


Nhanderuete ayvu  
iky'a e'ŷ va'e



New Testament in Guaraní, Mbyá

## **Nhanderuete ayvu iky'a e'ŷ va'e New Testament in Guaraní, Mbyá**

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

### **Copyright Information**

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

### **The New Testament**

in Guaraní, Mbyá

### **© 2004, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 23 Aug 2023 from source files dated 29 Jan 2022  
3309fa3b-7590-5ae9-b829-5df4ddfbf957

## Contents

Gênesis . . . . .	1
Êxodo . . . . .	75
Levítico . . . . .	136
Números . . . . .	178
Deuteronômio . . . . .	242
Josué . . . . .	295
Juízes . . . . .	330
Rute . . . . .	367
1 Samuel . . . . .	373
2 Samuel . . . . .	422
1 Reis . . . . .	463
2 Reis . . . . .	510
1 Crônicas . . . . .	557
2 Crônicas . . . . .	598
Esdras . . . . .	648
Neemias . . . . .	663
Ester . . . . .	684
Jó . . . . .	695
Salmos . . . . .	745
Provérbios . . . . .	877
Eclesiastes . . . . .	918
Cântico . . . . .	930
Isaías . . . . .	939
Jeremias . . . . .	1014
Lamentações . . . . .	1092
Ezequiel . . . . .	1104
Daniel . . . . .	1174
Oséias . . . . .	1197
Joel . . . . .	1209
Amós . . . . .	1214
Obadias . . . . .	1223
Jonas . . . . .	1225
Miquéias . . . . .	1229
Naum . . . . .	1236
Habacuque . . . . .	1239
Sofonias . . . . .	1243
Ageu . . . . .	1247
Zacarias . . . . .	1250
Malaquias . . . . .	1264
Mateus . . . . .	1269
Marcos . . . . .	1321
Lucas . . . . .	1354
João . . . . .	1409
Atos . . . . .	1453
Romanos . . . . .	1504
1 Coríntios . . . . .	1527
2 Coríntios . . . . .	1549
Gálatas . . . . .	1564

Efésios . . . . .	1572
Filipenses . . . . .	1580
Colossenses . . . . .	1586
1 Tessalonicenses . . . . .	1592
2 Tessalonicenses . . . . .	1597
1 Timóteo . . . . .	1600
2 Timóteo . . . . .	1607
Tito . . . . .	1612
Filemom . . . . .	1615
Hebreus . . . . .	1617
Tiago . . . . .	1634
1 Pedro . . . . .	1640
2 Pedro . . . . .	1647
1 João . . . . .	1651
2 João . . . . .	1657
3 João . . . . .	1658
Judas . . . . .	1659
Apocalipse . . . . .	1661

## Gênesis jypy'i kuaxia Moisés ombopara va'ekue Gênesis jypy'i kuaxia Moisés ombopara va'ekue

Tery Génesis ma “Mba'emo ypy” he'ia, “Jypy'i ma Nhanderuete ojapo raka'e yva ha'e yvy”, he'ia rami (1.1). Kova'e kuaxia para re ma omombe'u marã rami pa opa mba'e ijypy'iague: kuaray, jaxy, jaxy-tata, yvy, ye'ẽ, avakue, kunhague, mym̄ba, mba'emo rogue, tekوارã guive.

Ha'e nunga ha'e javi Nhanderuete ojapo jave ha'eve va'e meme raka'e. Ava ov'y'a oikovy yvotyty rupi oikoa py, gua'yxy reve. Ha'e gui ma ha'e kuery nonhe'ẽ rendui ramo Nhanderuete omoxẽ, ha'e omano aguã re ijayvu. Ha'e ramia py oiko ypy raka'e teko vai ha'e manoa. Ha'e rami rire nhande kuery jajejavu ha'e nhamano aguã rami meme nhandekuai.

Avakue hetave tema ha'e heko vaive oje'oivy. Ha'e ramo Nhanderuete yy ombou vy ojukapa raka'e. Noé anho Nhanderuete pe ete oiko ramo ogueraa jepe kanoã guaxu py, hoo pygua kuery reve.

Ha'e va'e rire Nhanderuete peteĩ regua oiporavo ha'e kuery pe ojekuaa uka aguã. Ha'e kuery ru ma Abraão raka'e, ha'e gui ta'y Isaque, ha'e gui Isaque ra'y Jacó ju oiporavo. Ha'e va'e kuery peteĩ-teĩ pe Nhanderuete ogueroayvu porã vy ijayvu yvy hekoague hamymino kuery pe ju ome'ẽ aguã re.

Jacó pe ma amboae heryrã ju ome'ẽ: ha'e va'e ma Israel. Jacó ma doze gua'y kuery oguereko. Ha'e kuery gui doze regua ikuai raka'e Israel kuery. Jacó ra'y kuery va'e regua peteĩ ma José. Ha'e va'e re tyke'y kuery nda'ija'ei vy ovende raka'e Egito yvy katy oguata va'e kuery pe. Ha'e gui ma karuai oiko ramo Jacó ra'y kuery ha'e javi oo Egito yvy re, tembi'u ojogua aguã. Ha'e py ma opyta raka'e.

Kova'e kuaxia para ha'e javi rupi Nhanderuete oexa uka nhanemboaxya. Adão ha'e Eva ojejavu rire teĩ Nhanderuete omboaxy vy omonhemonde. “Noé ma Senhor renonde oupity omboaxy”, he'i (6.8). Ha'e José voi guyke'y kuery pe aipoe'i: “Peẽ kuery ma anhetẽ xevy pejapo vaixe pekuapy karamboae. Ha'e rã Nhanderuete ma ha'e nunga oguerova nhomoingo porã aguã rami. Mba'eta heta ete rekove reraa jepearã xemoingo, aỹ pexa pekuapy rami”, he'i (50.20). Nhanderuete ma nhanemboaxyha'e nhandereraa jepea oiko.

### *Yva, yvy ha'e opa mba'e ikuai va'e omoingoague*

<sup>1</sup> Jypy'i ma Nhanderuete ojapo raka'e yva ha'e yvy.

<sup>2</sup> Yvy ma nda'itui porãi teri, neĩ mba'eve jipoi. Ijaxuru vaikue va'e áry ma pytû anho rei oiny. Ha'e gui Nhanderuete Nhe'ẽ oiko avi yy áry.

<sup>3</sup> Ha'e gui Nhanderuete aipoe'i:

— Toiko hexakãa – he'i. Ha'e ramo hexakãa oiko.\*

<sup>4</sup> Hexakãa Nhanderuete oexa rã ha'eve va'e. Ha'e vy omboja'o hexakãa ha'e pytûa.

<sup>5</sup> Hexakãa ma Nhanderuete oenoï “Ára”. Ha'e rã pytû reia pe ma “Pytû” he'i. Oiko ka'aru ha'e aje'ive. Ha'e va'e ára ma ijypyा.\*

<sup>6</sup> Ha'e gui Nhanderuete aipoe'i ju:

— Yy oĩ va'e mbyte rupi toĩ yva, yy omboja'o aguã mokoõ henda rupi – he'i.

<sup>7</sup> Ha'e rami vy Nhanderuete yva ojapo vy yy yvate oĩ va'e omboja'o iguy rupi oĩ va'e gui. Ha'e rã ha'e rami ojeapo.

<sup>8</sup> Ha'e va'e ma Nhanderuete oenoï “Yva”. Oiko ka'aru ha'e aje'ive. Ha'e va'e ma mokoõ araa.

\* <sup>1:3</sup> 2 Coríntios 4.6    \* <sup>1:5</sup> Ha'e kuery pe rã ára nhavõ ka'aru ranhe oiko, ha'e gui aje'ive.

<sup>9</sup> Ha'e gui Nhanderuete aipoe'i avi:

— Yy yva guýry oĩ va'e tono'õ peteĩ henda py, ha'e tojekuaa ipiru reia — he'i. Ha'e rã ha'e rami ojeapo.

<sup>10</sup> Ipiru reia ma Nhanderuete oenoĩ “Yvy”, ha'e rã yy ono'õ va'e pe ma “Ye'ẽ” he'i. Nhanderuete ha'e nunga oexa rã ha'eve va'e.

<sup>11</sup> Ha'e gui aipoe'i:

— Toiko nhuũ yvy gui. Toiko jai rogue ha'yĩ va'e ha'e yvyra hi'a va'e. Tai'a ha'yĩ va'e joo ramigua e'ŷ-e'ŷ yvy áry — he'i. Ha'e ramo ha'e rami oiko.

<sup>12</sup> Yvy gui oiko nhuũ, jai rogue ha'yĩ va'e joo ramigua e'ŷ-e'ŷ ha'e yvyra hi'a va'e. Ha'e va'e re oĩ joo rami e'ŷ-e'ŷ ha'yĩ va'e. Ha'e nunga Nhanderuete oexa rã ha'eve va'e.

<sup>13</sup> Oiko ka'aru ha'e aje'ive. Ha'e va'e ma mboapy araa.

<sup>14</sup> Ha'e gui Nhanderuete aipoe'i avi:

— Toĩ hendy va'e yva re, oikuua uka aguã ára ha'e pytû, ha'e va'e re oikuua aguã mba'emo oa'angaa, ára ha'e ma'etŷa.

<sup>15</sup> Yva re hendy va'e toĩ yvy moexakãarã — he'i. Ha'e ramo ha'e rami oiko.

<sup>16</sup> Nhanderuete ojapo mokoĩ hendy guaxu va'e: tuvixave va'e ma ara py ojekuaa va'erã, ha'e rã kyrïve va'e ma pyávy ojekuaa va'erã. Jaxy-tata avi ojapo.

<sup>17</sup> Ha'e vy yva re omoĩ yvy moexakãarã,

<sup>18</sup> ara py ha'e pyávy ojekuaa ha'e omboja'o aguã hexakã aguã ha'e pytû. Ha'e nunga Nhanderuete oexa rã ha'eve va'e.

<sup>19</sup> Oiko ka'aru ha'e aje'ive. Ha'e va'e ma irundy araa.

<sup>20</sup> Ha'e gui Nhanderuete aipoe'i avi:

— Toiko ke opa marãgua temimoingo yy rupi omyĩ va'e, ha'e rã yvy áry rupi ma toveve guyra yva rupi — he'i.

<sup>21</sup> Ha'e rami vy Nhanderuete omoingo yy rupigua tuvixakueve ha'e opa marãgua otyryry va'e. Ha'e nunga heta ikuai yy rupi, peteĩ-teĩ regua. Omoingo avi guyra peteĩ-teĩ regua. Ha'e nunga Nhanderuete oexa rã ha'eve va'e.

<sup>22</sup> Ha'e rami vy ogueroayvu porã vy aipoe'i:

— Pendera'y reta ke, pendereta ke. Ha'e rami vy pemonyẽ ye'ẽ, ha'e rã yvy re ma taeta guyra — he'i.

<sup>23</sup> Oiko ka'aru ha'e aje'ive. Ha'e va'e ma peteĩ nhiruĩ araa.

<sup>24</sup> Ha'e gui Nhanderuete aipoe'i avi:

— Toiko ke yvy re opa marãgua temimoingo joo ramigua e'ŷ-e'ŷ. Toiko mymba oka re ikuai va'erã, otyryry va'e ha'e ka'aguy regua joo ramigua e'ŷ-e'ŷ — he'i. Ha'e ramo ha'e rami oiko.

<sup>25</sup> Nhanderuete omoingo vixo ka'aguy regua joo ramigua e'ŷ-e'ŷ, mymba oka regua joo ramigua e'ŷ-e'ŷ, ha'e yvy rupi otyryry va'e ha'e javi joo ramigua e'ŷ-e'ŷ. Ha'e nunga Nhanderuete oexa rã ha'eve va'e.

<sup>26</sup> Ha'e gui Nhanderuete aipoe'i avi:

— Nhamoingo ava va'e nhande ete ramigua, nhande rami ete oiko va'erã. Topena pira ye'ẽ rupigua re, guyra oveve va'e re, mymba oka regua re, yvy ha'e javi re ha'e yvy rupi otyryry va'e ha'e javi re — he'i.

<sup>27</sup> Ha'e rami vy Nhanderuete omoingo ava ojee ramigua. Nhanderuete rami oiko va'erã ae omoingo. Ava ha'e kunha va'e omoingo.\*

<sup>28</sup> Ha'e vy Nhanderuete ogueroayvu porã. Ha'e vy aipoe'i:

— Pendera'y reta ke, pendereta ke, pemonyẽ yvy, ha'e pendepo'aka yvy re. Pepena ke pira ye'ẽ rupi ikuai va'e re, guyra oveve va'e ha'e yvy áry otyryry va'e ha'e javi re — he'i.

<sup>29</sup> Aipoe'ive ju:

\* <sup>1:27</sup> Mateus 19.4, Marcos 10.6

— Ma'ẽ, pẽvy ame'ẽ jai rogue ha'yĩ va'e yvy re ikuai va'e ha'e yvyra'a ha'yĩ va'e ha'e javi. Ha'e nunga ma pe'u va'erã oiko.

**30** Ha'e rã yvy re vixo ikuai va'e pe, guyra oveve va'e, yvy rupi otyryry va'e ha'e ipytue va'e ha'e javi pe ma jai rogue pyau 'rã ikuai ho'u va'erã — he'i. Ha'e ramo ha'e rami ae oiko.

**31** Nhanderuete opa mba'e omoingo va'ekue oexa rã ha'eve ete va'e. Oiko ka'aru ha'e aje'ive. Ha'e va'e ma mboapy meme araa.

## 2

**1** Ha'e rami py ojapopa yva ha'e yvy ha'e opa mba'e ikuai va'e.

**2** Ha'e gui ma Nhanderuete ojapopa ma vy sete-a ára py optyu'u opa mba'e ojapoa gui.\*

**3** Sete-a ára Nhanderuete ogueroayvu porã iky'a e'ŷ va'e optyta aguã rami, ha'e va'e ára opa mba'e ojapoa gui optyu'u vy.

### Ava ojapo ypy'iague

**4** Po rami ma yva ha'e yvy oiko ypy'i jave guare, SENHOR Nhanderuete omoingo rã.

**5** Ha'e va'e jave ma mba'eve onhotŷ mbyre jipoi teri yvy re, ha'e peteïve hogue va'e yvy re ikuai va'e naenhoï teri, mba'eta yvy áry SENHOR Nhanderuete nombo'okyi teri, ha'e ndoikoi teri avakue yvy re oma'etŷ va'erã.

**6** Yvy gui yvyxí rive opu'ã ovvy vy omoaky yvy jave re.

**7** Ha'e ramo SENHOR Nhanderuete ojapo ava yvy ku'i gui, ha'e inhapyigua py oipeju ipytue reve oiko aguã. Ha'e ramo ava hekove va'e oiko.\*

**8** Ha'e gui Éden yvy re SENHOR Nhanderuete onhotŷ peteï yvyra ty, kuaray oua katy. Ha'e py ae omoi ava omoingo va'ekue.

**9** Yvy gui SENHOR Nhanderuete omoenhoï opa marâguia yvyra jaexa rã iporã va'e ha'e hi'a ja'u aguã ha'eve va'e. Yvyra ty mbyte py omoi avi yvyra tekove me'ëa, ha'e yvyra mba'emo porã ha'e mba'emo vai kuaa ukaarã avi omoi.

**10** Éden yvy gui ma peteï yakã oẽ yvyra ty moakyarã. Ha'e va'e gui oja'o vy irundy henda rupi oxyry.

**11** Yakã jypygua ma Pisom hery va'e. Ha'e va'e ma Havilá yvy ouro oĩ rupi ojere-jere ovvy va'e.

**12** Ha'e va'e yvy re ouro oĩ va'e ma iporã. Ita bdélio ha'e ônix voi oiko ha'e py.\*

**13** Yakã mokoïa ma Giom hery va'e. Ha'e va'e ma Cuxé yvy ha'e javi rupi ojere-jere ovvy va'e.

**14** Yakã mboapya ma Tigre hery va'e. Ha'e va'e ma Assíria yvy rovai rupi oxyry ovvy kuaray oua katy rupi. Ha'e gui irundaya ma Eufrates hery va'e.

**15** Ha'e gui SENHOR Nhanderuete ava va'e ogueraa vy Éden regua yvyra ty omoi omoatyrõ ha'e opena aguã.

**16** Ha'e rami vy ixupe SENHOR Nhanderuete aipoe'i:

— Yvyra ty py yvyra hi'aĩ va'e ha'e javi'a ha'eve 'rã re'u aguã.

**17** Ha'e rã yvyra mba'emo porã ha'e mba'emo vai kuaa 'a ma re'u va'erã e'ŷ, mba'eta ha'e va'e re'ua ára anhetẽ remano 'rã.

### Kunha omoingoague

**18** Ha'e gui SENHOR Nhanderuete aipoe'ive ju:

— Nda'evei ava va'e ha'e ae'i oiko aguã. Amoingo 'rã ipytyvôarã, hexeve guarã ae — he'i.

**19** Ha'e rami vy SENHOR Nhanderuete ma mymba yvy regua ha'e guyra yvate rupi oveve va'e omoingo va'ekue ha'e javi oguerupa ava va'e oĩ py, marã rami pa omboerya oikuaa aguã. Temimoingo ikuai va'e peteï-tei ava va'e omboeryague rami ae hery.

\* **2:2** Hebreus 4.4 \* **2:7** 1 Coríntios 15.45 \* **2:12** Bdélio ma mba'emo iju porã va'e, ha'e rã ônix ma ita pytã'i va'e. Ovare va'e meme.

<sup>20</sup> Ha'e rami py ava omboery mymba kuery ha'e javi, guyra oveve va'e ha'e vixo ka'aguy regua voi. Ha'e rami teĩ ava pe jipoi hexeveguia ae ipytyvðarã.

<sup>21</sup> Ha'e ramo SENHOR Nhanderuete ojapo ava va'e hopeyi vaipa aguã rami. Ha'e ramo oke ete. Ha'e ramo ixugui peteĩ inharukã SENHOR omboi vy ho'o py ju omboiyague.

<sup>22</sup> Ava arukã SENHOR Nhanderuete omboi va'ekue gui omboete peteĩ kunha. Ha'e vy ogueru ava pe.

<sup>23</sup> Ha'e ramo ava va'e oexa vy aipoe'i:

— Kova'e ma xekägue gui ae ikägue va'e, ha'e xero'o gui ho'o va'e. Kova'e pe "Kunha" 'ea 'rã, ava va'e gui omboia rire – he'i.<sup>†</sup>

<sup>24</sup> Ha'e rami rire avakue oeja 'rã nguu ha'e oxy, gua'yxy reve joguereko aguã, mokoĩ gui peteĩ'i to'o oiko aguã.\*

<sup>25</sup> Ha'e rami jave ma ava va'e ha'e ta'yxy ipire rei va'eri noxí raka'e.

### 3

#### *Ava ha'e kunha ojejavyague*

<sup>1</sup> Ha'e gui mboi avi oiko raka'e. Ha'e va'e ma vixo ka'aguy rupigua SENHOR Nhanderuete omoingo va'ekue ha'e javi gui nhombotavy kuaave va'e. Ha'e rami vy aipoe'i kunha va'e pe:

— Po rami teve Nhanderuete aipoe'i ra'e: "Pe'u eme ha'e javive yvyra ty py ikuai va'e'a" he'i va'ekue?

<sup>2</sup> Kunha va'e ombovai:

— Yvyra ty py ikuai va'e'a ma ha'eve ro'u aguã.

<sup>3</sup> Ha'e rã yvyra ty mbyte py peteĩ yvyra hi'aĩ va'e'a pe ma Nhanderuete "Pe'u eme, neĩ pepoko eme, pemano e'ý aguã", he'i va'ekue orevy.

<sup>4</sup> Ha'e gui mboi aipoe'i kunha va'e pe:

— Anhetẽ napemanoi 'rã,

<sup>5</sup> mba'eta Nhanderuete oikuua ha'e va'e'a pe'ua ára penderexa ojepe'a 'rãa, ha'e Nhanderuete rami ete 'rã peikuaa mba'emo porã ha'e mba'emo vai – he'i.

<sup>6</sup> Kunha va'e oikuua rã yvyra'a ho'u aguã ha'eve. Yvyra'a oexa rã iporã, ha'e oikuua avi imo'aranduarã oikoa. Ha'e rami vy hi'a omondo vy ho'u. Ome pe avi ome'ẽ rã ha'e voi ho'u.

<sup>7</sup> Ha'e ramo mokoïve rex a ojepe'a rã oikuua ipire reia. Ha'e rami vy figo'y rogue ojou vy ombovyvy guambeorã.

<sup>8</sup> Ha'e gui ka'aru jave yvyra ty rupi SENHOR Nhanderuete oiko rã ava va'e ha'e ta'yxy oendu. Ha'e rami vy SENHOR renonde gui onhemi yvyra ty mbyte.

<sup>9</sup> Ha'e gui SENHOR oenoĩ ava va'e. Ha'e vy oporandu:

— Mamo tu reĩ?

<sup>10</sup> Ombovai:

— Aendu ndeayvu yvyra ty py reiko rã. Ha'e rami vy ndevy akyje vy anhemi, mba'eta xepire rei – he'i.

<sup>11</sup> Nhanderuete oporandu:

— Mava'e tu oikuua uka ndepire reia? Re'u teve yvyra'a "He'u eme ke" ha'eague?

<sup>12</sup> Ava va'e ombovai:

— Kunha xera'yxyrã reme'ẽ va'ekue rima yvyra'a ome'ẽ xevy. Ha'e ramo mae ma xee ha'u – he'i.

<sup>13</sup> Ha'e gui kunha va'e pe ju SENHOR aipoe'i:

— Mba'e re tu ha'e rami rejapo?

Kunha va'e ombovai:

<sup>†</sup> **2:23** Ha'e kuery ayvu py tery "Kunha" ma "Ava guigua" nhaendu rã joo ramigua rai'i. \* **2:24** Mateus 19.5, Marcos 10.7, 1 Coríntios 6.16, Efésios 5.31

— Mboi xembotavy ramo rima xee ha'u – he'i.

<sup>14</sup> Ha'e gui SENHOR Nhanderuete aipoe'i mboi pe:

— Guĩ rami rejapo rire mymba oka regua ikuai va'e ha'e vixo ka'aguy regua ha'e javive gui ayvu vai pyve 'rã reiko. Ha'e rami vy retyryry 'rã reikovy nderye re, ha'e reikovea pukukue re yvy ku'i rive 'rã rere.

<sup>15</sup> Ajapo 'rã ndee ha'e kunha va'e reve joe napenda'e'i aguã rami, ha'e gui neramymino kuery ha'e hemiarirõ kuery reve ju. Ha'e va'e omou'ũ 'rã neakã, ha'e rã ndee ma reixu'u 'rã ipyta py – he'i.

<sup>16</sup> Kunha va'e pe ju aipoe'i:

— Xee ajapo 'rã nememby ryru'i vy rejexavai ete aguã rami. Ha'e ramo haxy 'rã rendu nememby reikuavã'i vy. Renhomoirûxe 'rã neme reve. Ha'e rã ha'e ma ipo'aka 'rã ndere – he'i.

<sup>17</sup> Ha'e gui Adão pe aipoe'i:

— Ndee ma ndera'yxy renhe'ẽ rendu vy yvyra'a "He'u eme" ha'eague va'e re'u rire ndekáuxa ae 'rã yvy ayvu vaipy itui. Remba'eapo poyi vy 'rãe rejou yvy gui re'u va'erã, reikovea pukukue re.

<sup>18</sup> Yvy gui henhoï 'rã juu'y ha'e juu vaikue. Nerembi'urã oiko 'rã yvy gui ae.

<sup>19</sup> Ndery'aiague re 'rã re'u reikovy mbojape, yvy ju rejeapo peve, yvy gui ae rojapo rire. Mba'eta yvy ku'i regua reiko vy yvy ku'i ju 'rã rejeapo – he'i.

<sup>20</sup> Ava va'e gua'yxy omboery Eva, oikove va'e ha'e javive xy oiko ramo.\*

<sup>21</sup> Adão ha'e ta'yxy aorã ma SENHOR ojapo mymba pire gui. Ha'e rami vy omonhemonde.

<sup>22</sup> Ha'e gui SENHOR Nhanderuete aipoe'i:

— Aÿ gui ma nhande rami avakue ikuai, mba'eta oikuua mba'emo porã ha'e mba'emo vai. Ha'e gui nda'evei yvyra tekove me'ëa 'a voi ha'e kuery omondo aguã, mba'eta ho'u vy oiko riae 'rã – he'i.

<sup>23</sup> Ha'e rami vy SENHOR omoxẽ Éden regua yvyra ty gui, yvy gui omoingo rire yvy re ae ju oma'etý oikovy aguã.

<sup>24</sup> Ava omoxẽ ma vy anjo kuery ipepo va'e omoï imbokuapy yvyra ty regua kuaray oua katy. Oeja avi peteï kyxe guaxu hendy va'e ojere-jere va'erã, yvyra tekove me'ëa hi'aia katy tape oo va'e jokoarã.

## 4

### *Abel ha'e Caim rekokue oña*

<sup>1</sup> Ha'e gui ava va'e joguroke gua'yxy Eva reve. Ha'e ramo oguereko kyrí va'e, oikuavã Caim. Ha'e vy aipoe'i:

— SENHOR xepytyvõ ramo ava'i aikuavã – he'i.

<sup>2</sup> Ha'e rire teïgue ju oikuavã tyvy Abel. Abel ma vexa'i re openaa rupi oiko. Ha'e rã Caim ma oma'etý va'e.

<sup>3</sup> Peteï ára Caim ogueru mba'emo onhotý va'ekue'a SENHOR pe ome'ẽ va'erã.

<sup>4</sup> Ha'e rã Abel ma guymba kuery regua jypy'i oiko va'ekue ogueru, ikyrave va'e anho. Ha'e ramo SENHOR ojou porã Abel ha'e mba'emo ome'ẽ va'e.

<sup>5</sup> Ha'e rã Caim ome'ẽ va'e ma SENHOR ndojou porãi. Ha'e ramo Caim ivai vaipa vy hova mboaepa.

<sup>6</sup> Ha'e ramo ixupe SENHOR aipoe'i:

— Mba'e re tu ndevai? Mba'e re tu nderova mboae rei ri?

<sup>7</sup> Ha'evea rami reiko ramo anhetë e'ŷ 'rã ri ty'y roguerovy'a? Ha'e rami teï ha'eve'ŷa rami reiko ramo rejejav y aguã nerarõ okë py. Opa marã ndererekoxe ramo hexe ndepo'aka 'rãgue.

\* <sup>3:20</sup> Tery Eva ma "Hekove va'e" 'ea. Ha'e rã tery Adão ma "Ava" 'ea.

### *Jojuka ypy'iague*

<sup>8</sup> Ha'e gui Caim aipoe'i guyvy Abel pe:  
— Jaa na mba'ety py — he'i. Ha'e gui mba'ety rupi ikuai jave guyvy Abel re Caim opu'ã vy ojuka.

<sup>9</sup> Ha'e ramo SENHOR aipoe'i Caim pe:

— Mamo tu nderyvy Abel oĩ?

Caim ombovai:

— Xee ndaikuuaai. Xee ri ty'y xeryvy re opena va'e aiko? — he'i.

<sup>10</sup> Ha'e ramo Nhanderuete aipoe'i:

— Mba'e tu rejapo? Nderyvy ruguy xevy ojapukai yvy gui.

<sup>11</sup> Ha'e rami rire aŷ ayvu vaipy 'rã reiko yvy re, mba'eta nderyvy ruguy ndepo py remoẽ va'ekue yvy ojuru oipe'a vy omokõ rire.

<sup>12</sup> Ha'e nunga rupi yvy re rema'etŷ teĩ ixugui iporã va'e ndoikoi 'rã ndevy. Rejava-java ha'e reguata rei 'rã yvy re — he'i.

<sup>13</sup> Ha'e ramo Caim aipoe'i SENHOR pe:

— Ha'e rami ete xembopaga ramo ndaropo'aka reguai.

<sup>14</sup> Mba'eta aŷ xemoxõ ta xeyvy gui. Ha'e ramo ajep'e'a 'rã nerondené gui anhemí aguã. Ajava, aguata rei tema 'rã aikovy yvy re. Ha'e xererovaexõ va'e rei tema 'rã xejuka.

<sup>15</sup> SENHOR ombovai:

— Ha'e rami avi Caim, ndejukaare ma sete-kue 'rã opaga — he'i. Ha'e rami vy Caim re SENHOR omoĩ ikuua ukaarã, ojou va'e kuery ojuka e'ŷ aguã.

<sup>16</sup> Ha'e ramo SENHOR renonde gui Caim ojepe'a vy Node yvy re ju oiko, Éden regua kuaray oua katy.

### *Caim ramymino kuery rery oĩa*

<sup>17</sup> Ha'e gui Caim gua'yxy reve jogueroke ramo oguereko kyrõ va'e, ha'e vy oikuavã'i Enoque. Ha'e gui Caim peteĩ tetã ojapo vy gua'y Enoque rery rupi omboery.

<sup>18</sup> Enoque ra'y ma Irade oiko. Irade ra'y ma Meujael, Meujael ra'y ma Metusael, Metusael ra'y ma Lameque.

<sup>19</sup> Lameque ma mokoĩ kunha ojou gua'yxyrã: peteĩ ma Ada hery va'e, ha'e rã amboae ma Zilá.

<sup>20</sup> Ada oikuavã'i Jabal. Ha'e va'e ramymino kuery ma oo'i rupi ikuai ha'e mymba re opena va'e kuery ae.

<sup>21</sup> Tyvy rery ma Jubal. Ha'e va'e ramymino kuery ma mba'epu ixã reta va'e mbopua ha'e mimby monhe'ëa kuery ae.

<sup>22</sup> Ha'e gui Zilá ju oikuavã'i Tubalcaim. Ha'e va'e ma opa marâguia tembiporu haïmbe va'e apoa oiko, overa va'e ha'e ferro guigua. Tubalcaim reindy ma Naamá.

<sup>23</sup> Ha'e gui Lameque aipoe'i gua'yxy kuery pe:

— Ada ha'e Zilá, pendu ke xeayvu rã. Peẽ Lameque ra'yxy kuery, pejapyxaka ke xeayvua re. Xee ma ajuka peteĩ ava xere ojeai rire, ha'e peteĩ kunumi va'e ajuka avi xere opyrõ ramo rive.

<sup>24</sup> Caim ojukaa vy sete-kue 'rã opaga. Ha'e rã xee Lameque ma amongue xejukaa vy setenta vezes sete-kue 'rã opaga — he'i.

<sup>25</sup> Ha'e gui peteĩgue ju Adão gua'yxy reve jogueroke ramo peteĩ ava'i ju oikuavã. Ha'e va'e ma omboery Sete, mba'eta aipoe'i:

— Nhanderuete amboae ava'i ju ome'ë xevy, xepi'a Abel tyke'y Caim ojuka va'ekue rekovia — he'i. \*

<sup>26</sup> Ha'e gui peteĩ oiko avi Sete ra'y. Ha'e va'e ma omboery Enos. Ha'e va'e guive ma SENHOR rery rupi ha'e kuery ojapukai ypy raka'e.

\* <sup>4:25</sup> Tery Sete ma “Ome'ë mbyre” 'ea reve nhaendu rã joo ramigua.

## 5

*1 Crônicas 1.1-4*

<sup>1</sup> Kova'e kuaxia ma Adão ramymino kuery rekokue oña. Nhanderuete avakue omoingo vy ojee rami ae ojapo.

<sup>2</sup> Ha'e rami vy omoingo ava va'e, ha'e gui kunha ju. Ogueroayvu porã, ha'e mokoïve pe "Avakue" he'i, omoingoa ára guive.\*

<sup>3</sup> Adão ma cento e trinta ma'etŷ re oiko. Ha'e gui ta'y oiko nguu ramigua ete, nguu rami ete ojekuaa. Ha'e va'e ma omboery Sete.

<sup>4</sup> Sete oiko rire tuu Adão ma oitocentos ma'etŷ re ju oiko. Ha'e gui oikove ju ta'y ha'e tajy kuery.

<sup>5</sup> Adão ha'e javi vy novecentos e trinta ma'etŷ re oiko. Ha'e rire omano.

<sup>6</sup> Ha'e gui ta'y Sete ma cento e cinco ma'etŷ re oikoa py oiko ta'y Enos.

<sup>7</sup> Enos oiko rire tuu Sete ma oitocentos e sete ma'etŷ re ju oiko. Oikove ju ta'y ha'e tajy kuery.

<sup>8</sup> Sete ha'e javi vy novecentos e doze ma'etŷ oiko. Ha'e rire omano.

<sup>9</sup> Enos ma noventa ma'etŷ re oikoa py oiko ta'y Cainã.

<sup>10</sup> Cainã oiko rire tuu Enos ma oitocentos e quinze ma'etŷ re ju oiko. Oikove ju ta'y ha'e tajy kuery.

<sup>11</sup> Enos ha'e javi vy novecentos e cinco ma'etŷ re oiko. Ha'e rire omano.

<sup>12</sup> Cainã ma setenta ma'etŷ re oikoa py oiko ta'y Maalalel.

<sup>13</sup> Maalalel oiko rire ma tuu Cainã ma oitocentos e quarenta ma'etŷ re ju oiko. Oikove ju ta'y ha'e tajy kuery.

<sup>14</sup> Cainã ha'e javi vy novecentos ma'etŷ re oiko. Ha'e rire omano.

<sup>15</sup> Maalalel ma sessenta e cinco ma'etŷ re oikoa py oiko ta'y Jerede.

<sup>16</sup> Jerede oiko rire tuu Maalalel ma oitocentos e trinta ma'etŷ re ju oiko. Oikove ta'y ha'e tajy kuery.

<sup>17</sup> Maalalel ha'e javi vy oitocentos e noventa e cinco ma'etŷ re oiko. Ha'e rire omano.

<sup>18</sup> Jerede ma cento e sessenta e dois ma'etŷ re oikoa py oiko ta'y Enoque.

<sup>19</sup> Enoque oiko rire tuu Jerede ma oitocentos ma'etŷ re ju oiko. Oikove ta'y ha'e tajy kuery.

<sup>20</sup> Jerede ha'e javi vy novecentos e sessenta e dois ma'etŷ re oiko. Ha'e rire omano.

<sup>21</sup> Enoque ma sessenta e cinco ma'etŷ re oikoa py oiko ta'y Metusalém.

<sup>22</sup> Enoque ma Nhanderuete reve oiko. Ta'y Metusalém oiko rire tuu trezentos ma'etŷ re oiko. Oikove ju ta'y ha'e tajy kuery.

<sup>23</sup> Enoque ha'e javi vy trezentos e sessenta e cinco ma'etŷ oiko.

<sup>24</sup> Enoque ma Nhanderuete reve oiko ramo ndoexaavei, Nhanderuete ojeupe ae ogueraa ramo.

<sup>25</sup> Metusalém ma cento e oitenta e sete ma'etŷ re oikoa py oiko ta'y Lameque.

<sup>26</sup> Lameque oiko rire tuu Metusalém ma setecentos e oitenta e dois ma'etŷ re ju oiko. Oikove ju ta'y ha'e tajy kuery.

<sup>27</sup> Metusalém ha'e javi vy novecentos e sessenta e nove ma'etŷ re oiko. Ha'e rire omano.

<sup>28</sup> Lameque ma cento e oitenta e dois ma'etŷ re oikoa py oiko peteñ ta'y.

<sup>29</sup> Ha'e va'e ma Noé omboery vy aipoe'i:

— Kova'e ma nhanemombytu'u'rã ko yvy Nhanderuete ijayvu vaiague re nhandekuai vy nhandepo py nhamba'eapo poyia gui — he'i.

<sup>30</sup> Noé oiko rire tuu Lameque ma quinhentos e noventa e cinco ma'etŷ re ju oiko. Oikove ju ta'y ha'e tajy kuery.

<sup>31</sup> Lameque ha'e javi vy setecentos e setenta e sete ma'etŷ re oiko. Ha'e rire omano.

<sup>32</sup> Noé ma quinhentos ma'etŷ re oiko rire mboapy oiko ta'y kuery: Sem, Cam ha'e Jafé.

\* <sup>5:2</sup> Mateus 19.4, Marcos 10.6

## 6

*Avakue opa marã rei ikuaiague*

- <sup>1</sup> Hetave ovv avakue yvy re, ha'e tajy kuery ikuai.
- <sup>2</sup> Nhanderuete ra'y kuery ava rajy kuery oexa rã iporãgue. Ha'e ramo gua'yxyrã ojopy oipota va'e rei.
- <sup>3</sup> Ha'e ramo SENHOR aipoe'i:  
— Xenhe'ẽ noĩ riae'i 'rã avakue re, to'o rive ikuai rã. Ha'e rami vy ha'e kuery ma cento e vinte ma'etõ peve'i 'rã ikuai — he'i.
- <sup>4</sup> Ha'e jave ma ikuai gigante yvy re. Ha'e Nhanderuete ra'y kuery avakue rajy kuery re omenda rire ta'y kuery ojerovia rei va'e ikuai. Ha'e va'e avakue ma ipy'a guaxukue ha'e omboetepy meme raka'e.
- <sup>5</sup> SENHOR oexa rã avakue yvy re ikuai va'e heko vaive tema oje'oivy. Ha'e kuery py'a re oĩ opa marã ikuai aguã anho.
- <sup>6</sup> Ha'e ramo SENHOR ndoguerovy'avei avakue yvy re omoingoague. Opy'a re oendu nda'eveia.
- <sup>7</sup> Ha'e rami vy aipoe'i:  
— Avakue amoingo va'ekue amokanhymba 'rã yvy gui. Avakue, vixo, yvy rupi otyryry va'e ha'e guyra oveve va'e ha'e javi 'rã amomba. Ndarovy'avei amoingoague — he'i.
- <sup>8</sup> Ha'e rã Noé ma SENHOR renonde oupity omboaxya.
- <sup>9</sup> Po rami ma Noé rekoke: Noé ma ava heko porã va'e, ha'e javegua kuery mbyte anhetõ rupi anho oiko Nhanderuete reve.
- <sup>10</sup> Ta'y kuery ma mboapy oiko raka'e: Sem, Cam ha'e Jafé.

*Yy ovu aguã Nhanderuete omombe'u ma voiague*

- <sup>11</sup> Nhanderuete renonde yvy regua kuery opa marã rei ikuai joupe ojapo vaia rupi anho.
- <sup>12</sup> Yvy Nhanderuete oexa rã yvy regua kuery opa marã rei ikuai. Peteĩ-teĩ reko ivaipa ma yvy re.
- <sup>13</sup> Ha'e ramo Nhanderuete aipoe'i Noé pe:  
— Xee anhembopy'a yvy regua kuery ha'e javi amomba aguã, avakue heko vai va'e anho ikuai ramo yvy re. Amokanhymba 'rã, yvy reve.
- <sup>14</sup> Ha'e ramo ejapo peteĩ kanoã guaxu yvyrapé cipreste guigua va'e gui. Ha'e va'e py rejapo 'rã opy ja'o-ja'o'i. Ipa'ũ-pa'ũ rembotypa 'rã opy katy ha'e oka katy, oja va'e reikyty vy.
- <sup>15</sup> Po rami 'rã rejapo: cento e cinqüenta metros remoĩ 'rã ipuku-a, ha'e rã ipya ma vinte e cinco metros, ha'e yvatea ma quinze.
- <sup>16</sup> Jovaive rupi rembokua 'rã meio metro yvatea rami. Kanoã rokẽrã ma ijyke re 'rã rejapo. Pyrõarã ma renhono 'rã mboapy: peteĩ iguy rupi, peteĩ hi'áry, ha'e rã amboae ma yvateve rupi.
- <sup>17</sup> Mba'eta ambou 'rã yy yvy ha'e javi ao'iarã, amomba aguã opa mba'e ipytuẽ va'e yva guýry ikuai va'e. Yvy re ikuai va'e ha'e javi 'rã okanhymba.
- <sup>18</sup> Ha'e rã ndereve ma ajapo 'rã xereve guarã. Ha'e rami rã peikepa 'rã kanoã py, ndee, ndera'y kuery, ndera'yxy ha'e ndera'y ra'yxy kuery reve.
- <sup>19</sup> Kanoã py remoinge avi 'rã mymba temimoingo kuery ikuai va'e. Peteĩ-teĩ regua gui mokoĩ 'rã remoinge, ava ha'e kunha okuave reve rerekro aguã ndereve.
- <sup>20</sup> Guyra kuery, vaka, yvy rupi otyryry va'e, ha'e nunga ha'e javi peteĩ-teĩ regua gui mokoĩ 'rã reru ndea py, okuave reve rerekro aguã.
- <sup>21</sup> Ndea py emoi porã avi ke opa marãguia tembi'u. Emboaty ndea py ndee re'u va'erã, ha'e kuery pe voi — he'i.
- <sup>22</sup> Ha'e rami Noé ojapo. Nhanderuete ojapo uka va'ekue ojapopa.

## 7

*Ngoo pygua kuery reve Noé kanoã py oikeague*

<sup>1</sup> Ha'e gui SENHOR aipoe'i Noé pe:

— Eike ke kanoã py, ndee ha'e ndero pygua kuery ha'e javive, mba'eta aikuaa xerenonde heko porã va'e reikoa aÿgua kuery mbyte.

<sup>2</sup> Ha'e javi regua mymba pe'u aguã ha'eve va'e ma sete irũ va'e 'rã reraa ava ha'e kunha. Ha'e rã mymba ha'eve'ÿ va'e ma peteñ'i irũ va'e eraa ava ha'e kunha.\*

<sup>3</sup> Guyra oveve va'e voi sete irũ va'e 'rã reraa ava ha'e kunha, peteñ-teñ regua okuave aguã yvy re.

<sup>4</sup> Mba'eta sete araa py ambo'oky 'rã yvy re, quarenta ára ha'e quarenta pytû peve. Yvy gui amokanhymba 'rã amoingo va'ekue ha'e javi — he'i.

<sup>5</sup> Ha'e ramo Noé ojapo SENHOR ojapo uka va'ekue ha'e javi.

<sup>6</sup> Noé ma seiscentos ma'etÿ oguereko, yy ovu vy yvy ojao'i jave.

<sup>7</sup> Oky ramo yy ovu va'e gui Noé oike raka'e kanoã py. Hexeve oike avi ta'y kuery, ta'yxy ha'e ta'y ra'yxy kuery.

<sup>8</sup> Oike avi mymba ha'eve va'e ha'e ha'eve'ÿ va'e, guyra ha'e yvy rupi otyryry va'e ha'e javi.

<sup>9</sup> Ha'e kuery ma Noé-a py oikepa kanoã py. Mokô-mokoñ oike ava ha'e kunha, Noé pe Nhanderuete ojapo ukaague rami.

<sup>10</sup> Ha'e gui sete ára rire yy ovu ouvy yvy áry.

<sup>11</sup> Seiscentos ma'etÿ Noé oguereko jave, mokoñ jaxyha ha'e dezessete araa py ma yy yvy guy gui ovu vy omendoropa ygua ha'e javi, ombokua ja'ea, ha'e yva voi ojepe'apa.

<sup>12</sup> Ha'e rami vy oky vaipa yvy re quarenta ára ha'e quarenta pytû re.

<sup>13</sup> Ha'e va'e árave Noé oike raka'e kanoã py. Oike avi ta'y kuery Sem, Cam ha'e Jafé, ta'yxy ha'e ta'y ra'yxy kuery reve.

<sup>14</sup> Ha'e kuery ha'e mymba peteñ-teñ regua, vaka, yvy rupi otyryry va'e, guyra, guyra'i ha'e ipopo va'e ha'e javi,

<sup>15</sup> ho'o va'e ipytuë va'e ha'e javi gui mokô-mokoñ oike Noé reve kanoã py.

<sup>16</sup> Temimoingo ha'e javi regua gui oike ava ha'e kunha, Nhanderuete Noé pe ojapo ukaague rami. Ha'e rã ha'e oike rire ma SENHOR omboty okë.

*Yy ovu jave guare*

<sup>17</sup> Yvy áry ma quarenta ára re yy ou. Ovuve ovvy vy oguerovu heravy kanoã yvy áry gui.

<sup>18</sup> Yy ouve vy typyve ovvy yvy áry. Ha'e rã kanoã ma ovu oupy yy áry.

<sup>19</sup> Yvy áry yy ou vy ojao'ipa. Yvyty yvatekueve va'e yva guýry ikuai va'e ha'e javi ojao'i.

<sup>20</sup> Yvyty ikuai va'e yy ojao'i vy sete metros raxa peve typy hi'áry.

<sup>21</sup> Temimoingo yvy re ikuai va'e omanomba: guyra, mymba oka regua ha'e ka'aguy regua, yvy re omyí va'e ha'e avakue ha'e javi.

<sup>22</sup> Opa marâguia ipytuë va'e, yvy pirua rupi ikuai va'ekue omanomba.

<sup>23</sup> Ha'e rami py temimoingo kuery yvy re ikuai va'ekue opa, avakue, mymba, otyryry va'e, guyra oveve va'e, ha'e javive okanhymba yvy gui. Noé anho oikove, ha'e hexeve kanoã py ikuai va'e guive.

<sup>24</sup> Cento e cinqüenta ára re yy itui yvy áry.

## 8

*Yy ovu va'ekue typave ovvyague*

<sup>1</sup> Ha'e gui ma Nhanderuete ima'endu'a Noé re, ha'e kanoã py mymba ka'aguy regua ha'e oka regua hexeve ikuai va'e ha'e javi re. Ha'e rami vy Nhanderuete ojapo yvy áry rupi yvytu oipeju aguã rami. Ha'e ramo yy typa ovvy.

\* <sup>7:2</sup> Ha'e kuery ma amongue mymba pe "Ha'eve'ÿ va'e" he'i 'rã, ha'e rã amboae pe ma "Iky'a e'ÿ va'e" he'i 'rã. Ha'e nunga Levítico 11 py omombe'u porâve.

<sup>2</sup> Onhembotypa ju ygua yvy guy gui yy omondoro va'ekue, ha'e yva voi ndojepe'avei ramo oky vaipa va'ekue optyu'u.

<sup>3</sup> Yy ma oxyry ovy yvy áry gui. Typave ovy cento e cinqüenta araa peve.

<sup>4</sup> Ha'e gui sete jaxyha ha'e dezessete araa py ma kanoã optya Ararate yvyty áry.

<sup>5</sup> Ha'e va'e rire dez jaxyha peve ju yy typave ovy. Ha'e va'e jaxy jypy'ia ára ojekuaa ypy yvyty aptye.

### Noé xapirē ha'e apykaxu opoiague

<sup>6</sup> Ha'e gui quarenta araa py ma Noé oipe'a okẽ'i kanoã re ojapo va'ekue.

<sup>7</sup> Ha'e rami vy opoi peteĩ xapirē. Ha'e va'e oẽ vy oo ha'e ojevy jepi, yvy áry gui yy ipiru peve.

<sup>8</sup> Ha'e rire peteĩ apykaxu ju opoi, yvy áry gui pa yy typa maa oikuaaxe vy.

<sup>9</sup> Va'eri apykaxu oguapy aguã ndojoui vy ojevy ju ha'e oña py kanoã py, yvy yy ojao'i teri ramo. Ha'e ramo Noé okuave'ẽ rã oguapy ramo omoinge ju kanoã py.

<sup>10</sup> Sete ára ju oarõ rire opoi ju apykaxu kanoã gui.

<sup>11</sup> Ha'e rire ka'aru jave ojevy ju ha'e oña py. Ojuru py ogueru oliveira rogue ipyau va'e. Ha'e ramo Noé oikuaa yvy áry gui yy typa maa.

<sup>12</sup> Ha'e gui sete ára ju oarõ rire teĩgue ju opoi apykaxu. Ha'e ramo ndojevyvei ha'e py.

### Kanoã gui Noé kuery oẽmba jevyague

<sup>13</sup> Ha'e gui seiscentos e um ma'etŷa, ijypyja jaxy ha'e ijypyja ára ma yy typa yvy áry gui. Ha'e ramo Noé oipe'a kanoã ao'ia. Oma'ẽ vy oexa yvy ipiru maa.

<sup>14</sup> Ha'e gui mokoĩ jaxyha, vinte e sete araa py ma yvy ipiru ete ma.

<sup>15</sup> Ha'e ramo Nhanderuete aipoe'i Noé pe:

<sup>16</sup> — Peẽmba ju ke kanoã gui, ndera'yxy, ndera'y kuery ha'e ndera'y ra'yxy kuery reve.

<sup>17</sup> Emoẽmba avi mymba kuery ndereve ikuai va'e, temimoingo ha'e javi, guyra, vaka ha'e opa marãguia yvy rupi otyryry va'e, ha'e kuery yvy re ikuai jevy vy ta'y ha'e heta aguã — he'i.

<sup>18</sup> Ha'e ramo Noé oẽ gua'y kuery, gua'yxy ha'e gua'y ra'yxy kuery reve.

<sup>19</sup> Omoẽmba avi mymba kuery kanoã gui, yvy rupi otyryry va'e ha'e javi, guyra ha'e yvy áry omyi va'e peteĩ-teĩ regua.

### Noé altar ojapoague

<sup>20</sup> Ha'e gui Noé ojapo peteĩ altar SENHOR pegua.\* Ha'e rami vy mymba ha'e guyra'i ha'eve va'e regua ojopy vy ojuka. Oapy vy ome'ẽ altar áry.

<sup>21</sup> Ha'e rã ipixe porã SENHOR oetũ vy aipoe'i ojeupe:

— Aŷ gui ma avakue káuxa xee ndaxeayvu vaivei 'rã yvy re, kyrí guive heko vai aguã anho ipy'a va'eri. Neĩ namombavei ma 'rã temimoingo kuery amombaague rami.

<sup>22</sup> Yvy ituia ja ndoiko e'ŷi 'rã mba'emo onhotŷa aguã neĩ omono'õa aguã, yro'ya neĩ haku-a, ára neĩ pytû ndoiko e'ŷi 'rã guive.

## 9

### Noé kuery reve Nhanderuete guexeve guarã ojapoague

<sup>1</sup> Ha'e gui Nhanderuete ogueroayvu porã Noé ha'e ta'y kuery. Ha'e vy aipoe'i:

— Pendera'y ke, pendereta ha'e pemonyẽ yvy.

<sup>2</sup> Mymba yvy re ikuai va'e ha'e guyra oveve va'e ha'e javi 'rã okyje pendegui. Pendepo py amboaxa 'rã yvy áry omyi va'e ha'e pira ye'ẽ rupigua ha'e javi.

<sup>3</sup> Opa marãguia oikove va'e yvy re oo va'e ha'e javi 'rã ha'eve pe'u va'erã. Pêvy jai rogue pyau ame'ẽague rami avi aŷ ma ame'ẽmba.

<sup>4</sup> Ha'e rã xo'o huguy oĩ teri va'e ma nda'evei pe'u aguã, tuguy re tekove oĩ ramo.

\* **8:20** Altar ma SENHOR pe ome'ẽmba oapya aguã.

<sup>5</sup> Anhetẽ pende kuery ruguy omoëague re voi anhombopaga 'rã. Mymba ikuai va'e gui voi amboekovia 'rã, avakue po gui amboekoviaa rami avi. Mba'eta amongue oirũ rekove oipe'a rire ipo gui amboekovia kuerei 'rã.

<sup>6</sup> Amongue oirũ ruguy omoë rire avakue ju omoë 'rã huguy, Nhanderuete ojee rami ae avakue omoingo rire.

<sup>7</sup> Ha'e rã peẽ ma penda'y reta, pendereta ha'e pemonyẽ yvy, pendereta yvy re – he'i.

<sup>8</sup> Noé ha'e ta'y kuery pe Nhanderuete aipoe'i avi:

<sup>9</sup> – Aŷ ma peẽ kuery reve ajapo ta xereve guarã, peneramymino kuery

<sup>10</sup> ha'e temimoingo kuery pendereve ikuai va'e ha'e javi reve: guyra'i, mymba oka regua ha'e ka'aguy regua kanoã gui oẽ va'ekue, opa marâguia mymba yvy re ikuai va'e reve guive.

<sup>11</sup> Po rami pendereve ajapo xereve guarã: Temimoingo kuery namombavei ma 'rã yy gui, yy ndouvei 'rã yvy mombaarã.

<sup>12</sup> Nhanderuete aipoe'ive ju:

– Pova'e ma aeja xereve guarã ajapo va'e kuaa ukaarã, peẽ kuery ha'e temimoingo kuery pendereve ikuai va'e ha'e javi reve, ha'e araka'e rã peve ikuai va'erã va'e peguarã voi:

<sup>13</sup> Arai re aexa uka 'rã xerapa, yvy re ikuai va'e reve xereve guarã ajapo va'ekue kuaa ukaarã.\*

<sup>14</sup> Yvy áry arai aru nhavõ, ha'e arai re karugua ojekuaa ramo

<sup>15</sup> xema'endu'a 'rã xereve guarã ajapo va'ekue re, peẽ ha'e temimoingo ikuai va'e ha'e javi reve. Ha'e rami vy yy nambouvei 'rã okuave va'e mombaarã.

<sup>16</sup> Karugua ojekuaa 'rã arai re. Ha'e ramo xee aexa vy xema'endu'a 'rã xereve guarã xee Penderuete raka'e rã peve guarã ajapo va'ekue re, temimoingo yvy re ikuai va'e ha'e javi reve.

<sup>17</sup> Nhanderuete aipoe'i Noé pe:

– Ha'e va'e ma xereve guarã ajapo va'ekue kuaa ukaarã temimoingo kuery yvy re ikuai va'e reve – he'i.

<sup>18</sup> Noé ra'y kuery kanoã gui oẽ va'ekue ma Sem, Cam ha'e Jafé. Cam ra'y ma Canaã.

<sup>19</sup> Ha'e va'e kuery ma Noé ra'y mboapy ikuai raka'e. Ha'e kuery gui ae yvy jave re omomyẽ.

### Noé jogueroayvu porã ha'e ijayvu vaiague

<sup>20</sup> Noé ma oma'etŷa rupi oiko. Ha'e rami vy onhotŷ uva.

<sup>21</sup> Ha'e gui vinho oy'u vy oka'u, ha'e ipire rei oiny oo'i py.

<sup>22</sup> Canaã ru Cam ma nguu ipire reia oexa vy omombe'u mokoï guyke'y kuery oka py ikuai va'e pe.

<sup>23</sup> Ha'e ramo guyke'y Sem ha'e Jafé ma peteĩ capa ojopy vy omoï oaxi'y re. Ha'e rami vy okupe re oguata ovv vy ojao'i nguu pire reia oexa e'ŷ re, amboae katy rive oma'ẽ reve.

<sup>24</sup> Ha'e gui Noé oka'uague gui ovv vy oikuaa gua'y kyr̄ive va'e hexe ojapoague.

<sup>25</sup> Ha'e vy aipoe'i:

– Tove Canaã toiko ayvu vaipy. Guyke'y kuery rembiguai yvȳive va'e rami toiko – he'i.

<sup>26</sup> Aipoe'ive ju:

– SENHOR Sem Ruete va'e ma ayvu porãmby toiko. Ha'e rã Canaã ma Sem rembiguai toiko.

<sup>27</sup> Ha'e Jafé ma tove Nhanderuete tomboyvate. Guyke'y Sem irũ toiko hoo py. Ha'e rã Canaã ma hembiguai toiko – he'i.

<sup>28</sup> Yy ovuague oaxa rire Noé ma trezentos e cinqüenta ma'etŷ re ju oiko.

<sup>29</sup> Noé ha'e javi vy novecentos e cinqüenta ma'etŷ oiko. Ha'e rire omano.

---

\* <sup>9:13</sup> “Xerapa” he'ia ma arai re Nhanderuete karugua oexa uka va'e.

# 10

## *1 Crônicas 1.5-23*

<sup>1</sup> Po rami ma Noé ra'y kuery ramymino kuery rery. Ta'y kuery ma Sem, Cam ha'e Jafé. Ha'e kuery ma yy ovu rire ta'y okuapy.

<sup>2</sup> Jafé ra'y kuery ma Gômer, Magogue, Madai, Javã, Tubal, Meseque ha'e Tiras.

<sup>3</sup> Gômer ra'y kuery ma Asquenaz, Rifate ha'e Togarma.

<sup>4</sup> Javã ra'y kuery ma Elisá, Társis, Quitim ha'e Dodanim.

<sup>5</sup> Ha'e va'e kuery oja'o vy oo ye'ẽ rembe re ikuai amboae reguarã. Peteĩ-teĩ regua oayvu ae py ijayvu, joegua-egua joa py ikuai.

<sup>6</sup> Ha'e gui Cam ra'y kuery ma Cuxé, Mizraim, Pute ha'e Canaã.

<sup>7</sup> Cuxé ra'y kuery ma Sebá, Havilá, Sabtá, Raamá ha'e Sabtecá. Ha'e Raamá ra'y kuery ma Sabá ha'e Dedã.

<sup>8</sup> Cuxé ra'y ma Ninrode. Ha'e va'e ma ipo'akapa ypy raka'e yvy re.

<sup>9</sup> Imba'ejukaa ipy'a guaxu va'e oiko SENHOR renonde. Ha'e ixupe "Ninrode SENHOR renonde imba'ejukaa rami avi oiko va'e", 'ea.

<sup>10</sup> Jypy'i ipo'aka raka'e ma Babel tetã re, ha'e gui Ereque, Acade ha'e Calné re ju, Sinar yvy re ae.

<sup>11</sup> Ha'e va'e yvy gui ha'e ojepe'a Assíria re ju oiko aguã. Ha'e vy ojapo Nínive, Reobote-Ir ha'e Calá tetã.

<sup>12</sup> Nínive ha'e Calá mbyte ma ojapo avi Resém tetã guaxu.

<sup>13</sup> Mizraim ra'y ma Ludim, Anamim, Leabim, Naftuim,

<sup>14</sup> Patrusim ha'e Casluim (ha'e va'e gui ma filisteu kuery ikuai), ha'e gui Caftorim.

<sup>15</sup> Canaã ra'y ma Sidom jypygua. Ha'e va'e gui ma Hete ju.

<sup>16</sup> Hamymino kuery ma jebuseu kuery, amorreu, girkaseu,

<sup>17</sup> heveu, arqueu, sineu,

<sup>18</sup> arvadeu, zemareu ha'e hamateu kuery ikuai. Canaã ramymino kuery ma opa rupi oaïmba raka'e.

<sup>19</sup> Canaã ramymino kuery yvy omboja'oague ma Sidom guive oo Gerar katy, Gaza peve, ha'e gui oo Sodoma, Gomorra, Admá ha'e Zeboim katy, Lasa peve.

<sup>20</sup> Ha'e va'e kuery ma Cam ramymino kuery. Peteĩ-teĩ regua oayvu ae py ijayvu, joegua-egua joa py ikuai.

<sup>21</sup> Ha'e gui Jafé ryke'y Sem ma ta'y avi. Hamymino kuery ma Héber ra'y kuery ha'e javi ikuai.

<sup>22</sup> Sem ra'y kuery ma Elão, Assur, Arfaxade, Lude ha'e Arã.

<sup>23</sup> Arã ra'y kuery ma Uz, Hul, Geter ha'e Más.

<sup>24</sup> Arfaxade ra'y ma Salá, Salá ra'y ma Héber.

<sup>25</sup> Héber ra'y ma mokoõ oiko. Peteĩ ma Pelegue hery va'e, mba'eta ha'e va'e oiko jave yvy omboja'oaa.\* Ha'e rã tyvy ma Joctã.

<sup>26</sup> Joctã ra'y kuery ma Almodá, Salefe, Hazar-Mavé, Jerá,

<sup>27</sup> Hadorão, Uzal, Dicla,

<sup>28</sup> Obal, Abimael, Sabá,

<sup>29</sup> Ofir, Havilá ha'e Jobabe ikuai. Ha'e va'e kuery ha'e javi ma Joctã ra'y kuery.

<sup>30</sup> Ha'e kuery yvy omboja'oague ma Messa guive oo, kuaray oua katy Sefar yvyty oĩ va'e peve.

<sup>31</sup> Ha'e va'e kuery ma Sem ra'y kuery. Peteĩ-teĩ regua oayvu ae py ijayvu, joegua-egua joa py ikuai.

<sup>32</sup> Ha'e va'e kuery ae Noé ramymino kuery. Peteĩ-teĩ regua oayvu ae py ijayvu, joegua-egua joa py ikuai. Ha'e kuery ma yy ovu rire oja'opa yvy jave re.

---

\* <sup>10:25</sup> Tery Pelegue ma "Oja'oa" 'ea reve joo ramigua.

# 11

## *Babel py torre ojapoa okuapyague*

<sup>1</sup> Ha'e jave py ma yvy jave re peteĩ'i ayvu oiko ramo peteĩ'i rami anho ijayvu okuapy.  
<sup>2</sup> Ha'e kuery kuaray oua katy gui oje'oi vy ojou peteĩ yvy joja porã reia Sinar yvy re. Hâ'e py ju ikuai.

<sup>3</sup> Ha'e vy aipoe'i joupe-up:

— Peju ke, jajapo yvy jykuerã, japy porã — he'i. Ha'e jave py yvy jykue oiporu ita 'rãgue py. Oja va'e voi oiporu omboja aguã.

<sup>4</sup> Aipoe'i okuapy:

— Peju ke, jajapo peteĩ tetã nhandevy, ha'e torre yva re peve yvate va'erã. Ha'e rami vy nhandere ima'endu'a porã, ha'e yvy jave re nhaneaĩ e'ŷ aguã — he'i okuapy.

<sup>5</sup> Ha'e rami rã SENHOR oguejy oexa aguã tetã ha'e torre avakue ra'y kuery ojapo va'e.

<sup>6</sup> Ha'e vy SENHOR aipoe'i:

— Aŷ peve peteĩ regua anho ikuai, ha'e peteĩ rami meme ijayvu va'e. Ha'e nunga ma jypy'i rei teri. Aŷ gui ma ha'e kuery ndojapo kuaa e'ŷi 'rã ojapoxe va'e rei.

<sup>7</sup> Peju ke, jaguejy, jajapo joo rami e'ŷ-e'ŷ ijayvu aguã rami, peteĩ-teĩ joayvu oendu kuaa ve'ŷ aguã — he'i.

<sup>8</sup> Ha'e rami vy SENHOR omoaĩmba yvy jave re. Ha'e ramo optyu'u tetã ojapo okuapya gui.

<sup>9</sup> Ha'e nunga rupi ha'e va'e henda omboerya Babel, ha'e py joayvu oendu kuaa e'ŷ aguã rami SENHOR ojapo rire, yvy jave re omoaĩmba vy.\*

## *1 Crônicas 1.24-27*

<sup>10</sup> Po rami ma Sem ramymino kuery rery. Ha'e ma cem ma'etŷ oguerekoa py ta'y ypy'i Arfaxade oiko, yy ovu rire mokoĩ ma'etŷa py.

<sup>11</sup> Ha'e Arfaxade oiko rire tuu Sem ma quinhentos ma'etŷ re ju oiko. Ta'y ha'e tajy ju.

<sup>12</sup> Arfaxade ma trinta e cinco ma'etŷ oikoa py oiko ta'y Salá.

<sup>13</sup> Ha'e Salá oiko rire tuu Arfaxade ma quatrocetros e três ma'etŷ re ju oiko. Ta'y ha'e tajy ju.

<sup>14</sup> Salá ma trinta ma'etŷ oikoa py oiko ta'y Héber.

<sup>15</sup> Ha'e Héber oiko rire tuu Salá ma quatrocetros e três ma'etŷ re ju oiko. Ta'y ha'e tajy ju.

<sup>16</sup> Héber ma trinta e quatro ma'etŷ oikoa py oiko ta'y Pelegue.

<sup>17</sup> Ha'e Pelegue oiko rire tuu Héber ma quatrocetros e trinta ma'etŷ re ju oiko. Ta'y ha'e tajy ju.

<sup>18</sup> Pelegue ma trinta ma'etŷ oikoa py ta'y Reú oiko.

<sup>19</sup> Ha'e Reú oiko rire tuu Pelegue ma duzentos e nove ma'etŷ re ju oiko. Ta'y ha'e tajy ju.

<sup>20</sup> Reú ma trinta e dois ma'etŷ oikoa py oiko ta'y Serugue.

<sup>21</sup> Ha'e Serugue oiko rire tuu Reú ma duzentos e sete ma'etŷ re ju oiko. Ta'y ha'e tajy ju.

<sup>22</sup> Serugue ma trinta ma'etŷ oikoa py oiko ta'y Naor.

<sup>23</sup> Ha'e Naor oiko rire tuu Serugue ma duzentos ma'etŷ re ju oiko. Ta'y ha'e tajy ju.

<sup>24</sup> Naor ma vinte e nove ma'etŷ oikoa py oiko ta'y Terá.

<sup>25</sup> Ha'e Terá oiko rire tuu Naor ma cento e dezenove ma'etŷ re ju oiko. Ta'y ha'e tajy ju.

<sup>26</sup> Terá ma setenta ma'etŷ oiko rire oiko ta'y kuery Abrão, Naor ha'e Harã.

<sup>27</sup> Po rami ma Terá ramymino kuery rery. Terá ra'y kuery ma Abrão, Naor ha'e Harã. Harã ra'y ma Ló.

<sup>28</sup> Harã ma yvy oikoague py ae omano, Ur caldeu kuery rekoia py. Ha'e va'e jave py tuu Terá oikove teri.

<sup>29</sup> Abrão ha'e Naor ojou gua'yxyrã. Abrão ra'yxy ma Sarai hery va'e, ha'e rã Naor ra'yxy ma Milca, Harã rajy ae. Harã ra'y kuery ma Milca ha'e Iscá.

<sup>30</sup> Ha'e rã Sarai ma imembry va'erã e'ŷ ae oiko.

---

\* <sup>11:9</sup> Tery Babel ma "Joo rami e'ŷ-e'ŷ oikuua okuapya" 'ea.

<sup>31</sup> Ha'e gui Terá ogueraa gua'y Abrão, gua'y Harã ra'y Ló, ha'e gua'y Abrão ra'yxy Sarai. Ha'e vy caldeu kuery rekoia Ur gui jogueraa, Canaã yvy re ovaẽ aguã. Ha'e rami teĩ Harã tekoia peve'i oje'oi. Ha'e vy opyta okuapy ha'e py.

<sup>32</sup> Ha'e gui Terá ma duzentos e cinco ma'etý oikoa py omano Harã tekoia py.

## 12

### *Nhanderuete Abrão oenoĩ vy ogueroayvu porãague*

<sup>1</sup> Ha'e gui SENHOR aipoe'i Abrão pe:

— Exẽ ke ndeyvy gui, nderu ro ha'e neretarã kuery ikuiai gui, ha'e tereo yvy aexa uka va'erã katy.\*

<sup>2</sup> Mba'eta ndegui amoingo 'rã peteĩ regua heta va'e. Romoingo porã 'rã, ha'e amboete uka 'rã nderery. Ndere vy amboae regua kuery amoingo porã avi 'rã.

<sup>3</sup> Amoingo porã avi 'rã nemoingo porã va'e kuery, ha'e rã ndere ijayvu vai va'e kuery re ma xeayvu vai 'rã. Ndere vy yvy regua ha'e javi ikuai porã 'rã — he'i.\*

<sup>4</sup> Ha'e rami SENHOR ijayvuague rami vy Abrão oo. Ló voi oo hupive. Setenta e cinco ma'etý Abrão oguerek reve ojepé'a Harã tekoia gui.

<sup>5</sup> Abrão ngupive ogueraa va'e ma gua'yxy Sarai, guyvy ra'y Ló ha'e mba'emo oguerek va'e ha'e javi. Ogueraa avi guembiguai kuery Harã tekoia py oiko jave ojou va'ekue. Ha'e rami vy Canaã yvy katy ju jogueraa. Ha'e vy ovaẽmba ha'e py.

<sup>6</sup> Ha'e va'e yvy Abrão oaxa ovvy Siquém tetã peve, Moré py yvyra carvalho hi'aĩ va'e peve. Ha'e jave ma cananeu kuery ikuai yvy re.

<sup>7</sup> Ha'e ramo Abrão pe SENHOR ojexa uka. Ha'e vy aipoe'i:

— Kova'e yvy ame'ẽ 'rã neramymino kuery pe — he'i. Ha'e ramo Abrão ojapo peteĩ altar SENHOR pe, ixupe ojexa uka rire.

<sup>8</sup> Ha'e va'e gui oaxa ovvy yvyty Betel regua kuaray oua katy oĩ va'e peve. Ha'e py ma oupi oo'i, Betel tetã regua kuaray oikea katy opyta, ha'e Ai regua kuaray oua katy. Ha'e py voi ojapo peteĩ altar SENHOR pe, ha'e ojapukai SENHOR rery rupi.

<sup>9</sup> Abrão oo ju ha'e gui, Neguebe katy tema oo oiny.\*

### *Egito yvy re Abrão oiko jave guare*

<sup>10</sup> Ha'e gui ha'e va'e yvy re oiko karuai. Ha'e ramo Abrão oo vy Egito yvy re ju oiko, ijyvy re ae karuai ete ramo.

<sup>11</sup> Ha'e gui Egito yvy re ovaẽ rai'i maa py Abrão aipoe'i gua'yxy Sarai pe:

— Xee aikuaa porã ndee kunha porã ereikoa.

<sup>12</sup> Ha'e ramo Egito pygua kuery nderexa vy aipoe'i 'rã: “Peva'e kunha ma ta'yxy oiko”, he'i vy xejuka 'rã. Ndee anho'i nemoingove 'rã.

<sup>13</sup> Ha'e nunga rupi aipo're xereindy reikoa rami, ndere vy ha'e kuery xemboete vy xee voi xemoingove aguã — he'i.

<sup>14</sup> Egito yvy re Abrão ovaẽ ramo ha'e pygua kuery ta'yxy oexa rã iporã ete.

<sup>15</sup> Faraó rembiguai kuery yvatekueve va'e oexa vy omombe'u Faraó pe. Ha'e ramo Faraó ogueru ruka kunha va'e ngoo py.

<sup>16</sup> Faraó ma kunha va'e re vy opena porã Abrão re. Ha'e ramo ojou-jouve guymbarã: vexa'i, vaka, mburika'i, ha'e gui guembiguai avakue ha'e kunhague, kavaju ha'e camelio.

<sup>17</sup> Ha'e rami teĩ SENHOR omoingo axy Faraó ha'e hoo pygua kuery ha'e javi. Mba'emo vai ete omoingo Abrão ra'yxy Sarai káuxa.

<sup>18</sup> Ha'e ramo Faraó oenoĩ uka Abrão. Ha'e vy aipoe'i:

— Mba'e tu rejapo xere? Mba'e re tu ndera'yxy oikoa neremombe'u porãi ri,

\* **12:1** Atos 7.3 \* **12:3** Gálatas 3.8 \* **12:9** Neguebe ma Judéia regua yvy piru reia kuaray puku-a katy oĩ va'e.

<sup>19</sup> ha'e "Xereindy" 're rive? Ha'e rami rā ajopy karamboae xera'yxyrā. Aŷ ma nderayxy ae ri rā eraa ju, ha'e tapeo — he'i.

<sup>20</sup> Ha'e rami vy Faraó guembiguai kuery pe opena uka Abrão re. Ha'e ramo oarō heravy, ta'yxy ha'e opa mba'e oguerekva'e guive.

## 13

### *Abrão ha'e Ló joegui oja'oague*

<sup>1</sup> Ha'e gui Egito gui Abrão oẽ vy Neguebe katy ju oo. Gua'yxy ogueraa opa mba'e oguerekva'e reve. Ló avi oo hupive.

<sup>2</sup> Abrão ma oguerekopa va'e. Oguerekopa vaka, prata ha'e ouro.

<sup>3</sup> Ha'e gui Neguebe gui Betel katy ju oo, oo'i oupi ypy'iague py, Betel ha'e Ai mbyte py ae,

<sup>4</sup> altar SENHOR peguarā ojapoague peve. Ha'e py ae ju Abrão ojapukai SENHOR rery rupi.

<sup>5</sup> Abrão rupive Ló oo vy ogueraa reta vexa'i, vaka ha'e oo'i.

<sup>6</sup> Ha'e nunga rupi ha'e va'e yvy re nda'eveei joa py mokoīve ikuai aguā, oguerekopa va'e meme ramo. Nda'eveei ae joa py ikuai aguā.

<sup>7</sup> Ha'e gui Abrão rymba re opena va'e kuery joguero'a rei Ló rymba re opena va'e kuery reve. Ha'e va'e jave py cananeu ha'e ferezeu kuery avi ikuai ha'e va'e yvy re.

<sup>8</sup> Ha'e ramo Abrão aipoe'i Ló pe:

— Nda'evei nhande jajoguero'a rei aguā, neĩ xerembiguai kuery nerembiguai kuery reve joguero'a aguā nda'evei, joegua meme nhandekuai vy.

<sup>9</sup> Ma'ẽ, nerondenon itui yvy ha'e javi. Ajerure xea gui rejepa' a aguā. Xapy'a rei jaiporu kuaa e'ŷa katy ri reo ramo xee ma jaiporu kuaa katy 'rā aa. Ha'e rā jaiporu kuaa katy ri reo ramo xee ma jaiporu kuaa e'ŷa katy 'rā aa — he'i.

<sup>10</sup> Ha'e ramo Ló oma'ẽ vy oexa yvy joja porā reia Jordão yakā yvýry itui va'e, Zoar tekaoa katy'i. Ha'e va'e yvy ma Sodoma ha'e Gomorra SENHOR omomba e'ŷ mbove yy porā oĩa, yvotyty SENHOR omoingo va'ekue rami ae iporā, Egito yvy rami avi.

<sup>11</sup> Ha'e ramo Ló ma ojeupe guarā oiporavo Jordão yvýry yvy joja porā reia itui va'e ha'e javi. Ha'e rami vy ha'e katy oo, kuaray oua katy. Ha'e rami py mokoīve oja'o joe gui.

<sup>12</sup> Abrão ma Canaã yvy re ae opyta. Ha'e rā Ló ma oo vy yvy joja porā reia re tetā ikuai va'e rupi oiko. Ha'e rami vy oo'i oguerova heravy Sodoma tetā peve.

<sup>13</sup> Ha'e rā Sodoma pygua avakue ma heko vai va'e, SENHOR renonde ojejavypa ete va'e ikuai.

### *Abrão pe Canaã yvy ome'ẽ aguā re SENHOR ijayvuague*

<sup>14</sup> Ha'e gui Ló ojepe'a ma rire SENHOR aipoe'i Abrão pe:

— Ema'ẽ reĩa guive kuaray ijapu'a'ia katy, kuaray ipuku-a katy, oua katy ha'e oikea katy.

<sup>15</sup> Mba'eta yvy rexva'e ha'e javi 'rā ame'ẽmba ndevy, ha'e neramymino kuery pe voi, araka'e rā peve guarā.\*

<sup>16</sup> Amboeta 'rā neramymino kuery yvy ku'i hetaa ramo. Amongue yvy ku'i oipapa kuaa va'e rire mae oipapa kuaa avi 'rāgue neramymino kuery.

<sup>17</sup> Epu'ã ke, tereo ha'e eikuua pota kova'e yvy ipuku-a ha'e ipya ramo, mba'eta ame'ẽmba 'rā ndevy — he'i.

<sup>18</sup> Ha'e ramo Abrão ngoo'i oguerova heravy vy oiko carvalho yvyra ty Manre py oĩ va'e rexei'i ju oiko, Hebron tetā katy'i. Ha'e py ma teĩgue ju ojapo altar SENHOR pe.

## 14

### *Irundy huvixa kuery peteñ nhiruñ re opu'ã okuapyague*

---

\* **13:15** Gálatas 3.16

<sup>1</sup> Ha'e jave py ma Sinar tetã pygua huvixa Anrafel, Elasar pygua huvixa Arioque, Elão pygua huvixa Quedorlaomer ha'e Goim pygua huvixa Tidal reve,

<sup>2</sup> ha'e kuery ma opu'ã okuapy Sodoma pygua huvixa Bera rovai, Gomorra pygua huvixa Birsa, Admá pygua huvixa Sinabe, Zeboim pygua huvixa Semeber ha'e Belá Zoar hery avi va'e pygua huvixa rovai.

<sup>3</sup> Ha'e ramo ha'e va'e kuery ma Sidim regua yvyugua py ono'õmba okuapy, yupa he'ẽ ro va'e katy'i.

<sup>4</sup> Ha'e kuery ma doze ma'etŷ re ma huvixa Quedorlaomer escravo ikuai rire treze ma'etŷ maa py nonhe'ẽ reduxevei.

<sup>5</sup> Ha'e gui catorze ma'etŷa py Quedorlaomer ou, guexeveguia huvixa kuery reve. Ha'e rami vy oitypa refaim kuery Asterote-Carnaim tetã py, ha'e gui zuzim kuery Hā py, emim kuery Savé-Quiriataim py,

<sup>6</sup> ha'e horeu kuery ju oity Seir yvyty re, El-Parã regua tekoia e'ŷa katy'i oĩ va'e peve.

<sup>7</sup> Ha'e gui ma En-Mispate py ju ovaẽ (ha'e va'e ma Cades), ha'e rami vy oitypa amalequita ha'e amorreu kuery Hazazom-Tamar py ikuai va'ekue.

<sup>8</sup> Ha'e ramo hovai opu'ã jogueravy Sodoma pygua huvixa, Gomorra pygua huvixa, Admá pygua huvixa, Zeboim pygua huvixa ha'e Belá Zoar va'e pygua huvixa. Ha'e kuery jogueraa Sidim regua yvyugua py huvixa kuery mboae rovai opu'ã aguã,

<sup>9</sup> Elão pygua huvixa Quedorlaomer, Goim pygua huvixa Tidal, Sinar pygua huvixa Anrafel ha'e Elasar pygua huvixa Arioque rovai. Ha'e rami py irundy huvixa kuery opu'ã okuapy peteĩ nhiruĩ huvixa kuery rovai.

<sup>10</sup> Ha'e gui Sidim regua yvyugua py ma heta oĩ yvykua oja va'e oĩa. Ha'e va'e rupi Sodoma ha'e Gomorra pygua huvixa kuery ojava vy amongue ho'a yvykua py, ha'e rã amboae kuery ma yvyty katy ojava.

<sup>11</sup> Ha'e rã hovaigua kuery ma oipe'apa Sodoma ha'e Gomorra pygua kuery mba'e rei-rei. Tembi'u voi ogueraapa vy oje'oipa ju.

### *Ló kuery ojopypaa heravyague*

<sup>12</sup> Ha'e kuery ogueraa avi Abrão ryvy ra'y Ló, Sodoma tetã py oikoague gui. Hymba kuery voi ogueraapa.

<sup>13</sup> Ha'e ramo peteĩ oo jepe va'ekue ou vy omombe'u Abrão hebreu va'e pe, Manre regua carvalho ty katy'i oikoa py. Manre ma amorreu oiko raka'e, Escol ha'e Aner ruvy. Ha'e va'e kuery ma Abrão reve nhomoirũ va'e ikuai.

<sup>14</sup> Ha'e ramo Abrão ma tyvy ra'y ogueraa ague oendu vy omono'õmba guembiguai kuery hoo py itui'i va'ekue, opu'ã kuua va'e trezentos e dezoito ikuai va'e. Ha'e rami vy amboae kuery rakykue oje'oi Dã peve.

<sup>15</sup> Ha'e rami vy hembiguai kuery oja'o vy pyávy opu'ã okuapy amboae kuery rovai. Oitypa vy omonha Damasco yke ijaxua katy Hobá tetã oĩ va'e peve.

<sup>16</sup> Ha'e rami vy oguerupa ju imba'e rei-rei. Ogueru avi guetarã Ló, imba'e rei-rei, kunhague ha'e hetarã kuery ha'e javive.

<sup>17</sup> Ha'e gui Abrão ma huvixa Quedorlaomer ha'e hexeveguia huvixa kuery oitypaague gui ojevy ramo oĩa py Sodoma pygua huvixa ou ovaexi aguã Savé regua yvyugua, "Huvixa yvyugua" 'epy va'e py.

### *Melquisedeque Abrão ogueroayvu porãague*

<sup>18</sup> Ha'e gui oĩa py Salém pygua huvixa Melquisedeque ogueru mbojape ha'e vinho. Ha'e va'e ma sacerdote oiko Nhanderuete yvate ete va'e pegua.

<sup>19</sup> Ha'e gui ogueroayvu porã Abrão. Ha'e vy aipoe'i:

— Abrão, tove Nhanderuete yvate ete va'e, yva ha'e yvy rerekaoa tanemoingo porã.

**20** Ha'e ta'ima'endu'a porãa Nhanderuete yvate ete va'e re, ndepo py nderovaigua kuery omboaxapa rire – he'i. Ha'e rami rã ixupe Abrão ome'ẽ dízimo ogueru va'ekue ha'e javi gui.\*

**21** Ha'e gui Sodoma pygua huvixa ju aipoe'i Abrão pe:

– Xevy pe eraa uka ju xeretã pygua kuery, ha'e rã nhomba'e rei-rei reru va'ekue ma ndevy guarã toĩ – he'i.

**22** Ha'e rã Abrão ombovai:

– Aupi xepo SENHOR Nhanderuete yvate ete va'e, yva ha'e yvy rerekaoa pe.

**23** Ha'e rami vy aura mba'eve ajopy e'ỹ aguã nemba'e rei-rei gui, neĩ peteĩ nhimbo, neĩ xapatu xã, “Xee ame'ẽ ramo Abrão oguerekopa”, 're e'ỹ aguã.

**24** Mba'eve xee ndaipotai xejeupe guarã, mba'emo kunumigue ho'u va'ekue e'ỹ vy, ha'e xerupive oje'oi va'ekue Aner, Escol ha'e Manre pe reme'ẽ va'erã va'e anho. Tove ha'e kuery tojopy ojeupe guarã – he'i.

## 15

### *Nhanderuete Abrão ta'y aguã re ijayvuague*

**1** Ha'e va'e rire SENHOR Abrão pe ojexa uka vy aipoe'i ixupe:

– Abrão, ekyje eme. Xee ma mba'emo vai jokoa aiko ndevy, ha'e ndevy guarã va'ekue heta 'rã ame'ẽ.

**2** Abrão ombovai:

– SENHOR Xeruete, mba'e tu ha'vy reme'ẽ 'rã, xera'y e'ỹ re ae aiko rã? Ha'e xero py mba'emo areko va'e aeja rã ojopy va'erã ma Damasco guigua Eliézer anho.

**3** Aipoe'ive ju: – Xera'yrã nereme'ẽi rire mba'emo areko va'e xero py tembiguai itui'i va'ekue pe guarã rive opytapa.

**4** Ha'e ramo SENHOR ombovai vy aipoe'i:

– Ha'e va'e ma nemba'e jopyarã e'ỹ oiko. Ha'e rã ndegui oiko va'erã va'e ae ma 'rã ojopy – he'i.

**5** Ha'e vy ogueraa oka py. Ha'e vy aipoe'i:

– Ema'ẽ yva re, ha'e eipapa jaxy-tata ikuai va'e, reipapa aguã ha'eve ramo.\*

Aipoe'i avi: – Gui rami 'rã heta neramymino kuery – he'i.

**6** Ha'e ramo Abrão SENHOR re ojerovia ramo ixupe “Heko porã va'e” he'i.\*

**7** Ha'e gui SENHOR aipoe'ive ju:

– Xee ma SENHOR Úr caldeu kuery retã gui roipe'a va'ekue, kova'e yvy nderekoarã ame'ẽ aguã – he'i.

**8** Abrão oporandu ixupe:

– SENHOR Xeruete, mba'exa tu aikuua 'rã anhetã kova'e yvy ajopy 'rãa?

**9** Ombovai:

– Eru xevy ha'vy peteĩ vaka kunha'i, peteĩ kavara ha'e peteĩ vexa'i ra'y, mboapy ma'etõ oguerekoo va'e meme. Eru avi peteĩ pyku'i'i ha'e peteĩ apykaxu'i – he'i.

**10** Ha'e ramo Abrão mymba ha'e javi ogueru vy oipe'ãmba mbyte rupi. Onhono porã'i ipêgue, peteĩ-teĩ joexe-exei'i. Ha'e rã guyra'i ma noipe'ãi.

**11** Xapirẽ kuery mba'emo re'õgue áry oguejy ramo Abrão omondyi.

### *Abrão reve Nhanderuete ngupive guarã ojapoague*

**12** Ka'aru rai'i ma jave Abrão hopeyi vaipa, ha'e oendu avi okyje vaipaa, pytû vai ete ramo.

**13** Ha'e ramo SENHOR aipoe'i ixupe:

– Reikuua pota povae re, mba'eta neramymino kuery joyvy rupi oguata rei 'rã. Escravo ikuai aguã rami ojopya 'rã. Ha'e gui ombojexavaia 'rã quatrocentos ma'etõ re.

\* **14:20** Hebreus 7.17,21 \* **15:5** Romanos 4.18 \* **15:6** Romanos 4.3,9,22, Gálatas 3.6, Tiago 2.23

<sup>14</sup> Ha'e rami teĩ herekoaa kuery ma xee ju amoingo axy 'rã. Ha'e va'e rire ojepe'apa 'rã ha'e gui, imba'e rei-reipa reve.\*

<sup>15</sup> Ha'e rã ndee ma reo porã 'rã neramoĩ kuerya py. Ha'e ramo nenhono porãa 'rã ndetuja'i ete jave.

<sup>16</sup> Ha'e gui neramymino kuery irundykuea mae ma ikuai va'e ojevy 'rã apy, mba'eta ndopai teri apygua amorreu kuery heko vai aguã – he'i.

<sup>17</sup> Kuaray oike ma ramo pytã vaipa ete. Ha'e gui ojekuaa peteĩ tapyã ryru hataxã opu'ã oinya va'e, ha'e peteĩ takua ryxa rendy mymba pãgue ikuai va'e mbyte rupi oaxa oiny va'e.

<sup>18</sup> Ha'e va'e árave Abrão reve SENHOR ojapo ngupive guarã. Ha'e vy aipoe'i:

– Ha'e gui neramymino kuery pe ae 'rã ame'ẽ kova'e yvy, Egito yakã guive Eufrates yakã guaxu peve,

<sup>19</sup> queneu kuery ikuiaia, quenezeu, cadmoneu,

<sup>20</sup> heteu, ferezeu, refaim,

<sup>21</sup> amorreu, cananeu, girkaseeu ha'e jebuseu kuery ikuiaia guive.

## 16

### *Sarai ha'e Agar rekukue oĩa*

<sup>1</sup> Abrão ra'yxy Sarai ma imemby va'e'ŷ. Ha'e rami avi oguereko peteĩ guembiguai Egito guigua Agar hery va'e.

<sup>2</sup> Ha'e gui Sarai aipoe'i Abrão pe:

– Xee ma Nhanderuete xeapo kyrã va'e areko e'ŷ aguã rami. Emenda ke xerembiguai re, ha'e va'e rupi xepi'arã rami nderãy aguã – he'i. Ha'e ramo Abrão onhe'ẽ rendu Sarai.

<sup>3</sup> Ha'e rami vy ome Abrão-a py Sarai ogueraa guembiguai Egito guigua Agar, ome'ẽ ta'yxy jevyrã. Ha'e va'e jave ma dez ma'etŷ re ma ikuai Canaã yvy re.

<sup>4</sup> Ha'e gui Agar reve Abrão jogueroke ramo oguereko kyrã va'e. Kyrã va'e oguereko maa oexa vy nda'ija'evei ma opatõ ra'yxy re.

<sup>5</sup> Ha'e ramo Sarai aipoe'i Abrão pe:

– Ndere ae toopa xemoximba reiague. Xee ma xerembiguai rerekoko aguã ame'ẽ rire kyrã va'e oguereko maa oexa vy nda'ija'evei xere. Tove SENHOR toikuaa pota xere rejapo va'ekue re.

<sup>6</sup> Gua'yxy pe Abrão ombovai:

– Nerembiguai ma ndepo py oiko. Ereko ndee ae rerekoxea ramo – he'i. Ha'e ramo Sarai guembiguai oguereko axy ramo ojava ixugui.

<sup>7</sup> Ha'e gui SENHOR-a guigua anjo ojou tekoa e'ŷa py peteĩ yvu rexei, Sur yvy katy tape oo va'e py.

<sup>8</sup> Ha'e vy aipoe'i ixupe:

– Ndee Sarai rembiguai Agar, magui tu reju? Marã katy tu reo?

Ombovai:

– Xererekoo Sarai gui rima ajava – he'i.

<sup>9</sup> Ha'e ramo anjo SENHOR-a guigua aipoe'i ixupe:

– Ejevy ju ndererekooa py, ha'e enhemo'yvy'i ipo py.

<sup>10</sup> Anjo aipoe'ive ju:

– Xee amboeta ete 'rã neremiarirõ kuery, avave rei oipapa kuaa aguã rami e'ŷ.

<sup>11</sup> Anjo aipoe'ive ju:

– Rerekoo 'rã kyrã va'e, ava'i 'rã reikuavã. Remboery 'rã Ismael, rejexavaia gui SENHOR ndereraa jepe rire.\*

<sup>12</sup> Ha'e va'e ma avakue oikuaa rã mburika ka'aguy regua ramo 'rã oiko, mba'eta opu'ã 'rã pavẽ re, ha'e rã hexe ma pavẽ 'rã opu'ã avi. Oiko 'rã guyvy kuery rovaigua – he'i.

\* **15:14** Atos 7.6-7 \* **16:11** Tery Ismael ma "Nhanderuete oendu va'e" 'ea.

<sup>13</sup> Ha'e ramo Agar ma SENHOR hexeve ijayvu rire ojapukai hery rupi. Ha'e vy aipoe'i:  
— Ndee ma Xeruete rexa va'e — he'i. Mba'eta aipoe'i: “Xee ri ty'y apy ha'eve xerexaa  
aexa aguã?” he'i vy.

<sup>14</sup> Ha'e nunga rupi ha'e va'e ygua hery Beer-Laai-Roi. Cades ha'e Berede mbyte re opyta.<sup>†</sup>

### *Ismael itui'iague*

<sup>15</sup> Ha'e gui Agar oguerekoo'i Abrão ra'y. Ha'e rã Abrão Agar re ta'yague omboery Ismael.

<sup>16</sup> Oitenta e seis ma'etý re ma Abrão oiko jave Agar ta'y Ismael re.

## 17

### *Nhanderuete Abrão rery oguerovaague*

<sup>1</sup> Abrão noventa e nove ma'etý oguerekoo py SENHOR ojexa uka ixupe. Ha'e vy aipoe'i:  
— Xee ma Nderuete xepo'akapa va'e. Eiko ke xerenonde opa mba'e py ndereko porãa  
rupi.

<sup>2</sup> Ha'e ramo ndereve ajapo 'rã xerupive guarã, ha'e rami vy amboeta 'rã neramymino  
kuery — he'i.

<sup>3</sup> Ha'e ramo Abrão guenapy'ã re oĩ, ngova yvy re omovaẽ. Nhanderuete aipoe'i ixupe:

<sup>4</sup> — Xerupive guarã ndereve ajapo rire ndee reiko 'rã mbovy e'ŷ regua ikuai va'e ru.

<sup>5</sup> Ha'e nunga rupi Abrão ve'ŷ ma 'rã nderery, ha'e rã Abraão, mbovy e'ŷ regua rurã  
romoingo rire.\*

<sup>6</sup> Xee romboeta ete 'rã neramymino kuery. Ndegui 'rã amoingo joegua e'ŷ-e'ŷ, huvixa  
kuery guive.

<sup>7</sup> Xerupive guarã ndereve jypy'i ajapo va'ekue ma aikuua uka 'rã neramymino kuery pe  
ha'e kuery ikuai jevy-jevy rã guarã, raka'eve rã. Ha'e rami vy Nderuete aiko aguã, ha'e  
gui neramymino kuery Ruete guive.

<sup>8</sup> Ndevy ha'e neramymino kuery pe ame'ẽ 'rã yvy reguata reikovyague. Ha'e kuery  
pegua itui Canaã yvy ha'e javi, raka'e rã guarã. Ha'e xee aiko 'rã ha'e kuery Ruete.

### *Opire omboi uka aguã oejaagae*

<sup>9</sup> Nhanderuete aipoe'i ve ju Abraão pe:

— Ndee ha'e neramymino kuery pendekuai 'rã xereve guarã ajapo va'e rupi, ha'e  
kuery ikuiaia nhavõ ha'e rami ae ta'ikuai.

<sup>10</sup> Po rami ma xereve guarã ajapo, ha'e va'e rupi peẽ ha'e neramymino kuery pendekuai  
aguã: Pemboi 'rã avakue'i penembyte oiko va'e ha'e javi pire.

<sup>11</sup> Pendero'o pire ae 'rã pemboi. Ha'e nunga ma xereve guarã ajapo va'e rupi pendekuaia  
kuaa ukaarã oĩ.

<sup>12</sup> Penembyte oiko va'e oito ára oguerekoo py pemboi 'rã ipire: avakue pende kuery  
regua ha'e penerembiguai ra'y kuery pendo py oiko va'ekue, yvy mboae guigua pejogua  
va'ekue guive, penderegua ae e'ŷ tei.

<sup>13</sup> Pemboi 'rã pendero py itui'i va'ekue ha'e pendeperáta re pejogua va'ekue pire. Ha'e  
rami py xereve guarã ajapo va'ekue kuaa ukaarã oĩ 'rã pendero'o re, raka'e rã peve  
guarã.

<sup>14</sup> Ha'e rã ngo'o pire omboi uka e'ŷ va'e ma oipe'aa 'rã pende kuery mbyte gui, xereve  
guarã ajapo va'ekue rupi e'ŷ oiko ramo.

### *Sarai rery ju Nhanderuete oguerovaague*

<sup>15</sup> Nhanderuete aipoe'i Abraão pe:

— Ndera'yxy Sarai pe ma “Sarai” 'ereve eme, ha'e rã “Sara” ju 'rã renoi.<sup>†</sup>

\* <sup>16:14</sup> Tery Beer-Laai-Roi ma “Hekove va'e xerexaaty ygua” 'ea. \* <sup>17:5</sup> Tery Abraão ma “Heta regua ru” 'ea  
(Romanos 4.17). † <sup>17:15</sup> Tery Sara ma “Huvixave rajy” 'ea.

<sup>16</sup> Mba'eta amoingo porã vy ajapo 'rã ndera'yrã oguereko aguã rami. Anhetẽ amoingo porã ramo ixugui joegua e'ŷ-e'ŷ 'rã ikuai, huvixa kuery guive – he'i.

<sup>17</sup> Ha'e ramo Abraão guenapy'ã re oĩ vy yvy re ngova omovaẽ. Ha'e vy hory vy aipoe'i ojeupe:

– Ava cem ma'etŷ ma oguereko va'e nda'u ta'y 'rã ri? Ha'vy Sara nda'u imemby nho 'rã, noventa ma'etŷ ma oguereko va'eri? – he'i ojeupe.

<sup>18</sup> Ha'e gui Nhanderuete pe ju Abraão aipoe'i:

– Ismael ae oiko 'rãgue neronden rupi – he'i.

<sup>19</sup> Nhanderuete ombovai:

– Ndera'yxy Sara ae 'rã oguereko ndera'y. Ha'e va'e remboery 'rã Isaque. Ixupe ae 'rã amoĩ atã xereve guarã ajapo va'ekue, hamymino kuery raka'eve rã ikuai va'erã va'e peguarã.

<sup>20</sup> Ha'e ramo avi aendu avi Ismael re ndeayvu rã. Amoingo porã avi 'rã, ha'e ajapo 'rã ta'y reta aguã rami. Ta'y kuery ma doze huvixa 'rã ikuai. Ixugui amoingo 'rã peteĩ regua heta ete ikuai va'e.

<sup>21</sup> Ha'e rã xereve guarã ajapo va'ekue ma Isaque pe ae ju 'rã amoĩ atã. Ha'e va'e ma peteĩ ma'etŷa py kova'e ára ojeupity ju jave Sara oguereko 'rã ndera'yrã – he'i.

<sup>22</sup> Ha'e gui Abraão reve Nhanderuete ijayvupa ma vy ojeupi ov y ha'e gui.

### *Opire omboi ukapaa okuapyague*

<sup>23</sup> Ha'e va'e árave Abraão ogueru ruka gua'y Ismael, guembiguai kuery ha'e pygua ae ha'e peráta re ojogua va'ekue ha'e javi. Avakue hoo py ikuai va'e ha'e javive omboatypa vy omboi peteĩ-teĩ pire, Nhanderuete aipoe'iague rami vy.

<sup>24</sup> Abraão noventa e nove ma'etŷ oguereko reve opire omboi uka raka'e.

<sup>25</sup> Ta'y Ismael ma treze ma'etŷ oguereko jave omboi ipire.

<sup>26</sup> Peteĩ ára pyve Abraão ta'y Ismael reve omboi uka okuapy opire.

<sup>27</sup> Avakue hoo py ikuai va'e ma guive rã opire omboi ukapa, tembiguai kuery ha'e pygua ae, ha'e yvy mboae gui peráta re ojogua pyre guive.

## 18

### *Abraão pe SENHOR ha'e mokoĩ anjo ojexa ukaague*

<sup>1</sup> Ha'e gui Manre py Abraão pe SENHOR ojexa uka ju yvyra carvalho ty oĩ va'e rexei'i, hakuve ma jave ngoo'i rokẽ py oguapy oiny jave.

<sup>2</sup> Abraão oma'ẽ vy oexa mboapy avakue henonde hi'aĩ ra'e ramo. Oexa vy ngoo'i rokẽ gui onha ov y ovaexí aguã.\* Guenapy'ã re oĩ, ngova yvy re omovaẽ rei reve.

<sup>3</sup> Ha'e vy aipoe'i:

– Xe-Senhor, rejou porã ri ramo ajerure reaxa rive e'ŷ aguã xee nerembiguaia gui.

<sup>4</sup> Taru ruka yy pendepy pejoi aguã.† Pepytu'u ranhe kova'e yvyra guy py.

<sup>5</sup> Aru ruka 'rã mbojape'i. Pe'u ke, penembaraeteve, ore kuery penembiguaia py pevaẽ ma vy. Ha'e gui mae ma ha'eve peove aguã – he'i.

Ha'e kuery ombovai vy

– Ejapo ha'vy ndeayvuague – he'i okuapy.

<sup>6</sup> Ha'e ramo Abraão ojapyra ov y oo'i Sara oĩa py. Ha'e vy aipoe'i:

– Emoakŷ pojava na mboapy ryru trigo iporâve va'e mbojaperã, ha'e exy ju tanhimbu py – he'i.

<sup>7</sup> Ha'e gui Abraão ma mymba kora katy ju onha ov y. Peteĩ vaka ra'y ikyra porã va'e ojopy vy ome'ẽ omongakua va'ekue pe oguereko katu pojava aguã.

\* **18:2** Mboapy avakue ovaẽ va'e regua mokoĩ ma anjo ikuai (19.1), ha'e rã amboae ma SENHOR ae, ha'e'ŷ vy anjo ikuaa ukaa (versículos 1, 17, 20, 22). † **18:4** Ha'e kuery reko ramo vy oo py ipoua kuery ovaẽ ramo hoo va'e omovaẽ vy ogueru ruka 'rã yy ojoi aguã, tape rupi yvy ku'i rupi ou rire (19.2, 24.32, 43.24, Juízes 19.21, Lucas 7.44, João 13.1-14).

**8** Ogueru avi kamby kekue ha'e oke e'ŷ va'e, ha'e gui vaka ro'o oexy uka va'ekue. Ha'e rami vy ipoua kuery renonde omoimba. Oarõ ho'amy ha'e kuerya py yvyra guy py okaru okuapy ramo.

**9** Ha'e ramo ha'e kuery oporandu ixupe:

— Nderayxy Sara mamo tu oĩ?

Ombovai:

— Opy ri hiny — he'i.

**10** Ha'e kuery regua peteĩ va'e aipoe'i:

— Aŷ ma peteĩ ma'etŷa py ma aju ete ju 'rã ndea py. Ha'e ramo nderayxy Sara oguereko 'rã ava'i — he'i. Ha'e rami jave Sara oendu oo'i rokẽ py ha'e kuery rakykue katy.

**11** Abraão ha'e Sara ma tujakue'i ete ma ikuai. Sara voi ndoikovei ma gueko re.

**12** Ha'e gui Sara ha'e nunga oendu vy hory oiny opy'a py. Ha'e vy aipoe'i ojeupe ae:

— Xeguaigu'i ete ma, ha'e xeme voi tuja'i ma va'eri, ha'e rami teĩ nhi'ã avy'a nho 'rã ri? — he'i.

**13** SENHOR aipoe'i Abraão pe:

— Mba'e re tu Sara hory rei reve ri aipoe'i: “Anhetẽ ete ri nda'u areko'i teri 'rã kyrĩ va'e, xeguaigu'i ma rire?” he'i?

**14** Nhanderuete pe nda'u oiko 'rã ri mba'emo haxy ete va'e ojapo aguã? Peteĩ ma'etŷa py kova'e ára ojeupity jevy jave 'rã aju ndea py, ha'e Sara oguereko 'rã kyrĩ va'e — he'i.\*

**15** Ha'e rami rã Sara okyje vy onhenhom. Ha'e vy aipoe'i:

— Ndaxeroryi rima ainy.

Ha'e rã ha'e va'e ma ombovai:

— Any, anhetẽ nderory kuri — he'i.

### *Sodoma ha'e Gomorra omomba aguã re Nhanderuete ijayvuague*

**16** Ha'e gui avakue opu'ãmba vy oo ha'e gui, Sodoma tetã katy oma'ẽ aguã. Abraão voi oo ranhe ha'e kuery rupive tape oexa uka aguã.

**17** SENHOR aipoe'i ojeupe ae:

— Ndaikuaa ukai 'rã ri nda'u Abraão pe mba'e pa ajapo taa?

**18** Mba'eta Abraão gui ma oiko 'rã peteĩ regua hetá ha'e imbaraete va'e. Ha'e hexe vy yvy jave regua ha'e javi 'rã amoingo porã.\*

**19** Mba'eta xee aiporavo ha'e ombo'e aguã gua'y kuery ha'e guamymino kuery araka'eve rã guarã xee aipotaa rami ikuai aguã re, teko porã ha'e ha'eve ramigua anho ojapo aguã. Ha'e nunga rupi Abraão pe xee SENHOR ajapo 'rã hekorã re xeayvuague — he'i.

**20** SENHOR aipoe'ive ju:

— Sodoma ha'e Gomorra pygua kuery reko re opa marã ayvua rã aendu. Ha'e kuery ojejavypave tema oje'oivy.

**21** Ha'e nunga rupi avaẽ 'rã aexa aguã anhetẽ pa aendua rami ha'e kuery ikuiaia. Ha'e rami e'ŷ rã aikuua avi 'rã.

### *Nhanderuete pe Abraão ojerureague*

**22** Ha'e gui ha'e va'e avakue oje'oi Sodoma tetã katy. Ha'e rã Abraão ma SENHOR renonde teri oĩ.

**23** Ha'e rami vy hexe onhemboja vy aipoe'i:

— Heko vai va'e remombaa py remomba avi 'rã teve heko porã va'e?

**24** Xapy'a rei tetã py cinqüenta heko porã va'e ikuai teĩ nda'u remomba nho 'rã tetã? Cinqüenta heko porã va'e remboaxya nda'u nerendui 'rã tetã remomba e'ŷ aguã?

**25** Ejapo eme ha'e rami, heko vai va'e rejukaa py ejukapa avi eme heko porã va'e, heko vai va'e opaa rami ae avi heko porã va'e opa e'ŷ aguã. Tove ha'e ramigua toiko eme. Ndee yvy jave re ikuai va'e rerekhoa reiko va'e ha'eve e'ŷa rami teve 'rã rejoguereko? — he'i.

\* **18:14** Romanos 9.9 \* **18:18** Gálatas 3.8

**26** Ha'e ramo SENHOR ombovai:

— Ha'e gui Sodoma py cinqüenta heko porã va'e ajou ri vy ha'e kuery re vy amboaxy 'rã tetã ha'e javi — he'i.

**27** Ha'e gui Abraão aipoe'ive ju:

— Taxepy'a guaxu xeayvuve aguã Xeruete reve, yvy ku'i, tanhimbu guigua aiko va'eri.

**28** Xapy'a rei heko porã va'e cinqüenta aguã peteñ nhirû'i ri oata ramo remomba nho 'rã teve tetã?

Ombovai:

— Quarenta e cinco ri ha'e py ajou vy namombai 'rã tetã — he'i.

**29** Abraão aipoe'ive ju:

— Ha'e gui xapy'a rei quarenta ri ikuai ramo ha'vy?

Ombovai:

— Quarenta ikuai va'e re vy namombai 'rã — he'i.

**30** Oporanduve ju:

— Ejou vai eme ke SENHOR, xeayvuve ju taa. Ha'vy trinta ikuai ramo ha'e py?

SENHOR ombovai:

— Trinta heko porã va'e ha'e py ajou vy namombai 'rã — he'i.

**31** Abraão ijayvuve tema:

— SENHOR reve xeayvuve ta. Ha'vy vinte ete'i ri ikuai ramo ha'e py?

SENHOR ombovai:

— Namombai 'rã vinte ikuai va'e re vy — he'i.

**32** Abraão aipoe'ive ju:

— Ejou vai eme ke SENHOR, teñgue ju xeayvu taa. Ha'vy dez heko porã va'e ikuai ramo?

SENHOR ombovai:

— Dez-'i ikuai va'e re vy namombai 'rã — he'i.

**33** Abraão ijayvupa ma ramo SENHOR ojepe'a ovy. Ha'e rã Abraão ma ngoo katy ju ojevy.

## 19

### *Ló mokoñ anjo omovañague*

**1** Pytû'i ov yave mokoñ anjo ovañ Sodoma py. Ha'e jave py Ló oguapy oiny tetã py oikea py. Anjo kuery ou rã oexa vy opu'ã ov yave ovaexí aguã. Ovaexí vy guenapy'ã re oñ, yvy re ngova omovañ oiny.

**2** Ha'e vy aipoe'i:

— Añ ma xeruvixa kuery, pevañ ke xee penerembiguai ro py pendepy pejoi ha'e peke aguã. Ko'ë rã aje'ive'i mae ma peguatave ju 'rã.

Ha'e kuery ombovai:

— Ha'e rami avi tetã mbyte py rive roke teñ ha'eve — he'i.

**3** Ló onhea'ã ete ramo mae ma jogueraa hoo py oke aguã. Ha'e ramo omongaru, mbojape ombovu e'ñ re oexy uka vy. Ha'e ramo ha'e kuery okaru.

**4** Onhenomba e'ñ re Sodoma tetã pygua avakue jogueru vyombojere okuapy oo. Kunumigue ha'e tujakue ou okuapy opa rupi gui.

**5** Ha'e rami vy Ló pe ojapukai vy aipoe'i okuapy:

— Mamo tu ikuai avakue pytû'i jave ndero py ovañ va'ekue? Eru oka katy rojavyky rei aguã — he'i okuapy.

**6** Ha'e ramo Ló anho oñ ha'e kuerya py, ha'e omboty okë.

**7** Ha'e vy aipoe'i:

— Xeretarã kuery, ajerure pejapo vai e'ñ aguã.

**8** Ma'ë, mokoñ xerajy kunhatañgue areko xero py. Ha'e va'e kuery ma aru ta perekoxea rami perekoo aguã. Ha'e rã ha'e va'e avakue pe ma pejapo vai eme, xero py amovañ rire.

**9** Ha'e rã ha'e kuery aipoe'i:

— Ejepa ke upé gui!

Ha'e gui joupe-upé ju ijayvu:

— Amboae yvy guigua nhanderekoa py ou va'ekue ri oikuaa potaxe nhandere. Ha'e nunga rupi hexe tema ngoo py omovaë va'ekue gui jajapo vaive 'rã — he'i okuapy. Ha'e vy Ló omboty rei jogueruvy, ha'e omboixe okẽ.

<sup>10</sup> Ha'e ramo ngopy avakue ikuiai gui okuave'ẽ vy ojopy Ló, omoinge ju opy. Ha'e rami vy omboty ju okẽ.

<sup>11</sup> Ha'e gui oexa mboguepa oka py ikuai va'e, kyrīgueve ha'e tujakueve. Ha'e ramo okẽ rekaa rupi rive ikuai ikane'õmba peve.

<sup>12</sup> Ha'e gui mokoï ava aipoe'i Ló pe:

— Apy rerekove pa ndero pygua kuery? Nderajy me kuery, ndera'y kuery, nderajy kuery pa ikuai? Mba'eta rerekova'e ma guive rã eraapa ke tetã gui.

<sup>13</sup> Mba'eta ore romomba ta kova'e tetã. Apygua kuery reko vaia omombe'ua rã SENHOR renonde peve onhendu. Ha'e ramo SENHOR oremboou romomba aguã — he'i.

<sup>14</sup> Ha'e ramo Ló oo vy guajy me kuery pe omombe'u. Ha'e vy aipoe'i:

— Pepu'ã ke, pejepe'a apy gui. SENHOR omomba ta kova'e tetã — he'i tei tajy me kuery "Horyai vy po" he'i okuapy.

<sup>15</sup> Ko'ẽmba ramove anjo kuery peteigue ju ijayvu Ló pe. Ha'e vy aipoe'i:

— Epu'ã ke, erojava heravy ndera'yxy ha'e nderajy mokoïve rerekova'e, tetã okanhy rã pekanhy e'ŷ aguã — he'i.

<sup>16</sup> Ha'e rami tei heko mbegue ramo avakue ojopy ipo re ogueraa, ta'yxy ha'e tajy kuery mokoïve reve. SENHOR omboaxy ramo ogueraa tetã roka peve.

<sup>17</sup> Mombyry'i ma ogueraa maa py anjo kuery va'e regua aipoe'i ixupe:

— Penhave tema, tapeo jepe. Pema'ẽ eme penderakykue re, ha'e yvy joja porã reia rupi peaxapa e'ŷ teria ja pepyta eme. Yvy'ã re tapeo pekanhy e'ŷ aguã — he'i.

<sup>18</sup> Ha'e rã Ló ombovai vy aipoe'i:

— Ha'e rami ma nda'evei xeruvixa.

<sup>19</sup> Ndee ma xemboaxy vy xepytyvõ ete kuri xereraa jepe vy. Ha'e rami avi nda'evei yvy'ã re aa aguã. Akyje aa reve mba'emo vai xerupity ramo aiko vai gui.

<sup>20</sup> Pe'i py oĩ tekao mboae. Ha'e va'e katy taa, mba'eta ndatuvixai. Tove ha'e katy taa, kyrī'i ete ramo. Ha'e py ma xerekove reve 'rã aiko — he'i.

<sup>21</sup> Ha'e rami rã ha'e kuery ombovai:

— Ha'eve ri. Ore noromombai'rã tekao ndeayvuague.

<sup>22</sup> Tereo pojava ha'e py reiko aguã. Mba'eve rei ndajapoi 'rã ha'e py revaẽ e'ŷa ja — he'i. Ha'e rami rire ha'e va'e tetã omboerya Zoar.\*

### Sodoma ha'e Gomorra omombaa ague

<sup>23</sup> Kuaray yvate'i ma ovvy jave Ló ovaë Zoar tekao py.

<sup>24</sup> Ha'e rã Sodoma ha'e Gomorra áry ma SENHOR ombou enxofre ha'e tata, ixuguigua ae ho'a yva gui.

<sup>25</sup> Ha'e rami vy omomba ete tetã, ha'e ha'e katy'i yvy joja porã reia ha'e javi. Tetã py ikuai va'ekue omomba, mba'emo yvy re henhoï va'e ha'e javi reve.

<sup>26</sup> Ha'e gui Ló ra'yxy ma guakykue re oma'ẽ vy juky guigua optya ho'amy.

<sup>27</sup> Ha'e gui Abraão ma ko'ẽ e'ŷ re opu'ã vy oo SENHOR renonde oïague py.

<sup>28</sup> Sodoma ha'e Gomorra tetã katy oma'ẽ ho'amy. Ha'e vy oexa rã yvy joja porã reia ha'e javi gui hataxí opu'ã ovvy, tata rupa gui hataxí opu'ãa rami.

<sup>29</sup> Yvy joja porã reia re tetã ikuai va'ekue Nhanderuete omomba tei Abraão re ima'endu'a vy ogueraa jepe ta'y kyrī Ló hetã omomba ta va'e mbyte gui.

### Moabita ha'e amonita kuery ypy rekokue oĩa

\* <sup>19:22</sup> Tery Zoar ma "Kyrī'i va'e" 'ea.

<sup>30</sup> Ha'e gui Zoar tekaoa py Ló oikoxe teñ okyje vy ojepo'a ju ha'e gui, guajy mokoõve reve. Yvy'ã re ju oo, ha'e peteñ itakua oĩ va'e py ikuai guajy kuery reve.

<sup>31</sup> Ha'e gui tajy guaiguõve va'e aipoe'i kyrõve va'e pe:

— Nhanderu ma tuja'i ma, ha'e jipoí avakue kova'e yvy re nhanemerã ikuai va'e, nhanderekorã va'ekue rami vy nhamenda aguã.

<sup>32</sup> Jaa, nhamboy'u vinho py. Ha'e gui nhanheno hexeve, nhanderu gui ae nhanememby aguã ta'yrã — he'i.

<sup>33</sup> Ha'e rami vy ha'e va'e pyávy nguu pe ome'ẽ vinho oy'u aguã. Ha'e gui guaiguõve va'e ovaẽ vy nguu reve onheno oikuua e'ŷ re. Tajy onheno rã noendui, neñ opu'ã jevy ramo voi noendui.

<sup>34</sup> Ha'e gui ko'ëgue guaiguõve va'e aipoe'i kyrõve va'e pe:

— Kuee pyávy xee anheno va'ekue xeru reve. Ha'e gui kova'e pyávy ha'ekue rami ju jajapo vinho oy'u aguã. Ha'e gui ndee ju evaẽ enheno hexeve, ixugui nhanememby aguã ta'yrã — he'i.

<sup>35</sup> Ha'e va'e pyávy ha'ekue rami ae ju nguu pe vinho ome'ẽ oy'u aguã. Ha'e gui tajy kyrõve va'e ju ovaẽ vy onheno nguu reve oikuua e'ŷ re. Onheno rã tuu noendui, neñ opu'ã ramo voi ndoikuuai.

<sup>36</sup> Ha'e rami py Ló rajy kuery mokoõve nguu gui ae imemby.

<sup>37</sup> Guaiguõve va'e ma peteñ ava'i oikuavã vy omboery Moabe. Ha'e va'e ramymino kuery ma Moabe pygua kuery aŷ peve ikuai va'e.

<sup>38</sup> Ha'e gui kyrõve va'e voi peteñ ava'i oikuavã avi vy omboery Ben-Ami. Ha'e va'e ramymino kuery ma Amom pygua kuery aŷ peve ikuai va'e.

## 20

### *Gerar py Abraão ha'e Sara ikuai jave guare*

<sup>1</sup> Abraão guekoáa gui oẽ vy Neguebe yvy katy ju oo. Ha'e py ju oiko Cades ha'e Sur mbyte re, Gerar py ae.

<sup>2</sup> Gua'xy Sara pe "Xereindy" he'i ramo Gerar pygua huvixa Abimeleque ogueru ruka.

<sup>3</sup> Pyávy Abimeleque oexa ra'u rã Nhanderuete ojexa uka. Ha'e vy aipoe'i ixupe:

— Kunha va'e reipe'a ramo rombopaga 'rã remano peve, omenda va'e ramo — he'i.

<sup>4</sup> Ha'e jave kunha va'e reve Abimeleque ndajoguerekoi teri. Ha'e rami vy aipoe'i:

— SENHOR, rejuka ta va'e ty'y heko porã va'e?

<sup>5</sup> Mba'eta ime ae "Xereindy" he'i, ha'e kunha va'e voi ixupe "Xekyvy" he'i. Ha'e nunga rupi rima xee potae vy e'ŷ ajapo, ajapo vaixe vy e'ŷ — he'i.

<sup>6</sup> Nhanderuete ombovai oexa ra'u rã:

— Aikuua porã potae vy e'ŷ rejapoague. Ha'e nunga rupi ae xee rojoko xerovai rejavy e'ŷ aguã, ha'e kunha va'e reve rejoguerekoi e'ŷ aguã.

<sup>7</sup> Aŷ ma eraa ju imea py, mba'eta profeta oiko. Ha'e ma ndere ojerure ramo reikove 'rã. Ha'e rami avi ime pe kunha va'e ndereraai ju ri vy reikuua anhetẽ ete remano 'rãa, nerembiguai kuery ha'e javi reve — he'i.

<sup>8</sup> Ko'ẽ rai'i jave Abimeleque opu'ã vy oenoõmba guembiguai kuery, ha'e vy omombe'upa. Ha'e ramo avakue oendu vy onhemondyipa okuapy.

<sup>9</sup> Ha'e gui Abimeleque oenoõ uka Abraão. Ha'e vy aipoe'i ixupe:

— Mba'e tu rejapo orere? Mba'e nunga py tu ajejavy ndevy? Mba'eta ha'e rami ete ndee xererojejavý ha'e xerembiguai kuery guive. Nda'evei va'e rejapo va'ekue xere.

<sup>10</sup> Mba'exa tu renhembopy'a ha'e nunga rejapo aguã? — he'i Abraão pe.

<sup>11</sup> Abraão ombovai:

— Mba'eta xee ma xejeupe ae aipoa'e: "Kova'e tekaoa pygua kuery ma Nhanderuete renonde ojererokyjea rupi e'ŷ ikuai vy xejuka 'rã xera'yxy káuxa", ha'e va'ekue.

<sup>12</sup> Ha'e rami avi anhetẽ ae xereindy oiko, xeru rajy oiko vy, va'eri ha'i memby e'ŷ ta'vy oiko. Ha'e rami vy rima hexe amenda karamboae.

<sup>13</sup> Ha'e nunga rupi aguata-guata aguã xeru ro gui Nhanderuete xemondouka jave aipoa'e va'ekue xera'yxy pe: "Po rami 'rã ndee xepytyvõ nhavaëa nhavõ rupi, Xevy 'Xekyvy' 're 'rã", ha'e va'ekue ixupe.

<sup>14</sup> Ha'e rami rã ixupe Abimeleque ogueru ruka vexa'i, vaka, ha'e tembiguai kuery avakue ha'e kunhague, omboaxapa Abraão pe. Ta'yxy Sara avi omboaxa ju ime pe.

<sup>15</sup> Ha'e vy Abimeleque aipoe'i:

— Xeyvy ha'e javi ma nerentonde itui. Eĩ tema reĩxeá py rei — he'i.

<sup>16</sup> Ha'e gui Sara pe ju aipoe'i:

— Ma'ẽ, ndekyvy pe ame'ẽ ta mil hatã'i va'e prata guigua, ndere oiko va'ekue ha'e javi rekovia. Ha'e ramo pavẽ oikuaa 'rã nderekó porã va'ea — he'i.

<sup>17</sup> Ha'e gui Abraão ojerure ramo Nhanderuete omonguera Abimeleque, ta'yxy ha'e hembiguai kuery, ta'y jevy aguã rami.

<sup>18</sup> Mba'eta Abraão ra'yxy Sara káuxa SENHOR ojapo rire kunhague Abimeleque ro py ikuai va'e ha'e javi imembry ve'ŷ aguã rami.

## 21

### *Isaque itui'iague*

<sup>1</sup> SENHOR ijayvuague rami vy Sara pe ojekuaa uka vy ojapo ijayvuague.

<sup>2</sup> Ha'e ramo Sara oguerekó'i, ha'e vy oikuavã peteĩ ava'i. Nhanderuete oa'angaague ára py ae Abraão tuja'i ma va'eri ta'y, SENHOR ijayvuague rami vy.

<sup>3</sup> Sara pi'a'i itui'i va'ekue Abraão omboery Isaque.

<sup>4</sup> Ta'y Isaque oito ára oguerekoa py Abraão omboi ipire, Nhanderuete ojapo ukaague rami vy ae.

<sup>5</sup> Abraão cem ma'etŷ ma oguerekó ta'y Isaque oiko jave.

<sup>6</sup> Ha'e gui Sara aipoe'i:

— Aŷ ma Nhanderuete xeapo xerory ju aguã rami. Ha'e ramo pavẽ ha'e nunga oendu vy hory avi 'rã xererovy'a vy.

<sup>7</sup> Avave rei noexa'ái va'ekue xee Sara amokambu'i aguã re xepi'a'i Abraão ra'y, tuja'i vaipa ma va'eri ta'vy — he'i.

### *Tekoa e'ŷa rupi Agar oguata jave guare*

<sup>8</sup> Ava'i Isaque tuvixa ovvy vy nokambuvei. Ha'e ramo nokambuveia ára Abraão ojapo peteĩ ngaru tuvixa va'e.

<sup>9</sup> Ha'e va'e javegua py oĩ avi Egito guigua Agar pi'a, Abraão ra'y mboae va'e. Ha'e va'e ma oojai rei Isaque. Ha'e nunga Sara oexa vy

<sup>10</sup> aipoe'i Abraão pe:

— Emontouka na peva'e tembiguai ipi'a reve. Nda'evei ipi'a mba'emo reja va'e ojopy avi aguã xepi'a Isaque reve — he'i.\*

<sup>11</sup> Ha'e nunga Abraão oendu vy nda'evei gua'y jypyguia re.

<sup>12</sup> Ha'e rami teĩ Nhanderuete aipoe'i Abraão pe:

— Ndeporiau eme ndera'y ha'e ixý nerembiguai re oiko va'e re. Endu ke ndera'yxy Sara ijayvua ha'e javi, mba'eta Isaque ramymino kuery pe ae 'rã "Abraão ramymino kuery" 'ea.\*

<sup>13</sup> Ha'e gui nerembiguai pi'a ramymino kuery voi amboeta 'rã, ndera'y oiko avi ramo — he'i.

\* **21:10** Gálatas 4.30   \* **21:12** Romanos 9.7, Hebreus 11.18

<sup>14</sup> Ha'e ramo ko'ẽ e'ŷ mbove Abraão opu'ã vy Agar pe ome'ẽ mbojape ha'e peteĩ hyru yy. Ikupe re omoĩ. Ixupe omboaxa avi ipi'a'i. Ha'e rami vy omondouka. Ha'e ramo kunha va'e oo vy oguata rei oikovy Berseba katy tekao e'ŷa oĩ va'e rupi.

<sup>15</sup> Ha'e gui yy hyru py opa ma ramo opi'a omonheno yvyra'i hi'aĩ va'e guy py.

<sup>16</sup> Ha'e vy ojepe'a vy oo ava'i ituia gui mombyry'i, hu'y nhamombo ramo oguerovya rami peve, "Ava'i omano rã aexa aguã nda'evei" he'i vy. Ha'e rami vy ha'e py oguapy vy haxẽ reve ojae'o.

<sup>17</sup> Ha'e gui Nhanderuete ma ava'i va'e haxẽ rã oendu. Ha'e rami vy yva gui Nhanderuetea guigua anjo oenoĩ Agar. Ha'e vy aipoe'i:

— Agar, mba'e tu rereko? Ekyje eme, mba'eta Nhanderuete oendu ava'i ituia py haxẽa.

<sup>18</sup> Epu'ã ke, emopu'ã imo'amy ava'i ndepo py rejopy reve, mba'eta amboeta ete 'rã hamymino kuery — he'i.

<sup>19</sup> Ha'e gui Nhanderuete kunha va'e rexo oipe'a ramo oexa peteĩ ygua. Ha'e py oo vy omonyé ju yryru, ha'e opa'i pe ome'ẽ oy'u aguã.

<sup>20</sup> Ava'i va'e tuja ovv rã Nhanderuete oiko hexeve. Tekoa e'ŷa rupi oiko guyrapa ha'e hu'y reveguia.

<sup>21</sup> Parã yvy regua tekao e'ŷa rupi oiko. Ha'e gui ta'yxyrã ixy ojou peteĩ kunha Egito pygua.

### *Abimeleque reve Abraão peteĩ rami ikuai aguã ojapoague*

<sup>22</sup> Ha'e jave ma Abimeleque ha'e ojeupagua xondaro ruvixa Ficol reve aipoe'i Abraão pe:

— Opa mba'e rejapoa py Nhanderuete oiko ndereve.

<sup>23</sup> Ha'e nunga rupi aŷve eura xevy Nhanderuete rery rupi, xevy ndeapu e'ŷ aguã, xera'y pe, neĩ xeramymino pe. Ndevy ajapo porãague rami xevy ju rejapo porã aguã, ha'e xeyvy re reikoague re voi — he'i.

<sup>24</sup> Abraão ombovai vy

— Aura 'rã — he'i.

<sup>25</sup> Ha'e rami teĩ Abimeleque pe Abraão ijayvu ete, hembiguai kuery peteĩ ygua oipe'a nhea'ã okuapyague re.

<sup>26</sup> Ha'e ramo Abimeleque ombovai:

— Xee ndaikuai mava'e pa ha'e ramigua ojapo. Avave rei ndoikuua ukaai teri xevy, neĩ ruxã'i ma voi naendui kova'e ára e'ŷ vy — he'i.

<sup>27</sup> Ha'e ramo Abimeleque reve Abraão ojapo peteĩ rami ikuai aguã. Ha'e rami vy vexa'i ha'e vaka ogueru vy ome'ẽ Abimeleque pe.

<sup>28</sup> Sete vexa'i kunha Abraão oiporavo vy mymba kuerya gui ha'e kuery ae'i ikuai aguã py omoĩ.

<sup>29</sup> Ha'e ramo Abimeleque oporandu Abraão pe:

— Mba'erã tu sete vexa'i ri reipe'a?

<sup>30</sup> Abraão ombovai:

— Xepo gui rejopy 'rã pee py sete vexa'i ikuai va'e, xee ae kova'e ygua ajo'o ukaague kuaa ukaarã — he'i.

<sup>31</sup> Ha'e rami rire ha'e va'e henda hery Berseba, ha'e py oura okuapy rire.\*

<sup>32</sup> Ha'e rami vy peteĩ rami ikuai aguã re jogueroayvu Berseba py. Ha'e rire Abimeleque ha'e xondaro ruvixa Ficol opu'ã vy ojevypa ju filisteu kuery yvy katy.

<sup>33</sup> Berseba py Abraão onhotõ tamargueira. Ha'e py ojapukai guive SENHOR Nhanderuete imarã e'ŷ va'e rery rupi.

<sup>34</sup> Filisteu kuery yvy re Abraão oiko are.

---

\* <sup>21:31</sup> Tery Berseba ma "Ygua ouraague" 'ea.

**1** Ha'e va'e rire Nhanderuete oeko a'ã Abraão. Ha'e vy  
— Abraão — he'i ixupe.

Ombovai:

— Apy ma aĩ.

**2** Nhanderuete aipoe'i:

— Ejopy ndera'y peteĩ'i Isaque reayvu ete va'e, ha'e eraa Moriaá yvy re. Ha'e py reme'ẽ 'rã xevy reapy vy, peteĩ yvyty xee aexa uka va'erã áry — he'i.

**3** Ha'e gui ko'ẽ e'ŷ mbove Abraão opu'ã. Guymba mburika oguereko katupa ma vy ogueraa mokoõ guembiguai, gua'y Isaque guive. Yxakã omboa'y uka omoendy aguã. Ha'e gui oo Nhanderuete aipoe'iague katy.

**4** Mboapy ára ma ooa py Abraão oma'ẽ vy oexa oxsea mombyry gui.

**5** Ha'e vy aipoe'i guembiguai kuery pe:

— Peẽ kuery orerarõ 'rã apy mburika'i reve. Ha'e rã xee ma kunumi va'e reve 'rã roo kii rami. Nhanderuete romboetepa ma vy rojevy ju 'rã peẽa py — he'i.

**6** Ha'e vy yxakã omoendy va'erã Abraão ojopy vy ombovoyi gua'y Isaque. Ha'e rã ta'y ma opo py ogueraa tata ha'e kyxe. Ha'e rami vy jogueraa.

**7** Ooa rupi Isaque aipoe'i nguu Abraão pe:

— Xeru.

Ombovai:

— Apy ma aĩ xera'y.

Isaque oporandu:

— Apy ma tata, yxakã guive oĩ. Mamo tu oĩ vexa'i jajuka ha'e japy va'erã?

**8** Ombovai:

— Xera'y, Nhanderuete ae 'rã ojou uka vexa'i japy va'erã — he'i. Ha'e gui oove tema joupive.

**9** Ha'e gui ovaẽ ma Nhanderuete ijayvuague py. Ha'e py ma Abraão ojapo peteĩ altar SENHOR pe. Ha'e va'e áry omoõ yxakã. Ha'e gui ojokua gua'y Isaque, ha'e altar áry omonheno yxakã oĩ va'e áry.

**10** Opo omondouka vy ojopy kyxe gua'y ojuka aguã.

**11** Ha'e ramo anjo SENHOR-a guigua ijayvu nhendu yva gui. Ha'e vy aipoe'i:

— Abraão! Abraão!

ombovai vy

— Apy ma aĩ — he'i.

**12** Ha'e ramo aipoe'i:

— Eupi eme ndepo kunumi va'e rejuka aguã, mba'eve ejapo eme hexe. Mba'eta aŷ ma aikuaa Nhanderuete renonde rejererokyjea rupi reiko va'ea, ndera'y peteĩ'i va'e xevy nereme'ëxe e'ŷi rire — he'i.

**13** Abraão guakykue katy oma'ẽ vy oexa peteĩ vexa'i guakua re ojejura oiny va'e jai rogue hi'aĩ va'e re. Ha'e rami vy vexa'i ojopy vy oapy gua'y rekovia.

**14** Ha'e va'e henda Abraão omboery “SENHOR ojou uka 'rã”. Ha'e rami rire aŷ peve “SENHOR pegua yvyty re ojou uka 'rã", 'ea.

**15** Ha'e gui mokoõguea ma anjo SENHOR-a guigua ijayvu Abraão pe yva gui.

**16** Ha'e vy SENHOR aipoe'i:

— Xerery rupi ae aura: Nami rejapo, ndera'y peteĩ va'e xevy nereme'ëxe e'ŷi rire ma

**17** xee romoingo porã 'rã. Anhetẽ amboeta 'rã neramymino kuery jaxy-tata yva re ikuai va'e rami, ha'e ita ku'i ye'ẽ yvýry ikuai va'e hetaa rami. Neramymino kuery ipo'aka 'rã ngovaigua kuery retã re.\*

**18** Ha'e kuery re vy yvy regua kuery ha'e javi 'rã amoingo porã, xeayvua rejapo rire — he'i.\*

---

\* **22:17** Hebreus 6.14 \* **22:18** Atos 3.25

<sup>19</sup> Ha'e ramo Abraão ojevy ju guembiguai kuerya py. Oo joupive guekoa Berseba katy. Ha'e py ju hekoia.

### *Naor ramymino kuery rery oĩa*

<sup>20</sup> Ha'e va'e rire Abraão oendu “Milca voi oikuavã ma kyrīgue, nderyvy Naor ra'y” 'ea rã

<sup>21</sup> Po rami hery oĩ: tujave va'e ma Uz, tyvy Buz, Arã rurã Quemuel,

<sup>22</sup> ha'e gui Quésede, Hazo, Pildas, Jidlafe ha'e Betuel.

<sup>23</sup> Betuel rajy ma Rebeca. Ha'e va'e kuery irundy meme ma Milca memby kuery ikuai, Abraão ryvy Naor ramymino kuery.

<sup>24</sup> Naor ra'yxy jevy ma Reumá hery va'e. Ha'e voi oguereko kyrīgue: Teba, Gaã, Taás ha'e Maaca.

## 23

### *Sara omanoague*

<sup>1</sup> Ha'e gui Sara ma cento e vinte e sete ma'etõ re oikoa py

<sup>2</sup> omano Quiriate-Arba tetã Hebron 'epy va'e py, Canaã yvy re ae. Ha'e ramo Abraão ou vy ojae'o ipy'a vai vy.

<sup>3</sup> Ha'e va'e rire Abraão opu'ã ju omano va'ekue ituia gui. Ha'e vy ijayvu Hete ra'y kuery ikuai va'e pe:

<sup>4</sup> — Xee ma yvy mboae guigua aiko pendeyvy re. Peme'ẽ xevy ha'vy omano va'ekue ruparã pendeyvy re, xera'yxy retekue anhono porã aguã — he'i.

<sup>5</sup> Hete ra'y kuery ombovai vy Abraão pe aipoe'i:

<sup>6</sup> — Xeruvixa, endu ke oreayvu. Ndee ma orembyte reiko Nhanderuete huvixarã omoõ va'ekue rami. Yvyra rupa iporãve va'e py tema enhono porã ndera'yxy retekue. Ore kuery regua mava'eve norome'ẽ e'ŷi'rã yvyra ruparã va'e, omano va'ekue renhono porã aguã — he'i.

<sup>7</sup> Ha'e ramo Abraão opu'ã vy guenapy'ã re oĩ ha'e va'e tekoia pygua kuery ha'e Hete ra'y kuery renonde.

<sup>8</sup> Ha'e vy aipoe'i ha'e kuery pe:

— Xapy'a rei omano va'ekue anhono porã aguã pejou porã ri vy pejapyxaka. Xerekovia pejerure Zoar ra'y Efrom pe,

<sup>9</sup> xevy ome'ẽ aguã Macpela re itakua oĩ va'e, mba'eta ijyvy apy re oĩ. Hepya rami porã tovende xevy, pendeyvy mbyte re anhono porã aguã — he'i.

<sup>10</sup> Ha'e gui heteu regua Efrom ou vy oguapy oiny Hete ra'y kuery mbyte. Tetã kora rokẽ rupi oike va'e ha'e javi oendua py ijayvu, ha'e vy aipoe'i Abraão pe:

<sup>11</sup> — Any teve xeruvixa, endu ke. Xeyvy ame'ẽmba rive 'rã ndevy, itakua oĩ va'e guive. Xeretarã ra'y kuery pavẽ renonde ame'ẽ ndevy. Enhono porã tema omano va'ekue — he'i.

<sup>12</sup> Ha'e ramo Abraão guenapy'ã re oĩ tekoia pygua kuery renonde.

<sup>13</sup> Tekoa pygua kuery oendua py ijayvu ju Efrom pe:

— Ha'e rami teĩ rejou porã ri ramo ajerure rejapyxaka aguã re. Ndeyvy repy 'rã xee ame'ẽ. Ejopy ke xepo gui. Ha'e ramo 'rãe xera'yxy retekue anhono porã ha'e py — he'i.

<sup>14</sup> Ha'e ramo Efrom ombovai:

<sup>15</sup> — Xeruvixa, endu ha'vy. Peteĩ yvy quattrocentos hatã'i va'e prata guigua ovare va'e, mba'e tu ha'e nunga xevy ha'e ndevy? Enhono porã katu ha'e py ndera'yxy retekue — he'i.

<sup>16</sup> Ha'e rami Efrom ijayvu rã Abraão oendu vy oa'ã prata ha'e ome'ẽ ixupe. Hete ra'y kuery oexaa py ome'ẽ, ijayvuague rami vy quattrocentos hatã'i va'e prata guigua, mba'emo vendea oiporuve va'e regua.

<sup>17</sup> Ha'e rami Efrom yvy Macpela re oĩ va'e Manre katy'i, yvy, itakua ha'e yvyra ikuai va'e ha'e javi

<sup>18</sup> ovendepa Abraão pe, Hete ra'y kuery ha'e tetã kora rokẽ py ikuai va'e ha'e javive oendua py.

<sup>19</sup> Ha'e rire Abraão onhono porã gua'yxy Sara retekue itakua py, Macpela yvy re Manre katy'i. Ha'e va'e tekoa ma Hebron, Canaã yvy re oĩ.

<sup>20</sup> Ha'e rami py Hete ra'y kuery Abraão pe ovende raka'e yvy ha'e itakua oĩ va'e, ta'yxy omano va'ekue ruparã.

## 24

### *Guembiguai pe Abraão Isaque ra'yxyrã ojou ukaague*

<sup>1</sup> Ha'e rire Abraão tuja'i ete ma, heta ma'etõ ma oguereko, ha'e opa mba'e py SENHOR omoingo porã.

<sup>2</sup> Ha'e ramo Abraão ijayvu guembiguai hoo py ikuai va'e gui inhymave va'e, opa mba'e oguereko va'e re opena va'ety pe. Ha'e vy ixupe aipoe'i:

— Emoĩ ndepo xe'u guy rupi,

<sup>3</sup> ha'e eura SENHOR Nhanderuete yva ha'e yvy ha'e javi re ipo'aka va'e rery rupi, xera'y ra'yxyrã rejou aguã teĩ Canaã yvy apy aikoa py ikuai va'e rajy kuery regua e'ŷ guive.\*

<sup>4</sup> Ha'e rã xeretarã kuerya py ae 'rã reo, ha'e va'e regua rejou aguã xera'y Isaque ra'yxyrã — he'i.

<sup>5</sup> Ha'e ramo hembiguai aipoe'i:

— Xapy'a rei ma kunha va'e ndouxei 'rã xerupive kova'e yvy re. Ha'e rami rã nderay teve 'rã araa yvy rejuvenate katy?

<sup>6</sup> Abraão ombovai:

— Nda'evei! Ejapo eme xera'y ha'e katy ojevy aguã rami.

<sup>7</sup> Mba'eta SENHOR Nhanderuete yva pygua xepe'a karamboae xeru ro ha'e yvy xetuiague gui, ha'e xevy oura reve "Kova'e yvy ame'ẽ 'rã neramymino kuery peguarã", he'i va'ekue. Ha'e rami vy nerendirondé omondouka 'rã guembiguai anjo. Ha'e ramo ha'e va'e yvy gui 'rã reru xera'y ra'yxyrã.\*

<sup>8</sup> Ha'e gui xapy'a rei kunha va'e nderupive ndouxei ramo toaxa rive reuraague. Ha'e rami teĩ eraa eme xera'y ha'e katy — he'i.

<sup>9</sup> Ha'e ramo opatõ Abraão 'u guy rupi hembiguai opo omoĩ reve oura ijayvuague ramo ojapo aguã re.

<sup>10</sup> Ha'e rami vy dez camelو hembiguai ogueraa opatõ rymba, ha'e mba'emo porã ipatõ ogueraa uka va'ekue ha'e javi. Mesopotâmia katy ojepe'a ovu, Naor kuery retã katy ae.

<sup>11</sup> Hetã py ovaẽ rai'ia py peteĩ ygua oĩ va'e yvýry ovaẽ. Ha'e py omombytu'u ranhe mymba camelò henap'yã re. Ka'aru jave kunhataígue yy re ouaty hora omombytu'u imbokuapy.

<sup>12</sup> Ha'e vy aipoe'i opy'a py:

— SENHOR, xepatõ Abraão Ruete reiko va'e, ajerure ndevy xepytyvõ aguã, ha'e xepatõ Abraão voi remboaxy aguã.

<sup>13</sup> Mba'eta xee ma apy aĩ ygua rexel'i, kunhague kova'e tetã pygua rajy kuery yy re ouaty py.

<sup>14</sup> Ha'e nunga rupi tove kunhataí xevy aipoa'ea va'e: "Emboguejy yryru ay'u aguã", ha'e ramo "Ey'u, ha'e nerymba camelò kuery avi 'rã amboy'u", he'i va'e ae toiko nerembiguai Isaque ra'yxyrã reiporavo va'ekue. Ha'e ramo 'rãe aikuaa xepatõ remboaxy maa — he'i.

### *Rebeca reve Isaque nhovaexiague*

\* <sup>24:3</sup> Ha'e va'e jave ma ha'e kuery ouraa ovareve aguã opo omoĩ 'rã jo'u guy rupi oura vy. \* <sup>24:7</sup> Gálatas 3.16

<sup>15</sup> Ha'e rami teri ijayvu ho'amy jave tetā gui oẽ ouvy Rebeca, Betuel rajy va'e. Tuu ma Abraão ryke'y Naor ra'y, ha'e Milca pi'a. Peteĩ yryru ogueru oiny oaxi'y áry.

<sup>16</sup> Ha'e va'e kunhataĩ ma iporã vaipa, ava reve joguerekova'e'ý teri. Ha'e gui ygua py oo vy o'ryru omonyẽ ma vy ou ju.

<sup>17</sup> Ha'e va'e jave py tembiguai oo vy ovaexi. Ha'e vy aipoe'i:

— Eme'ẽ yy nde'ryryu gui ay'u aguã.

<sup>18</sup> Kunha va'e ombovai:

— Ey'u katu xeruvixa — he'i. Ha'e rami vy yryru omboguejy pojava vy ojopy reve ombojero'a omboy'u aguã.

<sup>19</sup> Omboy'upa ma vy aipoe'i:

— Anoẽve ta nerymba camelou kuery pe ju ha'e javive oy'u peve — he'i.

<sup>20</sup> Ha'e rami vy ojapura reve onhoẽ mymba oy'uaty py, ha'e onha ju ovy ygua katy ojarave aguã. Ogueruve ju vy camelou kuery ha'e javive omboy'u.

<sup>21</sup> Ava va'e ijayvu e'ý re oma'ẽ oiny oikuua porâxe vy SENHOR anhetẽ pa ha'e oguataa py oipytyvõa, tyraanya.

<sup>22</sup> Camelou kuery ha'e javive oy'u ma ramo ava va'e oguenoẽ peteĩ ojere'i va'e ouro guigua hatã'i va'e rami rai ipoyi va'e, ha'e mokoõ poapy regua ouro guigua dez hatã'i va'e rami ipoyi va'e.

<sup>23</sup> Ha'e vy oporandu kunha va'e pe:

— Xee ajerure remombe'u aguã: Mava'e rajy tu ndee? Ha'eve 'rã nda'u nderu ropy ake aguã, ha'e xerupive ou va'ekue guive?

<sup>24</sup> Ombovai:

— Xee ma Betuel rajy. Xeru ma Naor ra'yxy Milca pi'a.

<sup>25</sup> Ha'e gui roguerekova'e reta mba'emo pire ha'e nhuã. Peke aguã voi ha'eve — he'i.

<sup>26</sup> Ha'e rami rã ava va'e guenapyã re oĩ vy ombojerovia SENHOR.

<sup>27</sup> Ha'e vy aipoe'i:

— Ta'ima'endu'a porãmby toiko SENHOR, xepatõ Abraão “Xeruete” he'ia, mba'eta nomboaxy e'ýi xepatõ, neĩ anhetẽ rupi ndogueroko e'ýi. Xeraperã re SENHOR xembo'e ra'e xepatõ retarã kuery ro py ae avaẽ aguã — he'i.

<sup>28</sup> Ha'e rami rã kunhataĩ va'e onha ovy, ha'e oxy kuery ro py omombe'upa.

<sup>29</sup> Rebeca oguerekova'e retu re'ã apy oka py? Xeropy rupi areko katupa ma, nerymba camelou ikuai aguã guive — he'i.

<sup>30</sup> Ojere'i va'e ha'e poapy regua gueindy poapy re oexa vy, ha'e heindy “Po rami ava va'e ijayvu xevy” he'i. Ha'e ramo Labão oendu vy oo ovaexi camelou reve, ygua yvy'iry hi'aña py.

<sup>31</sup> Ha'e vy aipoe'i ixupe:

— SENHOR nemoingo porã va'e, evaẽ ke. Mba'e re tu re'ã apy oka py? Xeropy rupi areko katupa ma, nerymba camelou ikuai aguã guive — he'i.

<sup>32</sup> Ha'e rami vy omovaẽ. Camelou kuery áry gui mba'emo omboguejypa vy ome'ẽ mba'emo pire ha'e nhuã. Yy guive ogueru ruka ava va'e py ojoi aguã, avakue hupive ou va'ekue pe voi.

<sup>33</sup> Tembi'u guive ogueru.

Ha'e ramo ava va'e aipoe'i:

— Xee ndakaru reguai amombe'upa e'ý re mba'erã pa ajua.

Labão ombovai:

— Emombe'u ma'vy — he'i.

<sup>34</sup> Ha'e ramo aipoe'i:

— Xee ma Abraão rembiguai aiko.

<sup>35</sup> SENHOR omoingo porã ete xepatõ. Ha'e ramo oguerekopa: vexa'i, vaka, prata, ouro, guembiguai avakue ha'e kunhague, guymba camelou ha'e mburika'i.

**36** Sara xepatō ra'yxy kakuaa vaipa oikoa py oikuavā op'i'a. Ha'e va'e pe ma tuu ome'ẽmba oguerekō va'e ha'e javi.

**37** Ha'e gui xepatō xeapo karamboae aura aguã rami. Ha'e vy aipoe'i: "Xera'y ra'yxyrã rejou vy nda'evei kunhague Canaã yvy xee aikoa va'e regua rejou aguã.

**38** Ha'e rami 'rãgue py xeru ro py 'rã reo, xeretarã kuerya py ae. Ha'e gui 'rã reru xera'y ra'yxyrã", he'i va'ekue xevy.

**39** Ha'e ramo xepatō pe "Xapy'a rei ma kunha va'e ndouxei 'rã xerupive", ha'e.

**40** ramo ombovai: " SENHOR hexeve aikoa va'e ombou 'rã guembiguai anjo neptytyvðarã, xeretarã kuery ha'e xeru ro py ae rejou aguã xera'y ra'yxyrã.

**41** Ha'e rami avi xeretarã kuerya py reo ramo kunha va'e ha'e kuery nombou ukaxei ramo ma toaxa rive reuraague", he'i va'ekue xevy.

**42** Ha'e gui ange ygua py avaẽ vy aipoa'e xejeupe: "Xepatō Abraão SENHOR 'Xeruete' he'ia va'e, xapy'a rei aguataa rupi xepytyvõ ramo ma,

**43** apy ma aĩ aŷ ygua yvy'iry. Tove kunhatai yy re ou va'e pe aipoa'e ramo 'Eme'ẽ na yy ruxã'i tay'u nde'yryru gui', ha'e rã

**44** xevy 'Ey'u, ha'e nerymba camelو kuery pe voi ajara 'rã', he'i va'e, ha'e va'e ae toiko xepatō ra'y ra'yxyrã SENHOR oiporavo va'ekue", ha'e va'ekue.

**45** Ha'e nunga re teri xepy'a ainy jave oẽ ouvy Rebeca. Yryru oaxi'y áry ogueru va'e reve ygua py oo vy ojara yy. Ha'e gui xee aipoa'e: "Ajerure ndevy eme'ẽ na ay'u aguã", ha'e

**46** ramo ome'ẽ pojava. Ha'e vy oaxi'y áry gui yryru omboguejy vy aipoe'i: "Ey'u, ha'e nerymba camelو kuery pe voi ame'ẽ 'rã oy'u aguã", he'i. Ha'e ramo ay'u, xerymba camelو kuery voi omboy'u.

**47** Ha'e gui ixupe aporandu: "Mava'e rajy tu ndee?" Ha'e ombovai: "Betuel rajy aiko. Xeru ma Naor ra'y, Milca pi'a va'e", he'i. Ha'e ramo ixĩ re amoĩ ojere'i va'e, ha'e rã ipoapy re ma poapy regua amoĩ.<sup>†</sup>

**48** Ha'e vy xerenapy'ã re aĩ vy ambojerovia SENHOR. Xema'endu'a porã SENHOR xepatō Abraão "Xeruete" he'ia va'e re, mba'eta tape ha'evea rupi xererekō rire, xepatō retarã rajy ae ajou aguã rami ta'y ra'yxyrã.

**49** Ha'e gui aŷ ma xapy'a rei xepatō pe iporã va'e ha'e anhetẽ rupigua ri pejapoxe vy pemombe'u xevy. Ha'e rami e'ŷ ramo pemombe'u porã avi xevy, xee aikuua aguã jaiporu kuaa regua katy aa aguã, e'ŷ vy jaiporu kuaa e'ŷa katy – he'i.

**50** Ha'e ramo Labão ha'e Betuel ombovai:

— Ha'e nunga ma SENHOR gui ae oiko ra'e. Ore ma mba'eve rei oreayvurã ndoroikuaai, anhetẽ va'e remombe'u ramo.

**51** Upe hiny Rebeca nerendir. Eraa, tapeo. Toiko nepatō ra'y ra'yxyrã, SENHOR ijayvuague rami vy – he'i.

### *Rebeca re Isaque omendaague*

**52** Ha'e rami ombovai rã Abraão rembiguai oendu vy guenapy'ã re oĩ SENHOR renondre.

**53** Ha'e oguenoẽ mba'emo porã: ouro, prata guigua ha'e tupyja. Rebeca pe ome'ẽmba. Ikyvy pe, ixy pe avi ome'ẽ mba'emo porã.

**54** Ha'e rire mae okaru ha'e oy'u okuapy, avakue hupive ou va'ekue reve. Pytũ oaxa okuapy.

Ko'ẽ rai ramove tembiguai opu'ã vy aipoe'i:

— Xemondouka ju xepatōa katy.

**55** Ha'e rã ikyvy ha'e ixy aipoe'i:

— Tove, kunha va'e toptytave'i ranhe dez ára ri jepe. Ha'e gui mae ma 'rã oo – he'i.

**56** Ha'e ramo aipoe'i:

<sup>†</sup> **24:47** Ha'e va'e jave py kunhague omombu uka 'rã oxĩ, aŷgua onambi omombu ukaa rami avi, ijegua va'e omoĩ aguã.

— Nda'evei ha'e rami aguã, aguataa rupi SENHOR xepytyvõ rire. Xemondouka ju xepatõa katy.

<sup>57</sup> Aipoe'i okuapy:

— Nhaenoĩ ha'vy kunhataĩ va'e, ixugui ae nhaendu aguã – he'i.

<sup>58</sup> Ha'e rami vy gueindy Rebeca oenoĩ okuapy vy oporandu ixupe:

— Reoxe pa kova'e ava reve?

Ha'e ramo

— Aa 'rã – he'i.

<sup>59</sup> Ha'e ramo omondouka gueindy Rebeca hembiguai reve, Abraão rembiguai ha'e avakue hupive ou va'ekue reve oo aguã.

<sup>60</sup> Ogueroayvu porã imondovy Rebeca. Ha'e vy aipoe'i:

— Ndee ma orereindy. Tanememby reta ete. Tove neremiarirõ kuery ta'ipo'aka ngovaigua kuery retã re – he'i.

<sup>61</sup> Ha'e ramo Rebeca opu'ã guembiguai kunhataïgue reve. Camelo áry oïmba vy oje'oi ava va'e rakykue. Ha'e rami py Abraão rembiguai ogueraa Rebeca.

<sup>62</sup> Ha'e va'e jave Isaque ou oiny Beer-Laai-Roi katy gui, Neguebe yvy re ju oiko aguã.

<sup>63</sup> Ka'aru'i jave oo oyvy rupi oikuua pota aguã. Ha'e gui oma'ẽ vy oexa camelo árygua kuery ou oiny rã.

<sup>64</sup> Rebeca voi oma'ẽ vy oexa Isaque. Ha'e rami vy camelo áry gui oguejy vy

<sup>65</sup> oporandu Abraão rembiguai pe:

— Mava'e ava tu ou oiny yvy rupi nhanda katy?

— Xepatõ rima ou – he'i ombovai vy. Ha'e ramo tova mo'ãa oguenoẽ vy omo'ã ngova.<sup>‡</sup>

<sup>66</sup> Isaque pe tembiguai omombe'u mba'emo ojapo va'ekue ha'e javi.

<sup>67</sup> Ha'e ramo Isaque ma oxy Sara rogue py ogueraa Rebeca. Hexe omenda ramo ta'yxy oiko. Isaque oayvu ete. Ha'e rami vy mae ipy'a porã ju ixy omanoague gui.

## 25

### *1 Crônicas 1.32,33*

<sup>1</sup> Abraão omenda ju kunha mboae Quetura hery va'e re.

<sup>2</sup> Ha'e va'e ma oikuavã Zinrã, Jocsã, Medã, Midiã, Isbaque ha'e Suá.

<sup>3</sup> Jocsã ra'y kuery ma Sabá ha'e Dedã. Dedã ra'y kuery ma Assurim, Letusim ha'e Leumim.

<sup>4</sup> Midiã ra'y kuery ma Efá, Efer, Enoque, Abida ha'e Elda. Ha'e va'e kuery ha'e javi Quetura pi'a kuery.

<sup>5</sup> Ha'e rã Isaque pe ae ma Abraão ome'ẽ oguerekva'e ha'e javi.

<sup>6</sup> Gua'yxy jevy pi'a kuery pe ma mba'emo ome'ẽ avi va'eri oikove teri reve omondoukapa gua'y Isaque-a gui mombyry. Amboae yvy katy omondouka kuaray oua katy.

### *Abraão omanoague*

<sup>7</sup> Abraão ma cento e setenta e cinco ma'etý re oiko.

<sup>8</sup> Ha'e gui Abraão ipytuẽ atã vy omano kakuaa ete reve. Ha'e ramo heraa tamoĩ kuerya py.

<sup>9</sup> Ha'e ramo ta'y Isaque ha'e Ismael onhono porã Macpela py itakua oĩ va'e py. Ha'e va'e yvy ma Manre katy'i oĩ, heteu regua Zoar ra'y Efrom mba'ẽ va'ekue.

<sup>10</sup> Ha'e va'e yvy ma Hete ra'y kuery gui Abraão ojogua va'ekue. Ha'e py ae onhono porã Abraão, ta'yxy Sara yvýry.

<sup>11</sup> Abraão omano rire ta'y Isaque ju Nhanderuete omoingo porã. Isaque ma Beer-Laai-Roi katy'i oiko.

### *1 Crônicas 1.28-31*

<sup>‡</sup> **24:65** Rebeca ma ngova ojao'i omerã Isaque omboete vy, ha'e kuery reko rami vy.

<sup>12</sup> Po rami Ismael ramymino kuery rery. Ha'e ma Abraão ra'y, Sara rembiguai Agar Egito guigua pi'a.

<sup>13</sup> Po rami ma Ismael ra'y kuery rery, jypy'i itui'i va'ekue guive. Ismael ra'y ypy ma Nebaiote, ha'e gui Quedar, Adbeel, Mibsão,

<sup>14</sup> Misma, Dumá, Massá,

<sup>15</sup> Hadade, Tema, Jetur, Nafis ha'e Quedemá.

<sup>16</sup> Ha'e va'e kuery ma Ismael ra'y kuery. Ha'e kuery rery ma hetā ha'e hekoa rery joo ramigua. Doze huvixa ikuai guetarā kuery re opena va'e.

<sup>17</sup> Ismael ma cento e trinta e sete ma'etŷ re oiko. Ha'e vy omano. Ha'e rā heraa tamoĩ kuerya py.

<sup>18</sup> Ta'y kuery ma Havilá yvy guive Sur peve ikuai, Egito katy'i, Assíria katy jaa vy jaaxa va'e. Guetarā kuery gui mombyry ikuai.

### *Isaque ra'y kuery itui'iague*

<sup>19</sup> Po rami ma Abraão ra'y Isaque ra'y kuery. Abraão ra'y ma Isaque.

<sup>20</sup> Isaque quarenta ma'etŷ oguerekoa py omenda Rebeca re. Ha'e va'e ma arameu regua Betuel Padã-Arã pygua rajy, arameu regua Labão reindy.

<sup>21</sup> Ha'e gui Isaque ra'yxy imemby va'erā e'ŷ oiko ramo ojerure SENHOR pe. Ha'e rā ojerurea SENHOR oendu ramo ta'yxy Rebeca oguerekoi kyrī va'e.

<sup>22</sup> Hyru'i py kyrīgue joe opu'ã okuapy. Ha'e ramo Rebeca aipoe'i:

— Ha'e rami ri ramo mba'erā tu xee aiko? — he'i. Ha'e rami vy oporandu SENHOR pe.

<sup>23</sup> SENHOR ombovai:

— Mokoĩ regua rima nderye py oĩ, itui'i guive mokoĩ regua 'rā oiko joo rami e'ŷ ikuai va'e. Peteĩ regua ma amboae gui ipo'akave 'rā, ha'e tujave va'e oiko 'rā kyrīve va'e rembiguai — he'i.\*

<sup>24</sup> Ha'e gui kyrī va'e oikuavā aguã ára ovaẽ ramo mokoĩ oĩ ra'e hyru'i py.

<sup>25</sup> Jypyguia ma pytā rei, haguepa rei va'e oiko. Ha'e nunga rupi omboery Esaú.\*

<sup>26</sup> Ha'e rire'i ma tyvy ju oiko guyke'y Esaú pyta re ojopy reve. Ha'e nunga rupi omboery Jacó.† Isaque sessenta ma'etŷ oguerekoa py ta'yxy Rebeca oikuavā'i.

### *Esaú jypyguia peguarā va'e ovendeague*

<sup>27</sup> Ha'e gui avakue'i tujapave ma oje'iviy. Esaú ma imba'ejuka rupi oiko ka'aguy re. Ha'e rā Jacó ma oiko rive, oo'i py oĩ va'e.

<sup>28</sup> Isaque oayvu vaipa Esaú, xo'o ojuka va'ekue ho'uxe vai vy. Ha'e rā Rebeca ma Jacó oayvuve.

<sup>29</sup> Ha'e gui Jacó mba'emo'i ombojoy oiny jave Esaú ou oiny ka'aguy gui inhembyayi vaipa reve.

<sup>30</sup> Ha'e vy aipoe'i:

— Eme'ẽ xevy upe pytā rei va'e rembojoy va'ekue kyrī'i ha'u aguã, xenhembyayi vaipa ma — he'i. Ha'e nunga rupi omboerya Edom.‡

<sup>31</sup> Ha'e ramo Jacó aipoe'i:

— Evende ranhe xevy jypyguia peguarā rejopy va'erā va'e.§

<sup>32</sup> Tyke'y ombovai:

— Xee ma amano ta ma. Mba'erā tu ovare xevy jypyguia peguarā va'e? — he'i.

<sup>33</sup> Ha'e ramo Jacó

— Eura ranhe xevy — he'i ramo oura.

<sup>34</sup> Ha'e gui Esaú pe Jacó ome'ẽ mbojape ha'e lentilha mimoĩ. Ha'e rā ho'upa ma vy opu'ã ovu. Ha'e rami py Esaú nombovarei jypyguia pegua ojopy aguã va'ekue.

\* 25:23 Romanos 9.12    \* 25:25 Tery Esaú ma "Haguepa va'e" 'ea.    † 25:26 Tery Jacó ma "Jopyta jopya" 'ea, nhombotavya jaikuaa aguã.    ‡ 25:30 Tery Edom ma "Pytā va'e" 'ea.    § 25:31 Ha'e kuery reko rami vy tuu omano vy gua'y tujave va'e pe oeja retave 'rā iporāve va'e anho, ha'e rā kyrīve va'e pe ma mboapy've 'rā oeja.

## 26

*Filisteu kuery yvy re Isaque oiko jave guare*

<sup>1</sup> Ha'e gui oiko ju karuai yvy re, jypy'i Abraão oiko teri jave karuai oiko va'ekue ramigua. Ha'e nunga rupi Isaque oo Gerar katy, filisteu kuery ruvixa Abimeleque-a py.

<sup>2</sup> Ha'e gui ixupe SENHOR ojexa uka vy aipoe'i:

— Eguejy eme Egito katy. Epyta yvy xee aexa uka va'e py.

<sup>3</sup> Ha'e py ae eiko. Ha'e rã xee aiko 'rã ndereve, romoingo porã 'rã guive. Mba'eta ndevy ha'e ndera'y kuery pe ju 'rã ame'ẽ kova'e yvy ha'e javi. Ajapopa 'rã nderu Abraão pe auraague.

<sup>4</sup> Ha'e rami vy neramymino kuery amboeta 'rã jaxy-tata yva re ikuai va'e hetaa rami. Ha'e kuery pe ju teĩ ame'ẽ kova'e yvy ha'e javi. Neramymino kuery re vy amoingo porã 'rã ha'e javi regua yvy re ikuai va'e,

<sup>5</sup> Abraão xenhe'ẽ rendu rire. Ha'e ma ojapopa ajapo uka va'e, aipota va'e, lei hekorã aeja va'ekue ha'e javi — he'i.\*

<sup>6</sup> Ha'e ramo Isaque ma Gerar py ae opyta.

<sup>7</sup> Ha'e va'e tekao pygua kuery ta'yxy re oporandu rã “Xereindy” he'i 'rã, “Xera'yxy” he'i aguã okyje vy. Ojeupe ae “Avakue tekao pygua xejuka e'ŷ aguã Rebeca oayvu vy” he'i, ta'yxy iporã vaipa ramo.

<sup>8</sup> Are ma ha'e py Isaque oikoa py filisteu kuery ruvixa Abimeleque oma'ẽ peteĩ okẽ'i rupi. Ha'e vy oexa Isaque gua'yxy Rebeca reve joayvu ramo.

<sup>9</sup> Ha'e gui Abimeleque oenoĩ uka Isaque. Ha'e vy aipoe'i:

— Anhetẽ ae kunha va'e ndera'yxy ra'e! Mba'e re tu ixupe “Xereindy” 're?

Isaque ombovai:

— Mba'eta “Ikáuxa xejukaa e'ŷ aguã”, ha'e vy — he'i.

<sup>10</sup> Abimeleque aipoe'i:

— Mba'e re tu ha'e rami rejapo orere? Ndaxyi 'rãgue amongue apygua ndera'yxy reve ojeavy aguã. Ha'e rami va'e rire ndee orembojejavy vaipa ete 'rãgue — he'i.

<sup>11</sup> Ha'e gui guetarã kuery ha'e javive pe ju Abimeleque ijayvu:

— Amongue kova'e ava re ojapo vai va'e, ha'e e'ŷ vy ta'yxy re opena va'e ma anhetẽ omano 'rã — he'i.

<sup>12</sup> Ha'e rire ha'e va'e yvy re Isaque oma'etŷ. Ha'e va'e ma'etŷ re ae peteĩ-teĩ gui omono'õ cem, SENHOR omoingo porã ramo.

<sup>13</sup> Ha'e rami vy oguerekopave tema ovy, oiko porã, oguerekopa ete peve.

<sup>14</sup> Oguereko vexa'i, vaka, oguereko reta guembiguai. Ha'e ramo filisteu kuery nda'evei rei ikuai hexe.

<sup>15</sup> Ha'e rami vy ombotypa ygua tuu Abraão oikove teri rã hembiguai kuery ojo'o va'ekue, yvy omonyẽmba rive.

<sup>16</sup> Abimeleque voi aipoe'i Isaque pe:

— Ejepe'a orerekaoa gui, ore kuery gui ndepo'akapave ma guive ramo — he'i.

<sup>17</sup> Ha'e rami rã Isaque oo ha'e gui, Gerar yvy'ã guy py ju oiko aguã. Ha'e py ae hekoa.

<sup>18</sup> Ha'e py peteĩgue ju Isaque ojo'o uka yguarã Abraão oikove teri rã ojo'o pyre, Abraão omano rire filisteu kuery ombotypa va'ekue. Ygua peteĩ-teĩ omboery tuu omboeryague rupi ae.

<sup>19</sup> Isaque rembiguai kuery avi yvy'ã guy py ojo'o vy ojou yvu porã oĩa.

<sup>20</sup> Ha'e rã Gerar pygua vexa'i re opena va'e kuery joguero'a okuapy Isaque rymba kuery re opena va'e reve, “Kova'e yy ma oremba'e” he'i vy. Ha'e ramo ha'e va'e ygua Isaque omboery Eseque, hexeve joguero'a ramo.\*

---

\* **26:5** Atos 3.25    \* **26:20** Tery Eseque ma “Joguero'aa” 'ea.

<sup>21</sup> Ha'e gui amboae ygua ju ojo'o. Ha'e va'ekue re voi joguero'a okuapy. Ha'e nunga rupi ha'e va'e omboery Sitna.<sup>†</sup>

<sup>22</sup> Ha'e gui oove vy amboae ju ojo'o yguarã. Ha'e va'e re ma ndajoguero'avei vy omboery Reobote,<sup>‡</sup> "Aŷ SENHOR nhanderekoarã ome'ẽ ma ramo nhandekuai porã 'rã kova'e yvy re" he'i vy.

<sup>23</sup> Ha'e gui Berseba katy ju oo.

<sup>24</sup> Ha'e va'e pyávy SENHOR ojexa uka ixupe. Ha'e vy aipoe'i:

— Xee ma nderu Abraão Ruete. Ekyje eme, mba'eta ndereve voi xee aiko. Romoingo porã 'rã, ha'e neramymino kuery amboeta 'rã xerembiguai Abraão re vy – he'i.

<sup>25</sup> Ha'e ramo ha'e py ojapo peteĩ altar SENHOR pe, ha'e ojapukai hery rupi. Ha'e gui oupi oĩ aguã ha'e py ae hekoa vy. Hembiguai kuery ojo'o ju yguarã ha'e py.

### *Abimeleque reve Isaque peteĩ rami ikuai aguã ojapoague*

<sup>26</sup> Ha'e rire Gerar gui ou Abimeleque, irũ Ausate ha'e xondaro ruvixa Ficol reve.

<sup>27</sup> Ovaẽmba ramo Isaque aipoe'i ha'e kuery pe:

— Mba'erã tu peju xea py? Xere napendea'eí rei vy penembyte gui xepe'a va'ekue ri.

<sup>28</sup> Ha'e kuery ombovai:

— Roexa porã SENHOR anhetẽ ndereve oikoa. Ha'e rami vy aiporo'e: "Aŷ ke jaura ore kuery ndereve, jajapo peteĩ rami nhandekuai aguã."

<sup>29</sup> Eura ke orevy rejapo vai e'ŷ aguã, ore peteїve henda py ndere ndorojapo vaia ramo avi. Ha'evea ramo anho rojapo ndere, romondouka porã guive karamboae. Ndee ma SENHOR omoingo porã va'e reiko – he'i.

<sup>30</sup> Ha'e ramo Isaque ojapo ngaru ha'e kuery pe. Okaru ha'e oy'u okuapy.

<sup>31</sup> Ko'ẽ rai opu'ã vy oura okuapy joupe-upé. Ha'e gui Isaque omondoukapa rã ha'e kuery oje'oi porã.

<sup>32</sup> Ha'e va'e árave Isaque rembiguai kuery ou vy ixupe omombe'u ygua ojo'o va'ekue. Ha'e vy aipoe'i:

— Rojou ma yy – he'i okuapy.

<sup>33</sup> Ha'e va'e ygua ma omboery Seba. Ha'e rami rire ha'e va'e tetã rery aŷ reve Berseba.

<sup>34</sup> Ha'e gui Esaú quarenta ma'etŷ oguerekao py gua'yxyrã ojou mokoĩ: heteu regua Beeri rajy Judite ha'e heteu regua Elom rajy Basemate.

<sup>35</sup> Ha'e kuery mokoïve re Isaque ha'e Rebeca nda'evei ete ikuai.

## 27

### *Isaque gua'y kuery Jacó ha'e Esaú ogueroayvu porãague*

<sup>1</sup> Isaque tuja'i vy ndoexa kuaavei, noma'ẽ atâvei ma vy. Gua'y tujave va'e Esaú oenoĩ vy aipoe'i:

— Xera'y.

Ombovai:

— Apy ma aĩ – he'i.

<sup>2</sup> Tuu aipoe'i ixupe:

— Xetuja'i ma, amano aguã ára ovaẽ ouvy teĩ ndaikuuai araka'e paa.

<sup>3</sup> Aŷ eraa nerembiporu hu'y ryru ha'e nderapa, tereo ka'aguy re, ha'e ejuka xo'o xevy.

<sup>4</sup> Ejapo tembi'u hee va'e xee ha'uxea ramigua, eru ha'u aguã. Mba'eta amano e'ŷ mbove xee rogueroayvu porã 'rã – he'i.

<sup>5</sup> Ha'e ramo Rebeca oendu gua'y Esaú reve Isaque ijayvu rã. Ha'e ramo Esaú ka'aguy re xo'o ojuka aguã oo ma ramo

<sup>6</sup> Rebeca aipoe'i opi'a Jacó pe:

— Aendu kuri nderyke'y Esaú reve nderu ijayvu vy

<sup>†</sup> **26:21** Tery Sitna ma "Ija'e e'ŷa" 'ea.    <sup>‡</sup> **26:22** Tery Reobote ma "Heta ikuai aguã" 'ea.

<sup>7</sup> “Eru xo'o, ha'e ejapo tembi'u hee va'e ha'u aguã, amano e'ŷ mbove SENHOR renonde rogueroayvu porã aguã”, he'i rã.

<sup>8</sup> Aŷ ma xepi'a, endu xeayvu, ejapo ajapo uka va'e.

<sup>9</sup> Tereo mymba kora py, eru mokoĩ kavara'i iporã va'e. Ha'e va'e gui ma xee ajapo 'rã tembi'u hee va'e nderu pe, ha'e ho'uxea ramigua ae.

<sup>10</sup> Ha'e gui reraa 'rã nderu pe ho'u aguã, omano e'ŷ mbove ndee ae ndereroayvu porã aguã — he'i.

<sup>11</sup> Jacó aipoe'i oxy Rebeca pe:

— Ha'e rami avi ke'y Esaú ma haguepa rei va'e, ha'e rã xee ma ha'e ramigua e'ŷ.

<sup>12</sup> Xapy'a rei xeru opokopa 'rã xere, oikuua pota vy. Ha'e rami vy oikuua 'rã ambo-tavyxea, ha'e ijayvu vai 'rã xere, xereroayvu porã 'rãgue py — he'i.

<sup>13</sup> Ha'e rã ixy ombovai:

— Xepi'a, tove xere ae toĩ ijayvu vaia. Ndee ma ejapo xeayvua. Tereo, ha'e eru — he'i.

<sup>14</sup> Ha'e ramo oo. Mymba ojuka vy ogueru oxy pe. Ha'e rã ojapo tembi'u hee va'e, tuu ho'uxea ramigua.

<sup>15</sup> Ha'e gui Rebeca ogueru opi'a tujave va'e Esaú mba'e ao iporãve va'e, ngoo py oguerekva'e. Ha'e va'e py ma opi'a kyrïve va'e Jacó ju omonhemonde.

<sup>16</sup> Kavara rague py onhovã ipo ha'e ijaju'y ndagueia rupi.

<sup>17</sup> Ha'e vy opi'a Jacó pe ome'ẽ tembi'u hee va'e ha'e mbojape ojapo va'ekue.

<sup>18</sup> Ha'e gui nguua py Jacó oo. Ha'e vy aipoe'i:

— Xeru.

Ombovai:

— Apy ma aĩ. Mava'e tu ndee, xera'y?

<sup>19</sup> Jacó ombovai:

— Xee ma Esaú, ndera'y tujave va'e. Ajapo ma rejapo uka va'ekue. Evy ke, eguapy, he'u ajuka va'ekue, xereroayvu porã aguã — he'i.

<sup>20</sup> Ha'e ramo Isaque aipoe'i gua'y pe:

— Xera'y, mba'exa vy tu rejou voi'i ete ri rejuka va'erã?

Ombovai:

— Mba'eta SENHOR nderuete ombou xerenonderã — he'i.

<sup>21</sup> Ha'e ramo Isaque aipoe'i Jacó pe:

— Enhemboja ha'vy xea py. Tapoko ndere xera'y, Esaú ete pa reikoa tyrã anya aikuua aguã — he'i.

<sup>22</sup> Ha'e ramo nguu Isaque-a katy'i Jacó onhembojave. Ha'e ramo hexe opokopa vy aipoe'i:

— Ndeayvua ma Jacó rami ndeayvu, ha'e rã ndepo ma Esaú rami ae ndepo — he'i.

<sup>23</sup> Ndoikuuai, ipo haguepa rei ramo tyke'y Esaú po rami. Ha'e rami vy ogueroayvu porã.

<sup>24</sup> Ha'e vy aipoe'i ixupe:

— Ndee ma xera'y Esaú ae pa?

Ombovai:

— Tá, ha'e ae xee — he'i.

<sup>25</sup> Ha'e ramo aipoe'i:

— Xera'y, eru ha'vy xea py rejuka va'ekue ha'u aguã, rogueroayvu porã aguã — he'i.

Ha'e gui xo'o ogueru ramo ho'u. Vinho avi ogueru ramo oy'u.

<sup>26</sup> Tuu Isaque aipoe'i:

— Xera'y, evaẽve'i ju ke, xerayvu — he'i.

<sup>27</sup> Ha'e rã onhemboja vy oayvu. Ha'e ramo tuu oetũ ijao reakuã. Ha'e vy ogueroayvu porã vy aipoe'i:

— Xera'y, reakuã ma mba'ety SENHOR omoingo porã va'e reakuã.

<sup>28</sup> Nhanderuete tome'ẽ ndevy yxapy yva gui, tomoingo porã ndeyvvy re henhoĩ va'e. Tome'ẽ vaipa trigo ha'e uva pyau.

**29** Tove amboae regua nerembiguai ta'ikuai, tanemboete. Tove nderyvy kuery re tandepo'aka, ndexy pi'a kuery guenapy'ã re toĩ nerentonde. Tove ndere ijayvu vai va'e toiko ayvu vaipy, ha'e rã ndereroayvu porã va'e ma ayvu porãmby toiko – he'i.

**30** Gua'y Jacó Isaque ogueroayvu porãmba ma ramo nguua gui oẽ ov y ramove tyke'y Esaú ovaẽ okaxa vy ooague gui.

**31** Ha'e avi tembi'u hee va'e ojapo va'ekue ogueru nguua py. Ha'e vy aipoe'i ixupe:

– Evy ke xeru, he'u ndera'y ojuka va'ekue, xereroayvu porã aguã – he'i.

**32** Tuu Isaque oporandu:

– Mava'e tu ndee?

Ombovai:

– Xee ma ndera'y tujave va'e Esaú – he'i.

**33** Ha'e ramo Isaque oryryipa reve aipoe'i:

– Mava'e tu ha'vy xo'o ojuka va'ekue ogueru ra'e? Ndee reju e'ŷ mbove xee ha'upa ma, ha'e aroayvu porã guive. Ha'e rami rire ayvu porãmby ae 'rã oiko – he'i.

**34** Ha'e rami tuu ijayvu rã Esaú oendu vy nda'evei vaipa. Ha'e vy aipoe'i nguu pe:

– Xeru, xee voi ta'vy xereroayvu porã 'rãgue.

**35** Tuu ombovai:

– Nderyvy xembotavy reve ou vy ojereroayvu porã uka kuri nderekovia – he'i.

**36** Ha'e ramo Esaú aipoe'i:

– Ha'evea rami e'ŷ ri ty'y ha'e hery Jacó?\* Mba'eta mokoïgue ma xembotavy. Xegui jypyguia peguarã ajopy 'rã va'ekue oipe'a rire aŷ ma xerekovia ju ojereroayvu porã uka. Ndererekovei teve neĩ peteĩ henda py ri jepe xereroayvu porã aguã?

**37** Ha'e ramo tuu Isaque ombovai Esaú pe:

– Xee amoĩ ae ma ndere ipo'aka va'erã. Tyvy kuery hembiguai ikuai aguã rami ajapo. Trigo ha'e uva pyau ojoupa aguã rami xeayvu. Ha'e gui ndee xera'y, mba'e tu aŷ ajapo ta ndevy? – he'i.

**38** Esaú aipoe'i nguu pe:

– Xeru, neĩ peteĩ henda py xereroayvu porã aguã voi teve ndererekoi? Xereroayvu porã avi nho ke – he'i. Ha'e gui Esaú ijayvu atã vy ojae'o.

**39** Tuu Isaque ombovai:

– Ndee ma yvy porã gui mombyrya py 'rã reiko, yxapy yvate gui ho'a e'ŷa rupi.

**40** Kyxe re rejeroviaa rupi 'rã reiko nderyvy rembiguai. Ha'e rami teĩ repu'ã vy reo jepe 'rã ndere ipo'akaa gui – he'i.

**41** Ha'e rire gua'y Jacó tuu ogueroayvu porã rire Esaú ivai guyvy pe. Ha'e vy aipoe'i ojeupe: "Xeru omano aguã ovaẽ rai'i ma. Ha'e va'e rire ma ajuka 'rã xeryvy Jacó", he'i.

**42** Rebeca oendu ha'e rami ipi'a tujave va'e Esaú ijayvuague omombe'ua rã. Ha'e rami vy oenoĩ uka opi'a kyrĩve va'e Jacó. Aipoe'i ixupe:

– Ma'ẽ, nderyke'y Esaú ndejukaxe ipy'a porã aguã.

**43** Ha'e gui aŷ ma xepi'a, endu xeayvua. Tereo xekyvy Labão ro katy Harã py.

**44** Hexeve eiko are nderyke'y ivaiague oaxa peve,

**45** nderyke'y re rejapoague re hexarai vy nda'ivaipei peve. Ha'e gui ma amondouka 'rã ndereruarã. Mba'e re tu peteĩ árave amokanhy ta xepi'a kuery mokoïve? – he'i.

**46** Ha'e gui ome Isaque pe ju Rebeca aipoe'i:

– Xee ma ndavy'ai Hete rajy kuery kova'e yvy re ikuai va'e re. Xapy'a rei Jacó ju ha'e kuery va'e regua gua'yxyrã ojou ramo mba'erã tu aikove ta? – he'i.

## 28

### *Jacó ojavaague*

**1** Ha'e ramo Isaque oenoĩ Jacó. Ogueroayvu porã reve omondouka. Ha'e vy aipoe'i:

\* **27:36** Tery Jacó ma "Nhombotavya" 'ea (25.26).

- Nda'evei ndera'yxyrā rejou aguã apy Canaã yvy re ikuai va'e rajy kuery regua.
- <sup>2</sup> Ha'e rami 'rāgue py epu'ã, tereo Padã-Arã katy, ndexy ru Betuel ro katy. Ha'e py ae 'rā ndera'yxyrā rejou ndexy kyvy Labão rajy kuery regua.
- <sup>3</sup> Tove Nhanderuete ipo'akapa va'e tanemoingo porã, tomboeta neramymino kuery, heta regua pendekuai aguã.
- <sup>4</sup> Tove ndere ju toiko Abraão ogueroayvu porãague, ha'e gui neramymino kuery re ju, yvy reikoa Nhanderuete Abraão pe ome'ẽ va'ekue re ndee ju nderekoa aguã — he'i.
- <sup>5</sup> Ha'e rami vy Isaque omondouka Jacó Padã-Arã katy Betuel ra'y Labão ro katy. Ha'e va'e ma Arã pygua oiko, Jacó ha'e Esaú xy Rebeca kyvy.
- <sup>6</sup> Ha'e gui Esaú oexa gua'y Jacó Isaque ogueroayvu porã reve Padã-Arã katy omon-douka rã gua'yxyrā ha'e gui ojou aguã. Mba'eta ixupe “Nda'evei Canaã yvy re ikuai va'e rajy kuery regua rejou aguã ndera'yxyrā” he'i imondovy va'ekue.
- <sup>7</sup> Ha'e vy Esaú oexa avi Jacó nguu ha'e oxy ayvu oendu vy Padã-Arã katy oo rã.
- <sup>8</sup> Oikuua avi tuu Isaque kunhague Canaã yvy pygua ndojou porãia.
- <sup>9</sup> Ha'e rami vy Abraão ra'y Ismael rekoia py Esaú oo vy gua'yxyrā kuery ojou va'ekue gui ojouve ju Ismael rajy Maalate, Nebaiote reindy.

### *Jacó pe tape pyrō-pyrōa'i oexa ukaa ague*

- <sup>10</sup> Ha'e gui Jacó ma Berseba gui ojepe'a vy oo oiny Harã katy.
- <sup>11</sup> Peteĩ henda py ovaẽa py oaxa pytū, kuaray oike ma ramo. Peteĩ ita ha'e py itui va'e ojou vy omoõ oakã ngytarã. Ha'e vy onheno oupy vy oke.
- <sup>12</sup> Oexa ra'u vy oexa peteĩ tape pyrō-pyrōa'i yvy gui yva peve oo va'e. Ha'e va'e rupi anjo kuery Nhanderuetea guigua ojeupi ha'e oguejy okuapy.
- <sup>13</sup> Ha'e va'e gui mombyry e'ŷ hi'aĩ SENHOR. Ha'e vy aipoe'i ixupe:  
— Xee ma SENHOR neramoõ Abraão ha'e Isaque Ruete. Yvy aŷ renheno rejupya ma ame'ẽ 'rã ndevy ha'e neramymino kuery pe.
- <sup>14</sup> Neramymino kuery ma yvy ku'i rami 'rã heta. Kuaray oikea katy guive 'rã hekoa kuaray oua katy peve, ha'e ijapu'a'ia katy guive ipuku-a katy peve. Ndere ha'e neramymino kuery re vy amoingo porã 'rã ha'e javi regua yvy re ikuai va'e.
- <sup>15</sup> Xee ma aiko ndereve, ndere apena 'rã mamo rã reikoa rupi. Rojapo 'rã kova'e yvy re rejevy ju aguã rami. Noroipytyvõ e'ŷi 'rã, xeayvuague ajapopa peve — he'i.
- <sup>16</sup> Ha'e gui Jacó okeague gui omyi vy aipoe'i:  
— Anhetẽ SENHOR oĩ ra'e apy. Xee ma ndaikuai.
- <sup>17</sup> Nda'evei rima ra'e apy! Apy ma Nhanderuete ro, yva rokẽ ae! — he'i ojererokyje reve.

### *Betel py Jacó ita omopu'âague*

- <sup>18</sup> Ko'ẽ rai ramove Jacó opu'ã vy ojopy ita oakã ngytarã omoõ va'ekue, ha'e omopu'ã ijytarã rami. Hi'ary onhoẽ azeite.
- <sup>19</sup> Ha'e va'e katy'i tetã oĩ va'e yma Luz hery va'ekue ma Betel ju omboery.\*
- <sup>20</sup> Ha'e gui Jacó onhemboayvu vy aipoe'i:  
— Xapy'a rei xereve Nhanderuete oiko vy xere opena ramo, xapy'a rei mbojape ha'e ao anhemonde aguã xevy ome'ẽ ramo
- <sup>21</sup> xeru ro katy ju ajevy porã aguã rami, ha'e ramo SENHOR ae 'rã Xeruete.
- <sup>22</sup> Ha'e gui kova'e ita ijytarã rami amopu'ã va'ekue ma oĩ 'rã Nhanderuete rorã. Ha'e gui mba'emo rejou uka va'e nhavõ gui xee ame'ẽ kuerei 'rã dízimo ndevy — he'i.

## 29

### *Raquel reve Jacó nhovaex̃ague*

- <sup>1</sup> Jacó oguatave vy ovaẽ kuaray oua katy ikuai va'e kuery yvy re.

\* **28:19** Tery Luz ma português pygua ayvu “Luz” e'ŷ raka'e, ha'e kuery ayvu py “Amêndoal'ea”. Ha'e rã tery Betel ma “Nhanderuete ro” 'ea.

<sup>2</sup> Oma'ẽ vy oexa peteĩ ygua ojo'o pyre oĩ va'e. Oexa avi ijyvýry mboapy henda py vexa'i ijaty va'e. Onhenomba rei okuapy, mba'eta ha'e va'e ygua gui ae 'rã opena va'e kuery ome'ẽ guymba kuery oy'u aguã. Ygua juru áry oĩ ita tuvixa va'e imbotyarã.

<sup>3</sup> Ha'e py mymba kuery ijatypa jave opena va'e kuery oipe'a 'rã ita ygua juru gui. Ha'e vy vexa'i kuery omboy'upa ma vy omoĩ ju 'rã oĩaty py.

<sup>4</sup> Jacó oporandu ha'e kuery pe:

— Xeryvy kuery, mamogua tu peẽ kuery?

Ombovai:

— Ore ma Harã pygua – he'i okuapy.

<sup>5</sup> Jacó oporandu ha'e kuery pe:

— Peikuaa pa Naor ra'y Labão?

Ombovai vy

— Roikuua ri – he'i.

<sup>6</sup> Jacó oporanduve ju:

— Ha'e oiko porã pa?

— Tá, oiko porã. Pee hymba kuery vexa'i reve ou oiny va'e ma tajy Raquel ae – he'i okuapy.

<sup>7</sup> Ha'e ramo aipoe'i ha'e kuery pe:

— Ndaka'arui teri, novaẽi teri mymba kuery vexa'i pemboty aguã. Pemboy'u vexa'i kuery, ha'e peraa pemongaruve – he'i.

<sup>8</sup> Ha'e kuery ombovai:

— Ore kuery pe nda'evei, mymba kuery ijatypa e'ŷa ja. Ha'e ramo 'rãe roipe'a ita ygua juru gui romboy'u aguã – he'i okuapy.

<sup>9</sup> Ha'e kuery reve ijayvu teri reve ovaẽ ouvy Raquel nguu rymba kuery reve, mba'eta vexa'i re openaa rupi oiko.

<sup>10</sup> Ha'e gui oxy kyvy Labão rajy Raquel hymba vexa'i kuery reve ou oiny rã Jacó oexa vy oo oipe'a ita ygua juru gui. Ha'e rami vy omboy'u oxy kyvy Labão rymba vexa'i kuery.

<sup>11</sup> Ha'e nunga Jacó ojapopa vy Raquel oayvu vy ojae'o.

<sup>12</sup> Ha'e vy Raquel pe Jacó omombe'u tuu retarã ra'y ha'e Rebeca pi'a oikoa. Ha'e ramo kunha va'e onha ovy nguu pe omombe'u aguã.

<sup>13</sup> Heindy pi'a Jacó ovaẽague Labão oendu vy onha reve oo ovaexi. Oikuavã, oayvu, ha'e ngoo py ogueraa. Ha'e ramo Labão pe Jacó omombe'upa oguataa rupi oiko va'ekue.

<sup>14</sup> Labão aipoe'i ixupe:

— Anhetẽ ndee xekägue ha'e xero'o regua reiko – he'i. Ha'e ramo Jacó peteĩ jaxy re oiko hexeve.

<sup>15</sup> Ha'e rire Labão aipoe'i Jacó pe:

— Ndee xeretarã reiko va'eri ha'evea rami teve remba'eapo rive xevy? Emombe'u ke mba'e re 'rã tu remba'eapo – he'i.

<sup>16</sup> Labão oguereko mokoĩ guajy: guaiguïve va'e ma Lia, ha'e rã kyrïve va'e ma Raquel.

<sup>17</sup> Lia ma oexa porã va'e'ŷ, ha'e rã Raquel ma opa mba'e py iporã, hova rupi voi.

<sup>18</sup> Jacó oayvu Raquel. Ha'e vy aipoe'i Labão pe:

— Sete ma'etŷ re amba'eapo 'rã ndevy, nderajy kyrïve va'e Raquel re.

<sup>19</sup> Labão ombovai:

— Amboae ra'yxyrã ame'ẽ 'räge py ha'eveve ndevy ae ame'ẽ aguã. Eiko ha'vy xea py – he'i.

<sup>20</sup> Ha'e rami vy sete ma'etŷ re Jacó ombo'eapo Raquel re. Ixupe rã sete ma'etŷ oaxapa voi, mboapy ára ete'i merami, oayvu ete ramo.

### *Lia ha'e Raquel re omendaague*

<sup>21</sup> Ha'e gui Jacó aipoe'i Labão pe:

— Eme'ẽ ma'vy xera'yxyrã. Ovaẽ ma nha'angaague, hexe amenda aguã – he'i.

<sup>22</sup> Ha'e ramo Labão omboatypa avakue ha'e py ikuai va'e ngaru ojapoa py.

<sup>23</sup> Pyávy ma ogueru guajy Lia, Jacó pe ome'ë. Ha'e ramo jogueroke.

<sup>24</sup> (Guajy Lia rembiguairã Labão ome'ë guembiguai kunha Zilpa.)

<sup>25</sup> Ko'ëgue Lia ri ty ra'e oikuua vy Jacó aipoe'i Labão pe:

— Mba'e re tu ha'e rami xeapo ra'e? Nderajy Raquel re e'ë ri ty'y amba'eapo raka'e?

Mba'e re tu xembotavy ri?

<sup>26</sup> Labão ombovai:

— Nda'evei ha'e rami rojapo aguã orerekaoa py. Nda'evei guaiguïve va'e gui kyrïve va'e ranhe omenda aguã.

<sup>27</sup> Kova'e semana opa rire ma ame'ë 'rã Raquel avi, sete ma'etë re ju xevy remba'eapo aguã re — he'i.

<sup>28</sup> Jacó ojou porã vy peteñ semana oiko Lia reve. Ha'e ramo mae ma guajy Raquel avi Labão ome'ë ta'yxyrã.

<sup>29</sup> (Guajy Raquel rembiguairã Labão ome'ë avi guembiguai kunha Bila.)

<sup>30</sup> Ha'e gui Jacó joguereko Raquel reve. Lia gui oayvuve Raquel. Ha'e gui sete ma'etë re ju ombo'eapo Labão pe.

### *Jacó ra'y kuery itui'iague*

<sup>31</sup> Lia ndoayvuivea SENHOR oexa vy ojapo imemby aguã rami. Ha'e rã Raquel ma imemby va'erã e'ë oiko.

<sup>32</sup> Ha'e ramo Lia kyrï va'e oguereko vy oikuavã ava'i. Ha'e va'e omboery Rúben. Ha'e vy aipoe'i:

— Xeporiau rã SENHOR oexa vy xepytyvõ. Ha'e ramo aÿ xeme xerayvu 'rã — he'i.\*

<sup>33</sup> Teñgue ju kyrï va'e oguereko vy oikuavã ava'i. Ha'e vy aipoe'i:

— Ajexavai aikovya SENHOR oikuua vy kova'e ju ome'ë xevy — he'i vy omboery Simeão.†

<sup>34</sup> Peteñgue ju Lia kyrï va'e oguereko vy oikuavã ava'i. Ha'e vy aipoe'i:

— Aÿ kova'e gui ma xeme xereve onhemoirûve 'rã, mboapy ta'y areko ramo — he'i. Ha'e vy omboery Levi.‡

<sup>35</sup> Peteñgue ju oguereko kyrï va'e, ava'i. Ha'e vy aipoe'i:

— Aÿ ma arovya SENHOR — he'i. Ha'e vy omboery Judá.§ Ha'e gui ndoguerekovei ranhe kyrï va'e.

## 30

<sup>1</sup> Ha'e gui Raquel Jacó ra'y ndoguerekobia oikuua vy hakate'ë guyke re. Ha'e vy aipoe'i Jacó pe:

— Xemomemby ma ta'vy. Ha'e rami e'ë ramo amano 'rã — he'i.

<sup>2</sup> Ha'e ramo Jacó ivai Raquel pe. Ha'e vy aipoe'i:

— Xee ri ty'y Nhanderuete? Ha'e ae nememby e'ë aguã rami ojapo — he'i.

<sup>3</sup> Kunha va'e ombovai:

— Apy ma oï xerembiguai Bila. Xerekovia hexeve ju pejogueroke kyrï va'e oguereko aguã, imemby ramo xememby rami oiko aguã — he'i.

<sup>4</sup> Ha'e vy ixupe ome'ë guembiguai Bila ta'yxy jevyrã. Ha'e ramo Jacó jogueroke.

<sup>5</sup> Ha'e rami vy Bila oguereko Jacó ra'y.

<sup>6</sup> Ha'e ramo Raquel aipoe'i:

— Nhanderuete xere oikuua pota vy oendu xeayvua. Ha'e rami vy ome'ë xepi'arã — he'i. Ha'e nunga rupi omboery Dã.\*

<sup>7</sup> Ha'e gui Raquel rembiguai Bila teñgue ju oguereko kyrï va'e Jacó ra'y.

<sup>8</sup> Ha'e rã Raquel aipoe'i:

\* 29:32 Tery Rúben ma “Ma'ë, ipi'a oiko” 'ea. † 29:33 Tery Simeão ma “Oikuua porãmby” 'ea. ‡ 29:34 Tery Levi ma “Irû” 'ea. § 29:35 Tery Judá ma “Herovy'aa” 'ea. \* 30:6 Tery Dã ma “Joguerekobia” 'ea.

- Xeryke reve ropu'ã vaipaa gui xepo'aka ma hexe – he'i vy omboery Naftali.<sup>†</sup>
- <sup>9</sup> Ha'e gui Lia ma kyrĩ va'e ndoguererekoveia oikuaa vy ogueru guembiguai Zilpa, ha'e Jacó pe ome'ẽ ta'yxy jevy mboaerã.
- <sup>10</sup> Ha'e gui Lia rembiguai Zilpa oguereko'i ma Jacó ra'y.
- <sup>11</sup> Ha'e ramo Lia aipoe'i:
- Iporã ete va'e oiko xevy – he'i vy omboery Gade.<sup>‡</sup>
  - <sup>12</sup> Ha'e va'e rire Lia rembiguai Zilpa teïgue ju oguereko Jacó ra'y.
- <sup>13</sup> Ha'e ramo Lia aipoe'i:
- Aÿ ma avy'a, xepi'a kuery voi xererovy'a ete 'rã – he'i vy omboery Aser.<sup>§</sup>
  - <sup>14</sup> Ha'e gui Rúben ma trigo omono'õa py ojou mandrágora rembypy mba'ety py.\* Oxy Lia pe ogueru. Ha'e ramo Raquel aipoe'i Lia pe:
    - Eme'ẽ xevy mandrágora rembypy ndepi'a ojou va'ekue gui.  - <sup>15</sup> Lia oporandu:
    - Reraa ma xeme xegui. Aÿ mandrágora rembypy xepi'a ojou va'ekue ju ta reraa?
    - Ha'e ramo Raquel ombovai:
      - Ha'e rami rã ma aÿ pyávy tove Jacó ndereve toke mandrágora rembypy ndepi'a ojou va'ekue rekovia – he'i.
- <sup>16</sup> Ka'aru'i Jacó mba'ety gui ou ramo Lia oo ovaexi. Ha'e vy aipoe'i:
- Aÿ xereve ju 'rã reke, romboekovia kuri mandrágora rembypy xepi'a ojou va'ekue re – he'i ramo ha'e va'e pytû oke hexeve.
- <sup>17</sup> Lia ojerurea Nhanderuete oendu ramo peteñ nhiruña ma oguereko Jacó ra'y.
- <sup>18</sup> Ha'e ramo Lia aipoe'i:
- Nhanderuete ome'ẽ xevy mba'emo porã, xeme pe xerembiguai ame'ẽ rire – he'i vy omboery Issacar.<sup>†</sup>
  - <sup>19</sup> Lia peteñgue ju oguereko kyrĩ va'e. Mboapy memea ma oguereko Jacó ra'y.
- <sup>20</sup> Ha'e rami vy Lia aipoe'i:
- Nhanderuete mba'emo iporã ete va'e ome'ẽ xevy. Aÿ xereve anho 'rã xeme opyta, mboapy meme ta'y areko ramo – he'i vy omboery Zebulom.<sup>‡</sup>
  - <sup>21</sup> Ha'e rire kunha'i ju oguereko. Ha'e va'e ma omboery Diná.
  - <sup>22</sup> Ha'e gui Raquel re ju Nhanderuete oikuaa pota vy ojerurea oendu avi. Ha'e vy ojapo imemby aguã rami.
- <sup>23</sup> Oguereko kyrĩ'i va'e, ava'i. Ha'e vy aipoe'i:
- Aÿ ma Nhanderuete aximba rei aguã rami ve'ÿ xeapo – he'i.
- <sup>24</sup> Ha'e vy omboery José. Aipoe'i:
- Tove Nhanderuete amboae ju tome'ẽ xepi'arã – he'i vy.<sup>§</sup>
  - <sup>25</sup> Ha'e gui Raquel José oguereko'i rire Jacó aipoe'i Labão pe:
    - Aÿ ma xemondouka ju xeyvy re ae xerekoa oĩ va'e katy.
- <sup>26</sup> Eme'ẽ ta'yv xera'yxy kuery ha'e xera'y kuery, ha'e kuery re amba'eapo vaipa ete rire. Ha'e ramo aa 'rã. Ndee voi reikuaa mbovy ma'etÿ re ha'e marã rami pa ndevy amba'eapoague.
- Jacó ombo'eapove ju aguã re Labão ijayvuague*
- <sup>27</sup> Ha'e ramo Labão aipoe'i:
- Aÿ xemboaxya rendu vy ke epytave xereve. Aikuua ma ndere vy Nhanderuete xemoingo porãa.
  - <sup>28</sup> Emombe'u ke mba'e nunga re pa remba'eapo aguã xevy. Ha'e ramo xee apaga 'rã – he'i.

<sup>†</sup> 30:8 Tery Naftali ma “Joe apu'ãa” 'ea.    <sup>‡</sup> 30:11 Tery Gade ma “Iporã va'e oikoa” 'ea.    <sup>§</sup> 30:13 Tery Aser ma “Ovy'a va'e” 'ea.    \* 30:14 Mandrágora ma jai rogue. Ha'e kuery pe rã moã imemby aguã regua.    <sup>†</sup> 30:18 Tery Issacar ma “Mba'eapoa repy” 'ea.    <sup>‡</sup> 30:20 Tery Zebulom ma “Tekoa” 'ea.    <sup>§</sup> 30:24 Tery José ma “Tome'ëve ju” 'ea.

<sup>29</sup> Jacó aipoe'i:

— Ndee reikuua marã rami pa ndevy amba'eapoague, nerymba kuery re apena porãague voi.

<sup>30</sup> Xee aju e'ŷ mbove mboapy'i rerekva'ekue. Aŷ ma heta ete ma rerekva. Ndevy amba'eapo ramo Nhanderuete nemoingo porã. Ha'e gui aŷ araka'e tu ha'vy amba'eapo ta xee ae mba'erã re? — he'i.

<sup>31</sup> Ha'e ramo Labão oporandu:

— Mba'e tu ha'vy reipota ame'ẽ?

Jacó aipoe'i:

— Mba'eve eme'ẽ eme. Nerymba kuery re apena, arõve jevy 'rã aikovy, po rami ri xere rejapo ramo.

<sup>32</sup> Kova'e árave aaxa 'rã nerymba kuery ha'e javi ikuiaia rupi. Vexa'i kuery mbyte gui aipe'apa 'rã ipara'i va'e, ipara va'e ha'e huũ va'e ha'e javi. Ha'e gui kavara kuery mbyte gui aipe'a 'rã ipara va'e ha'e ipara'i va'e. Ha'e va'e nunga rive topyta amba'eapoague repy.

<sup>33</sup> Po rami 'rã reikuua ha'evea rami pa aiko tyrã pa anya. Reju xapy'a vy rexaxe ramo angana va'ekue ha'e javi 'rã ojekuaa neronden. Xapy'a rei kavara kuery ipara'i va'e'ŷ, ipara e'ŷ va'e, e'ŷ vy vexa'i kuery huũ e'ŷ va'e xereve rejou ri vy reikuua 'rã xemondaague — he'i.

<sup>34</sup> Ha'e ramo Labão aipoe'i:

— Tá, ha'eve. Ndeayvuague ramo ae tema eiko — he'i.

<sup>35</sup> Ha'e va'e árave guymba kavara ava Labão oguerekva'e gui omboja'opa ipara puku va'e ha'e ipara va'e ha'e javi. Kavara kunha ikuai va'e mbyte gui oipe'a ipara'i va'e ha'e ipara va'e, ha'e javive ipara xiĩ va'e. Vexa'i ikuai va'e mbyte gui oipe'a huũ va'e. Omboaxapa gua'y kuery pe.

<sup>36</sup> Mboapy araa py nhavaẽ aguã va'e py ogueraa Jacó-a gui. Ha'e rã Jacó ma Labão rymba mboae re opena oikovy.

### *Jacó oguerekopave ovyaque*

<sup>37</sup> Ha'e gui Jacó ojou yvyra rakã ipyau va'e álamo, aveleira ha'e plátano guigua. Ha'e vy oipiro vy ombopara puku-puku, yvyra xiĩ va'e ojekuaa aguã ramo.

<sup>38</sup> Ha'e vy yvyra rakã oipiro va'ekue omoĩ mymba renonde yy rape py, mymba oy'uaty py ae. Ha'e rami vy yy oy'u aguã ou vy ipuru'apa.

<sup>39</sup> Myumba kuery guenonde re yvyra oĩ jave ipuru'apa. Ha'e rami vy vexa'i kuery oguerekva'e ipara puku va'e, ipara'i va'e ha'e ipara va'e.

<sup>40</sup> Ha'e gui Jacó omboja'o vexa'i. Labão rymba kuery ipara puku ha'e huũ va'e ikuiaia katy ombojere mymba mboae. Guymba kuery ae omombyta mombyry'i, nomboje'ai Labão rymba kuery re.

<sup>41</sup> Ha'e gui vexa'i tuvixakueve ta'yxe nhavõ mymba kuery renonde Jacó omoĩ kuerei yvyra, yy rape yvýry mymba kuery oexa aguã py, yvyra oexa reve ta'y aguã.

<sup>42</sup> Ha'e rã vexa'i kuery ikangykue ta'yxe ramo ma nomoĩ yvyra. Ha'e rami vy ikangykue Labão pe opytapa, ha'e rã imbaraetekue ma Jacó pe opytapa.

<sup>43</sup> Ha'e rami vy Jacó oguerekopave tema: mymba vexa'i, guembiguai kuery avakue ha'e kunhague, camelô, mburika guive.

## 31

### *Nguu kuery yvy katy Jacó ojevyague*

<sup>1</sup> Ha'e gui Jacó oendu Labão ra'y kuery ijayvu vy "Jacó tu oipe'apa rima nhanderu mba'e. Nhanderu mba'e gui omba'erã ha'e javi ojou" he'i okuapy rã.

<sup>2</sup> Jacó oexa Labão voi ndoguerovy'avei rã ha'ekue rami e'ŷ.

<sup>3</sup> SENHOR aipoe'i Jacó pe:

— Tereo ju nderu kuery yvy katy, neretarã kuerya katy ae. Xee aiko 'rã ndereve — he'i.

- <sup>4</sup> Ha'e ramo Jacó oenoĩ uka Raquel ha'e Lia nhuũndy rupi guymba kuery reve oikoa py.
- <sup>5</sup> Ha'e vy aipoe'i ha'e kuery pe:  
— Xee aikuaa penderu ha'ekue rami e'ŷ ndaxererovy'aveia. Ha'e rami teĩ xeru Ruete xereve oiko.
- <sup>6</sup> Peẽ kuery ae voi peikuaa anhea'ãa rupi penderu pe amba'eapoague.
- <sup>7</sup> Ha'e rami teĩ penderu xembotavypa herekovy. Dez-kue ma opaga 'rã va'ekue oguerova. Ha'e rã Nhanderuete ma mba'eve py ndojapo vai ukai xere.
- <sup>8</sup> Xapy'a rei xevy "Vexa'i ipara'i va'e remba'eapoague repy topyta" he'i ramo hymba kuery ipara'i va'e anho 'rã ta'y'i. Ha'e rã xapy'a rei "Ipara puku va'e remba'eapoague repy topyta" he'i ramo hymba kuery ipara puku va'e anho ta'y'i.
- <sup>9</sup> Ha'e rami vy Nhanderuete nderu rymba kuery oipe'a vy xevy ju omboaxa.
- <sup>10</sup> Ha'e gui mymba kuery ipuru'a'ipa jave ama'ẽ vy aexa ra'u kavara ava ojeupi va'e ipara puku, ipara'i ha'e ipara va'e meme ikuaria.
- <sup>11</sup> Ha'e anjo Nhanderuetea guigua aexa ra'u rã "Jacó" he'i ramo ambovai: "Apy ma aĩ."
- <sup>12</sup> Aipoe'i xevy: "Ema'ẽ, ha'e exa kavara ava ojeupi va'e ipara puku, ipara'i ha'e ipara va'e meme ikuaria, mba'eta aexapa Labão ndere ojapo vaia.
- <sup>13</sup> Xee ma Nderuete Betel py ajexa uka va'ekue. Ha'e py ma ita remopu'ã va'ekue áry azeite renhoẽ reve renhemboayvu xevy. Epu'ã ke aŷ, kova'e yvy gui tereo ju neretarã kuerya katy" he'i va'ekue xevy – he'i.
- <sup>14</sup> Ha'e ramo Raquel ha'e Lia ombovai vy aipoe'i ixupe:  
— Anhetẽ ete ri oreru ro py noĩvei orevy ome'ẽ va'erã.
- <sup>15</sup> Ndorererekoi ri ty'y amboae yvy guigua oguereko rami? Mba'eta orevende, omomba orevy guarã va'ekue.
- <sup>16</sup> Mba'eta oreru gui Nhanderuete opa mba'e oipe'apa va'ekue ma nhanemba'e meme, ha'e nhandera'y kuery mba'e. Aŷ ejapo tema Nhanderuete ndevy aipoe'iague – he'i.
- <sup>17</sup> Ha'e ramo Jacó opu'ã. Gua'y kuery ha'e gua'yxy kuery camelô áry omoĩ vy
- <sup>18</sup> ogueraapa guymba kuery ha'e oguereko va'e ha'e javi. Hymba kuery Padã-Arã py oiko jave ojou va'ekue omboatypa, nguu Isaque-a py Canaã yvy re oo aguã.
- <sup>19</sup> Labão guymba rague ojaya aguã oo jave Raquel imonda mba'emo ra'angaa nguu ro py oĩ va'ekue re.
- <sup>20</sup> Ha'e rami vy Jacó ju ombotavy Arã pygua Labão. Nomombe'ui ojava aguã.
- <sup>21</sup> Ojava ovv opa mba'e oguereko va'e reve. Opup'ã vy oaxa ovv yakã Eufrates, Gileade yvyty katy oo vy.

### *Jacó rakykue Labão ooague*

- <sup>22</sup> Mboapy araa py mae ma Labão pe omombe'ua Jacó ojavaague.
- <sup>23</sup> Ha'e ramo guyvy kuery ngupive ogueraa vy oje'oi hakykue. Sete ára re oguata. Ha'e vy Gileade yvyty re ovaẽa py oupity.
- <sup>24</sup> Pyávy oexa ra'u rã Nhanderuete ou Arã pygua Labão-a py. Ha'e vy aipoe'i:  
— Eiko kuaa ke, Jacó pe ndeayvu eme iporã va'e rupi, neĩ iporã e'ŷ va'e rupi voi – he'i.
- <sup>25</sup> Ha'e gui Labão oupity ma Jacó ha'e va'e yvyty re Jacó oo'i oupiague py. Labão voi oupi oo'i Gileade yvyty re guyvy kuery reve.
- <sup>26</sup> Ha'e vy Labão aipoe'i Jacó pe:  
— Mba'e tu xere rejapo xembotavy vy? Xerajy kuery reraa ra'e, escravo-rã kyxe py ogueraa va'e rami rive.
- <sup>27</sup> Mba'e re tu rejava nhemi ri xembotavy aguã? Mba'eve neremombe'ui xevy romondouka porã'i aguã, mboraei rupi, pandeiro ha'e mba'epu ixã reta va'e rupi.
- <sup>28</sup> Mba'e re tu nderejapoi xeramymino kuery ha'e xerajy kuery ayvupa'i aguã rami? Ha'eve e'ŷa rami reiko.

<sup>29</sup> Ha'e rami avi xee xepo'aka ndere ajapo vai aguã, va'eri kuee pyávy nderu Ruete ijayvu xevy. Ha'e vy aipoe'i: "Eiko kuaa ke Jacó pe ndeayvu vai e'ŷ aguã, neĩ ndeayvu porã e'ŷ aguã", he'i va'ekue xevy.

<sup>30</sup> Aŷ ma nderu ro re nderevy'avei vy reo xea gui. Ha'e rami vy mba'e re tu ha'vy nemonda ri xeruete ra'angaa areko va'ekue re? — he'i.

<sup>31</sup> Ha'e ramo Jacó ombovai:

— Akyje vy ndaikuua ukai ndevy. Aipoa'e xejeupe: "Xapy'a rei rã guajy kuery oipe'a nhea'ã 'rã xegui", ha'e va'ekue.

<sup>32</sup> Ha'e gui nderuete ra'angaa reruare rejou ramo toikove eme. Nhaneretarã kuery oexaa py eikuua porã pota xemba'e oĩ va'e rupi nemba'e rejouxe vy. Eraapa ju nemba'e — he'i. Mba'eta Jacó ma ndaikuuai ra'e Raquel imondaague.

<sup>33</sup> Ha'e gui Labão oike Jacó ro Lia ha'e hembiguai kuery kunhague ikuiaia py. Opovvvypa teĩ ndojoui. Lia oĩ gui oẽ vy Raquel oĩ py ju oike.

<sup>34</sup> Tuuete ra'angaa ma Raquel onhomí ra'e cameló kupe árygua guýry. Ha'e va'e áry ju oguapy oiny. Labão opy ha'e javi rupi opovvvypa teĩ ndojoui.

<sup>35</sup> Ha'e ramo Raquel aipoe'i nguu pe:

— Xeruvixa, ndevai eme ke. Nda'evei apu'ã aguã nerendirre, kunhague reko gui xemba'eaxy vy — he'i. Ha'e ramo oeka teĩ ndojoui nguuete ra'angaa ngoo py oguerekva'ekue.

<sup>36</sup> Ha'e ramo rã Jacó ivai vy ijayvu Labão pe. Ha'e vy aipoe'i:

— Mba'e nunga py tu ha'vy noronhe'ẽ rendui raka'e? Mba'e py ha'vy ajejavvy vaipa raka'e ndevy, xerakykue reju aguã?

<sup>37</sup> Xemba'e rei-rei rupi repovvvypa reia rupi mba'e tu ha'vy rejou ndero gui guare? Eru apy xeretarã kuery nderyvy kuery renonde, ha'e kuery oikuua pota aguã nhanderekokue re.

<sup>38</sup> Vinte ma'etŷ re ndea py aiko jave ma nerymba vexa'i, kavara na'imemby porã e'ŷi, neĩ ndakarui guive nerymba vexa'i re.

<sup>39</sup> Neĩ peteigüe ndarui ndevy vixo omondoro va'ekue. Ha'e nunga oiko rã xee ae amboekovia. Ha'e rã ara py e'ŷ vy pyávy mba'emo nerymba kuery ogueraa ramo ndee remboekovia kuerei xepo gui.

<sup>40</sup> Ara py aiko axy kuaray aku gui, ha'e pyávy yro'y gui ju ajexavai aikovy va'ekue, ndake kuaavei guive.

<sup>41</sup> Vinte ma'etŷ re aiko va'ekue ndero py. Catorze ma'etŷ re ndevy amba'eapo nderajy kuery mokoïve re, ha'e gui seis ma'etŷ re ju nerymba kuery re apena aikovy va'ekue. Ha'e jave dez-kue ha'ekue'-ekue e'ŷ rami rerova xevy repaga 'rã va'ekue.

<sup>42</sup> Anhetê Xeru Ruete, Abraão Ruete, Isaque Ojererokyjea va'e ae xereve ndoikoi va'e rire ma ndee xemondouka rive 'rãgue. Ha'e rami teĩ Nhanderuete xere opena amba'eapoa py ajexavai rã. Ha'e nunga rupi ae kuee pyávy ijayvu raka'e ndevy — he'i.

### *Jacó reve Labão peteĩ rami ikuai aguã ojapoague*

<sup>43</sup> Ha'e ramo Labão aipoe'i Jacó pe:

— Kova'e kunhague ma xerajy kuery ikuai, kova'e avakue'i ma xeramymino kuery, kova'e mymba kuery ma xerymba meme ikuai. Opa mba'e jaexa va'e xemba'e meme. Mba'e tu ha'vy ajapo ta aŷ xerajy kuery pe ha'e ipi'a kuery oikuavã va'ekue pe?

<sup>44</sup> Aŷ ma eju, xereve jajapo peteĩ rami ju nhandekuai aguã, nhande mokoïve nhanema'endu'a riae aguã rami — he'i.

<sup>45</sup> Ha'e ramo Jacó peteĩ ita ojopy vy omopu'ã ijytarã rami.

<sup>46</sup> Ha'e vy aipoe'i guyvy kuery pe:

— Pemono'õ ke ita — he'i. Ha'e ramo ita ogueru vy omboaty. Ita omboaty va'ekue yvýry okaru okuapy.

<sup>47</sup> Ha'e va'e ma Labão omboery Jegar-Saaduta. Ha'e rã Jacó ma omboery Galeede.

**48** Ha'e ramo Labão aipoe'i:

— Kova'e itaaty ma aŷ guive topyta nhande mokoïve moma'endu'aarã — he'i. Ha'e nunga rupi ae omboerya Galeede.\*

**49** Omboery avi Mispa, mba'eta aipoe'i:

— Tove Nhanderuete topena xere ha'e ndere joe gui mombyry jaikoa ja. Toikuaa pota nhandeayyuague jajapo aguã re.<sup>†</sup>

**50** Ha'e gui xapy'a rei xerajy kuery reayvu ve'ŷ vy amboae kunha re ju remenda ramo avave rei oikuua e'ŷ teĩ tove Nhanderuete toikuaa pota ha'e nunga re, mokoïve nhanderexa vy.

**51** Labão aipoe'ive ju Jacó pe:

— Apy nhande mokoï mbyte oĩ itaaty ha'e ita amopu'ã va'ekue.

**52** Tove kova'e itaaty ha'e ita topyta nhanemoma'endu'aarã, kyvõ katy gui itaaty rovai katy aaxa e'ŷ aguã, neĩ ndee ma voi nda'evei itaaty neĩ ita reaxa aguã kyvõ katy.

**53** Tove nhaneramoï kuery Abraão ha'e Naor Ruete toikuaa pota nhandere — he'i. Ha'e ramo Jacó oura nguu Isaque Ojererokyjea va'e rery rupi.

**54** Ha'e va'e yvyty re Jacó ojuka peteĩ mymba Nhanderuete pe, ha'e guetarã kuery oenoimba mbojape ho'u aguã. Ho'upa vy ha'e va'e pyávy ju yvyty re oke.

**55** Ko'ẽ e'ŷ mbove'i Labão opu'ã vy oayvupa guamymino kuery ha'e guajy kuery. Peteĩ-teĩ ogueroayvu porã. Ha'e vy mae ma ojepa'a vy oo ju ngoo katy.

## 32

**1** Jacó voi oguatave ju. Ha'e ramo Nhanderuetea guigua anjo kuery jogueru ovaexí aguã.

**2** Ha'e kuery ou rã Jacó oexa vy aipoe'i:

— Apy rima Nhanderuetea guigua ikuiaia — he'i vy omboery Maanaim.\*

*Esaú reve Jacó peteĩ rami ju ikuai aguã ojapoague*

**3** Ha'e gui Jacó guenonde re omondouka guyke'y Esaú pe oayvu mombe'uarã kuery, Edom regua Seir yvy katy oĩ ramo.

**4** Ha'e vy aipoe'i imondovy ha'e kuery pe:

— Po rami pendeayvu 'rã xeruvixa Esaú pe: “Nerembiguai Jacó aipoe'i uka: ‘Aguataa rupi Labão ro py ranhe aiko va'ekue aŷ peve.

**5** Areko vaka, mburika, vexa'i, ha'e gui xerembiguai avakue ha'e kunhague. Xeruvixa, ndea py amondouka xeayvu mombe'uarã nerondenon xemboaxy uka aguã' he'i uka”, peje 'rã ixupe.

**6** Ha'e gui tenonde re omondouka va'ekue ou jevy vy aipoe'i Jacó pe:

— Roo nderyke'y Esaú-a py peve. Ha'e voi ou nerovaexí aguã quattrocentos avakue reve — he'i okuapy.

**7** Ha'e rami ijayvu rã Jacó oendu vy okyje vaipa, onhemondyi guive. Ha'e vy omboja'o ngupive ikuai va'e ha'e javi: vexa'i, vaka ha'e cameló kuery. Mokoï henda-enda py omboaty.

**8** Mba'eta ijayvu vy “Xapy'a rei Esaú ou vy peteĩ pygua ojukapa teĩ amboae pygua oo jepe 'rã”, he'i.

**9** Ha'e gui Nhanderuete pe Jacó ojerure vy aipoe'i:

— SENHOR xeramoï Abraão ha'e xeru Isaque Ruete, xevy aipo're va'ekue: “Tereo ju ndeyvy re neretarã kuerya katy. Ha'e py ma ndere apena porã 'rã”, 're va'ekue.

\* **31:48** Tery Galeede ma “Itaaty nhanema'endu'a aguã”'ea. † **31:49** Tery Mispa ma “Torre oikuua pota va'ety oĩ”'ea. \* **32:2** Tery Maanaim ma “Mokoï regua ikuiaia”'ea.

<sup>10</sup> Xee nerembiguai ma xe'yvyñ'i ete ndee xemboaxy vy ndeayvuague rami xererekoporã aguã. Mba'eta xepopoka reve anho aaxa karamboae kova'e Jordão yakã. Aÿ ma mokoï henda py ju oreathy.

<sup>11</sup> Xereraa jepe ke ke'y Esaú po py aiko vai e'ÿ aguã. Mba'eta akyje apy ou vy xejuka gui, ha'e xera'yxy ha'e xera'y kuery ojukapa gui.

<sup>12</sup> Xevy aipo're va'ekue: "Xee apena 'rã ndere. Amboeta 'rã neramymino kuery ita ku'i heta aguã, heta ete ramo avave rei ndoipapa kuaai aguã rami", 're va'ekue – he'i.

<sup>13</sup> Ha'e va'e pyávy Jacó opyta ha'e py. Mba'emo ogueraa va'e gui oguerekokatu guyke'y Esaú pe ome'ë va'erã:

<sup>14</sup> duzentos kavara, vinte kavara ava, duzentos vexa'i, vinte vexa'i ava,

<sup>15</sup> trinta cameloi kamby va'e ta'y'i reve, quarenta vaka, dez vaka ava, vinte mburika ha'e dez ta'y'i.

<sup>16</sup> Ha'e va'e nunga ogueraa ukapa guembiguai kuery pe, peteñ-teñ henda py omoï. Guembiguai kuery pe aipoe'i imondovy:

— Tapeo xerenonderã, pemondyi pokã mymba kuery peteñ-teñ regua amboae regua gui mombyry'i oo aguã – he'i.

<sup>17</sup> Jypy oo va'e pe aipoe'i:

— Ke'y Esaú rerovaexi rã oporandu 'rã ndevy: "Mava'e tu nembou? Marã katy tu reo? Mava'e rymba tu nerенонde ikuai?" he'i ramo

<sup>18</sup> rembovai 'rã: "Nerembiguai Jacó rymba rima aru. Nguvixa Esaú peguarã ombou uka. Ha'e gui ha'e voi ou oiny orerakykue", peje 'rã – he'i.

<sup>19</sup> Mokoïa oo va'e pe ha'ekue ramiju aipoe'i uka, mboapya oo va'e pe voi. Mymba kuery mondyiarã ha'e javi pe aipoe'i:

— Po ramimeme 'rã pendeayvu Esaú peovaexi vy.

<sup>20</sup> Aipopeje 'rã: "Nerembiguai Jacó ou oiny orerakykue", peje – he'i uka imondovy. Mba'eta ojeupe aipoe'i: "Mba'emo ame'ë uka vy ambopy'a porã 'rã avaexi e'ÿ mbove. Ha'e gui ma xee aexa 'rã. Ha'e rami rã xapy'a rei xejou porã 'rã", he'i.

<sup>21</sup> Ha'e rami vy guenonde ranhe omondouka ome'ë uka va'erã. Ha'e rã ha'e ma ha'e va'e pytû re opyta ranhe okeague py.

### *Nhanderuetea guigua ava reve Jacó joguero'aague*

<sup>22</sup> Ha'e va'e pyavyve Jacó opu'ã vy omboaty mokoïve gua'yxy, mokoïve guembiguai kunha ha'e gua'y kuery onze-ve ikuai va'e. Ha'e vy ogueraapa Jaboque yakã oaxaaty peve.

<sup>23</sup> Ha'e kuery ranhe omboaxa yakã rovai re. Oguerekova'e ha'e javi omboaxapa.

<sup>24</sup> Jacó ha'e ae'i opyta ha'e py. Ha'e ramo peteñ ava ojekuaa vy hexeve joguero'a ko'ë peve.

<sup>25</sup> Ava va'e ma Jacó re nda'ipo'akaia oexa vy opoko hi'u guýry. Ha'e rami vy omboi Jacó 'u ojepotaa, joguero'a vy.

<sup>26</sup> Ha'e vy aipoe'i:

— Xepoi katu, taa, mba'eta ko'ë ta ma.

Jacó ombovai:

— Noromondoukai 'rã xereroayvu porã e'ÿa ja – he'i.

<sup>27</sup> Ha'e ramo oporandu:

— Mba'exa tu ha'vy nderery?

— Jacó – he'i.

<sup>28</sup> Ha'e rã aipoe'i:

— Aÿ ma Jacó ve'ÿ 'rã nderery, ha'e rã Israel. Mba'eta huvixa rami Nhanderuete ha'e avakue reve renhea'ã ndepo'aka peve – he'i.<sup>†</sup>

<sup>29</sup> Ha'e gui Jacó aipoe'i:

<sup>†</sup> 32:28 Tery Israel ma "Nhanderuete reve joguero'a va'e" 'ea.

— Ajerure nderery remombe'u aguã.

Jacó ombovai:

— Mba'e re tu xerery re reporandu? — he'i. Ha'e vy ogueroayvu porã ha'e py.

<sup>30</sup> Ha'e va'e henda Jacó omboery Peniel, “Apy ma xerexa py ae Nhanderuete aexa teĩ xerekove ndoipe'ai”, he'i vy.<sup>‡</sup>

<sup>31</sup> Kuaray oẽ jave oaxa Peniel rupi, okara-karau ov y hi'u oi rire.

<sup>32</sup> Ha'e rami rire aŷ reve Israel kuery ndo'ui 'rã xo'o rajykue hi'u áry rupi ijapu'a oiny va'e, ava va'e Jacó retyma rajy omboapu'apa rire.

## 33

### *Esaú reve Jacó nhovaexīague*

<sup>1</sup> Jacó oma'ẽ vy oexa Esaú ou oiny rã quattrocentos avakue reve. Ha'e rami vy gua'y kuery omboja'o vy opena uka Lia, Raquel ha'e mokoïve guembiguai kunha pe.

<sup>2</sup> Tenonde omondouka mokoïve guembiguai kunha, ipi'a kuery reve. Ha'e kuery rakykue omondouka Lia imemby kuery reve. Takykue ete omondouka Raquel ipi'a José reve.

<sup>3</sup> Ha'e va'e kuery gui ha'e ranhe oo vy sete-kue guenapy'ã re oĩ ov y guyke'ya py ovaẽ peve.

<sup>4</sup> Ha'e ramo Esaú onha ouvy ovaexī aguã. Oikuavã, oayvupa. Ojae'o vaipa mokoïve.

<sup>5</sup> Ha'e gui Esaú oma'ẽ vy oexa kunhague ha'e kyrīgue ou oiny rã. Ha'e vy aipoe'i:

— Mava'e kuery tu ndereve ikuai?

Jacó ombovai:

— Peva'e kuery ma kyrīgue xee nerembiguai pe Nhanderuete ome'ẽ va'ekue — he'i.

<sup>6</sup> Ha'e gui mokoï hembiguai kunha ovaẽ ouvy op'i'a kuery reve, ha'e guenapy'ã re oĩmba.

<sup>7</sup> Ha'e gui Lia omemby kuery reve ju ovaẽ vy ha'e kuery voi guenapy'ã re oĩ. Ha'e gui ma Raquel op'i'a José reve ovaẽ ouvy vy oĩ guenapy'ã re.

<sup>8</sup> Ha'e ramo Esaú oporandu:

— Mba'erã tu guĩ rami ete nerymba kuery xererovaexī ra'e?

Jacó ombovai:

— Xeruvixa, anhemboaxy uka vy rima aru ruka kuri ndevy — he'i.

<sup>9</sup> Ha'e ramo Esaú aipoe'i:

— Xee ma areko vaipa ma mba'emo. Ndepo py ae ri toptya rereko va'e.

<sup>10</sup> Ha'e rã Jacó ombovai:

— Ejopy katu. Xapy'a rei xejou porã ri rã ajerure ame'ẽ rive'i va'e rejopy aguã re.

Mba'eta xevy rã nderova Nhanderuete rova rami ete, xererovy'aa rupi xemovaẽ ramo.

<sup>11</sup> Ha'e nunga rupi ajerure mba'emo'i aru ruka va'ekue rejopy aguã re, xevy Nhanderuete ome'ẽ porãmba rire. Arekopa opa mba'e — he'i. Ha'e rami vy onhea'ã ojopy aguã.

<sup>12</sup> Esaú aipoe'i:

— Jaje'oi ha'vy. Xee ma aa ta tenonde.

<sup>13</sup> Ha'e ramo Jacó aipoe'i:

— Xeruvixa, ndee reikuua xera'y kuery kyrīgue teri ikuiaia. Xereve areko avi vexa'i ha'e vaka ikamby va'e. Xapy'a rei peteĩ ára re xerymba kuery romondyi atã heravy ramo omanomba 'rã ha'e javi.

<sup>14</sup> Ha'e nunga rupi xeruvixa, tereo tema ndee ranhe xee nerembiguai renonde. Ha'e rã xee ma mbeguei'i 'rã aa nderakykue, vaka romondyi va'e ha'e kyrīgue ooa'i rami, Seir py ndee xeruvixaa py avaẽ peve — he'i.

<sup>15</sup> Esaú ombovai:

— Ha'e rami rã ndereve taeja xereve ikuai va'e regua.

Ha'e rã Jacó aipoe'i:

<sup>‡</sup> 32:30 Tery Sucote ma “Mymba ro” 'ea.

— Mba'erã tu ha'e kuery opyta ta? Xeruvixa, ha'eve ae ma aexa xemboaxya – he'i.

<sup>16</sup> Ha'e rami rã ha'e va'e árave Esaú oo ju Seir py ouague katy.

<sup>17</sup> Ha'e rã Jacó ma Sucote katy oo. Ha'e py ma ngoorã ojapo, vaka korarã ojao'i guive. Ha'e nunga rupi ae ha'e va'e henda omboery Sucote.

### *Siquém py Jacó ovaēague*

<sup>18</sup> Padã-Arã gui Jacó ojevy vy hexaĩ reve ovaẽ Siquém tetã py, Canaã yvy re oĩ va'e py. Tetã yvýry oupi oo'i.

<sup>19</sup> Yvy oo'i oupia va'e ma cem hatã'i va'e re ojogua Siquém ru Hamor ra'y kuery gui.

<sup>20</sup> Ha'e py ma ojapo peteĩ altar. Ha'e va'e ma omboery Nhanderuete Israel Ruete pegua.

## 34

### *Siquém pygua kuerya py Diná oo jave guare*

<sup>1</sup> Ha'e gui Lia memby Diná, Jacó rajy va'e ojepe'a ovvy yvy re ikuai va'e rajy kuery rexavy.

<sup>2</sup> Ha'e jave ha'e va'e pygua huvixa ma Hamor ra'y Siquém. Ha'e va'e ma Jacó rajy Diná oexa vy ojopy vy ojavyky, oguereko rive.

<sup>3</sup> Ovy'a ete kunhataĩ re, oayvu vy. Ijayvu porã'i guive ixupe.

<sup>4</sup> Ha'e gui Siquém aipoe'i nguu Hamor pe:

— Eru ruka ke ha'e va'e kunhataĩ xera'xyrã – he'i.

<sup>5</sup> Ha'e ramo Jacó oendu tajy Diná oguereko riveague. Ha'e rami teĩ okyrirĩ ranhe, ta'y kuery vaka re openaa rupi ikuiaia gui ojevypa e'ŷa ja.

<sup>6</sup> Ha'e va'e jave ou Siquém ru Hamor Jacó reve ijayvu aguã.

<sup>7</sup> Ha'e gui Jacó ra'y kuery oupa nhuñdy gui. Oendu okuapy gueindy re oikoague. Ha'e rami vy nda'eveipa, ipoxypa okuapy, Israel kuery re Siquém ha'eve e'ŷa ramigua ojapo rire. Jacó rajy oguereko rive, ha'eve'ŷ va'e ete ojapo.

<sup>8</sup> Ha'e gui ma ha'e kuery reve Hamor ijayvu. Ha'e vy aipoe'i:

— Xera'y Siquém ndovy'ai ete oikovy nderajy re. Ajerure peme'ẽ aguã ta'xyrã.

<sup>9</sup> Ha'e rami vy peiko 'rã oreretarã kueryrã. Orevy pe peme'ẽ 'rã pendajy kuery, ha'e orerajy kuery ju peraa 'rã pendera'y kuery ra'xyrã.

<sup>10</sup> Ha'e rami vy pendekuai ore kuery reve. Oreyvy ma pendeyvyrã itui. Apy ae pendekuai, mba'emo pejogua peikovy penemba'erã pejou vy – he'i.

<sup>11</sup> Siquém voi aipoe'i Diná ru ha'e ikyvy kuery pe:

— Ejapo ke ajerurea. Ha'e rã xee ame'ẽ 'rã peipota va'e rei.

<sup>12</sup> Mba'emo re pejerure reta teĩ ame'ẽmba 'rã. Ha'e rami avi peme'ẽ kunhataĩ va'e xera'xyrã – he'i.

<sup>13</sup> Ha'e ramo Siquém ha'e tuu Hamor pe Jacó ra'y kuery ombovai vy ombotavya rupi ijayvu, heindy Diná Siquém oguereko rive rire. Ha'e vy aipoe'i okuapy:

<sup>14</sup> — Ha'e rami aguã nda'evei, orereindy rome'ẽ aguã ava opire omboi uka e'ŷ va'e ra'xyrã. Orereko rami vy ha'e nunga nda'evei.

<sup>15</sup> Peteĩ mba'e pejapo ramo ha'eve 'rã orevy, peẽ kuery avakue ha'e javive ore rami avi pendepire pemboi uka ramo.

<sup>16</sup> Ha'e ramo 'rãe romomenda orereindy kuery, ha'e pendajy kuery re ore romenda, peẽ kuery reve orekuai, ha'e peẽ kuery reve peteĩ regua nhandekuai.

<sup>17</sup> Ha'e rã norenhe'ẽ rendui, pendepire napemboi ukai ramo rogueraa ju 'rã orereindy – he'i.

<sup>18</sup> Ha'e rami ha'e kuery ijayvu rã Hamor ha'e ta'y Siquém ojou porã.

<sup>19</sup> Ha'e rami vy kunumi va'e ndarei ha'e rami ojapo aguã, Jacó rajy oayvu vy. Ha'e va'e ma nguu ro pygua kuery ha'e javi gui omboeteave va'e oiko.

<sup>20</sup> Ha'e gui gua'y Siquém reve Hamor tetã kora rokẽ py oo vy ijayvu avakue ha'e py ikuai va'e pe. Ha'e vy aipoe'i:

<sup>21</sup> — Ha'e va'e avakue ma ndojapo vai 'rã nhandere. Ha'e ramo tove ta'ikuai, tojogua mba'emo. Nhandeyvy ma tuvixa, ha'eve nhande ha'e javi nhandekuai aguã. Ha'e kuery rajy kuery jajopy 'rã nhandera'yxyrã, ha'e nhanderajy kuery nhamomenda 'rã ha'e kuery re.

<sup>22</sup> Ha'e rami avi peteĩ mba'e jajapo ramo ha'e va'e avakue pe ha'eve 'rã nhandereve peteĩ'i regua ikuai aguã, avakue apy nhandekuai va'e ha'e javive nhandepire nhamboi uka ramo, ha'e kuery ojapoa rami avi.

<sup>23</sup> Ha'e rire ha'e kuery rymba vaka, mba'emo oguerekva'e-va'e ha'e javi ha'e hymba kuery ha'e javi 'rã teve nhanemba'erã opyta. Ha'e kuery peteĩ'i re ojerurea jajapo, nhande kuery reve ikuai aguã — he'i.

<sup>24</sup> Ha'e ramo tetã kora rokẽ py ikuai va'e ha'e javi onhe'ẽ rendu okuapy Hamor ha'e ta'y Siquém. Ha'e rami vy avakue opire omboi ukapa hokẽ py ikuai va'ekue ha'e javive.

### *Simeão ha'e Levi Siquém ro pygua avakue ojukapaague*

<sup>25</sup> Mboapy araa py avakue haxyo oendu vaipa jave Jacó ra'y mokoĩ Simeão ha'e Levi Diná kyvy kuery ikuai va'e ogueraa okyxé. Tetã py oike ha'e pygua kuery oexa'ã e'ŷa py. Ipoxy reve ojukapa avakue ha'e py ikuai va'ekue ha'e javi.

<sup>26</sup> Kyxe py ojuka avi Hamor ha'e ta'y Siquém. Siquém ro gui gueindy Diná oipe'a vy oje'oipa ju.

<sup>27</sup> Ha'e gui Jacó ra'y kuery mboae ou vy ojukapaague oexa vy ogueraapa mba'emo tetã py ojou va'e ha'e javi, heindy ha'e pygua oguerekova'e rive rire.

<sup>28</sup> Hymba vexa'i, vaka, mburika oipe'apa tetã gui, ha'e hovai re mba'emo ikuai va'ekue ha'e javi,

<sup>29</sup> imba'e rei-rei ha'e javi oipe'apa. Ta'y kuery ha'e ta'yxy kuery oipokuapa heravy ngoo katy.

<sup>30</sup> Ha'e ramo Jacó aipoe'i Simeão ha'e Levi pe:

— Ha'e rami peiko vy xemoĩ vai. Pejapo ko'i rupi ikuai va'e xejou vai aguã ramo, cananeu ha'e ferezeu kuery. Nhandereta e'ŷ'i ramo xere opu'ã vy xejuka 'rã, xero pygua kuery ha'e javi reve.

<sup>31</sup> Ha'e kuery ombovai:

— Ha'e rami avi ha'eve 'rã ri nda'u ha'e kuery orereindy itavy rei va'e ramo oguerekova'e rã? — he'i okuapy.

## 35

### *Betel py Jacó altar ojapoague*

<sup>1</sup> Ha'e gui Nhanderuete aipoe'i Jacó pe:

— Epu'ã ke, tereo ju Betel katy. Ha'e py eiko, ejapo peteĩ altar Nderuete nderyke'y Esaú gui rejava jave ojexa uka va'ekue pe — he'i.

<sup>2</sup> Ha'e ramo Jacó ijayvu ngoo pygua kuery ha'e hexeveguia kuery ha'e javi pe. Ha'e vy aipoe'i:

— Pemombo ke mba'emo ra'angaa amboae kuery guigua penembyte pereko va'e. Pejeky'a'o ukapa. Pendeao voi pemboekoviapa.

<sup>3</sup> Nhapu'ã ke, jaje'oi Betel katy. Ha'e py ma ajapo 'rã peteĩ altar Nhanderuete ajexavai rei rã xerepy va'ekue pe, aguata aikovya rupi xereve oiko rire — he'i.

<sup>4</sup> Ha'e ramo Jacó po py omboaxapa mba'emo ra'angaa amboae kuery guigua oguerekova'e ha'e javi. Namixã oguerekova'e voi omboaxapa. Ha'e ramo Jacó ojatypa yvyra carvalho Siquém katy'i hi'aĩ va'e guy py.

<sup>5</sup> Ha'e gui ma oje'oi. Nhanderuete ojapo ha'e katy rai-rai'i tetã oĩ va'e pygua kuery okyjea oendu aguã ramo. Ha'e ramo avave rei ndoje'oiai Jacó ra'y kuery rakykue.

<sup>6</sup> Ha'e rami vy Jacó hexeve ikuai va'e ha'e javive reve ovaẽmba Luz tetã Betel 'epy va'e py, Canaã yvy re oĩ va'e py.

<sup>7</sup> Ha'e py ma Jacó ojapo altar. Ha'e va'e henda omboery El-Betel, ha'e py guyke'y gui ojava ovv jave Nhanderuete ojexa uka rire.\*

<sup>8</sup> Ha'e py omano Rebeca mongakuaare Débora. Ha'e ramo onhono porã Betel guy katy carvalho hi'aĩ va'e guy py. Ha'e va'e yvyra omboery Alom-Bacute.†

<sup>9</sup> Ha'e gui Padã-Arã gui Jacó ou ma ramo Nhanderuete teĩgue ju ojexa uka ixupe. Ha'e rami vy ogueroayvu porã.

<sup>10</sup> Ha'e vy aipoe'i:

— Nderery ma Jacó. Aÿ guive ma Jacó ve'ÿ ma, ha'e rã Israel 'rã nderery — he'i. Ha'e rami vy omboery Israel.

<sup>11</sup> Aipoe'ive ju:

— Xee ma Penderuete ipo'akapa va'e aiko. Ndera'y reta ke. Ndegui oiko 'rã peteĩ regua, ha'e gui heta regua ju 'rã, huvixa kuery voi.

<sup>12</sup> Ndevy ju ame'ë 'rã yvy Abraão ha'e Isaque pe ame'ë va'ekue. Ha'e gui ndee ndereikovei ma rire neramymino kuery pe ju 'rã ame'ë — he'i.

<sup>13</sup> Ixugui Nhanderuete ojepe'a vy ijayvu oinyague gui ojeupi ju.

<sup>14</sup> Ha'e ramo Jacó reve Nhanderuete ijayvu oinyague py ixupe omopu'ã peteĩ ita ijytarã rami. Hi'áry onhoë guive mba'emo, azeite avi.

<sup>15</sup> Henda hexeve Nhanderuete ijayvuague ma Jacó omboery Betel.

### *Benjamim itui'i ramo Raquel omanoague*

<sup>16</sup> Betel gui oje'oive ju. Efrata py ovaẽ rai'ia py Raquel oikuavã opi'a. Haxy vaipa ete reve oikuavã.

<sup>17</sup> Imemby raxy ramo hexe opena va'e aipoe'i:

— Enhemondyi eme. Kova'e voi ma reikuavã nho 'rã — he'i.

<sup>18</sup> Ha'e gui omano rã inhe'ë ojepe'a ovv jave omboery Benoni. Ha'e rã tuu ma omboery Benjamim.‡

<sup>19</sup> Ha'e gui Raquel omano ramo onhono porã Efrata katy tape oo va'e yvýry. Ha'e va'e ma Belém.

<sup>20</sup> Raquel rupa áry Jacó omopu'ã peteĩ ita ijytarã. Ha'e va'e ma aÿ reve hi'aĩ.

<sup>21</sup> Ha'e gui Israel ojepe'a ju vy oorã ojapo Éder py torre oĩ va'e rovai re.

<sup>22</sup> Ha'e va'e yvy re Israel oiko jave py ta'y Rúben oo vy onheno nguu ra'yxy jevy Bila reve. Ha'e ramo Israel oikuua. Ha'e javi vy doze ikuai raka'e Jacó ra'y kuery.

### *1 Crônicas 2.1,2*

<sup>23</sup> Lia pi'a kuery ma Jacó ra'y jypy guare Rúben, ha'e gui Simeão, Levi, Judá, Issacar ha'e Zebulom.

<sup>24</sup> Raquel pi'a ma José ha'e Benjamim.

<sup>25</sup> Raquel rembiguai Bila pi'a ma Dã ha'e Naftali.

<sup>26</sup> Lia rembiguai Zilpa pi'a ma Gade ha'e Aser. Ha'e va'e kuery Jacó ra'y Padã-Arã py itui'i va'ekue.

<sup>27</sup> Ha'e gui nguu Isaque-a py ju Jacó ou Manre Quiriate-Arba re oĩ jave py. Ha'e va'e ma Hebrôm, Abraão ha'e Isaque ikuaiague.

<sup>28</sup> Isaque cento e oitenta ma'etÿ re oiko.

<sup>29</sup> Ha'e gui Isaque ipytuë atã vy omano tuja'i vaipa ma vy. Ha'e ramo heraa guamoï kuerya py. Ha'e ramo ta'y kuery Esaú ha'e Jacó ae onhono porã.

---

\* <sup>35:7</sup> Tery El-Betel ma “Betel py Nhanderuete ojekuaa ague” 'ea.    † <sup>35:8</sup> Tery Alom-Bacute ma “Carvalho ojae'opaague” 'ea.    ‡ <sup>35:18</sup> Tery Benoni ma “Xepi'a xeraxya guigua” 'ea. Ha'e rã Benjamim ma “Xera'y xepo aiporu kuaa regua oĩ va'e” 'ea.

## 36

### *1 Crônicas 1.35-37*

- <sup>1</sup> Po rami ma Esaú ramymino kuery rery. Hery mboae ma Edom.
- <sup>2</sup> Esaú gua'xyrā ojou Canaã py ikuai va'e rajy kuery regua: heteu regua Elom rajy Ada, heveu regua Zibeão ra'y Aná rajy Oolibama,
- <sup>3</sup> ha'e Ismael rajy Nebaiote reindy Basemate.
- <sup>4</sup> Esaú gui Ada oguereko Elifaz, ha'e Basemate oguereko Reuel.
- <sup>5</sup> Oolibama oguereko Jeús, Jalão ha'e Coré. Ha'e va'e kuery ma Esaú ra'y kuery Canaã yvy re itui'i va'ekue.
- <sup>6</sup> Esaú ogueraapa gua'xy kuery, gua'y kuery, guajy kuery, ngoo py oguereko va'e kuery ha'e javi, guymba kuery, vaka ha'e mba'emo Canaã yvy re oĩ jave ojou va'ekue ha'e javi. Amboae yvy re ju ogueraapa guyvy Jacó gui oja'o vy,
- <sup>7</sup> mba'eta ha'e kuery oguerekopa vy nda'evei joa py ikuaive aguã. Yvy ikuia re ma noïvei hymba kuery omongaru aguã, heta ete ramo.
- <sup>8</sup> Ha'e rami vy Esaú Edom avi hery va'e oo vy Seir yvyty re oiko.
- <sup>9</sup> Pova'e ma Esaú ramymino kuery, edomita kuery Seir yvyty re ikuai.
- <sup>10</sup> Po rami ma Esaú ra'y kuery rery: Esaú ra'xy Ada pi'a Elifaz, ha'e Esaú ra'xy Basemate pi'a Reuel.
- <sup>11</sup> Elifaz ra'y kuery ma Temã, Omar, Zefô, Gaetã ha'e Quenaz.
- <sup>12</sup> Esaú ra'y Elifaz ma gua'xy jevy oguereko, Timna hery va'e. Ha'e va'e ma Elifaz gui oguereko Amaleque. Ha'e va'e kuery ma Esaú ra'xy Ada remiarirõ.
- <sup>13</sup> Ha'e gui Reuel ra'y kuery ma Naate, Zerá, Samá ha'e Mizá. Ha'e va'e kuery ma Esaú ra'xy Basemate remiarirõ.
- <sup>14</sup> Ha'e rã Esaú ra'xy jevy Oolibama ma Aná rajy, Zibeão ramymino oiko. Esaú gui oguereko Jeús, Jalão ha'e Coré.
- <sup>15</sup> Pova'e kuery ma Esaú ra'y kuery huvixa ikuai va'e: Esaú ra'y jypy'igua Elifaz ra'y kuery ma huvixa Temã, Omar, Zefô, Quenaz,
- <sup>16</sup> Coré, Gaetã ha'e huvixa Amaleque. Ha'e va'e Elifaz ra'y kuery huvixa meme ikuai, Edom yvy re oiko va'ekue. Ada remiarirõ ikuai.
- <sup>17</sup> Ha'e rã Esaú ra'y Reuel ra'y kuery ma huvixa Naate, Zerá, Samá ha'e Mizá. Ha'e va'e Reuel ra'y kuery ma huvixa meme ikuai Edom yvy re. Esaú ra'xy Basemate remiarirõ ikuai.
- <sup>18</sup> Ha'e rã Esaú ra'xy Oolibama pi'a kuery ma huvixa Jeús, Jalão ha'e Coré. Ha'e va'e huvixa kuery ma Esaú ra'xy Oolibama Aná rajy memby ikuai.
- <sup>19</sup> Ha'e kuery, huvixa kuery guive Esaú ramymino meme ikuai. Ha'e ma Edom.

### *1 Crônicas 1.38-42*

- <sup>20</sup> Pova'e kuery ma horeu regua Seir ra'y kuery ha'e va'e yvy re ikuai va'e: Lotã, Sobal, Zibeão, Aná,
- <sup>21</sup> Disom, Eser ha'e Disã. Ha'e va'e kuery ma horeu kuery ruvixa, horeu regua Seir ra'y meme ikuai yvy re.
- <sup>22</sup> Lotã ra'y kuery ma Hori ha'e Homã. Lotã reindy ma Timna.
- <sup>23</sup> Sobal ra'y kuery ma Alvã, Manaate, Ebal, Sefô ha'e Onã.
- <sup>24</sup> Zibeão ra'y kuery ma Aiá ha'e Aná. Aná ma tekoa e'ya py yvu haku va'e ojou raka'e, nguu Zibeão rymba kuery mburika re opena oikovya py.
- <sup>25</sup> Aná ra'y kuery ma Disom ha'e tajy Oolibama.
- <sup>26</sup> Disã ra'y kuery ma Hendã, Esbã, Itrã ha'e Querã.
- <sup>27</sup> Eser ra'y kuery ma Bilã, Zaavã ha'e Acã.
- <sup>28</sup> Disã ra'y kuery ma Uz ha'e Arã.
- <sup>29</sup> Horeu kuery ruvixa ikuai va'e ma huvixa Lotã, Sobal, Zibeão, Aná,

<sup>30</sup> Disom, Eser ha'e Disã. Ha'e va'e kuery ma horeu kuery ruvixa ikuai, Seir yvy re hekoa va'e meme.

<sup>1</sup> *Crônicas 1.43-54*

<sup>31</sup> Pova'e kuery ma Edom yvy re huvixa kuery ikuai, Israel kuery ruvixave oĩ e'ŷ mbove.

<sup>32</sup> Beor ra'y Belá oĩ Edom pygua ruvixa. Tetã opena oikovya ma Dinabá.

<sup>33</sup> Belá omano ramo hekivia oĩ Bozra pygua Zerá ra'y Jobabe.

<sup>34</sup> Jobabe omano ramo hekivia oĩ temanita yvy guigua Husão.

<sup>35</sup> Husão ju omano ramo hekivia oĩ Bedade ra'y Hadade. Ha'e va'e ma Moabe yvy re Midiã pygua kuery ojuka va'ekue. Tetã opena oikovya ma Avite.

<sup>36</sup> Hadade omano ramo hekivia oĩ Masreca pygua Samlá.

<sup>37</sup> Samlá omano ramo hekivia oĩ Saul, Reobote tetã Eufrates yakã yvy'iry oĩ va'e guigua.

<sup>38</sup> Saul omano ramo hekivia oĩ Acbor ra'y Baal-Hanã.

<sup>39</sup> Acbor ra'y Baal-Hanã omano ramo hekivia oĩ Hadar. Tetã opena oikovya ma Pau. Ta'yxy ma Meetabel oiko, Matrede rajy, Me-Zaabe ramymino.

<sup>40</sup> Po rami ma Esaú ramymino huvixa ikuai va'e. Ha'e kuery rery, hetarã kuery rery ha'e hekoa rery ma joo ramigua: huvixa Timna, Alva, Jetete,

<sup>41</sup> Oolibama, Elá, Pinom,

<sup>42</sup> Quenaz, Temã, Mibzar,

<sup>43</sup> Magdiel ha'e Irã. Ha'e va'e kuery ma Edom pygua ruvixa ikuai. Ha'e kuery rery ma ijyvy hekoa rery joo ramigua ae. Ha'e va'e kuery ma Edom kuery ru Esaú ramymino ikuai.

## 37

### *Tyke'y kuery guyvy José ovendeague*

<sup>1</sup> Jacó ma yvy tuu oguata oikovyague rupi ae ju oiko, Canaã yvy re.

<sup>2</sup> Po rami ma Jacó kuery rekoke. Ta'y José dezessete ma'etý oguereko jave vexa'i re opena oikovy guyke'y kuery reve. Kunumi teri jave tuu rembiguai pi'a kuery reve oiko, Bila ha'e Zilpa pi'a kuery reve. Ha'e kuery reko omombe'u riae ngu pe.

<sup>3</sup> Tuu Israel ma gua'y kuery ha'e javi gui oayvuve José, tuja'i ma vy ta'y rire. Ha'e rami vy ikamixa pukurã ojapo, ijyva puku va'e.

<sup>4</sup> Ha'e gui tyke'y kuery ma ha'e kuery gui tuu José oayvuvea oexa vy nda'ija'evei hexe. Hexeve ijayvu porã aguã voi nda'evevei.

<sup>5</sup> Ha'e gui José oexa ra'u peteĩ mba'e, ha'e guyke'y kuery pe omombe'u. Ha'e ramo ipoxypave ju,

<sup>6</sup> mba'eta ha'e kuery pe aipoe'i rire:

— Ajerure pêvy, pendu ke amombe'u rã aexa ra'u va'ekue.

<sup>7</sup> Mba'ety py merami nhandekuai mba'emo aju jokuaa rupi. Ha'e va'e mbyte py xee ajokua va'ekue opu'ã ho'amy. Ha'e rã peẽ pejokua va'ekue ma ombojere vy xemba'e renonde re ojero'a okuapy – he'i.

<sup>8</sup> Ha'e ramo tyke'y kuery aipoe'i:

— Ha'e rami vy ndee ri ty'y oreruvixarã reiko? Ndee ri ty'y orere ndepo'aka ta? – he'i okuapy. Ha'e rami ipoxypave okuapy oexa ra'u va'ekue omombe'u ramo, ijayvua ojou vai vy.

<sup>9</sup> Ha'e gui amboae ju José oexa ra'u. Guyke'y kuery pe omombe'u vy aipoe'i:

— Aexa ra'u avi peteĩ mba'e. Ha'e vy aexa kuaray, jaxy ha'e jaxy-tata onze ikuai va'e. Ha'e kuery xerenonde re merami ikuai vy ngova yvy re omovaëmba okuapy – he'i.

<sup>10</sup> Nguu ha'e guyke'y kuery pe omombe'u ramo tuu ixupe ijayvu ete. Ha'e vy aipoe'i:

— Mba'erã tu ha'e nunga rexâ ra'u? Ha'e rami vy ore kuery – xee, ndexy, nderyke'y kuery – yvy re orerova romovaëmba 'rã ri ty'y nerondenre roï vy? – he'i.

**11** Tyke'y kuery ma ndoayvuvei okuapy. Ha'e rã tuu ma ha'e nungakue omoõ porã opy'a re.

**12** Ha'e gui tyke'y kuery oo nguu rymba kuery veva'i re opena aguã Siquém katy.

**13** Ha'e ramo Israel aipoe'i José pe:

— Xerymba kuery re nderyke'y kuery opena okuapy Siquém py. Romondouka 'rã ha'e kuerya py.

José ombovai:

— Apy ma aĩ.

**14** Israel aipoe'i:

— Tereo aÿ. Exa marã rami pa nderyke'y kuery ikuaria, ha'e xerymba kuery mba'exa pa ikuaria guive exa pota. Ha'e gui eju xevy remombe'u aguã — he'i. Ha'e rami vy Hebron yvy'ã guy gui omondouka Siquém katy.

**15** Opa rupi rei José oiko rã peteñ ava ovaexi. Ha'e vy oporandu:

— Mba'e tu reka reikovy?

**16** Ombovai:

— Ke'y kuery rima aeka aikovy. Emombe'u ke mamo pa mymba kuery oguereko okuapya — he'i.

**17** Ha'e rã ava va'e aipoe'i:

— Apy gui oje'oipa ju ma. Mba'eta aendu aipoe'i rã: "Jaje'oi apy gui Dotã katy ju" he'i okuapy ramo. — Ha'e ramo José oo guyke'y kuery rakykue. Ha'e vy Dotã py ojou.

**18** Mombyry rupi ou reve ha'e kuery oexa vy ovaë e'ÿ mbove jogueroayvu okuapy ojuka aguã re.

**19** Joupe-upé aipoe'i:

— Pee ma ou oiny oexa ra'u kuaa va'e!

**20** Peju ke aÿ, jajuka. Nhamombo yvykua py, ha'e nhamombe'u 'rã vixo ka'aguy regua ho'uague rami. Ha'e rami vy jaexa 'rã mba'e pa oexa ra'uague gui oiko ra'ea — he'i okuapy.

**21** Ha'e rami ijayvu rã tyke'y Rúben oendu vy ogueraa jepe ha'e kuery po gui. Ha'e vy aipoe'i:

— Nda'evei jajuka aguã.

**22** Nda'evei nhamoë aguã huguy. Yvykua tekoa e'ÿa py oï va'e py pemombo teñ hexe pemoï eme pendepo — he'i. Ha'e rami ijayvu ha'e kuery po gui ogueraa jepexe vy tuua py ju omondouka aguã.

**23** Ha'e gui José guyke'y kuerya py ovaë ramove ojopy, omboi ikamixa puku ijyva puku va'e onhemonde oikovya.

**24** Ojopy vy omombo yvykua yy oï e'ÿ va'e py.

**25** Ha'e gui oguapy okuapy okaru aguã. Oma'ë vy oexa Ismael regua kuery Gileade gui ou okuapy va'e. Guymba camelo áry ogueru heakuã porã va'e, bálsamo ha'e mirra. Egito yvy katy ogueraa henoiny.

**26** Ha'e gui Judá aipoe'i guyvy kuery pe:

— Mba'e tu jajou 'rã nhanderyvy jajukaague re, ha'e huguy nhamoëague nhanhomia re?

**27** Peju, nhavende Ismael regua kuery pe, hexe nhandepo nhamoï e'ÿ aguã, mba'eta nhanderyvy nhandro'o ae oiko — he'i. Ha'e ramo tyvy kuery ojou porã.

**28** Mba'emo vendea Midiã pygua kuery oaxa oje'oivy ramo José ryke'y kuery ojopy vy oguenoë yvykua gui. Ismael regua kuery pe ovende vinte hatã'i va'e prata guigua re. Ha'e rã ha'e kuery ma Egito yvy katy ogueraa José.

**29** Ha'e gui Rúben yvykua py oma'ë aguã ou ju ramo José noïvei ma ha'e py. Ha'e ramo oao omondoro.\*

\* **37:29** Ha'e kuery omondoro 'rã oao ndovy'aia oexa uka vy.

<sup>30</sup> Oo ju guyke'y kuerya py. Aipoe'i:

— Kunumi va'e noïvei pe py. Ha'e rami rire xee marã katy 'rã tu aa? — he'i.

<sup>31</sup> Ha'e ramo José kamixa puku ojopy vy kavara ojuka vy ombovypa huguy.

<sup>32</sup> Ha'e vy kamixa puku ijyva puku va'e omondouka, nguua py ogueraa uka. Ha'e vy aipoe'i uka okuapy:

— Kova'e rojou. Exa pota nderay mba'e pa tyrã pa ha'e'ÿa — he'i uka.

<sup>33</sup> Ha'e gui tuu kamixa puku oexa kuaa vy aipoe'i:

— Xera'y mba'e rima. Vixo ka'aguy regua rima ho'u ra'e. Anhetẽ José omondoropa 'rã ra'e — he'i.

<sup>34</sup> Ha'e rami vy Jacó oao omondoropa vy ajukue voxua guigua py ju onhemonde. Mbovy ára re rei e'ÿ ipy'a vai oikovy gua'y re.

<sup>35</sup> Ha'e ramo ta'y ha'e tajy kuery ha'e javive joguerupa ombopy'a porã aguã. Ha'e rã ha'e ma nonhembopy'a porã ukai. Ha'e vy aipoe'i:

— Ajae'o reve 'rã xenhe'ë oo xera'y oña py — he'i. Ha'e rami vy tuu ojae'o vaipa.

<sup>36</sup> Ha'e va'e jave Midiã regua kuery ma Egito yvy py ju ovende José, Faraó rembiguai xondaro ruvíxa Potifar hery va'e pe.

## 38

### *Judá ha'e ta'y ra'yxykue Tamar rekokue oña*

<sup>1</sup> Ha'e va'e jave py Judá guyvy kuerya gui ojepe'a vy oiko peteñ Adulão pygua, Hira hery va'e ro py.

<sup>2</sup> Ha'e py Judá oexa peteñ kunha Canaã pygua Sua rajy. Gua'yxyrã ogueru vy oguereko.

<sup>3</sup> Ha'e gui oguereko'i kyrí va'e, ava'i. Tuu omboery Er.

<sup>4</sup> Oguerekove ju amboae kyrí va'e. Ha'e va'e ma ixy omboery Onã.

<sup>5</sup> Peteñgue ju oguereko ramo amboae ava'i itui'i. Ha'e va'e rery ma Selá. Quezibe tekoa py oikoa py oikuavã'i.

<sup>6</sup> Ha'e gui Judá ojou gua'y jypy guare Er ra'yxyrã, Tamar hery va'e.

<sup>7</sup> Ha'e rã Judá ra'y tujave va'e ma teko vai rupi anho oiko Nhanderuete renonde. Ha'e ramo SENHOR oipe'ahekove.

<sup>8</sup> Ha'e ramo gua'y Onã pe ju Judá aipoe'i:

— Ereko nderyke'y ra'yxykue. Nhanderekorã va'ekue rami vy ereko, nderyke'y ra'yra rami perekro aguã — he'i.\*

<sup>9</sup> Ha'e rami teñ Onã oikuua ta'y oiko va'erã va'e ta'y ae e'ÿ oiko 'rãa. Ha'e rami vy guyke'y ra'yxykue reve onheno nhavõ ojapo yvy py ho'apa aguã rami, tyke'y ra'yrã rami oiko e'ÿ aguã.

<sup>10</sup> Ha'e rami ojapo ramo SENHOR ndojou porãi. Ha'e rami vy ha'e va'e rekove voi oipe'a avi.

<sup>11</sup> Ha'e ramo Judá aipoe'i gua'y ra'yxykue Tamar pe:

— Eiko imeve'ÿ va'e ranhe nderu ro py, xera'y Selá tuja peve — he'i. Mba'eta ojeupe aipoe'i: "Kova'e xera'y voi guyke'y kuery rami omano e'ÿ aguã", he'i vy. Ha'e ramo Tamar oo vy nguua ro py ju oiko.

<sup>12</sup> Yma ma rire Judá ra'yxy Sua rajy va'e omano. Ha'e va'e gui Judá ipy'a porã ju vy oo guymba kuery vexa'i rague ojaya aguã Timna py, oirũ Hira Adulão pygua reve.

<sup>13</sup> Ha'e Tamar pe aipo'ea:

— Neme rukue rako ou oiny Timna katy, guymba vexa'i rague ojaya aguã — he'i.

\* <sup>38:8</sup> Ha'e kuery reko rami vy amongue ta'y e'ÿ re omano ramo tyvy ju oiko 'rã imeve'ÿ va'e re omenda aguã rami, tyvy ra'y oiko aguã omano va'ekue ra'y rami (Deuteronômio 25.5-6). Ha'e nunga re saduceu kuery oporandu okuapy Jesus pe (Mateus 22.23-33; Marcos 12.18-27; Lucas 20.27-40).

**14** Ha'e ramo oao imeve'ŷ va'e regua onhemondea omboekovia, ngova guive omo'ã ojexa kuaa uka e'ŷ aguã. Oguapy oiny Enaim rokẽ rexei Timna katy tape oo va'e py, mba'eta oikuua Selá tuja ma va'eri ta'yxyrã nome'ëi teria.

**15** Ha'e gui Judá oexa vy "Itavy rei va'e po" he'i, ngova omo'ã ramo.

**16** Ha'e rami vy hexe onhemboja ovvy vy aipoe'i:

— Eju, jaa nhanheno — he'i, gua'y ra'yxykue oexa kuaa e'ŷ vy.

Kunha va'e oporandu:

— Mba'e tu ha'vy reme'ë ta nhanheno aguã re?

**17** Ha'e ombovai:

— Ndea py aru ruka 'rã peteĩ kavara xerymba kuery ikuiaia gui — he'i.

Ha'e rã kunha va'e aipoe'i:

— Kavara reru ruka e'ŷ ja eja ranhe xevy mba'emo areko va'erã — he'i.

**18** Judá oporandu:

— Mba'e nunga ha'vy reipota aeja?

Kunha va'e ombovai:

— Nemba'e carimbo ixã reve, ha'e ndepopoka ndepo py rereko va'e — he'i. Ome'ëmba vy onhenen kunha va'e reve. Ha'e gui kunha va'e oguerekoi ta'y.

**19** Ha'e vy opu'ã ovvy vy omboi ngova mo'aa. Omoï ju ao imeve'ŷ va'e regua omboi va'ekue.

**20** Ha'e va'e rire oñague py Judá ogueraa uka kavara oirũ Adulão pygua pe, kunha va'e gui ogueru ju aguã ipo py oeja va'ekue. Oo teĩ ndojou i kunha va'e.

**21** Ha'e vy oporandu ha'e pygua avakue pe. Ha'e vy aipoe'i:

— Mamo tu oĩ kunha itavy rei va'e Enaim rexei'i tape oo va'e py oĩ va'ekue?

Ha'e kuery ombovai:

— Apy tu ndoikoi ri jepi itavy rei va'e — he'i.

**22** Ha'e gui Judá oña py ju irũ ojevy vy aipoe'i:

— Xee ndajoui kunha va'e. Ha'e rami avi avakue ha'e pygua "Apy tu ndoikoi ri jepi itavy rei va'e", he'i okuapy xevy.

**23** Judá ombovai:

— Tove ipo py ae topyta aeja va'ekue, nhandejojaia rei e'ŷ aguã. Ixupe guarã kavara araa uka teĩ nderejoui — he'i.

**24** Ha'e gui mboapy jaxy rai'i jave Judá pe aipo'ea:

— Nderal' y ra'yxykue Tamar tu itavy rei ra'e, oguerekoi ma kyrĩ va'e — 'ea.

Ha'e ramo Judá aipoe'i:

— Penoë na oka py peapypa aguã.

**25** Oguenoë heruvy ramo aipoe'i uka ome rukue pe:

— Kova'e ja gui ae areko kyrĩ va'e. Peikuaa pota ke mava'e mba'e pa kova'e carimbo ixã revegua ha'e kova'e popoka — he'i.

**26** Ha'e ramo Judá oexa kuaa vy aipoe'i:

— Ha'e ma xegui heko porãve va'e oiko, imerã xera'y Selá name'ëi rire — he'i. Ha'e va'e rire nonhenovei hexeve.

**27** Kyrĩ va'e oikuavã aguã ára ovaẽ ramo mokoï'i oguerekoi hyru py.

**28** Itui'i jave peteĩ omoï opo oka katy. Ixy re opena va'e ojopy vy ipo rupi ojokua nhimbo pytã va'e py. Ha'e vy aipoe'i:

— Kova'e ma ha'e ranhe omoë opo.

**29** Ha'e rami teĩ ha'e va'e opo omoinge ju ramo amboae ju itui. Ha'e rã aipoe'i:

— Mba'eda tu remopa'ü rejuy? — he'i vy omboery Perez.<sup>†</sup>

**30** Ha'e gui ma tyvy ju itui ipo rupi nhimbo pytã ojokuaa va'ekue reve. Ha'e vy omboery Zera.

<sup>†</sup> **38:29** Tery Perez ma "Omopa'ü va'e" 'ea.

## 39

### *Potifar ro py José oikoague*

<sup>1</sup> Ha'e gui Ismael regua kuery Egito katy José ogueraa okuapy rire ha'e kuery gui Faraó rembiguai xondaro ruvixa Potifar hery va'e ju ojogua.

<sup>2</sup> José reve SENHOR oiko ramo oiko porã Egito pygua ro py.

<sup>3</sup> Potifar voi oexa hexeve SENHOR oikoa, ha'e mba'emo ojapoa ha'e javi py SENHOR omoingo porãa.

<sup>4</sup> Ha'e rami vy ojou porã José. Omoñngoo py ikuai va'e ha'e javi re opena aguã. Opa mba'e oguereko va'e omboaxapa ipo py.

<sup>5</sup> Ngoo ha'e opa mba'e oguereko va'e re opena ukaa ára guive José re vy SENHOR omoingo porã Egito pygua ro. Opa mba'e oguereko va'e, hoo pygua, mba'ety rupi voi SENHOR omoingo porã.

<sup>6</sup> Ha'e ramo Potifar opa mba'e José po py omboaxapa, mba'emo re opena va'erã omoñ vy mba'eve re ndoikuua potavei mbojape ho'u va'erã e'ý vy. José ma imbaraete, iporã guive.

<sup>7</sup> Ha'e va'e rire ipatõ ra'yxy openaxe oikovy José re. Ha'e vy aipoe'i:

— Enheno xereve.

<sup>8</sup> Ha'e ramo ndoipotai vy aipoe'i opatõ ra'yxy pe:

— Xepatõ ma ndoikuua potai mba'emo hoo py oĩ va'e re, xepo py omboaxapa oguereko va'e ha'e javi.

<sup>9</sup> Ha'e voi xegui ndayvatevei kova'e oo py. Mba'eve nomboaxa e'ýi apena aguã, ndere e'ý vy, ta'yxy ae reiko ramo. Mba'e re tu ha'e rami ete teko vai ajapo ta, Nhanderuete pe ajejavvy vy? — he'i.

<sup>10</sup> Ko'ë nhavõ kunha va'e ijayvu oikovy José pe. Ha'e rã ndojapyxakai hexeve onheno aguã, neï hexeve oï aguã ndojou porãi guive.

<sup>11</sup> Ha'e gui peteï ára oo py José ou mba'emo re oikuua pota aguã. Tembiguai oo pygua kuery neï peteïve noï.

<sup>12</sup> Ha'e ramo kunha va'e ijao re ojopy vy aipoe'i:

— Enheno xereve — he'i ju. Ha'e ramo kunha va'e po py oao oeja ovvy, onha ovvy oka katy.

<sup>13</sup> Oka katy onha vy oao ipo py oeja ovya kunha va'e oexa vy

<sup>14</sup> oenoï tembiguai avakue oo pygua kuery. Ha'e vy aipoe'i ha'e kuery pe:

— Pexa ma, kova'e hebreu xeme ogueru va'ekue nhanembojaru rei aguã ou. Xea py ou kuri xereve onhenoxe vy. Ha'e rã xee ajapukai ratã.

<sup>15</sup> Ajapukai ratã ramo oendu vy onha ovvy oka katy, oao oeja ovvy — he'i.

<sup>16</sup> Kunha va'e ijao omoñ porã oyvýry, ime ngoo py ou ju peve.

<sup>17</sup> Ha'e gui ome pe ju omombe'u jypy omombe'uague rami ae. Ha'e vy aipoe'i:

— Xea py ou kuri hebreu nerembiguarã reru va'ekue, xembojaruxe vy.

<sup>18</sup> Ha'e gui ajapukai atã ramo oka katy onha vy xeyvýry oeja ovvy oao — he'i.

<sup>19</sup> Ipatõ ra'yxy ixupe “Ha'e rami nerembiguai ojapo kuri xere” he'i rã oendu vy ipoxy vaipa.

<sup>20</sup> Ha'e vy ojopy José. Ombo'a uka nhuã huvixa ombo'a uka va'ekue ikuiaia py. Ha'e rami rã José nhuã py oï.

<sup>21</sup> Ha'e rami teï José reve SENHOR oiko vy opena porã hexe. Ojapo nhuã re opena va'e ojou porã aguã rami.

<sup>22</sup> Ha'e ramo José pe ju opena uka nhuã py ikuai va'e ha'e javive re. Mba'emo ojapoa va'e ha'e javi re opena ha'e py.

<sup>23</sup> Nhuã re opena va'e mba'eve ndojapoi, José pe anho mba'emo ojapo uka vy. Hexeve SENHOR oiko, ha'e mba'emo ojapoa ha'e javi py SENHOR omoingo porã.

## 40

### *José nhuā py oījave mokoī oexa ra'u va'ekue omombe'uague*

<sup>1</sup> Ha'e va'e rire Egito pygua huvixa rembiguai kuery, ixupegua karo re opena va'ety ha'e mbojape apoa, mokoīve ojejavý opatō pe.

<sup>2</sup> Ha'e ramo guembiguai mokoīve pe Faraó ivai, karo re opena va'e ruvixa pe, mbojape apoa ruvixa pe guive.

<sup>3</sup> Ha'e rami vy ombo'a uka xondaro ruvixa ro py, José nhuā py oīa py ae.

<sup>4</sup> Mokoīve re xondaro ruvixa opena uka José pe. Ha'e rami py opyta are okuapy nhuā py.

<sup>5</sup> Peteī pyavyve ha'e kuery mokoīve oexa ra'u, karo re opena va'ekue ha'e mbojape apoare Egito pygua huvixa rembiguai nhuā py ikuai va'e. Ha'e rami vy peteī-teī oikuaaxe oexa ra'uague mba'erā paa.

<sup>6</sup> Ko'ē aje'ive reve ha'e kuerya py José ou vy oexa rā iporiau rei okuapy.

<sup>7</sup> Ha'e ramo oporandu Faraó rembiguai hexeve nhuā py ikuai va'e pe. Ha'e vy aipoe'i:

— Mba'e re tu aīy pendeporiau rei pekuapy?

<sup>8</sup> Ha'e kuery ombovai:

— Roexa ra'u kuri peteī mba'e, ha'e avave rei jipoí mba'erā paa kuaa ukaarā — he'i.

Ha'e ramo José aipoe'i:

— Nhanderuete e'ŷ ri ty'y ha'e nunga kuaa ukaarā oiko? Pemombe'u ha'vy xevy pexa ra'u va'ekue.

### *Karo re opena va'e oexa ra'u va'ekue omombe'uague*

<sup>9</sup> Ha'e ramo karo re opena va'ekue José pe omombe'u oexa ra'u va'ekue. Ha'e vy aipoe'i:

— Xee aexa ra'u rā peteī uva rembypy hi'aī xerenonde.

<sup>10</sup> Uva rembypy re oī mboapy hakā. Hoky, ipotypa, hi'a ijajupa guive.

<sup>11</sup> Faraó pegua karo xepo py merami areko. Uva'a ajopy vy aumbiri merami karo py. Ha'e vy Faraó po py merami amoī — he'i.

<sup>12</sup> Ha'e ramo José aipoe'i ixupe:

— Po rami guarā rima ra'e: Mboapy uva rakā ma mboapy ára.

<sup>13</sup> Ha'e gui mboapy araa py ma Faraó nemoī ju 'rā reikoaty rami reiko aguā, nerembia-porā va'ekue rejapo ju 'rā ipo py karo remoī aguā, yma ixupegua karo re repenaaty rami ae ju.

<sup>14</sup> Ha'e rami avi reiko porā ma vy nema'endu'a ke xere. Ajerure xepytyvō aguā, Faraó oendua py ke nema'endu'a xere, kova'e oo gui aē aguā,

<sup>15</sup> mba'eta xee ma anhetē xererua rive va'ekue hebreu kuery yvy gui. Ha'e gui apy voi mba'eve ndajapoi nhuā py xembotya aguā — he'i.

### *Mbojape apoa oexa ra'u va'ekue omombe'uague*

<sup>16</sup> Ha'e gui mbojape apoa ruvixa ju José mba'emo omombe'u porāa oexa vy aipoe'i ixupe:

— Xee voi aexa ra'u kuri. Ha'e gui mboapy ajaka'i mbojape oīa xeakā áry merami araa henoiny.

<sup>17</sup> Ajaka'i hi'áryve oī va'e py ma opa marāgua Faraó ho'uxe vai va'e oī mbojape apoa rembiapo. Ha'e rā guyra ma ho'u okuapy xeakā áry ajaka'i araa va'e gui — he'i.

<sup>18</sup> Ha'e ramo José aipoe'i ixupe:

— Po rami guarā rima ra'e: Mboapy ajaka'i ma mboapy ára.

<sup>19</sup> Ha'e gui mboapy araa py ma Faraó oipe'a uka 'rā neakā, ha'e ndereupi 'rā yvyra re. Ha'e rā guyra ho'u 'rā ndero'okue — he'i.

<sup>20</sup> Ha'e gui mboapy araa py ma ovaē Faraó ituiague ára. Ha'e va'e ára py ngaru ojapo guembiguai kuery ha'e javi pe. Ha'e kuery oexaa py omoī ju karo re opena va'e ruvixa, ha'e rā mbojape apoa ruvixa re ma ijayvu omano aguā re.

<sup>21</sup> Karo re opena va'e ruvixa ma omoñ oikoaty rami ju oiko aguã rami, Faraó po py karo omoñ aguã.

<sup>22</sup> Ha'e rã mbojape apoa ruvixa ma ojyryvipy uka, José omombe'u voiague rami.

<sup>23</sup> Ha'e rami teñ karo re opena va'e ruvixa na'ima'endu'avei José re, hexarai rive.

## 41

### *Faraó oexa ra'u va'ekue ju José omombe'uague*

<sup>1</sup> Mokoñ ma'etÿa py Faraó ju oexa ra'u. Nilo yakã yvýry merami opu'ã ho'amy.

<sup>2</sup> Oexa ra'u sete vaka ikyra va'e, iporãgue va'e yy gui oẽ vy nhuñ rogue ho'u okuapy ramo.

<sup>3</sup> Ha'e va'e rire sete vaka ivaikue, inhangaikue va'e ju yy gui oẽ ouvy ikyrakue rakykue. Oẽ ypy va'ekue reve opyta okuapy yy rembe re.

<sup>4</sup> Ha'e gui vaka ivaikue rei, inhangaikue va'e omokõmba merami vaka ikyrave va'e. Ha'e ramove Faraó omyñ.

<sup>5</sup> Ha'e gui oke vyve oexa ra'u ju. Ha'e vy oexa peteñ rembypy re sete hary iporã va'e oĩ rã.

<sup>6</sup> Ha'e va'e rire sete hary ju oĩ ivaikue'i, yvytu haku va'e omombirupa rei'i va'ekue ramigua.

<sup>7</sup> Ha'e gui sete hary ivaikue'i va'e omokõmba hary porãgue oĩ va'ekue. Ha'e gui Faraó omyñ. Ha'e nunga oexa ra'u.

<sup>8</sup> Ko'ẽ aje'ive ha'e nunga re anho Faraó ipy'a oiny vy oenoñ ukapa imba'ekuaa va'e ha'e guembiguai hi'arandu va'e Egito py ikuai va'e ha'e javi. Ha'e kuery pe omombe'upa oexa ra'u va'ekue. Ha'e rami teñ peteñve jipoi ixupe mba'erã paa omombe'u kuaa va'erã.

<sup>9</sup> Ha'e rami rã karo re opena va'e ruvixa aipoe'i Faraó pe:

— Aÿ ma xema'endu'a peteñ ajejavvyague re.

<sup>10</sup> Nerembiguai kuery pe ndevai vaipa vy xemboty uka karamboae nhuã py xondaro ruvixa ro py, mbojape apoa ruvixa reve.

<sup>11</sup> Peteñ pyávy peteñ-teñ roexa ra'u joo rami e'ÿ-e'ÿ.

<sup>12</sup> Ore roña py oiko avi peteñ kunumi hebreu va'e xondaro ruvixa rembiguai oiko va'ekue. Ore roexa ra'u va'ekue romombe'u ramo oikuaa uka mba'erã pa roexa ra'uague. Peteñ-teñ pe roexa ra'u va'ekue ha'evea rami omombe'u orevy.

<sup>13</sup> Ha'e gui roexa ra'u va'ekue omombe'uague rami meme oiko. Xee ma aikoaty rami ju xemoñ. Ha'e rã amboae ma rejyryvipy uka — he'i.

<sup>14</sup> Ha'e ramo Faraó ma José oenoñ uka ramo nhuã gui oguenoëa pojava. Ha'e ramo guendyva ojapo, ha'e oao omboekovia ma vy oo Faraó pe ojexa uka aguã.

<sup>15</sup> Ixupe Faraó aipoe'i:

— Xee aexa ra'u va'ekue avave rei ndoikuaai mba'erã pa aexa ra'ua. Ha'e rã ndevy ma aipo'ea reikuua va'ea oexa ra'u pyre mba'erã paa.

<sup>16</sup> José ombovai vy aipoe'i:

— Xee e'ÿ rima aikuaa, Nhanderuete ae 'rã oikuaa uka ndee Faraó pe opena porã vy — he'i.

<sup>17</sup> Ha'e ramo Faraó omombe'u José pe:

— Aexa ra'u vy yakã Nilo rembe re merami xe'aï.

<sup>18</sup> Ha'e aexa sete vaka ikyra va'e, iporã va'e yy gui oẽ rã. Okaru okuapy ranhe nhuñ rogue re.

<sup>19</sup> Ha'e rire vaka kuery mboae ju oẽ ouvy ikangykue, ivaikue ha'e inhangaikue. Ha'e ramigua xee aexa va'e'ÿ teri Egito yvy ha'e javi re.

<sup>20</sup> Ha'e gui vaka inhangaikue, ivaikue va'e ho'upa ikyra va'e oẽ ypy va'ekue.

<sup>21</sup> Omokõmba rire teñ aexa rã nhomokõ va'ekue rami e'ÿ, ivaikue rei ae okuapy jypy guare rami ae. Ha'e gui amyñ.

<sup>22</sup> Ha'e gui ma aexa ra'u ju peteñ rembypy re sete hary iporãgue oĩ va'e.

<sup>23</sup> Ha'e va'e rire oẽ ju sete hary vaikue'i, yvytu haku va'e gui ipirupa rei va'e.

<sup>24</sup> Ha'e gui sete hary vaikue'i va'e omokõmba sete hary porãgue ikuai va'ekue. Ha'e nunga imba'ekuaa va'e kuery pe amombe'u rã neĩ peteĩve nomombe'u kuaai mba'erã paa – he'i.

<sup>25</sup> Ha'e ramo José ombovai:

— Ndee Faraó, peteĩ rami guarã ae rexâra'u ra'e. Nhanderuete mba'emo omoingo va'erã rima oikuua uka ndevy.

<sup>26</sup> Sete vaka iporã va'e rexâra'u ma sete ma'etã. Ha'e sete hary iporã va'e voi sete ma'etã. Rexâra'u va'ekue ma peteĩ'i rami guarã.

<sup>27</sup> Sete vaka ivaikue rei, inhangaikue va'e takykue oẽ va'e ma sete ma'etã avi, ha'e sete hary ivaikue rei va'e yvytu haku va'e omombirupa va'ekue ma sete ma'etã re karuai oiko va'erã.

<sup>28</sup> Pova'e ayvu Faraó pe aipoa'e va'e py ma Nhanderuete ndevy oikuua uka mba'emo ombou va'erã.

<sup>29</sup> Mba'eta sete ma'etã re opa mba'e oiko porã 'rã Egito yvy ha'e javi re.

<sup>30</sup> Ha'e va'e rire ma sete ma'etã re ju 'rã oiko karuai. Ha'e va'e gui opa mba'e oiko porãague re na'ima'endu'aavei 'rã Egito yvy re, mba'eta karuai omomba 'rã yvy ha'e javi.

<sup>31</sup> Yvy re oiko porãague re ma na'ima'endu'aavei 'rã karuai ha'e va'e rire oiko ramo. Ha'e nunga nda'evei ete 'rã.

<sup>32</sup> Mokoïgue ma Faraó pe Nhanderuete oexa ra'u uka, mba'eta ombou 'rãe, ombou voi 'rã guive.

<sup>33</sup> Aÿ ma Faraó, rejou 'rãgue peteĩ ava oiko kuaa va'e, hi'arandu va'e Egito yvy re opena aguã remoõi va'erã.

<sup>34</sup> Faraó, ejapo ke po rami. Emoõi yvy re opena va'erã kuery, Egito yvy rupi sete ma'etã re peteĩ nhiruõi henda py ijaju va'e oiko nhavõi gui peteĩ-tei ojopy va'erã.

<sup>35</sup> Opena va'e kuery tomono'õ mba'emo'a, ma'etã oiko porã va'e ára. Tomboaty reta mba'emo ra'yí Faraó po py tetã pygua kuery peguarã. Tomoõi porãmba.

<sup>36</sup> Ha'e rami vy 'rãe perekó tembi'u karuai sete ma'etã re Egito yvy re oiko jave guarã, karuai gui yvy re ikuai va'e opa e'ý aguã – he'i.

### *Egito yvy re José opena oikovyague*

<sup>37</sup> Ha'e va'e ayvu Faraó ojou porã. Hembiguai kuery voi ojou porã.

<sup>38</sup> Ha'e rami vy Faraó aipoe'i guembiguai kuery pe:

— Jajou 'rã ri nda'u ava kova'e rami hexe Nhanderuete Nhe'ë oï va'e? – he'i.

<sup>39</sup> Ha'e rire José pe ju Faraó aipoe'i:

— Ha'e gui ha'e nunga ha'e javi Nhanderuete oikuua ukapa ndevy. Avave rei ndoikoi ndee ramigua oiko kuaa ha'e hi'arandu va'e.

<sup>40</sup> Ha'e rami rã ndee ae 'rã rei xero re opena va'e. Ndee meme 'rã ndepo'aka xevygua kuery re. Xee anho 'rã ndegui yvateve va'e aiko – he'i.

<sup>41</sup> Faraó aipoe'ive ju José pe:

— Ma'ë, Egito yvy ha'e javi re repena aguã romoõi – he'i.

<sup>42</sup> Ha'e rami vy Faraó okuã regua hery oïa va'e omboi vy José kuã re ju omoõi. Ao ajukue iporãve va'e guigua py omonhemonde vy mbo'y ouro guigua omoõi ijaju'y re.

<sup>43</sup> Karóxa mokoõa va'e py oï aguã rami ojapo, ha'e henonde "Penenapy'ã re ke pei" he'i uka heravy. Ha'e rami py ombopo'aka Egito yvy re ikuai va'e ha'e javi re.

<sup>44</sup> Faraó aipoe'ive ju José pe:

— Xee ma Faraó. Ha'e rami avi ndeayvu e'ý re avave rei ndoupi 'rã opo neĩ opy Egito yvy ha'e javi re – he'i.

<sup>45</sup> Faraó omboery José Zafenate-Panéia. Ta'yxyrã ome'ë Asenate, Om pegua sacerdote Potífera hery va'e rajy. Ha'e va'e rire José oguata oikovy Egito yvy ha'e javi rupi.

<sup>46</sup> José trinta ma'etŷ oguereko Egito pygua huvixa Faraó renonde ojexa uka jave. Ha'e va'e gui Egito yvy jave re oguataa rupi oiko.

<sup>47</sup> Sete ma'etŷ re yvy py onhotŷ mbyre ha'e javi oiko porã.

<sup>48</sup> Ha'e va'e sete ma'etŷ re José omono'õ ukapa tembi'urã Egito yvy re oiko va'e. Omoĩ porã tetã ikuai va'e py. Peteĩ-teĩ tetã pyve omoĩ porã ha'e va'e katy'i rupi tembi'urã oiko va'ekue.

<sup>49</sup> Ha'e rami vy José omono'õ reta mba'emo ra'yí, ita ku'i ye'ẽ rembe rupi ikuai va'e hetaa rami. Ndoipapa kuaavei ma, heta vaipa ete rã.

<sup>50</sup> Ha'e gui karuai oiko e'ŷ mbove oiko mokoĩ kyrí va'e José ra'y, Om pegua sacerdote Potífera rajy Asenate pi'a.

<sup>51</sup> Tujave va'e ma José omboery Manassés, mba'eta "Nhanderuete xemboexarai amba'eapo atãague, ha'e xeru ro py aiko jave guare ha'e javi re", he'i vy.\*

<sup>52</sup> Ha'e rã gua'y mboae ma omboery Efraim, "Yvy ajexavai aikovyague py teĩ Nhan-deruete xeapo xera'y reta aguã rami", he'i vy.†

<sup>53</sup> Sete ma'etŷ Egito yvy re opa mba'e oiko porãa opa.

<sup>54</sup> Ha'e va'e rire oiko sete ma'etŷ re karuai, José aipoe'iague rami vy. Yvy jave re ete oiko karuai. Ha'e rã Egito yvy ha'e javi re ma oĩ tembi'u.

<sup>55</sup> Egito yvy jave re karuai oiko ramo Egito pygua kuery Faraó pe ojapukai tembi'u re. Ha'e ramo ojeupagua kuery pe Faraó  
— Tapeo José-a py. Ha'e ojapo uka va'e tema pejapo — he'i.

<sup>56</sup> Yvy jave re karuai oiko ramo José oipe'a uka tembi'u omoĩ porãaty ha'e javi Egito pygua kuery pe ovende aguã, Egito re voi karuai oiko ramo.

<sup>57</sup> Yvy jave re karuai ramo Egito katy oua, José gui tembi'u ojogua aguã.

## 42

### *Egito py José ryke'y kuery ju ou okuapyague*

<sup>1</sup> Egito yvy re tembi'u oĩ Jacó oikuua vy aipoe'i gua'y kuery pe:

— Mba'e re tu joe-joe rive ri pema'ẽ pekuapy?

<sup>2</sup> Xee aendu "Egito yvy re mba'emo ra'yí oĩ" 'ea rã. Tapeo ha'vy ha'e gui pejogua jaikove aguã, nhamanomba e'ŷ aguã — he'i.

<sup>3</sup> Ha'e ramo José ryke'y kuery dez-ve ikuai va'e oje'oi Egito gui mba'emo ra'yí ojogua aguã.

<sup>4</sup> Ha'e rã José ryvy Benjamim ma Jacó nomondoukai tyke'y kuery reve, ojeupe "Xapy'a rei mba'emo oiko gui", he'i vy.

<sup>5</sup> Ha'e rami vy amboae regua kuery reve Israel ra'y kuery oje'oi mba'emo ojogua vy, Canaã yvy re voi karuai oiko ramo.

<sup>6</sup> José ma Egito yvy re opena va'e oĩ. Ha'e ae yvy jave gui ou va'e pe mba'emo ovende oiny. Ha'e rami rã tyke'y kuery ou vy guenapy'ã re oĩ henonde, yvy re ngova omovaẽmba reve.

<sup>7</sup> José ma guyke'y kuery oexa kuaa. Ha'e rami teĩ ha'e kuery pe ndojekuaa ukai. Ha'e kuery pe ijayvu atã guive. Ha'e vy aipoe'i:

— Magui tu peju?

Ha'e kuery ombovai:

— Canaã yvy gui roju tembi'u rojogua aguã — he'i okuapy.

<sup>8</sup> José oexa kuaa guyke'y kuery, ha'e rã ha'e kuery ma ndoexa kuaai.

<sup>9</sup> José ima'endu'a ha'e kuery rekora oexa ra'u va'ekue re. Ha'e vy aipoe'i:

— Peẽ kuery ma nhemi rupi oikuua pota va'e pendekuai. Oreyvy re peju mamo pa roarõ e'ŷa peikuaaxe vy rive.

<sup>10</sup> Ha'e kuery ombovai:

\* <sup>41:51</sup> Tery Manassés ma "Nhomoexaraia" 'ea. † <sup>41:52</sup> Tery Efraim ma "Ta'y reta va'e" 'ea.

— Any, oreruvixa. Ore nerembiguai kuery tembi'u rojogua aguã rima roju.

<sup>11</sup> Ore kuery ha'e javive peteñ'i ava ra'y orekuai. Heko porã va'e guive orekuai, mba'emo re oikuaa pota va'e e'ÿ — he'i okuapy.

<sup>12</sup> Ha'e rã ha'e aipoe'i:

— Any teve. Yvy roarõ e'ÿa re peikuaaxe vy rima peju.

<sup>13</sup> Ha'e kuery ombovai:

— Ore kuery nerembiguai orekuai va'e ma doze joegua orekuai, peteñ ava Canaã yvy re oiko va'e ra'y kuery. Kyrïve va'e ma oreru ro py optya. Ha'e rã amboae ma ndoikovei ma — he'i okuapy.

<sup>14</sup> Ha'e gui José aipoe'i ha'e kuery pe:

— Xee pëvy aipoa'eague rami ae oreyyvy re peikuaa pota va'e ete pendekuai.

<sup>15</sup> Ha'e rami vy 'rãe aikuua. Anhetã ete Faraó rekove rupi aura vy aipoa'e: Apy gui ndapeoi 'rã penderyvy kyrïve va'e ou e'ÿ ja.

<sup>16</sup> Peẽ kuery regua peteñ xee amondouka 'rã penderyvy reruarã. Ha'e rã peẽ kuery ma romboty 'rã aikuua aguã anhetã pa pendeayvua. Ha'e rami e'ÿ rã Faraó rekove rupi aura vy aipoa'e: Oreyvy re peikuaa pota vy ae peju — he'i.

<sup>17</sup> Ha'e vy mboapy ára re ombo'a imbokuapy nhuã py.

<sup>18</sup> Mboapy araa py José aipoe'i:

— Po rami pejapo vy 'rãe peikove, mba'eta xee voi Nhanderuete renonde ajererokyjea rupi aiko va'e.

<sup>19</sup> Peẽ kuery heko porã'i va'e ri pendekuai vy peẽ kuery va'e regua peteñ'i pepytá 'rã apy nhuã py. Ha'e rã amboae kuery ma tapeo mba'emo ra'yí peraa pendo pygua kuery ho'u va'erã.

<sup>20</sup> Ha'e gui penderyvy kyrïve va'e ta'vy peru xea py. Ha'e ramo 'rãe aikuua porã pendeayvu anhetãa. Ha'e rami e'ÿ vy pemanomba 'rã — he'i.

Ha'e rami rã ha'e kuery oiko katu ha'e rami ojapo aguã.

<sup>21</sup> Joupe-upé aipoe'i:

— Aÿ ma japaga 'rã nhanderyvy re jajapo vaiague re. Anhetã ojexavai reve nhandevy ojapukai ramo nanhamboaxyi karamboae. Ha'e nungakue re ae jaiko axy aÿ — he'i okuapy.

<sup>22</sup> Ha'e ramo Rúben ombovai:

— Xee aipo nda'eí ri ty'y raka'e: "Nda'evei kunumi va'e re jajapo vai aguã" nda'eí? Teñ peẽ kuery naxenhe'ë rendui. Aÿ ha'e nungakue re japagapa jakuapy huguy nhamoë uka rire — he'i.

<sup>23</sup> Ha'e kuery ha'e rami ijayvu vy ndoikuuai José oendu kuaa, mba'eta ha'e kuery reve ijayvu mba'e he'ia paa omombe'u va'e rupi.

<sup>24</sup> Ha'e kuerya gui José ojepe'a ranhe. Ha'e vy ojae'o. Ha'e gui ou ju vy ha'e kuery reve ijayvu. Guyke'y Simeão ha'e kuery mbyte gui oipe'a vy ojokua uka ha'e kuery oexaa py.

### *Egitó gui José ryke'y kuery ojevyague*

<sup>25</sup> Ha'e kuery voxá mba'emo ra'yí José omonyë uka vy peteñ-teñ voxá py omoí uka ju iperáta, tembi'u tape rupi ho'u va'erã guive. Ha'e ramo ijayvuague rami ojapoa.

<sup>26</sup> Ha'e ramo guymba mburika'i áry mba'emo ra'yí ojogua va'ekue oupi vy oje'oipa ha'e gui.

<sup>27</sup> Oke aguã py optyaa py peteñ ovoxa oipe'a mburika'i ho'u va'erã oguenoë aguã. Ha'e vy operáta ojou ju voxá py oí ramo.

<sup>28</sup> Ha'e vy guyvy kuery pe aipoe'i:

— Kore ome'ëa ju rima xeperáta. Ha'ekue ete'i nda oí xevoxa py — he'i.

Ha'e rami vy onhemondyi okuapy okyje vy. Joe-joe oma'ë reve joupe-upé aipoe'i:

— Mba'e re nda'u ha'e rami ete ri Nhanderuete ojapo nhandere? — he'i okuapy.

<sup>29</sup> Ha'e gui Canaã yvy re nguu Jacó-a py ovaẽ vy ixupe omombe'upa oiko va'ekue-'ekue. Ha'e vy aipoe'i:

<sup>30</sup> — Ava ha'e va'e yvy pygua ruvixa oĩ va'e orevy ijayvu atã, ijyvy re oikuaa pota va'e rami orerereko.

<sup>31</sup> Ha'e rã ore kuery aiporo'e: “Ore ma heko porã va'e orekuai, roikuua pota va'e'ŷ.

<sup>32</sup> Doze joegua orekuai, peteĩ'i oiko oreru. Peteĩ oreryvy ma jipovei, ha'e rã kyrive va'e ma oreru ro py oĩ Canaã yvy re”, ore.

<sup>33</sup> Ha'e gui ava yvy regua ruvixa aipoe'i orevy: “Po rami 'rã aikuua peẽ kuery heko porã va'e pa peikoa. Apy peja 'rã peteĩ penderegua va'e. Ha'e rã amboae kuery ma pendo pygua kuery rembi'urã peraa vy tapeo.

<sup>34</sup> Ha'e gui xea py ju Peru penderyvy kyrive va'e. Ha'e ramo 'rã aikuua avakue heko porã va'ea, oikuua pota va'e'ŷ peikoa. Ha'e gui ma pendepo py ju amboaxa 'rã penderyvy, ha'e kova'e yvy re pejogua aguã mba'emo”, he'i va'ekue orevy.

<sup>35</sup> Ha'e kuery ogueru va'ekue voxágui onhoẽ vy peteĩ-teĩ oexa operáta voxápy ogueru jevyague. Voko'i peráta ryru oexa peteĩ-teĩ. Ha'e rami vy onhemondyipa okuapy, tuu voi.

<sup>36</sup> Ha'e gui tuu Jacó aipoe'i:

— Aŷ nda'evei teve xevy. José ma ndoikovei ma, Simeão voi noĩ apy. Aŷ ma Benjamim ju peraaxe. Ha'e nunga ha'e javi oiko xevy.

<sup>37</sup> Ha'e gui Rúben aipoe'i nguu pe:

— Xapy'a rei xeryvy ndaru jevyi ri ramo ejuka xera'y mokoïve'i hekobia. Xevy repena uka ramo ma xee aru ju 'rã.

<sup>38</sup> Ha'e rã tuu ombovai:

— Nda'evei xera'y penderupive oo aguã. Tyke'y omano ma. Ha'e anho'i oikove. Xapy'a rei ooa rupi mba'emo ixupe oiko ramo ma xeporiaua gui rive amano aguã rami 'rã pejapo — he'i.

## 43

*Egito yvy katy ju José ryke'y kuery oo aguã re onhembopy'a okuapyague*

<sup>1</sup> Ha'e ramia jave re karuai nda'evei ete yvy re.

<sup>2</sup> Ha'e gui ha'e kuery tembi'u Egito gui ojogua va'ekue opa ramo tuu aipoe'i:

— Tapeo, pejoguave ju tembi'u nhandevy.

<sup>3</sup> Ha'e ramo Judá ombovai:

— Ha'e rami avi ava va'e orevy ijayvu atã reve aipoe'i va'ekue: “Xerova ndapexa jevyi 'rã penderyvy penderupive ou e'ŷ rã”, he'i va'ekue.

<sup>4</sup> Ha'e nunga rupi oreryvy orerupive remondouka ramo ma roo ju 'rã tembi'u rojogua aguã.

<sup>5</sup> Ha'e rã neremondoukai ramo ndorooi 'rã, ava va'e “Xerova ndapexai 'rã penderyvy penderupive ou e'ŷ rã”, he'i rire.

<sup>6</sup> Ha'e ramo tuu Israel aipoe'i:

— Mba'e re tu xemoĩ vai rei pekuapy penderyvy mboae arekovea peikuaa uka vy?

<sup>7</sup> Ha'e kuery ombovai:

— Ha'e va'e ava oporandu karamboae orere, ha'e oreretarã kuery re guive. Ha'e vy aipoe'i: “Oikove teri pa penderu? Perekove pa penderyvy?” he'i orevy. Ha'e rã oporandua ha'e javi'i rombovai. Ndoroikuaai mba'erã pa oikuaaxea vy “Peru ke penderyvy”, he'i orevy.

<sup>8</sup> Ha'e gui Judá aipoe'i nguu Israel pe:

— Xerupive ha'vy emondouka kunumi va'e. Ha'e ramo ropu'ã vy roo 'rã jaikovepa aguã. Ha'e rami e'ŷ ramo ndajaikovei 'rã, ore kuery, ndee, neĩ orera'y kuery.

<sup>9</sup> Xee ae 'rã apena hexe, ha'e rire xepo gui ae ju rejou aguã. Ha'e gui xee ndea py ndaru jevyi ri ramo xee ae ajejavy va'e aiko 'rã ndevy, aikovea pukukue re.

<sup>10</sup> Ha'e rã nanhamboarei va'e rire ma mokoïguea ma rojevy 'rãgue – he'i.

<sup>11</sup> Tuu Israel ombovai:

– Ha'e rami rã ma po rami pejapo: Pejopy mba'emo iporãve va'e kova'e yvy gui, pendevoxa py peraa ava va'e pe peme'ẽ va'erã: bálsamo, ei kyrñ'i, heakuã porã va'e, mirra, terebinto ha'e amêndoas.

<sup>12</sup> Peráta guive peraave pendepo py. Pendevoxa py peráta peru va'ekue voi peraa ju pendepo py, mokoïguea repy. Xapy'a rei ojavy ri nhi'ã ra'e.

<sup>13</sup> Ha'e gui penderyvy avi peraa. Pepu'ã, ha'e tapeo ju ava va'ea katy.

<sup>14</sup> Tove Nhanderuete ipo'akapa va'e tapenemboaxy uka huvixa renonde peĩ ramo, penderyke'y mboae pendupive ou ju aguã, Benjamim guive. Ha'e gui xee, xera'y kuery okanhy ramo ma ta'y e'ý va'e 'rã apyta – he'i.

### *José guyke'y kuery omovaëmbaague*

<sup>15</sup> Ha'e gui avakue ogueraa mba'emo ome'ẽ va'erã, peráta guive ogueraa mokoïguea repy. Guyvy Benjamim voi ogueraa. Opu'ã vy oje'oi Egito katy. Ha'e rami vy ojexa uka ju José pe.

<sup>16</sup> Benjamim ha'e kuery reve oĩ rã José oexa vy aipoe'i hoo re opena va'e pe:

– Eraa kova'e avakue ha'e javi xero py. Ejuka vaka ra'y, ereko katupa. Kova'e kuery ma kuaray mbyte jave okaru'rã xereve – he'i.

<sup>17</sup> Ha'e ramo ojapopa José ijayvuague. Ha'e rami vy ogueraa avakue José ro py.

<sup>18</sup> José ro py ogueraa rã okyjepa okuapy. Ha'e vy aipoe'i:

– Peráta káuxa rima aÿ nhandereru, kueve nhandevoxa py peráta oĩ rire. Aÿ ma nhanemondaague ramo 'rã omombe'u, nhandere opu'ã vy escravo nhanemoingo aguã, nhanerymba kuery mburika'i ojopy aguã guive – he'i.

<sup>19</sup> Ha'e vy José ro re opena va'e re ha'e kuery onhemboja vy hexeve ijayvu oké py.

<sup>20</sup> Ha'e vy aipoe'i:

– Kore xeruvixa, tembi'u rojogua aguã jypy roju karamboae.

<sup>21</sup> Rojevyra rupi roke aguã py rovaẽ vy orevoxa roipe'a ramo ha'e py oreperáta oĩ ra'e. Ha'e va'ekue aÿ rogueru ju.

<sup>22</sup> Ha'e gui rogueruve ju peráta tembi'u rojogua aguã. Ndoroikuuai guive mava'e pa oreperáta orevoxa py omoï jevyague – he'i okuapy.

<sup>23</sup> Ha'e ramo ava va'e ombovai:

– Pendep'y a guaxu ke, pekyje eme. Penderuete, peẽ kuery ru Ruete ae omoï uka ju peráta pendevoxa py. Pendeperáta xee ae ajopypa karamboae – he'i. Ha'e gui ha'e kuerya py ogueru ju Simeão.

<sup>24</sup> Ha'e gui José ro py ogueroike vy yy ogueru opy ojoi aguã. Hymba kuery mburika'i guive omongaru.

<sup>25</sup> Ha'e rã ha'e kuery ma José pe ome'ẽ va'erã oguerekat katu kuaray mbyte jave ou rã guarã, mba'eta oendu ha'e py okaru vy ou 'rãa.

<sup>26</sup> José ou ramo ha'e kuery ogueroike heruvy ixupe ome'ẽ va'erã. Henonde re guenapy'ã re oĩ okuapy, yvy re ngova omovaẽ reve.

<sup>27</sup> Ha'e ramo ha'e kuery pe oporandu mba'exa pa ikuiaia re. Ha'e vy aipoe'i:

– Ha'vy penderu tuja'i pemombe'u va'ekue oiko porã pa? Oikove teri pa?

<sup>28</sup> Ha'e kuery ombovai:

– Oiko porã ri oreru nerembiguai, oikove teri – he'i okuapy. Oakã omboguejypa reve guenapy'ã re oĩ.

<sup>29</sup> Ha'e ramo José oma'ẽ vy oexa guyvy Benjamim ixy pi'a. Ha'e vy aipoe'i:

— Upe va'e ma nhi'ã penderyvy kyrīve va'e pemombe'u va'ekue? Nhanderuete toopena porã ndere, xera'y — he'i ixupe.

<sup>30</sup> José oeka pojava ojae'o aguã, opy'a re guyvy oayvua anho oendu vy. Ha'e vy opy mboae oike vy ojae'o.

<sup>31</sup> Ojeovaei rire oẽ ju ouvy. Ojejoko vy aipoe'i guembiguai pe:

— Pejara ke tembi'u — he'i.

<sup>32</sup> Ha'e ramo ixupe omoĩ ae'i, ha'e kuery pe omoĩ ae'i avi, ha'e Egito pygua kuery ha'e kuery reve okaru va'e pe omoĩ ae'i avi, mba'eta Egito pygua kuery pe nda'evei hebreu kuery reve okaru aguã, Egito kuery rekorã va'ekue rami vy.

<sup>33</sup> Ha'e rami vy guenonde omboguapy uka guyke'y kuery ha'e javi. Tujave va'e omboguapy tujave va'e oĩ aguã py porã, peteĩ-teĩ ha'e rami aguã rami omboguapy, kyrīve va'e voi kyrīve va'e oĩ aguã py. Ha'e rami rã joe-joe oma'ẽ reve onhemondyipa okuapy.

<sup>34</sup> Ha'e gui peteĩ-teĩ ho'u va'erã ojara uka tembi'u guenonde re oĩ va'e gui. Ha'e rã Benjamim pe ma hetave ojara uka, amboae kuery pe ojara uka va'e gui peteĩ nhiruïkue hetave. Ha'e ramo ha'e kuery okaru ha'e oy'u porã okuapy hexeve.

## 44

### *José guyke'y kuery ou jevy aguã rami ojapoague*

<sup>1</sup> Ha'e gui José aipoe'i ngoo re opena va'e pe:

— Emonyẽmba ke avakue voxā ipo'akaa rami peve, ha'e emoĩ ju peteĩ-teĩ peráta ivoxa py.

<sup>2</sup> Ha'e gui kyrīve va'e voxā py ma pemoĩ xekaro prata guigua voi, iperáta mba'emo ra'yĩ repykue reve — he'i. Ha'e rã José aipoe'iague rami ojapo.

<sup>3</sup> Ko'ẽmba ramove avakue oje'oipa ju guymba kuery reve.

<sup>4</sup> Tetã gui mombyry e'ŷ'i teri oo jave José aipoe'i ngoo re opena va'e pe:

— Epu'ã, tereo avakue oo va'ekue rakykue. Reupity vy ke aipo're: “Mba'e re tu penderayvu ete va'e pe pejapo vai?

<sup>5</sup> Upe va'e karo e'ŷ ri ty'y xeruvixa oy'uat y ha'e imba'ekuaa rupi oiporu va'ety? Ha'e ramia py pejapo vai rima”, 're.

<sup>6</sup> Ha'e ramo hembiguai ha'e kuery oupity vy ha'ekue rami ae ijayvu.

<sup>7</sup> Ha'e ramo ha'e kuery ombovai:

— Oreruvixa, mba'e re tu ha'e rami ete ri ndeayvu? Ha'e ramigua ete ore nerembiguai kuery ndorojapoi.

<sup>8</sup> Peráta orevoxa py rojou va'ekue ma Canaã yvy gui rogueru ju ndevy. Mba'erã tu ha'vy nderuvixa ro gui prata, ouro re oremonda ta?

<sup>9</sup> Karo rejou ri ramo heruare tomano, ha'e rã ore kuery ma torekuaí ndevygua escravo, oreruvixa — he'i okuapy.

<sup>10</sup> Ha'e ramo ombovai:

— Pendeayvuague rami ae teĩ karo reruare anho 'rã oiko xevygua escravo. Ha'e rã peẽ kuery re ma penderekó vaia noĩ — he'i.

<sup>11</sup> Ha'e gui ha'e kuery ojapura voxā omboguejypa aguã yvy py. Peteĩ-teĩ oipe'a ovoxa.

<sup>12</sup> Ha'e ramo huvixa rembiguai oikuuaa pota peteĩ-teĩ voxā py oĩ va'e re. Tujave va'ea gui ranhe omboypy vy kyrīve va'ea py omomba. Ha'e vy karo ojou Benjamim voxā py.

<sup>13</sup> Ha'e ramo ha'e kuery oao omondoropa. Peteĩ-teĩ guymba áry ju ovoxa oupipa vy ojevypa tetã katy.

### *Judá onhemombe'u porãague*

<sup>14</sup> Ha'e gui Judá guyvy kuery reve ovaẽmba ju José ro py, ha'e py teri oĩ ramo. Guenapy'ã re ju oĩmba henonde.

<sup>15</sup> Ha'e ramo José aipoe'i:

— Mba'e re tu ha'e ramigua pejapo xere? Ndapeikuaai va'e ty'y ava xee rami ipo'aka va'e imba'ekuaa va'e memea?

**16** Ha'e ramo Judá ombovai:

— Xeruvixa, mba'exa tu ha'vy rombovai ta ndevy? Mba'exa tu ha'vy oreayvu ta? Mba'exa tu ronhemombe'u ta? Nhanderuete oikuua ore nerembiguai kuery rojejavyague. Aÿ ma xeruvixa, ore kuery ha'e javive 'rã ndevygua escravo orekuai, karo reraare anho e'ÿ — he'i.

**17** Ha'e ramo José aipoe'i:

— Nda'evei ha'e rami ajapo aguã. Ava xekaro reraare anho 'rã oiko escravo. Ha'e rã peẽ kuery ma tapeo porã penderua katy — he'i.

**18** Ha'e ramo Judá onhembojave hexe. Ha'e vy aipoe'i:

— Xeruvixa, ejapyxaka ranhe xeayvua re. Ejapyxaka peteñ'i re xee nerembiguai xeayvu aguã. Xeruvixa, ndevai eme xee nerembiguai pe, mba'eta ndee ma Faraó rami avi ndepo'akapa va'e.

**19** Xeruvixa, ore nerembiguai kuery pe reporandu karamboae vy aipo're: “Perekpa pa penderu, e'ÿ vy penderyvy?” 're va'ekue.

**20** Ha'e gui ndee oreruvixa pe rombovai: “Roguereko oreru tuja'i, ha'e ta'y avi oiko oreru tuja'i ma vy ta'yague. Ha'e va'e ma kyrïve va'e oiko. Tyke'y ae'i va'ekue omano rire ha'e anho'i ma oiko ixyp'a. Tuu oayvuve va'e oiko”, ro'e va'ekue.

**21** Ha'e gui ndee aipo're avi va'ekue ore nerembiguai kuery pe: “Peru ha'vy apy aexa aguã.”

**22** Ha'e ramo ndee oreruvixa pe rombovai: “Kunumi va'e nda'evei nguu tuja'i oeja aguã. Oeja ramo omano 'rã”, ro'e va'ekue.

**23** Ha'e gui ndee aipo're ju orevy: “Penderyvy kyrïve va'e penderupive ndoui ramo ndapexavei 'rã xerova”, 're va'ekue.

**24** Ha'e gui roo ju nerembiguai orerua py. Romombe'upa ndee xeruvixa ndeayvuague.

**25** Oreru aipoe'i: “Tapeo, pejoguave'i ju tembi'u ja'u va'erã”, he'i va'ekue.

**26** Ha'e rã ore rombovai: “Nda'evei roo aguã. Oreryvy kyrïve va'e orerupive oo ramo 'rãe ha'eve. Nda'evei 'rã ava va'e rova roexa ju aguã oreryvy reve'ÿ”, ro'e ixupe.

**27** Ha'e gui nerembiguai oreru aipoe'i: “Peẽ kuery peikuaa xera'yxy oikuavã karamboae mokoñ'i xera'y.

**28** Peteñ ma xea gui okanhy ramo aipoa'e: ‘Xee aikuua rã ta'vy omboa'ypaa rã nda'u’, ha'e va'ekue. Aÿ peve xee ndaexavei.

**29** Aÿ kova'e ju xea gui peipe'axe, ha'e ixupe mba'emo oiko ramo pejapo 'rã xeporiau gui amano aguã rami”, he'i va'ekue oreru.

**30** Ha'e rami rire aÿ ma xapy'a rei xee nerembiguai xerua py ajevy teñ kunumi va'e orerupive ndooi ramo ma oreru omano rive 'rã, mba'eta kunumi va'e reve vy ae oikove'i teri.

**31** Orereve kunumi va'e noñ rã oreru oexa vy omano 'rã. Ha'e rami vy rojapo 'rã nerembiguai oreru iporiau gui rive omano aguã rami.

**32** Mba'eta xee nerembiguai aiko kunumi va'e re apena aguã rami. Ha'e rami vy xeru pe aipoa'e: “Xeru, xapy'a rei xee ndaru jevyi ramo ndevy pe aiko 'rã ajejavy va'e aikovea pukukue re”, ha'e va'ekue.

**33** Ha'e nunga rupi aÿ xeruvixa, xee ae tapyta nerembiguairã kunumi va'e rekovia, ha'e rã kunumi va'e ma too ju ke'y kuery reve.

**34** Mba'exa tu xerua py aa ju ta kunumi va'e reve'ÿ? Mba'eta xee ma ndaexaxei xeru tuja'i pe mba'emo vai oiko rã — he'i.

- <sup>1</sup> Ha'e gui José ma ha'e javi oexaa py nonhemombe'u e'ŷ reguavei. Ha'e vy ojapukai:  
— Toẽmba xea gui — he'i. Ha'e ramo avave rei hexeve ndopytai, guyke'y kuery pe José  
ojekuaa uka aguã.
- <sup>2</sup> Ha'e gui José ojae'o atã, Egito pygua kuery oendu aguã rami, Faraó ro pygua kuery  
guive.
- <sup>3</sup> Ha'e rami vy José aipoe'i guyke'y kuery pe:  
— Xee ma José aiko. Ha'vy oikove teri pa xeru? — he'i. Ha'e ramo tyke'y kuery  
nombovai kuaavei, henonde py okyjepa vy.
- <sup>4</sup> José peteigue ju aipoe'i guyke'y kuery pe:  
— Aŷ ma penhembojapa xere — he'i ramo hexe ovaẽmba ouvy. Ha'e vy aipoe'ive ju: —  
Xee ma José Egito yvy katy xevende imbouvy va'ekue.
- <sup>5</sup> Aŷ ma nda'evei pendeporiaupa rei aguã kylvõ katy xevendeague re, neĩ pendejeupe  
pendevai aguã voi nda'evei. Mba'eta ajogueraa jepe aguã ae Nhanderuete xembou  
raka'e penerononde.
- <sup>6</sup> Mba'eta mokoĩ ma'etŷ re ma karuai oiko kova'e yvy re. Aŷ oata peteĩ nhiruĩ ma'etŷ teri  
mba'eve rei nonhotŷai neĩ nomono'ðai aguã.
- <sup>7</sup> Nhanderuete xembou penerononde nhande kuery opa e'ŷ aguã ko yvy gui, heta araa  
jepe vy.
- <sup>8</sup> Mba'eta peẽ kuery e'ŷ xembou karamboae apy. Nhanderuete ae xembou vy Faraó ru  
rami xemoĩ, hoo py ikuai va'e ha'e javive ruvixarã, Egito yvy ha'e javi re apena aguã.
- <sup>9</sup> Tapeo povaja ha'vy xerua py, aipopeje: “Ndera'y José aipoe'i uka: ‘Nhanderuete xemoĩ  
Egito yvy ha'e javi regua ruvixarã. Eju voi xea py are e'ŷ re.
- <sup>10</sup> Gósen yvy re ha'eve 'rã xea katy'i reiko aguã, nderay' kuery, neramymino kuery,  
nerymba vexa'i, vaka kuery, ha'e mba'emo rerekova'e ha'e javi reve.
- <sup>11</sup> Ha'e py ma apena 'rã ndere, mba'eta peteĩ nhiruĩ ma'etŷ teri oata karuai opa aguã.  
Ha'e rami iporiaukue va'e reiko e'ŷ aguã, ndero py ikuai va'e, neĩ rerekova'e ha'e javi  
opa e'ŷ aguã', he'i uka José”, peje.
- <sup>12</sup> Aŷ ma peẽ kuery xeryvy Benjamim reve pexa pekuapy xee ae pendereve xeayvu  
aikovya.
- <sup>13</sup> Xeru pe pemombe'u Egito yvy re mba'emo porã arekopa va'e ha'e pexa va'e ha'e javi.  
Tapeo pojava, apy ju Peru xeru — he'i.
- <sup>14</sup> Ha'e gui guyvy Benjamim oña py José oo vy ijaju'y rupi oikuavã reve ojae'o. Benjamim  
voi ojae'o guyke'y aju'y rupi oikuavã vy.
- <sup>15</sup> Ha'e gui guyke'y kuery ha'e javive ju oayvupa ojae'o reve. Ha'e ramo tyke'y kuery  
ijayvu hexeve.

### *José ryke'y kuery ou okuapy rã Faraó oenduague*

- <sup>16</sup> Ha'e gui Faraó ro py voi onhendu aipo'ea rã:  
— José ryke'y kuery ri ty ou ra'e — 'ea rã. Faraó oendu vy ojou porã, hembiguai kuery  
guive.
- <sup>17</sup> Ha'e rami vy Faraó aipoe'i José pe:  
— Aipo're nderyke'y kuery pe: “Pova'e nunga pejapo: Penerymba kuery pembovoyi  
ju heravy Canaã yvy katy.
- <sup>18</sup> Ha'e gui Peru penderu ha'e pendera'y kuery xea py. Xee ame'ẽ 'rã yvy iporâvea Egito  
re oĩ va'e pendekuai aguã. Ha'e py pekaru 'rã pekuapy iporâve va'e re anho”, 're.
- <sup>19</sup> Emombe'u avi ha'e kuery pe: “Pova'e nunga pejapo: Egito yvy gui peraa karóxa  
pendera'y kuery ha'e pendera'yxy kuery Peru aguã. Peru avi penderu, pejupa.
- <sup>20</sup> Ha'e pepexã rei eme mba'emo perekova'e perupa aguã re, mba'eta Egito yvy ha'e javi  
re iporâguevea ikuai va'e opytapa rã pendevy”, 're — he'i.
- <sup>21</sup> Ha'e gui Israel ra'y kuery ha'e rami ojapo. Faraó aipoe'iague rami vy ha'e kuery pe  
José ome'ẽ karóxa, tembi'u guive tape rupi ho'u va'erã.

<sup>22</sup> Peteĩ-teĩ pe ome'ẽ ao iporãve va'e. Ha'e rã Benjamim pe ma ome'ẽve, trezentos hatã'i va'e prata guigua ha'e peteĩ nhiruĩ ao iporãve va'e.

<sup>23</sup> Nguu pe ma ha'e rami avi ogueraa uka dez mburika'i opa mba'e porã Egito guigua re ovoyi va'e, ha'e dez mburika'i mba'emo ra'yĩ ha'e mbojape re ovoyi va'e. Tembi'u tuu oua rupi ho'u va'erã voi ome'ẽ.

<sup>24</sup> Ha'e rami vy omondoukapa guyke'y kuery. Aipoe'i:

— Joe-joe pepu'ã eme tape peoa rupi — he'i imondovy.

<sup>25</sup> Ha'e rami rã Egito yvy gui oje'oi vy ovaẽmba ju Canaã yvy re nguu Jacó-a py.

<sup>26</sup> Nguu pe aipoe'i okuapy:

— José oikove teri. Ha'e ma Egito yvy jave re opena va'e oiko — he'i okuapy. Ha'e ramigua oendu vy nda'ipy'a tytyveia ramigua oendu, ndogueroviai vy.

<sup>27</sup> José ijayvuague omombe'upa rã tuu Jacó oendu vy, ha'e karóxa heruarã José omon-douka va'ekue oexa vy mae ma oendu ju ipy'a guaxua.

<sup>28</sup> Ha'e rami vy Israel aipoe'i:

— Ha'eve ma. Xera'y José anhetẽ oikove teri ra'e. Xee aa ta amano e'ŷ mbove aexa ju aguã — he'i.

## 46

### *Egito yvy katy Jacó ro pygua kuery oje'oiague*

<sup>1</sup> Ha'e gui Israel opa mba'e oguereko va'e reve oo vy Berseba py ranhe ovaẽ. Ha'e py ma mba'emo ome'ẽ nguu Isaque Ruete pe ombojerovia vy.

<sup>2</sup> Pyávy Israel pe Nhanderuete ojexa uka vy aipoe'i:

— Jacó! Jacó!

Ombovai:

— Apy ma aĩ — he'i.

<sup>3</sup> Ha'e ramo aipoe'i:

— Xee ma Nderuete, nderu Ruete aiko. Ekyje eme Egito yvy re reo aguã, mba'eta ha'e py ndegui amoingo 'rã peteĩ regua heta va'e.

<sup>4</sup> Xee aa 'rã ndereve Egito katy. Araka'eve rã ajapo 'rã ha'e gui pejevy ju aguã rami. Remano ramo José ae 'rã omboty nderexa — he'i.

<sup>5</sup> Ha'e gui Berseba gui Jacó oguatave ovy. Israel ra'y kuery ogueraa nguu Jacó, gua'y kuery ha'e gua'yxy kuery Faraó karóxa heraarã ombou va'ekue py.

<sup>6</sup> Ogueraapa guymba kuery vaka ha'e Canaã yvy re oiko jave ojou va'ekue ha'e javi. Oopa Egito katy, Jacó, hamymino kuery guive.

<sup>7</sup> Gua'y kuery, gua'y ra'y kuery, guajy kuery, gua'y rajy kuery, ha'e kuery ha'e javi ogueraapa Egito katy.

<sup>8</sup> Po rami ma Israel ra'y kuery nguu Jacó reve Egito katy oo va'ekue rery: Rúben ma Jacó ra'y tujave va'e.

<sup>9</sup> Rúben ra'y kuery ma Enoque, Palu, Hezrom ha'e Carmi.

<sup>10</sup> Simeão ra'y kuery ma Jemuel, Jamim, Oade, Jaquim, Zoar ha'e Canaã pygua pi'a Saul.

<sup>11</sup> Levi ra'y kuery ma Gérson, Coate ha'e Merari.

<sup>12</sup> Judá ra'y kuery ma Er, Onã, Selá, Perez ha'e Zera. Ha'e rã Er ha'e Onã ma Canaã yvy re ae omano. Perez ra'y kuery ma Hezrom ha'e Hamul.

<sup>13</sup> Issacar ra'y kuery ma Tola, Puva, Jó ha'e Sinrom.

<sup>14</sup> Zebulom ra'y kuery ma Serede, Elom ha'e Jaleel.

<sup>15</sup> Ha'e va'e kuery ma Jacó ramymino ikuai, Lia pi'a meme, Padã-Arã py oiko va'ekue. Tajy Diná voi ha'e pygua. Ha'e va'e ta'y kuery, tajy kuery ha'e javi vy ma trinta e três ikuai.

<sup>16</sup> Ha'e gui Gade ra'y kuery ma Zifiom, Hagi, Suni, Esbom, Eri, Arodi ha'e Areli.

<sup>17</sup> Aser ra'y kuery ma Imna, Isvá, Isvi, Berias ha'e heindy Sera. Berias ra'y kuery ma Héber ha'e Malquiel.

<sup>18</sup> Ha'e va'e kuery ma Zilpa pi'a meme, Jacó ra'y ha'e rajy kuery. Zilpa ma Labão guajy Lia rembiguairā ome'ẽ va'ekue. Ha'e kuery ha'e javi vy ma dezesseis ikuai.

<sup>19</sup> Ha'e gui Jacó ra'yxy Raquel pi'a ma José ha'e Benjamim.

<sup>20</sup> José ra'y kuery Egito py oiko va'ekue ma Manassés ha'e Efraim. Ha'e kuery ma Asenate pi'a ikuai. Ixy ma Om pegua sacerdote Potífera rajy.

<sup>21</sup> Benjamim ra'y kuery ma Bela, Bequer, Asbel, Gera, Naamã, Ei, Rôs, Mupim, Hupim ha'e Arde.

<sup>22</sup> Ha'e va'e kuery ma Jacó ra'y kuery, Raquel pi'a meme. Ha'e javi vy catorze ikuai.

<sup>23</sup> Ha'e gui Dã ra'y ma Husim.

<sup>24</sup> Naftali ra'y kuery ma Jazeel, Guni, Jezer ha'e Silém.

<sup>25</sup> Ha'e va'e kuery ma Jacó ra'y kuery, Bila pi'a meme. Ha'e va'e ma Labão guajy Raquel rembiguairā ome'ẽ va'ekue. Ha'e javi vy sete ikuai.

<sup>26</sup> Ha'e rami py Jacó reve Egito katy oo va'ekue ma sessenta e seis ikuai, ta'y ra'yxy kuery jaipapa e'ỹ re.

<sup>27</sup> José ra'y kuery Egito py oiko va'ekue ma mokoĩ ikuai. Jacó ro pygua kuery Egito py oo va'ekue ha'e javi vy setenta ikuai raka'e.

### *Nguu reve José nhovaexīague*

<sup>28</sup> Jacó guenonde re omondouka Judá José-a py, Gósen katy tape oo va'e oikuua aguã. Ha'e rami vy Gósen yvy re ovaẽmba.

<sup>29</sup> Ha'e gui José ma karóxa oguereko katu vy oo ovaexī nguu Israel Gósen re. Ixupe ojexa uka vy ijaju'y rupi oikuavã are'i ojae'o reve.

<sup>30</sup> Ha'e ramo Israel aipoe'i gua'y José pe:

— Aÿ ma amano teĩ ha'eve ma, reikove reve roexa rire — he'i.

<sup>31</sup> Ha'e gui José aipoe'i guyke'y kuery ha'e nguu ro pygua kuery ha'e javi pe:

— Xee aa ju ta ranhe. Faraó pe aipoa'e 'rã: “Ke'y kuery ha'e xeru ro pygua kuery ha'e javi Canaã yvy re ikuiai gui oupa ma xea py.

<sup>32</sup> Ha'e va'e avakue ma vexa'i ha'e vaka re openaa rupi ikuai. Oguerupa guymba kuery vexa'i ha'e vaka, mba'emo oguereko va'e ha'e javi reve”, ha'e 'rã.

<sup>33</sup> Ha'e gui Faraó penerenoĩ uka vy oporandu 'rã: “Mba'exa tu peẽ kuery pemba'eapo va'e?” he'i ramo ma

<sup>34</sup> aipopeje 'rã: “Ore nerembigual kuery ma mymba kuery re openaa rupi orekuai, orekunumi guive aÿ peve, oreramoĩ kuery ikuaiague rami ae”, peje. Ha'e rami rã ijayvu 'rã Gósen yvy re pendekuai aguã. Mba'eta Egito pygua kuery pe rã guymba re opena va'e omboetepy e'ỹ meme ikuai — he'i.

## 47

### *Faraó-a py José nguu Israel ogueruague*

<sup>1</sup> Ha'e gui José ou vy aipoe'i Faraó pe:

— Xeru ha'e ke'y kuery oupa ma Canaã yvy gui. Guymba kuery vexa'i ha'e vaka, ha'e mba'emo oguereko va'e ha'e javi reve ovaẽ okuapy Gósen yvy re — he'i.

<sup>2</sup> Ha'e vy teĩ nhiruĩ guyke'y kuery ogueru avi, oexa uka Faraó pe.

<sup>3</sup> Ha'e ramo José ryke'y kuery pe Faraó oporandu:

— Mba'exa tu peẽ kuery pemba'eapo va'e?

Ha'e kuery ombovai:

— Nerembigual kuery vexa'i re openaa rupi orekuai, oreramoĩ kuery ikuaiague rami ae.

<sup>4</sup> Kova'e yvy re orekuai aguã ri roju, mba'eta Canaã yvy re ma nhuã porã jipoi ore nerembiguai kuery rymba kuery pe, karuai nda'evei ete ramo. Ha'e nunga rupi aÿ rojerure Gósen yvy re orekuai aguã re – he'i okuapy Faraó pe.

<sup>5</sup> Ha'e ramo Faraó aipoe'i José pe:

– Nderu ha'e nderyke'y kuery ndea py oupa ma ramo

<sup>6</sup> Egito yvy ndevy guarã ae itui. Iporãvea py ejapo nderu ha'e nderyke'y kuery ta'ikuai. Gósen yvy re ae ri ta'ikuai. Ha'e gui xapy'a rei rã nderyke'y kuery regua opena kuaa ete va'e ikuai ramo emoi xerymba kuery re ae opena va'erã – he'i.

<sup>7</sup> Ha'e gui nguu Jacó ju José ogueru vy oexa uka Faraó pe. Ha'e ramo Jacó ogueroayvu porã Faraó.

<sup>8</sup> Faraó oporandu Jacó pe:

– Mbovy ma'etÿ ma tu rerekö?

<sup>9</sup> Jacó ombovai:

– Xee aikoa ha'e javi vy ma cento e trinta ma'etÿ. Mboapy'i ete aiko axya. Xee ma ndaupityi teri xeramoï kuery oikoague ma'etÿ peve – he'i.

<sup>10</sup> Ha'e rami vy Jacó Faraó ogueroayvu porã rire oo ju oia gui.

<sup>11</sup> Ha'e gui José omboekoa nguu ha'e guyke'y kuery. Ramessés yvy re Egito yvy iporãvea py ome'ë ikuai aguã, Faraó aipoe'iague rami vy.

<sup>12</sup> Nguu, guyke'y kuery ha'e nguu ro pygua kuery ha'e javi pe José ombou jepi tembi'u, peteï-teï gua'y kuery mbovy pa oguerekao rami.

### *José Egito yvy ha'e javi ojoguaague*

<sup>13</sup> Karuai nda'evei ete ramo yvy jave re jipoi tembi'u. Ha'e nunga rupi Egito ha'e Canaã yvy re ikuai va'e iporiauve oje'oivy karuai gui.

<sup>14</sup> Ha'e vy Egito ha'e Canaã pygua kuery José gui mba'emo ra'yï ojogua vy ipo py anho omboaxa peráta. Ha'e ramo Faraó ro py ju oguerupa.

<sup>15</sup> Ha'e gui Egito ha'e Canaã yvy re peráta jipovei ramo Egito pygua kuery ha'e javi jogueru vy ojexa uka José renonde. Ha'e vy aipoe'i okuapy:

– Eme'ë orerembi'urã. Mba'erã tu romanomba ta rexaa py? Oreperáta opa ma – he'i okuapy.

<sup>16</sup> José ombovai:

– Pendeperáta opa ma ramo penerymba kuery ju Peru. Penerymba kuery rekovia 'rã ame'ë tembi'u – he'i.

<sup>17</sup> Ha'e ramo José-a py ogueru guymba kuery. Ha'e rã hembi'urã José ome'ë kavaju, vexa'i, vaka ha'e mburika'i rekovia. Ha'e rami vy ha'e va'e ma'etÿ re ma mymba kuery rekovia re omongaru.

<sup>18</sup> Ha'e va'e ma'etÿ opa rire ma'etÿa mboae ovaõ ramo José-a py oupa ju. Ha'e vy aipoe'i:

– Oreruvixa, nda'evei rombotavya rupi oreayvu aguã ndevy. Oreperáta opa ma, orerymba kuery voi rerekopa ma. Mba'eve'i ndoroguerekovei ma ndevy peguarã, orerete ae ha'e oreyyvy e'ÿ vy.

<sup>19</sup> Mba'erã tu ore kuery romano ta rexaa py, oreyyvy opyta rive aguã? Orejogua ke, oreyyvy avi ejogua tembi'u rekovia. Ha'e rami rã ore kuery roiko 'rã escravo Faraó pegua, oreyyvy voi imba'erã topyta. Eme'ë oreyyv mba'emo ra'yïgue roikove aguã, romano e'ÿ aguã, yvy voi opyta rive e'ÿ aguã – he'i okuapy.

<sup>20</sup> Ha'e rami rã Egito yvy ha'e javi José ojogua Faraó pe. Egito pygua kuery peteï-teï oyvy ovende, ha'e py karuai nda'evei ete ramo. Ha'e rami vy yvy ha'e javi Faraó mba'e opyta.

<sup>21</sup> Ha'e pygua kuery voi ojeupegua escravo omoingo, Egito yvy ha'e javi rupi ikuai va'e.

<sup>22</sup> Sacerdote kuery hyvy anho ndojoguai, mba'eta ha'e va'e kuery pe Faraó mba'emo ome'ë jepi ramo. Faraó po gui ojopy va'ekue re ae okaru okuapy. Ha'e rami vy ha'e kuery novendei oyvy.

<sup>23</sup> Ha'e gui José aipoe'i heta va'e kuery pe:

— Aŷ ma peē kuery rojogua ma, pendeyvy voi ajogua Faraó mba'erā. Apy ma mba'emo ra'yīgue oĩ. Peraa, penhotŷ yvy re.

<sup>24</sup> Mba'emo'a pemono'õ vy ma peteñ nhiruñ ikuai va'e nhavõ gui peteñ-teñ peme'ẽ 'rã Faraó pe. Ha'e rã hembyrekue ma pendevy peguarã topyta. Pendevyguia ma yvy re penhotŷ ju aguã, pekaru aguã pendera'y kuery ha'e pendero py ikuai va'e ha'e javi reve — he'i.

<sup>25</sup> Ha'e ramo ha'e kuery ombovai:

— Ndee ma roikove aguã rami oreapo. Oreruvixa, ndee oremboaxya rupi orererek. Ha'e ramo Faraó pegua escravo orekuai teñ ha'eve — he'i okuapy.

<sup>26</sup> Ha'e rami aguã Egito yvy re José ojapoague ma lei aŷ peve guarã oĩ: Mba'emo aju peteñ nhiruñ ikuai nhavõ gui ma peteñ-teñ ome'ëa'rã Faraó pe. Sacerdote kuery yvy anho Faraó mba'e'ÿ itui.

<sup>27</sup> Ha'e rami vy Israel Egito yvy re oiko, Gósen re ae. Ha'e py ha'e kuery ikuai aguã ojou vy heta-etave oje'oivy, heta ete ikuai.

<sup>28</sup> Jacó ma dezessete ma'etŷ re oiko Egito yvy re. Jacó oikoa ma'etŷ ha'e javi vy cento e quarenta e sete ma'etŷ.

<sup>29</sup> Ha'e gui Israel omano rai'i ma vy oenoï gua'y José. Ha'e vy aipoe'i:

— Aŷ ma ndee xemboaxy ramo ajerure xe'u guýry ndepo remoï reve reura aguã, xevy rejapo porã aguã anhetê rupi. Ajerure Egito yvy re e'ÿ xenhono porã aguã,

<sup>30</sup> ha'e rã xeru kuery ikuaiague py anho. Ha'e rami vy Egito yvy gui xeretekue reraa 'rã xeru kuery onhono porãague py, ha'e py ae xenhono porã aguã — he'i.

José ombovai:

— Xee ajapo 'rã ndeayvuague rami — he'i.

<sup>31</sup> Ha'e gui Jacó

— Eura ha'vy xevy — he'i. Ha'e ramo oura. Ha'e rami rã Israel ojero'a, ngupa akã reojeko.\*

## 48

### *Jacó imba'eaxy oupya py José gua'y kuery ogueruague*

<sup>1</sup> Ha'e va'e rire José pe aipo'ea:

— Nderu tu imba'eaxy vaipa rima oupy — 'ea. Ha'e ramo ogueraa ha'e py mokoïve gua'y Manassés ha'e Efraim.

<sup>2</sup> Jacó pe omombe'ua:

— Ndera'y José rako ou oiny ndea py — 'ea. Ha'e ramo Israel onhemomburu ngupa py oguapy ranhe aguã.

<sup>3</sup> Ha'e gui Jacó aipoe'i José pe:

— Nhanderuete Ipo'akapa va'e xevy ojexa uka karamboae Canaã yvy re Luz tetã py aiko jave, ha'e rami vy xereroayvu porã.

<sup>4</sup> Ha'e vy aipoe'i: “Xee rojapo 'rã ndera'y reta aguã rami. Neramymino kuery ajapo 'rã heta regua ikuai aguã rami. Ha'e kuery pe ame'ẽ 'rã kova'e yvy araka'e rã peve guarã”, he'i va'ekue xevy.

<sup>5</sup> Ha'e rã ndera'y mokoï Egito yvy re aju e'ÿ mbove oiko va'ekue ma, ha'e kuery ma aŷ guive xera'y ae'i rami ikuai. Efraim ha'e Manassés ma xera'y ae'i rami ma ikuai, Rúben ha'e Simeão rami avi.\*

<sup>6</sup> Ha'e rã ha'e kuery rire ju ndera'y ikuai va'erã va'e ma ndera'y ae 'rã ikuai, ha'e guyke'y kuery yvy re 'rã ha'e kuery hekoia.

\* **47:31** Ha'e rami Jacó ojapo ombojerovia vy (Hebreus 11.21). \* **48:5** José ra'y kuery mokoï ikuai va'e ma Jacó omano ta vy ogueroayvu porã, gua'y kuery ae'i pe rami avi.

<sup>7</sup> Mba'eta xee Padã gui aju jave Raquel omano karamboae Canaã yvy re, tape Efrata katy oo va'e katy'i. Xeporiau reve anhono porã karamboae tape Efrata Belém 'epy va'e katy oo va'e yvýry – he'i.

<sup>8</sup> Ha'e gui Israel ma José ra'y kuery oexa vy aipoe'i:

– Mava'e kuery tu upe va'e?

<sup>9</sup> José aipoe'i nguu pe:

– Xera'y kuery rima ikuai, apy ae Nhanderuete xevy ome'ẽ va'ekue – he'i.

Ha'e ramo aipoe'i:

– Eronhembojave'i ha'vy xea py, aroayvu porã aguã – he'i.

<sup>10</sup> Israel tuja'i ete vy hexa voi pytumba ma, ndoexa porãvei ma. Ha'e nunga rupi José ogueronhemboja heruvy ha'e oña py. Ha'e ramo oayvupa, oikuavãmba.

### *Guay José ha'e ta'y kuery Jacó ogueroayvu porãague*

<sup>11</sup> Ha'e ramo Israel aipoe'i José pe:

– Xee ma naexa'ãi peteigue ju roexa aguã. Ha'e rami teñ Nhanderuete ojapo nderay' kuery avi aexa aguã rami – he'i.

<sup>12</sup> Ha'e gui José gua'y kuery oipe'a nguu renapy'ã re ikuiai gui. Ngoo renonde oĩ guenapy'ã re, ngova omovaõ yvy re.

<sup>13</sup> Ha'e va'e rire José ogueru ju gua'y kuery. Efraim ma oiporu kuaa re omopu'ã imo'amy, tuu Israel oiporu kuaa e'ÿa re oĩ aguã, ha'e rã Manassés ma oiporu kuaa e'ÿa re omopu'ã, Israel oiporu kuaa re. Ha'e rami vy mokoïve ogueronhemboja heruvy hexe.

<sup>14</sup> Ha'e rami teñ Israel opo ombojoaxa imondovy vy oiporu kuaa regua omoñ Efraim kyrive va'e apyte re, ha'e rã oiporu kuaa e'ÿa ma Manassés apyte re omoñ, tujave va'eri.

<sup>15</sup> Ha'e rami vy José ra'y kuery ogueroayvu porã vy aipoe'i:

– Xeramoñ Abraão oiko va'ekue Nhanderuete renonde, xeru Isaque guive. Ha'e gui xere ju opena oikovy xekyrí guive aÿ peve.

<sup>16</sup> Ixuguigua anjo opa mba'e vai gui xereraa jope va'e tomoingo porã kova'e avakue'i. Tove xerery rupi meme ta'ikuai, xeru kuery Abraão ha'e Isaque rery rupi guive. Ta'y kuery taetave oje'oivy yvy re – he'i.

<sup>17</sup> Ha'e gui tuu opo oiporu kuaa regua Efraim apyte re omoñ rã José oexa vy ndojou porãi. Ha'e rami vy nguu po re ojopy, Efraim apyte gui oguerova aguã Manassés apyte re.

<sup>18</sup> Ha'e vy José aipoe'i nguu pe:

– Evoko rami e'ÿ xeru, mba'eta kova'e ae ma tujave va'e oiko. Inhakã re ae 'rãgue remoñ reiporu kuaa regua – he'i.

<sup>19</sup> Ha'e rami teñ tuu opo ndoguerova ukai. Ha'e vy aipoe'i:

– Xera'y, xee aikuua ae ma, aikuua. Ha'e rami avi ixugui avi 'rã oiko peteñ regua, yvate va'e 'rã oiko. Ha'e rã tyvy ma ixugui yvateve 'rã. Hamymino kuery ma heta regua 'rã ikuai – he'i.

<sup>20</sup> Ha'e rami py ha'e va'e ára ogueroayvu porã. Ha'e vy aipoe'i:

– Peñ kuery rery rupi Israel kuery jogueroayvu porã 'rã. Ha'e vy “Tove Nhanderuete tanemoingo porã Efraim ha'e Manassés rami”, he'i 'rã okuapy. – Ha'e rami ijayvu vy Manassés rery gui Efraim rery re ranhe ijayvu.

<sup>21</sup> Ha'e rire Israel aipoe'i José pe:

– Aÿ xee amano 'rã. Ha'e rami teñ Nhanderuete oiko 'rã ndereve, ojapo 'rã yvy neramoñ kuery ikuaiague py peo ju aguã rami.

<sup>22</sup> Ndevy pe aeja peteñ mba'e, ha'e ramigua nderyke'y kuery pe aeja va'erã e'ÿ. Ndevy aeja yvy'ã amorreu kuery gui xekyxé ha'e xerapa py aipe'a va'ekue.

- <sup>1</sup> Ha'e rire Jacó oenoī gua'y kuery ha'e javi. Ha'e vy aipoe'i:  
 — Peno'õmba ke. Xee amombe'u 'rã penderekorã, raka'e rã guarã.
- <sup>2</sup> Jacó ra'y kuery, peno'õmba pendu aguã. Pejapyxaka penderu Israel ijayvu rã.  
<sup>3</sup> — Rúben, ndee ma xera'y tujave va'e, xembaraeeta kuaa ukaa. Jypy'i xegui reiko va'ekue, pavẽ gui yvateve ha'e ipo'akave va'e reiko.
- <sup>4</sup> Ha'e rami avi yai opu'ã-pu'ãa rami avi rejoko kuaa e'ÿ vy pavẽ gui e'ÿ 'rã ndeyvateve. Mba'eta nderu rupa py rejeupi vy retekoavy rire. Xerupa py rejeupi va'ekue.\*  
<sup>5</sup> — Ha'e gui Simeão, Levi reve ma joegua pendekuai. Pendekyxe perojerovia peikovy joe.
- <sup>6</sup> Ha'e rami avi peẽ kuery penhembopy'aa py xee ma nanhembopy'ai, peẽ penhemboatya re xenhe'ë nonhembojai. Mba'eta pendepoxy vy pejojuka raka'e, pejerovia vy vaka oguata vaikue aguã rami pejapo.
- <sup>7</sup> Pendevaia ma ayvu vaipy topyta, pendevai vaipa rã. Pendepoxy vy pejapo vai ete. Ha'e ramo xee romboja'o 'rã Jacó kuery ra'y ikuia rupi, Israel ra'y ikuia rupi romoaõmba 'rã.  
<sup>8</sup> — Judá, nderyvy kuery tandererovy'a. Ndepo py rejopy 'rã nderovaigua kuery aju'y re. Nderu ra'y kuery voi guenapy'ã re oĩ 'rã nerentonde.
- <sup>9</sup> Judá, ndee ma xivi ra'y rami ndepy'a guaxu va'e. Xera'y, guembia omondoroa gui opu'ã ju va'e rami reiko. Xivi ha'e xivi kunha minha onheno oupya gui mava'e nda'u omomyíta?
- <sup>10</sup> Judá regua po gui ndoipe'aai 'rã huvixa po pygua opy mbyte ojopy heno'amy va'e, ija Siló 'epy va'e ou e'ÿa ja. Ha'e va'e ma pavẽ regua 'rã onhe'ë rendu okuapy.
- <sup>11</sup> Guymba mburika omoxã 'rã uva rembypy re, hymba ra'y uva rembypy iporãve va'e re 'rã omoxã. Oao ojoi 'rã uva rykue py, o-capá ma tuguy rami uva'a guigua py ojoi 'rã.
- <sup>12</sup> Hexa ma pytã 'rã vinho gui, hañ ma xiñ va'e opyta 'rã kamby oy'u gui.  
<sup>13</sup> — Ha'e gui Zebulom ma ye'ë yvýry 'rã oiko, kanoã ojaaty katy. Sidom peve 'rã oo hekoia.  
<sup>14</sup> — Issacar ma mburika'i ikãgue mbaraete va'e, vexa'iaty ikuai va'e mbyte rupi onheno oupy va'e rami.
- <sup>15</sup> Ha'e oikuua rã opytu'u aguã ha'eve, ijyvy iporã rã. Ha'e rami vy ojero'a 'rã onhembovoyi uka vy. Ogueropo'akaa rã oiko 'rã nhoembiguai.  
<sup>16</sup> — Ha'e gui Dã ma oikuua pota 'rã guetarã kuery re, Israel regua mboae ojapoa rami.
- <sup>17</sup> Dã ma mboi tape yvýry itui va'e rami avi 'rã oiko. Mboi minha itui 'rã tape yvýry kavaju pyta py oixu'u aguã, kavaju árygua hakykue katy ho'a aguã rami ojapo.
- <sup>18</sup> — SENHOR, xee ma roarõ aikovy xereraa jepe aguã!  
<sup>19</sup> — Ha'e gui Gade re ma jojukaa kuery heta opu'ã okuapy teĩ omonhamba 'rã imondovoy.  
<sup>20</sup> — Aser ma ojou reta 'rã tembi'u porã, huvixave pegua voi.  
<sup>21</sup> — Naftali ma guaxu opoi pyre rami oiko, ijayvu porã kuaa 'rã guive.  
<sup>22</sup> — José ma yvyra rakã hi'a porã riae va'e rami 'rã oiko, yakã yvýry oĩ va'e rami, kora áry rupi hakã ojeupi ový va'e rami.  
<sup>23</sup> Hapa va'e kuery omoõ vai 'rã. Hexe hu'y omombo vy omoingo axy 'rã.  
<sup>24</sup> Ha'e rami teĩ nderapa rejopy atã riae 'rã, ndejyva voi imbaraete 'rã, Jacó repyare Ipo'akapa va'e neptytvõ ramo. Ha'e va'e ma Israel kuery re opena va'e, Israel kuery pegua ita imbaraete va'e.  
<sup>25</sup> Nderu Ruete neptytvõ 'rã. Ipo'akapa va'e nemoingo porã 'rã. Yva guigua ha'e yvy guyrygua py nemoingo porã 'rã. Omoingo porã avi 'rã xy kuery kã ha'e kyrí'i va'e ryru ndera'y reta aguã rami.  
<sup>26</sup> Xeru kuery xereroayvu porãague gui xee nderu rogueroayvu porãve, yvyty araka'e rã guarã apyte áryve. Ha'e nunga ha'e javi toĩ José akã re, guyke'y kuery gui yvateve va'e rã.

\* [49:4](#) Gênesis 35.22

<sup>27</sup> — Ha'e gui Benjamim ma guary nhomondoropa va'e rami ipo'aka riae va'e. Ha'e nunga ma aje'ive reve ho'u 'rā oiny guembia, ha'e ka'arukue voi omboja'o 'rā ojopy va'ekue — he'i.

<sup>28</sup> Ha'e va'e kuery ma Israel regua doze ikuai va'e ru. Ha'e rami ae tuu ogueroayvu porā. Peteī-teī ogueroayvu porā peteī-teī renonderā oĩa rami vy.

<sup>29</sup> Ha'e rire ha'e kuery pe aipoe'i:

— Xenhe'ẽ heraa 'rā xeramoĩ kuerya py. Ha'e ramo xenhono porā xeru kuery yvýry itakua heteu regua Efrom yvy re oĩ va'e py.

<sup>30</sup> Macpela regua yvy Manre katy'i oĩ Canaã yvy re, Efrom gui Abraão ojogua va'ekue jouparā.

<sup>31</sup> Ha'e py ma Abraão onhono porā raka'e gua'yxy Sara. Ha'e py ju Isaque onhono porā Rebeca. Ha'e py avi xee anhono porā karamboae Lia.

<sup>32</sup> Ha'e va'e yvy ha'e itakua oĩ va'e ma Hete ra'y kuery gui ojogua pyre — he'i.

<sup>33</sup> Opa ma Jacó gua'y kuery omongogetapa vy opy omboapu'a heravy ngupa py, ha'e omano. Ha'e rami vy inhe'ẽ heraa tamoi kuerya py.

## 50

### *Jacó re ipy'a vai reve onhono porāague*

<sup>1</sup> Ha'e ramo José nguu rova oikuavā vy ojae'o reve oayvupa.

<sup>2</sup> Guembuai poropoanoa ikuai va'e pe José ijayvu tuu retekue omoeakuãmba aguã re. Ha'e ramo poropoanoa kuery omoeakuãmba Israel retekue.\*

<sup>3</sup> Gueko rami vy quarenta ára re ombo'eapo omoeakuãmba peve. Ha'e Egito pygua kuery ma setenta ára re ojae'o okuapy.

<sup>4</sup> Ojae'oa opa ma rire José aipoe'i Faraó ro pygua kuery pe:

— Peẽ kuery xemboaxy ramo ajerure Faraó apyxa py pendeayvu aguã re. Aipoa'e uka:

<sup>5</sup> “Xeru râgue'i xeapo karamboae aura aguã rami. Ha'e vy aipoe'i: ‘Xee amano ta ma. Ha'e gui xenhono porā Canaã yvy re xeruparā xee ae areko katu va'ekue py’, he'i va'ekue. Aÿ ma aaxe xeru retekue anhono porā aguã. Ha'e gui aju ju 'rā”, peje Faraó pe — he'i.

<sup>6</sup> Ha'e ramo Faraó ombovai:

— Tereo katu, enhono porā nderu, ndevy oura ukaague rami ae — he'i.

<sup>7</sup> Ha'e ramo José ojepe'a ovu nguu onhono porā aguã. Hupive oje'oi avi Faraó rembiguai kuery, hoo pygua yvatekueve va'e ha'e Egito yvy re yvatekueve ha'e javi.

<sup>8</sup> Oje'oi avi José ro pygua kuery, tyke'y kuery ha'e nguu ro pygua kuery ha'e javi. Gósen yvy re opyta va'e ma kyrigue'i anho, hymba kuery vexa'i, vaka guive.

<sup>9</sup> Hupive oje'oi avi karóxa ha'e kavaju árygua. Heta ete oje'oi.

<sup>10</sup> Ha'e gui mba'emo moa'yñaty Atade py oĩ va'e py ovaẽmba vy opyta ranhe Jordão rovai re. Ha'e py ma peteigüe ju ojae'o vaipa okuapy. Sete ára re José ojae'o nguu re.

<sup>11</sup> Canaã yvy regua ha'e py ikuai va'e oexa okuapy ha'e rami ete ojae'o okuapy rã, Atade py mba'emo moa'yñaty oĩ va'e py. Ha'e vy aipoe'i:

— Egito pygua kuery ojae'o vaipa ete — he'i okuapy. Ha'e rami vy omboery Abel-Mizraim. Jordão rovai re oĩ.<sup>†</sup>

<sup>12</sup> Ha'e gui ta'y kuery ojapo tuu ijayvuague rami.

<sup>13</sup> Ha'e rami vy Canaã yvy katy ogueraa vy onhono porā Macpela yvy re itakua oĩ va'e py. Ha'e va'e yvy ma heteu regua Efrom gui Abraão jouparā ojogua va'ekue, Manre katy'i.

<sup>14</sup> Ha'e rire José ojevy ju Egito katy guyke'y kuery reve, ha'e tuu onhono porā aguã hupive oje'oi va'ekue ha'e javi.

### *Guyke'y kuery reve José ijayvu porā'ague*

\* **50:2** Egito pygua kuery gueko rami vy omoeakuã 'rã te'õgue, are teī hu'ũmba e'ŷ aguã. † **50:11** Tery Abel-Mizraim ma “Egito pygua kuery ojae'oa” 'ea.

<sup>15</sup> José ryke'y kuery ma tuu omano ma rire aipoe'i okuapy:  
 — Aÿ ma xapy'a rei José ojepyxe vy nhanembopaga ma 'rã ixupe jajapo vaiague re — he'i okuapy.

<sup>16</sup> Ha'e rami vy José pe aipoe'i uka okuapy:  
 — Nhanderu rãgue'i omano e'ÿ mbove aipoe'i:

<sup>17</sup> “Aipopeje 'rã José pe: ‘Eperdoa ke nderyke'y kuery ojejavyague ndevy otckoavy vaipa rire tei', he'i. Ha'e rami rire ma aÿ rojerure reperdoa aguã re ore kuery nderu Ruete rembiguai va'e rojejavyague”, peje. — Ha'e rami ha'e kuery ijayvua José oendu vy ojae'o.

<sup>18</sup> Ha'e gui tyke'y kuery ou vy henonde re guenapy'ã re oimbá reve aipoe'i okuapy:  
 — Apy ma roñ nerembiguai kueryrã.

<sup>19</sup> José ombovai:  
 — Pekyje eme. Xee ma nhi'ã Nhanderuete rami aí?

<sup>20</sup> Peẽ kuery ma anhetẽ xevy pejapo vaixe pekuapy karamboae. Ha'e rã Nhanderuete ma ha'e nunga oguerova nhomoingo porã aguã rami. Mba'eta heta ete rekove reraa jepearã xemoingo, aÿ pexa pekuapya rami.

<sup>21</sup> Ha'e nunga rupi pekyje eme. Xee apena 'rã pendere ha'e pendera'y kuery re — he'i. Ha'e rami vy ombopy'a guaxua rupi ijayvu porã'i ha'e kuery reve.

### *José omanoague*

<sup>22</sup> Egito yvy re José oiko, nguu ro pygua kuery guive. Cento e dez ma'etÿ re oiko.  
<sup>23</sup> José oexa Efraim ra'y kuery, ta'y ra'y kuery guive. Oexa avi Manassés ra'y Maquir ra'y kuery, guenapy'ã áry omboguapy imbokuapy.

<sup>24</sup> Ha'e gui José aipoe'i guyke'y kuery pe:  
 — Xee ma amano ta ma. Ha'e rire Nhanderuete pendevy ojekuaa uka vy penemon-douka ju 'rã kova'e yvy gui, yvy mboae Abraão ha'e Jacó pe ome'ẽ aguã re ouraague katy — he'i.

<sup>25</sup> José ojapo Israel ra'y kuery oura aguã rami. Ha'e vy aipoe'i:  
 — Anhetẽ Nhanderuete ojekuaa uka 'rã pendevy, ha'e ramo xekâgue peraa 'rã apy gui — he'i.

<sup>26</sup> Ha'e gui José omano cento e dez ma'etÿ oguerekoa py. Ha'e ramo hetekue omoeakuãmbaa vy Egito yvy re ae onhono porã peteñ hyru py.

## Êxodo mokoïa kuaxia Moisés ombopara va'ekue

### Êxodo mokoïa kuaxia Moisés ombopara va'ekue

Tery Êxodo ma “Oëmbaa” he'ia. Ha'e rami vy kova'e kuaxia para re omombe'ua Egito yvy re Israel kuery escravo ikuaria gui oëmbaague.

Jypy Nhanderuete oenoï Moisés Egito yvy re oo vy ixupegua kuery oguenoë aguã. Ha'e rã Moisés ma ndooxei ranhe. Ha'e rami vy oporandu: “Mava'e tu xee aiko Faraó-a py aa aguã, ha'e Egito yvy gui Israel kuery anoë aguã?” Nhanderuete ombovai: “Xee aiko 'rã ndereve”, he'i (3.11-12a). Ha'e gui ma Moisés oporanduve ju Nhanderuete rery marã rami paa re. “Nhanderuete ombovai Moisés pe: ‘Xee ma xee ae. Po rami ndeayvu 'rã Israel kuery pe: ‘Xee ae’ he'i va'e xembou peẽ kuerya py’”, he'i (3.14). Mba'eta Nhanderuete ma peteï'i anho, amboae ndoikoi.

Ha'e gui ma Egito yvy re Moisés oo vy huvixa Faraó renonde py dez regua ojapo nhomondyipaarã. Ha'e va'e rire mae ma Faraó omondouka Israel kuery oyvy gui. Ha'e rami teï nda'evei nho vy oakykue monha oxondaro kuery reve. Ha'e ramo ye'ẽ mbyte py Nhanderuete ojukapa. Ha'e rã ojeupegua kuery pe ma ye'ẽ omboja'o vy yy opu'ã va'e mbyte rupi omondouka yvy piru reia rupi.

Ha'e gui ma tekao e'ŷa rupi ogueraa Sinai vvyty peve. Ha'e py ma Moisés po py omboaxa ojeguigua lei ha'e kuery rekorã. Omombe'u avi ombojerovia atyrã ojapo aguã. Nhanderuete opa mba'e py ha'e kuery re opena porã, yva gui hembi'urã maná 'epy va'e ombou guive teï ha'e kuery ndojeroviai ha'e nonhe'ẽ rendui jepi raka'e.

#### *Jacó ramymino kuery Egito re ikuai va'ekue rery oĩa*

<sup>1</sup> Po rami ma Israel ra'y kuery rery, Jacó reve Egito re oo va'ekue. Peteï-teï ogueraa ngoo pygua kuery.

<sup>2</sup> Rúben, Simeão, Levi ha'e Judá,

<sup>3</sup> Issacar, Zebulom ha'e Benjamim,

<sup>4</sup> Dã ha'e Naftali, Gade ha'e Aser.

<sup>5</sup> Jacó guigua kuery ha'e javi ma setenta ikuai. Ha'e rã José ma Egito re oiko ae ma.

<sup>6</sup> Ha'e gui José omano ha'e tyke'y kuery ha'e javi, ha'e javegua kuery ha'e javive.

<sup>7</sup> Israel kuery ikuai porã vy heta-etave ha'e imbaraeteve tema ov. Ha'e rami vy ha'e kuery vvy omonyẽ.

<sup>8</sup> Ha'e gui Egito pygua huvixa mboae ju oĩ José oikuaa e'ŷ va'e.\*

<sup>9</sup> Ha'e va'e ma aipoe'i guembiguai kuery pe:

— Aŷ ma Israel kuery heta vaipa ma, nhandegui ipo'akave guive.

<sup>10</sup> Ma'ẽ, jaikuua rami jajapo ha'e kuery re heta-etave e'ŷ aguã, xapy'a rei nhandere opu'ãa ramo nhanderovaigua kuery re ha'e kuery onhemoirũ e'ŷ aguã, ha'e nhandere opu'ã vy nhandeyvy gui oje'oipa rive e'ŷ aguã.

<sup>11</sup> Ha'e rami vy omoï Israel kuery momba'eapoarã oguerekox rei aguã ombovoyia rupi. Ha'e ramo Faraó pe Israel kuery ojapo tetã mba'emo ra'yigüe omoï porã atyrã, Pitom ha'e Ramessés hery va'e.

<sup>12</sup> Ha'e rami teï oguerekox rei ramive ma heta-etave tema ov. Ha'e ramo nda'evei rei ikuai Israel kuery gui.

<sup>13</sup> Ha'e rami vy Egito pygua kuery oguerekox rei reive okuapy Israel kuery omomba'eapoa py.

<sup>14</sup> Ojavyky rei okuapy omomba'eapo poyi vy, yapo omou'ña py, tijolo ojapoa py ha'e mba'ety rupi omiba'eapoa py. Omiba'eapoa ha'e javi rupi omoingo axy.

\* **1:8** Atos 7.18

### *Faraó ijayvuague rami e'ŷ kyr̄'i va'e rexaa kuery ikuaiague*

<sup>15</sup> Ha'e gui Egito pygua huvixa ijayvu hebreu regua kyr̄'i va'e rexaa kuery pe. Ha'e va'e kuery regua peteñ ma Sifrá, ha'e rã amboae ma Puá hery va'e.

<sup>16</sup> Ha'e vy aipoe'i ha'e kuery pe:

— Hebreu regua memby pexa vy ke peikuua pota. Xapy'a rei ava'i ri ramo ma pejuka 'rã. Ha'e rã kunhague'i ri ramo ma tove ta'ikuai.

<sup>17</sup> Ha'e rã kyr̄'i va'e rexaa kuery ma Nhanderuete renonde ojererokyjea rupi ikuai vy Egito pygua huvixa ijayvuague rami e'ŷ ojapo. Ha'e rami vy ndojukai avakue'i itui'i rã.

<sup>18</sup> Ha'e ramo Egito pygua huvixa oenoñ uka kyr̄'i va'e rexaa kuery. Ha'e vy aipoe'i ha'e kuery pe:

— Mba'e re tu ha'e rami pejapo? Ndapejukai ri avakue'i.

<sup>19</sup> Ha'e ramo kyr̄'i va'e rexaa kuery aipoe'i Faraó pe:

— Mba'eta hebreu regua kunhague ma Egito regua rami e'ŷ ikyre'ŷ va'e vy kyr̄'i va'e rexaa kuery ovaë e'ŷ mbove ma voi 'rã oikuavã — he'i okuapy.

<sup>20</sup> Ha'e rami rã Nhanderuete opena porã kyr̄'i va'e rexaa kuery re, ha'e Israel kuery heta-etave ete tema ovv, imbaraete guive.

<sup>21</sup> Ha'e kyr̄'i va'e rexaa kuery Nhanderuete renonde ojererokyjea rupi vy ojapo ha'e kuery voi imemby aguã rami.

<sup>22</sup> Ha'e ramo Faraó ijayvu guembiguai kuery pe. Ha'e vy aipoe'i:

— Hebreu regua avakue'i itui nhavõ pemombo 'rã Nilo yakã py. Ha'e rã kunhague'i ma ndapejukai 'rã.

## 2

### *Moisés itui'i ha'e okakuaague*

<sup>1</sup> Ha'e gui peteñ ava Levi regua oo vy omenda peteñ Levi regua rajy re.

<sup>2</sup> Ha'e ramo kunha va'e ma kyr̄'i va'e oguereko vy oikuavã peteñ ava'i. Ha'e vy oexa rã iporã'i ramo onhomí mboapy jaxy re.

<sup>3</sup> Onhomí aguã nda'evevi ramo ma ojou peteñ ajaka jai rogue guigua, ha'e ombotypa betume ha'e oja va'e py. Ha'e gui opí'a'i omboyrú vy yakã py omoñ hembe katy'i jai rogue ikuiaia rupi.

<sup>4</sup> Ha'e rã heindy ma mombyry gui oma'ẽ oikovy mba'e pa oikoa oexaxe vy.

<sup>5</sup> Ha'e gui Faraó rajy ou yakã py ojau aguã. Hembiguai kunhatañgue yakã yvýry ikuai. Ha'e gui ajaka jai rogue mbyte ovu rã oexa vy omondouka guembiguai ojopy aguã.

<sup>6</sup> Oipe'a vy oexa kyr̄'i va'e itui rã. Ha'e va'e ojae'o ramo omboaxy. Ha'e vy aipoe'i:

— Kova'e ma hebreu regua ra'y ra'e.

<sup>7</sup> Ha'e ramo heindy ou vy aipoe'i Faraó rajy pe:

— Reipota pa aa peteñ hebreu regua aenoñ omokambu ha'e omongakuaa aguã ndevy?

<sup>8</sup> Faraó rajy ombovai:

— Tereo ha'vy — he'i. Ha'e ramo kunhatañ oo vy oenoñ kyr̄'i va'e xy.

<sup>9</sup> Ixupe Faraó rajy aipoe'i:

— Tereo, eraa kova'e ava'i, emongakuaa xevy. Ha'e rã xee apaga 'rã repenaa re — he'i. Ha'e ramo ixy ogueraa vy omongakuaa.

<sup>10</sup> Ha'e gui ava'i tujave ma ramo ogueraa Faraó rajya py. Ha'e va'e ju oguereko opí'a ete'i rami. Ha'e rami vy omboery Moisés, "Yy gui anoñ va'ekue" he'i vy.\*

### *Egito pygua Moisés ojuka vy Midiä katy onhaague*

<sup>11</sup> Ha'e gui Moisés tuja ma vy oo guetarã kuery ikuiaia py. Ha'e vy oexa rã omomba'epoia poyi vai ete. Oexa avi peteñ Egito pygua oinupã rã hebreu regua.

\* <sup>2:10</sup> Tery Moisés ma "Oguenoñ mbyre" ea reve nhaendu rã joo ramigua.

**12** Ha'e gui joavaive-ive re oma'ẽ vy avave rei ndoexai vy ojuka Egito pygua, ha'e vy hetekue ojaty ita ku'i reia py.

**13** Ko'ëgue ju oo vy oexa mokoï hebreu regua joguero'a rã. Ha'e rami vy joapo vai va'e pe aipoe'i:

— Mba'e re tu reinupã neretarã?

**14** Ha'e va'e ombovai:

— Mava'e tu nemoï oreruvixarã orere reikuua pota aguã? Egito pygua rejukaague rami jevy teve xejukaxe ri?

Ha'e nunga Moisés oendu vy okyje, “Anhetẽ teve ha'e va'e oikuaa” he'i vy.\*

**15** Ha'e nunga Faraó voi omombe'ua rã oendu vy ojukaxe Moisés. Ha'e rami tei Faraó gui Moisés ojava vy oo Midiã yvy re oiko.

Ha'e py ma oguapy oiny peteï ygua yvýry.

**16** Sacerdote Midiã pygua ma sete guajy oguerek. Ha'e va'e kuery ma ygua py ou yy ojara aguã. Ha'e rami vy mba'emo oy'uaty oï va'e py omonyê imoiny nguu rymba kuery vexa'i omboy'u aguã.

**17** Ha'e jave jogueru avi vexa'i re opena va'e kuery mboae, ha'e omonhamba kunhague ha'e gui. Ha'e rã Moisés ma opu'ã vy oepy kunhague, ha'e omboy'upa hymba kuery guive.

**18** Ha'e gui kunhague ma nguu Reuel-a py ojevypa. Ha'e ramo tuu oporandu:

— Mba'e re tu kova'e ára peju voive ri?<sup>†</sup>

**19** Kunhague ombovai:

— Peteï Egito pygua orereraa jepe vexa'i re opena va'e kuery po gui. Ha'e gui yy ju ojara orevy, ha'e mymba kuery pe voi ome'ẽ oy'u aguã — he'i.

**20** Ha'e ramo aipoe'i ha'e kuery pe:

— Mamo ha'vy hiny ava va'e? Mba'e re tu peja ra'e ha'e py? Penoï na, tou to'u mbojape — he'i.

**21** Ha'e ramo Moisés ov'y a ha'e va'e ava reve opyta vy. Ha'e ramo Moisés ra'yxyrã ome'ẽ guajy Zípora.

**22** Ha'e gui ta'yxy oikuavã peteï ava'i. Ha'e ramo omboery Gérson, “Yvy mboae re aiko va'e” he'i vy.<sup>‡</sup>

### *Egito pygua huvixa omano rã guare*

**23** Yma ete ma rire omano Egito pygua huvixa. Ha'e jave Israel kuery ipoaẽ riae okuapy escravo ikuai vy. Ha'e vy ojapukai okuapy. Ha'e ramo ha'e kuery ojapukaia ma Nhanderuetea peve onhendu.

**24** Ipoaẽa Nhanderuete oendu vy ima'endu'a Abraão, Isaque ha'e Jacó reve ngupive guarã ojapo va'ekue re.

**25** Ha'e rami vy Israel kuery Nhanderuete oexa vy oikuaa pota ikuai axya re.

## 3

### *Moisés reve Nhanderuete yvyra rogue hendy va'e mbyte gui ijayvuague*

**1** Ha'e gui Moisés opena oikovy guatyu Jetro Midiã pygua sacerdote va'e rymba kuery vexa'i re. Ha'e rami vy vexa'i kuery ogueraa kuaray oilea katy tekao e'ŷa va'e py, ha'e Nhanderuete pegua yvyty re ovaẽ, Horebe 'epy va'e py.\*

**2** Ha'e gui ixupe ojexa uka peteï anjo SENHOR-a guigua peteï yvyra rogue hendy va'e mbyte. Moisés oma'ẽ rã yvyra rogue re tata hendy oiny va'eri ndokai.

**3** Ha'e ramo aipoe'i ojeupe ae:

— Aa ta peva'e katy, aexa aguã ha'e rami ete iporã va'e. Mba'e re tu yvyra rogue ndokai?

\* **2:14** Atos 7.27-28,35    † **2:18** Reuel ma Midiã pygua sacerdote (versículo 16). Hery mboae ma Jetro (Êxodo 3.1).

‡ **2:22** Tery Gérson ma “Yvy mboae regua” 'ea reve nhaendu rã joo ramigua. \* **3:1** Horebe yvyty rery mboae ma Sinai.

<sup>4</sup> Ha'e katy oexa aguã oo rã SENHOR oexa vy oenoĩ tata yvyra rogue hendi va'e mbyte gui. Ha'e vy aipoe'i:

— Moisés, Moisés!

Ombovai:

— Apy ma aĩ.

<sup>5</sup> Ha'e ramo aipoe'i ju:

— Ejuve eme kyvõ katy. Emboi ndepy regua, mba'eta yvy repyrõ re'amya ma iky'a e'ŷ va'e.\*

<sup>6</sup> Xee ma nderu Ruete, Abraão, Isaque ha'e Jacó Ruete — he'i.

Ha'e ramo Moisés ma Nhanderuete re oma'ẽ aguã okyje vy omo'ã ngova.\*

<sup>7</sup> Ha'e gui SENHOR aipoe'ive ju:

— Xee aexa ete xevygua kuery Egito re ikuai vy ojexavaia. Aendu ma ha'e kuery ojapukaia imomba'epoa kuery gui. Xee aikuua ojexavaia.

<sup>8</sup> Ha'e nunga rupi aguejy araa jepe aguã Egito pygua kuery po gui, ha'e ajapo aguã ha'e va'e yvy gui yvy iporã mba'emo oata e'ŷa py oje'oi aguã rami. Ha'e va'e yvy ma kamby ha'e ei oata e'ŷa, ha'e cananeu kuery reko, heteu, amorreu, ferezeu, heveu ha'e jebuseu kuery reko.

<sup>9</sup> Mba'eta Israel kuery ojapukaia ma xea peve onhendu, aexa avi Egito pygua kuery opa marã rei ombojexavaia.

<sup>10</sup> Eju ha'vy, aŷ xee romondouka 'rã Faraó-a py, Egito yvy gui xevygua Israel kuery reipe'a aguã — he'i.

<sup>11</sup> Ha'e rami rã Moisés aipoe'i Nhanderuete pe:

— Mava'e tu xee aiko Faraó-a py aa aguã, ha'e Egito yvy gui Israel kuery anoẽ aguã?

<sup>12</sup> Nhanderuete ombovai:

— Xee aiko 'rã ndereve. Po rami 'rã reikuaa xee romondoukaague: Egito gui xevygua kuery renoẽmba ma rire kova'e yvyty re ae ju xee Penderuete xemboete 'rã pekuapy.

<sup>13</sup> Moisés aipoe'i Nhanderuete pe:

— Ha'e gui Israel kuery ikuaia py avaẽ vy ha'e kuery pe “Penderu kuery Ruete xembou peẽ kuerya py” ha'e ramo ma ha'e kuery oporandu 'rã xevy: “Mba'ixa tu hery?” he'i 'rã okuapy. Ha'e rami rã marã rami tu aipoa'e 'rã ha'e kuery pe?

<sup>14</sup> Nhanderuete ombovai Moisés pe:

— Xee ma xee ae. Po rami ndeayvu 'rã Israel kuery pe: “Xee ae” he'i va'e xembou peẽ kuerya py.

<sup>15</sup> Po rami 'rã ndeayvu Israel kuery pe: “ SENHOR peneramoĩ kuery Abraão, Isaque ha'e Jacó Ruete va'e rima xembou karamboae pendea py.† Po rami ae ma xerery opa va'erã e'ŷ. Ha'e va'e rupi ae 'rã xere penema'endu'a aŷ ha'e araka'e rã peve”, 're.

<sup>16</sup> Tereo ha'vy, emono'õmba Israel mongetaaty kuery. Aipo're ha'e kuery pe: “ SENHOR peneramoĩ kuery Abraão, Isaque ha'e Jacó Ruete ojexa uka karamboae xevy. Ha'e va'e aipoe'i: ‘Anhetẽ xee aikuua pota ma pendere, aexa guive Egito yvy re penemoingo axya.

<sup>17</sup> Ha'e nunga rupi xee aipoa'e: “Ajapo 'rã Egito yvy re pendekuai axy reia gui peo jepe aguã cananeu kuery yvy re, heteu, amorreu, ferezeu, heveu ha'e jebuseu kuery yvy re, yvy kamby ha'e ei oata e'ŷa py”, 're', 're 'rã ha'e kuery pe.

<sup>18</sup> — Ha'e ramo ha'e kuery oendu 'rã ndeayvua, ha'e gui Israel mongetaaty kuery reve peo 'rã Egito pygua huvixaa py. Ha'e vy aipopeje 'rã ixupe: “ SENHOR hebreu kuery Ruete ojekuaa uka orevy. Aŷ ma tove mboapy ára re toroo tekaoa e'ŷa oĩ va'e katy, SENHOR Oreruete pe mba'emo rome'ẽ aguã”, peje 'rã.

<sup>19</sup> Ha'e rami teĩ xee aikuua Egito pygua huvixa napenemondoukai 'rãa, xepo'akaa aexa uka e'ŷ rã.

\* <sup>3:5</sup> Atos 7.33   \* <sup>3:6</sup> Mateus 22.32, Marcos 12.26, Lucas 20.37, Atos 7.32   \* <sup>3:8</sup> Atos 7.34   † <sup>3:15</sup> Tery SENHOR ma “Aikove va'e” 'ea.

20 Ha'e nunga rupi xepo audi vy ajapo vai 'rã Egito yvy re. Ha'e kuery mbyte ambou 'rã opa marãguia nhomondyipaarã. Ha'e va'e rire mae ma penemondouka 'rã.

21 Mba'eta xee ajapo 'rã Egito pygua kuery penepytyvõxe aguã rami. Ha'e ramo penembouka rã ndapeo rivei 'rã, pendepo py mba'eve peraa e'ŷ re.

22 Ha'e rami 'rãgue py peẽ kuery regua peteĩ-teĩ kunha ojerure 'rã ha'e katy'i ikuai va'e, ha'e hoo py ovaê va'e-va'e pe prata ha'e ouro guigua iporã va'e re, ao re guive. Ha'e nunga pejopy vy pendera'y ha'e penderajy kuery re voi pemoi 'rã. Ha'e rami vy peraapa 'rã Egito pygua kuery mba'emo oguerekva'ekue.

## 4

### *Moisés mba'emo ojapo aguã re Nhanderuete ombo'eague*

1 Ha'e gui Moisés ombovai:

— Ha'e rami avi xeretarã kuery ndogueroviai 'rã xeayvua, neĩ noendui 'rã guive. Ha'e rami vy "SENHOR ma ndojexa ukai ndevy", he'i 'rã xevy.

2 SENHOR oporandu ixupe:

— Mba'e tu ndepo py rerekova'e?

Ombovai vy

— Xepopoka rima areko — he'i.

3 Ha'e rã aipoe'i ixupe:

— Emombo ha'vy yvy py.

Ha'e ramo yvy py omombo rã ojeapo mboi. Ha'e va'e gui Moisés onha.

4 Ha'e gui SENHOR aipoe'i ju Moisés pe:

— Eju, ekuave'ẽ ha'e ejopy huguai re.

Ha'e ramo okuave'ẽ vy huguai re ejopy rã popoka rive ju ojeapo.

5 SENHOR aipoe'i:

— Ha'e nunga ma ha'e kuery oexa vy oguerovia aguã ndevy SENHOR ojexa ukaague, peneramoi kuery Abraão, Isaque ha'e Jacó Ruete.

6 Ha'e gui emoi ndepo ndepexo re — he'i. Ha'e rami opexo re opo omoi vy oipe'a jevy rã ipo re oĩ lepra, yro'y rami xiĩ va'e.

7 SENHOR aipoe'ive ju:

— Emoi ju ndepo ndepexo re — he'i ramo teigue ju opexo re opo omoi vy oipe'a jevy rã ho'o iporã rami ae ju ojekuaa.

8 SENHOR aipoe'i:

— Jypyguia hexa pyrã rejapo rã ha'e kuery nandereroviai neĩ ndoikuaa potai tei xapy'a rei mokoia rejapo ramo ojerovia 'rã.

9 Ha'e rami avi ha'e va'e mokoï hexa pyrã rejapo rã ha'e kuery ndogueroviai, neĩ ndeayvua noendu potai ramo ma yy rejara 'rã yakã gui, ha'e renhoë 'rã yvy piru reia py. Ha'e rã yy yakã gui rejara va'ekue ojeapo 'rã tuguy yvy áry.

10 Moisés ombovai SENHOR pe:

— Ai SENHOR! Xee ma xeayvu kuaa va'e'ŷ, nerembiguai reve ndeayvu rire neĩ ndeayvu e'ŷ mbove. Mba'eta xejuru ha'e xeapekũ ipoyi vaipa xeayvu porã aguã.

11 SENHOR aipoe'i ixupe:

— Mava'e tu ojapo avakue juru? Mava'e tu ojapo ijayvu e'ŷ va'e ha'e oendu e'ŷ va'e, ha'e oexa va'e ha'e oexa e'ŷ va'e? Xee SENHOR e'ŷ teve ajapo?

12 Ha'e gui aŷ tereo. Xee ma ndejuru reve aiko vy rombo'e 'rã ndeayvu aguã.

13 Ha'e ramo aipoe'i:

— Ai SENHOR! Emondouka remondouka va'e rei, xee e'ŷ.

14 Ha'e ramo SENHOR ivai Moisés pe. Ha'e vy aipoe'i:

— Levita regua Arão nderyke'y e'ŷ ri ty'y? Xee aikuaa ha'e va'e ijayvu kuaa ete va'e. Ha'e gui ha'e ou ma oiny nerovaexi vy. Nderexa vy ov'y a 'rã opy'a py.

<sup>15</sup> Ha'e gui ndee hexeve ndeayvu vy remombe'u 'rã ijayvu aguã. Ha'e gui xee aiko 'rã ndejuru ha'e ijuru reve, ha'e rombo'e 'rã mba'emo pejapo aguã re.

<sup>16</sup> Nderekovia nderyke'y 'rã ijayvu penetarã kuery pe. Ha'e ma ndejuru rekovia 'rã ijayvu, ha'e rã ndee ma ixupe aipo'ere uka 'rã xee Penderuete rami.

<sup>17</sup> Ha'e rami ejopy kova'e popoka ndepo py, ha'e va'e py hexa pyrã rejapo aguã – he'i.

### *Egito yvy katy Moisés ojevyague*

<sup>18</sup> Ha'e gui Moisés ojevy vy guatyu Jetro-a py ranhe ovaẽ. Aipoe'i guatyu pe:

— Tove taa xeretarã kuery Egito yvy re ikuaria py ju ajevy aguã, okuave teri paa aexa aguã.

Ha'e rã Jetro ma

— Tereo porã ke – he'i Moisés pe.

<sup>19</sup> Ha'e gui Midiã yvy re teri Moisés oiko reve SENHOR aipoe'i ixupe:

— Tereo, ejevy ju Egito katy, mba'eta ndejukaxe va'ekue omanomba ma – he'i.

<sup>20</sup> Ha'e ramo Moisés ma gua'yxy ha'e gua'y kuery ogueraa vy omoõ mburika áry. Ha'e rami vy Egito yvy katy ojevy. Opo py ma Moisés ogueraa Nhanderuete pegua popoka.

<sup>21</sup> SENHOR aipoe'i ju Moisés pe:

— Egito yvy re revaẽ vy ke Faraó renonde ejapopa hexa pyrã ndepo py amboaxa va'ekue ha'e javi. Ha'e rami avi xee ajapo 'rã inhakã ratã aguã rami, neretarã kuery omondouka e'ŷ aguã.

<sup>22</sup> Faraó pe aipo're 'rã: “Po rami SENHOR ijayvu: ‘Israel kuery ma xera'y jypygua rami.

<sup>23</sup> Ha'e nunga rupi aipoa'e ndevy xera'y remondouka aguã xevy oiko aguã. Ha'e rã neremondoukaxe ramo xee ajuka 'rã ndera'y jypyguare rerekva'e, he'i uka ndevy”, 're 'rã ixupe.

<sup>24</sup> Ha'e gui tape rupi Moisés oguataa rupi opytu'ua py SENHOR ovaexĩ. Ha'e vy ojukaxe.\*

<sup>25</sup> Ha'e ramo ta'yxy Zípora ma peteĩ ita haimbe va'e oguenoẽ vy omboi op'i a pire, ha'e Moisés py yvy'iry omombo. Ha'e vy aipoe'i ixupe:

— Ndee xeme ma xevy rã jouguy moẽa – he'i.

<sup>26</sup> Ha'e rami rã SENHOR oeja Moisés oikove aguã rami. Op'i a pire omboia káuxa ae ixupe ta'yxy “Xeme jouguy moẽa”, he'i.

<sup>27</sup> Ha'e gui tyke'y Arão pe voi SENHOR aipoe'i:

— Tereo tekao e'ŷa py eovaexĩ nderyvy Moisés – he'i. Ha'e ramo ha'e va'e ojepe'a ov. Nhanderuete pegua vytyt oĩ va'e py guyvy ovaexĩ vy oayvupa.

<sup>28</sup> Ha'e ramo guyke'y Arão pe Moisés omombe'u SENHOR hexeve ijayvu vy omon-doukaague, ha'e hexa pyrã ojapo ukaague ha'e javi.

<sup>29</sup> Ha'e gui Moisés jogueraa Arão reve. Ha'e vy omboatypa Israel kuery mongetaaty kuery.

<sup>30</sup> Heta va'e kuery pe Arão omombe'u Moisés pe SENHOR aipoe'i ukaague ha'e javi, ha'e kuery oexaa py ojapo avi hexa pyrã.

<sup>31</sup> Ha'e rami rã ha'e kuery oguerovia. Mba'eta SENHOR oikuua pota vy Israel kuery ikuai axya oexaa ma. Ha'e nunga ha'e kuery pe omombe'u rã oendu vy oĩmba guenapy'ã re, ha'e ombojerovia.

## 5

### *Faraó pe Moisés ha'e Arão ijayvuague*

<sup>1</sup> Ha'e gui Faraó-a py Moisés Arão reve jogueraa vy aipoe'i ixupe:

— Po rami SENHOR Israel kuery ruete ijayvu: “Emondouka na xevygua kuery, xem-boete vy ngaru ojapo aguã tekao e'ŷa py”, he'i.

\* <sup>4:24</sup> Nhanderuete ojukaxe mba'eta Moisés nomboi teri gua'y pire, ijayvuague rami e'ŷ (Gênesis 17.9-14).

**2** Ha'e rã Faraó aipoe'i:

— Mava'e tu SENHOR oiko, ijayvua xee aendu vy Israel kuery amondouka aguã? Xee ndaikuaai teve "SENHOR" pejea, neĩ namondoukai 'rã Israel kuery – he'i.

**3** Ha'e ramo ha'e kuery aipoe'ive ju:

— Hebreu kuery ruete ma ou orepou. Ha'e nunga rupi oremondouka na mboapy ára re tekao e'ÿa py roo aguã, SENHOR oreruete pe mba'emo rome'ë aguã, orere ha'e ombou e'ÿ aguã mba'eaxy, e'ÿ vy kyxe rewegua.

**4** Ha'e ramo ha'e kuery pe Egito pygua huvixa aipoe'i:

— Moisés ha'e Arão, mba'e nunga rupi? Mba'e re tu pemombytu'uxe ri penetarã kuery ombo'apoa gui? Tapeo na peẽ kuery pemba'apo aguã katy.

**5** Faraó aipoe'i avi:

— Penetarã kuery heta ma ikuai oreyyvy re. Ha'e rã peẽ ma pemombytu'uxe ombo'apoa gui.

### *Faraó Israel kuery ombojexavai reiague*

**6** Ha'e va'e árave Faraó ijayvu guembiguai huvixa kuery ha'e ombo'apoa re opena va'e kuery pe. Ha'e vy aipoe'i:

**7** — Aÿ gui ma Israel kuery pe napeme'ëvei ma 'rã mba'emo 'ygue jypy guare rami, yvy jykuerã ojapo aguã. Ha'e kuery ae too ha'e kuery ae tojou mba'emo 'ygue.

**8** Ha'e rami avi ha'e kuery pe pejapo uka 'rã yvy jykuerã jypy'i guive ojapoaty rami ae. Mbovyve'i tojapo eme. Mba'eta ha'e kuery ma inhate'ÿ okuapy. Ha'e rami vy ae "Jaje'oi, mba'emo nhame'ë Nhanderuete pe", he'i.

**9** Ha'e nunga rupi pembopoyive tema ha'e va'e avakue rembiaporã, ha'e va'e rupi anho ikuai aguã, ijapu va'e ayvu ojapyxaka e'ÿ aguã – he'i.

**10** Ha'e ramo hembiguai huvixa kuery ha'e ombo'apoa re opena va'e kuery oje'oi vy ijayvu Israel kuery pe:

— Faraó aipoe'i: "Pendevy name'ëvei ma 'rã mba'emo 'ygue.

**11** Tapeo, peẽ ae pejou mba'emo 'ygue pejoua py rei. Mba'eta mba'eve py ndapejapoi 'rã penerembiapo mbovyve'i", he'i uka pêvy – he'i.

**12** Ha'e ramo Egito yvy ha'e javi rupi Israel kuery oaîmba oje'iv yvy mba'emo 'ygue 'râgue py hembyrekue ri jepe omono'õ aguã.

**13** Huvixa kuery ombojexavai rei herekovy. Ha'e vy aipoe'i:

— Pejapopa ke penembiapo peteñ-teñ ára pygurarã pejopy va'ekue mba'emo 'ygue ikuai jave guare rami – he'i.

**14** Ha'e rami vy oinupã Israel kuery ombo'apoa re opena va'e kuery Faraó rembiguai huvixa kuery omoñ va'ekue. Ha'e vy ha'e kuery pe aipoe'i okuapy:

— Mba'e re tu napemombai kuee, neĩ ange penembiaporã pejopy va'ekue, kueve guare rami yvy jykuerã pejapopa aguã?

### *Moisés ha'e Arão pe Israel kuery ivai okuapyague*

**15** Ha'e ramo Israel kuery ombo'apoa re opena va'e kuery oje'oi Faraó-a py. Ixupe ijayvu vy aipoe'i:

— Mba'e re tu ha'e rami orererekoo nerembiguai orekuai va'eri?

**16** Mba'emo 'ygue ma nome'ëavei ore kuery nerembiguai orekuai va'e pe, ha'e rami teñ "Pejapo ke yvy jykuerã", 're uka orevy. Ore ma orenupãmbaa rami teñ pende kuery ae pejejavý.

**17** Ha'e rami teñ Faraó ombovai:

— Peneate'ÿ, peneate'ÿ. Ha'e rami vy ae "Jaje'oi, mba'emo nhame'ë SENHOR pe", peje jepi.

**18** Ha'e gui aÿ tapeo pemba'apo. Ha'e rã mba'emo 'ygue ma nome'ëai 'rã pendevy. Ha'e rami teñ pejapo retaaty rami ae 'rã pejapo yvy jykuerã.

<sup>19</sup> Ha'e ramo Israel kuery ombo'eapoa re opena va'e kuery ojexavai rei okuapy, ha'e kuery pe aipo'ea rã: "Mba'eve py mbovyve'i pejapo eme yvy jykuerã, peteñ-teñ ára py pejapo aguã va'ekue."

<sup>20</sup> Ha'e gui Faraó renonde gui ha'e kuery oje'oi vy oexa Moisés ha'e Arão ha'e kuery rarõa py ikuai rã.

<sup>21</sup> Ha'e vy ha'e kuery pe aipoe'i:

— Tove pendere SENHOR toexa pota, toikuua pota pendere, mba'eta peẽ pejapo Faraó orere nda'ija'ei aguã rami, ha'e hembiguai kuery renonde. Ha'e kuery po py reme'ẽ kyxe orejuka aguã — he'i okuapy.

<sup>22</sup> Ha'e ramo Moisés SENHOR pe ojapukai. Ha'e vy aipoe'i:

— SENHOR, mba'e re tu rembojexavai uka kova'e kuery? Mba'e re tu xee xembou?

<sup>23</sup> Mba'eta Faraó-a py nderery rupi xeayvu aguã ajexaa ukaa ára guive ma ojavyky rei kova'e kuery. Ha'e rã ndee ma peteñve py ndereraa jepei teri ndevyguia kuery.

## 6

<sup>1</sup> Ha'e ramo SENHOR aipoe'i Moisés pe:

— Aÿ ma rex'a 'rã mba'emo Faraó re ajapo va'e, mba'eta xepo'akaa aexa uka ramo 'rãe penemondouka, xepo'akaa aexa uka ramo 'rãe penerenoë ukapa oyvy gui.

### *Israel kuery ogueraa jepe aguã re Nhanderuete ijayvuague*

<sup>2</sup> Ha'e gui Nhanderuete ijayvuve ju Moisés pe. Ha'e vy aipoe'i ixupe:

— Xee ma SENHOR.

<sup>3</sup> Abraão, Isaque ha'e Jacó pe ajexaa uka vy Penderuete ipo'akapa va'ea rami ajekuaa uka raka'e. Ha'e rã xerery SENHOR rupi ma ha'e kuery pe ndajekuaa ukai.

<sup>4</sup> Ha'e kuery reve ajapo avi xereve guarã, ha'e va'e rupi Canaã yvy ame'ẽ aguã hekoarã, ha'e va'e yvy re oguata rei va'e rami ikuaiague ae.

<sup>5</sup> Aendu avi Egito pygua kuery Israel kuery escravo omoingo rã ipoaë okuapy. Ha'e rami vy xema'endu'a xereve guarã ajapo va'ekue re.

<sup>6</sup> Ha'e nunga rupi aipo're Israel kuery pe: "Xee ma SENHOR. Ha'e rami vy roguenoë 'rã Egito pygua penembovoyia guy gui. Roipe'a 'rã pemba'eapo vaipaa gui, ha'e rogueraa jepe 'rã xepo'upi vy nhombopagaarã tuvixa va'e ambou reve.

<sup>7</sup> Xee rogueraa 'rã xevy guarã, ha'e aiko 'rã Penderuete. Ha'e ramo peikuaa 'rã xee SENHOR ae Penderuete aikoa, Egito pygua penembovoyia guy gui roguenoë va'e.

<sup>8</sup> Ha'e rami vy rogueraa 'rã yvy Abraão pe ame'ẽ aguã auraague, Isaque ha'e Jacó pe guive. Pendevy ju ame'ẽ 'rã penderekoarã. Xee ma SENHOR", 're 'rã xerery rupi.

<sup>9</sup> Ha'ekue rami ae Moisés ijayvu Israel kuery pe. Ha'e rami teñ ha'e kuery ndoikuaa potai Moisés re, escravo poyi ikuiaia gui onhe'ẽ py ikuerai vy.

<sup>10</sup> Ha'e gui teñgue ju SENHOR ijayvu Moisés pe. Ha'e vy aipoe'i:

<sup>11</sup> — Tereo Egito pygua huvixa Faraó-a py. Aipo're ixupe: "Tove na too Israel kuery ndeyvygui", 're.

<sup>12</sup> Ha'e rã Moisés ombovai vy aipoe'i SENHOR pe:

— Neñ endu ke, Israel kuery ma noendui. Mba'ex'a'vy tu Faraó oendu ta xeayvu? Ndaxeayvu porã kuaai — he'i.

<sup>13</sup> Ha'e rami teñ Moisés ha'e Arão pe SENHOR ojapo uka ae Israel kuery peguarã, ha'e Egito pygua huvixa Faraó peguarã guive, Egito yvy gui Israel kuery oguenoë aguã.

### *Moisés ha'e Arão ramymino kuery rery oña*

<sup>14</sup> Po rami ma hetu va'e kuery re opena va'e kuery rery. Israel ra'y jypygua Rúben ra'y kuery ma Enoque, Palu, Hezrom ha'e Carmi. Ha'e va'e kuery ma Rúben ra'y kuery.

<sup>15</sup> Ha'e Simeão ra'y kuery ma Jemuel, Jamim, Oade, Jaquim, Zoar ha'e Canaã pygua pi'a Saul. Ha'e va'e kuery ma Simeão ra'y kuery.

16 Po rami ma Levi ra'y kuery rery hamymino kuery reve: Gérson, Coate ha'e Merari. Levi ma cento e trinta e sete ma'etŷ re oiko.

17 Gérson ra'y kuery ma Libni ha'e Simei, ta'y kuery rery oña rami.

18 Coate ra'y kuery ma Anrão, Isar, Hebrom ha'e Uziel. Ha'e gui Coate ma cento e trinta e três ma'etŷ re oiko.

19 Merari ra'y kuery ma Mali ha'e Musi. Ha'e rami ma Levi ra'y kuery rery hamymino kuery reve.

20 Ha'e gui Anrão ma gua'yxyrā ojou ojaixe Joquebede. Ha'e ramo oikuavā Arão ha'e Moisés. Anrão ma cento e trinta e sete ma'etŷ re oiko.

21 Isar ra'y kuery ma Corá, Nefegue ha'e Zicri.

22 Uziel ra'y kuery ma Misael, Elzafā ha'e Sitrí.

23 Arão ma gua'yxyrā ojou Aminadabe rajy Eliseba, Naassom reindy va'e. Ha'e ramo oikuavā'i Nadabe, Abiú, Eleazar ha'e Itamar.

24 Corá ra'y kuery ma Assir, Elcana ha'e Abiasafe. Ha'e va'e ma Corá ra'y kuery.

25 Ha'e gui Arão ra'y Eleazar ma gua'yxyrā ojou Putiel rajy kuery va'e regua. Ha'e ramo oikuavā'i Finéias. Ha'e va'e kuery ma hoo va'e yvatekueve va'e ikuai gua'y kuery reve.

26 Ha'e gui Arão ha'e Moisés pe ae SENHOR aipoe'i: “Penoē ke Israel kuery Egito yvy gui xondaro ikuai va'e rami” he'i va'ekue.

27 Ha'e va'e kuery ma Egito pygua huvixa Faraó pe ijayvu va'ekue Egito gui Israel kuery oguenoē aguā. Moisés ha'e Arão hery va'e.

### *Faraó pe Moisés ijayvu jevyague*

28 Ha'e va'e jave ae SENHOR ijayvu Moisés pe Egito yvy re oiko rā.

29 Ha'e vy aipoe'i ixupe:

— Xee ma SENHOR. Aipo're Egito pygua huvixa Faraó pe ndevy xeayvuague ha'e javi rupi — he'i.

30 Ha'e ramo Moisés ombovai SENHOR renonde:

— Xee ma ndaxeayvu porā kuaai. Mba'exa tu Faraó xenhe'ẽ rendu ta?

## 7

1 Ha'e ramo SENHOR aipoe'i Moisés pe:

— Ma'ẽ, ndee romoī tuuete rami Faraó áry. Ha'e rā nderyke'y Arão oiko 'rā ndeayvu mombe'uarā.

2 Mba'eta nderyke'y Arão pe remboaxa 'rā ndevy aipoa'e uka va'e ha'e javi. Ha'e gui ha'e va'e ju 'rā ijayvu Faraó pe, oyvy gui Israel kuery omondouka aguā.

3 Ha'e rami avi xee ma ajapo 'rā Faraó inhakā ratā aguā rami. Ha'e Egito yvy re ajapo 'rā heta hexa pyrā ha'e xeguigua iporā va'e.

4 Ha'e rami teñ Faraó ndojapyxakai 'rā pendeayvu re. Ha'e nunga rupi xee amoī 'rā xepo Egito áry. Ha'e rami vy ajapo 'rā Egito yvy gui oẽmba aguā rami xexondaro kuery xevygua kuery ikuai va'e, Israel kuery, nhombopagaarā tuvixa va'e aikuua uka reve.

5 Ha'e ramo Egito pygua kuery oikuaa 'rā xee SENHOR aikoa, Egito áry xepo amoī jave ha'e kuery mbyte gui Israel kuery anoẽmba vy.

6 Ha'e gui Moisés ha'e Arão ojapo ha'e rami. Ha'e kuery pe SENHOR ijayvuague rami ae ojapo okuapy.

7 Moisés ma oitenta ma'etŷ oguereko, ha'e rā Arão ma oitenta e três ma'etŷ oguereko Faraó pe ijayvu jave py.

8 Ha'e gui SENHOR aipoe'i Moisés ha'e Arão pe:

9 — Ha'e gui pëvy Faraó “Pejapo ha'vy hexa pyrā, ha'e ramo ajerovia 'rā pendere”, he'i rā ke aipo're Arão pe: “Ejopy ndepopoka, ha'e emombo Faraó renonde.” Ha'e ramo ojeapo 'rā mboi.

<sup>10</sup> Ha'e ramo Moisés ovaẽ Faraó-a py Arão reve. Ha'e vy ojapo SENHOR ha'e kuery pe ojapo uka va'ekue. Arão omombo opopoka Faraó ha'e hembiguai kuery renonde. Ha'e ojeapo mboi.

<sup>11</sup> Ha'e ramo Faraó ogueruruka hi'arandu va'e ha'e imba'evyky va'e kuery. Ha'e ramo Egito pygua hi'arandu va'e kuery ma ha'ekue rami ae ojapo nhemi rupi hi'arandua py.

<sup>12</sup> Ha'e ramo ha'e kuery voi opopoka peteĩ-teĩ omombo ramo ojeapo mboi. Teĩ Arão popoka ho'upa ha'e kuery popoka.

<sup>13</sup> Ha'e rami teĩ Faraó inhakã ratã vy noendu potai SENHOR ijayvuague re.

### *Jypygua nhombopagaarã yy tuguy omoingoague*

<sup>14</sup> SENHOR aipoe'i Moisés pe:

— Faraó ma inhakã ratã vy nomondoukaxeí neretarã kuery.

<sup>15</sup> Tereo ju Faraó-a py ko'ëmba'i ramove. Ha'e ma oo 'rã yy katy. Rearõ 'rã yakã yvýry. Ndepo py rereko 'rã ndepopoka mboi ojeapo va'ekue.

<sup>16</sup> Ha'e aipo're ixupe: “SENHOR hebreu kuery ruete xembou ndea py aipoa'e aguã: ‘Emondouka xevygua kuery tekao e'ÿa py ikuai aguã xevy. Ha'e rami teĩ aÿ peve nerendu potai', ha'e aguã.

<sup>17</sup> Ha'e gui SENHOR aipoe'i ukave ju: ‘Pova'e nunga rupi 'rã reikuaa xee SENHOR aikoa. Kova'e popoka xepo py areko va'e py ainupã 'rã yy yakã rupi oĩ va'e. Ha'e ramo oiko 'rã tuguy.

<sup>18</sup> Pira yakã rupi ikuai va'e omanomba 'rã. Yakã heakuã vaikue 'rã, ha'e Egito pygua kuery ojeguaru 'rã yakã gui oy'u aguã', he'i uka.”

<sup>19</sup> SENHOR aipoe'ive ju Moisés pe:

— Aipo're Arão pe: “Ejopy ndepopoka, ha'e eupi ndepo yy Egito rupi ikuai va'e áry, yakã, yy rape, yupá ikuai va'e ha'e yy omboty pyre ha'e javi áry, tuguy oiko aguã. Toiko tuguy Egito yvy jave re, yryru yvyra guigua ha'e ita guigua py”, 're 'rã ixupe – he'i.

<sup>20</sup> Ha'e ramo Moisés ha'e Arão ojapo SENHOR ijayvuague. Ha'e rami vy Arão opopoka oupi vy oinupã yy yakã rupi oĩ va'e, Faraó ha'e hembiguai kuery oexaa py. Ha'e ramo yy yakã rupi oĩ va'e ha'e javi tuguy oiko.

<sup>21</sup> Pira yakã rupi ikuai va'e omanomba. Yakã heakuã vaikue. Ha'e Egito yvy re ikuai va'e nda'evevei yakã gui oy'u aguã. Egito yvy jave re tuguy oiko.

<sup>22</sup> Ha'e gui Egito pygua imba'ekuaa va'e kuery voi ha'ekue ramigua ju ojapo okuapy nhemi rupi hi'arandua py. Ha'e nunga rupi Faraó inhakã ratã vy noendu potai, SENHOR ijayvuague rami vy.

<sup>23</sup> Faraó ojere vy ngoo katy ju oo. Neĩ ha'e nunga re voi ndoikuua potai opy'a py.

<sup>24</sup> Ha'e gui Egito pygua kuery ha'e javi ojo'o okuapy yakã yvýry, ojou aguã yy oy'u aguã. Mba'eta yy yakã guigua nda'evei oy'u aguã.

<sup>25</sup> Ha'e gui SENHOR yakã oinupã uka rire sete ára oaxa.

## 8

### *Mokoia nhombopagaarã ju'i omboouague*

<sup>1</sup> Ha'e va'e rire SENHOR aipoe'i Moisés pe:

— Tereo ju Faraó-a py, ha'e aipo're ixupe: “Po rami SENHOR ijayvu: ‘Tove too xevygua kuery, xevy ikuai aguã.

<sup>2</sup> Xapy'a rei neremondoukai ramo ma rombopaga 'rã ju'i ndeyvy ha'e javi rupi ambou vy.

<sup>3</sup> Yakã gui oiko 'rã ju'i. Mbovy e'ÿ 'rã oẽ, oiko 'rã ndero py, opy ja'o'i rekeaty py, nderupa áry, nerembiguai kuery ro rupi, ndevygua kuery re, ha'e mbojape pembojaty rupi, mbojaperã pemoapomoaty rupi.

<sup>4</sup> Ju'i ojeupi 'rã ndere, nerembiguai kuery ha'e ndevygua kuery ha'e javive re', 're 'rã ixupe.”

**5** SENHOR aipoe'ive ju Moisés pe:

— Aipo're ke Arão pe: “Eupi ndepopoka reve yakã áry, yy rape ha'e yupa ikuai va'e áry, ju'i rejapo Egito yvy re oẽ aguã rami”, 're.

**6** Ha'e ramo Arão opo oupi yy Egito yvy re ikuai va'e áry. Ha'e rã ju'i oẽ vy Egito yvy ha'e javi rupi ojao'i.

**7** Ha'e ramo imba'ekuaa va'e kuery ha'ekue ramigua ju ojapo nhemi rupi hi'arandua py. Ha'e vy ojapo Egito yvy re ju'i oẽ aguã rami.

**8** Ha'e gui Faraó oenoĩ Moisés ha'e Arão. Ha'e vy aipoe'i ha'e kuery pe:

— Pejerure SENHOR pe oipe'a aguã ju'i xea gui ha'e xevyguia kuerya gui. Ha'e ramo ma pende kuery romondouka 'rã SENHOR pe mba'emo peme'ẽ aguã.

**9** Ha'e ramo Moisés aipoe'i Faraó pe:

— Aipo're ke xevy araka'e pa reipota ajerure ndere, nerembiguai kuery ha'e ndevyguia kuery re, ju'i oipe'aa aguã ndea gui ha'e ndero pygua kuerya gui, yakã py anho ju opyta aguã.

**10** — Ko'ẽ rã — he'i.

Moisés aipoe'i:

— Toiko ndeayvua rami, reikuaa aguã peteĩve jipoia SENHOR Oreruete ramigua.

**11** Ndea gui ojepe'apa 'rã ju'i, ndero pygua kuery, nerembiguai kuery ha'e ndevyguia kuerya gui. Yakã py anho ju 'rã ikuai — he'i.

**12** Ha'e ramo Moisés ha'e Arão jogueraa Faraó-a gui. SENHOR pe Moisés ojapukai ju'i káuxa, Faraó reve jogueroayvuague rami vy.

**13** Ha'e ramo SENHOR ojapo Moisés ijayvuague rami. Ju'i omanomba oo rupi, oka rupi ha'e mba'ety rupi ikuaiague py.

**14** Ijaty reta-eta. Ha'e ramo yvy jave re heakuã vaikue.

**15** Ha'e gui Faraó ma oo jepea oexa vy inhakã ratãve ju. Ha'e vy noenduxevei, SENHOR ijayvuague rami vy.

### *Mboapya nhombopagaarã ky omboouague*

**16** Ha'e gui SENHOR aipoe'i Moisés pe:

— Aipo're Arão pe: “Eupi ndepopoka, ha'e einupã yvy ku'i re, ky oiko aguã Egito yvy jave re”, 're.

**17** Ha'e rami ojapo. Arão opo opopoka reve oupi vy oinupã yvy ku'i. Ha'e ramo oiko reta ky avakue re ha'e mymba kuery re. Yvy ku'i ha'e javi gui ky oiko Egito yvy jave re.

**18** Ha'e ramo imba'ekuaa va'e kuery ma ha'ekue ramigua ae avi o'arandua rupi ojapo nhemixe ky omoingo aguã, va'eri ndojapo kuaai. Ky anho ikuai avakue re ha'e mymba kuery re.

**19** Ha'e ramo imba'ekuaa va'e kuery aipoe'i Faraó pe:

— Kova'e ma Nhanderuete kuã ojapo va'e — he'i teĩ Faraó inhakã ratã. SENHOR ijayvuague rami vy noendui ae.

### *Irundaya nhombopagaarã mberu omboouague*

**20** Ha'e gui SENHOR aipoe'i Moisés pe:

— Epu'ã ke ko'ẽ rã aje'ive'i reve, ha'e ejexa uka ju Faraó pe. Ha'e va'e oo 'rã oiny yy katy. Ha'e rã ixupe aipo're: “Po rami ijayvu SENHOR: ‘Tove too xevyguia kuery, xevy ikuai aguã.

**21** Ha'e gui xevyguia kuery neremondoukai ri ramo ma'ẽ, xee ambou 'rã mberu nde'áry, nerembiguai kuery, ndevyguia kuery ha'e ndero pygua kuery áry. Ha'e Egito pygua kuery ro rupi omonyẽmba 'rã mberu, yvy ha'e kuery ikuia voi.

**22** Ha'e rã Gósen yvy re xevyguia kuery ikuia rupi ma amboae ramí 'rã ajapo. Xevyguia kuery ikuia re mberu ndoikoi 'rã, reikuaa aguã pendeyvy mbyte re voi xee SENHOR aikoa.

**23** Ha'e rã ndevyguia kuery ma xevyguia kuery areko rami e'ý 'rã areko. Ko'ẽ rã oiko 'rã ha'e nunga hexa pyrã', he'i uka ndevy”, 're.

<sup>24</sup> Ha'e rami ae SENHOR ojapo. Ha'e ramo Faraó ro re ou mbovy e'ŷ mberu, hembiguai kuery ro re ha'e Egito yvy ha'e javi áry. Ha'e ramo yvy na'iporâei mberu gui.

<sup>25</sup> Ha'e ramo Faraó oenoĩ Moisés ha'e Arão. Ha'e vy aipoe'i:

— Tapeo, Penderuete pe mba'emo peme'ẽ teĩ kova'e yvy re anho ta'vy.

<sup>26</sup> Moisés ombovai:

— Ha'e rami rojapo aguã nda'evei, mba'eta SENHOR Oreruete pe rome'ẽ 'rã mba'emo Egito pygua kuery ojou porã va'e'ŷ. Ma'ẽ, xapy'a rei ha'e kuery oexaa rupi ha'e nunga rome'ẽ ramo ha'e kuery oreapipa 'rã ita py.

<sup>27</sup> Ha'e rami 'rãgue py mboapy ára re 'rã roo tekao e'ŷa py, ha'e py mae SENHOR Oreruete pe mba'emo rome'ẽ aguã, orevy aipoe'ia rami vy — he'i.

<sup>28</sup> Ha'e ramo Faraó aipoe'i:

— Ha'eve 'rã tekao e'ŷa py teĩ peo aguã mba'emo peme'ẽ aguã. Ha'e rami avi mombyry ete e'ŷ 'rã peo. Ha'e xere voi ke penhembo'e.

<sup>29</sup> Moisés ombovai:

— Ma'ẽ, aŷ ma xee nerенонде gui aa vy anhembo'e 'rã SENHOR pe. Ha'e gui ko'ẽ rã kova'e mberu ojepe'apa 'rã ndee Faraó-a gui, neremiguai kuery ha'e ndevyguia kuery ha'e javia gui. Ha'e rami avi Faraó, xembotavyve eme, xeretarã kuery SENHOR pe mba'emo ome'ẽ aguã neremondoukaia py — he'i.

<sup>30</sup> Ha'e ramo Faraó renonde gui Moisés oo vy onhembo'e SENHOR pe.

<sup>31</sup> Ha'e ramo SENHOR ojapo Moisés ijayvuague rami. Ha'e ramo mberu ojepe'apa Faraó-a gui, hembiguai kuery ha'e ixupeguia kuery ha'e javia gui. Peteĩ'i voi ndopytai mberu.

<sup>32</sup> Ha'e rami teĩ Faraó inhakã ratã ju. Ha'e vy nomondoukai ha'e kuery.

## 9

### *Peteĩ nhiruĩa nhombopagaarã mymba re mba'eaxy omboouague*

<sup>1</sup> Ha'e gui SENHOR aipoe'i Moisés pe:

— Ejexa uka ju Faraó pe, ha'e aipo're ixupe: “Po rami SENHOR hebreu kuery ruete va'e ijayvu: ‘Tove too xevygua kuery, xevy ikuai aguã.

<sup>2</sup> Mba'eta xapy'a rei neremondoukai ha'e remombyta nhea'ã ramo

<sup>3</sup> SENHOR opo omoĩ 'rã nerymba kuery nhuñdy rupi ikuai va'e áry, kavaju kuery, mburika, camelo kuery, vaka ha'e vexa'i kuery áry, mba'eaxy vaikue ombou vy.

<sup>4</sup> Ha'e rã Israel kuery rymba kuery re ma SENHOR amboae rami 'rã ojapo Egito pygua kuery rymba re ojapo 'rãgue py, Israel kuery rymba neĩ peteĩve omano e'ŷ aguã', he'i uka ndevy.

<sup>5</sup> Mba'eta SENHOR oa'anga ma ha'e nunga oiko aguã ára. Ko'ẽ rã ha'e nunga SENHOR omoingo 'rã yvy re", 're 'rã ixupe — he'i.

<sup>6</sup> Ha'e gui ko'ẽ jevy SENHOR ha'e nunga ombou ramo Egito pygua kuery rymba ha'e javi omano. Ha'e rã Israel kuery rymba ma nomanoi neĩ peteĩ.

<sup>7</sup> Ha'e gui Faraó omondouka oma'ẽ aguã, ha'e rã Israel kuery rymba nomanoi neĩ peteĩ. Ha'e rami teĩ Faraó inhakã ratã vy nomondoukai ha'e kuery.

### *Seis-a nhombopagaarã ai vaikue omboouague*

<sup>8</sup> Ha'e ramo SENHOR aipoe'i Moisés ha'e Arão pe:

— Tata rupa gui pejopy pendepo renyẽ tanhimbu. Ha'e ramo Faraó renonde Moisés omombo 'rã yvate katy.

<sup>9</sup> Ha'e va'e gui oiko 'rã iku'i va'e Egito yvy ha'e javi áry. Ha'e ramo Egito yvy jave rupi oiko 'rã irurupa, opu 'rã ai vaikue avakue re ha'e mymba kuery re — he'i.

<sup>10</sup> Ha'e ramo ha'e kuery oo vy tata rupa gui ojopy tanhimbu, ha'e vy oo Faraó-a py. Moisés omombo yvate katy. Ha'e ramo ha'e va'e gui oiko irurupa va'e ha'e ai vaikue avakue re ha'e mymba kuery re.

11 Ha'e nunga rupi Moisés renonde gui imba'ekuaa va'e kuery ojepe'apa ai vaikue gui. Mba'eta imba'ekuaa va'e kuery re voi ai vaikue oiko, ha'e Egito pygua kuery ha'e javi re.

12 Ha'e rami tei SENHOR ojapo Faraó inhakā ratā aguā rami. Ha'e ramo noendui, Moisés pe SENHOR ijayvuague rami vy.

### *Sete-a nhombopagaarā amandau ombouague*

13 Ha'e gui SENHOR aipoe'i Moisés pe:

— Epu'ā ke ko'ē rā aje'ive. Ejexa uka Faraó pe, ha'e aipo're ixupe: “Po rami SENHOR hebreu kuery ruete ijayvu: ‘Tove too xevyguia kuery, xevy ikuai aguā.

14 Mba'eta aŷ ma ndere ete amoī 'rā nhombopagaarā ha'e javi, nerembiguai kuery ha'e ndevyguia kuery áry, peikuua aguā avave rei xee ramigua jipoia yvy jave re.

15 Mba'eta ha'e rami ajapoxe va'e rire rojuka aguā xepo amoī ma 'rāgue, ndee ha'e ndevyguia kuery áry mba'eaxy ambou vy. Roipe'apa ma 'rāgue yvy gui.

16 Ha'e rami tei ha'e rami ndajapoi, ndevy aexa uka aguā xepo'akaa, ha'e xerery rupi xerekoo mombe'ua aguā yvy jave re.\*

17 Ha'e rā ndee repu'ā rei teri va'e ty'y xevyguia kuery rovai, remondouka e'ŷ aguā?

18 Ma'ē, ko'ē rā kova'e hora ojeupity ju jave ajapo 'rā amandau ho'a vaipa aguā rami, Egito yvy re oiko e'ŷ teri va'e ramigua ijypyā ára gui aŷ peve.

19 Ha'e gui aŷ ma emoinge ukapa nerymba vaka, avakue ha'e mymba nhuūndy rupi ikuai va'e. Mba'eta opy ndoikei vy ha'e kuery re amandau ho'a rā omanomba 'rā', he'i uka ndevy", 're.

20 Ha'e ramo Faraó rembiguai kuery va'e regua amongue ma SENHOR ayvu oendu vy ojeayvu. Ha'e rami vy ojapo guembiguai kuery ha'e guymba vaka kuery oupa aguā rami ngoo rupi.

21 Ha'e rā SENHOR ayvu re ndoikuuaa potai va'e ma oeja guembiguai kuery ha'e vaka kuery nhuūndy re ae.

22 Ha'e gui SENHOR aipoe'i Moisés pe:

— Eupi ndepo yvate katy. Ha'e rā ho'a 'rā amandau Egito yvy jave re, avakue áry, mymba ha'e Egito yvy jave re mba'ety rupi onhotŷ mbyre ikuai va'e áry.

23 Ha'e ramo Moisés yvate katy opopoka oupi ramo SENHOR ombou yapu hatā va'e ha'e amandau, tata voi ho'a yvy re. Ha'e rami vy SENHOR ojapo amandau Egito yvy re ho'a aguā.

24 Ha'e rami ete amandau ha'e tata amandau re irū va'e ho'a nda'evei ete va'e. Ha'e ramigua oiko va'e ū teri Egito yvy re, Egito pygua ikuai ypyā ára guive.

25 Ha'e gui Egito yvy jave re amandau ojuka opa mba'e oka rupi ikuai va'e, avakue ha'e mymba kuery. Amandau ojavyky avi mba'ety rupi onhotŷ mbyre ha'e javi, omopēmba avi yvyra nhuūndy rupi ikuai va'e.

26 Ha'e rā Gósen yvy re Israel kuery ikuiaia py anho ndo'ai amandau.

27 Ha'e ramo Faraó oenoī uka Moisés ha'e Arão. Ha'e vy aipoe'i ha'e kuery pe:

— Aŷ ma ajejav. SENHOR ma heko porā va'e, ha'e rā xee ha'e xevyguia kuery ma rojejav vy.

28 Ejapukai ke ha'vy SENHOR pe, mba'eta ha'eve ma kova'e yapu atā va'e ha'e amandau. Xee romondouka 'rā, ndapepytavei ma 'rā apy.

29 Ha'e ramo Moisés ombovai:

— Xee ma tetāgui aē vy xepo aupi 'rā SENHOR pe. Ha'e ramo yapu va'e oaxa 'rā, ndo'avei 'rā amandau, peikuua aguā ko yvy SENHOR mba'ea.

30 Ha'e rami avi xee aikuua ndee ha'e nerembiguai kuery SENHOR Oreruete renonde pejererokyje aguā noī teria.

31 (Ha'e jave py linho ha'e cevada ikuai va'e ojavykypa, mba'eta cevada ma hary ma, ha'e rā linho ma ipoty.

\* 9:16 Romanos 9.17

<sup>32</sup> Ha'e rã trigo ha'e centeio ma ndojavykyi, naenhoi teri ramo.)

<sup>33</sup> Ha'e gui Faraó renonde gui Moisés oo ju vy oẽ tetã gui. SENHOR pe opo oupi ramo yapu atã va'e ha'e amandau oaxapa, nei nda'okyvei yvy re.

<sup>34</sup> Ha'e rami tei amandau ha'e yapu atã va'e oaxapa rã Faraó oexa vy ojejavyve ju, mba'eta guembiguai kuery reve inhakã ratã va'e meme.

<sup>35</sup> Ha'e rami vy Faraó inhakã ratã vy nomondoukai Israel kuery, Moisés pe SENHOR ijayvuague rami vy.

## 10

### *Oito-a nhombopagaarã tuku omboouague*

<sup>1</sup> Ha'e gui SENHOR aipoe'i Moisés pe:

— Tereo Faraó-a py, mba'eta amoakã ratã, hembiguai kuery guive, ha'e kuery mbyte ajapo aguã kova'e nunga hexa pyrã,

<sup>2</sup> ha'e ndera'y kuery pe, ndera'y ra'y kuery pe remombe'u aguã Egito pygua kuery ajavyky reiague, ha'e ha'e kuery mbyte mbovykue rei e'ÿ nhomondyipaarã ambouague, ha'e kuery oikuua aguã xee ae SENHOR aikoa — he'i.

<sup>3</sup> Ha'e ramo Moisés ha'e Arão oo vy ojexa uka Faraó renonde. Ha'e vy aipoe'i ixupe:

— Po rami SENHOR hebreu kuery ruete ijayvu: “Raka'e peve tu nerenhemo'vyv'i 'rã xerenonde? Tove too xevyguia kuery, xevy ikuai aguã.

<sup>4</sup> Ha'e rami tei xevyguia kuery neremondoukaxe aguã ramo ma'ë, ko'ë rã ambou 'rã tuku ndeyvy re.

<sup>5</sup> Ha'e ramo ojao'ipa 'rã yvy. Ha'e va'e gui nei peteñ henda py ma ndojekuaavei 'rã. Ha'e kuery ho'upa 'rã amandau ndojavykypai va'ekue, ho'upa avi 'rã yvyra pendeyvy re henhoi va'ekue.

<sup>6</sup> Ndero rupi voi omonyëmba 'rã, nerembiguai kuery ha'e Egito pygua kuery ha'e javi ro. Nderu kuery oexa e'ÿ teri va'e nunga, nei neramoí kuery voi, yvy re ikuia ára guive kova'e ára peve”, he'i uka ndevy — he'i. Ha'e gui Moisés ojere vy ojepe'a ju ov yvy Faraó renonde gui.

<sup>7</sup> Ha'e ramo Faraó rembiguai kuery aipoe'i ixupe:

— Raka'e peve tu kova'e ava nhandejopy 'rã herekovy? Emondouka na ha'e kuery, SENHOR nguuete pe ikuai aguã. Nderekuaai teri ri ty'y Egito ivaipa maa? — he'i okuapy.

<sup>8</sup> Ha'e gui Faraó renonde ogueru ju Moisés ha'e Arão. Ha'e ramo ha'e aipoe'i ha'e kuery pe:

— Tapeo, peiko SENHOR penderuete pe. Ha'e gui mava'e kuery tu oo va'erã pendereve?

<sup>9</sup> Moisés ombovai:

— Ore reveguia oo 'rã kunumigue, tujakue'i, orera'y kuery, orerajy kuery, orerymba kuery ha'e vaka kuery ha'e javi. Mba'eta rojapo 'rãe ngaru SENHOR pegua — he'i.

<sup>10</sup> Ha'e ramo Faraó aipoe'i ha'e kuery pe:

— Toiko SENHOR pendereve, peñ ha'e kyrígue reve, xapy'a rei romondouka ri ramo. Ha'e rami avi peikuua pota, mba'eta ha'eve'ÿa rami pejapoxe.

<sup>11</sup> Ha'e rami nda'evei 'rã. Tapeo peñ avakue anho SENHOR pe pendekuai aguã rejerurea rami — he'i. Ha'e rami vy Faraó guenonde gui oipe'a uka.

<sup>12</sup> Ha'e gui SENHOR aipoe'i Moisés pe:

— Eupi ndepo Egito yvy áry, tuku ou vy ho'upa aguã jai rogue yvy re ikuai va'e, amandau ndojavykypai va'ekue ha'e javi — he'i.

<sup>13</sup> Ha'e gui Egito yvy áry Moisés opopoka oupi ramo SENHOR kuaray oua katy gui omboou yvytu. Ha'e va'e ára pukukue re ha'e pytú mbukukue re oipeju. Ha'e gui ko'ë jave ma yvytu rupi ou tuku.

<sup>14</sup> Ha'e rami vy tuku ou Egito yvy jave áry, yvy jave re oguejy. Heta ete vy ha'e va'e e'ÿ mbove ndoikoi teri ha'e va'e nunga tuku, neñ ha'e va'e rire ndouvei ma 'rã ha'e va'e ramigua.

<sup>15</sup> Mba'eta ojao'ipa yvy ha'e javi, yvy huû rei aguã rami opyta. Ho'upa jai rogue yvy re ikuai va'e ha'e yvyra'a ha'e javi, amandau ndojavykypai va'ekue. Egito yvy ha'e javi rupi mba'eve jipovei ipyau va'e yvyra re, neñ jai rogue mba'ety rupi ikuai va'e.

<sup>16</sup> Ha'e rami rã Faraó oenoõ pojava Moisés ha'e Arão. Ha'e vy aipoe'i ha'e kuery pe:  
— Ajejavý SENHOR penderuete rovai ha'e peẽ kuery rovai.

<sup>17</sup> Ha'e gui aÿ ma ajerure pëvy xeperdoa ju aguã ajejavya aÿgua voi. Ha'e pejerure SENHOR penderuete pe xegui oipe'a aguã kova'e manoá — he'i.

<sup>18</sup> Ha'e ramo Faraó renonde gui Moisés oo ju vy ojapukai SENHOR pe.

<sup>19</sup> Ha'e ramo SENHOR ojapo yvytu kuaray oikea katy gui ju oipeju atã aguã rami. Ha'e va'e ma tuku oguerovevepa vy oitypa Ye'ë Pytã va'e py. Neñ peteñ tuku ndopytai Egito yvy jave re.

<sup>20</sup> Ha'e rami teñ SENHOR Faraó omoakã ratã ramo nomondoukai Israel kuery.

### *Nove-a nhombopagaarã pytû omboouague*

<sup>21</sup> Ha'e gui SENHOR aipoe'i Moisés pe:

— Eupi ndepo yvate katy, Egito yvy re pytû ou aguã, pytû vaikue japokoa va'e regua — he'i.

<sup>22</sup> Ha'e ramo Moisés yvate katy opo oupi ramo oiko pytû ana Egito yvy jave re mboapy ára re.

<sup>23</sup> Ha'e nunga rupi peteñve ndajoexai, peteñve oña gui nopu'ãi mboapy ára re. Ha'e rã Israel kuery ro rupi ma hexakã.

<sup>24</sup> Ha'e ramo Faraó oenoõ Moisés. Ha'e vy aipoe'i ixupe:

— Tapeo, peiko SENHOR pe. Topyta penerymba vexa'i ha'e penerymba vaka anho. Pendera'y kuery kyrígue ma too avi pendupive.

<sup>25</sup> Moisés ombovai:

— Ha'e rami ri ramo ndee ae 'rã reme'ë orepo py mba'emo rojuka ha'e roapy vy SENHOR Oreruete pe rome'ë va'erã.

<sup>26</sup> Any, orerymba vexa'i kuery avi 'rã oo orerupive. Neñ peteñve pyapë ndopytai 'rã, mba'eta ha'e va'e regua gui roiporavo 'rã SENHOR Oreruete pe rome'ë aguã. Ndoroikuaai mba'e nunga pa SENHOR pe rome'ë va'erãa, ha'e py rovaë e'ÿa ja — he'i.

<sup>27</sup> Ha'e gui Faraó inhakã ratã aguã rami SENHOR ojapo ramo nomondoukaxeí.

<sup>28</sup> Ha'e rami vy Faraó aipoe'i Moisés pe:

— Ejepa' ke xea gui, ha'e eiko kuaa xerova rexá ve'ÿ aguã. Mba'eta xerova rexá jevya ára ma remano 'rã.

<sup>29</sup> Moisés ombovai:

— Ha'evea rami ndeayvu. Xee ndaexa jevyvei ma 'rã nderova — he'i.

## 11

### *Dez-a nhombopagaarã Nhanderuete ombou aguã re ijayvuague*

<sup>1</sup> Ha'e gui SENHOR aipoe'i Moisés pe:

— Peteñgue ju 'rã ambou nhomoingo axyarã Faraó ha'e Egito yvy ha'e javi áry. Ha'e ramo mae penemondouka 'rã apy gui. Penemondoukaa ára ma anhetë penemoxëmba ete 'rã.

<sup>2</sup> Aÿ ma ndeayvu neretarã kuery oendua py, avakue ha'e javi ngoo katy'i rupi ikuai va'e pe mba'emo re ojerure aguã re, kunhague voi tojerure kunhague ngoo katy'i rupi ikuai va'e pe. Prata ha'e ouro guigua re tojerure — he'i.

<sup>3</sup> Ha'e ramo SENHOR ojapo Egito pygua kuery ixupagua kuery omboaxy aguã rami. Moisés voi oikuaapy oiko Egito yvy re, Faraó rembiguai kuery ha'e ixupagua kuery omboetepa.

<sup>4</sup> Ha'e gui Moisés aipoe'i Faraó pe:

— Po rami SENHOR ijayvu: “Pytū mbyte jave xee aaxa 'rā Egito yvy mbyte rupi.

<sup>5</sup> Ha'e ramo omano 'rā jypygua Egito yvy re ikuai va'e ha'e javive, Faraó guenda openaaty py oguapy va'e ra'y jypygua, hembiguai kunha mba'emo mongu'ia pygua pi'a jypygua voi, ha'e mymba ikuai va'e ra'y'i ypya ha'e javi.

<sup>6</sup> Ha'e ramo Egito yvy jave re onhendu 'rā haxē va'e. Ha'e nunga oiko va'e'ŷ teri, ha'e ndoikovei ma 'rā guive.

<sup>7</sup> Ha'e rā Israel kuery re ma ndoikoi 'rā, avakue, neĩ mymba kuery re. Ha'e kuery re ma neĩ peteĩ jagua voi nonhe'ei 'rā, peikuua aguã SENHOR amboae rami oguerekoa Israel kuery, Egito pygua kuery rami e'ŷ”, he'i uka ndevy.

<sup>8</sup> Ha'e ramo nerembiguai kuery apy ikuai va'e xea py jogueruvy vy xerenonde ojero'a reve aipoe'i 'rā: “Tereo ndee ha'e neretarā kuery ndereve ikuai va'e ha'e javive”, he'i 'rā xevy. Ha'e va'e rire mae ma 'rā aa — he'i Faraó pe. Ha'e rami vy Moisés ipoxy vaipa reve ojepe'a Faraó renonde gui.

<sup>9</sup> Ha'e gui SENHOR aipoe'i Moisés pe:

— Faraó ma noendui 'rā pendeayvua, xeguigua nhomondyipaarā ojekuaave aguã Egito yvy re — he'i.

<sup>10</sup> Ha'e nunga nhomondyipaarā ha'e javi Moisés ha'e Arão ojapo Faraó renonde teĩ SENHOR omoakā ratā ramo Israel kuery nomondoukai oyvy gui.

## 12

### *Páscoa judeu kuery rekorā oejaagae*

<sup>1</sup> SENHOR aipoe'i Moisés ha'e Arão pe Egito yvy re teri ikuai jave:

<sup>2</sup> — Kova'e jaxy ma pendevy jaxy jypygua 'rā, ma'etŷa ijypya regua.

<sup>3</sup> Pendeayvu Israel kuery ijaty va'e pe. Ha'e vy aipopeje: “Kova'e jaxy dez araa py ma peteĩ-teĩ peru 'rā peteĩ vexa'i ra'y, peteĩ-teĩ hoo va'e ogueru 'rā peteĩ vexa'i ra'y ngoo peguarā.

<sup>4</sup> Ha'e gui xapy'a rei hoo pygua kuery mbovy'i vy vexa'i ra'y ndo'upai 'rā ri ramo ma toenoĩ ojea katy'ive rupi ikuai va'e, mbovy pa ikuia rami. Oikuua pota 'rā mbovy pe pa ha'eve vexa'i ra'y ho'upa aguã.

<sup>5</sup> Vexa'i ava ma ivaikue rei e'ŷ va'e peteĩ ma'etŷ oguerekoo va'e ha'eve. Vexa'i ra'y e'ŷ vy kavara'i ha'eve avi Peru aguã.

<sup>6</sup> Ha'e va'e jaxy pemboty 'rā catorze ára peve. Ha'e vy Israel kuery ha'e javive 'rā ojuka ka'arukue.

<sup>7</sup> Huguykue ma peraa vy peikyty 'rā okẽ yta jovalive ha'e hi'árygua rupi, pendero pe'ua va'e rokẽ re ae.

<sup>8</sup> Ha'e va'e pytûve 'rā pe'u ho'okue tata py oexy pyre. Mbojape imbovua revegua e'ŷ ha'e jai rogue iro va'e reve 'rā pe'u.

<sup>9</sup> Ho'okue ipyrygua ma ndape'ui 'rā, neĩ yy py ombojo pyre, ha'e rā tata py oexy pyre anho: inhakâgue, hetymague ha'e ha'ykue-'ykue.

<sup>10</sup> Ha'e va'e gui mba'eve rei ndapejai 'rā ko'ẽ peve guarā. Ko'ẽ peve opyta va'e ma peapypa 'rā tata py.

<sup>11</sup> Po rami 'rā pe'u. Pendeku'a kuaa reve 'rā pe'u, pendepy regua reve, ha'e pendepo py pendepopoka perekoo reve. Pe'u pojava ke. Ha'e va'e ma SENHOR pegua Páscoa.\*

<sup>12</sup> Mba'eta ha'e va'e pytû xee Egito yvy rupi aaxa vy ajuka 'rā ta'y jypygua ikuai va'e ha'e javi, avakue ha'e mymba guigua voi. Ambopaga 'rā Egito pygua ruete ikuai va'e ha'e javi. Xee ma SENHOR.

\* **12:11** Tery Páscoa ma “Oaxa ovv rivea” ea (versículo 23).

**13** Huguykue ma oikuaa uka 'rã oo pendekuaia. Mba'eta huguy aexa vy ma aaxa rive 'rã peña rupi. Ha'e rami rã peẽ kuery mbyte ma ndoikoi 'rã mba'eaxy nhomombaarã. Ha'e va'e py ma Egito yvy re anho 'rã ajojuka.

**14** "Ha'e va'e ára ma penema'endu'a aguã. Ngaru iky'a e'ŷ va'e pejapo 'rã SENHOR pe. Peneramymino kuery avi 'rã ojapo araka'e rã peve guarã, pendekorã aeja rire.

**15** Sete ára re pe'u 'rã mbojape imbovua revegua e'ŷ. Ijypyá ára guive peipe'apa 'rã mbojape mbiovua penderopy oĩ va'ekue, mba'eta ijypyá ára guive sete-a ára peve imbovua revegua ho'u va'e rei oipe'aa 'rã Israel kuerya gui.

**16** Ijypyá ára py ma pêvy oiko 'rã nhemboaty iky'a e'ŷ va'e. Sete araa py teĩgue ju pejapo 'rã nhemboaty iky'a e'ŷ va'e. Ha'e jave py ma neĩ peteĩve tembiapo ndojapoai 'rã, pe'u va'erã pejapoai e'ŷ vy. Ha'e va'e anho ha'eve pejapo aguã.

**17** Ha'e rami vy pejapo 'rã ngaru mbojape imbovua revegua e'ŷ pe'u va'erã, mba'eta ha'e va'e ára ae xee roguenoë Egito yvy gui. Ha'e nunga rupi peneramymino kuery ikuia peve 'rã penema'endu'a ha'e va'e ára re, araka'e rã peve guarã aeja rire.

**18** Jypyguá jaxy catorze araa ka'aru guive 'rã pe'u mbojape imbovua revegua e'ŷ, ha'e va'e jaxy vinte e um araa ka'aru peve.

**19** Ha'e va'e sete ára ma toĩ eme mbojape mbiovua pendero rupi. Mba'eta mbojape imbovua revegua ho'u va'e oipe'aa 'rã Israel kuery mbyte gui, mombyry guigua e'ŷ vy pendeyvy pygua ae teĩ.

**20** Mba'eve imbovua revegua pe'u eme. Pendero ha'e javi rupi 'rã pe'u mbojape imbovua revegua e'ŷ anho", peje ha'e kuery pe – he'i.

**21** Ha'e rami rã Moisés oenoimba Israel kuery mongetaaty kuery. Ha'e vy aipoe'i ha'e kuery pe:

– Peẽ kuery peteĩ-teĩ peiporavo 'rã vexa'i ra'y pendero peguarã, ha'e pejuka 'rã Páscoa ára pygumarã.

**22** Hissopo rakágue peru vy pemoaký huguykue hy'a jere py oĩ va'e py, ha'e hy'a jere py huguykue oĩ va'e peikyty 'rã peneroké yta re, ha'e hi'árygua rupi. Ko'ẽmba peve peteĩve napeẽi 'rã peneroké gui.

**23** Mba'eta SENHOR oaxa 'rã ov y Egito pygua kuery ojuka aguã. Ha'e rã okẽ árygua ha'e ijyta joavaive re huguy oĩa SENHOR oexa vy ma oaxa rive 'rã ha'e va'e oo rupi, pendero py nomoingei 'rã nhomombaarã pendejuka aguã.

**24** Ha'e nunga rupi peẽ ha'e pendera'y kuery penderexarai eme pendekorã araka'e rã peve aeja va'ekue re.

**25** Ha'e gui yvy SENHOR ijayvuague py penderekoa ma vy voi pendekuai 'rã pendekorã aeja va'ekue rami.

**26** Ha'e pendera'y kuery pêvy oporandu ramo: "Mba'exa tu nhanderekha'e rami?" he'i ramo

**27** aipopeje 'rã: " SENHOR pegua Páscoa pygumarã jajuka va'e, mba'eta Egito yvy re Israel kuery ro áry rupi oaxa vy Egito pygua kuery ojuka, ha'e rã nhandero py ikuai va'e ma ogueraa jepe", peje 'rã pendera'y kuery pe – he'i.

Ha'e ramo heta va'e kuery ojero'apa vy ombojerovia okuapy.

**28** Ha'e gui Israel kuery oje'oi vy ojapo ha'e rami. Moisés ha'e Arão pe SENHOR aipoe'iague rami ae ikuai.

### *Dez-a nhombopagaarã ta'y kuery jypyguá ojukapaa ague*

**29** Ha'e gui pytú mbyte jave SENHOR ojuka Egito yvy re ta'y jypyguá ikuai va'e ha'e javi. Ojuka Faraó guenda openaaty py oguapy va'ety ra'y jypyguá, nhuã py ombo'a pyre ra'y kuery ha'e mymba ra'y jypyguá ikuai va'e ha'e javi.

**30** Ha'e ramo Faraó opu'ã pyavyve, hembiguai kuery ha'e Egito pygua kuery ha'e javive guive. Mba'eta haxẽ va'e onhendu Egito yvy re, mba'eta oo omanoa e'ŷa jipoi.

<sup>31</sup> Ha'e ramo ha'e va'e pytûve Faraó oenoñ Moisés ha'e Arão. Ha'e vy aipoe'i ha'e kuery pe:

— Pepu'ã ke, tapeo xevyguia kuery mbyte gui, peẽ ha'e Israel kuery ha'e javive guive. Tapeo, SENHOR pe pendekuai, aipo pejeague rami vy.

<sup>32</sup> Penderupive peraa avi penerymba kuery vexa'i ha'e vaka, aipo pejeague rami. Tapeopa, ha'e xee voi ke xereroayvu porã — he'i.

<sup>33</sup> Mba'eta Egito pygua kuery omondouka pojava, oyvy gui omoëmba aguã ojapura vy, "Ha'e javive nhamanomba 'rã" he'i vy.

<sup>34</sup> Ha'e ramo ha'e kuery ojopy mbojaperã omoakÿ va'ekue, imbovua revegua e'ÿ. Omoapomoaty ma oao py onhovã vy ojaxei heravy.

<sup>35</sup> Ha'e rami vy Israel kuery ojapo okuapy Moisés ijayvuague rami. Ha'e vy Egito pygua kuery pe ojerure okuapy prata ha'e ouro guigua ha'e ao re.

<sup>36</sup> SENHOR ojapo Egito pygua kuery omboaxy aguã rami ixupeguia kuery. Ha'e va'e kuery pe ojerurea ome'ëmba. Ha'e ramo oipe'apa Egito pygua kuery oguerekva'ekue.

### *Egito yvy gui Israel kuery oëmbaague*

<sup>37</sup> Ha'e rami vy Israel kuery ma Ramessés tetã gui oje'oi Sucote katy. Seiscentos mil yvy rupigua avakue ikuai, kunhague ha'e kyrigue oipapa e'ÿ rã.

<sup>38</sup> Ha'e kuery reve oje'oi avi amboae kuery joegua e'ÿ-e'ÿ, ha'e gui mbovy e'ÿ mymba kuery vexa'i ha'e vaka.

<sup>39</sup> Ombojoy okuapy mbojape imbovua revegua e'ÿ Egito gui omoapomo heravy va'ekue. Imbovua revegua e'ÿ teri ombojoy, mba'eta Egito gui omoëmbaa ramo ojapura vy nda'evei ho'u va'erã ojapopa aguã.

<sup>40</sup> Israel kuery ma quatrocentos e trinta ma'etÿ re ikuai Egito yvy re.

<sup>41</sup> Ha'e gui quattrocentos e trinta ma'etÿa opa jave, ha'e va'e ára ae SENHOR pegua xondaro rami ikuai va'e ha'e javi oje'oi Egito gui.

<sup>42</sup> Ha'e va'e pytû ma SENHOR re ima'endu'aa aguã, mba'eta ha'e va'e jave oguenoëmba Egito yvy gui. Ha'e va'e pytû ma SENHOR pegua ramo Israel kuery ha'e javive 'rã ima'endu'a, araka'e rã ikuai va'e voi.

<sup>43</sup> Ha'e gui SENHOR aipoe'ive ju Moisés ha'e Arão pe:

— Po rami ma Páscoa ára py pejapo va'erã. Amboae regua neñ peteïve ndo'ui 'rã ha'e va'e regua.

<sup>44</sup> Ha'e rã tembiguai kuery peráta re ojogua pyre ha'e javi 'rã ho'u, opire omboi uka rire.

<sup>45</sup> Ha'e rã amboae regua ha'e peráta re ombo'eapo va'erã pejou va'ekue ma ndo'ui 'rã ha'e va'e regua.

<sup>46</sup> Peteï-teï vexa'i ra'y ma peteï'i oo py 'rã pe'u. Ho'okue peraa eme oka katy, neñ pemopẽ eme ikägue.\*

<sup>47</sup> Israel kuery ha'e javive tojapo ha'e rami.

<sup>48</sup> Ha'e rã xapy'a rei pendero py amboae yvy regua ovaõ vy SENHOR pegua Páscoa ho'uxe avi ramo ma avakue ha'e javi pire tomboi ranhe. Ha'e gui mae ma 'rã ha'eve onhemboja ha'e ho'u aguã. Ha'e rami rire ha'e pyguae rami 'rã oiko. Ha'e rã opire omboi uka e'ÿ va'e ma neñ peteïve ndo'ui 'rã.

<sup>49</sup> Ha'e rami ae toiko pendeyvy pygua ae, ha'e amboae yvy regua penembyte rupi ikuai va'e pe.

<sup>50</sup> Ha'e rami ikuai Israel kuery ha'e javive. Moisés ha'e Arão pe SENHOR ojapo ukaague rami ae ikuai.

<sup>51</sup> Ha'e va'e árave SENHOR oguenoë Israel kuery Egito yvy gui, peteï-teï regua ooa rami.

## 13

### *Jypygua itui'i va'ekue SENHOR pegua ikuai aguã re ijayvuague*

\* **12:46** João 19.36

<sup>1</sup> Ha'e gui SENHOR aipoe'i Moisés pe:

<sup>2</sup> — Xevy guarã remboaxa 'rã Israel kuery oxy gui jypygua itui'i va'e ha'e javi. Avakue e'ŷ vy mymba guigua teĩ xemba'e meme — he'i.\*

<sup>3</sup> Ha'e ramo Moisés aipoe'i guetarã kuery pe:

— Penema'endu'a ke kova'e ára Egito yvy gui peopaague re, escravo rami pumba'eapo poyiague gui. Mba'eta SENHOR opo'akaa rupi penerenoẽ ha'e gui. Ha'e nunga rupi pe'u eme mbojape imbovua revegua.

<sup>4</sup> Kova'e ára jaxy abibe 'epy va'e py ae peje'oi.

<sup>5</sup> Ha'e gui SENHOR pendereraa 'rã yvy mboae re, cananeu kuery, heteu, amorreu, heveu ha'e jebuseu kuery yvy penderekoarã ome'ẽ aguã re peneramoĩ kuery pe oura reve ijayvuague, yvy kamby ha'e ei oata e'ŷa. Ha'e va'e yvy re SENHOR pendereraa ma ramo kova'e jaxy ojeupity nhavõ penema'endu'a ha'e rami penderekorã oeja va'ekue rami pendekuai aguã.

<sup>6</sup> Ha'e rami vy sete ára re pe'u 'rã mbojape imbovua revegua e'ŷ. Ha'e gui sete araa py ma oiko 'rã nhemboaty iky'a e'ŷ va'e SENHOR pegua.

<sup>7</sup> Sete ára re pe'u 'rã mbojape imbovua revegua e'ŷ. Mbojape mbovua toĩ eme pendereve, neĩ pendeyvy ha'e javi rupi.

<sup>8</sup> Ha'e va'e árave ndera'y kuery pe remombe'u vy "Ha'e rami nhandekuai mba'eta SENHOR mba'emo porã ojapo xevy Egito gui orenoẽ vy", peje 'rã.

<sup>9</sup> Ha'e rami nhandekuaia opyta 'rã ikuaa ukaarã ndepo re ha'e nderova re oĩ va'e rami, nema'endu'a aguã SENHOR guigua lei rupi ndeayvu aguã, mba'eta Egito yvy gui SENHOR opo'akaa rupi nerenoẽ rire.

<sup>10</sup> Ha'e nunga rupi ma'etŷa nhavõ, hi'ára py porã pendekuai 'rã ha'e va'e ayvu rami.

<sup>11</sup> — Ha'e gui SENHOR ndevy ha'e neramoĩ kuery pe ouraague rami vy penemoinge 'rã cananeu kuery yvy re. Pendekoarã ome'ẽ ma ramo

<sup>12</sup> SENHOR peguarã remboaxa 'rã oxy gui jypygua itui'i va'ekue ha'e javi, mymba kuery guive. Jypygua ava oiko va'e ma guive rã SENHOR peguarã meme.

<sup>13</sup> Ha'e rã mburika'i ra'y jypygua rekoria reme'ẽ 'rã veva'i ra'y py. Remboekovia e'ŷ ri ramo remopẽ 'rã ijatua rupi. Ha'e rã avakue regua ndera'y kuery jypygua ikuai va'e ma remboekovia va'erã meme.

<sup>14</sup> Ha'e gui ko'ẽ rã ndera'y kuery oporandu rã "Mba'e re tu ha'e rami nhandekuai?" he'i ramo ixupe aipo're 'rã: "SENHOR opo'akaa rupi orerenoẽ raka'e escravo orekuiai gui.

<sup>15</sup> Mba'eta Faraó inhakã ratã vy noremondoukavei ramo SENHOR ojuka Egito yvy re jypy'i guare ha'e javi, avakue ha'e mymba guigua voi. Ha'e rami rire SENHOR pe xee amboaxa oxy gui jypygua itui'i va'e ava ma guive rã, ha'e rã xera'y kuery jypygua ha'e javi ma amboekovia 'rã.

<sup>16</sup> Ha'e rami nhandekuaia opyta 'rã ndepo re ha'e nderova re ikuaa ukaarã oĩ va'e rami, mba'eta SENHOR opo'akaa rupi orerenoẽ raka'e Egito yvy gui", 're 'rã ndera'y kuery pe.

### *Tape rupi Nhanderuete ojeupegua kuery oguerekaoague*

<sup>17</sup> Israel kuery Faraó omondouka ma jave filisteu kuery yvy rupi tape oo va'e rupi e'ŷ Nhanderuete ogueraa namombyryive teĩ, mba'eta aipoe'i vy: "Xevygua kuery joe opu'ã va'e oexa vy oendu 'rã okyjea, ha'e Egito yvy katy ju ojevyxe 'rã", he'i vy.

<sup>18</sup> Ha'e rami 'rãgue py ojeupegua kuery Nhanderuete ojapo ojere jogueravy aguã rami ye'ẽ pytã katy'i rupi tape tekaoa e'ŷa rupi oo va'e rupi. Ha'e ramo Israel kuery xondaro rami guembiporupa reve oje'oi Egito gui.

<sup>19</sup> Moisés ogueraa avi José kâgue, mba'eta ha'e rami Israel ra'y kuery ojapo aguã re oura rire. Ha'e vy aipoe'i: "Anhetẽ Nhanderuete ojekuaa 'rã pendevy. Ha'e ramo apy gui ke peraa xekâgue", he'iague rami ae ogueraa.

<sup>20</sup> Ha'e gui ha'e kuery Sucote gui oje'oi vy Etã py ju ikuai, tekaoa e'ŷa re ovaẽa'i py.

\* **13:2** Lucas 2.23

<sup>21</sup> SENHOR oo oiny ha'e kuery renonde. Ára pukukue re peteñ arai opu'ã va'e rupi oo, tape rupi ogueraa aguã. Ha'e rã pyávy ma tata opu'ã va'e rupi oo oexape aguã, ara py ha'e pyávy ha'e kuery oguata aguã.

<sup>22</sup> Ara py arai opu'ã va'e ndojepe'ai ha'e kuery áry gui, ha'e pyávy ma tata opu'ã va'e voi ndojepe'ai.

## 14

### *Israel kuery rakykue Egito pygua kuery ouague*

<sup>1</sup> Ha'e gui SENHOR aipoe'i Moisés pe:

<sup>2</sup> — Ndeayvu na Israel kuery pe guakykue katy ju oo vy Pi-Hairote rexei optyta aguã, Migdol ha'e ye'ẽ mbyte, Baal-Zefom renonde katy. Ha'e va'e renonde py pepyta 'rã ye'ẽ yvýry.

<sup>3</sup> Ha'e ramo Faraó ojeupe ae “Israel kuery nda'ikuai kuaavei vy po okanhymba ma nhi'ã tekao e'ŷa re” he'i 'rã.

<sup>4</sup> Ha'e rami vy amoakã ratã 'rã Faraó penderakykue oo aguã. Ha'e ramo pexa 'rã Faraó ha'e ixondaro kuery ha'e javi re xepo'aka rã. Egito pygua kuery voi oikuaa 'rã xee SENHOR aikoa – he'i. Ha'e ramo ha'e kuery ojapo ha'e rami.

<sup>5</sup> Ha'e gui Egito pygua huvixa pe omombe'ua Israel kuery ojavapa maa. Ha'e ramo Faraó ha'e hembiguai kuery amboae rami ju onhembopy'a ha'e kuery rovai. Ha'e vy aipoe'i okuapy:

— Mba'exa tu jajapo ra'e Israel kuery nhanerembiguai kuery ikuai ve'ŷ aguã rami? – he'i okuapy.

<sup>6</sup> Ha'e gui Faraó okaróxa oguereco katu ma vy ogueraa oxondaro kuery.

<sup>7</sup> Ha'e rami vy ogueraa seiscentos mba'eyru oiporavo va'ekue ha'e karóxa Egito re ikuai va'e ha'e javi, huvixa oĩ reve meme.

<sup>8</sup> Mba'eta SENHOR omoakã ratã Egito pygua huvixa Faraó Israel kuery rakykue oo aguã. Ha'e rã Israel kuery ma ipy'a guaxu reve oje'oi.

<sup>9</sup> Ha'e kuery rakykue Egito pygua kuery oje'oi. Kavaju ha'e javi, Faraó mba'e karóxa, kavaju árygua kuery ha'e ixondaro kuery reve oo vy oupity ye'ẽ yvýry hekoia okuapy pa, Pi-Hairote katy'i, Baal-Zefom renonde katy.

<sup>10</sup> Ha'e gui Faraó kuery ovaẽ rai'i rã Israel kuery oma'ẽ. Ha'e vy oexa Egito pygua kuery ha'e kuery rakykue ou oiny rã. Ha'e rami vy Israel kuery okyje ete okuapy, ha'e vy ojapukai okuapy SENHOR pe.

<sup>11</sup> Aipoe'i okuapy Moisés pe:

— Egito yvy re orenhono porã aguã jipoí ramo teve ha'e gui orenoẽ kova'e tekao e'ŷa py romanomba aguã? Mba'e re tu nami oreapo, Egito gui roẽmba aguã rami orerereko?

<sup>12</sup> Po rami e'ŷ ri ty'y ndevy oreayvu raka'e Egito yvy re teri nhandekuai reve: “Orereja ke Egito pygua kuery pe orekuai aguã” ro'e va'ekue. Mba'eta orevy pe ha'eveve va'e rire Egito pygua kuery pe orekuai aguã tekao e'ŷa py romanomba 'râgue py – he'i okuapy.

<sup>13</sup> Ha'e ramo Moisés ombovai heta va'e kuery pe:

— Pekyje eme, pekyrirĩ ha'e pexa 'rã pendereraa jepearã SENHOR kova'e ára omoingo ta va'e, mba'eta Egito pygua kuery aŷ pexa va'e ma ndapexa jevyvei ma 'rã.

<sup>14</sup> SENHOR ae 'rã opu'ã penderepy aguã, ha'e rã peẽ ma pekyrirĩ 'rã – he'i.

### *Ye'ẽ mbyte rupi oopaague*

<sup>15</sup> Ha'e gui SENHOR aipoe'i Moisés pe:

— Mba'e re tu rejapukai xevy? Aipo're Israel kuery toguata oje'oivy.

<sup>16</sup> Ha'e rã ndee ma eupi ndepopoka, ekuave'ẽ ye'ẽ áry, ha'e emboja'o, ye'ẽ mbyte rupi Israel kuery oaxa aguã ípiru reia rupi.

<sup>17</sup> Ma'ẽ, Egito pygua kuery xee amoakã ratã vy ajapo 'rã penderakykue oo vy ha'e va'e rupi oike avi aguã rami. Xemboete pavẽ 'rã Faraó re xepo'aka ramo, ha'e ixondaro kuery ha'e javi re, ikaróxa ha'e kavaju árygua kuery re guive.

<sup>18</sup> Ha'e ramo Egito pygua kuery oikuaa pavẽ 'rã xee SENHOR aikoa. Faraó re vy xemboetea 'rã, karóxa ha'e kavaju árygua kuery re vy guive – he'i.

<sup>19</sup> Ha'e gui Nhanderuetea guigua anjo ma Israel kuery xondaro kuery renonde oo oiny va'ekue ojepe'a vy ha'e kuery rakykue katy ju oaxa. Arai opu'ã va'e voi ojepe'a ha'e kuery renonde katy gui, ha'e vy hakykue katy ju opyta.

<sup>20</sup> Ha'e rami vy opyta Egito pygua kuery ikuiaha'e Israel kuery ikuiaia mbyte. Arai ma Egito pygua kuery pe pytû, ha'e rã Israel kuery pe ma hexakã. Ha'e rami py pytû mbukukue re nda'evei Egito pygua kuery onhemboja aguã Israel kuery re.

<sup>21</sup> Ha'e gui Moisés okuave'ẽ ye'ẽ áry. Ha'e ramo ha'e va'e pytû mbukukue re SENHOR ojapo yvytu kuaray oua katy gui oipeju aguã rami, ye'ẽ ojepe'a aguã. Yy oja'oague rupi yvy piru rei opyta.

<sup>22</sup> Ha'e ramo Israel kuery oike ye'ẽ mbyte yvy ipiru reia rupi. Yy ma kora rami oĩ ha'e kuery yvýry, oiporu kuaa re ha'e oiporu kuaa e'ŷa re.

<sup>23</sup> Ha'e gui Egito pygua kuery ma ha'e kuery rakykue oje'oi vy oike avi jogueravy, Faraó rymba kuery kavaju ha'e javive, karóxa ha'e kavaju árygua kuery guive. Ha'e rami vy ye'ẽ mbyte peve oo.

<sup>24</sup> Ha'e gui ko'ẽ rai jave SENHOR tata ha'e arai opu'ã va'e mbyte oĩa gui oexa Egito pygua kuery oje'oi rã. Ha'e rami vy omondyipa.

<sup>25</sup> Ha'e vy ha'e kuery karóxa ruéra ombopija vy ojapo ndoo porãvei aguã rami. Ha'e ramo Egito pygua kuery aipoe'i:

— Jajavapa ke Israel kuery renonde gui, mba'eta SENHOR opu'ã ore kuery rovai ha'e kuery repy vy.

### *Egito pygua kuery yy py omanombaague*

<sup>26</sup> SENHOR aipoe'i Moisés pe:

— Ekuava'ẽ ju ye'ẽ áry, Egito pygua kuery áry yy ojevy aguã, ikaróxa ha'e kavaju árygua kuery áry – he'i.

<sup>27</sup> Ha'e ramo ye'ẽ áry Moisés okuave'ẽ. Ko'ẽmba ma jave ye'ẽ oxyry atã ju ouvy. Egito pygua kuery ojavapa ta ovvy ramo yy ovaexi. Ha'e rami ye'ẽ mbyte py SENHOR oitypa Egito pygua kuery.

<sup>28</sup> Yy ojevypa vy ojao'ipa karóxa, kavaju kuery ha'e Faraó xondaro kuery ha'e javi ye'ẽ mbyte rupi hakykue oje'oi ta va'ekue. Ha'e kuery regua neñ peteñve ndopytai.

<sup>29</sup> Ha'e rã Israel kuery ma ye'ẽ mbyte ipiru reia rupi oguata. Ha'e kuery pe ma yy kora rami oĩ, oiporu kuaa re ha'e oiporu kuaa e'ŷa re.

<sup>30</sup> Ha'e va'e ára SENHOR ogueraa jepe Israel kuery Egito pygua kuery gui. Ha'e gui Israel kuery oexa okuapy Egito pygua kuery ye'ẽ rembe re omanomba va'ekue.

<sup>31</sup> Ha'e rami vy Israel kuery oexa SENHOR ipo'aka etea Egito pygua kuery re opu'ã rã. Ha'e ramo ha'e kuery oendu SENHOR renonde ojererokyjea. Hexe ojerovia ete okuapy, hembiguai Moisés re guive.

## 15

### *Moisés oporaeiague*

<sup>1</sup> Ha'e ramo Moisés ha'e Israel kuery omonhendu okuapy pova'e mboraei SENHOR pe. Ha'e vy aipoe'i:

— Aporaei 'rã SENHOR pe, mba'eta yvate ete vy ipo'aka.

Yé'ẽ mbyte py oitypa kavaju ha'e hi'árygua kuery.

<sup>2</sup> SENHOR ma xembaraetea ha'e aporaeia.

- Ha'e ma xereraa jepea oiko.  
 Ha'e va'e ma xeruete, ha'e nunga rupi amboete 'rã.  
 Xeru Ruete voi oiko ramo amboyvate 'rã.
- <sup>3</sup> SENHOR ma joe opu'ã va'e.  
 SENHOR ma hery.
- <sup>4</sup> Ye'ẽ mbyte py oitypa Faraó mba'e karóxa ha'e xondaro kuery.  
 Huvixa kuery voi oy'upa Ye'ẽ Pytã va'e py.
- <sup>5</sup> Yai ou oiny va'e ojao'ipa.  
 Ha'e ramo ita rami oikepa yy guy ete peve.
- <sup>6</sup> SENHOR, ndepo reiporu kuaa regua ipo'aka vy iporã ete.  
 SENHOR, ndepo reiporu kuaa regua omboa'ypa nderovaigua kuery.
- <sup>7</sup> Ndeyvate ete va'e vy reitypa nderovai opu'ã va'e kuery.  
 Ndepoxya rembou rã omokanhymba mba'emo ra'ykue rami.
- <sup>8</sup> Neapyigua gui nepytuẽ va'e py rive remboaty yy.  
 Oxyrya gui optyapa, ijaty oupy.  
 Yai ikuai va'e hatãmba ye'ẽ guýry.
- <sup>9</sup> Orerovaigua aipoe'i: "Aa 'rã ha'e kuery rakykue aupity peve.  
 Amboja'o 'rã ha'e kuery mba'e rei-rei va'ekue,  
 xenhe'ẽ py arovya 'rã ha'e nunga ajopypa vy.  
 Aekyi 'rã xekyxé, xepo py amokanhymba 'rã", he'i va'ekue.
- <sup>10</sup> Ha'e rã ndeguigua yvytu py reipeju ramo ye'ẽ ojao'ipa.  
 Ha'e kuery oikepa yy omyi atãa py chumbo oikea rami.
- <sup>11</sup> — SENHOR, tuuete ikuai va'e regua mava'e 'rã tu ndee ramigua oiko?  
 Mava'e tu oiko ndee ramigua? Ndeky'a e'ỹ va'e rã ndererovy'aa.  
 Nhomondyipaarã iporã va'e rejapo vy okyjepy reiko.
- <sup>12</sup> Reiporu kuaa regua reupi ramo  
 yvy omokõmba.
- <sup>13</sup> Rejoayvua rupi rerekoo ndevygua kuery reraa jepe va'ekue.  
 Ndepo'akaa rupi reraa nderekoo iky'a e'ỹ va'e py.
- <sup>14</sup> Yvy regua kuery oendu vy oryryipa okuapy,  
 tekoaxy poyi ipo'aka Filístia pygua kuery re.
- <sup>15</sup> Ma'ẽ, Edom py yvatekueve ikuai va'e ma oximba.  
 Moabe pygua ipo'aka va'e kuery voi oendu okuapy okyjea.  
 Canaã pygua kuery ikangypa.
- <sup>16</sup> Ha'e kuery áry ho'a imondiyiarã ha'e imongyjarã.  
 Ndejyva ipo'aka ete va'e gui vy okyririmb'a 'rã ita rami,  
 ndevygua kuery oaxa peve, SENHOR,  
 rejogua va'ekue oaxapa peve.
- <sup>17</sup> Ha'e va'e kuery ma ndevygua yvyty re reraa vy renhoty 'rã ha'e py nemba'etyrã,  
 SENHOR, tekoaa rei atyrã rerekoo katu va'ekue py,  
 henda iky'a e'ỹ va'e py, ndepo py renhono va'ekue py.
- <sup>18</sup> SENHOR ipo'aka 'rã araka'e rã peve – he'i.
- <sup>19</sup> Mba'eta Faraó rymba kuery kavaju, ikaróxa ha'e kavaju árygua kuery ye'ẽ mbyte py  
 oikepa ramo ha'e kuery áry SENHOR ombou ju yy. Ha'e rã Israel kuery ma yvy rupi oaxa  
 oje'oivy ye'ẽ mbyte ipiru reia rupi.
- Miriã kunhague mboae reve oporaei okuapyague*
- <sup>20</sup> Arão reindy Miriã ma profeta kunha oiko. Ha'e rami vy pandeiro ojopy rã hakykue  
 kunhague ha'e javive oje'oi pandeiro reve ha'e ojerokya rupi.
- <sup>21</sup> Ha'e ramo ha'e kuery pe Miriã ombovai:  
 – Peporaei SENHOR pe, mba'eta iporã ete ipo'akaa py.

Mba'eta ye'ẽ py oitypa kavaju ha'e hi'árygua kuery.

*Yy iro va'e iro e'ŷ va'e ju opytaague*

<sup>22</sup> Ye'ẽ Pytã va'e gui ma Moisés ogueraa Israel kuery teko a e'ŷa Sur katy. Tekoa e'ŷa rupi mboapy ára re oguata oje'oivy yy ojou e'ŷ re.

<sup>23</sup> Ha'e gui mae ma Mara py ovaẽ. Ha'e rami teĩ Mara py yy oĩ va'e ma nda'evei oy'u aguã, iro ramo. Ha'e ramo ae omboery Mara.\*

<sup>24</sup> Ha'e rami rã Moisés re heta va'e kuery ijayvu rei vy aipoe'i:

— Mba'e tu jay'u 'rã? — he'i okuapy.

<sup>25</sup> Ha'e ramo Moisés ojapukai SENHOR pe. Ha'e rã ixupe SENHOR oexa uka peteĩ yvyra. Ha'e va'e ma Moisés yy py omombo ramo yy nda'irovei. Ha'e py SENHOR oeja peteĩ ayvu ha'e kuery rekorã. Ha'e rami vy ha'e kuery oeko a'ã ha'e py.

<sup>26</sup> Ha'e vy aipoe'i:

— Xapy'a rei SENHOR Penderuete ayvu pendu riae, henonde ha'evea ramigua anho pejapo, ojapo uka va'e pendu, ha'e ijayvuague ha'e javi rupi pendekuai ramo ma neĩ peteĩve mba'eaxy ndoui 'rã pendere, Egito pygua kuery re ambou va'ekue regua. Mba'eta xee ma SENHOR romonguera va'e — he'i.

<sup>27</sup> Ha'e gui ha'e kuery ma Elim py ju ovaẽ, doze yvu ha'e setenta pindo ikuiaia py. Ha'e py opyta okuapy yy ikuai va'e yvýry.

## 16

*Nhanderuete maná ombouague*

<sup>1</sup> Elim teko a gui Israel kuery ha'e javi oje'oi Sim teko a e'ŷa katy, Elim ha'e Sinai mbyte oĩ va'e. Egito yvy gui oẽmba rire mokoĩ jaxy quinze araa py ovaẽ.

<sup>2</sup> Ha'e gui teko a e'ŷa py Israel kuery ha'e javive ijayvu mbegue rei okuapy Moisés ha'e Arão re.

<sup>3</sup> Ha'e vy aipoe'i okuapy:

— SENHOR po py romanomba va'e rire Egito yvy re, oja xo'o mimoĩ oĩa yvýry roguapy rokuapy jave, ha'e orerevyatãmba peve mbojape ro'u rokuapy jave. Mba'eta ndee ma kova'e teko a e'ŷa py orereru orejuka aguã karuai py, ore kuery ha'e javive — he'i.

<sup>4</sup> Ha'e ramo SENHOR aipoe'i Moisés pe:

— Ma'ẽ, ajapo 'rã yva gui penembi'urã ho'a aguã ramo. Ha'e ramo ko'ẽ nhavõ heta va'e kuery oẽ vy omono'õ 'rã peteĩ-teĩ ára guarã ete'i, xee aexa aguã xeguigua lei rupi pa ikuai tyrã pa anya.\*

<sup>5</sup> Ha'e gui mboapy meme araa py ma mokoĩ ára peguarã 'rã pemono'õ. Ha'e va'e pemono'õ vy pemoĩ 'rã penerembi'urã — he'i.

<sup>6</sup> Ha'e ramo Moisés ha'e Arão aipoe'i Israel kuery ha'e javi pe:

— Kuri ka'arukue peikuaa 'rã SENHOR ae Egito yvy gui penerenoẽmbaague.

<sup>7</sup> Ha'e rã ko'ẽ aje'ive'i ma pexa 'rã SENHOR rexakã oexa uka rã, mba'eta oendu pendeayvu rei rã. Ha'e gui marã ramigua tu ore roiko orere peẽ kuery pendeayvu rei aguã?

<sup>8</sup> Mba'eta ka'arukue SENHOR ombou 'rã xo'o pe'u va'erã, ha'e aje'ivekue ma mbojape ju ombou penerevyatã aguã. Ha'e rami avi SENHOR oendu pejou reia, mba'eta hexe ae pendeayvu rei. Ha'e rã ore ma mava'e tu roiko? Ore rovai e'ŷ pendeayvu, ha'e rã SENHOR rovai — he'i Moisés.

<sup>9</sup> Ha'e gui Moisés aipoe'i Arão pe:

— Aipo're Israel kuery ha'e javi pe: "Peno'õmba ke SENHOR renonde, mba'eta ha'e oendu pendeayvu rei rã", 're 'rã ha'e kuery pe — he'i.

<sup>10</sup> Ha'e ramo Israel kuery ha'e javi pe Arão ijayvu jave teko a e'ŷa katy oma'ẽ vy oexa okuapy SENHOR rexakã arai re.

\* **15:23** Tery Mara ma "Iro" 'ea. \* **16:4** João 6.31

### *Nhanderuete guyra codornizes ha'e maná ombouague*

<sup>11</sup> Ha'e gui SENHOR aipoe'i Moisés pe:

<sup>12</sup> — Aendu Israel kuery ijayvu reia. Ha'e ramo aipo're ha'e kuery pe: “Kuri ka'aru pytū e'ŷ mbove pe'u 'rã xo'o. Ha'e rã aje'ive'i ju ma pe'u 'rã mbojape. Ha'e rami vy peikuua 'rã xee SENHOR Penderuete aikoa”, 're 'rã ha'e kuery pe – he'i.

<sup>13</sup> Ha'e gui ka'arukue oveve ouvy guyra codornizes, ha'e vy ojao'ipa tekao ha'e javi rupi. Ha'e gui aje'ive'i ma yxapy oĩ tekao yvýry.

<sup>14</sup> Yxapy ho'a va'ekue ipirupa jave yvy re opyta mba'emo xiĩ rei va'e pira pekue ramigua, yro'y rami ipererĩ va'e.

<sup>15</sup> Ha'e nunga Israel kuery oexa vy joupe-upé aipoe'i okuapy:

— Mba'e nunga tu peva'e? Mba'eta ndoikuuai mba'e paa.

Ha'e ramo Moisés ombovai:

— Peva'e ma mbojape pe'u va'erã SENHOR ombou va'ekue.

<sup>16</sup> Mba'eta SENHOR aipoe'i uka pêvy: “Peva'e nunga peteĩ-teĩ pemono'õ 'rã pe'u va'erã, peteĩ-teĩ peguarã peteĩ ryru tynyẽ oĩ, mbovy pa pendekuaia rami. Peteĩ-teĩ omono'õ 'rã ngoo py ikuai va'e peguarã”, he'i uka va'ekue.

<sup>17</sup> Ha'e rami ae Israel kuery ojapo. Ha'e vy amongue omono'õve, ha'e rã amboae kuery ma nomono'õive'i.

<sup>18</sup> Ha'e rami teĩ hyru py oa'ã rã naembyrei omono'õ reta va'ekue pe, neĩ ndoatai mbovy'i omono'õ va'ekue pe. Mba'eta peteĩ-teĩ ho'u aguã ha'evea rami omono'õ.\*

<sup>19</sup> Ha'e gui Moisés aipoe'i ha'e kuery pe:

— Avave rei tomoĩ porã eme ko'ẽ rã guarã – he'i.

<sup>20</sup> Ha'e rami teĩ ha'e kuery noendu potai Moisés ayvu re. Ha'e vy amongue maná omono'õ vy omoĩ porã ko'ẽ rã guarã. Ha'e rã haxopa, heakuã vaikue guive. Ha'e ramo Moisés ivai ha'e kuery pe.

<sup>21</sup> Ha'e nunga rupi aje'ive'i nhavõ omono'õ peteĩ-teĩ ho'u va'erã ete'i, mba'eta kuaray aku rã hykupa.

### *Israel kuery maná omono'õ okuapyague*

<sup>22</sup> Ha'e gui seis araa py ma tembi'u omono'õ okuapy mokoĩ ára guarã, peteĩ-teĩ pe mokoĩ ryru omono'õ. Ha'e rã yvatekueve ou vy omombe'u okuapy Moisés pe.

<sup>23</sup> Ha'e ramo Moisés ombovai:

— Ha'e rami aguã ae ma SENHOR aipoe'i: “Ko'ẽ ramo ma pepytu'u 'rã, SENHOR pegua ára sábado iky'a e'ŷ va'e ramo. Ha'e gui aŷ ma mba'emo oexyaty py pexyxé va'e ma pexy 'rã, ha'e yy py pembojyxé va'e ma pembojy 'rã. Ha'e rami avi ndape'upai va'ekue ha'e javi 'rã peipe'a ko'ẽ rã guarã”, he'i va'ekue.

<sup>24</sup> Ha'e ramo Moisés aipoe'iague rami ha'e kuery omoĩ porã ko'ẽ jevy peve. Ha'e va'e ma naeakuã vaikuei, ndaxoi guive.

<sup>25</sup> Ha'e ramo Moisés aipoe'i:

— Pe'u ke kova'e ára, mba'eta kova'e ára ma sábado SENHOR pegua. Kova'e ára ma ndapejoui 'rã nhuũndy rupi.

<sup>26</sup> Seis ára re 'rã pemono'õ. Ha'e rã sete araa ma sábado. Ha'e va'e ára py ma jipoi 'rã – he'i.

<sup>27</sup> Ha'e gui sete araa py heta va'e kuery regua amongue oje'oi omono'õ aguã, teĩ ndojoui.

<sup>28</sup> Ha'e ramo SENHOR aipoe'i Moisés pe:

— Raka'e peve tu ndapejapoi 'rã ajapo uka va'e ha'e xeguigua lei?

<sup>29</sup> Peikuua pota SENHOR pepytu'u aguã sábado ára oejaague re. Ha'e nunga rupi seis araa py ome'ẽ penembi'u mokoĩ ára peguarã. Sete araa py ma peteĩ-teĩ topyta oĩa py ae, avave rei too eme oĩa gui – he'i.

\* **16:18** 2 Coríntios 8.15

**30** Ha'e rami rã sete araa py heta va'e kuery opytu'u okuapy.

**31** Ha'e nunga pe Israel kuery "Maná" he'i. Kuratõ ra'yí rami xií, ha'e ei guigua rami hee va'e.

**32** Ha'e gui Moisés aipoe'i:

— Po rami SENHOR ojapo uka va'e: "Ha'e va'e regua pemonyé 'rã peteĩ hyru, ha'e pemoĩ porã 'rã peneramymino kuery peguarã, ha'e kuery avi oexa aguã tembi'u teko a e'ýa rupi penemongaruague, Egito gui roguenoẽ jave", he'i.

**33** Ha'e gui Arão pe ju Moisés aipoe'i:

— Ejopy peteĩ hyru, ha'e emonyé maná. Ha'e va'e ma emoĩ porã SENHOR renonde, peneramymino kuery peguarã — he'i.

**34** Ha'e ramo Moisés pe SENHOR ijayvuague rami vy Arão ma Nhanderuete ayvu oĩaty renonde omoĩ porã hyru.

**35** Ha'e rã Israel kuery ma quarenta ma'etý re okaru okuapy maná re, yvy hekoa aguã py oike peve. Canaã yvy re ovaẽ peve okaru okuapy maná re.

**36** Ha'e gui dez ryru renyé ma peteĩ ajaka.

## 17

### *Refidim py ita gui yy oẽague*

**1** Ha'e gui Sim teko a e'ýa gui Israel kuery oje'oipa vy opytu'-pyta oje'oivy SENHOR aipoe'iague rami vy. Ha'e rami vy Refidim py ju opytu okuapy. Ha'e py ma yy jipoí ha'e kuery oy'u aguã.

**2** Ha'e ramo heta va'e kuery ijayvu ete okuapy Moisés re. Ha'e vy aipoe'i:

— Eme'ẽ yy roy'u aguã.

Moisés ombovai:

— Mba'e re tu pendeayvu ete xere? Mba'e re tu peko a'ã SENHOR? — he'i.

**3** Heta va'e kuery ha'e py ijey'uveipa vy Moisés re ijayvu rei vy aipoe'i:

— Mba'e re tu oreapo Egito yvy gui roju aguã rami, yuvei py orejukapa aguã, orera'y kuery ha'e orerymba kuery reve? — he'i okuapy.

**4** Ha'e ramo Moisés ojapukai SENHOR pe:

— Mba'e tu ajapo 'rã kova'e kuery re? Ita py xepipa ta ma okuapy.

**5** SENHOR ombovai:

— Eaxa heta va'e kuery renonde, ha'e nderupive eraa Israel kuery mongetaaty kuery regua. Ndepo py eraa ndepopoka yakã reinupãague va'e. Tereo.

**6** Ha'e gui neronden xee aí'rã peteĩ itaova Horebe py oĩ va'e áry. Einupã ha'e va'e itaova, ha'e rã ixugui oẽ 'rã yy. Ha'e ramo heta va'e kuery oy'u 'rã — he'i. Ha'e rami Moisés ojapo Israel kuery mongetaa kuery renonde.

**7** Ha'e va'e teko ma omboery Massá ha'e Meribá,\* SENHOR oeko a'ãa rupi Israel kuery ijayvu ete rire, "Nhanembyte SENHOR oĩ teve tyrã pa any?" he'i okuapy vy.

### *Israel kuery re Amaleque kuery opu'ãague*

**8** Ha'e gui Refidim py Israel kuery ikuai jave Amaleque kuery ou vy opu'ã okuapy ha'e kuery rovai.

**9** Ha'e ramo Moisés ijayvu Josué pe:

— Eiporavo avakue ha'e tereo, pepu'ã Amaleque kuery rovai. Ha'e rã xee ma ko'ẽ rã aẽ 'rã yvyty apyte áry, Nhanderuete pegua popoka xepo py areko reve — he'i.

**10** Ha'e ramo Josué ojapo Moisés ijayvuague rami. Ha'e rami vy opu'ã okuapy Amaleque kuery re. Ha'e rã Moisés, Arão ha'e Hur ma yvyty apyte áry oẽ.

**11** Moisés opo oupi jave Israel kuery ipo'aka 'rã. Ha'e rã opo omboguejy jave ma Amaleque kuery ju 'rã ipo'aka.

\* **17:7** Tery Massá ma "Moangekoa" 'ea, ha'e gui Meribá ma "Ayvua ete-ete" 'ea.

<sup>12</sup> Ha'e gui Moisés po ma ipoyi. Ha'e ramo peteĩ ita ha'e kuery ogueru vy omoĩ okuapy ha'e py. Ha'e ramo Moisés oguapy hi'áry. Arão ha'e Hur ma ipo omoĩ atã herekovy jovaive-ive re. Ha'e rami py ipo oĩ atã kuaray oike peve.

<sup>13</sup> Ha'e rami rã Josué kuery kyxé guaxu py oitypa Amaleque kuery.

<sup>14</sup> Ha'e ramo SENHOR aipoe'i Moisés pe:

— Embopara peteĩ kuaxia re ha'e nungakue re penema'endu'a aguã, ha'e eroayvu ju Josué pe. Mba'eta xee amomba ete 'rã Amaleque kuery, yva guýry rupi ha'e kuery re ima'endu'aa ve'ý aguã — he'i.

<sup>15</sup> Ha'e gui Moisés ojapo peteĩ altar. Ha'e va'e ma omboery “SENHOR ma xe-bandeira”.<sup>†</sup>

<sup>16</sup> Ha'e vy aipoe'i:

— Mba'eta SENHOR ouraague rami vy Amaleque kuery re opu'ã 'rã araka'e rã peve.

## 18

### *Moisés ratyu ta'yxy ha'e ta'y kuery ogueruague*

<sup>1</sup> Ha'e gui Moisés ratyu Jetro sacerdote Midiã pygua va'e oendu Moisés pe ha'e Israel kuery pe SENHOR ojapo va'ekue ha'e javi, ha'e marã rami vy pa Egito yvy gui ha'e kuery ogueru raka'eague.

<sup>2</sup> Ha'e rami vy Moisés ratyu Jetro ogueru ju ta'yxy Zípora omondoukaague gui.

<sup>3</sup> Mokoĩ ta'y kuery reve ogueru. Ha'e va'e kuery regua peteĩ ma omboery Gérson, Moisés “Amboae yvy rupi aguata rei aikovy va'ekue” he'i vy.

<sup>4</sup> Ha'e rã amboae ma omboery Eliézer, “Xeru ruete xepytyvõ vy xereraa jepe Faraó kyxé guaxu gui” he'i vy.\*

<sup>5</sup> Ha'e rami py Moisés tekao e'ýa py hekoia oikovya py hatyu Jetro ogueru ta'y kuery ha'e ta'yxy, Nhanderuete pegua yvyty katy'i.

<sup>6</sup> Ha'e vy hatyu aipoe'i uka Moisés pe:

— Xee nderatyu Jetro aju ndea py, ndera'yxy ha'e ndera'y kuery mokoĩ reve — he'i uka

<sup>7</sup> ramo Moisés oo ovaexí vy. Ojero'a vy oayvupa. Ha'e gui peteĩ-teĩ amboae oiko porãa re oporandu vy jogueroike opy.

<sup>8</sup> Guatyu pe Moisés omombe'u SENHOR Israel kuery oayvu vy ojapo va'ekue ha'e javi Faraó ha'e Egito pygua kuery ha'e javi re, ha'e Egito yvy re opa marâguia tembiapo ojapo va'ekue, ha'e marã rami vy pa SENHOR ogueraa jepepaague.

<sup>9</sup> Ha'e ramo Jetro oguerovy'a opa mba'e py Israel kuery pe SENHOR ojapo porãague, Egito pygua kuery po gui ogueraa jepe vy.

<sup>10</sup> Ha'e vy aipoe'i:

— Ta'ima'endu'a porã SENHOR Faraó ha'e Egito pygua kuery ha'e javi po gui pendereraa jepe va'ekue re.

<sup>11</sup> Aý ma aikuua ma tuuete ramigua ikuai va'e ha'e javi gui SENHOR ipo'akapave va'ea, mba'eta Egito pygua kuery po gui neretarã kuery ogueraa jepe, ha'e kuery oguereko axy ramo — he'i.

<sup>12</sup> Ha'e ramo Moisés ratyu Jetro ogueru Nhanderuete pe oapy vy ome'ë va'erã. Ha'e ramo ou Arão ha'e Israel monogetaaty kuery ha'e javi, Moisés ratyu reve okaru aguã Nhanderuete renonde.

### *Deuteronômio 1.9-18*

<sup>13</sup> Ko'ë jevy Moisés oguapy oiny heta va'e kuery re oikuua pota aguã. Ko'ëmba ramove kuaray oïkea peve heta va'e kuery opu'ã okuapy henonde.

<sup>14</sup> Ha'e gui Moisés heta va'e kuery oguereko rã hatyu oexa vy aipoe'i:

<sup>†</sup> **17:15** Bandeira ma joe opu'ãa py huvixa omopu'ã 'rã hupiveguia kuery ha'e py oupa aguã. \* **18:4** Tery Eliézer ma “Nhanderuete xepytyvõa” 'ea nhaendu rã joo ramigua.

— Mba'exa tu guĩ rami rerek heta va'e kuery? Mba'e re tu ndee anho repenaa py reguapy reiny ko'ẽmba'i ramove kuaray oikea peve, ha'e rã heta va'e kuery ma opu'ã okuapy nerendone?

<sup>15</sup> Moisés ombovai guatyu pe:

— Ha'e rami mba'eta xea py heta va'e kuery ou 'rã oporandu uka vy Nhanderuete pe.

<sup>16</sup> Ha'e gui amongue va'e ijayvu aguã oguerek vy ma ou 'rã xea py, xee aikuua pota aguã peteĩ-teĩ reko re, ha'e heta va'e kuery ambo'e porã aguã Nhanderuete ojapo uka va'ekue ha'e lei re — he'i.

<sup>17</sup> Ha'e ramo Moisés ratyu aipoe'i ixupe:

— Nda'evei ha'e rami rejapo aguã.

<sup>18</sup> Mba'eta nekangy 'rã, heta va'e kuery ndereve ikuai va'e voi. Guĩ ramigua ma ipoyi vaipa ndevy. Ndee ae'i ndereropo'aka kuaai 'rã.

<sup>19</sup> Ha'e gui endu ke xeayvu. Xee romongeta 'rã, ha'e Nhanderuete toiko ndereve. Eĩ tema heta va'e kuery rekovia Nhanderuete renonde. Nhanderuete pe emombe'u ha'e kuery mba'emo oguerek va'e.

<sup>20</sup> Embo'e hekorã va'ekue ha'e lei re. Ha'e embo'e ha'e kuery mava'e tape rupi pa oo aguã, ha'e mba'emo ojapo aguã re.

<sup>21</sup> Ha'e gui ejou avi heta va'e kuery regua avakue hi'aranduve va'e, avakue Nhanderuete renonde ojererokyjea rupi ikuai va'e, oipotapa reia re nda'eve e'ŷi va'e. Ha'e va'e nunga emoĩ mil ikuai nhavõ va'e ruvixarã, cem, cinqüenta ha'e dez ikuai nhavõ va'e ruvixarã.

<sup>22</sup> Ha'e kuery toikuua pota jepi heta va'e kuery re. Ha'e rã haxy ete va'e ha'e javi ma ndevy pe ae 'rã ogueru. Mba'emo ndaxyi va'e re ma ha'e kuery ae toikuua pota. Ha'e rami rã ha'eveve 'rã ndevy. Ndereve amboae kuery togueraa avi voyi.

<sup>23</sup> Xapy'a rei ha'e rami rejapo, ha'e Nhanderuete ha'e rami aguã ojapo uka ramo ma reropo'aka 'rã, ha'e heta va'e kuery ha'e javi 'rã ngoo katy ojevy avi ovya reve — he'i hatyu.

<sup>24</sup> Ha'e rami rã Moisés onhe'ẽ rendu guatyu. Ojapopa ijayvuague ha'e javi.

<sup>25</sup> Ha'e rami vy Moisés oiporavo avakue hi'arandu va'e Israel kuery regua ha'e javi gui. Ha'e va'e kuery ma omoĩ imbokuapy heta va'e kuery re opena va'erã: mil ikuai nhavõ va'e ruvixarã, cem, cinqüenta ha'e dez ruvixarã.

<sup>26</sup> Ha'e ramo ha'e kuery ju oikuua pota okuapy heta va'e kuery re. Haxy ete va'e ma Moisés-a py 'rã ogueru. Ha'e rã ndaxyi va'e re ma ha'e kuery ae 'rã oikuua pota.

<sup>27</sup> Ha'e ramo Moisés oxarura imondovy guatyu. Ha'e ramo ojevy ju oyvy katy.

## 19

### Sinai yvyty áry Moisés reve SENHOR ijayvuague

<sup>1</sup> Egito yvy gui Israel kuery oẽmba rire mboapy jaxya ha'e ijypy'ia ára py ovaẽ okuapy Sinai yvyty yvýry teko a e'ŷa oĩ va'e py.\*

<sup>2</sup> Refidim gui oje'oi vy Sinai regua teko a e'ŷa py ju ou. Ha'e va'e py ae Israel kuery opyta okuapy yvyty rexei.

<sup>3</sup> Ha'e gui Moisés oẽ yvyty re Nhanderuete reve ijayvu aguã katy. Ha'e ramo yvyty áry gui SENHOR oenoĩ vy aipoe'i ixupe:

— Po rami 'rã ndeayvu Jacó ramymino kuery pe, remombe'u 'rã Israel kuery ha'e javi pe:

<sup>4</sup> “Pexa ma karamboae Egito pygua kuery re ajapo va'e, taguato pepo áry rami rogueraa ague ha'e gui, ha'e apy xea py ju rogueruague.

\* <sup>19:1</sup> Sinai yvyty ma yvateve va'e. Ha'e rã ijyvyrygua ma ijoja rei teko a e'ŷa.

<sup>5</sup> Ha'e gui aŷ ma pendu kuaa pota 'rã xeayvu, pendekuai 'rã xereve guarã ajapo va'ekue rami. Ha'e rami vy xevyguia ae 'rã pendekuai, ha'e javi regua mbyte teĩ, mba'eta yvy ha'e javi ma xemba'e.

<sup>6</sup> Peẽ kuery pendekuai 'rã apenaa ha'e xevyguia sacerdote kuery, peteĩ regua iky'a e'ŷ va'e", 're 'rã Israel kuery pe – he'i.

<sup>7</sup> Ha'e ramo Moisés ou vy oenoĩ nhomongeta va'ety kuery. Ha'e kuery oendua py omombe'upa ayvu SENHOR omombe'u uka va'ekue ha'e javi.

<sup>8</sup> Ha'e ramo heta va'e kuery peteĩ rami ombovai:

– SENHOR ijayvua ha'e javi 'rã rojapo – he'i okuapy. Ha'e rami heta va'e kuery ijayvuague Moisés omombe'u ju SENHOR pe.

<sup>9</sup> Ha'e gui SENHOR aipoe'i Moisés pe:

– Ma'ě, ndea py aju 'rã peteĩ arai pytū va'e rupi, ndereve xeayvu rã heta va'e kuery oendu avi aguã, ndere ojerovia riae okuapy aguã – he'i. Mba'eta SENHOR pe Moisés omombe'u ma va'ekue heta va'e kuery ijayvuague.

<sup>10</sup> SENHOR aipoe'i avi Moisés pe:

– Tereo ju heta va'e kuerya py. Eiky'a'o ukapa kova'e ára ha'e ko'ě rã. Ha'e kuery tojoi oao,

<sup>11</sup> ha'e toiko katupa mboapy araa pyguarã. Mba'eta mboapy araa py heta va'e kuery ha'e javi oexaa py xee SENHOR aguejy 'rã Sinai yvyty áry peve.

<sup>12</sup> Ha'e gui yvyty yvýry rupi rea'anga 'rã imoiny heta va'e kuery rejoko vy. Ha'e vy aipo're 'rã: "Peiko kuaa pota yvyty re peẽ e'ŷ aguã, neĩ pepoko eme ijyvýry rupi aa'angaague re. Mba'eta yvyty re opoko va'e rei omano 'rã.

<sup>13</sup> Ha'e nunga re avave ndopokoai 'rã. Ha'e rami 'rãgue py ojapipaa 'rã ita py, e'ŷ vy onhyvõa 'rã. Avakue, e'ŷ vy mymba teĩ ae ma ndoikovevei 'rã. Mimby guaxu onhe'ě mbuku nhendu jave mae ma ha'eve yvyty re peẽ aguã", 're 'rã ha'e kuery pe.\*

<sup>14</sup> Ha'e gui Moisés yvyty áry gui heta va'e kuerya py ju oguejy ma vy oiky'a'o ukapa. Ha'e ramo ojoi okuapy oao.

<sup>15</sup> Moisés aipoe'i heta va'e kuery pe:

– Peiko katu ke mboapy araa pyguarã, ha'e rami vy penhemboja eme kunhague re – he'i.

<sup>16</sup> Ha'e gui mboapy araa ko'ěmba ramove ma oiko onhemboxi ha'e overa va'e, ha'e peteĩ arai pytū ete va'e yvyty áry ojekuaa. Peteĩ mimby guaxu onhe'ě ratã ete, tekoia py ikuai va'e oryryipa aguã rami.

<sup>17</sup> Ha'e ramo Moisés ogueraa heta va'e kuery ikuiaia gui mombyry'i Nhanderuete ovaexí aguã. Ha'e ramo yvyty yvýry ju ikuai.

<sup>18</sup> Sinai yvyty ha'e javi rupi hataxí oiny, hi'áry peve SENHOR oguejy ramo tata rupi. Hataxí opu'â ový tatakua gui hataxí opu'â va'e rami, ha'e yvyty ha'e javi oryryi atã.

<sup>19</sup> Ha'e gui mimby guaxu onhe'ě atã-atãve tema. Moisés ijayvu rã Nhanderuete ombovai yapu atãa py.

<sup>20</sup> Ha'e gui Sinai yvyty apyte áry SENHOR oguejy vy oenoĩ Moisés yvyty apyte áry ou aguã. Ha'e ramo Moisés oë ový.

<sup>21</sup> SENHOR aipoe'i Moisés pe:

– Eguejy ju, heta va'e kuery pe ndeayvu touve eme yvyty yvýry rupi rea'angaague kyvõ rami xee SENHOR-a katy xerexa aguã, ha'e kuery regua heta omano e'ŷ aguã.

<sup>22</sup> Sacerdote kuery xee SENHOR re onhemboja va'e voi tojeky'a'o, xee SENHOR ajuka e'ŷ aguã – he'i.

<sup>23</sup> Ha'e ramo Moisés ombovai:

– Heta va'e kuery nda'evei ae Sinai yvyty re oë aguã, mba'eta orevy ndeayvu vy aipo're: "Ea'anga yvyty yvýry rupi, xevy guarã ae remboaxa vy", 're va'ekue orevy.

\* **19:13** Hebreus 12.20

**24** SENHOR aipoe'i ixupe:

— Tereo, eguejy ju. Ha'e rire ma peẽ ju pejogueruvy Arão reve. Ha'e rã sacerdote kuery ha'e heta va'e kuery ma touve eme rea'angaague kylvõ rami xee SENHOR aña py oẽ aguã, ajuka e'ŷ aguã.

**25** Ha'e ramo heta va'e kuerya py ju Moisés oguejy vy omombe'u ha'e kuery pe ha'e nunga ha'e javi.

## 20

### *Deuteronômio 5.1-21*

**1** Ha'e gui po rami Nhanderuete ijayvu. Ha'e vy aipoe'i:

**2** — Xee ma SENHOR Nderuete Egito yvy re escravo pendekuai vy pumba'apo poyiague gui pendepe'a va'ekue.

**3** — Ndererekoi 'rã nderuete mboae xerenonde.

**4** — Nderejapoi 'rã mba'emo ra'angaa nderueterã, yva re ikuai va'e ra'angaa, yva guýry yvy re ikuai va'e ramigua, neĩ yvy guy rupi yy oĩ va'e rupi ikuai va'e ra'angaa voi.

**5** Ha'e nunga neremboetei 'rã, neĩ nerembojeroviai 'rã, mba'eta xee ae ma SENHOR Nderuete aiko, aipota xere anho pejerovia, mba'eta aju vy ambopaga 'rã xere nda'ija'ei va'e reko vaiague re, tuu kuery, ta'y kuery, hamymino ha'e hamymino jevy kuery ikuia peve.

**6** Ha'e rã amongue xerayvu vy ajapo ukaague rami ikuai va'e ma amboaxy 'rã mil-kue hamymino kuery ikuai peve.

**7** — Ndeayvu rive eme SENHOR Nderuete rery rupi, mba'eta SENHOR nomboeko porãi 'rã hery rupi ijayvu rive va'ekue.

**8** — Nema'endu'a ke sábado ára py iky'a e'ŷ va'erã remboete aguã.\*

**9** Mboapy meme ára re 'rã remba'apo, ha'e rejapopá 'rã rejapo va'erã va'ekue ha'e javi.

**10** Ha'e rã sete-a ára ma sábado SENHOR Nderuete pegua ára. Neremba'apoi 'rã mba'eve py, ndera'y, nderajy, nerembiguai avakue ha'e kunhague, nerymba kuery, neĩ mombyrygua kuery ndero py removaẽ va'ekue voi.

**11** Mba'eta mboapy meme ára re SENHOR ojapo raka'e yva ha'e yvy, ye'ẽ ha'e opa mba'e hexe ikuai va'e. Ha'e gui sete araa py ma opytu'u. Ha'e nunga rupi sábado ára SENHOR ogueroayvu porã vy oeja iky'a e'ŷ va'erã.\*

**12** — Remboete 'rã nderu ha'e ndexy, reikove puku aguã yvy ndeyvyrã SENHOR Nderuete ome'ẽ va'ekue re.\*

**13** — Ejojuka eme.\*

**14** — Ndetavy eme.\*

**15** — Nemonda eme.\*

**16** — Ndeayvu rive eme neirũ re.

**17** — Emoaruã eme neirũ ro. Emoaruã eme neirũ ra'yxy, hembiguai ava neĩ kunha, hymba vaka neĩ mburika'i, neĩ neirũ mba'e rei-rei oguereko va'e.\*

### *Deuteronômio 5.22-33*

**18** Israel kuery ha'e javi oendu okuapy yapu ha'e mimby guaxu pu, ha'e oexa overa va'e ha'e yvyty gui hataxí va'e. Ha'e nunga ha'e kuery oexa vy oryryipa ha'e mombyry'i opyta.

**19** Ha'e vy aipoe'i okuapy Moisés pe:

— Ndee ae ke ndeayvu orevy, ha'e ramo ore kuery roendu 'rã. Ha'e rã Nhanderuete ma ta'ijayvu eme orevy, romanomba e'ŷ aguã.

**20** Moisés ombovai heta va'e kuery pe:

\* **20:8** Sábado ma “Pytu'ua ára” 'ea. \* **20:11** Atos 4.24, 14.15 \* **20:12** Mateus 15.4, Marcos 7.10, Efésios 6.2-3

\* **20:13** Mateus 5.21, Romanos 13.9, Tiago 2.11 \* **20:14** Mateus 5.27, Romanos 13.9, Tiago 2.11 \* **20:15** Romanos 13.9 \* **20:17** Romanos 7.7, 13.9

— Pekyje eme ke. Nhanderuete ma pendeko a'ã aguã ou kuri, henonde pendu riae aguã pejererokyje aguã, pejejavy e'ÿ aguã — he'i.

<sup>21</sup> Ha'e ramo ha'e kuery opu'ãmba okuapy mombyry'i. Ha'e rã Moisés ma Nhanderuete oĩa katy onhemboja ovv arai pytû reia py.

### *Altar re ijayvuague*

<sup>22</sup> Ha'e ramo Nhanderuete aipoe'i Moisés pe:

— Po rami 'rã ndeayvu Israel kuery pe: “Peẽ kuery pexa ma yva gui pendereve xeayvu rã.

<sup>23</sup> Pejapo eme tuuete ramigua prata e'ÿ vy ouro gui xereve pemboete avi va'erã.

<sup>24</sup> Ha'e rami 'rãgue py peteĩ altar yvy guigua rive 'rã pejapo xemboete aguã. Ha'e va'e áry ma mba'emo peapy vy peme'ë 'rã, ha'e peteĩ rami nhandekuaia regua, penerymba vexa'i ha'e vaka ava. Mamo rã xerery re penema'endu'a aguã ajapoague rupi aju 'rã ha'e py pendea py romoingo porã aguã.

<sup>25</sup> Ita gui ri xevy guarã altar pejapo vy ita omoatyrõmba pyre gui e'ÿ 'rã pejapo, mba'eta tembiporu py pemoatyrõ vy pemongy'a 'rã.

<sup>26</sup> Xevygua altar re pejeupi eme tape pyrõ-pyrõa'i rupi, pendepire reia ojekuaa e'ÿ aguã”, 're 'rã ha'e kuery pe.

## 21

### *Deuteronômio 15.12-18*

<sup>1</sup> — Po rami 'rã remombe'u heta va'e kuery rekorã.

<sup>2</sup> Xapy'a rei peteĩ hebreu regua escravo-rã pejogua ramo mboapy meme ma'etÿ peve ete'i 'rã ombo'eapo pêvy. Ha'e rã sete ma'etÿa py ma pepoi rive 'rã, hepy re'ÿ.

<sup>3</sup> Omenda e'ÿ re ri peru rire ha'e ae'i 'rã oo. Ava omenda va'e ri vy ogueraa 'rã ta'yxy.

<sup>4</sup> Xapy'a rei ipatõ ta'yxyrã ome'ë ramo imemby e'ÿ vy ipi'a, ha'e ramo ma kunha ha'e imemby kuery ipatõ pe meme 'rã opyta, ha'e ime ma ha'e ae'i 'rã oo.

<sup>5</sup> Ha'e rami avi escravo onhemombe'u porã vy “Xee ma ayvu rima xepatõ, xera'yxy ha'e xera'y kuery. Ha'e rami vy ndajepo'axei apy gui”, he'i ramo

<sup>6</sup> ipatõ ogueraa 'rã huvixa kuerya py, ojapo 'rã okë py ovaë aguã ramo, e'ÿ vy okë yta peve, ha'e ramo inambi ipatõ omombu 'rã mba'emo mombua py. Ha'e rami rire ixupegua escravo riae 'rã oiko.

<sup>7</sup> — Xapy'a rei peteĩ ava escravo-rã guajy ovende ramo kunha va'e ndojepo'ai 'rã escravo kuery ojepe'aa ramo.

<sup>8</sup> Xapy'a rei ipatõ gua'yxyrã ojogua teĩ kunha va'e nombovy'ai ramo ovende ju 'rã. Ha'e rami avi nda'evei amboae yvy pygua pe ovende aguã, mba'eta ha'e ramo aguã ixupe anhetõ rupi e'ÿ 'rã oikoa.

<sup>9</sup> Ha'e rã gua'y re ri omomenda vy guajy ramo ae 'rã oguerek.

<sup>10</sup> Ha'e gui xapy'a rei gua'y ra'yxyrã kunha mboae ju ojou vy ta'yxy jypyguia pe ome'ë tema 'rã tembi'u, ijaorã ha'e ta'yxy ramo joguerek aguã.

<sup>11</sup> Ha'e nunga mboapyve mba'e ixupe nome'ëi ri vy opoi rive 'rã hepy re'ÿ.

### *Joguero'a va'e re ijayvuague*

<sup>12</sup> — Amongue jojuka ramo ha'e voi pejuka 'rã.

<sup>13</sup> Ha'e rã potae vy e'ÿ ojuka, ha'e rã ipo py Nhanderuete ombou rire ma pemondouka 'rã onhemi aguã henda pêvy aikuua uka va'erã va'e py.

<sup>14</sup> Ha'e rami avi guetarã ojukaxe vy ete hexe oma'ë mbegue reve opu'ã, hi'ã gui ojuka ramo ma xevygua altar yvýr oña gui teĩ penoë 'rã pejuka aguã.

<sup>15</sup> Nguu e'ÿ vy oxy ojuka va'ekue ma pejuka 'rã.

<sup>16</sup> Ha'e amongue ojopy nhea'ã rei vy ovende, ha'e rami e'ÿ vy ipo py ojoua ramo ma pejuka avi 'rã.

**17** Nguu e'ŷ vy oxy re ijayvu vai va'ekue avi 'rã pejuka.\*

**18** — Xapy'a rei mokoĩ joguero'aa py guetarã ombouguypa 'rã ita py, ha'e e'ŷ opo py. Ha'e gui hetarã omano e'ŷ vy jepe ngupa py itui 'rã.

**19** Ha'e gui opu'ã vy oka rupi ju oiko 'rã opopoka reve teĩ. Ha'e rami rã napembopagai 'rã nhoungaare. Ha'e rami avi nhoungaare omboekovia 'rã ára omboaxa riveague re, ha'e omopena uka 'rã okuera porã peve.

**20** — Xapy'a rei amongue guembiguai ava e'ŷ vy kunha yvyra py oinupã ramo omano 'rã ipo py. Ha'e rami rã pembopaga 'rã.

**21** Ha'e rami avi xapy'a rei peteĩ ára, mokoĩ ára ri hembiguai nomanoi ramo napembopagai 'rã ipatõ, mba'eta ipatõ peráta rami ombovare va'e.

**22** — Ha'e gui xapy'a rei avakue joguero'aa py peteĩ ouna 'rã kunha ipuru'a va'e. Ha'e gui omemby'i oity teĩ ixy re mba'eve rei ndoikoi ramo ma ounaare omboekovia 'rã kunha va'e me oipotaa rami, huvixa kuery ijayvua rami ete.

**23** Ha'e rami avi kunha va'e nda'evei ramo pejuka avi 'rã ijukaare,

**24** joexa omombuague re pemombu avi 'rã hexa, nhoaĩ omopẽague re pemopẽ avi 'rã haĩ, jopo ojayaague re pejaya avi 'rã ipo, jopy ojayaague re pejaya avi 'rã ipy,\*

**25** joapyague re peapy avi 'rã, nhoungaague re peunga avi 'rã, ha'e nhokyxñague re peikyxñ avi 'rã.

**26** — Xapy'a rei amongue guembiguai ava e'ŷ vy kunha oexa mbogue ramo ndoexavei 'rã. Ha'e rami rã opoi rive 'rã hexa ombogueague rekovia.

**27** Ha'e guembiguai ava e'ŷ vy kunha raĩ ojavykya rupi omboi ramo opoi rive 'rã haĩ omboiague rekovia.

**28** — Ha'e gui xapy'a rei amongue rymba vaka ma ava e'ŷ vy kunha oikutu rire omano 'rã. Ha'e rami rã vaka pejapipa 'rã ita py, ha'e neĩ ho'okue ma voi ndape'ui 'rã. Ha'e rã vaka ja ma napembopagai 'rã.

**29** Ha'e rami avi xapy'a rei vaka yma ma voi jokutu va'ety, ha'e ija oikuaa va'eri nombotyi ramo peteĩ ava e'ŷ vy kunha mba'e ojuka 'rã. Ha'e rami rã vaka pejapipa 'rã ita py, ha'e ija voi pejuka avi 'rã.

**30** Ha'e rami teĩ ija pe omboekovia re ojerurea ramo ojerurea rami ome'ẽ 'rã guekove rekovia.

**31** Xapy'a rei peteĩ ava'i e'ŷ vy kunha'i vaka oikutu vy ojuka ramo ha'ekue rami ae 'rã pembopaga ija.

**32** Ha'e rã escravo ava e'ŷ vy kunha mba'e vaka oikutu ramo ija opaga 'rã ipatõ pe trinta hatã'i va'e prata guigua, ha'e rã vaka ma pejapipa 'rã ita py.

**33** — Amongue yvykua ombotyi e'ŷ re oeja, xapy'a rei yvy ojo'o va'ekue ri ikua nombotyi ramo ha'e py ho'a 'rã vaka, e'ŷ vy mburika.

**34** Ha'e rami rã yvy jo'oare omboekovia 'rã ija pe peráta ome'ẽ vy. Ha'e gui mymba omano va'ekue ma imba'e ae 'rã opyta.

**35** — Xapy'a rei amongue rymba vaka ma amboae rymba vaka oikutu ramo omano 'rã. Ha'e rami rã ija kuery ovende 'rã vaka oikove va'e, ha'e hepykue omboja'o 'rã joo'i rami. Ha'e mymba omano va'ekue avi 'rã omboja'o.

**36** Ha'e rami avi ha'e va'e vaka jokutu va'etya oikuaa pavẽ va'eri ija nombotyi ramo guymba vaka ome'ẽ 'rã amboae vaka rekovia, ha'e rã omano va'ekue ma imba'e ae 'rã opyta.

## 22

### Nhomba'e rei-rei re ijayvuague

\* **21:17** Mateus 15.4, Marcos 7.10    \* **21:24** Mateus 5.38

<sup>1</sup> — Xapy'a rei amongue vaka e'ŷ vy vexa'i re imonda vy ovende 'rã ojuka e'ŷ vy. Ha'e ramo peteĩ-teĩ vaka imondaague rekovia ome'ẽ 'rã peteĩ nhiruĩ vaka, ha'e peteĩ-teĩ vexa'i imondaague rekovia ome'ẽ 'rã irundy vexa'i.

<sup>2</sup> Ha'e xapy'a rei imonda va'e peteĩ oo py oipe'a rã ojoua vy oikutu rã omano 'rã. Ha'e ramo huguy moẽare ojejavy va'e'ŷ 'rã opyta.

<sup>3</sup> Ha'e rã xapy'a rei kuaray ouve teri reve ri ha'e nunga oiko ramo huguy moẽare ojejavy va'e 'rã opyta.

— Imonda va'e oiko va'e rei omboekovia 'rã imondaague. Xapy'a rei ome'ẽ aguã ndojoui ramo pevende 'rã escravo-rã imondaague rekovia.

<sup>4</sup> Xapy'a rei mymba vaka, mburika e'ŷ vy vexa'i mba'e re imonda rire ipo py imondaague oikove reve teri ojoua 'rã. Ha'e rami rã imondaague rekovia mokoĩ kuerei 'rã ome'ẽ.

<sup>5</sup> — Xapy'a rei amongue guymba nhomba'ety py, e'ŷ vy jo'uvaty py omongaru 'rã, ha'e rami e'ŷ vy opoi rive 'rã nhomba'ety rupi okaru oikovy. Ha'e rami rã ija omba'ety gui ae 'rã omboekovia iporãgueve va'e ome'ẽ vy, ha'e e'ŷ vy o'uvaty gui.

<sup>6</sup> Xapy'a rei tata ojopy xapy'a vy juuty okai vy oapy avi 'rã mba'emo aju oĩ va'e, e'ŷ vy oipo'o pyre, ha'e rami e'ŷ vy mba'ety ha'e javi okai 'rã. Ha'e rami rã tata moendyare omboekovia 'rã okaiague re.

<sup>7</sup> — Xapy'a rei amongue guetarã pe peráta e'ŷ vy mba'emo ome'ẽ 'rã omoĩ porã aguã, ha'e gui ha'e nunga re imondaa 'rã ijopyare gui, ha'e imonda va'ekue ojoua 'rã. Ha'e rami rã imondaague re ma mokoõguea repy 'rã omboekovia.

<sup>8</sup> Ha'e xapy'a rei imonda va'ekue ndojouai ramo hoo va'e ae 'rã peraa huvixa kuerya py, ha'e kuery oikuua pota aguã guetarã mba'e rei-rei re na'imondai pa ra'ea re.

<sup>9</sup> Xapy'a rei amongue jokore 'rã mymba vaka re, mburika, vexa'i mba'e, ao, e'ŷ vy mba'emo omokanhy mbyre re. Ha'e rami vy amboae "Xemba'e rima" he'i ramo mokoõve 'rã peraa huvixa kuerya py. Ha'e ramo huvixa peteĩ ombopaga ramo guetarã pe mokoõguea repy 'rã omboekovia.

<sup>10</sup> Xapy'a rei amongue guetarã pe opena uka 'rã guymba mburika, vaka, e'ŷ vy vexa'i re, ha'e e'ŷ vy amboae nunga mymba re, ha'e gui hymba omano 'rã, ha'e e'ŷ vy ojejuka 'rã, e'ŷ vy oẽ ramo avave rei ndoexaavei 'rã.

<sup>11</sup> Ha'e rami rã guetarã pe oura 'rã Nhanderuete rery rupi. Ha'e vy "Xee tu ndajopyi nerymba", he'i 'rã. Ha'e ramo ija ojou porã 'rã, ha'e amboae ma nomboekoviai 'rã.

<sup>12</sup> Ha'e rami avi anhetẽ imondaague oikuua ramo ma omboekovia 'rã ija pe.

<sup>13</sup> Xapy'a rei ojayaapaa ramo ogueru 'rã oexa pavẽ aguã. Ha'e rami rã nomboekoviai 'rã ojayaapague re.

<sup>14</sup> Ha'e amongue guetarã pe hymba re ojerure vy ogueraa, ha'e ija noĩa py mymba okarau, e'ŷ vy omano 'rã. Ha'e rami rã heraare omboekovia 'rã.

<sup>15</sup> Ha'e rã ija ha'e py ri oĩ rire heraare nomboekoviai 'rã. Xapy'a rei hepy re oiporu rire oiporukaague repy ae 'rã ome'ẽ hekovia.

### *Jomeme ha'e Nhanderuete pe marã rami pa ikuai aguã oejaague*

<sup>16</sup> — Kunhatai'i omenda aguã nda'evei teri va'e amongue ombotavy vy onheno 'rã hexeve. Ha'e rami vy hexe omboekovia 'rã, ha'e omenda 'rã.

<sup>17</sup> Ha'e rami avi tuu nomomendaxei ramo ixupe peráta py omboekovia 'rã kunhataõgue re opagaa rami.\*

<sup>18</sup> Imba'evky va'e rei napemoingovei 'rã.

<sup>19</sup> Mymba reve itavy va'ekue pejuka 'rã.

<sup>20</sup> Amongue tuuete mboae pe, Nhanderuete pe'ŷ mba'emo ome'ẽ ramo pejuka avi 'rã.

<sup>21</sup> Pemoingo axy eme amboae regua, perekó axy eme, mba'eta peẽ voi Egito yvy re amboae regua peiko rire.

\* <sup>22:17</sup> Ha'e jave py ava omendaxe vy kunhatai ru kuery pe ome'ẽ 'rã mba'emo iporã va'e (Gênesis 24.53).

22 Pejavyky eme neĩ peteĩve imeve'ŷ va'e, e'ŷ vy tyre'ŷ.

23 Mba'eta mba'emo py rei pemoingo axy ramo ha'e kuery xevy ojapukai ramo aendu 'rã ojapukaia.

24 Ha'e rami vy xepoxy vy rojuka uka 'rã kyxé guaxu py. Ha'e ramo pendera'yxykue ju 'rã oiko imeve'ŷ va'e, ha'e pendera'y kuery voi tyre'ŷ 'rã ikuai.

25 Xapy'a rei xevygua iporiaukue'i ndea katy'i oiko va'e pe peráta reiporuka ma vy emboekovia retave eme, peráta oiporuka va'ety kuery rami e'ŷ.

26 Xapy'a rei neretarã gui ao puku reipe'a vy nemba'emo ogueraa va'e rekovia, ha'e rami vy ixupe reme'ẽ ju 'rã kuaray oike e'ŷ mbove.

27 Mba'eta ha'e va'e py ae 'rã onhemonde, onheovã'i 'rã ipire ao'ia. Ajukue py onheovã e'ŷ re mba'exa tu oke 'rã? Ha'e va'e xevy ojapukai ramo aendu 'rã, mba'eta xee anhomboaxy kuaa va'e.

28 Ndeayvu vai eme Nhanderuete rovai, neĩ penderuvixa kuery re voi.\*

29 Xevy reme'ẽ va'erã eru voi nemba'ety gui ha'e nde'uvaty gui iporãgueve. Nderay kuery jypyguia voi remboaxa 'rã xevy.

30 Ha'e rami ae avi 'rã rejapo 'rã nerymba vaka ha'e vexa'i re. Sete ára re ranhe oxy rupi toiko. Ha'e gui oito araa py ma reme'ẽ 'rã xevy.

31 Xevygua iky'a e'ŷ va'e 'rã pendekuai. Ha'e rami vy pe'u eme jai rupi ivaipa rei va'e ro'okue. Jagua kuery pe rive 'rã pemombo.

## 23

### *Ijapu ha'e joe ijayvu rei va'e re ijayvuague*

1 — Nda'evei nemba'emombe'u rive aguã, nda'evei joekokue ramigua remombe'u vy heko vai va'e reve renhomoirã aguã.

2 Nda'evei heta va'e kuery rupive peo aguã mba'emo vai pejapo aguã katy. Ha'e pavẽ ijayvu rei okuapya py voi nda'evei renhomoirã aguã anhetẽ rupi e'ŷ ndeayvu vy.

3 Iporiaukue re reikuaa potaa py ma nda'evei reayvuve rive aguã.

4 Xapy'a rei nderovaigua rymba vaka e'ŷ vy mburika ixã e'ŷ re rejou vy reraa ju 'rã ixupe.

5 Ndere ija'e e'ŷ va'e rymba mburika ovoyi reve onheno oupy rã rexu vy ema'ẽ rive eme, eipytyvõ ivoyi oupi aguã.

### *Deuterônômio 16.18-20*

6 — Neretarã iporiaukue'i huvinha kuery pe ojexa uka rã nda'evei ha'eve'ŷa rami rerekó aguã.

7 Nda'evei reiporu aguã ayvu rive rei. Nda'evei rejuka uka aguã ojejavý e'ŷ va'e ha'e heko porã va'e, mba'eta xee namboeko porã 'rã joapo vai rei va'e.

8 Nda'evei ome'ẽmbry rejopy aguã ha'eve'ŷa rami rejogueroko aguã, mba'eta ome'ẽ mbyre oexa mbogue 'rã hi'arandu va'e, ojapo 'rã heko porã va'ekue voi anhetẽ rupi e'ŷ ijayvu aguã rami.

9 Ha'e nda'evei amboae regua rejavyky aguã, mba'eta peikuaa ae ma amboae regua py'a re oĩ va'e, Egito yvy re amboae regua peiko rire.

### *Levitico 25.1-7*

10 — Mboapy meme ma'etŷ peve 'rã rema'etŷ ndeyvy re, ha'e ndejeupe guarã remono'õ 'rã mba'emo aju.

11 Ha'e rã sete ma'etŷa re ma yvy reja 'rã optytu'u aguã, topyta rema'etŷ e'ŷ re. Ha'e ramo heta va'e kuery regua iporiaukue'i ojou aguã ho'u va'erã, ha'e ka'aguy rupigua voi ho'u aguã hembyrekue. Ha'e rami ae 'rã rejapo nde'uvaty ha'e nde-oliveira-ty re.

### *Levitico 23.3*

---

\* **22:28** Atos 23:5

<sup>12</sup> — Mboapy meme ára peve 'rã remba'eapo. Ha'e rã sete araa py ma reptyu'u 'rã, nerymba vaka ha'e mburika voi opytu'u aguã, ha'e gui nerembiguai pi'a kuery ha'e amboae regua voi opytu'u avi aguã.

<sup>13</sup> Penekyre'ý xeayvua ha'e javi rupi pendekuai aguã. Ha'e rami vy penema'endu'a eme tuuete ramigua rive rery re, ha'e nunga rery rupi pendeayvu eme.

*Êxodo 34.18-26; Levítico 23.4-21,33-44; Deuteronômio 16.1-17*

<sup>14</sup> — Ma'etýa nhavõ mboapykue 'rã pejapo ngaru xevy.

<sup>15</sup> Ha'e rami vy pejapo 'rã ngaru mbojape imbovua revegua e'ý. Sete ára re pe'u 'rã mbojape imbovua revegua e'ý aipoa'egue rami vy, jaxy abibe re oa'angaague py ae, mba'eta ha'e va'e jave py Egito yvy gui peëmba raka'e. Xerenonde avave rei tou rive eme mba'emo ogueru e'ý re.

<sup>16</sup> Ha'e gui pejapo avi 'rã ngaru mba'emo ra'yigue pemono'õa regua, penemba'ety rupi mba'emo ra'yigue pemoaïgue gui jypy'igua pemono'õ jave. Ha'e gui ma'etýa opaa py pejapo avi 'rã ngaru mba'emo'a peipo'oa regua, penemba'ety rupi renhotý va'ekue gui pemono'õmba ma rire.

<sup>17</sup> Ma'etýa nhavõ mboapykue 'rã avakue ha'e javi ojexa uka okuapy SENHOR Penderuete renonde.

<sup>18</sup> Nda'evei mbojape imbovua regua xevy peme'ẽ avi aguã mymba pejuka va'ekue ruguykue reve. Xevygua ngarua py nda'evei avi inhandykue perekó aguã pytû mbukukue re ko'ëmba peve.

<sup>19</sup> Penemba'ety rupi jypy'i oiko va'ekue regua iporâgueve peru 'rã SENHOR Penderuete pegua oo py. Ha'e nda'evei kavara'i pembojy aguã ixy ae kamby reve.

*Ijyvyrã Nhanderuete ome'ẽ aguã re ijayvuague*

<sup>20</sup> — Penerenonde re amondouka 'rã peteĩ anjo pendere opena aguã tape rupi, ha'e pendereraa aguã pendeyvyrã areko va'e py.

<sup>21</sup> Ha'e va'e renonde re ma peiko kuua, ha'e pendu ijayvua. Pepu'ã eme hexe, mba'eta ha'e nomboguei 'rã pendeko vaiague, hexe xerery oĩ ramo.

<sup>22</sup> Ha'e rami 'rãgue py opa mba'e py penhe'ẽ rendu, ha'e xeayvuague ha'e javi rejapopa ramo xee aiko 'rã penderovaigua kuery rovaigua, ha'e penemoingo axy reixe va'e moingo axya.

<sup>23</sup> Mba'eta xeguigua anjo penerenonde oo vy pendereraa 'rã amorreu, heteu, ferezeu, cananeu, heveu ha'e jebuseu kuery yvy peve. Ha'e gui ha'e va'e kuery xee amomba 'rã.

<sup>24</sup> Ha'e gui nda'evei ha'e kuery ruete pembojerovia neĩ pemboete aguã, nda'evei ha'e kuery ikuiaia rami peẽ kuery pendekuai aguã. Ha'e rami 'rãgue py pemomba ete 'rã, ha'e pemboa'ypa 'rã ita omopu'ã va'ekue ha'e javi.

<sup>25</sup> SENHOR Penderuete pe ete 'rã pendekuai. Ha'e ramo ha'e omoingo porã 'rã mbojape pe'u va'e ha'e yy pey'u va'e. Penembyte gui oipe'apa 'rã mba'eaxy.

<sup>26</sup> Ha'e ramo pendeyvy re ndoikoi 'rã kunha omemby'i oity va'e, neĩ imemby va'erã e'ý. Xee romoingo pukuve 'rã.

<sup>27</sup> Ha'e penerenonde rupi amondouka 'rã xegui okyjepa aguã, mamo rã peoa ha'e javi rupi onhemondyipa aguã. Ajapo 'rã penderovaigua kuery ha'e javi guakykue katy onha aguã rami.

<sup>28</sup> Penerenonde amondouka avi 'rã kavy nerondenode gui oipe'a heravy va'erã: heveu kuery, cananeu ha'e heteu kuery.

<sup>29</sup> Ha'e rami avi peteĩ'i ma'etý re'ý 'rã aipe'a, ijyvy va'ekue opyta rei e'ý aguã, ha'e penderovai ka'aguy rupigua heta-etave e'ý aguã.

<sup>30</sup> Ha'e rami 'rãgue py mbeguei'i py aipe'a 'rã heravy penerenonde gui, pendereta ha'e pendeyvyrã va'ekue ha'e javi rupi pendekoa peve.

<sup>31</sup> Ha'e gui pendeyvyrã aa'anga 'rã Ye'ẽ Pytã guive filisteu kuery ikuaria rupi ye'ẽ oĩ va'e peve, ha'e teko a e'ŷa guive Eufrates yakã peve. Mba'eta pendepo py amboaxa 'rã ha'e va'e yvy re ikuai va'e ha'e javi, penerenonde gui peipe'apa aguã.

<sup>32</sup> Ha'e kuery reve pejapo eme peteĩ rami pendekuai aguã, neĩ ha'e kuery ruete ramigua kuery pe pendekuai eme guive.

<sup>33</sup> Ha'e va'e kuery ma nda'evei ikuai aguã pendeyvy re, xerovai rupi penderojejavvy e'ŷ aguã. Tuuete kuery pe pendekuai ramo nhuã py rami 'rã penembo'a.

## 24

### *Israel kuery reve Nhanderuete guexeve guarã ojapoague*

<sup>1</sup> Ha'e gui Nhanderuete aipoe'i Moisés pe:

— Eẽ eovy xee SENHOR aĩa py, Arão reve, ha'e gui Nadabe, Abiú ha'e setenta Israel regua nhomongeta va'ety kuery reve. Mombyry gui teri pejua py pembojerovia 'rã.

<sup>2</sup> Ndee Moisés anho 'rã renhemboja xee SENHOR re. Ha'e rã amboae kuery ma nonhembojai 'rã, heta va'e kuery ma voi nda'evei oẽ aguã ha'e kuery reve — he'i.

<sup>3</sup> Ha'e gui Moisés oo ju vy heta va'e kuery pe omombe'u Nhanderuete ijayvuague, ha'e ayvu oeja va'ekue ha'e javi.

Ha'e ramo heta va'e kuery peteĩ rami meme ombovai okuapy. Ha'e vy aipoe'i:

— SENHOR ijayvuague va'e ma guive rã rojapopa 'rã — he'i.

<sup>4</sup> Moisés omboparapa SENHOR ayvu ha'e javi'i. Ha'e gui ko'ẽ aje'ive'i reve opu'ã vy peteĩ altar ojapo yvyty yvy'iry. Doze ita omopu'ã avi, Israel kuery regua doze ikuaria rami.

<sup>5</sup> Ha'e omondouka amongue Israel kuery regua kunumigue. Ha'e va'e kuery ma mba'emo oapy vy ome'ẽ SENHOR pe, ha'e vaka ra'y ojuka hexeve peteĩ rami ikuaria regua.

<sup>6</sup> Huguy mbyte rupigua Moisés ojopy vy omoĩ peteĩ hy'a py, ha'e rã hembyrekue ma omboayvipa altar áry rupi.

<sup>7</sup> Ha'e gui kuaxia guexeve guarã ojapo pyre oĩa ogueru vy ogueroayvu heta va'e kuery oendua py. Ha'e ramo ha'e kuery aipoe'i:

— SENHOR ijayvuague ha'e javi 'rã rojapo, ronhe'ẽ rendu vy — he'i.

<sup>8</sup> Ha'e gui huguy omboyru va'ekue Moisés ogueraa vy heta va'e kuery áry rupi ju omboayvi. Ha'e vy aipoe'i:

— Kova'e tuguy ma SENHOR guexeve guarã pendereve ojapo aguã, ijayvuague ha'e javi rami vy — he'i.\*

<sup>9</sup> Ha'e gui oẽ jogueravy Moisés ha'e Arão, Nadabe, Abiú ha'e setenta-ve Israel regua nhomongeta va'ety kuery.

<sup>10</sup> Ha'e kuery oexa Israel kuery Ruete. Ipy guýry ma peteĩ pyrõa oĩ ita safira ramigua, yva rami hexakã va'e.

<sup>11</sup> Israel regua Nhanderuete oiporavo va'ekue oexa teĩ ha'e kuery re opo nomoĩ. Ha'e rami 'rãgue py okaru ha'e oy'u okuapy henonde.

### *Peteĩgue ju nhomongeta va'ety kuery reve Moisés yvyty re oẽague*

<sup>12</sup> Ha'e gui SENHOR aipoe'i Moisés pe:

— Eẽ ke yvyty re xea py, ha'e epyta ranhe ha'e py. Ndevy ame'ẽ 'rã itape ambopara va'ekue pendekorã ha'e ajapo uka va'e oĩa, ha'e kuery ju rembo'e aguã — he'i.

<sup>13</sup> Ha'e ramo guembiguai Josué reve Moisés opu'ã vy oẽ ovvy Nhanderuete pegua yvyty re.

<sup>14</sup> Nhomongeta va'ety kuery pe aipoe'i:

— Orerarõ ke apy pendea py rojevy peve. Arão ha'e Hur ma opyta 'rã pendereve. Xapy'a rei amongue mba'emo oguerekri vy ha'e kuerya py too — he'i.

<sup>15</sup> Ha'e gui Moisés oẽ ramo arai ojao'ipa yvyty.

\* **24:8** Mateus 26.28, Marcos 14.24, Lucas 22.20, Hebreus 9.20

<sup>16</sup> Sinai yvyty áry ojekuaa oiny Nhanderuete rexakã. Seis ára re arai ojao'i. Ha'e gui sete araa py ma SENHOR oenoĩ Moisés arai mbyte gui.

<sup>17</sup> SENHOR rexakã ma tata rami nhomomba va'e ojekuaa yvyty apyte áry Israel kuery oexa rã.

<sup>18</sup> Arai mbyte rupi Moisés oike vy oẽ ov yvyty re. Ha'e py ma opyta quarenta ára ha'e quarenta pytã re.

## 25

### Êxodo 35.4-9

<sup>1</sup> Ha'e gui SENHOR aipoe'i Moisés pe:

<sup>2</sup> — Ndeayvu ke Israel kuery pe ogueru aguã xevy ome'ẽ va'erã. Avakue ipy'a re ha'e rami aguã oĩa va'e, ha'e kuery po gui pejopy 'rã xevy ome'ẽ va'e.

<sup>3</sup> Pova'e ma xevygua ha'e kuery po gui pejopy va'erã: ouro, prata ha'e overa va'e,

<sup>4</sup> ajukue hovy va'e, púrpura, pytã va'e, ajukue iporãve va'e ha'e kavara rague,

<sup>5</sup> vexa'i pirekue omopytã mbyre, ipirekue iporãve va'e, yvyra acácia,

<sup>6</sup> azeite tataendy rykuerã, azeite SENHOR pe nhomboaxaa aguã regua irãrã ha'e heakuã porã va'e oapy pyrã,

<sup>7</sup> ita ônix ha'e ita sacerdote pegua manto ha'e ipexo regua jeguarã.

<sup>8</sup> Xevy pe pejapo 'rã peteĩ henda iky'a e'ŷ va'erã, heta va'e kuery mbyte xee aiko aguã.

<sup>9</sup> Ombojerovia atyrã rejapo 'rã ha'angaa ndevy aexa uka va'e ha'e javi rami, ha'e opy oĩ 'rã ha'e va'e rami rejapo va'erã ha'e javi.

### Êxodo 37.1-5

<sup>10</sup> — Yvyra acácia gui rejapo 'rã xeayvu ryrurã. Ipuku-a ma peteĩ metro raxa'i, ipya ma meio metro raxa'i, yvatea ma meio metro raxa'i avi.

<sup>11</sup> Renhovã 'rã ouro ete'i py. Hyepy rupi ha'e hi'áry rupi voi renhovã 'rã. Ha'e ijyvýry rupi ma rembojegua 'rã ouro guigua py.

<sup>12</sup> Rejapo avi 'rã irundy inhapyí va'e ouro gui. Ha'e va'e ma remoĩ 'rã hyru apy irundyve re. Mokoĩ inhapyí va'e remoĩ 'rã kyvõ katyguia re, ha'e mokoĩ avi 'rã remoĩ hovai re.

<sup>13</sup> Rejapo avi 'rã yvyra po'i'i acácia gui, ha'e renhovã 'rã ouro py.

<sup>14</sup> Yvyra po'i'i ma remboaxa 'rã hyru jovaive re inhapyí va'e oĩ va'e rupi, ha'e va'e re hyru peraa aguã.

<sup>15</sup> Yvyra po'i'i opyta 'rã hyru jovaive re inhapyí va'e oĩ va'e rupi. Ndapeipe'ai 'rã ha'e gui.

<sup>16</sup> Hyru py remoĩ 'rã xeayvu ndevy aikuaa uka va'erã va'e.

### Êxodo 37.6-9

<sup>17</sup> — Imbotya teko vai ombogue atyrã rejapo avi 'rã ouro ete'i gui. Ipuku-a ma peteĩ metro raxa'i 'rã, ha'e ipya ma meio metro raxa'i.

<sup>18</sup> Ouro gui avi 'rã rejapo mokoĩ anjo ipepo va'e ra'angaa. Ouro omoatyrõ mbyre gui 'rã rejapo, hyru mbotya apy jovaive re hi'aĩ va'erã.

<sup>19</sup> Peteĩ anjo ra'angaa remopu'ã 'rã peteĩ apy re, ha'e amboae ma hovai re. Peteĩ regua gui meme 'rã rejapo imbotya ha'e anjo ra'angaa ijapy jovaive re hi'aĩ va'erã.

<sup>20</sup> Anjo ra'angaa oepo oupi 'rã yvate katy, ipepo omo'ã 'rã hyru mbotya. Joa katy 'rã oma'ẽ, imbotya teko vai ombogueaty katy ae.

<sup>21</sup> Hyru áry remoĩ 'rã imbotya. Ha'e rã hyepy py ma remoĩ 'rã xeayvu ndevy amboaxa va'erã va'e.

<sup>22</sup> Ha'e py aju 'rã ndea py, imbotya teko vai ombogueaty áry, mokoïve anjo ipepo va'e ra'angaa xeayvu ryru mbotya áry hi'aĩ va'e mbyte. Ndereve xeayvu 'rã ajapo uka va'e, ha'e Israel kuery rekora amombe'u va'e ha'e javi re.

### Êxodo 37.10-16

<sup>23</sup> — Rejapo avi 'rã peteĩ mesa yvyra acácia gui. Ipuku-a ma peteĩ metro va'erã, ipua ma meio metro, ha'e yvatea ma meio metro raxa'i.

<sup>24</sup> Mesa ma renhovã 'rã ouro ete'i py. Ijyvýry rupi ma rembojegua 'rã ouro guigua py.

25 Ijyvýry rupi ma rejapo 'rã hembe 'yrã. Ipo guaxua ma irundy kuã va'erã, ha'e hembe 'y rupi rembojegua 'rã ouro guigua py.

26 Irundy inhapyí va'e rejapo 'rã ouro gui. Ha'e va'e ma remoõ 'rã ijapy irundyve re, hetyma irundyve oĩa py.

27 Rembojeguaague katy'i 'rã oĩ inhapyí va'e yvyra po'i'i oĩ aguã, ha'e va'e re peraa aguã mesa.

28 Ha'e va'e yvyra po'i'i ma rejapo 'rã yvyra acácia gui, ha'e ouro py renhovã 'rã, ha'e va'e re peraa aguã mesa.

29 Hi'áry guarã rejapo avi 'rã hy'arã, heakuã porã va'e oapy atyrã, hy'a kuarã ha'e hy'a rugua'i mba'emo ome'ẽmbi peraa aguã. Ha'e va'e ma ouro ete'i gui meme 'rã rejapo.

30 Mesa áry remoõ 'rã mbojape iky'a e'ý va'e xerenonde oĩ riae va'erã.

### *Êxodo 37.17-24*

31 — Rejapo avi 'rã peteõ tataendy 'yrã ouro guigua. Ouro omoatyrõ mbyre gui 'rã rejapo. Hapytarã, hakãrã, tykue ryrurã, ijapu'a va'erã, ha'e ipotyrã voi peteõ'i gui meme 'rã rejapo.

32 Ijyke gui ma oẽ 'rã mboapy meme hakã. Mboapy rakã oẽ oiny 'rã peteõ yke gui, ha'e hovai gui ju mboapy rakã avi 'rã oẽ.

33 Peteõ-teõ hakã re oĩ 'rã mboapy amêndoaa ra'angaa tykue ryrurã, peteõ ijapu'a va'e ha'e peteõ ipoty. Ha'e gui hakã mboae re ha'ekue rami ae avi 'rã oĩ mboapy amêndoaa ra'angaa tykue ryrurã, peteõ ijapu'a va'e ha'e peteõ ipoty. Ha'e rami 'rã mboapy meme hakã tataendy 'y gui oẽ oiny va'e.

34 Hi'y re ete ma oĩ 'rã irundy amêndoaa ra'angaa ijapu'a va'e tykue ryrurã, ipoty reve.

35 Peteõ ijapu'a va'e oĩ 'rã mokoõ rakã ixugui oẽ oiny va'e renderã, ha'e amboae ijapu'a va'e ha'ekue rami ae oĩ 'rã mokoõ rakã ixugui oẽ oiny va'e renderã. Oïve ju 'rã peteõ ijapu'a va'e mokoõ rakã ixugui oẽ oiny va'e renderã. Ha'e rami rejapo 'rã mboapy meme hakã mokõ-mokoõ tataendy 'y gui oẽ oiny va'e.

36 Ijapu'a va'e ha'e hakã ma peteõ'i guigua meme. Ha'e javive peteõ'i guigua meme 'rã rejapo ouro ete'i omoatyrõ mbyre gui.

37 Rejapo avi 'rã sete tataendy. Ha'e va'e ma hendy 'rã omoexakã aguã henonde.

38 Tata moendya ha'e imboguea ma ouro ete'i guigua meme.

39 Peteõ poyikue ouro ete gui 'rã rejapo tataendy 'yrã ha'e hyru ha'e javi.

40 Eikuua pota ke yvyty apyte re reõ jave ha'angaa aexa uka va'ekue rami ete rejapopa aguã re.\*

## 26

### *Êxodo 36.8-18*

1 — Ha'e gui rejapo 'rã ombojerovia atyrã. Imbotyarã ma oĩ 'rã dez cortina ajukue iporãve va'e oipoka pyre gui, ha'e hovy va'e, púrpura ha'e pytã va'e gui. Rembojegua 'rã anjo ipepo va'e ra'angaa py. Ojapo kuaa va'e ojapo 'rã.

2 Peteõ-teõ cortina puku-a ma catorze metros va'erã, ha'e ipya ma mokoõ. Cortina ikuai va'e joo rami meme 'rã.

3 Peteõ nhiruõ cortina oje'a 'rã joe, ha'e hovai re voi peteõ nhiruõ oĩ va'e oje'a-je'a 'rã joe.

4 Hovy va'e gui rejapo 'rã jokuaa cortina jypygua apy re oĩ va'e rembe re. Ha'e rami ae avi rejapo 'rã mokoõ aty apy re cortina oĩ va'e rembe re.

5 Peteõ-teõ cortina re cinqüenta jokuaa 'rã rejapo, ha'e amboae cinqüenta jokuaa rejapo 'rã mokoõ aty apy re cortina oĩ va'e re. Peteõ-teõ ojokuaa ma oĩ 'rã hovaigua renonde katy.

6 Ha'e rejapo avi 'rã cinqüenta ijopyarã ouro guigua. Ha'e va'e py peteõ-teõ cortina rejopy 'rã amboae re. Ha'e rami py ombojeroviaaty peteõ'i ae 'rã opyta.

---

\* **25:40** Hebreus 8.5

<sup>7</sup> — Ha'e kavara rague gui rejapo avi 'rã cortina mboae ombojeroviaaty ao'i jevya mbotyarã. Onze cortina rejapo 'rã ha'e ramigua.

<sup>8</sup> Ha'e va'e cortina peteĩ-teĩ puku-a ma quinze metros 'rã, ha'e ipya ma mokoĩ. Onze-ve cortina ikuai va'e joo rami meme 'rã ipuku-a ha'e ipya.

<sup>9</sup> Ha'e va'e cortina ma peteĩ nhiruĩ rejokua 'rã joe, ha'e gui mboapy meme mboae voi rejokua 'rã ha'e rami. Cortina mboapy memea va'e ogueroja 'rã ijao'ia oĩ va'e renonde.

<sup>10</sup> Ha'e jypygua aty apy re cortina oĩ va'e rembe re ma cinqüenta jokuaa rejapo 'rã, ha'e mokoĩa aty apy re cortina oĩ va'e rembe re ma cinqüenta jokuaa ju 'rã rejapo.

<sup>11</sup> Rejapo avi 'rã cinqüenta ijopyarã overa va'e guigua. Ha'e gui ijopya ikuai va'e remoĩ 'rã cortina jokuaa re. Ha'e va'e py rejokua 'rã reovy ijao'í arã, peteĩ'i ae opyta aguã.

<sup>12</sup> Ha'e gui ijao'ia re cortina hembyrekue ma remoĩ 'rã ombojeroviaaty kupe katy, cortina mbyte rupi hembyre va'e ae.

<sup>13</sup> Ha'e rami py ombojeroviaaty re cortina oĩ va'e pukukue rami hembyre vy ma kyvõ rupi meio metro, hovai rupi meio metro avi. Ha'e va'e ma jobaive re remoĩ 'rã ijao'í arã.

### *Mymba pirekue ha'e yvyrape ogueru rukaague*

<sup>14</sup> — Ha'e gui vexa'i pirekue omopytã mbyre gui rejapo 'rã ijao'ia áry guarã. Ha'e va'e áry guarã ju remoĩ 'rã ipirekue iporãve va'e.

<sup>15</sup> — Ombojeroviaaty ytarã ma rejapo avi 'rã yvyrape acácia gui. Ha'e nunga ma rejapo 'rã imo'amy.

<sup>16</sup> Peteĩ-teĩ yvyrape puku-a ma irundy metros raxa'i 'rã, ha'e ipya ma meio metro raxa'i.

<sup>17</sup> Peteĩ-teĩ yvyrape re oĩ 'rã mokoĩ omoĩ aguã joa katy oo va'e, joo'i rami nhovaexi aguã rami. Ha'e rami rejapo 'rã yvyrape ombojeroviaaty ytarã ha'e javi.

<sup>18</sup> Ha'e ombojeroviaaty ytarã ma vinte yvyrape rejapo 'rã kuaray puku-a katy guarã.

<sup>19</sup> Ha'e gui vinte-ve yvyrape guýry guarã ma rejapo 'rã quarenta omopyrõ aguã prata guigua. Mokoĩ omopyrõ aguã ma peteĩ yvyrape guýry guarã rejapo mokoĩve renderã, ha'e mokoĩ omopyrõ aguã amboae yvyrape guýry guarã, mokoĩve renderã.

<sup>20</sup> Ha'e gui ombojeroviaaty rovai re ma rejapo avi 'rã vinte yvyrape, kuaray ijapu'a'ia katyguia reguarã.

<sup>21</sup> Rejapo avi 'rã quarenta omopyrõ aguã prata guigua. Peteĩ yvyrape guýry mokoĩ omopyrõ aguã, ha'e amboae yvyrape guýry mokoĩ avi.

<sup>22</sup> Ha'e gui kuaray oikea katy ombojeroviaaty kupe reguarã ma rejapo 'rã mboapy meme yvyrape.

<sup>23</sup> Ha'e ombojeroviaaty kupe katy guarã ma rejapo avi 'rã mokoĩ yvyrape ijapy katy guarã.

<sup>24</sup> Ha'e va'e ma iguýry rupi oja'o, ha'e rã yvate rupi ma peteĩ inhapyi va'e rupi joyvy 'rã oĩ. Ha'e rami rejapo 'rã mokoĩ yvyrape re. Mokoĩve apy peteĩ-teĩ re 'rã mokoĩ oĩ.

<sup>25</sup> Ha'e rami oĩ 'rã oito yvyrape omopyrõ aguã prata guigua reve, dezesseis omopyrõ aguã. Peteĩ yvyrape guýry oĩ va'e mokoĩ omopyrõ aguã, ha'e amboae yvyrape guýry mokoĩ ju.

<sup>26</sup> — Yvyra mbyte rupi oaxa ovv va'erã ma rejapo avi 'rã acácia gui, ombojeroviaaty yke re oĩ 'rã peteĩ nhiruĩ yvyrape.

<sup>27</sup> Ha'e gui ombojeroviaaty rovai re yvyrape oĩ va'e rupi guarã ma peteĩ nhiruĩ, ha'e oo kupe kuaray oikea katy yvyrape oĩ va'e rupi guarã peteĩ nhiruĩ avi 'rã oĩ.

<sup>28</sup> Yvyra oaxa ovv va'e oaxa 'rã yvyrape mbyte rupi, peteĩ apy gui amboae apy peve.

<sup>29</sup> Yvyrape renhovã 'rã ouro py, ha'e ouro gui ae ju 'rã rejapo inhapyi va'e, ha'e va'e rupi mbyte yvyra oaxa ovv va'e oaxa aguã. Yvyra oaxa oiny va'e voi ouro py ae avi 'rã renhovã.

<sup>30</sup> Ha'e gui rejapo 'rã ombojerovia atyrã yvyty re ndevy aexa uka va'ekue rami ae.

<sup>31</sup> — Ha'e gui rejapo 'rã peteĩ ajukue okẽ regua hovy va'e gui, púrpura, pytã va'e, ha'e iporãve va'e oipoka pyre gui. Rembojegua 'rã anjo ipepo va'e ra'angaa py. Ojapo kuaa va'e ojapo 'rã.

<sup>32</sup> Ha'e va'e reipyo 'rã irundy yta yvyra acácia guigua ouro py onhovã mbyre. Ha'e va'e jopyarã rejapo 'rã ouro gui, ha'e irundy prata guigua omopyrõ aguã.

<sup>33</sup> Ajukue okẽrã reupi 'rã ijopya guýry. Ha'e gui xeayvu ryru ju reraa 'rã ha'e katy, ajukue okẽ regua rovai opyta aguã. Ha'e rami py ajukue oĩ 'rã omboja'o aguã henda iky'a e'ý va'e ha'e henda iky'a e'ý ete va'e.

<sup>34</sup> — Henda iky'a e'ý ete va'e py xeayvu ryru oĩ va'e mbotyarã ma remoĩ 'rã teko vai ombogueaty.\*

<sup>35</sup> Ha'e rã mesa ma cortina okẽ regua kylvõ rami 'rã remoĩ. Tataendy 'y ma remoĩ 'rã mesa renonde ombojeroviaaty yke kuaray puku-a katy. Ha'e rã mesa ma remoĩ 'rã kuaray ijapu'a'ia katy.

<sup>36</sup> — Oo rokẽrã ma rejapo 'rã peteĩ ajukue hovy va'e gui, púrpura, pytã va'e, ha'e ajukue iporãve va'e oipoka pyre gui, ombojegua kuaa va'e rembiapo.

<sup>37</sup> Ha'e va'e ajukue ytarã ma rejapo 'rã peteĩ nhiruĩ yvyra acácia guigua. Renhovãmba 'rã ouro py. Ijopyarã voi ouro guigua 'rã oĩ. Ha'e va'e renderã ma overa va'e remboyku 'rã peteĩ nhiruĩ.

## 27

### Êxodo 38.1-7

<sup>1</sup> — Ha'e gui altar-rã ma yvyra acácia gui 'rã rejapo. Ipuku-a ma mokoĩ metros raxa'i, ipya ma ha'e rami ae ju, altar ijapy irundy va'e opyta aguã. Ha'e rã yvatea ma peteĩ metro raxa'i 'rã.

<sup>2</sup> Ijapy irundyve re ma rejapo 'rã irundy rakua. Ha'e va'e ma altar reve peteĩ'i gui ae 'rã rejapo. Ha'e renhovãmba 'rã overa va'e py.

<sup>3</sup> Ha'e rejapo avi 'rã tanhimbu ryrrurã, ha'e pá iky'a'o arã, hy'arã, ikuxa rakua ha'e tapyĩ ryrrurã. Hyrrurã ha'e javive overa va'e gui meme 'rã rejapo.

<sup>4</sup> — Hi'árgua ipokã rei va'erã ma rejapo 'rã overa va'e gui, kya xã ramigua. Irundyve apy reguarã ma rejapo 'rã irundy inhapyĩ va'e overa'i va'e gui.

<sup>5</sup> Ha'e va'e remoĩ 'rã altar ryepy py yvy katy, altar mbyte peve ixã ovaẽ aguã rami.

<sup>6</sup> Altar peguarã rejapo avi 'rã yvyra po'i'i. Ha'e va'e yvyra po'i'i ma acácia gui 'rã rejapo, ha'e overa va'e py ju 'rã renhovã.

<sup>7</sup> Yvyra po'i'i ma oĩ 'rã inhapyĩ va'e jovaise altar re oĩ va'e re, peraa aguã.

<sup>8</sup> Inhyvyĩ va'e rejapo 'rã yvyrapo gui. Yvyty áry ndevy aexaague rami ae 'rã rejapo.

### Êxodo 38.9-20

<sup>9</sup> — Rejapo avi 'rã ombojeroviaaty rokarã. Kuaray puku-a katy oka rupi oĩ 'rã cortina ajukue iporãve va'e oipoka pyre gui. Jova-jovai re ipuku-a ma quarenta e cinco metros 'rã.

<sup>10</sup> Ha'e va'e rupi oĩ 'rã vinte ijyta ha'e vinte omopyrõ aguã overa va'e guigua meme. Ha'e va'e ijyta re ity'aĩ, ha'e hi'áry ikarẽ va'e oĩ va'e ma prata guigua meme 'rã.

<sup>11</sup> Ha'e rami avi kuaray ijapu'a'ia katyguia voi cortina puku-a quarenta e cinco metros avi 'rã. Ha'e vinte ijyta, ha'e vinte omopyrõ aguã oĩ va'e voi overa va'e guigua meme 'rã. Ha'e rã ijyta re ity'aĩ, ha'e hi'áry ikarẽ va'e oĩ va'e ma prata guigua meme 'rã.

<sup>12</sup> Ha'e kuaray oikea katy ma oka pukukue rupi oĩ 'rã cortina vinte e dois metros oĩ va'e. Ijyta oĩ 'rã dez, ha'e omopyrõ aguã dez avi.

<sup>13</sup> Ha'e rami ae avi oka kuaray oẽa katyguia voi ipya vinte e dois metros 'rã.

<sup>14</sup> Ha'e okẽ yke re cortina oĩ va'e ma sete metros 'rã. Ijyta ma mboapy 'rã oĩ, ha'e omopyrõ aguã voi mboapy 'rã.

---

\* **26:34** Êxodo 25.21

<sup>15</sup> Okẽ rovaigua re voi oĩ 'rã cortina sete metros va'e. Ijyta ma mboapy 'rã oĩ, ha'e omopyrõ aguã voi mboapy avi 'rã.

<sup>16</sup> Ha'e oka rokẽrã ajukue oĩ va'e ma nove metros ipya 'rã. Ha'e va'e ma hovy va'e guigua, púrpura, pytã va'e ha'e ajukue iporãve va'e oipoka pyre guigua, ajukue ombojegua kuaa va'e rembiapo. Ijyta irundy 'rã, ha'e omopyrõ aguã voi irundy.

<sup>17</sup> Ha'e javive ijyta oka rupi hi'aĩ va'e ma guive rã oguereko 'rã hi'áry rupi prata guigua. Ity'aĩ voi prata guigua, ha'e rã omopyrõ aguã ma overa va'e guigua 'rã.

<sup>18</sup> Oka puku-a ma quarenta e cinco metros, ha'e ipya ma jova-jovai re cinqüenta metros. Yvatea ma dois metros raxa'i 'rã. Cortina oĩ va'e ma ajukue iporãve va'e oipoka pyre gui, ha'e omopyrõ aguã ma overa va'e guigua meme 'rã.

<sup>19</sup> Ha'e javi tembiporu ombojeroviaaty py oiporu pyrã, ombota pyrã, ha'e oka rupi ombota pyrã voi overa va'e guigua meme 'rã.

#### *Levitico 24.1-4*

<sup>20</sup> — Aipo're 'rã Israel kuery pe togueru tataendyrã azeite oliveira gui anho ombota pyre, tata hendy riae oiny aguã.

<sup>21</sup> Ha'e gui oguy nhemboaty oĩaty py, xeayvu ryru renonde ajukue okẽ regua oĩ va'e kyvõ rami, ha'e py ma Arão ha'e ta'y kuery opena riae 'rã, ka'aru'i guive ko'ẽ aje'ive peve, SENHOR renonde. Ha'e rami ma Israel kuery rekora opa e'ý va'erã, araka'e rã peve guarã.

## 28

#### *Êxodo 39.1-31*

<sup>1</sup> — Tou ndea py nderyke'y Arão ha'e ta'y kuery, Israel kuery gui aiporavo ha'e kuery ae sacerdote ikuai aguã, Arão, ha'e gui ta'y kuery Nadabe, Abiú, Eleazar ha'e Itamar.

<sup>2</sup> Nderyke'y Arão pe rejapo 'rã ao iky'a e'ý va'erã, omboetea aguã ha'e iporã aguã rami.

#### *Sacerdote kuery aorã ojapo ukaague*

<sup>3</sup> — Ndeayvu avi 'rã avakue mba'emo ojapo kuaa va'e ha'e hexe nhe'ẽ imo'aranduarã amoña va'e ha'e javive pe, ha'e kuery ojapo aguã Arão aorã. Ha'e rami rã xevy guarã remboaxa 'rã, xevygua sacerdote oiko aguã.

<sup>4</sup> Po rami 'rã rejapo ijao: pexo regua, manto sacerdote pegua, kamixa puku árygua, kamixa puku ombojegua pyre, ngora oimama mbyre ha'e ku'akuua. Ao iky'a e'ý va'erã rejapo 'rã nderyke'y Arão ha'e ta'y kuery pe, xevygua sacerdote ikuai aguã.

<sup>5</sup> — Peru 'rã ouro, hovy va'e, púrpura, pytã va'e ha'e ajukue iporãve va'e,

<sup>6</sup> pejapo aguã manto sacerdote peguarã ouro gui, hovy va'e, púrpura, pytã va'e ha'e ajukue iporãve va'e oipoka pyre gui, ojapo porã mbyre meme.

<sup>7</sup> Ha'e va'e re oĩ 'rã mokoï axi'y árygua. Mokoïve apy re 'rã oĩ, pete'i'i opyta aguã.

<sup>8</sup> — Iku'akuua voi iporã aguã rami 'rã rejapo, sacerdote pegua manto áry oĩ va'erã, joo rami guarã. Mba'eta joo rami ae 'rã rejapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui.

<sup>9</sup> Rejou 'rã mokoï ita ônix regua. Ha'e va'e re rembopara 'rã Israel kuery rery.

<sup>10</sup> Pete'i ita re rembopara 'rã mboapy meme tery, ha'e amboae ita re amboae mboapy meme ju 'rã rembopara ha'e kuery itui'ague rami.

<sup>11</sup> Ita re omba'eapo va'e ombopara 'rã, kuã reguarã omboparaa rami avi. Ha'e va'e mokoï ita re rembopara 'rã Israel ra'y kuery rery ha'e javi. Ijyvýry rupi remboja 'rã ouro py.

<sup>12</sup> Mokoïve ita remoï 'rã manto sacerdote pegua axi'y áry, ita Israel kuery re imoma'endu'a arã. Ha'e kuery rery ma Arão oaxi'y áry ogueraa 'rã SENHOR renonde ima'endu'a aguã.

<sup>13</sup> Ouro gui rejapo 'rã ita renderã,

<sup>14</sup> ha'e remoxã 'rã mokoï corrente'i ouro ete'i gui. Ixã oipokaa rami 'rã reipoka. Ha'e va'e corrente'i oipoka pyre ma remboja 'rã ita renda re.

**15** — Rejapo avi 'rã pexo regua oikuaa pota aguã va'erã iporã aguã rami, manto sacerdote peguarã rejapoague rami. Ouro gui, ha'e hovy va'e, púrpura, pytã va'e ha'e ajukue iporãve va'e oipoka pyre gui 'rã rejapo.

**16** Irundyovaive re, ha'e mokoï rejapo 'rã. Ipuku-a ma peteï po pukukue, ha'e ipya voi peteï po pukukue avi 'rã.

**17** Ha'e va'e re ma remoï 'rã ita hendarã reve, ita irundy ryxy oï reve: jypy'igua ma sárdio, topázio ha'e carbúnculo. Ha'e va'e ma jypy'igua ryxy.

**18** Mokoï ryxya ma esmeralda, safira ha'e diamante.

**19** Mboapy ryxya ma jacinto, ágata ha'e ametista.

**20** Ha'e gui irundy ryxya ma berilo, ônix ha'e jaspe. Henda ouro guigua oï 'rã imbojeguaarã.

**21** Ha'e va'e ita oï 'rã Israel ra'y kuery rery oï aguã, hery doze va'e rami avi. Kuã reguarã rami 'rã rembopara, peteï-teï ita re hery oï aguã, doze regua ikuiaia rami.

**22** Pexo regua peguarã rejapo 'rã peteï corrente ixã rami, ouro guigua oipopë mbyre.

**23** Ha'e pexo regua peguarã rejapo 'rã mokoï inhapyï va'e ouro guigua. Ha'e mokoï inhapyï va'e remboja 'rã pexo regua apy re.

**24** Ha'e gui mokoïve corrente'i ouro guigua remboaxa 'rã mokoï inhapyï va'e pexo regua apy re remoï va'ekue rupi.

**25** Mokoïve corrente'i apy remboja 'rã mokoïve ita renda re, ha'e remoï 'rã manto sacerdote pegua axi'y árygua renonde katy.

**26** Rejapo avi 'rã mokoï inhapyï va'e ouro gui, ha'e remboja 'rã pexo regua apy mokoïve re, iguýry oï va'e rembe re, manto sacerdote pegua reve.

**27** Ha'e mokoï ju 'rã rejapo inhapyï va'e ouro gui. Ha'e va'e ma remoï 'rã mokoïve manto sacerdote pegua axi'y árygua re, henonde yvyïve'i, ijoapya oï va'e katy'i, iku'akuaa manto sacerdote pegua reve joo rami ojapo porã mbyre áry.

**28** Ha'e gui pexo regua re inhapyï va'e oï va'e ma rejokua 'rã inhapyï va'e manto sacerdote pegua re oï va'e hi'áry, peteï xã hovy va'e py oï aguã manto sacerdote pegua ku'akuaa reve joo rami oï aguã. Pexo regua ndoja'oï 'rã manto sacerdote pegua gui.

**29** Ha'e rami vy Israel kuery rery Arão ogueraa 'rã pexo regua oikuaa pota aguã va'e, okuraxõ áry, henda iky'a e'ý va'e py oike ma vy, SENHOR renonde ima'endu'a riae aguã.

**30** — Ha'e gui pexo regua oikuaa pota aguã va'e re remoï avi 'rã Urim ha'e Tumim,\* Arão kuraxõ áry oï aguã SENHOR renonde oike ramo. Ha'e rami vy Arão okuraxõ áry ogueraa 'rã Israel kuery re oikuaa pota aguã, SENHOR renonde oike nhavõ.

**31** — Ha'e sacerdote pegua manto reve guarã ma rejapo avi 'rã kamixa puku áry guarã hovy va'e gui anho.

**32** Mbyte py ma oï 'rã ijaju'y kuarã. Ha'e va'e hembe 'y rupi remoana 'rã tupyja ipererí'i va'e rami, oxoro e'ý aguã.

**33** Ha'e gui kamixa puku árygua rembe ha'e javi rupi rembojegua 'rã yvyra'a ra'angaa hovy va'e, púrpura ha'e pytã va'e gui ojapo pyre py. Mbyte rupi remoï avi 'rã oparã'i va'erã ouro guigua.

**34** Kamixa puku árygua rembe ha'e javi rupi oï 'rã peteï oparã'i va'e ouro guigua, ha'e peteï yvyra'a ra'angaa, ha'e gui amboae oparã'i va'e ouro guigua, ha'e amboae ju yvyra'a.

**35** Ha'e va'e kamixa puku árygua py Arão onhemonde 'rã ombaréapo jave guarã, oparã'i va'e onhendu aguã henda iky'a e'ý va'e py oike nhavõ SENHOR renonde, ha'e oẽ ouvy rã guive, omano e'ý aguã.

**36** — Rejapo avi 'rã ipe va'e ouro ete'i guigua. Ha'e va'e ma rembopara 'rã "Iky'a e'ý va'e SENHOR peguarã" he'ia py, kuã reguarã omboparaa rami avi.

\* **28:30** Urim ha'e Tumim ma sacerdote kuery mba'ekuaa-a oguereko va'ekue (Números 27.21).

**37** Ha'e va'e re rejokua 'rã peteĩ ixã hovy va'e reve akã regua oĩ rami avi, akã regua renonde ete py oĩ aguã.

**38** Ha'e va'e oĩ 'rã Arão rova áry, Israel kuery mba'emo iky'a e'ŷ va'e ome'ẽ va'ekue ogueraa vy ojeky'a'o uka aguã, hexe oĩ e'ŷ aguã jejavya. Ha'e nunga rupi oĩ riae 'rã Arão rova áry, ome'ẽ mbyre ombovy'a aguã SENHOR.

**39** — Rejapo 'rã kamixa puku ajukue iporãve va'e gui. Akã regua voi rejapo 'rã ajukue iporãve va'e gui, ha'e rã ku'akuaa ma ajukue ombopara va'e ojapoa rami 'rã rejapo.

**40** — Arão ra'y kuery pe rejapo 'rã kamixa puku, ku'akuaa ha'e akã regua, omboetea ha'e iporã aguã.

**41** Ha'e va'e py ae 'rã remonhemonde nderyke'y Arão ha'e ta'y kuery. Hexe azeite remoĩ reve remboaxa 'rã xevygua sacerdote iky'a e'ŷ va'erã.

**42** Rejapo avi 'rã ha'e kuery kaxõrã ijapu'a'i va'e ajukue iporãve va'e guigua ojao'i aguã ipire reia. Iku'a guive hi'u peve 'rã oĩ.

**43** Ha'e va'e ma Arão ha'e ta'y kuery omoĩ 'rã oguy nhemboaty oĩaty py oike nhavõ guarã, altar oĩa py ovaẽ vy henda iky'a e'ŷ va'e py omba'epo aguã, ha'e kuery re jejavya oĩ e'ŷ aguã omano e'ŷ aguã. Ha'e rami aguã aeja hekorã opa e'ŷ va'e, ha'e hamymino kuery ikuaive jevy va'e rekora.

## 29

### *Levítico 8.1-36*

**1** — Po ramí 'rã rejapo xevygua sacerdote-rã remboaxa aguã. Reru 'rã peteĩ vaka ra'y ha'e mokoĩ vexa'i ivaikue rei e'ŷ va'e,

**2** ha'e gui mbojape ha'e mbojape'i imbovua revegua e'ŷ azeite reve omoapomo mbyre, ha'e gui mbojape'i imbovua revegua e'ŷ azeite reve omoaký mbyre. Trigo ku'ikue iporãve va'e gui 'rã rejapo.

**3** Ha'e va'e ma peteĩ ajaka py 'rã rembooru reru aguã. Reru avi 'rã vaka ra'y ha'e mokoĩ vexa'i.

**4** Ha'e gui rejapo 'rã Arão ha'e ta'y kuery oguy nhemboaty oĩaty rokẽ py ovaẽ aguã rami. Jypy rejoi 'rã yy py.

**5** Ha'e rire ijaorã reru vy remonhemonde 'rã Arão kamixa puku py, hi'árygua, sacerdote pegua manto ha'e pexo regua py. Ha'e gui reku'a jokua 'rã ku'axã manto reguarã ojapo porã mbyre py.

**6** Inhakã áry ma remoĩ 'rã akã regua, ha'e akã regua áry ju 'rã remoĩ coroa iky'a e'ŷ va'e.

**7** Ha'e gui azeite SENHOR pe nhomboaxaa aguã regua reru vy renhoẽ 'rã inhakã áry. Ha'e rami vy 'rã remoĩ.

**8** Ha'e va'e rire Arão ra'y kuery ju 'rã remonhemboja. Ha'e kuery re ma remoĩ 'rã kamixa puku.

**9** Arão ha'e ta'y kuery re ku'akuaa ha'e akã reguarã reimama 'rã imoiny, sacerdote ikuai aguã guekorã opa e'ŷ va'e rupi. Ha'e rami py remboaxa 'rã Arão ha'e ta'y kuery xevy pegua sacerdote-rã.

**10** — Ha'e oguy nhemboaty oĩaty renonde peru 'rã vaka ra'y. Mymba akã re Arão ha'e ta'y kuery omoĩ 'rã opo.

**11** Rejyryvi kyxí 'rã SENHOR renonde, oguy nhemboaty oĩaty rokẽ py ae.

**12** Ha'e gui vaka ra'y ruguy rejopy vy nekuã py reikyty 'rã altar rakua ikuai va'e re. Ha'e rã huguy rembyrekue ma renhoẽ 'rã altar yvypy rupi.

**13** Ha'e gui reipe'apa 'rã ikyra hyepy rupi ojao'i imoiny va'ekue, ipy'akue, mokoĩve ipyky raxí ha'e ikyra hexe oĩ va'ekue. Ha'e nunga reapypa 'rã altar áry.

**14** Ha'e rã vaka ra'y ro'okue, ipire ha'e hye po'ikue ma pendekoa gui mombyry'i 'rã reapy. Ha'e va'e ma jejavya regua ome'ẽmby.

**15** — Ha'e rire ma Peru 'rã peteĩ vexa'i. Ha'e ramo inhakã re Arão ha'e ta'y kuery omoĩ 'rã opo.

16 Vexa'i rejyryvi kyxī 'rā, ha'e huguy rembooru vy renhoē 'rā altar yvýry joavaive rupi.

17 Vexa'i reipe'ā vy remboa'y-a'y 'rā. Hyepy ha'e hetymague rejoipa vy remoī 'rā ipēgue ha'e inhakāgue áry.

18 Ha'e rami meme 'rā vexa'i reapy altar áry. SENHOR pe reapy reve reme'ē 'rā, heakuā porā rā ojou porā aguā, SENHOR pe oapy vy ome'ē mbyrā.

19 — Ha'e gui amboae vexa'i rejopy ramo inhakā áry Arão ha'e ta'y kuery omoī 'rā opo.

20 Rejyryvi kyxī 'rā vexa'i. Ha'e gui huguykue rejopy vy reikyty 'rā Arão ha'e ta'y kuery nambi oiporu kuaa regua apy re, ha'ekue rami ae avi ikuā guaxu ha'e ipyxā guaxu oiporu kuaa regua re. Huguy rembyrekue ma renhoēmba 'rā altar yvýry joavaive rupi.

21 Rejopy 'rā huguy altar áry oī va'e ha'e azeite SENHOR pe nhomboaxaa aguā regua, ha'e remboayvipa 'rā Arão ha'e ijao re, ta'y kuery re ha'e ta'y kuery hexeve ikuai va'e ao re. Ha'e reiky'a'o uka aguā ijao reve, ha'e ta'y kuery hexeve ikuai va'e voi ha'e kuery ao reve.

22 — Ha'e gui reipe'a 'rā vexa'i kyrakue ha'e huguai kyrakue, ikyra hyepy rupi ojao'i imoiny va'ekue avi, ipy'akue, mokoīve ipyky raxīgue, ikyra hexe oī va'e ha'e hi'ugue oiporu kuaa regua, mba'eta vexa'i py reiky'a'o uka aguā,

23 peteī mbojape imbovua reveguia e'ŷ, ha'e mbojape'i azeite reveguia ha'e mbojape'i kyrīve'i va'e SENHOR renonde oī va'e gui.

24 Ha'e nunga ha'e javi reme'ē 'rā Arão ha'e ta'y kuery po py. Oupi reve ombovava 'rā SENHOR renonde ome'ē mbyrā.

25 Ha'e gui ipo gui rejopy ju vy reapy 'rā altar áry. SENHOR pe 'rā reme'ē. Heakuā porā rā ojou porā aguā, SENHOR pe oapy vy ome'ē mbyrā.

26 — Ha'e gui rejopy 'rā vexa'i reiky'a'o uka va'erā poxi'akue. Ha'e va'e ma Arão ojeky'a'o uka aguā. Oupi reve ombovava 'rā SENHOR renonde ome'ē mbyrā. Ha'e nunga ma ndevy guarā.

27 Reiky'a'o va'ekue reupi vy rembovava reve reme'ē 'rā, ipoxi'akue ha'e hetyma rovaikue'i rembovava reve reme'ē va'ekue 'u ro'okue. Ha'e va'e ma vexa'i reiky'a'o uka rā guarā gui reipe'a 'rā Arão ha'e ta'y kuery peguarā.

28 Ha'e va'e ma Israel kuery ome'ē riae 'rā Arão ha'e ta'y kuery pe, sacerdote peguarā ramo. Ha'e nunga Israel kuery ome'ē 'rā SENHOR pe peteī rami ikuiaia reguarā.

29 — Ha'e ao iky'a e'ŷ va'e Arão oiporu va'ekue ma ta'y kuery pe ju 'rā peme'ē 'rā ndoikovei rire, ha'e kuery ju oiporu aguā ha'e kuery re azeite omoīa reve SENHOR pegua sacerdote-rā omboaxaa rā.

30 Ta'y hekovia sacerdote-rā oiko aguā ma sete ára re 'rā onhemonde ha'e va'e py, oguy nhemboaty oīaty py oike vy henda iky'a e'ŷ va'e py ombo'eapo aguā.

31 — Rejopy 'rā vexa'i SENHOR pe nhomboaxaa aguā regua, ha'e vy ho'okue rembojy 'rā henda iky'a e'ŷ va'e py.

32 Ha'e va'e ro'okue ma Arão ha'e ta'y kuery ho'u 'rā okuapy, ha'e oguy nhemboaty oīaty rokē py ajaka py mbojape rembooru va'ekue oī va'e gui.

33 Ha'e kuery ho'u 'rā tembi'u teko vai ojao'i ukaa aguā regua, sacerdote-rā oiky'a'o uka ha'e omboaxaa aguā. Ha'e va'e tembi'u ma iky'a e'ŷ va'e ramo amboae regua ndo'ui 'rā.

34 Xapy'a rei ko'ēgue peve ri hembyre xo'o e'ŷ vy mbojape nhomboaxaa aguā regua, reapypa 'rā tata py. Nda'evei pe'u aguā, iky'a e'ŷ va'e ramo.

35 — Ha'e rami rejapo 'rā Arão ha'e ta'y kuery pe. Ajapo ukaague rami meme 'rā rejapo. Sete ára re 'rā remboaxa sacerdote-rā.

36 Ko'ē nhavō rerekō katu 'rā peteī vaka ra'y jejavya regua ome'ē mbyrā, imbogue arā. Ha'e va'e py reiky'a'o uka 'rā altar, ha'e va'e rire jejavya regua ome'ēmby py teko vai rejao'i uka aguā. Hexe azeite remoī 'rā SENHOR peguarā remboaxa aguā.

37 Sete ára re 'rā reiky'a'o uka altar, remboaxa vy. Ha'e rami rire altar iky'a e'ŷ ete va'erā, ha'e hexe ovy va'e ma guive rā iky'a e'ŷ va'e avi 'rā opyta.

**38** — Pova'e ma reme'ẽ riae 'rã altar áry: ko'ẽ nhavõ mokoõ vexa'i ra'y peteĩ ma'etõ oguereko va'e.

**39** Peteĩ vexa'i ra'y reme'ẽ 'rã aje'ivekue, ha'e rã amboae ma kuaray oike jave.

**40** Peteĩ vexa'i ra'y reve reme'ẽ avi 'rã peteĩ ryru trigo ku'ikue iporâve va'e peteĩ litro azeite ombota pyre reve omoapomo mbyre, ha'e renhoẽ 'rã peteĩ litro vinho.\*

**41** Ha'e gui amboae vexa'i ra'y ma kuaray oike jave rejuka 'rã aje'ive guare rami tembi'u reme'ẽ aguã mba'emo renhoẽ reve. Ha'e nunga ma heakuã iporã rã SENHOR ojou porã aguã, ixupe oapy vy ome'ẽmby.

**42** Ha'e rami ae araka'e rã peve peneramymino kuery mba'emo oapy vy ome'ẽ 'rã, oguy nhemboaty oïaty rokẽ py xee SENHOR renonde. Ha'e py ae xee arovaexi 'rã, ndereve xeayvu aguã ha'e py.

**43** Ha'e py ae aju 'rã Israel kuerya py, xerexakãa py aiky'a'o aguã.

**44** Ha'e rami vy aiky'a'o 'rã oguy nhemboaty oïaty ha'e altar, ha'e gui Arão ha'e ta'y kuery guive, xevygua sacerdote ikuai aguã.

**45** Xee aiko 'rã Israel kuery mbyte rupi, Tuuete aiko 'rã.

**46** Ha'e rami rire ha'e kuery oikuaapa 'rã xee ae SENHOR Tuuete aikoa, Egito yvy gui araa jepe va'ekue, ha'e kuery mbyte rupi aiko aguã. Xee ma SENHOR ha'e kuery Ruete.

## 30

### *Êxodo 37.25-28*

**1** — Ha'e gui rejapo avi 'rã peteĩ altar heakuã porã va'e peapy atyrã. Yvyra acácia gui 'rã rejapo.

**2** Ipuku-a ma meio metro va'erã, ha'e ipya ma ha'e rami ae avi 'rã, ijapy irundy va'e. Ha'e rã yvatea ma mokoõ metro 'rã. Hexe hakua ikuai va'e ma hexeve peteĩ'i rami 'rã rejapo.

**3** Ouro ete'i py renhovã 'rã yvatevea rupi, imbotyarã joavaive re ha'e hakua ikuai va'e. Ijyvýry rupi rembojegua 'rã ouro guigua py.

**4** Ha'e gui rembojeguaague yvyíve'i rejapo avi 'rã mokoõ inhapyí va'e ouro guigua. Jovaive re 'rã remoõ. Ha'e va'e rupi remboaxa 'rã yvyra po'i'i altar peraa aguã.

**5** Yvyra po'i'i ma rejapo 'rã acácia gui, ha'e renhovã 'rã ouro py.

**6** Altar ma remoõ 'rã xeayvu ryru renonde ajukue okẽ regua oï va'e kyvõ rami, teko vai ombogueaty xeayvu ryru oï va'e rexei. Ha'e py ndereve aï jepi 'rã.

**7** Ha'e va'e altar áry ma Arão oapy 'rã heakuã porã va'e, ko'ẽ tataendy omoatyrõ nhavõ.

**8** Ha'e gui pytû'i jave tataendy omoendy vy ha'ekue rami ae ju 'rã oapy. Ha'e rami py heakuã porã va'e oï riae 'rã SENHOR renonde, peneramymino jevy-jevy jave guarã.

**9** Ha'e va'e áry ma nda'evei reapy aguã amboae ramigua heakuã porã va'e, neõ amboae regua ome'ẽmby nda'evei hi'áry reapy reve reme'ẽ aguã, neõ mba'emo ra'yigue voi. Nda'evei avi mba'emo hi'áry renhoẽ reve reme'ẽ aguã.

**10** Ma'etõa nhavõ peteigüe'i altar áry hakua ikuai va'e re Arão ojao'i uka 'rã pejejavyague mymba ojuka va'ekue ruguy py. Ma'etõa nhavõ peteigüe'i ojao'i uka 'rã hi'áry. Ha'e va'e ma SENHOR pegua iky'a e'ý ete va'e, peneramymino jevy-jevy peguarã.

### *Guekovia peráta ome'ẽ aguã re ijayvuague*

**11** Ha'e gui SENHOR aipoe'ive ju Moisés pe:

**12** — Ha'e gui Israel kuery reipapa ramo ma peteĩ-teĩ SENHOR pe ome'ẽ 'rã guekovea repyrã oipapaa jave. Ha'e kuery mbyte imoingo axyarã oiko e'ý aguã, reipapa ma rire.

**13** Reipapa va'e ma guive rã ome'ẽ 'rã po rami: hatã'i va'e seis grama va'e, henda iky'a e'ý va'e py oiporupy ipoyi va'e rami (ha'e va'e regua ma doze gramas ipoyia). Seis grama va'e ae 'rã ome'ẽ SENHOR pe.

\* **29:40** Apy "peteĩ ryru" 'ea py ma mokoõ litro va'e jaikuua aguã, trigo ri rã peteĩ quilo va'e.

<sup>14</sup> Vinte ma'etŷ va'e guive tujakue peve ojepapa uka vy SENHOR pe ome'ẽ 'rã ha'e va'e regua ae.

<sup>15</sup> Oguerekopa va'e ma ome'ẽ aguã va'ekue gui nome'evei 'rã, neĩ iporiaukue'i voi mbovyve'i nome'ei 'rã SENHOR pe, pendereko vaiague pejao'i uka aguã.

<sup>16</sup> Pejopy 'rã peráta pejao'i uka aguã repy Israel kuery gui, ha'e peme'ẽ 'rã oguy nhemboaty oĩaty rupi ombo'eapo va'e pe. Ha'e va'e ma pejapo 'rã SENHOR renonde Israel kuery re ima'endu'aa aguã, pendereko vaiague pejao'i uka vy.

### Êxodo 38.8

<sup>17</sup> Ha'e gui SENHOR aipoe'ive ju Moisés pe:

<sup>18</sup> — Overa va'e gui rejapo 'rã peteĩ yy mbotyarã, mba'emo pejoi aguã. Hendarã voi ejapo overa va'e gui avi. Ha'e va'e ma remoĩ 'rã oguy nhemboaty oĩaty ha'e altar oĩ va'e mbyte py. Ha'e va'e py remoĩ 'rã yy.

<sup>19</sup> Ha'e va'e py ma Arão ha'e ta'y kuery ojoi 'rã opo ha'e opy.

<sup>20</sup> Oguy nhemboaty oĩaty py ha'e kuery oike vy yy py ojepoei, ha'e opy ojoi 'rã omano e'ŷ aguã, ha'e altar oĩa py ovaẽ vy mba'emo omoĩ aguã, ha'e SENHOR pe omoendy aguã mba'emo oapy vy omboaxa va'erã.

<sup>21</sup> Opo ha'e opy ha'e kuery ojoi 'rã omano e'ŷ aguã. Ha'e rami aguã oĩ 'rã hekorã opa e'ŷ va'e, ha'e kuery ha'e hamymino kuery ikuai jevy va'e peguarã.

### Êxodo 37.29

<sup>22</sup> Ha'e gui SENHOR aipoe'ive ju Moisés pe:

<sup>23</sup> — Ha'e gui heakuã porâve va'e regua reru 'rã mirra rykue mboapy meme quilos poyikue, cinamomo heakuã porã va'e ma mbyte rupi 'rã mboapy quilos va'e, ha'e gui cálamo heakuã porã va'e ma mboapy quilos va'e avi 'rã,

<sup>24</sup> ha'e cássia ma mboapy meme quilos va'e henda iky'a e'ŷ va'e py poyi oiporu va'ety rami ipoyi va'e, ha'e gui azeite oliveira guigua ma peteĩ galão va'e.

<sup>25</sup> Ha'e nunga gui ma rejapo 'rã azeite iky'a e'ŷ va'e SENHOR pe nhomboaxaa aguã regua, heakuã porã va'e apoa rembiapo. Ha'e va'e nunga ma azeite iky'a e'ŷ va'e SENHOR pe nhomboaxaa aguã regua.

<sup>26</sup> Ha'e va'e ma oguy nhemboaty oĩaty re 'rã remoĩ remboaxy vy, ha'e gui xeayvu aeja va'ekue ryru re,

<sup>27</sup> mesa hembiporu ha'e javi reve, tataendy 'y hembiporu ha'e javi reve, altar heakuã porã va'e oapyaty,

<sup>28</sup> altar mba'emo oapyaty hembiporu ha'e javi reve, ha'e hy'a re remoĩ avi 'rã, henda re guive.

<sup>29</sup> Ha'e nunga ha'e javi ma SENHOR peguarã remboaxa 'rã ha'e rami, iky'a e'ŷ ete va'e opyta aguã. Opa mba'e hexe ovy va'e avi 'rã iky'a e'ŷ va'e opyta.

<sup>30</sup> Azeite ma Arão ha'e ta'y kuery re avi 'rã remoĩ, xevygua sacerdote-'rã remboaxa vy.

<sup>31</sup> Ha'e aipo're 'rã Israel kuery pe: "Kova'e ma azeite iky'a e'ŷ va'e xee SENHOR pe nhomboaxaa aguã regua, pende kuery ha'e araka'e rã peve ikuai va'e peguarã.

<sup>32</sup> Nda'evei ava sacerdote e'ŷ va'e re pemoĩ aguã, neĩ ha'e ramigua nda'evei pejapo aguã ha'e va'e guigua gui ju. Iky'a e'ŷ va'e vy iky'a e'ŷ ae 'rã pendevy kuery pavẽ pe.

<sup>33</sup> Ha'e va'e azeite ramigua rive amongue ojapo, ha'e e'ŷ vy amboae regua re omoĩ va'ekue ma oipe'aa 'rã heta va'e kuerya gui", 're 'rã ha'e kuery pe.

### Heakuã porã va'e iky'a e'ŷ va'erã ojapo ukaague

<sup>34</sup> SENHOR aipoe'ive ju Moisés pe:

— Ejopy joo ramigua e'ŷ-e'ŷ heakuã porã va'e irûrã estoraque, ônica ha'e gálbano. Ha'e va'e ma remboje'a 'rã heakuã porã va'e re, peteĩ-teĩ guigua peteĩ rami meme 'rã ipoyi va'e.

<sup>35</sup> Ha'e va'e gui rejapo 'rã heakuã porã va'e, ha'e nunga apoa rembiapo rami. Remoirû 'rã juky reve, ha'e gui irû e'ŷ va'e ha'e iky'a e'ŷ opyta aguã.

<sup>36</sup> Ha'e va'e regua amongue ma remongu'i vy remoř'rã oguy nhemboaty ořaty py xeayvu ryru oř va'e rexei. Ha'e va'e ma peě kuery pavě pe iky'a e'ý va'erã ete.

<sup>37</sup> Ha'e va'e heakuã porã va'e pejapo va'e rami ju nda'evei pendejeupe guarã pejapo aguã. Iky'a e'ý va'e ma SENHOR pegua ae 'rã.

<sup>38</sup> Amongue ha'e ramigua gueakuãrã rive ojapo va'e ma oipe'aa 'rã heta va'e kuery mbyte gui.

## 31

### *Êxodo 35.30-36.1*

<sup>1</sup> Ha'e gui SENHOR aipoe'ive Moisés pe:

<sup>2</sup> — Aenoř hery rupi Judá regua Uri ra'y Bezalel, Hur ramymino.

<sup>3</sup> Ha'e va'e re ma xenhe'ẽ amoř amo'arandu ha'e mba'emo aikuua uka vy, tembiapo ha'e javi ojapo kuaa aguã rami,

<sup>4</sup> o'arandu rupi mba'emo ra'angaa ojapo aguã ouro, prata ha'e overa va'e gui,

<sup>5</sup> ha'e ita jeguarã ombope porã aguã, yvyra gui guive mba'emo ojapo aguã, ha'e tembiapo porã ha'e javi rupi omba'eapo aguã.

<sup>6</sup> Ha'e va'e irřrã ma amoř Dā regua Aisamaque ra'y Aoliabe. Ha'e avakue mba'emo ojapo kuaa va'e ha'e javi pe amo'arandu ajapo uka va'e ha'e javi ojapo kuaa aguã:

<sup>7</sup> oguy nhemboaty atyrã, ha'e xeayvu ryrurã, ha'e imbotya teko vai ombogue atyrã, ha'e oguy rupi tembiporu oř va'erã ha'e javi:

<sup>8</sup> mesa hembiporu ha'e javi reve, tataendy 'y ouro ete'i guigua hembiporu ha'e javi reve, altar heakuã porã va'e oapy atyrã,

<sup>9</sup> altar mba'emo oapy atyrã hembiporu ha'e javi reve, hy'a guaxu henda reve,

<sup>10</sup> ao ipererí'i va'e oipoka pyre, ao iky'a e'ý va'e sacerdote Arão ha'e ta'y kuery peguarã sacerdote ikuai aguã,

<sup>11</sup> azeite SENHOR pe nhomboaxaa aguã regua, ha'e heakuã porã va'e henda iky'a e'ý va'e pygumarã. Ha'e kuery ma xee ajapo ukaague rami meme 'rã ojapo.

### *Sábado ára ha'e itape ayvu oña re ijayvuague*

<sup>12</sup> Ha'e gui SENHOR aipoe'ive ju Moisés pe:

<sup>13</sup> — Israel kuery pe ndeayvu vy aipo'ere 'rã: "Pendekuai 'rã xevygua sábado ára pygumarã aeja va'ekue rupi. Mba'eta xee ha'e peě kuery reve guarã aeja peikuua aguã, peneramymino kuery araka'e rã ikuai va'erã pe guive, xee ae SENHOR pendeky'a'oa aikoa peikuua aguã.

<sup>14</sup> Ha'e nunga rupi ae pendekuai 'rã sábado ára pygumarã aeja va'ekue rupi, mba'eta iky'a e'ý va'e pěvy. Ha'e rã ha'e va'e ára py onhemongy'a va'e ma omano 'rã. Ha'e va'e ára mba'emo ojapo nho va'e oipe'aa 'rã heta va'e kuery mbyte gui.

<sup>15</sup> Seis ára re 'rã pemba'eapo. Ha'e rã sete araa ma sábado SENHOR pegua iky'a e'ý va'e pepytu'u aguã. Sábado ára py mba'emo ojapo va'e omano 'rã.

<sup>16</sup> Ha'e nunga rupi Israel kuery sábado ára py ikuai 'rã ha'e rami, xereve guarã ajapo va'ekue opa e'ý va'e re ima'endu'a reve araka'e rã peve.

<sup>17</sup> Ha'e nunga xee ha'e Israel kuery reve guarã aeja araka'e rã peve guarã ha'e kuery oikuua aguã. Mba'eta seis ára re xee SENHOR ajapo raka'e yva ha'e yvy. Ha'e gui sete araa py ma apytu'u mba'eve ndajapovei vy", 're 'rã ha'e kuery pe – he'i.

<sup>18</sup> Ha'e gui Moisés reve SENHOR Sinai yvyty áry ijayvupa ma rire ixupe ome'ẽ mokoř itape ijayvu oña. Ha'e va'e itape ma Nhanderuete ha'e ae okuã py ombopara va'ekue.

## 32

### *Deuteronomio 9.6-21*

<sup>1</sup> Ha'e gui yvyty gui Moisés ndoui ete maa heta va'e kuery oexa vy oupa okuapy Arão-a py. Ha'e vy aipoe'i ixupe:

— Epu'ã ke, ejapo tuuete ramigua nhanerenonde oo va'erã. Ha'e gui Moisés Egito yvy gui nhanerenoẽ va'ekue ri ndajaikuaai mba'e pa hexe oiko raka'eague. \*

<sup>2</sup> Arão ombovai:

— Pemboipa ha'vy namixã ouro guigua pendera'yxy nambi gui, pendera'y kuery ha'e penderajy kuery gui. Ha'e vy peru ju — he'i.

<sup>3</sup> Ha'e ramo heta va'e kuery ha'e javi onambi gui namixã omboipa vy ogueru Arão-a py.

<sup>4</sup> Ha'e kuery po gui ouro ojopy vy omoatyrõ tembiporu py. Tata py omboy rire ojapo peteĩ vaka ra'y. Ha'e ramo ha'e kuery aipoe'i okuapy:

— Israel kuery, kova'e ae ma penderuete Egito yvy gui penerenoẽ va'ekue — he'i okuapy.

<sup>5</sup> Ha'e nunga Arão oexa vy ta'angaa renonde ojapo peteĩ altar. Ha'e vy ijayvu atã reve aipoe'i:

— Ko'ẽ ramo ma oiko 'rã ngaru SENHOR pegua — he'i.

<sup>6</sup> Ko'ẽ jevy iko'ëmba okuapy vy ha'e nunga pe mba'emo oapy vy ome'ẽ okuapy, peteĩ rami ikuaria regua avi. Ha'e vy oguapy okuapy okaru ha'e oy'u aguã, ha'e gui opu'ã ma okuapy ov'y'a aguã.\*

<sup>7</sup> Ha'e ramo SENHOR aipoe'i Moisés pe:

— Tereo, eguejy ju, mba'eta neretarã kuery Egito gui renoẽ va'ekue ojejavypa ju ma.

<sup>8</sup> Ha'e kuery ojepe'a pojava tape xee aeja va'ekue gui. Ojeupe guarã ojapo uka okuapy vaka ra'y tata py. Ha'e va'e anho omboete vy ixupe mba'emo ome'ẽ okuapy. Ha'e vy aipoe'i: "Israel kuery, kova'e ae ma penderuete Egito yvy gui penerenoẽ va'ekue", he'i va'ekue.

<sup>9</sup> SENHOR aipoe'ive ju Moisés pe:

— Ha'e kuery aexa rã inhakã ratã okuapy.

<sup>10</sup> Aÿ ma xereja, xepoxya rupi tareko amokanhymba peve, ha'e gui ndegui ju ajapo 'rã peteĩ regua heta ikuai aguã rami.

### Êxodo 32.30-35; Deuterônômio 9.25-29

<sup>11</sup> Ha'e ramo Moisés ojerure SENHOR nguuite pe. Ha'e vy aipoe'i:

— Mba'e re tu ndepoxy ri ndevygua kuery opa mba'e re ndepo'akaa rupi Egito yvy gui rerupa va'ekue rovai?

<sup>12</sup> Mba'ixa tu ha'eve 'rã Egito pygua kuery ijayvu vy "Apy gui ma tuuete ogueraapa yvyty re ojukapa aguã, ha'e yvy áry gui omokanhymba aguã", he'i okuapy aguã? Ndepoxya rupi e'ÿ ke eiko, ejapo vai eme ndevygua kuery rovai.

<sup>13</sup> Nema'endu'a ke Abraão, Isaque ha'e Israel re. Ha'e kuery nerembiguai ikuai va'e pe ndee ae rery rupi reura vy "Amboeta 'rã neramymino kuery jaxy-tata hetaa rami. Ha'e gui kova'e yvy ha'e javi xeayvuague ame'ẽ 'rã neramymino kuery rekoarã araka'e rã peve", 're va'ekue — he'i.

<sup>14</sup> Ha'e rami rã ojeupagua kuery pe SENHOR ndojapoi ojapo vai aguã re ijayvuague.

<sup>15</sup> Ha'e gui Moisés yvyty gui ojevy vy opo py ogueroguejy mokoĩ itape Nhanderuete ayvu oĩa. Ha'e va'e itape ma joavaive re ipara oiny va'e.

<sup>16</sup> Itape ma Nhanderuete rembiapo, iparaa oĩ va'e ma Nhanderuete ae ombopara va'ekue itape re.

<sup>17</sup> Ha'e gui Josué ma heta va'e kuery ojapukaia oendu vy aipoe'i Moisés pe:

— Joe opu'ãmbaa py hevovo rei nhendu okuapy ha'e kuery ikuaria py.

<sup>18</sup> Moisés ombovai:

— Joe ipo'aka va'ekue onhendua e'ÿ, neĩ oity pyre onhendu e'ÿ guive. Oporaei va'e rima aendu — he'i.

<sup>19</sup> Heta va'e kuery ikuaria py ovaẽ rai'i vy oexa vaka ra'y ra'angaa hi'aĩ rã, ha'e ojeroky va'e. Ha'e rami vy ipoxya oendu vy itape omombo vy omboa'ypa yvyt'iry.

<sup>20</sup> Ha'e gui vaka ra'y ojapo pyre ojopy vy oapypa tata py. Omongu'i porã'i vy omaoã yy áry rupi. Ha'e rami vy Israel kuery pe ome'ẽ oy'u aguã.

<sup>21</sup> Moisés oporandu Arão pe:

— Mba'e tu ha'e kuery ojapo ndere ha'e rami ete ojejavypa aguã rami rejapo aguã?

<sup>22</sup> Arão ombovai:

— Xeruvixa, ndevai eme xevy. Reikuaa ma ha'e kuery py'a re teko vai anho oĩa.

<sup>23</sup> Mba'eta xevy aipoe'i okuapy: “Ejapo tuuete orevy orerenonde oo va'erã. Ha'e rami avi ava Moisés Egito yvy gui nhanerenoẽ va'ekue ri nhande ndajaikuai mba'e pa hexe oiko raka'ea”, he'i okuapy va'ekue.

<sup>24</sup> Ha'e ramo aipoa'e ha'e kuery pe: “Ouro perekó va'e ke peipe'a ha'e peme'ẽ xevy”, 're. Ha'e gui ma tata py xee amombo ramo rive kova'e vaka ra'y ra'angaa oiko – he'i.

### *Tuuete ramigua mboetea kuery Moisés ojuka ukapaague*

<sup>25</sup> Ha'e ramo Moisés oexa rã heta va'e kuery ndojokoi okuapy, ha'e kuery ae oakã gu ikuai aguã rami Arão oeja rire oximba aguã rami, ngovaigua kuery mbyte ae tei.

<sup>26</sup> Ha'e rami vy Moisés opu'ã ho'amy ha'e kuery ikuiaia py oikea py. Ha'e vy aipoe'i:

— SENHOR-a katygua peiko va'e ke peju xea py – he'i. Ha'e gui oĩa py ono'õmba jogueruvy Levi ramymino kuery ha'e javi.

<sup>27</sup> Ha'e va'e kuery pe aipoe'i:

— Po rami ma SENHOR Israel kuery ruete aipoe'i: “Petei-tei pemoi ke pendekyxe pendeku'a re. Peaxa-axa 'rã heta va'e kuery ikuiaia ha'e hokẽ ha'e javi rupi. Petei-tei pejuka 'rã penderyvy, peneirũ ha'e pendaia katy'igua”, he'i.

<sup>28</sup> Ha'e ramo Moisés ojapo ukaague rami Levi ramymino kuery ikuai. Ha'e va'e ára rãnda'u três mil avakue ho'a heta va'e kuery regua,

<sup>29</sup> Moisés aipoe'i rire: “Kova'e ára ma SENHOR pe anho 'rã pendekuai, petei-tei pendera'y kuery e'ẽ vy penderegua kuery rovai peiko tei, kova'e ára guive penemoingo porã ju aguã”, he'i rire.

### *Êxodo 32.11-14; Deuteronômio 9.25-29*

<sup>30</sup> Ko'ẽ jevy Moisés aipoe'i heta va'e kuery pe:

— Peẽ kuery ma pejejavvy vaipa. Ha'e rami tei aõ ma aa ju ta SENHOR-a py, pejejavvyague ambogue ukapa aguã – he'i.

<sup>31</sup> Ha'e gui Moisés SENHOR-a py ju oo. Ha'e vy aipoe'i:

— Ma'ẽ, kova'e kuery ojejavvy vaipa okuapy nguuetern ouro guigua ojapo py.

<sup>32</sup> Aõ ma ajerure ojejavvyague rembogue aguã re. Ha'e rami e'ẽ vy embogue xerery kuaxia rembopara va'ekue gui – he'i.

<sup>33</sup> Ha'e ramo SENHOR aipoe'i Moisés pe:

— Xerovai ojejavvy va'ekue anho 'rã ambogue xekuaxia gui.

<sup>34</sup> Ha'e rã tereo aõ, eraapa ha'e kuery xeayvuague katy. Xevygua anjo oo 'rã neronden. Ha'e rami avi xee ajekuaa ára ambopagapa 'rãe xevy ojejavvy va'ekue – he'i.

<sup>35</sup> Ha'e rami vy SENHOR omoingo axy, Arão pe ha'e kuery vaka ra'y ra'angaa ojapo uka rire.

## 33

### *Ha'e kuery renonde Nhanderuete guigua anjo omondouka aguã re ijayvuague*

<sup>1</sup> Ha'e gui SENHOR aipoe'i ju Moisés pe:

— Tapeo apy gui ndee ha'e Egito yvy gui reipe'apa va'ekue ha'e javi reve. Peguata 'rã yvy Abraão pe, Isaque ha'e Jacó pe ame'ẽ aguã re aura reveague katy, “Neramymino kuery pe 'rã ame'ẽ”, ha'eague rami vy.

<sup>2</sup> Ha'e rami vy petei anjo neronden amondouka vy aipe'apa 'rã cananeu kuery, amorreu, heteu, ferezeu, heveu ha'e jebuseu kuery.

<sup>3</sup> Tapeo yvy kamby ha'e ei oata e'ŷa katy. Ha'e rami avi peneakā ratā ete ramo xee ma ndaai 'rā peẽ kuery reve, tape rupi apomomba e'ŷ aguā — he'i.

<sup>4</sup> Ha'e rami ijayvu rā heta va'e kuery oendu vy ojae'opa okuapy, ojee jegua omoĩ va'ekue omboipa guive,

<sup>5</sup> mba'eta Moisés pe SENHOR aipoe'i rire:

— Aipo'ere ke Israel kuery pe: “Peẽ kuery peneakā ratā ete va'e. Xapy'a'i penembyte aa teĩ ma apomokanhymba 'rā. Ha'e nunga rupi pendejegui pemboipa jegua pemoĩ va'ekue. Ha'e ramo 'rāe aikuua mba'e pa ajapo aguā”, 're 'rā ha'e kuery pe — he'i va'ekue.

<sup>6</sup> Ha'e rami rā Israel kuery omboipa jegua oiporu va'ekue ha'e javi, Horebe yvyty re ovaẽa ára guive nomoĩvei.

<sup>7</sup> Moisés ma ha'e ae'i oĩ aguā oo'i ogueraa 'rā heta va'e kuery ikuiaia gui mombyry'i. Ha'e py ju 'rā omopu'ã. Ha'e va'e pe “Oguy nhemboaty oĩaty” 'ea 'rā. SENHOR re ojerovia va'e ha'e javi 'rā oje'oi oguy nhemboaty oĩaty katy. Heta va'e kuery ikuiaia gui mombyry'i oĩ.

<sup>8</sup> Oo'i oĩa katy Moisés oẽ ovy ramo heta va'e kuery peteĩ-teĩ opu'ãmba 'rā okuapy ngoo rokẽ py, hakykue katy gui oma'ẽ 'rā okuapy oo py oike peve.

<sup>9</sup> Moisés opy oĩ ramove arai opu'ã va'e oguejy 'rā hi'áry, oo rokẽ py ju 'rā opyta oiny. Ha'e rami vy SENHOR ijayvu 'rā Moisés reve.

<sup>10</sup> Pavẽ rei oexa okuapy arai opu'ã va'e okẽ py opyta rā. Ha'e rami vy ae peteĩ-teĩ ngoo rokẽ py opu'ãmba 'rā okuapy SENHOR omboete vy.

<sup>11</sup> Moisés reve SENHOR ijayvu 'rā oiny jova re oma'ẽ reve oirū reve ijayvu va'e rami. Ha'e gui ma Moisés ojevy ju 'rā heta va'e kuery ikuiaia py. Ha'e rā hembiguai kunumi Num ra'y Josué va'e ma oo'i gui ndojepo'ai oikovy.

### *Ha'e kuery reve Nhanderuete oiko aguā re Moisés ojerureague*

<sup>12</sup> Ha'e gui Moisés aipoe'i SENHOR pe:

— Ndee ma “Eraa kova'e kuery”, 're teĩ xevy neremombe'ui guive mava'e ete'i pa xerupive remondouka 'rāa. Xevy aipo're: “Nderery rupi xee roikuua, ha'e xerembiexa rupi avi romboaxy”, 're va'ekue xevy.

<sup>13</sup> Ha'e nunga rupi aŷ xemboaxya rendu ramo ajerure nderekoo reikuua uka aguā xevy, ha'e rami xee voi roikuua porā aguā, ha'e ndee xemboaxya rupi ete aiko aguā. Ha'e nema'endu'a avi kova'e kuery ndevygua ae ikuiaia re — he'i.

<sup>14</sup> Ombovai:

— Xee ae ma aa 'rā ndereve, ha'e ame'ẽ 'rā nekane'õgua aguā — he'i.

<sup>15</sup> Ha'e ramo Moisés aipoe'i:

— Xerupive ndereo reguai vy oremondouka eme apy gui.

<sup>16</sup> Ha'e rami e'ŷ ramo mba'exa vy tu oikuua ta nerembiexa rupi xee ha'e ndevygua kuery oremboaxya? Mba'eta orereve reiko ramo 'rāe yvy regua kuery reko rami e'ŷ orekuai.

### *Nhanderuete guexakāa oexa uka aguā re Moisés ojerureague*

<sup>17</sup> SENHOR aipoe'i Moisés pe:

— Xee ajapo avi 'rā ndeayvuague ramo, mba'eta xee romboaxy, nderery rupi roikuua guive.

<sup>18</sup> Moisés ojerure:

— Ajerure nerexakāa rexu uka aguā xevy.

<sup>19</sup> Ombovai ju:

— Ajapo 'rā nerentonde xeporayvua ha'e javi oaxa aguā ramo, ha'e ndevy amombe'u porāve 'rā xerery SENHOR. Mba'eta amboaxy 'rā xee amboaxyxe va'e, xemboaxya ramo areko 'rā ha'e rami arekoxe va'e.\*

<sup>20</sup> Ha'e rā xerova ma nda'evei rexu uka aguā, mba'eta xerova oexa va'e ndoikovei 'rā.

<sup>21</sup> SENHOR aipoe'ive ju:

\* **33:19** Romanos 9.15

- Apy xeyvy'iry oĩ peteĩ itaova, ha'e va'e áry ndee reĩ aguã.
- <sup>22</sup> Ha'e gui xepo'akaa oaxa ramo ma xee romoĩ 'rã ita pa'ũ oĩ va'e py, ha'e xepo py rojao'i 'rã xee aaxa peve.
- <sup>23</sup> Ha'e gui xepo aipe'a ramo xerexa 'rã, teĩ xekupe katy gui rive. Ha'e rã xerova ma nderexai 'rã.

## 34

### *Deuteronômio 10.1-5*

- <sup>1</sup> Ha'e gui SENHOR aipoe'i Moisés pe:
- Mokoĩ ju ke embope itaperã jypy'i guare rami. Ha'e va'e re ma xee ambopara uka 'rã ayvu ha'ekue ae itape rembovopa va'e re oĩ va'ekue.
- <sup>2</sup> Eiko katu ha'vy ko'ẽ rã guarã, aje'ivekue Sinai yvyty re reẽ ju aguã. Ha'e py ma rejexa uka jevy 'rã xevy, yvyty apyte áry ae.
- <sup>3</sup> Ha'e rami avi avave rei toẽ eme ndereve, neĩ toiko eme yvyty ha'e javi re. Ijyvýry rupi vexa'i, neĩ vaka ma voi nda'evei omongaru aguã — he'i.
- <sup>4</sup> Ha'e rami rã Moisés ombope mokoĩ ita, jypy'i guare rami. Ha'e gui ko'ẽ rai ma jave opu'ã vy oẽ ju ov yvyty re, SENHOR ijayvuague rami vy. Opo py ogueraa mokoĩ itaperã omoatyrõ va'ekue.

<sup>5</sup> Ha'e gui SENHOR arai rupi oguejy vy hexeve hi'aĩ ha'e py. Ha'e rami vy guery SENHOR omombe'u porãve reve

<sup>6</sup> oaxa ov yvy henonde re. Ha'e vy ijayvu:

— SENHOR, SENHOR Penderuete aiko va'e ma nhomboaxy va'e, poroayvu va'e, ipoxy voi e'ỹ va'e, opa mba'e py iporayvupa va'e ha'e ojeroviapy aiko.

<sup>7</sup> Mil-kue peneramymimo ikuiaia peve areko 'rã xeporayvua rupi. Ambogue 'rã guive ha'e kuery reko vaia, ha'eve'ÿa rami ikuiaia ha'e ojejavya ha'e javi. Ha'e rami avi heko vai va'e ma nambopaga e'ÿi 'rã. Ha'e rami vy tuu kuery reko vaiague regua ma ta'y kuery ha'e hamymimo kuery re ju 'rã ambou, mboapya ha'e irundaya ikuiaia peve — he'i.

<sup>8</sup> Ha'e rami SENHOR ijayvu ramove Moisés yvy py guenapy'ã re oĩ vy omboete.

<sup>9</sup> Ha'e vy aipoe'i:

— SENHOR, xapy'a rei aÿ nerembieixa rupi xemboaxy ri vy eiko ha'vy ore kuery mbyte rupi. Ore kuery oreakã ratã ete va'eri emboguepa ke orerekova vaiaty ha'e rojejavvyague. Ha'e orereraa ndejeupe guarã.

### *Deuteronômio 7.1-5*

- <sup>10</sup> Ha'e ramo aipoe'i:
- Xee ma heta va'e kuery reve xereve guarã ajapo vy ha'e kuery ha'e javi renonde 'rã ajapo mba'emo iporã ete va'e. Ha'e nunga iporã ete va'e ma neĩ peteĩ henda py, neĩ peteĩ regua renonde ma voi ndojapoai teri. Peva'e kuery mbyte reikoa va'e, ha'e kuery ha'e javi toexa xee SENHOR ajapo va'e, mba'eta mba'emo vaipa ete 'rã ajapo rombovai vy.
- <sup>11</sup> Penderexarai eme ange xeayvuague re. Mba'eta penerenonde gui amoxêmba 'rã amorreu, cananeu, heteu, ferezeu, heveu ha'e jebuseu kuery.
- <sup>12</sup> Ha'e peoa yvy re hekoa va'e kuery reve nda'evei pejapo aguã peteĩ rami pendekuai aguã, ha'e nungakue pendere oiko e'ÿ aguã nhuã rami.
- <sup>13</sup> Ha'e rami 'rãgue py peitypa 'rã ha'e kuery altar ojapo va'ekue, pemopêmba 'rã ita omopu'ã va'ekue, peake'o 'rã mba'emo ra'angaa ha'e kuery omopu'ã va'ekue.
- <sup>14</sup> Napemboetei 'rã amboae tuuete ramigua, mba'eta xee SENHOR pe "Oikuaa pota porã kuaa va'e" ea. Xee aipota xere anho pejerovia.
- <sup>15</sup> Ha'e nunga rupi ha'e va'e yvy regua kuery reve pejapo eme peteĩ rami pendekuai aguã. Mba'eta ha'e kuery nguete kuery mboetea rupi mba'emo ome'ë, ha'e guymba ojukaa py penerenoï 'rã ha'e kuery reve pe'u aguã ojuka va'ekue ro'okue gui.

16 Ha'e py peo ri vy ha'e kuery raxy kuery pejopy 'rā pendera'y kuery ra'yxyrā. Ha'e gui tajy kuery nguuete pe ju omboete vy ojapo 'rā pendera'y kuery voi ha'e kuery ruete omboete aguā rami.

17 Pejapo eme penderueterā mba'emo ryku gui rive.

*Êxodo 23.14-19; Levítico 23.4-21,33-44; Deuteronômio 16.1-17*

18 — Ha'e gui pejapo 'rā ngaru mbojape imbovua revegua e'ŷ regua. Sete ára re 'rā pe'u mbojape imbovua revegua e'ŷ xeavyuague rami vy, jaxy abibe 'epy va'e reguarā aa'angaague rami, mba'eta abibe jaxy py ae Egito yvy gui peẽmba rire.

19 Jypyguia itui'i va'ekue ma xemba'e meme. Penerymba kuery vaka ava, jypyguia oiko va'ekue ma guive rā, ha'e vexa'i guigua voi.

20 Ha'e gui mburika jypyguia oiko va'ekue ma pendejeupe guarā pemboekovia 'rā vexa'i ra'y'i pejuka vy. Ha'e rā pendejeupe guarā napemboekoviaxei ri vy pemopē 'rā ijaju'y. Ha'e rami ae pendejeupe pemboekovia avi 'rā pendera'y kuery jypy'i itui va'ekue.

— Avave rei xerenonde ndoui 'rā mba'emo ome'ẽ va'erā reve'ŷ.

21 — Seis ára re pemba'eapo 'rā. Ha'e rā sete araa py ma pepytu'u 'rā penemba'eaty rupi pemba'eapoa gui, ha'e mba'emo pemono'õa gui.

22 — Trigo pemono'õ ypy'ia ára py pejapo 'rā ngaru sete semana-a pygua, ha'e gui ma'etŷa opa nhavō ju mba'emo pemono'õa ngaru pejapo.

23 Ha'e rami py ma'etŷa nhavō mboapykue kuerei 'rā peẽ kuery va'e regua avakue ha'e javi pejexa uka SENHOR Israel kuery ruete renonde.

24 Mba'eta penerenonde gui aipe'a 'rā amboae regua kuery, pendekuai aguā ambopyve vy. Ha'e rami rire ma'etŷa nhavō mboapykue SENHOR renonde pejexa uka aguā peo tei jipoi 'rā pendeyvy pe'aarā.

25 — Ha'e gui xevy mymba ruguy peme'ẽ reve nda'evei mbojape imbovua revegua avi peme'ẽ aguā. Ha'e Páscoa ára ngaru py xevy mymba peme'ẽ rire nda'evei pyávy ndape'upai va'ekue opyta aguā ko'ẽ rā peve guarā.

26 Nemba'ety gui jypy'i pemono'õ va'ekue regua iporâgueve ma Peru 'rā SENHOR Penderuete pegua oo py.

— Nda'evei kavara'i remomimoĩ aguā ixy kamby py ae – he'i.

27 SENHOR aipoe'ive ju Moisés pe:

— Embopara ha'e va'e ayvu, mba'eta ha'e rami ae ndereve ha'e Israel kuery ha'e javi reve ajapo xereve guarā — he'i.

28 Ha'e py ma SENHOR reve Moisés oĩ quarenta ára ha'e quarenta pytū re. Ha'e jave ma ndo'ui mbojape, neĩ yy ma voi ndoy'ui Ha'e py itape re ombopara ayvu guexeve guarā ojapo va'ekue regua, dez ayvu ombopara.

*Moisés rova hexakāmbaa oexapa okuapyague*

29 Ha'e gui Sinai yvyty gui Moisés oguejy vy opo py ogueraa mokoĩ itape Nhanderuete ayvu oĩa. Hexeve Nhanderuete ijayvu rire hova hexakāmbaa teī ndoikuaai ranhe yvyty gui oguejy ouvya ja.

30 Ha'e gui Moisés re Arão ha'e Israel kuery ha'e javive oma'ẽ rā hova hexakāmba. Ha'e ramo ha'e kuery okyje hexe onhemboja aguā.

31 Ha'e rami rā Moisés oenoimba. Ha'e ramo mae Arão ha'e yvatekueve onhemboja hexe, ha'e ha'e kuery reve Moisés ijayvu.

32 Ha'e gui ma oupa avi okuapy Israel kuery ha'e javi. Ha'e ramo ha'e va'e kuery pe Moisés omboaxapa Sinai yvyty re SENHOR ojapo ukaague.

33 Ha'e kuery pe Moisés ijayvupa ma vy ngova re omoĩ imo'ãarā.\*

34 Ha'e gui SENHOR renonde ju Moisés ijayvu aguā oo vy ngova mo'ãa oipe'a kuerei 'rā, oẽ ouvy e'ŷa ja. Ha'e gui oẽ vy Israel kuery pe ju 'rā omombe'u ojapo uka pyre ha'e javi.

\* 34:33 2 Coríntios 3.7-16

<sup>35</sup> Ha'e ramo ma Israel kuery Moisés rova oexa rã hexakã. Ha'e va'e rire Moisés omo'ã ju 'rã ngova, peteīgue ju SENHOR reve ijayvu aguã py oike e'ÿa ja.

## 35

### Sábado ára re ijayvuague

<sup>1</sup> Ha'e gui Moisés Israel kuery ha'e javive omboaty vy aipoe'i:

— Pova'e ayvu ma SENHOR ojapo uka jajapopa ete aguã.

<sup>2</sup> Nhamba'eapo 'rã seis ára re, ha'e rã sete araa py ma ára iky'a e'ÿ va'e, SENHOR pegua sábado ixupe anho japytu'u aguã. Ha'e va'e ára ombo'eapo va'e ma omano 'rã.

<sup>3</sup> Sábado ára nda'evei neĩ peteīve ma pejatapy aguã pendero rupi ae'i voi.

### Êxodo 25.1-9

<sup>4</sup> Moisés aipoe'ive ju Israel kuery ha'e javive pe:

— Po rami SENHOR ijayvu vy aipoe'i:

<sup>5</sup> “Mba'emo perekva'e-va'e gui peipe'a 'rã SENHOR pe peme'ẽ va'erã. Petei-tei pendepy'a re oĩa rami, peme'ẽxeia rami Peru 'rã SENHOR pe peme'ẽ va'erã: ouro, e'ÿ vy prata, overa va'e,

<sup>6</sup> hovy va'e, púrpura, pytã va'e, ajukue iporãve va'e, kavara rague,

<sup>7</sup> vexa'i pirekue, mba'emo mopytãarã, yy rupigua pirekue, yvyra acácia,

<sup>8</sup> azeite omboverapa aguã, azeite SENHOR pe nhomboaxaa aguã regua irãrã, heakuã porã va'e oapy pyrã,

<sup>9</sup> ita ônix, manto sacerdote pegua re ha'e ipexo regua re ita oĩ va'erã”, he'i.

### Êxodo 39.32-43

<sup>10</sup> “Peẽ kuery va'e regua toupa avakue mba'emo ojapo kuua va'e ha'e javi, tojapopa SENHOR ojapo uka va'ekue.

<sup>11</sup> Tojapo ombojerovia atyrã, ijao'iarã ha'e hi'ary guarã reve, ty'aĩ ikuai va'erã, yvyrapo avi, yvyra hi'ary rupi guarã, ijytarã hendarã reve,

<sup>12</sup> ha'e ayvu ryrurã ijyke rupi yvyra po'i'i oĩ va'e reve, teko vai ombogue atyrã ha'e cortina okẽ pygurarã avi,

<sup>13</sup> mesa ijyke rupi yvyra po'i'i ha'e hembiporurã ha'e javi oĩ va'e reve, ha'e mbojape SENHOR renonde omoĩ mbyrã,

<sup>14</sup> tataendy 'yrã hembiporu reve, tataendyrã, azeite tataendy rykuerã,

<sup>15</sup> altar heakuã porã va'e oapy atyrã, ijyke regua yvyra po'i'i reve, azeite SENHOR pe nhomboaxaa aguã regua, heakuã porã va'e oapy pyrã, ha'e ajukue ombojeroviaaty rokẽ reguarã,

<sup>16</sup> altar mba'emo oapy atyrã, hi'ary guarã ipokã rei va'e overa va'e guigua, ijyke regua yvyra po'i'i, hembiporu ha'e javi'i, mba'emo ojoi atyrã hendarã reve,

<sup>17</sup> ajukue okẽ regua oka rupi guarã, ijytarã henda reve, cortina oka rokẽ pygurarã,

<sup>18</sup> ombota pyrã ombojeroviaaty omoĩ atã aguã, ombota pyrã oka kora omoĩ atã aguã, ixãrã,

<sup>19</sup> henda iky'a e'ÿ va'e rupi ombo'eapo va'e kuery aorã, ha'e sacerdote Arão ha'e ta'y kuery ao iky'a e'ÿ va'erã, ha'e kuery sacerdote ikuiaia rupi ombo'eapo vy oiporu aguã”, he'i.

### Ogueruxea rupi mba'emo ogueru okuapyague

<sup>20</sup> Ha'e gui Israel kuery ha'e javive Moisés renonde gui oo ju ramo

<sup>21</sup> oĩa py ou avakue opy'a ha'e onhe'ẽ py mba'emo ome'ẽxeia oendu va'e ha'e javi. Ha'e va'e kuery ma SENHOR pe ome'ẽ va'erã ogueru oguy nhemboaty atyrã ojapoa aguã, opy rupi mba'emo ojapo va'e kuery oiporu va'erã, ha'e ao iky'a e'ÿ va'erã avi.

<sup>22</sup> Avakue ha'e kunhague avi ou, ikyre'ÿ va'e meme. Ogueru jegua, mba'emo ojee omoĩ va'ekue, kuã regua, poapy regua, ha'e opa mba'e porã ouro guigua. Avakue ha'e javive ogueru SENHOR pe ouro guigua ome'ẽ va'erã.

23 Hovy va'e oguereco va'e ha'e javi ogueru, ha'e gui púrpura, pytã va'e, ajukue iporãve va'e, kavara rague, vexa'i pirekue omopytã mbyre, ha'e yy rupi ikuai va'e pirekue guive ogueru.

24 Amongue ma ojapo mba'emo SENHOR pe ome'ẽ va'erã, prata guigua e'ŷ vy overa va'e guigua. Ha'e va'e ma oguerupa. Ha'e yvyra acácia ojou va'ekue ogueru okuapy opa marãguia ojapo pyrã.

25 Ha'e kunhague mba'emo ojapo kuua va'e voi mba'emo ogueru okuapy ha'e kuery ae opo py ojapo va'ekue, hovy va'e, púrpura, pytã va'e ha'e ajukue iporãve va'e.

26 Kunhague opy'a re mba'emo ojapoxea oĩ va'e ha'e javi ma kavara rague gui oipoka.

27 Huvixa kuery ma ita ônix ha'e ita sacerdote pegua manto ha'e ipexo regua ombojegua pyrã ogueru,

28 ha'e mba'emo heakuã porã va'e, azeite tataendy rykuerã, azeite SENHOR pe nhomboaxaa aguã regua, ha'e heakuã porã va'e oapy pyrã.

29 Ha'e rami py Israel kuery ogueruxea rupi ogueru SENHOR pe ome'ẽ va'erã. Avakue ha'e kunhague opy'a re ome'ẽxeia oendu va'e ogueru okuapy ome'ẽ va'erã, Moisés pe SENHOR ojapo uka va'ekue ha'e javi.

### *Êxodo 31.1-11*

30 Ha'e gui Moisés aipoe'i Israel kuery pe:

— Pendu ke, SENHOR oenoĩ hery rupi Judá regua Uri ra'y Bezalel, Hur ramymino.

31 Ha'e rami vy Nhanderuete Onhe'ẽ omonyẽ imbaraeterã, hi'arandurã ha'e oikuaapa aguã, opa mba'e ojapo kuua aguã rami,

32 ha'e mba'emo ra'angaa ojapo va'ekue rami ojapo aguã ouro, prata ha'e overa va'e gui,

33 ha'e ita omoĩ 'rã omoatyrõ aguã, yvyra gui mba'emo ojapo aguã, ha'e opa mba'e porã ojapo kuua aguã.

34 Ipy'a re omoĩ 'rã amboae kuery avi ombo'e aguã, Dã regua Aisamaque ra'y Aoliabe guive.

35 Ha'e kuery re omoĩ hi'arandurã mba'emo ojapo kuua ete aguã rami, haxyve va'e guive, ha'e hovy va'e py ajukue ombopara kuua aguã, púrpura py, pytã va'e py ha'e ajukue iporãve va'e py, ha'e oipokaa rupi ombo'eapo aguã. Ha'e rami py opa marã ojapo kuua, mba'emo ra'angaa ojapo va'ekue rami ae.

## 36

1 Ha'e rami py Bezalel ha'e Aoliabe ombo'eapo, avakue mba'emo ojapo kuua va'e ha'e javi reve. Ha'e kuery pe SENHOR oikuaaa uka ha'e omo'arandu henda iky'a e'ŷ va'e pyguarã ha'e javi ojapo kuua aguã, SENHOR ojapo ukaague rami meme.

### *Mba'emo apoarã kuery po py heta va'e kuery ome'ẽ va'ekue Moisés omboaxapaague*

2 Ha'e gui Moisés oenoĩ Bezalel ha'e Aoliabe, ha'e avakue mba'emo ojapo kuua va'e ha'e javi. Ha'e va'e kuery SENHOR omo'arandu vy ipy'a re omoĩ ovaẽ ha'e mba'emo ojapoxea.

3 Ha'e va'e kuery pe ae Moisés omboaxa Israel kuery ogueru ha'e ome'ẽ va'ekue, henda iky'a e'ŷ va'e pyguarã ojapo aguã. Ko'ẽ nhavõ Moisés-a py ha'e kuery ogueruve 'rã ome'ẽxeia rupi ome'ẽ va'e.

4 Ha'e ramo avakue hi'arandu va'e ma henda iky'a e'ŷ va'e pyguarã mba'emo ojapo 'rã va'ekue oeja ranhe vy oupa.

5 Ha'e vy aipoe'i okuapy Moisés pe:

— Heta va'e kuery tu ogueruve rima SENHOR ojapo ukaague rami rojapo 'rã va'ekue áryve — he'i.

6 Ha'e ramo Moisés ijayvu heta va'e kuery ikuaria ha'e javi rupi omombe'ua aguã. Ha'e vy aipoe'i uka:

— Avakue ha'e kunhague ma voi henda iky'a e'ŷ va'e pyguarã ome'ẽ va'erã ojapo ve'ŷ teīha'eve — he'i uka. Ha'e rami vy heta va'e kuery pe ijayvu mba'emo ndogueruvei aguã,

<sup>7</sup> mba'eta mba'emo ha'everã ma oĩ mba'emo ojapcaa aguã, hetave guive oĩ.

#### Êxodo 26.1-13

<sup>8</sup> Ha'e rami rã ombojerovia atyrã. Ha'e rami vy dez cortina ojapo ajukue iporãve va'e oipoka pyre guigua, ha'e hovy va'e, púrpura ha'e pytã va'e gui. Anjo ipepo va'e ra'angaa py ombojegua. Opa mba'e ojapo porã ete.

<sup>9</sup> Peteĩ-teĩ cortina ma doze metros raxa'i 'rã ipuku-a, ha'e rã ipya ma mokoĩ. Cortina ikuai va'e ma joo rami meme ipuku-a ha'e ipya.

<sup>10</sup> Peteĩ nhiruĩ cortina ma amboae ae re oje'a, ha'e hovai re peteĩ nhiruĩ ikuai va'e voi ha'e rami avi amboae ae re oje'a.

<sup>11</sup> Cortina ojokua ypy va'ekue apy re ma jokuaarã ojapo hovy va'e gui. Ha'ekue rami ae ju ojapo cortina ojokua va'ekue mboae apy re.

<sup>12</sup> Cinqüenta jokuaa ojapo peteĩ-teĩ cortina re, ha'e cinqüenta ju cortina mboae ikuai va'e japy re. Jokuaa ikuai va'e ma peteĩ-teĩ joexe-exei'i aguã oĩ.

<sup>13</sup> Ojapo avi cinqüenta ojopy aguã ouro guigua. Ha'e va'e py ma cortina ikuai va'e amboae ae re ombojepo'oi aguã, ombojeroviaaty peteĩ'i opyta aguã.

<sup>14</sup> Kavara pire gui ojapo avi cortina ombojeroviaaty áry rupi guarã, onze cortina.

<sup>15</sup> Ha'e va'e regua peteĩ-teĩ cortina puku-a ma treze metros raxa'i, ha'e rã ipya ma mokoĩ. Onze-ve cortina ma joo rami meme ipuku-a ha'e ipya.

<sup>16</sup> Peteĩ nhiruĩ cortina ma joe ojokua, ha'ekue rami ae ju mboapy meme hembyre va'ekue re.

<sup>17</sup> Ha'e gui cinqüenta jokuaa ojapo cortina ojokua ypy va'ekue apy rembe re.

<sup>18</sup> Overa va'e guigua ojapo avi cinqüenta ojopy aguã oo ao'ia ojokua aguã, ha'e javive peteĩ'i opyta aguã.

<sup>19</sup> Oo áry guarã ma ojapo vexa'i pirekue omopytã mbyre gui, ha'e rã amboae pirekue ma inhana e'ý va'e.

#### Êxodo 26.14-30

<sup>20</sup> Ombojeroviaaty mbotyarã ojapo avi yvyrape acácia gui, omopu'ã imo'amy aguã.

<sup>21</sup> Peteĩ-teĩ yvyrape ma quatro metros raxa'i ipuku-a, ha'e rã ipya ma meio metro raxa'i.

<sup>22</sup> Peteĩ-teĩ yvyrape re oĩ mokoĩ omoĩ aguã joa katy oo va'e. Ha'e rami ojapo yvyrape ombojeroviaaty mbotyarã ha'e javi.

<sup>23</sup> Yvyrape ombojeroviaaty mbotyarã ma vinte ojapo kuaray puku-a katy guarã.

<sup>24</sup> Ha'e gui vinte-ve yvyrape renderã prata guigua ojapo avi quarenta iguýry rupi omoña aguã. Peteĩ ipe va'e guýry hendarã mokoĩ oĩ, ha'e amboae ipe va'e guýry voi oĩ 'rã mokoĩ hendarã.

<sup>25</sup> Ha'e gui ombojeroviaaty rovai katy guarã ma vinte yvyrape ju ojapo kuaray apu'a'ia katy guarã.

<sup>26</sup> Hendarã ma quarenta oĩ prata guigua meme: peteĩ-teĩ yvyrape guýry ma mokoĩ oĩ hendarã, amboae guýry mokoĩ avi oĩ, ha'e ramive tema.

<sup>27</sup> Ombojeroviaaty yke kuaray oikea katy guarã ma mboapy meme yvyrape ju omopu'ã.

<sup>28</sup> Ha'e gui ombojeroviaaty apy katy guarã ma mokoĩ yvyrape ju omopu'ã jobaive reguarã.

<sup>29</sup> Ha'e va'e ma iguy rupi ndoje'ai. Ha'e rã hi'áry ma joe oje'a 'rã inhapyí va'e oĩ ypy va'e re. Ha'e rami omoĩ mokoĩ yvyrape ijapy katy guarã oĩ va'e.

<sup>30</sup> Ha'e rami oĩ oito-ve yvyrape henda prata guigua reve. Ha'e javi ma dezesseis oĩ hendarã: peteĩ-teĩ yvyrape guýry ma mokoĩ 'rã oĩ hendarã, ha'e amboae guýry ma mokoĩ ju 'rã oĩ.

<sup>31</sup> Imbotya mbyte rupi guarã ma yvyra po'i'i ojapo acácia gui: peteĩ nhiruĩ ma yvyrape ombojeroviaaty yke rupi guarã ojapo,

32 ha'e gui peteñ nhiruñ ju ma yvyrape hovai re oñ va'e peguarã, ha'e gui peteñ nhiruñ ju ombojeroviaaty kupe katy rupi yvyrape oñ va'e peguarã, kuaray oua katy.

33 Yvyra po'i'i ma yvyrape omopu'ã va'ekue mbyte rupi omboaxa amboae apy peve.

34 Yvyrape ikuai va'e ma ouro py onhovã, ha'e omoñ avi inhapyñ va'e ouro guigua. Ha'e va'e rupi ae omboaxa imoiny yvyra po'i'i. Yvyra po'i'i voi ouro py avi onhovã.

#### *Êxodo 26.31-37*

35 Okêrã ma ojapo avi ajukue hovy va'e gui, púrpura, pytã va'e ha'e ajukue iporãve va'e oipoka pyre gui. Ombojegua avi anjo ipopo va'e ra'angaa py, hembiapo kuaa va'e ojapo va'ekue.

36 Yvyra acácia gui ojapo avi irundy ijytarã, ha'e ouro py ju onhovã. ijopyarã ma ouro guigua avi, ha'e hendarã irundy ikuai, prata guigua meme.

37 Ojapo avi oo'i rokẽ mbotyarã hovy va'e gui, púrpura, pytã va'e, ha'e ajukue iporãve va'e oipoka pyre gui, ombopara kuaa va'e ojapo.

38 Cortina ytarã ma peteñ nhiruñ ojapo, ojopy aguã reve. Ijapy yvate katyguia, ha'e hembe 'y ma ouro py meme onhovã. Ha'e rã hendarã peteñ nhiruñ ikuai va'e ma overa va'e guigua.

## 37

#### *Êxodo 25.10-15*

1 Ayvu ryrurã ma Bezalel ojapo yvyra acácia gui. Ipuku-a ma peteñ metro raxa'i, ha'e rã ipya ha'e yvatea ma meio metro raxa'i meme.

2 Ouro ete'i py onhovã ipypy rupi ha'e hi'áry rupi. Ijyvýry rupi ma ouro guigua py ju ombojegua.

3 Irundy inhapyñ va'e ma ouro gui ojapo. Ha'e va'e ma hyru apy omoñ irundyve re: mokoñ inhapyñ va'e omoñ kyvõ katy, ha'e mokoñ ju ma hovai re.

4 Yvyra acácia gui ojapo avi yvyra po'i'i, ha'e ouro py ju onhovã.

5 Yvyra po'i'i ma hyru jovaive re omboaxa inhapyñ va'e oñ va'e rupi, hyru ogueraa aguã.

#### *Êxodo 25.17-22*

6 Imbotyarã ma ouro ete'i gui ojapo avi teko vai ombogue atyrã. Ipuku-a ma peteñ metro raxa'i, ha'e rã ipya ma meio metro raxa'i.

7 Ouro gui ojapo avi mokoñ anjo ipopo va'e ra'angaa. Ouro ombope pyre gui ojapo, ha'e teko vai ombogueaty apy jovaive re omoñ.

8 Peteñ anjo ra'angaa ma peteñ apy re omoñ, ha'e rã amboae ma hovai re. Ha'e peteñ'i regua gui ae ojapo teko vai ombogue atyrã ha'e anjo ipopo va'e jovaive re oñ va'erã.

9 Anjo ra'angaa ma opepo py ojao'i teko vai ombogueaty. Peteñ-teñ joa katy hova, ha'e teko vai ombogueaty re oma'ë.

#### *Êxodo 25.23-30*

10 Mesa ma yvyra acácia gui avi ojapo. Ipuku-a ma peteñ metro, ipya ma meio metro, ha'e rã yvatea ma meio metro raxa'i.

11 Ouro ete'i py onhovã, ha'e ijyvýry rupi ombojegua.

12 Ijyvýry rupi ojapo avi hembe 'yrã irundy kuã ipya va'e, ha'e hembe 'y rupi ju ombojegua.

13 Ijapy irundyve re omoñ irundy inhapyñ va'e. Ouro omboyku vy ojapo, ha'e omoñ irundyve hetyma oña re.

14 Inhapyñ va'e ma hembe 'y katy'i omoñ yvyra po'i'i oaxa aguã, mesa ogueraa aguã.

15 Yvyra po'i'i ma acácia guigua, ha'e ouro py ju onhovã, mesa ogueraa aguã.

16 Mesa áry tembiporu oñ va'erã ma ouro ete'i gui ojapo: hy'a, heakuã porã va'e ryrurã, hy'a kua, ha'e tigela mba'emo rykue ome'ëmby ryrurã.

#### *Êxodo 25.31-39*

17 Tataendy 'yrã ma ouro ete'i omoatyrõ mbyre gui ojapo. Hapytarã, hakãrã, tykue ryrurã, ijapu'a va'e ha'e ipoty ikuai va'erã ha'e javi ma peteñ'i gui meme ojapo.

<sup>18</sup> Ijyke gui ma mboapy meme hakã oẽ oiny. Peteĩ yke gui oẽ 'rã mboapy, ha'e hovai gui ma mboapy avi oẽ.

<sup>19</sup> Peteĩ-teĩ rakã re ma mboapy tykue ryru oĩ amêndoа ramigua, ha'e gui peteĩ ijapu'a va'e ha'e peteĩ yvoty. Amboae hakã gui ma ha'ekue rami ae ju mboapy tykue ryru amêndoа ramigua oẽ, peteĩ ijapu'a va'e ha'e peteĩ yvoty. Ha'e rami ae ikuai mboapy meme hakã tataendy 'y gui oẽ oiny va'e.

<sup>20</sup> Tataendy 'y ete re ma irundy tykue ryru oĩ amêndoа ramigua, ijapu'a va'e ha'e ipoty reve.

<sup>21</sup> Mokoĩ rakã ixugui oẽ oiny va'e nhavõ re oĩ 'rã peteĩ ijapu'a va'e hendarã. Amboae mokoĩ rakã ixugui oẽ oiny va'e re ma ijapu'a va'e mboae ju oĩ hendarã. Ha'e rami ae tema ojapo mboapy meme hakã tataendy 'y gui oẽ oiny va'e.

<sup>22</sup> Ijapu'a va'e ha'e hakã hexe oĩ va'e ma peteĩ'i gui ae ojapo. Ha'e javi ma peteĩ'i guigua meme, ouro ete'i omoatyrõ mbyre gui ojapo.

<sup>23</sup> Ojapo avi sete tataendy. Tata moendya ha'e imboguea ma ouro guigua meme.

<sup>24</sup> Peteĩ poyikue ouro ete gui oiporu tataendy 'yrã ha'e hembiporu ha'e javi reve ojapo aguã.

#### Êxodo 30.1-10

<sup>25</sup> Altar heakuã porã va'e oapy atyrã ma yvyra acácia gui ojapo. Ipuku-a ha'e ha'e ipya ma meio metro meme, ipuku-a oĩ va'e'ý ramo. Ha'e rã yvatea ma peteĩ metro rai'i. Hexeve hakua ikuai va'e voi peteĩ'i gui ae avi.

<sup>26</sup> Ouro ete'i gui onhovã hi'áry ha'e ijyvýry rupi, hakua ikuai va'e guive. Ijyvýry rupi ma ouro guigua py ombojegua.

<sup>27</sup> Ombojeguaague guýry rupi ojapo avi mokoĩ inhapyí va'e ouro guigua. Jovaive re ojapo. Ha'e va'e rupi ma omboaxa yvyra po'i'i altar ogueraa aguã.

<sup>28</sup> Acácia gui yvyra po'i'i ojapo ma vy ouro py onhovãmba.

#### Êxodo 30.22-38

<sup>29</sup> Ojapo avi azeite iky'a e'ý va'e SENHOR pe nhomboaxaa aguã regua. Heakuã porã va'e oapy atyrã avi ojapo, heakuã porã va'e apoa ojapo va'ekue.

## 38

#### Êxodo 27.1-8

<sup>1</sup> Altar mba'emo oapy atyrã ojapo avi yvyra acácia gui. Ipuku-a ma mokoĩ metros raxa'i, ha'e ipya ha'e rami ae ju, ipuku-a oĩ va'e'ý ramo. Ha'e rã yvatea ma peteĩ metro raxa'i.

<sup>2</sup> Ijapy irundyve va'e re ma omoĩ irundy hakuarã. Ha'e va'e ma altar reve peteĩ'i gui meme ojapo. Overa va'e py ju onhovãmba.

<sup>3</sup> Tembiporu altar rupi oiporua va'erã ma ojapo avi opa marâguia: tanhimbu ryrurã, pá iky'a'oarã, hy'arã, ikuxa rakua ha'e tapyí ryrurã. Ha'e va'e ha'e javi ma overa va'e gui meme ojapo.

<sup>4</sup> Altar reguarã ma ojapo peteĩ ipokã rei va'e overa va'e gui kya xã ramigua. Ha'e va'e ma altar rye py rupi oĩ altar mbyte rupi peve ovaẽ.

<sup>5</sup> Ipokã rei va'e overa va'e guigua apy irundyve reguarã ma ojapo irundy inhapyí va'e. Ha'e va'e rupi ma omboaxa 'rã yvyra po'i.

<sup>6</sup> Yvyra po'i ma acácia gui ojapo, ha'e overa va'e py ju onhovã.

<sup>7</sup> Ha'e va'e ma inhapyí va'e rupi omboaxa altar jovaive re, ogueraa aguã. Inhyvyí va'erã ma yvyrape gui ojapo.

#### Êxodo 30.17-21

<sup>8</sup> Overa va'e gui ojapo yy mbotyarã, mba'emo ojoia aguã. Hendarã voi ojapo overa va'e gui avi. Oguy nhemboaty oĩaty rokẽ py kunhague ombo'eapo okuapy va'e epéko ome'ẽ va'ekue gui ojapo.

#### Êxodo 27.9-19

**9** Okarã ma ojapo avi oo regua kuaray ipuku-a katy. Cortina oka korarã oĩ va'e ma ajukue iporãve va'e oipoka pyre gui ojapo. Ipuku-a ma quarenta e cinco metros.

**10** Ijytarã ma vinte ojapo, ha'e hendarã ma overa va'e guigua meme. Ha'e rã ijyta re ty'aĩ oĩ va'e, ha'e hi'áry rupigua ma prata guigua.

**11** Ha'e rami ae avi kuaray ijapu'a ia katy voi oĩ cortina quarenta e cinco metros ipuku-a va'e. Ijytarã ma vinte ojapo, ha'e vinte avi ojapo hendarã, overa va'e guigua meme. Ijyta re ty'aĩ ha'e hi'áry rupigua oĩ va'e voi prata guigua.

**12** Ha'e rã kuaray oikea katy cortina oĩ va'e ma vinte e dois metros ipuku-a va'e. Ijytarã ma dez ojapo, ha'e ijyta renderã ma dez avi. Ijyta re ty'aĩ ha'e hi'áry rupigua oĩ va'e ma prata guigua meme.

**13** Kuaray oua katy cortina oĩ va'e ma vinte e dois metros ipuku-a va'e.

**14** Ha'e rã oikea rexei cortina oĩ va'e ma sete metros ipuku-a. Ijyta ma mboapy, ha'e henda voi mboapy.

**15** Oka py oikea rovai katy ma cortina puku-a sete metros, oikea rovaise katy joo rami ipuku-a. Ijyta ma mboapy, ha'e henda voi mboapy avi.

**16** Oka yvýry rupi cortina oĩ va'e ha'e javi ma ajukue iporãve va'e oipoka pyre gui ojapo.

**17** Ijyta renderã oĩ va'e ma overa va'e guigua meme. Ha'e rã ijyta re ty'aĩ ha'e hi'áry rupigua oĩ va'e ma prata guigua.

**18** Ajukue oka rokẽ regua ma ajukue ombopara va'e rembiapo. Hovy va'e gui, púrpura, pytã va'e ha'e ajukue iporãve va'e oipoka pyre gui ojapo. Ipuku-a ma nove metros. Yvatea ha'e ipya ma dois metros raxa'i meme, oka rupi cortina ikuai va'e re oa'ãague rami vy.

**19** Ijyta irundy va'e ha'e ijyta renda irundy va'e ma overa va'e gui meme ojapo. Ha'e rã hexegua ty'aĩ ma prata guigua. Ijapy yvategua, ha'e hi'áry ha'e javi prata guigua.

**20** Ha'e rã ombota pyrã ombojeroviaaty omoõ atã aguã, ha'e oka yvýry rupi oĩ va'e regua ma guive rã overa va'e guigua meme.

### *Mba'emo ombojeroviaaty regua oipapa ha'e oa'ãague*

**21** Pova'e nunga oĩ ombojeroviaaty Nhanderuete ayvu oĩa ropy. Moisés aipoe'iague rami vy sacerdote Arão ra'y Itamar oipapa, levita kuery ha'e py omba'eapo aguã.

**22** Judá regua Uri ra'y Bezalel, Hur ramymino va'e ojapapa Moisés pe SENHOR ojapo uka va'ekue ha'e javi.

**23** Hexeve ma Dã regua Aisamaque ra'y Aoliabe omba'eapo. Ha'e va'e ma mba'emo re opena va'e, mba'emo ra'angaa ombopara kuaa, ha'e ajukue ombopara va'e hovy va'e py, púrpura, pytã va'e ha'e ajukue iporãve va'e py.

**24** Henda iky'a e'ŷ va'e pygurarã ouro mba'emo ojapoa rupi oiporu va'ekue, ouro ome'ẽ mbyre oa'ãa rã mil quilos rãnda'u, henda iky'a e'ŷ va'e py oiporua va'e rami ae.

**25** Ha'e rã prata guery ombopara uka va'e kuery ome'ẽ va'ekue ha'e javi ma três mil quilos, henda iky'a e'ŷ va'e py oiporua va'e rami.

**26** Guery ombopara uka va'e vinte ma'etŷ va'e guive tujakue peve peteĩ-teĩ ome'ẽ peteĩ hatã'i va'e seis grama va'e, henda iky'a e'ŷ va'e py oiporua va'e rami. Ome'ẽ va'ekue ha'e javi ma seiscentos e três mil, quinhentos e cinqüenta.

**27** Prata ma três mil e quinhentos quilos oiporu mba'emo iky'a e'ŷ va'e py oĩ va'e renderã ojapo aguã, ha'e imbotya renderã guive. Cem ojapo hendarã, peteĩ-teĩ re ma trinta e cinco quilos prata oiporu.

**28** Ijyta re mba'emo ojopy aguã ojapo vy oiporu vinte quilos raxa'i, ha'e gui ijapy yvategua onhovã, ha'e hi'áry rupigua ojapo aguã.

**29** Ha'e gui overa va'e ha'e kuery ome'ẽ va'ekue oa'ãa rã dois mil e quinhentos quilos.

**30** Ha'e va'e gui ma ojapo oguy nhemboaty oĩaty rokẽ yta renderã, altar overa va'e guigua, ipokã rei va'e overa va'e guigua, ha'e altar py oiporu va'erã ha'e javi.

<sup>31</sup> Overa va'e gui ojapo avi oka yvýry rupi kora oĩ va'e renderã, oka rokẽ yta renderã, ombota pyrã ombojeroviaaty moĩ atãarã ha'e javi, ha'e oka yvýry rupi guarã ombota pyrã va'e ha'e javi.

## 39

### *Êxodo 28.1-43*

<sup>1</sup> Hovy va'e, púrpura ha'e pytã va'e gui ojapo avi ao iporãve va'e. Ha'e va'e ma henda iky'a e'ŷ va'e rupi ombo'e apo va'e onhemonde va'erã. Ojapo ao iky'a e'ŷ va'e Arão peguarã, Moisés pe SENHOR ojapo ukaague rami vy.

<sup>2</sup> Manto sacerdote peguarã ma ojapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui.

<sup>3</sup> Ouro ombope porã'i vy ojapo ipererõ'i va'e, ha'e ojaya po'i'i, oikutu aguã hovy va'e reve, púrpura, pytã va'e ha'e ajukue iporãve va'e reve, ajukue ombopara va'e rembiapo.

<sup>4</sup> Ojapo avi mokoõ axi'y áry guarã, manto apy mokoõve ojopy aguã, ha'e rami joe oje'a oiny.

<sup>5</sup> Iku'akuaarã voi ojapo porã, ha'e omoõ manto sacerdote pegua áry rupi. Ha'e va'e ma manto reve joo rami ae ojapo ouro gui, hovy va'e, púrpura, pytã va'e ha'e ajukue iporãve va'e oipoka pyre gui, Moisés pe SENHOR aipoe'iague rami vy.

<sup>6</sup> Ita ônix omoatyrõ vy omoõ hendarã ouro guigua re. Ha'e va'e re ma ombopara Israel kuery rery, kuã reguarã omboparaa rami avi.

<sup>7</sup> Ha'e va'e ita mokoõve ma manto sacerdote pegua axi'y áryguia re omoõ, Israel kuery re ima'endu'aa aguã, Moisés pe SENHOR aipoe'iague rami vy.

<sup>8</sup> Pexo regua ma manto sacerdote pegua rami avi ojapo porã ete. Ouro gui ojapo, ha'e hovy va'e, púrpura, pytã va'e ha'e ajukue iporãve va'e oipoka pyre gui.

<sup>9</sup> Pexo regua ma ijapy irundy va'e, mokoõ va'e ojapo. Ipuku-a ha'e ipya ma joo rami peteõ po pukukue.

<sup>10</sup> Ha'e va'e re ma omoõ ita peteõ-teõ renderã ojapo pyre reve. Ita ma irundy ryxy omoõ. Jypy'igua ma sárdio, topázio ha'e carbúnculo.

<sup>11</sup> Mokoõ ryxya ma esmeralda, safira ha'e diamante.

<sup>12</sup> Mboapy ryxya ma jacinto, ágata ha'e ametista.

<sup>13</sup> Irundy ryxya ma berilo, ônix ha'e jaspe. Peteõ-teõ renderã ojapo pyre ma ouro guigua meme.

<sup>14</sup> Ha'e javi vy doze ita oĩ, Israel ra'y kuery rery doze ikuai va'e rami avi. Kuã regua rami ombopara pyre. Peteõ-teõ re oĩ peteõ rery, doze regua rery ikuai va'e rami vy.

<sup>15</sup> Pexo regua omoxã corrente'i oipopõ mbyre py, ouro ete'i guigua.

<sup>16</sup> Ixã renderã ma mokoõ ojapo pexo regua re, mokoõ inhapyï va'e voi, ouro guigua meme. Mokoõve inhapyï va'e ma pexo regua apy re omoõ.

<sup>17</sup> Pexo regua apy re mokoõve inhapyï va'e oĩ va'e rupi omoõ mokoõve corrente oipopõ mbyre ouro guigua.

<sup>18</sup> Mokoõve corrente oipopõ mbyre apy mboae ma omovaõ mokoõve hendarã ojapo pyre re. Ha'e va'e ju omoõ manto sacerdote pegua axi'y áryguia re, henonde katy.

<sup>19</sup> Ojapove ju mokoõ inhapyï va'e ouro guigua. Ha'e va'e ma omoõ mokoõve pexo regua apy re, hembe oĩ ypyve va'e re omoõ manto sacerdote pegua rexei.

<sup>20</sup> Ojapove ju mokoõ inhapyï va'e ouro guigua, ha'e omoõ mokoõve manto sacerdote pegua axi'y áryguia re, iguýry, manto sacerdote pegua renonde re, ombojaague oĩ va'e yvy'iry, ku'akuua ojapo porã mbyre áry rupi.

<sup>21</sup> Ha'e gui pexo regua re inhapyï va'e oĩ va'e ma ojokua inhapyï va'e manto sacerdote pegua re oĩ va'e re, hi'áry rupi. Peteõ xã hovy va'e py ojokua, manto sacerdote pegua ku'akuua ojapo porã mbyre áry rupi opyta aguã. Ha'e rami vy pexo regua oja'o e'ŷ aguã manto gui, Moisés pe SENHOR aipoe'iague rami vy.

<sup>22</sup> Manto sacerdote pegua reve guarã ojapo avi kamixa puku árygua oipopẽ mbyre gui, hovy va'e guigua.

<sup>23</sup> Ha'e va'e mbyte py oĩ ijaju'y kuarã. Ijyvýry rupi omoana, oxoro e'ŷ aguã.

<sup>24</sup> Kamixa puku árygua rembe ha'e javi ombojegua yvyra'a ra'angaa py. Hovy va'e, pytã va'e ha'e ajukue iporãve va'e oipoka pyre gui ojapo.

<sup>25</sup> Oparã'i va'e voi ojapo ouro ete'i gui. Ha'e va'e ma omoĩ yvyra'a ra'angaa ikuai va'e mbyte rupi, hembe ha'e javi rupi.

<sup>26</sup> Peteĩ oparã'i va'e, ha'e gui peteĩ yvyra'a ra'angaa, ha'e gui amboae oparã'i va'e, ha'e amboae yvyra'a, ha'e rami ae tema kamixa puku árygua rembe ha'e javi rupi oĩ aguã. Ha'e va'e py onhemonde 'rã mba'emo ojapo oikovya rupi, Moisés pe SENHOR aipoe'iague rami vy.

<sup>27</sup> Kamixa pukurã ma ajukue iporãve va'e gui ojapo, Arão ha'e ta'y kuery peguarã.

<sup>28</sup> Akã reguarã ma ajukue iporãve va'e gui avi ojapo, ha'e akã jokuaa ajukue iporãve va'e gui, ha'e gui kaxõ ajukue iporãve va'e oipoka pyre gui ojapo.

<sup>29</sup> Ha'e rã ku'akuua ma ajukue iporãve va'e oipoka pyre gui ojapo, hovy va'e, púrpura ha'e pytã va'e gui. Ajukue ombopara va'e rembiapo, Moisés pe SENHOR aipoe'iague rami vy.

<sup>30</sup> Akã jokua iky'a e'ŷ va'e reguarã ma ojapo avi ipererî'i va'e. Ouro ete'i gui ojapo. Ha'e va'e re ma ombopara "SENHOR pegua iky'a e'ŷ va'e" he'ia va'e, kuã reguarã omboparaa rami avi.

<sup>31</sup> Ha'e gui akã regua áry ipererî'i va'e ojokua aguã ma peteĩ ixã hovy va'e py oiporu, Moisés pe SENHOR aipoe'iague rami vy.

### Êxodo 35.10-19

<sup>32</sup> Ha'e rami vy ojapopa ombojeroviaaty py mba'emo oĩ va'erã, oguy nhemboaty oĩaty reguarã. Israel kuery ojapopa, Moisés pe SENHOR ojapo ukaague rami vy.

<sup>33</sup> Ha'e gui Moisés-a py ogueru avi ombojeroviaaty, ijaõ'iarã, opy guarã ha'e javive, ojopy aguã, yvyrape, hi'áry rupi guarã, ijytarã, hendarã,

<sup>34</sup> ijaõ'iarã vexa'i'rague omopytã mbyre guigua, hi'áry guarã pirekue inhana e'ŷ va'e guigua, ajukue okẽ reguarã,

<sup>35</sup> Nhanderuete ayvu ryru yvyra po'i'i reve, imbotya teko vai ombogue atyrã,

<sup>36</sup> mesa opa marãguia hembiporu reve, mbojape SENHOR renonde omoĩ mbyrã,

<sup>37</sup> tataendy 'yrã ouro ete'i gui ojapo va'ekue hataendy reve, ha'e tataendy hendarã py porã oĩ hembiporu ha'e javi reve, azeite tataendy rykuerã,

<sup>38</sup> altar ouro guigua avi, azeite SENHOR pe nhomboaxaa aguã regua, heakuã porã va'e oapy pyrã, ajukue oo rokẽrã,

<sup>39</sup> altar overa va'e guigua, ipokã rei va'e overa va'e guigua hembiporu ha'e javi reve, ha'e hy'a guaxu henda reve,

<sup>40</sup> cortina oka korarã, ijyta hendarã ojapo pyre reve, ajukue oka rokẽrã, ixãrã, ombota pyrã va'e, ombojeroviaaty re oiporu va'erã va'e ha'e javi, oguy nhemboaty oĩaty rupi guarã,

<sup>41</sup> ao iporãve va'e henda iky'a e'ŷ va'e py omba'epo va'e kuery oiporu va'erã, ao iky'a e'ŷ va'e sacerdote Arão peguarã, ha'e ta'y kuery aorã sacerdote ikuai aguã.

<sup>42</sup> Moisés pe SENHOR aipoe'iague rami vy Israel kuery ojapopa ma.

<sup>43</sup> Ha'e ramo Moisés mba'emo ojapo pyre oexa rã SENHOR ojapo ukaague rami meme ojapopa ra'e. Ha'e rami ojapopa ma ramo Moisés ogueroayvu porã.

## 40

### Moisés pe SENHOR omopu'ã ukaague ombojerovia atyrã ojapo pyre

<sup>1</sup> Ha'e gui SENHOR aipoe'i Moisés pe:

<sup>2</sup> — Jaxy jypy'ia re ijypy'ia ára ma remopu'ã 'rã imo'amy oguy pembojerovia vy penhemboaty aguã.

<sup>3</sup> Ha'e va'e py ma remoĩ 'rã xeayvu ryru, ha'e remboty 'rã ajukue okẽ reguarã reipyo vy.

<sup>4</sup> Remoinge 'rã mesa, ha'e hi'áry mba'emo remoĩ 'rã oĩ aguã py porã. Opy remopu'ã avi 'rã imo'amy tataendy 'y, ha'e remoendy 'rã hataendy.

<sup>5</sup> Ha'e gui altar ouro guigua heakuã porã va'e oapy atyrã ma xeayvu ryru renonde 'rã remoĩ. Ha'e gui mae ma remoĩ 'rã ajukue ombojeroviaaty rokẽrã.

<sup>6</sup> Ha'e gui altar mba'emo oapy atyrã remoĩ 'rã oguy ombojeroviaaty ha'e nhemboaty oĩaty rokẽ rexei'i.

<sup>7</sup> Ha'e gui hy'a guaxu ju 'rã remoĩ oguy nhemboaty oĩaty ha'e altar mbyte py. Ha'e rami vy remonyẽ 'rã imoiny yy.

<sup>8</sup> Ijyvýry ma remopu'ã 'rã imo'amy oka korarã, ha'e remoĩ 'rã ajukue oka rokẽrã.

<sup>9</sup> — Ha'e guiazeite xee SENHOR pe nhomboaxaa aguã regua reru vy remoĩ 'rã ombojeroviaaty ha'e hexegua ikuai va'e ha'e javi re. Ha'e rami py remboaxapa 'rã xevy guarã, hexegua ha'e javi reve. Ha'e ramo opyta 'rã iky'a e'ý va'e.

<sup>10</sup> Altar mba'emo oappyat re avi 'rã azeite remoĩ, hembiporu ha'e javi reve, altar xee SENHOR peguarã remboaxa vy. Ha'e ramo altar opyta 'rã iky'a e'ý ete va'e.

<sup>11</sup> Azeite remoĩ 'rã hy'a guaxu re, henda reve, xevy guarã remboaxa vy.

<sup>12</sup> Ha'e gui rejapo 'rã Arão ha'e ta'y kuery oguy nhemboaty oĩaty rokẽ re onhembojapa aguã rami. Ha'e py ma rejoi 'rã yy py.

<sup>13</sup> Arão remonhemonde 'rã ao iky'a e'ý va'e py, ha'e hexe remoĩ 'rã azeite, xevyguia sacerdote-rã remboaxa vy.

<sup>14</sup> Ha'e gui ta'y kuery ju 'rã remonhemboja, ha'e kuery re avi remoĩ aguã kamixa puku.

<sup>15</sup> Ha'e kuery re ju remoĩ 'rã azeite tuu re remoĩague rami, ha'e kuery voi xevyguia sacerdote ikuai aguã. Ha'e kuery re azeite remoĩ rire hamymino kuery voi araka'e rã peve ha'eve 'rã sacerdote ikuai aguã — he'i.

### *Ombojerovia atyrã omopu'ã imo'amyague*

<sup>16</sup> Ha'e ramo Moisés ojapopa SENHOR ojapo ukaague rami meme. Ha'ekue rami ae ojapo.

<sup>17</sup> Mokoĩ ma'etõa py, jaxy ijypy'i ouvya py, jypy'ia ára py ma omopu'ãa imo'amy ombojerovia atyrã.

<sup>18</sup> Ombojerovia atyrã Moisés omo'ã aguã omoĩ hendarã, omopu'ã imo'amy yvyrape, peteĩ-teĩ re omoĩ hi'áry rupigua, ha'e gui omopu'ã imo'amy ijytarã.

<sup>19</sup> Ha'e gui ombojeroviaaty áry rupi oipyo ijao'iarã, ha'e hi'áry rupi guarã avi omoĩ, Moisés pe SENHOR ojapo ukaague rami.

<sup>20</sup> Ha'e vy itape Nhanderuete ayvu oĩa ogueru vy omoĩ hyrurã ojapo pyre py. Hyru yke re omoĩ avi yvyra po'i'i. Hyru áry ma teko vai mbogue atyrã omoĩ.

<sup>21</sup> Ha'e gui ayvu ryru ma ombojeroviaaty py ogueroike vy okẽrã oipyo ajukue. Ha'e rami vy omboty ayvu ryru, Moisés pe SENHOR ojapo ukaague rami vy.

<sup>22</sup> Ha'e gui mesa ju omoĩ oguy nhemboaty oĩaty py, ombojeroviaaty regua kuaray puku-a katy, ajukue okẽ regua kyvõ rupi, oka katy.

<sup>23</sup> Ha'e va'e áry hendarã py porã omoĩ mbojape iky'a e'ý va'e SENHOR renonde oĩ aguã, Moisés pe SENHOR ojapo ukaague rami.

<sup>24</sup> Tataendy 'y avi omoĩ oguy nhemboaty oĩaty py, mesa renonde, ombojeroviaaty regua kuaray oua katy.

<sup>25</sup> Ha'e rami vy SENHOR renonde omoatyrõ tataendy, Moisés pe SENHOR ojapo ukaague rami vy.

<sup>26</sup> Altar ouro guigua ma oguy nhemboaty oĩaty py avi omoĩ, ajukue okẽ regua rexei.

<sup>27</sup> Hi'áry ma heakuã porã va'e omoendy, Moisés pe SENHOR ojapo ukaague rami vy.

<sup>28</sup> Ha'e gui ombojeroviaaty rokẽrã ju ajukue oipyo imoiny.

**29** Ha'e gui altar mba'emo oapyaty ma oguyombojeroviaaty py omoñ, ha'e nhemboaty oñaty rokẽ py ae. Ha'e rami vy hi'áry mba'emo oapy vy ome'ẽ, mba'emo ra'yigue guive, Moisés pe SENHOR ojapo ukaague rami vy.

**30** Ha'e gui hy'a guaxu ju omoñ oguy nhemboaty oñaty ha'e altar mbyte. Ha'e va'e omonyẽ yy ojejoia aguã.

**31** Ha'e va'e py ma Moisés, Arão ha'e ta'y kuery ojepoei ha'e ojepyei 'rã

**32** oguy nhemboaty oñaty py oike ta vy, ha'e altar re onhemboja vy, Moisés pe SENHOR ojapo ukaague rami vy.

**33** Ombojeroviaaty ha'e altar yvýry rupi omopu'ã avi imo'amy oka korarã. Kora rokẽrã ma ajukue oipyo. Ha'e rami py Moisés ojapo 'rã va'e ojapopa.

*Números 9.15-23*

**34** Ha'e gui oguy nhemboaty oñaty rupi arai ojao'ipa. Ha'e ramo ombojeroviaaty ropy rupi tynyémba SENHOR rexakãa.

**35** Moisés eteve voi ndoike reguai ranhe oguy nhemboaty oñaty py, hi'áry rupi arai opyta, ha'e ombojeroviaaty SENHOR rexakãa tynyé teria ja.

**36** Ombojeroviaaty áry gui arai opu'ã ma rire mae ma Israel kuery oguatave ju ikuaiague gui. Ha'e rami oiko kuerei 'rã ha'e kuery oguataa ha'e javi rupi.

**37** Ha'e rã arai opu'ã e'ÿa ja ma ha'e kuery ndoguatai 'rã, opu'ãa ára anho.

**38** Ara py ma SENHOR guigua arai ojekuaa 'rã ombojeroviaaty áry. Ha'e rã pyávy ma hi'áry ojekuaa 'rã tata, Israel kuery ha'e javi oexaa py, ha'e kuery oguataa ha'e javi rupi.

## Levítico mboapya kuaxia Moisés ombopara va'ekue

## Levítico mboapya kuaxia Moisés ombopara va'ekue

Tery Levítico ma “Levita kuery pegua” he’ia. Mba’eta Nhanderuete oenoī Levi ramymino kueryombojeroviaaty rupi ombo'eapo aguā. Amongue ma sacerdote-rā omoī Nhanderuete pe mymba ojuka vy oapy reve omboaxa aguā, ha'e e'ŷ vy amboae nunga: nhandy, mba'emo aju. Moisés ryke'y Arão ma jypygua sacerdote oiko raka'e. Ha'e rā levita kuery mboae ma sacerdote pytyvōarā ikuai ombojeroviaaty rupi.

Sacerdote kuery ha'e levita kuery ha'e javi ma Nhanderuete renonde iky'a e'ŷ va'erā omoña raka'e. Aipoe'i: “Xee Senhor ae Egito yvy gui penenoëmba va'ekue, Penderuete aiko aguā. Ha'e nunga rupi iky'a e'ŷ va'e 'rā peiko, mba'eta xee ma iky'a e'ŷ va'e” (11.45). Ha'e rami avi Israel kuery pavē pe ju aipoe'i: “Iky'a e'ŷ va'e 'rā peiko xevy guarā, mba'eta xee Senhor iky'a e'ŷ va'e aiko ramo, ha'e yvy regua kuery mbyte gui roipe'a xevy guarā ae pendekuai aguā”, he'i (20.26). Ha'e va'e ayvu ma Nhanderuete pe jaiko va'e ha'e javi peguarā.

Mbonykue rei e'ŷ Nhanderuete ojapo uka vy aipoe'i: “Xee ma Senhor”: “Pendekuai 'rā xeayvua aeja va'ekue ha'e javi rupi, pejapopa 'rā ajapo uka va'ekue. Xee ma Senhor”, he'i (19.37). Ha'e va'e ayvu ma jajererokyje aguā oī, mba'eta Iky'a e'ŷ ha'e Ipo'akapa va'e pegua jaiko.

### *Oapy vy ome'ẽmby regua*

<sup>1</sup> SENHOR oguy nhemboaty oīaty gui oenoī Moisés. Ha'e vy aipoe'i ixupe:

<sup>2</sup> — Aipo're Israel kuery pe: SENHOR pe mba'emo peme'ẽ va'erā peruxe vy penerymba vaka e'ŷ vy vexa'i 'rā peru.

<sup>3</sup> — Xapy'a rei peapy vy peme'ẽxe vy mymba ava ivaikue rei e'ŷ va'e 'rā peru.\* Oguy nhemboaty oīaty rokē peve 'rā peru, SENHOR renonde pendejou porā aguā.

<sup>4</sup> Ime'ẽa ma mymba ome'ẽ va'erā akā áry opo omoī'rā, hekoria SENHOR ojopy vy ojejavya ojao'i aguā.

<sup>5</sup> Ha'e rire ma vaka ra'y ojuka 'rā SENHOR renonde. Ha'e gui huguykue ma Arão ra'y kuery sacerdote ikuai va'e oexa uka vy omboayvipa 'rā altar oguy nhemboaty oīaty rokē rexei'i oī va'e yvýry rupi.

<sup>6</sup> Ha'e gui oapy vy ogueru pyre oipiropa vy omboa'ypa 'rā.

<sup>7</sup> Sacerdote Arão ra'y kuery omoendy 'rā tata altar áry, ha'e tata py omoīve ju 'rā xakā.

<sup>8</sup> Ha'e gui xakā altar áry tata reve oī va'e py ma Arão ra'y kuery sacerdote ikuai va'e omoī avi 'rā mymba omboa'y va'ekue, inhakāgue, ikyrakue voi.

<sup>9</sup> Ha'e rā hyekue ha'e hetymague ma sacerdote kuery ojoi 'rā yy py. Ha'e gui mae 'rā oapy altar áry. Ha'e nunga ma oapy vy ome'ẽmby, heakuā porā rā SENHOR ojou porā aguā.

<sup>10</sup> — Xapy'a rei mymba reapy vy reme'ẽ va'erā ma kyrīve va'e, vexa'i e'ŷ vy kavara ri reru vy ma ava meme 'rā reru ivaikue rei e'ŷ va'e.

<sup>11</sup> Ha'e va'e ma SENHOR renonde ojukaa 'rā altar yvýry kuaray ijapu'a'ia katy. Huguykue ma Arão ra'y kuery sacerdote ikuai va'e omboayvipa 'rā altar yvýry ha'e javi rupi.

<sup>12</sup> Ha'e gui omboa'ypa 'rā, inhakāgue, ikyrakue voi. Ha'e vy sacerdote omoī porā'i 'rā xakā altar áry tata oī va'e py.

<sup>13</sup> Ha'e rā hyekue ha'e hetymague ma ojoi 'rā yy py. Ha'e nungakue ha'e javi sacerdote ogueru vy oapypa 'rā altar áry. Ha'e nunga voi ma oapy vy ome'ẽmby, heakuā porā rā SENHOR ojou porā aguā.

\* <sup>1:3</sup> Judeu kuery mba'emo oapy reve ome'ẽ 'rā Nhanderuete omboete aguā, ha'e'ŷ vy ojejavyague ombogue uka aguā, e'ŷ vy Nhanderuete pe ete oikoa oikuaa uka aguā.

**14** — Ha'e gui xapy'a rei SENHOR pe reapy vy reme'ẽ va'erã guyra ri vy ma reru 'rã pyku'i'i e'ỹ vy apykaxu xii.

**15** Ha'e gui altar oĩa py sacerdote ogueru vy opoapẽ py omopẽ 'rã ijaju'y kãgue, ipire omundo e'ỹ re. Ha'e vy oapy 'rã altar áry. Ha'e rã huguykue ma omboxyry 'rã altar yvýry rupi.

**16** Ha'e rã hi'ai hague reve omboi vy omombo 'rã altar kuaray oua katy tanhimbu oĩa py.

**17** Ha'e vy ipopo guive omondoro 'rã omboa'y e'ỹ re. Ha'e vy sacerdote oapypa 'rã altar áry, xakã tata py itui va'e áry. Ha'e nunga voi oapy vy ome'ẽmby, heakuã porã rã SENHOR ojou porã aguã.

## 2

### *Mba'emo aju guigua ome'ẽmby regua*

**1** — Ha'e gui xapy'a rei amongue va'e rei SENHOR pe mba'emo aju guigua ome'ẽ vy ma ogueru 'rã trigo ku'ikue iporãve va'e.\* Hi'ary ma omoi 'rã azeite, ha'e gui hexeve heakuã porã va'e ju 'rã ogueru.

**2** Ha'e nunga ogueraa 'rã Arão ra'y kuery sacerdote ikuai va'e pe. Ha'e kuery ojopy 'rã tei po trigo ku'ikue, azeite ha'e heakuã porã va'e ha'e javi reve. Ha'e va'e ma oapy 'rã altar áry ome'ẽmby ha'e javi rekovia. Ha'e va'e ma oapy vy ome'ẽmby, heakuã porã rã SENHOR ojou porã aguã.

**3** Ha'e rã mba'emo aju guigua ome'ẽ mbyre ndoapyi va'ekue ma Arão ha'e ta'y kuery peguarã opyta. Ha'e nunga ma SENHOR pe oapy pyre regua iky'a e'ỹ ete va'e.

**4** — Ha'e gui xapy'a rei reru 'rã mba'emo aju guigua tatakua py ombojy pyre reme'ẽ va'erã. Ha'eve mbojape imbovua revegua e'ỹ, trigo ku'ikue iporãve va'e azeite reve omoapomo mbyre, ha'e mbojape ipererii'i va'e imbovua revegua e'ỹ azeite py oikytypa pyre.

**5** Xapy'a rei mba'emo aju oexyaty py oexy pyre ri reru vy ma trigo ku'ikue gui imbovua revegua e'ỹ azeite reve omoapomo mbyre 'rã ha'eve.

**6** Remboa'y-a'ypa 'rã. Ha'e gui hi'ary renhoẽ 'rã azeite. Ha'e nunga ma mba'emo aju guigua ome'ẽmby.

**7** — Ha'e gui xapy'a rei mba'emo aju guigua reme'ẽ va'erã pairá py ri rembojy vy ma trigo ku'ikue iporãve va'e gui 'rã rejapo azeite reve.

**8** Ha'e nunga mba'emo aju guigua reme'ẽ va'erã rejapo ri vy reru 'rã SENHOR pe. Sacerdote-a py 'rã reraa, ha'e va'e ju altar py ogueraa aguã.

**9** Ha'e gui mba'emo aju guigua reme'ẽ va'e gui ma sacerdote oipe'a 'rã altar áry oapy va'erã ha'e javi rekovia. Ha'e nunga ma oapy vy ome'ẽmby, heakuã porã rã SENHOR ojou porã aguã.

**10** Ha'e gui mba'emo aju guigua ome'ẽ mbyre ndoapyi va'ekue ma Arão ha'e ta'y kuery pegua. Ha'e nunga ma SENHOR pe oapy pyre regua iky'a e'ỹ ete va'e.

**11** — Ha'e rami avi mba'emo aju guigua SENHOR pe peme'ẽ va'erã ma ndapejapoi 'rã imbovua revegua. Mba'eta tei've regua imbovua revegua nda'evei SENHOR pe peapy vy peme'ẽ va'erã, nei ei revegua voi nda'evei.

**12** Ha'e va'e regua gui ma Peru 'rã SENHOR pe jypy'igua peme'ẽ va'erã, tei altar áry ma nomoiai 'rã heakuã porã aguã rami.

**13** Mba'emo aju guigua reme'ẽ va'e ha'e javi 'rã remoe'ẽ juky py. Ha'e nunga reme'ẽ nhavõ neremoe'ẽ e'yi 'rã juky, mba'eta Nderuete guexeve guarã ojapo va'ekue kuaa ukaarã. Reme'ẽ va'e ha'e javi re 'rã remoĩ juky.

\* **2:1** Mba'emo aju guigua ma ha'e kuery ome'ẽ 'rã Nhanderuete omboete ha'e oguerovy'a aguã.

**14** — SENHOR pe reru avi 'rã mba'emo aju jypy'i oiko va'ekue regua iporãgueve reme'ẽ va'erã. Ha'eve 'rã mba'emo rary pyau guigua reme'ẽ aguã, tata py rexy va'ekue, ha'yñgy hary pyau va'e gui reumbiri va'ekue.

**15** Ha'e va'e áry renhoẽ 'rã azeite, ha'e hexeve reru 'rã heakuã porã va'e. Ha'e nunga ma mba'emo aju guigua ome'ẽmby.

**16** Mba'emo ra'yñgy oumbiri pyre gui sacerdote oipe'a 'rã ome'ẽmby ha'e javi rekovia oapy va'erã, azeite ha'e heakuã porã va'e ha'e javi reve. Ha'e nunga ma SENHOR pe oapy vy ome'ẽmby.

### 3

#### *Peteĩ rami ikuaria regua ome'ẽmby regua*

**1** — Ha'e gui amongue SENHOR renonde ogueru 'rã peteĩ rami ikuaria regua ome'ẽ va'erã.\* Ha'e rami vy ha'eve 'rã guymba ava e'ŷ vy kunha ivaikue rei e'ŷ va'e.

**2** Mymba ome'ẽ va'e akã áry opo omoõ vy ojuka 'rã oguy nhemboaty oĩaty rokẽ katy'i. Huguykue ma Arão ra'y kuery sacerdote ikuai va'e omboayvi 'rã altar yvýry ha'e javi rupi.

**3** Peteĩ rami ikuaria regua ome'ẽ va'e gui ma oipe'a 'rã mba'emo SENHOR pe oapy vy ome'ẽ va'erã: ikyra hyekue áry ha'e hyekue re oĩ va'ekue ha'e javi,

**4** ha'e gui ipykyraxi mokoõve, hi'áry ikyra ojao'i va'ekue, ikupe áry guare, ha'e ipy'akue re ikyra oĩ va'ekue voi ipykyraxi reve omboipa 'rã.

**5** Ha'e nunga ha'e javi Arão ra'y kuery oapy 'rã altar áry, mba'emo oapy vy ome'ẽmby, xakã áry ae 'rã oapy. Ha'e va'e ma oapy vy ome'ẽmby, heakuã porã rã SENHOR ojou porã aguã.

**6** — Ha'e gui peteĩ rami ikuaria reguarã SENHOR pe mba'emo ome'ẽ aguã ma ha'eve mymba kyrí'i veva e'ŷ vy kunha, ivaikue rei e'ŷ va'e anho.

**7** Vexa'i ri ome'ẽ va'erã ogueru vy ma SENHOR renonde py ae 'rã ome'ẽ.

**8** Ha'e vy ome'ẽ va'e akã áry opo omoõ vy ojuka 'rã oguy nhemboaty oĩaty roka py. Huguykue ma Arão ra'y kuery omboayvi 'rã altar yvýry rupi.

**9** Peteĩ rami ikuaria regua ome'ẽ va'e gui ma oipe'a 'rã ikyrakue SENHOR pe oapy aguã: huguaikue ipyxo kãgue katy'i omboi pyre ha'e javi, ha'e ikyra hyekue áry ha'e hyekue re oĩ va'ekue ha'e javi.

**10** Ipykyraxi mokoõve omboi avi 'rã, mokoõve áry ikyra oĩ va'e, ikupe regua, ha'e gui ipy'akue re ha'e ipykyraxi re oĩ va'ekue ha'e javi 'rã omboi.

**11** Ha'e va'e ha'e javi sacerdote oapypa 'rã altar áry, SENHOR pe tembi'u oapy vy ome'ẽmby.

**12** — Kavara ri ome'ẽ va'erã vy ma SENHOR renonde py 'rã ogueru.

**13** Ha'e vy inhakã áry opo omoõ vy ojuka 'rã oguy nhemboaty oĩaty roka py. Huguykue ma Arão ra'y kuery omboayvi 'rã altar yvýry ha'e javi rupi.

**14** Ha'e va'e regua ome'ẽ va'e gui oipe'a 'rã SENHOR pe oapy vy ome'ẽ va'erã: ikyra hyekue áry ha'e hyekue re oĩ va'ekue ha'e javi,

**15** ipykyraxi mokoõve, mokoõve áry ikyra oĩ va'ekue, ikupe regua, ha'e ipy'akue regua oĩ va'ekue ipykyraxi reve omboipa 'rã.

**16** Ha'e nunga ha'e javi sacerdote oapypa 'rã altar áry, tembi'u oapy vy ome'ẽmby, heakuã porã rã SENHOR ojou porã aguã. Ikyrakue ha'e javi ma SENHOR pegua ae.

**17** Po rami ma pendekorã oeja pyre raka'e rã peve guarã, pendekuaia jave re, ha'e mamo rã pendekuaia py: ndape'ui 'rã ikyrakue neĩ huguykue — he'i.

### 4

#### *Sacerdote kuery potae vy e'ŷ ojejavvy mba'emo ome'ẽ aguã regua*

**1** Ha'e gui SENHOR aipoe'ive ju Moisés pe:

\* **3:1** Peteĩ rami ikuaria regua ha'e kuery ome'ẽ 'rã Nhanderuete omboete ha'e hexeve peteĩ rami ikuaria oikuaa uka aguã.

<sup>2</sup> — Ndeayvu ke Israel kuery pe. Ha'e vy aipo're 'rā: Xapy'a rei amongue potae vy e'ŷ ojejavy 'rā SENHOR ojapo uka va'ekue rovai, xapy'a rei ha'e nunga rovai py ojapo 'rā ojapo e'ŷ va'erā va'ekue.

<sup>3</sup> Xapy'a rei sacerdote-rā omoī mbyre eteve voi ojejavy 'rā heta va'e kuery opaga aguā rami avi omoingo vy. Ha'e rami vy ojejavyague re SENHOR pe ome'ē 'rā peteī vaka ra'y ivaikue rei e'ŷ va'e.\*

<sup>4</sup> SENHOR renonde py vaka ra'y ogueru 'rā oguy nhemboaty oīaty rokē py. Vaka ra'y akā áry opo omoī vy ojuka 'rā SENHOR renonde.

<sup>5</sup> Huguykue regua ma sacerdote-rā omoī mbyre ogueraa 'rā oguy nhemboaty oīaty py.

<sup>6</sup> Huguykue py okuā omoakŷ vy sete-kue 'rā omboayvi SENHOR renonde py, henda iky'a e'ŷ va'e py ajukue okē regua oī va'e rexei.

<sup>7</sup> Sacerdote huguy omoī avi 'rā altar heakuā porā va'e oapyaty va'e rakua ikuai va'e apy re, SENHOR renonde py. Ha'e va'e altar ma oguy nhemboaty oīaty py oī. Ha'e gui huguy rembyrekue ma altar mba'emo oapyaty va'e guýry onhoē 'rā, nhemboaty oīaty rokē py oī va'e py.

<sup>8</sup> Jejavya ojao'i ukaa aguā regua vaka ra'y ome'ēmbi gui omboipa 'rā ikyrakue oī va'e ha'e javi: ikyra hyekue áry, hyekue re oī va'ekue ha'e javi,

<sup>9</sup> ipykyraxī mokoīve, mokoīve re ikyra oī va'ekue, ikupe regua, ha'e ipy'akue regua oī va'ekue ipykyraxī reve omboipa avi 'rā,

<sup>10</sup> peteī rami ikuiaia regua vaka ra'y ome'ēmbi gui omboia rami avi. Ha'e vy sacerdote oapypa 'rā altar mba'emo oapyaty va'e áry.

<sup>11</sup> Ha'e rā vaka ra'y pirekue, ho'okue ha'e javi, inhakāgue, ipykue, hyekue, ha'e hepoxikue,

<sup>12</sup> vaka ra'y retekue ha'e javi ma ogueraa 'rā teta ikuiaia gui mombyry'i peteī henda iky'a e'ŷa py. Tanhimbukue omomboaty py 'rā oapypa tata py, xakā áry.

### Números 15.22-26

<sup>13</sup> — Xapy'a rei Israel kuery ha'e javi potae vy e'ŷ ojejavy teī ha'e nungakue avave rei ndoikuai ranhe, xapy'a rei ojapo e'ŷ va'erā va'ekue py ojejavy okuapy 'rā SENHOR ojapo uka va'ekue rovai.

<sup>14</sup> Ha'e gui ha'e kuery ojejavyague oikuua ri ramo pavē ogueru 'rā vaka ra'y ojejavyague re ome'ē va'erā. Ha'e vy oexa uka 'rā okuapy oguy nhemboaty oīaty roka py.

<sup>15</sup> Vaka ra'y akā áry ha'e kuery monogetaaty kuery omoī 'rā opo SENHOR renonde. Ha'e rire vaka ra'y ojukaa 'rā SENHOR renonde.

<sup>16</sup> Vaka ra'y ruguykue regua sacerdote-rā omoī mbyre ojopy vy ogueraa 'rā oguy nhemboaty oīaty py.

<sup>17</sup> Ha'e vy huguykue py okuā omoakŷ vy sete-kue 'rā omboayvi SENHOR renonde py, cortina okē regua rexei.

<sup>18</sup> Huguykue omoī avi 'rā altar oī va'e rakua apy re, SENHOR renonde oguy nhemboaty oīaty py. Ha'e rā huguy rembyrekue ha'e javi ma onhoē 'rā altar mba'emo oapyaty va'e nhemboaty oīaty rokē py oī va'e guýry.

<sup>19</sup> Vaka ra'y gui ikyrakue omboipa vy oapypa 'rā altar áry.

<sup>20</sup> Ha'e va'e vaka ra'y re ojapo 'rā jejavya regua vaka ra'y ome'ēmbi re ojapoa rami avi. Ha'e rami ae 'rā ojapo, ha'e kuery ojejavyague sacerdote ojao'i uka vy. Ha'e rami rā ha'e kuery operdoaa 'rā.

<sup>21</sup> Ha'e va'e rire vaka ra'y retekue oipe'aa 'rā heravy teta ikuiaia gui mombyry'i. Ha'e vy oapypa 'rā jypy vaka ra'y oapyague rami avi. Ha'e va'e ma heta va'e kuery ojejavyague regua ome'ēmbi.

### Yvatekueve potae vy e'ŷ ojejavy vy mba'emo ome'ē aguā regua

\* **4:3** Jejavya regua ome'ēmbi ma ha'e kuery ome'ē ojejavyague ombogue uka aguā. Ha'e nunga ome'ē reve ojejavyague omombe'upa Nhanderuete oiky'a'o ju aguā.

**22** — Ha'e gui huvixa kuery va'e regua potae vy e'ŷ ojejavy'rã SENHOR ojapo uka va'ekue regua e'ŷ ojapoa py. Ha'e vy ha'e nunga py opaga aguã rami 'rã oiko,

**23** ha'e gui ojejavyague ixupe oikuaa ukaa ramo ogueru 'rã kavara ivaikue rei e'ŷ va'e ome'ẽ va'erã.

**24** Kavara akã áry opo omoõ vy SENHOR renonde ojuka 'rã oapy pyrã ojukaaty py. Ha'e nunga ma jejavya regua ome'ẽmby.

**25** Ha'e gui jejavya regua ome'ẽ mbyre ruguy py sacerdote okuã re omoakŷ vy ombovy 'rã altar mba'emo oapyaty va'e rakua ikuai va'e apy re. Ha'e rã huguy rembyrekue ma onhoẽmba 'rã altar mba'emo oapyaty va'e yvýry rupi.

**26** Ome'ẽ mbyre kyrakue ma oapypa 'rã altar áry, peteĩ rami ikuiaia regua ome'ẽmby kyrakue oapya rami avi. Ha'e rami py sacerdote ojao'i uka 'rã huvixa ojejavyague. Ha'e ramo operdoaa 'rã.

### *Mava'e rã rei potae vy e'ŷ ojejavy vy mba'emo ome'ẽ aguã regua*

**27** — Ha'e gui xapy'a rei mava'e rã rei pendeyvy re oiko va'e regua ojejavy 'rã potae vy e'ŷ, SENHOR ojapo uka e'ŷ va'ekue ojapoa py. Ha'e rami vy opaga aguã rami va'e 'rã oiko.

**28** Ha'e gui ojejavyague ixupe oikuaa ukaa ramo ogueru 'rã kavara ivaikue rei e'ŷ va'e ome'ẽ va'erã, ojejavyague regua.

**29** Ojejavyague regua ome'ẽ va'e akã áry opo omoõ vy ojuka 'rã oapy pyrã ojukaaty py ae.

**30** Ome'ẽmby ruguy py sacerdote okuã omoakŷ vy ombovy 'rã altar mba'emo oapyaty va'e rakua apy re. Ha'e rã huguy rembyrekue ma onhoẽmba 'rã altar yvýry rupi.

**31** Ikyrakue maomboipa 'rã peteĩ rami ikuiaia regua re ome'ẽmby rami avi. Sacerdote oapypa 'rã altar áry, heakuã porã rã SENHOR ojou porã aguã.<sup>†</sup> Ha'e rami sacerdote ojao'i uka 'rã ojejavyague, ha'e ramo operdoaa 'rã.

**32** — Ha'e rami teĩ xapy'a rei vexa'i ri ojejavyague regua ome'ẽ vy ma kunha ivaikue rei e'ŷ va'e 'rã ogueru.

**33** Ha'e rami vy ojejavyague regua ome'ẽmby akã áry opo omoõ vy ojuka 'rã ojejavyague re, mba'emo ome'ẽmby oapyaty py ae.

**34** Ojejavyague regua ome'ẽmby ruguykue py sacerdote okuã omoakŷ vy ombovy 'rã altar mba'emo oapyaty va'e rakua apy re. Ha'e rã huguy rembyrekue ma onhoẽmba 'rã altar yvýry rupi.

**35** Ha'e rã ikyrakue maomboipa 'rã, peteĩ rami ikuiaia regua ome'ẽmby re ojapoa rami avi. Ha'e vy sacerdote oapypa 'rã altar áry, SENHOR pe mba'emo oapypa va'e áry. Ha'e rami sacerdote ojao'i uka 'rã ojejavyague. Ha'e ramo operdoaa 'rã.

## 5

### *Amongue va'e rei oikuaa e'ŷ re ojejavy vy mba'emo ome'ẽ aguã regua*

**1** — Xapy'a rei amongue ojejavy 'rã po rami: Mba'emo oiko rã oexa e'ŷ vy oendu teĩ huvixa omboayvua py voi nomombe'uxei 'rã. Mba'emo oikuaa va'eri nomombe'ui vy hexe ae 'rã oĩ ojejavyague re opaga aguã.

**2** Xapy'a rei amongue ojopy 'rã mba'emo ha'eve'ŷ va'e re, vixo ha'eve'ŷ va'e re'õgue re mba'e, mymba ha'eve'ŷ va'e re'õgue, e'ŷ vy yvý rupi onhembotyryry va'e ha'eve'ŷ va'e re'õgue re. Ha'e nunga avave rei ndoexaai teĩ ha'e ae ju ha'eve'ŷ va'e ojeapo vy ha'e ae oiko 'rã opaga aguã rami.

<sup>†</sup> **4:31** Mboapy regua ome'ẽmby pe anho “Heakuã porã rã SENHOR ojou porã aguã” 'ea va'e. Ha'e va'e ma oapypa vy ome'ẽmby (capítulo 1), mba'emo aju guigua ome'ẽmby (capítulo 2), ha'e peteĩ rami ikuiaia regua ome'ẽmby (capítulo 3). Ha'e va'e mboapy regua ome'ẽmby ma ome'ẽxeal'i py 'rã ome'ẽ, Nhanderuete omboetea rupi. Ha'e rã amboae regua ome'ẽmby pe ma “Heakuã porã rã SENHOR ojou porã aguã” nde'i, mba'eta ojejavyague re ome'ẽ, Nhanderuete ombogue aguã. Ha'e va'e ma jejavya regua ome'ẽmby (4.1-5.7). Ha'e rami avi jejavya regua ome'ẽmby gui voi ikyrakue oapypa 'rã ha'e nunga pe “Heakuã porã rã SENHOR ojou porã aguã” he'i avi 'rã, mba'eta peteĩ rami ikuiaia regua ome'ẽmby rami oapypa (4.31).

<sup>3</sup> Ha'e rami e'ŷ vy xapy'a rei ojopy 'rã ava guigua ha'eve'ŷ va'e re, ha'e nunga oĩ va'e re rei onhemongy'a 'rã. Potae vy e'ŷ opoko teĩ oikuaa nho vy opaga aguã rami 'rã oiko.

<sup>4</sup> Ha'e rami e'ŷ vy amongue ijayvu vy oura rive 'rã ojapo vai aguã re, e'ŷ vy ojapo porã aguã re teĩ, ha'e rami rei oura rivea rupi ijayvu 'rã oikuaa pota vy e'ŷ, teĩ oikuaa nho vy ha'e nunga káuxa oiko 'rã opaga aguã rami.

<sup>5</sup> Ha'e ramigua py ri opaga aguã rami oiko rire omombe'upa 'rã mba'e py ete'i pa ojejavya,

<sup>6</sup> ha'e ome'ẽ 'rã ojejavyague regua. Ha'e rami vy SENHOR pe ogueru 'rã mymba kyrïve va'e, vexa'i kunha, e'ŷ vy kavara kunha, ojejavyague regua ome'ẽ va'erã. Ha'e ramo sacerdote ojao'i uka 'rã ojejavyague.

<sup>7</sup> Ha'e gui vexa'i kunha ndojoui ri vy SENHOR pe ogueru 'rã mokoõ apykaxu e'ŷ vy mokoõ jeruxi, opaga aguã rami oikoague re ome'ẽ va'erã. Peteĩ ma ojejavyague regua 'rã ome'ẽ, ha'e rã amboae ma oapy vy ome'ẽmby.

<sup>8</sup> Sacerdote pe mokoõve ome'ẽ rã jejavya regua ranhe 'rã ojuka. Ha'e rami vy opoapẽ py omopẽ 'rã ijaju'y kãgue, ipire omondo e'ŷ re.

<sup>9</sup> Ha'e gui jejavya regua ome'ẽmby ruguykue gui ma ogueraa vy omboayvipa 'rã altar yke rupi. Ha'e rã huguy rembyrekue ma altar guýry rupi onhoëmba 'rã. Ha'e va'e ma jejavya regua ome'ẽmby.

<sup>10</sup> Ha'e gui amboae guyra ma oapy 'rã ipara oña rami vy. Ha'e rami sacerdote ojao'i uka 'rã ojejavyague. Ha'e rã operdoaa 'rã.

<sup>11</sup> Xapy'a rei mokoõ apykaxu e'ŷ vy mokoõ jeruxi ogueru aguã ndojoui ri vy, ojejavya regua ome'ẽ va'erã togueru peteĩ ryru trigo ku'ikue iporâve va'e.\* Ha'e va'e áry tomoõ eme guive azeite, neĩ heakuã porã va'e, jejavya regua ome'ẽmby ramo.

<sup>12</sup> Sacerdote pe ha'e va'e ome'ẽ ramo ojara 'rã peteĩ po renyõ ha'e javi rekovia. Ha'e va'ekue ma SENHOR pe oapy 'rã altar áry, oapy vy ome'ẽmby oĩ va'e áry ju. Ha'e va'e ma jejavya regua.

<sup>13</sup> Ha'e rami sacerdote ojao'i uka 'rã mba'emo py rei tema ojejavyague. Ha'e ramo operdoaa 'rã. Ha'e rã ndoapyi va'ekue ma sacerdote kuery pegua, mba'emo aju guigua ome'ẽ mbyre re ojapoa rami.

### *SENHOR pegua nomboeteiague re ome'ẽ aguã regua*

<sup>14</sup> SENHOR aipoe'ive ju Moisés pe:

<sup>15</sup> — Ha'e gui xapy'a rei amongue ojapo 'rã ojapo e'ŷ va'erã va'ekue, ha'e potae vy e'ŷ ojejavy 'rã mba'emo SENHOR pegua iky'a e'ŷ va'e oĩ va'e py. Ha'e rami vy guymba kuery ikuai va'e gui ogueraa 'rã SENHOR pe peteĩ vexa'i ivaikue rei e'ŷ va'e ome'ẽ va'erã. Ha'e va'e repy re reikuua 'rã hatã'i va'e prata guigua mbovy paa, henda iky'a e'ŷ va'e py oiporua va'e rami, mba'emo omboekovia aguã regua ome'ẽmby.

<sup>16</sup> Ha'e rami py oguerupa ju 'rã SENHOR pe ndoguerupai va'ekue. Hi'áry omoõ retave ju 'rã, peteĩ nhiruĩ ikuai nhavõ áry peteĩ-teĩ ju 'rã ome'ẽve. Sacerdote pe ae 'rã ome'ẽ. Ha'e ramo sacerdote ojao'i uka 'rã ojejavyague, mba'emo omboekovia aguã regua vexa'i ome'ẽ va'ekue py ae. Ha'e ramo operdoaa 'rã.

### *Potae vy e'ŷ ojejavyague re mba'emo ome'ẽ aguã regua*

<sup>17</sup> — Xapy'a rei amongue ojejavy 'rã SENHOR ojapo uka va'ekue rupi e'ŷ. Potae vy e'ŷ ojapo teĩ oiko 'rã opaga aguã rami, ha'e vy hexe ae 'rã oĩ ojejavyague re opaga aguã.

<sup>18</sup> Ha'e rami vy guymba kuery gui ogueraa 'rã sacerdote pe peteĩ vexa'i ivaikue rei e'ŷ va'e. Hepy reikuua rami ome'ẽ 'rã ojejavyague omboekovia aguã. Ha'e ramo ha'e va'e py sacerdote ojao'i uka 'rã potae vy e'ŷ ojejavyague. Ha'e ramo operdoaa 'rã.

\* **5:11** Apy “peteĩ ryru” he'ia ma mokoõ litro va'e re ijayvu vy, ha'e rã trigo ri rã peteĩ quilo va'e (Lucas 2.24).

<sup>19</sup> Ha'e va'e ma mba'emo omboekovia aguã regua ome'ẽmby, SENHOR pe opaga aguã rami oiko rire.

## 6

### *Amongue oikuua teĩ ojejavy nho vy mba'emo ome'ẽ aguã regua*

<sup>1</sup> SENHOR ijayvuve Moisés pe. Ha'e vy aipoe'i:

<sup>2</sup> — Xapy'a rei amongue ojejavy 'rã, ojapo vai 'rã SENHOR rovai. Xapy'a rei oirũ pe nome'ẽ jevyxei 'rã mba'emo oĩa py omoĩ porã uka va'ekue, e'ŷ vy mba'emo repyrã ome'ẽ va'ekue, mba'emo re imondaague mba'e, oirũ okoreague,

<sup>3</sup> omokanhy mbyre ojou teĩ ha'e nunga pe "Ndajoui" he'i 'rã oura rive vy, e'ŷ vy amboae ramigua py avakue ojejavy jepiaty rami.

<sup>4</sup> Ha'e rami ojejavyague oikuua pavẽ ramo ome'ẽ jevy nho 'rã imondaague rekovia, e'ŷ vy okoreague rekovia, hexeve omoĩ porã va'ekue, mba'emo omokanhy mbyre ojou va'ekue,

<sup>5</sup> e'ŷ vy ha'e nunga ha'e javi re oura riveague. Omboekoviapa ju 'rã ha'ekue'i rami. Ha'e va'e áry omoõve'i ju 'rã, peteĩ nhiruĩ ikuai nhavõ áry peteĩ-teĩ ju 'rã ome'ẽve. Ija kuery pe ae 'rã ome'ẽ, ojejavyague re omboekovia aguã regua ome'ẽa árave.

<sup>6</sup> Omboekovia aguã regua ome'ẽ va'erã ma SENHOR pe ogueru 'rã guymba kuery gui vexa'i ivaikue rei e'ŷ va'e, mbovy repy reikuua rami omboekovia aguã regua ome'ẽ va'erã. Sacerdote pe ae 'rã ogueru.

<sup>7</sup> Ha'e ramo ojejavyague sacerdote ojao'i uka 'rã SENHOR renonde. Ha'e ramo operdoaa 'rã ojejavya py opaga aguã rami oikoague.

### *Mba'emo oapya vy ome'ẽmby regua lei oĩa*

<sup>8</sup> SENHOR aipoe'ive Moisés pe:

<sup>9</sup> — Ejapo uka na Arão ha'e ta'y kuery pe. Ha'e vy aipo're: Po rami 'rã mba'emo peme'ẽ peapy vy. Oapy vy ome'ẽ mbyre ma altar áry 'rã optya pytã mbukukue ko'ẽ peve, tata altar áry hendy riae reve.

<sup>10</sup> Ha'e gui ma sacerdote onhemonde 'rã ao puku ajukue iporãve va'e guigua py, ha'e kaxõ ajukue iporãve va'e guigua py opire reia áry. Ha'e rami vy altar áry tata ome'ẽ mbyre oapypa ma rire tanhimbu oguerova 'rã ha'e gui, altar yvýry ju ranhe 'rã omoĩ.

<sup>11</sup> Ha'e gui oao omboekoviapa vy amboae ju 'rã omoĩ. Ha'e vy tanhimbu ogueraa 'rã teta ikuiai mombyry'i, peteĩ henda iky'a e'ŷa py.

<sup>12</sup> Altar áry tata hendy riae 'rã oiny. Pembogue eme. Ko'ẽ nhavõ hi'áry sacerdote omoõve 'rã xakã, ha'e gui ha'e va'e áry ju 'rã omoĩ oapy vy ome'ẽmby, ha'e gui ha'e va'e áry ju 'rã oapy mba'emo kyrakue peteĩ rami ikuiai regua, ome'ẽ mbyre guigua.

<sup>13</sup> Altar áry tata hendy riae 'rã oiny. Pembogue eme.

### *Mba'emo aju guigua ome'ẽmby regua lei oĩa*

<sup>14</sup> — Po rami 'rã peme'ẽ mba'emo aju guigua. SENHOR renonde altar oĩ va'e py 'rã Arão ra'y kuery ome'ẽ.

<sup>15</sup> Ha'e kuery regua peteĩ ma mba'emo aju guigua ome'ẽmby gui ojopy 'rã peteĩ po renyẽ trigo ku'ikue iporãve va'e azeite reve. Ojopy avi 'rã heakuã porã va'e ome'ẽmby revegua ha'e javi. Ha'e va'e ma altar áry omoendy 'rã ome'ẽmby ha'e javi rekovia, heakuã porã rã SENHOR ojou porã aguã.

<sup>16</sup> Ha'e rã hembyrekue ma Arão ha'e ta'y kuery ho'u 'rã. Imbovua reve'ŷ 'rã ho'u henda iky'a e'ŷa py. Oguy nhemboaty oĩaty roka rupi 'rã ho'u okuapy.

<sup>17</sup> Ha'e rami avi ndoexyi 'rã imbovua reve. Ha'e kuery peguarã ae xee aeja xevygua oapy vy ome'ẽmby regua. Ha'e nunga ma iky'a e'ŷ ete va'e, jejavya regua ha'e mba'emo omboekovia aguã regua ome'ẽmby rami avi.

18 Arão ra'y kuery va'e regua ha'e javi 'rã ho'u ha'e va'e gui. Ha'e rami aguã pendekorã aeja va'ekue raka'e rã peve, pendekuaia pukukue reguarã, SENHOR pe oapy vy ome'ẽmby regua. Ha'e va'e re ovv va'e rei tema iky'a e'ŷ va'e avi 'rã opyta.

### *Sacerdote kueryrã omoña jave mba'emo ome'ẽ aguã regua*

19 Ha'e gui SENHOR aipoe'ive Moisés pe:

20 — Pova'e nunga ma Arão ha'e ta'y kuery ome'ẽ 'rã SENHOR pe sacerdote-rã omoña ára py. Peteĩ ryru trigo ku'ikue iporãve va'e ome'ẽ riae jepi 'rã mba'emo aju guigua ome'ẽ mbyrã. Mbyte peve ma aje'ivekue 'rã ome'ẽ, ha'e rã hembyrekue ma ka'arukue 'rã.

21 Ha'e va'e ma ombojy 'rã oexyaty py azeite reve, omona porã 'rã guive ogueru aguã. Pêgue-pêgue'i mbixy ma ogueru 'rã mba'emo aju guigua ome'ẽ aguã, heakuã porã rã SENHOR ojou porã aguã.

22 Ha'e gui Arão ra'y kuery va'e regua hekovia sacerdote-rã omoñ mbyre ma ha'ekue rami ae 'rã ojapo. Raka'e rã peve guarã ojapo uka pyre rami vy oapy 'rã SENHOR peguarã ae.

23 Ha'e rami 'rã mba'emo aju guigua ome'ẽmby peapypa, ndape'ui 'rã.

### *Jejavya regua ome'ẽmby regua lei oña*

24 SENHOR aipoe'ive Moisés pe:

25 — Aipo're Arão ha'e ta'y kuery pe: Po rami 'rã peme'ẽ jejavya regua. Mba'emo oapy vy ome'ẽmby ojukaaty py ae 'rã pejuka jejavya regua, SENHOR renonde. Ha'e va'e ma iky'a e'ŷ ete va'e.

26 Jejavya regua mboaxaare sacerdote ae 'rã ho'u. Henda iky'a e'ŷa py 'rã ho'u, oguy nhemboaty oïaty roka py.

27 Ome'ẽmbyre ro'okue re ovv va'e ha'e javi tema iky'a e'ŷ va'e avi 'rã opyta. Ha'e gui oao re ri huguy omboayvi xapy'a vy ma omboayviague ojoi 'rã henda iky'a e'ŷa py.

28 Yapo guigua py ri ombojy rire ma ombovo 'rã hyrukue. Ha'e rã overa va'e guigua py ri ombojy rire ma oipyeipa porã, ha'e ojoi 'rã yy py.

29 Ha'e va'e ma sacerdote regua ha'e javi 'rã ho'u. Iky'a e'ŷ ete va'e.

30 Ha'e rã jejavya regua ome'ẽmbyre ro'okue ma ndape'ui 'rã teñve, oguy nhemboaty oïaty py huguykue Peru rire, henda iky'a e'ŷ va'e py jejavya ojao'i ukaa aguã. Ha'e nunga ma tata py 'rã peapypa.

## 7

### *Mba'emo omboekovia aguã regua ome'ẽmby regua lei oña*

1 — Po rami 'rã peme'ẽ mba'emo omboekovia aguã regua. Ha'e va'e ma iky'a e'ŷ ete va'e.

2 Mba'emo omboekovia aguã regua ome'ẽmby ma oapy vy ome'ẽmby ojukaaty py ae avi 'rã pejuka. Ha'e gui huguykue ma omboayvia 'rã altar áry ha'e javi rupi.

3 Ikyrakue ma omboaxapa 'rã, huguaikue ha'e hye áry ikyra oï va'ekue voi,

4 ha'e gui ipykyraxígue mokoïve, hexe ikyra oï va'ekue ikupe reguare, ha'e ipy'akue regua ipykyraxígue reve omboipa 'rã.

5 Altar áry 'rã sacerdote oapy, SENHOR pe oapy vy ome'ẽmbyre. Ha'e va'e ma mba'emo omboekovia aguã regua ome'ẽmby.

6 Sacerdote regua ha'e javi 'rã ho'u henda iky'a e'ŷ va'e py. Iky'a e'ŷ ete va'e.

7 Jejavya regua peme'ea rami ae avi 'rã peme'ẽ mba'emo omboekovia aguã regua. Mokoïve regua lei ma peteĩ'i. Ha'e va'e py sacerdote ojao'i uka 'rã jejavya, rire ixupergua ae 'rã opyta ndoapyi va'ekue.

8 Amongue rekovia sacerdote oapy vy ome'ẽ rire ipirekue opyta 'rã ixupergua ae.

9 Ombooxryryaty py, e'ŷ vy oexyaty áry ombojy pyre ma sacerdote peguarã meme 'rã opyta, tatakua py mba'emo aju guigua oexy pyre rami avi.

<sup>10</sup> Mba'eta mba'emo aju guigua ome'ẽ mbyre, azeite reve omoapomo mybre e'ŷ vy ipiru va'e teĩ ma Arão ra'y kuery pegua meme.

### *Peteĩ rami ikuiaia regua ome'ẽmby regua lei oĩa*

<sup>11</sup> — Po rami 'rã peme'ẽ peteĩ rami ikuiaia regua. Amongue va'e rei ha'eve SENHOR pe ome'ẽ aguã.

<sup>12</sup> SENHOR oguerovy'aa rupi ri ome'ẽ vy oguerovy'aa rupi ome'ẽ va'e reve ogueru avi 'rã mbojape imbovua reveguia e'ŷ azeite py omoapomo mbyre, ha'e mbojape ipererí'i va'e imbovua reveguia e'ŷ azeite py oikyty pyre, ha'e mbojape trigo ku'ikue iporâve va'e guigua azeite reve omoapomo porã mbyre.

<sup>13</sup> Ha'e va'e mbojape reve ogueru avi 'rã mbojape imbovua reveguia ome'ẽ va'erã, peteĩ rami ikuiaia regua reve oguerovy'aa rupi ome'ẽ mbyrã.

<sup>14</sup> Mba'emo ome'ẽmby ha'e javi regua gui ogueru avi 'rã peteĩ mbojape SENHOR pe ome'ẽ va'erã. Ha'e va'e ma peteĩ rami ikuiaia regua ome'ẽmby ruguykue sacerdote omboayvi rire ixupe guarã ae 'rã opyta.

<sup>15</sup> Peteĩ rami ikuiaia reguare ome'ẽa árave 'rã ho'upa oguerovy'aa rupi ome'ẽmby ro'okue. Mba'eve ndoejai 'rã ko'ẽ rã guarã.

<sup>16</sup> — Ha'e gui xapy'a rei amongue onhemboayvua rupi ri mba'emo ome'ẽ, e'ŷ vy ha'e ae'i onhenhandua rami ome'ẽ teĩ ome'ẽa árave ae 'rã ho'ua. Xapy'a rei mba'emo hembyre ramo ko'ëgue ha'eve teri ho'ua aguã.

<sup>17</sup> Ha'e rã mboapy ára peve ri ome'ẽ mbyre ro'okue hembyre ramo ma oapypaa 'rã tata py.

<sup>18</sup> Mba'eta xo'o peteĩ rami ikuiaia regua ome'ẽ mbyre ma mboapy ára peve ri ho'ua ramo heruare ndojou porãai 'rã, ome'ẽ va'ekue voi ndovarei 'rã. Ha'e nunga ma ha'eve'ŷ va'e. Hi'uare re ae 'rã oïmba ojeavyague re opaga aguã.

<sup>19</sup> — Ha'e gui mba'emo ha'eve'ŷ va'e re xo'o ov y ramo ma ndo'uai 'rã. Tata py 'rã oapypaa. Ha'e rã xo'o ome'ẽ mbyre regua ma amongue ojeky'a'o ukapa va'ekue rei 'rã ha'eve ho'u aguã.

<sup>20</sup> Ha'e rami avi amongue ojeky'a'o uka va'ekue'ŷ ri, peteĩ rami ikuiaia regua SENHOR pe ome'ẽ mbyre xo'o ho'u ramo, oipe'aa 'rã heta va'e kuery mbyte gui.

<sup>21</sup> Ha'e rami avi xapy'a rei amongue opoko 'rã mba'emo ha'eve'ŷ va'e re, avakue guigua ha'eve'ŷ va'e, e'ŷ vy mymba ha'eve'ŷ va'e, e'ŷ vy onhembotyryry va'e ha'eve'ŷ va'e guigua re. Ha'e gui ha'e va'e peteĩ rami ikuiaia regua SENHOR pe ome'ẽ mbyre xo'o gui ho'u ramo oipe'aa 'rã heta va'e kuery mbyte gui.

### *Ikyrakue ha'e huguykue Nhanderuete ndo'u ukaiague*

<sup>22</sup> SENHOR aipoe'ive ju Moisés pe:

<sup>23</sup> — Ndeayvu 'rã Israel kuery pe. Ha'e vy aipo're: Pe'u eme vaka kyra, neĩ vexa'i ha'e kavara kyra voi.

<sup>24</sup> Ha'e gui mymba omano rive va'ekue, ha'e inharõ va'e rembia kyrakue ha'eve 'rã amboae rami peiporu aguã, ha'e rã pe'u aguã ma nda'evei.

<sup>25</sup> Mba'eta SENHOR pe oapy vy ogueru pyre kyrakue ho'u va'e rei ma oipe'aa 'rã heta va'e kuery mbyte gui.

<sup>26</sup> Ndape'ui 'rã huguy mamo rã peĩa py, neĩ guyra neĩ vaka guigua.

<sup>27</sup> Huguy ho'u va'e rei tema oipe'aa 'rã heta va'e kuery mbyte gui.

### *Sacerdote kuery pegua re ijayvua*

<sup>28</sup> SENHOR aipoe'ive ju Moisés pe:

<sup>29</sup> — Ndeayvu ke Israel kuery pe. Ha'e vy aipo're: Peteĩ rami ikuiaia regua amongue ome'ẽ vy ogueru 'rã SENHOR pe. Ha'e gui peteĩ rami ikuiaia regua ome'ẽmby gui

<sup>30</sup> opo py ae 'rã oipe'a heruvy SENHOR pe oapy vy ome'ẽ va'erã. Ipexo kyrakue ma ogueru 'rã ipexokue reve. Ha'e va'e SENHOR renonde oupi vy ombovava reve 'rã ome'ẽ.

**31** Ikyrakue ma sacerdote oapy 'rã altar áry, ha'e rã ipexokue ma Arão ha'e ta'y kuery peguarã opyta.

**32** Hi'ugue oiporu kuaa regua voi ome'ẽ 'rã sacerdote pe, peteĩ rami ikuiaia regua ome'ẽ va'e gui oipe'a va'ekue.

**33** Mba'eta Arão ra'y kuery va'e regua peteĩ rami ikuiaia regua ome'ẽmby ruguykue mboayviare ha'e ikyrakue rapyare, ha'e va'e ae 'rã ogueraa hi'ugue oiporu kuaa regua ojeupe guarã.

**34** Mba'eta xejeupe guarã ae aipe'a uka peteĩ rami ikuiaia regua mymba pexokue ha'e hi'ugue Israel kuery ome'ẽ va'ekue gui, ha'e sacerdote Arão ha'e ta'y kuery pe ju amboaxa. Raka'e rã peve guarã ha'eve 'rã Israel kuery gui ojopy aguã.

**35** Ha'e nunga ae ma opyta Arão ha'e ta'y kuery peguarã, mba'emo SENHOR pe oapy vy ome'ẽ mbyre regua, SENHOR pegua sacerdote-rã omoña ára guive ha'e kuery peguarã aeja.

**36** Ha'e kuery omoña ára py ha'e nunga ae xee SENHOR xeayvu Israel kuery ome'ẽ aguã ha'e kuery pe, hamymino kuery rekorã avi aeja raka'e rã peve guarã – he'i.

**37** Ha'e rami ae 'rã peme'ẽ mba'emo oapy vy ome'ẽmby, mba'emo aju guigua, jejavya regua, mba'emo omboekovia aguã regua, ojeky'a'o aguã regua ha'e peteĩ rami ikuiaia regua.

**38** Moisés pe SENHOR ae ojapo uka va'ekue Sinai yvyty re. Ojapo ukaa ára guive Israel kuery mba'emo ogueru aguã SENHOR pe Sinai regua tekoá e'ýa py.

## 8

### *Êxodo 29.1-37*

**1** SENHOR aipoe'ive ju Moisés pe:

**2** – Eraa Arão ha'e ta'y kuery ijaó puku reve, ha'e azeite SENHOR pe nhomboaxaa aguã regua avi, ha'e gui peteĩ vaka ra'y jejavya re reme'ẽ va'erã, ha'e mokoí vexa'i, ha'e gui ajaka mbojape imbovua revegua e'ý va'e oïa.

**3** Oguy nhemboaty oïaty rokẽ py emboaty uka heta va'e kuery ha'e javi – he'i.

**4** Ha'e ramo Moisés ojapo SENHOR ojapo ukaague rami. Ha'e ramo heta va'e kuery ma oguy nhemboaty oïaty rokẽ py onhemboatypa okuapy.

**5** Moisés aipoe'i ijaty va'e kuery pe:

– Namigua ma SENHOR ojapo uka va'ekue nhandevy – he'i vyve

**6** Arão ha'e ta'y kuery ogueru vy ombojau yy py.

**7** Omohemonde Arão kamixa puku py, ha'e ku'akuaa ju omoï. Omoï ao puku sacerdote pegua. Hexe omoï avi hi'árygua, ha'e manto sacerdote pegua ae omoï vy oku'akua avi manto regua py ae, ita oïmbaa va'e py. Ha'e vy omoatyrõmba porã'i hexe.

**8** Ha'e gui ma omoï avi pexo regua, ha'e pexo regua re ma Urim ha'e Tumim ju omoï.\*

**9** Inhakã re oimama imoiny ingorarã, ha'e ingora re henonde katy omoï avi ouro guigua ipererí'i va'e hakã regua iky'a e'ý va'erã, Moisés pe SENHOR ojapo ukaague rami vy.

**10** Ha'e rami rã azeite SENHOR pe nhomboaxaa aguã regua Moisés ogueru vy omoï ombojeroviaaty re, ha'e mba'emo ikuai va'e ha'e javi re, iky'a e'ý va'erã omboaxa vy.

**11** Altar áry rupi ma sete-kue azeite omboayvi. Omboayvi altar re hembiporu ikuai va'e rupi, hy'a guaxu ha'e henda rupi guive, iky'a e'ý va'erã omboaxa vy.

**12** Ha'e va'e rire Arão akã áry ju azeite SENHOR pe nhomboaxaa aguã regua onhoë, iky'a e'ý va'erã omboaxa vy.

**13** Ha'e gui Moisés omohemonde avi Arão ra'y kuery. Ha'e vy kamixa puku py omohemonde vy ha'e kuery oiku'akua avi ku'akuaa py. Akã reguarã oimama avi imoiny, SENHOR ijayvuague rami vy.

\* **8:8** Urim ha'e Tumim ma sacerdote kuery mba'ekuaa-a oguerekó va'ekue (Números 27.21).

<sup>14</sup> Vaka ra'y ogueru ruka avi jejavya regua ome'ẽ va'erã. Vaka ra'y akã áry Arão ha'e ta'y kuery opo omoõ jejavya regua ome'ẽ va'erã.

<sup>15</sup> Ha'e rã Moisés ojuka vy ojopy huguykue, ha'e vy okuã py oikyty altar rakua ikuai va'e re. Ha'e rami vy oiky'a'o altar. Huguy rembyrekue ma altar yvýry onhoëmba. Ha'e rami vy omboaxa iky'a e'ŷ va'erã, hi'áry ojejavyague ojao'i uka aguã.

<sup>16</sup> Ha'e gui ma hyekue áry ha'e ipy'akue re ikyra oĩ va'ekue ogueru ipykyraxígue mokoïve ikyrakue reve. Ha'e vy Moisés oapypa altar áry.

<sup>17</sup> Ha'e rã vaka ra'y regua altar áry ndoapyi va'ekue ma ha'e kuery rekoa gui mombyry'i oapy, ipirekue, xo'o ha'e hepoxi ha'e javi reve, Moisés pe SENHOR ojapo ukaague rami vy.

<sup>18</sup> Ha'e va'e rire vexa'i oapy vy ome'ẽ va'erã ju ogueru ruka. Vexa'i akã áry ma Arão ha'e ta'y kuery opo omoõ.

<sup>19</sup> Moisés ojuka vy huguykue omboayvipa altar áry ha'e javi rupi.

<sup>20</sup> Omboa'ypa vexa'i. Inhakägue ma Moisés oapy, ipégue ha'e ikyrakue reve.

<sup>21</sup> Hyekue, hetymague ma ojoipa ranhe yy py. Ha'e gui vexa'i ha'e javi Moisés oapy altar áry, heakuã porã rã SENHOR ojou porã aguã. Ixupegua oapy vy ome'ẽmby optyta, Moisés pe SENHOR ojapo ukaague rami vy.

<sup>22</sup> Ha'e gui amboae vexa'i ju ogueru ruka sacerdote-rã mboaxaarã. Vexa'i akã áry Arão ha'e ta'y kuery omoõ opo.

<sup>23</sup> Moisés ojuka vy huguykue gui ojara vy ombovy Arão nambi, ikuã guaxu ha'e ipyxã guaxu oiporu kuaa regua re meme.

<sup>24</sup> Ha'e gui Arão ra'y kuery avi omovaẽ. Huguy gui ae ombovy ha'e kuery nambi, ikuã guaxu ha'e ipyxã guaxu oiporu kuaa regua re. Ha'e rã huguy rembyrekue ma altar áry ha'e javi rupi Moisés omboayvi.

<sup>25</sup> Ogueru ikyrakue, huguaikue, ikyra hyekue áry ha'e ipy'akue re oĩ va'ekue, ipykyraxígue mokoïve ikyrakue reve, ha'e gui hi'ugue oiporu kuaa regua.

<sup>26</sup> Ha'e gui ajaka mbojape imbovua rewegua e'ŷ va'e oĩ SENHOR renonde oĩ va'e gui ma ojopy peteĩ mbojape imbovua rewegua e'ŷ, peteĩ mbojape azeite rewegua, ha'e gui peteĩ mbojape ipererí'i va'e. Ha'e va'e ma omoõ ikyrakue ha'e hi'ugue oiporu kuaa regua áry.

<sup>27</sup> Ha'e nunga ha'e javi omoõ Arão ha'e ta'y kuery po py. Ha'e vy oupi reve ombovava SENHOR renonde, ome'ẽ mbyrã.

<sup>28</sup> Ha'e va'e rire ha'e kuery po gui Moisés oipe'a ju vy oapy altar áry, mba'emo oapy inony va'e áry. Ha'e nunga ma ha'e kuery iky'a e'ŷ va'erã omboaxa vy ome'ẽ, heakuã porã rã SENHOR ojou porã aguã, SENHOR pe ae oapy vy ome'ẽ.

<sup>29</sup> Iplexokue ma Moisés ojopy vy oupi reve ombovava SENHOR renonde, ome'ẽ mbyrã. Ha'e va'e vexa'i nhomboaxaa aguã regua ome'ẽmby pexokue ma Moisés pegua ae, SENHOR ijayvuague rami vy.

<sup>30</sup> Ha'e gui Moisés ojopy avi azeite SENHOR pe nhomboaxaa aguã regua, ha'e altar áry huguykue oĩ va'ekue. Ha'e va'e omboayvi Arão ha'e ijao re, ha'e gui ta'y kuery ha'e ijao re guive. Ha'e rami vy iky'a e'ŷ va'erã omboaxa Arão ha'e ta'y kuery, ijao reve.

<sup>31</sup> Ha'e gui ma Arão ha'e ta'y kuery pe Moisés aipoe'i:

— Pembojy ke xo'o oguy nhemboaty oĩaty rokẽ rexei. Ha'e pyve 'rã pe'u ajaka nhomboaxaa aguã regua py mbojape oĩ va'e reve, xee ajapo ukaague rami vy, "Arão ha'e ta'y kuery ho'u 'rã", ha'e rire.

<sup>32</sup> Ha'e gui xo'o ha'e mbojape ndape'upai va'ekue ma peapypa 'rã.

<sup>33</sup> Sete ára peve pejepa'eme oguy nhemboaty oĩaty rokẽ gui, iky'a e'ŷ va'erã penemboaxa aguã ára ojeupitypa e'ŷa ja. Mba'eta sete ára peve 'rã SENHOR ojeupe guarã penemboaxa.

<sup>34</sup> Kova'e ára py jajapo va'ekue ma SENHOR ojapo uka va'ekue meme, pejejavyague ojao'ipa aguã.

**35** Ha'e nunga rupi sete ára peve 'rã pepyta oguy nhemboaty oñaty rokẽ py ara py ha'e pyávy. Pejapopa 'rã SENHOR ojapo uka va'ekue, pemano e'ÿ aguã, ha'e rami xevy ojapo uka rire – he'i.

**36** Ha'e ramo Arão ha'e ta'y kuery ojapopa Moisés rupi SENHOR ojapo uka va'ekue ha'e javi.

## 9

### *Arão ojeupega ha'e heta va'e kuery regua ome'ëague*

**1** Oito araa py ma Moisés oenoõ Arão ta'y kuery reve, ha'e Israel mongetaaty kuery guive.

**2** Ha'e vy aipoe'i Arão pe:

— Eraa peteĩ vaka ra'y rejavya regua reme'ë va'erã, ha'e peteĩ vexa'i reapy vy reme'ë va'erã. Mokoõve ma ivaikue rei e'ÿ va'e 'rã. Ha'e vy eru SENHOR renonde.

**3** Ha'e gui aipo're 'rã Israel kuery pe: “Peru peteĩ kavara pejavyague re peme'ë va'erã, ha'e gui peteĩ vaka ra'y ha'e peteĩ vexa'i ra'y, mokoõve peteĩ ma'etÿ va'e ha'e ivaikue rei e'ÿ va'e meme, peapy vy peme'ë va'erã.

**4** Peru avi peteĩ vaka ha'e peteĩ vexa'i peteĩ rami ikuiaia regua peme'ë va'erã, SENHOR renonde pejuka aguã, ha'e gui mba'emo aju guigua azeite reve omona mbyre peme'ë va'erã, mba'eta kova'e ára SENHOR ojexa uka 'rã pëvy”, 're 'rã ha'e kuery pe – he'i.

**5** Ha'e ramo Moisés ijayvuague rami vy ha'e kuery oguerupa okuapy oguy nhemboaty oñaty rexei. Ha'e vy heta va'e kuery ha'e javi oupa vy ojexa uka okuapy SENHOR renonde.

**6** Moisés aipoe'i:

— Kova'e SENHOR ojapo uka va'ekue ma pejapo 'rã. Ha'e ramo SENHOR rexakãa ojexa uka 'rã pëvy.

**7** Arão pe ju Moisés aipoe'i:

— Enhemboja ke altar oña py, ha'e eme'ë rejavyague re reapy vy reme'ë aguã va'e. Ha'e vy ejao'i uka ndee ae rejavyague, ha'e gui heta va'e kuery pe avi. Ha'e va'e rire eme'ë heta va'e ome'ë uka va'ekue ha'e kuery ojeavyague rejao'i uka aguã, SENHOR ijayvuague rami vy – he'i.

**8** Ha'e ramo altar oña py Arão onhemboja vy ha'e ae ojeavyague regua ranhe ojuka vaka ra'y.

**9** Arão pe ta'y kuery huguykue ogueru ramo huguykue re okuã ombovy vy oikyty altar rakua ikuai va'e re. Huguy rembyrekue ma onhoõmba altar yvýry.

**10** Ha'e gui ojeavyague regua ome'ëmby kyrakue, ipykyraxígue ha'e ipy'akue regua oí va'ekue ha'e javi ma oapypa altar áry, SENHOR Moisés pe ojapo ukaague rami vy.

**11** Ha'e rã ho'o ha'e ipirekue ma tekoa gui mombyry'ia py oapy.

**12** Ha'e va'e rire mymba oapy vy ome'ë va'erã ju ojuka. Arão pe ta'y kuery huguykue ogueru rã ha'e omboayvi altar yvýry ha'e javi rupi.

**13** Ixupe ogueru avi mymba oapy vy ome'ë va'erã omboa'ypa va'ekue, inhakãgue reve. Ha'e rã oapypa altar áry.

**14** Ha'e gui hyekue ha'e hetymague ojoipa vy oapy altar py oapy inony va'e áry.

**15** Ha'e va'e rire ogueru ruka heta va'e kuery ome'ë uka va'ekue. Kavara heta va'e ojeavyague regua ome'ëmby ranhe ojopy vy ojuka, ha'e oguereko katu ojeavyague regua ome'ë aguã, jypy ojapoague rami vy.

**16** Ogueru ruka avi oapy vy ome'ë va'erã. Ha'e vy ome'ë ojapoaty rami vy.

**17** Ha'e gui ogueru ruka avi mba'emo aju guigua ome'ë va'erã. Ha'e va'e regua peteĩ po renyë ojopy vy oapy altar áry, aje'ive reve mba'emo oapy va'ekue áryve.

**18** Ha'e va'e rire ojuka vaka ha'e vexa'i peteĩ rami ikuiaia reguarã heta va'e kuery rekovia. Huguykue Arão ra'y kuery ixupe omboaxa rã omboayvipa altar yvýry ha'e javi rupi.

<sup>19</sup> Ojopy avi vaka ha'e vexa'i kyrakue, huguaikue, hyekue regua oĩ va'ekue, ipykyraxígue ha'e ipy'akue regua oĩ va'ekue.

<sup>20</sup> Ipexokue áry ikyrakue omoõmba vy oapypa altar áry.

<sup>21</sup> Ha'e rã ipexo ha'e hi'ugue oiporu kuaa regua ma Arão omboaxa SENHOR renonde oupi vy ombovava reve, Moisés ojapo ukaague rami vy.

<sup>22</sup> Ha'e va'e rire heta va'e kuery ikuai katy Arão opo oupi vy ogueroayvu porãmba. Ha'e gui mae oguejy, ojejavvyague regua ome'ẽmba ma rire, oapy vy ome'ẽmba ha'e peteĩ rami ikuai aguã regua guive.

<sup>23</sup> Moisés ha'e Arão oike jogueravy oguy nhemboaty oĩaty py. Ha'e gui oẽ ju vy teĩgue ju ogueroayvu porãmba heta va'e kuery. Ha'e ramo SENHOR rexakãmbaa ojekuaa ha'e kuery pavẽ pe.

<sup>24</sup> Oma'ẽ rã SENHOR-a guigua tata oguejy vy oapypa mymba ome'ẽmba altar áry oĩ va'e ha'e javi, ikyrakue guive. Ha'e nunga ha'e kuery oexa vy oguerovy'a reve omboete okuapy. Guenapy'ã re oõmba, ngova yvy re omovaẽ reve.

## 10

### *SENHOR renonde Nadabe ha'e Abiú oiko vaiague*

<sup>1</sup> Ha'e gui Arão ra'y kuery Nadabe ha'e Abiú ma ha'e kuery voi ogueraa ombar'e hy'a'i heakuã porã va'e oapypy, ha'e va'e re omoõ tata ha'e heakuã porã va'e. Ha'e rami vy ha'eve e'ŷa ramigua tata ogueroike SENHOR renonde, ha'e kuery pe ojapo uka va'ekue'ŷ teĩ.

<sup>2</sup> Ha'e ramo SENHOR-a gui tata ho'a xapy'a vy oapypa. Ha'e rã oiko vai SENHOR renonde.

<sup>3</sup> Ha'e gui Moisés aipoe'i Arão pe:

— Po rami SENHOR ijayvuague ae: “Xere onhemboja va'e pe aexa uka 'rã xeky'a e'ŷ va'ea, ha'e heta va'e kuery renonde ojekuaa 'rã xepo'akaa”, he'i. Ha'e ramo Arão okyrirí.

<sup>4</sup> Ha'e gui Moisés oenoõ Arão tuty Uziel ra'y kuery Misael ha'e Elzafã. Ha'e kuery pe aipoe'i:

— Peju, peipe'a penderyvy retekue henda iky'a e'ŷ va'e renonde gui, peraa tekuaa gui mombyry'ia py — he'i.

<sup>5</sup> Ha'e ramo ha'e kuery ou vy ikamixa puku py ae onhovã heravy tekuaa gui mombyry'ia py, Moisés aipoe'iague rami vy.

<sup>6</sup> Moisés aipoe'i Arão pe, ha'e ta'y kuery Eleazar ha'e Itamar pe voi:

— Pejeai eme pende'a re, neĩ pemondoro eme pendeao, pemano e'ŷ aguã, ha'e nhande kuery pavẽ áry ou e'ŷ aguã imbopagaarã nda'evei ete va'e. Ha'e rã nderegua kuery Israel ro pygua kuery ikuai va'e ma tojae'o pavẽ SENHOR-a gui tata ho'aague re.

<sup>7</sup> Peẽ eme guive oguy nhemboaty oĩaty rokẽ gui, pemano e'ŷ aguã, pendere omoõa rire azeite SENHOR pe nhomboaxaa aguã regua — he'i.

Ha'e ramo ha'e kuery ojapo okuapy Moisés aipoe'iague rami.

### *Sacerdote kuery mba'emo ojapo aguã, ha'e kuery pegua re ijayvua*

<sup>8</sup> SENHOR voi ijayvu Arão pe. Ha'e vy aipoe'i:

<sup>9</sup> — Ndee ha'e ndera'y kuery oguy nhemboaty oĩaty py peike ta jave ndapey'ui 'rã vinho neĩ iro va'e, peiko vai e'ŷ aguã. Ha'e rami aguã ma peẽ kuery rekorã aeja va'e raka'e peve guarã, ha'e peneramymino kuery ikuai va'erã-'erã pe guive guarã,

<sup>10</sup> peẽ kuery peikuaa aguã mba'emo iky'a e'ŷ va'erã omboaxa pyre ha'e omboaxa pyre'ŷ reve joo rami e'ŷa, ha'eve va'e ma ha'eve'ŷ va'e reve joo rami e'ŷ guive,

<sup>11</sup> Israel kuery pembo'e kuaa aguã Moisés pe SENHOR omombe'u uka va'ekue rupi ikuai aguã rami.

<sup>12</sup> Ha'e gui Moisés aipoe'i Arão ha'e ta'y okuave'i va'ekue Eleazar ha'e Itamar pe:

— Pejopy mba'emo aju guigua SENHOR pe ome'ea teĩ ndoapyi va'ekue, ha'e pe'u imbovua e'ŷ re altar yvy'iry ae, iky'a e'ŷ va'e ramo.

<sup>13</sup> Pe'u 'rā henda iky'a e'ŷ va'e py, mba'eta pêvygua ha'e pendera'y kuery pegua ae, mba'emo SENHOR pe oapy vy ome'ē mbyre guigua. Ha'e rami ae xevy ojapo uka va'ekue.

<sup>14</sup> Ha'e gui ipexokue ha'e hi'ugue peupi vy pembovava reve pemboaxa va'ekue voi pe'u 'rā peteī henda iky'a e'ŷa py, ndera'y kuery ha'e nderajy kuery reve. Mba'eta ha'e nunga ma ndevy guarã ae ome'ē mbyre, ha'e ndera'y kuery peguarã, Israel kuery peteī rami ikuia regua ome'ē va'ekue guigua.

<sup>15</sup> Hi'ugue ha'e ipexokue peupi vy pembovava reve pemboaxa va'ekue ma Peru 'rā mymba peapy va'ekue kyrakue reve. Ha'e nunga ha'e javi peupi vy pembovava 'rā SENHOR renonde. Ha'e rami aguã ma penderekorã aeja va'e raka'e peve guarã, ha'e peneramymino kuery peguarã, SENHOR he'iague rami vy – he'i.

<sup>16</sup> Moisés oikuua pota ete kavara jejavya regua ome'ē mbyre guigua teī oapypaa ma ra'e. Ha'e vy ijayvu atã Arão ra'y kuery okuave'i va'e Eleazar ha'e Itamar pe. Ha'e vy aipoe'i:

<sup>17</sup> — Mba'e re tu ndape'ui ri jejavya regua ome'ē mbyre guigua henda iky'a e'ŷa py? Mba'eta ha'e nunga ma iky'a e'ŷ ete va'e. Pendevy SENHOR ome'ē heta va'e kuery ojejavyague peraa aguã SENHOR renonde pejao'i uka vy.

<sup>18</sup> Ne'exa, ha'e va'e mymba ome'ē mbyre ruguykue henda iky'a e'ŷ va'e py ndogueruai ramo ma xo'o pe'upa 'rāgue ra'e henda iky'a e'ŷ va'e py, xee ajapo ukaague rami vy – he'i.

<sup>19</sup> Arão ombovai Moisés pe:

— Ma'ẽ, ange jejavya regua xee ha'u va'e rire SENHOR ojou porã 'rāgue ri nda'u? Mba'eta ange xera'y kuery omboaxa heta va'e kuery ojejavyague regua SENHOR renonde, oapy vy ome'ē mbyre voi, va'eri ha'e rami ete xere oiko – he'i.

<sup>20</sup> Ha'e nunga Moisés oendu vy nda'ivaivei.

## 11

### *Deuteronômio 14.3-20*

<sup>1</sup> SENHOR ijayvu Moisés ha'e Arão pe. Ha'e vy aipoe'i:

<sup>2</sup> — Aipopeje Israel kuery pe: Yvy re mymba ipy irundy va'e ikuai va'e gui ma pova'e anho 'rā pe'u:

<sup>3</sup> Ipyapẽ mbyte rupi ja'o va'e ha'e oixu'u jevy va'e ha'e javi ma ha'eve 'rā mymba ikuai va'e gui pe'u aguã.

<sup>4</sup> Ha'e rā pova'e nunga ma ndape'ui 'rā: oixu'u jevy va'e rive, ha'e e'ŷ vy ipyapẽ ja'o va'e'ŷ rive. Camelo ma oixu'u jevy va'eri ipyapẽ ja'o va'e'ŷ. Ha'e nunga ma ha'eve'ŷ va'e pendevy.

<sup>5</sup> Arganaz ma oixu'u jevy avi va'eri ipyapẽ ja'o va'e'ŷ. Ha'e nunga ma pendevy ha'eve'ŷ va'e.

<sup>6</sup> Tapixi ma oixu'u jevy va'eri ipyapẽ ja'o va'e'ŷ. Ha'e nunga pendevy ha'eve'ŷ va'e.

<sup>7</sup> Poryko ma ipyapẽ ja'o va'eri oixu'u jevy va'e'ŷ. Ha'e va'e ma pendevy ha'eve'ŷ va'e.

<sup>8</sup> Ha'e nunga ro'okue ma ndape'ui 'rā, neī he'õgue re ma voi ndapepokoi 'rā, pendevy ha'eve'ŷ va'e ramo.

<sup>9</sup> — Ha'e gui yy rupi ikuai va'e regua ma pova'e pe'u 'rā: ye'ẽ ha'e yakã rupi ipopo ha'e ipekue va'e ma pe'u 'rā.

<sup>10</sup> Ha'e rā ipopo e'ŷ va'e, e'ŷ vy ipekue e'ŷ va'e ma nda'evei: ye'ẽ rupi, yakã, yy rupi onhemboaty okuapy, yy rupi temimoingo ikuai va'e tema nda'evei, ha'eve'ŷ va'e pendevy.

<sup>11</sup> Pendevy ha'eve'ŷ va'e ramo ma ho'okue ndape'ui 'rā, he'õgue voi ha'eve'ŷ va'e.

<sup>12</sup> Yy rupigua ipopo e'ŷ va'e, e'ŷ vy ipekue e'ŷ va'e ma pendevy ha'eve'ŷ va'e meme.

<sup>13</sup> — Guyra oveve va'e regua ha'eve'ŷ va'e ma pova'e regua ro'o ndape'ui 'rā, ojeguarupy ramo: taguato xiñ, xapirẽ ha'e taguato ye'ẽ rupigua gui;

<sup>14</sup> milhano, falção ha'e hexegua va'e ma guive rā;

<sup>15</sup> xapirẽ regua ha'e javi, ha'e hexegua va'e ma guive rā;

<sup>16</sup> avestruz, urukure'a, gaivota, taguato, ha'e hexegua va'e ma guive rã;

<sup>17</sup> mocho, xapirẽ ye'ẽ rupigua, íbis,

<sup>18</sup> aka'ẽ, pelicano, abutre,

<sup>19</sup> cegonha, garça ha'e hexegua va'e ma guive rã, poupa ha'e mbopi.

<sup>20</sup> — Ha'e gui omyĩ'i va'e oveve'i ha'e ipy irundy'i va'e regua ma guive rã ha'eve'ỹ va'e pendevy.

<sup>21</sup> Ha'e rã omyĩ'i ha'e oveve'i va'e, opy irundy re oguata va'e regua yvy áry rupi opo aguã hetyma mbukuve va'e ma pe'u 'rã.

<sup>22</sup> Ha'e va'e regua pe'u va'erã ma pova'e: locusta ha'e hexegua va'e ma guive rã, tukukaru ha'e hexegua va'e ma guive rã, kyju ha'e hexegua va'e ma guive rã, ha'e tuku hexegua va'e ma guive rã.

<sup>23</sup> Ha'e gui amboae oveve'i va'e ha'e omyĩ'i va'e opy irundy re oguata va'e ma ha'eve'ỹ va'erã meme pendevy.

<sup>24</sup> — Pova'e nunga re'õgue ma penemongy'aarã ramo amongue va'e rei hexe opoko va'ekue ma ha'eve'ỹ va'e 'rã oiko ka'aru peve.

<sup>25</sup> He'õgue reraare ma ojoi 'rã oao, ha'e rami teñ ha'eve'ỹ va'e 'rã oiko ka'aru peve.

<sup>26</sup> Mymba ipyapẽ ja'o va'eri mbyte rupi e'ỹ oja'o va'e, ha'e oixu'u jevy va'e'ỹ ma pendevy ha'eve'ỹ va'e meme. Ha'e nunga re opoko va'e rei ma ha'eve'ỹ va'e avi 'rã oiko.

<sup>27</sup> Mymba ipy irundy va'eri opy mbyte re oguata va'e ma pendevy ha'eve'ỹ va'e meme. He'õgue re opoko va'e ma guive rã ha'eve'ỹ va'e 'rã oiko ka'aru peve.

<sup>28</sup> He'õgue reraare voi ojoi 'rã oao, ha'e ha'eve'ỹ va'e oiko 'rã ka'aru peve. Ha'e nunga ha'e javi ma ha'eve'ỹ va'e pendevy.

<sup>29</sup> — Ha'e gui yvy jave re temimoingo ikuai va'e-va'e regua ma pova'e nunga ha'eve'ỹ va'e 'rã: doninha, anguja, teju ha'e hexegua va'e ma guive rã,

<sup>30</sup> ha'e geco, jakare yvy re ikuai va'e, tejuro, teju ye'ẽ yvýrygua ha'e camaleão.

<sup>31</sup> Ha'e gui temimoingo ikuai va'e ha'e javi gui ma ha'e nunga pendevy ha'eve'ỹ va'e meme 'rã. He'õgue re opoko va'ekue ma oiko 'rã ha'eve'ỹ va'e ka'aru peve.

<sup>32</sup> Ha'e mba'emo áry ha'e nunga re'õgue ho'a ramo voi ha'eve'ỹ va'e 'rã, mba'emo ryru yvyra guigua mba'e, ao, ipire, voxá, e'ỹ vy tembiporu mba'emo jajapoa va'e rei, ha'e nunga nhamoĩ 'rã yy py, ka'aru peve 'rã opyta ha'eve'ỹ va'e. Ha'e ramo ma ha'eve va'e ju 'rã opyta.

<sup>33</sup> Ha'e gui mba'emo ryru nhae'ũ guigua py ri ha'e nunga ho'a ramo ma ha'e py omboyrú pyre ha'e javi ha'eve'ỹ va'e 'rã opyta. Hyru voi pembovo 'rã.

<sup>34</sup> Ha'e va'e py tembi'u yy reve ojy va'ekue ma ha'eve'ỹ va'e meme 'rã opyta. Hykue va'e jay'u va'erã omboyrú pyre ma ha'eve'ỹ va'e meme avi 'rã.

<sup>35</sup> Ha'e mba'emo áry rei he'õgue ho'a ramo opyta 'rã ha'eve'ỹ va'e: tatakua, e'ỹ vy tata rupa yapo guigua áry ho'a ramo pembovopa 'rã, ha'eve'ỹ va'e ma opyta ramo, ha'e nunga rupi ha'eve'ỹ va'eaa aguã.

<sup>36</sup> Ha'e rã yvu, e'ỹ vy yy omboty pyre py ri ho'a ramo ma ha'eve va'e 'rã opyta. Ha'e rã yy py omamo va'ekue re opoko va'ekue ma ha'eve'ỹ va'e 'rã opyta.

<sup>37</sup> Xapy'a rei mba'emo ra'yigue onhotõ mbyrã va'e áry ri he'õgue ho'a ramo ma opyta 'rã ha'eve va'e.

<sup>38</sup> Ha'e rã xapy'a rei amongue ha'yigue yy py omoakõ va'ekue áry mba'emo re'õgue ho'a ramo ma ha'eve'ỹ va'e 'rã opyta pendevy.

<sup>39</sup> — Xapy'a rei mymba pe'u aguã ha'eve va'e omamo ramo he'õgue re amongue opoko ri vy opyta 'rã ha'eve'ỹ va'e ka'aru peve.

<sup>40</sup> He'õgue regua ho'u va'ekue ma ojoi 'rã oao, ha'e ka'aru peve 'rã oiko ha'eve'ỹ va'e. He'õgue reraare voi ojoi 'rã oao, ha'e oiko 'rã ha'eve'ỹ va'e ka'aru peve.

<sup>41</sup> — Opa marãguá temimoingo yvy rupi omyĩ okuapy va'e ma pe'u aguã ha'eve'ỹ va'e meme. Ha'e nunga ma pe'u va'erã e'ỹ.

**42** Opa marāgua temimoingo yvy rupi omyī okuapy va'e guye re oguata va'e, opy irundy re oguata va'e, e'ŷ vy ipy reta va'e ma nda'evei 'rā pe'u aguā, ha'eve'ŷ va'e ramo.

**43** Ha'eve'ŷ va'e penhemongo eme ha'e va'e regua temimoingo yvy rupi omyī okuapy va'e pe'ua py, penhemongy'a eme ha'e va'e regua gui, ha'eve'ŷ va'e peiko e'ŷ aguā.

**44** Xee ma SENHOR Penderuete. Ha'e nunga rupi peẽ voi pejeky'a'o iky'a e'ŷ va'e peiko aguā, mba'eta xee ma iky'a e'ŷ va'e. Penhemongy'a eme temimoingo kuery yvy rupi onhembotyryry va'e gui.

**45** Xee SENHOR ae Egito yvy gui penenoēmba va'ekue, Penderuete aiko aguā. Ha'e nunga rupi iky'a e'ŷ va'e 'rā peiko, mba'eta xee ma iky'a e'ŷ va'e.\*

**46** — Ha'e va'e lei ma mymba kuery, guyra oveve va'e, yy rupi omyī va'e, ha'e temimoingo yvy re ikuai va'e ha'e javi regua,

**47** peikuaa aguā ha'eve va'e ha'e ha'eve'ŷ va'e reve joo rami e'ŷa, ha'e mymba pe'u aguā ha'eve va'e ha'e ha'eve'ŷ va'e voi.

## 12

### *Kunhague oikuavā'i rire ojeky'a'o jevy aguā regua*

**1** SENHOR aipoe'ive ju Moisés pe:

**2** — Ndeayvu 'rā Israel kuery pe: Xapy'a rei peteĩ kunha kyrī va'e oguereko vy ava'i ri oikuavā'i ma vy sete ára re 'rā oĩ ha'eve'ŷ va'e, gueko re oiko va'e rami ae avi.

**3** Oito araa py ma ava'i pire omboi uka 'rā.

**4** Ha'e gui kunha va'e ma trinta e três ára peve 'rā oĩve nguguy gui ojeky'a'o aguā. Ojeky'a'opaa ára ojeupity e'ŷa ja teĩve ma voi ndopokoi 'rā iky'a e'ŷ va'e re, neĩ ndoikei 'rā henda iky'a e'ŷ va'e py.

**5** Ha'e rā kunha'i ri oikuavā'i vy ma mokoĩ semana 'rā ha'eve'ŷ va'e oĩ, gueko re oiko va'e rami avi. Ha'e va'e rire sessenta e seis ára re oĩ 'rā nguguy gui ojeky'a'opa peve.

**6** — Ha'e gui imemby'i e'ŷ vy ipi'a'i oikoague gui ojeky'a'opa aguā ára ojeupity ma ramo sacerdote pe ogueraa 'rā peteĩ vexa'i ra'y peteĩ ma'etŷ'i va'e oapy vy ome'ẽ va'erā, ha'e gui peteĩ apykaxu e'ŷ vy peteĩ jeruxi'i jejavya regua ome'ẽ va'erā, oguy nhemboaty oĩaty rokê py.

**7** Ha'e ramo sacerdote ojuka 'rā SENHOR renonde kunha va'e ha'eve e'ŷague ojao'i uka vy. Ha'e ramo ojeky'a'opa ju 'rā nguguy gui. Ha'e rami aguā ma omemby'i e'ŷ vy opi'a'i oikuavā'i va'e rekorā oeja pyre.

**8** Ha'e rami teĩ xapy'a rei vexa'i ra'y ome'ẽ va'erā ndojoui ri vy ogueraa 'rā mokoĩ jeruxi e'ŷ vy mokoĩ apykaxu'i. Ha'e va'e regua peteĩ ma oapy vy ome'ẽ 'rā, ha'e rā amboae ma jejavya regua. Ha'e va'e py sacerdote ojao'i uka 'rā kunha va'e ha'eve e'ŷague, ha'e ramo ha'eve va'e ju 'rā oiko.\*

## 13

### *Lepra regua lei oĩa*

**1** SENHOR aipoe'i Moisés ha'e Arão pe:

**2** — Xapy'a rei amongue pire re oĩ 'rā irurupaa e'ŷ vy ipeupa rei, e'ŷ vy iovea overa rei va'e. Ha'e nunga lepra rivyvyi ramo peraa 'rā sacerdote Arão-a py, e'ŷ vy ta'y sacerdote oiko va'ea py.

**3** Ha'e ramo sacerdote oexa pota 'rā ijaja ipire re oĩ va'e. Xapy'a rei ijaja rupi ipire rague xiñ rei, ha'e ijaja ho'o peve oike ma ramo ma oikuua 'rā lepra guigua ete ai vaikue. Sacerdote oexa potapa ma vy ixupe "Ha'eve'ŷ va'e" he'i 'rā.

**4** Xapy'a rei iovea overa rei va'e ha'e xiñ rei va'eri ho'o peve ijai ndoikei, ha'e ipire rague voi naxiñ ramo sacerdote omboty 'rā ijai va'e ha'e ae'i sete ára peve.

<sup>5</sup> Sete araa py ma sacerdote oexa pota ju 'rã. Oexa rã ijai vaikue opyta, ha'e ipire áry rupi nda'ipy-ipyve ovyi ri ramo sete ára peve ae ju 'rã sacerdote omboty.

<sup>6</sup> Ha'e gui sete araa py sacerdote oexa pota jevy 'rã. Xapy'a rei lepra ndovera reivei, ha'e nda'ipyve ovyi ramo ma ixupe sacerdote "Ha'eve va'e" he'i 'rã. Ha'e va'e regua ai ma tykue rei va'ekue ae. Ava oao ojoi vy ha'eve va'e ju 'rã oiko.

<sup>7</sup> Ha'e rami teñ ojeky'a'o uka aguã sacerdote pe ojexa uka ma rire ipire rupi ijai tykue reia ipyve ju ovvy ri ramo teigüe ju 'rã ojexa uka sacerdote pe.

<sup>8</sup> Ha'e va'e oikuaa pota rã ipire rupi ijai tykue reia ipyve ra'e ri ramo ixupe "Ha'eve'ý va'e" he'i 'rã, lepra ete oĩ ramo.

<sup>9</sup> — Xapy'a rei amongue re lepra ojekuaa ri ramo peraa 'rã sacerdote-a py.

<sup>10</sup> Sacerdote oikuaa pota rã ipire rurua rupi xiñ rei va'e ojekuaa, ipire rague xiñmba ha'e ho'okue ojekuaa rei ri ramo

<sup>11</sup> ipire re lepra ae oĩ. Ha'e nunga rupi sacerdote ixupe "Ha'eve'ý va'e" he'i 'rã. Nomboty 'rã, ha'eve'ý va'e ae oiko ramo.

<sup>12</sup> Xapy'a rei lepra ipy-ipyve ri hete pire ha'e javi rupi, ha'e sacerdote oexa rã inhakã guive ipy peve ojao'ipa ri ijai ramo

<sup>13</sup> oikuaa pota porã 'rã. Xapy'a rei lepra ho'o ha'e javi rupi ojao'ipa ramo iove va'e pe "Ha'eve va'e" he'i 'rã. Lepra oñague xiñmba ramo ha'eve va'e ju oiko.

<sup>14</sup> Ha'e rami teñ ho'okue ojekuaa jevya ára py ma ha'eve'ý va'e ju 'rã oiko.

<sup>15</sup> Ho'okue ojekuaa reia py sacerdote oexa vy "Ha'eve'ý va'e" he'i 'rã. Ho'okue ojekuaa va'e ma ha'eve'ý va'e. Ha'e nunga ma lepra ae.

<sup>16</sup> Xapy'a rei ho'okue ojekuaa rei va'ekue xiñmba jevy ramo ou 'rã sacerdote-a py.

<sup>17</sup> Ha'e ramo oexa pota 'rã. Xapy'a rei lepra ojekuaa va'ekue xiñmba jevy ramo ijai vaikueague pe sacerdote "Ha'eve va'e" he'i 'rã. Ha'e ramo ha'eve va'e 'rã oiko.

<sup>18</sup> — Ha'e gui xapy'a rei ho'okue ha'e ipire py ipeupa reiague onhembotypa,

<sup>19</sup> ha'e ipeupa reia 'räge py irurupa rei vy iovea xiñmba rei, e'ý vy overa reia rupi pytãmba rei avi ramo ojexa uka 'rã sacerdote pe.

<sup>20</sup> Ha'e ramo sacerdote oikuaa pota 'rã. Xapy'a rei ipire guýry ete oike, ha'e ipire rague'i xiñmba ri ramo sacerdote "Ha'eve'ý va'e" he'i 'rã. Ha'e va'e ma lepra ae, ipeupa reiague gui ju ojekuaa.

<sup>21</sup> Ha'e rami teñ sacerdote oexa pota rã ipire rague'i naxiñvei, ipire guýry e'ý, ha'e ndoveravei ramo sacerdote sete ára peve 'rã omboty ha'e ae'i.

<sup>22</sup> Xapy'a rei ipire rupi ipy-ipyve ri ramo ma ixupe sacerdote "Ha'eve'ý va'e" he'i 'rã, lepra ae ramo.

<sup>23</sup> Ha'e rami avi iovea overa reia nda'ipyve ovyi ri ramo ma ipeupa reia rendakue ae 'rã ipere. Ha'e ramo ixupe sacerdote "Ha'eve va'e" he'i 'rã.

<sup>24</sup> — Xapy'a rei ipire re tata okaia py ho'okue perea overa rei ri, xapy'a rei xiñmba ha'e pytã rei reve, e'ý vy xiñmba rive ramo

<sup>25</sup> sacerdote oexa pota 'rã. Xapy'a rei ipere overa reia rague xiñmba, ha'e ipire guýryve ri oĩ ramo lepra ae okaiague mbyte gui ojekuaa. Ixupe sacerdote "Ha'eve'ý va'e" he'i 'rã, lepra ae ramo.

<sup>26</sup> Ha'e rami teñ sacerdote oexa pota rã ipere overa reia rague naxiñ ri, neñ ipire guýry voi ndoikei, ha'e ndoveravei ri ramo sacerdote omboty 'rã sete ára peve ha'e ae'i.

<sup>27</sup> Ha'e gui sete araa py ma sacerdote oexa pota jevy 'rã. Xapy'a rei ijai ipire rupi ipyve ri ovvy ramo sacerdote "Ha'eve'ý va'e" he'i 'rã, lepra ae ramo.

<sup>28</sup> Ha'e rami avi xapy'a rei ipere overa reia oñague py opyta, nda'ipyve ovyi, ha'e ndovera reivei ramo okaiague pere ae 'rã ojekuaa. Ha'e ramo sacerdote "Ha'eve va'e" he'i 'rã, okaiague pere rive ramo.

<sup>29</sup> — Xapy'a rei ava e'ý vy kunha inhakã re e'ý vy hembeta re ijai ramo

30 sacerdote oexa pota 'rā ai. Xapy'a rei ipire guýry ri ijai oike, ha'e hague'i ijupa rei va'e ojekuaa ramo ma sacerdote "Ha'eve'ŷ va'e" he'i 'rā. Ha'e nunga lepra ma tinha 'epy va'e, inhakā re e'ŷ vy hembeta re ojekuaa.

31 Ha'e rami teĩ ai tinha sacerdote oikuua pota vy oexa rā ijai ipire guýry vaipa e'ŷ, ha'e hague huū va'e noĩ ri ramo sacerdote sete ára peve 'rā omboty tinha reveguia ha'e ae'i.

32 Sete araa py ma sacerdote oexa pota ju 'rā ai. Xapy'a rei tinha nda'ipyve ovyi, hague'i iju va'e noĩ, ha'e tinha ai oexa rā ipire guýry e'ŷ ri ijai ramo ma

33 ava onhopĩa 'rā. Ha'e rā ai tinha oĩa rupi ma nonhopĩai. Ha'e gui sacerdote omboty ju 'rā sete ára peve ai tinha reveguia.

34 Sete araa py ma sacerdote oexa pota jevy 'rā ai tinha reveguia. Xapy'a rei ipire rupi nda'ipyve ovyi, ha'e ipire guýry e'ŷ ri ijai ramo ixupe sacerdote "Ha'eve va'e" he'i 'rā. Oao ojoi ma vy ha'eve va'e ju 'rā oiko.

35 Ha'e rami avi xapy'a rei ojeky'a'o uka rire ipire rupi ai tinha ipyve pyve ri ramo

36 sacerdote oexa pota ju 'rā. Ipire rupi tinha ipyve pyve ri ramo sacerdote hague'i ijupa va'e oeka e'ŷ teĩ ha'eve'ŷ va'e ae oiko.

37 Ha'e rami avi ha'e oexa rā ai tinha va'e optyta, ha'e hague'i huū va'e ipukuve ri ramo ai tinha okuera ma. Ha'eve va'e ramo ixupe sacerdote "Ha'eve va'e" he'i 'rā.

38 — Ha'e gui ava e'ŷ vy kunha ipire rupi iperea overa rei va'e oĩ ramo

39 sacerdote oexa pota 'rā. Xapy'a rei ipire rupi ipereague xiĩmba rei va'eri ndovera reivei va'e ramo ma iove xiĩ ojekuaa ipire rupi. Ha'e va'e ma ha'eve va'e.

40 — Xapy'a rei ava akā gui hi'a okuipa vy ipire rei teĩ ha'eve va'e oiko.

41 Xapy'a rei hova katy gui ri hi'a kui vy hova katy ipire rei teĩ ha'eve va'e oiko.

42 Ha'e rami avi xapy'a rei ijapte rupi e'ŷ vy hova katy hi'a kuipaague py ojekuaa ri ai xiĩ rei va'e pytā reve vy ma lepra ojekuaa, ijapte rupi e'ŷ vy hova katy hi'a kuipaague py.

43 Ha'e gui sacerdote oikuua pota vy oexa rā irurua ijapte re e'ŷ vy hova katy hi'a kuipaague py xiĩ rei pytā reve ri ramo lepra ipire re ojekuaa rami,

44 ha'e ramo ma lepra reveguia ae, ha'eve'ŷ va'e oiko. Ixupe sacerdote "Ha'eve'ŷ va'e" he'i 'rā, inhakā re ijai oĩ ramo.

45 — Ha'e gui lepra reveguia ma oao xorokue py onhemonde 'rā, o'a voi nomoatyrõi 'rā. Ojejuru mo'ã reve ojapukai vy "Ha'eve'ŷ va'e, ha'eve'ŷ va'e aiko!" he'i 'rā.

46 Hexe ai oĩa ja ha'eve'ŷ va'e oiko 'rā. Ha'eve'ŷ va'e vy ha'e ae'i 'rā oiko. Heta va'e kuery gui mombyry 'rā onhemboekoa.

47 — Xapy'a rei amongue ao re ojekuaa 'rā hove rei va'e, ao vexa'i rague guigua, e'ŷ vy ajukue iporâve va'e guigua re.

48 Ipuku-a rupigua mba'e, e'ŷ vy ipya rupigua re ojekuaa 'rā ajukue iporâve va'e guigua e'ŷ vy vexa'i rague guigua re, mba'emo pire re, e'ŷ vy pire guigua ojapo pyre re mba'e.

49 Ha'e nunga re hove va'e hovy, e'ŷ vy pytā va'e ri oĩ ramo, ao re mba'e, e'ŷ vy mba'emo pire re, ipuku-a rupi e'ŷ vy ipya rupigua re, ha'e pire gui mba'emo ojapo pyre re teĩ hove rei va'e ojekuaa rā oexa uka 'rā sacerdote pe.

50 Sacerdote oexa pota vy hove rei va'e oĩa omoĩ porã 'rā sete ára peve.

51 Ha'e gui sete araa py ma oexa pota jevy 'rā. Xapy'a rei iiao re ipyve ovyi ri ramo, ipuku-a rupi e'ŷ vy ipya rupi teĩ, ipire re e'ŷ vy mba'emo hembiapo re mba'e, ha'e ramo lepra ovyi va'e ae 'rā oĩ. Ha'e va'e ma ha'eve'ŷ va'e ae.

52 Ha'e ramo oapypaa 'rā ajukue, ipuku-a rupi e'ŷ vy ipya rupigua re lepra ojekuaa teĩ, vexa'i rague guigua e'ŷ vy ajukue iporâve va'e guigua teĩ, mba'emo pire gui ojapo pyre re teĩ lepra ojoua rā lepra ae ovyi va'e ae. Ha'e nunga ha'e javi oapypaa 'rā.

53 — Ha'e rami avi xapy'a rei sacerdote oexa pota rā hove rei va'e nda'ipyve ovyi ri iiao re, neĩ ipuku-a rupi neĩ ipya rupi, neĩ mba'emo pire gui ojapo pyre re voi ramo

54 sacerdote ojoi uka 'rā hove va'e oĩague, ha'e sete ára peve ju omoĩ porã 'rā ha'e ae'i.

<sup>55</sup> Ha'e gui ajukue hove rei va'e ojekuaa ague ojoia rire sacerdote oexa pota rā ha'ekue'i ae opyta ramo, nda'ipyve ovyi teĩ ha'eve'ŷ va'e ae 'rā oiko. Oapypaa 'rā tata py. Ha'e nunga ma lepra okaru va'e, hi'áry rupi e'ŷ vy iguy rupi ojekuaa teĩ.

<sup>56</sup> — Ha'e rami avi sacerdote oikuaa pota vy xapy'a rei oexa 'rā ojoia rire oje'o ramo omondoro 'rā ajukue gui, e'ŷ vy ipirekue guigua gui, ipuku-a rupi e'ŷ vy ipya rupi ojekuaa teĩ.

<sup>57</sup> Ajukue re hove rei ovvy va'e ojekuaa teri ramo, ipuku-a rupi e'ŷ vy ipya rupi teĩ, mba'emo pire gui ojapo pyre re teĩ lepra ipy-ipyve va'erā ae. Oapypaa 'rā tata py lepra ovvyague.

<sup>58</sup> Ha'e rami teĩ xapy'a rei ao re hove rei va'e oña va'e, ipuku-a rupi e'ŷ vy ipya rupi teĩ, e'ŷ vy mba'emo pire guigua teĩ ojoia rā hove rei va'e ndojekuaavei ri ramo teĩgue ju 'rā ojoia. Ha'e vy ma ha'eve va'e ju 'rā oiko.

<sup>59</sup> Ha'e va'e lei ma vexa'i rague guigua re hove rei va'e ojekuaa va'e regua, e'ŷ vy ajukue iporāve va'e guigua re, ipuku-a rupi e'ŷ vy ipya rupi ojekuaa, e'ŷ vy ipire gui ojapo pyre re ojekuaa rire, ha'e nunga pe "Ha'eve va'e" e'ŷ vy "Ha'eve'ŷ va'e" he'i kuaa aguã.

## 14

### *Lepra gui okuera va'ekue regua lei oña*

<sup>1</sup> SENHOR aipoe'i Moisés pe:

<sup>2</sup> — Pova'e ojapo ukapy ma lepra gui okuera va'ekue ojeky'a'oa ára guarã. Ha'e rami rā peraa 'rā sacerdote-a py.

<sup>3</sup> Ha'e ramo tekaoa gui mombyry'i oipe'a vy oexa pota 'rā. Xapy'a rei lepra oguereko va'ekue gui okuera ma ramo

<sup>4</sup> sacerdote oiky'a'o aguã ogueru ruka 'rā mokoï guyra oikove reve ha'e ha'eve va'e, ha'e gui peteĩ yvyra yary, havijukue pytā va'e ha'e hissopo rogue.

<sup>5</sup> Peteĩ guyra ma sacerdote ojuka uka 'rā hyru nhae'ũ guigua py yy xyry ombolsru va'ekue áry.

<sup>6</sup> — Ha'e gui mokoïa guyra ju ogueru 'rā oikove reve, ha'e gui yvyra yary, havijukue pytā va'e, ha'e hissopo rogue. Ha'e vy omoakŷmba 'rā guyra yy xyry áry ojuka va'ekue ruguykue py.

<sup>7</sup> Lepra gui ojeky'a'o uka va'e áry rupi ma omboayvi 'rā sete-kue. Ha'e vy ixupe "Ha'eve va'e" he'i 'rā, ha'e gui guyra oikove va'e opoi ju 'rā tekaoa e'ŷa áry rupi oveve ovvy aguã.

<sup>8</sup> Ha'e gui ojeky'a'o uka va'e ojoi 'rā oao, onhopimba 'rā opire rague ha'e javi, ha'e ojau 'rā yy py. Ha'e vy ma ha'eve va'e ju 'rā oiko. Ha'e va'e rire oo ju 'rā tekaoa py, teĩ ngoo py tema ndoikei ranhe 'rā sete ára peve.

<sup>9</sup> Sete araa py ma o'a onhopimba 'rā oakã gui, guendyva, ha'e guexa pykã rague guive. Opire rague ha'e javi 'rā onhopimba. Ha'e vy oao ojoi 'rā, ojau 'rā guive. Ha'e vy ma ha'eve va'e ju 'rā oiko.

<sup>10</sup> — Oito araa py ma ogueru 'rā mokoï vexa'i ivaikue rei e'ŷ va'e, peteĩ vexa'i kunha ivaikue rei e'ŷ va'e peteĩ ma'etŷ'i va'e, ha'e mboapy ryru trigo ku'ikue iporāve va'e mba'emo aju guigua ome'ẽ mbyrā, azeite reve omonamba pyre, ha'e gui peteĩ ryru azeite ju.

<sup>11</sup> Ha'e gui sacerdote joky'a'o ukaa rupi oiko va'e ma SENHOR renonde oexa uka 'rā ava ojeky'a'o uka aguã ou va'e mba'emo ogueru va'ekue ha'e javi reve, oguy nhemboaty oñaty rokẽ py.

<sup>12</sup> Peteĩ vexa'i va'e regua ogueru vy ojuka 'rā mba'emo omboekovia aguã regua ome'ẽ va'erā, azeite ryru reve. Ha'e nunga oupi reve ombovava 'rā SENHOR renonde ome'ẽ vy.

<sup>13</sup> Ha'e gui vexa'i mboae ju 'rā ojuka. Jejavya regua ha'e oapy vy ome'ẽmby ojukaaty py ae ojuka, henda iky'a e'ŷ va'e py. Mba'eta mba'emo omboekovia aguã regua ome'ẽmby ha'e jejavya regua ma sacerdote pe meme opyta, iky'a e'ŷ ete va'e.

14 Omboekovia aguã ome'ẽmby ruguykue regua sacerdote ojopy vy ombovy 'rã ojeky'a'o uka va'e nambi, ikuã guaxu ha'e ipyxã guaxu oiporu kuaa regua re meme.

15 Azeite ju ojopy vy hyru gui onhoẽ 'rã opo ijaxua regua mbyte py.

16 Opo ijaxua re azeite oĩ va'e py omoakỹ 'rã okuã oiporu kuaa regua. Ha'e vy okuã py ju omboayvipa 'rã sete-kue SENHOR renonde.

17 Azeite rembyrekue opo py oĩ teri va'e regua ma sacerdote ombovy 'rã ojeky'a'o uka va'e nambi, ikuã guaxu ha'e ipyxã guaxu oiporu kuaa regua re meme, mba'emo omboekovia aguã regua ome'ẽ mbyrã ojuka uka va'ekue ruguy áry.

18 Ha'e rã azeite rembyrekue opo py oĩ va'e ma sacerdote onhoẽ 'rã ojeky'a'o uka va'e apyte re. Ha'e rami vy SENHOR renonde sacerdote ojao'i uka 'rã ha'eve e'ŷague.

19 — Ha'e gui ma jejavya regua sacerdote ome'ẽ vy ojao'i uka 'rã ojeky'a'o uka va'e ha'eve e'ŷague. Ha'e va'e rire ma ojuka 'rã oapy vy ome'ẽmby.

20 Ha'e nunga ome'ẽ 'rã altar áry mba'emo aju guigua reve. Ha'e rami py sacerdote ojao'i uka 'rã ava ha'eve e'ŷague. Ha'e ramo ha'eve va'e ju 'rã oiko.

21 Xapy'a rei iporiaukue'i vy ha'e nunga ha'e javi ndojoui ri vy ogueru 'rã peteĩ vexa'i mba'emo omboekovia vy ome'ẽ aguã oupi vy ombovava reve, ha'eve e'ŷague ojao'i uka aguã. Ogueru avi 'rã peteĩ ryru trigo iporãve va'e azeite reve omona mbyre mba'emo aju guigua ome'ẽ aguã, ha'e peteĩ ryru azeite,

22 ha'e gui mokoõ jeruxi e'ŷ vy mokoõ apykaxu ojoua'i rami. Ha'e va'e regua peteĩ ma jejavya regua ome'ẽ va'erã, ha'e rã amboae ma oapy vy ome'ẽ va'erã.

23 Ha'e gui irundy meme ára ma ojeky'a'o ukaa py sacerdote pe ogueru 'rã ha'e nunga ha'e javi, oguy nhemboaty oñaty va'e rokẽ py, SENHOR renonde.

24 Sacerdote ma vexa'i mba'emo omboekovia aguã regua ome'ẽmby ha'e azeite ryru ojopy vy oupi 'rã SENHOR renonde ombovava reve ome'ẽ mbyrã.

25 Ha'e gui ma sacerdote ojuka 'rã vexa'i mba'emo omboekovia aguã regua ome'ẽmby. Ha'e vy mba'emo omboekovia aguã vexa'i ojuka va'ekue ruguy ojopy vy ombovy 'rã ojeky'a'o uka va'e nambi, ikuã guaxu ha'e ipyxã guaxu oiporu kuaa regua re meme.

26 Azeite onhoẽ 'rã opo ijaxua regua mbyte re.

27 Ha'e vy opo ijaxua regua re azeite oĩ va'e py okuã oiporu kuaa regua omoakỹ vy omboayvi 'rã sete-kue SENHOR renonde.

28 Ha'e vy azeite opo py oĩ va'e regua ombovy 'rã ojeky'a'o uka va'e nambi apy, ikuã guaxu ha'e ipyxã guaxu oiporu kuaa regua re meme, mba'emo omboekovia aguã regua ojuka pyre ruguy oikyty va'ekue áry.

29 Ha'e gui sacerdote po py azeite rembyre oĩ va'e ma onhoẽ 'rã ojeky'a'o uka va'e apyte re, SENHOR renonde ha'eve e'ŷague ojao'i uka aguã.

30 Ome'ẽ 'rã peteĩ jeruxi e'ŷ vy peteĩ apykaxu ha'e ojoua'i rami.

31 Ha'e va'e regua peteĩ ma jejavya regua ome'ẽ 'rã, ha'e rã amboae ma mba'emo aju guigua oapy vy ome'ẽmby reve guarã. Ha'e rami py SENHOR renonde sacerdote ojao'i uka 'rã ojeky'a'o uka va'e ha'eve e'ŷague.

32 Ha'e va'e lei ma lepra oguerekva'e gui ojeky'a'o uka va'e rekorã, iporiaukue'i vy ome'ẽ aguã ndojoui ramo.

### *Lepra oo re ojekuaa va'e regua lei oña*

33 SENHOR aipoe'ive ju Moisés ha'e Arão pe:

34 — Canaã yvy pendekoarã pendevy ame'ẽ va'ekue py pevaẽ ma rire amongue oo re xee amoõ 'rã hu'ũmba rei va'e.

35 Ha'e ramo hoo va'e sacerdote pe omombe'u vy "Mba'emo vaikue ko xero re oĩ", he'i 'rã.

36 Ha'e ramo sacerdote oguenoẽ ukapa 'rã opy gui, hu'ũ rei va'e oexa pota e'ŷ mbove, oo py ikuai va'e ha'e javi omongy'apa e'ŷ aguã. Ha'e rire mae ma sacerdote oo 'rã oo re oikuaa pota aguã.

<sup>37</sup> Oexa pota 'rā hu'ū rei va'e. Xapy'a rei oo mbotya re iovea hovy rei va'e e'ŷ vy pytā reia ri ojekuaa oo mbotya guýryve oike ramo ma

<sup>38</sup> opy gui sacerdote oẽ vy omboty uka 'rā sete ára peve.

<sup>39</sup> Sete araa py sacerdote ou ju 'rā oexa pota vy. Xapy'a rei oo mbotya re ipyve ri hu'ū rei va'e ojekuaa ramo ma

<sup>40</sup> oo mbotya gui omboi uka 'rā ita hu'ū rei va'e oĩa, ha'e vy omombo uka 'rā tetā gui mombyry'i peteñ henda mba'emo ha'eve'ŷ va'e omomboaty py.

<sup>41</sup> Ha'e gui onhopi ukapa 'rā opy rupi mbotya ikuai va'e ha'e javi rupi. Onhopi va'ekue ku'ikue ma omombo 'rā tetā gui mombyry'i peteñ henda mba'emo ha'eve'ŷ va'e omomboaty py.

<sup>42</sup> Ha'e va'e rire ma ita mboae ojopy vy omoña 'rā omboi ypyague py. Omoapomo pyau va'ekue ojopy vy omboja 'rā oo re.

<sup>43</sup> — Xapy'a rei ita omboia vy oo mbotya onhopimba rire omboja jevy teñ oo re hu'ū rei va'e ojekuaa jevy ri ramo

<sup>44</sup> sacerdote oike ju 'rā oexa pota. Xapy'a rei oo re hu'ū rei va'e tuvixa-vixave ri vy ma hu'ū rei ov yv va'e ae 'rā oĩ. Ha'eve'ŷ va'e ae 'rā opyta.

<sup>45</sup> Ha'e rami rā oitypa 'rā oo, ita ha'e yvyra omboipa 'rā, oo mbotya omboja va'ekue voi. Ha'e nunga ogueraapaa 'rā tetā gui mombyry, peteñ henda mba'emo ha'eve'ŷ va'e omomboaty py.

<sup>46</sup> Oo omboty aguã jave py amongue oike vy ha'eve'ŷ va'e avi 'rā oiko ka'aru peve.

<sup>47</sup> Opy oke e'ŷ vy okaru va'ekue ma ojoi 'rā oao.

<sup>48</sup> — Ha'e rami avi oo omboja pyaupa rire ha'e py sacerdote oike jevy vy oexa pota rā oo re hu'ū rei va'e ndatuvixave ovyi ri ramo ixupe sacerdote "Ha'eve va'e" he'i 'rā, hu'ū rei va'e okanhy ma rire.

<sup>49</sup> Ha'e gui oo oiky'a'o aguã ma ojopy 'rā mokoñ guyra, yvyra yary, havijukue pytā va'e ha'e hissopo rogue.

<sup>50</sup> Peteñ guyra ojuka 'rā hyru nhae'ū guigua py yy xyry ombooru va'ekue áry.

<sup>51</sup> Ojopy 'rā yvyra yary, hissopo rogue, havijukue pytā va'e ha'e guyra oikove va'e. Ha'e vy guyra ojuka va'ekue ruguy py omoakŷ 'rā yy oxyry va'e reve. Sete-kue 'rā omboayvi oo re.

<sup>52</sup> Ha'e rami py oo oiky'a'o 'rā guyra ruguykue, yy oxyry va'e, guyra oikove va'e, yvyra yary, hissopo rogue ha'e havijukue pytā va'e py guive.

<sup>53</sup> Guyra oikove va'e ma tetā gui opoi 'rā mombyry tekoia e'ŷa áry rupi oveve ov yaguã. Ha'e rami vy oo ha'eve e'ŷague oiky'a'o uka ma ramo ha'eve va'e ju 'rā opyta.

<sup>54</sup> — Ha'e va'e lei ma opa marâguia lepra ha'e mba'eaxy tinha oguereko va'e regua,

<sup>55</sup> ao re hu'ū rei va'e oĩ va'e, ha'e oo re,

<sup>56</sup> irurupa va'e re, ipeu ha'e iperea overa rei va'e re,

<sup>57</sup> penhombo'e aguã ha'eve va'e ha'e ha'eve'ŷ va'e oikoa re. Ha'e va'e ma lei lepra regua.

## 15

### Ava ha'e kunha re ha'eve'ŷa oĩ va'e re ijayvua

<sup>1</sup> SENHOR aipoe'ive Moisés ha'e Arão pe:

<sup>2</sup> — Pendeayvu Israel kuery pe, ha'e vy aipopeje: Ava ma guive rā hete guigua ndopytai ramo ha'eve'ŷ va'e 'rā oiko ndopytaia káuxa.

<sup>3</sup> Po rami 'rā ha'eve'ŷ va'e oikoa oikuua aguã regua, hete guigua ndopytaia káuxa. Xapy'a rei hete gui ndopytai, e'ŷ vy opytu'u-tu'u teñ ha'eve'ŷ va'e ae 'rā oiko.

<sup>4</sup> Tupa ha'e onhenoa py rei tema ha'eve'ŷ va'e 'rā opyta, ndopytaia káuxa. Ha'e mba'emo áry ha'e oñague py rei ha'eve'ŷ va'e avi 'rā opyta.

<sup>5</sup> Hupa re ov yv va'e rei tema ojoi 'rā oao, ha'e ojau 'rā yy py. Ha'e vy ka'aru peve ha'eve'ŷ va'e 'rā oiko.

<sup>6</sup> Ha'e gui hete guigua opyta e'ŷ va'e oguapyague py ri oguapy va'e tema ojoi 'rã oao, ha'e ojau 'rã yy py. Ha'e vy ha'eve'ŷ va'e 'rã oiko ka'aru peve.

<sup>7</sup> hete guigua opyta e'ŷ va'e re ovvy va'e tema ojoi 'rã oao, ojau 'rã guive yy py, ha'e oiko 'rã ha'eve'ŷ va'e ka'aru peve.

<sup>8</sup> Xapy'a rei amongue ha'eve va'e re ava hete guigua opyta e'ŷ va'e onyvõ ramo ha'e va'e voi ojoi 'rã oao, ha'e ojau 'rã yy py, ha'e vy ka'aru peve oiko 'rã ha'eve'ŷ va'e.

<sup>9</sup> Kavaju kupe árygua hete guigua opyta e'ŷ va'e oĩague voi opyta 'rã ha'eve'ŷ va'e.

<sup>10</sup> Mba'emo iguýry oĩ va'e re opoko va'e rei tema oiko 'rã ha'eve'ŷ va'e ka'aru peve. Ha'e rã ha'e nunga reraare voi ojoi 'rã oao, ha'e ojau 'rã yy py, ha'e vy oiko 'rã ha'eve'ŷ va'e ka'aru peve.

<sup>11</sup> Amongue re hete guigua opyta e'ŷ va'e ojepoei e'ŷ re opokoa va'ekue ma ojoi 'rã oao, ha'e ojau 'rã yy py, ha'e vy oiko 'rã ha'eve'ŷ va'e ka'aru peve.

<sup>12</sup> Hyru yapo guigua re hete guigua opyta e'ŷ va'e opokoague ma ombovoa 'rã. Ha'e rã hyru yvyla guigua ri ramo ma ojoipa 'rã yy py.

<sup>13</sup> — Ha'e gui hete guigua opyta e'ŷ va'e okuera ju ma vy oipapa 'rã sete ára peve ojeky'a'o uka aguã. Ha'e gui ojoi 'rã oao ha'e ojaupa 'rã guete ha'e javi rupi yy xyry py. Ha'e vy ma ha'eve va'e ju 'rã oiko.

<sup>14</sup> Irundy meme araa py ma ogueraa 'rã mokoĩ jeruxi e'ŷ vy mokoĩ apykaxu. Ha'e vy ojexa uka 'rã SENHOR renonde py, oguy nhemboaty oĩaty rokẽ py. Ha'e vy sacerdote pe ome'ẽ 'rã mokoĩ guyra,

<sup>15</sup> ha'e va'e omboaxa aguã. Jypygua ma ome'ẽ 'rã jejavya regua, ha'e rã amboae ma oapy vy ome'ẽmby. Ha'e rami SENHOR renonde sacerdote ojao'i uka 'rã hete guigua opyta e'ŷ va'e ha'eve e'ŷague.

<sup>16</sup> — Ha'e gui ava xapy'a rei ijay ndopytai rei rive vy ma ojau 'rã yy py guete ha'e javi rupi, ha'e vy oiko 'rã ha'eve'ŷ va'e ka'aru peve.

<sup>17</sup> Ijao e'ŷ vy ipire re ijay ovvyague oĩ ramo ojoipa 'rã yy py, ha'e vy opyta 'rã ha'eve'ŷ va'e ka'aru peve.

<sup>18</sup> Xapy'a rei peteĩ ava kunha reve joguerekaoa py ojapo ri vy mokoĩve 'rã ojau yy py, ha'e vy ha'eve'ŷ va'e 'rã ikuai ka'aru peve.

<sup>19</sup> — Kunha va'e gueko re oiko ramo heko ae ri oiko ramo sete ára peve 'rã oiko gueko re. Hexe ovvy va'e rei ha'eve'ŷ va'e 'rã oiko ka'aru peve.

<sup>20</sup> Gueko re oikoa pukukue re oke oupyague ha'e oguapyague rei tema ha'eve'ŷ va'e 'rã opyta.

<sup>21</sup> Hupa re ovvy va'e rei tema ojoi 'rã oao, ha'e ojau 'rã yy py. Ha'e vy oiko 'rã ha'eve'ŷ va'e ka'aru peve.

<sup>22</sup> Mba'emo áry oĩague re opoko va'ekue voi ojoi 'rã oao, ha'e ojau 'rã. Ha'e vy oiko 'rã ha'eve'ŷ va'e ka'aru peve.

<sup>23</sup> Hupa e'ŷ vy oguapyague áry mba'emo itui va'e re opoko va'ekue ma oiko 'rã ha'eve'ŷ va'e ka'aru peve.

<sup>24</sup> Xapy'a rei gueko re oiko va'e reve ava joguerekoo vy ma ha'eve'ŷ va'e 'rã oiko sete ára peve. Tupa onhenoague voi opyta 'rã ha'eve'ŷ va'e.

<sup>25</sup> — Ha'e gui kunha ma heko ojekuaa vaipa ete mbovy ára rei e'ŷ, ha'e ramiaty py e'ŷ va'eri, ha'e'ŷ vy gueko re oikoaty gui oaxave ri vy ko'ẽ nhavõ gueko re oikoa ja oiko 'rã ha'eve'ŷ va'e, gueko re ae oikoa rami.

<sup>26</sup> Gueko re oiko va'e tupo okeva va'e ma ha'eve'ŷ va'e 'rã opyta gueko re ae oikoaty rami ae. Mba'emo áry oĩague va'e tema opyta avi 'rã ha'eve'ŷ va'e, gueko re oikoaty rami ae.

<sup>27</sup> Ha'e va'e re ovvy va'ekue ma oiko 'rã ha'eve'ŷ va'e. Ha'e rami vy ojoi 'rã oao, ha'e ojau 'rã yy py. Ha'e vy oiko 'rã ha'eve'ŷ va'e ka'aru peve.

<sup>28</sup> Ha'e rami avi heko opyta ri ramo oipapa 'rã sete ára peve ju, ha'e gui ma ha'eve va'e ju 'rã oiko.

<sup>29</sup> Oito araa py ma ojopy 'rã mokoõ jeruxi e'ŷ vy mokoõ apykaxu, ha'e vy ogueru 'rã sacerdote pe oguy nhemboaty oĩaty rokẽ py.

<sup>30</sup> Peteĩ ma sacerdote omboaxa 'rã jejavya re, ha'e rã amboae ma oapy vy ome'ẽmby. Ha'e va'e rupi SENHOR renonde sacerdote ojao'i uka 'rã gueko re oiko va'e ha'eve e'ŷague.

<sup>31</sup> — Ha'e rami Israel kuery gui peipe'a ukapa 'rã ha'eve e'ŷague, ha'e va'e gui oiko vai e'ŷ aguã xembojeroviaaty ha'e kuery mbyte oĩ va'e omongy'aague re.

<sup>32</sup> — Ha'e va'e lei ma hete guigua ndopytaia, ha'e ijay ndopytai rei rivea re ha'eve'ŷ va'e oiko va'e regua,

<sup>33</sup> ha'e kunha gueko re oikoa py oiko axy va'e regua, ava e'ŷ vy kunha teĩ hete guigua opyta e'ŷ va'e, ha'e gui ava reve gueko re oiko va'e joguereko va'e regua guive.

## 16

### *Jejavya ojao'i ukaa ára regua*

<sup>1</sup> SENHOR ijayvu Moisés pe, mokoõ Arão ra'y kuery SENHOR renonde py onhemboja vy oiko vai rire.

<sup>2</sup> Ha'e vy SENHOR aipoe'i Moisés pe:

— Aipo're nderyke'y Arão pe, toike riae eme henda iky'a e'ŷ va'e py ajukue okẽ regua rovai, xeayvu ryru áry imbotya tekao ambogueaty oĩ va'e renonde, omano xapy'a e'ŷ aguã, mba'eta xee ae imbotya áry ajexa uka 'rã arai rupi.

<sup>3</sup> Pova'e nunga reve anho 'rã Arão oike henda iky'a e'ŷ va'e py: peteĩ vaka ra'y jejavya re ome'ẽ va'erã, ha'e vexa'i oapy vy ome'ẽmby.

<sup>4</sup> Onhemonde 'rã kamixa puku ajukue iporãve va'e guigua iky'a e'ŷ va'e py, ha'e kaxõ voi ajukue iporãve va'e guigua 'rã oiporu opire ao'iarã, oku'a rupi ojokua 'rã ajukue iporãve va'e guigua avi, ha'e vy ngorarã ajukue iporãve va'e guigua oimama mbyre py. Ha'e va'e ao ma iky'a e'ŷ va'e meme. Yy py ojaupa ma vy onhemonde 'rã.

<sup>5</sup> Israel kuery po gui ojopy 'rã mokoõ kavara ojejavvyague re ome'ẽ va'erã, ha'e gui peteĩ vexa'i oapy vy ome'ẽ va'erã.

<sup>6</sup> — Vaka ra'y jejavya regua ome'ẽ va'erã Arão ogueru vy ha'e ae ojejavvyague ranhe 'rã ojao'i uka, ha'e gui ngoo pygua kuery ojejavvyague ju.

<sup>7</sup> Mokoõve kavara ojopy vy ogueru 'rã imo'amy SENHOR renonde oguy nhemboaty oĩaty rokẽ py.

<sup>8</sup> Mokoõve kavara re oexa 'rã xortea. Peteĩ ma SENHOR peguarã opyta, ha'e rã amboae kavara ma omondouka pyrã.

<sup>9</sup> Kavara SENHOR peguarã opyta va'ekue ma Arão omovaẽ vy ojuka 'rã jejavya regua ome'ẽ va'erã.

<sup>10</sup> Ha'e rã kavara omondouka pyrã ma oikove reve 'rã oexa uka SENHOR renonde, ha'e va'e rupi jejavya ojao'i uka aguã, ha'e gui tekao e'ŷa katy omondoukaa aguã.

### *Sacerdote yvateve va'e ha'e ae ojejavvyague re ome'ẽa regua*

<sup>11</sup> — Ha'e gui Arão ogueru 'rã vaka ra'y ha'e ae ojejavvyague ranhe ojao'i uka aguã, ha'e gui ngoo pygua kuery ojejavvyague ju. Ha'e vy ojuka 'rã ojejavvyague reguarã.

<sup>12</sup> SENHOR renonde altar oĩ va'e áry gui oguenoẽ 'rã tapyi heakuã porã va'e oapyaty renyẽ, ha'e gui mokoõ po renyẽ heakuã porã va'e omongu'i porã mbyre. Ha'e va'e ogueroike 'rã ajukue okẽ regua rovai.

<sup>13</sup> Xee SENHOR renonde omoõ 'rã heakuã porã va'e tata py, hataxigue ojao'i aguã xeayvu ryru mbotya tekao ambogueaty áry rupi, omano xapy'a e'ŷ aguã.

<sup>14</sup> Ha'e gui vaka ra'y ruguykue ojopy vy okuã py omboayvipa 'rã ayvu ryru mbotya áry rupi. Ha'e gui hyru mbotya renonde rupi ju sete-kue 'rã omboayvi huguykue okuã py.

### *Heta va'e kuery ojejavvyague re ome'ẽa regua*

**15** — Ha'e va'e rire ma ojuka 'rã kavara heta va'e kuery ojejavyague re ome'ẽ aguã. Huguykue ma ogueroike 'rã ajukue okẽ regua rovai. Huguykue py ojapo 'rã vaka ra'y ruguykue py ojapoague rami ae. Omboayvi 'rã ayvu ryru mbotya teko vai ambogueaty áry rupi, ha'e henonde rupi.

**16** Ha'e rami py ojao'i uka 'rã Israel kuery henda iky'a e'ŷ va'e omongy'aague, ha'e kuery ojejavya ha'e heko vaia ha'e javi káuxa. Ha'e rami ae avi oiky'a'o uka 'rã oguy nhemboaty oĩaty ha'e kuery mbyte oĩ va'e omongy'apaague gui.

**17** Peteĩve ava ndopytai 'rã oguy nhemboaty oĩaty py henda iky'a e'ŷ va'e py sacerdote oike jave jejavya ojao'i uka aguã, ha'e ae ojejavyague ranhe ojao'i uka ma vy oẽ e'ŷa ja, ha'e gui ngoo pygua kuery ha'e Israel kuery ha'e javi ojejavyague ju.

**18** Ha'e gui oẽ vy SENHOR renonde altar oĩa py oo vy oiky'a'o uka avi 'rã omongy'aague oĩ va'e gui. Ha'e rami vy vaka ra'y ha'e kavara ruguykue ojopy vy ombovy 'rã altar rakua ikuai va'e yvýry rupi.

**19** Okuã py sete-kue 'rã huguykue omboayvi 'rã altar áry. Ha'e rami py oiky'a'o uka 'rã Israel kuery omongy'aague gui.

**20** — Ha'e gui ma henda iky'a e'ŷ va'e, oguy nhemboaty oĩaty ha'e altar oiky'a'o ukapa ma rire ogueru ruka 'rã kavara oikove va'e.

**21** Arão opo jovaive omoï 'rã kavara oikove va'e akã áry. Hi'áry omombe'u 'rã Israel kuery reko vaia, nonhe'ẽ rendui ha'e ojejavyague ha'e javi. Kavara akã áry ha'e nunga omoïmba ma vy ogueraa uka 'rã peteĩ ava po rupi, ha'e rami aguã omoï mbyre pe.

**22** Ha'e rami ha'e kuery reko vaia kavara ojee ae ogueraapa 'rã peteĩ yvy avave rei noĩa py. Tekoa e'ŷa py 'rã ava opoi kavara.

**23** — Ha'e va'e rire Arão oike jevy 'rã oguy nhemboaty oĩaty py. Ha'e vy omboipa 'rã ao ajukue iporãve va'e guigua henda iky'a e'ŷ va'e py oike aguã omoï va'ekue. Ha'e py ae 'rã oejapa.

**24** Ojau 'rã yy py peteĩ henda iky'a e'ŷa py, ha'e vy onhemonde 'rã oao ae'i py. Ha'e vy oẽ ju vy oapy vy ome'ẽ 'rã ha'e ae ojejavyague, ha'e heta va'e kuery ojejavyague guive. Ha'e rami vy ojao'i uka 'rã.

**25** Ome'ẽ mbyrã ojuka va'ekue kyrakue ma ojejavyague re oapypa avi 'rã altar áry.

**26** Ha'e gui kavara reraaa-are ma ojoi 'rã oao ha'e ojaupa 'rã yy py. Ha'e gui ma ovaẽ ju 'rã tekao py.

**27** Ha'e rã vaka ra'y ha'e kavara ojejavyague regua ome'ẽ va'ekue ma huguykue henda iky'a e'ŷ va'e py jejavya ojao'i uka aguã ogueroike rire hetekue peraa ju 'rã tekao gui mombyry'i. Ipirekue, ho'okue ha'e hepoxikue ha'e javi 'rã oapypa.

**28** Ha'e va'e rapyare ma ojoi 'rã oao, ha'e ojau 'rã yy py. Ha'e gui ma ovaẽ ju 'rã tekao py.

### *Jejavya ojao'ia ára ma'etŷa nhavõ ojeupity aguã regua*

**29** — Pova'e nunga ma penderekorã oeja pyre raka'e rã peve guarã. Ha'e gui sete jaxyva'e dez araa py ma pejexavai 'rã penenhe'ẽ py, ndapejapoi 'rã mba'eve, neĩ ha'e py aegua, neĩ amboae regua penembyte rupi ikuai va'e.\*

**30** Mba'eta ha'e va'e ára ma ojao'ia 'rã pejejavyague, pendeky'a'o aguã. Ha'e ramo xee SENHOR renonde pejeky'a'opa 'rã pejejavyague ha'e javi gui.

**31** Ha'e va'e sábado ára ma xevy pe ete 'rã pepytu'u ha'e pejexavai aguã penenhe'ẽ py. Ha'e va'e ma penderekorã oeja pyre raka'e rã peve guarã.

**32** Ha'e gui nguu rekoria sacerdote-rã omboaxaa vy hexe azeite omoï mbyre ae 'rã ojao'i uka pejejavyague, ao ajukue iporãve va'e guigua iky'a e'ŷ va'e py onhemonde reve.

**33** Ha'e rami vy ojao'i uka 'rã henda iky'a e'ŷ va'e, oguy nhemboaty oĩaty ha'e altar re ha'eve'ŷa oĩ va'ekue. Ojao'i uka avi 'rã sacerdote kuery ha'e heta va'e kuery ha'e javi re oĩ va'ekue.

\* **16:29** Onhe'ẽ py ojexavai ojejavyague re, ha'e okaru e'ŷ re ikuai.

<sup>34</sup> Ha'e va'e ma penderekorā raka'e rā peve guarā oeja pyre, ma'etŷa nhavō Israel kuery ojejavyague ojao'ia aguā — he'i.

Ha'e ramo Arão ojapopa Moisés pe SENHOR omombe'u ukaague rami.

## 17

### *Mymba ojuka aguā regua lei oña*

<sup>1</sup> SENHOR aipoe'i Moisés pe:

<sup>2</sup> — Ndeayvu ke Arão, ta'y kuery ha'e Israel kuery ha'e javi pe. Ha'e vy aipo're: Po rami SENHOR ojapo uka vy aipoe'i va'ekue:

<sup>3</sup> Israel kuery regua ma guive rā xevy peguarā teĩ vaka ra'y e'ŷ vy vexa'i, ha'e'ŷ vy kavara mba'e ojuka amboae tekaoa py, e'ŷ vy tekaoa gui mombyry'i,

<sup>4</sup> oguy nhemboaty oīaty rokē py ogueru 'rāgue py xee SENHOR pe ome'ẽ aguā, ha'e va'e ava pe "Jojukaa" 'ea 'rā. Huguy omoē rire ha'e va'e ava oipe'aa 'rā heta va'e kuery mbyte gui.

<sup>5</sup> Mba'eta Israel kuery ma mymba tekaoa rovai rupi ojuka 'rāgue py ogueru 'rā SENHOR pe oexa uka aguā, oguy nhemboaty oīaty rokē py ae. Ha'e rami rā sacerdote ome'ẽ 'rā SENHOR pe peteĩ rami ikuiaia reguarā.

<sup>6</sup> Huguykue sacerdote omboayvipa 'rā oguy nhemboaty oīaty rokē rexei SENHOR pegua altar oī va'e áry. Ha'e rā ikyrakue ma oapypa 'rā, heakuā porā rā SENHOR ojou porā aguā.

<sup>7</sup> Anha kuery pe rive nda'eveei ome'ẽ aguā mymba, mba'eta ha'e nunga pe rive onhembotavy uka okuapy. Ha'e va'e ma penderekorā oeja pyre raka'eve rā ikuai va'e peguarā.

<sup>8</sup> — Ha'e nunga rupi aipo're ha'e kuery pe: Ava ma guive rā Israel kuery va'e regua e'ŷ vy amboae regua penembyte ikuai va'e teĩ mba'emo oapy, e'ŷ vy mymba ome'ẽ aguā ojuka aguā

<sup>9</sup> oguy nhemboaty oīaty rokē py e'ŷ ogueru ramo SENHOR pe ome'ẽ aguā, ha'e va'e ma oipe'aa 'rā heta va'e kuery mbyte gui.

### *Mymba ruguykue ho'u e'ŷ aguā re ijayvua*

<sup>10</sup> — Ava ma guive rā Israel kuery regua e'ŷ vy amboae guigua penembyte rupi ikuai va'e teĩ huguykue ho'u ramo ma hovai apu'ã vy aipe'a 'rā heta va'e kuery mbyte gui.

<sup>11</sup> Mba'eta temimoingo rekovea ma huguy re ae oī. Huguy ma ame'ẽ uka va'e altar áry penderekko vaiaty pejao'i uka aguā. Mba'eta huguy re vy ae 'rā ajao'i, tekove rekivia.

<sup>12</sup> Ha'e nunga rupi aipoa'e ae ma Israel kuery pe: "Peẽ kuery va'e regua neĩ peteĩve to'u eme huguykue, neĩ amboae regua penembyte ikuai va'e voi to'u eme", ha'e va'ekue.

<sup>13</sup> Ava ma guive rā Israel kuery va'e regua, e'ŷ vy amboae regua penembyte rupi ikuai va'e teĩ, mymba e'ŷ vy guyra ojuka vy huguy omoēmba rive 'rā, ha'e yvy ku'i py ju 'rā ojao'i.

<sup>14</sup> — Mba'eta temimoingo ha'e javi rekovea ma huguy re ae oī. Ha'e nunga rupi ae aipoa'e va'ekue Israel kuery pe: "Xo'o ma guive rā pe'u eme huguykue, mba'eta temimoingo ha'e javi rekovea ma huguy re ae oī. Ho'u va'e rei tema oipe'aa 'rā", ha'e va'ekue.

<sup>15</sup> Ha'e py aegua, e'ŷ vy amboae regua teĩ, mymba omano rive va'ekue e'ŷ vy omboa'ypa pyre ri ho'u rire ojoi 'rā oao, ha'e ojau 'rā yy py. Ha'e vy ha'eve'ŷ va'e 'rā oiko ka'aru peve. Ha'e va'e rire ma ha'eve va'e ju 'rā oiko.

<sup>16</sup> Ha'e rami teĩ oao ndojoi neĩ yy py ndojauí ri ramo hexe ae 'rā oī ojejavyague re opaga aguā.

## 18

### *Amboae reve itavy rei va'e re ijayvua*

<sup>1</sup> SENHOR aipoe'ive Moisés pe:

<sup>2</sup> — Ndeayvu Israel kuery pe. Ha'e vy aipo're: Xee ma SENHOR Penderuete.

<sup>3</sup> Pendekuai eme Egito yvy pendekuaiague pygua kuery reko rami, neĩ Canaã yvy katy xee rogueraa henoinya pygua kuery reko rami ma voi. Ha'e kuery reko rami pendekuai eme.

<sup>4</sup> Xee aipotaa rami ae 'rã pendekuai, xeayvu aeja va'ekue pejapo, ha'e va'e rupi anho peiko aguã. Xee ma SENHOR Penderuete.

<sup>5</sup> Ha'e nunga rupi xeayvua ha'e ajapo uka va'ekue rupi ae 'rã pendekuai. Mba'eta ha'e va'e ayvu amongue ojapopa ri vy oikove 'rã hexe vy. Xee ma SENHOR.\*

<sup>6</sup> — Ava ma guive rã nda'evei guetarã kunha reve ae ojejavy aguã. Xee ma SENHOR.

<sup>7</sup> Ejejavy eme nderu pe, ndexy reve pejejavya rupi. Ha'e ma ndexy ae. Ejejavy eme hexeve.

<sup>8</sup> Ejejavy eme ndexy anga reve, nderu pe voi rejejavvy e'ŷ aguã.

<sup>9</sup> Ejejavy eme nereindy reve. Xapy'a rei nderu rajy e'ŷ vy ndexy memby, pendero py aegua e'ŷ vy pendero gui mombyry guigua teĩ ejejavy eme hexeve.

<sup>10</sup> Ejejavy eme ndera'y rajy e'ŷ vy nderajy memby reve, ndero'o pe ae rejejavvy e'ŷ aguã.

<sup>11</sup> Ejejavy eme nderu ra'yxy memby, nderu gui oiko va'ekue reve, nereindy ae oiko ramo.

<sup>12</sup> Ejejavy eme nderu reindy reve, nderu retarã ae oiko ramo.

<sup>13</sup> Ejejavy eme ndexy kypy'y reve, ndexy retarã ae oiko ramo.

<sup>14</sup> Ejejavy eme nderu ryvy pe ta'yxy reve rejejavya rupi, ndexy'y ae oiko ramo.

<sup>15</sup> Ejejavy eme ndera'y ra'yxy reve, ndera'y ra'yxy ae oiko ramo. Ejejavy eme hexeve.

<sup>16</sup> Ejejavy eme nderyke'y e'ŷ vy nderyvvy ra'yxy reve, nderyke'y e'ŷ vy nderyvvy pe rejejavvy e'ŷ aguã.

<sup>17</sup> Ejejavy eme peteĩ kunha ha'e imemby reve avi. Ha'e ejopy eme ndera'y rajy neĩ nderajy memby hexeve rejejavvy aguã. Ha'e kuery ma neretarã kuery ae ramo ma ha'eve'ŷ ete 'rã.

<sup>18</sup> Ndera'yxy ae rerekoy reve eraa eme amboae kunha ndera'yxy jevyrã, joe nda'iija'ei e'ŷ aguã. Ndera'yxy ae oikovea ja nda'evei amboae re rejejavvy aguã.

### *Ojeguarupy rupi anho joguereco va'e re ijayvua*

<sup>19</sup> — Enhemoja eme kunha gueko re oikoa ja, hexeve renheno aguã.

<sup>20</sup> Enheno eme neirũ ra'yxy reve, hexeve vy renhemongy'a e'ŷ aguã.

<sup>21</sup> Ndeguigua kuery peteĩve ma emboaxa eme Moloque pe rive, remongy'a rei e'ŷ aguã Nderuete rery. Xee ma SENHOR.\*

<sup>22</sup> Enheno eme ava reve kunha reve rami. Ha'e nunga ma ojeguarupy ete.

<sup>23</sup> Neĩ mymba reve voi nerenhenoi 'rã, hexeve vy renhemongy'a e'ŷ aguã. Kunhague ma voi nda'evei mymba re onhemboja vy hexeve ojejavy aguã. Ha'e nunga ma ha'eve'ŷ ete.

<sup>24</sup> — Neĩ peteĩve ha'e va'e regua py enhemongy'a eme, mba'eta ha'e nunga ha'e javi py amboae regua kuery onhemongy'a okuapya re aipe'apa 'rã penerenonde gui.

<sup>25</sup> Ha'e rami vy ha'e kuery oyvy ae omongy'apa. Ha'e ramo aju vy ha'e va'e yvy re aikuua pota vy yvy gui amondyipa 'rã ha'e py ikuai va'e.

<sup>26</sup> Ha'e rã peẽ kuery ma pejapo 'rã ajapo uka va'e ha'e xeayvu aeja va'ekue ha'e javi. Neĩ peteĩve ojeguarupy amboae kuery ikuia regua pejapo eme, peẽ ha'e py aegua kuery, neĩ amboae regua penembyte rupi ikuai va'e voi.

<sup>27</sup> Mba'eta ha'e va'e regua ojeguarupy ha'e javi ma peẽ kuery peju e'ŷ mbove ha'e va'e yvy re ikuai va'e ojapo raka'e. Ha'e rami vy oyvy omongy'apa.

<sup>28</sup> Peẽ ma pendekuai eme pendeyvvy pemongy'aa rupi, peẽ kuery voi pendepe'apaa e'ŷ aguã ha'e gui, peju e'ŷ mbove ha'e py ikuai va'e oipe'apaague rami ae avi.

\* **18:5** Romanos 10.5, Gálatas 3.12    \* **18:21** Tuuete ra'angaa Moloque ma amboae regua kuery ombojerovia vy ixupe gua'y kuery ae 'rã omboaxa tata rupi ojuka aguã (20.1-5; 2 Reis 23.10; Jeremias 7.31, 32.35).

<sup>29</sup> Ha'e va'e regua ojeguarupy rupi ikuai va'e, ha'e nunga apoare rei tema oipe'apaa 'rã heta va'e kuery mbyte gui.

<sup>30</sup> Ha'e nunga rupi xereve guarã aeja va'ekue rupi anho 'rã pendekuai. Pejapo eme neñ peteñive ojeguarupy peju e'ý mbove ikuai va'e ojapo va'ekue, penhemongy'a e'ý aguã. Xee ma SENHOR Penderuete.

## 19

### *Lei regua omombe'u porãve jevyague*

<sup>1</sup> Ha'e gui SENHOR aipoe'i Moisés pe:

<sup>2</sup> — Ndeayvu Israel kuery pavẽ pe. Ha'e vy aipo're: Peiko iky'a e'ý va'e, mba'eta xee SENHOR Penderuete ma iky'a e'ý va'e aiko.

<sup>3</sup> Peteñ-teñ pemboete 'rã pendexy ha'e penderu, ha'e pemboete avi 'rã xevyguá sábado ára. Xee ma SENHOR Penderuete.

<sup>4</sup> Peiko eme mba'emo ra'angaa pe, neñ pejapo eme penderuete ra'angaarã mba'emo ryku gui. Xee ae ma SENHOR Penderuete.

<sup>5</sup> — Ha'e gui xee SENHOR reve peteñ rami nhandekuaia regua peme'ë vy ma pendejou porã aguã rami 'rã peme'ë.

<sup>6</sup> Peme'ëa árave 'rã pe'u, ha'e ko'ëgue jevy. Ha'e rã mboapy araa py ma peapypa 'rã ndape'upai va'ekue.

<sup>7</sup> Mboapy araa py ri ho'u va'e ma ojeguarupy ae 'rã opyta, ha'e ome'ë mbyre voi ndajou porãi 'rã.

<sup>8</sup> Ha'e nunga ho'u va'e rei tema hexe ae 'rã oï ojejavvyague re opaga aguã, xee SENHOR pegua iky'a e'ý va'e nombovarei rire. Ha'e nunga rupi oipe'aa 'rã heta va'e kuery mbyte gui.

<sup>9</sup> — Ha'e gui ndeyvy re renhoty va'ekue remono'õ vy nemba'ety rembe rupi neremono'õ katu'i 'rã, neñ hary reity rive va'ekue voi neremono'õi 'rã nemba'ety gui.

<sup>10</sup> Neremono'õ jevyi 'rã nde'uvaty rupi, neñ nderejopyi 'rã uva'a reity rive va'ekue. Ha'e nunga ha'e javi reja 'rã iporiaukue'i ha'e amboae regua kuery pe. Xee ma SENHOR Penderuete.

<sup>11</sup> — Nemonda eme, ndeapu eme, neñ embotavy eme neirũ kuery.

<sup>12</sup> Eura rive eme xerery rupi, Penderuete rery nerembovare e'ýi aguã. Xee ma SENHOR.

<sup>13</sup> — Emoingo axy rei eme neirũ kuery, ha'e kuery gui nemonda eme guive. Omba'eapo va'e kuery peguarã ndepo py topyta eme ko'ë peve.

<sup>14</sup> — Ndeayvu vai eme ijapyxa e'ý va'e re, neñ hexa pyxo e'ý va'e renonde emoi eme onhepyxanga aguã. Ha'e rami 'rãgue py Penderuete renonde rejererokyjea rupi eiko. Xee ma SENHOR.

<sup>15</sup> — Mba'emo re reikuua potaa py ejoguerekoo eme ha'eve e'ýa rami. Ema'ëve eme iporiaukue'i re, eayvuve rei eme guive oguerekopa rei va'e kuery. Ha'evea rami meme 'rã reikuua pota neirũ kuery reko re.

<sup>16</sup> — Enhomoangeko rei eme heta va'e kuery mbyte rupi. Eiko eme neirũ kuery rekove reipe'a ukaa rupi. Xee ma SENHOR.

<sup>17</sup> — Ndea'e e'ý eme nderyke'y e'ý vy nderyvy kuery re ndepy'a py. Ha'e rami avi ndeayvu ete 'rã neirũ pe, ha'e ramia py rive ndee voi rejeyavy e'ý aguã.

<sup>18</sup> — Ejepy eme joe, neñ ndejee emoi eme neirũ kuery va'e regua pe ndevaia. Ha'e rami 'rãgue py reayvu 'rã neirũ ndee ae rejeyvua rami. Xee ma SENHOR.\*

<sup>19</sup> — Reiko 'rã xeayvua aeja va'ekue rupi anho. Eja eme nerymba kuery joegua e'ý-e'ý re ta'y aguã. Nemba'ety py enhoty eme mba'emo ra'yí mokoí regua. Enhemonde eme guive ao joegua e'ý-e'ý guigua py.

\* <sup>19:18</sup> Mateus 5.43, 19.19, 22.39; Marcos 12.31; Lucas 10.27; Romanos 13.9; Gálatas 5.14; Tiago 2.8

<sup>20</sup> — Amongue onheno 'rã escrava kunha amboae ava re omenda aguã rami oiko va'e reve, teĩ imerã mba'eve ndopagai teri escrava oikoa gui opoi aguã. Ha'e ramo mokoïve ombopia 'rã. Ha'e rami avi ndojukaai 'rã, mba'eta escrava oikoa gui ndopoiai teri ramo.

<sup>21</sup> Ha'e ramia py ava va'e ojejavyague omboekovia aguã ogueru peteĩ vexa'i xee SENHOR pe oguy nhemboaty oïaty rokẽ py.

<sup>22</sup> Ha'e ramo mba'emo omboekovia aguã regua vexa'i ome'ẽ va'e py ma sacerdote ojao'i uka 'rã ojejavyague SENHOR renonde. Ha'e ramo ojejavyague operdoa 'rã.

<sup>23</sup> — Ha'e gui pendeyvyrã va'ekue re pendekoa ma vy opa marãguia yvyra hi'a va'e penhotõ ramo nda'evei ranhe 'rã hi'a pe'u aguã. Mboapy ma'etõ peve nda'evei 'rã, ndape'ui 'rãe.

<sup>24</sup> Ha'e gui irundy ma'etõa re ma hi'a ha'e javi peikuaa 'rã iky'a e'ŷ va'ea, ha'e SENHOR pe peme'ẽmba 'rã perovy'aa rupi anho.

<sup>25</sup> Peteĩ nhiruĩ ma'etõa py mae ma 'rã pe'u hi'a, ha'e rami py hi'ave aguã. Xee ma SENHOR Penderuete.

<sup>26</sup> — Ndape'ui 'rã xo'o huguykue reve. Penemba'ekuaa eme, penemba'evyky rei eme guive.

<sup>27</sup> — Pejaya eme pende'a ijapu'a'i aguã rami, neĩ pejaya eme penerendyva apy rupi.\*

<sup>28</sup> Omanoa rã penhekxyximba rei eme pendero'o rupi, penhembojeguapa rei eme guive. Xee ae ma SENHOR.

<sup>29</sup> — Pembojeavy eme penderajy kuery itavy rei va'e ikuai aguã, pendeyvy ha'e javi rupi penhembotavy vy teko vai rupi anho pendekuai e'ŷ aguã.

<sup>30</sup> Pemboete 'rã xevygua sâbado ára, ha'e xevygua henda iky'a e'ŷ va'e. Xee ma SENHOR.

<sup>31</sup> — Peo eme omanogue mboayvua kuery re, neĩ imba'ekuaa va'e kuery re. Peka eme, ha'e kuery reve vy penhemongy'a e'ŷ aguã. Xee ma SENHOR Penderuete.

<sup>32</sup> — Pepu'ã pe'amy hi'a xiimba'i va'e renonde py, pemboete 'rã tujakueve ikuai va'e. Penderuete renonde avi peiko pejerokyjea rupi. Xee ma SENHOR.

<sup>33</sup> — Amboae regua pendeyvy re ikuai va'e pemoingo axy rei eme.

<sup>34</sup> Amboae regua penembyte ikuai va'e perekõ 'rã pẽa py aegua perekõa rami. Pemboaxy 'rã peẽ ae penhemboaxya rami, mba'eta Egito yvy re amboae regua peẽ voi peiko rire. Xee ma SENHOR Penderuete.

#### *Deuteronômio 25.13-16*

<sup>35</sup> — Pejokore eme joeko re peikuaa potaa py, neĩ yvyra'i py mba'emo pea'ã vy, mba'emo pepejaa py, neĩ hyru py mba'emo pea'ãa py.

<sup>36</sup> Mba'emo opejaa, ipoyia, ajaka ha'e galão ma ha'evea'i ramigua meme 'rã peiporu. Xee ma SENHOR Penderuete Egito yvy gui penerenoẽmbaare.

<sup>37</sup> Pendekuai 'rã xeavvua aeja va'ekue ha'e javi rupi, pejapopa 'rã ajapo uka va'ekue. Xee ma SENHOR.

## 20

### *Nhomoingo axyague repy re ijayvua*

<sup>1</sup> SENHOR aipoe'ive ju Moisés pe:

<sup>2</sup> — Aipo're avi 'rã Israel kuery pe: Ava ma guive rã Israel kuery e'ŷ vy amboae regua peẽ kuery mbyte rupi ikuai va'e Moloque pe gua'y kuery omboaxa ramo pejuka 'rã. Pendeyvy re pendekuai va'e ae 'rã pejapipa ita py.\*

<sup>3</sup> Ha'e va'e rovai xee voi apu'ã vy aipe'a 'rã heta va'e kuery mbyte gui, mba'eta Moloque pe gua'y kuery ae omboaxa vy omongy'a xevygua henda iky'a e'ŷ va'e, ha'e nombovarei xerery iky'a e'ŷ va'e.

\* <sup>19:27</sup> Ha'e jave py amboae regua kuery ma omanoa rã ipy'a vai vy ojaya 'rã o'a ijapu'a'i aguã rami, ha'e opa marã 'rã onhekxyximba rei (21.5; Deuteronômio 14.1-2). \* <sup>20:2</sup> Levítico 18.21

<sup>4</sup> Xapy'a rei pendeyvy re pendekuai va'e penderexa pemboty 'rã pexa e'ŷ aguã amongue gua'y kuery Moloque pe omboaxa rã, ha'e rami vy ndapejukai 'rã.

<sup>5</sup> Ha'e ramo ma xee ae 'rã apu'ã ha'e va'e ava ha'e hoo pygua kuery ha'e javi rovai. Aipe'apa 'rã heta va'e kuery mbyte gui, hexeve Moloque pe onhembotavy uka va'ekue ha'e javi guive.

<sup>6</sup> — Ha'e gui amongue oo 'rã omanogue mboayvua kuery pe oporandu aguã, ha'e rami e'ŷ vy imba'evyky va'e kuerya py oo 'rã ha'e kuery reve vy onhembotavy uka aguã. Ha'e ramo ha'e va'e rovai xee ae apu'ã vy aipe'a 'rã heta va'e kuery mbyte gui.

<sup>7</sup> Ha'e nunga rupi pejeky'a'o uka ke iky'a e'ŷ va'e peiko aguã, mba'eta xee ma SENHOR Penderuete.

<sup>8</sup> Peiko ete 'rã xeayvua aeja va'ekue rupi, pejapopa ete. Xee ma SENHOR xevyguia iky'a e'ŷ va'erã penemoingo va'e.

<sup>9</sup> Mava'e rã rei ava nguu e'ŷ vy oxy re ijayvu vai ramo pejuka 'rã. Nguu e'ŷ vy oxy re ijayvu vai rire hexe ae 'rã oĩ huguy pemoëague re opaga aguã.\*

<sup>10</sup> — Oirũ ra'yxy reve ava itavy ramo pejuka 'rã, kunha itavy va'ekue voi.

<sup>11</sup> Nguu ra'yxy reve ava onheno vy ojejavu nguu pe ae. Ha'e rã mokoïve 'rã pejuka. Ha'e kuery re ae 'rã oĩ huguy pemoëague re opaga aguã.

<sup>12</sup> Gua'y ra'yxy reve ava onheno ramo pejuka 'rã mokoïve, nda'eveipa va'e ojapo rire. Ha'e kuery re ae 'rã oĩ huguy pemoëague re opaga aguã.

<sup>13</sup> Ha'e gui ava meme ri kunha rami joguerekoo va'e ma mokoïve ojapo okuapy ojeguarupy. Pejuka 'rã. Ha'e kuery re ae 'rã oĩ huguy pemoëague re opaga aguã.

<sup>14</sup> Xapy'a rei peteĩ ava joguerekoo 'rã peteĩ kunha ha'e ixy reve. Ha'e ramo ha'eve'ŷ va'e ae. Peapypa 'rã ava ha'e kunhague, penembyte ha'e rami ete teko vai ojapoa ve'ŷ aguã.

<sup>15</sup> Mymba reve ri ava itavy ramo pejuka 'rã, pejuka avi 'rã mymba.

<sup>16</sup> Kunha ri mymba re onhemboja vy hexeve ojejavu ramo pejuka 'rã kunha va'e ha'e mymba avi. Ha'e kuery re ae 'rã oĩ huguy pemoëague re opaga aguã.

<sup>17</sup> — Xapy'a rei peteĩ ava ogueraa 'rã gueindy nguu rajy va'e, ha'e e'ŷ vy oxy memby, hexeve ojejavu aguã. Ha'e ramo ma ha'eve'ŷ va'e ae. Ha'e kuery oipe'apaa 'rã heta va'e kuery mbyte gui. Gueindy reve ae ojejavu rire hexe ae 'rã oĩ ojejavuague re opaga aguã.

<sup>18</sup> Xapy'a rei peteĩ kunha gueko re oiko va'eri ava oguerekoo vy ojejavu 'rã. Heko regua oexa, ha'e kunha va'e voi gueko regua oexa uka rire mokoïve oipe'aa 'rã heta va'e kuery mbyte gui.

<sup>19</sup> Ha'e rami ae avi ejejavy eme ndexy kypy'y e'ŷ vy nderyke reve, neĩ nderu reindy reve voi. Neretarã ae'i reve rejeky rire ndere ae 'rã oĩ rejekyague re opaga aguã.

<sup>20</sup> Oxy'y reve ava onheno vy otuty pe voi ojejavu. Hexe ae 'rã oĩ ojejavuague re opaga aguã. Ha'e rami vy omano 'rã ta'y ve'ŷ re.

<sup>21</sup> Guyvy e'ŷ vy guyke'y ra'yxy reve ri ava joguerekoo vy ha'eve'ŷ va'e ae oiko, guyke'y e'ŷ vy guyvy pe ojejavu rire ta'y ve'ŷ re 'rã oiko.

<sup>22</sup> — Ha'e nunga rupi peiko 'rã xeayvua aeja va'ekue ha'e javi rupi, pejapopa ajapo uka va'ekue, vyv pendekuai aguã py rogueraa ague gui pendepe'apaa e'ŷ aguã.

<sup>23</sup> Pendekuai eme penerononde gui aipe'a va'ekue regua ikuai rami, mba'eta ha'e nunga ha'e javi ha'e kuery ojapo va'e. Ha'e nunga rupi ae xee ajou vai.

<sup>24</sup> Ha'e rã peẽ kuery pe ma aipoa'e ae ma: Ha'e va'e vyv re ae 'rã pendekoa, pendekoarã ae ame'ẽ, vyv kamby ha'e ei oata e'ŷa. Xee ma SENHOR Penderuete vyv regua kuery mbyte gui pendepe'aare.

<sup>25</sup> Ha'e nunga rupi aŷ peikuaa 'rã mymba ha'e guyra ha'eve va'e ha'e ha'eve'ŷ va'e reve joo ramigua e'ŷa. Penhemoingo eme ojeguarupy mymba re rive, guyra, e'ŷ vy vyv áry rupi onhembotyryry ovu va'e re rive, mba'eta ha'e rami ikuai va'e pendegui aipe'a rire ha'eve'ŷ va'e memea peikuaa aguã.

\* **20:9** Mateus 15.4, Marcos 7.10

**26** Iky'a e'ŷ va'e 'rã peiko xevy guarã, mba'eta xee SENHOR iky'a e'ŷ va'e aiko ramo, ha'e yvy regua kuery mbyte gui roipe'a xevy guarã ae pendekuai aguã.

**27** — Ha'e gui ava e'ŷ vy kunha teĩ omanogue mboayvua, ha'e'ŷ vy imba'evykyra rupi oiko va'e pejuka 'rã. Pejapipa 'rã ita py. Ha'e kuery re ae 'rã oĩ huguy pemoēague re opaga aguã.

## 21

### *Sacerdote kuery regua lei oĩa*

**1** SENHOR aipoe'i Moisés pe:

— Ndeayvu Arão ra'y kuery sacerdote ikuai va'e pe. Ha'e vy aipo're: Sacerdote kuery ma nda'evei onhemongy'a aguã heta va'e kuery ikuiaia py omano va'ekue re opokoa py,

**2** hetarã ae'i re e'ŷ ramo, ixy, tuu, ta'y, tajy, tyvy e'ŷ vy tyke'y ae'i,

**3** ha'e heindy ae'i voi kunhatai'i omenda e'ŷ teri va'e retekue re opoko vy onhemongy'a teĩ ha'eve avi.

**4** Heta va'e kuery renondegua sacerdote kuery ikuai va'e vy nda'evei onhemongy'a rive aguã, ha'eve'ŷ va'e oiko e'ŷ aguã.

**5** Sacerdote kuery ma oakã nombopire rei 'rã, guendyva voi ndojayai 'rã, nonhekiximbã rei 'rã guive guete rupi.

**6** Ha'e kuery ma Nguuete pegua iky'a e'ŷ va'e 'rã ikuai, Nguuete rery nombovareai aguã rami e'ŷ, mba'eta SENHOR pe ae mba'emo oapy vy omboaxa, tembi'u SENHOR pegua guive. Ha'e vy iky'a e'ŷ va'e 'rã ikuai.

**7** Ha'e kuery ma gua'yxyrã ndojou'i 'rã kunha itavy rei va'e, e'ŷ vy omboetepy e'ŷ. Ndojoui 'rã ime omoxẽ va'ekue, mba'eta sacerdote ma iky'a e'ŷ va'e, Nguuete pe ete oiko va'e.

**8** Ha'e nunga rupi remboaxa 'rã xevy guarã, Nguuete pegua tembi'u me'ëa ikuai ramo. Ha'e kuery ikuai 'rã iky'a e'ŷ va'e, mba'eta xee SENHOR pendeky'a'oa aiko va'e ma iky'a e'ŷ va'e aiko.

**9** Peteĩ sacerdote rajy onhembotavy reia py omboetepy e'ŷ onhemoingoa ma nguu voi nomboete ukai vy. Ha'e ramo oapypaa 'rã.

**10** — Ha'e gui sacerdote yvateve va'e ma tyvy kuery mbyte gui oiporavo vy inhakã re onhoëa azeite SENHOR pe omboaxaa aguã regua, ha'e ao iky'a e'ŷ va'e py onhemonde aguã oiky'a'oa ramo ma nomoatyrõ e'ŷi 'rã o'a, neĩ nomondoroi 'rã oao.

**11** Neĩ nonhembojai 'rã teĩve tetekue re, neĩ tuu e'ŷ vy ixy ae omano teĩ ha'e nonhemongy'ai 'rã hetekue re.

**12** Ha'e ma noëi 'rã henda iky'a e'ŷ va'e gui, nombovare e'ŷi 'rã Nguuete pegua henda iky'a e'ŷ va'e, hexe azeite Tuuete pe nhomboaxaa aguã regua omoña rire. Xee ma SENHOR.

**13** Gua'yxyrã ma kunhatai'i omenda e'ŷ teri va'e anho 'rã ojou.

**14** Gua'yxyrã ndojou'i 'rã imeve'ŷ va'e, neĩ opoi pyre, omboetepy e'ŷ neĩ itavy rei va'e, ha'e rami 'rãgue py kunhatai'i omenda e'ŷ teri va'e ha'e kuery va'e regua ae 'rã ojou gua'yxyrã,

**15** ha'e rami vy amboae kuery mbyte gua'y kuery nombovare e'ŷi aguã, mba'eta xee SENHOR ae aiko xevyguia iky'a e'ŷ va'erã amoingo va'e – he'i.

**16** SENHOR aipoe'ive ju Moisés pe:

**17** — Ndeayvu 'rã Arão pe. Ha'e vy aipo're: Neramymino kuery, aŷ guive ikuai va'erã voi, ha'e kuery va'e regua re ivaikue reia oĩa va'e nonhembojai 'rã SENHOR Nguuete peguarã tembi'u omboaxa aguã.

**18** Peteĩve ava hexe ivaikue reia oĩa va'e nonhembojai 'rã: ava hexa pyxo e'ŷ va'e, e'ŷ vy ipy xogue va'e, hova pëgue'i va'e, e'ŷ vy hete vaikue'i va'e,

**19** ipy e'ŷ vy ipo opẽ va'ekue,

**20** ojero'a rei'i va'e, kyri'i rei va'e, e'ŷ vy hexa ra'yî huñâ xiñ'i va'e, hemomba va'e, ipire ijapa rei va'e, ha'e'ŷ vy ha'yî opu va'ekue.

**21** Peteīve ava sacerdote Arão ramymino va'e regua teī hexe ivaikue reia oĩ ramo nonhembojai'rã SENHOR pe mba'emo oapy vy omboaxa aguã. Hexe ivaikue reia oĩ ramo nonhembojai'rã Nguuete pegua tembi'u omboaxa aguã.

**22** Ha'e rami avi ha'e va'e regua ma Nguuete pegua tembi'u ho'u teī ha'eve, tembi'u iky'a e'ŷ va'e, iky'a e'ŷ ete va'e teī.

**23** Ha'e rami teī hexe ivaikue reia oĩ ramo ndoikei'rã ajukue okẽ regua katy'i peve, neĩ novaẽi'rã altar oĩa peve, xevygua henda iky'a e'ŷ va'e nombovare e'ŷi aguã, mba'eta xee ma SENHOR xevygua iky'a e'ŷ va'erã amoingo va'e – he'i.

**24** Ha'e rami Moisés ijayvu Arão, ta'y kuery ha'e Israel kuery ha'e javi pe.

## 22

### *Tembi'u ha'eve va'e regua lei oĩa*

**1** SENHOR aipoe'i Moisés pe:

**2** – Aipo're Arão ha'e ta'y kuery pe mba'emo iky'a e'ŷ va'e Israel kuery xevy ome'ẽ va'ekue re topena rive eme, xerery iky'a e'ŷ va'e nombovare e'ŷi aguã. Xee ma SENHOR.

**3** – Aipo're avi ha'e kuery pe: Peẽ kuery ha'e peneramymino kuery ikuai va'e regua teī hexe ha'eve'ŷa oĩ teri reve mba'emo iky'a e'ŷ va'e xee SENHOR pe Israel kuery ome'ẽ va'ekue re onhemboja ramo oipe'aa'rã xerenonde gui. Xee ma SENHOR.

**4** Arão ramymino kuery regua teī lepra oguereko, e'ŷ vy hete guigua opyta e'ŷ va'e ndo'ui'rã tembi'u iky'a e'ŷ va'e, ojeky'a'opa e'ŷa ja. Ha'e rami ae avi mba'emo ha'eve'ŷ va'e re opoko va'e avi, tetekue re ovv va'ekue, e'ŷ vy ijay opyta e'ŷ xapy'a va'e,

**5** ha'e'ŷ vy onhembotyryry va'e re opoko vy ha'eve'ŷ va'e oiko va'ekue, e'ŷ vy ava ndojeky'a'o ukai teri va'e re, mba'emo re rei tema ovv vy ha'eve'ŷ va'e'rã oiko.

**6** Ha'e nunga re opoko va'ekue rei tema oiko avi'rã ha'eve'ŷ va'e ka'aru peve. Ha'e rami vy tembi'u iky'a e'ŷ va'e ho'u aguã nda'evei, yy py ojaupa ranhe e'ŷa ja.

**7** Ha'e gui kuaray oike ma jave ha'eve va'e ju'rã oiko. Ha'e vy'rãe ho'u temibi'u iky'a e'ŷ va'e, ixupe guarã va'ekue ae ramo.

**8** Sacerdote kuery ndo'ui avi'rã mymba omano rive va'ekue e'ŷ vy omboa'ypa pyre, ha'e nunga py onhemongy'a e'ŷ aguã. Xee ma SENHOR.

**9** Ha'e kuery ma xereve guarã aeja va'ekue rupi'rã ikuai, ha'e kuery omano e'ŷ aguã ojejavya re opaga aguã oĩ va'e káuxa, ha'e kuery ae onhemongy'a rire. Xee ma SENHOR iky'a e'ŷ va'erã amoingo va'e.

**10** – Ha'e rã amboae regua peteīve ndo'ui'rã tembi'u iky'a e'ŷ va'e. Sacerdote kuerya py oke vy ou va'e, neĩ ixupe ombo'eapo va'e kuery ma voi ndo'ui'rã.

**11** Ha'e rami avi xapy'a rei sacerdote operáta re ae'rã ojogua escravo-rã. Ha'e va'e regua ma ha'eve'rã ha'e nunga gui ho'u aguã. Hopy ae oiko'i va'ekue voi hexeve okaru avi'rã hembi'u re.

**12** Ha'e rami teī sacerdote rajy amboae regua re ri omenda vy ndokaruvei'rã iky'a e'ŷ va'e ome'ẽ mbyre re.

**13** Ha'e rami avi xapy'a rei sacerdote rajy imeve'ŷ va'e oiko, ha'e e'ŷ vy opoi pyre, ha'e imemby e'ŷ teri vy nguu ro py ju ojevy'rã kunhatai jave oikoague py. Ha'e vy ma ha'eve'rã nguu rembi'u re ju okaru aguã. Ha'e rã amboae regua ma peteīve nda'evei ha'e nunga re okaru aguã.

**14** Xapy'a rei amongue oikuua pota e'ŷ re mba'emo iky'a e'ŷ va'e ho'u'rã. Ha'e rami ri vy ma ha'ekue regua áryve ome'ẽve ju'rã sacerdote pe, peteīnhiruñ ikuai nhavõ áry peteī-teī ju'rã ome'ẽve iky'a e'ŷ va'ekue repy.

**15** Sacerdote kuery nda'evei nombovarei aguã mba'emo iky'a e'ŷ va'e SENHOR pe Israel kuery ome'ẽ va'e,

**16** mba'eta ha'e rami ri vy ojapo 'rā hexe ae ojejavyague re opaga aguā oī aguā rami, mba'emo iky'a e'ŷ va'e ho'uague káuxa, mba'eta xee ma SENHOR iky'a e'ŷ va'erā amoingo va'e.

*Mymba ivaikue rei e'ŷ va'e anho ome'ē aguā re ijayvua*

**17** SENHOR aipoe'ive ju Moisés pe:

**18** — Ndeayvu Arão ha'e ta'y kuery pe, ha'e Israel kuery ha'e javi pe. Ha'e vy aipo're: Xapy'a rei Israel kuery va'e regua, ha'e'ŷ vy amboae regua Israel kuery mbyte rupi ikuai va'e ogueru 'rā mba'emo ome'ē va'erā, onhemboayvuague ojapopaa regua mba'e, e'ŷ vy onhenhandua'i rami ome'ē va'e. Ha'e nunga SENHOR pe oapy vy ome'ē va'erā ogueru ramo

**19** xee ajopy 'rā mymba ava ivaikue rei e'ŷ va'e anho, vaka ra'y, vexa'i e'ŷ vy kavara.

**20** Ha'e rā mymba ivaikue rei va'e ma napeme'ēi 'rā, mba'eta ha'e nunga ma xee ndajopyi 'rā pendepo gui.

**21** Ha'e gui xapy'a rei xee SENHOR pe amongue ome'ē 'rā peteī rami ikuiaia regua, onhemboayvuague ojapopaa regua, e'ŷ vy onhenhandua'i rami ome'ē teī, vaka ra'y, e'ŷ vy guymba kuery mboae guigua. Ha'e ramo mymba ajopy aguā ma ivaikue rei e'ŷ va'e. Ha'e va'e re neī peteī henda py ivaikue reia oī aguā nda'evei.

**22** Ha'e rā oexa e'ŷ va'e, ikarēgue'i, e'ŷ vy hova pēgue'i va'e, ijai vaikue va'e, hemomba va'e, e'ŷ vy ipire rupi iove rei va'e, ha'e nunga ma nda'evei xee SENHOR pe peme'ē aguā, neī altar áry ma voi napemoī 'rā xee SENHOR pe peapy aguā.

**23** Ha'e rami avi vaka ra'y e'ŷ vy vexa'i hete vaikue'i va'e ha'eve 'rā penhenhandua'i rami peme'ē aguā, ha'e rā penhemboayvuague pejapopaa reguarā ma ndajopyi 'rā.

**24** SENHOR pe napeme'ēi 'rā mymba ha'yī raxy va'e, omou'ū mbyre, oa'yījo pyre, ha'e'ŷ vy ojaya pyre. Ha'e nunga pejapo eme yvy pendekuaia re.

**25** Neī amboae regua kuery po gui pejopy eme avi ha'e nunga mymba Penderuete pegua tembi'u peme'ē aguā, mba'eta ivaikuea oña káuxa nda'evelei ae ma. Ha'e nunga ma ndajopyi 'rā pendepo gui.

**26** SENHOR aipoe'ive ju Moisés pe:

**27** — Vaka ra'y, e'ŷ vy vexa'i oiko'i rire ma sete ára peve 'rā oiko ixya py. Oito ára guive mae ha'eve xee SENHOR pe peapy vy peme'ē aguā. Ha'e ramo ma xee ajopy 'rā.

**28** Vaka, e'ŷ vy vexa'i teī peteī'i ára pyve pejuka eme mokoīve imemby reve.

**29** SENHOR perovy'aa rupi mba'emo peme'ē vy ma pendejou porā aguā rami peme'ē.

**30** Ha'e va'e árave pe'upa 'rā. Mba'eve pemoembyre eme ko'ē jevy guarā. Xee ma SENHOR.

**31** Ha'e nunga rupi peiko 'rā ajapo uka va'ekue rupi, pejapopa 'rā. Xee ma SENHOR.

**32** Pembovare e'ŷ eme xerery iky'a e'ŷ va'e, mba'eta Israel kuery mbyte aikuua uka 'rā iky'a e'ŷ va'e aikoa. Xee ma SENHOR iky'a e'ŷ va'erā penemoingo va'e.

**33** Egito yvy gui roguerupa va'ekue Penderuete aiko aguā. Xee ma SENHOR.

## 23

*SENHOR pegua ngaru ikuai va'e re ijayvua*

**1** SENHOR aipoe'i Moisés pe:

**2** — Ndeayvu 'rā Israel kuery pe. Ha'e vy aipo're: Ngaru SENHOR peguarā oa'angaa pyre ma peikuua uka 'rā iky'a e'ŷ va'e memea penhemboaty aguā. Pova'e ma xevygua ngaru ikuai va'e.

*Exodo 23.12*

**3** — Seis ára re pemba'eapo 'rā. Ha'e rā sete araa ma sábado, xevygua pepytu'u ha'e penhemboaty aguā ára iky'a e'ŷ va'e. Mba'eve py napemba'eapoi 'rā, mba'eta sábado SENHOR pegua ára, mamo rā peikoa rupi rei.

*Exodo 23.14,15; 34.18; Deuteronômio 16.1-8*

<sup>4</sup> — Pova'e ma ngaru SENHOR oa'anga va'ekue meme, ára iky'a e'ŷ va'e penhemboaty aguã. Peikuaa uka 'rã oa'angaague ára ojeupity nhavõ.

<sup>5</sup> Jypy'igua jaxy re, catorze araa py, ka'aru'i ma jave ojeupity 'rã SENHOR pegua Páscoa ára.

<sup>6</sup> Ha'e va'e jaxy re ae quinze araa py oiko 'rã SENHOR pegua ngaru mbojape imbovua reveguia e'ŷ va'e regua. Sete ára peve 'rã pe'u mbojape imbovua reveguia e'ŷ.

<sup>7</sup> Jypy'ia ára ma pejapo 'rã nhemboaty iky'a e'ŷ va'e. Ha'e vy pemba'epo eme mba'eve py.

<sup>8</sup> Sete ára re peme'ẽ 'rã mba'emo SENHOR pe peapy vy. Ha'e gui sete araa py ma oiko 'rã nhemboaty iky'a e'ŷ va'e. Pemba'epo eme mba'eve py.

### *Êxodo 23.16; 34.22,26*

<sup>9</sup> SENHOR aipoe'ive Moisés pe:

<sup>10</sup> — Ndeayyu Israel kuery pe. Ha'e vy aipo're: Yvy ame'ẽ va'ekue re pevaẽ ma vy pemono'õ 'rã mba'emo penhoty va'ekue. Mba'emo aju pemono'õ va'e gui ma sacerdote pe Peru 'rã jypy'i pejokua va'ekue regua iporãgueve peme'ẽ va'erã.

<sup>11</sup> Ha'e va'e jokuaa sacerdote oupi reve ombovava 'rã SENHOR renonde, pendejou porã aguã.

<sup>12</sup> Sábado ára rire'i 'rã sacerdote oupi reve ombovava. Mba'emo aju ojokua pyre oupia ára ae 'rã peme'ẽ avi peteĩ vexa'i ivaikue rei e'ŷ va'e, peteĩ ma'etõ oguerekó va'e, SENHOR pe peapy vy peme'ẽ aguã.

<sup>13</sup> Ha'e gui mba'emo aju guigua peme'ẽ va'erã mokoõ ryru trigo iporãve va'e azeite reve omona mbyre. Ha'e va'e ma peapy vy peme'ẽ 'rã, heakuã porã rã SENHOR ojou porã aguã. Peru avi 'rã peteĩ ryru vinho ixupe penhoẽ va'erã.

<sup>14</sup> Ndape'ui 'rã mbojape, trigo maimbe, neĩ mba'emo ra'yõng, Penderuete pe peme'ẽ va'erã Peru e'ŷa ja. Ha'e rami aguã ma raka'e rã peve aeja va'ekue penderekorã, pendekuaia rupi ha'e javi guarã ae.

### *Deuteronomio 16.9-12*

<sup>15</sup> — Ha'e gui peipapa 'rã ára, sábado ára rire'i jokuaa oupi reve ombovava pyrã Peru aára guive peipapa 'rã sete semana ha'e javi re.

<sup>16</sup> Ha'e gui sete-a sábado rire'i ára guive ma cinqüenta ára jevy 'rã peipapa. Ha'e gui ma Peru ju 'rã SENHOR pe mba'emo aju guigua peme'ẽ va'erã.

<sup>17</sup> Pendekoa gui Peru 'rã mokoõ mbojape oupi reve ombovava pyrã. Mokoõ ryru trigo gui 'rã pejapo. Imbovua reve 'rã pembojy. Ha'e va'e ma jypy'igua SENHOR pe peme'ẽ va'erã.

<sup>18</sup> Ha'e gui mbojape reve peme'ẽ avi 'rã sete vexa'i ra'y ivaikue rei e'ŷ va'e, peteĩ ma'etõ'i va'e meme, ha'e peteĩ vaka ra'y, ha'e gui mokoõ vexa'i. Ha'e nunga peapy uka vy peme'ẽ 'rã SENHOR pe, peteĩ rami pendekuaia regua ha'e vinho penhoẽ va'e reve. Peapy uka vy 'rã peme'ẽ, heakuã porã rã SENHOR ojou porã aguã.

<sup>19</sup> Ha'e gui peteĩ kavara peme'ẽ avi 'rã pejeavyague re, ha'e mokoõ vexa'i peteĩ ma'etõ va'e ju 'rã peme'ẽ peteĩ rami pendekuaia reguarã.

<sup>20</sup> — Ha'e nunga ma sacerdote oupi reve ombovava 'rã, trigo jypygua gui mbojape pejapo va'ekue reve. Ha'e nunga SENHOR renonde oupi reve ombovava pyrã peme'ẽ, mokoõ vexa'i ra'y reve. Ha'e nunga ma SENHOR pegua iky'a e'ŷ va'e, sacerdote kuery ho'u va'erã.

<sup>21</sup> Ha'e va'e árave oikuua uka 'rã nhemboaty aguã ára iky'a e'ŷ va'erã. Pemba'epo eme mba'eve py. Ha'e va'e ma ojapo uka pyre raka'e rã peve guarã, pendekuaia ha'e javi rupi, ha'e peneramymino kuery ikuai va'e peguarã avi.

<sup>22</sup> — Ha'e gui pendeyvy re penembatey rupi pemono'õ vy ndapeo jevyi 'rã penembatey rembe rupi gui Peru aguã, neĩ hary peity rive va'ekue pemono'õ eme. Tove iporiaukue'i ha'e amboae regua kuery peguarã. Xee ma SENHOR Penderuete — he'i.

<sup>23</sup> SENHOR aipoe'ive ju Moisés pe:

**24** — Ndeayvu Israel kuery pe. Ha'e vy aipo're: Sete jaxya re ijypy'ia ára py ma oiko 'rã xevy pepytu'u ha'e penema'endu'a aguã ára. Mimby guaxu pemonhe'ẽ 'rã penhemboaty aguã, ára iky'a e'ŷ va'e ramo.

**25** Mba'eve py pemba'eapo eme. Ha'e rami 'rãgue py SENHOR pe 'rã peru peapy vy peme'ẽ va'erã.

### *Jejavya ojao'ia aguã ára re ijayvua*

**26** SENHOR aipoe'ive Moisés pe:

**27** — Ha'e gui ha'e va'e sete jaxya va'e re, dez araa py ma ojeupity 'rã jejavya ojao'ia aguã ára. Oiko 'rã nhemboaty iky'a e'ŷ va'e, penenhe'ẽ py pejexavaia rupi pendekuai aguã. Ha'e rami vy SENHOR pe peru 'rã peapy vy peme'ẽ va'erã.

**28** Ha'e va'e ára ma mba'eve py napemba'eapoi 'rã, pejejavyague ojao'ia aguã ára, SENHOR Penderuete renonde pejejavyague pejao'i uka aguã ae.

**29** Ha'e va'e ára onhe'ẽ py ojexavaia rupi e'ŷ ikuai va'e oipe'aa 'rã heta va'e kuery mbyte gui.

**30** Ha'e va'e ára mba'emo py omiba'eapo va'e ma xee ae amokanhy 'rã heta va'e kuery mbyte gui.

**31** Mba'eve py napemba'eapoi 'rã. Ha'e va'e ma ojapo uka pyre raka'e rã peve guarã peneramymino ikuai va'e peguarã, pendekuaia ha'e javi rupi.

**32** Sábado ára rami oiko 'rã xevy pe pepytu'u aguã ára, penenhe'ẽ py pejexavaia rupi peiko aguã. Ha'e va'e jaxy re nove araa py ka'arukue guive, ha'e ko'ẽ jevy ka'aru peve ma pepytu'u 'rã sábado ára pemboetea rami.

### *Ngaru oikoa ára oguy'i py ikuai aguã re ijayvua*

**33** SENHOR aipoe'ive ju Moisés pe:

**34** — Ndeayvu Israel kuery pe, ha'e vy aipo're: Sete jaxya va'e re quinze araa py ma oiko 'rã SENHOR pegua ngaru oguy'i py pei aguã regua. Sete ára re 'rã oiko.

**35** Jypy'ia ára ma oiko 'rã nhemboaty iky'a e'ŷ va'e. Ha'e rami vy mba'eve py napemba'eapoi 'rã.

**36** Sete ára re 'rã SENHOR pe peme'ẽ mba'emo peapy vy. Oito araa py ju 'rã oiko nhemboaty iky'a e'ŷ va'e, SENHOR pe peme'ẽ aguã mba'emo peapy vy. Ixupe penhemboaty aguã ára ramo mba'eve py napemba'eapoi 'rã.

**37** — Ha'e va'e ha'e javi ma SENHOR pegua ngaru oiko aguã ára oa'anga pyre. Ojeupity nhavõ peikuua uka 'rã nhemboaty iky'a e'ŷ va'erã, SENHOR pe peme'ẽ aguã mba'emo peapy vy, tata py oapya va'erã, mba'emo aju guigua, mymba ojukaa va'erã, ha'e mba'emo rykue onhoëa va'erã, peteñ-teñ regua ma hi'ára py porã 'rã peme'ẽ.

**38** Oiko avi 'rã SENHOR pegua sábado ára, ha'e mba'emo peme'ẽ aguã ára, ha'e penhemboatyague pejapopaa regua, ha'e SENHOR pe mba'emo penhenhandua'i rami peme'ẽ aguã ha'e javi.

**39** — Ha'e gui sete jaxya re quinze ára py ma pendeyvy re penhoty' va'ekue'a pemono'õmba ma vy sete ára re pejapo 'rã ngaru SENHOR pe. Jypy'ia ára, ha'e gui oito araa py ju 'rã oiko xevy pepytu'u aguã.

**40** Jypy'ia ára py ma Peru 'rã yvyra'a iporãgueve va'e, pindo rogue, yvyra rogue porãgue, ha'e salgueiro yy rembe rupi hi'aĩ va'e rogue guive. Ha'e rami vy sete ára re pevy'a 'rã SENHOR Penderuete renonde.

**41** Ha'e rami vy pejapo 'rã ngaru SENHOR pegua, sete ára re ma'etýa nhavõ. Ha'e va'e ma ojapo uka pyre raka'e rã peve guarã, peneramymino kuery ikuai va'e peguarã. Sete jaxya py ae 'rã pejapo.

**42** Sete ára peve 'rã pei oguy'i yvyra rogue gui pejapo va'ekue guýry. Israel kuery regua ha'e javi toñ oguy'i py,

<sup>43</sup> peneramymino kuery oikuua aguã, mba'eta Egito yvy gui Israel kuery xee anoẽmba jave ajapo karamboae oguy'i guýry ikuai aguã rami. Xee ma SENHOR Penderuete — he'i.

<sup>44</sup> Ha'e rami Israel kuery pe Moisés omombe'u porãve ngaru SENHOR pegua oa'angaague ára.

## 24

*Êxodo 27.20,21*

<sup>1</sup> Ha'e gui SENHOR aipoe'i Moisés pe:

<sup>2</sup> — Ndeayvu Israel kuery pe ogueru aguãazeite ete'i oliveira onhami mbyre guigua tataendy reguarã, ha'e rami vy hexakã riae oiny aguã ogue e'ŷ re.

<sup>3</sup> Ha'e va'e re ma Arão opena porã 'rã oikovy oguy nhemboaty oĩaty py SENHOR ayvu oĩaty renonde, ajukue okẽ regua kyvõ rupi, ka'aru guive ko'ëgue peve. Ha'e va'e ma raka'e rã peve guarã ojapo uka pyre peneramymino kuery ikuai va'e peguarã.

<sup>4</sup> SENHOR renonde tataendy 'y ouro ete'i gui ojapo pyre áry ikuai 'rã hendy va'e. Ha'e va'e re ha'e opena riae 'rã oikovy.

*SENHOR pegua mesa áry mbojape oĩ va'e re ijayvua*

<sup>5</sup> — Ha'e gui trigo iporãve va'e rejou vy rejapo 'rã doze mbojape. Peteĩ-teĩ ma mokoĩ ryru gui 'rã rejapo.\*

<sup>6</sup> Ha'e gui mesa ouro guigua va'e áry remoĩ 'rã mokoĩ ryxy rupi. Peteĩ-teĩ ryxy rupi ma mboapy meme 'rã remoĩ SENHOR renonde.

<sup>7</sup> Peteĩ-teĩ ryxy áry rupi ma remoĩ 'rã heakuã porã va'e. Ha'e va'e ma mbojape ha'e javi rekovia oapy vy ome'ëa 'rã SENHOR pe.

<sup>8</sup> Sábado nhavõ Arão omoatyrõ porã'i 'rã SENHOR renonde. Ojapo riae 'rã Israel kuery re vy, raka'e rã peve xereve guarã aeja va'ekue rami vy.

<sup>9</sup> Ha'e va'e mbojape ma Arão ha'e ta'y kuery peguarã, henda iky'a e'ŷ va'e py ae ho'u okuapy aguã, mba'eta iky'a e'ŷ ete va'e ha'e kuery pe, SENHOR pe mba'emo oapy vy ome'ë mbyre reveguia, raka'e rã peve guarã ajapo ukaague rami vy.

*SENHOR re ijayvu vai va'e opaga aguã re ijayvua*

<sup>10</sup> Ha'e gui Israel kuery mbyte peteĩ oiko Israel regua pi'a, Egito pygua ra'y. Ha'e va'e ava Israel regua pi'a va'e ma Israel regua ae reve joe opu'ã ha'e kuery rekoia py.

<sup>11</sup> Israel regua pi'a va'e ma ojejavvy vy ijayvu vai SENHOR rery re. Ha'e ramo Moisés oña py oguerua. Ixy ma Dã regua Dibri rajy Selomite.

<sup>12</sup> Ha'e rã ava va'e nhuã py ombotya hekorã SENHOR oikuua uka e'ŷa ja.

<sup>13</sup> Ha'e rami rã SENHOR aipoe'i Moisés pe:

<sup>14</sup> — Peipe'a ijayvu vai va'ekue pendekoa gui mombyry'i. Ha'e ramo inhakã áry henduare kuery ha'e javi tomoĩ opo. Ha'e gui heta va'e kuery ha'e javi 'rã ojapipa ita py.

<sup>15</sup> — Aipo're Israel kuery pe: Mava'e rã rei Nguuete re ijayvu vai va'e ma hexe ae 'rã oĩ ojejavvyague re opaga aguã.

<sup>16</sup> SENHOR rery re ijayvu vai va'ekue ma pejuka 'rã. Peẽ kuery ha'e javi 'rã pejapi ita py. Amboae regua kuery, e'ŷ vy Israel regua ae teĩ SENHOR rery re ijayvu vai ramo ojukaa 'rã.

<sup>17</sup> Jojuka va'e rei tema ojukaa avi 'rã.

<sup>18</sup> Ha'e rã mymba jukaare ma amboae ju 'rã ome'ë hekobia, ha'ekue ramigua ete'i.

<sup>19</sup> Amongue va'e rei joupe ojapo vai ri ramo joe ojapoague re pejapo avi 'rã hexe:

<sup>20</sup> nhomopéague re pemopé avi 'rã, joexa omombuague re pemombu avi 'rã hexa, nhoaõ omopéague re pemopé avi 'rã haõ. Nhomingo axyague re pejapo avi 'rã hexe.\*

\* **24:5** Mbojape peteĩ-teĩ ma dois quilos trigo gui 'rã ojapo. \* **24:20** Mateus 5.38

**21** Mymba jukaare ma amboae ju 'rã ome'ẽ hekivia. Ha'e rã ava ri ojuka ramo ma ojukaa avi 'rã.

**22** Lei peteĩ'i rami ae 'rã peiporu, amboae regua kuery ha'e Israel kuery va'e regua pe teĩ. Mba'eta xee ma SENHOR Penderuete – he'i.

**23** Ha'e ramo Israel kuery pe Moisés aipoe'i ijayvu vai va'ekue tekaoa gui mombyry'i oipe'a vy ita py ojapipa aguã. Ha'e ramo Israel kuery ojapo okuapy Moisés pe SENHOR ojapo ukaague rami.

## 25

### *Êxodo 23.10,11*

**1** SENHOR aipoe'i Moisés pe Sinai yvyty re oĩ teri jave:

**2** – Ndeayvu Israel kuery pe, ha'e vy aipo're: Pendeyvyrã ame'ẽ va'ekue py pevaẽ ma ramo yvy ae opyta rive jepi 'rã oupy SENHOR pe sábado ára py rami.

**3** Mboapy meme ma'etý re penhotý 'rã penemba'ety rupi, mboapy meme ma'etý re avi 'rã pende'uva ty rupi pemoatyrõ hakã, ha'e vy pemono'õ 'rã hi'a.

**4** Ha'e rã sete ma'etý re ma oiko 'rã sábado ára py rami yvy opytu'u aguã, SENHOR pe ae 'rã opyta rive sábado ára py rami. Ha'e vy napema'etýi 'rã penemba'ety rupi, neĩ pende'uva ty rupi hakã napemoatyrõi 'rã guive.

**5** Penemba'ety rupi henhoĩ rive va'ekue'a voi napemono'õi 'rã, neĩ uva rakã pemoatyrõ e'ÿague rupi voi ndapeipo'oi 'rã. Ha'e va'e ma'etý re ma yvy opyta rive 'rã xevy.

**6** Ha'e rami avi yvy opyta rivea ja hi'a rive va'ekue ma ha'eve 'rã pe'u aguã, peẽ, penembiguai kuery avakue ha'e kunhague, pêvy ombo'eapo va'e ha'e amboae regua pendereve ikuai va'e guive.

**7** Penerymba kuery ha'e mymba kuery pendeyvy re ikuai va'e voi okaru avi 'rã mba'etygue ha'e javi rupi.

### *Ma'etý jubileu 'epy va'e re ijayvua*

**8** – Ha'e gui peipapa 'rã ma'etýa oaxa va'e, sete ma'etýa sete-kue peve 'rã peipapa. Ha'e rami vy sete ma'etýa sete-kue peipapa va'e ha'e javi vy quarenta e nove ma'etýa 'rã peipapa.

**9** Ha'e gui sete jaxya va'e re, dez araa py ma pemonhe'ẽ atã 'rã mimby guaxu. Jejavya ojao'ia ára py ae 'rã pemonhe'ẽ pendeyvy ha'e javi rupi onhendu aguã rami.

**10** Ha'e vy cinqüenta ma'etý ma peikuaa uka 'rã ma'etý iky'a e'ÿ va'ea, yvy jave rupi ikuai va'e pe peikuaa uka avi 'rã opa mba'e pepoi rivepa aguã. Ha'e va'e ma'etý ma jubileu pendevy peguarã aeja va'e. Ha'e rami vy peteĩ-teĩ pejevypa 'rã peovy pendeyvy ae katy, ha'e penetrarã kuerya katy ae.

**11** Cinqüenta ma'etý ojeupity nhavõ oiko 'rã jubileu ma'etý pendevy pegua. Ha'e vy napema'etýi 'rã, neĩ napemono'õi 'rã henhoĩ rive va'ekue gui, neĩ uva rakã pemoatyrõ e'ÿague rupi voi ndapeipo'oi 'rã.

**12** Mba'eta jubileu ma'etý oiko, iky'a e'ÿ va'e pendevy. Ha'e vy penemba'ety rupi hi'a rive va'ekue 'rã pe'u.

**13** – Jubileu ma'etý re ma peteĩ-teĩ pejevypa 'rã penderekaoa katy ae.

**14** Xapy'a rei neirũ pe mba'emo revende, ha'e e'ÿ vy neirũ gui mba'emo rejogua ri vy ekore eme nderyke'y, e'ÿ vy nderyvy.

**15** Mba'eta jubileu ma'etý oiko guive mbovy ma'etý oaxa va'ekue reipapaa rami vy 'rã neirũ gui yvy rejogua va'e repyrã peikuaa. Mba'eta oyvy ndevy ha'e ovende jave jubileu ma'etý ojeupity jevy aguã remono'õ aguã mbovy ma'etý oata teria rami vy peikuaa 'rã hepyrã.

**16** Heta ma'etý re guarã ri vy hepyve 'rã, ha'e rã mbovy'i ma'etý re guarã ri vy ma ndaepyive 'rã, mba'eta ndevy ha'e omboepy 'rã mbovykue pa remono'õ aguã rami.

<sup>17</sup> Ha'e nunga rupi pekore eme peneirũ kuery. Ha'e rami 'rãgue py peteĩ-teĩ Penderuete renonde pejererokyjea rupi pendekuai, mba'eta xee ma SENHOR Penderuete.

<sup>18</sup> — Pendekuai xee ajapo uka va'ekue rupi, xee aipotaa rami pejapopa aguã. Ha'e rami vy 'rã pendekuai porã pendeyvy re.

<sup>19</sup> Ha'e rami vy yvy re mba'emo hi'a porã 'rã, pe'uxea rami 'rã pe'u, pendekuai porã 'rã guive.

<sup>20</sup> Xapy'a rei aipopeje 'rã: "Mba'e tu ja'u 'rã sete ma'etõa re, nanhama'etõi neĩ nhanemba'ety gui nhamono'õ e'õ re?" peje 'rã xevy.

<sup>21</sup> Ha'e ramo ma mboapy meme ma'etõa re ajou uka retave 'rã pendevy, mboapy ma'etõ peve mba'emo hi'a aguã rami.

<sup>22</sup> Ha'e gui oito ma'etõa re mae ma pema'etõ jevy vy pe'u 'rã pemono'õ ypy va'ekue rive, nove ma'etõa peve. Penhotõ jevy va'ekue hi'a e'õa ja pe'u 'rã inhymague gui.

<sup>23</sup> Ha'e gui pendeyvy nahevendei 'rã raka'e rã peve guarã, mba'eta yvy ma xemba'e ae, ha'e rã peẽ kuery ma xevy rã kova'e yvy regua e'õ, amboae guigua yvy rupi oguata va'e rami rive.

<sup>24</sup> Ha'e nunga rupi yvy pendekuaia ha'e javi rupi yvy ja pe ae ju 'rã pejogua uka.

<sup>25</sup> — Xapy'a rei penderyvy e'õ vy penderyke'y iporiaukue'i vy oyvy ovende ramo peteĩ hetarã ou 'rã hepyarã, ha'e vy ojogua jevy 'rã yvy tyvy e'õ vy tyke'y ovende va'ekue.

<sup>26</sup> Xapy'a rei amongue ndoguerekoi guetarã oyvy jogua jevyarã teĩ ha'e ae 'rã ojou hepyrã ojogua jevy aguã.

<sup>27</sup> Ha'e rami vy ha'e oipapa 'rã mbovy ma'etõ re pa ojapo ma ovendeague, ha'e gui jubileu ma'etõ ojeupity aguã oata teria rami vy ome'õ 'rã oyvy joguaare pe, ha'e gui oyvy katy ae 'rã ojevy ju.

<sup>28</sup> Ha'e rami avi yvy repyrã ndojoui ramo yvy ovende va'ekue opyta 'rã ijoguaare po py ae, jubileu ma'etõ ojeupity jevy e'õa ja. Ha'e gui jubileu ojeupity jevy ramo ipo gui ojopy ju 'rã oyvyrã.

<sup>29</sup> — Ha'e gui xapy'a rei tetã ikorapa va'e py amongue ngoo oguereko va'e ovende teĩ ovendeague ára guive peteĩ ma'etõ ndoaxai teria ja ha'eve ojogua jevy aguã. Peteĩ ma'etõ oaxa e'õa ja ha'eve ju 'rã ojogua aguã.

<sup>30</sup> Ha'e rami avi ojogua jevy e'õ re peteĩ ma'etõ oaxa ma rire oo tetã ikorapa va'e py oĩ va'e opyta ae 'rã ijoguaare po py, ha'e oiko rire hamymino kuery po py ju, raka'e rã guarã. Jubileu ma'etõ ojeupity teĩ ijoguaare nome'õvei 'rã ivendeare pe.

<sup>31</sup> Ha'e rã oo tekao'i ikora e'õ va'e py oĩ va'e ma yvy hovai rupi oĩ va'e rami 'rã omboepya. Ha'e nunga ma ha'eve riae 'rã ojogua jevy aguã, ha'e vy jubileu ma'etõ ojeupity jave py ijoguaare ome'õ ju 'rã ivendeare pe.

<sup>32</sup> Ha'e rã levita kuery retã rupi ma ngoo ovende rire teĩ raka'e rã peve guarã ha'eve ojogua ju aguã.

<sup>33</sup> Xapy'a rei levita ngoo guetã py ovende va'ekue ndojogua jevyi teĩ ijoguaare ome'õ nho 'rã jubileu ma'etõ ojeupity jevy ramo. Mba'eta levita kuery retã py hoo ikuai va'e ma imba'e ae 'rã oĩ Israel kuery mbyte rupi.

<sup>34</sup> Ha'e rã ha'e kuery retã yvýry yvy itui va'e ma novendei 'rã, mba'eta imba'e ae 'rã itui raka'e rã peve guarã.

### *Deuteronomio 15.7-11*

<sup>35</sup> — Xapy'a rei nderyvy e'õ vy nderyke'y iporiau vy ikangypa ramo pemongaru 'rã. Amboae regua pendeyvy rupi ikuai va'e reipytyvõa rami rerekro avi 'rã ndereve.

<sup>36</sup> Ixupe peráta reiporukaa áryve emboekovia uka retave eme. Ha'e rami 'rãgue py Nderuete renonde rejelerokyjea rupi eiko, ndereve nderyvy kuery, nderyke'y kuery ikuai porã aguã rami.

<sup>37</sup> Ha'e kuery pe peráta ndereiporukai 'rã remboekovia uka retave aguã rive, neĩ tembi'u voi nerevendei 'rã ha'e kuery pe hepyve re.

38 Xee ma SENHOR Penderuete. Egito yvy gui roguerupa Canaã yvy ame'ẽ, ha'e Penderuete aiko aguã.

### *Escravo kuery regua lei oña*

39 — Ha'e gui nderyvy e'ŷ vy nderyke'y ndereve oikoa py iporiau vy nerembiguairã onhevende teĩ ereko eme escravo rami.

40 Ndea py oiko 'rã om̄ba'epo va'e e'ŷ vy amboae regua rami. Jubileu ma'etŷ ojeupity jevy peve'i 'rã om̄ba'epo ndevy.

41 Ha'e gui ma ndero gui ojepe'a vy gua'y kuery reve oje'oipa jevy 'rã nguu kuery rekoague katy.

42 Mba'eta peẽ kuery ma Egito yvy gui xevygua escravo rami ae arupa va'ekue. Ha'e nunga rupi napenevendeai ju 'rã amboae pegua escravo-rã.

43 Ha'e nunga rupi ejoguerekoy poyi eme. Ha'e rami 'rãgue py Nderuete renonde eiko rejelerokyjea rupi.

44 Xapy'a rei ndevygua escravo-rã ava e'ŷ vy kunha ma pendeyvy yvýry rupigua anho 'rã pejogua. Ha'e gui ae 'rã pejou escravo-rã.

45 Ha'eve avi mombyry guigua penembyte ikuai va'e ra'y kuery pejogua aguã, pendeyvy re ta'y kuery oguerekoy va'e guive. Ha'e kuery anho ha'eve escravo perekoy aguã.

46 Ha'e va'e kuery ma peja 'rã pendera'y kuery peguarã, pendera'y kuery ju oguerekoy aguã. Pendera'y kuery pe om̄ba'epo 'rã raka'e rã peve. Ha'e rã penderyvy kuery, penderyke'y kuery Israel kuery ae ikuai ramo perekoy poyi rei eme, peteĩ-teĩ penhem-bouvixave eme joe gui.

47 — Ha'e gui xapy'a rei amboae regua penda rupi ikuai va'e oguerekopa 'rã mba'emo, ha'e penderyke'y e'ŷ vy penderyvy iporiau vy onhevende 'rã amboae regua penembyte oiko va'e pegua escravo-rã, ha'e rami e'ŷ vy ta'y kuery pe.

48 Ha'e va'e regua onhevende ma teĩ ha'eve nho 'rã ojoguaa ju aguã. Tyvy kuery, tyke'y kuery va'e regua ha'eve 'rã ojogua ju aguã.

49 Ituty kuery, tyvy kuery voi ha'eve 'rã ojogua aguã, e'ŷ vy hetarã va'e rei ojogua 'rã. Ha'e e'ŷ ramo ma ha'e ae mba'emo ojoupa ri vy ojejogua 'rã.

50 Ha'e gui ma ijoguaare reve oikuaa pota 'rã mbovy repy re pa onhevendeague ma'etŷ guive jubileu ma'etŷ ojeupity jevy peve. Ha'e va'e ma'etŷa mbovy paa rami vy oikuaa 'rã hepyrã, om̄ba'epo va'e pe pemboekoviaa rami vy.

51 Xapy'a rei jubileu ojeupity peve ma'etŷa oata reta teri ramo ma ojejogua ju aguã ome'ẽ reta 'rã.

52 Ha'e rami avi jubileu ojeupity peve ma'etŷa ndoata retai ri ramo ma hexeve oikuaa pota vy ojejogua ju aguã nome'ẽ retaive 'rã.

53 Ha'e rami vy ma'etŷ nhavõ ixupe om̄ba'epo 'rã om̄ba'epo va'e rami ae. Ha'e rami avi reikuaa pota 'rã ija oguerekoy poyi e'ŷ aguã.

54 Xapy'a rei avave rei ndojoguaa jevyi ri ramo jubileu ma'etŷ py ae 'rã oo jepe, ta'y kuery voi oje'oi 'rã hexeve.

55 Mba'eta Israel kuery ma xevygua escravo rami ae ikuai. Xevygua kuery areko va'e ma ha'e kuery ae, Egito yvy gui aipe'apa va'ekue. Xee ma SENHOR Penderuete.

## 26

### *Nguuete ra'angaa omboete e'ŷ aguã re ijayvua*

1 — Ndapejapoi 'rã penderuete ra'angaa rive, neĩ napemopu'ãi 'rã mba'emo ra'angaa neĩ ita. Nda'evei avi pendeyvy re ita oĩ va'e gui ta'angaa rã pejapo aguã, ha'e nunga pe pejero'a e'ŷ aguã. Mba'eta xee ae ma SENHOR Penderuete.

2 Pemboete 'rã xevygua sábado ára, pemboete avi 'rã xevygua henda iky'a e'ŷ va'e. Xee ma SENHOR.

- <sup>3</sup> — Xapy'a rei xeayvua rupi pendekuai, ha'e ajapo uka va'e ha'e javi pejapo ramo  
<sup>4</sup> pendevy xee ambou 'rā oky hi'ára py porā. Ha'e rā yvy gui oiko 'rā mba'emo'a, ha'e yvyra pendeyvy rupi ikuai va'e voi hi'a 'rā.  
<sup>5</sup> Ha'e rami rā mba'emo ra'yīgue pejyky 'rā uva peipo'oa ára peve, ha'e uva peipo'o 'rā mba'emo ra'yī pemono'ō jevya ára peve. Pejou 'rā tembi'u oata aguā rami e'ŷ, ha'e pendekuai porā 'rā pendeyvy re.  
<sup>6</sup> Ajapo 'rā pendeyvy re pendekuai porā aguā rami. Penheno rā nda'ipoi 'rā penemondiyiarā. Pendeyvy gui amomba 'rā mymba penemoangeko reiarā ikuai va'ekue, ha'e pendeyvy rupi ndoaxavei ma 'rā kyxe revegua.  
<sup>7</sup> Peakykue monhamba 'rā penderovaigua kuery. Penerenonde ha'e kuery ho'apa 'rā pendekyxе gui.  
<sup>8</sup> Peē kuery va'e regua peteñ nhiruñ'i teñ pemomba 'rā cem, ha'e peē kuery va'e regua cem pemomba 'rā dez mil. Ha'e rā penerenonde penderovaigua kuery ho'apa 'rā pendekyxе gui.  
<sup>9</sup> Pendere ama'ẽ vy ajapo 'rā pendera'y reta aguā rami, romboetave 'rā. Ha'e vy xereve guarā aeja va'ekue amoñ atāve 'rā.  
<sup>10</sup> Pe'u tema 'rā pemono'ō va'ekue ymague gui, ha'e inhymague penoñmba vy 'rāe pejou mba'emo ra'yīgue pyau pemoñ porā aguā.  
<sup>11</sup> Penembyte amoñ 'rā xembojerovia atyrā, ha'e gui xenhe'ẽ py ndoroipota e'ŷvei ma 'rā.  
<sup>12</sup> Penembyte rupi aiko vy Penderuete ae 'rā aiko, ha'e rā peē kuery ma xevygua kuery pendekuai 'rā.\*  
<sup>13</sup> Xee ma SENHOR Penderuete. Egito yvy gui roquerupa va'ekue ha'e kuery pegua escravo pendekuai ve'ŷ aguā. Hi'y pendeaju'y rupi omoñ va'ekue amopẽ vy ajapo pende'yvi porā reve peiko aguā rami.

#### *Deuteronômio 28.15-68*

- <sup>14</sup> — Ha'e rami teñ xapy'a rei naxenhe'ẽ rendui, ha'e ajapo uka va'e ha'e javi ndapejapoi ramo,  
<sup>15</sup> xeayvuague pemboykepa rive ri ramo, ha'e pendepy'a re aipotaa ha'e javi napendu potai ajapo uka va'e ndapejapoxei vy, ha'e xereve guarā aeja va'ekue rupi e'ŷ pendekuai ramo,  
<sup>16</sup> ha'e ramo xee ambou 'rā povae nunga: Pende'áry ambou 'rā penemongyjarā, mba'eaxy ha'e pire raku vaikue. Ha'e nunga ojapo 'rā penderexa hendy reia oguepa aguā rami, ha'e pendekovea opa ov y aguā rami. Mba'emo ra'yī penhoty rive 'rā, mba'eta penderovaigua kuery ou vy ho'upa 'rā.  
<sup>17</sup> Penderovaigua xee voi aiko ramo penderovaigua kuery pendejuka 'rā. Pendere ija'e e'ŷ va'e kuery onhembouvixa rei 'rā pende'áry, ha'e mava'eve penemonhaa e'ŷ teñ penhamba rive 'rā.  
<sup>18</sup> Xeayvuague napendu potai teri ri ramo pejejavyague re rombojexavaive ju 'rā sete-kue peve.  
<sup>19</sup> Ha'e rami vy amomba 'rā penembaraetea penhemboyvate rei ve'ŷ aguā. Ha'e vy yva pende'áry rupi oñ va'e amboty 'rā ferro guigua rami, pendeyvy overa va'e rami hatāmba aguā.  
<sup>20</sup> Rive ete 'rā penhea'ã pemba'eapoa rupi. Mba'eta pendeyvy gui ndoikovei ma 'rā pemono'ō va'erā, yvyra yvy re ikuai va'e voi ndai'avei 'rā.

- <sup>21</sup> — Xapy'a rei xerovai tema pendekuai, ha'e xeayvua napendu potai ae ramo pende'áry ambouve 'rā penemoingo axyarā sete-kue peve ju, pejejavyve temaa re.  
<sup>22</sup> Ha'e rami vy penembyte ambou 'rā ka'aguy rupigua inharō va'e. Ha'e va'e kuery omomba 'rā pendera'y kuery ha'e penerymba kuery, ojapo 'rā mbovy'i ete pekuave aguā rami, tape peguataaty rupi avave rei ndoaxaavei peve.

\* 26:12 2 Coríntios 6.16

<sup>23</sup> — Ha'e ramigua oiko teĩ ndapeikuaa potai vy xeayvu napendu potai xevy pe ju pendekuai aguã, ha'e xerovai tema peiko ramo ma

<sup>24</sup> xee voi aiko 'rã penderovai. Ha'e rami vy pejejavyvea re xee ae rojukapa 'rã sete-kue teri pendekuai axy aguã.

<sup>25</sup> Pende'áry ambou 'rã kyxe revegua penemombaarã, xereve guarã aeja va'ekue rovai pendekuai ramo. Ha'e ramo peneretã rupi pendeatypa teĩ penembyte ambou 'rã mba'eaxy vaikue, ha'e romboaxa 'rã penderovaigua kuery po py.

<sup>26</sup> Pe'u 'rã va'ekue aipe'a ramo dez kunhague pete'i'i tatakua pyve 'rã ombojy mbojape, ha'e gui opejapa va'ekue anho 'rã omboja'o-ja'o pendevy. Pe'u teĩ napenhandui 'rã.

<sup>27</sup> — Ha'e rami ete oiko teĩ napendu potai vy xerovai ae tema peiko ramo

<sup>28</sup> xee voi xepoxya aendu vy aiko 'rã penderovai. Ha'e rami vy pejejavyvea re rombojexavaive 'rã sete-kue peve ju.

<sup>29</sup> Ha'e ramo pe'u 'rã pendera'y ha'e penderajy kuery ro'okue ae.

<sup>30</sup> Aity ukapa 'rã pembojerovia atyrã yvy'ã rupi pejapo va'ekue, ambovaipa 'rã kuaray ra'angaa pejapo va'ekue, ha'e penere'õgue amombo 'rã penderuete ramigua ivaipa va'ekue áry. Ha'e vy xepy'a py aendu 'rã noromboaxyveia anho.

<sup>31</sup> Ambovaipa 'rã peneretã ikuai va'e tekao e'ÿa opyta aguã rami, amomba 'rã pembojeroviaaty, naetûvei ma 'rã heakuã porã va'e ajou porã aguã peapy teĩ.

<sup>32</sup> Ambotyguepa avi 'rã pendeyvy. Ha'e nunga gui penderovaigua kuery onhemondyipa 'rã onhemboekoa okuapy vy.

<sup>33</sup> Romoaïmba 'rã yvy regua kuery mbyte rupi, ha'e aekyi uka 'rã kyxe penderakykue rupi. Pendeyvy va'ekue itygue 'rã, ha'e peneretã va'ekue ma tekoague meme 'rã opyta.

<sup>34</sup> — Ha'e ramo 'rãe pendeyvy opytu'upa sâbado ára py rami, jipoaveia ja. Ha'e rã peẽ kuery ma penderovaigua kuery yvy re rive 'rã pendekuai. Ha'e va'e jave ma pendeyvy ikane'õguia 'rã, sâbado ára py opytu'upaa rami.

<sup>35</sup> Jipoaveia ja pendeyvy ikane'õguia 'rã, mba'eta yvy re pendekuai jave pendeyvy ndopytu'ui rire sâbado ára py rami.

<sup>36</sup> Ha'e gui pekuave va'e kuraxõ re amoõ 'rã mby'a guaxu ve'ÿ penderovaigua kuery yvy re pendekuaia py. Ha'e rami vy penhamba 'rã mba'emo rogue pirukue ovava nhendu'i va'e gui rive. Kyxe revegua ou va'e gui rami 'rã penhamba, pe'apa rive 'rã guive mava'eve penemonha ramo e'ÿ.

<sup>37</sup> Pe'apa 'rã jo'a-jo'a kyxe gui ho'a va'e rami, mava'eve penemonha ramo e'ÿ. Napepu'ã kuaavei 'rã penderovaigua kuery renonde.

<sup>38</sup> Pemanomba 'rã yvy regua kuery mbyte, ha'e penderovaigua kuery yvy re peneru'ñmba 'rã.

<sup>39</sup> Pende kuery va'e regua okuave'i va'ekue okanhymba 'rã oje'oivy penderovaigua kuery yvy re, peẽ ha'e peneramoõ kuery reko vaiague káuxa pekanhymba 'rã ha'e kuery rami avi.

<sup>40</sup> — Ha'e rami avi xapy'a rei ha'e kuery ojejavyague omombe'upa 'rã, ha'e tamoõ kuery xerovai ikuiaia rupi ojejavyague. Mba'eta tamoõ kuery voi xerovai ikuiaia onhemombe'upa raka'e,

<sup>41</sup> ha'e kuery rovai xee aiko vy hovaigua kuery yvy re amboaxapa rire. Ha'e gui xapy'a rei pende kuery regua voi inhakã ratã va'e teĩ onhemo'yvy'i'i vy ojejavyague repy pe "Ha'evea ramigua" he'i ramo,

<sup>42</sup> ha'e ramo xee xema'endu'a ju 'rã xereve guarã Jacó reve ajapo va'ekue, Isaque ha'e Abraão reve ma voi ajapo va'ekue re. Ha'e kuery yvy re avi xema'endu'a 'rã.

<sup>43</sup> Ha'e rami avi ijyvy jipoaveia ha'e kuery oeja va'ekue opytu'u 'rã sâbado ára py rami. Ha'e rami jave ha'e kuery ojejavyague re ambopagaa pe "Ha'evea ramigua" he'i 'rã, xee aipota va'e ha'e kuery nombovarei, ha'e ajapo uka va'ekue ojou vai rire.

**44** Ha'e rami rā hovaigua kuery yvy re ha'e kuery ikuai jave ndaxerexarai 'rā ha'e kuery gui, naenduvei 'rā guive ha'e kuery ndaipotavei vy amomba aguã, neĩ xereve guarã ha'e kuery reve ajapo va'ekue amboavaipa aguã, mba'eta xee ma SENHOR ha'e kuery Ruete.

**45** Ha'e rami 'rāgue py ha'e kuery amboaxy vy xema'endu'a ma voi 'rā tamoĩ kuery pe xereve guarã ajapo va'ekue re, mba'eta Egito yvy gui aipe'a va'ekue yvy regua kuery oexaa py, ha'e kuery Ruete aiko aguã. Xee ma SENHOR – he'i.

**46** Ha'e va'e ae SENHOR ojapo uka, oipota va'e ha'e lei Israel kuery pe oeja va'ekue hexeve ikuai aguã. Sinai yvyty áry ome'ẽ va'ekue Moisés po rupi.

## 27

### *Mba'emo ome'ẽa aguã re, ha'e hepyrã oikuua aguã re ijayvua*

<sup>1</sup> SENHOR aipoe'ive Moisés pe:

**2** — Ndeayvu Israel kuery pe, ha'e vy aipo're: Amongue onhemboayvu 'rā xevy guarã nhomboaxa aguã re. Ha'e rami rire omboaxa pyre SENHOR pegua ae 'rā oiko, tei ha'eve avi nhomboaxa ete 'rāgue py omboekovia aguã hepyrã reikuua va'e re.\*

**3** Petei ava vinte ma'etý va'e guive sessenta ma'etý va'e peve ri ramo ma hepyrã reikuua 'rā cinqüenta hatã'i va'e prata guigua, henda iky'a e'ŷ va'e py oiporua va'e rami.

**4** Ha'e rā kunha ri ramo ma trinta hatã'i va'e reikuua 'rā hepyrã.

**5** Ha'e rā amongue cinco ma'etý'i va'e guive vinte ma'etý va'e peve, ava ri ramo hepyrã reikuua 'rā vinte hatã'i va'e, ha'e rā kunha repyrã ramo dez 'rā reikuua.

**6** Ha'e rā petei jaxy'i va'e guive cinco ma'etý va'e peve, ava ri ramo hepyrã reikuua 'rā cinco hatã'i va'e prata guigua, ha'e rā kunha repyrã ma três ete'i 'rā.

**7** Ha'e rā avakue sessenta ma'etý va'e guive tujakueve peve ramo ma quinze hatã'i va'e reikuua 'rā hepyrã. Ha'e rā kunha ma dez 'rā hepyrã.

**8** Ha'e rami tei xapy'a rei nhomboaxa aguã re onhemboayvu va'e iporiaukue'i vy ndojoui 'rā joepyrã reikuua va'ekue. Ha'e rami vy ojexa uka 'rā sacerdote pe, ha'e va'e ju joepyrã oikuua aguã. Ha'e ramo hepyrã sacerdote oikuua 'rā ojoua'i rami vy.

**9** — Xapy'a rei penhemboayvu 'rā mymba SENHOR pe pemboaxa aguã re. Peme'ẽ va'ekue ma SENHOR pe iky'a e'ŷ va'e meme.

**10** Ha'e nungakue ndaperovai 'rā, neĩ iporã va'e napemboekoviai 'rā ivaikue va'e re, neĩ ivaikue va'e iporã va'e re. Xapy'a rei petei mymba amboae re pemboekovia ramo mokoïve 'rā opyta iky'a e'ŷ va'e.

**11** Xapy'a rei mymba ha'eve'ŷ va'e SENHOR pe ome'ẽ mbyrã va'ekue'ŷ regua ri Peru vy pexa uka 'rā sacerdote pe.

**12** Sacerdote ae oikuua 'rā iporã pa, tyrã ivaikue rei va'ea. Sacerdote oikuua rami ae 'rā hepy.

**13** Ha'e gui xapy'a rei pendejeupe guarã ju pejoguaxe vy hepyrã oikuua pyre áryve 'rā peme'ẽve, petei nhiruĩ repy oikuua nhavõ áry petei-tei ju 'rā peme'ẽve.

**14** — Ha'e gui amongue ngoo SENHOR pe omboaxa aguã re onhemboayvu 'rā iky'a e'ŷ va'erã. Ha'e ramo sacerdote oexa pota 'rā iporã paa, tyrã ivaikue rei va'ea. Sacerdote oikuua rami ae 'rā hepy.

**15** Ha'e rā SENHOR pe ngoo omboaxa va'ekue omboekovia jevyxe ri vy hepyrã oikuua pyre áryve 'rā ome'ẽve, petei nhiruĩ repy oikuua nhavõ áry petei-tei ju 'rā ome'ẽve. Ha'e ramo mae ma imba'e ju 'rā opyta.

### *Oyvy ome'ẽ aguã re oura rire ojogua jevy va'e regua*

**16** — Xapy'a rei amongue pe petei mba'ety oeja 'rā imba'erã, ha'e ramo onhemboayvu 'rā SENHOR peguarã ju omboaxa aguã re. Ha'e gui hepyrã reikuua 'rā mba'emo ra'yigue

\* **27:2** Samuel xy Ana onhemboayvu ipi'a oiko'i rire SENHOR peguarã omboaxa aguã re (1 Samuel 1.9-11). Ha'e gui apy aipoe'i ha'eve avi amongue nhomboaxa ete 'rāgue py peráta re omboekovia aguã.

ha'e va'e rupi onhotŷ aguã ha'eve va'e. Cevada ra'yŷgue mba'e peteĩ ryru renyẽ repyrã ma cinqüenta hatã'i va'e prata guigua 'rã reikuua.

**17** Xapy'a rei jubileu ma'etŷ py ri ombo'ety omboaxa aguã re onhemboayvu ramo hepyrã ha'e javi porã'i 'rã reikuua.

**18** Ha'e rami avi jubileu ma'etŷ oiko rire ri ombo'ety omboaxa ramo sacerdote hepyrã oikuaa 'rã jubileu ojeupity jevy peve mbovy ma'etŷ pa oataa rami vy. Ha'e va'e rami vy hepyrã reikuua vy neremboetaive 'rã.

**19** Xapy'a rei ombo'ety ome'ẽ rire ojogua jevyxe ri vy peráta ome'ẽve 'rã hepyrã reikuua va'ekue áryve, peteĩ nhiruĩ repy oikuaa nhavõ áry peteĩ-teĩ ju 'rã ome'ẽve. Ha'e vy mae imba'e ju 'rã itui.

**20** Xapy'a rei ombo'etykue ndojogua jevyxei, neĩ amboae ava pe novendexei rire ma nda'evei 'rã omboekovia ju aguã.

**21** Ha'e rami avi jubileu ma'etŷ py ri ha'e va'e mba'ety omboekoviaa ramo SENHOR pegua iky'a e'ŷ va'e 'rã itui, mba'ety ixupe omboaxa pyre rami ae. Sacerdote peguarã 'rã itui.

**22** — Xapy'a rei amongue ombo'etyrã ojogua va'ekue omboaxa 'rã SENHOR peguarã, imba'erã oeja pyre regua e'ŷ.

**23** Ha'e ramo hepyrã sacerdote oikuaa 'rã jubileu ma'etŷ ojeupity peve oataa rami vy. Ha'e va'e árave hepyrã oikuaa va'ekue ome'ẽ 'rã SENHOR pe iky'a e'ŷ va'e opyta aguã.

**24** Ha'e gui jubileu ojeupity jevy jave ha'e va'e mba'ety ivendeare mba'erã ju 'rã itui, imba'erã ae oeja rire.

**25** Peteĩ-teĩ mba'e repyrã reikuua 'rã hatã'i va'e henda iky'a e'ŷ va'e py oiporua va'e rami. Peteĩ-teĩ hatã'i va'e ma doze gramas va'e.

**26** — Ha'e rã jypy'igua mymba ra'y oiko va'e SENHOR peguarã ae ma oiko ramo nda'evei avave rei omboaxa jevy aguã. Jypy'igua vaka ra'y, e'ŷ vy mymba kyrĩ-kyrĩ'i va'e oiko teĩ SENHOR pegua ae meme.

**27** Ha'e rami avi mymba ha'eve'ŷ va'e regua ramo ma ha'eve 'rã omboekovia ju aguã, hepyrã reikuua va'ekue rami vy, ha'e hi'áryve ome'ẽve avi 'rã, peteĩ nhiruĩ repy reikuua nhavõ áry peteĩ-teĩ ju 'rã ome'ẽve. Xapy'a rei nomboekovia jevyi ri ramo ovendea 'rã hepyrã reikuua va'ekue re.

### *Mba'emo iky'a e'ŷ va'e ae omboekovia jevy e'ŷ aguã re ijayvua*

**28** — Ha'e rami avi SENHOR pe amongue omboaxa 'rã mba'emo oguereco va'e raka'e rã peve guarã, ava mba'e, e'ŷ vy mymba, ha'e'ŷ vy imba'etyrã oeja pyre teĩ. Ha'e nunga ma nda'evei pevende, neĩ pemboekovia ju aguã. Ha'e nunga ha'e javi SENHOR pe pemboaxa ae ma rire iky'a e'ŷ ete va'e opyta.

**29** Avakue va'e regua teĩ SENHOR peguarã omboaxaa ae ma rire nda'evei omboekovia ju aguã. Ojukaa 'rãe.

### *Dízimo re ijayvua*

**30** — Ha'e gui dízimo voi yvy gui mba'emo'a oiko va'ekue regua, mba'ety gui mba'emo ra'y ũ va'e regua, e'ŷ vy yvyra'a teĩ SENHOR mba'e meme, SENHOR pegua iky'a e'ŷ va'e.

**31** Xapy'a rei amongue dízimo ome'ẽ va'ekue regua ri omboekoviaxe vy ome'ẽve 'rã hepyrã va'ekue áryve, peteĩ nhiruĩ repy ovare nhavõ áry peteĩ-teĩ ju 'rã ome'ẽve.

**32** Ha'e rã dízimo vaka ra'y regua, mymba kyrigueve'i, ha'e mymba re opena va'e kuery oipapa vy yvyra guy rupi omboaxa va'e ha'e javi regua dízimo ome'ẽ ma rire ma SENHOR pegua iky'a e'ŷ va'e ae opyta.

**33** Ija ndoikuuaa potai 'rã iporã va'e pa, e'ŷ vy iporã e'ŷ va'ea re, neĩ nda'evei omboekovia aguã. Omboekovia ri ramo mokoïve 'rã opyta iky'a e'ŷ va'e. Nda'evei avi 'rã ojeupe guarã ju ojogua aguã — he'i.

**34** Kova'e ayvu ha'e javi Moisés pe SENHOR oeja va'ekue Israel kuery peguarã, Sinai yvyty áry.

## Números irundaya kuaxia Moisés ombopara va'ekue Números irundaya kuaxia Moisés ombopara va'ekue

Kova'e kuaxia ma Números 'epy va'e, mba'eta omombe'u mokoigue Moisés heta va'e kuery oipapaague. Jypy ma Egito yvy gui Israel kuery oëmba rire Sinai yvyty py ikuai jave py oipapa (capítulo 1). Ha'e gui amboae ma quarenta ma'etÿ rire Canaã yvy re oopa ta jave py ju oipapa (capítulo 26). Ha'e gui kova'e kuaxia para re oï quarenta ma'etÿ re Israel kuery teko a e'ÿa rupi ikuai jave guare.

Ha'e va'e jave ma Israel kuery nonhe'ẽ rendui jepi okuapy Nhanderuete, neñ hemimbo'e Moisés voi. Amongue py na'ikyre'ÿvei, okyje rei ha'e ijayvu rei okuapy Moisés ha'e Nhanderuete rovai. Ha'e rami teñ Nhanderuete omboaxyo rupi opena porã, ojejavyague operdoa kuerei guive. Moisés ma imbaraete oikovy va'eri ha'e voi peteigüe nonhe'ẽ rendu porãi, mba'eta Meribá teko a py ivai vy nomboetei Nhanderuete heta va'e kuery oendua py. "Ha'e ramo Senhor aipoe'i Moisés ha'e Arão pe: 'Peẽ kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ÿ va'ea. Ha'e nunga rupi peẽ ma naperovaëvei ma 'rã kova'e kuery ijyvyrã ame'ëague py', he'i" (20.12).

Ha'e gui ma Israel kuery rovaigua kuery ogueru peteñ ava Balão ha'e kuery re ijayvu vai aguã. Ha'e rami teñ Nhanderuete ojoko vy ojeupegua kuery rovai nomombe'u ukai ayvu vai. Ha'e rami 'rãgue py Balão aipoe'i: "Jacó kuery rovai rupi mba'evykya nda'eve ranhei 'rã, Israel kuery rovai mba'ekuaa ndovarei 'rã", he'i (23.23a). Ha'e ramia py Nhanderuete oepy kuerei 'rã ojeupegua kuery.

### *Moisés pe Israel kuery rery rupi Nhanderuete oipapa ukapaague*

<sup>1</sup> Egito yvy gui Israel kuery oje'oipa rire mokoñ ma'etÿa re, mokoñ jaxya, jypy araa py ma SENHOR ijayvu Moisés pe, Sinai yvyty katy'i teko a e'ÿa oï va'e py. Oguy nhemboaty oñaty oï va'e py aipoe'i:

<sup>2</sup> — Pemboparapa ke Israel kuery rery ha'e javi, peteñ-teñ ta'y va'e, ha'e tamoñ kuery ro pygua ikuiaia rami vy. Avakue ha'e javi 'rã peipapa peteñ-teñ rery rupi.

<sup>3</sup> Vinte ma'etÿ oguereco va'e guive 'rã peipapa tujakue peve, Israel regua joe opu'ã aguã ikuai kuaa va'e meme, ha'e va'e kuery ae ndee ha'e Arão reve peipapa 'rã xondaro kueryrã peteñ-teñ regua gui.

<sup>4</sup> Peteñ-teñ regua ikuai va'e gui oiko avi 'rã peteñ ava penepytyvõarã, nguu ro pygua kuery ruvixa ae.

<sup>5</sup> Po rami ma avakue penepytyvõa rery: Rúben ramymino kuery ruvixa ma Sedeur ra'y Elizur;

<sup>6</sup> Simeão ramymino kuery ruvixa ma Zurisadai ra'y Selumiel;

<sup>7</sup> Judá ramymino kuery ruvixa ma Aminadabe ra'y Naassom;

<sup>8</sup> Issacar ramymino kuery ruvixa ma Zuar ra'y Natanael;

<sup>9</sup> Zebulom ramymino kuery ruvixa ma Helom ra'y Eliabe;

<sup>10</sup> Ha'e gui José ra'y kuery ramymino kuery, Efraim ramymino kuery ruvixa ma Amiúde ra'y Elisama, ha'e rã Manassés ramymino kuery ruvixa ma Pedazur ra'y Gamaliel;

<sup>11</sup> Benjamim ramymino kuery ruvixa ma Gideoni ra'y Abidã;

<sup>12</sup> Dã ramymino kuery ruvixa ma Amisadai ra'y Aiezer;

<sup>13</sup> Aser ramymino kuery ruvixa ma Ocrã ra'y Pagiel;

<sup>14</sup> Gade ramymino kuery ruvixa ma Deuel ra'y Eliasafe;

<sup>15</sup> Naftali ramymino kuery ruvixa ma Enã ra'y Aira.

<sup>16</sup> Ha'e va'e kuery ma heta va'e kuery mbyte gui oiporavo pyre, tamoñ kuery ramymino kuery yvateve va'e, Israel kuery mbovy rei e'ÿ ikuai va'e ruvixarã.

- <sup>17</sup> Ha'e ramo ha'e va'e avakue hery rupi oiporavoa ramo Moisés ha'e Arão ogueraa.
- <sup>18</sup> Ha'e vy mokoï jaxyia jypy'ia ára py heta va'e kuery omboatypa ramo ha'e kuery omombe'u poräve okuapy peteï-teï regua ramoï kuery rery, tuu ha'e ta'y kuery. Hery rupi oipapa vinte ma'etý oguereko va'e guive tujakue peve.
- <sup>19</sup> Moisés pe SENHOR ojapo ukaague rami vy oipapapa Sinai yvyty katy'i tekoa e'ýa oĩ va'e py.\*
- <sup>20</sup> Israel ra'y jypykue Rúben ramymino kuery, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>21</sup> Ha'e vy Rúben ramymino kuery oipapa rã quarenta e seis mil e quinhentos ha'e javi vy.
- <sup>22</sup> Ha'e gui Simeão ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>23</sup> Ha'e vy Simeão ramymino kuery oipapa rã cinqüenta e nove mil e trezentos ha'e javi vy.
- <sup>24</sup> Ha'e gui ma Gade ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>25</sup> Ha'e vy Gade ramymino kuery oipapa rã quarenta e cinco mil seiscientos e cinqüenta ha'e javi vy.
- <sup>26</sup> Ha'e gui Judá ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>27</sup> Ha'e vy Judá ramymino kuery oipapa rã setenta e quatro mil e seiscentos ha'e javi vy.
- <sup>28</sup> Ha'e gui Issacar ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>29</sup> Ha'e vy Issacar ramymino kuery oipapa rã cinqüenta e quatro mil e quatrocentos ha'e javi vy.
- <sup>30</sup> Ha'e gui Zebulom ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>31</sup> Ha'e vy Zebulom ramymino kuery oipapa rã cinqüenta e sete mil e quatrocentos ha'e javi vy.
- <sup>32</sup> Ha'e gui José ra'y kuery ju, Efraim ramymino kuery ranhe, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>33</sup> Ha'e vy Efraim ramymino kuery oipapa rã quarenta mil e quinhentos ha'e javi vy.
- <sup>34</sup> Manassés ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>35</sup> Ha'e vy Manassés ramymino kuery oipapa rã trinta e dois mil e duzentos ha'e javi vy.
- <sup>36</sup> Ha'e gui Benjamim ramymino kuery ju, peteï-teï hoo pygua kuery ikuaria rami, tuu ha'e ta'y kuery, hery rupi meme oipapa. Peteï-teï ava vinte ma'etý oguereko va'e guive tujakue peve oipapa joe opu'ã kuaa va'e meme.
- <sup>37</sup> Ha'e vy Benjamim ramymino kuery oipapa rã trinta e cinco mil e quatrocentos ha'e javi vy.

\* <sup>1:19</sup> Sinai yvyty áry SENHOR lei oeja raka'e (Êxodo 19.1-6).

<sup>38</sup> Ha'e gui Dã ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

<sup>39</sup> Ha'e vy Dã ramymino kuery oipapa rã sessenta e dois mil e setecentos ha'e javi vy.

<sup>40</sup> Ha'e gui Aser ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

<sup>41</sup> Ha'e vy Aser ramymino kuery oipapa rã quarenta e um mil e quinhentos ha'e javi vy.

<sup>42</sup> Ha'e gui Naftali ramymino kuery ju, peteĩ-teĩ hoo pygua kuery ikuiaia rami, tuu ha'e ta'y kuery, hery rupi meme oipapa. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

<sup>43</sup> Ha'e vy Naftali ramymino kuery oipapa rã cinqüenta e três mil e quatrocentos ha'e javi vy.

<sup>44</sup> Ha'e va'e kuery ma Moisés ha'e Arão oipapa va'ekue. Israel kuery yvatekueve ikuai va'e ma doze avakue, peteĩ-teĩ tamõi kuery ro pygua kuery ruvixa oiko.

<sup>45</sup> Ha'e rami vy Israel kuery ha'e javi oipapaa peteĩ-teĩ hoo pygua kuery ikuiaia rami. Peteĩ-teĩ ava vinte ma'etõ oguereko va'e guive tujakue peve oipapa joe opu'ã kuaa va'e meme.

<sup>46</sup> Oipapa pyre ha'e javi vy ma seiscentos e três mil quinhentos e cinqüenta.

### *Levita kuery regua ndoipapaaigue*

<sup>47</sup> Ha'e rã levita kuery regua ma ndoipapaaai tuu kuery regua ikuiaia rami, amboae kuery oipapaa rami e'ý,

<sup>48</sup> mba'eta Moisés pe SENHOR ijayvu ma voi vy aipoe'i va'ekue:

<sup>49</sup> "Levita kuery regua anho 'rã nderepapai, ha'e kuery rery ma voi neremboparai 'rã Israel kuery rery mboae ikuiaia py.

<sup>50</sup> Ha'e rami 'rãgue py levita kuery ma remoõ 'rã ombojeroviaaty xeayvu oña va'e re opena va'erã, tembiporu ikuai va'e ha'e hexegua ha'e javi re. Ha'e kuery ikuai 'rã ombojeroviaaty oguerova heravy aguã rami, hexegua tembiporu ha'e javi reve. Ombojeroviaaty ropy rupi ae 'rã ha'e kuery opena okuapy, ha'e ijyvýry rupi 'rã ikuai.

<sup>51</sup> Ha'e gui ombojeroviaaty oguerova ta jave ma levita kuery ombovaipa 'rã. Ha'e gui tekao mbyte py ju omopu'ã aguã ma levita kuery ae ju 'rã omoatyrõ. Ha'e rã amboae regua hexe onhemboja vy omano 'rã.

<sup>52</sup> Ha'e gui Israel kuery ma peteĩ-teĩ ngoorã ojapo 'rã guekoa py ae, peteĩ-teĩ regua joa py ae 'rã ikuai, ojeupeguia bandeira yvýry rupi.

<sup>53</sup> Ha'e rã levita kuery ma ngoorã ojapo 'rã okuapy ombojeroviaaty xeayvu oña va'e yvýry rupi ae, Israel kuery áry ou e'ý aguã imbopagaarã. Ha'e rami vy levita kuery ae 'rã opena okuapy ombojeroviaaty xeayvu oña va'e re", he'i va'ekue.

<sup>54</sup> Ha'e ramo Israel kuery ojapo ha'e rami. Moisés pe SENHOR ojapo ukaague ha'e javi rupi ikuai.

## 2

### *Tekoa rupi peteĩ-teĩ regua ikuai aguã re ijayvuague*

<sup>1</sup> SENHOR aipoe'i Moisés ha'e Arão pe:

<sup>2</sup> — Israel kuery ikuai 'rã peteĩ-teĩ regua bandeira 'y yvýry rupi ae. Peteĩ-teĩ regua bandeira re ma tamõi kuery kuaa ukaarã oĩ. Oguy nhemboaty oñaty oĩ va'e yvýry rupi 'rã hekaoa, ha'e va'e katy peteĩ-teĩ regua oma'ẽ okuapy aguã rami.

<sup>3</sup> Kuaray oua katy ikuai 'rã Judá regua kuery ojeupeguia bandeira 'y yvýry, peteĩ-teĩ regua joa py ae. Judá ra'y kuery ruvixarã oĩ 'rã Aminadabe ra'y Naassom.

<sup>4</sup> Ha'e kuery va'e regua xondaro kuery oipapaa rã setenta e quatro mil seiscentos ha'e javi vy.

<sup>5</sup> Ha'e kuery yvýry ikuai 'rã Issacar regua kuery. Ha'e va'e kuery ruvixarã oĩ 'rã Zuar ra'y Natanael.

<sup>6</sup> Ha'e kuery va'e regua xondaro kuery oipapaa rã cinqüenta e quatro mil e quatrocientos ha'e javi vy.

<sup>7</sup> Ha'e gui Zebulom regua kuery jevy 'rã ikuai. Ha'e va'e kuery ruvixarã oĩ 'rã Helom ra'y Eliabe.

<sup>8</sup> Ha'e kuery va'e regua xondaro kuery oipapaa rã cinqüenta e sete mil e quatrocientos ha'e javi vy.

<sup>9</sup> Judá regua kuery rekao py oipapaa rã cento e oitenta e seis mil e quatrocientos ha'e javi vy, amboae regua irũ kuery reve. Ha'e kuery ma tenondegua 'rã oje'oi.

<sup>10</sup> Ha'e gui kuaray puku-a katy 'rã ikuai Rúben regua kuery ojeupequa bandeira 'y yvýry, peteĩ-teĩ regua joa py ae. Rúben ra'y kuery ruvixarã oĩ 'rã Sedeur ra'y Elizur.

<sup>11</sup> Ha'e kuery va'e regua xondaro kuery oipapaa rã quarenta e seis mil e quinhentos ha'e javi vy.

<sup>12</sup> Ha'e kuery yvýry ma ikuai 'rã Simeão regua kuery. Ha'e va'e kuery ruvixarã oĩ 'rã Zurisadai ra'y Selumiel.

<sup>13</sup> Ha'e kuery va'e regua xondaro kuery oipapaa rã cinqüenta e nove mil e trezentos ha'e javi vy.

<sup>14</sup> Ha'e gui ma Gade regua kuery jevy 'rã ikuai. Ha'e va'e kuery ruvixarã oĩ 'rã Deuel ra'y Eliasafe.

<sup>15</sup> Ha'e kuery va'e regua xondaro kuery oipapaa rã quarenta e cinco mil seiscentos e cinqüenta ha'e javi vy.

<sup>16</sup> Rúben regua kuery rekao py oipapaa rã cento e cinqüenta e um mil quatrocientos e cinqüenta ha'e javi vy, amboae regua irũ kuery reve. Ha'e kuery ma tenondegua rakykue 'rã oje'oi.

<sup>17</sup> Ha'e gui mae ma oguerovaa 'rã heravy oguy nhemboaty oĩaty. Levita kuery ikuai va'e amboae kuery mbyte py 'rã oje'oi. Ha'e kuery ikuiaia rami ae 'rã oje'oi oguataa rupi. Peteĩ-teĩ regua oje'oi 'rã ikuai aguã py ae, ojeupequa bandeira rakykue.

<sup>18</sup> Ha'e gui kuaray oikea katy ikuai 'rã Efraim regua kuery ojeupequa bandeira 'y yvýry, peteĩ-teĩ regua joa py ae. Efraim ra'y kuery ruvixarã oĩ 'rã Amiûde ra'y Elisama.

<sup>19</sup> Ha'e kuery va'e regua xondaro kuery oipapaa rã quarenta mil e quinhentos ha'e javi vy.

<sup>20</sup> Ha'e va'e kuery yvýry ikuai 'rã Manassés regua kuery. Ha'e va'e kuery ruvixarã oĩ 'rã Pedazur ra'y Gamaniel.

<sup>21</sup> Ha'e kuery va'e regua xondaro kuery oipapaa rã trinta e dois mil e duzentos ha'e javi vy.

<sup>22</sup> Ha'e gui ma Benjamim regua kuery jevy 'rã ikuai. Ha'e va'e kuery ruvixarã oĩ 'rã Gideoni ra'y Abidã.

<sup>23</sup> Ha'e kuery va'e regua xondaro kuery oipapaa rã trinta e cinco mil e quatrocientos ha'e javi vy.

<sup>24</sup> Efraim regua kuery rekao py oipapaa rã cento e oito mil e cem ha'e javi vy, amboae regua irũ kuery reve. Ha'e kuery ma mboapya py 'rã oje'oi.

<sup>25</sup> Ha'e gui kuaray apu'aa katy ikuai 'rã Dã regua kuery ojeupequa bandeira 'y yvýry, peteĩ-teĩ regua joa py ae. Dã ra'y kuery ruvixarã oĩ 'rã Amisadai ra'y Aiezer.

<sup>26</sup> Ha'e kuery va'e regua xondaro kuery oipapaa rã sessenta e dois mil e setecentos ha'e javi vy.

<sup>27</sup> Ha'e va'e kuery yvýry ikuai 'rã Aser regua kuery. Ha'e va'e kuery ruvixarã oĩ 'rã Ocrã ra'y Pagiel.

<sup>28</sup> Ha'e kuery va'e regua xondaro kuery oipapaa rã quarenta e um mil e quinhentos ha'e javi vy.

<sup>29</sup> Ha'e gui ma Naftali regua kuery jevy 'rā ikuai. Ha'e va'e kuery ruvixarā oī 'rā Enā ra'y Aira.

<sup>30</sup> Ha'e kuery va'e regua xondaro kuery oipapaa rā cinqüenta e três mil e quatrocentos ha'e javi vy.

<sup>31</sup> Dā regua kuery rekoa py oipapaa rā cento e cinqüenta e sete mil e seiscentos ha'e javi vy, amboae regua irū kuery reve. Ha'e kuery ma opa vygua 'rā oje'oi, peteī-teī regua ojeupegua bandeira rakykue.

<sup>32</sup> Ha'e va'e kuery ma Israel kuery regua oipapa pyre, tamoī kuery ikuai va'e-va'e rupi. Oipapa pyre ha'e javi vy ma seiscentos e três mil quinhentos e cinqüenta, peteī-teī regua joa py ikuiaia rami.

<sup>33</sup> Ha'e rā levita kuery ma ndoipapaai Israel kuery oipapaa py, Moisés pe SENHOR ijayvuague rami vy.

<sup>34</sup> Ha'e rami ae Israel kuery ikuai. Moisés pe SENHOR ijayvuague rami ae ikuai ojeupegua bandeira 'y yvýry rupi. Ha'e rami ae avi oguata oje'oivy, peteī-teī regua nguu ro pygua kuery reve.

### 3

#### *Levita kuery mbovy pa ikuai, ha'e hembiaporā re ijayvuague*

<sup>1</sup> Ha'e gui pova'e kuery ma Arão ha'e Moisés ra'y kuery ikuai, Sinai yvyty áry Moisés pe SENHOR ijayvu jave guare.

<sup>2</sup> Po rami ae Arão ra'y kuery rery: ta'y jypykue ma Nadabe, ha'e gui ma Abiú, Eleazar ha'e Itamar.

<sup>3</sup> Po rami Arão ra'y kuery rery, sacerdote-rā omoī mbyre meme ikuai, sacerdote-rā omboaxaa rire.

<sup>4</sup> Ha'e rami teī Nadabe ha'e Abiú omano raka'e SENHOR renonde py, Sinai regua tekaoa e'ŷa py SENHOR renonde tata ha'eve'ŷa ramigua ogueroike ramo. Ta'y e'ŷ re omano raka'e. Ha'e rā tyvy kuery Eleazar ha'e Itamar ju sacerdote ikuai nguu Arão renonde.

<sup>5</sup> SENHOR aipoe'i Moisés pe:

<sup>6</sup> — Emonhemboja ke Levi regua kuery sacerdote Arão renonde py ipytyvōarā.

<sup>7</sup> Ha'e kuery tojapo mba'emo ixupe, ha'e heta va'e kuery oguy nhemboaty oīaty renonde rupi ikuai va'e ha'e javi re vy, ombojeroviaaty ropy rupi ombo'eapoa py.

<sup>8</sup> Ha'e kuery opena 'rā tembiporu oguy nhemboaty oīaty pygua ha'e javi re. Ha'e vy 'rāe ojapopa ojapo 'rā va'ekue Israel kuery re vy, ombojeroviaaty rupi ombo'eapoa py.

<sup>9</sup> Ha'e nunga rupi levita kuery remboaxa 'rā Arão ha'e ta'y kuery peguarā. Israel kuery regua ixupe remboaxa va'erā ha'e kuery anho.

<sup>10</sup> Ha'e rā Arão ha'e ta'y kuery pe ndeayvu 'rā sacerdote rami anho ombo'eapo aguā re. Ha'e rā amboae regua ri onhemboja vy ma omano 'rā — he'i.

<sup>11</sup> SENHOR aipoe'i Moisés pe:

<sup>12</sup> — Ma'ě, levita kuery ma xee aipe'a va'ekue Israel kuery mbyte gui. Israel kuery jypy'i oiko'i va'e nhavō rekoria ma levita kuery aiporavo xejeupe guarā. Ha'e rami rire levita kuery xevygua meme 'rā ikuai.

<sup>13</sup> Mba'eta jypy'i oiko va'e nhavō ma xevygua ae. Egito yvy py jypy'i oiko va'ekue ajukapa ára guive ma Israel kuery va'e regua jypykue'i amboaxapa xejeupe guarā, avakue ha'e mymba kuery voi. Xevy guarā meme ikuai. Xee ma SENHOR — he'i.

<sup>14</sup> Ha'e gui Sinai regua tekaoa e'ŷa py SENHOR ijayvu Moisés pe. Ha'e vy aipoe'i:

<sup>15</sup> — Reipapa 'rā Levi ramymino kuery peteī-teī tamymino kuery rery rupi, tuu ha'e ta'y kuery reve. Avakue ha'e javi 'rā reipapa, peteī jaxy oguereko va'e guive tujapave peve — he'i.

<sup>16</sup> Ha'e ramo SENHOR ijayvuague rami vy Moisés oipapa levita kuery, ixupe oipapa ukaague rami ae.

17 Po rami ma Levi ra'y kuery rery: Gérson, Coate ha'e Merari.

18 Ha'e gui pova'e ma Gérson ra'y kuery rery, peteī-teī ta'y kuery reve: Libni ha'e Simei.

19 Ha'e gui Coate ra'y kuery, ta'y kuery reve ma Anrão, Izar, Hebrom ha'e Uziel.

20 Ha'e gui Merari ra'y kuery, ta'y kuery reve ma Mali ha'e Musi. Ha'e va'e kuery ae Levi ramymino kuery, guamoī kuery rery rupi.

21 Gérson ramymino kuery ma Libni ha'e Simei ra'y kuery, Gérson re tamoī va'e meme.

22 Ha'e kuery regua avakue peteī jaxy oguereko va'e guive tujapave peve ma hery rupi oipapaa rā sete mil e quinhentos ha'e javi vy.

23 Ha'e gui Gérson ramymino kuery ma ombojeroviaaty kupe rupi 'rā ngoorā ojapo, kuaray oikea katy.

24 Gérson ramymino kuery ruvixarā ma Lael ra'y Eliasafe ikuai 'rā.

25 Gérson ramymino kuery opena 'rā okuapy oguy nhemboaty oīaty re, ombojeroviaaty, oo ha'e ijao'ia re, ha'e oguy nhemboaty oīaty rokērā ajukue oī va'e re,

26 ajukue oka ombojeroviaaty ha'e altar yvýry rupi ikuai va'e re, oka rokērā ajukue oī va'e re, ha'e gui ixā ikuai va'e re. Ha'e nunga ha'e javi rupi ombo'eapo aguā rami ikuai.

27 Ha'e gui Coate ramymino kuery ma Anrão, Izar, Hebrom ha'e Uziel ra'y kuery. Ha'e va'e kuery ma Coate re tamoī va'e meme.

28 Ha'e kuery regua avakue peteī jaxy oguereko va'e guive tujapave peve ma oipapaa rā oito mil e seiscentos ha'e javi vy. Ha'e kuery ma henda iky'a e'ŷ va'e re opena aguā rami ikuai.

29 Ha'e gui Coate ramymino kuery ma ombojeroviaaty yke katy rupi 'rā ngoorā ojapo, kuaray puku-a katy.

30 Coate ramymino kuery ruvixarā oī 'rā Uziel ra'y Elisafā.

31 Ha'e kuery ma xeayvu ryru re opena aguā rami ikuai, mesa oī va'e, tataendy 'y, altar ha'e javi re, tembiporu henda iky'a e'ŷ va'e rupi oiporu va'ety ha'e ajukue okērā oī va'e re. Ha'e nunga ha'e javi re opena aguā rami ikuai.

32 Levi ramymino kuery ruvixa yvateve va'e ma sacerdote Arão ra'y Eleazar. Ha'e va'e ma opena 'rā henda iky'a e'ŷ va'e ropy rupi ombo'eapo va'e kuery re.

33 Ha'e gui Merari ramymino kuery ma Mali ha'e Musi ra'y kuery. Ha'e va'e kuery ae Merari re tamoī va'e meme.

34 Ha'e kuery regua avakue peteī jaxy oguereko va'e guive tujapave peve ma oipapaa rā seis mil e duzentos ha'e javi vy.

35 Ha'e gui Merari ramymino kuery ruvixarā oī 'rā Abiaiil ra'y Zuriel. Ha'e kuery ma ombojeroviaaty yke katy rupi 'rā ngoorā ojapo, kuaray apu'a'ia katy.

36 Merari ra'y kuery omoīague rami vy opena 'rā okuapy yvyra pe ombojeroviaaty regua ikuai va'e re, ha'e gui ijyta'i, ijyta, ijyta yvypy ha'e tembiporu ikuai va'e re. Ha'e va'e ha'e javi re opena aguā rami ikuai,

37 ha'e gui ijyvýry oka rupi ijyta ikuai va'e re, ijyta yvypy, yvyra rakua, ha'e ixā ikuai va'e ha'e javi re.

38 Ha'e gui ombojeroviaaty renonde kuaray oua katy Moisés ha'e Arão ojapo 'rā ngoorā gua'y kuery reve, oguy nhemboaty oīaty renonde kuaray oua katy ae. Ha'e va'e kuery ma henda iky'a e'ŷ va'e ropy rupi 'rā ombo'eapo, omoīague rami vy. Ombo'eapo 'rā Israel kuery re oma'ē vy. Ha'e rā amboae regua ri onhemboja vy omano 'rā.

39 Ha'e gui levita kuery regua avakue peteī jaxy oguereko va'e guive tujapave peve ma oipapaa rā vinte e dois mil ha'e javi vy. SENHOR ojapo ukaague rami vy Moisés ha'e Arão oipapa, ta'y kuery ha'e javi reve.

*Jypy oiko'i va'ekue rekovia ome'ẽ mbyrā re ijayvuague*

<sup>40</sup> SENHOR aipoe'i Moisés pe:

— Eipapa ta'y jypykue'i avakue Israel kuery regua. Peteī-teī hery rupi 'rā reipapa peteī jaxy oguereko va'e guive tujapave peve.

**41** Ha'e rami avi Israel kuery jypykue'i va'e rekoria xejeupe guarã amboaxa ma levita kuery. Xee ma SENHOR. Ha'e rami ae avi levita kuery rymba kuery xejeupe guarã amboaxa 'rã Israel kuery rymba kuery jypykue'i va'ekue rekoria – he'i.

**42** Ha'e ramo SENHOR ojapo ukaague rami vy Moisés oipapa jypykue'i Israel kuery regua ha'e javi.

**43** Ha'e kuery regua avakue jypykue'i va'e peteĩ jaxy oguereko va'e guive tujapave peve ma hery rupi oipapaa rã vinte e dois mil duzentos e setenta e três ha'e javi vy.

**44** Ha'e gui SENHOR aipoe'i Moisés pe:

**45** – Israel kuery regua ta'y jypykue'i rekoria emboaxa ke levita kuery xevy guarã, ha'e Israel kuery rymba kuery rekoria emboaxa avi levita kuery rymba ikuai va'e. Mba'eta levita kuery ma xevy guarã meme ikuai. Xee ma SENHOR.

**46** Ha'e gui ikuai avi duzentos e setenta e três jypykue Israel kuery regua, levita kuery gui hetave va'e. Ha'e va'e kuery remboekovia aguã ma

**47** peteĩ-teĩ repyrã rejopy 'rã cinco hatã'i va'e. Henda iky'a e'ý va'e py hatã'i va'e oiporua va'e regua ae 'rã reiporu, doze gramas va'e meme.

**48** Ha'e va'e peráta reme'ẽ 'rã Arão ha'e ta'y kuery pe, hetave va'e kuery repyrã – he'i.

**49** Ha'e va'e peráta ma Moisés ojopy levita kuery gui Israel kuery jypykue'i hetave ikuai va'e repyrã.

**50** Israel kuery jypykue'i gui ae ojopy, mil trezentos e sessenta e cinco hatã'i va'e ha'e javi vy, henda iky'a e'ý va'e py oiporua va'e rami.

**51** Ha'e va'e peráta SENHOR ome'ẽ ukaague rami vy Moisés ome'ẽ ha'e kuery repyrã. Arão ha'e ta'y kuery pe ome'ẽmba, Moisés pe SENHOR ojapo ukaague rami vy.

## 4

### *Coate ramymino kuery rembiaporã re ijayvuague*

**1** Ha'e gui SENHOR aipoe'i Moisés ha'e Arão pe:

**2** – Pemboparapa ke Levi ra'y Coate ramymino kuery rery, ta'y kuery ha'e tuu ro rupigua kuery ikuai va'e reve.

**3** Trinta ma'etý va'e guive cinqüenta ma'etý oguereko va'e peve ha'e va'e kuery ombo'eapo aguã rami ikuai 'rã, onhemboaty aty ropy rupi mba'emo ojapo aguã.

**4** Po rami ae 'rã Coate ra'y kuery ombo'eapo oguy nhemboaty oñaty rupi, mba'emo iky'a e'ý ete va'e re opena vy.

**5** Ha'e gui heta va'e kuery ikuai va'e ova ta ma ramo Arão gua'y kuery reve ou vy omboi 'rã ajukue okẽ regua xeayvu ryru oña mbotyarã omoõ mbyre, ha'e vy ha'e va'e py onhovã 'rã hyru.

**6** Ha'e va'e áry rupi ma omoõ 'rã mba'emo pirekue iporãve va'e, ha'e gui hi'áry jevy rupi omoõ 'rã peteĩ ajukue hovypa rei va'e. Ha'e gui mae ma joavaive rupi 'rã omoõ yvyra po'i oupi heravy aguã.

**7** Ha'e rami ae avi mesa mbojape xerenonde omoõ mbyre ikuaiaty áry voi omoõ 'rã peteĩ ajukue hovypa va'e. Ha'e va'e áry ju omoõ 'rã hy'a, heakuã porã va'e ryrurã, karo, ha'e gui mba'emo ryru kyrí'i va'e. Hi'áry ikuai tema avi 'rã mbojape xerenonde ikuai riae va'erã.

**8** Ha'e nunga ha'e javi áry rupi omoõ 'rã ajukue pytã porãve va'e, ha'e ojao'i 'rã mba'emo pirekue iporãve va'e py. Ha'e gui ma joavaive rupi omoõ avi 'rã yvyra po'i.

**9** Ha'e gui ma ajukue hovy va'e oupi vy ojao'i 'rã imoiny tataendy 'y hi'aõ va'e, tataendy ikuai va'e, tapyí pejua, imboguea, ha'e gui tykuerãazeite ryru ikuai va'e ha'e javi.

**10** Tataendy 'y, ha'e hexegua tembiporu ikuai va'e ha'e javi ojao'ipa 'rã mba'emo pirekue iporãve va'e py. Ha'e gui ma omoõmba 'rã yvyra po'i áry rupi.

**11** Ha'e gui ma altar ouro guigua áry rupi omoõ 'rã peteĩ ajukue hovy va'e, ha'e ojao'i 'rã mba'emo pirekue iporãve va'e py. Ha'e gui ma yvyra po'i jevy 'rã omoõ joavaive rupi.

<sup>12</sup> Ha'e gui ma oguerupa 'rã tembiporu henda iky'a e'ŷ va'e rupi oiporua va'e ha'e javi. Ha'e nunga voi onhovã 'rã ajukue hovy va'e py, ha'e ojao'i avi 'rã mba'emo pirekue iporâve va'e py. Ha'e gui omoimba 'rã yvyra po'i áry rupi.

<sup>13</sup> Ha'e gui altar ryepy gui oipe'a 'rã tanhimbu oĩ va'e, ha'e hi'áry ma omoi 'rã peteĩ ajukue pytã va'e.

<sup>14</sup> Ha'e va'e áry jevy omoimba 'rã altar rupi tembiporu oiporupy ha'e javi: tapyi ryru, kuxa rakua va'e, kuxa guaxu ha'e hy'a guaxu ikuai va'e, ha'e altar rupi tembiporu oiporupy ha'e javi. Ha'e gui hi'áry rupi ma omoi 'rã mba'emo pirekue iporâve va'e. Ha'e gui ma jovaive rupi omoi 'rã yvyra po'i.

<sup>15</sup> — Ha'e gui tekaoa gui oje'oipa ta ramo Arão ha'e ta'y kuery henda iky'a e'ŷ va'e ha'e hexegua mba'emo ikuai va'e ojao'ipa ma rire Coate ra'y kuery ju 'rã ou ogueraapa aguã. Ha'e rã mba'emo iky'a e'ŷ va'e re ma ha'e kuery ndopokoi 'rã, omano e'ŷ aguã. Mba'emo oguy nhemboaty oñaty regua anho 'rã ha'eve Coate ra'y kuery ogueraaa aguã.

<sup>16</sup> Ha'e gui sacerdote Arão ra'y Eleazar ma tataendy rykuerã azeite oĩ va'e re opena 'rã, ha'e gui heakuã porã va'e re, mba'emo aju guigua ome'ẽ jepi aguã, azeite SENHOR pe nhomboaxaa aguã regua re. Ha'e rami ae 'rã opena ombojeroviaaty re, ha'e gui ha'e py ikuai va'e ha'e javi re, henda iky'a e'ŷ va'e ropy rupi mba'emo ikuai va'e re guive — he'i.

<sup>17</sup> Ha'e ramo SENHOR aipoe'i Moisés ha'e Arão pe:

<sup>18</sup> — Peja eme Coate ramymino kuery ojapo aguã, levita kuery mbyte gui okanhymba aguã rami.

<sup>19</sup> Pova'e ae 'rã pejapo ha'e kuery okuave aguã, mba'eta mba'emo iky'a e'ŷ ete va'e ikuiaia katy onhemboja vy ha'e kuery omanomba 'rã. Arão ha'e ta'y kuery anho 'rã ha'e py oike, peteĩ-teĩ rembiaporã ome'ẽ aguã.

<sup>20</sup> Ha'e rã Coate kuery ma nei xapy'a'i voi nda'evei oike aguã ha'e py mba'emo iky'a e'ŷ va'e oexa aguã, ha'e kuery omano e'ŷ aguã.

### *Gérson ramymino kuery rembiaporã re ijayvuague*

<sup>21</sup> Ha'e gui SENHOR aipoe'ive ju Moisés pe:

<sup>22</sup> — Aŷ ma pemboparapa ke Gérson ramymino kuery rery, ta'y kuery ha'e tuu ro rupigua kuery ikuai va'e reve.

<sup>23</sup> Trinta ma'etý va'e guive cinqüenta ma'etý oguereko va'e peve ha'e va'e kuery ombo'eapo aguã rami ikuai 'rã, oguy nhemboaty oñaty roka rupi opena aguã.

<sup>24</sup> Gérson ramymino kuery rembiaporã ma mba'emo re opena ha'e ogueraaa aguã.

<sup>25</sup> Oguerovapa 'rã ajukue ombojeroviaaty ha'e oguy nhemboaty oñaty mbotyarã oipyo pyre, ha'e gui ijao'ia, hi'áry rupi mba'emo pirekue iporâve va'e py onhovã mbyre, okẽ reguarã ajukue omoi mbyre,

<sup>26</sup> ombojeroviaaty, altar yvýry rupi ajukue oka mbotyarã oupi pyre, oka rokẽrã ajukue omoi mbyre, ixã-ixã ha'e tembiporu ikuai va'e. Ha'e nunga ha'e javi re openaa rupi 'rã ha'e kuery ombo'eapo.

<sup>27</sup> Gérson ramymino kuery mba'emo ogueraaa e'ŷ vy ojapo aguã ha'e javi ma Arão ha'e ta'y kuery ojapo ucaa rami 'rã ojapo. Arão kuery ae 'rã oguerova uka mba'emo.

<sup>28</sup> Ha'e rami ae Gérson ra'y kuery ombo'eapo 'rã oguy nhemboaty oñaty rupi. Sacerdote Arão ra'y Itamar ijayvua rami anho 'rã ombo'eapo okuapy.

### *Merari ramymino kuery rembiaporã re ijayvuague*

<sup>29</sup> — Ha'e gui Merari ramymino kuery reipapa avi 'rã ta'y kuery ha'e tuu ro rupigua kuery ikuai va'e reve.

<sup>30</sup> Trinta ma'etý va'e guive cinqüenta ma'etý oguereko va'e peve ha'e va'e kuery ombo'eapo aguã rami 'rã ikuai, oguy nhemboaty oñaty rupi ombo'eapo aguã.

<sup>31</sup> Pova'e nunga ha'e kuery oguerova 'rã oguy nhemboaty oĩaty rupi ombo'eapo vy: yvyra peombojeroviaaty mbotyarã omoĩ mbyre, yvate rupi ikuai va'e, ijytarã omopu'ã mbyre, ijyta yvypy ikuai va'e,

<sup>32</sup> oka yvýry rupi ijytarã omopu'ã mbyre, ijyta yvypy, yvyra rakua, ixã-ixã, tembiporu ha'e opa mba'e ha'e rupi oiporupy ha'e javi. Mba'emo ha'e kuery oguerova va'erã rery remombe'upa 'rã.

<sup>33</sup> Ha'e rami ae 'rã Merari ramymino kuery ombo'eapo oguy nhemboaty oĩaty rupi, sacerdote Arão ra'y Itamar ijayvua rami anho.

### *Coate ra'y kuery oipapaa ague*

<sup>34</sup> Ha'e gui Moisés ha'e Arão heta va'e kuery yvatekueve reve oipapapa Coate ra'y kuery, ta'y kuery ha'e tuu ro rupigua kuery ikuai va'e reve.

<sup>35</sup> Trinta ma'etý va'e guive cinqüenta ma'etý oguereko va'e peve oipapa hembiaporã ome'ẽ aguã, oguy nhemboaty oĩaty rupi mba'emo ojapo aguã.

<sup>36</sup> Ha'e va'e kuery oipapa rã dois mil setecentos e cinqüenta ha'e javi vy, tuu ro rupigua kuery ikuiaia rami.

<sup>37</sup> Ha'e kuery ae Coate ramymino kuery oipapa pyre, oguy nhemboaty oĩaty rupi ombo'eapo va'erã meme. Moisés ha'e Arão ae oipapa, Moisés pe SENHOR ojapo ukaague rami vy.

### *Gérson ramymino kuery oipapaa ague*

<sup>38</sup> Ha'e gui Gérson ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

<sup>39</sup> trinta ma'etý va'e guive cinqüenta ma'etý oguereko va'e peve hembiaporã ome'ẽ aguã, oguy nhemboaty oĩaty rupi mba'emo ojapo aguã.

<sup>40</sup> Ha'e va'e kuery oipapa rã dois mil seiscentos e trinta ha'e javi vy, tuu ro rupigua kuery ikuiaia rami.

<sup>41</sup> Ha'e kuery ae Gérson ramymino kuery oipapa pyre, oguy nhemboaty oĩaty rupi ombo'eapo va'erã meme. Moisés ha'e Arão ae oipapa, Moisés pe SENHOR ojapo ukaague rami vy.

### *Merari ramymino kuery oipapaa ague*

<sup>42</sup> Ha'e gui Merari ramymino kuery ju oipapa avi, ta'y kuery ha'e tuu ro rupigua kuery ikuai va'e reve,

<sup>43</sup> trinta ma'etý va'e guive cinqüenta ma'etý oguereko va'e peve hembiaporã ome'ẽ aguã, oguy nhemboaty oĩaty rupi mba'emo ojapo aguã.

<sup>44</sup> Ha'e va'e kuery oipapa rã três mil e duzentos ha'e javi vy, tuu ro rupigua kuery ikuiaia rami.

<sup>45</sup> Ha'e kuery ae Merari ramymino kuery oipapa pyre. Moisés ha'e Arão ae oipapa, Moisés pe SENHOR ojapo ukaague rami vy.

### *Levita regua kuery anho'i mbovy pa ikuiaia re ijayvuague*

<sup>46</sup> Ha'e rami py Moisés ha'e Arão Israel kuery yvatekueve reve oipapa levita regua kuery, ta'y kuery ha'e tuu ro rupigua kuery ikuai va'e reve,

<sup>47</sup> trinta ma'etý va'e guive cinqüenta ma'etý oguereko va'e peve, hembiaporã ome'ẽ aguã, oguy nhemboaty oĩaty rupi mba'emo ojapo aguã.

<sup>48</sup> Ha'e va'e kuery oipapa rã oito mil quinhentos e oitenta ha'e javi vy.

<sup>49</sup> Moisés pe SENHOR ojapo ukaague rami vy peteĩ-teĩ omoĩ guembiaporã rupi ombo'eapo aguã. Ha'e rami aguã ae ha'e kuery oipapa, Moisés pe SENHOR ojapo ukaague rami vy.

<sup>2</sup> — Aipo're Israel kuery pe tekaoa mbyte gui mombyry'i oipe'apa aguã lepra revegua, ipeupa rei va'e, ha'e omanogue re opokoa py ha'eve'ŷ va'e ikuai va'ekue ha'e javi.

<sup>3</sup> Avakue ha'e kunhague voi peipe'a 'rã tekaoa gui mombyry'i, penderekaoa omongy'apa e'ŷ aguã, mba'eta mbyte rupi xee aiko — he'i.

<sup>4</sup> Ha'e ramo Israel kuery ha'e rami ae ojapo okuapy. Ha'e vy guekoa mbyte gui oipe'apa ha'e ramigua kuery. Moisés pe SENHOR ojapo ukaague rami vy Israel kuery ojapo okuapy.

### *Lei mba'emo rekovia ome'ëa regua oña*

<sup>5</sup> Ha'e gui SENHOR aipoe'ive ju Moisés pe:

<sup>6</sup> — Aipo're Israel kuery pe: Xapy'a rei ava e'ŷ vy kunha mba'e ojejavvy 'rã pavẽ ojejavvy py, ha'e vy otekoavy 'rã SENHOR pe. Ha'e rami vy ha'e va'e ojejavvy va'e oiko.

<sup>7</sup> Ha'e gui ma omombe'u 'rã ojejavvyague, ha'e ojejavvyague re mba'emo ome'ë 'rã otekoavyague rekovia. Ome'ëve 'rã guive, peteĩ nhiruĩ repy ovare nhavõ áry peteĩ-teĩ ju 'rã ome'ëve. Ha'e nunga ha'e javi ome'ë 'rã ojapo vaia va'ekue pe ae.

<sup>8</sup> Ha'e gui xapy'a rei ha'e va'e omano, ha'e hetarã ete'i nda'ipoi ramo otekoavyague rekovia ome'ëa rã ojopy va'erã, ha'e ramo SENHOR pe ae 'rã ome'ë opaga aguã va'ekue. Sacerdote pe togueru peteĩ vexa'i reve, ha'e va'e py ojejavvyague ojao'i uka aguã.

<sup>9</sup> Mba'emo sacerdote pe Israel kuery ogueru va'ekue ha'e javi ma sacerdote pegua ae opyta iky'a e'ŷ va'e.

<sup>10</sup> Peteĩ-teĩ gui mba'emo iky'a e'ŷ va'e ojopy va'ekue ma imba'e ae. Sacerdote pe ogueru pyre ma ixupe ae 'rã opyta.

### *Kunha otavypaague re oikuua pota aguã re ijayvuague*

<sup>11</sup> SENHOR aipoe'ive ju Moisés pe:

<sup>12</sup> — Ndeayvu ke Israel kuery pe, ha'e vy aipo're: Xapy'a rei amongue ra'yxy ome gui ojep'e'a vy oiko 'rã ome okorea rupi.

<sup>13</sup> Ava mboae reve itavy rei teĩ onhenhomí ramo ime ndoexai 'rã, ha'eve'ŷa rami oiko teĩ avave rei ndoexaai, neĩ itavy jave voi.

<sup>14</sup> Ha'e gui xapy'a rei ime opy'a re oendu hakâte'ŷ reia, gua'yxy re hakâte'ŷ 'rã kunha va'e itavy rire, ha'e'ŷ vy nda'itavyi teĩ hexe hakâte'ŷ vy ma

<sup>15</sup> ava va'e ogueru 'rã gua'yxy sacerdote-a py. Ogueru avi 'rã mba'emo gua'yxy ojejavvy regua ome'ë va'erã. Peteĩ ryru cevada ku'ikue ome'ë 'rã ha'e va'e re azeite omoĩ e'ŷ re, neĩ heakuã porã va'e ma voi nomoĩ 'rã hi'áry, mba'eta hakâte'ŷ reia regua mba'emo aju guigua ome'ëmby. Ha'e va'e ma mba'emokue re nhomoma'endu'a aguã regua ome'ë, teko vai kuaa ukaarã.

<sup>16</sup> — Ha'e ramo sacerdote kunha va'e omonhemboja vy ogueru 'rã imo'amy SENHOR renonde py.

<sup>17</sup> Ha'e vy sacerdote karo nhae'û guigua yy ky'a e'ŷ oña va'e oupi vy ojopy avi 'rã yvy ku'ikue ombojeroviaaty ropy rupi ikuai va'e regua. Ha'e va'e ma omoĩ 'rã yy py.

<sup>18</sup> Ha'e vy SENHOR renonde py kunha va'e oexa uka vy omboguejypa 'rã hi'a. Ha'e vy ipo py omoĩ 'rã mba'emo aju guigua imoma'endu'aarã ome'ë mbyre, takâte'ŷ regua. Ha'e rã yy iro va'e nhomoingo axyarã ma sacerdote po py ranhe 'rã opyta.

<sup>19</sup> Ha'e gui kunha va'e pe sacerdote oura uka vy aipoe'i 'rã ixupe: "Xapy'a rei ndereve avave rei nonhenoai, ha'e neme oipotaa rami e'ŷ vy ixugui nderejepe'ai ri vy ha'eve'ŷ va'e rejapo aguã, ha'e rami vy kova'e yy iro va'e ayvu vaipy nhomoingoarã gui rey'u teĩ mba'eve ndoikoi 'rã, reo jepe 'rã.

<sup>20</sup> Ha'e rami teĩ xapy'a rei neme openaa gui rejope'a vy ha'eve'ŷa rami reiko, ha'e ava neme e'ŷ ri ndereve onheno ramo ma —"

<sup>21</sup> (ha'e rami vy sacerdote oura uka 'rã kunha va'e pe oiko axy aguã rupi, ha'e vy ixupe aipoe'ive 'rã:) “— Ha'e rami ri ramo tove SENHOR tanemoingo ayvu vaipy ha'e ojou vaipy

heta va'e kuery mbyte. Tove SENHOR tandeapo nde'u ivaipa ha'e nderyepy rupi irurupa ovy aguã rami.

<sup>22</sup> Ha'e rami vy kova'e yy ayvu vaipy nhomoingoarã nderyepy rupi oike ramo ta'irurupa, ha'e ta'ivaipa nde'u", he'i 'rã. Ha'e ramo kunha va'e "Ha'eve va'e, ha'eve va'e!" he'i 'rã.

<sup>23</sup> — Ha'e gui ha'e va'e ayvu vai sacerdote omboparapa 'rã peteĩ kuaxia re, ha'e gui ipara omboje'opa ju 'rã yy iro va'e irûrã.

<sup>24</sup> Ha'e vy kunha va'e pe oy'u uka 'rã yy iro va'e ayvu vaipy nhomoingoarã. Ha'e va'e oy'u ramove ma hexe oĩ 'rã imoingo axyarã.

<sup>25</sup> Ha'e gui kunha va'e po gui sacerdote ju ojopy 'rã mba'emo aju guigua takâte'ŷ regua ome'ẽ mbyre, ha'e SENHOR renonde oupi vy ombovava 'rã. Ha'e gui ma altar hi'aña py ju 'rã ogueraa.

<sup>26</sup> Ha'e gui mba'emo aju guigua nhomoma'endu'aarã ome'ẽ mbyre peteĩ po ojopy vy oapy 'rã altar áry. Ha'e va'e rire yy ome'ẽ 'rã kunha va'e pe oy'u aguã.

<sup>27</sup> Ha'e gui ma ixupe yy oy'u uka ramo, xapy'a rei kunha va'e ojejavry ri vy ha'eve'ŷa rami ome okorea rupi oiko rire ma yy ayvu vaipy nhomoingoarã hexe oike vy omoingo axy 'rã. Ha'e ramo hyepy rupi irurupa 'rã, ha'e hi'u ivaipa 'rã. Ha'e ramo kunha va'e heta va'e kuery mbyte rupi oiko 'rã ayvu vaipy.

<sup>28</sup> Ha'e rami teĩ xapy'a rei kunha va'e mba'eve py ndojejavyi, ha'e hexe ha'eve'ŷ va'e noĩ ramo oo jepe 'rã, ha'eve ju 'rã kyrĩ va'e oguereko'i aguã.

<sup>29</sup> — Ha'e va'e lei ma takâte'ŷa regua, kunhague ome kuery openaa gui ojepe'a vy ha'eve'ŷa rami oiko ramo guarã,

<sup>30</sup> ha'e rami e'ŷ vy ava opy'a re hakâte'ŷa oendu ramo guarã. Ha'e rami vy gua'yxy ogueraa vy SENHOR renonde py oexa uka 'rã, ha'e hexe sacerdote ojapopa 'rã lei oĩ va'e ha'e javi rami vy.

<sup>31</sup> Ha'e gui ava va'e re ma teko vai noĩ, ha'e rã kunha va'e ojejavry rire hexe oĩ 'rã ojejavague re opaga aguã.

## 6

### *Lei nazireu rami oiko aguã regua oĩa*

<sup>1</sup> SENHOR aipoe'i Moisés pe:

<sup>2</sup> — Ndeayvu ke Israel kuery pe, ha'e vy aipo're: Peteĩ ava e'ŷ vy kunha teĩ ae ma onhemboayvu 'rã anhetẽ rupi nazireu rami oiko aguã re, SENHOR pe anho oiko aguã.\*

<sup>3</sup> Ha'e rami vy ha'e va'e ndoy'uvei ma 'rã vinho ha'e iro va'e regua. Neĩ ndoy'uvei 'rã vinagre vinho guigua, iro va'e guigua, uva rykue, ndo'ui 'rã uva oipo'o ramo'i pyre, neĩ ipirukue ma voi.

<sup>4</sup> Nazireu rami oiko teri reve ndo'uvei 'rã mba'emo uva'a gui ojapo pyre, ha'yigue neĩ ipirekue gui ma voi.

<sup>5</sup> Nazireu rami oiko aguã re onhemboayvuague rami oiko teri reve ma oakã rague ndojaya ukai 'rã mba'emo haimbe va'e py ma voi. SENHOR pe anho oiko aguã ára ojeupitypa e'ŷa ja ma oiko 'rã iky'a e'ŷ va'e. Ha'e vy onhembo'a vuku 'rã.

<sup>6</sup> — SENHOR pe onhemboaxa aguã pukukue re ma nonhembojavei 'rã te'ðgue ituia katy ma voi.

<sup>7</sup> Xapy'a rei tuu ae omano teĩ, e'ŷ vy ixy teĩ ae ma, e'ŷ vy tyvy, tyke'y, e'ŷ vy heindy omano teĩ ikáuxa rive nda'evei ha'eve'ŷ va'e oiko aguã. Mba'eta inhakã re oĩ 'rã Nguete pe anho oiko aguã kuaa ukaarã.

<sup>8</sup> Nazireu rami oikoa pukukue re ma SENHOR pe iky'a e'ŷ va'ea 'rã oexa uka.

---

\* <sup>6:2</sup> Nazireu ma Nhanderuete pe anho'i oiko aguã rami onhemboayvu va'ekue. Peteĩ semana e'ŷ vy peteĩ jaxy, e'ŷ vy cinco ma'etŷ peve guarã oiko 'rã ijayvuague rami ae. Ha'e va'e rire ma nazireu ve'ŷ 'rã oiko, Nhanderuete pe oiko riae teĩ amboae nunga re opena reve.

<sup>9</sup> — Ha'e gui ha'e oĩa py amongue omano xapy'a ramo nazireu rami onhemboaxaague  
gui ha'eve'ŷ va'e ju 'rã oiko, hi'a guive. Ha'e ramo ma sete araa py ojaya ukapa ju 'rã o'a,  
ojeky'a'o ucaa ára py ae.

<sup>10</sup> Ha'e gui oito araa py ma sacerdote pe ogueraa 'rã mokoĩ pyku'i'i e'ŷ vy mokoĩ  
apykaxu'i, oguy nhemboaty oĩaty rokẽ peve.

<sup>11</sup> Ha'e va'e regua peteĩ ma sacerdote omboaxa 'rã jejavya regua, ha'e rã amboae ma  
oapypa vy omboaxa 'rã. Ha'e rami vy ojao'i uka 'rã omanogue káuxa ojejavyague. Ha'e  
va'e árave omboaxa jevy 'rã o'a.

<sup>12</sup> Ha'e gui onhemboaxa ju 'rã SENHOR pe nazireu rami oiko aguã, ha'e vy mba'emo  
omboekovia aguã regua ome'ẽ va'erã ogueraa 'rã peteĩ vexa'i peteĩ ma'etŷ oguereko  
va'e. Ha'e gui nazireu rami oikoa oaxa va'ekue ma ndovarevei 'rã, ivaipa rive ramo.

<sup>13</sup> — Po rami ma nazireu pegua lei. Nazireu rami oiko aguã ára ojeupitypa ma ramo  
oguerua 'rã oguy nhemboaty oĩaty rokẽ peve.

<sup>14</sup> Ha'e ramo SENHOR pe ha'e ogueru 'rã vexa'i peteĩ ma'etŷ va'e ivaikue rei e'ŷ va'e, oapy  
vy ome'ẽ mbyrã. Ha'e gui jejavya regua ome'ẽ avi 'rã vexa'i kunha peteĩ ma'etŷ oguereko  
va'e, ivaikue rei e'ŷ va'e. Ha'e gui peteĩ rami ikuiaia regua ome'ẽ 'rã peteĩ vexa ava ivaikue  
rei e'ŷ va'e.

<sup>15</sup> Ome'ẽ avi 'rã peteĩ varai mbojape imbovua revegua e'ŷ, mbojape trigo iporãve va'e  
guigua azeite reve omoapomo mbyre, ha'e gui mbojape iperirí'i va'e azeite revegua.  
Mba'emo aju guigua voi ome'ẽ 'rã, mba'emo rykue guive.

<sup>16</sup> Ha'e nunga SENHOR renonde py sacerdote ogueru vy oexa uka 'rã jejavya regua  
ome'ẽmby ha'e oapypa revegua.

<sup>17</sup> Vexa'i ma SENHOR pe ome'ẽ 'rã peteĩ rami ikuiaia regua, varai py mbojape imbovua  
revegua e'ŷ reve. Sacerdote ome'ẽ avi 'rã mba'emo aju guigua ogueru pyre, mba'emo  
rykue guive.

<sup>18</sup> Ha'e gui nazireu rami oiko va'e ma oguy nhemboaty oĩaty rokẽ py hi'aĩa py onhopí  
ukapa 'rã oakã rague nazireu rami oikoague kuaa ucaa. Ha'e va'e ma ogueraa vy omoĩ  
'rã tata áry, peteĩ rami ikuiaia regua ome'ẽmby oĩ va'e yvýry.

<sup>19</sup> Ha'e va'e rire ma sacerdote ogueru 'rã vexa'i axi'y ro'okue mimoĩ, peteĩ mbojape  
imbovua revegua e'ŷ hyru gui, ha'e gui peteĩ mbojape perirí'i imbovua revegua e'ŷ. Ha'e  
nunga ma omoimba 'rã nazireu va'e po py, nazireu rami oiko aguã oakã onhopimba ma  
rire.

<sup>20</sup> Ha'e nunga sacerdote oupi 'rã SENHOR renonde py, oupi vy ombovava reve ome'ẽ  
mbyrã. Ha'e nunga ma iky'a e'ŷ va'e opyta sacerdote peguarã, mymba oupi vy ombo-  
vava reve ome'ẽmby pexokue ha'e hi'ugue ha'e rami ae avi. Ha'e va'e rire ma ha'eve ju  
'rã nazireu va'ekue vinho oy'u aguã.

<sup>21</sup> — Ha'e va'e lei ma nazireu rami oiko aguã re onhemboayvu va'ekue pegua. SENHOR  
pe mba'emo ome'ẽ 'rã nazireu ome'ẽ aguã va'e ae, mba'emo oguereko va'e rami ome'ẽ  
va'e áryve. Onhemboayvuague rami ae 'rã oiko, lei nazireu rami oiko aguã regua oĩ  
rami ae.

### *Sacerdote jogueroayvu porã aguã regua*

<sup>22</sup> SENHOR aipoe'i Moisés pe:

<sup>23</sup> — Ndeayvu ke Arão ha'e ta'y kuery pe, ha'e vy aipo're: Po rami 'rã peroayvu porã  
Israel kuery. Ha'e vy aipopeje 'rã:

<sup>24</sup> “ SENHOR tanemoingo porã  
ha'e topena porã ndere.

<sup>25</sup> SENHOR rova taexakã nde'áry rupi,  
tanemboaxy guive.

<sup>26</sup> SENHOR toma'ẽ riae ndere,  
ha'e tome'ẽ revy'a aguã.”

<sup>27</sup> Po rami 'rã peroayvu xerery Israel kuery áry rupi. Ha'e ramo xee amoingo porã 'rã – he'i.

## 7

*Altar SENHOR pegua iky'a e'ŷ va'erã omboaxaa py yvatekueve mba'emo ome'ẽ okuapyague*

<sup>1</sup> Ha'e gui Moisés ombojerovia atyrã ojapopaa ára py azeite omoĩ reve omboaxa SENHOR pegua iky'a e'ŷ va'erã, tembiporu ikuai va'e guive, altar ha'e hexegua tembiporu ikuai va'e ha'e javi reve.

<sup>2</sup> Ha'e ramo Israel kuery yvatekueve guetarã kuery rerekaoa ikuai va'e, peteĩ-teĩ regua ruvixa kuery guetarã kuery papaare ma mba'emo ome'ẽmba okuapy.

<sup>3</sup> Ha'e vy SENHOR renonde py ogueru okuapy ome'ẽ va'erã mboapy meme karóxa hoopa va'e ha'e doze toro. Yvatekueve mokõ-mokoĩ ome'ẽ peteĩ karóxa, ha'e rã peteĩ-teĩ ma ome'ẽ toro. Oguerupa okuapy ombojeroviaaty rexei.

<sup>4</sup> Ha'e gui SENHOR aipoe'i Moisés pe:

<sup>5</sup> — Ejopypa ke ha'e nunga ha'e kuery po gui, mba'eta oguy nhemboaty oĩaty rupi omba'eapo va'e kuery oiporu va'erã. Levita kuery pe ju 'rã remboaxapa, peteĩ-teĩ guembiaporã oguerekaoa rami – he'i.

<sup>6</sup> Ha'e ramo Moisés karóxa ha'e toro ojopypa vy omboaxapa levita kuery pe.

<sup>7</sup> Ha'e rami vy Gérson ramymino kuery pe ranhe omboaxa mokoĩ karóxa ha'e irundy toro, ha'e kuery guembiaporã oguerekaoa rami.

<sup>8</sup> Ha'e gui Merari ramymino kuery pe ma irundy karóxa ha'e oito toro omboaxa, ha'e kuery guembiaporã oguerekaoa rami. Ha'e kuery ma sacerdote Arão ra'y Itamar po py meme omba'eapo.

<sup>9</sup> Ha'e rã Coate ramymino kuery pe ma nome'ẽi mba'eve, mba'eta ha'e va'e kuery henda iky'a e'ŷ va'e rupi omba'eapo va'e vy ojaxei 'rã mba'emo.

<sup>10</sup> Ha'e gui altar re azeite omoĩ reve SENHOR peguarã omboaxa aguã yvatekueve ogueru okuapy mba'emo altar áry ome'ẽ va'erã. Altar rexei peteĩ-teĩ ogueru okuapy ome'ẽ va'e.

<sup>11</sup> Mba'eta SENHOR aipoe'i Moisés pe:

— Altar xevygua iky'a e'ŷ va'erã pemboaxa aguã ma huvixa kuery peteĩ-teĩ ogueru 'rã ome'ẽ va'erã, ára rexei ae 'rã oguerupa – he'iague rami vy.

<sup>12</sup> Ha'e ramo jypy'ia ára py mba'emo ome'ẽ va'erã ogueru va'ekue ma Aminadabe ra'y Naassom, Judá ramymino kuery ruvixa.

<sup>13</sup> Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoïve ma trigo iporâve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

<sup>14</sup> ha'e gui peteĩ hyru ouro guigua cento e vinte gramas ipoyi va'e, heakuã porã va'e tynyẽ reve;

<sup>15</sup> ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

<sup>16</sup> ha'e gui peteĩ kavara jejavya regua ome'ẽ va'erã;

<sup>17</sup> ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Aminadabe ra'y Naassom ome'ẽ va'ekue.

<sup>18</sup> Ha'e gui mokoĩ araa py mba'emo ome'ẽ va'erã ogueru va'ekue ma Zuar ra'y Natanael, Issacar ramymino kuery ruvixa.

<sup>19</sup> Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py

oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ẽ va'erā;  
 20 ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;  
 21 ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;  
 22 ha'e gui peteī kavara jejavya regua ome'ẽ va'erā;  
 23 ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Zuar ra'y Natanael ome'ẽ va'ekue.

24 Ha'e gui mboapy araa py ma ou Helom ra'y Eliabe, Zebulom ramymino kuery ruvixa.

25 Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ẽ va'erā;

26 ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

27 ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

28 ha'e gui peteī kavara jejavya regua ome'ẽ va'erā;

29 ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Helom ra'y Eliabe ome'ẽ va'ekue.

30 Ha'e gui irundy araa py ma ou Sedeur ra'y Elizur, Rúben ramymino kuery ruvixa.

31 Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ẽ va'erā;

32 ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

33 ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

34 ha'e gui peteī kavara jejavya regua ome'ẽ va'erā;

35 ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Sedeur ra'y Elizur ome'ẽ va'ekue.

36 Peteī nhiruī araa py ma ou Zurisadai ra'y Selumiel, Simeão ramymino kuery ruvixa.

37 Ha'e va'e ma ome'ẽ peteī hy'a prata guigua mil e quinhentos gramas ipoyi va'e, ha'e gui peteī hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoīve ma trigo iporāve va'e py omonyē reve ogueru, azeite reve omoapomo mbyre, mba'emo aju guigua ome'ẽ va'erā;

38 ha'e gui peteī hyru ouro guigua cento e vinte gramas ipoyi va'e, heakūa porā va'e tynyē reve;

39 ha'e peteī toro ra'y, peteī vexa ava ha'e peteī vexa'i ra'y peteī ma'etŷ va'e, oapy vy ome'ẽ va'erā meme;

40 ha'e gui peteī kavara jejavya regua ome'ẽ va'erā;

41 ha'e gui peteī rami ikuai aguã regua ome'ẽ va'erā ma mokoī toro, peteī nhiruī vexa ava, peteī nhiruī kavara ava ha'e peteī nhiruī vexa'i ra'y peteī ma'etŷ va'e meme. Ha'e va'e ha'e javi ma Zurisadai ra'y Selumiel ome'ẽ va'ekue.

<sup>42</sup> Ha'e gui mboapy meme araa py ma ou Deuel ra'y Eliasafe, Gade ramymino kuery ruvixa.

<sup>43</sup> Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

<sup>44</sup> ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

<sup>45</sup> ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

<sup>46</sup> ha'e gui peteĩ kavara jejavya regua ome'ẽ va'erã;

<sup>47</sup> ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Deuel ra'y Eliasafe ome'ẽ va'ekue.

<sup>48</sup> Ha'e gui sete araa py ma ou Amiúde ra'y Elisama, Efraim ramymino kuery ruvixa.

<sup>49</sup> Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

<sup>50</sup> ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

<sup>51</sup> ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

<sup>52</sup> ha'e gui peteĩ kavara jejavya regua ome'ẽ va'erã;

<sup>53</sup> ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Amiúde ra'y Elisama ome'ẽ va'ekue.

<sup>54</sup> Oito araa py ma ou Pedazur ra'y Gamaliel, Manassés ramymino kuery ruvixa.

<sup>55</sup> Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

<sup>56</sup> ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

<sup>57</sup> ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

<sup>58</sup> ha'e gui peteĩ kavara jejavya regua ome'ẽ va'erã;

<sup>59</sup> ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etŷ va'e meme. Ha'e va'e ha'e javi ma Pedazur ra'y Gamaliel ome'ẽ va'ekue.

<sup>60</sup> Ha'e gui nove araa py ma ou Gideoni ra'y Abidã, Benjamim ramymino kuery ruvixa.

<sup>61</sup> Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporãve va'e py omoneyẽ reve ogueru, azeite reve omoapomo mbyre, mba'emo aju guigua ome'ẽ va'erã;

<sup>62</sup> ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

<sup>63</sup> ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etŷ va'e, oapy vy ome'ẽ va'erã meme;

<sup>64</sup> ha'e gui peteĩ kavara jejavya regua ome'ẽ va'erã;

65 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etý va'e meme. Ha'e va'e ha'e javi ma Gideoni ra'y Abidã ome'ẽ va'ekue.

66 Ha'e gui dez araa py ma ou Amisadai ra'y Aiezer, Dã ramymino kuery ruvixa.

67 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporâve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

68 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

69 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etý va'e, oapy vy ome'ẽ va'erã meme;

70 ha'e gui peteĩ kavara jejavya regua ome'ẽ va'erã;

71 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etý va'e meme. Ha'e va'e ha'e javi ma Amisadai ra'y Aiezer ome'ẽ va'ekue.

72 Ha'e gui onze araa py ma ou Ocrã ra'y Pagiel, Aser ramymino kuery ruvixa.

73 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporâve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

74 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

75 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etý va'e, oapy vy ome'ẽ va'erã meme;

76 ha'e gui peteĩ kavara jejavya regua ome'ẽ va'erã;

77 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etý va'e meme. Ha'e va'e ha'e javi ma Ocrã ra'y Pagiel ome'ẽ va'ekue.

78 Ha'e gui doze araa py ma ou Enã ra'y Aira, Naftali ramymino kuery ruvixa.

79 Ha'e va'e ma ome'ẽ peteĩ hy'a prata guigua mil e quinhentos gramas ipoyi va'e, ha'e gui peteĩ hy'a guaxu prata guigua oitocentos gramas ipoyi va'e, henda iky'a e'ŷ va'e py oiporupy ramigua ae. Ha'e va'e mokoĩve ma trigo iporâve va'e py omonyẽ reve ogueru, azeite reve omoapomo mbyre, mba'emo aju guigua ome'ẽ va'erã;

80 ha'e gui peteĩ hyru ouro guigua cento e vinte gramas ipoyi va'e, heakũa porã va'e tynyẽ reve;

81 ha'e peteĩ toro ra'y, peteĩ vexa ava ha'e peteĩ vexa'i ra'y peteĩ ma'etý va'e, oapy vy ome'ẽ va'erã meme;

82 ha'e gui peteĩ kavara jejavya regua ome'ẽ va'erã;

83 ha'e gui peteĩ rami ikuai aguã regua ome'ẽ va'erã ma mokoĩ toro, peteĩ nhiruĩ vexa ava, peteĩ nhiruĩ kavara ava ha'e peteĩ nhiruĩ vexa'i ra'y peteĩ ma'etý va'e meme. Ha'e va'e ha'e javi ma Enã ra'y Aira ome'ẽ va'ekue.

84 Po rami ma Israel kuery yvatekueve ome'ẽ va'ekue altar áry azeite omoĩ reve SENHOR peguarã omboaxa aguã: doze hy'a prata guigua, doze hy'a guaxu prata guigua ha'e doze avi hyru ouro guigua.

85 Peteĩ-teĩ hy'a prata guigua va'e ma mil e quinhentos gramas ipoyi va'e meme, ha'e gui peteĩ-teĩ hy'a guaxu ma setenta ipoyi va'e. Ha'e va'e tembiporu re prata oĩ va'e ha'e javi vy ma vinte e oito quilos e oitocentos gramas, henda iky'a e'ŷ va'e py oiporupy rami ae.

86 Ha'e gui doze hyru ouro guigua heakuã porã va'e tynyẽ reve ma cento e vinte gramas ipoyi va'e meme, henda iky'a e'ŷ va'e py oiporupy ramigua ae. Ha'e nunga ha'e javi re ouro oĩ va'e ma um quilo e quatrocentos e quarenta gramas.

<sup>87</sup> Ha'e gui mymba kuery oapy vy ome'ẽ mbyre ma doze toro ra'y, doze vexa ava, doze avi vexa'i ra'y peteĩ ma'etŷ va'e, mba'emo aju guigua ome'ẽ mbyre reve, ha'e doze kavara ava avi ome'ẽ jejavya regua.

<sup>88</sup> Ha'e gui peteĩ rami ikuai aguã regua mymba ome'ẽ mbyre ha'e javi vy ma vinte e quatro toro ra'y, sessenta vexa ava, sessenta kavara ha'e sessenta avi vexa'i ra'y peteĩ ma'etŷ va'e meme. Ha'e va'e ma ome'ẽ okuapy altar áry azeite omoĩ vy SENHOR peguarã omboaxa aguã.

<sup>89</sup> Ha'e gui SENHOR reve Moisés ijayvu aguã oguy nhemboaty oĩaty py oike nhavõ oendu kuerei 'rã ixupe ijayvu va'e ayvu ryru mbotya teko vai ombogueaty áry gui. SENHOR ayvu ryru áry mokoĩ anjo ipopo va'e ra'angaa hi'aĩ va'e mbyte gui onhendu.\* Ha'e rami ae 'rã ijayvu ixupe.

## 8

### *Henda iky'a e'ŷ va'e py sete tataendy renda ikuai va'e re ijayvuague*

<sup>1</sup> SENHOR aipoe'i Moisés pe:

<sup>2</sup> — Ndeayvu ke Arão pe, ha'e vy aipo're: Sete tataendy hendarã py remoĩ vy reja 'rã imoiny hi'y kyvõ katy hexakã aguã rami – he'i.

<sup>3</sup> Ha'e ramo ha'ekue rami ae Arão ojapo. Ha'e rami vy tataendy omoĩ hi'y kyvõ katy meme hexakã aguã rami, Moisés pe SENHOR aipoe'iague rami vy.

<sup>4</sup> Tataendy 'y ma ouro ombota pyre gui ojapoa va'ekue, hi'yvypy guive yvate katy ipoty ikuia peve. Moisés pe SENHOR ta'angaa oexa ukaague rami ae ju ojapo tataendy 'yrã.

### *SENHOR pegua iky'a e'ŷ va'erã levita kuery omboaxaa ague*

<sup>5</sup> Ha'e gui SENHOR aipoe'ive ju Moisés pe:

<sup>6</sup> — Aŷ ma emono'õmba levita kuery Israel kuery mbyte gui, ha'e eiky'a'opa xevy guarã.

<sup>7</sup> Po rami 'rã rejapo iky'a e'ŷ va'e ikuai aguã: Ha'e kuery áry emboayvi yy jejavya ojao'ia aguã regua. Ha'e gui hete ha'e javi rupi renhopi uka 'rã kyxe py, ha'e rejoi ukapa 'rã iiao. Ha'e rami vy 'rã ha'e kuery iky'a e'ŷ va'e ikuai.

<sup>8</sup> Ha'e gui ha'e kuery ogueru 'rã peteĩ toro ra'y mba'emo aju guigua reve ome'ẽ va'erã, trigo iporãve va'e ha'e azeite reve omoapomo mbyre. Ha'e rã ndee ma amboae toro ra'y ju 'rã reru jejavya regua reme'ẽ va'erã.

<sup>9</sup> Ha'e gui rejapo 'rã oguy nhemboaty oĩaty rexei levita kuery onhembojapa aguã rami. Remboaty avi 'rã Israel kuery ha'e javi.

<sup>10</sup> Ha'e gui ma SENHOR renonde py levita kuery removaẽmba ramo ha'e kuery áry katy Israel kuery omoimba 'rã opo.

<sup>11</sup> Ha'e gui SENHOR pe Arão oexa uka 'rã levita kuery mba'emo oupi reve Israel kuery ome'ẽ va'e rami. Ha'e rami rã 'rã SENHOR pe ombo'epo aguã rami ikuai.

<sup>12</sup> Ha'e gui levita kuery ju opo omo'i'rã okuapy toro ra'y ikuai va'e akã áry. Ha'e va'e regua peteĩ ma rejuka 'rã jejavya regua ome'ẽ mbyrã, ha'e rã amboae ma SENHOR pe oapy vy ome'ẽ mbyrã, levita kuery ojejavague rejao'i uka aguã.

<sup>13</sup> Ha'e vy Arão ha'e ta'y kuery renonde py levita kuery removaẽ imo'amy vy rexâ uka 'rã SENHOR pe oupi reve ome'ẽmby rami.

<sup>14</sup> — Reipe'a 'rã levita kuery Israel kuery mbyte gui. Levita kuery ma xevy pegua ae 'rã ikuai.

<sup>15</sup> Ha'e va'e rire mae ma levita kuery oike 'rã oguy nhemboaty oĩaty rupi ombo'epo aguã. Ndee remboaxa 'rã iky'a e'ŷ va'erã, ha'e xevy rexâ uka 'rã oupi reve ome'ẽmby rami.

<sup>16</sup> Mba'eta ha'e kuery ae Israel kuery va'e regua ikuai va'erã xevy pegua. Israel kuery regua jypykue ta'y ikuai va'ekue ha'e javi rekovia ma xejeupe guarã meme aipe'a.

\* <sup>7:89</sup> Anjo ipopo va'e ra'angaa ma ayvu ryru mbotya áry guarã omoĩ mbyre (Êxodo 25.18-20).

<sup>17</sup> Mba'eta xevyguia meme ikuai Israel kuery regua jypykue ikuai va'ekue, avakue ha'e'ŷ vy mymba kuery regua teĩ. Egito yvy re ta'y ypy'iague ajukapa ára guive ha'e kuery aipe'a xejeupeguia iky'a e'ŷ va'erã.

<sup>18</sup> Ha'e nunga rupi xejeupe guarã levita kuery aipe'a Israel kuery jypykue ikuai va'e rekovia.

<sup>19</sup> Ha'e gui ma Arão ha'e ta'y kuery po py ju amboaxa levita kuery, Israel kuery mbyte gui. Amboaxapa oguy nhemboaty oĩaty rupi om̄ba'eapo okuapy aguã Israel kuery re ama'ẽ vy, ha'e kuery ojejavyague ojao'i uka aguã, ha'e rami vy Israel kuery mbyte rupi oiko e'ŷ aguã imoingo axyarã, mba'eta henda iky'a e'ŷ va'e py Israel kuery oike va'e rire oiko 'râgue ae – he'i.

<sup>20</sup> Ha'e ramo Moisés, Arão ha'e Israel kuery ha'e javi ma ha'e rami ae ojapo okuapy levita kuery re. Moisés pe SENHOR ijayvuague ha'e javi rami Israel kuery ojapo okuapy levita kuery omboaxa vy.

<sup>21</sup> Ha'e rami vy levita kuery iky'a e'ŷ va'e ikuai aguã ojoi okuapy oao. Ha'e gui Arão oexa ukapa SENHOR renonde py oupi reve ome'ẽmbi rami. Ojao'i uka guive ha'e kuery ojejavyague, iky'a e'ŷ va'e ikuai aguã.

<sup>22</sup> Ha'e va'e rire levita kuery ovaẽmba okuapy oguy nhemboaty oĩaty rupi om̄ba'eapo aguã, Arão ha'e ta'y kuery renonde rupi. Levita kuery rekora re Moisés pe SENHOR ijayvuague rami vy ae ojapo ha'e kuery re.

<sup>23</sup> Ha'e gui SENHOR aipoe'ive ju Moisés pe:

<sup>24</sup> — Pova'e lei ma levita kuery regua: Vinte e cinco ma'etŷ va'e guive tujakue peve 'rã ikuai oguy nhemboaty oĩaty rupi om̄ba'eapo aguã.

<sup>25</sup> Ha'e rã cinqüenta ma'etŷ va'e ma ha'e va'e rupi nda'ikuaivei 'rã, ha'ekue rami nomba'eapovei 'rã.

<sup>26</sup> Ha'e rami 'râgue py joegua kuery pytyvõa rupi 'rã ikuai oguy nhemboaty oĩaty rupi om̄ba'eapoa py, teĩ ha'e kuery ae nomba'eapovei 'rã. Ha'e rami ae 'rã remoĩ levita kuery guembiapora oĩ va'e ojapo aguã.

## 9

### *Páscoa ára pygua ngaru ojapo aguã re ijayvuague*

<sup>1</sup> SENHOR ijayvu Moisés pe Sinai regua tekoa e'ŷa rupi oiko teri reve. Egito yvy gui oje'oipa rire mokoĩ ma'etŷa ha'e jypy'ia jaxy re ijayvu vy aipoe'i:

<sup>2</sup> — Israel kuery tojapo okuapy ngaru Páscoa regua hi'ára py porã.

<sup>3</sup> Kova'e jaxy re catorze araa py, ka'aru ma ovya py ma pejapo 'rã ngaru hi'ára py. Lei ha'e ojapo uka pyre ha'e javi rami vy 'rã pejapo ngaru – he'i.

<sup>4</sup> Ha'e ramo Moisés aipoe'i Israel kuery pe ngaru ojapo aguã Páscoa ára py.

<sup>5</sup> Ha'e rami vy ngaru ojapo okuapy, peteĩjaxya re, catorze araa py ae. Ka'aru ma ovya jave ojapo Sinai regua tekoa e'ŷa py. Moisés pe SENHOR ojapo ukaague rami vy Israel kuery ojapopa okuapy.

<sup>6</sup> Ha'e va'e ára ma amongue ikuai avi ha'eve'ŷ va'e peteĩ omanogue re opokoague káuxa. Ha'e nunga rupi nda'evei ngaru oĩa py ikuai aguã. Ha'e rami vy Moisés ha'e Arão renonde py ha'e kuery ovaẽ vy

<sup>7</sup> aipoe'i okuapy:

— Ore ma ha'eve'ŷ va'e roiko peteĩ ava omano va'ekue re ropoko rire. Nda'evei 'rã ri nda'u SENHOR pe ore voi mba'emo rome'ẽ aguã Israel kuery reve Páscoa ára py?

<sup>8</sup> Moisés ombovai:

— Pearõ ranhe, ha'e xee ajapyxaka 'rã ainy mba'exa pa peẽ kuery re SENHOR ojapo uka rã aendu aguã – he'i.

<sup>9</sup> Ha'e gui ma SENHOR aipoe'i Moisés pe:

**10** — Ndeayvu ke Israel kuery pe, ha'e vy aipo're: Xapy'a rei amongue pende kuery va'e regua, e'ŷ vy raka'eve rã peneramymimo kuery ikuai va'erã regua ikuai 'rã ha'eve'ŷ va'e omano va'ekue káuxa. Ha'e rami e'ŷ vy penderekaoa gui mombyry oguata teĩ ha'eve nho 'rã Páscoa regua ngaru ojapo aguã SENHOR pe.

**11** Ha'e rami vy ha'e kuery mokoĩ jaxy a py 'rã ngaru ojapo, catorze araa va'e ka'aru ma javé. Ho'u 'rã okuapy mbojape imbovua revegua e'ŷ, jai rogue iro va'e reve.\*

**12** Pemoembyre eme neĩ kyrĩ'i ma voi ko'ẽ rã guarã, pemopẽ eme guive ikãgue'i. Páscoa pygua ngaru regua re ipara oĩ rami 'rã pejapo.

**13** Ha'e rami avi xapy'a rei peteĩ ava ngarua pyguarã ha'eve va'e oiko, ha'e tape rupi ndoguatai va'eri Páscoa ára ngaru py ndooi ri ramo ha'e va'e oipe'aa 'rã heta va'e kuery mbyte gui, mba'eta ha'e va'e ára py mba'eve ndoguerui SENHOR pe ome'ẽ va'erã. Ha'e va'e ava re oĩ ae 'rã ojejavvyague re opaga aguã.

**14** Ha'e gui penembyte amboae regua ikuai va'e Páscoa ára SENHOR pegua ngarua py ikuai avi ri vy lei ipara oĩ rami vy ae 'rã ikuai. Peteĩ'i lei oĩ pendevy ha'e amboae kuery pe joo rami.

#### *Êxodo 40.34-38*

**15** Ha'e gui ombojerovia atyrã ojapoaa ára py arai ou va'e ojao'ipa. Ha'e va'e oo ma SENHOR ayvu oĩaty ae. Ha'e rã ka'aru guive ko'ẽmba peve ma tata rami ju 'rã ojekuaa ombojeroviaaty áry rupi.

**16** Ha'e rami ae tema oiko. Arai ojao'i kuerei 'rã, ha'e rã pyávy ma tata rami ju 'rã ojekuaa.

**17** Oo áry gui arai ojeupi ov y nhavõ Israel kuery oguata 'rã oje'oivy. Ha'e gui arai opyta oinya py ae ju 'rã Israel kuery opyta avi okuapy.

**18** SENHOR oikuaa ucaa rami vy Israel kuery oje'oi 'rã, ha'e gui SENHOR oikuaa ucaa rami vy ae ju 'rã opyta okuapy. Ombojeroviaaty áry rupi arai opyta oinya ja ma ikuai tema 'rã ha'e py.

**19** Heta ára re ri ombojeroviaaty áry rupi arai opyta teĩ Israel kuery SENHOR ojapo ucaa rami ikuai vy ndooi 'rã okuapy.

**20** Amongue py are'ŷ'i re arai opyta 'rã oiny ombojeroviaaty áry rupi. Ha'e ramo SENHOR oikuaa ucaa rami vy ikuaive tema 'rã ha'e py, ha'e gui SENHOR oikuaa ucaa rami vy jevy 'rã oguata oje'oivy.

**21** Amongue py ma ka'aru'i ramove ko'ẽmba peve'i 'rã arai opyta oiny. Ha'e gui ko'ẽ rã arai ojeupi ov y ramo ma ha'e kuery oguata 'rã oje'oivy. Ara py e'ŷ vy pyávy teĩ arai ojeupi ramo oguata 'rã oje'oivy.

**22** Xapy'a rei ombojeroviaaty áry rupi arai oĩ tema 'rã mokoĩ ára re, e'ŷ vy peteĩ jaxy re mba'e, e'ŷ vy areve mba'e teĩ hi'áry rupi arai oĩ teria ja Israel kuery ikuai tema 'rã ha'e py, ndoguatai. Ojeupi ov y ramo mae ma oguata ju 'rã oje'oivy.

**23** Ha'e rami py SENHOR oikuaa ucaa rami vy opyta 'rã, ha'e gui SENHOR oikuaa ucaa rami vy ae ju 'rã oguata oje'oivy. SENHOR pe ojapo okuapy ojapo 'rã va'ekue, Moisés rupi SENHOR ojapo ucaa rami vy.

## 10

#### *Mokoĩ mimby guaxu prata guigua re ijayvuague*

**1** Ha'e gui SENHOR aipoe'ive ju Moisés pe:

**2** — Ejapo uka mokoĩ mimby guaxu prata guigua. Pembota-mbota vy 'rã pejapo. Ha'e va'e pemonhe'ẽ 'rã heta va'e kuery pemboaty aguã, ha'e ikuiai gui oguata oje'oivy aguã guive.

**3** Pemonhe'ẽ ramo heta va'e kuery onhemboaty 'rã okuapy ndea py, oguy nhemboaty oĩaty rokẽ rexei'i rupi ae.

\* **9:11** Ha'e kuery pe ma Nhanderuete ngaru ojapo uka amboae jaxy py, hi'ára pyguarã ndoiko katui rire.

<sup>4</sup> Peteĩ'i mimby guaxu pemonhe'ẽ ramo ndea py onhemboja 'rã yvatekueve anho, Israel kuery mbovy rei e'ŷ regua ruvixa ikuai va'e ae.

<sup>5</sup> Ha'e gui mokoïve ri pemonhe'ẽ ramo ma oje'oi 'rã kuaray oua katy ikuai va'ekue ranhe.

<sup>6</sup> Pemonhe'ẽ jevy ramo oje'oi 'rã kuaray puku-a katy ikuai va'ekue. Pemonhe'ẽ va'e ha'e kuery oendu vy oikuaa 'rã oje'oi aguã.

<sup>7</sup> Ha'e rã ha'e kuery pemboaty jevy aguã ma pemonhe'ẽ avi 'rã teĩ hatã e'ŷ ta'vy.

<sup>8</sup> Arão ramymino kuery sacerdote ikuai va'e ae 'rã omonhe'ẽ mimby guaxu. Pende kuery rekorã aeja raka'e rã peve guarã.

<sup>9</sup> Ha'e gui pendeyvy re ae pendekuai jave penderovaigua kuery reve pepu'ã aguã katy peje'oi ramo penemoi vai okuapy ramo pemonhe'ẽ avi 'rã mimby guaxu. Ha'e ramo xee SENHOR Penderuete aña py peẽ kuery re ama'ẽ ramo peo jepe 'rã penderovaigua kuery gui.

<sup>10</sup> Ha'e rami ae avi pevy'a aguã ára py, xevy ngaru pejapoa py mba'e, ha'e jaxy jypy'ia py guive pemonhe'ẽ avi 'rã mimby guaxu. Ha'e va'e jave py mba'emo peapypa vy peme'ẽ, ha'e peteĩ rami pendekuaia regua peme'ẽ va'e áry rupi pemonhe'ẽ ramo xee Penderuete aña py ama'ẽ 'rã pendere. Xee ma SENHOR Penderuete aiko.

### *Sinai gui Israel kuery oje'opiaague*

<sup>11</sup> Ha'e gui ma mokoï ma'etŷa py, mokoï jaxya re vinte ára ma jave arai ojeupi ovy oguy nhemboaty oïaty áry rupi oïague gui.

<sup>12</sup> Ha'e ramo Israel kuery Sinai regua tekao e'ŷa py ikuiai gui oguata oje'oivy. Oguata-guata oje'oivy Parã regua tekao e'ŷa py ju arai opyta peve.

<sup>13</sup> Ha'e rami vy oguata ypy'i oje'oivy, SENHOR Moisés pe ojapo ucaa rami vy.

<sup>14</sup> Jypyra ete ma Judá ramymino kuery pegua bandeira reraa ranhe oje'oi ngupivegua kuery reve. Ha'e va'e regua xondaro kuery ruvixa ma Aminadabe ra'y Naassom.

<sup>15</sup> Ha'e gui Issacar ramymino kuery regua xondaro kuery ruvixa ma Zuar ra'y Natanael.

<sup>16</sup> Zebulom ramymino kuery xondaro kuery regua ruvixa ma Helom ra'y Eliabe.

<sup>17</sup> Ha'e gui ma ombovaipa okuapy ombojeroviaaty, ha'e Gérson ha'e Merari ramymino kuery oje'oi vy ogueraapa henoiny.

<sup>18</sup> Ha'e va'e rire ma Rúben kuery pegua bandeira reraa ju oje'oi ngupivegua kuery reve. Ha'e kuery va'e regua xondaro kuery ruvixa ma Sedeur ra'y Elizur.

<sup>19</sup> Ha'e gui Simeão ramymino kuery regua xondaro kuery ruvixa ma Zurisadai ra'y Selumiel.

<sup>20</sup> Gade ramymino kuery regua xondaro kuery ruvixa ma Deuel ra'y Eliasafe.

<sup>21</sup> Ha'e gui ma oje'opia ju Coate regua kuery mba'emo iky'a e'ŷ va'e ogueraa reve. Ha'e gui ha'e kuery ovaẽ e'ŷ mbove ma voi omopu'ãmbaa ju 'rã imoiny ombojeroviaaty.

<sup>22</sup> Ha'e va'e rire ma Efraim ramymino kuery pegua bandeira reraa ju oje'oi ngupivegua kuery reve. Ha'e kuery regua xondaro kuery ruvixa ma Amiúde ra'y Elisama.

<sup>23</sup> Ha'e gui Manassés ramymino kuery regua xondaro kuery ruvixa ma Pedazur ra'y Gamaliel.

<sup>24</sup> Benjamim ramymino kuery regua xondaro kuery ruvixa ma Gideoni ra'y Abidã.

<sup>25</sup> Ha'e gui ma Dã ramymino kuery pegua bandeira reraa ju oje'oi ngupivegua kuery reve. Ha'e va'e kuery ma heta va'e kuery ha'e javi rakykue oje'oi oarõa rupi. Ha'e kuery va'e regua xondaro kuery ruvixa ma Amisadai ra'y Aiezer.

<sup>26</sup> Ha'e gui Aser ramymino kuery regua xondaro kuery ruvixa ma Ocrã ra'y Pagiel.

<sup>27</sup> Naftali ramymino kuery regua xondaro kuery ruvixa ma Enã ra'y Aira.

<sup>28</sup> Ha'e rami ae oguata oje'oivy Israel kuery meme, oxondaro kuery reve.

### *Hobabe pe ha'e kuery reve oo aguã re Moisés ojerureague*

<sup>29</sup> Ha'e gui Moisés ijayvu Hobabe pe. Ha'e va'e ma hatyu Midiã pygua Reuel ra'y. Ha'e vy aipoe'i:

— Roguata roje'oivy peteñ henda orevy SENHOR “Ame'ẽ 'rã pêvy” he'iague katy. Eju orerupive, ha'e ramo rojapo porã 'rã ndevy. Mba'eta Israel kuery pe mba'emo porã ome'ẽ aguã re SENHOR ijayvu.

<sup>30</sup> Ha'e ombovai:

— Xee ma ndaa reguai. Xeyvy xeretarã kuery rekaoa py ae 'rã aa — he'i.

<sup>31</sup> Ha'e gui ixupe Moisés aipoe'ive ju:

— Ne'ixa, orereja eme ke, mba'eta ndee ma reikuua tekaoa e'ŷa rupi orekuai ranhe 'rãa. Ha'e gui ndee ma orererekooarã 'rã reiko.

<sup>32</sup> Xapy'a rei ore kuery reve reo ri ramo ndevy pe rojapo porã 'rã SENHOR ore kuery pe ojapoa rami ae — he'i.\*

<sup>33</sup> Ha'e gui ma oje'oipa ma SENHOR pegua yvyty katy'i ikuaiague gui. Mboapy araa re oguata oje'oivy. Ha'e kuery renonde rupi SENHOR guexeve guarã ojapo va'ekue ryru reraa kuery oguata oje'oivy mboapy ára re, ha'e kuery optyu'u aguã ojou aguã.

<sup>34</sup> Ha'e gui ára py arai SENHOR ombou va'ekue oo tema ha'e kuery áry rupi, ikuiaia gui oje'oi jave voi.

<sup>35</sup> Ha'e gui Nhanderuete ayvu ryru oupia heravy nhavõ Moisés aipoe'i 'rã:

— SENHOR, epu'ã ke nderovaigua kuery remoaïmba aguã. Tove nerendonee gui tonhamba ndere nda'ija'ei va'e.

<sup>36</sup> Ha'e gui optyta ju nhavõ aipoe'i 'rã:

— SENHOR, ejevy ju ke mbovy rei e'ŷ Israel kuery ikuiaia py.

## 11

### *Israel kuery ijayvu ete okuapyague*

<sup>1</sup> Ha'e gui ma SENHOR oendua py teñ ha'e kuery ijayvu ete okuapy mba'emo oiko va'e re. SENHOR oendu ramo ipoxya hendy. Ha'e rami vy ha'e kuery mbyte tata SENHOR guigua ou vy omomba hekoia apy rupi ikuai va'e.

<sup>2</sup> Ha'e ramo Moisés pe ha'e kuery ojerure okuapy ramo SENHOR pe ha'e ju onhembo'e. Ha'e ramo tata oguepa.

<sup>3</sup> Ha'e nunga rupi ha'e va'e tekaoa ma oenoñ Taberá, ha'e kuery mbyte tata SENHOR guigua hendy ma rire.\*

<sup>4</sup> Ha'e gui ha'e kuery mbyte opa marã ikuai va'e oendu okuapy Egito pygua kuery rembi'u regua ho'uxe reia. Ha'e ramo Israel kuery voi ojae'opa reve aipoe'i okuapy:

— Mava'e 'rã tu ome'ẽ xo'o ja'u va'erã?

<sup>5</sup> Aŷ ma nhanema'endu'a jakuapy Egito yvy re pira ja'u rive jakuapyague re, ha'e pepino, melão, alho ka'aguy regua, cebola ha'e alho re guive.

<sup>6</sup> Ha'e rami teñ aŷ ma nhanenhe'ẽ voi ipirupa ma 'rã, mba'eta amboae ramigua ma voi ndajajouvei, kova'e maná e'ŷ vy — he'i okuapy.

<sup>7</sup> Maná ma coentro ra'yigue ramigua, jaexa rã yvyra ayxy ramigua rei.

<sup>8</sup> Heta va'e kuery opa rupi oeka oje'oivy vy omono'õ vy omongu'i 'rã mba'emo mongu'ia py, ha'e'ŷ vy angu'a py ojoxo 'rã. Ha'e rami vy omomimo'i 'rã oja py, e'ŷ vy iku'ikue gui ojapo 'rã mbojape. Ja'u rã mbojape azeite reve ojapo pyre rami hee va'e.

<sup>9</sup> Pyávy ha'e kuery rekaoa rupi yxapy ho'a reve maná ho'a avi 'rã oiny ha'e rupi.

### *Moisés ojapo 'rã va'ekue ipoyi etea rupi ijayvuague*

<sup>10</sup> Heta va'e kuery ojae'o rã Moisés oendu, mba'eta peteñ-teñ gua'y kuery reve ngoo rokẽ py ojae'o okuapy. Ha'e ramo SENHOR poxya hendy. Moisés voi oexa vy ndojou porãi.

<sup>11</sup> Ha'e ramo Moisés aipoe'i SENHOR pe:

---

\* <sup>10:32</sup> Moisés ngupive ogueraaxe ngovaja Hobabe. Ha'e va'e ma ndooxei ranhe teñ oo nho (Juízes 1.16). \* <sup>11:3</sup> Tery Taberá ma “Okaia” ea reve nhaendu rã joo ramigua.

— Mba'e re tu mba'emo vai rejapo xee nerembiguai re? Mba'e re tu ndaxejou porãvei nerенонде py? Mba'eta xemoї kova'e kuery ha'e javi re apena aguã rami.

<sup>12</sup> Xee ae ri ty'y kova'e kuery moingoare aiko? Xee ae ri ty'y areko'i va'ekue xevy aipo're aguã: “Eraapa ndejyva áry okambu'i va'e rami, yvy aura reve neramoї kuery pe ame'ẽ aguã re xeayvuague peve”, 're aguã?

<sup>13</sup> Magui 'rã tu xee ajou xo'o ha'e kuery ha'e javi peguarã? Mba'eta xerenonde py ojae'o reve aipoe'i okuapy: “Eme'ẽ na xo'o ro'u va'erã.”

<sup>14</sup> Ha'e gui xee ae'i ma voi ndaropo'akai 'rã kova'e kuery ha'e javi, xevy ipoyi vaipa ramo.

<sup>15</sup> Nami ae ta ri xererekoy vy ma xejuka vyvoi, ajerure. Xemboaxy ri vy xemoingo eme ajexavai aguã rive.

### *Moisés pytyvõarã setenta avakue Nhanderuete oiporavo ukaague*

<sup>16</sup> SENHOR aipoe'i Moisés pe:

— Emboaty ha'vy setenta avakue Israel kuery mongetaaty va'e regua rexâva'ety, nhomongetaa rupi ha'e heta va'e kuery re openaa rupi ae ikuai va'ety. Ha'e va'e kuery remonhembojapa 'rã oguy nhemboaty olaty rexei, ha'e py ikuai aguã nerенонде.

<sup>17</sup> Ha'e py ma xee aguejy vy xeayvu 'rã ndereve. Ha'e Xenhe'ẽ ndere oĩ va'e ambouve vy ha'e kuery re voi amoї 'rã. Ha'e vy ndereve ha'e kuery ikuai avi 'rã heta va'e kuery re openaa rupi, ndee anho'i e'ỹ repena aguã.

<sup>18</sup> Ha'e vy aipo're 'rã heta va'e kuery pe: “Pejeky'a'o uka ju ko'ẽ rã guarã, pe'u aguã xo'o. Mba'eta peě kuery pejae'o reve ‘Mava'e tu ome'ẽ ta xo'o ja'u va'erã? Egito yvy re ma jaiko porã va'ekue’, peje ramo SENHOR oendu. Ha'e rami vy pendevy SENHOR ome'ẽ 'rã xo'o, ha'e pe'upa 'rã.

<sup>19</sup> Peteї ára'i re rive'ỹ 'rã pe'u, neї mokoї ára'i 'rã e'ỹ, neї peteї nhiruї neї dez, neї vinte ára re'i e'ỹ guive.

<sup>20</sup> Ha'e rami 'rãgue py peteї jaxy pukukue re 'rã pe'u, peneapyïgua gui oëmba rã pe-jeguarupa peve. Mba'eta SENHOR penembyte oiko va'e ndapeipotavei, ha'e henonde py pejae'o reve ‘Mba'e re tu Egito gui jajupa raka'e?’ peje va'ekue”, 're 'rã ha'e kuery pe – he'i.

<sup>21</sup> Ha'e ramo Moisés ombovai:

— Xee ma seiscentos mil avakue opu'ã okuapy va'e mbyte py aiko. Ha'e ramo mba'exa tu aipo're xevy: “Eme'ẽ ha'e kuery pe xo'o, peteї jaxy pukukue re ho'u okuapy aguã” 're?

<sup>22</sup> Mymba kuery vexa'i ha'e vaka ty'y ojukapaa 'rã ha'e kuery ha'e javi ho'u va'erã? Tyrã pa ye'ẽ rupi pira ikuai va'e ha'e javi 'rã omono'õmbaa ha'e kuery ho'u va'erã? — he'i.

<sup>23</sup> Ha'e ramo Moisés pe SENHOR ombovai:

— Xee SENHOR jyva nda'u ijapu'a'i ri? Aÿ'i ma voi rexâva'ety xeayvuague oiko rã tyrã pa anya! — he'i.

<sup>24</sup> Ha'e gui Moisés oẽ vy heta va'e kuery pe SENHOR omombe'upa SENHOR ijayvuague. Ha'e vy ha'e kuery mongetaaty setenta avakue ikuai va'e omboaty imbokuapy oo yvýry rupi.

<sup>25</sup> Ha'e ramo SENHOR oguejy arai rupi. Ha'e vy ijayvu ixupe. Ha'e vy Nhe'ẽ hexe oĩ va'e ombouve vy omoї avi setenta nhomongetaaty ikuai va'e re. Ha'e va'e kuery re Nhe'ẽ oĩ avi ramo omombe'u okuapy ixuguigua, teї ha'e va'e rire ma nda'ijayvvuei ha'e rami.

<sup>26</sup> Ha'e gui ma mokoї avakue opyta tekao py. Peteї ma Eldade hery va'e, ha'e rã amboae ma Medade. Ha'e kuery re voi Nhe'ẽ oĩ, mba'eta ha'e kuery voi nhomongetaaty kuery regua teї oo katy ndooi va'ekue. Ha'e rami vy ha'e kuery voi ayvu omombe'u okuapy tekao mbyte ikuia py.

<sup>27</sup> Ha'e ramo peteї kunumi onha ovvyy omombe'upa Moisés pe. Ha'e vy aipoe'i:

— Eldade ha'e Medade voi ri tu ayvu omombe'u okuapy — he'i.

<sup>28</sup> Ha'e ramo Num ra'y Josué, Moisés pytyvõarã oiporavo va'ekue va'e ombovai vy aipoe'i:

— Xeruvixa Moisés, emokyrirí na.

<sup>29</sup> Ha'e rã Moisés aipoe'i ixupe:

— Ndee ta'vy nerakâte'ý teve xere? SENHOR pegua kuery profeta meme ikuai 'rãgue, ha'e kuery ha'e javi re SENHOR Onhe'ë omoñ aguã! — he'i.

<sup>30</sup> Ha'e va'e rire Moisés ma tekao katy ju oje'oi Israel kuery mongetaaty kuery reve.

### *Guyra codornizes Nhanderuete ombouague*

<sup>31</sup> Ha'e gui SENHOR-a gui peteñ vytytu oipeju ovv vy ye'ë áry gui ogueru guyra codornizes. Ha'e vy tekao áry ha'e javi rupi omoaõmba heravy peteñ ára jaguataa rami rai'i peve. Ijyvýry rupi opyta peteñ metro peve yvvy py.

<sup>32</sup> Ha'e ramo ha'e va'e árave heta va'e kuery oje'oipa, pyávy ha'e ko'ëgue voi, ha'e vy ojopy oje'oivy guyra ikuai va'e. Amongue mboapy'ive ojopy va'ekue ri cem voxá renyë ogueru. Ha'e vy tekao ha'e javi rupi omboaty imoiny ojeupe guarã ae.

<sup>33</sup> Ha'e rami teñ ijuru py xo'o oime rei reve, oixu'u jepe e'ý re voi ha'e kuery rovai SENHOR poxya hendy vy ojukapa mba'emo vai py.

<sup>34</sup> Ha'e nunga rupi ha'e va'e tekao ma oenoña Quibrote-Hataavá, ha'e py Egito regua tembi'u re nda'eveive va'ekue ojatypaa rire.<sup>†</sup>

<sup>35</sup> Ha'e gui Quibrote-Hataavá gui ma ha'e kuery oje'oive Hazerote katy, ha'e vy opyta ju ha'e py.

## 12

### *Moisés rovai rupi Miriã ha'e Arão ijayvuague*

<sup>1</sup> Ha'e gui Moisés ogueraa peteñ kunha Cuxé pygua gua'yxyrã. Ha'e ramo Miriã ha'e Arão ijayvu okuapy Moisés rovai, Cuxé pygua gua'yxyrã ogueraa va'ekue káuxa.

<sup>2</sup> Ha'e vy aipoe'i okuapy:

— Xapy'a rei nda'u Moisés rupi anho ri SENHOR ijayvu? Nhande rupi voi nda'u nda'ijayvui avi 'rã? — he'i ramo SENHOR oendu.

<sup>3</sup> Moisés ma ava onhemo'yvy'i va'e, ko yvy re avakue ikuai va'e gui voi yvyi'ive va'e oiko.

<sup>4</sup> Are'ý'i re SENHOR aipoe'i Moisés pe, Arão ha'e Miriã pe voi:

— Peẽ kuery mboapy ma peẽ 'rã oguy nhemboaty oñaty oñ va'e gui — he'i. Ha'e ramo oñmba mboapyve.

<sup>5</sup> Arai rupi SENHOR oguejy ouvy vy oo rokë py opyta ho'amy. Ha'e vy oenoñ Arão ha'e Miriã. Ha'e ramo ha'e kuery ojexa uka.

<sup>6</sup> Ha'e ramo aipoe'i ha'e kuery pe:

— Pendu ke aÿ xee xeayvu ramo. Penembyte profeta oiko ramo ma ixupe xee SENHOR ajekuaa uka 'rã mba'emo aexa ukaa py, ha'e'ý vy oexa ra'ua py 'rã xeayvu hexeve.

<sup>7</sup> Ha'e rã xerembiguai Moisés reve ma nami e'ý ju aiko, mba'eta ha'e ma ojeroviapye ete oiko xero pygua kuery ha'e javi re openaa rupi.\*

<sup>8</sup> Hexeve ma xeayvu 'rã xejuru rupi ae, oikuaa porã aguã rami, ayvu haxy rei va'e rupi e'ý. Ixupe xee SENHOR ajekuaa rã xerexa guive. Mba'exa ha'vy tu ndapekyjei ri xerembiguai Moisés rovai rupi pendeayvu aguã? — he'i.

<sup>9</sup> Ha'e rami vy ha'e kuery rovai SENHOR poxya hendy. Ha'e rire ojepe'a.

<sup>10</sup> Arai voi ojepe'a ovv oo áry gui. Ha'e ramove Miriã oikuaa rã hexe oñ ma lepra, yro'y apí rami xiñ rei va'e. Miriã re Arão oma'ë ramo lepra revegua ma hi'añ.

<sup>11</sup> Arão aipoe'i Moisés pe:

— Ake'e xeruvixa! Ndevy ajerure: Orere emoñ eme orerekvaia, mba'eta ore'arandua rupi e'ý rojapo ha'e nunga, rojejavy ete ange.

\* <sup>11:34</sup> Tery Quibrote-Hataavá ma "Tembí'u re nda'eveive va'ekue ojatyaague" 'ea. \* <sup>12:7</sup> Hebreus 3.2,5

**12** Nhanereindy topyta eme kyr̄'i va'e oity pyre rami, mbyte rupi ho'okue ho'apa va'e rami – he'i.

**13** Ha'e ramo SENHOR pe Moisés ojapukai vy aipoe'i:

– Xeruete, ajerure remonguera ju aguã.

**14** SENHOR ombovai Moisés pe:

– Xapy'a rei hova re tuu onyvõ va'e rire nda'u sete araa peve ndopytai 'rāgue oximbaba py? Ha'e voi topyta ranhe sete ára tekoá gui mombyry'i. Ha'e va'e rire ma ha'eve peru ju aguã – he'i.

**15** Ha'e rami rā Miriā sete ára peve omondouka ranhe tekoá gui mombyry'i. Oguerua e'ýa ja heta va'e kuery ndoguatai tekoá gui.

**16** Ha'e va'e rire mae ha'e kuery oje'oi ju Hazerote gui, ha'e Parā regua tekoá e'ýa py ju ikuai.

## 13

### *Deuteronômio 1.19-25*

**1** SENHOR aipoe'i Moisés pe:

**2** — Emondouka ke avakue Canaã yvy re oexa pota va'erā, mba'eta ame'ë 'rā Israel kuery yvyrā. Peneramoí kuery peteñ-teñ regua gui remondouka 'rā peteñ ava, huvixa oiko va'e ae – he'i.

**3** Ha'e ramo Moisés omondouka Parā regua tekoá e'ýa py ikuiaia gui ae, SENHOR aipoe'iague rami vy. Ha'e va'e avakue ma Israel kuery ruvixa ikuai va'e meme.

**4** Po rami ma ha'e va'e kuery rery: Rúben kuery regua ma Zacur ra'y Samua;

**5** Simeão kuery regua ma Hori ra'y Safate;

**6** Judá kuery regua ma Jefoné ra'y Calebe;

**7** Issacar kuery regua ma José ra'y Jigeal;

**8** Efraim kuery regua ma Num ra'y Oséias;

**9** Benjamim kuery regua ma Rafu ra'y Palti;

**10** Zebulom kuery regua ma Sodi ra'y Gadiel;

**11** José kuery regua, ha'e Manassés kuery regua ae ma Susi ra'y Gadi;

**12** Dã kuery regua ma Gemali ra'y Amiel:

**13** Aser kuery regua ma Micael ra'y Setur;

**14** Naftali kuery regua ma Vofsi ra'y Nabi;

**15** Gade kuery regua ma Maqui ra'y Geuel.

**16** Ha'e va'e avakue ma Moisés omoí yvy re oexa pota va'erā omondouka aguã. Ha'e gui Num ra'y Oséias rery Moisés oguerova vy Josué ju omboery.

**17** Ha'e gui Canaã yvy katy Moisés omondouka oexa pota aguã. Ha'e vy aipoe'i ha'e kuery pe:

— Peñ Neguebe katy, ha'e yvyty ikuai va'e rupi ju 'rā peo.

**18** Pexa 'rā yvy peikuaa aguã mba'exa pa ra'e, ha'e hexegua kuery re guive peikuaa pota, imbaraetekue tyrā pa ikangykue, ndaetai tyrā pa heta.

**19** Ha'e peikuaa pota 'rā mba'exa pa yvy ha'e kuery ikuiaia re, iporā tyrā pa na'iporāi, ha'e mba'exa pa tetā ikuiaia voi ra'e, tekoá rive tyrā pa tetā ikorapa va'e.

**20** Pexa avi mba'exa pa ra'e yvy itui, iporā tyrā pa na'iporāi, ha'e gui ka'aguy tyrā pa any. Penekyre'ý tema, ha'e Peru mba'emo aju ha'e va'e yvy guigua – he'i. Ha'e va'e jave ma uva ijaju ypya ára ae.

**21** Ha'e rami rā ha'e kuery oje'oi vy ha'e va'e yvy rupi oexa pota oje'oivy, Zim regua tekoá e'ýa guive Reobe peve Hamate py ovaëa'i py.

**22** Neguebe rupi oje'oi vy ou okuapy Hebrom peve. Ha'e py ma ikuai Enaque ra'y kuery Aimã, Sesai ha'e Talmai. (Hebrom tetā ojapoa ma sete ma'etý teri Egito yvy re Zoã tetā ojapoa e'ýa mbove ma voi.)

<sup>23</sup> Ha'e rire ma Escol yvyugua peve ju ou. Ha'e py ma ojaya okuapy peteī xā uva hi'y reve. Ha'e va'ekue ma mokoī avakue ogueru peteī yvyra po'i re ombo'y vy. Romā'a ha'e figo'a avi ogueru.

<sup>24</sup> Ha'e va'e yvyugua pe ma “Escol” oenoī, ha'e py Israel kuery uva'a ojaya rire.\*

*Deuteronômio 1.26-33*

<sup>25</sup> Ha'e gui yvy oexa vy oje'oiaque gui quarenta ára opaa py ojevypa ju.

<sup>26</sup> Oguata jogueruvy vy ovaēmba ju Moisés ha'e Arão-a py, ha'e Israel kuery ha'e javi onhemboaty okuapya py Parā regua tekao e'ŷa re, Cades py ae. Ha'e kuery pe omombe'upa okuapy oexa va'ekue, heta va'e kuery ha'e javi pe voi. Oexa uka avi mba'emo aju ha'e va'e yvy gui ogueru va'ekue.

<sup>27</sup> Ha'e vy Moisés pe omombe'u vy aipoe'i okuapy:

— Roje'oi yvy oremondoukaague va'e peve. Ha'e gui anhetē ete ha'e py kamby ha'e ei ndoatai. Kova'e ma mba'emo'a ha'e pyguare.

<sup>28</sup> Ha'e rami avi avakue ha'e va'e yvy re ikuai va'e ma imbaraetekue ae. Hetā voi tuvixa ete va'e ikuai, ikorapa va'e meme guive. Ha'e py roexa avi Enaque ramymino kuery.†

<sup>29</sup> Amalequita kuery ma Neguebe re ikuai. Ha'e rā yvyty rupi ma heteu, jebuseu ha'e amorreue kuery ikuai. Ye'ê katy'i rupi ma cananeu kuery ikuai, Jordão yakā yvýry rupi guive — he'i okuapy.

<sup>30</sup> Ha'e gui Calebe ju nhomokyririmbā heta va'e kuery Moisés renonde py ikuai va'e. Ha'e rami vy aipoe'i:

— Ma'ē, jaje'oi jajopy aguā ha'e va'e yvy, mba'eta nhandepo'aka 'rā ha'e kuery re — he'i.

<sup>31</sup> Ha'e rami teī avakue mboae hexeve oje'oi va'ekue aipoe'i okuapy:

— Nda'evei teve ha'e va'e kuery rovai jaje'oi aguā, nhande kuery gui ipo'akapave va'e ramo — he'i okuapy.

<sup>32</sup> Ha'e rami vy Israel kuery oendupaa py ha'e kuery ijayvu rei okuapy yvy oexa va'ekue re. Ha'e vy aipoe'i:

— Yvy mbyte rupi roexa pota aguā roaxaague va'e ma hekoia va'e kuery mombaarā itui. Ha'e py roexa va'ekue ma ava ja'eakue meme,

<sup>33</sup> gigante kuery avi roexa karamboae. Ha'e vy rojoexa ramo tuku'i rami rive orekuai, ha'e kuery pe voi ha'e rami ae avi orerexa rā — he'i okuapy. Enaque ramymino kuery ma gigante guigua meme ikuai raka'e.

## 14

*Heta va'e kuery oyvyrā katy ndooxeiague*

<sup>1</sup> Ha'e gui heta va'e kuery opu'āmba vy ojapukai atā rei okuapy. Ha'e va'e pyávy ha'e kuery ojae'opa okuapy.

<sup>2</sup> Ha'e vy Israel kuery ha'e javi ijayvu rei okuapy Moisés ha'e Arão re. Ha'e vy aipoe'i:

— Ha'eveve 'rāgue Egito yvy re, e'ŷ vy kova'e tekao e'ŷa py ma voi nhamanomba va'e rire!

<sup>3</sup> Mba'erā tu SENHOR nhandererupa kova'e yvy re? Kyxe py nhamanomba aguā pa, ha'e nhandera'yxy kuery ha'e nhandera'y kue'iry escravo-rā ogueraapaa aguā teve? Nda'evei nda'u Egito yvy katy ae ju jajevypa aguā? — he'i.

<sup>4</sup> Joupe-upé aipoe'i okuapy:

— Jajou peteī nhanderuvixarā, Egito yvy katy jajevypa aguā — he'i okuapy.

<sup>5</sup> Ha'e rami rā Israel kuery oexaa py Moisés ha'e Arão guenapy'ā re oī ngova yvy re omovaē reve.

<sup>6</sup> Ha'e rami ae avi yvy rexaare kuery va'e regua Num ra'y Josué ha'e Jefoné ra'y Calebe omondoro okuapy oao.

<sup>7</sup> Ha'e vy Israel kuery ha'e javive pe ijayvu vy aipoe'i:

\* <sup>13:24</sup> Tery Escol ma “Uva'a” 'ea. † <sup>13:28</sup> Enaque ra'y kuery ma gigante ikuai raka'e (versículo 33).

— Yvy mbyte rupi roaxaque va'e rima iporã ete.

<sup>8</sup> SENHOR nhandejou porã ri vy ojapo 'rã ha'e va'e yvy re nhavaã aguã rami, nhandevy ju omboaxa aguã. Ha'e va'e yvy ma kamby ha'e ei oata e'ÿa.

<sup>9</sup> Ha'e nunga rupi pepu'ã rei eme SENHOR re, pekyje eme guive ha'e pygua avakue gui, mba'eta mbojape ja'ua rami nhamomba avi 'rã ha'e kuery. Ha'e kuery reve noïvei ma hepyarã va'ekue. Ha'e rã nhande kuery reve ma SENHOR ae 'rã oiko. Pekyje eme ha'e kuery gui – he'i.

<sup>10</sup> Ha'e rami teī heta va'e kuery ha'e javi jogueroayvu okuapy ita py ojapipa aguã re. Ha'e rami teī ha'e kuery pe SENHOR rexakã ojekuaa xapy'a oguy nhemboaty oñaty rupi.

<sup>11</sup> Ha'e rami vy SENHOR aipoe'i Moisés pe:

— Raka'e peve nda'u kova'e kuery xerekoo a'ã 'rã okuapy? Raka'e peve nda'u ndo-jeroviai 'rã xere, ha'e kuery mbyte rupi opa marãgu hexa pyrã amoingo va'eri?

<sup>12</sup> Ha'e nunga rupi ambou 'rã mba'eaxy vaikue ijukapaarã, name'ëvei ma 'rã ijyvyrã va'ekue. Ha'e gui ndegui ju amoingo 'rã peteî regua kova'e kuery gui hetave ha'e imbaraetekueve va'e – he'i.

### *Heta va'e kuery re Moisés ojerureague*

<sup>13</sup> Ha'e ramo Moisés ombovai SENHOR pe:

— Egito pygua kuery mbyte gui ndepo'akapaa rupi kova'e kuery reipe'apa rire teī remomba ramo Egito pygua kuery oendupa 'rã.

<sup>14</sup> Ha'e rami vy ha'e kuery omombe'u uka 'rã kova'e yvy re ikuai va'e pe. Ha'e gui SENHOR, kova'e yvy pygua kuery oendu ae ma ndevygua kuery mbyte rupi reikoa, ha'e ha'e kuery rexa py ae rejexa ukaa. Ha'e kuery áry rupi ndeguigua arai oĩ, ha'e ha'e kuery renonde rupi arai opu'ã va'e py 'rã reo ara py, ha'e rã pyávy ma tata opu'ã va'e py 'rã reo.

<sup>15</sup> Ha'e gui xapy'a rei ndevygua kuery rejukapa vyvoi ramo amboae regua kuery nemombe'ua rã oendu va'ekue aipoe'i 'rã okuapy:

<sup>16</sup> “Yvy re SENHOR ndogueraa kuaai ri nda'u ojeupagua kuery, oura reve ha'e kuery pe ome'ë aguã re ijayvu va'ekue ri, ha'e nunga rupi ae ojukapa tekao e'ÿa py”, he'i 'rã okuupy.

<sup>17</sup> Ha'e nunga rupi aÿ SENHOR, ajerure ndepo'akapa va'ea rexa uka aguã, ndeayvuague rami vy. Mba'eta aipo're va'ekue:

<sup>18</sup> “Xee SENHOR ma xeporayvu va'e ha'e opa mba'e py anhomboaxy va'e, ambogue 'rã teko vai ha'e jejavya. Ha'e rami avi ojejavvy va'ekue nambopaga e'ÿi 'rã. Ha'e rami 'rãgue py tuu kuery reko vaiague re ambou 'rã ta'y kuery voi ojexavai aguã, mboapya ha'e irundaya ikuai peve”, 're va'ekue.

<sup>19</sup> Ha'e nunga rupi opa mba'e py renhomboaxy va'e vy embogue ke kova'e kuery reko vaia, heko vaia Egito yvy gui oje'oipa guive apy ovaëmba peve rembogue jepiaty rami.

### *Deuteronomio 1.34-40*

<sup>20</sup> Ha'e ramo SENHOR aipoe'i:

— Ndeayvua rami xee ambogue ma ha'e kuery reko vaia.

<sup>21</sup> Ha'e rami avi anhetë ete xee SENHOR xee ae rekove rupi, ha'e xerexakãa yvy jave rupi ojekuaa va'erã va'e rupi aura vy aipoe'i:

<sup>22</sup> avakue xerexakãa ha'e hexa pyrã Egito yvy re ha'e tekao e'ÿa rupi ajapo rã oexa va'ekue, ha'e gui dez-kue ma xerekoo a'ãa rupi naxenhe'ë rendui va'ekue,

<sup>23</sup> ha'e va'e regua neñ peteîve ma ndoexai 'rã yvy peneramoí kuery pe ame'ë aguã re aura reve xeayvuague va'e. Tá, ndaxepotavei va'e kuery neñ peteî'i ma voi ndoexai 'rã.

<sup>24</sup> Ha'e rã xerembiguai Calebe re ma amboae regua nhe'ë oĩ. Ha'e va'e ma xereve ete oiko riae ramo xee ajapo 'rã yvy oexa potague re ae hekao aguã rami. Hamymino kuery avi 'rã ikuai ha'e py.

<sup>25</sup> Ne'ixa, amalequita ha'e cananeu kuery ma yvy'ã guy katy ikuai. Pejepekuavo ha'vy amboae katy. Ko'ë rã tapeo tekao e'ÿa katy ju, ye'ë pytã yvýry tape oo va'e rupi ae – he'i.

<sup>26</sup> Ha'e rire Moisés ha'e Arão pe ju SENHOR aipoe'i:

<sup>27</sup> — Raka'e peve 'rã tu aropo'aka kova'e kuery xerovai rupi ijayvu okuapy va'e? Xee aendupa ainy Israel kuery xere ijayvu rei okuapy ramo.

<sup>28</sup> Aipo're ha'e kuery pe: SENHOR aipoe'i: Xee ae rekove rupi aura vy aipoa'e: Xeapyxa py pendeayvuague ae ju 'rã ambou pendere.

<sup>29</sup> Mba'eta kova'e teko a e'ŷa py ae 'rã pemanomba, peẽ kuery va'e regua penderery omoña jave vinte ma'etŷ va'e ha'e pendetujakueve va'e guive, joupe-upe xerovai pendeayvu va'ekue ha'e javi.

<sup>30</sup> Ndapeupityi 'rã yvy pendekoarã ame'ẽ aguã re aura reve xeayvuague va'e py, Jefoné ra'y Calebe ha'e Num ra'y Josué va'e e'ŷ vy.

<sup>31</sup> Ha'e rã pendera'y kuery pe "Escravo-rã ogueraapaa 'rã" peje va'ekue ri ha'e kuery ma ajapo 'rã ha'e py ovaẽmba aguã rami. Ha'e kuery ma oexa 'rã yvy peẽ ndapeipotai va'ekue.

<sup>32</sup> Ha'e rã peẽ kuery ma kova'e teko a e'ŷa py 'rã pemanomba.

<sup>33</sup> Kova'e teko a e'ŷa rupi ma quarenta ma'etŷ re pendera'y kuery ikuai 'rã guymba kuery re openaa rupi. Pejeadavya káuxa ae 'rã ha'e kuery ojexavai, kova'e teko a e'ŷa py xapirẽ penderetekue ho'upa peve.

<sup>34</sup> Mba'eta quarenta ára re yvy re pexa pota peje'oivy rire quarenta ma'etŷ re ju 'rã pejexavai pejeadavyague re, peteĩ-teĩ ára rekoria peteĩ ma'etŷ 'rã oaxa. Ha'e rami vy pendupa 'rã xee rojou vaia regua.

<sup>35</sup> Xee SENHOR ha'e rami xeayvu rire ha'e rami ae ju 'rã ajapo kova'e kuery heko vai va'e xere opu'ã va'ekue re. Kova'e teko a e'ŷa py ae 'rã okanhy ovv, opa peve — he'i.

<sup>36</sup> Ha'e gui avakue yvy rexaarã Moisés omondouka va'ekue ojevy vy ha'e va'e yvy re ijayvu rei vy ojapo heta va'e kuery ha'e javi yvy re ijayvu rei avi okuapy aguã rami.

<sup>37</sup> Ha'e va'e avakue yvy re ijayvu rei va'ekue ma SENHOR renonde py omanomba raka'e mba'eaxy vaikue gui.

<sup>38</sup> Ha'e rã Num ra'y Josué ha'e Jefoné ra'y Calebe ma avakue yvy rexaarã oje'oi va'ekue va'e regua avi teĩ okuave.

#### *Deuteronomio 1.41-46*

<sup>39</sup> Ha'e nunga Moisés omombe'u Israel kuery ha'e javive pe. Ha'e ramo ha'e kuery iporiau vaipa ete okuapy.

<sup>40</sup> Ko'ẽ rai ramove ovypa vy oẽmba jogueruvy yvyty apyte katy. Ha'e vy aipoe'i okuapy:  
— Apy ma orekuai, anhetẽ ae rojejavypa rire teĩ roo nho 'rã yvy nhandevy SENHOR ome'ẽ 'rã va'ekue re — he'i okuapy.

<sup>41</sup> Moisés ombovai:

— Mba'e re ha'vy SENHOR ojapo ukaa rami e'ŷ pendekuai? Pendeayvua rami pendekuai aguã ma nda'eve porãi.

<sup>42</sup> Tapeo eme ta'vy penderovaigua kuery renonde py pemanomba e'ŷ aguã, mba'eta SENHOR noĩvei ma 'rã peẽ kuery mbyte.

<sup>43</sup> Ma'ẽ, penerenonde rupi amalequita ha'e cananeu kuery ikuai. Pe'apa 'rã pekuapy ikyxe gui. Mba'eta SENHOR gui pejep'a ma rire noĩvei 'rã peẽ kuery reve — he'i.

<sup>44</sup> Ha'e ramive ma ha'e kuery onhea'ã tema okuapy yvyty rupi oje'oi aguã. Ha'e ramo teĩ SENHOR guexeve guarã ojapo va'ekue ryru ndogueraai ha'e kuery reko a mbyte oĩa gui, neĩ Moisés voi ndooi.

<sup>45</sup> Ha'e ramo amalequita ha'e cananeu kuery yvyty rupi ikuai va'e oguejy vy ojukapa, Horma peve oitypa.

<sup>2</sup> — Ndeayvu ke Israel kuery pe, ha'e vy aipo're: Yvy pendekoarã xee ame'ẽ va'erã re pevaẽ jave ma

<sup>3</sup> mba'emo peapy vy peme'ẽ 'rã SENHOR pe, mymba mba'e pejuka vy penhemboayvuague pejapopa regua, e'ŷ vy mba'emo penhenhandua'i rami peme'ẽ va'e, e'ŷ vy ngaru hi'ára py pejapoa py SENHOR pe peapy 'rã heakuã porã va'e, vaka, vexa'i pejuka vy peme'ẽ va'e reve.

<sup>4</sup> Ha'e gui SENHOR pe mba'emo ome'ẽ va'erã ogueru va'e ma ogueru avi 'rã peteĩ ryru trigo iporãve va'e, peteĩ ryru raxa'i azeite reve omoirũ va'ekue.

<sup>5</sup> Ha'e peteĩ-teĩ vexa'i peme'ẽ va'e reve guarã peru avi 'rã peteĩ ryru vinho penhoẽ reve peme'ẽ va'erã, mba'emo peapy vy peme'ẽ va'e ha'e mymba pejuka uka va'e áry.

<sup>6</sup> Peteĩ-teĩ vexa'i peme'ẽ va'e reve guarã peru avi 'rã mba'emo aju guigua peme'ẽ va'erã. Mokoĩ ryru trigo iporãve va'e Peru, peteĩ ryru raxa'i azeite reve omoirũ mbyre.

<sup>7</sup> Vinho peteĩ ryru raxa'i 'rã peme'ẽ SENHOR pe penhoẽ reve, peapy vy peme'ẽ ramo heakuã porã aguã.

<sup>8</sup> Ha'e gui toro ra'y peapy e'ŷ vy pejuka aguã perekó katu 'rã penhemboayvuague pejapopaa reguarã, ha'e'ŷ vy perovy'a aguã regua SENHOR pe peme'ẽ va'erã.

<sup>9</sup> Toro ra'y reve Peru avi 'rã mba'emo aju guigua peme'ẽ va'erã. Mboapy ryru trigo iporãve va'e 'rã Peru, mokoĩ ryru rai'i azeite reve omoirũ mbyre.

<sup>10</sup> Vinho penhoẽ reve peme'ẽ 'rã mokoĩ ryru rai'i, SENHOR pe mba'emo peapy vy peme'ẽ ramo heakuã porã aguã.

<sup>11</sup> Ha'e rami ae pejapo 'rã toro ra'y peme'ẽ va'e reve guarã, vexa ava, vexa'i ra'y ha'e kavara ava reve guarã guive.

<sup>12</sup> Peteĩ-teĩ peme'ẽ va'e reve guarã 'rã Peru, mboovy pa peme'ẽa rami vy.

<sup>13</sup> Ha'e py aegua kuery ojapo 'rã ha'e rami, mba'emo oapy vy SENHOR pe ome'ẽ ramo heakuã porã aguã.

<sup>14</sup> Ha'e penembyte rupi ikuai avi 'rã amboae regua, peneramymino kuery ikuaive-ive jave. Ha'e va'e regua ogueru avi 'rã mba'emo oapy vy SENHOR pe ome'ẽ va'erã, heakuã porã aguã. Peẽ kuery pejapoa rami ae avi 'rã ha'e kuery voi ojapo.

<sup>15</sup> Peẽ kuery ha'e javi rekorã ma peteĩ'i aeja, pêvy ha'e amboae regua penembyte rupi ikuai va'e pe voi. Ha'e va'e ma raka'e rã peve guarã oĩ peneramymino kuery rekorã avi ikuai jave guarã. Peẽ kuery pendekuaia rami ae avi 'rã amboae regua kuery ikuai xee SENHOR renonde.

<sup>16</sup> Peteĩ'i lei oĩ 'rã penderekorã, peẽ kuery pe ha'e amboae regua penembyte rupi ikuai va'e pe voi – he'i.

<sup>17</sup> SENHOR aipoe'ive ju Moisés pe:

<sup>18</sup> — Ndeayvu ke Israel kuery pe, ha'e vy aipo're: Yvy xee rogueraa ague py pevaẽ jave

<sup>19</sup> yvy re mba'emo aju oiko va'ekue pe'u ta nhavõ SENHOR pe ranhe 'rã peme'ẽ mba'emo.

<sup>20</sup> Jypygua mba'emo pemongu'i va'ekue iporãve va'e gui pejapo 'rã mbojape. Ha'e va'e ma Peru peme'ẽ va'erã. Mba'emo pemoa'yí va'ekue rami 'rã peme'ẽ.

<sup>21</sup> Jypygua mba'emo pemongu'i va'ekue iporãve va'e guigua SENHOR peguarã ranhe 'rã peme'ẽ, peneramymino kuery ikuaive-ive jave voi.

#### *Levítico 4.13-21*

<sup>22</sup> — Ha'e gui amongue py pejavy 'rã Moisés rupi SENHOR ojapo uka va'ekue ndape-japoia py.

<sup>23</sup> Mba'eta Moisés rupi meme SENHOR ojapo uka raka'e pêvy, ojapo uka ypya ára guive aŷ peve, ha'e peneramymino kuery ikuaive-ive jave guarã guive.

<sup>24</sup> Ha'e gui xapy'a rei potae vy e'ŷ pejapo 'rã ha'eve'ŷa rami, ha'e neĩ heta va'e kuery voi ndoikuaai okuapy. Ha'e rami vy ha'e kuery ha'e javi ome'ẽ 'rã peteĩ toro ra'y, oapya ramo SENHOR pe heakuã porã aguã. Mba'emo aju guigua reve 'rã ogueru, ha'e mba'emo rykue onhoẽ aguã ome'ẽ va'erã reve, pendekorã oeja pyre rami vy ae. Peteĩ kavara ogueru avi 'rã jejavya regua ome'ẽ va'erã.

<sup>25</sup> Ha'e gui sacerdote ojao'i uka 'rã Israel kuery ojejavy okuapyague. Ha'e ramo ha'e kuery operdoaa 'rã, potae vy e'ŷ ojavy rire. Ha'e kuery ojejavyague re ogueru 'rã mba'emo oapy vy SENHOR pe ome'ẽ va'erã. SENHOR renonde py ogueru avi 'rã ojejavyague regua ome'ẽ va'erã.

<sup>26</sup> Ha'e ramo operdoaa 'rã Israel kuery ha'e javi, ha'e kuery mbyte rupi amboae regua ikuai va'e voi, ha'e javive otekoavy rire.

<sup>27</sup> — Amongue potae vy e'ŷ ojejavy rire ogueru 'rã peteĩ kavara kunha peteĩ ma'etŷ va'e, ojejavyague regua ome'ẽ va'erã.

<sup>28</sup> Ha'e ramo sacerdote ojao'i uka 'rã ojejavyague, SENHOR renonde potae vy e'ŷ ojejavy rire. Ha'e nungakue ojao'i uka ramo operdoaa 'rã.

<sup>29</sup> Israel kuery ae, ha'e'ŷ vy ha'e kuery mbyte amboae regua ikuai va'e teĩ peteĩ'i anho 'rã oĩ lei potae vy e'ŷ ojejavy va'ekue pe.

<sup>30</sup> Ha'e rã otekoavy potae va'e, ha'e pygua kuery ae, e'ŷ vy amboae regua teĩ SENHOR mboetea rupi e'ŷ rei oiko ramo oipe'aa 'rã heta va'e kuery mbyte gui,

<sup>31</sup> SENHOR ayvu noendu potai rire, ha'e ndojapoxei ete ha'e ojapo uka va'ekue. Ha'e va'e oipe'aa 'rãe, ha'e hexe ae 'rã oĩ ojejavyague opaga aguã.

### Sábado regua lei rupi e'ŷ oiko va'ekue ombopagaague

<sup>32</sup> Tekoa e'ŷa py Israel kuery ikuai teri reve oikuaa okuapy peteĩ ava sábado py va'eri xakã omono'õ oikovy rã.

<sup>33</sup> Ha'e rami vy xakã mono'õare ojou va'ekue ogueru okuapy Moisés ha'e Arão-a py, heta va'e kuery ha'e javi renonde py.

<sup>34</sup> Oeja ranhe openaa imoiny aguã, mba'eta ndoikuuai rei teri mba'exa pa hexe ojapo aguã.

<sup>35</sup> Ha'e ramo SENHOR aipoe'i Moisés pe:

— Ha'e va'e ava ma omano aguã rami oiko. Pavẽ 'rã ojapi ita py, tekaoa gui mombyry'ia py — he'i.

<sup>36</sup> Ha'e ramo ha'e kuery ha'e javi ma tekaoa gui mombyry'ia py ogueraa vy ojapipa okuapy ita py. Ha'e ramo omano, Moisés pe SENHOR ojapo ukaague rami vy.

### Deuteronômio 22.12

<sup>37</sup> SENHOR aipoe'i Moisés pe:

<sup>38</sup> — Ndeayvu ke Israel kuery pe. Ha'e vy aipo're: Pembopotypa 'rã pendeano apy rupi, peneramymino kuery ikuaiive-ive jave guarã. Ao apy re peteĩ-teĩ poty 'rã pejokua ixã hovy va'e py.

<sup>39</sup> Ha'e nunga pexa nhavõ penema'endu'a 'rã SENHOR ojapo uka va'ekue ha'e javi re, pejapo ete aguã. Nda'evei pendepy'a re peipotaa oĩ va'e rami rive pendekuai aguã, neĩ mba'emo pexa vy peipota rei aguã guive, mba'eta ha'e nunga rupi pendekuai vy pendetavy rei ae ma.

<sup>40</sup> Ha'e rami 'rãgue py penema'endu'a ajapo uka va'ekue ha'e javi re, pejapo ete aguã. Ha'e vy 'rãe Penderuete renonde peiko iky'a e'ŷ va'e.

<sup>41</sup> Xee ae ma SENHOR Penderuete, Egito yvy gui pendererupaare, Penderuete aiko aguã. Xee ae SENHOR Penderuete.

## 16

### Coré, Datã ha'e Abirão SENHOR rovai opu'âxe okuapyague

<sup>1</sup> Peteĩ levita regua oiko Coate ramymino Isar ra'y Coré hery va'e.\* Ha'e va'e ma ngupive ogueraa Rúben kuery regua, Eliabe ra'y kuery Datã ha'e Abirão, ha'e gui Pelete ra'y Om.

\* <sup>16:1</sup> Amongue Bíblia py hery Coré 'rãgue py Corá oĩ. Mokoïve tery ojeporu.

<sup>2</sup> Ha'e ramo ha'e va'e kuery ma Moisés renonde py opu'ã okuapy duzentos e cinqüenta Israel kuery regua avakue reve, huvixarã heta va'e kuery oiporavo va'ekue, avakue omboetepy ikuai va'e meme.

<sup>3</sup> Ha'e kuery onhemboaty okuapy Moisés ha'e Arão rovai opu'ãxe vy. Ha'e vy aipoe'i okuapy ha'e kuery pe:

— Aŷ ha'eve ma! Mba'eta heta va'e kuery ha'e javive iky'a e'ŷ va'e ikuai, nhande kuery va'e regua peteĩ-teĩ ma iky'a e'ŷ va'e jaiko, nhande kuery mbyte SENHOR oiko ramo. Mba'e re tu ha'vy penhemboyvateve ri SENHOR pegua orekuai va'e gui? — he'i okuapy.

<sup>4</sup> Ha'e nunga Moisés oendu vy guenapy'ã re oĩ, ngova yvy re omovaẽ peve.

<sup>5</sup> Ha'e rami vy ijayvu Coré ha'e hexeveguia kuery ha'e javi pe. Ha'e vy aipoe'i:

— Ko'ẽ rã aje'ive ma SENHOR oikuaa uka 'rã mava'e ete pa ixupeguia ra'ea, ha'e mava'e pa iky'a e'ŷ va'e ojee omonhemboja va'erã. Mba'eta ha'e oiporavo va'ekue anho 'rã omonhemboja.\*

<sup>6</sup> Coré ha'e ndereveguia kuery ha'e javi, po rami 'rã pejapo. Peru ke hy'a'i heakuã porã va'e oapyaty,<sup>†</sup>

<sup>7</sup> ha'e gui ko'ẽ rã pemboja 'rã tata. Hi'áry pemoĩ avi 'rã heakuã porã va'e SENHOR renonde py. Ha'e gui SENHOR oiporavo va'e ae ma 'rã iky'a e'ŷ va'e. Peẽ levita kuery pendekuai va'e, ha'eve ma aŷ pendeayvu — he'i.

<sup>8</sup> Aipoe'ive ju Coré kuery pe:

— Aŷ ma Levi ramymino kuery, penduve tema.

<sup>9</sup> Peẽ kuery pe rã nda'u mba'e'ŷ'i ri Israel kuery Ruete ha'e kuery mbyte gui pendeporavo hexe penhemboja aguã, ha'e SENHOR ombojeroviaaty rupi ixupe pemb'a'epo aguã heta va'e kuery re vy?

<sup>10</sup> Mba'eta Coré, ha'e ma nemonhemboja ojee, ha'e ndereveguia Levi ramymino kuery voi. Mba'e re tu sacerdote ete avi peikoxe ri?

<sup>11</sup> Ha'e nunga rupi ndee ha'e ndereveguia ikuai va'e ma SENHOR rovaigua meme pendekuai. Ha'e gui Arão ma mba'exagua tu oiko, hovai re pendeayvu rei pekuapy aguã? — he'i.

<sup>12</sup> Ha'e gui Moisés oenoĩ uka Eliabe ra'y kuery Datã ha'e Abirão. Ha'e rami teĩ ha'e kuery ma aipoe'i uka:

— Ore kuery ma ndorooi 'rãe.

<sup>13</sup> Ndee ma orepe'a va'ekue yvy kamby ha'e ei oata e'ŷa gui, kova'e tekoa e'ŷa py ju romanomba aguã, ha'e gui aŷ renhemoĩ ukaxe oreruvixarã orere ndepo'aka aguã.

<sup>14</sup> Mba'eta ndee ndorereraai teri yvy kamby ha'e ei oata e'ŷa py, neĩ orevy nereme'ẽi guive mba'ety ha'e vinho ty. Remombo ta ri ty'y yvy ku'ikue kova'e avakue rexâa py? Ha'e nunga rupi ore kuery ma ndorooi 'rã — he'i uka.

<sup>15</sup> Ha'e ramo Moisés ivai vaipa reve aipoe'i SENHOR pe:

— Ha'e kuery ndevy mba'emo ome'ẽ teĩ ema'ẽ rive ome'ẽ va'e re. Mba'eta xee ma ha'e kuery gui neĩ peteĩ mburika ma voi ndaraai, neĩ peteĩ henda py ma voi ndajapo vai ha'e kuery pe — he'i.

<sup>16</sup> Moisés aipoe'ive ju Coré pe:

— Ndee ha'e ndereveguia kuery ma ko'ẽ rã peĩmba 'rã SENHOR renonde py. Arão voi oĩ 'rã.

<sup>17</sup> Peteĩ-teĩ peru 'rã penemba'e hy'a'i heakuã porã va'e oapyaty, pemoĩ avi 'rã heakuã porã va'e. Peteĩ-teĩ peru 'rã SENHOR renonde py, duzentos e cinqüenta hy'a'i ha'e javi py 'rã peru. Ndee ha'e Arão Peru 'rã penemba'e ae — he'i.

\* <sup>16:5</sup> 2 Timóteo 2.19    † <sup>16:6</sup> Ha'e kuery ma sacerdote e'ŷ ikuai ramo nda'evei heakuã porã va'e oapy aguã, sacerdote kuery pe anho ha'eve (Êxodo 30.34-38).

<sup>18</sup> Ha'e ramo ha'e kuery peteĩ-teĩ ogueru okuapy heakuã porã va'e oapyaty. Tataomboja, ha'e hi'áry omoĩ heakuã porã va'e. Moisés ha'e Arão reve ikuai oguy nhemboaty oĩaty rokẽ rexei.

<sup>19</sup> Moisés ha'e Arão rovai Coré omboatypa heta va'e kuery oguy nhemboaty oĩaty rokẽ py. Ha'e ramo SENHOR rexakãa ojekuaa xapy'a ijaty va'e ha'e javi pe.

### *Opu'ã rei va'ekue ombopagaague*

<sup>20</sup> Ha'e gui SENHOR aipoe'i Moisés ha'e Arão pe:

<sup>21</sup> — Pejepe'a ke upe va'e kuery mbyte gui, mba'eta are'ŷ'i re amomba vyvoi 'rã — he'i.

<sup>22</sup> Ha'e rami teĩ ha'e kuery mokoïve ma ngova yvy re omovaõ reve aipoe'i:

— Oreruete temimoingo ha'e javi moingoare ha'e hereko reiko va'e, xapy'a rei rã peteĩ'i ava ri ojejavy ramo kova'e kuery ha'e javi rovai 'rã teve ndepoxy?

<sup>23</sup> SENHOR ombovai Moisés pe:

<sup>24</sup> — Aipo're ha'vy upe py ikuai va'e ha'e javi pe: “Pejepe'a ke Coré, Datã ha'e Abirão ikuiai gui”, 're.

<sup>25</sup> Ha'e ramo Moisés opu'ã ju vy oo Datã ha'e Abirão ikuiai py. Hakykue oje'oipa avi Israel kuery mongetaaty kuery.

<sup>26</sup> Ha'e vy aipoe'i ha'e py ijaty va'e pe:

— Ajerure, pejepe'apa na upe va'e avakue heko vai va'e rekoia gui mombyry'i. Pepoko eme guive ha'e kuery mba'e rei-rei re, ha'e kuery ojejavya py peẽ voi penemombaa e'ŷ aguã — he'i.

<sup>27</sup> Ha'e ramo ojepe'apa oje'oivy Coré, Datã ha'e Abirão ikuiai gui. Datã ha'e Abirão ma oẽ vy ngoo rokẽ py oguapy, gua'yxy kuery reve, gua'y kuery, guajy kuery ha'e kyrigue'i ha'e javi reve.

<sup>28</sup> Ha'e gui Moisés aipoe'i:

— Mba'emo oiko ta va'e rupi peikuaa 'rã SENHOR ae xembouague ixupeguia ha'e javi ajapo aguã, ha'e xejegui e'ŷ ae meme ajapoa peikuaa aguã.

<sup>29</sup> Aŷ ma peva'e avakue amboae avakue omanoa rami ri omano ramo, xapy'a rei avakue mboae ojexavaia rami rive ha'e kuery ojexavai ramo ma SENHOR remimbou e'ŷ xee aiko.

<sup>30</sup> Ha'e rami avi xapy'a rei SENHOR mba'emo ndajaexai teri va'e ojapo ramo yvy ojepe'a rã kova'e avakue ho'apa aguã ombo'e rei-rei reve, ha'e yvykua vaikue py ha'e kuery oikove reve oguejy ramo peikuaa 'rã SENHOR mboetea rupi ve'ŷ ikuai va'e memea — he'i.

<sup>31</sup> Ijayvupa'i ramove yvy ha'e kuery ikuiai guy rupi ojepe'a ovy.

<sup>32</sup> Ojepe'a ramo ha'e kuery ho'apa hoo ha'e javi reve, Coré reveguia avakue ikuai va'ekue voi, imba'e rei-rei ha'e javi reve.

<sup>33</sup> Yvykua vaikue py ho'apa oguerekva'ekue ha'e javi reve. Ha'e gui yvy ojao'ipa jevy ramo heta va'e kuery mbyte gui okanhymba.

<sup>34</sup> Ha'e ramo Israel kuery ha'e kuerya katy'i rupi ikuai va'ekue onhamba oje'oivy haxẽmba rã oendu vy, “Tove yvy tanhanemomba heravy eme avi” he'i vy.

<sup>35</sup> SENHOR-a gui tata oẽ ouvy vy ojukapa duzentos e cinqüenta avakue heakuã porã va'e ryru reveguia.

<sup>36</sup> Ha'e gui SENHOR aipoe'i Moisés pe:

<sup>37</sup> — Aipo're sacerdote Arão ra'y Eleazar pe heakuã porã va'e oapyaty ikuai va'e oipe'apa aguã tata hendy va'e mbyte gui, tomoaĩmba tata oĩ va'e mombyrya rupi, mba'eta hyru ma iky'a e'ŷ va'e meme.

<sup>38</sup> Ha'e gui ojejavy okuapy va'e mba'ekue heakuã porã va'e oapyaty peipe'a va'ekue ma pemopererí'i 'rã altar penhovã aguã, SENHOR renonde py oguerupa okuapy rire. Ha'e nunga iky'a e'ŷ va'e ikuai ramo optya 'rã Israel kuery oikuua aguã — he'i.

<sup>39</sup> Ha'e ramo sacerdote Eleazar oipe'a heakuã porã va'e oapyaty overa va'e guigua okaipa va'ekue po gui, ha'e vy omopererí'i altar onhovã aguã,

**40** Israel kuery ha'e nungakue re ima'endu'a okuapy aguã. Mba'eta amboae regua rei Arão guigua e'ŷ va'e nda'evei SENHOR renonde py onhemboja aguã heakuã porã va'e oapy aguã, Coré ha'e hexeveguia kuery re oiko va'ekue ramigua oiko ju e'ŷ aguã, Moisés rupi SENHOR ijayvuague rami vy.

### *Opa marã ju ikuai va'ekue ombopagaague*

**41** Ko'ẽ jevy ma Israel kuery ha'e javi ijayvu rei okuapy Moisés ha'e Arão rovai. Ha'e vy aipoe'i:

— Peẽ kuery tu pejuka ma SENHOR pegua kuery — he'i.

**42** Moisés ha'e Arão rovai re ha'e kuery onhemboatypa vy oguy nhemboaty oĩaty oĩa katy oje'oi ramove arai ou vy ojao'ipa, ha'e SENHOR rexakãa ojekuaa xapy'a.

**43** Moisés ha'e Arão jogueru avi onhemboaty aty renonde py.

**44** Ha'e gui Moisés pe SENHOR ijayvu vy aipoe'i:

**45** — Pejep'e a ke upe va'e kuery ikuiaia gui, amomba vyvoi aguã — he'i ramo mokoïve guenapy'ã re ikuai ngova yvy re omovaẽ peve.

**46** Ha'e ramo Moisés aipoe'i Arão pe:

— Eraa ke nemba'e heakuã porã va'e oapyaty, ha'e emboja tata altar áry gui rejopy va'e. Hi'áry rupi emoĩ avi heakuã porã va'e. Ha'e gui tereo pojava heta va'e kuery ikuiaia rupi ha'e kuery ojejavya rejao'i uka aguã, mba'eta imbopagaarã tuvixa ete va'e ou SENHOR renonde gui. Omboypy ma mba'eaxy vaikue — he'i.

**47** Arão ma Moisés ijayvuague rami vy heakuã porã va'e ryru ogueraa vy onha ov y tekao mbyte rupi, ha'e kuery mbyte rupi mba'eaxy vaikue ou ma ramo. Tata áry rupi heakuã porã va'e omoĩ vy ojao'i uka ov y ha'e kuery ojejavya.

**48** Ha'e rami py omanogue ha'e okuave va'e mbyte oiko. Ha'e rami rã mba'eaxy vaikue opa vyvoi.

**49** Mba'eaxy gui omano va'ekue ma catorze mil e seiscentos ha'e javi vy, Coré káuxa omano va'ekue reve'ŷ vy.

**50** Ha'e gui mba'eaxy vaikue optytu'u rire oguy nhemboaty oĩaty rokẽ py ju Arão ou Moisés oĩa py.

## 17

### *Arão popoka ipotypaague*

**1** SENHOR aipoe'i Moisés pe:

**2** — Ndeayvu ke Israel kuery pe. Ha'e kuery gui rejopy 'rã popoka. Doze popoka rejopy 'rã, peteĩ-teĩ tamoi ro pygua kuery va'e regua yvatekueve gui. Peteĩ-teĩ rery rembopara 'rã imba'e popoka re ae.

**3** Ha'e rã Levi kuery va'e regua popoka re ma rembopara 'rã Arão rery, mba'eta peteĩ-teĩ oo pygua kuery ruvixa oguereko 'rã popoka.

**4** Ha'e va'e ma remoimba 'rã oguy nhemboaty oĩaty py, xeayvu ryru oĩ va'e renonde. Ha'e py xee ae 'rã rovaexi.

**5** Ha'e gui ava xee aiporavo va'e popoka ma ipotypa 'rã. Ha'e rami vy xerenonde gui amombytu'upa 'rã Israel kuery penderovai rupi ijayvu rei okuapya — he'i.

**6** Ha'e rami Israel kuery pe Moisés ijayvu ramo doze yvatekueve ikuai va'e ome'ẽ okuapy opopoka. Peteĩ-teĩ ixupe ome'ẽ guamoĩ ro pygua kuery pegua ae, doze popoka ha'e javi vy. Ha'e kuery popoka mbyte py oĩ avi Arão popoka.

**7** Ha'e kuery popoka ma Moisés ogueroikepa SENHOR renonde py, opy ijayvua oĩaty py ae.

**8** Ko'ẽ jevy oguy Nhanderuete ayvu oĩaty ropy Moisés oike ramo Arão popoka Levi ro pygua kuery pegua henhoimba ra'e. Hi'y tuvixaa rupi ipotypa ma, ha'e vy hi'apa guive.

**9** Ha'e ramo popoka ha'e javi ma SENHOR renonde gui Moisés ogueraapa ju Israel kuery ikuiaia py. Ha'e ramo ha'e kuery oexa vy peteĩ-teĩ ojopy okuapy opopoka ae.

**10** SENHOR aipoe'i Moisés pe:

— Eraa ju ke imoiny Arão popoka xeayvu oīaty renonde py, ha'e py ae oī porā aguā Israel kuery opu'ā rei va'e oīkuua okuapy aguā. Ha'e rami vy 'rāe remokyrirī xerovai rupi ijayvu rei okuapy va'e, omanomba e'ŷ aguā — he'i.

**11** Ha'e ramo Moisés ojapo ha'e rami. SENHOR ojapo ukaa rami vy ae ojapo.

**12** Ha'e gui Moisés pe Israel kuery ijayvu jevy vy aipoe'i okuapy:

— Aŷ ma romanomba ta ma! Rokanhymba 'rā, rokanhymba 'rāe ha'e javive!

**13** Mba'eta SENHOR ombojeroviaaty katy onhemboja va'e rei ma omano 'rā. Xapy'a rei nda'u ore kuery ha'e javive 'rā ri romanomba? — he'i okuapy.

## 18

*Sacerdote kuery mba'emo ojapo ha'e ojopy va'erā re ijayvuague*

**1** Ha'e gui SENHOR aipoe'i Arão pe:

— Ndee, ndera'y kuery ha'e neramoī Levi ramymino kuery ha'e javi re oī 'rā henda iky'a e'ŷ va'e rupi pemba'eapoa py pejejavvy ri vy pepaga aguā. Ha'e rā ndee ha'e ndera'y kuery re anho 'rā oī sacerdote rami pemba'eapoa py pejejavvy vy pepaga aguā.

**2** Ha'e gui oo xeayvu oīaty renonde rupi ndee ha'e ndera'y kuery pemba'eapo pekuapy javé ma Peru avi 'rā peneretarā kuery peneramoī Levi ramymino ikuai va'e, pendea py meme ha'e kuery ou vy penepytyvō okuapy aguā.

**3** Ha'e kuery ma ndereve oo rupi omba'eapo vy ojapo 'rā okuapy ojapo 'rā va'ekue. Ha'e rami teī ha'e kuery nonhembojai 'rāe henda iky'a e'ŷ va'e py mba'emo ikuai va'e re, neī altar re, omanomba e'ŷ aguā, peē kuery voi.

**4** Ndea py ha'e kuery onhemboaty 'rā okuapy ojapopa aguā oguy nhemboaty oīaty rupi ojapo 'rā va'e ha'e javi. Ha'e rā amboae regua ma nda'evei pēa py onhemboja aguā.

**5** Peē kuery anho 'rā pemba'eapo henda iky'a e'ŷ va'e py, altar rupi voi, Israel kuery mbopagaarā oiko jevy e'ŷ aguā.

**6** Peneretarā kuery levita ikuai va'e ma xee aiporavo Israel kuery mbyte gui, ha'e penepytyvōarā ju amboaxa oguy nhemboaty oīaty rupi SENHOR pe omba'eapo okuapy aguā.

**7** Ha'e rā altar rupi, ha'e ajukue okē regua oī va'e ropy rupi ma ndee ha'e ndera'y kuery reve ae 'rā pepena sacerdote rembiaporā oī va'e ha'e javi re. Ha'e va'e ma penembiajorā ae. Peē kuery pe ame'ẽ sacerdote rami pemba'eapo aguā. Ha'e rā amboae regua onhemboja ri vy ma omano 'rā — he'i.

**8** SENHOR aipoe'ive ju Arão pe:

— Ndevy peguarā xee amboaxa xevy ome'ẽ mbyre-mbyre gui mba'emo oipe'aa va'e, Israel kuery mba'emo iky'a e'ŷ va'erā ogueru va'e guigua. Ndevy ha'e ndera'y kuery pe raka'e rā peve guarā amboaxa peē kuery peguarā ae.

**9** Pova'e ae 'rā pejopy mba'emo iky'a e'ŷ ete va'e gui, tata py omoīa e'ŷ va'ekue regua. Xevy ome'ẽ va'erā ha'e kuery ogueru va'e ha'e javi gui mba'emo optyta 'rā ndevy ha'e ndera'y kuery pe iky'a e'ŷ ete va'erā, mba'emo aju guigua mba'e, jejavya regua, ha'e mba'emo omboekovia aguā regua xevy ogueru va'e ha'e javi gui.

**10** Ha'e nunga pe'u 'rā pekuapy henda iky'a e'ŷ etea py ae. Peē kuery va'e regua avakue ma guive rā pe'u 'rā. Pendevy ma iky'a e'ŷ va'e optyta.

**11** Pova'e nunga voi optyta 'rā ndevy guarā: mba'emo Israel kuery oupi vy ombovava reve ome'ẽ va'ekue ha'e javi gui oipe'a pyre, ha'e nunga voi amboaxa ndevy, ndera'y kuery ha'e nderajy kuery pe guive, raka'e rā peve guarā. Ndero pygua kuery ngarua pyguarā ha'eve va'e ri ikuai vy ha'e javi 'rā ha'eve ho'u aguā.

**12** Azeite, vinho ha'e mba'emo ra'yīgue oiko ypy'i va'ekue regua iporāgueve SENHOR pe ha'e kuery ome'ẽ va'ekue ma ndevy peguarā meme amboaxapa.

13 Yvy re onhoty mbyre ha'e javi regua jypy'i hi'a va'e xee SENHOR pe ha'e kuery ogueru va'e ma nemba'e meme 'rã. Ndero pygua kuery ngarua pygurarã ha'eve va'e ri ikuai vy ha'e javi 'rã ho'u.

14 SENHOR peguarã Israel kuery omboaxa va'ekue ha'e javi ma ndevygua meme optya.

15 Ha'e javi regua temimoingo jypy'igua oiko va'ekue xee SENHOR pe ha'e kuery ogueru va'e, avakue e'ŷ vy mymba kuery teñ ndevy guarã meme 'rã optya. Ha'e rami avi avakue jypykue oiko va'ekue ma remboekovia uka 'rã, mymba kuery ha'eve'ŷ va'e regua jypy guare remboekovia uka avi 'rã.

16 Peteñ jaxy'i va'e meme 'rã remboekovia uka. Hekovia repyrã reikuua rami vy ae 'rã ome'ẽ, cinco hatã'i va'e re, henda iky'a e'ŷ va'e py oiporupy regua doze grama va'e rami ae.

17 Ha'e rã vaka, vexa'i, kavara ra'y kuery jypy'igua va'e ma nomboekoviai 'rã, iky'a e'ŷ va'e ramo. Huguykue ma pemboayvipa 'rã altar áry rupi, ha'e rã ikyrakue ma oapy vy ome'ëa 'rã SENHOR pe heakuã porã aguã.

18 Ha'e rã ho'okue ma pendevyguia 'rãe, ipexo oupi vy ombovava reve ome'ẽ mbyre ro'okue, ha'e hi'u oiporu kuaa regua ro'okue ma ha'e rami ae avi.

19 Xee SENHOR peguarã iky'a e'ŷ va'e Israel kuery ome'ẽ va'ekue ha'e javi amboaxa ndevy, ndera'y ha'e nderajy kuery ikuai va'e pe guive, raka'e rã peve guarã. Xee SENHOR renonde py oï riae 'rã xereve guarã ajapo va'ekue juky regua, ndee ha'e neramymino kuery peguarã.\*

20 Ha'e gui SENHOR aipoe'i avi Arão pe:

— Ndee ma ndeyvyrã nderejopyi 'rã neñ ruxã'i voi, heta va'e kuery yvy mbyte neñ peteñ henda py voi noñ 'rã ndeyvyrã. Mba'eta xee ae ma aiko ndevyguia rerekva'erã Israel kuery mbyte — he'i.

### *Dízimo ha'e levita kuery re ijayvuague*

21 — Levi ramymino kuery pe ma xee amboaxa dízimo ome'ẽmby ha'e javi. Ha'e kuery peguarã ae optya oguy nhemboaty oñaty rupi ombo'eapoague repyrã.

22 Ha'e rã Israel kuery ma novaëi 'rã oguy nhemboaty oñaty py, ha'e kuery ojejavyague re opaga aguã oñ ramo omanomba e'ŷ aguã.

23 Levita kuery ae 'rã ombo'eapo oguy nhemboaty oñaty rupi, ha'e kuery re ae 'rã oñ ojejavy vy opaga aguã. Ha'e va'e lei ma raka'e rã peve oñ hekorã, hamymino jevy kuery peguarã. Ha'e rã oyvyrã ma neñ ruxã'i ma voi ndojopyi 'rã Israel kuery mbyte py.

24 Mba'eta Israel kuery dízimo SENHOR pe ome'ẽ okuapy va'e ma amboaxapa levita kuery peguarã. Ha'e kuery pe ma "Israel kuery mbyte rupi pendevyvrã neñ ruxã'i ma voi ndapejopyi 'rã", ha'e rire.

25 Ha'e gui Moisés pe ju SENHOR aipoe'i:

26 — Ndeayvu 'rã levita kuery pe, ha'e vy aipo're: Israel kuery dízimo ome'ẽ va'ekue pendevy guarã amboaxa va'e pejopy vy pemboja'o ju 'rã SENHOR pe. Dízimo ome'ẽ mbyre regua gui dízimo ju 'rã peme'ẽ xevy.

27 Ha'e nunga peme'ẽ va'e ma mba'emo pemoa'yí va'ekue gui, e'ŷ vy vinho onhamiaty gui jypy'igua peme'ẽ 'rãgue py.

28 Ha'e rami vy SENHOR pe ju 'rã peme'ẽ dízimo Israel kuery po gui pejopy va'ekue ha'e javi guigua. Ha'e nunga gui SENHOR pe peme'ẽ va'e ma sacerdote Arão ae oiporu va'erã.

29 Ome'ẽ mbyre pejopy va'e ha'e javi gui peme'ẽ 'rã SENHOR pegua meme. Ha'e nunga iporãgueve ae 'rã peme'ẽ iky'a e'ŷ va'erã.

30 — Aipo'reve ju 'rã levita kuery pe: Dízimo ome'ẽ mbyre regua iporãgueve peme'ẽ ma rire hembyrekue ma pendevy guarã ae optya, mba'emo pemoa'yí va'ekue gui, e'ŷ vy vinho onhamiaty gui dízimo me'ëare pe hembyrekue optyaa rami avi.

\* **18:19** Mba'emo ome'ẽ 'rã juky py omoe'ẽ reve (Levítico 2.13).

<sup>31</sup> Ha'e nunga pe'ua py rei pe'u teĩ ha'eve, peẽ kuery ha'e pendero pygua kuery guive, oguy nhemboaty oĩaty rupi pemba'epoague repy ae ramo.

<sup>32</sup> Ha'e va'e mbyte gui iporãve va'e peme'ẽ aguã peiporavo ramo pendere noĩ 'rã pejejavya. Ha'e rami vy 'rãe mba'emo Israel kuery iky'a e'ŷ va'erã ome'ẽ va'ekue ndopyta jevi ha'eve'ŷ va'e, pemanomba e'ŷ aguã.

## 19

### *Yy joky'a'oa re ijayvuague*

<sup>1</sup> Ha'e gui SENHOR aipoe'ive ju Moisés ha'e Arão pe:

<sup>2</sup> — Pova'e lei rupi SENHOR ojapo uka vy aipoe'i: Aipopeje Israel kuery pe peẽa py togueru peteĩ vaka kunha'i pytã va'e, iporã rei va'e, ivaikue rei e'ŷ va'e, neĩ peteĩgue ma voi canga py omomba'epo e'ŷ teri va'e.

<sup>3</sup> Ha'e va'e ma pemboaxa ju 'rã sacerdote Eleazar pe. Ha'e va'e ju ogueraa 'rã tekaoa gui mombyry'ia py, ha'e vy ojukaa 'rã henonde py.

<sup>4</sup> Ha'e vy huguykue re sacerdote Eleazar okuã omboovy vy omboayvipa 'rã oguy nhemboaty oĩaty renonde katy. Sete-kue 'rã omboayvi.

<sup>5</sup> Ha'e oexaa py oapypaa 'rã vaka kunha'i ha'e javi: ipire, ho'okue, huguy ha'e hepoxikue voi. Ha'e javi 'rã oapypa.

<sup>6</sup> Sacerdote ogueru 'rã peteĩ yvyra yary va'e, hissopo rogue ha'e havijukue pytã va'e, ha'e vy omoimba 'rã tata mbyte vaka kunha'i okaia py.

<sup>7</sup> Ha'e gui ma sacerdote ojoi 'rã oao, ojau 'rã guive yy py. Ha'e rire mae 'rã ojevy ju tekaoa py, teĩ ha'eve'ŷ va'e oiko 'rã ka'aru peve.

<sup>8</sup> Hapyare voi ojoi 'rã oao ha'e ojau yy py. Ha'e voi oiko 'rã ha'eve'ŷ va'e ka'aru peve.

<sup>9</sup> Ha'e gui peteĩ ava ha'eve va'e ma tanhimbu vaka kunha'i rugue omboaty ju vy omoĩ porã 'rã tekaoa gui mombyry'ia py, peteĩ henda iky'a e'ŷ va'e ojapo pyre py. Israel kuery ha'e javi peguarã omoĩ porã 'rã, yy joky'a'oa irürã, jejavya gui joky'a'o aguã.

<sup>10</sup> Ha'e gui vaka kunha'i rugue mono'õare voi ojoi 'rã oao, ha'e ha'eve'ŷ va'e oiko 'rã ka'aru peve. Ha'e va'e ojapo uka pyre ma raka'e rã peve guarã Israel kuery pe, ha'e amboae regua ha'e kuery mbyte rupi ikuai va'e pe guive.

<sup>11</sup> — Amongue omanogue re, ava retekue re ri opoko ramo ma ha'eve'ŷ va'e oiko 'rã sete ára peve.

<sup>12</sup> Ha'e gui mboapy araa py, ha'e sete araa py ju ojeky'a'o uka 'rã ha'e va'e yy py, ha'eve va'e ju oiko aguã. Va'eri mboapy araa py, e'ŷ vy sete araa py ndojeky'a'o ukai ri vy ma ha'eve'ŷ va'e ae 'rã oiko.

<sup>13</sup> Xapy'a rei omanogue re, ava retekue re opoko va'ekue ndojeky'a'o ukai vy ma omongy'apa avi 'rã SENHOR mbojeroviaaty. Ha'e va'e ma oipe'aa 'rã Israel kuery mbyte gui, mba'eta hi'áry rupi yy joky'a'oa nomboayviai rire ha'eve'ŷ va'e ae 'rã oiko. Hexe oĩ teri ha'eve'ŷa.

<sup>14</sup> — Pova'e lei ma amongue ava peteĩ oo py ri omano rã guarã. Ha'e va'e opy oike va'e, ha'e opy ikuai va'ekue ha'e javi 'rã ha'eve'ŷ va'e ikuai sete ára peve.

<sup>15</sup> Mba'emo ryru ojepe'a va'e, imbotya ojokua e'ŷ va'e ma ha'eve'ŷ va'e oiko avi 'rã.

<sup>16</sup> Ha'e javive rei mba'ety rupi ooa rupi amongue kyxé py ojuka pyre re opoko va'ekue ma oiko 'rã ha'eve'ŷ va'e sete ára peve, ha'e'ŷ vy amboae rami omano va'ekue re, amongue ava kãgue re, e'ŷ vy te'õgue rupa re mba'e.

<sup>17</sup> Ha'eve'ŷ va'e oiky'a'oa aguã ma pejopy 'rã vaka kunha'i oapy va'ekue rugue jejavya gui joky'a'oa va'e regua, ha'e gui hugue áry penhoẽ 'rã yy oxyry va'e, peteĩ hyru py.

<sup>18</sup> Peteĩ ava ha'eve va'e ma peteĩ hissopo rogue ogueraa vy omoaký 'rã ha'e va'e yy py. Ha'e va'e py omboayvipa 'rã ha'e va'e oo áry rupi ha'e tembiporu ikuai va'e, ha'e py ikuai va'ekue áry rupi, ha'e gui ojuka pyre, e'ŷ vy omano va'ekue kãgue re opoko va'ekue, hupa áry rupi guive.

**19** Ha'eve'ŷ va'e áry rupi amongue ha'eve va'e omboayvi 'rã mboapy araa py, ha'e sete araa py ju. Sete araa py ma oiky'a'o 'rã. Ha'eve'ŷ va'ekue ojoi 'rã oao, ha'e ojau 'rã yy py. Ka'aru jave ha'eve va'e ju 'rã oiko.

**20** — Ha'e rami teĩ xapy'a rei amongue ha'eve'ŷ va'e ndojeky'a'o ukai ramo oipe'aa 'rã heta va'e kuery mbyte gui, SENHOR pegua henda iky'a e'ŷ va'e omongy'apa rire. Hi'áry rupi yy joky'a'oa nomboayviai rire ha'eve'ŷ va'e ae 'rã oiko.

**21** Ha'e rami aguã ma raka'e rã peve guarã oĩ ha'e kuery ojapo aguã. Yy joky'a'oa mboayviare voi ojoi 'rã oao. Yy joky'a'oa re opoko va'e rei ma oiko 'rã ha'eve'ŷ va'e ka'aru peve.

**22** Opa marãgua re ha'eve'ŷ va'e opokoa va'e rei oiko 'rã ha'eve'ŷ va'e. Hexe opoko va'e voi oiko 'rã ha'eve'ŷ va'e ka'aru peve.

## 20

### *Miriã omanoague*

**1** Ha'e gui Israel kuery ha'e javi ovaẽ okuapy Zim regua tekao e'ŷa py. Jypy'igua jaxy py ma Cades py opytapa okuapy. Ha'e py ma Miriã omano, ha'e pyve ju onhono porãa.

### *Meribá py itaova oĩ va'e Moisés ombovoague*

**2** Ha'e gui yy nda'ipoi ha'e kuery oy'u aguã. Ha'e ramo onhemboaty okuapy Moisés ha'e Arão rovai.

**3** Moisés pe ijayvu atã vy aipoe'i okuapy:

— Ne'exa, oreryvy kuery SENHOR renonde py omanomba jave ore voi romano va'e rire ha'eveve 'rãgue!

**4** Mba'e re tu SENHOR pegua orekuai va'e orererupa raka'e tekao e'ŷa py, romanomba aguã rive, ore kuery ha'e orerymba kuery guive?

**5** Mba'e re tu Egito yvy gui orererupa ri kova'e tekao vaikue py oremovaẽ aguã, neĩ mba'emo ra'yigue noĩa py, neĩ figo'a ma voi, vinho, romã'a, neĩ yy jay'u va'erã voi nda'ipoia py? — he'i okuapy.

**6** Ha'e ramo heta va'e kuery onhemboaty okuapy va'e renonde gui Moisés ha'e Arão oje'oi vy ovaẽ nhemboaty oĩaty rokẽ py. Ha'e vy guenapy'ã re oĩ ngova yvy re omovaẽ peve. Ha'e ramove SENHOR rexakãa ojekuaa xapy'a ha'e kuery pe.

**7** SENHOR aipoe'i Moisés pe:

**8** — Aŷ eru popoka, ha'e emboatypa ju heta va'e kuery, ndee ha'e nderyke'y Arão voi. Ha'e vy ha'e kuery oexapaa py ndeayvu 'rã itaova oĩ va'e pe, ha'e ramo ixugui onheẽ 'rã yy. Ita gui yy onheẽ aguã rami pejapo vy peme'ẽ 'rã heta va'e kuery pe oy'u okuapy aguã, hymba kuery pe guive — he'i.

**9** Ha'e ramo popoka SENHOR renonde py oĩ va'ekue Moisés oguenoẽ, SENHOR aipoe'iague rami vy.

**10** Ha'e gui Moisés ha'e Arão omboatypa heta va'e kuery itaova oĩ va'e rexei. Ha'e vy aipoe'i ha'e kuery pe:

— Pendu ke aŷ, pepu'ã rei va'e kuery. Xapy'a rei nda'u rojapo 'rã kova'e itaova oĩ va'e gui yy onheẽ aguã rami, peẽ kuery pey'u aguã? — he'i vy

**11** Moisés opo py popoka oguerekva'e oupi vy itaova re oinupã mokoigue. Ha'e ramo onheẽ vaipa ete yy. Heta va'e kuery oy'u okuapy, hymba kuery guive.

**12** Ha'e ramo SENHOR aipoe'i Moisés ha'e Arão pe:

— Peẽ kuery ndapejeroviai va'ekue xere, mba'eta Israel kuery oendua py ndapexa ukai xeky'a e'ŷ va'e. Ha'e nunga rupi peẽ ma naperovaẽvei ma 'rã kova'e kuery ijyvyrã ame'ëague py — he'i.

<sup>13</sup> Ha'e va'e yy ma Meribá pygua. Ha'e py ma Israel kuery SENHOR rovai rupi ijayvu atã okuapy ramo ha'e kuery mbyte py SENHOR oexa uka iky'a e'ŷ va'ea.\*

*Edom yvy rupi ha'e kuery oaxa oje'oivy aguã re Moisés ojerure uka tēague*

<sup>14</sup> Cades gui Moisés omondouka guembiguai kuery Edom pygua huvixaa py, ixupe aipoe'i aguã: “Po rami ijayvu nderyvy Israel kuery: Reikuua porã ma ore kuery opa mba'e py orekuai axyague.

<sup>15</sup> Mba'eta oreramoï kuery Egito yvy katy oguejypa raka'e. Ha'e gui ore kuery ju Egito py are vaipa orekuai. Ha'e rã Egito pygua kuery oremoingo axy, ore kuery ha'e oreru kuery voi.

<sup>16</sup> SENHOR pe rojapukai ramo oreayvua oendu vy ojeguigua anjo omondouka Egito gui orepe'apaarã. Ha'e gui aŷ ma Cades py orekuai, tetã ndeyvy rexei'i oĩ va'e py.

<sup>17</sup> Eja ndeyvy rupi roaxa aguã. Ndoroaxai 'rã penemba'ety rupi, neĩ uvaty rupi. Ndoroy'ui avi 'rã ygua ikuai va'e gui. Tape iporâve va'e rupi anho 'rã roguata, ndropiai 'rã jaiporu kuaa katy, neĩ jaiporu kuaa e'ŷa katy ma voi, ndeyvy rupi roaxapa peve”, he'i uka.

<sup>18</sup> Ha'e ramo Edom pygua aipoe'i uka ixupe:

— Peaxa eme ta'vy xeyvy rupi, rovaexĩ vy aa e'ŷ aguã kyxe reve — he'i.

<sup>19</sup> Ha'e gui Israel kuery aipoe'i ju okuapy ixupe:

— Tape jeporuve va'e rupi anho 'rã roje'oi. Xapy'a rei xee ha'e'ŷ vy xerymba kuery nemba'e yy roy'u ri vy apagapa 'rã hepya rami tema. Amboae nunga ma ndaipotai, yvy rupi roaxa aguã e'ŷ vy.

<sup>20</sup> Ombovai:

— Peaxa eme ta'vy — he'i vy Edom kuery oupa nhoguenoiny heta avakue reve ovaexĩ aguã, opo'akaa oexa uka reve.

<sup>21</sup> Ha'e rami vy Edom kuery ndoejai Israel kuery ijyvy rupi oaxa aguã. Ha'e ramo Israel kuery ojepekuavo oje'oivy ha'e va'e gui.

*Números 33,38,39*

<sup>22</sup> Cades gui Israel kuery ha'e javi ikuai va'ekue oje'oi vy oguata oje'oivy Hor yvyty katy.

<sup>23</sup> Hor yvyty re Edom yvy opa'ia py ma SENHOR aipoe'i Moisés ha'e Arão pe:

— Arão nhe'ẽ ma heraa 'rã tamõi kuerya py, novaẽi 'rã Israel kuery yvyrã ame'ẽ va'e py, Meribá py yy onheẽ jave naxenhe'ẽ rendu potai rire.

<sup>25</sup> Eraa ha'vy Arão ha'e ta'y Eleazar, ha'e enoẽ Hor yvyty apyte peve.

<sup>26</sup> Ha'e rire ma emboi Arão ao, ha'e gui ijakue py ta'y Eleazar ju emonhemonde, mba'eta Arão ma oipe'aa 'rã tuu kuery ooague katy, ha'e py ae 'rã omano — he'i.

<sup>27</sup> Moisés ojapo SENHOR ojapo ukaa rami vy. Jugueraa nhoguenoiny Hor yvyty katy heta va'e kuery ha'e javi oexaa gui.

<sup>28</sup> Arão ao Moisés omboi vy ta'y Eleazar ju omonhemonde ijakue py. Ha'e py Arão omano yvyty apyte py ae. Ha'e rã Moisés ha'e Eleazar ma oguejy ju jogueruvy ha'e gui.

<sup>29</sup> Ha'e ramo heta va'e kuery Arão omanoague oikuua ma vy ha'e kuery ha'e javi ojae'o hexe. Trinta ára re ojae'o okuapy.

## 21

*Arade pygua huvixa oity okuapyague*

<sup>1</sup> Ha'e gui ma cananeu regua Arade pygua huvixa Neguebe py oikoa py oendu omombe'ua rã Israel kuery tape rupi ou okuapya Atarim katy. Ha'e rami vy Israel kuery re opu'ã vy amongue ogueraa escravo-rã.

<sup>2</sup> Ha'e ramo Israel kuery SENHOR renonde onhemboayvu vy aipoe'i okuapy:

\* **20:13** Tery Meribá ma “Ayvua ete-ete” 'ea (Êxodo 17.7).

— Orepo py ri ha'e va'e kuery remboaxapa ramo romomba ete 'rā ha'e kuery retā ikuai va'e — he'i.

<sup>3</sup> Israel kuery ijayvua SENHOR oendu vy ipo py omboaxapa cananeu kuery. Ha'e ramo Israel kuery omomba ete, hetā ikuai va'e guive. Ha'e va'e tekao ma oenoī okuapy Horma.\*

### *Mboi ra'angaa overa va'e guigua re ijayvuague*

<sup>4</sup> Ha'e gui Hor yvyty gui oje'oipa okuapy. Ye'ē Pytā va'e yvýry tape oo va'e rupi oje'oi, Edom yvy rovai rupi oaxa aguā. Ha'e rami teī Israel kuery oguataa rupi nda'evei ete ju okuapy.

<sup>5</sup> Ha'e vy ijayvu okuapy Nhanderuete ha'e Moisés rovai rupi. Ha'e vy aipoe'i:

— Mba'erā tu Egito yvy gui orererupa ri, kova'e tekao e'ŷa py romanomba aguā ty'y, mbojape neī yy ma voi nda'ipoia py? Mba'eta orenhe'ē py voi orekane'ōmba ma kova'e nunga mbojape ovare e'ŷ va'e anho ro'u vy — he'i.

<sup>6</sup> Ha'e ramo ha'e kuery mbyte rupi SENHOR ombou mboi inharōve va'e, ixu'uphaarā. Ha'e ramo heta omano Israel kuery va'e regua.

<sup>7</sup> Moisés-a py ha'e kuery oupa vy aipoe'i okuapy:

— Rojejavypa ra'e, mba'eta SENHOR rovai ha'e nderovai rupi oreayvu. Ejerure ha'vy SENHOR pe ore kuerya gui oipe'apa aguā mboi — he'i ramo Moisés ojerure ha'e kuery re.

<sup>8</sup> Ha'e gui SENHOR aipoe'i Moisés pe:

— Ejapo ke peteī mboi inharōve va'e ra'angaa, ha'e eupi imoiny yvyra po'i apy re. Ha'e gui ha'e javive oixu'u va'ekue ha'e nunga re oma'ē vy oïkove 'rā — he'i.

<sup>9</sup> Ha'e ramo Moisés ojapo peteī mboi ra'angaa overa va'e gui, ha'e vy oupi imoiny peteī yvyra po'i apy re. Ha'e gui amongue mboi oixu'u ramo overa va'e guigua re oma'ē va'e okuera kuerei.\*

### *Israel kuery oguata oje'oivyague*

<sup>10</sup> Ha'e gui Israel kuery oje'oipa vy Obote py ju ikuai.

<sup>11</sup> Ha'e gui Obote gui oje'oi vy Ijé-Abarim py ju opyta okuapy, tekao e'ŷa Moabe rexei oī va'e py, kuaray oua katy.

<sup>12</sup> Ha'e gui oje'oi vy Zerede yvy'ā guy py ju opyta.

<sup>13</sup> Oje'oi jevy vy Arnom yakā rovai ju opyta okuapy, tekao e'ŷa amorreuu kuery rekooa peve oo va'e py. Mba'eta Arnom yakā ma Moabe yvy apy'i rupi oī, Moabe ha'e amorreuu kuery rekooa mbyte py.

<sup>14</sup> Ha'e nunga rupi ae SENHOR joe opu'āa regua oīa kuaxia re ipara oiny:

“Vaebe tekao Sufa re oī va'e,  
ha'e Arnom yakā yvýry yvy'ā guy ikuai va'e rupi,

<sup>15</sup> ha'e gui yvyugua gui jaguejya rupi  
jaguejyve 'rā Ar tekao katy,  
Moabe tekao apy'ia py nhavaēa peve.”

<sup>16</sup> Ha'e gui ma Beer katy ju oguata oje'oivy. Ha'e va'e ygua ma Moisés pe SENHOR aipoe'iague: “Emboatypa heta va'e kuery, ha'e ramo ame'ē 'rā yy”, he'iague va'e.

<sup>17</sup> Ha'e ramo pova'e mboraei rupi Israel kuery oporai okuapy:

— Tovu yy! Perovy'a ke mboraei rupi!

<sup>18</sup> Yguarā huvixa kuery ojo'o va'ekue,  
heta va'e kuery regua yvatekueve ojo'o va'ekue  
yvyra py rive, popoka oguereco va'e py ae — he'i okuapy.

Ha'e gui ma tekao e'ŷa gui Matana katy ju oguata oje'oivy.

<sup>19</sup> Matana gui ma Naaliel katy ju oje'oi, ha'e Naaliel gui ma Bamote katy,

\* <sup>21:3</sup> Tery Horma ma “Ombovaipaague” 'ea. \* <sup>21:9</sup> João 3.14-15

<sup>20</sup> ha'e Bamote gui ma yvy'ã guy Moabe yvy oĩ va'e katy ju oje'oi, Pisga yvyty áry peve. Ha'e va'e apyte gui nhama'ẽ 'rã teko a e'ýa katy.

*Deuteronomio 2.26-37*

<sup>21</sup> Ha'e gui ma Seom amorreu kuery ruvixaa py Israel kuery omondouka ayvu reraarã. Ha'e vy aipoe'i:

<sup>22</sup> — Oremboaxa uka ke ndeyvy rupi. Ndoropiai 'rã mba'ety ikuai va'e rupi, neĩ uvaty rupi. Ygua gui voi ndoroy'ui 'rã. Roguata 'rã roje'oivy tape iporãve rupi anho, ndeyvy rupi roaxapa peve — he'i uka.

<sup>23</sup> Ha'e rami teĩ Seom nomboaxa ukai Israel kuery oyvy rupi. Ha'e rami 'rãgue py ojeupegua kuery omboatypa vy oje'oi Israel kuery ovaexí aguã teko a e'ýa py. Jasa py ovaãa py opu'ã okuapy Israel kuery rovai.

<sup>24</sup> Teĩ Israel kuery ma kyxe py ojuka reta vy ipo'aka ijyvy re, Arnom yakã guive Jaboque peve, Amom ramymino kuery reko a peve. Ha'e va'e teko a apy'i rupi ikorapa va'e.

<sup>25</sup> Ha'e rami vy Israel kuery ojopypa amorreu kuery retã ikuai va'ekue, ha'e va'e py ju ikuai, Hesbom py ha'e ijyvýry teko a ikuai va'e ha'e javi rupi.

<sup>26</sup> Mba'eta Hesbom tetã ma amorreu kuery ruvixa Seom openaaty ae. Ha'e va'e ma Moabe pygua ruvixa yma guare re opu'ã vy ijyvy ojopypa va'ekue Arnom yakã peve,

<sup>27</sup> ijayvu kuaa va'e kuery aipoe'ia rami:

“Peju ke Hesbom tetã py! Pejapo ju,  
pemoatyrõmba ju Seom opena atyrã.

<sup>28</sup> Mba'eta Hesbom gui tata oẽ,

tataendy nhomombaarã oẽ Seom pegua tetã gui,  
ha'e vy omomba Moabe kuery reko a Ar,  
ha'e Arnom yvýry yvy'ã re yvatekueve ikuai va'ekue ha'e javive.

<sup>29</sup> Moabe kuery, nda'evei ete 'rã pêvy!

Quemos pe pendekuai va'e, okanhgue ma peiko.  
Mba'eta ojapo pendera'y kuery onhamba aguã rami,  
ha'e penderajy kuery escravo-rã ogueraapa aguã rami,  
amorreu kuery ruvixa Seom peguarã ae.

<sup>30</sup> Ore kuery ma roitypa ma.

Okanhymba ete Hesbom guive Dibom peve.  
Rombovaipa ma Nofa peve,  
tata py roapypa Medeba peve.”

*Deuteronomio 3.1-11*

<sup>31</sup> Ha'e rami vy amorreu kuery yvy re ju Israel kuery heko a.

<sup>32</sup> Ha'e va'e rire Jazer tetã re ju Moisés oexa pota uka ma ramo Israel kuery ipo'aka heko a ijyvýry ikuai va'e ha'e javi reve, amorreu kuery ha'e py ikuai va'ekue oipe'apa vy.

<sup>33</sup> Ha'e gui ojevypa ju vy oje'oi Basã tetã katy tape oo va'e rupi. Ha'e ramo Basã pygua huvixa Ogue va'e ou ha'e kuery rovai, ojeupegua kuery ha'e javi reve. Ha'e vy joe opu'ã okuapy Edrei py.

<sup>34</sup> Ha'e gui SENHOR aipoe'i Moisés pe:

— Ekyje eme ha'e kuery gui, mba'eta xee amboaxa ma ndepo py, huvixa ha'e ixupegua kuery ha'e javi, ijyvy voi. Ha'e kuery re pejapo 'rã amorreu kuery ruvixa Seom Hesbom pygua re pejapoague rami ae — he'i.

<sup>35</sup> Ha'e ramo ojuka reta okuapy, huvixa, ta'y kuery ha'e ixupegua kuery ha'e javi. Ha'e kuery va'e regua neĩ peteñ'i ma voi ndoo jepai. Ijyvy re ipo'aka avi omba'erã.

<sup>1</sup> Israel kuery ha'e gui oje'oipa vy opyta ju okuapy Moabe yvy rupi Jordão rovaigua re, Jericó tetā rexei.

<sup>2</sup> Ha'e gui ma Zipor ra'y Balaque oexapa va'ekue Israel kuery amorreu kuery re ojapoague.\*

<sup>3</sup> Ha'e rami vy ha'e kuery gui Moabe kuery okyje vaipa okuapy, heta raxa ramo. Nda'evei ete ikuai Israel kuery ou rã oexa vy.

<sup>4</sup> Ha'e va'e jave ma Moabe pygua huvixa ma Zipor ra'y Balaque ae.

Ha'e rami vy Moabe pygua huvixa aipoe'i Midiā pygua kuery yvatekueve pe:

— Aŷ ma ha'e kuery heta ete vy omomba 'rã orevvýry ikuai va'e, vaka nhuū mba'ety rupi oĩ va'e ho'upaa rami avi — he'i.

<sup>5</sup> Ha'e rami vy guembiguai kuery omondouka Beor ra'y Balaão oenoĩ aguã. Ha'e va'e ma Eufrates yakã yvýry oiko Petor py, hetarã kuery ikuiaia py ae. Ha'e va'e pe aipoe'i uka:

— Aŷ ma peteĩ regua Egito yvy gui ou vy ojao'ipa ma okuapy yvy ha'e javi. Ha'e kuery ma xerekoa renonde katy ae ju ikuai.

<sup>6</sup> Ha'e gui aŷ ajerure ndevy: Eju na ha'e kuery re ndeayvu vai aguã, xegui ipo'akapave ramo. Xapy'a rei rã ha'e kuery va'e regua ajuka vy aipe'apa 'rã xeyvy gui, mba'eta xee aikuuaa reroayvu porã va'ekue rei ayvu porãmbys ae 'rã ikuai, ha'e amongue re ndeayvu vai rire ma ayvu vaipy 'rã oiko — he'i uka.

<sup>7</sup> Ha'e ramo Moabe ha'e Midiā pygua yvatekueve oje'oi. Ngupive ogueraa avi ijayvu viaia omboekovia aguã. Balaão-a py ovaẽmba ma vy ixupe omombe'u okuapy Balaque ijayvuague ha'e javi.

<sup>8</sup> Ha'e ramo Balaão aipoe'i ha'e kuery pe:

— Pepyta ke apy kova'e pyávy, ha'e gui aikuuaa uka 'rã amboavaia, SENHOR ijayvua rami vy ae — he'i ramo Balaão ro py Moabe pygua yvatekueve opyta okuapy.

<sup>9</sup> Ha'e gui Balaão-a py Nhanderuete ojekuaa vy aipoe'i:

— Marã ramigua tu kova'e avakue ndero py ikuai va'e?

<sup>10</sup> Balaão ombovai Nhanderuete pe:

— Ha'e kuery ma Zipor ra'y Balaque Moabe pygua huvixa va'e ombou va'ekue xereve ijayvu aguã. Ha'e vy aipoe'i xevy:

<sup>11</sup> “Egito yvy gui ou va'ekue regua ojao'ipa ma okuapy yvy ha'e javi. Aŷ ma eju na ha'e kuery re ndeayvu vai aguã. Xapy'a rei ha'e kuery re xepo'aka nho 'rã xeyvy gui aipe'apa aguã rami”, he'i va'ekue xevy.

<sup>12</sup> Ha'e ramo Nhanderuete aipoe'i Balaão pe:

— Tereo eme ha'e kuery reve, ndeayvu vai eme guive heta va'e kuery re. Mba'eta ha'e kuery ma ijayvu porãmbys ae ikuai — he'i.

<sup>13</sup> Ha'e gui ko'ëgue Balaão opu'ã vy aipoe'i Balaque pegua yvatekueve pe:

— Tapeo ju pendeyvy katy, mba'eta SENHOR naxemondoukai penderupive — he'i.

<sup>14</sup> Ha'e ramo Moabe pygua yvatekueve opu'ã vy oje'oi ju Balaque-a py. Ha'e vy aipoe'i okuapy:

— Balaão rima ndouxei orereve — he'i okuapy.

<sup>15</sup> Ha'e gui yvatekueve mboae ju Balaque omondouka, jypygua kuery gui hetave ha'e omboetevepy va'e.

<sup>16</sup> Ha'e va'e kuery ma Balaão-a py ovaẽ vy aipoe'i okuapy:

— Po rami ma Zipor ra'y Balaque ijayvu: “Ajerure ndevy: Emboare eme xea py reju aguã,

<sup>17</sup> mba'eta anhetē ete rojapo 'rã omboetepy. Ndeayvua ha'e javi tema 'rã ajapo. Ha'e gui ajerure ndevy: Eju ke, ndeayvu vai kova'e kuery re”, he'i uka va'ekue ndevy.

<sup>18</sup> Ha'e ramo Balaque pegua yvatekueve pe Balaão ombovai:

---

\* **22:2** Balaque ma Moabe pygua huvixave.

— Xevy pe Balaque ngoo prata ha'e ouro tynyē reve ome'ẽmba teĩ xee mba'eve ndajapoi 'rã SENHOR Xeruete ojapo uka va'e e'ŷ vy, mba'emo kyr̄i va'e e'ŷ vy tuvixa va'e teĩ.

<sup>19</sup> Ha'e rami avi aŷ ajerure kova'e pyávy peẽ kuery pepyta aguã apy, aikuua aguã xapy'a rei xevy SENHOR omombe'uve rã — he'i.

<sup>20</sup> Pyávy Balaão-a py SENHOR ojekuua vy aipoe'i ixupe:

— Ha'e va'e avakue ndereraaxe vy ou ramo epu'ã, tereo ha'e kuery reve. Ha'e rami teĩ rejapo 'rã xeayvua anho.<sup>†</sup>

### *SENHOR-a guigua anjo ha'e Balaão rymba mburika'i ojoko-jokoague*

<sup>21</sup> Ko'ẽmba jave Balaão opu'ã vy ombokupe áryguapa guymba mburika'i, ha'e vy oo Moabe pygua yvatekueve reve.

<sup>22</sup> Ha'e oo ramo Nhanderuete poxya hendy. Ha'e rami vy SENHOR-a guigua anjo opyta tape henonde oo aguã py ojoko aguã. Ha'e rami jave Balaão oguata ov ymburika'i áry. Hexeve oo avi mokoñ hembiguai.

<sup>23</sup> Ha'e gui henda mburika'i oexa SENHOR-a guigua anjo tape py opyta ho'amy rã, opo py okyxe hyru gui oekue oguereko reve. Ha'e ramo mburika'i ma tape gui ojepekuavo ov ym b'a'ety rupi ju oo oiny. Ha'e ramo Balaão oinupã mburika'i tape rupi ae ju ojevy aguã.

<sup>24</sup> Ha'e gui ma SENHOR-a guigua anjo ma peteĩ henda uvaty mbyte rupi hi'aĩ, kora joavaive rupi oĩ va'e py.

<sup>25</sup> Mburika'i ma SENHOR-a guigua anjo hi'aĩ rã oexa vy kora re ojekyty vy oubiri heravy Balaão retyma. Ha'e ramo Balaão ojeaive ju.

<sup>26</sup> Ha'e gui henonde katy SENHOR-a guigua anjo oove vy peteĩ henda ipo'i'ivea py ju hi'aĩ, ojepekuavo aguã ha'eve'ŷa py oiporu kuaa katy, neĩ oiporu kuaa e'ŷa katy ma voi.

<sup>27</sup> Ha'e gui mburika'i ma SENHOR-a guigua anjo hi'aĩ rã oexa vy ho'a oupy Balaão guy rupi. Ha'e ramo Balaão ivai ete vy oinupãmba mburika'i yvyla py.

<sup>28</sup> Ha'e ramo SENHOR ojapo mburika'i ijayvu aguã rami. Ha'e vy aipoe'i Balaão pe:

— Mba'e tu xee ajapo ndevy, mboapykue ma xenupãmba aguã?

<sup>29</sup> Balaão ombovai mburika'i pe:

— Mba'eta xeavyky rei. Xepo py kyxe areko va'e rire aŷ'i ma voi rojuka 'rãgue — he'i.

<sup>30</sup> Ha'e ramo mburika'i ijayvu Balaão pe:

— Xapy'a rei nda'u xee nerymba mburika'i e'ŷ ri aiko, xe'áry e'ŷ nda'u reĩ, reikoa pukukue re aŷ peve? Xapy'a rei nda'u nami ae pa ndevy ajapo jepi?

Ombovai vy

— Any ri — he'i.

<sup>31</sup> Ha'e gui Balaão rexha SENHOR oipe'a ramo oexa SENHOR-a guigua anjo tape py hi'aĩ rã, kyxe hyru gui oekue opo py oguereko reve. Ha'e ramo oakã omboguejy vy ngova omovaõ yvyl re.

<sup>32</sup> SENHOR-a guigua anjo aipoe'i ixupe:

— Mba'e re tu mboapykue ma reinupãmba mburika'i? Ne'exa, xee ma nderovai guarã aju, mba'eta xerenonde rupi ha'eve'ŷa ramo reiko.

<sup>33</sup> Mburika'i ma xerexa vy ae mboapykue ma ojepekuavo xegui. Anhetẽ ete ha'e rami e'ŷ va'e rire xee rojuka ma 'rãgue, ha'e rã nerymba ma aeja 'rãgue oikove reve — he'i.

<sup>34</sup> SENHOR-a guigua anjo pe Balaão ombovai:

— Ajejavý, mba'eta ndaikuuaai kova'e tape py xejokoarã ne'aña. Ha'e rã xapy'a rei rã ha'eve'ŷ va'e ri reikuaa ramo ma ajevy ju 'rã.

<sup>35</sup> SENHOR-a guigua anjo ombovai:

<sup>†</sup> **22:20** Nhanderuete nomondoukaxeit teĩ omondouka nho, mba'eta oikuua vy Balaão ooxe etea (versículo 12). Ha'e gui Balaão ma oikuua ma voi Nhanderuete nomondoukaxeia, teĩ oo nho Nhanderuete oipotaa rami e'ŷ.

— Tereo tema peva'e avakue reve. Ha'e rami teñ xeayvua rami anho 'rã ndeayvu — he'i ramo Balaão oo ju oiny Balaque pegua yvatekueve reve.

<sup>36</sup> Ha'e gui Balaão ovaẽ ta maa Balaque oendu vy oẽ ovaexi aguã peteñ tetã Moabe regua Arnom yakã ovaëa peve, oyvy apy peve ete.

<sup>37</sup> Ha'e rami vy Balaque oporandu Balaão pe:

— Xee namondoukai ri ty'y xerembiguai kuery nerenoi aguã? Mba'e re tu ndereju voi ri xea py? Xee nda'u nanemboete kuaai ri?

<sup>38</sup> Balaão ombovai Balaque pe:

— Apy ma xee aï nerondenon py. Xapy'a rei nda'u xee ju aÿ ha'eve 'rã xeayvu aguã mba'emo re rei? Ha'e rami 'rãgue py ayvu Nhanderuete xevy omombe'u uka va'e rupi anho 'rã xeayvu — he'i.

<sup>39</sup> Ha'e gui Balaque reve Balaão oo vy ovaë okuapy Quiriate-Huzote py.

<sup>40</sup> Ha'e ramo Balaque ma vaka ha'e vexa'i ojuka uka vy ho'okue omondouka Balaão pe ha'e hexeve yvatekueve ikuai va'e pe.

<sup>41</sup> Ko'ëgue Balaque Balaão ogueraa vy oguenoë heravy Bamote-Baal apyte peve. Ha'e va'e gui ma Balaão oexa Israel kuery regua ha'e'i pyve ikuiaia.

## 23

### *Balaão jypy'i Israel kuery ogueroayvu porãague*

<sup>1</sup> Ha'e ramo Balaão aipoe'i Balaque pe:

— Ejapo na sete altar xevy, ha'e vy ejuka sete toro ra'y ha'e sete vexa'i — he'i ramo

<sup>2</sup> Balaque ojapo Balaão ijayvague. Peteñ-teñ altar áry Balaque ha'e Balaão oapy peteñ toro ra'y ha'e peteñ vexa'i.

<sup>3</sup> Ha'e gui Balaão aipoe'ive ju Balaque pe:

— Ndee ma epyta apy altar áry reapy va'ekue yvýry, ha'e rã xee ma aa 'rã mombyry'i. Xapy'a rei SENHOR xererovaexi vy ou ramo ma aju vy ndevy amombe'upa 'rã oexa uka va'e rei — he'i vy oẽ ov yvety áry.

<sup>4</sup> Ha'e gui Balaão reve Nhanderuete nhovaexi ouvy ramo aipoe'i ixupe:

— Xee ma sete altar ma ajapo ndevy, ha'e gui peteñ-teñ áry apy ma peteñ toro ra'y ha'e peteñ vexa'i — he'i.

<sup>5</sup> Ha'e ramo SENHOR ome'ë ayvu Balaão omombe'u va'erã. Ha'e vy aipoe'i:

— Tereo ju Balaque-a py. Ha'e vy xeayvua rami ae 'rã ndeayvu — he'i.

<sup>6</sup> Ha'e katy ju Balaão oo vy altar ikuiaia py ovaë rã altar yvýry teri Balaque hi'aï, Moabe pygua yvatekueve ha'e javi reve.

<sup>7</sup> Ha'e ramo ayvu omombe'u vy aipoe'i:

— Balaque ma xereru ruka Arã gui,

Moabe pygua huvixa xerenoi kuaray ou katy yvety oï va'e gui.

“Eju na, Jacó ramymino kuery re ndeayvu vai aguã,

eju ndeayvu rei Israel kuery re”, he'i uka.

<sup>8</sup> Ha'e rami avi mba'exa tu xeayvu vai ta Nhanderuete nda'ijayvu vaia kuery re?

Mba'exa tu xeayvu rei ta SENHOR nda'ijayvu reia kuery re?

<sup>9</sup> Mba'eta xee ma yvety áry gui aexa Israel kuery,

yvy'ã xe'aïa gui ama'ë ha'amy ha'e kuery re.

Ha'e vy xee aexa rã ha'e kuery ae'i ikuai va'e regua,

ha'e kuery pe “Yvy regua” nda'eai 'rã.

<sup>10</sup> Mava'e ha'vy oipapa kuaa ta Jacó ramymino kuery yvy ku'i rami heta va'e,

mava'e oipapa kuaa ta Israel kuery heta va'e apy re'i voi?

Xee ma tamano heko porã va'e kuery rami,

ha'e kuery opaa rami avi tapa — he'i.

<sup>11</sup> Ha'e ramo Balaque aipoe'i Balaão pe:

— Mba'e tu rejapo xere? Xee ma roenoĩ xerovaigua kuery re ndeayvu vai aguã, va'eri ndee ma reroayvu porã.

<sup>12</sup> Ha'e rã ombovai:

— Xapy'a rei nda'u ayvu SENHOR omombe'u uka va'ekue rupi e'ŷ 'rã ri xeayvu? — he'i.

### *Balaão mokoĩguea Israel kuery ogueroayvu porãague*

<sup>13</sup> Ha'e ramo Balaque aipoe'i ixupe:

— Xee ajerure ndevy: Eju, amboae katy ju jaa xerupive, ha'e kuery rexâ aguã py. Ha'e'i rupive ikuai va'e anho 'rã rexâ, ha'e javi e'ŷ. Ha'e vy ndeayvu vai 'rã ha'e gui — he'i vy

<sup>14</sup> Zofim regua nhuũndy rupi ju ogueraa, Pisga yvyty apyte áry. Ha'e py ma sete altar ju ojapo, ha'e peteĩ-teĩ áry oapy peteĩ toro ra'y ha'e peteĩ vexa'i.

<sup>15</sup> Ha'e ramo Balaão aipoe'i Balaque pe:

— Epyta ke apy altar áry reapy va'ekue yvýry, ha'e rã xee ma aa ta pe'i py SENHOR reve aikuua pota aguã — he'i.

<sup>16</sup> Balaão-a py SENHOR ojekuaa ju vy ixupe ome'ẽ ayvu omombe'u va'erã. Ha'e vy aipoe'i:

— Tereo ju Balaque-a py. Xeayvua rami 'rã ndeayvu.

<sup>17</sup> Ha'e gui Balaque oĩa py ojevy rã ho'ame teri altar yvýry. Hexeve ikuai avi Moabe pygua yvatekueve. Ha'e vy oporandu:

— Mba'e he'i SENHOR?

<sup>18</sup> Ha'e ramo Balaão ayvu omombe'u vy aipoe'i:

— Epu'ã ke Balaque, rendu aguã.

Ndee Zipor ra'y, ejapyxaka xeayvu re.

<sup>19</sup> Nhanderuete ma ava e'ŷ oiko ijapu aguã,

ava ra'y e'ŷ guive oiko nda'evei nho ju aguã.

Xapy'a rei nda'u ha'e nome'ẽi 'rã ri ome'ẽ 'rã va'ekue?

Ha'e ijayvu rire ndojapo'i 'rã ri nda'u ha'e rami he'iague?

<sup>20</sup> Ma'ẽ, ha'e ijayvu ha'e kuery aroayvu porã aguã re.

Ha'e gui ha'e ogueroayvu porãague ma xee nda'evei amboaxa rive aguã.

<sup>21</sup> Mba'eta Jacó kuery re ha'e ndoexai mba'emo vai,

nonhembopy'ai guive Israel kuery omoingo axy aguã.

Ha'e kuery reve SENHOR tuuete oiko,

ha'e kuery mbyte gui onhendu nguvixave oguerovy'a okuapya regua.

<sup>22</sup> Egito yvy gui Nhanderuete ogueraapa raka'e,

ha'e kuery ma toro ka'aguy regua rami 'rã imbaraete.

<sup>23</sup> Mba'eta Jacó kuery rovai rupi mba'evykyia nda'eve ranhei 'rã,

Israel kuery rovai mba'ekuaa ndovarei 'rã.

Aŷ ma Jacó ha'e Israel kuery re aipo'ea 'rã:

“Mba'emo iporã ete va'e ha'e kuery pe Nhanderuete ojapo!”

<sup>24</sup> Ma'ẽ, ha'e kuery opu'ã 'rã guary kunha rami,

guary rami ete 'rã opu'ã.

Mba'eta nonhenoi 'rã guembia ho'upa e'ŷa ja,  
ojuka va'ekue ruguy voi oy'u va'e — he'i.

<sup>25</sup> Ha'e ramo Balaque aipoe'i Balaão pe:

— Ndeayvu vai eme ha'e kuery re, neĩ eroayvu porã eme guive.

<sup>26</sup> Ha'e rã Balaão ombovai vy aipoe'i Balaque pe:

— Aipo nda'eí ri ty'y: “SENHOR ijayvua ha'e javi ma xee ajapo 'rãe”, nda'eí ae ty'y ndevy?

<sup>27</sup> Ha'e rami rã Balaque aipoe'ive ju Balaão pe:

— Neĩ ke eju, amboae katy jevy ta rogueraa. Xapy'a rei ma ha'e py Nhanderuete ojou porã 'rã ndeayvu vai aguã — he'i.

<sup>28</sup> Ha'e rami vy Peor yvyty apyte peve ju Balaque ogueraa Balaão. Ha'e va'e gui ma tekoaa e'ŷa ha'e javi ojekuaa 'rã.

<sup>29</sup> Ha'e gui Balaão aipoe'i Balaque pe:

— Apy voi ke ejapo xevy sete altar, ha'e eapy ju sete toro ra'y ha'e sete vixa'i — he'i.

<sup>30</sup> Balaão ijayvuague rami vy Balaque ojapo vy peteĩ-teĩ altar áry oapy peteĩ toro ra'y ha'e peteĩ vixa'i.

## 24

### *Balaão mboapykuea Israel kuery ogueroayvu porãague*

<sup>1</sup> Ha'e gui Balaão oikuua ae ma SENHOR Israel kuery ogueroayvu porãxeia. Ha'e rami vy ha'ekue rami e'ŷ ndooi ranhe imba'ekuaa aguã. Ha'e rami 'rãgue py tekoaa e'ŷa katy oma'ẽ ho'amy.

<sup>2</sup> Balaão oma'ẽ vy oexa Israel kuery peteĩ-teĩ regua ikuai va'e. Ha'e gui hexe ou Nhanderuete-a guigua Nhe'ẽ.

<sup>3</sup> Ijayvu vy aipoe'i:

— Po rami ma Beor ra'y Balaão ijayvu,  
ava mba'emo oexa porã va'e ayvu,

<sup>4</sup> Nhanderuete hayvu oendu va'e ayvu ae.

Mba'eta Ipo'akapa va'e oexa uka va'e aexa vy  
xerenap'yã re aĩ reve ama'ẽ porã va'e.

<sup>5</sup> Jacó kuery, oo pendekuaia va'e ma iporã va'e meme!

Israel kuery, penderekaoa ma iporã ete!

<sup>6</sup> Yvy'ãmbe reia rupi ojekuaa,

yvoty ty yakã yvýry onhotõy mbyre rami,  
yvyra sândalo rembypy SENHOR onhotõy va'ekue rami,  
yary yy yvýry rupi hi'aĩ va'e rami.

<sup>7</sup> Ha'e kuery yryru py ndoatai 'rã yy,

mba'emo ra'yõ onhotõy rupi voi inhakõy porã riae 'rã.  
Ha'e kuery ruvixave ma Agague gui 'rã yvateve,  
ipo'akaa voi omboetevepy.

<sup>8</sup> Israel kuery Egito yvy gui Nhanderuete ogueru va'ekue ma

toro ka'aguy regua rami imbaraete va'e.

Ha'e vy omomba 'rã ngovaigua kuery yvy regua.

Omopẽmba 'rã ikãgue.

Ngu'y py onhyvõmba 'rã.

<sup>9</sup> Ha'e kuery oguapy vy onheno 'rã guary rami,

ha'e guary kunha rami. Mava'e 'rã tu omomyi?

Ovy'a ete 'rã ha'e kuery reroayvu porãare,

ha'e rã ha'e kuery re ijayvu vai va'ekue ma ayvu vaipy ikuai — he'i.

<sup>10</sup> Ha'e ramo Balaão pe Balaque ipoxy raxa. Ha'e vy aipoe'i Balaão pe:

— Xee ma xerovaigua kuery pe ndeayvu vai aguã roenoĩ teĩ mboapykue ma reroayvu porã.

<sup>11</sup> Ha'e nunga rupi aŷ ma tereo ju ndero katy. Xee ma “Ndevy ame'ẽ 'rã mba'emo porã” ha'e va'ekue ri aŷ SENHOR ojapo ma mba'eve rejopy e'ŷ aguã rami — he'i.

<sup>12</sup> Ha'e ramo Balaão ju aipoe'i Balaque pe:

— Ha'e rami avi nerembiguai kuery xea py remondouka va'ekue pe xee aipo nda'eit y'y:

<sup>13</sup> “Xapy'a rei Balaque ngoo ouro ha'e prata tynyẽ reve xevy ome'ẽ teĩ xee ma mba'eve ndajapoi 'rã SENHOR ojapo uka va'e e'ŷ vy, aroayvu porã aguã, e'ŷ vy xeayvu vai aguã teĩ. SENHOR ijayvuague rupi ae 'rã xee xeayvu”, nda'eit ae ri ty'y?

<sup>14</sup> Ha'e gui aŷ xee aa ju ta xeretarã kuery rekaoa katy. Ha'e rami teĩ enhemboja ranhe, ndevy amombe'u ta raka'eve rã ndevyguia kuery re kova'e kuery ojapo 'rãa – he'i.

*Jaxy-tata Jacó guigua re Balaão ijayvu ma voiague*

- <sup>15</sup> Ha'e vy Balaão ayvu omombe'u vy aipoe'i:  
– Po rami ma Beor ra'y Balaão ijayvu,  
ava mba'emo oexa porã va'e ayvu,
- <sup>16</sup> Nhanderuete hayvu oendu va'e ayvu ae.  
Mba'eta Yvateve ete va'e oikuaa uka va'e aikuaa va'e,  
Ipo'akapa va'e oexa uka va'e aexa va'e,  
ha'e xerenapy'ã re aĩ reve ama'ẽ porã va'e.
- <sup>17</sup> Ha'e gui peteĩ aexa teĩ aŷ'i oiko va'erã e'ŷ guive,  
aexa teĩ ovaẽ rai'i va'erã e'ŷ.  
Mba'eta peteĩ jaxy-tata oiko 'rã Jacó ramymino,  
Israel kuery mbyte gui peteĩ ou 'rã po pygua revegua,  
Moabe kuery akã rupi omopẽmba va'erã,  
ha'e Sete ramymino kuery mombaarã.
- <sup>18</sup> Mba'eta Edom yvy re ipo'aka 'rã,  
ngovaigua kuery Seir yvy re voi ipo'aka 'rã.  
Ha'e rã Israel kuery ma imbaraetea rupi 'rã ikuai.
- <sup>19</sup> Mba'eta Jacó kuery mbyte gui oiko 'rã joe ipo'aka va'erã.  
Ha'e va'e omomba 'rã peneretã rupi pekuave va'ekue-'ekue – he'i.
- <sup>20</sup> Ha'e gui Balaão amalequita kuery ju oexa vy ayvu omombe'uve. Ha'e vy aipoe'i:  
– Amalequita kuery ma yvy regua kuery gui penderetave va'eri  
opaa py ma penemokanhymbaa 'rã – he'i.
- <sup>21</sup> Oexa avi Queneu kuery. Ha'e vy ayvu omombe'u vy aipoe'i:  
– Penderekoa ma oĩ porã ranhe,  
nderaityrã itaova re rejapo va'ekue ri,
- <sup>22</sup> teĩ peẽ Queneu kuery penemombaa 'rã.  
Raka'e peve 'rã tu? Assur pygua kuery pendereraapa 'rã escravo-rã – he'i.
- <sup>23</sup> Ayvu omombe'u teri vy aipoe'i:  
– Haxy ete 'rã! Mava'e tu oikove 'rã  
Nhanderuete ha'e nunga omoingo jave?
- <sup>24</sup> Mba'eta Quitim yvy gui kanoã guaxu py avakue ou vy  
Assur ha'e Héber rupi voi nhombojexavai 'rã.  
Ha'e rami teĩ ha'e kuery ae jevy 'rã omanomba – he'i.
- <sup>25</sup> Ha'e rire Balaão opu'ã vy ojepe'a ovv, oyvy katy ju ojevy. Balaque voi oo ju ouague rupi.

## 25

*Peor pygua kuery ruete ramigua Baal ombojerovia okuapya py Finéias omombaague*

<sup>1</sup> Israel kuery Sitim py ikuai jave ha'e kuery omboypy Moabe pygua kunhague reve itavy rei okuapy aguã.

<sup>2</sup> Ha'e va'e kunhague oenoimba nguuetre ra'angaa kuery pe rive mba'emo ome'ẽa py.  
Ha'e ramo Israel kuery amboae kuery reve okaru okuapy aguã oo vy kunhague ruete ra'angaa kuery renonde py rive 'rã guenapy'ã re ikuai.

<sup>3</sup> Peor pygua kuery ruete ramigua Baal re Israel kuery voi oje'oi ramo SENHOR poxya hendy ha'e kuery rovai.

<sup>4</sup> Ha'e rami vy SENHOR aipoe'i Moisés pe:  
– Ejopypa ke heta va'e kuery ruvixa ikuai va'e, ha'e vy SENHOR renonde ejyryvipypa imo'amy oka py, Israel kuerya gui xepoxya ojepe'a aguã – he'i.

<sup>5</sup> Ha'e ramo Moisés aipoe'i Israel kuery mongetaa kuery pe:

— Peteĩ-teĩ pejuka 'rã penderegua avakue Peor pygua ruete Baal re oje'oi va'ekue — he'i.

<sup>6</sup> Ha'e rami teĩ peteĩ ava Israel kuery va'e regua oo vy heta va'e kuery ikuaria py ogueru peteĩ kunha Midiã pygua. Moisés oexaa py eteve ogueru, ha'e Israel kuery ha'e javi oexa pavẽa py, ha'e kuery oguy nhemboaty oĩaty renonde py ojae'opa teri okuapy jave.

<sup>7</sup> Kunha va'e ogueru rã sacerdote Finéias oexa. Ha'e va'e ma Eleazar ra'y, Arão ramymino ae. Ha'e rami vy heta va'e kuery mbyte gui ha'e opu'ã vy peteĩ hu'y ojopy reve

<sup>8</sup> oo oiny ava Israel regua rakykue, ngopy oike ovvyague peve. Ha'e py ae onhyvõ mokoïve hyepy rupi, ava Israel regua ha'e kunha va'e voi. Ha'e ramo optytu'u mba'emo vai Israel kuery mbyte rupi oiko va'ekue.

<sup>9</sup> Mba'emo vai gui omano va'ekue ma vinte e quatro mil ha'e javi vy.

<sup>10</sup> Ha'e gui SENHOR aipoe'i Moisés pe:

<sup>11</sup> — Eleazar ra'y Finéias, sacerdote Arão ramymino va'e rima ojapo Israel kuery áry gui xepoxya optytu'u aguã rami. Mba'eta xere vy ae oendu nda'evei etea ha'e kuery mbyte rupi. Ha'e rami vy ojapo Israel kuery amomba e'ý aguã rami, nda'evei etea aendu teĩ.

<sup>12</sup> Ha'e nunga rupi aipo're 'rã: "Aý ma ndereve ajapo 'rã xereve peteĩ rami romoingo aguã" 're,

<sup>13</sup> mba'eta hexeve, ha'e gui ha'e ndoikovei rire hamymino kuery jevy ikuai va'e reve ajapo 'rã sacerdote ikuai aguã. Xee nguete re ima'endu'a vy ae oendu openaxeia, ha'e rami vy ojao'i uka Israel kuery ojejavyague — he'i.

<sup>14</sup> Midiã pygua kunha reve Israel regua ojuka pyre ma Salu ra'y Zimri. Tuu ma Simeão regua kuery ruvixa.

<sup>15</sup> Ha'e rã Midiã pygua kunha ojuka pyre ma Zur rajy Cosbi. Tuu ma Midiã pygua huvixa oiko.

<sup>16</sup> Ha'e gui SENHOR aipoe'ive ju Moisés pe:

<sup>17</sup> — Pemoingo axy 'rã Midiã pygua kuery pejukapa peve,

<sup>18</sup> mba'eta ha'e kuery voi penemoingo axy va'ekue Peor py nguuete ramigua pembojerovia aguã rami penembotavypaa py, ha'e gui gueindy Midiã pygua huvixa rajy Cosbi káuxa voi. Ha'e va'e ma ojukaa Peor py mba'emo vai oiko jave.

## 26

### *Israel kuery oipapaa jevyague*

<sup>1</sup> Mba'emo vai oaxapa ma rire SENHOR ijayvu Moisés pe, ha'e sacerdote Arão ra'y Eleazar pe. Ha'e vy aipoe'i:

<sup>2</sup> — Pemboparapa ke Israel kuery ha'e javi rery, vinte ma'etý va'e guive tujakue peve, peteĩ-teĩ tamoi kuery ro pygua ikuaria rami vy. Israel kuery va'e regua pemboparapa 'rã joe opu'ã kuaa va'e ha'e javi — he'i.

<sup>3</sup> Ha'e ramo Moisés ha'e sacerdote Eleazar ijayvu Israel kuery yvatekueve pe. Moabe yvy ka'aguy e'ýa py, Jordão yakã yvýry Jericó tetã rexei ikuaria py ijayvu vy aipoe'i:

<sup>4</sup> — Peipapa 'rã avakue vinte ma'etý va'e guive tujakue peve, Moisés pe SENHOR ojapo ukaague rami vy, ha'e Israel kuery Egito gui oje'oi va'ekue ha'e javi pe — he'i.

<sup>5</sup> Ha'e gui Rúben ma Israel ra'y jypykue va'e. Rúben ramymino kuery Enoque guigua ma enoquita, Palu ramymino kuery ma paluíta,

<sup>6</sup> Hezrom ramymino kuery ma hezronita, Carmi ramymino kuery ma carmita.

<sup>7</sup> Ha'e va'e kuery ma Rúben ramymino meme. Ha'e kuery va'e regua oipapaa rã quarenta e três mil e setecentos e trinta ha'e javi vy.

<sup>8</sup> Palu ra'y ma Eliabe.

<sup>9</sup> Eliabe ra'y kuery ma Nemuel, Datā ha'e Abirão. Ha'e gui Datā ha'e Abirão ma heta va'e kuery oiporavo va'ekue ri opu'ã okuapy Moisés ha'e Arão rovai Coré pegua kuery reve, SENHOR rovai ae opu'ãa py.

<sup>10</sup> Ha'e va'e jave py yvy ojepe'a ramo Coré pegua kuery ho'apa raka'e. Ha'e vy omanomba. Tata py ju duzentos e cinqüenta avakue omano raka'e. Ha'e nungakue ma nhanheangu aguã oiko raka'e.

<sup>11</sup> Ha'e rami teĩ Coré ra'y kuery ma noamanombai.

<sup>12</sup> Ha'e gui Simeão ramymino kuery peteĩ-teĩ regua ikuai va'e ma po rami hery: Nemuel ramymino kuery ma nemuelita, Jamim ramymino kuery ma jaminita, Jaquim ramymino kuery ma jaquinita,

<sup>13</sup> Zerá ramymino kuery ma zeraíta, Saul ramymino kuery ma saulita.

<sup>14</sup> Ha'e va'e kuery ma Simeão ramymino meme, vinte e dois mil e duzentos ha'e javi vy ikuai.

<sup>15</sup> Ha'e gui Gade ramymino kuery ju. Zefom ramymino kuery ma zefonita, Hagi ramymino kuery ma hagita, Suni ramymino kuery ma sunita,

<sup>16</sup> Ozni ramymino kuery ma oznita, Eri ramymino kuery ma erita,

<sup>17</sup> Arodi ramymino kuery ma arodita, Areli ramymino kuery ma arelita.

<sup>18</sup> Ha'e va'e kuery ma Gade ramymino kuery meme. Ha'e kuery va'e regua oipapaa rã quarenta mil e quinhentos ha'e javi vy.

<sup>19</sup> Ha'e gui Judá ramymino kuery ma Er ha'e Onã. Ha'e va'e kuery ma Canaã yvy re omano va'ekue.

<sup>20</sup> Ha'e rami vy Judá ramymino kuery peteĩ-teĩ regua ikuai va'e ma po rami hery: Selá ramymino kuery ma selaíta, Perez ramymino kuery ma perezita, Zera ramymino kuery ma zeraíta,

<sup>21</sup> Perez ra'y Hezrom ramymino kuery ma hezronita, ha'e rã Hamul ramymino kuery ma hamulita.

<sup>22</sup> Ha'e va'e kuery ma Judá ramymino kuery meme. Ha'e kuery va'e regua oipapaa rã setenta e seis mil e quinhentos ha'e javi vy.

<sup>23</sup> Ha'e gui Issacar ra'y kuery ju peteĩ-teĩ regua ikuai va'e ma po rami hery: Tola ramymino kuery ma tolaíta, Puva ramymino kuery ma puvita,

<sup>24</sup> Jasube ramymino kuery ma jasubita, Sinrom ramymino kuery ma sinronita.

<sup>25</sup> Ha'e va'e kuery ma Issacar ramymino kuery meme. Ha'e va'e kuery oipapaa rã sessenta e quatro mil e trezentos ha'e javi vy.

<sup>26</sup> Ha'e gui Zebulom ra'y kuery ju peteĩ-teĩ regua ikuai va'e ma po rami hery: Serede ramymino kuery ma seredita, Elom ramymino kuery ma elonita, Jaleel ramymino kuery ma jaleelita.

<sup>27</sup> Ha'e va'e kuery ma Zebulom ramymino kuery meme. Ha'e kuery va'e regua oipapaa rã sessenta mil e quinhentos ha'e javi vy.

<sup>28</sup> Ha'e gui José ra'y kuery ju peteĩ-teĩ regua ma Manassés ha'e Efraim.

<sup>29</sup> Manassés ramymino kuery Maquir guigua ma maquirita, Maquir ra'y ma Gileade, ha'e Gileade ramymino kuery ma gileadita.

<sup>30</sup> Ha'e gui Gileade ramymino kuery Jezer ramymino kuery ma jezerita, Heleque ramymino kuery ma helequita,

<sup>31</sup> Asriel ramymino kuery ma asrielita, Siquém ramymino kuery ma siquemita,

<sup>32</sup> Semida ramymino kuery ma semidaíta, Hefer ramymino kuery ma heferita.

<sup>33</sup> Hefer ra'y Zelofeade ma ta'y e'ŷ va'e, tajy kuery anho ikuai. Zelofeade rajy kuery ma Macla, Noa, Hogla, Milca e Tirza.

<sup>34</sup> Ha'e va'e kuery ma Manassés ramymino kuery. Ha'e kuery va'e regua oipapaa rã cinqüenta e dois mil e setecentos ha'e javi vy.

<sup>35</sup> Ha'e gui Efraim ra'y kuery peteĩ-teĩ ikuai va'e ma po rami hery: Sutela ramymino kuery ma sutelaíta, Bequer ramymino kuery ma bequerita, Taã ramymino kuery ma taanita.

<sup>36</sup> Ha'e gui Sutela ra'y Erã va'e ramymino kuery ma eranita ae.

<sup>37</sup> Ha'e va'e kuery ma Efraim ramymino kuery meme. Ha'e kuery va'e regua oipapaa rã trinta e dois mil e quinhentos ha'e javi vy. Ha'e va'e kuery ma José ramymino kuery meme, peteĩ-teĩ regua ikuaria rami.

<sup>38</sup> Ha'e gui Benjamim ramymino kuery peteĩ-teĩ regua ikuai va'e ma po rami hery: Bela ramymino kuery ma belaíta, Asbel ramymino kuery ma asbelita, Airão ramymino kuery ma airamita,

<sup>39</sup> Sufã ramymino kuery ma sufamita, Hufã ramymino kuery ma hufamita.

<sup>40</sup> Bela ra'y kuery ma Arde ha'e Naamã. Arde ramymino kuery ma ardita, Naamã ramymino kuery ma naamanita.

<sup>41</sup> Ha'e va'e kuery ma Benjamim ramymino kuery meme. Ha'e kuery va'e regua oipapaa rã quarenta e cinco mil e seiscentos ha'e javi vy.

<sup>42</sup> Ha'e gui Dã ramymino kuery peteĩ-teĩ regua ikuai va'e ma po rami hery: Suão ramymino kuery ma suamita. Ha'e va'e kuery ma Dã ramymino kuery kuery, peteĩ-teĩ regua ikuaria rami.

<sup>43</sup> Ha'e gui suamita kuery va'e regua ma oipapaa rã sessenta e quatro mil e quatrocetros ha'e javi vy.

<sup>44</sup> Ha'e gui Aser ra'y kuery ju peteĩ-teĩ regua ikuai va'e ma po rami hery. Imna ramymino kuery ma imnaíta, Isvi ramymino kuery ma isvita, Berias ramymino kuery ma beriaíta.

<sup>45</sup> Berias ra'y Héber ramymino kuery ma heberita, ha'e rã Malquiel ramymino kuery ma malquielita.

<sup>46</sup> Ha'e gui Aser rajy rery ma Sera.

<sup>47</sup> Ha'e va'e kuery ma Aser ramymino kuery meme. Ha'e kuery va'e regua oipapaa rã cinqüenta e três mil e quatrocetros ha'e javi vy.

<sup>48</sup> Ha'e gui Naftali ra'y kuery peteĩ-teĩ regua ikuai va'e ma po rami: Jazeel ramymino kuery ma jazeelita, Guni ramymino kuery ma gunita,

<sup>49</sup> Jezer ramymino kuery ma jezerita, Silém ramymino kuery ma silemita.

<sup>50</sup> Ha'e va'e kuery ma Naftali ramymino kuery meme. Ha'e kuery va'e regua oipapaa rã quarenta e cinco mil e quatrocetros ha'e javi vy.

<sup>51</sup> Ha'e va'e kuery ma Israel kuery va'e regua oipapaa rã seiscentos e um mil setecentos e trinta ha'e javi vy.

### *Ha'e kuery yvyrã omboja'o-ja'o aguã re ijayvua*

<sup>52</sup> SENHOR aipoe'i Moisés pe:

<sup>53</sup> — Ha'e kuery pe ma remboja'o 'rã yvy imba'erã, peipapa rã peteĩ-teĩ regua mbovy pa ikuaria rami vy.

<sup>54</sup> Ha'e gui hetave va'e regua pe ma yvy tuvixave 'rã pemboaxa. Ha'e rã mboapy'ive va'e regua pe ma ruxâve'i 'rã remboaxa. Peteĩ-teĩ regua mbovy pa ikuaria rami vy 'rã remboaxa ijyvyrã.

<sup>55</sup> Yvy pemboja'o 'rã xorte pexa vy. Tamoõ kuery regua rery pexaa rami vy ha'e kuery ojopy 'rã oyvyrã.

<sup>56</sup> Xorte pexa vy 'rãe pemboja'opa peteĩ-teĩ regua pe, hetave va'e pe, ha'e mboapy'ive va'e pe voi.

### *Levita kuery ju oipapaa ague*

<sup>57</sup> Pova'e kuery ma levita kuery va'e regua oipapa pyre, peteĩ-teĩ regua ikuaria rami: Gérson ramymino kuery ma gersonita, Coate ramymino kuery ma coatita, Merari ramymino kuery ma merarita.

**58** Pova'e kuery voi ma Levi ramymino kuery ikuai: libnita, hebronita, malita, musita ha'e coreíta kuery regua. Coate ra'y ma Anrão.

**59** Anrão ra'yxy ma Levi ramymino Joquebede, Egito yvy re ae oiko va'ekue. Ha'e va'e ma oguereko'i Anrão ra'y kuery Arão ha'e Moisés, ha'e gui ha'e kuery reindy Miriã.

**60** Arão ra'y kuery ma Nadabe, Abiú, Eleazar ha'e Itamar.

**61** Nadabe ha'e Abiú ma omano va'ekue, tata ha'eve'ña ramigua SENHOR renonde py ogueruague re.

**62** Ha'e va'e kuery regua oipapaa rã vinte e três mil, avakue peteñ jaxy va'e guive tujakue peve. Ha'e va'e kuery ma Israel kuery mboae reve ndoipapaai, mba'eta ha'e kuery pe ma nome'ñai ijyvyrã amboae kuery reve.

**63** Ha'e va'e kuery ha'e javi ma Moisés ha'e sacerdote Eleazar oipapa va'ekue. Moabe yvy ka'aguy e'ña py oipapa Israel kuery, Jordão yakã yvýry, Jericó tetã rexei ikuai jave.

**64** Ha'e va'e kuery regua peteñ ma voi jipovei Moisés ha'e sacerdote Arão oipapa ypy valekue, Sinai regua tekao e'ña py Israel kuery ikuai jave,

**65** SENHOR “Ha'e kuery omanomba 'rã tekao e'ña py” he'i rire. Ha'e rami rire peteñ ma voi ndoikovei, Jefoné ra'y Calebe e'ñ vy, ha'e gui Num ra'y Josué guive.

## 27

### *Zelofeade rajy kuery oyvyrã ojopy aguã re ijayvua*

**1** Ha'e gui ou okuapy Zelofeade rajy kuery. Zelofeade ma Hefer ra'y, Hefer ma Gileade ra'y, Gileade ma Maquir ra'y, Maquir ma Manassés ra'y, Manassés ma José ra'y. Po rami ma tajy kuery rery: Macla, Noa, Hogla, Milca ha'e Tirza.

**2** Ha'e gui ha'e va'e kuery ma Moisés renonde py ojexa uka okuapy, sacerdote Eleazar, huvixa kuery ha'e heta va'e kuery renonde py, oguy nhemboaty oñaty rokë py onhemboatya py. Ha'e vy aipoe'i okuapy:

**3** — Ore kuery ru ma omano karamboae tekao e'ña py teñ SENHOR rovai Coré pegua kuery opu'ñ okuapy va'e revegua e'ñ. Ha'e ae ojejavyague re omano raka'e. Ta'y e'ñ re guive omano.

**4** Mba'e re tu ha'vy oreru rery pembogue ta ri hetarã kuery mbyte gui, ta'y kuery nda'ipoia káuxa rive? Eme'ñ avi na oreiyvyrã, oreru ryvy kuery oguerekao rami avi – he'i okuapy.

**5** Ha'e va'e kunhague ojerurea Moisés omboaxa SENHOR renonde py.

**6** Ha'e ramo SENHOR aipoe'i Moisés pe:

**7** — Zelofeade rajy kuery ma ha'evea rupi meme ojerure. Ha'e nunga rupi ha'e kuery pe voi peme'ñ 'rã ijyvyrã, tuu ryvy kuery pe rami avi. Tajy kuery pe 'rã peme'ñ tuu yvykue.

**8** Ndeayvu 'rã Israel kuery pe. Ha'e vy aipo're: “Amongue ta'y e'ñ re omano ri ramo imba'ekue peme'ñ 'rã tajy pe ae.

**9** Ha'e rã tajy ndoikoi ramo imba'ekue peme'ñ 'rã tyvykue pe.

**10** Ha'e rã tyvy kuery ndoikoi ri ramo imba'ekue peme'ñ 'rã tuu ryvy kuery pe.

**11** Ha'e rã guyvy kuery ndoguerekoi ri ramo imba'ekue peme'ñ 'rã penetarã kuery ae'ive pe imba'erã”, 're 'rã – he'i.

Ha'e va'e ma Israel kuery rekorã SENHOR oeja va'ekue, Moisés pe ojapo ukaague rami vy.

### *Deuteronomio 3.23-29*

**12** Ha'e va'e rire SENHOR aipoe'i Moisés pe:

— Eñ ke kova'e yvyty Abarim apyte peve, yvy Israel kuery pe ame'ñ va'e rexa aguã.

**13** Ha'e va'e rexa ma rire nenhe'ñ ju 'rã heraa neramoñ kuerya py, nderyke'y Arão nhe'ñ heraa ague rami avi.

**14** Mba'eta Zim regua tekao e'ña py heta va'e kuery opu'ñamba rei jave peñ voi naxenhe'ñ rendui va'ekue, ha'e vy ha'e kuery oexaa py ndapexa ukai xeky'a e'ñ va'ea, yy peme'ñaa py – he'i. Ha'e va'e yy ma Meribá pygua, Cades katy'i, Zim regua tekao e'ña py.

<sup>15</sup> Ha'e ramo Moisés aipoe'i SENHOR pe:

<sup>16</sup> — Ndee SENHOR pavē rekoverā me'ea, ha'e pavē rekove re repena va'e, emoī peteī ava kova'e kuery re opena va'erā,

<sup>17</sup> ha'e kuery renonde rupi ojepe'a ha'e ojevy va'erā, ha'e ha'e kuery oje'oi ha'e ojevy a rupi oguereko va'erā, SENHOR pegua kuery vexa'i ija e'ý va'e rami rive ikuai e'ý aguā – he'i.

### *Moisés rekovia Josué ju omoīague*

<sup>18</sup> SENHOR aipoe'i Moisés pe:

— Eraa ha'vy Num ra'y Josué, ha'e emoī ndepo hexe, mba'eta ha'e va'e re ma Nhe'ẽ oĩ.

<sup>19</sup> Rexa uka 'rā sacerdote Eleazar ha'e heta va'e kuery ha'e javi renonde py. Ha'e kuery oexaa py eme'ẽ ojapo va'erā.

<sup>20</sup> Ixupe ju 'rā remboaxa ndepo'akaa regua, Israel kuery ha'e javi onhe'ẽ rendu aguā.

<sup>21</sup> Ha'e jevy 'rā ojexa uka sacerdote Eleazar pe, SENHOR renonde py oikuaa pota aguā Urim oexaa rupi. Mba'eta sacerdote ijayvua rami meme 'rā ha'e kuery oje'oi ha'e ojevy okuapy, Josué ha'e Israel kuery ha'e javi – he'i.

<sup>22</sup> Ha'e ramo Moisés ojapo SENHOR ojapo ukaa rami. Ha'e vy Josué ogueraa vy oexa uka sacerdote Eleazar pe heta va'e kuery pavē oexaa py.

<sup>23</sup> Hexe opo omoī vy ome'ẽ ojapo va'erā, Moisés pe SENHOR ijayvuague rami vy.

## 28

### *Êxodo 29.38-42*

<sup>1</sup> Ha'e gui SENHOR aipoe'ive ju Moisés pe:

<sup>2</sup> — Ndeayvu ke Israel kuery pe. Ha'e vy aipo're: Pepena 'rā mba'emo xevy peme'ẽ aguā, peme'ẽ aguā ára py porā, mba'emo aju guigua mba'e, mba'emo peapy va'erā, heakuā porā va'e guive.

<sup>3</sup> Pova'e ae 'rā ko'ẽ nhavō SENHOR pe peapy vy peme'ẽ va'erā: mokoī vexa'i ra'y peteī ma'etŷ va'e, ivaikue rei e'ý va'e. Ha'e va'e ma peapy vy peme'ẽ jepi 'rā.

<sup>4</sup> Peteī vexa'i ra'y ma peme'ẽ 'rā aje'ive'i reve, ha'e rā amboae ma ka'a'ru'i jave guarā.

<sup>5</sup> Peteī ryru trigo iporāve va'e avi 'rā Peru mba'emo aju guigua ome'ẽ mbyrā, peteī ryru azeite onhami mbyre reve pemoirū vy pemoapomo va'ekue reve.

<sup>6</sup> Ha'e va'e ma peapy vy peme'ẽ jepi 'rā Sinai yvyty py oejaague rami vy, heakuā porā rā SENHOR ojou porā aguā.

<sup>7</sup> Peteī-teī vexa'i ra'y reve penhoē avi 'rā peteī ryru iro va'e. Henda iky'a e'ý va'e py 'rā peme'ẽ SENHOR pe.

<sup>8</sup> Ha'e rā amboae vexa'i ra'y ma ka'aru'i jave 'rā peme'ẽ. Aje'ive'i reve guarā peme'ẽa rami ae avi 'rā peme'ẽ ju mba'emo aju guigua, iro va'e penhoē reve. Peapy vy 'rā peme'ẽ, heakuā porā rā SENHOR ojou porā aguā.

<sup>9</sup> — Ha'e rā sábado ára py ma peme'ẽ 'rā mokoī vexa'i ra'y peteī ma'etŷ va'e, ivaikue rei e'ý va'e, ha'e gui mokoī ryru trigo iporāve va'e azeite reve omoapomo mbyre. Mba'emo aju guigua peme'ẽ 'rā iro va'e penhoē reve.

<sup>10</sup> Ha'e va'e ma sábado nhavō peapy vy peme'ẽ va'erā, ko'ẽ nhavō mba'emo peme'ẽ ha'e penhoē va'e áryve.

<sup>11</sup> — Ha'e gui jaxy nhavō ijypy'ia ára py ma SENHOR pe peapy vy peme'ẽ 'rā mokoī toro ra'y, peteī vexa'i ha'e sete vexa'i ra'y peteī ma'etŷ va'e, ivaikue rei e'ý va'e.

<sup>12</sup> Toro ra'y reve peme'ẽ avi 'rā mba'emo aju guigua mboapy ryru trigo iporāve va'e azeite reve omoapomo mbyre. Ha'e rā vexa'i reve ma mba'emo aju guigua peme'ẽ 'rā mokoī ryru trigo iporāve va'e azeite reve omoapomo mbyre.

<sup>13</sup> Vexa'i ra'y reve ma mba'emo aju guigua peme'ẽ 'rā peteī ryru trigo iporāve va'e azeite reve omoapomo mbyre. Ha'e va'e ma peapy vy peme'ẽ 'rā, heakuā porā rā SENHOR ojou porā aguā.

<sup>14</sup> Toro ra'y reve penhoẽ 'rã mokoõ ryru vinho, ha'e rã vexa'i reve ma peteĩ ryru raxa'i 'rã penhoẽ, ha'e gui vexa'i ra'y reve ma peteĩ ryru ete'i 'rã penhoẽ. Ha'e va'e ma jaxy pyaua ára ojeupity nhavõ peme'ẽ 'rã peapy vy, ma'etõ mbukukue re.

<sup>15</sup> Ko'ẽ nhavõ peru avi 'rã peteĩ kavara ava jejavya regua SENHOR pe peapy vy peme'ẽ va'erã, mba'emo penhoẽ va'e reve.

<sup>16</sup> — Ha'e gui jaxy jypy'igua re catorze araa py ma oiko 'rã SENHOR pegua ngaru Páscoa regua.

<sup>17</sup> Ha'e va'e jaxy re quinze araa py ma pejapo 'rã ngaru. Sete ára re 'rã mbojape pe'u pekuapy imbovua revegua e'ŷ.

<sup>18</sup> Ijypy'a ára oiko 'rã nhemboaty iky'a e'ŷ va'e. Neĩ peteĩve ma napemba'eapoi 'rã.

<sup>19</sup> SENHOR pe peapy vy peme'ẽ 'rã mokoõ toro ra'y, peteĩ vexa'i ha'e sete vexa'i ra'y peteĩ ma'etõ va'e, ivaikue rei e'ŷ va'e meme.

<sup>20</sup> Mba'emo aju guigua peme'ẽ 'rã azeite reve omoapomo mbyre. Toro ra'y reve peme'ẽ 'rã mboapy ryru trigo iporãve va'e gui pejapo va'ekue, ha'e rã vexa'i ava reve ma mokoõ ryru gui,

<sup>21</sup> ha'e gui sete vexa'i ra'y ikuai va'e regua peteĩ-teĩ reve 'rã peme'ẽ peteĩ ryru gui pejapo va'ekue.

<sup>22</sup> Peme'ẽ avi 'rã peteĩ kavara ava jejavya regua, pejejavyague pejao'i uka aguã.

<sup>23</sup> Ha'e nunga ha'e javi 'rã peme'ẽ, aje'ive'i reve mba'emo peapy vy peme'ẽ va'ety reve.

<sup>24</sup> Ha'e rami vy sete ára re, ko'ẽ nhavõ peme'ẽ 'rã mba'emo aju guigua peapy vy, heakuã porã rã SENHOR ojou porã aguã. Ko'ẽ nhavõ mba'emo peapy vy peme'ẽ va'e reve ha'e va'e peme'ẽ avi 'rã, mba'emo penhoẽ reve.

<sup>25</sup> Ha'e gui sete araa py ju 'rã pejapo nhemboaty iky'a e'ŷ va'e. Neĩ peteĩve ma napemba'eapoi 'rã.

<sup>26</sup> — Ha'e gui mba'emo aju jypy'igua ára py ju 'rã pejapo nhemboaty iky'a e'ŷa va'e, mba'emo aju pyau guigua SENHOR pe Peru aguã, ngaru semana regua ojeupity jave. Neĩ peteĩve ma napemba'eapoi 'rã.

<sup>27</sup> Ha'e va'e jave py pova'e 'rã peapy vy peme'ẽ heakuã porã rã SENHOR ojou porã aguã: mokoõ toro ra'y, peteĩ vexa'i ava ha'e sete vexa'i ra'y peteĩ ma'etõ va'e meme.

<sup>28</sup> Mba'emo aju guigua peme'ẽ avi 'rã azeite reve omoapomo mbyre. Toro ra'y reve guarã pejapo 'rã mboapy ryru trigo iporãve va'e gui, ha'e rã vexa'i ava reve guarã ma mokoõ ryru gui.

<sup>29</sup> Sete vexa'i ra'y va'e regua peteĩ-teĩ reve guarã ma pejapo avi 'rã peteĩ ryru gui.

<sup>30</sup> Peteĩ kavara ava peme'ẽ avi 'rã pejejavyague pejao'i uka aguã.

<sup>31</sup> Ha'e nunga ha'e javi 'rã peme'ẽ, ko'ẽ nhavõ mba'emo peapy vy peme'ẽ va'e reve, mba'emo aju guigua ha'e mba'emo penhoẽ va'e reve. Ivaikue rei e'ŷ va'e meme 'rã Peru.

## 29

### *SENHOR pegua ngaru mboae oiko jave py mba'emo ome'ẽ va'erã re ijayvuague*

<sup>1</sup> — Ha'e gui sete jaxya re, jypy'igua ára py ma pejapo 'rã nhemboaty iky'a e'ŷ va'e. Neĩ peteĩve ma napemba'eapoi 'rã. Pêvy oiko 'rã mimby guaxu pemonhe'ẽ aguã ára.

<sup>2</sup> Ha'e va'e jave py pova'e nunga peme'ẽ 'rã peapy vy, heakuã porã rã SENHOR ojou porã aguã: peteĩ toro ra'y, peteĩ vexa ava ha'e sete vexa'i ra'y peteĩ ma'etõ va'e, ivaikue rei e'ŷ va'e meme.

<sup>3</sup> Mba'emo aju guigua peme'ẽ avi 'rã azeite reve omoapomo mbyre. Toro ra'y reve guarã ma mboapy ryru trigo iporãve va'e gui 'rã pejapo, ha'e rã vexa ava reve guarã ma mokoõ ryru gui 'rã.

<sup>4</sup> Ha'e gui sete vexa'i ra'y peteĩ-teĩ reve guarã ma peteĩ ryru gui 'rã pejapo.

<sup>5</sup> Peteĩ kavara peme'ẽ avi 'rã jejavya regua, pejejavyague pejao'i uka aguã.

<sup>6</sup> Ha'e va'e jaxy re mba'emo peapy vy peme'ẽ va'e reve 'rã peme'ẽ, mba'emo aju guigua reve, ko'ẽ nhavõ mba'emo peapy vy mba'emo aju guigua ha'e penhoẽ va'e regua reve. Ombopara pyre oĩa rami vy peme'ẽ 'rã heakuã porã rã SENHOR ojou porã aguã.

<sup>7</sup> — Ha'e gui sete jaxy re dez araa py ma pejapo ju 'rã nhemboaty iky'a e'ŷ va'e. Penenhe'ẽ py pejexavaia rupi 'rã pendekuai. Neĩ peteĩve ma napemba'eapoi 'rã.

<sup>8</sup> Pova'e ma peapy vy peme'ẽ 'rã heakuã porã rã SENHOR ojou porã aguã: peteĩ toro ra'y, peteĩ vexa ava, ha'e gui sete vexa'i ra'y peteĩ ma'etŷ va'e, ivaikue rei e'ŷ va'e meme.

<sup>9</sup> Mba'emo aju guigua peme'ẽ 'rã azeite reve omoapomo mbyre: toro ra'y reve guarã ma mboapy ryru trigo iporãve va'e gui pejapo 'rã, ha'e gui vexa'i ava reve guarã ma mokoĩ ryru gui 'rã.

<sup>10</sup> Ha'e rã sete vexa'i ra'y ikuai va'e regua peteĩ-teĩ reve guarã ma peteĩ'i ryru gui 'rã pejapo.

<sup>11</sup> Peme'ẽ avi 'rã peteĩ kavara ava jejavya regua. Ha'e va'e peme'ẽ avi 'rã jejavya regua ko'ẽ nhavõ peme'ẽ va'e reve, ha'e mba'emo peapy va'e, mba'emo aju guigua ha'e mba'emo penhoẽ jepi va'e reve.

<sup>12</sup> — Sete jaxy re quinze araa py ma teĩgue ju 'rã oiko nhemboaty iky'a e'ŷ va'e. Neĩ peteĩve ma napemba'eapoi 'rã. Sete ára re 'rã pejapo ngaru SENHOR pe.

<sup>13</sup> Pova'e ma peapy vy peme'ẽ 'rã heakuã porã rã SENHOR ojou porã aguã: mboapy toro ra'y, mokoĩ vexa ava, ha'e gui catorze vexa'i ra'y peteĩ ma'etŷ va'e, ivaikue rei e'ŷ va'e meme.

<sup>14</sup> Mba'emo aju guigua peme'ẽ 'rã azeite reve omoapomo mbyre: mboapy toro ra'y peteĩ-teĩ reve guarã ma mboapy ryru trigo iporãve va'e gui pejapo 'rã, ha'e gui mokoĩ vexa'i ra'y peteĩ-teĩ reve guarã ma mokoĩ ryru gui 'rã pejapo.

<sup>15</sup> Ha'e rã catorze vexa'i ra'y peteĩ-teĩ reve guarã ma peteĩ'i ryru gui 'rã pejapo.

<sup>16</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>17</sup> — Ha'e gui mokoĩ araa py ma peme'ẽ 'rã doze toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

<sup>18</sup> Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>19</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>20</sup> — Ha'e gui mboapy araa py ma peme'ẽ 'rã onze toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

<sup>21</sup> Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>22</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>23</sup> — Ha'e gui irundy araa py ma peme'ẽ 'rã dez toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

<sup>24</sup> Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>25</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>26</sup> — Ha'e gui peteĩ nhiruĩ araa py ma peme'ẽ 'rã nove toro ra'y, mokoĩ vexa'i ava ha'e catorze vexa'i ra'y peteĩ ma'etŷ va'e, ivaikue rei e'ŷ va'e meme.

<sup>27</sup> Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>28</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>29</sup> — Ha'e gui mboapy meme araa py ma peme'ẽ 'rã oito toro ra'y, mokoĩ vexa'i ava ha'e catorze vexa'i ra'y peteĩ ma'etõ va'e, ivaikue rei e'ŷ va'e meme.

<sup>30</sup> Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>31</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>32</sup> — Ha'e gui sete araa py ma peme'ẽ 'rã sete toro ra'y, mokoĩ vexa'i ava ha'e catorze vexa'i ra'y peteĩ ma'etõ va'e, ivaikue rei e'ŷ va'e meme.

<sup>33</sup> Toro ra'y, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>34</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>35</sup> — Ha'e gui oito araa py ma pejapo 'rã nhemboaty iky'a e'ŷ va'e. Neĩ peteĩve ma napemba'eapoi 'rã.

<sup>36</sup> Ha'e rami vy peapy vy peme'ẽ 'rã peteĩ toro ra'y, peteĩ vexa ava ha'e sete vexa'i ra'y peteĩ ma'etõ va'e, ivaikue rei e'ŷ va'e meme, heakuã porã rã SENHOR ojou porã aguã.

<sup>37</sup> Toro ra'y reve guarã, vexa'i ava ha'e vexa'i ra'y kuery reve guarã ma peme'ẽ avi 'rã mba'emo aju guigua ha'e mba'emo penhoẽ va'e. Peteĩ-teĩ mymba regua mbovy pa ikuiaia rami vy peme'ẽ 'rã hexeve guarã, ayvu oeja pyre rami vy.

<sup>38</sup> Peteĩ kavara peme'ẽ avi 'rã jejavya regua, ko'ẽ nhavõ mba'emo peapy va'e reve, mba'emo aju guigua ha'e mba'emo penhoẽ va'e reve.

<sup>39</sup> — Ha'e va'e ha'e javi ma SENHOR pe peme'ẽ 'rã peteĩ-teĩ ngaru ojeupity nhavõ oapy vy ome'ẽ mbyrã, mba'emo aju guiguarã, mba'emo onhoẽ mbyrã, ha'e peteĩ rami ikuai aguã reguarã. Ha'e va'e peme'ẽ avi 'rã SENHOR renonde penhemboayvua rami, e'ŷ vy penhenhandua'i rami mba'emo peme'ẽ va'e reve — he'i.

<sup>40</sup> Ha'e rami Moisés ijayvu Israel kuery pe, ixupe SENHOR ojapo ukaague ha'e javi rami vy.

## 30

*Deuteronômio 23.21-23*

<sup>1</sup> Ha'e gui Moisés ijayvu Israel kuery peteĩ-teĩ regua yvatekueve ikuai va'e pe. Ha'e vy aipoe'i:

— Pova'e ayvu ma SENHOR ojapo uka va'ekue:

<sup>2</sup> Xapy'a rei peteĩ ava onhemboayvu 'rã SENHOR pe mba'emo ojapo aguã re, ha'e'ŷ vy mba'emo ojapo e'ŷ re oiko aguã re. Ha'e rami ri vy ndojapo e'ŷi 'rã ijayvuague. Onhemboayvuague ha'e javi 'rã ojapo.

<sup>3</sup> Ha'e rami avi xapy'a rei peteĩ kunha onhemboayvu 'rã SENHOR pe mba'emo ojapo aguã re, ha'e'ŷ vy mba'emo ojapo e'ŷ re oiko aguã re, kunhataĩ vy nguu ro py teri oiko va'e.

<sup>4</sup> Ha'e gui xapy'a rei tuu ma guajy onhemboayvuague oikuua va'eri mba'eve nde'i 'rã ixupe. Ha'e ramo ma onhemboayvuague ha'e javi 'rã ovare. Tagy ojapopa 'rãe mba'emo ojapo e'ŷ re oiko aguã re onhemboayvuague.

<sup>5</sup> Ha'e 'rã xapy'a rei tuu ha'e va'e nunga oikuua vyve ojoko ramo ma tajy onhemboayvuague neĩ peteĩ henda py voi ndovarei 'rã, mba'emo ojapo e'ŷ re oiko aguã re

ijayvuague rupi oiko e'ŷ teĩ ha'eve 'rã. SENHOR operdoa 'rã, onhemboayvuague tuu ojoko rire.

<sup>6</sup> — Ha'e rami avi xapy'a rei kunha va'e onhemboayvuague, ha'e'ŷ vy opẽxa porã e'ŷ re mba'emo ojapo aguã re ijayvuague ovare teri reve omenda 'rã,

<sup>7</sup> ha'e xapy'a rei ime ha'e nunga oendu teĩ mba'eve nde'i ramo kunha va'e onhemboayvuague ovare tema 'rã. Ojapo 'rãe mba'emo ojapo e'ŷ re oiko aguã re ijayvuague.

<sup>8</sup> Ha'e rami teĩ xapy'a rei ime oendu vyve ojoko 'rã kunha va'e onhemboayvuague, e'ŷ vy opẽxa porã e'ŷ re ijayvuague ojapo aguã gui. Ijayvuague ime ombovaipa rire SENHOR operdoa 'rã.

<sup>9</sup> Ha'e gui imeve'ŷ va'e, e'ŷ vy kunha oeja pyre onhemboayvuague ma ovare va'erã meme.

<sup>10</sup> — Xapy'a rei kunha va'e ome ro py oiko reve onhemboayvu 'rã, ha'e'ŷ vy oura reve ijayvu 'rã mba'emo ojapo e'ŷ re oiko aguã re.

<sup>11</sup> Ha'e nunga ime oikuua vy "Ha'eve" nde'i, neĩ "Nda'evei" nde'i ri ramo kunha va'e onhemboayvuague ovare 'rã. Ojapopa 'rãe mba'emo ojapo aguã re ijayvuague.

<sup>12</sup> Ha'e rã xapy'a rei ime ha'e nunga oikuua vyve ombovaipa 'rã. Ha'e rami rã kunha va'e mba'emo ojapo aguã re, ha'e'ŷ vy mba'emo ojapo e'ŷ re oiko aguã onhemboayvu rire teĩ ndovarei 'rã. Ime ombovaipa rire SENHOR operdoa 'rã.

<sup>13</sup> Kunha va'e onhe'ẽ py ojexavaia rupi oiko aguã re ijayvu, e'ŷ vy oura ramo ime oendu vy xapy'a rei "Ha'eve" he'i 'rã, e'ŷ vy "Nda'evei" he'i 'rã ombovaipa vy.

<sup>14</sup> Ha'e rami avi xapy'a rei ime ma ko'ẽ nhavõ mba'eve nde'i ramo kunha va'e mba'emo ojapo aguã re onhemboayvuague ovarepa 'rã, ime oikuua vyve mba'eve nde'i rire.

<sup>15</sup> Ha'e gui xapy'a rei ime ha'e nunga oendua ára rire ri ombovaipa ramo hexe ae 'rã oĩ kunha va'e káuxa opaga aguã — he'i.

<sup>16</sup> Ha'e va'e ma Moisés pe SENHOR omboaxa va'ekue ojapoa aguã, ime ha'e gua'yxy reve joguereko kuaa aguã regua, ha'e gui tuu ha'e tajy kunhataĩ vy nguu ro py teri oiko va'e pegua.

## 31

### *Midiã pygua kuery re ipo'akaague*

<sup>1</sup> SENHOR aipoe'i Moisés pe:

<sup>2</sup> — Embopaga Midiã pygua kuery Israel kuery re ojapoague re. Ha'e rire ma nenhe'ẽ heraa 'rã neramoĩ kuerya py — he'i.\*

<sup>3</sup> Ha'e ramo Moisés ijayvu heta va'e kuery pe. Ha'e vy aipoe'i:

— Peẽ kuery va'e regua perekatatu ke tembiporu joe pepu'ã aguã. Ha'e gui tapeo Midiã pygua kuery rovai pepu'ã aguã, SENHOR ombopaga ukaa rami pejapo aguã.

<sup>4</sup> Israel kuery peteĩ-teĩ regua joe opu'ã aguã py pemondouka 'rã mil avakue — he'i.

<sup>5</sup> Ha'e ramo Israel kuery mbovy e'ŷ ikuai va'e peteĩ-teĩ regua gui omondouka mil. Joe opu'ã aguã katy doze mil ha'e javi vy omondouka tembiporu revegua meme.

<sup>6</sup> Moisés ae omondouka joe opu'ã aguã katy, peteĩ-teĩ regua mil oje'oi aguã. Oo avi sacerdote Eleazar ra'y Finéias. Ha'e va'e ma ogueraa mimby guaxu iky'a e'ŷ va'e omonhe'ẽ aguã.

<sup>7</sup> Ha'e gui Midiã pygua kuery reve opu'ã okuapy, Moisés pe SENHOR ojapo ukaague rami vy.

<sup>8</sup> Ha'e vy ojukapa okuapy avakue ikuai va'ekue ha'e javi. Jypyve omano va'ekue regua anho e'ŷ, ojuka avi Midiã pygua huvixa kuery: Evi, Requém, Zur, Hur ha'e Reba, peteĩ nhiruĩ Midiã pygua kuery ruvixa ikuai va'ekue. Kyxe py ojuka avi okuapy Beor ra'y Balaão.

\* **31:2** Midiã pygua kuery ojapo va'ekue ma ombotavypa rei Israel kuery, tuuete ramigua rive ombojerovia aguã rami (25.16-18).

<sup>9</sup> Ha'e rã Midiã pygua kunhague ha'e kyrígue ma Israel kuery ogueraapa okuapy guembiguarã. Ogueraapa avi vaka kuery ha'e hymba kuery ikuai va'ekue, ha'e oguereko va'ekue-'ekue ha'e javi.

<sup>10</sup> Oapypa avi tetã ha'e kuery ikuaiague, ha'e gui hekoa mboae ikuai va'ekue voi.

<sup>11</sup> Ha'e rami py ogueraapa ojopy va'ekue-'ekue, omba'erã ojou va'ekue ha'e javi, ha'e kuery va'e regua ha'e hymba kuery guive.

<sup>12</sup> Ha'e nunga oguerupa okuapy Moisés pe, sacerdote Eleazar ha'e Israel kuery ha'e javi ikuai va'e pe. Guembiguarã ogueraaa va'ekue, mba'emo ojou va'ekue ha'e imba'e rei-rei va'ekue ha'e javi ogueraaa guekoaa py, Moabe yvy ka'aguy e'ÿa py, Jordão yakã yvýry, Jericó tetã rexei.

### *Guembiguarã oguerupa pyre re ijayvuague*

<sup>13</sup> Ha'e gui Moisés, sacerdote Eleazar ha'e heta va'e kuery regua yvatekueve ha'e javi ma tekaoa gui oëmba okuapy mombyrry'i omovaë jevy aguã.

<sup>14</sup> Ha'e rami teñ Moisés ivai xondaro ruvixa kuery pe, mil ha'e cem xondaro capitão kuery joe opu'ãague gui ou va'ekue pe.

<sup>15</sup> Ha'e vy Moisés aipoe'i ha'e kuery pe:

— Peja ri ty'y kunhague ha'e javi okuave aguã?

<sup>16</sup> Mba'eta ha'e kuery ae Balaão omongoetaa rami vy ojapo va'ekue Israel kuery SENHOR rovai rupi ikuai aguã rami, Peor py ae. Ha'e nunga rupi mba'emo vai oiko raka'e SENHOR pegua kuery mbyte rupi.

<sup>17</sup> Ha'e nunga rupi aÿ kyrígue'i regua pejukapa 'rã avakue'i ikuai va'e. Pejukapa avi 'rã kunhague avakue reve nhogueronheno va'ekue.

<sup>18</sup> Ha'e rã kunhague'i ha'e kunhataígue'i avakue reve nhogueronheno e'ÿ teri va'e ma peja 'rã okuave aguã pendejeupe guarã.

### *Xondaro kuery ha'e mba'emo ogueru va'ekue oiky'a'opaa jevyague*

<sup>19</sup> — Sete ára re ranhe 'rã pendekuai tekaoa gui mombyrry'ia py. Mava'e rã rei peñ kuery pejojuka, ha'e'ÿ vy omanogue re pepoko va'ekue ma pejeky'a'o uka 'rã mboapy araa py, ha'e gui sete araa py ju, penembiguarã peru va'ekue voi.

<sup>20</sup> Peiky'a'o uka avi 'rã ao perekoo va'e, mba'emo mymba rague gui ojapo pyre, kavara rague gui ha'e yvyra gui ojapo pyre ha'e javi — he'i.

<sup>21</sup> Ha'e gui sacerdote Eleazar aipoe'i avi xondaro kuery joe opu'ã aguã katy oje'oi va'ekue pe:

— Po rami ma lei Moisés rupi SENHOR ojapo uka va'ekue.

<sup>22</sup> Mba'emo ouro guigua, prata, overa va'e, ferro, estanho ha'e chumbo guigua,

<sup>23</sup> opa mba'e tata py oï aguã ha'eve va'e ma pemboaxa 'rã tata rupi ha'eve va'e optyta aguã. Peiky'a'o avi 'rã yy joky'a'oa py. Ha'e rã mba'emo tata py oï aguã nda'evei va'e ma yy py rive 'rã peiky'a'o.

<sup>24</sup> Ha'e gui sete araa py pejoipa 'rã pendeao, ha'eve va'e ju peiko aguã. Ha'e gui mae ma peike ju 'rã tekaoa py.

### *Mba'emo ogueru pyre omboja'opa aguã re ijayvuague*

<sup>25</sup> Ha'e gui SENHOR aipoe'ive ju Moisés pe:

<sup>26</sup> — Reipapa 'rã nhomba'ekue ogueru pyre, ha'e kuery va'e regua ha'e mymba kuery voi. Ndee ha'e sacerdote Eleazar peipapa 'rã, ha'e heta va'e kuery regua tamoi kuery ro pygua yvatekueve ikuai va'e guive.

<sup>27</sup> Pemboja'o 'rã mokoñ henda katy joo rami meme. Peteñ henda py ma xondaro kuery joe opu'ã aguã oje'oi va'ekue peguarã, ha'e rã amboae henda py ma heta va'e kuery ha'e javi peguarã.

<sup>28</sup> Ha'e gui SENHOR peguarã peipe'a avi 'rã xondaro kuery joe opu'ã aguã oje'oi va'ekue guigua. Quinhentos ikuai va'e nhavõ gui peteĩ 'rã peipe'a, ha'e kuery va'e regua, toro, mburika'i ha'e vexa'i kuery ikuai va'e gui.

<sup>29</sup> Xondaro kuery peguarã omboja'o pyre mbyte gui reipe'a va'ekue ma sacerdote Eleazar po py 'rã reme'ẽ, SENHOR pe ju omboaxa va'erã.

<sup>30</sup> Ha'e rã Israel kuery peguarã omboja'o pyre mbyte gui ma reipe'a 'rã cinqüenta ikuai va'e nhavõ gui peteĩ, ha'e kuery va'e regua gui, toro, mburika'i, vexa'i ha'e mymba kuery ha'e javi gui. Ha'e nunga remboaxapa 'rã levita kuery po py, SENHOR pembojerovia aty rupi ombo'eapo va'e peguarã — he'i.

<sup>31</sup> Ha'e gui Moisés ha'e sacerdote Eleazar ojapopa SENHOR Moisés pe ojapo ukaague.

<sup>32</sup> Xondaro kuery mba'emo ogueru va'ekue ha'e javi vy ma seiscentos e setenta e cinco mil vexa'i,

<sup>33</sup> setenta e dois mil toro,

<sup>34</sup> sessenta e um mil mburika'i,

<sup>35</sup> ha'e gui trinta e dois mil kunhague neĩ peteĩgue ma avakue reve nhogueronheno e'ŷ teri va'e.

<sup>36</sup> Ha'e gui joe opu'ã aguã katy oje'oi va'ekue peguarã omboja'o pyre ma trezentos e trinta e sete mil e quinhentos vexa'i ikuai.

<sup>37</sup> Vexa'i kuery SENHOR peguarã omboaxa va'ekue ma seiscentos e setenta e cinco ha'e javi vy.

<sup>38</sup> Toro ma trinta e seis mil. Ha'e va'e regua SENHOR peguarã omboaxa va'ekue ma setenta e dois.

<sup>39</sup> Mburika'i kuery ma trinta mil e quinhentos. Ha'e va'e regua SENHOR peguarã ome'ẽ va'ekue ma sessenta e um.

<sup>40</sup> Ha'e rã ha'e kuery va'e regua ma dezesseis mil. Ha'e va'e regua SENHOR peguarã omboaxa va'ekue ma trinta e dois.

<sup>41</sup> Ha'e ramo sacerdote Eleazar po py ju Moisés omboaxa SENHOR peguarã ome'ẽ mbyre, Moisés pe ojapo ukaague rami vy.

<sup>42</sup> Heta va'e kuery peguarã ju Moisés omboja'o joe opu'ã aguã katy oje'oi va'ekue ogueru va'ekue gui.

<sup>43</sup> Heta va'e kuery peguarã omboja'o va'ekue ma trezentos e trinta e sete mil e quinhentos vexa'i,

<sup>44</sup> trinta e seis mil toro,

<sup>45</sup> trinta mil e quinhentos mburika'i,

<sup>46</sup> ha'e gui ha'e kuery va'e regua ma dezesseis mil.

<sup>47</sup> Ha'e gui Israel kuery peguarã omboja'o pyre mbyte gui ma cinqüenta ikuai va'e nhavõ gui Moisés oipe'a peteĩ, ha'e kuery va'e regua ha'e mymba kuery guive. Ha'e vy omboaxapa levita kuery SENHOR ombojeroviaaty rupi ombo'eapo va'e po py, Moisés pe SENHOR ojapo ukaague rami vy.

### *Xondaro ruvixa kuery mba'emo onhenhandua'i rami ome'ẽ okuapyague*

<sup>48</sup> Ha'e gui Moisés-a py ovaẽmba okuapy xondaro kuery mbovy e'ŷ ikuai va'e ruvixa kuery, mil ha'e cem ikuai va'e capitão kuery voi.

<sup>49</sup> Ha'e vy ha'e kuery aipoe'i okuapy ixupe:

— Ore nerembiguai kuery ma roipapapa avakue joe opu'ãa pygua ore kuery ropenaa va'e. Ha'e rã ha'e kuery va'e regua neĩ peteĩve ma ndoatai, ore kuery va'e regua ha'e rami ae avi.

<sup>50</sup> Ha'e nunga rupi rogueru ma SENHOR pe rome'ẽ va'erã, peteĩ-teĩ rogueru rojou va'ekue regua gui, mba'emo ouro guigua, jyva regua, poapy regua, kuã regua, namixã ha'e mbo'y. SENHOR renonde py rogueru rojejavyague rojao'i uka aguã — he'i okuapy.

<sup>51</sup> Ha'e ramo ha'e kuery gui Moisés ha'e sacerdote Eleazar ojopypa ouro guigua, mba'eta jegua ojapo porã mbyre meme ramo.

<sup>52</sup> SENHOR pe ouro guigua mil ha'e cem rerekoa capitão kuery ogueru va'ekue poyikue ma cento e oitenta quilos raxa ha'e javi vy.

<sup>53</sup> Mba'eta joe opu'ãa pygua kuery ombo'erã mba'emo ojopy va'ekue meme.

<sup>54</sup> ouro guigua mil ha'e cem rerekoa capitão kuery gui Moisés ha'e sacerdote Eleazar ojopy vy onhemboaty aty ropy ju ogueru imoiny, SENHOR renonde py Israel kuery ima'endu'a riae aguã.

## 32

### *Ha'e kuery va'e regua amongue Jordão rovai re optytaxe okuapyague*

<sup>1</sup> Rúben ha'e Gade ramymino kuery ma heta ete oguereko guymba kuery. Ha'e kuery ma Jazer ha'e Gileade yvy oexa rã mymba kuery ikuai aguã ha'eve.

<sup>2</sup> Ha'e rami vy Gade ha'e Rúben ramymino kuery ou okuapy Moisés pe ojerure aguã, sacerdote Eleazar ha'e heta va'e kuery yvatekueve reve. Ha'e vy aipoe'i okuapy:

<sup>3</sup> – Ha'e gui yvy Atarote, Dibom, Jazer, Ninra, Hesbom, Eleale, Sebã, Nebo ha'e Beom,

<sup>4</sup> ha'e va'e yvy pygua kuery Israel kuery renonde gui SENHOR oipe'apa ma va'ekue meme. Ha'e va'e yvy ma ha'eve mymba kuery ikuai aguã. Ha'e gui ore nerembiguai kuery ma orerymba va'e meme.

<sup>5</sup> Xapy'a rei rã ndee rejou porã ri vy eme'ẽ ha'e va'e yvy ore nerembiguai kuery pe orelyvyrã. Oremboaxa eme Jordão yakã rovai katy – he'i okuapy.

<sup>6</sup> Ha'e rami teñ Gade ha'e Rúben ramymino kuery pe Moisés aipoe'i:

  – Amboae regua kuery anho 'rã ty'y joe opu'ã aguã katy oje'oi, ha'e rã peẽ kuery ma apy ae 'rã pepytapa?

<sup>7</sup> Mba'e re tu pejapo Israel kuery nda'ipy'a guaxuvei aguã rami, yvy SENHOR ha'e kuery pe ome'ẽ va'e py oove e'ŷ aguã?

<sup>8</sup> Mba'eta ha'e rami ae avi penderu kuery ojapo raka'e, Cades-Barnéia gui amondouka jave py kova'e yvy oexa pota aguã.

<sup>9</sup> Ha'e va'e kuery ma Escol yvy'ã guy katy peve ovaẽa py yvy oexapa ma vy ojapo okuapy Israel kuery nda'ipy'a guaxuvei aguã rami, yvy SENHOR ome'ẽ va'e oupity e'ŷ aguã.

<sup>10</sup> Ha'e va'e árave SENHOR poxya hendy vy oura reve aipoe'i va'ekue orevy:

<sup>11</sup> “Anhetẽ ete avakue vinte ma'etŷ va'e guive tujakue peve Egito gui oje'oi va'ekue ri peteñi ma ndoexai 'rã yvy Abraão pe, Isaque ha'e Jacó pe aura reve ame'ẽ aguã re xeayvuague, xenhe'ẽ rendua gui ojepe'apa rire.

<sup>12</sup> Oexa va'erã ma quenezeu Jefoné ra'y Calebe anho, ha'e Num ra'y Josué avi, mba'eta ha'e kuery ma SENHOR nhe'ẽ rendua gui ndojepe'ai rire”, he'i va'ekue.

<sup>13</sup> Ha'e rami vy SENHOR poxya Israel rovai rupi hendy vy quarenta ma'etŷ re ojapo ha'e kuery tekao e'ŷa rupi oguata rei aguã rami, SENHOR rovai opu'ã okuapy va'ekue omanomba peve.

<sup>14</sup> Ha'e gui apy ju pendekuai avakue ojejavypa va'e regua. Peẽ kuery ju penderu kuery ojapoague rami ae avi pepu'ã pekuapy, pejapo aguã Israel rovai SENHOR ipoxyve aguã rami.

<sup>15</sup> Mba'eta peẽ kuery napenhe'ẽ reduxei ramo teñgue ju ha'e oejapa 'rã kova'e kuery tekao e'ŷa py. Ha'e ramo peẽ kuery káuxa ae 'rã ha'e kuery okanhymba – he'i.

<sup>16</sup> Ha'e ramo Moisés oĩa py ha'e kuery onhembojave jogueruvy vy aipoe'i okuapy:

  – Ore kuery ma apy rojapo 'rã mymba kuery korarã, ha'e tetã orera'y kuery rekoarã.

<sup>17</sup> Ha'e rã ore kuery ma orerembiporu rojopy vy rojapura reve 'rã roje'oi Israel kuery renonde rupi, ha'e kuery ikuai aguã py rogueraa peve. Orera'y kuery anho 'rã optyta tetã ikorapa va'e py, yvy regua kuery ojuka e'ŷ aguã py.

<sup>18</sup> Israel kuery peteñ-teñ oyvyrã va'ekue py ikuaiipa e'ŷa ja ore kuery ndorojevyvei 'rã orero katy.

**19** Mba'eta ore kuery ma ndorojopyi 'rā ha'e kuery reve yvy Jordão rovai re itui va'e regua, neñ henondeve katy ma voi, mba'eta ore ma Jordão kyvõ katy roguereko ae ma oreyvyrã, kuaray oua katy – he'i okuapy.

**20** Ha'e ramo Moisés ombovai:

— Xapy'a rei ha'e nunga pejapo ri vy, ha'e SENHOR renonde rupi penerembiporu reve joe pepu'ã aguã katy peje'oi,

**21** SENHOR renonde rupi peteñ-teñ penerembiporu reve Jordão rovai re peaxa, guenonde gui ngovaigua kuery oipe'apa peve,

**22** ha'e SENHOR renonde rupi ha'e va'e yvy re pendepo'akapa, ha'e rami ramo ma ha'eve 'rā pejevy ju aguã. Ha'e gui SENHOR ha'e Israel kuery renonde rupi pejapo ve'ŷ teñ ha'eve 'rā. Ha'e gui kova'e yvy ma pendekuai aguã 'rā itui SENHOR renonde.

**23** Ha'e rā xapy'a rei ha'e rami e'ŷ ri pendekuai ramo ma ma'ẽ, SENHOR rovai ojejavy va'e 'rā peiko. Ha'e rami vy peikuaa pejejavvyague re pepaga 'rāe.

**24** Ha'e nunga rupi pejapo tema tetã pendera'y kuery ikuai aguã, penerymba kuery korarã guive. Pejapopa e'ŷ eme guive pendeayvuague – he'i.

**25** Ha'e ramo Gade ha'e Rúben ramymino kuery ijayvu ju okuapy Moisés reve. Ha'e vy aipoe'i okuapy:

— Ndee oreruvixa, rejapo uka va'ekue meme 'rā ore nerembiguai kuery rojapo.

**26** Orera'y kuery, orerajy kuery, orera'yxy kuery ha'e orerymba kuery ha'e javi optytapa 'rā apy tetã Gileade yvy re ikuai va'e py ae.

**27** Ha'e rā ore nerembiguai kuery ma SENHOR renonde rupi 'rā roaxa orerembiporu reve meme, ndee oreruvixa aipo'reague rami vy – he'i okuapy.

**28** Ha'e ramo ha'e kuery ojapo va'erã re Moisés ijayvu sacerdote Eleazar pe, Num ra'y Josué ha'e Israel kuery regua tamoñ kuery ro pygua yvatekueve ikuai va'e ha'e javi pe.

**29** Ha'e vy aipoe'i ha'e kuery pe:

— Gade ha'e Rúben ramymino kuery pende kuery renonde rupi ri Jordão rovai katy oaxa ramo, SENHOR renonde rupi peteñ-teñ guembiporu reve joe opu'ã aguã katy oo aguã, ha'e xapy'a rei ha'e va'e yvy re pendepo'akapa ri vy ma ha'e kuery pe peme'ẽ 'rā Gileade yvy ikuai aguã.

**30** Ha'e rami teñ xapy'a rei ha'e kuery guembiporu reve ndoaxai ri vy pende kuery reve, ha'e rami vy pende kuery pendekuaia mbyte rupi ae 'rā ha'e kuery ikuai, Canaã yvy re ae – he'i.

**31** Ha'e ramo Gade ha'e Rúben ramymino kuery ombovai vy aipoe'i okuapy:

— Ore nerembiguai kuery pe SENHOR ijayvua rami tema rojapo 'rā.

**32** Ha'e rami vy SENHOR renonde rupi roaxa 'rā Canaã yvy re orerembiporu reve. Ha'e rā oreyvyrã rojopy va'erã ma Jordão yakã kyvõ rami ae itui.

### *Deuteronomio 3.12-17*

**33** Ha'e rami rā Gade ha'e Rúben ramymino kuery, ha'e José ra'y Manassés ramymino kuery va'e regua mbytekue yvyrã ma Moisés ome'ẽ amorreu kuery ruvixa Seom ha'e Basã pygua huvixa Ogue openaague. Ha'e va'e yvy ome'ẽ tetã ikuai va'e reve, mba'eta yvy ha'e javi rupi tetã ikuai.

**34** Ha'e gui Gade ramymino kuery ma ojapo Dibom tetã, Atarote ha'e Aroer,

**35** Atarote-Sofã, Jazer ha'e Jogbeá,

**36** Bete-Ninra ha'e Bete-Harã, tetã ikorapa va'e meme. Vexa'i kuery korarã voi ojapo.

**37** Ha'e gui Rúben ramymino kuery ma ojapo Hesbom, Eleale ha'e Quiriataim,

**38** Nebo, ha'e Baal-Meom hery oguerova va'e. Sibma voi ojapo. Tetã ha'e kuery ojapo va'e ma amboae rami meme omboery.

**39** Ha'e gui Manassés ra'y Maquir ramymino kuery ma Gileade yvy katy oje'oi vy ipo'aka. Amorreu kuery ha'e py ikuai va'ekue ma ha'e kuery oipe'apa.

<sup>40</sup> Ha'e rami vy Manassés ra'y Maquir kuery pe Moisés ome'ẽ Gileade yvy ha'e kuery ikuai aguã.

<sup>41</sup> Ha'e va'e yvýry rupi tekao ikuai va'e ma Manassés ra'y Jair ae oo vy ojopypa. Ha'e va'e ma oenoĩ Havote-Jair.

<sup>42</sup> Ha'e gui Noba oo vy ojopy Quenate, ijyvýry rupi tekao ikuai va'e guive. Ha'e va'e oenoĩ ju Noba, guery rupi ae.

## 33

### *Egito gui ha'e kuery oẽmba guive ikuaiague rery meme oĩa*

<sup>1</sup> Pova'e rupi ma Israel kuery Egito yvy gui oje'oi vy peteĩ-teĩ regua oxondaro kuery reve oguata jogueravyague, Moisés ha'e Araõ ijayvua rami meme.

<sup>2</sup> Moisés ombopara oguata oje'oivy nhavõ, SENHOR ijayvua rami vy. Pova'e rupi ha'e kuery oguata, oje'oia nhavõ rupi.

<sup>3</sup> Ramessés tetã gui oje'oi jaxy jypyra re quinze araa py. Páscoa ára rire ko'ẽ jevy ma Israel kuery oguata oje'oivy ipy'a guaxu reve, Egito pygua kuery ha'e javi oexaa gui,

<sup>4</sup> Egito pygua gua'y jypykue onhono porã teri okuapya ja, ha'e kuery mbyte rupi SENHOR ojukapa rire. Ha'e kuery ruete ra'angaa re voi SENHOR ombou imbopagaarã.

<sup>5</sup> Ha'e gui Ramessés tetã gui Israel kuery oje'oi vy ikuai ranhe Sucote py.

<sup>6</sup> Sucote gui oje'oi vy ma ikuai ranhe Etã py, tekao e'ŷa apy'i py.

<sup>7</sup> Etã gui oje'oi vy ojeapa oje'oivy vy Pi-Hairote py ju ikuai, Baal-Zefom katy'i peve. Ha'e vy ikuai ju ranhe Migdol rexei'i.

<sup>8</sup> Ha'e gui Pi-Hairote gui oje'oi ju vy ye'ẽ oĩ va'e mbyte rupi oaxa oje'oivy tekao e'ŷa katy oje'oi vy. Ha'e gui mboapy ára re tekao e'ŷa Etã rupi oguata rire ma opyta ju ranhe Mara py.

<sup>9</sup> Mara gui oje'oi jevy vy ova okuapy Elim py. Ha'e gui Elim py ma doze ygua oĩ, setenta pindo avi ikuai. Ha'e py ju opyta ranhe.

<sup>10</sup> Elim gui oje'oi vy Ye'ẽ Pytã rembe'i rupi ju opyta.

<sup>11</sup> Ye'ẽ Pytã gui oje'oi vy Sim tekao e'ŷa py ju opyta.

<sup>12</sup> Sim gui oje'oi vy Dofca py ju opyta.

<sup>13</sup> Dofca gui oje'oi vy ma Alus py ju opyta.

<sup>14</sup> Alus gui oje'oi vy ma Refidim py ju opyta, teĩ ha'e py ma nda'ipoi yy ha'e kuery oy'u aguã.

<sup>15</sup> Refidim gui oje'oi vy Sinai regua tekao e'ŷa py ju opyta.

<sup>16</sup> Sinai regua tekao e'ŷa gui oje'oi vy ma Quibrote-Hataavá py ju opyta.

<sup>17</sup> Quibrote-Hataavá gui oje'oi vy Hazerote py ju opyta.

<sup>18</sup> Hazerote gui oje'oi vy Ritma py ju opyta.

<sup>19</sup> Ritma gui oje'oi vy Rimom-Perez py ju opyta.

<sup>20</sup> Rimom-Perez gui oje'oi vy Libna py ju opyta.

<sup>21</sup> Libna gui oje'oi vy Rissa py ju opyta.

<sup>22</sup> Rissa gui oje'oi vy Queelata py ju opyta.

<sup>23</sup> Queelata gui oje'oi vy Sefer yvyty py ju opyta.

<sup>24</sup> Yvyty Sefer gui oje'oi vy Harada py ju opyta.

<sup>25</sup> Harada gui oje'oi vy Maquelote py ju opyta.

<sup>26</sup> Maquelote gui oje'oi vy Taate py ju opyta.

<sup>27</sup> Taate gui oje'oi vy Tera py ju opyta.

<sup>28</sup> Tera gui oje'oi vy Mitca py ju opyta.

<sup>29</sup> Mitca gui oje'oi vy Hasmona py ju opyta.

<sup>30</sup> Hasmona gui oje'oi vy Moserote py ju opyta.

<sup>31</sup> Moserote gui oje'oi vy Bene-Jaacã py ju opyta.

<sup>32</sup> Bene-Jaacã gui oje'oi vy Hor-Hagidgade py ju opyta.

33 Hor-Hagidgade gui oje'oi vy Jotbatá py ju opyta.

34 Jotbatá gui oje'oi vy Abrona py ju opyta.

35 Abrona gui oje'oi vy Eziom-Geber py ju opyta.

36 Eziom-Geber gui oje'oi vy Zim regua tekoá e'ŷa regua py ju opyta. Ha'e va'e ma Cades ae.

37 Cades gui oje'oi vy ma Hor yvyty py ju opyta, Edom yvy apy'i py.

*Números 20.22-29*

38 Ha'e gui sacerdote Arão ma SENHOR ijayvuague rami vy oẽ ový Hor yvyty re. Ha'e py ae omano, quarenta ma'etŷ re ma Israel kuery Egito yvy gui oje'oipa rire, peteñ nhiruñ jaxya, ijypy'ia ára py.

39 Arão ma cento e vinte e três ma'etŷ oguerekaoa py omano Hor yvyty re.

40 Ha'e gui cananeu Arade pygua huvixa oendu Israel kuery oupa ta maa. Ha'e va'e ma Canaã yvy regua kuaray puku-a katy oiko va'e.

41 Ha'e gui Hor yvyty gui ha'e kuery oje'oi vy Zalmona py ju opyta.

42 Zalmona gui oje'oi vy Punom py ju opyta.

43 Punom gui oje'oi vy Obote py ju opyta.

44 Obote gui oje'oi vy Ijé-Abarim py ju opyta, Moabe yvy apy'i py.

45 Ijé-Abarim gui oje'oi vy Dibom-Gade py ju opyta.

46 Dibom-Gade gui oje'oi vy Almom-Diblataim py ju opyta.

47 Almom-Diblataim gui oje'oi vy yvyty Abarim py ju opyta, Nebo katy'i.

48 Yvyty Abarim gui oje'oi vy opyta ju Moabe yvy ka'aguy e'ŷa rupi, Jordão yvýry, Jericó tetã rexei.

49 Ha'e gui Jordão yakã yvýry opyta ranhe okuapy, Bete-Jesimote guive Abel-Sitim oĩa peve, Moabe yvy ka'aguy e'ŷa rupi.

*Canaã yvy regua kuery Nhanderuete oipe'a ukapaague*

50 Ha'e gui SENHOR aipoe'i Moisés pe, Moabe yvy ka'aguy e'ŷa rupi ha'e kuery ikuai jave, Jordão yakã yvýry, Jericó tetã rexei:

51 — Ndeayvu ke Israel kuery pe. Ha'e vy aipo're: Jordão yakã peaxapa ma vy Canaã yvy katy peje'oi ma jave

52 penerenonde katy gui peipe'apa 'rã ha'e va'e yvy regua kuery. Pembovaipa 'rã ita ta'angaa oĩa va'e ha'e javi, ta'angaarã mba'emo ryku gui ha'e kuery ojapo va'ekue voi. Peitypa 'rã yvy'ã rupi ombojerovia atyrã ojapo va'ekue.

53 Ha'e va'e yvy pejopypa 'rã penemba'erã, ha'e py ae pendekuai aguã, mba'eta ha'e va'e yvy ae ame'ẽ pendeyvyrã.

54 Xortea pexaa rami 'rã pemboja'o yvy, pendera'y kuery peteñ-teñ mbovy pa ikuiaia rami vy. Hetave va'e regua pe ma tuvixave va'e 'rã peme'ẽ ijyvyrã, ha'e 'rã mboapy'ive va'e pe kyríve'i va'e 'rã peme'ẽ ijyvyrã. Xorte pexaa rami ae 'rã opyta peteñ-teñ peguarã. Penderu kuery guigua peteñ-teñ regua mbovy pa ikuiaia rami 'rã pejopy pendeyvyrã.

55 Ha'e rami avi penerenonde gui yvy regua kuery ndapeipe'apai ri ramo peẽ kuery mbyte py opyta va'ekue ma penderexa py juu haxy va'e rami 'rã ikuai, penderyepy rupi hakua va'e oĩa rami 'rã pendu. Ha'e rami vy penemoangekoarã rive 'rã opyta yvy pendekuaia re.

56 Ha'e gui pendere ju ajapo 'rã ha'e kuery re ajapo aguã re anhembopy'aague.

## 34

*Ijyvy apy ikuai va'e re ijayvuague*

<sup>1</sup> Ha'e gui SENHOR aipoe'ive ju Moisés pe:

<sup>2</sup> — Ndeayvu ke Israel kuery pe. Ha'e vy aipo're: Canaã yvy re pevaẽmba ma rire itui 'rã penderekoarã, Canaã yvy ae, ijapya'i nhavõ peve.

<sup>3</sup>— Yvy kuaray puku-a katy itui va'e re pendekuai 'rã Zim regua tekoai e'ŷa regua guive Edom yvy apy'i peve. Kuaray puku-a katy pendeyvy oo 'rã ye'ẽ apy guive kuaray oua katy.

<sup>4</sup> Ha'e va'e apy ma ojeapa 'rã ov yvy kuaray puku-a katy rupi, Acrabim yvy'ã katy, ha'e gui ma oaxa ju 'rã Zim peve. Ha'e gui ma oo 'rã Cades-Barnéia kuaray puku-a katy rupi. Ha'e vy Hazar-Adar katy oẽ vy Azmom peve 'rã oaxa.

<sup>5</sup> Ha'e va'e apy ma Azmom gui ojeapave 'rã ov yvy Egito katy'i yakã'i oĩ va'e rembe peve. Ha'e gui oove 'rã ye'ẽ rembe'i peve ae.

<sup>6</sup>— Ha'e gui kuaray oikea katy rupi pendeyvy apyrã ma ye'ẽ tuvixave va'e rembe 'rã optya. Ha'e va'e ae 'rã optya pendeyvy apy kuaray oikea katy rupi.

<sup>7</sup>— Pova'e ma ijapy kuaray ijapu'a'ia katy rupi: ye'ẽ tuvixave va'e guive oaxa 'rã Hor yvyty peve.

<sup>8</sup> Ha'e gui Hor yvyty guive ma oo 'rã Hamate py nhavaã'i peve. Ha'e va'e apy ma Zedade peve 'rã oo.

<sup>9</sup> Ha'e va'e gui ma oo 'rã Zifrom peve, ha'e gui opaa ma Hazar-Enã py 'rã optya. Ha'e va'e ae ma ijapy kuaray ijapu'a'ia katy rupi oo va'e.

<sup>10</sup>— Ha'e gui kuaray oua katy rupi ijapy oo 'rã Hazar-Enã guive Sefã peve.

<sup>11</sup> Ha'e gui Sefã guive oguejy 'rã Ribla peve, Aim kuaray oua katy rupi ae. Ha'e gui ma oguejyve vy oo 'rã Quinerete ye'ẽ rembe rupi kuaray oua katy rupi.

<sup>12</sup> Ha'e gui oguejyve 'rã ov yvy Jordão yakã rembe ha'e javi rupi, ha'e gui ye'ẽ rembe py ju 'rã opa. Ha'e va'e ae 'rã pendeyvyrã itui, ijapya'i ha'e javi peve — he'i.

<sup>13</sup> Ha'e gui Moisés ijayvu Israel kuery pe. Ha'e vy aipoe'i:

— Kova'e yvy ma pendeyvyrã xortea pexaa rami pejopy va'erã, nove regua pe ha'e peteĩ regua mbytekue ikuai va'e pe ju SENHOR ome'ẽ uka va'ekue.

<sup>14</sup> Mba'eta Rúben ha'e Gade ramymino kuery ma oyvyrã ojopy ae ma okuapy guamoĩ ro pygua kuery mbovy pa ikuai rami vy. Ha'e gui Manassés kuery regua mbytekue voi ojopy ma avi oyvyrã.

<sup>15</sup> Ha'e va'e mokoĩ regua ha'e peteĩ regua mbytekue ikuai va'e ju ojopy ae ma okuapy oyvyrã Jordão yakã kyvõ rami, Jericó tetã rexei, kuaray oua katy ae.\*

### *Yvy mboja'oarã kuery rery oĩa*

<sup>16</sup> Ha'e gui SENHOR aipoe'ive ju Moisés pe:

<sup>17</sup>— Pova'e avakue ae ma yvy mboja'oarã ikuai. Hery ma sacerdote Eleazar ha'e Numra'y Josué.

<sup>18</sup> Peteĩ-teĩ regua gui peiporavo avi 'rã peteĩ huvixa, yvy mboja'oarã.

<sup>19</sup> Ha'e va'e avakue rery ma po rami: Judá kuery va'e regua ma Jefoné ra'y Calebe,

<sup>20</sup> Simeão ramymino kuery va'e regua ma Amiúde ra'y Samuel,

<sup>21</sup> Benjamim kuery va'e regua ma Quislom ra'y Elidade,

<sup>22</sup> Dã ramymino kuery va'e regua ma Jogli ra'y huvixa Buqui,

<sup>23</sup> José ra'y Manassés ramymino kuery va'e regua ma Éfode ra'y huvixa Haniel,

<sup>24</sup> Efraim ramymino kuery va'e regua ma Siftã ra'y huvixa Quemuel,

<sup>25</sup> Zebulom ramymino kuery va'e regua ma Parnaque ra'y huvixa Elizafã,

<sup>26</sup> Issacar ramymino kuery va'e regua ma Azã ra'y huvixa Paltiel,

<sup>27</sup> Aser ramymino kuery va'e regua ma Selomi ra'y huvixa Aiúde,

<sup>28</sup> Naftali ramymino kuery va'e regua ma Amiúde ra'y huvixa Pedael — he'i.

<sup>29</sup> Ha'e va'e kuery pe ae SENHOR omboja'o uka Canaã yvy Israel kuery rekoarã.

\* <sup>34:15</sup> Kova'e kuaxia py ma "Jordão kyvõ rami" he'ia ma Jordão yakã regua kuaray oua katy yvy itui va'e re ijayvu vy, mba'eta ha'e py teri ha'e kuery ikuai.

## 35

### *Levita kuery pegua tetā re ijayvuague*

<sup>1</sup> SENHOR aipoe'ive ju Moisés pe, Moabe yvy ka'aguy e'ŷa py ha'e kuery ikuai jave, Jordão yakã yvýry, Jericó tetā rexei:

<sup>2</sup> — Ndeayvu ke Israel kuery pe, amongue tetā ha'e kuery yvy re ikuai va'e ome'ẽ aguã levita kuery rekoarã. Peteĩ-teĩ tetā yvýry rupigua ome'ẽ avi 'rã levita kuery yvýrã, guymba kuery oguereko aguã.

<sup>3</sup> Ha'e va'e tetā py ae 'rã ha'e kuery ikuai. Ha'e rã ijyvýry rupi ma vaka, vexa'i ha'e guymba kuery ha'e javi 'rã oguereko.

<sup>4</sup> Tetā ikuai va'e yvýrykue levita kuery pe ome'ẽ va'erã va'e ma tetā kora guive oo 'rã mombyry'i, quatrocentos e cinqüenta metros peve tetā yvýry ha'e javi rupi.

<sup>5</sup> Tetā gui mombyrya py kuaray oua katy rupi ma pea'ã 'rã novecentos metros, ha'e gui kuaray puku-a katy rupi, oikea katy, ha'e kuaray ijapu'a'ia katy rupi ma novecentos metros ju 'rã pea'ã. Ha'e va'e mbyte py oĩ 'rã tetā. Ha'e rami ae 'rã peteĩ-teĩ tetā yvýrykue oĩ.

<sup>6</sup> — Levita kuery pe tetā peme'ẽ va'e regua ma mboapy meme tetā opyta 'rã onhemí atyrã. Ha'e va'e ma peiporavo 'rã jojuka rive va'ekue onhemí aguã. Ha'e va'e áryve levita kuery pe peme'ẽ 'rã quarenta e dois tetā.

<sup>7</sup> Levita kuery pe tetā peme'ẽ va'erã ma quarenta e oito tetā ha'e javi vy, ijyvýrykue reve.

<sup>8</sup> Ha'e gui tetā Israel kuery mba'e regua levita kuery pe peme'ẽ va'erã va'e ma xapy'a rei peteĩ regua heta raxa ri ikuai ramo ma levita kuery pe heta 'rã pemboaxa tetā. Ha'e rã xapy'a rei peteĩ regua ndaetai ramo mboapy'i 'rã pemboaxa levita kuery pe. Peteĩ-teĩ regua guetā mbovy pa ojopyague rami amongue ome'ẽ 'rã levita kuery pe ikuai aguã.

### *Deuteronômio 4.41-43; 19.1-3*

<sup>9</sup> Ha'e gui SENHOR aipoe'ive ju Moisés pe:

<sup>10</sup> — Ndeayvu ke Israel kuery pe, ha'e vy aipo're: Canaã yvy re pevaẽ aguã Jordão yakã peaxa ma vy

<sup>11</sup> amboae tetā ju 'rã peiporavo onhemia atyrã, ha'e va'e py jojuka rive va'ekue oike 'rã onhemí aguã.

<sup>12</sup> Ha'e va'e tetā perek 'rã jouguy moẽare onhemí aguã imbopagaarã va'e gui, heta va'e kuery mbyte py jojuka rive va'ekue ojukaa e'ŷ aguã ojexa uka e'ŷ mbove onhemboayvu uka aguã.

<sup>13</sup> Mboapy meme tetā peiporavo 'rã onhemia atyrã.

<sup>14</sup> Ha'e va'e tetā va'e regua ma mboapy peme'ẽ 'rã Jordão kyvõ rami oĩ va'e, ha'e rã amboae mboapy va'e ma Canaã yvy re 'rã oĩ, tetā onhemia atyrã ae oĩ aguã.

<sup>15</sup> Ha'e va'e mboapy meme tetā ma Israel kuery pe opyta 'rã onhemí atyrã, ha'e amboae regua kuery pe guive, ha'e kuery mbyte rupi ovaẽ va'ekue pe, ha'e va'e tetā py jojuka rive va'ekue onhemí aguã.

### *Deuteronômio 19.11-13*

<sup>16</sup> — Ha'e gui amongue tembiporu ferro guigua py mba'e nhonupã rã omano ramo hembiporu revegua pe "Jojukaare" peje 'rã. Ha'e ramo jojukaare ma guive rã pejuka 'rã.

<sup>17</sup> Ha'e'ŷ vy amongue opo py ita oguereko va'e py amboae ojapi 'rã omano aguã ramí. Ha'e va'e pe voi "Jojukaare" peje 'rã. Ijukaare ramo pejuka 'rã.

<sup>18</sup> Ha'e'ŷ vy amongue opo py yvýra oguereko va'e py amboae oinupã 'rã omano aguã ramí. Ha'e va'e pe voi "Jojukaare" peje 'rã. Ijukaare ramo pejuka 'rã.

<sup>19</sup> Jouguy moẽare reve joepyarã ou va'ekue nhovaexí vy ojuka 'rãe.

<sup>20</sup> Ha'e gui xapy'a rei amongue nhomoanha 'rã nda'iporayvui vy, ha'e'ŷ vy amongue ojukaxe vy mba'emo hexe omombo 'rã omano aguã ramí,

<sup>21</sup> ha'e rami e'ŷ vy ija'ea rupi e'ŷ opo py ae ounga 'rã omano aguã rami. Ha'e ramo pejuka 'rã ijukaare, jojukaare ramo. Jojukaare reve joepyarã ou va'ekue nhovaexí vy ojuka 'rã.

*Deuteronomio 19.4-10*

<sup>22</sup> — Ha'e gui xapy'a rei amongue potae vy e'ŷ nhomoanha xapy'a 'rã, ha'e'ŷ vy mba'emo omombo rive 'rã hexe ojukaxe vy e'ŷ.

<sup>23</sup> Ha'e'ŷ vy oexa e'ŷ re hi'áry ita oity rive ramo omano 'rã, hovaigua e'ŷ oiko, neĩ ixupe ojapo vaixe rei e'ŷ teĩ.

<sup>24</sup> Ha'e ramo ma heta va'e kuery ha'e javi oikuaa pota 'rã okuapy jojukaare ha'e joepyarã ou va'e re, kova'e lei oĩ rami vy ae.

<sup>25</sup> Ha'e rami vy joepyarã ou va'ekue po gui ogueraa jepe 'rã okuapy jojukaare, hekoá katy'i tetã onhemia aty oĩ va'e katy omondouka vy, ha'e py onhemi aguã. Ha'e py ae 'rã jojukaare optya, sacerdote yvateve va'erã azeite iky'a e'ŷ va'e py omoĩ mbyre omano e'ŷa ja.

<sup>26</sup> Ha'e rã xapy'a rei jojukaare tetã onhemi aguã ooague gui oẽ ri ramo

<sup>27</sup> ha'e va'e tetã gui mombyrya py joepyarã ojou vy jojukaare ojuka teĩ napembopagai 'rã huguy omoëague re.

<sup>28</sup> Tetã onhemiaty py ae jojukaare optya 'rãgue sacerdote yvateve va'e omano e'ŷa ja. Ha'e gui sacerdote omano ma rire jojukaare ojevy ju 'rã oyvy py.

<sup>29</sup> Ha'e va'e ma penderekorã ombopara pyre, peneramymino kuery ikuai va'erã pe guive, penderekoa ha'e javi rupi.

<sup>30</sup> — Jojukaague hexaare kuery omombe'u ramo mae ma jojukaare pejuka 'rã. Peteĩ'i ri hexaare oiko ramo ma nda'evei 'rã pejuka aguã.

<sup>31</sup> Jojukaare omano aguã rami oiko rire ma nda'evei 'rã pemboekovia uka aguã. Pejuka 'rãe.

<sup>32</sup> Ha'e rami ae avi xapy'a rei tetã py onhemi oikovya gui ojevy ju 'rã oyvy re ae, sacerdote yvateve va'e omano e'ŷ mbove ma voi. Ha'e va'e voi napemboekovia ukai 'rã,

<sup>33</sup> pejapo e'ŷ aguã yvy pendekuaia ha'eve'ŷ va'e itui aguã rami, mba'eta jouguy omoëague ma ojapo 'rã yvy ha'eve'ŷ va'e itui aguã rami. Peteĩ've henda py pendeyvy ndapeiky'a'oi jouguy omoëague gui, jouguy moëare ruguy pemoë e'ŷ vy.

<sup>34</sup> Ha'e nunga rupi pejapo eme yvy pendekuaia ha'eve'ŷ va'e optya aguã rami, ha'e va'e mbyte rupi xee aiko aví ramo. Mba'eta xee SENHOR aiko Israel kuery mbyte.

## 36

### *Kunhague yvy jopyare omenda aguã re ijayvuague*

<sup>1</sup> Ha'e gui Moisés oĩa py ovaëmba okuapy Gileade ramymino kuery huvixa ikuai va'e. Gileade ma Maquir ra'y, Maquir ma Manassés ra'y, Manassés ma José ra'y. Ha'e gui ha'e kuery ijayvu okuapy Moisés ha'e Israel kuery ruvixa ikuai va'e renonde py.

<sup>2</sup> Ha'e vy aipoe'i okuapy:

— Oreruvixa, ndevy SENHOR ojapo ukaague rami vy kova'e yvy xortea oexaa rupi reme'ẽ uka va'ekue Israel kuery yvyrã. Ha'e gui oreruvixa, SENHOR ijayvuague rami ae avi rejapo va'ekue oreryke'y Zelofeade yvykue tajy kuery pe ju omboaxaa aguã rami.\*

<sup>3</sup> Ha'e rami teĩ xapy'a rei ha'e va'e kuery omenda 'rã Israel kuery regua mboae re. Ha'e ramo ma ha'e kuery yvyrã ojopy va'ekue oipe'aa 'rã oreramoĩ kuery yvykue gui, ha'e omboaxaa 'rã amboae regua mba'erã, ime kuery regua mba'e ae. Ha'e rami 'rã oipe'aa orevyrã xortea oexaa rupi rojopy va'ekue gui.

<sup>4</sup> Mba'eta jubileu ma'etŷ Israel kuery pegua ojeupity nhavõ ma kunhague yvyrã ojopy va'ekue oaxa 'rã ime kuery regua pe ae.\* Ha'e rami vy oyvyrã ojopy va'ekue oipe'aa 'rã oreramoĩ kuery regua yvykue gui — he'i okuapy.

<sup>5</sup> Ha'e ramo Moisés ijayvu Israel kuery pe, SENHOR ojapo ukaa rami vy. Ha'e vy aipoe'i:

\* **36:2** Números 27.1-11    \* **36:4** Levítico 25.8-34

— José ramymino kuery va'e regua ma anhetẽ rupi meme ijayvu.

<sup>6</sup> Mba'eta po ramí ae SENHOR oeja va'ekue Zelofeade rajy kuery pe. Aipoe'i va'ekue: “Ha'e kuery pe ma ha'eve amongue va'e re rei omenda aguã teĩ guamoĩ ramymino kuery regua re anho.

<sup>7</sup> Ha'e ramí vy Israel kuery peteĩ-teĩ regua mba'e yvy ndoaxai 'rã amboae regua mba'erã. Mba'eta Israel kuery ikuai 'rã guamoĩ kuery mba'ekue yvy py ae.

<sup>8</sup> Xapy'a rei Israel kuery peteĩ regua tajy omба'erã ojopy 'rã guamoĩ kuery yvykue. Ha'e ramí vy omenda 'rã guamoĩ ramymino kuery regua re ae, Israel kuery peteĩ-teĩ ikuai aguã guamoĩ kuery yvykue py.

<sup>9</sup> Ha'e ramí vy peteĩ-teĩ regua oyvyrã ojopy va'ekue gui ndoaxai 'rã amboae regua pe. Mba'eta Israel kuery peteĩ-teĩ ikuai 'rã guamoĩ kuery yvykue py ae”, he'i va'ekue.

<sup>10</sup> Moisés pe SENHOR ojapo ukaague ramí ae Zelofeade rajy kuery ikuai.

<sup>11</sup> Ha'e ramí vy Zelofeade rajy kuery Macla, Tirza, Hogla, Milca ha'e Noa ma otuty ra'y kuery re meme omenda,

<sup>12</sup> José ra'y Manassés ramymino kuery va'e regua re ae omendapa. Ha'e ramí vy oyvyrã ojopy va'ekue optytapa tamoĩ ramymino kuery regua mba'e ae.

<sup>13</sup> Ha'e va'e ayvu ha'e javi SENHOR oeja va'ekue Moisés pe Israel kuery rekorã, Moabe yvy ka'aguy e'ŷa py ikuai jave, Jordão yakã yvýry, Jericó tetã rexei.

## Deuteronômio peteĩ nhiruĩa kuaxia Moisés ombopara va'ekue

Jordão yakã yvýry Moisés ijayvu ypy'iague

## Deuteronômio peteĩ nhiruĩa kuaxia Moisés ombopara va'ekue

Tery Deuteronômio ma “lei omombe'u porâveague” he'ia, mba'eta kova'e kuaxia para re Israel kuery pe Moisés omombe'u porâve Nhanderuete guigua lei. Omombe'u avi ha'e kuery teko a e'ya rupi oguata jave Nhanderuete opena porâague, ha'e omongeta guive Canaã yvy re oo vy onhe'ẽ rendu aguã. Moabe yvy re teri ikuai jave omombe'u, Jordão yakã regua kuaray oua katy, Canaã yvy re oo ta jave.

Kova'e kuaxia para re Moisés omombe'u porâve avi Nhanderuete reko: “Pendu ke, Israel kuery. Peteĩ' i oiko Senhor, Senhor Nhanderuete ae. Ha'e nunga rupi peayvu 'rã Senhor Penderuete pendep'y'a, penenhe'ẽ ha'e penembaraetea ha'e javi py”, he'i (6.4-5). Moisés ijayvu avi Nhanderuete renonde jajererokyjea rupi nhanhe'ẽ rendu aguã: “Ha'e nunga rupi Israel kuery, mba'e nunga tu Senhor oipota pejapo? Senhor Penderuete renonde pejererokyjea rupi pendekuai aguã anho, heko rupi pendekuai, Senhor Penderuete peayvu ha'e ixupe peiko aguã pendep'y'a ha'e penenhe'ẽ ha'e javi py, ha'e pejapopa aguã Senhor ojapo uka va'e ha'e oayvu oeja va'ekue, aÿ pêvy amboaxa va'e, ha'e rami vy pendekuai porã aguã”, he'i (10.12-13).

Kuaxia para opaa py ijayvu Moisés omanoague re, mba'eta Meribá py Nhanderuete nonhe'ẽ rendui rire ixupe noguerovaẽ ukai heta va'e kuery ijyvyrã ome'ẽ va'ekue py. Moisés rekoria Nhanderuete oiporavo uka ipytyvõare Josué heta va'e kuery ogueraa aguã. Ha'e rã Moisés ma Pisga yvyty oẽ, ha'e va'e gui Canaã yvy katy oma'ẽ ranhe aguã. Ha'e rire yvyty áry ae Moisés omano raka'e, Israel kuery pegua profeta yvateve va'e.

### *Israel kuery ikuaiague Moisés omombe'uague*

<sup>1</sup> Kova'e ayvu rupi ma Israel kuery pe Moisés ijayvu raka'e Jordão yakã rovai teri ikuai jave, teko a e'ya yvy joja reia py, Sufe ye'ẽ yvýry, Parã, Tofel, Labã, Hazerote ha'e Di-Zaabe mbyte ikuiaia py.

<sup>2</sup> Onze ára ogueraa 'rã va'ekue Horebe yvyty guive Cades-Barnéia peve oguata oje'oivy aguã, Seir yvy'ã rupi tape oo va'e rupi.\*

<sup>3</sup> Quarenta ma'etÿa va'e onze jaxy ijypy'ia ára py Moisés ijayvu raka'e Israel kuery pe, SENHOR ha'e kuery re ijayvuague rami ae,

<sup>4</sup> amorreu kuery ruvixa Seom Hesbom pygua, ha'e Basã pygua kuery ruvixa Ogue Astarote py oiko va'ekue ha'e kuery ojuka rire Edrei py.

<sup>5</sup> Jordão yakã rovai, Moabe yvy re teri ikuiaia py Moisés omboypy kova'e lei omombe'u porâve aguã. Ha'e vy aipoe'i:

<sup>6</sup> — SENHOR Nhanderuete ma ijayvu Horebe yvyty re nhande kuery nhandekuai jave. Ha'e vy aipoe'i va'ekue: “Kova'e yvyty re pepyta ranheague ha'eve ma.

<sup>7</sup> Pejere ha'vy, pejepe'apa. Tapeo yvyty rupi amorreu kuery ikuiaia katy, ha'e yvy joja reia re yvyty ikuiaia katy, Neguebe katy voi, ha'e ye'ẽ yvýry cananeu kuery ikuiaia katy, Líbano katy Eufrates yakã guaxu peve.

<sup>8</sup> Ne'exa, ha'e va'e yvy ha'e javi amoï penerononde. Pevaẽ ha'vy, ha'e va'e yvy re penhemboekoa aguã, SENHOR oura reve peneramoï kuery pe ome'ẽ rire, Abraão, Isaque

\* <sup>1:2</sup> Horebe ma Sinai yvyty ae (Êxodo 3.1, Malaquias 4.4). Onze ára ete'i oguata 'rãgue py quarenta ma'etÿ re ha'e kuery ikuai raka'e teko a e'ya rupi, Nhanderuete ombopaga rã nonhe'ẽ renduiague re (Números 14.26-34).

ha'e Jacó, ha'e gui ha'e kuery ikuai rire hamymino jevy-jevy kuery peguarã voi", he'i va'ekue.

### *Êxodo 18.13-27*

<sup>9</sup> — Ha'e va'e jave py ae aipoa'e pendevy: "Xee ae'i ndaxepo'aka reguai peẽ kuery rogueraa aguã,

<sup>10</sup> SENHOR Penderuete penemboetave rire. Ha'e ramo aÿ pendereta ma jaxy-tata yva re ojekuaa va'e rami.

<sup>11</sup> Tove SENHOR peneramoĩ kuery Ruete tapenemboetave mil-kue peve ju, ha'e ijayvuague rami vy.

<sup>12</sup> Ha'e rami avi mba'exa tu xee ae'i aropo'aka ta pendepoyikue ha'e javi, pendevoyi, ha'e pepu'ã reia?

<sup>13</sup> Peiporavo ha'vy avakue hi'arandu, oiko kuaa ha'e opena kuaa va'e, peẽ kuery peteĩ-teĩ regua gui ae, amoĩ aguã pendere opena va'erã", ha'e va'ekue.

<sup>14</sup> — Ha'e rã xembovai vy "Ha'evea rami ndeayvu", peje va'ekue.

<sup>15</sup> Ha'e rã peẽ kuery peteĩ-teĩ regua akã aenoĩ vy amoĩ peẽ kuery ruvixarã, avakue hi'arandu ha'e opena va'e meme. Ha'e vy amoĩ mil ikuai va'e-va'e re opena va'erã, ha'e gui cem, cinqüenta ha'e dez ikuai va'e re opena va'erã, peẽ kuery peteĩ-teĩ regua re ae.

<sup>16</sup> Ha'e va'e jave py xeayvu pendere opena va'ety kueryrã pe. Ha'e vy aipoa'e va'ekue: "Pendu 'rã penderegua kuery joe nda'evei reia, ha'evea'i rami 'rã peikuua pota avakue joegua meme nda'evei rei va'e re, ha'e ÿ vy amboae regua ha'e kuery reve ikuai va'e re teĩ.

<sup>17</sup> Ha'e rami vy peikuua potaa py peteĩ regua peayvuve eme joegui, pendu 'rã yvyigueve'i ha'e yvatekueve ijayvua teĩ. Pekyje eme guive avave gui, mba'eta peikuua pota kuaa aguã ma Nhanderuete gui ae ou. Ha'e rami avi mba'emo peikuua pota aguã haxy ete ri ramo pemboaxa 'rã xea py, ha'e rã xee voi aendu 'rã", ha'e va'ekue.

<sup>18</sup> Ha'e rami ae ha'e va'e jave py xeayvu va'ekue mba'emo pejapo aguã ha'e javi re.

### *Números 13.1-24*

<sup>19</sup> — Ha'e gui ma Horebe yvyty gui jaje'oi vy jaguata tekao e'ÿa ijava etea pexaague ha'e javi rupi. Tape amorreu kuery regua yvyty ikuai va'e rupi jaje'oi SENHOR Nhanderuete ojapo ukaague rami vy. Ha'e vy Cades-Barnéia peve nhavaẽ karamboae.

<sup>20</sup> Ha'e ramo xee aipoa'e va'ekue peẽ kuery pe: "Amorreu kuery regua yvyty ikuai va'e re nhavaẽ ma, nhandeyvyrã SENHOR Nhanderuete ome'ẽ va'e re ae.

<sup>21</sup> Ne'exa, kova'e yvy ma SENHOR Nhanderuete omoĩ ma penerenonde. Tapeo ha'vy penhemboekoa aguã, SENHOR peneramoĩ kuery Ruete aipoe'iage rami vy. Pekyje eme, penhemondyi eme guive", ha'e va'ekue.

<sup>22</sup> Ha'e ramo peẽ kuery xea py pevaẽmba vy aipopeje va'ekue: "Nhamondouka 'rã avakue nhanerenonde guarã, yvy re oexa pota aguã nhandevy, ha'e gui nhandevy omombe'u ju aguã tape jaa aguã, ha'e tetã oĩa py tema nhavaẽ aguã", peje va'ekue.

<sup>23</sup> Ha'e rami pendeayvua xee ajou porã vy doze avakue aiporavo karamboae penembyte gui, peteĩ-teĩ regua peteĩ'i ava.

<sup>24</sup> Ha'e ramo ha'e kuery jogueraa vy yvyty ikuai va'e rupi oguata vy yvy re oexa pota oje'ovy raka'e. Ha'e vy Escol yvyugua peve ovaẽ vy

<sup>25</sup> yvy re mba'emo aju ikuai va'ekue opo py ojopy vy ha'e nunga ogueru okuapy nhanda py. Ha'e vy nhandevy omombe'u vy "Yvy porã ete SENHOR Nhanderuete nhandevy ome'ẽ va'e", he'i va'ekue.

### *Números 13.25-33*

<sup>26</sup> — Ha'e rami teĩ peẽ kuery ma ndapeoxei. Ha'e rami 'rãgue py SENHOR Penderuete ojapo ukaague rupi e'ÿ pendekuai.

<sup>27</sup> Ha'e rami vy pendero rupi voi penhembooxo rivea rami pendeayvu tema pekuapy. Ha'e vy aipopeje va'ekue: " SENHOR ma nanhanderayvui vy ae ma nhi'ã nhandepe'apa

Egitó yvy gui, amorreu kuery po py nhanemboaxapa rã ha'e kuery nhanemomba aguã rive.

<sup>28</sup> Ha'e gui marã katy 'rã tu jaje'oi aguã ha'eve? Mba'eta nhanderyvy kuery ojapo nhandepy'a ikangy rei aguã rami. Mba'eta ha'e kuery aipoe'i va'ekue: 'Ha'e pygua kuery ma nhandegui tuvixakueve ha'e yvatekueve ikuai. Ha'e kuery retã voi tuvixave, ha'e yva peve ikorapa va'e. Ha'e gui roexa avi ha'e py Enaque ra'y kuery regua', he'i", peje va'ekue.<sup>†</sup>

<sup>29</sup> Ha'e ramo xee aipoa'e va'ekue pendevy: "Penhemondyi rei eme, pekyje eme guive.

<sup>30</sup> Mba'eta SENHOR Penderuete penerenonde rupi oo vy ha'e ae joe opu'ã 'rã peẽ kuery repy vy, Egito yvy re pexa pavãa py nhandevy mba'emo ojapoague rami ae,

<sup>31</sup> ha'e tekao e'ýa re nhandekuaia rupi ojapoague rami voi. Ha'e py ma pexapa karamboae ava gua'y ogueraa rami avi SENHOR Penderuete pendereraa henoiny tape peguataa ha'e javi rupi, apy pevaẽ peve.

<sup>32</sup> Ha'e rami teĩ aý ma ndapejeroviai pekuapy SENHOR Penderuete re,

<sup>33</sup> penerenonde tape ha'e javi rupi oo teĩ, ojou uka vy peẽ kuery pepyta aguã. Pyávy ma tata py oexa uka tape peo aguã, ha'e rã ára py ma arai rupi", ha'e va'ekue pendevy.

### Números 14.20-38

<sup>34</sup> — Ha'e rami pendeayvua SENHOR oendu vy ivai reve oura reve aipoe'i va'ekue:

<sup>35</sup> "Anhetẽ ete aipoa'e, kova'e avakue heko vai va'e regua peteĩve ndoexai 'rã yvy porã, tamoi kuery pe ame'ẽ aguã xeayvuague,

<sup>36</sup> Jefoné ra'y Calebe anho e'ý vy. Ha'e va'e ma oexa 'rã. Ha'e rami vy yvy ha'e opyrõ ma oikovyague ame'ẽ 'rã ixupe ha'e ta'y kuery pe ju, SENHOR rupive oiko aguã onhea'ã rire", he'i va'ekue SENHOR.

<sup>37</sup> Ha'e rami avi pendekáuxa xevy voi SENHOR ivai vy aipoe'i va'ekue: "Ha'e rami ae avi ndee voi ndereupityi 'rã ha'e va'e yvy.

<sup>38</sup> Ha'e rã Num Josué ra'y nerentonde rupi oiko va'e, ha'e va'e ae 'rã oupity. Embopy'a guaxu ke ha'vy, mba'eta ha'e va'e ojapo 'rã Israel kuery heko aguã rami yvy ame'ẽ va'e re.

<sup>39</sup> Ha'e gui pendera'y kue'iry, ha'e kuery pe 'Ombo'a pyrã' pejeague va'e, pendera'y kuery mba'emo vai neĩ mba'emo porã ma voi ndoikuuaii va'e kuery ae oike 'rã ha'e py. Ha'e kuery pe ae 'rã ame'ẽ, ha'e ramo heko 'rã okuapy ha'e py.

<sup>40</sup> Ha'e rã peẽ kuery ma pejere, tapeopa ju tekao e'ýa katy, tape Ye'ẽ pytã katy oo va'e rupi", he'i va'ekue SENHOR.

### Números 14.39-45

<sup>41</sup> — Ha'e ramo peẽ kuery aipopeje va'ekue xevy: "Rojejavy rima SENHOR rovai. Roje'oi nho 'rã joe ropu'ã vy, SENHOR Nhanderuete ijayvuague rami vy", peje vy peteĩ-teĩ penerembiporu joe opu'ãa pygua pejopypa vy pendepy'a py pemoĩ ae pekuapy yvyty ikuaii katy peje'oi aguã.

<sup>42</sup> Ha'e ramo SENHOR aipoe'i karamboae xevy: "Aipo're ha'e kuery pe: 'Tapeo eme, pepu'ã eme joe, mba'eta xee ndaikoi 'rã peẽ kuery mbyte, penderovaigua kuery pendereitypa e'ý aguã', 're", he'i va'ekue.

<sup>43</sup> Ha'e rami pendevy xeayvu va'ekue ri napenduxei pekuapy. Ha'e rami 'rãgue py SENHOR nhe'ẽ rendua rupi e'ý, ha'e pendejee anho rei pejeroviaa rupi peje'oi karamboae yvyty ikuaii katy.

<sup>44</sup> Ha'e ramo ha'e va'e yvy re amorreu kuery ikuai va'e penerovaexi aguã joguerupa vy eiru rami penemonha. Ha'e rami vy pendereitypa Seir guive Horma peve.

<sup>45</sup> Ha'e ramo pejevypa ma vy pejae'o va'ekue SENHOR renonde. Ha'e rami teĩ SENHOR noendui, ndojapyxakai ae pejapukaia re.

<sup>46</sup> Ha'e va'e rire mbovy ára rei e'ý pendekuai va'ekue Cades py ae.

<sup>†</sup> 1:28 Enaque ra'y kuery ma gigante ikuai raka'e (Números 13.28).

## 2

*Cades gui Zerede peve oguata oje'oivy jave guare*

<sup>1</sup> — Ha'e va'e rire ma jajeapa vy teko a e'ŷa katy ju jaje'o i, tape ye'ẽ pytã katy oo va'e rupi, SENHOR xevy aipoe'iague rami vy. Ha'e rami vy mbovy ára re rei e'ŷ jajere-jere jakuapy Seir regua yvyty yvýry rupi.

<sup>2</sup> Ha'e rã SENHOR ijayvu vy aipoe'i xevy:

<sup>3</sup> "Pejere-jere vaipa ma kova'e yvyty yvýry rupi. Pejeapa ju ke kuaray ijapu'a'ia katy.

<sup>4</sup> Ha'e vy heta va'e kuery pe ndeayvu vy aipo're 'rã: 'Peaxa 'rã penderyke'y kuery Esaú ramymino kuery Seir re ikuaia rupi. Ha'e va'e kuery ma okyje 'rã peẽ kuery gui. Va'eri peiko kuaa pota ta'vy opa mba'e py.

<sup>5</sup> Pejoguero'a rei eme ha'e kuery reve, mba'eta ha'e kuery yvy ma name'ẽi 'rã pendevy, neĩ ruxã'i pepyrõ aguã rive voi. Mba'eta Esaú kuery pe ae ame'ẽ raka'e Seir yvyty regua ha'e javi.

<sup>6</sup> Ha'e kuery gui tembi'u pe'u va'erã pejogua 'rã peráta re ae. Yy pey'u va'erã voi pejogua peráta re', 're 'rã" he'i va'ekue SENHOR.

<sup>7</sup> Mba'eta SENHOR Penderuete penemoingo porã va'ekue pendepo py penembiapoa ha'e javi re. Ha'e ma oikuaapa kova'e teko a e'ŷa rupi peguataa. Quarenta ma'etõ re SENHOR Penderuete oiko pendereve. Ha'e ramo mba'eve rei ndoatai pendevy.

<sup>8</sup> Ha'e gui jaaxa nhanderyvy Esaú ramymino kuery Seir re ikuaia yke rupi. Ha'e rami vy tape Elate ha'e Eziom-Geber gui yvy joja reia katy oo va'e gui jajeapa vy tape Moabe regua teko a e'ŷa rupi oo va'e rupi ju jaa.

<sup>9</sup> — Ha'e gui SENHOR aipoe'i xevy: "Pejavyky rei eme Moabe pygua kuery, neĩ pepu'ã rei eme guive ha'e kuery re, mba'eta ha'e kuery yvy ma name'ẽi 'rã pendevy, mba'eta Ar tetã ame'ẽ ma voi Ló ramymino kuery pe", he'i.

<sup>10</sup> (Ha'e py ymave rupi ikuai va'ekue ma emim kuery. Ha'e va'e kuery ma tuvixakue, heta ete, ha'e anaquim kuery rami ipuku va'ekue raka'e.

<sup>11</sup> Ha'e kuery pe ma "Refaim ikuai" 'ea va'ekue, anaquim kuery pe rami avi. Ha'e rã ha'e kuery pe Moabe pygua kuery ma "Emim kuery" he'i.

<sup>12</sup> Ha'e horeu kuery voi ikuai va'ekue Seir py. Va'eri Esaú ra'y kuery omomba vy omondyipa guenonde gui, ha'e rami vy hekoague py ha'e kuery ju ikuai, Israel kuery ojapoague rami avi oyvyrã SENHOR ome'ẽ va'ekue py.)

<sup>13</sup> Ha'e gui "Pepu'ã ke aŷ, ha'e peaxa Zerede yakã rovaigua re", SENHOR he'iague rami vy jaaxa va'ekue Zerede yakã rovaigua re.

<sup>14</sup> Cades-Barnéia guive Zerede yakã rovaigua peve jaguataague ha'e javi ma trinta e oito ma'etõ, nhande kuery regua avakue joe opu'ã va'ety ha'e javi omanomba peve nhandeaty mbyte py ae, SENHOR oura reve ijayvu ma voiague rami vy.\*

<sup>15</sup> Ha'e rami vy SENHOR ae opo oupi ha'e kuery rovai, nhandeaty mbyte gui omomba ha'e omokanhymba peve.

*Ar tetã rupi Arnom yakã oaxapa oje'oivyague re ima'endu'aague*

<sup>16</sup> — Ha'e gui heta va'e kuery mbyte gui avakue joe opu'ã va'ety omanomba ma rire

<sup>17</sup> SENHOR ijayvu vy aipoe'i xevy:

<sup>18</sup> "Aŷ ma peaxa 'rã Ar rupi, Moabe pygua kuery yvy rupi,

<sup>19</sup> ha'e pevaẽ 'rã Amom ra'y kuery renonde katy peve. Ha'e rã pejavyky rei eme, neĩ pepu'ã rei eme ha'e kuery re, mba'eta Amom ra'y kuery yvy ma name'ẽi 'rã pendevyvrã, Ló ra'y kuery oyvyrã ame'ẽ ma voi rire."

<sup>20</sup> (Ha'e rami avi ha'e va'e yvy pe "Refaim kuery yvy" 'ea avi, ha'e kuery voi ikuai ranhe rire, ha'e kuery pe amonita kuery "Zanzumim kuery" 'ea va'e ae.

\* **2:14** Números 14.28-35

<sup>21</sup> Ha'e kuery ma tuvixakue, heta ete, ha'e anaquim kuery rami ipuku va'ekue raka'e. Ha'e gui SENHOR omomba va'ekue amonita kuery renonde gui. Ha'e ramo ha'e kuery ju omondyipa ma vy ikuai hekoague py.

<sup>22</sup> Ha'e rami ae avi Esaú ra'y kuery re ojapo raka'e Seir py, mba'eta ha'e kuery renonde horeu kuery omomba rire Esaú ra'y kuery ju ikuai hekoague py, kova'e ára peve.

<sup>23</sup> Ha'e gui Caftor pygua kuery voi guekoa gui ae ou vy omomba avi raka'e aveu kuery Gaza tekaoa peve ikuai va'ekue, ha'e vy ikuai hekoague py.)

<sup>24</sup> Ha'e gui "Pepu'ã ke ha'vy. Tapeo, ha'e peaxa Arnom yakã. Ne'exa, ndepo py ma amboaxa Hesbom pygua huvixa Seom amorreu regua, ha'e ijyvy ha'e javi. Tapeo ha'vy, pendekuai ha'e py, pepu'ã ha'e kuery re.

<sup>25</sup> Aÿ gui amboypy 'rã yva guy rupi ikuai va'e ha'e javi re amoï aguã peẽ kuery gui okyjepa rei aguã. Ha'e kuery pendepo'akaa omombe'ua rã oendu vy oryryipa 'rã okuapy pendegui, ndaekorâvei rei vy", SENHOR he'i va'ekue.

### Números 21.21-30

<sup>26</sup> — Ha'e ramo Quedemote tekaoa e'ÿa gui xee amondouka ayvu mombe'uarã kuery Hesbom pygua huvixa Seom-a py. Ayvu ha'evepa rei aguã regua amombe'u uka vy aipoa'e:

<sup>27</sup> "Tove toroaxa ndeyvy rupi. Tape rupi anho 'rã roo. Ndorojepe'ai 'rã roiporu kuaa katy, neñ roiporu kuaa e'ÿa katy voi.

<sup>28</sup> Tembi'u ro'u va'erã reme'ẽ peráta re ae, yy roy'u va'erã voi peráta re reme'ẽ. Ha'e vy tove toroaxa ndeyvy rupi,

<sup>29</sup> Esaú ra'y kuery Seir py ikuai va'e oremboaxaague rami avi, ha'e Moabe pygua kuery Ar py ikuai va'e voi. Ha'e rami vy roaxa aguã Jordão yakã rovaigua re, orevvyrã SENHOR Oreruete ome'ẽ va'ekue py rovaẽ peve", ha'e uka va'ekue.

<sup>30</sup> Ha'e rami teñ Hesbom pygua huvixa Seom ndoipotai jaaxa ijyvy rupi, mba'eta SENHOR ae ojapo inhakã ratãa rupi onhe'ẽ py ndoipotaia oendu aguã rami, pendepo py omboaxa aguã aÿ pexaa rami ae.

<sup>31</sup> Ha'e vy SENHOR aipoe'i: "Ne'exa, apy amboypy ma pendepo py omboaxa aguã Seom ha'e ijyvy ha'e javi. Tapeo ha'vy peipe'apa, peẽ ju ijyvykue py penhemboekoa aguã", he'i va'ekue.

<sup>32</sup> — Ha'e gui Seom ojeupagua kuery ha'e javi reve ou okuapy nhanderovai opu'ã aguã Jaza py.

<sup>33</sup> Ha'e rami teñ nhandepo py SENHOR Nhanderuete omboaxa ramo jaitypa, ta'y kuery ha'e ixupagua kuery ha'e javi.

<sup>34</sup> Ha'e va'e jave ha'e kuery retã ikuai va'e jajopypa vy nhamomba katuñ'i, avakue, kunhague ha'e kyrigue'i guive. Neñ peteñve ma voi ndajaejai va'ekue ikuavie aguã.

<sup>35</sup> Hymba kuery anho tema jajopy nhanerymbarã, ha'e hetã jaipe'a va'ekue py mba'emo oeja va'ekue voi.

<sup>36</sup> Arnom yvjugua yvýry Aroer oĩ va'e, ha'e ha'e py tetã oĩ va'e guive Gileade peve, tetã ikora yvateve va'e meme teñ jaipe'apa, nhandepo py SENHOR Nhanderuete omboaxapa ramo.

<sup>37</sup> Ha'e rã Amom ra'y kuerya py anho nanhavaẽi va'ekue, neñ Jaboque yakã yvýry rupi, yvyty yvýry tetã ikuai va'e rupi, neñ teñve henda py SENHOR Nhanderuete nanhanemon-doukaia rupi.

## 3

### Números 21.31-35

<sup>1</sup> — Ha'e gui jajeapa vy Basã katy tape oo va'e rupi ju jaa. Ha'e ramo Basã pygua huvixa Ogue nhanerovaexí vy ou ojeupagua kuery ha'e javi reve, nhandere opu'ã aguã Edrei py.

<sup>2</sup> Ha'e rã SENHOR Nhanderuete aipoe'i xevy: "Ekyje eme ha'e kuery gui, mba'eta amboaxa ndepo py, ixupagua kuery ha'e ijyvy ha'e javi reve. Ha'e va'e re pejapo

'rã amorreu kuery ruvixa Seom re pejapoague rami, Hesbom pygua ae va'ekue", he'i va'ekue.

<sup>3</sup> Ha'e rami vy nhandepo py SENHOR Nhanderuete omboaxa avi Basã pygua huvixa Ogue, ixupegua kuery ha'e javi reve. Jajukapa, neĩ peteĩ'i voi oikove aguã rami e'ŷ.

<sup>4</sup> Ha'e va'e jave py nhandepo'aka hetã ha'e javi re. Teĩve tetã noĩ nhandepo'akaa e'ŷ va'ekue. Sessenta tetã re nhandepo'aka Argobe regua yvy ha'e javi, Basã pygua huvixa Ogue openaague.

<sup>5</sup> Ha'e va'e tetã ha'e javi ma ikora yvate va'e meme, ikora rokẽ jokoa va'e voi. Tetã mbovy e'ŷ rei avi jajopy ikora e'ŷ va'e.

<sup>6</sup> Nhamomba katuĩ'i, Hesbom pygua huvixa Seom mba'ekue re jajapoague rami. Peteĩ-teĩ tetã nhamomba, avakue, kunhague ha'e kyrigue ha'e javi.

<sup>7</sup> Mymba kuery anho tema jaraa nhandevy guarã, tetã pygua kuery oguereko va'ekue voi.

<sup>8</sup> Ha'e rami py amorreu kuery huvixa mokoĩve po gui jaipe'a va'ekue ijyvy Jordão yakã kyvõ rupi itui va'ekue, Arnom yakã guive yvyty Hermom yvyty peve.

<sup>9</sup> (Hermom yvyty pe ma Sidom pygua kuery "Siriom" he'i, ha'e rã amorreu kuery ma "Senir" he'i okuapy va'e.)

<sup>10</sup> Ha'e rami vy nhandepo'aka yvy joja reia rupi tetã ikuai va'e re, Gileade regua ha'e javi re, Basã regua re voi, Salca ha'e Edrei peve. Ha'e va'e ma Basã pygua huvixa Ogue openaague meme.

<sup>11</sup> (Mba'eta Basã pygua huvixa Ogue anho'i ma oikove va'ekue refaim kuery regua. Ha'e va'e rupa ma ferro guigua, Amom ra'y kuery retã Rabá re oĩ teri va'e. Ipuku-a ma irundy metros, ha'e rã ipya ma mokoĩ metros, aŷ nha'ãa rami.)

### Números 32.33-42

<sup>12</sup> — Ha'e va'e jave py ae jajopypa nhandeyvyrã. Ha'e gui Arnom yvyugua yvýry Aroer teko a oĩ va'ekue guive Gileade regua yvyty mbytekue peve, tetã ikuai va'e ha'e javi reve amboaxa Rúben ha'e Gade ramymino kuery pe.

<sup>13</sup> Ha'e rã Manassés ramymino kuery mbytekue ikuai va'e pe ma amboaxa Gileade yvy rembyre ha'e Ogue openaague Basã yvy ha'e javi. Argobe regua Basã ha'e javi pe ma "Refaim kuery yvy" 'ea va'ekue.

<sup>14</sup> Ha'e gui Manassés ra'y Jair ojopy Argobe, ha'e va'e ma Basã ae, gesurita ha'e maacatita kuery yvy oje'aa peve. Ha'e vy teko a ikuai va'e ma guery py ae oenoĩ rire "Havote-Jair" 'ea aŷ peve.

<sup>15</sup> Maquir pe ma amboaxa Gileade.

<sup>16</sup> Ha'e rã Rúben ha'e Gade regua kuery pe ma amboaxa Gileade guive Arnom yvyugua peve, ha'e va'e mbyte rupi ija'orã opyta oiny ramo, ha'e gui Jaboque yakã yvýry Amom ra'y kuery yvy oje'aa peve.

<sup>17</sup> Ha'e rami ae avi Arabá rupi ma Jordão yakã opyta ija'orã, Quinerete yupá guive Arabá regua ye'ero peve, ha'e gui kuaray oẽa katy ma Pisga yvy'ã guy katy rupi oo.

<sup>18</sup> — Ha'e va'e jave py pendevy xeayvu vy aipoa'e va'ekue: " SENHOR Penderuete ae ome'ẽ kova'e yvy penderekoarã. Ha'e nunga rupi penderegua avakue ipy'a guaxukue guembiporu reve toaxapa guyvy kuery Israel regua mboae renonde.

<sup>19</sup> Penda'xyx kuery, pendera'y ha'e penderajy kuery anho 'rã opyta penderekoarã amboaxa va'ekue py, penerymba kuery guive, mba'eta aikuua penerymba reta va'ea,

<sup>20</sup> ha'e rami penderyvy kuery voi SENHOR opytu'u aguã ome'ẽa ára peve peẽ kuery pe ranhe pepytu'u aguã ome'ẽague rami avi, ha'e kuery voi hekoa aguã ijyvyrã Jordão yakã rovai re SENHOR Penderuete ome'ẽ va'e py. Ha'e gui mae ma peteĩ-teĩ pejevy 'rã pendeyvyrã amboaxa va'ekue py", ha'e va'ekue.

<sup>21</sup> — Ha'e va'e jave py Josué pe voi xeayvu vy aipoa'e va'ekue: "Nderexa py ae rexapa ma kova'e mokoĩ huvixa re SENHOR Nderuete ojapoague. Ha'ekue rami ae ju 'rã SENHOR ojapo huvixa ikuai va'e openaa rupi ndee reaxa aguã rupi.

**22** Pekyje eme ha'e kuery gui, mba'eta SENHOR Penderuete ae 'rã opu'ã peẽ kuery repy vy", ha'e va'ekue.

### Números 27,12-23

**23** — Ha'e va'e jave xee voi ajapukai SENHOR pe. Ha'e vy aipoa'e:

**24** “Ah SENHOR Oreruete, remboypy ma xee nerembiguai pe rexa uka aguã mba'emo ndepo'akaa rupi ndepo imbaraete va'e py rejapo va'e. Mba'eta mba'e nunga tuuete yva re, e'ŷ vy yvy re teĩ ikuai va'e, ha'e kuery ojapo avi 'rã ndepo'akaa rupi rejapo va'e ramigua?

**25** Ha'e nunga rupi ajerure ndevy, tove taaxa avi, xee voi aexa aguã yvy porã Jordão yakã rovai re itui va'e, ha'e va'e yvytya ha'e javi, Líbano peve", ha'e va'ekue SENHOR pe.

**26** — Ha'e rami teĩ peẽ kuery káuxa SENHOR xevy ivai vy noendu potai. Ha'e rami vy aipoe'i: “Ha'eve ma! Ndeayvuve eme xereve ha'e nunga re.

**27** Eẽ eovy Pisga yvyty apyte áry, ha'e ema'ẽ kuaray ijapu'a'ia katy, ipuku-a katy ha'e oikea katy. Nderexa py rive 'rã rexa, mba'eta nda'evei kova'e Jordão yakã rovai re reaxa aguã.

**28** Ha'e rami avi Josué pe ndeayvu 'rã rembopy'a guaxu ha'e remombaraelea rupi, mba'eta ha'e ma oaxa 'rã kova'e kuery renonde, ojapo 'rã yvy ndee rexa rive va'ekue py hekoa aguã rami", he'i va'ekue.

**29** — Ha'e ramo japytave'i ranhe Bete-Peor katy'i yvyugua oĩ va'e py.

## 4

### SENHOR nhe'ẽ rendua rupi heta va'e kuery ikuai aguã re Moisés ijayvuague

**1** — Aŷ ma Israel kuery, pendu ke ayvu oeja pyre ha'e 'arandua rupigua re rombo'e ta va'e. Pejapo ete peikove ha'e peupity aguã pendeyvyrã SENHOR Penderuete ome'ẽ va'e.

**2** Napemoĩvei 'rã ayvu xee amboaxa va'e áryve, neĩ napemboivei 'rã guive, SENHOR Penderuete ojapo uka va'ekue pejapopa aguã, xee amboaxaa rami ae.

**3** Penderexa py ae pexa va'ekue tuuete Baal re oje'oi va'ekue re SENHOR Penderuete ojapoague, mba'eta avakue Peor pygua kuery nguuete Baal re oje'oi va'ekue ma omokanhymba raka'e penembyte gui.

**4** Ha'e rã peẽ kuery SENHOR Penderuete re pejerovia ete va'e ma pekuavepa aŷ peve.

**5** Ne'exa, SENHOR Xeruete omombe'u ukaague rami vy xee rombo'e ma oayvu oeja va'ekue ha'e hi'arandua rupigua re, pendeyvyrã pejopy va'ekue py pendekuai ma vy ha'e rami ae pendekuai aguã.

**6** Pendejee pemoĩ ha'vy pejapo ete aguã, mba'eta ha'e rami vy pexa uka 'rã pene'arandua ha'e peiko porã kuaa amboae regua kuery rembiexa py. Ha'e nunga ayvu oeja pyre ha'e kuery oendu vy “Anhetẽ ete kova'e kuery ma hi'arandu ete ha'e ikuai porã kuaa va'e”, he'i 'rã okuapy.

**7** Mba'eta mba'e nunga kuery regua tu heta teĩ nguu ete oguereco SENHOR Nhanderuete jajapukai nhavõ nhanepytyvõ va'e ramigua?

**8** Mba'e nunga kuery regua tu heta teĩ oguereco ayvu oeja pyre ha'e 'arandu rupigua aŷ penderekorã amboaxa va'e ha'e javi ramigua?

**9** — Ha'e rami avi perekoo kuaa pota peẽ ae pendekuaia ha'e penenhe'ẽ, penderexarai e'ŷ aguã penderexa py pexa va'ekue-ekue re, ha'e pendepy'a gui pemokanhy eme peikoa pukukue re. Peikuua uka avi 'rã pendera'y ha'e peneramymino kuery pe.

**10** Pendexarai eme Horebe yvyty re Penderuete renonde pendekuai jave guare re, xevy SENHOR aipoe'i jave: “Emboatypa ke kova'e kuery, tojapyxaka xeayvu re, yvy re ikuiai pukukue re xerenonde ikuai aguã ojererokyjea rupi, ha'e gua'y kuery voi ombo'e aguã ha'e rami” he'i va'ekue.

**11** Ha'e va'e yvyty yvýry pevaẽ vy pearõmba pekuapy. Yvyty ma tata raku jekuaa yva mbyte peve, ha'e gui pytũ vaikue, arai pytũ guive.

**12** Ha'e gui tata mbyte gui SENHOR ijayvu. Ijayvu nhendu rā pendu va'ekue. Ha'e rami ete ijayvua pendu va'eri neñ peteñve py ndapexai va'ekue.

**13** Pendevy peguarā omombe'u guexeve guarā, ojapo uka avi dez ayvu ojapo pyrā. Ha'e va'e ma ombopara mokoñ itape re.

**14** Ha'e va'e jave ae SENHOR xevy penembo'e uka avi oayvu oeja va'ekue ha'e o'arandu rupigua re, pendeyvyrā pejopy va'ekue py pendekuai ma vy pejapopa aguā.

**15** Pereko kuaa pota ha'vy penenhe'ẽ, mba'eta Horebe vvyty re tata mbyte gui SENHOR Penderuete pendevy ijayvu jave neñ teñgueve ma ndapexai va'ekue,

**16** penhemboeko ky'a rei e'ŷ aguā mba'emo ra'angaa pembojerovia va'erā rive pejapoa py, ava e'ŷ vy kunha ra'angaa teñ ae ma,

**17** ha'e'ŷ vy mba'emo mymba yvy rupi ikuai va'e, e'ŷ vy yva guy rupi oveve va'e ramigua,

**18** mymba yvy rupi otyryry va'e, e'ŷ vy pira yy guýry ikuai va'e voi.

**19** Peiko kuaa pota ke, yva re pema'ẽ vy kuaray, jaxy, jaxy-tata ha'e mba'emo yva re ojekuaa va'e ha'e javi pexa vy pejekore vy henonde penenapy'ã re peñreve pemboete e'ŷ aguā, mba'eta ha'e nunga ma SENHOR Penderuete ae oeja va'ekue yva guýry ha'e javi regua ikuai va'e peguarā rive.

**20** Ha'e rā peñkuery ma SENHOR pendejogua vy penerenoẽmba tata rupa ferro ky'a'oaty, Egito yvy re pendekuaia gui, ojeupe guarā ae pendereru, aŷ minha pexaa rami.

**21** — Ha'e gui pendekáuxa xevy SENHOR ivai vy oura xee aaxa e'ŷ aguā yvy porā Jordão yakā rovai re pendekoarā SENHOR Penderuete ome'ẽ va'e py.

**22** Ha'e rami rā xee ma kova'e tekaoa py ae 'rā amano, ndaaxai 'rā Jordão yakā rovai re. Ha'e rā peñkuery ma peaxa 'rā ha'e va'e yvy porā py penderekaoa aguā.

**23** Peiko kuaa pota ke penderexarai e'ŷ aguā SENHOR Penderuete guexeve guarā ojapo va'ekue gui, pejapo e'ŷ aguā mba'emo ra'angaa pembojerovia va'erā, ha'e nunga SENHOR Penderuete ndojapo ukai rire.

**24** Mba'eta SENHOR Penderuete ma tata nhomokanhyarā. Ha'e ma oipota hexe anho pejerovia.\*

**25** — Ha'e gui pendera'y ha'e peneramymino jevy vy yvy re pendetuja'ipa ma jave, xapy'a rei penhemboeko ky'aa rupi pejapo 'rā mba'emo ra'angaa pembojerovia va'erā, ha'e vy SENHOR Penderuete renonde ha'eve'ŷ va'e pejapo 'rā pendevy ivai aguā rami,

**26** aŷ gui ma yva ha'e yvy opyta peñkuery rekukue moma'endu'aarā, mba'eta peñmanomba voi 'rā pendeyvyrā Jordão yakā rovai re peaxa vy pejopyague py. Ha'e py ma ndapeiko pukui 'rā. Ha'e rami 'rāgue py penemombaa 'rā.

**27** Ha'e rami vy SENHOR penemoaĩmba 'rā amboae regua ikuiaia rupi. Mboapy'i ete'i 'rā pekuave, yvy regua kuery ikuiaia rupi SENHOR penemondoukaague rupi.

**28** Ha'e py ma penderueterā pembojerovia 'rā avakue rembiapo rive, yvyra ha'e ita guigua, oexa e'ŷ va'e, oendu e'ŷ va'e, okaru e'ŷ va'e, neñ oetū e'ŷ va'e.

**29** Ha'e gui mae ma peka 'rā SENHOR Penderuete, ha'e vy pejou 'rā, penenhe'ẽ ha'e pendep'y ha'e javi py ri peka vy.

**30** Mba'eta pejexavaia py opaa ára ha'e nunga ha'e javi pendere ou ramo SENHOR Penderuete pe pejevy vy penhe'ẽ rendu nho ramo

**31** SENHOR Penderuete napenepytyvõ e'ŷi 'rā, nhomboaxy kuaa va'e vy. Napenemomba etei 'rā, ndaexarai 'rā guive oura reve guexeve guarā peneramoĩ kuery reve ojapo va'ekue gui.

**32** — Aŷ ma peikuaa pota yma peiko e'ŷ mbove mba'emo oikoague re, mba'eta yvy re Nhanderuete avakue omoingo guive, yva guy ha'e javi rupi ndoikoi neñ noenduai teri guĩ ramigua.

**33** Tyrā pa amongue va'e regua nda'u oendu ma tata mbyte gui tuuete ijayvu va'e teñ okuave teri, peñkuery re oikoague rami?

\* **4:24** Hebreus 12.29

<sup>34</sup> Tyrã amongue tuuete nda'u onhembopy'a ma amboae regua kuery mbyte gui ojeupe guarã oipe'a aguã, joeko a'ãa py, mba'emo porã oexa ucaa py, iporã va'e ojapoa py, joe opu'ãa py, opo oupi vy opo'akaa oexa ucaa py, opa marã nhomondyipaa py, Egito yvy re SENHOR Penderuete penembiexarã ojapoague rami ete?

<sup>35</sup> Pendevy ae ha'e nunga oexa uka raka'e, peikuaa aguã SENHOR ae Penderuete oikoa. Jipoi amboae, ha'e anho e'ý vy.\*

<sup>36</sup> Yva gui oayvua omonhendu penembo'e aguã, ha'e yvy re ju oexa uka guata tuvixa va'e. Ha'e ramo hata mbyte gui pendu va'ekue ijayvua.

<sup>37</sup> Peneramoí kuery ha'e oayvua rupi, hamymino kuery ju oiporavo vy penerenoëmba raka'e Egito yvy gui, ha'e ae ojekuaa uka opo'akaa ha'e javi py,

<sup>38</sup> penerenonde gui oipe'apa aguã amboae regua pendegui ipo'akapave va'e voi, ha'e gui pendeyvyrã va'ekue py peru aguã, aý jaexaa rami ae.

<sup>39</sup> Ha'e nunga rupi aý gui ma peikuaa 'rã, pendepy'a py peikuaa pota porã 'rã SENHOR anho Nhanderuete oikoa re, yva re ha'e yvy re ndoikoi amboae.

<sup>40</sup> Pejapopa ha'vy oayvu oeja va'ekue ha'e ojapo ukaague aý xee ju amboaxa va'e, pendekuai porã'i aguã, ha'e pendera'y kuery ju peẽ ndapeikovei jave, pendeyvyrã SENHOR Penderuete raka'e rã peve guarã ome'ẽ va'ekue py pendekuai puku aguã – he'i Moisés.

### *Números 35.9-15; Deuteronômio 19.1-3*

<sup>41</sup> Moisés oiporavo mboapy tetã onhemi atyrã Jordão yakã regua kuaray oua katy ikuai va'e,

<sup>42</sup> ha'e py potae vy e'ý oirũ ojuka va'ekue onhemi aguã, neĩ omotare'ý-e'ýkue py ri vy, ha'e va'e tetã va'e regua py rei ovaẽ vy oiko aguã.

<sup>43</sup> Ha'e vy Rúben kuery peguarã ma Bezer tetã oiporavo teko a'ýa py yvypea re oĩ va'e. Gade kuery pe ma Gileade regua Ramote tetã oiporavo, ha'e rã Manassés kuery pe ma Basã regua Golã tetã ju.

## Mokoïgue ma Moisés ijayvu jevyague

### *Lei oeja pyre Moisés omombe'u porãveague*

<sup>44</sup> Pova'e lei ma Israel kuery rekorã Moisés omboaxa va'ekue.

<sup>45</sup> Po rami ma mba'emo oikuaa uka pyre, ayvu oeja pyre ha'e 'arandu rupigua Israel kuery pe Moisés omombe'u va'ekue Egito yvy gui oupa jave py,

<sup>46</sup> Jordão yakã rovai teri ikuiaia re, Bete-Peor katy'i yvyugua rupi ikuai jave, amorreu kuery Hesbom pygua ruvixa Seom oiko va'ekue yvy re. Ha'e va'e ma Moisés ha'e Israel kuery ojuka va'ekue Egito yvy gui oupa ma jave,

<sup>47</sup> ha'e ijyvykue guive ojopypa ikuai aguã, Basã pygua huvixa Ogue yvykue guive. Ha'e va'e mokoïve ma amorreu kuery huvixa ikuai va'ekue meme. Ijyvykue ma Jordão yakã regua kuaray oua katy itui,

<sup>48</sup> Arnom yvyugua katy'i Aroer teko oĩ va'e guive, ha'e Siom yvyty peve (ha'e va'e ma Hermom),

<sup>49</sup> Yvy joja reia ha'e javi Jordão yakã regua kuaray oua katy oĩ va'e, yvy joja reia regua ye'ẽ rembe peve Pisga yvyty katy'i yvy'ã guy rupi.

## 5

### *Êxodo 20.1-17*

<sup>1</sup> Ha'e gui Israel kuery Moisés oenoõmba vy aipoe'i:

– Israel kuery, pendu ke ayvu oeja pyre ha'e 'arandu rupigua re pendeapyxa py xeayvu ramo, peikuaa porã vy pejapopa ete aguã.

<sup>2</sup> Horebe yvyty re nhandekuai jave nhande kuery reve SENHOR Nhanderuete ojapo guexeve guarã.

\* 4:35 Marcos 12.32

<sup>3</sup> Nhaneramoĩ kuery reve'ŷ SENHOR ojapo, ha'e rã nhande kuery apy aŷ'i jakuave'i teri va'e reve ae.

<sup>4</sup> Nhande kuery nhaendua py ete SENHOR ijayvu, yvyty áry tata mbyte gui.

<sup>5</sup> (Ha'e rami jave ma xee ha'ã va'ekue Nhanderuete ha'e peẽ kuery mbyte SENHOR ijayvua mboaxaarã, mba'eta tata gui pekyje vy napeei yvyty re.) Ha'e gui SENHOR aipoe'i va'ekue:

<sup>6</sup> "Xee ma SENHOR Nderuete Egito yvy re escravo pendekuai vy pemba'eapo poyiague gui pendepe'a va'ekue.

<sup>7</sup> Ndererekoi 'rã nderuete mboae xerenonde.

<sup>8</sup> Nderejapoi 'rã mba'emo ra'angaa nderueterã, yva re ikuai va'e ra'angaa, yva guýry yvy re ikuai va'e ramigua, neĩ yvy guy rupi yy oĩ va'e rupi ikuai va'e ra'angaa voi.

<sup>9</sup> Ha'e nunga neremboetei 'rã, neĩ nerembojeroviai 'rã, mba'eta xee SENHOR Nderuete ma aipota xere anho pejerovia, mba'eta aju vy ambopaga 'rã xere nda'ija'ei va'e reko vaiague re, tuu kuery, ta'y kuery, hamymino ha'e hamymino jevy kuery ikuiaia peve.

<sup>10</sup> Ha'e rã amongue xerayvu vy ajapo ukaague rami ikuai va'e ma amboaxy 'rã mil-kue hamymino kuery ikuai peve.

<sup>11</sup> "Ndeayvu rive eme SENHOR Nderuete rery rupi, mba'eta SENHOR nomboeko porãi 'rã hery rupi ijayvu rive va'ekue.

<sup>12</sup> "Nema'endu'a ke sábado ára py iky'a e'ŷ va'erã remboete aguã, SENHOR Nderuete ojapo ukaague rami vy.

<sup>13</sup> Mboapy meme ára re 'rã remba'eapo, ha'e rejapopa 'rã rejapo va'erã va'ekue ha'e javi.

<sup>14</sup> Ha'e rã sete-a ára ma sábado SENHOR Nderuete pegua ára. Neremba'eapoi 'rã mba'eve py, ndera'y, nderajy, nerembiguai avakue ha'e kunhague, nerymba vaka, mburika'i, neĩ peteïve nerymba, neĩ mombyrygua kuery ndero py removaõ va'ekue voi, nerembiguai kuery voi ndee rami avi topytu'u.

<sup>15</sup> Mba'eta nema'endu'a Egito yvy re escravo reiko jave ha'e gui SENHOR Nderuete ndepe'aague re, opo oupi vy opo'akaa oexa ukaa py. Ha'e rami rire SENHOR Nderuete omboete uka sábado ára.

<sup>16</sup> "Remboete 'rã nderu ha'e ndexy, SENHOR Nderuete ojapo ukaague rami, reikove puku ha'e reiko porã aguã ndeyvyrã SENHOR Nderuete ome'ẽ va'ekue py.\*

<sup>17</sup> "Ejojuka eme.\*

<sup>18</sup> "Ndetavy eme.\*

<sup>19</sup> "Nemonda eme.\*

<sup>20</sup> "Ndeayvu rive eme neirũ re.

<sup>21</sup> "Emoaruã eme neirũ ra'yxy. Emoaruã eme neirũ ro, neĩ imba'ety, hembiguai ava neĩ kunha, hymba vaka neĩ mburika'i, neĩ mba'eve neirũ mba'e rei-rei oguereko va'e."\*

### Êxodo 20.18-21, 31.18

<sup>22</sup> — Ha'e va'e ayvu rupi ma pendeaty va'e kuery pe SENHOR ijayvu raka'e yvyty oĩa gui. Tata ha'e arai pytû mbyte gui onhendu atã. Ha'e va'e rire nda'ijayvuve jevyi. Mokoĩ itape re omboparapa ma rire ome'ẽ xevy.

<sup>23</sup> Yvyty tata ojopeayi teri reve arai pytûa gui ijayvu rã pendu vy penhemboja xere, peteï-teï regua akã ha'e nhomongeta va'ety kuery.

<sup>24</sup> Ha'e vy aipopeje va'ekue xevy: "Apy ma SENHOR Nhanderuete orevy oexa uka opo'akaa ha'e imarã e'ŷ va'ea. Roendu guive tata mbyte gui ijayvu rã. Aŷ roexa rã Nhanderuete ndee ava reiko va'e reve ijayvu teï reikove teri.

<sup>25</sup> Ha'vy aŷ, mba'e re tu romanomba ta? Mba'eta peva'e tata tuvixa va'e oremokanhymba 'rã. SENHOR Nhanderuete ayvu roenduve tema ri vy romanomba 'rã.

<sup>26</sup> Mba'eta mava'e ava nda'u SENHOR Nhanderuete oikove va'e tata mbyte gui ijayvu rã oexa teï oikove 'rã, nhande kuery jaexaa rami?

---

\* <sup>5:16</sup> Mateus 15.4, Marcos 7.10, Efésios 6.2-3   \* <sup>5:17</sup> Mateus 5.21, Romanos 13.9, Tiago 2.11   \* <sup>5:18</sup> Mateus 5.27, Romanos 13.9, Tiago 2.11   \* <sup>5:19</sup> Romanos 13.9   \* <sup>5:21</sup> Romanos 7.7, 13.9

- <sup>27</sup> Enhemboja ndee, ha'e endu SENHOR Nhanderuete mba'e he'ia. Ha'e gui orevy ju remombe'upa 'rã SENHOR ijayvuague. Ha'e ramo roendu vy rojapopa 'rã", peje va'ekue.
- <sup>28</sup> Ha'e rami xevy pendeayvu rã SENHOR oendu vy aipoe'i xevy: "Xee aendu heta va'e kuery ndevy pe ijayvu rã. Ha'e kuery ha'evea rami meme ijayvu.
- <sup>29</sup> Ha'e kuery py'a re oĩ ete 'rãgue xerenonde ojererokyjea rupi ikuai aguã, ha'e ajapo uka va'e ha'e javi rupi, ha'e kuery ikuai porã aguã, ta'y kuery voi, raka'e rã peve guarã!
- <sup>30</sup> Tereo ha'vy, ha'e kuery pe 'Tapeopa ju pendero katy', 're.
- <sup>31</sup> Ha'e rã ndee ma repytave ju 'rã apy xereve. Ha'e rã xee amombe'uve 'rã ajapo uka va'e, xeayvu ha'e aipota va'e ha'e javi. Ha'e va'e re ma ndee rembo'e 'rã ha'e kuery oyvyrã ame'ẽ va'e py ikuai jave ojapopa aguã rami", he'i va'ekue SENHOR.
- <sup>32</sup> Ha'e nunga rupi pejapopa pota 'rã SENHOR Penderuete ojapo uka va'ekue. Ha'e ramia gui pejep'e aeme peiporu kuaa katy, neĩ peiporu kuaa e'ŷa katy.
- <sup>33</sup> SENHOR Penderuete ojapo uka va'e ha'e javi rupi pendekuai, pendekuai porã ha'e peiko pukuve aguã pendeyvyrã pejopy aguã va'e re.

## 6

### *"Nhanhe'ẽ rendu aguã ae lei oeja", he'iage*

- <sup>1</sup> — Kova'e ayvu ma SENHOR Penderuete ojapo uka va'ekue, 'arandua rupigua ha'e oipotaa reve, ha'e va'e re penhembo'e vy pejapo ete aguã vvy re pendekuai ma vy,
- <sup>2</sup> SENHOR Penderuete renonde pejererokyjea rupi pendekuai aguã, 'arandua rupigua ha'e oayvua ojapo uka va'e xee amboaxa rã peẽ ha'e pendera'y kuery, ha'e peneramymimo kuery voi ikuia pukukue reguarã, peiko pukuve aguã.
- <sup>3</sup> Ha'e nunga rupi pendu ke Israel kuery, peikuaa pota ha'e pejapo ete aguã, pendekuai porã ha'e penderetave ete aguã pendeyvvy kamby ha'e ei oata e'ŷa py, SENHOR peneramoĩ kuery ruete aipoe'iage rami vy.
- <sup>4</sup> Pendu ke, Israel kuery. Peteĩ'i oiko SENHOR, SENHOR Nhanderuete ae.\*
- <sup>5</sup> Ha'e nunga rupi peayvu 'rã SENHOR Penderuete pendepy'a, penenhe'ẽ ha'e penembaraetea ha'e javi py.\*
- <sup>6</sup> Kova'e ayvu aŷ amombe'u va'e ma pemoĩ 'rã pendepy'a re.
- <sup>7</sup> Ha'e va'e rupi pembo'e 'rã pendera'y kuery. Ha'e va'e rupi avi 'rã pendeayvu pekuapy pendero py, tape rupi peikoa py, penheno ha'e pevy ju ma vy guive.
- <sup>8</sup> Ha'e va'e re penemoma'endu'aarã pejokua 'rã imoiny pendepo re, ha'e penderova re penderexa mbyte py.
- <sup>9</sup> Pembopara avi 'rã pendero rokẽ áry, ha'e okẽ re.

- <sup>10</sup> — Ha'e gui SENHOR Penderuete peneramoĩ Abraão, Isaque ha'e Jacó pe ouraague rami vy pendeyvyrã va'e py pendereraa ma rire pendepo py omboaxa 'rã tetã tuvixa ha'e iporã va'e peẽ kuery pejapo va'ekue'ŷ,
- <sup>11</sup> ha'e gui oo opa mba'e porã oĩa pemonyẽ va'ekue'ŷ, ha'e yguarã pejo'o va'ekue'ŷ, uvaty ha'e oliveira ty penhotŷ va'ekue'ŷ. Ha'e va'e gui pe'u vy penevyatãmba ma vy
- <sup>12</sup> penheangu penderexarai e'ŷ aguã SENHOR, Egito yvy re escravo peiko vy pembapeio poyiague gui pendepe'a va'ekue gui.
- <sup>13</sup> SENHOR Penderuete renonde pejererokyjea rupi 'rã peiko, ixupe ae 'rã pendekuai, hery rupi anho 'rã peura.
- <sup>14</sup> Peiko eme amboae tuuete ramigua pe, neĩ teĩve yvy regua kuery pendeyvýry ikuai va'e ruete pe,
- <sup>15</sup> mba'eta SENHOR Penderuete penembyte oiko va'e oipota hexe anho pejerovia. Ha'e rami e'ŷ rã SENHOR Penderuete poxya penderovai hendy vy penemomba 'rã yvy áry gui.

\* **6:4** Marcos 12.29,32    \* **6:5** Mateus 22.37, Marcos 12.30,33, Lucas 10.27

16 Peko a'ã eme SENHOR Penderuete, Massá py peko a'ãague rami.\*

17 Pejapo ete 'rã SENHOR Penderuete ojapo uka va'ekue, ayvu ha'e 'arandua rupigua ha'e ojapo uka va'ekue ha'e javi.

18 SENHOR renonde rupi pejapo 'rã ha'eve va'e ha'e iporã va'e anho, pendekuai porã aguã, ha'e yvy porã re pendekoa aguã, SENHOR peneramoõ kuery pe oura reve ome'ẽ aguã re ijayvuague py ae,

19 ha'e penerenonde gui pendovaigua kuery SENHOR oipe'apa aguã aipoe'iague rami.

20 — Raka'eve rã nderay kuery oporandu 'rã ndevy. Ha'e vy aipoe'i 'rã: "Mba'erã tu ayvu 'arandua rupigua ha'e oipotaa SENHOR Nhanderuete oeja raka'e nhandevy?" he'i ramo

21 rembovai 'rã nderay kuery pe: "Egitó yvy re Faraó pegua escravo orekuai va'ekue ri tei SENHOR opo'akaa rupi orepe'apa ha'e gui.

22 Roexaa py SENHOR ojapo karamboae mba'emo kuaa ukaarã ha'e nhomondyipaarã tuvixa ete va'e nhomongyjea rupi, Faraó rovai, hoo pygua kuery ha'e Egito pygua kuery ha'e javi rovai.

23 Ha'e rami vy ha'e gui orepe'a orereru aguã kova'e yvy nhaneramoõ kuery pe oura reve nhanderekorã ome'ẽ aguã re ijayvuague py.

24 SENHOR ijayvu avi kova'e ayvu oeja va'ekue ha'e javi jajapopa ete aguã, ha'e henonde jajererokyjea rupi nhandekuai aguã, raka'e rã peve nhanemoingo porã ha'e nhanemoingove aguã, aý peve ojapoa rami ae.

25 Ha'e gui SENHOR Nhanderuete renonde kova'e ayvu ojapo uka va'ekue ha'e javi ri jajapo ramo aipoe'iague rami ae, ha'e nunga oí 'rã nhanderekorã", 're 'rã.

## 7

### *Êxodo 34.10-17*

1 — SENHOR Penderuete pendereru 'rã pendeyvyrã py penderekoag Aguã, ha'e penerenonde gui oipe'a reta 'rã yvy regua: heteu kuery, gurgaseu, amorreue, cananeu, ferezeu, heveu ha'e jebuseu kuery, sete regua 'rã oipe'a pendegui hetave ha'e imbaraetekueve va'e tei.

2 Ha'e va'e kuery ma SENHOR Penderuete omboaxapa 'rã pendepo py. Ha'e ramo pemomba katuí'i 'rã. Ha'e kuery reve ndapejapoi 'rã peteñ rami pendekuai aguã, napemboaxyi 'rã guive.

3 Neñ napemundai 'rã ha'e va'e regua kuery reve. Ta'y kuery re napemomendai 'rã penderajy kuery, tajy kuery ma voi ndaperui 'rã pendera'y kuery re omenda va'erã.

4 Mba'eta ha'e kuery ojapo 'rã pendera'y kuery xegui ojepe'a aguã rami, amboae tuuete ramigua kuery pe ju ikuai aguã. Ha'e ramo penderovai SENHOR poxya hendy vy penemomba vyvoi 'rã.

5 Ha'e rami 'rãgue py po rami 'rã pejapo ha'e kuery re: Peitypa 'rã altar ha'e kuery ojapo va'ekue, pemopëmba 'rã ita omopu'ã va'ekue, peake'o 'rã yvyra ta'angaaarã omopu'ã va'ekue, ha'e gui peapypa 'rã mba'emo ra'angaaarã ojapo va'ekue.

6 — Mba'eta peñ kuery ma SENHOR Penderuete pegua iky'a e'ý va'e pendekuai. Yvy regua ha'e javi gui SENHOR Penderuete pendeporavo ojeupe guarã.

7 Amboae regua gui penderetave va'e ramo e'ý guive SENHOR penderayvu vy pendeporavo, mba'eta yvy regua ha'e javi gui mboapy'ive va'e peiko.

8 Ha'e rami 'rãgue py SENHOR penderayvu ete vy rive pendepe'a opo'akaa rupi, ha'e peneramoõ kuery pe oura reve ijayvuague ojapo vy. Ha'e vy ae penderepy escravo peiko vy pemb'eapo poyia gui, ha'e Egito pygua huvixa Faraó po'akaa gui.

9 Ha'e nunga rupi peikuua pota SENHOR Penderuete anho Nhanderuete oikoa re. Nhanderuete ojeroviapi va'e vy guexeve guarã ojapo va'ekue rupi ae 'rã oiko nhanemboaxy

---

\* **6:16** Kova'e ayvu rupi Jesus ombovai anha omoangeko rã (Mateus 4.7,10, Lucas 4.8,12).

rupi, jayvua rupi ojapo uka va'e jajapo va'e kuery pe, mil-kue nhaneramymimo ikuai jevy-jevy va'e pe guive.

<sup>10</sup> Ha'e rã hexe nda'ija'ei va'e kuery ma ha'e ombopaga 'rã omokanhymba peve. Ndarei 'rã hexe nda'ija'ei va'e re oikuua pota vy ombopaga vyvoi aguã.

<sup>11</sup> Ha'e nunga rupi pejapopa 'rã ojapo uka va'ekue, ayvu ha'e 'arandua rupigua kova'e ára gui pendevy amboaxa va'e.

*Levitico 26.3-13; Deuteronômio 28.1-14*

<sup>12</sup> — Pova'e 'arandua rupigua pendu vy pemoõ porã ha'e pejapo ete ri ramo SENHOR Penderuete oiko 'rã guexeve guarã peneramoõ kuery pe oura reve ojapo va'ekue rami.

<sup>13</sup> Ha'e rami vy penderayvua rupi penemoingo porã ha'e penemboetave 'rã heravy. Omoingo porã avi 'rã pendera'y kuery, ha'e pendeyvy re mba'emo aju oiko va'e, mba'emo ra'yã, vinho, azeite, ha'e penerymba vaka ha'e vexa'i ra'y kuery, yvy peneramoõ kuery pe oura reve ome'ẽ aguã re ijayvuague py ae.

<sup>14</sup> Yvy regua ikuai va'e ha'e javi gui penemoingo porãve 'rã. Ha'e ramo pendekuaia py ndoikoi 'rã avakue ta'y e'ŷ va'erã, kunhague imemby e'ŷ va'erã, neĩ penerymba kuery regua ma voi.

<sup>15</sup> Pendegui SENHOR oipe'apa 'rã opa marãgua mba'eaxy. Peẽ kuery re nomoõ 'rã mba'eaxy vaikue Egito yvy re pexa va'ekue ramigua. Ha'e nunga ma pendere ija'e'ŷ va'e kuery ha'e javi re 'rã omoõ.

<sup>16</sup> Pemomba 'rã ha'e javi regua pendepo py SENHOR Penderuete omboaxa va'ekue. Ha'e kuery re pema'ẽ teĩ pemboaxy eme, peiko eme guive ha'e kuery pegua tuuete pe, mba'eta ha'e rami rã pendereity 'rã.

<sup>17</sup> — Xapy'a rei aipopeje 'rã pendepy'a py: “Kova'e yvy regua kuery ma nhande kuery gui hetave ramo mba'exa tu jaipe'a 'rã?” peje teĩ

<sup>18</sup> pekyje eme ha'e kuery gui. Penema'endu'a tema Faraó re SENHOR Penderuete ojapo va'ekue re, ha'e Egito yvy ha'e javi rupi

<sup>19</sup> mba'emo tuvixa ete va'e pexaa py ojapo va'ekue re, hexa pyrã ha'e mba'emo porã ete ojapo va'ekue re, mba'eta SENHOR Penderuete opo oupi vy opo'akaa oexa uka reve penerenoõ ha'e gui. Ha'ekue rami ae ju 'rã ojapo yvy regua pekyjea va'e kuery ha'e javi re.

<sup>20</sup> Ha'e kuery mbyte rupi SENHOR Penderuete ombou avi 'rã kavy guaxu, pendegui nonhai vy onhemi va'e ndaekorãvei pavẽ peve.

<sup>21</sup> Ha'e nunga rupi penhemondyipa rei eme ha'e kuery pexa vy, mba'eta penembyte SENHOR Penderuete oĩ, Nhanderuete ipo'akapa ha'e okyjevepy va'e ae.

<sup>22</sup> Ha'e rami avi mbeguei'i rupi anho 'rã SENHOR Penderuete oipe'a 'rã kova'e kuery regua penerenonde gui. Napemomba vyvoi 'rã, penderovai guarã mymba inharõ va'e hetave oje'oivy e'ŷ aguã.

<sup>23</sup> Ha'e rami avi pendepo py SENHOR Penderuete omboaxapa 'rãe, nda'evei reive va'e ojapo vy omomba peve.

<sup>24</sup> Pendepo py omboaxa avi 'rã huvixa kuery, ha'e ramo pejapo aguã yva guy rupi ha'e kuery rery na'ima'endu'aavei aguã rami. Avave rei nda'ipo'akaa'i'rã pendere, pemomba peve.

<sup>25</sup> Ha'e kuery ruete ra'angaa ma peapypa 'rã tata py. Prata ha'e ouro ha'e nunga onhovãague re voi pepena rei eme, peraa eme penemba'erã, ha'e va'e py pe'a e'ŷ aguã. Mba'eta ha'e nunga ma SENHOR Penderuete pe rã ojeguarupy.

<sup>26</sup> Ha'e nunga rupi Peru eme ojeguarupy penderopy guarã, ayvu vaipy peẽ voi peiko e'ŷ aguã ha'e nunga rami ae. Ha'e nunga ha'e javi pejou vai ha'e pembojeguaru ete 'rã, ayvu vaipy meme ramo.

## 8

*SENHOR opena porâague re ima'endu'a aguã regua*

<sup>1</sup> — Peikuaa pota ke ojapo uka pyre aÿ amboaxa va'e pejapopa ete aguã, peikove ha'e penderetave aguã. Ha'e gui yvy SENHOR penamoõ kuery pe oura reve ome'ẽ aguã re ijayvuague py pevaẽ vy pendekuai aguã.

<sup>2</sup> Penema'endu'a ke tape rupi SENHOR Penderuete pendereraa ague ha'e javi re. Quarenta ma'etý re pendereraa tekao e'ÿa rupi penemo'yvyí'i aguã pendereko a'ã vy, pendepy'a re oĩ va'e oikuua aguã, xapy'a rei ojapo uka va'e rupi pa pendekuai tyrã pa any.

<sup>3</sup> Ha'e rami vy penemo'yvyí'ia rupi ojapo pendekaruai aguã rami. Ha'e gui maná re ju penemongaru, ha'e nunga pexa va'ekue'ÿ teri, neõi penderu kuery ma voi oikuua va'ekue'ÿ. Ha'e ramigua ome'ẽ pendevy oikuua uka aguã mbojape re anho e'ÿ avakue oikoa. Ha'e rã SENHOR ayvu ha'e javi re 'rã avakue oiko.\*

<sup>4</sup> Pendeano penhemondea va'e voi nda'ivaipai raka'e, pendepy ma voi nda'irurupai, quarenta ma'etý pukukue re tei.

<sup>5</sup> Ha'e nunga rupi peikuaa pota penekuraxõ py, mba'eta avakue gua'y kuery omo'arandua rami avi SENHOR Penderuete penemo'arandu herekovy.

<sup>6</sup> Pendekuai SENHOR Penderuete ojapo uka va'ekue rupi ete, gueko oeja va'ekue rupi ae peiko aguã henonde pejererokyjea rupi.

<sup>7</sup> Mba'eta SENHOR Penderuete pendereraa 'rã yvy porãa py, yakã ikuaria, yvu, yvu typy va'e guive yvyugua ha'e yvyty áry gui oxyry oiny va'e,

<sup>8</sup> yvy trigo ha'e cevada oiko porãa, uva, figo ha'e romã'a oiko porãa guive, ha'e gui oliveira, azeite ha'e ei ikuaria.

<sup>9</sup> Ha'e va'e yvy re ma tembi'u oata aguã rami e'ÿ 'rã pe'u, mba'eve rei ndoatavei ma 'rã ha'e py. Yvy re ita ikuai va'e py ferro oĩ, ha'e yvyty ikuai va'e gui ma penoẽ 'rã overa va'e.

<sup>10</sup> Pekaru vy penevyatãmba 'rã, ha'e vy perovy'a 'rã SENHOR Penderuete yvy porã pendevy ome'ẽague re.

<sup>11</sup> — Ha'e rami avi penheangu, penderexarai eme SENHOR Penderuete re, ha'e ojapo uka va'ekue ndapejapo e'ÿi aguã, 'arandua rupigua ha'e ayvu oeja va'ekue, pendevy aÿ amboaxa va'e ae.

<sup>12</sup> Ha'e rami pekarupa vy penevyatãmba ma rire tei, oo porã pejapo vy ha'e va'e py pei ma rire,

<sup>13</sup> penerymba vaka ha'e vexa'i kuery hetave ma rire, ha'e penemba'e prata ha'e ouro voi ndoatavei aguã rami rire tei

<sup>14</sup> xapy'a rei pendepy'a py pendeyvate rei vy penderexarai 'rã SENHOR Penderuete re, Egito yvy re escravo peiko vy pemba'eapo poyiague gui penerenoẽ va'ekue ri,

<sup>15</sup> ha'e gui tekao e'ÿa tuvixa ha'e ijavaete va'e rupi pendereraa herekovy va'ekue ri mboi inharõ ete va'e ikuaria rupi, japeuxa popia va'e ha'e yvy pirua yy ikuai e'ÿa rupi. Ha'e gui pendevy itaova gui yy omoẽ va'ekue,

<sup>16</sup> ha'e tekao e'ÿa rupi penemongaru va'ekue maná penderu kuery oikuua va'ekue'ÿ re, penemo'yvyí'i vy pendereko a'ã aguã, ha'e gui opaa py penemoingo porã aguã.

<sup>17</sup> Ha'e nunga rupi pendepy'a py "Xepo'akaa ha'e xejyva mbaraetea py ae arekopa", peje eme.

<sup>18</sup> Ha'e rami 'rãgue py penema'endu'a SENHOR Penderuete re, mba'eta ha'e ae penembarae mba'emo pejoupa aguã rami, ha'e rami pendevy pe ojapo guexeve guarã peneramoõ kuery pe oura reve ojapo va'ekue ojeupity aguã, aÿ pexaa rami.

<sup>19</sup> Mba'eta SENHOR Penderuete re penderexarai ri vy amboae tuete kuery re peo vy ha'e kuery pemboetea rupi ju pendekuai ramo aÿ ma'ẽ, penderovai xeayvu pekanhymba aguã re.

\* **8:3** Kova'e ayvu rupi Jesus ombovai anha omoangeko rã (Mateus 4.4, Lucas 4.4).

<sup>20</sup> Ha'e javi regua penerenonde gui SENHOR omombaague rami pekanhymba avi 'rã, SENHOR Penderuete napenhe'ẽ rendu potai rire.

## 9

### *SENHOR Israel kuery oipytyvõague re Moisés omoma'endu'aague*

<sup>1</sup> — Pendu ke, Israel kuery. Aÿ peaxa 'rã Jordão yakã, amboae regua kuery pendegui hetave ha'e imbaraeteve va'e re pendepo'aka aguã katy. Hetã ikuai va'e ma tuvixa ha'e yva peve ikorapa va'e.

<sup>2</sup> Ha'e kuery ma heta ha'e yvateve va'e, Enaque ra'y kuery ae. Ha'e va'e kuery reko ma pendua ae ma, "Mava'e 'rã tu ipo'aka Enaque ra'y kuery re?" 'ea ramo.

<sup>3</sup> Ha'e nunga rupi aÿ peikuaa pota, mba'eta SENHOR Penderuete ae oaxa 'rã penerenonde rupi. Tata nhomokanhyarã rami 'rã omomba ha'e oitypa penerenonde rupi. Ha'e rami rã peipe'a ha'e pemokanhymba vyvoi 'rã, SENHOR ijayvuague rami vy.

<sup>4</sup> — Ha'e nunga rupi penerenonde gui SENHOR Penderuete oipe'apa ma ramo aipopeje eme pendepy'a py: "Xerekó porã ramo ae SENHOR xereru kova'e yvy re xerekoa aguã", peje eme. Mba'eta kova'e yvy regua kuery heko vai ramo SENHOR oipe'apa 'rã penerenonde gui.

<sup>5</sup> Penderekó porãa re e'ÿ ta'vy, neï pendepy'a py iporã va'e oña re e'ÿ guive yvy re pendekoa aguã pevaë 'rã. Kova'e yvy regua kuery reko vaia re rima SENHOR Penderuete oipe'apa 'rã penerenonde gui, ojapo aguã peneramoï kuery pe oura reve ijayvuague ojeupity aguã, Abraão, Isaque ha'e Jacó pe.

### *Êxodo 32.1-20*

<sup>6</sup> — Ha'e nunga rupi peikuaa pota ke, mba'eta penderekó porãa re e'ÿ SENHOR Penderuete ome'ẽ kova'e yvy porã pendekuai aguã, mba'eta peë kuery ma peneakã ratãgue ae.

<sup>7</sup> Penema'endu'a tema, pendexarai eme tekaoa e'ÿa rupi SENHOR Penderuete pembopoxyague re. Egito yvy gui peopaa ára guive apy pevaëmba peve pepu'âmba reia rupi pendekuai SENHOR rovai.

<sup>8</sup> Horebe yvyty re pendekuai jave SENHOR pembopoxy rei ramo penderovai ipoxya hendy va'ekue penemomba aguã.

<sup>9</sup> Mba'eta xee ma yvyty áry aa va'ekue itape ajopy aguã, guexeve guarã SENHOR pendereve ojapo va'ekue oña. Yvyty áry ma quarenta ára ha'e pytû re aiko mbojape ha'u e'ÿ re, neï yy ay'u e'ÿ re.

<sup>10</sup> Ha'e ramo xevy pe SENHOR ome'ẽ mokoï itape Nhanderuete okuã py ae ombopara va'ekue. Ha'e va'e re oï ayvu pendevy guarã SENHOR yvyty áry omombe'u va'ekue ha'e javi, tata mbyte oña gui, peë kuery ha'e javi pendeatypa pekuapy jave.

<sup>11</sup> Ha'e gui quarenta ára ha'e quarenta pytûa py ma SENHOR ome'ẽ xevy mokoï itape ipara va'e, guexeve guarã ojapo va'ekue oña.

<sup>12</sup> Ha'e vy SENHOR aipoe'i xevy: "Epu'ã ju ke, eguejy pojava apy gui, mba'eta ndevygua kuery Egito yvy gui reru va'ekue onhemongy'apa ma oje'oivy. Are e'ÿ'i re ojepe'apa ma ha'e kuery rekorã aeja va'ekue gui, mba'emo ryku gui rive nguuete ra'angaarã ojapo vy", he'i va'ekue.

<sup>13</sup> — Xevy pe SENHOR ijayvuve ju vy aipoe'i: "Kova'e kuery xee aexa rã inhakã ratã ete okuapy.

<sup>14</sup> Tamomba ete, yva guy ha'e javi rupi gui hery amboguepa aguã. Ha'e gui ma ndegui ju amoingo 'rã peteï regua ha'e kuery gui imbaraetekueve ha'e hetave va'erã", he'i va'ekue xevy

<sup>15</sup> Ha'e ramo ajere vy aguejy yvyty gui. Ha'e ramo yvyty ojopeayi oiny tata gui. Xepo py araa mokoï itape guexeve guarã ojapo va'ekue oña.

16 Ha'e gui ama'ẽ rã pejejavypa rei ra'e SENHOR Penderuete rovai. Ha'e rami vy penderueterã mba'emo ryku gui pejapo ra'e peteĩ vaka ra'y ra'angaa rive. Are e'ŷ'i re pejepe'apa penderekorã SENHOR oeja va'ekue gui.

17 Ha'e ramo mokoõ itape areko va'e amombo xepo gui, ha'e vy pexaa py amboa'ypa.

18 — Ha'e gui teĩgue ju quarenta ára ha'e quarenta pytû re aiko SENHOR renonde py jypy guare rami. Xerenapy'ã re aĩ, mbojape nda'ui neĩ yy ma voi nday'ui pejejavya ha'e javi re vy, mba'eta SENHOR oexaa py mba'emo vai ete pejapo ipoxy aguã rami.

19 Xee voi akyje va'ekue SENHOR penemomba aguã rami ipoxy etea gui. Ha'e rami teĩ peteĩgue ju SENHOR oendu xeayvua.\*

20 Arão pe voi SENHOR ipoxy raxa va'ekue omomba aguã rami. Ha'e rami teĩ ha'e va'e jave py Arão re voi ajerure.

21 Ha'e rami vy pejejavya rupi vaka ra'y ra'angaa pejapo va'ekue ajopy vy apypa, ha'e gui amou'ũmba porã iku'ipa peve. Iku'ikue ma yakã yvyty gui oxyry oiny va'e py amombo.

22 — Ha'e gui Taberá py, Massá ha'e Quibrote-Hataavá py ju pejapo SENHOR ipoxy ete aguã rami.

23 Cades-Barnéia gui SENHOR penemondouka vy aipoe'i: “Tapeo, ha'e penderekoa yvy pendevy ame'ẽ va'e py”, he'i ramo ndapejapoxei raka'e SENHOR Penderuete ijayvuague. Ndaperoviai vy napenhe'ẽ rendui.

24 Ha'e rami vy SENHOR rovai pepu'ã rei va'e ae tema roexa ypya ára guive ma voi.

### *Êxodo 32.11-14,30-35*

25 — SENHOR renonde py ajero'a ainy, ha'e quarenta ára ha'e quarenta pytû re xetui, pendevy SENHOR “Amomba 'rã” he'i rire.

26 Ha'e vy SENHOR pe ajerure vy aipoa'e: “Ah SENHOR Oreruete! Emomba eme ndevygua kuery, ndejeupe guarã ae nembaraetea rupi repy vy Egito yvy gui ndepo'akaa rupi renoẽmba va'ekue.

27 Nderexarai eme nerembiguai kuery Abraão, Isaque ha'e Jacó re. Eikuua pota eme kova'e kuery inhakã atãa re, neĩ heko vaia re, neĩ ojejavy okuapya re.

28 Ha'e rami Egito yvy orerenoẽague pygua kuery aipoe'i e'ŷ aguã: ‘Ha'e kuery rima SENHOR ndogueraa reguai yvy ijayvuague py. Ha'e kuery re ha'e nda'ija'evei vy ae rima oguenoẽmba raka'e tekao e'ŷa py ojukapa aguã’, he'i okuapy e'ŷ aguã.

29 Ha'e rami avi ha'e kuery ma ndevygua ae, ndevy guarã ae renoẽmba raka'e ndepo'aka etea rupi, ha'e ndepo reupi reve”, ha'e va'ekue SENHOR pe.

## 10

### *Mokoõguea itape re lei omboparaague*

1 — Ha'e va'e jave py SENHOR aipoe'i xevy: “Mokoõ itape ju ke amoatyrô jypy guare rami guarã. Ha'e vy eju ju xea katy yvyty áry. Ejapo avi peteĩ hyru yvyra gui.

2 Ha'e gui mokoõ itape re xee ambopara 'rã jypyguia remopẽmba va'ekue re oĩague rami. Ha'e ramo remboyrô 'rã hyrurã rejapo va'ekue py”, he'i xevy.

3 Ha'e rami rã peteĩ hyru yvyra acácia guigua ajapo, ha'e mokoõ itape amoatyrô jypy guare rami guarã. Ha'e gui aẽ avy yvyty re mokoõve itape xepo py araa reve.

4 Ha'e gui itape re SENHOR jypy iparaague rami ju ombopara dez ayvu ojapo uka va'e, pendeatya ára py yvyty áry tata oĩ va'e mbyte gui omombe'u ypy va'ekue rami ae. Ha'e rami vy SENHOR omboaxa xevy.

5 Ha'e ramo ajere vy yvyty gui aguejy ju. Itape ma amboyrô hyrurã ajapo va'ekue py. Ha'e va'e py ae opyta, xevy SENHOR ojapo ukaague rami vy.

### *Levi kuery regua oiporavoague*

\* 9:19 Hebreus 12.21

<sup>6</sup> — Ha'e gui ma Israel kuery oje'oi pa Beerote-Bene-Jaacā gui Mosera katy ju oo aguã. Ha'e py ma Arão omano, ha'e ramo onhono porãa ha'e pyve. Hekovia ta'y Eleazar ju oĩ sacerdote.

<sup>7</sup> Ha'e va'e gui ma oje'oi ju Gudgoda katy, ha'e Gudgoda gui ma Jotbatá katy ju oje'oi. Ha'e va'e vyv re ma yakã'i ikuai rei.

<sup>8</sup> Ha'e va'e jave py SENHOR oiporavo Levi ramymino kuery ogueraa aguã hyru SENHOR guexeve guarã ojapo va'ekue oĩa, SENHOR renonde ikuai aguã, ixupe omba'eapo, ha'e hery rupi jogueroayvu porã aguã, aÿ peve guarã ae.

<sup>9</sup> Ha'e rami rire Levi kuery ndoguerekoi ae tema oyvyrã guyke'y kuery reve. SENHOR ae oiko ha'e kuery mba'erã, SENHOR Penderuete ijayvuague rami vy.

<sup>10</sup> — Ha'e gui jypy'i guare rami aiko tema yyvty re, quarenta ára ha'e pytû re. Ha'e ramo xeayvua peteïgue ju SENHOR oendu, napenemombaxezi.

<sup>11</sup> Ha'e gui SENHOR aipoe'i xevy: “Epu'ã ke, tereo ju heta va'e kuery renonde rupi, vyv peneramoï kuery pe aura reve ame'ẽ aguã re xeayvuague py ha'e kuery ovaẽ vy ikuai aguã.”

### *Onhe'ẽ rendu aguã regua*

<sup>12</sup> — Ha'e nunga rupi Israel kuery, mba'e nunga tu SENHOR oipota pejapo? SENHOR Penderuete renonde pejererokyjea rupi pendekuai aguã anho, heko rupi pendekuai, SENHOR Penderuete peayvu ha'e ixupe peiko aguã SENHOR pendep'y'a ha'e penenhe'ẽ ha'e javi py,

<sup>13</sup> ha'e pejapopa aguã SENHOR ojapo uka va'e ha'e oayvu oeja va'ekue, aÿ pëvy amboaxa va'e, ha'e rami vy pendekuai porã aguã.

<sup>14</sup> Ma'ẽ, yva ha'e yvate rupi yva oĩ va'e ma SENHOR Penderuete mba'e meme, vyv ha'e hexe ikuai va'e ha'e javi guive.

<sup>15</sup> Ha'e rami avi peneramoï kuery SENHOR oayvu etea rupi omboaxy rire peẽ kuery ha'e kuery ramymino pendekuai va'e ju ojeupe guarã pendeporavo ha'e javi regua gui, aÿ pexaa rami.

<sup>16</sup> Ha'e nunga rupi penekuraxõ gui pemboi mba'emo vai oĩ va'e, ha'e pendekuaive eme peneakã ratãa rupi.

<sup>17</sup> Mba'eta SENHOR Penderuete ma tuuete ikuai va'e ruete, ha'e senhor ikuai va'e SENHOR, Nhanderuete yvateve va'e, ipo'akapa ha'e okyjevepy va'e. Ha'e ma peteï rive joegui oayvuve va'e'ÿ, neï ome'ẽmbi ndojopyi 'rã guive ha'eve'ÿa rami joguerekoo aguã.

<sup>18</sup> Ha'evea rami 'rã oguerekoo tyre'ÿ ha'e imeve'ÿ va'e, oayvu avi amboae regua kuery, ha'e kuery pe tembi'u ha'e ijaorã ojou uka vy.

<sup>19</sup> Ha'e nunga rupi peẽ avi peayvu 'rã amboae regua, mba'eta peẽ kuery voi amboae regua pendekuai va'ekue Egito vyv re peiko jave.

<sup>20</sup> Ha'e gui SENHOR Penderuete renonde pendekuai 'rã pejererokyjea rupi. Ixupe ae 'rã peiko, hexe ae penhemboja, ha'e hery rupi anho 'rã peura.

<sup>21</sup> Mba'eta ha'e ma perovy'a va'erã ha'e Penderuete oiko, pendevy ojapo va'e mba'emo tuvixa ete va'e nhomondyipaarã, penderexa py ae pexa va'ekue.

<sup>22</sup> Mba'eta peneramoï kuery ma setenta ikuai va'e reve oje'oi raka'e Egito vyv katy. Ha'e gui aÿ ma SENHOR Penderuete pendeapo yva re jaxy-tata ikuai va'e rami pendereta aguã rami.

## 11

<sup>1</sup> — Ha'e nunga rupi peayvu 'rã SENHOR Penderuete, ha'e ára nhavõ peiko 'rã penembo'ea rupi, ayvu oeja va'ekue, 'arandua rupigua ha'e ojapo uka va'ekue ha'e javi rupi.

<sup>2</sup> Aÿ gui peikuaa pota ha'vy. (Pendera'y kuery pe'ÿ xeayvu, mba'eta ha'e kuery ma ndoikuuaai neï ndoexai SENHOR Penderuete penemo'arandua rupi pendererekooague.) Peikuaa pota ke SENHOR yvate etea, ipo'aka etea ha'e opo oupia reve mba'emo ojapoague re.

<sup>3</sup> Penema'endu'a avi hexa pyrã Egito mbyte rupi ojapo va'ekue re, Egito pygua huvixa Faraó re, ijyvy jave rupigua ha'e javi re,

<sup>4</sup> Egito pygua xondaro kuery re, ha'e gui kavaju árygua ha'e karóxa ikuai va'e re SENHOR ojapoague re, mba'eta ha'e kuery áry rupi ombou Ye'ë Pytã, penderakykue ha'e kuery ou jave py. Aÿ peve guarã SENHOR omomba.

<sup>5</sup> Penema'endu'a avi teko a e'ÿa py ojapoague re, apy pevaë peve,

<sup>6</sup> ha'e gui Rúben ramymino Eliabe ra'y kuery Datã ha'e Abirão re ojapoague re. Mba'eta yvy ojepe'a ramo ho'apa raka'e, hoo pygua kuery, hoo ha'e hupive oo va'ekue ha'e javi, Israel kuery pavë oexaa py.

<sup>7</sup> Penderexa py ae pexa va'ekue tuvixa ete va'e SENHOR ojapo rã.

### *Onhe'ë rendu rã omoingo porã aguã re ijayvua*

<sup>8</sup> — Ha'e nunga rupi pendekuai SENHOR ojapo uka va'ekue aÿ amboaxa va'e ha'e javi rupi, penembaraete aguã, ha'e yvy katy peoa py pevaë vy penderekaoa aguã,

<sup>9</sup> ha'e rami vy peiko pukuve aguã yvy SENHOR oura reve peneramoï kuery pe ome'ë aguã re ijayvuague py, hamymino kuery pe avi. Ha'e va'e yvy ma kamby ha'e ei oata e'ÿa.

<sup>10</sup> Mba'eta yvy penderekaoarã ma Egito yvy pejepé'aague va'e rami e'ÿ. Mba'eta ha'e va'ekue py ma mba'emo ra'yí penhotÿague katy pendepy py pemboxyry vy pemoaky va'ekue horta rami ae.

<sup>11</sup> Ha'e rã yvy penderekaoarã SENHOR ome'ë va'e ma yvyty ha'e yvyugua reia, oky yva gui ho'a va'e gui ae 'rã inhakÿ va'e.

<sup>12</sup> Ha'e va'e yvy re SENHOR Penderuete ae 'rã opena. Ha'e va'e re SENHOR Penderuete oma'ë riae 'rã, ma'etÿa ypy'i guive opa peve.

<sup>13</sup> Xapy'a rei aÿ ayvu amboaxa va'e rupi peiko ramo, SENHOR Penderuete peayvua rupi, ha'e pendepy'a ha'e penenhe'ë ha'e javi py ixupe anho pendekuai ramo

<sup>14</sup> yvy áry rupi ambou 'rã oky hi'ára py porã, mba'emo henhoï jave ha'e ipoty jave ju, mba'emo ra'yí penhotÿ va'ekue gui pemono'õ aguã, uva rykue ha'e azeite perekó aguã.

<sup>15</sup> Pendeyvy rupi amoingo 'rã jai rogue penerymba kuery rembi'urã. Ha'e ramo pekaru vy penevyatãmba 'rã pekuapy.

<sup>16</sup> Penheangu ke pendepy'a py pejekore e'ÿ aguã, ha'e pejepé'a vy tuuete mboae pe pendekuai vy ha'e kuery renonde penerenapy'ã re peñ e'ÿ aguã.

<sup>17</sup> Mba'eta peñ kuery rovai SENHOR poxya hendy ramo ojoko 'rã yva nda'okyvei aguã rami, ha'e ramo yvy re mba'emo naenhoïvei 'rã, ha'e are e'ÿ re pekanhymba 'rã yvy porã SENHOR pendevy ome'ë va'ekue gui.

<sup>18</sup> — Ha'e nunga rupi pemoï porã xeayvuague pendepy'a ha'e penenhe'ë py. Pejokua 'rã imoiny pendepo re penemoma'endu'aarã, ha'e penderova re penderexa mbyte py.

<sup>19</sup> Ha'e va'e re pembo'e 'rã pendera'y ha'e penderajy kuery, penderopy rupi peguapy peiny vy pendeayvu 'rã, tape rupi peoa py, penhenoa py ha'e pevy ju ma vy.

<sup>20</sup> Ha'e va'e ayvu pembopara avi 'rã penerokë áry rupi, ha'e penerokë re ae,

<sup>21</sup> pende'ára hetave aguã pendera'y ha'e penderajy kuery pe voi, yvy SENHOR oura reve peneramoï kuery pe ome'ë aguã re ijayvuague py penderekaoa ma vy, yvy áry yva oï temaa rami avi.

<sup>22</sup> Mba'eta xapy'a rei kova'e ayvu pendevy amboaxa va'e ha'e javi pejapo ramo, SENHOR Penderuete peayvua rupi, heko rupi pendekuai, ha'e hexeve peiko ramo

<sup>23</sup> SENHOR oipe'apa 'rã amboae regua kuery ha'e javi. Ha'e ramo pejopy 'rã ha'e kuery ikuaiague, peñ kuery gui hetave ha'e imbaraetekueve tei.

<sup>24</sup> Ha'e gui mamo rã rei pepyrõa ma penemba'e meme 'rã, teko a e'ÿa guive, Líbano ha'e yakã Eufrates yakã guive, ye'ë kuaray oikea katyguia peve.

<sup>25</sup> Avave rei nda'ipo'akai 'rã pendere. Mba'eta yvy pepyrõa ha'e javi rupi SENHOR Penderuete omoingo 'rã pendegui okyjea aguã rami, ijayvuague rami vy.

*Imoingo porãarã e'ŷ vy imoingo vaiarã re ijayvuague*

- <sup>26</sup> — Ma'ẽ, aŷ penerenonde py amoĩ penemoingo porãarã, e'ŷ vy penemoingo vaiarã.
- <sup>27</sup> Penemoingo porãa oiko 'rã SENHOR Penderuete ojapo uka va'ekue pejapopa ramo, aŷ amboaxa va'e rupi ae.
- <sup>28</sup> Ha'e rã penemoingo vaia ma oiko 'rã SENHOR Penderuete ojapo uka va'ekue pejapo 'rãgue py pejepe'a ramo tape pendevy aŷ aikuaa uka va'e gui, amboae tuuete kuery rupi ndapeikuaai va'eri peo vy.
- <sup>29</sup> Ha'e gui yvy penderekoarã peo aguã py SENHOR Penderuete pendereraa ma jave pemombe'u 'rã penemoingo porãa regua Gerizim yvyty áry gui, ha'e rã penemoingo vaia regua ma Ebal yvyty áry gui 'rã pemombe'u.
- <sup>30</sup> Ha'e va'e mokoїve yvyty ma Jordão yakã rovai re oĩ, kuaray oikea katy, cananeu kuery yvy re, yvy joja reia re Gilgal rexei, Moré py yvyra carvalho ikuai va'e katy'i.
- <sup>31</sup> Mba'eta peaxa ta ma Jordão yakã, pendeyvyrã SENHOR Penderuete ome'ëague py pendekuai aguã. Ha'e py 'rã penhemboekoa.
- <sup>32</sup> Ha'e rami avi penhea'ã ayvu ha'e 'arandua rupigua aŷ aikuaa uka va'e ha'e javi rupi pendekuai aguã.

## 12

*Anhetẽ va'e rupi ombojerovia atyrã oiporavoague*

- <sup>1</sup> — Pova'e ayvu oeja pyre ha'e 'arandu rupigua pejapo 'rã pendeyvyrã SENHOR peneramoĩ kuery Ruete ome'ẽ va'ekue py, ára nhavõ ha'e va'e yvy re peikoa pukukue re.
- <sup>2</sup> Amboae regua kuery peipe'a vy pemomba 'rã nguuete ramigua mboeteaty, yvyty ha'e yvy'ã'i áry ha'e javi rupi, ha'e yvyra rovana guy rupi ikuai va'e ha'e javi.
- <sup>3</sup> Peitypa 'rã ha'e kuery mba'e altar ha'e javi, ita omopu'ã va'ekue pemboa'ypa 'rã, ta'angaa yvyra gui omo'ã va'ekue peapypa 'rã tata py, mba'emo ryku gui nguuete ra'angaarã ojapo va'ekue pemboa'ypa avi 'rã, hery pemboguepa aguã ha'e va'e yvy gui.
- <sup>4</sup> — Mba'eta SENHOR Penderuete ma ha'e rami e'ŷ 'rã pemboete.
- <sup>5</sup> Ha'e rami 'rãgue py ha'e javi regua ikuaiague mbyte py SENHOR Penderuete peteĩ henda oiporavo 'rã guery omoĩ, ha'e ojeupagua oo oĩ aguã. Ha'e py ae 'rã peo peka vy.
- <sup>6</sup> Ha'e katy 'rã peru mba'emo peapy vy peme'ẽ va'erã ha'e mymba pejuka vy peme'ẽ va'erã, dízimo perekva'e, mba'emo pendepo py Peru va'e, mba'emo penhenhandua'i rami peme'ẽ va'erã, ha'e gui jypy'i guare penerymba vaka ha'e vexa'i ra'y'i oiko va'ekue.
- <sup>7</sup> Ha'e py SENHOR Penderuete renonde py ae 'rã pekaru ha'e perovy'a pekuapy opa mba'e pejapoa py, peẽ ha'e pendero pygua kuery reve, SENHOR Penderuete penemoingo porã rire.
- <sup>8</sup> Apy jajapoa rami ve'ŷ 'rã pendekuai, mba'eta aŷ peve peteĩ-teĩ ha'e ae ojou porãa rami rive 'rã ikuai,
- <sup>9</sup> mba'eta ndapeupityi teri pepytu'u aguã pendeyvyrã SENHOR Penderuete ome'ẽ va'e.
- <sup>10</sup> Ha'e rami avi peaxa 'rãe Jordão yakã, pendekuai aguã pendeyvyrã SENHOR Penderuete ome'ẽ va'erã py. Ha'e ramo pendevy pe ome'ẽ 'rã pepytu'u aguã penderovaigua kuery pendeyvýry rupi ikuai va'e ha'e javi gui. Ha'e ramo pendekuai porã 'rã opa mba'e vai gui.
- <sup>11</sup> Ha'e ramo SENHOR Penderuete oiporavo 'rã peteĩ henda hery oĩ aguã. Ha'e py ae 'rã Peru pendevy aruruka va'ekue ha'e javi: mba'emo peapy vy peme'ẽ va'erã ha'e mymba pejuka vy peme'ẽ va'erã, dízimo perekva'e, mba'emo pendepo py pejapo va'ekue, ha'e gui iporãgueve SENHOR peguarã peme'ẽ aguã penhemboayvuague ha'e javi.
- <sup>12</sup> Ha'e rami vy pevy'a 'rã SENHOR Penderuete renonde py, peẽ kuery, pendera'y ha'e penderajy kuery, pendevygua escravo avakue ha'e kunhague, ha'e gui levita kuery peneretã py ikuai va'e, penembyte rupi ijyvy e'ŷ va'e teĩ.

13 Penheangu ke, mba'emo peapy vy peme'ẽ e'ŷ aguã mamo rã pexa rã ha'eve reia py rive.

14 Ha'e rami 'rãgue py peẽ kuery va'e regua pendekuaia gui peteĩ'i henda SENHOR oiporavoague py 'rã peo mba'emo peapy vy peme'ẽ aguã, ha'e ayvu amboaxa va'e ha'e javi pejapo aguã.

### *Xo'o ho'u ha'e mba'emo ome'ẽ aguã re ijayvua*

15 — Ha'e rami avi nderekoa py ae ha'eve xo'o rejuka vy re'u tema aguã, nenhe'ẽ py re'uxea rami, SENHOR Nderuete ojou uka va'e rei. Ha'eve va'e e'ŷ vy ha'eve'ŷ va'e reiko teĩ ha'eve re'u aguã, guaxu puku ha'e guaxu ete'i ro'o re'ua rami.\*

16 Ha'e rã huguykue ma ndere'ui 'rã. Yy rami renhoẽ 'rã yvy py.

17 Ha'e rami teĩ nderekoa py ma nda'evei re'u aguã dízimo-rã remboja'o va'ekue, mba'emo aju gui, e'ŷ vy uva rykue gui, azeite, nerymba kuery vaka ha'e vexa'i ra'y jypyguare regua gui voi. Neĩ nda'evei re'u aguã mba'emo reme'ẽ aguã re renhem-boayvuague regua gui, mba'emo renhenhandua'i rami reme'ẽ va'erã, neĩ reme'ẽ aguã ndepo py rejapo va'ekue gui voi.

18 Ha'e nunga ma SENHOR Nderuete renonde anho 'rã re'u, henda ha'e oiporavoague py ae, ndee, ndera'y kuery, nderajy kuery, ndevyguua escravo avakue ha'e kunhague, ha'e levita kuery nderekoa py ikuai va'e. Ha'e rami vy SENHOR Nderuete renonde py ae 'rã revy'a rejapoa ha'e javi py.

19 Enheangu ke, eipytyvõ e'ŷ eme levita kuery yvy re reikoa ja.

20 — Ha'e gui SENHOR Nderuete oayvuague rami vy ndeyvyrã ombotuvixave ma ramo, xapy'a rei xo'o re'uxe vy "Ha'u 'rã xo'o" 're 'rã. Ha'e rami vy nderekoa py ae 'rã re'u, re'uxea rami.

21 Ha'e rami avi henda SENHOR Nderuete guery omoĩ aguã oiporavoague gui mombyry ri reiko vy ma rejuka 'rã nerymba vaka ha'e vexa'i kuery SENHOR ojou uka va'ekue, ha'e nderekoa py ae teĩ ha'eve re'u aguã, re'uxea rami, ndevy amboaxaague rami vy.

22 Guaxu puku ha'e guaxu ete'i ro'o re'ua rami 'rã re'u xo'o. Ha'e nunga gui ma avakue ha'eve va'e ha'e ha'eve'ŷ va'e teĩ ha'eve ho'u aguã.

23 Ha'e rami avi eikuaa pota huguy reve re'u e'ŷ aguã, mba'eta tuguy re ma oĩ tekove. Nda'evei tekove xo'o reve re'u aguã.

24 He'u eme tuguy. Yvy py 'rã renhoẽ yy rami.

25 Ndere'ui 'rãe. Ndera'y kuery nderekoveei rire ndo'ui avi 'rã, SENHOR penemoingo porã aguã, henonde ha'evea ramigua anho pejapo ramo.

26 Ha'e rã mba'emo rerekva'e gui reiky'a'o uka va'ekue, ha'e reme'ẽ aguã re renhem-boayvuague va'e ma henda SENHOR oiporavoague py ae 'rã reraa.

27 SENHOR Penderuete pegua altar áry ae 'rã reapy vy reme'ẽ, ho'okue ha'e huguykue guive. Mymba reme'ẽ va'e ruguykue ma onhoẽa 'rã SENHOR Penderuete pegua altar áry rupi. Ha'e rã ho'okue gui ma re'u 'rã.

28 Eikuua pota rejapopa aguã ayvu amboaxa va'ekue ha'e javi, ndee ha'e ndera'y kuery peiko porã aguã raka'e rã peve, SENHOR Penderuete renonde ha'evea ramigua pejapo ramo.

29 — Ha'e gui penerenonde gui SENHOR Nderuete amboae regua kuery oipe'apa ma jave, ha'e ijyvykue py reo ma vy nderekoa aguã,

30 enheangu ha'e kuery ikuaiague rami avi reiko e'ŷ aguã, nerendonde gui omombaa rire teĩ. Eikuua pota rei eme guive ha'e kuery ruete ra'angaa kuery re, neĩ "Ha'e kuery nguu ete ra'angaa omboeteague rami xee voi ajapo 'rã", 're eme.

\* 12:15 Mba'eta guaxu puku ma ka'aguy rupigua rã SENHOR pe ome'ẽ mbyrã e'ŷ. Ha'eve amongue va'e rei ho'u tema aguã.

<sup>31</sup> Emboete eme SENHOR Nderuete ha'e rami, mba'eta ha'e kuery nguuete kuery pe ojapo va'e ma SENHOR pe rã ojeguarua ha'e ojou vaipy meme, mba'eta nguuete kuery pe ha'e kuery oapy 'rã gua'y ha'e guajy kuery eteve voi.

<sup>32</sup> — Rejapopa 'rã ayvu amboaxa va'e ha'e javi. Hi'áryve neremoívei 'rã, neñ nerem-boivei 'rã guive.

## 13

*Profetaramiguarive ha'e mba'emo ra'angaa mboetearupinhomoingoxeva'e re ijayvua*

<sup>1</sup> — Ha'e gui xapy'a rei peteñ profeta, ha'e'ý vy mba'emo rex a ra'ua penembyte py oiko vy omombe'u ma voi 'rã hexa pyrã e'ý vy nhomondyipaarã,

<sup>2</sup> ha'e rire hexa pyrã e'ý vy nhomondyipaarã omombe'u va'ekue oiko 'rã, teñ ha'e va'e aipoe'i avi 'rã: “Jaa ke amboae tuuete kuery ndajaikuai teri va'ekue pe ju jaiko”, he'i ramo ma

<sup>3</sup> pendu pota eme profeta e'ý vy mba'emo rex a ra'ua ayvu. Mba'eta SENHOR Penderuete pendereko a'ã, oikuaaxe vy anhetê pa pendep'y a ha'e penenhe'ë ha'e javi py peayvu ra'ea.

<sup>4</sup> SENHOR Penderuete rupive anho 'rã peiko, henonde pejererokyjea rupi 'rã pendekuai. Pejapo 'rã ha'e ojapo uka va'e, pendu 'rã ijayvua, ixupe ae 'rã peiko, hexe anho 'rã penhemboja.

<sup>5</sup> Ha'e gui ha'e va'e profeta e'ý vy mba'emo rex a ra'ua ma pejuka 'rã, SENHOR Penderuete rovai nhomopu'ãa rupi ijayvu rire, Egito yvy re escravo pendekuaiague gui penerenoëare rovai ijayvu, pendepe'axe vy SENHOR Penderuete tape oeja va'ekue gui. Ha'e rami vy penembyte gui peipe'a 'rã mba'emo vai.

<sup>6</sup> Xapy'a rei nderyvy e'ý vy nderyke'y ndexy pi'a ae ha'e rami 'rã ijayvu, ndera'y e'ý vy nderajy, ndera'yxy reayvu va'e mba'e, e'ý vy neirû ndee ae rejeayvua rami reayvu va'e teñ nhemi rupi ndereroayvu vy aipoe'i 'rã: “Jaa jaiko amboae tuuete kuery pe ju, ha'e nunga ndee neñ neramoí kuery ma voi ndoikuai va'e teñ,

<sup>7</sup> amboae regua ndeyvýry ikuai va'e ruete ra'angaa pe ae, ndea gui mombyry e'ý vy ha'e'i rupigua, pendeyvy re mamo rã rei”, he'i ramo ma

<sup>8</sup> enhembotavy uka eme ixupe, endu pota eme, hexe ema'ë eme guive remboaxya rupi. Ndereraa jepe ukai 'rã, nerenhomi 'rã guive.

<sup>9</sup> Ha'e rami 'rãgue py rejuka 'rãe. Ndee ranhe'i 'rã ndepo reupi rejuka aguã, ha'e gui heta va'e kuery ha'e javi ju 'rã.

<sup>10</sup> Pejapipa 'rã ita py omano peve, mba'eta SENHOR Penderuete Egito yvy re escravo peikoague gui penerenoëare gui pendepe'axe rire.

<sup>11</sup> Ha'e rami rã Israel kuery ha'e javi omombe'ua rã oendu vy ojererokyje 'rã okuapy, ha'e ha'ekue ramigua mba'emo vai ndojapovei 'rã penembyte rupi.

<sup>12</sup> — Ha'e gui xapy'a rei amongue tetã pendekoarã SENHOR Penderuete ome'ë va'ekue rupi pendu 'rã omombe'ua vy aipo'ea rã:

<sup>13</sup> “Penderekao py avakue heko vai va'e oje'oi vy nhombotavypa tetã pygua kuery, ‘Jaa amboae ruete ndajaikuai va'ekue pe jaiko’ he'i va'e”,

<sup>14</sup> 'ea ramo pendu vy ma peikuaa pota porã 'rã, pexa pota ha'e peporandu porã 'rã. Xapy'a rei ha'e rami ete mba'emo vai penembyte rupi anhetê ri oiko ra'e ramo

<sup>15</sup> ha'e va'e tetã pygua kuery pejukapa 'rãe kyxe py. Pemomba 'rã ha'e py ikuai va'ekue ha'e javi, mymba kuery guive.

<sup>16</sup> Imba'e rei-reikue ma pemboatypa 'rã tetã mbyte py, ha'e vy tetã ha'e mba'e rei-rei reve peapypa 'rã SENHOR Penderuete pe mba'emo oapy vy ome'ëmby rami. Ha'e rami rire ha'e va'e tetã mba'emo vaikueaty rive 'rã oï raka'e rã peve, ndojapoavei 'rã guive.

17 Omomba pyrã regua neĩ peteĩve topyta eme pendepo py, SENHOR penemboaxy nhombopaga ve'ŷ aguã poxya rupi, ha'e penderayvua rupi penemboetave aguã, peneramoĩ kuery pe ouraague rami vy,

18 xapy'a rei SENHOR Penderuete ijayvua pendu vy ha'e ojapo uka va'ekue ha'e javi pejapo ri ramo, aŷ amboaxa va'e ae, SENHOR Penderuete renonde rupi ha'evea ramigua anho pejapo aguã.

## 14

### *Onhekyxĩ rei e'ŷ aguã re ijayvua*

<sup>1</sup> — SENHOR Penderuete ra'y kuery ae peiko. Ha'e nunga rupi penhekyxĩ rei eme, neĩ penderova katy ma voi penhopĩ eme omano va'ekue káuxa pendepy'a vai vy.

<sup>2</sup> Mba'eta peẽ kuery ma SENHOR Penderuete pegua iky'a e'ŷ va'e pendekuai. Ha'e javi regua yvy jave rupi ikuai va'e gui SENHOR pendeporavo va'ekue ojeupe guarã.

#### *Levítico 11.1-47*

<sup>3</sup> — Neĩ peteĩve ndape'ui 'rã ojeguarupy regua.

<sup>4</sup> Pova'e mymba ro'o anho 'rã pe'u: vaka, vexa'i, kavara,

<sup>5</sup> guaxu ete'i, guaxu puku, guaxu miri, kavara ka'aguy regua, antílope, vexa yvyty rupigua ha'e gamo.

<sup>6</sup> Mymba ikuai va'e regua ipyapẽ mbyte rupi ja'o va'e, ha'e oixu'u jevy va'e ma ha'eve meme 'rã pe'u aguã.

<sup>7</sup> Ha'e rã pova'e ma ndape'ui 'rã: mymba oixu'u jevy va'e anho, ha'e'ŷ vy ipyapẽ ja'o va'e anho: camelô, tapixi ha'e arganaz, oixu'u jevy va'eri ipyapẽ ja'o va'e'ŷ vy. Ha'e nunga ma ha'eve'ŷ va'e 'rã pendevy.

<sup>8</sup> Poryko voi nda'evei, mba'eta ipoapẽ ja'o va'eri oixu'u jevy va'e'ŷ guive vy ha'eve'ŷ va'e 'rã pendevy. Ha'e va'e ro'o ndape'ui 'rã, he'õgue re voi pepoko eme.

<sup>9</sup> — Yy rupi ikuai va'e gui ma pova'e regua 'rã pe'u: ipopo ha'e ipekue va'e ha'e javi.

<sup>10</sup> Ha'e rã opa mba'e ipopo e'ŷ va'e, ha'e'ŷ vy ipekue e'ŷ va'e ma ndape'ui 'rã. Ha'eve'ŷ va'e meme 'rã pendevy.

<sup>11</sup> — Ha'e gui guyra ja'u aguã ha'eve va'e ha'e javi regua ma pe'u 'rã.

<sup>12</sup> Ha'e rã pova'e ma pe'u va'erã e'ŷ: taguato guaxu, quebrantosso, taguato guaxu ye'ẽ rupigua,

<sup>13</sup> açor, taguato ha'e milhano, ha'e ha'e va'e regua ma guive rã;

<sup>14</sup> ha'e javi uruvu, ha'e ha'e va'e regua ma guive rã;

<sup>15</sup> ha'e gui avestruz, urukure'a, mbyju ye'ẽ rupigua, taguato, ha'e ha'e va'e regua ma guive rã;

<sup>16</sup> ha'e gui mocho, íbis, aka'ẽ,

<sup>17</sup> oko, abutre, uruvu ye'ẽ rupigua,

<sup>18</sup> kuruka ha'e guyraxi, ha'e ha'e va'e regua ma guive rã; ha'e gui poupa ha'e mbopi.

<sup>19</sup> — Ha'e javi regua omyi'i ha'e oveve'i va'e ma guive rã ha'eve'ŷ va'e pendevy, pe'u va'erã e'ŷ.

<sup>20</sup> Ha'e rã guyra ha'eve va'e ha'e javi regua ma pe'u 'rã.

<sup>21</sup> — Mymba omano rive va'ekue ma ndape'ui 'rã. Ha'eve peme'ẽ aguã amboae regua kuery peneretã py ikuai va'e pe ho'u aguã, ha'e'ŷ vy amboae regua kuery pe pemboekovia aguã, mba'eta peẽ kuery ma SENHOR Penderuete pegua iky'a e'ŷ va'e.

— Napembojyi 'rã kavara ra'y ixý kamby py ae.

### *SENHOR peguarã dízimo ome'ẽ aguã regua*

<sup>22</sup> — Ha'evea rami kuerei 'rã dízimo reme'ẽ mba'emo ra'yî renhotŷ va'ekue aju guigua, ma'etŷa nhavõ mba'ety rupi remono'õ va'e gui.\*

\* **14:22** Levítico 27.30-33, Números 18.21

<sup>23</sup> Dízimo regua gui ma SENHOR Nderuete renonde 'rã re'u, guery omoõ aguã oiporavoague py, mba'emo aju guigua, vinho, azeite, ha'e gui nerymba vaka ha'e vexa'i kuery ra'y ypy'i regua gui. Ha'e rami vy 'rã reikuua SENHOR Nderuete renonde rejererokyjea rupi reiko aguã, reikovea pukukue re.

<sup>24</sup> Ha'e gui xapy'a rei henda SENHOR Nderuete guery omoõ aguã oiporavoague mombyry ete ramo nda'evei 'rã ha'e py reraa aguã, nderekoa gui mombyry ramo ha'e SENHOR Nderuete ojou uka reta va'ekue reme'ẽ aguã,

<sup>25</sup> ha'e ramo remboekovia 'rã dízimo, ha'e hepykue peráta ndepo py reraa reve tereo henda SENHOR Nderuete oiporavoague py.

<sup>26</sup> Ha'e va'e peráta re ma rejogua 'rã nenhe'ẽ py reme'ẽxe va'e rei, vaka, vexa'i, e'ŷ vy vinho, oy'u pyrã irove va'e, ha'e'ŷ vy nenhe'ẽ py reme'ẽxea rendua rami tema. Ha'e rami vy ha'e py, SENHOR Nderuete renonde py ae re'u vy revy'a 'rã ndero pygua kuery ha'e javi reve.

<sup>27</sup> — Ha'e rami teĩ eipytyvõ e'ŷ eme levita kuery neretã mbyte ikuai va'e, pendeyvy rupi oyvyrã ndojopyi rire.

<sup>28</sup> Mboapy ma'etŷa opa nhavõ ma dízimo ha'e va'e ma'etŷa mba'emo aju regua remono'õ vy neretã py ae 'rã remoõ porã.

<sup>29</sup> Ha'e ramo levita kuery ou 'rã ho'u aguã (pendeyvy rupi oyvyrã ndojopyi rire). Ou avi 'rã amboae regua kuery, tyre'ŷ ha'e imeve'ŷ va'e neretã py ikuai va'e. Okaru 'rã okuapy hevyatãmba peve, SENHOR Nderuete nemoingo porã aguã ndepo py rejapo va'e ha'e javi py.

## 15

### *Oreveague omboguepaa aguã ára pyguarã re ijayvua*

<sup>1</sup> — Ha'e gui sete ma'etŷa opa nhavõ remboguepa kuerei 'rã ndevy oreveaague.

<sup>2</sup> Po rami 'rã rembogue: Neirũ kuery pe mba'emo reiporuka va'ekue ha'e javi rembogue 'rã omboekovia aguã va'ekue. Ha'e rami vy neremboekovia ukai 'rã neirũ e'ŷ vy nderyvy kuery pe, rembogue aguã SENHOR oikuua uka ramo.

<sup>3</sup> Ha'e rã amboae regua kuery pe ma ha'eve remboekovia uka aguã, ha'e rã nderyvy oiporu vy ogueraa va'ekue ma neremboekovia ukavei 'rã.

<sup>4</sup> Ha'e rami vy pendekuaia py iporiaukue'i ikuai e'ŷ aguã, mba'eta opa mba'e py SENHOR Penderuete penemoingo porã 'rã yvy penderekooarã ome'ẽ va'ekue py,

<sup>5</sup> xapy'a rei SENHOR Penderuete ayvu pendu ri ramo, aŷ amboaxa va'e ha'e javi pejapo ete aguã.

<sup>6</sup> Mba'eta SENHOR Penderuete penemoingo porã 'rãe, aipoe'iague rami vy. Ha'e ramo heta regua kuery pe peiporuka 'rã mba'emo, teĩ ha'e kuery gui ma peẽ kuery ndapeiporui 'rã mba'eve. Heta regua re pendepo'aka 'rã, teĩ ha'e kuery ma pendere nda'ipo'akai 'rã.

### *Levítico 25.35-38*

<sup>7</sup> — Ndeyvyrã SENHOR Nderuete ome'ẽague rupi xapy'a rei nderekoa rupi oiko 'rã nderyvy iporiaukue'i va'e, neretã oĩ va'e pygua. Ha'e ramo ma ndepy'a ratã eme, neĩ nerakâte'ŷ eme guive nderyvy iporiaukue'i pe.

<sup>8</sup> Ha'e rami 'rãgue py reipe'a 'rã ndepo opa marãgua reiporuka aguã ixupe oata va'e rei.

<sup>9</sup> Enheangu ke amboae rami rei ndepy'a e'ŷ aguã, aipo're eme guive: “Sete ma'etŷa ovaẽ ta ma, orevea nhamboguepa aguã”, 're eme, nderyvy iporiau'i va'e re rema'ẽ vai vy ixupe mba'eve nereme'ẽi aguã. Mba'eta ha'e rami rã SENHOR pe ojapukai 'rã nderovai, ha'e ndere oĩ 'rã rejeyava.

<sup>10</sup> Reme'ẽxe'a'i py eme'ẽ ixupe, ndepy'a re mba'emo vai toĩ eme reme'ẽa py. Ha'e rami rã SENHOR Nderuete nemoingo porã 'rã ndepo py rejapo va'e ha'e rejapoxea ha'e javi py.

11 Mba'eta ikuai 'rãe iporiaukue'i yvy re. Ha'e nunga rupi aipoa'e ndevy: Eipe'a ndepo, reme'ëxeal'i py reme'ë aguã nderyvy ojexavai rei'i va'e ha'e iporiaukue'i ndeyvy re ikuai va'e pe.

### *Êxodo 21.1-11*

12 — Xapy'a rei peteñ nderyvy e'ÿ vy nereindy hebreu regua ndevy ovendea ramo ma mboapy meme ma'etÿ peve'i 'rã remomba'eapo. Ha'e gui sete ma'etÿa py ma repoi ju 'rã.

13 Ndea gui oo ma jave emondouka rive eme mba'emo reraa uka e'ÿ re.

14 Ixupe reme'ëxeal'i py eme'ë nerymba kuery regua, mba'emo moa'yíaty gui, ha'e uva renhamiaty gui guare. SENHOR Nderuete nemoingo porãague regua gui reme'ë 'rã ixupe.

15 Nema'endu'a ke Egito yvy re ndee voi escravo reikoague gui SENHOR Nderuete nerenoëague re. Aÿ gui ma ha'e nunga amboaxa ndevy.

16 Ha'e rã xapy'a rei nerembiguai "Xee ndaai 'rã ndea gui" he'i 'rã ndevy, mba'eta nderayvu ha'e ndero pygua kuery voi, ha'e ndea py oiko porã.

17 Ha'e ramo mba'emo mombua py remombu 'rã inambi okë py. Ha'e rami rire nerembiguai ae 'rã oiko raka'e rã peve. Ha'e rami ae avi 'rã rejapo nerembiguai kunha va'e re.

18 Ndejeupe "Haxy xee apoi aguã" 'ere eme, mba'eta mboapy meme ma'etÿ re ma ndevy omiba'eapo rire mbyte rupi ete'i omiba'eapo va'e repy re, SENHOR Nderuete nemoingo porã aguã rejapo va'e ha'e javi py.

### *Lei mymba ra'y kuery oiko ypy'i va'ekue re ijayvua*

19 — Nerymba vaka e'ÿ vy vexa'i ra'y oiko ypy'i va'ekue ha'e javi ma, ava ri ramo remboaxa 'rã SENHOR Nderuete peguarã. Vaka ra'y jypy guare ma neremomba'eapoi 'rã, ha'e vexa'i ra'y jypy guare rague ma nderejayai 'rã.

20 Ha'e va'e ro'o re'u 'rã SENHOR renonde py ndero pygua kuery reve. Ma'etÿa nhavõ 'rã re'u, henda SENHOR oiporavoague py ae.

21 Ha'e rami teñ ha'e va'e mymba re ivaikuea oĩ ri ramo, hetyma vaikue'i e'ÿ vy oexa e'ÿ va'e mba'e, ha'e'ÿ vy amboae rami ivaikuea oĩ ramo ma nereme'ëi 'rã SENHOR Nderuete pe.

22 Ha'e va'e ma neretã py ae 'rã re'u. Peñ kuery va'e regua ha'eve va'e ha'e ha'eve'ÿ va'e teñ pe'u 'rã joa py, guaxu puku e'ÿ vy guaxu ete'i ro'o pe'ua rami.

23 Ha'e rã huguykue ma ndape'ui 'rãe. Penhoë 'rã yvy py yy rami.

## 16

### *Judeu kuery pegua ngaru mboapy regua ojapo aguã re ijayvua*

#### *Páscoa ára regua*

#### *Êxodo 23.14,15; 34.18; Levítico 23.4-8*

1 — Abibe jaxy re Páscoa ára ojeupity nhavõ pejapo 'rã ngaru SENHOR Penderuete pegua. Mba'eta abibe jaxy py ae, pyávy SENHOR Penderuete penerenoëmba raka'e Egito yvy gui.

2 Ha'e rami rire Páscoa ára ojeupity jave SENHOR Penderuete pe peme'ë 'rã penerymba vaka ha'e vexa'i regua, SENHOR guery omoï aguã oiporavoague py ae.

3 Ha'e va'e jave py ma mbojape ombovu pyre ndape'ui 'rã. Sete ára re 'rã pe'u mbojape imbovua revegua e'ÿ, jexavai regua, (mba'eta Egito yvy gui pejepe'a pojava raka'e), peikoa pukukue re penema'endu'a aguã Egito yvy gui pejepe'aague ára re.

4 Sete ára re pendea py noï 'rã mbojape mbovua, pendeyvy ha'e javi rupi. Ha'e rami avi jypyá ára ka'arukue xo'o pejuka va'ekue ma topyta eme ko'ëguerã.

5 Páscoa ára pyguarã nei peteñive pejuka eme penderekoarã SENHOR Penderuete ome'ë va'ekue py,

<sup>6</sup> ha'e rã SENHOR Penderuete guery omoõ aguã oiporavoague py ae 'rã pejuka Páscoa ára pyguarã. Ka'arukue, kuaray oike ma jave 'rã pejuka, Egito yvy gui peëmbaague hora ojeupity jave ae.

<sup>7</sup> Pembojoy vy pe'u 'rã SENHOR Penderuete oiporavoague py ae. Ha'e gui ko'ëgue jevy peo 'rã pendero katy pejevy aguã.

<sup>8</sup> Mboapy meme ára re 'rã pe'u mbojape imbovua revegua e'ÿ. Ha'e gui sete araa py ma SENHOR Penderuete pe pejapo 'rã nhemboaty iky'a e'ÿ va'e. Neï peteïve ma napemba'eapoi 'rã.

### *Pentecostes ára regua*

*Êxodo 23.16; 34.22; Levítico 23.15-21*

<sup>9</sup> — Ha'e gui peipapa 'rã sete semana peve. Mba'ety rupi kyxe py mba'emo aju pemono'õ ypya ára guive sete semana peve 'rã peipapa.

<sup>10</sup> Ha'e vy SENHOR Penderuete pe pejapo 'rã ngaru semanas regua. Pendepo py ae 'rã peme'ë mba'emo peme'ëxea'i py, SENHOR Penderuete penemoingo porãague rami.

<sup>11</sup> Pevy'a 'rã pekuapy SENHOR Penderuete renonde py, pendera'y, penderajy kuery, penerembiguai avakue ha'e kunhague reve, levita kuery penderekao py ikuai va'e reve, ha'e gui amboae regua, tyre'ÿ ha'e imeve'ÿ va'e kuery penda rupi ikuai va'e reve, SENHOR Penderuete guery omoõ aguã oiporavoague py ae.

<sup>12</sup> Penema'endu'a ke Egito yvy re escravo pendekuaiague re. Ha'e rami vy kova'e ayvu oeja pyre re peikuaa pota 'rã pejapo ete aguã.

### *Oguy'i py ikuai aguã regua*

*Levitico 23.33-43*

<sup>13</sup> — Ha'e gui sete ára re pejapo 'rã ngaru oguy'i py pendekuai aguã regua, mba'emo pemoa'yimbä ma jave, ha'e uva rykue penhamimba ma rire.

<sup>14</sup> Ngarua py pevy'a 'rã, pendera'y, penderajy kuery, penerembiguai avakue ha'e kunhague, ha'e gui levita, amboae regua, tyre'ÿ ha'e imeve'ÿ va'e kuery penderekao py ikuai va'e reve.

<sup>15</sup> Sete ára re 'rã ngaru pejapo SENHOR Penderuete pegua, SENHOR oiporavoague py ae, mba'eta SENHOR Penderuete penemoingo porã 'rã mba'emo pemono'õa ha'e pendepo py pejapo va'e ha'e javi py, opa mba'e py perovy'a aguã rami.

<sup>16</sup> — Ha'e rami py ma'etÿa nhavõ mboapykue-pykue peẽ kuery va'e regua avakue ikuai va'e ojexa uka 'rã SENHOR Penderuete renonde, oiporavoague py ae: ngaru mbojape imbovua revegua e'ÿ va'e regua oikoa py, ngaru semanas regua, ha'e gui ngaru oguy'i py ikuai aguã regua oikoa py. Opo py mba'emo ogueru reve anho 'rã ojexa uka SENHOR renonde py.

<sup>17</sup> Peteï-teï ome'ë 'rã ojoua'i rami, SENHOR Tuuete omoingo porãague rami.

*Êxodo 23.6-9*

<sup>18</sup> — Penderekao rã SENHOR Penderuete ome'ë va'ekue py peẽ kuery regua ikuia ha'e javi rupi pemoi 'rã nhomboayvu va'ety ha'e huvixa kueryrã, heta va'e kuery re oikuua pota aguã ha'evea rami.

<sup>19</sup> Joe peikuaa pota eme ha'eve e'ÿa rami rei. Peteï peayvvu eme joegui. Pejopy eme ome'ëmby, mba'eta ome'ëmby ombogue 'rã hi'arandu va'e rexha ha'e omboeko vai rive 'rã heko porã va'e.

<sup>20</sup> Ha'evea rami meme 'rã peikuaa pota, ha'e rami anho'i, peikove ha'e penderekao aguã pendeyvyrã SENHOR Penderuete ome'ë va'ekue py.

<sup>21</sup> Pemo'ã eme yvyra ta'angaarã SENHOR Penderuete pegua altar yvýry.

<sup>22</sup> Neï pemo'ã eme ita SENHOR Penderuete ojou vai va'e regua rive.

## 17

### *Tuuete ra'angaa mboeteare ombopagaa aguã re ijayvua*

<sup>1</sup> — Ha'e gui vaka ra'y e'ŷ vy vexa'i iporã e'ŷ, ivaikue rei va'e ma peme'ẽ eme SENHOR Penderuete pe, mba'eta ixupe ramo ojeguaru pyrã.

<sup>2</sup> Xapy'a rei pendea py penderekooarã SENHOR Penderuete ome'ẽ va'ekue rupi pejou 'rã ava e'ŷ vy kunha teĩ SENHOR Penderuete renonde teko vai rupi oiko va'e, guexeve guarã ojapo va'ekue rupi e'ŷ.

<sup>3</sup> Ha'e va'e nunga oo vy tuuete mboae pe rive 'rã ikuai omboetea rupi, ha'e'ŷ vy kuaray, jaxy, ha'e'ŷ vy yva re ojekuaa va'e pe rei, xee ajapo ukaague rami e'ŷ.

<sup>4</sup> Ha'e va'e reko omombe'ua rã pendu vy ma peikuaa pota porã 'rã. Ha'e gui xapy'a rei anhetẽ ete ri Israel kuery mbyte ha'eve'ŷ va'e ojapo ramo

<sup>5</sup> ava e'ŷ vy kunha va'e ha'eve'ŷ va'e apoare peraa 'rã peneretã rokẽ peve, ha'e vy pejapipa 'rã ita py omano peve.

<sup>6</sup> Mokoĩ e'ŷ vy mboapy hexaare omombe'u ramo mae ma pejuka omano aguã rami ojejavý va'ekue. Peteĩ'i hexaare omombe'u ramo nomanoi 'rã.\*

<sup>7</sup> Hexaare ranhe 'rã ita omombo ojuka aguã. Ha'e gui ma heta va'e kuery ha'e javi 'rã ojapi. Ha'e rami vy pendea gui peipe'a aguã heko vai va'e.\*

### *Haxy ete va'e re huvixa oikuaa pota kuaa aguã re ijayvua*

<sup>8</sup> — Ha'e gui mba'emo re reikuuaa pota aguã haxy ete ri ramo, jojukaague re mba'e, e'ŷ vy mba'emo re ojerurea, joapo vaiague, e'ŷ vy amboae ramigua oikuaa pota ukaa py, ha'e ramo repu'ã vy reo 'rã SENHOR Nderuete oiporavoague py.

<sup>9</sup> Ha'e vy rejexa uka 'rã levita regua sacerdote kuery ha'e nhomboayvu va'ety ha'e jave py ikuai va'e pe. Ha'e kuery pe reporandu rã omombe'u 'rã rejapo va'erã.

<sup>10</sup> SENHOR oiporavoague py ndevy ombovaiague rami 'rã rejapo. Enhea'ã ndevy ojapo uka va'ekue rejapopa aguã.

<sup>11</sup> Lei re ha'e kuery nembo'eague rami 'rã rejapo. Ayvu ndevy omombe'uague gui nderejepe'ai 'rãe, reiporu kuaa regua katy, neĩ reiporu kuaa e'ŷa katy ma voi.

<sup>12</sup> Ha'e gui ava onhemboyvate rei vy SENHOR Nderuete pegua sacerdote ayvu noendu potai, neĩ nhomboayvu va'ety ayvu ri ramo ma ojukaa 'rã, Israel kuery mbyte gui peipe'a aguã mba'emo vai,

<sup>13</sup> ha'e nunga heta va'e kuery ha'e javi oendu vy okyje aguã, onhemboyvate ve'ŷ aguã rami.

### *Huvixaverã omoĩ mbyre rekora re ijayvua*

<sup>14</sup> — Xapy'a rei yvy penderekooarã SENHOR Penderuete ome'ẽ va'ekue py pevaẽ ma vy aipopeje 'rã: "Nhamoĩ huvixave nhandere opena va'erã, ha'e javi regua nhandeyvýry rupi ikuia rami" peje 'rã.

<sup>15</sup> Ha'e rami vy penderuvixaverã pemoĩ 'rã SENHOR Penderuete oiporavo va'e ae. Ha'e rã amboae regua ava penderyvy kuery regua e'ŷ ma nda'evei pemoĩ aguã, ha'e rã Israel kuery va'e regua anho.

<sup>16</sup> Ha'e rami avi penderuvixave ma nda'evei ojeupe guarã kavaju omboetave aguã, neĩ Egito yvy katy heta va'e kuery ogueraa jevy aguã, kavaju ojouvexe vy. Mba'eta pendevy "Ndapejevyvei 'rã kova'e tape rupi" he'i va'ekue SENHOR.

<sup>17</sup> Nda'evei avi ojou reta aguã gua'yxy jevyrã, opy'a py tape porã gui opia e'ŷ aguã. Nda'evei guive ojeupe guarã prata e'ŷ vy ouro ojou reta aguã.

<sup>18</sup> — Ha'e gui guenda opena atyrã py oguapy ma vy ojeupe ae oguerova 'rã kova'e lei kuaxia re ombopara vy. Ha'e va'e ma levita regua sacerdote kuerya py oĩ va'e.

\* **17:6** Hebreus 10.28    \* **17:7** 1 Coríntios 5.13

<sup>19</sup> Ngupive oguereko riae 'rã, oikovea ára nhavõ ogueroayvu aguã. Ha'e rami vy oikuaa 'rã SENHOR Nguuete renonde ojererokyjea rupi oiko aguã, ha'e kova'e lei re ayvu oĩ va'e ha'e javi rupi omoĩ porã ha'e ojapopa ete aguã.

<sup>20</sup> Mba'eta ha'e va'e ayvu ojapo 'rã opy'a py guyvy kuery gui onhembovateve e'ŷ aguã, ha'e ojapo uka pyre gui ojepe'a e'ŷ aguã, oiporu kuaa regua katy neĩ oiporu kuaa e'ŷa katy ma voi. Ha'e rami vy Israel kuery mbyte huvixa oĩ are aguã, ha'e gui ta'y kuery ju.

## 18

### *Sacerdote ha'e levita kuery peguarã ha'e hekorã re ijayvua*

<sup>1</sup> — Ha'e gui levita regua sacerdote kuery, ha'e levita kuery ha'e javi ndoguerokoi 'rã oyvyrã Israel kuerya py. Ha'e kuery okaru 'rã SENHOR pe oapy vy ome'ẽ mbyre re, ha'e kuery peguarã opyta va'e gui.

<sup>2</sup> Oyyvrã ma ndoguerokoi 'rã guyvy kuery ikuiaia rupi. SENHOR ae 'rã ha'e kuery mba'erã va'ekue, ha'e kuery pe ijayvuague rami vy.

<sup>3</sup> Ha'e nunga rupi pova'e ma sacerdote kuery peguarã heta va'e kuery ome'ẽ va'ekue regua, vaka e'ŷ vy vexa'i kuery mba'e. Sacerdote pegua ma ijaxi'y kãgue, ha'e gui haĩ'y kãgue ha'e hyekue.

<sup>4</sup> Ha'e kuery pe peme'ẽ avi 'rã jypygua mba'emo aju, uva rykue ha'e azeite iporãgueve gui, ha'e gui vexa'i rague jypy guare voi.

<sup>5</sup> Mba'eta ha'e kuery ma Israel kuery ha'e javi regua gui SENHOR Penderuete oiporavo va'ekue, SENHOR rery rupi ombe'apo aguã, ha'e gui ta'y kuery ju, ára nhavõ reguarã.

<sup>6</sup> — Ha'e gui xapy'a rei peteĩ levita ou 'rã guekoa peteĩ tetã Israel regua va'e rei gui. Opy'a py ombe'apoexa'i ha'e javi rupi 'rã ou henda SENHOR oiporavoague py.

<sup>7</sup> Ha'e rami vy ombe'apo 'rã SENHOR Nguuete rery rupi, guyvy kuery levita regua ha'e javi SENHOR renonde opena okuapya rami.

<sup>8</sup> Ha'e va'e ho'u va'erã ma ha'e kuery pegua reve joo rami ae 'rã, mba'emo guekoa py ovendeague repy áryve ome'ëa 'rã.

### *Imba'ekuaa ha'e imba'evyky va'e kuery rovai ijayvua*

<sup>9</sup> — Ha'e gui yvy SENHOR Penderuete ome'ëague py pevaẽ ma vy napenhembo'ei 'rã ha'e pygua kuery ha'eve'ŷ va'e ojapoa rami pendekuai avi aguã.

<sup>10</sup> Penembyte py toiko eme guive gua'y e'ŷ vy guajy tata py oapy va'e, imba'ekuaa va'e, tenondegua mombe'ua, oexa'ã kuaa va'e, neĩ imba'evyky va'e ma voi,

<sup>11</sup> onhembo'e vaikue va'e, neĩ omanogue mboayvua, nhe'ẽ vai revegua, neĩ omanogue pe oporandu va'e ma voi.

<sup>12</sup> Mba'eta ha'e nunga apoa ma SENHOR pe rã ojeguarupy meme. Ha'e nunga ha'e kuery ojapo okuapya re ae SENHOR Penderuete oipe'a raka'e penerononde gui.

<sup>13</sup> Opa mba'e py heko porã va'e 'rã peiko SENHOR Penderuete renonde.

<sup>14</sup> Mba'eta yvy pejopy va'erã va'e regua kuery ojapyxaka 'rã okuapy tenondegua mombe'ua ha'e imba'ekuaa va'e kuery re. Ha'e rã pendevy pe ma SENHOR Penderuete ndojapo ukai ha'e nunga.

### *Profeta yvate ete va'e oiko aguã re ijayvua*

<sup>15</sup> — Penembyte gui SENHOR Penderuete omoingo 'rã peteĩ profeta-rã, penderyvy regua xee rami guarã ae. Ha'e va'e re ma pejapyxaka 'rã,\*

<sup>16</sup> mba'eta Horebe yvyty re penhemboaty pekuapya py SENHOR Penderuete pe pejerure vy “Nda'evei SENHOR Óreruete ayvu roenduve aguã, neĩ kova'e tata tuvixa ete va'e roexave aguã, romano e'ŷ aguã”, peje va'ekue.

<sup>17</sup> Ha'e ramo SENHOR aipoe'i xevy: “Ha'evea rami ha'e kuery ijayvu.

\* **18:15** Profeta Moisés ramigua SENHOR omoingo va'erã ma Jesus ae (Atos 3.22-23, 7.37).

18 Ha'e rami rã ha'e kuery pe xee amoingo 'rã peteñ profeta-rã penderyvy kuery mbyte gui, ndee ramigua ae. Ha'e va'e juru py amoñ'rã xeayvu, ha'e kuery pe ju omombe'u aguã ixupe ajapo ukaague ha'e javi.

19 Xerery rupi xeayvu ha'e omombe'u ramo ambopaga 'rã ndojapyxaka potai va'e ha'e javi.

20 Ikuai avi 'rã profeta kuery xerery rupi merami ijayvu va'eri xeayvu namombe'u ukaia va'e, ha'e ÿ vy tuuete mboae rery rupi ijayvu va'e. Ha'e va'e regua profeta kuery ma pejuka 'rã.

21 Xapy'a rei aipopeje 'rã pendepy'a py: 'Mba'exa vy tu jaikuua 'rã SENHOR gui e'ÿ aipoe'i rã?'

22 Peikuaa pota ke: Peteñ profeta SENHOR rery rupi ijayvu teñ ijayvuague ndojeupityi, ndoikoi ri ramo ma SENHOR guigua e'ÿ ae ijayvu. Ha'e va'e profeta ma onhembovatea rupi rive ijayvu ra'e. Pekyje eme ixugui.'

## 19

### Números 35.9-15; Deuteronômio 4.41-43

1 — SENHOR Penderuete vvy regua oipe'apa vy ijyvykue pendevy ju ome'ë ramo ha'e kuery rekoague ha'e hoogue ikuai va'e pejopy vy ha'e py pendekuai ma rire,

2 ha'e jave py mboapy tetã ju pemboja'o 'rã pendeyvyrã SENHOR Penderuete ome'ë va'ekue mbyte rupi.\*

3 Pejapo 'rã tape ha'e va'e katy oo va'erã, ha'e pendeyvyrã SENHOR Penderuete ome'ë va'ekue pemboja'o 'rã mboapy henda rupi, ha'e va'e tetã py jojukaare ma guive rã onhemi aguã.

### Números 35.22-28

4 — Pova'e nunga jojukaare ha'eve 'rã ha'e va'e tetã py onhemi vy oikove aguã: oirũ ojukaxe reia py e'ÿ, potae vy e'ÿ ojuka va'ekue anho.

5 Xapy'a rei amongue oo 'rã oirũ reve ka'aguy re xakã ojaya aguã. Ha'e vy haxa py yvyra ojaya aguã oity ratã ramo hi'y gui ferro oë xapy'a ramo oirũ omongarau rire omano 'rã. Ha'e gui ijukaare oo vy onhemi 'rã ha'e va'e tetã py oo jepe aguã.

6 Ha'e rami e'ÿ rã huguy repyarã opy'a py ipoxy reve jojukaare omonha vy oupity 'rã tape ipuku-a rupi. Ha'e vy ojuka 'rã, omano aguã rami e'ÿ oiko teñ, jojukaxe reia py e'ÿ rire.

7 Ha'e nunga rupi aipoa'e mboapy tetã peiporavo aguã.

8 Xapy'a rei SENHOR Penderuete peneramoñ kuery pe ouraague rami vy ombotuvixave 'rã pendeyvy, ha'e pendevy ome'ëmba 'rã vvy ome'ë 'rã va'ekue,

9 xapy'a rei ha'e ojapo uka va'ekue aÿ amboaxa va'e ha'e javi pejapo ramo SENHOR Penderuete peayvu, ha'e ára nhavõ ixuguigua tape rupi peiko aguã, ha'e rami vy ma mboapy tetã ju 'rã pejouve, mboapy ae ma va'ekue áryve,

10 ha'e rami pendeyvyrã SENHOR Penderuete ome'ë va'ekue py heko porã va'e ruguy omoëa e'ÿ aguã, pendere oï e'ÿ aguã tuguy omoëague re opaga aguã.

### Números 35.16-21

11 — Ha'e gui xapy'a rei oiko 'rã oirũ ndoayvui vy oity aguã re onhembopy'a va'e. Ha'e vy hexe opu'ã vy oinupã vy ojuka 'rã, ha'e gui onhemi 'rã peteñ tetã peiporavo va'ekue py.

12 Ha'e ramo hekoa ae pygua nhomongeta va'ety kuery omondouka 'rã heruarã, ha'e oguerua ma ramo omboaxa 'rã huguy repyarã po py ojuka aguã.

13 Ha'e va'e re pema'ë eme pemboaxya rupi, Israel kuery mbyte gui peipe'a aguã heko porã va'e ruguy moëare ojejavyague, pendekuai porã aguã.

\* 19:2 Jordão yakã yvýry ha'e kuery ovaë ypyague py mboapy tetã omboja'o ma voi raka'e (4.41-43). Apy ma mboapy ju omboja'o aguã re ijayvu, ha'e javi vy mboapy meme tetã oï aguã jojukaare onhemi atyrã.

*Yvy ja'oa ha'e mba'emo mombe'ua kuery re ijayvua*

<sup>14</sup> — Erova eme neirũ kuery yvy markaa, ymagua kuery pendeyvy re omo'ã va'ekue, yvy SENHOR Penderuete penderekooarã ome'ẽ va'ekue py.

<sup>15</sup> — Amongue teko vai, e'ŷ vy jejavya ma guive rã ojapo rire teĩ peteĩ'i hexaare nda'evei hovai opu'ã vy hekokue omombe'u aguã. Mokoõ, mboapy hexaare omombe'u rire mae 'rã peikuaa anhetẽguia.\*

<sup>16</sup> Xapy'a rei joe amongue opu'ã vy hekokue ramigua omombe'u 'rã teko vai ojapoague rami.

<sup>17</sup> Ha'e rami rã mokoõve avakue joupe ijayvu va'ekue ojexa uka 'rã SENHOR renonde py, sacerdote ha'e nhomboayvu va'ety kuery ha'e va'e ára ikuai va'e renonde.

<sup>18</sup> Nhomboayvu va'ety kuery oikuua pota porã 'rã. Ijayvu riveague, guyvy rovai ijapuague ri oikuua vy

<sup>19</sup> hexe ojapo 'rã guyvy re ojapoxeague rami. Ha'e rami vy 'rã peipe'a teko vai penembyte gui,

<sup>20</sup> amboae kuery oendu vy okyje aguã, ha'ekue ramigua ndojapoavei aguã penembyte rupi.

<sup>21</sup> Joapo vaiare re pema'ẽ eme pemboaxya rupi: joekove oipe'aague re peipe'a avi 'rã hekove, joexa omombuague re pemombu avi 'rã hexa, nhoaõ omopẽague re pemopẽ avi 'rã haõ, jopo ojayaague re pejaya avi 'rã ipo, e'ŷ vy jopy ojayaague re pejaya avi 'rã ipy.

## 20

*Joe opu'ãa rã guarã re ijayvua*

<sup>1</sup> — Ha'e gui penderovaigua kuery reve pepu'ã aguã peo vy pexa 'rã kavaju áry e'ŷ vy karóxa py ou va'e pendegui hetave va'e. Ha'e rami teĩ pekyje eme, mba'eta pendereve oiko SENHOR Penderuete Egito yvy gui penerenoẽare ae.

<sup>2</sup> Joe pepu'ã aguã py pevaõ ta ramo penerononde sacerdote oo vy ijayvu 'rã peẽ kuery pe.

<sup>3</sup> Ha'e vy aipoe'i 'rã: "Pendu ke, Israel kuery. Aõ pevaõ ta ma penderovaigua kuery reve joe pepu'ã aguã py. Penhemondyi eme penekuraxõ py. Pekyje eme, peryryipa eme, napenderekorãvei eme guive penderovai ha'e kuery ou rã pexa vy,

<sup>4</sup> mba'eta SENHOR Penderuete oo 'rã peẽ kuery reve. Pendere vy ha'e opu'ã 'rã penderovaigua kuery re, pendereraa jepe aguã", he'i 'rã.

<sup>5</sup> — Ha'e gui yvatekueve ju peẽ kuery pe ijayvu 'rã. Ha'e vy aipoe'i 'rã: "Peẽ kuery va'e regua mava'e tu ngoorã ojapo teĩ nomboaxai teri SENHOR peguarã? Ha'e va'e tojevy ju ngoo katy, joe opu'ãa py omano ramo amboae ju omboaxa e'ŷ aguã.

<sup>6</sup> Ha'e peẽ kuery va'e regua mava'e tu uva tyrã onhotõ va'eri hi'a nomono'õi teri? Ha'e va'e tojevy ju ngoo katy, joe opu'ãa py omano ramo amboae ju omono'õ e'ŷ aguã.

<sup>7</sup> Peẽ kuery va'e regua mava'e tu kunha re omendaxe va'eri nomendai teri? Ha'e va'e tojevy ju ngoo katy, joe opu'ãa py omano ramo amboae ju kunha re omenda e'ŷ aguã.

<sup>8</sup> Peẽ kuery va'e regua mava'e tu okyje raxa ha'e ipy'a vava rei va'e? Ha'e va'e tojevy ju ngoo katy, tyvy kuery voi opy'a py okyjea oendu avi e'ŷ aguã, ha'e va'e opy'a py okyjea rami", he'i 'rã yvatekueve heta va'e kuery pe ijayvu vy.

<sup>9</sup> Heta va'e kuery pe yvatekueve ijayvupa ma vy mae ma omoõ 'rã xondaro kuery ruvixarã ha'e kuery renonde katy guarã.

<sup>10</sup> — Ha'e gui amongue tetã re pepu'ã aguã py pevaõ ta ma vy peporandu ranhe ha'e kuery reve peteĩ rami pendekuai aguã re.

<sup>11</sup> Xapy'a rei peteĩ rami ikuaxea rami penembovai, ha'e pendevy guetã rokẽ oipe'a ramo ma ha'e pygua kuery ha'e javi pemomba'eapo atã 'rã penerembigualrã.

\* <sup>19:15</sup> Mateus 18.16, 2 Coríntios 13.1

<sup>12</sup> Ha'e rami teĩ pendereve peteĩ rami nda'ikuaixei vy pendere opu'ã ri ramo ma pejokopa 'rã tetã.

<sup>13</sup> Ha'e ramo SENHOR Penderuete omboaxa 'rã pendepo py. Ha'e pygua avakue ikuai va'e ma guive rã pejuka 'rã kyxe py.

<sup>14</sup> Ha'e rã kunhague, kyrigue, mymba kuery, ha'e mba'emo tetã py ikuai va'e ha'e javi ma peraapa 'rã penemba'erã. Peẽ ae peiporu 'rã penderovaigua kuery mba'e rei-reikue pendepo py SENHOR Penderuete omboaxa va'ekue.

<sup>15</sup> Ha'e rami ae 'rã pejapo tetã pendegui mombyry ikuai va'e ha'e javi re, ha'e katy'igua kuery pegua e'ý ramo.

<sup>16</sup> Ha'e rã amboae regua kuery pendepo py SENHOR Penderuete omboaxa va'e retã py ma neĩ peteĩv ndapejai 'rã oikove vy ipytue va'e.

<sup>17</sup> Ha'e rami 'rãgue py SENHOR Penderuete ijayvuague rami vy pemomba ete 'rã: heteu kuery, amorreu, cananeu, ferezeu, heveu ha'e jebuseu kuery,

<sup>18</sup> ha'e kuery penembo'e e'ý aguã ha'eve 'ý va'e pejapo aguã, nguuete ra'angaa kuery pe ojapoa rami, mba'eta ha'e rami pejejav 'rã SENHOR Penderuete rovai.

<sup>19</sup> — Xapy'a rei peteĩ tetã pejoko 'rã mbovy ára re rei e'ý, ha'e kuery re pepu'ã 'rã pendepo'aka aguã. Ha'e rami teĩ pembovaipa rive eme yvyra ha'e va'e rupi ikuai va'e haxa py peake'o vy, mba'eta hi'a ha'eve 'rã pe'u aguã. Pemboguai eme, mba'eta yvyra mba'ety rupi ikuai va'e nda'u avakue teve, ha'e va'e re pepu'ã aguã?

<sup>20</sup> Ha'e rã yvyra hi'a pe'u e'ý va'erã ma ha'eve peake'o vy peity aguã. Ha'e va'e py tetã re pepu'ã pekuapya va'e rovai pemo'ã 'rã ijokoarã, peitypa peve.

## 21

### *Oikuaa e'ýpy jojukaague ojao'i ukaa aguã re ijayvua*

<sup>1</sup> — Ha'e gui pendeyvyrã SENHOR Penderuete ome'ëague py peteĩ te'ögue pejou xapy'a 'rã mba'ety py itui va'e, ha'e ndapeikuaai 'rã guive mava'e pa ojukaague.

<sup>2</sup> Ha'e ramo nhomongetaa ha'e oikuaa pota va'ety kuery oẽ 'rã jogueruvy, ha'e vy omano va'ekue ituia gui oa'ã 'rã peteĩ-teĩ tetã ijyvýry rupi oĩ va'e peve.

<sup>3</sup> Ha'e gui omano va'ekue ituia katy'ive tetã oĩ va'e pygua nhomongeta va'ety kuery ogueraa 'rã peteĩ vaka kunha nomba'eapoi teri va'e, neĩ canga re voi nomoatãi teri va'ekue.

<sup>4</sup> Ha'e va'e ogueraa 'rã peteĩ yvyugua yy xyry oĩa yvy noikaraïai, neĩ nonhotýai teria py. Ha'e va'e yvyugua py ae 'rã ojyryvi poka vaka kunha.

<sup>5</sup> Ha'e gui Levi ramymino va'e regua sacerdote kuery ovaẽ avi 'rã, mba'eta ha'e va'e kuery SENHOR Penderuete oiporavo va'ekue ojeupe omba'eapo aguã, SENHOR rery rupi jogueroayvu porã, ha'e ijayvua rupi oikuaa pota aguã peteĩ-teĩ ojerurea ha'e joguero'apaague re.

<sup>6</sup> Ha'e gui nhomongeta va'ety kuery tetã omano va'ekue ituia katy'ivegua ha'e javi ma ojepoei 'rã vaka kunha yvyugua py ojuka va'ekue áry.

<sup>7</sup> Ha'e vy aipoe'i 'rã okuapy: "Orepo e'ý ae kova'e ava ruguy omoẽ va'ekue, orerexa ndoexai guive huguy omoëa rã.

<sup>8</sup> Ha'e gui SENHOR, emboaxy ndevygua Israel kuery, ndee ae reraa jepe rire. Eja eme heko porã va'e ruguy omoëague py jejavy optya aguã ndevygua Israel kuery mbyte", he'i okuapy ramo ojao'ia 'rã huguy omoëague py jejavy oĩ va'e.

<sup>9</sup> Ha'e rami py penembyte gui peipe'a uka 'rã heko porã va'e ruguy omoëague py jejavy oĩ va'e, SENHOR renonde ha'evea ramigua pejapo vy.

### *Kunha escravo-rã ogueraa pyre re ijayvua*

<sup>10</sup> — Penderovaigua kuery reve joe pepu'ã aguã peo ramo xapy'a rei SENHOR Penderuete omboaxa 'rã pendepo py, ha'e peraapa 'rã escravo-rã.

<sup>11</sup> Ha'e vy ha'e kuery mbyte xapy'a rei peteĩ kunha iporã ete va'e rexâ vy ndea'e rei 'rã hexe, ha'e reraaxe 'rã ndera'yxyrã.

<sup>12</sup> Ha'e rami vy reraa 'rã ndero katy, ha'e o'a ojayapa 'rã oakã re oĩ va'ekue, ojaya 'rã opoapẽ,

<sup>13</sup> ha'e gui omboekovia 'rã oao escravo-rã peraa jave onhemondeague. Ndero py ae 'rã oiko, ha'e peteĩ jaxy re ojae'o 'rã nguu ha'e oxy re. Ha'e va'e rire mae ma rejoguereko 'rã hexeve. Ndee ma ime 'rã reiko, ha'e rã kunha va'e ma ndera'yxy 'rã.

<sup>14</sup> Ha'e gui xapy'a rei ndevy pe rã kunha va'e nda'evei rei ramo tove too ha'e ae oocea katy rei. Nda'evei 'rã peráta re revende aguã, ereko axy eme guive, ndee ae ma remo'yvy'i rire.

### *Ta'y jypy guare peguarã re ijayvua*

<sup>15</sup> — Xapy'a rei peteĩ ava omenda 'rã mokoĩ kunha re. Peteĩ ma oayvuve 'rã, ha'e rã amboae ma ndoayvuive 'rã. Ha'e vy gua'yxy mokoõve re ta'y 'rã, ha'e ndoayvuive va'e re ranhe 'rã ta'y.

<sup>16</sup> Ha'e gui gua'y kuery pe mba'emo oguereko va'e omboja'opaa ára py ma nda'evei 'rã jypy guare peguarã oguereko va'e oayvuve va'e pi'a pe ome'ẽ aguã, ndoayvuive va'e pi'a pe 'rãgue py, mba'eta ha'e va'e ae ta'y jypy guare.

<sup>17</sup> Ndoayvuive va'e pi'a pe ae tuu "Jypy guare" he'i vy ixupe ome'ẽ retave 'rã oguereko va'e gui mokoõguea va'ekue. Kumumive jave py ta'ya pe ae ojopy 'rã jypy guare peguarã tuu oguereko va'ekue.

### *Ta'y nonhe'ẽ rendu e'ŷ va'e re ijayvua*

<sup>18</sup> — Xapy'a rei amongue oguereko 'rã peteĩ gua'y inhe'ẽ rendu e'ŷ ha'e opu'ã rei va'e, nguu neĩ oxy ayvu ma voi noendu potai va'e, tuu oinupã teĩ ndoikuaa potai rive ae va'e.

<sup>19</sup> Ha'e ramo tuu ha'e ixy ojopy vy ogueraa 'rã tetã pygua nhomongeta va'ety kuery ikuaia py, guetã rokẽ py ae.

<sup>20</sup> Ha'e rami vy aipoe'i 'rã ha'e kuery pe: "Kova'e orera'y ma orere opu'ã rei ha'e norenhe'ẽ rendui va'e, neĩ ndojapyxakai oreayvua re. Opa marã rei oiko, oka'uxe guive oikovy", he'i 'rã.

<sup>21</sup> Ha'e ramo tetã pygua avakue ha'e javi ojapipa 'rã ita py, omano peve. Ha'e rami vy penembyte gui peipe'a 'rã teko vai. Ha'e ramo Israel kuery ha'e javi oendu vy ojererokyje 'rã okuap.

### *Yvyra re omano va'ekue oupi pyre oipe'aa jevy aguã re ijayvua*

<sup>22</sup> — Xapy'a rei amongue ojejavvy vy omano aguã rami oiko 'rã. Ha'e ramo pejuka ma vy hetekue yvyra re peupi imoiny rire,

<sup>23</sup> hetekue ndopytai 'rã yvyra re pytã mbuku re. Ha'e va'e árave 'rãe pemboguejy ha'e pejaty. Mba'eta yvyra re oupi pyre ma Nhanderuete ijayvu vaia va'e oiko. Ha'e ramo vy 'rãe napemongy'a rei pendeyvyrã SENHOR Penderuete ome'ẽ va'ekue.\*

## 22

### *Okanhygue re ijayvua*

<sup>1</sup> — Xapy'a rei nderyvy rymba vaka e'ŷ vy vexa okanhhygue rexâ vy enhomi eme ixugui. Reme'ẽ jevy 'rã nderyvy pe.

<sup>2</sup> Ha'e rami avi ija ndea katyguia e'ŷ ramo, e'ŷ vy rexâ va'ety e'ŷ ramo ma ndero py ranhe eraa rerekoy aguã, nderyvy ogueraa aguã ou rã ixupe remboaxa jevy peve.

<sup>3</sup> Ha'e rami ae 'rã rejapo hymba mburika'i re, ha'e ija re voi. Ha'e rami ae avi 'rã rejapo nderyvy omokanhy va'ekue re rei, rejou ri vy. Nda'evei renhomie aguã.

<sup>4</sup> Ha'e gui nderyvy rymba mburika'i e'ŷ vy vaka tape rupi ho'a va'ekue rexâ vy enhomi eme ixugui. Reipytyvõ 'rãe remopu'ã vy.

\* 21:23 Gálatas 3.13

### *Lei opa mba'e rei regua*

<sup>5</sup> — Kunhague nonhemondei 'rā avakue pegua ao py, avakue ma voi nonhemondei 'rā kunha pegua ao py. Mba'eta ha'e ramigua ojapo va'e rei tema SENHOR Nderuete ojeguarua meme.

<sup>6</sup> — Tape rupi reoa rupi xapy'a rei rex'a 'rā guyra'i raity yvyra re, e'ŷ vy yvy py, ha'e va'e re guyra ra'y kue'iry ikuai, e'ŷ vy hupi'a, ha'e gui ta'y kue'iry áry, e'ŷ vy hupi'a áry ixy oĩ. Ha'e rami rā ejopy eme ixy ta'y kue'iry reve.

<sup>7</sup> Tove ixy too ooxea katy, eraa ta'y kue'iry anho ndejeupe guarā, reiko porā ha'e reiko pukuve aguā.

<sup>8</sup> — Ha'e gui oorā rejapo vy ijao'ia rembe rupi rejapo 'rā kora jojokoarā, xapy'a rei ijao'ia gui amongue ho'a ramo oo káuxa ndere oĩ e'ŷ aguā huguy omoēague re repaga aguā.

<sup>9</sup> — Nde'uvaty rupi enhotŷ eme mokoĩ regua ha'yī'i, ha'yī renhotŷ va'ekue gui hi'a oiko vy ha'eve'ŷ va'e opyta e'ŷ aguā, ha'e remono'õ va'ekue ha'e javi.

<sup>10</sup> — Yvy reikaraĩ aguā eraa eme vaka mburika reve irū va'e.

<sup>11</sup> — Enhemonde eme ao vexa rague guigua ipererī va'e reve ombojo'a pyre py.

### *Lei ombojeguaa aguā regua*

<sup>12</sup> — Ao puku renheovāa rembojegua 'rā ijapy irundy va'e py.

### *Lei itavy reia ha'e omenda va'e pegua*

<sup>13</sup> — Xapy'a rei peteĩ ava omenda 'rā kunha re, ha'e kunha va'e reve jogueroke ma rire nda'ija'evei 'rā hexe.

<sup>14</sup> Ha'e rami vy omombe'u 'rā itavy rei va'ea rami, kunha va'e re ijayvu rei vy. Ha'e vy aipoe'i 'rā: "Kova'e kunha re amenda teĩ hexeve ajoguerekoy vndaexai kunhataĩ'i teria" he'i ramo

<sup>15</sup> kunha va'e ru ha'e ixy ma kunhataĩ'i teria kuaa ukaarā ojou vy ogueraa 'rā tetā py nhomongeta va'ety kuery okẽ py ikuai py.

<sup>16</sup> Nhomongeta va'ety kuery pe kunha va'e ru aipoe'i 'rā: "Kova'e ava re xerajy amo-menda teĩ kunha va'e re ha'e nda'ija'ei vy

<sup>17</sup> hexe ijayvu oximbā aguā rami. Ha'e vy xevy 'Nderajy ma kunhataĩ'i e'ŷ ra'e' he'i. Ko, apy ma oĩ xerajy kunhataĩ'i teri oikoa kuaa ukaarā", he'i vy ajukue oipyopa 'rā tetā pygua nhomongeta va'ety kuery renonde.

<sup>18</sup> Ha'e nunga ha'e kuery oexa vy ime ojopy vy oinupāmba 'rā.

<sup>19</sup> Ha'e rami vy ome'ẽ uka 'rā cem hatã'i va'e prata guigua kunha va'e ru peguarā, Israel regua kunhataĩ va'e rovai ijayvu rei rire. Ha'e gui kunha va'e oiko 'rā ta'yxy ae, ha'e ime nomoxẽvei 'rā oikoa pukukue re.

<sup>20</sup> Ha'e rami avi anhetē ae ri kunhataĩ'i oikoa ndoexai ramo

<sup>21</sup> ha'e pygua kuery kunha va'e ogueraa 'rā tuu kuery rokẽ peve, ha'e tetā pygua avakue ojapipa 'rā ita py omano peve, Israel kuery mbyte oiko vaikue rei rire, itavy rei ra'e nguu ro rupi teri oiko reve. Ha'e rami vy penembyte gui peipe'a 'rā teko vai.

<sup>22</sup> — Ha'e gui xapy'a rei peteĩ ava ojoua 'rā kunha ome oguerekoy va'e reve onheno ramo. Ha'e vy mokoĩve omano 'rā, ava kunha reve onheno va'ekue, ha'e kunha va'e teĩ ae ma. Ha'e rami py peipe'a 'rā teko vai Israel kuery mbyte gui.

<sup>23</sup> — Xapy'a rei peteĩ kunhataĩ ete teri omenda aguā rami oiko, ha'e gui peteĩ ava tetā py ojou vy ogueronheno 'rā.

<sup>24</sup> Ha'e ramo mokoĩve peraa 'rā tetā rokẽ peve ita py pejapipa aguā, omano peve. Kunha va'e ma tetā py ndojapukaiague re 'rā pejuka, ha'e rā ava ma oirū ra'yxy omo'yvyi'ague re. Ha'e rami py peipe'a 'rā teko vai penembyte gui.

<sup>25</sup> — Ha'e rã mba'ety rupi ava ojou 'rã kunha omenda aguã rami oiko va'e, ha'e vy onhea'ã vy ogueronheno 'rã. Ha'e rami vy ava va'e anho'i omano 'rã kunha ogueronhenoague re.

<sup>26</sup> Ha'e rã kunha va'e re ma mba'eve ndapejapoi 'rã. Hexe ma noĩ omano aguã regua, mba'eta ava va'e ojapo oirũ rovai opu'ã vy ojukaa rami,

<sup>27</sup> mba'ety py ojou rire. Kunha omenda aguã rami oiko va'e ojapukai teĩ nda'ipoai heraa jepearã.

<sup>28</sup> — Ha'e gui xapy'a rei peteĩ ava ojou 'rã kunhata'i ete va'eri omenda aguã rami e'ŷ teri oiko va'e, ha'e. ojopy vy ogueronheno 'rã. Ha'e nunga ojoua ramo

<sup>29</sup> kunha va'e ru pe ava va'e kunha reronhenoare ome'ẽ 'rã cinqüenta hatã'i va'e prata guigua. Ava omo'yvy'i rire kunha va'e oiko 'rã ta'yxyrã. Neĩ nda'evei 'rã omoxẽ aguã oikoa pukukue re.

<sup>30</sup> — Ha'e gui peteĩve ava ma voi nogueronhenoi 'rã oxy ranga, nguu rupa omongy'a e'ŷ aguã.

## 23

### *Nhemboaty iky'a e'ŷ va'e py oĩ aguã nda'evei va'e re ijayvua*

<sup>1</sup> — Avakue oa'yijo pyre e'ŷ vy oembo aya pyre ma ndoikei 'rã SENHOR pegua nhemboaty oĩaty py.

<sup>2</sup> Omenda e'ŷ va'ekue pi'a ma voi ndoikei 'rã SENHOR pegua nhemboaty oĩaty py. Neĩ hamymino kuery dez-kue peve ikuai va'e voi ndoikei 'rã.

<sup>3</sup> Amom ha'e Moabe pygua kuery va'e regua mava'eve voi ndoikei 'rã SENHOR pegua nhemboaty oĩaty py. Neĩ hamymino kuery dez-kue peve ikuai va'e voi ndoikei 'rã, raka'e rã peve teĩ,

<sup>4</sup> mba'eta ha'e va'e kuery ndogueraai rire mbojape ha'e yy penerovaexi aguã, Egito yvy gui peopa jave tape rupi peguataa rupi. Ha'e rami 'rãgue py peráta re penderovai guarã ogueru Beor ra'y Balaão, Mesopotâmia re Petor guigua, peẽ kuery rovai ijayvu vai aguã.

<sup>5</sup> Ha'e rami teĩ SENHOR Penderuete Balaão ayvu noendu potai vy ojapo pendereroayvu porã aguã rami ijayvu vai 'rãgue py, penderayvu ete vy.

<sup>6</sup> Ha'e va'e regua kuery reve peteĩ rami pendekuai aguã nda'evei pejapo aguã, neĩ ha'e kuery ikuai porã aguã rami ma voi, pendekuia pukukue re, raka'e rã peve.

<sup>7</sup> — Ha'e rã Edom pygua kuery ma peayvu e'ŷ eme, penderovy vy kuery ae ramo. Peayvu e'ŷ eme avi Egito pygua kuery, ha'e kuery yvy re amboae regua rami pendekuai rire.

<sup>8</sup> Ha'e va'e ramymino kuery regua peteĩ-teĩ oike 'rã SENHOR pegua nhemboaty oĩaty py.

### *Tekoa iky'a e'ŷ va'e opyta aguã re ijayvua*

<sup>9</sup> — Penderovaigua kuery re xondaro kuery opu'ã aguã oje'oi jave ma penheangu 'rã ha'eve'ŷ va'e ha'e javi gui.

<sup>10</sup> Xapy'a rei peẽ kuery va'e regua oiko 'rã ha'eve'ŷ va'e pyávy otyy omondykya py. Ha'e rami vy ha'e va'e ojepe'a 'rã pendekuiai gui. Ndopytai 'rãe ha'e py.

<sup>11</sup> Ha'e gui ko'ẽ jevy ka'aru ma jave ojau 'rã yy py. Kuaray oike ma jave oike ju 'rã pendekuiai py.

<sup>12</sup> Pendekuiai gui mombyry'ia py oĩ 'rã peteĩ henda peo aguã.

<sup>13</sup> Tembiporu rerekoyva'e reve reraa avi 'rã peteĩ yvyrá, reguapy ma vy ha'e va'e py rejo'o aguã yvy. Ha'e gui rejevy ta ma vy rejaty 'rã nderepoxi.

<sup>14</sup> Mba'eta SENHOR Penderuete oiko avi 'rã pendekuiai mbyte rupi, penderovaigua kuery gui pendereraa jepe ha'e penderepy aguã. Ha'e nunga rupi pendekuiai ma iky'a e'ŷ va'e 'rã opyta, pendere SENHOR ha'eve'ŷ va'e oexa vy pendegui ojepe'a e'ŷ aguã.

### *Escravo oo jepe va'ekue, itavy rei va'e ha'e oiporuka pyre rekovia re ijayvua*

<sup>15</sup> — Peteĩ escravo opatõ gui ojava vy ndea py ri onhemi ramo neremboaxa jevyi 'rã ipatõ pe.

<sup>16</sup> Ndea py ae toiko ha'e ae oiporavoague py, peẽ kuery reko a rupi ojou porãa py ae. Pereko axyeme.

<sup>17</sup> — Israel regua rajy kuery ta'ikuai eme ta'angaa pegua itavy rei va'e, neĩ Israel regua ra'y kuery ma voi ta'ikuai eme ha'e rami.\*

<sup>18</sup> SENHOR Penderuete pegua opy ndaperui 'rã itavy rei va'e repykue, neĩ ava itavy rei va'e repykue voi, penhemboayvuague pejapopaa regua peme'ẽ aguã teĩ ae ma. Mba'eta ha'e va'e mokoïve repy ma SENHOR Penderuete ojeguarua meme.

<sup>19</sup> — Nderyvy pe mba'emo reiporuka rire emboekovia uka retave eme, peráta, tembi'u, e'ŷ vy mba'emo rei, ha'e nunga oiporukaa vy hekivia ojopyave aty teĩ.

<sup>20</sup> Amboae regua kuery pe mba'emo reiporuka vy ha'eve 'rã remboekovia uka retave aguã. Ha'e rã nderyvy pe ma mba'emo reiporuka vy emboekovia uka retave eme, SENHOR Nderuete nemoingo porã aguã ndeyvy reĩa rupi mba'emo rejapo va'e ha'e javi py.

### *Mba'emo ojapo aguã re onhemboayvu okuapyague*

<sup>21</sup> — SENHOR Nderuete pe mba'emo rejapo aguã re renhemboayvu ri vy emboare eme rejapo aguã. Mba'eta SENHOR Nderuete nembopaga 'rã, ha'e ndere ae oĩ 'rã rejavya.

<sup>22</sup> Ha'e rami avi mba'emo rejapo aguã re nerenhemboayvui rire ma ndere noĩ 'rã rejavya.

<sup>23</sup> Enhea'ã ndeayvuague rejapo ete aguã, mba'eta ndejuru py ae SENHOR Nderuete pe rejapoxea'i py ndeayvu rire.

<sup>24</sup> — Neirũ mba'e uvaty rupi reaxa vy ha'eve 'rã uva re'uxea rami re'u aguã nerevyatã peve, teĩ eraa eme ajaka py.

<sup>25</sup> Ha'e rami ae avi neirũ mba'ety rupi reaxa vy ha'eve mba'emo aju reipo'o aguã, teĩ kyxé py nderejayai 'rã imba'ety rupi.

## 24

### *Omenda va'e oja'o rã guarã re ijayvua*

<sup>1</sup> — Xapy'a rei peteĩ ava kunha va'e ojou vy omenda 'rã hexe, teĩ kunha va'e re ha'eve'ŷ va'e ojou rire ndojou porãvei 'rã. Ha'e rami vy oja'o aguã regua ombopara vy kunha va'e po py ome'ẽ ma vy mae ma omondouka 'rã ngoo gui.\*

<sup>2</sup> Ha'e gui xapy'a rei hoo gui kunha va'e oo rire amboae ava re ju 'rã omenda.

<sup>3</sup> Ha'e gui ha'e va'e ju ndoayvuvei vy oja'o aguã regua ombopara vy ipo py ome'ẽ ma vy omondouka ju 'rã ngoo gui, ha'e rami e'ŷ vy mokoïa ava gua'yxyrã ogueraa ma rire omano 'rã.

<sup>4</sup> Ha'e gui ime jypygua imondoukaare ma nda'evei 'rã ogueru ju aguã gua'yxyrã omongy'a ma rire, mba'eta SENHOR pe ojeguarua ae 'rã. Pejapo eme pendeyvyrã SENHOR Nderuete ome'ẽ va'ekue re jejavya oĩ aguã rami.

### *Lei nhomboaxy a rupi ikuai aguã re ijayvuague*

<sup>5</sup> — Ava omenda ramo'i va'e ma joe opu'ã aguã katy oo e'ŷ teĩ ha'eve, neĩ napemopenai 'rã mba'eve rei re. Peteĩ ma'etýa peve toiko ngoo py ae, gua'yxyrã ogueraa va'ekue ombovy'a aguã.

<sup>6</sup> — Ndevy amongue oreve ramo eraa eme mokoï ita mba'emo ra'yigue mongu'ia oguerekova'e, neĩ ita hi'arygua eraa eme, mba'eta ha'e rami reipe'a 'rãgue oikove aguã.

\* **23:17** Ha'e jave py itavy reia 'rã amboae regua kuery ruete ra'angaa pegua templo py (1 Reis 14.24). Mateus 5.31, 19.7-9

\* **24:1**

<sup>7</sup> – Xapy'a rei amongue imonda 'rã guyvy Israel regua va'e re escravo-rã, e'ŷ vy ovende va'erã. Imondaague peikuaa ramo tomano. Ha'e rami vy 'rã penembyte gui peipe'a teko vai.

<sup>8</sup> – Penheangu ke mba'eaxy lepra gui, ha'e penhea'ã levita regua sacerdote kuery penembo'ea pejapopa aguã. Penhea'ã ha'e kuery pe ajapo ukaague rami pejapo aguã.

<sup>9</sup> Penema'endu'a ke Miriã re SENHOR Penderuete ojapoague re, tape rupi Egito yvy gui peopaa javé.\*

<sup>10</sup> – Neirũ pe mba'emo reiporuka ri vy eike eme hoo py hekobia renoẽ aguã.

<sup>11</sup> Repyta 'rã oka py, ha'e rã mba'emo poruare ae 'rã ogueru hekobia reraa aguã.†

<sup>12</sup> Ha'e rami teĩ ha'e va'e ava iporiaukue'i ri ramo nda'evei hekobia rereko aguã pytã mbukukue re.

<sup>13</sup> Kuaray oike'i jave ixupe reme'ẽ ju 'rã ao puku reraa va'ekue ha'e va'e py onheovã aguã, ha'e ramo ndereroayvu porã 'rã. Ha'e ramigua ma SENHOR Nderuete renonde "Nderekõ porã" he'i 'rã.

<sup>14</sup> – Ereko axy eme nerembiguai iporiaukue'i ojexavai va'e, nderyvy ae'i e'ŷ vy amboae regua ndeyvy re nderekao py oiko va'e.

<sup>15</sup> Hi'ára py porã ixupe reme'ẽ 'rã ombo'eapoague repy, kuaray oike e'ŷ teri reve, mba'eta iporiaukue'i vy oipota oikove aguã. Ha'e rami e'ŷ rã SENHOR pe ha'e ojapukai 'rã nderovai, ha'e ndere oĩ 'rã jejavya.

<sup>16</sup> – Tuu kuery ndapejukai 'rã ta'y kuery ojejavvyague re, neĩ ta'y kuery ma voi ndapejukai 'rã tuu kuery ojejavvyague re. Peteĩ-teĩ omano 'rã ha'e ae ojejavvyague re.

<sup>17</sup> – Eikuaa pota porã e'ŷ eme amboae guigua ha'e tyre'ŷ kuery. Eraa eme imeve'ŷ va'e ao ixupe reiporuka va'ekue rekivia.

<sup>18</sup> Nema'endu'a tema Egito yvy re escravo pendekuaiague re, ha'e SENHOR ha'e gui pendereraa ague re. Ha'e nunga rupi ae ajapo uka ndevy ha'e rami aguã.

<sup>19</sup> – Nemba'ety py mba'emo aju remono'õ jave peteĩ jokuaa re nderexarai ri vy ejevy eme rejopy nho aguã. Topyta amboae regua, tyre'ŷ ha'e imeve'ŷ va'e peguarã. Ha'e ramo SENHOR Nderuete nemoingo porã 'rã ndepo py rejapo va'e ha'e javi py.

<sup>20</sup> Azeite remondopa ma rire ejevy ju eme remondove aguã hakã gui. Topyta amboae regua, tyre'ŷ ha'e imeve'ŷ va'e peguarã.

<sup>21</sup> Ha'e gui uva'a reipo'opa ma rire ejevy ju eme reipo'ove aguã. Hembyrekue topyta amboae regua, tyre'ŷ ha'e imeve'ŷ va'e peguarã.

<sup>22</sup> Nema'endu'a Egito yvy re escravo pendekuaiague re. Ha'e nunga rupi ajapo uka ndevy ha'e rami aguã.

## 25

### *Nhombopagaa py nhonupã aguã re ijayvua*

<sup>1</sup> – Xapy'a rei mokoĩ joguero'a vy jogueraa rã oikuua pota va'ety kuerya py. Ha'e ramo oikuua pota vy omboeko porã 'rã ha'evea rami oiko va'ekue, ha'e ombopaga 'rã ha'eve'ŷa rami oiko va'ekue.

<sup>2</sup> Xapy'a rei ha'eve'ŷa rami oiko va'ekue pembopi aguã rami ri oiko ramo nhomboayvu va'ety omonheno uka, ha'e gui oinupã uka 'rã guenonde py, mbovykue pa ojapo vaiague re oinupãa oikuua rami.

<sup>3</sup> Quarenta-kue peve'i 'rã peinupã, ha'e va'e áryve nda'evei peinupã aguã, mba'eta penderyvy peinupãve ri vy pemo'yvy'i 'rã penerenonde.

<sup>4</sup> – Vaka mba'emo aju moa'yã rupi ombo'eapo va'e ma pejokua eme ijuru rupi.\*

---

\* **24:9** Moisés reindy Miriã ma hovai ijayvu rire Nhanderuete omomba'eaxy lepra py (Números 12.9-10). † **24:11** Ha'e kuery reko rami vy amongue oirũ pe mba'emo oiporuka ramo iporukaare pe irũ ogueraa uka 'rã mba'emo, oiporu va'e hekobia ome'ẽ ju peve guarã. \* **25:4** 1 Coríntios 9.9, 1 Timóteo 5.18

### *Guyke'y ra'yxykue re omenda aguã re ijayvua*

<sup>5</sup> — Xapy'a rei joegua meme joa py oiko, ha'e peteĩ omano 'rã ta'y e'ŷ re. Ha'e ramo omano va'ekue ra'yxy nomendai 'rã amboae re, ngoo pygua re ae e'ŷ vy. Hovaja ae gua'yxyrã ogueraa vy omenda 'rã hexe, hexe ta'y aguã hovaja rekora oeja pyre rami vy.\*

<sup>6</sup> Ha'e gui kunha va'e re jypy'i ta'ya omboery 'rã guyke'y omano va'ekue rery rupi, hery okanhy e'ŷ aguã Israel kuery mbyte gui.

<sup>7</sup> — Ha'e rã xapy'a rei ngovaja re tyvy nomendaxeい ri ramo kunha va'e oo 'rã tetã rokẽ py nhomongeta va'ety kuery ikuia py. Ha'e vy aipoe'i 'rã: "Xerovaja xere ndata'yxei guyke'y rery oĩ ae aguã Israel kuerya rupi. Xereve ndojapoxei hovaja ojapo aguã va'e", he'i 'rã.

<sup>8</sup> Ha'e ramo hetã pygua monogeta va'ety kuery oenoĩ uka 'rã ava va'e, ixupe ijayvu aguã. Ha'e gui ndoipotai vy "Ndaraaxeい ae" he'i ramo

<sup>9</sup> hovaja kunha ou ju 'rã nhomongeta va'ety kuerya py. Ha'e vy ipy gui omboi 'rã ngovaja py regua, ha'e onyvõ 'rã hova re. Ha'e rami vy "Ha'e rami 'rã ojapoa ava guyke'y rekoria ndata'yxei va'e re" he'i 'rã.

<sup>10</sup> Ha'e rami rire ava va'e ro pygua kuery pe "Ipy rei va'e regua" 'ea 'rã Israel kuerya rupi.

<sup>11</sup> — Xapy'a rei mokoĩ ava joe opu'ãa py peteĩ va'e ra'yxy ovaẽ 'rã ome oepy aguã hovaigua po gui. Ha'e rami vy okuave'ẽ vy ojopy 'rã hako rupi.

<sup>12</sup> Ha'e ramo ma pejaya 'rã ipo. Hexe pema'ẽ eme pemboaxya rupi.

### *Levitico 19.35,36*

<sup>13</sup> — Ndevoxa py eraa eme ipoyia joo rami e'ŷ va'e: peteĩ tuvixave va'e, ha'e rã amboae kyrĩve va'e.

<sup>14</sup> Ha'e ndero py erekø eme hyru joo rami e'ŷ va'e: peteĩ tuvixave va'e, ha'e rã amboae kyrĩve va'e.

<sup>15</sup> Teĩ'i regua rereko 'rã opejaa aguã, ha'evea'i ramigua anho, ha'e hyru ha'evea'i ramigua anho avi. Ha'e rami vy reiko pukuve aguã ndeyvyrã SENHOR Nderuete ome'ẽ va'ekue py.

<sup>16</sup> Mba'eta ha'e ramigua teko vai ojapo va'e ha'e javi ma SENHOR Nderuete ojeguarua meme.

### *Amaleque kuery omokanhymba aguã re ijayvuague*

<sup>17</sup> — Penema'endu'a ke Egito yvy gui peopa jave Amaleque kuery pendere ojapo vaiague re tape rupi.

<sup>18</sup> Mba'eta tape rupi pendeporiau ha'e penekangy reve peguata jave ha'e kuery ovaẽ xapy'a vy opu'ã okuapy takykue penekangykueve peju va'ekue re, Nhanderuete renonde ojererokyjea rupi e'ŷ.

<sup>19</sup> Ha'e nunga rupi pendeyvyrã SENHOR Penderuete ome'ẽ va'ekue py pendekuai ma ramo ha'e ome'ẽ 'rã pepytu'u aguã penderovaigua kuery pendeyvýry rupi ikuai va'e ha'e javi gui. Ha'e ramo pemokanhymba 'rã Amaleque kuery, ha'e kuery re ima'endu'aave aguã rami e'ŷ, yva guy rupi rei. Penderexarai eme ke.

## 26

### *Mba'emo aju oiko ypy'i va'ekue re ijayvua*

<sup>1</sup> — Ha'e gui pendeyvyrã SENHOR Penderuete ome'ẽ va'ekue py revaẽ vy ha'e py nderekoa ma vy

<sup>2</sup> rejopy 'rã mba'emo aju remono'õ ypy'i va'ekue, ndeyvy gui oiko va'ekue regua iporãgueve. Ha'e va'e ma peteĩ ajaka py remoĩ vy reraa 'rã henda SENHOR Penderuete guery omoĩ aguã oiporavoague py.

\* **25:5** Mateus 22.24, Marcos 12.19, Lucas 20.28

<sup>3</sup> Ha'e gui reo 'rã sacerdote ha'e va'e jave oĩ va'ea py. Ha'e vy aipo're 'rã ixupe: "Aŷ SENHOR Nhanderuete pe amombe'u porã, yvy nhaneramoĩ kuery pe ome'ẽ aguã oura reve ijayvuague py xerekoa maa", peje 'rã.

<sup>4</sup> Ha'e ramo ndepo gui sacerdote ajaka ojopy vy omoĩ 'rã SENHOR Nderuete pegua altar oĩ va'e rexei.

<sup>5</sup> Ha'e gui ma SENHOR Nderuete renonde py renhemombe'u porã vy aipo're 'rã: "Xeramoĩ ma arameu regua oiko raka'e. Ha'e va'e ma omano rai'i ma vy oo Egito yvy re. Ha'e py ju amboae regua rami oiko raka'e ngoo pygua kuery mboapy'i va'e reve. Ha'e gui ixugui oiko peteĩ regua hetave ha'e imbaraetekueve, ha'e py ae.

<sup>6</sup> Ha'e rami teĩ Egito pygua kuery orembojaru ha'e orembojexavai rei vy oremoĩ romba'eapo raxa aguã rami.

<sup>7</sup> SENHOR oreramoĩ kuery Ruete pe rojapukai ramo oreayvua oendu vy oikuaa pota rojexavaia, romba'eapoa ha'e oremoingo axya re.

<sup>8</sup> Ha'e rami vy Egito yvy gui SENHOR orerenoẽ opo oupi py opo'akaa oexa uka reve, ha'e nhomondyipaarã ojapo reve, mba'emo kuua ukaarã ha'e hexa pyrã reve.

<sup>9</sup> Apy ju orereru vy kova'e yvy ome'ẽ orevy, kamby ha'e ei oata e'ŷa.

<sup>10</sup> Ha'e gui ma'ẽ, aŷ ma aru mba'emo aju jypy guare iporâgueve va'e yvy ndee SENHOR xevy reme'ẽ va'ekue guigua", 're 'rã. Ha'e rami vy SENHOR Nderuete renonde ajaka remoĩ vy rejero'a 'rã henonde.

<sup>11</sup> Ha'e gui rerovy'a 'rã mba'emo porã SENHOR Nderuete ndevy ome'ẽ va'ekue ha'e javi, ndero pygua kuery pe, ha'e nderekoa py levita ha'e amboae regua ikuai va'e pe guive.

### Dízimo ome'ẽ kuua aguã re ijayvua

<sup>12</sup> — Ha'e gui mboapy ma'etŷa py dízimo reme'ẽ ojeupity nhavõ dízimo-rã remboja'opa ma rire reme'ẽ 'rã levita kuery pe, amboae yvy guigua, tyre'ŷ ha'e imeve'ŷ va'e kuery pe, nderekoa rupi ha'e kuery okaru vy hevyatã okuapy aguã.

<sup>13</sup> Ha'e vy SENHOR Nderuete renonde py aipo're 'rã ixupe: "Ndevy peguarã amboaxa va'ekue xero gui anoẽ vy levita kuery pe ame'ẽ, amboae guigua, tyre'ŷ ha'e imeve'ŷ va'e kuery pe, xevy rejapo uka va'ekue ha'e javi rami vy. Rejapo uka va'ekue neĩ peteĩve ndajapo e'ŷi, peteĩve re ndaxerexarai.

<sup>14</sup> Dízimo gui ma xee nda'ui xepy'a vai jave, neĩ ruxã'i ma voi nanoẽi xevy ha'eve'ŷ va'e aiko reve, namboaxai guive oo omanogue ituia py oĩ aguã. Xee anhe'ẽ rendu SENHOR Xeruete. Xevy ojapo uka va'ekue ajapopa ma.

<sup>15</sup> Ema'ẽ yva re ne'amba iky'a e'ŷ va'e oĩa gui, ha'e vy emoingo porã ndevygua Israel kuery, ha'e yvy oreramoĩ kuery pe reuraague rami orevy reme'ẽ va'ekue, yvy kamby ha'e ei oata e'ŷa", 're 'rã.

### Onhe'ẽ rendu aguã re ijayvua

<sup>16</sup> — Aŷ gui ma pendevy SENHOR Penderuete ojapo uka kova'e ayvu oeja va'ekue ha'e oipotaa. Pemoĩ porã pendejee, ha'e pejapo pendepy'a ha'e penenhe'ẽ ha'e javi py.

<sup>17</sup> Ange SENHOR oikuaa uka Penderuete oikoa regua, ha'e ixuguigua tape rupi, ha'e oayvu oeja va'ekue rupi pendekuai aguã, ha'e gui ojapo uka va'ekue ha'e nhomongetaa rupi, ha'e ijayvua re pejapyxaka aguã.

<sup>18</sup> Ange SENHOR pendevy oikuaa uka avi ixupeguia pendekuai aguã, pendevy aipoe'igue rami vy, ha'e ojapo uka va'ekue ha'e javi rupi pendekuai aguã.

<sup>19</sup> Ha'e rami rã ha'e javi regua SENHOR omoingo va'ekue gui penemboyvateve 'rã, ha'e kuery gui pendererovy'aave, penemboeteave ha'e pendejou porãave aguã, ha'e SENHOR Penderuete pegua iky'a e'ŷ va'e peiko aguã, aipoe'igue rami vy – he'i Moisés.

## Mboapykuea ma Moisés ijayvuague

## 27

*Omboetea rupi lei ita re ombopara ukaague*

<sup>1</sup> Israel regua nhomongoeta va'ety kuery reve Moisés ijayvu heta va'e kuery pe. Ha'e vy aipoe'i:

— Pejapopa ke kova'e ojapo uka pyre aŷ pendevy amombe'u va'e.

<sup>2</sup> Peaxa 'rã Jordão yakã rovai re pendeyvyrã SENHOR Penderuete ome'ẽ va'e katy peo vy. Yakã peaxaa árave pemo'ã 'rã ita tuvixakue, ha'e cal py pemoxiimba 'rã.

<sup>3</sup> Peaxapa ma rire ha'e va'e ita re pembopara 'rã kova'e lei re ayvu oĩ va'e ha'e javi, ha'e rami vy pevaë aguã pendeyvyrã SENHOR Penderuete ome'ẽ va'ekue py. Ha'e va'e yvy ma kamby ha'e ei oata e'ŷa, SENHOR peneramoï kuery Ruete ijayvuague rami vy.

<sup>4</sup> Kova'e ára aipoa'e Jordão yakã rovai re peaxa ma vy Ebal yvyty re ita pemo'ã aguã, ha'e pemoxiimba 'rã cal py.

<sup>5</sup> Ha'e py SENHOR Penderuete pe pejapo 'rã peteĩ altar ita gui. Ha'e va'e re ndapeiporui 'rã tembiporu ferro guigua.

<sup>6</sup> Ita pejou va'ekue py rive 'rã pejapo altar SENHOR Penderuete peguarã. Hi'áry peapy 'rã mba'emo peme'ẽ va'e.

<sup>7</sup> Peme'ẽ avi 'rã peteĩ rami pendekuaia regua ha'e py. Ha'e rami vy pekaru ha'e pevy'a 'rã SENHOR Penderuete renonde.

<sup>8</sup> Ha'e va'e ita re pembopara 'rã ayvu kova'e lei re oĩ va'e ha'e javi, ojekuaa porã aguã rami — he'i.

<sup>9</sup> Ha'e gui levita regua sacerdote kuery reve Moisés ijayvu vy aipoe'i Israel kuery ha'e javi pe:

— Israel kuery, pekyririmba ke pendu aguã! Aŷ gui ma SENHOR Penderuete pegua ete 'rã peiko.

<sup>10</sup> Ha'e nunga rupi penhe'ẽ rendu SENHOR Penderuete, ha'e pejapopa ojapo uka ha'e ayvu oeja va'ekue aŷ pêvy amombe'u va'e.

*Ebal yvyty áry gui ayvu vai omombe'ua aguã re ijayvuague*

<sup>11</sup> Ha'e va'e ára Moisés ojapo uka heta va'e kuery pe. Ha'e vy aipoe'i:

<sup>12</sup> — Jordão yakã rovai re peaxa ma rire pova'e kuery ikuai 'rã Gerizim yvyty áry jogueroayvu porã aguã: Simeão, Levi, Judá, Issacar, José ha'e Benjamim regua.

<sup>13</sup> Ha'e rã pova'e kuery ma ayvu vai mombe'uarã 'rã ikuai Ebal yvyty áry: Rúben, Gade, Aser, Zebulom, Dã ha'e Naftali regua.

<sup>14</sup> — Ha'e gui levita kuery ijayvu atã 'rã Israel kuery ha'e javi pe. Ha'e vy aipoe'i 'rã:

<sup>15</sup> “Ayvu vaipy 'rã oiko ava ta'angaarã onhopi e'ŷ vy, mba'emo ryku gui ojapo vy hi'ã py omopu'ã va'e. Ha'e nunga ojapo kuaa va'e rembiapo tei SENHOR pe rã ojeguarupy meme.”

Ha'e ramo heta va'e kuery ha'e javi ombovai vy “Ha'eve va'e” he'i 'rã okuapy.

<sup>16</sup> Aipoe'i avi 'rã: “Ayvu vaipy 'rã oiko oxy e'ŷ vy nguu nomboetei va'e.”

Heta va'e kuery ombovai vy “Ha'eve va'e” he'i 'rã.

<sup>17</sup> Aipoe'i 'rã: “Ayvu vaipy 'rã oiko oirũ yvy markaa oguerova va'e.”

Heta va'e kuery ombovai vy “Ha'eve va'e” he'i 'rã.

<sup>18</sup> Aipoe'i 'rã: “Ayvu vaipy 'rã oiko hexa pyxo ve'ŷ va'e tape ojavy aguã rami ojapo va'e.”

Heta va'e kuery ombovai vy “Ha'eve va'e” he'i 'rã.

<sup>19</sup> Aipoe'i 'rã: “Ayvu vaipy 'rã oiko mombyry guigua, e'ŷ vy tyre'ŷ ha'e imeve'ŷ va'e mba'e oipe'a va'e.”

Heta va'e kuery ombovai vy “Ha'eve va'e” he'i 'rã.

<sup>20</sup> Aipoe'i 'rã: “Ayvu vaipy 'rã oiko oxy ranga reve onheno va'e, nguu rupa omongy'a rire.”

Heta va'e kuery ombovai vy “Ha'eve va'e” he'i 'rã.

<sup>21</sup> Aipoe'i 'rã: “Ayvu vaipy 'rã oiko mymba reve itavy va'e.”

Heta va'e kuery ombovai vy "Ha'eve va'e" he'i 'rã.

<sup>22</sup> Aipoe'i 'rã: "Ayvu vaipy 'rã oiko gueindy reve, nguu rajy e'ŷ vy oxy memby reve onheno va'e."

Heta va'e kuery ombovai vy "Ha'eve va'e" he'i 'rã.

<sup>23</sup> Aipoe'i 'rã: "Ayvu vaipy 'rã oiko guaixo reve onheno va'e."

Heta va'e kuery ombovai vy "Ha'eve va'e" he'i 'rã.

<sup>24</sup> Aipoe'i 'rã: "Ayvu vaipy 'rã oiko oirũ nhemi rupi ojuka va'e."

Heta va'e kuery ombovai vy "Ha'eve va'e" he'i 'rã.

<sup>25</sup> Aipoe'i 'rã: "Ayvu vaipy 'rã oiko amongue ome'ẽmby ojopy va'e heko porã va'e ojuka aguã."

Heta va'e kuery ombovai vy "Ha'eve va'e" he'i 'rã.

<sup>26</sup> Aipoe'i 'rã: "Ayvu vaipy 'rã oiko kova'e lei re ayvu oĩ va'e nomboetei vy ndojapoi va'e."

Heta va'e kuery ombovai vy "Ha'eve va'e" he'i 'rã.\*

## 28

*Levítico 26:3-13; Deuteronômio 7:12-26*

<sup>1</sup> — Ha'e gui SENHOR Penderuete ayvu re pejapyxaka porã vy ha'e ojapo uka va'ekue aŷ amombe'u va'e pejapopa ri ramo SENHOR Penderuete penemboyvate 'rã vvy jave re ikuai va'e áryve.

<sup>2</sup> SENHOR Penderuete penhe'ẽ rendu ramo pendere ombou 'rã kova'e ayvu porã ha'e javi, peẽ kuery re ojeupitypa 'rã.

<sup>3</sup> Ayvu porãmby 'rã peiko tetã py ha'e penemba'ety rupi.

<sup>4</sup> Ayvu porãmby 'rã ikuai kyrigue perekoo va'e, mba'emo'a pendeyvy gui oiko va'e, ha'e penerymba kuery vaka ha'e vexa'i ta'y'ia.

<sup>5</sup> Ayvu porãmby 'rã peiko hyru py mba'emo aju pemono'õa, ha'e mbojaperã pemoapo-moa py.

<sup>6</sup> Ayvu porãmby 'rã peiko peike ha'e peẽ ju maa ha'e javi py.

<sup>7</sup> SENHOR ojapo 'rã penerenonde py penderovaigua kuery pendere opu'ã va'ekue oity-paa aguã rami. Peteĩ tape rupi penderovai ou va'ekue ri sete tape rupi ju 'rã ojava jogueravy pendegui.

<sup>8</sup> SENHOR ojapo 'rã mba'emo aju pemoĩ porãaty oĩ porã aguã, ha'e opa mba'e pendepo py pejapo va'e voi. Ha'e rami vy penemoingo porã 'rã pendeyvyrã SENHOR Penderuete ome'ẽ va'ekue py.

<sup>9</sup> SENHOR ojeupe guarã penemoingo 'rã iky'a e'ŷ va'e regua, pendevy ouraague rami vy, SENHOR Penderuete ojapo uka va'ekue pejapo, ha'e ixuguigua tape rupi pendekuai ramo.

<sup>10</sup> Ha'e ramo vvy regua kuery ha'e javi SENHOR guery rupi penerenoĩ oexa vy okyjepa 'rã pendegui.

<sup>11</sup> SENHOR opa mba'e 'rã ome'ẽ pêvy: kyrigue perekooa py, penerymba kuery ta'y'ia py, ha'e pendeyvy gui mba'emo oikoa py, SENHOR pendeyvyrã ome'ẽ aguã re peneramoĩ kuery pe ouraague py ae.

<sup>12</sup> SENHOR oipe'a 'rã yva mba'emo porã ombou aguã, hi'ára py porã vvy re ombo'oky aguã, pendepo py mba'emo pejapo va'e ha'e javi py penemoingo porã aguã. Ha'e ramo heta regua pe mba'emo peiporuka 'rã teĩ peẽ ma ndapeiporui 'rã ha'e kuery mba'e.

<sup>13</sup> SENHOR penemoĩ 'rã ha'e kuery akãrã, tuguairã ve'ŷ. Ha'e ramo hi'árykue'i 'rã pendekuai, iguy rupi rive'ŷ, xapy'a rei SENHOR Penderuete ojapo uka va'ekue aŷ amombe'u va'e pejapopa aguã pemoĩ ramo.

\* **27:26** Gálatas 3:10

**14** Pejepe'a eme peteīve ayvu aŷ ajapo uka va'e gui, pendeaxua re neĩ pendeaxua e'ŷa re ma voi, tuuete mboae kuery re rive peaxa vy ha'e kuery pe pendekuai e'ŷ aguã.

**Levítico 26.14-45**

**15** — Ha'e rami teĩ xapy'a rei SENHOR Penderuete napenhe'ẽ rendui vy, ojapo uka va'ekue ha'e ayvu aŷ amombe'u va'e ha'e javi ndapejapoi ramo, pendere ou 'rā kova'e ayvu vai ha'e javi, pendere ojeupitypa 'rā.

**16** Ha'e ramo ayvu vaipy 'rā peiko tetā py ha'e penemba'ety rupi.

**17** Ayvu vaipy 'rā peiko hyru py mba'emo aju pemono'õa, ha'e mbojaperā pemoapomoa py.

**18** Ayvu vaipy 'rā ikuai kyrīgue perekva'e, mba'emo'a pendeyvy gui oiko va'e, ha'e penerymba vaka ha'e vexa'i kuery ta'y'ia.

**19** Ayvu vaipy 'rā peiko peike ha'e peē ju maa ha'e javi py.

**20** — Pendere SENHOR ombou 'rā ayvu vai penemoĩ vayarā ha'e pendere opu'ã va'e mba'emo pejapoa ha'e javi py, penemomba rā pekanhymba xapy'a peve, teko vai pejapoa rupi xegui pejepe'aague re.

**21** SENHOR ombou 'rā mba'eaxy vaikue pendere oja va'erā, pendeyvyrā pejopy aguã katy peoa va'e omomba peve.

**22** SENHOR pendejuka 'rā mba'eaxy vaikue py, pire raku, ai ipeupa va'e, kuaray aku raxa va'e, pirupa va'e, hu'ũmbaa ha'e hatāmba reia py. Ha'e nunga penemoingo axy 'rā pekanhymba peve.

**23** Yva peneakā áry rupi oĩ va'e ma overa va'e rami 'rā onhemboty, ha'e yvy pepyrõa ma ferro rami 'rā hatāmba.

**24** Pendeyvy rupi oky 'rāgue py SENHOR ombou 'rā yvy ku'i ha'e tanhimbu rive. Yva gui ha'e nunga anho ho'a 'rā pende'áry penemomba peve.

**25** SENHOR pendereity 'rā penderovaigua kuery renonde rupi. Peteī tape rupi ha'e kuery rovai peju rire teĩ sete tape rupi ju 'rā pejavapa ha'e kuery gui. Ha'e vy yvy jave regua ikuia rupi pendekuaa 'rā ojeguaru reia rami.

**26** Penderetekue opyta 'rā guyra yvate rupi oveve va'e ha'e mymba yvy re ikuai va'e rembi'urā rive. Ha'e nunga mondyiarā ndoikoi 'rā.

**27** SENHOR penembojexavai 'rā ai vaikue Egito pyguare regua py, tyepy peu, temo ha'e ai vaikue py, ndapekueravei aguã rami.

**28** SENHOR penembojexavai 'rā peneakā vai reia py, napema'ẽveia ha'e pendepy'a eta reia py.

**29** Ha'e ramo kuaray mbyte teĩ pekuave'ẽ rei 'rā peovy, pytū rupi oexa e'ŷ vy okuave'ẽ rei ovv va'e rami. Ha'e rami vy ndapeiko porāvei 'rā. Ha'e rami 'rāgue py peikoa pukukue re pejexavai 'rā, penemba'e rei-rei re imondapaa riae 'rā. Ha'e avave rei napendereraa jepeai 'rā.

**30** Peteī kunha re pemenda teĩ hexeve amboae ava onheno 'rā. Penderorā pejapo teĩ ha'e py ndapeikoi 'rā. Uva penhoty teĩ napemono'õi 'rā.

**31** Penerymba toro ojukaa 'rā pexaa py, teĩ ho'okue ndape'ui 'rā. Pendegui penerymba mburika'i re imondaa 'rā, ha'e ndojevyvei 'rā pendea py. Penerymba kuery vexa'i ogueraa ukapaa 'rā penderovaigua kuery pe. Ha'e avave rei napendereraa jepeai 'rā.

**32** Pendera'y ha'e penderajy kuery omboaxapaa 'rā amboae regua kuery pe. Ha'e nunga penderexa py ae pexa rire penema'endu'aa rupi pejexavai rei 'rā ára nhavõ. Ha'e rami teĩ pendepo py mba'eve ndapejapo kuaai 'rā.

**33** Pendeyvy rupi pemba'eapoague gui mba'emo aju oiko va'ekue ma peteī va'e regua kuery peikuaa e'ŷ va'e ho'upa 'rā. Ha'e vy penembojexavai ha'e penembojero'a rei 'rā ára nhavõ.

**34** Ha'e ramo peneakā vaipa 'rā mba'emo vai ete pexa rire.

**35** SENHOR penembojexavai 'rā ai vaikue karu penerenapy'ã ha'e peneretyma re oĩ va'e py. Ha'e va'e gui ma ndapekueravei 'rā, pendepy guive pendeapte peve.

<sup>36</sup> — Ha'e gui SENHOR pendereraa uka 'rã penderuvixaverã pemoõ va'ekue reve, pexa va'ety e'ÿ regua kuery pe, neõ peẽ neõ penderu kuery ma voi ndapeikuaai va'e regua pe. Ha'e py pendekuai 'rã amboae tuuete kuery yvyra ha'e ita gui rive ojapo pyre pe.

<sup>37</sup> Ha'e javi regua ikuiaia rupi SENHOR pendereraa ukaague rupi ha'e kuery onhemondyi 'rã pendegui, pendere ijayvu ha'e pendejojai rei 'rã okuapy.

<sup>38</sup> Mba'ety rupi mba'emo ra'yí penhotÿ reta teĩ mbovy'i 'rã pemono'õ, tuku ho'upa ramo.

<sup>39</sup> Uva voi penhotÿ reta vy pepena porã'i teĩ ndapey'ui 'rã hykue, neõ napemono'õi 'rã hi'a, haxo'i ho'upa ramo.

<sup>40</sup> Pendeyvy ha'e javi rupi azeitona'y ikuai teĩ azeite ndaperekoi 'rã pendejee peikyty aguã, hi'a okuipa rã.

<sup>41</sup> Pendera'y ha'e penderajy kuery perekoi teĩ pendereve ndopytai 'rã, escravo-rã oguer-aapaa rã.

<sup>42</sup> Pendeyvy re yvyra ikuai ha'e ijaju okuapy va'e tuku-karu ho'upa 'rã.

<sup>43</sup> Penembyte py amboae regua ikuai va'e yvateve 'rã oje'oivy, ha'e rã peẽ ma pene'yvyïve 'rã peje'oivy.

<sup>44</sup> Ha'e kuery mba'emo oiporuka 'rã pendevy, teĩ peẽ ma ndaperekoi 'rã ha'e kuery pe peiporuka aguã. Ha'e kuery ikuai 'rã peneakã, ha'e rã peẽ ma peiko 'rã huguai.

<sup>45</sup> Kova'e ayvu vai ha'e javi ou 'rã pende'áry. Penembojexavai rei 'rã, pendere ojeupitypa vy penemokanhymba peve, SENHOR Penderuete napenhe'ẽ rendui rire, pendevy ojapo uka ha'e ayvu oeja va'ekue ndapejapoi guive.

<sup>46</sup> Penembyte py mba'emo oiko va'e opyta 'rã mba'emo kuaa ukaarã ha'e hexa pyrã, ha'e peneramymimo kuery pe voi, raka'e rã peve guarã.

<sup>47</sup> — Mba'eta SENHOR Penderuete perovy'a ha'e peayvua rupi ve'ÿ ixupe peiko, opa mba'eme perekoi teĩ,

<sup>48</sup> ha'e rire karuai, yuvei, pire reia ha'e opa mba'e oataa py 'rã peiko, penderovaigua kuery SENHOR ombou va'e pe ae. Pendeaju'y re ha'e omoõ 'rã kanga ferro guigua penemomba peve.

<sup>49</sup> Pendere SENHOR ombou 'rã peteĩ regua kuery mombyry gui. Ha'e ramo yvy apy gui 'rã ou pojava taguato oveve ouvy va'e rami. Neõ ha'e va'e kuery ayvu ma voi napendu kuaai 'rã.

<sup>50</sup> Ha'e kuery ngova py oexa uka 'rã opoxya, neõ peẽ kuery va'e regua tujakue'i omboete va'e'ÿ, neõ kunumigue'i ma voi nomboaxyi 'rã.

<sup>51</sup> Ha'e kuery ho'u 'rã penerymba ra'y kuery ha'e pendeyvy gui mba'emo aju oiko va'ekue, omokanhymba peve. Ndoejai'rã ha'yigue'i, uva rykue, azeite, neõ penerymba vaka ha'e vexa'i ta'y'i aguã, omomba ete peve.

<sup>52</sup> Peneretã ikuai va'e ojokopa 'rã, pendeyvy ha'e javi rupi kora yvateve ha'e hatãve va'e pejeroviaague oitypa peve. Peneretã ikuai va'e ojokopa 'rã, pendeyvyrã SENHOR Penderuete ome'ẽ va'ekue ha'e javi rupi.

<sup>53</sup> Penderovaigua kuery pendejokopaa py penemoõ vai ete ramo pe'u 'rã kyrigue perekoi va'ekue, pendera'y ha'e penderajy kuery SENHOR Penderuete pendevy ome'ẽ va'ekue ro'okue ae.

<sup>54</sup> Avakue penembyte py porayvuve ha'e ojou porãvepy ikuai va'e teĩ hakate'ÿ 'rã guyvy, gua'xyy oayvu va'e, ha'e gui gua'y kuery okuave va'e pe,

<sup>55</sup> mba'eta ha'e kuery pe nomboja'oxei 'rã gua'y ha'e guajy kuery ro'okue ha'e ae ho'upa aguã, mba'eta tetã ha'e javi hovaigua kuery ojokopa ramo ixupe neõ mba'eve'i ndopytai, oĩ vaia py ombojexavai rire.

<sup>56</sup> Ha'e kunhague penembyte py porayvuve ha'e ojou porãvepy ikuai va'e teĩ, porayvu ha'e ojou porãvepy vy neõ yvy re nopyrõi va'ekue teĩ hakate'ÿ 'rã ome oayvu va'e, op'i a ha'e omemby pe,

57 mba'eta hakate'ŷ 'rã omemby ryrukue ha'e ho'okue re, ha'e ae nhemi rupi ho'upaxe opa mba'e oata ramo, mba'eta tetã ha'e javi hovaigua kuery ojokopa vy ombojexavai ete 'rã.

58 Xapy'a rei kova'e lei kuaxia para re oĩ va'e pejapo aguã napemoõ, ha'e SENHOR Penderuete rery hexakãmba va'e renonde ndapejererokyjevei ramo

59 pendere SENHOR ombou 'rã mba'eaxy vaikue, peneramymino kuery re guive. Ha'e va'e mba'eaxy vaikue ma tuvixa ha'e opa voi va'erã e'ŷ.

60 Ha'e vy penemoingo axy 'rã mba'eaxy vaikue Egito pyguare regua pekyjea py. Ha'e ramo pendere ju 'rã oja oiny.

61 Pende'áry SENHOR ombou avi 'rã mba'eaxy ha'e mba'emo vaikue kova'e kuaxia lei oĩa re ipara noĩ va'e voi, penemokanhymba peve.

62 Ha'e ramo mboapy'i ete 'rã pendekuai, yva re jaxy-tata rami pendereta va'ekue teĩ, SENHOR Penderuete napenhe'ẽ rendui rire.

63 SENHOR pendererovy'a vy penemoingo porã ha'e penemboetave heravyague rami ae ju ovya 'rã penemokanhymbaa rupi, penemomba peve. Yvy penderekorã peoa va'e gui pendepe'apa 'rã.

64 SENHOR penemoaĩmba 'rã ha'e javi regua mbyte rupi, yvy apy guive hovai re peve. Ha'e py ma peiko 'rã amboae tuuete peikuua e'ŷ va'ekue pe, neĩ penderu kuery ma voi ndoikuaai va'ekue pe. Ha'e vy pembojerovia 'rã yvyra ha'e ita guigua rive.

65 Ha'e gui neĩ ha'e va'e regua ikuiaia rupi pendekuaia py ndapepytu'ui 'rã, neĩ pendepy opytu'u aguã ma voi ndapejoui 'rã, mba'eta ha'e py SENHOR ombou 'rã pendepy'a oryryipa, penderexa kangypa ha'e penenhe'ẽ py pe'a rive aguã.

66 Penderekove okanhy rai'i 'rã, penerenonde nhimbo py omoxã mbyre rami. Ara py ha'e pyávy pekyjepa 'rã, ndapeikovei aguã re pepêxaa py.

67 Ko'ëgue aipopeje 'rã: "Pytû ma va'e rire ha'eve 'rãgue!" Ha'e gui pytû'i jave ma "Aikore! Ko'ëmba ma va'e rire ha'eve 'rãgue!" peje 'rã pekuapy, mba'eta pendepy'a re pendu 'rã pekyje reia, ha'e penderexa py nhomondyipa rei va'e pexa vy.

68 SENHOR ojapo 'rã Egito katy kanoã guaxu py pendereraa jevy aguã, ha'e tape pendevy "Ndapeovei ma 'rã" he'iague rupi teĩ. Ha'e py ma penhevendexe 'rã penderovaigua kuery escravo-rã avakue ha'e kunhague, teĩ ndoikoi 'rã pendejoguaarã — he'i Moisés.

## Irundykuea ma Moisés ijayvuague

### 29

#### *Heta va'e kuery reve Nhanderuete guexeve guarã ojapo pyauague*

<sup>1</sup> Kova'e ayvu ma Moisés rupi SENHOR guexeve guarã Israel kuery reve ojapo va'ekue Moabe yvy re, ha'e kuery pe Horebe yvyty re oeja va'ekue áryve.

<sup>2</sup> Ha'e rami vy Moisés Israel kuery ha'e javi oenoĩmba vy aipoe'i:

— Peẽ kuery pexapa va'ekue Egito yvy re SENHOR ojapoague ha'e javi. Pexaa py ojapo Faraó re, hembiguai kuery ha'e ijyvy ha'e javi re.

<sup>3</sup> Hexa pyrã tuvixa va'e penderexa py ae pexa va'ekue, mba'emo kuaa ukaarã ha'e iporã ete va'e.

<sup>4</sup> Ha'e rami teĩ aŷ peve nome'ẽi pãvy penekuraxõ py pejapyxaka ete aguã, neĩ penderexa py pexa aguã, neĩ pendeapyxa py mba'emo pendu aguã.\*

<sup>5</sup> Aipoe'i: "Quarenta ma'etŷ re tekua e'ŷa rupi xee roguereko jave pendeao na'inhymai, neĩ pendepy regua ma voi nda'ivaipai.

<sup>6</sup> Mbojape ndaperekoi va'ekue pe'u va'erã, ha'e vinho neĩ iro va'e voi ndapey'ui, peikuua aguã xee ae SENHOR Penderuete aikoa", he'i va'ekue.

<sup>7</sup> Apy ju peju jave Hesbom pygua huvixa Seom ha'e Basã pygua huvixa Ogue voi ou nhandere opu'ã aguã, teĩ nhande kuery jaity karamboae.

\* **29:4** Romanos 11.8

<sup>8</sup> Ha'e kuery yvykue re nhandepo'aka vy nhamboaxa Rúben kuery peguarã, Gade ha'e Manassés kuery pe.

<sup>9</sup> Ha'e nunga rupi pendu porã ke kova'e ayvu guexeve guarã ojapo pyre regua. Pejapopa ete, peiko porã aguã opa mba'e pejapoa py.

<sup>10</sup> — Ha'e gui aŷ peẽ kuery ha'e javive pene'aĩ SENHOR Penderuete renonde py: peẽ kuery va'e regua huvixa kuery, tujakueve ha'e yvatekueve, avakue Israel kuery regua ha'e javive,

<sup>11</sup> ha'e gui pendera'y ha'e penderajy kuery, pendera'yxy ha'e amboae regua pendekuaia rupigua kuery, pendevy yxakã ayaaty ha'e yy reruaty kuery voi,

<sup>12</sup> pendejee pemoĩ aguã SENHOR Penderuete guexeve guarã ojapo va'ekue rupi pendekuai aguã, ha'e aŷ pendevy oura reve ijayvua rupi.

<sup>13</sup> Ha'e rami ojapo aŷ gui ojeupe guarã penemoingo aguã, ha'e Penderuete oiko aguã, pendevy ijayvuague rami vy, ha'e peneramoĩ kuery Abraão, Isaque ha'e Jacó pe ouraague rami.

<sup>14</sup> Ha'e gui peẽ kuery peguarã anho e'ŷ guĩ rami Nhanderuete reve guarã ajapo aura reve.

<sup>15</sup> Aŷ apy SENHOR Nhanderuete renonde py pene'aĩ va'e reve, ha'e gui aŷ apy nhandereve ikuai e'ŷ va'e kuery reve voi.

<sup>16</sup> — Mba'eta peikuua ae ma Egito yvy re nhandekuai jave, ha'e gui yvy regua kuery yvy mbyte rupi jaaxa jave guare ha'e javi.

<sup>17</sup> Pexa ha'e kuery pegua ojeguarua, mba'emo ra'angaarã yvyra ha'e ita gui ojapo va'ekue. Pexa avi ha'e kuery mbyte rupi prata ha'e ouro guigua oguerekva'e,

<sup>18</sup> ha'e rami vy peẽ kuery mbyte rupi oiko e'ŷ aguã neĩ peteĩve ava, kunha neĩ hoo pygua kuery, neĩ peẽ kuery va'e regua ma voi opy'a re omoĩ va'e SENHOR Nhanderuete gui ojepe'a vy yvy regua kuery ruete pe rive oiko aguã, peẽ kuery mbyte rupi oiko e'ŷ aguã mba'emo vai rapo, ha'e va'e gui henhoĩ aguã moã vaikue iro va'e.\*

<sup>19</sup> Avave rei kova'e ayvu vai oendu vy aipote'i eme ha'e ae opy'a py ojereroayvu porãa rupi rive: “Xee aiko porã 'rã, xepy'a py mba'emo vai oĩ va'e rupi aiko teĩ”, te'i eme, mba'eta oka'u ma teĩ oy'uvexea oendu va'e rami ijayvu.

<sup>20</sup> Ha'e va'e ma SENHOR ndoperdoai 'rãe. Ha'e rami 'rãgue py ha'e va'e ava pe SENHOR oexa uka 'rã ipoxya ha'e nda'evei etea. Hi'áry ombou 'rã ayvu vai kova'e kuaxia re ipara oiny va'e ha'e javi, ha'e SENHOR ombogue 'rã hery yva guy rupi gui.

<sup>21</sup> Ha'e va'e ma SENHOR omboja'o 'rã Israel kuery regua ikuiaigui ojexavai aguã, ayvu vai kova'e kuaxia re ombopara pyre ha'e javi rami vy.

<sup>22</sup> — Ha'e ramo raka'eve rã ikuai va'e kuery omombe'u 'rã okuapy, peẽ kuery rire pendera'y ju ikuai va'e, ha'e amboae regua yvy mboae mombyry gui ou va'e voi. Mba'eta oexa 'rã kova'e yvy re mba'emo vai ha'e mba'eaxy vaikue oikoague, nhomoingo axyarã SENHOR ombou va'ekue.

<sup>23</sup> Mba'eta pendeyvy ha'e javi rupi okaipa 'rã enxofre ha'e juky ho'aague rami. Mba'eve rei nonhotýai 'rã, neĩ ndai'avei 'rã, neĩ ka'aguy ma voi ndoikovei 'rã, tetã Sodoma ha'e Gomorra, Admá ha'e Zeboim SENHOR ojou vai vy opoxya rupi omombaague rami.

<sup>24</sup> Ha'e ramo ha'e javi regua aipoe'i 'rã okuapy: “Mba'e re nda'u SENHOR guĩ ramigua ojapo peva'e yvy re? Mba'e nunga káuxa py tu nami ete oexa uka opoxya?”

<sup>25</sup> he'i okuapy ramo omboavaia 'rã: “Mba'eta SENHOR tamoi kuery Ruete gui ha'e kuery herexaraipa rire, ha'e Egito yvy gui oguenoẽ vy guexeve guarã ojapo va'ekue gui ojepe'a ramo.

<sup>26</sup> Ha'e rami ojepe'a vy amboae tuuete kuery pe ikuai, ombojeroviapa rei okuapy, ha'e va'e tuuete ha'e kuery ndoikuuaii va'ekue ri, ha'e SENHOR nombojerovia ukai teĩ.

\* <sup>29:18</sup> “Mba'emo vai rapo” he'ia ma nhombojejavy va'e re ijayvu vy (Hebreus 12.15).

<sup>27</sup> Ha'e nunga rupi ae kova'e yvy rovai SENHOR poxya hendy vy ombou ayvu vaipy kova'e kuaxia re ipara oiny va'e ha'e javi.

<sup>28</sup> Ha'e rami vy SENHOR opoxya reve oipe'apa ijyvy gui. Ojou vai ete ha'e ombopagaxea oendu vy omombopa yvy mboae katy, aŷ jaexaa rami ae", he'i 'rã ombovai vy.

<sup>29</sup> — Mba'eta mba'emo jaikuaa e'ŷ va'e ma SENHOR Nhanderuete pegua ae. Ha'e rã mba'emo oikuaa uka va'ekue ma nhandevy ha'e nhandera'y kuery pegua raka'e rã peve guarã, kova'e lei re ayvu oĩ va'e jajapopa aguã.

## 30

### *Omboaxy jevy aguã re ijayvuague*

<sup>1</sup> — Raka'eve rã ha'e nunga ha'e javi ou 'rã pendere, ayvu porã ha'e ayvu vai, penerenonde amombe'u va'ekue voi. Ha'e ramo yvy regua kuery ikuiaia mbyte SENHOR Penderuete penemomboague py penema'endu'a ju 'rã ha'e nungakue re.

<sup>2</sup> Ha'e gui peẽ ha'e pendera'y kuery reve pejevypa ju 'rã SENHOR Penderuete pe, penekuraxõ ha'e penenhe'ẽ ha'e javi py. Pejapyxaka ju 'rã ijayvua re, aŷ ajapo uka va'e rami vy.

<sup>3</sup> Ha'e ramo SENHOR Penderuete penemboaxy nho vy penemoingo porã ju 'rã. Ha'e vy teĩgue ju 'rã penemboatypa heruvy yvy regua kuery mbyte penemoaigue gui.

<sup>4</sup> Yva mamo rã ijapy rupi penemoxẽ va'ekue teĩ ha'e gui voi SENHOR Penderuete penemboatypa 'rã heruvy, ha'e gui ae 'rã pendereru.

<sup>5</sup> Ha'e vy SENHOR Penderuete pendereraa 'rã yvy peneramoĩ kuery ikuaiague py ae, peẽ kuery ju pendekuai aguã. Ha'e vy penemoingo porã vy peneramoĩ kuery gui voi penemboetave 'rã.

<sup>6</sup> Ha'e vy penekuraxõ gui SENHOR Penderuete omboi 'rã mba'emo vai oĩ va'e, peneramymino kuery kuraxõ gui voi, penekuraxõ ha'e penenhe'ẽ ha'e javi py peayvu aguã SENHOR Penderuete, peikove aguã.

<sup>7</sup> Ha'e gui penderovaigua kuery áry ae 'rã SENHOR Penderuete ombou kova'e ayvu vai ha'e javi, pendere ija'e e'ŷ va'e penembojexavaiare kuery re ju oiko aguã.

<sup>8</sup> Ha'e rami rire SENHOR ijayvua re pejapyxaka ju vy pejapo 'rã ojapo uka va'ekue aŷ xeayvua ha'e javi.

<sup>9</sup> Ha'e ramo SENHOR Penderuete ojapo 'rã pendepo py mba'emo pejapo va'e oiko porã aguã rami, pendera'y ha'e penderajy kuery itui'ia py, penerymba kuery ta'y'ia py, mba'ety rupigua hi'a porã aguã pendekuai porã aguã rami. Mba'eta teĩgue ju SENHOR pendererovy'a 'rã penemoingo porã aguã, peneramoĩ kuery oguerovy'aague rami,

<sup>10</sup> xapy'a rei SENHOR Penderuete ayvu re pejapyxaka vy ojapo uka va'ekue ha'e ayvu kova'e kuaxia re ipara oiny va'e ha'e javi pemoĩ porã ramo, ha'e penekuraxõ ha'e penenhe'ẽ ha'e javi py SENHOR Penderuete peguarã ju pejeko rerova ri ramo.

<sup>11</sup> — Mba'eta kova'e ayvu aŷ pendevy amboaxa va'e ma haxy vaipa va'e'ŷ, neĩ pendegui mombyry e'ŷ oĩ.

<sup>12</sup> Mba'eta yva re e'ŷ oĩ, aipopeje aguã: "Mava'e nda'u oo 'rã yva re, nhandevy ogueru vy omombe'u aguã, jajapo kuaa aguã rami?" peje e'ŷ aguã.

<sup>13</sup> Neĩ ye'ẽ rovai re e'ŷ guive ayvu oĩ, aipopeje aguã: "Mava'e nda'u nhanderekovia oaxa 'rã yy rovai re ogueru vy nhandevy omombe'u aguã, jajapo kuaa aguã?" peje e'ŷ aguã.

<sup>14</sup> Mba'eta kova'e ayvu ma pendea'i py oĩ, pendejuru py pemombe'u kuaa, ha'e pendepy'a py peikuua va'e ae, pejapo kuaa aguã.\*

### *Tekove e'ŷ vy manoia oiporavo ukaague*

<sup>15</sup> — Ma'ẽ, aŷ penerenonde xee amoĩ tekove mba'emo porã reve, ha'e gui manoia mba'emo vai reve.

---

\* **30:14** Romanos 10.5-10

<sup>16</sup> Xapy'a rei aŷ kova'e ayvu ajapo uka va'e pemoï porã vy, ha'e SENHOR Penderuete peayvu vy ixuguigua tape rupi peiko, ha'e gui ojapo uka va'ekue, ayvu ha'e 'arandua rupigua pemoï porã ri vy peikove ha'e penderetave 'rã, mba'eta SENHOR Penderuete penemoingo porã 'rã yvy pendekuai aguã peoague py.

<sup>17</sup> Ha'e rami tei xapy'a rei pendep'y'a py pejepe'a vy ndapejapyxakaxevei 'rã, ha'e pendererovaa rã tuuete mboae pemboete, ha'e kuery pe ju peiko aguã ramo,

<sup>18</sup> ha'e ramo aŷ amombe'u porã ma voi anhetẽ pemano 'rã. Napendekuai arei 'rã yvy Jordão yakã rovai re peaxaague py.

<sup>19</sup> Aŷ gui ma aenoï yva ha'e yvy penderovai xeayvua moma'endu'aarã. Mba'eta penerenonde amoï tekove ha'e manoia, ayvu porã ha'e ayvu vai. Peiporavo ha'vy tekove peikove aguã, peẽ ha'e pendera'y kuery.

<sup>20</sup> Peayvu tema SENHOR Penderuete. Pejapyxaka ijayvua re, hexeve peiko aguã. Mba'eta ha'e rami vy 'rãe peikove ha'e peiko puku yvy peneramoï kuery pe SENHOR oura reve ome'ẽ aguã re ijayvuague py, Abraão, Isaque ha'e Jacó pe ae – he'i Moisés.

## Opa vygua omombe'uague

### 31

#### *Moisés rire Josué ju joguerekoarã oiko aguã re ijayvuague*

<sup>1</sup> Pova'e ayvu Moisés omombe'u Israel kuery ha'e javi pe.

<sup>2</sup> Ha'e vy aipoe'i:

— Kova'e ára ma cento e vinte ma'etŷ ma areko. Aŷ nda'eveei aẽ ha'e aike ju aguã, SENHOR ae xevy ijayvuague rami: "Ndee ndereaxai 'rã Jordão yakã", he'i.

<sup>3</sup> SENHOR Penderuete ae oaxa 'rã penerenonde rupi. Ha'e ae omomba 'rã amboae regua kuery penerenonde gui, peẽ kuery ju pendekuai aguã. Josué ma oaxa 'rã penerenonde rupi, SENHOR ijayvu ma voiague rami vy.

<sup>4</sup> Ha'e kuery re SENHOR ojapo 'rã amorreu pygua huvixa Seom ha'e Ogue re ojapoague rami. Ha'e va'e kuery ma omomba va'ekue, ijyvy voi.

<sup>5</sup> Ha'e gui penerenonde ikuai va'e kuery ma pendepo py SENHOR omboaxa ma ramo ha'e kuery re pejapo 'rã pêvy ajapo uka ma voiague ha'e javi rami vy.

<sup>6</sup> — Penembaraete ha'e pendep'y'a guaxu. Pekyje eme, ha'e kuery pexa vy penhemondyi eme guive, mba'eta SENHOR Penderuete ae oo 'rã pendereve. Napenderejai 'rã, napenepytyvõ e'ŷi 'rã guive – he'i.\*

<sup>7</sup> Ha'e gui Moisés oenoï Josué, ha'e vy Israel kuery ha'e javi renonde py aipoe'i ixupe:

— Nembaraete ha'e ndepy'a guaxu ke. Mba'eta kova'e kuery reve reo 'rã yvy SENHOR oura reve nhaneramoï kuery pe ome'ẽ aguã re ijayvuague py. Ha'e rami vy ndee reraa 'rã ha'e py ikuai aguã.

<sup>8</sup> SENHOR ae 'rã oo nerенонde rupi. Ha'e ma oiko 'rã ndereve. Nanderejai 'rã, naneipytyvõ e'ŷi 'rã. Ekyje eme, enhemondyi eme guive – he'i.

#### *Sete ma'etŷ ojeupity nhavõ heta va'e kuery pe lei ogueroayvua aguã re ijayvuague*

<sup>9</sup> Kova'e lei ae Moisés ombopara va'ekue. Ha'e gui Levi ramymino kuery sacerdote ikuai va'e pe ju omboaxa, SENHOR guexeve guarã ojapo va'ekue ryru reraaty kuery pe, ha'e Israel kuery mongetaaty kuery ha'e javi pe.

<sup>10</sup> Ha'e kuery pe Moisés ojapo uka vy aipoe'i:

— Sete ma'etŷ opa'ia py kuerei, ma'etŷ oreveague pemboguepa aguã ojeupity nhavõ, ngaru oguy'i py pendekuai aguã regua oiko jave,

<sup>11</sup> Israel kuery ha'e javi ojexa uka 'rã okuapy SENHOR nguuete renonde. Ha'e va'e jave py peroayvu 'rã kova'e kuaxia para lei oĩa va'e, henda SENHOR oiporavoague py ae.

\* **31:6** Hebreus 13:5

<sup>12</sup> Ha'e rami vy pemboatypa 'rã heta va'e kuery: avakue, kunhague, kyrígue ha'e amboae regua penderekoa rupi ikuai va'e, ha'e kuery oendu vy oikuua aguã, ha'e SENHOR Penderuete renonde ojererokyjea rupi ikuai aguã, ha'e ayvu kova'e lei regua ojapopa aguã,

<sup>13</sup> pendera'y kuery lei oikuua e'ŷ teri va'eri oendu vy oikuua avi aguã SENHOR Penderuete renonde ojererokyjea rupi ikuai aguã, Jordão yakã rovai re yvy peoague py peikoa pukukue re.

### *Raka'eve rã Israel kuery nonhe'ẽ renduvei 'rãa re ijayvuague*

<sup>14</sup> Ha'e gui SENHOR aipoe'i Moisés pe:

— Ma'ẽ, ovaẽ rai'i ma remano aguã ára. Enoĩ ha'vy Josué, ha'e vy pejexa uka 'rã oguy nhemboaty oĩaty py, ixupe aeja aguã ojapo va'erã — he'i ramo Moisés ha'e Josué jogueraa vy ojexa uka oguy nhemboaty oĩaty py.

<sup>15</sup> Ha'e py SENHOR ojekuaa arai rupi, hokẽ áry rupi optyta oiny.

<sup>16</sup> SENHOR aipoe'i Moisés pe:

— Ma'ẽ, ovaẽ rai'i ma neramoĩ kuery reve repytu'u aguã. Ha'e va'e rire kova'e kuery opu'ã vy itavy rei 'rã okuapy, amboae regua tuuete kuery pe 'rã ikuai, yvy oje'oiague mbyte py. Ha'e rami vy xegui ojepe'apa 'rã oje'oivy, xereve guarã ha'e kuery reve ajapo va'ekue ombovaipa vy.

<sup>17</sup> Ha'e va'e jave py xepoxya hendy 'rã ha'e kuery rovai. Ha'e vy naipytyvõvei 'rã, ha'e kuery pe ndajexa ukai 'rã omombaa aguã. Ha'e kuery áry mba'emo vai ha'e ikuai axy aguã ou reta ramo ijayvu 'rã: “Nhanderuete orembyte py noïvei ramo e'ŷ teve ha'e rami ete oiko orere?” he'i 'rã okuapy.

<sup>18</sup> Ha'e va'e jave anhetẽ ete ha'e kuery pe ndajexa ukai 'rã, opa marã rei ikuaiague re, amboae regua tuuete kuery re rive ovapa rire.

<sup>19</sup> Ha'e ramo pembopara kova'e mboraei pendejeupe ae, ha'e pembo'e Israel kuery ha'e javi oporaei aguã rami, Israel kuery rovai xeayvua moma'endu'aarã optyta aguã.

<sup>20</sup> Mba'eta xee araa 'rã xevyguia kuery yvy kamby ha'e ei oata e'ŷa py, tamoĩ kuery pe aura reve ame'ẽ aguã re xeayvuague rami vy. Ha'e ramo ha'e kuery okaru porã vy hevyatã ha'e ikyrapa 'rã. Ha'e gui ma ovapa 'rã amboae regua tuuete kuery re xembopoxy aguã rami, xereve guarã ajapo va'ekue ombovaipa vy.

<sup>21</sup> Ha'e gui opa marã ikuai axy ha'e ojexavai ramo, ha'e jave py kova'e mboraei rupi ima'endu'a 'rã mba'e re pa ha'e kuery rovai aikoa re, mba'eta hamymino kuery oporai riae 'rã. Mba'eta aikuaa ha'e kuery py'a re aŷ voi oĩ va'e ha'e javi, yvy aura reve ame'ẽ aguã re xeayvuague py araa e'ŷ re ma voi — he'i.\*

<sup>22</sup> Ha'e va'e árave Moisés ombopara kova'e mboraerã ha'e javi, ha'e vy ombo'e Israel kuery oporaei aguã.

<sup>23</sup> Ha'e gui Num ra'y Josué ojapo va'erã re SENHOR ijayvu vy aipoe'i:

— Nembaraete ha'e ndepy'a guaxu ke, mba'eta ndee reraa 'rã Israel kuery yvy ame'ẽ aguã re aura reve xeayvuague py. Ha'e ramo xee aiko 'rã ndereve.

### *Hyru yvýry kuaxia lei oña omoña aguã re ijayvuague*

<sup>24</sup> Kuaxia re Moisés ombopara ayvu kova'e lei regua ha'e javi.

<sup>25</sup> Ijayvu guive levita kuery SENHOR guexeve guarã ojapo va'ekue ryru reraa kuery pe. Ha'e vy aipoe'i:

<sup>26</sup> — Pejopy ke kova'e kuaxia lei oña, ha'e pemoĩ porã SENHOR Penderuete guexeve guarã ojapo va'ekue ryru oĩaty yvýry, ha'e py itui riae aguã mba'e re pa penderovai oikoa kuua ukaarã.

\* **31:21** “Kova'e mboraei” he'ia ma 32 py oĩ.

<sup>27</sup> Mba'eta xee aikuaa ae ma pendevai reia ha'e peneakã ratãa. Mba'eta aŷ peẽ kuery reve xee aiko teri jave SENHOR rovai rupi pendekuai rire, amano rire katuve ma ha'e ramive 'rã pendekuai.

<sup>28</sup> Pemboatypa ke xerenonde rupi peẽ kuery regua nhomogeta va'ety ha'e penderuvixa kuery, ha'e kuery apyxa py xeayvu aguã pov'a'e ayvu rupi. Ha'e vy xee aenoĩ yva ha'e yvy ha'e kuery rovai xeayvua moma'endu'aarã.

<sup>29</sup> Mba'eta xee aikuaa porã amano rire opa marã rei pendekuai 'rãa. Pejepe'apa 'rã tape xee rombo'eague gui. Ha'e rami vy opaa ára py kova'e ayvu vai penderupity 'rã, mba'eta SENHOR renonde pejapo vai, pendepo py pejapo va'ekue py peko a'ã rei rire, ipoxy aguã rami.

### *Moisés mboraerā re nhombo'eague*

<sup>30</sup> Ha'e ramo Israel kuery ha'e javi pe Moisés ombo'e pov'a'e ayvu mboraerā:

## 32

<sup>1</sup> — Yva, xeayvu rã ejapyxaka ke ndeapyxa py.

Yvy, endu ke xejuru gui ayvu oẽ va'e.

<sup>2</sup> Xe'arandua ma opa rupi too oky otykya rami,

xeayvua tanhomoingo porã yxapy yvy omoakŷa rami,  
nhuũ áry oky rayvi'i, ha'e mba'ety áry rupi otykya rami.

<sup>3</sup> Mba'eta amombe'u porâve 'rã SENHOR rery.

Amboyvate ete 'rã Nhanderuete.

<sup>4</sup> Ha'e ma itaova! Ha'e ojapo va'e ma ha'evea ramigua meme,

oikoa ha'e javi rupi oexa uka gueko porãa.

Nhanderuete ma ojeroviapy, hexe noĩ 'rã mba'emo vai.

Heko porã va'e vy ha'evea rami joguerek.

<sup>5</sup> Ha'e rã peẽ kuery ma hovai rupi pendekuai, ojeroviaa rupi e'ŷ.

Ha'e rami vy ta'y kuery regua e'ŷ ma peiko,  
ha'e rã iove ramigua rive.

Peẽ kuery ma ha'eve e'ŷa rami pendekuai teko vai rupi.

<sup>6</sup> Ha'e rami ete teve pemboekovia SENHOR pendererekao re,

inhakã porã e'ŷ ha'e oikuaa e'ŷ rei va'e peiko va'e?

Ha'e'ŷ nda'u Penderu ojeupe guarã pendejoguaare,  
penemoingoare ha'e penemombaraetea?

<sup>7</sup> Penema'endu'a ke ára ymave rupi oiko va'ekue re,

peikuaa pota na ma'etŷa oaxapa rei ma va'ekue rupi ikuai va'ekue re.

Peporandu ke penderu kuery pe, ha'e ramo omombe'u porâve 'rã.

Penemongeta va'ety kuery pe peporandu rã omombe'u avi 'rã.

<sup>8</sup> Mba'eta Yvate ete va'e yvy regua ikuai aguã ome'ë-me'ë raka'e,

avakue ra'y kuery joegui omboja'o vy.

Ha'e va'e jave py oa'anga raka'e ha'e kuery rekoarã,

Israel ra'y kuery regua mbovy pa ikuia rami vy.

<sup>9</sup> Mba'eta SENHOR pegua oï va'e ma ixupegua kuery,

Jacó kuery ae ikuai ixupegua regua.

<sup>10</sup> Yvy ipirupa reia py ojou va'ekue ojeupe guarã,

peteñ henda tekao e'ŷa hi'âgue-'âgue nhendua py.

Ha'e vy ojoko herekovy vy opena ha'e kuery re,

opena porã imoiny guexa ra'yñ re rami ae.

<sup>11</sup> Taguato minha gua'y kuery ombo'e vy

ha'e kuery áry rupi oveve oikovy va'e rami,

opepo oipyo vy ojopy imoiny vy opepo áry ogueraa va'e rami,

- 12 ha'e rami ae SENHOR nhandererek, ha'e anho'i.  
 Hexeve ndoikoi amboae regua tuuete.
- 13 Ha'e vy vyty áry rupi ojapo kavaju árygua rami oje'oi aguã rami.  
 Ojapo mba'ety rupi ikuai va'e gui okaru okuapy aguã rami,  
 ei itaova re ikuai va'e oipyte aguã, ha'e azeite itaty reia rupi ikuai va'e,
- 14 vaka kamby kekue, vexa'i kamby gui,  
 ha'e gui vexa ra'y kyrakue,  
 kavara ha'e kavara ava Basã py ikuai va'e gui,  
 trigo porãgueve va'e gui ae.  
 Ojapo uva rykue oy'u aguã rami, pytã porã va'e.
- 15 Ha'e rami tei hymba hembiayvu va'e ikyrapa ma vy opyvoi hexe.  
 Ikyrapa, tuvixapa, oguerekopa ma vy  
 hexaraipa Nhanderuete imoingoare gui,  
 ndoipotavei itaova gueraa jepeare.
- 16 Mba'eta amboae regua tuuete re rive ha'e kuery oo vy ojapo SENHOR nda'evei etea  
 oendu aguã rami,  
 ojeguarupy omboetea py ombopoxy.
- 17 Anha kuery pe rive ome'ẽ okuapy mba'emo, Nhanderuete pe e'ŷ.  
 Amboae regua tuuete ndoikuuai rei va'ety pe,  
 tuuete ojapoa pyau va'ekue pe,  
 tuu kuery omboete va'ety pe e'ŷ.
- 18 Hexaraipa okuapy itaova ha'e kuery re ta'y va'e gui,  
 nguuete imoingoare gui ae hexarai.
- 19 Ha'e nunga SENHOR oexa vy nopenavei,  
 ta'y kuery ha'e tajy kuery ombopoxy rire.
- 20 Ha'e vy aipoe'i: "Ha'e kuery pe ndajexa ukavei 'rã.  
 Aexa 'rã opaa py ha'e kuery re oiko va'e.  
 Mba'eta ha'e kuery ma teko vai rupi ikuai va'erã ae,  
 ta'y kuery ojeroviapy e'ŷ.
- 21 Ha'e rami vy nguuete pe rai'i ra'aga e'ŷ ikuai vy xeapo nda'evei etea aendu aguã rami,  
 mba'emo ra'angaa pe rive ikuai vy xembopoxy.  
 Ha'e nunga rupi xee ju ajapo 'rã ha'e kuery nda'evei etea oendu aguã rami peteĩ  
 regua e'ŷ ikuai va'e arua py,  
 inhakã porã e'ŷ va'e regua arekoaa py xee ajapo 'rã ha'e kuery ivai aguã rami.\*
- 22 Mba'eta xepoxya rupi amoendy 'rã tata  
 manoaa guyve katy peve hendy va'erã.  
 Ha'e va'e omomba 'rã vy ha'e mba'ety ikuai va'e,  
 vyty guy rupi peve 'rã amoendy.
- 23 Ha'e kuery rovai heta 'rã ambou mba'emo vai.  
 Xeru'y amombo 'rã ha'e kuery re.
- 24 Ha'e ramo okanhymba 'rã karuai gui,  
 omano 'rã pire raku ha'e mba'eaxy vaikue gui.  
 Ha'e kuery rovai ambou 'rã mymba haĩmba rei va'e,  
 ha'e mboi vaikue vyty ku'i rupi onhembotyryry va'e.
- 25 Oka rupi omanomba 'rã kyxé gui,  
 ha'e rã ngopy rupi ma ho'apa 'rã nhemondyi gui,  
 kunumigue ha'e kunhataigüe,  
 kyrigue'i okambu'i ha'e tujakue hi'a xiĩmba'i va'e voi.
- 26 Xee aipoa'e 'rãgue opa rupi romoaĩmba aguã rami,

\* 32:21 1 Coríntios 10.22, Romanos 10.19

- ajapo 'rāgue pendere avave ima'endu'aa ve'ŷ aguã rami,  
 27 va'eri xee ndaiptai penderovaigua kuery ov'y'a rei,  
     penderovaigua kuery ojekore vy  
     aipoe'i e'ŷ aguã: 'Nhandepo py ae jaity,  
     SENHOR e'ŷ rima ha'e nunga ha'e javi ombou va'ekue', he'i okuapy e'ŷ aguã.  
 28 Mba'eta xevyguia kuery ma imongetaarã va'e'ŷ merami ikuai,  
     ha'e kuery re noĩ 'arandu.  
 29 Ha'e kuery ma hi'arandu va'e tamo ra'e ikuai!  
     Ha'e rami va'e rire ma oikuaa 'rāgue ha'e nunga,  
     oikuaa pota 'rāgue opa taa re.  
 30 Mba'exa vy tu pete'i va'eri ha'e kuery va'e regua mil omondyi,  
     e'ŷ vy moko'i va'e dez mil omondyi.  
     Ha'e kuery repyarã itaova oĩ va'ekue oeja ramo ae oiko ha'e rami,  
     ha'e jopo py SENHOR omboaxa ramo.  
 31 Mba'eta hovaigua kuery pegua itaova ma nhande'itaova rami e'ŷ,  
     nhanderovaigua eteve voi oikuaa.  
 32 Mba'eta ha'e kuery uvaty ma Sodoma py ikuai va'e ramigua,  
     ha'e imba'ety ma Gomorra regua.  
     Ha'e kuery uva ma veneno rami jojukaarã,  
     ha'e ijaju va'e voi iro va'e meme.\*  
 33 Ha'e kuery uva rykue ma onhembotyryry va'e veneno rami iro va'e,  
     mboi guigua rami ete nda'evei va'e.  
 34 Ha'e rami aguã ma xejee e'ŷ ri ty'y amoĩ imoiny,  
     mba'emo moĩ porãaty py rami?  
 35 Mba'eta anhombopaga aguã rami aiko mba'emokue amboekovia vy,  
     ha'evea ára py ha'e kuery onhepyxanga jave.  
     Mba'eta ovaẽ rai'i ma ha'e kuery ojexavai aguã ára,  
     ha'e kuery renonderã ou pojava."  
 36 Mba'eta SENHOR oikuaa pota 'rā ojeupegua kuery re,  
     ha'e vy omboaxy 'rā guembiguai kuery,  
     ha'e kuery mbaraeteague opa ma ovya ha'e oexa vy,  
     mba'eta ha'e kuery va'e regua nonhenduvei 'rā, escravo ha'e escravo e'ŷ va'e ma  
     voi.\*  
 37 Ha'e ramo aipoe'i 'rā: "Mamo tu ikuai tuuete ramigua pemboete va'ekue,  
     ha'e itaova re pejeroviaa va'ekue?  
 38 Ha'e va'e tuuete kuery nda'u ho'u 'rā mba'emo kyra peme'ẽ va'e,  
     ha'e oy'u 'rā vinho peme'ẽ va'e?  
     Ha'e kuery ae ha'vy topu'ãmba penepytyvõ aguã,  
     peẽ kuery penhemi atyrã ojeapo vy!  
 39 Pexa ke aŷ, xee ae, xee anho'i aiko.  
     Amboae regua tuuete ndoikoi, xee e'ŷ vy.  
     Xee ma ajojuka ha'e anhomoingove 'rā.  
     Xee anhomoingo axy ha'e anhomonguera ju 'rā.  
     Ndoikoi guive xepo py ho'a va'ekue reraa jepearã.  
 40 Yvate katy xepo upi reve  
     xee ae rekove opa va'erã e'ŷ rupi aura vy aipoa'e:  
 41 Xekyxe hendy rei va'e aĩmbe'e,  
     ha'e xepo'akaa rupi aikuua pota vy

\* 32:32 Uvaty re ijayvua py Israel kuery re ae ijayvu, ha'e rã uva'a ma ha'e kuery reko porãrã va'ekue. \* 32:36 Romanos 12.19, Hebreus 10.30

ambopaga 'rã xerovaigua kuery,  
amboekovia 'rã xere nda'ija'e i va'e kuery ojapoague.

<sup>42</sup> Ajapo 'rã xeru'y tuguy omoë aguã rami,  
(xekyxé voi omomba 'rã ho'o.)  
omanogue ha'e ombo'a pyre kuery ruguy,  
penderovaigua kuery akã hi'a vuku va'e regua voi", he'i.

<sup>43</sup> Amboae regua kuery, perovy'a ke ixupegua kuery,  
mba'eta SENHOR nhombopaga 'rã guembiguai kuery ruguy omoëa ague re,  
ombopaga 'rã hovaigua kuery,  
ha'e vy oiky'a'o ju 'rã ojeupegua kuery yvy.\*

<sup>44</sup> Ha'e va'e ayvu mboraei regua ha'e javi Moisés omombe'u heta va'e kuery remien-durã, Num ra'y Josué reve.

<sup>45</sup> Ha'e va'e ayvu rupi Israel kuery pe Moisés ijayvupa ma rire

<sup>46</sup> aipoe'ive ju:

— Penekuraxõ re pemoï porã 'rã ayvu aÿ penembyte amombe'u va'e ha'e javi, pendera'y kuery pe pejapo uka aguã kova'e lei re ayvu oï va'e ha'e javi.

<sup>47</sup> Mba'eta pova'e ma pendevy ayvu rive e'ÿ, ha'e rã penemoingovearã ae. Pova'e ayvu rupi vy ae 'rã peiko pukuve pendeyvyrã Jordão yakã rovai re peaxa ma vy pendekuaia py.

## Moisés rekove opa ma aguã ára pyguare

*Nebo yvyty apyte gui Moisés Canaã yvy oexa aguã re ijayvuague*

<sup>48</sup> Ha'e va'e árave SENHOR ijayvu Moisés pe. Ha'e vy aipoe'i:

— Eẽ ke Abarim yvyty rupi Nebo yvyty peve. Ha'e va'e ma Moabe yvy re oï Jericó rexei'i katy. Ha'e vy rexa 'rã Canaã yvy, Israel kuery rekoarã ame'ẽ va'ekue.

<sup>50</sup> Ha'e gui yvyty reêague áry ae 'rã remano, ha'e rã nenhe'ẽ heraa 'rã neramoï kuerya py, nderyke'y Arão Hor yvyty py omano rã inhe'ẽ tamoï kuerya py heraa ague rami avi.

<sup>51</sup> Mba'eta peẽ naxenhe'ẽ rendui va'ekue Israel kuery mbyte, Meribá yakã katy'i Cades re, Zim teko a e'ÿa py. Mba'eta Israel kuery mbyte py ndapeikuua ukai iky'a e'ÿ va'e aikoa.

<sup>52</sup> Ha'e rami vy yvy nerentonde oï va'e rexa rive 'rã, nerevaëi 'rã Israel kuery yvyrã ame'ẽ va'ekue py.

## 33

*Moisés jogueroayvu porãague*

<sup>1</sup> Po rami ma Nhanderuete remimbo'e Moisés omano ta jave ogueroayvu porã Israel kuery.

<sup>2</sup> Ha'e vy aipoe'i:

— SENHOR ma Sinai yvyty katy gui ou vy  
ha'e kuery pe ojekuaa Seir katy gui ko'ëmba'i ouvya rami,  
Parã yvyty guive hexakãmba ouvy.  
Mbovy rei e'ÿ ojeupegua iky'a e'ÿ va'e kuery reve ou.  
Oiporu kuaa regua re tata rami ojekuaa ha'e kuery pegua lei.

<sup>3</sup> Anhetẽ ete ae ra'e reayvu heta va'e kuery.

Ndevyguia kuery iky'a e'ÿ va'e ndepo py meme ikuai.  
Ndep yvy'iry ha'e kuery onhemboja okuapy vy  
onhembo'e uka 'rã ndeayvua re.

<sup>4</sup> Moisés ombopara va'ekue

Jacó guigua kuery peguarã lei.

<sup>5</sup> Ha'e gui SENHOR ae oï guembiaiyvu kuery ruvixarã,

\* **32:43** Romanos 15.10, Hebreus 1.6

- ha'e kuery regua yvatekueve onhemboatya py,  
Israel kuery regua ha'e javi reve.
- <sup>6</sup> – Rúben kuery ma tokuave, tomanomba eme.  
Ha'e va'e regua avakue mbovy'i e'ŷ ta'ikuai.
- <sup>7</sup> Judá kuery renonderā ma po rami omombe'u:  
– SENHOR, endu ke Judá kuery ojerurea,  
epena heta va'e kuery ikuiaia py ju ojevy aguã rami.\*  
Ndepo py ke ejoguero'a ha'e kuery repya rupi,  
eipytyvõ hovaigua kuery rovai rupi.
- <sup>8</sup> Ha'e gui Levi kuery va'e regua pe aipoe'i:  
– Xeruete, Tumim ha'e Urim rupi ejekuaa uka ke  
ndevyguia ava ojeroviapy va'e pe.  
Ha'e va'e reko ma Massá py reikuaa porã raka'e,  
ha'e Meribá yakã py ixupe ndeayvu ete.†
- <sup>9</sup> Ha'e va'e ma oxy ha'e nguu pe aipoe'i va'ekue  
peteigueve oexa e'ŷa rami,  
neñ guyvy kuery oexa e'ŷ va'ekue,  
gua'y kuery re voi openaa rupi ndoikoi.  
Ha'e rami 'rãgue py ojee omoï porã ndeayvuague,  
ha'e ndereve guarã rejapo va'ekue rupi anho oiko.‡
- <sup>10</sup> Ha'e vy ne'arandua re ombo'e oikovy Jacó kuery,  
Israel kuery ombo'e ndeguigua lei re.  
Oapy avi heakuã porã va'e rejou porã aguã,  
mymba kuery voi oapy ndevyguia altar áry.
- <sup>11</sup> SENHOR, emoingo porã ke ha'e kuery imbaraete aguã,  
erovy'a avi opo py ojapo va'e.  
Ha'e rã emoingo axypa ha'e kuery re ija'e e'ŷ vy opu'ã rei va'e,  
raka'eve rã opu'ã ve'ŷ aguã.
- <sup>12</sup> Ha'e gui Benjamim kuery va'e regua pe ma aipoe'i:  
– SENHOR rembiayvu oĩ porã ete 'rã hexeve.  
Ára nhavõ SENHOR opena porã 'rã.  
Ha'e ramo optyu'u 'rã ijyva áry rupi.
- <sup>13</sup> Ha'e gui José kuery va'e regua pe ma aipoe'i:  
– SENHOR tomoingo porã pendeyvy,  
yva gui ho'a va'e iporâgueve py,  
yxapy ha'e yy yvy guy rupi oĩ va'e py guive,
- <sup>14</sup> kuarayomboaju va'e iporâgueve,  
ha'e jaxy nhavõ hi'a va'e py,
- <sup>15</sup> ha'e gui yvyty ymave guare,  
ha'e yvy'ã raka'eve rã peve oĩ va'e rupi henhoï porâgueve va'e py,
- <sup>16</sup> yvy gui oiko va'e iporâgueve va'e ha'e javi py,  
yvyra'a iporâgueve va'e py voi.  
Ha'e nunga ha'e javi tou José kuery re,  
tyvy kuery yvateve va'e rã.§
- <sup>17</sup> Ha'e kuery ipo'aka 'rã vaka jypy guare va'e rami,

---

\* **33:7** Judá kuery va'e regua ma heta va'e kuery renonde 'rã oje'oi joe opu'ã aguã katy (Números 2.9).   † **33:8** Apy ma ijayvu sacerdote yvateve Levi regua oiko va'e re. Sacerdote jypyguia ma Arão ae oiko raka'e. Ha'e gui Tumim ha'e Urim ma sacerdote kuery mba'ekuaa-arã oĩ (Êxodo 28.30).   ‡ **33:9** Levi kuery ma pavẽ gui oayvuve Nhanderuete ayvu (Êxodo 32.25-29).   § **33:16** José ramymino kuery ma mba'emo ojopy retave aguã rami ikuai (1 Crônicas 5.1).

- hakua ma vaka ka'aguy regua rakua rami.  
 Ha'e va'e py ma ipo'aka 'rã yvy regua ha'e javi re,  
 yvy apy peve voi.  
 Ha'e rami ae mbovy e'ý ta'ikuai Efraim  
 ha'e Manassés regua kuery.
- 18 Ha'e gui Zebulom kuery va'e regua pe ma aipoe'i:  
 – Pevy'a ke Zebulom kuery, ye'ẽ rembe rupi peoa py,  
 ha'e peẽ Issacar kuery voi pendekoa py peña rupi.
- 19 Ha'e kuery mokoĩ regua ma oenoĩ 'rã amboae regua kuery yvyty áry oupa aguã.  
 Ha'e py ma Nhanderuete pe ome'ẽ 'rã ha'evea ramigua.  
 Mba'eta ha'e kuery okaru porã 'rã ye'ẽ rupigua re,  
 ha'e mba'emo iporãve va'e ita ku'ia guýry oĩ va'ekue gui.\*
- 20 Ha'e gui Gade kuery va'e regua pe ma aipoe'i:  
 – Tovy'a porã Gade kuery yvyrã omboetavea rupi.  
 Ha'e kuery ma guary kunha rami 'rã ikuai,  
 jojyva ha'e nhoakã omboa'yпaa rupi.
- 21 Ha'e vy ombo'erã ojopy 'rã iporãve va'e,  
 huixia kuery peguarã ha'e py omoĩ porã mbyre.  
 Ha'e vy heta va'e kuery renonde rupi oguata vy  
 ojapo 'rã SENHOR oipotaa ha'evea ramigua,  
 Israel kuery re ijayvuague rami vy.
- 22 Ha'e gui Dã kuery va'e regua pe ma aipoe'i:  
 – Dã kuery ma guary'i  
 Basã gui opo va'e rami 'rã ikuai.
- 23 Ha'e gui Naftali kuery va'e regua pe ma aipoe'i:  
 – Naftali kuery ma SENHOR omoingo porãa rupi 'rã ov'y'a okuapy.  
 Opa mba'e py SENHOR ogueroayvu porãa rami vy  
 heko'a 'rã yupa rupi, kuaray puku-a katy.
- 24 Ha'e gui Aser kuery va'e regua pe ma aipoe'i:  
 – Aser kuery ma ta'ikuai porãve Jacó ra'y kuery ikuiaia mbyte.  
 Tyvy kuery rembiayyuve toiko,  
 ha'e ipy rupi tomoaky azete py.
- 25 Ha'e kuery retã rokẽ jokoa ma ferro ha'e overa va'e guigua toĩ.  
 Ta'ikuai porã okuave teria ja.
- 26 – Hembiaiyvu peiko va'e, Penderuete ramigua mboae ndoikoi.  
 Yva áry rupi ha'e ou 'rã penepytyvõ aguã,  
 yvatevea rupi ou arai áry.
- 27 Nhanderuete imarã e'ý va'e re ae 'rã pendekoa,  
 ha'e ramo ojyva áry rupi penekuavã 'rã raka'e rã peve guarã.  
 Penerenonde katy gui oipe'a 'rã penderovaigua kuery  
 "Pemomba katu", he'i vy.
- 28 Ha'e ramo Israel kuery ikuai porã 'rã,  
 Jacó ramymino kuery, ygua oĩ ae'i va'e rami 'rã ikuai,  
 yvy mba'emo aju ha'e vinho oña va'e re.  
 Yva gui ma ho'a 'rã yxapy imoakyarã.
- 29 Israel kuery, pevy'a ete 'rã!  
 Marã ramigua tu ikuai peẽ kuery ramigua?  
 SENHOR ogueraa jepe va'e peiko.  
 Ha'e ma mba'emo vai jokoa oĩ penepytyvõarã,

\* 33:19 Zebulom kuery ma ye'ẽ rembe rupi ikuai raka'e.

ha'e kyxe penembopo'akaarã.

Ha'e rami rire penderovaigua kuery ma peipotaa rami meme 'rã ikuai,  
ha'e rã peẽ ma pepyrõ 'rã ha'e kuery ombojeroviaaty yvy'ã re ojapo va'ekue áry.

## 34

### *Moisés omanoague*

<sup>1</sup> Ha'e gui Moabe yvy gui Moisés oẽ vy Nebo yvyty katy oo, Pisga yvy'ã yvatevea py, Jericó rexel'i ae. Ha'e ramo ixupe SENHOR oexa uka yvy ha'e javi Gileade guive Dã peve,

<sup>2</sup> Naftali, Efraim ha'e Manassés kuery peguarã, ha'e gui Judá kuery peguarã yvy ha'e javi, ye'ẽ kuaray oikea katy oĩ va'e peve,

<sup>3</sup> ha'e gui Neguebe ha'e Jericó tetã pindo ty va'e katy'i yvyugua oĩ va'e ha'e javi rupi, Zoar peve.

<sup>4</sup> Ha'e rami vy SENHOR aipoe'i ixupe:

— Kova'e yvy ae ma Abraão, Isaque ha'e Jacó pe aura reve ame'ẽ aguã re xeayvuague va'e, “Peneramymino kuery pe ame'ẽ 'rã”, ha'league ae. Ha'e va'e ma nderexa py rexa aguã rami ajapo va'eri ndereoi 'rã ha'e katy — he'i.

<sup>5</sup> Ha'e pyve SENHOR rembiguai Moisés omano, Moabe yvy re, SENHOR ijayvuague rami vy.

<sup>6</sup> Ha'e ramo onhono porã peteĩ yvy'ã guy py Moabe re, Bete-Peor rexel'i. Aÿ peve avave rei ndokuuai teri onhono porãague.

<sup>7</sup> Moisés omano jave py cento e vinte ma'etõ oguerekva va'ekue. Ha'e rami teĩ hexa ndoguepai teri va'ekue, imbaraete rei guive.

<sup>8</sup> Peteĩ jaxy re Israel kuery ojae'opa okuapy Moisés re, Moabe yvy re ae, ojae'o aguã va'ekue opa peve.

<sup>9</sup> Ha'e gui Num ra'y Josué re Moisés opo omoĩ rire hexe Nhe'ẽ imo'arandua anho oĩ. Ha'e ramo ijayvua re Israel kuery ojapyxaka vy ojapo okuapy Moisés rupi SENHOR ojapo ukaague rami.

<sup>10</sup> Israel kuery mbyte ndoikovei teri profeta Moisés ramigua ju, mba'eta jova re oma'ẽ reve SENHOR ijayvu hexeve.

<sup>11</sup> Ndoikovei teri mba'emo kuaa ukaarã ha'e hexa pyrã SENHOR ojapo ukaa rami vy Egito yvy re ha'e ojapo va'ekue ramigua, Faraó re, ixupeguia yvatekueve re, ha'e ijyvy ha'e javi rupi.

<sup>12</sup> Mba'eta Moisés ma opo'akaa rupi ojapo va'ekue mba'emo nda'evei ete ha'e tuvixave va'e, Israel kuery pavẽ oexaa py.

## Josué rekukue oĩa Josué rekukue oĩa

Jypy'i kova'e kuaxia para py aipoe'i: "Senhor rembiguai Moisés omano rire ipytyvõare Num ra'y Josué va'e ju Senhor oenoĩ. Ha'e vy aipoe'i: 'Xerembiguai Moisés omano ma. Epu'ã ke aỹ, eaxa Jordão yakã kova'e kuery ha'e javi reve, Israel kuery yvyrã ame'ẽ va'ekue py. Opa rupi pepyrõa yvy ame'ẽ ma voi pendevy, Moisés pe xeayvuague rami vy. ... Moisés reve aikoague rami ae ju 'rã aiko ndereve. Ndorojai 'rã, noroipytyvõ e'ŷi 'rã guive. Nembaraete ha'e ndepy'a guaxu ke'", he'i (1.1-2, 5b-6a). Ha'e rami rã kova'e kuaxia re oĩ Josué Israel kuery ogueraa vy Canaã yvy re ipo'akaague.

Jypy ma Jericó tetã oipe'a okuapy, Nhanderuete opo'akaa rupi ikora oitypa ramo. Ha'e gui amboae tetã ikuai va'e re ju ha'e kuery ipo'aka. Amongue henda py nda'ipo'akai guive. Josué opena vy peteĩ-teĩ regua pe ome'ẽ ijyvyrã.

Opaa py Josué aipoe'i Israel kuery ha'e javi pe: "Xetuja'i ma, are ma aiko. Ha'e gui peẽ kuery pexapa ma Senhor Penderuete peẽ kuery re oma'ẽ vy amboae regua kuery re ojapoague. Mba'eta ha'e kuery re Senhor Penderuete ae opu'ã oikovy penderepy vy", he'i (23.2b-3).

### *Josué ipy'a guaxu aguã re Nhanderuete ijayvuague*

<sup>1</sup> SENHOR rembiguai Moisés omano rire ipytyvõare Num ra'y Josué va'e ju SENHOR oenoĩ. Ha'e vy aipoe'i:

<sup>2</sup> — Xerembiguai Moisés omano ma. Epu'ã ke aỹ, eaxa Jordão yakã kova'e kuery ha'e javi reve, Israel kuery yvyrã ame'ẽ va'ekue py.

<sup>3</sup> Opa rupi pepyrõa yvy ame'ẽ ma voi pendevy, Moisés pe xeayvuague rami vy.

<sup>4</sup> Tekoa e'ŷa ha'e Líbano yvy guive Eufrates yakã tuvixa va'e peve, heteu kuery yvy ha'e javi ame'ẽ, ha'e gui kuaray oikea katy ye'ẽ tuvixa va'e oĩ va'e peve, pendevy guarã meme itui.

<sup>5</sup> Reikovea pukukue re avave rei nda'ipo'akaaai 'rã pendere. Moisés reve aikoague rami ae ju 'rã aiko ndereve. Ndorojai 'rã, noroipytyvõ e'ŷi 'rã guive.

<sup>6</sup> Nembaraete ha'e ndepy'a guaxu ke, mba'eta ndee rejapo 'rã kova'e kuery yvy re hekoa aguã rami, tuu kuery pe aura reve ame'ẽ aguã re xeayvu rire.

<sup>7</sup> Nembaraete ha'e ndepy'a guaxu ete ke, rejapopa aguã lei xerembiguai Moisés ojapo ukaague. Ejep'e aeme ndeaxu e'ŷa katy, neĩ ndeaxua katy, mamo rã reikoa py reiko porã aguã.

<sup>8</sup> Ejep'e aeme kuaxia re lei oĩa re ndeayvua gui. Ha'e va'e re reikuaa pota 'rã reikovy ara py ha'e pyávy. Enhea'ã tema ipara re oĩa rami rejapopa aguã. Ha'e rami vy reiko porã 'rã, ha'e rejapopa 'rã rejapo va'erã va'e.

<sup>9</sup> Xee ae aipo nda'ei ri ty'y ra'e? Nembaraete ha'e ndepy'a guaxu ke. Ekyje eme, enhemondyi eme guive, mba'eta SENHOR Nderuete oiko ndereve mamo rã reikoa py rei.

### *Canaã yvy re oaxa e'ŷi mbove ijayvuague*

<sup>10</sup> Ha'e ramo Josué ijayvu heta va'e kuery regua yvatekueve pe. Ha'e vy aipoe'i:

<sup>11</sup> — Peaxa ke heta va'e kuery ikuaria mbyte rupi. Ha'e kuery pe pendeayvu vy aipopeje 'rã: "Perekó katu ke tembi'u, mba'eta mboapy araa py peaxa 'rã kova'e Jordão yakã, pevaẽ aguã pendeyvyrã SENHOR Penderuete ome'ẽ va'ekue re, penderekoa aguã", peje.

<sup>12</sup> Ha'e gui Rúben regua, Gade ha'e Manassés regua mbyte rupi oja'o va'ekue pe ju Josué ijayvu vy aipoe'i:\*

<sup>13</sup> — Penema'endu'a ke SENHOR rembiguai Moisés ijayvu vy pendevy aipoe'iague re: “SENHOR Penderuete ome'ẽ 'rã pepytu'u aguã kova'e yvy ome'ẽ va'e re.

<sup>14</sup> Pendera'yxy kuery, pendera'y ha'e penderajy kuery ha'e penerymba vaka kuery topyta Jordão yakã kyvõgua re pendevy Moisés omboaxa va'ekue re. Ha'e rã peẽ ma tembiporu reve 'rã peaxa penderyvy kuery renonde, xondaro peiko va'e ha'e javi. Peipytyvõ 'rã,

<sup>15</sup> penderyvy kuery voi opytu'u aguã SENHOR ome'ẽ, peve peẽ kuery pe rami avi. Ha'e kuery voi 'rã hekoa oyvyrã SENHOR Penderuete ome'ẽ va'e re. Ha'e rami vy 'rãe pejevy pendeyvyrã SENHOR rembiguai Moisés omboaxa va'ekue re, kuaray oua katy pendekoa aguã, Jordão yakã kyvõgua re”, he'i va'ekue.

<sup>16</sup> Ha'e ramo Josué pe ha'e kuery ombovai okuapy vy aipoe'i:

— Orevy pe ndeayvua ha'e javi 'rã rojapo, ha'e mamo rã oremondoukaa py tema roo 'rã.

<sup>17</sup> Opa mba'e py Moisés ronhe'ẽ renduague rami avi ndee ju 'rã ronhe'ẽ rendu.

<sup>18</sup> Ha'e rã ha'e javi ava ndeayvua rami ndoikoxei, ha'e rejapo uka va'e ha'e javi ndojapoxei va'e ma omano 'rã. Ha'e nunga rupi nembaraete ke, ha'e ndepy'a guaxu.

## 2

### *Jericó tetã re oikuua pota vy oo va'e kuery Raabe ro py ikuai jave guare*

<sup>1</sup> Sitim gui Num ra'y Josué omondouka mokoĩ ava yvy re oma'ẽ nhemi aguã. Ha'e vy aipoe'i:

— Peguataa rupi peikuua pota peovy yvy re, Jericó tetã peve — he'i ramo oje'oi. Ha'e rami vy ovaẽ peteĩ kunha itavy rei va'e ro py. Hery ma Raabe. Ha'e py ae ha'e kuery oke.

<sup>2</sup> Ha'e ramo Jericó pygua huvixa pe omombe'ua vy aipo'ea:

— Ma'ẽ, ange pyávy apy ovaẽ ra'e avakue Israel kuery regua nhandeyvy re oikuua pota va'e — 'ea.

<sup>3</sup> Ha'e ramo Jericó pygua huvixa aipoe'i uka Raabe pe:

— Emoẽ ju avakue ou vy ndero py ovaẽ va'ekue, mba'eta nhandeyvy ha'e javi re oikuua pota aguã ou — he'i uka.

<sup>4</sup> Ha'e rami teĩ kunha va'e ma mokoĩ avakue omovaẽ vy onhomí ma voi va'ekue. Ha'e rami vy aipoe'i:

— Anhetẽ xea py ovaẽ kuri mokoĩ avakue. Va'eri xee ndaikuuaai maguigua paa.

<sup>5</sup> Ha'e gui pytũ ma jave tetã korarokẽ pemboty ta ramo ha'e kuery oexa vy jogueraa ju kuri. Ndaikuuaai marã katy pa oje'oria. Tapeo pojava ha'e kuery rakykue, peupity nho 'rã — he'i.

<sup>6</sup> Mba'eta ha'e va'e e'ŷ mbove ngoo áry ojeupi vy onhomí va'ekue linho 'ygue omoĩ porã va'ekue guy py.

<sup>7</sup> Ha'e gui huvixa rembiguai kuery oje'oi ju yvy re oikuua pota va'e kuery rakykue, Jordão yakã oaxaaty katy tape oo va'e rupi. Ha'e kuery rekaa oẽ ramove tetã korarokẽ ombotya.

<sup>8</sup> Ha'e gui oikuua pota va'e kuery onheno e'ŷ mbove kunha va'e oo ha'e kuerya py oo áry.

<sup>9</sup> Ha'e vy aipoe'i ha'e kuery pe:

— Xee aikuua porã pende kuery pe SENHOR kova'e yvy ome'ẽague. Pende kuery gui ore kuery rokyjea anho roendu, ha'e yvy re ikuai va'e ha'e javi ikangypa guive.

\* <sup>1:12</sup> Rúben, Gade ha'e Manassés regua mbyte rupi oja'o va'ekue opytu'raka'e Jordão yakã regua kuaray oẽa katy oĩ va'e re, amboae kuery reve yakã oaxa 'rãgue py. Ha'e kuery va'e regua xondaro kuery anho oaxa Jordão yakã guyvy kuery oipytyvõ aguã (Números 32).

<sup>10</sup> Mba'eta roendu Egito gui peo jave Ye'ẽ Pytā penerenonde oĩ va'e SENHOR omboypaague, ha'e gui mokoĩ amorreu kuery ruvixa re pejapo va'ekue voi, Jordão rovai re Seom ha'e Ogue pemomba va'ekue.

<sup>11</sup> Ha'e nungakue roendu vy orepy'a kangy, neĩ peteĩve re noĩvei imbaraetea, pende kuery peju ramo. Mba'eta SENHOR Penderuete ae Nhanderuete yva ha'e yvy re ipo'aka va'e ae.

<sup>12</sup> Ha'e gui aŷ ma peura xevy SENHOR rery rupi, xee romboaxyague rami peẽ kuery ju xeru ro pygua kuery pemboaxy aguã. Ha'e aikuua porã aguã aipota avi mba'emo xevy pemboaxa,

<sup>13</sup> xeru ha'e ha'i hekove reve peja aguã, xekypy ha'e xekypy'y kuery voi, ha'e roguereko va'e ha'e javi, orejukaarã gui orereraa jepe vy – he'i.

<sup>14</sup> Ha'e ramo avakue aipoe'i kunha va'e pe:

– Ndee oremombe'u e'ŷ ramo orerekovea voi rome'ẽ 'rã nderekove rekovia. Ha'e vy kova'e yvy SENHOR orevy ome'ẽ ma jave anhetẽ ete romboaxy 'rã – he'i okuapy.

<sup>15</sup> Ha'e ramo kunha va'e ojapo janela oĩ va'e py ixã va'e rupi ha'e kuery oguejy aguã rami, tetã kora áry ae hoo oĩ ramo.

<sup>16</sup> Ha'e gui aipoe'i ha'e kuery pe:

– Tapeo yvyty reia re, pendereka vy oo va'e kuery pendejou e'ŷ aguã. Mboapy ára peve 'rã penhemí ha'e py, ha'e kuery ojevy ju peve. Ha'e gui mae ma tapeo tape rupi – he'i.

<sup>17</sup> Ha'e ramo avakue aipoe'i ixupe:

– Ndevy rouraague ndorojapoi 'rã,

<sup>18</sup> teĩ po rami 'rã rejapo: pendeyvy re ore kuery rovaẽ jave kova'e ixã pytā va'e janela roguejyague py rejokua 'rã, ha'e gui nderu, ndexy, ndekypy ha'e nderu ro pygua kuery ha'e javi remboatypa 'rã ndero py. Ha'e rami e'ŷ rã ndorojapoi 'rã rouraague.

<sup>19</sup> Ha'e rami avi peteĩ va'e rei ndero rokẽ gui oka py oẽ ri ramo ma hexe ae 'rã oĩ huguy omoëague opaga aguã, orere e'ŷ. Ha'e rã ndereve opy ikuai va'e ruguy omoëa ramo ma orere ae toĩ ropaga aguã, ha'e kuery re amongue opo omoĩ rã.

<sup>20</sup> Ha'e rami avi ndee oremombe'u ramo ore ndorojapoi 'rã ndevy rouraague – he'i.

<sup>21</sup> Ha'e ramo kunha va'e

– Pendeayvuague rami toiko – he'i vyve omondouka. Ha'e rã ha'e kuery oo. Ha'e gui janela re kunha va'e ojokua ixã pytā va'e.

<sup>22</sup> Avakue jogueraa vy yvyty reia re ovaẽ. Ha'e py ma mboapy ára optya, heka vy oo va'e kuery guetã katy ju ojevypa peve, ha'e kuery tape ha'e javi rupi oeka okuapy teĩ ndojoui vy.

<sup>23</sup> Ha'e rami vy mokoïve ava ma yvy'ã gui oguejy vy jogueraa ju. Yakã oaxa ma vy ovaẽ Num ra'y Josué oĩa py. Ixupe omombe'u ha'e kuery re oiko va'ekue ha'e javi.

<sup>24</sup> Ha'e vy aipoe'i Josué pe:

– Anhetẽ ete nhandepo py SENHOR omboaxa ha'e va'e yvy ha'e javi. Ha'e py ikuai va'e ha'e javi ipy'a kangypa nhandegui – he'i.

### 3

#### *Jordão yakã oaxa oje'oivyague*

<sup>1</sup> Ko'ẽ ju ramove Israel kuery ha'e javi reve Josué nhomopu'ãmba vy Sitim gui oje'oi, Jordão yakã rembe peve ovaẽmba. Ha'e py ma oke ju ranhe okuapy oaxa e'ŷ mbove.

<sup>2</sup> Ha'e gui mboapy araa py huvixa kuery oaxa ju oje'oivy heta va'e kuery mbyte rupi.

<sup>3</sup> Ha'e vy heta va'e kuery pe omombe'u-mbe'u vy aipoe'i:

– SENHOR Penderuete guexeve guarã ojapo va'ekue ryru ma levita regua sacerdote kuery oupi heravy rã pexa vy peẽ kuery voi peo 'rã ha'e kuery rakykue.\*

\* <sup>3:3</sup> Êxodo 25.10-16, Hebreus 9.1-5

<sup>4</sup> Ha'e rami avi hyru gui mombyry'i 'rã peiko, mil metros-a py. Ha'e va'e re penhemboja eme, marupi pa peo aguã peikuaa aguã, mba'eta ha'e va'e tape rupi peo va'e'ý teri – he'i.

<sup>5</sup> Josué avi aipoe'i avi heta va'e kuery pe:

– Pejeky'a'o ke ko'ẽ rã guarã, mba'eta peẽ kuery mbyte SENHOR ojapo 'rã iporã va'e – he'i.

<sup>6</sup> Sacerdote kuery pe voi ijayvu vy aipoe'i:

– Peupi heravy Nhanderuete guexeve guarã ojapo va'ekue ryru, ha'e peroaxa heta va'e kuery renonde – he'i ramo hyru oupi vy heta va'e kuery renonde ogueroguata heravy.

<sup>7</sup> Ha'e gui SENHOR aipoe'i Josué pe:

– Kova'e ára amboypy 'rã romboyvate aguã Israel kuery pavẽ oexaa py, ha'e kuery oikuua aguã Moisés reve aikoague rami ndereve ju aikoa.

<sup>8</sup> Ha'e gui ndee ma sacerdote kuery hyru reraa va'e pe ndeayvu vy aipo're: “Jordão yakã py peguejy ma vy pepyta ranhe 'rã ha'e py”, 're.

<sup>9</sup> Ha'e ramo Josué aipoe'i Israel kuery pe:

– Penhemboja ke kylvõ rami, SENHOR Penderuete ayvu pendu aguã.

<sup>10</sup> Ha'e va'e rire Josué aipoe'ive ju:

– Po rami 'rã peikuaa Nhanderuete oikove va'e penembyte oikoa, ha'e anhetẽ penerenonde gui oipe'apa 'rãa cananeu, heteu, heveu, ferezeu, gurgaseu, amorreu ha'e jebuseu kuery ha'e javi.

<sup>11</sup> Ma'ẽ, SENHOR yvy jave re ipo'aka va'e guexeve guarã ojapo va'ekue ryru ma penerenonde ogueroaxa 'rã heravy Jordão yakã.

<sup>12</sup> Ha'e gui aý ma peiporavo doze avakue Israel regua, peteĩ-teĩ regua gui peteĩ ava peiporavo,

<sup>13</sup> mba'eta Jordão yakã py sacerdote kuery SENHOR yvy jave re ipo'aka va'e ayvu ryru reraa kuery oguejy ramove yy ojeaya 'rã, yvate katy gui yy ou 'rã va'ekue ijaty ramo – he'i.

<sup>14</sup> Ha'e gui ma ha'e kuery guekoa gui oguata oje'oivy Jordão yakã oaxa aguã. Ha'e kuery renonde sacerdote kuery ogueraa okuapy SENHOR ayvu ryru.

<sup>15</sup> Hyru reraa kuery Jordão yakã py oguejy ramo yy py ipy inhaký. (Mba'eta Jordão ma ára pyau nhavõ tyguaxu raxa va'e, hembe ikuai va'e áry rupi guive.)

<sup>16</sup> Ha'e gui yy yvate katy gui ou va'e opyta. Adã tetã gui mombyry'i ono'õ, Zaretã rexei oĩ va'e katy. Ha'e rã yvy joja reia regua ye'ẽ ro katy oxyryague ma typa. Ha'e ramo ha'e kuery oaxa oje'oivy, Jericó tetã rexei'i ae.

<sup>17</sup> Ha'e rã sacerdote kuery SENHOR ayvu ryru reraa va'e ma Jordão yakã mbyte py opyta okuapy. Ha'e ramia ja Israel kuery ha'e javi ipiru reia rupi oaxa.

## 4

### *Jordão yakã mbyte gui doze ita oguenoëague*

<sup>1</sup> Ha'e kuery ha'e javi Jordão yakã oaxapa ma ramo SENHOR ijayvu Josué pe. Ha'e vy aipoe'i:

– Eiporavo doze avakue, peteĩ-teĩ regua gui eiporavo peteĩ.

<sup>3</sup> Ha'e va'e kuery pe ndeayvu vy aipo're: “Apy Jordão yakã mbyte gui penoẽ doze ita sacerdote kuery opyta vy opyrõ okuapya gui. Ha'e va'e ma peraa vy pemboaty kova'e pytû pepyta aguã py”, 're.

<sup>4</sup> Ha'e rami rã Josué oenoĩ doze avakue Israel kuery regua oiporavo va'ekue,

<sup>5</sup> peteĩ-teĩ regua gui peteĩ oiporavo. Ha'e vy aipoe'i ha'e kuery pe:

– Tapeo Jordão yakã mbyte py peẽ ranhe SENHOR Penderuete ayvu ryru reraa kuery renonde, ha'e peteĩ-teĩ pendeaxi'y áry peupi 'rã heravy peteĩ ita, Israel kuery regua mbovy pa ikuiaia rami vy.

<sup>6</sup> Ha'e va'e ma pendera'y kuery mbyte oĩ 'rã penema'endu'a aguã. Ha'e gui pendera'y kuery raka'e rã ikuai va'e oporandu vy "Mba'erã tu kova'e ita?" he'i ramo

<sup>7</sup> aipopeje 'rã ha'e kuery pe: " SENHOR ayvu ryru renonde ma Jordão yakã ojeaya raka'e. Hyru ogueroaxaa ramove yy ojeaya. Ha'e rami rire kova'e ita ma raka'e rã peve guarã ikuai Israel kuery ima'endu'a aguã", peje 'rã – he'i.

<sup>8</sup> Ha'e rami rã Israel kuery ojapo Josué ijayvua. Ha'e vy Jordão yakã mbyte gui ojopy heravy doze ita, Josué pe SENHOR aipoe'iague rami vy, Israel kuery regua mbovy pa ikuiaia rami vy. Ha'e va'e ma ha'e kuery optyta aguã py ogueraa vy omboaty ha'e py.

<sup>9</sup> Ha'e gui Jordão yakã mbyte py ma Josué ju doze ita omopu'ã, sacerdote kuery ayvu ryru reraa va'e optyta vy opyrõague py ae. Ha'e va'e ita ma aÿ peve ikuai ha'e py.\*

<sup>10</sup> Mba'eta sacerdote hyru reraa kuery ma Jordão mbyte optyta okuapy, Moisés pe SENHOR aipoe'i ukaague ojeupitypa peve, heta va'e kuery pe Josué ijayvuague rami vy. Ha'e ramo heta va'e kuery oaxapa pojava.

<sup>11</sup> Heta va'e kuery ha'e javi yakã oaxapa ma ramo sacerdote kuery optyaague gui oguenoẽ ju SENHOR ayvu ryru, pavẽ oexaa py.

<sup>12</sup> Israel kuery renonde oaxa avi jogueravy Rúben regua, Gade ha'e Manassés regua mbyte rupi oja'o va'ekue. Tembiporu reve meme oaxa, Moisés ijayvuague rami vy.

<sup>13</sup> SENHOR renonde quarenta mil xondaro rãnda'u oaxa joe opu'ã aguã katy, Jericó tetã yvýry nhuñdy reia py.

<sup>14</sup> Ha'e va'e ára ma SENHOR ombovate Josué Israel kuery pavẽ oexaa py. Ha'e ramo omboete okuapy oikovea pukukue re, Moisés omboeteague rami avi.

<sup>15</sup> Ha'e gui SENHOR aipoe'i Josué pe:

<sup>16</sup> — Aipo're sacerdote kuery xeayvu ryru reraa va'e pe Jordão yakã gui oguenoẽ aguã – he'i.

<sup>17</sup> Ha'e ramo sacerdote kuery pe Josué ijayvu vy

— Peẽ ju ke Jordão yakã gui – he'i ramo

<sup>18</sup> sacerdote kuery ayvu ryru reraa va'e ma Jordão mbyte gui oẽmba. Ha'e gui yvy pirua re ha'e kuery opyrõ ramove Jordão yakã oïague rupi ju oxyry. Yy rembe ha'e javi rupi oxyry, oïague rami ae ju.

<sup>19</sup> Dez-a jaxy jypy'ia ára ha'e kuery oje'oi Jordão yakã gui. Gilgal py ju optyta okuapy, Jericó rexei kuaray oua katy.

<sup>20</sup> Doze ita Jordão yakã gui oguenoẽ va'ekue ma Josué omboaty Gilgal py.

<sup>21</sup> Ha'e vy aipoe'i Israel kuery pe:

— Raka'e rã pendera'y kuery pendevy pe oporandu vy aipoe'i 'rã: "Mba'erã tu kova'e ita?" he'i ramo

<sup>22</sup> pendera'y kuery pe pemombe'u vy aipopeje 'rã: "Peva'e Jordão yakã ma Israel kuery oaxa raka'e ipirua rupi.

<sup>23</sup> Mba'eta peẽ kuery renonde SENHOR Nhanderuete ojapo Jordão yakã ipiru aguã rami, peaxapa peve. Mba'eta ore kuery renonde SENHOR Nhanderuete Ye'ẽ Pytã omombiru karamboae roaxapa peve, ha'e gui ha'ekue rami ae ju ojapo orevy,

<sup>24</sup> yvy regua kuery ha'e javi oikuua aguã SENHOR ipo'akapa va'ea, ha'e peẽ voi SENHOR Penderuete renonde pejererokyjea rupi pendekuai aguã, raka'e rã peve."

## 5

### *Israel kuery pire omboia ague*

<sup>1</sup> Ha'e va'e yvy regua huvixa kuery oendupa ha'e nunga. Amorreu kuery Jordão yakã kyvõ katy ikuai va'e kuaray oikea katy, ha'e cananeu kuery ye'ẽ yvýry ikuai va'e ruvixa kuery ha'e javi oendu Israel kuery renonde Jordão yakã SENHOR omombirupaque, ha'e

---

\* <sup>4:9</sup> "Aÿ peve" he'i mba'eta kova'e kuaxia omboparaa jave ita optyta teri.

kuery oaxapa peve. Ha'e va'e oendu vy ipy'a kangypa Israel kuery káuxa, noīvei ma imbaraeterá.

<sup>2</sup> Ha'e va'e jave py SENHOR aipoe'i Josué pe:

— Pejapo kyxe ita gui, ha'e emboi uka Israel kuery pire — he'i.\*

<sup>3</sup> Ha'e ramo Josué ojapo uka kyxe ita gui, ha'e vy omboi uka Israel kuery pire, Gibeate-Haralote py.

<sup>4</sup> Pova'e nunga rupi ae Josué omboi uka ipire, mba'eta Egito yvy gui oẽ va'ekue tekao e'ŷa re oguataa rupi omanomba ma rire, avakue xondaro ikuai va'ekue ha'e javi.

<sup>5</sup> Mba'eta Egito yvy gui oẽ va'e kuery ma opire omboi uka va'ekue meme, ha'e rã oẽ va'ekue gui tekao e'ŷa rupi oiko'i va'ekue ma nomboi ukai.

<sup>6</sup> Quarenta ma'etŷ re Israel kuery ikuai tekao e'ŷa rupi, avakue xondaro ikuai va'e Egito gui oẽ va'ekue omanomba peve, SENHOR nonhe'ẽ rendui rire. Ha'e va'e kuery pe ma SENHOR oura reve ijayvu yvy neĩ ndoexa ukai aguã re, tamoĩ kuery pe SENHOR ome'ẽ aguã re oura reve ijayvuague, yvy kamby ha'e ei oata e'ŷa.

<sup>7</sup> Ha'e rami vy ha'e kuery rekovia ma ta'y kuery ju omoingo. Ha'e va'e kuery pire ae Josué omboi uka, nomboi ukai teri va'ekue ikuai ramo, oguataa rupi nomboiai rire.

<sup>8</sup> Ha'e kuery pire omboipa ma rire opyta ranhe ikuiaia py ae, okuerapa peve.

<sup>9</sup> SENHOR aipoe'ive ju Josué pe:

— Kova'e ára peẽ kuery gui aipe'a Egito yvy re escravo pendekuai vy peximba reiague — he'i.

Ha'e nunga rupi ha'e va'e tekao Gilgal hery aŷ peve.\*

### *Páscoa ára py ngaru ojapo okuapyague*

<sup>10</sup> Gilgal py Israel kuery ikuai jave ojapo okuapy ngaru Páscoa ára. Ha'e va'e jaxy catorze ára va'e ka'arukue py ojapo, Jericó yvýry nhuñdy reia oĩ va'e py.

<sup>11</sup> Páscoa ára rire ko'ẽ jevy ho'u okuapy mba'emo aju ha'e va'e yvy re ojou va'ekue: mbojape imbovua e'ŷ va'e ha'e mba'emo ra'yí oaimbe va'ekue ho'u okuapy ha'e va'e ára.

<sup>12</sup> Ha'e va'e yvy regua mba'emo aju ho'ua ára rire'ive ma opa maná.† Ha'e rã Israel kuery ndojouvei. Ha'e rami 'rágue py ha'e va'e ma'etŷ guive okaru okuapy Canaã yvy re mba'emo aju ikuai va'e re.

### *Josué pe SENHOR pegua xondaro ruvixa ojekuaa ukaague*

<sup>13</sup> Jericó yvýry Josué oikoa py oma'ẽ vy guenonde oexa peteĩ ava opu'ã ho'amy va'e, opo py kyxe hyru gui oekyi va'ekue reve. Ha'e va'e re Josué onhemboja vy oporandu ixupe:

— Ndee pa orea katygua tyrã pa orerovaigua reiko?

<sup>14</sup> Ha'e rã ombovai:

— Any. Xee ma SENHOR pegua xondaro kuery ruvixa aŷ aju va'e — he'i.

Ha'e ramo Josué ojero'a vy ngova omovaẽ yvy re omboete vy. Ha'e vy oporanduve ju ixupe:

— Xeruvixa, mba'e 're 'rã tu xee nerembiguai pe?

<sup>15</sup> SENHOR pegua xondaro kuery ruvixa ombovai Josué pe:

— Emboi ndepy regua, mba'eta yvy reĩa ma iky'a e'ŷ va'e — he'i.

Ha'e ramo Josué ojapo ha'e rami.

## 6

### *Jericó tetã oitypaague*

<sup>1</sup> Ha'e gui Jericó rokẽ ma Israel kuery gui onhemboty porã. Avave rei noẽai, neĩ ndoikeai 'rã.

---

\* 5:2 Gênesis 17.10-14 ha'e Êxodo 12.43-48 \* 5:9 Tery Gilgal nhaendu rã "Oipe'a" 'ea rami. † 5:12 Maná ma Israel kuery rembi'urã Nhanderuete yva gui ombou va'ekue (Êxodo 16).

<sup>2</sup> Ha'e ramo SENHOR aipoe'i Josué pe:

— Ma'ë, ndepo py amboaxa ma Jericó tetã, huvixa ha'e ixupegua ipy'a guaxukueve guive.

<sup>3</sup> Ha'e rã peẽ avakue joe opu'ãa pygua kuery ha'e javive ma pembojere 'rã tetã peteĩgue. Ha'e rami ma mboapy meme ára re 'rã pejapo.

<sup>4</sup> Xeayvu ryru renonde ma sete sacerdote ogueraa 'rã sete mimby guaxu vexa'i ava rakuakue guigua. Ha'e gui sete araa py ma sete-kue 'rã pembojere tetã, ha'e sacerdote kuery omonhe'ẽ 'rã mimby guaxu.

<sup>5</sup> Ha'e gui mimby guaxu vexa'i ava rakuakue guigua omonhe'ẽ puku rã pendu vy peẽ kuery ha'e javive pejapukai ratã 'rã. Ha'e gui tetã kora ho'apa 'rã yvy katy, ha'e peẽ kuery pejeupi 'rã hi'áry rupi, peteĩ-teĩ penerononde katy — he'i.

<sup>6</sup> Ha'e ramo Num ra'y Josué oenoĩ sacerdote kuery. Ha'e vy aipoe'i ha'e kuery pe:

— Pejopy heravy SENHOR ayvu ryru. Ha'e gui SENHOR ayvu ryru renonde ma sete sacerdote togueraa sete mimby guaxu vexa'i ava rakuakue guigua — he'i.

<sup>7</sup> Heta va'e kuery pe ju aipoe'i:

— Tapeo, pembojere tetã. Ha'e rã tembiporu revegua kuery ma SENHOR ayvu ryru renonde toje'oi — he'i.

<sup>8</sup> Josué ijayvuague rami heta va'e kuery oje'oi. SENHOR renonde sete sacerdote ranhe oaxa jogueravy sete mimby guaxu vexa'i ava rakuakue guigua reve, mimby guaxu omonhe'ẽ jogueravy. Ha'e rã hakykue ma SENHOR ayvu ryru ogueraa.

<sup>9</sup> Ha'e gui sacerdote kuery mimby guaxu omonhe'ẽ va'e renonde ma avakue tembiporu revegua oje'oi. Takykue ete oo va'e ma hyru rakykue oje'oi. Ha'e rã mimby guaxu omonhe'ẽ ae tema jogueravy.

<sup>10</sup> Heta va'e kuery pe Josué ijayvu vy aipoe'i:

— Pejapukai eme, penhendu eme, neĩ peteĩ ayvu toẽ eme pendejuru gui. Xee xeayvu vy "Pejapukai ke" ha'e ramo mae ma pejapukai — he'i.

<sup>11</sup> Ha'e rami py SENHOR ayvu ryru revegua kuery ma peteĩgue ombojere jogueravy tetã, ha'e ojevy ju. Tekoa py ju ovaẽ. Ha'e vy oke okuapy ha'e py.

<sup>12</sup> Ko'ẽ rai Josué opu'ã rã sacerdote kuery ogueraa ju okuapy SENHOR ayvu ryru.

<sup>13</sup> SENHOR ayvu ryru renonde sete sacerdote kuery sete mimby guaxu vexa'i ava rakuakue guigua omonhe'ẽ tema jogueravy. Ha'e kuery renonde ma avakue tembiporu revegua oje'oi. Ha'e rã takykueguia kuery ma SENHOR ayvu ryru rakykue oje'oi. Ha'e ramia ja mimby omonhe'ẽ tema jogueravy.

<sup>14</sup> Mokoĩ araa py teĩgue ju ha'e kuery ombojere tetã, ha'e ojevypa ju tekao py. Ha'e rami ma mboapy meme ára re ojapo okuapy.

<sup>15</sup> Sete araa py ma ko'ẽ ju hexakã ramove oje'oi ju. Ha'ekue rami ae ombojere tetã, sete-kue. Ha'e va'e ára anho sete-kue ombojere tetã.

<sup>16</sup> Ha'e gui sete-kuea py sacerdote kuery mimby guaxu omonhe'ẽ jave Josué aipoe'i heta va'e kuery pe:

— Pejapukai ke, mba'eta SENHOR omboaxa ma tetã pendepo py.

<sup>17</sup> Pemomba ete aguã rami oĩ, ha'e py ikuai va'e ha'e javi voi. Oikove va'erã ma Raabe itavy rei va'ekue anho, hoo pygua kuery guive, mba'eta avakue yvy re oikuua pota aguã romondouka va'ekue onhomí rire.

<sup>18</sup> Ha'e rami avi pejepoyvu ke pejopy e'ŷ aguã mba'emo pemomba aguã rami omboaxa pyre, Israel kuery rekoia ayvu vaipy pejapo e'ŷ aguã, nda'evei rei va'e perua py.

<sup>19</sup> Ha'e rã prata ha'e ouro guigua, ha'e mba'emo ryru overa va'e ha'e ferro guigua ha'e javi ma SENHOR peguarã ae 'rã opyta. Ha'e nunga ma jaraa 'rã ixupe guarã nhamoĩ porã aguã — he'i.

<sup>20</sup> Ha'e ramo heta va'e kuery ojapukai, ha'e sacerdote kuery omonhe'ẽ mimby guaxu. Omonhe'ẽ rã ha'e kuery oendu vy ojapukai ratã okuapy. Ha'e ramo tetã kora ho'apa.

Hi'áry ha'e kuery ojeupi jogueravy vy oikepa tetã py, peteĩ-teĩ ooa katy ae. Ha'e rami py oipe'a tetã.

<sup>21</sup> Tetã py ikuai va'e ma guive rã ojukapa kyxe py: avakue, kunhague, kyrígue, tujakue, mymba kuery vaka, vexa'i ha'e mburika kuery guive.

### *Raabe ogueraaa jepeague*

<sup>22</sup> Ha'e gui Josué ijayvu mokoĩ ava yvy re oikuuaa pota aguã oo va'ekue pe. Ha'e vy aipoe'i:

— Peike kunha itavy rei va'ekue ro py, penoẽ ha'e gui, ha'e javi ikuai va'e reve, ixupe peuraague rami vy — he'i.

<sup>23</sup> Ha'e ramo kunumigue oikuuaa pota va'ekue ma oo py oike vy oguenoẽ Raabe, ha'e tuu, ixy, ikyvy kuery, ha'e oguereko va'e ha'e javi. Hetarã kuery ha'e javi ogueraaa Israel kuery rekoaa katy'i ikuai aguã.

<sup>24</sup> Ha'e rã tetã ha'e opa mba'e ha'e py ikuai va'e ma oapypa tata py. Ha'e rã prata, ouro, ha'e overa va'e guigua, ferro guigua anho oguenoẽ SENHOR ropy guarã.

<sup>25</sup> Josué omoingove itavy rei va'ekue Raabe, tuu ro pygua kuery, ha'e opa mba'e oguereko va'e voi. Ha'e rami rire Israel kuery mbyte ha'e kuery ikuai aÿ peve, Jericó tetã re oikuuaa pota aguã Josué omondouka va'ekue onhomí rire.

<sup>26</sup> Ha'e va'e jave py Josué ojapo heta va'e kuery oura vy aipoe'i okuapy aguã: “Ayvu vaipy toiko SENHOR renonde ava opu'ã vy kova'e tetã Jericó ojapo jevy va'e. Ijytarã omo'ã va'e omokanh'y'rã gua'y jypyguia, ha'e rã tetã rokẽ omoĩ jevy va'e ma omokanh'y'rã kyríve va'e” he'i okuapy aguã.

<sup>27</sup> Ha'e rami SENHOR oiko Josué reve. Ha'e ramo heko oendupaa yvy jave re.

## 7

### *Acã ojejavvyague káuxa Israel kuery Ai tekao re nda'ipo'akaiague*

<sup>1</sup> Ha'e rami teĩ Israel kuery ikuai aguã va'ekue rupi nda'ikuai, mba'emo omomba pyrã re nda'evei vy. Mba'eta Judá regua Carmi ra'y Acã, Zabdi ramymino ha'e Zera ramymino jevy va'e ma ojeupe guarã ojopy mba'emo omomba aguã rami omboaxa pyre. Ha'e nunga rupi SENHOR poxya hendy Israel kuery rovai.

<sup>2</sup> Ha'e rami jave py Josué omondouka avakue Jericó gui Ai tekao katy. Ha'e va'e tekao ma Bete-Áven katy'i oĩ, Betel regua kuaray oua katy. Ha'e kuery pe ijayvu vy aipoe'i imondovoy:

— Tapeo, peiko kuaa yvy re — he'i ramo ha'e kuery oje'oi vy Ai tekao re oikuuaa pota.

<sup>3</sup> Josué oĩa py ha'e kuery ojevy vy aipoe'i ixupe:

— Heta va'e kuery ha'e javi e'ÿ toje'oi. Dois mil e'ÿ vy três mil avakue ete'i ri toje'oi Ai tekao mombaará. Emokane'õmba eme heta va'e kuery, nhanderovaigua kuery ha'e pygua mbovy'i ri ikuai rã — he'i okuapy.

<sup>4</sup> Ha'e rami vy ha'e kuery regua avakue ma três mil oje'oi. Ha'e rami ra'aga vy ha'e kuery onhamba Ai pygua avakue gui.

<sup>5</sup> Ha'e kuery regua avakue ma Ai pygua ojuka trinta e seis, ha'e omonha amboae kuery tetã kora rokẽ gui ita oguenoëaty oĩ va'e peve. Yvy'ã guy rupi oo vy ojukave. Ha'e nunga rupi heta va'e kuery ipy'a kangypa, yy rami rive opyta.

<sup>6</sup> Ha'e rami rã Josué omondoro oao, ha'e ho'a oupy ngova yvy re omovaẽ reve. Ka'aru peve onheno SENHOR ayvu ryru renonde. Israel mongetaaty kuery voi ha'e rami nda'evei vy oakã re omoĩ okuapy yvy ku'i.

<sup>7</sup> Josué ojapukai vy aipoe'i:

— Ah SENHOR Xeruete! Mba'e re tu rejapo kova'e kuery Jordão yakã oaxa aguã rami? Amorreu kuery po py oremboaxa aguã pa rejapo, ha'e kuery oremombia aguã rive? Jordão yakã rovai re ae ropyta aguã rovy'a va'e rire!

<sup>8</sup> Ah SENHOR, mba'e pa aipoa'e ta? Mba'eta Israel kuery onhamba rire ngovaigua kuery gui!

<sup>9</sup> Ha'e nunga ma cananeu kuery ha'e yvy re ikuai va'e ha'e javi oendo vy orejoko 'rã jogueruvy, ojapo 'rã orerery re na'ima'endu'aavei aguã rami yvy re. Ha'e gui ha'e rami vy mba'e 'rã tu rejapo nderery ipo'akapa va'e re ima'endu'aa aguã?

<sup>10</sup> Ha'e ramo SENHOR aipoe'i Josué pe:

— Epu'ã ke. Mba'e re tu evoko rami re'a rejupy nderova yvy re?

<sup>11</sup> Israel kuery ojejavy, nda'ikuaxei xereve guarã ajapo va'ekue rami. Ha'e rami vy ojopy omomba pyrã regua. Imonda, ijapu, ha'e omba'e rei-rei guýry onhomí imoiny.

<sup>12</sup> Ha'e nunga rupi ae Israel kuery nopu'ã kuaavei kuri ngovaigua kuery renonde. Onhamba oje'oivy amboae regua renonde gui, Israel kuery ae ju omomba pyrã ojeapo. Peẽ kuery mbyte gui mba'emo onhomí mbyre peipe'a e'ÿa ja xee ndaikovei ma 'rã peẽ kuery reve.

<sup>13</sup> Eiko katu ke, eiky'a'o uka heta va'e kuery. Aipo're ha'e kuery pe: "Pejeky'a'o ke ko'ë rã guarã. Mba'eta po rami Israel kuery Ruete ijayvu: Peẽ Israel kuery, peẽ kuery mbyte oï omomba pyrã va'ekue. Penembyte gui mba'emo omomba pyrã peipe'a e'ÿa ja nda'evei penderovaigua kuery renonde pepu'ã aguã.

<sup>14</sup> Aÿ ma ko'ë rã aje'ive'i reve pejexa ukapa 'rã peteñ-teñ regua. Ha'e ramo xorte rupi SENHOR oikuaa uka 'rã peteñ regua. Ha'e va'e kuery ma ojexa uka 'rã, peteñ-teñ tekoá pygua. Ha'e ramo SENHOR oikuaa uka 'rã peteñ tekoá. Ha'e va'e kuery ju peteñ-teñ oo rupi 'rã ojexa uka. Ha'e ramo SENHOR oikuaa uka 'rã peteñ oo. Ha'e va'e gui ma peteñ-teñ ava 'rã ojexa uka.

<sup>15</sup> Ha'e gui mba'emo omomba pyrã jopyare pejou va'e rei peapypa 'rã tata py, opa mba'e oguerekva'e guive, mba'eta SENHOR guexeve guarã ojapo va'ekue rami ndoikoxei vy ha'eve'ÿ va'e ojapo Israel kuery mbyte", 're 'rã.

<sup>16</sup> Ha'e rami rã Josué opu'ã ko'ë rai. Ha'e vy ojapo Israel kuery ojexa ukapa aguã rami, peteñ-teñ regua. Ha'e gui xortea oexa rã Judá regua ae ra'e.

<sup>17</sup> Ha'e gui Judá regua kuery ojexa uka rã Zera ramymino kuery re ojekuaa. Ha'e gui Zera ramymino kuery peteñ-teñ ojexa uka rã Zabdi ro pygua kuery re ojekuaa.

<sup>18</sup> Ha'e gui ha'e va'e ro pygua kuery ojexa uka rã ojekuaa Judá regua Carmi ra'y Acã, Zabdi ramymino, Zera ramymino jevy va'e re.

<sup>19</sup> Ha'e gui Acã pe Josué aipoe'i:

— Xera'y, embojerovia na SENHOR Israel kuery Ruete, eporaei ixupe.\* Aÿ emombe'u porã xevy mba'e pa rejapoague. Enhenhomí eme — he'i.

<sup>20</sup> Ha'e ramo Josué pe Acã ombovai vy aipoe'i:

— Anheté ae ajejavý ra'e SENHOR Israel kuery Ruete pe, po rami ajapo.

<sup>21</sup> Mba'emo rei-reikue re ama'ë vy aexa peteñ ao puku Babilônia guigua iporâve va'e, ha'e duzentos hatã'i va'e prata guigua, ha'e gui peteñ ouro guigua meio quilo poyikue oï va'e. Ha'e nunga aipota vy ajopy karamboae. Ha'e vy anhomí yvy guýry, ajaty xeroguy mbyte py, ha'e iguýry ma prata oï — he'i.

<sup>22</sup> Ha'e ramo hoo katy Josué omondouka oikuaa pota va'erã kuery. Onha reve oje'oi hoguy katy. Ha'e py ma onhomí va'ekue oïmba ra'e, ha'e rã iguýry ma prata oï.

<sup>23</sup> Ha'e rami vy hoguy mbyte gui ojopypa heruvy vy ogueru Josué ha'e Israel kuery pavê ikuia py. SENHOR renonde omoïmba.

<sup>24</sup> Ha'e ramo Israel kuery ha'e javi reve Josué ogueraa Zera ra'y Acã. Ogueraa avi prata, ao puku, ouro guigua, ha'e ta'y kuery, tajy kuery, hymba kuery vaka, mburika, vexa'i kuery, ha'e gui hoguy, ha'e oguerekva'eekue ha'e javi. Acor yvyugua py ogueraapa.

<sup>25</sup> Ha'e py ma Josué aipoe'i:

\* **7:19** “Embojerovia Nhanderuete” he'i hery rupi omboura vy (João 9.24).

— Mba'e re tu orembojexavai rei ri? Kova'e ára ma ndee ju 'rã SENHOR nembojexavai — he'i ramo Israel kuery ha'e javi ojapipa ita py. Ojapipa ma rire oapypa tata py.

<sup>26</sup> Ha'e gui hetekue áry heta omboaty ita. Ha'e nunga ma aÿ peve oï ha'e py. Ha'e rami rire SENHOR nda'ipoxyvei. Ha'e va'e yvyugua ma Acor hery aÿ peve.<sup>†</sup>

## 8

### *Ai tekao omomba okuapyague*

<sup>1</sup> Ha'e gui SENHOR aipoe'i Josué pe:

— Ekyje eme, enhemondyi eme guive. Emboaty uka ju xondaro kuery ha'e javi, ha'e pepu'ã. Tapeo ju Ai tekao katy. Mba'eta ndepo py amboaxa ma Ai pygua huvixa ha'e ixupeguia kuery, hetã ha'e ijivy guive.

<sup>2</sup> Ha'e rã Ai tekao ha'e huvixa re rejapo 'rã Jericó ha'e huvixa re rejapoague rami. Ha'e rã imba'e rei-reikue ha'e hymba kuery ma ha'eve 'rã pendejeupe guarã peraa aguã. Peiko katu tetã kupe rupi penhemí aguã, tetã re pepu'ã aguã ha'e gui — he'i.

<sup>3</sup> Ha'e ramo Josué ha'e joe opu'ãa pygua kuery ha'e javi reve opu'ã vy oje'oi Ai pygua kuery re opu'ã aguã. Trinta mil avakue imbaraeteve va'e Josué oiporavo vy omondouka pyávy.

<sup>4</sup> Ha'e kuery pe ijayvu vy aipoe'i:

— Ma'ẽ, romoï 'rã penhemí aguã tetã re pepu'ã aguã ikupe katy gui. Mombyry vaipa e'ÿ ke pendekuai tetã gui. Ha'e javive peke eme.

<sup>5</sup> Ha'e rã xee ha'e xerupive ikuai va'e ha'e javi ma tetã renonde py rovaõ rai'i 'rã rokuapy. Ha'e gui kueve guare rami orea katy ha'e kuery oẽ ramo ma ronha 'rã ranhe ha'e kuery renonde gui.

<sup>6</sup> Tove ha'e kuery orerakykue tou tetã gui oẽmba peve. Mba'eta ha'e kuery “Onhamba po nhanerenonde gui” he'i 'rã kueve guare rami. Ha'e rami ae ronhamba ranhe 'rã tei.

<sup>7</sup> Ha'e gui ma peë kuery penhemiaque gui peju vy pendepo'aka 'rã tetã re. Mba'eta SENHOR Penderuete omboaxa 'rã pendepo py.

<sup>8</sup> Tetã re pendepo'aka ma vy pemboja 'rã tata, SENHOR ijayvuague rami vy. Ma'ẽ, ha'e rami aguã ae pendevy xeayvu — he'i.

<sup>9</sup> Ha'e gui Josué omondouka ramo ha'e kuery oo onhemi aguã py. Betel ha'e Ai mbyte opyta okuapy, Ai regua kuaray oikea katy. Ha'e rã Josué ma ha'e va'e pytû oaxa heta va'e kuery mbyte.

<sup>10</sup> Ko'ẽ rai ma jave Josué opu'ã vy oikuua pota ju heta va'e kuery re. Ha'e rire heta va'e kuery renonde oje'oi Israel mongetaaty kuery reve Ai tekao katy opu'ã aguã.

<sup>11</sup> Hupive oje'oi avakue joe opu'ãa pygua kuery ha'e javi. Ovaẽmba ma okuapy tetã renonde katy, Ai regua kuaray ijapu'a'ia katy opyta. Ha'e kuery ikuia ha'e Ai tekao pa'û re ma peteï yvyugua oï.

<sup>12</sup> Cinco mil avakue ogueraa avi vy Betel ha'e Ai mbyte py omoï onhemi aguã, tetã regua kuaray oikea katy.

<sup>13</sup> Ha'e rami vy ha'e javi omoï imbokuapy ikuai aguã py ae. Hetave ikuai tetã gui kuaray ijapu'a'ia katy, ha'e rã onhemi va'e kuery ma ka'arua katy opyta. Ha'e va'e pytû ma Josué oguejy yvyugua peve.

<sup>14</sup> Ai tekao pygua huvixa oexa vy tetã pygua kuery reve ikuai atã. Ko'ẽ rai jave opu'ã okuapy vy oo Israel kuery rovai yvy joja reia py opu'ã aguã katy. Ndoikuaai okuapy hovaigua kuery tetã kupe rupi onhemi okuapy.

<sup>15</sup> Ha'e kuery renonde Josué ha'e Israel kuery ha'e javi ojeapo ipo'akaa pyre rami. Ha'e vy onhamba tenonde gui, tekao e'ÿa katy tape oo va'e rupi oje'oi vy.

<sup>16</sup> Ha'e nunga rupi tetã pygua kuery ha'e javive oenoña omonha aguã. Ha'e ramo Josué kuery rakykue oje'oi, tetã gui mombyry'ia peve.

<sup>†</sup> 7:26 Tery Acor ma “Moangecko” 'ea ha'e kuery ayvu py.

**17** Neĩ peteĩ'i ava ndopytaai Ai py, neĩ Betel py, Israel kuery rakykue oje'oipa vy. Israel kuery rakykue oje'oi vy oeja tetā rokẽ ojepe'a reve.

**18** Ha'e ramo SENHOR aipoe'i Josué pe:

— Ai tekao katy eupi hu'y guaxu ndepo py rerekva'e, mba'eta amboaxa 'rã ndepo py — he'i.

Ha'e rã Josué hu'y guaxu opo py oguerekova'e oupi tetā katy.

**19** Opo oupi rã onhemi va'ekue oexa vy opu'ã pojava onhemiague gui. Tetā py ovaẽ vy oikepa. Omboja pojava tata ha'e py.

**20** Ha'e gui Ai tekao pygua avakue guakykue katy ojere vy oexa tetā mbyte gui hataxí opu'ã jekuaa rã yvate katy. Nda'evei onheguáa aguã guakykue katy neĩ guenonde katy, mba'eta tekao e'ŷa katy onha va'ekue voi ojere okuapy, hakykue rupi ou va'e kuery rovai opu'ã aguã.

**21** Ha'e gui Josué ha'e Israel kuery ha'e javive oexa okuapy onhemi va'ekue tetā re ipo'aka rã. Hataxí tetā gui opu'ã va'e avi oexa vy ojevy vy ojukapa Ai pygua avakue.

**22** Tetā gui amboae kuery voi oẽ ngovaigua kuery rovai opu'ã aguã. Ha'e ramo optya okuapy Israel kuery mbyte py. Amongue peteĩ henda katy gui ou, amboae ma amboae katy gui ou. Ha'e rami vy ojukapa. Peteĩve ndoikovei, neĩ ndoo jepei.

**23** Ha'e rã Ai pygua huvixa ma oikove reve ojopy vy ogueru okuapy Josué-a py.

**24** Ha'e rami py Israel kuery Ai pygua kuery ojukapa yvy'ãmbe reia py, tekao e'ŷa py hakykue oje'oiague rupi ae. Ojukapa kyxé py, omomba. Ha'e vy Israel kuery Ai tekao py ojevy vy ha'e py ju ojukapa kyxé py.

**25** Ha'e va'e ára ojuka va'ekue avakue kunhague reve vy ma doze mil, Ai pygua kuery ha'e javi.

**26** Mba'eta Ai pygua kuery omomba ete e'ŷa ja Josué nomboguejyi opo hu'y guaxu reve oupiague gui.

**27** Mymbakue ha'e mba'e rei-reikue ma Israel kuery ojeupe guarã ogueraa tetā gui, Josué pe SENHOR ijayvuague rami vy.

**28** Ai tekao re Josué tata omboja uka vy mba'emo vaikueaty ojapo raka'e rã peve guarã. Aŷ peve optya ha'e rami.

**29** Ha'e rã Ai pygua huvixa ma ojyryvipy, ha'e yvyra re oeja ka'aru peve. Kuaray oike jave mae ma Josué omboi uka he'õgue yvyra gui. Tetā kora rokẽ py omombo inony. Hi'áry omboaty reta ita aŷ peve oĩ va'erã.

### *Lei ogueroayvu jevyague*

**30** Ha'e ramo Ebal yvyty re Josué ojapo peteĩ altar SENHOR Israel kuery Ruete pe,

**31** Israel kuery pe SENHOR rembiguai Moisés ijayvuague rami vy. Mba'eta kuaxia lei oĩa re Moisés ombopara va'ekue po rami: "Xevygua altar pejapo 'rã ita omoatyrõ mbyre gui e'ŷ, tembiporu ferro guigua ndapeiporui 'rã" he'iague rami. Ha'e va'e áry ma mba'emo mymba oapy okuapy Senhor pe. Ome'ẽ avi hexeve peteĩ rami ikuai aguã regua.

**32** Ha'e py ita re ju Josué ombopara lei Israel kuery renonde Moisés ombopara va'ekue ogueroáva vy.

**33** Israel kuery ha'e javive ikuai ha'e py, imongetaaty kuery, yvatekueve ha'e nhomboayvu va'ety kuery reve. SENHOR guexeve guarã ojapo va'ekue ryru jovaive-ive rupi ikuai, levita regua sacerdote kuery hyru reraa va'e renonde. Yvy mboae regua ikuai avi, ha'e kuery mbyte py ae ikuai va'ekue reve. Ha'e kuery regua omboja'o mbyte rupi, amongue ikuai aguã Gerizim yvyty rexei, ha'e rã amboae kuery ma Ebal yvyty rexei ikuai aguã, SENHOR rembiguai Moisés ijayvuague rami meme, Israel regua ogueroayvu porã uka vy.

**34** Ha'e rire ogueroayvu lei re ayvu oĩ va'e ha'e javi, ayvu porã ha'e ayvu vai oĩ va'e, kuaxia re lei ipara oĩ rami vy.

<sup>35</sup> Israel kuery pavẽ nhomboatya py Josué neĩ peteĩ henda py ma voi ndogueroayvu e'ŷi Moisés ojapo ukaague regua. Kunhague, avakue'i ha'e kunhague'i pe voi ogueroayvu, ha'e yvy mboae regua kuery ha'e kuery mbyte ikuai va'e pe guive.

## 9

### *Gibeão pygua kuery nhombotavypaague*

<sup>1</sup> Ha'e nunga huvixa kuery oendu okuapy Jordão yakã kyvõguia ha'e javi: yvy'ãa rupi, yvy'ãmbe reia rupi, ye'ẽ tuvixa va'e rembe ha'e javi rupi, Líbano katy'i ikuai va'e, heteu kuery, amorreu, cananeu, ferezeu, heveu ha'e jebuseu kuery.

<sup>2</sup> Ha'e vy peteĩ rami ha'e kuery ono'õ okuapy Josué ha'e Israel kuery rovai opu'ã aguã.

<sup>3</sup> Ha'e gui Gibeão pygua kuery ma Jericó ha'e Ai teko re Josué ojapo va'ekue oendu vy

<sup>4</sup> jogueroayvu okuapy ombotavy aguã re. Ha'e vy Josué-a katy oje'oi huvixa rembiguai rami rive ojeapo vy. Voxa ymague anho ogueraa mburika áry, ha'e vinho ryru ymague, oxorokue ha'e ombojapa pyre.

<sup>5</sup> Opy re xapatu ymague, ombojapa pyre omoĩ, ha'e ojee ao yma py onhemonde. Mbojape tape rupi guarã ogueru va'e ma ipiru ha'e ivaipa va'e meme.

<sup>6</sup> Oje'oi Josué-a py Gilgal py hekoa oĩa py. Ha'e rami vy ixupe aipoe'i okuapy, ha'e Israel regua avakue ha'e javi pe:

— Rovaẽ apy orevvv mombyry oĩ va'e gui. Aŷ ma jajapo peẽ kuery reve peteĩ rami nhandekuai aguã — he'i okuapy.

<sup>7</sup> Ha'e ramo Israel regua avakue aipoe'i ha'e kuery heveu ikuai va'e pe:

— Xapy'a rei ore kuerya katy'i rupi ae pendekuai va'e. Ha'e rami rã mba'exa tu rojapo ta peẽ kuery reve peteĩ rami nhandekuai aguã?

<sup>8</sup> Ha'e kuery ombovai Josué pe:

— Ore ma nerembiguai roiko — he'i okuapy.

Josué peteĩgue ju oporandu ha'e kuery pe:

— Marã ramigua ete tu peẽ? Magui tu peju?

<sup>9</sup> Ombovai okuapy:

— Ore nerembiguai kuery ma orevvv mombyry ete oĩ va'e gui roju, SENHOR Nderuete omombe'ua rã roendu rire. Roendu heko, ha'e Egito yvy re ojapo va'ekue ha'e javi,

<sup>10</sup> ha'e amorreu kuery ruvixa mokoïve Jordão yakã rovai ikuai va'e re ojapo va'ekue: Hesbom pygua huvixa Seom, ha'e Basã Astarote py oĩ va'e pygua huvixa Ogue re.

<sup>11</sup> Ha'e nunga rupi oremongeta va'ety kuery ha'e orevvv re ikuai va'e ha'e javi aipoe'i orevy: “Peraa tembi'u tape rupi peguata rã guarã, ha'e tapeo ha'e kuery peovaexi aguã. Aipopeje ha'e kuery pe: ‘Ore kuery ma penerembiguai roiko. Ha'e gui aŷ ma pejapo ke peẽ kuery reve peteĩ rami nhandekuai aguã’, he'i va'ekue orevy.”

<sup>12</sup> Kova'e mbojape rogueru va'e ma haku teri reve rojopy va'ekue orero gui, peẽ kuerya py rovaẽ aguã rojua ára. Ha'e gui ma'ë, apy oĩ ipirupa ha'e ivaipa ma.

<sup>13</sup> Ha'e gui kova'e vinho ryru ma ipyau va'ekue vinho romboyrus jave, aŷ ma oxoropa ma. Ha'e kova'e oreao, ha'e xapatu voi inhymamba ma, mombyry ete gui roguata ramo — he'i okuapy.

<sup>14</sup> Ha'e ramo Israel kuery ha'e kuery rembi'u oa'anga teĩ SENHOR pe ma noporandui.

<sup>15</sup> Ha'e rami vy ha'e kuery reve Josué ojapo peteĩ rami ikuai aguã, ojapo ha'e kuery okuave aguã rami. Ha'e Israel regua yvatekueve voi oura okuapy ha'e rami.

<sup>16</sup> Ha'e kuery reve peteĩ rami ikuai aguã ojapo ma rire mboapy araa py oikuaa ha'e'i rupi ae ikuai ra'ea, ha'e kuery mbyte ikuai va'e ae.

<sup>17</sup> Mba'eta Israel kuery oo vy ovaẽ ha'e kuery retã py mboapy araa py ete'i. Ha'e kuery retã ma Gibeão, Cefira, Beerote ha'e Quiriate-Jearim.

<sup>18</sup> Ha'e rami teĩ Israel kuery ndojukai, SENHOR Israel kuery Ruete rery rupi yvatekueve oura rire. Ha'e ramo hetu va'e kuery ijayvu vai okuapy yvatekueve rovai.

**19** Ha'e ramo yvatekueve aipoe'i okuapy heta va'e kuery ha'e javi pe:

— Ore ma SENHOR Israel kuery Ruete rery rupi roura ae ma ha'e kuery pe. Ha'e nunga rupi nda'evei ha'e kuery re nhandepo nhamoï aguã.

**20** Ha'e rami avi po rami 'rã jajapo ha'e kuery re: Nhamoingove 'rã, roura rire nhande'áry Nhanderuete poxya ou e'ý aguã.

**21** Ta'ikuai tema – he'i yvatekueve ha'e kuery pe. Ha'e rami rire Gibeão pygua kuery ma yxakã mbovoarã ha'e yy renoëarã ikuai heta va'e kuery pavẽ pe, yvatekueve ijayvuague rami vy.

**22** Ha'e gui Josué oenoïmba vy aipoe'i ha'e kuery pe:

— Mba'ê re tu oreembotavy vy “Peẽ kuerya gui mombyry orerekaoa va'e” peje va'ekue, ore kuerya katy'i ae pendekoa va'eri?

**23** Ha'e nunga rupi aý ma ayvu vaipy pendekuai. Ore kuery pegua escravo pendekuai riae 'rã yxakã pembovo ha'e yy penoë aguã Xeruete ro pyguarã – he'i.

**24** Ha'e kuery ombovai Josué pe:

— Rombotavya rupi oreayvu va'ekue, mba'eta ore nerembiguai kuery roendu omombe'ua rã anhetê SENHOR Nderuete guembiguai Moisés pe ijayvu pendevy ome'ë aguã kova'e yvy ha'e javi, ha'e peẽ kuery renonde omomba aguã yvy re ikuai va'e ha'e javi. Peẽ kuery orejukapa gui rokyje vy ae orekuai va'ekue ha'e rami.

**25** Ma'ë, ndepo py orekuai. Ha'evea rami ha'e anhetê rupi orerereko – he'i okuapy.

**26** Ha'e rami rã Josué oguereko ha'e rami. Ogueraa jepepa Israel kuery po gui, ndojuka ukai.

**27** Ha'e va'e ára guive Josué omoingo yxakã mbovoarã ha'e yy renoëarã heta va'e kuery pe, ha'e SENHOR pegua altar pyguarã. Aý peve ha'e rami ikuai, henda Nhanderuete oiporavoague py ae.

## 10

### *Peteñ nhiruñ huvixa Gibeão rovai opu'ã okuapyague*

**1** Ha'e gui Jerusalém pygua huvixa Adoni-Zedeque oendu Ai tekoia re Josué kuery ipo'aka vy omomba eteague. Oendu avi Ai ha'e huvixa re ojapoague, Jericó ha'e ha'e pygua huvixa re ojapoague rami avi. Oendu avi Gibeão pygua kuery Israel kuery reve peteñ rami ikuai aguã ojapoague, ha'e ha'e kuery mbyte ikuiaia. Ha'e nunga oendu vy **2** okyje vaipa okuapy, mba'eta Gibeão ma tetã guaxu oĩ huvixave oĩa ramigua, Ai tekoia gui tuvixave va'e. Oíkuaa avi ha'e pygua ipy'a guaxukue memea.

**3** Ha'e ramo Jerusalém pygua huvixa Adoni-Zedeque omondouka guembiguai Hoão Hebron pygua huvixaa py, ha'e Jarmute pygua huvixa Pirã hery va'ea py, Laquis pygua huvixa Jafia-a py, ha'e Eglom pygua huvixa Debir-a py. Ha'e vy ha'e kuery pe aipoe'i uka:

**4** — Peju ke xea py, xepytyvõ Gibeão pygua kuery jajukapa aguã. Mba'eta ha'e kuery ma Josué ha'e Israel kuery reve ojapo raka'e peteñ rami ikuai aguã – he'i.

**5** Ha'e rami rã amorreu regua huvixa kuery nhomboaty vy oje'oi peteñ nhiruñ: Jerusalém pygua huvixa, Hebron, Jarmute, Laquis ha'e Eglom pygua huvixa. Xondaro kuery ha'e javi reve oje'oi vy Gibeão katy'i ikuai. Ha'e gui opu'ã okuapy ha'e pygua kuery rovai.

### *Gibeão pygua kuery Josué pe ojepy ukaague*

**6** Ha'e ramo Gibeão pygua avakue omondouka oayvu reraa Josué kuery rekaoa Gilgal py. Ha'e vy aipoe'i ixupe:

— Orereja eme ore ae'i, nerembiguai orekuai rã. Eju pojava orea katy, orereraa jepe, oreypytyvõ ke. Mba'eta amorreu kuery yvytya rupi ikuai va'e regua huvixa kuery reve ono'õ ma okuapy orere opu'ã aguã – he'i.

**7** Ha'e ramo Josué ma Gilgal gui oje'oi oxondaro kuery ha'e ipy'a guaxukue ha'e javi reve.

<sup>8</sup> Ha'e gui SENHOR aipoe'i Josué pe:

— Ekyje eme ha'e kuery gui, mba'eta ndepo py amboaxapa. Neĩ peteĩve nda'ipo'akai 'rã ndere — he'i.

<sup>9</sup> Pytû mbukukue re Gilgal gui Josué oguata ovy vy ovaẽ xapy'a ha'e kuerya py.

<sup>10</sup> SENHOR omoĩ vai Israel kuery renonde, ojapo ojuka reta aguã rami Gibeão py. Ha'e rami vy omonha Bete-Horom katy tape oo va'e rupi, Azeca ha'e Maquedá peve oitypa oje'oivy.

<sup>11</sup> Ha'e gui Israel kuery gui Bete-Horom yvy'ã guy katy onha oje'oivy jave ma ha'e kuery áry SENHOR yva guiombo'oky amandau guaxu Azeca ovaẽa peve. Ha'e ramo omanomba. Israel kuery kyxe py ojuka va'ekue gui hetave amandau gui omano va'ekue.

### *Kuaray ha'e jaxy opyta ranheague*

<sup>12</sup> Israel kuery po py SENHOR amorreuu kuery omboaxaa ára ma Josué ojapukai SENHOR pe. Ha'e vy Israel kuery oendua py aipoe'i:

— Kuaray, epyta ke Gibeão áry, ha'e ndee jaxy, epyta Aijalom yvyugua áry — he'ia rami

<sup>13</sup> kuaray opyta, jaxy guive, ngovaigua kuery ojukapa peve. Yva mbyte py ae kuaray opyta, are oike aguã peteĩ ára ha'e javi re rai'i. Kuaxia heko porã va'e rekokue oĩa re ha'e nunga ipara oiny.

<sup>14</sup> Ha'e va'e'ý mbove ha'e va'e ramigua ára ndoikoi, neĩ ha'e va'e rire, SENHOR peteĩ ava ojapukai rã onhe'ẽ rendu vy ojapo va'ekue ramigua. Mba'eta SENHOR ae Israel kuery re oma'ẽ vy opu'ã hovaigua kuery re.

<sup>15</sup> Ha'e gui ma Israel kuery ha'e javi reve Josué ojevy guekoa Gilgal py oĩ va'e py.

### *Peteĩ nhiruĩ huvixa Josué omботу ukapa rire ojukaague*

<sup>16</sup> Ha'e rã peteĩ nhiruĩve huvixa kuery ma onha vy onhemimba Maquedá py itakua oĩ va'e py.

<sup>17</sup> Ha'e ramo Josué pe omombe'ua vy

— Peteĩ nhiruĩve huvixa kuery ojoua ra'e Maquedá py itakua oĩ va'e py onhemi va'ekue 'ea.

<sup>18</sup> Ha'e gui Josué aipoe'i:

— Itakua juru mbotyarã ha'vy pembojere peteĩ ita guaxu, ha'e pemoĩ avakue harðarã. Ha'e rã peẽ ae ma pepyta eme ha'e py.

<sup>19</sup> Ha'e rami 'rãgue py tapeo pendovaigua kuery rakykue, pejukapa takykue oo va'e-va'e. Pemoinge eme ha'e kuery retã py, mba'eta SENHOR Penderuete omboaxa ma pendepo py — he'i.

<sup>20</sup> Ha'e rami py Israel kuery reve Josué ojuka reta, omomba. Ha'e rami avi ha'e kuery regua amongue ete'i oo jepe tetã ikorapa va'e py oike vy.

<sup>21</sup> Ha'e gui Josué oĩa katy ixupegua kuery ha'e javi ojevy okuapy ovy'a reve, Maquedá py ikuaiague py ae. Ha'e rami rire avave rei nda'ijayvu kuaavei Israel kuery rovai.

<sup>22</sup> Ha'e va'e rire mae Josué aipoe'i:

— Peipe'a ke itakua juru gui ita guaxu oĩ va'e, ha'e xea py ju Peru peteĩ nhiruĩve huvixa kuery ha'e gui.

<sup>23</sup> Ha'e ramo ma ha'e rami ikuai vy itakua gui ogueru peteĩ nhiruĩve huvixa: Jerusalém pygua, Hebrom, Jarmute, Laquis ha'e Eglom pygua.

<sup>24</sup> Josué-a py huvixa kuery ogueru ma ramo oenoĩmba avakue Israel regua ha'e javi. Ha'e vy aipoe'i xondaro ruvixa kuery hexeve oje'oi va'ekue pe:

— Peju ke. Pepyrõ kova'e huvixa kuery aju'y re — he'i ramo ha'e kuery ou vy opyrõ ha'e kuery aju'y re.

<sup>25</sup> Ha'e ramo Josué aipoe'i ha'e kuery pe:

— Pekyje eme, penhemondyi eme guive. Penembaraete ha'e pendepy'a guaxu, mba'eta guĩ rami ae SENHOR ojapo 'rã pendovaigua kuery ha'e javi re, ha'e kuery rovai pepu'ãa va'e re rei — he'i.

<sup>26</sup> Ha'e gui Josué oikutu vy ojukapa. Ha'e vy yvyra re oupi imoiny peteñ nhiruñve. Hetekue yvyra re ovava okuapy ka'aru peve.

<sup>27</sup> Kuaray oike ma jave Josué omboguejy uka yvyra gui. Ha'e rã omombo itakua onhemiague py ae. Ha'e gui itakua juru py omboaty reta ita guaxu. Ha'ekue py teri oĩ aÿ peve.

### *Sete huvixa re vyvoi ju Josué kuery ipo'akaague*

<sup>28</sup> Ha'e va'e árave Josué ipo'aka Maquedá tetã re. Ha'e pygua kuery ojukapa kyxe py, huvixa voi. Omomba katuñ'i ha'e py ikuai va'ekue. Ndoejai neñ peteñve. Maquedá pygua huvixa re ojapo Jericó pygua huvixa re ojapoague rami ae.

<sup>29</sup> Maquedá gui ma Israel kuery ha'e javi reve Josué oje'oi Libna katy, ha'e vy ha'e pygua re ju opu'ã.

<sup>30</sup> Ha'e ramo SENHOR omboaxa Israel kuery po py, huvixa guive. Kyxe py ojukapa ha'e py ikuai va'e ha'e javi. Ndoejai neñ peteñ'i. Ha'e pygua huvixa re ojapo Jericó pygua huvixa re ojapoague rami.

<sup>31</sup> Libna gui Israel kuery ha'e javi reve Josué oo vy Laquis tetã ju ojoko, ha'e vy opu'ã ha'e pygua re.

<sup>32</sup> Laquis voi SENHOR omboaxa Israel kuery po py. Ha'e ramo ko'ẽ jevy oike vy ojukapa kyxe py ha'e py ikuai va'e ha'e javi, Libna re ojapoague rami ae.

<sup>33</sup> Ha'e ramo Geber pygua huvixa Hoão va'e oo Laquis pygua kuery oipytyvõ vy, teñ Josué ojuka, hupivegua kuery voi. Neñ peteñ'i ndoejai.

<sup>34</sup> Laquis gui Israel kuery ha'e javi reve Josué oo Eglom katy. Ha'e py ju ojoko vy opu'ã ha'e pygua re.

<sup>35</sup> Ha'e va'e árave oike vy ojukapa kyxe py. Ha'e py ikuai va'e ha'e javi omomba. Laquis re ojapoague rami ae ju ojapo.

<sup>36</sup> Ha'e rire ma Eglom gui Israel kuery ha'e javi reve Josué oo Hebron katy. Ha'e pygua kuery re ju opu'ã.

<sup>37</sup> Ha'e py oike vy ojukapa kyxe py: huvixa ha'e ha'e katy'i hekoia va'ekue ha'e javi. Neñ peteñ'i voi ndoejai, Eglom re ojapoague rami ae. Omomba ukaague rami ae Josué omomba, ha'e pygua kuery ha'e javi.

<sup>38</sup> Ha'e gui Debir py ju Israel kuery ha'e javi reve Josué ojevy vy opu'ã ha'e pygua re.

<sup>39</sup> Oipe'a tetã, ha'e huvixa voi ojuka kyxe py. Ha'e py ikuai va'e ha'e javi omomba katuñ'i. Peteñ'i voi ndoejai. Hebron, Libna ha'e huvixa re ojapoague rami ojapo Debir ha'e huvixa re voi.

<sup>40</sup> Ha'e rami py Josué kuery ojukapa ha'e va'e yvy regua kuery yvy'ã reia rupi ikuai va'e, Neguebe rupi, nhuñdy reia ha'e yvy'ã guy rupi ikuai va'e, huvixa kuery ha'e javi reve. Omomba ipytuñ ve ha'e javi. Neñ peteñ'i voi ndoejai, SENHOR Israel kuery Ruete ijayvuague rami vy.

<sup>41</sup> Cades-Barnéia guive Gaza peve Josué kuery jojukapa, yvy ha'e javi Gósen guive Gibeão rupi peve.

<sup>42</sup> Josué kuery oitypa vyvoi ha'e va'e huvixa kuery, ha'e ijyvy ha'e javi, mba'eta SENHOR Israel kuery Ruete ae Israel kuery re oma'ẽ vy opu'ã joe.

<sup>43</sup> Ha'e rire ma Israel kuery ha'e javi reve Josué ojevy ju guekoa Gilgal katy.

## 11

### *Amboae kuery re Josué kuery ipo'akaague*

<sup>1</sup> Ha'e nunga ma omombe'ua rã Hazor pygua huvixa Jabim oendu vy guembiguai omondouka Madom pygua huvixa Jobabe-a py, Sinrom ha'e Acsafe pygua huvixaa py,

<sup>2</sup> ha'e yvyty reia kuaray ijapu'a'ia katy huvixa kuery ikuai va'ea py, Quinerete regua kuaray puku-a katy yvy joja reia py, Dor regua yvy'ãmbe ha'e yvy'ãmbe tuvixa va'e ikuai va'e rupi, ye'ẽ rexei oĩ va'e py,

<sup>3</sup> omondouka avi cananeu kuery kuaray oua katy, ha'e kuaray oikea katy ikuai va'e pe: amorreue kuery, heteu, ferezeu, jebuseu kuery yvytya rupi ikuai va'e pe, ha'e heveu kuery Hermom yvy'ã guy py Mispa yvy re ikuai va'e pe.

<sup>4</sup> Ha'e rami rã ha'e va'e kuery oupa, oxondaro kuery ha'e javi reve. Mbovy e'ÿ ete ikuai, ita ku'i ye'ë rembe rupi ikuai va'e rami heta. Guymba kavaju ha'e karóxa heta ete ogueru.

<sup>5</sup> Ha'e va'e huvixa kuery jogueruvy vy Merom yakã yvýry ono'õ okuapy, Israel kuery re opu'ã aguã.

<sup>6</sup> Ha'e gui SENHOR aipoe'i Josué pe:

— Ekyje eme ha'e kuery gui. Ko'ë rã kova'e hora-ve amboaxapa 'rã Israel kuery po py ojuka pyre. Kavaju kuery pemongaraupa 'rã, ha'e karóxa peapypa 'rã tata py — he'i.

<sup>7</sup> Ha'e rami rã Merom yakã katy Josué oxondaro kuery ha'e javi reve ou pojava vy opu'ã okuapy ha'e kuery rovai.

<sup>8</sup> Israel kuery po py SENHOR omboaxapa ramo ojukapa. Omonha Sidom tuvixa va'e peve, ha'e Misrefote-Maim ha'e Mispa regua yvyugua kuaray oua katy oï va'e peve. Ojukapa, neñ peteñ'i voi ndoejai.

<sup>9</sup> Ha'e kuery re Josué kuery ojapo SENHOR aipoe'iague rami. Kavaju omongaraupa, ha'e karóxa oapypa.

<sup>10</sup> Ha'e va'e jave py Josué kuery ojevy vy Hazor tetã re ju ipo'aka. Kyxe py ojuka ha'e pygua huvixa. Hazor ma tetã mboae ae ha'e javi re ipo'aka va'ekue.

<sup>11</sup> Kyxe py ojuka ha'e py ikuai va'e ha'e javi, omomba katuñ'i. Peteñ've ndoikovevei. Ha'e Hazor tetã ma oapypa.

<sup>12</sup> Ha'e va'e huvixa kuery tetã openaa ha'e javi ma Josué kuery ojopypa, huvixa kuery voi. Ojukapa kyxe py, omomba katuñ'i, SENHOR rembiguai Moisés ijayvuague rami vy.

<sup>13</sup> Ha'e rã tetã yvy'ã reia rupi ikuai va'e ma Israel kuery ndoapyi, Hazor e'ÿ vy. Ha'e va'e ma Josué oappy uka.

<sup>14</sup> Ha'e va'e tetã pygua mba'e rei-reikue ma Israel kuery ogueraapa, hymbakue guive. Ha'e rã ha'e pygua kuery ma ojukapa kyxe py omomba peve. Peteñ've ndoikovevei.

<sup>15</sup> SENHOR guembiguai Moisés pe ijayvuague rami ae Moisés ju ijayvu Josué pe. Ha'e rã ha'ekue rami Josué ojapo. Neñ peteñ ayvu'i voi ndojapo e'ÿi Moisés pe SENHOR ijayvuague ha'e javi.

<sup>16</sup> Ha'e rami py Josué kuery ipo'aka ha'e va'e yvy ha'e javi re: yvyty reia rupi, Neguebe ha'e Gósen yvy ha'e javi, yvy joja reia rupi, Arabá, ha'e gui Israel peguarã yvyty reia, ha'e ijyvýry yvy'ã reia oï va'e reve,

<sup>17</sup> Halaque yvyty Seir katy oo va'e guive Baal-Gade Líbano regua yvyugua re oï va'e peve, Hermom yvyty yvy'iry. Ha'e va'e rupi huvixa kuery ikuai va'e voi ojopypa. Oitypa, ha'e ojukapa.

<sup>18</sup> Are vaipa Josué kuery opu'ã okuapy ha'e va'e huvixa kuery rovai.

<sup>19</sup> Jipoi tetã Israel kuery reve peteñ rami ikuai va'e, heveu kuery Gibeão pygua e'ÿ vy. Joe opu'ãa rupi anho ojopypa.

<sup>20</sup> Mba'eta SENHOR gui ae ou ha'e kuery inhakã ratã aguã, Israel kuery rovai opu'ã aguã rami, ha'e rami rã omboaxy e'ÿ re omomba ete aguã omokanhymba peve, Moisés pe SENHOR ijayvuague rami vy.

<sup>21</sup> Ha'e va'e jave py Josué kuery oje'oi vy omomba anaquim kuery yvyty reia rupi ikuai va'e, ha'e gui Hebron, Debir ha'e Anabe pygua, ha'e Judá ha'e Israel regua yvyty re ikuai va'ekue ha'e javi. Josué kuery omomba ete, hetã guive.

<sup>22</sup> Anaquim regua neñ peteñ've ndoikovei Israel kuery yvy re. Gaza py anho, Gate ha'e Asdode py ma amongue'i okuave.

<sup>23</sup> Ha'e rami py Moisés pe SENHOR ijayvuague rami vy Josué ipo'aka ha'e va'e yvy ha'e javi re. ha'e omboja'o Israel kuery yvyrã. Joegua-egua ikuai va'e peguarã omboja'o. Ha'e va'e rire yvy re optyu'upa joe opu'ãa gui.

**12***Mokoï huvixa Moisés oity va'ekue rery oĩa*

<sup>1</sup> Pova'e kuery ma ha'e va'e yvy regua huvixa Israel kuery ojukapa va'ekue Jordão yakã rovai re kuaray oua katy, ha'e ijyvy re voi ipo'aka, Arnom yakã'i guive Hermom yvyty peve, ha'e yvy joja reia kuaray oua katyguha ha'e javi.

<sup>2</sup> Amorreu kuery ruvixa Seom ma Hesbom py oĩ va'ekue. Ha'e va'e openaague ma Arnom yvyugua yvýry Aroer oĩ va'e guive, ha'e Arnom yvyugua mbyte gui Gileade mbyte peve, Jaboque yakã'i peve, Amom ramymino kuery yvy peve.

<sup>3</sup> Yvy joja reia guive ye'ẽ Quinerete kuaray oua katy peve, ha'e gui Ye'ẽ ro regua kuaray oua katy tape Bete-Jesimote katy oo va'e rupi, ha'e gui kuaray puku-a katy guive Asdote-Pisga yvy'ã guy katy.

<sup>4</sup> Amboae yvy ma Basã pygua huvixa Ogue mba'ekue. Ha'e va'e ma refaim kuery ramymino, Astarote ha'e Edrei py oĩ va'ekue.

<sup>5</sup> Ha'e va'e openaague ma Hermom yvyty, Salca ha'e Basã ha'e javi, gesurita ha'e maacatita kuery yvy peve, ha'e gui Gileade mbyte rupi Hesbom pygua huvixa Seom yvy peve.

<sup>6</sup> Ha'e va'e kuery SENHOR rembiguai Moisés Israel kuery reve ojukapa. Ijyvykue ma SENHOR rembiguai Moisés omboaxa Rúben regua, Gade ha'e Manassés regua mbyte rupi oja'o va'ekue pe.

*Huvixa kuery Josué oitypa va'ekue retã rery oĩa*

<sup>7</sup> Ha'e gui po rami ma Jordão yakã kyvõ rupi kuaray oikea katy huvixa kuery ikuai va'e rery, Israel kuery reve Josué ojukapa va'ekue, Baal-Gade Líbano regua yvyugua guive, Halaque yvyty Seir katy oo va'e peve. Ha'e va'e yvy ma Josué omboaxa Israel regua kuery pe omboja'o vy.

<sup>8</sup> Ha'e va'e yvy ma yvyty reia rupi oĩ, yvy'ãmbe reia rupi, yvy joja reia rupi, yvy'ã guy rupi, tekoá e'ŷa rupi, ha'e Neguebe rupi. Ha'e py ikuai va'ekue ma heteu, amorreu, cananeu, ferezeu, heveu ha'e jebuseu kuery.

<sup>9</sup> Huvixa ojuka ypy'i va'ekue ma Jericó pygua, ha'e gui Betel rexei Ai oĩ va'e pygua,

<sup>10</sup> ha'e gui Jerusalém pygua huvixa, Hebrom pygua,

<sup>11</sup> Jarmute pygua, Laquis pygua,

<sup>12</sup> Eglom pygua, Gezer pygua,

<sup>13</sup> Debir pygua, Geder pygua,

<sup>14</sup> Horma pygua, Arade pygua,

<sup>15</sup> Libna pygua, Adulão pygua,

<sup>16</sup> Maquedá pygua, Betel pygua,

<sup>17</sup> Tapua pygua, Hefer pygua,

<sup>18</sup> Afeca pygua, Lasarom pygua,

<sup>19</sup> Madom pygua, Hazor pygua,

<sup>20</sup> Sinrom-Merom pygua, Acsafe pygua,

<sup>21</sup> Taanaque pygua, Megido pygua,

<sup>22</sup> Quedes pygua, Carmelo py Jocneão oĩ va'e pygua,

<sup>23</sup> Nafate-Dor pygua, Goim pygua Gilgal py oĩ va'e,

<sup>24</sup> ha'e gui ma Tirza pygua huvixa. Ha'e javi vy ma trinta e um huvixa kuery ikuai va'ekue.

**13***Yvy ndojopypai teri va'ekue re ijayvuague*

<sup>1</sup> Ha'e gui Josué tuja'i ma, heta ma'etŷ ma oguereko jave ixupe SENHOR aipoe'i:

— Ndetuja'i ma, heta ma rerekma'etý. Ha'e rami teñ heta ete teri oĩ yvy ndapejopypai va'e.

<sup>2</sup> Yvy ndapejopyi teri va'e ma filisteu kuery yvy ha'e javi, Gesur ha'e javi,

<sup>3</sup> Egito katy'i Sior oĩ va'e guive Ecrom yvy kuaray ijanu'a'ia katy oĩ va'e peve, "Cananeu kuery yvy" 'epy va'e, ha'e gui filisteu kuery ruvixa peteñ nhiruñ ikuai va'e openaa: Gaza, Asdode, Asquelom, Gate ha'e Ecrom tetã.

<sup>4</sup> Kuaray puku-a katy oĩ va'e ma aveu kuery yvy ndapejopyi teri avi, ha'e gui cananeu kuery yvy ha'e javi, ha'e Sidom regua kuery Meara yvy, amorreua kuery yvy katy'i Afeca oĩ va'e.

<sup>5</sup> Oime teri avi gibleu kuery yvy, ha'e Líbano yvy ha'e javi kuaray oëa katy oĩ va'e, Hermom yvy'ã guy py Baal-Gade oĩ va'e guive Hamate katy oaxaa peve,

<sup>6</sup> ha'e gui yvyty reia rupi ikuai va'e ha'e javi, Líbano gui Misrefote-Maim peve, Sidom regua kuery ha'e javi. Ha'e va'e yvy xee aipe'a 'rã Israel kuery renonde gui. Ha'e nunga rupi emboja'o ma voi yvy Israel kuery peguarã, ndevy xeayvuague rami vy.

<sup>7</sup> Ha'e nunga rupi aÿ ma emboja'o yvy nove regua ikuai va'e peguarã, ha'e Manassés regua mbyte rupi oja'o va'ekue pe – he'i.

<sup>8</sup> Ha'e rã Manassés regua mboae mbyte rupi oja'o va'ekue reve ma Rúben ha'e Gade regua kuery hekoa ae ma Jordão yakã rovai re kuaray oua katy, SENHOR rembiguai Moisés omboaxaague rami vy.

<sup>9</sup> Ha'e kuery yvy ma Arnom yvyugua py Aroer oĩ va'e gui ijypy, ha'e gui tetã yvyugua mbyte py oĩ va'e, ha'e Medeba py yvy'ãmbe tuvixa va'e ha'e javi Dibom peve oo va'e,

<sup>10</sup> ha'e amorreua kuery ruvixa Seom Hesbom py oĩ va'e openaague tetã, Amom ramymino kuery yvy peve.

<sup>11</sup> Ha'e gui Gileade, ha'e gesurita ha'e maacatita kuery yvy, Hermom yvyty ha'e javi, ha'e gui Basã ha'e javi Salca peve,

<sup>12</sup> Basã pygua huvixa Ogue openaague ha'e javi, Astarote ha'e Edrei py voi opena va'ekue. Ha'e va'e ma gigante kuery regua rembyrekue. Ha'e va'e kuery ma Moisés ojukapa rai vy oipe'apa va'ekue.

<sup>13</sup> Ha'e rã gesurita ha'e maacatita kuery ma Israel kuery ndoipe'ai rire aÿ peve ha'e kuery ikuai Israel kuery mbyte.

### *Moisés yvy omboja'o-ja'oague*

<sup>14</sup> Ha'e rã Levi regua pe anho nomboja'oi ijyvyrã, mba'eta SENHOR Israel kuery Ruete pe mba'emo oapy reve ome'ẽ mbyre ma ha'e kuery pegua oĩ, aipoe'i ma voiague rami vy.

<sup>15</sup> Ha'e gui Rúben ramymino kuery regua pe ma Moisés omboja'o peteñ-teñ hoo pygua kuery ikuia rami vy.

<sup>16</sup> Ha'e kuery rekoarã ijypy Arnom yvyugua apy re Aroer oĩ va'e gui, ha'e gui tetã yvyugua mbyte py oĩ va'e, ha'e yvy'ãmbea tuvixa va'e ha'e javi Medeba peve.

<sup>17</sup> Oĩ avi Hesbom ijyvýry tetã ikuai va'e ha'e javi reve, yvy'ãmbea tuvixa va'e py oĩ va'e: Dibom, Bamote-Baal ha'e Bete-Baal-Meom,

<sup>18</sup> ha'e gui Jaza, Quedemote, Mefaate,

<sup>19</sup> Quiriataim, Sibma, ha'e Zerete-Saar yvy'ã rugua oĩ va'e re,

<sup>20</sup> Bete-Peor, Pisga re yvy'ã reia oĩ va'e, Bete-Jesimote,

<sup>21</sup> tetã yvy'ãmbe tuvixa va'e ha'e javi, ha'e amorreua kuery ruvixa Seom Hesbom py oĩ va'e openaague ha'e javi. Ha'e va'e ma Moisés ojuka Midiã pygua ruvixa kuery Evi, Requém, Zur, Hur ha'e Reba ojukaague rami avi. Ha'e va'e kuery ma Seom pegua yvatekueve yvy re opena va'ekue.

<sup>22</sup> Israel kuery kyxe py ojuka avi Balaão Beor ra'y imba'ekuaa va'e, amboae kuery ojukaa py.

**23** Rúben regua kuery yvy ma Jordão yakã peve oo, ha'e ha'e katy rai'i ikuai va'e peve. Ha'e va'e yvy ma Rúben ramymino kuery pegua, peteĩ-teĩ hoo pygua kuery ikuiaia rami vy, tetã ha'e tekao ijyvýry ikuai va'e reve.

**24** Ha'e gui Gade regua kuery pe ma Moisés omboja'o ta'y kuery peguarã peteĩ-teĩ hoo pygua kuery ikuiaia rami vy.

**25** Ha'e kuery yvy ma Jazer ha'e Gileade re tetã oĩ va'e ha'e javi, ha'e Amom ramymino kuery yvy mbyte rupi, Rabá apy re Aroer oĩ va'e peve;

**26** ha'e gui Hesbom guive Ramate-Mispa ha'e Betonim peve, ha'e Maanaim guive Debir yvy peve;

**27** ha'e gui yvyugua py oĩ va'e ma Bete-Arã, Bete-Ninra, Sucote ha'e Zafom ma Hesbom pygua huvixa Seom openaague rembyrekue, ha'e gui Jordão yakã, ha'e ijyvýry rupi ikuai va'e ye'ẽ Quinerete apy peve, Jordão rovai re kuaray oua katy oĩ va'e.

**28** Ha'e va'e yvy ma Gade ramymino kuery pegua peteĩ-teĩ hoo pygua kuery ikuiaia rami vy, tetã ha'e tekao ijyvýry ikuai va'e reve.

**29** Ha'e gui Manassés regua mbyte rupi oja'o va'ekue peguarã ma Moisés omboja'o peteĩ-teĩ hoo pygua kuery ikuiaia rami vy.

**30** Ha'e kuery rekoia ma Maanaim gui ijypy, ha'e gui Basã ha'e javi, Basã pygua huvixa Ogue openaague ha'e javi, ha'e tekao Jair openaague ha'e javi, sessenta tetã Basã re ikuai va'e;

**31** ha'e gui Gileade yvy mbyte rupi, ha'e Astarote ha'e Edrei tetã Basã pygua huvixa Ogue openaague. Ha'e va'e tetã ma Manassés ra'y Maquir pe omboaxa va'ekue, Maquir ramymino kuery mbyte rupi ikuai va'e pe omboaxa, peteĩ-teĩ hoo pygua kuery ikuiaia rami vy.

**32** Ha'e va'e yvy ma Moisés omboja'o va'ekue Moabe regua nhuñdy rupi oiko teri jave. Jordão yakã rovai re opyta, Jericó regua kuaray oua katy.

**33** Ha'e rã Levi regua pe ma Moisés nomboja'oi yvy, mba'eta ha'e kuery pegua ma SENHOR Israel kuery Ruete ae oiko, ha'e kuery pe ijayvu ma voiague rami vy.

## 14

### Canaã yvy xorte rupi omboja'oague

**1** Po rami ma Canaã yvy re Israel kuery oyvyrã ojopy raka'e. Sacerdote Eleazar, Num ra'y Josué ha'e Israel kuery regua huvixa ikuai va'e omboja'o okuapy ha'e kuery pe.

**2** Ha'e kuery yvyrã xorte oexaa rupi omboja'o okuapy Moisés pe SENHOR ijayvuague rami vy, nove regua pe, ha'e peteĩ mbyte rupi oja'o va'ekue peguarã ae.

**3** Ha'e rã mokoõ regua ha'e amboae mbyte rupi oja'o va'ekue yvyrã ma Moisés omboaxa ma voi Jordão yakã rovai re. Ha'e rã levita kuery pe ma nomboaxai ijyvyrã tyke'y kuery yvy mbyte rupi.

**4** Mba'eta José ramymino kuery Manassés ha'e Efraim gui ma mokoõ regua ikuai. Ha'e gui levita kuery pe ma nomboaxai ijyvyrã.\* Ha'e rami avi tetã omboaxa ha'e kuery ikuai aguã, ha'e gui tetã yvýry rupi omboaxa avi guymba vaka ha'e mymba mboae oguerekó aguã.

**5** Moisés pe SENHOR ijayvuague rami ae Israel kuery ikuai vy omboja'opa yvy.

### Calebe pe Josué Hebrom yvy omboaxaague

**6** Ha'e gui Josué-a py Judá ramymino kuery ovaẽ avi Gilgal py. Ha'e rami vy quenezeu regua Jefoné ra'y Calebe aipoe'i ixupe:

\* **14:4** José ramymino kuery reve doze ma ikuai araka'e Israel regua. Ha'e va'e doze regua pe anho ome'ẽ ijyvyrã, Levi regua pe e'ŷ.

— Ndee reikuua Nhanderuete remimbo'e Moisés pe SENHOR ijayvuague Cades-Barnéia py, xereko re ha'e nderekō re avi.<sup>†</sup>

<sup>7</sup> Xee ma quarenta ma'etŷ areko va'ekue Cades-Barnéia gui SENHOR rembiguai Moisés xemondouka jave yvy re aikuaa pota aguã. Ha'e rã xee amombe'u porã ixupe xepy'a re aendu va'e.

<sup>8</sup> Ha'e rã xeryvy kuery xerupive oje'oi va'ekue ma omongyjepa rei heta va'e kuery. Ha'e rã xee ma aĩ atãve tema SENHOR Xeruete oipota va'e ajapo aguã.

<sup>9</sup> Ha'e ramo ha'e va'e ára Moisés oura vy aipoe'i va'ekue xevy: “Anhetê yvy repyrõague ma ndee ha'e neramymino kuery pegua oĩ raka'e rã peve guarã, SENHOR Xeruete oipota va'e rejapo aguã reĩ atã ramo”, he'i va'ekue xevy.

<sup>10</sup> Ma'ë, SENHOR xere opena aŷ peve aikove aguã rami, ijayvuague rami vy. Quarenta e cinco ma'etŷ ma ojapo Moisés pe ha'e rami SENHOR ijayvuague, Israel kuery teko a e'ŷa rupi teri oguata jave py. Ha'e gui aŷ ma xee oitenta e cinco ma'etŷ ma areko.

<sup>11</sup> Xembaraete teri, Moisés xemondouka jave guare rami. Aŷ voi xembaraete aikovy ha'ekue rami ae, joe apu'ã aguã katy aa ha'e ajevy aguã.

<sup>12</sup> Ha'e nunga rupi aŷ ma emboaxa xevy yvyty reia SENHOR aipoe'iague. Ha'e jave py rendu karamboae anaquim kuery ha'e py ikuia, ha'e tetã guaxu ikorapa va'ea. Ha'e rami teĩ xereve SENHOR oiko rã aipe'apa 'rã ijayvuague rami vy – he'i.

<sup>13</sup> Ha'e rami rã Josué ogueroayvu porã Jefoné ra'y Calebe. Ha'e vy ixupe omboaxa Hebrom regua ijyvyrã.

<sup>14</sup> Ha'e rami rã Hebrom oppta quenezeu regua Jefoné ra'y Calebe mba'e, ixupe guarã ome'ë aŷ peve, SENHOR Israel kuery Ruete oipota va'e ojapo aguã oĩ atã ramo.

<sup>15</sup> Ha'e va'e e'ŷ mbove Hebrom tetã rery ma Quiriate-Arba. Arba ma anaquim kuery regua gui yvateve va'ekue. Ha'e va'e rire yvy re opytu'upa ju joe opu'ãa gui.<sup>‡</sup>

## **Nove regua ha'e amboae regua mbyte rupi oja'o va'ekue yvyrã omboja'oague**

### 15

#### *Judá kuery pe ijyvyrã omboja'oague*

<sup>1</sup> Ha'e gui Judá ramymino kuery yvyrã xorte rupi omboja'oa peteĩ-teĩ hoo pygua kuery ikuia rami vy. Ha'e kuery yvy itui kuaray puku-a katy Edom yvy peve, Zim teko a e'ŷa kuaray puku-a katy itui va'e apy peve.

<sup>2</sup> Kuaray puku-a katy rupi ijyvy itui Ye'ë ro apy guive, ijapy kuaray puku-a katyguia guive.

<sup>3</sup> Ha'e gui oo kuaray puku-a katy Acrabim katy oẽ ovya peve, Zim rupi oaxa, ha'e gui kuaray puku-a katy gui oẽ ovya Cades-Barnéia katy.

<sup>4</sup> Oaxa Hezrom rupi, oẽ Adar peve, ha'e gui Carca rupi ju ojere ovya. Oaxa Azmom, ha'e ovaë Egito katy'i yakã'i oĩ va'e py. Ha'e gui ijyvy oo ye'ë peve. Ha'e va'e rupi oo 'rã pendeyvyrã omboja'oa kuaray puku-a katy oĩ va'e.

<sup>5</sup> Ha'e rã ijapy kuaray oua katyguia ma Ye'ë ro rembe rupi itui, Jordão yakã 'aa peve. Ijapy ka'arua katyguia ma ye'ë rembe ojere va'e gui oo, Jordão 'aa guive.

<sup>6</sup> Ha'e gui oo Bete-Hogla peve, ha'e oaxa Bete-Arabá kuaray ijapu'a'ia katy rupi, oẽ ovya Rúben ra'y Boã pegua ita oĩa peve.

<sup>7</sup> Oëve tema ovya Acor yvyugua guive Debir katy, ha'e gui kuaray ijapu'a'ia katy rupi ju oo Gilgal katy. Ha'e va'e ma oĩ Adumim katy oẽ ovya katy'i, kuaray puku-a katy yakã'i oĩa rami. Ha'e gui ma oaxa ovya En-Semes py yy oĩ va'e peve. Ha'e gui oove En-Rogel peve.

---

<sup>†</sup> **14:6** Calebe ha'e Josué ma Canaã yvy re oikuua pota aguã omondouka pyre regua, ha'e kuery anho nhomoneta va'ekue yvy py heta va'e kuery oike oje'ovvy aguã re. Ha'e rã amboae kuery oje'oi va'ekue ma okyjepa. Ha'e nunga rupi Calebe ha'e Josué pe anho SENHOR ijayvu yvy re oike aguã re (Números 14.24).    <sup>‡</sup> **14:15** Tery Quiriate-Arba ma “Arba pegua tetã” 'ea.

<sup>8</sup> Ha'e va'e gui ma oẽ ov yv yugua rupi, ha'e gui jebuseu kuery ikuai regua kuaray puku-a katy rupi. Ha'e va'e ma Jerusalém. Ha'e gui oẽ ov yv yugua rexei kuaray oua katy yvyty oĩ va'e apyte peve, yv yugua refaim kuery ikuaiague kuaray ijapu'a'ia katy itui va'e apy peve.

<sup>9</sup> Ha'e gui yvyty apyte guive oo yvu Neftoa py oï va'e peve. Ha'e gui oo oiny Efraim tetä yvyty reia rupi ikuai va'e peve. Oove tema Baalá peve. Ha'e va'e ma Quiriate-Jearim.

<sup>10</sup> Ha'e gui ojere ovy Baalá guive kuaray oikea katy Seir yvyty pevē oo vy. Oaxa ovy Jearim yvyty kuaray ijapu'a'ia katy oĩ va'e yvýry rupi. Ha'e va'e ma Quesalom. Ha'e gui oguejy ovy Bete-Semes katy. Timna rupi oaxa.

<sup>11</sup> Oove ju Ecrom yke kuaray puku-a katy oĩ va'e katy rupi. Siquerom katy oo vy oaxa yyty Baalá, Jabneel py oẽ, ye'ẽ py mae ijapy.

<sup>12</sup> Ha'e rã yvy omboja'oa kuaray oikea katy itui va'e ma ye'ë tuvixa va'e rembe ae. Ha'e rami ma itui Judá ramymino kuery yvyrã omboja'oa, peteñ-teñ hoo pygua kuery ikuai rami vy.

Juízes 1.11-15

<sup>13</sup> Ha'e gui Jefoné ra'y Calebe pe ma Josué omboaxa Judá ramymino kuery yvy mbyte py oiko aguã, SENHOR aipoe'iague rami vy. Ha'e va'e ma Quiriate-Arba, Hebron 'epy va'e. Arba ma Enaque ru oiko va'ekue.

<sup>14</sup> Ha'e va'e tetā gui Calebe oipe'a mboapy Enaque ra'y kuery regua: Sesai, Aimā ha'e Talmai, Enaque ramymino kuery meme.

<sup>15</sup> Ha'e va'e gui oo Debir pygua kuerya katy. Ymave heryague ma Quiriate-Sefer.

<sup>16</sup> Calebe aipoe'i:

— Quiriate-Sefer re ipo'aka vy oipe'apa va'ekue pe ma ame'ẽ 'rã xerajy Acsa ta'yxyrã  
— he'i.

<sup>17</sup> Ha'e gui Calebe ryke'y Quenaz ra'y Otniel ae oipe'a. Ha'e ramo ta'yxyrā ome'ẽ guajy Acsa.

**18** Ha'e va'e kunha O

e. Ha'e gui ml

— Mb'a'e tu reipota?  
<sup>19</sup> Ombovai:  
— Eme'ẽ mba'emo xevy. Yvy pirua rive xevy reme'ẽ rire eme'ẽve ju ygua ikuai va'e —

#### *Judé luuunat&uuml;num&uuml;*

<sup>20</sup> Pova'e ma Judá ramymino kuery rekoarā omboaxa pyre, peteī-teī hoo pygua kuery

<sup>21</sup> Judá ramymino kuery retā kuaray puku-a katy, Edom yvy katy'i ikuai va'e rery ma  
Sulam hukuy.

Cabzeel, Eder, Jagur,  
22. Januar 2011

**22** Quiná, Dimona, Ada

<sup>23</sup> Quedes, Hazor, Itnā.

<sup>24</sup> Zife, Telém, Bealote,  
<sup>25</sup> H. H. Hobart, *Saint-Hilaire's Natural History*, 1830.

## **25 Hazor-Hadata, Quer**

<sup>26</sup> Amā, Sema, Moladá,  
<sup>27</sup> Hā, Sāl, Hā, Rā, Rālā.

## 27 Hazar-Gada, Hesmo

<sup>28</sup> Hazar-Sual, Berseba, Biziotia,  
<sup>29</sup> Babilónia, Egiptus

<sup>29</sup> Baala, Iim, Ezem,  
<sup>30</sup> Eltoladah, Sennil, I

<sup>30</sup> Eltolade, Quesil, Horma,  
<sup>31</sup> Zidane, Modric, Savić

<sup>31</sup> Ziclague, Madman, Sansana,  
<sup>32</sup> Léonard, Sili, Ajedat, Bi-

<sup>32</sup> Lebaote, Silim, Aim ha'e Rimom. Ha'e javi vy ma vinte e nove tetâ ikuai, ijvyvry tekao ikuai va'e reve.

<sup>33</sup> Ha'e gui yvy'ämbe reia rupi ma Estaol, Zorä, Asna,

<sup>34</sup> Zanoa, En-Ganim, Tapua, Enã,

<sup>35</sup> Jarmute, Adulão, Socó, Azeca,

<sup>36</sup> Saaraaim, Aditaim, Gedera ha'e Gederotaim. Ha'e javi vy ma catorze tetã ikuai, ijyvýry tekoa ikuai va'e reve.

<sup>37</sup> Ha'e gui Zenã, Hadasa, Migdal-Gade,

<sup>38</sup> Dileã, Mispa, Jocteel,

<sup>39</sup> Laquis, Bozcate, Eglom,

<sup>40</sup> Cabom, Laamás, Quitlis,

<sup>41</sup> Gederote, Bete-Dagom, Naamá ha'e Maquedá. Ha'e javi vy ma dezesseis tetã ikuai ijyvýry tekoa ikuai va'e reve.

<sup>42</sup> Ha'e gui Libna, Eter, Asã,

<sup>43</sup> Ifta, Asná, Nezibe,

<sup>44</sup> Queila, Aczibe ha'e Maressa. Ha'e javi vy ma nove tetã ikuai ijyvýry tekoa ikuai va'e reve.

<sup>45</sup> Ha'e gui Ecrom avi, ha'e ijyvýry tetã'i ha'e tekoa ikuai va'e reve,

<sup>46</sup> ha'e gui Ecrom tetã guive ye'ẽ peve, Asdode katy tekoa ikuai va'e ha'e javi reve.

<sup>47</sup> Ha'e gui Asdode ha'e ijyvýry tetã'i ha'e tekoa ikuai va'e reve, Gaza ha'e ijyvýry tetã'i ha'e tekoa ikuai va'e reve, Egito regua yakã ha'e ye'ẽ tuvixa va'e rembe peve.

<sup>48</sup> Yvy'ã reia rupi ikuai va'e ma Samir, Jatir, Socó,

<sup>49</sup> Daná, Quiriate-Sana (ha'e va'e ma Debir),

<sup>50</sup> Anabe, Estemoa, Anim,

<sup>51</sup> Gósen, Holom ha'e Gilo. Ha'e javi vy ma onze tetã ikuai ijyvýry tekoa ikuai va'e reve.

<sup>52</sup> Ha'e gui Arabe, Dumá, Esã,

<sup>53</sup> Janim, Bete-Tapua, Afeca,

<sup>54</sup> Hunta, Quiriate-Arba (ha'e va'e ma Hebron) ha'e Zior. Ha'e javi vy ma nove tetã ikuai ijyvýry tekoa ikuai va'e reve.

<sup>55</sup> Ha'e gui Maom, Carmelo, Zife, Jutá,

<sup>56</sup> Jezreel, Jocdeão, Zanoa,

<sup>57</sup> Caim, Gibeá ha'e Timna. Ha'e javi vy ma dez tetã ikuai ijyvýry tekoa ikuai va'e reve.

<sup>58</sup> Ha'e gui Halul, Bete-Zur, Gedor,

<sup>59</sup> Maarate, Bete-Anote ha'e Eltecom. Ha'e javi vy ma mboapy meme tetã ikuai ijyvýry tekoa ikuai va'e reve.

<sup>60</sup> Ha'e gui Quiriate-Baal (ha'e va'e ma Quiriate-Jearim) ha'e Rabá. Ha'e javi vy ma mokoï tetã oĩ ijyvýry tekoa ikuai va'e reve.

<sup>61</sup> Tekoa e'ŷa py oĩ va'e ma Bete-Arabá, Midim, Secaca,

<sup>62</sup> Nibsã, Tetã-juky ha'e En-Gedi. Ha'e javi vy ma mboapy meme tetã ikuai ijyvýry tekoa ikuai va'e reve.

<sup>63</sup> Ha'e rã jebuseu kuery Jerusalém py ikuai va'e ma Judá ramymino kuery ndoipe'a kuaai. Ha'e ramo aŷ peve Jerusalém py jebuseu kuery ikuai Judá ramymino kuery mbyte.

## 16

### *Efraim kuery pe ijyvyrã omboja'oague*

<sup>1</sup> Ha'e gui José ramymino kuery yvyrã xorte rupi omboaxaa va'ekue ma ijypy Jordão yakã ha'e Jericó katy'i gui. Ha'e gui oo Jericó regua kuaray oua katy yy oĩ va'e rupi, ha'e gui tekoa e'ŷa ha'e yvy'ã reia rupi oo Betel peve.

<sup>2</sup> Betel gui ma oo Luz katy, ha'e arquita kuery yvy oaxa Atarote peve.

<sup>3</sup> Ha'e gui oguejy ov ykuay oikea katy Jafleti yvy peve, Bete-Horom yvy'ã guy oĩ va'e ha'e Gezer peve. Ye'ẽ rembe py ma ijapy.

<sup>4</sup> Ha'e va'e ma José ra'y kuery Manassés ha'e Efraim regua yvyrã ojopy va'ekue.

<sup>5</sup> Ha'e gui Efraim ramymino kuery yvyrā peteī-teī hoo pygua kuery ikuiaia rami vy ojopy va'ekue apy ma kuaray oua katy rupi oo Atarote-Adar guive Bete-Horom yvy'ā oī va'e peve.

<sup>6</sup> Ha'e gui ye'ē katy oo. Kuaray ijapu'a'ia katy rupi oo Micmetate katy'i. Ha'e va'e gui ma kuaray oua katy ojevy ovv Taanate-Siló peve. Ha'e va'e rupi oo ju kuaray oua katy Janoa peve.

<sup>7</sup> Janoa guive oguejy ovv Atarote ha'e Naarate katy. Jericó py ovaē vy Jordão yakā rembe py ijapy.

<sup>8</sup> Ha'e gui Tapua guive kuaray oikea katy oo oiny Caná yakā'i peve. Ye'ē rembe py ma ijapy. Ha'e va'e ma Efraim ramymino kuery regua yvyrā omboaxa pyre, peteī-teī hoo pygua kuery ikuiaia rami vy.

<sup>9</sup> Efraim ramymino kuery pe omboja'oa avi amongue tetā Manassés ramymino kuery yvy mbyte ikuai va'e, ijyvýry tetā'i ha'e tekao'i ikuai va'e ha'e javi reve.

<sup>10</sup> Ha'e rā cananeu kuery Gezer py ikuai va'e ma ndoipe'ai okuapy. Ha'e rire ha'e va'e kuery ma Efraim kuery mbyte ikuai aŷ peve. Ha'e ramo omomba'eapo nhea'ā imbokuapy.

## 17

### *Manassés kuery mbyte rupi oja'o va'ekue pe ijyvyrā omboja'oague*

<sup>1</sup> Ha'e gui Manassés regua kuery yvyrā ma xorte rupi avi omboaxaa. Manassés ma José ra'y oiko pyp'i va'ekue. Ha'e gui Manassés ra'y jypy'igua ma Maquir Gileade ru va'e, joe opu'āa rupi oiko va'ekue. Ixupe ma Gileade ha'e Basā tekoia omboaxaa.

<sup>2</sup> Manassés ramymino kuery mboae ojopy avi oyvyrā, peteī-teī hoo pygua kuery ikuiaia rami vy. Ha'e va'e kuery ma Abiezer ra'y kuery, Heleque, Asriel, Siquém, Hefer ha'e Semida ra'y kuery. Ha'e va'e kuery ma José ra'y Manassés ramymino kuery meme, peteī-teī hoo pygua kuery ikuiaia rami vy.

<sup>3</sup> Ha'e rā Manassés ra'y Maquir ramymino, Gileade ra'y Zelofeade hery va'e ma ndata'yi, tajy anho rei. Tajy kuery rery ma Macla, Noa, Hogla, Milca ha'e Tirza.

<sup>4</sup> Ha'e va'e kuery ma ovaēmba sacerdote Eleazar, Num ra'y Josué ha'e huvixa kuery renonde. Ha'e vy aipoe'i okuapy:

— Moisés pe SENHOR aipoe'i raka'e oreiyvyrā omboaxa aguā orekyvy kuery ikuiaia mbyte — he'i ramo ha'e kuery yvyrā Josué omboaxa tuu ryvy kuery ikuiaia mbyte, SENHOR aipoe'iague rami vy.

<sup>5</sup> Ha'e vy Manassés regua rekoarā omboaxave ju dez henda py, Gileade ha'e Basā yvy Jordão yakā rovai re oī va'e ojopy ae ma va'ekue áryve.

<sup>6</sup> Mba'eta Manassés ramymino kuery kunhague ma ta'y kuery mbyte oguereko 'rāe yvy. Ha'e rā Manassés ramymino kuery mboae ma Gileade yvy ojopy ae ma va'ekue.

<sup>7</sup> Ha'e gui Manassés kuery yvy apy ma Aser gui oo Micmetate, Siquém regua kuaray oua katy oī va'e peve. Ha'e gui kuaray puku-a katy oo En-Tapua pygua kuery ikuiaia peve.

<sup>8</sup> Manassés kuery ma Tapua yvy re hekao. Ha'e rā Tapua tetā ma Efraim ramymino kuery pegua opyta, Manassés regua yvy apy py oī va'eri.

<sup>9</sup> Ha'e ramo ijyvy apy oguejy ovv Caná yakā peve. Ha'e rā Manassés yvy re, yakā gui kuaray puku-a katy tetā ikuai va'e ma Efraim pegua opyta. Ha'e gui Manassés yvy apy ma yakā gui kuaray ijapu'a'ia katy rupi oo oiny. Ijapy ma ye'ē rembe py.

<sup>10</sup> Efraim regua yvy ma kuaray puku-a katy oī, ha'e rā Manassés regua yvy ma kuaray ijapu'a'ia katy oī. Ha'e gui ijapy ma ye'ē rembe. Kuaray ijapu'a'ia katy rupi oī va'e ma Aser regua yvy. Ha'e rā kuaray oua katy rupi ma Issacar regua yvy oī.

<sup>11</sup> Mba'eta Issacar ha'e Aser regua yvy re amongue tetā ikuai va'e ma Manassés kuery peguarā opyta. Ha'e va'e ma Bete-Seā ha'e tetā'i ijyvýry ikuai va'e, Ibleāo, Dor, Taanaque ha'e Megido, yvy mboapy yvyty'i oī va'e re.

<sup>12</sup> Ha'e rami avi ha'e va'e tetã pygua kuery ma Manassés ramymino kuery ndoipe'a kuaai. Ha'e nunga rupi cananeu kuery ikuai ae tema ha'e va'e yvy re.

<sup>13</sup> Ha'e gui Israel kuery heta-etave ov y vy omomba'epo nhea'ã cananeu kuery, ndoipe'apai.

<sup>14</sup> Ha'e gui José ramymino kuery regua aipoe'i Josué pe:

— Mba'e re tu peteĩ henda py ete'i ri remboaxa orevyrã? Mba'eta ore kuery ma heta orekuai, aÿ peve SENHOR oremoingo porã ramo.

<sup>15</sup> Josué ombovai:

— Pendereta va'e vy tapeo ka'aguy re, ha'e py pembokatu ferezeu ha'e refaim kuery yvy re, pendeyvy Efraim re yvy'ã reia oĩ va'e ipo'i'i vaipa ri ramo — he'i.

<sup>16</sup> Ha'e ramo José ramymino kuery aipoe'ive ju:

— Yvy'ã reia re orerekao oĩ va'e ma nda'evei. Ha'e gui cananeu kuery yvyugua py ikuai va'e ma karóxa ferro guigua oguereko va'e meme. Bete-Seã py ha'e ijvvýry tetã'i rupi ikuai va'e ha'e javi oguereko avi, Jezreel yvy'ã guy py ikuai va'e kuery voi.

<sup>17</sup> Ha'e ramo José ra'y Efraim ha'e Manassés regua kuery pe Josué ombovai vy aipoe'i:

— Peẽ kuery ma pendereta ha'e penembaraete va'e. Peteĩ henda py ete'i e'ÿ 'rã penderekao.

<sup>18</sup> Aÿ ma yvy'ã reia ma pendevy guarã itui. Ka'aguy anho rei teĩ pembokatupa 'rã. Ijapyá peve 'rã penderekao, mba'eta peipe'apa 'rã cananeu kuery, imbaraetekue ha'e karóxa ferro guigua guive oguereko va'eri — he'i.

## 18

### *Yvy nomboja'opai teriague sete henda rupi omboja'oague*

<sup>1</sup> Ha'e gui Israel kuery ijatypa okuapy Siló py. Ha'e py oupi okuapy oo onhemboaty atyrã, yvy ha'e javi re ha'e kuery ipo'aka rire.

<sup>2</sup> Ha'e rami avi Israel kuery mbyte sete regua ikuai oyvyrã ndojopyi teri va'e.

<sup>3</sup> Ha'e ramo Josué aipoe'i Israel kuery pe:

— Raka'e peve tu pearõ 'rã pendevyvrã SENHOR peneramoĩ kuery Ruete ome'ẽ va'ekue pejopy aguã?

<sup>4</sup> Peteĩ-teĩ regua gui peiporavo 'rã mboapy avakue xee amondouka va'era. Ha'e kuery toiko katu oo aguã. Yvy jave rupi toguata, tombopara kuaxia re peteĩ-teĩ regua oyvyrã ndojopyi va'ekue. Ha'e gui toupa ju xea py.

<sup>5</sup> Ha'e rami vy omboja'o 'rã yvy sete henda rupi. Ha'e rã Judá kuery ma oyvy re ae ma ikuai kuaray puku-a katy. José ramymino kuery voi oyvy re ae ma ikuai kuaray ijapu'a'ia katy.

<sup>6</sup> Pembopara 'rã yvy sete henda rupi omboja'oa aguã regua. Ha'e gui Peru 'rã xevy, xee xortea aexa aguã SENHOR Nhanderuete renonde peikuaa aguã.

<sup>7</sup> Ha'e rã levita kuery ma ndojopyi 'rã oyvyrã peẽ kuery mbyte, mba'eta ha'e kuery pegua ma sacerdote SENHOR pegua ikuai aguã. Ha'e rami avi Gade, Rúben ha'e Manassés regua mbyte rupi oja'o va'ekue ma ojopy ae ma oyvyrã Jordão yakã rovai re kuaray oua katy, ha'e kuery pe SENHOR rembiguai Moisés omboaxa va'ekue — he'i.

<sup>8</sup> Ha'e rami rã ha'e va'e avakue opu'ã vy oje'oi. Yvy regua ombopara aguã oje'oi va'e kuery pe Josué ijayvu vy aipoe'i imondovy:

— Tapeo, peguata yvy ha'e javi rupi. Pemboparapa kuaxia re. Ha'e vy pejevy ju xea py apy Siló py ae, xortea aexa aguã pêvy SENHOR renonde — he'i.

<sup>9</sup> Ha'e ramo avakue oje'oi. Yvy ha'e javi rupi oaxa jogueravy. Kuaxia re ombopara tetã ikuai va'e ha'e javi, sete henda rupi ombopara oje'oivy. Ha'e vy ojevypa ju Josué-a py tekao Siló py.

<sup>10</sup> Ha'e ramo SENHOR renonde Josué ha'e kuery pe oexa xortea Siló py. Ha'e rami vy Israel kuery yvyrã Josué omboja'o ha'e py, peteĩ-teĩ regua jave ikuiaia rami vy.

### *Benjamim regua kuery pe ijyvyrā omboja'oaague*

<sup>11</sup> Ha'e gui Benjamim ramymino kuery pe ma xorte oexa peteī-teī hoo pygua kuery ikuiaia rami vy. Ha'e gui ijyvyrā xorte rupi opyta Judá ha'e José ramymino kuery yvy mbyte py.

<sup>12</sup> Ha'e kuery yvy apy ma kuaray ijapu'a'ia katy oo oiny Jordão yakā guive. Jericó rexei gui oē ov ykuaray ijapu'a'ia katy, ha'e gui oē ov yvy'ā reia rupi kuaray oikea katy. Bete-Áven tekaoa e'ýa py ma ijapy.

<sup>13</sup> Ha'e va'e gui oaxa ov y Luz tekaoa katy, Luz regua ka'arua katy. Ha'e va'e ma Betel. Oguejy ov ykuaray ijapu'a'ia katy, ha'e va'e ov yvy'ā reia rupi oī va'e regua yvyty kuaray ijapu'a'ia katy oī va'e yvy'iry peve.

<sup>14</sup> Oove tema yvyty yke kuaray puku-a katy oī va'e rupi kuaray oikea katy oo vy. Ijapy ma Judá ramymino kuery retā Quiriate-Baal py. Ha'e va'e ma Quiriate-Jearim. Ha'e va'e ma ijapy kuaray oikea katy oī va'e.

<sup>15</sup> Ha'e gui ijapy kuaray puku-a katyguia ma ijypy Quiriate-Jearim apy kuaray oēa katy oī va'e gui. Ha'e gui oove ju Neftoa py yvu ikuai va'e peve.

<sup>16</sup> Oguejy ov yvyty Hinom ra'y rekoia yvyugua rexei oī va'e peve, refaim kuery rekoia yvyugua regua kuaray ijapu'a'ia katy rupi. Ha'e gui oguejy ov y Hinom yvyugua rupi, jebuseu kuery rekoia yvy'ā guy reia rupi kuaray puku-a katy oo vy. Ha'e gui En-Rogel katy ju oguejy.

<sup>17</sup> Ojeapa ov ykuaray ijapu'a'ia katy vy ovaē En-Semes py. Ha'e gui ma oaxa oiny Adumim yvy'ā re Gelilote oī va'e katy'i. Ha'e vy oguejy ov y Rúben ra'y Boã pegua ita oña peve.

<sup>18</sup> Oo ju kuaray puku-a katy yvy joja reia rupi, yvu ikuai va'e katy'i rupi oo vy. Ha'e gui oguejy ov yvy'āmbe reia katy.

<sup>19</sup> Ha'e va'e gui ma ijapy oaxa ov y Bete-Hogla peve, kuaray ijapu'a'ia katy rupi. Opa 'rā Ye'ē ro rembe py, Jordão yakā 'aa py. Ha'e va'e ma yvy apy kuaray puku-a katy oī va'e.

<sup>20</sup> Ha'e gui ijapy kuaray oua katy rupi oī va'e ma Jordão rembe rupi oī. Ha'e va'e ma Benjamim ramymino kuery pegua yvy apy ojere ov y va'e regua, peteī-teī hoo pygua kuery ikuiaia rami vy.

### *Benjamim kuery retā rery oīa*

<sup>21</sup> Benjamim regua peteī-teī hoo pygua kuery ikuiaia rami vy ha'e kuery pegua tetā ma Jericó, Bete-Hogla, Emeque-Quesis,

<sup>22</sup> Bete-Arabá, Zemaraim, Betel,

<sup>23</sup> Avim, Pará, Ofra,

<sup>24</sup> Quefar-Amonai, Ofni ha'e Geba. Ha'e javi vy ma doze tetā ikuai, ijyvýry tekaoa ikuai va'e reve.

<sup>25</sup> Ha'e gui Gibeão, Ramá, Beerote,

<sup>26</sup> Mispa, Cefira, Mosa,

<sup>27</sup> Requém, Irpeel, Tarala,

<sup>28</sup> Zela, Elefe, Jebus (ha'e va'e ma Jerusalém), Gibeá ha'e Quiriate. Ha'e javi vy ma catorze tetā ikuai, ijyvýry rupi tekaoa ikuai va'e reve. Ha'e va'e ma Benjamim ramymino kuery yvy, peteī-teī hoo pygua kuery ikuiaia rami vy.

## 19

### *Simeão kuery pe ijyvyrā omboja'oaague*

<sup>1</sup> Ha'e gui Simeão pe, Simeão ramymino kuery pe ma mokoia xorte oexa, peteī-teī hoo pygua kuery ikuiaia rami vy. Ha'e va'e kuery yvy ma Judá ramymino kuery yvy mbyte py itui.

<sup>2</sup> Ha'e kuery yvyrā ojopy va'ekue re oī Berseba, Seba, Moladá,

<sup>3</sup> Hazor-Sual, Balá, Ázen,

<sup>4</sup> Eltolade, Betul, Horma,

<sup>5</sup> Ziclague, Bete-Marcabote, Hazar-Susa,

<sup>6</sup> Bete-Lebaote ha'e Saruém. Ha'e javi vy ma treze tetā ikuai, ijyvýry tekoai kuai va'e reve.

<sup>7</sup> Ha'e gui Aim, Rimom, Eter ha'e Asā, irundy tetā, ijyvýry tekoai kuai va'e reve.

<sup>8</sup> Ha'e gui oī avi ha'e va'e tetā yvýry tekoai kuai va'e ha'e javive, Baalate-Beer peve. Ha'e va'e ma Ramá Neguebe regua. Ha'e va'e ma Simeão ramymino kuery yvyrā ojopy va'ekue, peteī-teī hoo pygua kuery ikuia rami vy.

<sup>9</sup> Simeão ramymino kuery yvyrā ma Judá ramymino kuery yvy gui omboja'oa, mba'eta ha'e kuery yvy ma tuvixa ete ha'e kuery pe. Ha'e nunga rupi Simeão ramymino kuery pe ha'e kuery yvy gui omboja'oa ikuai aguā.

### *Zebulom kuery pe ijyvyrā omboja'oague*

<sup>10</sup> Ha'e gui Zebulom ramymino kuery pe mboapya xorte oexa peteī-teī hoo pygua kuery ikuia rami vy. Ha'e kuery yvy apy ma Saride peve oo.

<sup>11</sup> Oē ovy kuaray oikea katy rupi Marala peve. Dabesete gui oo va'e ovaē yakā'i Jocneão katy'i oī va'e peve.

<sup>12</sup> Saride gui ojeapa ovy kuaray oua katy, Quislote-Tabor kyvō peve. Daberate katy oo vy Jafia peve oē ovy.

<sup>13</sup> Ha'e va'e gui oaxa ovy kuaray oēa katy Gate-Hefer ha'e Ete-Cazim katy. Rimom katy oo oiny Neá peve.

<sup>14</sup> Ha'e va'e rupi ojere ovy vy oaxa kuaray ijapu'a'ia katy Hanatom peve. Ijapy Ifta-El yvy'ā guy py.

<sup>15</sup> Oīve ju Catate, Naalal, Sinrom, Idala ha'e Belém. Ha'e javi vy doze tetā ikuai, ijyvýry tekoai kuai va'e reve.

<sup>16</sup> Ha'e va'e ma Zebulom ramymino kuery yvyrā ojopy va'ekue, peteī-teī hoo pygua kuery ikuia rami vy, ha'e va'e tetā ha'e ijyvýry tekoai kuai va'e reve.

### *Issacar kuery pe ijyvyrā omboja'oague*

<sup>17</sup> Ha'e gui Issacar ju. Issacar ramymino kuery pe ma irundaya xorte oexa, peteī-teī hoo pygua kuery ikuia rami vy.

<sup>18</sup> Ha'e va'e kuery yvy re oī Jezreel, Quesulote, Suném,

<sup>19</sup> Hafaraim, Siom, Anacarate,

<sup>20</sup> Rabite, Quisião, Ebés,

<sup>21</sup> Remete, En-Ganim, En-Hada ha'e Bete-Pazes.

<sup>22</sup> Ijyvy apy ma Tabor, Saazima ha'e Bete-Semes rupi oaxa ovy vy Jordão yakā rembe py ijapy. Ha'e javi vy dezesseis tetā ikuai, ijyvýry tekoai kuai va'e reve.

<sup>23</sup> Ha'e va'e ma Issacar ramymino kuery yvyrā ojopy va'ekue, peteī-teī hoo pygua kuery ikuia rami vy, ha'e va'e tetā ha'e ijyvýry tekoai kuai va'e reve.

### *Aser kuery pe ijyvyrā omboja'oague*

<sup>24</sup> Aser ramymino kuery pe ma peteī nhiruña xorte oexa, peteī-teī hoo pygua kuery ikuia rami vy.

<sup>25</sup> Ha'e kuery yvy re ma oī Helcate, Hali, Béten, Acsafe,

<sup>26</sup> Alameleque, Amade ha'e Misal. Ha'e gui oaxa ovy kuaray oikea katy Carmelo peve, ha'e gui Sior-Libnate katy.

<sup>27</sup> Ojeapa ovy kuaray oua katy Bete-Dagom peve. Oaxa ovy Zebulom ha'e Ifta-El yvyugua rupi, kuaray ijapu'a'ia katy oo Bete-Emeque ha'e Neiel peve. Ha'e gui oo oiny nhandeaxua regua rupi Cabul peve.

<sup>28</sup> Oaxa avi Ebrom, Reobe, Hamom ha'e Caná rupi, Sidom tuvixa va'e peve oo.

<sup>29</sup> Ojere ovy Ramá katy, Tiro tetā ikorapa va'e peve. Ha'e gui ma ojeapa ovy Hosa katy. Aczibe yvýry ye'ē rembe py ijapy.

**30** Oĩ avi Umá, Afeca ha'e Reobe. Ha'e javi vy ma vinte e duas tetã ikuai ijyvýry tekao ikuai va'e reve.

**31** Ha'e va'e ma Aser ramymino kuery yvyrã ojopy va'ekue, peteĩ-teĩ hoo pygua kuery ikuia rami vy.

### *Naftali kuery pe ijyvyrã omboja'oague*

**32** Ha'e gui Naftali ramymino kuery pe ma mboapy memea xorte oexa, peteĩ-teĩ hoo pygua kuery ikuia rami vy.

**33** Ha'e kuery yvy apy ma Helefe guive oo carvalho yvyraty Zaananim py oĩ va'e peve. Ha'e gui Admim-Neguebe katy oo, ha'e Jabneel katy Lacum peve. Ha'e gui Jordão yakã rembe py ijapy.

**34** Ojere ov yuaray oikea katy rupi Aznote-Tabor katy. Ha'e gui ma oaxa ov yucoque katy. Kuaray puku-a katy oĩ Zebulom yvy, ha'e rã kuaray oikea katy oĩ Aser yvy. Ha'e gui kuaray oikea katy oĩ Judá regua yvy Jordão rembe rupi.

**35** Tetã ikorapa va'e ma Zidim, Zer, Hamate, Racate, Quinerete,

**36** Adamá, Ramá, Hazor,

**37** Quedes, Edrei, En-Hazor,

**38** Irom, Migdal-El, Horém, Bete-Anate ha'e Bete-Semes. Ha'e javi vy dezenove tetã ikuai, ijyvýry tekao ikuai va'e reve.

**39** Ha'e va'e ma Naftali ramymino kuery yvyrã ojopy va'ekue peteĩ-teĩ hoo pygua kuery ikuia rami vy, ha'e va'e tetã ha'e ijyvýry tekao ikuai va'e reve.

### *Dã kuery pe ijyvyrã omboja'oague*

**40** Ha'e gui Dã ramymino kuery pe ma sete-a xorte oexa, peteĩ-teĩ hoo pygua kuery ikuia rami vy.

**41** Ha'e kuery yvy re ma oĩ Zorá, Estaol, Ir-Semes,

**42** Saalabim, Ajalom, Itla,

**43** Elom, Timna, Ecrom,

**44** Elteque, Gibetom, Baalate,

**45** Jeúde, Bene-Beraque, Gate-Rimom,

**46** Me-Jarcom, Racom ha'e yvy Jope katy'i oĩ va'e.

**47** Dã ramymino kuery pe ijyvy kyríve'i ramo ha'e kuery oje'oi vy joguero'a okuapy Lesém pygua kuery reve. Ipo'aka vy ojukapa kyxe py. Tetã re ipo'aka ma vy ikuai ha'e py. Ha'e vy omboery Dã, guamoĩ rery rupi ae.

**48** Ha'e va'e ma Dã ramymino kuery yvyrã ojopy va'ekue, peteĩ-teĩ hoo pygua kuery ikuia rami vy, ha'e va'e tetã ha'e ijyvýry tekao ikuai va'e reve.

### *Josué peguarã tetã omboaxaague*

**49** Ha'e gui Israel kuery yvy omboja'opa ma rire Num ra'y Josué pe ome'ẽ hekoarã ha'e kuery yvy mbyte py.

**50** SENHOR ijayvuague rami vy ixupe ome'ẽ Timnate-Sera tetã ojerureague, Efraim kuery ikuia mbyte py yvy'ã reia oĩ va'e py. Ha'e ramo ha'e va'e tetã ha'e ojapo jevy vy oiko ha'e py.

**51** Ha'e va'e yvy ma sacerdote Eleazar, Num ra'y Josué ha'e heta va'e kuery ruvixa kuery omboja'o okuapy xorte oexa vy. Israel kuery yvyrã omboja'o Siló py SENHOR renonde, onhemboaty atyrã ojapo va'ekue rokẽ py. Ha'e rami vy opa ma yvy omboja'o.

<sup>2</sup> — Aipo're Israel kuery pe: "Peiporavo ke amongue tetā onhemi atyrā, Moisés rupi pendevy ajapo ukaague rami vy.\*

<sup>3</sup> Ha'e va'e tetā jojukaare onhemiatiy 'rā oĩ, jojuka rive va'e, potae vy e'ŷ, ojekore vy rive jojuka va'ekue oo jepe aguã jouguy omoëague re imbopagaarã gui.

<sup>4</sup> Ha'e va'e tetā katy oo 'rā onhemi aguã. Tetā kora rokẽ py ovaẽ vy ha'e pygua nhomongeta va'ety kuery pe omombe'upa 'rā guekokue. Ha'e ramo mae omoinge 'rā tetā py. Ha'e vy ixupe ome'ẽ 'rā ha'e kuery reve oiko aguã.

<sup>5</sup> Xapy'a rei jouguy omoëague re imbopagaarã ha'e py ovaẽ ramo ipo py ha'e pygua kuery nomboaxai 'rā jojukaare, potae vy e'ŷ jojuka rire, nda'ija'e e'ŷi guive.

<sup>6</sup> Ha'e ramo ha'e va'e tetā py ae 'rā jojukaare oĩ, heta va'e kuery renonde ojexa uka rã omboayvu rã guarã, ha'e gui sacerdote yvateve va'e ha'e va'e jave py oĩ va'e omano e'ŷa ja. Ha'e ramo mae ma jojuka rive va'ekue oẽ vy ngoo katy ju 'rā ojevy tetā onhaague py ae", 're.

<sup>7</sup> Ha'e gui ma tetā ha'e kuery oiporavo va'e ma Galiléia regua Quedes, Naftali regua yvy'ã reia re oĩ va'e; Efraim regua Siquém yvy'ã reia re oĩ va'e; ha'e Quiriate-Arba Hebrom hery mboae va'e, Judá regua yvy'ã reia re oĩ va'e.

<sup>8</sup> Ha'e gui Jordão yakã rovai re Jericó rexei kuaray oua katy ma oiporavoa ae ma Rúben kuery ikuaria Bezer tekoia e'ŷa yvy'ãmbea tuvixa va'e re oĩ va'e; ha'e Gileade regua Ramote Gade kuery ikuaria py, ha'e gui Basã regua Golã, Manassés kuery ikuaria py.

<sup>9</sup> Ha'e va'e tetā oiporavo Israel kuery ha'e javi pe, amboae yvy regua ha'e kuery mbyte ikuai va'e pe guive. Ha'e py potae vy e'ŷ jojuka va'ekue ha'e javi onhemi atyrā, jouguy omoëague re imbopagaarã po py omano e'ŷ aguã, ha'e ramo 'rãgue py heta va'e kuery renonde ojexa uka aguã.

## 21

### *1 Crônicas 6.54-81*

<sup>1</sup> Ha'e gui sacerdote Eleazar ha'e Num ra'y Josué oĩa py ovaẽ okuapy levita regua tujakueve ruvixa ikuai va'e, ha'e Israel kuery regua ruvixa ikuaria py.

<sup>2</sup> Canaã yvy re Siló oĩ va'e py ha'e kuery ijayvu vy aipoe'i:

— Moisés rupi SENHOR ijayvu raka'e orevy pemboaxa aguã tetā orekuai aguã, ha'e ijyvýry rupi yvy itui va'e orerymba kuery roguereko aguã — he'i.

<sup>3</sup> Ha'e rami rã SENHOR aipoe'iague rami vy levita kuery pe Israel kuery omboaxa tetā oyvy re oĩ va'e, ha'e ijyvýry yvy itui va'e.

<sup>4</sup> Coatita kuery pe ranhe xorte oexa. Ha'e kuery regua sacerdote Arão ramymino kuery levita ikuai va'e ma xorte rupi ojopy treze tetā Judá, Simeão ha'e Benjamim kuery yvy regua.

<sup>5</sup> Ha'e rã Coate ramymino kuery mboae ma xorte rupi ojopy dez tetā Efraim, Dã ha'e Manassés regua mbyte rupi oja'o va'ekue yvy regua.

<sup>6</sup> Ha'e gui Gérson ramymino kuery ma xorte rupi ojopy treze tetā Issacar, Aser, Naftali ha'e Manassés regua oyvyrã ojopy ypy va'ekue yvy regua Basã py.

<sup>7</sup> Ha'e gui Merari ramymino kuery ma peteĩ-teĩ hoo pygua kuery ikuaria rami vy ojopy doze tetā Rúben, Gade ha'e Zebulom kuery yvy regua.

<sup>8</sup> Ha'e rami py levita kuery pe Israel kuery omboaxa ha'e va'e tetā ha'e javi, ijyvýrykue reve. Xorte rupi omboaxa, Moisés rupi SENHOR ojapo ukaague rami vy.

<sup>9</sup> Ha'e gui Judá ha'e Simeão ramymino kuery yvy regua pova'e tetā omboaxa.

<sup>10</sup> Levi ra'y Coate ramymino Arão ra'y kuery ikuai aguã, ha'e kuery pe ranhe xorte oexa.

<sup>11</sup> Ha'e kuery pe omboaxa Quiriate-Arba Judá regua yvy'ã reia re oĩ va'e (ha'e va'e ma Hebron), ijyvýrykue reve. Arba ma Enaque ru oiko va'ekue.

\* **20:2** Números 35.9-28; Deuteronômio 4.41-43; 19.1-13

<sup>12</sup> Ha'e rā tetā yvýrykue ha'e tekoa ikuai va'e ma Jefoné ra'y Calebe peguarā omboaxaa ae ma.

<sup>13</sup> Ha'e gui sacerdote Arão ramymino kuery pe omboaxa Hebrón tetā jojukaare oo jepe aguā, ijyvýrykue reve. Omboaxa avi Libna,

<sup>14</sup> Jatir, Estemoa,

<sup>15</sup> Holom, Debir,

<sup>16</sup> Aim, Jutá ha'e Bete-Semes ijyvýrykue reve meme. Ha'e javi vy ma nove tetā omboaxa mokoī regua yvy re.

<sup>17</sup> Ha'e gui Benjamim kuery yvy regua ma irundy tetā omboaxa: Gibeão, Geba,

<sup>18</sup> Anatote ha'e Almom, ijyvýrykue reve meme.

<sup>19</sup> Ha'e javi vy sacerdote Arão ramymino kuery pegua ma treze tetā omboaxaa ijyvýrykue reve.

<sup>20</sup> Ha'e gui Levi ra'y Coate ramymino kuery ma tetā ojopy xorte rupi Efraim kuery yvy regua.

<sup>21</sup> Ha'e kuery pe omboaxa Siquém tetā jojukaare oo jepe aguā Efraim regua yvy'ā reia re, ijyvýrykue reve. Omboaxa avi Gezer,

<sup>22</sup> Quibzaim ha'e Bete-Horom ijyvýrykue reve meme, irundy tetā.

<sup>23</sup> Ha'e gui Dã kuery yvy regua ma irundy tetā omboaxa: Elteque, Gibetom,

<sup>24</sup> Aijalom ha'e Gate-Rimom, ijyvýrykue reve meme.

<sup>25</sup> Ha'e gui Manassés regua mbyte rupi oja'o va'ekue yvy regua ma mokoī tetā omboaxa: Taanaque ha'e Gate-Rimom, ijyvýrykue reve meme.

<sup>26</sup> Ha'e javi vy ma dez tetā ijyvýrykue reve omboaxaa Coate ramymino kuery mboae pe.

<sup>27</sup> Ha'e gui Levi ra'y Gérson ramymino kuery pe ma Basã py Manassés regua kuery yvy regua omboaxa mokoī tetā: Golã jojukaare oo jepe aguā, ha'e Beesterá guive, ijyvýrykue reve meme.

<sup>28</sup> Issacar kuery yvy regua ma irundy tetā omboaxa: Quisião, Daberate,

<sup>29</sup> Jarmute ha'e En-Ganim, ijyvýrykue reve meme.

<sup>30</sup> Aser kuery yvy regua ma irundy tetā omboaxa: Misal, Abdom,

<sup>31</sup> Helcate ha'e Reobe, ijyvýrykue reve meme.

<sup>32</sup> Naftali kuery yvy regua ma Galiléia py omboaxa Quedes jojukaare oo jepe aguā, ijyvýrykue reve. Omboaxa avi Hamote-Dor ha'e Cartã ijyvýrykue reve meme, mboapy tetā.

<sup>33</sup> Ha'e javi vy Gérson regua kuery peteñ-teñ hoo pygua kuery ikuai rami vy ma treze tetā ojopy ijyvýrykue reve meme.

<sup>34</sup> Ha'e gui Levita kuery mboae Merari ramymino kuery pe ma Zebulom kuery yvy regua ma irundy tetā omboaxa: Jocneão, Cartá,

<sup>35</sup> Dimna ha'e Naalal, ijyvýrykue reve meme.

<sup>36</sup> Rúben kuery yvy regua ma irundy tetā omboaxa: Bezer, Jaza,

<sup>37</sup> Quedemote ha'e Mefaate, ijyvýrykue reve meme.

<sup>38</sup> Gade kuery yvy gui ma Gileade py omboaxa Ramote jojukaare oo jepe aguā, ijyvýrykue reve. Omboaxa avi Maanaim,

<sup>39</sup> Hesbom ha'e Jazer ijyvýrykue reve meme, irundy tetā ha'e javi vy.

<sup>40</sup> Ha'e va'e tetā ha'e javi ma xorte rupi omboaxaa Merari ramymino kuery pe, peteñ-teñ hoo pygua kuery ikuai rami vy, Levi regua voi ikuai ramo. Doze tetā ojopy.

<sup>41</sup> Ha'e rami vy Israel kuery yvy regua ma quarenta e oito tetā omboaxa levita kuery pe, ijyvýrykue reve meme.

<sup>42</sup> Peteñ-teñ tetā omboaxa ijyvýry rupi yvy itui va'e reve. Ha'e va'e tetā ha'e javi ma ha'e rami meme omboaxa.

<sup>43</sup> Ha'e rami py Israel kuery pe SENHOR ome'ẽ yvy ha'e javi, tamoī kuery pe ome'ẽ aguā re ouraague rami vy. Ha'e ramo ojopy ma vy ikuai ha'e py.

**44** Ha'e kuery pe SENHOR ome'ẽ opytu'u aguã oyvy ha'e javi rupi, tamoĩ kuery pe ouraague ha'e javi rami vy. Hovaigua kuery neĩ peteĩve nda'ipo'akai ha'e kuery re, ha'e kuery po py SENHOR omboaxapa ramo.

**45** Israel kuery pe mba'emo porã ojapo aguã re SENHOR ijayvuague peteĩ henda py voi ndoaxa rivei. Ha'e javi ojeupity.

## 22

*Mokoĩ regua ha'e amboae regua mbyte rupi oja'o va'ekue Josué ogueroayvu porãmba ma vy hoo katy omondoukaague*

**1** Ha'e ramo Josué oĩa py oenoĩ Rúben, Gade ha'e Manassés regua mbyte rupi oja'o va'ekue.

**2** Ha'e vy aipoe'i ha'e kuery pe:

— Peẽ kuery pe SENHOR rembiguai Moisés ijayvuague pejapopa ma. Ha'e gui xee voi xenhe'ẽ rendu pekuapy ajapo uka va'e ha'e javi py.

**3** Are ma, aÿ peve napeipytyvõ e'ÿi penderyvy kuery. Ha'e rami 'rãgue py pendejee pemoĩ SENHOR Penderuete ojapo uka va'ekue pejapopa aguã.

**4** Penderyvy kuery pe SENHOR Penderuete ome'ẽ ma opytu'u aguã, ijayvuague rami vy. Ha'e nunga rupi pejevy aÿ, tapeo penderekao katy, yvy pendevygua itui va'e katy, SENHOR rembiguai Moisés Jordão yakã rovai re pendevy omboaxa va'ekue py.

**5** Ha'e rami teĩ pemoĩ porã pota ke lei SENHOR rembiguai Moisés pendevy ojapo uka va'ekue, po rami: Peayvu 'rã SENHOR Penderuete, peiko 'rã ixuguiagua tape rupi anho, pemoĩ 'rã ojapo uka va'ekue pejapopa aguã, pejep'e aeme ixugui, ha'e peiko ixupe pendep'y a ha'e penenhe'ẽ ha'e javi py — he'i.

**6** Ha'e rami vy Josué ogueroayvu porãmba ma vy omondoukapa. Ha'e ramo guekoa katy ae oje'oi.

**7** Ha'e rami mba'eta Manassés regua kuery yvyrã ma Basã yvy re Moisés omboaxa ae ma va'ekue. Ha'e rã ha'e kuery regua mboae kuery yvyrã ma Josué omboaxa va'ekue tyvy kuery ikuiaia mbyte, kuaray oikea katy Jordão yakã kyvõguare. Ha'e gui Josué hekoia katy omondoukapa ta ma vy ogueroayvu porãmba.

**8** Ha'e vy aipoe'i ha'e kuery pe:

— Perekopa reve tapejevy porã'i penderekao katy, penerymba kuery reta reve, prata, ouro, overa va'e, ferro ha'e ao heta ete reve. Penderyvy kuery pe tapemboja'o penderovaigua kuery mba'e rei-reikue — he'i.

**9** Ha'e ramo Rúben, Gade ha'e Manassés regua mbyte rupi oja'o va'ekue ojevypa. Canaã yvy re Israel kuery rekoia Siló gui oje'oi ju Gileade yvy re ha'e kuery yvy itui va'e katy, ha'e py ae hekoarã Moisés omboaxa rire, SENHOR ijayvuague rami vy.

### *Jordão yakã rembe re altar ojapo jave guare*

**10** Ha'e gui Rúben, Gade ha'e Manassés regua mbyte rupi oja'o va'ekue oje'oi vy Jordão yakã rembe peve ovaẽ. Ha'e py ma peteĩ altar ojapo okuapy Jordão rembe re. Ha'e va'e altar ma tuvixa ete oexaa pavẽ va'erã.

**11** Ha'e ramo Israel kuery oendu aipo'ea rã: “Rúben ha'e Gade kuery Manassés regua mbyte rupi oja'o va'ekue reve ojapo okuapy peteĩ altar Jordão yakã rembe re, Canaã yvy Israel kuery ikuiaia katy”, 'ea rã.

**12** Ha'e ramigua Israel kuery oendu vy ono'õmba okuapy Siló py, ha'e gui oje'oi vy guyvy kuery rovai opu'ã aguã.

**13** Ha'e gui Gileade yvy katy Israel kuery omondouka sacerdote Eleazar ra'y Finéias hery va'e, Rúben ha'e Gade kuery Manassés regua mbyte rupi oja'o va'ekue ikuiaia katy.

**14** Hupive omondouka avi dez huvixa kuery, Israel kuery peteĩ-teĩ regua gui. Ha'e va'e kuery ma ngoo pygua kuery tujakueve ikuai, Israel regua heta va'e kuery ikuiaia gui omondouka.

**15** Ha'e ramo ha'e kuery oje'oi vy Rúben ha'e Gade kuery Manassés regua mbyte rupi oja'o va'ekue reve ikuaria py ovaẽ. Ha'e vy ha'e kuery pe ijayvu vy aipoe'i okuapy:

**16** — SENHOR pegua kuery nhomboaty va'e ha'e javi aipoe'i uka okuapy: Mba'exa tu pendeayvuague rami e'ŷ peiko Israel kuery Ruete rovai? Kova'e ára SENHOR pe pendekuaia gui pejepé'apa ri pekuapy. Mba'eta altar pejapo SENHOR rovai pendekuai aguã.

**17** Yma Peor py nhande kuery ojapo vaiague ri ty'y kyr̄i ete p̄evy?\* Ha'e nungakue gui ndajajeky'a'o ukapai teri aŷ peve, nhaneramoĩ kuery re SENHOR mba'emo vai ombou va'ekue ri.

**18** Mba'erã tu ha'vy aŷ voi pepoipa ri SENHOR gui? Mba'eta SENHOR rovai aŷ pendekuai ramo araka'eve rã ipoxy 'rã Israel kuery ha'e javi rovai.

**19** Xapy'a rei pendeyvyrã pejopy va'ekue re ha'eve'ŷa ramo peva ju SENHOR pegua yvy re, ha'e SENHOR pegua oo oĩa py. Mba'eta ha'eve 'rã ore kuery mbyte penderekao aguã. Ha'e rami e'ŷ vy teĩ pejapo vai eme guive SENHOR rovai, neĩ ore kuery rovai, SENHOR pegua altar 'rãgue py altar mboae pejapo py.

**20** Tyrã pa Zera ra'y Acã mba'emo omomba pyrã ojopy vy ha'eve'ŷa rami ojapo jave Israel kuery ha'e javi áry e'ŷ teve ou raka'e mboxy? Mba'eta ha'e anho'i e'ŷ omano va'ekue ojapo vaiague re — he'i okuapy.\*

**21** Ha'e ramo Rúben, Gade ha'e Manassés regua mbyte rupi oja'o va'ekue ombovai okuapy Israel kuery ruvixa ikuai va'e pe. Ha'e vy aipoe'i:

**22** — SENHOR, Nhanderuete ipo'akapa va'e! SENHOR, Nhanderuete ipo'akapa va'e! Ha'e ma oikuaa porã. Ha'e Israel kuery voi toikuaapa. Xapy'a rei ronhe'ẽ rendu e'ŷa rupi, e'ŷ vy SENHOR rovai rojapo vaia rupi roiko ramo toremomba aŷ'ive.

**23** Xapy'a rei SENHOR gui rojepé'a aguã ri altar-rã rojapo, ha'e rami e'ŷ vy hi'áry ojuka pyre, mba'emo aju, e'ŷ vy peteĩ rami orekuai aguã regua rome'ẽ aguã rojapo ramo SENHOR ae torembopaga.

**24** Ha'e rami 'rãgue py kova'e altar rojapo roexa'âmba rei reve orekuai vy, mba'eta xapy'a rei raka'eve rã orera'y kuery pe pendera'y kuery aipoe'i 'rã: "Mba'e nunga tu peẽ kuery pereko SENHOR Israel kuery Ruete reve?"

**25** Mba'eta Jordão yakã SENHOR onhono vy yvy apyrã omoĩ raka'e ore ha'e peẽ kuery mbyte, peẽ Rúben ha'e Gade ramymino kuery. Mba'eve ndaperekoi SENHOR reve", he'i 'rã okuapy. Ha'e rami vy pendera'y kuery ojapo 'rã orera'y kuery ojepe'a aguã rami SENHOR renonde ojererokyjea rupi ikuaria gui.

**26** Ha'e nunga rupi aiporo'e va'ekue orejeupe ae: "Po rami 'rã jajapo, peteĩ altar-rã, mba'emo roapy aguã e'ŷ, neĩ mymba rome'ẽ aguã e'ŷ.

**27** Ha'e rami 'rãgue py ha'e va'e toĩ ore ha'e peẽ kuery mbyte ikuua ukaarã, nhaneramymino kuery raka'e rã nhande rire ikuai va'erã pe, ha'e kuery oikuaa aguã SENHOR pe ete ore kuery orekuia, ha'e henonde anho mba'emo roapy, mymba rome'ẽ, ha'e peteĩ rami orekuai aguã regua rogueraa 'rã rome'ẽ aguã. Ha'e rami rã raka'eve rã orera'y kuery pe pendera'y kuery 'Mba'eve ndaperekoi SENHOR reve', he'i e'ŷ aguã."

**28** Ha'e nunga rupi ae orejeupe aiporo'e va'ekue: "Xapy'a rei raka'eve rã ha'e rami ha'e kuery ijayvu 'rã nhandevy, ha'e nhaneramymino kuery pe. Ha'e rami rã aipoja'e 'rã: 'Peikuaa pota SENHOR pegua altar-rã oreru kuery ojapo va'ekue re, mba'emo oapy aguã e'ŷ, neĩ mymba ome'ẽ aguã e'ŷ, ha'e rã ikuua ukaarã opyta aguã ore ha'e peẽ kuery mbyte', ja'e 'rã", ro'e.

**29** Ha'e nunga rupi nda'evei ete ore kuery SENHOR rovai roiko aguã, neĩ kova'e ára ixugui rojepé'a aguã. Altar-rã rojapo va'ekue áry ma norome'ẽi 'rãe mba'emo roapy reve, mba'emo aju, e'ŷ vy mymba rojuka va'ekue, SENHOR Nhanderuete pegua opy renonde altar hi'aĩ va'e áry e'ŷ vy — he'i okuapy.

\* **22:17** Números 25.1-9    \* **22:20** Josué 7

<sup>30</sup> Ha'e rami Rúben, Gade ha'e Manassés ramymino kuery ijayvu rã sacerdote Finéias ha'e Israel regua heta va'e kuery tujakueve ikuai va'e oendu vy oguerovy'a okuapy.

<sup>31</sup> Ha'e rami vy sacerdote Eleazar ra'y Finéias aipoe'i Rúben, Gade ha'e Manassés ramymino kuery pe:

— Aÿ roikuaa ma SENHOR nhanembyte oikoa. Mba'eta mba'eve ndapejapoi ra'e SENHOR rovai. Aÿ ma pejapo Israel kuery SENHOR po py jaiko vai e'ÿ aguã rami — he'i.

<sup>32</sup> Ha'e gui mae sacerdote Eleazar ra'y Finéias huvixa kuery mboae reve oeja oje'oivy Rúben ha'e Gade ramymino kuery ha'e py. Gileade yvy gui ha'e kuery ojevypa ju Canaã yvy re Israel kuery ikuiaia katy. Ha'e py ovaë vy heta va'e kuery pe omombe'upa.

<sup>33</sup> Ha'e rami ijayvu rã Israel kuery oendu vy oguerovy'a vy ima'endu'a porã okuapy Nhanderuete re. Ha'e vy nda'ijayvuvei Rúben ha'e Gade ramymino kuery rovai opu'ã aguã re, neñ ha'e kuery yvy ombovaipa aguã.

<sup>34</sup> Ha'e gui Rúben ha'e Gade ramymino kuery ma altar-rã ojapo va'ekue pe "Ikuua ucaa" he'i okuapy, mba'eta aipoe'i: "Nhanembyte oikuaa uka 'rã SENHOR ae Nhanderuete oikoa."

## 23

### *SENHOR guigua lei rami ikuai aguã re Josué ijayvuague*

<sup>1</sup> Yma ete rire, Israel kuery hovaigua kuery ijyvýry rupi ikuai va'e ha'e javi gui SENHOR omombytu'upa rire Josué tuja'i ma, oiko are'i ma.

<sup>2</sup> Ha'e vy Josué oña py oenoï Israel kuery ha'e javi, nhomogeta va'ety, huvixa kuery, nhomboayvu va'ety ha'e mba'emo re opena va'e kuery. Ha'e vy aipoe'i ha'e kuery pe:

— Xetuja'i ma, are ma aiko.

<sup>3</sup> Ha'e gui peẽ kuery pexapa ma SENHOR Penderuete peẽ kuery re oma'ë vy amboae regua kuery re ojapoague. Mba'eta ha'e kuery re SENHOR Penderuete ae opu'ã oikovy penderepy vy.

<sup>4</sup> Ma'ë, apy peẽ kuery pegua xorte aexa karamboae, amboae regua kuery amomba va'e yvykue pejopy aguã, Jordão yakã guive ye'ë tuvixa va'e peve kuaray oikea katy. Ha'e rami avi ha'e kuery va'e regua amongue okuave teri.

<sup>5</sup> SENHOR Penderuete oipe'apa 'rã penembyte gui, omoxë 'rã penerononde gui. Ha'e ramo pejopy 'rã ha'e kuery yvykue, SENHOR Penderuete ijayvuague rami vy.

<sup>6</sup> Ha'e nunga rupi penhea'ã ete ke kuaxia re lei Moisés ombopara va'ekue pejapopa aguã, ha'e va'e gui pejepa e'ÿ aguã pendeaxu e'ÿa katy, neñ pendeaxua katy,

<sup>7</sup> penhemoirû e'ÿ aguã amboae regua kuery peẽ kuery mbyte okuave va'e re. Penema'endu'a eme ha'e kuery ruete rery re, peura eme ha'e kuery re, peiko eme ha'e kuery pe, pembojerovia eme guive.

<sup>8</sup> Ha'e rami 'rãgue py SENHOR Penderuete re tema peĩ atã, kova'e ára peve pendekuaia rami ae.

<sup>9</sup> Mba'eta penerononde gui SENHOR oipe'a ma amboae regua imbaraeteve ha'e heta ikuai va'e teñ. Ha'e rã peẽ kuery re ma avave rei nda'ipo'akaai aÿ peve.

<sup>10</sup> Peẽ kuery regua peteñ'i ava teñ omonha 'rã mil ikuai va'e, SENHOR Penderuete ae penderepy vy joe opu'ã ramo, ijayvuague rami vy.

<sup>11</sup> Ha'e nunga rupi penhea'ã penenhe'ë re pepenaa py, SENHOR Penderuete anho peayvu aguã.

<sup>12</sup> Mba'eta xapy'a rei ixugui pejepa vy kova'e regua kuery penembyte okuave va'e re penhemoirû ha'e penhemotarã, ha'e gui ha'e kuery reve peẽ kuery penhomoirû vy,

<sup>13</sup> peikuaa pota ke pova'e re: SENHOR Penderuete anhetë ndoipe'avei ma 'rã peẽ kuery renonde gui. Ha'e rami 'rãgue py nhuã ha'e mba'emo mbo'aa rami 'rã oĩ pëvy. Oiko 'rã pendekupe rupi penenupãa rami, ha'e juu penderexa py oĩ va'e rami, kova'e yvy porã SENHOR Penderuete ome'ë va'ekue áry gui pekanhymba peve.

**14** — Ma'ẽ, aŷ xee aa ta ma tape yvy regua ha'e javi oje'opia rupi.\* Ha'e gui peẽ kuery ma pendepy'a ha'e penenhe'ẽ ha'e javi re peikuua porã neĩ peteĩve ayvu ndoaxa riveia SENHOR Penderuete pêvy mba'emo porã re ijayvuague ha'e javi. Ha'e nunga ha'e javi ojeupitypa, neĩ peteĩve ndoaxa rivei.

**15** Ha'e rami avi mba'emo porã oiko aguã re SENHOR Penderuete ijayvuague ha'e javi ojeupityague rami ae ju pendere ha'e ombou 'rã mba'emo vai ijayvuague rami vy, yvy porã pêvy ome'ẽ va'ekue áry gui pekanhymba peve.

**16** Xapy'a rei SENHOR Penderuete guexeve guarã ojapo va'ekue rupi e'ŷ pendekuaia gui pejepe'a vy amboae regua ruete pe ju pendekuai ha'e pemboete ramo SENHOR poxya hendy 'rã pendere. Ha'e are'ŷ re pekanhy 'rã yvy porã pêvy ome'ẽ va'ekue áry gui.

## 24

### *Josué omano ta vy heta va'e kuery omongoataague*

**1** Ha'e va'e rire Siquém py Josué oenoĩ Israel regua kuery ha'e javi. Israel mongetaaty kuery, huvixa, nhomboayvu va'ety ha'e mba'emo re opena va'e kuery oenoĩmba ramo ojexa uka okuapy Nhanderuete renonde.

**2** Ha'e ramo Josué aipoe'i heta va'e kuery ha'e javi pe:

— Po rami SENHOR Israel kuery Ruete ijayvu: "Ymave rupi peneramoĩ kuery ikuai va'ekue Eufrates yakã rovai re. Tuuete mboae pe ikuai, Abraão ha'e Naor ru Terá voi.

**3** Ha'e gui peneramoĩ Abraão yakã rovai gui xee aru vy ajapo raka'e Canaã yvy ha'e javi rupi oguata aguã rami. Amboeta avi hamymino kuery. Ta'yrã ame'ẽ Isaque,

**4** ha'e gui Isaque pe ma Jacó ha'e Esaú ame'ẽ. Esaú yvyrã ame'ẽ Seir regua yvy'ã reia. Ha'e rã Jacó ha'e ta'y kuery ma Egito katy oje'oi.

**5** Ha'e ramo ambou Moisés ha'e Arão, ha'e Egito pygua kuery amoingo axy mba'emo vai ambou vy. Ha'e va'e rire peẽ kuery roguenoẽ ha'e gui.

**6** Egito yvy gui peneramoĩ kuery anoẽmba ramo pevaẽ va'ekue ye'ẽ rembe re. Ha'e kuery rakykue Egito pygua kuery voi karóxa ha'e kavaju árygua reve ou va'ekue Ye'ẽ Pytã peve.

**7** Ha'e gui peneramoĩ kuery ojapukai ramo SENHOR omoĩ pytã reia peẽ ha'e Egito pygua kuery mbyte. Ha'e gui Egito pygua kuery áry yy ombou ramo ojao'ipa. Peẽ kuery pexa xee Egito yvy re mba'emo ajapo rã. Ha'e ramo pendekuai are va'ekue tekoia e'ŷa rupi.

**8** Ha'e va'e gui amorreu kuery Jordão yakã rovai re ikuai va'e yvy re ju xee rogueru. Ha'e va'e kuery ma peẽ kuery rovai opu'ã va'ekue ri pendepo py amboaxapa. Ha'e ramo pejopy ha'e kuery yvy, penerenonde gui amomba rire.

**9** Israel kuery re opu'ã avi raka'e Moabe pygua huvixa, Zipor ra'y Balaque. Ha'e rami vy oenoĩ uka Beor ra'y Balaão peẽ kuery re ijayvu vai aguã.

**10** Ha'e rami teĩ xee naendu potai Balaão ayvu. Ha'e rami 'rãgue py pendereroayvu porã aguã ramo ajapo. Ha'e rami vy rogueraa jepe ha'e kuery po gui.\*

**11** Ha'e gui Jordão yakã peaxa vy Jericó tetã peve pevaẽ rã peẽ kuery re Jericó pygua kuery opu'ã raka'e, ha'e amorreu kuery, ferezeu, cananeu, heteu, gurgaseu, heveu ha'e jebuseu kuery guive. Ha'e rami teĩ ha'e kuery amboaxapa raka'e peẽ kuery po py.

**12** Penerenonderã amondouka kanharõ guaxu. Ha'e va'e ma penerenonde gui oipe'apa, mokoïve amorreu kuery ruvixa va'e voi. Pendekyxe py e'ŷ, penderapa py e'ŷ guive oipe'aa.

**13** Pêvy ame'ẽ yvy pumba'apoague e'ŷ, ha'e tetã pejapo va'ekue e'ŷ. Ha'e ramo aŷ penderekoa ha'e py. Pe'u pekuapy uva ha'e oliveira'a penhotŷague gui e'ŷ", he'i SENHOR.

### *SENHOR pe ikuai aguã regua ombopyau jevyague*

**14** — Ha'e nunga rupi aŷ gui ma SENHOR renonde pendekuai pejererokyjea rupi. Ixupe pendekuai opa mba'e py, pejepe'a e'ŷ re. Ha'e gui pemombopa tuuete ramigua

\* **23:14** Ha'e rami ijayvu omano ta maa oikuaa vy. \* **24:10** Números 22.1-24

Eufrates rovai ha'e Egito yvy re peneramoĩ kuery ombojerovia va'ekue, SENHOR pe anho pendekuai.

<sup>15</sup> Ha'e rami avi xapy'a rei pẽvy SENHOR pe pendekuai aguã nda'evei ramo aÿve peiporavo marã ramigua pe ete pa peiko aguã: tuuete ramigua Eufrates rovai re peneramoĩ kuery ombojerovia va'ekue pe, e'ÿ vy amorreu kuery ruete kuery pe rive, ha'e kuery yvy re pendekuai vy. Ha'e rã xee ha'e xero pygua kuery ma SENHOR pe ae 'rã roiko – he'i.

<sup>16</sup> Ha'e ramo heta va'e kuery ombovai vy aipoe'i:

– Nda'evei ete SENHOR gui rojepo'a aguã tuuete mboae kuery pe rive orekuai aguã.

<sup>17</sup> Mba'eta SENHOR ae ma Nhanderuete. Ha'e ma Egito yvy gui nhande ha'e nhaneramoĩ kuery nhanerenoẽ va'ekue, escravo nhandekuaiague gui. Ojapo guive hexa pyrã tuvixa va'e jaexa va'e, ha'e gui opa rupi tape jaguataa rupi opena porã nhandere, amboae regua kuery ikuaria rupi roaxaa rupi guive.

<sup>18</sup> Nhanerenonde gui SENHOR oipe'a va'ekue ha'e va'e kuery ha'e javi, amorreu kuery kova'e yvy re ikuai va'ekue voi. Ha'e nunga rupi ore kuery voi orekuai 'rã SENHOR pe, ha'e ae ma Nhanderuete oiko ramo – he'i okuapy.

<sup>19</sup> Josué aipoe'ive ju heta va'e kuery pe:

– Nda'evei 'rã ko SENHOR pe pendekuai aguã, mba'eta Nhanderuete ma iky'a e'ÿ va'e. Ha'e ma oipota hexe anho pejerovia. Ha'e rami vy ixupe penderekoi vai ramo nomboguei 'rã pejejavyague.

<sup>20</sup> Mba'eta SENHOR pe peikoa gui pejepe'a vy tuuete amboae ramigua pe ju pendekuai ramo ha'e onhemoingo 'rã peẽ kuery rovai, penemoingo axy 'rã penemokanhymba peve, peẽ kuery pe ojapo porã ranhe rire tei – he'i.

<sup>21</sup> Ha'e rami rã heta va'e kuery ombovai:

– Any ri, SENHOR pe 'rã orekuai – he'i okuapy.

<sup>22</sup> Ha'e gui Josué aipoe'i heta va'e kuery pe:

– Ha'e rami vy peẽ kuery ma penderovai ae peikuua uka SENHOR peiporavoa rami, ixupe pendekuai aguã.

Ombovai vy

– Tá, ha'e rami ae roikuua uka – he'i okuapy.

<sup>23</sup> Josué aipoe'i:

– Ha'e rami vy aÿ pemombopa tuuete amboae ramigua penembyte ikuai va'e, ha'e pendepy'a re pemoĩ SENHOR Israel kuery Ruete pe anho peiko aguã.

<sup>24</sup> Heta va'e kuery ombovai Josué pe:

– SENHOR Nhanderuete pe orekuai 'rã, ha'e ijayvu rã ronhe'ẽ rendu 'rã guive – he'i okuapy.

<sup>25</sup> Ha'e rami py ha'e va'e ára Siquém py Josué heta va'e kuery reve ojapo SENHOR pe ikuai aguã regua. Ha'e kuery pe oeja ha'e rami ae ikuai aguã.

### *Ita nhomoma'endu'aarã omopu'âague*

<sup>26</sup> Ha'e ramigua ayvu Josué ombopara kuaxia para Nhanderuete guigua lei oĩa va'e re. Ha'e gui peteĩ ita tuvixa va'e ojopy vy omopu'ã imo'amy ha'e py, yvyra carvalho SENHOR pegua henda iky'a e'ÿ va'e py hi'aĩ va'e guy py.

<sup>27</sup> Ha'e vy heta va'e kuery pavẽ pe Josué aipoe'i:

– Ma'ẽ, kova'e ita ma penema'endu'a aguã oĩ, mba'eta hexei ha'e va'e ayvu ha'e javi SENHOR omombe'u. Ha'e va'e ma penemoma'endu'a 'rã Penderuete pe pendeapu e'ÿ aguã – he'i.

<sup>28</sup> Ha'e gui Josué omondoukapa ju heta va'e kuery, peteĩ-tei hekoa katy.

### *Juízes 2.6-9*

<sup>29</sup> Ha'e va'e nunga oiko rire SENHOR rembiguai Num ra'y Josué omano, cento e dez ma'etÿ re ma oikoa py.

30 Ha'e ramo ijyvy re ae onhono porãa, Timnate-Sera, Efraim regua yvyty reia re oĩ va'e py, Gaás yvyty regua kuaray ijapu'a'ia katy.

31 Josué oikovea pukukue re Israel kuery ikuai SENHOR pe, ha'e gui Josué ndoikovevei ma rire nhomongeta va'ety kuery ikuia pukukue re ju, Israel kuery pe SENHOR ojapo va'ekue oikuaapa va'e ramo.

32 Ha'e gui José kãgue Israel kuery Egito yvy gui ogueru va'ekue ma Siquém yvy re ojaty inony. Yvy Siquém ru Hamor ra'y kuery gui cem hatã'i va'e prata guigua re Jacó ojogua va'ekue py ae onhono porã. Ha'e rami rire ha'e va'e yvy ma José ramymino kuery mba'erã itui.

33 Arão ra'y Eleazar omano avi ramo onhono porãa Gibeá py. Ha'e va'e yvy Efraim regua yvyty reia re oĩ va'e ma ta'y Finéias peguarã ome'ẽ mbyre.

## Joguerekoa juiz kuery opena jave guare oĩa Joguerekoa juiz kuery opena jave guare oĩa

Josué omano ma ramo Israel kuery “Oeja rivepa guamoĩ kuery Ruete Senhor Egito yvy gui oguenoẽmba va'ekue ri. Ha'e vy ovapa nguuete kuery mboae re, ha'e kuerya katy rai'i rupi ikuai va'e kuery ruete re. ... Ha'e nunga rupi Israel kuery rovai Senhor poxya hendy vy omboaxa mba'emo pe'apaarã kuery po py. Ha'e rã oipe'apa ha'e kuery oguerekoo va'ekue. Hovaigua kuery ha'e katy'i rupi ikuai va'e kuery po py ae omboaxa ramo ojejopy uka ngovaigua kuery pe. ... Ha'e gui Senhor omoĩ joguerekorã kuery, mba'emo pe'apaa kuery po gui oepy aguã. ... Joguerekorã omoĩ va'ekue reve Senhor oiko vy oepypa hovaigua kuery po gui, joguerekoa oikoa pukukue re. Mba'eta ha'e kuery moingo axya ha'e imbojexavai reia kuery káuxa ipoaẽ okuapy. Ha'e nunga Senhor oendu vy omboaxy. Ha'e rami teĩ joguerekoa omano ma rire ha'ekue rami ae ju'rã ikuai” (2.12a, 14, 16, 18-19a).

Ha'e javi vy treze joguerekorã Nhanderuete omoĩ raka'e. Ha'e kuery va'e regua ma Gideão ha'e Sansão. Ha'e rami teĩ heta va'e kuery ha'eve'ŷa rami anho ikuai. Opaa py aipoe'i: “Ha'e va'e jave ma ndoikoi huvixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive” (21.25).

Kova'e kuaxia py ijayvua rami vy Nhanderuete pegua kuery ixupe ete ri ikuai vy ikuai porã 'rã. Ha'e rã ndojeroviai rei ramo ha'e kuery pe nda'evei 'rã. Jajejavy rei teĩ Nhanderuete pe jajapukai ramo nhandeperdoa 'rã tema.

### *Cananeu kuery re Judá kuery ipo'akaague*

<sup>1</sup> Josué omano rire Israel kuery oporandu okuapy SENHOR pe. Ha'e vy aipoe'i:

— Ore kuery va'e regua mava'e nda'u ha'e ranhe oo 'rã cananeu kuery ikuaria py, ha'e kuery rovai opu'ã aguã?

<sup>2</sup> SENHOR ombovai:

— Judá kuery ma oo 'rã. Mba'eta ha'e kuery po py ma amboaxa ma yvy — he'i.

<sup>3</sup> Ha'e ramo Judá kuery aipoe'i guyvy kuery Simeão regua pe:

— Jaa ke orerupive jajopy aguã oreyyvrã xorte rupi ome'ẽ mbyre. Nhapu'ã 'rã cananeu kuery rovai. Ha'e va'e rire ore kuery ju 'rã penderupive roo, pendeyvyrã xorte rupi ome'ẽ mbyre py — he'i ramo ha'e kuery rupive Simeão kuery oo avi.

<sup>4</sup> Judá kuery oje'oi rã ipo py SENHOR omboaxa cananeu ha'e ferezeu kuery. Ha'e ramo Bezeque py ojukapa ha'e kuery va'e regua dez mil avakue.

<sup>5</sup> Bezeque py ma ha'e kuery Adoni-Bezeque ojou vy hexe opu'ã okuapy. Ha'e vy ojuka cananeu ha'e ferezeu kuery.

<sup>6</sup> Ha'e rã Adoni-Bezeque ma ojava ovvy teĩ hakykue oje'oi vy oupity vy ojaya ikuã guaxu joavaive ha'e ipyxã guaxu voi.

<sup>7</sup> Ha'e ramo Adoni-Bezeque aipoe'i:

— Setenta huvixave ikuai ha'e va'e kuery kuã guaxu ha'e ipyxã guaxu ojayapaa reve omono'õ okuapy va'ekue tembi'u kure'i xe-mesa guy py. Ha'e gui joe xee ajapoague rami ae Nhanderuete xembopaga avi — he'i.

Ha'e rire Jerusalém py ogueraa ramo omano ha'e py.

<sup>8</sup> Judá kuery ma Jerusalém rovai ju opu'ã vy ipo'akapa. Ha'e vy ojukapa kyxe py, ha'e tetã re omboja tata.

<sup>9</sup> Ha'e va'e rire Judá kuery oje'oi ju opu'ã aguã cananeu kuery yvyty áry rupi ikuai va'e re, Neguebe rupi ha'e yvy'ã guy rupi ikuai va'e re.

**10** Ha'e gui cananeu kuery Hebrón py ikuai va'e rovai ju Judá kuery oje'oi. Ha'e va'e rery ypy ma Quiriate-Arba. Ha'e vy Judá kuery ojuka Sesai, Aimã ha'e Talmai.

### *Josué 15.14-19*

**11** Ha'e va'e gui ma Debir tetã py ikuai va'e rovai opu'ã aguã ju oje'oi. Ymave ma Debir rery ma Quiriate-Sefer.

**12** Calebe aipoe'i:

— Amongue va'e rei Quiriate-Sefer oitypa vy ipo'aka va'ekue pe ma ame'ẽ 'rã xerajy Acsa ta'yxyrã — he'i.

**13** Ha'e gui Calebe ryvy Quenaz ra'y Otniel va'e ae ipo'aka tetã re. Ha'e ramo ixupe Calebe ome'ẽ guajy Acsa ta'yxyrã.

**14** Ha'e va'e ma omea py oo vy aipoe'i:

— Tereo xeru pe ejerure peteĩ henda yvy re — he'i. Ha'e gui kunha va'e ae mburika'i áry gui oguejy ramo Calebe oporandu ixupe:

— Mba'e tu reipota?

### *15 Ombovai:*

— Eme'ẽ rive xevy peteĩ mba'e. Yvy pirua rive ma xevy reme'ẽ va'ekue ri yvu avi eme'ẽ xevy — he'i ramo ixupe Calebe ome'ẽ yvy'ã re ha'e yvy'ã guy rupi yvu ikuai va'e.

### *Amboae rupi ipo'akaague*

**16** Judá kuery reve Moisés ratyu queneu va'e ra'y kuery oguata avi oje'oivy. Tetã pindoty va'e gui oje'oi Judá regua tekao e'ŷa peve, Arade rexei kuaray puku-a katy.\* Ha'e py oje'oi vy ikuai ha'e pygua kuery reve.

**17** Ha'e gui Judá kuery guyvy kuery Simeão regua reve oje'oi vy ojukapa cananeu kuery Zefate py ikuai va'ekue, omomba ete. Ha'e nunga rupi ha'e va'e omboerya ju Horma.<sup>†</sup>

**18** Judá kuery ojopypa avi Gaza, Asquelom ha'e Ecrom, ha'e katy'i rupi yvy ikuai va'e ha'e javi reve.

**19** Judá kuery reve SENHOR oiko ramo oipe'apa yvyty rupi ikuai va'ekue. Ha'e rã yvyugua re ikuai va'e ma ndoipe'a kuaai, karóxa ferro guigua ha'e kuery oguereko ramo.

**20** Ha'e gui Moisés ijayvuague rami vy Calebe pe omboaxaa Hebrón tetã. Ha'e ramo ha'e gui Calebe oipe'apa Enaque ra'y kuery mboapy ikuai va'ekue.

**21** Ha'e rã Benjamim kuery ma ndoipe'a reguai jebuseu kuery Jerusalém py ikuai va'e. Ha'e rami 'rãgue py Benjamim kuery reve jebuseu kuery ikuai Jerusalém py ae, aŷ peve.

**22** José ramymino kuery voi oje'oi Betel tetã rovai opu'ã aguã. Ha'e ramo ha'e kuery reve SENHOR oiko.

**23** Ha'e rami vy Betel re ha'e kuery omondouka avakue oikuua pota nhemi aguã. Ha'e va'e tetã omboery ypyague ma Luz.

**24** Oikuua pota va'e kuery oexa okuapy peteĩ ava tetã gui oẽ ouvy rã. Ha'e vy aipoe'i ixupe:

— Exa uka na orevy tetã katy oikeaty. Ha'e rami rã romboaxy 'rã — he'i.

**25** Ha'e gui tetã katy oikeaty ha'e oexa uka ramo ha'e kuery ojukapa tetã pygua kuery kyxe py. Ha'e rã ha'e va'e ava hoo pygua kuery reve ma ndojukai.

**26** Ha'e ramo heteu kuery yvy re ju ava va'e oo vy peteĩ tetã ojapo ha'e py, ha'e omboery Luz. Ha'e va'e ma hery oime aŷ peve.<sup>‡</sup>

### *Yvy Israel kuery ndojopypai teri va'ekue re ijayvuague*

**27** Ha'e gui Manassés kuery ma ndoipe'ai Bete-Seã pygua kuery, neĩ Taanaque, Dor, Ibleão, neĩ Megido pygua kuery, neĩ ha'e katy'i rupi tekao ikuai va'e pygua kuery, mba'eta cananeu kuery oĩ atãve okuapy oyvy re ae ikuai aguã.

\* **1:16** Tetã pindoty ma Jericó ae (Deuteronômio 34.3, 2 Crônicas 28.15). † **1:17** Tery Horma ma “Ombovaipaague” 'ea. ‡ **1:26** Tery Luz ma “Amêndoа'y” 'ea ha'e kuery ayvu py.

<sup>28</sup> Israel kuery imbaraeteve ma vy omomba'eapo nhea'ã cananeu kuery. Ha'e rami teĩ ndoipe'apai.

<sup>29</sup> Efraim kuery ma ndoipe'ai cananeu kuery Gezer py ikuai va'e. Ha'e ramo ha'e kuery reve ikuaise tema Gezer py ae.

<sup>30</sup> Zebulom kuery ma ndoipe'ai avi Quitrom neĩ Naalol py ikuai va'e. Ha'e ramo cananeu kuery ikuaise tema ha'e kuery reve, omiba'eapo nhea'ã aguã rami ikuai.

<sup>31</sup> Aser kuery ma ndoipe'ai Aco py ikuai va'e, neĩ Sidom, Alabe, Aczibe, Helba, Afeca, neĩ Reobe pygua kuery voi.

<sup>32</sup> Ha'e rami rire Aser kuery ma cananeu kuery mbyte rupi ae ikuai ha'e va'e yvy re, ndoipe'apai rire.

<sup>33</sup> Naftali kuery ma ndoipe'ai Bete-Semes pygua kuery, neĩ Bete-Anate pygua kuery voi. Ha'e rami vy cananeu kuery mbyte rupi ikuaise tema ha'e va'e yvy re. Ha'e rã Bete-Semes ha'e Bete-Anate pygua kuery ma omomba'eapo nhea'ã.

<sup>34</sup> Ha'e gui amorreu kuery ojapo Dã kuery yvy'ã rupi anho ikuai aguã rami, yvy'ã guy katy oguejy e'ŷ aguã.

<sup>35</sup> Ha'e rami ae avi amorreu kuery onhea'ã okuapy Heres yvyty re ikuai aguã, Ajalom ha'e Saalabim re. Ha'e rami teĩ José ramymino kuery ipo'aka nho vy omomba'eapo nhea'ã.

<sup>36</sup> Amorreu kuery ikuaria apy ma Acrabim ha'e Sela guive oo oiny yvy'ã katy.

## 2

### *Israel kuery pe Nhanderuete ijayvu atãague*

<sup>1</sup> Ha'e gui SENHOR-a guigua anjo ma Gilgal gui oẽ vy oo Boquim tetã py. Ha'e vy aipoe'i:

— Ajapo raka'e Egito gui peẽmba aguã rami, ha'e rogueru yvy aura reve peneramoĩ kuery pe ame'ẽ aguã re ju. Xee aipoa'e va'ekue: “Nambovaipai 'rã xereve guarã peẽ kuery reve ajapo va'ekue.

<sup>2</sup> Ha'e rã peẽ ma nda'evei kova'e yvy regua kuery reve pejapo aguã peteĩ rami pendekuai aguã. Ha'e rami 'rãgue py peitypa 'rã ha'e kuery altar ikuai va'e", ha'e va'ekue ri peẽ naxenhe'ẽ rendui. Mba'e re tu ha'e rami pejapo?

<sup>3</sup> Ha'e nunga rupi xee aipoa'e avi: “Xee ma ndaipe'ai 'rã ha'e kuery penerenonde gui. Ha'e rami 'rãgue py penderovaigua riae 'rã ikuai, ha'e tuuete ramigua ikuai va'e voi nhuã penembo'aarã 'rã ikuai", ha'e va'ekue — he'i.

<sup>4</sup> SENHOR-a guigua anjo ha'e rami Israel kuery ha'e javi pe ijayvu ramo ha'e kuery onhendu atã vy ojae'o okuapy.

<sup>5</sup> Ha'e nunga rupi ha'e va'e henda omboery Boquim.\* Ha'e gui ha'e py mba'emo ome'ẽ okuapy SENHOR pe.

### *Josué 24.29-31*

<sup>6</sup> Josué heta va'e kuery omondoukapa rã Israel kuery peteĩ-teĩ regua oje'oi oyvyrã ojopy aguã katy.

<sup>7</sup> Josué oikoa pukukue re ma SENHOR pe anho heta va'e kuery ikuai, ha'e gui Josué ndoikovei ma rire nhomongoeta va'ety kuery ikuaria pukukue re ju. Ha'e va'e kuery ma Israel kuery pe SENHOR mba'emo porã tuvixa va'e ojapo rã oexapa va'ekue.

<sup>8</sup> Ha'e gui ma Num ra'y Josué SENHOR rembiguai va'e omano, cento e dez ma'etõ ma oguerekao py.

<sup>9</sup> Ha'e ramo onhono porãa ijyvy apy re ae, Timnate-Heres py, Efraim kuery yvy re yvyty oĩ va'e re, Gaás yvyty regua kuaray ijapu'aia katy.

<sup>10</sup> Ha'e va'e javegua kuery ha'e javi avi omano rã ogueraa tuu kuerya py. Ha'e va'e kuery rire ma ta'y ha'e tajy kuery ju ikuai SENHOR oikuua e'ŷ va'e, neĩ Israel kuery pe mba'emo porã ojapo va'ekue voi ndoikuuai okuapy.

\* <sup>2:5</sup> Tery Boquim ma “Ojae'oa” 'ea.

<sup>11</sup> Ha'e rami vy SENHOR renonde Israel kuery ojapo okuapy ha'eve'ŷ va'e, Baal ra'angaa ikuai va'e re rive ikuai vy.

<sup>12</sup> Oeja rivepa guamoï kuery Ruete SENHOR Egito yvy gui oguenoëmba va'ekue ri. Ha'e vy ovapa nguuete kuery mboae re, ha'e kuerya katy rai'i rupi ikuai va'e kuery ruete re. Ha'e nunga rive ha'e kuery omboete vy ombopoxy SENHOR,

<sup>13</sup> SENHOR gui ojepe'apa vy Baal ha'e Astarote pe rive ikuiaia py.

<sup>14</sup> Ha'e nunga rupi Israel kuery rovai SENHOR poxya hendy vy omboaxa mba'emo pe'apaarã kuery po py. Ha'e rã oipe'apa ha'e kuery oguerekoo va'ekue. Hovaigua kuery ha'e katy'i rupi ikuai va'e kuery po py ae omboaxa ramo ojejopy uka ngovaigua kuery pe.

<sup>15</sup> Ha'e kuery rovai tema SENHOR po oĩ oje'oia rupi rei. Ha'e kuery re ma mba'emo vai anho SENHOR ombou, oura reve ijayvuague rami vy. Ha'e rami rã ojexavai ete okuapy.

<sup>16</sup> Ha'e gui SENHOR omoï joguerekooarã kuery, mba'emo pe'apaa kuery po gui oepy aguã.

<sup>17</sup> Ha'e rami teĩ nonhe'ẽ rendui avi okuapy joguerekooa kuery. Ha'e vy ovapa okuapy amboae ramigua tuuete kuery re, ha'e vy omboete okuapy. Ojepe'a pojava guamoï kuery SENHOR onhe'ẽ rendua rupi oje'oiague gui. Ha'e vy nda'ikuavei guamoï kuery ikuaiague rami.

<sup>18</sup> Juguerekooarã omoï va'ekue reve SENHOR oiko vy oepypa hovaigua kuery po gui, joguerekooa oikoa pukukue re. Mba'eta ha'e kuery moingo axya ha'e imbojexavai reia kuery káuxa ipoaõ okuapy. Ha'e nunga SENHOR oendu vy omboaxy.

<sup>19</sup> Ha'e rami teĩ joguerekooa omano ma rire ha'ekue rami ae ju 'rã ikuai. Ha'e vy guamoï kuery ikuaiague gui nda'eveive ete ju okuapy, amboae regua tuuete re ovapa, ha'e nunga pe rive ikuai ha'e omboete okuapy. Peteĩ henda py voi ndojep'e ai teko vai ojapo okuapya gui, neĩ ha'eve'ŷa rami rei ikuiaia gui.

<sup>20</sup> Ha'e nunga rupi Israel kuery rovai SENHOR poxya hendy. Ha'e vy aipoe'i:

— Kova'e kuery nda'ikuai ae tamoï kuery pe xereve guarã ajapo va'ekue rupi, naxenhe'ẽ rendui guive.

<sup>21</sup> Ha'e ramo ha'e kuery renonde gui xee voi ndaipe'avei 'rã amboae regua kuery, Josué omano vy oeja rive va'ekue rembyre.

<sup>22</sup> Ha'e rami 'rãgue py ha'e va'e regua aeja 'rã Israel kuery aeko a'ã aguã, aikuua aguã SENHOR guigua tape rupi tamoï kuery ikuaiague rami ikuai 'rãa, tyrã pa anya — he'i.

<sup>23</sup> Ha'e rami vy ha'e kuery mbyte py SENHOR oeja amboae regua kuery, ndoipe'a voi, neĩ nomboaxapai guive Josué po py.

### 3

#### *Israel kuery mbyte amboae rami rei onhembo'ea rupi ikuai va'e re ijayvuague*

<sup>1</sup> Pova'e regua kuery ma SENHOR oeja va'ekue Israel kuery oa'anga aguã, mba'eta Israel kuery pavẽ e'ŷ oikuua Canaã yvy re joe opu'ãa katy oo aguã.

<sup>2</sup> Ha'e rami ojapo Israel kuery joe opu'ã aguã oikuua e'ŷ teri va'ekue'-ekue ombo'e vy.

<sup>3</sup> Ijyvy re oeja va'ekue ma peteĩ nhiruĩ filisteu regua yvatekueve va'e, ha'e cananeu kuery ha'e javi, Sidom tetã pygua ha'e heveu kuery Líbano yvy'ã re ikuai va'e, Baal-Hermom yvy'ã guive Hamate katy oikea peve.

<sup>4</sup> Ha'e va'e kuery optya SENHOR oeko a'ã aguã Israel kuery, oikuua aguã ha'e kuery ojapyxaka 'rã paa tamoï kuery pe Moisés rupi ojapo uka va'ekue re.

<sup>5</sup> Ha'e ramo Israel kuery ma heteu kuery mbyte rupi, amorreu, ferezeu, heveu ha'e jebuseu kuery mbyte rupi ikuai vy

<sup>6</sup> gua'yxyrã ogueraa ha'e va'e regua rajy kuery, ha'e guajy kuery omomenda ha'e va'e regua ra'y kuery re. Ha'e kuery ruete kuery omboete avi okuapy.

*Cusã-Risataim po gui Otniel Israel kuery oepyague*

<sup>7</sup> SENHOR renonde rupi Israel kuery ha'eve'ŷa rami ikuai, hexaraipa SENHOR nguuete gui. Ha'e vy omboete okuapy Baal ra'angaa ikuai va'e ha'e yvyra aygue gui ta'angaarã omopu'ã mbyre.

<sup>8</sup> Ha'e ramo ha'e kuery rovai SENHOR poxya hendy vy omboaxapa Mesopotâmia pygua huvixa Cusã-Risataim po py. Ha'e ramo oito ma'etŷ re Cusã-Risataim rembiguai ikuai.

<sup>9</sup> Ha'e gui SENHOR pe Israel kuery ojapukai okuapy ramo hepyarã ombou Calebe ryvy Quenaz ra'y Otniel. Ha'e ramo oepy.

<sup>10</sup> Ha'e va'e re SENHOR guigua Nhe'ê ou ramo oikuaa pota Israel kuery re. Joe opu'ã aguã katy ha'e oo ramo ipo py SENHOR omboaxa Mesopotâmia pygua huvixa Cusã-Risataim. Ha'e ramo Otniel ipo'aka hexe.

<sup>11</sup> Ha'e rami rire quarenta ma'etŷ re optyu'upaa yvy re. Ha'e gui ma Quenaz ra'y Otniel omano.

### *Eglom rembiguai ranhe ha'e kuery ikuaiague*

<sup>12</sup> Peteïgue ju Israel kuery ha'eve'ŷa ramigua ikuai SENHOR renonde. Ha'e ramo Israel kuery re SENHOR ombopo'aka Moabe pygua huvixa Eglom, henonde ha'eve'ŷa rami ikuai rire.

<sup>13</sup> Ha'e va'e ma ojea py omboaty Amom ha'e Amaleque kuery. Ha'e kuery reve oje'oi vy ojuka Israel kuery regua. Tetã pindoty va'e re avi ipo'aka.

<sup>14</sup> Dezoito ma'etŷ re Israel kuery ikuai Moabe pygua huvixa Eglom va'e rembiguai.

### *Eúde joepy jevyague*

<sup>15</sup> Ha'e gui SENHOR pe Israel kuery ojapukai okuapy ramo hepyarã ombou peteï ava ijaxu va'e, Benjamim regua Gera ra'y Eúde. Ha'e va'e po rupi Israel kuery omondouka peráta Moabe pygua kuery ruvixa Eglom pe omboaxa va'erã.

<sup>16</sup> Ha'e rã Eúde ma peteï kyxé haimbe jovai va'e ojapo, ijyva ku'a peve ipuku-a va'e. Ha'e va'e ma oku'a oiporu kuaa re omoĩ, oao guy rupi.

<sup>17</sup> Ogueraa avi peráta Moabe pygua kuery ruvixa Eglom pe ome'ê va'erã. Eglom ma ava guaxu rei.

<sup>18</sup> Peráta ogueru va'ekue ome'ê rire ma omondoukapa ju avakue ngupivegua, ha'e kuery reve oẽ avi ranhe.

<sup>19</sup> Ha'e gui Gilgal py ta'angaa ikuaria peve ooague gui ojevy ju. Ha'e vy aipoe'i huvixa pe:

- Xeruvixa, xee areko peteï ayvu xee ae'i aikuia va'e ndevy guarã.

Huvixa ombovai vy

— Ekyrirí ranhe — he'i vy guenonde gui omondoukapa ijyvýry ikuai va'ekue.

<sup>20</sup> Yro'yxâvea'i jave ramo huvixa oguapy oiny peteï opy ja'o'i py. Oĩa py Eúde oike vy aipoe'i:

- Areko peteï ayvu Nhanderuete guigua ndevy amombe'u va'erã — he'i ramo Eglom opu'ã tenda oĩa gui.

<sup>21</sup> Ha'e ramo Eúde oaxua regua okuave'ê vy oekyi kyxé oyke oiporu kuaa regua gui, ha'e oipyxo hye py.

<sup>22</sup> Haimbea reve hi'y voi oike, ha'e hye gui kyxé ndoekyi ramo ikyra onhembotypa hi'áry. Ha'e gui Eúde ma okẽ'i oĩ va'e rupi oẽ vy

<sup>23</sup> oaxa ovy oikeaty rupi, okẽ ombotypa vy ojoko rire.

<sup>24</sup> Ha'e oo ma rire ou huvixa rembiguai kuery. Ha'e kuery oma'ê rã opy yro'yxâvea'i rokẽ ojokoa ra'e imoiny. Ha'e ramo “Opy yro'yxâvea'i py po optyu'u oiny” he'i ranhe.

<sup>25</sup> Ha'e gui noarõxevei ma okuapy vy opy katygua okẽ ndoipe'a reguai vy ipe'aa ogueru vy oipe'a. Ha'e gui oexa rã huvixa re'õgue ipukupa oupy yvy rupi.

<sup>26</sup> Ha'e kuery ikuai area ja Eúde oo jepe. Ta'angaa ojapo pyre ikuaria rupi oaxa vy Seirá katy oo.

<sup>27</sup> Ha'e py ovaẽ vy omonhe'ê mimby guaxu Efraim regua yvyty reia rupi. Ha'e rã Israel kuery oguejy oje'oivy hupive, tenonde ha'e oo ramo.

**28** Ha'e kuery pe aipoe'i:

— Jaa ke xerupive, mba'eta pendepo py SENHOR omboaxa ma penderovaigua kuery Moabe pygua — he'i.

Ha'e ramo hakykue oje'oi vy ojoko Jordão yakã oaxaaty, Moabe pygua kuery oaxa e'ŷ aguã. Ha'e kuery va'e regua neĩ peteĩve nomboaxai.

**29** Ha'e va'e jave py ojuka dez mil avakue Moabe pygua kuery regua, imbaraetekue ha'e ipy'a guaxukue meme. Peteĩve ndoo jepei.

**30** Ha'e rami py ha'e va'e ára Israel kuery ipo'aka okuapy Moabe re. Ha'e ramo yvy re opytu'upa oitenta ma'etŷ re.

**31** Ha'e va'e rire ma oiko avi Anate ra'y Sangar. Ha'e va'e ma peteĩ toro mondyia py ojuka seiscentos avakue filisteu regua. Ha'e rami vy ha'e voi oepy Israel kuery.

## 4

### *Canaã pygua huvixa Jabim rembiguai ha'e kuery ikuaiague*

**1** Eúde omano rire ma peteĩgue ju Israel kuery ha'eve'ŷa rami ikuai SENHOR renonde.

**2** Ha'e ramo SENHOR omboaxapa Canaã pygua huvixa Jabim po py. Ha'e va'e openaa ma Azor tetã. Ixupeguia xondaro kuery ruvixa ma Harosete-Hagoim pygua Sísera hery va'e.

**3** Ha'e gui Israel kuery ojapukai okuapy SENHOR pe, mba'eta Jabim ma novecentos karóxa ferro guigua oguereko va'e reve vinte ma'etŷ re ma oguereko axy.

### *Débora ha'e Baraque joepyague*

**4** Ha'e va'e jave Israel kuery oguereko oikovy va'e ma peteĩ profeta kunha Lapidote ra'yxy Débora hery va'e.

**5** Débora ma peteĩ pindo hi'aĩ va'e “Débora oñaty” 'epy va'e guy py opena oiny, Ramá ha'e Betel mbyte py Efraim regua yvy'ã reia py. Ha'e oña py Israel kuery jogueru 'rã mba'emo re oikuua pota aguã.

**6** Ha'e gui ha'e va'e kunha va'e oenoĩ uka Abinoão ra'y Baraque, Naftali regua Quedes tetã py oikoa gui. Ha'e vy aipoe'i ixupe:

— SENHOR Israel kuery ruete nda'u ndevy ijayvu vy aipo nde'i raka'e: “Tereo, eraa avakue Tabor yvyty peve. Dez mil avakue eraa Naftali ha'e Zebulom kuery regua.

**7** Ha'e gui xee ajapo 'rã ndea py Quisom yakã'i py Jabim pegua xondaro kuery ruvixa Sísera va'e ou aguã rami, karóxa ha'e xondaro kuery reve, ha'e amboaxapa 'rã ndepo py", nde'i pa?

**8** Ha'e rã Baraque aipoe'i:

— Xerupive ndee reo ramo ma aa 'rã. Ha'e rã xerupive ndereoi ramo ma xee ndaai 'rã — he'i.

**9** Kunha va'e ombovai:

— Anhetẽ aa 'rã nderupive, teĩ ndee e'ŷ 'rã nemboetea joe nhapu'ã aguã katy jaa rire. Mba'eta SENHOR omboaxa 'rã Sísera peteĩ kunha va'e po py — he'i. Ha'e vy Débora ojepe'a vy Baraque reve jogueraa Quedes katy.

**10** Quedes py ma Baraque oenoĩ Zebulom ha'e Naftali kuery va'e regua. Ha'e rã hupive oje'oi dez mil avakue. Débora voi oo avi hupive.

**11** Quedes katy'i oiko avi peteĩ ava queneu regua Héber hery va'e. Ha'e va'e ma queneu kuery Moisés ratyu Hobabe ramymino kuerya ikuaiia gui ojepe'a ma vy Zaananim katy'i ojapo va'ekue ngoorã, yvyra carvalho hi'aĩ va'e guy py.

**12** Ha'e gui Sísera pe omombe'ua rã oikuua Tabor yvyty katy Abinoão ra'y Baraque oo maa.

**13** Ha'e rami vy Sísera ogueru rukapa karóxa ha'e javi, novecentos karóxa ferro guigua meme, ha'e hexeve ikuai va'e ha'e javi, Harosete-Hagoim gui ogueraapa Quisom yakã'i peve.

**14** Ha'e ramo Débora aipoe'i Baraque pe:

— Epu'ã ke, mba'eta kova'e árave SENHOR omboaxa 'rã Sísera ndepo py. Xapy'a rei nda'u SENHOR ndooi ri neronden rupi? — he'i. Ha'e ramo Baraque ma Tabor yvyty gui oguejy ovy, ngupivegua dez mil avakue reve.

<sup>15</sup> Ha'e gui Baraque rupivegua kuery kyxe reve ovaẽ ramo SENHOR oitypa Sísera, karóxa ha'e xondaro kuery ha'e javi. Ha'e rã Sísera ma karóxa gui opo vy onha ov yvy rupi.

<sup>16</sup> Baraque ma karóxa ha'e xondaro kuery rakykue monha Harosete-Hagoim peve. Ha'e rami py Sísera pegua xondaro kuery oitypa kyxe py, neĩ peteĩve ndoo jepei.

### *Jael ojukaague Sísera*

<sup>17</sup> Ha'e gui Sísera ma yvy rupi onha ov yvy ovaẽ queneu regua Héber ro py, mba'eta peteĩ rami ikuai Hazor pygua huvixa Jabim ha'e queneu regua Héber ro pygua kuery reve. Ha'e gui Héber ra'yxy Jael oña py ovaẽ ramo

<sup>18</sup> Jael oẽ ov yvy Sísera ovaexi vy. Ha'e vy aipoe'i ixupe:

— Eike ke, xeruvixa. Eike na xero py, ekyje eme — he'i. Ha'e ramo opy ovaẽ ramo kunha va'e onhovã peteĩ nheovãa py.

<sup>19</sup> Ava va'e aipoe'i ixupe:

— Ajerure ndevy, eme'ẽ na xevy ruxã'i yy ay'u aguã, xey'uvei ramo.

Ha'e rã kunha va'e ma kamby ryru oipe'a vy kamby ome'ẽ oy'u aguã. Ha'e va'e rire onhovã ju.

<sup>20</sup> Ha'e gui ava va'e aipoe'ive ju ixupe:

— He'ã ke okẽ py. Xapy'a rei amongue ou rã oporandu vy “Oña pa?” 'ea ramo “Any” 're 'rã — he'i.

<sup>21</sup> Ha'e ramo Héber ra'yxy Jael ma peteĩ yvyra rakua oguy pygua ha'e peteĩ karavo mbotaa ogueru vy oo mbeguei'i ava va'e onhenoa py. Ha'e rami vy hexapy kã rexei'i ombota yvyra rakua, oaxa vy yvy re oike aguã peve, mba'eta oke rana oupy, ikane'õ vaipa vy. Ha'e rami vy omano.

<sup>22</sup> Ha'e gui Sísera rakykue Baraque oo rã Jael oexa vy oẽ ju ovaexi vy. Ha'e vy aipoe'i ixupe:

— Eju, aexa uka 'rã ava reka va'ekue — he'i ramo oo hakykue'i. Ha'e vy oexa rã Sísera omano ra'e oupy, yvyra rakua hexapy kã rexei'i oĩ reve.

<sup>23</sup> Ha'e rami py ha'e va'e ára Israel kuery renonde Nhanderuete omo'yvyi'i Canaã pygua huvixa Jabim.

<sup>24</sup> Ha'e gui Canaã pygua huvixa Jabim kuery re Israel kuery ipo'akave tema oje'oivy, omomba peve.

## 5

### *Débora oporaeiague*

<sup>1</sup> Ha'e va'e ára Débora ha'e Abinoão ra'y Baraque reve oporaei vy aipoe'i:

<sup>2</sup> — Israel kuery renonde huvixa kuery onhemõmba,  
ha'e heta va'e kuery onhenhandua rupi ojeko me'ẽmba ramo  
penema'endu'a porã SENHOR re.

<sup>3</sup> Pendu ke, huvixa kuery. Pejapyxaka, yvatekueve:

Xee, xee ae ma aporaei ta SENHOR pe.

Aporaei ta SENHOR Israel kuery Ruete pe.

<sup>4</sup> Ndee SENHOR, Seir gui reẽ vy,

Edom regua nhuñdy guive rejerojy reovy ramo

yvy oryryi, yva gui hayvi avi.

Tá, arai voi ombo'oky rayvi.

<sup>5</sup> SENHOR renonde rupi yvyty ikuai va'e omy-omyi,

yvyty Sinai voi, SENHOR Israel kuery Ruete renonde.

<sup>6</sup> Anate ra'y Sangar oiko jave,

- Jael avi oiko jave ma ndoaxavei mba'emo vendea kuery.  
 Oguata va'e kuery voi opia oje'oivy tape vaikue rupi.\*
- <sup>7</sup> Israel yvy re tekoa ikuai va'ekue tekoa e'ŷa opyta, okyrirĩmba rei,  
 xee Débora apu'ã peve,  
 Israel kuery va'e regua xy aiko va'e apu'ã.
- <sup>8</sup> Nguuete pyaurã Israel kuery ojou ramo  
 hetã kora rokẽ py oiko joe opu'ã va'e.  
 Israel kuery quarenta mil ikuai va'eri  
 ha'e kuery mbyte py ndojoui hu'y jokoa neñ hu'y guaxu.
- <sup>9</sup> Xekuraxõ oo Israel regua xondaro kuery ruvixa re,  
 heta va'e kuery rerekoarã onhenhandua rupi onhemoĩ ramo.  
 Penema'endu'a porã SENHOR re!
- <sup>10</sup> Peẽ kuery mburika xiñ va'e áry peẽ va'e,  
 peikuaa potaa py peguapy va'e,  
 ha'e tape rupi peguata va'e voi pendeayvu avi ha'e nunga re.
- <sup>11</sup> Yy rerua kuery oporaei va'e,  
 mymba kuery oy'uaty yakã ikuai va'e mbyte rupi  
 pendeayvu SENHOR gueko porãa rupi ojapo va'e re,  
 mba'eta gueko porãa rupi oipytyvõ Israel re hekoa va'e.  
 Ha'e rami rire SENHOR pegua kuery  
 ha'eve ju ngoo katy ojevy aguã.
- <sup>12</sup> Emyĩ ke Débora, emyĩ ke.  
 Evy ke, ekeve eme, emonhendu mboraei.  
 Epu'ã ke Baraque, ndee Abinoão ra'y,  
 eraapa ke ndejopyare kuery rejokua reve.
- <sup>13</sup> Ha'e ramo oguejy avi yvatekueve rembyre,  
 SENHOR pegua kuery xereve guarã oje'oi ipo'akakueve rovai.
- <sup>14</sup> Efraim kuery va'e regua Amaleque yvy yma guare re ikuai va'e  
 ma joe opu'ãa katy oguejy jogueravy.  
 Ha'e gui ndee Débora nderakykue  
 oje'oi avi Benjamim regua guetarã kuery reve.  
 Maquir gui oguejy xondaro ruvixa kuery,  
 Zebulom gui voi ou po pygua ojopy reve jogueraa va'e kuery.
- <sup>15</sup> Issacar regua yvatekueve voi Débora rupive oje'oi.  
 Issacar kuery ma Baraque rupive oje'oi,  
 hakykue oguejy jogueravy yvy'ã guy katy.  
 Ha'e rã Rúben kuery va'e regua mbyte ma  
 joo rami e'ŷ-e'ŷ ijayvu okuapy.
- <sup>16</sup> Mba'e re tu vaka kora rupi ri pepyta pekuapy  
 mimby pu pendua py rive?  
 Rúben regua joo rami e'ŷ-e'ŷ ijayvu okuapy.
- <sup>17</sup> Gileade pygua kuery voi Jordão yakã rovai re opyta.  
 Ha'e Dã kuery, mba'e re tu kanoã guaxu yvýry opyta okuapy?  
 Aser kuery voi oguapypa okuapy ye'ẽ rembe re,  
 opytu'u porã okuapy ye'ẽ rakã pa'ũ py.
- <sup>18</sup> Ha'e rã Zebulom kuery va'e regua ma ndojeayvuveikue py oo,  
 Naftali kuery voi nhuñdy yvy'ã re oje'oi.
- <sup>19</sup> Ha'e gui huvixave kuery ono'õ vy joe opu'ã okuapy.

\* **5:6** Ha'e kuery okyjepa rei Canaã pygua huvixa Jabim ha'e ixupeguia xondaro ruvixa Sísera gui. Ha'e nunga rupi ndoguatavei tape rupi, ha'e guekoia voi oeja reipa.

- Canaã pygua huvixa kuery opu'ã okuapy Taanaque py,  
 Megido yy yvýry.  
 Ha'e rami teĩ prata guigua mba'eve ndogueraai omba'erã.
- <sup>20</sup> Mba'eta yva guive ma voi jaxy-tata opu'ã okuapy Sísera rovai,  
 oaxa ovya rupi ae opu'ã.
- <sup>21</sup> Quisom yakã voi ogueroxyrypaa,  
 Quisom yakã opu'ã jepiaty ae.  
 Xenhe'ẽ, ejerojyve tema, nembaraete ke.
- <sup>22</sup> Ha'e ramo kavaju kuery ipyambu onhaa rupi,  
 hi'árgua kuery joe opu'ã aguã katy ogueronha ramo.
- <sup>23</sup> SENHOR-a guigua anjo aipoe'i: "Pendeayvu vai ke Meroz tetã re.  
 Pendeayvu vai ha'e py ikuai va'e re,  
 mba'eta ha'e kuery ma SENHOR jogueraa jepe aguã katy ndooi rire,  
 SENHOR jogueraa jepe aguã katy ndooi ixupeguia ipy'a guaxukueve reve", he'i.
- <sup>24</sup> Ha'e rã Jael ma kunhague mboae gui ayvu porãvepy toiko,  
 queneu regua Héber ra'yxy va'e.  
 Ayvu porãvepy toiko kunhague oguy py ikuai va'e ha'e javi gui.
- <sup>25</sup> Mba'eta ava va'e ovaẽ vy yy re ojerure ramo ixupe ome'ẽ kamby.  
 Karo yvatekueve pegua va'e py ae ome'ẽ kamby nhandykue.
- <sup>26</sup> Ha'e gui okuave'ẽ yvyra rakua ituia katy,  
 oiporu kuaa regua re okuave'ẽ omba'epo va'e kuery karavo ombotaaty re.  
 Ha'e vy Sísera re ombota vy  
 ombovo inhakã,  
 ombokua vy omboaxa inhakã rupi.
- <sup>27</sup> Ha'e rã kunha va'e py yvy'iry ojero'a,  
 ho'a vy ipukupa oupy.  
 Ipy yvýry ojero'a vy ho'a.  
 Ojero'aa pyve ho'a vy omano.
- <sup>28</sup> Ha'e gui ma Sísera xykue'i ma janela jokoa pa'ũ rupi oma'ẽ ho'amy.  
 Ha'e vy janela gui haxẽ reve aipoe'i:  
 "Mba'e re tu ikaróxa ndou voi ri?  
 Mba'e re tu hymba kavaju kuery ndoguata pojavai ri?" he'i.
- <sup>29</sup> Ha'e rã kunhague hi'arandukueve ombovai okuapy,  
 ha'e rã ha'e voi ombovai ojeupe ae:
- <sup>30</sup> "Ndojoui 'rã ri nda'u, nomboja'oi 'rã ri nda'u mba'emo oipe'apa va'ekue?  
 Peteĩ-teĩ ava pe peteĩ e'ŷ vy mokoĩ kunhataĩ nome'ẽi 'rã ri ty'y?  
 Ha'e gui Sísera peguarã ae ma opyta 'rã ajukue joegua e'ŷ-e'ŷ pytã va'e,  
 ha'e ramo peteĩ e'ŷ vy mokoĩ ajukue ombojeguapa pyre e'ŷ nda'u  
 gua'yxy aju'y re omoĩ 'rã?" he'i.
- <sup>31</sup> Ha'e rami ae SENHOR, tomanomba nderovaigua kuery ha'e javi.  
 Ha'e rã nderayvua kuery ma  
 kuaray hexakã ouvya rami taexakã – he'i.  
 Ha'e rami rire yvy re opytu'upa quarenta ma'etŷ re.

## 6

*Midiã pygua kuery Israel kuery ojavyky reiague*

<sup>1</sup> Israel kuery ha'eve'ŷ va'e ojapo SENHOR renonde. Ha'e nunga rupi SENHOR sete ma'etŷ re omboaxa Midiã pygua kuery po py.

<sup>2</sup> Israel kuery re Midiā pygua kuery ipo'akapave tema oje'oivy ramo ha'e kuery gui onhemi atyrā ojapo okuapy yvy'ā re itaovape guy ha'e itakua oī va'e rupi, ha'e tetā ikorapa va'e py.

<sup>3</sup> Mba'eta Israel kuery oma'etŷ nhavō Midiā pygua kuery, amalequita ha'e kuaray oua katyguia kuery regua opu'ā 'rā jogueruvy ha'e kuery rovai.

<sup>4</sup> Ha'e vy ha'e kuery rovai ono'ō vy omomba 'rā mba'emo aju yvy re ikuai va'e Gaza katyi'i peve. Israel kuery pe mba'eve ndoejai ho'u va'erā. Oipe'a avi 'rā hymba kuery vexa'i, vaka ha'e mburika'i.

<sup>5</sup> Mba'eta ovaē 'rā okuapy guymba kuery ha'e oguy omopu'ā va'erā reve. Tuku-karu rami mbovy e'ŷ reve ou ramo neī oipapaa aguā nda'evei, neī hymba camelo kuery voi. Ou okuapy yvy regua ombotyguepa aguā.

<sup>6</sup> Ha'e rami rā Israel kuery ikangy ete okuapy Midiā pygua kuery ikuai rā. Ha'e rami vy ha'e kuery ojapukai okuapy SENHOR pe.

<sup>7</sup> Midiā pygua kuery káuxa SENHOR pe Israel kuery ojapukai ramo

<sup>8</sup> SENHOR ombou peteĩ profeta ha'e kuery pe aipoe'i va'erā:

— Po rami SENHOR Israel kuery Ruete ijayvu: “Xee ae ma Egito yvy gui roquerupa va'ekue, escravo pendekuaiague gui roguenoẽ.

<sup>9</sup> Ha'e rami vy rogueraa jepe Egito pygua ha'e penemoingo axya kuery ha'e javi po gui. Penerenonde gui ha'e kuery aipe'a vy pendevy ju ame'ẽ ijyvykue.

<sup>10</sup> Ha'e gui aipoa'e: ‘Xee ma SENHOR Penderuete. Pekyje eme amorreu kuery ruete ramigua kuery gui, ha'e kuery yvy re pendekuai teĩ, ha'e va'ekue ri xeayvu re peẽ kuery ndapejapyxakai.’

### *Nhanderuete oenoīague Gideão*

<sup>11</sup> Ha'e gui SENHOR-a guigua anjo ou vy oguapy Ofra py yvyra carvalho hi'aĩ va'e guy py, Abiezer ra'y Joás yvy re. Ha'e va'e jave ma ta'y Gideão ma uva'a ombiriaty py omoa'yĩ oiny trigo, Midiā pygua kuery gui onhomí aguā.

<sup>12</sup> Ha'e va'e pe SENHOR-a guigua anjo ojexa uka vy aipoe'i:

— SENHOR oiko ndereve, ava ipy'a guaxu va'e — he'i.

<sup>13</sup> Gideão ombovai:

— Ai xeruvixa! SENHOR orereve oiko va'eri mba'e re tu ha'vy orere ou kova'e nunga ha'e javi? Mamo 'rā tu oī mba'emo porā ha'e ojapo va'ekue oreru kuery omombe'u va'e ramigua? Mba'eta aipoe'i orevy: “Egitoyvy gui e'ŷ ri nda'u SENHOR nhanenoẽmba raka'e?” he'i okuapy va'eri aŷ ma SENHOR orerejapa, oremboaxapa ri Midiā pygua kuery po py — he'i.

<sup>14</sup> Ha'e ramo Gideão oĩa katy SENHOR ojere vy aipoe'i:

— Tereo ndere mbaraetea oī va'e rupi, ha'e eraa jepe Israel kuery Midiā pygua kuery po gui. Xee e'ŷ ri nda'u romondouka? — he'i.

<sup>15</sup> Ha'e ramo aipoe'i ixupe:

— Aikore xeruvixa! Mba'e nunga py 'rā tu araa jepe Israel kuery? Ma'ẽ, Manassés kuery ikuai va'e gui xero pygua kuery iporiauve va'e, ha'e gui xee ma xeru ro pygua kuery gui kyrive va'e aiko.

<sup>16</sup> SENHOR ombovai:

— Ndereve xee aiko ramo ma rejukapa vyvoi 'rā Midiā pygua kuery peteĩ'i ava rami rive — he'i.

<sup>17</sup> Gideão aipoe'i ju:

— Xapy'a rei aŷ xejou porā ha'e xemboaxy ri vy ejapo ha'vy mba'emo, ndee ae ri SENHOR ndeayvua reikuua uka aguā.

<sup>18</sup> Ambe'i ranhe, apy gui ejepa eme ajevy e'ŷa ja, mba'emo nerенонde amoĩ va'erā aru aguā.

Ombovai vy

— Roarõ 'rã ha'vy rejevy peve — he'i.

<sup>19</sup> Opy Gideão oike vy oguereko katu peteĩ kavara'i ha'e peteĩ ryru trigo gui ojapo mbojape imbovua rewegua e'ŷ. Xo'o omoĩ peteĩ ajaka py, ha'e rã tykue ma peteĩ oja py omoĩ. Ha'e rami vy yvyra carvalho guy py oĩa py oguerupa vy omoĩ henonde.

<sup>20</sup> Ha'e ramo SENHOR-a guigua anjo aipoe'i ixupe:

— Ejopy xo'o ha'e mbojape imbovua rewegua e'ŷ, emoĩmba peva'e ita áry, ha'e hi'áry enhoẽmba tykue — he'i rã ha'e rami ojapo.

<sup>21</sup> Ha'e ramo SENHOR-a guigua anjo ma popoka opo py ogueru va'ekue omokuave'ẽ vy omovaẽ xo'o ha'e mbojape imbovua rewegua e'ŷ oĩ va'e re. Ha'e ramo ita gui tata opu'ã vy oapypa vyvoi xo'o ha'e mbojape. Ha'e gui SENHOR-a guigua anjo ojepe'a vyvoi henonde gui.

<sup>22</sup> Ha'e gui Gideão ma anjo SENHOR-a guigua etea oikuua vy aipoe'i:

— SENHOR Xeruete, nda'evei ete xevy! Mba'eta xerexa py ae aexa kuri SENHOR-a guigua anjo.

<sup>23</sup> Ha'e rã SENHOR ombovai:

— Toĩ ndere mby'a porã! Ekyje eme! Neremanoï 'rã ri — he'i.

<sup>24</sup> Ha'e ramo SENHOR pe Gideão ojapo peteĩ altar ha'e py. Ha'e va'e omboery “SENHOR gui ou mby'a porã.” Aŷ peve ha'e va'e altar oĩ Ofra py Abiezer ramymimo kuery yvy re.

### *Baal pegua altar Gideão oitypaague*

<sup>25</sup> Ha'e va'e pyavyve SENHOR aipoe'i ixupe:

— Eraa peteĩ vaka nderu rymba, ha'e va'e ma toro sete ma'etŷ va'e regua mokoĩa perekó va'e. Ha'e va'e reve eity Baal pegua altar nderu ojapo va'ekue, ha'e ejaya yvyra gui ta'angaařā omo'ã mbyre, altar yvýry hi'aĩ va'e.

<sup>26</sup> Ha'e gui SENHOR Nderuete pe ju ejapo peteĩ altar. Ha'e va'e yvy'ã apyte áry pyve ejapo, ita py remboupa vy. Ha'e vy toro mokoĩa rejopy vy rejuka ha'e reapy 'rã ome'ẽ mbyrã, ta'angaa'y yxakãrã rejaya va'ekue remoendy vy — he'i.

<sup>27</sup> Ha'e ramo Gideão dez avakue guembiguai ikuai va'e ogueraa vy ojapo SENHOR ijayvuague. Ha'e rami teĩ okyje avi nguu ro pygua kuery ha'e guetã pygua avakue gui. Ha'e rami vy ara py ndojapoi, pyávy anho.

<sup>28</sup> Ha'e gui ko'ẽ rai jave ha'e va'e tetã pygua avakue opu'ã vy oexa rã Baal pegua altar oitya ma ra'e, ha'e ijyvýry ta'angaa'y guigua hi'aĩ va'ekue ojaya ra'e. Ha'e toro mokoĩa va'e voi oapypaa inony altar ojapo va'ekue áry.

<sup>29</sup> Ha'e rami vy joupe-upé aipoe'i okuapy:

— Mava'e tu ojapo peva'e nunga?

Ha'e vy oporanduve ha'e oikuua pota porã ma vy

— Joás ra'y Gideão rima ojapo — he'i okuapy.

<sup>30</sup> Ha'e ramo ha'e va'e tetã pygua avakue aipoe'i okuapy Joás pe:

— Eraa na nderá'y apy gui mombyry'i, jajuka aguã. Mba'eta oity altar Baal pegua ha'e ojaya ijyvýry ta'angaa'y hi'aĩ va'ekue.

<sup>31</sup> Ha'e ramo Joás aipoe'i hexe opu'ã va'e kuery ha'e javi pe:

— Baal repya rupi ri ty'y pejoguero'a ta? Peẽ ae ri ty'y pepy 'rã? Hepya rupi joguero'a va'e rei omano 'rã kova'e ko'ẽ re ma voi. Mba'eta tuuete ae ri vy ha'e ae tojepy ixupegua altar oityague re — he'i.

<sup>32</sup> Ha'e va'e ára guive Gideão omboerya Jerubaal, mba'eta aipoe'i:

— Baal ae tojepy, ixupegua altar oityague re — 'ea.\*

<sup>33</sup> Ha'e gui Midiã pygua kuery, amalequita ha'e kuaray oua katy ikuai va'e kuery ono'õmba okuapy. Ha'e vy oupa vy Jezreel yvyugua py ikuai.

\* <sup>6:32</sup> Tery Jerubaal ma “Baal tojepy” 'ea.

<sup>34</sup> Ha'e ramo Gideão re SENHOR Nhe'ẽ onhemonde ramo omonhe'ẽ atã mimby guaxu. Ha'e ramo Abiezer ramymino kuery oupa oĩa py.

<sup>35</sup> Ha'e rami vy guembiguai kuery omondouka Manassés regua ikuiaia ha'e javi rupi, ha'e kuery avi oenoĩ oĩa py oupa aguã. Aser regua ikuiaia rupi avi omondouka guembiguai, Zebulom ha'e Naftali regua ikuiaia rupi guive. Ha'e ramo oupa oĩa py.

<sup>36</sup> Ha'e gui Gideão aipoe'i Nhanderuete pe:

— Xapy'a rei ndeayvuague rami vy xee rupi ae ri Israel kuery reraa jepe 'rã ramo

<sup>37</sup> ma'ẽ, peteĩ pirekue vexa'i rague amoĩ 'rã mba'emo moa'yĩaty py. Xapy'a rei ha'e va'e re anho ri yxapy oĩ ramo, ha'e ijyvýry rupi ipiru rei ramo aikuua 'rã xee rupi ae Israel kuery reraa jepe 'rã, ndeayvuague rami vy — he'i.

<sup>38</sup> Ha'e ramo ha'ekue rami oiko, mba'eta ko'ẽgue, ko'ẽ rai ramove Gideão ovvy vy vexa'i rague onhami vy yxapykue peteĩ hy'a omonyé.

<sup>39</sup> Ha'e gui Gideão aipoe'ive ju:

— Ndevai eme xevy, xeayvuve ju ta povae re anho. Aŷ ma ajerure ndevy teĩgue ju rejapo aguã vexa'i rague re xee aikuua aguã. Tove vexa'i rague anho ta'ipiru, ha'e rã ijyvýry ma ta'ixapypa — he'i.

<sup>40</sup> Ha'e ramo ha'ekue rami ae Nhanderuete ojapo ha'e va'e pytũ re. Vexa'i rague anho ipiru oiny, ha'e rã ijyvýry rupi ma yvy inhakýmba yxapy gui.

## 7

### *Trezentos avakue reve Gideão oitypaague Midiã pygua kuery*

<sup>1</sup> Ko'ẽ rai ramove Jerubaal Gideão va'e opu'ã, hexeve ikuai va'e ha'e javi reve. Ha'e vy oje'oi vy Harode yvu oĩ va'e yvýry ju ikuai. Kuaray ijapu'a'ia katy ikuai Midiã pygua kuery, Moré yvyty rexei.

<sup>2</sup> Gideão pe SENHOR aipoe'i:

— Heta ete rima ndereve ikuai va'e, ha'e kuery po py Midiã pygua kuery amboaxa aguã. Ha'e rami va'e rire xerovai Israel kuery onhemboyvate vy “Orepo'akaa rupi ae roo jepe” he'i 'rãgue okuapy.

<sup>3</sup> Ha'e nunga rupi ndeayvu ke heta va'e kuery oendua py. Ha'e vy aipo're: “Amongue ndooxeia ha'e okyjea oendu va'e ma tojevy ju, tojepe'a ovvy Gileade yvyty reia gui”, 're 'rã — he'i. Ha'e rami rã ha'e kuery va'e regua ojevy vinte e dois mil, ha'e rã dez mil ma opyta.

<sup>4</sup> SENHOR aipoe'ive ju Gideão pe:

— Oĩ reta ete teri ha'e kuery va'e regua. Ejapo yy py oguejypa aguã rami, ha'e rã ha'e py ndevy aikuua pota uka 'rã. Amongue xee ndevy aipoa'ea va'e: “Kova'e ma oo 'rã nderupive” ha'ea va'e ma oo 'rã nderupive. Ha'e rã ndevy “Kova'e ma nderupive ndooi 'rã”, ha'ea va'e ma ndooi 'rãe — he'i.

<sup>5</sup> Ha'e ramo Gideão ojapo yy py oguejypa aguã rami. Ha'e ramo ixupe SENHOR aipoe'i:

— Reipe'a 'rã opu'ã reve jagua rami oapekũ py oy'u va'e ha'e javi, ha'e rã oy'u aguã guenapy'ã re oĩ va'e kuery ma amboae katy 'rã reipe'a — he'i.

<sup>6</sup> Opu'ã reve opo py oy'u va'e ma trezentos avakue ikuai. Ha'e rã hembyrekue ha'e javi ma guenapy'ã re oĩ yy oy'u aguã.

<sup>7</sup> Ha'e gui SENHOR aipoe'i Gideão pe:

— Peva'e trezentos avakue oapekũ py oy'u va'ekue reve ma xee rogueraa jepe 'rã, ndepo py Midiã pygua kuery amboaxapa vy. Ha'e rã amboae kuery ma tojepe'a pavé, peteĩ-teĩ too guekoia katy ae — he'i.

<sup>8</sup> Ha'e rami rã avakue Israel regua peteĩ-teĩ Gideão omondoukapa hoo katy, ha'e rã trezentos ete'i ma ojea py omombyta. Ha'e va'e kuery ma opo py ojopy heravy guembi'urã ha'e mimby guaxu mymba rakuakue guigua. Ha'e rã Midiã pygua kuery ma yvy'ã guy py ono'õ okuapy.

<sup>9</sup> Ha'e va'e pyavyve SENHOR aipoe'i ixupe:

— Epu'ã ke ha'e eguejy ono'õ okuapya katy, mba'eta amboaxapa ma ndepo py.

<sup>10</sup> Xapy'a rei repu'ã aguã rekyje teri ri vy ono'õ okuapya katy eguejy nerembiguai kunumi va'e Pura reve.

<sup>11</sup> Ha'e vy pendu 'rã ha'e kuery joupe-upe ijayvu va'e. Ha'e va'e rire ndepy'a guaxua rendu ma ramo peguejy 'rã ono'õ okuapya va'e rovai pepu'ã aguã — he'i. Ha'e ramo guembiguai Pura reve oo ono'õ okuapya apy'i peve.

<sup>12</sup> Midiã pygua kuery, amalequita ha'e kuaray oua katyguia kuery ha'e javi ma mbovy e'ŷ vy omonyê rei yvyugua tuku rami. Ha'e kuery rymba camelio kuery voi mbovy rei e'ŷ ikuai, ita ku'i ye'ẽ rembe re ikuai va'e rami.

<sup>13</sup> Ha'e gui Gideão ovaẽ vy oendu peteĩ ava oirũ pe omombe'u rã oexa ra'u va'ekue. Ha'e vy aipoe'i:

— Xee aexa ra'u kuri rã peteĩ mbojape cevada guigua ojere ov y Midiã pygua kuery nhano'õ jakuapya katy. Ha'e vy onhembota xondaro kuery ruvíxa roguy re. Ha'e va'e ho'a vy ojere yvate katy guare yvy katy. Ha'e vy ha'ekue rami ae itui — he'i.

<sup>14</sup> Irũ ma ombovai:

— Ha'e va'e ma Israel regua Joás ra'y Gideão kyxe ae. Ipo py tuuete omboaxa ra'e Midiã pygua kuery, ha'e nhano'õ jakuapya va'e ha'e javi — he'i.

<sup>15</sup> Ha'e rami rã oexa ra'u pyre ha'e mba'erã paa Gideão oendu ma vy omboete Nguuete. Ha'e gui ojevy ju Israel kuery onhemboatya py. Ha'e vy aipoe'i ha'e kuery pe:

— Pepu'ã ke, mba'eta pendepo py SENHOR omboaxa ma Midiã pygua kuery.

<sup>16</sup> Ha'e gui omboja'o trezentos avakue mboapy aty ikuai aguã. Peteĩ-teĩ po py ome'ẽ mimby guaxu ha'e yryru, ipy py takua ryxa rendy oĩ va'e reve.

<sup>17</sup> Ha'e vy ha'e kuery pe aipoe'i:

— Pema'ẽ ke xere, ha'e pejapo xee ajapoa rami. Ono'õ okuapya apy'i peve xee avaẽ vy ajapoa rami pejapo avi 'rã.

<sup>18</sup> Ha'e gui xee ha'e xereve ikuai va'e mimby guaxu romonhe'ẽ ramove peẽ voi pemonhe'ẽ 'rã pekuapy ono'õ va'e kuery yvýry rupi. Ha'e vy pejapukai reve “SENHOR ha'e Gideão rery rupi!” peje 'rã — he'i

<sup>19</sup> Ha'e gui ma Gideão ha'e cem avakue hexeve ikuai va'e ma ono'õa apy'i peve ovaẽ, pytû mbyte rai'i nhoarõa kuery omboekovia aguã rami ikuai jave. Ha'e vy mimby guaxu omonhe'ẽ vy ombovo yryru opo py ogueru va'ekue.

<sup>20</sup> Ha'e rami vy mboapy aty ikuai va'e omonhe'ẽ pavẽ mimby guaxu ha'e ombovo yryru. Oaxua regua re ojopy tataendy'y, ha'e rã oiporu kuaa regua re ma mimby guaxu omonhe'ẽ va'e oguereco. Ha'e vy ojapukai okuapy:

— Kyxe SENHOR ha'e Gideão rery rupigua!

<sup>21</sup> Ha'e vy peteĩ-teĩ ma hi'añague py ae opyta ono'õ okuapya va'e yvýry. Ha'e ramo ha'e javi omboypy onha, ojapukai ha'e ojava oje'oivy aguã.

<sup>22</sup> Trezentos mimby guaxu onhendu rã SENHOR ojapo peteĩ-teĩ kyxe jomeme oiporu aguã rami. Ono'õ okuapya ha'e javi rupi oiko ha'e rami. Ha'e rami vy Zererá katy onhamba, ha'e gui Bete-Sita ha'e Abel-Meolá apy peve, Tabate rovai.

<sup>23</sup> Ha'e ramo Israel regua avakue, Naftali, Aser ha'e Manassés regua oenoimbua avi Midiã pygua kuery rakykue oje'oi aguã.

<sup>24</sup> Efraim regua yvy'ã reia ha'e javi rupi Gideão omondouka guembiguai kuery. Ha'e vy aipoe'i imondovy:

— Peguejy ke Midiã pygua kuery pejoko aguã. Pemboaxa eme Jordão yakã, Bete-Bara peve — he'i ramo Efraim regua avakue oenoĩ mbyre ojokopa Jordão yakã Bete-Bara peve.

<sup>25</sup> Ha'e rami vy ojopy okuapy Midiã pygua huvixave mokoõ oiko va'ekue, Orebe ha'e Zeebe. Ojuka Orebe itaova Orebe regua py ae, ha'e rã Zeebe ma ojuka Zeebe regua uva

onhamiaty py. Oje'oive Midiā pygua kuery rakykue. Ha'e gui Jordão rovai re Gideão oĩa py ogueru Orebe ha'e Zeebe akāgue.

## 8

*Efraim kuery reve Gideão ijayvu porã'i, ha'e rã Midiā pygua huvixave kuery ojukapaaque*

<sup>1</sup> Ha'e gui Efraim regua avakue aipoe'i okuapy Gideão pe:

— Mba'e re tu ha'e rami ete rejapo orere? Mba'eta Midiā pygua kuery rovai repu'ã aguã reo jave norerenoĩ — he'i okuapy ixupe ijayvu atã vy.

<sup>2</sup> Ha'e ramo ombovai ha'e kuery pe:

— Aŷ ma mba'exa tu peẽ kuery pejapoia gui xee ajapove? Peẽ Efraim kuery mba'e uva'a rembyrekue na'iporãive ri ty'y ore Abiezer ramymino kuery mba'e uva'a gui?

<sup>3</sup> Pendepo py ae Nhanderuete omboaxa Midiā pygua huvixave kuery Orebe ha'e Zeebe. Mba'exa tu xee ajapo ta peẽ pejapo va'ekue ramigua? — he'i vy ojapo ha'e kuery nda'ivaivei aguã rami.

<sup>4</sup> Ha'e gui Jordão yakã yvýry peve Gideão ovaẽ vy oaxapa oje'oivy trezentos avakue hexeve ikuai va'e reve. Ha'e kuery ikane'õmba ma teĩ joakykue teri oje'oi.

<sup>5</sup> Ha'e gui aipoe'i Sucote pygua avakue pe:

— Ajerure pêvy, peme'ẽ xerupivegua kuery ho'u va'erã, mba'eta ikane'õmba ma, ha'e xerupive oje'oi Midiā pygua huvixa kuery Zeba ha'e Zalmuna rakykue.

<sup>6</sup> Ha'e rã Sucote pygua yvatekueve ombovai:

— Ndee rerekro ma pa Zeba ha'e Zalmuna pokue, nexondaro kuery ho'u va'erã rome'ẽ aguã? — he'i.\*

<sup>7</sup> Ha'e ramo Gideão ju aipoe'i:

— Ha'e rami rã Zeba ha'e Zalmuna xepo py SENHOR omboaxa ma ramo pendero'o rupi roikutupa 'rã juu tekao e'ŷ regua ha'e juu rakuaendy py — he'i.

<sup>8</sup> Ha'e gui Penuel py oo vy ha'ekue rami ae ju ijayvu ha'e pygua avakue pe. Ha'e rã Penuel pygua kuery voi ombovai Sucote pygua avakue ombovaiague rami.

<sup>9</sup> Ha'e ramo Penuel pygua avakue pe ijayvu vy aipoe'i avi:

— Xee ma ajevy porã ju vy aitypa 'rã kova'e torre — he'i.

<sup>10</sup> Ha'e gui Zeba ha'e Zalmuna ma Carcor py ikuai oxondaro kuery reve, quinze mil avakue ha'e javi vy, kuaray oua katyguia kuery va'e regua xondaro kuery hembyre va'ekue. Ha'e rã ojuka pyre ma cento e vinte mil avakue kyxe reve guare.

<sup>11</sup> Gideão ma ijyvy e'ŷ va'e rape rupi oo oiny, Noba ha'e Jogbeá katy rupi kuaray oua katy. Ha'e vy ojukapa ha'e va'e xondaro kuery nonheangui rei jave.

<sup>12</sup> Zeba ha'e Zalmuna ma ojava jogueravy va'eri ha'e kuery rakykue Gideão oo. Ha'e vy ojopy moko'ive Midiā pygua huvixa Zeba ha'e Zalmuna, oitypa avi ixondaro kuery.

<sup>13</sup> Ha'e gui Joás ra'y Gideão opu'ãague gui Heres yvy'ã rupi ojevy vy

<sup>14</sup> ojoko peteĩ kunumi va'e Sucote pygua, ha'e ixupe oporandu mba'emo re. Ha'e ramo kunumi va'e ixupe ombopara Sucote pygua yvatekueve ha'e nhomongeta va'ety kuery rery ha'e javi, setenta e sete avakue rery.

<sup>15</sup> Ha'e ramo Gideão ou ju Sucote pygua avakue ikuai py. Ha'e vy aipoe'i:

— Ema'ẽ apy ma Zeba ha'e Zalmuna re, ha'e kuery reko re xejojai vy aipo pejeague: “Rerekro ma pa Zeba ha'e Zalmuna pokue, ndevygua avakue ikane'õmba va'e ho'u va'erã rome'ẽ aguã?” pejeague — he'i.

<sup>16</sup> Ha'e rami vy ojopy ha'e va'e tetã pygua nhomongeta va'ety kuery, ha'e ombopi ukapa Sucote pygua avakue juu tekao e'ŷ regua ha'e juu rakuaendy py.

<sup>17</sup> Oity avi torre Penuel py oĩ va'ekue, ha'e ojuka tetã pygua avakue.

\* <sup>8:6</sup> Ha'e jave ma ngovaigua ruvixa kuery ojuka vy inhakã e'ŷ vy ipokue ojaya 'rã oexa uka aguã (Juízes 7.25).

- <sup>18</sup> Ha'e rire aipoe'i Zeba ha'e Zalmuna pe:  
 — Marā ramigua avakue tu pejuka raka'e Tabor py?  
 Ha'e kuery ombovai:  
 — Ndee ramigua meme ri ha'e kuery ikuai karamboae. Peteī-teī ma huvixave ra'y ramigua — he'i.
- <sup>19</sup> Ha'e ramo aipoe'i:  
 — Ha'e va'e kuery rima xeryvy kuery, ha'i pi'a kuery ae'i. Anhetē ete SENHOR oikove va'e rery rupi aura vy aipoa'e: Ha'e kuery ndapejukai va'e rire xee voi ndorojukai 'rāgue — he'i.
- <sup>20</sup> Ha'e gui aipoe'i gua'y jypygua Jéter va'e pe:  
 — Epu'ã ha'e ejuka mokoīve — he'i teī kunumi teri vy okyxe ndoekyi, okyje vy.
- <sup>21</sup> Ha'e ramo Zeba ha'e Zalmuna aipoe'i:  
 — Epu'ã ke ndee ae, ha'e eju orere, mba'eta tuja va'e anho 'rā ipy'a guaxu — he'i ramo Gideão opu'ã vy ojuka mokoīve. Ha'e vy ha'e kuery rymba camelo aju'y gui oipe'a ijeguarā jaxy pēgue ramigua oī va'ekue.
- Gideão huvixarā noīxei va'eri manto sacerdote peguarā ojapo ma rire omanoague*
- <sup>22</sup> Ha'e ramo Israel regua avakue aipoe'i okuapy Gideão pe:  
 — Eī ke oreruvixarā, ndee ha'e gui ndera'y ju, ha'e va'e rire neramymino voi ju, Midiā pygua kuery po'akaa gui orereraa jepe rire.
- <sup>23</sup> Gideão ombovai:  
 — Xee ma naī reguai penderuvixarā, xera'y voi nopenai 'rā pendere. SENHOR ae ma 'rā penderuvixa oī — he'i.
- <sup>24</sup> Gideão aipoe'ive ju ha'e kuery pe:  
 — Ha'e ramí avi peteī mba'e re ma ajerure ta pēvy: Peme'ẽ xevy namixā penemba'erā peipe'a va'ekue-'ekue — he'i, mba'eta hovaigua kuery ma Ismael regua vy namixā ouro guigua oguereko va'ekue.
- <sup>25</sup> Ha'e kuery aipoe'i:  
 — Rovy'a ete reve 'rā rome'ẽ ndevy — he'i okuapy vy peteī ao puku ha'e kuery oipyo vy hi'áry peteī-teī omoī peteī namixā oipe'a va'ekue.
- <sup>26</sup> Namixā ouro guigua ojerurea va'ekue poyikue oikuua rā dezenove quilos ouro ete anho oī, amboae ramigua jegua reve'ỹ vy: jaxy pēgue, mbo'y, ao púrpura guigua Midiā pygua huvixa kuery omoī va'ekue ha'e camelo kuery aju'y re jegua oī va'ekue reve'ỹ vy.
- <sup>27</sup> Ha'e va'ekue gui ma Gideão ojapo peteī manto sacerdote peguarā, ha'e guekoa Ofra py omoī. Ha'e ramo ha'e re Israel kuery ovapa vy opa marā rei ikuai. Ha'e va'e manto ma nhuā rami optyta Gideão pe, hoo pygua kuery pe voi.
- <sup>28</sup> Ha'e rami py Midiā pygua kuery ma Israel kuery oitypa ma rire neī oakā nomopu'āvei ha'e kuery rovai ou aguā. Ha'e rami rā yvy re optyu'upa quarenta ma'etý re, Gideão oikovea pukukue re.
- <sup>29</sup> Ha'e gui Joás ra'y Jerubaal va'e ojepe'a vy oiko ngoo py ae.<sup>†</sup>
- <sup>30</sup> Gideão ma setenta gua'y kuery oguereko, ta'y ae meme, mba'eta ta'yxy reta vy.
- <sup>31</sup> Siquém py ta'yxy jevy oiko va'e voi oikuavā'i peteī ava'i. Ha'e rā omboery Abimeleque.
- <sup>32</sup> Ha'e gui Joás ra'y Gideão tuja'i ete ma vy omano. Ha'e rā onhono porāa tuu Joás onhono porāague py ae ju, Abiezer ramymino kuery rekoa Ofra py.
- <sup>33</sup> Ha'e gui Gideão omano rire Israel kuery opa marā rei ju ikuai, Baal ra'angaa ikuai va'e re rive ovapa vy. Ha'e rami vy nguuetere omoī okuapy Baal-Berite ra'angaa.
- <sup>34</sup> Israel kuery na'ima'endu'avei SENHOR nguuetre re, hovaigua kuery ijyvýry ikuai va'e ha'e javi gui ogueraa jepe va'ekue ri.
- <sup>35</sup> Neī Jerubaal Gideão va'e ro pygua kuery re voi ha'e kuery nda'iija'evei, Israel kuery pe ha'e ojapo porā va'ekue ri.

<sup>†</sup> 8:29 Jerubaal ma Gideão rery mboae (Juízes 6.32).

## 9

*Abimeleque guyvy kuery ojukapa vy ha'e ju onhembouvixave oinyague*

<sup>1</sup> Ha'e gui Jerubaal ra'y Abimeleque ma Siquém tetã py oo, oxy kyvy kuery ikuiaia py. Ha'e pygua kuery pe ijayvu, ha'e guamoĩ ro pygua kuery ha'e javi pe. Ha'e vy aipoe'i:

<sup>2</sup> — Ajerure pendeayvu ke Siquém pygua kuery ha'e javi oendua py. Ha'e vy aipopeje: "Mava'e tu peẽ kuery pejou porãve penderuvixarã: Setenta avakue Jerubaal ra'y kuery ha'e javi, tyrã pa peteĩ'i penderuvixarã oĩ aguã? Penema'endu'a ke xee voi peẽ kuery va'e regua, pendero'o ae aikoa re", peje – he'i.

<sup>3</sup> Ha'e va'e ayvu ha'e javi ma Siquém pygua kuery pe ju ixy kyvy kuery omombe'u. Ha'e ramo ha'e kuery py'a re oĩ Abimeleque-a katy anho oje'oi aguã, "Nhanderegua" he'i okuapy vy.

<sup>4</sup> Ha'e rami vy ixupe ome'ẽ okuapy setenta hatã'i va'e prata guigua Baal-Berite ra'angaa oña gui oipe'a va'ekue. Ha'e va'e peráta Abimeleque ome'ẽ avakue hi'arandu e'ý ha'e ojerovia rei rive va'e pe ngupive guarã.

<sup>5</sup> Ha'e rami vy Ofra tetã py nguu ro py oje'oi vy ojuka guyvy kuery Jerubaal ra'y ikuai va'ekue. Peteĩ ita áry pyve ojuka setenta avakue. Ha'e rã Jerubaal ra'y kyrõve Jotão va'e ma onhemi vy oikove.

<sup>6</sup> Ha'e gui Siquém ha'e Bete-Milo pygua kuery ha'e javi ono'õmba jogueru vy nguvixaverã omoĩ okuapy Abimeleque, Siquém katy'i yvyra carvalho ima'endu'aapy hi'aĩ va'e yvy'iry.

*Jotão ijayvuague*

<sup>7</sup> Ha'e gui Jotão pe ha'e nunga omombe'ua rã oo vy oẽ Gerizim yvyty re. Ha'e py oĩa gui ojapukai reve ijayvu ho'amy. Ha'e vy aipoe'i ha'e kuery pe:

— Siquém pygua kuery, pejapyxaka ke xeayvua re, Nhanderuete ju pendeayvu oendu aguã.

<sup>8</sup> Peteĩgue ma yvyra ikuai va'e oje'oi nguvixaverã omoĩ aguã azeite oikyty reve. Ha'e rami vy peteĩ azeitona'y hi'aĩ va'e pe aipoe'i okuapy: "Eĩ ke oreruvixarã."

<sup>9</sup> Ha'e rami teĩ azeitona'y ombovai: "Ha'e rami avi xee ajepa'a'rã ri ty'y azeite ame'ëa gui, Nhanderuete ha'e avakue oguerovy'a va'eri, yvyra pendekuai va'e áry rupi rive xerakã ovava aguã?" he'i.

<sup>10</sup> Ha'e gui figo'y pe ju yvyra ikuai va'e aipoe'i: "Eju ndee oreruvixarã."

<sup>11</sup> Ha'e rã figo'y ombovai: "Xee ajepa'a'rã ri ty'y xe'a he'ẽ ha'e iporã va'e ame'ëa gui, yvyra pendekuai va'e áry rupi rive xerakã ovava aguã?" he'i.

<sup>12</sup> Ha'e gui uva rembypy pe ju yvyra ikuai va'e aipoe'i: "Eju ndee oreruvixarã."

<sup>13</sup> Ha'e rã uva rembypy ombovai: "Xee ajepa'a'rã ri ty'y vinho ame'ëa gui, Nhanderuete ha'e avakue oguerovy'a va'eri, yvyra pendekuai va'e áry rupi rive xerakã ovava aguã?" he'i.

<sup>14</sup> Ha'e gui juu'y pe rive ju yvyra ikuai va'e aipoe'i okuapy: "Eju ndee oreruvixarã."

<sup>15</sup> Ha'e ramo juu'y ombovai yvyra ikuai va'e pe: "Anhetẽ ri penderuvixarã xemoõxe vy peju ha'vy, penhemi xekuaray'ã guy py. Ha'e rã any ri ramo juu'y gui toẽ tata, toapypa yary Líbano py ikuai va'e voi" he'i.

<sup>16</sup> — Ha'e gui aÿ ma anhetẽ rupi ri nda'u pendekuai Abimeleque penderuvixarã pemoĩa py? Ha'evea rami ri nda'u Jerubaal ha'e hoo pygua kuery re pejapo? Ha'e va'e mba'emo porã ojapoague rami ri nda'u pejapo hexe?

<sup>17</sup> (Mba'eta xeru ma pendere vy joe opu'ã vy ndojeayvuveikue py pendereraa jepe raka'e Midiã pygua kuery po gui.

<sup>18</sup> Ha'e rã peẽ kuery ma aÿ xeru ro pygua kuery re pepu'ã vy peteĩ ita áryve pejukapa kuri ta'y kuery setenta ikuai va'e. Ha'e gui peẽ Siquém pygua kuery, hembiguai pi'a Abimeleque va'e ju pemoĩ penderuvixarã, penderegua ramo rive.)

<sup>19</sup> Ha'e gui xapy'a rei anhetē rupi ha'e ha'evea rami ri Jerubaal ha'e hoo pygua kuery re pejapo vy ma tapererovy'a Abimeleque, ha'e voi toguerovy'a peẽ kuery.

<sup>20</sup> Ha'e rã any ri ramo Abimeleque gui toẽ tata, tomomba Siquém ha'e Bete-Milo pygua kuery. Ha'e Siquém ha'e Bete-Milo pygua kuery gui voi toẽ tata, Abimeleque ju tomomba – he'i.

<sup>21</sup> Ha'e va'e rire'ive Jotão ojava vy oo Beer katy guyke'y Abimeleque gui okyje vy. Ha'e py ju oiko.

### *Abimeleque rovai Gaal ijayvuague*

<sup>22</sup> Ha'e gui Abimeleque mboapy ma'etõ re ma Israel kuery ruvixa oĩ jave

<sup>23</sup> Nhanderuete ombou peteĩ nhe'ẽ Abimeleque ha'e Siquém pygua kuery reve joe ija'e e'ŷ aguã rami nhomoingoarã. Ha'e ramo ha'e kuery nhemi rupi ikuai Abimeleque rovai.

<sup>24</sup> Ha'e rami oiko Jerubaal ra'y kuery setenta ikuai va'e ojukapaague repyrã ou aguã, ha'e tyke'y Abimeleque ojukapa va'ekue áry ae huguy omoëague re imbopagaarã ou aguã, ha'e Siquém pygua kuery áry voi, mba'eta ha'e kuery onhemoirũ rire guyvy kuery ojukapa aguã py.

<sup>25</sup> Ha'e rami vy Abimeleque rovai Siquém pygua kuery omoõ avakue yvyty ikuai va'e áry oma'ẽ mbegue aguã, ha'e va'e rupi oaxa va'e ha'e javi ha'e kuery oguero'a aguã. Ha'e rã ha'e nunga Abimeleque pe omombe'ua.

<sup>26</sup> Ha'e gui Ebede ra'y Gaal va'e guyvy kuery reve ou avi vy Siquém py ikuai. Ha'e ramo hexe Siquém pygua kuery ojerovia okuapy.

<sup>27</sup> Ha'e gui ha'e kuery mba'ety py oje'oi vy omono'õ uva'a. Ha'e vy hi'a onhamimba ma rire ojapo okuapy ngaru. Ha'e rami vy nguu ete ra'angaa pegua oo py ju oje'oi vy okaru ha'e oy'u okuapy, Abimeleque re ijayvu vai guive.

<sup>28</sup> Ha'e rami vy Ebede ra'y Gaal aipoe'i:

— Marã ramigua tu Abimeleque, ha'e marã ramigua tu nhande Siquém pygua jaiko, ixupe jaiko aguã? Ha'e va'e ma Jerubaal ra'y e'ŷ ri ty'y? Zebul e'ŷ ri ty'y hembiguai oiko? Mba'erã tu ixupe rive jaiko? Ha'e rami 'rãgue py ha'eve Siquém ru Hamor ramymino kuery pe jaiko.

<sup>29</sup> Peẽ kuery ma xepo py penemoña va'e rire xee aipe'a 'rãgue Abimeleque, ha'e ixupe "Emboatypa ndevyguia xondaro kuery, ha'e erupa" ha'e 'rãgue – he'i.

<sup>30</sup> Ha'e rami Ebede ra'y Gaal ijayvu rã tetã pygua huvixa Zebul oendu vy ivai vaipa.

<sup>31</sup> Ha'e rami vy Abimeleque-a py omondouka nhemi guembiguai omombe'u va'erã: "Ebede ra'y Gaal ma guyvy kuery reve Siquém py ou vy tetã pygua kuery omopu'ãmba nderovai.

<sup>32</sup> Epu'ã ke ha'vy pyávy, ndee ha'e ndereve ikuai va'e kuery ha'e javi. Penhemi ranhe mba'ety rupi.

<sup>33</sup> Ha'e gui ko'ẽ aje'ive reve pevypa kuaray oẽ'i ramove, ha'e pepu'ã pekuapy tetã re. Ha'e rã Gaal ngupive ikuai va'ekue reve penderovai oẽmba jogueruvy ramo pejapo tema hexe pejapoxea rami", he'i uka.

### *Gaal ha'e Siquém pygua kuery re Abimeleque opu'ã vy omombaague*

<sup>34</sup> Ha'e va'e pyavyve Abimeleque ha'e hexeve ikuai va'e ovypa vy onhemi okuapy Siquém tetã re opu'ã aguã. Irundy henda py ikuai.

<sup>35</sup> Ha'e gui Ebede ra'y Gaal oẽ vy opu'ã ho'amy tetã rokẽ py. Ha'e ramo Abimeleque ha'e hexeve ikuai va'e ha'e javi opu'ãmba ju onhemiague gui.

<sup>36</sup> Ha'e rã ha'e kuery ou rã Gaal oexa vy aipoe'i Zebul pe:

— Ma'ẽ, oguejya jekuaa yvyty áry gui.

Zebul ombovai:

— Any, yvyty'ã rima ava rami rexas – he'i.

<sup>37</sup> Ha'e gui Gaal ijayvuve ju. Ha'e vy aipoe'i:

— Ma'ẽ, pee ma oguejya jogueruvy nhanerenonde katy gui, ha'e ou reta avi yvyla carvalho imba'ekuaa aty rupi tape ou va'e gui.

**38** Zebul ombovai:

— Ha'e gui mamo tu aŷ'i oĩ ndejuru, ha'e va'e py aipo'reague: “Marã ramigua tu Abimeleque ixupe jaiko aguã?” 'reague? Peva'e e'ŷ ri ty'y nerembovarei va'ekue? Ha'e rami vy eẽ ha'vy, epu'ã hovai — he'i.

**39** Ha'e ramo Siquém pygua kuery renonde Gaal oẽ ovvy opu'ã Abimeleque kuery rovai.

**40** Ha'e rã Abimeleque omonha vy ou ramo Gaal ojava henonde gui. Ha'e gui heta ojuka pyre ho'a tetã rokẽ rupi oike ta maa peve.

**41** Ha'e gui Abimeleque ma Arumá py ranhe oo opyta ramo Zebul ae omoxẽ Gaal ha'e tyvy kuery Siquém py ikuai ve'ŷ aguã.

**42** Ko'ẽ jevy tetã pygua kuery oẽmba ju oje'oivy mba'ety katy. Ha'e nunga Abimeleque pe omombe'ua rã

**43** ojeupergua avakue ojopy vy omboja'o mboapy henda py. Ha'e rami vy omondouka mba'ety rupi onhemi aguã. Amboae kuery tetã gui oẽ rã oexa vy opu'ã hovai, oitypa.

**44** Abimeleque hexeveguia kuery reve onha pojava vy tetã rokẽ py ae ikuai. Ha'e rã amboae mokoõ aty va'e mba'ety katy oẽ oje'oivy va'ekue re opu'ã vy oitypa avi.

**45** Ha'e va'e ára pukukue re Abimeleque kuery opu'ã okuapy ha'e va'e tetã re. Ha'e vy ipo'aka. Ha'e pygua kuery ojukapa vy ombovaipa tetã, ha'e juky avi omoaï.\*

**46** Ha'e ramo Siquém pygua kuery torre py ikuai va'e ha'e nunga oendu vy oikepa El-Berite pegua templo guy py onhemi atyrã ojo'o pyre py.

**47** Abimeleque pe omombe'ua Siquém py torre pygua kuery ono'õ okuapya.

**48** Ha'e ramo Zalmom yvyty re Abimeleque oẽ ojeupergua kuery ha'e javi reve. Haxa Abimeleque ojopy vy ojaya peteĩ yvyla rakã. Ha'e va'e oupi vy oaxi'y áry omoi reve aipoe'i ngupive ikuai va'e pe:

— Xee ajapo rã pexa vy peẽ voi ha'ekue rami pejapo pojava — he'i ramo

**49** ha'e kuery peteĩ-teĩ yvyla rakã ojaya vy oo Abimeleque rakykue. Ha'e vy onhonomba imoiny onhemi atyrã ojo'o pyre áry. Ha'e vy omoendy Siquém pygua kuery torre py ikuai va'ekue ha'e javi áry, oapypa. Ha'e rami vy omanomba, mil avakue ha'e kunhague.

### *Abimeleque omanoaque*

**50** Ha'e gui Abimeleque ma Tebes tetã py oo vy ojokopa vy ipo'aka.

**51** Ha'e va'e tetã mbyte py oĩ peteĩ torre imbaraete va'e. Ha'e va'e katy tetã pygua kuery avakue ha'e kunhague onha vy oikepa. Ha'e vy guakykue torre rokẽ omboty vy ojeupipa okuapy ijapyte áry.

**52** Torre oĩa peve Abimeleque ou vy opu'ã hovai. Ha'e vy okẽ peve ovaẽ oapy aguã.

**53** Ha'e ramo peteĩ kunha ma peteĩ ita guauxu mba'emo mongu'ia regua oupi vy omombo Abimeleque hakã re, ombovo ikãgue.

**54** Ha'e ramo ha'e oenoĩ vyvoi ojeupergua kunumi hu'y jokoa reraa. Ha'e vy aipoe'i ixupe:

— Ekyi ndekyxé ha'e xejuka, “Kunha rive ojuka”, 'ea e'ŷ aguã — he'i ramo kunumi va'e oipyxo ramo omano.

**55** Abimeleque omano maa Israel regua avakue oexa vy oje'oipa peteĩ-teĩ ngoo katy.

**56** Ha'e rami py Abimeleque re Nhanderuete ombou nguu pe ojapo vaiague rekovia, guyvy kuery setenta va'e ojukapaague re.

**57** Ha'e rami ae avi Siquém pygua avakue áry Nhanderuete ombou ojapo vaiague ha'e javi rekovia. Ha'e rami vy ha'e kuery re ojeupity Jerubaal ra'y Jotão ijayvu vaiague.

\* **9:45** Juky omoaï mba'eve henhoi e'ŷ aguã (Deuteronomio 29.23, Salmo 107.33-34).

## 10

*Israel rerekoa kuery Tola ha'e Jair rekokue oĩa*

<sup>1</sup> Abimeleque oiko rire ma Israel kuery repyarã oiko Issacar regua Puá ra'y Tola, Dodô ramymino. Ha'e va'e ma Samir py oiko Efraim regua yvy'ã reia re.

<sup>2</sup> Ha'e va'e ma vinte e três ma'etý re opena Israel kuery re. Ha'e gui omano, ha'e rã onhono porãa Samir py ae.

<sup>3</sup> Tola oiko rire ma oiko Jair. Ha'e va'e ju opena Israel kuery re, vinte e dois ma'etý re.

<sup>4</sup> Ha'e va'e ma trinta gua'y kuery oguereko, trinta mburika'i áry ikuai va'e. Oguereko avi trinta tetã. Ha'e va'e ma Havote-Jair omboery kova'e ára peve, Gileade yvy re ikuai va'e.

<sup>5</sup> Ha'e gui Jair omano, ha'e rã Camom py onhono porãa.

*Filisteu ha'e Amom kuery rembiguai ikuai jave guare*

<sup>6</sup> Ha'e gui Israel kuery ha'eve'ña rami ju ikuai SENHOR renonde. Ha'e vy Baal ra'angaa kuery pe rive ikuai, Astarote, ha'e Síria pygua kuery ruete ramigua ikuai va'e pe, Sidom, Moabe, Amom ha'e filisteu kuery pegua va'e pe. Ojepe'apa okuapy SENHOR pe ikuiai gui, ixupe nda'ikuai.

<sup>7</sup> Ha'e ramo Israel kuery rovai SENHOR poxya hendy vy omboaxapa filisteu ha'e Amom kuery po py.

<sup>8</sup> Ha'e ramo ha'e va'e kuery ombojexavai Israel kuery ha'e va'e ma'etý guive, oguereko axy rei. Dezoito ma'etý re oguereko axy Israel kuery Jordão yakã rovai re ikuai va'e ha'e javi, amorreu kuery yvy re Gileade py ikuai va'e.

<sup>9</sup> Ha'e gui Amom kuery ma Jordão yakã kyyõ rupi oaxa Judá kuery rovai ju opu'ã avi aguã, Benjamim ha'e Efraim kuery rovai guive. Ha'e ramo Israel kuery ikuai axy ete.

<sup>10</sup> Ha'e gui Israel kuery ojapukai okuapy SENHOR pe. Ha'e vy aipoe'i:

— Rojejavy nderovai, mba'eta oreruete roeja vy Baal ra'angaa kuery pe rive orekuai.

<sup>11</sup> Ha'e rã SENHOR ombovai Israel kuery pe:

— Egito pygua kuery penemoingo axy jave, ha'e gui amorreu kuery ju, Amom kuery, filisteu,

<sup>12</sup> Sidom pygua, amalequita ha'e maonita kuery pendererekko axy rã xevy pe pejapukai jave xee ndorogueraa jepei ri ty'y ha'e kuery po gui?

<sup>13</sup> Ha'e rami tei peẽ xereja ma tuuete ramigua pe rive pendekuai aguã. Ha'e nunga rupi xee ndorogueraa jepevei ma 'rã.

<sup>14</sup> Tapeo, pejapukai penderueterã peiporavo va'ekue pe ae. Ha'e kuery ae tapendereraa jepe pejexavaia gui — he'i.

<sup>15</sup> Ha'e rami tei Israel kuery ojapukaive ju SENHOR pe:

— Rojejavy ae ma. Ejapo orere rejapoxea ha'e javi rami, va'eri orereraa jepe ju aÿ ete'i ri jepe, rojerure ndevy — he'i okuapy.

<sup>16</sup> Ha'e rami vy ha'e kuery mbyte gui oipe'apa okuapy amboae kuery ruete ra'angaa, ha'e vy SENHOR pe ju ikuai. Ha'e ramo ndoexa uka e'ÿvei Israel kuery omboaxy, ikuai axy rã.

<sup>17</sup> Amom kuery ma ono'õ vy Gileade py ikuai. Ha'e rã Israel kuery ma oupa vy Mispa py ikuai.

<sup>18</sup> Ha'e ramo heta va'e kuery regua Gileade pygua huvixa kuery joupe-upa aipoe'i okuapy:

— Mava'e ava nda'u ha'e ranhe 'rã oo Amom kuery rovai opu'ã aguã? Ha'e va'e oĩ 'rã Gileade pygua ha'e javi ruvixarã.

## 11

*Israel kuery repyarã Jefté onhemolague*

<sup>1</sup> Ha'e gui Gileade tetã pygua Jefté ju oiko. Ha'e va'e ava ma ipy'a guaxu va'e, kunha itavy rei va'e pi'a, Gileade ra'y.

<sup>2</sup> Gileade ra'yxy ae oguereko avi ta'y kuery. Ha'e va'e kuery tujapa ma vy omoxẽ Jefté. Ha'e vy aipoe'i okuapy ixupe:

— Ndee ma mba'eve ndererekoi 'rã orevy guarã nhanderu oguereko va'e regua, kunha mboae pi'a reiko vy — he'i okuapy.

<sup>3</sup> Ha'e ramo guyke'y kuery renonde gui Jefté ojava vy Tobe yvy re ju oiko. Ha'e pygua avakue hi'arandu e'ŷ rei va'e hexe onhemoirũ vy oje'oi 'rã hupive.

<sup>4</sup> Ha'e va'e rire Amom kuery opu'ã okuapy Israel kuery rovai.

<sup>5</sup> Ha'e kuery opu'ã rã Gileade pygua nhomoneta va'ety kuery oje'oi Jefté oĩa py, Tobe yvy gui ogueru aguã.

<sup>6</sup> Ha'e vy aipoe'i okuapy Jefté pe:

— Eju oreruvixarã, Amom kuery rovai nhapu'ã aguã.

<sup>7</sup> Jefté ombovai Gileade pygua nhomoneta va'ety kuery pe:

— Ha'e rami avi peẽ kuery ndaxerayvui vy naxemoxẽi ri ty'y raka'e xeru ro gui? Ha'e vy mba'e re tu aŷ peju xea py, pendekuai axy vy rive? — he'i

<sup>8</sup> Ha'e ramo Gileade pygua nhomoneta va'ety kuery aipoe'i ju Jefté pe:

— Ha'e rami rã ae roju ndea py. Eju orereve, Amom kuery rovai nhapu'ã aguã. Ha'e rã ndee ma rei'rã Gileade pygua kuery ha'e javi ruvixa — he'i okuapy.

<sup>9</sup> Ha'e ramo Jefté ju oporandu Gileade pygua nhomoneta va'ety kuery pe:

— Ha'e gui xapy'a rei xereraa ju ri Amom kuery rovai apu'ã aguã, ha'e SENHOR xepo py omboaxa ramo anhetẽ ri pa xee aiko 'rã penderuvixa?

<sup>10</sup> Gileade pygua nhomoneta va'ety kuery ombovai:

— SENHOR ae 'rã nhanembyte oĩ oreayvu renduarã, ha'e rami vy orembopaga 'rã ndeayvuague ndorojapoí ramo — he'i.

<sup>11</sup> Ha'e rami rã Jefté oo Gileade pygua nhomoneta va'ety kuery reve. Ha'e rã ha'e pygua kuery omoi nguvixarã. Ha'e gui SENHOR renonde Mispa py ju Jefté omombe'upa SENHOR ijayvuague.

<sup>12</sup> Ha'e gui Amom kuery ruvixaa katy Jefté omondouka guembiguai kuery oayvu mombe'uarã. Ha'e vy aipoe'i uka:

— Mba'e tu rereko xereve, xea py reju vy xeyvy rovai repu'ã aguã?

<sup>13</sup> Jefté rembiguai kuery pe Amom pygua huvixa ombovai:

— Mba'eta Egito yvy gui Israel kuery ou vy ojopy raka'e oreayvy Arnom guive Jaboque peve, ha'e gui Jordão yakã peve ju. Aŷ eme'ẽ porã'i ju xeyvy — he'i.

<sup>14</sup> Ha'e rami tei guembiguai kuery mboae ju Jefté omondouka Amom kuery ruvixa pe oayvu mombe'uarã.

<sup>15</sup> Ha'e vy aipoe'i ixupe:

— Jefté aipoe'i uka: Israel kuery ma ndojopyi raka'e Moabe pygua kuery yvy, nei Amom kuery yvy.

<sup>16</sup> Mba'eta Egito gui Israel kuery ou vy tekao e'ŷa rupi oguata Ye'ẽ Pytã peve, ha'e rupi ae Cades py ovaẽ aguã.

<sup>17</sup> Ha'e ramo Israel kuery oayvu mombe'uarã omondouka raka'e Edom pygua kuery ruvixaa py. Ha'e vy aipoe'i uka: "Royerure ndevy roaxa ta ndeyvy rupi", he'i uka. Ha'e rami tei Edom pygua kuery ruvixa noendu potai. Ha'ekue rami ae ju Israel kuery ojerure Moabe pygua kuery ruvixa pe, ha'e va'e voi noendu potai. Ha'e rami rã Cades py ranhe Israel kuery ikuai.

<sup>18</sup> Ha'e va'e rire tekao e'ŷa rupi oguata vy ojeapa raka'e Edom ha'e Moabe pygua kuery yvy yke rupi. Ha'e vy ha'e va'e kuery yvy gui mombyry'i ovaẽ kuaray oua katy, Arnom yakã rovai re ae ikuai. Ha'e rami vy novaẽi raka'e Moabe kuery yvy re, mba'eta Arnom yakã ma ijyvy apy oĩ.

<sup>19</sup> Ha'e ramo amorreu kuery ruvixa Hesbom pygua Seom pe ju Israel kuery omondouka oayvu mombe'uarã. Ha'e vy aipoe'i uka ixupe: "Rojerure ndevy, toroaxa ndeyvy rupi orekuai aguã py rovaẽ aguã", he'i

<sup>20</sup> teĩ Israel kuery re Seom ndojeroviai vy nomboaxai oyvy rupi. Ha'e rami 'rãgue py ojeupeguia kuery ha'e javi oenoĩ vy Jaza py ikuai, ha'e vy opu'ã okuapy Israel kuery rovai.

<sup>21</sup> Ha'e gui Israel kuery po py SENHOR Israel kuery ruete omboaxa Seom ha'e ixupeguia kuery ha'e javi, ha'e ramo ojukapa. Ha'e ramo Israel kuery oipe'apa amorreu kuery ijyvy rupi ikuaiague gui.

<sup>22</sup> Ipo'aka amorreu kuery yvy ha'e javi re, Arnom guive Jaboque peve, ha'e gui tekao e'ŷa guive Jordão yakã peve.

<sup>23</sup> Ha'e rami py SENHOR Israel kuery ruete ae oipe'a uka raka'e amorreu kuery ojeupeguia kuery renonde gui. Ha'e gui ndee ma nhi'ã kova'e yvy ja renhemingo ta?

<sup>24</sup> Anhetẽ e'ŷ ri ty'y penderuete Camos mba'emo pendevy omboaxa va'e ramo "Oremba'e" peje? Ha'e rami ae avi ore kuery voi rojopy 'rã oreruete SENHOR orerenonde gui oipe'a va'ekue yvy.

<sup>25</sup> Ndee ma nhi'ã Zipor ra'y Balaque Moabe pygua ruvixa oĩ va'ekue gui nembaraeteve? Mba'eta ha'e va'e ma peteigüeve nda'ijayvu rei raka'e Israel kuery rovai, ha'e kuery re nopus'ãi guive.\*

<sup>26</sup> Ha'e gui Israel kuery trezentos ma'etõ re Hesbom ha'e Aroer re hekoia jave, ha'e ijyvýry tekao'i ikuai va'e rupi, ha'e gui Arnom yakã rembe ha'e javi rupi tetã ikuai va'e re ha'e kuery hekoia jave ma, ha'e va'e jave mba'e re tu ndapejopy jevyi raka'e ha'e va'e tetã?

<sup>27</sup> Ha'e nunga rupi xee e'ŷ ajejavvy nderovai! Ha'e rã ndee ae ma rejapo vai orerovai repu'ãa py. Tove SENHOR pavẽ re oikuaa pota va'e toikuua pota aŷ Israel ha'e Amom kuery re, he'i uka.

<sup>28</sup> Ha'e rami teĩ Amom kuery ruvixa ndojapyxaka potai Jefté oayvu omombe'u uka va'ekue re.

### *Jefté onhemboayvuague*

<sup>29</sup> Ha'e ramo Jefté re SENHOR Nhe'ẽ ou ramo oaxa ovy Gileade ha'e Manassés rupi, ha'e vy Gileade regua Mispa oĩ va'e peve oo, ha'e Mispa gui oo ju Amom kuery rovai opu'ã aguã.

<sup>30</sup> Jefté onhemboayvu vy oura SENHOR pe. Ha'e vy aipoe'i:

— Xapy'a rei Amom kuery xepo py remboaxa ramo

<sup>31</sup> Amom kuery re xepo'akaague gui ajevy ju ma ramo xerokẽ gui xerovaexi aguã ha'e ranhe oẽ ouvy va'e rei amboaxa 'rã SENHOR peguarã, ixupe xee ame'ẽ 'rã apy reve — he'i.

<sup>32</sup> Ha'e rami vy Jefté oo Amom kuery reve nhovaexi, ha'e kuery rovai opu'ã aguã. Ha'e gui Jefté po py SENHOR omboaxapa.

<sup>33</sup> Ha'e ramo oitypa Aroer guive Minite katy'i peve (vinte tetã ha'e javi vy), ha'e Abel-Queramim peve ju. Heta tekao oity. Ha'e rami vy Israel kuery renonde Amom kuery nda'ipo'akavei aguã rami ikuai.

<sup>34</sup> Ha'e gui Mispa py Jefté ou jevy vy ngoo py ovaẽ ramo tajy ae ha'e ranhe oẽ ouvy ovaexi aguã. Pandeiro reve ojerokya rupi ou. Ha'e va'e ma tajy pete'i va'e ae, tajy mboae nda'ipoi, ta'y e'ŷ va'e guive.

<sup>35</sup> Guajy oexa vy Jefté oao omendoropa reve aipoe'i:

— Aikore xerajy, ndee xemomboriau ete! Ndee ma reiko ajexavai aguã rami, mba'eta nda'evei SENHOR pe anhemboayvuague amboaxa rive ju aguã.

36 Ha'e rã kunhatai ombovai nguu pe:

— Xeru, ndee renhemboayvu ae ma SENHOR pe. Ha'e rami xere ejapo SENHOR pe renhemboayvuague rami ae. Mba'eta nderovaigua Amom kuery gui SENHOR nderepy rire — he'i.

\* **11:25** Números 22 guive 24 peve.

<sup>37</sup> Aipoe'ive ju nguu pe:

— Peteĩ mba'e ejapo xevy: Taa ranhe, mokoĩ jaxy re taiko yvy'ã rupi, amenda e'ŷ va'e aikoa re ajae'o aguã, xeirũ kuery reve.

<sup>38</sup> Tuu ombovai vy — Tereo — he'i vy mokoĩ jaxy re omondouka. Ha'e ramo oirũ kuery reve tajy oo vy yvy'ã rupi ojae'o omenda e'ŷ va'e oikoa re.

<sup>39</sup> Mokoĩ jaxy opa ma ramo ojevy ju nguua py. Ha'e ramo hexe ojapo onhemboague. Kunhataĩ va'e ma ava reve nonhemoirũ ae. Ha'e va'e gui oiko Israel kuery rekorã,

<sup>40</sup> mba'eta ma'etŷ nhavõ Israel rajy kuery oje'oi 'rã irundy ára re, Gileade pygua Jefté rajy re ipy'a vaia rupi oporaei aguã.

## 12

### *Efraim kuery re Jefté kuery opu'ãague*

<sup>1</sup> Ha'e ramo Efraim regua avakue oenoĩmbaa rã oje'oipa Zafom katy. Ha'e vy aipoe'i okuapy Jefté pe:

— Mba'e re tu Amom kuery rovai repu'ã aguã reo jave norerenoĩ ore avi nderupive roo aguã? Roapy'rã ndero, ha'e py reĩ teri reve.

<sup>2</sup> Ha'e kuery pe Jefté ombovai:

— Ha'e rami avi Amom kuery reve xevyguia kuery joguero'a ete jave xee roenoĩ teĩ peẽ kuery ndapeoi va'ekue ha'e kuery po gui xereraa jepe aguã.

<sup>3</sup> Peẽ ndaxereraa jepei taa aikuaa vy mae ajeayvukue'i py e'ŷ aa Amom kuery rovai apu'ã aguã. Ha'e ramo xepo py SENHOR omboaxa ha'e kuery ha'e javi. Ha'e gui mba'e re tu aý peju xea py xerovai pepu'ãxe vy? — he'i

<sup>4</sup> Ha'e rami vy Gileade pygua avakue Jefté omboatypa vy opu'ã okuapy Efraim kuery rovai. Gileade pygua avakue oitypa Efraim regua, mba'eta Efraim pygua kuery ijayvu vy “Peẽ Gileade pygua kuery Efraim gui pejepe'a va'ekue, Efraim ha'e Manassés kuery mbyte pendekuai va'ekue”, he'i rire.

<sup>5</sup> Ha'e ramo Gileade pygua kuery ojokopa Jordão yakã oaxaaty Efraim katy oo va'e py. Ha'e rami vy Efraim regua ojava ovu vy “Aaxaxe” he'i ramo ha'e kuery pe Gileade pygua avakue ju oporandu 'rã: “Ndee pa Efraim pygua ae?” Ha'e rã ombovai vy “Any” he'i

<sup>6</sup> ramo aipoe'ive ju 'rã: “Ha'e vy aipo're: ‘Chibolete’ ‘re”, he'i 'rã. Ha'e ramo ombovai vy xapy'a rei “Sibbolete” he'i 'rã ayvu ndoupity porãi vy. Ha'e ramo oguero'a vy ojuka 'rã Jordão yakã oaxaaty pyve. Ha'e rami vy ha'e va'e jave py Efraim kuery va'e regua omano quarenta e dois mil.

<sup>7</sup> Gileade pygua Jefté ma mboapy meme ma'etŷ re opena raka'e Israel kuery re. Ha'e gui omano rã onhono porãa peteĩ tetã Gileade re oĩ va'e py.

### *Joguerekaoa kuery Ibsã, Elom ha'e Abdom ikuai jave guare*

<sup>8</sup> Ha'e va'e rire ma Belém pygua Ibsã ju opena Israel kuery re.

<sup>9</sup> Ha'e va'e ma trinta gua'y kuery oguerekoo, trinta guajy kuery guive mombyryguia kuery re omenda va'e meme. Ha'e rami ae avi mombyry gui trinta kunhague ogueru gua'y kuery ra'yxyrã. Sete ma'etŷ re opena Israel kuery re.

<sup>10</sup> Ha'e gui Ibsã omano rã onhono porãa Belém tetã py ae.

<sup>11</sup> Ha'e va'e rire ma Zebulom pygua Elom oiko. Ha'e va'e ma dez ma'etŷ re opena Israel kuery re.

<sup>12</sup> Zebulom pygua Elom omano rã onhono porãa Zebulom yvy re Aijalom py.

<sup>13</sup> Ha'e va'e rire ma piratonita Hilel ra'y Abdom ju opena Israel kuery re.

<sup>14</sup> Ha'e va'e ma quarenta gua'y kuery oguerekoo, ha'e gui trinta guamymino kuery. Ha'e va'e kuery ma setenta mburika'i áry ikuai. Oito ma'etŷ re opena Israel kuery re.

<sup>15</sup> Ha'e gui piratonita Hilel ra'y Abdom omano rã onhono porãa Efraim yvy re Piratom py, yvyty reia rupi amalequita kuery ikuaiia py.

## 13

### *Sansão itui'iague*

<sup>1</sup> SENHOR renonde Israel kuery ha'eve'ŷa rami ju ikuai ramo quarenta ma'etŷ re omboaxa filisteu kuery po py.

<sup>2</sup> Zorá tetã py oiko peteĩ ava Dã ramymino, Manoá hery va'e. Ta'yxy ma imemby va'erã e'ŷ ae oiko vy na'imembyi.

<sup>3</sup> Ha'e gui kunha va'e pe SENHOR-a guigua anjo ojexa uka vy aipoe'i ixupe:

— Ma'ẽ, ndee ma nememby va'erã e'ŷ ae reiko va'ekue, nememby va'e'ŷ teri va'eri rerekoi'rã, ha'e vy reikuavã nho 'rã peteĩ ava'i.

<sup>4</sup> Ha'e rã aŷ ma eiko kuaa ke, ey'u eme vinho, neĩ iro va'e. He'u eme ha'eve'ŷ va'e.

<sup>5</sup> Mba'eta ndee rerekoi'rã vy reikuavã 'rã peteĩ ava'i. Ha'e va'e akã re napemovaëi 'rã kyxe hi'a pejaya aguã. Mba'eta ava'i guive oiko 'rã nazireu, guyru'i py teri oĩ reve ae 'rã oiko Nhanderuete pe omboaxa pyre.\* Ha'e gui omboypy 'rã Israel kuery ogueraa jepe aguã filisteu kuery po'akaa gui — he'i.

<sup>6</sup> Ha'e rami rã omea py kunha va'e oo vy aipoe'i ixupe:

— Peteĩ ava Nhanderuete remimbo'e ou kuri xea py, Nhanderuetea guigua anjo ramigua ojekuaa, nhanemongyje rei va'e. Ha'e rã xee ma naporandui maguigua paa re, neĩ ha'e voi guery nomombe'ui xevy,

<sup>7</sup> va'eri aipoe'i xevy: “Ma'ẽ, ndee rerekoi'rã vy reikuavã 'rã peteĩ ava'i. Ha'e nunga rupi aŷ ma ey'uve eme vinho, neĩ iro va'e, he'u eme guive ha'eve'ŷ va'e, mba'eta ava'i ma oiko 'rã nazireu Nhanderuete pe omboaxa pyre, guyru'i py oĩ reve omanoa ára peve”, he'i va'ekue xevy.

<sup>8</sup> Ha'e ramo Manoá onhembo'e SENHOR pe. Ha'e vy aipoe'i:

— Xe-SENHOR, ajerure ndevy, embou ju ava neremimbo'e, torembo'e ava'i itui'i va'erã roguereko aguã re.

<sup>9</sup> Ha'e rami Manoá ijayvu rã Nhanderuete oendu ramo SENHOR-a guigua anjo teïgue ju ou kunha va'e oĩa py, mba'ety py oguapy oiny jave. Ha'e rã ime Manoá ma noĩ hexeve.

<sup>10</sup> Ojekuaa ramo kunha va'e opu'ã pojava ho'amy vy onha ovvy ome pe omombe'u. Ha'e vy aipoe'i ixupe:

— Ma'ẽ, xevy ojexa uka ju ava kueve'i ojexa uka va'ekue — he'i.

<sup>11</sup> Ha'e ramo Manoá opu'ã avi vy gua'yxy rakykue oo. Ha'e gui ava va'e hi'aña py ovaẽ vy aipoe'i ixupe:

— Ndee pa kova'e kunha pe ndeayvu ra'e?

Ombovai:

— Xee ae ri — he'i.

<sup>12</sup> Ha'e ramo Manoá aipoe'i:

— Ha'e gui ndeayvuague ojeupity ma jave marã rami 'rã tu roguereko ava'i, ha'e mba'e nunga 'rã tu ojapo?

<sup>13</sup> Ixupe SENHOR-a guigua anjo ombovai ju:

— Tove kunha va'e toiko xeayvuague ramo ae.

<sup>14</sup> Ha'e rami vy peteїve henda py ndo'ui 'rã uva'a guigua, vinho neĩ iro va'e ndoy'ui 'rã, ndo'ui 'rã guive ha'eve'ŷ va'e. Ixupe xeayvuague ha'e javi 'rã ojapo — he'i.

<sup>15</sup> Ha'e ramo Manoá teïgue ju aipoe'i SENHOR-a guigua anjo pe:

— Epytave'i ranhe ke, ha'e rã ndevy roguereko katu 'rã peteĩ kavara'i — he'i,

<sup>16</sup> mba'eta Manoá ndoikuaai SENHOR-a guigua anjo oikoa. Ha'e gui SENHOR-a guigua anjo aipoe'i Manoá pe:

— Apytave teї nda'ui 'rã tembi'u reme'ẽ va'e. Xapy'a rei mba'emo reapy reve reme'ẽ va'erã ri rerekoi'rã katu vy SENHOR pe ae eme'ẽ — he'i.

\* **13:5** Nazireu kuery mboae ma Nhanderuete pe mba'emo ojapo aguã re onhemboayvu va'e (Números 6.1-21). Ha'e rã Sansão ma itui'i e'ŷ re voi anjo oiporavo uka va'ekue nazireu oiko aguã.

<sup>17</sup> Manoá oporandu ju SENHOR-a guigua anjo pe:

— Marã rami tu nderery, ndeayvuague ojeupity ramo romboete aguã?

<sup>18</sup> SENHOR-a guigua anjo ombovai vy

— Mba'e re tu reporandu xerery re? Mba'eta iporã ete va'e oikuaa pyrã e'ŷ — he'i.

<sup>19</sup> Ha'e gui Manoá ojopy peteĩ kavara'i ha'e mba'emo aju guigua ome'ẽ va'erã. Ha'e va'e ma SENHOR pe ome'ẽ peteĩ ita áry. Ha'e ramo SENHOR-a guigua anjo ma peteĩ mba'e ojapo iporã ete va'e, Manoá ha'e ta'yxy oexaa py.

<sup>20</sup> Ha'e rami vy altar áry gui tata yva katy ojeupi ov yva'e rupi SENHOR-a guigua anjo voi ojeupi ov yva'e. Ha'e rã Manoá ha'e ta'yxy oexaa vy guenapy'ã re ikuai ngova yvy re omovaẽ reve.

<sup>21</sup> Manoá pe, neĩ ta'yxy pe anjo SENHOR-a guigua ndojexa ukavei ramo Manoá oikuaa SENHOR-a guigua anjo oikoa.

<sup>22</sup> Ha'e rami vy aipoe'i gua'yxy pe:

— Anhetẽ ete nhamano'rã, Nhanderuete jaexa rire.

<sup>23</sup> Ha'e rã ta'yxy ombovai:

— SENHOR nhandejukaxe va'e rire nhandepo gui ndojopyi 'rãgue mba'emo jaapy reve nhame'ẽ va'ekue, neĩ mba'emo aju guigua. Neĩ ndoexa ukai 'rãgue ha'e nunga ha'e javi, neĩ ndoikuua ukai 'rãgue guive — he'i.

<sup>24</sup> Ha'e va'e rire ma kunha va'e oikuavã'i peteĩ ava'i. Ha'e vy omboery Sansão. Ha'e gui ava'i tuvixa ov yva'e, ha'e SENHOR omoingo porã.

<sup>25</sup> Ha'e gui Zorá ha'e Estaol mbyte Maané-Dã py oiko jave SENHOR Nhe'ẽ omboypy oguereko aguã.

## 14

### *Sansão omendaxeague*

<sup>1</sup> Ha'e gui Sansão ma Timna tetã py oo. Ha'e py ma peteĩ filisteu rajy oexaa vy

<sup>2</sup> ojevy vy omombe'u nguu ha'e oxy pe. Ha'e vy aipoe'i:

— Timna py aexa kuri peteĩ kunha, filisteu kuery rajy regua. Peru ta'vy xera'yxyrã.

<sup>3</sup> Ha'e rami teĩ tuu ha'e ix y ombovai:

— Jipoi ri ty'y kunha nhanceretarã kuery rajy regua, ha'e'ŷ vy nhande kuery ha'e javi regua, filisteu kuery ikuiaia gui ndera'yxyrã rejopy 'rãgue py? Mba'eta ha'e kuery ma opire omboi uka e'ŷ va'e.

Sansão aipoe'i nguu pe:

— Eru xevy ha'e va'e ae, mba'eta ha'e va'e anho ajou porã — he'i.

<sup>4</sup> Ha'e gui tuu ha'e ix y ndoikuuaai SENHOR gui ha'e rami aguã oikoa. Ha'e va'e jave py Israel kuery re filisteu kuery ipo'aka ramo SENHOR oarõ filisteu kuery ombopaga aguã.

<sup>5</sup> Ha'e gui nguu ha'e oxy reve jogueraa Timna py. Timna katy'i uvaty ikuai va'e py ovaẽ jave oma'ẽ vy oexaa peteĩ guary ra'y okororõ reve oẽ ouvy rã oña katy.

<sup>6</sup> Ha'e ramo hexe SENHOR Nhe'ẽ onhemonde rã omondoropa vyvoi kavara'i omondoroaa rami avi, opo py mba'eve oguereko e'ŷ re. Ha'e rami teĩ nguu neĩ oxy pe nomombe'ui ojukaague.

<sup>7</sup> Oove vy kunha va'e reve ijayvu vy ojou porã.

<sup>8</sup> Kueve ma rire Sansão ojevy ju gua'yxyrã ogueraa aguã. Ha'e gui tape rupi oo vy opia ov yva'e aguã guary re'õgue. Ha'e va'e oexaa rã eiru oĩ ei reve.

<sup>9</sup> Opo py hetãgue ojopy vy ho'u heravy oguata reve. Ha'e gui nguu ha'e oxya py ovaẽ vy ha'e kuery pe ome'ẽ ei, ha'e rã ho'u avi. Ha'e rami teĩ ha'e kuery pe nomombe'ui guary re'õgue gui oguenoëague.

### *Ayvu py mba'emo re Sansão oporanduague*

<sup>10</sup> Ha'e gui kunha va'e ro py Sansão ojapo peteĩ ngaru, mba'eta ha'e rami ae kunumigue ojapo va'erã ha'e kuery reko rami vy. Tuu avi oo.

<sup>11</sup> Ha'e gui filisteu kuery Sansão oexa vy trinta avakue oenoĩ hexeve ikuai aguã.

<sup>12</sup> Ha'e gui ha'e va'e kuery pe Sansão aipoe'i:

— Pêvy amombe'u ta peteĩ ayvu pembovai va'erã. Xapy'a rei sete ára re ngaru ndopai peve pembovai kuaai ri ramo pêvy ame'ẽ 'rã trinta kamixa ha'e trinta ao ngaru oĩa py oiporupy.

<sup>13</sup> Ha'e rã napembovai kuaai ri vy peẽ ae 'rã peme'ẽ xevy trinta kamixa ha'e trinta ao ngaru oĩa py oiporupy — he'i.

Ha'e kuery aipoe'i:

— Emombe'u ha'vy orevy, toroendu ayvu rombovai aguã.

<sup>14</sup> Ha'e ramo ha'e kuery pe omombe'u vy

— Okaru va'ekue gui oẽ tembi'u,

imbaraete va'ekue gui oẽ he'ẽ va'e — he'i.

Ha'e rã mboapy ára re ha'e kuery nombovai kuaai okuapy.

<sup>15</sup> Sete araa py ma ha'e kuery aipoe'i Sansão ra'yxy pe:

— Ndeayvu na neme pe orevy oporanduague omombe'u porãve aguã re, ndee ha'e nderu ro roapypa e'ŷ aguã. Tyrã pa oremba'e rei-rei reipe'a aguã rive orerenoĩ uka? Ha'e rami e'ŷ teve? — he'i okuapy.

<sup>16</sup> Ha'e ramo Sansão renonde ta'yxy ojae'o. Ha'e vy aipoe'i:

— Xemomboriau ete, ndaxerayvui vy. Mba'eta xeretã pygua kuery pe remombe'u ayvu ha'e kuery ombovai va'erã, teĩ xevy voi neremombe'u porãvei teri.

Ha'e ramo ombovai:

— Neĩ xeru neĩ ha'i pe voi namombe'ui. Ha'e gui ndevy ma nhi'ã amombe'u 'rã? — he'i.

<sup>17</sup> Ha'e rã henonde ojae'o oikovy sete ára re ngaru oikoa pukukue re. Ha'e ramo sete araa py mae omombe'u porãve ixupe oporandu riae ramo. Ha'e ramo kunha va'e ju omombe'u guetã pygua kuery pe.

<sup>18</sup> Ha'e gui sete araa py kuaray oike e'ŷ mbove ma ha'e va'e tetã pygua avakue aipoe'i Sansão pe:

— Mba'e nunga tu oiko ei gui he'ẽve va'e, ha'e guarý gui imbaraeteve va'e? — he'i.

Ha'e rã ha'e kuery pe Sansão aipoe'i:

— Xerymba vaka kunha py yvy napeikaraĩ va'e rire napembovai kuaai 'rãgue aporanduague.\*

<sup>19</sup> Ha'e ramo hexe SENHOR Nhe'ẽ onhemonde ramo Asquelom pygua kuery ikuiaia py oo vy ha'e va'e regua ojuka trinta avakue. Ha'e rami vy ha'e kuery ao ngaru oĩa py oiporu va'e oipe'apa vy ome'ẽ oporanduague ombovai va'ekue pe. Va'eri ivai raxa reve oo ju nguoo ro katy.

<sup>20</sup> Ha'e gui Sansão irũ ae pe ju ome'ẽa kunha va'e ta'yxyrã.

## 15

### *Filisteu kuery mba'ety rupi Sansão oapypaague*

<sup>1</sup> Kueve ma rire trigo omono'õa ára py Sansão peteĩ kavara'i ogueraa reve vy oo guembireko py, "Avaẽ 'rã xerembireko oĩa py" he'i vy. Ha'e rami teĩ hatyu nomovaẽi.

<sup>2</sup> Ha'e vy aipoe'i ixupe:

— Xee aexa'ã ndereayvuveia ramo. Ha'e rami vy neirũ pe ju ame'ẽ. Ha'e rami avi ikypy'y kyrive va'e ixugui iporãve va'e'ŷ ri ty'y? Ha'e rami rã eraa hekivia.

<sup>3</sup> Sansão ombovai:

— Aŷ ma xee ha'evea ramo 'rã ambopaga filisteu kuery — he'i.

<sup>4</sup> Ha'e rami vy oo vy ojopy trezentos aguara'i, ha'e mokõ-mokoõ ruguai re ojokua hendy va'erã.

\* <sup>14:18</sup> "Xerymba vaka kunha" he'ia ma gua'yxy re ae ijayvu vy, "Xera'yxy pe napeporandui va'e rire napembovai kuaai 'rãgue" he'i aguã.

<sup>5</sup> Hendy va'erã omoendypa vy opoipa filisteu kuery mba'ety rupi. Ha'e rami vy omoendy mba'emo aju jokuaa ikuai va'e, nomono'õi teri va'ekue guive, ha'e gui uvaty ha'e oliveiratty ha'e javi rupi.

<sup>6</sup> Filisteu kuery oporandu okuapy:

— Mava'e tu ha'e nunga ojapo?

Ombovaia:

— Timna pygua rajy me Sansão ojapo, mba'eta ixugui ta'yxy oipe'a vy irũ pe ju ome'ẽ rire — 'ea. Ha'e ramo filisteu kuery oje'oi vy oapy kunha va'e tuu reve.

<sup>7</sup> Sansão aipoe'i ha'e kuery pe:

— Evoko rami pejapo rire ndapytu'ui 'rã aipotaa rami ajepy e'ŷa ja — he'i.

<sup>8</sup> Ha'e rami vy oguero'a vy ojuka reta. Ha'e vy oo ju, Etã py itaovape guy oĩ va'e py opyta.

### *Judá regua avakue Sansão ojokua reve ogueraa ague*

<sup>9</sup> Ha'e ramo filisteu kuery oje'oi vy Judá rovai opu'ã okuapy. Ha'e rami vy Leí tetã katy'i rupi ikuai.

<sup>10</sup> Ha'e kuery pe Judá regua avakue oporandu:

— Mba'e re tu peju ore kuery rovai?

Ha'e kuery ombovai:

— Sansão re roju rojokua heravy aguã, hexe rojapo aguã ore kuery re ojapoague rami avi — he'i okuapy.

<sup>11</sup> Ha'e ramo três mil avakue Judá regua oje'oi Etã py itaovape guy oĩ va'e py. Ha'e vy aipoe'i okuapy Sansão pe:

— Ndereikuaai teve filisteu kuery nhandere ipo'akaa? Mba'e re tu ha'vy ha'e rami ete rejapo nhande kuery re?

Ombovai:

— Xere ha'e kuery ojapoague rami ae avi xee ajapo karamboae ha'e kuery re — he'i.

<sup>12</sup> Ha'e kuery aipoe'i:

— Ore roju rojokua heravy aguã, filisteu kuery po py romboaxa aguã.

Sansão aipoe'i ha'e kuery pe:

— Peura ha'vy peẽ ae xejuka e'ŷ aguã.

<sup>13</sup> Ha'e kuery ombovai:

— Any ri, rojokua heravy aguã rive roju ha'e kuery po py romboaxa aguã. Mba'eve py rei ndorojukai 'rã — he'i. Ha'e rami vy mokoĩ ixã pyau py ojokua vy oguenoẽ heravy itaovape guy py oĩa gui.

### *Mburika raŷ'y kâgue py Sansão mil avakue ojukaague*

<sup>14</sup> Leí tetã py ha'e kuery oguerovaẽ ramo filisteu kuery ov'y a reve oẽmba jogueruvy ovaexi aguã. Ha'e rami tei Sansão re SENHOR Nhe'ẽ onhemonde ramo ixã ijyva rupi ojokuaague omondo nhimbo kaigue'i rami rive. Ha'e rami vy ojokuaague ojerapa ipo gui.

<sup>15</sup> Petei mburika'i raŷ'y kâgue pyau teri va'e ha'e katy'i itui va'e ojou vy ha'e va'e py ojuka mil avakue.

<sup>16</sup> Ha'e vy aipoe'i:

— Petei mburika'i raŷ'y kâgue py ajapo opa rupi ono'õa aguã rami,  
petei mburika'i raŷ'y kâgue py rive ajuka mil avakue — he'i.

<sup>17</sup> Ha'e rami ijayvupa ma vy omombo haŷ'y kâgue opo gui. Ha'e va'e henda ma omboery Ramate-Leí.\*

<sup>18</sup> Ijy'uwei vaipa vy ojapukai SENHOR pe. Ha'e vy aipoe'i:

— Xee nerembiguai pe heta reraa jepe uka kuri. Ha'e gui xee amano 'rã teve xey'uwei gui? Aĩ vai 'rã teve ha'e va'e kuery opire omboi uka e'ŷ va'e po py? — he'i.

\* <sup>15:17</sup> Tery Ramate-Leí ma "Yvy'ã haŷ'y kâgue oĩa" 'ea.

<sup>19</sup> Ha'e ramo itakua Leí py oĩ va'e SENHOR oipe'a vy ojapo yy oxyry ouvy aguã rami. Sansão oy'u ma vy imbaraete ha'e oiko porã ju. Ha'e va'e rire ha'e va'e henda omboerya En-Hacoré aÿ peve.<sup>†</sup>

<sup>20</sup> Sansão ma vinte ma'etÿ re opena Israel kuery re, filisteu kuery ipo'aka jave ae.

## 16

### Gaza py Sansão ooague

<sup>1</sup> Ha'e gui Gaza tetã py ju Sansão oo. Ha'e py ma peteĩ kunha itavy rei va'e oexa vy hexeve jogueroke rive.

<sup>2</sup> Gaza pygua kuery joupe-upé

— Sansão ovaẽ ra'e apy — he'i okuapy.

Ha'e ramo ojoko mbeguepa, pytû mbukukue re oarõ okuapy tetã kora rokë py onhemia py. Pytû mbukukue re okyrirõ okuapy, mba'eta aipoe'i:

— Nharõ tema ko'ẽ peve. Ha'e rami vy jajuka 'rã — he'i vy.

<sup>3</sup> Ha'e rã Sansão ma pytû mbyte peve'i nhogueronheno joguerupy. Ha'e gui ovv vy oyopy tetã kora rokë joavaive regua. Ijokoa reve oipe'a vy omoõ oaxi'y áry, ha'e vy yvv'ã katy ogueraa, yvyty apyte áry Hebrom renonde katy peve.

### Dalila Sansão oyopy uka nhemiague

<sup>4</sup> Ha'e va'e rire Sansão inhakã vai peteĩ kunha Soreque yvvyugua py oiko va'e Dalila hery va'e re.

<sup>5</sup> Ha'e ramo kunha va'e oĩa py filisteu regua yvatekueve oje'oi vy aipoe'i ixupe:

— Ndeayvu na ixupe ndevy omombe'u porãve aguã mba'e nunga rupi pa imbaraete oikovya, ha'e mba'e nunga py pa rojokua vy rojopy ete aguã. Ha'e ramo ore kuery peteĩ-teĩ ndevy rome'ẽ 'rã mil e cem hatã'i va'e prata guigua — he'i okuapy.

<sup>6</sup> Ha'e rami rã Dalila aipoe'i Sansão pe:

— Ajerure ndevy remombe'u aguã xevy mba'e nunga rupi tu nembaraetea, ha'e mba'e nunga py ndejokua vy 'rã tu ndere ipo'akaa.

<sup>7</sup> Sansão ombovai:

— Sete vaka pi pyau, ipiru e'ÿ teri va'e py ri xekangy 'rã. Ha'e rami vy avakue mboae rami rive 'rã aiko — he'i.

<sup>8</sup> Ha'e ramo Dalila pe filisteu regua yvatekueve ogueru sete vaka pi pyau, ipiru e'ÿ teri va'e. Ha'e rã ha'e va'e py kunha va'e ojokua,

<sup>9</sup> ha'e rã avakue ma opy ja'o mboae py onhomí okuapy. Ha'e rami vy kunha va'e aipoe'i Sansão pe:

— Sansão, filisteu kuery ou ma ra'e ndere! — he'i ramove omondopa vaka pi, mandyju okai va'ekue omondoa rami. Ha'e rami py ndoikuuai okuapy mba'e nunga rupi pa imbaraetea.

<sup>10</sup> Ha'e gui Dalila aipoe'i Sansão pe:

— Ma'ẽ, ndee ma xejojai rei ha'e ndeapu xevy. Ma'ẽ, aÿ ma emombe'u porã xevy: Mba'e nunga py pa ndejokuaa ramo 'rã tu ha'eve?

<sup>11</sup> Ombovai:

— Ixã pyau mba'eve py oiporu pyre e'ÿ teri va'e py ri xekangy vy amboae avakue rami rive 'rã aiko — he'i.

<sup>12</sup> Ha'e ramo Dalila ma opy ja'o mboae py avakue onhomí ma vy ixã pyau ogueru, ha'e ojokua. Ha'e vy

— Sansão, filisteu kuery ou ma ra'e ndere! — he'i teĩ ojyva kuaa omondopa vyvoi peteĩ nhimbo omondoa rami.

<sup>13</sup> Ha'e gui Dalila aipoe'i Sansão pe:

<sup>†</sup> **15:19** Tery En-Hacoré ma “Ojapukai va'e pegua yvu” 'ea.

— Aŷ peve xejojai anho rei ha'e ndeapu xevy. Ha'e rã aŷ ma emombe'u porã xevy: Mba'e nunga py pa ndejokuaa ramo 'rã tu ha'eve?

Ombovai:

— Ajukue popēa py xe'a sete henda py ri reipopē, ha'e yvyra rakua py rembopija atā ramo xekangy vy aiko 'rã avakue mboae rami rive — he'i.

Ha'e ramo oke oupy jave kunha va'e hi'a sete popēa oĩ va'e oipopēmba ajukue popēa py,

<sup>14</sup> ha'e peteĩ yvyra rakua py ju ombopija atā. Ha'e vy aipoe'i ixupe:

— Sansão, filisteu kuery ou ma ra'e ndere! — he'i ramo okeague gui omyĩ vy yvyra rakua omboi vy oguenoẽ o'a ajukue popēa gui.

<sup>15</sup> Ha'e gui kunha va'e aipoe'i ixupe:

— Mba'exa tu xevy "Roayvu" 're va'eri nekuraxõ py xere nerenhemoirũxei? Mba'eta mboapykue ma xejojai rei, neremombe'ui teri guive mba'e nunga rupi pa nembaraetea — he'i.

<sup>16</sup> Ko'ẽ nhavõ kunha va'e oporandu tema, omombe'u ete aguã omoangeko rei riae ramo Sansão onhe'ẽ py nonhenhandu porãvei, omanoxe rive peve.

<sup>17</sup> Ha'e rami vy kunha va'e pe onhemombe'upa opy'a re oĩ va'e ha'e javi. Ha'e vy aipoe'i ixupe:

— Xee ma xekã rague re kyxe omovaẽa va'erã e'ŷ, mba'eta ha'i rye py teri aĩ reve nazireu aiko Nhanderuete omboaxa pyre. Xekã rague onhopĩa ri ramo xembaraetea ojep'apa 'rã xegui. Ha'e ramo xekangy vy aiko 'rã avakue mboae rami rive — he'i.

<sup>18</sup> Opy'a re oĩ va'e ha'e javi onhemombe'ua Dalila oikuaa ma vy oenoĩ uka filisteu regua yvatekueve. Ha'e vy aipoe'i:

— Peju ke teĩgue ju, mba'eta aŷ ma xevy onhemombe'u ma opy'a re oĩ va'e ha'e javi — he'i. Ha'e ramo oĩa py filisteu regua yvatekueve oupa okuapy, peráta guive ogueru.

<sup>19</sup> Ha'e ramo Dalila ojapo o'u áry Sansão oke aguã rami. Ha'e vy peteĩ ava oenoĩ vy onhopĩ uka hi'a sete popēa oĩ va'ekue ha'e javi. Ha'e rami py ipo'aka nho hexe, imbaraetea okanhy ete ramo.

<sup>20</sup> Ha'e gui kunha va'e aipoe'i:

— Sansão, filisteu kuery ou ra'e ndere!

Ha'e rã okeague gui omyĩ vy ojeupe ae "Jepiaty rami aẽ ju 'rã aŷ, ha'e vy aa jepe 'rã" he'i, mba'eta ndoikuuai teri ixugui SENHOR opo'akaa oipe'a maa.

<sup>21</sup> Ha'e ramo filisteu kuery ojopy vy omombupa hexa, ha'e Gaza tetã py ogueraa. Mokoĩ corrente overa va'e guigua py ojokua. Ha'e rã mba'emo mongu'ia ombojere herekovy nhuã py ombotya py.

<sup>22</sup> Ha'e rami teĩ inhakã rague onhopĩa rire ipukuve ju ma ovy.

### *Sansão omanoague*

<sup>23</sup> Ha'e gui filisteu regua yvatekueve ono'õ okuapy nguu ete Dagom ra'angaa pe mba'emo ome'ẽ ha'e ovy'a okuapy aguã. Mba'eta

— Nhandevygua nhanderuete ma nhandepo py Sansão nhanderovaigua omboaxa rire — he'i vy.

<sup>24</sup> Ha'e rami heta va'e kuery oexa vy oporaei okuapy nguu ete ramigua pe, mba'eta aipoe'i:

— Nhandevygua nhanderuete nhandepo py omboaxa nhanderovaigua nhandeyvy ojapo vai ha'e nhanderegua ojuka va'ety — he'i okuapy.

<sup>25</sup> Ha'e gui opy'a py ovy'a okuapy vy aipoe'i:

— Pembou na Sansão jarovy'a rei aguã — he'i. Ha'e ramo Sansão nhuã gui herua rã oguerovy'a rei okuapy. Oo ytarã mokoĩ omo'ã mbyre pa'ũ py omopu'ãa imo'am.

<sup>26</sup> Ha'e gui Sansão aipoe'i kunumi ipo re ogueno'ã va'e pe:

— Xererekó ke oo yta hi'aĩ va'e re apoko aguã peve, hexe ajeko aguã — he'i.

<sup>27</sup> Ha'e va'e oo ma tynyē rei avakue ha'e kunhague. Ikuai avi filisteu regua yvatekueve ha'e javi. Oo ao'ia áry ma três mil ju ikuai avakue ha'e kunhague, Sansão re oma'ẽ okuapy ojojai rei reve.

<sup>28</sup> Sansão ojapukai SENHOR pe. Ha'e vy aipoe'i:

— SENHOR Xeruete, ajerure ndevy xere nema'endu'a aguã, ha'e eme'ẽ aŷ ete'i ri jepe xembaraete ju aguã. Xeruete, filisteu kuery re ajepy'râgue xerexa omombuague rekovia — he'i.

<sup>29</sup> Ha'e rami vy Sansão oikuavã mokoïve oo yta oo mbyte py hi'aĩ va'e, ha'e va'e re onhemomburu ete ho'amy, peteĩ re ma oiporu kuaa regua re, ha'e rã amboae re ma oaxua re.

<sup>30</sup> Ha'e vy aipoe'i:

— Tamano filisteu kuery reve — he'i vy onhemomburu ete reve ojero'a ramo oo ho'apa yvatekueve ha'e heta va'e kuery ha'e py ikuai va'e ha'e javi áry. Ha'e rami py oiko vaia ára ma oikove teri reve jojukaague gui ojuka retave.

<sup>31</sup> Ha'e gui ou tyvy kuery ha'e tuu ro pygua kuery ha'e javi. Hetekue oupi heravy vy onhono porã Zorá ha'e Estaol mbyte, tuu Manoá onhono porãague py ae. Vinte ma'etõ re Sansão opena va'ekue Israel kuery re.

## 17

### *Mica ngoo py ta'angaa oguerekaoague*

<sup>1</sup> Oiko peteĩ ava Efraim regua Mica hery va'e, yvy'ã reia re oiko.

<sup>2</sup> Ha'e va'e ma aipoe'i oxy pe:

— Ha'e gui mil e cem hatã'i va'e prata guigua ndegui imondaague va'e, ha'e va'e re ndeayvu vaiague ha'e xevy remombe'u avi va'ekue, ma'ẽ, ha'e va'e peráta ma xee ae areko. Xee ae xemonda karamboae ndegui.

Ha'e ramo ixy ombovai:

— Tove SENHOR tanemoingo porã, xepi'a! — he'i.

<sup>3</sup> Oxy pe mil e cem hatã'i va'e prata guigua ome'ẽ jevy ramo ixy aipoe'ive ju:

— Kova'e peráta ma xepo gui ae amboaxa SENHOR pe. Ndee xepi'a, ndee ae 'rã reiporu peteĩ ta'angaarã rejapo uka aguã yvyra gui, ha'e gui amboae ju ma prata ryku gui. Aŷ gui ma ame'ẽmba ju 'rã ndevy — he'i.

<sup>4</sup> Ha'e rami rã oxy pe peráta ome'ẽ ramo duzentos hatã'i va'e prata guigua ogueraa vy opaga prata re ombo'eapo va'e pe. Ha'e va'e ju peteĩ ta'angaarã ojapo yvyra gui, ha'e amboae ju ma hyku va'e gui ojapo. Ha'e va'e ta'angaa ma Mica ro py ae opyta.

<sup>5</sup> Ha'e ramo py ava Mica hery va'e oguerekoo tuuete ra'angaa ikuaiaty. Ojapo avi peteĩ manto sacerdote pegua ha'e ta'angaa opy guarã. Peteĩ gua'y omboaxa avi sacerdote-rã.

<sup>6</sup> Ha'e jave py ma ndoikoi huvixave Israel kuery re opena va'erã. Ha'e ramo peteĩ-teĩ ikuai 'rã ha'e kuery ae oipotaa rami rive.

### *Mica ro py levita ovaẽ jave guare*

<sup>7</sup> Ha'e gui Judá regua Belém tetã py oiko peteĩ kunumi va'e. Ha'e va'e ma levita oiko va'eri ha'e py oiko.

<sup>8</sup> Ha'e gui Judá regua Belém gui ha'e va'e ojepe'a ovu, mamo rã ojou porã reia py oiko aguã. Ha'e rami vy tape rupi oo vy ovaẽ Efraim regua yvy'ã reia re, Mica ro oña py ae.

<sup>9</sup> Ha'e gui Mica oporandu ixupe:

— Magui tu rejuvenar?

Ombovai:

— Xee ma levita Judá regua Belém guigua. Ha'e vy mamo rã ajou porã py 'rã aiko — he'i.

<sup>10</sup> Ha'e ramo Mica aipoe'i ixupe:

— Eiko xea py ae. Xerurã rami eiko, xevyguia sacerdote-rã. Ha'e rã ma'etõa nhavõ ndevy ame'ẽ 'rã dez hatã'i va'e prata guigua, ndeaorã ha'e tembi'u — he'i rã levita va'e oendu vy ovaẽ ha'e py.

<sup>11</sup> Ovy'a reve kunumi va'e oiko ava ro py. Ta'y rami oiko.

<sup>12</sup> Ha'e ramo Mica ma levita regua kunumi va'e omoõ ojeupeguia sacerdote-rã. Ha'e ramo Mica ro py oiko.

<sup>13</sup> Ojeupe ae Mica aipoe'i:

— Aŷ xee aikuaa SENHOR xemoingo porã 'rãa, xevyguia sacerdote-rã levita areko ramo.

## 18

### *Dã regua kuery oyvy tuvixave va'erã ojouxe jave guare*

<sup>1</sup> Ha'e va'e jave ma ndoikoi huvixave Israel kuery re opena va'erã. Ha'e rami rã Dã regua kuery oeka okuapy oyvyrã ikuai aguã, mba'eta ha'e va'e ára peve ha'e kuery ndojopyi teri oyvyrã xorte rupi ome'ẽ mbyre Israel regua ikuia mbyte.\*

<sup>2</sup> Ha'e rami vy Dã kuery omondouka peteĩ nhiruĩ avakue ha'e kuery va'e regua ae, Zorá ha'e Estaol pygua kuery ipy'a guaxuvekue, yvy re oma'ẽ mbegue ha'e oikuaa pota aguã. Ha'e vy ha'e kuery pe

— Tapeo, peikuaa pota yvy re — he'i. Ha'e ramo oje'oi vy Efraim regua yvy'ã reia re ovaẽ Mica ro py. Ha'e vy oke okuapy ha'e py.

<sup>3</sup> Mica ro py ha'e kuery ikuai jave oendu kuaa kunumi va'e levita regua ayvu. Ha'e vy oña py onhemboja vy aipoe'i ixupe:

— Mava'e tu ndereru apy? Mba'e tu rejapo reikovy apy? Ha'e mba'e tu apy rerekó?

<sup>4</sup> Ombovai:

— Po ramí Mica ojapo xevy. Peráta re ixupe amba'eapo vy aiko ixupeguia sacerdote — he'i.

<sup>5</sup> Ha'e ramo aipoe'i okuapy ixupe:

— Eporandu ha'vy Nhanderuete pe, roikuaa aguã tape rupi rooa rupi iporã va'e rojou 'rã paa.

<sup>6</sup> Sacerdote ombovai:

— Tapeo porã ke. Tape rupi peguataa rupi SENHOR oma'ẽ 'rã — he'i.

<sup>7</sup> Ha'e ramo peteĩ nhiruĩ avakue oje'oi vy Laís tetã py ju ovaẽ. Ha'e py ma oexa rã ha'e pygua kuery ikuai porã. Sidom pygua kuery reko rami ikuai mby'a porã ha'e joe ojeroviaa rupi. Peteĩve jipoi huvixa mba'emo py omoingo axy va'erã. Sidom tetã gui mombyry ikuai, amboae kuery re nonhemoiruĩ guive.

<sup>8</sup> Ha'e ramo ojevypa ju guyvy kuery Zorá ha'e Estaol py ikuiai py. Ha'e rã ha'e kuery pe oporandu vy

— Mba'e pa pemombe'u orevy? — he'i ramo

<sup>9</sup> ombovai:

— Pepu'ã ke, jaje'oi ha'e kuery rovai. Mba'eta yvy re roikuaa potaa rupi roexa rã iporã. Peĩ rive ta tema ri ty'y upe py? Pemboare eme ta'vy peje'oi vy ha'e va'e yvy pejopy aguã.

<sup>10</sup> Mba'eta ha'e py pevaẽ vy pejou 'rã joe ojeroviaa rupi rive ikuai va'e, ijyvy ma tuvixa guive. Nhanderuete omboaxa ma pendepo py. Ha'e va'e yvy ma mba'eve oata e'ŷa ha'e py ikuai va'e kuery pe — he'i.

<sup>11</sup> Ha'e rami rã Dã regua kuery ma Zorá ha'e Estaol gui oje'oi, seiscentos avakue tembiporu joe opu'ãa pygua revegua meme.

<sup>12</sup> Ha'e kuery oje'oi vy Judá regua Quiriate-Jearim py ranhe ikuai. Ha'e nunga rupi ha'e va'e henda pe "Maané-Dã" he'i okuapy aŷ peve. Quiriate-Jearim rovai katy oĩ.

<sup>13</sup> Ha'e va'e gui oje'oi ju Efraim regua yvy'ã reia katy. Ha'e vy Mica ro py ju ovaẽ okuapy.

### *Mica pegua ta'angaa oipe'a vy Laís tetã re ipo'aka okuapyague*

\* **18:1** Josué 19.41-48

<sup>14</sup> Peteĩ nhiruĩ avakue Laís yvy re oikuua pota aguã oje'oi va'ekue aipoe'i guyvy kuery pe:

— Peikuaa pa ha'e va'e oo py oĩa peteĩ manto sacerdote pegua, ha'e ta'angaa oo pygua, ta'angaa yvyra guigua ha'e amboae ma mba'emo ryku guigua oĩa? Penhembopy'a ke ha'vy mba'emo pejapo aguã re — he'i.

<sup>15</sup> Ha'e ramo ha'e py ovaẽ okuapy kunumi levita regua ro py, Mica ro py ae. Ha'e vy oxarura okuapy ixupe.

<sup>16</sup> Seiscentos avakue Dã regua tembiporu joe opu'ãa pygua oguereko va'e ma okẽ rupi opyta okuapy oikeaty py.

<sup>17</sup> Ha'e rã peteĩ nhiruĩ avakue yvy re oikuua pota aguã oje'oi va'ekue oike vy ojopy ta'angaa yvyra guigua, manto sacerdote pegua, ta'angaa oo py ikuai va'ekue ha'e ta'angaa mba'emo ryku gui ojapo pyre guive. Ha'e rã sacerdote ma opyta ho'amy okẽ py, seiscentos avakue tembiporu joe opu'ãa pygua reveguia kuery ikuaria py.

<sup>18</sup> Mica ro py ha'e kuery oike vy ta'angaa yvyra guigua oipe'a heravy, manto sacerdote pegua, ta'angaa oo py ikuai va'e ha'e ta'angaa mba'emo ryku guigua. Ha'e ramo sacerdote aipoe'i ha'e kuery pe:

— Mba'e tu pejapo?

<sup>19</sup> Ha'e kuery ombovai:

— Ekyrirĩ ke, emoĩ ndepo ndejuru py, ha'e eju orerupive. Orevy ju 'rã reiko oreru rami ha'e sacerdote-rã. Mba'eta ndevy pe ha'eveve pa peteĩ'i ava ro py sacerdote reikoa, tyrã pa Israel re peteĩ regua ha'e javi pe sacerdote reiko aguã? — he'i rã

<sup>20</sup> sacerdote oendu vy ovy'a opy'a py. Ha'e rami vy ha'e ae ju manto sacerdote pegua oipe'a, ta'angaa oo py ikuai va'e ha'e ta'angaa yvyra guigua oipe'a avi vy oguenoẽ heravy ha'e kuery mbyte rupi.

<sup>21</sup> Ha'e kuery ojevy aguã katy ju oo ta vy guenonde omoĩ gua'y kue'iry, guymba kuery ha'e omba'e rei-rei ha'e javi. Ha'e rami vy oje'oi.

<sup>22</sup> Mica ro gui mombyry'i ma Dã kuery oje'oi jave avakue Mica ro katy'igua kuery nhomboaty vy oupity okuapy.

<sup>23</sup> Ha'e vy hakykue katy gui ojapukai oje'oivy. Ha'e rã ha'e kuery ojere vy aipoe'i Mica pe:

— Mba'e tu oiko upe va'e kuery remboaty aguã?

<sup>24</sup> Ombovai:

— Tuuete ra'angaarã ajapo va'ekue peipe'apa ra'e, xevyguia sacerdote guive. Ha'e gui peo ju kuri. Mba'e tu oiko xevy guarã peja va'ekue? Ha'e gui mba'e re tu xevy peporandu vy "Mba'e tu oiko?" peje? — he'i.

<sup>25</sup> Ha'e ramo Dã kuery aipoe'i ixupe:

— Ndeayvuve eme orevy, xapy'a rei avakue ipy'a guaxukueve ndere opu'ã rã pekan-hymba e'ŷ aguã, ndero pygua kuery reve — he'i okuapy.

<sup>26</sup> Ha'e rami vy Dã kuery oje'oive tema. Ha'e rã Mica ma ixugui ha'e kuery ipo'akavea oikuua vy ojevy ju ngoo katy.

<sup>27</sup> Ha'e kuery ogueraa ta'angaarã Mica ojapo va'ekue ha'e sacerdote oguereko va'ekue. Ha'e gui Laís tetã py ju ovaẽ, peteĩ regua ikuai porã ha'e joe ojeroviaa rupi rive ikuaria py. Ha'e vy ojukapa kyxe py, ha'e oapypa tetã.

<sup>28</sup> Nomoingovei avave rei, mba'eta Sidom tetã gui mombyry, avave rei re na'irũi guive. Ha'e va'e tetã ma Bete-Reobe katy'i oĩ yvyugua oĩ va'e py. Ha'e gui ha'e kuery ae ju tetã omoatyrõ ju vy ha'e py ikuai.

<sup>29</sup> Tetã omboery guamoĩ Dã Israel ra'y oiko va'ekue rery py. Ha'e rã tetã rery ypyague ma Laís.

<sup>30</sup> Dã kuery ojeupe ae ogueraa ta'angaa yvyra guigua. Ha'e gui Dã regua kuery pe ju Gérsion ra'y Jônatas, Manassés ramymino va'e oĩ sacerdote, ha'e va'e rire ta'y kuery pe ju, ha'e kuery escravo-rã ogueraapaa ára peve.

**31** Ha'e rami py Mica ta'angaa ojapo va'ekue ma ojeupe ae ju ha'e kuery oguereko, Siló py Nhanderuete pegua oo oĩ teria ja.

## 19

### *Levita ha'e ta'yxy jevy rekokue oĩa*

**1** Ha'e va'e jave py huvixave ndoikoi Israel kuery re opena va'erã. Ha'e gui oiko peteĩ levita regua. Ha'e va'e ma Efraim yvy'ã rupi oguata oikovy vy peteĩ gua'yxy jevyrã ogueraa Judá regua Belém tetã pygua.

**2** Ha'e rã kunha va'e ma hexe nda'ijs'evei vy opoi. Ha'e rami vy nguu ro katy ju ojevy Judá regua Belém py. Ha'e py ju oiko irundy jaxy re.

**3** Ha'e gui ime opu'ã vy guembiguai ha'e mokoĩ mburika ogueraa hakykue oo vy. Hexeve ijayvu porã'ixe ogueru ju aguã. Ha'e py ovaẽ ramo kunha va'e omovaẽ nguu ro py. Tuu oexa vyve ov'y'a reve oẽ, omovaẽ porã'i.

**4** Hatyu kunha va'e ru va'e ma mboapy ára re omombyta ojea py. Okaru ha'e oy'u okuapy, ha'e gui omenda va'e kuery oke ha'e py.

**5** Irundy araa py ov'y voi, opu'ã oje'oí aguã. Ha'e ramo kunha va'e ru aipoe'i guajy me pe:

— Penhemombaraete ranhe ke peteĩ mbojape'i re. Ha'e va'e rire ma peo 'rã — he'i ramo

**6** oguapy mokoïve, okaru ha'e oy'u nhoguenoiny.

Ha'e gui kunha va'e ru aipoe'i ava pe:

— Ajerure ndevy, kova'e pytũ ju peke apy, pendepy'a py pevy'a aguã.

**7** Ha'e rami teĩ ava va'e opu'ã ju oo aguã. Ha'e rã hatyu ma hexeve ijayvu tema vy ha'e va'e pytũ re ju omombyta.

**8** Peteĩ nhiruĩ araa py ov'y voi oo aguã. Ha'e rã kunha va'e ru aipoe'i:

— Penhemombaraete ke, pepytave'i ju ka'aru peve — he'i ramo mokoïve okaru nhoguenoiny.

**9** Ha'e ramo ava va'e opu'ã ju oo aguã, ta'yxy jevy ha'e hembiguai kunumi va'e reve. Ha'e rã ixupe aipoe'i hatyu kunha va'e ru:

— Ma'ẽ, ka'aru ma, pytũ ovaẽ ju ta ma. Ajerure ndevy pytũ peaxa ju aguã apy. Ára oaxa ta ramo peaxa pytũ apy, pendepy'a py pevy'a aguã. Ha'e gui ko'ẽ rã mae ma pepu'ã pendero katy peo aguã — he'i.

**10** Ha'e rami teĩ ava va'e ndoaxaxevei pytũ ha'e py. Ha'e rami vy opu'ã vy oo. Ngupive ogueraa va'e ma mokoĩ mburika ikupe árygua va'e ha'e ta'yxy jevy. Ha'e gui Jebus tetã katy'i peve ovaẽ (ha'e va'e ma Jerusalém tetã).

**11** Jebus katy'i oje'oí jave ka'aru ete ma ramo kunumi va'e aipoe'i opatõ pe:

— Aÿ ma jaa, nhavaẽ jebuseu kuery retã py, pytũ jaaxa aguã ha'e py.

**12** Ipatõ ombovai:

— Any, nda'evei tetã jaikuua e'ÿ va'e py nhavaẽ aguã, Israel kuery e'ÿ ikuiaia py. Jaave 'rã Gibeá peve.

**13** Jaave 'rã, nhavaẽ 'rã amboae tekoa py, Gibeá py e'ÿ vy Ramá py jake aguã — he'i guembiguai pe.

**14** Ha'e gui oje'oive. Gibeá tetã katy'i ovaẽ jave kuaray oike, Benjamim regua yvy py.

**15** Ha'e rami vy opia oje'oivy Gibeá katy, pytũ oaxa aguã ha'e py. Ha'e py ovaẽ vy oguapy okuapy tetã mbyte py, mba'eta avave rei nomovaẽai ngoo py pytũ oaxa aguã.

**16** Ha'e gui pytũ ma jave ou peteĩ tuja'i mba'ety rupi ombo'epoague gui. Ha'e va'e ma Efraim yvy'ã reia pygua va'eri Gibeá py hekoia va'e. Ha'e rã ha'e pygua kuery ae ma Benjamim regua meme.

**17** Tuja'i va'e oma'ẽ vy tetã mbyte py oexa oguata va'e. Ha'e vy oporandu ha'e kuery pe:

— Marã katy peo, ha'e magui tu peju?

**18** Ombovai:

— Judá regua Belém gui roguata roje'oivy, mombyry Efraim yvy'ã reia katy roo. Xee ma ha'e pygua ae. Aa karamboae Judá regua Belém py. Ha'e gui aÿ ma aguata avy SENHOR pegua oo oña katy. Teĩ avave rei naxemovaëai ngoo py,

<sup>19</sup> roguereko teĩ ae ma mba'emo pirukue ha'e mba'emo rogue orerymba mburika peguarã. Mbojape ha'e vinho voi roguereko xevy, kunha ha'e kunumi va'e nerembiguai reve ou va'ekue pe. Mba'eve rei ndoatai orevy — he'i.

<sup>20</sup> Ha'e ramo tuja'i va'e aipoe'i:

— Tove mby'a porã toĩ ndere. Xapy'a rei ndevy mba'emo oata ramo xee ae tajou. Ha'e rami avi nda'evei tetã mbyte py peaxa aguã pytû — he'i.

<sup>21</sup> Ha'e rami vy ngoo py ae omovaë vy mba'emo rogue ome'ẽ mburika kuery pe. Ha'e kuery py ojoipa ma rire okaru ha'e oy'u okuapy.

<sup>22</sup> Ha'e kuery ov'y a okuapy jave ha'e va'e tetã pygua avakue nhe'ẽ vai ra'y kuery oupa vy ombojere okuapy oo. Ombota-mbota okuapy okẽ re. Ha'e vy hoo va'e tuja'i va'e pe ijayvu vy

— Emoẽ apy oka py ava ndero py removaë va'ekue rojavyky rei aguã — he'i.

<sup>23</sup> Ha'e rã hoo va'e ma ha'e kuerya py oẽ vy aipoe'i ha'e kuery pe:

— Any xeryvy kuery, pejapo eme ha'e rami ete ha'eve'ŷ va'e. Xee ae ma xero py ava amovaë rire pejapo vai eme.

<sup>24</sup> Xee aru 'rã oka py xerajy omenda e'ŷ teri va'e, ha'e ava va'e ra'yxy jevy. Ha'e va'e kuery ma pemo'yvŷ'i 'rã, ha'e kuery re 'rã pejapo pejapoxea rami. Ha'e rã ava va'e re ma pejapo vai eme ha'e rami ete — he'i.

<sup>25</sup> Ha'e pygua avakue noendu potaxei ramo levita ra'yxy jevy ojopy vy ogueraa oka py, omboaxa ha'e kuery pe. Ha'e ramo ha'e kuery ju ojopy vy ojavyky reia rupi oguenonheno okuapy pytû mbukukue re, ko'ẽ peve. Ha'e gui ko'ẽmba ma ramo oejapa rive oje'oivy.

<sup>26</sup> Ko'ẽ rai'i ma ramo kunha va'e ou vy ho'a oo ome oña rokẽ py. Ha'e py ma iko'ẽmba ete'i oupy.

<sup>27</sup> Ko'ẽgue ime opu'ã vy oipe'a okẽ. Ha'e rami vy oove aguã oẽ vy oexa rã kunha gua'yxy jevy okẽ rupi itui ra'e, opyrõ ovaty áry opo omoĩ reve.

<sup>28</sup> Ha'e vy aipoe'i ixupe:

— Epu'ã ke, ha'e gui jaa — he'i teĩ nombovai. Ha'e ramo ava va'e oupi inony mburika'i áry, ojepe'a, oo ju ngoo katy.

<sup>29</sup> Ngoo py ovaë ma vy gua'yxy omboguejy jevy retekue. Ha'e vy kyxe ogueru vy omboa'ypa, ikãgue reve, doze henda py. Ha'e va'e ma ogueraa uka Israel kuery ikuaria ha'e javi rupi.

<sup>30</sup> Peteĩ-teĩ oexa va'e aipoe'i okuapy joupe-upe:

— Kova'e nunga ojapoa va'e'ŷ teri, neĩ oexaa va'e'ŷ teri, Egito yvy gui Israel kuery oua ára guive aÿ peve. Peikuaa pota ha'e nunga re, penhembopy'a ha'e pejogueroayvu — he'i okuapy.

## 20

### *Levita ra'yxy jevy ojavyky reia ague re Israel kuery nhombopagaague*

<sup>1</sup> Ha'e gui Israel kuery ha'e javi ma Mispa py oje'oi vy nhomboatypa okuapy SENHOR renonde. Peteĩ'i rami ou Dã guive Berseba peve ikuai va'e, Gileade yvy gui guive.

<sup>2</sup> Ha'e kuery va'e regua yvatekueve ha'e javi ha'e Israel kuery peteĩ-teĩ regua oupa okuapy Nhanderuete pegua onhemboaty okuapy py. Quatrocentos mil avakue ikuai opu'ã okuapy va'e, kyxe revegua meme.

<sup>3</sup> Benjamim kuery voi oendu okuapy Israel kuery Mispa katy oje'oia omombe'ua rã.

Ha'e gui ava pe Israel kuery oporandu okuapy:

— Emombe'upa orevy marã rami vy pa ha'e nunga oikoague.

<sup>4</sup> Ha'e ramo ava levita kunha omano va'ekue megueombovai vy aipoe'i:

— Xera'yxy jevy reve rovaẽ Benjamim regua kuery retã Gibeá py, pytũ roaxa aguã.

<sup>5</sup> Ha'e ramo Gibeá pygua kuery xere opu'ã vy pyávy ombojere oo xee aña va'e. Xejukaxe, ha'e gui xera'yxy jevy voi ojavyky rei okuapy. Ha'e ramo omano.

<sup>6</sup> Ha'e ramo xera'yxy jevy retekue araa. Amboa'ypa vy araa uka Israel kuery yvy ha'e javi rupi, nhande Israel kuery moximbabarã ojapo rire.

<sup>7</sup> Ma'ẽ, peẽ kuery ma Israel kuery regua meme pendekuai. Peikuaa pota porã ke! Pejogueroayvu ha'e penhomongeta ha'e nunga re — he'i.

<sup>8</sup> Ha'e rami rã heta va'e kuery ha'e javi ma pete'i rami opu'ãmba okuapy vy aipoe'i:

— Nhande kuery va'e regua peteive ndojevyi 'rã ngoo katy, peteive ndajaai 'rã nhanderer katy.

<sup>9</sup> Ha'e rami vy po rami 'rã jajapo Gibeá pygua kuery re: Jaje'oi 'rã ha'e kuery rovai nhapu'ã aguã xorte jaexaa rami.

<sup>10</sup> Ha'e rami vy Israel kuery regua cem avakue ikuai va'e-va'e gui ma dez kuerei 'rã nhamondouka, mil ikuai va'e-va'e gui cem kuerei 'rã, ha'e dez mil ikuai va'e-va'e gui ma mil kuerei 'rã nhamondouka tembi'u ojou aguã nhande kuery pe. Ha'e rã nhande kuery ma Benjamim regua Gibeá py jaa vy ha'e kuery re jajapo 'rã Israel kuery mbyte ojapo vaiague rami — he'i.

<sup>11</sup> Ha'e rami vy Israel regua avakue ha'e javi nhomboaty okuapy ha'e va'e tetã rovai opu'ã vy oo aguã. Pete'i rami onhemoirãmba okuapy.

<sup>12</sup> Ha'e gui Israel kuery omondouka avakue Benjamim regua yvy ha'e javi rupi, aipoe'i aguã:

— Mba'e nunga ha'eve'ý va'e tu penembyte ojapoa?

<sup>13</sup> Aý orepo py pemboaxa na Gibeá pygua avakue nhe'ë vai ra'y kuery rojukapa aguã, ha'e rami vy Israel kuerya gui roipe'a aguã ha'e rami ete nda'evei va'e — he'i. Ha'e rã Benjamim kuery ma noendu potai guyvy Israel kuery ayvu.

<sup>14</sup> Ha'e rami 'rãgue py Benjamim kuery ma Gibeá katy'i tetã ikuai va'e gui oupa vy ono'õmba okuapy, oje'oi aguã Israel kuery re opu'ã aguã.

<sup>15</sup> Ha'e va'e ára ma oipapaa Benjamim kuery tetã ikuai va'e gui ou va'ekue. Oikuaa rã vinte e seis mil avakue ikuai kyxe revegua, Gibeá pygua kuery reve'ý vy. Ha'e va'e kuery ma oipapaa rã seiscentos avakue ikuai oiporavo pyre meme.

<sup>16</sup> Ha'e va'e kuery ha'e javi regua ma setecentos avakue ikuai oiporavo pyre ijaxu va'e meme. Ha'e va'e kuery ma ita momboa py pete'i 'ague'i re omombo vy voi ndojavyi 'rã.

<sup>17</sup> Ha'e rã Israel regua avakue ma oipapaa rã quatrocentos mil avakue ikuai kyxe revegua, joe opu'ãa rupi ikuai va'ety meme, Benjamim regua e'ý.

<sup>18</sup> Ha'e gui Israel regua kuery opu'ã vy Betel py oo. Ha'e py ma Nhanderuete pe oporandu vy aipoe'i:

— Ore kuery va'e regua mava'e ranhe 'rã tu oo Benjamim kuery rovai opu'ã aguã?

SENHOR ombovai:

— Judá kuery ranhe 'rã oo — he'i.

<sup>19</sup> Ha'e gui ko'ë aje'ive reve Israel kuery opu'ã vy oje'oi. Ono'õ okuapy Gibeá rovai opu'ã aguã.

<sup>20</sup> Israel regua avakue ae oje'oi Benjamim kuery rovai opu'ã aguã. Gibeá katy'i ikuai joe opu'ã aguã rami.

<sup>21</sup> Ha'e ramo Gibeá gui Benjamim kuery oë oje'oivy vy ha'e va'e ára oitypa Israel regua yvy rupi, vinte e dois mil avakue.

<sup>22</sup> Ha'e gui avakue Israel kuery regua peteigüe ju ipy'a guaxu vy oiko katu okuapy joe opu'ã aguã, jypyä ára opu'ãague py ae ju.

<sup>23</sup> Ha'e va'e'ý mbove ma Israel kuery oje'oi ranhe vy ojae'o okuapy SENHOR renonde. Ka'aru peve oporandu okuapy SENHOR pe,

— Roje'oi ju 'rã pa oreryvy kuery Benjamim regua rovai ropu'ã aguã? — he'i vy.

SENHOR ombovai:

— Tapeo ha'e kuery re pepu'ã aguã — he'i.

<sup>24</sup> Ha'e gui ma ko'ẽ jevy Israel kuery ovaẽ ma okuapy Benjamim kuery rovai opu'ã aguã.

<sup>25</sup> Ha'e va'e ára voi Benjamim kuery Gibeá tetã gui oẽ oje'oivy ha'e kuery ovaexí aguã. Ha'e vy dezoito mil avakue ju oity yvy rupi, kyxe revegua meme.

<sup>26</sup> Ha'e rami rã Israel kuery ha'e javi oje'oi vy Betel py ovaẽ. Ha'e vy ojae'o ete okuapy, ha'e py SENHOR renonde ikuiaia py. Ha'e va'e ára okaru e'ŷ re ikuai ka'aru peve. SENHOR renonde ome'ẽ avi okuapy mba'emo oapy reve ha'e peteĩ rami ikuiaia regua.

<sup>27</sup> Ha'e rami vy Israel kuery oporandu ju okuapy SENHOR pe. (Mba'eta ha'e va'e jave ma ha'e py ae oĩ Nhanderuete guexeve guarã ojapo va'ekue ryru.

<sup>28</sup> Ha'e va'e oĩa rupi Eleazar ra'y Finéias, Arão ramymino va'e omba'eapo oikovy ha'e jave py.) Ha'e gui aipoe'i okuapy:

— Roo jevy'rã pa oreryvy kuery Benjamim regua rovai ropu'ã aguã, tyrã pa ndoroovei ma 'rã?

SENHOR ombovai:

— Tapeo, mba'eta ko'ẽ ramo xee amboaxa 'rã pendepo py — he'i.

<sup>29</sup> Ha'e ramo Israel kuery ma Gibeá yvýry rupi omoĩ xondaro kuery onhemi aguã.

<sup>30</sup> Ha'e gui mboapy araa py ma Benjamim kuery rovai Israel kuery opu'ã aguã oje'oi vy jypy guare rami ae oiko katu okuapy Gibeá rovai opu'ã aguã.

<sup>31</sup> Ha'e ramo ha'e kuery ovaexí aguã Benjamim kuery oẽ jogueruvy vy tetã gui mombyry ojereru uka vyomboypy ju ojuka aguã ha'e kuery regua. Jypy guare rami ojuka trinta avakue Israel regua tape rupi. Ha'e va'e regua peteĩ ma Betel katy oo, ha'e rã amboae ma Gibeá nhuñdy katy oo va'e.

<sup>32</sup> Ha'e rami vy Benjamim kuery aipoe'i:

— Kue'i guare rami ae ju ho'apa ta ma nhanerenonde — he'i okuapy.

Ha'e rã Israel kuery ma aipoe'i:

— Nhanhamba, ha'e kuery nhanderakykue tape rupi oopa aguã tetã gui mombyry peve — he'i.

<sup>33</sup> Ha'e ramo vy Israel regua avakue ikuaiague gui opu'ãmba jogueruvy, joe opu'ã aguã rami ikuai Baal-Tamar py. Israel regua onhemia py ikuai va'ekue voi oẽmba jogueruvy Geba katy'i ikuaiague gui.

<sup>34</sup> Ha'e ramo vy dez mil avakue Israel kuery regua oiporavo pyre ou okuapy Gibeá re opu'ã aguã. Opu'ãa ma nda'evei ete va'e, ha'e rã amboae kuery ma noexa'ãi okuapy okanhymba taa.

<sup>35</sup> Ha'e ramo Israel kuery renonde SENHOR omoĩ vai Benjamim kuery. Ha'e ramo ha'e va'e ára Israel kuery ojuka Benjamim regua vinte e cinco mil e cem avakue, kyxe revegua meme.

<sup>36</sup> Ha'e ramo mae Benjamim kuery oexaombojexavai maa. Mba'eta avakue Israel regua ojepe'apa ranhe Benjamim regua kuery renonde gui, Gibeá rovai opu'ã va'erã kuery onhomí va'ekue re ojerovia vy.

<sup>37</sup> Ha'e gui onhemi okuapy va'ekue oẽmba pojava vy oikepa Gibeá tetã py. Ha'e vy oitypa ha'e javi kyxe py ojuka vy.

<sup>38</sup> Avakue Israel regua ma jogueroayvu ae ma onhemi va'e kuery reve, tetã gui peteĩ arai tuvixa va'e rami hataxí omopu'ã aguã re.

<sup>39</sup> Ha'e nunga Israel regua kuery oexa vy ojevy ju opu'ã aguã katy. Ha'e kuery re ae Benjamim regua kuery omboypy ojapo vai aguã, trinta avakue Israel regua ojuka vy

— Kuee nhapu'ãague rami ae ri ha'e kuery ho'apa ma 'rã nhanerenonde — he'i okuapy tei.

<sup>40</sup> Ha'e rami teĩ tetã gui hataxĩ opu'ã ma ovy arai rami, oo yta hi'aĩ va'e rami ae. Ha'e ramo Benjamim regua kuery guakykue katy oma'ẽ vy oexa rã tetã ha'e javi rupi tata rendy vuku ojeupi ma ovy ra'e yvate.

<sup>41</sup> Israel regua avakue ojerepa rã Benjamim regua kuery oexa vy onhemondyipa okuapy, imombaarã ou ta maa oexa vy.

<sup>42</sup> Ha'e rami vy Israel regua avakue renonde gui ojevypa, teko a e'ŷa katy tape oo va'e rupi onhambaxe va'eri opu'ã va'e kuery omoi vai. Ha'e rã tetã gui ou va'e kuery ju ojukapa ha'e kuery mbyte.

<sup>43</sup> Ha'e rami vy ojokopa rei Benjamim regua kuery. Hakykue monha vy mamo rã opytu'ua py oupity, Gibeá katy'i, kuaray oua katy.

<sup>44</sup> Ha'e rami py Benjamim regua ho'a dezoito mil avakue, ipy'a guaxuve va'e meme.

<sup>45</sup> Ha'e gui ojevypa vy teko a e'ŷa katy ju onhamba, Rimom py itaova oĩ va'e katy. Tape rupi hembyrekue onha va'e regua ma cinco mil avakue ju ojukave. Ha'e gui hupive rei omonhave Gidom peve. Ha'e py ju ojukave dois mil avakue ha'e kuery regua.

<sup>46</sup> Ha'e va'e ára Benjamim regua omano va'e ha'e javi vy ma vinte e cinco mil avakue kyxe reveguia, ipy'a guaxuve va'e meme.

<sup>47</sup> Ha'e rami teĩ seiscentos avakue ojere vy ojava teko a e'ŷa katy, Rimom py itaova oĩ va'e py. Ha'e py ma irundy jaxy re ikuai.

<sup>48</sup> Ha'e gui ma Israel regua avakue ojevy ju Benjamim kuery rekaoa katy. Ha'e vy ojukapa kyxe py tetã py hembyre va'ekue ha'e javi, avakue ha'e mymba kuery, ojou va'e rei. Tetã ojou va'e rei oapypa tata py.

## 21

### *Benjamim regua avakue ra'yxyrã ojouague*

<sup>1</sup> Ha'e gui Israel regua avakue Mispa py teri ikuiaia py oura okuapy reve

— Nhande kuery regua peteĩve nomomendai'rã guajy Benjamim regua ra'yxyrã — he'i ma voi va'ekue.

<sup>2</sup> Ha'e rami teĩ Betel py ha'e kuery oo vy ka'aru peve ikuai Nhanderuete renonde ha'e py. Ojapukai ha'e ojae'o okuapy hexay ete reve.

<sup>3</sup> Ha'e vy aipoe'i:

— Ah! SENHOR Israel kuery ruete, mba'e re tu ha'e rami ete oiko Israel re, mba'eta aŷ oata ma peteĩ regua — he'i okuapy.\*

<sup>4</sup> Ha'e gui ko'ẽ jevy, ko'ẽmba ramove ha'e kuery opu'ã vy peteĩ altar ojapo ha'e py. Hi'ary ome'ẽ okuapy mba'emo oapy reve, peteĩ rami ikuiaia regua guive ome'ẽ.

<sup>5</sup> Ha'e gui Israel kuery joupe-upo oporandu vy

— Mava'e tu Israel regua ndooi va'ekue SENHOR pegua nhemboaty oikoa py? — he'i. Mba'eta Mispa py SENHOR renonde oura ae ma voi onhemboaty aguã ndoui va'e ojukaa aguã re.

<sup>6</sup> Israel kuery omboaxy okuapy guyvy Benjamim regua kuery,

— Kova'e ára opa rai'i ete peteĩ regua Israel gui.

<sup>7</sup> Ha'e gui marã rami vy nda'u jajou'rã hembyrekue ra'yxyrã? Mba'eta SENHOR pe jaura ae ma nhanderajy kuery nhamomenda e'ŷ aguã ha'e kuery ra'yxyrã — he'i okuapy.

<sup>8</sup> Ha'e rami vy aipoe'i:

— Oiko pa Israel regua SENHOR pegua nhemboaty Mispa py oiko va'e py ndooi va'ekue?

— he'i.

Ha'e rami vy oikuua pota rã Jabes-Gileade pygua kuery peteĩve ndooi ra'e ono'õ okuapy vy nhemboaty ojapoa py.

<sup>9</sup> Heta va'e kuery oipapaa rã oikuua Jabes-Gileade pygua kuery peteĩve noĩ ha'e py.

\* **21:3** “Peteĩ regua oata” he'i okuapy, mba'eta Benjamim regua avakue ojukapa rai'i ma rire (versículo 6).

<sup>10</sup> Ha'e nunga rupi ha'e katy ijaty okuapy va'e omondouka doze mil avakue ipy'a guaxukueve. Ijayvu imondovy vy aipoe'i ha'e kuery pe:

— Tapeo pejukapa Jabes-Gileade pygua kuery kyxé py, kunhague ha'e kyrígue guive.

<sup>11</sup> Po rami 'rã pejapo: Avakue ha'e kunhague avakue reve onheno ma va'ekue ha'e javi 'rã pejuka — he'i.

<sup>12</sup> Ha'e rami rã Jabes-Gileade py oo vy quattrocentos kunhataígue ojou avakue reve onheno e'ý teri va'e. Ha'e va'e kuery Siló py oguerupa heta va'e kuery ikuia py, Canaã yvy re.

<sup>13</sup> Ha'e gui ono'õ okuapy va'e ha'e javi omondouka Benjamim kuery pe imombe'uarã, Rimom itaovape guy py onhemi va'ekue pe. Ha'e rami vy ijayvu jomeme ikuai porã ju aguã re.

<sup>14</sup> Ha'e ramo Benjamim regua kuery ojevypa. Ha'e rã ha'e kuery ra'yxyrã ome'ëa Jabes-Gileade py kunhataígue ndojukai va'ekue. Ha'e rami teï oata teri ha'e kuery ra'yxyrã.

<sup>15</sup> Ha'e rami py ha'e kuery omboaxy Benjamim kuery, Israel regua oata aguã rami SENHOR ojapo rire.

<sup>16</sup> Ha'e gui nhomongeta va'ety kuery aipoe'i ijaty okuapy va'e pe:

— Marã rami vy nda'u jajouve ju 'rã hembyrekue ra'yxyrã, Benjamim regua kunhague opa rire?

<sup>17</sup> Mba'eta nda'evei Benjamim regua rembyrekue ndata'yi aguã, mba'eta nda'evei peteï regua ha'e javi oata aguã.

<sup>18</sup> Ha'e rami avi nhande ma nda'evei ha'e kuery ra'yxyrã nhamomenda aguã nhanderajy kuery, mba'eta nhande Israel kuery jaura vy “Ayvu vaipy toiko Benjamim regua ra'yxyrã guajy omomenda va'e”, ja'e rire — he'i.

<sup>19</sup> Ha'e ramo ombovai:

— Ma'etÿa nhavõ ma oiko 'rã SENHOR pegua nhemboaty Siló py. Ha'e nunga oiko 'rã Betel tetã katy'i kuaray ijapu'a'ia katy, tape Betel gui Siquém katy yvy'ã rupi oo va'e rupi kuaray oua katy, ha'e Lebona regua kuaray ipuku-a katy — he'i.

<sup>20</sup> Ha'e rami vy Benjamim kuery pe ju ijayvu vy aipoe'i:

— Tapeo, penhemi uvaty ikuai va'e rupi.

<sup>21</sup> Ha'e py ma pema'ë mbegue peiny, mba'eta Siló pygua rajy kuery oë 'rã jogueruvy oguyryí reve ojeroky vy. Ha'e ramo ma peë 'rã uvaty py penhemia gui, ha'e ha'e kuery regua peteï-teï pejopy 'rã pendera'yxyrã. Ha'e vy tapeo ju Benjamim yvy re.

<sup>22</sup> Ha'e gui tuu ha'e ikyvy kuery ou 'rã nhandea py ndojou porãia rupi ijayvu aguã. Ha'e ramo ha'e kuery pe aipo ja'e 'rã: “Orerayvua rupi ke pemboaxy avi Benjamim regua avakue, mba'eta Jabes-Gileade tetã re ropu'ã jave ta'yxyrã ndorojoupai rire. Ha'e rami avi penderajy kuery napeme'ëi va'ekue ha'e kuery pe. Ha'e rami e'ý va'e rire pepaga aguã rami peiko 'rãgue”, ja'e 'rã — he'i.<sup>†</sup>

<sup>23</sup> Ha'e rami ae Benjamim kuery ikuai. Ha'e rami vy gua'yxyrã peteï-teï ogueraa oguyryí reve ojeroky okuapy va'e kuery gui, mbovy pa ikuia rami vy ogueraa. Ha'e gui oje'oi vy oyvy py ju ojevypa. Ojapo ju guetã, ha'e vy ikuai ha'e py.

<sup>24</sup> Ha'e gui mae ma Israel kuery voi ojevy ju ha'e gui. Peteï-teï guetarã kuerya py ae oo, gua'y kuerya py ha'e oyvy py ae.

<sup>25</sup> Ha'e va'e jave ma ndoikoi huvixave Israel kuery re opena va'erã. Ha'e ramo peteï-teï ikuai 'rã ha'e kuery ae oipotaa rami rive.

<sup>†</sup> **21:22** Ha'e kuery ha'e javi oura va'ekue Benjamim regua avakue ra'yxyrã guajy kuery ome'ë e'ý aguã (versículo 1). Ha'e gui apy ojerure guajy kuery pe Benjamim regua avakue ra'yxyrã ojereraa uka aguã, ouraague ombovaipa e'ý aguã.

## Rute rekukue oĩa Rute rekukue oĩa

“Joguerekao kuery opena jave py ma oiko karuai Israel yvy re. Ha'e gui peteĩ ava oo Judá regua Belém tetã py oikoa gui Moabe yvy re ju oiko aguã, gua'yxy ha'e mokoĩ gua'y kuery reve” (1.1). Ha'e rami ijypy kova'e kuaxia para. Moabe yvy re ava va'e omano, ta'y kuery avi. Ha'e ramo ta'yxykue Noemi hery va'e ojevy ju Belém tetã py. Hexeve ou avi peteĩ ipi'a ra'yxykue Rute hery va'e, Moabe pygua. Ha'e va'e ma oayvu ete ome xykue'i, Nhanderuete anhetẽ va'e re ojerovia guive oikovy.

Belém tetã py oiko jave peteĩ ava heko porã va'e ogueraa gua'yxyrã, Boaz hery va'e. Ha'e rami vy Rute ma huvixa Davi jaryi, ha'e Jesus Cristo jaryi guive oiko raka'e.

Ha'e jave py heko vai va'e heta ikuai teĩ Rute rami ikuai avi yvyigueve'i ojerovia ete va'e. Ha'e va'e kuery ma Nhanderuete omoingo porã.

### *Moabe yvy gui Noemi ha'e Rute ojevyague*

<sup>1</sup> Joguerekao kuery opena jave py ma oiko karuai Israel yvy re. Ha'e gui peteĩ ava oo Judá regua Belém tetã py oikoa gui Moabe yvy re ju oiko aguã, gua'yxy ha'e mokoĩ gua'y kuery reve.

<sup>2</sup> Ha'e va'e ava ma Elimeleque hery va'e, ha'e rã ta'yxy ma Noemi. Ta'y kuery ma Malom ha'e Quiliom. Efrateu kuery ikuai Judá regua Belém py hekoa va'e. Moabe yvy re ha'e kuery ovaẽmba vy hekoa ha'e py.

<sup>3</sup> Ha'e gui ma Noemi me Elimeleque omano. Ha'e rã kunha va'e ha'e anho opyta mokoĩ op'i'a reve.

<sup>4</sup> Ha'e gui mokoĩve omenda Moabe pygua kunhague re. Ta'yxy kuery regua peteĩ rery ma Orfa, ha'e rã amboae ma Rute. Ha'e rami vy ha'e py ikuai dez ma'etý rai'i.

<sup>5</sup> Ha'e gui mokoĩve ipi'a Malom ha'e Quiliom omano avi. Ha'e rami vy kunha va'e ha'e anho'i opyta, ipi'a kuery mokoĩve ha'e ime ndikovevei ma rire.

<sup>6</sup> Ha'e gui kunha va'e oendu SENHOR ojeupegua kuery re ima'endu'a vy ho'u va'erã ojou uka jevya. Ha'e rami vy op'i'a ra'yxykue reve opu'ã jogueravy Moabe yvy gui ojevy aguã.

<sup>7</sup> Ha'e ramo op'i'a ra'yxykue mokoĩve reve oje'oi ikuaiague gui. Mboapyve oguata jogueravy, Judá yvy katy ovaẽ aguã.

<sup>8</sup> Ha'e gui ma Noemi aipoe'i ha'e kuery pe:

— Tapeo, pejevy ju peteĩ-teĩ pendexya py. Tove SENHOR tapenemboaxy, omano va'ekue peẽ pemboaxyague rami, ha'e xevy voi.

<sup>9</sup> Tove SENHOR tapenembovy'a, peteĩ-teĩ penemerã ro py – he'i. Ha'e vy oayvupa.

Ha'e rami rã ha'e kuery ojae'o atã.

<sup>10</sup> Ha'e rami vy ime xykue pe aipoe'i:

— Any, ore voi roo avi 'rã nderupive neretarã kuerya katy.

<sup>11</sup> Ha'e rã Noemi aipoe'i:

— Pejevy ke, xememby kuery. Mba'erã tu peo ta xerupive? Xee nda'u areko teri ri xerye py xepi'a penemerã?

<sup>12</sup> Pejevy ke, xememby kuery. Tapeo ke, mba'eta xeguaimi'i ete ma amenda jevy aguã. Xee ma “Aendu teri arõ aguã” ha'e va'e rire, ha'e rami e'ý vy kova'e pytû re xemerã ajou vy xememby voi va'e rire ma

<sup>13</sup> pearõ 'rãgue ri ty'y ha'e kuery tujapa peve? Imeve'ý va'e teri 'rãgue ri ty'y peiko? Any teve, xememby kuery. Mba'eta pendere vy xee xeporiau vaipa teĩ, xerovai SENHOR opo oupi rire – he'i.

<sup>14</sup> Ha'e ramo ha'e kuery teĩgue ju ojae'o atã okuapy. Orfa ma peteĩgue oayvu reve oxarura ov y ome xykue pe. Ha'e rã Rute ma oikuavã ratã tema oiny.

**15** Ha'e ramo Noemi aipoe'i ixupe:

— Ne'ixa, neirũ ojevy ma ovv guetarã kuery ha'e nguuete kuerya katy. Ejevy ke ndee voi neirũ rakykue.

**16** Ha'e rã Rute ombovai:

— Ejeja uka eme xevy, xejoko eme guive nderupive aa aguã. Mba'eta mamo rã reoa py rei xee aa avi 'rã, ha'e mamo rã rekea py xee voi ake 'rã. Neretarã kuery ma xeretarã kuery ae avi 'rã ikuai, ha'e Nderuete pe ma "Xeruete" ha'e avi 'rã.

**17** Mamo rã remanoa py xee amano avi 'rã, ha'e py ae 'rã xenhono porãa. Ha'e gui tove SENHOR taxemoingo axy ha'e oikuaa rami, xapy'a rei ndegui mba'emo pe ajepe'a uka ramo, manoia e'ý vy – he'i.

**18** Ha'e ramo Noemi ngupive ooxe etea oexa vy nonhea'ávei ojevy aguã.

**19** Ha'e rami vy jogueraa mokoíve Belém peve.

Ha'e py ovaẽ ramo tetã pygua kuery onhemondyipa rei okuapy ha'e kuery oexa vy. Ha'e vy kunhague ma aipoe'i okuapy:

— Peva'e e'ý teve Noemi?

**20** Ha'e ramo ombovai:

— Xevy pe "Noemi" pejeve eme, ha'e rã "Mara" peje xevy, mba'eta Ipo'akapa va'e ha'e rami ete xemoingo axy rire.\*

**21** Arekopa reve apy gui aa va'ekue ri SENHOR ojapo xeporiaukue'i reve ajevy aguã rami. Mba'e re tu "Noemi" peje xevy, xerovai SENHOR onhemoí ramo, Ipo'akapa va'e xembojexavai rei rire? – he'i.

**22** Ha'e rami py Noemi ojevy Moabe yvy gui, op'i a ra'yxykue Moabe pygua Rute reve. Cevada omono'õa ypy'i jave ovaẽ Belém py.†

## 2

### *Cevada ra'yigue 'are Rute ojeupe guarã omono'õague*

**1** Ha'e gui peteĩ ava oiko Noemi me rãgue'i retarã oguerekopa va'e. Ha'e va'e ma Elimeleque retarã, Boaz hery va'e.

**2** Ha'e gui Moabe pygua Rute aipoe'i Noemi pe:

— Taa nhomba'ety rupi taiko, xemboaxy'i va'e rakykue rupi rei aa vy cevada ra'yigue 'are amono'õ aguã.

Ombovai:

— Tereo ha'vy, xememby – he'i.

**3** Ha'e gui Rute nhomba'ety py oo vy omono'õ oikovy omono'õ va'e kuery rakykue rupi. Elimeleque retarã Boaz mba'ety py guive oo.

**4** Ha'e jave py ae Boaz ou Belém gui. Ha'e rami vy guembiguai kuery omono'õ va'e pe oxarura:

— SENHOR toiko peẽ kuery reve.

Ha'e kuery ombovai:

— Ndee voi SENHOR tanemoingo porã – he'i okuapy.

**5** Ha'e gui Boaz oporandu guembiguai kuery re opena va'e pe:

— Mava'e rajy tu pe kunha va'e?

**6** Hembiguai ombovai:

— Pe kunha va'e ma Moabe pygua, Noemi reve Moabe yvy gui ou va'ekue.

\* **1:20** Tery Noemi ma "Iporã va'e" 'ea. Ha'e rã tery Mara ma "Haxy va'e, iro va'e" 'ea (Êxodo 15.23). † **1:22** Israel kuery yvy py ma mba'emo ra'yigue omono'õ 'rã abril ha'e maio py. Cevada ranhe 'rã omono'õ, ha'e gui trigo ju. Po rami 'rã omono'õ. Hi'y ma avakue ojaya rire kunhague hakykue oo vy ojokua 'rã. Ha'e gui oo ju 'rã ndojokuapai va'ekue ojopy vy. Ha'e gui mae ma ogueraa 'rã ojyky aguã py. Vaka omopyrõ vy 'rã ojyky, ha'e'ý vy hi'áry rupi mba'emo ipoyi va'e omoatã 'rã heruvy, e'ý vy karóxa omboguata reve. Ha'e gui omboveve 'rã, ha'e oiky'a'o ju 'rã omboyrú aguã.

<sup>7</sup> Ha'e va'e ma ange xevy aipoe'i: “Tajopy ha'yigue, tamono'õ avy omboaty pyre pa'ũ rupi omono'õ va'e kuery rakykue rupi”, he'i vy ou kuri. Ko'ëmba'i ramove koropi ae oiko aÿ'i peve, xapy'a'i optyu'u oguy py guive – he'i.

### Rute reve Boaz ijayvu porã'ague

<sup>8</sup> Ha'e gui Boaz aipoe'i Rute pe:

– Endu ke, xerajy. Tereo eme mba'ety mboae py remono'õ vy, apy gui tereove eme. Apy ae 'rã reiko xerembiguai kunhague reve.

<sup>9</sup> Rexa pota 'rã cevada mono'õa kuery omba'eapoa re, hakykue rupi reo aguã. Xerembiguai kuery pe xeayvu ae ma ndere opena rei e'ÿ aguã. Ndey'uvei vy tereo yryru oĩa py, ha'e ey'u xerembiguai kuery ojara va'ekue – he'i.

<sup>10</sup> Ha'e ramo kunha va'e ngova omovaẽ yvy re. Ha'e vy aipoe'i:

– Mba'exávy tu xepytyvõ 'rã, amboae tekaoa guigua aiko va'eri?

<sup>11</sup> Boaz ombovai vy aipoe'i:

– Xevy omombe'ua porã neme omano rire ixykue pe rejapo porãague. Mba'eta nderu, ndexy ha'e yvy ndetui'ague reja vy peteïve reikuua e'ÿ va'e kuerya py reju va'ekue.

<sup>12</sup> SENHOR tomboekovia joupe rejapo porãague. Tove SENHOR Israel kuery ruete gui toupa ndevy guarã ha'e javi, ipopo guýry renhemi aguã reju rire – he'i.

<sup>13</sup> Ha'e ramo kunha va'e aipoe'i:

– Xeruvixa, ndee xepytyvõ vaipa ma. Xembopy'a porã xee nerembiguai py'a re peve guarã ndeayvu vy, xee nerembiguai regua ndaikoi va'eri – he'i.

<sup>14</sup> Ha'e gui okarua jave ju Boaz aipoe'i ixupe:

– Enhemboja ke kyvõ katy, ekaru einy mbojape re, vinho reve – he'i. Ha'e ramo omono'õ va'e kuery reve oguapy oiny. Ha'e rã ixupe ome'ẽ ha'yigue mbixy. Ixupe ome'ẽ retave ramo okaru porã, hevyatã peve.

<sup>15</sup> Ha'e gui kunha va'e ha'yigue oekave ju aguã opu'ã ramo Boaz peteïgue ju ijayvu guembiguai kuery pe. Ha'e vy aipoe'i:

– Tove tomono'õ pemboaty va'ekue ikuia rupi voi, pendeayvu eme ixupe.

<sup>16</sup> Peity-ityve tema upe py pemboaty va'ekue gui, tove ta'ikuai ojopy aguã. Pendevai eme ixupe – he'i.

<sup>17</sup> Ha'e gui mba'ety rupi kunha va'e omono'õ oikovy ka'aru peve. Omono'õ va'ekue ojky vy oexa rã peteï ajaka renyẽ rai'i cevada oĩ.

<sup>18</sup> Ha'e va'e oupi heravy tetã katy. Ha'e ramo ime xykue oexa omono'õ va'ekue. Ha'e ramo okaru okuapy jave guare rembyre voi oguenoẽ vy ome'ẽ avi ome xykue pe.

<sup>19</sup> Ha'e rami rã ime xykue aipoe'i ixupe:

– Mamo tu remono'õ ange? Mamo tu remba'eapo ra'e? Ta'ima'endu'a porãa nepytyvõ vy nemovaẽ porãare re!

Ha'e ramo ome xykue pe Rute omombe'u mamo pa omba'eapoague. Ha'e vy aipoe'i:

– Mba'ety amba'eapoa va'e ja rery ma Boaz – he'i.

<sup>20</sup> Ha'e ramo Noemi aipoe'i op'i'a ra'yxykue pe:

– SENHOR tomoingo porã, mba'eta ndojepe'ai jaikove va'e ha'e omano va'ekue ombaaxy oikovya gui. Ha'e va'e ava ma peteï nhanderepya regua oiko – he'i.\*

<sup>21</sup> Ha'e ramo Moabe pygua Rute aipoe'i:

– Ha'e va'e ma xevy “Xerembiguai kuery reve ae 'rã reiko ha'yigue omono'õmba peve”, he'i avi.

<sup>22</sup> Opi'a ra'yxykue Rute pe Noemi ombovai:

\* **2:20** Ha'e kuery reko rami vy hetarã ae'ive va'e pe “Nhanderepya” he'i 'rã. Ha'e va'e ma ojogua ju 'rã guetarã yvy operde va'ekue (Levítico 25.25), opena 'rã guetarã iporiaukue'i re (Levítico 25.35), ojogua ju 'rã guetarã escravo-rã ogueraa pyre (Levítico 25.47-49), oepy 'rã guetarã ojukaague re (Números 35.19), ha'e omenda 'rã guyvy rembirekokue re imemby va'e'ÿ teri ramo (Deuteronomio 25.5-10). Ha'e gui nhande kuery repya ma Jesus ae (Gálatas 4.5, Tito 2.14).

— Xememby, ha'eve ete 'rā hembiguai kunhague reve reiko aguã, amboae kuery mba'ety rupi reiko axy 'rāgue py — he'i.

<sup>23</sup> Ha'e rami vy Boaz rembiguai kunhague reve kunha va'e omono'õ oikovy cevada ha'e trigo omono'õmba peve, ha'e ome xykue'ia py oke jepi oikovy.

### 3

#### *Mba'emo moa'yīaty py Boaz oĩa py Noemi omondoukaague*

<sup>1</sup> Ha'e gui ime xykue Noemi aipoe'i ixupe:

— Xememby, nda'evei ri ty'y nemerā xee ajou aguã revy'a aguã?

<sup>2</sup> Ne'ixa, Boaz ma nhanceretarā oiko, guembiguai kunhague reve nemoingo va'ety guive. Ma'ẽ, kova'e pyávy ojyky 'rā mba'emo moa'yīaty py.

<sup>3</sup> Ejau ke, enhemoeakuā ha'e emoñ ndeo iporāve va'e. Ha'e vy tereo mba'emo moa'yīaty py. Va'eri ava va'e okaru ha'e oy'u e'ŷ teria ja ejekuaa uka eme ta'vy ixupe.

<sup>4</sup> Ha'e gui oke ta ma ramo reikuua pota 'rā mamo pa onhenoa re. Ha'e gui reo avi 'rā ha'e py. Eipe'a inhovā ipy gui, ha'e enheno avi ha'e py. Ha'e gui ma ava va'e omombe'u 'rā rejapo va'erā.

<sup>5</sup> Rute ombovai:

— Xee ajapopa 'rā ndeayvuague — he'i.

#### *Rute re Boaz omenda aguã re ijayvuague*

<sup>6</sup> Ha'e rami rā mba'emo moa'yīaty py oo vy ojapo ime xykue ijayvuague ha'e javi.

<sup>7</sup> Ha'e rami vy Boaz okaru ha'e oy'upa ma vy, ha'e opy'a py ovy'a ete oiny reve oo onheno ha'yīgue omboaty pyre yvy'iry, ha'e ramo kunha va'e onhemboja mbegue'i vy oipe'a inhovā ipy gui. Ha'e vy onheno avi oupy ha'e py.

<sup>8</sup> Pytū mbyte jave ava va'e onhemondyi. Ovy vy oexa rā peteñ kunha va'e ipy rupi onheno oupy ra'e.

<sup>9</sup> Ha'e vy aipoe'i:

— Mava'e tu ndee?

Ombovai:

— Xee ma nerembiguai Rute. Eipyo ke nde-capa xee nerembiguai áry, mba'eta ndee ma oreptyvōarā reiko — he'i.\*

<sup>10</sup> Ha'e ramo aipoe'i:

— Xerajy, SENHOR tanemoingo porā. Jypy joupe rejapo porāague gui aŷ xevy rejapo va'e iporāve ete, mba'eta kunumigue rakykue rupi ma ndereoi, iporiaukue'i e'ŷ vy oguerekopa va'e rakykue rupi voi.

<sup>11</sup> Ha'e gui aŷ ma xerajy, ekyje eme. Ndeayvua ha'e javi 'rā ajapo, mba'eta tetā py xeretarā kuery ikuai va'e ha'e javi oikuuaa ndee kunha heko porā va'ea.

<sup>12</sup> Ne'ixa, anhetē ete xee penepytyvōarā aiko va'eri penepytyvōarā mboae oiko avi xegui peneretarā ae'ive va'e.

<sup>13</sup> Epyta apy kova'e pytū re. Ha'e gui ko'ẽmba'i jave xapy'a rei ha'e va'e nepytyvōxe vy ha'eve nepytyvō aguã. Ha'e rā nanepytyvōxei ri ramo anhetē ete SENHOR oikove va'e rery rupi aura vy aipoa'e: Xee ae 'rā roipytyvō. Enhenove ranhe ejupy ko'ẽmba peve — he'i.

<sup>14</sup> Ha'e rami rā ipy rupi onheno oupy ko'ẽmba peve. Aje'ive'i reve opu'ã ovy joexa kuaa e'ŷ re teri, ava va'e

— Toikuuaa eme kunha va'e mba'emo moa'yīaty py ouague — he'i ramo.

<sup>15</sup> Ava va'e aipoe'i avi:

— Eupi xevy ajukue renheovāa va'e, ejopy imoiny — he'i. Kunha va'e oupi ma ramo omonyē mboapy meme ryru cevada ra'yīgue. Ikupe áry oupi ma ramo oo ju tetā katy.

<sup>16</sup> Ome xykue ro py ovaẽ ramo ixupe oporandu:

\* <sup>3:9</sup> Hexe omendaxea rami ijayvu ojejavy e'ŷ re, ha'e kuery reko rami vy.

— Xememby, mba'e pa oiko ra'e?

Ha'e ramo omombe'u ava va'e ixupe ojapo porāague ha'e javi.

<sup>17</sup> Aipoe'ive ju:

— Kova'e cevada ra'yīgue mboapy meme ryru ome'ē xevy, mba'eta aipoe'i: "Mba'eve reraa e'ŷ re ejevy eme teri neme xykuea katy", he'i va'ekue.

<sup>18</sup> Ha'e ramo Noemi aipoe'i ixupe:

— Xememby, earō ke, mba'e pa oiko 'rāa jaikuua peve. Mba'eta ha'e va'e ava ma ndopytu'ui 'rā kova'e árave ha'e nunga re oikuaa pota e'ŷ re.

## 4

### Rute re Boaz omenda aguā re jogueroayvuague

<sup>1</sup> Ha'e gui tetā kora rokē py Boaz oo vy oguapy oiny ha'e py.\* Ha'e rami vy oexa oiny hetarā pytyvōa mboae ijayvuague va'e oaxa rā. Ha'e va'e pe Boaz aipoe'i:

— Xeretarā, eju apy, eguapy ke – he'i ramo ha'e va'e ojere vy oguapy oiny avi ha'e py.

<sup>2</sup> Ha'e ramo Boaz oenoī dez avakue tetā pygua nhomongeta va'ety ikuai va'e. Ha'e kuery pe aipoe'i:

— Peē voi peguapy ke apy – he'i ramo oguapy avi okuapy.

<sup>3</sup> Ha'e gui guetarā oipytyvō aguā rami oiko va'e pe ju aipoe'i:

— Ha'e gui nhanderyke'y Elimeleque yvykue ma ta'yxykue ovendea va'erā itui, Noemi Moabe yvy gui ojevy va'ekue ae 'rā ovendexe.

<sup>4</sup> Ha'e nunga rupi xee anhembopy'a ndevy amombe'u aguā. Ha'e rami vy nhaneretarā kuery apy oguapy okuapy va'e renonde aipoa'e ndevy: Ejogua na ha'e va'e yvy. Rejoguaxe ri vy ejogua. Ha'e rā any ri vy emombe'u porā xevy aikuua aguā, mba'eta amboae ipytyvōara ndoikoi ndee e'ŷ vy, ha'e ndee rire ma xee ju aiko – he'i.

Ombovai:

— Xee ma ajogua 'rā – he'i.

<sup>5</sup> Ha'e gui Boaz aipoe'ive ju:

— Ha'e rami avi Noemi po gui yvy rejoguaa ára ma Moabe pygua imeve'ŷ va'e Rute gui avi 'rā rejogua, hexe remenda ramo ndera'y oiko va'erā pe ime yvykue opyta aguā hery py – he'i.\*

<sup>6</sup> Ha'e ramo ojogua ta va'ekue aipoe'i:

— Ha'e rami ri ramo xee ma nda'evei ajogua aguā, amokanhy e'ŷ aguā xera'y kuery peguarā ae mba'emo areko va'e ha'e javi. Ejogua ndee ae ajogua 'rā va'ekue, xee ajogua aguā nda'eve reguai ramo – he'i.

<sup>7</sup> Po rami ae yma rupi Israel kuery reko, amongue mba'emo ovende, e'ŷ vy omboekoviaa py. Ha'e va'e oikuaa uka porā aguā ma omboi 'rā opy ryru, ha'e ijoguaa pe ome'ē 'rā. Ha'e rami py oikuaa pavē 'rā omboekoviaague, Israel kuery reko rami vy.

<sup>8</sup> Ha'e rami rā hetarā oipytyvō aguā rami oiko va'e Boaz pe "Ndee ae ejogua" he'i vy omboi opy ryru.

<sup>9</sup> Ha'e ramo Boaz aipoe'i nhomongeta va'ety ha'e guetarā kuery ha'e javi pe:

— Kova'e ára pexa pavēa py Noemi po gui ajogua mba'emo Elimeleque, Quiliom ha'e Malom oguerekva'ekue ha'e javi.

<sup>10</sup> Ha'e xera'yxyrā araa avi Malom ra'yxykue Moabe pygua Rute, herykue py xera'y oiko ma ramo ixupe guarā yvy opyta aguā, Malom rerykue re hexegua kuery ha'e tetā rokē py onhemboaty va'e hexarai e'ŷ aguā. Ha'e nunga rexaaare ma peē kuery ae pendekuai aŷ – he'i.

\* <sup>4:1</sup> Ha'e jave py ma huvixa kuery mba'emo re oikuaa pota vy oo 'rā tetā rokē py, tetā rokē yvýry oguapy 'rā okuapy jogueroayvu aguā. Ha'e rami vy amongue mba'emo oguerekva'ekue ha'e javi pe oo 'rā tetā rokē py huvixa kuery oikuaa pota aguā (Deuteronômio 21.18-19; 2 Samuel 15.1-4, 19.8; Jó 29.7-12; Proverbios 31.23; Jeremias 38.7-8, 39.3). \* <sup>4:5</sup> Deuteronômio 25.5-10

<sup>11</sup> Ha'e ramo nhomongeta va'ety kuery ha'e okẽ py ikuai va'e ha'e javi aipoe'i:

— Ore kuery ma roexa ri. Ha'e ramo ha'e va'e kunha ndero py reraa va'erã ma SENHOR tomoingo porã Raquel ha'e Lia omoingoague rami, mba'eta ha'e va'e mokoïve omboetave raka'e Israel kuery. Ha'e gui ndee Boaz voi tanemboetea Efrata py, nderery re ta'ima'endu'aa pavẽ Belém tetã py.

<sup>12</sup> Ndero pygua kueryrã ta'ikuai Judá ra'y Perez, Tamar pi'a va'e ro py ikuiaia rami, ndera'yxy rupi ndera'y kueryrã SENHOR ome'ẽ va'erã ha'e javi.

### *Rute opi'a Obede oikuavã'igue*

<sup>13</sup> Ha'e gui Boaz ogueraa Rute gua'yxyrã. Hexeve joguereko ramo ixupe SENHOR ome'ẽ oguereko'i aguã. Ha'e rã oikuavã'i ava'i.

<sup>14</sup> Ha'e ramo Noemi pe kunhague ikuai va'e aipoe'i:

— SENHOR toiko ima'endu'a porãmby, mba'eta kova'e ára nome'ẽ e'ŷi neremiarirõ nepytyvõarã. Tove ha'e va'e rery re ta'ima'endu'aa pavẽ Israel kuery ikuiaia rupi.

<sup>15</sup> Ha'e va'e ma nembopy'a porã ju 'rã nderekove pukukue re, ha'e nembopy'a porã 'rã neguaimi'i ma jave teĩ, mba'eta ndepi'a ra'yxykue nderayvu va'e oikuavã'i ma. Ha'e va'e kunha ma sete ndepi'a kuery oiko 'rã va'ekue gui ovareve va'e ndevy – he'i.

<sup>16</sup> Ha'e ramo guamiarirõ ava'i Noemi ojopy vy omoõ o'u áry, hexe opena oikovy guive.

<sup>17</sup> Hoo katy'i rupi ikuai va'e omboery okuapy.

— Oiko ma peteĩ ava'i Noemi remiarirõ – he'i vy omboery Obede. Ha'e va'e ma Jessé ru, ha'e Jessé ma Davi ru raka'e.

<sup>18</sup> Po rami ma Perez ramymino kuery rery: Perez ra'y ma Hezrom,

<sup>19</sup> Hezrom ra'y ma Rão, Rão ra'y ma Aminadabe,

<sup>20</sup> Aminadabe ra'y ma Naassom, Naassom ra'y ma Salmom,

<sup>21</sup> Salmom ra'y ma Boaz, Boaz ra'y ma Obede,

<sup>22</sup> Obede ra'y ma Jessé, ha'e rã Jessé ra'y ma Davi.

## Jypygua kuaxia Samuel 'epyre oĩa Jypygua kuaxia Samuel 'epyre oĩa

Kova'e kuaxia para re oĩ Samuel ha'e huvixa Saul rekokue. Samuel ma Nhanderuete renonde profeta oiko, ha'e joguerekoa opa vygua. Saul ma Israel pygua huvixave jypy'i oĩ va'ekue. Saul oĩ jave Davi oiko avi, Saul rekovia Israel kuery ruvixa oĩ va'erã.

Heta va'e kuery ae ojerure okuapy raka'e nguvixaverã omoĩa aguã re. Ha'e rami teĩ Samuel nomoĩxei ranhe. Ha'e vy ixupe Nhanderuete aipoe'i: "Ha'e kuery oipota ramo emoĩ" he'i ramo mae omoĩ Saul. Huvixa Saul ma jypy onhe'ẽ rendu Nhanderuete, ha'e rã araka'eve rã ojepe'a onhe'ẽ rendua gui, ha'e ae oikuua rami rive oiko vy. Nhanderuete pe mymba ome'ẽ teĩ ixupe Samuel aipoe'i: "Mba'emo nhame'ẽa gui ma ha'eveve nhanhe'ẽ rendu. Vexa'i kyrakue nhame'ẽa gui ha'eveve ojapo uka va'e jajapo. ... Ha'e gui Senhor ayvu reja rire ha'e voi ndereja, huvixa nereĩvei aguã", he'i (15.22b, 23b). Ha'e ramo Saul oiko vai, Senhor ndoguerovy'avei rã. Nhanderuete nanhanhe'ẽ rendui ramo ou 'rã jajexavai aguã.

Saul oĩ teri reve hekovia Nhanderuete oiporavo Davi. Ha'e va'e ma kunumi va'e, guymba vexa'i kuery openaa rupi oiko. Ha'e rami teĩ Nhanderuete po'akaa rupi ojuka raka'e gigante Golias ita momboa py rive. Aipoe'i: "Ndee ma kyxe reve reju xerovai, hu'y guaxu ha'e hu'y jokoa reve. Ha'e rã xee ma nderovai aju Senhor ixondaro reta va'e rery rupi. ... Apy heta va'e kuery ikuai va'e ha'e javi oexa 'rã Senhor jogueraa jepea kyxe py e'ŷ, hu'y guaxu py e'ŷ guive. Mba'eta pendere opu'ã va'e ma Senhor ae. Ha'e ae 'rã penemboaxapa orepo py", (17.45a, 47) he'i vy ojuka.

### *Elcana ha'e mokoĩ ta'yxy rekokue oĩa*

<sup>1</sup> Oiko peteĩ ava Ramataim-Zofim guigua, Efraim yvy'ã reia katyguia, Elcana hery va'e. Ha'e va'e ma Jeroão ra'y, Jeroão ma Eliú ra'y, Eliú ma Toú ra'y, Toú ma Zufe ra'y. Efraim regua meme ikuai.

<sup>2</sup> Ha'e va'e ma ta'yxy mokoĩ va'e. Peteĩ ma Ana, amboae ma Penina. Penina ma imemby va'e, ha'e rã Ana ma imemby va'e'ŷ.

<sup>3</sup> Ha'e va'e ava ma'etŷa nhavõ guekoa gui oo 'rã Siló tetã katy, omboetea rupi mba'emo ome'ẽ aguã SENHOR ixondaro reta va'e pe. Ha'e py oiko avi sacerdote Eli ta'y mokoïve Hofni ha'e Finéias reve. SENHOR pegua sacerdote meme ikuai.

<sup>4</sup> Elcana ma SENHOR pe mba'emo omboaxa va'e nhavõ gui mba'emo ome'ẽ avi 'rã gua'yxy Penina pe, ha'e gua'y ha'e guajy kuery ha'e javi pe.\*

<sup>5</sup> Ha'e rã gua'yxy Ana pe ma hetave 'rã ome'ẽ oayvuve vy, SENHOR nomomemby ukai teĩ.

<sup>6</sup> Ta'yxy mboae omoangeko reia rupi tema oguerek, SENHOR nomomemby ukai ramo.

<sup>7</sup> Ha'e rami ae tema oiko ma'etŷa nhavõ. SENHOR pegua oo katy Ana oo nhavõ ta'yxy mboae omomboriaua rupi tema ijayvu. Ha'e ramo ojae'o oiny vy ndokarui.

<sup>8</sup> Ha'e rami rã ime Elcana aipoe'i ixupe:

— Ana, mba'e re tu rejae'o? Mba'e re tu nderekarui ri? Mba'e re tu ndepy'a py ndeporiau reiny? Peteĩ nhiruĩ meme ndepi'a 'râgue py xee ndereve aikoa ha'eveve e'ŷ ri ty'y? — he'i.

### *Ana ojerure vy onhemboayvuague*

<sup>9</sup> Ha'e gui Siló py ha'e kuery okaru ha'e oy'u jave oĩ avi sacerdote Eli. Ha'e ma peteĩ tenda py oguapy oiny SENHOR pegua oo yta yvýry.

\* <sup>1:4</sup> Ha'e kuery reko rami vy SENHOR pe tembi'u omboaxa va'e amongue regua gui ha'eve 'rã ha'e kuery ae ho'u aguã, ngoo pygua kuery ha'e javi reve (Deuteronômio 12.17-18, 16.13-17).

<sup>10</sup> Ha'e va'e rire Ana opu'ã vy onhe'ẽ py nda'evei etea oendu reve ojerure ho'amy SENHOR pe, ojae'o vaipa guive.

<sup>11</sup> Ha'e vy onhemboayvu reve aipoe'i:

— SENHOR nexondaro reta va'e, xapy'a rei xee nerembiguai ajexavaia re rema'ẽ vy xere nema'endu'a ri ramo, xapy'a rei xee nerembiguai re nema'endu'a vy peteĩ xepi'arã reme'ẽ ri ramo ma ndevy ju SENHOR amboaxa 'rã oikoa pukukue re ndevy guarã anho oiko aguã, ha'e peteigueve hi'a ndojayaai 'rã guive kyxe py — he'i.<sup>†</sup>

<sup>12</sup> SENHOR renonde onhembo'ea py oĩ are ramo Eli oma'ẽ oiny ijuru omyña re.

<sup>13</sup> Mba'eta Ana ma opy'a py rive'i ijayvu. Hembe omyñ va'eri nda'ijayvuëi. Ha'e ramo Eli "Oka'u rai po" he'i vy

<sup>14</sup> aipoe'i ixupe:

— Raka'e peve 'rã tu reka'u rei reiny? Ey'uve eme vinho! — he'i.

<sup>15</sup> Ha'e rami teĩ Ana ombovai:

— Any, xeruvixa! Xee ma kunha xenhe'ẽ py ajexavai rei va'e. Xee nday'ui ri vinho, neĩ iro va'e. Ha'e rami 'rãgue py SENHOR renonde aju xenhe'ẽ py ajexavaia rami anhemombe'u aguã.

<sup>16</sup> Ha'e nunga rupi xee nerembiguai pe "Nhe'ẽ vai rajy" 're eme. Mba'eta xeporiaua ha'e ajexavaia rima aroayvu ainy aÿ — he'i.

<sup>17</sup> Ha'e rami rã Eli ombovai:

— Tereo porã'i ha'vy. Tove Israel kuery ruete tojapo rejurerueague — he'i.

<sup>18</sup> Ha'e rã kunha va'e ju

— Xee nerembiguai taxejou vai eme — he'i. Ha'e rami ijayvu ma vy kunha va'e oo ju tape rupi. Okaru jeyv rire iporiaua noïvei hova re.

### *Samuel itui'i rire Nhanderuete peguarã omboaxaague*

<sup>19</sup> Ha'e gui ko'ẽ rai ramove ha'e kuery ovv vy SENHOR renonde omboete okuapy. Ha'e rami vy ojevypa vy ngoo py ae ovaẽ Ramá tetã py. Ha'e gui gua'yxy Ana reve Elcana joguerekju. Ha'e ramo hexe SENHOR ima'endu'a ramo

<sup>20</sup> oguerekoi peteĩ kyrí va'e. Hi'ára ovaẽ ramo oikuavã'i opi'a'i. Ha'e va'e ma omboery Samuel,

— SENHOR pe ajerureague ae oiko — he'i vy.

<sup>21</sup> Ha'e gui ime Elcana ma ngoo pygua kuery ha'e javi reve oje'oi SENHOR pe mba'emo ma'etýa nhavõ ome'ẽa rami ome'ẽ ha'e onhemboayvuague ojapopa aguã.

<sup>22</sup> Ha'e rã Ana ma ndooi. Ha'e vy ome pe aipoe'i:

— Ava'i nokambuvei jave ma xee araa 'rã aexa uka SENHOR pe, ha'e rã ha'e py ae oiko aguã.

<sup>23</sup> Ime Elcana ombovai:

— Eiko ha'vy ndevy ha'evea rami. Eropyta okambu teria ja. Ha'e rami vy eiko SENHOR ijayvuague ojapopa aguã rami — he'i. Ha'e ramo ta'yxy opyta vy ombotuvixa kyrí va'e okã re, okambu teria ja.

<sup>24</sup> Nokambuvei ma jave mae ma ogueraa. Peteĩ vaka ra'y mboapy ma'etý va'e reve ogueraa avi, peteĩ ajaka trigo ku'ikue ha'e peteĩ vinho ryru. Ha'e rami vy SENHOR pegua opy oexa uka Siló py, ava'i va'e kyrí'i ete teri reve.

<sup>25</sup> Ha'e rami vy vaka ra'y ojuka ukapa ma vy opi'a'i ogueraa sacerdote Eli oña py.

<sup>26</sup> Ha'e vy ixupe ixy aipoe'i:

— Aÿ ma xeruvixa, anhetẽ ete nderekove rupi aura vy aipoa'e: Xee ma kunha apy ndereve aĩ va'ekue, SENHOR renonde anhembo'e ha'amya py.

<sup>27</sup> SENHOR pe kova'e ava'i re ae ajerure ramo ojapo ma ajerureague.

<sup>†</sup> **1:11** SENHOR pe opi'a omboaxa aguã re Ana ijayvu Números 6.1-21 py oña ramo. Ha'e rami ae avi oiko Sansão (Juízes 13.2-5) ha'e Paulo (Atos 18.18).

28 Ha'e nunga rupi aru oikoa pukukue re SENHOR peguarã amboaxa aguã, SENHOR pe ajerure rire – he'i. Ha'e ramo omboete SENHOR ha'e py.

## 2

### *Ana oporaeiague*

- 1 Ha'e rami vy Ana onhembo'e vy aipoe'i:  
– Xepy'a py arov'y'a SENHOR,  
xembaraetevea aendu avi SENHOR re vy.  
Xejuru py ma xerory xerovaigua kuery gui,  
ndee xereraa jepea re avy'a vy.
- 2 SENHOR rami iky'a e'ŷ va'e ndoikoi,  
ndee ramigua amboae ndoikoi vy.  
Neĩ peteĩve'i py ndoikoi itaova ndee Oreruete rami guarã.
- 3 Pemboeteve eme ayvu pejejou porã reia rupigua,  
pendejuru gui toẽ eme nhemboyvate reia rupigua.  
Mba'eta SENHOR Nhanderuete anho hi'arandua rupi oiko va'e.  
Jaikoa ha'e javi re ha'e oikuua pota 'rã mba'emo opejaa py rami.
- 4 Ha'e rami vy omopẽmba 'rã imbaraete va'e kuery rapa,  
ha'e rã ikangykue'i va'ekue ma omombarae 'rã.
- 5 Karuai oendu e'ŷ va'ekue ma aŷ escravo-'rã onhemoingo uka 'rã mbojape re rive,  
ha'e rã okaruxe reia rupi ikuai va'ekue ma ndojexavai reivei ma 'rã karuai gui.  
Na'imembyi ae va'ekue voi sete kyrĩ va'e oguerekoo,  
ha'e rã imemby reta va'ekue ma na'imbaraetevei ma 'rã.
- 6 SENHOR ae ma tekove pe'aa ha'e tekove me'ea oiko.  
Yvykua katy nhomboguejy, ha'e jogueru jevy kuaa va'e.
- 7 SENHOR ma nhomomboriau kuaa, ha'e nhombovy'a jevy kuaa va'e,  
nhomo'yvy'i kuaa, ha'e nhomboyvate jevy kuaa va'e.
- 8 Ha'e omopu'ã 'rã iporiaukue'i yvy ku'i ituiague gui,  
ytyaty ikuiai gui omboyvate 'rã iporiaukue'i va'e,  
yvatekueve va'e mbyte ju 'rã omboguapy,  
ojapo 'rã ipo'akapa va'e renda áry oguapy aguã rami.  
Mba'eta SENHOR gui vy ae yvy yta itui va'e oĩ atã,  
ha'e va'e áry omoĩ atã yvy ha'e javi.
- 9 Ha'e opena 'rã ojeupe guarã oiky'a'o va'ekue re opyrõa rupi,  
ha'e rã heko vai va'e kuery ma omokyririmb'a 'rã pytû manoia oĩ py.  
Mba'eta avakue ma ombaraetea rupi rive nda'ipo'akai 'rã.
- 10 SENHOR re opu'ãa rupi ikuai va'e ma omomba 'rã,  
ha'e kuery rovai hyapu 'rã yva gui.  
SENHOR nhombopaga 'rã yvy apy rupi voi,  
ha'e rã ojeupeguia huvixa ma omombarae 'rã,  
ombopo'aka 'rã guembiporavo – he'i.
- 11 Ha'e gui Elcana ojevy ju Ramá py ngoo oĩ py. Ha'e rã ava'i ma sacerdote Eli renonde  
rupi mba'emo ojapo oikovy SENHOR pe.

### *Eli ra'y kuery mba'emo vai ojapo jepiague*

- 12 Eli ra'y kuery ma nhe'ẽ vai ra'y ete ikuai, nomboetei guive SENHOR.
- 13 Mba'eta ha'e jave ma po rami 'rã sacerdote kuery ojapo heta va'e kuery re. Amongue  
mba'emo ome'ẽ nhavõ ou 'rã peteĩ sacerdote rembiguai kunumi va'e xo'o ombojy teria  
py, opo py kuxa rakua oguerekoo reve,

<sup>14</sup>ha'e vy omopo'ẽ 'rã oja ferro guigua py, e'ŷ vy oja py, oja guaxu py, e'ŷ vy hy'a py mba'e, ha'e gui kuxa rakua py oguenoẽ va'e rei sacerdote kuery ogueraa 'rã ojeupe guarã. Ha'e rami ae tema 'rã ojapo Israel kuery ha'e py Siló py oo va'e nhavõ re.

<sup>15</sup> Ikyrakue oapy e'ŷ mbove ma voi sacerdote rembiguai kunumi va'e ou vy aipoe'i 'rã ava oapy ta va'e pe: "Upe va'e xo'o eme'ẽ sacerdote kuery pe oexy aguã, mba'eta ndepo gui ndojopyi 'rã xo'o jykue, ipyrygua anho", he'i 'rã.

<sup>16</sup> Ha'e gui xapy'a rei xo'o me'ẽa ombovai vy "Tove ikyrakue ranhe taapy, ha'e rire ma rejopyxeia rami ejopy", he'i ramo ma aipoe'i 'rã: "Any, eme'ẽ xevy aŷ ma voi. Ha'e rami e'ŷ rã aipe'apa nhea'ã 'rã", he'i 'rã.

<sup>17</sup> Ha'e rami py ha'e va'e kunumigue opa mba'e py ojejavy SENHOR renonde, ixupe mba'emo ome'ẽmbay nombovarei vy.

### *Samuel kyrĩ jave guare*

<sup>18</sup> Ha'e gui Samuel ma kyrĩ reve ma voi mba'emo ojapo oikovy SENHOR renonde, manto sacerdote pegua ipererĩ'i va'e py onhemonde guive.

<sup>19</sup> Ixy ma ma'etŷa nhavõ ao puku ruxã'i va'e ojapo vy ixupe ogueru 'rã ome reve, ma'etŷa nhavõ mba'emo ome'ẽaty rami ome'ẽ jave.

<sup>20</sup> Ha'e ramo Eli ogueroayvu porã 'rã Elcana ha'e ta'yxy. Ha'e vy aipoe'i 'rã:

— Tove SENHOR tome'ẽve ju kova'e kunha pi'arã, SENHOR pe opi'a omboaxa va'ekue rekovia — he'i. Ha'e ramo ha'e kuery ojevy ju 'rã gueko katy.

<sup>21</sup> Ha'e rã Ana re SENHOR opena porã ramo oguerek raka'e mboapy avakue ha'e mokoĩ kunha. Ha'e gui kunumi va'e Samuel ma tujave ovy SENHOR renonde.

### *Gua'y kuery pe Eli ijayvuague*

<sup>22</sup> Ha'e gui Eli tuja'i ete reve oendu omombe'ua rã Israel kuery ha'e javi re ta'y kuery ojapo vaia, mba'eta nhogueronheno 'rã kunhague oguy nhemboaty oĩaty rokẽ rupi ombo'eapo va'e kuery reve.

<sup>23</sup> Ha'e rami vy gua'y kuery pe aipoe'i:

— Mba'e re tu ha'e nunga pejapo? Mba'eta aendu riae tema heta va'e kuery omombe'u rã pendeko vaia.

<sup>24</sup> Ha'e rami e'ŷ ta'vy xera'y kuery, peiko porã e'ŷa ae tema aendu. SENHOR pegua kuery ojejavya aguã rami pejapo.

<sup>25</sup> Xapy'a rei peteĩ ava oirũ rovai ri ojejavy ramo Nhanderuete oikuua pota 'rã mokoĩve re. Ha'e rã SENHOR rovai ri ojejavy ramo ma mava'e 'rã tu oiko hepyarã? — he'i. Ha'e rami tuu ijayvu teĩ ha'e kuery noendu potai, SENHOR ojukaxe ae ramo.

<sup>26</sup> Ha'e rã kunumi va'e Samuel ma tujave ha'e ijivateve ovy, SENHOR ha'e avakue ojou porãve tema aguã rami oiko.

### *Eli ro pygua kuery rovai profeta ijayvuague*

<sup>27</sup> Ha'e gui Eli oĩa py ou peteĩ ava Nhanderuete remimbo'e. Ha'e vy aipoe'i ixupe:

— Po rami SENHOR ijayvu: "Neramoĩ ro pygua kuery pe xee ajekuaa uka va'ekue Egito yvy re teri Israel kuery ikuai jave, Faraó rekoia py. Anhetẽ e'ŷ ri ty'y?

<sup>28</sup> Ha'e rami vy Israel kuery pavẽ regua mbyte gui xee aiporavo ae ma sacerdote xejeupe guarã, xevygua altar oĩa py oo vy heakuã porã va'e oapy aguã, ha'e xerenonde manto sacerdote pegua py onhemonde reve ikuai aguã. Neramoĩ kuery peguarã ame'ẽmba va'ekue mba'emo Israel kuery oapy va'ekue ha'e javi.

<sup>29</sup> Mba'e re tu ha'vy pepyrõmba rei ri xevy pe mymba ha'e mba'emo ra'yigue ome'ẽmbay re, xeayvuague rami vy xevygua oo py ome'ẽa teĩ? Ha'e ndee, mba'e re tu xegui remboeteve ndero'y kuery rive? Mba'eta ha'e kuery reve penhemongyra rivepa ma pekuapy xevygua Israel kuery ome'ẽ va'e iporãgueve re."

<sup>30</sup> Ha'e nunga rupi SENHOR Israel kuery ruete aipoe'i: "Anhetẽ xee aipoa'e va'ekue ndero pygua ha'e neramoĩ ro pygua kuery raka'e rã peve guarã amoingo aguã", he'i

va'ekue. Ha'e rami teĩ aŷ SENHOR aipoe'i: "Ha'e nunga toĩve eme, mba'eta amboete uka 'rã xemboetea kuery, ha'e rã xerayvua rupi e'ŷ ikuai va'e ma ojou vaia 'rã.

<sup>31</sup> Ne'exa, ovaẽ ouvy ndejyva ajaya aguã ára, ha'e neramoĩ jyva voi, ndero py tujakueve ndoikovei aguã rami.\*

<sup>32</sup> Ndee ae rexa 'rã jexavaia Nhanderuete pegua opy rupi oiko rã. Israel kuery re mba'emo porã oikoa ramive ndero pygua kuery va'e regua ma ndoikoi 'rã tuja va'e.

<sup>33</sup> Xapy'a rei neramymino kuery va'e regua amongue ava xevyguia altar oikoa gui ndaipe'ai 'rã va'eri nderexay py amboguepa 'rã nderexa, nenhe'ẽ py ndeporiaua rendu va'e gui. Ha'e rami vy neramymino kuery, ndero pygua kuery ha'e javi ma kunumi rei teri reve teĩ omanomba 'rã.

<sup>34</sup> Ha'e gui ndera'y kuery mokoĩ Hofni ha'e Finéias re mba'emo oiko 'rã reikuua aguã, mba'eta peteĩ ára pyve omano 'rã mokoĩve.

<sup>35</sup> Ha'e gui ma xejeupe guarã amoingo 'rã peteĩ sacerdote ojerovia pyrã. Ha'e va'e ma oiko 'rã xepy'a re oĩ va'e ha'e javi rami, anhembopy'aa rami meme. Hoorã ajapo 'rã oĩ atã aguã rami, ha'e oiko riae 'rã xerembiporavo renonde.

<sup>36</sup> Ha'e va'e renonde ou 'rã okuapy ndero gui hembyre va'ekue ha'e javi, guenapy'ã re oĩ 'rã peteĩ hatã'i va'e prata guigua ojopy aguã rive, ha'e peteĩ jururã'i mbojape. Ha'e vy aipoe'i 'rã: 'Ajerure ndevy, sacerdote kuery ombo'eapoa rupi xee voi xemoĩ aguã re, mbojape ra'ykue'i ha'u va'erã ajou aguã', he'i 'rã okuapy."

### 3

#### *Ikéry py SENHOR Samuel oenoĩague*

<sup>1</sup> Kunumi va'e Samuel mba'emo ojapo oikovy SENHOR pe, Eli oexaa rupi. Ha'e va'e jave ma SENHOR oayvu nombou retai, mba'emo ndoexa uka riae guive.

<sup>2</sup> Ha'e gui peteĩ pytũ ma sacerdote Eli onheno oupy onhenoaty rupi. Hexa pytũmba rei ma guive vy ndoexavei rai'i ma.

<sup>3</sup> Samuel voi onheno ma avi oupy SENHOR ayvu ryru oĩa oo py, Nhanderuete pegua tataendy oĩ va'e nombogueai teri jave.

<sup>4</sup> Ha'e gui ma SENHOR oenoĩ kunumi va'e:

— Samuel, Samuel!

Ha'e ramo ombovai:

— Apy ma aĩ! — he'i.

<sup>5</sup> Ha'e rami vy onha ovvy Eli ituia py. Ha'e vy aipoe'i:

— Apy ma ha'ã, ndee xerenoĩ ramo.

Ha'e rã aipoe'i:

— Any, xee e'ŷ ri roenoĩ xera'y. Tereo ju enheno — he'i ramo oo ju onheno.

<sup>6</sup> SENHOR teĩgue ju oenoĩ:

— Samuel! — he'i.

Ha'e ramo ovvy jevy vy Eli ituia py oo vy aipoe'i:

— Apy ma ha'ã, ndee xerenoĩ ramo.

Ha'e rã aipoe'i:

— Any, xee e'ŷ ri roenoĩ xera'y. Tereo enheno ju — he'i.

<sup>7</sup> Mba'eta Samuel ndoikuaai teri SENHOR ae ria, ixupe SENHOR oayvu nomboui teri ramo.

<sup>8</sup> Ha'e gui mboapykue ma SENHOR oenoĩ Samuel. Ha'e rã ovvy oo ju Eli-a py. Ha'e vy aipoe'i:

— Apy ma ha'ã, ndee xerenoĩ ramo.

Ha'e ramo mae ma Eli oikuua SENHOR ae ri kunumi va'e oenoĩa.

<sup>9</sup> Ha'e rami vy aipoe'i Samuel pe:

---

\* <sup>2:31</sup> "Ndejyva ajayapa 'rã" he'ia ma ta'y kuery ojukapa aguã re ijayvu vy. Ha'e rami ae ojapo (1 Samuel 4.11-18).

— Tereo enheno ju. Ha'e gui xapy'a rei nerenoña ju rã aipo're: "Ndeayvu ke SENHOR, xee nerembiguai aendu ainy ndeayvu", 're 'rã — he'i. Ha'e ramo Samuel oo ju ngupa py onheno.

<sup>10</sup> Ha'e gui SENHOR ou vy hi'añ ha'e py. Ha'e rami vy oenoñ ypyague rami ae ju oenoñ:

— Samuel, Samuel! — he'i ramove ombovai:

— Ndeayvu ke, mba'eta xee nerembiguai aendu ma ainy — he'i.

<sup>11</sup> Ha'e gui SENHOR aipoe'i Samuel pe:

— Ne'ixa, peteñ mba'e ajapo ta Israel kuery re, ha'e va'e oendu va'e rei ijapyxa nhe'ëmba 'rã nhemondyi gui.

<sup>12</sup> Mba'eta ha'e va'e ára Eli rovai amoingo 'rã hoo pygua kuery rekorã xeayvuague ha'e javi. Amboypy vy ma ajapopa 'rã.

<sup>13</sup> Mba'eta ixupe aipoa'e ae ma va'ekue hoo pygua kuery ambopaga aguã raka'e rã peve, ha'e kuery ojejavya ha'e voi oikuua porã rire. Ta'y kuery opa marã rei ikuai va'eri tuu ndojokoi.

<sup>14</sup> Ha'e nunga rupi aura Eli ro pygua kuery ojejavyague ndojao'iai ae aguã re, mymba e'ÿ vy mba'emo ra'yigue ha'e kuery ome'ë tei.

### *Eli pe Samuel oexa va'ekue omombe'uague*

<sup>15</sup> Ko'ëmba peve Samuel onheno oupy. Ha'e vy ma oipe'a SENHOR pegua oo rokë. Ha'e rami tei okyje teri Eli pe oexa va'ekue omombe'u aguã.

<sup>16</sup> Ha'e gui Eli oenoñ Samuel. Ha'e vy aipoe'i:

— Xera'y Samuel!

Ombovai:

— Apy ma ha'ã! — he'i.

<sup>17</sup> Ha'e ramo aipoe'i:

— Mba'e he'i tu SENHOR ijayvu vy? Ajerure renhomí e'ÿ aguã. Tove Nhanderuete ha'e oipotaa rami ete tojapo ndevy, xapy'a rei ijayvuague ha'e javi remombe'u porãmba e'ÿ rã.

<sup>18</sup> Ha'e ramo Samuel omombe'upa, mba'eve py ndoikuua uka e'ÿi. Ha'e rami rã Eli aipoe'i:

— SENHOR ae rima ra'e. Ha'e oipota va'e ae tojapo — he'i.

<sup>19</sup> Ha'e gui Samuel okakuaave tema ovu. Hexeve SENHOR oiko vy peteñve henda py ndoejai ijayvuague oaxa rive aguã rami.

<sup>20</sup> Ha'e rami rã Israel kuery ha'e javi, Dã guive Berseba peve ikuai va'e oikuaapa okuapy SENHOR pegua profeta Samuel oikoa.

<sup>21</sup> Siló py SENHOR ojekuaa uka ae tema Samuel pe, oayvu ombou guive.

## 4

### *Israel kuery re filisteu kuery ipo'akaague*

<sup>1</sup> Ha'e rami rã Samuel ayvu oendupaa Israel kuery ikuia rupi.

Ha'e gui ma Israel kuery oje'oipa filisteu kuery rovai opu'ã aguã. Ha'e rami vy Ebenézer tekua katy'i ijaty okuapy. Ha'e rã filisteu kuery ma Afeca katy'i ijaty okuapy.

<sup>2</sup> Filisteu kuery ma hyxy porãmba okuapy, Israel kuery reve joguero'a aguã oje'oi. Ha'e gui joguero'a okuapy py filisteu kuery omoingo axypa Israel kuery. Ha'e vy nhuñdy reia rupi ojukua okuapy quattro mil avakue Israel regua.

<sup>3</sup> Ha'e gui Israel kuery ijaty okuapyague py ojevypa ramo nhomongeta va'ety kuery aipoe'i:

— Mba'e re nda'u SENHOR nhanemoingo axy uka ange filisteu kuery renonde? Siló tetã gui jaru 'rãgue SENHOR guexeve guarã ojapo va'ekue ryru, nhanembyte ou vy nhanderovaigua kuery po gui nhanderepy aguã — he'i.

**4** Ha'e ramo heta va'e kuery ogueru ruka SENHOR ixondaro reta va'e anjo ipepo va'e ra'angaa ikuai va'e mbyte oĩ va'e ayvu ryru. Nhanderuete guexeve guarã ojapo va'ekue ryru oguerua py ma Eli ra'y kuery mokoõive ikuai, Hofni ha'e Finéias.

### *Hyru oipe'aa heravy, ha'e Hofni ha'e Finéias ojukaa okuapyague*

**5** Ha'e gui Israel kuery ijaty okuapya py SENHOR ayvu ryru oguerua jave ma ha'e kuery ha'e javi onhendu atã xapy'a okuapy. Ha'e ramo yvy jave rupi rai oendua.

**6** Ha'e kuery ov'y a reve ojapukai atã filisteu kuery oendu vy aipoe'i okuapy:

— Mba'exa tu ov'y a ete nhendu va'e hebreu kuery ijaty a py? — he'i. Ha'e vy mae oikuaa SENHOR ayvu ryru ijaty a py oguerua maa.

**7** Ha'e rami vy filisteu kuery okyjepa aipoe'i okuapy.

— Nhanderuete ramigua kuery ou ra'e ha'e kuery ijaty okuapya py — he'i. — Nda'evei ete nhandevy! Ha'e nunga oiko va'e'ŷ teri aŷ peve.

**8** Nda'evei ete nhandevy! Mava'e tu nhandereraa jepe 'rã Nhanderuete ramigua kuery ipo'akapa va'e gui? Mba'eta ha'e va'e Nhanderuete ramigua kuery ae ma Egito pygua kuery opa marâguia mba'eaxy py omoingo axy va'ekue teko a e'ŷa re ikuiai a py.

**9** Filisteu kuery, penembaraete ke ha'vy! Avakue ipy'a guaxukueve peiko, hebreu kuery pegua escravo nhandekuai e'ŷ aguã, ha'e kuery nhande-escravo ikuaiague rami e'ŷ! Avakue ipy'a guaxukueve nhandekuai reve jaje'oi joe nhapu'ã aguã! — he'i okuapy.

**10** Ha'e rami vy filisteu kuery joe opu'ã okuapy. Ha'e vy ombojexavai Israel kuery ramo peteñ-teñ onhamba ngoo katy. Israel kuery regua ikuai axypa, trinta mil avakue yvy rupigua ojukaa ramo.

**11** Oipe'aa avi heravy Nhanderuete ayvu ryru. Ojukaa avi Eli ra'y mokoõive, Hofni ha'e Finéias.

### *Eli omanoague*

**12** Ha'e va'e árave peteñ ava Benjamim regua hyxy okuapya mbyte gui onha ov'y vy ovaõ Siló tetã py. Oao xorokue reve ovaõ, yvy oakã re omombo reve.

**13** Ha'e va'e ovaõ jave Eli oguapy oiny guenda py, tape yvýry. Oma'ẽ oiny, Nhanderuete ayvu ryru re nda'evei vy ipy'a ryryipa rei guive. Ava va'e tetã py ovaõ vy omombe'upa ma rire tetã ha'e javi rupi hevovo rei xapy'a okuapy haxë vy.

**14** Haxë rei va'e Eli oendu vy oporandu:

— Mba'e nunga tevovo tu pova'e? — he'i ramo ava va'e ojapurave ouvy reve omombe'u Eli pe.

**15** Eli ma noventa e oito ma'etŷa oguerekha'e va'e jave py. Ndoexavei ae ma, oexa aguã nda'eveei ae va'e vy.

**16** Ha'e gui ava va'e aipoe'i Eli pe:

— Xee ma hyxy va'e gui aõ vy ange'i anha ajuvy kuri va'ekue — he'i.

Eli oporandu:

— Xera'y, mba'e nunga tu oiko ra'e?

**17** Imombe'ua ombovai:

— Filisteu renonde gui Israel kuery onhamba kuri. Nhande kuery mbyte rupi oiko nhandejukapaa. Nderay mokoõive, Hofni ha'e Finéias ojukaa avi. Nhanderuete ayvu ryru voi oipe'aa heravy — he'i.

**18** Nhanderuete ayvu ryru omombe'u ramove Eli guakykue katy ho'a guenda okë katy'i oĩ va'e gui. Oaju'y omopë vy omano vyvoi, tuja'i ete ha'e ipoyi guive vy. Quarenta ma'etŷ re ma Israel kuery re opena va'ekue.

**19** Ha'e gui ma ta'y Finéias ra'yxy omemby oikuavã rai'i va'e oendu avi omombe'u rã Nhanderuete ayvu ryru oipe'a heravyague ha'e ime ru ha'e ime omanoague. Ha'e nunga oendu vy onhea'ã xapy'a vy kyr'i va'e oikuavã'i oiny, omemby raxya oendu vy.

**20** Kunha va'e omano ta ramo kunhague ipytyvõa kuery aipoe'i okuapy:

— Ekyje eme, reikuavã'i ae ma ava'i — he'i.

Ha'e rami teĩ kunha va'e nombovai, ha'e rami ijayvua re ndojapyxaka potai.

<sup>21</sup> Va'eri op'i'a'i omboery Icabô,

— Israel kuery pegua hexakãmba va'ekue okanhy ra'e — he'i vy.

Ha'e rami ijayvu Nhanderuete ayvu ryru oipe'aa heravyague re, ime ru ha'e ime omanoague re guive.\*

<sup>22</sup> Aipoe'ive ju:

— Israel kuery pegua hexakãmba va'ekue okanhy ra'e, Nhanderuete ayvu ryru oipe'aa rã.

## 5

### *Dagom pegua opy hyru oĩjave guare*

<sup>1</sup> Ha'e gui Nhanderuete ayvu ryru ma filisteu kuery ogueraa Ebenézer tekaoa gui, ha'e Asdode tetã py oguerovaẽ.

<sup>2</sup> Ha'e py ma Nhanderuete ayvu ryru ogueraa vy Dagom ra'angaa oĩ oo py omoĩ, ta'angaa yvy'iry ae.

<sup>3</sup> Ha'e gui ko'ẽ ramo aje'ive'i reve Asdode pygua kuery ovypa vy oma'ẽ rã Dagom ra'angaa ho'a ma oupy ra'e, ngova yvy rami itui SENHOR ayvu ryru renonde. Ha'e ramo ojopy vy hi'aĩague py ju omopu'ã imo'amy.

<sup>4</sup> Ko'ẽ jevy aje'ive'i reve ovypa ju vy oma'ẽ rã Dagom ra'angaa ho'a ju oupy ra'e, ngova yvy rami ae ju itui SENHOR ayvu ryru renonde. Dagom akã ha'e ipo jovaive ojaya ma ra'e inony okẽ renda áry. Hete mbytekue rive ma ouve.

<sup>5</sup> Ha'e rami rire Dagom pegua sacerdote kuery ha'e ixupegua opy oike va'e rei ma ha'e va'e okẽ renda re nopyrõvei 'rã Asdode tetã py, aÿ peve.

<sup>6</sup> Ha'e gui Asdode pygua kuery rovai SENHOR opo omoĩ vy omoingo axy vaipa. Ombojexavai vy omomba'eaxypa tuguy rape mbopeupaa py, ha'e katy'i rupi ikuai va'e kuery guive.

<sup>7</sup> Ha'e rami rã avakue Asdode pygua ha'e nunga oexa vy aipoe'i okuapy:

— Nda'eveei nhanderekoa py Israel kuery ruete ayvu ryru opyta aguã. Mba'eta nhande'ary ma ipo ipoyi ete, nhande kuery ruete Dagom áry voi — he'i.

<sup>8</sup> Ha'e rami vy ayvu reraarã omondouka guekoa py omboatypa aguã filisteu kuery ruvixa ikuai va'e ha'e javi. Ha'e vy ha'e kuery pe aipoe'i okuapy:

— Mba'e nda'u jajapo 'rã Israel kuery ruete ayvu ryru re?

Ombovai:

— Peraa ju Israel kuery ruete ayvu ryru Gate tetã py, ha'e gui tetã nhavõ rupi toguerekoa — he'i ramo Gate tetã py ju ogueraa.

<sup>9</sup> Ayvu ryru ogueraa ma rire ha'e va'e tetã rovai ju SENHOR po oĩ. Ha'e ramo nda'eveipa rei okuapy, mba'eta ha'e va'e tetã py voi omomba'eaxypa yvyigueve ha'e yvatekueve voi. Ha'e kuery ha'e javi re oĩ tuguy rape mbopeupaa.

<sup>10</sup> Ha'e ramo Ecrom tetã py ju ogueraa Nhanderuete ayvu ryru. Teĩ ha'e py oguerovaẽ rã Ecrom pygua kuery ijayvu atã reve aipoe'i:

— Nhanda py ju oguerua ra'e Israel kuery ruete ayvu ryru. Nhande kuery ha'e javi ojukapaxe vy rima ogueru — he'i.

<sup>11</sup> Ha'e rami vy ayvu reraarã omondouka vy filisteu kuery ruvixa ikuai va'e omboaty ju aguã. Ha'e vy aipoe'i:

— Peraa uka ju apy gui Israel kuery ruete ayvu ryru, tojevy ju oĩague py ae, ore kuery ha'e javi orejukapa e'ŷ aguã — he'i. Mba'eta hetã ha'e javi rupi oiko manoa gui okyjepa rei va'e, ha'e py Nhanderuete po ombojexavai ete ramo.

<sup>12</sup> Mba'eta omano e'ŷ va'ekue re voi oĩ tuguy rape mbopeupaa. Ha'e ramo ha'e va'e tetã pygua kuery ojapukaia onhendu ovv yva peve.

\* <sup>4:21</sup> Tery Icabô ma “Okanhy ma hexakã va'e” 'ea.

## 6

*Filisteu kuery oyvy rovai katy hyru ogueraa ukaague*

<sup>1</sup> Sete jaxy re SENHOR ayvu ryru oĩ filisteu kuery yvy re.  
<sup>2</sup> Ha'e ramo ha'e kuery oenoĩmba sacerdote ha'e imba'ekuaa va'e kuery. Ha'e vy aipoe'i okuapy:

— Mba'e tu jajapo 'rã SENHOR ayvu ryru re? Pemombe'u marã rami vy pa oĩague katy ae rogueraa uka jevy aguã.

<sup>3</sup> Ha'e kuery ombovai:

— Ha'e gui Israel kuery ruete ayvu ryru peraa ukaxe vy peraa uka eme hyru rive. Ha'e kuery ruete oĩa katy peraa uka avi 'rã nhandereko vaia rekovia peme'ẽ va'e. Ha'e vy 'rãe pekuera, ha'e peikuaa mba'e re pa opo pende'áry gui ndoipe'ai teria — he'i.

<sup>4</sup> Ha'e ramo oporanduve ju okuapy:

— Mba'e nunga 'rã tu orerekvaia rekovia rome'ẽ?

Ha'e kuery ombovai:

— Filisteu kuery yvatekueve mbovy pa ikuia rami vy peme'ẽ 'rã peteĩ nhiruĩ tuguy rape mbopeupaa ra'angaa ha'e peteĩ nhiruĩ anguja ra'angaa ouro guigua meme, mba'eta tekoaxy pende'áry ha'e yvatekueve ikuai va'e áry ou va'ekue ma peteĩ'i regua.

<sup>5</sup> Pejapo ke pendekoaxy ra'angaa ha'e anguja ra'angaa guive Israel kuery ruete pemboete aguã, mba'eta anguja heta ikuai nhandeyvy jave rupi ombovaipa va'e. Xapy'a rei rã pende'áry gui oipe'a nho 'rã opo, penderuete ramigua ha'e pendeyvy ha'e javi áry gui guive.

<sup>6</sup> Mba'eta mba'e re rã'vy peneakã ratã Faraó ha'e Egito pygua kuery ha'e javi inhakã ratãague rami? Mba'eta ha'e va'e minha oguerekaxy rire omondoukapa raka'e, oeja ha'e kuery oje'oipa aguã.

<sup>7</sup> Ha'e gui aŷ ma pejapo peteĩ karóxa ipyau va'e heraarã. Pejopy avi mokoĩ vaka ta'y'i va'e, canga hexe omoĩby e'ŷ teri va'e, ha'e pemoĩ karóxa re. Ha'e rã ta'y'i ma peraa uka vy pemboty uka 'rã hoo py.

<sup>8</sup> Ha'e vy mae ma SENHOR ayvu ryru peupi vy pemoĩ karóxa py. Ijyke re hyru mboae oĩ va'e py ma pemoĩ ouro gui mba'emo ra'angaa pejapo va'ekue, pendeko vaia rekovia peme'ẽ va'e. Ha'e gui ma tove too.

<sup>9</sup> Pexa pota porã ke. Xapy'a rei Bete-Semes katy tape oo va'e rupi ri oo ramo jaikuua 'rã ha'e ae nhanemoingo axyare oikoa. Ha'e rã ha'e katy e'ŷ ri oo ramo jaikuua 'rã ipo e'ŷ ae nhanemoingo axyare oikoa, ha'e xapy'a-py'a py rive nhandere oiko va'e ae — he'i.

*Bete-Semes py hyru ovaẽague*

<sup>10</sup> Ha'e rami ae ha'e va'e avakue ojapo. Ha'e vy mokoĩ vaka ta'y'i va'e ogueraa vy omoĩ karóxa re. Ha'e rã ta'y'i ma ombovai hoo py.

<sup>11</sup> Karóxa py omoĩ SENHOR ayvu ryru. Omoĩ avi hyru py anguja ra'angaa ouro guigua ha'e tuguy rape mbopeupaa ra'angaa guive.

<sup>12</sup> Ha'e gui ma vaka oguata oje'oivy Bete-Semes katy ma voi. Oguataa rupi haxẽ jogueravy va'eri ha'e va'e tape rupi ae tema oo, opia e'ŷ re oiporu kuaa katy neĩ oiporu kuaa e'ŷa katy. Hakykue rupi oje'oi filisteu yvatekueve, Bete-Semes tetã katy'i peve oo.

<sup>13</sup> Ha'e va'e jave py ma Bete-Semes pygua kuery trigo omono'õ okuapy yvyugua rupi. Ha'e gui oma'ẽ-ma'ẽ vy oexa ayvu ryru oguerua oiny rã. Oexa vy ov'y'a pavẽ.

<sup>14</sup> Karóxa ma Bete-Semes pygua Josué yvy peve oguerua. Ha'e py ae opyta peteĩ ita tuvixa va'e ituia py. Ha'e ramo karóxa regua yvyrape ikuai va'e omboipa vy omoendy. Tata ojapo va'e áry oapy okuapy vaka, SENHOR pe ome'ẽ vy.

<sup>15</sup> Levita kuery ma SENHOR ayvu ryru omboguejy, ijyvýry hyru ouro gui ojapo pyre oĩ va'e voi. Ha'e rami vy ita tuvixa va'e áry ju omoĩ. Ha'e va'e árave Bete-Semes pygua avakue mba'emo ome'ẽ avi SENHOR pe, mymba oapy reve.

<sup>16</sup> Ha'e nunga ha'e javi peteñ nhiruñ filisteu yvatekueve va'e oexa ma vy ojevypa ju Ecrom tetã katy ha'e va'e árave.

<sup>17</sup> Ha'e gui tuguy rape mbopeupaa ra'angaa ouro guigua filisteu kuery gueko vaia rekovia SENHOR pe ogueru ruka va'ekue ma pova'e: Asdode tetã regua peteñ, ha'e Gaza, Gate, Asquelom ha'e Ecrom tetã regua avi.

<sup>18</sup> Anguja ra'angaa ouro guigua ha'e rami ae avi filisteu kuery guetã mbovy pa ikuaiia rami vy ogueru ruka, mba'eta tetã peteñ nhiruñ ikuai va'e ma yvatekueve peteñ-teñ openaa, ikorapa va'e ha'e ha'e katy'i tekaoa ikuai va'e guive. Ha'e gui ita tuvixa va'e hi'áry SENHOR ayvu ryru omoñague va'e ma aÿ peve oime Bete-Semes pygua Josué mba'etygue py.

### *Quiriate-Jearim peve ayvu ryru ogueraa ague*

<sup>19</sup> Bete-Semes pygua avakue ayvu ryrupy katy oma'ë ramo SENHOR omomba'eaxypa. Ha'e kuery regua cinqüenta mil e setenta ojuka. Ha'e ramo heta va'e kuery ojae'opa okuapy ha'e kuery va'e regua SENHOR ojuka reta ramo.

<sup>20</sup> Ha'e rami vy Bete-Semes pygua kuery avakue aipoe'i okuapy:

— Mava'e nda'u ha'eve SENHOR renonde oï aguã? Mba'eta Nhanderuete ma iky'a e'ÿ va'e oiko. Mava'e kuery rekaoa katy ju 'rã jaraa uka nhanderekaoa gui? — he'i.

<sup>21</sup> Ha'e nunga rupi Quiriate-Jearim pygua kuery pe omondouka ayvu reraarã. Ha'e vy aipoe'i:

— Filisteu kuery ogueru ruka ju ma SENHOR ayvu ryru. Peju ha'vy, peraa peñ kuerya py.

## 7

<sup>1</sup> Ha'e ramo Quiriate-Jearim pygua avakue ou vy SENHOR ayvu ryru ogueraa Abinadabe ro py, yvy'á áry. Ha'e rami vy ta'y Eleazar omoñ SENHOR ayvu ryru re opena aguã.

### *Ojeko rerova jevy okuapy aguã re Samuel ijayvuague*

<sup>2</sup> Ha'e va'e ára guive SENHOR ayvu ryru opyta Quiriate-Jearim py. Mbovy ára re rei e'ÿ oaxa oiny ha'e py, vinte ma'etÿ oaxapa peve. Ha'e nunga re Israel kuery ha'e javi ojae'o okuapy SENHOR renonde.

<sup>3</sup> Ha'e rami rã Samuel ijayvu Israel ro pygua kuery ha'e javi pe. Ha'e vy aipoe'i:

— Pendepy'a ha'e javi py ri SENHOR pe pejevy vy peipe'a ha'vy penembyte gui Nhanderuete ramigua rive pereko va'e, Astarote ra'angaa ikuai va'e voi. Pereko katu pendepy'a SENHOR peguarã, ha'e ixupe anho peiko. Ha'e rami ri ramo pendereraa jepe 'rã filisteu kuery po gui — he'i.

<sup>4</sup> Ha'e ramo Israel kuery ombyte gui oipe'a Baal ha'e Astarote ra'angaa oguerekoo va'ekue ha'e javi, ha'e SENHOR pe anho ju ikuai.

### *Filisteu kuery nda'ipo'akaveiague*

<sup>5</sup> Samuel aipoe'ive ju:

— Israel kuery ha'e javi tonhemboaty Mispa py. Ha'e rã xee ma SENHOR pe anhembo'e 'rã pendere — he'i.

<sup>6</sup> Ha'e ramo Mispa py onhemboaty okuapy vy yy oguenoë vy SENHOR renonde onhoë, okaru e'ÿ re ikuai vy ha'e va'e ára. Ha'e py aipoe'i:

— Jajejavý SENHOR rovai — he'i okuapy. Israel kuery Mispa py ikuai va'e re ma Samuel ae opena.

<sup>7</sup> Mispa py Israel kuery onhemboaty okuapya omombe'ua rã filisteu kuery oendu vy yvatekueve ikuai va'e reve ou Israel kuery rovai. Ha'e nunga Israel kuery oendu vy okyjepa rei okuapy filisteu kuery gui.

<sup>8</sup> Ha'e rami vy Israel kuery aipoe'i okuapy Samuel pe:

— Epytu'u eme ta'vy SENHOR Nhanderuete pe orere rejapukaia gui, filisteu kuery po gui orerepy aguã — he'i.

<sup>9</sup> Ha'e gui Samuel peteī vexa'i okambu teri va'e ogueraa vy ojuka, ha'e SENHOR pe ome'ẽ oapy reve. SENHOR pe Samuel ojapukai Israel kuery re. Ha'e ramo ombovai.

<sup>10</sup> Samuel mymba ome'ẽ jave py filisteu kuery ovaẽ Israel kuery reve joguero'a aguã. Ha'e rami teī ha'e va'e ára SENHOR hyapu opororo ratã reve filisteu kuery áry rupi. Ha'e rami vy omongyjea py rive oitypa, Israel kuery renonde.

<sup>11</sup> Israel regua avakue Mispa gui oje'oi filisteu kuery rakykue. Ha'e rami vy oity Bete-Car katy'i yvy'ã guy oĩ va'e peve.

<sup>12</sup> Ha'e gui Samuel peteī ita ojopy vy omopu'ã Mispa ha'e Sem mbyte py. Ha'e va'e omboery Ebenézer. Po va'e ma "Apy peve SENHOR nhaneptytvõ" he'ia.

<sup>13</sup> Ha'e rami vy filisteu kuery oitypaa rire ndouwei Israel kuery yvy re, Samuel oikovea ja ha'e kuery rovai SENHOR po oĩ rã.

<sup>14</sup> Ha'e gui tetã ikuai va'e re filisteu kuery ipo'akaague va'e ma Israel kuery po py ju omboaxapa, Ecrom guive Gate peve. Ha'e katy'i yvy itui va'e voi Israel kuery oipe'a filisteu kuery po gui. Amorreuu kuery voi ndajoguero'avei ranhe Israel kuery reve.

<sup>15</sup> Samuel oikovea pukukue re opena Israel kuery re.

<sup>16</sup> Ma'etõa nhavõ ojeapa 'rã ovy Betel, Gilgal ha'e Mispa tetã rupi. Ha'e va'e tekoa ha'e javi rupi oikuaa pota Israel kuery re.

<sup>17</sup> Ramá tetã py ojevy kuerei 'rã, ha'e py ae hoo oĩ ramo. Ha'e py voi Israel kuery re opena, ha'e peteī altar SENHOR peguarã ojapo avi ha'e py.

## 8

### *Nguvixaverã re Israel kuery ojerure okuapyague*

<sup>1</sup> Samuel tuja'i ma vy gua'y kuery ju omoĩ Israel kuery re opena aguã.

<sup>2</sup> Ta'y ypy rery ma Joel, ha'e rire jevygua ma Abias. Ha'e kuery ma Berseba py opena.

<sup>3</sup> Ha'e rami teī Samuel ra'y kuery ma nguu oikoague rami e'ŷ ikuai. Peráta re rive nda'eveive va'e vy mba'emo ome'ẽa rã ojopy 'rã ha'eve e'ŷa rami joguerekoo aguã.

<sup>4</sup> Ha'e ramo Israel regua nhomoneta va'ety kuery onhemboaty vy oupa okuapy Ramá py Samuel oĩa py.

<sup>5</sup> Ha'e vy aipoe'i okuapy ixupe:

— Ne'exa, ndee ndetuja'i, ha'e nderay kuery ma reikoague rami e'ŷ ikuai. Ha'e nunga rupi aŷ ejou peteī oreruvixaverã orere opena va'erã, yvy regua ha'e javi oguerekoo rami — he'i.

<sup>6</sup> Ha'e rami ijayvu rã Samuel oendu vy ndojou porãi, "Ejou oreruvixaverã orere opena va'erã", he'i ramo. Ha'e rami vy Samuel oporandu oiny SENHOR pe.

<sup>7</sup> Ha'e gui SENHOR aipoe'i Samuel pe:

— Endu pota heta va'e kuery ijayvua ha'e ndevy ojerurea ha'e javi re, mba'eta ndee e'ŷ ndereja, ha'e rã xee anho ndaxepotai ha'e kuery re apena aguã.

<sup>8</sup> Ha'e kuery Egito yvy gui anoẽmba jave ma voi rire aŷ peve ikuai tema ha'e rami. Mba'eta nguuete mboae pe ikuai vy xereja jepi okuapy. Ha'e rami ae ju ojapo ndere voi.

<sup>9</sup> Ha'e rami teī aŷ ma endu pota ha'e kuery ijayvua re. Ha'e rami avi ndeayvu atã 'rã ha'e kuery pe, emombe'u porãve marã rami pa huvixave oĩ va'e oguerekoo 'rãa — he'i.

<sup>10</sup> Ha'e ramo heta va'e kuery nguviixerã re ojerure rire ha'e kuery pe Samuel omombe'upa SENHOR ijayvuague.

<sup>11</sup> Ha'e vy aipoe'i:

— Po rami ma huvixave oĩ va'e pendererekoo 'rã. Ha'e va'e ma penderay kuery oipe'a vy omomba'epo 'rã karóxa py ha'e kavaju áry guarã, ha'e karóxa renonde onha va'erã.

<sup>12</sup> Ha'e kuery va'e regua omoĩ 'rã mil re opena va'erã, ha'e'ŷ vy cinqüenta va'e re mba'e. Amboae kuery ma omiba'ety rupi 'rã omomba'epo, mba'emo ra'yigue omono'õa py. Ha'e rã amboae kuery ju ma ojapo uka 'rã tembiporu joe opu'ãa pyguarã, ha'e'ŷ vy karóxa reguarã.

<sup>13</sup> Penderajy kuery voi ogueraa 'rā heakuā porā va'e apoarā, tembi'u mbojyarā ha'e mbojape apoarā.

<sup>14</sup> Ojeupe ae oipe'a 'rā penemba'ety iporāvea, uvaty ha'e oliveira ty gui. Guembiguai kuery pe ju 'rā omboaxa.

<sup>15</sup> Mba'emo ra'yīgue ha'e uva pemono'ō va'ekue gui ojopy 'rā dízimo ojeupe ae, ojeupegua opena va'e ha'e guembiguai kuery pe omboaxapa aguā.

<sup>16</sup> Ogueraa avi 'rā penerembiguai avakue ha'e kunhague, ha'e kunumigue iporāve va'e, penerymba mburika'i kuery voi. Ha'e vy omomba'eapo 'rā mba'emo ojapo ukaa py.

<sup>17</sup> Penerymba vexa'i kuery gui voi ojopy 'rā dízimo, ha'e penemoingo 'rā guembiguairā.

<sup>18</sup> Ha'e rami rā ha'e va'e ára pejapukai 'rā SENHOR pe penderuvixarā peiporavo uka va'ekue káuxa. Ha'e rami teī ha'e va'e ára SENHOR noendui 'rā pejapukaia – he'i.

<sup>19</sup> Ha'e rami Samuel ijayvu rā heta va'e kuery noendu potai. Ha'e vy aipoe'i okuapy:

– Any rima! Roguerekko nho 'rā huvixave orere opena va'erā,

<sup>20</sup> yvy regua kuery ha'e javi ikuiaia rami ore kuery voi orekuai aguā. Oreruvixave ae 'rā opena orere, ha'e ore kuery renonde 'rā oo joe ropu'ā aguā katy – he'i okuapy.

<sup>21</sup> Ha'e rami heta va'e kuery ijayvua Samuel oendu vy SENHOR pe ju omombe'u.

<sup>22</sup> Ha'e ramo Samuel pe SENHOR ombovai vy

– Endu ke ha'e kuery ijayvua, ha'e emoī huvixaverā teī – he'i.

Ha'e rami rā Israel kuery pe ju Samuel aipoe'i:

– Pejevy ju peteī-teī penderekoa katy.

## 9

### *Mburika'i kanhygue reka vy Saul oo vy Samuel reve joexaague*

<sup>1</sup> Peteī ava oiko oguerekopa va'e Benjamim regua Quis hery va'e. Ha'e va'e ma Abiel ra'y, Abiel ma Zeror ra'y, Zeror ma Becorate ra'y, Becorate ma Afia ra'y.

<sup>2</sup> Ha'e va'e ma peteī gua'y oguerekko Saul hery va'e. Ha'e va'e kunumi ma iporāve va'e. Israel kuery regua nda'ipoi ixugui iporāve va'e. Heta va'e kuery ha'e javi gui ipukuve va'e, joaxi'y gui oaxa reive va'e.

<sup>3</sup> Ha'e gui Saul ru Quis rymba kuery mburika okanhymba. Ha'e ramo gua'y Saul pe Quis aipoe'i:

– Eraa peteī kunumi va'e nderupive guarā. Peiko katu, ha'e tapeo mburika'i peka vy – he'i.

<sup>4</sup> Ha'e ramo oo vy oaxa jogueravy Efraim yvy'ā reia ha'e Salisa yvy rupi teī ndojoui. Ha'e va'e rire Saalim yvy katy ju oo va'eri ha'e py voi nda'ipoi avi. Benjamim yvy rupi ju oaxa teī ndojoui ae tema.

<sup>5</sup> Ha'e gui ma Zufe yvy re ha'e kuery ovaē ramo Saul aipoe'i kunumi hupive oo va'e pe:  
– Eju, jajevy ju. Nda'evei xeru guymba kuery mburika'i re iporiaua gui nhandere ju iporiauve aguā.

<sup>6</sup> Kunumi va'e ombovai:

– Ha'e rami avi kova'e tetā py oiko peteī ava Nhanderuete remimbo'e omboetevepy. Ha'e va'e ijayvua ma oiko 'rāe. Jaa mba'e ha'e py. Xapy'a rei ha'e oexa uka 'rā tape jaa aguā – he'i.

<sup>7</sup> Ha'e ramo Saul aipoe'ive ju kunumi va'e pe:

– Ha'e rami avi ha'e va'e oīa py jaa vy mba'e nunga ta'vy jarao 'rā ixupe? Mba'eta nhandevoko py mbojape jareko va'ekue opa ma. Nda'ipoi teve ava Nhanderuete remimbo'e pe nhame'ē va'erā. Mba'e tu jareko?

<sup>8</sup> Kunumi va'e ombovai Saul pe:

– Apy ko arekove teri peteī hatā'i kyri'i va'e prata guigua. Ha'e va'e ae 'rā ame'ē ava Nhanderuete remimbo'e pe, nhandevy tape oexa uka aguā – he'i.

<sup>9</sup> (Ymave rupi Israel yvy re ma Nhanderuete pe oporandu uka vy oo va'e "Peju, jaje'oi imba'ekuaa va'e oña py", he'i 'rā. Aŷ "Profeta" ja'ea va'e pe ma yma rupi "Imba'ekuaa va'e" 'ea raka'e.)

<sup>10</sup> Ha'e gui Saul aipoe'i kunumi va'e pe:

— Aipo'rea ma ha'eve va'e. Eju ha'vy, jaa. Ha'e rami vy oo tema tetā Nhanderuete remimbo'e oña katy.

<sup>11</sup> Tetā py ovaē rai'i ma vy ovaexī kunhataīgue yy re oẽ okuapy va'e. Ha'e vy oporandu ha'e kuery pe:

— Apy nda'u oĩ 'rā ri imba'ekuaa va'e?

<sup>12</sup> Ha'e kuery ombovai:

— Oĩ rima. Ma'ě, peove ma penerenonde. Pejapurave'i ke, mba'eta ange ou kuri tetā py. Mba'eta apygua kuery oo 'rā kuri yvy'ā re Nhanderuete pe mba'emo ome'ě aguā.

<sup>13</sup> Tetā py pevaē vyve pejou 'rā, yvy'ā katy okaru aguā oo e'ŷ mbove'i. Mba'eta apygua kuery ndokarui 'rā ha'e ovaē e'ŷa ja, mba'emo ome'ě va'erā oguereko va'e ogueroayvu porā ranhe e'ŷa ja. Ha'e va'e rire mae ma oenoī uka pyre kuery okaru 'rā okuapy. Tapeo ha'vy aŷ'i ma voi pejou aguā — he'i.

<sup>14</sup> Ha'e ramo tetā katy oo. Ovaē ramove Samuel ae oẽ ouvy yvy'ā katy oo aguā. Ha'e rami vy nhovaexī okuapy.

<sup>15</sup> Peteī ára teri Saul ovaē aguā oata jave SENHOR oikuaa uka ma voi Samuel pe. Ha'e vy aipoe'i:

<sup>16</sup> "Ko'ě rā kova'e hora ndea py ambou 'rā peteī ava Benjamim yvy guigua. Ha'e va'e ma azeite reikyty reve remoī 'rā xevygua Israel kuery ruvixarā. Ha'e ma ogueraa jepe 'rā xevygua kuery filisteu kuery po gui. Mba'eta xee aendu xevygua kuery ojerure rā, ha'e kuery ojapukaia xea peve onhendu ramo", he'i va'ekue.

<sup>17</sup> Ha'e gui ma Samuel oexa Saul ramove SENHOR aipoe'i ixupe:

— Pee ma ava aipoa'eague. Evoko va'e ae ma opena 'rā xevygua kuery re — he'i.

<sup>18</sup> Okē py Saul Samuel re onhemboja vy aipoe'i:

— Ajerure ndevy, rexu uka aguā mamo pa imba'ekuaa va'e ro oña.

<sup>19</sup> Samuel ombovai vy aipoe'i Saul pe:

— Xee ae ma imba'ekuaa va'e. Tereo xerenonde yvy'ā katy. Kova'e ára ma jakaru 'rā xereve. Ko'ě rā aje'ivekue ma romondouka ju 'rā, ha'e amombe'upa 'rā ndepy'a re oĩ va'e ha'e javi.

<sup>20</sup> Ndepy'a vai eme guive mboapy ára re mburika'i okanhy va'ekue re, mba'eta ojoua ma. Mava'e peguarā tu oĩ ovareve va'e Israel ha'e javi re, ndevy e'ŷ vy, ha'e nderu ro pygua kuery ha'e javi pe e'ŷ teve? — he'i.

<sup>21</sup> Ha'e ramo Saul ombovai:

— Ha'e rami avi xee ma Benjamim regua Israel kuery ikuai va'e gui yvyīve va'e, xero pygua kuery voi Benjamim regua gui ore'yvyīve va'e orekuai. Mba'e re tu ha'vy ha'e rami ndeayvu? — he'i.

<sup>22</sup> Ha'e gui Samuel ogueraa Saul ha'e hexeveguia kunumi va'e, ha'e vy ogueroike opy mboae'i okaruaty py. Ha'e kuery pe ome'ě henda iporāve va'e oenoī uka va'ekue mbyte py, trinta rivyvyi ikuaiia py.

<sup>23</sup> Tembi'u mbojya pe Samuel aipoe'i:

— Eru ke ndevy tembi'u ame'ě va'ekue, "Emoī porā ndea py", ha'eague.

<sup>24</sup> Ha'e ramo tembi'u mbojya ma xo'o 'ugue hexegua ha'e javi reve ogueru vy Saul renonde omoī. Samuel aipoe'i:

— Ne'exa, upe va'e ma amoī porā va'ekue. Ejopy ke, he'u, mba'eta ndevy pe ae amoī porā kova'e hora guarā, "Penoī ukapa apygua kuery", ha'e va'ekue guive — he'i. Ha'e ramo Samuel reve Saul okaru ha'e va'e ára.

<sup>25</sup> Ha'e gui yvy'ã gui oguejy jogueruvy vy tetã re ju ovaẽ rire Samuel ijayvu oiny Saul reve ngoo áry.

<sup>26</sup> Ko'ẽmba rai jave ko'ẽ mbija oẽ jekuaa ouvy ramove Samuel ovy vy onhenduka Saul hoo áry okea py.\* Ha'e vy aipoe'i:

— Evy ke. Xee aa 'rã ndereve romondouka aguã — he'i ramo Saul ovy vy jogueraa mokoõve, Samuel reve.

<sup>27</sup> Tetã apy katy ha'e kuery oguejy jogueravy jave Samuel aipoe'i Saul pe:

— Aipo're kunumi va'e pe nhanerenonde oo aguã re. Ha'e rã ndee ma ha'e oo rire earõve'i ke, ndevy amombe'u aguã Nhanderuete ijayvuague.

## 10

### *Israel kuery ruvixarã Saul re Samuel azete onhoẽague*

<sup>1</sup> Ha'e gui peteĩ ryru azete Samuel oguenoẽ vy onhoẽ Saul akã re. Oayvu vy aipoe'i:

— SENHOR ae ndere onhoẽ uka azete ojeupeua Israel kuery ruvixa reiko aguã.

<sup>2</sup> Ha'e gui xea gui kurive reo vy rexa 'rã mokoõ avakue Raquel ojatyague katy'i, Benjamim yvy re Zelza py. Ha'e va'e kuery aipoe'i 'rã ndevy: "Ojoua ju ma mburika'i peka peikovy va'e. Ha'e gui aÿ ma nderu mburika'i re nda'ipy'a vaivei ma, pendere ju iporiau oikovy. Ha'e rami vy ojeupe ae 'Mba'e 'rã tu ajapo xera'y ajou aguã?" he'i."

<sup>3</sup> Ha'e gui peove'i vy pevaẽ 'rã Tabor katy'i yvyra carvalho hi'aĩ va'e py. Ha'e py penerovaexi 'rã jogueruvy mboapy avakue Betel py Nhanderuete omboete vy oje'oi va'e. Peteĩ ma omondyi 'rã heravy mboapy kavara. Amboae ma mboapy mbojape he'ẽ va'e 'rã ogueraa. Ha'e rã amboae ju ma peteĩ ryru ipire guigua py 'rã ogueraa vinho.

<sup>4</sup> Ha'e kuery ma ndevy oxarura ma vy ndevy ome'ẽ 'rã mokoõ mbojape. Ha'e va'e ma rejopy 'rã ipo gui.

<sup>5</sup> Ha'e gui peove 'rã Gibeá-Eloim katy. Ha'e py ma oĩ filisteu regua xondaro kuery ijaty okuapya. Tetã py pevaẽ ma vy peovaexi 'rã profeta kuery yvy'ã katy gui ou va'e. Ha'e kuery renonde ou 'rã okuapy mbaraka revegua, angu'a pu, mimby ha'e mba'epu ixã reta va'e revegua. Ayvu omombe'u reve 'rã ou.

<sup>6</sup> Ha'e gui ndere voi SENHOR Nhe'ẽ oĩ 'rã. Ha'e ramo ayvu remombe'u avi 'rã ha'e kuery reve, amboae ava rami nemoingo ramo.

<sup>7</sup> Ha'e nunga ndere oiko ramo ejapo reipota va'e ha'e py, mba'eta ndereve Nhanderuete oiko ramo.

<sup>8</sup> Ha'e gui ndee ranhe xegui reo 'rã Gilgal py. Ne'exa, xee voi aa avi 'rã reĩa py, mymba aapy reve ame'ẽ aguã, peteĩ rami ikuai aguã regua voi. Sete ára re xerarõ 'rã ndea py aju peve. Ha'e ramo ma ndevy amombe'u porã 'rã rejapo va'erã — he'i.

### *Profeta kuery mbyte Saul oikoague*

<sup>9</sup> Saul oo ta vy Samuel-a katy ojere oxarura aguã. Ha'e ramove Nhanderuete oguerova ipy'a. Ha'e gui ha'e va'e árave ha'e nunga ha'e javi oiko ikuua ukaarã.

<sup>10</sup> Ha'e gui Gibeá py ha'e kuery ovaẽ jogueravy ramo profeta kuery oẽ ouvy ovaexi aguã. Saul re Nhanderuete Nhe'ẽ onhemonde ramo ha'e voi ayvu omombe'u avi ha'e kuery mbyte.

<sup>11</sup> Yma guive oexa va'ety kuery ha'e javi ma profeta kuery mbyte ayvu omombe'u avi rã oexa vy peteĩ-teĩ aipoe'i okuapy joupe-upe:

— Mba'e nunga tu oiko Quis ra'y re? Saul voi nda'u profeta kuery regua avi oiko?

<sup>12</sup> Ha'e rã peteĩ ava ombovai:

— Ha'e rami avi mava'e ha'vy amboae kuery ru? — he'i. Ha'e nunga rupi aipo'ea va'ety: "Saul voi nda'u profeta kuery regua avi oiko?"

<sup>13</sup> Saul ayvu omombe'upa ma rire yvy'ã katy ju oo.

\* <sup>9:26</sup> Ha'e kuery ro ao'ia ma pyrõa rami ae ijoja rei va'e hiny, hi'áry ha'e kuery oke, e'ŷ vy mba'emo ojapo aguã ha'eve va'e.

<sup>14</sup> Ha'e gui Saul tuty oporandu ixupe, hexeveguá kunumi va'e pe guive:

— Marā katy tu peo ra'e?

Ombovai:

— Mburika'i reka vy roo teī ndorojou reguai vy roove ju Samuel oña py – he'i.

<sup>15</sup> Ha'e ramo Saul tuty aipoe'i:

— Ajerure ndevy, emombe'u ke xevy mba'e he'i tu Samuel pendevy?

<sup>16</sup> Saul ombovai otuty pe:

— Orevy omombe'u mburika'i ojoua jevyague rive – he'i. Nomombe'u porā potai huvixa oī aguā re Samuel ijayvuague.

### *Saul huvixarā oīague*

<sup>17</sup> Ha'e gui Mispa py Samuel oī teria py omboatypa SENHOR pegua kuery.

<sup>18</sup> Ha'e vy aipoe'i Israel kuery pe:

— Po rami SENHOR Israel kuery ruete ijayvu: “Xee ma Israel kuery anoēmba va'ekue Egito yvy gui. Egito pygua kuery po gui araa jepé, huvixa ikuai va'e imbojexavaia gui guive.”

<sup>19</sup> Ha'e rami teī aŷ ma pejapa Penderuete mba'emo vai py pejexavaia gui pendereraa jepé va'ekue. Ha'e vy aipopeje: “Any! Emoī peteī huvixave orere opena va'erā”, peje. Ha'e gui aŷ SENHOR renonde pendekuai, penderegua ikuai va'e ha'e javi, ha'e mil jevy-jevy pendekuai va'e reve – he'i.

<sup>20</sup> Ha'e javi regua Samuel omboatypa rire xortea py Benjamim regua oiporavoa oikuua ukaa.

<sup>21</sup> Ha'e gui Benjamim regua kuery peteī-teī ro pygua ikuai va'e oguerupa rā oikuua ukaa va'e ma Matri ro pygua kuery. Ha'e va'e kuery gui ju Quis ra'y Saul oikuua ukaa. Ha'e rami teī oeka vy ndojouai.

<sup>22</sup> Ha'e ramo SENHOR pe ju oporandu Saul pa ou ra'ea re. Ha'e ramo SENHOR ombovai vy

— Upe py ae ma oī, mba'e rei-rei mbyte py onhemi oiny – he'i.

<sup>23</sup> Ha'e ramo onha oje'oivy vy ogueru ha'e gui. Ha'e ramo heta va'e kuery mbyte hi'aīa py pavē gui ipukuve ho'amý joaxi'y gui oaxa reive va'e.

<sup>24</sup> Ha'e gui Samuel aipoe'i heta va'e kuery pe:

— Pexa ma pa SENHOR oiporavo va'ekue? Nhande kuery va'e regua amboae ndoikoi ae ha'e ramigua ete'i – he'i ramo heta va'e kuery ha'e javi ojapukai atā reve

— Toikove riae nhanderuvixa! – he'i okuapy.

<sup>25</sup> Heta va'e kuery pe Samuel omombe'u porāve huvixa ikuai va'e joguerekó aguā. Ha'e nunga peteī kuaxia re ombopara vy omoī porā SENHOR renonde. Ha'e rami vy Samuel omondoukapa heta va'e kuery peteī-teī hoo katy.

<sup>26</sup> Saul voi oo avi ngoo katy Gibeá py. Hupive heta oje'oi avi avakue ipy'a Nhanderuete oguerovaague va'e kuery.

<sup>27</sup> Ha'e rā nhe'ē vai ra'y kuery ma aipoe'i okuapy:

— Mba'eda 'rā ha'e va'e ava nhandereraa jepé? – he'i. Ha'e rami vy ombojaru rei okuapy, mba'eve ndoguerui guive ixupe ome'ē va'erā. Ha'e rami teī Saul ma oendu rive.

## 11

### *Amom pygua kuery re Saul ipo'akaague*

<sup>1</sup> Ha'e gui Amom pygua Naás opu'ā ovy vy ojoko Jabel-Gileade tetā. Ha'e ramo Naás pe Jabel pygua avakue aipoe'i okuapy:

— Ejapo ke orererekó porā aguā regua, ha'e ramo ndevy pe orekuai 'rā – he'i.

<sup>2</sup> Ha'e rami teī Amom pygua Naás ombovai:

— Ajapo 'rā ri teī penderexa peiporu kuaa regua re amombupa avi 'rā – he'i Israel kuery ha'e javi omoximbaxe vy.

<sup>3</sup> Ha'e ramo Jabel pygua nhomongeta va'ety kuery aipoe'i:

— Ha'e rami rā ma earō ranhe sete ára ayvu mombe'uarā romondouka aguā Israel ha'e javi rupi. Ha'e gui xapy'a rei orerepyarā nda'ipoai ramo ma rojejopy ukapa 'rā ndevy — he'i okuapy.

<sup>4</sup> Ha'e gui Saul rekao Gibeá py ayvu mombe'ua kuery ovaē vy ha'e pygua kuery pe omombe'u oiko va'ekue. Ha'e ramo ha'e kuery ojae'o atā okuapy.

<sup>5</sup> Ha'e jave py ma Saul nhuñdy rupi vaka kuery re openaa gui ojevy vy oporandu:

— Mba'e tu ha'e kuery oguereko ha'e rami ete ojae'o okuapy aguā? — he'i ramo ixupe omombe'u Jabel pygua avakue ijayvuague.

<sup>6</sup> Ha'e rami ijayvu rā Saul oendu ramo hexe oī Nhanderuete Nhe'ē. Ha'e ramo oendu ipoxy raxaa.

<sup>7</sup> Ha'e rami vy mokoī toro ojuka ha'e ombo'ipa vy ogueraa uka Israel yvy regua ha'e javi pe. Ayvu mombe'ua kuery heraa va'e pe aipoe'i uka:

— Saul ha'e Samuel oipotaa rami amongue nda'ikuai ramo nami ae 'rā ojapoa hymba toro re — he'i uka.

Ha'e ramo heta va'e kuery SENHOR gui okyjea oendu vy peteī ava ramo oupa.

<sup>8</sup> Bezeque py ovaēa py oipapaa rā Israel kuery va'e regua ma trezentos mil, ha'e gui Judá guigua ma trinta mil avakue ju ikuai.

<sup>9</sup> Ayvu mombe'ua kuery ou va'ekue pe ha'e kuery aipoe'i:

— Po rami 'rā aipopeje Jabel-Gileade pygua kuery pe: “Ko'ē rā kuaray ojope'i ramove penderepya 'rā”, peje.

Ha'e ramo ayvu mombe'ua kuery oo vy omombe'u okuapy Jabel pygua kuery pe.

Ha'e rami rā ha'e kuery ovv'apa vy

<sup>10</sup> Amom pygua kuery pe ju aipoe'i:

— Ko'ē rā rojejopy ukapa 'rā pendevy. Ha'e ramo ma peipotaa rami oreapo teī ha'eve — he'i okuapy.

<sup>11</sup> Ha'e gui ko'ē jevy Saul omboja'o ngupivegua kuery mboapy henda py. Ha'e ramo aje'ive'i reve ha'e kuery Amom pygua kuery ikuia mbyte oo vy ojukapa rai'i, kuaray akuve peve. Okuave va'e joa rupi e'ŷ-e'ŷ onha vy ndopytai peteīve ma joa py.

### *Huvixarā Saul oī ete aguā re ijayvu okuapyague*

<sup>12</sup> Ha'e gui heta va'e kuery aipoe'i Samuel pe:

— Mava'e kuery tu nhandere Saul opena aguā ndoipotai va'ekue? Peru apy, rojukapa aguā.

<sup>13</sup> Ha'e rā Saul ombovai:

— Kova'e ára ma mava'eve nomanoi 'rā, mba'eta ange SENHOR ogueraa jepepa Israel kuery — he'i.

<sup>14</sup> Heta va'e kuery pe Samuel ju aipoe'i:

— Peju, jaje'oi Gilgal py nhamoī atāve aguā huvixarā oī aguā regua — he'i.

<sup>15</sup> Ha'e ramo ha'e kuery ha'e javi Gilgal py oo vy SENHOR renonde ijayvu okuapy nguvixarā Saul oī ete aguā re. Henonde ogueru avi okuapy peteī rami ikuai aguā regua SENHOR pe ome'ē va'erā. Saul voi ovv'a vaipa ha'e py Israel regua kuery ha'e javi reve.

## 12

### *Samuel opa vy ijayvu heravyague*

<sup>1</sup> Ha'e gui Samuel aipoe'i Israel kuery ha'e javi pe:

— Ne'ixa, pendeayvua aendu vy ajapopa va'ekue pejerurea. Ha'e vy amoī penderuvixaverā.

<sup>2</sup> Aŷ ma perekko ma huvixa penerenonde oiko va'erā. Ha'e gui xee ma xetuja'i ma, xe'a xiimb'a ma guive. Xera'y kuery ikuai avi apy pendekuaia py. Xee ae penerenonde aiko va'ekue, xekunumi guive aŷ peve.

<sup>3</sup> Ha'e gui apy ma ha'ã SENHOR renonde, ha'e penderuvixarã omoĩ va'ekue renonde. Pemombe'u ha'vy xapy'a rei xerovai mba'emo perekri vy. Mava'e rymba toro tu aipe'a raka'e? Mava'e gui tu mburika'i aipe'a raka'e? Mava'e tu akore raka'e? Mava'e tu areko axy raka'e? Mava'e po gui tu peráta ajopy raka'e ha'evea rami e'ŷ aikuaa pota aguã? Ha'e nungakue ajopy va'e rire ame'ẽmba ju 'rãgue – he'i.

<sup>4</sup> Ha'e ramo heta va'e kuery ombovai:

– Any rima, mba'eve py ndee ndorekorei, norembojexavai, neĩ mba'eve nderejopyi orepo gui – he'i.

<sup>5</sup> Ha'e rã ha'e aipoe'i:

– Kova'e ára SENHOR ae oĩ pendeayvuague renduarã, ha'e penderuvixarã omoĩ va'ekue voi oĩ omombe'u aguã xepo py mba'eve ndapejouia.

Ha'e rã heta va'e kuery ombovai vy

– Nhanderuete oĩ ri oreayvuague renduarã – he'i okuapy.

<sup>6</sup> Ha'e ramo Samuel aipoe'i heta va'e kuery pe:

– SENHOR ae pendeayvu renduarã oĩ. Ha'e ae Moisés ha'e Arão oiporavo va'ekue Egito yvy gui penderu kuery oguenoẽ aguã.

<sup>7</sup> Ha'e gui aŷ ma apy pendekuai va'e xee romoma'endu'apa 'rã SENHOR renonde, mba'emo porã pendevy ha'e penderu kuery pe ojapoague re.

<sup>8</sup> Mba'eta Jacó kuery Egito yvy py ovaẽmba raka'e. Ha'e va'e rire penderu kuery SENHOR pe ojapukai okuapy ramo ombou Moisés ha'e Arão. Ha'e rami vy Egito yvy gui oguenoẽmba vy ojapo apy ju hekoa aguã rami.

<sup>9</sup> Ha'e rami teĩ ha'e kuery hexaraipa SENHOR Nguuete gui. Ha'e ramo omboaxapa Hazor pygua xondaro kuery ruvixa Sísera va'e po py, filisteu kuery po py, ha'e gui Moabe pygua huvixa po py ju. Ha'e ramo ha'e kuery reve joguero'a.

<sup>10</sup> – Ha'e gui ma SENHOR pe ju ojapukai vy aipoe'i okuapy: “Rojejavy, mba'eta SENHOR roeja vy Baal ha'e Astarote ra'angaa pe rive orekuai va'ekue. Ha'e rami teĩ aŷ orereraa jepe jevy ke orerovaigua kuery po gui. Ha'e ramo ndevy ae ju 'rã orekuai”, he'i va'ekue.

<sup>11</sup> Ha'e rami rã SENHOR ombou Jerubaal, Baraque, Jefté ha'e gui xee Samuel ju, penderovaigua kuery penembojere rei va'e po gui pendereraa jepe uka vy. Ha'e va'e rire pendekuai porãmba va'ekue.

<sup>12</sup> – Ha'e rami teĩ penderovai Amom kuery ruvixa Naás ou rã pexa vy aipopeje xevy: “Nda'evei! Tove toĩ oreruvixaverã”, peje, SENHOR Penderuete ae penderuvixave oĩ ae va'eri.

<sup>13</sup> Ha'e gui aŷ, pee ma hi'aĩ penderuvixaverã pejou uka va'ekue, pejerureague. Ma'ẽ, SENHOR penderuvixaverã omoĩ va'ekue hi'aĩ.

<sup>14</sup> Ha'e gui xapy'a rei SENHOR renonde pejererokyjea rupi vy ixupe pendekuai, ha'e penhe'ẽ rendu, ha'e ojapo uka va'e rovai naopepu'ãi, ha'e rami 'rãgue py peẽ ha'e penderuvixave pendere opena va'e reve SENHOR penderuete pe ete ri peiko ramo ma ha'eve 'rã pendevy.

<sup>15</sup> Ha'e rami avi xapy'a rei SENHOR ayvu re ndapejapyxakai vy ojapo uka va'e ndapejapoi ri ramo ma SENHOR oupi 'rã opo penderovai, peneramoĩ kuery rovai oupiague rami avi.

<sup>16</sup> Ha'e gui aŷ voi apy pene'aĩ va'e pexa 'rã mba'emo porã SENHOR penerononde ojapo va'e.

<sup>17</sup> Aŷ e'ŷ teve trigo mono'õa ára? Ha'e rami teĩ aŷ ajerure 'rã SENHOR pe. Ha'e rã ombou 'rã yapu oky reve. Ha'e nunga pexa vy peikuua 'rã SENHOR renonde pejejavy vaipa eteague, mba'eta pejerure penderuvixaverã omoĩ aguã re – he'i.

<sup>18</sup> Ha'e rami vy SENHOR pe Samuel ojerure ramo ha'e va'e árave SENHOR ombou yapu oky reve. Ha'e ramo ojererokyje okuapy SENHOR renonde, Samuel guive omboete pavẽ.

<sup>19</sup> Ha'e gui ha'e kuery ha'e javi aipoe'i Samuel pe:

— Ejerure ke SENHOR nderuete pe ore nerembiguai kuery romanomba e'ŷ aguã re. Mba'eta rojejavyague ha'e javi romboetave ma heravy oreruvixaverã re rojerurea py.

<sup>20</sup> Samuel ombovai:

— Pekyje eme. Ha'e rami pejapoa py pejejavy ete ri. Ha'e rami teĩ pejepe'a eme SENHOR pe pendekuaia gui. Ha'e rami 'rãgue py pendepy'a ha'e javi py pendekuai SENHOR pe.

<sup>21</sup> Pejepe'a eme mba'emo ra'angaa pe rive pendekuai aguã, ha'e nunga mba'everã ndovarei, neĩ pendereraa jepearã e'ŷ, mba'emo ra'angaa rive ae vy.

<sup>22</sup> Ha'e rami teĩ SENHOR guery tuvixa va'e omboete ukaa rupi vy noipytyvõ e'ŷi 'rã ojeupeguia kuery, ojeupe guarã SENHOR pendereru rire.

<sup>23</sup> — Ha'e gui xee ma ndajejavyi 'rãe SENHOR pe, peẽ kuery re ajerure e'ŷa py rive. Ha'e rami 'rãgue py xee rombo'e tema 'rã tape porã hi'yvi va'e re.

<sup>24</sup> Ha'e nunga rupi SENHOR renonde pejererokyjea rupi pendekuai, ixupe anho peiko pendepy'a ha'e javi py. Mba'eta pexa ae mba'emo porã pendevy ojapo va'ekue tuvixa ete va'e.

<sup>25</sup> Ha'e rami teĩ xapy'a rei pejejavya rupi tema pendekuai vy pekanhy 'rãe, peẽ kuery, ha'e penderuvixave voi.

## 13

### *Israel ha'e filisteu kuery reve joe opu'ã aguã rami ikuaiague*

<sup>1</sup> Peteĩ ma'etã ma Israel kuery re Saul opena rire mokoĩ ma'etã py

<sup>2</sup> ojeupe oiporavo três mil avakue Israel regua. Ha'e kuery va'e regua ma dois mil ikuai Saul reve Micmás py, Betel yvy'ã reia re, ha'e rã amboae mil avakue ma ta'y Jônatas reve ikuai Benjamim regua Gibeá py. Heta va'e kuery rembyrekue ma omondoukapa ju peteĩ-teĩ hoo katy.

<sup>3</sup> Ha'e gui Jônatas kuery ojukapa rai'i filisteu kuery Gibeá py ikuai va'e. Ha'e nunga filisteu kuery oendupa vy ivai ramo Saul omonhe'ẽ uka mimby guaxu oyvy ha'e javi rupi, "Hebreu kuery toendupa" he'i vy.

<sup>4</sup> Ha'e rami py Israel kuery ha'e javi oendu okuapy Saul kuery filisteu ikuai va'e ojukapa rai'i ramo filisteu kuery Israel kuery pe ivai okuapy. Ha'e ramo Saul oenoĩ ukapa heta va'e kuery Gilgal py oña py.

<sup>5</sup> Filisteu kuery voi ono'õmba okuapy Israel kuery reve joguero'a aguã. Ha'e kuery va'e regua ma trinta mil karóxa, seis mil kavaju árygua kuery ha'e gui amboae kuery ju ita ku'i ye'ẽ rembe re ikuai va'e rami heta va'e. Ha'e vy oje'oi vy ijaty okuapy Micmás py, Bete-Áven regua kuaray oua katy.

<sup>6</sup> Ha'e gui avakue Israel regua omoĩ vaia rã oexa okuapy heta va'e kuery ndaekorãvei rei. Ha'e rami vy onhemi okuapy itakua ikuai va'e rupi, yvykua, itaova yvateve va'e pa'ũ, yvyra rupa ha'e yy oĩ atyrã ojo'o pyre rupi.

<sup>7</sup> Hebreu kuery va'e regua amongue ma Jordão yakã oaxa oje'oivy Gade ha'e Gileade yvy katy oo aguã. Ha'e rã heta va'e kuery Gilgal py Saul reve ae opyta va'ekue ma okyjea anho oendu okuapy.

### *Saul mymba kuery ome'ẽ ramo ixupe Samuel ijayvu eteague*

<sup>8</sup> Ha'e gui Saul ma sete ára re oarõ Samuel ijayvuague rami vy.\* Va'eri Gilgal py Samuel ndoui ramo heta va'e kuery omboypy ha'e gui joa katy e'ŷ-e'ŷ oje'oi aguã.

<sup>9</sup> Ha'e ramo Saul aipoe'i:

— Peru ha'vy xevy mymba aapy reve ame'ẽ va'erã, ha'e peteĩ rami nhandekuai aguã regua guive — he'i.

Ha'e rami vy mymba ome'ẽ oapy reve.

\* <sup>13:8</sup> Samuel ijayvu ma voi va'ekue Gilgal py sete ára re Saul oarõ aguã (1 Samuel 10.8).

<sup>10</sup> Oapy reve ome'ẽmba'i ramove Samuel ovaẽ ouvy. Ha'e rã Saul oẽ ov y ovaexĩ vy oipopyy aguã.

<sup>11</sup> Samuel oporandu:

— Mba'e tu rejapo?

Saul ombovai:

— Heta va'e kuery apy gui joa katy e'ŷ-e'ŷ oje'oi ta, ha'e ndee reju 'rãgue ára py nderejui, ha'e gui filisteu kuery Micmás py ono'õmba ma avi. Ha'e nunga aexa vy

<sup>12</sup> aipoa'e xejeupe ae: “Aŷ ma xerovai filisteu kuery ou ma 'rã Gilgal py, SENHOR pe ajerure e'ŷ re.” Ha'e rami vy aĩ vai ma vy mymba kuery ame'ẽ kuri aapy reve – he'i.

<sup>13</sup> Ha'e rami rã Samuel aipoe'i Saul pe:

— Ne'arandua rupi e'ŷ reiko ra'e SENHOR nderuete ojapo uka va'ekue e'ŷ rejapo vy. Ha'e rami e'ŷ va'e rire SENHOR ojapo ma 'rãgue raka'e rã peve Israel kuery re repena aguã rami.

<sup>14</sup> Ha'e rami teĩ aŷ gui ma repenaa noĩ riae'i 'rã. SENHOR ojeupe guarã ojou ae ma peteĩ ava oguerovy'a va'e. Ha'e va'e ma omoĩ'rã ojeupega kuery ruvixarã, SENHOR ojapo uka va'ekue ndee nderejapoi rire – he'i.

<sup>15</sup> Ha'e vy Samuel opu'ã vy Gilgal gui oo Benjamim regua Gibeá katy. Ha'e rire'ive Saul oipapa heta va'e kuery hexeve opyta va'e, seiscentos avakue ikuai.

<sup>16</sup> Ha'e gui Saul, ta'y Jônatas ha'e heta va'e kuery hexeve opyta va'ekue ma Benjamim regua Geba py ikuai. Ha'e rã filisteu kuery ma Micmás py ijaty okuapy.

<sup>17</sup> Filisteu kuery rekoia gui ma mboapy henda katy oje'oi mba'emo re imonda aguã. Ha'e kuery regua peteĩ aty ma tape Ofra via rupi oje'oi Sual yvy katy.

<sup>18</sup> Amboae kuery ma oje'oi tape Bete-Horom via rupi. Ha'e rã mboapya ma tape kavaju árygua ooaty rupi oje'oi Zeboim yvyugua rupi, tekao e'ŷa katy.

<sup>19</sup> Ha'e gui Israel yvy ha'e javi re peteĩve ndoikoi ferro moatyrõa, filisteu kuery “Hebreu kuery ojapo e'ŷ aguã kyxe, neĩ hu'y rakua” he'i rire.

<sup>20</sup> Ha'e nunga rupi Israel ha'e javi oje'oi 'rã filisteu kuery rekoia py oaĩmbe'e uka aguã yvy karaĩa, enxada, haxa ha'e foice.

<sup>21</sup> Filisteu kuery ma Israel kuery gui mokoĩ hatã'i va'e repy re 'rã oaĩmbe'e yvy karaĩa ha'e enxada, ha'e gui haxa ha'e foice oaĩmbe'e aguã ma peteĩ repy 'rã ojopy.

<sup>22</sup> Ha'e nunga rupi joguero'aa ára ma Saul ha'e Jônatas reve ikuai va'e po py neĩ kyxe, neĩ hu'y rakua ma voi ndoguerekoi. Ha'e nunga oguerekoo va'e ma Saul ha'e ta'y Jônatas anho'i.

<sup>23</sup> Ha'e jave py filisteu regua xondaro kuery oẽ oje'oivy Micmás tape rugua katy.

## 14

### *Filisteu kuery re Jônatas ipo'akaague*

<sup>1</sup> Ha'e gui peteĩ ára Saul ra'y Jônatas aipoe'i hu'y jokoa reraa kunumi va'e pe:

— Eju, jaa filisteu kuery yvy'ã ugua rovai re ijaty va'e katy – he'i. Nguu pe oikuua uka e'ŷ re oo.

<sup>2</sup> Ha'e jave py Saul ma Gibeá apy katy oiko Migrom py romã'y hi'aĩ va'e yvypy py. Hexeve ikuai va'e ma seiscentos avakue.

<sup>3</sup> Ha'e py oiko avi sacerdote Aías, manto sacerdote pegua py onhemonde va'e. Ha'e va'e ma Icabô ryvy Aitube ra'y, Icabô ma Finéias ra'y, Finéias ma Eli ra'y. Eli ma sacerdote SENHOR pegua Siló py oiko va'ekue. Saul reve ikuai va'e ndoikuuai okuapy Jônatas ooague.

<sup>4</sup> Ha'e gui Jônatas ma onhembopy'a tape rugua oaxa aguã filisteu kuery ijatya katy. Kyvõ rupi hi'aĩ peteĩ itaova, ha'e rã hovai re ma amboae hi'aĩ. Peteĩ rery ma Bozez, amboae ma Sené.

<sup>5</sup> Peteĩ ma kuaray apu'a'ia katy hi'aĩ Micmás katy, ha'e rã amboae ma kuaray puku-a katy hi'aĩ Geba katy.

**6** Ha'e gui hu'y jokoa reraa pe Jônatas aipoe'i:

— Eju, jaa opire omboi uka e'ŷ va'ekue ijatya katy. Xapy'a rei SENHOR nhaneptytvõ 'rã, mba'eta ixupe ma ndaxyi jogueraa jepe aguã heta va'e rupi e'ŷ vy mboapy'i va'e rupi teī – he'i.

**7** Ha'e ramo hu'y jokoa reraa ombovai:

— Ejapo tema ndepy'a re oĩ va'e ha'e javi. Apy ma xee aiko avi ndereve, ajapo 'rã ndee reipota va'e.

**8** Ha'e ramo Jônatas aipoe'i:

— Jaa ha'vy ha'e va'e avakue ikuaria katy. Ha'e kuery pe jajexa uka 'rã.

**9** Xapy'a rei nhandevy "Pepyta peña py rovaě peve" he'i ramo ma japyta 'rã nhane'aĩa py ae, ndajaai 'rã ha'e kuerya katy.

**10** Ha'e rã xapy'a rei "Peju orea katy" he'i ramo ma nhavaẽ 'rã javy ha'e katy, mba'eta SENHOR omboaxapa 'rã nhandepo py. Ha'e rami ma jaikuua 'rã – he'i.

**11** Ha'e gui filisteu kuery ijatya va'e pe mokoïve ojexa uka ramo joupe-upe aipoe'i:

— Pee ma hebreu kuery oẽ jogueruvy itakua py onhemiague gui – he'i okuapy.

**12** Ha'e rami vy Jônatas ha'e hu'y jokoa reraa ojexa uka rã filisteu kuery ijatya va'e ombovai vy aipoe'i:

— Peju orea katy, ha'e ore rombopaga 'rã – he'i.

Ha'e ramo hu'y jokoa reraa pe Jônatas aipoe'i:

— Eju einy xerakykue'i rupi, mba'eta SENHOR omboaxapa ma Israel kuery po py – he'i.

**13** Ha'e rami vy Jônatas oponhy reve ojeupi ovv. Hakykue'i rupi ma hu'y jokoa reraa ou avi oiny. Jônatas guenonde rupi oitypa filisteu kuery. Hakykue rupi ma hu'y jokoa reraa voi jojuka ovv.

**14** Ha'e rami jypy Jônatas ha'e hu'y jokoa reraa reve jojuka vinte avakue meio litro yvy py rive'i.

**15** Ha'e ramo filisteu kuery ijatya py oiko nhemondyi tuvixa va'e, nhuñdy rupi ha'e kuery ikuaria ha'e javi rupi guive. Ijaty va'e ha'e imonda aguã oje'oi va'ekue voi oryryipa okuapy. Yvy voi oryryi, ngyje Nhanderuete guigua oiko rã.

**16** Ha'e gui Benjamim regua Gibeá py Saul pegua harõa kuery oma'ẽ vy oexa rã filisteu kuery heta va'ekue oaĩmba ra'e, joa katy e'ŷ-e'ŷ onha oje'oivy.

**17** Ha'e ramo Saul aipoe'i hexeve ikuai va'e pe:

— Ne'exa, peipapa xerevegua kuery, mava'e pa nhandea gui oo ra'ea peikuaa aguã – he'i ramo oipapa vy oikuua Jônatas ha'e py noĩa, neĩ hu'y jokoa reraa va'e voi.

**18** Saul aipoe'i Aías pe:

— Eru apy Nhanderuete ayvu ryru – he'i, mba'eta ha'e va'e ára ma Israel kuery ikuaria py ae hyru oĩ.

**19** Ha'e gui sacerdote pe Saul ijayvu jave filisteu kuery ijatya py hevovo nhendu va'e onhenduve tema ramo Saul aipoe'i sacerdote pe:

— Aŷ gui ma ayvu ryru reru e'ŷ teī ha'eve – he'i.\*

**20** Ha'e ramo Saul ha'e hexeve ikuai va'e ono'õmba jevy vy joguero'a aguã katy oje'oi. Ha'e ramo filisteu kuery jomeme ae opu'ã okuapy ra'e kyxe oguerojerovia reve, opa marã jojuka rive okuapy.

**21** Ha'e gui hebreu kuery filisteu kuery ijatya py ikuai va'ekue ma Israel kuerya katy ju oje'oi, ha'e vy Saul ha'e Jônatas reve ikuai va'e re ju onhemoirũ okuapy.

**22** Ha'e gui Efraim yvy'ã reia rupi Israel regua avakue onhemi va'ekue oendupa okuapy filisteu kuery onhambaa. Ha'e rami vy ha'e kuery voi oje'oi hakykue joguero'a vy.

**23** Ha'e rami py ha'e va'e ára SENHOR ogueraa jepe Israel kuery. Bete-Áven rovai rupi voi joguero'a oje'oivy.

\* **14:19** Nhanderuete ayvu ryru Saul oipota, ha'e va'e rupi Nhanderuete pe oporandu aguã mba'e pa oikoa re, ha'e filisteu kuery rakykue oo aguã re. Ha'e gui filisteu kuery onhambaa ma rire Saul ndoipotavei hyru.

*Saul onhemboayvu jave guare*

<sup>24</sup> Ha'e va'e ára Israel regua avakue ojexavai okuapy, mba'eta ojeupegua kuery oendua py Saul oura vy: "Ayvu vaipy toiko ava pytū e'ŷ mbove tembi'u ho'u va'e rei, xerovaigua kuery re ajepypa e'ŷa ja", he'i rire. Ha'e rami rā heta va'e kuery neñ mba'eve ndo'ui.

<sup>25</sup> Ha'e gui ha'e kuery ha'e javive ovaẽ okuapy ka'aguy re, ei yvy re oĩa py.

<sup>26</sup> Ka'aguy re ha'e kuery ovaẽ rā ei oĩ vaipa teĩ mava'eve rei ndoerei, ouraague káuxa okyje vy.

<sup>27</sup> Ha'e rā Jônatas ma noendui nguu heta va'e kuery oendua py ouraague. Ha'e rami vy yvyra'i opo py oguerekva'e apy omovaẽ vy omoaky ei rykue'i py. Oere vyve hexa hendypa.

<sup>28</sup> Ha'e ramo heta va'e regua peteĩ aipoe'i:

— Ange nderu oura kuri ore roendua py. Ha'e vy aipoe'i: "Ayvu vaipy toiko ava kova'e ára tembi'u ho'u va'e rei", he'i va'ekue. Ha'e ramo ore kuery orekangypa ma rokuapy — he'i.

<sup>29</sup> Ha'e ramo Jônatas aipoe'i:

— Xeru ma ojapo ra'e nhandevvy re ojexavaia aguã rami. Ne'exa, xerexa hendypa kuri kova'e ei ruxã'i aere va'ekue gui teĩ.

<sup>30</sup> Ha'e gui nhande kuery katuve ma imbaraete 'rãgue kova'e ára ngovaigua kuery tembi'u ogueru va'ekue gui okaruxea rami okaru va'e rire. Ha'e rami teĩ kova'e py filisteu kuery ndajajuka reta vaipai kuri — he'i.

<sup>31</sup> Ha'e va'e ára ma filisteu kuery Micmás guive Aijalom peve ojukapaa py ha'e kuery ikangypa.

<sup>32</sup> Ha'e vy hovaigua kuery mba'emo ogueru va'ekue re oje'oi pojava vy ojopypa vexa'i, vaka ha'e ta'y'i guive. Yvy rupi rive ojuka vy ho'u okuapy huguy reve.

<sup>33</sup> Ha'e nunga Saul pe omombe'ua vy

— Nhande reveguia kuery ojejavy okuapy SENHOR rovai, xo'o huguy reve ho'u vy — 'ea. Ha'e ramo Saul aipoe'i:

— Ha'eve'ŷa rami raxa pejapo. Pembojere aŷve ita guaxu kyvõ katy.

<sup>34</sup> Aipoe'ive ju:

— Tapeo, nhande kuery mbyte rupi aipopeje: "Peteĩ-teĩ Peru mymba vaka e'ŷ vy vexa'i pejou va'ekue, ha'e pejuka apy ae. Ha'e gui mae pe'u. Pejejavyve jevy eme SENHOR rovai, huguy reve pe'ua py", peje — he'i.

Ha'e ramo pyavyve ha'e kuery peteĩ-teĩ ogueru vaka ojopy va'ekue. Ha'e vy ojuka ha'e py.

<sup>35</sup> Saul ojapo avi peteĩ altar SENHOR peguarã. Ha'e va'e altar ma jypygua ha'e ojapo.

*Jônatas oo jepe aguã rami heta va'e kuery ojapo okuapyague*

<sup>36</sup> Saul aipoe'ive ju:

— Kova'e pyavyve jaje'oi 'rã filisteu kuery rakykue. Jaitypa 'rã ko'ẽmba peve. Nhamoemyre eme peteĩve ava ha'e kuery va'e regua — he'i.

Hexeveguia kuery ombovai okuapy:

— Ejapo rejou porãa rami.

<sup>37</sup> Ha'e rã sacerdote oĩ va'e aipoe'i:

— Ha'e rami avi Nhanderuete pe ranhe nhaporandu — he'i.

Ha'e ramo Nhanderuete pe Saul oporandu uka vy aipoe'i:

— Toroo pa filisteu kuery rakykue? Remboaxa 'rã pa ore Israel kuery po py? — he'i uka teĩ ha'e va'e ára ma Nhanderuete nombovai.

<sup>38</sup> Ha'e rami rã Saul aipoe'i:

— Peẽ heta va'e kuery re pepena va'e ha'e javi, pejupa apy. Peikuaa pota pexa aguã mba'e nunga jejavy pa ange ojapoa ra'e.

**39** Mba'eta anhetē ete SENHOR oikove va'e Israel kuery reraa jepea rery rupi aura vy aipoa'e: Ojejavy va'ekue omano 'rā, xera'y Jônatas ae teī — he'i va'eri heta va'e kuery peteīve nombovai.

**40** Ha'e gui aipoe'ive ju Israel kuery pe:

— Peē kuery ma peteī henda py 'rā peī, ha'e rā xee ha'e xera'y Jônatas reve ma amboae py 'rā ore'aī.

Heta va'e kuery ombovai:

— Ejapo ha'vy rejou porāa rami — he'i okuapy.

**41** Ha'e gui Saul aipoe'i SENHOR Israel kuery ruete pe:

— Eikuua uka ke anhetē va'e.

Ha'e ramo xortea py oikuua uka Jônatas ha'e Saul, ha'e rā heta va'e kuery e'ŷ ae ra'e.

**42** Saul aipoe'i ju:

— Pexa ha'vy xortea xere ha'e xera'y Jônatas re — he'i ramo Jônatas ae oikuua ukaa.

**43** Ha'e ramo Saul oporandu Jônatas pe:

— Emombe'u porā ke mba'e pa rejapo ra'ea.

Jônatas ombovai:

— Aere kuri ei yvyra'i xepo py areko va'e py. Ha'e gui apy ma aī amano aguā.

**44** Ha'e ramo Saul aipoe'i:

— Nhanderuete taxembopaga ha'e oipotaa rami, Jônatas omano e'ŷ rā.

**45** Ha'e rami teī heta va'e kuery aipoe'i Saul pe:

— Jônatas ri ty'y omano 'rā, nhande Israel kuery nhandereraa jepe va'ekue ri? Tomano eme. Anhetē ete SENHOR oikove va'e rery rupi roura vy aiporo'e: Ha'e va'e akā gui neī peteīhi'a ma voi ndo'ai 'rā. Nhanderuete reve vy ae ha'e nunga ojapo ange — he'i okuapy. Ha'e rami py heta va'e kuery ojapo Jônatas omano aguā gui oo jepe aguā rami.

**46** Ha'e gui filisteu kuery rakykue Saul kuery ndooivei ramo ha'e kuery ojevypa ju oyvy katy.

**47** Israel kuery ruvixarā Saul oī ma vy joguero'a oikovy ngovaigua kuery jovaive rupi ikuai va'e ha'e javi reve: Moabe, Amom ra'y kuery ha'e Edom ha'e Zobá pygua huvixa kuery reve, ha'e gui filisteu regua huvixa kuery reve. Ooa katy rei ipo'akapa va'e raka'e.

**48** Imbaraetea rupi joguero'a vy ojuka Amaleque pygua kuery voi. Ha'e rami vy ogueraa jepe Israel kuery mba'emo re imonda aguā oje'oi va'ekue po gui.

**49** Saul ra'y kuery ma Jônatas, Isvi ha'e Malquisua raka'e. Tajy guaimive va'e rery ma Merabe, ha'e rā kyrīve va'e ma Mical.

**50** Saul ra'yxy ma Aimaás rajy Ainoā. Ixupe xondaro kuery re opena va'e rery ma Abner, Saul tuty Ner ra'y ae.

**51** Saul ru ma Quis raka'e. Ha'e gui Abner ru Ner ma Abiel ra'y raka'e.

**52** Saul oīa pukukue re joguero'a tema filisteu kuery reve. Ha'e rami vy avakue imbaraetekue ha'e ipy'a guaxukueve Saul oexa vy ogueraapa 'rā ojeupe guarā.

## 15

*Saul SENHOR nonhe'ē rendui rire huvixa noīvei aguā re ijayvuague*

**1** Ha'e gui Samuel aipoe'i Saul pe:

— SENHOR xembou karamboae ndere azeite aikyty vy ixupegua Israel kuery ruvixarā amoī aguā. Ha'e rire aīj ejapyxaka SENHOR ijayvua re.

**2** Po rami SENHOR ixondaro reta va'e ijayvu: Xee ambopaga 'rā Amaleque pygua kuery Israel kuery re ojapo vaiague re, mba'eta Egito gui Israel kuery ou ramo ha'e kuery rovai opu'ā okuapy tape rupi.

**3** Ha'e nunga rupi tereo aīj. Ejukapa Amaleque pygua kuery, ha'e emomba katuī'i guive oguerekva'e ha'e javi, emomba e'ŷ eme mba'eve'i. Rejuka 'rā avakue ha'e kunhague,

avakue'i ha'e kyrīgue'i okambu va'e ha'e javi, vaka ha'e vexa'i, camelo ha'e mburika'i kuery – he'i.

<sup>4</sup> Ha'e rami rā Saul heta va'e kuery oenoī ukapa vy oipapa Telaim py: duzentos mil avakue yvy rupi guarā ha'e dez mil avakue Judá regua ikuai.

<sup>5</sup> Amaleque tetā py Saul ogueraa ma vy yvyugua py omoī oarō nhemiarā.

<sup>6</sup> Ha'e rami vy queneu kuery pe ranhe aipoe'i:

– Tapeo, pejep'e'a. Peēmba Amaleque pygua kuery mbyte gui, ha'e kuery amombaa py peē kuery romomba avi e'ŷ aguā. Mba'eta Israel kuery Egito gui ou jave pemboaxypa raka'e – he'i. Ha'e rami rā queneu kuery ojepe'apa Amaleque pygua kuery mbyte gui.

<sup>7</sup> Ha'e ramo mae ma Saul ojuka Amaleque pygua kuery, Havilá guive Egito katy'i Sur peve.

<sup>8</sup> Ojopy avi Amaleque pygua huvixa Agague oikove reve. Ha'e rā ha'e pygua kuery ma ojukapa kyxe py.

<sup>9</sup> Ha'e rā Agague ma Saul ha'e hexeveguia kuery ndojukai, neī mymba kuery vexa'i ha'e vaka ra'y porāgueve, mymba ikyrakueve va'e, vexa'i ra'y kuery ha'e mba'emo porāgueve ha'e javi guive. Nomomba etei. Ivaikue-ikue'i, oipota e'ŷ va'e rive omomba.

<sup>10</sup> Ha'e ramo SENHOR oayvu ombou Samuel pe. Ha'e vy aipoe'i:

— Xee ndavy'avei huvixarā Saul amoīague re, mba'eta xevy oikoa gui ojepe'a vy ndojapoi xeayvuague – he'i ramo Samuel iporiau vaipa vy pytū mbukukue re ojerure oiny SENHOR pe.

<sup>12</sup> Ko'ẽ rai ramove Samuel oo aje'ive'i reve Saul ovaexī aguā. Teī ixupe omombe'ua:

– Saul oo ma Carmelo katy. Ha'e py ma mba'emo omopu'ā ha'e ae onhemoma'endu'a uka aguā. Ha'e gui ojevy vy Gilgal katy oguejy ovv – 'ea.

<sup>13</sup> Ha'e ramo Samuel oo Saul oĩa py. Ha'e py ovaẽ ramo Saul aipoe'i ixupe:

– Tove SENHOR topena porā ndere. Xee ajapopa ma SENHOR ijayvuague.

<sup>14</sup> Ha'e ramo Samuel oporandu:

– Mba'exa tu ha'vy vexa'i ha'e vaka nhendua xeapyxa py aendu va'e?

<sup>15</sup> Saul ombovai:

– Ha'e nunga tu Amaleque tekaoa gui ogueru pyre rima. Mba'eta vexa'i ha'e vaka kuery iporāgueve ma xereveguia kuery nomombai, SENHOR Nderuete pe ojuka aguā ogueru. Ha'e rā hembyrekue ma rojukapa katuī'i – he'i.

<sup>16</sup> Ha'e ramo Samuel aipoe'i Saul pe:

– Earō ranhe, ndevy amombe'u aguā kuee pyávy xevy SENHOR aipoe'iague.

Saul ombovai vy

– Ndeayvu ke – he'i.

<sup>17</sup> Samuel ijayvuve:

– Ndejeupe ae “Xe'yvyī'ive” 're va'ekue ri Israel kuery akārā e'ŷ ri ty'y nemoīa? Ha'e vy ndere azeite SENHOR oikyty uka reve nemoī raka'e ha'e kuery ruvixarā.

<sup>18</sup> Ha'e gui kyvō rupi ju SENHOR nemondouka vy aipoe'i va'ekue: “Tereo, emomba katuī'i ojejavy va'e kuery Amaleque regua. Ha'e kuery rovai pejoguero'a 'rā pemomba peve”, he'i va'ekue.

<sup>19</sup> Mba'e re ha'vy nderejapyxakai SENHOR ijayvua re? Ha'e rami 'rāgue py renha reve imba'e rei-reikue rejopy. Ha'eve'ŷa rami rejapo SENHOR renonde – he'i.

<sup>20</sup> Ha'e rami teī Saul ombovai Samuel pe:

– Ha'e rami e'ŷ ko, aendu ri SENHOR ayvu. Ha'e vy tape SENHOR xemondoukaague rupi ae aa vy Amaleque pygua huvixa Agague aru, ha'e rā Amaleque pygua kuery ma ajukapa katuī'i.

<sup>21</sup> Ha'e rami avi heta va'e kuery ogueru avi imba'e rei-reikue mba'emo mymba vexa'i ha'e vaka ra'y kuery. Romomba aguā va'ekue gui iporāgueve ha'e kuery oiporavo heruwy SENHOR nderuete pe ome'ē aguā Gilgal py – he'i.

**22** Va'eri Samuel aipoe'i:

— SENHOR nda'u ijayvua nhaendua gui oguerovy'ave 'rā teve mba'emo japy vy nhame'ē va'e rive? Ne'exa, mba'emo nhame'ēa gui ma ha'eveve nhanhe'ē rendu. Vexa'i kyrakue nhame'ēa gui ha'eveve ojapo uka va'e jajapo.

**23** Mba'eta onhemboyvate va'e kuery ma imba'evyky va'e rami ae ojejavy, nonhe'ē rendui va'e kuery ma ngopy ta'angaa ombojerovia aguā oguerekva'e rami ojejavy. Ha'e gui SENHOR ayvu reja rire ha'e voi ndereja, huvixa nereīvei aguā — he'i.

**24** Ha'e ramo Saul ombovai Samuel pe:

— Xee ma ajejavy ri, SENHOR ojapo uka va'e ndajapoi vy, ndeayvua guive. Mba'eta heta va'e kuery gui akyje vy ha'e kuery ijayvua aenduve.

**25** Ha'e rami teī aŷ ma ndevy ajerure xeperdoa aguā ajejavyague. Ha'e rami vy ejevy ju xereve SENHOR romboete aguā — he'i.

**26** Ha'e rami teī Samuel aipoe'i Saul pe:

— Xee ndajevyi 'rā ndereve. SENHOR ayvu reja rire ha'e voi ndereja, Israel kuery ruvixa nereīvei aguā — he'i.

**27** Ha'e gui Samuel oo ju aguā ojere rā Saul ojopy ijaopuku apy re. Ha'e ramo oxoro.

**28** Ha'e ramo Samuel aipoe'i ixupe:

— Ange ndepo gui SENHOR omondoro avi Israel kuery re repenaague. Ha'e vy ndea katy'igua ndegui heko porāve va'e pe ju ome'ē.

**29** Ha'e gui Israel kuery ruete Hexakāmba va'e ma nda'ijapui, nda'evei nho va'e'ŷ guive, mba'eta ava e'ŷ oiko ojeko rerova rive aguā.

**30** Ha'e ramo Saul aipoe'i:

— Xee ajejavy teī xemboete uka ri jepe heta va'e kuery yvatekueve ha'e Israel kuery ha'e javi renonde. Ejevy ju ha'vy xereve, SENHOR nderuete nhamboete aguā — he'i.

**31** Ha'e ramo Saul reve Samuel jogueraa nho ju, ha'e vy omboete SENHOR.

### *Samuel Agague ojukaague*

**32** Ha'e gui Samuel aipoe'i:

— Peru apy Amaleque pygua huvixa Agague — he'i.

Ha'e ramo oĩa py Agague oikuaa rei reve ou, ojeupe "Anhetē, amano aguā gui akyjea ko oaxa ma" he'i vy.

**33** Ha'e rami teī Samuel aipoe'i:

— Ndekyxe kunhague pi'a kuery rekove oipe'aague rami ae avi ndexy voi oiko 'rā ipi'a ve'ŷ va'e kunhague mbyte rupi — he'i vyve SENHOR renonde Gilgal py Samuel omboa'y-a'ypa Agague.

**34** Ha'e gui Samuel oo Ramá katy. Ha'e rā Saul ma guekoa Gibeá py oo ngoo oĩ va'e katy.

**35** Saul omanoa ára peve Samuel ndoexavei teī oendu guive Saul re ipy'a vaia. SENHOR voi ndovy'avei Israel kuery ruvixarā Saul omoñague re.

## 16

### *Jessé rekoa py Samuel omondoukaa ague*

**1** Ha'e gui SENHOR aipoe'i Samuel pe:

— Raka'e peve 'rā tu ndepy'a vai Saul re? Mba'eta xee SENHOR amboyke ma Israel kuery re openaa gui. Emonyē peteī hakuakue azeite, ha'e tereo. Romondouka 'rā Jessé rekoa Belém py. Mba'eta ta'y kuery va'e regua peteī ajou ma huvixarā.

**2** Samuel oporandu:

— Mba'exa 'rā tu aa? Saul oikuaa ri vy xejuka 'rā.

SENHOR ombovai:

— Eraa peteī vaka ra'y. Ha'e vy aipo're: "Aju SENHOR pe mymba ajuka vy ame'ē aguā", 're.

<sup>3</sup> Ha'e rami vy renoī 'rā Jessé mymba reme'ẽ aguã py ou aguã. Ha'e rã xee aikuua uka 'rã mba'e pa rejapo 'rāa. Ha'e ramo xee aikuua uka va'e ae 'rã remoī, azeite reikyty vy – he'i.

<sup>4</sup> Ha'e gui SENHOR aipoe'iague rami Samuel oiko vy oo Belém tekoa py. Ha'e ramo tetã pygua nhomongeta va'ety kuery oexa vy oryryipa reve oẽ jogueruvy ovaexĩ aguã. Ha'e vy oporandu:

– Ha'evepa reia rupi pa reju?

5 Ombovai:

– Ha'evepa reia rupi ri aju SENHOR pe mymba ajuka vy ame'ẽ aguã. Pejeky'a'o ke ha'e peju xereve mymba ame'ẽa py – he'i. Ha'e rami vy oiky'a'o Jessé ha'e ta'y kuery. Ha'e vy oenoimba avi mymba ome'ẽ aguã katy.

<sup>6</sup> Ha'e kuery oike ouvy rã Samuel oexa Eliabe. Ha'e vy ojeupe ae “Kova'e nhi'ã SENHOR renonde oiporavo va'ekue hi'aĩ” he'i.

7 Ha'e rami teĩ SENHOR aipoe'i Samuel pe:

– Eikuua pota eme hova re, neĩ ipuku-a re, mba'eta ha'e va'e ma xee ndaiporavoi. Mba'eta SENHOR ma avakue joexaa rami e'ŷ oexa va'e. Avakue ma hi'árykue rive 'rã oexa, ha'e rã SENHOR ma ipy'apy re oexa va'e – he'i.

<sup>8</sup> Ha'e gui gua'y Abinadabe ju Jessé oenoī vy ojapo Samuel renonde rupi oaxa aguã rami. Ha'e rami teĩ

– Kova'e voi SENHOR oiporavo va'ekue'ŷ – he'i.

<sup>9</sup> Ha'e gui gua'y Samá ju Jessé ojapo oaxa aguã, teĩ Samuel

– Kova'e e'ŷ SENHOR oiporavo – he'i.

<sup>10</sup> Ha'e rami vy Jessé sete-ve ojapo gua'y kuery Samuel renonde rupi oaxa aguã rami, teĩ Jessé pe Samuel ombovai vy

– Kova'e kuery voi SENHOR ndoiporavoi avi – he'i.

<sup>11</sup> Ha'e gui ma Samuel oporandu Jessé pe:

– Opa ma teve ndera'y kuery?

Ombovai:

– Oata teri kunumive ete va'e teĩ vexa'i re opena oikovy – he'i.

Samuel aipoe'i ju Jessé pe:

– Enoī uka ha'vy, mba'eta ha'e ou e'ŷ re nda'evei mesa py jaguapy aguã.

<sup>12</sup> Ha'e ramo oenoī uka vy ogueroike uka. Ha'e va'e ma ipytã rei porã, hexa porãmba, ha'e hete porã rei va'e. SENHOR aipoe'i Samuel pe:

– Epu'ã ha'e eikyty azeite hexe, mba'eta upe va'e ae ma – he'i.

<sup>13</sup> Ha'e ramo Samuel hakuakue py azeite oĩ va'e oupi vy oikyty inhakã re omoī tyke'y kuery oexaa py. Ha'e va'e ára guive SENHOR Nhe'ẽ onhemonde Davi re. Ha'e gui ma Samuel opu'ã vy Ramá katy ju oo.

### *Saul renonde Davi mba'epu ixã reta va'e ombopu oinyague*

<sup>14</sup> Saul gui SENHOR Nhe'ẽ ojepe'a ramo nhe'ẽ vai ju ombou rã oguereko axy.

<sup>15</sup> Ha'e ramo Saul rembiguai kuery aipoe'i okuapy:

– Ne'exa, aŷ ma nhe'ẽ vai Nhanderuete ombou va'ekue nembojexavai.

<sup>16</sup> Ha'e nunga rupi oreruvixa, emondouka na nerembiguai kuery nerondenonde ikuai va'e peteĩ ava rogueru aguã ixã reta va'e mbopuarã. Ha'e ramo rãnda'u nhe'ẽ vai SENHOR ombou va'ekue ndere ou jave peteĩ-teĩ okuã py ombopu rã rendu vy rekuerave 'rã – he'i okuapy.

<sup>17</sup> Saul ombovai guembiguai kuery pe:

– Pejou ha'vy peteĩ ava imba'epu porã kuaa va'e, ha'e Peru Xea py – he'i.

<sup>18</sup> Ha'e gui peteĩ kunumi va'e ombovai vy aipoe'i:

– Xee ma aikuua peteĩ ava Belém pygua Jessé ra'y kuery va'e regua. Ha'e va'e ma imba'epu porã kuaa va'e, imbaraete ha'e ipy'a guaxu va'e guive, ava joguero'aa pygua

rami rei oiko va'e, ijayvu kuaa ha'e hete porā rei va'e, ha'e hexeve SENHOR oikoa va'e – he'i.

<sup>19</sup> Ha'e rami rā Jessé oĩa py Saul ayvu mombe'uarā ombou vy aipoe'i uka:

– Embou xevy nderay Davi, vexa'i kuery re opena oikovy va'e – he'i uka.

<sup>20</sup> Ha'e ramo Jessé guymba mburika'i ojopy vy ombovoyi mbojape ha'e peteī vinho ryru re. Peteī kavara ra'y'i voi ogueru vy Saul peguarā ogueraa uka avi gua'y Davi pe.

<sup>21</sup> Ha'e rami vy Saul oĩa py Davi oo vy henonde oiko. Ha'e ramo ha'e oayvu vaipa vy hu'y jokoa reraarā omoingo.

<sup>22</sup> Saul aipoe'i uka Jessé pe:

– Tove Davi xerenonde rupi riae toiko, xembovy'a rei ramo – he'i.

<sup>23</sup> Ha'e gui Saul re nhe'ẽ vai Nhanderuete ombou va'e ou nhavõ Davi mba'epu ixã reta va'e oupi vy peteī-teī okuã py ombopu 'rā oiny. Ha'e ramo Saul onhenhandu 'rā ha'eve raive, okuerave 'rā, ixugui nhe'ẽ vai ojepe'a kuerei rā.

## 17

### *Golias opu'āxe reia rupi ijayvuague*

<sup>1</sup> Ha'e gui filisteu kuery omboaty xondaro kuery joguero'a aguã. Ono'õmba okuapy Judá re Socó oĩ va'e py. Socó ha'e Azeca mbyte ijaty okuapy Efes-Damim py.

<sup>2</sup> Ha'e rā Saul ha'e Israel kuery ma ono'õmba vy Elá yvyugua py ijatypa okuapy. Ha'e py ma oiko katu okuapy filisteu kuery re opu'ā okuapy aguã.

<sup>3</sup> Filisteu kuery ma hovai re ikuai yvy'ã oĩ va'e re, ha'e rā Israel kuery ma yvy'ã kyvõ rupigua re ikuai. Ha'e kuery ikuaria mbyte ma yvyugua oĩ.

<sup>4</sup> Ha'e gui filisteu kuery ijaty okuapya gui peteī ava oẽ ouvy joguero'a kuaa rei va'e. Golias hery va'e, Gate pygua, mboapy metros ipuku va'e.

<sup>5</sup> Oakã re oguereco akã regua overa va'e guigua, ha'e onhemonde ao ratã ipore-pore va'e py. Ha'e va'e poyia ma cinqüenta e cinco quilos.

<sup>6</sup> Hetyma re ma oĩ tetyma regua hatã va'e overa va'e guigua. Ijaxi'y re ma peteī hu'y guaxu overa va'e guigua oĩ.

<sup>7</sup> Hu'y guaxu'y ma ipoguaxu ajukue popẽ'a'y rami. Hu'y guaxu apy ma seis quilos va'e. Henonde ma oo oiny hu'y jokoa tuvixa va'e reraa.

<sup>8</sup> Ha'e va'e ojapukai ho'amy Israel regua xondaro kuery ikuaria katy. Ha'e vy aipoe'i:

– Mba'e re tu pejoguero'a aguã peju va'eri pendeyxy rei pekuapy? Xee ma filisteu e'ŷ teve aiko, ha'e peẽ nda'u Saul rembiguai kuery e'ŷ teve pendekuai? Peiporavo ha'vy peteī ava penderegua xerovaiguarā.

<sup>9</sup> Ha'e gui xereve rojoguero'aa py ha'e va'e xejuka ri ramo ore kuery orekuai 'rā penerembiguirā. Ha'e rā xee ri xepo'aka vy ajuka ramo peẽ 'rā orerembiguirā pendekuai ore roipotaa rami anho.

<sup>10</sup> Aipoe'ive tema:

– Aŷ ma xeayvu ha'amy xondaro kuery Israel regua rovai. Embou na xevy peteī ava, mokoõive rojoguero'a aguã – he'i.

<sup>11</sup> Ha'e rami filisteu va'e ijayvu rā Saul ha'e Israel kuery ha'e javi oendu vy onhemondyipa rei okuapy, okyje vaipa guive.

### *Tyke'y kuery ikuaria katy Davi omondoukaa ague*

<sup>12</sup> Davi ru ma efrateu Judá regua Belém pygua, Jessé hery va'e, ta'y irundy meme va'e. Saul opena oikovy jave ma tujave va'e ae ma oiko.

<sup>13</sup> Jessé ra'y kuery tujakueve mboapy ikuai va'e ma Saul pe ojexa uka vy hupive oo joguero'a aguã katy. Ha'e va'e kuery regua tujave va'e ma Eliabe, mokoõia ma Abinadabe, ha'e rā mboapya ma Samá.

<sup>14</sup> Davi ma kunumive ete va'e. Tyke'y tujakueve anho oo mboapyve Saul rupive.

**15** Ha'e rã Davi ma Saul oña py oo rire ojevy kuerei 'rã gueko Belém py nguu rymba veva'i kuery re opena aguã.

**16** Ha'e ramia ja filisteu va'e ma aje'ive'i nhavõ 'rã ou, ka'aru'i avi. Quarenta ára re ha'e rami oiko.

**17** Ha'e gui ma Jessé aipoe'i gua'y Davi pe:

— Eraa ke nderyke'y kuery pe peteĩ ryru trigo oaimbe pyre ha'e kova'e dez mbojape. Tereo pojava kova'e nunga reraa vy ijaty okuapya py, nderyke'y kuery pe.

**18** Ha'e gui kova'e dez queijo ma mil xondaro re opena va'e pe eraa. Nderyke'y kuery reipou 'rã reikuua aguã ikuai porã pa ra'ea. Ha'e gui reju vy ha'e kuerya gui reru 'rã mba'emo aikuaa aguã.

**19** Ha'e kuery ma Saul ha'e Israel kuery ha'e javi reve 'rã ikuai Elá yvyugua py, filisteu kuery reve joguero'a aguã py — he'i tuu.

**20** Ha'e ramo ko'ëmba rai'i ramove Davi ovv vy veva'i kuery re opena va'erã po py oejapa vy mba'emo ojopy heravy nguu Jessé aipoe'iague rami vy. Xondaro kuery ijaty okuapya py ovaẽ jave ha'e kuery joguero'a aguã katy oje'oi. Ojapukai okuapy reve nhoenoï joguero'a aguã py oje'oi aguã.

**21** Israel kuery ha'e filisteu kuery nhoarõ okuapy, jovaive re hyxy okuapy.

**22** Ha'e ramo Davi mba'emo ogueraa va'ekue oejapa ranhe mba'emo re opena va'ety po py. Ha'e vy onha ovv joguero'a va'erã ikuiaia katy. Ha'e py ovaẽ vy oporandu guyke'y kuery pe ikuai porã paa re.

**23** Ha'e kuery reve Davi ijayvu teri ho'amy reve filisteu regua xondaro kuery ikuiaia gui ou oiny ha'e ae'i opu'ã va'erã Golias hery va'e, filisteu Gate pygua. Ha'e va'e ma ijayvuaty rami ae ijayvu ramo Davi oendu.

### *Israel kuery rovai gigante Golias ijayvuague*

**24** Ha'e va'e ava Israel kuery ha'e javi oexa vy onhamba ixugui okyje vaipa vy.

**25** Ha'e vy joupe-upe aipoe'i:

— Pexa pa ha'e va'e ava ou rã? Israel kuery rovai ijayvu aguã ou. Ha'e va'e jukaare pe ma huvixa ome'ẽ 'rã opa mba'e nunga, guajy ae ome'ẽ avi 'rã ta'yxyrã, ha'e tuu ro pygua kuery imposto re ndopagavei ma 'rã Israel regua — he'i okuapy.

**26** Ha'e rami rã Davi oporandu oña katy'i ikuai va'e pe. Ha'e vy aipoe'i:

— Mba'e nunga ete tu ome'ẽa 'rã ava ha'e va'e filisteu ojuka vy Israel kuery moximbaare oipe'a va'e pe? Marã ramigua tu ha'e va'e opire omboi uka e'ŷ va'ekue oiko, Nhanderuete oikove va'e pegua xondaro kuery rovai ha'e rami ete ijayvu aguã? — he'i.

**27** Ha'e kuery ijayvuague ramia ae ju ijayvu vy

— Ha'e nunga ome'ẽmbaa 'rã ava ijukaare pe — he'i.

**28** Ha'e gui ha'e kuery reve ijayvu rã tyke'y tujave va'e Eliabe oendu vy ivai vaipa Davi pe. Ha'e vy aipoe'i:

— Mba'e re tu reju ra'e apy? Mava'e po py tu reja ra'e veva'i kuery mboapy'i repenaa va'e tekoaa e'ŷa rupi? Xee aikuaa porã renhemboyvateve reia ha'e nderekvaia. Joguero'a va'e rexia aguã rive reju.

**29** Davi ombovai:

— Mba'e nunga py tu xee ajapo vai aŷ? Aporandu rive'i merami va'eri — he'i.

**30** Ha'e rami vy ixugui ojepe'a vy amboae pe ju oporandu ha'ekue rami ae. Ha'e rã jypyguare rami ae ju ombovai.

### *Gigante rovai Davi joguero'a aguã oiko katuague*

**31** Ha'e rami Davi ijayvua oendupaa vy Saul pe omombe'u uka. Ha'e ramo oenoï uka Davi.

**32** Davi ou vy aipoe'i Saul pe:

— Avave py'a re toï eme ixugui okyjea. Xee nerembiguai ae 'rã aa filisteu rovai ajoguero'a aguã — he'i.

<sup>33</sup> Ha'e rami teĩ Saul aipoe'i Davi pe:

— Nda'evei ndee reo aguã filisteu reve rejoguero'a vy, mba'eta ndee ma nekunumi ete teri. Ha'e rã ha'e ma kunumi guive joguero'a va'ety ae rei.

<sup>34</sup> Davi ombovai Saul pe:

— Ha'e gui xee nerembiguai ma xeru rymba kuery vexa'i re apena va'e. Guary e'ŷ vy urso mba'e ou vy mymba kuery ikuiai gui vexa ra'y'i ojopy ramo

<sup>35</sup> hakykue xee aa vy ajuka 'rã. Ha'e vy ijuru gui araa jepe kuerei 'rã vexa ra'y'i. Xere opu'ã teĩ hendyva re ajopy vy ajuka 'rã.

<sup>36</sup> Xee nerembiguai ajuka karamboae guary ha'e urso. Ha'e gui filisteu va'e voi omano 'rã ha'e kuery rami, Nhanderuete oikove va'e pegua xondaro kuery rovai ijayvu rire — he'i.

<sup>37</sup> Davi aipoe'ive tema:

— Guary ha'e urso xejopya gui SENHOR xereraa jepe rire filisteu va'e po gui voi xereraa jepe 'rã — he'i.

Ha'e rami rã Saul aipoe'i Davi pe:

— Tereo ha'vy, SENHOR toiko ndereve — he'i.

<sup>38</sup> Saul omonhemonde Davi oao ratã py ae, inhakã re ngora overa va'e guigua omoĩ, ha'e ipexo re omba'e pexo regua ae omoĩ.

<sup>39</sup> Ao ratã re Davi kyxe omoĩ vy onhea'anga oguata aguã, oiporu va'ety e'ŷ vy. Ha'e rami vy Davi aipoe'i Saul pe:

— Kova'e nunga reve tu nda'evei rima aguata aguã, aiporu va'ety e'ŷ vy — he'i. Ha'e vy Davi omboipa ju ojegui.

<sup>40</sup> Opo py yvyra'i oiporu va'ety ogueraa reve oo yakã'i rembe py. Ha'e py oiporavo peteĩ nhiruĩ ita yxyi rei'i va'e. Ha'e va'e ita omboyrus ovoko vexa'i re openaa rupi oguereko va'ety py. Ha'e vy ita momboa ogueraa avi vy onhembojave ovy filisteu va'e re.

### *Gigante reve Davi nhovaexĩ vy ojukaague*

<sup>41</sup> Davi onhemboja ovy rã filisteu va'e oexa vy ha'e voi ovaexĩ ouvy. Henonde ma hu'y jokoa tuvixa va'e reraa ou avi oiny.

<sup>42</sup> Filisteu va'e oma'ẽ porã vy oexa Davi. Ha'e rami vy oojai rei, kunumi pytã rei ha'e hete porã rei va'e ou rã.

<sup>43</sup> Ha'e rami vy filisteu va'e aipoe'i Davi pe:

— Ha'e gui jagua ri ty'y xee aiko, yvyra'i reve rive reju aguã? — he'i. Ha'e vy nguuete ramigua rery rupi filisteu ijayvu vai Davi re.

<sup>44</sup> Filisteu va'e aipoe'ive tema Davi pe:

— Eju ke xere, ndero'okue ame'ẽ aguã guyra oveve va'e ha'e vixo vaikue ikuai va'e pe — he'i.

<sup>45</sup> Ha'e ramo Davi aipoe'i filisteu pe:

— Ndee ma kyxe reve reju xerovai, hu'y guaxu ha'e hu'y jokoa reve. Ha'e rã xee ma nderovai aju SENHOR ixondaro reta va'e rery rupi. Ha'e va'e ma Israel regua xondaro kuery rovai ndeayvu vaiaty va'e ruete ae oiko.

<sup>46</sup> Aŷ'ive SENHOR nemboaxa 'rã xepo py. Rojuka 'rã, ha'e amboi 'rã neakãgue. Ha'e rami vy filisteu ijaty okuapy va'e retekue voi aŷ've ame'ẽmba 'rã guyra yvate rupi oveve va'e ha'e vixo vaikue pe. Ha'e rami rire yvy jave re oikuaapaa 'rã Israel kuery mbyte Nhanderuete oikoa.

<sup>47</sup> Apy heta va'e kuery ikuai va'e ha'e javi oexa 'rã SENHOR jogueraa jepea kyxe py e'ŷ, hu'y guaxu py e'ŷ guive. Mba'eta pendere opu'ã va'e ma SENHOR ae. Ha'e ae 'rã penemboaxapa orepo py — he'i.

<sup>48</sup> Ha'e gui filisteu va'e Davi ovaexĩ aguã ouve ramo hyxy okuapy va'e oeja ovy vy onha ovy filisteu va'e ovaexĩ vy.

**49** Ovoko'i py Davi opo'ẽ ovvy vy oguenoẽ peteĩ ita. Ha'e va'e ma ita momboa py omombo vy ojapi filisteu rova py. Hova mbyte py ita oike oiny ramo ho'a ngova yvy re.

**50** Ha'e rami py filisteu re Davi ipo'aka raka'e ita py ha'e ita momboa py rive'i. Ojapi vy ojuka, opo py kyxo oguereko vy e'ŷ.

**51** Ha'e gui Davi onha ovvy vy filisteu áry onhemombo vy ikyxe ojopy vy oguenoẽ hyru gui. Ojuka ma vy ha'e va'e py ojaya inhakã. Ha'e ramo filisteu kuery ma guepyarã va'ekue omano maa oexa vy onhamba.

**52** Ha'e ramo Israel ha'e Judá pygua avakue opu'ãmba. Ovy'apa reve oje'oi filisteu kuery rakykue Gate ha'e Ecrom tetã rokẽ peve. Filisteu kuery ojuka pyre ho'a-o'apa tape rupi, Saaraim guive Gate ha'e Ecrom peve.

**53** Ha'e gui ma filisteu kuery rakykue ooague gui Israel kuery ojevypa ju. Filisteu kuery ijaty okuapyague gui ojopypa heravy mba'emo oeja pyre.

**54** Davi ma filisteu akãgue ojopy vy ogueraa Jerusalém tetã py. Ha'e rã hembiporukue ma ngoo py ae omoõ porã.

**55** Filisteu va'e re nhovaexí aguã Davi oo rã Saul oexa vy aipoe'i xondaro kuery ruvixa Abner pe:

— Abner, mava'e ra'y tu peva'e kunumi va'e?

Abner ombovai:

— Xeruvixa, anhetẽ ete nderekove rupi aura vy aipoa'e: Xee ndaikuaai — he'i.

**56** Huvixave aipoe'i ju:

— Eporandu ha'vy mava'e ra'y pa ha'e va'e kunumi va'e — he'i.

**57** Ha'e gui ma filisteu ojukaague gui Davi ojevy ju ma ramo Abner ogueraa Saul oĩa py, filisteu akãgue opo py ogueru reve.

**58** Ha'e ramo Saul oporandu:

— Kunumi, mava'e ra'y tu ndee?

Davi ombovai:

— Xee nerembiguai ma Belém pygua Jessé ra'y aiko — he'i.

## 18

### *Davi reve Jônatas joayvuague*

**1** Ha'e gui Saul reve Davi ijayvupa ma ramo ta'y Jônatas onhe'ẽ py joayvu Davi reve. Jônatas ha'e ae ojeayvua rami oayvu.

**2** Ha'e va'e ára guive Saul oĩa py ae omombyta Davi, tuu ro katy nomondoukavei.

**3** Davi reve Jônatas ojapo peteĩ rami ikuai aguã, ha'e ae ojeayvua rami oayvu vy.

**4** Ha'e rami vy Jônatas oao puku oiporu va'ety omboi vy ome'ẽ Davi pe, tembiporu joe opu'ãa pygua guive: kyxo, guyrapa ha'e ku'akuua.

**5** Davi oo tema'rã Saul omondoukaa py rei, ha'evea rami meme ojapo oikovy. Ha'e ramo ipo py Saul omboaxa oxondaro kuery opena aguã. Heta va'e kuery ojou porãmba okuapy, Saul rembiguai kuery ikuai va'e voi.

### *Kunhague oporaeia Saul oendu vy ivai oinyague*

**6** Ha'e gui Saul oxondaro kuery reve oupa jave Davi avi ojevy filisteu kuery ojukaague gui. Ha'e ramo kunhague Israel tetã py ikuai va'e ha'e javi oẽmba huvixa Saul ovaexí vy. Oporaei oje'oivy, pandeiro reve ojeroky guive. Ovy'a oje'oivy mba'epu reve.

**7** Kunhague ovvy'a reve jorire-rire'i oporaei vy

— Saul ma mil ojuka va'ekue,

    ha'e rã Davi ma dez mil peve ojuka va'ekue — he'i oje'oivy.

**8** Ha'e rami ijayvu rã Saul oendu vy ivai vaipa oiny, ha'e va'e ayvu nombovy'ai ete rã. Ha'e aipoe'i:

    — Davi pe ma “Dez mil peve ojuka va'ekue” he'i kunhague, ha'e rã xevy pe ma “Mil ete'i ojuka va'ekue” he'i. Anhetẽ ixupe oata va'e ma huvixarã oĩ aguã anho — he'i.

<sup>9</sup> Ha'e va'e ára guive Saul ndoexaxe porãvei Davi.

<sup>10</sup> Ko'ë jevy Saul re nhe'ë vai Nhanderuete ombou va'ekue oï ramo ivaia re anho oï ngoo py. Ha'e rã Davi ma jypyguare rami ae ixã reta va'e ombopu oiny. Saul ma hu'y guaxu oguereko opo py.

<sup>11</sup> Ojeupe "Anhyvõ 'rã Davi oo mbotya reve" he'i vy omombo teĩ Davi ojeavy uka. Hu'y guaxu mokoïgue omombo teĩ Davi ojeavy uka kuerei.

<sup>12</sup> Davi reve SENHOR oiko rã Saul okyje ixugui, Saul-a gui ma SENHOR ojepe'a rire.

<sup>13</sup> Ha'e rami vy Saul oña gui omondouka ju Davi, ha'e vy mil xondaro kuery re ju omopena. Ha'e ramo oxondaro kuery reve oẽ ha'e ojevy 'rã heta va'e kuery oexaa py.

<sup>14</sup> Davi reve SENHOR oiko rã ha'evea rami meme ojapo.

<sup>15</sup> Ha'e ramo Saul ma Davi ha'evea rami ojapo oikovya oexa vy okyjeve tema ixugui.

<sup>16</sup> Ha'e rã Israel ha'e Judá kuery ha'e javi ma oayvu okuapy Davi, mba'eta ha'e kuery oexaa py oxondaro kuery reve oẽ ha'e ojevy 'rã.

### *Saul Davi ojuka ukaxeague*

<sup>17</sup> Ha'e gui Saul aipoe'i Davi pe:

— Ne'exa, apy ma oï xerajy guaimive va'e Merabe. Ame'ë 'rã ndera'yxyrã. Ha'e gui ndee ma xevy anho 'rã reiko xera'y ipy'a guaxu va'erã, SENHOR pe vy rejoguero'a aguã — he'i, ojeupe ae "Xepo py e'ë 'rã oiko vai, ha'e rã filisteu kuery po py" he'i vy.

<sup>18</sup> Ha'e ramo Davi ombovai vy aipoe'i Saul pe:

— Ha'e rami avi marã ramigua tu xee, ha'e mba'exa tu xerek, ha'e xeru kuery marã ramigua tu ikuai Israel yvy re, xeruvixa rajy me xee aiko aguã? — he'i.

<sup>19</sup> Ha'e rami teĩ Davi pe Saul guajy Merabe ome'ë 'rãgue py amboae pe ome'ë ta'yxyrã, Meolá pygua Adriel pe.

### *Mical Davi oayvu vy hexe omendaague*

<sup>20</sup> Ha'e rã Saul rajy mboae Mical ma oayvu Davi. Ha'e nunga Saul pe omombe'ua rã oendu vy ovy'a vaipa.

<sup>21</sup> Mba'eta ojeupe aipoe'i: "Xerajy Mical ae 'rã ame'ë ixupe, oiko aguã nhuã imbo'aarã, filisteu kuery ojuka aguã", he'i vy.

Ha'e rami vy Davi pe Saul aipoe'i:

— Kova'e xerajy mokoña va'e re ma aÿ xerajy me 'rã reiko — he'i.

<sup>22</sup> Saul aipoe'i uka guembiguai kuery pe:

— Pendeayyu ke Davi pe ha'e ae'ia py. Ha'e vy aipopeje 'rã: "Ne'exa, huvixa ma nderayvu vaipa, hembiguai kuery ha'e javi nderayvu avi. Eiko ha'vy huvixa rajy merã", peje 'rã.

<sup>23</sup> Ha'e rami Davi pe Saul rembiguai kuery ijayvu rã ombovai:

— Pavẽ gui xeporiaukueve va'eri huvixa rajy me ta ri ty'y aiko? — he'i.

<sup>24</sup> Ha'e rami ijayvuague Saul rembiguai kuery ixupe omombe'u vy aipoe'i:

— Po rami ma Davi ijayvu.

<sup>25</sup> Saul aipoe'ive ju:

— Po rami aipopeje ju 'rã Davi pe: "Oreruvixa ma mba'eve ndoipotai reme'ë tajy re remenda aguã, cem filisteu kuery pirekue e'ë vy, ngovaigua kuery re ojepy uka aguã" peje 'rã — he'i Saul, mba'eta oipota filisteu kuery po py Davi omano.

<sup>26</sup> Ha'e va'e ayvu Davi pe Saul rembiguai kuery omombe'u rã ovy'a vaipa huvixa rajy merã oiko aguã. Ha'e rami vy oa'angaague ára ovaë e'ë mbove

<sup>27</sup> Davi opu'ã vy ojeupegua kuery ogueraa vy ojuka duzentos filisteu regua. Ipirekue omboipa heruvy vy ome'ë huvixa pe, tajy me oiko aguã. Ha'e ramo ta'yxyrã Saul ome'ë guajy Mical.

<sup>28</sup> Ha'e nunga Saul oexa vy oikuua Davi reve SENHOR anhetë oikoa, ha'e tajy Mical Davi oayvua guive oexa.

<sup>29</sup> Ha'e rami vy Davi gui Saul okyjeve oikovy vy nda'ija'ei ae tema hexe.

<sup>30</sup> Filisteu yvatekueve pegua xondaro kuery joguero'a vy oje'oi nhavõ Saul rembiguai kuery ikuai va'e gui Davi ojukave 'rã. Ha'e ramo hery opa rupi oendupaa.

## 19

### *Davi re Jônatas ojerureague*

<sup>1</sup> Ha'e gui ma gua'y Jônatas pe Saul ijayvu Davi ojuka aguã re, guembiguai kuery ha'e javi pe guive. Ha'e rami teñ Saul ra'y Jônatas Davi oayvu ete vy

<sup>2</sup> omombe'u ixupe. Ha'e vy aipoe'i:

— Xeru Saul ndejuka ukaxe. Enheangu ke ko'ẽ rã aje'ivekue guarã. Tereo renhemí aguã katy, epyta ha'e py ae.

<sup>3</sup> Ha'e rã xee ma aa 'rã xeru reve nhuñdy rupi reña katy'i peve. Xeru reve xeayvu 'rã ndere, ha'e aexa 'rã oiko va'e. Ha'e gui ma aikuua uka 'rã ndevy — he'i.

<sup>4</sup> Ha'e gui ma nguu Saul reve Jônatas ijayvu porã Davi re. Ha'e vy aipoe'i:

— Xeruvixa, ejejavy eme nerembiguai Davi rovai, mba'eta ndevy pe ndojapo vai. Ha'e rami 'rãgue py ndevy ojapo oikovy va'e ma iporã va'e meme.

<sup>5</sup> Mba'eta ndojeayvuvei reve filisteu kuery ojuka reta ramo SENHOR ogueraa jepe Israel kuery. Ndee ae voi rexu vy rerovy'a va'ekue. Mba'e re 'rã'vy rejeady heko porã'i va'e ruguy remoë vy, Davi rejuka rive vy? — he'i.

<sup>6</sup> Ha'e rami Jônatas ijayvu 'rã Saul oendu vy oura:

— Anhetê ete SENHOR oikove va'e rupi aura vy aipoa'e: Davi ma nomanoi 'rã — he'i.

<sup>7</sup> Ha'e rã Jônatas Davi oenoĩ uka vy ixupe omombe'upa tuu ijayvuague ha'e javi. Ha'e rami vy Saul oña py ju ogueru. Ha'e ramo henonde rupi ju oiko jypyguare rami ae.

### *Peteigue ju Saul Davi ojuka ukaxeague*

<sup>8</sup> Ha'e gui teñgue ju oiko joe opu'aa. Ha'e ramo filisteu kuery reve Davi joguero'a vy oitypa ramo onhamba okuapy ixugui.

<sup>9</sup> Ha'e rã Saul re ma nhe'ẽ vai ju oĩ SENHOR ombou va'ekue. Ngoo py oguapy oiny, opo py hu'y guaxu oguereco reve. Henonde Davi ombopu oiny mba'epu ixã reta va'e.

<sup>10</sup> Ha'e rami vy Davi re Saul hu'y omombo xapy'a oo mbotya reve onhyvõxe vy, teñ ojeavy uka rã hu'y guaxu ipija oiny oo mbotya re. Ha'e ramo Davi onha vy oo jepe.

<sup>11</sup> Ha'e va'e pyavyve Saul omondouka guembiguai kuery Davi ro py, oarõ vy aje'ive reve ojuka aguã. Ha'e nunga Davi pe ta'yxy Mical omombe'u vy

— Kova'e pyávy ndereo jepei ri vy ko'ẽ rã ndejukaa 'rã — he'i.

### *Mical nguu ombotavy ramo Davi oo jepeague*

<sup>12</sup> Ha'e gui Mical ma janela yvate oĩ va'e gui omboguejy Davi. Ha'e ramo onha ovv vy oo jepe.

<sup>13</sup> Mical ojopy peteñ ta'angaa ngopy oguereco va'e. Ha'e va'e ma tupa py omonheno vy inhakã re omoñ peteñ ajukue kavara rague guigua, ha'e ao puku py ju onhovãmba inony.

<sup>14</sup> Saul rembiguai kuery Davi reraarã ombou va'ekue pe ma ta'yxy ijayvu vy

— Imba'eaxy oupy — he'i.

<sup>15</sup> Ha'e rire Saul guembiguai kuery omondouka ju Davi oexa ete aguã. Ha'e vy aipoe'i ha'e kuery pe:

— Peru tema hupa reve teñ, ajuka aguã — he'i.

<sup>16</sup> Ha'e ramo hembiguai kuery oo ju vy tupa py oexa rã ta'angaa oo pygua ae itui ra'e, ha'e inhakã re ajukue kavara rague guigua oĩ.

<sup>17</sup> Ha'e ramo guajy Mical pe Saul aipoe'i:

— Mba'e re tu nami xembotavy vy remondouka xerovaigua?

Mical ombovai:

— Mba'eta ha'e aipoe'i xevy: “Eja taa. Ha'e rami e'ŷ ramo xee rojuka 'rã”, he'i va'ekue.

### *Guembiguai kuery reve Saul ayvu omombe'u okuapyague*

<sup>18</sup> Ha'e rami py Davi onha vy oo jepe. Ha'e vy Ramá tetā py Samuel oĩa py ovaẽ vy ixupe omombe'u Saul ojapoague ha'e javi. Ha'e rami vy Samuel reve ojepe'a vy profeta kuery ro oĩ va'e py ju oiko.

<sup>19</sup> Ha'e gui Saul pe aipo'ea:

— Davi je Ramá tetā py oiko profeta kuery ro py — 'ea.

<sup>20</sup> Ha'e rami rã Saul omondouka guembiguai kuery Davi ogueru aguã. Ha'e kuery oo vy oexa profeta kuery ikuai va'e ayvu omombe'u okuapy rã. Samuel voi oĩ ha'e kuery reroayvua py. Saul rembiguai kuery re voi ou Nhanderuete Nhe'ẽ, ha'e ramo ha'e kuery omombe'u avi okuapy ayvu.

<sup>21</sup> Ha'e nunga Saul pe omombe'ua rã oendu vy guembiguai kuery mboae ju omondouka. Ha'e rã ha'e kuery voi omombe'u avi ayvu. Ha'e ramo Saul ma mboapykuea ju omondouka. Ha'e kuery voi omombe'u avi ayvu.

<sup>22</sup> Ha'e ramo ha'e ae ma voi oo Ramá tetā py. Ygua tuvixa va'e Seco tekoa katy'i oĩ va'e py ovaẽ vy oporandu:

— Mamo tu ikuai Davi ha'e Samuel?

Ombovai vy

— Ha'e kuery ma Ramá tetā py ikuai profeta kuery ro py — 'ea.

<sup>23</sup> Ha'e ramo Ramá tetā py profeta kuery ro oĩ va'e katy oo. Ha'e rã hexe voi Nhanderuete Nhe'ẽ ou. Ha'e ramo oguata ovya ramive ayvu omombe'u ovvy Ramá py profeta kuery ro oĩ va'e py ovaẽ peve.

<sup>24</sup> Ha'e py ma oao puku omboi vy omombe'u oiny ayvu Samuel renonde. Ha'e rami onheno oupy ha'e va'e ára re, pytũ mbukukue re guive. Ha'e rami rã aipo'ea:

— Saul voi teve oiko profeta kuery va'e regua?

## 20

### *Davi ha'e Jônatas joayvu eteague*

<sup>1</sup> Ha'e gui Ramá tetā py profeta kuery ro oĩ va'e gui Davi onhave ju ovvy. Ha'e vy aipoe'i Jônatas pe:

— Mba'e tu xee ajapo? Mba'e nungakue py tu ajejav? Mba'e py tu xee ajapo vai nderupe, xejuka ukaxe aguã?

<sup>2</sup> Ombovai:

— Ha'e nunga ndoikoi 'rã. Nanderejukai 'rãe. Xeru ma ndojapoi 'rã mba'eve, tuvixa va'e neĩ kyrĩ'i va'e xevy ranhe omombe'u e'ŷ re. Mba'erã tu xeru ha'e ramigua ndoikuua ukai 'rã xevy? Ha'e nunga ndoikoi 'rãe — he'i.

<sup>3</sup> Ha'e rã Davi oura reve ombovai:

— Nderu ma oikuua ae ndee xemboaxya. Ha'e nunga rupi ojeupe ae aipoe'i: "Jônatas toikuaa eme ha'e nunga, iporiau e'ŷ aguã", he'i va'ekue. Anhetẽ ete SENHOR oikove va'e rupi, ha'e ndee Jônatas nderekove rupi avi aura vy aipoa'e: Xee amano aguã ovaẽ rai'i ma — he'i.

<sup>4</sup> Ha'e rami rã Jônatas aipoe'i Davi pe:

— Ndee reipota va'e tema xee ajapo 'rã.

<sup>5</sup> Davi ombovai:

— Ko'ẽ ramo oiko 'rã ngaru jaxy pyau pygua, huvixa reve xee akaru ainy aguã 'rãgue. Va'eri tove taa nhuündy rupi anhemi aguã, mboapy araa ka'arukue peve.

<sup>6</sup> Ha'e gui xee naĩa nderu oikuua rã ndee aipo're 'rã: "Davi ojerure kuri Belém guetã katy oo aguã re, mba'eta ha'e py hetarã kuery ha'e javi 'rã ojapo mymba ome'ẽ okuapy aguã ma'etŷa nhavõ", 're 'rã.

<sup>7</sup> Ha'e ramo xapy'a rei nderu "Ha'eve" he'i ramo xee nerembiguai aiko porã 'rã. Teĩ ivai ri ramo reikuua ma 'rã xejukaxea.

<sup>8</sup> Xee nerembiguai pe exa uka xemboaxya, xereve SENHOR renonde peteī rami jaiko aguā rami rejapo rire. Ha'e rami e'ŷ rā xapy'a rei xere ha'eve'ŷ va'e oĩa reikuua vy ndee ae xejuka. Mba'e re 'rā tu nderu pe xemboaxa? — he'i.

<sup>9</sup> Jônatas ombovai:

— Ha'e nunga ma ndoikoi 'rāe ndere. Xeru ndejukaxe aikuua ri vy aju voi 'rā ndea py, xee ae amombe'u aguā — he'i.

<sup>10</sup> Davi oporandu Jônatas pe:

— Ha'e rami rā nderu ivai reve ri ombovai rā mava'e tu ou 'rā xevy pe omombe'u aguā?

<sup>11</sup> Jônatas ombovai:

— Eju ha'vy, jaa nhuñdy rupi — he'i. Ha'e vy jogueraa.

*Davi reve peteī rami ikuai aguā Jônatas ojapoague*

<sup>12</sup> Ha'e gui Jônatas aipoe'i Davi pe:

— SENHOR Israel kuery ruete oendua py aipoa'e: Ko'ẽ rā e'ŷ vy ko'ẽ mboae ramo aikuua pota 'rā xerua py. Xapy'a rei ndee Davi pe ha'e ojapo porāxe ri ramo xee amombe'u uka 'rā.

<sup>13</sup> Ha'e rami avi xapy'a rei xeru ndejukaxe teī ndevy xee ndaikuua ukai ri ramo reo jepe aguā rami, ha'e ramo tove SENHOR xee Jônatas taxembopaga ha'e ae oipotaa rami. SENHOR toiko ndereve, xeru reve oikoague rami.

<sup>14</sup> Ha'e gui xapy'a rei xee aikove teri ramo xemboaxy ke SENHOR rami, amano e'ŷ aguā.

<sup>15</sup> Ha'e vyv guí SENHOR omomba teī ndee Davi rovaigua kuery ha'e javi, ha'e rami teī emboaxy e'ŷ eme xero pygua kuery — he'i.

<sup>16</sup> Ha'e rami Davi ro pygua kuery re Jônatas oma'ẽ vy ojapo peteī rami ikuai aguā. Ha'e vy aipoe'i:

— Tove SENHOR tombopaga Davi rovaigua kuery ha'e javi — he'i.

<sup>17</sup> Teīgue ju Jônatas ojapo Davi oayvua rupi oura aguā rami, mba'eta Jônatas oayvu onhe'ẽ ha'e javi py.

<sup>18</sup> Ha'e gui Jônatas aipoe'ive:

— Ko'ẽ ramo oiko 'rā ngaru jaxy pyau pygua. Ha'e va'e py oporandua 'rā ndere, nerenda oĩ rive ramo.

<sup>19</sup> Mboapy araa py ma reo pojava 'rā jypy renhemiaque katy, Ezel py itaova rovai hi'ää py 'rā repyta.

<sup>20</sup> Ha'e gui xee ma ha'e katy amombo 'rā mboapy hu'y, itaova re rive omombo va'e rami.

<sup>21</sup> Ha'e rami vy amondouka 'rā kunumi va'e, “Tereo, eka hu'y”, ha'e vy. Ha'e va'e gui xapy'a rei kunumi va'e pe “Ne'exa, hu'y tu kyvõ'i rami ikuai, eru”, ha'e ramo ke eju ju Davi, mba'eta anhetē ete SENHOR oikove va'e rupi aura vy aipoa'e: Reiko porā 'rā, mba'eve gui rekyje e'ŷ re.

<sup>22</sup> Ha'e rami teī xapy'a rei kunumi va'e pe “Neī ke, hu'y nderovaive'i ma ikuai”, ha'e ramo tereo, SENHOR nemondouka ramo.

<sup>23</sup> Ha'e gui jajogueroayvuague rami vy nhanembyte SENHOR oĩ 'rā raka'e rā peve — he'i.

<sup>24</sup> Ha'e rami rā Davi oo vy nhuñdy rupi onhemi.

Ha'e gui ngaru jaxy pyau pygua oiko jave py ma huvixa ma mesa py oĩ okaru aguā.

<sup>25</sup> Gueko rami vy guenda py ae oĩ oo mbotya vyv'iry. Jônatas ma henonde'i oĩ, ha'e gui Saul vyv'iry ma Abner oĩ avi. Ha'e rā Davi renda ma oĩ rive.

<sup>26</sup> Ha'e rami teī ha'e va'e ára ma Saul mba'eve nde'i, ojeupe ae “Davi re ko mba'emo rei oĩ rā ha'eve'ŷ va'e teri oiko, onhemongy'a uka va'ekue ae 'rā”, he'i vy.

<sup>27</sup> Ko'ẽ jevy ha'ekue rami ae ju oiko mokoĩ araa ma ngaru jaxy pyau pygua. Davi renda oĩ rive ae tema.

Ha'e ramo Saul aipoe'i gua'y Jônatas pe:

— Mba'e re tu Jessé ra'y ndoui okaru vy, kuee neī aŷ ma voi?

<sup>28</sup> Jônatas ombovai:

— Davi ijayvu porā'ia rupi ojerure xevy Belém tekoaa katy oo aguā re.

<sup>29</sup> Ha'e vy aipoe'i xevy: "Ajerure aa aguā, mba'eta xeretarā kuery mba'emo ome'ē aguā rami ikuai tekoaa py. Ha'e vy xeretarā kuery va'e regua onhea'ā rei xereraa aguā re. Aŷ ha'eve ri ramo ajerure aa aguā re, xeregua kuery aexapa aguā", he'i rire. Ha'e nunga rupi ae ndoui xeruvixa ngaru rejapoa py.

### *Jônatas pe Saul ivai reve ijayvuague*

<sup>30</sup> Ha'e ramo Saul ma Jônatas pe ae ivai. Ha'e vy aipoe'i:

— Kunha heko vai ha'e inhakā ratā va'e pi'a! Xee ndaikuuaai teve Jessé ra'y reiporavoague nemoxīmbaarā, ha'e ndexy nekuavāare voi oxīmba aguā?

<sup>31</sup> Ha'e nunga rupi Jessé ra'y yvy re oikovea ja neī ndee ma voi riae ndereikoi 'rā, neī repenaa voi noī atāi 'rā. Eru ruka ha'vy aŷ ma voi, ajuka 'rāe — he'i.

<sup>32</sup> Ha'e ramo Jônatas ombovai vy aipoe'i nguu Saul pe:

— Mba'e re 'rā ha'vy rejuka? Mba'e tu ojapo vai?

<sup>33</sup> Ha'e rami teī hexe Saul omombo hu'y guaxu onhyvō aguā. Ha'e rami rā Jônatas oikuua anhetē ae tuu onhembopy'aa Davi ojuka aguā.

<sup>34</sup> Ha'e rire Jônatas ivai vy mesa gui opu'ā ovyy. Mokoī araa ma ngaru jaxy pyau pygua va'e ára ma ndokarui, tuu ha'e rami ete Davi re ijayvu rā iporiau vy.

### *Jônatas Davi mondoukaa rupi ijayvuague*

<sup>35</sup> Ko'ē jevy Davi reve Jônatas oa'angaague ára py oo nhuūndy katy. Ogueraa avi peteī guembiguai kunumi va'e.

<sup>36</sup> Kunumi va'e pe

— Enha ke hu'y amombo rā reru aguā — he'i. Ha'e ramo ha'e va'e onha jave omombo peteī hu'y henonderā katy.

<sup>37</sup> Jônatas hu'y omombo va'ekue ho'aague py kunumi va'e ovaē ramo Jônatas ojapukai ixupe. Ha'e vy aipoe'i:

— Nderovaive'i e'ŷ teve hu'y ho'a?

<sup>38</sup> Teīgue ju Jônatas ojapukai:

— Neī ejapura ke, neakuā ta'vy — he'i. Ha'e ramo kunumi Jônatas rembiguai hu'y ojopy ma vy ojevy ju herekoaa oīa py.

<sup>39</sup> Kunumi va'e mba'eve ma voi ndoikuuaai. Jônatas ha'e Davi anho'i oikuua ha'e nunga.

<sup>40</sup> Ha'e gui ma kunumi ogueru va'ekue po py Jônatas omoī guapa. Ha'e vy aipoe'i:

— Tereo, eraa tetā katy.

<sup>41</sup> Kunumi va'e oo'i ramove Davi opu'ā ouvy kuaray puku-a katy oīague gui. Mboapykue oī guenapy'ā re, ngova yvy re omovaē reve. Ha'e vy Jônatas reve mokoīve joayvu vyve ojae'o. Davi ma ojae'ove oiny.

<sup>42</sup> Jônatas aipoe'i Davi pe:

— Tereo porā'i ke, nhande mokoīve SENHOR rery rupi jaura vy "SENHOR toī nhanem-byte, ha'e gui xero pygua ha'e ndero pygua kuery mbyte avi", ja'e rire — he'i.

Ha'e ramo Davi opu'ā ovyy. Ha'e rā Jônatas ma tetā katy ju ojevy.

## 21

### *Sacerdote Aimeleque oīa py Davi ooague*

<sup>1</sup> Ha'e gui ma Nobe tetā py Davi ovaē sacerdote Aimeleque oīa py. Ha'e ramo Aimeleque ma Davi ou rā oexa vy oryryipa reve oē ovaexī vy. Ha'e vy aipoe'i:

— Mba'e re tu ndee ae'i reju? Mava'eve pa ndoui ndereve?

<sup>2</sup> Davi ombovai sacerdote Aimeleque pe:

— Huvixave xembou vy aipoe'i: "Mava'eve toikuua eme mba'e re pa romondoukaa, ha'e mba'e nunga rupi paa voi", he'i va'ekue. Ha'e rā xevygua xondaro kuery pe ma aipoa'e peteī henda py rojoxa ju aguā rami.

<sup>3</sup> Aŷ ma mba'e tu rereko apy ndepo py? Eme'ẽ xevy peteĩ nhiruĩ mbojape, e'ŷ vy rereko va'e rei tema — he'i.

<sup>4</sup> Sacerdote ombovai vy Davi pe aipoe'i:

— Mbojape rive'i ma ndarekoi xepo py. Mbojape iky'a e'ŷ va'e anho oĩ. Ha'e rami avi nderevegua avakue kunha reve nhogueronheno ve'ŷ teri va'e pe ma guive rã — he'i.

<sup>5</sup> Davi ombovai vy aipoe'i sacerdote pe:

— Tá, ha'e rami ae jepi, rojoguero'a aguã katy roo nhavõ nda'evei ae kunhague reve roõ aguã. Ha'e rami vy xerevegua avakue nonhemboete ky'ai 'rã roo rivea rupi, ha'e gui aŷ katuve ma nda'iky'aive ma 'rã — he'i.

<sup>6</sup> Ha'e rami rã sacerdote ome'ẽ mbojape iky'a e'ŷ va'e, amboae regua ha'e py nda'ipoi rã. Mbojape iky'a e'ŷ va'e anho oĩ, SENHOR renonde gui oguenoẽ mbyre, hi'ára py porã omboekovia rire mbojape haku rei teri va'e re.

<sup>7</sup> Ha'e va'e ára py oĩ ra'e peteĩ Saul rembiguai regua, SENHOR renonde oĩ aguã rami oiko va'e ae. Doegue hery va'e, Edom pygua, Saul rymba kuery re opena va'e.

<sup>8</sup> Ha'e gui Davi aipoe'i Aimeleque pe:

— Ndererekoi pa hu'y guaxu, e'ŷ vy kyxe? Mba'eta xee ndarekoi kyxe neĩ xerembiporu ma voi, huvixa xembou pojava rã.

<sup>9</sup> Sacerdote ombovai:

— Apy oĩ va'e ma kyxe filisteu Golias Elá yvyugua py rejuka va'ekue mba'ekue. Manto sacerdote pegua'ã katy oĩ ajukue py onhovã mbyre. Reraaxe vy ke eraa, mba'eta amboae nda'ipoi kova'e anho e'ŷ vy — he'i.

Davi aipoe'i:

— Amboae nda'ipoi ri ha'e va'e ramigua. Eme'ẽ xevy.

### *Gate pygua huvixa Aquis oĩa katy ojavaague*

<sup>10</sup> Ha'e va'e ára Davi opu'ã vy ojava ovu Saul gui. Ha'e vy Gate pygua huvixa Aquis oĩa py ju ovaẽ.

<sup>11</sup> Ha'e rami teĩ Aquis pe hembiguai kuery aipoe'i okuapy:

— Peva'e pa Davi oyvy re huvixa opena va'e e'ŷ teve? Ixupe e'ŷ teve ojeroky reve oporaei reve “Saul ma mil ete'i ojuka, ha'e rã Davi ma dez mil peve ojuka va'e”, he'i okuapyague va'e? — he'i okuapy.

<sup>12</sup> Ha'e rami ijayvu rã Davi oendu vy ima'endu'a riae oikovy ha'e ae'i. Ha'e rami vy Gate pygua huvixa Aquis gui okyje.

<sup>13</sup> Ha'e rami vy ha'e kuery oexaa py onhembotavy rei vy inhakã porã e'ŷ va'e rami oiko. Ha'e vy okẽ yta rupi oikaraĩmba, ha'e hendyry xyrypa rei oikovy guendyva rupi.

<sup>14</sup> Ha'e ramo Aquis aipoe'i guembiguai kuery pe:

— Pexa ma kova'e ava na'inhakã porãia va'eri. Mba'e re tu xea py peru?

<sup>15</sup> Xevy pe oata ri ty'y inhakã porã e'ŷ va'e, ha'e va'e Peru avi aguã, xerenonde inhakã vai rei oikovy aguã? Ha'e va'e voi ri ty'y oike 'rã xero py? — he'i.

## 22

### *Adulão ha'e Moabe py Davi onhemiague*

<sup>1</sup> Ha'e rami rã Davi ha'e gui oo vy Adulão katy'i itakua oĩ va'e py ju onhemi. Ha'e py ha'e oikoa tyke'y kuery ha'e tuu ro pygua kuery ha'e javi oendu vy oupa ha'e py hexeve ikuai aguã.

<sup>2</sup> Hexe onhemoirũ avi avakue mba'emo py ojapurapa rei va'e ha'e javi, oreve va'e e'ŷ vy ndovy'ai rei va'e. Ha'e rã ha'e ma oiko ha'e kuery re opena va'e. Ha'e javi vy hexeve ikuai quattrocentos avakue rivyvyi.

<sup>3</sup> Ha'e va'e gui Davi oo ju Moabe regua Mispa katy. Ha'e rami vy ha'e pygua huvixa pe aipoe'i:

— Toiko xeru ha'e ha'i pendereve, mba'e pa Nhanderuete xere ojapo 'rāa aikuaa peve — he'i.

<sup>4</sup> Ha'e rami vy Moabe pygua huvixa oĩa py ha'e kuery ogueru ramo hexeve ikuai, Davi itakua py oikoa ja.

<sup>5</sup> Ha'e gui profeta Gade aipoe'i Davi pe:

— Epytave eme apy. Tereo, Judá yvy re ju eike — he'i ramo Davi oẽ vy Herete ka'aguy'i re ju oo.

### *Nobe py sacerdote ikuai va'ekue Saul ojuka ukapaague*

<sup>6</sup> Davi ha'e hexeveguia avakue ikuiaia oikuaa okuapya. Ha'e nunga Saul pe omombe'ua rā oendu. Ha'e javi py Saul ma Gibeá py oĩ, yvyra-vyra'i guy py, yvy'ã'ia re. Opo py oguerekó hu'y guaxu, ha'e hexeve hembiguai kuery voi ikuai.

<sup>7</sup> Ha'e va'e kuery pe aipoe'i:

— Benjamim ramymino kuery, pendu ke xeayvua! Pêvy voi ty'y Jessé ra'y ome'ẽ 'rā yvy ha'e uvaty? Peẽ kuery ha'e javi pendeapo 'rā ri ty'y mil ha'e cem re pepena aguã rami?

<sup>8</sup> Ha'e rami aguã ae ri ty'y pejogueroayyu pekuapy xerovai? Mava'eve rei nomombe'ui xevy Jessé ra'y reve xera'y peteĩ rami ikuai aguã re jogueroayvuague. Peẽ kuery va'e regua peteĩve naxemboaxyi vy xevy napemombe'ui xera'y eteve voi xerembiguai reve xemoingo axy aguã rami jogueroayvuague, aÿ minha jaexaa rami — he'i.

<sup>9</sup> Ha'e ramo Edom pygua Doegue ma ombovai, Saul rembiguai kuery mboae reve hi'aĩ avia py. Ha'e vy aipoe'i:

— Ha'e gui xee ma aexa Jessé ra'y Nobe tetã py ovaẽ rā, Aitube ra'y Aimeleque oĩa py.

<sup>10</sup> Ha'e gui ha'e ojerure rā Aimeleque oporandu SENHOR pe. Ha'e vy ixupe ome'ẽ tembi'u. Ixupe ome'ẽ avi kyxe filisteu Golias mba'ekue — he'i.

<sup>11</sup> Ha'e rami rā huvixa oenoĩ uka sacerdote Aitube ra'y Aimeleque, ha'e tuu ro pygua kuery ha'e javi. Ha'e va'e kuery ma Nobe py sacerdote ikuai va'e. Ha'e ramo ha'e kuery ha'e javi ou okuapya huvixaa py.

<sup>12</sup> Saul aipoe'i:

— Aitube ra'y, endu ke xeayvua!

Ombovai:

— Apy ma aĩ, xeruvixa — he'i.

<sup>13</sup> Ha'e ramo Saul aipoe'i:

— Mba'e re tu Jessé ra'y reve penhomongeta xerovai? Mba'eta ixupe reme'ẽ mbojape ha'e kyxe. Hexe reporandu avi Nhanderuete pe, xerovai opu'ã vy xejuka nhemi aguã, aÿ jaexaa rami — he'i.

<sup>14</sup> Ha'e ramo Aimeleque ombovai vy huvixa pe aipoe'i:

— Ha'e rami avi mava'e ha'vy nerembiguai kuery ikuai va'e regua Davi rami heko porã va'e? Ha'e ma nderajy me, nerarõa kuery re opena va'e, ha'e ndero pygua kuery omboeteve okuapya va'e.

<sup>15</sup> Tyrā aÿ ramo teve jypy'i Nhanderuete pe ajerure hexe? Any! Ndeayvu rive eme xee nerembiguai re, neĩ xeru ro pygua kuery re. Mba'eta xee nerembiguai va'e ma mba'eve aikuua va'e'ÿ, tuvixa va'e neĩ kyrl'i va'e — he'i.

<sup>16</sup> Ha'e rami teĩ huvixave ombovai:

— Aimeleque, ndee remano 'rā, nderu ro pygua kuery ha'e javi reve.

<sup>17</sup> Huvixa aipoe'ive ju harõa kuery hexeve ikuai va'e pe:

— Peju, pejukapa SENHOR pegua sacerdote kuery, mba'eta ha'e kuery voi Davi re onhemoirû vy ojava rā oikuua va'eri xevy ndoikuua ukai rire — he'i teĩ hembiguai kuery ndojukaxei SENHOR pegua sacerdote kuery.

<sup>18</sup> Ha'e ramo Doegue pe ju huvixa aipoe'i:

— Eju, ejukapa sacerdote kuery — he'i ramo Edom pygua Doegue ou vy ojukapa sacerdote kuery. Ha'e va'e ára ojuka oitenta e cinco avakue manto sacerdote pegua py onhemonde va'ekue.

<sup>19</sup> Nobe tetā sacerdote kuery rekaoa py voi ojukapa kyxe py: avakue ha'e kunhague, kyrīgue ha'e okambu'i va'e, vaka, mburika'i ha'e vexa'i kuery.

### *Davi reve Abiatar voi onhemiague*

<sup>20</sup> Aitube ra'y Aimeleque ra'y kuery regua ojukaa rā pete'i anho oo jepe, Abiatar hery va'e. Ha'e va'e ma Davi oña katy onha ovv.

<sup>21</sup> Ha'e vy ixupe omombe'u vy aipoe'i:

— Saul ma ojuka ukapa ma SENHOR pegua sacerdote kuery.

<sup>22</sup> Ha'e ramo Davi aipoe'i Abiatar pe:

— Xee aikuua porā ae ma Edom pygua Doegue ha'e py oĩ rire nomombe'u e'ŷi 'rāe Saul pe. Xekáuxa ae nderu ro pygua kuery omanomba.

<sup>23</sup> Eiko ri xereve, ekyje eme, mba'eta xejukaxeaa ma ndee voi ndejukaxe avi. Xereve vy ma reo jepe 'rā — he'i.

## 23

### *Queila pygua kuery Davi ogueraa jepeague*

<sup>1</sup> Ha'e gui ma Davi pe omombe'ua:

— Queila pygua kuery reve filisteu kuery joguero'a vy imondapa mba'emo ra'yīgue re 'ea.

<sup>2</sup> Ha'e rami rā SENHOR pe Davi oporandu vy aipoe'i:

— Ha'e gui xee aa vy pa aity 'rā filisteu kuery?

SENHOR ombovai vy aipoe'i Davi pe:

— Tereo, filisteu kuery peitypa 'rā, ha'e vy peraa jepe 'rā Queila pygua kuery — he'i.

<sup>3</sup> Ha'e rami tei avakue Davi reve ikuai va'e aipoe'i:

— Apy Judá yvy re rive voi rokyje, ha'e gui Queila katy filisteu regua xondaro kuery rovai roje'oi vy katuve ma — he'i okuapy.

<sup>4</sup> Ha'e rami rā Davi teīgue ju oporandu SENHOR pe. Ha'e rā SENHOR ombovai vy aipoe'i:

— Peiko katu tema Queila katy peo aguā, mba'eta pendepo py amboaxapa 'rā filisteu kuery — he'i.

<sup>5</sup> Ha'e ramo Queila katy Davi oje'oi hexeveguia kuery va'e reve. Filisteu kuery rovai opu'ā vy ogueraapa ju mymba kuery imondaague. Heta avi ojuka ha'e kuery regua. Ha'e rami py Davi ogueraa jepe Queila pygua kuery.

<sup>6</sup> Davi oña katy Aimeleque ra'y Abiatar ojava va'ekue Queila katy oo avi vy opo py ogueraa manto sacerdote pegua.

<sup>7</sup> Ha'e gui Saul pe omombe'ua Queila katy Davi ooague. Saul aipoe'i:

— Nhanderuete omboaxa ma xepo py. Ojejoko uka ma, pete'i tetā hokē jokoa va'e py oike rire — he'i.

<sup>8</sup> Ha'e rami vy Saul oenoí ukapa ojeupagua kuery, joe opu'ā vy Queila katy oje'oi aguā, Davi ha'e hexeveguia kuery ojokopa aguā.

<sup>9</sup> Ha'e rami tei Davi oikuua ae Saul ojukaxe oikovya. Ha'e vy aipoe'i sacerdote Abiatar pe:

— Eru apy manto sacerdote pegua — he'i ramo ogueru.

<sup>10</sup> Ha'e gui Davi onhembo'e SENHOR pe:

— Xe-SENHOR Israel kuery ruete va'e, xee nerembiguai aendu Saul xekáuxa Queila tetā py ou vy ombovaipaxea.

<sup>11</sup> Ha'e gui Queila pygua avakue xemboaxa 'rā teve ipo py? Ha'e Saul ou ae 'rā teve, xee nerembiguai aendua rami? Ah SENHOR Israel kuery ruete, eikuua uka ke xee nerembiguai pe.

SENHOR ombovai:

— Ou 'rã — he'i.

<sup>12</sup> Ha'e gui teīgue ju Davi oporandu ixupe:

— Ha'e gui avakue Queila pygua xemboaxa 'rã teve Saul po py, xerembiguai kuery reve?

SENHOR ombovai ju:

— Penemboaxa 'rã ipo py — he'i.

<sup>13</sup> Ha'e rami rã Davi ma hexeve avakue seiscentos ikuai va'e reve oiko katupa vy Queila gui oëmba vy ooa katy rei oje'oi. Ha'e gui Queila gui Davi ojava maa omombe'ua rã Saul oendu vy ndoo potavei.

<sup>14</sup> Ha'e rã Davi ma tekao e'ÿa rupi ae tema oiko onhemia py. Yvy'ã reia Zife tekao e'ÿa re oiko. Saul ko'ë nhavõ oeka oikovy teñ Nhanderuete nomboaxai ipo py.

### *Teīgue ju Davi ha'e Jônatas peteī rami ikuai aguã re jogueroayvuague*

<sup>15</sup> Ha'e gui Saul ojukaxe vy oo jevyague Davi oikuua vy opyta ranhe Horesa py Zife tekao e'ÿa py.

<sup>16</sup> Ha'e ramo Saul ra'y Jônatas opu'ã vy oo Davi oña katy Horesa py. Ha'e vy ombopy'a guaxuve Nhanderuete re ojeroviaa py.

<sup>17</sup> Ha'e vy aipoe'i:

— Ekyje eme, mba'eta xeru Saul nandejoui 'rã. Ha'e rami 'rãgue py ndee ae 'rã repena Israel kuery re. Ndereve xee voi aí 'rã nepytyvðarã. Ha'e nunga xeru ae voi oikuua porã — he'i.

<sup>18</sup> Ha'e rami vy SENHOR renonde mokoïve ojapo peteī rami ikuai aguã. Ha'e gui Davi opyta Horesa py, ha'e rã Jônatas ma ngoo katy ju ojevy.

### *Zife pygua kuery Davi omboaxa nhemi aguã re ijayvu okuapyague*

<sup>19</sup> Ha'e gui Zife pygua kuery oje'oi Gibeá katy Saul oña py. Ha'e vy aipoe'i:

— Ore kuery orerekao Horesa py e'ÿ teve Davi onhemi oikovy? Haquila yvy'ã reia rupi oiko Jesimom regua kuaray puku-a katy.

<sup>20</sup> Aÿ ma oreruvixa, tereo ndepy'a py rejou porã rami vy. Ha'e gui ore kuery ma ndepo py romboaxa aguã rami 'rã roiko — he'i okuapy.

<sup>21</sup> Saul aipoe'i:

— SENHOR tapenemoingo porã, xemboaxya rupi peiko rã.

<sup>22</sup> Tapeo ha'vy peporandu porâve. Peikuua pota porã mamo pa oikoa re, ha'e mava'e pa oexa jepi va'ea re. Mba'eta xevy omombe'ua ha'e oiko kuaa raxa va'ea rami.

<sup>23</sup> Ha'e nunga rupi pejapyxaka, peikuua pota porã onhemiaty ha'e javi re. Ha'e gui ma pejevy ju xea py pemombe'u porâve aguã, Judá regua mbovy e'ÿ ikuia rupi teñ ajou aguã — he'i.

<sup>24</sup> Ha'e rami rã ha'e kuery opu'ã vy Zife katy ju ojevy Saul renonderã. Davi ha'e hexeveguia avakue ikuai Maom regua tekao e'ÿa py Jesimom katy, yvy joja reia oí va'e re.

<sup>25</sup> Hakykue Saul ha'e hexeveguia avakue oje'oi rã Davi pe omombe'ua. Ha'e rami rã oo itaova pa'ü tekao e'ÿa Maom oí va'e katy. Ha'e nunga Saul oendu vy oo avi Davi rakykue tekao e'ÿa Maom katy.

<sup>26</sup> Ha'e gui ma Saul ha'e hexeveguia avakue oje'oi peteī yvy'ã katy, ha'e rã Davi ha'e hexeveguia avakue ma amboae katy oje'oi. Davi ojapura Saul gui oo jepe aguã onha vy. Ha'e rami teñ ha'e kuery ojoko Davi kuery ojopypa aguã.

<sup>27</sup> Ha'e gui Saul oña py ou peteī ayvu mombe'ua. Ha'e vy aipoe'i:

— Ejapura ke ha'e tereo ju, mba'eta filisteu kuery oupa ma nhandeyvy re — he'i.

<sup>28</sup> Ha'e rami rã Saul ojepe'a Davi rakykue ooa gui, filisteu kuery re opu'ã ovu aguã. Ha'e nunga rupi ha'e va'e tekao omboerya Ita oo jepea.

<sup>29</sup> Ha'e va'e gui Davi oo vy En-Gedi py ju onhemi oí porã aguã py.

## 24

### *Davi Saul ndojukaiague*

<sup>1</sup> Filisteu kuery rakykue Saul ooague gui ojevy jave omombe'ua ixupe:  
— Davi ma En-Gedi tekao e'ŷa re oiko — 'ea.

<sup>2</sup> Ha'e ramo Saul ogueraa três mil avakue Israel kuery ha'e javi gui oiporavo va'ekue.  
Ha'e rami vy itaova pa'ū ijavaete reia rupi oje'oi Davi ha'e hexeveguia avakue rakykue.

<sup>3</sup> Tape rupi ooa rupi ovaē vexa'i kuery kora oī va'e py. Ha'e py oī avi peteī itakua. Ha'e va'e py ma Saul oike, jai py optytaxea oendu vy. Ha'e va'e itakua py ae Davi oirū kuery reve ikuai, iguyve katy onhemi okuapy.

<sup>4</sup> Ha'e ramo Davi reveguia avakue aipoe'i okuapy:

— Ange ma SENHOR aipoe'iague ára: “Ndepo py amboaxa 'rā nderovaigua, reipotaa rami rereko aguā” he'iague — he'i okuapy ramo Davi opu'ā mbeguei'i ovvy vy ojaya Saul ao puku apy.

<sup>5</sup> Ha'e rami teī Saul ao apy ojaya rire Davi oendu ipy'a tytyvea.

<sup>6</sup> Ha'e rami vy hexeveguia avakue pe aipoe'i:

— SENHOR taxejoko mba'emo rei xeruvixa re ajapo e'ŷ aguā, hovai xepo amoī e'ŷ aguā, SENHOR oiporavo va'ekue oiko rā — he'i.

<sup>7</sup> Ha'e rami Davi ijayvu vy ojoko hexeveguia avakue Saul rovai opu'ā okuapya gui. Ha'e gui Saul ma itakua gui oē ju vy oove tema.

<sup>8</sup> Ha'e rire Davi voi opu'ā vy oē avi itakua gui. Ha'e rami vy ojapukai ho'amy Saul pe. Ha'e vy aipoe'i:

— Huvixave, xeruvixa!

Saul guakykue re oma'ē ramo Davi guenapy'ā re oī omboetea rupi, ngova yvy re omovaē reve.

<sup>9</sup> Ha'e vy Davi aipoe'i Saul pe:

— Mba'e re tu rejapyxaka 'rā avakue “Davi ndejukaxe”, he'i va'e kuery re?

<sup>10</sup> Mba'eta nderexa py ae rexa ange kova'e itakua py SENHOR xepo py SENHOR nemboaxa rā. Ha'e gui amongue aipoe'i rojuka aguā teī xee ma ndorojukai, mba'eta aipoa'e: “Xee namoī 'rā xepo xeruvixa re, Nhanderuete oiporavo rire”, ha'e kuri.

<sup>11</sup> Ema'ē ha'vy xeru, exa apy xepo py ndeo apykue areko va'e. Ndeo apy'i rive xee ajaya kuri rojuka 'rāgue py. Eikuua pota ha'vy rexa aguā xere noīa romoingo axy aguā. Xee ma mba'eve ndajapoxei ndere, ndajapo vai ndevy, ndee xejukaxe vy xereka reikovy teī.

<sup>12</sup> SENHOR toikuaa pota xere ha'e ndere, SENHOR ae tanembopaga xere rejapo vaiague re, ha'e rā xee ma namoī 'rā xepo ndere.

<sup>13</sup> Ymagua kuery ayvu omombe'u vy “Heko vai va'e gui ae oiko teko vai”, he'iaty rami ae. Ha'e rā xee ma namoī 'rā xepo nderovai.

<sup>14</sup> Ha'e gui mava'e rakykue tu ndee Israel pygua huvixa va'e reo? Marā ramigua tu rejopyxe? Peteī jagua re'ōgue ri ty'y? Tyrā pa peteī jagua ky teve?

<sup>15</sup> SENHOR toikuaa pota xere, toikuaa pota xere ha'e ndere, toexa pota porā, taxemboeko porā, xevy pe tojapo ha'evea ramigua, ha'e taxereraa jepe ndepo gui — he'i.

<sup>16</sup> Ha'e rami Davi ijayvupa ma ramo Saul ombovai:

— Pova'e ae pa ndeavvua, xera'y Davi? — he'i vyve ojae'o atā.

<sup>17</sup> Aipoe'ive Davi pe:

— Ndee ma xegui ndereko porāve va'e, mba'eta mba'emo porā anho rejapo xere, ha'e rā xee ma mba'emo vai ajapoxe ndere.

<sup>18</sup> Ange rexa uka xere rejapo porā. Ndepo py SENHOR xemboaxa teī ndee ndaxejukai.

<sup>19</sup> Mba'eta mava'e nda'u ngovaigua ojou teī omondouka porā rive 'rā tape rupi? SENHOR tome'ē ndevy mba'emo porā ange xere nderejapo vaiague re.

<sup>20</sup> Aŷ aikuaa porā ma ndee ae 'rā huvixave reiko, ha'e Israel kuery re repenaa oī atā 'rā ndepo py.

<sup>21</sup> Ha'e nunga rupi eura ke xevy SENHOR re, xeguigua kuery remomba e'ŷ aguã, xerery rembogue e'ŷ aguã xeru ro gui – he'i.

<sup>22</sup> Ha'e rami rã Saul pe Davi oura ramo oo ju ngoo katy. Ha'e rã Davi ma hexeve avakue reve oje'oi peteĩ henda py onhemi jevy aguã.

## 25

### *Samuel omanoague*

<sup>1</sup> Ha'e gui Samuel omano. Ha'e ramo Israel kuery ha'e javi ono'õmba vy ojae'o okuapy. Hekoague py ae onhono porã, Ramá tetã py. Ha'e va'e rire Davi opu'ã vy oove ju Parã tekoa e'ŷa katy.

### *Nabal rekaoa py Davi kuery ovaẽ jave guare*

<sup>2</sup> Oiko peteĩ ava Maom pygua, Carmelo katy'i ijyvy va'e. Ha'e va'e ma oguerekopa va'e, três mil vexa'i ha'e mil kavara oguereko va'e. Ha'e vy vexa'i rague ojaya oikovy Carmelo py ae.

<sup>3</sup> Ha'e va'e rery ma Nabal.\* Ha'e rã ta'yxy rery ma Abigail. Kunha va'e ma hi'arandu ha'e iporã guive. Ha'e rã ime ma ivai ja rei ha'e nda'iporayvui guive opa mba'e py. Ha'e va'e ma Calebe ramymino oiko raka'e.

<sup>4</sup> Ha'e gui Davi ma tekoa e'ŷa re oikoa py oendu Nabal vexa'i rague ojaya oikovya.

<sup>5</sup> Ha'e rami vy dez guembiguai kunumigue ha'e katy omondouka vy aipoe'i:

– Tapeo Carmelo py Nabal ombo'eapoa py. Ixupe peporandu 'rã xerery rupi, mba'exa pa oikoa re.

<sup>6</sup> Ha'e vy oguerekopa va'e pe aipopeje 'rã: “Toĩ ndere mby'a porã, ndero pygua re voi, ha'e rerekova'e ha'e javi re.

<sup>7</sup> Aendu vexa'i rague pejaya pekuapya. Nerymba vexa'i re opena va'e kuery romovaẽ oreia py. Ha'e kuery pe ndorojapo vai, ha'e ha'e kuery pe mba'eve rei ndoatai Carmelo py oreia py ikuai jave.

<sup>8</sup> Ndevygua kunumigue ikuai va'e pe reporandu rã ha'e kuery oremombe'u porã 'rã. Ha'e nunga rupi xevygua kunumigue voi ndea py ou ramo emovaẽ porã, mba'eta pevy'aa ára py rovaẽ ramo. Eme'ẽ ha'vy xerembiguai kuery pe ndepo py rerekova'e temma, xee ndera'y Davi pe voi”, he'i uka imondovy.

<sup>9</sup> Ha'e gui kunumigue Davi omondouka va'ekue Nabal oĩa py ovaẽmba vy ixupe omombe'upa Davi ayvu ha'e javi, hery rupi. Ha'e vy ojapyxaka okuapy.

<sup>10</sup> Ha'e ramo Davi rembiguai kuery pe Nabal ombovai vy aipoe'i:

– Mava'e tu Davi? Mava'e tu Jessé ra'y? Mba'eta aŷ gui ma heta ikuai tembiguai opatõ gui ojavapa va'ekue.

<sup>11</sup> Xee nda'u aipe'a 'rã ri xemba'e mbojape ha'e yy, ha'e xevy ombo'eapo va'e kuery peguarã xo'o ajuka va'ekue, ha'e nunga amboaxa aguã avakue aikuua e'ŷ va'e pe, magui pa oua aikuua e'ŷ re? – he'i.

<sup>12</sup> Ha'e rami rã Davi rembiguai kuery ojevy ju oje'oivy tape ouague rupi. Ovaẽmba vy Davi pe omombe'upa ju ijayvuague ha'e javi.

<sup>13</sup> Ha'e ramo Davi aipoe'i guembiguai kuery pe:

– Peteĩ-teĩ pemoĩ kyxé pendejee – he'i ramo peteĩ-teĩ ojee omoĩ okyxe, Davi voi omoĩ avi okyxe. Davi rupive avakue oje'oi va'e ma quatrocentos rivyvyi, ha'e gui duzentos ju mba'e rei-rei rarõa py opyta.

<sup>14</sup> Ha'e rami jave Nabal rembiguai kuery va'e regua omombe'u ta'yxy Abigail pe. Ha'e vy aipoe'i:

– Davi tekoa e'ŷa py oĩa gui ombou guembiguai kuery orererekoa va'e pe ijayvu porã'i uka aguã teĩ ha'e ombovai atã.

\* <sup>25:3</sup> Tery Nabal ma “Hi'arandu e'ŷ va'e” 'ea (versículo 25).

15 Ha'e va'e avakue ma ha'eve vai'i va'e orevy. Mba'eve py ha'e kuery noremoingo axyi. Ha'e rami ae avi ha'e kuery reve orekuaia ja mba'eve rei ndoatai oremba'e, nhuündy rupi orekuai jave tei.

16 Ore kuery pe ma ha'e kuery ara py ha'e pyávy ikuai kora mba'emo jokoarā, ha'e kuery reve vexai'i ropenaa rupi orekuia ja.

17 Aŷ ma eikuua pota. Exa mba'e pa rejapo va'erā, mba'eta anhetē mba'emo vai oiko 'rā tema orererekoa re, ha'e hoo pygua kuery ha'e javi re. Ha'e ma nhe'ẽ vai ra'y ramo ndoikoi hexeve ijayvu porā'ia aguā – he'i.

### *Davi jojukaxea gui Abigail omombytu'u eteague*

18 Ha'e ramo ta'yxy Abigail ojapura reve ogueraa duzentos mbojape, mokoī ryru vinho, tei nhiruī vexai' ro'okue, tei nhiruī ryru trigo ra'yīgue mbixy, cem uva'a pirukue ha'e duzentos figo pirukue apomo. Ha'e vy guymba kuery mburika'i áry omoimba vy

19 aipoe'i guembiguai kunumigue pe:

— Tapeo xerenonderā. Xee ma penderakykue'i 'rā aa – he'i va'eri ome Nabal pe ma mba'eve nomombe'ui.

20 Mburika'i áry oo oiny vy yvy'ã guy oguejy vy ojeapa'i ma ovv jave Davi ha'e hupivegua avakue ou avi okuapy. Ha'e vy nhovaexi ha'e kuery reve.

21 Davi aipoe'i ma voi va'ekue: "Anhetē tekao e'ŷa rupi arō uka rive va'ekue mba'emo Nabal oguereko va'e. Xee ma imba'e rei-rei regua mba'eve namboatai heta tei. Ixupe xee ajapo porāague rekovia ha'e ojapo vai xevy.

22 Tove Nhanderuete oipotaa rami tombopaga Davi rovaigua kuery, xapy'a rei ko'ẽmba peve petei ava ha'e kuery va'e regua oikove reve aeja ri ramo", he'i va'ekue.

23 Ha'e gui Abigail oexa Davi vy oguejy pojava guymba mburika'i áry gui. Davi renonde py guenapy'ã re oñ ngova yvy re omovaẽ reve, yvy re peve ojero'a oiny.

24 Ipy yvy'iry oña py aipoe'i:

— Ake'e xeruvixa, xere ae toñ xeme ojapo vaiague repy. Ha'eve rā xee nerembiguai xeayvu ta ndereve. Endu ke xee nerembiguai xeayvu rā.

25 Xeruvixa, epena eme nhe'ẽ vai ra'y Nabal hery va'e re. Mba'eta hery he'ia rami avi heko. Hery ma Nabal, a rami avi hexe oñ va'e ma 'arandu e'ŷ reia anho. Ha'e rā xee nerembiguai ma ndaexai kuri nerembiguai kuery remondouka va'ekue.

26 Ha'e gui aŷ ma xeruvixa, anhetē ete SENHOR oikove va'e rupi, ha'e ndee avi nderekove rupi aura vy aipoa'e: SENHOR ndejoko kuri jouguy remoẽ e'ŷ aguā, ha'e ndepo py ae rejepy e'ŷ aguā. Nabal rami ae avi topagapa nderovaigua kuery ndee xeruvixa pe ojapo vaixe va'e ha'e javi.

27 Ha'e gui kova'e ma xee nerembiguai aru va'ekue ndee xeruvixa pe ame'ẽ rive va'erā. Eme'ẽ nderupivegua kunumigue pe.

28 Xeperdoa ke xee nerembiguai ajejavya. Mba'eta SENHOR ojapo 'rā ndero pygua kuery imbaraete aguā rami meme, SENHOR pe vy rejoguero'a ramo. Teko vai toñ eme ndere reikoa pukukue re.

29 Xapy'a rei amongue ava nderakykue opu'ã 'rā nderekovea oipe'a aguā tei nderekovea SENHOR Nderuete ojokua 'rā ojeupegua ikuai va'e mbyte. Ha'e rā nderovaigua kuery rekovea ma omombo 'rā ita momboa py rami.

30 Ha'e gui ma SENHOR ndere ijayvuague rami vy oexa uka 'rā nderayvua, Israel kuery ruvixaverā nemoi vy.

31 Ha'e va'e jave py xeruvixa, noñ 'rā nemomboriauarā, neñ ndepy'a re ipoyi va'e jouguy mba'eve re'ŷ remoẽague re, neñ ndepo py ae rejepyague re. Ha'e gui SENHOR nemoingo porā jave ma nema'endu'a ke xee nerembiguai re – he'i.

32 Ha'e rami rā Abigail pe Davi ombovai:

— Tove SENHOR Israel kuery ruete ta'ima'endu'a porāa, ange xerovaexi aguā nembou rire.

<sup>33</sup> Ta'ima'endu'a porāa ne'arandu reikovya re, ha'e ima'endu'a porāmby tereiko ndee ae, mba'eta ange xejoko jouguy amoē taa gui, ha'e xepo py ae ajepy taa gui.

<sup>34</sup> Mba'eta anhetē ete SENHOR Israel kuery ruete oikove va'e rupi aura vy aipoa'e: Xejoko kuri ajapo vai taa gui. Mba'eta xerovaexī aguā ndereju pojawai va'e rire Nabal ndoikovei 'rāgue ko'ẽmba peve, neĩ peteĩve ava ixupeguia ma voi – he'i.

<sup>35</sup> Ha'e gui Abigail po gui Davi ojopy mba'emo ogueru va'ekue. Ha'e vy aipoe'i:  
— Tereo porā'i ke ndero katy. Ne'ixa, rejerurea aendu vy ajapo 'rāe.

### *Nabal omanoague*

<sup>36</sup> Ha'e rire Abigail ojevy ju Nabal oĩa py. Ha'e rā ha'e ma ngoo py ojapo oikovy ngaru, huvinxave ngaru ojapo va'e ramigua. Opy'a re ov'yaa anho rei oendu, oka'u vaipa ma vy. Ha'e rami rā ixupe ta'yxy nomombe'ui ranhe mba'eve, neĩ mboapy'i neĩ heta ma voi, nako'ẽi teria ja.

<sup>37</sup> Ko'ẽ jevy Nabal okuera ju ma oiny vinho py oka'uague gui. Ha'e gui ma ta'yxy omombe'u ha'e nunga. Ha'e rā ipy'a he'õmba rire ita rami ju opyta.

<sup>38</sup> Dez araa py ma SENHOR ojuka Nabal. Ha'e rā omano.

### *Abigail re Davi omendaague*

<sup>39</sup> Nabal omanoague Davi pe omombe'ua rā oendu vy aipoe'i:

— SENHOR toiko ima'endu'a porāmby, mba'eta xerepy ma Nabal xevy ijayvu atāague re, xejoko guive mba'emo vai ajapo taa gui. Nabal ojapo vaiague repy ma hexe ae ju SENHOR ombou – he'i.

Ha'e gui Abigail pe Davi oporandu uka gua'yxyrā ogueraa aguā re.

<sup>40</sup> Ha'e ramo Davi rembiguai kuery oje'oi Carmelo py Abigail oĩa py. Ha'e vy aipoe'i okuapy ixupe:

— Davi orembou gua'yxyrā rogueraa aguā – he'i.

<sup>41</sup> Ha'e ramo kunha va'e opu'ã vy guenapy'ã re oĩ ngova yvy re omovaẽ reve. Ha'e vy aipoe'i:

— Apy ma aĩ hembiguairā. Xeruvixa rembiguai kuery py ajoí aguā rami aiko – he'i.

<sup>42</sup> Ha'e rami vy kunha va'e ojapura vy oo mburika'i áry teĩ nhiruĩ guembiguai kuhataigue reve. Ha'e vy oo Davi rembiguai kuery rupive. Ha'e ramo ogueraa gua'yxyrā.

<sup>43</sup> Davi ogueraa avi Ainoã Jezreel guigua. Ha'e vy ta'yxy mokoĩ.

<sup>44</sup> Mba'eta Saul ma guajy Mical Davi ra'yxy va'e ome'ẽ ju va'ekue Galim pygua Laís ra'y Palti ra'yxyrā.

## 26

### *Tēgue ju Davi Saul ndojukaiague*

<sup>1</sup> Ha'e gui Zife pygua kuery ou Gibeá py Saul oĩa py. Ha'e vy aipoe'i okuapy:

— Davi ma Haquila yvy'ã reia rupi nonhemi teve, Jesimom katy'i? – he'i okuapy.

<sup>2</sup> Ha'e rami rā Saul opu'ã vy Zife tekao e'ŷa katy oo Davi reka vy. Hexeve oje'oi avi três mil avakue Israel gui oiporavo va'ekue.

<sup>3</sup> Saul kuery ijaty okuapy Haquila yvy'ã re, Jesimom katy, tape yvýry. Ha'e rā Davi ma tekao e'ŷa re oiko. Ha'e rami vy Saul oeka ouvya Davi oikuua vy

<sup>4</sup> omondouka oexa pota va'erā kuery. Ha'e vy oikuua Saul ou ete ae ra'ea.

<sup>5</sup> Davi opu'ã vy oo Saul kuery ijaty okuapy py. Ha'e vy oexa Saul onheno oupy rā, Ner ra'y Abner xondaro kuery re opena va'e guive. Saul ma ijaty okuapy va'e mbyte py onheno oupy. Ijyvýry rupi ma heta va'e kuery ikuai.

<sup>6</sup> Ha'e gui Davi aipoe'i Heteu pygua Aimeleque ha'e Joabe ryke'y Abisai Zeruia pi'a va'e pe:

— Mava'e tu peo ta xerupive ha'e kuery ijaty okuapy py Saul ituia py?

Abisai ma ombovai:

— Xee aa 'rā nderupive – he'i.

<sup>7</sup> Ha'e rami vy Abisai reve Davi ou pyávy heta va'ea py. Ha'e rā ha'e py Saul onheno vy oke oupy ijaty okuapy va'e mbyte. Oakā katy'i hu'y guaxu oipyxo imo'amy yvy re. Abner ha'e heta va'e kuery mboae ma ijyvýry rupi meme onheno okuapy.

<sup>8</sup> Ha'e gui Abisai aipoe'i Davi pe:

— Aŷ ma ndepo py Nhanderuete omboaxa ma nderovaigua. Taa xee aŷ taipyxo yvy re hu'y guaxu py ae, peteīgue'i pyve. Mokoīgue aipyxo e'ŷ teī ha'eve 'rā – he'i.

<sup>9</sup> Teī Davi ombovai vy aipoe'i Abisai pe:

— Ejuka eme. Mava'e tu SENHOR oiporavo va'ekue rovai opo oupi 'rā ojejavy e'ŷ re?

<sup>10</sup> Davi aipoe'ive ju:

— Anhetē ete SENHOR oikove va'e rupi aura vy aipoa'e: SENHOR ae 'rā ojuka, e'ŷ vy omano aguā ára ovaē 'rā, e'ŷ vy joguero'aa py oo rā ojukaa 'rā, xee e'ŷ.

<sup>11</sup> SENHOR taxejoko oiporavo va'ekue re xepo auti e'ŷ aguā. Ha'e rami avi aŷ ma ejopy hu'y guaxu inhakā katy'i oī va'e, yryru guive. Ha'e gui jaa ju – he'i.

<sup>12</sup> Ha'e rami vy Davi ojopy uka hu'y guaxu Saul akā katy'i oī va'e ha'e yryru. Ha'e gui oo ju. Mava'eve ndoexaai, neī ndoikuaai, nomyīai guive. Ha'e javive okepa tema okuapy, ha'e kuery hopeyi vaipa aguā rami SENHOR ojapo rā.

<sup>13</sup> Ha'e gui Davi ma yvyugua rovai re oo ma vy yvy'ā apyte py hi'aī mombyry'ia py. Saul kuery ikuiaia gui mombyry'i ete hi'aī.

<sup>14</sup> Ha'e rami vy ha'e kuery pe ojapukai nhendu ho'amy, Ner ra'y Abner pe guive. Ha'e vy aipoe'i:

— Abner, nerembovai va'e ty'y?

Ha'e ramo Abner omyī vy oporandu:

— Mava'e tu ndee, huvixave pe rejapukai aguā?

<sup>15</sup> Ha'e ramo Davi ombovai Abner pe:

— Ndee ta'vy ava e'ŷ teve reiko? Israel kuery va'e regua mava'e tu oiko ndee rami ipo'aka va'e? Mba'e re ha'vy nerepenai ri nderuvixa re? Mba'eta ou kuri peteī regua nderuvixa omomba aguā.

<sup>16</sup> Ha'eve'ŷa rami rejapo. Anhetē ete SENHOR oikove va'e rupi aura vy aipoa'e: Ha'eveve pemano, penderuvixarā SENHOR oiporavo va'ekue re napenai rire. Aŷ ma exa pota: Mamo tu oī huvixa mba'e hu'y guaxu ha'e yryru inhakā katy'i oī va'ekue? – he'i.

### *Teīgue ju Davi reve Saul peteī rami ikuai aguā re ijayvuague*

<sup>17</sup> Ha'e gui Davi ri ty ra'ea Saul oendu kuaa vy aipoe'i:

— Ndeayvu e'ŷ teve, xera'y Davi?

Davi ombovai:

— Tá xeruvixa, xeayvu ae ri – he'i.

<sup>18</sup> Aipoe'ive tema:

— Xeruvixa, mba'e re tu ha'e rami ete ri reka riae nerembiguai? Mba'e tu xee ajapo ndere? Mba'e nunga tekoi vai tu rejou xere?

<sup>19</sup> Aŷ ma xeruvixa, ajerure ndevy: Endu ke xee nerembiguai xeayvu rā. SENHOR ae xerovai reo aguā rami ndeapo va'e rire ojopy 'rāgue mba'emo ixupe ame'ē va'e. Ha'e rami avi avakue ri ha'e rami aguā rami ndeapo vy ayvu vaipy ta'ikuai SENHOR renonde. Mba'eta aŷ ha'e kuery xemoxē ma SENHOR pegua yvy re aikoague gui, "Tereo, embojerovia tuuete mboae ramigua pe", he'ia rami.

<sup>20</sup> Ha'e rami teī aŷ xeruguy tomoēa eme SENHOR pegua yvy gui mombyrya py. Mba'eta ndee Israel pygua huvixave ma jagua ky ramigua rakykue rive reo, inambu pytā rakykue yvy'ā reia rupi oo va'e rami – he'i.

<sup>21</sup> Ha'e rami rā Saul aipoe'i:

— Ajejavy rima. Xera'y Davi, ejevy ju ha'vy, mba'eta ndajapo vai jevyi 'rā ndevy. Ange rex a uka xerekovea rembovare va'ea. Xee ae ma inhakā porā e'ŷ va'e rami aiko ajejavy riaeae py.

<sup>22</sup> Davi ombovai:

— Ne'exa, apy ma nemba'e hu'y guaxu areko. Tou xea py peteī kunumi ogueru aguā.

<sup>23</sup> Ha'e gui peteī-teī pe SENHOR tomboekovia heko porāa rupi ojeroviapy oikoa. Mba'eta xepo py SENHOR nemboaxa va'eri xee ma xepo ndaupixeī SENHOR oiporavo va'ekue rovai.

<sup>24</sup> Ange nderekovea ambovareague rami ae avi SENHOR tombovare xerekovea voi, taxereraa jepe opa mba'e vai gui — he'i.

<sup>25</sup> Ha'e ramo Saul aipoe'i Davi pe:

— Xera'y Davi, ima'endu'a porāmby tereiko. Mba'eta rejapo 'rā mba'emo tuvixa va'e, ndepo'aka 'rāe — he'i.

Ha'e ramo Davi oove ju, ha'e rā Saul ma guekoa katy ju ojevy.

## 27

### *Teīgue ju Davi Gate pygua huvixa Aquis oĩ py ooague*

<sup>1</sup> Ha'e rami teī Davi ojeupe ae aipoe'i: "Xapy'a rei ramo amongue ára xee akanhy 'rā Saul po py. Ha'eveve filisteu kuery yvy katy ajava, Israel ha'e javi rupi Saul xerekua oikovya gui ikane'ō vy optyu'u aguā. Ha'e ramo 'rāe xee aa jepe ipo gui" he'i.

<sup>2</sup> Ha'e rami vy Davi oiko katu vy seiscentos avakue hupive ikuai va'e reve oje'oi Gate pygua huvixa Maoque ra'y Aquis oĩa katy.

<sup>3</sup> Gate tetā py ae Davi oiko Aquis reve. Ha'e rā hupivegua avakue ma peteī-teī gua'yxy kuery reve ikuai. Davi voi mokoīve gua'yxy reve oiko: Jezreel guigua Ainoā, ha'e Carmelo pygua Nabal ra'yxykue Abigail.

<sup>4</sup> Gate katy Davi ojavaague Saul pe omombe'ua rā oendu vy ndoeka potavei.

<sup>5</sup> Ha'e gui Davi aipoe'i Aquis pe:

— Xapy'a rei ndee xemboaxya rendu vy ke eme'ē peteī tetā ndeyvy regua py aī aguā. Xee nerembiguai nda'evei ndeyvy'iry aī aguā tetā huvixave oīaty mbyte py — he'i ramo

<sup>6</sup> ha'e va'e árave ixupe Aquis omboaxa Ziclague tetā. Ha'e rami rire aī peve Ziclague optya huvixa Judá pygua mba'e ae.

<sup>7</sup> Filisteu kuery yvy re Davi oiko peteī ma'etī rire irundy jaxya peve.

<sup>8</sup> Ha'e gui Davi ngupivegua avakue reve oje'oi jepi 'rā gesurita kuery, gersita ha'e amalequita kuery rovai. Ha'e va'e kuery ma ha'e va'e yvy re ikuai Sur katy Telā guive Egito yvy peve.

<sup>9</sup> Ha'e va'e yvy Davi kueryombovaipa 'rā heravy, ojuka 'rā avakue ha'e kunhague. Ojeupe guarā ogueraapa kuerei vexa'i, vaka, mburika'i ha'e cameloo kuery, ajukue guive. Ojevy vy ovaē kuerei Aquis oĩa py.

<sup>10</sup> Ha'e ramo Aquis oporandu'rā: "Marā ramigua kuery reve tu ange pejoguero'a ra'e?" he'i nhavō Davi ombovai'rā: "Judá regua kuaray puku-a katy ikuai va'e reve ri, jerameel ha'e queneu kuery kuaray puku-a katy ikuai va'e reve" he'i 'rā.\*

<sup>11</sup> Davi ndojuka e'ŷi peteīve ava neī kunha ma voi Gate tetā py oguerojevy va'erā. Mba'eta ojeupe ae aipoe'i: "Oremombe'ua e'ŷ aguā, 'Ha'e rami Davi ojapo', he'i vy." Ha'e rami vy filisteu kuery yvy re oī teria ja ojapo oikovy ha'e rami ae.

<sup>12</sup> Aquis ma ojerovia Davi re. Ha'e vy aipoe'i:

— Ha'e anhetē ete ri ojapo guetarā Israel pygua kuery ae voi nda'ija'eí aguā rami. Ha'e nunga rupi xevy anho'i riae 'rā oiko.

\* <sup>27:10</sup> Ha'e rami Davi ombovai ombotavy vy. Guetarā Israel kuery reve ae joguero'aa rami ijayvu, Israel kuery rovaigua kuery reve joguero'a va'eri.

## 28

### *En-Dor py omanogue mboayvua oiko va'ea py Saul ooague*

<sup>1</sup> Ha'e va'e jave py filisteu regua xondaro kuery ono'õmba okuapy Israel kuery rovai joguero'a aguã. Ha'e rami vy huvixa Aquis aipoe'i Davi pe:

— Aikuaa uka ma voi ndevy: Xereve ndee voi reo 'rã joguero'aa py, nderevegua avakue reve.

<sup>2</sup> Davi ombovai:

— Ha'e rami rã reikuaa 'rã xee nerembiguai mba'e pa ajapo 'rãa — he'i.

Aquis aipoe'ive ju Davi pe:

— Ha'e rami rire romoï 'rã xerarõarã reikoa pukukue re — he'i.

<sup>3</sup> Samuel omano ma va'ekue, ha'e ramo Israel kuery ha'e javi ojae'o vy onhono porã raka'e Ramá tetã py hekoague py ae. Ha'e gui Saul oyvy gui oipe'apa raka'e omanogue mboayvua ha'e imba'ekuaa va'e kuery ha'e javi.

<sup>4</sup> Ha'e gui filisteu kuery ono'õ vy ou Suném py ju ijaty okuapy aguã. Ha'e ramo Saul omono'õmba avi Israel kuery ramo Gibeá py ijaty okuapy.

<sup>5</sup> Filisteu kuery ijaty okuapya Saul oexa vy oendu okyjea. Ha'e vy ipy'a tyty vaipa oiny onhemondyi vy.

<sup>6</sup> Ha'e rami vy SENHOR pe oporandu teñ nombovai, ra'u rupi, Urim rupi, neñ profeta kuery ayvu rupi ma voi.\*

<sup>7</sup> Ha'e ramo Saul aipoe'i guembiguai kuery pe:

— Pejou na peteñ kunha omanogue mboayvua, ha'e va'e oña py aa vy aporandu uka aguã.

Hembiguai kuery ombovai:

— Oiko peteñ kunha En-Dor py omanogue mboayvua — he'i.

<sup>8</sup> Ha'e gui Saul ndojekuaa ukai aguã amboae ao omoï reve oo. Hupive ma oo avi mokoï avakue. Ha'e vy pyávy ovaõmba kunha va'ea py. Ha'e vy aipoe'i:

— Ndevy ajerure omanogue remboayvu aguã. Ha'e vy rembovy 'rã aipota va'e ae.

<sup>9</sup> Kunha va'e ombovai:

— Ha'e rami avi reikuaa porã huvixa Saul ojapoague, mba'eta oipe'apa raka'e omanogue mboayvua ha'e imba'ekuaa va'e kuery. Mba'e re tu amano aguã rami rive reju, xejuka ukaxe vy? — he'i

<sup>10</sup> Ha'e ramo ixupe Saul oura SENHOR rery rupi:

— Anhetẽ ete SENHOR oikove va'e rupi aura vy aipoa'e: Ndoikoi 'rãe ha'e nungakue re nembopagaarã — he'i.

<sup>11</sup> Ha'e rami rã kunha va'e aipoe'i:

— Mava'e ha'vy ambovy 'rã?

Ombovai:

— Embovy xevy Samuel — he'i.

<sup>12</sup> Ha'e gui kunha va'e Samuel oexa vy ojapukai atã reve aipoe'i Saul pe:

— Mba'e re tu xembotavy? Mba'eta ndee ae ri tu huvixa Saul.

<sup>13</sup> Huvixa ombovai:

— Ekyje eme. Mba'e tu rex? — he'i.

Kunha va'e ombovai Saul pe:

— Peteñ aexa nhanderuete ramigua yvy gui oë rã — he'i.

<sup>14</sup> Ha'e ramo oporandu ju:

— Mba'exa tu ojekuaa?

Kunha va'e ombovai:

— Oë ouvy va'e ma tuja'i, ao puku py onheovã va'e — he'i. Ha'e ramo Samuel ae ria Saul oikuaa vy guenapyã re oñgova yvy re omovaẽ reve.

\* **28:6** Urim ma sacerdote kuery mba'ekuaa-a oguerek raka'e (Êxodo 28.30, Números 27.21).

<sup>15</sup> Ha'e gui Samuel aipoe'i Saul pe:

— Mba'e re tu xemoangeko, aẽ jevy aguã rami rejapo vy?

Saul ombovai:

— Xeporiau vaipa aikovy, xerovai filisteu kuery joguero'a rã. Nhanderuete voi xegui ojepe'a vy naxembovaivei, profeta kuery rupi, neĩ ra'u rupi ma voi. Ha'e nunga rupi roenoĩ uka, xevy remombe'u aguã ajapo va'erã — he'i.

<sup>16</sup> Ha'e ramo Samuel aipoe'i:

— Mba'e re ha'vy xevy reporandu ri, SENHOR ndereja vy nderovaigua oiko rire?

<sup>17</sup> Mba'eta SENHOR ndere ojapo xevy aipoe'i ukaague rami. Ndepo gui ndepo'akaa oipe'a vy neirũ Davi pe ju omboaxa.

<sup>18</sup> SENHOR ayvu re nderejapyxakai vy neremombai karamboae Amaleque kuery opoxya rupi omomba ukaague rami vy. Ha'e nunga rupi ae SENHOR nemoĩ vai aÿ.

<sup>19</sup> SENHOR nemboaxa 'rã filisteu kuery po py, Israel kuery ha'e javi reve. Ha'e gui ko'ẽ ramo ndee ha'e ndera'y kuery xereve ma 'rã peiko. Filisteu kuery po py SENHOR omboaxa avi 'rã Israel kuery ijaty okuapy va'e — he'i.

<sup>20</sup> Ha'e ramove Saul ho'a vy ipukupa oupy yvy rupi. Okyje vaipa oupy Samuel ayvu gui. Ha'e vy na'imbaraetevei, ha'e va'e ára, pyávy voi mba'eve ndo'ui rire.

<sup>21</sup> Saul ituia katy kunha va'e ovaëve'i ovvy vy oexa ndojepokuaavei etea. Ha'e vy aipoe'i:

— Ma'ẽ, xee nerembiguai ma rejerurea aendu vy ndajeayvuveikue py ajapopa kuri ndeayvuague.

<sup>22</sup> Teĩ aÿ ma ndee ju endu xee nerembiguai xeayvua. Tamoĩ mbojape re'u va'erã. He'u, nembaraete ma vy tape rupi reo aguã.

<sup>23</sup> Ha'e rami teĩ ndoipotai vy aipoe'i:

— Xee nda'ui 'rã — he'i. Ha'e rami teĩ hembiguai kunha va'e reve ome'ẽ nhea'ã rei ramo ojapyxaka. Ha'e vy yvy gui opu'ã vy oguapy oiny tupa py.

<sup>24</sup> Kunha va'e oguerekó peteĩ vaka ra'y omongyra va'ekue. Ojuka pojava. Trigo ku'i avi ogueru vy omoapomo, ha'e ombojy mbojape imbovua e'ÿ va'e.

<sup>25</sup> Ha'e rami vy Saul ha'e hembiguai kuery pe ogueru ramo okaru okuapy. Ha'e gui opu'ãmba vy oje'oipa ju pyavyve.

## 29

### *Davi re filisteu kuery ndojeroviaveiague*

<sup>1</sup> Ha'e gui filisteu kuery omono'õmba xondaro kuery Afeca py. Ha'e rã Israel kuery ma Jezreel py yvu oĩ va'e katy'i ijaty okuapy.

<sup>2</sup> Ha'e katy filisteu kuery yvatekueve va'e oje'oi cem ha'e mil reve-reve. Ha'e rã Davi ha'e avakue hexeve ikuai va'e ma oo Aquis reve hakykue guarã.

<sup>3</sup> Filisteu kuery yvatekueve va'e aipoe'i okuapy:

— Kova'e hebreu kuery, mba'e tu ojapo okuapy apy?

Aquis ombovai filisteu kuery yvatekueve va'e pe:

— Ha'e va'e pa Davi e'ÿ, Israel pygua huvixa Saul rembiguai e'ÿ teve? Kueve ma guive xereve ae oiko. Ha'e gui hexe ndajou vai, xea py ou guive aÿ peve — he'i.

<sup>4</sup> Ha'e rami teĩ filisteu kuery yvatekueve va'e ivai vaipa ixupe. Ha'e vy aipoe'i okuapy:

— Embojevy ju ha'e va'e ava hekoarã reme'ẽague katy. Nda'evei nhandereve oo aguã jajoguero'aa py, nhanderovaigua oiko e'ÿ aguã. Mba'eta ha'e rami e'ÿ vy mba'exa vy 'rã tu ha'eve nguvixa reve peteĩ rami ju ikuai aguã, nhande kuery akâgue ogueraa e'ÿ vy?

<sup>5</sup> Ha'e va'e pa Davi e'ÿ? Ojerokya py joupe-upé ombovai vy aipoe'i: "Saul ma ojuka mil, ha'e rã Davi ma dez mil ojuka va'ekue" he'iague va'e e'ÿ teve?

<sup>6</sup> Ha'e rami rã Aquis oenoĩ Davi. Ha'e vy aipoe'i ixupe:

— Anhetẽ ete SENHOR oikove va'e rupi aura vy aipoa'e: Ndee ma anhetẽ rupi reiko va'e. Ha'e gui xevy rã ha'evea rami vy rei orereve kova'e rojoguero'aa py reo. Mba'eta xea py

rejuague guive kova'e ára peve mba'eve py ndojou vaiai ndere. Ha'e rami teĩ yvatekueve va'e ma ndojou porãi.

<sup>7</sup> Ejevy ju aÿ, ejevy porã ke, filisteu kuery yvatekueve va'e ndejou vai rei e'ÿ aguã – he'i.

<sup>8</sup> Ha'e ramo Davi aipoe'i Aquis pe:

– Ha'e rami avi mba'e tu xee ajapo? Ha'e e'ÿ vy mba'e tu xee nerembiguai re rejou vai, ndevy amba'eapo ypya ára guive aÿ peve, xeruvixa rovaigua kuery rovai xee voi ajoguero'a e'ÿ aguã?

<sup>9</sup> Aquis ombovai:

– Xee ma aikuaa porã. Xevy rã anhetẽ Nhanderuete guigua anjo rami reiko porã va'e teĩ. Ha'e rã filisteu kuery yvatekueve va'e ma “Too eme orereve joguero'aa py” he'i okuapy.

<sup>10</sup> Evy voi ha'vy ko'ë rai ramove nerembiguai kuery ndereve ou va'ekue reve. Kuaray hexakã'i ramove pevypa, ha'e tapeo – he'i.

<sup>11</sup> Ha'e ramo ko'ë rai ramove Davi ovv avakue hexeve ikuai va'e reve, filisteu kuery yvy katy ju ojevy oje'oivy aguã. Ha'e rã filisteu kuery ma Jezreel katy oje'oi.

## 30

### *Ziclague tetã gui Amaleque kuery opa mba'e ogueraapaague*

<sup>1</sup> Ha'e gui mboapy araa py Davi hexeveguavakue reve ovaëmba Ziclague tetã py. Ha'e vy oikuua Amaleque pygua kuery ou vy kuaray puku-a katyguia kuery re opu'âague, ha'e Ziclague tetã ombovaipa vy oapypa ma raka'egue.

<sup>2</sup> Ha'e vy kunhague ojou va'e tema ogueraapa raka'e ojeupe guarã. Ha'e rami avi mavave ndojukai: kyrïgue neĩ tujakue. Ngupive ogueraapa rive oje'oivy ouague rupi.

<sup>3</sup> Ha'e gui tetã py Davi ha'e hexeveguavakue ou vy oexa rã okaipa raka'e. Ha'e rã ta'yxy kuery, ta'y ha'e tajy kuery ogueraapaa raka'e.

<sup>4</sup> Ha'e rami rã Davi ha'e hexeve ikuai va'e ojapukai atã reve ojae'o. Ojae'o raxa okuapy ikangypa peve.

<sup>5</sup> Davi ra'yxy mokoïve avi ogueraaa raka'e: Jezreel guigua Ainoã, ha'e Carmelo pygua Nabal ra'yxykue'i Abigail.

<sup>6</sup> Davi iporiau vaipa, mba'eta hexeveguavakue ita py ojapipa aguã re ijayvu okuapy rã. Peteï-teï ivai okuapy gua'y ha'e guajy kuery re. Ha'e rami teĩ Davi ma SENHOR nguuete re vy ipy'a guaxuve ju.

### *Ojokua reve reve ogueraa pyre Davi oguerupa jevyague*

<sup>7</sup> Ha'e gui Davi aipoe'i sacerdote Aimeleque ra'y Abiatar pe:

– Eru manto sacerdote pegua – he'i ramo Abiatar ogueru Davi pe.

<sup>8</sup> Ha'e gui SENHOR pe Davi oporandu vy aipoe'i:

– Aa 'rã teve ha'e kuery rakykue? Aupity 'rã teve?

SENHOR ombovai:

– Tereo, peupity 'rãe. Ha'e vy peraa jepeda ju 'rã ogueraa va'ekue ha'e javi – he'i.

<sup>9</sup> Ha'e gui Davi oo seiscentos avakue hexeve ikuai va'e reve. Besor yakã'i py ovaë ramo amongue optyta ikane'õve va'e-va'e.

<sup>10</sup> Ha'e rã Davi quatrocentos avakue reve oove tema. Duzentos ma takykue optyta va'ekue, ikane'õ vy Besor yakã'i ndoaxai va'ekue.

<sup>11</sup> Ha'e gui nhuündy rupi ojou okuapy peteï ava Egito pygua, Davi oña py ogueru. Ixupe mbojape ome'ë rã ho'u. Ome'ë avi yy oy'u aguã.

<sup>12</sup> Ome'ë avi peteï figo pirukue apomo ra'ykue'i, mokoï uva'a pirukue guive. Ha'e ramo ho'upa. Ha'e gui ikangy gui imbaraeteve ju, mboapy ára ha'e mboapy pytû re ma mba'eve ndo'uvei, neĩ yy ndoy'uvei va'ekue.

<sup>13</sup> Ha'e ramo ma Davi oporandu:

– Mava'e regua tu ndee? Magui tu rejue?

Egitó pygua kunumi va'e ombovai:

— Xee tu Amaleque regua rembiguai rima. Mboapy ára re xemba'eaxy ramo xepatō xereja apy.

<sup>14</sup> Ore kuery romomba rojuvy kuaray puku-a katy queretita kuery, Judá yvy regua kuery, ha'e gui Calebe regua kuaray puku-a katygua. Ha'e vy Ziclague tetā voi roapypa rojuvy — he'i.

<sup>15</sup> Davi aipoe'i:

— Ha'eve pa reo vy ha'e kuerya py xereraa aguā?

Ombovai:

— Nhanderuete rery rupi ha'vy eura xevy xejuka e'ŷ aguā, ha'e xepatō po py ju xemboaxa e'ŷ aguā. Ha'e rami rā aa 'rā roguereko aguā ha'e kuery ikuiaia peve — he'i.

<sup>16</sup> Ha'e gui oo, ogueraa henoiny. Ha'e ramia ja Amaleque pygua kuery ma joa rupi e'ŷ-e'ŷ ikuai ha'e va'e yvy re. Okaru ha'e oy'u okuapy, ov'y'a vaipa okuapy omondakue ha'e javi filisteu kuery yvy ha'e Judá gui ogueru va'ekue re.

<sup>17</sup> Ko'ě rai'i ramove Davi kuery ojuka okuapy ka'aru'i peve. Ha'e ramo ha'e kuery va'e regua peteīve ma ndoo jepei, quattrocentos kunumigue cameló áry oĩ va'e anho onhamba.

<sup>18</sup> Ha'e rami py Davi ogueraa jepepa nho ju Amaleque pygua kuery ogueraa va'ekue-ekue. Ogueraa jepe avi gua'yxy mokoīve.

<sup>19</sup> Mba'eve'i ndoatai, kyrīgue neĩ tujakue, ta'y neĩ tajy kuery, neĩ omondakue ogueraa va'ekue ma voi, neĩ mba'eve ha'e kuery ogueraapa va'ekue. Davi oguerupa nho ju.

<sup>20</sup> Ha'e gui Davi ojopypa avi heruvy vexa'i ha'e vaka. Ha'e nunga Davi renonde omondyi heravy va'e aipoe'i:

— Kova'e ma Davi ogueru va'e.

### *Davi mba'emo omboja'o ukaague*

<sup>21</sup> Ha'e gui Davi ovaẽ ouvy duzentos avakue ikane'õ vy ndooovei va'ekuea py, Besor yakā yvýry opytapa okuapyague py ae. Ha'e ramo ha'e va'e kuery oupa Davi ovaexī vy, hupive ou okuapy va'e voi. Ha'e kuery oua py Davi ovaẽve'i ouvy vy oxarura porā'i.

<sup>22</sup> Ha'e rami teĩ Davi rupive oje'oi va'ekue regua iporayvu e'ŷ va'e, nhe'ẽ vai ra'y kuery ombovai vaikue reve aipoe'i okuapy:

— Nhande kuery reve ha'e kuery ndooi rire nanhame'ẽi 'rā mba'eve rei ogueraapa pyre jaru ju va'ekue. Peteĩ-teĩ peraa pendera'yxy ha'e pendera'y kuery rive. Ha'e vy tapeopa ju — he'i okuapy.

<sup>23</sup> Ha'e rami teĩ Davi aipoe'i:

— Xeryvy kuery, evoko rami e'ŷ pejapo SENHOR nhandevy ome'ẽ va'ekue re, nhandere opena vy nhande po py nhanderovai ou va'ekue omboaxapa rire.

<sup>24</sup> Mava'e 'rā tu ojapyxaka ha'e rami pendeayvua re? Mba'eta pejoguero'a vy peo va'ekue pejopya rami ae avi 'rā mba'e rei-rei rarõa py opyta va'ekue voi ojopy. Joo rami meme 'rā jajopy — he'i.

<sup>25</sup> Ha'e rami rire ha'e rami aguā ma Israel kuery rekorā oĩ, ha'e va'e ára guive aŷ peve.

<sup>26</sup> Ziclague tetā py Davi ovaẽ vy mba'emo re imonda vy ogueraapa pyre ogueraa ukapa ju Judá regua tujakueve oirū kuery ikuai va'e pe. Ha'e vy ha'e va'e kuery pe aipoe'i uka:

— Kova'e ma pendevy rome'ẽ rive SENHOR rovaigua kuery ogueraapa va'ekue regua — he'i.

<sup>27</sup> Ha'e rami vy Betel pygua kuery pe ogueraa uka, Ramote Neguebe pygua kuery pe, Jatir,

<sup>28</sup> Aroer, Sifmote, Estemoa,

<sup>29</sup> Racal, jerameel ha'e queneu kuery ikuiaia tetā pygua kuery pe,

<sup>30</sup> Horma, Borasã, Atace,

31 Hebrom, ha'e gui Davi avakue hexeve ikuai va'e reve oje'oiague ha'e javi rupi ikuai va'e pe.

## 31

### *1 Crônicas 10.1-7*

<sup>1</sup> Ha'e gui Israel kuery reve filisteu kuery joguero'a ramo avakue Israel regua on-hamba filisteu kuery gui. Ha'e ramo Gilboa yvy'ã re ojukapa.

<sup>2</sup> Filisteu kuery ojoko avi Saul ha'e ta'y kuery. Ha'e vy ojuka Saul ra'y kuery Jônatas, Abinadabe ha'e Malquisua.

<sup>3</sup> Joguero'aa py Saul oĩ vaive ovy. Hu'y momboa kuery ojou ramo ha'e kuery gui okyje vaipa.

<sup>4</sup> Ha'e gui Saul aipoe'i hu'y jokoa reraa pe:

— Ekyi ndekyxé ha'e xepyxo, ha'e kuery opire omboi uka e'ŷ va'ekue ou vy xepyxo vy xejoxai rei e'ŷ aguã — he'i teĩ hu'y jokoa reraa ndoipyxoxei, okyje vaipa vy. Ha'e ramo Saul ae kyxe ojopy vy hakua re ho'a.

<sup>5</sup> Hu'y jokoa reraa Saul omano ma ri ty ra'ea oexa vy ha'e voi kyxe re ho'a vy omano avi hexeve.

<sup>6</sup> Ha'e rami py Saul omano, ta'y kuery voi, hu'y jokoa reraa reve. Avakue hexeve ikuai va'e voi ha'e va'e ára ojukapaa.

<sup>7</sup> Ha'e gui avakue Israel regua yvyugua rupi ha'e Jordão yakã rovai hekoia va'e oexapa okuapy oirũ kuery onhambaa, ha'e Saul gua'y kuery reve omanomba maa. Ha'e rami vy ha'e kuery voi guekoa oejapa vy onhamba avi. Ha'e gui filisteu kuery ou vy ha'e py ju hekoia.

### *1 Crônicas 10.8-12*

<sup>8</sup> Ko'ẽ jevy filisteu kuery ou omanogue mba'ekue ogueraapa aguã. Ha'e rami vy ojou Saul ha'e ta'y kuery mboapyve Gilboa yvy'ã re omanoague py.

<sup>9</sup> Ha'e rami vy Saul akãgue ojaya vy hembiporukue ogueraapa. Filisteu kuery yvy ha'e javi rupi omondouka ayvu mombe'uarã, ha'e nungakue omombe'u aguã ta'angaa pegua oo ikuai va'e rupi, ha'e guetarã kuery ha'e javi pe.

<sup>10</sup> Saul rembiporukue ma Astarote ra'angaa oĩa py ogueraaa. Ha'e rã hetekue ma Bete-Seã tetã kora re omboja imoiny.

<sup>11</sup> Ha'e gui ma Jabes-Gileade pygua kuery oendu okuapy filisteu kuery Saul re ojapoague.

<sup>12</sup> Ha'e rami vy avakue ipy'a guaxukueve va'e opu'ãmba vy pytû mbukukue re oguata oje'oivy. Ha'e vy Bete-Seã tetã kora gui omboi heruvy Saul ha'e ta'y kuery retekue. Jabes tetã py oupa ju vy oapypa.

<sup>13</sup> Ikãgue ojopy vy ojatypa Jabes py ae, yvyra ikuai va'e guy py. Ha'e vy sete ára re okaru e'ŷ re ikuai.

## Mokoĩa kuaxia Samuel 'epyre oĩa Mokoĩa kuaxia Samuel 'epyre oĩa

Kova'e kuaxia ma Davi rekokue oĩa, huvixa oĩ jave guare. Jypy ma Judá regua kuery ruvixa oĩ. Ha'e rire ma Israel kuery ha'e javi ju oipota huvixa oĩ aguã.

Davi ma Nhanderuete re ojerovia ete va'e. Ha'e ramo ojapo ngovaigua kuery ha'e javi re ipo'aka aguã rami. Ijyvate ete, ha'e heta va'e kuery ha'e javi ombojepokuaapa ojee. Ha'e rami teĩ itavy reia py ojapo vai guive. Ha'e ramo ixupe profeta Natã ijayvu ramo Davi onhemombe'u: "Ajejavy raka'e Senhor pe." Natã ombovai Davi pe: "Senhor ndeperdoa rejavyague gui. Ndee ma neremanoi 'rã. Ha'e rami avi rejapo vaiague káuxa ma Senhor rovaigua kuery ijayvu rei okuapy. Ha'e gui ndera'y oiko rire omano 'rã", he'i (12.13-14). Nhanderuete ombopaga rã Davi ojou porã ha'e ogueropo'aka. Ha'e rami teĩ Davi ro pygua kuery ojapo jepi iporiau aguã rami.

Davi ma Israel pygua huvixa ikuai va'e gui yvateve va'e oiko raka'e. Ha'e nunga rupi nhandereraa jepearã Nhanderuete ombou va'ekue pe ma "Davi ra'y" e'ý vy "Davi ramymino" 'ea. Davi ma heta salmo ojapo raka'e Nhanderuete pe oporai vy.

### *Israel kuery oitypa ha'e Saul omano aviague Davi pe omombe'uague*

<sup>1</sup> Saul omano ma rire Davi ojevy ju Amaleque kuery oitypaague gui. Ha'e vy mokoĩ ára re oiko Ziclague tetã py.

<sup>2</sup> Mboapy araa py, Saul pegua kuery ijaty okuapya gui ou peteĩ ava ijaõ xoropa rei va'e, oakã áry yvy omoimba rei reve.\* Davi oña py ha'e va'e ovaẽ vy ojero'a, yvy re oĩ guenapy'ã re.

<sup>3</sup> Ixupe Davi oporandu:

— Magui tu rejuvenar?

Ombovai:

— Anha ajuvy Israel kuery ijaty okuapya gui — he'i.

<sup>4</sup> Davi oporanduve ju:

— Mba'e tu oiko ha'e py? Emombe'u ke xevy.

Ombovai:

— Joguero'aa gui ore kuery ronhamba, heta ho'a vy omano rã, Saul ha'e ta'y Jônatas guive — he'i.

<sup>5</sup> Ha'e rami rã Davi aipoe'i kunumi imombe'ua va'e pe:

— Mba'exa tu ha'vy reikuua Saul ha'e ta'y Jônatas omanoa?

<sup>6</sup> Ha'e rã kunumi imombe'ua va'e aipoe'i:

— Avaẽ xapy'a rei Gilboa yvyty re. Ha'e rã Saul ojeko oiny guembiporu hu'y re. Ha'e gui karóxa ha'e kavaju áryguia kuery ojokove tema okuapy.

<sup>7</sup> Guakykue katy oma'lẽ vy xerexa vy xerenoĩ. Ha'e ramo xee "Apy ma aĩ" ha'e ixupe.

<sup>8</sup> Xevy pe oporandu "Mava'e tu ndee?" he'i ramo xee ambovai: "Xee ma Amaleque regua", ha'e.

<sup>9</sup> Ha'e ramo aipoe'i xevy: "Eju ha'vy, xe'áry epu'ã he'amy ha'e xejuka, mba'eta xerajy-jeapa rei va'eri xerekovea oime teri", he'i.

<sup>10</sup> Ha'e ramo hi'áry apu'ã ha'amy vy ajuka, mba'eta xee aikuaa porã ndoikovei 'rãa ho'a ma rire. Ha'e vy coroa oĩ va'ekue ajopy ha'e ipoapy regua, ha'e gui aru apy ndevy xeruvixa — he'i.

### *Davi ojuka ukaague Amaleque regua*

\* <sup>1:2</sup> Oao omondoropa rei ha'e oakã re yvy omoĩ Saul omanoague re ipy'a vai vy (Gênesis 37.29,34, 1 Samuel 4.12, 2 Samuel 1.11).

<sup>11</sup> Ha'e rami rã Davi oao ae ojopy vy omondoro, avakue hexeve ikuai va'e ha'e javive Davi ojapoa rami avi ojapo okuapy.

<sup>12</sup> Iporiaupa, ojae'opa okuapy, ha'e va'e ára okaru e'ŷ re ikuai ka'aru peve, Saul ha'e ta'y Jônatas omano ramo, ha'e SENHOR pegua Israel kuery re guive, kyxé py ho'apa rire.

<sup>13</sup> Davi aipoe'ive ju kunumi imombe'ua va'e pe:

— Maguigua tu ndee?

Ombovai:

— Xee tu amboae guigua ra'y, Amaleque regua — he'i.

<sup>14</sup> Davi aipoe'i ixupe:

— Mba'exa tu nderekyjei ri ra'e SENHOR oiporavo va'ekue rovai ndepo reupi aguã?

<sup>15</sup> Ha'e gui ma Davi oenoĩ peteĩ kunumi va'e. Ha'e vy aipoe'i:

— Eju, epu'ã peva'e ava re — he'i. Ha'e ramo oipyxo rã omano.

<sup>16</sup> Davi aipoe'i va'ekue:

— Ndere ae toĩ nderuguy moõague repaga aguã, mba'eta ndejuru py ae nderovai remombe'u vy “Ajuka SENHOR oiporavo va'ekue”, 're va'ekue.

### *Saul ha'e Jônatas re Davi ipy'a vaia rupi oporaiague*

<sup>17</sup> Ha'e gui Davi ojae'o Saul ha'e ta'y Jônatas re. Po rami oporaei iporiaua rupi.

<sup>18</sup> Judá ra'y kuery ha'e javiombo'e uka avi kova'e mboraei guyrapa regua, kuaxia para heko porã va'e kuery rekukue oña va'e re.

<sup>19</sup> — Israel kuery, perovy'a rei va'ekue ho'a ma pendeyvy re yvy'ã oĩ va'e re!

Mba'exa tu ipy'a guaxukueve ho'apa!

<sup>20</sup> Ha'e rã Gate tetã py ma pemombe'u eme,

peikuua uka eme guive Asquelom tetã py tape ikuai va'e rupi,

filisteu kuery rajy kuery oguerovy'a rei e'ŷ aguã,

opire omboi uka e'ŷ va'e rajy kuery ov'y'a rei reve opo-opo e'ŷ aguã.<sup>†</sup>

<sup>21</sup> Ha'e gui Gilboa yvy'ã peiko va'e,

pende'áry to'ave eme yxapy neĩ oky,

pendere toikove eme mba'emo aju,

mba'eta ha'e py ma ipy'a guaxukueve mba'e hu'y jokoa ojeatypa yvy re,

Saul mba'e hu'y jokoa voi ho'a rire nomboveraavei ma 'rã azeite py.

<sup>22</sup> Jônatas peteĩgueve ma voi ndogueropytu'ui va'ekue guapa,

neĩ Saul ndogueru jevy rivei va'ekue okyxe,

ojuka va'ekue ruguy ha'e ipy'a guaxukueve kyrakue oĩ e'ŷ re.

<sup>23</sup> Saul ha'e Jônatas ma ija'ea ha'e oayvuve pyre,

oikovea ja ha'e omano ma teĩ nomboja'oai!

Taguato gui ipojavave,

ha'e guary gui imbaraeteve va'ekue.

<sup>24</sup> Peẽ Israel rajy kuery, pejae'o Saul re,

ajukue pytã va'e py pemonhemonde,

ha'e ouro guigua py pendeao ombojegua va'ekue re.

<sup>25</sup> Mba'exa tu ipy'a guaxukueve ho'apa raka'e joguero'aa py!

Jônatas voi ojukaa yvy'ã re!

<sup>26</sup> Xeryvy Jônatas, xeporiau aikovy ndere!

Ndee xerayvu vaipa va'ekue!

Xerayvu ete vy

kunhague gui voi ndee xerayvuve va'ekue.

<sup>27</sup> Mba'exa tu ipy'a guaxukueve ho'apa,

ha'e hembiporu joguero'aa pygua okanhymba! — he'i.

<sup>†</sup> **1:20** Gate ha'e Asquelom ma Israel rovaigua kuery filisteu va'e retã.

## 2

*Judá pygua ruvixarā Davi omoī okuapyague*

<sup>1</sup> Ha'e va'e rire Davi oporandu SENHOR pe. Ha'e vy aipoe'i:

— Aa 'rā teve Judá tetā regua py?

SENHOR ombovai:

— Tereo — he'i.

Davi oporanduve ju:

— Mamo katy ete 'rā aa?

SENHOR ombovai:

— Hebrōm katy — he'i.

<sup>2</sup> Ha'e ramo Davi oo ha'e katy. Ta'yxy mokoīve oje'oi avi: Jezreel pygua Ainoā ha'e Carmelo pygua Nabal ra'yxykue'i Abigail.

<sup>3</sup> Davi oguerupa avi hexeveguia avakue, peteī-teī ta'y kuery reve. Ha'e rami vy Hebrōm tekao py ju ikuai.

<sup>4</sup> Ha'e gui Davi oña py Judá pygua avakue ou vy omoī nguvixarā. Davi pe omombe'u avi:

— Avakue Saul retekue nhono porāare ma Jabel-Gileade pygua meme — he'i.

<sup>5</sup> Ha'e ramo Jabel-Gileade pygua avakue pe Davi omondouka ayvu mombe'uarā kuery aipoe'i aguā: “Tove SENHOR tapenemoingo porā, penderuvixakue pe pejapo porāague re, Saul retekue penhono porā rire!\*

<sup>6</sup> Ha'e gui aŷ ma tove SENHOR tapendererekoo penemboaxya ha'e ojeroviapy oikoa rupi. Xee voi ajapo porā 'rā ha'e rami pejapo porāague re.

<sup>7</sup> Aŷ ma pendepo ta'imbaraete, tapendepy'a guaxu guive, mba'eta penderuvixa Saul omano ma teī xee ju Judá regua kuery xemoī nguvixarā” he'i uka.

*Israel pygua ruvixarā Abner omoīague Isbosete*

<sup>8</sup> Ha'e gui Saul pegua xondaro kuery ruvixa Ner ra'y Abner ma Maanaim tetā py ogueraa Saul ra'ykue Isbosete.

<sup>9</sup> Ha'e py ma omoī huvixarā Gileade yvy re, Aser, Jezreel, Efraim, Benjamim ha'e Israel ha'e javi re opena aguā.

<sup>10</sup> Saul ra'ykue Isbosete ma quarenta ma'etŷ rivyvyi oguereko Israel re opena ypy'i jave. Ha'e vy mokōi ma'etŷ peve'i oī. Judá regua kuery anho ikuai Davi pegua.

<sup>11</sup> Davi ma sete ma'etŷ ha'e seis jaxy re opena Judá pygua kuery re, Hebrōm tetā py ae.

*Isbosete pegua kuery re Davi pegua kuery ipo'akaague*

<sup>12</sup> Ha'e gui Ner ra'y Abner ma Maanaim gui ogueraa Saul ra'ykue Isbosete pegua avakue Gibeão peve.

<sup>13</sup> Ha'e rā Davi pegua avakue ma Zeruia pi'a Joabe ogueraa avi ha'e py. Ha'e rami vy nhovaeximbā Gibeão yy omboty pyre katy'i. Jovaive-ive re ikuai, hovai katy ha'e kyvō katy.

<sup>14</sup> Abner aipoe'i Joabe pe:

— Topu'ã kunumigue, tajoguero'a nhanerenonde.

Joabe ombovai vy

— Topu'ã ha'vy — he'i.

<sup>15</sup> Ha'e rami rā opu'ã jogueruvy jojo'i rami: doze Benjamim regua Saul ra'y Isbosete pegua, ha'e gui doze avakue Davi pegua ju.

<sup>16</sup> Peteī-teī ojopy ngovaigua akā re, jopyxo kyxe py joyke py. Ha'e vy jojaví ho'apa. Ha'e rami rire ha'e va'e henda pe ma “Yvy kyxe” 'ea, Gibeão katy'i oī.

\* <sup>2:5</sup> Jabel-Gileade tekao ma Davi retarā kuery Judá regua e'ŷ, Israel regua ramo ma ha'e pygua kuery reve ijayvu porā'i, ixupe guarā ju ikuai aguā.

<sup>17</sup> Ha'e va'e árave joguero'ave tema okuapy. Ha'e rã Davi pegua avakue oitypa Abner ha'e Israel regua kuery re.

### *Abner ojukaague Asael*

<sup>18</sup> Ha'e py ma ikuai Zeruia pi'a mboapyve: Joabe, Abisai ha'e Asael. Asael ma guaxu ka'aguy regua rami inhakuã va'e.

<sup>19</sup> Ha'e gui Asael ma Abner rakykue oo. Oeka ovya rupi ndoikei oiporu kuaa katy, neĩ oiporu kuaa e'ŷa katy ma voi.

<sup>20</sup> Ha'e ramo Abner guakykue katy oma'ẽ vy oporandu ovy:

— Ndee ae ri ty'y Asael?

Ombovai vy:

— Xee ae ri — he'i.

<sup>21</sup> Ha'e ramo Abner aipoe'i ixupe:

— Eike ha'vy reiporu kuaa katy, e'ŷ vy reiporu kuaa e'ŷa katy. Ejoguero'a peteĩ kunumi va'e reve, ixugui ae eipe'a hembiporu joguero'aa pygua — he'i teĩ Asael ma ndojepe'axei hakykue ooa gui.

<sup>22</sup> Teĩgue ju Abner aipoe'i ixupe:

— Ejep'e na xerakykue gui. Mba'e re tu xee rojuka ta, ha'e yvy py roity rive? Ha'e rami vy mba'exa tu xee ajoexa ta nderyvy Joabe reve?

<sup>23</sup> Ha'e rami teĩ Asael ndojepe'axei ae ramo hye py Abner oipyxo hu'y guaxu rapyta py rive, ikupe gui omboaxa. Ha'e ramo Asael ho'a vy ha'e pyve omano. Omanoague py ovaẽ va'e tema optyta kuerei 'rã.

### *Abner pegua avakue rakykue Joabe ooague*

<sup>24</sup> Ha'e gui Joabe ha'e Abisai ju Abner rakykue oje'oi. Kuaray oike'i ma jave ovaẽ jogueravy Amá yvy'ã re. Ha'e va'e ma Giá katy'i oĩ, Gibeão tekoá e'ŷa katy tape oo va'e yvy'iry.

<sup>25</sup> Ha'e gui Benjamim ra'y kuery ono'õmba vy Abner rupive oje'oi vy peteĩ yvy'ã apyte áry ijaty okuapy peteĩ rami.

<sup>26</sup> Ha'e ramo Abner ojapukai Joabe pe. Ha'e vy aipoe'i:

— Kyxe py nhanhomomba riae 'rã teve? Nderekuaai teve opaa py joe nanhandea'evei 'rã? Raka'e peve 'rã tu neremombytu'ui penderegua kuery reve orerakykue peoa gui?

<sup>27</sup> Joabe ombovai:

— Anhetẽ ete Nhanderuete oikove va'e rery rupi aura vy aipoa'e: Nami nandeayvui va'e rire ko'ẽ rã aje'ive'i mae ma 'rãgue ore kuery ropytu'u oreryvy kuery rakykue rupi rooa gui — he'i.

<sup>28</sup> Ha'e rami vy Joabe mimby guaxu omonhe'ẽ rã ha'e kuery ha'e javi optyapa, ha'e vy ndooevei Israel kuery rakykue rupi, ndajoguero'a nhoi guive.

<sup>29</sup> Ha'e ramo ha'e va'e pytũ mbukukue re Abner ha'e ixupegua avakue oguata yvy joja reia rupi. Jordão yakã oaxapa vy aje'ive'i reve oguatave vy ovaẽmba Maanaim py.

<sup>30</sup> Ha'e ramo py Joabe ndooevei Abner rakykue. Ha'e vy ojeupegua kuery omboatypa rã oata ra'e dezenove Davi pegua avakue, Asael oipapa e'ŷ re.

<sup>31</sup> Va'eri Davi rembiguai kuery ma trezentos e sessenta avakue ojuka va'ekue Benjamim regua Abner reve oje'oi va'ekue, ha'e ramo omanomba.

<sup>32</sup> Asael retekue ma ha'e kuery ogueraa vy onhono porã okuapy tuu rupa py ae, Belém katy'i. Ha'e va'e pytũ mbukukue re Joabe ha'e avakue hexeve ikuai va'e oguatave vy Hebrom tetã py iko'ẽmba jogueravy.

## 3

<sup>1</sup> Davi ro pygua kuery reve Saul ro pygua kuery joguero'a are raka'e. Ha'e rami teĩ Davi kuery imbaraeteve, ha'e rã Saul ro pygua kuery ma ikangyve oje'oivy.

- <sup>2</sup> Hebrom tetā py Davi ra'y kuery ikuai. Ta'y ypy'i ma Jezreel pygua Ainoā pi'a Amnom.  
<sup>3</sup> Mokoña ma Carmelo pygua Nabal ra'yxykue'i Abigail pi'a Quileabe. Mboapya ma Gesur pygua huvixa Talmai rajy Maaca pi'a Absalão.  
<sup>4</sup> Irundaya ma Hagite pi'a Adonias. Peteī nhiruña ma Abital pi'a Sefatias.  
<sup>5</sup> Mboapy memea ma Davi ra'yxy Eglá pi'a Itreão. Ha'e kuery ma Davi ra'y kuery Hebron py ae ikuai va'ekue.

*Davi reve peteī rami ikuai aguā Abner ojapoague*

<sup>6</sup> Davi ha'e Saul ro pygua kuery joguero'a jave Saul ro pygua ikuai va'e gui Abner ipo'akave ovv.

<sup>7</sup> Oiko avi raka'e Saul ra'yxy jevykue Rispa hery va'e, Aiá rajy. Ha'e gui Isbosete oporandu Abner pe:

— Mba'e re tu ndee renheno xeru ra'yxy jevykue reve?

<sup>8</sup> Ha'e rami Isbosete ijayvu rā Abner oendu vy ivai vaipa ixupe. Ha'e vy aipoe'i:

— Xee ri ty'y jagua akā aiko, Judá kuerya katy aa aguā? Ange teri ajapo porā nderu Saul ro pygua kuery pe, tyvy ha'e irū kuery pe guive. Xee ma noromboaxai Davi po py. Ha'e rami teī aŷ remombe'u ha'e va'e kunha reve atekoavya rami.

<sup>9</sup> Xee Abner Nhanderuete taxembopaga oipotaa rami, Davi pe SENHOR ouraague rami xee ndajapoi ri ramo.

<sup>10</sup> Mba'eta Saul ro pygua po'akaague amboaxa 'rā joupe. Ha'e rami vy ajapo 'rā Davi ju Israel ha'e Judá kuery re ipo'aka aguā rami, Dā guive Berseba peve — he'i.

<sup>11</sup> Ha'e rami Abner ijayvua Isbosete nda'evei ombovai aguā neī peteī ayvu'i py ma voi, okyje vy.

<sup>12</sup> Ha'e ramo Abner ojegui ae omondouka ayvu mombe'uarā Davi pe. Ha'e vy aipoe'i uka:

— Mava'e po py tu kova'e yvy itui? Xereve ha'vy ejapo peteī rami jaiko aguā, ha'e ramo xee roipytyvō 'rā ndepo py Israel kuery ha'e javi amboaxa vy — he'i uka.

<sup>13</sup> Davi ombovai:

— Ha'eve, ndereve ajapo 'rā peteī rami jaiko aguā, va'eri peteī mba'e ma aipota: Xea py reju vy reru 'rā Saul rajy Mical. Ha'e rami e'ŷ vy nderexai 'rā xerova — he'i.\*

<sup>14</sup> Saul ra'ykue Isbosete pe voi Davi ombou ayvu mombe'uarā. Ha'e vy aipoe'i uka:

— Embou ju xera'yxy Mical, cem filisteu kuery pire amboiague re xera'yxyrā ajogua va'ekue — he'i.

<sup>15</sup> Ha'e rami rā Isbosete kunha va'e oipe'a uka ju ime Paltiel Laís ra'y va'e ro gui.

<sup>16</sup> Ime oo ranhe oiny hakykue'i, ooa rupi ojae'o ovv Baurim peve. Ha'e rā ixupe Abner

— Tereo, ejevy ju eovy — he'i ramo mae ojevy.

<sup>17</sup> Ha'e gui Abner jogueroayvu Israel regua nhomongetaa ikuai va'e reve. Ha'e vy aipoe'i:

— Kueve ma pemoīxe Davi penderuvixarā.

<sup>18</sup> Aŷ ma pejapo ete, mba'eta Davi pe SENHOR ijayvu va'ekue: "Xerembiguai Davi rupi vy xevygua kuery araa jepepa 'rā filisteu kuery ha'e hovaigua kuery ha'e javi po gui", he'i va'ekue.

<sup>19</sup> Benjamim kuery pe ju Abner omombe'u uka ha'e rami ae. Ha'e vy Davi oĩa katy oo Hebron tetā py, ixupe omombe'u aguā Israel ha'e Benjamim regua kuery ha'e javi oipota okuapya.

<sup>20</sup> Ha'e gui Hebron tetā py Davi ro oĩ va'e py Abner ovaẽ, hexeve vinte avakue ou va'ekue reve.

<sup>21</sup> Ha'e rami vy Abner aipoe'i Davi pe:

---

\* <sup>3:13</sup> Saul rajy Mical ma Davi ra'yxyrā ome'ē va'ekue ri ixugui oipe'a vy amboae ava pe ju omboaxa raka'e (1 Samuel 18.27, 25.44).

— Xeruvixa, xee apu'ã vy aa 'rã Israel kuery ha'e javi amono'õmba aguã ndeea py, ndereve ojapo okuapy aguã ndevy ikuai aguã — he'i. Ha'e rami rã Davi Abner omondouka ramo oo porã'i.

### *Nhemiri upi Joabe Abner ojukaague*

<sup>22</sup> Ha'e jave ma Davi ha'e Joabe rembiguai kuery joguero'a vy oje'oiague gui oupa ju. Ngupive ogueru reta joegui oipe'a va'ekue. Ha'e rã Abner ma Hebron tetã py noïvei ma Davi-a py, omondouka rã oo porã ma rire.

<sup>23</sup> Ha'e gui Joabe guexeveguia kuery reve ou rã ixupe aipo'ea:

— Huvixa Davi-a py Ner ra'y Abner ou ra'e, ha'e gui omondouka rire oo porã ju ma oiny — 'ea.

<sup>24</sup> Ha'e rami rã huvixaa py Joabe oo vy aipoe'i ixupe:

— Mba'e tu rejapo ra'e? Abner ou ra'e ndea py. Mba'exa tu remondouka rive ju?

<sup>25</sup> Reikuaa porã Ner ra'y Abner reko. Ha'e ma nembotavy aguã ou, ha'e mba'emo rejapo va'e re oikuaa pota vy oikuaa aguã renhembopy'aa ha'e javi — he'i.

<sup>26</sup> Ha'e gui Davi-a gui Joabe ojep'e'a ma vy Davi pe oikuaa uka e'õ re omundouka ayvu mombe'uarã Abner rakykue, ha'e rami vy ojapo Sirá ygua gui ojevy aguã.

<sup>27</sup> Hebron tetã py Abner ojevy ju ma ramo Joabe ogueroike okẽ rupi ha'e kuery ae'ia py jogueroayvu aguã merami. Ha'e vy hye py Joabe oipyxo ramo omano, guyke'y Asael ojukaague re oepy vy.

<sup>28</sup> Ha'e rire ma Davi oikuaa vy aipoe'i:

— Xee ha'e xevygua kuery ma SENHOR pe mba'eve py ndorojejavyi Ner ra'y Abner ruguy omoëague py, raka'e rã peve.

<sup>29</sup> Huguy moëague re opaga aguã toï Joabe ha'e tuu ro pygua kuery ha'e javi re! Joabe ro py toï riae ijai peupa va'e, lepra revegua, yvyra re oguata va'e, kyxe py ho'a va'e ha'e tembi'u oipota rei va'e voi — he'i.

<sup>30</sup> Ha'e rami py Joabe guyvy Abisai reve ojuka raka'e Abner, Gibeão py joguero'aa py tyke'y Asael ojukaague re.

### *Abner omanoague re Davi ojae'oague*

<sup>31</sup> Ha'e gui Davi aipoe'i Joabe ha'e hexeveguia kuery ha'e javi pe:

— Pemondoro pendeao, penhemonde vox a py, ha'e vy tapeo pejae'o peovy Abner retekue renonde ogueraa rã — he'i. Ha'e rã huvixa Davi ma mba'e guaxu ryru rakykue'i oo oiny.

<sup>32</sup> Ha'e rami vy Hebron tetã py onhono porã okuapy Abner retekue. Abner onhono porãague yvy'iry huvixa onhendu ratã reve ojae'o oiny. Heta va'e kuery ha'e javi ojae'o avi okuapy.

<sup>33</sup> Abner re huvixa ojae'o vy aipoe'i:

— Mba'e re tu Abner omano heko vai va'ekue rami?

<sup>34</sup> Mba'eta ipo ndojokuaai,

neñ ipy re voi noï corrente.

Ha'e rami 'rãgue py heko vai va'e ra'y kuery po py ho'a rive va'e rami ho'a! — he'i.

Ha'e ramo heta va'e kuery ha'e javi ojae'ove hexe.

<sup>35</sup> Ha'e gui ma heta va'e kuery ha'e javi ou vy ojapo okuapy Davi okaru aguã rami, ára rei teri reve. Ha'e rami teñ Davi oura vy aipoe'i:

— Kuaray oike e'õ mbove mbojape e'õ vy tembi'u mboae xee ha'u ramo tove Nhan-deruete taxembopaga ha'e oipotaa rami — he'i.

<sup>36</sup> Ha'e rami Davi ijayvu rã heta va'e kuery oendu vy ojou porã okuapy, huvixa ojapo va'e rei ojou porã memea rami avi.

<sup>37</sup> Ha'e rami vy ha'e va'e ára guive ha'e kuery ha'e Israel kuery ha'e javi oikuaapa okuapy Ner ra'y Abner ojukaague py huvixa Davi mba'eve ndoguerekoiague.

<sup>38</sup> Ha'e gui huvixa aipoe'i guembiguai kuery pe:

— Ndapeikuuaai teve ange Israel yvy re peteī ava yvateve ha'e imbaraete va'e ho'aague?

<sup>39</sup> Ha'e rā xee ma xekangy aŷ, huvixarā xemoña teī. Xegui ma kova'e avakue Zeruia pi'a kuery imbaraetekueve va'e. SENHOR ae tombopaga mba'emo vai apoare kuery ojapoague re — he'i.

## 4

### *Isbosete ojukaa ague*

<sup>1</sup> Hebrom tetā py Abner ojukaa ague Saul ra'ykue Isbosete oendu vy ikangypa, ha'e Israel kuery ha'e javi okyjepa.

<sup>2</sup> Saul ra'ykue pegua mokoī ava oiko, xondaro kuery ruvixa meme. Peteī ma Baaná, ha'e rā amboae ma Recabe hery va'e. Beerote pygua Rimom ra'y va'e meme, Benjamim kuery regua, mba'eta Beerote ma Benjamim yvy regua ae,

<sup>3</sup> mba'eta Beerote pygua kuery yma guare onha vy Gitaim tetā py ova va'ekue. Ha'e py ae ikuai aŷ peve.

<sup>4</sup> Ha'e gui Saul ra'y Jônatas ma peteī gua'y oguereko va'ekue oguata e'ŷ va'e. Peteī nhiruī ma'etŷ rivyvyi oguereko va'ekue Saul ha'e Jônatas omanoague mombe'ua ou jave Jezreel gui. Ha'e ramo hexe opena va'ety oupi heravy oguerojava vy. Oguerojava aguā ojapura ramo ava'i ho'a vy oguata karē'i va'e oiko. Hery ma Mefibosete raka'e.

<sup>5</sup> Ha'e gui Beerote pygua Rimom ra'y kuery Recabe ha'e Baaná jogueraa vy Isbosete ro py ovaē. Kuaray mbyte jave hakuve ma ramo oke oupy.

<sup>6</sup> Ha'e py Recabe ha'e tyvy Baaná jogueroike jogueravy oguy katy, trigo re ou va'e rami. Ha'e rami vy oipyxo hye py, ha'e gui onha jepe.

<sup>7</sup> Ha'e kuery ma oguy py oike rā Isbosete ngupa okeaty py itui jave oipyxo vy ojuka. Ha'e rire inhakāgue ojaya vy ogueraa. Pytū mbukukue re oguata jogueravy yvy joja reia rupi.

<sup>8</sup> Isbosete akāgue ma ha'e kuery ogueru huvixa Davi pe Hebrom py. Ha'e vy aipoe'i ixupe:

— Apy ma nderovaigua Saul ndejukaxeare ra'ykue Isbosete akāgue. Xeruvixa, ha'e rami ange SENHOR ojapo rejepy aguā rami Saul ha'e ta'y kuery ojapoague ha'e javi re — he'i.

<sup>9</sup> Ha'e rami teī Davi ombovai Beerote pygua Rimom ra'y kuery Recabe ha'e tyvy Baaná pe. Ha'e vy aipoe'i:

— Anhetē ete SENHOR oikove va'e xenhe'ē ojexavaia ha'e javi gui ogueraa jepe va'ekue rery rupi aura vy aipoa'e:

<sup>10</sup> Yma xea py amongue ayvu ogueru vy “Saul ma omano ma” he'i ramove araa vy Ziclague tetā py ajuka karamboae, ojeupe rā iporā va'e merami omombe'u rā.

<sup>11</sup> Ha'e gui heko vai va'e kuery katuve ma ambopaga 'rā, peteī ava heko porā va'e ngoo py ngupa py ae itui va'e jukaare kuery. Ha'e rami vy aŷ xee rombopaga 'rā huguy pendepo py pemoēague re, romomba 'rā yvy gui — he'i.

<sup>12</sup> Ha'e rami vy Davi guembiguai kunumigue pe ijayvu rā ha'e kuery ojuka. Ha'e vy ipokue ha'e ipykue ojaya ma vy oupi imoiny Hebrom tetā py, yy omboty pyre oĩ va'e yvy'iry. Ha'e rā Isbosete akāgue ma ogueraa vy Abner rupa katy'i ojaty, Hebrom py ae.\*

## 5

### *1 Crônicas 11.1-3*

<sup>1</sup> Ha'e gui ma Israel regua kuery ha'e javi ou okuapy Hebrom py Davi oĩa py. Ha'e vy ijayvu vy aipoe'i okuapy:

— Ore kuery voi ma nderegua kuery ae avi.

\* <sup>4:12</sup> Ha'e kuery ma Isbosete akāgue ojaya rire Davi ojaya uka ipo ha'e ipy.

<sup>2</sup> Yma Saul oiko teri vy orere opena jave py ndee ae reo ha'e rejevy 'rā va'ekue Israel regua xondaro kuery reve. Ha'e gui SENHOR aipoe'i: "Ndee repena 'rā xevygua Israel kuery re, reiko 'rā ha'e kuery ruvixa", he'i va'ekue ndevy – he'i okuapy.

<sup>3</sup> Hebrom py huvixa Davi-a py Israel regua nhomongetaa kuery ha'e javi ou ramo ha'e kuery reve Davi ojapo oguerekoo porā aguā regua, SENHOR renonde. Ha'e ramo omoī okuapy Davi nguvixarā Israel kuery re opena aguā.

<sup>4</sup> Davi opena ypy'i jave ma trinta ma'etŷa oguerekoo. Ha'e gui ma quarenta ma'etŷ re opena.

<sup>5</sup> Hebrom py ma Judá kuery re anho ranhe opena sete ma'etŷ ha'e mboapy meme jaxy re. Ha'e gui Jerusalém py ju trinta e três ma'etŷ re opena Israel ha'e Judá kuery ha'e javi re.

#### *1 Crônicas 11.4-9*

<sup>6</sup> Ha'e gui Jerusalém tetā katy huvixa Davi ogueraa ojeupeguavakue, jebuseu kuery ha'e va'e yvy re ikuai va'e rovai opu'ã aguā. Ha'e ramo Davi pe ha'e pyguavakue aipoe'i okuapy:

— Ndereikei 'rā apy, ára reveguavakue e'ŷ ha'e oguata e'ŷ va'e kuery rive teñ ndejoko rā – he'i okuapy, ojeupe "Davi ndoikei 'rā apy", he'ia rami.

<sup>7</sup> Ha'e rami teñ Davi oipe'a nho Sião py oo ikorapa va'e. Ha'e va'e pe ma "Tetā Davi rekoo" 'ea.

<sup>8</sup> Mba'eta ha'e va'e ára Davi aipoe'i:

— Jebuseu kuery pejukaxe va'e tapeo yy raperā ita ombokuaague rupi, ha'e vy pejukapa "Ára reveguavakue e'ŷ ha'e oguata e'ŷ va'e" 'ea va'e kuery – he'i, mba'eta Davi onhe'ẽ py nda'ija'ei ae ha'e kuery re. (Ha'e nunga rupi aipo'ea: "Ára reveguavakue e'ŷ ha'e oguata e'ŷ va'e ndoikei 'rā ha'e va'e oo py", 'ea.)

<sup>9</sup> Ha'e rami vy oo ikorapa va'e py Davi ae oĩ, ha'e vy omboery tetā Davi rekoo. Ha'e va'e yvýry rupi tetā omoatyrō heravy, Milo guive oikea peve.

<sup>10</sup> Davi ipo'akave tema ovvy, hexeve SENHOR Nhanderuete ixondaro reta va'e oiko ramo.

#### *1 Crônicas 14.1,2*

<sup>11</sup> Davi-a py Tiro pyguavakue huvixa Hirão ombou ayvu mombe'uarā. Ogueru ruka avi yvyra yary, oo apoa kuery ha'e ita re ombo'apo va'e kuery, Davi rorā ojapo va'erā.

<sup>12</sup> Ha'e ramo Davi oikuua SENHOR omoī atâvea Israel re opena aguā, ojeupeguavakue oayvua rupi ombopo'akave.

#### *1 Crônicas 3.5-9; 14.3-7*

<sup>13</sup> Hebrom tetā gui Davi ou rire Jerusalém py ju ojouve gua'yxy jevyrā. Ha'e rā ikuavive ju ta'y ha'e tajy kuery.

<sup>14</sup> Po rami ma Jerusalém py itui'i va'ekue rery: Samua, Sobabe, Natā, Salomão,

<sup>15</sup> Ibar, Elisua, Nefegue, Jafia,

<sup>16</sup> Elisama, Eliada ha'e Elifelete.

#### *1 Crônicas 14.8-17*

<sup>17</sup> Filisteu kuery oendu okuapy Davi omoī Israel kuery ha'e javi ruvixarā. Ha'e vy oupa ojopy aguā Davi. Ha'e nunga Davi oendu vy ova ju oo ikorapa va'e py.

<sup>18</sup> Ha'e rā filisteu kuery ou vy Refaim yvvyugua ha'e javi rupi ijaty.

<sup>19</sup> Ha'e ramo Davi oporandu SENHOR pe. Ha'e vy aipoe'i:

— Taa pa filisteu kuery rovai? Remboaxa 'rā teve xepo py?

SENHOR ombovai:

— Tereo, mba'eta anhetē amboaxa 'rā filisteu kuery ndepo py – he'i.

<sup>20</sup> Ha'e rami rā Baal-Perazim py Davi ou vy oitypa ha'e py. Ha'e vy aipoe'i:

— SENHOR omoāmba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami – he'i. Ha'e nunga rupi ha'e va'e tekao oenoī Baal-Perazim.\*

\* **5:20** Tery Baal-Perazim ma "Senhor omoāmba" 'ea.

<sup>21</sup> Ha'e py ma filisteu kuery oejapa oje'oivy ta'angaa oguereko va'ekue. Ha'e rā Davi ha'e avakue hexeve ikuai va'e ogueraapa.

<sup>22</sup> Ha'e gui filisteu kuery ou nho jevy vy ijaty ju okuapy Refaim yvyugua ha'e javi rupi.

<sup>23</sup> SENHOR pe Davi oporandu jevy ramo ombovai:

— Tereo eme. Pembojere 'rā hakykue katy gui, ha'e gui ma ha'e kuery re pepu'ā 'rā amora ikuai va'e guy rupi.

<sup>24</sup> Ha'e gui xapy'a rei rendu 'rā amora rovapy rupi opyrō-pyrō nhendu va'e. Ha'e va'e rendu vy ke ejapura. Ha'e va'e ma nerondenonc SENHOR ae oo nhendua, filisteu kuery ijaty okuapy va'e jukapaarā — he'i.

<sup>25</sup> SENHOR ojapo ukaa rami Davi ojapo vy ojukapa filisteu kuery Geba guive Gezer py ovaēa peve.

## 6

### *1 Crônicas 13.5-14*

<sup>1</sup> Davi ma Israel kuery gui omboatypa ju oiporavo va'ekue ha'e javi, trinta mil avakue.

<sup>2</sup> Oiko katupa ma vy ogueraa ha'e kuery Judá re Baalá oī va'e katy, ha'e va'e gui Nhanderuete ayvu ryru ogueru aguā yvy'ā katy. Ha'e va'e re oī SENHOR ixondaro reta va'e anjo ipepo va'e kuery ikuai va'e mbyte oī va'e rery.

<sup>3</sup> Nhanderuete ayvu ryru ma peteī karóxa ipyau va'e áry omoī vy ogueru Abinadabe ro

yvy'ā re oīague gui. Ha'e rā Abinadabe ra'y kuery Uzá ha'e Aiô oje'oi karóxa pyau reraarā.

<sup>4</sup> Ha'e rami py Abinadabe ro yvy'ā re oīague gui ogueru inony Nhanderuete ayvu ryru. Ha'e rā Aiô oo oiny hyru renonde.

<sup>5</sup> Davi ha'e Israel ro pygua kuery ha'e javi ov'y'a oje'oivy SENHOR renonde rupi, opa marāgua ipu va'e yvyla faia gui ojapo pyre py, ixā reta va'e, mbaraka, angu'a pu'i, pandeiro ha'e hy'a pu py.

<sup>6</sup> Ha'e gui Nacom mba'emo moa'yīaty re ovaēa py ma Nhanderuete ayvu ryru re Uzá opoko vy omombyta, vaka onhepyxanga rā.

<sup>7</sup> Ha'e ramo Uzá rovai SENHOR poxya hendy vy ha'e pyve ojuka, nomboetei reia re. Ha'e rā omano Nhanderuete ayvu ryru yvy'iry ae.

<sup>8</sup> SENHOR Uzá ojuka rā Davi ndojou porāi. Ha'e vy ha'e va'e tekao omboery Perez-Uzá, aŷ peve guarā.

<sup>9</sup> Ha'e va'e ára SENHOR gui Davi okyje vy aipoe'i:

— Mba'exa nda'u SENHOR ayvu ryru aru 'rā? — he'i.

<sup>10</sup> Ha'e rami vy Davi ndogueruxevei SENHOR ayvu ryru guekoa katy. Ha'e rami 'rāgue py Gate guigua Obede-Edom va'e ro katy rive ogueraa uka.

<sup>11</sup> Mboapy jaxy re SENHOR ayvu ryru opyta Gate guigua Obede-Edom ro py. Ha'e rā SENHOR omoingo porā, hoo pygua ha'e javi reve.

### *1 Crônicas 15.25-16.3*

<sup>12</sup> Ha'e gui ma Davi pe omombe'ua vy aipo'ea:

— SENHOR oayvu ryru re vy omoingo porā Obede-Edom ro pygua kuery ha'e mba'emo oguereko va'e ha'e javi — 'ea. Ha'e ramo Davi ov'y'a reve oo vy Obede-Edom ro gui ogueru ruka guekoa katy Nhanderuete ayvu ryru.

<sup>13</sup> SENHOR ayvu ryru rerua kuery mboapy memekue opyrōa py kuerei 'rā SENHOR pe ojuka vaka ha'e vexa'i omongyra pyre.

<sup>14</sup> Davi ojeroky ratā ouvy SENHOR renonde ov'y'a reve. Onhemonde sacerdote pegua manto ajukue pererī'i gui ojapo pyre py.

<sup>15</sup> Ha'e rami vy Israel kuery ha'e javi reve Davi ogueru SENHOR ayvu ryru, ov'y'a reve ha'e mimby guaxu omonhe'ēa rupi.

<sup>16</sup> Tetā Davi rekoa py SENHOR ayvu ryru oguerovaēa ma heruvy jave Saul rajykue Mical janela rupi oma'ē vy oexa oiny SENHOR renonde huvixa Davi ojeroky ha'e opo-opo reve ou rā. Ha'e rami vy opy'a py ojou vai.

<sup>17</sup> Ha'e gui SENHOR ayvu ryru ogueroike vy omoõ oo'i hendarã ae ma voi Davi ojapo va'ekue py. Davi ae SENHOR renonde ogueru mba'emo oapy reve ha'e peteĩ rami ikuia regua ome'ẽ va'erã.

<sup>18</sup> Mba'emo oapy reve ha'e peteĩ rami ikuia regua Davi ome'ẽmba ma rire ogueroayvu porã heta va'e kuery SENHOR ixondaro reta va'e rery rupi.

<sup>19</sup> Ha'e gui ha'e kuery ha'e Israel kuery ha'e javi pe ome'ẽ tembi'u, avakue ha'e kunhague pe. Peteĩ-teĩ ikuai va'e pe ome'ẽ peteĩ ra'ykue mbojape, peteĩ ra'ykue ja'ea'i xo'o ha'e uva pirukue. Ha'e rire ma ha'e kuery ojepe'apa oje'oivy ngoo katy.

### *Mical pe Davi ijayvu eteague*

<sup>20</sup> Davi ngoo pygua kuery ae ogueroayvu porã aguã ojevy jave Saul rajykue Mical oẽ ovaexi aguã. Ha'e vy aipoe'i:

— Ojexa uka porã ete pa Israel pygua huvixa! Ange ojekuaa uka guembiguai kuery rembiguai kunhague pe, oxõ e'ŷ va'e rami ojekuaa uka, ovare'ŷ va'e rive rami ete.

<sup>21</sup> Ha'e rã Davi ombovai Mical pe:

— SENHOR renonde ae xee ajapo. Ha'e va'e ma xeporavo karamboae nderu ha'e hoo pygua kuery ha'e javi 'rãgue py, ha'e vy xemoõ uka ojeupegu Israel kuery ruvixarã. SENHOR renonde ae xee avy'a kuri.

<sup>22</sup> Ha'e gui xee ange aikoague gui ndajeayvu ukaive tema 'rã, ha'e anhemo'yvyi've 'rã aikoa py. Ha'e rã tembiguai kunhague ndeayvua va'e ma xemboeteve 'rã okuapy — he'i.

<sup>23</sup> Saul rajykue Mical ma na'imembyi, omanoa ára peve.

## 7

### *1 Crônicas 17.1-15*

<sup>1</sup> Ha'e gui huvixa Davi ngoo py ae oĩ jave, hovaigua kuery jova-jovai re ikuai va'e opu'ãague gui SENHOR omombytu'u ma rire

<sup>2</sup> huvixa aipoe'i profeta Natã pe:

— Ma'ẽ, xee ma xero ainy yary guigua py, ha'e rã hyru Nhanderuete pegua ma peteĩ oo'i py rive oĩ.

<sup>3</sup> Natã ombovai huvixa pe:

— Tereo, ejapo ndepy'a re rendu va'e ha'e javi, ndereve SENHOR oiko ramo — he'i.

<sup>4</sup> Ha'e gui ha'e va'e pyavyve, Natã pe SENHOR ombou oayvu. Ha'e vy aipoe'i:

<sup>5</sup> — Tereo ha'e aipo're xerembiguai Davi pe: “Po rami SENHOR ijayvu: Ndee ae 'rã teve rejapo peteĩ oo xee aĩ aguã?

<sup>6</sup> Mba'eta neĩ peteĩve oo py ma voi xee naĩ teri Egito yvy gui Israel kuery arupa guive aŷ peve. Ha'e rami 'rãgue py oo'i py rive aiko va'e, xembojerovia aty py ae.

<sup>7</sup> Opa rupi Israel kuery aru herekovya rupi nda'u xeayvu ri raka'e amongue nderegua pe, xevygua Israel kuery re apena uka va'ekue pe nda'u aipoa'e: ‘Mba'e re tu nderejapoi peteĩ xerorã yary guigua?’ ha'e teve?

<sup>8</sup> Ha'e gui aŷ ma po rami 'rã ndeayvu xerembiguai Davi pe: ‘SENHOR ixondaro reta va'e aipoe'i: Xee roiporavo karamboae vexa'i kuery re repenaa gui, ha'e kuery rakykue reikoa gui, huvixarã xevygua Israel kuery re ju repena aguã.

<sup>9</sup> Ndereve xee aa avi karamboae, mamo rã reoa rupi tema. Nderovaigua kuery amomba nerondenodegui, amboyvate guive nderery, yvy regua ipo'akakueve anho ikuia rami.

<sup>10</sup> Areko katu avi xevygua Israel kuery rekoarã, ha'e vy amboekoapa ha'e py, mava'eve omoangeckoave e'ŷ aguã, ha'e heko vai va'e ombojexavaive e'ŷ aguã jypy guare rami e'ŷ,

<sup>11</sup> xevygua Israel kuery rerekoarã amoña ára guive. Ha'e rami avi ndevy ame'ẽ 'rã nderovaigua kuery opu'ãague gui repytu'u aguã”, he'i va'ekue. SENHOR ma oikuua uka povae: Ha'e ae 'rã ojapo oo ndevy.\* Aipoe'i:

\* **7:11** Oo ojapo aguã re SENHOR ijayvu, raka'eve rã Davi ramymino kuery regua huvixarã omoingo aguã re (versículos 12, 16). Ha'e va'e regua ma Jesus Cristo ae oiko (Lucas 1.32-33,69; Atos 13.23).

**12** “Nderekovea opa rā nderu kuery reve repytu'u ma jave nderekovia xee amoingo 'rā ndeguigua, ndegui ete oiko va'erā. Ha'e vy ajapo 'rā ipo'akaa oī atā aguā rami.

**13** Ha'e va'e ae ma ojapo 'rā peteī oo xerery oī aguā, ha'e rā xee ajapo 'rā raka'e rā peve ipo'aka oiny aguā rami.

**14** Xee ma tuu 'rā, ha'e rā ha'e ma xera'y 'rā oiko. Xapy'a rei ha'e ojeavy ramo ma ambopaga 'rā avakue hyvyra po'i'i py, avakue gua'y kuery ombopia rami.\*

**15** Ha'e rami teī ixugui ndaipe'ai 'rā amboaxya, Saul nerенонде gui aipe'a vy namboaxyveiague rami e'ŷ.

**16** Ha'e rā ndero ha'e ndepo'akaa ma amoī atāve 'rā nerенонде. Ha'e rami vy oī riae 'rā ndepo'aka reinya", he'i.

**17** Ha'e va'e ayvu ha'e javi ma Natā pe oexa ukaague rami ae omombe'u Davi pe.

*1 Crônicas 17.16-27*

**18** Ha'e gui ma SENHOR pegua opy Davi oike vy hi'aī henonde. Ha'e vy aipoe'i:

— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguā?

**19** SENHOR Xeruete, ha'e nunga tu ndevy pe mba'e'ŷ rima, ndeayvu ma voi guive xee nerembiguai ro pygua raka'e rā guarā re. SENHOR Xeruete, ha'e nunga ma avakue ha'e javi mo'aranduarā rejapo.

**20** Ha'e gui xee nerembiguai Davi, mba'e ta'eve ju ndevy pe? Mba'eta ndee ma xekuaa porā, SENHOR Xeruete.

**21** Ndeayvua ha'e ndepy'a re rendua rami vy rejapo kova'e nunga tuvixa va'e ha'e javi, xee nerembiguai pe reikuua uka guive.

**22** Ha'e nunga rupi SENHOR Xeruete, ndetuvixa ete va'e, mba'eta ndoikoi ndee ramigua ete'i, ndoikoi guive Oreruete mboae ndee e'ŷ vy, oreapyxa py ae roenduague rami.

**23** Mava'e regua tu ndevygua Israel kuery ikuia ramigua? Xeruete, ha'e kuery anho'i ae yvy re ikuai va'e mbyte gui ndejeupe guarā reipe'a va'ekue. Ha'e rami ndejeupe ae rejapo nderery re ima'endu'aa aguā rami, ha'e ndevygua kuery pe rejapo mba'emo porā ete, ndeyvy re guive, mba'eta ha'e gui yvy regua kuery remoxēmba raka'e tuuete ramigua kueryreve, ndevygua kuery Egito yvy gui renoēmba va'ekue renonde gui.

**24** SENHOR, Israel kuery ndejeupe guarā ae remoingo raka'e rā peve, ha'e gui ndee ju renhemoingo Tuuete.

**25** Ha'e gui aŷ ma SENHOR Xeruete, ha'e va'e ayvu xee nerembiguai rekorā re, ha'e xero pygua re guive aipo'reague toī atāve, ejapo ndeayvuague rami ae.

**26** Nderery tomboetea riae, ha'e vy “SENHOR ixondaro reta va'e ma Israel kuery Ruete”, ta'ea. Ha'e ramo xee Davi nerembiguai ro ma oī atā riae 'rā nerенонде.

**27** Mba'eta SENHOR ixondaro reta va'e, Israel kuery Ruete va'e, xee nerembiguai pe ha'e nunga reikuua uka vy “Ajapo 'rā oo ndevy”, 're va'ekue. Ha'e nunga rupi ae xee nerembiguai xepy'a guaxu nami anhembo'e aguā ndevy.

**28** Ha'e gui aŷ, SENHOR Xeruete, ndee ae ma Oreruete, ha'e ndeayvua ma anhetē va'e meme. Ha'e vy xee nerembiguai pe rejapo porā aguā re ndeayvu.

**29** Ha'e nunga rupi aŷ SENHOR Xeruete, emoingo porā xee nerembiguai ro pygua kuery, nerенонде rupi orekuai riae aguā rami, mba'eta ha'e rami aguā re ndeayvu rire. Ha'e rami vy xee nerembiguai ro pygua reroayvu porā rire raka'e rā peve 'rā roiko porā — he'i.

## 8

*1 Crônicas 18.1-13*

**1** Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi hetā tuvixakueve re ipo'aka aguā.

\* **7:14** 2 Coríntios 6.18, Hebreus 1.5, Apocalipse 21.7

<sup>2</sup> Oitypa avi Moabe pygua kuery. Ha'e rami vy yvy rupi omonhenomba vy oa'ã: mokoõ ixã'i oa'ãgue ma ojuka aguã rami ikuai, ha'e rã peteĩ ixã'i oa'ãgue ma ndojukai. Ha'e rami vy Moabe pygua kuery ikuai Davi rembiguairã, ha'e ixupe mba'emo opaga jepi 'rã okuapy.

<sup>3</sup> Ha'e gui Zobá pygua huvixa Reobe ra'y Hadadezer ma yakã Eufrates re ipo'aka ju aguã oo jave hexe voi Davi ipo'aka.

<sup>4</sup> Ixupeguia kavaju árygua kuery ma Davi ojopy mil e setecentos, ha'e gui vinte mil avakue yvy rupigua. Ojayapa guive kavaju karóxa regua pytaxã, cem ete'i oeja ojaya e'ý re.

<sup>5</sup> Ha'e ramo Síria pygua kuery ma Damasco tetã gui ou Zobá pygua huvixa Hadadezer repyarã. Ha'e rami teĩ ha'e va'e avakue Síria guigua ma Davi ojuka vinte e dois mil.

<sup>6</sup> Ha'e gui Damasco regua Síria py Davi omoõ harõarã kuery. Ha'e ramo Síria pygua kuery Davi rembiguairã ikuai vy mba'emo opaga 'rã okuapy ixupe. Davi ooa nhavõ rupi SENHOR ombopo'akave tema.

<sup>7</sup> Hadadezer rembiguai yvatekueve hu'y jokoa ouro guigua oguereko va'ekue Davi ojopy vy oguerupa Jerusalém py.

<sup>8</sup> Hadadezer pegua tetã Betá ha'e Berotai gui voi huvixa Davi oipe'ave tema overa va'e guigua.

<sup>9</sup> Ha'e gui Hamate pygua huvixa Toí oendu Hadadezer pegua xondaro kuery Davi oitypaague.

<sup>10</sup> Ha'e rami vy huvixa Davi-a py ombou gua'y Jorão. Ha'e va'e ma oxarura vy oguerovy'a Hadadezer reve joguero'aa py ojukapaague re (mba'eta Toí reve Hadadezer joguero'a tema rire). Jorão ou vy ogueru mba'emo prata, ouro ha'e overa va'e guigua ome'ê va'erã.

<sup>11</sup> Ha'e nunga huvixa Davi ojopy vy omboaxapa SENHOR peguarã, ha'e javi regua re ipo'akaague va'e kuery gui prata ha'e ouro ojopy va'ekue reve:

<sup>12</sup> Síria guigua, Moabe regua, Amom ra'y kuery, filisteu kuery, Amaleque ha'e Zobá pygua huvixa Recabe ra'y Hadadezer mba'e rei-rei guigua guive.

<sup>13</sup> Síria pygua kuery Davi oitypaague gui ou vy "Juky yvyugua" 'ea va'e py dezoito mil avakue ju ojuka. Ha'e rami rã Davi rery re ima'endu'aa opa rupi.

<sup>14</sup> Edom re voi omoõ harõarã kuery. Edom ha'e javi rupi omoõ harõarã. Ha'e ramo Edom pygua kuery ha'e javi ikuai Davi rembiguairã. Davi ooa nhavõ rupi SENHOR ombopo'akave tema.

### *2 Samuel 20.23-26; 1 Crônicas 18.14-17*

<sup>15</sup> Ha'e rami vy Davi opena Israel kuery ha'e javi re. Joe oikuua potaa py ha'evea rami oguereko ojeupagua kuery.

<sup>16</sup> Ixupeguia xondaro kuery ruvixa ma Zeruia pi'a Joabe. Mba'emo oiko va'ekue mboparaa ma Ailude ra'y Josafá.

<sup>17</sup> Sacerdote ma Aitube ra'y Zadoque, ha'e gui Abiatar ra'y Aimeleque. Ha'e rã kuaxia re opena va'ety ma Seraías.

<sup>18</sup> Huvixa ro rarõa kuery ruvixa ma Joiada ra'y Benaia. Ha'e rã Davi pytyvõa kuery ma ta'y kuery ae.

## 9

### *Jônatas ra'ykue re Davi opena porãague*

<sup>1</sup> Davi aipoe'i:

— Oikove teri teve Saul ro pygua kuery va'e regua, Jônatas ayvua rupi xee apena porã aguã? — he'i.

<sup>2</sup> Saul ro py oiko raka'e peteĩ hembiguai Ziba hery va'e. Ha'e va'e oenoõ ukaa Davi-a py oo aguã. Davi oporandu ixupe:

— Ndee pa Ziba?

Ombovai:

— Xee ae ri, nerembiguai aiko — he'i.

<sup>3</sup> Huvixa aipoe'i:

— Ndoikovei ma teve Saul ro pygua Nhanderuete porayvua rami apena porā aguā? Ziba ombovai huvixa pe:

— Oiko teri peteī Jônatas ra'ykue, opy jovaive oiporu ve'ŷ va'e — he'i.

<sup>4</sup> Huvixa oporandu:

— Mamo ha'vy oĩ?

Ziba ombovai:

— Amiel ra'y Maquir ro py ko oĩ, Lo-Debar py — he'i.

<sup>5</sup> Ha'e ramo Lo-Debar gui huvixa ogueru ruka Amiel ra'y Maquir ro gui.

<sup>6</sup> Davi-a py Saul ra'y Jônatas ra'ykue Mefibosete ou vy guenapy'ā re oĩ, ngova yvy re omovaē reve. Ixupe Davi aipoe'i:

— Mefibosete!

Ombovai:

— Apy ma nerembiguai aiko! — he'i.

<sup>7</sup> Ha'e gui Davi aipoe'i:

— Ekyje eme, mba'eta nderu Jônatas ayvua rupi apena porā 'rā ndere. Ha'e vy ndevy ame'ẽmba 'rā neramoĩ Saul yvykue ha'e javi. Ha'e rā ndee ma rekaru riae 'rā xe-mesa py.

<sup>8</sup> Ha'e ramo ojero'a ju reve aipoe'i:

— Mba'e tu xee nerembiguai aiko, jagua re'õgue rami xee aiko va'e re rema'ẽ aguā? — he'i.

<sup>9</sup> Ha'e gui Davi oenoĩ uka ju Saul rembiguai Ziba. Ha'e vy aipoe'i ixupe:

— Saul mba'e va'ekue ha'e imba'e rei-reikue ha'e javi ma amboaxa ange nepatō ra'ykue pe.

<sup>10</sup> Pemba'eapo 'rā ijyvy re, nderay'kuery ha'e nerembiguai kuery reve. Ha'e vy mba'emo aju pemono'õ kuerei 'rā, nepatō rogue py oĩ aguā pe'u va'erā. Ha'e rā nderuvixa ra'ykue Mefibosete ma xe-mesa py riae 'rā okaru — he'i. Ziba ra'y kuery ikuai raka'e quinze, ha'e gui hembiguai kuery ma vinte.

<sup>11</sup> Ziba aipoe'i huvixa pe:

— Xeruvixa, xee nerembiguai pe rejapo uka va'e ha'e javi 'rā ajapo — he'i. Ha'e ramy Mefibosete okaru oikovy Davi mesa py, huvixa ra'y kuery rami ae avi.

<sup>12</sup> Mefibosete ra'y kyr̄i va'e rery ma Mica. Ziba ro py ikuai va'e ma Mefibosete rembiguai meme raka'e.

<sup>13</sup> Mefibosete ma Jerusalém tetā py hekoia raka'e, huvixa mesa py ae tema okaru vy. Ha'e ma opy jovaive oiporu ve'ŷ va'e.

## 10

*1 Crônicas 19.1-19*

<sup>1</sup> Ha'e rire ma Amom ra'y kuery ruvixa omano, ha'e rā ta'y Hanum ju oĩ nguu rekovia.

<sup>2</sup> Ha'e ramo Davi aipoe'i:

— Naás ra'ykue Hanum pe aexa uka 'rā ayvua, tuu xerayvuague rami — he'i. Ha'e ramy Davi omondouka guembiguai kuery ombopy'a porā ju aguā tuu omanoague gui. Ha'e rā Davi rembiguai kuery ovaē Amom ra'y kuery yvy re.

<sup>3</sup> Ha'e rami teī Amom regua yvatekueve aipoe'i okuapy nguvixa Hanum pe:

— Rexa'ã teve Davi nderu rāgue'i omboetea rupi guembiguai ombou nembopy'a porārā? Xapy'a rei ma ndea py merami guembiguai kuery ombou vy neretā re oikuua pota ha'e yvy re oexa pota rire ombovaipa aguā e'ŷ teve? — he'i okuapy.

<sup>4</sup> Ha'e rami rā Hanum ojopy Davi rembiguai kuery, ha'e vy onhopimba hendyva ijykekue'i rupi, ijao ojaya guive hevi ro'o ojekuaa peve. Ha'e rire mae ma omondouka ju.

<sup>5</sup> Ha'e nunga Davi oikuaa vy ombou ayvu mombe'uarã ha'e kuery ovaexã aguã, omoximbaa rire. Huvixa aipoe'i uka:

— Pepyta ranhe Jericó tetã py, penerendyva ipukupa ju peve. Ha'e rire ma peju ju — he'i uka.

<sup>6</sup> Amom ra'y kuery oikuaa okuapy Davi nda'ija'evei aguã rami ojapoague. Ha'e vy omondouka ayvu mombe'uarã vinte mil Síria pygua avakue ogueru aguã Bete-Reobe ha'e Zobá gui, ha'e gui mil avakue Maaca pygua huvixa pegua, ha'e doze mil ju Tobe gui ogueru aguã.

<sup>7</sup> Ha'e nunga Davi oendu vy ha'e kuery rovai ombou Joabe oxondaro kuery ha'e javi reve, ipy'a guaxukueve meme.

<sup>8</sup> Amom ra'y kuery oje'oi vy tetã kora rokẽ py oarõ okuapy joe opu'ã aguã. Ha'e rã Síria pygua kuery Zobá ha'e Reobe guigua ma amboae rupi ranhe ikuai nhuündy rupi, avakue Tobe ha'e Maaca guigua kuery reve.

<sup>9</sup> Ha'e gui Joabe oexa hovaigua kuery henonde ha'e hakykue katy gui oarõ okuapya, ha'e rami vy Israel kuery ikuai va'e gui opu'ã kuaave va'e oiporavo vy omboyxy imbokuapy Síria pygua kuery rovai.

<sup>10</sup> Ha'e rã hembyrekue ma guyvy Abisai po py omboaxa. Ha'e ramo ha'e va'e ma Amom ra'y kuery rovai ju omboyxy imbokuapy.

<sup>11</sup> Ixupe Joabe aipoe'i:

— Xapy'a rei Síria pygua kuery xegui imbaraeteve ramo ndee reo 'rã xepytyvõ aguã. Ha'e rã Amom ra'y kuery ri ndegui imbaraeteve ramo xee aju 'rã roipytyvõ vy.

<sup>12</sup> Nhanembaraete ke ha'vy. Jajoguero'a nhandepy'a guaxua rupi nhaneretarã kuery ha'e Nhanderuete pegua tetã ikuai va'e jaepya rupi. Ha'e SENHOR tojapo ojou porãa rami — he'i.

<sup>13</sup> Ha'e vy Joabe guexeveguia kuery ogueraa vy joguero'a okuapy Síria pygua kuery reve. Ha'e rã ha'e va'e kuery onhamba henonde gui.

<sup>14</sup> Ha'e rã Síria pygua kuery onhamba maa Amom ra'y kuery oexa vy ha'e kuery voi onhamba avi Abisai renonde gui, ha'e vy guetã py ju oikepa. Ha'e ramo Joabe ma Amom ra'y kuery reve joe opu'ãague gui ojevy vy oopa ju Jerusalém katy.

<sup>15</sup> Ha'e gui Síria pygua kuery ma Israel kuery renonde oitypaa oexa vy ono'õmba ju.

<sup>16</sup> Hadadezer ogueru rukave ju Síria pygua kuery yakã rovai re ikuai va'ekue, ha'e rã ha'e va'e kuery ma Helã tetã py ou. Ha'e kuery renonde ou oiny Sobaque, Hadadezer pegua xondaro kuery rerekoarã.

<sup>17</sup> Ha'e nunga Davi pe omombe'ua rã oendu vy omboatypa Israel kuery ha'e javi, ha'e vy Jordão yakã oaxa vy Helã katy oje'oi. Síria pygua kuery oarõ okuapy Davi kuery rovai joguero'a aguã, ha'e vy joguero'a ha'e kuery reve.

<sup>18</sup> Ha'e rami teñ Israel kuery renonde gui Síria pygua kuery onhamba ju. Ha'e ramo Davi ojuka Síria pygua kuery va'e regua setecentos karóxa pygua ha'e quarenta mil kavaju árygua. Oipyxo avi xondaro kuery rerekoia Sobaque, ha'e rami rã ha'e pyve omano.

<sup>19</sup> Hadadezer rembiguai kuery huvixa ikuai va'e oitypaa maa oexa okuapy vy ojapo Israel kuery reve ikuai porã ju aguã, ha'e kuery rembiguai ikuai aguã. Ha'e rami rire Síria pygua kuery okyje vy noipytyvõxevei Amom ra'y kuery.

## 11

### Bate-Seba reve Davi itavyague

<sup>1</sup> Peteñ ma'etýa ma rire huvixa kuery joguero'a vy oopa jepi jave Davi omondouka Joabe guembiguai kuery ha'e Israel kuery ha'e javi. Ha'e ramo ha'e kuery oitypaa Amom ra'y kuery, ojokopa okuapy guive hetã Rabá. Ha'e rã Davi ma Jerusalém py ae opyta.

<sup>2</sup> Peteñgue ka'aru rai jave Davi ngupa py ituia gui opu'ã vy oiko-iko rei ngoo áry rupi. Ha'e vy oexa peteñ kunha ojau rã, iporã raxa va'e.

<sup>3</sup> Davi oporandu uka mava'e paa re. Ha'e rā ombovaia:

— Bate-Seba ri, Eliā rajy ha'e heteu regua Urias ra'yxy va'e — 'ea.

<sup>4</sup> Ha'e ramo Davi omondouka guembiguai kuery ogueru aguā. Ha'e ou ramo onheno hexeve. Ha'e ramo kunha va'e ma ha'eve'ÿague gui ojeky'a'o ma vy ngoo katy ju ojevy.

<sup>5</sup> Kunha va'e oguereko'i vy Davi pe

— Areko'i ma — he'i uka.

### *Davi Urias ogueru ruka jave guare*

<sup>6</sup> Ha'e ramo Davi omondouka ayvu mombe'ua Joabe pe. Ha'e vy aipoe'i uka:

— Embou ke xea py heteu regua Urias — he'i ramo Davi-a py Joabe ombou Urias.

<sup>7</sup> Davi-a py Urias ou rā ixupe oporandu mba'exa pa Joabe oikoa re, ha'e kuery ikuiaia re ha'e joguero'a okuapya re.

<sup>8</sup> Ha'e gui ma Davi aipoe'i Urias pe:

— Tereo ndero py epytu'u — he'i.

Davi ro gui Urias oo ramove'i ixupe huvixa ogueraa uka mba'emo ome'ẽ rive va'e.

<sup>9</sup> Ha'e rami teī Urias ma huvixa ro rokē py rive onheno, nguvixa rembiguai kuery ha'e javi reve. Ha'e vy ngoo katy ndooi.

<sup>10</sup> Davi pe omombe'ua vy

— Urias tu ndooi ma ngoo katy — 'ea.

Ha'e ramo Davi aipoe'i Urias pe:

— Mombyry gui e'ÿ teve reju? Mba'e re tu ndereoi ndero katy?

<sup>11</sup> Urias ombovai:

— Lei ryru ha'e Israel ha'e Judá kuery ma oguy'i py rive opytapa teri okuapy. Xepatō Joabe ha'e nerembiguai kuery ha'e javi ma ijaty okuapy oka py rive. Ha'e rā xee teve aike ta xero py akaru ha'e ay'u aguā, ha'e xera'yxy reve anheno aguā? Anhetē ete nderekove rupi aura vy aipoa'e: Xee ndajapoi 'rā ha'e nunga — he'i.

<sup>12</sup> Ha'e ramo Davi aipoe'i Urias pe:

— Epytave'i ranhe aÿ ete'i ri jepe, ha'e vy ko'ẽ ramo romondouka ju aguā — he'i ramo ha'e va'e ára pukukue re Urias oiko Jerusalém tetā py, ko'ëgue peve.

<sup>13</sup> Davi oenoī vy hexeve okaru ha'e oy'u, omonga'u guive. Ka'aru'i ma jave Urias oo ngupa py onheno aguā nguvixa rembiguai kuery reve, ha'e rā ngoo katy ma ndooi ae.

### *Urias omanoague*

<sup>14</sup> Aje'ivekue, kuaxia para Joabe pe Davi ojapo vy Urias po py ogueraa uka.

<sup>15</sup> Kuaxia para re aipoe'i imoiny:

— Emondouka Urias pavē renonde joguero'avea py. Ha'e vy peja ha'e ae'i, ojukaa aguā — he'i.

<sup>16</sup> Ha'e ramo tetā Joabe kuery ojoko imoinya py omondouka Urias avakue imbaraetekueve reve joe opu'ã aguā py.

<sup>17</sup> Avakue tetā py ikuai va'e oẽ vy Joabe kuery reve joguero'a okuapy ramo Davi rembiguai kuery va'e regua amongue ho'a. Heteu regua Urias omano avi.

<sup>18</sup> Ha'e ramo imombe'uarā Joabe ombou vy Davi pe omombe'u joguero'aa py oiko va'ekue ha'e javi.

<sup>19</sup> Ayvu mombe'ua pe ijayvu imondovy vy aipoe'i:

— Xapy'a rei joguero'aa oiko va'ekue remombe'upa rā

<sup>20</sup> ha'e ivai vy aipoe'i'rā ndevy: "Mba'e re tu tetā yvy'iry ete ri pejoguero'a? Ndapeikuai ri ty'y tetā kora gui omombo 'rāa?

<sup>21</sup> Mba'exa tu ojukaa raka'e Jerubesete ra'y Abimeleque? Peteī kunha va'e e'ÿ teve kora áry gui hexe omombo ita, ha'e va'e gui ae omano raka'e Tebes py?" he'i ramo ndee ju "Omano avi nerembiguai heteu regua Urias" 're 'rā — he'i.

<sup>22</sup> Ha'e ramo ayvu mombe'ua oo vy ovaẽ, ha'e Davi pe omombe'upa Joabe aipoe'i ukaague.

**23** Ha'e vy ayvu mombe'ua aipoe'i Davi pe:

— Anhetē, ha'e va'e avakue ma oregui ipo'akave vy nhuñndya rupi ou orerovai. Teĩ ore kuery roo avi ha'e kuery rovai, tetā kora rokẽ py oikea peve.

**24** Ha'e ramo hu'y revedua kuery ikora yvatea gui nerembiguai kuery rovai omombo ramo amongue'i omano ndee xeruvixa rembiguai kuery. Ha'e gui omano avi nerembiguai heteu regua Urias.

**25** Davi aipoe'i ayvu mombe'ua pe:

— Po rami 'rã aipo're Joabe pe: "Ndepy'a vai eme ha'e nungakue re, mba'eta kyxe py jojuka 'rãe joguero'aa py. Pejoguero'ave tema tetā rovai ha'e peitypa", 're 'rã. Po rami 'rã rembopy'a guaxu Joabe — he'i.

### *Bate-Seba re Davi omendaague*

**26** Ha'e gui Urias ra'yxy ma ome omanoa oendu vy ojae'o.

**27** Ojae'o vaipa ma rire Davi ogueru ruka rã herua hoo py. Ha'e rã ta'yxy ju ma oiko vy oguerekopetē kyrī va'e. Ha'e rami teĩ Davi ojapo va'ekue ma SENHOR pe nda'evei va'e.

## 12

### *Davi pe Natā ijayvuague*

**1** Davi-a py SENHOR ombou profeta Natā. Ha'e py Natā ovaẽ vy aipoe'i ixupe:

— Peteĩ tetā py ma je oiko mokoĩ avakue. Peteĩ je oguerekopa va'e, ha'e rã amboae ma je iporiaukue'i.

**2** Oguerekopa va'e ma vexa'i ha'e vaka kuery heta oguerekopetē.

**3** Ha'e rã iporiaukue'i va'e ma je mba'eve ndoguerekoi, peteĩ vexa ra'y'i ojogua va'ekue ombotuvixa va'e e'ŷ vy. Ha'e va'e ma hoo py tuvixa'i ta'y kuery reve. Ha'e kuery reve okaru, ha'e kuery karo gui oy'u guive. Ijyva áry oke ramo guajy rami oguerekopetē.

**4** Ha'e gui oguerekopa va'ea py peteĩ ovaẽ mombyry gui ou va'ekue. Ha'e ramo ha'e va'e ndojukaxe'i guymba kuery vexa'i ha'e vaka ae, mombyry gui ou va'ekue omongaru aguā. Ha'e rami 'rãgue py ojopy iporiaukue'i va'e rymba vexa'i, ha'e vy ae omongaru ava ovaẽ va'ekue — he'i.

**5** Ha'e ramo Davi ivai raxa ava ha'e rami ete joapo va'ekue pe. Ha'e vy aipoe'i Natā pe:

— Anhetē ete SENHOR oikove va'e rery rupi aura vy aipo'e: Ava ha'e rami joapo va'ekue ma ojukaa ramo 'rã ha'eve.

**6** Ha'e vexa ra'y'i ojuka va'ekue rekoria ma irundy ju 'rã ome'ẽ, nhomboaxyu rupi e'ŷ ojapo rire — he'i.

**7** Ha'e ramo Natā ombovai Davi pe:

— Ha'e va'e ava ma ndee ae. Po rami SENHOR Israel kuery ruete ijayvu: Xee roiporavo va'ekue Israel kuery ruvixarã, Saul po gui rogueraa jepe guive.

**8** Ndevy ame'ẽ nderuvixa rokue, ha'e ndejyva py amboaxa ta'yxykue ha'e javi. Ndevy amboaxa avi Israel ha'e Judá kuery. Ha'e rã ha'e nunga mboapy'i raka'e va'e rire mba'emo ame'ẽ retave heravy 'rãgue ndevy.

**9** Mba'e re tu nderexarai ri SENHOR ijayvua gui, mba'emo vai rei rejapo vy? Mba'eta heteu regua Urias ma rejuka uka kyxe py. Ha'e gui ta'yxykue ma ndera'yxyrã rejopy, Amom ra'y kuery kyxe py ime rejuka uka rire.

**10** Ha'e rami rire aŷ guive ndero py ndoiko e'ŷi 'rã kyxe jojukaarã, mba'eta xereja vy heteu regua Urias ra'yxy reraa rire.

**11** — Po rami SENHOR ijayvu: Ma'ẽ, ndero gui ae amoingo 'rã mba'emo vai nde'áry, ha'e vy ndee ae rexaa py ajopy ukapa 'rã ndera'yxy kuery, neirū pe ju 'rã amboaxa. Ha'e va'e ae ju 'rã onheno ha'e kuery reve, ára porã rei jave.

**12** Mba'eta ndee ma nhemi rupi rejapo, ha'e rã xee ma ha'e nunga ajapo 'rã Israel kuery ha'e javi oexaa py, kuaray rexakāa py ae — he'i.

**13** Ha'e rami rã Davi aipoe'i Natā pe:

— Ajejavy raka'e SENHOR pe.

Natā ombovai Davi pe:

— SENHOR ndeperdoa rejavyague gui. Ndee ma neremanoi 'rā.

<sup>14</sup> Ha'e rami avi rejapo vaiague káuxa ma SENHOR rovaigua kuery ijayvu rei okuapy. Ha'e gui ndera'y oiko rire omano 'rā — he'i.

<sup>15</sup> Ha'e gui ma Natā oo ju ngoo katy.

### Bate-Seba pi'a omanoague

Ha'e gui SENHOR omoingo axy Davi ra'y'i Urias ra'yxykue oguereko va'ekue. Ha'e rā kyrī va'e imba'eaxy vaipa.

<sup>16</sup> Kyrī va'e re Davi ojapukai Nhanderuete pe. Okaru e'ŷ re guive oiko, ha'e pytū mbukukue oaxa oupy yvy rupi ipukupa reve.

<sup>17</sup> Ha'e ramo nhomongeta va'ety kuery hoo py ikuai va'e onhemboja okuapy hexe, yvy gui omopu'āxe vy. Ha'e rā ha'e ma nopus'āxei, ha'e kuery reve ndokaruxei guive.

<sup>18</sup> Sete araa py ma kyrī va'e omano. Ha'e rā hembiguai kuery okyje okuapy kyrī va'e omano maa Davi pe omombe'u aguā, mba'eta ha'e kuery aipoe'i okuapy:

— Ma'ē, kyrī va'e oikove'i teri reve nhandeayvu ramo noendu potai. Mba'exa 'rā tu kyrī va'e omano maa nhamombe'u ramo? Mba'eta iporiauve ju 'rā — he'i okuapy.

<sup>19</sup> Davi ma hembiguai kuery joupe-upé ijayvu mbegue rā oexa vy oikuaa kyrī va'e omano maa. Ha'e vy oporandu guembiguai kuery pe:

— Kyrī va'e pa omano ma ra'e?

Ha'e kuery ombovai:

— Omano ma — he'i.

<sup>20</sup> Ha'e ramo Davi opu'ā ju yvy gui. Ojau, onhemoatyrō ha'e oao omboekovia ma vy SENHOR pegua opy oike vy omboete. Ha'e gui ma ngoo katy ju ou vy ojerure tembi'u oguerua aguā re. Henonde omoña rā ho'u.

<sup>21</sup> Hembiguai kuery aipoe'i okuapy:

— Mba'e tu rejapo? Kyrī va'e oikove'i teria ja ma rekaru e'ŷ re reiko, rejae'o guive. Va'eri omano ma rire revy vy mbojape guive re'u reiny.

<sup>22</sup> Ombovai:

— Kyrī va'e oikove'i teria ja rima akaru e'ŷ re aiko, ajae'o guive, mba'eta aipoa'e vy: “SENHOR xemboaxy nho rivyyvi gui, ha'e rā pa kyrī va'e oikove tema 'rā?” ha'e va'ekue.

<sup>23</sup> Ha'e gui aŷ ma omano ma rire mba'e re 'rā'vy akaru e'ŷ re aiko? Xee nda'u amoingove ju 'rā teve? Xee aa 'rā ha'e oña py, teī ha'e ma ndou jevyvei 'rā xevy — he'i.

<sup>24</sup> Ha'e gui ma Bate-Seba oña py Davi oo vy ijayvu porā'i, hexeve onheno guive. Ha'e ramo oguereko'i peteĩ ava'i. Ha'e va'e ma Davi omboery Salomão. Ha'e rā SENHOR voi oayvu.

<sup>25</sup> Profeta Natā po py Davi omoñ ramo oenoñ Jedidias, SENHOR oayvu ramo.\*

### 1 Crônicas 20.1-3

<sup>26</sup> Ha'e ramia ja Joabe kuery joguero'a teri Amom ra'y kuery retā Rabá rovai, ha'e vy ipo'aka okuapy huvixa rekoa oĩ va'e re.

<sup>27</sup> Ha'e ramo Davi-a py Joabe ombou ayvu mombe'ua aipoe'i va'erā: “Rabá rovai ajoguero'a vy xepo'aka ma yy tetā pygua kuery oy'u aguā va'ekue re.

<sup>28</sup> Ha'e gui aŷ ma emono'õve ju ndejeupegua kuery mboae, ha'e pejoko tetā pendepo'aka peve, xee ae xepo'aka ramo xerery rupi oenoña e'ŷ aguā”, he'i uka.

<sup>29</sup> Ha'e ramo Davi amboae kuery ha'e javi omono'õmba vy Rabá tetā katy oje'oi. Ha'e va'e tetā rovai joguero'a vy ipo'aka.

\* <sup>12:25</sup> Salomão ma hery mokoñ va'e. Tery Jedidias ma “SENHOR rembiayvu” 'ea. Ha'e rā tery Salomão ma “Joguereko porā'i va'e” 'ea.

**30** Ha'e pygua huvixa akā gui omboi coroa. Ha'e va'e re ouro oī va'e poyia ma trinta e três quilo rivyvyi, ha'e va'e re oī avi ita hepykueve va'e. Ha'e gui Davi akā re ju omoña. Ha'e va'e tetā gui ogueraa reta mba'emo.

**31** Ha'e py ikuai va'ekue ogueraa avi vy omomba'eapo yvyra ayaa py, picareta ha'e haxa ferro guigua py, ha'e gui yvy jykue apoa py. Ha'e rami Davi ojapo Amom ra'y kuery retā ha'e javi re. Ha'e gui heta va'e kuery ha'e javi reve Davi ojevy ju Jerusalém katy.

## 13

### *Amnom gueindy reve itavyague*

**1** Davi ra'y Absalão oguereko raka'e gueindy iporā vaipa va'e, Tamar hery va'e. Ha'e va'e re ma Davi ra'y mboae Amnom va'e opena rei.

**2** Amnom nda'evei oiko gueindy Tamar re, imba'eaxy peve, teī kunha va'e ma avakue oikuua va'e'ŷ teri ramo haxy ete ha'e nunga ojapo aguã.

**3** Amnom oguereko peteī oirū, Davi ryvy Siméia ra'y, Jonadabe hery va'e. Jonadabe ma oiko kuaa rei va'e.

**4** Ha'e va'e aipoe'i Amnom pe:

— Mba'e re tu ko'ē nhavō ne'angaise reovy? Neremombe'uxei teve xevy?

Ha'e ramo Amnom onhemombe'u:

— Ayvu xeryvy Absalão reindy Tamar — he'i.

**5** Jonadabe aipoe'i ixupe:

— Enheno nderupa py, enhemomba'eaxy merami ejupy. Nderu ndepou vy ou ramo aipo're: "Ajerure xereindy Tamar ou vy mbojape ome'ē aguã, mba'eta tembi'u ojapo rā aexa vy ha'u 'rā ipo gui", 'rā 'rā — he'i.

**6** Ha'e ramo Amnom onheno vy onhemomba'eaxy oupy. Huvixa oipou vy ou rā Amnom aipoe'i ixupe:

— Ajerure xereindy Tamar ou vy tojapo mokoĩ mbojape aexaa py, ipo gui ha'u aguã — he'i.

**7** Ha'e ramo Davi aipoe'i uka Tamar pe ngoo py oīa py:

— Tereo ndekyvy Amnom ro py, ejapo tembi'u ixupe — he'i.

**8** Okyvy Amnom ro py Tamar ovaẽ rā onheno oupy. Kunha va'e trigó apomo ogueru vy mbojape ojapo, ha'e vy ombojy oexaa py.

**9** Oexya renda oguerova ixupe teī Amnom ndo'uxei. Ha'e rami 'rāgue py aipoe'i:

— Tojepe'apaa xea gui — he'i. Ha'e ramo ha'e javive ojepe'apa.

**10** Ha'e gui ma Amnom aipoe'i gueindy Tamar pe:

— Eru tembi'u xerupa py, ha'e ramo ha'u 'rā ndepo gui — he'i ramo Tamar mbojape ojapo va'ekue ogueru okyvy Amnom rupa okeaty peve.

**11** Ome'ē ramove ojopy kunha va'e jyva re, ha'e vy aipoe'i:

— Xereindy, eju, enheno xereve — he'i.

**12** Ha'e rami teī kunha va'e ombovai:

— Any xekyvy, enhea'ā rei eme, mba'eta Israel re ma namigua ojapoa va'e'ŷ. Ejapo eme mba'emo vai.

**13** Mamo 'rā tu aa axīmba reve? Ha'e rā ndee ma Israel kuery ndekuua 'rā inhakā porā e'ŷ va'e rami. Aŷ ma ajerure huvixa reve ndeayvu aguã re. Ha'e ma naxeme'ē e'ŷi 'rā ndera'yxyrā — he'i.

**14** Ha'e rami teī ikyvy noendu potai kunha va'e ijayvua re. Ha'e imbaraeteve vy onhea'ā rei vy nhogueronheno kunha va'e reve.

**15** Ha'e rire Amnom oendu nda'iija'evei etea, jypy oayvuague rami e'ŷ. Ha'e vy Amnom aipoe'i ixupe:

— Epu'ā, tereo ju.

**16** Ha'e ramo kunha va'e ombovai:

— Any, xekyvy. Xemondouka rive jepy va'e rire jypy xere rejapo va'ekue gui nda'eveive 'rāgue — he'i.

Ha'e rami teī ikyvy noendu potai vy

<sup>17</sup> guembiguai kunumi va'e oenoī vy aipoe'i:

— Emoē kunha va'e oka py, ha'e gui emboty okē — he'i.

<sup>18</sup> Ha'e ramo hembiguai kunumi va'e oka py omoē vy omboty okē.

Tamar ma ao ijyva puku va'e py onhemonde, huvixa rajy kuery kunhataī'i va'e onhemondea rami.

<sup>19</sup> Ha'e gui tanhimbu ojopy vy omoī oakā re, omondoropa oao ijyva puku va'e onhemondea, ha'e vy oakā re opo omoī reve ojepe'a. Ojae'o atā ovv.

<sup>20</sup> Ha'e gui ikyvy Absalāo ju oexa vy aipoe'i ixupe:

— Ndekyvy Amnom teve oīra'e ndereve? Ma'ē xereindy, ekyrirī ma'vy. Ndekyvy ranga oiko. Ndepy'a vai eme ha'e nungakue re — he'i. Ha'e rami rire Tamar iporiau vaipa reve okyvy Absalāo ro py ju oiko.

<sup>21</sup> Huvixa Davi ha'e nunga ha'e javi oendu vy ivai.

<sup>22</sup> Ha'e rā Absalāo ma guyke'y Amnom reve nda'ijayvu porāi neī nda'ijayvu vai guive, gueindy Tamar re onhea'ā reiague re.

### *Guyke'y Amnom Absalāo ojuka ukaague*

<sup>23</sup> Mokoī ma'etā ma oaxa rire Absalāo ojaya oikovy guymba kuery vexa'i rague Baal-Hazor py, Efraim katy'i oī va'e py. Ha'e vy Absalāo oenoī uka huvixa ra'y kuery ha'e javi ha'e py ou aguā.

<sup>24</sup> Ha'e vy huvixaa py Absalāo oo vy aipoe'i ixupe:

— Ma'ē, xee nerembiguai ajaya aikovy vexa'i rague. Xeruvixa, ajerure reo aguā nerembiguai kuery reve.

<sup>25</sup> Ha'e rami teī huvixa ombovai:

— Any xera'y, ndorooi 'rā jojavī, ndevy pe mba'emo oata e'ŷ aguā — he'i. Ta'y Absalāo ogueraaxeia rami ijayvu tema va'eri ndooxei. Ha'e rami teī ogueroayvu porā.

<sup>26</sup> Ha'e rami rā Absalāo aipoe'i:

— Ndee ndereoxti teī xeryke'y Amnom ri jepe emondouka orereve.

Huvixa oporandu:

— Mba'erā tu ha'e oo 'rā ndereve? — he'i ramo

<sup>27</sup> Absalāo onhea'ā rei tema. Ha'e ramo huvixa omondouka nho Amnom, gua'y kuery ha'e javive reve.

<sup>28</sup> Ha'e gui Absalāo ma guembiguai kunumigue pe ijayvu vy aipoe'i:

— Peikuaa pota rei ke. Amnom vinho gui oka'u vaipa ma vy ovv'a rei jave pendevy "Pejuka ke Amnom" ha'e ramo pejuka. Pekyje eme. Xee e'ŷ ri ty'y ha'e rami ajapo uka? — he'i.

<sup>29</sup> Ha'e rami rā Absalāo rembiguai kunumigue Amnom re ojapo okuapy Absalāo ojapo ukaague. Ha'e ramo huvixa ra'y kuery ikuai va'e oexa vy opu'āmba vy peteī-teī guymba áry oī vy onhamba.

<sup>30</sup> Ha'e kuery tape rupi teri oo reve ayvu mombe'ua ovaē Davi-a py aipoe'i va'e:

— Xeruvixa, Absalāo tu ndera'y kuery ha'e javive ma ojukapa, neī peteīve ndopytai — he'i.

<sup>31</sup> Ha'e rami rā huvixa opu'ā vy omondoro oao, ha'e ho'a yvy rupi. Hembiguai kuery hexeve ikuai va'e ha'e javi avi omondoro oao.

<sup>32</sup> Davi ryvy Siméia ra'y Jonadabe oī avi. Ha'e va'e ombovai vy aipoe'i:

— Xeruvixa, exa'ā eme ndera'y kuery ha'e javi ojukapa rami, Amnom anho'i omano. Mba'eta Absalāo ma gueindy Tamar re Amnom onhea'ā reia ára guive ha'e rami aguā ae onhembopy'a va'ekue.

<sup>33</sup> Ha'e nunga rupi aŷ xeruvixa, erovia eme ha'e rami ete, ndera'y kuery omanombaa rami e'ŷ. Mba'eta Amnom anho'i ko omano — he'i.

<sup>34</sup> Ha'e gui Absalão ma ojava ma ra'e.

Ha'e gui tembiguai oikuua pota ho'amy va'e ma guakykue katy tape oī va'e re oma'ē vy oexa yvy'ā katy gui heta oguejy jekuaa jogueruvy va'e.

<sup>35</sup> Ha'e ramo Jonadabe aipoe'i huvixa pe:

— Xeruvixa, pee ma ou jekuaa ndera'y kuery. Xee nerembiguai xeayvuague rami ae oiko ra'e — he'i.

<sup>36</sup> Ha'e va'e ijayyupa ramove'i huvixa ra'y kuery ovaēmba okuapy. Ha'e vy onhendu ratā reve ojae'o okuapy. Ha'e rā huvixa ha'e hembiguai kuery ha'e javive avi ojae'o raxa okuapy.

### *Talmai rekoa katy Absalão ojavaague*

<sup>37</sup> Ha'e rā Absalão ma ojava vy oo Gesur pygua huvixa Amiúde ra'y Talmai rekoa katy. Ha'e rā Davi ma ojae'o tema gua'y re ko'ē nhavō.

<sup>38</sup> Ha'e rami vy Absalão ojava vy oo Gesur katy. Ha'e py ma mboapy ma'etŷa peve oiko.

<sup>39</sup> Ha'e ramo ma Davi opytu'u Absalão oekaa gui, mba'eta ipy'a porā ju ma Amnom omanoague gui.

## 14

### *Jerusalém tetā katy Absalão ojevy juague*

<sup>1</sup> Ha'e gui huvixa opy'a py oexa nga'u tema gua'y Absalão. Ha'e nunga Zeruia pi'a Joabe oikuua vy

<sup>2</sup> ogueru ruka peteī kunha hi'arandu va'e Tecoa tetā gui. Ha'e vy aipoe'i ixupe:

— Ejexa uka iporiau vaipa va'e rami, emōi ao ndeporiaua pygua, enhemoatyrō eme azeite py, ha'e enhemoingo omamo va'ekue re are ma iporiau oikovy va'e rami.

<sup>3</sup> Ejexa uka ha'e rami huvixa pe, ha'e ndeayvu hexeve aipoa'eague rupi anho — he'i. Ha'e vy Joabe omombe'u ijayvu aguā.

<sup>4</sup> Ha'e gui huvixa pe Tecoa pygua kunha ojexa uka vy ojero'a reve oī guenapy'ā re, ngova yvy re omovaē reve. Ha'e vy aipoe'i:

— Xeruvixa, xepytyvō ke!

<sup>5</sup> Huvixa oporandu:

— Mba'e ha'vy rerekō?

Ombovai:

— Aikore! Xee nerembiguai ma kunha imeve'ŷ va'e aiko xeme omamo rire.

<sup>6</sup> Xee areko va'ekue mokoī xepi'a. Ha'e kuery ma jomeme joguero'a mba'ety py. Imboja'oarā nda'ipoai rā peteī ma guyke'y oipyxo vy ojuka.

<sup>7</sup> Ha'e ramo xeretarā kuery ha'e javi opu'āmba okuapy xee nerembiguai rovai, ha'e vy aipoe'i okuapy xevy: “Emboaxa na orepo py guyke'y jukaare, rojuka aguā omamo va'ekue rekovia, ha'e rami vy romomba aguā ndee rire nemba'ekue jopyarā”, he'i okuapy. Ha'e rami vy 'rā ha'e kuery ombogue tapyī opa vygua areko va'ekue, ha'e xeme rerry voi, ta'ykue yvy re ndoikovevei aguā rami — he'i.

<sup>8</sup> Kunha va'e pe huvixa ombovai:

— Tereo ndero katy. Ha'e rā xee ajapo 'rā ndeayvuague — he'i.

<sup>9</sup> Tecoa pygua kunha aipoe'ive ju huvixa pe:

— Ha'e gui xeruvixa, tove xere ha'e xeru ro pygua kuery re toī ha'e nungakue re ropaga aguā. Ha'e rā ndee xeruvixa, tenda repenaaty py reī va'e re toī eme.

<sup>10</sup> Huvixa ombovai:

— Nderovai ijayvuave ri ramo eru xea py. Ha'e ramo nanemoangekovei 'rā — he'i.

<sup>11</sup> Kunha va'e aipoe'i:

— Ha'e rami rā xeruvixa, eura ke SENHOR Nderuete rerry rupi, ojepyxe vy ou va'e kuery ojuka e'ŷ aguā xepi'a jouguy omoēague re.

Ombovai:

— Anhetē ete SENHOR oikove va'e rupi aura vy aipoa'e: Neĩ peteĩ'i ma voi ndepi'a'a ndo'a rivei 'rā vyv py — he'i.

<sup>12</sup> Ha'e gui ma kunha va'e aipoe'i:

— Xeruvixa, tove xee nerembiguai tamombe'uve'i ju peteĩ ayvu ndevy.

Ombovai:

— Emombe'u tema — he'i.

<sup>13</sup> Kunha va'e ijayvuve tema:

— Mba'e re tu ndee ha'e rami e'ŷ renhembopy'a Nhanderuete pegua kuery rovai reiko aguã? Mba'eta xeruvixa, ha'e rami ndeayvua rami vy ndee ae renhembopaga uka, mba'eta ndee voi ndereru ruka jevyxei ndera'y amboae vyv katy remondouka va'ekue.

<sup>14</sup> Mba'eta nhande kuery ma nhamano 'rāe, vyv py yy onhoẽ mbyre nanhambooru kuaaveia rami. Ha'e rā Nhanderuete ma nanhandejuka rivei 'rā, ha'e rami 'rāgue py onhembopy'a 'rā henonde gui omondouka pyre mombyry riae ikuai e'ŷ aguã re.

<sup>15</sup> Aŷ ma xeruvixa, pova'e ayvu rupi ndereve xeayvu vy ae aju, heta va'e kuery xemongyje ramo. Ha'e ramo xee nerembiguai aipoa'e: "Xeayvu 'rā huvixa reve. Xapy'a rei rā ha'e ojapo 'rā xeayvua", ha'e vy aju.

<sup>16</sup> Mba'eta ndee xeruvixa, xee nerembiguai re reikuua pota 'rā avakue po gui xerepy aguã, xee ha'e xepi'a rekove ha'e kuery oipe'a e'ŷ aguã, Nhanderuete mba'emo ome'ẽ rā rojopy e'ŷ aguã rami.

<sup>17</sup> Xee nerembiguai teĩgue ju aipoa'e ta: Aŷ xeruvixa, ndeayvu ke aiko porā ju aguã rami. Mba'eta ndee ma Nhanderuete guigua anjo rami reikuua va'e mba'emo porā ha'e mba'emo vai. Ha'e SENHOR Nderuete oiko 'rā ndereve — he'i.

<sup>18</sup> Ha'e ramo huvixa ombovai vy aipoe'i kunha va'e pe:

— Ajerure renhenhomí e'ŷ aguã ndevy aporandu taa re.

Kunha va'e ombovai:

— Ndeayvu ha'vy, xeruvixa — he'i.

<sup>19</sup> Huvixa aipoe'i:

— Joabe e'ŷ teve ndereve ijayvu va'ekue pova'e ha'e javi rupi ndeayvu aguã?

Kunha va'e ombovai:

— Anhetē ete xeruvixa, nderekove rupi aura vy aipoa'e: Ndeayvua gui mava'eve ojepe'a aguã nda'evei, oiporu kuaa regua katy neĩ oiporu kuaa e'ŷa katy. Mba'eta anhetē nerembiguai Joabe ae ri xembou ra'e pova'e ayvu ha'e javi rupi xeayvu aguã.

<sup>20</sup> Ha'ekue rami ve'ŷ reiko aguã ae ri nerembiguai Joabe ojapo uka ha'e rami. Ha'e rami teĩ xeruvixa, Nhanderuete guigua anjo rami ne'arandu va'e vy vyv jave re oiko va'e teĩ reikuapa 'rā — he'i.

<sup>21</sup> Ha'e gui ma Joabe pe ju huvixa aipoe'i:

— Aendu ma rejerure ukaa. Tereo ha'vy, eru kunumi Absalão — he'i.

<sup>22</sup> Ha'e ramo Joabe ojero'a vy guenapy'ã re oĩ ngova vyv re omovaẽ peve. Ha'e vy huvixa ogueroayvu porā vy aipoe'i:

— Aŷ ma xeruvixa, aikuua ma ndee xejou porāa, xee nerembiguai ajerure ukaague rejapo rire — he'i.

<sup>23</sup> Ha'e rami vy Joabe opu'ã vy oo Gesur katy. Ha'e vy Jerusalém py ju ogueru Absalão.

<sup>24</sup> Ha'e rami rā huvixa aipoe'i:

— Tojevy ju ngoo py xerova oexa e'ŷ re — he'i ramo Absalão ngoo py ae ojevy huvixa rova oexa e'ŷ re.

### *Absalão iporāa re ijayvuage*

<sup>25</sup> Israel ha'e javi rupi amboae nda'ipoi Absalão rami ojou porāmby. Ipy guive ijapyte peve noĩ ivaikuea.

<sup>26</sup> Hi'a ma ma'etŷa opaa nhavõ ojaya vy ipoyia oexaa rā dois quilos raxa'i 'rā, mba'emo opejaa huvixa oiporu uka va'e rami.

**27** Oiko avi ta'y mboapy ha'e pete'i tajy, Tamar hery va'e. Ha'e va'e kunha ma jaexa rã iporã ete va'e.

### *Davi oĩa py Absalão ooague*

**28** Mokoï ma'etý re ma huvixa rova oexa e'ý re Jerusalém py Absalão oiko vy  
**29** oenoï uka Joabe, huvixaa py omondouka aguã tei ha'e ndouxei. Peteïgue ju oenoï uka tei ha'e ndouxei.

**30** Ha'e ramo aipoe'i guembiguai kuery pe:

— Ma'ẽ, pee py ma Joabe mba'ety itui xemba'ety re oje'a va'e, cevada onhotýague. Tapeo peapy — he'i ramo Absalão rembiguai kuery oapy imba'ety.

**31** Ha'e rami rã Joabe opu'ã vy oo Absalão ro py. Ha'e vy aipoe'i:

— Mba'e re tu nerembiguai kuery oapy ri xemba'ety?

**32** Absalão ombovai:

— Roenoï uka vy aipoa'e va'ekue: “Eju apy, huvixaa py romondouka aguã, po rami xeayvu remombe'u aguã: ‘Mba'erã tu aju raka'e Gesur tetã aikoague gui? Ha'eveve 'rãgue ha'e py ae aiko va'e rire', 're aguã.’” Aÿ ma xee aexaxe huvixa rova. Xapy'a rei xee ri ajejavy ramo ma taxejuka — he'i Joabe pe.

**33** Ha'e ramo huvixaa py Joabe oo vy omombe'upa. Ha'e ramo mae huvixa oenoï uka Absalão. Ha'e ramo ou vy ojexa uka huvixa renonde, ngova yvy re omovaẽ reve. Ha'e ramo huvixa oayvupa.

## 15

### *Absalão opu'ã rei ramo Davi kuery onhambaague*

**1** Ha'e va'e rire ma Absalão ojeupe ae ojou pete'i karóxa, kavaju kuery ha'e cinqüenta avakue henonde oo va'erã.\*

**2** Ha'e rami vy aje'ive'i reve Absalão ovv vy opyta 'rã ho'amy tetã kora rokë py. Ha'e ramo avakue huvixaa katy mba'emo re oikuua pota uka vy oo va'e ha'e javi pe Absalão aipoe'i 'rã: “Mava'e tetã guigua tu ndee?” he'i rã ombovai vy “Israel regua ae ri xee nerembiguai aiko” he'i

**3** ramo ma Absalão aipoe'ive ju 'rã ixupe: “Ma'ẽ, reikuua pota ukaa va'e ma ha'evea ramigua, ha'evea rami meme. Ha'e rami tei huvixa ma avave rei nomoï oendu va'erã”, he'i 'rã.

**4** Absalão aipoe'ive ju 'rã: “Aikore! Yvy re opena va'etyrã xemoña va'e rire, avakue mba'emo re oikuua pota uka vy, e'ý vy ojerure aguã xea py ou ramo ha'e kuery re ajapo 'rãgue ha'evea ramigua meme!” he'i 'rã.

**5** Ha'e rami ae avi henonde amongue ou vy henonde yvy py ojero'a ta ramo ha'e okuave'ẽ vy omopu'ã ju 'rã oayvupa reve.

**6** Ha'e rami py Absalão ojapo Israel kuery huvixaa katy mba'emo re oikuua pota uka vy oo va'e ha'e javi re. Ha'e rami vy ojee meme oguerovapa avakue Israel kuery kuraxõ.

**7** Irundy ma'etý opaa py ma Absalão aipoe'i huvixa pe:

— Tove Hebrom tetã katy taa SENHOR pe anhemboayyuague ajapo aguã.

**8** Mba'eta Síria re Gesur tekoa py teri aiko jave xee nerembiguai anhemboayvu vy aipoa'e va'ekue: “Xapy'a rei Jerusalém katy ajevy aguã rami SENHOR xeapo ri ramo ambojerovia 'rã”, ha'e rire.

**9** Huvixa ombovai:

— Tereo porã ke — he'i. Ha'e ramo opu'ã vy Hebrom katy oo.

**10** Ha'e rami avi Absalão nhemi rupi omondouka ayvu mombe'uarã Israel kuery va'e regua ha'e javi rupi. Ha'e vy aipoe'i:

— Mimby guaxu pu pendu vy aipopeje 'rã: “Absalão ma Hebrom tetã py oĩ nhanderuvixa”, peje.

\* **15:1** Israel pygua huvixa kuery gui Absalão ranhe guendarã karóxa ojou raka'e. Opa mba'e ojapo huvixarã onhemoingo aguã.

<sup>11</sup> Jerusalém gui Absalão rupive oje'oi duzentos avakue oenoī va'ekue. Ha'e va'e kuery ma oo tema rive, mba'erā paa oikuua vy e'ŷ.

<sup>12</sup> Absalão mba'emo Nhanderuete pe ome'ẽ oikovy jave oenoī uka avi Davi mongetaaty Aitofel Gilo tetā py heko a va'e. Ha'e rami py huvixa rovaigua kuery imbaraeteve oje'oivy, heta-etave tema ou Absalão-a katy guarā.

<sup>13</sup> Ha'e gui peteī ou ayvu mombe'ua Davi pe. Ha'e vy aipoe'i:

— Israel kuery ha'e javive ko Absalão re anho ovapa — he'i.

<sup>14</sup> Ha'e rami rā Davi aipoe'i Jerusalém py hexevegua avakue ikuai va'e pe:

— Pepu'ã ke, nhanha, mba'eta Absalão gui ndajaa jepe reguai teve. Pejapura ke jaje'oi pojava, nhanderupity xapy'a e'ŷ aguā, ha'e nhande'āry mba'emo vai ogueru reve tetā py ikuai va'e ha'e javi ojukapa e'ŷ aguā kyxe py.

<sup>15</sup> Ha'e ramo huvixa Davi revegua avakue ombovai:

— Ma'ẽ, apy ma nerembiguai orekuai, oreruvixa ojapo uka va'e tema rojapo aguā ae — he'i okuapy.

<sup>16</sup> Ha'e gui huvixa ojepe'a ramo hoo pygua kuery ha'e javi oje'oi hexeve. Va'eri oeja avi dez gua'yxy jevy kuery ngoo re opena va'eraā.

<sup>17</sup> Ha'e rami vy heta va'e kuery hupive oje'oi va'e reve huvixa oo rā oo ijapy'i py oĩ va'e py optytapa ranhe.

<sup>18</sup> Ha'e gui hexevegua avakue ha'e javi oaxa henonde katy. Ha'e vy harða ha'e Gate pygua kuery ha'e javi ju, seiscentos avakue Gate pygua hupive oje'oi va'ekue oaxa jogueravy huvixa renonde.

### *Itai ojeroviapy oikoa oexa ukaague*

<sup>19</sup> Ha'e gui ma huvixa aipoe'i Gate pygua Itai va'e pe:

— Mba'e re tu ndee reoxe avi ore kuery reve? Ejevy ju, epyta penderuvixarā ou va'e reve, mba'eta amboae yvy guigua reiko, ndeyvy gui ae mombyry reiko va'e.

<sup>20</sup> Kuee rei revaē va'ekue ma nhi'ã xee rogueraa ta ma avi xerupive aŷ, neĩ xee ma voi ndaikuuai marā katy pa aa aguā va'eri? Ejevy ju, erojevypa avi nderyvy kuery. Tove ndere toĩ Nhanderuete nemboaxya ha'e ojeroviapy oikoa.

<sup>21</sup> Ha'e ramo Itai ombovai huvixa pe:

— Anhetē ete SENHOR oikove va'e rupi, ha'e ndee xeruvixa nderekove rupi avi aura vy aipoa'e: Mamo rā rei ndee xeruvixa reĩa py ae xee nerembiguai aiko avi 'rā, amano e'ŷ vy aikove aguā teĩ — he'i.

<sup>22</sup> Ha'e ramo Davi aipoe'i Itai pe:

— Tereo ha'vy, eaxa xerenonde katy — he'i. Ha'e ramo Gate pygua Itai ma hexevegua avakue ha'e javi reve oo, kyrīgue guive.

<sup>23</sup> Ha'e kuery oo rā ha'e va'e vy re ikuai va'e oexa vy ojae'o ratā pavē.<sup>†</sup> Ha'e rā ha'e kuery oaxa oje'oivy. Cedrom yakā huvixa voi oaxa, tekota e'ŷa katy tape oĩ va'e rupi oo vy.

### *Jerusalém tetā katy ju Zadoque, Abiatar ha'e Husai ombojevyague*

<sup>24</sup> Oaxa avi sacerdote Abiatar ha'e Zadoque. Ha'e kuery reve oje'oi avi levita kuery SENHOR guexeve guarā ojapo va'ekue ryru reraa kuery. Ha'e py omboguejy ranhe, tetā gui ha'e kuery ha'e javi oẽ vy oaxapa peve.

<sup>25</sup> Ha'e ramo huvixa Davi aipoe'i Zadoque pe:

— Perojevy ju SENHOR ayvu ryru tetā katy. SENHOR rembiexa rupi xemboaxy ri vy xeapo 'rā ha'e katy ju ajevy aguā rami hyru aexa ju aguā, oĩaty voi.

<sup>26</sup> Ha'e rami teĩ xapy'a rei SENHOR xevy “Xee ndoguerovy'avei”, he'i ramo, ma'ẽ, xee ma apy ha'ã. Tojapo xere ha'e oipotaa rami — he'i.

<sup>27</sup> Sacerdote Zadoque pe huvixa aipoe'ive ju:

<sup>†</sup> **15:23** Ha'e kuery ojae'o mba'eta huvixa guetā gui onha ramo (versículo 20).

— Ndee ha'e Abiatar imba'ekuaa va'e vy pejevy porã'i ke tetã katy. Pendereve too porã'i avi pendera'y mokoõ: ndera'y Aimaás, Abiatar ra'y Jônatas guive.

**28** Ma'ẽ, peẽ pemombe'u uka jevy e'ŷa ja xee apyta ranhe 'rã yy oaxaaty tekao e'ŷa katy oĩ va'e py — he'i.

**29** Ha'e ramo Zadoque ha'e Abiatar ma Jerusalém katy ju ogueraa Nhanderuete ayvu ryru. Ha'e py ae opyta.

**30** Ha'e gui Davi oguatave ovv vy Oliveiras yvv'ã rupi oẽ ovv ojae'o reve. Oakã ojao'i ha'e ipy rei reve oguata ovv. Hupive oje'oi va'e ha'e javi oakã ojao'i reve meme ojae'o avi jogueravy.

**31** Ha'e rire Davi pe omombe'ua vy aipo'ea:

— Aitofel voi Absalão reve opyta ndere opu'ã rei va'e kuery mbyte.

Ha'e ramo Davi aipoe'i:

— SENHOR, xee ajerure: ejapo Aitofel o'arandua rupi e'ŷ nhomongeta aguã rami — he'i.<sup>‡</sup>

**32** Ha'e gui yvyty apyte áry Davi ovaẽ SENHOR ombojeroviaaty py. Ha'e jave ha'e oma'ẽ rã peteĩ ovaẽ ouvy arquita regua Husai. Ha'e va'e ma oao puku oxoropa va'e py onhemonde reve ou, ha'e oakã re yvv omoĩ reve.

**33** Ixupe Davi aipoe'i:

— Xerupive reo aguã ri rejua ramo nda'evei xevy.

**34** Ha'eveve 'rã tetã katy rejevy vy Absalão pe aipo're: “Aŷ ma xeruvixa, xee ma nerembiguai ju 'rã aiko, nderu rembiguai aikoague rami avi. Ha'ekue rami ae 'rã aiko nerembiguai”, 're vy rejapo 'rã Aitofel ijayvu rã Absalão oendu ve'ŷ aguã rami.

**35** Ha'e py ndereve ikuai avi 'rã sacerdote kuery Zadoque ha'e Abiatar. Huvixa ro py mba'emo rendu va'ekue ha'e javi 'rã remombe'u uka ha'e kuery pe.

**36** Ta'y kuery avi 'rã ikuai ha'e py: Zadoque ra'y Aimaás ha'e Abiatar ra'y Jônatas. Ha'e kuery pe ma xeremiendurã pemombe'u uka 'rã mba'emo pyau pendu va'ekue ha'e javi — he'i.

**37** Ha'e ramo Davi irũ Husai ojevy ju tetã katy. Absalão voi ovaẽ ma avi Jerusalém py.

## 16

### Davi reve Ziba ijayvuague

**1** Ha'e gui Davi ma yvv'ã guy katy ojapyro ovv jave ou jekuaa oiny Mefibosete rembiguai Ziba.\* Ha'e va'e ma mokoõ mymba mburika'i ogueru ombokupe áryguapa va'ekue, ha'e hi'áry duzentos mbojape, ha'e cem xã uva pirukue, cem avi hi'a pyau, ha'e gui peteĩ ryru vinho.

**2** Ziba ou rã Davi oexa vy oporandu ixupe:

— Mba'erã tu kova'e nunga reru?

Ziba ombovai:

— Myumba mburika'i ma hi'áry huvixa ro pygua kuery oĩ aguã. Ha'e rã mbojape ha'e mba'emo'a ma kunumigue ho'u va'erã aru. Vinho ma tekao e'ŷa rupi penekane'õ vy pey'u va'erã — he'i.

**3** Ha'e rã Davi oporanduve ju:

— Ha'vy nderuvixa ra'y, mamo tu opyta?

Ziba ombovai:

— Ha'e ma Jerusalém py ae opyta, mba'eta ojeupe ae “Kova'e ára po xevy ju 'rã Israel ro pygua kuery omboaxa xeru rekoria xepo'aka aguã”, he'i vy.

**4** Ha'e rami rã Davi aipoe'i Ziba pe:

<sup>‡</sup> **15:31** Aitofel ma huvixa mongetaaty oiko. Davi mongetaa rupi ranhe oiko, ha'e gui Absalão mongetaa rupi ju (versículo 12). \* **16:1** Ziba ma Saul rembiguai ranhe oiko, ha'e gui Jônatas ra'ykue Mefibosete rembiguai ju (2 Samuel 9.9-10).

— Mefibosete oguereko va'ekue-ekue ma ame'ẽmba ndevy.<sup>†</sup>

Ziba ombovai:

— Xeruvixa, xee ajero'a romboete vy. Taxemboaxy nerentonde – he'i Davi pe.

### *Davi re Simei ijayvu vaiague*

<sup>5</sup> Ha'e gui Baurim tekoa py huvixa Davi ovaẽ vy oma'ẽ rã peteĩ ovaexi jogueruvy Saul ro pygua kuery regua Simei hery va'e, Gera ra'y. Ha'e va'e ovaexi vy ijayvu vai ouvy hexe.

<sup>6</sup> Davi re ita omombo ouvy, hembiguai kuery re guive, Davi reveguia ha'e hembiguai xondaro kuery ooa yke jovaive rupi oje'oi oiny va'eri.

<sup>7</sup> Simei ijayvu vai vy aipoe'i:

— Tereo apy gui, tereo ke, ndee ava tuguy moẽaty, nhe'ẽ vai ra'y.

<sup>8</sup> Aŷ Nhanderuete nembopaga ma Saul ro pygua kuery ruguy omoẽague re, hekivia ndee nhemi rupi reĩ rire. Ha'e rami teĩ ndera'y Absalão po py ju SENHOR omboaxa. Ma'ẽ, aŷ ma reximba reia rupi reiko, ava tuguy moẽaty reiko vy – he'i.

<sup>9</sup> Ha'e rami rã Zeruia pi'a Abisai aipoe'i Davi pe:

— Xeruvixa, mba'e re tu peva'e jagua re'õgue ijayvu vai ri ndere? Tove taaxa apy gui akã'o aguã.

<sup>10</sup> Huvixa ombovai:

— Mba'e tu xee areko peẽ Zeruia pi'a kuery reve? Tove ri ta'ijayvu vai. Mba'eta xapy'a rei SENHOR ae ixupe ijayvu vy "Ndeayvu vai Davi pe", he'i raka'e. Ha'e rami ri ramo mava'e tu "Mba'e re tu ha'e rami ete rejapo?" he'i aguã ha'eve ta? – he'i.

<sup>11</sup> Davi aipoe'ive ju Abisai ha'e guembiguai kuery ha'e javive pe:

— Ne'exa, xera'y ae teĩ xejukaxe aŷ, ha'e rami peva'e Benjamim regua katuve ma. Tove ta'ijayvu vai, mba'eta SENHOR ae ojapo uka ha'e rami.

<sup>12</sup> Xapy'a rei SENHOR oma'ẽ 'rã xee ajexavaia re. Ha'e rami ri vy mba'emo porã anho 'rã SENHOR ome'ẽ xevy kova'e ára ayvu vaiague rekovia – he'i.

<sup>13</sup> Ha'e gui ma oguatave oje'oviy, Davi ha'e ixupegua avakue reve. Ijyke rupi Simei voi oo avi oiny yvy'ã pukukuea rupi. Ijayvu vai tema ovu, ita ha'e yvy guive omombo ovu hexe.

<sup>14</sup> Ha'e gui huvixa ha'e hupive oguata va'e kuery reve ma ikangypakue ovaẽ oje'oviy Jordão yakã rembe re. Ha'e py ma ikane'õguia ranhe okuapy.

### *Absalão pegua oikoa rami Husai ombotavya rupi onhemombe'uague*

<sup>15</sup> Ha'e gui Jerusalém tetã py Absalão kuery ovaẽmba okuapy ixupegua avakue Israel regua ha'e javi reve. Ha'e kuery reve ou avi Aitofel.

<sup>16</sup> Ha'e gui Davi irũ Husai arquita va'e voi ojexa uka avi Absalão pe. Ha'e vy aipoe'i ixupe:

— Toikove huvixa, toikove huvixa!

<sup>17</sup> Ha'e rã Absalão aipoe'i Husai pe:

— Ha'e rami ae teve rexa uka neirũ Davi pe reikoa? Mba'e re tu ndereoi neirũ rupive?

<sup>18</sup> Husai ombovai:

— Any ri. Xee apyta 'rã hekivia SENHOR omoĩ va'ekue reve. Kova'e kuery Israel pygua avakue ha'e javi oiporavo va'ekue reve xee voi aiko 'rã, hexeve ae 'rã.

<sup>19</sup> Mba'eta mava'e pe 'rã tu aiko aguã ha'eve? Ndee ta'y pe e'ŷ ri ty'y? Nderu rembiguai aikoague rami ae ndevy ju 'rã aiko xee – he'i.

### *Davi ra'yxy jevy kuery reve Absalão onhenoague*

<sup>20</sup> Ha'e gui ma Absalão aipoe'i Aitofel pe:

— Oremongeta na mba'e nunga pa rojapo aguã.

<sup>21</sup> Aitofel ombovai Absalão pe:

<sup>†</sup> **16:4** Ziba pe Davi omboaxa mba'emo Mefibosete oguereko va'ekue, mba'eta ixupe Ziba ijapu vy Absalão re Mefibosete ooague rami omombe'u ramo. Ha'e rã Mefibosete ma ndooi (2 Samuel 19.24-30).

— Nderu ra'yxy jevy kuery oeja ovy ngoo re opena va'erā. Enheno ha'vy ha'e kuery reve. Ha'e ramo nderu reve joe napendea'eveia Israel kuery ha'e javi oikuua ramo nderevegua kuery ipy'a guaxuve 'rā okuapy — he'i.

<sup>22</sup> Ha'e gui ma oo áry ojapo okuapy peteī oo'i Absalão oī aguā. Ha'e ramo ha'e py, Israel kuery pavē oexaa py onheno nguū ra'yxy jevy kuery reve.

<sup>23</sup> Ha'e va'e jave Aitofel nhomongeta 'rā Nhanderuete pe oporandua rā ombovaia rami avi. Ha'e rami ae tema Aitofel ijayvu nhomongeta vy, Davi omonogetaague rami ae avi omonogeta Absalão.

## 17

### *Aitofel ha'e gui Husai ju omonogetaague*

<sup>1</sup> Aitofel aipoe'ive ju Absalão pe:

— Tove taiporavo doze mil avakue. Ha'e vy Davi rakykue aa 'rā kova'e pyavyve.

<sup>2</sup> Hexe apu'ā 'rā ikane'ō ha'e ikangypa rei jave. Amondyipa 'rā. Ha'e rā hexeve ikuai va'ekue onhamba 'rā. Huvixa anho'i 'rā ajuka.

<sup>3</sup> Ha'e kuery ajapo 'rā ndere oupa ju aguā rami meme. Mba'eta ha'e kuery ha'e javi ojevypa 'rā, peteī'i ava rejukaxea rami rejuka uka rire. Ha'e rami vy ikuai porāmba 'rā — he'i.

<sup>4</sup> Ha'e rami ijayvu rā Absalão ha'e Israel regua nhomongeta va'ety kuery ha'e javi oendu vy ojou porā rei okuapy.

<sup>5</sup> Ha'e rami teī Absalão aipoe'ive ju:

— Penoī ta'vy arquita regua Husai ju, nhaendu aguā ha'e pa mba'e he'i ra'e — he'i.

<sup>6</sup> Absalão-a py Husai ovaē ramo aipoe'i ixupe:

— Ha'e rami Aitofel ijayvu ange. Ha'eve 'rā pa ijayvua rami jajapo aguā? Ha'e rami e'ŷ vy ndee ju ke ndeayvu.

<sup>7</sup> Husai ombovai Absalão pe:

— Aitofel ange ijayvuague ma ha'eve va'e'ŷ — he'i.

<sup>8</sup> Husai aipoe'ive ju:

— Reikuua porā nderu ha'e avakue hexeve ikuai va'e reko, reikuua avi ha'e kuery ipy'a guaxukueve ikuiaia, ha'e ursa kunha ka'aguy rupi gua'y kuery omokanhy va'e rami ipoxy va'e memea. Nderu voi joe opu'ā va'ety vy pyávy teī ndopytai 'rā ojeupegua kuery reve.

<sup>9</sup> Ne'exa, aŷ ma ha'e oma'ē mbegue 'rā peteī itakua gui, e'ŷ vy amboae henda py. Ha'e gui jypy'i hexe pepu'āa py ndevyguia kuery amongue oitya ri ramo ha'e nunga oendu va'e rei ijayvu vy "Absalão rupi ou va'ekue oitypaa ra'e" he'i 'rā.

<sup>10</sup> Ha'e rami rā ma avakue ipy'a guaxukueve voi okyjepa rei 'rā, xivi rami ipy'a guaxu va'e teī. Mba'eta Israel kuery pavē oikuua nderu ma joe opu'āa py ipo'akave va'ety ae, ha'e hexevegua avakue voi ipy'a guaxukueve memea.

<sup>11</sup> Xee ma po rami romongeta: Emboatypa pojava ndejeupe Israel kuery ha'e javi, Dā guive Berseba peve ikuai va'e, ye'ē rembe re ita ku'i ikuiaia rami mbovy rei e'ŷ ikuai va'e. Ha'e vy ndee ae 'rā reraa henoiny ha'e kuery mbyte rupi.

<sup>12</sup> Ha'e vy ma Davi re jaje'oi 'rā mamo rā rei oīa py, ha'e vy jajopy xapy'a 'rā, yxapy minha yvy re ho'aa ramo. Ha'e ramo ndoikovevei 'rā, hexevegua avakue voi ndokuavei 'rā teīve.

<sup>13</sup> Xapy'a rei amongue tetā py ha'e onhemi ramo ma ha'e katy Israel kuery ha'e javi 'rā ogueraa ixā. Ha'e vy jaitypa 'rā heravy yakā katy, oīague py neī peteī'i ita ra'y'i voi nda'ipovei peve — he'i.

<sup>14</sup> Ha'e rami rā Absalão ha'e Israel pygua avakue aipoe'i okuapy:

— Aitofel ijayvuague gui ma arquita regua Husai ijayvua ha'eveve — he'i okuapy, mba'eta SENHOR ae ojapo Aitofel ijayvua oendu rivepa aguā rami, Absalão kuery áry mba'emo vai ombouxe vy.

<sup>15</sup> Ha'e gui ma Husai aipoe'i sacerdote kuery Zadoque ha'e Abiatar pe:

— Aitofel ma ha'e rami omongoeta kuri Absalão ha'e Israel regua nhomongoeta va'ety kuery. Ha'e rā xee ma amboae rami amongeta.

<sup>16</sup> Aŷ pemondouka pojava ha'vy Davi pe ayvu mombe'uarā aipoe'i aguā: “Epyta eme kova'e pytū yy oaxaaty tekao e'ŷa katy oĩ va'e py. Ha'e rami 'rāgue py eauxa pojava hovaigua re, huvixa ojukaa e'ŷ aguā, hexeve ikuai va'e kuery reve”, peje uka — he'i.

<sup>17</sup> Ha'e jave ma Jônatas ha'e Aimaás ma En-Rogel katy'i oĩ, tetā py ha'e kuery ovaē rā oexaa e'ŷ aguā. Ha'e gui ha'e kuery pe peteī tembiguai kunha'i omombe'u ha'e nunga, Davi pe ju ha'e kuery omombe'u aguā.

<sup>18</sup> Ha'e rami teī peteī kunumi va'e oexa nho vy ou Absalão pe omombe'u. Ha'e rā mokoīve ma ojapura reve jogueraa vyvoi vy peteī ava ro py ovaē, Baurim tekao py. Ha'e va'e roka py oĩ peteī ykua ojo'o pyre. Ha'e va'e py ha'e kuery oguejy jogueravy.

<sup>19</sup> Ykua mbotya hoo va'e ra'yxy ogueru vy omoī hi'áry. Imbotya áry ju mba'emo ra'yīgue onhoē. Ha'e rami rā mava'eve ndoikuuai.

<sup>20</sup> Ha'e va'e oo py Absalão rembiguai kuery ovaē vy aipoe'i okuapy kunha va'e pe:

— Mamo tu ikuai Aimaás ha'e Jônatas?

Kunha va'eombovai:

— Ha'e kuery oaxapa ae ma yy oaxaaty — he'i. Ha'e ramo ha'e kuery oeka teī ndojoui vy ojevypa ju Jerusalém katy.

<sup>21</sup> Ha'e kuery oje'oi ramove ykua gui oẽ mokoīve. Ha'e rami vy oo vy omombe'u Davi pe. Ha'e vy aipoe'i:

— Pepu'ã ke, peaxapa pojava yy rovai re, mba'eta ha'e rami Aitofel ijayvu penderovai — he'i.

<sup>22</sup> Ha'e rami rā Davi ha'e hexeveguia kuery ha'e javi oaxapa Jordão yakā. Ko'ẽmba ma jave takyue re neī teī'i voi nda'ipoi Jordão oaxa e'ŷ va'e.

<sup>23</sup> Ha'e gui Aitofel ma nhomongoetaague rami e'ŷ ikuiaia rā oexa vy ombokupe árygua guymba mburika'i, ha'e oĩ vy oo tetā py ngoo oĩ va'e py. Mba'emo omoīmba porā ma vy ha'e ae oo ojejyryvipy. Omano ramo onhono porāa tuu rupa yvýry.

<sup>24</sup> Ha'e gui Davi kuery ma Maanaim py ovaē. Absalão kuery voi Jordão yakā oaxapa, avakue Israel kuery hexeve ikuai va'e reve.

<sup>25</sup> Ha'e vy xondaro kuery ruvixa Joabe rekovia ma Absalão omoī Amasa. Ha'e va'e ma Ismael guigua Itra ra'y, Naás rajy Abigail pi'a. Abigail ma Joabe xy Zeruia kypy'y.

<sup>26</sup> Ha'e rami vy Israel kuery Absalão reve ijatypa okuapy Gileade yvy re.

### *Absalão reveguia xondaro kuery re Davi reveguia kuery ipo'aka okuapyague*

<sup>27</sup> Maanaim py Davi kuery ovaē ma ramo ovaexī jogueruvy pova'e kuery: Amom kuery va'e regua Rabá pygua Naás ra'y Sobi, ha'e gui Lo-Debar pygua Amiel ra'y Maquir, ha'e gui Rogelim pygua gileadita regua Barzilai avi.

<sup>28</sup> Ha'e va'e kuery ma Davi oĩa py ogueru tupu, hy'a, hyru nhae'ũ guigua, trigo, cevada, mba'emo ku'ikue, ha'yīgue maimbe, ei retā, kumanda pe'i,

<sup>29</sup> ei, kamby kekue, vexa'i kuery ha'e gui queijo vaka guigua. Ha'e nunga oguerupa Davi ha'e hexeve ikuai va'e pe ho'u va'erā, mba'eta aipoe'i okuapy: “Kova'e kuery ma tekao e'ŷa rupi ikuiaia py inhembyayi, ikane'õ ha'e ije'yuvei guive” he'i vy.

## 18

<sup>1</sup> Davi guexeveguia kuery oipapa vy ha'e kuery ruvixarā omoī mil e'ŷ vy cem re opena va'erā.

<sup>2</sup> Ha'e gui mboapy henda py omboja'o vy omondoukapa ju: peteī aty ma Joabe ogueraa, amboae aty ma Zeruia pi'a Abisai ogueraa, ha'e rā amboae aty ma Gate pygua Itai ogueraa. Huvixa aipoe'i ha'e kuery pe:

— Xee voi aa 'rā peē kuery reve.

<sup>3</sup> Ha'e rā ha'e kueryombovai:

— Ndee ma ndereoi 'rā. Xapy'a rei nhanderovaigua kuery oremonha vy orere ha'e kuery nopenai 'rā, neñ mbyte rupi peve ore romano teñ ae ma, mba'eta ore kuery va'e regua dez mil ikuai va'e gui ndee anho'i teñ revareve va'e. Ha'eveve ndee orerepy aguã rami reiko aguã, tetã py reña gui ae – he'i okuapy.

<sup>4</sup> Davi ju aipoe'i ha'e kuery pe:

— Peñ kuery peipotaa rami ha'vy xee aiko 'rā – he'i. Ha'e rami rā tetã kora rokẽ yvýry huvixa hi'añ jave ixupegua kuery ha'e javi oë jogueravy cem ha'e mil ma voi-voi.

<sup>5</sup> Ha'e gui ma Joabe, Abisai ha'e Itai pe ju Davi ijayvu. Ha'e vy aipoe'i:

— Xere pema'ẽ vy perekó porã'i xera'y Absalão – he'i. Amboae kuery ha'e javi oendu okuapy xondaro ruvixa kuery pe huvixa gua'y Absalão re opena porã uka rā.

<sup>6</sup> Ha'e gui ma ha'e javi oje'oi tetã rovai rupi, Israel kuery reve joguero'a aguã. Efraim regua ka'aguy rupi joe opu'ã okuapy.

<sup>7</sup> Ha'e py ma Davi rembiguai kuery oitypa Israel kuery. Ha'e va'e ára ho'a reta, vinte mil avakue ojukaa py.

<sup>8</sup> Mba'eta joe opu'ã va'e kuery oaïmba oje'oivy ha'e va'e yvy ha'e javi rupi. Ha'e va'e ára kyxe py ojukaa gui okanhy retave ka'aguy re ikuiaia py rive.

### *Absalão omanoague*

<sup>9</sup> Absalão ma mburika áry oo oiny vy nhovaexí Davi rembiguai avakue reve. Hymba mburika ma peteñ yvyra carvalho hi'añ va'e rakã guy rupi oaxa ovy jave Absalão akã ipija oiny yvyra rakãmby py, ha'e vy ovava oiny yvate katy gui yvy katy. Hymba mburika ma oaxa tema ovy.

<sup>10</sup> Peteñ ava ha'e nunga oexa vy oo omombe'u Joabe pe. Ha'e vy

— Absalão ma yvyra carvalho rakã re ovava oiny – he'i.

<sup>11</sup> Ha'e rā Joabe aipoe'i ava imombe'uare pe:

— Rexa va'eri mba'e re tu nderejukai ha'e pyve, ha'e reity 'rāgue inony yvy rupi? Ha'e rami reiko va'e rire ma ndevy ame'ẽ 'rāgue dez hatã'i va'e prata guigua ha'e peteñ ku'akuua – he'i.

<sup>12</sup> Ha'e ramo ava va'e aipoe'i Joabe pe:

— Xepo py mil hatã'i va'e prata guigua reme'ẽ teñ xee ma nakuave'ẽi 'rā huvixa ra'y rovai, mba'eta roendu porã ange huvixa ndevy, Abisai ha'e Itai pe ijayvu ramo, “Perekó porã'i xera'y Absalão”, he'i rā.

<sup>13</sup> Xapy'a rei xee ma nanhe'ẽ renduia rupi hexe ajapo vai va'e rire huvixa ndoikuua e'ŷi 'rāgue. Ha'e rami avi ndee eteve voi xejou vai 'rāgue – he'i.

<sup>14</sup> Joabe ombovai:

— Nda'evei ndereve ha'ã rive aguã – he'i vyve mboapy hu'y ogueraa vy oipyxo Absalão kuraxõ py, oikove teri reve yvyra carvalho rakãmby re ipija oinya py.

<sup>15</sup> Ha'e gui dez kunumigue Joabe rembiporu reraa va'e kuery ju ombojere okuapy vy ojuka ete'i Absalão.

<sup>16</sup> Ha'e gui ma Joabe mimby guaxu omonhe'ẽ rā ixondaro kuery optyu'upa Israel kuery monhaa gui. Ha'e vy ojevypa, Joabe omombytu'u ramo.

<sup>17</sup> Absalão retekue ogueraa vy omombo ka'aguy re yvykua tuvixa va'e oĩ va'e py, ha'e vy hi'áry omboaty reta ita. Ha'e rā Israel kuery ma peteñ-teñ ngoo katy onhamba oje'oivy.

<sup>18</sup> Absalão oikove teri reve omopu'ã va'ekue peteñ ita ojeupe ae, huvixa rekoia yvyugua py. Mba'eta aipoe'i: “Xee ndarekoi xera'y peteñ'i ma voi xerery re ima'endu'aa aguã”, he'i. Ha'e rami vy ita re ae omoi guery. Ha'e rami rire ha'e va'e pe aŷ peve “Absalão pegua ita” 'ea.

### *Absalão omano rā Davi ojae'o vaipaague*

<sup>19</sup> Ha'e gui Zadoque ra'y Aimaás aipoe'i:

— Tove taa tamombe'u huvixa pe hovaigua kuery po'akaa gui SENHOR ogueraa jepe maague.

**20** Ha'e rami teĩ Joabe ombovai:

— Ndee ma neremombe'ui 'rã teve ange mba'emo oiko va'ekue, amboae ára py ha'eve 'rã teĩ, huvixa ra'y ae omano rire – he'i.

**21** Ha'e gui peteĩ Etiópia pygua hi'aĩ va'e pe ju Joabe aipoe'i:

— Ndee katu tereo emombe'u mba'emo rexâ va'ekue – he'i ramo Joabe renonde ojero'a ma vy onha ovy.

**22** Ha'e gui Zadoque ra'y Aimaás aipoe'ive ju Joabe pe:

— Ha'e rami teĩ ma tove xee voi taa Etiópia pygua rakykue.

Joabe aipoe'i:

— Mba'erã tu ndee voi renha ta, xera'y? Mba'eta ha'e nunga remombe'ua gui nderejoui 'rã hekovia – he'i.

**23** — Ha'e rami teĩ ae ma xee aanha ta avi – he'i ju Aimaás.

Ixupe Joabe

— Enha ha'vy eovy – he'i ramove Aimaás onha avi ov yvy tape yvy'ämbe rupi, ha'e vy onhokuã ov y Etiópia pygua.

**24** Tetã jaikea py Davi oguapy oiny mokoĩ okẽ oĩ va'e mbyte py. Peteĩ jopya ojeupi ov y okẽ yke rupi kora oĩ va'e áry. Ha'e vy oma'ẽ vy oexa peteĩ ava ha'e ae'i onha ouvy va'e.

**25** Ha'e vy jopya ojapukai vy omombe'u huvixa pe. Ha'e rã huvixa ombovai:

— Ha'e ae'i ri ou va'e ma mba'emo porã mombe'uarã 'rã ou – he'i. Ha'e vy ou oiny va'e ovaẽ ouvy.

**26** Ha'e gui jopya oma'ẽ jevy vy oexa amboae ava onha ouvy va'e. Ha'e vy teĩgue ju ojapukai okẽ py oĩ va'e pe. Ha'e vy aipoe'i:

— Amboae ava ju ha'e ae'i onha jekuaa ouvy.

Huvixa ombovai:

— Ha'e rami rã ha'e va'e voi mba'emo porã mombe'uarã 'rã ou – he'i.

**27** Aipoe'ive ju jopya:

— Tenonde onha ouvy va'e ma ko Zadoque ra'y Aimaás.

Huvixa ombovai:

— Ha'e va'e ma heko porã va'e vy mba'emo porã omombe'u 'rã ouvy – he'i.

**28** Ha'e gui ma Aimaás ovaẽ vy ojapukai huvixa pe:

— Ha'evepa rei! – he'i vy huvixa renonde ojero'a ngova yvy re omovaẽ peve. Ha'e vy aipoe'ive ju:

— Ta'ima'endu'a porãa SENHOR Nderuete re, mba'eta nhandepo py omboaxapa xeru-vixa rovai opu'ã va'ekue – he'i.

**29** Huvixa oporandu:

— Oiko porã pa xera'y Absalão?

Aimaás ombovai:

— Ha'e rami avi xeruvixa, xee ma nerembiguai Joabe xembou ma jave aexa nhomoanha-anha ha'e hevovo rei va'eri xee ndaikuuai guive mba'e paa – he'i.

**30** Huvixa aipoe'i:

— Apy he'ã, earõ ranhe – he'i ramo oarõ ho'amy ha'e py.

**31** Ha'e gui Etiópia pygua ju ovaẽ vy aipoe'i:

— Xeruvixa, mba'emo porã aru neremiendurã. Ange ma SENHOR nderepy nderovai opu'ã va'ekue po'akaa gui – he'i.

**32** Ha'e ramo huvixa oporandu Etiópia pygua pe:

— Oiko porã pa xera'y Absalão?

Etiópia pygua ombovai:

— Xeruvixa, tove ha'e va'e oiko vaiague ramigua toiko nderovaigua kuery ha'e javi re, ndevy ojapo vai aguã opu'ã va'ekue ma guive rã – he'i.

**33** Ha'e rami rã huvixa opy'a py onhenhandu vai ete vy ojepe'a ov y tetã kora rokẽ áry opy ja'o oĩ va'e py oĩ aguã. Ha'e vy ojae'o. Oguata vy ojevy-jevy oikovya rupi aipoe'i:

— Xera'y Absalão, xera'y, xera'y Absalão! Nderekovia xee amano 'rāgue teī, Absalão xera'y, xera'y!

## 19

### *Davi pe Joabe ijayvuague*

<sup>1</sup> Ha'e gui ma Joabe pe aipo'ea:

— Ma'ẽ, huvixa tu ojae'o rima oikovy gua'y Absalão re ipy'a vaia rupi — 'ea.

<sup>2</sup> Ha'e rami py ha'e va'e ára ha'e kuery ipo'aka teī iporiaupa okuapy, "Huvixa ma gua'y Absalão re ipy'a vai" 'ea ramo.

<sup>3</sup> Ha'e va'e árave ha'e kuery nda'evei reve oike ju okuapy tetā py, joe opu'ãa gui oximb'a rei vy onha va'e ramo.

<sup>4</sup> Huvixa Davi ma oakā ojao'ipa reve ojapukai ratā:

— Xera'y Absalão, Absalão xera'y, xera'y! — he'i oikovy.

<sup>5</sup> Ha'e ramo Joabe ma huvixa oĩa py oike vy aipoe'i ixupe:

— Aŷ ma rejapo nerembiguai kuery ha'e javi oximb'a aguã rami, ha'e kuery ange nderekove ogueraa jepe rire teī, ha'e ndera'y ha'e nderajy kuery rekove, ha'e ndera'yxy ha'e ndera'yxy jevy kuery rekove guive.

<sup>6</sup> Ndee ma nhi'ã reayvu ndere ija'e e'ŷ va'e kuery, ha'e rā nderayvua kuery ma remombo-riau rive. Aŷ ma xee aikuaa rā ange Absalão nomanoi, ha'e rā ore kuery ma romanomba va'e rire revy'a 'rāgue.

<sup>7</sup> Epu'ã ke aŷ, eẽ, ha'e ndeayvu nerembiguai kuery ipy'a porā ju aguã rami. Xee ma Nhanderuete rery rupi aura vy aipoa'e: Aŷ ndeayvu aguã neree'i ri ramo ndereve neī peteī'i ava ma voi ndopytavei 'rā kova'e pyávy. Nekunumi guive aŷ peve rejexavaiaty gui ma ha'e nunga nda'eveive 'rā ndevy — he'i.

<sup>8</sup> Ha'e rami rā huvixa opu'ã vy oguejy tetā kora rokē py oguapy oiny. Ha'e rā heta va'e kuery ha'e javi pe omombe'ua vy

— Ne'exa, huvixa ma okẽ py hiny — 'ea rā ha'e kuery ha'e javi ou vy ojexa uka okuapy huvixa renonde.

Ha'e rā Israel kuery ma onhamba ma voi, peteī-teī ngoo katy.

<sup>9</sup> Ha'e rami vy Israel kuery ha'e javi regua joupe-upa ijayvu okuapy, ha'e vy aipoe'i:

— Huvixa ma nhanderovaigua ha'e filisteu kuery po gui nhandereraa jepe va'ekue ri oyvy gui ae onha va'ekue Absalão káuxa.

<sup>10</sup> Ha'e rami teī Absalão nhanderuvixarā nhamoī va'ekue ma joe opu'ãa py omano. Aŷ ka, mba'e re tu pekyrirī ri? Pejapo 'rāgue huvixa ojevy ju aguã rami.

### *Jerusalém tetā katy Davi ojevyague*

<sup>11</sup> Israel kuery ha'e rami joupe-upa ijayvua omombe'upaa ma huvixa Davi pe. Ha'e ramo huvixa aipoe'i uka sacerdote kuery Zadoque ha'e Abiatar pe:

— Aipopeje ke Judá regua nhomongetaa kuery ikuai va'e pe: "Mba'e re tu peē kuery gui amboae kuery ha'e javi ranhe ogueru ju 'rā huvixa hekoä py?

<sup>12</sup> Peē kuery ma xeryvy kuery ae'i, xekāgue ha'e xero'o regua'i ae peiko. Mba'e re tu ha'vy peē kuery gui amboae regua kuery ranhe xereru jeyv ta?" peje.

<sup>13</sup> Ha'e gui Amasa pe ma aipopeje: "Ndee nda'u xero'o ha'e xekāgue regua ae'i e'ŷ avi? Xevygua xondaro kuery ruvixa Joabe rekovia ndee romoī e'ŷ ramo Nhanderuete taxembopaga ha'e oipotaa rami" peje.

<sup>14</sup> Ha'e rami huvixa ijayvua Judá regua avakue oendu vy peteī'i rami ovy'a okuapy opy'a py. Ha'e vy aipoe'i uka okuapy ixupe:

— Oreruvixa, ejevy ju nerembiguai kuery ha'e javi reve — he'i uka.

<sup>15</sup> Ha'e ramo huvixa ojevy vy Jordão yakã peve ranhe ovaẽ. Ha'e rā Judá kuery avi Gilgal py oje'oi huvixa reve nhovaexi aguã, Jordão yakã ogueroaxa heruvy aguã.

*Davi reve Simei nhovaexīague*

<sup>16</sup> Ha'e gui Gera ra'y Simei, Benjamim regua Baurim pygua va'e ojapura ovvy vy Judá regua avakue rupive oguejy, huvixa Davi reve nhovaexī avi aguā.\*

<sup>17</sup> Ha'e va'e reve oo avi mil xondaro kuery Benjamim regua. Saul ro pygua kuery rembiguai Ziba oo avi, gua'y kuery quinze ha'e guembiguai vinte va'e reve. Ha'e kuery jogueraa pojava Jordão yakā py huvixa pe ojexa uka vy.

<sup>18</sup> Ha'e rami vy ha'e kuery yy oakapa huvixa ro pygua kuery ogueroaxa ju heruvy aguā, ha'e ixupe ojapo aguā oipotaa rami rei.

Gera ra'y Simei ma huvixa renonde oĩ guenapy'ã re, huvixa Jordão yakā oaxa ta ramo.

<sup>19</sup> Ha'e vy aipoe'i ixupe:

— Xeruvixa, xembopaga eme ajejavyague re, nema'endu'a eme xee nerembiguai xe'arandu e'ýa rupi ajapo vaiague re, Jerusalém gui reoa ára. Xeruvixa, nema'endu'ave eme ha'e nungakue re ndepy'a py.

<sup>20</sup> Mba'eta xee nerembiguai va'e aý anhemombe'upa ajejavyague. Ha'e rami vy ae xeruvixa, José ramymino kuery gui xee ranhe aju rovaexī aguā — he'i.

<sup>21</sup> Ha'e ramo Zeruia pi'a Abisai aipoe'i:

— Simei nomanoi 'rā ri nda'u huvixarā SENHOR omoĩ va'ekue pe ijayvu vaiague re?

<sup>22</sup> Ha'e rā Davi ombovai:

— Mba'e tu xee areko peē Zeruia pi'a kuery reve? Mba'e re tu aý penhemoingo xerovaiguarā? Aý nda'u Israel regua omano ta? Tyrā pa xee ndaikuai teve Israel kuery ruvixa ju aña? — he'i

<sup>23</sup> Ha'e gui Simei pe ju huvixa oura vy

— Ndee neremanoi 'rā — he'i.

*Davi reve Mefibosete nhovaexīague*

<sup>24</sup> Saul ramymino Mefibosete voi oo huvixa reve nhovaexī aguā. Ha'e va'e ma huvixa ooa ára guive ojevy porāa ára peve ndojepyeivei, nonhendyva apoi, neĩ oao voi ndojoivei va'ekue.

<sup>25</sup> Ha'e gui Jerusalém py huvixa ovaẽ ramo hexeve Mefibosete nhovaexī aguā ou ramo huvixa aipoe'i:

— Mefibosete, mba'e re tu ndereoi raka'e xerupive?

<sup>26</sup> Omboyai:

— Xeruvixa, xerembiguai xembotavy ramo ndaai. Mba'eta xee nerembiguai aguata porā e'ý va'e vy aipoa'e tei: "Ambokupe árygua uka 'rā xerymba huvixa rupive aa aguā", ha'e va'ekue.

<sup>27</sup> Ha'e rami tei xeruvixa, xerembiguai ma nerondenre ijayvu rei xere.<sup>†</sup> Ha'e rami avi xeruvixa, ndee ma Nhanderuetea guigua anjo rami reikuaapa va'e. Xererekoo ke ndee reipotaa rami.

<sup>28</sup> Ha'e gui xeruvixa, ha'evea rami 'rāgue xeru ro py ikuai va'ekue rejuka ukapa va'e rire. Ha'e rami tei ndee xereru imoiny nde-mesa py okaru va'e kuery mbyte. Ha'e nunga rupi xeruvixa, nda'evei mba'emo re rive xee ajerure aguā ndevy — he'i.

<sup>29</sup> Ha'e rā huvixa ombovai:

— Ha'eve ma. Mba'e re tu ha'e nunga re teri ndeayvu? Xeayvu Ziba reve pemboja'o pendeyvy.

<sup>30</sup> Mefibosete aipoe'i huvixa pe:

— Ixupe ae toptyapa, xeruvixa, ndero py rejevy porā ma rire.

*Davi reve Barzilai nhovaexīague*

\* <sup>19:16</sup> Simei ma Jerusalém gui Davi onha jave ixupe ijayvu vai, ha'e hexe ita omombo va'ekue (2 Samuel 16.5-14).

† <sup>19:27</sup> Mefibosete ma Saul ra'y Jônatas ra'ykue, hexe Davi opena porāa va'ekue Jônatas re ima'endu'a vy. Hembiguai ma Ziba (9.1-13). Ha'e gui Ziba ma Mefibosete rekoke ramigua rive omombe'u va'ekue Davi pe, ijyvy ojeupe guarā ae ojopyxe vy (16.1-4).

<sup>31</sup> Ha'e gui Gileade pygua Barzilai voi Rogelim gui ou vy huvixa reve oaxa Jordão yakã, yy rovai re peve.

<sup>32</sup> Barzilai ma tuja'i ete, oitenta ma'etý ma oguerekva'e. Ha'e ae huvixa kuery pe ome'ẽ va'ekue ho'u va'erã Maanaim py ikuai jave, ava oguerekopa va'e vy.\*

<sup>33</sup> Ha'e gui huvixa aipoe'i Barzilai pe:

— Jaa ke xerupive, Jerusalém tetã py xee ame'ẽ 'rã nerembi'urã.

<sup>34</sup> Barzilai ombovai huvixa pe:

— Mbovy ára peve teri nda'u aiko 'rã? Nda'evei teve ndee xeruvixa reve aa aguã Jerusalém peve.

<sup>35</sup> Oitenta ma'etý ma xee areko. Ndaikuaavei ma mba'e nunga pa iporã va'e, ha'e'ý vy iporã e'ý va'ea voi. Tembi'u ha'u va'e voi naendu kuaavei ma heea, ha'u va'e ha'e ay'u va'e voi. Xee nda'u aendu kuaa teri 'rã avakue ha'e kunhague oporaei rã? Xeruvixa, mba'erã tu xee nerembiguai romoingo eta rei rive ta?

<sup>36</sup> Ha'e rami avi xeruvixa, ndereve xee aa 'rã Jordão yakã rovai peve'i. Mba'e re tu ndee remboekovia ta mba'emo porã ndevy ajapoague?

<sup>37</sup> Tove xee nerembiguai taa ju, ha'e vy xerekaoa py ae amano'i 'rã xeru ha'e ha'i kuery rupa katy'i xenhono porãa aguã. Ha'e rami avi ne'exa, Quimã toĩ nerembiguairã. Xeruvixa, toaxa ha'e ae nderupive, ha'e rã rerekoo 'rã reipotaa rami – he'i.

<sup>38</sup> Huvixa ombovai:

— Toaxa ha'vy Quimã xereve, ha'e ixupe ajapo 'rã reipotaa rami tema. Ndevy voi ajapo 'rã reipota va'e ha'e javi – he'i.

<sup>39</sup> Pavẽ rei Jordão yakã oaxapa ramo huvixa voi oaxa ma vy oayvupa Barzilai rova py, ha'e vy ogueroayvu porã imondovy. Ha'e rã Barzilai ojevy ju ngoo katy.

<sup>40</sup> Gilgal peve huvixa oaxa ovvy ramo Quimã oo avi oiny hupive. Huvixa rupive oje'oi avi Judá regua kuery ha'e javi, ha'e Israel regua mbyte rupi peve.

<sup>41</sup> Ha'e gui Israel regua avakue ha'e javi oupa okuapy huvixaa py. Ha'e vy aipoe'i okuapy ixupe:

— Oreruvixa, mba'e re tu oreryvy kuery gui Judá regua ranhe rive ndereru nhemi okuapy? Mba'eta Jordão yakã kyyvõgu re ha'e kuery ndereru ndero pygua kuery reve, nerembiguai kuery ha'e javi avi – he'i.‡

<sup>42</sup> Ha'e ramo Judá regua avakue ha'e javi ombovai Israel kuery pe:

— Ha'e rami rojapo mba'eta huvixa ma oreretarã ae. Mba'e re tu ha'e rami rã rive pendevai ta? Ore kuery nda'u huvixa rembi'u re rokaru, tyrã pa orevy mba'emo ome'ẽ rive va'ekue?

<sup>43</sup> Ha'e gui avakue Israel kuery ombovai ju Judá kuery pe:

— Ore kuery ma pendegui dez-kue oreretave va'e vy peẽ kuery gui roguerekove Davi reve. Mba'e re tu ha'vy peẽ kuery norembovareive? Ore kuery ranhe oreayvu raka'e nhanderuvixa rogueru jevy aguã re – he'i tei Israel kuery ijayvua gui Judá kuery ijayvu poyive tema.

## 20

### *Seba huvixa rovai opu'ã rã ojukaa ague*

<sup>1</sup> Ha'e py oĩ avi peteĩ ava nhe'ẽ vai ra'y Seba hery va'e, Bicri ra'y, Benjamim regua va'e. Ha'e va'e ma mimby guaxu omonhe'ẽ vy aipoe'i:

— Nhande kuery ma mba'eve ndajarekoi Jessé ra'y Davi reve. Israel kuery, peteĩ-tei jaje'oi nhandro katy! – he'i.

\* <sup>19:32</sup> 2 Samuel 17.27-29    ‡ <sup>19:41</sup> Apy "Israel kuery" he'ia ma Judá regua e'ý re ijayvu vy. Ha'e rã amboae py ma jaikuua 'rã judeu kuery ha'e javi re ijayvua.

<sup>2</sup> Ha'e ramo Israel regua avakue ha'e javi oja'o jogueravy Davi-a gui, Bicri ra'y Seba rupive anho oje'oi. Ha'e rā Judá regua kuery ma huvixa reve tema ikuai, ha'e vy Jordão yakā guive ogueru okuapy Jerusalém peve.

<sup>3</sup> Jerusalém tetā py ngoo oī va'e py Davi ovaē vy ogueraapa dez gua'yxy jevy oguerekō va'ekue ngoo re opena va'erā oeja va'ekue. Ha'e va'e kuery ma ombotypa vy omongaru uka porā va'eri neī teīve reve nonhenovei. Ha'e kuery omano e'ŷa ja oo omboty pyre py ikuai imeve'ŷ va'e rami ae.

<sup>4</sup> Ha'e gui Davi aipoe'i Amasa pe:

— Mboapy araa py emboatypa ke xea py Judá regua avakue, ha'e ndee voi eju ju apy rejexa uka aguā — he'i.

<sup>5</sup> Ha'e ramo Amasa oo Judá regua avakue oguerupa aguā, teī ou ju e'ŷ re ára oa'angaague oaxa rive.

<sup>6</sup> Ha'e ramo Abisai pe ju Davi aipoe'i:

— Aŷ Absalão ojapoague gui Seba ojapo vaive 'rā nhandevy. Ha'e rami vy eraapa na xerembiguai kuery, ha'e pemonha, tetā ikorapa va'e py onhemi vy nhandegui oo jepe e'ŷ aguā — he'i.

<sup>7</sup> Ha'e ramo Joabe reveguia kuery ma Jerusalém gui kuery oje'oipa Bicri ra'y Seba omonha vy, huvixa rarõa ha'e xondaro kuery ipy'a guaxukue ha'e javi reve.

<sup>8</sup> Ha'e gui Gibeão katy'i ita tuvixa va'e hi'aña py ha'e kuery ovaẽmba jave ma Amasa ovaexī ouvy. Joabe ma xondaro kuery ao py onhemonde ho'amy ha'e py. Hi'áry ku'akuua oī va'e reve kyxe avi oī hyru py. Ovaexī ovvy vy oity kyxe.

<sup>9</sup> Ha'e vy Amasa pe Joabe

— Xeryvy, reiko porā'i pa? — he'i reve hendyva re ojopy oiporu kuaa regua py, oayvu aguā merami.

<sup>10</sup> Ha'e rā Amasa neī ndoikuuaa potai Joabe opo rovai py kyxe oguerekoa re. Ha'e rā ha'e va'e py ae oye'o, hyekue onhoẽmba. Teīgue ju oikyxī e'ŷ re omano ha'e pyve. Ha'e ramo guyvy Abisai reve Joabe omonhave ju jogueravy Bicri ra'y Seba.

<sup>11</sup> Joabe reve ikuai va'e regua peteī ma Amasa retekue yvýry hi'aĩ vy aipoe'i:

— Joabe reveguia Davi-a katygua peiko va'e ma jaa ke Joabe rupive — he'i.

<sup>12</sup> Tape mbyte rupi Amasa nguguy re omyĩ teri oupy ramo oexa va'e nhavō opyta kuerei 'rā. Ha'e nunga rupi xondaro va'e oexa vy tape mbyte gui oguerovave heravy Amasa retekue nhuūndy katy. Ha'e vy hi'áry omombo peteī ao puku, ituia py ovaē va'e nhavō opyta ramo.

<sup>13</sup> Tape gui oguerova ma rire avakue ha'e javi oo Joabe rupive, Bicri ra'y Seba rakykue monha vy.

<sup>14</sup> Seba kuery ma Israel ha'e javi regua ikuiaia rupi oaxapa jogueravy, Abel-Bete-Maaca peve. Ha'e rami teī berita kuery anho onhemboatypa vy oje'oi hupive.

<sup>15</sup> Ha'e gui Joabe oxondaro kuery reve ovaẽmba vy ojoko imoiny Abel-Bete-Maaca tetā. Ha'e va'e tetā katy'i omboaty reta vvy, tetā kora yvatekuea peve. Ha'e javi Joabe reve ikuai va'e ojo'o-jo'o okuapy tetā kora oity aguā.

<sup>16</sup> Ha'e gui ma tetā gui peteī kunha hi'arandu va'e ojapukai:

— Pendu ke, pendu ke. Aipopeje Joabe pe tou kyvõ katy, hexeve xeayvu aguā.

<sup>17</sup> Ha'e va'e ovaē ramove kunha va'e oporandu:

— Ndee ae pa Joabe?

Ombovai:

— Xee ae — he'i.

Ha'e rā kunha va'e aipoe'i:

— Endu ke xee nerembiguai xeayvua.

— Aendu 'rā — he'i Joabe.

<sup>18</sup> Ha'e rā kunha va'e aipoe'ive ju:

— Yma guive aipo'ea: “Penhemongeta uka 'rã Abel py, mba'emo perekova'e re oikuua pota porãa aguã” 'ea.

**19** Ha'e rami ae xee ma Israel kuery joe opu'ã va'e regua e'ÿ, ore kuery ma ojeroviapy memo. Ha'e rã ndee ma rembovaipaxe peteñ tetã, xee Israel regua xy aiko va'eri. Mba'e re tu oremokanhy ta SENHOR pegua orekuai va'e?

**20** Joabe ombovai vy aipoe'i:

— Xee ma namokanhyi 'rãe, nambovaipavei 'rã guive.

**21** Ndee rexãa rami e'ÿ aikoa. Ha'e rami avi peteñ ava Efraim yvyty re oiko va'e, Bicri ra'y Seba hery va'e, opu'ã karamboae huvixa Davi rovai. Ha'e va'e anho'i pemboaxa xevy, ha'e ramo ajepe'a ju 'rã peneretã gui – he'i.

Ha'e rã kunha va'e aipoe'i Joabe pe:

— Ma'ẽ, inhakãgue amombo uka 'rã ndevy tetã kora áry rupi.

**22** Ha'e gui kunha va'e o'arandua rupi oo guetarã kuery ha'e javi reve jogueroayvu aguã. Ha'e rire Bicri ra'y Seba akã ojaya okuapy vy omombo Joabe oexa aguã. Ha'e rã omonhe'ẽ mimby guaxu, ha'e ramo ojepe'apa ju tetã gui. Peteñ-teñ ngoo katy ju oje'oi. Ha'e rã Joabe ma Jerusalém katy ojevy huvixa reve jogueroayvu aguã.

*2 Samuel 8.15-18; 1 Crônicas 18.14-17*

**23** Joabe ma Israel regua xondaro kuery ha'e javi re opena va'e. Ha'e rã Joiada ra'y Benaia ma huvixa rarõa kuery re opena.

**24** Adorão ma omomba'eapo nhea'ãmby kuery re opena. Ha'e rã Ailude ra'y Josafá ma mba'emo oiko va'ekue mboparaa ae.

**25** Seva ma kuaxia re opena va'ety. Zadoque ha'e Abiatar ma sacerdote ikuai.

**26** Ha'e gui Jair ramymino Ira ma Davi monoetaaty oiko.

## 21

### *Gibeão pygua kuery ojepy okuapyague*

**1** Davi oí jave oiko karuai mboapy ma'etý re. Ha'e rã SENHOR pe Davi oporandu rã aipoe'i ixupe:

— Ha'e rami oiko mba'eta Saul ha'e hoo pygua kuery jouguy omoëague re ndopagai teri, Gibeão pygua kuery regua ojukaague re guive – he'i.

**2** Ha'e rami rã Gibeão pygua kuery huvixa oenoí uka vy ijayvu ha'e kuery reve. Gibeão pygua ma Israel regua e'ÿ, amorreu regua rembyrekue ae. Ha'e gui Israel kuery oura ma voi va'ekue omomba e'ÿ aguã re, va'eri Saul ma omombaxe Israel ha'e Judá kuery re nda'evei ete vy.\*

**3** Ha'e gui Davi oporandu Gibeão pygua kuery pe:

— Mba'e tu peipota ajapo pendevy kuery pe? Mba'e nunga tu ame'ẽ 'rã pendevy teko vai ojapoague rekoria, SENHOR pegua kuery peroayvu porã aguã?

**4** Gibeão regua kuery ombovai okuapy:

— Saul ha'e hoo pygua kuery mba'e prata ha'e ouro ma ndoroipotai. Israel regua ndorojukaxeí guive peteñve – he'i.

Davi oporanduve ju:

— Mba'e nunga tu ha'vy tajapo pendevy kuery pe?

**5** Ha'e kuery ombovai huvixa pe:

— Ha'e gui oreregua kuery jukaare, Israel mbyte rupi roikove e'ÿ aguã oremokanhym-baxe va'ekue,

**6** ha'e va'e ra'y kuery regua gui emboaxa orevy sete avakue SENHOR renonde rojyryvipy aguã, Gibeá SENHOR rembiporavo Saul rekoague py ae – he'i.

Ha'e ramo huvixa aipoe'i:

\* **21:2** Gibeão regua kuery reve Josué jogueroayvuague rami vy Israel kuery pe ombo'eapo 'rã avave rei ojukaa e'ÿ re (Josué 9).

— Xee amboaxa 'rã pendevy — he'i.

<sup>7</sup> Ha'e rã Jônatas ra'y Mefibosete Saul ramymino va'e ma huvixa nomboaxai, SENHOR rery rupi Saul ra'y Jônatas reve SENHOR Davi ouraague rami vy.

<sup>8</sup> Ha'e rami vy huvixa ojopy Saul ra'y kuery Aiá rajy Rispa pi'a mokoïve, Armoni ha'e Mefibosete hery va'e, ha'e gui Saul rajy Merabe pi'a kuery peteñ nhiruïve, meolatita Barzilai ra'y Adriel ra'y kuery ikuai va'e.

<sup>9</sup> Ha'e va'e kuery ma Gibeão pygua kuery po py omboaxa yvy'ã áry ojyryvypa aguã, SENHOR renonde. Ha'e rã sete-ve ho'apa vyvoi. Ha'e vy omano, mba'emo mono'õa ypy'ia ára, jypy cevada omono'õa ára py ae.

<sup>10</sup> Ha'e ramo Aiá rajy Rispa ma peteñ ajukue voxua guigua ogueraa vy peteñ ita tuvixa va'e áry oipyo imoiny oĩ aguã. Ha'e py ma jypy omono'õa ára guive opyta yva gui oky ho'a ju peve. Ha'e va'e ma ara py neñ pyávy ndoejai oikovy tetekue ikuiaia py guyra oveve va'e onhemboja aguã, mymba ka'aguy rupigua guive.

<sup>11</sup> Davi pe omombe'ua Saul ra'yxy jevy Rispa oikoa ha'e javi, Aiá rajy va'e.

<sup>12</sup> Ha'e rami rã Davi oo vy Jabel-Gileade gui ogueru Saul ha'e ta'y Jônatas kãgue, ha'e pygua kuery Bete-Seã tetã mbyte gui ogueraa rire. Ha'e py ma Gilboa yvyty re filisteu kuery Saul ojukaa ára py oeja imoiny va'ekue.

<sup>13</sup> Ha'e kuery po gui Saul ha'e ta'y Jônatas kãgue ogueru vy ha'e va'e reve onhono porã avi ojyryvipy pyre kãgue.

<sup>14</sup> Ha'e rami vy Benjamim regua yvy re ojaty okuapy Saul ha'e ta'y Jônatas kãgue, Zela py, tuu Quis onhono porãague py ae. Huvixa ojapo ukka rami ojapopa. Ha'e va'e rire ma ha'e va'e yvy re Nhanderuete ojapo porã ju.

#### *1 Crônicas 20.4-8*

<sup>15</sup> Ha'e gui filisteu kuery opu'ã ju okuapy Israel kuery rovai. Ha'e rã Davi oxondaro kuery reve oje'oi vy joguero'a filisteu kuery reve. Ha'e gui ma Davi ikane'õ vaipa.

<sup>16</sup> Isbi-Benobe ma gigante ramymino regua. Hu'y guaxu oguereko va'e ma cinco quilos ipoyi va'e, ha'e onhemonde oikovy hu'y jokoa regua ipyaukue py. Ha'e va'e ma ojukaxe Davi.

<sup>17</sup> Ha'e rami teñ Zeruia pi'a Abisai oepy vy filisteu oipyxo vy ojuka. Ha'e ramo Davi pegua kuery ixupe oura vy aipoe'i okuapy:

— Aÿ gui ma orereve ndereevei 'rã joe ropu'ã aguã katy, Israel kuery moexakãa ogue e'ý aguã — he'i okuapy.

<sup>18</sup> Ha'e va'e rire ma joguero'ave ju Gobe py, filisteu kuery reve. Ha'e py ma husatita Sibecai va'e ojuka gigante ramymino Safe.

<sup>19</sup> Ha'e va'e rire teñ ju joguero'a filisteu kuery rovai Gobe py. Ha'e gui Belém pygua Jaaré-Oregim ra'y Elanã ojuka Gate pygua Golias. Ha'e va'e guembiporu hu'y guaxu oguereko va'ekue ma ajukue popẽa'y rami tuvixa va'e.\*

<sup>20</sup> Teñ ju opu'ã okuapy joe, Gate py ae. Ha'e py oiko peteñ ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quatro ikuã ha'e ipyxã oguereko. Ha'e va'e voi gigante ramymino regua.

<sup>21</sup> Ha'e va'e ma Israel kuery mbojaru reia rupi ijayvu ramo Davi ryke'y Simei ra'y Jônatas ojuka.

<sup>22</sup> Ha'e va'e avakue irundy ikuai gigante ramymino Gate tetã py. Ha'e rami teñ Davi ha'e ixondaro kuery oitypa raka'e.

## 22

#### *Salmo 18.1-50*

<sup>1</sup> Ha'e gui SENHOR pe Davi ijayvu kova'e mboraei rupi, Saul ha'e hovaigua kuery ha'e javi po gui SENHOR ogueraa jepe javé.

<sup>2</sup> Ha'e vy aipoe'i:

\* **21:19** 1 Crônicas 20.5

- SENHOR, ndee ma xe'itaova.  
 Ndee ma oo imbaraete va'e ha'e xerepya.
- <sup>3</sup> Xeruete ma xe'itaova anhemiaty,  
 mba'emo vai jokoa, xereraa jepea imbaraete va'e,  
 oo yvate va'e, ha'e anhemiaty.  
 Ndee Xeruete, xereraa jepe 'rā xejukaxea kuery gui.
- <sup>4</sup> Ajapukai SENHOR ogueroporaepy va'e pe.  
 Ha'e rami vy aa jepe 'rā xerovaigua kuery gui.
- <sup>5</sup> Manoa pygua xejoko va'ekue yai rami,  
 heko vai va'e yai rami xere opu'ã vy xemongyje.
- <sup>6</sup> Manoa pygua xejokua va'ekue,  
 nhu'ã xā xejura xapy'a.
- <sup>7</sup> Ha'e ramo ajexavaia py ajapukai karamboae SENHOR pe.  
 Xeruete pe ajapukai ainy.  
 Ha'e rā ojeupequa templo gui oendu xeayvua,  
 ijapyxa peve ajapukaia ovaẽ ramo.
- <sup>8</sup> Ha'e ramo yvy omyĩ ha'e oryryi.  
 Yva yta ikuai va'e voi ovavapa, oryryipa,  
 ogueropoxy ramo.
- <sup>9</sup> Inhapyĩgua gui opu'ã hataxĩ,  
 ijuru gui ma tata nhomombaarã oẽ,  
 tapyĩ hexakã va'e.
- <sup>10</sup> Yva omo'yvyĩ vy oguejy,  
 ipy guýry pytū vaikue oĩ reve.
- <sup>11</sup> Peteĩ anjo ipepo va'e áry oĩ vy oveve ouvy,  
 yvytu opepo áry ogueru pojava ramo.
- <sup>12</sup> Oyvýry rupi rami omoĩ pytū reia oo'irã,  
 pytū, yy ijatya ha'e yva re arai ikuai va'e voi.
- <sup>13</sup> Hexakãa henonde oo va'e gui  
 hendy ov yagy tapyĩ rexakã ramigua.
- <sup>14</sup> Ha'e gui SENHOR yapu yva re,  
 Yvate ete va'e ijayvu atã.
- <sup>15</sup> Ngu'y omombo vy omaimba xerovaigua kuery.  
 Overa vy omondyipa.
- <sup>16</sup> Ha'e ramo ojekuaa yy rupa,  
 ha'e yvy yta avi ojekuaapa,  
 ndeayvu atãa py SENHOR,  
 ndepoxya rupi neapyĩgua gui nepytuẽ ramo.
- <sup>17</sup> Yvate gui ha'e okuave'ẽ vy xejopy,  
 xerenoẽ yy tuvixa va'e gui.
- <sup>18</sup> Xereraa jepe xerovaigua kuery imbaraete va'e gui,  
 xemomboriau rei va'e kuery gui ae,  
 xegui ipo'akave ete va'ekue ri.
- <sup>19</sup> Xere ha'e kuery opu'ãmba rei ajexavai javé,  
 teĩ SENHOR onhemoĩ xepytyvõarã.
- <sup>20</sup> Ha'e rami vy xereru peteĩ henda ipa'ũ ja'eavea py.  
 Xereraa jepe xererovy'a vy.
- <sup>21</sup> Xerekó porãa re SENHOR xererekó porã,  
 xevy pe ome'ẽ ndaxepo ky'aiague repy.
- <sup>22</sup> Mba'eta xee ma SENHOR guigua tape rupi aiko va'e,

- ndajep'e'ai Xeruete gui ha'eve'ŷa rami aiko aguã.
- <sup>23</sup> Xejee amoĩ ijayvuague ha'e javi,  
xejegui ndaipe'aï ayvu omoĩ va'ekue.
- <sup>24</sup> Henonde aiko anhetẽa rupi,  
ajejoko teko vai rupi aiko e'ŷ aguã.
- <sup>25</sup> Ha'e ramo SENHOR ome'ẽ xerekoporãague repy,  
henonde rupi ndaxereko ky'ai rire.
- <sup>26</sup> Heko porã va'e kuery pe rejekuaa uka 'rã heko porã va'e,  
anhetẽ rupi ikuai va'e pe rejekuaa uka anhetẽ rupigua avi,
- <sup>27</sup> iky'a e'ŷ va'e pe rejekuaa uka iky'a e'ŷ va'e,  
ha'e rã heko vai va'e pe ma rejekuaa uka 'rã nhombopaga kuaa va'e.
- <sup>28</sup> Ndee reraa jepe 'rã onhemo'yvy'i va'e,  
ha'e rã oma'ẽ vaikue reia rupi onhembovate va'e ma remomba 'rã.
- <sup>29</sup> Ndee SENHOR ma xerexapea,  
SENHOR omoexakã pytũ rupi aiko rã.
- <sup>30</sup> Ndereve vy amomba 'rã xondaro kuery,  
Xeruete reve vy apo 'rã hetã kora áry rupi.
- <sup>31</sup> Nhanderuete guigua tape ma iky'a e'ŷ va'e,  
SENHOR ayvu ma oa'anga pyre.  
Hexe onhemi va'e ha'e javi pe ma mba'emo vai jokoa oiko.
- <sup>32</sup> Mava'e tu Nhanderuete oiko SENHOR e'ŷ vy?  
Mava'e tu nhande'itaova oiko Nhanderuete e'ŷ vy?
- <sup>33</sup> Nhanderuete ma xemombaraetea xekangy e'ŷ aguã,  
omoatyrõ 'rã aguata aguã rupi.
- <sup>34</sup> Ha'e ojapo xepy guaxu rami inhakuã aguã.  
Ha'e vy yvatea rupi xemoingo.
- <sup>35</sup> Xepo pe voi ome'ẽ joe apu'ã kuaa aguã.  
Ha'e ramo guyrapa overa va'e guigua voi aipira 'rã.
- <sup>36</sup> Mba'emo vai jokoarã reme'ẽ xereraa jepea,  
xemboaxy rupi xembovate.
- <sup>37</sup> Apyrõ aguã tape rembopyve ramo  
ndaxepyxryi 'rã.
- <sup>38</sup> Xerovaigua kuery amonha 'rã aupity peve.  
Amomba rire ma ajevy ju.
- <sup>39</sup> Amomba ae, amou'ũmba opu'ã aguã nda'evevei peve.  
Xepy yvýry ho'apa.
- <sup>40</sup> Mba'eta ndee xemombaraete ajoguero'a kuaa aguã,  
rejapo xere opu'ã va'ekue re xepo'aka aguã rami.
- <sup>41</sup> Xerovaigua kuery rejapo ojavapa aguã rami.  
Xerayvu e'ŷ va'e amomba.
- <sup>42</sup> Ha'e kuery oma'ẽ rã avave rei ndoepyai.  
Tá, SENHOR pe ha'e kuery ojapukai teĩ nombovai.
- <sup>43</sup> Ha'e ramo amongu'ipa yvy ku'i rami.  
Amou'ũmba, yapo tape guiguare rami amomba.
- <sup>44</sup> Xeretã pygua kuery xere opu'ãa gui xereraa jepe,  
xemoĩ yvy regua kuery ruvixarã.  
Amboae regua kuery ndaexai va'ety voi xevyguia ikuai.
- <sup>45</sup> Amboae regua kuery xenhe'ẽ rendu.  
Xeayvu oendu vy ojapopa okuapy.
- <sup>46</sup> Ha'e gui amboae regua kuery okanhymba,

- onhemiague gui oẽmba onhemondyipa vy.
- <sup>47</sup> SENHOR ma oikove va'e, togueroayvu porãa xe'itaova!  
Tomboetea Xeruete, ita xereraa jepea.
- <sup>48</sup> Nhanderuete xerepy vy jojukapa,  
heta va'e kuery re xembopo'aka.
- <sup>49</sup> Nhanderuete ae xereraa jepe xerovaigua kuery gui.  
Ndee ma xemboyvate xerovaigua kuery áry,  
ha'e xerepy avakue jojuka va'ety po gui.
- <sup>50</sup> Ha'e ramo SENHOR, roguerovy'a 'rã yvy regua kuery oendua py,  
aporaei 'rã nderery rupi.\*
- <sup>51</sup> Ha'e ae ombopo'aka 'rã huvixave omoĩ va'ekue,  
oexa uka 'rã guembiporavo oayvua,  
Davi ha'e hamymino kuery pe, raka'e rã peve.

## 23

### *Davi opa vygua ijayvuague*

- <sup>1</sup> Pova'e ayvu ma opa vygua Davi ijayvuague.  
Jessé ra'y Davi ijayvua,  
ava omboyvate pyre, Jacó kuery ruete omoĩ va'ekue,  
Israel regua ha'eve rei'ia rupi oporai va'e.
- <sup>2</sup> — SENHOR Nhe'ẽ ijayvu xejuru rupi,  
ha'e ijayvua rupi ae xejuru omombe'u.
- <sup>3</sup> Israel kuery ruete ijayvu,  
Itaova Israel kuery onhemiaty aipoe'i xevy:  
“Teko porã rupi avakue re opena va'e,  
SENHOR renonde ojererokyjea rupi joe opena va'e ma
- <sup>4</sup> ko'ẽ aje'ive omoexakã ouvy va'e rami oiko,  
ko'ẽ aje'ive nda'araivei jave kuaray ojope ouvy va'e rami,  
oky rire ojope ju vy mba'emo renhoĩ ombo'okypa va'e rami”, he'i.
- <sup>5</sup> Ha'e rami e'ỹ ri pa Nhanderuete renonde xero pygua kuery ikuai?  
Mba'eta xereve ojapo ngupive guarã opa e'ỹ va'erã,  
ha'evea rami meme ae ojapo, ivaipa aguã rami e'ỹ.  
Ha'e rami vy ndojapoi avi 'rã teve aa jepe aguã,  
aupity aguã arõ aikovy va'e ha'e javi?
- <sup>6</sup> Ha'e rã nhe'ẽ vai ra'y kuery ma oipe'apaa 'rã  
juu nhandepo py e'ỹ nhamondo va'e rami.
- <sup>7</sup> Mba'eta amongue omodoxe vy  
oiporu 'rã ferro guigua, e'ỹ vy hu'y guaxu.  
Ha'e rire hi'aíague pyve okai katuñ'i 'rã tata py.

### *1 Crônicas 11.10-47*

- <sup>8</sup> Po rami ma Davi pegua ipy'a guaxukueve rery oĩ: Taquemoni ra'y Josebe-Bassebete ma mboapyve va'e kuery ruvixa. Ha'e va'e ma guembiporu hu'y guaxu reve onhea'ã oikovy oitocentos avakue rovai, ha'e vy ojukapa vyvoi peteigue'i pyve.
- <sup>9</sup> Ha'e va'e rire ma Dodô ra'y Eleazar, Aoí ramymino va'e. Ha'e va'e ma mboapyve ipy'a guaxukueve va'e regua oiko. Peteĩ ára Davi reve ha'e kuery ikuai vy filisteu kuery ijaty okuapy va'e ombovai okuapy joe opu'ã aguã. Israel kuery mboae ma ojepo'apa ma teĩ
- <sup>10</sup> ha'e opu'ã vy onhea'ã filisteu kuery rovai, ipo kyxe ojopya haxypa peve. Ha'e va'e ára SENHOR ogueraa jepepa rã heta va'e kuery Eleazar opu'ã ho'amya py ojevypa ju mba'emo oeja pyre ojopy heravy aguã.

\* **22:50** Romanos 15.9

<sup>11</sup> Ha'e va'e rire ma Agé ra'y Samá, hararita va'e. Leí tekoa py peteĩ mba'ety kumanda pe'i anho ikuaiia py filisteu kuery ijaty okuapy ramo ha'e kuery gui heta va'e kuery onhamba teī

<sup>12</sup> mba'ety mbyte py Samá hi'aĩ vy ojokopa. Ha'e rami vy ojukapa filisteu kuery. Ha'e rami py teīgue ju SENHOR ogueraa jepepa.

<sup>13</sup> Ha'e gui trinta yvatekueve ikuai va'e regua mboapy ma mba'emo mono'õa ára oje'oi avi Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains yvyugua py.

<sup>14</sup> Ha'e rami vy Davi onhemia py oĩ, ha'e rã filisteu regua xondaro kuery ma Belém py ikuai.

<sup>15</sup> Ha'e gui Davi ijy'uvei etea rupi aipoe'i:

— Mava'e tu xemboy'u ta ygua Belém tetã kora rokẽ py oĩ va'e gui? — he'i ramo

<sup>16</sup> ha'e va'e mboapyve ipy'a guaxukueve ikuai va'e ma filisteu kuery ijaty okuapya mbyte rupi oaxa vy ygua Belém tetã rokẽ py oĩ va'e gui oguenoõ yy, ha'e Davi oĩa py ogueru. Ha'e rã ha'e ndoy'uxei vy onhoẽ SENHOR renonde ome'ẽ mbyrã.

<sup>17</sup> Ha'e vy aipoe'i:

— SENHOR, nda'evei ete xee ha'e nunga ay'u aguã! Xee ay'u 'rã ri nda'u avakue ndojeayvuveikue py oje'oi va'ekue ruguy rami? — he'i vy ndoy'ui. Ha'e ramigua ae mboapy ipy'a guaxukueve ojapo va'ekue.

<sup>18</sup> Ha'e gui Joabe ryke'y Abisai, Zeruia pi'a va'e ma trinta ikuai va'e ruvixa. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy tenondegua mboapyve ikuai va'e rami ete ima'endu'a porãmby oiko.

<sup>19</sup> Ha'e ma trinta ikuai va'e gui omboetevepy vy ha'e kuery ruvixa oiko va'eri tenondegua mboapyve ikuai va'e regua e'ŷ guive.

<sup>20</sup> Ha'e gui Joiada ra'y Benaia ma ipy'a guaxuve va'e avi. Cabzeel pygua oiko, mba'emo tuvixa va'e ojapo avi va'e. Ha'e rami vy ojuka mokoĩ Moabe pygua joe opu'ã kuaave va'ekue. Yro'y apĩ ho'a jave ma itakua py oguejy vy ojuka peteĩ guary okua py oĩ va'ekue.

<sup>21</sup> Ojuka avi peteĩ ava Egito guigua ipukuve va'ekue. Egito pygua ma hu'y guaxu reve ou rã Benaia popoka py rive opu'ã ovvy vy ipo gui hu'y guaxu oguereko va'ekue oipe'a vy ha'e va'e py ae ju ojuka.

<sup>22</sup> Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endu'a porãmby oiko.

<sup>23</sup> Ha'e va'e ma trinta ikuai va'e gui omboetevea va'eri mboapyve tenondegua regua ndoikoi guive. Ha'e gui Davi omoĩ guarõa kuery re opena va'erã.

<sup>24</sup> Trinta ikuai va'e ma po rami hery: Joabe rvvy Asael, Belém pygua Dodô ra'y Elanã,

<sup>25</sup> ha'e gui Samá ha'e Elica harodita va'e meme,

<sup>26</sup> paltita va'e Heles, Tecoa pygua Iques ra'y Ira,

<sup>27</sup> Anatote pygua Abiezer, Mebunai husatita va'e,

<sup>28</sup> Zalmom aoíta va'e, Maarai netofatita va'e,

<sup>29</sup> Baaná netofatita va'e ra'y Helebe, Gibeá pygua Ribai ra'y Itai Benjamim regua va'e,

<sup>30</sup> Benaia piratonita va'e, Gaás yakã katygua Hidai,

<sup>31</sup> Abi-Albom arbatita va'e, Azmavete barumita va'e,

<sup>32</sup> Eliaba saalbonita va'e, Jasém ra'y kuery, Jônatas,

<sup>33</sup> Sama hararita va'e, Sarar ararita va'e ra'y Aião,

<sup>34</sup> Aasbai maacatita va'e ra'y Elifelete, Aitofel gilonita va'e ra'y Eliã,

<sup>35</sup> Hezrai carmelita va'e, Paarai arbita va'e,

<sup>36</sup> Zobá pygua Natã ra'y Jigeal, Bani gadita va'e,

<sup>37</sup> Zeleque amonita va'e, Naarai beerotita va'e, Zeruia pi'a Joabe rembiporu reraaty,

<sup>38</sup> Ira ha'e Garebe itrita va'e meme,

<sup>39</sup> ha'e gui Urias heteu va'e. Ha'e javi vy trinta e sete ikuai.

## 24

### *1 Crônicas 21.1-6*

**1** Ha'e gui teñgue ju SENHOR poxya hendy jevy Israel kuery rovai. Ha'e vy Davi py'a re omoñ ha'e kuery rovai oiko aguã. Ha'e vy aipoe'i ixupe:

— Tereo eipapa Israel ha'e Judá kuery ha'e javi — he'i.

**2** Ha'e ramo huvixa Davi aipoe'i xondaro ruvixa Joabe pe:

— Eiko ke Israel regua ha'e javi ikuiaia rupi, Dã guive Berseba peve. Ha'e vy eipapapa, aikuua aguã mbovy pa ikuiaia.

**3** Joabe ombovai huvixa pe:

— Ha'e rami avi tove SENHOR Nderuete cem-kue ju tomboetave, ndee xeruvixa rexaa py. Ha'e rami teñ xeruvixa, mba'e re tu ndee ha'e rami ete rejapoxe? — he'i.

**4** Ha'e rami teñ huvixa ayvu Joabe ha'e xondaro ruvixa kuery ijayvua gui ipoyive ramo huvixa renonde gui Joabe ha'e xondaro ruvixa kuery oje'oi vy oipapa jogueravy Israel kuery ha'e javi.

**5** Ha'e rami vy ha'e kuery Jordão yakã oaxa vy opyta Aroer py Gade yvyugua mbyte py tetã oĩ va'e yke jaiporu kuaa regua katy. Ha'e vy oo Jazer katy.

**6** Ha'e gui ma Gileade katy oo vy ovaõ Cades peve, heteu kuery yvy re. Ha'e gui Dã-Jaã katy oo vy ojeapa jogueravy Sidom katy.

**7** Ha'e vy ovaõ Tiro tetã ikorapa va'e py, ha'e gui heteu ha'e cananeu kuery rekoia ha'e javi rupi. Ha'e gui oje'oi ju Judá regua Neguebe yvy katy Berseba peve.

**8** Ha'e rami py oguata jogueravy Israel yvy ha'e javi rupi.

Ha'e gui nove jaxyo vinte araa py ma ovaõ ju okuapy Jerusalém py.

**9** Huvixa pe Joabe omombe'u heta va'e kuery mbovy pa ikuiaia. Israel re ikuai ra'e oitocentos mil avakue joe opu'ãa py kyxe oiporu kuaa va'e. Ha'e rã Judá re ma quinhentos mil ikuai.

### *1 Crônicas 21.7-17*

**10** Ha'e gui Davi heta va'e kuery oipapa ukapa ma rire opy'a py oendu ramo nda'eveia. Ha'e vy aipoe'i SENHOR pe:

— Ajejavy vaipa ra'e ha'e rami ajapoia py. Ha'e rami teñ aÿ SENHOR, ajerure rembogue aguã xee nerembiguai ajejavyague, inhakã porã ve'ÿ va'e rami ajapo rire — he'i.

**11** Ko'ë aje'ive'i reve Davi ovvy ramove Davi pegua imba'ekuua va'e profeta Gade rupi SENHOR ombou oayvu. Ha'e vy aipoe'i ixupe:

**12** — Tereo aipo're Davi pe: “Po rami SENHOR ijayvu: ‘Mboapy regua va'e aikuua uka 'rã peteñ eiporavo ajapo aguã’, he'i.”

**13** Ha'e ramo Davi-a py profeta Gade ovaõ vy omombe'u. Ha'e vy aipoe'i:

— Reipota pa sete ma'etÿ re karuai ou ndeyvy re? Tyrã pa mboapy jaxy re renha ta reikovy nderovaigua kuery gui, ha'e kuery nemonha rã? Tyrã pa reipota mboapy ára re mba'eaxy vaikue oiko ndeyvy re? Eiporavo ke aÿ, ha'e emombe'u xembouare pe ambovai va'erã — he'i.

**14** Gade pe Davi ombovai:

— Xee ma ajexavaia aendu. Ha'eveve SENHOR po py anhemboaxa uka rã, mba'eta ha'e ma opa e'ÿ va'e nhanemboaxy va'e. Ha'e rã avakue po py ma xee nanhemboaxa ukaxei — he'i.

**15** Ha'e rami rã SENHOR ombou mba'eaxy vaikue Israel yvy ha'e javi rupi, ko'ë aje'ive'i guive oa'angaague ára peve. Ha'e ramo Dã guive Berseba peve omano setenta mil avakue ha'e kuery regua.

**16** Ha'e gui Jerusalém áry SENHOR-a guigua anjo tetã omomba aguã opo oupi ho'amy jave SENHOR opytu'u ma mba'emo vai omoingoa gui. Ha'e vy aipoe'i anjo heta va'e kuery mombaarã ou va'ekue pe:

— Ha'eve ma, emboguejy ju ndepo — he'i. Ha'e va'e jave ma anjo hi'aï jebuseu regua Araúna mba'emo moa'yñaty yvy'iry.

<sup>17</sup> Ha'e gui anjo heta va'e kuery omomba rã Davi oexa vy ojapukai SENHOR pe. Ha'e vy aipoe'i:

— Xee rima ajejavý, xee rima hi'arandu e'ý va'e rami ajapo. Ha'e rã kova'e vexa'i kuery, mba'e tu ha'e kuery ojapo? Xerovai ae eupi ndepo, ha'e xeru ro pygua kuery rovai.

*1 Crônicas 21.18-27*

<sup>18</sup> Ha'e va'e árave profeta Gade ou Davi oña py. Ha'e vy aipoe'i:

— Tereo na, ejapo SENHOR pe peteñ altar-rã jebuseu regua Araúna mba'emo moa'yñaty py.

<sup>19</sup> Gade ayvu rupi SENHOR ojapo ukaague rami vy Davi oo.

<sup>20</sup> Ha'e gui Araúna ma yvy'ã re oña gui oexa huvixa guembiguai kuery reve jogueru nhoguenoiny ramo. Ha'e rami vy guenapy'ã re oñgova yvy peve.

<sup>21</sup> Ha'e vy oporandu:

— Xeruvixa, mba'e re tu ndee reju apy xee nerembiguai aña py?

Davi ombovai:

— Mba'emo moa'yñaty ajogua aguã rima aju, SENHOR pe altar-rã ajapo aguã, mba'eaxy vaikue heta va'e kuery áry ombou va'ekue optyu'u aguã — he'i.

<sup>22</sup> Ha'e rã Araúna aipoe'i Davi pe:

— Ejopy ha'e eme'ë SENHOR pe reme'ëxe va'e, reipota va'e rei teñ. Apy ma vaka ikuai reapy vy reme'ë va'erã. Oñ avi yvyrapo mba'emo moa'yñaty regua yxakãrã, canga guive oñ.

<sup>23</sup> Xeruvixa, ha'e nunga ha'e javi ndepo py xee Araúna ame'ëmba — he'i.

Ha'e vy aipoe'ive ju:

— SENHOR Nderuete tojapo rejerurea.

<sup>24</sup> Ha'e rami teñ huvixa ombovai Araúna pe:

— Any, ndegui xee ajogua 'rã hepyrã porã re, mba'eta SENHOR Xeruete pe name'ëi 'rã xevy ome'ë rive pyre — he'i. Ha'e rami vy Davi ojogua mba'emo moa'yñaty, ha'e vaka re ma ome'ë cinqüenta hatã'i va'e prata guigua.

<sup>25</sup> Ha'e py ma Davi ojapo peteñ altar SENHOR pe, ha'e vy ome'ë mba'emo oapy reve, peteñ rami ikuia regua guive. Ha'e rami rã ha'e va'e yvy re SENHOR ojapo porã jevy ramo Israel kuery ikuia áry gui mba'eaxy vaikue optyu'u.

## Jypy'igua kuaxia huvixave rei kuery rekokue oĩa Jypy'igua kuaxia huvixave rei kuery rekokue oĩa

Huvixa Davi omano rire ta'y Salomão ju oĩ hekobia. "Salomão pe Nhanderuete ome'ẽ avi hi'arandurã, opa mba'e py oikuaa pota ha'e mba'emo oikuaapa rei aguã rami, ye'ẽ rembe rupi ita ku'i ikuia rami. ... Omombe'u avi três mil ayvu arandua regua, ha'e gui mil e cinco mboraeirã. ... Ha'e ramo ha'e javi regua ou Salomão arandua oenduxe vy" (4.29, 32, 34a). Nhanderuete ombojerovia atyrã Salomão ojapo peteĩ templo iporã vaipa va'e, ouro ha'e overa va'e py onhovãmbaa. Mbovy rei e'ŷ oguereko kavaju ha'e karóxa joe opu'ãa pygurarã. 'Ha'e rami vy setecentos kunhague oguereko huvixa rajy meme, ha'e gui trezentos ta'yxy jevy kuery. Ha'e va'e kunhague ma ojapo amboae rami rei ipy'a aguã. Ha'e vy tuja'ive ma jave ta'yxy kuery ombopy'a rerova ete tuuete mboae ramigua kuery re ju ombojerovia aguã. Ha'e ramo opy'a re anhetẽ rupi ve'ŷ oiko Senhor nguuete pe, nguu Davi oikoague rami e'ŷ" (11.3-4).

Salomão omano rire openaague omboja'oa mokoĩ henda py. Kuaray puku-a katy opyta Judá regua, ta'ykue opena aguã. Ha'e rã kuaray ijapu'a'ia katy ma Israel regua opyta, amboae kuery openaa. Ha'e va'e mokoĩve regua joe opu'ã jepi raka'e.

Israel regua re opena raka'e peteĩ huvixa Acabe hery va'e. Ha'e va'e ma Nhanderuete re ndojeroviai ramo ixupe profeta Elias ijayvu, tuuete ramigua Baal pegua sacerdote kuery reve oeko a'ã guive. Aipoe'i heta va'e kuery pe: "Raka'e peve 'rã tu pendepy'a py ndapeikuaai rei pekuapy mokoĩ rupi rei vy? Senhor ae ri Nhanderuete oiko ramo ixupe ete pendekuai. Ha'e'ŷ vy xapy'a rei Baal ri Nhanderuete oiko ramo ixupe pendekuai" he'i (18.21). Ha'e ramo Nhanderuete ombovai vy tata ombou yva gui, opo'akaa oexa uka vy.

### *Davi tuja'i ete jave guare*

<sup>1</sup> Huvixa Davi tuja'i ete, ha'e heta ma'etŷa oguereko ma ramo ajukue py onhovãmbaa teĩ ijeyro'y ae tema.

<sup>2</sup> Ha'e ramo ixupe hembiguai kuery aipoe'i:

— Oreruvixa, tove tojoua peteĩ kunhataĩ'i nerondenre oiko va'erã. Tove ndere topena toikovy, toke avi ndejyva py, ndeyro'y riae e'ŷ aguã — he'i.

<sup>3</sup> Ha'e rami vy Israel ha'e javi rupi oeka oje'oivy kunhataĩ'i iporãve va'e. Ha'e vy Suném pygua Abisague hery va'e ojou vy ogueru huvixaa py.

<sup>4</sup> Kunhataĩ va'e ma iporã ete va'e. Huvixa re opena oikovy, oipytyvõa rupi oiko teĩ huvixa ma hexe nopena rei.

### *Adonias huvixarã onhemoi uka rivexeague*

<sup>5</sup> Ha'e gui Davi ra'y Adonias Hagite pi'a va'e ma onhemboyvate rei. Ha'e vy aipoe'i:

— Xee ae 'rã aĩ huvixarã — he'i. Ha'e ramo vy ojou karóxa, kavaju áry guarã kuery ha'e cinqüenta avakue henondenre rupi onha okuapy aguã.

<sup>6</sup> Ha'e ramo teĩ tuu ma neĩ peteĩgue ma voi nda'ijayvui ixupe. Neĩ aipo nde'i: "Mba'e re tu guĩ rami reiko?" nde'i. Ha'e ma jaexa rã iporãve va'e avi, Absalão oiko rire oiko va'ekue.\*

<sup>7</sup> Ha'e ramo vy Zeruia pi'a Joabe ha'e sacerdote Abiatar reve jogueroayvu, ha'ea katy ha'e kuery oo vy oipytyvõ aguã re.

<sup>8</sup> Ha'e rã sacerdote Zadoque ma Adonias-a katy ndooi, neĩ Joiada ra'y Benaia, profeta Natã, Simei, Reí ha'e Davi rembiguai kuery ipy'a guaxukueve va'e ma voi.

\* <sup>1:6</sup> Adonias ma Absalão ryvy (2 Samuel 3.2-5), teĩ ha'e kuery ikuia re tuu Davi ndokuuaa potai (2 Samuel 14).

<sup>9</sup> Ha'e rire Adonias ma ita Zoete py oĩ py oo vy ome'ẽ mymba kuery vexa'i, vaka ha'e ikyra ete va'e oapy reve, Rogel katy'i yvu oĩ va'e py. Ha'e katy oenoĩmba avi guyvy kuery huvixa ra'y ikuai va'e, ha'e gui avakue Judá pygua huvixa rembiguai kuery ha'e javive.<sup>†</sup>

<sup>10</sup> Ha'e rã profeta Natã ma noenoĩ ukai ae, neĩ Benaia, avakue ipy'a guaxukueve neĩ guyvy Salomão ma voi.

### *Bate-Seba reve Salomão huvixarã oĩ aguã re Natã ijayvuague*

<sup>11</sup> Ha'e rami rã Natã aipoe'i Salomão xy Bate-Seba va'e pe:

— Nerendui ri ty'y Hagite pi'a Adonias huvixarã onhemoĩague? Ha'e rami teĩ nhan-deruvixa Davi ndoikuuai.

<sup>12</sup> Ha'e nunga rupi eju, toromongeta, reikove reve reo jepe aguã, ndepi'a Salomão voi.

<sup>13</sup> Tereo, ejexa uka huvixa Davi pe. Ha'e vy aipo're ixupe: "Xeruvixa, reura ma e'ŷ teve xee nerembiguai pe? Mba'eta aipo're va'ekue: 'Ndepi'a Salomão ae ma oĩ 'rã huvixave xerekovia, xerenda áry ae 'rã oĩ', 're va'ekue. Mba'e re tu ha'vy Adonias ri huvixarã onhemoĩ?' 're 'rã ixupe.

<sup>14</sup> Ha'e gui huvixa reve ndee ndeayvu teri reve ma xee voi avaẽ 'rã nderakykue. Ha'e vy xee ju xeayvu 'rã ndeayvuague rupi — he'i.

<sup>15</sup> Ha'e gui Bate-Seba ma opy huvixa oĩ py oo vy ojexa uka ixupe. Huvixa ma tuja'i raxa ma ramo Suném pygua Abisague oĩ avi oipytyvõa rupi.

<sup>16</sup> Ha'e gui huvixa renonde py Bate-Seba ojero'a vy oĩ guenapy'ã re. Ha'e ramo oporandu vy

— Mba'e tu reipota? — he'i huvixa.

<sup>17</sup> Kunha va'e ombovai:

— Xeruvixa, SENHOR Nderuete renonde reura va'ekue xee nerembiguai va'e pe. Ha'e vy aipo're va'ekue: "Ndepi'a Salomão ae ma oĩ 'rã huvixarã xerekovia. Ha'e ae 'rã oguapy xerenda áry", 're va'ekue.

<sup>18</sup> Ha'e rami teĩ aŷ ma Adonias ae onhemoĩ ra'e huvixaverã. Ha'e gui ndee xeruvixa, ndereikuuai teri.

<sup>19</sup> Ha'e va'e ma mymba kuery ojuka uka vy ome'ẽ ma vaka ra'y ikyrave va'e ha'e vexa'i oata aguã rami rei e'ŷ. Oenoĩmba avi huvixa kuery ha'e javi, sacerdote Abiatar ha'e xondaro kuery ruvixa Joabe. Ha'e rã nderal'õ Salomão ma ha'e noenoĩ ukai.

<sup>20</sup> Ha'e rami teĩ xeruvixa, Israel kuery ha'e javi ma ndere meme oma'ẽ okuapy, ndee ae reikuua uka porãve aguã mavae ete pa nerenda áry oguapy va'erãa nderekovia huvixarã oĩ aguã.

<sup>21</sup> Ha'e rami e'ŷ rã xeruvixa, neramoĩ kueryague rami nenhono porãa rã xee ha'e xepi'a Salomão voi orererekko axya rei 'rã joapo vai va'ety rami rive — he'i.

<sup>22</sup> Huvixa reve kunha va'e ijayvu teri reve ovaẽ avi profeta Natã ha'e py.

<sup>23</sup> Ha'e ramo huvixa pe omombe'ua vy ixupe aipo'ea:

— Apy ma ko ovaẽ profeta Natã — 'ea ramove ha'e va'e ju ojero'a vy henonde ngova omboja yvy peve.

<sup>24</sup> Ha'e vy aipoe'i:

— Xeruvixa, ndee ae ri nhi'ã aipo're va'ekue: "Adonias 'rã huvixa oĩ xee ndaikovevei ma rire, ha'e vy ha'e ae ma 'rã oguapy xerenda áry", 're ri ty'y?

<sup>25</sup> Mba'eta ange ma ha'e ou vy ojuka uka vaka ha'e mymba kuery ikyrakueve va'e, vexa'i kuery oata aguã rami e'ŷ guive. Ha'e vy oenoĩ ukapa huvixa ra'y kuery ha'e javi, xondaro kuery ruvixa ha'e sacerdote Abiatar. Ha'e ramo ha'e kuery oguerovy'a vy okaru ha'e oy'u okuapy henonde py. Ha'e vy ixupe aipoe'i okuapy: "Ha'eve ete ma nhanderuvixave Adonias!" he'i okuapy.

<sup>†</sup> **1:9** Adonias ma ngaru ojapo Nhanderuete peguarã merami teĩ huvixa oĩ aguã rive, tyke'y Absalão ojapoague ramo avi (2 Samuel 15.7-12).

<sup>26</sup> Ha'e rã xee nerembiguai aiko va'e ma naxerenoĩ, neĩ sacerdote Zadoque, Joiada ra'y Benaia ha'e ndera'y Salomão ma voi.

<sup>27</sup> Xeruvixa, ndee ae ri nhi'ã rejapo uka va'ekue ha'e nunga? Mba'eta nerembiguai kuery pe ndereikuua ukai teve nderekovia nerenda áry oguapy va'erãa – he'i.

<sup>28</sup> Ha'e ramo huvixa Davi ijayvu vy

– Penoĩ ju ha'vy Bate-Seba xea py – he'i. Ha'e rã kunha va'e ma huvixa renonde py ou ju vy ojexa uka ho'amy ixupe.

<sup>29</sup> Ha'e ramo huvixa oura reve aipoe'i:

– Anhetẽ ete ajexavaia ha'e javi gui SENHOR oikove va'e xerepy va'ekue rery rupi aura vy aipoa'e:

<sup>30</sup> Kova'e ára pyve ajapo 'rã ndevy auraague. Mba'eta SENHOR Israel kuery Ruete rery rupi aipoa'e va'ekue: "Ndepi'a Salomão ae 'rã oĩ xee naĩvei jave. Ha'e ae ju 'rã oguapy xerenda áry xerekovia", ha'e va'ekue.

<sup>31</sup> Ha'e ramo Bate-Seba ma huvixa renonde py ojero'a vy yvy peve omboja ngova. Ha'e vy aipoe'i:

– Ha'eve ete ma xeruvixa Davi, raka'e rã peve guarã!

### *Huvixarã Salomão omoĩ okuapyague*

<sup>32</sup> Ha'e gui ma Davi aipoe'i:

– Penoĩ xea py sacerdote Zadoque, profeta Natã ha'e Joiada ra'y Benaia – he'i ramo ha'e va'e kuery oguerua rã ojexa uka okuapy huvixa pe.

<sup>33</sup> Ha'e kuery pe huvixa aipoe'i:

– Peraa ke xee penderuvixa rembiguai kuery, ha'e pejapo xera'y Salomão mburika áry oĩ aguã rami. Ha'e vy peraapa Giom katy.

<sup>34</sup> Ha'e py ma profeta Natã reve sacerdote Zadoque omoĩ 'rã huvixarã Israel kuery re opena aguã. Ha'e gui pembopu 'rã mimby guaxu, ha'e vy "Ha'eve ete ma huvixave Salomão!" peje 'rã.

<sup>35</sup> Ha'e gui ma peju jevy 'rã hupive. Ha'e rã ha'e ma ou vy oguapy 'rã xerenda áry, xerekovia ha'e ju oĩ aguã, mba'eta xeayvuague rami vy ha'e ae 'rã opena Israel ha'e Judá kuery re – he'i.

<sup>36</sup> Ha'e rami rã Joiada ra'y Benaia huvixa ombovai vy aipoe'i:

– Ha'eve va'e. Po rami ae ta'ijayvu avi SENHOR xeruvixa Ruete va'e.

<sup>37</sup> Xeruvixa, ndere SENHOR openaague rami ae toopena Salomão re voi. Ha'e rami vy tombopo'aka xeruvixa Davi po'akaa gui eteve voi – he'i.

<sup>38</sup> Ha'e gui huvixa pegua xondaro kuery reve oje'oi sacerdote Zadoque, profeta Natã ha'e Joiada ra'y Benaia. Huvixa Davi rymba mburika'i áry ae Salomão omoĩ vy ogueraa okuapy Giom py.

<sup>39</sup> Ha'e gui sacerdote Zadoque ma azeite ryru ombojerovia aty gui ogueru va'ekue oupi vy omoĩ Salomão re. Ha'e vy mimby guaxu ombopu rã heta va'e kuery ha'e javi oendu vy ojapukai:

– Ha'eve ete ma huvixa Salomão! – he'i okuapy.

<sup>40</sup> Ha'e gui hakykue oje'oipta vy gaita ombopu reve oguerovy'a ete heravy. Onhendu atã oje'oivy yvy voi omomyĩ rei aguã rami.

### *Adonias ojeupegua kuery reve onhemondyipa okuapyague*

<sup>41</sup> Ha'e ramo Adonias ha'e oenoĩ va'ekue okarupa ma rire oendu okuapy. Joabe voi mimby pu oendu vy aipoe'i:

– Mba'e nungarã tu pova'e tetã katy gui hevovo rei va'e onhendu?

<sup>42</sup> Ha'e ijayvu teri reve ovaẽ sacerdote Abiatar ra'y Jônatas. Ha'e ramo ixupe Adonias aipoe'i:

— Eike na, mba'eta ndee ma ava ndepy'a guaxu va'e vy mba'emo pyau porã va'e anho 'rã nhi'ã reru orevy – he'i.

<sup>43</sup> Ha'e rã Jônatas ombovai vy aipoe'i Adonias pe:

— Ha'e rami 'rãgue py nhanderuvixa Davi ma omoõ uka ra'e Salomão huvixaverã.

<sup>44</sup> Ha'e rami vy hexeve Davi omondouka sacerdote Zadoque, profeta Natã, Joiada ra'y Benaia ha'e ojeupegua xondaro kuery. Ha'e va'e kuery ma omoõ huvixa rymba mburika'i áry ae.

<sup>45</sup> Ha'e vy Giom py sacerdote Zadoque ha'e profeta Natã omoõ huvixaverã. Ha'e gui oguerovy'a ete reve ojevypa jogueruvy ramo tetã ha'e javi rupi hevovo rei okuapy. Ha'e va'e kuery ae rima ojapukai rã pendu va'e.

<sup>46</sup> Ha'e gui Salomão ma huvixa renda áry oguapy ae.

<sup>47</sup> Ha'e rami ae avi Davi rembiguai kuery yvatekueve ou okuapy ixupe oxarura. Ha'e vy aipoe'i okuapy: "Nderuete tojapo nderery gui Salomão rery omboetevea aguã rami. Tombopo'akave ndepo'akaa gui eteve", he'i okuapy ramo huvixa ngupa áry ituia pyve ojero'a.

<sup>48</sup> Ha'e rami vy aipoe'i: "Ta'ima'endu'a porãa SENHOR Israel kuery Ruete re, mba'eta ange nhandevy ombou xerenda áry oguapy va'erã, xee ae rexa py ma voi aexa va'e", he'i.

<sup>49</sup> Ha'e rami rã Adonias hexeve guarã oenoõ va'ekue oryryipa reve opu'ãmba vy oje'oipa joa katy e'ŷ-e'ŷ.

### *Adonias onhemboaxy ukaague*

<sup>50</sup> Ha'e rã Adonias ma Salomão gui okyje vaipa avi vy opu'ã vy templo py oo, ha'e ojopy oiny altar apy'i ikuai va'e re.<sup>‡</sup>

<sup>51</sup> Salomão pe aipo'ea:

— Ma'ë, Adonias ma ndegui okyje vy oo altar apy'i re ojopy oiny. Ha'e vy aipoe'i: "Aŷ gui huvixa Salomão toura xejuka uka e'ŷ aguã kyxe py, hembiguai aiko rã", he'i.

<sup>52</sup> Ha'e ramo Salomão ombovai:

— Ha'e va'e ma ha'evea rami ri oiko va'e ramo neĩ peteĩ hi'a ma voi ndo'ai 'rã yvy py. Ha'e rã hexe nda'evei va'e oña jaikuua ramo omano 'rã – he'i.

<sup>53</sup> Ha'e ramo guembiguai kuery Salomão omondouka rã omboguejy okuapy altar gui. Ha'e ramo ha'e ou vy huvixa Salomão renonde py ojero'a. Ha'e rã aipoe'i ixupe:

— Tereo ju ndero katy.

## 2

### *Salomão pe Davi mba'emo ojapo va'erã omboaxapa ma vy omanoague*

<sup>1</sup> Ovaẽ ma ouvy Davi omano aguã ára. Ha'e vy gua'y Salomão pe mba'emo ojapo uka vy aipoe'i:

<sup>2</sup> — Xee aa ta ma tape omano va'e pavẽ oje'oia rupi. Ha'e gui ndepy'a guaxu ke ava rami!

<sup>3</sup> Eiko SENHOR Nderuete nhanembo'eague rami, ha'e oikoa rami ae reiko vy ijayvua oeja va'ekue rejapopa aguã, ha'e ojapo uka va'ekue, oipotaa, ha'e oikuaa uka va'ekue lei Moisés ombopara va'ekue re oña rami, ha'e rami vy opa mba'e rejapoa py reiko porã aguã, mamo rã reoa rupi rei.

<sup>4</sup> Ha'e ramo 'rãe SENHOR ndevy voi omoõ atã xevy ijayvuague. Mba'eta aipoe'i va'ekue: "Ndera'y kuery ma ikuia re ae oikuaa pota ri vy anhetẽ ete rupi xerenonde ikuai aguã opy'a ha'e onhe'ë ha'e javi py, ha'e ramo ndoatai 'rã nderekovia tenda Israel kuery re openaaty áry oĩ va'e", he'i va'ekue.

<sup>5</sup> — Ha'e rami avi ndee ma reikuua porã Zeruia pi'a Joabe xeapo vaiague, ha'e gui Israel pyguia xondaro kuery ruvixa mokoõ va'e re voi: Ner ra'y Abner ha'e Jéter ra'y Amasa re.

<sup>‡</sup> **1:50** Templo py Adonias oike vy altar apy'i ikuai va'e re ojopy onhemboaxy ukaa rupi (Êxodo 21.12-14).

Ha'e va'e kuery ma ha'e ojuka joe nopus'avei ma jave tei. Ha'e rami vy ojepy joe opus'aa jave py jouguy omoëague re. Ha'e nungakue py onhemongy'a, oku'akuua ha'e oxapatu voi.\*

<sup>6</sup> Ha'e nunga rupi ejapo hexe ne'arandua rami. Ha'e rami vy eja eme hi'a xiimba rire ma omano aguã.

<sup>7</sup> — Ha'e rã Gileade pygua Barzilai ra'y kuery re ma repena porã 'rã. Ha'e kuery va'e regua ta'ikuai riae nde-mesaa py okaru va'e, mba'eta ha'e rami ae xere opena karamboae nderyke'y Absalão gui anha jave py.

<sup>8</sup> — Ha'e gui apy ndereve avi oiko teri Benjamim regua Gera ra'y Simei, Baurim pygua. Ha'e va'e ma xevy ijayvu vaikue rei ete karamboae, Maanaim katy aa jave py. Ha'e rami rire tei Jordão yakã rembe re xerovaexi vy ou ramo xee ma SENHOR rery rupi aura vy aipoa'e karamboae kyxe py ajuka e'ý aguã re.

<sup>9</sup> Ha'e rami tei aý ma exa'ã eme ojejavvy e'ý va'e oikoa rami, mba'eta ne'arandu va'e vy reikuua porã 'rã hexe rejapo va'erã, huguy omoëa ramo omano aguã — he'i.

<sup>10</sup> Ha'e va'e rire Davi ndoikovevei'i ma guamoï kueryague rami. Ha'e ramo onhono porã tetã Davi rekoague py ae.

<sup>11</sup> Davi ma quarenta ma'etã re oï huvixa Israel kuery re opena va'e. Hebräm py ranhe opena sete ma'etã re, ha'e gui trinta e três ma'etã re ju Jerusalém py opena.

<sup>12</sup> Ha'e rami py Salomão ju oï nguu Davi rekovia. Ha'e vy opa mba'e py ipo'akave tema ovv.

### *Adonias omanoague*

<sup>13</sup> Ha'e gui Hagite pi'a Adonias ou Salomão xy Bate-Seba oïa py. Ha'e ramo ixupe kunha va'e oporandu:

— Ha'evepa reia rupi pa reju?

Ombovai:

— Ha'evepa reia rupi rima — he'i.

<sup>14</sup> Ha'e vy aipoe'ive ju:

— Petei ayvu xeayvu ta ndevy.

Kunha va'e ombovai vy

— Ndeayvu tema — he'i.

<sup>15</sup> Ha'e ramo aipoe'i:

— Reikuua porã xee ae huvixa aí aguã rami aiko va'ekue, ha'e Israel kuery ha'e javi oarõ okuapy va'ekue xee apena aguã, tei opena aguã ma xeryvy pe ju omboaxaa. SENHOR gui ae ojopy ha'e rami aguã.

<sup>16</sup> Ha'e gui aý ma petei mba'e re anho ajerure ndevy. Ejapo e'ý eme xevy.

Kunha va'e ombovai:

— Ndeayvu ha'vy — he'i.

<sup>17</sup> Ha'e ramo aipoe'i:

— Ajerure ndeayvu aguã huvixa Salomão pe, mba'eta ndevy pe ma nome'ë e'ýi 'rã.

Tome'ë xevy Sunéem pygua Abisague xera'xyrã.

<sup>18</sup> Bate-Seba ombovai:

— Ha'eve, ndeayvuague rami vy xee xeayvu 'rã huvixa pe — he'i.

<sup>19</sup> Ha'e gui ma Bate-Seba oo huvixa Salomão-a py, Adonias ojerureague omombe'u aguã. Huvixa opus'aa oxy reve nhovaexi aguã, ha'e vy ojero'a henonde py. Ha'e gui guenda áry ju oguapy vy ogueru ruka petei tenda oxy pe. Ha'e ramo oguapy oiny oiporu kuua regua re.

<sup>20</sup> Ha'e vy aipoe'i:

— Petei mba'e kyr'i ete va'e re tema ajerure ta ndevy. Eme'ë e'ý eme.

---

\* <sup>2:5</sup> Joabe ma Abner ha'e Amasa ojukaague omombe'u 2 Samuel 3.25-32 ha'e 20.9-10 py. Ha'e rã Barzilai ra'y kuery Davi re opena porãague omombe'u 2 Samuel 17.27-29 py.

Huvixa ombovai:

— Ha'i, ejerure tema. Xee name'ẽ e'ŷi 'rã ndevy — he'i.

**21** Kunha va'e aipoe'i:

— Reme'ẽ 'rãgue Suném pygua Abisague nderyke'y Adonias ra'yxyrã.

**22** Ha'e ramo huvixa Salomão ombovai vy aipoe'i oxy pe:

— Mba'e re tu rejerure Suném pygua Abisague re Adonias ra'yxyrã? Mba'e re tu nderejerurei avi ha'e ipo'aka aguã re (mba'eta xeryke'y oiko rã), ha'e sacerdote Abiatar ha'e Zeruia pi'a Joabe peguarã re voi? — he'i.

**23** Ha'e vy huvixa Salomão oura SENHOR rery rupi. Ha'e vy aipoe'i:

— Adonias guekove rovai ae e'ŷ ri ijayvu ramo Xeruete oipotaa rami taxembopaga.<sup>†</sup>

**24** Ha'e gui aŷ anhetẽ ete SENHOR xeru Davi rekoria xemoĩ, ha'e ijayvuague rami vy xero pygua kueryrã omoingo va'ekue oikove va'e rery rupi aura vy aipoa'e: Aŷ ma Adonias omano 'rã — he'i.

**25** Ha'e rami vy huvixa Salomão ma Joiada ra'y Benaia omondouka rã oo vy oguero'a Adonias, ha'e vy ojuka.

### *Salomão sacerdote Abiatar omoxēague*

**26** Ha'e gui sacerdote Abiatar pe ju huvixa aipoe'i:

— Tereo Anatote katy nemba'ety ituia py, mba'eta ndee ma ava ojuka pyrã. Ha'e rami teĩ aŷ ma ndorojukai 'rã, mba'eta xeru Davi renonde rupi SENHOR ayvu ryru reraa va'ekue, ha'e xeru ojexavaiague ha'e javi py ndee voi rejexavai rire — he'i.

**27** Ha'e rami vy Salomão omoxē Abiatar, SENHOR pegua sacerdote-ve'ŷ oiko aguã. Ha'e rami py ojeupity Siló py Eli ramymino kuery rekorã re SENHOR ijayvuague.<sup>‡</sup>

### *Joabe ojukaa ague*

**28** Ha'e nunga Joabe pe omombe'ua rã oendu vy ojava ovvy vy oike SENHOR ombojerovia aty ropy, ha'e vy ojopy oiny altar apy'i oĩ va'e re, mba'eta Joabe voi Adonias reve onhemoirũ va'ekue, Absalão reve nonhemoirũi va'ekue ri.

**29** Ha'e ramo Salomão pe omombe'ua SENHOR ombojerovia aty katy Joabe ojava vy altar yvy'iry oĩa. Ha'e ramo Salomão Joiada ra'y Benaia omondouka vy aipoe'i:

— Tereo ke, ero'a.

**30** Ha'e ramo SENHOR ombojerovia aty py Benaia oo vy aipoe'i Joabe pe:

— Po ramo huvixa ijayvu: Eẽ ke upe gui.

Ombovai:

— Any, apy ae 'rã amano — he'i.

Ha'e gui Benaia oo jevy vy ha'e nunga huvixa pe omombe'u vy aipoe'i:

— Po ramo Joabe xembovai kuri.

**31** Ha'e ramo ixupe huvixa aipoe'i:

— Ejapo ha'vy aipoe'iague ramo vy. Ero'a vy ejuka, ha'e gui enhono porã. Ha'e ramo vy 'rãe xegui ha'e xeru ro pygua kuery gui reipe'a heko porã va'e ruguy Joabe omoẽ riveague re rombopaga aguã oĩ va'ekue.

**32** Ha'e ramo rã Joabe re ae ju 'rã SENHOR omoĩ tuguy omoëague re opaga aguã. Mba'eta mokoĩ avakue ixugui heko porãve ha'e ha'eveva re opu'ã vy ojuka ete rire kyxe py, xeru Davi oikuaa e'ŷ re. Ha'e va'e ma Ner ra'y Abner Israel kuery xondaro ruvixa va'e, ha'e gui Jéter ra'y Amasa Judá pygua xondaro ruvixa.

**33** Ha'e ramo rã Joabe re ae 'rã oĩ ha'e kuery ruguy omoëague re opaga aguã, hamymino kuery re guive, raka'e rã peve guarã. Ha'e rã Davi re ma, hamymino kuery, hoo pygua kuery, ha'e henda áry oĩ va'e re ma oĩ 'rã SENHOR omoingo porã aguã, raka'e rã peve guarã — he'i.

<sup>†</sup> **2:23** Adonias ojerureague omombe'ua rã Salomão oendu vy ndojou porãi, mba'eta Suném pygua Abisague Davi ra'yxy jevy rami ae irũ oiko va'ekue (1.1-4), ha'e pavẽ oikuaa rã huvixa ra'yxykue re omenda va'e huvixa jevrã oikoa rami (2 Samuel 16.20-23). <sup>‡</sup> **2:27** Eli pe SENHOR ijayvuague ma 1 Samuel 2.27-33 py oĩ.

<sup>34</sup> Ha'e ramo Joiada ra'y Benaia Joabe re oguero'a vy ojuka. Ha'e vy onhono porã hoogue py ae, teko a e'ÿa py.

<sup>35</sup> Ha'e gui Joabe rekoria ma huvixa omoï Joiada ra'y Benaia xondaro ruvixarã, ha'e rã Abiatar rekoria ma omoï Zadoque sacerdote-rã.

### *Simei ojukaa ague*

<sup>36</sup> Ha'e rire ma huvixa oenoï uka Simei. Ha'e vy aipoe'i ixupe:

— Ejapo ke nderorã Jerusalém py, ha'e py ae eiko. Apy gui eë-eëve eme ke peteïve henda katy.

<sup>37</sup> Mba'eta eikuua pota porã ke: Apy gui reo vy Cedrom yakã reaxa vyve remano 'rã. Ha'e gui ndere ae ju 'rã oï nderuguy omoëague re repaga aguã.

<sup>38</sup> Ha'e ramo Simei ombovai huvixa:

— Xeruvixa, ha'evea rami ndeayvu. Ndeayyuague rami 'ræe xee nerembiguai aiko — he'i. Ha'e rami vy Simei are'i ma oiko Jerusalém py.

<sup>39</sup> Ha'e gui mboapy ma'etÿa py ma mokoï Simei rembiguai ojava jogueravy Gate pygua huvixa Maaca ra'y Aquis ro katy. Ha'e ramo Simei pe omombe'ua vy

— Nerembiguai kuery je Gate py ikuai — 'ea.

<sup>40</sup> Ha'e rami rã Simei opu'ã vy guymba mburika'i oguerekat u vy oo Gate katy, Aquis ro gui guembiguai kuery ogueru aguã. Ha'e rami vy Gate gui ogueru ju guembiguai kuery.

<sup>41</sup> Salomão pe omombe'ua Simei Jerusalém gui Gate katy oo rire ojevy ju maague.

<sup>42</sup> Ha'e ramo huvixa oenoï uka Simei. Ha'e vy aipoe'i ixupe:

— Xee ndajapoi ri ty'y raka'e SENHOR rery rupi reura aguã rami? Ha'e romongeta vy aipo nda'e i teve raka'e: "Marã katy rã rei reoa árave remano 'rã", nda'e i ri ty'y? Ha'e ramo xevy aipo're va'ekue: "Ha'evea rami ndeayvu aendu", 're va'ekue ri.

<sup>43</sup> Mba'e re ha'vy nderejapoi ri SENHOR pe reuraague, neñ xee romongetaague ma voi?

<sup>44</sup> Huvixa aipoe'ive ju Simei pe:

— Ndepy'a re reikuua porã xeru Davi re rejapo vaiague ha'e javi. Ha'e nunga rupi ndere ae ju SENHOR ombou ta rejapo vaiague repy.

<sup>45</sup> Ha'e rã huvixa Salomão ma ogueroayvu porã 'rã, ha'e SENHOR renonde py Davi po'akaa va'ekue omoï porã 'rã raka'e rã peve — he'i.

<sup>46</sup> Ha'e gui Joiada ra'y Benaia pe huvixa ijayvu ramo oo vy hexe opu'ã vy ojuka. Ha'e rami py Salomão po'akaa oï atãve.

## 3

### *Faraó rajy re Salomão omendaague*

<sup>1</sup> Salomão hatyu oikovy Egito pygua huvixa Faraó re. Ha'e vy gua'xyrã Faraó rajy ogueraa vy tetã Davi rekoague py ranhe ogueru, ngoorã ojapopa e'ÿa ja, ha'e gui SENHOR pegua oo ha'e Jerusalém tetã ha'e javi rupi kora ojapopa e'ÿa ja.

<sup>2</sup> Ha'e rami teñ heta va'e kuery ma yvy'ã rupi ombojeroviaaty ikuai va'e rupi oo vy mba'emo ome'ë teri okuapy ha'e py, mba'eta ha'e va'e jave ma oo SENHOR rery oï atyrã ndojapoai teri.

### *2 Crônicas 1.2-13*

<sup>3</sup> Salomão oayvu ete SENHOR. Ha'e rami vy nguu Davi ombo'eague rami oiko. Ha'e rami teñ yvy'ã rupi ombojeroviaaty ikuai va'e rupi teri ome'ë jepi mba'emo, heakuã va'e oapy guive.

<sup>4</sup> Ha'e rami vy Gibeão katy oo mba'emo ome'ë aguã, ombojeroviaaty yvy'ã re oï va'e tuvixave va'e ramo. Ha'e py altar oï va'e áry Salomão oapy uka mil mymba.

<sup>5</sup> Ha'e gui ma Gibeão py ae Salomão pe SENHOR ojexa uka pyávy, ra'u rupi. Ha'e vy aipoe'i:

— Ejerure ke xevy reipota va'e re, ha'e rã xee ame'ë 'rã.

<sup>6</sup> Ha'e rã Salomão ombovai:

— Nerembiguai xeru rãgue'i Davi pe reayvua rexu uka raka'e opa mba'e py, mba'eta ha'e ma ojerovia etea rupi ndereve oiko va'ekue, gueko porãa rupi ha'e nerondenon rupi opy'a re anhetẽ ete va'e omoï reve. Reayvua rexu ukaa rupi ixupe reme'ẽ peteï ta'y hekoria oï va'erã, aÿ ojekuaa rami.

<sup>7</sup> Ha'e rami vy SENHOR Xeruete, xeru Davi rekovia xee nerembiguai ju xembopo'aka. Ha'e rami teï xee xekyrã ete teri, mba'eve py ndaiko kuaai.

<sup>8</sup> Xee nerembiguai ma ndevyguia kueryrã reiporavo va'ekue mbyte rupi aiko. Ha'e va'e kuery ma heta raxa va'e, neï aipapapa rei va'erã e'ÿ va'e.

<sup>9</sup> Ha'e nunga rupi xee nerembiguai pe eme'ẽ xepy'a py xe'arandu aguã, ndevyguia kuery areko kuaa, ha'e xe'arandua rupi aikuaa pota aguã heko porã ha'e heko vai va'e re. Mba'eta mava'e 'rã tu oguerekia kova'e kuery heta va'e? — he'i.

<sup>10</sup> Ha'e rami ijayvu rã SENHOR oendu vy ojou porã, ha'e rami oiko aguã re Salomão ojerure ramo.

<sup>11</sup> Ha'e vy Nhanderuete ombovai:

— Ha'e rami aguã re ae rejerure rire, reiko pukuve aguã re'ÿ, rerekopa aguã re, neï nderovaigua kuery omanomba aguã re'ÿ ma voi rejerure, ha'e rã ne'arandurã re anho ha'evea ramigua reikuua aguã,

<sup>12</sup> ha'e ramo ma xee ajapo 'rãe ndeayvuague. Ha'e vy ndepy'a re amoï rã ne'arandu ha'e reikuaapa aguã. Ndoikoi teri ndee reiko 'rãa rami oiko va'ekue, neï reï rire voi ndoikoi 'rã amboae.

<sup>13</sup> Ndevy pe ame'ẽve avi 'rã rejerureague'ÿ teï, rerekopa ha'e ndeporiau e'ÿ aguã. Huvixa kuery ikuai va'e regua ndoikoi 'rã ndee ramigua, repena reikovya pukukue re.

<sup>14</sup> Xapy'a rei aikoa rami ri reiko ramo, ha'e nderu Davi oikoague rami avi xeayvuague ha'e ajapo uka va'ekue rejapopa ramo xee amboetave 'rã nde'ára — he'i.

<sup>15</sup> Ha'e gui ma Salomão omyí vy oikuuaa oexa ra'u ra'ea. Ha'e vy Jerusalém py ojevy vy SENHOR guexeve guarã ojapo va'ekue ryru renonde py hi'aï. Ha'e vy ome'ẽ mymba kuery oapy uka reve, ome'ẽ avi hexeve peteï rami ju ikuia regua. Ha'e vy peteï ngaru ojapo guembiguai yvatekueve ikuai va'e ha'e javi pe.

### *Mokoï kunhague re Salomão oikuuaa potaague*

<sup>16</sup> Ha'e gui huvixaa py mokoï kunhague itavy rei va'e ovaë vy opu'ã okuapy henonde py.

<sup>17</sup> Ha'e kuery va'e regua peteï aipoe'i ixupe:

— Xeruvixa, kova'e kunha va'e reve ma peteï oo py ae roiko va'e. Ha'e py ae aikuavã'i xepi'a.

<sup>18</sup> Kyrã va'e aikuavã rire mboapy araa py ma kova'e kunha va'e voi oikuavã'i avi ava'i. Joa py roï va'ekue, neï peteïve ma voi jipoï oo py roï jave, ore anho'i ae roï ha'e py.

<sup>19</sup> Ha'e gui pyávy ma kova'e kunha va'e pi'a'i omano, hi'áry onheno ouupy rive ramo.

<sup>20</sup> Ha'e gui pytû mbyte xee nerembiguai ake teri ajupy jave ha'e va'e ovu vy xejyva áry gui xepi'a'i oguerova vy ojyva áry ju omonheno. Ha'e rã opi'a'i omano va'ekue ma omonheno xejyva áry.

<sup>21</sup> Ko'ẽ rai jave avy amokambu aguã teï xepi'a'i omano ma ra'e merami. Ha'e gui ko'ẽgue aikuuaa pota rã ha'e va'e ava'i aikuavã'i va'ekue'ÿ — he'i.

<sup>22</sup> Ha'e ramo amboae kunha va'e aipoe'i:

— Any, oikove'i va'e ma xepi'a'i ae, ndepi'a'i ae ma omano va'ekue.

Ha'e rã amboae ju ombovai:

— Any, omano va'ekue ma ndepi'a, xepi'a'i ma oikove va'e — he'i. Ha'e rami ijayvu tema okuapy huvixa renonde py.

<sup>23</sup> Ha'e ramo huvixa aipoe'i:

— Kova'e kunha aipoe'i: “Kova'e oikove va'e ma xepi'a, ha'e rā ndepi'a ma omanogue.” Ha'e rā amboae ombovai vy “Any, omanogue ma ndepi'a, xepi'a ma oikove va'e”, he'i.

<sup>24</sup> Huvixa aipoe'ive ju:

— Peru peteī kyxe xevy — he'i ramo huvixaa py oguerua peteī kyxe.

<sup>25</sup> Huvixa aipoe'i:

— Pemboja'o ava'i oikove va'e, ha'e gui mbytekue peme'ẽ 'rā peteī kunha pe, ha'e rā hovaikue ma amboae pe peme'ẽ — he'i.

<sup>26</sup> Ha'e rami rā ava'i oikove va'e xy ijayvu huvixa pe, mba'eta ixy ae vy oendu op'i a oayvua anho. Ha'e vy aipoe'i:

— Xeruvixa, eme'ẽ na amboae pe ava'i oikove va'e. Ejuka uka eme teve.

Ha'e rā amboae kunha ma

— Ndoikoi 'rā xepi'a, neñ ndepi'a voi. Tomboja'oa — he'i.

<sup>27</sup> Ha'e ramo huvixa ombovai:

— Peme'ẽ ava'i oikove va'e kunha jypygua pe. Pejuka eme ta'vy, mba'eta peva'e ma ixy ae — he'i.

<sup>28</sup> Huvixa ijayvuague Israel kuery ha'e javi oendu vy omboete ete okuapy, mba'eta oikuua okuapy hexe Nhanderuete guigua 'arandua oña, ha'evea rami joguerekoo kuaa aguã.

## 4

### *Salomão rembiguai kuery yvatekueve rery oña*

<sup>1</sup> Ha'e gui Salomão opena oikovy Israel kuery ha'e javi re.

<sup>2</sup> Pova'e avakue ma hembiguai yvatekueve va'e: yvateve ete va'e ma Zadoque ra'y Azarias.

<sup>3</sup> Sisa ra'y kuery Eliorefe ha'e Aías ma kuaxia mboparaaty kuery. Mba'emo oiko va'ekue ombopara va'ety ma Ailude ra'y Josafá.

<sup>4</sup> Joiada ra'y Benaia ma xondaro kuery ruvixa. Zadoque ha'e Abiatar ma sacerdote ikuai.

<sup>5</sup> Ha'e gui Natã ra'y Azarias ma opena va'ety kuery ruvixa. Natã ra'y Zabude ma mba'emo re opena ha'e huvixa irū oiko.

<sup>6</sup> Ha'e gui Aisar ma mba'emo re opena va'ety. Abda ra'y Adonirão ma omomba'eapo nhea'ämby kuery rerekaoa.

<sup>7</sup> Salomão omoï doze avakue Israel kuery ha'e javi re opena va'erã, huvixa ha'e hoo pygua kuery ho'u va'erã ojoua rupi. Ha'e kuery regua peteī-teī ma ma'etŷa nhavõ ojou 'rā peteī jaxy reguarã.

<sup>8</sup> Ha'e kuery rery ma po ramí: Ben-Hur ma Efraim yvyty rupi opena va'e.

<sup>9</sup> Ben-Dequer ma Macaz, Saalabim, Bete-Semes, Elom ha'e Bete-Hanã rupi opena.

<sup>10</sup> Ben-Hesede ma Arubote rupi opena. Ha'e va'e pegua ma Socó ha'e Hefer yvy ha'e javi avi.

<sup>11</sup> Ben-Abinadabe ma opena Dor yvy'ã ha'e javi rupi. Ta'yxy ma Salomão rajy Tafate.

<sup>12</sup> Ailude ra'y Baaná ma opena Taanaque, Megido ha'e Bete-Seã ha'e javi rupi. Ha'e va'e ma Zaretã katy'i rupi opyta Jezreel yvy'ã guy katy, Bete-Seã guive Abel-Meolá peve, ha'e Jocmeão tetã rovai peve.

<sup>13</sup> Ben-Geder ma Ramote-Gileade rupi opena. Ha'e va'e ma Manassés ra'y Jair rekoague Gileade re ikuai va'e rupi opena. Opena avi Basã regua Argobe tetã oĩ va'e re, ha'e javi vy sessenta tetã ikorapa ha'e hokẽ jokoa overa va'e guigua va'e meme.

<sup>14</sup> Ido ra'y Ainadabe ma Maanaim rupi opena.

<sup>15</sup> Aimaás ma Naftali rupi opena. Ha'e va'e ma gua'yxyrã ogueraa peteī Salomão rajy, Basemate hery va'e.

<sup>16</sup> Husai ra'y Baaná ma opena Aser ha'e Bealote rupi.

<sup>17</sup> Parua ra'y Josafá ma Issacar rupi opena.

<sup>18</sup> Elá ra'y Simei ma Benjamim rupi opena.

<sup>19</sup> Uri ra'y Geber ma Gileade rupi opena amorreu kuery ruvixa Seom ha'e Basã pygua huvixa Ogue yvykue re. Ha'e va'e yvy re pete'i anho oĩ opena va'e.

### *Salomão openaa rupi oguerekopaague*

<sup>20</sup> Judá ha'e Israel kuery ma heta ikuai, ye'ẽ yvýry ita ku'i ikuai va'e rami heta. Okaru, oy'u ha'e ový'a okuapy.

<sup>21</sup> Salomão ma amboae regua ikuai va'e re opena avi, Eufrates yakã guive filisteu kuery yvy ha'e Egito yvy peve. Ha'e pygua kuery ma mba'emo ome'ẽ 'rã okuapy Salomão pe, ixupe ombo'eapo 'rã guive okuapy ha'e oikovea pukukue re.

<sup>22</sup> Ko'ẽ nhavõ Salomão peguarã ome'ẽ 'rã okuapy trinta ryru trigo iporãve va'e ha'e sessenta ryru trigo mboae,

<sup>23</sup> ha'e gui dez vaka ra'y ikyra va'e, vinte vaka ikora pygua, ha'e cem vexa'i, guaxu ete'i, guaxu puku, guaxu mirõ ha'e guyra ikyrakue rei'i va'e.

<sup>24</sup> Mba'eta ha'e va'e yvy ha'e javi rupi opena, ha'e Eufrates yakã yvýry rupi Tifsa guive Gaza peve huvixa kuery ikuai va'e re. Ha'e gui ijyvy yvýry ha'e javi rupi ma mba'eve rei ndoikoi.

<sup>25</sup> Ha'e rami py Judá ha'e Israel kuery ikuai porã'i. Salomão oikovea pukukue re pete'i-tei oguapy 'rã okuapy ngoka py ae uva ha'e figo'y ikuiaia guy rupi, Dã guive Berseba peve.

<sup>26</sup> Salomão oguereko avi quarenta mil kavaju oguy pygua karóxa reraarã, ha'e gui imboguataa kuery ma doze mil.

<sup>27</sup> Ha'e gui tembi'u re opena va'ety kuery ojou 'rã okuapy pete'i-tei jaxy reguarã, huvixa Salomão ha'e i-mesa py ovaẽ va'e pe rei, mba'eve oata e'ŷ aguã rami.

<sup>28</sup> Mamo rã huvixa oĩa py ogueraa avi 'rã cevada ha'e hi'ygue kavaju kuery ha'e kavaju porãgueve peguarã, ijayvuague rami vy ae.

### *Salomão 'arandua re ijayvua*

<sup>29</sup> Salomão pe Nhanderuete ome'ẽ avi hi'arandurã, opa mba'e py oikuua pota ha'e mba'emo oikuapa rei aguã rami, ye'ẽ rembe rupi ita ku'i ikuiaia rami.

<sup>30</sup> Kuaray oua katygua ha'e Egito pygua kuery 'arandua gui voi Salomão hi'aranduve va'e.

<sup>31</sup> Avakue ikuai va'e ha'e javi gui hi'aranduve, ezraíta Etã gui voi, ha'e gui Maol ra'y kuery Hemã, Calcol ha'e Darda gui voi. Ha'e ramo hi'arandua oendupaa ha'e javi regua ijyvýry ikuai va'e rupi.

<sup>32</sup> Omombe'u avi três mil ayvu 'arandu regua, ha'e gui mil e cinco mboraeirã.

<sup>33</sup> Omombe'u kuaa avi hogue va'e ha'e javi, yary Líbano re ikuai va'e, hissopo kora áry henhoĩ va'e guive. Omombe'u avi mymba kuery ha'e guyra ikuai va'e, yvy rupi otyryry va'e ha'e pira ikuai va'e voi.

<sup>34</sup> Ha'e ramo ha'e javi regua ou Salomão 'arandua oenduxe vy. Heta avi ou yvy regua huvixa kuery rembiguai Salomão 'arandua omombe'ua rã oendu va'ekue.

## 5

### *2 Crônicas 2.1-16*

<sup>1</sup> Salomão-a py Tiro pygua huvixa Hirão voi ombou guembiguai kuery, mba'eta oendu tuu rekovia Salomão ju huvixarã omoñaague. Hirão ma Davi irũ ae oiko va'ekue.

<sup>2</sup> Ha'e ramo Hirão pe ju Salomão omondouka guembiguai kuery aipoe'i va'erã:

<sup>3</sup> "Reikuua porã xeru Davi SENHOR nguuete pegua oorã ojapo aguã nda'eveiague, ngovaigua kuery reve joguero'a riae ramo, ipo'akaa guýry SENHOR ha'e kuery omoñmba e'ŷa ja.

<sup>4</sup> Ha'e rã xevy pe ma SENHOR Xeruete ome'ẽ joavaive rupi orekuai porã'i aguã. Ha'e vy ndoikoi orerovaiguarã, neĩ oremoangeko reiarã voi.

<sup>5</sup> Ha'e nunga rupi anhembopy'a peteĩ oo ajapo aguã SENHOR Xeruete rery oĩ aguã, xeru Davi pe ijayvuague rami vy. Ha'e vy aipoe'i va'ekue: 'Nderekovia ndera'y amoĩ va'erã va'e ae 'rã ojapo oo xerery oĩ aguã', he'i va'ekue.

<sup>6</sup> Ha'e nunga rupi ejaya na xevy yvyra yary Líbano yvy re ikuai va'e. Xerembiguai kuery ma nerembiguai kuery reve avi 'rã ikuai, ha'e gui ha'e va'e kuery ombo'eapoague repy xee ame'ẽ 'rã ndeayvua rami ae. Mba'eta reikuaa porã nerembiguai kuery Sidom pygua yvyra ojaya kuaa va'e rami ete xerembiguai avakue regua peteĩve ndoikoi", he'i.

<sup>7</sup> Ha'e rami Salomão ayvukue Hirão oendu vy ov'y'a vaipa. Ha'e vy aipoe'i:

— Ta'ima'endu'a porãa SENHOR re aÿ, mba'eta Davi pe peteĩ ta'y hi'arandu ete va'e ome'ẽ heta va'e kuery re opena va'erã — he'i.

<sup>8</sup> Ha'e rami vy Salomão oña py ju Hirão ombou guembiguai kuery aipoe'i va'erã: "Aendu ma rejerure ukaague. Ha'e rami vy reipotaa rami ajaya uka 'rã yvyra yary ha'e cipreste.

<sup>9</sup> Ha'e va'e ma Líbano yvy gui xerembiguai kuery ogueraa 'rã ye'ẽ rembe peve. Ha'e gui ye'ẽ rupi ma xee aru rukapa 'rã ojokuapa va'ekue ndee rejopy aguã peve. Ha'e gui ha'e py ma ojorapa ju 'rã, ha'e ndee ju reraa ukapa 'rã. Ha'e gui ndee voi rejapo 'rã xee aipotaa rami, xero pygua kuery pe tembi'u reme'ẽ vy", he'i va'erã.

<sup>10</sup> Ha'e rami py Salomão oipotaa rami vy ixupe Hirão ogueru ruka yvyra yary ha'e cipreste.

<sup>11</sup> Ha'e gui Hirão pe ma Salomão ome'ẽ vinte mil ryru trigo hoo pygua kuery rembi'urã, ha'e vinte ryru azeite-rã oumbiri pyre. Ha'e rami ojapo ma'etÿa nhavõ.

<sup>12</sup> Salomão pe Nhanderuete ijayvuague rami vy ome'ẽ hi'arandurã. Ha'e gui Hirão ha'e Salomão reve peteĩ rami ikuai, jogueroayvuague rami vy.

## 2 Crônicas 2.17,18

<sup>13</sup> Israel kuery va'e regua avakue ma Salomão omomba'eapo trinta mil.

<sup>14</sup> Ha'e va'e kuery ma omondouka kuerei 'rã Líbano katy, jaxyx nhavõ re dez mil 'rã oo. Peteĩ jaxyx re ma ikuai 'rã Líbano re, ha'e gui mokoĩ jaxyx re ma ngoo rupi 'rã ikuai. Ha'e kuery hereko ma Adonirão.

<sup>15</sup> Salomão oguereko avi oitenta mil mba'emo reraaty kuery, ha'e gui oitenta mil ju yvyty rupi ita mbovoa kuery.

<sup>16</sup> Salomão rembiguai três mil e duzentos avi ikuai joe opena va'ety. Ha'e va'e kuery ma ombo'eapo va'e kuery re opena vy ojapo uka 'rã mba'emo.

<sup>17</sup> Huvixa ogueru ruka ita tuvixakueve ha'e iporãgueve va'e, omoatyrõ mbyre guive ogueru ruka oo ytarã.

<sup>18</sup> Salomão ha'e Hirão rembiguai kuery ae imoatyrõarã ikuai, Gibal pygua kuery voi. Yvyra ha'e ita omoatyrõ okuapy templo-rã ojapo aguã.

## 6

### 2 Crônicas 3.1-9

<sup>1</sup> Egito yvy gui Israel kuery oje'oipa rire ma quatrocentos ma'etÿa py Salomão omboypy templo-rã ojapo aguã, Israel kuery re openaa py irundy ma'etÿa py, mokoĩ jaxyx zive 'epy va'e re.

<sup>2</sup> Ha'e gui oo SENHOR peguarã huvixa Salomão ojapo va'ekue puku-a ma vinte e sete metros va'e, ipya ma nove, ha'e yvatea ma treze raxa'i va'e.

<sup>3</sup> Ha'e rã templo roka ja'oa renonde katy oĩ va'e pya ma nove metros va'e, henda iky'a e'ÿ va'e rami ae. Ha'e rã ipuku-a katy ma quattro metros raxa'i.

<sup>4</sup> Oo re omoĩ avi janela-rã opy katy oĩ va'e gui oka katy ipo'i'ive'i va'e.

<sup>5</sup> Oo mbotya re oka katy rupi ma ojapo opy ja'orã yvatevea py, henda iky'a e'ÿ va'e ha'e iky'a e'ÿ ete va'e yvýry rupi guive.

<sup>6</sup> Pyrõa jypygua pya ma mokoï metros raxa'i, mokoïa ma mboapy metros rai'i va'e, ha'e rã mboapya ma mboapy metros raxa'i va'e, mba'eta imbotya oka katyguia ha'e javi rupi ojapo pyrõa yta renderã, imbotya ombokua e'ŷ aguã.

<sup>7</sup> Oorã ojapo ita imbovoaty py ae oguereko katu pyre py. Ha'e rami vy oo ojapo okuapya py ndoiporuai martelo, haxa neĩ tembiporu ferro guigua ma voi, nombota-mbota nhenduai aguã ha'e py.

<sup>8</sup> Opy ja'o yvyïve va'e rokẽ ma kuaray puku-a katy oĩ, ha'e tape pyrõ-pyrõa'i rupi nhaẽ 'rã mokoïa ha'e mboapya peve.

<sup>9</sup> Ha'e rami vy oo ojapove heravy ojapopa peve. Ha'e vy oipyovãmba yvyrape yary guigua py.

<sup>10</sup> Ha'e gui oo re opy ja'o ojapo va'ekue yvatea ma mokoï metros raxa'i va'e meme. Templo re ombojoapy yary guigua py ae.

<sup>11</sup> Ha'e gui ma SENHOR oayvu ombou Salomão pe. Ha'e vy aipoe'i:

<sup>12</sup> — Upe va'e oo rejapo reikovy va'e ma, xapy'a rei xeayvu aeja va'ekue rupi reiko ramo, ha'e aipotaa rejapopa, ajapo uka va'e rejapo avi vy ha'e va'e rupi anho ri reiko, ha'e ramo ndevy pe ajapo 'rã nderu Davi pe xeayvuague.

<sup>13</sup> Ha'e rami vy aiko 'rã Israel kuery mbyte rupi, xevyguia kuery naipytyvõ e'ŷi 'rã guive.

### *Henda iky'a e'ŷ ete va'e re ijayvua*

<sup>14</sup> Ha'e rami py Salomão ojapopa oo.

<sup>15</sup> Imbotya ma opy rupi ojao'ipa yvyrape yary guigua py. Opyrõa guive ijao'ia peve ojao'ipa yvyrape py, opy rupi. Ha'e rã pyrõa ma ojao'i yvyrape cipreste guigua py.

<sup>16</sup> Ha'e rami ae yvyrape yary guigua py ojao'ipa avi opy ja'o'i ijapy katy oĩ va'e, nove metros ipya va'e, pyrõa guive ijao'ia peve. Ha'e va'e opy ja'o ma henda iky'a e'ŷ ete va'erã ojapo.

<sup>17</sup> Templo ropy iky'a e'ŷ va'e puku-a ma dezoito metros va'e.

<sup>18</sup> Ha'e gui yvyrape opy rupi omo'ã mbyre ma ombojeguapa hy'a ha'e yvoty ra'angaa py. Yary guigua anho ojekuaa, ita ma neĩ peteĩ henda'i py ma voi ndojekuaai.

<sup>19</sup> Ijapy katy ma oguereko katu henda iky'a e'ŷ ete va'erã, ha'e va'e py omoï aguã SENHOR guexeve guarã ojapo va'ekue ryru.

<sup>20</sup> Henda iky'a e'ŷ ete va'e puku-a ma nove metros, ipya ha'e yvatea ha'e rami ae avi nove metros va'e meme. Ouro ete py onhovãmba, altar yary guigua voi ouro ete py onhovã avi.

<sup>21</sup> Opy rupi voi Salomão onhovãmba ouro ete py. Henda iky'a e'ŷ ete va'e ropy rupi omoatã avi imoiny corrente ouro guigua, ouro py avi ojao'i rire.

<sup>22</sup> Ha'e rami py ouro py meme onhovãmba opy rupi, altar henda iky'a e'ŷ ete va'e renonde py oĩ va'e voi.

### *2 Crônicas 3.10-14*

<sup>23</sup> Henda iky'a e'ŷ ete va'e pyguarã ma yvyra oliveira gui ojapo avi mokoï anjo ipepo va'e ra'angaa. Peteĩ-teĩ yvatea ma irundy metros raxa'i meme.

<sup>24</sup> Peteĩ-teĩ anjo pepo puku-a ma mokoï metros raxa'i. Ha'e rami vy irundy metros raxa'i oĩ ipepo apy jovaise re.

<sup>25</sup> Amboae anjo ra'angaa ma ha'ekue rami ae ju yvatea irundy metros raxa'i va'e avi. Mokoïve tuvixaa ma joo rami ete'i.

<sup>26</sup> Peteĩ anjo ra'angaa yvatea ma irundy metros raxa'i, ha'e rami ae amboae voi ramo.

<sup>27</sup> Anjo ra'angaa ma opy omo'ã. Ipepo ma oipyo imoiny. Ha'e gui peteĩ pepo ma ovaẽ oiny oo mbotya re, ha'e rã amboae pepo ma oo mbotya mboae re ovaẽ oiny. Ha'e rami vy opy mbyte rupi peve mokoïve jovai gui opepo omovaẽ imoiny joe.

<sup>28</sup> Ha'e gui mokoïve anjo ra'angaa ombojupa ju ouro py.

### *Opy rupi ha'e okẽ rupi ombojeguaague*

- <sup>29</sup> Oo mbotya opy ha'e javi rupi ombojeguapa anjo ipepo va'e ra'angaa, pindo ha'e yvoty ojepe'apa va'e ra'angaa py, opyve rupi ha'e kyvõ rupi voi.
- <sup>30</sup> Pyrõa ha'e javi rupi voi ombojupa ju ouro py, opyve rupi ha'e kyvõ rupi voi.
- <sup>31</sup> Henda iky'a e'ŷ ete va'e rokẽrã ma ojapo yvyrape oliveira guigua gui. Ha'e rã yvateve rupi guarã ha'e ijytarã ma ojapo vy omboapyte rakua, peteĩ nhiruĩ ijapy va'e oĩ aguã.
- <sup>32</sup> Okẽrã ma mokoĩ yvyrape oliveira guigua gui ojapo. Ha'e vy ombojeguapa anjo ipepo va'e, pindo ha'e yvoty ojepe'apa va'e ra'angaa py. Ha'e nunga ha'e javi ouro py meme onhovã, pindo ha'e anjo ra'angaa guive.
- <sup>33</sup> Henda iky'a e'ŷ va'e oikeaty ytarã ma yvyra oliveira gui avi ojapo. Oikeaty ma ijapy irundy va'erã ojapo.
- <sup>34</sup> Ha'e va'e okẽrã ma mokoĩ yvyrape cipreste guigua gui ojapo. Mokoĩve yvyrape ma ojerea oĩ va'e meme.
- <sup>35</sup> Ha'e va'e ombojegua avi anjo, pindo ha'e yvoty ojepe'apa va'e ra'angaa py, ha'e vy onhovãmba ouro py, ombojeguaague rupi porã.
- <sup>36</sup> Ha'e gui opy ja'o mbyte pygua rupi omoĩ avi ita ojaya pyre mboapy jo'aa rupi, ha'e gui peteĩ jo'aa yvyra yary guigua.
- <sup>37</sup> Irundy ma'etã py, mokoĩ jaxya zive 'epy re ma omoĩ oo SENHOR pegua ytarã.
- <sup>38</sup> Ha'e gui onze ma'etã py, oito jaxya bul 'epy re, opa ete ma oo ojapoxeague rami, hexegua ha'e javi. Ha'e rami py sete ma'etã ogueraa Salomão ojapopa aguã.

## 7

*Salomão oo mboae ju ojapoveague*

- <sup>1</sup> Ha'e gui Salomão ngoorã ojapo avi, treze ma'etã ogueraa ojapopa aguã.
- <sup>2</sup> Ojapo avi oo Líbano ka'aguy regua guigua. Ipuku-a ma quarenta e cinco metros, ipya ma vinte e dois, ha'e yvatea ma treze raxa'i. Ijytarã ma irundy ryxy rupi omo'ã imo'amy yary guigua. Ha'e gui ijyta hi'aĩ va'e áry omoĩ ijaõ'ia ytarã, yary guigua meme ju.
- <sup>3</sup> Ijaõ'ia ma yary guigua. Opy ja'o ijyvýry rupigua ma quarenta e cinco ikuai. Peteĩ-teĩ opy yvate va'e ja'o ma quinze oĩ. Ha'e va'e ma oyta re meme oĩ.
- <sup>4</sup> Janela ma oĩ avi mboapy ryxy rupi, mboapy ryxy-ryxy jovai rupi janela oĩ.
- <sup>5</sup> Okẽ ha'e janela ikuai va'e ma ijapy irundy va'e meme, janela jova-jovai rupi oĩ va'e ha'e javi.
- <sup>6</sup> Ha'e gui ma Salomão ojapo avi opy guaxurã ijyta reta va'e. Ipuku-a ma vinte e dois metros, ha'e rã ipya ma treze raxa'i. Hexei'i rupi oĩ avi oike atyrã ijyta va'e, ijaõ'ia reve.
- <sup>7</sup> Ojapo avi oo henda openaaty oĩ aguã. Ha'e py ma mba'emo re oikuua pota 'rã. Ha'e nunga rupi oikuua potaaty 'ea. Yary gui meme ojaõ'ipa, pyrõa guive ijaõ'ia peve.
- <sup>8</sup> Ha'e rã ngoo oke atyrã ma ojapo oo henda openaaty oĩa rovai oka oĩ va'e mbyte py, ha'e va'e rami guarã ae ojapo. Faraó rajy Salomão ra'yxýrã ogueru va'ekue rorã avi ojapo, henda openaaty oĩa rami guarã ae ju.
- <sup>9</sup> Ha'e va'e oo ha'e javi ma ita iporãve va'e guigua, oa'ãague rami ojaya pyre meme, oka katy ha'e opy katy guarã ojaya pyre anho oiporu, yvy guive ijaõ'ia rembe peve, ha'e oka katy rupi oka guaxu oĩ va'e peve.
- <sup>10</sup> Ha'e gui yvy re ijytarã omoĩ ita ovareve va'e tuvixakueve, mboapy e'ŷ vy irundy metros meme ipuku-a va'e.
- <sup>11</sup> Ha'e va'e áry rupi ma ita ovarekueve oa'ãague rupi ojaya pyre, yary voi.
- <sup>12</sup> Ha'e gui oka guaxu yvýry rupi ma oĩ mboapy jo'aa ita ojaya pyre, ha'e irundaya ma yary gui ombojo'a. Ha'e ramigua ae avi oĩ SENHOR pegua opy ja'o mbyte pygua, ha'e oikeaty rupi voi.
- <sup>13</sup> Ha'e gui ma huvixa Salomão omondouka guembiguai kuery Tiro tetã gui Hirão ogueru aguã.

<sup>14</sup> Ha'e va'e ma kunha Naftali regua imeve'ý va'e pi'a. Tuu ma ava Tiro pygua overa va'e re ombo'eapo va'ekue. Hirão ma hi'arandu raxa ha'e oikuaapa va'e. Overa va'e gui voi ojapo kuaapa va'e. Ha'e va'e Salomão-a py ou ma vy ojapopa ojapo uka va'e.\*

### 2 Crônicas 3.15-17

<sup>15</sup> Ojapo avi mokoï oo ytarã overa va'e guigua. Peteï-teï yvatea ma oito metros, ha'e gui ixã cinco metros raxa'i va'e ojereea rupi.

<sup>16</sup> Overa va'e gui ojapo avi mokoï ijyta áry guarã. Peteï-teï yvatea ma mokoï metros raxa'i.

<sup>17</sup> Ijyta áry guarã ojapo va'ekue ma ombojegua corrente oipoka pyre py. Sete corrente ojapo peteï árygua reguarã, ha'e sete avi ojapo amboae reguarã.

<sup>18</sup> Ojapo avi yvyra'a ra'angaa mokoï ryxy corrente oï va'e áry rupi ombojegua vy ojao'i aguã ijyta árygua rupi. Ha'e rami ae avi ojapo amboae yta áry rupi.

<sup>19</sup> Ijyta áry ojekuaa va'e ma yvoty rami meme, oo henda oña va'e py rami avi, mokoï metros ya'e meme.

<sup>20</sup> Ijyta árygua re, yvoty katy'i, oipoka pyre py ombojeguaague rovai'i rupi ma ikuai avi duzentos yvyra'a ra'angaa. Ha'e va'e ma ijvvýry rupi omoï ryxy pyre, mokoïve yta re.

<sup>21</sup> Ha'e gui ma ijytarã omopu'ã imo'amy templo oikeaty py. Ijaxu e'ýa re omopu'ã va'ekue ma omboery Jaquim, ha'e rã ijaxua re omopu'ã va'ekue ma omboery Boaz.<sup>†</sup>

<sup>22</sup> Ijyta árygua ma yvoty rami ojekuaa. Ha'e rami py ojapopa ijytarã.

### Overa va'e ryku gui yy mbotyarã ojapoague

<sup>23</sup> Ha'e gui overa va'e ryku gui ojapo avi peteï yy mbotyarã. Ha'e va'e ma ojere rei va'e, irundy metros raxa'i ipya va'e, ha'e rã yvatea ma mokoï metros raxa'i. Ha'e gui ijyke rupi ixã treze metros raxa'i va'e oa'ãa va'e.\*

<sup>24</sup> Iguýry rupi ma omoï hy'akua ra'angaa, meio metro nhavõ re dez ta'angaa omoï. Mokoï ryxy omoï, hy'a guaxu reve jojavi ojapo avi.

<sup>25</sup> Yy mbotya ma doze vaka ra'angaa áry oï. Mboapy ma kuaray ijapu'a'ia katy hi'aï, mboapy ma kuaray oikea katy, mboapy ma kuaray puku-a katy, ha'e mboapy ma kuaray oua katy hi'aï. Ha'e va'e kuery áry ae oï hy'a guaxu. Ha'e rã hevi ma mbyte katy meme ovaẽ oiny.

<sup>26</sup> Ipo guaxu-a ma irundy kuã oña rami. Ijvvýrykue ma karóxa rami hembe va'e, yvoty rami ojekuaa. Yy henyëa ma quarenta mil litros rivyvyi va'e.

### 2 Crônicas 4.6-22

<sup>27</sup> Overa va'e gui ojapo avi dez ryru renderã. Peteï-teï ipuku-a ha'e ipya ma mokoï metros rai'i, ha'e rã yvatea ma peteï metro raxa'i.

<sup>28</sup> Po rami ma hendarã ojapo: hexe oï imbotya, ijyta reve.

<sup>29</sup> Ha'e va'e re ma oï guary, vaka ha'e anjo ipepo va'e ra'angaa. Ijyta re guary ha'e vaka ra'angaa ikuai va'e áry ha'e iguýry ma ombojegua avi.

<sup>30</sup> Peteï-teï henda ma iruéra irundy va'e overa va'e guigua meme. Iruéra'y voi overa va'e guigua. Ipy irundy va'e áry ma oï yryru ytarã mba'emo ryku gui ojapo pyre. Ha'e va'e yvýry ombojegua.

<sup>31</sup> Hi'áry oï avi ijyta ojere va'e. Ha'e va'e yvatea ma meio metro. Hi'vvypy ho'amy va'e yta ma ojere rei va'e. Ipya ma meio metro raxa. Hexe oï avi ijeguarã. Imbotya ma ijapy irundy va'e, ojere rei e'ý va'e.

<sup>32</sup> Iruéra irundy va'e ma imbotya guy rupi ikuai. Hi'y ma henda regua ae oï. Peteï-teï ruéra yvatea ma meio metro raxa'i.

<sup>33</sup> Iruéra ma karóxa regua ramigua meme. Hi'y, ijvvýry rupigua, raios, ha'e mbyte regua voi ma overa va'e ryku guigua meme.

<sup>34</sup> Peteï-teï hyru renda re, ijapy irundyve re oï hendarã. Ha'e va'e voi hexegua ae oï.

\* <sup>7:14</sup> Tiro pygua huvixa ma Hirão avi (5.1-12). Ha'e rã apy omombe'u va'e ma Hirão mboae, overa va'e re ombo'eapo va'e, huvixa e'ý. † <sup>7:21</sup> Tery Jaquim ma "Imoï atãa" 'ea, ha'e rã Boaz ma "Imombaraetea" 'ea, Nhanderuete re ima'endu'aa rupi omboery vy. \* <sup>7:23</sup> 2 Crônicas 4.1-5

<sup>35</sup> Peteĩ-teĩ hyru renda áry re oĩ peteĩ ojere va'e peteĩ po yvatea va'e. Henda áry rupi mba'emo yta ha'e imbotya ikuai va'e ma hexegua ae oĩ.

<sup>36</sup> Hexegua ijyta ha'e imbotya ikuai va'e re ma ojapo anjo, guary ha'e pindo ra'angaa. Peteĩ-teĩ oĩ aguã ha'evea py ae. Ijvvýry rupi oĩ avi ijeguarã.

<sup>37</sup> Ha'e rami vy ojapo dez hyru renderarã. Peteĩ-teĩ ma overa va'e ryku guigua, joo rami meme tuvixa ha'e ojekuaa oiny va'e voi.

<sup>38</sup> Ha'e gui ojapo avi dez hy'a overa va'e guigua. Peteĩ-teĩ ma oitocentos litros raxa'i va'e. Peteĩ-teĩ pya ma mokoĩ metros rai'i. Dez hyru renda ikuai va'e peteĩ-teĩ áry ma oĩ peteĩ hy'a.

<sup>39</sup> Ha'e gui peteĩ nhiruĩ henda omoĩ opyve katy jaiporu kuaa regua re, ha'e rã peteĩ nhiruĩ mboae ma jaiporu kuaa e'ŷa re omoĩ. Ha'e rã hy'a guaxu ma omoĩ jaiporu kuaa regua re, kuaray puku-a ha'e oua katy rami.

<sup>40</sup> Ha'e va'e rire ma Hirão ojapo avi oja guaxu, mba'emo reraa ha'e hy'a. Ha'e rami py ojapopa SENHOR pegua opy guarã huvixa Salomão ojapo uka va'ekue.

<sup>41</sup> Ha'e va'e ma mokoĩ oo ytarã, mokoĩ ojere va'e oo yta áry oĩ va'erã, mokoĩ oipoka pyre mokoĩ ijyta árygua reguarã,

<sup>42</sup> quatrocentos yvyra'a ra'angaa mokoĩ oipoka pyre reve guarã, ha'e rami vy peteĩ-teĩ oipoka pyre re mokoĩ ryxy omoĩ yvyra'a ra'angaa, ombojegua aguã mokoĩ oo yta árygua,

<sup>43</sup> dez hyru renderarã, ha'e hi'áry dez hy'a oĩ va'erã,

<sup>44</sup> hy'a guaxu, ha'e iguýry doze vaka ra'angaa hi'âi va'erã,

<sup>45</sup> oja guaxu, mba'emo reraa, hy'a mboae, ha'e va'e tembiporu ha'e javi Hirão ojapo huvixa Salomão pe, SENHOR pegua opy guarã. Ha'e javive ma overa va'e guigua omoexakã mbyre meme.

<sup>46</sup> Ha'e nungarã ma huvixa ojapo ukapa Jordão yakã yvýry mba'emo omboyku vy yapo porã reia áry, Sucote ha'e Zaretã mbyte.

<sup>47</sup> Ha'e nunga heta raxa ramo Salomão ndopeja ukai. Ha'e rami vy ndoikuua porã potai overa va'e guigua poyia re.

<sup>48</sup> Salomão ojapo uka avi tembiporu SENHOR pegua henda iky'a e'ŷ va'e reguarã: altar ouro guigua, ouro guigua mesa hi'áry mbojape SENHOR renonde omoña aguã,

<sup>49</sup> tataendy'y ouro ete'i guigua, peteĩ nhiruĩ ijaxu e'ŷa re, ha'e peteĩ nhiruĩ ju ijaxua re omoña va'erã henda iky'a e'ŷ ete va'e rexei. Yvoty ra'angaa, tataendyrã ha'e tata mboguea ma ouro guigua meme.

<sup>50</sup> Ha'e gui hy'a'i, tapyí araa, hy'a, heakuã porã va'e ryrurã, tapyí ryrurã, ouro ete'i guigua meme. Ha'e gui henda iky'a e'ŷ ete va'e ha'e templo ropy henda iky'a e'ŷ va'e rokẽ ma ouro guigua meme ojapo.

## 2 Crônicas 5.1

<sup>51</sup> Ha'e rami py huvixa Salomão ojapo ukapa oo SENHOR peguarã. Salomão ogueru avi mba'emo nguu Davi omboaxa ma voi va'ekue: prata, ouro ha'e tembiporu ha'e javi omoimba SENHOR pegua oo re mba'emo hepyve va'e reve.

## 8

### 2 Crônicas 5.2-14

<sup>1</sup> Ha'e gui Salomão omboatypa Israel regua nhomongeta va'ety kuery, peteĩ-teĩ regua akã ikuai va'e ha'e Israel regua yvatekueve. Guenonde py omboaty Jerusalém py ae, tetã Davi rekoague Sião va'e gui templo katy oguerova aguã SENHOR guexeve guarã ojapo va'ekue ryru.

<sup>2</sup> Ha'e ramo avakue Israel regua ha'e javi onhemboatypa okuapy huvixa Salomão-a py. Ngaru ojapoa py ijaty sete jaxya etanim 'epy va'e py.

<sup>3</sup> Israel regua nhomongeta va'ety kuery oupa ramo sacerdote kuery oupi heravy SENHOR ayvu ryru.

<sup>4</sup> Ha'e vy yvy'ã katy oguerova heravy oguy nhemboaty oïaty reve ha'e tembiporu iky'a e'ŷ va'e ha'e py ikuai va'ekue ha'e javi. Sacerdote ha'e levita kuery ae ogueraa.

<sup>5</sup> Ha'e rã huvixa Salomão ha'e Israel kuery onhemboaty va'ekue ha'e javi reve ma hyru renonde rupi oje'oi. Vexa'i ha'e vaka ojuka oje'oivy. Mymba kuery heta raxa ramo oipapaa aguã voi nda'evei.

<sup>6</sup> Ha'e gui SENHOR guexeve guarã ojapo va'ekue ryru ma sacerdote kuery omoõ okuapy oĩ aguã py ae, templo ropyve henda iky'a e'ŷ va'e py, henda iky'a e'ŷ ete va'e py ae, anjo ra'angaa ikuai va'e pepo guy rupi.

<sup>7</sup> Mba'eta anjo pepo ma oipyo imoiny hyru itui aguã áry rupi. Ha'e rami vy yvate rupi ojao'i hyru ha'e yvyra po'i'i hi'yrã ikuai va'e.

<sup>8</sup> Yvyra po'i'i ipuku ete ramo henda iky'a e'ŷ va'e gui ojekuaa henda iky'a e'ŷ ete va'e rexei'i, va'eri oka katy gui ma ndojekuaai. Ha'e py ma itui aŷ peve.

<sup>9</sup> Ha'e gui ayvu ryru py ma mba'eve nda'ipoi Horebe py Moisés itape omoõ va'ekue e'ŷ vy. Egito yvy gui Israel kuery oje'oipa jave py ha'e kuery reve guexeve guarã SENHOR ojapo va'ekue.

<sup>10</sup> Ha'e gui henda iky'a e'ŷ va'e gui sacerdote kuery oẽ ju ramove peteĩ arai ou vy omonyê SENHOR pegua opy rupi.

<sup>11</sup> Ha'e ramo sacerdote kuery nda'evei ha'e py omba'eapove aguã, mba'eta arai rupi SENHOR guigua rexakã ojekuaa va'e omonyê ixupegua opy rupi.

## *2 Crônicas 6.1-11*

<sup>12</sup> Ha'e gui Salomão aipoe'i:

— SENHOR aipoe'i va'ekue pytãa mbyte oĩ aguã re.

<sup>13</sup> Ha'e rami rã anhetẽ ete xee ajapo peteĩ oo porã, peteĩ henda raka'e rã peve reiko aguã — he'i.\*

<sup>14</sup> Ha'e gui huvixa ojere vy ogueroayvu porã Israel kuery onhemboaty va'ekue ha'e javi, opu'ãmba teri okuapy reve.

<sup>15</sup> Ha'e vy aipoe'i:

— Ta'ima'endu'a porãa SENHOR Israel kuery ruete re, mba'eta xeru rãgue'i Davi pe ijayvuague ojapopa ma opo'akaa rupi. Ha'e vy aipoe'i va'ekue:

<sup>16</sup> “Egito yvy gui xevygua kuery Israel regua aipe'apa ára guive, Israel kuery ikuaria tetã neĩ peteїve ndaiporavoi ha'e py peteĩ oo rejapo aguã xerery oĩ aguã. Ha'e rami teĩ aiporavo Davi xevygua Israel kuery ruvixarã”, he'i va'ekue.

<sup>17</sup> Ha'e rami avi xeru Davi opy'a re omoõ peteĩ oo SENHOR Israel kuery ruete rery oĩ atyrã ojapo aguã.

<sup>18</sup> Ha'e rami teĩ xeru Davi pe SENHOR aipoe'i: “Peteĩ oo xerery oĩ atyrã rejapoxea py ha'evea rami ndepy'a re remoõ ha'e rami aguã.

<sup>19</sup> Ha'e rami teĩ ndee e'ŷ 'rã oo rejapo, ha'e rã ndera'y ndegui oiko va'ekue ae 'rã ojapo xerery oĩ atyrã”, he'i raka'e.

<sup>20</sup> Ha'e rami rire SENHOR ojapopa ma ijayvuague, mba'eta xeru Davi rekovia xee aĩ vy aguapy ma ainy tenda Israel kuery re openaaty áry, SENHOR ijayvuague rami vy. Ha'e rami vy ajapo ma oo SENHOR Israel kuery ruete rery oĩ atyrã.

<sup>21</sup> Ha'e py ajapo avi ijayvu ryru oĩ aguã. Ha'e va'e py oĩ itape nhaneramoõ kuery reve Egito yvy gui SENHOR oipe'a jave guexeve guarã ojapo va'ekue oña.

## *2 Crônicas 6.12-42*

<sup>22</sup> Ha'e gui Salomão ma Israel kuery ha'e javi oexaa py SENHOR pegua altar renonde py oĩ. Ha'e vy yva katy opo oupi reve

<sup>23</sup> aipoe'i:

\* **8:13** Nhandeuete Moisés reve ijayvu jave aipoe'i va'ekue arai pytãa py oĩ aguã, heta va'e kuery ijayvua oendu teĩ oexa e'ŷ aguã (Êxodo 19.9). Ha'ekue rami ae avi templo ropy henda iky'a e'ŷ ete va'e py SENHOR pegua hyru oĩa py ma pytã rei, janela noĩ, ha'e oikeaty onhemboty ramo, ajukue hokẽrã omoõ mbyre Jesus omano jave omondoroa peve (Mateus 27.51).

— SENHOR Israel kuery ruete, ndoikoi amboae ndee rami guarā ete yva re neī yva guy yvy re voi, mba'eta nerembiguai kuery opy'a ha'e javi py nerentonde rupi ikuai va'e ndee rerekō 'rā ndereve guarā rejapo va'ekue rami, ha'e remboaxya rupi.

<sup>24</sup> Mba'eta rejapo ae ma nerembiguai xeru Davi pe ndeayvuague. Ndee ae ndeayvu rire ndepo'akaa rupi rejapo ma, aŷ roexaa rami ae.

<sup>25</sup> Ha'e gui aŷ SENHOR Israel kuery ruete, ejapopa ke nerembiguai xeru Davi pe ndeayvuague. Ha'e vy aipo're va'ekue: "Xerenonde ndoatai 'rā nderekovia tenda Israel kuery re openaaty áry oguapy oiny va'erā, xapy'a rei xerenonde rupi nderā'y kuery voi ndee reikoague rami ikuai aguā omoī porā ramo", 're va'ekue.

<sup>26</sup> Ha'e gui aŷ Israel kuery ruete, tojeupity nerembiguai xeru Davi pe ndeayvuague.

<sup>27</sup> — Ha'e rami avi ha'eve 'rā ri nda'u Oreruete yvy re reiko aguā? Ma'ē, mba'eta yva neī yva yvatevea rupi peve voi nandejai 'rā, ha'e vy kova'e oo xee ajapo va'ekue py katuve ma nda'evei 'rā.

<sup>28</sup> Ha'e rami avi SENHOR Xeruete, endu pota ke xee nerembiguai anhembo'e vy ajerurea re, rendu aguā aŷ nerentonde xee nerembiguai ajapukai reve anhembo'ea.

<sup>29</sup> Ha'e rami vy ara py ha'e pyávy kova'e oo re rema'ē riae aguā, ha'e kova'e henda "Ha'e py 'rā xerery oī", 'reague re, kova'e henda py nerembiguai onhembo'e oinya rendu aguā.

<sup>30</sup> Ha'e gui aŷ, endu nerembiguai ha'e Israel kuery ha'e javi kova'e henda py rojapukai rokuapya. Endu ke yva re ne'amba py reĩa gui. Endu ha'e oreperdoa guive.

<sup>31</sup> — Xapy'a rei amongue oirū pe otekoavy ramo ha'ekue re omboayvua ramo ou vy kova'e ndevygua opy altar oī va'e renonde py oura ramo

<sup>32</sup> endu ke yva re reĩa gui, ha'e embovai. Eikuua pota nerembiguai kuery re. Ha'e rami vy embopaga ojeavy va'ekue, hexe ae ojeapa aguā ojapo vaiague. Ha'e rā ha'evea rami oiko va'e ma emboeko porā, ha'evea rami oikoa repy reme'ē vy.

<sup>33</sup> — Ha'e gui xapy'a rei ndevygua Israel kuery ndevy ojeavy rire ngovaigua kuery renonde rupi ho'apa ma vy ndevy ju ojeko rerova 'rā okuapy. Ha'e vy nderery rupi ojapukai vy kova'e oo py ndevy onhembo'e ha'e ojerure ramo

<sup>34</sup> endu ke yva re reĩa gui, ha'e vy eperdoapa ndevygua Israel kuery ojeavyague. Ha'e gui ejapo ju yvy tuu kuery pe reme'ē va'ekue katy ojevy aguā rami.

<sup>35</sup> — Ha'e gui xapy'a rei nderovai heta va'e kuery ojejavypa rire yva rembotypa 'rā nda'okyvei aguā rami, ha'e gui kova'e henda py onhembo'e okuapy vy nderery rupi ojapukai 'rā, ha'e remoingo axy rire ojejavypaa gui ojeko rerova ramo

<sup>36</sup> endu ke yva re reĩa gui, ha'e vy eperdoapa nerembiguai kuery, ndevygua Israel kuery ojeavyague. Embo'e ju tape porā rupi ikuai aguā, ha'e gui embou oky yvy ndevygua kuery ikuai aguā reme'ē va'ekue áry.

<sup>37</sup> — Ha'e gui xapy'a rei kova'e yvy re oiko 'rā karuai e'ŷ vy mba'eaxy vaikue, ha'e'ŷ vy hu'ūmbaa, hatāmba reia, e'ŷ vy tuku karu ha'e ape'i okaru va'e, xapy'a rei hovaigua kuery ojokopa 'rā ha'e kuery retā, ha'e'ŷ vy oiko 'rā ai vaikue e'ŷ vy mba'eaxy va'e rei,

<sup>38</sup> ha'e gui xapy'a rei mava'e rā rei onhembo'e vy ojerure 'rā, ha'e'ŷ vy ndevygua Israel kuery ha'e javi 'rā ojerure okuapy, peteī-teī opy'a raxya oikuaa vy kova'e oo oīa katy opo omoī ramo

<sup>39</sup> endu ke yva re ne'amba py reĩa gui, ha'e vy eperdoa. Ejapo, ha'e vy eme'ē peteī-teī pe oikoague repy, ha'e kuery py'a re oī va'e reikuaapa va'e vy, mba'eta ndee anho'i pavē py'a regua oikuaa va'e reiko.

<sup>40</sup> Ha'e ramo nerentonde ha'e kuery ojererokyje aguā, oreru kuery yvyrā reme'ē va'ekue re ikuia pukukue re.

<sup>41</sup> — Ha'e gui amboae regua voi, ndevygua Israel kuery regua e'ŷ ikuai va'eri oyvy mombyrya gui ou avi 'rā nderery rupi ikuai aguā,

**42** (mba'eta ha'e kuery voi oendu 'rā nderery yvateve va'e omombe'ua rā, ha'e ndejyva reupi vy ndepo'akaa rexa ukaague), ha'e gui ha'e kuery onhembo'e avi 'rā kova'e oo oña katy oma'ẽ reve,

**43** ha'e ramo endu ke yva re ne'amba py reĩa gui, ha'e ejapopa amboae regua kuery ndevy ojerurea, ha'e rami vy yvy regua ha'e javi nderery oikuaa aguã, ndevyguia Israel kuery rami ha'e kuery voi nerondenre ojererokyjea rupi ikuai aguã, ha'e oikuaapa aguã kova'e oo xee ajapo va'ekue py nderery remoñague.

**44** — Ha'e gui xapy'a rei ndevyguia kuery oje'oi 'rā ngovaigua kuery reve joe opu'ã aguã katy, ha'e gui tape rupi remondoukaa py onhembo'e 'rā ndevy pe SENHOR, kova'e tetā reiporavo va'ekue ha'e kova'e oo nderery oĩ atyrā rejapo uka va'ekue katy oma'ẽ ramo

**45** endu ke yva re reĩa gui onhembo'e vy ojerure okuapya, ha'e ejapo ha'evea rami.

**46** — Xapy'a rei ma ha'e kuery ojejavy 'rā nderovai (mba'eta jipoj ojejavy e'ỹ va'erã), ha'e ramo ha'e kuery rovai ndepoxy vy remboaxapa 'rā hovaigua kuery po py, ha'e kuery guekoia katy ogueraapa aguã escravo-rā, mombyry e'ỹ vy ha'e'i rupi teĩ ae ma.

**47** Ha'e gui yvy mamo rā rei escravo-rā ogueraa ague re ikuiaia py xapy'a rei ha'e kuery onhemboaxy vy ojeko rerova 'rā, ha'e yvy escravo ikuiaia py ae ndevy ojerure vy aipoe'i 'rā okuapy: "Rojejavypa, teko vai rupi anho orekuai va'ekue", he'i 'rā okuapy.

**48** Ha'e rami vy xapy'a rei ndevy guarã ju ojeko rerova 'rā opy'a ha'e onhe'ẽ ha'e javi py, yvy hovaigua kuery escravo-rā ogueraa ague py ae, ha'e vy ndevy onhembo'e 'rā okuapy oyvyrā tuu kuery pe reme'ẽ va'ekue katy oma'ẽ reve, kova'e tetā ha'e kova'e oo nderery oĩ atyrā ajapo va'ekue katy voi.

**49** Ha'e ramo endu ke yva re ne'amba py reĩa gui ha'e kuery onhembo'e vy ojerure okuapya, ha'e ejapo ha'evea rami.

**50** Eperdoa ndevyguia kuery ndevy ojejavyague, nderovai rupi opa mba'e py ojapo vai rā. Ejapo escravo-rā heraare kuery omboaxy aguã rami.

**51** Mba'eta ndevyguia kuery ma ndevy guarã ae Egito yvy gui reipe'a va'ekue, tata rupa ferro guigua mbyte py ojexavaia gui.

**52** Ha'e rami vy eikuua pota riae nerembiguai ha'e ndevyguia Israel kuery ojerure okuapya re, opa mba'e re ndevy ojapukai rā rendu aguã.

**53** Mba'eta SENHOR xeruete, ndee ma kova'e yvy regua ha'e javi mbyte gui reipe'apa raka'e ore ndevyguia kuery ae orekuai aguã, Egito yvy gui oreru kuery reipe'apa jave nerembiguai Moisés rupi ndeayvuague rami vy – he'i.

### *Salomão heta va'e kuery ogueroayvu porãague*

**54** Ha'e gui Salomão opa ma SENHOR pe onhembo'e ha'e ojerure rire, guenapy'ã re oĩ reve yvate katy opo oupi oinya gui opu'ã ju SENHOR pegua altar oĩ va'e renonde gui.

**55** Opu'ã ho'amy vy ogueroayvu porã Israel kuery ijaty okuapy va'e ha'e javi. Ha'e vy ijayvu atã reve aipoe'i:

**56** — Ta'ima'endu'a porãa SENHOR re, ojeupeguia Israel kuery pe optyu'u aguã ome'ẽ rire ijayvuague ha'e javi rami vy. Nhanemoingo porã aguã re guembiguai Moisés rupi ijayvuague neĩ pete'i ayvu nomboaxa rivei.

**57** Ha'e gui SENHOR Nhanderuete toiko riae peẽ kuery reve, nhaneramoĩ kuery reve oikoague rami ae. Tanhanepytyvõ e'ỹ eme, tanhandereja eme guive,

**58** nhanekuraxõ tomombyta ojeupe guarã ae, ixuguigua tape ha'e javi rupi nhandekuai aguã, ha'e jajapopa aguã ojapo uka va'ekue, ijayvuague ha'e oipotaa nhanderu kuery pe omombe'u va'ekue.

**59** Tove po rami xeayvu vy SENHOR renonde rupi ajerurea toĩ riae SENHOR Nhanderuete renonde py, ara py ha'e pyávy, ha'e rami vy guembiguai ha'e ojeupeguia Israel kuery oepy kuerei aguã, ko'ẽ nhavõ nhaikotevẽa rami,

**60** yvy regua ha'e javi oikuua aguã SENHOR ae Nhanderuete oikoa, ha'e amboae ndoikoia.

**61** Tove penekuraxõ py SENHOR Nhanderuete pegua ete tapendekuai, ha'e ijayvuague rupi anho peiko ha'e ojapo uka va'ekue pejapopa aguã, aÿ pejapoa rami ae – he'i.

**2 Crônicas 7.4-10**

**62** Ha'e gui huvixa ha'e Israel kuery hexeve ikuai va'e ha'e javi ma mymba kuery ome'ẽ okuapy SENHOR renonde.

**63** Salomão ma SENHOR reve peteĩ rami ju ikuiaia reguarã ome'ẽ avi vinte e dois mil vaka ha'e cento e vinte mil vexa'i kuery. Ha'e rami py huvixa ha'e Israel kuery ha'e javi reve SENHOR pegua oo omboaxa okuapy ipo py.

**64** Ha'e va'e árave huvixa omboaxa avi oka SENHOR pegua oo rexei oĩ va'e. Mba'eta ha'e py ae ome'ẽ mymba oapy reve, ha'e hexeve peteĩ rami ikuai aguã regua kyrakue. Mba'eta altar overa va'e guigua SENHOR renonde oĩ va'e ma kyrí'i ete rã noimbã reguai mymba oapy reve ome'ẽ va'e, mba'emo aju guigua ha'e hexeve peteĩ rami ikuai aguã regua kyrakue oapy va'e.

**65** Ha'e va'e jave ae avi Salomão ojapo ngaru oguy'i py ikuai aguã Israel kuery ha'e javi reve.<sup>†</sup> Heta ete ijaty okuapy SENHOR Nhanderuete renonde py, Hamate tekoá py nhavaëa'i ha'e Egito yakã katy'i gui ou va'ekue. Sete ára rire sete ára re ju, ha'e javi vy catorze ára re ikuai.

**66** Ngaru oikoa py oito araa py ma omondoukapa heta va'e kuery, ha'e rã ha'e kuery ju ogueroayvu porã okuapy nguvixa. Ha'e gui mae ma oje'oipa ju ngoo katy, ov'y'a ete ha'e opy'a py oguerovy'a reve opa mba'e py SENHOR guembiguai Davi pe ojapoague, ha'e ojeupagua Israel kuery pe guive.

## 9

**2 Crônicas 7.11-22**

**1** Ha'e gui huvixa Salomão ojapopa ma oo SENHOR peguarã, ngoorã ha'e opa mba'e onhembopy'aa rami ojapoxe va'ekue voi.

**2** Ha'e ramo peteigüe ju ixupe SENHOR ojexa uka, Gibeão py ojexa ukaague rami.

**3** Ha'e vy SENHOR aipoe'i:

— Xee aendu ae ma xerenonde py renhembo'e vy rejerurea. Ha'e rami vy xee ajapo oo rejapo va'ekue iky'a e'ÿ va'e oĩ aguã rami, ha'e py xerery amoï aguã raka'e rã peve guarã. Ha'e va'e re ama'ẽ vy xepy'a py xema'endu'a riae 'rã ára nhavõ.

**4** Ha'e gui xapy'a rei xerenonde rupi nderu Davi oikoague rami ndee voi reiko ramo, ndepy'a ha'e javi py anhetê ete rupi ae ri reiko vy ajapo uka va'ekue, xeayvuague ha'e aipotaa ha'e javi rejapopa ramo,

**5** ha'e ramo raka'e rã peve guarã amoï atã 'rã nderu Davi pe xeayvuague, hamymino kuery va'e regua amoingo riae 'rã xevygua Israel kuery re opena va'erã. Ixupe aipoa'e va'ekue: "Nderekovia ndoiko e'yi 'rã tenda Israel kuery re openaaty áry oguapy oiny va'erã", ha'e va'ekue.

**6** Ha'e gui xapy'a rei peẽ ha'e pendera'y kuery marã rami vy xegui pejep'e a vy ajapo uka va'ekue ha'e xeayvuague ndapejapovei vy peo 'rã tuuete kuery mboae re, ha'e kuery pembojeroviaa rupi,

**7** ha'e ramo ri ramo xee aipe'apa 'rã Israel kuery ijyvyrã ame'ẽ va'ekue gui, ha'e kova'e oo xerery oĩ atyrã aiky'a'opa va'ekue voi mombyry amombopa 'rã xerenonde gui. Ha'e rami rire Israel kuery ikuai 'rã yvy regua kuery ojojai rei vy ijayvu rei okuapy aguã rami.

**8** Kova'e oo ma aÿ omboeteave tei ha'e va'e jave py oñague rupi oaxa va'e kuery oexa vy onhemondyipa 'rã. Ha'e vy otuvy nhe'ẽ ha'e aipoe'i 'rã: "Mba'e re tu SENHOR guĩ rami ete ri ombovaipa uka kova'e yvy ha'e kova'e oo?" he'i 'rã okuapy.

**9** Ha'e rã ombovaipa 'rã: "Ha'e rami ete ombovaipa uka mba'eta ha'e kuery oejapa rire SENHOR nguuite Egito yvy gui tuu kuery oipe'a va'ekue, ha'e tuuete mboae pe ju ova

<sup>†</sup> **8:65** Ngaru oguy'i py ikuai aguã regua ma ha'e kuery rekorã Moisés rupi oeja pyre (Levítico 23.33-36; Deuteronômio 16.13-15).

vy omboete ha'e ombojerovia okuapy ramo. Ha'e nunga rupi ae rima ha'e kuery áry SENHOR ombou raka'e guĩ rami ete ojexavai aguã", 'ea 'rã.

### *2 Crônicas 8.1-18*

<sup>10</sup> Vinte ma'etã py mae ma Salomão ojapopa mokoĩ oo, SENHOR peguarã ha'e ojeupe guarã guive.

<sup>11</sup> Ha'e Salomão oipotaa rami ixupe Tiro pygua huvixa Hirão ma ombou yvyra yary ha'e cipreste guigua, ouro guive. Ha'e gui Hirão pe ju Salomão omboaxa vinte tetã Galiléia yvy regua.

<sup>12</sup> Ha'e ramo guetã Tiro gui Hirão oo oexa aguã tetã Salomão omboaxa va'ekue, teĩ ndojou porãi.

<sup>13</sup> Ha'e rami vy aipoe'i ixupe:

— Xeryvy, kova'e tetã ae ma nhiã xevy remboaxa va'ekue? — he'i. Ha'e rami vy omboery Cabul yvy, aÿ peve guarã.\*

<sup>14</sup> Hirão ma huvixa pe ouro guigua quatro mil quilos rivyvyi omondouka va'ekue.

<sup>15</sup> Ha'e gui Salomão ma nhomomba'eapo nhea'ã SENHOR pegua oo ojapo aguã, ngoorã, ha'e gui Milo, Jerusalém korarã, Hazor tetã, Megido ha'e Gezer tetã avi,

<sup>16</sup> mba'eta Egito pygua huvixa Faraó ou vy Gezer tetã re ipo'aka va'ekue. Ha'e vy oapypa vy ojukapa ha'e py cananeu kuery ikuai va'ekue. Ha'e vy Salomão pe ju omboaxa ta'yxyrã guajy ome'ẽ javé.

<sup>17</sup> Ha'e nunga rupi ae Salomão ojapo ju Gezer, Bete-Horom yvy'ã guy rupigua,

<sup>18</sup> Baalate ha'e Tadmor, ha'e va'e yvy re tekao e'ÿa oĩ va'e py ae.

<sup>19</sup> Ojapo avi tetã mba'emo oguereko va'e ha'e javi omoĩ porã atyrã, ha'e tetã ikaróxa ikuai aguã, kavaju árygua kuery rekoarã, ha'e Jerusalém py ojapoxe va'ekue ha'e javi, Líbano ha'e amboae yvy re openaa ha'e javi rupi peve.

<sup>20</sup> Ha'e gui okuave teri amorreu kuery regua, heteu, ferezeu, heveu ha'e jebuseu kuery Israel kuery regua e'ÿ ikuai va'e.

<sup>21</sup> Ha'e va'e kuery ra'y kuery okuave va'e ma Israel kuery ndojukapai va'ekue teĩ Salomão omomba'eapo nhea'ã, aÿ peve guarã.

<sup>22</sup> Ha'e rã Israel kuery va'e regua ma neĩ peteĩve Salomão nomomba'eapoi escravo rami. Ha'e va'e kuery ma ixupe ikuai joe opu'ãa rupi, huvixa kuery, yvatekueve, capitão kuery, karóxa re opena va'e ha'e imboguataaty kuery.

<sup>23</sup> Ha'e gui Salomão rembiguai kuery mba'emo ojapo uka va'e re opena va'ety yvatekueve ma quinhentos e cinqüenta ikuai. Ha'e va'e kuery ma omba'eapo va'e kuery re opena.

<sup>24</sup> Ha'e gui Faraó rajy ma tetã Davi rekoague py oÿague gui ova ju hoorã Salomão ojapo uka va'ekue py. Ha'e gui mae ojapo Milo.†

<sup>25</sup> Ma'etã nhavõ mboapykue kuerei 'rã Salomão ome'ẽ mymba kuery oapy reve ha'e peteĩ rami ikuai aguã regua, altar SENHOR peguarã ojapo va'ekue áry. SENHOR renonde altar oĩ va'e áry oapy uka avi heakuã porã va'e. Ha'e rami py ojapopa oo ixupe guarã.

<sup>26</sup> Eziom-Geber py huvixa Salomão ojapo avi kanoã guaxu, Elate katy'i, ye'ẽ pytã va'e yvýry, Edom yvy re ae.

<sup>27</sup> Ha'e va'e kanoã guaxu mboguataarã Hirão ombou guembiguai kuery yy rupi oguata va'ety, ye'ẽ rupi ikuai kuaa va'e meme, Salomão rembiguai kuery reve omboguata va'erã.

<sup>28</sup> Ha'e kuery ma Ofir py ovaẽ vy ha'e gui ojogua catorze mil quilos ouro guigua, ha'e gui huvixa Salomão pe ju ogueru.

\* <sup>9:13</sup> Tery Cabul ma "Mba'everã ndovarei va'e" 'ea. Ha'e rami omboery ndojou porãi vy. † <sup>9:24</sup> Milo ma peteĩ henda Jerusalém tetã regua Salomão omombaraete va'ekue.

<sup>1</sup> Ha'e gui Sabá pygua huvixa kunha oendu avi Salomão reko omombe'ua rã, SENHOR rery omboetea voi. Ha'e rami vy ou haxy-axy va'e re oporandu aguã.

<sup>2</sup> Ha'e vy Jerusalém tetã py ovaẽ guembiguai kuery heta va'e reve. Guymba camelo kuery ombovoyi heruvy tembi'u irũrã, mbovy rei e'ŷ ouro ha'e ita iporãve va'e re. Ha'e gui Salomão renonde py ovaẽ vy ixupe oporandu onhembopy'aague ha'e javi rami.

<sup>3</sup> Ha'e ramo opa mba'e re oporandu rã Salomão ombovai, mba'eta ixupe neĩ peteĩ henda py ma voi ndaxyi omombe'u porãve aguã.

<sup>4</sup> Ha'e ramo Sabá pygua huvixa kunha oikuua Salomão 'arandua ha'e javi, oexa avi oo ojapo uka va'ekue,

<sup>5</sup> mesa áry tembi'u oguerua va'e, yvatekueve ikuaiaty, hembiguai kuery omba'eapoa, ijao guive, karo rerua kuery ha'e mymba kuery altar áry SENHOR pe oapyaty. Ha'e va'e ha'e javi oexa vy onhemondyi rei oiny.

<sup>6</sup> Ha'e vy aipoe'i huvixa pe:

— Anhetẽ ete ae ra'e xerekaoa py ayvua ndereko regua aendu va'ekue ha'e ne'arandua regua voi.

<sup>7</sup> Ha'e rami teĩ xee ma ha'e va'e ayvu ndaroviai va'ekue, apy aju vy xee ae rexo py aexa e'ŷa ja. Anhetẽ neĩ mbyte rupi peve ma voi xevy nomombe'uai va'ekue, mba'eta ndereko omombe'ua rã aenduague gui ne'arandupave ra'e, rerekopave ha'e ndere ima'endu'a porã mbyve ete va'e.

<sup>8</sup> Ovy'a ete okuapy nerembiguai avakue nerentonde rupi ikuai va'ety, mba'eta ha'e kuery oendu 'rã ne'arandua rupi ndeayvua.

<sup>9</sup> Ta'ima'endu'a porãa avi SENHOR Nderuete re, mba'eta ndererovy'a vy tenda Israel kuery re openaaty áry nemoï rire. Israel kuery SENHOR oayvu riae vy ae nemoï huvixarã, ha'evea rami rejoguereko ha'e reikuaa pota aguã — he'i.

<sup>10</sup> Ha'e rami vy huvixa pe kunha va'e ome'ẽ quatro mil quilos ouro guigua, heta tembi'u irũrã ha'e ita iporãve va'e guive. Neĩ peteĩgueve ma ndogueruai teri mba'emo porã Sabá pygua huvixa kunha Salomão pe ome'ẽ va'ekue ramigua ete.

<sup>11</sup> Ha'e gui Hirão mba'e kanoã guaxu Ofir gui ouro ogueru va'e ma ha'e katy gui ogueru avi yvyra sândalo aygue ha'e ita iporãve va'e.

<sup>12</sup> Ha'e va'e yvyra sândalo gui ma huvixa Salomão ojapo uka jopy-jopy ovyaty SENHOR pegua opy ha'e ngopy guarã, ha'e gui mba'epu ixã reta va'e ha'e mbaraka oporaei va'e kuery peguarã. Ha'e va'e regua yvyra ma neĩ peteĩgueve ndogueruai teri ha'e py, ha'e aŷ peve voi ndoexaavei ha'e va'e regua yvyra.

<sup>13</sup> Ha'e gui Sabá pygua huvixa kunha pe huvixa Salomão ju ome'ẽ mba'emo ojerurea ha'e javi, mba'emo ome'ẽxeia'i py ome'ẽ va'e áryve rupi. Ha'e ramo ojevy vy oyvy katy ju oo, guembiguai kuery ha'e javi reve.

## 2 Crônicas 1.14-17; 9.13-28

<sup>14</sup> Ha'e gui ma'etŷa nhavõ Salomão pe ouro oguerua va'e poyikue ma vinte e dois mil quilos,

<sup>15</sup> mba'emo vendea kuery, mba'emo mboekoviaaty, Arábia pygua huvixa ha'e ijyvy re opena va'ety kuery ixupe ome'ẽ kuerei va'e áryve.

<sup>16</sup> Ha'e ramo ouro ombope pyre gui Salomão ojapo duzentos hu'y jokoa tuvixave va'e. Peteĩ-teĩ hu'y jokoarã ma seis quilos ouro opejaa.

<sup>17</sup> Ouro ombope pyre gui ojapo avi trezentos hu'y jokoa kyrïve va'e. Ha'e va'e regua hu'y jokoarã peteĩ-teĩ ma dois quilos rai'i ouro opejaa. Ha'e va'e ma oo Líbano ka'aguy regua guigua py huvixa omoï porã ukapa.

<sup>18</sup> Huvixa ojapo avi peteĩ tenda tuvixave va'e marfim guigua, ha'e vy onhovãmba ouro ete py anho.

<sup>19</sup> Ha'e va'e tenda renonde guarã ma ojapo mboapy meme pyrõa. Henda kupe ma ojere rei va'e. Ijyke jovaive re ma omoĩ avi jyva ytarã oguapyaty yvýry, ha'e ijyva yta yvýry ma mokoĩ guary ra'angaa omopu'ã imo'amy.

<sup>20</sup> Mboapy meme pyrõa ikuai va'e áry ma doze avi omoĩ guary ra'angaa, peteĩ-teĩ pyrõa apy reguarã. Ha'e va'e nunga ma neĩ peteĩve huvixa pe ma voi ojapoa va'e'ý teri.

<sup>21</sup> Karo huvixa Salomão oy'uaty va'e ma guive rã ouro guigua meme, ha'e gui oo Líbano ka'aguy regua guigua py tembiporu ikuai va'e voi ouro guigua meme avi. Ha'e va'e re neĩ ruxã'i ma voi noĩ prata, mba'eta Salomão oĩ jave prata rive nombovarei.

<sup>22</sup> Mba'eta huvixa oguerekko reta ye'ẽ rupi Társis guigua kanoã guaxu, Hirão mba'e reve omboguataa va'e. Mboapy ma'etýa py kuerei 'rã Társis gui kanoã guaxu ojevy okuapy vy ogueru ouro, prata, marfim, karaja ha'e jayru guaxu.

<sup>23</sup> Ha'e rami vy yvy jave re huvixa kuery ikuai va'e gui huvixa Salomão ipo'akave, o'arandua py ha'e mba'emo oguerekopaa py.

<sup>24</sup> Ha'e ramo oĩa py yvy jave gui ou 'rã okuapy o'arandua rupi ijayvu rã oendu aguã.

<sup>25</sup> Ma'etýa nhavõ peteĩ-teĩ ogueru 'rã mba'emo ixupe ome'ẽ va'erã: ouro ha'e prata guigua, ajukue, tembiporu, kavaju ha'e mburika kunha, tembi'u irûrã guive.

<sup>26</sup> Ha'e ramo Salomão oguerekopave ovy karóxa ha'e kavaju áry guarã. Mil e quatrocentos karóxa oguerekko, ha'e doze mil kavaju áry guarã. Ha'e va'e ma joa py e'ý-e'ý 'rã oguerekko tetã karóxa ikuaiaty rupi, Jerusalém tetã py huvixa oĩa py guive.

<sup>27</sup> Prata ma ita rami rive huvixa omboetave Jerusalém py, ha'e gui yary voi oata aguã rami e'ý ojapo sicômoro'y tekoa e'ýa rupi ikuai va'e rami rive.

<sup>28</sup> Kavaju Salomão rymbarã ma Egito ha'e Cilícia yvy gui ogueru. Cilícia guigua ma huvixa rembiguai mba'emo vendea kuery ae ogueru hepy oĩa rami.

<sup>29</sup> Ha'e rã Egito gui peteĩ-teĩ karóxa ogueru 'rã seiscentos hatã'i va'e repy prata guigua re, ha'e rã kavaju ma cento e cinqüenta repy re. Ha'e rami ae avi mba'emo vendea kuery ovende ju 'rã heravy heteu ha'e Síria pygua huvixa kuery peguarã.

## 11

### *Tuuete kuery mboae re rive Salomão ojeroviaague*

<sup>1</sup> Ha'e gui Faraó rajy anho e'ý huvixa Salomão oayvu, heta oguerekko avi kunhague yvy mboae guigua: Moabe, Amom, Edom, Sidom ha'e Hete guigua.

<sup>2</sup> Ha'e va'e regua kunhague re ma SENHOR aipoe'i ma voi va'ekue Israel kuery pe: "Pejoguerekko eme ha'e kuery reve, neĩ ha'e kuery ma voi tapendererekko eme, pendepy'a py penhembotavy uka e'ý aguã tuuete kuery mboae re rive pevapa aguã", he'i raka'e teĩ ha'e va'e regua ae Salomão oayvu.

<sup>3</sup> Ha'e rami vy setecentos kunhague oguerekko huvixa rajy meme, ha'e gui trezentos ta'yxy jevy kuery. Ha'e va'e kunhague ma ojapo amboae rami rei ipy'a aguã rami.

<sup>4</sup> Ha'e vy tuja'ive ma jave ta'yxy kuery ombopy'a rerova ete tuuete mboae ramigua kuery re ju ombojerovia aguã. Ha'e ramo opy'a re anhetê rupi ve'ý oiko SENHOR nguuete pe, nguu Davi oikoague rami e'ý.

<sup>5</sup> Ha'e rami vy Sidom pygua kuery xyete ra'angaa Astarote pe Salomão oiko, ha'e gui Amom pygua kuery ruete Milcom ojeguarupy va'e pe guive.

<sup>6</sup> Ha'e rami vy SENHOR renonde ha'eve'ý va'e Salomão ojapo vy SENHOR pe anho ve'ý oiko, nguu Davi oikoague rami e'ý.

<sup>7</sup> Ha'e va'e jave ma Salomão ojapo peteĩ oo Moabe kuery ruete Quemos ojeguarupy peguarã, yvyty Jerusalém katy'i ae, ha'e Amom kuery ruete Moloque ojeguarupy peguarã guive.

<sup>8</sup> Ha'e rami ae avi gua'yxy kuery peteĩ-teĩ regua pe ojapo, ha'e kuery nguuete ramigua kuery pe heakuã porã va'e oapy ha'e mymba ojuka aguã.

### *Salomão rovai Nhanderuete onhemoīague*

<sup>9</sup> Ha'e nunga rupi SENHOR opu'ã Salomão rovai, SENHOR Israel kuery ruete pe oikoa gui ova ramo opy'a py, mokoīgue ixupe ojexa uka va'ekue ri.

<sup>10</sup> Ha'e rami e'ŷ aguā ijayvu ae ma, tuuete ramigua kuery mboae pe oiko e'ŷ aguā. Ha'e rami teĩ ndoikoi ae SENHOR ijayvuague rami.

<sup>11</sup> Ha'e nunga rupi SENHOR aipoe'i ju Salomão pe:

— Nami ete reiko vy xerupive guarã ajapo va'ekue ha'e ajapo uka va'ekue gui rejep'e'a ma ramo ndegui ju aipe'a 'rã ndepo'akaa, nerembiguai pe ju amboaxa aguā.

<sup>12</sup> Ha'e rami teĩ reĩ teria ja ndaipe'ai 'rã, nderu Davi re ama'ẽ vy. Ha'e rami 'rãgue py ndera'y po gui 'rã aipe'a.

<sup>13</sup> Ha'e rami avi ndaipe'apai 'rã guive ndepo'akaa. Ha'e vy ndera'y po py aeja 'rã peteĩ regua, xerembiguai Davi re ha'e Jerusalém tetã re xema'endu'a vy, aiporavo rire.

### *Salomão rovai guarã Nhanderuete omopu'ãague*

<sup>14</sup> Ha'e gui SENHOR omopu'ã Salomão rovai guarã. Ha'e va'e ma Edom pygua Hadade, Edom pygua huvixa ramymino ae.

<sup>15</sup> Mba'eta Edom yvy re Davi oiko jave ixondaro kuery ruvixa Joabe voi ou avi omanogue onhono porã aguā. Ha'e va'e jave py ojuka avakue Edom pygua ha'e javi.

<sup>16</sup> (Mba'eta mboapy meme jaxy re Joabe oiko raka'e ha'e py Israel pygua xondaro kuery reve, Edom pygua avakue ojukapa peve.)

<sup>17</sup> Ha'e va'e jave py Hadade kunumi teri reve onha ovy amongue avakue Edom pygua tuu rembiguai kuery reve, Egito katy oje'oi aguā.

<sup>18</sup> Midiã yvy gui oje'oi vy Parã katy oguata jogueravy. Ha'e py ojouve ju ngupive guarã, ha'e vy oguerovaẽmba Egito pygua huvixa Faraó-a py. Ha'e va'e ma Hadade pe ome'ẽ peteĩ oo ijyvyrã guive, ha'e vy ijayvu oipytyvõ aguā re.

<sup>19</sup> Faraó omboaxy ete vy Hadade ra'yxýrã ome'ẽ avi ngovaja gua'yxy kypy'y va'e.

<sup>20</sup> Ha'e va'e ma ta'yxy Tafnes kypy'y. Ha'e va'e ma oikuavã'i ava'i, Genubate hery va'e. Ha'e va'e ma Faraó ro py ae Tafnes omongakuaa herekovy, Faraó ra'y kuery rupi ae Genubate oiko.

<sup>21</sup> Ha'e gui Egito yvy re Hadade oikoa py oendu Davi guamoĩ kueryague rami ndoikovevei'i maa, ha'e ixondaro kuery ruvixa Joabe voi omano ma avia. Ha'e ramo Hadade aipoe'i Faraó pe:

— Tajevy ju xerekaoa katy.

<sup>22</sup> Ha'e ramo Faraó oporandu ixupe:

— Mba'e tu xereve reikoa py oata ndevy, ndeyvy re rejevy aguā?

Ombovai:

— Any, mba'eve rei ndoatai, teĩ taa ju — he'i.

<sup>23</sup> Nhanderuete omoingo avi amboae Salomão rovai guarã. Ha'e va'e ma Eliada ra'y Rezom, opatõ Zobá pygua huvixa Hadadezer gui ojava va'ekue.

<sup>24</sup> Ha'e va'e ma guembiguai kuery avakue omboaty vy onhemoingo ha'e kuery ruvixa. Ha'e gui Davi pegua xondaro kuery jojukapa rire ha'e kuery ma Damasco katy oje'oi. Ha'e py ma huvixaverã omoĩ okuapy Rezom.

<sup>25</sup> Ha'e va'e ma Salomão oikovea pukukue re Israel kuery rovaigua oiko. Hadade rami ae avi omoingo axy, Israel kuery re nda'ija'eí vy Síria pygua kuery ruvixa onhemoingo rire.

### *Israel kuery ruvixa Jeroboão oĩ 'rãa re profeta Aías ijayvu ma voiague*

<sup>26</sup> Ha'e gui Nebate ra'y Jeroboão ma Efraim regua oiko tekaoa Zereda pygua, Salomão rembiguai ae oiko. Ixy ma imeve'ŷ va'e, Zerua hery va'e. Ha'e va'e ava ae opo oupi huvixa rovai.

<sup>27</sup> Po rami ae huvixa rovai oupi opo. Ha'e va'e jave py Salomão ma Milo ojapoa rupi ombojoja yvy nguü Davi rekoague rupi.

<sup>28</sup> Ha'e gui Salomão oexa rā Jeroboão ava ipy'a guaxu ha'e oiko kuaa va'e, kumu'ni omomba'epo kuaa va'e ae. Ha'e ramo omopena José ramymino kuery regua omomba'epo nhea'āmby kuery ha'e javi re.

<sup>29</sup> Ha'e gui ma Jerusalém tetā gui Jeroboão oguata vy tape rupi nhovaexí Siló pygua profeta Aías reve. Ha'e va'e ma peteī ao puku ipyau'i va'e py onhemonde ovy, ha'e rā ha'e kuery moko'i ikuai nhuūndy py.

<sup>30</sup> Ha'e ramo Aías ao puku ipyau'i va'e ojee gui omboi vy omondoro. Doze ra'ykue omboja'o.

<sup>31</sup> Ha'e vy aipoe'i Jeroboão pe:

— Ejopy ke dez ra'ykue ndejeupe guarã, mba'eta po rami ijayvu SENHOR Israel kuery ruete: Ma'ẽ, Salomão po gui amondoropa 'rā ipo'akaa, ha'e vy ndevy pe ju amboaxa 'rā dez regua.

<sup>32</sup> Ha'e rami avi peteī regua aeja teri 'rā ipo py, xerembiguai Davi ha'e Jerusalém tetā re ama'ẽ vy, Israel kuery ha'e javi regua gui aiporavo rire.

<sup>33</sup> Mba'eta xegui Salomão ojepe'a vy guenapy'ã re oĩ Sidom kuery xyete Astarote ra'angaa renonde, Moabe pygua kuery ruete Quemos ha'e Amom pygua kuery ruete Milcom ra'angaa renonde. Xeguigua tape rupi ve'ŷ oiko, xerenonde ha'eve va'e ndojapoxevei vy. Xeayvuague rupi ve'ŷ, aipotaa rami ve'ŷ oiko, tuu Davi oikoague rami e'ŷ.

<sup>34</sup> Ha'e rami teī ixugui ipo'akaa ndaipe'apa etei 'rā guive. Ha'e rami 'rāgue py oikovea pukukue reguarã amoĩ huvixarã, xerembiguai Davi aiporavo va'ekue re ama'ẽ vy, mba'eta Davi ma mba'emo ajapo uka va'ekue ha'e xeayvuague ha'e javi rupi oiko va'ekue.

<sup>35</sup> Ha'e rā ta'y po gui ma aipe'a 'rā ipo'akaa, dez regua va'e, ndevy pe ju amboaxa 'rā.

<sup>36</sup> Ta'y po py peteī regua'i 'rā ame'ẽ, xerenonde xerembiguai Davi rekoria peteī hendy va'e oĩ riae aguã raka'e rā peve guarã, Jerusalém tetā xerery oĩ atyrã aiporavo va'ekue py ae.\*

<sup>37</sup> Ha'e gui ndee romoĩ ramo ndepo'aka 'rā ndepy'a py reipota va'e re rei, Israel pygua huvixa reĩ vy.

<sup>38</sup> Ha'e gui xee ajapo uka va'e ha'e javi ri rejapo ramo, ha'e xeguigua tape rupi reiko vy xerenonde rupi ha'evea ramigua ri rejapo, xeayvuague ha'e ajapo uka va'ekue remoimba ri xerembiguai Davi ojapague rami avi, ha'e ramo xee aiko 'rā ndereve, ha'e ndevy ajapo 'rā peteī oo oĩ riae va'erã, Davi pe ajapo va'ekue ramigua, mba'eta ndevy pe amboaxa 'rā Israel kuery re repena aguã.

<sup>39</sup> Ha'e rā Davi ramymino kuery ma ambojexavai 'rā, teī raka'e rā peve'ŷ guive – he'i.

<sup>40</sup> Ha'e rami rā Salomão ojukaxe teī Jeroboão. Ha'e va'e oiko katu vy Egito yvy katy ojava, Egito pygua huvixa Sisaque reve jogueroayvu aguã. Ha'e py ae oiko Salomão omano peve.

### *2 Crônicas 9.29-31*

<sup>41</sup> Ha'e gui oïve rei tema Salomão rekoke regua. Ha'e rami avi hi'arandua ha'e mba'emo ojapo va'ekue ha'e javi noĩ 'rā teve kuaxia Salomão rekoke oña re?

<sup>42</sup> Quarenta ma'etŷ re Salomão oĩ huvixa Jerusalém py, Israel kuery ha'e javi re openaa rupi.

<sup>43</sup> Ha'e gui guamoĩ kueryague rami ndokovevei'i ma ramo onhono porãa tetā Davi rekoague py ae. Ha'e gui ta'y Roboão ju oĩ nguu rekoria.

---

\* <sup>11:36</sup> "Hendy va'e" he'ia ma huvixa raka'eve rā oiko aguã re ijayvu vy, ha'e Jesus Cristo rekorã re guive (1 Reis 15.4; 2 Reis 8.19; 2 Crônicas 21.7; Salmo 132.17; Lucas 2.30-32; João 8.12).

<sup>1</sup> Ha'e gui Roboão oo Siquém katy, mba'eta ha'e py Israel kuery onhemboatypa ma nguvixarã omoĩ aguã.

<sup>2</sup> Ha'e nunga Nebate ra'y Jeroboão oendu. (Ha'e va'e ma Egito yvy re teri oiko, huvixa Salomão gui onhaague py).

<sup>3</sup> Ha'e gui ju oenoña ramo) ha'e voi ou Israel kuery ha'e javi ikuaria py, Roboão reve ha'e kuery jogueroayvu aguã. Ha'e rami vy aipoe'i okuapy Roboão pe:

<sup>4</sup> — Nderu ma orerereko axy ete va'ekue. Ha'e gui aÿ gui ma ndee orerereko porã'i ju ke nderu orembojexavai ha'e orerereko axyague gui. Ha'e ramo ma ndevy ae 'rã orekuai – he'i okuapy.

<sup>5</sup> Ha'e ramo Roboão ombovai:

— Tapeopa ju. Ha'e gui mboapy araa py ma peju ju xea py – he'i. Ha'e ramo heta va'e kuery oje'oipa.

<sup>6</sup> Ha'e gui ma huvixa Roboão onhemoneta uka nguu Salomão oikove teri jave tujakueve henonde ikuai va'ekue pe. Ha'e vy oporandu ha'e kuery pe:

— Mba'exa tu peẽ kuery xemoneta ta heta va'e kuery ambovai aguã?

<sup>7</sup> Ha'e ramo ha'e kuery ombovai:

— Aÿ gui kova'e kuery ruvixa reiko vy xapy'a rei reipytyvõxe ha'e repena kuaaxe ri vy ndeayvu porã'i, ha'e ramo ha'e kuery raka'e rã peve 'rã ikuai nerembiguai – he'i okuapy.

<sup>8</sup> Ha'e rami teĩ tujakueve omoneta rã Roboão noendu potai. Ha'e vy guembiguai kunumigue ojavegua kuery pe ju onhemoneta uka.

<sup>9</sup> Ha'e vy ha'e kuery pe aipoe'i:

— Peẽ kuery, mba'exa tu xemoneta ta kova'e kuery ambovai aguã? Mba'eta xevy ojerure vy “Orerereko porã'i ju nderu orerereko axyague gui”, he'i okuapy ramo.

<sup>10</sup> Ha'e ramo kunumigue ijavegua kuery ombovai okuapy:

— Po rami 'rã ndeayvu heta va'e kuery “Nderu orerereko axy, va'eri ndee orerereko porã'i ju”, he'i va'ekue pe. Po rami 'rã ndeayvu: “Xekuã kyrí'i va'e teĩ xeru ku'aa gui tuvixave.

<sup>11</sup> Xeru penderereko axy ae ma, ha'e rã xee ma roguereko axyve ete 'rã. Xeru ma vaka pi py penembojexavai penenupã vy, ha'e rã xee ma japeuxa popia py 'rã rombojexavai”, 're 'rã – he'i okuapy.

<sup>12</sup> Ha'e va'e rire mboapy araa py Jeroboão ha'e heta va'e kuery reve joguerupa ju Roboão-a py, huvixa “Mboapy araa py pejevy ju xea py”, he'iague rami vy.

<sup>13</sup> Ha'e ramo huvixa Roboão ombovai vy ayvu poyi py ijayvu, tujakueve omonetaa noendu potai rire.

<sup>14</sup> Kunumigue omonetaague rami rive ijayvu vy aipoe'i:

— Xeru penderereko axy, ha'e rã xee ma roguereko axyve 'rã. Xeru ma vaka pi py penembojexavai, ha'e rã xee ma japeuxa popia py 'rã rombojexavai – he'i.

<sup>15</sup> Ha'e rami vy huvixa Roboão noendu potai heta va'e kuery ayvu re, mba'eta ha'e rami aguã ma SENHOR gui ae oiko, Nebate ra'y Jeroboão pe Siló pygua Aías ijayvuague SENHOR omoingo aguã.

## 2 Crônicas 10.16-19

<sup>16</sup> Ha'e gui Israel kuery ha'e javi oexa rã ijayvua re huvixa Roboão ndojapyxaka potai ramo ivai vaipa okuapy. Ha'e vy aipoe'i:

— Mba'e tu ha'vy jareko Davi ramymino kuery reve? Jessé ra'y reve guarã noïvei ri nhandevy! Israel kuery, jaje'oipa nhandro katy! Ha'vy Davi ramymino kuery, pepena pendero re ae! – he'i okuapy. Ha'e rami vy Israel kuery peteĩ-teĩ oje'oipa ju ngoo katy.

<sup>17</sup> Ha'e rã Judá regua tetã rupi Israel kuery hekoa va'e re ma Roboão ae opena oikovy.

<sup>18</sup> Ha'e gui heta va'e kuerya py huvixa Roboão omondouka omomba'eapo nhea'ämby kuery re opena va'ety Adorão. Ha'e rami teĩ Israel kuery ojapipa ita py, ha'e ramo omano. Ha'e rã huvixa Roboão ma okaróxa ogueraa nho vy onha ový Jerusalém katy.

<sup>19</sup> Ha'e rami py Israel kuery onhemoingo Davi ramymino kuery rovaigua, aŷ peve guarã.

<sup>20</sup> Ha'e rami vy Israel kuery ha'e javi ma Jeroboão ojevy ju maa oendu vy oenoĩ uka onhemboaty okuapya py, ha'e vy omoĩ okuapy nguvixarã. Mava'eve nda'ikuai Davi ramymino kuery rupive, Judá regua anho e'ŷ vy.\*

## *2 Crônicas 11.1-4*

<sup>21</sup> Ha'e gui Jerusalém py Roboão ovaẽ ma vy omboatypa Judá ha'e Benjamim kuery, cento e oitenta mil oiporavo pyre, joe opu'ã kuaa va'e meme, Israel kuery rovai opu'ã aguã, ha'e kuery re Salomão ra'y Roboão ju ipo'aka aguã rami ojapo aguã.

<sup>22</sup> Ha'e rami teĩ Nhanderuete oayvu ombou peteĩ ava guemimbo'e Semaías hery va'e pe. Ha'e va'e pe aipoe'i:

<sup>23</sup> — Ndeayvu Salomão ra'y Roboão Judá pygua huvixa va'e pe, ha'e gui Judá ha'e Benjamim kuery pe, heta va'e kuery rembyrekue pe guive. Ha'e vy aipo're:

<sup>24</sup> “Po rami SENHOR ijayvu: ‘Tapeo eme, pepu'ã eme penderyvy Israel kuery rovai. Peteĩ-teĩ pejevy ju pendero katy, mba'eta xee ae ha'e nunga amoingo va'ekue’, he'i”, ‘re 'rã. Ha'e rami SENHOR ijayvua omombe'u rã ha'e kuery oendu vy ojevypa, ijayvuague rami vy.

## *Jeroboão mba'emo ra'angaa rive ombojeroviaague*

<sup>25</sup> Ha'e gui Jeroboão omoatyrõ Siquém tetã Efraim regua yvy'ã re. Ha'e vy onhemboekoa ha'e py. Omoatyrõ avi Penuel.

<sup>26</sup> Ha'e vy Jeroboão ojeupe ae aipoe'i:

— Aŷ ma nhi'ã xepo'akaa 'rãgue py Davi ramymino kuery nho 'rã ipo'aka.

<sup>27</sup> Mba'eta kova'e kuery ma Jerusalém tetã katy oo jepi 'rã SENHOR pe mba'emo ome'ẽ aguã. Ha'e rami vy opy'a re oendu 'rã okuapy Judá pygua huvixa Roboão re ju oopa aguã. Ha'e vy xejuka 'rã okuapy, Judá pygua huvixa pe ojevypa vy – he'i.

<sup>28</sup> Ha'e gui huvixa onhemongeta uka vy mokoĩ vaka ra'y ra'angaa ojapo ouro gui. Ha'e vy aipoe'i heta va'e kuery pe:

— Peẽ Israel kuery, aŷ gui ma Jerusalém katy peove e'ŷ teĩ ha'eve. Apy ae pexa Penderuete ramigua Egito yvy gui pendererupaare – he'i.

<sup>29</sup> Ha'e va'e ta'angaa ma peteĩ omoĩ Betel py, ha'e rã amboae ma Dã py.

<sup>30</sup> Ha'e ramia káuxa heta va'e kuery ojejavy okuapy, Dã py voi oje'oi tema vy, vaka ra'y ra'angaa rive peteĩ-teĩ omboete aguã.

<sup>31</sup> Yvy'ã ikuaria rupi Jeroboão ojapo avi ombojerovia atyrã. Ha'e vy heta va'e kuery regua rive omoĩ sacerdote kueryrã, Levi ramymino kuery regua e'ŷ teĩ.

<sup>32</sup> Ha'e gui irundy meme jaxyra re quinze araa py ojapo peteĩ ngaru, Judá re ngaru oiko va'e ramigua. Ha'e rami vy mba'emo oapy okuapy altar áry. Ha'ekue ramigua Betel tetã py avi ojapo vy mba'emo ome'ẽ okuapy vaka ra'y ra'angaa ojapo va'ekue pe. Betel py voi omoĩ sacerdote kueryrã, yvy'ã re ombojerovia atyrã omopu'ã mbyre peguarã.

<sup>33</sup> Ha'e gui oito jaxyra re quinze araa py, ha'e ae oipotaa rami rive oa'angaague py ae, oo oiny Betel py altar ojapo uka va'ekuea py. Ha'e py voi ojapo ngaru Israel kuery pegua. Heakuã porã va'e oapy avi ha'e py.

## 13

### *Altar oĩ va'e re profeta ijayvuague*

<sup>1</sup> Ha'e gui ma peteĩ ava Nhanderuete remimbo'e SENHOR ijayvuague rami vy Judá gui ou vy Betel py ovaẽ. Ha'e jave py altar yvýry Jeroboão hi'aĩ heakuã porã va'e oapya py.

<sup>2</sup> Ha'e ramo profeta ojapukai reve ijayvu altar re. SENHOR aipoe'i ukaague rami vy aipoe'i:

\* <sup>12:20</sup> Apy “Israel kuery” he'ia ma dez-ve regua kuery Judá regua e'ŷ ikuai va'e re ijayvu vy. Ha'e rã amboae py ma jaikuaa 'rã judeu kuery ha'e javi re ijayvua.

— Altar, altar! Nhanderuete ijayvu po rami: “Ma'ẽ, oiko 'rã peteĩ Davi ro pygua ramymino, Josias hery va'e. Ha'e va'e ma nde'áry oapy 'rã sacerdote kuery yvy'ã regua, nde'áry ha'e va'e kuery heakuã porã va'e oapy va'ekue ae. Ha'e rami py nde'áry oapya 'rã nhande va'e kãgue”, he'i.

<sup>3</sup> Ha'e va'e árave ma omombe'u avi mba'emo kuaa ukaarã. Ha'e vy aipoe'i:

— Po rami SENHOR omombe'u uka mba'emo kuaa ukaarã. Ma'ẽ, altar ovopa rive 'rã, ha'e vy hi'áry tanhimbu oĩ va'ekue voi onheẽmba 'rã — he'i.

<sup>4</sup> Ha'e rami Nhanderuete remimbo'e Betel pygua altar re ijayvu rã huvixa Jeroboão oendu vy altar áry gui opo oipe'a vy okuave'ẽ vy “Pejopy”, he'i ramove ipo ipiru vyvoi, Nhanderuete remimbo'e rovai okuave'ẽ ramo. Ha'e ramo nomomyĩ kuaavei.

<sup>5</sup> Ha'e ramo altar ovo xapy'a rã hi'áry tanhimbu oĩ va'ekue onheẽmba, SENHOR ijayvuague rami mba'emo kuaa ukaarã hemimbo'e omombe'u va'ekue rami vy.

<sup>6</sup> Ha'e rami rã huvixa aipoe'i Nhanderuete remimbo'e pe:

— Ejapukai te'i ae ri SENHOR nderuete pe, ha'e vy ejerure xere, xepo ratãmbaa gui ha'eve ju aguã — he'i.

Ha'e ramo Nhanderuete remimbo'e ojerure SENHOR pe. Ha'e ramove huvixa po ha'eve ju, ha'ekue rami ae.

<sup>7</sup> Ha'e gui ma huvixa aipoe'ive ju Nhanderuete remimbo'e pe:

— Eju xerupive xero py, ha'e he'u mba'emo nembaraete aguã. Ha'e rã xee ma ame'ẽ 'rã mba'emo ndevy.

<sup>8</sup> Ha'e rami teĩ Nhanderuete remimbo'e va'e ombovai huvixa pe:

— Ndero py rerekva'e regua ma mbyte rupi peve xevy reme'ẽ teĩ xee ndaai 'rã nderupive, nda'ui 'rã mbojape, nday'ui 'rã guive yy kova'e tekao py.

<sup>9</sup> Mba'eta po rami ae xevy SENHOR ijayvu vy aipoe'i va'ekue: “Ndere'ui 'rã mbojape, neĩ nderey'ui 'rã yy, ha'e neĩ nderejevyi 'rã guive tape rejuague rupi”, he'i va'ekue.

<sup>10</sup> Ha'e rami vy ojepe'a vy amboae tape rupi oo, Betel katy ouague rupi e'ŷ.

### *Profeta nonhe'ẽ rendui rã ombopagaague*

<sup>11</sup> Ha'e gui Betel py oiko avi peteĩ profeta tuja'i va'e. Ha'e va'e oĩa py ta'y kuery ou vy omombe'u Nhanderuete remimbo'e ha'e va'e ára Betel py ojapo va'ekue ha'e javi. Nguu pe omombe'u avi huvixa pe ijayvuague.

<sup>12</sup> Ha'e ramo tuu oporandu ha'e kuery pe:

— Mava'e tape rupi ha'vy oo? — he'i ramo ta'y kuery oexa uka tape Nhanderuete remimbo'e Judá guigua ooague.

<sup>13</sup> Ha'e gui ma gua'y kuery pe aipoe'ive ju:

— Pembokupe árygua ha'vy xerymba mburika xevy pe — he'i. Ixupe ombokupe áryguapa ramo oĩ hi'áry,

<sup>14</sup> ha'e oo Nhanderuete remimbo'e rakykue. Ha'e vy ouputy yvyra carvalho guy py oguapy oiny rã. Ha'e rami vy aipoe'i ixupe:

— Ndee ae pa Nhanderuete remimbo'e Judá gui reju va'ekue?

Ombovai:

— Xee ae ri — he'i.

<sup>15</sup> Ha'e ramo aipoe'i:

— Eju ha'vy xerupive xero py, ja'u mbojape.

<sup>16</sup> Ha'e rã ombovai:

— Nda'evei ndereve ajevy aguã, neĩ navaẽi 'rã ndero py, nda'ui 'rã mbojape, neĩ yy ma voi nday'ui 'rã kova'e tekao py.

<sup>17</sup> Mba'eta SENHOR ayvu rupi aipo'ea xevy: “Ha'e py ma ndere'ui 'rã mbojape neĩ nderey'ui 'rã yy, tape rejuague rupi guive ndereo jevyi 'rã”, 'ea rire — he'i.

<sup>18</sup> Ha'e rami rã aipoe'ive ju ixupe:

— Xee voi profeta aiko ndee rami ae. Ha'e SENHOR ayvu rupi peteñ anjo aipoe'i xevy: "Ejapo ke nderupive ndero py ojevy aguã rami, mbojape ho'u ha'e yy oy'u aguã", he'i va'ekue — he'i ijapua rupi.

<sup>19</sup> Ha'e ramo ma ojevy vy hoo py ovaẽ vy mbojape ho'u, yy oy'u guive.

<sup>20</sup> Mesa py ha'e kuery ikuai jave joguerojevyare pe SENHOR ombou oayvu.

<sup>21</sup> Ha'e ramo Nhanderuete remimbo'e Judá guigua pe ojapukai vy aipoe'i:

— Po rami ijayvu SENHOR: "Nerenhe'ẽ rendui ra'e SENHOR, nderejapoi SENHOR nderuete ojapo uka va'ekue.

<sup>22</sup> Ha'e ramí 'rãgue py rejevy vy re'u mbojape ha'e rey'u guive yy ndevy, 'Ndere'ui 'rã mbojape, neĩ yy ma voi nderey'ui 'rã', he'iague py ae. Ha'e ramí rire nderetekue nonhono porãai 'rã nderu kuery onhono porãague py", he'i.

<sup>23</sup> Ha'e gui profeta joguerojevyare va'e opa ma mbojape ho'u ha'e yy oy'upa ma vy joupe ombokupe árygua ju mburika.

<sup>24</sup> Ha'e gui ma amboae ma oo ramo tape rupi ooa py peteñ guary ovaexí vy ojuka. Hetekue ma tape rupi oity inony rive, mburika ha'e guary ma hi'aĩ hetekue yvýry.

<sup>25</sup> Ha'e rupi oguata va'e kuery oaxa vy oexa okuapy hetekue tape rupi itui rã, ha'e guary voi hetekue yvý'iry hi'aĩ rã. Ha'e vy oje'oi vy profeta tuja'i va'e rekaoa py omombe'u.

<sup>26</sup> Ha'e gui profeta joguerojevyare ha'e nunga oendu vy aipoe'i:

— Nhanderuete remimbo'e va'ekue ae ri, SENHOR nonhe'ẽ rendui va'ekue. Ha'e nunga rupi ae SENHOR omboaxa guary pe. Ha'e rã omboa'ypa vy ojuka, SENHOR ixupe aipoe'i ukaague rami vy.

<sup>27</sup> Ha'e gui aipoe'i gua'y kuery pe:

— Pembokupe árygua ha'vy xerymba mburika — he'i ramo ombokupe áryguapa.

<sup>28</sup> Ha'e ramo oo vy ojou tetekue tape rupi oity pyre, ha'e tetekue yvýry mburika'i ha'e guary hi'aĩ va'eri ndo'ui, neĩ mburika ma voi nomboa'ypai ra'e.

<sup>29</sup> Ha'e gui Nhanderuete remimbo'e retekue profeta oupi vy mburika'i áry omoĩ vy ogueraa ju. Ha'e ramí vy gueko a py ju profeta tuja'i ojae'o reve oguerovaẽ onhono porã aguã.

<sup>30</sup> Nguparã oguereco katu ma voi va'ekue py ae onhono porã. Ha'e vy ha'e kuery ojae'opa okuapy vy

— Aikore xeryvy! — he'i okuapy.

<sup>31</sup> Onhono porã ma rire aipoe'i gua'y kuery pe:

— Xee amano ma ramo ke xenhono porã avi Nhanderuete remimbo'e nhanhono porãague py ae. Pemoĩ ke xekãgue ikãgue yvýry.

<sup>32</sup> Mba'eta ojeupity 'rãe Betel py altar oĩ va'e rovai SENHOR omombe'u ukaague, Samaria yvy reombojeroviaaty ikuai va'e rovai guive — he'i.

### *Jeroboão ojejavvyte tema ovayague*

<sup>33</sup> Ha'e nunga oiko rire teñ Jeroboão ndojepe'ai ae tema gueko vaia gui. Ha'e ramí 'rãgue py heta va'e kuery regua rive omoĩve sacerdote kuery yvý'ã rupi ombojeroviaaty ikuai va'e peguarã. Ha'e va'e oipota va'e rei tema omoĩ sacerdote kuery yvý'ã rupi ombojeroviaaty ikuai va'e peguarã.

<sup>34</sup> Ha'e ramí tema oiko Jeroboão ro pygua kuery ojejavypa rei aguã rami, ko yvy gui ha'e kuery omombaa aguã okanhymba peve.

## 14

### *Jeroboão rovai profeta Aías ijayvuague*

<sup>1</sup> Ha'e va'e jave py Jeroboão ra'y Abias imba'eaxy.

<sup>2</sup> Ha'e ramo gua'yxy pe aipoe'i:

— Tereo aŷ'i ma voi, ejexa uka amboae rami, “Jeroboão ra'yxy teve” 'ea e'ŷ aguã. Ha'e vy tereo Siló py. Ha'e py ma oiko profeta Aías, kova'e kuery ruvixarã xee aí aguã re ijayvua ma voi va'ekue.

<sup>3</sup> Eraa avi dez mbojape, xipa'i ha'e peteĩ ryru ei. Evaẽ oĩa py hexeve ndeayvu aguã. Ha'e ramo ha'e ma omombe'u 'rã xera'y re oiko 'rãa – he'i.

<sup>4</sup> Ha'e ramo Jeroboão ra'yxy oiko ha'e rami ae. Ha'e vy opu'ã ovy Siló katy, ha'e Aías ro py ovaẽ. Ha'e rã Aías ma tuja'i ete vy ndoexavei ma.

<sup>5</sup> Ha'e gui SENHOR aipoe'i Aías pe.

— Ma'ẽ, ou ma oiny Jeroboão ra'yxy opi'a imba'eaxy re oporandu aguã. Po rami-rami 'rã ijayvu oike ma ouvy vy, “Jeroboão ra'yxy ae rima ra'e” 're e'ŷ aguã – he'i.

<sup>6</sup> Ha'e gui Aías ma kunha va'e okẽ rupi oike nhendu rã oendu vyve aipoe'i:

— Eike ke, Jeroboão ra'yxy. Mba'e re tu amboae rami rejexa ukaxe? Mba'eta ndevy pe haxy va'e amombe'u aguã rami aiko.

<sup>7</sup> Tereo ju, aipo're Jeroboão pe: “Po rami ijayvu SENHOR Israel kuery ruete va'e: Xee ma heta va'e kuery mbyte gui roiporavo vy romoĩ huvixa Israel kuery re repena va'erã.

<sup>8</sup> Davi ro pygua kuery po'akaa aipe'a vy ndevy ju amboaxa, va'eri ndee ma xerembiguai Davi oikoague rami e'ŷ reiko. Mba'eta ha'e va'e ma ajapo uka va'ekue ojapoa rupi xerupive oiko va'ekue opy'a ha'e javi py, xerenonde rupi ha'evea ramigua anho ojapo.

<sup>9</sup> Ha'e rã ndee ma mba'emo vai anho rejapo, huvixa reĩ e'ŷ mbove ikuai va'ekue ha'e javi gui nderekovaive ete vy. Ha'e vy amboae tuuete kuery ra'angaarã rejapo avi mba'emo ryku gui rive, xembopoxy aguã rami. Ha'e ramo vy ndekupe rive rerova xea katy.

<sup>10</sup> Ha'e nunga rupi Jeroboão ro pygua kuery áry xee ambou 'rã mba'emo vai anho. Ha'e vy Jeroboão ramymino kuery amomba 'rã ava ma guive rã, escravo e'ŷ vy ikuai rive'i va'e teĩ. Ha'e vy Jeroboão ro pygua kuery amombopa 'rã mymba repoxi mombyry omombopaa rami, ha'e kuery ha'e javi opa peve.

<sup>11</sup> Ha'e ramo Jeroboão guigua tetã py omano va'ekue jagua ho'upa kuerei 'rã, ha'e rã mba'ety rupi omano va'ekue ma guyra yvate rupigua 'rã ho'u”, he'i SENHOR.

<sup>12</sup> — Ha'e ramo rã ejere ju, tereo ndero katy. Ha'e gui nderekova re ndepoy removaẽ ramove ndepi'a'i omano 'rã.

<sup>13</sup> Ha'e ramo Israel kuery ha'e javi ojae'opa reve 'rã onhono porã. Ha'e rami avi Jeroboão ra'y kuery va'e regua ma ha'e va'e anho'i 'rã onhono porãa, mba'eta Jeroboão ro pygua kuery regua ha'e va'e re anho oĩ SENHOR ojou porã va'e.

<sup>14</sup> Ha'e gui SENHOR amboae ju 'rã omoĩ huvixa ojeupagua Israel kuery re opena va'erã. Ha'e va'e ma oĩ vy omomba 'rã Jeroboão ro pygua kuery. Xee aipoa'eague oikopa vyvoi 'rã.

<sup>15</sup> Ha'e gui Israel kuery voi SENHOR oity ukapa 'rã mba'emo'ygue-'ygue yy rupi ivevui vy omyĩ rei va'e ramo ikuai peve. Kova'e yvy porã tuu kuery pe ome'ẽ va'ekue gui oipe'apa 'rã Israel kuery, Eufrates yakã rovai rupi ju omoaĩmba 'rã, SENHOR ombopoxya rupi ta'angaarã yvyra omopu'ã rire.

<sup>16</sup> Ha'e ramo py Jeroboão ojeavyague re oeja 'rã Israel kuery, joguerojejavypa rire – he'i.

<sup>17</sup> Ha'e gui ma Jeroboão ra'yxy opu'ã vy oo ju. Tirza tekota py ovaẽ. Ngoo py ovaẽ ramove ava'i ya'e omano ma.

<sup>18</sup> Ha'e ramo Israel kuery ha'e javi onhono porã vy ojae'opa okuapy, SENHOR oayvu guembiguai profeta Aías rupi ombou va'ekue rami vy.

<sup>19</sup> Ha'e gui oĩve rei tema Jeroboão rekokue regua. Ha'e ramo avi joe opu'ãague, joe openaague ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

<sup>20</sup> Vinte e dois ma'etŷ re ma Jeroboão oĩ huvixa. Ha'e gui ndoikovevei'i ma guamoĩ kueryague rami. Ha'e ramo ta'y Nadabe ju oĩ nguu rekovia.

<sup>21</sup> Ha'e gui Salomão ra'y Roboão ma Judá re oĩ huvixa. Ixy ma Amom guigua, Naamá hery va'e. Quarenta e um ma'etŷ ma oguerekoa py Roboão omboypy huvixa oĩ aguã, ha'e gui dezessete ma'etŷ re peve opena Jerusalém py. Ha'e va'e tetã ma Israel re ikuai va'e gui SENHOR oiporavo va'ekue hery oĩ aguã.

<sup>22</sup> Ha'e gui ma Judá pygua kuery ha'eve'ŷ ete va'e ojapo okuapy SENHOR renonde. Ojejavya rupi anho ikuai vy guamoĩ kuery gui voi nda'eveive va'e ojapo okuapy SENHOR nda'evei etea oendu aguã rami.

<sup>23</sup> Mba'eta Judá pygua kuery voi yvy'ã re omopu'ã mba'emo ra'angaa, ita ha'e yvyra ta'angaarã yvy'ã ikuai va'e áry, ha'e yvyra ikuai va'e guy rupi.

<sup>24</sup> Ijyvy re ikuai avi avakue ta'angaa pegua itavy rei va'e. Ha'e rami vy ojapo okuapy ha'eve'ŷ va'e yvy regua Israel kuery renonde gui SENHOR oipe'a va'ekue ikuaiague rami rive.

<sup>25</sup> Ha'e gui peteĩ nhiruĩ ma'etŷa re ma Roboão huvixa oĩ jave py Egito pygua huvixa Sisaque ou Jerusalém re opu'ã aguã.

<sup>26</sup> Ha'e vy ogueraapa SENHOR pegua opy ha'e huvixa ropy iporãgueve oĩ va'ekue. Ogueraa avi hu'y jokoarã ouro guigua Salomão ojapo va'ekue.

<sup>27</sup> Ha'e gui ha'e va'ekue rekoria ma huvixa Roboão ojapove ju hu'y jokoa, teĩ overa va'e guigua rive. Ha'e va'e ma omboaxa huvixa rokẽ rarõa kuery rerekao po py.

<sup>28</sup> Ha'e gui SENHOR pegua oo py huvixa oike nhavõ harõa kuery ogueraa 'rã hu'y jokoa. Ha'e rire ogueru kuerei 'rã opy ja'o harõa kuery ikuaiaty py.

<sup>29</sup> Ha'e gui oĩve rei tema Roboão rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekukue oĩa re?

<sup>30</sup> Jeroboão kuery reve Roboão kuery joguero'a okuapy oikovea pukukue re.

<sup>31</sup> Ha'e gui ma Roboão ndoikovevei'i ma guamoĩ kueryague rami. Ha'e gui ha'e kuery reve onhono porãa tetã Davi rekoague py. Ixy rery ma Naamá, Amom guigua. Ha'e gui ta'y Abias ju oĩ nguu rekoria.

## 15

### 2 Crônicas 13.1-22

<sup>1</sup> Ha'e gui Nebate ra'y Jeroboão dezoito ma'etŷ re ma huvixa oĩ jave py Abias oĩ Judá pygua huvixarã.

<sup>2</sup> Ha'e vy mboapy ma'etŷ re opena Jerusalém py. Ixy ma Absalão rajy Maaca.

<sup>3</sup> Ha'e va'e ma nguu ojejavypaague ha'e javi rupi ae ju oiko. Ha'e vy ipy'a re noĩ SENHOR nguuete pe ete oiko aguã, nguu Davi oikoague rami e'ŷ.

<sup>4</sup> Ha'e rami teĩ SENHOR tuuete Davi re oma'ẽ vy hekoria omoĩ peteĩ hendy va'e Jerusalém py, ha'e va'e oiko rire ta'y ju omoingo vy. Ha'e rami vy omoĩ atâve Jerusalém.\*

<sup>5</sup> Mba'eta Davi ma SENHOR renonde ha'evea rami anho ojapo va'ekue, oikovea pukukue re ndojepe'ai guive peteїve ojapo uka va'ekue gui ma voi, Urias heteu va'e re ojapo va'ekue py e'ŷ vy.

<sup>6</sup> Roboão ha'e Jeroboão ikuaria pukukue re oiko riae joe opu'ã va'e.

<sup>7</sup> Ha'e gui oĩve rei tema Abias rekukue regua. Ha'e rami avi hi'arandua ha'e mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekukue oĩa re? Oiko avi raka'e Abias ha'e Jeroboão kuery reve joe opu'ãa.

<sup>8</sup> Ha'e gui ma Abias ndoikovevei'i ma guamoĩ kueryague rami. Ha'e ramo onhono porãa tetã Davi rekoague py. Ha'e gui ta'y Asa ju oĩ nguu rekoria.

### 2 Crônicas 14.1-8; 15.16-16.14

<sup>9</sup> Ha'e gui Israel pygua huvixa Jeroboão vinte ma'etŷa re ma oĩ jave py Asa oĩ Judá pygua huvixarã.

\* <sup>15:4</sup> "Hendy va'e" he'ia ma hekoria huvixa mboae raka'eve rã oiko va'erã re ijayvu vy (1 Reis 11.36).

10 Ha'e va'e ma quarenta e um ma'etŷ re opena Jerusalém py. Ijaryi ma Absalão rajy Maaca hery va'e.

11 Ha'e gui Asa ma SENHOR renonde rupi ha'evea rami oiko, guamoĩ Davi rami ae.

12 Mba'eta oyvy gui oipe'apa avakue ta'angaa pegua itavy rei va'ekue, oitypa avi ta'angaa nguu kuery ojapo va'ekue.

13 Ojaryi Maaca eteve voi oipe'a huvixa xy po'akaa gui, mba'eta ha'e va'e ma yvyra gui ta'angaa ojeguaru pyrã ojapo uka rire. Ha'e rã Asa ma ta'angaa ombovaipa vy oapypa Cedrom yvyugua py.

14 Ha'e rami teī yvy'ã rupi ombojerovia atyrã ojapo pyre ma nombovaipai va'eri Asa oikovea pukukue re SENHOR pe ae oiko opy'a py.

15 Ha'e vy SENHOR pegua opy ogueru ju SENHOR pe mba'emo nguu omboaxa uka va'ekue, ha'e ae omboaxa uka va'ekue guive: prata, ouro ha'e tembiporu.

16 Israel pygua huvixa Baasa reve Asa opu'ã riae, oikovea pukukue re.

17 Mba'eta Israel pygua huvixa Baasa ma Judá kuery rovai ou vy ojokopa Ramá tetã, Judá pygua huvixa Asa openaa gui mava'eve oo e'ŷ aguã, neĩ ovaẽa e'ŷ aguã ha'e py.

18 Ha'e ramo Asa oipe'apa ouro ha'e prata SENHOR pegua opy oĩ teri va'e, ha'e huvixa ropy omoī porã mbyre voi. Ha'e vy guembiguai kuery po py huvixa Asa omboaxapa vy omondoukapa Síria pygua huvixa Ben-Hadade pe, Damasco tetã py oĩa py. Ha'e va'e ma Heziom ramymimo Tabrimom ra'y. Ha'e vy ixupe aipoe'i uka:

19 — Jajapo ke jomeme nhandekuai porã'i aguã, nderu xeru reve ikuaiague rami. Ne'exa, aru ruka ndevy ame'ẽ rive va'e, prata ha'e ouro. Ha'e rã tereo, Israel pygua huvixa Baasa-a py embovaipa hexeve guarã rejapo va'ekue, xeretã ojokoa gui ojepe'a aguã – he'i uka.

20 Ha'e ramo Asa ijayvua Ben-Hadade oendu vy xondaro ruvixa kuery omondouka Israel kuery retã re opu'ã aguã. Ha'e rami vy oitypa Ijom, Dã, Abel-Bete-Maaca ha'e Quinerete tekao ha'e javi rupi, Naftali yvy rupi voi.

21 Ha'e nunga Baasa oendu vy opytu'u Ramá tetã ojokoa gui, ha'e vy Tirza tekao py ju opyta.

22 Ha'e ramo huvixa Asa ma Judéia ha'e javi rupi omombe'u uka oupaa vy Ramá gui oguerupaa ju aguã ita ha'e yvyra huvixa Baasa ojokoa py oiporu va'ekue. Ha'e va'ekue py ma huvixa Asa ju ojapo Geba tetã Benjamim regua ha'e Mispa.

23 Ha'e gui oĩve rei tema Asa rekoke regua. Ha'e rami avi ipo'akaague, tetã ojapoague, ha'e mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekoke oĩa re? Ha'e gui tuja'i ma jave imba'eaxy opy rupi.

24 Ha'e gui Asa ndoikovevei'i ma guamoĩ kueryague rami. Ha'e ramo onhono porãa tetã Davi rekoague py, tuu kuery ituia py ae. Ha'e gui ta'y Josafá ju oĩ nguu rekoria.

### *Israel pygua huvixa Nadabe ha'eve'ŷa rami joguerekoague*

25 Ha'e gui Judá pygua huvixa Asa mokoĩ ma'etŷa re ma oĩ jave py Jeroboão ra'y Nadabe oĩ Israel pygua huvixarã. Ha'e vy mokoĩ ma'etŷ re oiko Israel kuery re openaa rupi.

26 Ha'e va'e ma SENHOR renonde rupi ha'eve'ŷ va'e ojapo oikovy nguu oikoague rami, ha'e nguu Israel kuery oguerojejavypaague rupi ae.

27 Ha'e ramo hexe Issacar regua Aías ra'y Baasa opu'ã vy oity filisteu kuery rekao Gibetom py, Gibetom tekao Nadabe ha'e Israel kuery ha'e javi ojokopa jave.

28 Ha'e vy Baasa ma Judá pygua huvixa Asa oĩ jave mboapy ma'etŷa py Nadabe ojuka vy ha'e ju huvixarã oĩ hekovia.

29 Ha'e gui oĩ ypy'ia pyve ojukapa Jeroboão ramymimo kuery ha'e javi. Neĩ peteĩve ma voi ndoejai oikove reve, omomba ete, SENHOR guembiguai Siló pygua Aías rupi oayvu ombou va'ekue rami vy,

30 Jeroboão ojejavypaague re ae, ha'e Israel kuery oguerojejavypa ague re, mba'emo vai py SENHOR Israel kuery ruete ombopoxya py.

<sup>31</sup> Ha'e gui oïve rei tema Nadabe rekukue regua. Ha'e rami avi mba'emo ojapo va'ekue ha'e javi noï 'rã teve kuaxia Israel pygua huvixa kuery rekukue oña re?

<sup>32</sup> Asa ha'e Israel pygua huvixa Baasa ikuai a pukukue re oiko raka'e jomeme opu'ã va'e.

### *Israel pygua huvixa Baasa oïjave guare*

<sup>33</sup> Ha'e gui Judá pygua huvixa Asa mboapy ma'etýa re ma oïjave Aías ra'y Baasa oïhuvixarã. Ha'e va'e ma Israel kuery ha'e javi re opena oikovy Tirza py. Vinte e quattro ma'etýa re opena.

<sup>34</sup> SENHOR renonde ojapo ha'eve'ý va'e. Ha'e vy Jeroboão ojejavyague rupi ae oiko, ha'e Israel kuery oguerojejavypa ague rupi.

## 16

### *Baasa rovai guarã Jeú ijayvu ma voiague*

<sup>1</sup> Ha'e gui SENHOR oayvu ombou Hanani ra'y Jeú pe. Baasa rovai ijayvu vy aipoe'i:

<sup>2</sup> — Xee ma yvy ku'i gui romopu'ã vy romoï va'ekue xevyguia Israel kuery ruvixarã, va'eri Jeroboão rekukue rupi reiko vy xevyguia Israel kuery rerojejavypa, xembopoxy aguã rami.

<sup>3</sup> Ne'exa Baasa, xee romomba ma 'rã neramymino kuery reve. Ha'e vy ndero pygua kuery re ajapo 'rã Nebate ra'y Jeroboão ro pygua kuery re ajapoague rami.

<sup>4</sup> Ha'e rami rã Baasa guigua kuery tetã rupi omano va'ekue jagua kuery ho'upa 'rã, ha'e rã mba'ety rupi omano va'ekue ma guyra yvate rupigua 'rã ho'u — he'i.

<sup>5</sup> Ha'e gui oïve rei tema Baasa rekukue regua. Ha'e rami avi opo'akaa rupi mba'emo ojapo va'ekue ha'e javi noï 'rã teve kuaxia Israel pygua huvixa kuery rekukue oña re?

<sup>6</sup> Ha'e gui Baasa ndoikovevei'i ma guamoï kueryague rami. Ha'e ramo onhono porãa Tirza py ae. Ha'e gui ta'y Elá ju oïnguu rekovia.

<sup>7</sup> Ha'e rami aguã ae SENHOR oayvu ombou Hanani ra'y profeta Jeú pe Baasa ha'e hamymino kuery rovai, mba'eta SENHOR renonde opa mba'e py ojapo vai vy ombopoxy, Jeroboão ro pygua kuery ikuaiague rami oikoa py, ha'e Jeroboão ro pygua kuery ojukapaa py.

### *Israel pygua huvixa Elá re Zinri opu'ãague*

<sup>8</sup> Ha'e gui Judá pygua huvixa Asa vinte e seis ma'etýa re ma oïjave py Baasa ra'y Elá oï Israel kuery ruvixarã, tetã Tirza py ae. Mokoï ma'etý re opena.

<sup>9</sup> Ha'e va'e re opu'ã hembiguai Zinri joe opu'ãa pygua karóxa ikuai va'e re mbyte rupi peve opena va'e. Elá ma Tirza py oïguembiguai Arsa ro py, oy'u ha'e oka'u vaipaa rupi.

<sup>10</sup> Ha'e gui Zinri oike vy oguero'a vy ojuka ete, Judá pygua huvixa Asa vinte e sete ma'etýa re ma oïjave. Ha'e vy ha'e ae ju oïhekovia.

<sup>11</sup> Ha'e va'e ma tenda openaaty áry oïypy vyve ojukapa Baasa kuery. Ndoejai neï peteïve avakue, hetarã, neï irã kuery ma voi.

<sup>12</sup> Ha'e rami py Zinri ojukapa Baasa kuery, profeta Jeú rupi Baasa rovai SENHOR oayvu ombouague rami vy.

<sup>13</sup> Baasa ha'e ta'y Elá opa mba'e py ojejavyague re ojuka, ha'e Israel kuery oguerojejavypa ague re, SENHOR Israel kuery ruete ombopoxy aguã rami, mba'emo ra'angaa ojapoague re guive.

<sup>14</sup> Ha'e gui oïve rei tema Elá rekukue regua. Ha'e rami avi mba'emo ojapo va'ekue ha'e javi noï 'rã teve kuaxia Israel pygua huvixa kuery rekukue oña re?

### *Israel pygua huvixa Zinri oïjave guare*

<sup>15</sup> Ha'e gui Judá pygua huvixa Asa vinte e sete ma'etýa re ma oïjave py Zinri sete ára ete'i oïTirza py. Ha'e jave py heta va'e kuery ma filisteu kuery rekoia Gibetom re opu'ãa rupi ikuai.

**16** Ha'e gui ha'e py ikuai va'e oendu "Zinri ma huvixa rovai opu'ã vy ojuka" 'ea rã. Ha'e rami vy ha'e va'e árave Israel kuery ikuai va'e ha'e javi nguvixarã omoõ xondaro kuery rerekoa Onri.

**17** Ha'e ramo Gibetom gui Onri ogueraa Israel kuery ha'e javi. Ha'e vy Tirza tekao ojokopa okuapy.

**18** Ha'e gui Zinri ma tetã re ipo'akaa ta ma ramo oexa vy oo huvixa ropy imbaraetevea py. Ha'e py oike ma vy oña áry omoendypa vy omano.

**19** Ojeavyague re ae omano, SENHOR renonde ha'eve'ý va'e ojapo rire, Jeroboão oikoague rami ae Israel kuery oguerojejavypa ague re.

**20** Ha'e gui oïve rei tema Zinri rekukue regua. Ha'e rami avi huvixa rovai opu'ãague ha'e mba'emo ojapo va'ekue ha'e javi noï'rã teve kuaxia Israel pygua huvixa kuery rekukue oña re?

### *Israel pygua huvixa Onri oïjave guare*

**21** Ha'e gui Israel kuery oja'o mokoõ henda katy. Peteĩ ja'okue ma Ginate ra'y Tibni rupive oje'oi nguvixarã omoõ aguã, ha'e rã amboae ja'okue ma Onri rupive oje'oi.

**22** Ha'e gui Onri rupive oje'oi va'ekue ma ipo'aka okuapy Ginate ra'y Tibni rupive oo va'ekue re. Ha'e gui Tibni omano ramo Onri ae ju opena.

**23** Ha'e rami py Judá pygua huvixa Asa trinta e um ma'etýa re ma oïjave py Onri oï Israel kuery ruvixarã. Ha'e javi vy doze ma'etý re opena. Ha'e rã Tirza py ma seis ma'etý re opena.

**24** Ha'e gui Semer gui ojogua Samaria yvyty sessenta e seis quilos prata re, ha'e vy omombaraete. Yvyty áry tetã ojapo va'ekue ma omboery Samaria, Semer yvy jakue rery rupi.

**25** Onri ma SENHOR renonde ojapo oikovy ha'eve'ý va'e. Ha'e oiko e'ý mbove ikuai va'ekue gui ojapo vaive.

**26** Nebate ra'y Jeroboão oikoague ha'e javi rupi oiko, Israel kuery oguerojejavypa ague rupi. Ha'e vy SENHOR Israel kuery ruete ipoxy aguã rami ojapo ta'angaarã ojapoa py.

**27** Ha'e gui oïve rei tema Onri rekukue regua. Ha'e rami avi opo'akaa oexa ukaa rupi mba'emo ojapo va'ekue ha'e javi noï'rã teve kuaxia Israel pygua huvixa kuery rekukue oña re?

**28** Ha'e gui Onri ndoikovevei'i ma guamoõ kueryague rami. Ha'e ramo onhono porãa Samaria py. Ha'e gui ta'y Acabe ju oïnguu rekovia.

### *Israel pygua huvixa Acabe oï, ha'e Jezabel re omendaague*

**29** Ha'e gui Judá pygua huvixa Asa trinta e oito ma'etýa re ma oïjave py Onri ra'y Acabe oï Israel kuery ruvixarã. Ha'e vy vinte e dois ma'etý re opena oikovy Israel kuery re, Samaria py ae.

**30** Onri ra'y Acabe ma SENHOR renonde ojapo oikovy ha'eve'ý va'e, ha'e oiko e'ý mbove ikuai va'e gui heko vaive va'e.

**31** Nebate ra'y Jeroboão ojeavyague rupi anho e'ý oiko, gua'yxyrã ogueraa avi Sidom pygua huvixa Etbaal rajy Jezabel. Ha'e vy ova vy Baal pegua ete oiko, ombojerovia ete.

**32** Ha'e vy peteĩ altar Baal peguarã ojapo Samaria py, Baal peguarã oo ojapo va'ekue py ae.

**33** Acabe omopu'ã avi imo'amy yvyra mba'emo ra'angaarã. Ha'e vy ha'e oiko e'ý mbove Israel pygua huvixa kuery ikuai va'ekue gui ha'eve'ýve va'e ojapo, SENHOR Israel kuery ruete ombopoxy aguã rami rive.

**34** Ha'e va'e oïjave Betel pygua Hiel ojapo ju Jericó. Ikora ytarã omoõ jave omano ta'y jypykue Abirão. Ha'e gui ikora rokẽ omoõ jave ma Segube ju omano ijapyre va'ekue, Num ra'y Josué rupi SENHOR ijayvuague rami vy.\*

---

\* **16:34** Josué 6.26

## 17

### *Nda'oky pukuvei aguã re Elias ijayvu rire xapirẽ kuery omongaruague*

- <sup>1</sup> Ha'e gui Gileade gui ou Tisbé pygua Elias. Ha'e va'e ma aipoe'i Acabe pe:  
 — Anhetẽ ete SENHOR Israel kuery ruete henonde aikoa va'e rekove rupi aura vy aipoa'e: Ndo'ai 'rã yxapy neĩ oky kova'e ma'etŷ guive, xee aipoa'e jevy e'ŷa ja — he'i.
- <sup>2</sup> Ha'e gui SENHOR oayvu tēgue ju ombou Elias pe. Ha'e vy aipoe'i:
- <sup>3</sup> — Ejepa ke apy gui, ha'e tereo kuaray oua katy. Enhemi Querite yakã yvýry rupi, Jordão yakã rovai.
- <sup>4</sup> Ha'e va'e yakã gui ae 'rã rey'u reikovy. Ha'e py ambou avi 'rã xapirẽ kuery nemongaru va'era — he'i.
- <sup>5</sup> Ha'e ramo oo vy SENHOR ijayvuague rami ojapo. Ha'e vy ojepe'a vy oiko Jordão yakã rovai Querite yakã yvýry.
- <sup>6</sup> Ha'e gui ko'ẽmba'i nhavõ ixupe xapirẽ ogueru jepi 'rã mbojape ha'e xo'o. Ka'aru'i jave ju 'rã ogueru mbojape ha'e xo'o. Ha'e rã yakã gui ae oy'u oikovy.
- <sup>7</sup> Ha'e gui kueve ma rire yakã gui oy'uaty typa, yvy re nda'okyvei ramo.

### *Imeve'ŷ va'e Sarepta pygua ro py Elias oiko jave guare*

- <sup>8</sup> Ha'e gui ixupe SENHOR oayvu ombou jevy vy aipoe'i:  
 — Aŷ ma epu'ã ke, tereo ju Sidom re tekota Sarepta oĩ va'e katy. Eiko are ha'e py, mba'eta ha'e py oiko peteĩ kunha imeve'ŷ va'e, ha'e va'e pe xeayvu ma nemongaru aguã re — he'i.
- <sup>10</sup> Ha'e ramo opu'ã ov y Sarepta katy. Tetã rokẽ py ovaẽ ovya py oma'ẽ rã ha'e py oiko peteĩ kunha imeve'ŷ va'e xakã omono'õa rupi. Ha'e rã onhenduka vy aipoe'i kunha va'e pe:  
 — Ajerure ndevy, eru ke xevy peteĩ ryru yy ay'u aguã.
- <sup>11</sup> Ha'e rã kunha va'e yy re oo ta ramo onhenduka jevy vy aipoe'i:  
 — Eru avi ke mbojape ra'ykue'i peteĩ jururã'i ri jepe.
- <sup>12</sup> Ha'e ramo kunha va'e ombovai:  
 — Anhetẽ ete SENHOR nderuete oikove va'e rery rupi aura vy aipoa'e: Mba'eve ndarekoi ojykue ma voi. Oĩ va'e ma peteĩ po'i trigo oja py, ha'e ruxã'i azeite hyru py. Ema'ẽ, ko ma mokoĩ yvyra rakãgue'i ajopy va'ekue, tembi'u'i ajapo aguã xevy ha'e xepi'a pe. Ha'e va'e ro'upa ma rire romano 'rã — he'i.
- <sup>13</sup> Ha'e ramo Elias aipoe'i:  
 — Ekyje eme. Tereo ha'e ejapo tema xeayvuague. Jypy ma xevy ranhe ejapo peteĩ mbojape'i, ha'e vy eru apy oka katy. Ha'e gui mae ejapove ju ndejeupe ha'e ndepi'a pe avi.
- <sup>14</sup> Mba'eta po rami SENHOR Israel kuery ruete ijayvu: "Trigo oja py oĩ va'e ndopavei 'rã, ha'e azeite ndoatavei 'rã hyru py, yvy áry SENHOR ombo'oky e'ŷa ja", he'i.
- <sup>15</sup> Ha'e ramo kunha va'e oo vy ojapo Elias ijayvuague. Ha'e rami rire kunha va'e ha'e hoo pygua kuery ha'e javi reve okaru okuapy, mbovy ára re e'ŷ.
- <sup>16</sup> Oja py trigo oĩ va'e ndopavei, azeite voi ndoatai hyru py, Elias pe SENHOR aipoe'i ukaague rami vy.
- <sup>17</sup> Ha'e va'e rire ma kunha hoo va'e pi'a imba'eaxy. Ha'e vy nda'eveive ov y omano.
- <sup>18</sup> Ha'e ramo kunha va'e aipoe'i Elias pe:  
 — Nhanderuete remimbo'e, mba'e tu xee ajapo ra'e? Tyrã pa xea py reju raka'e xereko vaiague re xemoma'endu'a aguã, ha'e va'ekue káuxa rive ava'i omano aguã?
- <sup>19</sup> Ha'e ramo Elias ombovai:  
 — Emboaxa ha'vy ndepi'a xevy — he'i. Ha'e vy ixy jyva áry gui ojopy vy ogueraa opy ja'o yvateve ha'e ae'i okeaty py. Ha'e vy omonheno ngupa rupi.
- <sup>20</sup> Ha'e gui ma ojapukai oiny SENHOR pe. Ha'e vy aipoe'i:

— SENHOR Xeruete, kova'e imeve'ŷ va'e xemovaẽare voi ri ty rembojexavai ra'e, ipi'a rejuka vy — he'i.

**21** Ha'e vy ava'i va'e áry rupi mboapykue onheno vy ojapukai ju SENHOR pe. Ha'e vy aipoe'i:

— SENHOR Xeruete, ajerure ndevy, ejapo inhe'ẽ ojevy vy hexe ju oĩ aguã rami — he'i.

**22** Ha'e ramo Elias ayvu SENHOR oendu. Ha'e ramo ava'i nhe'ẽ ojevy vy hexe oĩ ju. Ha'e rã oikove ju.

**23** Ha'e gui Elias ava'i va'e oupi vy opy ja'o gui ogueroguejy ju. Ha'e vy ixy pe ju ome'ẽ vy aipoe'i:

— Ne'exa, ndepi'a oikove ju ma — he'i.

**24** Ha'e ramo kunha va'e aipoe'i Elias pe:

— Namia py aŷ aikuua ma ndee anhetẽ ae Nhanderuete remimbo'e reikoa, ha'e ndejuru rupi SENHOR ijayvua anhetẽ va'e meme.

## 18

### *Acabe pe Elias ojexa uka jevyague*

**1** Are ma rire mboapy ma'etŷa py ma SENHOR oayvu ombou ju Elias pe. Ha'e vy aipoe'i:

— Tereo, ejexa uka ju huvixa Acabe pe, mba'eta ambo'oky ju 'rã yvy áry — he'i.

**2** Ha'e ramo Elias oo huvixa Acabe pe ojexa uka aguã. Ha'e va'e jave ma karuai nda'evei ete Samaria tetã py.

**3** Ha'e gui Acabe oenoĩ mba'emo re opena va'ety Obadias. (Obadias ma SENHOR renonde ojererokyjea rupi ete oiko va'e.

**4** Ha'e rami vy SENHOR pegua profeta kuery Jezabel ojuka ta jave Obadias cem profeta ogueraa vy mokoĩ itakua py onhom. Cinquenta meme omboja'o vy ha'e kuery pe mbojape ha'e yy py omongaru jepi raka'e.)

**5** Ha'e gui Acabe aipoe'i Obadias pe:

— Tereo xeyvy re yakã ryapy ha'e yupu ikuai va'e ha'e javi rupi. Xapy'a rei jajou 'rã nhuũ pyau xerymba kuery kavaju ha'e mburika'i jaraa jepe nho aguã, omanomba e'ŷ aguã — he'i.

**6** Ha'e gui mokoïve ma yvy rupi joa katy e'ŷ oje'oi oikuua pota aguã. Acabe oo peteĩ tape rupi, ha'e rã Obadias ma amboae tape rupi oo avi ha'e ae'i.

**7** Ha'e gui Obadias tape rupi ooa rupi Elias reve nhovaexí xapy'a. Obadias oexa kuaa vy guenapy'ã re oĩ ngova yvy re omovaẽ reve. Ha'e vy aipoe'i:

— Xeruvixa Elias, ndee ae pa?

**8** Ombovai:

— Xee ae ri. Ha'e gui tereo aipo're nderuvixa pe: "Pe py ma Elias oĩ", 're — he'i.

**9** Ha'e rami teĩ ha'e aipoe'i:

— Mba'e nunga py tu ajapo vai, Acabe po py xee nerembiguai xemboaxa aguã, xejuka aguã?

**10** Anhetẽ ete SENHOR nderuete oikove va'e rupi aura vy aipoa'e: Mamo rã yvy regua ikuia ha'e huvixa kuery ipo'akaa rupi ma voi xeruvixa guembiguai kuery omondouka ndereka vy. Ha'e gui ha'e pygua kuery "Apy ma noĩ", he'i teĩ ha'e kuery pe huvixa oura uka guive nandejouiague rami.

**11** Ha'e gui aŷ ma ndee aipo're kuri: "Tereo, aipo're nderuvixa pe: 'Pe py ma Elias oĩ' ", 're uka xevy.

**12** Teĩ xapy'a rei ma ndea gui aa ramove SENHOR guigua Nhe'ẽ ndereraa ju 'rã, marã katy paa xee aikuua e'ŷ re. Ha'e gui reñague py huvixa Acabe aru vy ndorojoui ramo xejuka 'rã. Ha'e rami avi xee nerembiguai SENHOR re ajerovia va'e xekunumi guive.

**13** Ha'e gui xeruvixa, ndevy pe nomombe'uai teve SENHOR pegua profeta kuery ajapo porãague Jezabel ojuka ta jave? Mba'eta SENHOR pegua profeta kuery va'e regua anhom.

cem avakue, cinqüenta meme anhomí peteñ-teñ henda itakua py, ha'e vy mbojape ha'e yy py amongaru va'ekue.

<sup>14</sup> Ha'e gui aÿ ma ndee aipo're: "Tereo, aipo're nderuvixa pe: 'Pe py ma oĩ Elias' ", 're uka. Ha'e ramo ma xejuka 'rã – he'i.

<sup>15</sup> Ha'e gui Elias ombovai:

– Anhetẽ ete SENHOR ixondaro reta va'e henonde rupi aikoa va'e rekove rupi aura vy aipoa'e: Aÿve ajexa uka 'rã Acabe pe – he'i.

<sup>16</sup> Ha'e ramo mae Obadias oo Acabe-a py, ixupe omombe'u. Ha'e ramo Acabe oo Elias reve ijayvu aguã katy.

<sup>17</sup> Ha'e gui huvixa oexa vy aipoe'i:

– Israel kuery moangecko reiaty, ndee ae pa reiko?

<sup>18</sup> Elias ombovai:

– Xee'ÿ ma Israel kuery moangecko, ha'e rã ndee ae, ha'e nderu ro pygua kuery reve, mba'eta SENHOR ojapo uka va'ekue gui pejepa vy Baal kuery mboetea rupi peiko.

<sup>19</sup> Ha'e gui aÿ ma xea py emboaty ukapa Israel kuery ha'e javi, Carmelo vyty áry. Toupa avi quattrocentos e cinqüenta Baal pegua profeta kuery, ha'e quattrocentos profeta kuery vyvra ta'angaarã omopu'ã mbyre pegua, Jezabel omongaru jepi va'e – he'i.

### *Carmelo vyty áry Baal pegua profeta kuery reve Elias joeko a'ã okuapague*

<sup>20</sup> Ha'e gui Israel kuery ikuia rupi Acabe omondouka guembiguai kuery omombe'u va'erã. Ha'e vy omboatypa profeta kuery Carmelo vyty áry.

<sup>21</sup> Ha'e rã heta va'e kuery ikuia py Elias ovaë vy aipoe'i ha'e kuery pe:

– Raka'e peve 'rã tu pendepy'a py ndapeikuai rei pekuapy mokoñ rupi rei vy? SENHOR ae ri Nhanderuete oiko ramo ixupe ete pendekuai. Ha'e'ÿ vy xapy'a rei Baal ri Nhanderuete oiko ramo ixupe pendekuai – he'i. Ha'e ramo heta va'e kuery teïve nombovai.

<sup>22</sup> Ha'e gui Elias aipoe'ive ju heta va'e kuery pe:

– Xee anho'i aikove SENHOR pegua profeta kuery va'e regua. Ha'e rã Baal pegua profeta kuery ma quattrocentos e cinqüenta avakue ikuai.

<sup>23</sup> Aÿ ma Peru orevy mokoñ vaka ra'y. Tove amboae kuery ranhe toiporavo peteñ vaka ra'y, ha'e tomboa'ypa. Ha'e vy tomoñ xakã áry, teñ tomboja eme guive tata. Ha'e gui xee voi amboae vaka ra'y areko katu vy amoñ 'rã xakã áry, tata amboja e'ÿ re avi.

<sup>24</sup> Ha'e gui ma peñ kuery pejapukai 'rã pekuapy penderuete rery rupi, ha'e rã xee ma SENHOR rery rupi 'rã ajapukai. Ha'e gui tata omboua py nhanembovai va'e jaikuaa 'rã Nhanderuete oikoa – he'i.

Ha'e ramo heta va'e kuery ombovai vy

– Ha'e rami ma ha'eve – he'i okuapy.

<sup>25</sup> Ha'e gui ma Elias aipoe'i Baal pegua profeta kuery pe:

– Aÿ peiporavo peteñ vaka ra'y pendejeupe guarã. Peñ kuery ranhe perekó katu, penderetave vy. Pejapukai penderuete rery rupi. Ha'e rami teñ pemboja eme tata – he'i.

<sup>26</sup> Ha'e ramo ha'e kuery ranhe oiporavo okuapy peteñ vaka ra'y ogueru pyre regua. Oguereko katupa ma vy ojapukai okuapy nguuete Baal rery rupi. Ko'ëmba'i guive kuaray mbyte peve aipoe'i okuapy:

– Baal, orembovai na! – he'i okuapy teñ mamove gui nombovaia nhendui. Ha'e ramo opa marã opo-opo reve ojeroky oje'oivy altar ojapo va'ekue yvýry rupi.

<sup>27</sup> Kuaray mbyte jave ma Elias ojojai rei vy aipoe'i ha'e kuery pe:

– Pejapukai ratâve ke, mba'eta ha'e ma tuuete va'e vy xapy'a rei mba'emo re oikuaa pota ra'e, e'ÿ vy oo 'rã ra'e jai katy, ha'e'ÿ vy amboae katy 'rã oguata ra'e, ha'e rami e'ÿ vy oke 'rã. Ha'e rami ri vy omyñ 'rã nhi'ã oupy – he'i.

**28** Ha'e rami rā ha'e kuery ojapukai ratāve tema, ha'e gueko rami vy onhekyxī okuapy kyxe ha'e hu'y py, huguy onheēmba peve.

**29** Kuaray mbyte rire ma teī ha'e kuery ojapukai teri, mba'emo aju guigua ome'ēa aguā hora peve. Ha'e rami teī nombovaia nhendui, ndojapyxakaai ae tema.

**30** Ha'e gui mae ma Elias aipoe'i heta va'e kuery ha'e javi pe:

— Penhembojapa ke xere — he'i. Ha'e ramo heta va'e kuery onhembojapa hexe. Ha'e gui jypy Elias omoatyrōmba ju SENHOR pegua altar ivaipa va'ekue.

**31** Ha'e vy doze ita ojou heruvy Jacó ra'y kuery mbovy pa ikuaiague rami. Ha'e va'e pe ma SENHOR ijayvu vy "Aŷ gui ma Israel 'rā nderery", he'i raka'e.

**32** Ha'e va'e ita py omoatyrō ju altar SENHOR rery rupi guarā. Altar yvýry rupi ojo'o yy raperā tuvixave va'e, mba'emo ra'yī ryrukue vinte quilo va'e rami.

**33** Ha'e gui xakā omoī vy vaka ra'y omboa'ypa ha'e onhono xakā áry.

**34** Ha'e gui ma aipoe'i:

— Pemonyē ke irundy yryru. Penhoē xo'o áry, ha'e xakā ikuai va'e ha'e javi rupi.

Aipoe'ive ju:

— Teīgue ju pejapo — he'i ramo ojapo ju okuapy.

Aipoe'ive ju:

— Teīgue ju pejapo mboapykuerā — he'i ramo mboapykuea ma ojapo okuapy.

**35** Ha'e ramo altar yvýry rupi peve yy oxyry vy omonyēmba ojo'oague.

**36** Ha'e gui mba'emo aju guigua ome'ēa aguā jave ma profeta Elias ju onhemboja ouvy vy aipoe'i:

— Xe-SENHOR Abraão ruete, Isaque ha'e Israel ruete va'e, aŷ gui toikuaa pavē ndee ae Israel kuery ruete reikoa, ha'e rā xee ma nerembiguai aikoa, ha'e ndeayvua rami ae kova'e nunga ha'e javi ajapoague.

**37** Xembovai ke SENHOR, xembovai ke, kova'e kuery oikuaapa aguā ndee ae SENHOR Oreruete reikoa, ha'e ndejeupe guarā ha'e kuery py'a rerupa jevy 'rāa — he'i.

**38** Ha'e gui ma SENHOR-a gui tata ho'a vy oapypa xo'o omoī mbyre, xakā, ita ha'e yvy voi, omombirupa avi yy ojo'oague rupi oī va'ekue.

**39** Ha'e nunga heta va'e kuery oexa vy guenapy'ā re ikuai ngova yvy re omovaēmba reve. Ha'e vy aipoe'i:

— SENHOR ae ma Nhanderuete! SENHOR ae ma Nhanderuete! — he'i okuapy.

**40** Ha'e ramo Elias aipoe'i ha'e kuery pe:

— Pejopypa na Baal pegua profeta kuery, neī peteīve oo jepe e'ŷ aguā — he'i. Ha'e ramo ojopypa ramo Elias ogueraa ukapa Quisom yakā katy, ojukapa okuapy ha'e py.

### *Oky aguā re Elias ojerureague*

**41** Ha'e gui ma Elias aipoe'i Acabe pe:

— Tereo, ekaru ha'e ey'u, mba'eta onhendu ma ouvy oky ja'ea revovo! — he'i.

**42** Ha'e ramo Acabe oy'u ha'e okaru aguā katy oo jave Elias oē ov yvyty re. Ha'e py ojero'a oiny yvy katy, guenapy'ā re ngova omovaē reve.

**43** Ha'e vy aipoe'i guembiguai kunumi va'e pe:

— Tereo, ema'ē ye'ē katy.

Ha'e rā kunumi va'e oo vy oma'ē. Ha'e vy ombovai:

— Ndaexai mba'eve — he'i.

Ha'e rā Elias aipoe'i ixupe:

— Tereo ju ha'vy.

Ha'ekue rami sete-kue peve oiko.

**44** Ha'e gui sete-kuea py ma aipoe'i:

— Aŷ ma ye'ē gui oē jekuaa ouvy peteī arai, teī nhandepo rami kyrī'i va'e guive — he'i.

Ha'e rā ombovai:

— Tereo ha'vy aipo're Acabe pe: "Ereko katu na ndekaróxa ha'e tereo katu, oky ndejoko e'ŷ aguã", 're.

<sup>45</sup> Ha'e gui are e'ŷ'i re yva pytumba araipa vy. Ha'e vy yvytu ha'e oky vaipa. Ha'e rã Acabe okaróxa py oĩ vy ojepe'a ma ov yezreel tetã katy.

<sup>46</sup> Ha'e rã Elias re SENHOR opo omoĩ ramo ojeku'akua rire onha ov yezreel renonde, Jezreel tetã py jaikea'i peve.

## 19

### *Horebe yvyty py Elias oikoague*

<sup>1</sup> Ha'e gui Jezabel pe Acabe omombe'upa Elias ojapo va'ekue, Baal pegua profeta kuery kyxe py ojuka ukapaague guive.

<sup>2</sup> Ha'e ramo Elias oĩa py Jezabel omondouka peteĩ guembiguai ixupe aipoe'i va'erã: "Ko'ẽ rã kova'e hora ojeupity peve xee nderekove ndaipe'ai ramo amboae kuery re rejapoague rami, tuuete kuery ikuai va'e taxerereko axy oipotaa rami", he'i uka.

<sup>3</sup> Ha'e rami rã Elias okyje vy opu'ã ov y. Ojeayvu vy Berseba tetã py ovaõ, Judá yvy re ae. Ha'e py oeja ov y guembiguai kunumi va'e.

<sup>4</sup> Ha'e gui ha'e anho oove ju teko a e'ŷ katy, peteĩ ára re oguata. Ha'e py ovaõ vy oguapy oiny peteĩ yv yra zimbro hi'aĩ va'e yvypy py. Ha'e vy ojerure oiny omano aguã re. Ha'e vy aipoe'i:

— SENHOR, ha'eve ma, aŷ eipe'a xerekove, mba'eta xeru kuery gui xerekoporâve va'e'ŷ ae — he'i.

<sup>5</sup> Ha'e vy onheno vy oke oupy zimbro hi'aĩ va'e guy py.

Ha'e gui ma peteĩ anjo omomyĩ vy

— Evy ke, ekaru — he'i.

<sup>6</sup> Ha'e rã oma'ẽ vy oakã yvy'iry oexa peteĩ mbojape ita raku áry ojy va'ekue, ha'e peteĩ yryru. Ha'e vy okaru ha'e oy'u. Ha'e gui oke ju.

<sup>7</sup> Teigue ju ou SENHOR guigua anjo. Omomyĩ vy aipoe'i ixupe:

— Evy ke, ekaru, mba'eta reguata aguã mombyry vaipa teri — he'i.

<sup>8</sup> Ha'e ramo ov y vy okaru ha'e oy'u ju. Ha'e va'e tembi'u gui imbaraete ma vy oguatave ju quarenta ára ha'e quarenta pytû re, Nhanderuete pegua Horebe yvyty py ovaõ peve.

<sup>9</sup> Ha'e py ma peteĩ itakua oĩ va'e py oike vy oaxa oiny peteĩ pytû. Ha'e gui ixupe SENHOR oayvu ombou vy aipoe'i:

— Elias, mba'e tu rejapo reiny apy?

<sup>10</sup> Elias ombovai:

— Xee ma SENHOR Xeruete ixondaro reta va'e pe aikoa rupi nda'evei ete, mba'eta Israel kuery hexaraipa ma okuapy ndereve guarã rejapo va'ekue gui. Ha'e rami vy oitypa altar ndevy guarã ojapo mbyre, kyxe py ojukapa guive ndevyguia profeta kuery. Aŷ xee anho'i ma aikove, ha'e xee voi xerekaka okuapy xejuka aguã — he'i.\*

<sup>11</sup> Ha'e ramo Nhanderuete aipoe'i ixupe:

— Eê ha'e he'ã kova'e yvyty re SENHOR renonde — he'i.

Ha'e gui ma SENHOR oaxa ov y. Jypy peteĩ yvytu vaikue oitypa yvyty ikuai va'e, omboa'ypa avi ov y itaova SENHOR renonde rupi. Ha'e rami teĩ yvytu py ma SENHOR noĩ rae. Ha'e gui yvytu rire ma yvy ju oryryipa, teĩ yvy oryryia py ma SENHOR noĩ avi.

<sup>12</sup> Ha'e gui yvy oryryi rire ojekuaa tata, teĩ SENHOR ma noĩ tata py. Ha'e gui ma tata oaxa rire peteĩ ayvu onhendu mbeguei'i ha'e ha'eve rei'i va'e.

<sup>13</sup> Ha'e va'e ma Elias oendu vy oao puku apy py ngova omo'ã reve oẽ vy ho'ã itakua rokẽ py.

Ha'e gui ma ixupe ou peteĩ ayvu.

— Elias, mba'e tu rejapo re'amy apy? — he'i ju.

\* **19:10** Romanos 11.3-4

**14** Ombovai:

— Xee ma SENHOR Xeruete ixondaro reta va'e pe aikoa rupi nda'evei ete, mba'eta Israel kuery hexaraipa ma okuapy ndereve guarā reja va'ekue gui. Ha'e rami vy oitypa altar ndevy guarā ojapo mbyre, ha'e kyxe py ojukapa ndevyguia profeta kuery. Aÿ xee anho'i ma aikove, ha'e xee voi xereka okuapy xejuka aguã — he'i.

**15** SENHOR aipoe'i ixupe:

— Tereo, ejevy ju rejuague katy ae, Damasco regua tekao e'ÿa katy. Ha'e py revaẽ vy emoï Hazaël Síria pygua huvixarã.

**16** Ninsi ra'y Jeú remoï avi 'rã Israel pygua huvixarã. Ha'e gui Abel-Meolá pygua Safate ra'y Eliseu ma remoï 'rã profeta-rã nderekovia.

**17** Ha'e gui Hazaël kyxe gui oo jepe va'ekue ma Jeú 'rã ojuka, ha'e Jeú kyxe gui oo jepe va'ekue ma Eliseu 'rã ojuka.

**18** Ha'e gui xejeupe guarā amoingove ma voi sete mil Israel kuery va'e regua. Ha'e va'e kuery ma Baal renonde guenapy'ã re oï va'e'ÿ, ha'e ha'angaa ojuru rayvu va'e'ÿ meme.

### *Elias ngupive guarā Eliseu oenoÿague*

**19** Ha'e gui Elias oo vy ojou Safate ra'y Eliseu, doze canga vaka ombo'eapo va'e reve yvy oikaraña jave, ha'e rã ha'e ma doze-a va'e ogueraa. Ha'e rupi Elias oaxa ovvy vy Eliseu kupe re omombo oao puku.

**20** Ha'e ramo Eliseu vaka oejapa vy onha ouvy Elias rakykue. Ha'e vy aipoe'i ixupe:

— Taa ranhe taxarura xeru ha'e ha'i pe ayvua rupi, ha'e gui ma aa 'rã nderupive.

Elias ombovai:

— Tereo ha'vy, ha'e gui ejevy ju. Mba'eta reikuua porã ma ndevy ajapoague — he'i.

**21** Elias oña gui Eliseu ojepe'a ranhe vy ojevy mokoï vaka ombo'eapo va'e ikuiaia py. Mokoïve ojopy vy ojuka, ha'e ijaju'y regua canga omoendy vy oexy ho'okue. Ha'e vy heta va'e kuery pe ome'ëmba ramo ho'upa okuapy. Ha'e gui mae ma ojepe'a ouvy vy Elias rupive oo ipytyvõarã.

## 20

### *Acabe Síria pygua kuery re ipo'akaague*

**1** Ha'e gui Síria pygua huvixa Ben-Hadade omboatypa oxondaro kuery ha'e javi. Hexeve ikuai avi trinta e dois huvixa kuery, kavaju kuery ha'e karóxa. Ha'e kuery oje'oi vy Samaria tetã ojokopa ha'e kuery rovai opu'ãa rupi.

**2** Ha'e gui tetã katy omondouka Israel kuery ruvixa Acabe pe imombe'uarã kuery.

**3** Ha'e vy aipoe'i okuapy ixupe:

— Po rami ijayvu Ben-Hadade: “Prata ha'e ouro rerekva'e ma xemba'e ae. Ha'e ndera'yxy kuery ha'e ndera'y ipo'akakueve voi xemba'e meme 'rã!” he'i.

**4** Ha'e rã Israel pygua huvixa ombovai:

— Xeruvixa, ndeayvua rami ae tema toiko. Xee ha'e opa mba'e areko va'e ha'e javi ma ndevy guarā meme — he'i.

**5** Ha'e gui imombe'uare kuery teïgue ju ou vy aipoe'i okuapy:

— Po rami ijayvu Ben-Hadade: “Ndea py anhetë amondouka va'ekue pe aipoa'e uka: ‘Xevy remboaxa mate 'rã prata ha'e ouro, ha'e gui ndera'yxy ha'e ndera'y kuery’, ha'e uka va'ekue.”

**6** Ha'ekue rami ae teï ko'ë rã, kova'e hora ojeupity jeyva py xerembiguai kuery ambou ju 'rã. Ha'e va'e kuery ma nderropy rupi oike vy oexapa 'rã, nerembiguai kuery opena va'ety ro rupi guive. Ha'e vy oipe'a 'rã heravy iporägueve oexa va'e rei”, he'i.

**7** Ha'e nunga Israel pygua huvixa oendu vy oenoï ukapa nhomongeta va'ety kuery oyvy re ikuai va'e. Ha'e vy aipoe'i ha'e kuery pe:

— Peikuua ae ha'e va'e ava ha'eve'ÿ va'e anho ojapoxe oikovya. Mba'eta xera'yxy ha'e xera'y kuery, ha'e gui prata ha'e ouro guive ome'ë ukapa ramo xee name'ëxe e'ÿi — he'i.

<sup>8</sup> Ha'e ramo nhomongeta va'ety kuery ha'e heta va'e kuery ha'e javi aipoe'i okuapy ixupe:

— Ejapyxaka rei eme ta'vy ijayvua re, ejapo eme guive.

<sup>9</sup> Ha'e ramo huvixa ombovai Ben-Hadade rembiguai kuery pe:

— Aipopeje penderuvixa pe: “Jypy xee nerembiguai pe rejerure ukaague ajapo ta va'ekue. Ha'e rā angegua ma ndajapo reguai”, peje. Ha'e rami ombovai ramo tembiguai kuery ojevy vy omombe'upa.

<sup>10</sup> Ha'e gui Ben-Hadade omondoukave ju imombe'uarā kuery. Ha'e vy aipoe'i:

— Xapy'a rei Samaria guigua yvy ku'i xerupiveguia kuery po tynyēmba aguā rami peve teī opyta ramo tuuete kuery ikuai va'e taxerereko axy oipotaa rami — he'i.\*

<sup>11</sup> Ha'e rā Israel pygua huvixa ombovai:

— Aipopeje ixupe: “Joe opu'ā aguā onhemoatyrō teri reve oiko va'e ma nda'evei ijayvu aguā joity maague gui ojevy va'ekue ijayvua rami rive”, peje 'rā.

<sup>12</sup> Ha'e rami ombovaiague Ben-Hadade oendu oo py huvixa kuery mboae reve oy'u okuapya py. Ha'e vy aipoe'i guembiguai pe:

— Peiko katu pavē ha'vy — he'i ramo oiko katupa ma tetā pygua kuery rovai opu'ā aguā.

<sup>13</sup> Ha'e gui ma Israel pygua huvixa Acabe-a py ovaē peteī profeta. Ha'e vy aipoe'i ixupe:

— Po rami ijayvu SENHOR: “Rexa pa peva'e avakue nhomboaty va'e ha'e javi? Ha'e va'e kuery ma kova'e árave amboaxapa 'rā ndepo py. Ha'e ramo reikuua 'rā xee ae SENHOR aikoa”, he'i.

<sup>14</sup> Ha'e ramo Acabe oporandu:

— Mava'e kuery po rupi 'rā ha'vy aity uka?

Profeta ombovai:

— Po rami SENHOR ijayvu: “Kunumigue xondaro ruvixa kuery rembiguai ikuai va'e po rupi 'rā reity uka”, he'i.

Ha'e ramo Acabe oporanduve ju:

— Mava'e ranhe 'rā tu omboypy joe opu'ā aguā?

— Ndee ae 'rā ri — he'i profeta.

<sup>15</sup> Ha'e ramo oipapa ukapa kunumigue xondaro ruvixa kuery rembiguai ikuai va'e. Ha'e ramo duzentos e trinta e dois oikuua. Ha'e gui Israel kuery ha'e javi ju oipapa uka vy sete mil oikuua.

<sup>16</sup> Kuaray mbyte jave ha'e kuery oje'oi. Ha'e va'e jave py Ben-Hadade ma opy oy'u tema oiny, oka'upa rei guive okuapy, huvixa kuery mboae trinta e dois oipytyvōa rupi ikuai va'e reve.

<sup>17</sup> Ha'e gui kunumigue ranhe tenonde jogueraa, huvixa kuery rembiguai va'e. Ha'e ramo oexa pota va'erā Ben-Hadade omondouka va'ekue oexa vy

— Samaria tetā gui ou jekuua avakue — he'i uka ixupe.

<sup>18</sup> Ombovai:

— Ha'e kuery ma xapy'a rei peteī rami nhandekuai aguā re ojerure vy ou ramo pejopypa rive 'rā oikove reve. Orere opu'ā aguā ri ou teī ha'e rami ae avi pejopypa rive 'rā oikove reve — he'i.

<sup>19</sup> Ha'e gui tetā gui kunumigue huvixa kuery rembiguai va'e jogueru, ha'e hupive xondaro kuery ha'e javi ou va'e ma

<sup>20</sup> peteī-teī ojuka avakue ojee opu'ā va'e. Ha'e ramo Síria pygua kuery onhamba ramo Israel kuery oje'oi hakykue. Ha'e rā Síria pygua huvixa Ben-Hadade ma kavaju áry oo jepe, kavaju árygua kuery mboae reve.

<sup>21</sup> Ha'e gui Israel pygua huvixa ou vy ojukapa kavaju, karóxa guive ombovaipa. Ha'e vy ojuka reta avi Síria pygua kuery.

\* <sup>20:10</sup> Ha'e rami Ben-Hadade ouraa rupi ijayvu Samaria tetā omomba ete aguā re.

**22** Ha'e gui Israel pygua huvixaa py profeta ou jevy vy aipoe'i ixupe:

— Tereo, ha'e enhemombaraeeteve na. Eikuaa pota porā mba'e pa rejapo aguā re, mba'eta peteī ma'etŷa py Síria pygua huvixa ou jevy 'rā nderovai — he'i.

**23** Ha'e gui Síria pygua huvixa rembiguai kuery aipoe'i okuapy ixupe:

— Israel kuery ruete nhi'ã yvyty rupi rive ipo'aka va'e. Ha'e nunga rupi ae ipo'aka karamboae nhande kuery re. Ha'e rā yvy joja reia rupi ri ha'e kuery rovai nhapu'ã vy nhande ju 'rā jaity ha'e kuery.

**24** Ha'e nunga rupi ejapo po rami: Reipe'apa 'rā huvixa ndereve ikuai va'ekue ha'e javi, ha'e hekoria remoī 'rā xondaro ruvixa ae.

**25** Ha'e gui rejouve ju 'rā xondaro kuery, omanomba va'ekue hetaa rami ae. Ha'ekue rami ae ju 'rā rejou kavaju ha'e karóxa voi. Ha'e gui yvy joja reia rupi ha'e kuery rovai nhapu'ã vy nhi'ã jaitypa 'rā — he'i okuapy. Ha'e rami ha'e kuery ijayvua oendu ma vy ha'e rami ae ju ojapo.

**26** Ha'e gui peteī ma'etŷa py Ben-Hadade oo jevy vy Síria pygua xondaro kuery re oexa potapa. Ha'e vy Afeca katy ogueraa Israel kuery re opu'ã aguā.

**27** Ha'e gui Israel kuery re voi oexa potaa, ha'e ho'u va'erā ogueraa reve oje'oi amboae kuery rovai. Israel kuery ma amboae kuery renonde ikuia py mokoī henda py mbovy'i e'ŷ kavara kuery rami rive'i ojekuaa. Ha'e rā Síria pygua kuery ma yvy jojaa opa rupi ikuai.

**28** Ha'e gui ovaē peteī ava Nhanderuete remimbo'e. Ha'e vy Israel pygua huvixa pe ijayvu vy aipoe'i:

— Po rami SENHOR ijayvu: “Síria pygua kuery aipoe'i: ‘SENHOR ma yvyty rupi anho ri ipo'aka va'e, yvyugua rupi ipo'aka va'e'ŷ, he'i okuapy teī xee ma ndepo py amboaxapa rā peva'e kuery ha'e javi. Ha'e ramia py reikuaa aguā xee ae SENHOR aikoa”, he'i.

**29** Ha'e gui sete ára re ikuai joexei'i. Sete araa py ma omboypy okuapy joe opu'ã aguā. Ha'e vy Israel kuery ma peteī ára pyve cem mil avakue vyvoi ojuka Síria pygua xondaro kuery yvy rupigua.

**30** Ha'e ramo hembyrekue ma Afeca katy onhamba vy oikepa jogueravy tetā py. Tetā kora ma vinte e sete mil avakue hembyre va'ekue áry ho'a ramo omanomba. Ha'e rā Ben-Hadade ma onha vy tetā katy ou vy onhemi peteī opy ja'o py.

**31** Ha'e gui ixupe hembiguai kuery aipoe'i:

— Ma'ẽ, roendu ma Israel pygua huvixa kuery nhomboaxya rupi ikuia. Ha'e nunga rupi nhandejee nhamoī 'rā ajukue vox a guigua rive, ha'e nhaneakā rupi ixā nhaimama 'rā heravy, Israel pygua huvixaa py nhaẽ aguā. Xapy'a rei ma nandejukai nho 'rā — he'i okuapy.

**32** Ha'e rami ojee omoī okuapy ajukue vox a guigua, ha'e oakā rupi ixā omoī va'e reve oē okuapy Israel pygua huvixaa py. Ha'e vy ixupe aipoe'i okuapy:

— Nerembiguai Ben-Hadade aipoe'i uka: “Xejuka eme nho ta'vy”, he'i uka.

Ha'e rā Acabe ombovai:

— Oikove teri ri ty'y? Ha'e ma xeryvy — he'i.

**33** Ha'e rami ijayvu rā avakue ipy'a guaxuve vy ombovai ju aipoe'iague rami.

— Ben-Hadade ma nderyvy ae! — he'i okuapy ramo ombovai:

— Peju ha'vy Peru xea py — he'i. Ha'e ramo mae Ben-Hadade oē ouvy oĩa katy. Ha'e rā oguerojeupi okaróxa py ae.

**34** Ben-Hadade aipoe'i Acabe pe:

— Ndevy amboaxapa ju 'rā tetā nderu gui xeru oipe'a va'ekue. Damasco py ae 'rā remondouka ndevygua mba'emo vendea kuery, xeru Samaria py ojapoague rami.

Acabe ombovai:

— Ha'e gui xee ma romondouka porā ju 'rā, ndereve peteī rami nhandekuai aguā regua ajapo va'erā rami vy — he'i. Ha'e vy hexeve peteī rami ikuai aguā ojapo ma vy omondouka ju.

- <sup>35</sup> Ha'e ramo peteĩ profeta remimbo'e aipoe'i oirũ pe SENHOR aipoe'iague rami vy:  
 – Ejeai ha'vy xere – he'i oirũ pe teĩ irũ ndojeaixe.
- <sup>36</sup> Ha'e ramo aipoe'i ixupe:  
 – Ndee ma SENHOR nereneh'ẽ rendui rire aŷ'i xea gui rejope'a ramove peteĩ guary ou vy ndejuka 'rã – he'i. Ha'e gui ojepe'a ovv ramove peteĩ guary ovaexi vy ojuka.
- <sup>37</sup> Ha'e gui profeta ma ava mboae ju ojou vy aipoe'i ixupe:  
 – Ejeai xere – he'i ramove ojeai vy oity.
- <sup>38</sup> Ha'e gui profeta oo tape huvixa ouaty va'e rupi teĩ ngova omo'ãmba reve hi'aĩ ojexa kuaa uka e'ŷ aguã.<sup>†</sup>
- <sup>39</sup> Huvixa oaxa rã ojapukai vy aipoe'i:  
 – Xee nerembiguai ma joe opu'ãa mbyte py aiko jave xea py xeirũ ou vy ogueru peteĩ ava xea py. Ha'e vy aipoe'i xevy: “Epêna ke kova'e ava re, mba'eta kova'e okanhy ri ramo ndee ae 'rã remboekovia nderekove py, ha'e rami e'ŷ ri vy hekovia reme'ẽ 'rã trinta e cinco quilos prata guigua”, he'i va'ekue xevy.
- <sup>40</sup> Ha'e gui xee nerembiguai xereketa rei jave ava va'e oo ma ra'e – he'i.  
 Ha'e ramo Israel pygua huvixa ombovai:  
 – Nembopagaa 'rã ndee ae aipo'reague rami vy – he'i.
- <sup>41</sup> Ha'e ramove oakã oimamaague omboi vyvoi ngova gui. Ha'e ramo mae ma Israel pygua huvixa oexa kuaa ramo profeta kuery va'e regua ae ra'e.
- <sup>42</sup> Ha'e vy aipoe'i huvixa pe:  
 – Po rami SENHOR ijayvu: “Ndee ma ava ndepo py opaga aguã amboaxa va'ekue, teĩ repoi rire ma hekovia aipe'a 'rã nderekove, ha'e ixupergua kuery ikuai axy 'rãgue py ndevygua kuery 'rã ikuai axy”, he'i uka ndevy.
- <sup>43</sup> Ha'e ramo Israel pygua huvixa oo ju ngoo katy, ndojou porãi ha'e nonhenhandu porãei reve. Ha'e vy Samaria tetã py ju ovaõ.

## 21

### *Acabe pe Nabote omba'e uvaty novendexeiaque*

- <sup>1</sup> Ha'e va'e rire ma pova'e oiko. Jezreel pygua Nabote hery va'e oguerekopeteĩ uvaty. Jezreel py ae onhotŷ va'ekue Samaria pygua huvixa Acabe ro yvy'iry.
- <sup>2</sup> Ha'e gui Acabe aipoe'i Nabote pe:  
 – Eme'ẽ na nemba'e uvaty xe-hortarã, mba'eta xero yvy'iry optya. Ha'e rã hekovia ame'ẽ 'rã uvaty mboae iporãve va'e. Ha'e rami e'ŷ vy amboae rami reipota ramo ndevy ame'ẽ 'rã peráta hepya rami ae tema.
- <sup>3</sup> Nabote ombovai Acabe pe:  
 – SENHOR taxejoko xeramoĩ kuery yvy oeja va'ekue joupe amboaxa e'ŷ aguã – he'i.
- <sup>4</sup> Ha'e gui Acabe ma ndojou porãi ha'e nda'evei ete reve oo ju ngoo py, ixupe Jezreel pygua Nabote “Ndevy name'ẽi 'rã xeramoĩ kuery yvy oeja va'ekue”, he'i rire. Ha'e vy ngupa rupi onheno oupy vy hovai katy ngova ombojere vy neĩ ndokaru potai.
- <sup>5</sup> Ha'e gui ituia py ta'yxy Jezabel ou vy oporandu:  
 – Mba'e tu oĩ ha'e rami ete nderejou porãi va'e nenhe'ẽ py, neĩ nderekarui aguã?
- <sup>6</sup> Ime ombovai:  
 – Mba'eta Jezreel pygua Nabote pe “Emboekovia na nde'uvaty peráta re, e'ŷ vy reipotaa rami amboae uvaty ame'ẽ va'erã re”, ha'e ramo ombovai: “Ndevy name'ẽi 'rã xe'uvaty”, he'i.
- <sup>7</sup> Ha'e ramo ta'yxy Jezabel aipoe'i:  
 – Israel kuery ruvixa e'ŷ ri ty'y ndee reiko? Evy ke, ekaru, ha'e evy'a guive ndepy'a py. Ha'e rã xee ma ndepo py amboaxa 'rã Jezreel pygua Nabote uvaty – he'i.

<sup>†</sup> 20:38 Profeta ombojeaixe ojee huvixa oexa vy oikuaa e'ŷ aguã profeta oikoa.

### *Jezabel Nabote ojuka ukaague*

<sup>8</sup> Ha'e gui Acabe rery rupi ta'yxy ombopara kuaxia. Acabe rery oña reve guive omboja vy ogueraa uka Nabote rekoia py nhomongeta va'ety ha'e yvatekueve ikuai va'e pe.

<sup>9</sup> Ha'e vy kuaxia re ombopara vy aipoe'i: "Pejapo okaru e'ŷ re ikuai aguã, ha'e gui Peru Nabote heta va'e kuery renonde.

<sup>10</sup> Henonde py Peru avi 'rã mokoñ avakue heko vai va'e hexe ijayvu rive va'erã, 'Nabote ijayvu vai Nhanderuete ha'e huvixa rovai', he'i aguã. Ha'e gui ma tetã gui peraa 'rã mombyrya py, ha'e pejapipa 'rã ita py omano peve", he'i ombopara vy.

<sup>11</sup> Ha'e gui ma ha'e va'e tetã pygua nhomongeta va'ety kuery ha'e yvatekueve ojapo okuapy Jezabel aipoe'iague rami, kuaxia para ogueraa uka va'ekue re oña rami ae.

<sup>12</sup> Ha'e rami vy omombe'u peteñ ára re okaru e'ŷ re ikuai aguã. Ha'e vy heta va'e kuery renonde ogueru Nabote.

<sup>13</sup> Henonde py ogueru avi mokoñ avakue heko vai va'e. Heta va'e kuery oendua py ijayvu rive Nabote rovai.

— Ijayvu vai Nhanderuete ha'e huvixa rovai — he'i okuapy. Ha'e ramo tetã gui ogueraa okuapy vy ita py ojapipa, ha'e rã omano.

<sup>14</sup> Ha'e va'e rire Jezabel pe omombe'u uka Nabote ojapipaa rã omano maa.

<sup>15</sup> Ha'e gui Nabote ojapipaa rã omano maa Jezabel oendu vy aipoe'i Acabe pe:

— Epu'ã ke, ha'e ejopy uvaty Jezreel pygua Nabote peráta re nomboekoviaxei va'ekue. Mba'eta Nabote ndoikovevei ma, omano ma — he'i.

<sup>16</sup> Nabote omano maa Acabe oendu vy opu'ã ju, ha'e Nabote mba'ekue uvaty katy oo ojopy aguã.

### *Acabe ha'e Jezabel pe Elias ijayvu poyiague*

<sup>17</sup> Ha'e gui ma Tisbé pygua Elias pe SENHOR oayvu ombou vy aipoe'i:

<sup>18</sup> — Epu'ã ke, tereo revaexi aguã Israel pygua huvixa Acabe Samaria py hekoia va'e. Nabote mba'ekue uvaty py 'rã rexia, ojeupe guarã ojopy aguã ooague py.

<sup>19</sup> Ixupe ndeayvu vy aipo're: "Po rami SENHOR ijayvu: 'Rejojuka uka ma, ha'e gui rejapo vaive vy imba'ekue'i ae reipe'apa ta?' he'i. Po rami SENHOR ijayvuve ju: 'Nabote ruguy jagua oy'uague py ae ju oy'u avi 'rã nderuguy', he'i", 're 'rã.

<sup>20</sup> Ha'e gui Acabe Elias oexa vy oporandu ixupe:

— Aŷ pa xejou ma, xerovaigua?

Elias ombovai:

— Tá, rojou ae ma, mba'eta renheme'ẽ ma SENHOR renonde ha'eve'ŷ va'e rejapo aguã.

<sup>21</sup> Po rami SENHOR ijayvu ndere: "Ne'exa, ndere ambou 'rã mba'emo vai. Ha'e rami vy amokanhymba 'rã neramymino kuery, Israel gui amomba 'rã ndee Acabe ramymino kuery avakue ikuai va'e ma guive rã, escravo e'ŷ vy ikuai rive'i va'ekue teñ.

<sup>22</sup> Ndero pygua kuery re ajapo 'rã Nebate ra'y Jeroboão ro pygua kuery re ajapoague ramigua, ha'e Aías ra'y Baasa ro pygua re, xembopoxy rei rire, ha'e Israel kuery oguerojejavypa ague re", he'i.

<sup>23</sup> Ha'e gui Jezabel re voi SENHOR ijayvu: "Jezreel tetã py ae jagua ho'upa 'rã Jezabel retekue.

<sup>24</sup> Acabe kuery va'e regua tetã rupi omano rã jagua ho'upa 'rã, ha'e rã mba'ety rupi omano ramo ma guyra oveve va'e 'rã ho'upa", he'i.

<sup>25</sup> Mava'eve ndoikoi raka'e Acabe rami ete, mba'eta onheme'ẽ rei SENHOR renonde ha'eve'ŷ va'e ojapo aguã, ta'yxy Jezabel ombo'eague rami rive.

<sup>26</sup> Mba'eta mba'emo ra'angaa re rive ojeroviaa rupi oiko vy ojapo ha'eve'ŷ ete va'e, amorreu kuery ojapoague ramigua meme. Ha'e va'e kuery ma SENHOR oipe'apa Israel kuery ikuai aguã gui.

<sup>27</sup> Ha'e gui ma ha'e va'e ayvu Acabe oendu vy omondoropa oao, ha'e ajukue vox a guigua py rive onheovāmba vy okaru e'ŷ re oiko. Voxa py guive oke, ha'e oakā oity rei reve oiko.

<sup>28</sup> Ha'e gui SENHOR oayvu ombou ju Tisbé pygua Elias pe. Ha'e vy aipoe'i:

<sup>29</sup> – Rexa pa Acabe xerenonde onhemō'yvyī'i oikovya? Xerenonde onhemō'yvyī'i ramo ma oikove teria ja namboui 'rā mba'emo vai ambou 'rā va'ekue. Ha'e rā ta'y ju ma oī jave ambou 'rā hoo pygua kuery re.

## 22

### *2 Crônicas 18.1-3*

<sup>1</sup> Mboapy ma'etŷ oaxa Síria ha'e Israel kuery reve joe opu'ā ve'ŷ re.

<sup>2</sup> Ha'e gui mboapy ma'etŷa py ma Judá pygua huvixa Josafá oo joexa aguā Israel pygua huvixa reve.

<sup>3</sup> Ha'e jave py Israel pygua huvixa aipoe'i guembiguai kuery pe:

– Ndapeikuuaai ri ty'y Ramote-Gileade tetā nhanemba'erā optytaa? Mba'exa tu ha'vy ndajaa potai teri Síria pygua huvixa po gui jaipe'a ju aguā? – he'i.

<sup>4</sup> Huvixa Josafá pe ju oporandu:

– Ndee pa reo avi 'rā orereve Ramote-Gileade re ropu'ā aguā katy?

Josafá ombovai Israel pygua huvixa:

– Xee ma aiko 'rā ndereve, xevygua kuery voi ndevygua kuery revegua ae avi 'rā, xerymba kuery kavaju voi nerymba kuery kavaju rami avi 'rā ikuai – he'i.

### *2 Crônicas 18.4-11*

<sup>5</sup> Ha'e gui Josafá aipoe'ive ju Israel pygua huvixa pe:

– Eikuua pota ranhe ke SENHOR ijayvua re – he'i.

<sup>6</sup> Ha'e ramo Israel pygua huvixa omboatypa profeta kuery, quatrocentos avakue ha'e javi vy. Ha'e vy aipoe'i ha'e kuery pe:

– Taa pa Ramote-Gileade re apu'ā aguā, tyrā pa taa eme?

Ha'e kuery ombovai vy

– Tereo oreruvixa, mba'eta SENHOR omboaxapa 'rā ndepo py – he'i okuapy.

<sup>7</sup> Ha'e rā Josafá ma aipoe'i:

– Nda'ipoi teri pa apy profeta SENHOR pegua ete jaikuua pota ranhe aguā?

<sup>8</sup> Israel pygua huvixa ombovai Josafá pe.

– Peteĩ'i teri oiko ha'e va'e rupi SENHOR ayvu re jaikuua pota aguā. Ha'e rami avi hexe ma xee ndaxea'e, mba'eta xerenonderā re nomombe'ui iporā va'e, iporā e'ŷ va'e anho. Ha'e va'e ma Inlá ra'y Micaías – he'i.

Ha'e rā Josafá aipoe'i:

– Huvixa, ha'e rami ndeayvu eme.

<sup>9</sup> Ha'e gui Israel pygua huvixa ma peteĩ guembiguai oenoĩ vy ixupe aipoe'i:

– Tou vyvoi ta'vy xea py Inlá ra'y Micaías – he'i.

<sup>10</sup> Ha'e va'e jave py ma Israel pygua huvixa ha'e Judá pygua huvixa reve jogueroguapy nhoguenoiny peteĩ-teĩ guenda py ae, ha'e huvixa pegua ao py ae onhemonde reve, Samaria tetā oike ovya rokē yvýry, mba'emo moa'yīaty py. Ha'e kuery renonde ma profeta kuery ha'e javi ijayvu okuapy.

<sup>11</sup> Ha'e gui Quenaana ra'y Zedequias ma vaka rakua ra'angaa oguerek ferro gui ojapo va'ekue. Ha'e vy aipoe'i:

– Po rami SENHOR ijayvu: “Kova'e ramigua py reipyxo 'rā Síria pygua kuery reitypa peve”, he'i.

<sup>12</sup> Ha'e gui profeta mboae kuery pova'e ayvu rupi meme ijayvu okuapy.

– Oreruvixa, tereo ke Ramote-Gileade katy, ha'e py ma ndepo'aka 'rā, mba'eta SENHOR omboaxapa 'rā ndepo py – he'i okuapy.

### *2 Crônicas 18.12-27*

**13** Ha'e gui tembiguai Micaías reruarã oo va'ekue ixupe ijayvu vy aipoe'i:

— Ma'ẽ, profeta kuery ikuai va'e ma peteĩ'i rami ijayvu kuri huvixa pe mba'emo porã re anho. Ndee voi ndeayvu 'rãgue ha'e kuery ijayvuague rami ae, mba'emo porã re anho.

**14** Ha'e rã Micaás ombovai:

— Anhetẽ ete SENHOR oikove va'e rupi aura vy aipoa'e: Xee ma SENHOR aipoe'i ukaa rami ae 'rã xeayvu — he'i.

**15** Ha'e gui ma huvixaa py ovaẽ ramove ixupe oporandu:

— Micaás, toroo ae pa Ramote-Gileade re ropu'ã vy, tyrã pa toroo eme?

Micaás ombovai:

— Tapeo, ha'e vy pendepo'aka 'rã, mba'eta ndepo py SENHOR omboaxapa 'rã — he'i.\*

**16** Ha'e rami rã huvixa aipoe'i ixyupe:

— Mbovykue ma tu ndevy xeayvu, SENHOR rery rupi anhetẽ va'e re anho ndeayvu aguã?

**17** Ha'e rã Micaás aipoe'i:

— Israel kuery aexapa yvyty áry rupi omoãmbaa ramo, vexa'i ija e'ŷ va'e rami. Ha'e ramo SENHOR aipoe'i: "Peva'e kuery ma ija e'ŷ va'e vy peteĩ-teĩ too porã ngoo katy", he'i kuri xevy.

**18** Ha'e ramo Israel pygua huvixa aipoe'i Josafá pe:

— Aipoa'e ae ma ndevy: "Ha'e va'e ma xerenonderã re nomombe'ui ae iporã va'e, ha'e rã iporã e'ŷ va'e anho", ha'e ma voi kuri.

**19** Ha'e gui ma Micaás ijayuve tema:

— Endu ha'vy SENHOR ayvu. Xee aexa SENHOR guenda openaaty py oguapy oiny rã, ha'e oña py ikuai avi ixondaro kuery yva pygua ha'e javi, ijaxu e'ŷa re ha'e ijaxua re.

**20** SENHOR oporandu: "Mava'e 'rã tu Acabe mbotavyarã oo, Ramote-Gileade tetã py omano aguã?" he'i ramo peteĩ ma peteĩ rupi ijayvu, ha'e rã amboae ma amboae rami ijayvu.

**21** Ha'e gui ma peteĩ nhe'ẽ ou vy ojexa uka SENHOR renonde. Ha'e va'e aipoe'i: "Xee ma ambotavy 'rã" he'i. Ha'e rã SENHOR oporandu: "Mba'e py ha'vy?"

**22** Ombovai: "Aa 'rã nhe'ẽ imbotavyarã aĩ ixupergua profeta kuery ha'e javi juru re", he'i. Ha'e rami rã SENHOR aipoe'i: "Ndee ma rembotavy 'rã, amboae kuery gui ndepo'akave vy. Tereo ha'vy, ejapo ha'e rami", he'i.

**23** Ha'e rami rã kova'e profeta kuery ndevygua ikuai va'e juru re SENHOR omoĩ ra'e nhe'ẽ nembotavyarã. Ha'e rã SENHOR ae nderovai ijayvu mba'emo vai oiko aguã re — he'i.

**24** Ha'e ramo Quenaana ra'y Zedequias onhemboja vy oipete Micaás. Ha'e vy aipoe'i:

— Ma rupi tu ha'vy xegui SENHOR nhe'ẽ oẽ ndereve ijayvu aguã?

**25** Micaás ombovai:

— Reikuua 'rã opy ja'o py renhemí aguã reike jave — he'i.

**26** Ha'e gui Israel pygua huvixa ju aipoe'i:

— Pejopy ke Micaás, ha'e pemboaxa tetã ruvixa Amom ha'e huvixa ra'y Joás po py.

**27** Ha'e vy aipopeje: "Po rami huvixa ijayvu: 'Pemboty nhuã py kova'e ava, ha'e pembojexavai mbojape ha'e yy ruxã'i kuerei peme'ẽa py, ajevy porã ju e'ŷa ja', he'i."

**28** Ha'e ramo Micaás aipoe'i:

— Teĩ xapy'a rei anhetẽ ri rejevy porã ramo SENHOR ayvu rupi e'ŷ xeayvu ramo ma 'rã. Aipoe'ive ju:

— Peẽ kuery ha'e javi, pendu pota pova'e re! — he'i.

**2 Crônicas 18.28-34**

**29** Ha'e gui ma Ramote-Gileade tetã katy Israel pygua huvixa jogueraa Judá pygua huvixa Josafá reve.

**30** Israel pygua huvixa aipoe'i Josafá pe:

\* **22:15** Micaás ma profeta ramigua kuery ayvu rupi rive ranhe ijayvu, anhetẽ va'e'ŷa rami oikuua uka vy.

— Xee ma amboae rami anhemonde reve 'rã aa joe apu'ã aguã katy. Ha'e rã ndee ma ndeao py ae 'rã renhemonde — he'i. Ha'e rami vy Israel pygua huvixa amboae rami onhemonde reve oo joe opu'ãa py.

<sup>31</sup> Síria pygua huvixa aipoe'i ma voi okaróxa mboguataa trinta e dois huvixa ikuai va'e pe: "Pepu'ã eme ou va'e-va'e rovai, yvatekueve ikuai teĩ, ha'e rã Israel pygua huvixa rovai anho'i", he'i va'ekue.

<sup>32</sup> Ha'e gui huvixa karóxa mboguataa kuery ma Josafá oexa vy

— Peva'e ae ri nhi'ã Israel pygua huvixa — he'i okuapy. Ha'e vy ha'e katy oje'oi ojoko aguã. Ha'e ramo Josafá ojapukai.

<sup>33</sup> Ha'e gui huvixa karóxa mboguataa kuery ma Israel pygua huvixa e'ý ae ra'ea oikuua vy oejapa ju oje'oivy.

<sup>34</sup> Ha'e gui ma peteĩ ava guyrapa xã omoatã vy opoia katy rei opoi vy onhyvõ Israel pygua huvixa pexo regua pa'üa py rive. Ha'e ramo aipoe'i guembiguai karóxa mboguataa va'e pe:

— Ejere joe opu'ãa mbyte gui xereraa aguã, mba'eta xepyxoa ma — he'i.

<sup>35</sup> Ha'e va'e ára ma joe opu'ãve tema okuapy. Ha'e rã huvixa ma Síria kuery oexaa py omopu'ãa imoiny ikaróxa py, ha'e ijaja gui huguy onheẽ oiny karóxa py rupi. Ha'e rire ka'aru ma jave omano.

<sup>36</sup> Kuaray ndojopevei ma jave onhendu peteĩ ayvu xondaro kuery ikuiaia rupi, "Peteĩ-teĩ tapeo pendekoa katy, peteĩ-teĩ tapeo pendeyvy katy ae", he'i va'e.

<sup>37</sup> Huvixa Acabe omano ma ramo Samaria tetã py ogueraa vy onhono porã okuapy ha'e py.

<sup>38</sup> Ha'e rã ikaróxa ma Samaria py yy ojoko pyre yvýry ojoi ramo jagua oere okuapy huvixa ruguykue, SENHOR aipoe'iague rami vy. Ha'e va'e yy py kunhague itavy rei va'e voi ojau 'rã.

<sup>39</sup> Ha'e gui oïve rei tema Acabe rekokue regua. Ha'e rami avi oorã marfim gui anho ojapoague, tetã ha'e mba'emo ojapo va'ekue ha'e javi noï 'rã teve kuaxia Israel pygua huvixa kuery rekokue oïa re?

<sup>40</sup> Ha'e rami py Acabe ndoikovevei'i ma guamoñ kueryague rami. Ha'e ramo ta'y Acazias ju oïnguu rekovia.

## *2 Crônicas 20.31-37*

<sup>41</sup> Ha'e gui Israel pygua huvixa Acabe irundy ma'etý re ma oï jave py Asa ra'y Josafá oï Judá kuery ruvixarã.

<sup>42</sup> Huvixa oï ypy'i jave Josafá ma trinta e cinco ma'etý oguereko. Ha'e vy vinte e cinco ma'etý re huvixa oï Jerusalém py. Ixy rery ma Azuba, Sili rajy.

<sup>43</sup> Ha'e ma nguu Asa oikoague rupi ae oiko. Ha'e va'e rupi oikoa gui ndojope'ai vy ha'evea ramigua meme ojapo SENHOR renonde.

<sup>44</sup> Ha'e rami teĩ yvy'ã rupi ombojerovia atyrã ojapo pyre ndoipe'ai ramo ha'e va'e py heta va'e kuery mba'emo ome'ë ha'e heakuã porã va'e oapy tema okuapy.

<sup>45</sup> Josafá ma peteĩ rami ikuai Israel pygua huvixa reve.

<sup>46</sup> Ha'e gui oïve rei tema Josafá rekokue regua. Ha'e rami avi opo'akaa oexa ukaague, joe opu'ãague, ha'e mba'emo ojapo va'ekue ha'e javi noï 'rã teve kuaxia Judá pygua huvixa kuery rekokue oïa re?

<sup>47</sup> Ha'e rami avi oyvy gui oipe'apa avakue ta'angaa pegua itavy rei va'ekue, nguu Asa teri oï jave py optya va'ekue ha'e javi.

<sup>48</sup> Ha'e va'e jave ma noï huvixave Edom py, ha'e rã peteĩ oiko joe opena ukaa va'e.

<sup>49</sup> Josafá ojapo kanoã guaxu Társis guigua Ofir katy ouro re oo aguã, va'eri ndooi, Eziom-Geber py kanoã guaxu opêmba rã.

<sup>50</sup> Acabe ra'y Acazias aipoe'i Josafá pe:

— Xerembiguai kuery toje'oi avi kanoã guaxu py nerembiguai kuery reve — he'i teĩ Josafá ndoipotai.

<sup>51</sup> Ha'e gui Josafá ndoikoveei'i ma guamoĩ kueryague rami. Ha'e ramo onhono porãa tetã guamoĩ Davi rekoague py. Ha'e gui ta'y Jeorão ju oĩ nguu rekovia.

*Israel pygua huvixa Acazias oĩ jave guare*

<sup>52</sup> Ha'e gui Judá pygua huvixa Josafá dezessete ma'etŷ re ma oĩ jave py Acabe ra'y Acazias oĩ Israel pygua huvixarã, Samaria py. Ha'e vy mokoĩ ma'etŷ peve opena Israel kuery re.

<sup>53</sup> Ha'e va'e ma ha'eve'ŷ va'e ojapo oikovy SENHOR renonde rupi, mba'eta nguu ha'e oxy oikoague rami ae oiko, ha'e Nebate ra'y Jeroboão Israel kuery oguerojejavypa ague rupi. Ha'e rami vy Baal pe rive oiko omboetea py. Ha'e rami py ojapo SENHOR Israel kuery ruete ipoxy aguã rami, nguu ojapoague ha'e javi rami ae ju.

## Mokoĩa kuaxia huvixave rei kuery rekoke oĩa Mokoĩa kuaxia huvixave rei kuery rekoke oĩa

Kova'e kuaxia para re ma oĩ mokoĩ henda py judeu kuery ikuai: kuaray ijapu'a'ia katy ha'e ipuku-a katy.

Kuaray ijapu'a'ia katy ikuai va'e ma Israel kuery. Opaa py Assíria pygua kuery ou vy ojuka, ombojexavai ha'e escravo-rã ogueraapa. “Ha'e va'e nunga oiko raka'e mba'eta Senhor nguete pe Israel kuery ojejavypa ramo, Egito yvy gui oguerupa rire teĩ, Egito pygua huvixa Faraó po'akaa rupi ikuaiague gui. Ha'e rami rire teĩ amboae regua tuuete ramigua kuery ju ha'e kuery omboete okuapy. Yvy regua kuery reko rupi rive ikuai. ... Ha'e nunga rupi Senhor ojou vai ete Israel kuery, ha'e vy guenonde gui oipe'apa. Omombytave ranhe va'e ma Judá kuery anho” (17.7-8a, 18).

Ha'e gui ma Judá kuery voi nonhe'ẽ rendui ramo Babilônia pygua kuery po py Senhor omboaxapa. “Mba'eta profeta ha'e imba'ekuaa va'e kuery ha'e javi rupi Senhor ijayvu va'ekue Israel ha'e Judá kuery pe. ... Ha'e rami teĩ ha'e kuery noendu potai okuapy. ... Ha'e nunga rupi Senhor oeja Israel kuery regua ha'e javi. Omoingo axy rei vy omboaxapa hovaigua kuery po py, guenonde gui oipe'apa peve” (17.13a, 14a, 20).

### *Huvixa Acazias pe profeta Elias ayvu omombe'ua ague*

<sup>1</sup> Huvixa Acabe omano ma rire Moabe kuery opu'ã okuapy Israel kuery rovai.

<sup>2</sup> Ha'e gui huvixa Acazias ma Samaria tetã py oikoa py peteĩ oo yvateve va'e py janelo oĩ va'e gui ho'a vy imba'eaxy vaipa. Ha'e rami vy guembiguai kuery omondouka oayvu reraarã. Ha'e kuery pe aipoe'i:

— Tapeo, peporandu Ecrom pygua kuery ruete Baal-Zebube pe, aikuua aguã xemba'eaxyg ui akuera 'rã, tyrã pa anya — he'i.

<sup>3</sup> Ha'e gui ma Tisbé pygua Elias pe SENHOR-a guigua anjo aipoe'i:

— Epu'ã ke, tereo penhovaexi aguã Samaria pygua huvixa rembiguai kuery reve. Aipo're ha'e kuery pe: “Xapy'a rei nda'u Israel yvy re nda'ipoi ri Nhanderuete, Ecrom pygua ruete Baal-Zebube pe rive peporandu aguã?

<sup>4</sup> Ha'e nunga rupi SENHOR aipoe'i uka: ‘Nderupa ndetuia gui nderevyvei 'rã, remano 'rãe', he'i uka”, 're 'rã. Ha'e rire Elias oo ju.

<sup>5</sup> Ha'e gui tembiguai kuery ma huvixaa py ju ojevy. Ha'e rã oporandu ha'e kuery pe:

— Mba'e tu oiko, pejevy aguã?

<sup>6</sup> Ha'e kuery ombovai:

— Peteĩ ava orerovaexi ouvy kuri. Ha'e vy aipoe'i orevy: “Tapeo ke, pejevy ju huvixa penembouarea py. Ha'e vy aipopeje ixupe: ‘Po rami SENHOR ijayvu: Xapy'a rei nda'u Israel yvy re nda'ipoi ri Nhanderuete, Ecrom kuery ruete Baal-Zebube pe rive reporandu uka aguã? Ha'e nunga rupi nderupa ndetuia gui nderevyvei 'rã, remano 'rãe', he'i kuri.

<sup>7</sup> Ha'e ramo huvixa oporandu ha'e kuery pe:

— Mba'exagua ava tu penerovaexi ouvy vy ha'e rami ijayvu ra'e?

<sup>8</sup> Ombovai vy

— Mba'emo pirekue py onhemonde ha'e vaka pire py iku'axã va'e — he'i okuapy.

Ha'e ramo aipoe'i:

— Ha'e va'e ko Tisbé pygua Elias ae ra'e.

### *Elias-a py mboapy xondaro ruvixa oo rã guare*

<sup>9</sup> Ha'e gui Elias oĩa katy huvixa omondouka peteĩ xondaro ruvixa cinqüenta avakue re opena va'e, ixupagua xondaro kuery ha'e javi reve. Ha'e ramo ha'e kuery ma profeta

oĩa katy oẽ jogueravy. Yvyty apyte áry oguapy oinya py ovaẽ vy xondaro ruvixa aipoe'i ixupe:

— Nhanderuete remimbo'e, huvixa ma “Toguejy ke”, he'i uka.

**10** Ha'e rã Elias ombovai xondaro ruvixa cinqüenta re opena va'e pe:

— Xapy'a rei xee Nhanderuete remimbo'e ri aiko ramo totejy ha'vy tata yva gui, tanemomba, ndevygua cinqüenta avakue reve — he'i ramove yva gui tata ho'a xapy'a vy omomba, cinqüenta va'ekue guive.

**11** Ha'e gui ma ha'e oĩa katy huvixa omondoukave ju xondaro ruvixa cinqüenta avakue reve. Ha'e ramo ha'e va'e ju aipoe'i ixupe:

— Nhanderuete remimbo'e, huvixa ma “Toguejy pojava ke”, he'i uka.

**12** Elias ombovai vy aipoe'i ixupe:

— Xapy'a rei rã xee Nhanderuete remimbo'e ri aiko ramo totejy tata yva gui, ha'e tanemomba, ndevygua cinqüenta avakue reve — he'i ramove yva gui Nhanderuete guigua tata ho'a vy omomba, cinqüenta va'ekue guive.

**13** Ha'e gui mboapykuea ma huvixa omondouka xondaro ruvixa cinqüenta avakue reve. Ha'e ramo xondaro ruvixa oo vy oẽ yvy'ã re, ha'e Elias renonde py oĩ guenapy'ã re. Ha'e vy ixupe ojerure vy aipoe'i:

— Nhanderuete remimbo'e, ajerure ndevy: Tovare xerekove xere rema'ẽa rupi, ha'e kova'e nerembiguai kuery cinqüenta ikuai va'e rekove guive.

**14** Mba'eta yva gui tata ho'a vy omomba raka'e mokoïve xondaro ruvixa, ixondaro cinqüenta ikuai va'ekue reve. Ha'e nunga rupi tovare xerekove xere rema'ẽa rupi — he'i.

**15** Ha'e gui SENHOR-a guigua anjo aipoe'i Elias pe:

— Eguejy ke peva'e reve, ekyje eme guive — he'i. Ha'e ramo opu'ã vy oguejy ovvy hexeve huvixaa katy.

**16** Ha'e gui ma huvixa pe aipoe'i:

— Po rami SENHOR ijayvu: “Mba'e re tu nerembiguai kuery remondouka Ecrom kuery ruete Baal-Zebube pe oporandu va'erã? Israel yvy re nda'u nda'ipoi ri Nhanderuete, ixupe reporandu aguã? Ha'e nunga rupi upa va'e tupa ndetuia gui nderevyvei 'rã, remano 'rãe”, he'i.

### *Acazias omanoague*

**17** Ha'e gui ma huvixa omano, SENHOR ayvu Elias omombe'uague rami vy. Ha'e gui Acazias ta'y va'e'ŷ ramo tyvy Jorão ju oĩ hekivia. Josafá ra'y Jeorão Judá pygua huvixa oĩ rire mokoi ma'etý rai'i maa py omboypy opena aguã.

**18** Ha'e gui oĩve rei tema Acazias rekoke regua. Ha'e rami avi hi'arandua ha'e mba'emo ojapo va'ekue ha'e javi noĩ'rã teve kuaxia Israel pygua huvixa kuery rekoke oĩa re?

## 2

### *Elias rupive Eliseu ooague*

**1** Ha'e gui SENHOR ma yvate katy omboaguyje ta heravy Elias peteĩ yvytu jere rupi. Ha'e rami jave Elias oo Gilgal gui, hupive Eliseu oo avi.

**2** Ha'e ramo Elias aipoe'i Eliseu pe:

— Epyta ke apy, mba'eta SENHOR xemondouka ta Betel katy.

Eliseu ombovai:

— Anhetẽ ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rã ndee anho'i — he'i. Ha'e rami vy oguejy jogueravy Betel katy.

**3** Ha'e gui Betel py profeta kuery remimbo'e ikuai va'e oẽmba jogueruvy Eliseu ovaexi aguã. Ha'e vy aipoe'i okuapy ixupe:

— Reikuaa ma pa kurive'i SENHOR omboaguyje heravy 'rãa nderuvixa neakã áry rupi? Ombovai:

— Xee voi aikuua ae ma. Pekyrirī ke – he'i.

<sup>4</sup> Ha'e gui ma Elias aipoe'i Eliseu pe:

— Epyta ke apy ae, mba'eta SENHOR ma Jericó katy ju xemondouka ta. Ombovai:

— Anhetē ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rā ndee anho'i – he'i vy jogueraave ju Jericó katy.

<sup>5</sup> Ha'e gui Jericó py profeta kuery remimbo'e ikuai va'e oëmba jogueruvy Eliseu ovaexī aguā. Ha'e vy aipoe'i okuapy ixupe:

— Reikuua ma pa kurive SENHOR omboaguyje heravy 'rāa nderuvixa neakā áry rupi? Ombovai:

— Xee voi aikuua ae ma. Pekyrirī ke – he'i.

<sup>6</sup> Ha'e gui ma ixupe Elias aipoe'i:

— Epyta ke apy, mba'eta SENHOR xemondouka ta Jordão yakā katy. Ombovai:

— Anhetē ete SENHOR oikove va'e rupi, ha'e nderekove rupi avi aura vy aipoa'e: Xee ma noromondoukai 'rā ndee anho'i – he'i vy joupive ju jogueraa.

<sup>7</sup> Oje'oi avi cinqüenta avakue profeta kuery remimbo'e va'e. Ha'e gui Jordão yakā rembe re mokoïve optya ramo hembiguai kuery voi optyapa okuapy mombyry'i.

<sup>8</sup> Ha'e gui ma Elias oao puku omboi vy oipokapa, ha'e oinupā yy. Ha'e ramo yy ma mbyte rupi oja'o. Ha'e ramo mokoïve ipiru reia rupi oaxa jogueravy.

### *Yva re Elias ogueraague*

<sup>9</sup> Ha'e gui mokoïve oaxa ma vy Elias aipoe'i Eliseu pe:

— Ejerure xevy peteī ndevy ajapo aguā, ndegui xepe'aa e'ŷ'i re. Eliseu aipoe'i:

— Ajerure xevy pe hetave remboaxa aguā nenhe'ẽ – he'i.

<sup>10</sup> Elias ombovai:

— Haxy va'e re ri rejerure, teī xapy'a rei ndegui xepe'aa jave xerexa ri ramo rejueague rami ae 'rā oiko. Ha'e rā ndaxerexai ri ramo ndoikoi 'rā rerejureague – he'i.

<sup>11</sup> Mokoïve oove ha'e jogueroayvu jogueravy teri reve ha'e kuery mbyte ojekuaa xapy'a peteī karóxa ha'e kavaju tata revegua, joegui omboja'o. Ha'e rā Elias ma yvate katy oipe'aa heravy peteī yvytu jere mbyte py.

<sup>12</sup> Ha'e nunga Eliseu oexa ho'amy vy ojapukai:

— Xeru, xeru! Ha'vy Israel kuery karóxa ha'e kavaju árygua kuery! – he'i vyve ndoexa jevyvei. Ha'e vy oao ojopy vy omondoro mbyte rupi.

<sup>13</sup> Ha'e vy ojopy Elias mba'e va'ekue ao puku ixupe guarā oity va'ekue. Ojopy heravy vy ojevy ju. Ha'e gui ovaē ju ho'amy Jordão yakā rembe re.

<sup>14</sup> Ha'e vy ao puku Elias oity va'ekue py oinupā yy. Ha'e vy aipoe'i:

— Mamo tu oĩ SENHOR Elias ruete va'e? – he'i vy yy oinupā ramove oja'o mbyte rupi. Ha'e ramo Eliseu oaxa ju ouvy.

### *Profeta remimbo'e kuery Elias oeka teī okuapyague*

<sup>15</sup> Ha'e nunga profeta kuery remimbo'e henonde rupi ikuai va'e ha'e nunga oexa okuapy, Jericó py ikuiai py ae. Ha'e vy ijayvu:

— Elias re nhe'ẽ oĩ va'ekue ma Eliseu re ju oĩ ra'e – he'i okuapy. Ha'e vy ovaexī aguā katy jogueru, ha'e henonde ojero'a okuapy yvy peve.

<sup>16</sup> Ha'e vy aipoe'i okuapy:

— Apy ore neremimbo'e kuery regua ikuai cinqüenta avakue ipy'a guaxukueve va'e. Emondouka na nderuvixa oeka aguā. Xapy'a rei rā SENHOR guigua nhe'ẽ ogueraa ri teī, oeja nho 'rā peteī yvyty áry, e'ŷ vy yvy'ã guy katy mba'e.

Ombovai vy

— Pemondouka eme – he'i.

<sup>17</sup> Ha'e rami teĩ ha'e kuery onhea'ave tema hexeve ramo nda'evei vy  
 — Pemondouka ha'vy — he'i ha'e kuery pe. Ha'e ramo omondouka okuapy cinqüenta avakue. Mboapy ára re ha'e va'e kuery oeka okuapy teĩ ndojoui.

<sup>18</sup> Ha'e gui ma Jericó py ojevypa ju Eliseu oĩ teria py. Ha'e ramo ha'e kuery pe aipoe'i:  
 — “Tapeo eme” nda'eí ri ty'y raka'e?

### *Jericó py yy iporã jevy aguã rami Eliseu ijayvuague*

<sup>19</sup> Ha'e gui Eliseu pe tetã pygua avakue aipoe'i okuapy:  
 — Xeruvixa, apy ma rexaa rami oretetã oĩ porã ete teĩ yy ma na'iporãi, neĩ yvy ma voi na'iporãi nhama'etã aguã — he'i okuapy.

<sup>20</sup> Ha'e ramo  
 — Peru ha'vy xevy pe hy'a ipyau'i va'e, juky reve — he'i ramo ogueru okuapy oĩa py.  
<sup>21</sup> Ha'e gui Eliseu ma yvu oĩ va'e py oo vy onhoẽ juky yy py. Ha'e vy aipoe'i:  
 — Po rami SENHOR ijayvu: “Ajapo kova'e yy iporã ju aguã rami. Ha'e rami rire ndajojukavei, neĩ mba'emo aju ma voi nomoingo e'ÿvei ma 'rã”, he'i.

<sup>22</sup> Ha'e ramove yy ikuai va'e iporãmba ju aÿ peve guarã, Eliseu ijayvuague rami vy.

### *Kunumigue Eliseu ojojai rei okuapyague*

<sup>23</sup> Ha'e gui ma Jericó tetã gui Eliseu oove ju Betel katy. Tape rupi oo oiny ramo amongue kunumigue'i oẽ jogueruvy tetã katy gui. Ha'e va'e kuery ojojai reia rupi aipoe'i okuapy ixupe:

— Neĩ ke akã perõ, eẽ ke eovy. Neĩ ke akã perõ, eẽ ke eovy — he'i okuapy.

<sup>24</sup> Ha'e ramo Eliseu guakykue katy ojere vy oexa vy ha'e kuery pe ijayvu vai, SENHOR rerry rupi. Ha'e ramove ka'aguy gui mokoõ urso oẽ ouvy vy omboa'ypa quarenta e dois kunumigue ikuai va'ekue.

<sup>25</sup> Ha'e rire Eliseu Carmelo yvyty katy oo, ha'e gui Samaria tetã katy ju ojevy.

## 3

### *Israel pygua huvixa Jorão oĩ jave guare*

<sup>1</sup> Ha'e gui ma Acabe ra'y Jorão ju oĩ Israel kuery ruvixa. Samaria tetã py oĩ ypy, dezoito ma'etã re ma Judá pygua huvixa Josafá oĩ rire. Ha'e vy doze ma'etã re oĩ.

<sup>2</sup> Ha'e va'e ma SENHOR renonde rupi ha'eve'ÿa ramigua ojapo. Ha'e rami avi nguu rami ete'ÿ ojapo, neĩ oxy rami e'ÿ guive. Mba'eta oipe'a Baal peguarã ita nguu omo'ã va'ekue.

<sup>3</sup> Ha'e rami teĩ Nebate ra'y Jeroboão ojejavvyague rupi ae tema oiko, Israel kuery oguerojejavya py. Ha'e rami oikoa gui ndojope'aí ae.

### *Huvixa kuery Moabe pygua kuery oitypa 'rã rami Eliseu omombe'u ma voiague*

<sup>4</sup> Ha'e gui Moabe pygua huvixa Mesa va'e ma mymba kuery re opena va'e ramo ixugui Israel pygua huvixa okobra jepi 'rã cem mil vexa'i ra'y ha'e gui cem mil vexa'i ava rague.

<sup>5</sup> Ha'e rami teĩ huvixa Acabe omano ma rire Moabe pygua huvixa opu'ã Israel pygua huvixa Jorão rovai.

<sup>6</sup> Ha'e ramove Samaria tetã gui Jorão oẽ vy omboatypa Israel kuery ha'e javi.

<sup>7</sup> Judá pygua huvixa Josafá pe voi aipoe'i uka:

— Moabe pygua huvixa opu'ã ma xerovai. Ndee voi pa reo 'rã xereve Moabe kuery rovai re nhapu'ã aguã?

Ombovai:

— Xee aa 'rã. Xee voi aa 'rã ndee rami, xevygua avakue ma ndevygua avakue rami avi 'rã ikuai, ha'e xerymba kavaju kuery ma nerymba kuery rami avi 'rã ikuai ndepo py — he'i.

<sup>8</sup> Ha'e ramo Jorão oporandu:

— Mava'e tape rupi 'rã tu jaje'oi?

Ombovai:

— Edom tekao e'ÿa rupi tape oÿ va'e rupi rima ha'eve — he'i.

<sup>9</sup> Ha'e rami vy huvixa Israel pygua, Judá pygua ha'e Edom pygua reve jogueraa.

Ha'e gui sete araa py ma ha'e kuery oguataa rupi nda'ipovei ma yy xondaro kuery ha'e mymba kuery ogueraa va'e pe.

<sup>10</sup> Ha'e ramo Israel pygua huvixa aipoe'i:

— Aikore! Mba'eta mboapy huvixa jaiko va'e SENHOR nhanerenoÿ nhanemboaxapa aguã Moabe kuery po py.

<sup>11</sup> Ha'e rã Josafá oporandu:

— Ndoikoi pa apy SENHOR pegua profeta, ixupe ranhe SENHOR pe nhaporandu uka aguã?

Ha'e ramo peteÿ Israel pygua huvixa rembiguai oÿ va'e ombovai:

— Apy ma oÿ Safate ra'y Eliseu, Elias ojepoei aguã yy ogueru va'ekue — he'i.

<sup>12</sup> Josafá aipoe'i:

— Ha'e va'e ma oikuua 'rã SENHOR guigua ayvu — he'i ramo Eliseu-a katy Josafá reve jogueraa huvixa Israel ha'e Edom pygua.

<sup>13</sup> Ha'e rami teÿ Eliseu aipoe'i Israel pygua huvixa pe:

— Mba'e tu areko ndereve? Tereo ke eporandu nderu ha'e ndexy pegua profeta kuery pe ae.

Ha'e rã Israel pygua huvixa aipoe'i ixupe:

— Nda'evei, mba'eta SENHOR ae mboapyve huvixa roiko va'e orerenoÿ va'ekue Moabe kuery po py oremboaxa aguã — he'i.

<sup>14</sup> Eliseu aipoe'ive ju:

— Anhetê ete SENHOR ipo'akapa ha'e oikove va'e henonde rupi xee aikoa va'e rupi aura vy aipoa'e: Judá pygua huvixa Josafá xee namboetei va'e rire naendu potai 'rãgue ndeayvua, neñ ndere nama'ëi 'rãgue guive.

<sup>15</sup> Ha'e gui Peru ha'vy xea py peteÿ imba'epu va'erã — he'i.

Ha'e ramo oña py imba'epu va'e ombopu jave Eliseu re ou Nhanderuete po'akaa.

<sup>16</sup> Ha'e ramo aipoe'i:

— Po rami SENHOR ijayvu: "Pejo'o-jo'o ke yvy kova'e yvyugua ha'e javi rupi", he'i.

<sup>17</sup> Mba'eta SENHOR ijayvuve ju: "Yvytu napendui, ha'e oky ndapexai teÿ kova'e yvyugua ha'e javi rupi 'rã tynyë yy. Ha'e ramo peë kuery pey'u 'rã, penerymba vaka ha'e penerymba kuery ha'e javi guive", he'i.

<sup>18</sup> Ha'e va'e ma SENHOR pe rã mba'e'ÿ. Ha'e gui pendepo py omboaxa avi 'rã Moabe kuery.

<sup>19</sup> Pembovaipa 'rã ha'e kuery retã ikorapa ha'e yvatekueve va'e ha'e javi. Pejayapa 'rã yvyra porãgue, ha'e pembotypa 'rã yvu ikuai va'e ha'e javi. Ha'e gui mba'ety porãgueve ha'e javi rupi 'rã pemombo ita — he'i.

<sup>20</sup> Ha'e gui ma ko'ëgue mba'emo aju ome'ëa jave oma'ë rã Edom yvy katy gui yy ou xapy'a vy omonyëmba yvy.

### *Moabe kuery oitypaa ague*

<sup>21</sup> Ha'e gui ma Moabe kuery oendupa okuapy ha'e kuery rovai huvixa kuery opu'ã aguã ouague. Ha'e rami vy omboatypa tembiporu revegua ma guive rã, kunumigueve ha'e tujakueve va'e voi. Oyvy apy rupi omoimba avi imbokuapy harðarã.

<sup>22</sup> Ha'e gui ko'ëgue yy áry rupi kuaray oë jekuaa jave Moabe kuery ovypa vy guenonde katy rupi oma'ë okuapy rã yy tuguy rami ojekuaa.

<sup>23</sup> Ha'e vy aipoe'i okuapy:

— Peva'e tu tuguy rima. Huvixa kuery meme nhí'ã nhomomba ra'e, jojukaa py! Ha'e gui Moabe kuery, aÿ ma jaa jajopy imba'e rei-reikue! — he'i.

<sup>24</sup> Ha'e gui ma Israel kuery ikuaria py ha'e kuery ovaë rã Israel kuery opu'ãmba vy oitypaa Moabe kuery. Ha'e rã ha'e kuery gui onhamba. Ha'e ramo ijyvy re Israel kuery oo vy ha'e py voi ojukapa okuapy Moabe kuery regua.

<sup>25</sup> Ha'e vy ombovaipa hetā ikuai va'e, ha'e vy mba'ety porāgueve rupi peteī-teī omombo ita, omonyēmba peve. Ombotypa yvu ikuai va'e, ha'e ojayapa yvyla iporāgueve ikuai va'ekue. Quir-Haresete py anho hi'aī teri tetā kora, va'eri nhemoatā va'e rewegua kuery ojokopa vy ojukapa avi okuapy.

<sup>26</sup> Ha'e gui Moabe pygua huvixa ma hovaigua kuery ipo'akave ta ramo oexa vy setecentos avakue kyxe rewegua ogueraa ngupive, Edom pygua huvixa reve joguero'a aguā, teī novaē reguai.

<sup>27</sup> Ha'e rami vy ojopy gua'y jypykue'i, guekovia huvixarā omoī va'erā va'e, ha'e vy ikora áry ae ojuka vy oapypa. Ha'e rami rā Israel kuery rovai ju ojerovia reive okuapy. Ha'e ramo ojepe'apa ha'e gui, oyvy katy ae ju ojevy aguā.

## 4

### *Imeve'ŷ va'e pe azeite oata e'ŷ aguā rami Eliseu ojapoague*

<sup>1</sup> Ha'e gui peteī profeta remimbo'e ra'yxykue imeve'ŷ va'e ojerure Eliseu pe. Ha'e vy aipoe'i:

— Xeme neremimbo'e oiko va'ekue ma omano. Ndee voi reikuua SENHOR renonde ojererokyjea rupi oikoague. Ha'e gui aŷ mba'emo porukaare ovaē ta ma ouvy xepi'a kuery mokoīve ogueraa aguā escravo-rā.

<sup>2</sup> Ha'e ramo Eliseu oporandu ixupe:

— Mba'e tu ajapo 'rā ndevy? Emombe'u ke mba'e pa rerekon dero py.

Kunha va'e ombovai:

— Xee nerembiguai mba'eve ndarekoi xero py, peteī ryru azeite e'ŷ vy – he'i.

<sup>3</sup> Ha'e ramo Eliseu aipoe'i:

— Tereo ha'vy, hyrurā re ejerure ndero katy'i rupi ikuai va'e ha'e javi pe. Hyrukue anho eru, mboapy'i e'ŷ ta'vy.

<sup>4</sup> Ha'e gui ma eike ju ndero py, ha'e emboty ju okē, ndepi'a kuery reve penhembotypa aguā. Ha'e vy azeite rerekon va'e enhoē hyru rejou va'ekue ha'e javi py. Ha'e vy ke eroval tnyē va'e-va'e ijyke katy – he'i.

<sup>5</sup> Ha'e gui ma oĩa gui kunha va'e ojepe'a vy onhembotypa opi'a kuery reve. Ha'e gui oxy oĩa py ha'e kuery hyru omboaxa rā ixy omonyē tema.

<sup>6</sup> Hyru omonyēmba ma vy ixy aipoe'i peteī opi'a pe:

— Eru ju peteī hyrurā.

Ha'e va'e ombovai:

— Apy ma nda'ipovei ma hyrurā – he'i. Ha'e ramove azeite opa.

<sup>7</sup> Ha'e gui kunha va'e oo vy omombe'u Nhanderuete remimbo'e va'e pe. Ha'e ramo ha'e aipoe'i:

— Tereo, evende azeite, ha'e gui epagapa rereveague. Ha'e gui hembyrekue ma topyta ndepi'a kuery reve pe'u va'erā.

### *Suném pygua kunha Eliseu oipytyvõague*

<sup>8</sup> Peteī ára Eliseu oaxa ovy Suném tetā rupi. Ha'e py ma oiko peteī kunha oguerekopa va'e. Ha'e va'e ma oenoī okaru aguā. Ha'e rupi oaxa nhavō ovaē kuerei 'rā ha'e py okaru aguā.

<sup>9</sup> Kunha va'e aipoe'i ome pe:

— Xee aexa rā kova'e ava nhanda rupi oaxa jepi va'e ma Nhanderuete remimbo'e iky'a e'ŷ va'e.

<sup>10</sup> Ha'e nunga rupi jajapo na yvate katy peteī opy ja'o'i oke atyrā. Ita gui 'rā jajapo uka huparā nhamoī aguā ha'e py, mesa, tenda ha'e tataendy renderā, nhandro py ovaē vy ha'e py oke aguā – he'i.

<sup>11</sup> Ha'e gui peteī ára ha'e py Eliseu ovaē jevy vy okeaty py oo vy onhenouupy.

<sup>12</sup> Ha'e vy aipoe'i guembiguai Geazi pe:

– Enoī ranhe Suném pygua kunha – he'i ramo oenoī rā kunha va'e oī profeta oīa py.

<sup>13</sup> Eliseu aipoe'i uka kunumi va'e pe:

– Aipo're kunha va'e pe: “Ma'ē, orere repena porā opa mba'e py. Mba'e 'rā tu ha'vy ajapo ndevy? Oiko pa nderekovia huvixa pe ajerure aguā? Tyrā pa xondaro kuery ruvixa pe?” 're 'rā ixupe.

Kunha va'e ombovai:

– Arekopa rei apy xeretarā kuery mbyte py aikoa py – he'i.

<sup>14</sup> Ha'e ramo profeta oporanduve ju:

– Mba'exagua nda'u ajapo 'rā ixupe?

Geazi ombovai:

– Ne'exa, ha'e ndoguerekoi omemby, ime tuja'i ma guive – he'i.

<sup>15</sup> Eliseu ju

– Enoī ha'vy – he'i.

Oenoī ramo kunha va'e ou vy okē py hi'aī.

<sup>16</sup> Ha'e ramo profeta aipoe'i:

– Peteī ma'etŷa py kova'e ára ojeupity jevy ma jave reikuavā'i 'rā peteī kyrī va'e – he'i.

Kunha va'e aipoe'i:

– Any teve xeruvixa, Nhanderuete remimbo'e reiko va'e. Ndeapu eme xee nerembiguai pe – he'i.

<sup>17</sup> Ha'e va'e rire kunha va'e oguerekoi ma. Ha'e vy peteī ma'etŷ opaa py porā oikuavā peteī ava'i, Eliseu aipoe'iague rami vy.

<sup>18</sup> Ha'e gui ma ipi'a tujave ma vy peteī ára oo nguu omba'eapo va'e kuery reve oikoa py.

<sup>19</sup> Ha'e vy nguu pe

– Xeakā raxy! – he'i.

Ha'e ramo guembiguai kunumi va'e pe tuu

– Eraa na ixya py – he'i.

<sup>20</sup> Ha'e ramo oupi vy ogueraa ixya py. Ha'e ramo guenapy'ā áry oikuavā ranhe imoiny, ha'e gui kuaray mbyte jave omano.

<sup>21</sup> Ha'e ramo kunha va'e oguerojeupi heravy vy onhono inony Nhanderuete remimbo'e rupa rupi. Ha'e vy okē omboty vy oo ju.

<sup>22</sup> Ha'e gui ome oenoī uka vy aipoe'i uka ixupe:

– Embou xea py peteī nerembiguai ha'e peteī mburika'i, Nhanderuete remimbo'e oīa katy aa ranhe, ha'e gui ajevy ju aguā – he'i.

<sup>23</sup> Ha'e ramo ime oporandu:

– Mba'e re tu aŷ reo ta ri ha'e py, jaxy pyau e'ŷ teri, neŷ sâbado e'ŷ guive va'eri?

Kunha va'e ombovai:

– Tove ri, ha'eve 'rā – he'i.

<sup>24</sup> Ha'e gui kunha va'e ombokupe árygua ukapa mburika'i. Ha'e vy aipoe'i guembiguai pe:

– Eraa, eroguata tema, eropytu'u eme guive, xee amombytu'u uka e'ŷa ja – he'i.

<sup>25</sup> Ha'e gui ma kunha va'e oo vy Nhanderuete remimbo'e oīa py ovaē, Carmelo yvyty re. Ha'e ramo mombyry teri oexa vyve aipoe'i guembiguai Geazi pe:

– Pee ma ou jekuua oiny Suném pygua kunha.

<sup>26</sup> Eē ke eovy reovaeixi aguā, ha'e vy aipo're ixupe: “Ha'eve vai pa ndee, neme ha'e ndepi'a voi?” 're.

Oporandu rā kunha va'e ombovai:

– Ha'evepa rei – he'i.

<sup>27</sup> Ha'e gui ma yvyty re Nhanderuete remimbo'e oīa py kunha va'e ovaē vyve oikuavā ipy. Ha'e ramo Geazi oipe'a aguā ovaē ta ramo ixupe Nhanderuete remimbo'e aipoe'i:

— Tove katu, mba'eta onhe'ẽ py nda'evei ete va'e oendu. Ha'e nunga ma SENHOR onhomni xegui, ndoikuua ukaxe'i vy.

**28** Ha'e ramo kunha va'e aipoe'i:

— Xeruvixa, xapy'a rei nda'u ndevy ajerure va'ekue xepi'arã re? "Xembotavy eme ke", ha'e va'ekue e'ŷ ri? — he'i.

**29** Ha'e gui profeta aipoe'i Geazi pe:

— Eiko katu ke, ejopy xemba'e popoka, ha'e tereo. Xapy'a rei amongue reovaexi vy ma exarura eme. Ndevy pe amongue oxarura ri ramo embovai eme guive. Ha'e gui xepopoka remoĩ 'rã ava'i va'e rova áry — he'i.

**30** Ha'e rami teī ixy aipoe'i Eliseu pe:

— Anhetẽ ete SENHOR oikove va'e rupi, ha'e nderekove rupi avi aura vy aipoa'e: Xee ma ndoroejai 'rã — he'i. Ha'e ramo ha'e voi opu'ã vy oo ma oiny kunha va'e reve.

**31** Ha'e rã Geazi ma ha'e kuery renonde rupi oo vy ava'i va'e rova áry rupi omoĩ popoka. Ha'e rami teī nda'ijayvuẽ nhendui, neī ipyтуea ma voi ndojekuaai. Ha'e ramo oo ju Eliseu reve nhovaexi aguã. Ha'e vy ixupe omombe'u vy aipoe'i:

— Ava'i va'e nomyi ae tema — he'i.

**32** Ha'e gui oo py profeta ju ovaẽ ramo ava'i va'e omano oupy tupa rupi.

**33** Ha'e ramo oike vy omboty okẽ ha'e kuery mokoive oĩa py, ha'e vy onhembo'e SENHOR pe.

**34** Ha'e vy tupa oĩa katy oo vy onheno ava'i va'e áry rupi. Ha'e vy ojuru omboja ijuru re, guexa ma hexa re, ha'e opo ma ipo re, hi'áry rupi itui vy. Ha'e ramo ava'i va'e rete hakupa ju ma ovy.

**35** Ha'e gui ma opu'ã ju vy oguata-guata oikovy opy rupi, ha'e gui ma oo ju ha'e py. Ha'e vy ava'i va'e áry rupi ju onheno oupy. Ha'e ramo mae sete-kue vyvoi inhaxia reve oipe'a ju guexa.

**36** Ha'e ramo oenoĩ Geazi, ha'e vy aipoe'i ixupe:

— Enoĩ ke Suném pygua kunha — he'i. Oenoĩ ramo kunha va'e ojexa uka ho'amy profeta pe.

Ha'e ramo aipoe'i kunha va'e pe:

— Eraa ju ke ndepi'a.

**37** Ha'e ramo kunha va'e oike ouvy vy ipy yvy'iry rupi oĩ, ha'e ojero'a yvy katy guenapy'ã re. Ha'e gui ma opi'a'i oupi heravy vy oẽ ju.

### *Oja py jojukaarã oĩ va'ekue oipe'aague*

**38** Ha'e gui ma ha'e va'e yvy re karuai oiko, ha'e Eliseu ojevy ju Gilgal katy. Ha'e py ma henonde profeta kuery remimbo'e kuery oguapypa okuapy. Ha'e ramo aipoe'i guembiguai pe:

— Emoĩ ke oja guaxu tata áry, ha'e vy ejapo tembi'u profeta kuery remimbo'e kuery pe — he'i.

**39** Ha'e ramo peteĩ oo mba'ety rupi mba'emo aju re. Ha'e vy ojou peteĩ hi'y rupi hi'a va'e ka'aguy reguae. Ha'e vy hi'y gui hi'a oipo'opa vy omoneyã oao puku. Ha'e gui ma ou ju vy oipe'ãmba'i vy omoimba oja py, oexa va'e'ŷ teri va'eri.

**40** Ha'e gui ma ome'ẽ avakue pe ho'u aguã. Ojykue ho'u teri okuapy reve ojapukai okuapy:

— Nhanderuete remimbo'e! Oja py rima oĩ jojukaarã! — he'i okuapy. Ho'uve aguã ma voi nda'evei.

**41** Ha'e rami rã aipoe'i:

— Peru ke trigo — he'i. Ha'e vy oja py omoĩ vy aipoe'i:

— Ejara ju ke, emongaru heta va'e kuery — he'i. Ha'e ramove oja py noïvei ma ra'e jojukaarã.

*Vinte mbojape re cem avakue okaru porã okuapyague*

<sup>42</sup> Ha'e gui ou peteĩ ava Baal-Salisa gui. Ha'e va'e ma Nhanderuete remimbo'e pe ogueru mbojape jypykue'i regua voxā py. Vinte mbojape cevada guigua ha'e hary pyau ogueru. Ha'e rã Eliseu aipoe'i:

— Emboja'o heta va'e kuery pe ho'u aguã — he'i.

<sup>43</sup> Ha'e ramo hembiguai aipoe'i ixupe:

— Mba'exa tu amoĩ ta cem avakue ikuai va'e ho'u va'erã?

Ombovai:

— Eme'ẽ katu heta va'e kuery pe ho'u aguã, mba'eta po rami SENHOR ijayvu: "Ho'u 'rã okuapy, ha'e gui hembyre ju 'rã", he'i.

<sup>44</sup> Ha'e ramo omoĩ ha'e kuery renonde py. Ha'e ramo ho'u okuapy, ha'e gui hembyre ju, SENHOR ijayvuague rami vy.

## 5

### *Lepra gui Naamã okueraague*

<sup>1</sup> Oiko peteĩ Síria pygua huvixa pegua xondaro kuery ruvixa, Naamã hery va'e. Ha'e va'e ma huvixa renonde rupi ipo'akave va'e ha'e omboetepy oiko, mba'eta hupive ma SENHOR ojapo Síria kuery ipo'aka aguã rami. Joe opu'ãa py ipo'akapave. Ha'e rami avi lepra revezua oiko.

<sup>2</sup> Ha'e gui Síria gui xondaro kuery oje'oi vy Israel kuery yvy gui voi ogueraa peteĩ kunha'i va'e escravo-rã. Ha'e va'e ma Naamã ra'yxy pe oiko om̄ba'eapoa rupi.

<sup>3</sup> Ha'e gui ma kunha'i va'e aipoe'i herekoia pe:

— Xeruvixa Samaria py profeta oiko va'ea py oo va'e rire omonguera 'rãgue lepra gui — he'i.

<sup>4</sup> Ha'e ramo Naamã oo vy aipoe'i nguvixa pe:

— Po rami ijayvu kunha'i Israel yvy gui aru va'ekue.

<sup>5</sup> Ha'e ramo Síria pygua huvixa ombovai:

— Tereo ha'vy, eguata. Ha'e rã xee ma peteĩ kuaxia araa uka 'rã Israel pygua huvixa pe reme'ẽ va'erã — he'i. Ha'e ramo oo ma. Ngupive ogueraa dez poyikue prata guigua, seis mil hatã'i va'e ouro guigua, ha'e gui dez ao ngarua pygua.

<sup>6</sup> Ogueraa avi kuaxia Israel pygua huvixa pegua ijayvu imoinya va'e: "Kova'e kuaxia ndea py ome'ẽa ramove reikuua 'rã xerembiguai Naamã ambouague lepra gui remonguera aguã", he'ia va'e.

<sup>7</sup> Ha'e gui ma Israel pygua huvixa kuaxia para ogueroayvu ma vy omondoro oao. Ha'e vy aipoe'i:

— Xapy'a rei nda'u xee Nhanderuete ri aiko, joekove amboi, e'ŷ vy anhomomingove aguã rami xepo'akapa va'e? Mba'eta xea py ombou kova'e ava lepra gui amonguera aguã. Peikuua pota ke, ha'e pexa porã, mba'eta xereve joguero'axe vy teve ombou — he'i.

<sup>8</sup> Ha'e gui ma Nhanderuete remimbo'e Eliseu oendu Israel pygua huvixa oao omondoroague. Ha'e vy aipoe'i uka huvixa pe:

— Mba'e re tu ndeo remondoropa ri? Tou ava xea py, ha'e vy oikuua 'rã Israel re profeta oikoa — he'i uka.

<sup>9</sup> Ha'e gui ma Naamã ou guymba kavaju kuery ha'e karóxa reve. Ha'e vy ovaẽmba okuapy Eliseu rokẽ rexei'i.

<sup>10</sup> Ha'e ramo Eliseu omondouka peteĩ guembiguai. Ha'e vy aipoe'i uka:

— Tereo, ejau sete-kue Jordão yakã py. Ha'e ramo ndero'o oĩ porãmba ju 'rã, nda'eve e'ŷvei ma 'rã — he'i uka.

<sup>11</sup> Ha'e rami rã Naamã ndojou porãi ete. Ha'e vy aipoe'i ový:

— Xee aexa'ã va'ekue teĩ xee aĩa py profeta oẽ ho'amy vy ojerure 'rãgue SENHOR Nguuete rery rupi, ha'e lepra oĩ áry rupi okuave'ẽ reve xemonguera 'rãgue.

**12** Ha'e rā xapy'a rei nda'u Damasco py Abana ha'e Farfar yakā ikuai va'e ma Israel re yakā ikuai va'e gui na'iporāive 'rā ri? Nda'evei nda'u ha'e va'e py ae xee ajau aguā, akuera ju aguā? – he'i. Ha'e rami vy ojevy ju ivai reve.

**13** Ha'e ramo oīa py ovaē jogueravy ixupeguia kuery yvatekueve va'e. Ha'e vy aipoe'i okuapy ixupe:

— Oreruvixa, xapy'a rei profeta mba'emo haxy va'e ojapo uka va'e rire ndee nda'u nderejapoi'rāgue? Mba'eta ndevy pe "Ejau ke, ha'e rā ha'eve va'e ju 'rā reiko" he'i va'ekue rive – he'i okuapy.

**14** Ha'e rami rā Naamā oo vy Jordāo yakā py oguejy sete-kue, Nhanderuete remimbo'e ijayvuague rami vy. Ha'e ramove ho'o oī porā ju kyrī va'e ro'o rami. Ha'e vy ha'eve va'e ju oiko.

**15** Ha'e gui ma ojevy ju jogueravy Nhanderuete remimbo'ea katy, hexeveguia kuery ha'e javi reve. Ovaē ma vy henonde py hi'aī. Ha'e vy aipoe'i:

— Aŷ aikuaa ma yvy jave rupi ndokoi Nhanderuete, Israel kuery Ruete e'ŷ vy. Ha'e nunga rupi aŷ ma ajerure rejopy aguā mba'emo xee nerembiguai ame'ē va'e.

**16** Eliseu ombovai:

— Anhetē ete SENHOR oikove va'e henonde rupi aikoa va'e rupi aura vy aipoa'e: Xee ma mba'eve ndaipotai – he'i. Ha'e ramo hexeve onhea'ā tema ojopy aguā re, va'eri ndaipotai ae.

**17** Ha'e rami rā Naamā aipoe'i:

— Ndereipotai ae ramo ajerure apy gui taraa yvy mokoī mburika'i áry. Mba'eta aŷ gui xee nerembiguai ma tuuete ra'angaa pe rive name'ēvei 'rā mymba apy reve ajuka uka va'e, SENHOR pe e'ŷ vy.\*

**18** Ha'e gui aŷ SENHOR pe xee hembiguai ajerure ajejavya ombogue aguā re. Mba'eta xeruvixa ma nguete Rimom pegua opy oike jepi 'rā omboete aguā, ha'e xepo re ojopy 'rā oiny. Ha'e gui xee voi aī 'rā xerenapy'ā re Rimom pegua opy ajero'a ainya py. Ha'e nunga rupi tove SENHOR tomboguepa xee hembiguai ajejavya.

**19** Eliseu ombovai vy

— Tereo porā ke – he'i.

### *Geazi re ju lepra ovaague*

Ha'e gui Naamā ojepe'a ma mombyry'i ovvy jave

**20** Nhanderuete remimbo'e Eliseu rembiguai Geazi va'e ma aipoe'i ojeupe ae:

— Xeruvixa ma ndaipotai Síria pygua Naamā ome'ē mba'emo ogueru va'ekue. Ha'e rami avi anhetē ete SENHOR oikove va'e rupi aura vy aipoa'e: Xee ae 'rā anha avy hakykue rupi, ixugui ajopy aguā mba'emo – he'i.

**21** Ha'e rami vy Geazi oo Naamā oupity aguā. Ha'e rā Naamā ma hakykue rupi onha ouvy ramo oexa vy opo okaróxa gui ovaexī aguā. Ha'e vy oporandu:

— Ha'eve vai pa?

**22** Ombovai:

— Ha'evepa rei. Xeruvixa aipoe'i uka: "Aŷ ma ou mokoī kunumigue profeta remimbo'e kuery Efraim yvyty reia gui. Eme'ē ha'e va'e kuery pe peteī poyikue prata guigua ha'e mokoī ao ngarua pygua", he'i uka.

**23** Ha'e ramo Naamā aipoe'i:

— Eraa ha'vy mokoī poyikue prata guigua – he'i. Ha'e rami vy ogueraa uka ete vy mokoī voxā py ojokua mokoī poyikue prata guigua ha'e mokoī ao ngarua pygua. Ha'e va'e py ombovoysi mokoī guembiguai Geazi renonde rupi ogueraa va'erā.

**24** Ha'e gui yvy'ā áry peve ovaē ma vy ha'e kuery po gui ju ojopy, ha'e omoī porā oo py. Avakue omondoukapa ramo oje'oi ju.

---

\* **5:17** Ha'e kuery reko rami vy Israel regua yvy Naamā ogueraa oyvy re, ha'e py ju omboete aguā Nhanderuete.

<sup>25</sup> Ha'e ramo oike vy nguvixa renonde py hi'aĩ. Ixupe Eliseu oporandu:

— Geazi, magui tu reju?

Ombovai:

— Xee nerembiguai ma mamove rei ndaai — he'i.

<sup>26</sup> Ha'e ramo aipoe'i ixupe:

— Ndea py xenhe'ẽ oĩ avi kuri, ava nerovaexĩ aguã karóxa gui oguejy ouvy javé. Aÿ voi pa ha'eve prata ha'e ao rejopy aguã, ha'e gui oliveira ha'e uvaty, veva'i ha'e vaka kuery, tembiguai avakue ha'e kunhague?

<sup>27</sup> Ha'e nunga rupi ndere ju 'rã Naamã guigua lepra ova, neramymino kuery re guive, raka'e rã peve guarã — he'i. Ha'e ramove lepra yro'y rami xiĩ va'e reve ae ojepe'a ový henonde gui.

## 6

### *Eliseu peteĩ haxa ovu aguã rami ojapoague*

<sup>1</sup> Ha'e gui profeta kuery remimbo'e kuery ikuai va'e aipoe'i okuapy Eliseu pe:

— Apy ndereve orekuiaia ma nhanemboty rei'i ete.

<sup>2</sup> Ha'e nunga rupi toroo Jordão yakã re, ha'e gui peteĩ-teĩ rogueru aguã yvyra, peteĩ oo nhandekuai atyrã rojapo aguã.

Ombovai:

— Tapeo ha'vy — he'i.

<sup>3</sup> Ha'e ramo ha'e kuery va'e regua peteĩ aipoe'i:

— Ha'eve 'rã ndee voi reo aguã ore nerembiguai kuery reve.

Eliseu ombovai:

— Xee aa avi 'rã — he'i.

<sup>4</sup> Ha'e rami vy oo ha'e kuery reve.

Jordão yakã rembe re ha'e kuery ovaẽ vy oake'o okuapy yvyra.

<sup>5</sup> Ha'e gui peteĩ yvyra hi'aĩ va'e oake'o vy haxa oity yy py. Ha'e ramo ojapukai vy aipoe'i:

— Aikore xeruvixa! Haxa ma nhomba'e aiporu va'ekue — he'i.

<sup>6</sup> Ha'e ramo Nhanderuete remimbo'e oporandu:

— Mamo tu ho'a ra'e?

Ha'e gui ixupe oexa uka ramo Eliseu peteĩ yvyra ojaya vy omombo yy py. Ha'e vy ojapo ferro guigua ovu aguã rami.

<sup>7</sup> Ha'e vy

— Emoatã ju ke — he'i ramo okuave'ẽ vy ojopy.

### *Síria pygua kuery reve joguero'aa jave Eliseu nhopytyvõague*

<sup>8</sup> Ha'e gui Síria pygua huvixa opu'ã Israel kuery rovai. Ha'e vy yvatekueve reve nhomongeta vy peteĩ henda re onhembopy'aa rupi aipoe'i:

— Ha'e py 'rãe ha'eve japyta ranhe aguã — he'i.

<sup>9</sup> Ha'e ramo teĩ Israel pygua huvixa pe Nhanderuete remimbo'e aipoe'i uka:

— Penheangu ke ha'e rupi peaxa e'ŷ aguã, mba'eta ha'e py 'rã Síria pygua kuery oo — he'i uka.

<sup>10</sup> Ha'e ramo Nhanderuete remimbo'e omombe'u ma voi rire ijayvuague katy Israel pygua huvixa voi omondouka guembiguai kuery oikuua pota va'erã. Ha'e ramo vy oo jepe nho. Ha'e va'e ramigua ma mbovykue rei e'ŷ oiko.

<sup>11</sup> Ha'e nunga rupi Síria pygua huvixa opy'a py nda'evei etea oendu. Ha'e vy guembiguai kuery oenoĩ vy aipoe'i ha'e kuery pe:

— Pemombe'u na xevy nhande kuery va'e regua mava'e tu Israel pygua huvixaa katy oo va'e.

<sup>12</sup> Ha'e ramo hembiguai va'e regua ombovai:

— Xeruvixa, avave rei ndorooi ri. Ha'e ramo avi profeta Eliseu Israel re oĩ va'e ae ri Israel pygua huvixa pe omombe'u kuerei 'rã rekeaty py ndeayvua voi — he'i.

**13** Ha'e ramo aipoe'i:

— Tapeo, pexa pota mamo pa oña re, xee ajopy uka aguã — he'i.

Ha'e gui ma ixupe

— Dotã tetã py rima oĩ — 'ea.

**14** Ha'e ramo ha'e katy omondouka kavaju, karóxa ha'e xondaro kuery ipy'a guaxukueve. Pyávy ha'e kuery ovaẽ vy ojokopa tetã.

**15** Ha'e gui ma Nhanderuete remimbo'e rembiguai aje'ive'i reve ovv vy oẽ vy oexa mbovy rei e'ŷ ikuai va'e, kavaju árygua ha'e karóxa reveguia kuery. Jovaive re ojokopa ra'e. Ha'e ramo hembiguai aipoe'i Eliseu pe:

— Aikore xeruvixa! Mba'e tu jajapo ta?

**16** Eliseu ombovai:

— Ekyje eme. Mba'eta ha'e kuery reve ikuai va'e gui nhandereveguia kuery hetave — he'i.

**17** Ha'e gui ma Eliseu onhembo'e vy aipoe'i:

— SENHOR, ajerure hexa reipe'a aguã oexa kuaa aguã rami — he'i. Ha'e ramo hembiguai rexha SENHOR oipe'a ramo Eliseu yvýry rupi oexa tata reveguia kuery kavaju árygua ha'e karóxa yvý'ã rupi ikuai va'e.

**18** Ha'e gui ma hovaigua kuery ha'e kuery rovai ou ramo Eliseu onhembo'e ju SENHOR pe. Ha'e vy aipoe'i:

— Ajerure ndevy: Embogue ke ha'e kuery rexha oexa e'ŷ aguã — he'i ramo Eliseu ijayvuague rami vy omboguepa hexa, ndoexai aguã rami.

**19** Ha'e gui ma ha'e kuery va'e regua pe Eliseu aipoe'i:

— Kova'e tape ma ha'evea ramigua e'ŷ, neñ kova'e tetã oĩ va'e voi. Peju xerakykue, ha'e rogueraa 'rã ava peka va'e katy — he'i. Ha'e rami vy Samaria tetã py ogueraa.\*

**20** Ha'e gui ma Samaria tetã py ha'e kuery ovaẽ ma ramo Eliseu aipoe'i:

— SENHOR, eipe'a ju kova'e avakue rexha, ha'e kuery oexa ju aguã — he'i. Ha'e ramo ha'e kuery rexha SENHOR oipe'a ramo oexa rã Samaria tetã mbyte py ra'e ma ikuai.

**21** Ha'e nunga Israel pygua huvixa oexa vy oporandu Eliseu pe:

— Xeru, ajukapa 'rã? Tajukapa pa?

**22** Ombovai:

— Any teve, ejuka eme. Rejuka aguã ha'eve va'e ma ndee ae kyxe ha'e nderapa reve rejopy va'ekue anho. Ha'e rã kova'e kuery pe ma eru ruka mbojape ho'u va'erã ha'e yy oy'u aguã. Ha'e gui ma tojevypa ju nguvixaa katy ae — he'i.

**23** Ha'e ramo ha'e kuery pe huvixa ojapo ngaru tuvixa ete va'e. Ha'e ramo okaru ha'e oy'u okuapy. Ha'e ramo mae omondoukapa rã nguvixaa katy ju oje'oi. Ha'e rami rire Síria pygua kuery ndouvei ranhe Israel yvý re mba'emo oipe'a aguã.

### *Samaria py karuai oikoague*

**24** Ha'e va'e rire Síria pygua huvixa Ben-Hadade va'e ma teñgue ju ojeupegua xondaro kuery omboaty ramo oje'oi vy ojokopa okuapy Samaria tetã.

**25** Ha'e nunga rupi Samaria py oiko karuai vaikue. Ojokopaa rã tetã mbyte py mburika'i kãgue rive ovende 'rã oitenta hatã'i va'e prata re, ha'e apykaxu'i repoxi mboapy rai teñ cinco re 'rã ovende.

**26** Ha'e gui ma Israel pygua huvixa tetã kora rupi oaxa ovv jave ixupe ojapukai nhendu peteñ kunha va'e:

— Xepytvõ ke, xeruvixa — he'i.

**27** Huvixa ombovai vy aipoe'i:

— SENHOR nanepytyvõi ri ramo magui tu xee ajou 'rã roipytyvõ aguã? Mba'emo moa'yíaty gui, tyrã pa uva onhamiaty gui teve 'rã ajou?

\* **6:19** Ha'e kuery ma Eliseu re ae oje'oi va'ekue ri oexa e'ŷ rã Eliseu ogueraa ngovaigua Israel kuery retã mbyte peve, Samaria py ae.

**28** Huvixa oporanduve ju ixupe:

— Mba'e tu ha'vy rerekō?

Kunha va'e ombovai:

— Kova'e kunha xereveguia aipoe'i va'ekue xevy: “Eme'ẽ ndepi'a'i ja'u va'erā, ha'e gui ko'ẽ ramo ma xepi'a ju 'rā ja'u”, he'i va'ekue xevy.

**29** Ha'e rami vy xepi'a'i ranhe nhamomimoi vy ja'u. Ha'e rami teĩ ko'ẽ jevy ixupe xee “Aŷ ma ndepi'a ju eme'ẽ ja'u aguã”, ha'e ramo onhomē – he'i.

**30** Ha'e rami kunha va'e ijayvu rā huvixa oendu vy omondoro oao tetā kora rupi oaxa ovya pyve. Ha'e ramo heta va'e kuery oexa rā oao guýry huvixa onhemonde ra'e ajukue voxā guigua py rive.†

### *Eliseu “Heta mba'e ju 'rā pejou”, he'iague*

**31** Ha'e ramo huvixa aipoe'i:

— Kurive Safate ra'y Eliseu akā ijaxi'y áry gui aipe'a e'ŷ rā Nhanderuete taxemoingo axy oipotaa rami – he'i.

**32** Ha'e rami vy huvixa peteĩ ava omondouka Eliseu-a katy, ngoo py oguapy oiny ramo nhomongeta va'ety kuery reve. Tembiguai ovaẽ e'ŷ mbove ma voi Eliseu aipoe'i nhomongeta va'ety kuery pe:

— Pexa 'rā jojuka rive va'e ra'y xeakā ayaarā ombou va'e. Pexa pota ke, tembiguai ovaẽ jave pemboty okē, pejoko guive. Ha'e va'e rakykue rupi ou avi 'rā ri huvixa. Ipy ambua pendu 'rā – he'i.

**33** Ha'e kuery reve ijayvu teri jave ovaẽ nhendu tembiguai. Ha'e gui huvixa voi ovaẽ, mba'eta aipoe'i: “Kova'e mba'emo vai ma SENHOR-a gui ae ou ramo mba'e re tu xee arõve ta orerepy aguã?” he'i.

## 7

**1** Ha'e ramo Eliseu aipoe'i:

— Pejapyxaka ke SENHOR ijayvua re. Po rami SENHOR ijayvu: “Ko'ẽ rā, kova'e hora rupi rivyvyi, Samaria tetā rokē py peteĩ varai trigo ku'ikue ovendea 'rā peteĩ hatā'i va'e re rive, ha'e mokoĩ ryru cevada guigua ma peteĩ hatā'i va'e re 'rā ovendea”, he'i.

**2** Ha'e ramo xondaro ruvixa huvixa pytyvõa va'e ombovai Nhanderuete remimbo'e:

— SENHOR ha'e nunga ombou aguã yva oipe'a teĩ ha'e nunga oiko 'rā nda'u? – he'i.

Profeta ombovai:

— Ha'e nunga nderexa py ae 'rā rexā va'eri ndere'ui 'rā ta'vy.

### *Síria pygua kuery onhambaague irundy lepra reveguia omombe'u okuapyague*

**3** Tetā rokē py irundy avakue lepra reveguia ikuai. Ha'e va'e kuery ma joupe-upē aipoe'i okuapy:

— Mba'erā tu apy jaguapy jakuapy nhamanomba peve teve?

**4** Xapy'a rei “Tetā py jaike” ja'e teĩ tetā rupi karuai nhaendu vy nhamanomba 'rā ha'e py. Ha'e rā “Apy ae 'rā jaguapyve nhainy” ja'e vy ma nhamanomba avi 'rā. Ha'e nunga rupi aŷve jaje'oi Síria pygua kuery ikuiaia katy. Ha'e kuery nhanemoingove ri ramo jaikove 'rā. Ha'e rā nhandejukapa ramo nhamanomba 'rāe ma vy – he'i okuapy.

**5** Ha'e rami vy ha'e kuery ma pytūmba ramove opu'ãmba Síria pygua ikuiaia katy oje'oi aguã. Ha'e py ovaẽ vy ndoexai avave rei.

**6** Mba'eta Síria pygua kuery ikuiaia rupi SENHOR oenduka ma voi va'ekue kavaju áryguia, karóxa reveguia ha'e xondaro kuery hyapu rei nhendu va'e. Ha'e nunga Síria pygua kuery oendu vy joupe-upē “Pendu ke, Israel pygua huvixa nhanderovai oiporuka ra'e huvixa heteu regua ha'e Egito pygua, nhanderovai opu'ã aguã”, he'i va'ekue.

† **6:30** Ha'e kuery reko ramy vy ajukue voxā guigua py onhemonde 'rā ipy'a vai, e'ŷ vy nda'evei etea oendu vy.

<sup>7</sup> Ha'e nunga rupi ha'e kuery oje'oipa ra'e. Ha'e vy pytū rupi onhamba vy oejapa oje'oivy oguy ikuai va'e ha'e guymba kavaju ha'e mburika'i kuery. Ikuaiague ha'e javi oeja ha'ekue rami ae. Onhamba oje'oivy oo jepexe vy.

<sup>8</sup> Ha'e kuery ikuaiague py lepra revegua kuery ju ovaẽ ma jogueruvy. Peteĩ oguy py oike vy okaru ha'e oy'u okuapy. Ha'e gui ae oipe'a prata, ouro ha'e ao. Oje'oipa ju vy onhomimba. Ha'e gui ojevy vy amboae oguy py ju oike vy ha'e va'e gui voi mba'emo oipe'ave vy onhom.

<sup>9</sup> Ha'e gui mae aipoe'i joupe-up:

— Ha'eve'ŷa ramigua jajapo. Kova'e ára ma mba'emo porã nhamombe'u aguã ára va'eri nhakyririmbä jakuapy. Xapy'a rei ko'ẽ rã peve nhamombe'u aguã nharõ ramo pavẽ rei 'rã oikuaa jajejavý va'ea. Ha'e nunga rupi aŷ ma voi jaje'oi, huvixa ro peve nhamombe'u aguã — he'i okuapy.

<sup>10</sup> Ha'e rami vy ha'e kuery oo vy ojapukai okuapy tetã rokẽ rarõa kuery pe. Onhemombe'u porã'i vy aipoe'i:

— Roje'oi kuri Síria pygua ikuiaia py teĩ ha'e py ma avave rei nda'ipoavei ma, non-henduai guive. Kavaju ha'e mburika'i kuery ojokua pyre anho ikuai, ha'e gui oguy voi ha'ekue rami ae ikuai — he'i.

<sup>11</sup> Ha'e ramo okẽ rarõa kuery ju ojapukai reve omombe'u ukapa huvixa ro rupi peve.

<sup>12</sup> Ha'e gui ma pyavyve huvixa opu'ã vy aipoe'i guembiguai kuery pe:

— Aŷ ma xee amombe'u ta pãvy Síria pygua kuery nhandere ojapoague. Ha'e kuery oikuaapa mba'eve ndajarekoveia. Ha'e rami vy ikuiaia gui mombyry'i peve ojepe'apa ra'e mba'ety rupi onhemi aguã. Mba'eta aipoe'i: "Tetã pygua kuery oẽmba jogueruvy ramo jajopypa 'rã oikove reve, tetã py jaike aguã", he'i okuapy ra'e.

<sup>13</sup> Ha'e ramo peteĩ hembiguai va'e regua ombovai vy aipoe'i:

— Ejou ha'vy peteĩ nhiruĩ kavaju tetã py hembyre va'ekue regua. Nhamondouka 'rã avakue ha'e py oikuaa pota aguã. Mba'eta Israel kuery apy hembyrekue ikuai va'e okanhymba avi 'rã Israel kuery mboae rami ae — he'i.

<sup>14</sup> Ha'e ramo mokoĩ karóxa kavaju revegua ojou rã huvixa omondouka avakue Síria pygua xondaro kuery rakykue. Ha'e vy aipoe'i:

— Tapeo pexa pota — he'i.

<sup>15</sup> Ha'e ramo hakykue rupi oje'oi Jordão yakã peve. Ha'e vy oexa rã tape rupi omboty rei ra'e ao ha'e tembiporu Síria kuery onhamba vy omombopa va'ekue. Ha'e ramo tembiguai kuery ojevypa ju vy omombe'upa okuapy huvixa pe.

### *Eliseu ayvu ojeupityague*

<sup>16</sup> Ha'e gui ma heta va'e kuery oẽmba oje'oivy tetã gui. Ha'e vy Síria pygua kuery ikuaiague gui oipe'apa. Ha'e SENHOR ijayvuague rami vy peteĩ varai trigo ovendea peteĩ hatã'i va'e re rive, mokoĩ varai cevada guive ha'e rami ae avi.

<sup>17</sup> Ha'e gui huvixa ma xondaro ruvixa ipytyvõaty pe oarõ uka tetã rokẽ. Ha'e rami teĩ heta va'e kuery okẽ py ae opyrõmba okuapy ramo omano, Nhanderuete remimbo'e oia py huvixa oo jave ijayvuague rami vy.

<sup>18</sup> Ha'e rami py ojeupity huvixa pe Nhanderuete remimbo'e ijayvu ma voiague: "Ko'e rã kova'e hora rivyvyi mokoĩ varai cevada ovendea 'rã peteĩ hatã'i va'e re Samaria py ae, peteĩ varai trigo guive", he'iague.

<sup>19</sup> Ha'e jave ma xondaro ruvixa ombovai va'ekue Nhanderuete remimbo'e pe: "SENHOR yva oipe'a teĩ pova'e ayvu oiko 'rã nda'u?" he'i va'ekue. Ha'e profeta ju "Ha'e nunga nderexa py ae 'rã rexâ va'eri ndere'ui 'rã ta'vy", he'i va'ekue.

<sup>20</sup> Ha'ekue rami ae oiko. Tetã rokẽ py heta va'e kuery opyrõmba ramo omano.

<sup>1</sup> Ha'e gui Eliseu ijayvu ju ava'i omboete ju va'ekue xy pe. Ha'e vy aipoe'i:\*

— Epu'ã ke, tapeo ndero pygua kuery reve, ha'e gui penderekoa ju 'rã mamo rã ha'evea py rei. Mba'eta pendeyvy re SENHOR ombou ta karuai sete ma'etõ re oiko va'erã — he'i.

<sup>2</sup> Ha'e ramo kunha va'e opu'ã vy Nhanderuete remimbo'e ijayvuague rami oiko. Ha'e rami vy ngoo pygua kuery ha'e javi reve oje'oi vy sete ma'etõ re ikuai filisteu kuery yvy re.

<sup>3</sup> Sete ma'etõ opaa py ma filisteu kuery yvy gui kunha va'e ojevy ju. Ha'e vy huvixaa py oo ngoo ha'e oyvy oguereko va'ekue re ojerure ju aguã.

<sup>4</sup> Ha'e va'e jave py huvixa ijayvu oiny Nhanderuete remimbo'e rembiguai Geazi reve. Ha'e vy ixupe aipoe'i:

— Xee ajerure, emombe'u ke xevy mba'emo tuvixa va'e Eliseu ojapo va'ekue ha'e javi — he'i.

<sup>5</sup> Ha'e ramo huvixa pe Geazi omombe'u oiny Eliseu ava'i omano va'ekue omopu'ã jevyague. Ha'e ramove ava'i omboete ju va'ekue xy ae ovaõ, ha'e vy huvixa pe ojerure ngoo ha'e oyvy re.

Ha'e ramo Geazi aipoe'i:

— Xeruvixa, kova'e kunha ae ma Eliseu omboete jevy va'ekue xy.

<sup>6</sup> Ha'e gui kunha va'e pe huvixa oporandu ramo omombe'upa. Ha'e ramo ipytyvõarã huvixa omoõ peteõ guembiguai. Ha'e va'e pe aipoe'i:

— Ixupe eme'ẽ ukapa ju oguereko va'ekue ha'e javi, ha'e oyvy gui oõa ára guive aý peve imba'ety gui omono'õ mbyre repykue voi — he'i.

### *Eliseu-a py Damasco pygua Hazaël ooague*

<sup>7</sup> Ha'e gui ma Síria pygua huvixa Ben-Hadade imba'eaxy oupy jave Eliseu oo Damasco tetã py. Huvixa pe omombe'ua vy

— Nhanderuete remimbo'e ovaõ ra'e apy — 'ea.

<sup>8</sup> Ha'e ramo huvixa aipoe'i Hazaël pe:

— Eiporavo mba'emo Nhanderuete remimbo'e pe reme'ẽ va'erã, ha'e tereo eovaexi. Ixupe eporandu uka xere SENHOR pe, kova'e mba'eaxy areko va'e gui akuera 'rãa aikuaa aguã — he'i.

<sup>9</sup> Ha'e gui Hazaël ma mba'emo ome'ẽ va'erã reve oo ovaexi aguã katy. Ha'e vy quarenta camelô áry ogueraa Damasco tetã py iporãgueve oõ va'ekue regua. Eliseu oõa py ovaõ vy ojexa uka henonde py. Ha'e vy aipoe'i:

— Síria pygua huvixa ndera'y Ben-Hadade ae xembou aporandu aguã: “Akuera 'rã pa mba'eaxy areko va'e gui?” he'i uka.

<sup>10</sup> Ha'e ramo Eliseu ombovai:

— Tereo, ha'e aipo're ixupe: “Rekuera ju 'rãe”, 're. Ha'e rami teõ xevy SENHOR oikuaa uka avi omano nho 'rãa — he'i.

<sup>11</sup> Ha'e vy Hazaël re Eliseu oma'ẽ ngatu oiny. Hexe oma'ẽ ngatu ete ramo nda'evei reia oendu. Ha'e gui Nhanderuete remimbo'e ojae'o.

<sup>12</sup> Ha'e ramo Hazaël aipoe'i:

— Xeruvixa, mba'e re tu rejae'o ri?

Ombovai:

— Mba'eta aikuaa ma voi Israel kuery re mba'emo vai rejapo 'rãa. Mba'eta reapypa 'rã ha'e kuery ro ikorapa va'e, kyxe py rejukapa 'rã ha'e kuery va'e regua kunumigue, remou'ñmba 'rã kyrigue'i, ha'e remondoropa 'rã kunhague imemby ryru'i va'e — he'i.

<sup>13</sup> Ha'e ramo Hazaël aipoe'i:

— Ha'e gui mba'eda tu xee nerembiguai jagua ramigua'i va'eri ha'e ramigua ete ajapo aguã?

Eliseu ombovai:

— SENHOR ma xevy oikuaa uka ndee ju Síria pygua ruvixarã reõ aguã — he'i.

\* <sup>8:1</sup> Kunha va'e pi'a Eliseu omboete jevyague omombe'u 2 Reis 4.8-31 py.

<sup>14</sup> Eliseu oĩ gui Hazael oo ju vy nguvixaa py ovaẽ. Ha'e rã ixupe oporandu:  
— Mba'e he'i Eliseu ndevy?

Ombovai:

— Aipoe'i xevy rekuera 'rãa rami — he'i.

<sup>15</sup> Ha'e gui ko'ẽ jevy ma Hazael peteĩ nheovãa ogueraa yy py. Omoakŷ ma vy onhovã huvixa rova, omano peve. Ha'e gui hekoria Hazael ju oĩ huvixa.

### 2 Crônicas 21.1-20

<sup>16</sup> Peteĩ nhirui ma'etŷ re ma Acabe ra'y Jorão Israel pygua huvixa oĩ rire, Judá pygua huvixa Josafá oĩ teri reve ta'y Jeorão ju omboypy Judá pygua huvixa oĩ aguã.

<sup>17</sup> Ha'e va'e ma huvixa oĩ ypy'i jave py trinta e dois ma'etŷ oguereco. Ha'e gui oito ma'etŷ re opena Jerusalém py.

<sup>18</sup> Israel pygua huvixa kuery ikuaiague rupi oiko, Acabe ro pygua kuery ikuaiague rami avi, tajy re ae omenda rire. Ha'e rami vy SENHOR renonde rupi mba'emo vai anho ojapo oikovy.

<sup>19</sup> Ha'e rami teĩ SENHOR guembiguai Davi re oma'ẽ vy nomombaxeí Judá pygua kuery, mba'eta ixupe ijayvuague rami vy hekoria nhomoexakãarã omoĩ riae aguã re, ha'e gui hamymino kuery rekoria ju.<sup>†</sup>

<sup>20</sup> Ha'e gui Jeorão oĩ jave Edom pygua kuery opu'ã okuapy Judá kuery rovai, ipo'akaa guy py nda'ikuaxevei vy. Ha'e rami vy omoĩ okuapy nguvixarã ae.

<sup>21</sup> Ha'e nunga rupi Jeorão ma Zair katy oje'oi karóxa oguereco va'e ha'e javi reve. Ha'e rã Edom pygua kuery ojoko okuapy, ha'e ikaróxa ja ruvixa kuery voi, teĩ pyavyve Jeorão kuery opu'ã vy oitypa. Ha'e rami teĩ ixupeguia kuery onhamba ju ngoo katy.

<sup>22</sup> Ha'e rami py Edom pygua kuery opu'ãmba okuapy Judá kuery po'akaa gui oo jepe aguã, aÿ peve guarã. Ha'e va'e jave ae avi Libna pygua kuery opu'ã okuapy.

<sup>23</sup> Ha'e gui oïve rei tema Jeorão rekoke regua. Ha'e rami avi mba'emo ojapo va'ekue ha'e javi noï'rã teve kuaxia Judá pygua huvixa kuery rekoke oña re?

<sup>24</sup> Ha'e gui Jeorão ndoikovevei'i ma guamoĩ kueryague rami.<sup>‡</sup> Ha'e ramo onhono porãa tetã Davi rekoague py. Ha'e gui ta'y Acazias ju oĩ nguu rekoria.

### 2 Crônicas 22.1-6

<sup>25</sup> Ha'e gui Acabe ra'y Jorão doze ma'etŷ re ma Israel pygua huvixa oĩ rire ma Jeorão ra'y Acazias oĩ Judá pygua huvixarã.

<sup>26</sup> Acazias ma huvixa oĩ ypy'i jave py vinte e dois ma'etŷ oguereco, ha'e gui peteĩ ma'etŷ ete'i opena Jerusalém py. Ixy ma Israel pygua huvixa Onri rajy, Atalia hery va'e.

<sup>27</sup> Ha'e gui Acazias voi Acabe ro pygua kuery ikuaiague rupi oiko. Ha'e vy mba'emo vai anho ojapo oikovy SENHOR renonde rupi. Acabe ro pygua rami oiko, tajy me ae vy.

<sup>28</sup> Ha'e rami vy Acabe ra'y Jorão reve jogueraa Ramote-Gileade katy, Síria pygua huvixa Hazael kuery re opu'ã aguã. Ha'e ramo Síria pygua kuery oipyxo Jorão.

<sup>29</sup> Ha'e ramo huvixa Jorão ma Jezreel tetã katy ju ojevy Síria kuery oipyxoague gui okuera aguã, Ramá py Síria pygua huvixa Hazael re opu'ãa py. Ha'e gui ma Jezreel py Acabe ra'y Jorão imba'eaxy oupya py Judá pygua huvixa Jeorão ra'y Acazias oo avi oexa aguã.

## 9

### Israel pygua huvixarã Jeú omoĩaague

<sup>1</sup> Ha'e gui profeta Eliseu ma peteĩ oenoĩ profeta kuery remimbo'e regua. Ha'e vy aipoe'i ixupe:

— Eiko katu, eraa kova'e azeite ryru, ha'e tereo Ramote-Gileade katy.

<sup>†</sup> **8:19** Davi pe SENHOR ijayvuague ma 1 Reis 11.34-36, 15.4, 2 Crônicas 21.7 ha'e Salmo 132.17 py. Ha'e gui "Nhomoexakãa" he'ia ma huvixave raka'eve rã oiko aguã re ijayvu vy, ha'e Jesus Cristo rekorã re guive (Lucas 2.30-32; João 8.12). <sup>‡</sup> **8:24** Apy "Opytu'u ma guamoĩ kueryague rami", he'ia ma omano maa rami ijayvu vy.

<sup>2</sup> Ha'e py revaẽ vy ejou Josafá ra'y Jeú, Ninsi ramymino. Eike ha'e emopu'ã tyvy kuery mbyte gui, ha'e opyvea py ju eraa.

<sup>3</sup> Ha'e gui azeite ryru reupi reve enhoẽ inhakã re. Ha'e vy aipo're: "Po rami SENHOR ijayvu: 'Israel pygua huvixarã romoĩ', he'i." Ha'e gui okẽ reipe'a ju vy enha pojava eovy – he'i.

<sup>4</sup> Ha'e ramo profeta kunumi va'e ma Ramote-Gileade katy oo.

<sup>5</sup> Ha'e py kunumi va'e ovaẽ vy oma'ẽ rã xondaro ruvixa kuery oguapypa okuapy ra'e. Ha'e rami vy aipoe'i ixupe:

– Xeruvixa, areko ndevy amombe'u va'erã – he'i.

Jeú oporandu:

– Mava'e tu ore kuery ha'e javive regua pe?

Omobovai:

– Ndevy pe ae, xeruvixa – he'i.

<sup>6</sup> Ha'e ramo Jeú opu'ã vy oike opy katy. Ha'e rã inhakã re kunumi va'e azeite onhoẽ vy aipoe'i:

– Po rami SENHOR Israel kuery ruete ijayvu: "Romoĩ Israel pygua huvixarã, SENHOR pegua kuery re repena aguã.

<sup>7</sup> Ha'e gui rejukapa 'rã nderuvixa Acabe ro pygua kuery, ambopaga aguã Jezabel po py xerembiguai profeta kuery ruguy omoëague re, ha'e SENHOR rembiguai kuery ojuka ukaague ha'e javi re.

<sup>8</sup> Ha'e ramo py Acabe ro pygua kuery omanomba 'rã. Israel gui amomba 'rã Acabe guigua avakue ikuai va'e ha'e javi, escravo, ha'e'ŷ vy escravo e'ŷ tei.

<sup>9</sup> Mba'eta Acabe ro pygua kuery re ajapo 'rã Nebate ra'y Jeroboão ro pygua re ajapoague rami, ha'e Aías ra'y Baasa ro pygua kuery re rami.

<sup>10</sup> Ha'e gui Jezreel tetã yvýry rupi jagua kuery ho'upa 'rã Jezabel retekue. Ijatyarã nda'ipoai 'rã guive", he'i.

Pova'e nunga kunumi va'e omombe'upa vyve okẽ oipe'a ju vy onha ovy.

<sup>11</sup> Ha'e gui Jeú ma nguvixa rembiguai kuery ikuiaia py ou ju ramo oporandu okuapy ixupe:

– Ha'eve vai pa? Mba'erã tu ou peva'e inhakã porã e'ŷ va'e?

Jeú ombovai:

– Peikuaa porã ha'e va'e ava, ha'e ijayvua re – he'i.

<sup>12</sup> Ha'e ramo aipoe'i okuapy:

– Ndeapu rima. Aŷ ma rojerure ndevy, emombe'u porã tema roikuaa aguã.

Ha'e ramo Jeú aipoe'i:

– Peikuaaxe rã po rami ri ijayvu: "SENHOR aipoe'i: 'Romoĩ Israel pygua huvixarã', he'i."

<sup>13</sup> Ha'e ramove ha'e kuery ojapura vy peteĩ-teĩ oao puku omboi vy omoĩ okuapy tenda oĩ va'e guy rupi escada oĩ va'e áry rupi. Ha'e vy mimby guaxu omonhe'ẽ vy ijayvu okuapy:

– Jeú ma nhanderuvixa oĩ.

### *Jorão ha'e Acazias Jeú ojukaague*

<sup>14</sup> Ha'e gui ma Josafá ra'y Jeú, Ninsi ramymino va'e jogueroayvu rei Jorão rovai. Ha'e rami tei Jorão ma Ramote-Gileade oarõ okuapy Israel kuery ha'e javi reve, Síria pygua huvixa Hazael gui.

<sup>15</sup> Ha'e gui Jorão ojevy ju va'ekue Jezreel katy onhepoano uka aguã, Síria pygua huvixa Hazael pegua kuery re opu'ã rã oipyxopaague gui. Ha'e gui Jeú aipoe'i:

– Xapy'a rei penderuvixarã xepota ri vy avave rei toẽ eme tetã gui Jezreel py joupe omombe'u aguã – he'i.

**16** Ha'e rami vy Jeú ae peteñ karóxa py ojeupi vy oo Jezreel katy, mba'eta ha'e py Jorão itui ramo tupa rupi. Ha'e Judá pygua huvixa Acazias voi oo ma avi va'ekue Jorão oexa aguã.

**17** Ha'e gui Jezreel py torre oĩ va'e re oĩ peteñ oexa pota va'ety. Ha'e va'e ma Jeú revegua kuery mbovy rei e'ý ou jekuaa va'e oexa vy aipoe'i:

— Aexa mbovy rei e'ý ou va'e — he'i.

Ha'e ramo Jorão aipoe'i:

— Emondouka ha'vy peteñ kavaju árygua ovaexí vy ha'e kuery pe oporandu aguã: "Peteñ rami nhandekuai aguã pa peju?" he'i aguã.

**18** Ha'e ramo kavaju árygua ovaexí aguã oo vy aipoe'i:

— Po rami huvixa aipoe'i uka: "Peteñ rami nhandekuai aguã pa peju?" he'i uka.

Ha'e rã Jeú ombovai:

— Mba'e tu rereko peteñ rami ikuai va'e reve? Eju ke xerakykue — he'i.

Ha'e nunga ju oexa pota va'ety omombe'u vy aipoe'i:

— Ha'e kuerya py tembiguai ovaẽ teñ ndojevyvei ju — he'i.

**19** Ha'e gui Jorão ma amboae ju omondouka kavaju árygua. Ha'e rã ha'e kuerya py ha'e va'e ovaẽ vy aipoe'i:

— Po rami huvixa aipoe'i uka: "Peteñ rami nhandekuai aguã pa peju?" he'i uka.

Jeú ombovai:

— Mba'e tu rereko peteñ rami ikuai va'e reve? Eju ke xerakykue — he'i.

**20** Ha'e gui oexa pota va'ety ha'e nunga ju omombe'u vy aipoe'i:

— Peva'e voi ha'e kuerya py ovaẽ teñ ndojevyvei ju. Ha'e gui karóxa ogueroguata heruvy va'e ma ko Ninsi ramymino Jeú, mba'eta ojerovia rei reve ou ta — he'i.

**21** Israel pygua huvixa Jorão aipoe'i:

— Emoatyrõ xekaróxa — he'i. Ha'e rami vy ikaróxa omoatyrõa ma ramo Jorão oo oiny, Judá pygua huvixa Acazias avi, peteñ-teñ okaróxa py ae jogueraa Jeú reve nhovaexí aguã. Ha'e vy ovaexí okuapy Jezreel pygua Nabote mba'ety py.

**22** Ha'e gui Jorão ma Jeú rexu vy oporandu ixupe:

— Jeú, peteñ rami nhandekuai aguã pa reju?

Ombovai:

— Mba'eda vy 'rã tu peteñ rami nhandekuai, ndexy Jezabel tavy reia ha'e imba'evykyha'e javi rupi nhomoingo teria ja? — he'i.

**23** Ha'e ramove Jorão ma kavaju juru xã ombojeapa vy ogueronha heravy. Ha'e vy aipoe'i ovv Acazias pe:

— Nhanderovaigua ae ra'e, Acazias!

**24** Ha'e rami teñ Jeú ma ombaraetekuea ha'e javi py guyrapa omoatã vy ojapi Jorão kupe mbyte py. Ikuraxõ rupi hu'y oaxa oiny ramo okaróxa py ae ho'a.

**25** Ha'e ramo Jeú aipoe'i oxondaro ruvixa Bidcar pe:

— Eraa ke, ha'e emombo Jezreel pygua Nabote yvykue py. Mba'eta nema'endu ke, ndereve tuu Acabe rakykue rupi kavaju áry jaa jave hovai SENHOR aipoe'i ma voiague re:

**26** "Kuee ka'aru Nabote ha'e ta'y kuery ruguy omoẽ rã aexa va'ekue rupi aipoa'e: Anhetẽ ha'e va'e mba'ety py ae avi 'rã ambopaga", he'iague re. Ha'e nunga rupi eraa ha'e va'e mba'ety py ae emombo, SENHOR ijayvuague rami vy — he'i.

**27** Ha'e nunga Judá pygua huvixa Acazias oexa vy onha ovv Bete-Hagã katy tape oo va'e rupi. Ha'e rami teñ Jeú ma hakykue monha avi vy aipoe'i:

— Pejuka avi — he'i ramo oipyxo ikaróxa py ae, Ibleão katy'i Gur katy ooa py. Ha'e ramo Megido katy onhave vy ha'e py mae omano.

**28** Ha'e ramo karóxa pyve hembiguai kuery ogueraa Jerusalém py. Ha'e vy onhono porã okuapy tetã Davi rekoague py, tamoñ kuery rupa yvýry ae.

**29** Acabe ra'y Jorão onze ma'etõ re ma huvixa oĩ rire Acazias omboypy va'ekue Judá kuery re opena aguã.

### *Jezabel omanoague*

<sup>30</sup> Ha'e gui Jezabel oendu omombe'ua rā Jezreel py Jeú ovaẽ maa. Ha'e rami vy onhemotypāmba guexa yvýry rupi, omoatyrōmba o'a, ha'e vy janela gui oma'ẽ ho'amy.

<sup>31</sup> Ha'e gui ma huvixa roka rokē rupi Jeú oaxa ramo kunha va'e aipoe'i:

— O nderuvixa jukaare Zinri, jomeme reiko porā'i vy teve reju?\*

<sup>32</sup> Ha'e ramo Jeú yvate katy oma'ẽ janela oĩ va'e re. Ha'e vy aipoe'i:

— Mava'e tu xea katygua peiko? Mava'e tu? — he'i. Ha'e ramo mokoõ e'ŷ vy mboapy tembiguai ikuai va'e oma'ẽ okuapy hexe.

<sup>33</sup> Ha'e kuery pe aipoe'ive ju:

— Pemombo ke kunha va'e upe gui yvy katy — he'i. Ha'e ramo kunha va'e omombo okuapy yvy katy. Ha'e vy oo mbotya re huguy hayvipa, ha'e kavaju kuery re voi, hi'áry rupi Jeú ogueroguata rā.

<sup>34</sup> Ha'e gui ma opy oike ma vy okaru ha'e oy'u ma. Ha'e rire mae ma aipoe'i:

— Pepena ke kii heko vai va'e retekue re. Peraa, penhono porā, huvixa rajykue ae ramo — he'i.

<sup>35</sup> Ha'e ramo oje'oi okuapy onhono porā aguã. Ha'e rami teĩ hetekue ma ndojouwei inhakāgue e'ŷ vy, ha'e gui ipykue ha'e ipokue anho'i.

<sup>36</sup> Ha'e kuery ojevy ju vy omombe'u okuapy ixupe. Ha'e ramo aipoe'i:

— Ha'e nunga ma SENHOR ijayvuague rami ae oiko, guembiguai Tisbé pygua Elias rupi aipoe'i ukaague rami. Ha'e vy aipoe'i: "Jezreel yvy py jagua kuery ho'upa 'rā Jezabel retekue.

<sup>37</sup> Ha'e gui Jezabel rete rembyrekue ma tepoxi rami rive 'rā opyta Jezreel yvy rupi. Ha'e rami rire avave rei 'Apy ma Jezabel itui', nda'eavei 'rā."

## 10

### *Acabe ro pygua kuery Jeú ojuka ukapaague*

<sup>1</sup> Samaria tetā py setenta ikuai Acabe ra'y kuery. Ha'e gui Jeú ma kuaxia ombopara vy omondouka ha'e katy, tetā pygua huvixa kuery pe, nhomoneta va'ety ha'e Acabe ra'y kuery re opena va'ety kuery pe. Ha'e vy aipoe'i:

<sup>2</sup> "Peẽ kuerya py perekō penderuvixakue ra'y kuery, ha'e gui karóxa, kavaju, tetā ikorapa va'e ha'e tembiporu joe opu'ãa pygua ha'e javi. Ha'e nunga rupi peẽ kuerya py kova'e kuaxia para oguerovaẽa ramove'i

<sup>3</sup> peiporavo penderuvixa ra'ykue'i va'e kuery regua hi'aranduve ha'e omboetevepy. Ha'e va'e ma pemoõ 'rā penderuvixarā penderu rāgue'i rekovia, ha'e gui peju xereve pejoguero'a aguã penderuvixa ro pygua kuery pepya rupi", he'i uka.

<sup>4</sup> Ha'e rami teĩ ha'e kuery okyje ete vy joupe-upé aipoe'i okuapy:

— Mokoõ huvixa voi nda'ipo'akai raka'e hexe. Ha'e nunga rupi mba'exa tu nhande kuery nhandepo'aka ta hexe? — he'i joupe-upé.

<sup>5</sup> Ha'e rami vy huvixa ro re ha'e tetā rupi opena va'e kuery, nhomoneta va'ety ha'e huvixa ra'y kuery re opena va'e kuery ombovai okuapy Jeú:

— Ore ma nerembiguai kuery ae, ha'e gui rejapo uka va'e ha'e javi tema ore kuery rojapo 'rā. Ore ma oreruvixarā noroiporavo reguai neĩ teive. Orereko tema ndee reipotaa rami — he'i uka okuapy.

<sup>6</sup> Ha'e ramo Jeú ma kuaxia mboae ju ombopara ha'e kuery pe. Ha'e vy aipoe'i:

"Xapy'a rei xea katygua ae peiko vy, ha'e xenhe'ẽ rendu ta ri vy ma peipe'a 'rā penderuvixakue ra'y kuery akã. Ha'e gui ma ko'ẽ rā kova'e hora ojeupity ju jave peru xea py Jezreel py", he'i.

\* <sup>9:31</sup> Jeú pe ma "Zinri" he'i omboetea rupi e'ŷ, mba'eta Zinri ma ymave rupi nguvixa ojuka avi, ha'e gui sete ára ete'i rire ojukaa avi va'ekue (1 Reis 16.8-20).

Ha'e va'e jave huvixakue ra'y kuery setenta va'e ma tetā pygua mongakuaa kuery yvatekuevea py ikuai.

<sup>7</sup> Ha'e gui ha'e kuerya py kuaxia para oguerovaēa ramo nguvixakue ra'y kuery ojopypa vy ojukapa setenta-ve. Ha'e vy inhakāgue ajaka py omboyrupa vy ogueraa uka okuapy Jezreel katy.

<sup>8</sup> Jeú oña py peteī tembiguai ou vy aipoe'i ixupe:

— Oguerupaa ma huvixa ra'y kuery akāgue.

Ha'e ramo ombovai:

— Pemoī mokoī aty okē jaike'ia py, ko'ẽ rā peve.

<sup>9</sup> Ha'e gui ma ko'ẽgue ha'e oo ha'e py. Ha'e vy opyta ho'amy vy aipoe'i heta va'e kuery pe:

— Kova'e nunga ma peẽ kuery káuxa e'ŷ oiko. Xee ae rima xeruvixa rovai anhembopy'a vy ajuka. Ha'e rami teī mava'e tu kova'e kuery jukapaare?

<sup>10</sup> Ha'e nunga rupi aŷ peikuaa ma SENHOR oayvu Acabe rovai omombe'u ma voi va'ekue ndoaxa rivei 'rāe, mba'eta SENHOR ojapo ma oayvu guembiguai Elias pe omombe'u ukaague — he'i.

<sup>11</sup> Ha'e rami vy Jeú ojukapa Jezreel tetā py Acabe ro pygua kuery okuave va'ekue, ixupeguia yvatekueve ikuai va'ekue voi, irū ha'e sacerdote kuery guive. Neī peteī'i ma voi ndoejai hembyre aguā.

<sup>12</sup> Ha'e gui ma Jeú oiko katu vy Samaria katy ojepe'a ovy. Tape rupi oo oiny vy, Bete-Equede dos Pastores tekao py

<sup>13</sup> nhovaexī Judá pygua huvixakue Acazias retarā kuery reve. Ha'e vy oporandu ha'e kuery pe:

— Mava'e kuery peẽ?

Ha'e kuery ombovai:

— Acazias rāgue'i retarā kuery roiko. Oreruvixakue ra'y kuery roexa aguā rima roje'oi, ha'e ixykue pi'a kuery voi — he'i okuapy.

<sup>14</sup> Ha'e ramo Jeú ngupive oje'oi va'e pe

— Pejopypa ke oikove reve — he'i. Ha'e ramo oikove reve ojopypa vy ojukapa Bete-Equede ygua py ae. Quarenta e dois avakue ikuai va'ekue regua neī peteī'i ma voi ndoejai hembyre aguā.

### *Jonadabe reve Jeú nhovaexīague*

<sup>15</sup> Ha'e gui oove vy nhovaexī Recabe ra'y Jonadabe reve, hexeve ovaexī aguā ae ou rā. Jeú oxarura reve oporandu ixupe:

— Anhetē ete pa nekuraxō py xea katy reiko, xee ma ndea katy anhenhandua rami?

Jonadabe ombovai:

— Tá, ha'e rami ae ri aiko — he'i.

Ha'e ramo aipoe'i:

— Ha'e rami ete ri reiko vy xepopyy — he'i ramo Jonadabe oipopyy.

Ha'e gui Jeú ma okaróxa py ombojeupi ngupive oo aguā.

<sup>16</sup> Ha'e vy ixupe aipoe'i:

— Jaa ha'vy xerupive, ha'e vy rexā 'rā SENHOR pe ete aikoa rupi ajapo va'e — he'i. Ha'e rami vy Jeú ogueraa okaróxa py.

<sup>17</sup> Ha'e gui Samaria py Jeú ovaē ma vy ojukapa Acabe pegua kuery ha'e py okuave va'ekue omomba peve, Elias pe SENHOR ijayvuague rami vy.

### *Baal mbojeroviaa kuery Jeú ojuka ukapaague*

<sup>18</sup> Ha'e gui Jeú omboatypa heta va'e kuery, ha'e vy aipoe'i:

— Acabe ma amongue py ete'i ombojerovia va'ekue Baal. Ha'e rā xee Jeú ma opa mba'e py 'rā ambojerovia.

<sup>19</sup> Ha'e nunga rupi penoimba xea py Baal pegua profeta kuery, imbojeroviaa ha'e ixupegua sacerdote ikuai va'e ha'e javi. Nei peteive ma voi toata eme, mba'eta heta mba'e areko Baal pe ame'ẽ va'erã. Ha'e javi oata va'e ma ndokovevei 'rã – he'i. Ha'e rami Jeú ijayvu nhombotavy vy, Baal mbojeroviaa kuery ojukapaxe vy.

<sup>20</sup> Jeú aipoe'ive ju:

— Pejapo ke Baal pegua nhemboaty iky'a e'ŷ va'erã – he'i. Ha'e ramo omombe'u okuapy.

<sup>21</sup> Israel ha'e javi rupi Jeú omondouka ayvu reraarã. Ha'e ramo oupa okuapy Baal mbojeroviaa kuery ha'e javi, nei pete'i ma voi ndou e'ŷi. Ha'e rami vy oikepa okuapy Baal pegua opy, ha'e javi rupi omonye.

<sup>22</sup> Ha'e gui ma ao re opena va'ety pe Jeú aipoe'i:

— Erupa ke ao Baal mbojeroviaa kuery pegua, ha'e kuery ha'e javi onhemonde aguã – he'i. Ha'e ramo ha'e rami ojapo.

<sup>23</sup> Ha'e gui mae Jeú oike Baal ropy Recabe ra'y Jonadabe reve. Ha'e vy aipoe'i Baal mbojeroviaa kuery pe:

— Peikuaa pota, pexa pota porã apy peẽ kuery mbyte SENHOR rembiguai kuery ndokoi pa ra'e, Baal mbojeroviaa arho e'ŷ vy mba'e – he'i.

<sup>24</sup> Ha'e gui ha'e kuery oike jogueravy mba'emo oapy reve ome'ẽ aguã. Ha'e rã oka katy ma Jeú omoi ma voi va'ekue oitenta avakue. Ha'e va'e kuery pe "Avakue pendepo py amboaxa va'ekue regua oo jepe ri ramo hekvia aipe'a 'rã imondoukaare rekove", he'i va'ekue.

<sup>25</sup> Ha'e gui Jeú mba'emo oapy reve ome'ẽmba ma vy aipoe'i uka jopya ha'e xondaro ruvixa kuery pe:

— Peike ke, pejukapa. Pemondouka eme nei peteive voi – he'i. Ha'e ramo ojukapa okuapy kyxé py, ha'e jopya ha'e xondaro ruvixa kuery omombopa oka py. Ha'e va'e rire oikeve jogueravy Baal ra'angaa oñaty opyve katy.

<sup>26</sup> Ha'e rami vy oguenoẽ mba'emo ra'angaa omopu'ã mbyre Baal ropy oĩ va'ekue. Ha'e vy oapypa okuapy.

<sup>27</sup> Oguenoẽ avi Baal ra'angaa omopu'ã mbyre ae. Ha'e rami vy oitypa okuapy Baal pegua oo oĩ va'ekue, ha'e oñague ma ojapo tepoxi rorã rive ju, aŷ peve guarã.

<sup>28</sup> Ha'e rami vy Israel gui Jeú omomba Baal peguare kuery.

<sup>29</sup> Ha'e rami tei Jeú ae ma ndojepe'ai tema Nebate ra'y Jeroboão ojejavyague ramigua gui, mba'eta ha'e va'e ma Israel kuery oguerojejavy aguã vaka ra'y ouro guigua ojapo va'ekue, Betel ha'e Dã py omoi vy.

<sup>30</sup> SENHOR ijayvu Jeú pe:

— Ndee ma xerenonde rupi ha'evea ramigua rejapo vy xee anhembopy'aague ha'e javi rupi remomba Acabe ro pygua kuery, ha'e rami rire neramymino jevy-jevy ikuai va'e voi oguapy 'rã Israel kuery ruvixa renda áry – he'i.

<sup>31</sup> Ha'e rami tei Jeú ma opy'a ha'e javi py e'ŷ oiko SENHOR Israel kuery ruete guigua lei rupi, nei ndojepe'ai guive Jeroboão Israel kuery oguerojejavyague ramigua gui.

### *Jeú omanoague*

<sup>32</sup> Ha'e va'e ára guive SENHOR omboypy Israel kuery yvy omokyrive aguã, Hazael ojukapa rire ijyvy ha'e javi rupi,

<sup>33</sup> Jordão yakã guive kuaray oua katy peve, ha'e Gileade yvy ha'e javi. Ha'e va'e ma Gad, Rúben ha'e Manassés regua yvy itui va'ekue Arnom yvyugua katy'i Aroer oĩ va'e guive, Gileade ha'e Basã yvy ae.

<sup>34</sup> Ha'e gui oñve rei tema Jeú rekukue regua. Ha'e rami avi ipo'akaague ha'e mba'emo ojapo va'ekue ha'e javi noi'rã teve kuaxia Israel pygua huvixa kuery rekukue oña re?

<sup>35</sup> Ha'e gui ma Jeú ndokovevei'i ma guamoí kueryague rami. Ha'e ramo onhono porãa Samaria py. Ha'e gui ta'y Jeoacaz ju oĩ huvixarã nguu rekovia.

36 Samaria py Jeú vinte e oito ma'etŷ re huvixa oĩ va'ekue.

## 11

### *2 Crônicas 22.10-12*

<sup>1</sup> Ha'e gui Acazias xy Atalia oendu op'i'a omano maa. Ha'e vy opu'ã vy ojukapa guemiarirõ kuery voi.\*

<sup>2</sup> Ha'e rã Acazias ra'y Joás ma ha'e kuery ojukaa ta jave Jorão rajy Jeoseba Acazias reindy va'e ogueraa jepe huvixa ra'y kuery mbyte gui. Ha'e rami vy onhomí peteĩ opy mbyteve katy hexe opena va'ety reve. Atalia gui onhomí vy ndojuka ukai nho.

<sup>3</sup> SENHOR pegua opy ae Jeoseba onhomí mboapy meme ma'etŷ re. Ha'e va'e jave ma Atalia ae huvixa oĩ ha'e va'e yvy re.

### *2 Crônicas 23.1-11*

<sup>4</sup> Ha'e gui sete ma'etŷa py Joiada oenoĩ uka Cária guigua kuery ha'e harõa ikuai va'e ruvixa kuery.<sup>†</sup> Ha'e vy oĩa py omoinge ukapa SENHOR pegua opy ae. Ha'e kuery reve jogueroayvu. Ojapo avi ha'e kuery oura aguã SENHOR ropy ae. Ha'e vy mae ha'e kuery pe oexa uka huvixa ra'ykue.

<sup>5</sup> Ha'e rami vy ha'e kuery pe ijayvu vy aipoe'i:

— Peẽ kuery ma mboapy henda py 'rã pendekuai. Peteĩ regua ma sábado py peike vy pearõ 'rã huvixa ro py.

<sup>6</sup> Ha'e gui amboae regua ma Sur Okẽ 'epy va'e py 'rã pearõ. Ha'e gui amboae regua ma okẽ jopya kuery ikuai va'e rovai rupi 'rã pearõ. Ha'e rami 'rã pearõ pekuapy kova'e oo.

<sup>7</sup> Ha'e gui mokoĩ regua sábado py oje'oi va'e kuery ha'e javi 'rã oarõ SENHOR pegua oo, huvixa yvýry.

<sup>8</sup> Ha'e rami vy huvixa yvýry ae 'rã pendekuai, peteĩ-teĩ pendepo py tembiporu perekó reve. Ha'e gui mava'e rã rei penderyxy va'e mbyte rupi oaxa ta va'e pejuka 'rã. Huvixa reve ae 'rã peiko oẽ ový jave, ha'e gui oike ouvy jave voi — he'i.

<sup>9</sup> Ha'e ramo cem ikuai va'e-va'e ruvixa kuery ojapo okuapy sacerdote Joiada ojapo uka va'ekue ha'e javi. Ha'e rami vy peteĩ-teĩ ogueraa guexeveguá avakue sacerdote Joiada oĩa py, sábado ára py oike ha'e oẽ ta va'e kuery.

<sup>10</sup> Ha'e ramo cem ikuai va'e-va'e ruvixa kuery pe sacerdote omboaxa hu'y guaxu ha'e hu'y jokoa huvixa Davi mba'ekue, SENHOR pegua opy omoĩ porã mbyre.

<sup>11</sup> Ha'e ramo huvixa ro rarõa kuery ikuai, peteĩ-teĩ guembiporu reve, huvixa ro oiporu kuaa ha'e oiporu kuaa e'ýa rupi, altar ha'e templo peve.

<sup>12</sup> Ha'e gui mae ma Joiada oguenoẽ huvixa ra'ykue. Inhakã re coroa omoĩ vy ixupe ome'ẽ kuaxia para Nhanderuete ayvu oĩa. Ha'e rami vy nguvixarã omoĩ okuapy azeite oikyty reve. Ha'e vy ojepopete-pete reve ojapukai okuapy:

— Toiko riae nhanderuvixa!

### *2 Crônicas 23.12-15*

<sup>13</sup> Harõa ha'e heta va'e kuery ojapukai okuapy rã Atalia oendu vy ha'e kuerya py ou SENHOR pegua opy.

<sup>14</sup> Ha'e py oma'ẽ rã huvixa hi'aĩ ma oo yta yvýry huvixa va'e nhavõ hi'aĩaty py ae. Huvixa renonde ikuai avi harõa kuery ruvixa ha'e mimby guaxu monhe'ëa kuery. Heta va'e kuery ha'e javi oguerovy'a okuapy, ha'e omonhe'ëa avi mimby guaxu. Ha'e nunga Atalia oexa vy oao omondoro reve ojapukai:

— Xerovaigua ra'e! Xerovaigua ra'e! — he'i.

<sup>15</sup> Ha'e ramo sacerdote Joiada ma xondaro ruvixa kuery pe ijayvu vy aipoe'i:

\* **11:1** Guemiarirõ kuery ojukapa ha'e ae onhembouvixaxe vy. † **11:4** Joiada ma sacerdote yvateve va'e ha'e Jeoseba me, Nhanderuete pe ete oiko va'e. Gua'yxy reve onhomí huvixa ra'y Joás sete ma'etŷ oguereko peve, ha'e gui omoĩ uka huvixarã.

— Kunha va'e penoẽ ke heravy hyxy okuapy va'e kuery mbyte rupi. Amongue hupive oo ta ramo pejuka 'rã kyxe py — he'i. Mba'eta sacerdote ae “Pejuka eme SENHOR pegua ogypt” he'iague rami.

<sup>16</sup> Ha'e ramo ojopy okuapy kunha va'e. Ha'e rami vy kavaju rape oĩ va'e rupi ogueraa huvixa ro peve. Ha'e py mae ma ojuka.

### *2 Crônicas 23.16-21*

<sup>17</sup> Ha'e gui ma Joiada ojapo SENHOR pe ete ha'e kuery ikuai aguã regua, ha'e ae ha'e heta va'e kuery reve.

<sup>18</sup> Ha'e ramo heta va'e kuery oyvy ha'e javi gui ou va'ekue oike okuapy Baal pegua oo py, ha'e vy ombovaipa. Ixupegua altar ikuai va'ekue omopẽmba okuapy, ta'angaa ikuai va'e voi. Baal pegua sacerdote Matã voi ojuka altar yvy'iry.

Ha'e gui sacerdote Joiada omoõ SENHOR pegua oo rarõarã kuery.

<sup>19</sup> Ha'e rami vy ogueraapa Cária guigua kuery ruvixa, harõa kuery ruvixa kuery ha'e heta va'e kuery oyvy ha'e javi gui ou va'ekue. Ha'e va'e kuery ha'e javi reve ogueraa huvixa SENHOR pegua oo gui. Ha'e rami vy nhoarõa kuery rokẽ rupi tape oo va'e rupi oguenovaẽ huvixa ro py ae. Ha'e ramo Joás oguapy oiny tenda huvixa va'e nhavõ openaaty áry.

<sup>20</sup> Ha'e ramo heta va'e kuery oyvy gui ou va'ekue ha'e javi oyv'a okuapy, tetã rupi voi ha'eve rei va'e ikuai, huvixa ro py Atalia kyxe py ojukaa ma rire.

<sup>21</sup> Joás ma sete ma'etõ oguereko huvixarã omoõa ypy'i jave.

## 12

### *2 Crônicas 24.1-14*

<sup>1</sup> Israel pygua huvixa Jeú sete ma'etõ re ma oĩ rire Joás oĩ huvixarã. Ha'e gui quarenta ma'etõ re opena Jerusalém py. Ixy ma Berseba pygua Zíbia.

<sup>2</sup> Joás ma ha'evea ramigua ojapo oikovy SENHOR renonde, sacerdote Joiada ombo'e herekovya ja.

<sup>3</sup> Ha'e rami teī ombojeroviaaty yvy'ã rupi ikuai va'e nombovaipai. Ha'e ramo heta va'e kuery mba'emo ome'ẽ okuapy ha'e py, heakuã porã va'e oapy avi teri okuapy.

<sup>4</sup> Ha'e gui Joás aipoe'i sacerdote kuery pe:

— Pemonoõ 'rã peráta iky'a e'ý va'e SENHOR pe ome'ẽ mbyre, imposto re peteõ-teõ ome'ẽ va'ekue, amongue rekovia ome'ẽ mbyre, ha'e gui peráta peteõ-teõ onhenhandua'i rami ome'ẽ va'ekue SENHOR ropy guarã.

<sup>5</sup> Ha'e va'e ma sacerdote ikuai va'e ae 'rã ojopy, peteõ-teõ oirũ kuery gui. Ha'e va'e py ha'e kuery omoatyrõ 'rã oo ivaipaa oĩa rupi — he'i.

<sup>6</sup> Ha'e gui vinte e três ma'etõ re ma huvixa Joás oĩ teõ sacerdote kuery nomoatyrõi teri oo ivaipaague.

<sup>7</sup> Ha'e ramo huvixa Joás oenoõ sacerdote Joiada ha'e sacerdote kuery mboae. Ha'e vy aipoe'i ha'e kuery pe:

— Mba'e re tu napemoatyrõi ri oo ivaipaa oĩa rupi? Aý gui ma ndapejopyvei ma 'rã peráta peneirũ kuery gui. Ha'e rami 'rãgue py pemboaxapa 'rã oo moatyrõarã kuery pe — he'i.

<sup>8</sup> Ha'e ramo sacerdote kuery ojou porã okuapy heta va'e kuery gui peráta ojopy ve'ý aguã, oo ivaipaa oĩa rupi ha'e kuery ae omoatyrõ ve'ý aguã.

<sup>9</sup> Ha'e ramo sacerdote Joiada ma peteõ hyru ojopy uka vy ombokua uka imbotya re. Ha'e vy altar yvýry omoõ, SENHOR ropy oike va'e kuery oiporu kuaa regua re. Ha'e rami vy ha'e py ae sacerdote kuery okẽ rarõa ikuai va'e omoõ peráta SENHOR pegua ogypt ogueru pyre ha'e javi.

<sup>10</sup> Ha'e gui hyru py heta ma peráta oĩ nhavõ oexa rã huvixa pegua kuaxia re opena va'etõ oo kuerei 'rã sacerdote yvateve va'e reve, ha'e vy oipapa vy omboyrupa 'rã okuapy SENHOR ropy peráta ogueru pyre.

**11** Ha'e rami vy peráta opesapa rire omboaxapa 'rã SENHOR pegua oo moatyrõa kuery re opena va'e kuery po py. Ha'e va'e kuery ju opaga 'rã oo apoa ha'e oo ivaipaague omoatyrõ va'e kuery pe,

**12** ita re ombo'eapo ha'e imboa'ya kuery pe guive. Ha'e ramo ha'e kuery ojogua 'rã yvyra ha'e ita omoatyrõ mbyre SENHOR pegua oo ivaipaa oĩa rupi omoatyrõ aguã. Opaga avi SENHOR pegua oo omoatyrõa py oiporua va'erã ha'e javi.

**13** Ha'e gui peráta SENHOR pegua oo py ogueru pyre gui ma ndojapoai hy'a prata guigua, neĩ tapyĩ araa, hy'a guaxu, mimby guaxu, neĩ hyru SENHOR pegua oo pyguarã ndojapoai ha'e va'e ouro ha'e prata gui.

**14** Ha'e rami 'rãgue py omboaxapa ombo'eapo va'e kuery re opena va'e kuery pe. Ha'e ramo ha'e va'e py omoatyrõ okuapy SENHOR pegua oo.

**15** Ha'e ramive neĩ ndoikuua potaavei avakue peráta jopyare re, ombo'eapo va'e kuery pe ome'ẽ va'erã kuery re. Mba'eta ha'e kuery ma ojeroviapy meme ikuai ombo'eapoa py.

**16** Ha'e rã peráta mba'emo omboekovia aguã regua ha'e jejavya regua ome'ẽmbry ma ndogueruai SENHOR pegua oo py. Ha'e va'e ma sacerdote kuery peguarã anho.

**17** Ha'e va'e javé ma Síria pygua huvixa Hazael opu'ã vy joguero'a Gate tetã ojopy aguã, ha'e vy ipo'aka. Ha'e va'e rire Hazael kuery Jerusalém katy ooxe avi ojopy aguã.

**18** Ha'e ramo Judá pygua huvixa Joás ma oipe'apa mba'emo iky'a e'ŷ va'erã guamoĩ kuery Judá pygua huvixa va'e SENHOR pe omboaxa va'ekue, Josafá, Jeorão ha'e Acazias. Oipe'a avi ouro SENHOR ropy ha'e huvixa ropy omoĩ porã mbyre. Ha'e va'e ma Síria pygua huvixa Hazael pe omondouka. Ha'e ramo nopenavei Jerusalém tetã re.

**19** Ha'e gui oĩve rei tema Joás rekokue regua. Ha'e rami avi mba'emo ojapo va'ekue ha'e javi noĩ'rã teve kuaxia Judá pygua huvixa kuery rekokue oĩa re?

### *2 Crônicas 24.25-27*

**20** Ha'e gui ma Joás rembiguai kuery hovai opu'ã vy oipyxo okuapy Milo ro py, Sila katy jaguejy'i javya py.

**21** Ha'e vy hembiguai Simeate ra'y Jozacar ha'e Somer ra'y Jozabate ae oipyxopa okuapy ramo omano. Ha'e ramo onhono porã tuu kuery rupa katy'i Davi rekoague py. Ha'e gui ta'y Amazias ju huvixarã oĩ nguu rekoria.

## 13

### *Israel pygua huvixa Jeoacaz oĩjave guare*

**1** Acazias ra'y Joás vinte e três ma'etõ re ma Judá pygua huvixa oĩ rire Jeú ra'y Jeoacaz oĩ Israel pygua huvixarã. Samaria py opena dezessete ma'etõ re.

**2** Ha'e va'e ma ha'eve'ŷ va'e ojapo oikovy SENHOR renonde, mba'eta Nabote ra'y Jeroboão Israel kuery oguerojejavague rupi ae ju oiko, ndojepe'ai guive ha'e rami oikoague gui.

**3** Ha'e nunga rupi SENHOR poxya hendy Israel kuery rovai. Ha'e rami vy omboaxapa Síria pygua huvixa Hazael ha'e ta'y Ben-Hadade po py, Jeoacaz oĩa pukukue re.

**4** Ha'e rami teĩ SENHOR renonde Jeoacaz ojerure ramo oendu guive, mba'eta oexa Síria pygua huvixa Israel kuery ombojexavai rã.

**5** Ha'e rami vy SENHOR peteĩ ombou Israel kuery reraa jepearã. Ha'e ramo Israel kuery ma Síria kuery po'akaa gui oo jepe nho vy ha'ekue rami ae ju ikuai ngoogue rupi.

**6** Ha'e rami teĩ ndojepe'ai tema okuapy Jeroboão Israel kuery oguerojejavague ramigua gui, ha'e va'ekue rupi ae tema ikuai, ndoipe'ai guive ta'angaarã yvyra Samaria py omopu'ã mbyre.

**7** Ha'e ramo Jeoacaz pegua xondaro kuery ma Síria pygua huvixa omomba rire ndokuavei, cinqüenta kavaju árygua ete'i e'ŷ vy, ha'e dez karóxa ha'e dez mil avakue yvy rupigua. Yvy ku'i rami ojapo omou'ũmba vy.

**8** Ha'e gui oĩve rei tema Jeoacaz rekokue regua. Ha'e rami avi mba'emo opo'akaa rupi ojapo va'ekue ha'e javi noĩ'rã teve kuaxia Israel pygua huvixa kuery rekokue oĩa re?

<sup>9</sup> Ha'e gui ma Jeoacaz ndoikovevei'i ma guamoĩ kueryague rami. Ha'e ramo onhono porãa Samaria py. Ha'e ramo ta'y Jeoás ju oĩ nguu rekovia.

### *Israel pygua huvixa Jeoás oĩ jave guare*

<sup>10</sup> Judá pygua huvixa Joás trinta e sete ma'etŷ re ma oĩ rire Jeoacaz ra'y Jeoás oĩ Israel pygua huvixarã. Ha'e gui Samaria py opena dezesseis ma'etŷ re.

<sup>11</sup> Ha'e va'e ma ha'eve'ŷa ramigua ojapo oikovy SENHOR renonde. Ha'e rami vy ndojepe'ai Nabote ra'y Jeroboão Israel kuery oguerojejavyague ramigua gui. Ha'e rami vy hekokue rupi ae oiko.

<sup>12</sup> Ha'e gui oĩve rei tema Jeoás rekokue regua. Ha'e rami avi Judá pygua huvixa Amazias rovai opu'âague, ha'e mba'emo opo'akaa rupi ojapo va'ekue ha'e javi noĩ'râ teve kuaxia Israel pygua huvixa kuery rekokue oĩa re?

<sup>13</sup> Ha'e gui Jeoás ndoikovevei'i ma guamoĩ kueryague rami. Ha'e ramo onhono porãa Samaria py ae, Israel pygua huvixa kuery rupa yvýry. Ha'e gui hekovia ma oĩ Jeroboão.

### *Eliseu opa vygua ayvu omombe'u rire omanoague*

<sup>14</sup> Ha'e gui Eliseu ma ojexavai oupy mba'eaxy gui, omano rai'i ma. Ha'e ramo Israel pygua huvixa Jeoás ou oipou aguã. Ha'e vy hexe ojae'o vy aipoe'i:

— Xeru, xeru! Ha'vy Israel kuery karóxa ha'e kavaju árygua kuery!

<sup>15</sup> Ha'e ramo ixupe Eliseu

— Ejopy ke peteĩ guyrapa ha'e hu'y – he'i. Ha'e ramo ojopy peteĩ guyrapa ha'e hu'y.

<sup>16</sup> Aipoe'ive ju Israel pygua huvixa pe:

— Emoatã ke guyrapa – he'i ramo omoatã. Ha'e gui ma huvixa po áry Eliseu omoĩ opo.

<sup>17</sup> Ha'e vy aipoe'i:

— Peipe'a janela kuaray puku-a katygua. Ha'e kuery oipe'a ramo Eliseu aipoe'ive ju:

— Emombo ke – he'i ramo omombo.

Aipoe'ive ju:

— Ha'e va'e hu'y ma SENHOR ipo'akaa regua kuaa ukaarã, hu'y Síria kuery re ipo'aka aguã regua, mba'eta Afeca py reitypa 'rã Síria kuery remomba peve – he'i.

<sup>18</sup> Ha'e gui ma aipoe'ive teri:

— Hu'y rembyrekue ju ejopy – he'i ramo Israel pygua huvixa hu'y ojopy jevy ramo aipoe'i ixupe:

— Einupã ke yvy re – he'i. Ha'e ramo mboapykue yvy re oinupã ma vy opytu'u.

<sup>19</sup> Ha'e rami rã ixupe Nhanderuete remimbo'e ivai vaipa vy aipoe'i:

— Cinco-kue e'ŷ vy seis-kue reinupã va'e rire Síria pygua kuery reity ete 'rãgue remomba peve. Ha'e rami tei aŷ mboapykue'i 'rã reity Síria pygua kuery – he'i.

<sup>20</sup> Ha'e gui ma Eliseu omano. Ha'e ramo onhono porãa.

Ha'e gui Moabe pygua kuery regua ma ára pyau ojeupity nhavõ ijyvy re jogueru jepi 'rã mba'emo oipe'apa aguã.

<sup>21</sup> Ha'e gui ma peteĩ ava retekue hetarã kuery ojaty jave oexa okuapy Moabe pygua kuery ou rã. Ha'e rami vy hetekue ma Eliseu rupa py rive omombo okuapy. Ha'e gui Eliseu kãgue re hetekue oje'a ramove ava va'e oikove jevy vy opu'â ho'amy.

<sup>22</sup> Jeoacaz oĩa pukukue re Síria pygua huvixa Hazael ombojexavai imbokuapy Israel kuery.

<sup>23</sup> Ha'e ramo SENHOR omboaxy nho oayvu vy. Ha'e kuery re oma'ẽ Abraão, Isaque ha'e Jacó reve guexeve guarã ojapo va'ekue re ima'endu'a vy. Nomombaxe etei, guenonde gui nomomboi teri guive.

<sup>24</sup> Ha'e gui Síria pygua huvixa Hazael omano ma ramo ta'y Ben-Hadade ju oĩ nguu rekovia.

25 Jeoacaz oĩ jave hexeve Ben-Hadade joguero'a vy ojopy ixupegua tetã ikuai va'ekue. Ha'e va'e tetã ma Jeoacaz ra'y Jeoás ju ojopypa Ben-Hadade po'akaa gui. Mboapykuea ma Jeoás oitypa vy ojopy Israel kuery retã ikuai va'ekue.

## 14

### *2 Crônicas 25.1-4*

1 Jeoacaz ra'y Jeoás mokoõ ma'etŷ re ma Israel pygua huvixa oĩ rire Joás ra'y Amazias oĩ Judá pygua huvixarã.

2 Ha'e va'e ma vinte e cinco ma'etŷ oguereko huvixa oĩ ypy'i jave py, ha'e vinte e nove ma'etŷ re opena Jerusalém py. Ixy rery ma Jeoadã, Jerusalém pygua ae.

3 Ha'e ma ha'evea ramigua ojapo oikovy SENHOR renonde rupi, teĩ guamoõ Davi rami ete'ŷ ju ta'vy. Ha'e rami vy nguu Joás ojapoague ramigua meme ojapo oikovy.

4 Ha'e rami avi ombojeroviaaty yvy'ã rupi ikuai va'e nombovaipai. Ha'e rami vy ha'e va'e rupi teri heta va'e kuery mba'emo ome'ë, ha'e heakuã porã va'e oapy okuapy.

5 Ha'e gui opo'akaa re oĩ atã ma rire ojuka ukapa guembiguai kuery tuu jukaare.

6 Ha'e rã ijukaare ra'y kuery ma ndojuka ukai, Moisés kuaxia re omboparaague rami vy, mba'eta SENHOR ojapo uka vy aipoe'i: "Tuu kuery ma ndojukaai 'rã ta'y kuery ojapo vaiague re, ta'y kuery voi ndojukaai 'rã tuu kuery ojapo vaiague re. Peteĩ-teĩ ojukaa 'rã ha'e ae ojejavyague re", he'iague rami.

### *2 Crônicas 25.5-13*

7 Yvyugua Juky 'epy va'e oĩa py Amazias ojuka Edom pygua kuery dez mil, ha'e vy joguero'aa py ojopy Sela tekoa. Ha'e va'e ma omboery ju Jocteel, aÿ peve guarã.

### *2 Crônicas 25.17-24*

8 Israel pygua huvixa ma Jeoacaz ra'y Jeoás, Jeú ramymino va'e. Ha'e va'ea katy Amazias omondouka ayvu mombe'uarã kuery.  
— Peju, jajoguero'a — he'i uka.

9 Ha'e rami teĩ Israel pygua huvixa Jeoás ombovai Judá pygua huvixa Amazias:

— Ha'e gui Líbano yvy re ma je peteĩ juu rakuaendy hi'aï va'e oayvu omondouka yary ha'e py hi'aï avi va'e pe: "Eme'ë na nderajy xera'y ra'yxyrã", he'i uka. Ha'e rami teĩ juu rakuaendy re mymba kuery Líbano yvy regua opyrõmba rive.\*

10 Ha'e gui ndee ma anhetê ete Edom pygua kuery re ndepo'aka va'ekue, ha'e rami vy nekuraxõ re oĩ renhemboyvate reixeia. Ha'e nungakue rerovy'a vy ndero py ae repyta 'râgue. Mba'e re tu rejeity ukaxe ri mba'emo vai py, Judá pygua kuery reve? — he'i uka.

11 Ha'e rami teĩ Judá pygua huvixa Amazias noendu potai. Ha'e rami vy oo nho Judá regua Bete-Semes tekoa py joe opu'ã aguã Israel pygua huvixa Jeoás reve.

12 Ha'e gui ma Israel kuery renonde rupi Judá pygua kuery oitypaa. Ha'e vy peteĩ-teĩ onhamba ngoo katy.

13 Ha'e gui Bete-Semes py ae Israel pygua huvixa Jeoás ojopy Judá pygua huvixa Joás ra'y Amazias, Acazias ramymino va'e. Ha'e rami vy Jerusalém py oo vy oitypa tetã kora rokẽ Efraim 'epy va'e guive ojerea katy'i okẽ hi'aïague peve, cento e oitenta metros va'ekue ha'e javi.

14 Ha'e rami vy oipe'apa ouro, prata ha'e mba'emo ryru SENHOR ropy ikuai va'ekue, huvixa ro py mba'emo omoõ porã mbyre ha'e javi guive. Ogueraa avi avakue mba'emo re omboekovia va'erã. Ha'e gui mae ma ojevy ju Samaria katy.

### *Israel pygua huvixa Jeoás omanoague*

15 Ha'e gui oïve rei tema Jeoás rekokue regua. Ha'e rami avi Judá pygua huvixa Amazias re opu'ãague, ha'e mba'emo opo'akaa rupi ojapo va'ekue ha'e javi noï 'rã teve kuaxia Israel pygua huvixa kuery rekokue oïa re?

\* **14:9** "Juu rakua endy" he'ia ma Amazias ombojaru reia rupi ijayvu vy, ha'e rã "Yary hi'aï va'e" he'ia ma ojee ae ijayvu vy.

<sup>16</sup> Ha'e gui ma Jeoás ndoikovevei'i ma guamoĩ kueryague rami. Ha'e ramo onhono porãa Samaria py, Israel pygua huvixa kuery rupa yrýry ae. Ha'e ramo ta'y Jeroboão ju oĩ nguu rekovia.

### 2 Crônicas 25.25-28

<sup>17</sup> Jeoacaz ra'y Jeoás Israel pygua huvixa omano ma rire Joás ra'y Amazias Judá pygua huvixa oikove ranhe quinze ma'etý re.

<sup>18</sup> Ha'e gui oĩve rei tema Amazias rekokue regua. Ha'e rami avi mba'emo opo'akaa rupi ojapo va'ekue ha'e javi noĩ 'rã teve kuaxia Judá pygua huvixa kuery rekokue oĩa re?

<sup>19</sup> Ha'e va'e rovai Jerusalém py jogueroayvua ramo onha Laquis katy. Ha'e rami teĩ hakykue omondoukaa avakue Laquis peve. Ha'e rami vy ha'e pyve ojuka.

<sup>20</sup> Ha'e rami vy kavaju áry ogueru vy Jerusalém tetã py ae onhono porãa, tetã Davi rekoague py tuu kuery rupa yvýry.

<sup>21</sup> Ha'e gui ta'y Uzias ma dezesseis ma'etý oguerekó reve Judá pygua kuery omoĩ okuapy tuu Amazias rekovia.

<sup>22</sup> Ha'e va'e ma Elate tetã omoatyrõ ma vy ojapo Judá kuery rekoarã, tuu Amazias guamoĩ kueryague rami ndoikovevei'i ma rire.

### *Israel pygua huvixa Jeroboão mokoĩa va'e oĩ jave guare<sup>†</sup>*

<sup>23</sup> Joás ra'y Amazias Judá pygua huvixa quinze ma'etý re ma oĩ jave Samaria py oĩ Jeoás ra'y Jeroboão Israel pygua huvixarã. Ha'e rami vy quarenta e um ma'etý re oĩ huvixa.

<sup>24</sup> Ha'e va'e ma mba'emo vai anho ojapo oikovy SENHOR renonde rupi. Neĩ ruxã'i ma voi ndojepe'ai Nabote ra'y Jeroboão Israel kuery oguerojejavyague ramigua gui.

<sup>25</sup> Ha'e va'e ma Israel kuery omoĩ atã ju ijyvy apy rupi, Hamate py jaikeaty guive yvy joja reia regua ye'ẽ rembe peve, SENHOR Israel kuery ruete ijayvuague rami vy, guembiguai Amitai ra'y profeta Jonas Gate-Hefer pygua ayvu rupi.

<sup>26</sup> Mba'eta SENHOR oexa rã Israel kuery opa mba'eo py ojexavai okuapy, ndoikoi guive Israel kuery repyarã, neĩ escravo ha'e escravo e'ŷ voi.

<sup>27</sup> Ha'e va'e jave ma SENHOR nda'ijayvui teri Israel rery ombogue aguã re yva guy rupi gui. Ha'e rami vy Jeoás ra'y Jeroboão pe ogueraa jepe uka.

<sup>28</sup> Ha'e gui oĩve rei tema Jeroboão rekokue regua. Ha'e rami avi joe opu'ãa rupi Judá regua tetã Damasco ha'e Hamate re ipo'akaague Israel rekoarã, ha'e mba'emo opo'akaa rupi ojapo va'ekue ha'e javi noĩ 'rã teve kuaxia Israel pygua huvixa kuery rekokue oĩa re?

<sup>29</sup> Ha'e gui Jeroboão ndoikovevei'i ma nguu kuery Israel pygua huvixa ikuai va'ekue rami. Ha'e ramo ta'y Zacarias ju oĩ nguu rekovia.

## 15

### 2 Crônicas 26.1-15

<sup>1</sup> Vinte e sete ma'etý re ma Israel pygua huvixa Jeroboão oĩ jave py Amazias ra'y Azarias oĩ Judá pygua huvixarã.\*

<sup>2</sup> Ha'e va'e ma dezesseis ma'etý oguerekó jave py oĩ ypy'i huvixa, ha'e vy cinqüenta ma'etý re opena Jerusalém py. Ixy ma Jecolias, Jerusalém pygua ae.

<sup>3</sup> Ha'e ma ha'evea ramigua ojapo oikovy SENHOR renonde rupi, nguu Amazias ojapoague rami meme.

<sup>4</sup> Ha'e rami teĩ nombovaipai guiveombojeroviaaty yvy'ã rupi ikuai va'e. Ha'e rupi heta va'e kuery mba'emo ome'ẽ teri, ha'e heakuã porã va'e guive oapy okuapy.

### 2 Crônicas 26.16-23

<sup>†</sup> **14:22** Jeoás ra'y Jeroboão pe ma "Jeroboão mokoĩa va'e" 'ea, mba'eta jypygua Jeroboão Nabote ra'y va'e oĩ ae ma va'ekue Israel pygua huvixa. \* **15:1** Azarias rery mboae ma Uzias raka'e (14.21, 15.13).

<sup>5</sup> Ha'e gui SENHOR omomba'eaxy huvixa. Ha'e ramo lepra revegua oiko omano peve, oo ha'e ae'i oĩ aguã py. Ha'e ramo ta'y Jotão ju opena oikovy hoo re, ijyvy pygua kuery re guive.

<sup>6</sup> Ha'e gui oĩve rei tema Azarias rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekukue oĩa re?

<sup>7</sup> Ha'e gui Azarias ndoikovevei'i ma guamoĩ kueryague rami. Ha'e ramo onhono porãa tuu kuery rupa yvýry ae, Davi rekoague py. Ha'e ramo ta'y Jotão ju oĩ nguu rekovia.

### *Israel pygua huvixa Zacarias oĩjave guare*

<sup>8</sup> Trinta e oito ma'etý re ma Azarias Judá pygua huvixa oĩ rire Jeroboão ra'y Zacarias oĩ Israel pygua ruvixarã. Samaria py opena seis jaxy re ete'i.

<sup>9</sup> Ha'e va'e ma ha'eve'ý va'e ojapo oikovy SENHOR renonde, nguu kuery ojapoague ramigua ae. Ndojepe'ai Nabote ra'y Jeroboão Israel kuery oguerojeavyague ramigua gui. Ha'e rami vy hekokue rupi ae oiko.

<sup>10</sup> Ha'e va'e rovai opu'ã Jabel ra'y Salum. Heta va'e kuery oexaa py oipyxo vy ojuka. Ha'e vy ha'e ju oĩ hekovia.

<sup>11</sup> Ha'e gui oĩve rei tema Zacarias rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekukue oĩa re?

<sup>12</sup> Ha'e rami vy ojeupity Jeú pe SENHOR ijayvuague: "Neramymino jevy kuery ikuia peve ha'e kuery oguapy 'rã tenda Israel kuery re openaaty áry", he'iague rami ae oiko raka'e.

### *Israel pygua huvixa Salum oĩjave guare*

<sup>13</sup> Trinta e nove ma'etý re ma Uzias Judá pygua huvixa oĩ rire Jabel ra'y Salum oĩ Israel kuery ruvixarã. Ha'e va'e ma peteĩ jaxy ete'i opena Samaria py.

<sup>14</sup> Ha'e gui ma Tirza tetã gui Gadi ra'y Menaém Samaria py ou vy oipyxo Jabel ra'y Salum, ha'e vy ojuka. Ha'e gui ha'e ju oĩ hekovia.

<sup>15</sup> Ha'e gui oĩve rei tema Salum rekukue regua. Ha'e rami avi nguvixa rovai opu'ãague, ha'e mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekukue oĩa re?

<sup>16</sup> Ha'e ramo Menaém ojukapa Tifsa pygua kuery, Tirza guive ikuai va'ekue ha'e javi reve, ixupe guetã rokẽ ndoipe'ai ramo rive. Ha'e rami vy omomba ha'e omondoro ukapa kunhague hye guaxu'i va'ekue rye.

### *Israel pygua huvixa Menaém oĩjave guare*

<sup>17</sup> Trinta e nove ma'etý re ma Judá pygua huvixa Azarias oĩ rire Gadi ra'y Menaém oĩ Israel pygua ruvixarã. Ha'e vy dez ma'etý re opena Samaria py.

<sup>18</sup> Ha'e va'e ma ha'eve'ý va'e anho ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerojeavyague ramigua gui. Ha'e rami vy hekokue rupi ae oiko.

<sup>19</sup> Ha'e ramo Síria pygua huvixa Pul ou ijyvy re opu'ã aguã. Ha'e va'e Pul pe Menaém ome'ẽ trinta e três toneladas prata guigua, onhembopo'aka ukavexe vy.

<sup>20</sup> Ha'e va'e peráta ma Israel ha'e javi rupi gui Menaém ojopy Assíria pygua huvixa pe ome'ẽ aguã. Ipo'akapa ha'e oguerekopa va'e peteĩ-teĩ gui ojopy cinqüenta hatã'i va'e prata guigua. Ha'e rire ma Assíria pygua huvixa oo ju oyvy katy, Israel yvy re ndopytavei.

<sup>21</sup> Ha'e gui oĩve rei tema Menaém rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekukue oĩa re?

<sup>22</sup> Ha'e gui Menaém ndoikovevei'i ma guamoĩ kueryague rami. Ha'e gui ta'y Pecaías ju oĩ nguu rekovia.

### *Israel pygua huvixa Pecaías oĩjave guare*

<sup>23</sup> Cinquenta ma'etý re ma Judá pygua huvixa Azarias oĩ rire Menaém ra'y Pecaías oĩ Israel pygua huvixarã. Samaria py ae opena mokoĩ ma'etýa peve.

<sup>24</sup> Ha'e va'e ma ha'eve'ý va'e ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerojejavyague ramigua gui. Ha'e rami vy hekokue rupi ae oiko.

<sup>25</sup> Ixupega xondaro ruvixa ma Remalias ra'y Peca. Ha'e va'e ma Pecaías re opu'ã vy oipyxo Samaria tetã py, huvixa ro ikorapa va'e py ae. Ojuka avi Argobe ha'e Arié. Peca reveguia ma cinquenta avakue ikuai Gileade pygua meme. Ha'e vy huvixa ojuka rire ha'e ju oĩ hekoria.

<sup>26</sup> Ha'e gui oĩve rei tema Pecaías rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekukue oĩa re?

### *Israel pygua huvixa Peca oĩ jave guare*

<sup>27</sup> Cinquenta e dois ma'etý re ma Judá pygua huvixa Azarias oĩ rire Remalias ra'y Peca oĩ Israel pygua ruvixarã. Samaria py ae opena vinte ma'etý re.

<sup>28</sup> Ha'e va'e ma ha'eve'ý va'e ojapo oikovy SENHOR renonde rupi. Ndojepe'ai Nabote ra'y Jeroboão Israel kuery oguerojejavyague ramigua gui.

<sup>29</sup> Israel pygua huvixa Peca oĩ jave py ou Assíria pygua huvixa Tiglate-Pileser. Ha'e va'e ou vy ipo'aka Ijom re, Abel-Bete-Maaca, Janoa, Quedes, Hazor, Gileade, Galiléia ha'e Naftali yvy ha'e javi re. Ha'e rupi ikuai va'ekue ogueraapa oyvy Assíria katy.

<sup>30</sup> Ha'e gui ma Remalias ra'y Peca rovai Elá ra'y Oséias opu'ã vy oipyxo, ha'e vy ojuka. Ha'e rami vy ha'e ae ju oĩ hekoria, vinte ma'etý re ma Uzias ra'y Jotão Judá pygua huvixa oĩ rire.

<sup>31</sup> Ha'e gui oĩve rei tema Peca rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Israel pygua huvixa kuery rekukue oĩa re?

### *2 Crônicas 27.1-9*

<sup>32</sup> Mokoĩ ma'etý re ma Remalias ra'y Peca Israel pygua huvixa oĩ rire Uzias ra'y Jotão oĩ Judá pygua ruvixarã.

<sup>33</sup> Ha'e va'e ma vinte e cinco ma'etý oguereko jave py oĩ ypy'i huvixarã. Ha'e vy dezesseis ma'etý re opena Jerusalém py. Ixy ma Zadoque rajy Jerusa.

<sup>34</sup> Ha'e ma ha'evea rami oiko SENHOR renonde rupi, nguu Uzias oikoague ha'e javi rami.

<sup>35</sup> Ha'e rami teĩ nombovaipai ae tema ombojeroviaaty yvy'ã rupi ikuai va'e. Ha'e rami rã yvy'ã rupi heta va'e kuery mba'emo ome'ẽ ha'e heakuã porã va'e oapy okuapy. Jotão ma ojapo uka SENHOR pegua oo rokẽ yvate rupi guarã.

<sup>36</sup> Ha'e gui oĩve rei tema Jotão rekukue regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekukue oĩa re?

<sup>37</sup> Ha'e va'e jave py SENHOR omboypy Judá rovai guarã ombou aguã Síria pygua huvixa Rezim ha'e Remalias ra'y Peca.

<sup>38</sup> Ha'e gui Jotão ndoikoveve'i ma guamoĩ kueryague rami. Ha'e ramo tuu kuery rupa yvýry ae onhono porãa, Davi rekoague py. Ha'e gui ta'y Acaz ju oĩ nguu rekoria.

## 16

### *2 Crônicas 28.1-4*

<sup>1</sup> Dezessete ma'etý re ma Remalias ra'y Peca Israel pygua huvixa oĩ rire Jotão ra'y Acaz oĩ Judá pygua ruvixarã.

<sup>2</sup> Acaz ma oĩ ypy'i jave vinte ma'etý ramo'i oguereko. Ha'e gui dezesseis ma'etý re opena Jerusalém py. Ha'e va'e ma ha'eve'ýa ramigua ojapo oikovy SENHOR nguuete renonde rupi, guamoĩ Davi rami e'ý.

<sup>3</sup> Mba'eta Israel pygua huvixa kuery reko rami oiko. Ha'e vy gua'y ae oapy nguuete ramigua pe, amboae regua kuery Israel kuery renonde gui SENHOR oipe'a va'ekue ojeguarupy ojapo okuapyague rami.

<sup>4</sup> Ombojeroviaaty yvy'ã rupi ikuai va'e py voi mba'emo ome'ẽ oikovy, heakuã porã va'e oapy avi yvy'ã rupi, yvyra rogue ana ikuai va'e guýry rupi guive.

*2 Crônicas 28.16-21*

<sup>5</sup> Ha'e gui ma Jerusalém tetã re jogueru nhoguenoiny Síria pygua huvixa Rezim ha'e Israel pygua huvixa Remalias ra'y Peca reve, ha'e pygua re opu'ã aguã. Ojoko okuapy Acaz oña teñ nda'ipo'akai hexe.

<sup>6</sup> Ha'e va'e jave py Síria pygua huvixa Rezim ipo'aka ju Elate tetã Síria reguarã. Ha'e va'e gui oipe'apa judeu ikuai va'ekue. Ha'e gui Elate katy Síria pygua kuery ju oo vy ha'e py ikuai aÿ peve.

<sup>7</sup> Ha'e ramo Acaz ma Assíria pygua huvixa Tiglate-Pileser pe omondouka ayvu mombe'uarã. Ha'e vy aipoe'i uka:

— Xee ma nerembiguai ha'e ndera'y aiko. Eju ha'vy, xereraa jepe Síria ha'e Israel pygua huvixa po'akaa gui, mba'eta ha'e kuery opu'ã okuapy orerovai — he'i uka.

<sup>8</sup> Ha'e rami vy prata ha'e ouro guigua SENHOR pegua templo ropy ikuai va'ekue Acaz oipe'a vy omondoukapa Assíria pygua huvixa pe, huvixa ro py ikuai va'ekue voi omboaxa ixupe.

<sup>9</sup> Ha'e ramo Assíria pygua huvixa oendu vy Damasco tetã re ju oo opu'ã aguã. Ha'e va'e tetã re ipo'aka ma vy ha'e pygua kuery escravo-rã ogueraapa Quir katy. Ha'e vy ojuka avi Rezim.\*

*2 Crônicas 28.22-25*

<sup>10</sup> Damasco tetã katy huvixa Acaz voi oo Assíria pygua huvixa Tiglate-Pileser reve joexa aguã. Ha'e py ma peteñ altar oexa vy sacerdote Urias pe omondouka oa'ãmba ha'e ha'angaa ojapo uka va'ekue, ha'e nunga ha'e javi'i oña rami vy.

<sup>11</sup> Ha'e ramo sacerdote Urias ojapo peteñ altar huvixa Acaz Damasco tetã py oexa va'ekue ramigua, ojapo ukaague ha'e javi rami. Damasco tetã gui huvixa Acaz ou jevy e'ý re ma voi sacerdote Urias ojapopa.

<sup>12</sup> Damasco gui huvixa ou ma vy oexa altar. Ha'e rami vy ha'e katy onhemboja vy mba'emo ome'ẽ hi'áry.

<sup>13</sup> Ha'e rami vy oapy mymba, mba'emo aju guigua guive ome'ẽ. Altar áry onhoẽ mba'emo rykue, ha'e hi'áry rupi omboayvipa avi mymba kuery ruguykue, peteñ rami ikuai aguã regua ome'ẽ va'ekue guigua.

<sup>14</sup> Ha'e rã altar overa va'e guigua SENHOR renonde oĩ va'ekue ma oipe'a heravy oo rexei oñague gui, SENHOR pegua oo ha'e ombo'e altar mbyte gui, ha'e vy ombo'e altar yvy'iry ju oguerova, kuaray apu'a'ia katy.

<sup>15</sup> Ha'e gui huvixa Acaz ojapo ukave ju sacerdote Urias pe. Ha'e vy aipoe'i:

— Altar tuvixave va'e áry ma eapy aje'ive nhavõ reme'ẽ va'e, ha'e mba'emo aju guigua ka'aru nhavõ reme'ẽ va'e guive, ha'e xee huvixa mba'emo apy uka va'e, ha'e mba'emo aju guigua ame'ẽ va'e. Hi'áry rupi remboayvi 'rã mba'emo oapya aguã ome'ẽ mbyre ruguykue ha'e javi. Ha'e rã altar overa va'e guigua ma xee ae aiporu 'rã xemba'ekuaa aguã — he'i.

<sup>16</sup> Ha'e ramo huvixa Acaz ojapo ukaague rami meme sacerdote Urias ojapo.

<sup>17</sup> Ha'e gui mba'emo renderã omoõ mbyre gui ma huvixa Acaz ojaya imbotya oĩ va'ekue, ha'e gui hi'áry gui omboi hy'a ikuai va'ekue. Ha'e gui mba'emo yy mbotya oĩ va'e voi omboi vaka ra'angaa overa va'e guigua áry oñague gui, ha'e vy ita ombojopeague áry rive ju omboguejy.

<sup>18</sup> Omboi avi oo oikeaty ao'iarã omoõ mbyre sábado py anho'i oiporu va'ekue. SENHOR ro roka katy gui omboi avi huvixa oikeaty. Ha'e va'ekue ma omboipa, Assíria pygua huvixa oipotaa rami rive.

*2 Crônicas 28.26,27*

---

\* <sup>16:9</sup> Damasco ma Síria hyvy re opena va'e huvixa retã, aÿ peve voi.

<sup>19</sup> Ha'e gui oīve rei tema Acaz rekokue regua. Ha'e rami avi mba'emo ojapo va'ekue ha'e javi noī 'rā teve kuaxia Judá pygua huvixa kuery rekokue oīa re?

<sup>20</sup> Ha'e gui Acaz ndoikovevei'i ma guamoī kueryague rami. Ha'e ramo onhono porāa tuu kuery rupa yvýry, Davi rekoague py. Ha'e ramo ta'y Ezequias ju oī hekobia.

## 17

### *Israel pygua huvixa Oséias oījave guare*

<sup>1</sup> Doze ma'etŷ re ma Acaz Judá pygua huvixa oī rire Elá ra'y Oséias oī Israel pygua ruvixarā. Samaria py ae opena nove ma'etŷ peve.

<sup>2</sup> Ha'e va'e ma ha'eve'ŷ va'e ojapo oikovy SENHOR renonde rupi, teī huvixa ymavegua kuery rami e'ŷ guive.

### *Samaria tetā re ipo'akaa ha'e Israel kuery escravo-rā ogueraapaa ague*

<sup>3</sup> Ha'e gui ma Oséias rovai ou Assíria pygua huvixa Salmaneser. Ha'e va'e rembiguai Oséias oiko, ixupe mba'emo ome'ē oikovy guive.

<sup>4</sup> Ha'e ramo Assíria pygua huvixa ojeupe "Xere Oséias opu'ā" he'i, mba'eta Egito pygua huvixa Sô oīa katy ayvu mombe'uarā omondouka ramo, ha'e jypy guare rami e'ŷ nome'ēvei kuerei mba'emo huvixa Assíria pygua pe, ma'etŷ nhavō ome'ēague rami e'ŷ. Ha'e nunga rupi Assíria pygua huvixa ojokua vy omboty nhuā py.

<sup>5</sup> Mba'eta huvixa Assíria pygua ma ijyvy jave rupi oiko vy Samaria tetā re ou vy mboapy ma'etŷ re ojoko.

<sup>6</sup> Oséias nove ma'etŷ re ma oī rire Assíria pygua huvixa ipo'aka Samaria re. Ha'e vy ogueraapa Israel kuery oyvy Assíria katy. Ha'e rami vy Hala tetā py ju omboekoa, Habar ha'e Gozā yakā yvýry, ha'e gui Média pygua kuery retā ikuai va'e rupi.

### *Mba'emoj apo vai rā pa ogueraapaa ague*

<sup>7</sup> Ha'e va'e nunga oiko raka'e mba'eta SENHOR nguuete pe Israel kuery ojejavypa ramo, Egito yvy gui oguerupa rire teī, Egito pygua huvixa Faraó po'akaa rupi ikuaiague gui. Ha'e rami rire teī amboae regua tuuete ramigua kuery ju ha'e kuery omboete okuapy.

<sup>8</sup> Yvy regua kuery reko rupi ikuai, Israel kuery renonde gui SENHOR oipe'apa va'ekue rekokue rupi ae, ha'e Israel pygua huvixa kuery amboae rami rei ombo'ēague rami.

<sup>9</sup> Ha'e rami vy SENHOR nguuete rovai Israel kuery ojapo ha'eve'ŷ va'e. Ha'e vy yvy'ā rupi ojapo okuapy ha'e kuery oikuua rami rive ombojerovia atyrā, guekoa ikuai va'e rupi, nhoarōa kuery ikuaiha'e tetā ikorapa va'e ha'e javi rupi.

<sup>10</sup> Ha'e vy yvy'ā rupi ha'e yvyra rogueana ikuai va'e ha'e javi guýry rupi omopu'ā avi imo'amy ita ha'e yvyra ta'angaa.

<sup>11</sup> Ombojeroviaaty yvy'ā rupi ikuai va'e ha'e javi py oapy okuapy heakuā porā va'e, ha'e kuery renonde gui SENHOR amboae regua oipe'apa va'ekue reko rami ae ju. Ha'e vy opa marā ikuai SENHOR ombopoxy aguā rami rive.

<sup>12</sup> Mba'emo ra'angaa pe rive ikuai. Ha'e va'e nunga re SENHOR ijayvu vy aipoe'i: "Ha'e ramigua peē kuery ndapejapoi 'rā", he'i va'ekue ri.

<sup>13</sup> Mba'eta profeta ha'e imba'ekuaa va'e kuery ha'e javi rupi SENHOR ijayvu va'ekue Israel ha'e Judá kuery pe. Ha'e vy aipoe'i: "Pejep'e a nho ke tape vai rupi pendekuaia gui, ha'e gui pemoī porā xee ajapo uka va'e ha'e ayvu aeja va'ekue, lei peneramoī kuery pe ambopara uka va'ekue xerembiguai profeta kuery pe", he'i va'ekue.

<sup>14</sup> Ha'e rami teī ha'e kuery noendu potai okuapy. Ha'e rami 'rāgue py inhakā ratāve tema oje'oivy nonhe'ē reduxei vy, guamoī kuery SENHOR nguuete re ndojeroviaiague rami ae ju.

<sup>15</sup> Ha'e kuery noendu potai okuapy ayvu SENHOR oeja va'ekue ha'e guamoī kuery reve guexeve guarā ojapo va'ekue re, neī ha'e kuery pe ijayvu ete jepiague re. Ha'e rami 'rāgue py ta'angaa ndovarei va'e pe rive ikuai, ha'e kuery ae ju ndovarei va'e ikuai peve.

Mba'eta amboae regua kuery reko rupi ikuai, SENHOR "Napendekuai 'rā ha'e rami", he'i va'ekue ri.

<sup>16</sup> SENHOR nguuete ojapo uka va'ekue ha'e kuery omboykepa vy ha'e kuery oikuua rami rive ojapo okuapy ta'angaarā mba'emo rykukue gui. Mokoī toro ra'y ra'angaarā ojapo, ha'e yvyra omopu'ā avi imo'amy mba'emo ra'angaarā rive. Ha'e vy omboete okuapy yva re ikuai va'e, ha'e tuuete ramigua Baal pe rive ikuai.

<sup>17</sup> Gua'y ha'e guajy kuery ae oapy okuapy nguuete ramigua pe ome'ē vy. Ha'e vy onhembo'e okuapy imba'ekuaa aguā re rive, oexa'ā kuaa va'e kuery re anho ojerovia vy. SENHOR renonde rupi ojeko me'ē okuapy ha'eve'ŷ va'e ojapo aguā, ombopoxy aguā rami rive.

<sup>18</sup> Ha'e nunga rupi SENHOR ojou vai ete Israel kuery, ha'e vy guenonde gui oipe'apa. Omombytave ranhe va'e ma Judá kuery anho.

<sup>19</sup> Ha'e rami teī Judá kuery voi nomoī porāi SENHOR nguuete ojapo uka va'ekue. Ha'e rami 'rāgue py Israel kuery ikuia rami ae ju ikuai.

<sup>20</sup> Ha'e nunga rupi SENHOR oeja Israel kuery regua ha'e javi. Omoingo axy rei vy omboaxapa hovaigua kuery po py, guenonde gui oipe'apa peve.

<sup>21</sup> Mba'eta Davi ramymino kuery po gui SENHOR Israel kuery oipe'apa ma rire Nabote ra'y Jeroboão nguvixarā ha'e kuery omoī okuapy ramo ha'e va'e ojapo Israel kuery SENHOR re ojeroviaague gui ojepe'a vy ojejavypa aguā rami.

<sup>22</sup> Ha'e rami vy Israel kuery ikuai Jeroboão ojejavvyague rupi anho, neī peteīgueve ma voi ndojepe'ai ha'e rami ikuiai gui,

<sup>23</sup> SENHOR guenonde gui Israel kuery oipe'apa peve, guembiguai profeta kuery rupi ijayvuague ha'e javi rami vy. Ha'e rami vy Assíria yvy katy escravo-rā ogueraa ukapa raka'e Israel kuery, aŷ peve ha'e py ae ikuai.

### *Assíria pygua huvixa Samaria tetā py hekoa va'erā ogueru rukaveague*

<sup>24</sup> Ha'e gui ma huvixa Assíria pygua ogueru rukave ju Babilônia tetā pygua, Cuta, Ava, Hamate ha'e Sefarvaim gui, Samaria tetā py hekoa va'erā Israel kuery rekoague py. Ha'e ramo Samaria tetā re ha'e kuery ipo'aka ma vy onhemboekoa okuapy ha'e katy tetā ikuai va'e ha'e javi rupi.

<sup>25</sup> Ha'e kuery ikuai ypy jave SENHOR renonde ojererokyjea rupi e'ŷ ranhe ikuai. Ha'e ramo ha'e kuery mbyte rupi SENHOR ombou guary ha'e kuery va'e regua jukaarā.

<sup>26</sup> Ha'e ramo Assíria pygua huvixa pe omombe'ua vy aipo'ea:

— Samaria tetā py hekoa aguā remondouka va'ekue ma ndoikuaai rei okuapy ha'e va'e yvy regua tuuete ombojerovia aguā. Ha'e nunga rupi ae ha'e kuery mbyte rupi ombou rima guary, ha'e ramo ojukapa rai'i, ha'e pygua tuuete nombojerovia kuaai okuapy ramo — 'ea.

<sup>27</sup> Ha'e ramo Assíria pygua huvixa aipoe'i uka:

— Peraa ju ha'e katy peteī sacerdote ha'e gui Peru va'ekue, ha'e katy oo vy ha'e kuery ombo'e oikovy aguā ha'e pygua tuuete ombojerovia aguā re — he'i.

<sup>28</sup> Ha'e ramo oo ju peteī sacerdote Samaria gui ogueru pyre, ha'e vy Betel py oiko. Ha'e va'e ma nhombo'e oikovy SENHOR renonde ojererokyjea rupi ikuai aguā re.

### *Samaria pygua kuery joo rami e'ŷ-e'ŷ rei ombojerovia okuapyague*

<sup>29</sup> Ha'e rami teī peteī-teī regua ojapo teri okuapy ha'e kuery ruete ra'angaa rive tetā py ikuiai rupi, ha'e omopu'ā imo'amy yvy'ā rupi ombojerovia atyrā Samaria pygua kuery ojapo va'ekue ha'e javi py.

<sup>30</sup> Ha'e rami vy Babilônia guigua kuery ojapo okuapy Sucote-Benote ra'angaa, Cuta guigua ma Nergal ra'angaa ojapo okuapy, Hamate guigua ma Asima ra'angaa ojapo,

<sup>31</sup> Aveu kuery ma Nibaz ha'e Tartaque ra'angaa ojapo, ha'e rā Sefarvaim guigua kuery ma gua'y ha'e guajy kuery ae oapy okuapy tata py nguuete ra'angaa Adrameleque ha'e Anameleque peguarā.

**32** Ha'e rami rei teĩ SENHOR ojererokyjea rupi avi ikuai, va'eri ha'e kuery regua omoĩ avi okuapy sacerdote kuery ombojeroviaaty yvy'ã rupi ikuai va'e py, ha'e pygua kuery re vy mba'emo ome'ẽ aguã.

**33** Ha'e rami py SENHOR ojererokyjea rupi ikuai va'eri nguuete ra'angaa ombojeroviaa rupi avi ju, ha'e kuery ikuaiague pygua kuery reko rami vy.

**34** Aÿ peve ma ha'e kuery gueko ymague rupi ae tema ikuai. SENHOR renonde ojererokyjea rupi e'ÿ ikuai, oayvu ha'e oipotaa oeja va'ekue rupi e'ÿ guive, neĩ lei Jacó ramymino kuery pe SENHOR ombopara uka vy ojapo uka va'ekue rupi. Ha'e va'e ma omboery ju Israel raka'e.

**35** Mba'eta ha'e kuery reve SENHOR guexeve guarã ojapo vy aipoe'i va'ekue: "Pembojerovia eme tuuete mboae rive, neĩ ha'e nunga renonde rupi peĩ eme penerenapy'ã re, ha'e kuery pe pendekuai eme, peme'ẽ eme mba'emo guive.

**36** SENHOR pe anho ha'eve, Egito yvy gui opo'aka etea rupi ha'e opo oupi reve penerenoẽ va'ekue pe ae. Henonde ma pejererokyjea rupi pendekuai, henonde penerenapy'ã re peĩ 'rã guive, ha'e ixupe ae 'rã peme'ẽ mba'emo.

**37** Ha'e gui oayvu ha'e oipotaa oeja va'ekue, lei, ha'e nunga pendevy ojapo uka va'ekue ma pemoĩ porã pota 'rã ára nhavõ. Ha'e rã tuuete mboae ramigua ma pembojerovia eme.

**38** Penderexarai eme guive guexeve guarã ojapo va'ekue re. Pembojerovia eme tuuete mboae ramigua rive.

**39** SENHOR Penderuete renonde pejererokyjea rupi anho 'rã pendekuai. Ha'e ramo pendereraa jepepa 'rã penderovaigua kuery po gui", he'i va'ekue.

**40** Ha'e rami teĩ ha'e kuery ndojapyxakai ha'e nunga re. Ha'e rami 'rãgue py gueko ymague rupi ae tema ikuai.

**41** Ha'e rami py ha'e va'e regua kuery ma SENHOR ojererokyjea rupi ikuai va'eri ombojerovia avi okuapy ta'angaarã ha'e kuery ae ojapo va'ekue. Guamoĩ kuery ikuaiague rami ae ju ta'y kuery ha'e hamymino kuery voi ikuai, aÿ peve.

## 18

### *2 Crônicas 29.1,2*

**1** Ha'e gui mboapy ma'etÿ re ma Elá ra'y Oséias Israel pygua huvixa oĩ jave py Acaz ra'y Ezequias oĩ Judá pygua ruvixarã.

**2** Ha'e va'e oĩ ypy'i jave vinte e cinco ma'etÿ oguereko, ha'e vy vinte e nove ma'etÿ re opena Jerusalém py. Ixy ma Zacarias rajy Abi.

**3** Ha'e va'e ma ha'evea ramigua ojapo oikovy SENHOR renonde rupi, guamoĩ Davi ojapoague ha'e javi rami.

**4** Ombojeroviaaty yvy'ã rupi ikuai va'ekue ombovaipa vy omopẽmba ita omopu'ã mbyre, oitypa guive ta'angaarã yvyra omopu'ã mbyre. Omboa'ypa mboi ra'angaa overa va'e guigua Moisés ojapo va'ekue, mba'eta ha'e va'e jave ha'e va'e pe Israel kuery oapy 'rã okuapy heakuã porã va'e, Neustã omboery vy.

**5** Ezequias ma ojerovia oikovy SENHOR Israel kuery ruete re. Ha'e oĩ rire nda'ipovei ha'ekue ramigua, Judá pygua huvixa kuery ma voi ndoikoi, neĩ ha'e oiko e'ÿ mbove voi.

**6** Mba'eta SENHOR pe ae ma voi oiko, ndojep'eai ixupe oikoa gui, ha'e vy omoĩ porãmba Moisés rupi SENHOR ojapo uka va'ekue.

**7** Ha'e ramo hexeve SENHOR oiko. Mamo rã rei ooa py tema ha'evea ramigua meme ojapo. Assíria pygua huvixa rovai re opu'ã, oipota va'e ndojapoxevei vy.

**8** Ojukapa guive filisteu kuery Gaza ha'e ijyvýry tekoa ikuai va'e peve, harõa kuery oikuua potaaty ha'e tetã ikorapa va'e py voi.

**9** Ha'e gui ma irundy ma'etÿ re ma huvixa Ezequias oĩ jave, ha'e sete ma'etÿ re ma Elá ra'y Oséias Israel pygua huvixa oĩ jave py ou Assíria pygua huvixa Salmaneser kuery Samaria tetã re, ha'e vy ojokopa.

**10** Ha'e gui mboapy ma'etŷa py ipo'aka. Ha'e va'e jave py mboapy meme ma'etŷ ma ojapo Ezequias oñague, ha'e nove ma'etŷ ojapo Israel pygua huvixa Oséias oñague.

**11** Assíria pygua huvixa ma oyvy katy ae ogueraapa Israel kuery ha'e javi. Hala py ju omboekoa, Habor katy'i Gozā yakā yvýry, tetã Média pygua kuery rekao ikuai va'e rupi guive.

**12** Ha'e nunga oiko mba'eta SENHOR nguuete ha'e kuery nonhe'ẽ rendui okuapy rire. SENHOR guexeve guarã ojapo va'ekue rupi e'ŷ ikuai, hembiguai Moisés ojapo uka va'ekue rupi e'ŷ guive. Noendu potai, ha'e ndojapoi guive okuapy.

*2 Crônicas 32.1-8; Isaías 36.1-3*

**13** Ha'e gui catorze ma'etŷa re ma huvixa Ezequias oĩ jave py ou Assíria pygua huvixa Senaqueribe. Ha'e va'e ma Judá regua tetã ikorapa va'e ha'e javi re opu'ã vy ipo'aka.

**14** Ha'e ramo Judá pygua huvixa Ezequias ma Laquis tetã py omondouka guembiguai huvixa Assíria pygua oĩa katy. Ha'e vy aipoe'i uka:

— Ha'eve'ŷa rami aiko va'ekue. Ejepe'a ke xeyvy gui. Ha'e gui opa mba'e reme'ẽ uka va'e tema ame'ẽmba 'rã ndevy — he'i uka.

Ha'e ramo huvixa Assíria pygua ojapo Judá pygua huvixa Ezequias dez mil quilos prata ha'e mil quilos ouro ome'ẽ aguã rami.

**15** Ha'e ramo ixupe Ezequias ome'ẽ prata SENHOR ropy ojou va'ekue ha'e javi, ngoo py ae omoõ porã va'ekue guive.

**16** Ha'e rami vy SENHOR pegua templo rokẽ ha'e ijyta oĩ va'e gui Ezequias omboipa ouro Judá pygua huvixa ae omonheovãague. Ha'e nunga ha'e javi ome'ẽ avi Assíria pygua huvixa pe.

**17** Ha'e ramive ma Assíria pygua huvixa Laquis tetã py oĩa gui omondouka reta xondaro kuery Jerusalém py huvixa Ezequias oĩa katy, Tartã, Rabe-Saris ha'e Rabsaqué rupive. Ha'e va'e kuery ma Jerusalém tetã py oupa. Ovaẽmba ma vy ijatypa okuapy yy omboty pyre yvy'ã re oĩ va'e gui yy oxyry ouvyaty rovai katy, tape ao joiaty kuery yvy via yvýry.

**18** Ha'e rami vy ha'e kuery oenoõ uka huvixa Ezequias. Ha'e ramo ha'e kuery ijaty okuapya py huvixa ombou uka guembiguai kuery Hilquias ra'y Eliaquim huvixa ro re opena va'ety, kuaxia para re opena va'e Sebna, ha'e gui Asafe ra'y Joá mba'emo oiko va'ekue mboparaaty.

*2 Crônicas 32.9-20; Isaías 36.4-22*

**19** Ha'e ramo ha'e kuery pe Rabsaqué aipoe'i:

— Aipopeje ke Ezequias pe: Po rami Assíria pygua huvixa yvateve va'e ijayvu: Mba'e nunga re tu rejerovia?

**20** Ha'e ramo ndevy pe xeayvu: Ndee ore kuery re repu'ã aguã re renhembopy'aa ma ayvu rive'i. Marã ramigua kuery re tu rejerovia reikovy, xerovai repu'ã aguã?

**21** Egito pygua kuery re rima rejerovia, ha'e rami teī ha'e kuery ma popoka takua ovopa va'e ramigua rive, mba'eta ha'e va'e re amongue ojeko rã ipo py oixu'upa 'rã. Ha'e ramigua ae 'rã oiko Egito pygua huvixa Faraó ha'e hexe ojerovia va'e kuery ha'e javi re.

**22** Ha'e rã xapy'a rei xevy aipopeje 'rã: “Ore ma SENHOR Oreruete re ae rojerovia va'e”, peje teī ha'e va'e peguare e'ŷ teve ombojeroviaaty yvy'ã rupi ikuai va'e ha'e altar Ezequias oitypa va'ekue? Mba'eta ha'e ma Judá ha'e Jerusalém pygua kuery pe aipoe'i va'ekue: “Kova'e altar Jerusalém py oĩ va'e katy anho 'rã pembojerovia pekuapy”, he'i va'ekue pendevy.

**23** Ha'e nunga rupi ejerure na xeruvixa Assíria pygua pe, ha'e gui xee ma ame'ẽ 'rã ndevy dois mil kavaju, xapy'a rei avakue hi'ary guarã rejou ri ramo.

**24** Mba'e re tu rejerovia reikovy Egito pygua karóxa ha'e kavaju árygua kuery re? Mba'eta xeruvixa rembiguai yvyigüeve teī nderakykue monha 'rã.

<sup>25</sup> Ha'e gui xapy'a rei xee nda'u SENHOR reve'ŷ ri aju peneretā amomba aguã? Any, mba'eta SENHOR ae xevy aipoe'i: "Tereo ke, epu'ã ha'e kuery yvy re, ha'e emomba", he'i va'ekue xevy.

<sup>26</sup> Ha'e rami rã Rabsaqué pe Hilquias ra'y Eliaquim, Sebna ha'e Joá ombovai vy aipoe'i okuapy:

— Rojerure ndevy: Ore nerembiguai kuery pe ndeayvu ke aramaico ayvu py anho, roendu kuaa rã. Ndeayvuve eme judeu kuery ayvu py, heta va'e kuery tetā kora áry rupi ikuai va'e oendu kuaa e'ŷ aguã — he'i.

<sup>27</sup> Ha'e rami teĩ Rabsaqué ombovai:

— Ha'e gui pêvy ha'e penderuvixa remiendurã anho teve xeruvixa xembou xeayvu aguã? Avakue tetā kora áry rupi ikuai va'e pe guive e'ŷ teve xeayvu, mba'eta peẽ kuery rami avi ha'e kuery voi ikuai guepoxi ho'u ha'e otyrai ae oy'u okuapy aguã rami — he'i.\*

<sup>28</sup> Ha'e rami vy Rabsaqué opu'ã vy ijayvu atãve ho'amy judeu kuery ayvu py. Ha'e vy aipoe'i:

— Pejapyxaka ke Assíria pygua huvixa yvateve va'e ayvu re.

<sup>29</sup> Po rami xeruvixa ijayvu: "Penhembotavy uka eme Ezequias pe, mba'eta ha'e ma napendereraa jepei 'rã xepo gui.

<sup>30</sup> Ezequias tapendeapo eme SENHOR re pejerovia aguã rami, mba'eta aipoe'i: 'SENHOR nhandereraa jepe 'rãe, ha'e vy kova'e tetā nomboaxai 'rã Assíria pygua huvixa po py', he'i 'rã.'

<sup>31</sup> Pejapyxaka eme Ezequias ayvu re. Mba'eta po rami Assíria pygua huvixa ijayvu: "Pejapo ke xereve peteĩ rami nhandekuai aguã, ha'e vy peju xea katy. Ha'e rami vy peteĩ-teĩ pekaru 'rã penemba'e vinho ha'e figo'a re, ha'e penemba'e ygua gui ae 'rã pey'u pekuapy,

<sup>32</sup> xee pendeyvy re xee aju peve. Ha'e gui ma xee rogueraa 'rã peteĩ yvy pendeyvy rami ae itui va'e katy. Ha'e va'e yvy ma mba'emo aju ha'e uva rykue oikoa, mbojape ha'e uva, oliveira ty ha'e ei oata e'ŷa, peiko puku aguã pemanomba e'ŷ re. Ha'e nunga rupi pejapyxa eme Ezequias ayvu re. Mba'eta penembotavya rupi rive 'SENHOR nhandereraa jepe 'rã', he'i pêvy.

<sup>33</sup> Mba'eta yvy regua kuery ruete ra'angaa ikuai va'e nda'u ogueraa jepe ri yvy Assíria pygua huvixa po gui?

<sup>34</sup> Mba'eta mamo tu ikuai Hamate ha'e Arpade pygua kuery ruete ra'angaa? Mamo tu ikuai Sefarvaim, Hena ha'e Iva pygua kuery ruete ra'angaa? Ha'e kuery nda'u ogueraa jepe raka'e Samaria tetā xepo gui?

<sup>35</sup> Mba'eta ha'e va'e yvy re ikuai va'e ruete ra'angaa regua mava'e rei ogueraa jepe oyvy xepo gui. Mba'exa 'rã tu ha'vy SENHOR ogueraa jepe Jerusalém xepo gui?" he'i.

<sup>36</sup> Ha'e rami heta va'e kuery oendu teĩ okyririmbä okuapy, peteïve ma voi nombovai, huvixa "Pembovai eme" he'i rire.

<sup>37</sup> Ha'e ramo Hilquias ra'y Eliaquim mba'emo re opena va'ety, kuaxia re opena va'ety Sebna ha'e Asafe ra'y Joá mba'emo oiko va'ekue ombopara va'ety jogueru ju Ezequias oĩa py. Oao omondoropa va'ekue reve ou vy ixupe omombe'u okuapy Rabsaqué ijayvuague ha'e javi.

## 19

### Isaías 37.1-7

<sup>1</sup> Ha'e nunga huvixa Ezequias oendu vy omondoro oao, ha'e ajukue voxá guigua py rive onheovãmba vy oike SENHOR pegua oo py.

\* <sup>18:27</sup> Ha'e rami ijayvu, mba'eta tetā ojokopa ha'e pygua kuery ho'u va'erã ha'e yy oy'u aguã ojou e'ŷ aguã, tetā re ipo'akaxe vy.

<sup>2</sup> Ha'e rami vy Amoz ra'y profeta Isaías oña katy omondouka ngoo re opena va'ety Eliaquim ajukue voxua guigua py onheovā va'ekue reve, kuaxia re opena va'ety Sebna ha'e sacerdote kuery yvatekueve va'e guive,

<sup>3</sup> Isaías pe ha'e kuery aipoe'i aguā:

— Po rami Ezequias aipoe'i: “Kova'e ára ma jajexavai aguā ha'e nhanembopagaa rā nhaxīmba aguā ára, kunha oikuavā'i ta teñ oguerekō ete aguā na'imbaraetevei va'e rami nhandekuai.

<sup>4</sup> Mba'eta Assíria pygua huvixa remimbou Rabsaqué ijayvu va'ekue Nhanderuete oikove va'e rovai. Ijayvua SENHOR Nderuete oendu vy ijayvu ete 'rāgue. Ha'e nunga rupi ejapukai ke ixupe jakuave'i teri va'e re”, he'i aguā.

<sup>5</sup> Ha'e ramo Isaías oña py huvixa Ezequias rembiguai kuery ou ramo

<sup>6</sup> Isaías aipoe'i ha'e kuery pe:

— Aipopeje ke penderuvixa pe: “Po rami SENHOR ijayvu: Ekyje eme ayvu rendu va'ekue káuxa. Ha'e va'e ayvu rupi ma xerovai ae Assíria pygua huvixa rembiguai kuery ijayvu okuapy.

<sup>7</sup> Ha'e rami teñ hexe ambou 'rā peteñ nhe'ẽ imongyjearā. Ha'e ramo ixupe mba'emo omombe'ua rā oendu vy ojepe'a ju 'rā ovv oyvy katy ae. Ha'e gui ma ha'e py ajapo 'rā kyxe py ojukaa aguā rami”, he'i.

### *Isaías 37.8-13*

<sup>8</sup> Ha'e gui ma Rabsaqué oo ju vy oikuua Assíria pygua huvixa kuery Libna tetā re opu'ā okuapya, mba'eta oendu ma voi huvixa Laquis tetā re opu'āa gui ojepe'a ma ovvyague.

<sup>9</sup> Assíria pygua huvixa oendu avi “Etiópia pygua huvixa Tiraca ma je ou oiny nderovai opu'ā vy”, 'ea ramo. Ha'e rami vy peteñgue ju Ezequias oña katy omondouka guembiguai kuery. Ha'e vy aipoe'i uka ha'e kuery pe:

<sup>10</sup> — Po rami pendeayvu 'rā Judá pygua huvixa Ezequias pe: “Enhembotavy uka eme nderuete re rejeroviaa py. Mba'eta aipo're: ‘Jerusalém tetā ma nomboaxai 'rā Assíria pygua huvixa po py’, 're.

<sup>11</sup> Ndee nerendui teve Assíria pygua huvixa kuery yvy jave re ojapo va'ekue? Mba'eta omomba ete. Ha'e nunga rupi ndee rexā'ā ri ty'y reo jepe aguā?

<sup>12</sup> Mba'eta yvy regua ruete ra'angaa ikuai va'e nda'u ogueraa jepe ri raka'e xeramoī kuery omomba aguā gui? Ha'e va'e kuery ma Gozā, Harā ha'e Rezefe pygua, ha'e Éden ramymino kuery Telassar py ikuai va'ekue.

<sup>13</sup> Ha'e mamo tu oiko aŷ Hamate pygua huvixa, ha'e Arpade, Sefarvaim tetā, Hena ha'e Iva pygua huxixa kuery?” — he'i uka.

### *Isaías 37.14-20*

<sup>14</sup> Ha'e gui ma tembiguai kuery po gui kuaxia para Ezequias ojopy vy ogueroayvu. Ha'e rami vy SENHOR pegua oo py oike vy oexa uka imoiny henonde.

<sup>15</sup> Ha'e rami vy SENHOR renonde ojapukai vy aipoe'i:

— SENHOR Israel kuery ruete, anjo kuery pepo áry rupi reguapy reiny va'e repenaa py, ndee anho'i reiko yvy jave regua kuery ruete. Ndee ma yva ha'e yvy apoare.

<sup>16</sup> SENHOR, ejapyxaka rendu pota aguā. Eipe'a ke nderexa, rexā pota aguā. Ha'e vy endu pota Senaqueribe ijayvuague ha'e javi re, mba'eta Oreruete reikove va'e, nderovai ae ijayvu.

<sup>17</sup> Ha'e gui SENHOR, anhetē ete ae Assíria pygua huvixa kuery omomba raka'e yvy regua ikuai va'e, ha'e kuery yvy guive.

<sup>18</sup> Ha'e gui oapypa guive ha'e kuery ruete ra'angaa oguerekō va'ekue. Ha'e rami avi ha'e nunga ma tuuete e'ŷ ae, avakue rembiapo, yvyra ha'e ita guigua rive. Ha'e nunga rupi ae omomba.

<sup>19</sup> Ha'e ramo SENHOR Oreruete, orereraa jepe ke ipo gui, yvy regua ha'e javi oikuua aguā ndee anho SENHOR reikoa — he'i.

### *Isaías 37.21-35*

<sup>20</sup> Ha'e gui Amoz ra'y Isaías oayvu ogueraa uka Ezequias pe:

— Po rami SENHOR Israel kuery ruete ijayvu: Assíria pygua huvixa Senaqueribe káuxa xevy rejerure ramo xee aendu ae ma.

<sup>21</sup> Ha'e rami vy po rami xee SENHOR xeayvu hexe. Ndere ma kunhataigue'i Sião pygua rajy kuery opuka rei okuapy. Nderakykue Jerusalém pygua rajy kuery oguerova-rova oakã.

<sup>22</sup> Mba'eta mava'e re tu ndeayvu vai? Mava'e tu rejojai? Mava'e rovai rupi tu ndeayvu ha'e nderexa py rema'ẽ vaikue rei? Xee Israel kuery ruete xeky'a e'ŷ va'e rovai ae.

<sup>23</sup> Mba'eta nerembiguai kuery rembo'e SENHOR rovai ijayvu aguã re. Ha'e vy aipo're: "Xekaróxa reta va'e vy ajeupi 'rã yvyty áry peve, Líbano yvy re mombyryvea rupi tei. Xee aitypa 'rã ha'e py yary yvatekueve ha'e cipreste iporãgueve ikuai va'e, avaẽ 'rã mombyryvea py apyta aguã, ka'aguy inhanavea py peve.

<sup>24</sup> Ha'e gui yvy ajo'o vy ay'u amboae regua kuery pegua yy gui, ha'e Egito yvy re apyrõ vy rive amombirupa yakã ikuai va'e", 're va'ekue.

<sup>25</sup> — Ha'e rami tei nerendui teve yma rupi ma voi xee ae amoĩ ha'e va'e nunga oiko aguã, ymave guive anhembopy'a ae ma ha'e rami aguã re? Ha'e rami vy aŷ ma amoingo ete ma ha'e nungakue. Xee ae aipotaa rami vy ndee rembovaipa karamboae tetã ikorapa va'ekue.

<sup>26</sup> Ha'e nunga rupi ae ha'e pygua kuery ikangypa, okyjepa ha'e oximba rei raka'e. Ha'e rami vy okanhymba vyvoi nhuũ rami rive, e'ŷ vy jai rogue pyau, nhuũ oo ao'ia áry henhoĩ rive va'e rami, e'ŷ vy mba'emo onhoty mbyre ijaju e'ŷ re okaipa va'e rami rive.

<sup>27</sup> Ha'e rã xee ma aikuua porã reguapy reiny rã, repu'ã reovy ha'e reike ju rejuvy nhavõ, ha'e gui xerovai repu'ã reia guive.

<sup>28</sup> Ha'e ramo xerovai repu'ã reia ha'e renhemboyvate reia aendupa ma vy aŷ ma nexi re amoĩ'rã ty'aĩ ndereruarã, ndejuru re amoĩ avi 'rã juru xã, ha'e rami vy ajapo 'rã rejuague rupi ae ju rejevy aguã rami.

<sup>29</sup> — Ha'e gui ndee Ezequias reikuua aguã ma pova'e 'rã oiko: Aŷ kova'e ma'etŷ ma peẽ kuery pekaru 'rã mba'emo ha'e ae gui henhoĩ va'ekue re, ha'e gui amboae ma'etŷ ma ha'e va'ekue gui ikuai va'ekue re ju 'rã pekaru. Ha'e rã mboapy ma'etŷa py ma penhoty ju 'rã mba'emo, ha'e gui pemono'õ 'rã. Penhoty 'rã uva, hi'a pe'u aguã.

<sup>30</sup> Ha'e gui Judá regua rembyre oo jepe va'ekue ma hapo ju 'rã yvy katy, ha'e vy hi'árykue ma hi'a ju 'rã.

<sup>31</sup> Mba'eta Jerusalém tetã py ikuai 'rã okuave va'e, Sião yvyty re ikuai 'rã oo jepe va'ekue. SENHOR ixondaro reta va'e ae 'rã ojapo, nhanderayvu etea rupi.

<sup>32</sup> — Mba'eta po rami SENHOR ijayvu Assíria pygua huvixa rekorã re: "Ha'e ma kova'e tetã py ndoikei 'rãe, nei peteive hu'y nomomboi 'rã tetã katy, hu'y jokoa reve nonhembojai 'rã ouvy, nei yvy nombo'yvatei 'rã guive tetã kora áry rupi ojeupi aguã.

<sup>33</sup> Ha'e rami 'rãgue py tape ouague rupi ae ju 'rã ojevy. Kova'e tetã py ndoikei 'rãe", he'i SENHOR.

<sup>34</sup> "Mba'eta xee ae ajoko 'rã tetã araa jepe vy, xejee ha'e xerembiguai Davi re ama'ẽ vy", he'i.

## 2 Crônicas 32.21,22; Isaías 37.36-38

<sup>35</sup> Ha'e gui ma ha'e va'e pyavyve anjo SENHOR-a guigua ou vy Assíria pygua kuery ijatya rupi ojuka cento e oitenta e cinco mil. Ko'ëgue okuave'i va'e ovvy vy oexa rã hetekue rive ikuai.

<sup>36</sup> Ha'e ramo Assíria pygua huvixa Senaqueribe ojepe'a ju ovvy. Ojevy vy ngetã ae Nínive py ju opyta.

<sup>37</sup> Ha'e gui ma nguuete ra'angaa Nisroque pegua opy omboetea py oï jave ta'y kuery ae Adrameleque ha'e Sarezer ojuka kyxé py. Ha'e vy onhamba jogueravy Ararate yvy katy. Ha'e ramo ta'y Esar-Hadom ju oï nguu rekovia.

## 20

### *2 Crônicas 32.24; Isaías 38.1-8*

<sup>1</sup> Ha'e va'e jave py huvixa Ezequias imba'eaxy vy omano ta ma oupy. Ha'e ramo oña py ou Amoz ra'y profeta Isaías. Ha'e vy aipoe'i ixupe:

— Po rami SENHOR ijayvu: “Emoatyrō mba'emo ndero py ikuai va'e, mba'eta remano 'rā, ndereikovevei ta ma”, he'i.

<sup>2</sup> Ha'e ramo Ezequias ojere vy ngoo mbotya re ngova omboja oupy. Ha'e vy SENHOR pe ojerure vy aipoe'i:

<sup>3</sup> — SENHOR, ajerure ndevy. Nema'endu'a ke neronden rupi ha'evea rami aikoague re, xepy'a ha'e javi py. Ha'evea ramigua ajapo aikovy va'ekue neronden rupi — he'i. Ha'e vy ojae'o vaipa oupy.

<sup>4</sup> Ha'e gui Isaías ma tetā mbyte gui oo e'ŷ mbove ma voi ixupe SENHOR ombou ju oayvu. Ha'e vy aipoe'i:

<sup>5</sup> — Ejevy ke, ha'e vy aipo're xeiyguia kuery ruvixa Ezequias va'e pe: Po rami SENHOR neramoī Davi ruete va'e ijayvu: “Xee aendu ma renhembo'ea, nderexay aexa guive. Ma'ē, xee romonguera 'rā. Ha'e ramo mboapy araa py reo 'rā SENHOR pegua oo py.

<sup>6</sup> Ha'e vy amoīve 'rā nde'ára quinze ma'etŷ peve ju, ha'e rogueraa jepe 'rā Assíria pygua huvixa po gui, kova'e tetā guive. Aepy 'rā kova'e tetā xejee ha'e xerembiguai Davi re ama'ē vy”, he'i.

<sup>7</sup> Isaías aipoe'ive ju:

— Peru ke peteī figo ru'ūgue — he'i ramo ha'e kuery ogueru vy omoī huvixa ai re. Ha'e ramo okuera ju.

<sup>8</sup> Ezequias aipoe'i Isaías pe:

— Mba'exagua hexa pyrā tu aexa 'rā aikuua aguā SENHOR xemonguera ete 'rāa, mboapy araa py SENHOR pegua oo py aa aguā?

<sup>9</sup> Isaías ombovai:

— Pova'e nunga SENHOR oexa uka 'rā ndevy, reikuua aguā oayvuague ojapo 'rāa. Mava'e pa reipotave? Escada rupi kuaray'ā tenonde katy oove ma voi 'rā dez pyrōa, tyra pa hakykue katy?

<sup>10</sup> Ha'e ramo Ezequias aipoe'i:

— Ndaxyi'i ae guive dez pyrōa kuaray'ā tenonde katy oove vyvoi. Ha'e rami aguā ma nda'evei. Ha'e rami 'rāgue py tojevy ju dez pyrōa hakykue katy — he'i.

<sup>11</sup> Ha'e ramo SENHOR pe profeta Isaías ojapukai ramo escada Acaz ojapo va'ekue rupi ojapo dez pyrōa hakykue katy ju ojevy aguā rami.

### *Isaías 39.1-8*

<sup>12</sup> Ha'e va'e jave py Babilônia pygua huvixa Baladā ra'y Merodaque-Baladā va'e ma “Huvixa Ezequias haxy oupy” 'ea rā oendu vy oña katy ombou kuaxia para, mba'emo ome'ē va'erā reve.

<sup>13</sup> Ha'e ramo herua kuery ovaē rā Ezequias oguerovy'a vy ha'e kuery pe oexa uka mba'emo omoī porāaty py oguerekva'e ha'e javi: prata, ouro, tembi'u irūrā, azeite iporāve va'e ha'e tembiporu joe opu'āa pygua. Omoī porāaty py ikuai va'e ha'e javi oexa uka. Neī peteī'i voi Ezequias ndoexa ukai ha'e kuery pe, ngoo py ae, neī openaa ha'e javi rupi oguerekva'e.

<sup>14</sup> Ha'e ramo huvixa Ezequias oña py profeta Isaías ou vy oporandu ixupe:

— Mba'e nunga re tu avakue ou va'ekue ijayvu okuapy ra'e? Magui tu ou okuapy ndea py?

Ezequias ombovai:

— Peteī yvy mombyryvea gui ou, Babilônia gui ae — he'i.

<sup>15</sup> Ha'e ramo oporanduve ju:

— Mba'e tu ha'e kuery oexa okuapy ndero py?

Ezequias ombovai:

— Xero py oexa okuapy mba'emo ikuai va'e ha'e javi. Xemba'e amoĩ porãaty py oĩ va'e regua neĩ peteĩve ndaexa ukai ha'e kuery pe — he'i.

<sup>16</sup> Ha'e gui ma Isaías aipoe'i Ezequias pe:

— Endu ha'vy SENHOR ixondaro reta va'e ayvu.

<sup>17</sup> “Ovaẽ 'rã ára ndero py ikuai va'e ha'e javi Babilônia yvy katy oguerapaa aguã, ymave guive neramoĩ kuery omoĩ porã va'ekue kova'e ára peve. Ndoejaaí 'rã neĩ peteĩ regua ma voi”, he'i SENHOR.

<sup>18</sup> Ndera'y kuery rerekoo va'ekue ae voi ogueraapaa avi 'rã okuapy, Babilônia pygua huvixa ro py oa'yjõo pyre meme ikuai aguã — he'i.\*

<sup>19</sup> Ha'e ramo Ezequias aipoe'i Isaías pe:

— Pova'e ayvu SENHOR guigua remombe'u va'e ma ha'eve va'e — he'i, ojeupe ae “Xee aikuaa rã aikovea ja mby'a porã anho ha'e ha'evepa rei'i ta merami”, he'i vy.

### *2 Crônicas 32.32,33*

<sup>20</sup> Ha'e gui oïve rei tema Ezequias rekokue regua. Ha'e rami avi yy omboty vy tetã mbyte peve yy ogueru aguã haperã ojapoague, ha'e mba'emo opo'akaa rupi ojapo va'ekue ha'e javi noĩ 'rã teve kuaxia Judá pygua huvixa kuery rekokue oña re?

<sup>21</sup> Ha'e gui Ezequias ndoikovevei'i ma guamoĩ kueryague rami. Ha'e ramo ta'y Manassés ju oĩ nguu rekovia.

## 21

### *2 Crônicas 33.1-9*

<sup>1</sup> Manassés ma doze ma'etõ oguereco jave py oĩ huvixarã. Ha'e vy cinqüenta e cinco ma'etõ re opena Jerusalém py. Ixy rery ma Hefzibá.

<sup>2</sup> Ha'e va'e ma ha'eve'ý va'e ojapo oikovy SENHOR renonde rupi, amboae regua kuery Israel kuery renonde gui SENHOR oipe'apa va'ekue ikuaiague rami ae ju.

<sup>3</sup> Ha'e rami vy omoatyrõmba juombojeroviaaty yvy'ã rupi ikuai va'e nguu Ezequias omboavaipa va'ekue, altar Baal peguarã ojapo reta guive. Omopu'ã avi imo'amy ta'angaarã yvyra guigua Israel pygua huvixa Acabe omopu'ã va'ekue ramigua. Ha'e vy guenapy'ã re oĩ yva re jaxy-tata ikuai katy omboetea rupi.

<sup>4</sup> SENHOR pegua opy rupi eteve voi ojapo altar-rã, SENHOR aipoe'iague: “Jerusalém py amoĩ 'rã xerery”, he'iague py.

<sup>5</sup> SENHOR pegua oo roka mokoïve oĩ va'e rupi ojapo avi altar jaxy-tata yva re ikuai va'e ha'e javi peguarã.

<sup>6</sup> Ha'e rami vy gua'y ae oapy reve ome'ë, ha'e arai rupi rive imba'ekuaa ha'e oexa'ã oikovy. Oporandu uka oikovy omanogue mboayvua ha'e imba'evyky va'e kuery pe rive. Ha'e rami vy SENHOR renonde rupi ojapo oikovy ha'eve'ý va'e meme, ombopoxy aguã rami rive.

<sup>7</sup> Ha'e vy yvyra gui ta'angaarã ojapo uka va'ekue omoĩ avi opy Davi ha'e ta'y Salomão pe SENHOR aipoe'iague va'e py: “Kova'e oo ha'e Jerusalém tetã aiporavo Israel regua ha'e javi gui, ha'e py xerery amoĩ aguã raka'e rã peve guarã.

<sup>8</sup> Mba'eta xee ajapo uka va'ekue ha'e lei xerembiguai Moisés ijayvuague ha'e javi rupi Israel kuery ikuai ramo xee namoxëvei 'rã tuu kuery yvyrã ame'ë va'ekue gui oguata rei aguã rami”, he'iague py ae.

<sup>9</sup> Ha'e rami teĩ ha'e kuery noendu potai okuapy. Ha'e rami vy Manassés oguerojejavý ramo amboae regua Israel kuery renonde gui SENHOR omomba va'ekue gui heko vaive okuapy.

### *Judá kuery ombopaga aguã re ijayvuague*

<sup>10</sup> Ha'e nunga rupi SENHOR ijayvu guembiguai kuery profeta ikuai va'e rupi. Ha'e vy aipoe'i:

\* <sup>20:18</sup> Ha'e va'e jave ma huvixave kuery oa'yjõo uka 'rã guembiguai kuery ngoo rupi guarã.

**11** — Ha'e rami ete Judá pygua huvixa Manassés ojeguaru pyrã ojapo oikovy. Ha'e va'e oĩ e'ŷ mbove amorreu kuery ikuaiague gui nda'eveive va'e ojapo ta'angaa oguereko va'e rupi Judá kuery voi ojejavy aguã rami.

**12** Ha'e rire SENHOR Israel kuery ruete aipoe'i: “Ma'ẽ, Jerusalém ha'e Judá re ambou 'rã mba'emo vai, ha'e nunga oendu va'e rei ijapyxa jovaive nhe'ẽmba 'rã nhemondyi gui.

**13** Ha'e rami vy Jerusalém áry rupi amoatã 'rã ixã ha'ãarã, Samaria ha'e Acabe ro pygua kuery aa'ãague rami avi. Ha'e rami vy Jerusalém tetã gui aipe'apa 'rã ikuai va'e, hy'a oiky'a'o vy ombovapy va'e rami.

**14** Ha'e rami vy aejapa 'rã xevygua kuery rembyrekue, hovaigua kuery po py amboaxapa vy. Ha'e ramo hovaigua kuery ojuka ha'e ogueraa aguã rami rive 'rã ikuai,

**15** mba'eta xerenonde rupi ha'e kuery ojapo okuapy ha'eve'ŷ va'e xembopoxy aguã rami rive, jypy tuu kuery Egito yvy gui oupaa ára guive aŷ peve.

**16** Ha'e rami ae avi Manassés omoẽ reta ojejavy e'ŷ va'e ruguy, Jerusalém ha'e javi rupi omonyẽmba peve. Oguerojejavypa avi Judá kuery, SENHOR renonde rupi ha'eve'ŷ va'e ojapoa py.”

### *2 Crônicas 33.18-20*

**17** Ha'e gui oïve rei tema Manassés rekoke regua. Ha'e rami avi ojejavayague, ha'e mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekoke oña re?

**18** Ha'e gui Manassés ndoikovevei'i ma guamoĩ kueryague rami. Ha'e ramo onhono porãa hoo py yvotyty ituia py, Uzá py ae. Ha'e gui ta'y Amom ju oĩ nguu rekovia.

### *2 Crônicas 33.21-25*

**19** Amom ma vinte e dois ma'etŷ oguereko huvixa oĩ ypy'i jave py. Ha'e gui mokoĩ ma'etŷ re ete'i opena Jerusalém py. Ixy ma Mesulemete, Jotbá pygua Haruz rajy.

**20** SENHOR renonde rupi ha'eve'ŷ va'e anho ojapo oikovy, nguu Manassés ojapoague rami.

**21** Nguu oikoague ha'e javi'i rupi oiko, mba'emo ra'angaa tuu ojerovaiague re ae ju ojerovia, omboete guive.

**22** Ha'e rami vy SENHOR nguu kuery ruete gui ojepe'a vy SENHOR guigua tape rupi ndoikovei.

**23** Ha'e ramo huvixa Amom rovai hembiguai kuery jogueroayvu vy hoo py ae ojuka okuapy.

**24** Ha'e rã ijyvy re ae ikuai va'e ju ojukapa huvixa Amom jukaare kuery. Ha'e rami vy ta'y Josias ju omoĩ okuapy hekovia.

**25** Ha'e gui oïve rei tema Amom rekoke regua. Ha'e rami avi mba'emo ojapo va'ekue ha'e javi noĩ 'rã teve kuaxia Judá pygua huvixa kuery rekoke oña re?

**26** Ha'e gui onhono porãa yvotyty Uzá py oĩ va'e py. Ha'e ramo ta'y Josias oĩ nguu rekovia.

## 22

### *2 Crônicas 34.1,2*

**1** Josias ma oito ma'etŷ oguereko huvixa oĩ ypy'i jave py. Ha'e vy trinta e um ma'etŷ re opena Jerusalém py. Ixy ma Jedida, Bozcate pygua Adaías rajy.

**2** Ha'e va'e ma SENHOR renonde rupi ha'evea ramigua ojapo oikovy, guamoĩ Davi ojapoague ha'e javi rupi. Ha'e vy ndojepe'ai oiporu kuaa katy, neĩ oiporu kuaa e'ŷa katy ma voi.

### *2 Crônicas 34.8-13*

**3** Huvixa Josias dezoito ma'etŷ re ma oĩ jave py omondouka kuaxia re opena va'ety Azalias ra'y Safã, Mesulão ramymino va'e SENHOR pegua oo katy.

**4** Ha'e vy ixupe aipoe'i:

— Tereo ke sacerdote yvateve va'e Hilquias-a katy, reipapa aguã peráta SENHOR pegua opy ogueru pyre. Ha'e va'e peráta ma hetu va'e kuery ome'ẽ rã okẽ rarõa kuery omono'õ va'ekue.

<sup>5</sup> Ha'e kuery tomboaxapa SENHOR pegua opy rupi ombo'epo va'e kuery re opena va'e kuery po py. Ha'e kuery ju omboekovia aguã SENHOR pegua opy rupi ombo'epo va'e kuery pe. Ha'e rami vy 'rãe opy rupi ivaipaague ikuai va'e omoatyrõmba okuapy.

<sup>6</sup> Yvyra gui mba'emo ojapo va'e, oo apoa ha'e ita re ombo'epo va'e kuery pe 'rã omboekovia. Ha'e gui ojogua 'rã yvyra ha'e ita omoatyrõ mbyre, opy rupi ivaipaague omoatyrõmba aguã – he'i.

<sup>7</sup> Ombo'epo va'e kuery ma opa mba'e py ojeroviapy ikuai ramo ndoikuaa potavei ha'e kuery po py peráta omboaxa pyre re.

### *2 Crônicas 34.14-18*

<sup>8</sup> Ha'e gui sacerdote yvateve va'e Hilquias aipoe'i kuaxia re opena va'ety Safã pe:

— SENHOR pegua opy xee ajou kuaxia para lei oña – he'i. Ha'e rami vy Safã pe Hilquias ome'ẽ ramo ogueroayvu.

<sup>9</sup> Ha'e gui kuaxia re opena va'ety Safã ma huvixaa py ou vy ixupe omombe'u. Ha'e vy aipoe'i:

— Nerembiguai kuery oipapapa ma peráta SENHOR pegua opy omoõ porã mbyre, ha'e omboaxapa ma SENHOR pegua opy rupi ombo'epo va'e kuery re opena va'e kuery po py.

<sup>10</sup> Ha'e gui Safã omombe'uve ju huvixa pe. Ha'e vy aipoe'i:

— Sacerdote Hilquias ma xevy ome'ẽ kova'e kuaxia para – he'i. Ha'e rami vy huvixa renonde py Safã ogueroayvu.

### *2 Crônicas 34.19-28*

<sup>11</sup> Kuaxia para lei oña ogueroayvu rã huvixa oendu vy omendoropa oao.

<sup>12</sup> Ha'e rami vy huvixa ijayvu sacerdote Hilquias, Safã ra'y Aicão, Micaías ra'y Acbor, nhomongeta va'ety Safã ha'e guembiguai Asaías pe. Ha'e vy aipoe'i ha'e kuery pe:

<sup>13</sup> — Tapeo ke, peporandu uka SENHOR pe xereko re, ha'e heta va'e kuery Judá regua ha'e javi re. Mba'eta nhanderovai SENHOR poxya hendy vaipa, mba'eta kova'e kuaxia para re ayvu oĩ va'e re nhaneramoõ kuery ndojapyxaka potai, neñ nhanderekorã re ipara oĩ va'e ha'e javi re ma voi rire – he'i.

<sup>14</sup> Ha'e ramo sacerdote Hilquias, Aicão, Acbor, Safã ha'e Asaías oje'oi Jerusalém tetã yvy'ã guy katy profeta kunha Hulda oikoa py. Ha'e va'e ma Harás ra'y Ticvá ra'y Salum sacerdote kuery ao re opena va'ety ra'yxy. Ha'e gui kunha va'e pe ha'e kuery omombe'u okuapy oiko va'ekue.

<sup>15</sup> Ha'e ramo ha'e kuery pe kunha va'e aipoe'i:

— Po rami SENHOR Israel kuery ruete aipoe'i uka: “Aipopeje ava xea py penembouare pe:

<sup>16</sup> Po rami SENHOR ijayvu: Ma'ẽ, mba'emo vai ambou 'rã kova'e tekao ha'e apy ikuai va'e re, kuaxia para Judá pygua huvixa ogueroayvu uka va'ekue ha'e javi rami vy.

<sup>17</sup> Mba'eta ha'e kuery xerejapa vy amboae regua tuuete ramigua kuery pe oapy okuapy heakuã porã va'e, opo py mba'emo ojapo va'ekue py xembopoxy aguã rami rive. Ha'e nunga rupi xepoxya hendy ma kova'e tekao áry, ndoguei 'rã guive”, he'i.

<sup>18</sup> Ha'e rã Judá pygua huvixa SENHOR pe peporandu uka aguã penembou va'ekue pe pemombe'u 'rã: “Po rami SENHOR Israel kuery ruete ijayvu, ayvu rendu va'ekue omombe'u porãve vy:

<sup>19</sup> ‘Ndee ma rendu kova'e tekao ha'e apy hekao va'e kuery amomba aguã re xeayvu vai rã, ha'e rami vy xee SENHOR renonde py renhemoyvy'i vy ndeao remondoro ha'e rejae'o va'ekue. Ha'e va'e ma xee ju aendu', he'i SENHOR.

<sup>20</sup> ‘Ha'e nunga rupi xee romombytu'u 'rã neramoõ kueryague rami, ha'e rã nenhono porãa 'rã, nderexa py rexas e'ý aguã mba'emo vai kova'e tekao re ambou rã', he'i.”

Ha'e ramo kunha va'e ombovaiague ha'e kuery omombe'u okuapy huvixa pe.

## 23

### *2 Crônicas 34.29-33*

<sup>1</sup> Ha'e gui ma huvixa oenoĩ uka ijayvu nhomongeta va'ety kuery Judá re ha'e Jerusalém py ikuai va'e oña py onhemboatypa okuapy aguã.

<sup>2</sup> Ha'e gui Judá regua avakue, Jerusalém pygua, sacerdote, profeta ha'e heta va'e kuery ha'e javi reve huvixa oo SENHOR pegua oo katy. Yvyīgueve ha'e yvatekueve guive oje'oí. Ha'e rami vy ha'e kuery oendu pavẽa py huvixa ogueroayvu kuaxia para SENHOR pegua opy ojou pyre. Guexeve guarã ojapo va'ekue regua ayvu oĩ va'e ha'e javi ogueroayvu.

<sup>3</sup> Ha'e vy oo yta hi'aĩ va'e yvýry huvixa opu'ã ho'amy vy SENHOR renonde ojapo ixupe anho ha'e kuery ikuai aguã, opy'a ha'e onhe'ẽ ha'e javi py ojapopa okuapy aguã SENHOR ojapo uka va'ekue, ijayvua ha'e oipotaa, ha'e rami vy ayvu kuaxia para re oĩ va'e rupi ikuai aguã, SENHOR guexeve guarã ojapo va'ekue rupi anho. Ha'e ramo heta va'e kuery ha'e javi onhemboayvu okuapy ha'e va'e ayvu rupi ikuai aguã re.

### *2 Crônicas 34.3-7*

<sup>4</sup> Ha'e gui ma huvixa ijayvu sacerdote yvateve va'e Hilquias, sacerdote yvyīgueve ha'e okẽ rarõa kuery pe, SENHOR pegua templo ropy gui ha'e kuery oipe'apa aguã tembiporu Baal peguarã ojapo pyre, ha'e gui ta'angaarã yvyra omopu'ã mbyre ha'e yva re jaxy-tata ikuai va'e peguarã ojapo pyre ha'e javi. Ha'e rami vy Jerusalém gui mombyrya py oapypa, Cedrom nhuñdy py, ha'e gui tanhimbukue ma ogueraa Betel katy.

<sup>5</sup> Oipe'apa guive sacerdote kuery Judá rupi ha'e Jerusalém yvýry ombojeroviaaty yvy'ã rupi ikuai va'e peguarã Judá pygua huvixa kuery omoĩ va'ekue. Ha'e va'e kuery ma tuete ramigua pe heakuã porã va'e oapy va'ekue, Baal pe, kuaray, jaxy, ko'ẽ mbija ha'e jaxy-tata ha'e javi pe.

<sup>6</sup> Ha'e rami vy SENHOR pegua opy gui oipe'a avi ta'angaarã yvyra omopu'ã mbyre, ha'e vy Jerusalém gui mombyrya py ogueraa Cedrom yvyugua peve. Ha'e va'e ma oapypa vy omongu'ipa, ha'e vy ha'e pyguare rupa ikuai va'e áry rupi omombopa.

<sup>7</sup> Oitypa avi SENHOR pegua oka py oo avakue ombojeroviaa rupi itavy rei okuapyague. Ha'e va'e opy rupi kunhague ojapo va'ekue oo'i ajukue guigua ta'angaarã yvyra omopu'ã va'ekue rorã.

<sup>8</sup> Ha'e gui ma ogueru rukapa sacerdote kuery Judá regua tetã py ikuaiague gui, ha'e vy omongy'apa ombojeroviaaty yvy'ã rupi ikuai va'e ha'e kuery heakuã porã va'e oapyaty va'ekue, Geba guive Berseba peve. Ha'e vy oitypa avi altar tetã rokẽ py oĩ va'ekue, tetã re opena va'ety Josué pegua okẽ regua oiporu kuaa e'ŷa re.

<sup>9</sup> Ha'e rã ombojeroviaaty yvy'ã rupi sacerdote kuery ikuai va'ekue pe ma mba'eve ndoapy ukai SENHOR pegua altar Jerusalém py oĩ va'e áry, mbojape mbovua revegua e'ŷ guyvy kuery reve ho'u okuapy va'eri.

<sup>10</sup> Ha'e gui huvixa omongy'apa avi Hinom ra'y kuery yvyugua re Tofete oĩ va'ekue, ha'e py avave rei gua'y e'ŷ vy guajy kuery ndoapyavei aguã ta'angaa Moloque peguarã.

<sup>11</sup> Oipe'apa avi kavaju Judá pygua huvixa kuery kuaray re ojeroviaa rupi omboaxa va'ekue. Ha'e va'e ma SENHOR pegua oka py optya va'ekue jaikeaty rexei, opy rupi opena va'ety Natã-Meleque renda katy'i rupi. Ha'e rã karóxa kuaray peguarã omboaxa va'ekue ma oapypa.

<sup>12</sup> Huvixa oipe'apa avi Acaz rendakue yrýry rupi altar ikuai va'ekue, oo áry rupi. Ha'e va'e altar ma Judá pygua huvixa kuery ha'e Manassés ojapo va'ekue SENHOR pegua oka mokoĩ oĩ va'e rupi. Ha'e va'e omboa'ypa vy oipe'apa heravy. Ha'e vy iku'ikue ma omombo Cedrom yakã áry rupi.

<sup>13</sup> Huvixa omongy'apa avi ombojeroviaaty Jerusalém katy'i yvy'ã rupi ikuai va'ekue, yvyty mba'emo omombaaty katy'i ijaxu e'ŷa re. Ha'e va'e ma Sidom pygua kuery ha'eve'ŷ va'e Astarote pe ojapo atyrã Israel pygua huvixa Salomão omopu'ã va'ekue, ha'e Moabe pygua kuery Camo pe, ha'e gui Amom ra'y kuery ruete ramigua ojeguarupy Milcom pe ojapo atyrã va'ekue voi.

<sup>14</sup> Ha'e rami ae avi omboa'ypa ita omopu'ã mbyre, ta'angaarã yvyra omopu'ã mbyre voi ojajapa. Ha'e vy ha'e nunga ikuaiague rupi omonyẽmba imoiny avakue kāgue.

*Betel py altar oĩ va'ekue ju omongy'apa ha'e oitypaague*

<sup>15</sup> Huvixa oity avi altar Betel py oĩ va'ekue, ha'e yvy'ã rupi ombojerovia atyrã Nebate ra'y Jeroboão ojapo va'ekue Israel kuery oguerojeavy aguã. Ombovaipa ombojerovi-aaty yvy'ã re oĩ va'ekue, altar oĩ va'ekue ma omongu'ipa, ha'e oapypa ta'angaarã yvyra omopu'ã mbyre.

<sup>16</sup> Ha'e gui huvixa Josias oma'ẽ-ma'ẽ vy oexa yvyra rupa yvy'ã re ikuai va'e. Ha'e va'e gui ma ikāgue ikuai va'ekue oguenoẽ ukapa vy oapypa altar oĩ va'e áry. Ha'e vy omongy'apa, SENHOR ayvu Nhanderuete remimbo'e omombe'u ma voiague rami vy.\*

<sup>17</sup> Ha'e gui huvixa oporandu:

— Mava'e rupa markaague tu pe py xee aexa va'e?

Ha'e rã tetã pygua avakue ombovai okuapy:

— Peva'e ma ava Nhanderuete remimbo'e Judá gui ou va'ekue rupa. Ha'e va'e ma omombe'u ma voi va'ekue Betel py altar oĩ va'e ndee remongy'a 'rãa — he'i okuapy.

<sup>18</sup> Ha'e ramo Josias aipoe'i:

— Tove ha'vy ta'itui. Avave rei topena eme ikāgue re — he'i. Ha'e ramo ha'e va'e kāgue ma ha'e kuery oeja okuapy, Samaria gui profeta ou va'ekue kāgue ha'e py oĩ va'e reve.

<sup>19</sup> Ha'e gui Samaria re tetã ikuai va'e rupi ju Josias ombovaipa yvy'ã rupi ombojerovia atyrã Israel pygua huvixa kuery ojapo va'ekue SENHOR ombopoxy aguã rami rive. Ha'e va'e re ju ojapo Betel rupi ojapoague ha'e javi rami.

<sup>20</sup> Ha'e vy altar ha'e py ikuai va'e áry ae ojukapa sacerdote kuery ombojeroviaaty yvy'ã rupi ikuai va'e peguare, ha'e vy ikāgue ma oapypa hi'áry. Ha'e gui mae ma ojevy ju Jerusalém katy.

*2 Crônicas 35.1-19*

<sup>21</sup> Ha'e gui ma heta va'e kuery ha'e javi pe huvixa omombe'u uka vy aipoe'i:

— Páscoa ára pejapo ngaru SENHOR Penderuete peguarã, kuaxia para re guexeve guarã ojapo va'ekue oĩa rami vy — he'i.

<sup>22</sup> Ha'e ramo Páscoa ára ngaru ojapo okuapy va'e ramigua ma neĩ peteigueve ma voi ndojapoai teri Israel rerekaoa kuery opena jave, neĩ Israel ha'e Judá pygua huvixa kuery opena jave ma voi.

<sup>23</sup> Huvixa Josias dezoito ma'etý re ma oĩa py ojapo okuapy Páscoa ára ngaru SENHOR peguarã, Jerusalém py.

*Josias Nhanderuete pe ete oikoague*

<sup>24</sup> Josias omomba avi omanogue mboayvua ha'e imba'evyky va'e kuery, opy rupi ta'angaa ikuai va'ekue, ta'angaa mboae, ha'e Judá yvy re ha'e Jerusalém py ojeguarupy ikuai va'ekue-ekue. Ha'e rami oiko ojapopa aguã kuaxia para SENHOR ropy sacerdote Hilquias ojou va'ekue re lei oĩa rami vy.

<sup>25</sup> Ha'e oĩ e'ý mbove ma ndoikoi teri huvixa ha'e ramigua, mba'eta opy'a, onhe'ẽ ha'e ombaraetea ha'e javi py SENHOR pe ojeko me'ẽ va'e, Moisés lei ombopara va'ekue ha'e javi rami vy. Ha'e va'e rire ma ha'ekue ramigua ete ju ndoikovei guive.

<sup>26</sup> Ha'e rami avi SENHOR nda'ipoxy ve'ýi guive Judá rovai, Manassés opa marã omboopoxy aguã rami ojapo vai rire.

<sup>27</sup> Ha'e rami vy SENHOR aipoe'i:

— Judá regua voi aipe'apa 'rã xerenonde gui, Israel regua aipe'aague rami ae ju. Ha'e rami vy aeja 'rã kova'e tetã Jerusalém xejeupe guarã aiporavo va'ekue ri, xevygua oo “Ha'e py oĩ 'rã xerery”, ha'eague voi.

*2 Crônicas 35.20-27*

\* <sup>23:16</sup> Ha'e va'e ayvu jaexa 'rã 1 Reis 13.1-32 py.

<sup>28</sup> Ha'e gui oïve rei tema Josias rekokue regua. Ha'e rami avi mba'emo ojapo va'ekue ha'e javi noï'rã teve kuaxia Judá pygua huvixa kuery rekokue oña re?

<sup>29</sup> Josias oï teri jave ma Egito pygua huvixa Faraó-Neco oo Eufrates yakã katy Assíria pygua huvixa rovai. Ha'e ramo Neco rovai ju Josias oo vy hexe opu'ã ramo ojuka, Megido py.

<sup>30</sup> Hetekue ma hembiguai kuery ogueru okuapy peteñ karóxa py. Jerusalém py oguerovaõ ma vy onhono porã okuapy huparã oï va'ekue py ae. Ha'e rire ma ha'e va'e yvy re ikuai va'e kuery Josias ra'y Jeoacaz ogueraa vy omoõ okuapy nguvixarã tuu rekovia.

### 2 Crônicas 36.1-4

<sup>31</sup> Jeoacaz oï ypy'i jave py ma vinte e três ma'etõ oguerek, ha'e gui mboapy jaxy re ete'i opena Jerusalém py. Ixy ma Hamutal, Libna pygua Jeremias rajy.

<sup>32</sup> Ha'e va'e ma ha'eve'ý va'e ojapo oikovy SENHOR renonde rupi, guamoõ kuery ojapoague ha'e javi rami.

<sup>33</sup> Ha'e ramo Faraó-Neco ombo'a uka imoiny Ribla py Hamate yvy re, Jerusalém py opena ve'ý aguã. Ha'e vy ijyvy re ikuai va'e gui okobra três mil e trezentos quilos prata ha'e trinta e três quilos ouro guigua.

<sup>34</sup> Huvixarã ma Faraó-Neco omoõ Josias ra'y Eliaquim, tuu Josias rekovia opena aguã. Ha'e vy hery oguerova vy Jeaquim ju omboery. Ha'e rã Jeoacaz ma Egito yvy katy ju ogueraa. Ha'e ramo omano ha'e py.

<sup>35</sup> Ha'e gui ma Jeaquim prata ha'e ouro omboaxa Faraó pe. Ha'e rami vy oyvy jave rupi ome'ẽ uka, Faraó ijayvuague rami vy ixupe omboaxapa aguã. Oyvy re ikuai va'e prata ha'e ouro ome'ẽmba aguã rami ojapo, peteñ-teñ gui oipe'a ha'e ae ome'ẽ ucaa rami vy, Faraó-Neco pe omboaxa aguã.

### 2 Crônicas 36.5-8

<sup>36</sup> Jeaquim ma vinte e cinco ma'etõ oguerek jave py huvixa oï ypy. Ha'e gui onze ma'etõ re opena Jerusalém py. Ixy ma Zebida, Ruma pygua Pedaías rajy.

<sup>37</sup> Ha'e va'e ma ha'eve'ý va'e anho ojapo oikovy SENHOR renonde rupi, guamoõ kuery ojapoague ha'e javi rami.

## 24

<sup>1</sup> Jeaquim oï jave py Babilônia pygua huvixa Nabucodonosor ou hexe opu'ã aguã. Ha'e ramo mboapy ma'etõ peve Jeaquim oiko hembiguai. Ha'e va'e rire ma Jeaquim ju opu'ã hexe.

<sup>2</sup> Ha'e ramo Jeaquim rovai SENHOR ombou caldeu kuery, Síria pygua, Moabe pygua ha'e Amom ra'y kuery. Judá yvy re ombou ombovaipa aguã, guembiguai profeta kuery rupi SENHOR ijayvuague rami vy.

<sup>3</sup> Ha'e nunga oiko Judá kuery re SENHOR ijayvuague rami vy ae, guenonde gui oipe'apa aguã, Manassés opa marã ojejavvyague káuxa,

<sup>4</sup> ojejavvy e'ý va'e kuery ruguy omoëague káuxa guive, Jerusalém tetã ha'e javi rupi huguy omoë rire. Ha'e rami ete ojejavvyague ma SENHOR nomboguexei.

<sup>5</sup> Ha'e gui oïve rei tema Jeaquim rekokue regua. Ha'e rami avi mba'emo ojapo va'ekue ha'e javi noï'rã teve kuaxia Judá pygua huvixa kuery rekokue oña re?

<sup>6</sup> Ha'e gui Jeaquim ndoikovevei'i ma guamoõ kueryague rami. Ha'e ramo ta'y Joaquim ju oï nguu rekovia.

<sup>7</sup> Ha'e rã Egito pygua huvixa ma neñ peteñgue ma voi noëvei oyvy gui. Mba'eta mba'emo oguerek ova'ekue ha'e javi Babilônia pygua huvixa oipe'apa ma, Egito katy'i yakã'i oï va'e guive Eufrates yakã peve.

### 2 Crônicas 36.9

<sup>8</sup> Joaquim ma dezoito ma'etõ oguerek jave py huvixa oï ypy. Ha'e gui mboapy jaxy re ete'i opena Jerusalém py. Ixy ma Neústa, Jerusalém pygua Elnatã rajy.

<sup>9</sup> Ha'e va'e ma ha'eve'ŷ va'e anho ojapo oikovy SENHOR renonde rupi, guamoĩ kuery ojapoague ha'e javi rami.

*Jerusalém gui yvatekueve Nabucodonosor escravo-rã ogueraapaague*

<sup>10</sup> Ha'e va'e jave py ma Jerusalém katy ou Babilônia pygua huvixa Nabucodonosor rembiguai kuery. Ha'e vy ojokopa tetã.

<sup>11</sup> Ha'e gui tetã re Babilônia pygua huvixa Nabucodonosor ae ou, guembiguai kuery ojokopa okuapy jave.

<sup>12</sup> Ha'e ramo Judá pygua huvixa Joaquim oo Babilônia pygua huvixa reve nhovaexí aguã. Ngupive ogueraa oxy, guembiguai kuery, ojeupagua yvatekueve ha'e joe opena va'ety kuery. Ha'e ramo Babilônia pygua huvixa ogueraa escravo-rã, oito ma'etŷ re ma oĩ jave py.

<sup>13</sup> Ogueraa avi SENHOR pegua opy mba'emo omoĩ porã mbyre ha'e javi, huvixa ro gui guive. SENHOR ijayvuague rami vy omboa'ypa tembiporu Israel pygua huvixa Salomão ojapo va'ekue, ouro guigua SENHOR pegua templo ropy guarã va'ekue meme.

<sup>14</sup> Ha'e rami py oipe'apa Jerusalém py ikuai va'ekue ha'e javi. Yvatekueve, avakue ipy'a guaxukue, mba'emo apoa ha'e ferro re ombo'eapo va'e kuery ha'e javi vy ma dez mil ogueraa. Avave rei ndopytai yvy re, iporiaukue'i e'ŷ vy.

<sup>15</sup> Babilônia katy ogueraa Joaquim. Jerusalém gui escravo-rã ogueraa avi huvixa xy, ta'yxy kuery ha'e hembiguai kuery ha'e javi.

<sup>16</sup> Avakue ipy'a guaxukueve sete mil ikuai va'e, mba'emo apoa ha'e ferro re ombo'eapo va'e kuery mil ikuai va'e joe opu'ã kuaa va'ekue meme ma Babilônia pygua huvixa ogueraapa escravo-rã.

<sup>17</sup> Ha'e gui Joaquim rekovia ma Babilônia pygua huvixa omoĩ tuvy'i Matanias. Ha'e va'e rery oguerova vy Zedequias ju omboery.

*2 Crônicas 36.10-16; Jeremias 52.1-3*

<sup>18</sup> Zedequias ma vinte e um ma'etŷ oguereco jave py oĩ ypy huvixa. Ha'e gui onze ma'etŷ re opena Jerusalém py. Ixy ma Hamutal, Libna pygua Jeremias rajy.

<sup>19</sup> Ha'e va'e ma ha'eve'ŷ va'e anho ojapo oikovy SENHOR renonde rupi, Joaquim ojapoague ha'e javi rami.

*Jeremias 39.1-7; 52.3-11*

<sup>20</sup> Ha'e nunga oiko Jerusalém tetã ha'e Judá pygua kuery rovai SENHOR ipoxy ramo, guenonde gui oipe'apa aguã. Ha'e gui ma huvixa Zedequias opu'ã Babilônia pygua huvixa rovai.

## 25

<sup>1</sup> Zedequias nove ma'etŷ re ma huvixa oĩ jave, dez jaxyra re dez araa py ma Babilônia pygua huvixa Nabucodonosor ou Jerusalém py, oxondaro kuery ha'e javi reve. Tetã re ipo'akaxe vy ojokopa okuapy jovaive re.

<sup>2</sup> Onze ma'etŷ re ma Zedequias oĩ peve ojokopa tetã.

<sup>3</sup> Irundy jaxyra re nove araa py ma tetã ha'e javi rupi karuai oiko rã ha'e pygua kuery ndojouwei ho'u va'erã.

<sup>4</sup> Ha'e va'e jave py oitya tetã kora. Ha'e ramo ha'e pygua avakue joe opu'ãa pygua onhamba pyáv. Mokoĩ kora pa'ũ okẽ oĩ va'e rupi oje'oi huvixa mba'e yvotyty oĩ va'e yvýry tape oĩ va'e rupi, caldeu kuery tetã jovaive re ikuai tei. Ha'e rã huvixa ma yvy joja reia rupi tape oĩ va'e rupi onha.\*

<sup>5</sup> Ha'e ramo caldeu regua xondaro kuery ma huvixa Zedequias rakykue oje'oi vy oupity Jericó tetã katy'i yvy joja reia oĩ va'e py. Hexevegua xondaro kuery oaĩmba vy oejapa oje'oivy.

\* <sup>25:4</sup> Caldeu kuery ma Babilônia pygua kuery ae. Ha'e gui caldeu kuery ruvixa ma Nabucodonosor (versículo 1).

<sup>6</sup> Ha'e ramo ojokua reve ogueraa Ribla py Babilônia pygua huvixa oĩ py. Ha'e ramo ijayvu opaga aguã re.

<sup>7</sup> Ha'e rami vy Zedequias oexaa py ae ojukapa ta'y kuery. Ha'e gui ma hexa omombupa. Mokoĩ corrente overa va'e guigua py ojokua reve ogueraa okuapy Babilônia katy.

*2 Crônicas 36.17-21; Jeremias 39.8-10; 52.12-27*

<sup>8</sup> Dezenove ma'etõ re ma Babilônia pygua huvixa Nabucodonosor oĩ jave py, peteĩ nhiruĩ jaxy re sete araa py ma peteĩ ou Jerusalém peve, Babilônia pygua huvixa rembiguai, jopya kuery ruvixa Nebuzaradã.

<sup>9</sup> Ha'e va'e ma oapypa SENHOR pegua oo, huvixa rogue ha'e Jerusalém tetã rupi oo ikuai va'ekue ha'e javi. Oo iporâgueve ikuai va'e oapypa.

<sup>10</sup> Ha'e rami vy jopya kuery ruvixa reve caldeu regua xondaro kuery ou va'ekue oitypa okuapy Jerusalém tetã yvýry rupi kora oĩ va'ekue.

<sup>11</sup> Ha'e gui jopya kuery ruvixa Nebuzaradã ma heta ogueraa escravo-rã: tetã rupi ikuai va'ekue, Babilônia pygua huvixa pe ojejopy uka va'ekue, heta va'e kuery regua guive.

<sup>12</sup> Ha'e rã iporiaukueve ma jopya kuery ruvixa oejapa uva nhotýarã ha'e mba'ety rupi omba'eapo va'erã.

<sup>13</sup> Caldeu kuery omopẽmba okuapy SENHOR pegua oo ytarã overa va'e guigua mokoïve hi'aĩ va'ekue, mba'emo renda ha'e yy mbotyarã overa va'e gui ojapo pyre, SENHOR pegua opy oĩ va'ekue. Ha'e vy overa va'e oĩ va'ekue ogueraapa Babilônia katy.

<sup>14</sup> Ogueraa avi oja, pá, tapyĩ araa, heakuã porã va'e ryrukue, tembiporurã overa va'e gui ojapo pyre, ha'e mba'emo omboetea rupi oiporua va'ekue ha'e javi.

<sup>15</sup> Jopya kuery ruvixa ogueraa avi tapyĩ ryru, hy'a guaxu, ha'e gui ouro ha'e prata guigua ha'e javi.

<sup>16</sup> Ha'e gui mokoïve oo yta hi'aĩ va'ekue, mba'emo ojoiaty ha'e mba'emo renderã Salomão ojapo va'ekue SENHOR pegua opy rupi guarã, ha'e va'e tembiporu re overa va'e oĩ va'ekue ha'e javi ma jaipapapa va'erã e'ŷ.

<sup>17</sup> Peteĩ-teĩ oo yta yvatekuea ma oito metros, ha'e gui hi'áry ma oĩ ju overa va'e guigua mokoï metro yvatea va'e. Hi'árygua yvýry rupi imbojeguaarã kya corrente guigua ha'e yvyra'a ra'angaa oĩ va'ekue ma overa va'e guigua meme. Ha'e rã hovai re ijyta hi'aĩ va'e reve ma joegua, kya imbojeguaarã oĩ va'e voi.

<sup>18</sup> Jopya kuery ruvixa ogueraa avi sacerdote yvateve va'e Seraías, sacerdote yvyïve va'e Sofonias, ha'e gui okẽ rarõa kuery mboapy ikuai va'ekue.

<sup>19</sup> Tetã gui ogueraa avi peteĩ xondaro kuery ruvixa oĩ va'ekue, ha'e gui peteĩ nhiruĩ avakue huvixa monogetaaty tetã py ojou va'ekue, ha'e xondarorã ha'e py ikuai va'e rery ombopara va'ety, ha'e gui sessenta avakue ha'e py hekoa va'ekue tetã rupi ojou va'ekue.

<sup>20</sup> Ha'e va'e kuery ma jopya kuery ruvixa Nebuzaradã ojokua reve ogueraapa Ribla py Babilônia pygua huvixa oĩa py.

<sup>21</sup> Ha'e ramo Ribla py ae Babilônia pygua huvixa oipyxo uka vy ojuka ukapa, Hamate yvy re. Ha'e rami py Judá kuery ijyvy gui ogueraapaa escravo-rã.

<sup>22</sup> Babilônia pygua huvixa Nabucodonosor ma Safã ra'y Aicão ra'y Gedalias omoĩ Judá yvy re oeja va'ekue re opena va'erã.

### *Ismael Gedalias ojukaague*

<sup>23</sup> Ha'e gui xondaro ruvixa kuery, hexeveguia avakue reve oendu okuapy Babilônia pygua huvixa Gedalias ju huvixarã omoñague. Ha'e rami vy Mispa py Gedalias oĩa py ha'e kuery ou okuapy oikuaa porâve aguã. Ha'e va'e kuery regua ma Netanias ra'y Ismael, Careá ra'y Joanã, netofatita Tanumete ra'y Seraías ha'e maacatita ra'y Jazanias. Guexeveguia avakue reve ou okuapy.

<sup>24</sup> Ha'e ramo Gedalias onhemboayvu ha'e kuery pe ha'e hexeveguia avakue ikuai va'e pe. Ha'e vy aipoe'i:

— Pekyje eme caldeu kuery gui. Pepyta tema nhandeyvy re, ha'e penhe'ẽ rendu Babilônia pygua huvixa. Ha'e ramo peẽ kuery pendekuai porã 'rã — he'i.

<sup>25</sup> Ha'e rami teĩ sete jaxyia py ou Netanias ra'y Ismael, Elisama ramymino va'e, ipo'akave va'e ra'y. Hexeve ou avi dez avakue. Ha'e va'e kuery Gedalias oipyxo ramo omano, judeu ha'e caldeu kuery Mispa py hexeve ikuai va'ekue voi.

<sup>26</sup> Ha'e ramo heta va'e kuery ha'e javi caldeu kuery gui okyje vy opu'ãmba oje'oivy, yvyigueve ha'e yvatekueve, xondaro ruvixa kuery voi oje'oi Egito yvy katy.

*Jeremias 52.31-34*

<sup>27</sup> Judá pygua huvixa Joaquim dezessete ma'etã ma escravo-rã ogueraague ojapo rire, doze jaxyia re vinte e sete araa py ma Evil-Merodaque oĩ Babilônia pygua huvixarã. Ha'e va'e ma Judá pygua huvixa Joaquim opoi nhuã py ombo'aague gui.

<sup>28</sup> Ha'e vy hexeve ha'eve reia'i rupi ijayvu vy ombovateve amboae huvixa kuery Babilônia py hexeve ikuai va'e gui.

<sup>29</sup> Ha'e ramo Joaquim oao nhuã py oiporu va'ekue omboekovia vy huvixa renonde ae okaru oikovy ko'ẽ nhavõ, oikoa pukukue re.

<sup>30</sup> Ha'e vy ko'ẽ nhavõ huvixa po gui ae ojopy mba'emo repyrã, oikovea ja guarã.

## Jypy Crônicas huvixa kuery rekokue oĩa Jypy crônicas huvixa kuery rekokue oĩa

Kova'e kuaxia para re ma omombe'ua porâve ju mba'emo omombe'ua ma va'ekue, omo'arandu ha'e ombopy'a guaxu aguã judeu kuery escravo-rã ogueraa ague gui oyvy re ojevy va'ekue. Ha'e rami vy jypy omombe'u oyvy re ojevy va'ekue ramoĩ kuery rery. Ha'e gui ma huvixa Davi openaague ju omombe'u vy ima'endu'a yvatea ha'e ipo'akaa re. Omombe'u avi Senhor pegua templo peguarã Davi oguereko katupaague.

Heta va'e kuery oendua py Davi oguerovy'a Senhor. Ha'e vy aipoe'i: "Senhor Israel kuery ruete, Oreruete reiko va'e, ndere ae ta'ima'endu'a porãa yma ete guive raka'eve rã peve. ... Ndere ae oĩ ndepo'aka aguã, ha'e pavẽ ikuai va'e aryve rupi ndeyvateve va'e repenaa py. ... Ha'e gui aãy ma Oreruete, roguerovy'a vy rogueroporaei rokuapy nderery hexakãmba va'e rupi" (29.10b, 11b, 13).

### *Adão ramymino kuery rery oĩa*

#### *Gênesis 5.1-32*

<sup>1</sup> Adão, ha'e gui Sete, Enos,

<sup>2</sup> Cainã, Maalalel, Jaredé,

<sup>3</sup> Enoque, Metusalém, Lameque,

<sup>4</sup> Noé, Sem, Cam ha'e Jafé.\*

#### *Gênesis 10.1-32*

<sup>5</sup> Jafé ra'y kuery ma Gômer, Magogue, Madai, Javã, Tubal, Meseque ha'e Tiras.

<sup>6</sup> Gômer ra'y kuery ma Asquenaz, Rifate ha'e Togarma.

<sup>7</sup> Javã ra'y kuery ma Elisá, Társis, Quitim ha'e Rodaním.

<sup>8</sup> Ha'e gui Cam ra'y kuery ma Cuxé, Mizraim, Pute ha'e Canaã.

<sup>9</sup> Cuxé ra'y kuery ma Sebá, Havilá, Sabtá, Raamá ha'e Sabtecá. Raamá ra'y kuery ma Sabá ha'e Dedã.

<sup>10</sup> Cuxé ra'y ma Ninrode. Ha'e va'e ma jypy'i ipo'akapa va'e oiko yyv re.

<sup>11</sup> Mizraim ra'y kuery ma Ludim, Anamim, Leabim, Naftuim,

<sup>12</sup> Patrusim, Casluim (ha'e va'e ma filisteu kuery ypy'i) ha'e Caftorim.

<sup>13</sup> Canaã ra'y kuery ma jypygua Sidom, ha'e gui Hete,

<sup>14</sup> ha'e jebuseu kuery, amorreu, girkaseu,

<sup>15</sup> heveu, arqueu, sineu,

<sup>16</sup> arvadeu, zemareu ha'e hamateu kuery.

<sup>17</sup> Ha'e gui Sem ra'y kuery ma Elão, Assur, Arfaxade, Lude, Arã, Uz, Hul, Geter ha'e Meseque.

<sup>18</sup> Arfaxade ra'y ma Selá, ha'e Selá ra'y ma Héber.

<sup>19</sup> Héber ra'y kuery ma mokoõ oiko: Peteñ rery ma Pelegue, mba'eta ha'e va'e oiko jave py yyv omboja'oa.<sup>†</sup> Ha'e rã tyvy rery ma Joctã.

<sup>20</sup> Joctã ra'y ma Almodá, Salefe, Hazar-Mavé, Jerá,

<sup>21</sup> Hadorão, Uzal, Dicla,

<sup>22</sup> Ebal, Abimael, Sabá,

<sup>23</sup> Ofir, Havilá ha'e Jobabe. Ha'e va'e kuery ha'e javi ma Joctã ra'y kuery meme.

#### *Gênesis 11.10-32*

<sup>24</sup> Sem, ha'e gui Arfaxade, Selá,

<sup>25</sup> Héber, Pelegue, Reú,

<sup>26</sup> Serugue, Naor, Terá,

\* <sup>1:4</sup> Sem, Cam ha'e Jafé ma Noé ra'y kuery ikuai (Gênesis 5.32). † <sup>1:19</sup> Tery Pelegue ma "Mboja'o" 'ea.

<sup>27</sup> ha'e gui Abrão, hery mboae Abraão va'e.

*Gênesis 25.12-18*

<sup>28</sup> Abraão ra'y kuery ma Isaque ha'e Ismael.

<sup>29</sup> Po rami ma ha'e va'e ra'y kuery: Ismael ra'y jypygua ma Nebaiote, ha'e gui Quedar, Adbeel, Mibsão,

<sup>30</sup> Misma, Dumá, Massá, Hadade, Temá,

<sup>31</sup> Jetur, Nafis ha'e Quedemá. Ha'e va'e kuery ma Ismael ra'y kuery meme.

*Gênesis 25.1-6*

<sup>32</sup> Ha'e gui Abraão ra'yxy jevy Quetura opi'a kuery oikuavã'i va'ekue ma Zinrã, Jocsã, Medã, Midiã, Isbaque ha'e Suá. Jocsã ra'y kuery ma Sabá ha'e Dedã.

<sup>33</sup> Midiã ra'y kuery ma Efá, Efer, Enoque, Abida ha'e Elda. Ha'e va'e kuery ma Quetura pi'a kuery meme.

<sup>34</sup> Ha'e gui Abraão ra'y ma Isaque. Isaque ra'y kuery ma Esaú ha'e Israel.

*Gênesis 36.1-19*

<sup>35</sup> Esaú ra'y kuery ma Elifaz, Reuel, Jeús, Jalão ha'e Coré.

<sup>36</sup> Elifaz ra'y kuery ma Temã, Omar, Zefi, Gaetã, Quenaz, Timna ha'e Amaleque.

<sup>37</sup> Reuel ra'y kuery ma Naate, Zerá, Samá ha'e Mizá.

*Gênesis 36.20-30*

<sup>38</sup> Ha'e gui Seir ra'y kuery ma Lotã, Sobal, Zibeão, Aná, Diso, Eser ha'e Disã.

<sup>39</sup> Lotã ra'y kuery ma Hori ha'e Homã. Ha'e gui Lotã reindy ma Timna.

<sup>40</sup> Sobal ra'y kuery ma Aliã, Manaate, Ebal, Sefô ha'e Onã. Zibeão ra'y kuery ma Aiá ha'e Aná.

<sup>41</sup> Aná ra'y ma Disom. Disom ra'y kuery ma Hanrã, Esbã, Itrã ha'e Querã.

<sup>42</sup> Eser ra'y kuery ma Bilã, Zaavã ha'e Jaacã. Disã ra'y kuery ma Uz ha'e Arã.

*Gênesis 36.31-43*

<sup>43</sup> Pova'e kuery ma Edom yvy re huvixave oĩ va'ekue, Israel kuery ruvixave oĩ e'ŷ teri jave: Beor ra'y Bela. Ha'e va'e retã openaaty ma Dinabá.

<sup>44</sup> Ha'e gui Bela omano rire hekivia oĩ Bozra pygua Zera ra'y Jobabe.

<sup>45</sup> Jobabe omano rire hekivia oĩ temanita kuery yvy guigua Husão.

<sup>46</sup> Husão omano rire hekivia oĩ Bedade ra'y Hadade. Ha'e va'e ma oitypa Midiã pygua kuery Moabe yvy re. Hetã openaaty ma Avite.

<sup>47</sup> Ha'e gui Hadade omano rire hekivia oĩ Masreca pygua Samlá.

<sup>48</sup> Samlá omano rire hekivia oĩ Saul. Ha'e va'e ma Eufrates yakã yvýry Reobote oĩ va'e guigua.

<sup>49</sup> Ha'e gui Saul omano rire hekivia oĩ Acbor ra'y Baal-Hanã.

<sup>50</sup> Baal-Hanã omano rire hekivia oĩ Hadade. Ha'e va'e retã openaaty ma Paí. Ha'e rã ta'yxy ma Matrede memby Meetabel, Me-Zaabe remiarirõ va'e.

<sup>51</sup> Ha'e gui Hadade ju omano.

Po rami ma Edom pygua yvatekueve rery: yvatekueve Timna, Alva, Jetete,

<sup>52</sup> Oolibama, Elá, Pinom,

<sup>53</sup> Quenaz, Temã, Mibzar,

<sup>54</sup> Magdiel, ha'e gui Irã. Ha'e va'e kuery ma Edom pygua yvatekueve meme.

## 2

*Gênesis 35.22-26*

<sup>1</sup> Ha'e gui pova'e ma Israel ra'y kuery: Rúben, Simeão, Levi, Judá, Issacar, Zebulom,

<sup>2</sup> Dã, José, Benjamim, Naftali, Gade ha'e Aser.

*Judá ramymino kuery rery oĩa*

<sup>3</sup> Ha'e gui Judá ra'y kuery ma Er, Onã ha'e Selá. Ha'e va'e kuery mboapy ma Canaã pygua Bate-Sua pi'a ikuai raka'e. Ha'e gui Judá ra'y jypygua Er ma SENHOR renonde rupi heko vai ramo ojuka.

<sup>4</sup> Ha'e rã gua'y ra'yxy Tamar re Judá ta'yague ma Perez ha'e Zera. Judá ra'y kuery ha'e javi vy ma peteñ nhiruñ ikuai.

<sup>5</sup> Ha'e gui Perez ra'y kuery ma Hezrom ha'e Hamul.

<sup>6</sup> Zera ra'y kuery ma Zinri, Etã, Hemã, Calcol ha'e Dara. Ha'e javi vy ma peteñ nhiruñ ikuai.

<sup>7</sup> Carmi ra'y ma Acar. Ha'e va'e ma Israel kuery ikuai axy aguã rami ojapo ha'eve'ý va'e py ojejavy vy.

<sup>8</sup> Etã ra'y ma Azarias.

<sup>9</sup> Hezrom ra'y kuery ikuai va'ekue ma Jerameel, Rão ha'e Quelubai.

<sup>10</sup> Ha'e gui Rão ra'y ma Aminadabe. Aminadabe ra'y ma Naassom, Judá regua kuery ruvixa va'e.

<sup>11</sup> Naassom ra'y ma Salma, ha'e Salma ra'y ma Boaz.

<sup>12</sup> Boaz ra'y ma Obede, ha'e Obede ra'y ma Jessé.

<sup>13</sup> Jessé ra'y jypygua ma Eliabe, mokoña ma Abinadabe, mboapya ma Siméia,

<sup>14</sup> irundaya ma Natanael, peteñ nhiruña ma Radai,

<sup>15</sup> mboapy memea ma Ozém, ha'e gui sete-a ma Davi.

<sup>16</sup> Ha'e va'e reindy kuery ma Zeruia ha'e Abigail. Zeruia pi'a kuery ma mboapy: Abisai, Joabe ha'e Asael.

<sup>17</sup> Abigail ma oikuavã'i Amasa. Ha'e rã Amasa ru ma Ismael guigua Jéter.

<sup>18</sup> Ha'e gui Hezrom ra'y Calebe ma gua'y kuery oguereko gua'yxy Azuba ha'e gui Jeriote re. Ha'e va'e pi'a kuery ma Jeser, Sobabe ha'e Ardom.

<sup>19</sup> Ha'e gui Azuba omano ma rire gua'yxyrã Calebe ogueraa Efrata. Ha'e va'e re ta'ya ma Hur.

<sup>20</sup> Hur ra'y ma Uri, ha'e Uri ra'y ma Bezalel.

<sup>21</sup> Ha'e gui Hezrom ma Gileade ru Maquir rajy re omenda, sessenta ma'etý ma oguerekoa py. Ha'e ramo oikuavã'i Segube.

<sup>22</sup> Segube ra'y ma Jair. Ha'e va'e ma vinte e três tetã re opena Gileade yvy rupi.

<sup>23</sup> Ha'e rami teñ Jair pegua tekaoa ikuai va'ekue ma Gesur ha'e Arã oipe'apa, Quenate yvýry tekaoa'i ikuai va'e ha'e javi guive, ha'e javi vy ma sessenta tekaoa ikuai. Ha'e va'e kuery ha'e javi ma Gileade ru Maquir ra'y kuery meme.

<sup>24</sup> Calebe-Efrata py Hezrom omano ma rire Hezrom ra'yxy Abia oikuavã'i Tecoa rurã Asur.

<sup>25</sup> Ha'e gui pova'e ma Hezrom ra'y jypygua Jerameel ra'y kuery: jypygua Rão, ha'e gui Buna, Orém, Ozém ha'e Áias.

<sup>26</sup> Ha'e gui Jerameel amboae ju ogueraa gua'yxyrã, Atara hery va'e. Ha'e va'e ma Onã xyra.

<sup>27</sup> Jerameel ra'y jypygua Rão ra'y kuery ma Maaz, Jamim ha'e Equer.

<sup>28</sup> Onã ra'y kuery ma Samai ha'e Jada. Samai ra'y kuery ma Nadabe ha'e Abisur.

<sup>29</sup> Abisur ra'yxy rery ma Abail. Ha'e va'e oguereko Abã ha'e Molide.

<sup>30</sup> Nadabe ra'y kuery ma Selede ha'e Apaim. Ha'e rã Selede ma ta'y e'ý re omano.

<sup>31</sup> Apaim ra'y ma Isi. Isi ra'y ma Sesã. Sesã ra'y ma Alai.

<sup>32</sup> Ha'e gui Samai ryvy Jada ra'y kuery ma Jéter ha'e Jônatas. Ha'e rã Jéter ma omano ta'y e'ý re.

<sup>33</sup> Jônatas ra'y kuery ma Pelete ha'e Zaza. Ha'e va'e kuery ma Jerameel ra'y kuery.

<sup>34</sup> Ha'e gui Sesã ma ndata'yi, tajy kuery anho. Ha'e rami avi Sesã oguereko peteñ guembiguai Egito guigua, Jara hery va'e.

<sup>35</sup> Ha'e gui Jara ra'yxyrã ma Sesã ome'ë guajy. Ha'e va'e ma oikuavã'i Atai.

<sup>36</sup> Atai ra'y ma Natã, ha'e Natã ra'y ma Zabade.

<sup>37</sup> Zabade ra'y ma Eflal, ha'e Eflal ra'y ma Obede.

<sup>38</sup> Obede ra'y ma Jeú, ha'e Jeú ra'y ma Azarias.

<sup>39</sup> Azarias ra'y ma Heles, ha'e Heles ra'y ma Eleasa.

<sup>40</sup> Eleasa ra'y ma Sismai, ha'e Sismai ra'y ma Salum.

<sup>41</sup> Salum ra'y ma Jecamias, ha'e rã Jecamias ra'y ma Elisama.

<sup>42</sup> Ha'e gui Calebe ra'y jypygua, Jerameel ryke'y va'e ma Maressa. Ha'e va'e ma Zife ru oiko. Maressa ra'y ma Abi-Hebrom.

<sup>43</sup> Hebrom ra'y kuery ma Coré, Tapua, Requém ha'e Sema.

<sup>44</sup> Sema ra'y ma Jorqueão rurã Raão. Ha'e gui Requém ra'y ma Samai.

<sup>45</sup> Samai ra'y ma Maom, ha'e Maom ra'y ma Bete-Zur.

<sup>46</sup> Ha'e gui Calebe ra'yxy jevy Efá ma oikuavã'i Harã, Mosa ha'e Gazez. Ha'e Harã ra'y ma Gazez.

<sup>47</sup> Jadai ra'y kuery ma Regém, Jotão, Gesã, Pelete, Efá ha'e Saafe.

<sup>48</sup> Ha'e gui Calebe ra'yxy jevy Maaca oguereko Seber ha'e Tiraná.

<sup>49</sup> Maaca oikuavã'i avi Madmana rurã Saafe, ha'e gui Macbena ha'e Gibeá rurã Seva. Ha'e gui Acsa ma Calebe rajy ae.

<sup>50</sup> Ha'e va'e kuery ma Calebe ra'y kuery meme.

Ha'e gui Efrata ra'y jypygua Hur ra'y kuery ma Quiriate-Jearim rurã Sobal,

<sup>51</sup> ha'e gui Belém pygua kuery rurã Salma, ha'e Bete-Gade rurã Harefe.

<sup>52</sup> Ha'e gui Quiriate-Jearim pygua kuery ru Sobal ra'y kuery ma Haroé ha'e Hazi-Hamenuote.

<sup>53</sup> Ha'e gui Quiriate-Jearim pygua kuery regua ikuai va'e ma itrita kuery, puteu, sumateu ha'e misraeu kuery. Ha'e va'e kuery guigua ma zoratita ha'e estaoleu kuery.

<sup>54</sup> Ha'e gui Salma ra'y kuery ma Belém netofatita kuery reve, Atrote-Bete-Joabe ha'e Hazi-Hamanaati, zoreu va'e.

<sup>55</sup> Lei re nhombo'e va'ety kuery Jabez py ikuai va'e regua ma tiratita, simeatita ha'e sucatita kuery. Ha'e va'e kuery ae ma queneu kuery Hamate gui ou va'ekue. Ha'e va'e ma Recabe regua kuery ru ae.

### 3

#### *2 Samuel 3.2-5*

<sup>1</sup> Pova'e ma Davi ra'y kuery Hebron tetã py itui'i va'ekue. Jypygua ma Jezreel pygua Ainoã pi'a Amnom. Mokoña ma Carmelo pygua Abigail pi'a Daniel.

<sup>2</sup> Mboapya ma Gesur pygua huvixave Talmai rajy Maaca pi'a Absalão. Ha'e gui irundy ma Hagite pi'a Adonias.

<sup>3</sup> Peteñ nhiruña ma Abital pi'a Sefatias. Mboapya memea ma ta'yxy Eglá pi'a Itreão.

<sup>4</sup> Ha'e va'e mboapya meme ta'y kuery Hebron tetã py itui'i va'ekue, ha'e py sete ma'etýa ha'e mboapya meme jaxy re huvixave oĩ javé.

Ha'e va'e rire ma Jerusalém tetã py ju trinta e três ma'etýa re oĩ.

<sup>5</sup> Pova'e ma Jerusalém py ta'y kuery itui'i va'ekue: Siméia, Sobabe, Natã ha'e Salomão. Ha'e va'e irundy ma Amiel rajy Bate-Seba pi'a kuery.

<sup>6</sup> Ha'e va'e rire ju ta'ya ma Ibar, Elisama, Elifelete,

<sup>7</sup> Nogá, Nefegue, Jafia,

<sup>8</sup> Elisama, Eliada ha'e Elifelete, nove ikuai ha'e javi vy.

<sup>9</sup> Ha'e va'e kuery ma Davi ra'y kuery meme, ta'yxy jevy pi'a kuery rery oĩ e'ý re. Ha'e gui Tamar ma ha'e kuery reindy ae avi.

#### *Salomão ramymino kuery rery oĩa*

<sup>10</sup> Ha'e gui Salomão ra'y ma Roboão, Roboão ra'y ma Abias, Abias ra'y ma Asa, Asa ra'y ma Josafá,

<sup>11</sup> Josafá ra'y ma Jorão, Jorão ra'y ma Acazias, Acazias ra'y ma Joás,

<sup>12</sup> Joás ra'y ma Amazias, Amazias ra'y ma Azarias, Azarias ra'y ma Jotão,

<sup>13</sup> Jotão ra'y ma Acaz, Acaz ra'y ma Ezequias, Ezequias ra'y ma Manassés,

<sup>14</sup> Manassés ra'y ma Amom, Amom ra'y ma Josias.

15 Ha'e gui Josias ra'y kuery ma pova'e: ta'y jypygua ma Joanã, mokoña ma Jeoaquim, mboapya ma Zedequias, irundaya ma Salum.

16 Ha'e gui Jeoaquim ra'y kuery ma Jeconias ha'e Zedequias.

17 Jeconias escravo-rã ogueraa pyrã ra'y kuery ma Sealtiel,

18 Malquirão, Pedaías, Senazar, Jecamias, Hosama ha'e Nedabias.

19 Pedaías ra'y kuery ma Zorobabel ha'e Simei. Zorobabel ra'y kuery ma Mesulão ha'e Hananias. Ha'e va'e kuery reindy ma Selomite.

20 Ikuai avi Hasuba, Oel, Berequias, Hasadias ha'e Jusabe-Hesede, peteñ nhiruñ ikuai ha'e javi vy.

21 Ha'e gui Hananias ra'y kuery ma Pelatias ha'e Jesaías. Ikuai avi Refaías ra'y kuery, Arnã ra'y kuery, Obadias ra'y kuery ha'e Secanias ra'y kuery.

22 Secanias ra'y ma Semaías. Ha'e rã Semaías ra'y kuery ma Hatus, Igal, Barias, Nearias ha'e Safate, mboapy meme ikuai ha'e javi vy.

23 Ha'e gui Nearias ra'y kuery ma Elioenai, Ezequias ha'e Azricão, mboapy ikuai ha'e javi vy.

24 Elioenai ra'y kuery ma Hodavias, Eliasibe, Pelaías, Acube, Joanã, Delaías ha'e Anani, sete ikuai ha'e javi vy.

## 4

### *Judá ramymino kuery rery oĩa*

1 Ha'e gui Judá ra'y kuery ma Perez, Hezrom, Carmi, Hur ha'e Sobal.

2 Sobal ra'y Reaías ra'y ma Jaate. Jaate ra'y kuery ma Aumai ha'e Laade. Ha'e va'e kuery regua ma zoratita ikuai.

3 Pova'e ma Etã ru ra'y kuery: Jezreel, Isma ha'e Idbas. Ha'e kuery reindy rery ma Hazelelponi.

4 Ikuai avi Gedor ru Penuel ha'e Husa ru Ezer. Pova'e kuery ma Hur ra'y kuery meme. Ha'e va'e ma Efrata ra'y jypygua, ha'e Belém pygua kuery ru.

5 Ha'e gui Tecoa ru Asur ma mokoñ ogueraa gua'yxyrã: Hela ha'e Naara.

6 Naara ma oikuavã'i Auzão, Héfer, Temeni ha'e Haastari. Ha'e va'e kuery ma Naara pi'a kuery meme.

7 Hela pi'a kuery ma Zerete, Izar ha'e Etnã.

8 Coz ma Anube ha'e Zobeba ru, ha'e Harum ra'y Aarel guigua kuery ru avi.

9 Jabez ma guyvy kuery gui omboeteave va'e. Ixy Jabez omboery vy aipoe'i: "Mba'eta haxy ete py aikuavã'i va'ekue", he'i.\*

10 Ha'e gui Jabez ma ojerure Israel kuery ruete pe. Ha'e vy aipoe'i:

— Xemoingo porã tamo ra'e, ha'e emoïve xeyvyrã. Tove xereve riae toñ ndepo, ha'e xepe'a mba'emo vai gui, xemoingo axyarã ou e'ý aguã rami — he'i. Ha'e ramo Nhanderuete ojapo ojerureague.

11 Ha'e gui Suá ryke'y Quelube ra'y ma Meir. Ha'e va'e ma Estom ru.

12 Estom ra'y ma Bete-Rafa, Paséia ha'e Ir-Naás pygua kuery rurã Teína. Ha'e va'e avakue ma Reca pygua meme.

13 Quenaz ra'y kuery ma Otniel ha'e Seraías. Ha'e rã Otniel ra'y ma Hataate.

14 Meonotai ra'y ma Ofra, ha'e Seraías ra'y ma Joabe. Ha'e va'e ma yvyugua py mba'emo ojapo kuaa va'e kuery retã ojapo ypy va'ekue, ha'e py mba'emo ojapoa rupi ikuai va'e meme.

15 Ha'e gui Jefoné ra'y Calebe ra'y kuery ma Iru, Elá ha'e Naã. Ha'e gui Elá ra'y ma Quenaz.

16 Jealelel ra'y kuery ma Zife, Zifa, Tiria ha'e Asareel.

17 Ezra ra'y kuery ma Jéter, Merede, Efer ha'e Jalom. Ha'e gui Merede ma gua'yxyrã ogueraa Faraó rajy Bitia. Ha'e va'e pi'a kuery ma Miriã, Samai ha'e Estemoa rurã Isbá.

\* 4:9 Ha'e kuery ayvu py ma tery Jabez "Haxy va'e" 'ea rami onhendu.

<sup>18</sup> Ha'e gui ta'yxy Judá regua va'e oikuavã'i Gedor pygua kuery rurã Jerede, Socó pygua kuery rurã Héber, ha'e gui Zanoa pygua kuery rurã Jecutiel.

<sup>19</sup> Ha'e gui Hodias ra'yxy Naã reindy va'e pi'a kuery ma Garmi pygua Abiqueila, ha'e Maacá pygua Estemoa.

<sup>20</sup> Simão ra'y kuery ma Amnom, Rina, Ben-Hanã ha'e Tilom. Ha'e gui Isi ra'y kuery ma Zoete ha'e Bene-Zoete.

<sup>21</sup> Ha'e gui Judá ra'y Selá ra'y kuery ma Leca pygua kuery rurã Er ha'e Maressa pygua kuery rurã Lada. Selá ma linho re omba'eapo va'e kuery ru avi, Asbéia py hekoia va'e.

<sup>22</sup> Oiko avi Joquim, Cozeba pygua kuery, Joás ha'e Sarafe pygua kuery Moabe re ipo'aka va'e, Jasubi-Leém pygua kuery guive. Ha'e va'e ma ymavegua kuery rery ombopara pyre.

<sup>23</sup> Ha'e kuery ma nhae'ũ re omba'eapo va'e, Netaim ha'e Gedera py hekoia va'e. Ha'e py ae ikuai nguvixave pe omba'eapo aguã.

### *Simeão ramymino kuery rery oĩa*

<sup>24</sup> Ha'e gui Simeão ra'y kuery ma Nemuel, Jamim, Jaribe, Zerá ha'e Saul.

<sup>25</sup> Ha'e va'e ra'y ma Salum, Salum ra'y ma Mibsão, Mibsão ra'y ma Misma.

<sup>26</sup> Ha'e gui Misma ra'y ma Hamuel, Hamuel ra'y ma Zacur, Zacur ra'y ma Simei.

<sup>27</sup> Simei ra'y kuery ma dezesseis ikuai, ha'e rã tajy kuery ma mboapy meme. Ha'e rã tyvy kuery ma ndata'y retaive meme rei, ndaetaive guive Judá ramymino kuery rami e'ŷ.

<sup>28</sup> Ha'e kuery ma Berseba py hekoia va'e, ha'e Moladá py, Hazar-Sual,

<sup>29</sup> Bila, Ezém, Tolade,

<sup>30</sup> Betuel, Horma, Ziclague,

<sup>31</sup> Bete-Marcabote, Hazar-Susim, Bete-Biri ha'e Saaraim py. Ha'e va'e tetã py ikuai Davi huvixave oĩ peve.

<sup>32</sup> Ha'e kuery pegua tekao'i ikuai va'e ma Etã, Aim, Rimom, Toquéim ha'e Asã, peteñ nhiruñ tetã.

<sup>33</sup> Ha'e va'e tetã yvýry rupi tekao'i ikuai va'e ha'e javi, Baal peve. Ha'e py ae ha'e kuery ikuai, ha'e oguereko avi kuaxia guamoñ kuery rery oĩa.

<sup>34</sup> Peteñ-teñ regua huvixa omboparaa hery rupi: Mesobabe, Janleque, Amazias ra'y Josa,

<sup>35</sup> ha'e gui Joel ha'e Josibias ra'y Jeú. Josibias ma Asiel ra'y, ha'e Asiel ma Seraías ra'y.

<sup>36</sup> Ha'e gui Elioenai, Jaacobá, Jesoaías, Asaías, Adiel, Jesimiel, Benaia,

<sup>37</sup> ha'e gui Sifi ra'y Ziza. Sifi ma Alom ra'y, Alom ma Jedaías ra'y, Jedaías ma Sinri ra'y, Sinri ma Semaías ra'y.

<sup>38</sup> Ha'e va'e kuery ramymino kuery hetave tema ový.

<sup>39</sup> Ha'e rami vy Gedor yvy re ovaẽ ovya peve oje'oi, yvyugua gui kuaray oua katy oje'oi nhuñ oeka vy guymba kuery vixa'i omongaru aguã.

<sup>40</sup> Ha'e py ma ojou nhuñdy oata e'ŷ va'e, ha'eve reia, ha'e yvy voi tuvixaa ojou, mba'eve noña, ha'e ový'a rei aguã va'e. Ha'e py ma Cam ramymino kuery rekoague.

<sup>41</sup> Ha'e gui hery ombopara pyre ma oupa okuapy Judá pygua huvixa Ezequias oĩ jave py. Ha'e rami vy ha'e py oo ikuai va'e oitypa vy ojukapa meunita kuery ha'e py ojou va'e rei. Omomba ete aŷ peve guarã. Ha'e rami vy ha'e kuery ikuaiague py ae ikuai, mba'eta ha'e py oĩ nhuñdy hymba kuery vixa'i okaru aguã.

<sup>42</sup> Ha'e gui ha'e kuery va'e regua ae, Simeão ramymino kuery, quinhentos avakue oje'oi Seir yvyty katy. Ha'e va'e kuery rerekao kuery ma Pelatias, Nearias, Refaías ha'e Uziel, Isi ra'y kuery va'e meme.

<sup>43</sup> Ha'e rami vy ojukapa nho amalequita kuery gui oo jepe va'ekue. Ha'e vy ha'e kuery ju ikuai ha'e py, aŷ peve.

<sup>1</sup> Ha'e gui Rúben ramymino kuery ju. (Ha'e va'e ma Israel ra'y jypygua va'eri otekoavy nguu rupa py ae. Ha'e nunga rupi ta'y jypygua oikoa regua ixugui oipe'aa vy Israel ra'y José pe ju omboaxaa. Ha'ekue rami ju jypygua oikoa omombe'ua py ma hery noī.\*

<sup>2</sup> Ha'e rami avi Judá anhetē guyvy ha'e guyke'y kuery gui ipo'akave va'e, ha'e hamymino oiko huvixarā, va'eri José pe ae omboaxaa jypygua pegua.)

<sup>3</sup> Ha'e gui Rúben ra'y kuery ma Enoque, Palu, Hezrom ha'e Carmi.

<sup>4</sup> Joel ra'y ma Semaías, Semaías ra'y ma Gogue, Gogue ra'y ma Simei,

<sup>5</sup> Simei ra'y ma Mica, Mica ra'y ma Reaías, Reaías ra'y ma Baal,

<sup>6</sup> Baal ra'y ma Beera, Assíria pygua huvixa Tiglate-Pileser escravo-rā ogueraa va'ekue. Ha'e va'e ma Rúben ramymino kuery ruvixa oiko.

<sup>7</sup> Ha'e gui tyvy kuery rery omboparaa avi hamymino kuery ikuiaia rami, peteī-teī oo pygua rery oīa. Ha'e va'e kuery akārā omoī mbyre ma Jeiel, ha'e gui Zacarias,

<sup>8</sup> Azaz ra'y Bela, Sema ramymino ha'e Joel ramymino kuery regua. Ha'e va'e kuery ma Aroer py hekoa va'ekue, Nebo ha'e Baal-Meom peve oje'oi.

<sup>9</sup> Ikuai avi va'ekue kuaray oua katy, tekoia e'ya re ovaē ovya peve. Ijyvy oo 'rā Eufrates yakā peve, hymba kuery Gileade yvy re heta-etave ramo.

<sup>10</sup> Ha'e gui Saul huvixave oī javé py ma ha'e kuery opu'ā okuapy Agar regua kuery rovai. Ha'e rami vy ha'e kuery rogue ha'e javi rupi ju hekoa okuapy, Gileade katy'i rupi, kuaray oua katy.

### Gade ramymino kuery rery oīa

<sup>11</sup> Ha'e gui Gade ramymino kuery ma hekoa avi raka'e ha'e kuery ikuiaia rexei'i rupi, Basā yvy re, Salca peve.

<sup>12</sup> Joel ma ha'e kuery re opena va'erā omoī mbyre yvateve va'e, ha'e gui jevy guare ma Safā omoīa. Janai ha'e Safate ikuai va'ekue Basā py.

<sup>13</sup> Ha'e rā tyvy kuery ma povā'e, tuu ro pygua kuery rery rami: Micael, Mesulão, Seba, Jorai, Jacā, Zia ha'e Héber, ha'e javi vy sete ikuai.

<sup>14</sup> Ha'e va'e kuery ma Abiail ramymino kuery ae. Ha'e va'e ma Huri ra'y, Huri ma Jaroa ra'y, Jaroa ma Gileade ra'y, Gileade ma Micael ra'y, Micael ma Jesisai ra'y, Jesisai ma Jado ra'y, ha'e Jado ma Buz ra'y.

<sup>15</sup> Ha'e gui Abdiel ra'y Ái, Guni ramymino va'e ma hetarā kuery akā oī.

<sup>16</sup> Ha'e kuery ma Gileade py ae hekoa va'ekue, Basā py, ha'e ijyvýry rupi tekoia ikuai va'e py, ha'e Sarom yvýry tekoia ikuai va'e ha'e javi rupi peve.

<sup>17</sup> Ha'e kuery rery ha'e javi ma omboparaa raka'e, Judá pygua huvixave Jotāo ha'e Israel kuery ruvixave Jeroboão oī javé py.

### Jordão yakā rovaigua rupi ikuai va'e kuery rekokue oīa

<sup>18</sup> Ha'e gui Rúben, Gade ha'e Manassés regua mbyte rupi oja'o va'ekue ma avakue ipy'a guaxukueve meme ikuai raka'e. Ha'e kuery ma ojee omoī 'rā okuapy hu'y jokoa ha'e kyxe. Guyrapa voi oiporu kuaa, ha'e joe opu'āa py ikuai kuaa va'e. Ha'e kuery va'e regua ma quarenta e quatro mil setecentos e sessenta ikuai, joe opu'āa py ikuai kuaa va'e meme.

<sup>19</sup> Ha'e gui ha'e kuery joguero'a okuapy Agar kuery, Jetur, Nafis ha'e Nodabe reve.

<sup>20</sup> Ha'e va'e kuery reve joguero'aa py oipytyvōa, ha'e ipo py omboaxapaa Agar kuery re ipo'aka aguā, imoirūa kuery ha'e javi re guive, joguero'aa py Nhanderuete pe ojapukai okuapy ramo. Hexe ojerovia ete okuapy ramo oendu.

<sup>21</sup> Ha'e rami rā ogueraapa hymba kuery: cinqüenta mil camelo, duzentos e cinqüenta mil vexa'i ha'e dois mil mburika. Ogueraa avi cem mil avakue.

\* <sup>5:1</sup> Rúben ma nguu Israel pe otekoavy ta'yxy jevy reve (Gênesis 35.22, 49.3-4).

<sup>22</sup> Heta ete avi ikuai kyxe py ojuka va'ekue, ha'e kuery rovai opu'ã okuapy aguã Nhanderuete gui ae ou ramo. Ha'e rire hekoague py ae ju ikuai, escravo-rã heraapaa peve.

<sup>23</sup> Ha'e gui Manassés regua mbyte rupi oja'o va'ekue ma ha'e py ae hekoa Basã vyv re, Baal-Hermom, Senir ha'e Hermom vyvty peve. Ha'e kuery heta-etave tema ovv.

<sup>24</sup> Pova'e ma hetarã kuery akã ikuai va'ekue: Efer, Isi, Eliel, Azriel, Jeremias, Hodavias ha'e Jadiel. Ha'e va'e kuery ma joe opu'ãa py ipy'a guaxukueve, avakue omboetevepy ha'e hetarã kuery akã.

<sup>25</sup> Ha'e rami teiñ ha'e kuery ojejavv nguu kuery ruete rovai. Ha'e vy itavy rei ha'e va'e vyv regua kuery ruete pegua ikuiaia rupi, henonde gui ha'e va'e kuery Nhanderuete omomba rire teiñ.

<sup>26</sup> Ha'e nunga rupi ae Israel kuery ruete omokyre'ý Assíria pygua huvixa Pul ha'e Tiglate-Pileser. Ha'e ramo ha'e va'e ma escravo-rã ogueraapa Rúben, Gade ha'e Manassés regua mbyte rupi oja'o va'ekue. Hala katy ogueraaa, Habor ha'e Hara py, Gozã yakã peve. Ha'e py ae ha'e kuery ikuai aý peve.

## 6

### *Levi ramymino kuery rery oña*

<sup>1</sup> Ha'e gui Levi ra'y kuery ma Gérson, Coate ha'e Merari.

<sup>2</sup> Coate ra'y kuery ma Anrão, Isar, Hebrom ha'e Uziel.

<sup>3</sup> Anrão ra'y kuery ma Arão, Moisés ha'e Miriã. Arão ra'y kuery ma Nadabe, Abiú, Eleazar ha'e Itamar.

<sup>4</sup> Eleazar ra'y ma Finéias, Finéias ra'y ma Abisua,

<sup>5</sup> Abisua ra'y ma Buqui, Buqui ra'y ma Uzi,

<sup>6</sup> Uzi ra'y ma Zeraías, Zeraías ra'y ma Meraioite,

<sup>7</sup> Meraioite ra'y ma Amarias, Amarias ra'y ma Aitube,

<sup>8</sup> Aitube ra'y ma Zadoque, Zadoque ra'y ma Aimaás,

<sup>9</sup> Aimaás ra'y ma Azarias, Azarias ra'y ma Joanã,

<sup>10</sup> Joanã ra'y ma Azarias. Ha'e va'e ma sacerdote oĩ va'ekue Jerusalém py Salomão oorã ojapo va'ekue py.

<sup>11</sup> Ha'e gui Azarias ra'y ma Amarias, Amarias ra'y ma Aitube,

<sup>12</sup> Aitube ra'y ma Zadoque, Zadoque ra'y ma Salum,

<sup>13</sup> Salum ra'y ma Hilquias, Hilquias ra'y ma Azarias,

<sup>14</sup> Azarias ra'y ma Seraías, Seraías ra'y ma Jeozadaque.

<sup>15</sup> Ha'e gui Jeozadaque ma escravo-rã heraa, Judá regua ha'e Jerusalém pygua kuery Nabucodonosor pe SENHOR ogueraaa uka ramo.

<sup>16</sup> Ha'e gui Levi ra'y kuery ma Gérson, Coate ha'e Merari.

<sup>17</sup> Gérson ra'y kuery ma Libni ha'e Simei.

<sup>18</sup> Coate ra'y kuery ma Anrão, Isar, Hebrom ha'e Uziel.

<sup>19</sup> Merari ra'y kuery ma Mali ha'e Musi. Ha'e va'e kuery ma Levi ra'y kuery va'e regua meme, tamoi kuery rery rami ae.

<sup>20</sup> Gérson ra'y ma Libni, Libni ra'y ma Jaate, Jaate ra'y ma Zima,

<sup>21</sup> Zima ra'y ma Joá, Joá ra'y ma Ido, Ido ra'y ma Zerá, Zerá ra'y ma Jeaterai.

<sup>22</sup> Ha'e gui Coate ra'y ma Aminadabe, Aminadabe ra'y ma Coré, Coré ra'y ma Assir,

<sup>23</sup> Assir ra'y ma Elcana, Elcana ra'y ma Ebiasafe, Ebiasafe ra'y ma Assir,

<sup>24</sup> Assir ra'y ma Taate, Taate ra'y ma Uriel, Uriel ra'y ma Uzias, Uzias ra'y ma Saul.

<sup>25</sup> Ha'e gui Elcana ra'y kuery ma Amasai ha'e Aimote.

<sup>26</sup> Elcana ra'y ma Zofai, Zofai ra'y ma Naate,

<sup>27</sup> Naate ra'y ma Eliabe, Eliabe ra'y ma Jeroão, Jeroão ra'y ma Elcana.

<sup>28</sup> Ha'e gui Samuel ra'y jypygua ma Joel, ha'e va'e riregua Abias.

29 Merari ra'y ma Mali, Mali ra'y ma Libni, Libni ra'y ma Simei, Simei ra'y ma Uzá,  
 30 Uzá ra'y ma Siméia, Siméia ra'y ma Hagias, ha'e Hagias ra'y ma Asaías.

### *Levi ramymino kuery oporaei va'erā omoī mbyre rery oĩa*

31 Pova'e kuery ma Davi omoī va'ekue jogueroporai va'erā SENHOR pegua oo py, ixupegua hyru ogueru ma imoiny rire.

32 Ha'e ramo ha'e kuery ma oporaeia rupi ikuai onhemboaty oĩaty renonde, Jerusalém py SENHOR peguarã oo Salomão ojapo e'ŷa ja. Ha'e rami vy ipara oĩa rami ojapo okuapy SENHOR pe.

33 Pova'e kuery ma gua'y kuery reve ombo'eapo va'ekue. Coate ramymino kuery regua ma oporai va'e Hemã. Ha'e va'e ma Joel ra'y, Joel ma Samuel ra'y,

34 Samuel ma Elcana ra'y, Elcana ma Jeroão ra'y, Jeroão ma Eliel ra'y, Eliel ma Toá ra'y,

35 Toá ma Zufe ra'y, Zufe ma Elcana ra'y, Elcana ma Maate ra'y, Maate ma Amasai ra'y,

36 Amasai ma Elcana ra'y, Elcana ma Joel ra'y, Joel ma Azarias ra'y, Azarias ma Sofonias ra'y,

37 Sofonias ma Taate ra'y, Taate ma Assir ra'y, Assir ma Ebiasafe ra'y, Ebiasafe ma Coré ra'y,

38 Coré ma Isar ra'y, Isar ma Coate ra'y, Coate ma Levi ra'y, Levi ma Israel ra'y.

39 Ha'e gui tyvy Asafe ma irũrã oĩ oiporu kuaa regua re. Asafe ma Berequias ra'y, Berequias ma Siméia ra'y,

40 Siméia ma Micael ra'y, Micael ma Baaséias ra'y, Baaséias ma Malquias ra'y,

41 Malquias ma Etni ra'y, Etni ma Zera ra'y, Zera ma Adaías ra'y,

42 Adaías ma Etã ra'y, Etã ma Zima ra'y, Zima ma Simei ra'y,

43 Simei ma Jaate ra'y, Jaate ma Gérson ra'y, Gérson ma Levi ra'y.

44 Ha'e gui tyvy kuery Merari ramymino kuery ma ijaxua re ikuai. Ha'e va'e ma Quisi ra'y Etã. Ha'e gui Quisi ma Abdi ra'y, Abdi ma Maluque ra'y,

45 Maluque ma Hasabias ra'y, Hasabias ma Amazias ra'y, Amazias ma Hilquias ra'y,

46 Hilquias ma Anzi ra'y, Anzi ma Bani ra'y, Bani ma Semer ra'y,

47 Semer ma Mali ra'y, Mali ma Musi ra'y, Musi ma Merari ra'y, Merari ma Levi ra'y.

48 Ha'e gui tyvy kuery Levi ramymino ikuai va'e ma omoña Nhanderuete pegua opy rupi opa mba'e re ombo'eapo aguã.

### *Arão ramymino kuery rery oĩa*

49 Ha'e gui Arão ma gua'y kuery reve mba'emo ome'ẽ 'rã okuapy altar mba'emo oappyaty oĩ va'e áry, heakuã porã va'e oappyaty áry guive. Ha'e kuery ma henda iky'a e'ŷ ete va'e py avi ikuai guetarã Israel kuery ojejavvyague ojao'i uka aguã SENHOR pe, Nhanderuete guembiguai Moisés pe ojapo ukaague ha'e javi rami vy.

50 Arão ra'y ma Eleazar, Eleazar ra'y ma Finéias, Finéias ra'y ma Abisua,

51 Abisua ra'y ma Buqui, Buqui ra'y ma Uzi, Uzi ra'y ma Zeraías,

52 Zeraías ra'y ma Meraiote, Meraiote ra'y ma Amarias, Amarias ra'y ma Aitube,

53 Aitube ra'y ma Zadoque, ha'e rã Zadoque ra'y ma Aimaás.

### *Josué 21.1-42*

54 Pova'e py ma ha'e kuery hekoa okuapy, ha'e kuery rekoarã ome'ẽague rami vy, ijapya peve: Arão ramymino kuery Coate regua pe ranhe xortea oexa ramo

55 ha'e kuery pe ome'ẽa Hebrõm tetã Judá yvy re, ha'e ijyvýry rupi yvy itui va'e ha'e javi.

56 Ha'e rã yvy tetã ha'e tekoia'i ikuai va'e yvýry rupigua ma Jefoné ra'y Calebe pe ome'ẽa.

57 Arão ramymino kuery pe ome'ẽa tetã jojukaarã gui onhemia aguã: Hebrõm ha'e Libna ijyvýry rupi yvy itui va'e reve, ha'e gui Jatir ha'e Estemoa ijyvýry rupi yvy itui va'e reve,

58 Hilém ha'e Debir ijyvýry rupi yvy itui va'e reve,

59 Asã ha'e Bete-Semes ijyvýry rupi yvy itui va'e reve,

<sup>60</sup> ha'e gui Benjamim regua gui ome'ëa Geba, Alemete ha'e Anatote ijyvýry rupi yvy itui va'e reve. Ha'e javi vy ma treze tetã ome'ëa ha'e kuery va'e regua ikuai aguã.

<sup>61</sup> Ha'e gui Coate ramymino kuery mboae pe ma xortea oexaague rami ome'ëa dez tetã Manassés regua mbyte rupi oja'o va'ekue ikuai re.

<sup>62</sup> Ha'e gui Gérson ramymino kuery pe ma treze tetã ome'ëa ha'e kuery ikuai aguã, Issacar, Aser, Naftali ha'e Manassés regua Basã yvy re ikuai va'e.

<sup>63</sup> Ha'e gui Merari ramymino kuery pe ma doze tetã ome'ëa Rúben, Gade ha'e Zebulom regua, xortea oexaague rami vy.

<sup>64</sup> Ha'e rami py Levi ramymino kuery pe Israel kuery ome'ë ha'e va'e tetã ha'e javi ijyvýry rupi yvy itui va'e reve.

<sup>65</sup> Ha'e va'e tetã peteñ-teñ rery rupi ome'ëa avi Judá, Simeão ha'e Benjamim regua va'ekue, xorte oexaague rami.

<sup>66</sup> Ha'e gui Coate ramymino kuery amongue regua pe ma ome'ëa tetã Efraim regua yvy re ikuai va'e.

<sup>67</sup> Ha'e kuery pe ome'ëa avi tetã onhemia aguã, pov'a'e: Siquém yvyty Efraim regua re oĩ va'e ijyvýry rupi yvy itui va'e ha'e javi reve, ha'e gui Gezer,

<sup>68</sup> Jocmeão, Bete-Horom,

<sup>69</sup> Aijalom ha'e Gate-Rimom ijyvýry rupi yvy itui va'e ha'e javi reve.

<sup>70</sup> Ha'e gui Manassés regua mbyte rupi oja'o va'ekue yvy gui Coate ramymino kuery mboae pe ome'ëa Aner ha'e Bileã ijyvýry rupi yvy itui va'e ha'e javi reve.

<sup>71</sup> Ha'e gui Gérson ramymino kuery pe ma ome'ëa Manassés regua mbytekue Basã yvy re oĩ va'e Golã ha'e Astarote ijyvýry rupi yvy itui va'e ha'e javi reve,

<sup>72</sup> ha'e gui Issacar regua gui ome'ëa Quedes ha'e Daberate ijyvýry rupi yvy itui va'e ha'e javi reve,

<sup>73</sup> Ramote ha'e Aném ijyvýry rupi yvy itui va'e ha'e javi reve guive.

<sup>74</sup> Ha'e gui Aser regua gui ma ome'ëa Masal ha'e Abdom ijyvýry rupi yvy itui va'e ha'e javi reve,

<sup>75</sup> ha'e Hucoque ha'e Reobe ijyvýry rupi yvy itui va'e ha'e javi reve guive.

<sup>76</sup> Ha'e gui Naftali regua Galiléia re ikuaiia gui ma ome'ëa Quedes, Hamom ha'e Quiriataim ijyvýry rupi yvy itui va'e ha'e javi reve.

<sup>77</sup> Ha'e gui Merari ramymino kuery mboae pe ma ome'ëa Zebulom regua gui Rimono ha'e Tabor ijyvýry rupi yvy itui va'e ha'e javi reve.

<sup>78</sup> Ha'e gui Jordão yakã rovai, Jericó tetã rexei Jordão gui kuaray oua re oĩ va'e voi ome'ëa avi Rúben regua gui Bezer ha'e Jaza ijyvýry rupi yvy itui va'e ha'e javi reve,

<sup>79</sup> ha'e Quedemote ha'e Mefaate ijyvýry rupi yvy itui va'e ha'e javi reve guive.

<sup>80</sup> Ha'e gui Gade regua Gileade re oĩ va'e gui ome'ëa Ramote ha'e Maanaim ijyvýry rupi yvy itui va'e ha'e javi reve,

<sup>81</sup> ha'e Hesbom ha'e Jazer ijyvýry rupi yvy itui va'e ha'e javi reve guive.

## 7

### *Issacar ramymino kuery rery oĩa*

<sup>1</sup> Ha'e gui Issacar ra'y kuery ma Tola, Puá, Jasube ha'e Sinrom, ha'e javi vy irundy ikuai.

<sup>2</sup> Tola ra'y kuery ma Uzi, Refaías, Jeriel, Jamai, Ibsão ha'e Samuel, Tola ramymino kuery re opena va'e, avakue ipy'a guaxukueve meme. Ha'e kuery va'e regua rery huvixa Davi oĩ jave ombopara pyre ma vinte e dois mil e setecentos ikuai.

<sup>3</sup> Ha'e gui Uzi ra'y ma Izraías. Ha'e gui Izraías ra'y kuery ma Micael, Obadias, Joel ha'e Issias, ha'e javi vy peteñ nhiruñ ikuai, huvixa meme.

<sup>4</sup> Ha'e kuery va'e regua rery ombopara pyre ma trinta e seis mil avakue ikuai joe opu'ña pygua, mba'eta ha'e kuery va'e regua heta ete avi ikuai kunhague ha'e ta'y kuery.

<sup>5</sup> Tyvy kuery Issacar ramymino kuery va'e regua avakue ipy'a guaxukueve ha'e javi vy ma oitenta e sete mil ikuai, hery ombopara pyre oña rami vy.

### *Benjamim ramymino kuery rery oña*

<sup>6</sup> Ha'e gui Benjamim ra'y kuery ma Bela, Bequer ha'e Jediael, ha'e javi vy mboapy ikuai.  
<sup>7</sup> Ha'e gui Bela ra'y kuery ma Esbom, Uzi, Uziel, Jerimote ha'e Iri, ha'e javi vy peteñ nhiruñ ikuai. Guetarã kuery re opena va'e meme, avakue ipy'a guaxukueve. Vinte e dois mil e trinta e quatro ikuai hery ombopara pyre oña rami vy.

<sup>8</sup> Ha'e gui Bequer ra'y kuery ma Zemira, Joás, Eliézer, Elioenai, Onri, Jerimote, Abias, Anatote ha'e Alemete, Bequer ra'y kuery meme ikuai.

<sup>9</sup> Ha'e javi vy vinte mil e duzentos ikuai guamoñ jypygua kuery rery ombopara pyre oña rami. Guetarã kuery re opena va'e, avakue ipy'a guaxukueve ikuai.

<sup>10</sup> Ha'e gui Jediael ra'y ma Bilã. Ha'e rã Bilã ra'y kuery ma Jeús, Benjamim, Eúde, Quenaana, Zetã, Társis ha'e Aisaar.

<sup>11</sup> Ha'e va'e Jediael ra'y kuery ha'e javi ma ma guetarã kuery re opena va'e. Avakue ipy'a guaxukueve ma dezessete mil e duzentos ikuai joe opu'ña py ikuai kuaa va'e.

<sup>12</sup> Ha'e gui Supim ha'e Hupim ma Ir ra'y kuery ae. Ha'e rã Husim ma Aer ra'y ju.

<sup>13</sup> Ha'e gui Naftali ra'y kuery ma Jaziel, Guni, Jezer ha'e Salum, Bila ramymino meme.

### *Manassés ramymino kuery rery oña*

<sup>14</sup> Ha'e gui Manassés ra'y ma Asriel, ta'yxy jevy Síria guigua oguereko va'ekue. Ha'e va'e oikuavã'i avi Gileade rurã Maquir.

<sup>15</sup> Ha'e gui Maquir ma gua'yxyrã ojou Hupim ha'e Supim reindy, Maaca hery va'e. Ha'e rã Maquir ryvy rery ma Zelofeade. Ha'e va'e ma guajy anho oguereko raka'e.

<sup>16</sup> Ha'e gui Maquir ra'yxy Maaca ma peteñ opi'a oguereko vy omboery Perez. Tyvy ma Seres hery va'e. Ha'e rã Perez ra'y kuery ma Ulão ha'e Requém.

<sup>17</sup> Ulão ra'y ma Bedã. Ha'e kuery ae Gileade ramymino ikuai. Ha'e va'e ma Maquir ra'y, Manassés ramymino.

<sup>18</sup> Heindy Hamolequete ma oikuavã'i Is-Hode, Abiezer, ha'e Macla.

<sup>19</sup> Ha'e rã Semida ra'y kuery ma Aiã, Siquém, Liqui, ha'e Anião.

### *Efraim ramymino kuery rery oña*

<sup>20</sup> Ha'e gui Efraim ra'y ma Sutela. Ha'e gui Sutela ra'y ma Berede, Berede ra'y ma Taate, Taate ra'y ma Eleada, ha'e Eleada ra'y ma Taate avi.

<sup>21</sup> Ha'e gui Taate ra'y ma Zabade, ha'e Zabade ra'y ma Sutela. Ha'e rã Ezer ha'e Eleada ma avakue Gate pygua ae ojuka, ha'e va'e kuery rymba re imonda aguã oje'oi ramo.

<sup>22</sup> Ha'e nunga rupi mbovy ára re rei e'ý tuu Efraim ojae'o oiny ha'e kuery re. Ha'e ramo tyke'y kuery ou ombopy'a porã ju aguã.

<sup>23</sup> Ha'e va'e rire ma gua'yxy reve joguereko ramo oguereko'i vy oikuavã peteñ opi'a. Ha'e ramo tuu omboery Berias, hoo py mba'emo vai oiko ramo.\*

<sup>24</sup> Ha'e gui tajy ma Seerá, Bete-Horom tetã ojapo va'erã, yvy'ã guy katy ha'e yvy'ã katy voi. Ojapo avi Uzém-Seerá.

<sup>25</sup> Ha'e gui Berias ra'y ma Refa, Refa ra'y ma Resefe, Resefe ra'y ma Tela, Tela ra'y ma Taã,

<sup>26</sup> Taã ra'y ma Ladã, Ladã ra'y ma Amiúde, Amiúde ra'y ma Elisama,

<sup>27</sup> Elisama ra'y ma Num, ha'e Num ra'y ma Josué.

<sup>28</sup> Ha'e kuery yvy ha'e hekoa ma pova'e: Betel ijyvýry rupi tekao'i ikuai va'e reve, ha'e gui kuaray oua katy Naarã oĩ, ha'e rã kuaray oikea katy oĩ va'e ma Gezer, Siquém ha'e Aia peve, ijyvýry rupi tekao'i ikuai va'e reve.

\* <sup>7:23</sup> Ha'e kuery ayvu py tery Berias ma "Mba'emo vai" 'ea rami onhendu.

<sup>29</sup> Ha'e gui Manassés ramymino kuery rekoia rexui rupi ma Bete-Seã ijyvýry rupi tekoia'i ikuai va'e reve, Taanaque, Megido ha'e Dor ijyvýry rupi tekoia'i ikuai va'e reve. Ha'e va'e tetã ha'e javi rupi Israel ra'y José ramymino kuery ikuai.

### *Aser ramymino kuery rery oña*

<sup>30</sup> Ha'e gui Aser ra'y kuery ma Imna, Isvá, Isvi ha'e Berias. Ha'e rã Sera ma ha'e kuery reindy oiko.

<sup>31</sup> Berias ra'y kuery ma Héber ha'e Malquiel. Malquiel ra'y ma Birzavite.

<sup>32</sup> Héber ra'y kuery ma Jaflete, Somer, Hotão ha'e Suá ha'e kuery reindy.

<sup>33</sup> Jaflete ra'y kuery ma Pasaque, Bimal ha'e Asvate. Ha'e kuery ma Jaflete ra'y kuery ikuai.

<sup>34</sup> Ha'e gui Semer ra'y kuery ma Aí, Roga, Jeubá ha'e Arã.

<sup>35</sup> Tyvy Helém ra'y kuery ma Zofa, Imna, Seles ha'e Amal.

<sup>36</sup> Ha'e gui Zofa ra'y kuery ma Sua, Harnefer, Sual, Beri, Inra,

<sup>37</sup> Bezer, Hode, Sama, Silsa, Itrã ha'e Beera.

<sup>38</sup> Ha'e gui Jéter ra'y kuery ma Jefoné, Pispa ha'e Ara.

<sup>39</sup> Ula ra'y kuery ma Ara, Haniel ha'e Rizia.

<sup>40</sup> Ha'e kuery ha'e javi ma Aser ramymino kuery ikuai, guetarã kuery re opena va'erã oiporavo pyre, avakue ipy'a guaxukueve, huvixa yvatekueve ikuai, hetarã kuery rery oña py hery omboparaa joe opu'aa rupi ikuai va'erã. Ha'e javi vy ma vinte e seis mil avakue ikuai raka'e.

## 8

### *Benjamim ramymino kuery rery oña*

<sup>1</sup> Ha'e gui Benjamim ra'y ma Bela jypyguva va'e. Mokoña ma Asbel, mboapya ma Aará,

<sup>2</sup> irundaya ma Noá, ha'e rã peteñ nhiruña ma Rafa.

<sup>3</sup> Ha'e gui Bela ra'y kuery ma Adar, Gera, Abiúde,

<sup>4</sup> Abisua, Naamã, Aoá,

<sup>5</sup> Gera, Sefufá ha'e Hurão.

<sup>6</sup> Pova'e kuery ma Eúde ramymino kuery. Ha'e kuery ma Geba pygua kuery re opena va'ekue ri ha'e gui oguerovapaa Manaate py ju ikuai aguã.

<sup>7</sup> Ha'e kuery ma Naamã, Aías ha'e Gera. Ha'e va'e ae oguerovapa, ha'e gui ta'ya ma Uzá ha'e Aiúde.

<sup>8</sup> Ha'e gui Saarim ma gua'yxy kuery Husim ha'e Baara gui opoi ma rire Moabe regua yvy re oiko jave

<sup>9</sup> gua'yxyrã Hode ju ojou va'e reve oguereko Jobabe, Zíbia, Messa, Malcã,

<sup>10</sup> Jeús, Saquias ha'e Mirma. Ha'e va'e kuery ma ta'y kuery ikuai, guetarã kuery re opena va'e meme.

<sup>11</sup> Ha'e gui Husim ra'y kuery ma Abitube ha'e Elpaal.

<sup>12</sup> Elpaal ra'y kuery ma Héber, Misã ha'e Semede. Ha'e va'e ma ojapo Ono ha'e Lode, ha'e ijyvýry rupi tekoia ikuai va'erã.

<sup>13</sup> Ha'e gui Berias ha'e Sema ma Ajalom py hetarã kuery akã ikuai. Ha'e kuery ma Gate py hekoa va'ekue omoxëmba.

<sup>14</sup> Ha'e gui Aiô, Sasaque, Jeremote,

<sup>15</sup> Zebadias, Arade, Éder,

<sup>16</sup> Micael, Ispa ha'e Joá, Berias ramymino kuery meme ikuai.

<sup>17</sup> Ha'e gui Zebadias, Mesulão, Hizqui, Héber,

<sup>18</sup> Ismerai, Izlias, ha'e Jobabe ma Elpaal ramymino kuery ikuai.

<sup>19</sup> Ha'e gui Jaquim, Zicri, Zabdi,

<sup>20</sup> Elenai, Ziletaí, Eliel,

<sup>21</sup> Adaías, Beraías ha'e Sinrate ma Simei ramymino kuery ikuai.

- <sup>22</sup> Ha'e gui Ispã, Héber, Eliel,  
<sup>23</sup> Abdom, Zicri, Hanã,  
<sup>24</sup> Hananias, Elão, Antotias,  
<sup>25</sup> Ifdéias ha'e Penuel ma Sasaque ramymino kuery ikuai.
- <sup>26</sup> Ha'e gui Sanserai, Searias, Atalias,  
<sup>27</sup> Jaaresias, Elias ha'e Zicri ma Jeroão ramymino kuery ikuai.  
<sup>28</sup> Ha'e kuery ma Jerusalém tetã py guetarã kuery re opena va'e, ha'e kuery va'e regua rery oña rami vy.
- <sup>29</sup> Ha'e gui Gibeão py oiko Gibeão rurã. Ha'e rã ta'yxy rery ma Maaca,  
<sup>30</sup> Ha'e py oiko avi ta'y jypyguare Abdom, ha'e gui Zur, Quis, Baal, Nadabe,  
<sup>31</sup> Gedor, Aiô ha'e Zequer.
- <sup>32</sup> Ha'e gui Miclote ra'y ma Siméia. Ha'e va'e kuery ma Jerusalém py ikuai guyvy kuery reve joa katy'i.
- <sup>33</sup> Ha'e gui Ner ra'y ma Quis, Quis ra'y ma Saul, Saul ra'y ma Jônatas, Malquisua, Abinadabe ha'e Esbaal.
- <sup>34</sup> Jônatas ra'y ma Meribe-Baal, ha'e gui Meribe-Baal ra'y ma Mica.
- <sup>35</sup> Mica ra'y kuery ma Pitom, Meleque, Tareia ha'e Acaz.
- <sup>36</sup> Acaz ra'y ma Jeoada, ha'e Jeoada ra'y kuery ma Alemete, Azmavete ha'e Zinri. Ha'e gui Zinri ra'y ma Mosa,
- <sup>37</sup> Mosa ra'y ma Bineá, Bineá ra'y ma Rafa, Rafa ra'y ma Eleasa, Eleasa ra'y ma Azel.
- <sup>38</sup> Ha'e gui Azel ra'y kuery ma mboapy meme ikuai raka'e. Ha'e kuery rery ma Azricão, Bocru, Ismael, Searias, Obadias ha'e Hanã. Ha'e va'e kuery ha'e javi ma Azel ra'y ikuai.
- <sup>39</sup> Ha'e gui tyvy Eseque ra'y kuery ma pova'e: Ulão ma jypykue, Jeú ma mokoña, Elifelete ma mboapya.
- <sup>40</sup> Ulão ra'y kuery ma avakue ipy'a guaxukueve, guyrapa oiporu kuaa va'e. Ha'e gui heta avi ta'y ha'e hamymino kuery, ha'e javi vy cento e cinqüenta ikuai. Ha'e kuery ha'e javi ma Benjamim ramymino kuery meme.

## 9

### *Escravo ikuai rire Jerusalém py ju ikuai va'e kuery rery oña*

- <sup>1</sup> Ha'e gui Israel kuery ha'e javi rery omboparapaa imoiny kuaxia Israel kuery ruvixa rekokue oña re. Ha'e gui Judá regua kuery ma ojejavy okuapya re Babilônia katy ogueraapaa escravo ikuai aguã py.
- <sup>2</sup> Ha'e va'e rire amongue ou ju oyvy re, ha'e tetã ikuaiague py ae ju hekoa. Ou ypy va'ekue ma Israel regua sacerdote kuery, levita kuery ha'e templo py ombo'eapo va'ekue.
- <sup>3</sup> Ha'e gui amongue Judá ramymino kuery, Benjamim, Efraim ha'e Manassés ramymino kuery Jerusalém py ae ikuai va'e ma pova'e:
- <sup>4</sup> Utai ma Amiúde ra'y, Amiúde ma Onri ra'y, Onri ma Inri ra'y, Inri ma Bani ra'y, Bani ma Judá ra'y Perez ramymino kuery va'e regua.
- <sup>5</sup> Ou avi Siló py hekoa va'ekue: jypyguare Asaías, hamymino kuery guive,
- <sup>6</sup> ha'e gui Zerá ramymino kuery regua Jeuel ha'e tyvy kuery reve vy seiscentos e noventa ikuai.
- <sup>7</sup> Benjamim ramymino kuery regua ma Salu, ha'e va'e ma Mesulão ra'y, Mesulão ma Hodavias ra'y, ha'e Hodavias ma Hassenuá ra'y.
- <sup>8</sup> Ou avi Jeroão ra'y Ibnéias, ha'e gui Uzi ra'y Elá, Micri ramymino, ha'e gui Sefatias ra'y Mesulão, Mesulão ma Reuel ra'y, Ibnijas ramymino.
- <sup>9</sup> Ha'e gui tyvy kuery ma ha'e kuery rery oña rami vy novecentos e cinqüenta e seis ha'e javi vy. Ha'e va'e avakue ha'e javi ma hetarã kuery akã ikuai peteñ-teñ oo rupi.
- <sup>10</sup> Ha'e gui sacerdote kuery va'e regua ma Jedaías, Jeoiaribe, Jaquim

<sup>11</sup> ha'e Azarias. Ha'e va'e ma Hilquias ra'y, Hilquias ma Mesulão ra'y, Mesulão ma Zadoque ra'y, Zadoque ma Meraiote ra'y, Meraiote ma Aitube ra'y, ha'e Aitube ma Nhanderuete pegua opy rupi openaa py yvateve va'e.

<sup>12</sup> Ou avi Jeroão ra'y Adaías, Jeroão ma Pasur ra'y, Pasur ma Malquias ra'y. Ou avi Adiel ra'y Masai, Adiel ma Jazera ra'y, Jazera ma Mesulão ra'y, Mesulão ma Mesilemite ra'y, ha'e Mesilemite ma Imer ra'y.

<sup>13</sup> Ou avi tyvy kuery hetarã kuery akã ikuai va'e, ha'e javi vy mil setecentos e sessenta ikuai, avakue Nhanderuete pegua ropy rupi ombo'eapo kuaa va'e meme.

<sup>14</sup> Ha'e gui levita kuery regua ou va'ekue ma Semaías. Ha'e va'e ma Hassube ra'y, Hassube ma Azricão ra'y, Azricão ma Hasabias ra'y, Hasabias ma Merari ramymino kuery regua.

<sup>15</sup> Ou avi Baquebacar, Heres, Galal ha'e Matanias. Ha'e va'e ma Mica ra'y, Mica ma Zicri ra'y, ha'e Zicri ma Asafe ra'y.

<sup>16</sup> Ou avi Semaías ra'y Obadias, Semaías ma Galal ra'y, Galal ma Jedutum ra'y, Jedutum ma Berequias ra'y, Berequias ma Asa ra'y, Asa ma Elcana netofatita kuery yvy re hekoa va'e ra'y.

<sup>17</sup> Ha'e gui okẽ rarõa kuery ma Salum, Acube, Talmom ha'e Aimã, ha'e tyvy kuery guive. Salum ma ha'e kuery ruvixa oiko.

<sup>18</sup> Aÿ peve ha'e kuery huvixa rokẽ rarõa rupi ae ikuai, kuaray oua yke katy. Ha'e va'e kuery ae Levi ramymino kuery rekoia kora rokẽ rarõa rupi ikuai va'e.

<sup>19</sup> Salum ma Coré ra'y, Coré ma Ebiasafe ra'y, ha'e Ebiasafe ma Corá ra'y. Tyvy kuery nguu ro pygua ikuai va'e reve ma Coré regua kuery omoña ixupe ombo'eapo va'erã ha'e ombojerovia aty rokẽ rarõarã. Tamoĩ kuery ma SENHOR pegua kuery ikuiaia re opena, ha'e tekoia rokẽ rarõa rupi ikuai va'ekue.

<sup>20</sup> Ha'e jave ma Eleazar ra'y Finéias opena ha'e kuery re, ha'e hexeve SENHOR oiko.

<sup>21</sup> Ha'e gui Meselemias ra'y Zacarias ma onhemboaty aty rokẽ rarõa rupi avi oiko.

<sup>22</sup> Ha'e va'e okẽ rarõarã oiporavo pyre kuery ha'e javi vy ma duzentos e doze ikuai. Tamoĩ kuery rery oĩa py ha'e kuery rery omboparaa peteĩ-teĩ rekoia py ae. Davi ha'e profeta Samuel ae omoĩ va'ekue peteĩ-teĩ rembiaporã.

<sup>23</sup> Ha'e rami rire ha'e kuery, gua'y kuery reve oarõ 'rã okuapy SENHOR pegua rokẽ, oo py oikea ikuai va'e.

<sup>24</sup> Okẽ rarõa kuery ma irundy henda yvytu oipejua katy ikuai: kuaray oua katy, oikea katy, apu'a'ia katy ha'e kuaray puku-a katy.

<sup>25</sup> Ha'e rã tyvy kuery tekoia'i py ikuiaia gui ou jepi 'rã ha'e kuery reve sete ára re ombo'eapo aguã.

<sup>26</sup> Ha'e rami teĩ ha'e jave py ikuai riae 'rã irundy okẽ rarõa yvatekueve Levi ramymino kuery va'e regua. Ha'e kuery ae opena 'rã Nhanderuete pegua oo ja'o ikuai va'e re, ha'e peráta omoĩ porã mbyre re.

<sup>27</sup> Ha'e kuery ma oke 'rã Nhanderuete pegua oo yvy'iry rupi ae, opena va'erã omoña rire, ha'e ko'ẽ nhavõ okẽ oipe'a aguã.

<sup>28</sup> Ha'e kuery va'e regua amongue ma tembiporu re openaa rupi ikuai. Ha'e kuery ma oipapapa 'rã ogueraa ha'e oguerua jevy rã.

<sup>29</sup> Ikuai avi amboae kuery tenda ha'e mesa ikuai va'e re opena va'erã, ha'e henda iky'a e'ÿ va'e pygua tembiporu ikuai va'e re, ha'e gui trigo, vinho, azeite, heakuã porã va'e ha'e irûrã oguereko va'e re.

<sup>30</sup> Mba'eta sacerdote ra'y kuery amongue va'e ma ojapo 'rã heakuã porã va'e irûrã.

<sup>31</sup> Ha'e gui peteĩ levita va'e regua oiko Matitias hery va'e, Salum ra'y jypykue, Coré ramymino kuery va'e regua. Ha'e va'e ma mbojape apoa kuery re opena.

<sup>32</sup> Ha'e rã tyvy kuery Coate ramymino kuery va'e regua ma sábado nhavõ ojapo 'rã mbojape SENHOR renonde omoĩ mbyrã.

<sup>33</sup> Ha'e gui oporai va'e kuery ma levita regua kuery akā ikuai va'e meme. Ha'e kuery ma templo ropy ja'o ikuai va'e py ae 'rā ikuai. Amboae rupi nomba'epoi 'rāe, mba'eta ara py ha'e pyávy omba'epoi 'rā okuapy hembiaporā ome'ē mbyre rupi ae.

<sup>34</sup> Ha'e va'e kuery ma levita regua kuery akā ikuai, ojavegua kuery ruvixa. Jerusalém py ae hekoa va'e meme.

<sup>35</sup> Gibeão py ma oiko raka'e Jeiel, Gibeão ru va'e. Ha'e rā ta'yxy ma Maaca.

<sup>36</sup> Ta'y jypykue ma Abdom, ha'e gui Zur, Quis, Baal, Ner, Nadabe,

<sup>37</sup> Gedor, Aiô, Zacarias ha'e Miclote.

<sup>38</sup> Ha'e gui Miclote ra'y ma Siméia. Ha'e va'e kuery ma Jerusalém py ae hekoa va'ekue, guyvy kuery reve joa katy'i ikuai.

<sup>39</sup> Ner ra'y ma Quis, Quis ra'y ma Saul, ha'e Saul ra'y kuery ma Jônatas, Malquisua, Abinadabe ha'e Esbaal.

<sup>40</sup> Jônatas ra'y ma Meribe-Baal, ha'e Meribe-Baal ra'y ma Mica.

<sup>41</sup> Mica ra'y kuery ma Pitom, Meleque ha'e Taréia.

<sup>42</sup> Ha'e gui Acaz ra'y ma Jaerá, ha'e rā Jaerá ra'y kuery ma Alemete, Azmavete ha'e Zinri. Ha'e rā Zinri ra'y ma Mosa,

<sup>43</sup> Mosa ra'y ma Bineá, Bineá ra'y ma Refaías, Refaías ra'y ma Azel.

<sup>44</sup> Ha'e rā Azel ra'y kuery ma mboapy meme ikuai. Hery ma Azricão, Bocru, Ismael, Searias, Obadias ha'e Hanã. Ha'e kuery ha'e javi ma Azel ra'y kuery meme.

## 10

### *1 Samuel 31.1-7*

<sup>1</sup> Ha'e gui Israel kuery reve filisteu kuery joguero'a ramo avakue Israel regua on-hamba filisteu kuery gui. Ha'e ramo Gilboa vyv'ā re ojukapa.

<sup>2</sup> Filisteu kuery ojoko avi Saul ha'e ta'y kuery. Ha'e vy ojuka Saul ra'y kuery Jônatas, Abinadabe ha'e Malquisua.

<sup>3</sup> Joguero'aa py Saul oī vaive ovvy. Hu'y momboa kuery ojou ramo ha'e kuery gui okyje vaipa.

<sup>4</sup> Ha'e gui Saul aipoe'i hu'y jokoa reraa pe:

— Ekyi ndekyxe ha'e xepyxo, ha'e kuery opire omboi uka e'ŷ va'ekue ou vy xejajai rei e'ŷ aguā — he'i.

Ha'e rami teī hu'y jokoa reraa okyje vaipa vy ndoipyxoxei. Ha'e ramo Saul ae kyxe ojopy vy onhemombo hakua re.

<sup>5</sup> Hu'y jokoa reraa Saul omano ma ri ty ra'ea oexa vy ha'e voi kyxe re onhemombo vy omano avi.

<sup>6</sup> Ha'e rami py Saul omano gua'y kuery mboapyve reve. Hoo pygua kuery voi omanomba avi hexeve.

<sup>7</sup> Ha'e gui avakue Israel regua vyvugua rupi hekoa va'e oexa okuapy oirū kuery onhambaa, ha'e Saul gua'y kuery reve omanomba maa. Ha'e rami vy ha'e kuery voi gueko aejapa vy onhamba avi oje'oivy. Ha'e gui filisteu kuery ou vy ha'e py ju ikuai.

### *1 Samuel 31.8-13*

<sup>8</sup> Ko'ē jevy filisteu kuery ou omanogue mba'ekue ogueraapa aguā. Ha'e rami vy ojou Saul ha'e ta'y kuery mboapyve retekue Gilboa vyv'ā re ho'apaague py.

<sup>9</sup> Ha'e rami vy Saul akāgue ojaya vy hembiporukue ogueraapa. Filisteu vyv ha'e javi rupi omondouka ayvu mombe'uarā, ha'e nungakue omombe'u aguā ta'angaa pegua oo ikuai va'e rupi, ha'e guetarā kuery ha'e javi pe.

<sup>10</sup> Saul rembiporukue ogueraaa nguuete kuery pegua oo py. Ha'e rā inhakāgue ma nguuete Dagom pegua oo re omboja imoiny.

<sup>11</sup> Ha'e gui Jabel-Gileade pygua kuery oendu okuapy filisteu kuery Saul re ojapoague.

**12** Ha'e rami vy avakue ipy'a guaxukueve va'e opu'ãmba vy omboi heruvy Saul ha'e ta'y kuery retekue. Jabes tetã py ogueru vy ojatypa ha'e py, yvyra ikuai va'e guy py. Ha'e vy sete ára re okaru e'ý re ikuai.

**13** Ha'e rami py Saul omano SENHOR rovai ojejavvyague re, SENHOR ijayvua noenduxei rire, omanogue mboayvua pe rive oporandu ramo guive,

**14** SENHOR pe e'ý. Ha'e nunga rupi SENHOR ojuka uka vy Jessé ra'y Davi pe ju omboaxa huvixave oĩ aguã.

## 11

### 2 Samuel 5.1-5

**1** Ha'e gui ma Israel regua kuery ha'e javi ou okuapy Hebrom tetã py Davi oĩ py. Hexeve jogueroayvu vy aipoe'i okuapy:

— Ore kuery voi ma ndereguia kuery ae avi.

**2** Yma Saul oiko teri vy orere opena jave py ndee ae reo ha'e rejevy 'rã va'ekue Israel regua xondaro kuery reve. Ha'e gui SENHOR aipoe'i ndevy: "Ndee repena 'rã xevygua Israel kuery re, ha'e reiko 'rã ha'e kuery ruvixa", he'i va'ekue.

**3** Ha'e rami vy Israel regua nhomongetaa kuery ha'e javi ou okuapy Hebrom py huvixa reve jogueroayvu aguã. Ha'e ramo Hebrom py, SENHOR renonde ha'e kuery reve huvixa Davi ojapo oguerekó porã aguã regua. Ha'e rã omoõ okuapy Davi nguvixarã Israel kuery ha'e javi re opena aguã, Samuel ayvu rupi SENHOR aipoe'iague rami vy.\*

### 2 Samuel 5.6-10

**4** Ha'e gui Davi ha'e Israel kuery ha'e javi reve oje'oi Jerusalém tetã hery mboae Jebus va'e katy, mba'eta ha'e py ae jebuseu kuery ha'e va'e yvy regua rekoia.

**5** Ha'e ramo Jebus py hekoa va'e kuery aipoe'i Davi pe:

— Apy ma ndereikei 'rã — he'i okuapy. Ha'e rami teñ Davi oipe'a oo ikorapa va'e Sião py oĩ va'e. Ha'e va'e pe ma "Davi rekoia" 'ea.

**6** Mba'eta Davi aipoe'i ma voi va'ekue: "Amongue va'e rei jypy'i jebuseu kuery oity va'e amoõ 'rã xondaro kuery ruvixarã", he'i va'ekue. Ha'e ramo Zeruia pi'a Joabe ha'e ranhe opu'ã ovu ha'e kuery re. Ha'e ramo omoõ xondaro ruvixarã.

**7** Ha'e rami vy oo ikorapa va'e py ae Davi oĩ. Ha'e nunga rupi ha'e va'e pe "Davi rekoia" 'ea.

**8** Ha'e va'e yvýry rupi mba'emo ojapo avi. Milo guive tetã omoatyrõ heravy ombopyague py ovaẽ peve. Ha'e rã tetã rembyre ma Joabe ju omoatyrõmba.

**9** Davi ma ipo'akave tema ovu, hexeve SENHOR ixondaro reta va'e oiko ramo.

### 2 Samuel 23.8-39

**10** Pova'e kuery ma Davi pegua ipy'a guaxukueve yvateve va'e. Ha'e kuery ma Israel kuery ha'e javi reve oipytyvõ okuapy huvixave oĩ aguã, ha'e va'e kuery reko re SENHOR ijayvague rami vy.

**11** Po rami ma Davi pegua kuery ipy'a guaxukueve rery: hacmonita Jasobeão ma trinta ikuai va'e ruvixa. Ha'e va'e ma guembiporu hu'y reve trezentos ikuai va'e rovai opu'ã vy peteigüe'i pyve ojukapa va'ekue.

**12** Ha'e va'e rire ma Dodô ra'y Eleazar, Aoí ramymino. Ha'e va'e ma mboapyve ipy'a guaxukueve va'e regua oiko.

**13** Ha'e gui ha'e va'e kuery ma Pas-Damim py Davi reve ikuai filisteu kuery ijaty okuapy jave py. Ha'e py peteñ yvy cevada-ty oĩa py xondaro kuery onhamba filisteu kuery renonde gui.

**14** Ha'e va'e yvy mbyte py ha'e kuery opu'ã vy ojoko nho, oitypa filisteu kuery. Ha'e rami py SENHOR ogueraa jepepa raka'e.

\* **11:3** Davi huvixave oĩ aguã Samuel oikuua ukaague omombe'u 1 Samuel 16.1-13 py.

<sup>15</sup> Ha'e gui trinta yvatekueve ikuai va'e regua mboapy oje'oi avi Adulão itakua py Davi onhemia py. Ha'e va'e jave py filisteu regua xondaro kuery voi ijaty okuapy Refains yvyugua py.

<sup>16</sup> Ha'e rami vy Davi onhemia py oĩ, ha'e rã filisteu regua xondaro kuery ma Belém tetã py ikuai.

<sup>17</sup> Ha'e gui Davi ijy'uvei etea rupi aipoe'i:

— Mava'e tu xemboy'u ta ygua Belém rokẽ py oĩ va'e gui? — he'i.

<sup>18</sup> Ha'e ramo ha'e va'e mboapyve ma filisteu kuery ijaty okuapya rupi oje'oi vy ygua Belém kora rokẽ py oĩ va'e gui yy oguenoẽ, ha'e Davi oĩa py ogueru. Ha'e rã ha'e ndoy'uxei vy SENHOR renonde onhoẽ ixupe guarã.

<sup>19</sup> Ha'e vy aipoe'i:

— SENHOR, nda'evei ete xee ha'e va'e ay'u aguã! Xee ay'u 'rã ri nda'u avakue ojeayvu ve'ÿkue py oje'oi va'ekue ruguy rami? Mba'eta ha'e kuery ndojeayvuveikue py ogueru okuapy va'ekue — he'i vy ndoy'uxei.

Ha'e ramigua ae mboapy ipy'a guaxukueve ojapo va'ekue.

<sup>20</sup> Ha'e gui Joabe ryke'y Abisai ma trinta ikuai va'e akã. Ha'e va'e ma guembiporu hu'y guaxu reve opu'ã trezentos ikuai va'e rovai, ha'e vy ojukapa. Ha'e rami vy mboapyve tenonde re ikuai va'e rami ete ima'endu'a porãmby oiko.

<sup>21</sup> Ha'e ma trinta ikuai va'e gui yvateve va'e vy ha'e kuery akã oiko, va'eri mboapyve tenonde re ikuai va'e regua e'ÿ guive.

<sup>22</sup> Ha'e gui Joiada ra'y Benaia ma ipy'a guaxuve va'e avi Cabzeel pygua, mba'emo tutixa va'e ojapo avi va'e. Ha'e rami vy ojuka mokoõ Moabe pygua joe opu'ã kuaave va'ekue. Yro'y apí ho'a jave ma itakua py oguejy vy guarý okua py oĩ va'ekue ojuka.

<sup>23</sup> Ojuka avi peteĩ ava Egito pygua mokoõ metros raxa'i yvate va'ekue. Egito pygua ma hu'y guaxu ajukue popẽa 'y rami ipo guaxu va'e reve ou rã Benaia ma popoka py rive opu'ã ový vy ipo gui hu'y guaxu oguereko va'ekue oipe'a vy ha'e va'e py ae ju ojuka.

<sup>24</sup> Ha'e nunga Joiada ra'y Benaia ojapo rire mboapyve tenondegua ipy'a guaxukueve re rami ima'endu'a porãmby oiko.

<sup>25</sup> Ha'e va'e ma trinta ikuai va'e gui omboetevea va'eri mboapyve tenonde re ikuai va'e regua ndoikoi guive. Ha'e gui Davi omoõ guarãa kuery re opena va'erã.

<sup>26</sup> Ha'e gui xondaro kuery regua ipy'a guaxukueve ma Joabe ryvy Asael, Belém pygua Dodô ra'y Elanã,

<sup>27</sup> Harode guigua Samote, Pelete guigua Heles,

<sup>28</sup> Tecoa pygua Iques ra'y Ira, Anatote guigua Abiezer,

<sup>29</sup> Husa guigua Sibecai, Aoí guigua Ilai,

<sup>30</sup> Netofa guigua Maarai, Netofa pygua Baaná ra'y Helede,

<sup>31</sup> Gibeá pygua Ribai ra'y Itai Benjamim ramymino va'e, Piratom guigua Benaia,

<sup>32</sup> Gaás yakã'i yvýry guigua Hurai, Arba guigua Abiel,

<sup>33</sup> Baarum guigua Azmavete, Saalbom guigua Eliaba,

<sup>34</sup> Gizom guigua Benê-Hasém, Aião pygua Sage ra'y Jônatas,

<sup>35</sup> Aião pygua Sacar ra'y Aião, ha'e Ur ra'y Elifal,

<sup>36</sup> Mequerá guigua Hefer, Pelom guigua Aías,

<sup>37</sup> Carmelo guigua Hezro, Ezbai ra'y Naarai,

<sup>38</sup> Natã ryvy Joel, Hagri ra'y Mibar,

<sup>39</sup> Amom guigua Zeleque, Beerote guigua Naarai, Zeruia pi'a Joabe rembiporu reraaty va'e,

<sup>40</sup> ha'e gui Jatir guigua kuery Ira ha'e Garebe,

<sup>41</sup> heteu Urias, Alai ra'y Zabade,

<sup>42</sup> Rúben regua Siza ra'y Adina Rúben ramymino kuery ruvixa, hexeveguá trinta avi ikuai,

- <sup>43</sup> ha'e gui Maaca ra'y Hanã, Mitã guigua Josafá,  
<sup>44</sup> Asterá pygua Uzias, Aroer pygua Hotão ra'y kuery Sama ha'e Jeiel,  
<sup>45</sup> Sinri ra'y Jediael, ha'e tyvy Joá Tiz guigua,  
<sup>46</sup> Maavá guigua Eliel, Elnaão ra'y kuery Jeribai ha'e Josavias, Moabe guigua Itma,  
<sup>47</sup> ha'e gui Zobá guigua kuery Eliel, Obede ha'e Jaasiel.

## 12

### *Davi pegua xondaro kuery re ijayvua*

- <sup>1</sup> Pova'e kuery ma Davi-a katy ou va'ekue Ziclague py Quis ra'y Saul gui onhaague py. Ha'e va'e kuery ma ipy'a guaxukueve joe opu'ãa rupi ikuai va'e regua.  
<sup>2</sup> Ha'e va'e kuery rembiporu ma guyrapa. Oiporu kuaa regua re ha'e oiporu kuaa e'ÿa re oiporu ita momboa, hu'y voi omombo 'rã guyrapa py. Ha'e va'e kuery ma Saul regua ae, Benjamim ramymino kuery.  
<sup>3</sup> Ha'e kuery ruvixa ma Gibeá pygua Semaá ra'y kuery Aiezer ha'e Joás, ha'e gui Azmavete ra'y kuery Jeziel ha'e Pelete, Beraca, Anatote guigua Jeú,  
<sup>4</sup> Gibeão guigua Ismaías ma trinta ipy'a guaxukueve ikuai va'e regua, ha'e kuery akã avi oiko, ha'e gui Jeremias, Jaaziel, Joanã ha'e Gedera pygua Jozabade,  
<sup>5</sup> ha'e gui Eluzai, Jerimote, Bealias, Semarias ha'e Harife pygua Sefatias,  
<sup>6</sup> Elcana, Issias, Azarel, Joezer ha'e Jasobeão, Corá ramymino meme,  
<sup>7</sup> ha'e gui Gedor pygua Jeroão ra'y kuery Joela ha'e Zebadias.

<sup>8</sup> Gade regua kuery voi oaxa Davi-a katy, tekoá e'ÿa py oo ikorapa va'e py oï jave. Ha'e va'e avakue ma ipy'a guaxukueve joe opu'ã kuaa va'e meme. Hembiporu ma hu'y jokoa ha'e imo'ãa tuvixa va'e. Hova ma guary rami, ha'e guaxu yvyty áry rupi onhaa rami inhakuã va'e.

<sup>9</sup> Ha'e gui Ezer ma ha'e kuery akã, ha'e va'e gui mokoña ma Obadias, mboapya ma Eliabe,  
<sup>10</sup> irundaya ma Mismana, peteñ nhiruña ma Jeremias,

<sup>11</sup> mboapy memea ma Atai, sete-a ma Eliel,

<sup>12</sup> oito-a ma Joanã, nove-a ma Elzabade,

<sup>13</sup> dez-a ma Jeremias ha'e onze-a ma Macbanai.

<sup>14</sup> Ha'e kuery Gade ramymino ma xondaro kuery ruvixa ikuai. Ha'e va'e regua yvyíve va'e ma cem avakue rami ovare va'e opu'ãa py, ha'e rã yvateve va'e ma mil avakue rami ovare va'e.

<sup>15</sup> Ha'e va'e kuery ma Jordão yakã rupi oaxa va'ekue jaxy ijypyä re, hembe ha'e javi áry rupi yy ojao'i teñ. Ha'e rami vy omonhamba yvyugua rupi ikuai va'ekue ha'e javi, kuaray oua katy ha'e kuaray oikea katy guive.

<sup>16</sup> Ha'e gui Davi oïa py ou avi Benjamim ha'e Judá ramymino kuery regua, oo ikorapa va'e py.

<sup>17</sup> Ha'e ramo Davi ovaexí aguã oo vy ijayvu ha'e kuery reve. Ha'e vy aipoe'i:

— Xapy'a rei rã peñ kuery xepytyvõ aguã ri peju ramo xepy'a py anhemoirü 'rã peñ kuery reve. Ha'e gui pëvy ajapo vai e'ÿ teñ xerovaigua kuery pe xemboaxa aguã rive ri peju ramo ma tove nhaneramoñ kuery ruete ae toexa pota, ha'e vy ta'ijayvu pëvy — he'i.

<sup>18</sup> Ha'e ramo trinta va'e akã Amasai re Nhe'ẽ oï ramo aipoe'i:

— Ha'e ramo avi ore kuery ma ndevyguia ae, Davi! Jessé ra'y, ndereve ete 'rã orekuai! Tereiko porã, nepytyvõa kuery voi ta'ikuai porã! Mba'eta Nderuete ma nepytyvõ 'rã — he'i ramo Davi omovaẽ imbokuapy vy xondaro kuery ruvixarã omoñ.

<sup>19</sup> Ha'e gui Manassés va'e regua voi Davi-a katy oaxa, filisteu kuery reve ha'e ou jave Saul reve ha'e kuery joguero'a aguã katy. Ha'e ramo teñ ha'e noipytyvõi va'ekue filisteu kuery, mba'eta ha'e kuery va'e regua huvixa kuery jogueroayvuague rami vy nomondoukai. Ha'e vy aipoe'i okuapy:

— Nguvixave Saul-a katy ri Davi oaxa ramo ma nhaneakã ojayapaa 'rã — he'i okuapy.

<sup>20</sup> Ha'e ramo Ziclague tetã katy Davi ojevy ju ramo ha'ea katy oaxapa okuapy Manassés ramymino kuery. Ha'e va'e kuery ma Adna, Jozabade, Jediael, Micael, Jozabade, Eliú ha'e Ziletaí, Manassés regua mbovy rei e'ŷ ruvixa kuery ikuai va'ekue.

<sup>21</sup> Ha'e va'e kuery ma oipytyvõ Davi hexe opu'ã va'e mbovy rei e'ŷ ikuai va'e rovai, avakue ipy'a guaxukueve ha'e xondaro ruvixa meme ikuai va'e vy.

<sup>22</sup> Ha'e va'e jave py ko'ẽ nhavõ ou retave 'rã Davi pytvyvõarã. Ha'e rami py mbovy e'ŷ ikuai ixondaro kuery, Nhanderuete pegua xondaro kuery hetaa rami.

### *Hebrom tetã py xondaro kuery Davi nguvixaverã omoĩ okuapyague*

<sup>23</sup> Pova'e avakue ma joe opu'ã aguã katy guarã hembiporu va'e Davi Hebrom py oĩa py ou va'ekue, Saul rekoria ha'e ju nguvixaverã omoĩ aguã, SENHOR ijayvuague rami vy.

<sup>24</sup> Ha'e gui Judá ramymino kuery regua hu'y jokoa ha'e imo'ãa tuvixa va'e oguereko va'e ha'e javi vy ma seis mil e oitocentos ou, joe opu'ã aguã katy guarã hembiporu va'e meme.

<sup>25</sup> Ha'e gui Simeão ramymino kuery regua avakue joe opu'ã aguã ipy'a guaxu va'e ma sete mil e cem ou.

<sup>26</sup> Levi ramymino kuery regua ma quatro mil e seiscentos ou.

<sup>27</sup> Joiada ma Arão ramymino kuery ruvixa oiko va'e vy ngupive três mil e setecentos avi ogueru.

<sup>28</sup> Ha'e gui Zadoque ma kunumi teri va'eri ava ipy'a guaxu va'e vy ogueru avi vinte e dois huvixa kuery nguu ro py ikuai va'ekue.

<sup>29</sup> Benjamim ramymino kuery regua, Saul regua kuery ma três mil ou. Mba'eta ha'e va'e jave py heta teri ikuai Saul-a katyguia.

<sup>30</sup> Efraim ramymino kuery regua ma vinte mil e oitocentos avakue ipy'a guaxukueve ha'e omboetevepy nguu ro py ikuai va'ekue.

<sup>31</sup> Manassés regua mbyte rupi oja'o va'ekue ma dezoito mil ikuai hery rupi oiporavo pyre Davi nguvixaverã omoĩ aguã ou va'ekue.

<sup>32</sup> Issacar ramymino kuery regua ou ha'e va'e ára Israel kuery mba'e pa ojapo aguã re oikuaa pota kuaa va'e. Ha'e rami vy ou duzentos huvixa kuery, guyvy kuery hembiguai ikuai va'e meme reve.

<sup>33</sup> Ha'e gui Zebulom regua joe opu'ãa katy oo va'e, opa marãgua tembiporu oguereko va'e ma cinqüenta mil ikuai. Ha'e kuery ma joguero'a aguã py ikyre'ŷ va'e, ndokyje kuaai guive.

<sup>34</sup> Naftali rekoa gui ma mil xondaro ruvixa ou. Ha'e va'e kuery reve ou avi trinta e sete mil hu'y jokoa ha'e hu'y guaxu tuvixa va'e revezua.

<sup>35</sup> Dã ramymino kuery regua ma vinte e oito mil e seiscentos ou joe opu'ã aguã katy guarã hembiporu va'e.

<sup>36</sup> Aser guigua ma quarenta mil ou joe opu'ã aguã katy guarã hembiporu va'e, joguero'a kuaa rei va'e.

<sup>37</sup> Jordão yakã rovai guigua Rúben, Gade ha'e Manassés regua kuery mboae ma cento e vinte mil ou okuapy opa marãgua tembiporu oguereko va'e joe opu'ã aguã.

<sup>38</sup> Ha'e va'e avakue joe opu'ã aguã ombo'e pyre ma Hebrom tetã py ou okuapy Davi omoĩ aguã Israel kuery ha'e javi ruvixaverã. Ha'e gui Israel kuery ndoui va'e voi peteĩ rami Davi omoĩxe avi okuapy nguvixaverã.

<sup>39</sup> Ha'e py ma ikuai mboapy ára re Davi oĩa py. Ha'e rami vy okaru ha'e oy'u okuapy ha'e py, ho'u va'erã tyvy kuery ome'ẽmba rire.

<sup>40</sup> Ha'e rami ae ha'e'i rupi ikuai va'e, Issacar, Zebulom ha'e Naftali guigua kuery ogueru avi okuapy tembi'u. Mburika áry, camelo, kavaju ha'e vaka áry ogueru farinha, figo ha'e uva'a pirukue, vinho, azeite, vaka ha'e vexa'i guive, mymba kyrigueve'i voi ogueru oata aguã rami e'ŷ, mba'eta Israel kuery ový'a ete okuapy.

## 13

*Davi Jerusalém py lei ryru ogueru aguã re ijayvuague*

<sup>1</sup> Ha'e gui ma Davi jogueroayvu huvixa kuery mil ha'e cem re opena va'e kuery, ha'e yvatekueve ikuai va'e reve.

<sup>2</sup> Ha'e vy Israel kuery ha'e javi pe aipoe'i onhemboatya py:

— Xapy'a rei pejou porã ri ramo, ha'e SENHOR Nhanderuete guigua ri ramo ma nhamondouka pojava 'rã ayvu mombe'uarã nhanderyvy kuery Israel yvy ha'e javi rupi ikuai va'e pe, sacerdote kuery pe, ha'e Levi regua kuery tetã ha'e ijyvýry rupi ikuai va'e ha'e javi pe, ha'e kuery ono'õmba avi aguã nhande reve.

<sup>3</sup> Aÿ gui ma jaru ju 'rã Nhanderuete ayvu ryru nhanderekao py. Mba'eta Saul oĩ teri jave py ha'e va'e re nanhapenavei ranhe va'ekue — he'i.

<sup>4</sup> Ha'e ramo ono'õmba va'e ha'e javi ojou porã okuapy ha'e rami ae ojapo aguã, iporã va'ea oikuaa pavẽ vy.

*2 Samuel 6.1-11*

<sup>5</sup> Ha'e gui ma Davi omboaty Israel kuery ha'e javi Egito yvy re Sior oĩ va'e guive Hamate py nhavãea peve, Nhanderuete ayvu ryru ogueru aguã Quiriate-Jearim py oĩa gui.

<sup>6</sup> Ha'e rami vy Israel kuery ha'e javi reve Davi oje'oi Baalá Quiriate-Jearim hery mboae va'e, Judá re oĩ va'e py, Nhanderuete ayvu ryru ogueru aguã ha'e gui. Ha'e va'e renonde ma SENHOR rery re ima'endu'aa riae, anjo kuery ipepo va'e ikuai va'e áry oguapy oiny va'e re.

<sup>7</sup> Ha'e rami vy Nhanderuete pegua hyru omoõ okuapy peteõ karóxa ipyau va'e áry. Abinadabe ro gui ogueru okuapy. Uzá ha'e Aiô oje'oi karóxa reraarã.

<sup>8</sup> Israel kuery ha'e javi reve Davi ov'y'a ov'y Nhanderuete renonde rupi ombaraetea ha'e javi reve, oporaei okuapya py, ixã reta va'e pu reve, mbaraka, pandeiro ha'e hy'a pu py, mimby guaxu omonhe'ëa py guive.

<sup>9</sup> Ha'e gui Quidom mba'emo moa'yñaty re ovaõa py vaka onhepyxanga rã Uzá opoko hyru re ho'a e'ý aguã.

<sup>10</sup> Uzá hyru re opoko ramo hovai SENHOR poxya hendy vy oity. Ha'e pyve omano Nhanderuete renonde.

<sup>11</sup> SENHOR Uzá ojuka rã Davi ndojou porãi. Ha'e vy ha'e va'e tekoia omboery Perez-Uzá, aÿ peve guarã.

<sup>12</sup> Ha'e va'e ára Nhanderuete gui Davi okyje vy aipoe'i:

— Mba'exa vy nda'u aru 'rã Nhanderuete ayvu ryru? — he'i.

<sup>13</sup> Ha'e rami vy Davi ndogueruxevei SENHOR ayvu ryru guekoa katy. Ha'e rami 'rãgue py Gate guigua Obede-Edom va'e ro py ranhe ogueraa uka.

<sup>14</sup> Mboapy jaxy re Nhanderuete ayvu ryru opyta Obede-Edom kuerya py. Ha'e rã SENHOR omoingo porã Obede-Edom ro pygua kuery ha'e mba'emo oguereko va'e ha'e javi.

## 14

*2 Samuel 5.11,12*

<sup>1</sup> Davi oĩa py Tiro pygua huvixa Hirão ombou ayvu mombe'uarã. Ogueru ruka avi yvyra yary, oo apoa ha'e ita re ombo'epo va'e kuery, hoorã ojapo va'erã.

<sup>2</sup> Ha'e rami Davi oikuaa SENHOR omoõ atâvea Israel re opena aguã, ha'e ombopo'akave ojeupeguia kuery re oma'ë vy.

*2 Samuel 5.13-16; 1 Crônicas 3.5-8*

<sup>3</sup> Jerusalém tetã py Davi ojouve kunhague gua'yxy jevyrã. Ha'e vy ikuaiive ju ta'y ha'e tajy kuery.

<sup>4</sup> Po rami ma Jerusalém py itui'i va'ekue rery: Samua, Sobabe, Natã, Salomão,

<sup>5</sup> Ibar, Elisua, Elpelete,

<sup>6</sup> Nogá, Nefegue, Jafia,

<sup>7</sup> Elisama, Beeliada ha'e Elifelete.

<sup>2</sup> *Samuel 5.17-25*

<sup>8</sup> Filisteu kuery oendu avi okuapy Davi omoña Israel kuery ha'e javi ruvixarã. Ha'e vy oje'oipa ojopy aguã Davi. Ha'e nunga Davi oendu vy ha'e voi oo avi ha'e kuery ovaexi aguã.

<sup>9</sup> Ha'e rã filisteu kuery ou Refaim yvyugua py mba'emo oipe'apa aguã.

<sup>10</sup> Davi ma SENHOR pe oporandu vy aipoe'i:

— Taa pa filisteu kuery rovai? Remboaxa 'rã teve xepo py?

SENHOR ombovai:

— Tereo, mba'eta amboaxa 'rã ndepo py – he'i.

<sup>11</sup> Ha'e ramo Davi Baal-Perazim py oo vy oitypa ha'e py. Ha'e vy aipoe'i:

— SENHOR xepo rupi omoaõmba xerovaigua filisteu kuery ryxya xerenonde py ikuai va'ekue, yy mba'emo ogueroxyry heravya rami – he'i. Ha'e nunga rupi ha'e va'e tekao oenoña Baal-Perazim.\*

<sup>12</sup> Ha'e py ma filisteu kuery oejapa oje'oivy nguuete kuery ra'angaa. Ha'e rã Davi oapy ukapa tata py.

<sup>13</sup> Ha'e gui filisteu kuery ou nho ju yvyugua gui mba'emo oipe'apa aguã.

<sup>14</sup> Peteïgue ju Nhanderuete pe Davi oporandu ramo ombovai:

— Tereo eme hakykue rupi. Ha'e rami 'rãgue py hakykue katy rupi ranhe 'rã pejeapa, ha'e gui ma ha'e kuery re pepu'ã 'rã amora ikuai va'e guy rupi.

<sup>15</sup> Ha'e gui xapy'a rei rendu 'rã amora ty rovapy rupi opyrõ-pyrõ nhendu va'e. Ha'e va'e rendu ramove peẽ 'rã ha'e kuery re pepu'ã aguã. Ha'e va'e ma neronden Nhanderuete oo nhendua, filisteu kuery ijaty okuapy va'e jukapaarã – he'i.

<sup>16</sup> Nhanderuete ojapo ukaa rami Davi ojapo vy ojukapa filisteu kuery Geba guive Gezer py ovaëa peve.

<sup>17</sup> Ha'e rami vy ha'e va'e yvy jave rupi Davi rery re ima'endu'aave ovy, mba'eta SENHOR ojapo Davi gui pavẽ regua okyje aguã rami.

## 15

### *Levita kuery lei ryru reraarã omoñague*

<sup>1</sup> Ha'e gui Davi pegua tetã 'epy va'e py ojapo ngoorã. Oguereko katu avi Nhanderuete ayvu ryru oĩ aguã, ha'e hi'áry guarã ma peteï oo'i ojapo.

<sup>2</sup> Ha'e gui Davi aipoe'i:

— Avave rei nda'evei Nhanderuete ayvu ryru ogueru aguã levita kuery e'ý vy, SENHOR ae omoñ rire oayvu ryru reraarã, ha'e ixupe anho ombo'epo riae aguã raka'eve rã peve guarã – he'i.

<sup>3</sup> Ha'e nunga rupi Jerusalém tetã py Davi omboatypa Israel kuery ha'e javi, SENHOR ayvu ryru ogueru aguã oĩ aguã ojapo va'ekue py.

<sup>4</sup> Davi omboaty avi Arão ramymino kuery, levita kuery guive, po rami hery va'e:

<sup>5</sup> Coate ramymino kuery va'e regua ma huvixa Uriel ha'e tyvy kuery reve vy cento e vinte ikuai,

<sup>6</sup> Merari ramymino kuery va'e regua ma huvixa Asaías ha'e tyvy kuery reve vy duzentos e vinte ikuai,

<sup>7</sup> Gérson ramymino kuery va'e regua ma huvixa Joel ha'e tyvy kuery reve vy cento e trinta ikuai,

<sup>8</sup> Elisafã ramymino kuery va'e regua ma huvixa Semaías ha'e tyvy kuery reve vy duzentos ikuai,

<sup>9</sup> Hebrom ramymino kuery va'e regua ma huvixa Eliel ha'e tyvy kuery reve vy oitenta ikuai,

\* <sup>14:11</sup> Tery Baal-Perazim ma "Senhor omoaõmba" 'ea.

<sup>10</sup> Uziel ramymino kuery va'e regua ma huvixa Aminadabe ha'e tyvy kuery reve vy cento e doze ikuai.

<sup>11</sup> Davi oenoī avi sacerdote kuery va'e regua Zadoque ha'e Abiatar, ha'e gui levita kuery Uriel, Asaías, Joel, Semaías, Eliel ha'e Aminadabe.

<sup>12</sup> Ha'e vy aipoe'i ha'e kuery pe:

— Peē kuery ma levita kuery akā peiko. Pejeky'a'o uka ke ha'vy penderyvy kuery reve, SENHOR Israel kuery ruete ayvu ryru Peru aguā hendarā areko katu va'ekue py.

<sup>13</sup> Mba'eta jypy peē kuery ndaperui ramo SENHOR Nhanderuete ipoxy va'ekue nhande kuery rovai, ojapo ukaague rami e'ŷ jaru rire — he'i.

<sup>14</sup> Ha'e rami rā sacerdote kuery ojeky'a'o uka okuapy, levita kuery guive, SENHOR Israel kuery ruete ayvu ryru ogueru aguā.

<sup>15</sup> Ha'e rami vy levita kuery ogueru okuapy Nhanderuete ayvu ryru oaxi'y áry, hi'yrā omoī va'ekue reve, SENHOR ijayvuague rami vy Moisés ojapo ukaague rami vy.

### *Imba'epua rupi ikuai va'erā omoīague*

<sup>16</sup> Ha'e gui Davi aipoe'i levita ruvixa kuery pe guyvy kuery regua omoī aguā oporaei va'erā. Ha'e va'e kuery ma mba'epu reve, mbaraka, mba'epu ixā reta va'e ha'e hy'a pu reve ov'yaa rupi oporaei aguā pavē oendu aguā rami.

<sup>17</sup> Ha'e ramo levita kuery oiporavo Joel ra'y Hemā tyvy kuery regua Berequias ra'y Asafe reve, Merari ramymino kuery va'e regua Cusaías ra'y Etā guive.

<sup>18</sup> Ha'e kuery reve ma tyvy kuery yvyīgueve avi. Ha'e va'e kuery ma Zacarias, Bene, Jaaziel, Semiramote, Jeiel, Uni, Eliabe, Benaia, Maaséias, Matitias, Elifeleu ha'e Micnéias, ha'e gui Obede-Edom ha'e Jeiel ma okē raroārā ikuai.

<sup>19</sup> Ha'e rami py oporaei va'e Hemā, Asafe ha'e Etā ma onhendu 'rā okuapy hy'a pu overa va'e guigua py.

<sup>20</sup> Ha'e rā Zacarias, Aziel, Semiramote, Jeiel, Uni, Eliabe, Maaséias ha'e Benaia ma mbaraka reve 'rā oporaei yvatea py.

<sup>21</sup> Matatias, Elifeleu, Micnéias, Obede-Edom, Jeiel ha'e Azazias ma oporaeia py ombo-joguy 'rā ixā reta va'e, irundy meme xā oīa peve.

<sup>22</sup> Ha'e gui Quenanias levita kuery oporaeia re opena va'e ma jogueroporaearā omoī mbyre, ha'e rami aguā oikuaave va'e ramo.

<sup>23</sup> Berequias ha'e Elcana ma lei ryru oīa rokē rarōarā omoī.

<sup>24</sup> Ha'e rā Sebanias, Josafá, Natanael, Amasai, Zacarias, Benaia ha'e Eliézer sacerdote ikuai va'e ma omonhe'ē 'rā okuapy mimby guaxu, Nhanderuete ayvu ryru renonde py. Ha'e gui Obede-Edom ha'e Jeías ma hyru oīa rokē rarōa avi ikuai.

### *Jerusalém tetā py lei ryru ogueru okuapyague*

<sup>25</sup> Ha'e gui ma Davi ha'e Israel regua nhomongetaa kuery reve oje'oi, xondaro kuery ruvixa ikuai va'e reve. Ovy'aa rupi jogueraa Obede-Edom ro gui ogueru aguā SENHOR guexeve guarā ojapo va'ekue ryru.

<sup>26</sup> Ha'e gui levita kuery hyru oguerua rupi Nhanderuete oipytyvō ramo ixupe ome'ē okuapy sete vaka ra'y ha'e sete vexa'i ojuka vy.

<sup>27</sup> Ha'e rā Davi ma onhemonde ov'y peteī ao puku xiī porā rei ha'e ipererī'i va'e py. Ha'e rami ae avi levita kuery hyru reraa voi onhemonde okuapy, ha'e oporaei va'e kuery, hyru reraa kuery ha'e oporaei va'e kuery re opena va'e Quenanias guive. Davi onhemonde avi manto sacerdote pegua, ajukue ipererī'i va'e guigua.

<sup>28</sup> Ha'e rami py Israel kuery ha'e javi ov'y'a reve ogueru okuapy SENHOR guexeve guarā ojapo va'ekue ryru, mimby ha'e mimby guaxu omonhe'ē reve, ha'e hy'a pu, mbaraka ha'e ixā reta va'e omonhendu ratāa rupi.

<sup>29</sup> SENHOR guexeve guarã ojapo va'ekue ryru Davi rekaoa py ogueroikea jave ma Saul rajykue Mical janela gui oma'ẽ ho'amy. Ha'e rami vy huvixa Davi ov'y'aa rupi ojeroky oikovy rã oexa vy ndojou porãi opy'a py.

## 16

### *Mba'emo ome'ẽ okuapyague*

<sup>1</sup> Ha'e rire ma Nhanderuete pegua hyru ogueroike vy omoõ oo'i Davi ojapo va'ekue mbyte py. Nhanderuete renonde py ogueru avi okuapy mba'emo oapy reve ome'ẽ va'erã, hexeve peteĩ rami ju ikuaria regua guive.

<sup>2</sup> Ha'e gui opa ma oapy va'erã ha'e hexeve peteĩ rami aguã regua Davi ome'ẽmba ma vy SENHOR rery rupi ogueroayvu porã heta va'e kuery ha'e javi.

<sup>3</sup> Ha'e gui ma Israel kuery avakue ha'e kunhague ikuai va'e peteĩ-teĩ pe omboja'o peteĩ mbojape, xo'o ra'ykue ja'ea'-ea ha'e uva'a pirukue.

<sup>4</sup> Omoõ avi levita kuery va'e regua SENHOR ayvu ryru renonde rupi ikuai va'erã, SENHOR Israel kuery ruete oguerovy'a, ogueroporaei ha'e omboete aguã. Ha'e va'e kuery ma pova'e:

<sup>5</sup> huvixa Asafe, ha'e gui mokoña ma Zacarias, ha'e va'e rire ma Jeiel, Semiramote, Jeiel mboae, Matitias, Eliabe, Benaia, Obede-Edom ha'e Jeiel mboapya mbaraka ha'e ixã reta va'e reve guarã. Ha'e gui Asafe ma omonhendu ratãve 'rã hy'a pu.

<sup>6</sup> Ha'e gui sacerdote kuery Benaia ha'e Jaaziel ma mimby guaxu omonhe'ẽa rupi riae 'rã ikuai Nhanderuete guexeve guarã ojapo va'ekue ryru oĩa renonde rupi.

### *Salmos 105, 96, 106*

<sup>7</sup> Ha'e va'e ára ma Davi omoõ ypy'i Asafe ha'e tyvy kuery SENHOR pe oporaeia rupi oguerovy'a aguã. Aipoe'i:

<sup>8</sup> — Perovy'a SENHOR, hery rupi pejapukai.

Yvy regua kuery pe peikuua uka ojapo va'ekue.

<sup>9</sup> Peporaei ke ixupe, peporaei salmos.

Pemombe'upa ke nhomondyipaarã ojapo va'ekue.

<sup>10</sup> Perovy'a hery iky'a e'ŷ va'e.

SENHOR oeka va'e kuery tovy'a opy'a py.

<sup>11</sup> Peka SENHOR, ipo'akaa guive.

Peka ke henonde peĩ riae aguã.

<sup>12</sup> Penema'endu'a ke mba'emo porã ojapo va'ekue re,  
nhomondyipaa ha'e oipota va'e re ijayvuague re,

<sup>13</sup> peẽ hembiguai Israel ramymino kuery,  
peẽ Jacó ra'y kuery hembiporavo pendekuai va'e.

<sup>14</sup> Ha'e ma SENHOR Nhanderuete.

Oipotaa ma yvy jave re ojekuua.

<sup>15</sup> Ima'endu'a riae 'rã guexeve guarã ojapo va'ekue re,  
mbovy rei e'ŷ ikuai va'erã peve guarã ayvu ome'ẽ va'ekue re,

<sup>16</sup> Abraão reve ngupive guarã ojapo va'ekue re,

Isaque pe ouraa rupi ijayvuague re guive.

<sup>17</sup> Ha'e nungakue re ma Jacó reve ju ijayvu,  
raka'e rã peve guarã re ijayvu Israel reve.

<sup>18</sup> Ha'e vy aipoe'i:

“Ndevy ame'ẽ 'rã Canaã yvy penemba'erã”, he'i.

<sup>19</sup> Ha'e jave py ha'e kuery mbovy'i teri ikuai,

yvy mboae guigua mbovy'i ete ikuai raka'e,

<sup>20</sup> oguata va'ekue yvy mboae-ae ikuai va'e rupi,

joyvy-yvy re.

- <sup>21</sup> Ha'e rami teñ avave rei pe ha'e ndoguerekó axy ukai.  
Ha'e kuery re oma'ẽ vy ijayvu ete huvixave ikuai va'e pe.
- <sup>22</sup> Ha'e vy aipoe'i: "Emoĩ eme ndepo xerembiporavo kuery re,  
perekó axy eme xevygua profeta kuery", he'i.
- <sup>23</sup> Peporaei ke SENHOR pe yvy jave regua kuery!  
Ko'ẽ nhavõ peikuaa uka nhandereraa jepea.
- <sup>24</sup> Yvy regua kuery pe peikuaa uka hexakãa,  
ha'e javi regua pe pemombe'u mba'emo porã ojapoa.
- <sup>25</sup> Mba'eta SENHOR ma yvate ete va'e.  
Ha'evea rami ixupe japoraeia,  
tuuete ikuai va'e gui okyjevepy oiko.
- <sup>26</sup> Mba'eta yvy regua kuery ruete ha'e javi ma mba'emo ra'angaa rive.  
Ha'e rã SENHOR ma yva apoare.
- <sup>27</sup> Henonde ma guexakãa ha'e ijyvatea oexa uka.  
Ipo'akaa ha'e iporãa ojekuaa ixupeguia henda iky'a e'ŷ va'e py.
- <sup>28</sup> Yvy regua ha'e javi, peroporaei ke SENHOR!  
Peroporaei SENHOR rexakãa ha'e ipo'akaa.
- <sup>29</sup> Peroporaei SENHOR rery iporã ete ramo.  
Peme'ẽ va'erã peru vy peroike ixupeguia roka py.  
Pembojerovia SENHOR iky'a e'ŷa rexakãa py.
- <sup>30</sup> Yvy jave regua kuery, peryryipa henonde.  
Mba'eta yvy omoĩ atã raka'e omyí e'ŷ aguã rami.
- <sup>31</sup> Ha'e nunga rupi tovy'a yva ha'e yvy.  
Yvy regua kuery ikuiaia rupi "SENHOR ma huvixave oĩ", peje.
- <sup>32</sup> Taevovo ye'ẽ ha'e hexe ikuai va'e ha'e javi!  
Tovy'a nhuũndy ha'e hexe ikuai va'e ha'e javi!
- <sup>33</sup> Tovy'apa yvyra ka'aguy re ikuai va'e Senhor renonde,  
mba'eta ou 'rã yvy regua kuery re oikuaa pota aguã.
- <sup>34</sup> Perovy'a ke SENHOR, porayvu va'e ramo,  
mba'eta nhomboaxya opa va'erã e'ŷ.
- <sup>35</sup> Ha'e gui aipopeje: "Oreruete orereraa jepea, orereraa jepe ke!  
Oremboatypa ju, orereraa jepe ke yvy regua kuery gui,  
nderery iky'a e'ŷ va'e rupi roguerovy'a aguã,  
ha'e rovy'aa rupi rogueroporaei aguã."
- <sup>36</sup> Ima'endu'a porãmby toiko SENHOR Israel kuery Ruete  
aŷ, ha'e raka'e rã peve! – he'i.  
Ha'e ramo heta va'e kuery "Amém!" he'i vy ogueroporaei okuapy SENHOR.
- SENHOR pe mba'emo ojapo va'erã Davi omoïve juague*
- <sup>37</sup> Ha'e ramo SENHOR guexeve guarã ojapo va'ekue ryru oĩ renonde py ae Davi omoĩ Asafe tyvy kuery reve, ha'e kuery opena riae aguã henonde py, ko'ẽ nhavõ opena ukaague rami vy.
- <sup>38</sup> Omoĩ avi Obede-Edom tyvy kuery ha'e javi reve, sessenta e oito ha'e javi vy. Jedutum ra'y Obede-Edom ha'e Hosa ma omoĩ okẽ re opena va'erã.
- <sup>39</sup> Ha'e rã sacerdote Zadoque ha'e tyvy sacerdote ikuai va'e ma omoĩ oo'i SENHOR pegua Gibeão yvy'ã re oĩ va'e renonde rupi ikuai va'erã,
- <sup>40</sup> altar oĩ va'e áry SENHOR pe mba'emo oapy reve ome'ẽ riae aguã, aje'ivekue ha'e ka'arukue. Ha'e rami ikuai Israel kuery pe SENHOR lei oeja va'ekue re ipara oĩ ha'e javi rami.
- <sup>41</sup> Ha'e kuery reve omoĩ avi Hemã ha'e Jedutum, ikuaive ju hery rupi oiporavo pyre SENHOR pe oporaei va'erã, mba'eta nhanemboaxya rupi oiko riae 'rã raka'e rã peve.

**42** Ha'e kuery reve ikuai avi Hemã ha'e Jedutum mimby guaxu omonhe'ẽ aguã, ha'e hy'a pu ha'e mba'epu Nhanderuete pe ombopu aguã. Ha'e rã Jedutum ra'y kuery ma okẽ rarõa ikuai.

**43** Ha'e va'e rire mae ma onhemboaty va'ekue peteĩ-teĩ ngoo katy oje'oi. Davi voi oo ju ngoo pygua kuery ogueroayvu porã aguã.

## 17

### 2 Samuel 7.1-17

**1** Ha'e gui huvixa Davi ngoo py ae oiko vy aipoe'i profeta Natã pe:

— Ma'ẽ, xee ma xero ainy yary guigua py, ha'e rã Nhanderuete guexeve guarã ojapo va'ekue ryru ma oo'i py rive oĩ.

**2** Natã ombovai huvixa pe:

— Tereo, ejapo ndepy'a re rendu va'e ha'e javi, mba'eta ndereve Nhanderuete oiko — he'i.

**3** Ha'e va'e pyavyve SENHOR oayvu ombou Natã pe. Ha'e vy aipoe'i:

**4** — Tereo ha'e aipo're xerembiguai Davi pe: “Po rami SENHOR ijayvu: ‘Ndee ma oo xee aĩ aguã apoarã e'ŷ reiko.

**5** Mba'eta neĩ peteĩve oo py ma voi xee naĩ teri Israel kuery Egito gui arupa guive aŷ peve. Ha'e rami 'rãgue py oo'i py rive aiko va'e, xembojerovia aty py ae mamo rã oĩa rupi rei.

**6** Opa rupi Israel kuery aru herekovya rupi nda'u xeayvu ri raka'e amongue herekoia pe, e'ŷ vy xevygua kuery re apena uka va'ekue pe nda'u aipoa'e: “Mba'e re tu nderejapoi peteĩ xerorã yary guigua?” ha'e teve?”

**7** Ha'e gui aŷ ma po rami 'rã ndeayvu xerembiguai Davi pe: ‘SENHOR ixondaro reta va'e aipoe'i: Xee roiporavo karamboae vexa'i kuery re repenaa gui, ha'e hakykue reikoa gui, huvixarã xevygua Israel kuery re ju repena aguã.

**8** Xee aa avi karamboae ndereve, reoa rupi tema. Nderovaigua kuery amomba nerendonde gui, amboyvate guive nderery, ipo'akakueve anho ikuiaia rami.

**9** Areko katu avi xevygua Israel kuery ikuai aguã, amboekoapa guive ha'e py, mava'eve omoangekoave e'ŷ aguã, ha'e heko vai va'e ombojexavaive e'ŷ aguã jypy guare rami e'ŷ,

**10** xevygua Israel kuery rerekoarã amoĩa ára guive. Ha'e rami avi nderovaigua kuery aitypa, ha'e aikuua uka pova'e: Xee SENHOR ae'rã ajapo oo ndevy.\*

**11** Mba'eta nderekovea opa rã nderu kuery ooague py ndereraa avi ma jave nderekovia amoingo 'rã ndeguigua, nderay' kuery ramymino va'e regua. Ha'e va'e ma ajapo 'rã ipo'akaa oĩ atã aguã rami.

**12** Ha'e va'e ae ma ojapo 'rã peteĩ oo xevy guarã, ha'e rã xee ajapo 'rã raka'e rã peve huvixave oĩ aguã rami.

**13** Xee ma tuu 'rã, ha'e rã ha'e ma xera'y 'rã oiko. Ha'e rami vy ixugui ndaipe'ai 'rã amboaxyta, ndee reĩ e'ŷ mbove guare gui aipe'a vy namboaxyveiague rami e'ŷ.\*

**14** Ha'e rami 'rãgue py ha'e va'e amoĩ atãve 'rã xero re opena aguã, ha'e huvixave oĩ riae aguã rami. Ha'e ramo huvixave oĩ riae 'rã raka'e rã peve', he'i.”

**15** Ha'e va'e ayvu ha'e javi, Natã pe oikuua ukaague rami ae Davi pe ju omombe'u.

### 2 Samuel 7.18-29

**16** Ha'e gui ma SENHOR pegua opy Davi oike vy hi'aĩ henonde. Ha'e vy aipoe'i:

— SENHOR Xeruete, mba'e nunga tu xee aiko, ha'e mba'e nunga tu xero pygua kuery ikuai, apy peve ndee xereru aguã?

\* **17:10** Oo ojapo aguã re SENHOR ijayvua py ma raka'eve rã Davi ramymino kuery regua huvixarã amoingo aguã re ijayvu (versículos 12,16). Ha'e va'e regua Jesus Cristo ae oiko (Lucas 1.32-33,69; Atos 13.23). Ha'e rami avi “Israel ro” he'ia ma Israel ramymino kuery re ijayvu vy. \* **17:13** Hebreus 1.5, Apocalipse 21.7

<sup>17</sup> Xeruete, ha'e nunga tu ndevy pe mba'e'ŷ rima, ndeayvu ma voi guive xee nerembiguai ro pygua raka'e rã guarã re. SENHOR Xeruete, ha'e rami xereroayvu porã avakue omboetevepy rami.

<sup>18</sup> Xee nerembiguai Davi nami xemboete uka rire mba'e ta'eve ju ndevy? Mba'eta ndee ma xee nerembiguai xekuaa porã.

<sup>19</sup> SENHOR, nerembiguai remboaxyha'e ndepy'a re rendua rami vy rejapo kova'e nunga tuvixa va'e ha'e javi, oikuaa pavã aguã.

<sup>20</sup> Ha'e nunga rupi SENHOR Xeruete, ndoikoi ndee ramigua ete'i, ndoikoi guive Oreruete mboae ndee e'ŷ vy, oreapyxa py ae roenduague rami.

<sup>21</sup> Mava'e regua tu ndevygua Israel kuery ikuia ramigua? Xeruete, ha'e kuery anho'i ae yvy re ikuai va'e mbyte gui ndejeupe guarã reipe'a va'ekue. Mba'emo porã ete rejapoa py ndejeupe ae rejapo aguã nderery re ima'endu'aa aguã rami. Mba'eta yvy regua kuery remoxêmba raka'e, ndevygua kuery Egito gui renoêmba va'ekue renonde gui.

<sup>22</sup> Israel kuery ndejeupe guarã ae remoingo raka'e rã peve, ha'e gui SENHOR, ndee ju renhemoingo Tuuete.

<sup>23</sup> Ha'e gui aŷ ma SENHOR, ha'e va'e ayvu xee nerembiguai rekorã re aipo'reague, ha'e xero pygua re voi, toĩ atâve. Ejapo ndeayvuague rami ae.

<sup>24</sup> Nderery toikuua pavã, tomboetea riae, ha'e vy aipo ta'ea: "SENHOR ixondaro reta va'e ma Israel kuery Ruete, Israel kuery pegua ae", ta'ea. Ha'e ramo xee Davi nerembiguai ro ma oĩ atã riae 'rã neronden.

<sup>25</sup> Mba'eta Xeruete, xee nerembiguai pe reikuua uka xevy pegua oorã rejapo 'rãa. Ha'e nunga rupi ae xee nerembiguai xepy'a guaxu nami anhembo'e aguã ndevy.

<sup>26</sup> Aŷ ma SENHOR, ndee ae ma Oreruete, ha'e xee nerembiguai pe rejapo porã aguã re ndeayvu.

<sup>27</sup> Ha'e nunga rupi aŷ, emingo porã nerembiguai ro pygua kuery, neronden rupi orekuai riae aguã rami. Mba'eta SENHOR, ndee orereroayvu porã rire raka'e rã peve 'rã roiko porã – he'i.

## 18

### 2 Samuel 8.1-14

<sup>1</sup> Ha'e rire ma Davi filisteu kuery oitypa vy ipo'aka ha'e kuery re. Ha'e kuery po gui oipe'a avi Gate tetã ha'e ijyvýry rupi tekoia ikuai va'e.

<sup>2</sup> Oitypa avi Moabe pygua kuery. Ha'e rire Davi rembiguairã ikuai, ixupe mba'emo ome'ẽ 'rã okuapy guive.

<sup>3</sup> Ha'e gui Zobá pygua huvixa Hadadezer ma yakã Eufrates re ipo'aka ju aguã oo jave hexe voi Davi ipo'aka Hamate peve.

<sup>4</sup> Ixupagua kavaju árygua kuery regua ma Davi ogueraa mil e setecentos, vinte mil avakue yvy rupigua reve. Davi ojajapa avi kavaju karóxa regua pytaxã, cem ete'i ojaya e'ŷ re oeja.

<sup>5</sup> Ha'e ramo Síria pygua avakue ou Damasco gui, huvixa Zobá pygua Hadadezer pytyvõarã. Ha'e rami tei Síria guigua ma Davi ojuka vinte e dois mil.

<sup>6</sup> Ha'e gui Síria Damasco regua py Davi omoi harõarã kuery. Síria pygua kuery voi Davi rembiguairã ikuai vy mba'emo ome'ẽ 'rã okuapy ixupe. Davi ooa nhavõ rupi SENHOR ombopo'akave tema.

<sup>7</sup> Hadadezer rembiguai kuery yvatekueve hu'y jokoa ouro guigua oguereko va'ekue Davi ojopy vy oguerupa Jerusalém py.

<sup>8</sup> Hadadezer pegua tetã Tibate ha'e Cum gui voi huvixa Davi oipe'ave tema overa va'e guigua. Ha'e va'e overa va'e gui ma Salomão ojapo 'rã yy mbotya, oo ytarã ha'e tembiporu.

<sup>9</sup> Ha'e gui Hamate pygua huvixa Toú oendu Zobá pygua huvixa Hadadezer pegua xondaro kuery Davi oitypaague.

<sup>10</sup> Ha'e vy Davi-a py huvixa ombou gua'y Hadorão oxarura vy oguerovy'a aguã Hadadezer reve joguero'aa py oitypaague re (mba'eta Toú reve Hadadezer joguero'a avi tema rire). Hadorão ou vy ogueru mba'emo ouro, prata ha'e overa va'e guigua ome'ẽ va'erã.

<sup>11</sup> Ha'e nunga huvixa Davi ojopy vy omboaxapa SENHOR peguarã, ha'e javi regua gui prata ha'e ouro ojopy va'ekue reve: Edom guigua, Moabe, Amom ramymino kuery, filisteu kuery ha'e Amaleque guigua guive.

<sup>12</sup> Ha'e gui Zeruia pi'a Abisai ojuka avi dezoito mil Edom pygua juky yvjugua 'epy va'e py.

<sup>13</sup> Edom re voi omoõ harðarã kuery. Ha'e ramo Edom pygua kuery ha'e javi ikuai Davi rembiguairã. Davi ooa nhavõ rupi SENHOR ombopo'akave tema.

### *2 Samuel 8.15-18; 20.23-26*

<sup>14</sup> Ha'e rami vy Davi opena Israel kuery ha'e javi re. Mba'emo re oikuaa potaa py ha'evea rami meme oguerek.

<sup>15</sup> Ixupegua xondaro kuery ruvixa ma Zeruia pi'a Joabe. Mba'emo oiko va'ekue mboparaa ma Ailude ra'y Josafá.

<sup>16</sup> Sacerdote ma Aitube ra'y Zadoque, ha'e gui Abiatar ra'y Abimeleque ju. Kuaxia re opena va'ety ma Sausa.

<sup>17</sup> Huvixa ro rarða kuery ruvixa ma Joiada ra'y Benaia. Ha'e rã huvixa Davi reveguia yvatekueve ma ta'y kuery ae.

## 19

### *2 Samuel 10.1-19*

<sup>1</sup> Ha'e rire ma Amom kuery ruvixa Naás omano, ha'e rã ta'y ju oĩ nguu rekovia.

<sup>2</sup> Ha'e ramo Davi aipoe'i:

— Naás ra'ykue Hanum pe aexa uka 'rã ayvua, tuu xerayvu rire — he'i. Ha'e rami vy Davi omondouka guembiguai kuery ombopy'a porã ju aguã tuu omanoague gui. Ha'e gui Davi rembiguai kuery ovaẽ Amom kuery yvy re, Hanum ombopy'a porã aguã.

<sup>3</sup> Ha'e rami teĩ Amom regua yvatekueve aipoe'i okuapy Hanum pe:

— Rexa'ã teve Davi nderu rãgue'i omboetea rupi guembiguai ombou nembopy'a porãarã? Xapy'a rei ma ndea py merami guembiguai kuery ombou vy neretã re oikuaa pota ha'e nhandeyvy re oexa pota rire ombovaipa aguã e'ŷ teve? — he'i okuapy.

<sup>4</sup> Ha'e rami rã Hanum omboty Davi rembiguai kuery, ha'e vy onhopi hendyva, ija ojaya guive hevi ro'o ojekuaa peve. Ha'e rire ma omondouka ju.

<sup>5</sup> Ha'e ramo amongue oje'oi vy Davi pe omombe'upa hembiguai kuery re oiko va'ekue. Ha'e kuery omoximbaa rire huvixa ombou ayvu mombe'uarã ha'e kuery ovaexi aguã. Aipoe'i uka:

— Pepyta ranhe Jericó tetã py, penerendyva ipukupa ju peve. Ha'e rire ma peju ju — he'i uka.

<sup>6</sup> Amom kuery oikuaa okuapy Davi nda'ija'evei aguã rami ojapoa. Ha'e rami vy Hanum ha'e Amom kuery omondouka trinta e três mil quilos prata guigua, Mesopotâmia gui ojeupe guarã ogueru ruka aguã karóxa ha'e kavaju árygua kuery, Síria pygua kuery Maaca ha'e Zobá gui guive.

<sup>7</sup> Ha'e rami vy ojeupe guarã ogueru ruka trinta e dois mil karóxa ha'e Maaca pygua huvixa ixupegua kuery reve. Ha'e kuery ha'e javi ou vy Medeba tetã rexei'i ikuai. Amom kuery voi guetã ikuai va'e ha'e javi gui ou vy ono'õmba avi. Ha'e rami vy mae ma oje'oi joe opu'ã aguã katy.

<sup>8</sup> Ha'e nunga Davi oendu vy ha'e kuery rovai ombou Joabe oxondaro kuery ipy'a guaxukueve ha'e javi reve.

<sup>9</sup> Amom kuery oje'oi vy oarõ okuapy tetã kora rokẽ py joe opu'ã aguã. Ha'e rã huvixa kuery ipytyvðarã ou va'ekue ma amboae rupi ranhe ikuai nhuñdy rupi.

<sup>10</sup> Ha'e gui Joabe oexa hovaigua kuery henonde ha'e hakykue katy gui voi oarõ okuapy rã, ha'e rami vy Israel kuery ikuai va'e gui opu'ã kuaave va'e oiporavo vy omboyxy imbokuapy Síria pygua kuery rovai.

<sup>11</sup> Ha'e rã hembyrekue ma guyvy Abisai po py omboaxa, ha'e rã ha'e ma Amom kuery rovai ju omboyxy imbokuapy.

<sup>12</sup> Ixupe Joabe aipoe'i:

— Xapy'a rei Síria pygua kuery xegui imbaraeteve ramo ndee reo 'rã xepytyvõ aguã. Ha'e rã Amom kuery ri ndegui imbaraeteve ramo xee aju 'rã roipytyvõ vy.

<sup>13</sup> Nhanembaraete ke ha'vy. Jajoguero'a nhandepy'a guaxua rupi nhaneretarã kuery ha'e Nhanderuete pegua tetã ikuai va'e jaepya rupi. Ha'e SENHOR tojapo ojou porãa rami — he'i.

<sup>14</sup> Ha'e gui Joabe guexeveguia kuery reve oje'oi vy joguero'a okuapy Síria pygua kuery reve. Ha'e rã ha'e va'e kuery onhamba henonde gui.

<sup>15</sup> Síria pygua kuery onhamba maa Amom kuery oexa vy ha'e kuery voi onhamba avi Joabe ryvy Abisai renonde gui. Ha'e rami vy onhemimba ju guetã py. Ha'e ramo Joabe ojevy ju Amom kuery reve joe opu'ãague gui, ha'e vy oopa ju Jerusalém katy.

<sup>16</sup> Ha'e gui Síria pygua kuery ma Israel kuery renonde oitypaa oexa okuapy vy omondouka ayvu reraarã guetã pygua kuery yakã rovai re heko va'e oupa avi aguã. Ha'e kuery renonde ou oiny Sofaque, Hadadezer pegua xondaro kuery rerekoarã.

<sup>17</sup> Ha'e nunga Davi pe omombe'ua rã omboatypa Israel kuery ha'e javi, ha'e vy Jordão yakã oaxa ma vy ha'e kuery ikuiaia katy oje'oi joguero'a aguã. Síria pygua kuery rovai joguero'a aguã Davi kuery oje'oi ramo ha'e kuery voi opu'ã jogueruvy hovai.

<sup>18</sup> Ha'e rami tei Israel kuery renonde gui Síria pygua kuery onhamba ju. Ha'e ramo Síria pygua kuery va'e regua avakue ma Davi ojuka sete mil karóxa pygua ha'e quarenta mil yvy rupigua. Ojuka avi xondaro kuery ruvixa Sobaque.

<sup>19</sup> Hadadezer rembiguai kuery oitypa ae maa oexa okuapy vy Davi reve ojapo ikuai porã aguã, ha'e vy hembiguai ju ikuai. Ha'e rami rire Síria pygua kuery nei raka'e ramo voi noipytyvõxevei Amom kuery.

## 20

### 2 Samuel 12.26-31

<sup>1</sup> Ha'e gui peteĩ ma'etã opaa py, huvixa kuery joe opu'ã aguã katy oo 'rã jave py ma Joabe ogueraa xondaro kuery. Ha'e rami vy Amom kuery yvy ombovaipa vy Rabá tetã peve ou ha'e ojokopa okuapy. Ha'e rã Davi ma Jerusalém tetã py opyta. Ha'e gui Joabe kuery ma Rabá re opu'ã vy omomba ete okuapy.

<sup>2</sup> Ha'e pygua kuery ruvixa akã gui Davi omboi coroa. Ha'e gui opejaa rã oikuua trinta e três quilos ouro guigua ipoyia. Hexe oĩ avi ita rexakã iporãve va'e. Ha'e rami vy Davi akã re ju omoĩa. Tetã gui imba'e rei-rei va'ekue ogueraa reta avi.

<sup>3</sup> Ha'e pygua kuery ogueraa avi vy omomba'eapo yvyra ayaa py, picareta ha'e haxa ferro guigua py. Ha'e rami ae Davi ojapo Amom kuery retã ha'e javi re. Ha'e gui ojeupegua kuery ha'e javi reve Davi ojevy ju Jerusalém katy.

### 2 Samuel 21.15-22

<sup>4</sup> Ha'e va'e rire ma Gezer py joguero'a okuapy filisteu kuery reve. Ha'e vy Husa pygua Sibecai ojuka gigante ramymino Sipai. Ha'e rami vy ipo'aka okuapy filisteu kuery re.

<sup>5</sup> Ha'e gui filisteu kuery reve ju joguero'a okuapy. Ha'e vy Jair ra'y Elanã ojuka Gate pygua Golias ryvy Lami. Ha'e va'e guembiporu hu'y guaxu oguerekoo va'ekue ma ajukue popẽa 'y rami tuvixa va'e.

<sup>6</sup> Ha'e gui teigue ju opu'ã okuapy joe, Gate py ae. Ha'e py oiko peteĩ ava yvate ete va'e. Ha'e va'e ma mboapy meme ikuã ha'e ipyxã voi, ha'e javi vy vinte e quatro ikuã ha'e ipyxã oguerekoo. Ha'e va'e voi gigante ramymino regua.

<sup>7</sup> Ha'e va'e ma Israel kuery mbojaru reia rupi ijayvu ramo Davi ryke'y Simei ra'y Jônatas ojuka.

<sup>8</sup> Ha'e va'e avakue ma gigante ramymino ikuai Gate py. Ha'e rami teĩ Davi ha'e ixondaro kuery oitypa raka'e.

## 21

### *2 Samuel 24.1-9*

<sup>1</sup> Ha'e gui Israel kuery rovai Satanás opu'ã vy Davi py'a re omoĩ Israel kuery oipapapa aguã.\*

<sup>2</sup> Ha'e rami vy Davi aipoe'i Joabe ha'e heta va'e kuery ruvixa ikuai va'e pe:

— Tapeo, peipapapa Israel kuery ikuai va'e, Berseba guive Dã peve. Ha'e vy peikuaa va'ekue Peru ju xea py, xee voi aikuua aguã mbovy pa ikuiaia — he'i.

<sup>3</sup> Joabe ombovai:

— Ha'e rami avi tove SENHOR Nderuete tomboetave cem-kue ju. Ha'e rami teĩ Xeruvixa, ha'e kuery ha'e javi e'ý teve nerembiguai ikuai? Mba'e re tu ha'e rami ete rejapoxe? Xeruvixa, mba'e re tu ha'e rami ete rejapo Israel kuery ha'e javi re jejavya ou aguã rami? — he'i.

<sup>4</sup> Ha'e rami teĩ huvixa ayvu Joabe ijayvua gui ipoyive ramo Joabe oo vy Israel yvy ha'e javi rupi oikuua pota. Ha'e gui mae ma ojevy ju Jerusalém katy,

<sup>5</sup> ha'e Davi pe omombe'u heta va'e kuery mbovy pa ikuiaia. Israel re avakue kyxe oiporu kuaa va'e ma um milhão e cem mil ikuai ra'e. Ha'e rã Judá py ma quatrocentos e setenta mil ikuai avakue kyxe oiporu kuaa va'e.

<sup>6</sup> Ha'e rã ha'e kuery reve Levi ha'e Benjamim regua ma Joabe ndoipapai, huvixa ayvu ndojou porãi ete vy.

### *2 Samuel 24.10-17*

<sup>7</sup> Ha'e nunga ha'e javi Nhanderuete ndojou porãi vy omoingo axy Israel kuery.

<sup>8</sup> Ha'e ramo Davi aipoe'i Nhanderuete pe:

— Ajejavy vaipa ra'e ha'e rami ajapoa py. Ha'e rami teĩ aý SENHOR, ajerure xee nerembiguai ajejavyague rembogue aguã, inhakã porã ve'ý va'e rami aiko rire — he'i.

<sup>9</sup> Ha'e gui SENHOR ijayvu Davi pegua profeta Gade pe. Ha'e vy aipoe'i:

<sup>10</sup> — Tereo aipo're Davi pe: “Po rami SENHOR ijayvu: ‘Mboapy regua va'e peteĩ ma ambou 'rã ndere. Ha'e va'e regua peteĩ eiporavo ajapo aguã’, he'i.”

<sup>11</sup> Ha'e ramo Davi oña py Gade ou vy aipoe'i ixupe:

— SENHOR ma po rami ijayvu: “Eiporavo reipota va'e rei:

<sup>12</sup> Mboapy ma'etý re karuai oiko aguã, tyrã pa mboapy ma'etý re nderovaigua kuery nhandereity aguã kyxe nderupitya py, tyrã pa mboapy ára re SENHOR okyxe ae oiporu aguã. Ha'e va'e ma mba'eaxy vaikue oiko aguã ndeyvy re, Israel ha'e javi rupi SENHOR-a guigua anjo nhomokanhymba aguã.” Eikuua pota porã ke aý, xembouare pe ambovai kuaa aguã — he'i.

<sup>13</sup> Ha'e ramo Davi ombovai Gade pe:

— Xee ma ajexavai vaipaa aendu. Ha'eveve SENHOR po py anhemboaxa uka rã, mba'eta ha'e ma opa e'ý va'e nhanemboaxy va'e. Ha'e rã avakue po py ma xee nanhemboaxa ukaxe — he'i.

<sup>14</sup> Ha'e rami rã SENHOR ombou mba'eaxy vaikue Israel ha'e javi rupi. Ha'e ramo Israel kuery va'e regua setenta mil avakue omano.

<sup>15</sup> Jerusalém tetã py voi Nhanderuete ombou peteĩ anjo nhomombaarã. Ha'e rami teĩ omomba ta ma ramo SENHOR oma'ë vy opytu'u ma mba'emo vai omoingoa gui. Ha'e vy aipoe'i anjo nhomombaarã ombou va'ekue pe:

\* **21:1** Davi oipapa uka avakue joe opu'ã kuaa va'e. Ha'e nunga py ojejavy, oxondaro kuery re ojerovia vy, Nhanderuete re 'rãgue py.

— Ha'eve ma, emboguejy ju ndepo — he'i. Ha'e va'e jave ma anjo hi'aĩ jebuseu regua Ornã mba'emo moa'yñaty yvy'iry.

<sup>16</sup> Ha'e gui Davi oma'ẽ vy oexa anjo SENHOR-a guigua yvy ha'e yva mbyte opyta rã, opo py kyxé oekyi va'ekue oupi ho'amy Jerusalém rovai. Ha'e ramo Davi ha'e nhomongeta va'ety kuery hexeve ikuai va'e ajukue vaikue py onhemonde reve ojero'apa vy yvy re ngova omovaẽ okuapy.

<sup>17</sup> Ha'e ramo Davi aipoe'i Nhanderuete pe:

— Xee ae e'ŷ ri ty'y heta va'e kuery aipapa aguã re xeayvu va'ekue? Xee rima ajejavy, xee ae ha'eve'ŷ va'e ajapo. Ha'e rã kova'e vexa'i kuery, mba'e tu ha'e kuery ojapo? SENHOR Xeruete, xerovai anho eupi ndepo, ha'e xeru ro pygua kuery rovai. Ha'e rã ndevygua kuery ma embopaga eme.

### *2 Samuel 24.18-25*

<sup>18</sup> Ha'e gui ma SENHOR-a guigua anjo aipoe'i Gade pe:

— Davi too peteĩ altar SENHOR peguarã tojapo, jebuseu regua Ornã mba'emo moa'yñaty py — he'i.

<sup>19</sup> Ha'e gui SENHOR rery rupi Gade ha'e rami ijayvu ramo Davi oo ijayvuague rami vy.

<sup>20</sup> Ornã ma ha'e va'e jave trigo moa'yña rupi oiko. Ha'e gui ojere vy oexa anjo hi'aĩ rã. Ha'e ramo hexeve ta'y kuery irundy ombo'epo okuapy va'e onhemimba jogueravy.

<sup>21</sup> Ha'e gui Ornã oĩ py Davi ovaẽ ouvy ramo oma'ẽ. Oexa kuaa vy mba'emo moa'yñaty gui oẽ vy Davi renonde py oĩ guenapy'ã re, ngova yvy re omovaẽ reve.

<sup>22</sup> Davi aipoe'i Ornã pe:

— Xevy pe eme'ẽ kova'e yvy peteĩ altar SENHOR peguarã ajapo aguã, mba'eaxy vaikue heta va'e kuery áry ombou va'ekue opytu'u aguã. Emboaxa xevy, ha'e rã hepy xee ame'ẽ 'rã ha'evea rami.

<sup>23</sup> Ha'e rã Ornã aipoe'i Davi pe:

— Xeruvixa, ejopy tema ndejeupe guarã, ha'e ejapo reipota va'e rei. Apy ma vaka ikuai, ame'ẽ reapy reve reme'ẽ va'erã. Ame'ẽ avi yvyrape mba'emo moa'yñaty regua yxakãrã, ha'e trigo ra'yñgue guive reme'ẽ va'erã irûrã. Ame'ẽmba rive — he'i.

<sup>24</sup> Huvixa Davi ombovai Ornã:

— Any, ha'e rami 'rãgue py ndevy pe xee amboekovia 'rã hepyrã porã re. Mba'eta ndepo gui nda'evei ajopy rive aguã SENHOR pe ame'ẽ va'erã. Ome'ẽ rive pyre ma xee name'ẽ reguai — he'i.

<sup>25</sup> Ha'e rami vy ha'e va'e yvy repyrã Davi ome'ẽ Ornã pe seiscentos hatã'i va'e ouro guigua.

<sup>26</sup> Ha'e py ma Davi ojapo altar SENHOR peguarã. Hi'áry ma ome'ẽ mymba oapy reve, hexeve peteĩ rami ju ikuia regua guive. Ha'e gui SENHOR pe ojapukai ramo ombovai tata yva gui altar áry ombou vy.

<sup>27</sup> Ha'e gui anjo pe SENHOR ijayvu ramo omboyrju ju kyxé.

### *Templo oĩ aguã py mba'emo ome'ẽague*

<sup>28</sup> Ha'e jave py Davi oexa rã jebuseu Ornã mba'emo omoa'yñaty py SENHOR ombovai. Ha'e rami vy mba'emo ome'ẽ ixupe ha'e py.

<sup>29</sup> Mba'eta ha'e va'e jave py ma oo'i SENHOR peguarã tekao e'ŷa py Moisés ojapo va'ekue ma Gibeão yvy'ã re teri oĩ, altar mba'emo oapyaty voi.

<sup>30</sup> Ha'e katy nda'evei Davi oo aguã Nhanderuete pe oporandu aguã, SENHOR-a guigua anjo kyxé oguereco va'e gui okyje vy.

— Apy ae ojapoa'rã oo SENHOR Nhanderuete peguarã, altar Israel kuery mba'emo oapy aguã guive — he'i.

<sup>2</sup> Ha'e rami vy Davi omboaty uka amboae guigua kuery Israel yvy ha'e javi rupi hekoava'e. Ha'e kuery va'e regua omoõ ita re ombo'eapo va'erã, ita omoatyrõ aguã oo SENHOR peguarã ojapoa rã guarã.

<sup>3</sup> Ikaravorã ma Davi ojou uka reta avi ferro, okẽ re omoõ aguã ijao'ia ha'e hexe guarã. Overa va'e voi ojou uka oata aguã rami e'ÿ, opejapaa rei aguã rami e'ÿ guive,

<sup>4</sup> yary aygue guive heta avi. Ha'e nunga ma Sidom ha'e Tiro pygua kuery ogueru okuapy Davi pe oata aguã rami e'ÿ.

<sup>5</sup> Mba'eta Davi aipoe'i: "Xera'y Salomão ma kunumi'i teri vy mba'emo ojapo kuaa va'e'ÿ teri. Ha'e gui oo SENHOR peguarã ojapo pyrã ma iporãve ete va'e 'rã, ha'e va'e re ima'endu'a porãa aguã rami yvy jave re. Ha'e nunga rupi xee areko katupa ma voi 'rã mba'emo ojapo vy oiporu va'erã", he'iague rami Davi omano e'ÿ mbove voi oguereko katupa oata aguã rami e'ÿ.

### *Salomão pe Davi templo-rã ojapo ukaague*

<sup>6</sup> Ha'e ramo Davi oenoõ gua'y Salomão. Ha'e vy ixupe ojapo uka oo SENHOR Israel kuery ruete peguarã.

<sup>7</sup> Ha'e vy aipoe'i Salomão pe:

— Xera'y, xee aendu va'ekue oo SENHOR Xeruete pe ajapoxea hery oĩ aguã.

<sup>8</sup> Ha'e rami teĩ xevy SENHOR ombou avi oayvu. Ha'e vy aipoe'i: "Ndee ma tuguy ndopavei aguã rami remoë va'ekue, joe repu'ãa py rejoguero'aa rupi. Ha'e rami vy ndee nda'evei 'rã rejapo aguã oo xerery oĩ aguã, mbovy e'ÿ tuguy remoë rire kova'e yvy re, xerenonde rupi.

<sup>9</sup> Ne'exa, oiko 'rã peteĩ ndera'y. Ha'e va'e ma joe opu'ãa rupi e'ÿ 'rã oiko, mba'eta amombytu'u 'rã hovaigua kuery ha'e javi gui. Ha'e ma Salomão hery va'erã. Ha'e oĩ jave ma ajapo 'rã Israel kuery ikuai porã aguã rami, mba'eve ndoikoi rã.

<sup>10</sup> Ha'e va'e ae 'rã ojapo oo xerery oĩ aguã. Xera'y rami ae 'rã oiko, ha'e rã xee ma tuu rami 'rã aiko. Ha'e gui raka'e rã peve amoõ atã 'rã Israel kuery re opena aguã", he'i va'ekue xevy.

<sup>11</sup> Ha'e gui aÿ ma xera'y, tove SENHOR toiko ndereve, reiko porã aguã, SENHOR Nderuete peguarã oo rejapo aguã rami, nderekorã re ijayvuague rami vy.

<sup>12</sup> Tove SENHOR tome'ẽ ne'arandurã ha'e reiko kuaa aguã, Israel kuery re repenaa ja SENHOR Nhanderuete guigua lei rami ete reiko aguã rami.

<sup>13</sup> Ha'e rami vy 'rãe reiko porã, nekyre'ÿa rupi Israel kuery rekorã SENHOR Moisés pe ombopara uka va'ekue rejapopa aguã. Nembaraete ke ha'vy, ndepy'a guaxu, ekyje eme guive nekangy e'ÿ aguã.

<sup>14</sup> Ha'e gui ne'exa, xee ma amba'eapo vaipaa rupi anho areko katu ma oo SENHOR peguarã três milhões e trezentos mil quilos ouro guigua, ha'e trinta e três milhões de quilos prata guigua, ha'e gui overa va'e ha'e ferro oata aguã rami e'ÿ, neĩ ndopejaai guive. Ha'e gui yvyra ha'e ita voi areko katu avi va'ekue. Ha'e rami avi ndee ju rejou retave aguã ha'eve.

<sup>15</sup> Ha'e gui ndevy guarã ikuaise ju ombo'eapo va'e kuery heta ete, ita moatyrõa, ita re ombo'eapo va'e, oo apoa kuery, ha'e opa mba'e ojapo kuaa va'e,

<sup>16</sup> ouro ha'e prata guigua, overa va'e ha'e ferro guigua re ombo'eapo va'e mbovy e'ÿ. Ha'e nunga rupi nekyre'ÿ ke rejapopa aguã. Ha'e tove SENHOR toiko ndereve — he'i.

<sup>17</sup> Ha'e gui Davi ijayvu avi Israel kuery ruvixa ikuai va'e gua'y Salomão oipytyvõ aguã re. Ha'e vy aipoe'i:

<sup>18</sup> — SENHOR Penderuete peẽ kuery reve oiko ojapo jova-jovai rupi pendere nopu'ãavei aguã rami. Mba'eta xepo py omboaxapa ma nhandeyvy re ikuai va'e ha'e javi. Ha'e rami rire ha'e kuery SENHOR rembiguai ikuai, ixupeguia kuery rembiguai guive.

<sup>19</sup> Ha'e nunga rupi aŷ penekyre'ŷ ke pendepy'a ha'e penenhe'ẽ ha'e javi py SENHOR Penderuete peka aguã. Pejapo ete oo SENHOR Nhanderuete pegua iky'a e'ŷ va'erã, ha'e py hery oĩ aguã, ha'e SENHOR guexeve guarã ojapo va'ekue ryru peru aguã, tembiporu ixupegua ikuai va'e guive – he'i.

## 23

### *Levita kuery peteĩ-teĩ regua omba'eapo aguã re ijayvuague*

<sup>1</sup> Ha'e gui Davi tuja'i ma, ha'e hi'ára opa rai'i ma ramo omoõ gua'y Salomão Israel kuery ruvixarã.

<sup>2</sup> Ha'e rami vy omboatypa Israel kuery ruvixa ikuai va'e, sacerdote ha'e levita kuery guive.

<sup>3</sup> Levita kuery trinta ma'etŷ va'e guive tujakue peve oipapaa rã ha'e javi vy trinta e oito mil avakue ikuai.

<sup>4</sup> Ha'e kuery va'e regua ma vinte e quatro mil ikuai SENHOR pegua oo py omba'eapo va'e kuery re opena va'erã, ha'e gui seis mil ju ikuai huvixarã mba'emo re oikuua pota va'erã.

<sup>5</sup> Quatro mil ikuai okẽ rarõarã, ha'e gui quattro mil ju ikuai SENHOR pe oporaei va'erã, mba'epu Davi ha'e rami aguã ojapo uka va'ekue ombojoguy reve.

<sup>6</sup> Ha'e kuery Levi ramymino ikuai va'e ma Davi omboja'o ta'y kuery rery rupi peteĩ-teĩ regua ikuai aguã: Gérson, Coate ha'e Merari.

<sup>7</sup> Gérson ra'y kuery ma Ladã ha'e Simei.

<sup>8</sup> Ladã ra'y kuery ma huvixa Jeiel, ha'e gui Zetã ha'e Joel, ha'e javi vy mboapy ikuai.

<sup>9</sup> Simei ra'y kuery ma Selomite, Hziel ha'e Harã, mboapy ikuai. Ha'e kuery ma Ladã ramymino kuery re opena va'e meme.

<sup>10</sup> Simei ra'y kuery ma Jaate, Ziza, Jeús ha'e Berias. Ha'e kuery Simei ra'y ikuai va'e ma irundy.

<sup>11</sup> Jaate ma huvixa oiko, ha'e rã Ziza ma mokoña. Ha'e gui Jeús ha'e Berias ma ndata'y reta vaipai. Ha'e nunga rupi ha'e va'e mokoõve ramymino kuery ma peteĩ'i regua rive ikuai.

<sup>12</sup> Ha'e gui Coate ra'y kuery ma Anrão, Isar, Hebron ha'e Uziel, irundy ikuai.

<sup>13</sup> Anrão ra'y kuery ma Arão ha'e Moisés. Ha'e gui Arão ma omoña henda iky'a e'ŷ va'e rupi omba'eapo aguã, hamymino kuery voi, raka'e rã peve, ha'e gui SENHOR renonde py oapy aguã heakuã porã va'e, ixupe omba'eapo aguã, ha'e hery rupi jogueroayvu porã aguã, raka'e rã peve.

<sup>14</sup> Nhanderuete remimbo'e Moisés ra'y kuery voi Levi ramymino ikuai.

<sup>15</sup> Moisés ra'y kuery ma Gérson ha'e Eliézer.

<sup>16</sup> Gérson ra'y ma huvixa Sebuel.

<sup>17</sup> Eliézer ra'y ma huvixa Reabias. Nda'ipoi ae ta'y kuery mboae. Ha'e rami avi Reabias ramymino kuery ma heta-etave oje'oviv.

<sup>18</sup> Isar ra'y ma huvixa Selomite.

<sup>19</sup> Hebron ra'y kuery ma huvixa Jerias, mokoña ma Amarias, mboapya ma Jaaziel, ha'e gui irundaya ma Jecameão.

<sup>20</sup> Uziel ra'y kuery ma huvixa Mica, ha'e mokoña ma Issias.

<sup>21</sup> Merari ra'y kuery ma Mali ha'e Musi. Mali ra'y kuery ma Eleazar ha'e Quis.

<sup>22</sup> Eleazar ma ta'y e'ŷ re omano va'eri tajy kuery ikuai. Ha'e kuery re ikyvy kuery Quis ra'y ikuai va'e omenda okuapy.

<sup>23</sup> Musi ra'y kuery ma Mali, Éder ha'e Jeremote, mboapy ikuai.

<sup>24</sup> Ha'e va'e kuery ma Levi ramymino kuery meme, peteĩ-teĩ regua re opena va'e kuery reve. Peteĩ-teĩ oipapaa hery rupi. Ha'e gui vinte ma'etŷ va'e guive tujakue peve omoña SENHOR pegua oo rupi omba'eapo va'erã.

<sup>25</sup> Mba'eta Davi aipoe'iague rami: “ SENHOR Israel kuery ruete ojapo ojeupegua kuery re nopu'ãavei aguã rami, Jerusalém py hekoa riae aguã.

**26** Ha'e nunga rupi Levi ramymino kuery ndogueraavei 'rã oo'i, neñ tembiporu oiporu va'erã ma voi", he'i va'ekue.

**27** Ha'e nunga rupi Davi opa vy ijayvuague rami vy oipapapaa Levi ramymino kuery vinte ma'etý va'e guive tujakue peve.

**28** Ha'e kuery omoña Arão ramymino kuery oipytyvõ aguã SENHOR pegua opy rupi ombo'epo ramo, oka rupi, opy ja'o ikuai va'e rupi, mba'emo oiky'a'oa rupi, ha'e Nhanderuete pegua opy ombo'epo ha'e javi rupi.

**29** Ha'e kuery opena 'rã mbojape SENHOR renonde omoñby re, trigo ku'i mba'emo irũ ome'ẽ mbyrã oĩ va'e re, mbojape imbovua revegua e'ý ojapoa re, mba'emo oxyha'e oxyryrya re, ha'e mba'emo opejaa ha'e oa'ãa ha'e javi re.

**30** Ko'ẽ nhavõ aje'ive'i reve ikuai aguã SENHOR oguerovy'aa rupi oporaei aguã, ka'arukue voi ha'ekue rami ae ju 'rã ikuai,

**31** ha'e gui SENHOR pe mba'emo oapy reve ome'ẽ aguã, sábado ára ha'e jaxy ipyau'ia ára nhavõ ngaru oikoa py, ngaru aguã ára oa'anga pyre ojeupity nhavõ. SENHOR renonde py ombo'epo 'rã oipapaague rami vy.

**32** Ha'e rami vy opena 'rã onhemboaty aty re, henda iky'a e'ý va'e re guive. Oipytyvõ avi 'rã guexegua Arão ramymino kuery SENHOR pegua opy rupi ombo'epo py.

## 24

### *Sacerdote kuery peteñ-teñ regua ombo'epo aguã re ijayvuague*

**1** Ha'e gui Arão ramymino kuery ju omboja'o-ja'opaa peteñ-teñ regua rami. Arão ra'y kuery ma Nadabe, Abiú, Eleazar ha'e Itamar.

**2** Ha'e gui Nadabe ha'e Abiú ma nguu omano e'ý mbove omano raka'e ta'y e'ý re. Ha'e va'e rire ma Eleazar ha'e Itamar ju sacerdote ikuai.

**3** Ha'e gui Davi ma Eleazar ramymino Zadoque ha'e Itamar ramymino Aimeleque reve omboja'o peteñ-teñ regua ombo'epo py ojapo 'rã va'ekue rami.

**4** Ha'e rami vy omboja'o vy oikuaa Itamar ramymino kuery ikuai va'e gui Eleazar ramymino kuery re opena va'e hetave ra'ea. Mba'eta Eleazar ramymino kuery re opena va'e ma dezesseis, ha'e rã Itamar ramymino kuery regua ma oito ete'i ikuai.

**5** Ha'e gui xortea oexa vy omboja'opa peteñ-teñ regua rami ikuai aguã. Ha'e rami py Eleazar ha'e Itamar ramymino kuery va'e regua ma henda iky'a e'ý va'e re ha'e mba'emo Nhanderuete pegua ikuai va'e re opena va'erã ikuai.

**6** Ha'e rami vy ha'e kuery rery Semaías omboparapa imoiny. Ha'e va'e ma levita Natanael ra'y kuaxia mboparaa rupi oiko va'e. Huvixa oexaa py ombopara, ha'e gui huvixa kuery, sacerdote Zadoque ha'e Abiatar ra'y Aimeleque, ha'e gui sacerdote ha'e levita kuery akã ikuai va'e ha'e javi oexaa py guive. Ha'e rami py xortea oexa vy jorire-rire oiporavo heravy Eleazar ha'e Itamar ramymino va'e regua.

**7** Jypy xortea oexaa rami vy oiporavo Jeoiaribe, ha'e gui mokoña ma Jedaías,  
**8** mboapya ma Harim, irundaya ma Seorim,

**9** peteñ nhiruña ma Malquias, mboapy memea ma Miamim,

**10** sete-a ma Hacoz, oito-a ma Abias,

**11** nove-a ma Jesua, dez-a ma Secanias,

**12** onze-a ma Eliasibe, doze-a ma Jaquim,

**13** treze-a ma Hupá, catorze-a ma Jesebeabe,

**14** quinze-a ma Bilga, dezesseis-a ma Imer,

**15** dezessete-a ma Hezir, dezoito-a ma Hapises,

**16** dezenove-a ma Petaías, vinte-a ma Jeezquel,

**17** vinte e um-a ma Jaquim, vinte e dois-a ma Gamul,

**18** vinte e três-a ma Delaías, vinte e quatro-a ma Maazias.

- <sup>19</sup> Ha'e rami hery ikuaria rami peteī-teī SENHOR pegua opy oike 'rā ombo'eapo aguā, guamoī Arão ha'e SENHOR Israel kuery ruete ojapo ukaague rami.
- <sup>20</sup> Ha'e gui Levi ramymino kuery mboae ikuai va'e ruvixa kuery rery ma po rami: Anrão ra'y kuery va'e regua Subael, Subael ra'y kuery va'e regua Jedias,
- <sup>21</sup> Reabias ra'y kuery va'e regua huvixa Issias,
- <sup>22</sup> Isar ramymino kuery va'e regua Selomite, Selomite ra'y kuery va'e regua Jaate,
- <sup>23</sup> Hebrôm ra'y kuery va'e regua jypygua ma Jerias, mokoīa ma Amarias, mboapya ma Jaaziel, ha'e gui irundaya ma Jecameão,
- <sup>24</sup> Uziel ra'y kuery va'e regua Mica, Mica ra'y kuery va'e regua Samir,
- <sup>25</sup> Mica ryvy Issias, Issias ra'y kuery va'e regua Zacarias,
- <sup>26</sup> Merari ra'y kuery va'e regua Mali ha'e Musi, Jaazias ra'y kuery va'e regua Beno,
- <sup>27</sup> Merari ramymino Jaazias guigua ikuai va'e regua ma Beno, Soão, Zetur ha'e Ibri,
- <sup>28</sup> Mali ramymino Eleazar ta'y e'ŷ va'e,
- <sup>29</sup> Quis ra'y kuery va'e regua Jerameel,
- <sup>30</sup> Musi ra'y kuery va'e regua Mali, Éder ha'e Jerimote. Ha'e va'e kuery ma Levi ramymino kuery meme, peteī-teī regua ikuaria rami.
- <sup>31</sup> Ha'e kuery voi guyvy kuery Arão ramymino ikuai va'e ojapoague rami ae ju oexa okuapy xortea. Guetarã kuery re opena va'e ha'e yvyīgueve voi oexa okuapy xortea huvixa Davi oexaa py, Zadoque ha'e Aimeleque, ha'e gui sacerdote ha'e levita kuery akā ikuai va'e ha'e javi oexaa py guive.

## 25

### *Oporaei va'e kuery ombo'eapo aguā re ijayvuague*

- <sup>1</sup> Ha'e gui Davi ha'e ombo'eapo va'e kuery ruvixa ikuai va'e reve omoī Asafe, Hemā ha'e Jedutum ra'y kuery regua ombo'eapo aguā. Ha'e va'e kuery ma ikuai ayvu omombe'u aguā mba'epu ixā reta va'e reve, mbaraka ha'e hy'a pu reve. Ha'e rami aguā omoī va'ekue rery ma po rami:
- <sup>2</sup> Asafe ra'y kuery ma Zetur, José, Netanias ha'e Asarela. Asafe ra'y kuery meme ikuai, ha'e ae opena ha'e kuery ombo'eapoa re. Ha'e rā Asafe ombo'eapoa re ma huvixave ae opena oikovy.
- <sup>3</sup> Ha'e gui Jedutum ra'y kuery ma Gedalias, Zeri, Jesaías, Hasabias ha'e Matitias, ha'e javi vy mboapya meme ikuai. Ha'e kuery ombo'eapoa re tuu Jedutum ae opena oikovy. Mba'epu ixā reta va'e reve omombe'u 'rā ayvu, SENHOR oguerovy'aa rupi oporaeia py.
- <sup>4</sup> Ha'e gui Hemā ra'y kuery ma Buquias, Matanias, Uziel, Sebuel, Jerimote, Hananias, Hanani, Eliata, Gidalti, Romanti-Ézer, Josbecasa, Maloti, Hotir ha'e Maaziote.
- <sup>5</sup> Ha'e kuery ma Hemā ra'y kuery meme. Ha'e rā ha'e ma huvixave pegua profeta oiko. Nhanderuete oayvuague rami vy omombaraete, ha'e vy ixupe ome'ē catorze ta'y ha'e mboapya tajy kuery.
- <sup>6</sup> Ha'e kuery peteī-teī ombo'eapoa re tuu ae opena oikovy. SENHOR pegua opy oporaei 'rā hy'a pu reve, mbaraka ha'e ixā reta va'e reve Nhanderuete pegua oo rupi ombo'eapo vy. Ha'e rā tuu Asafe, Jedutum ha'e Hemā ombo'eapoa re ma huvixave ae opena oikovy.
- <sup>7</sup> Ha'e kuery ryvy kuery ma SENHOR pe oporaei aguā re ombo'ea rā oporaei kuaa va'e meme. Ha'e javi vy duzentos e oitenta e oito ikuai.
- <sup>8</sup> Ha'e kuery oexa okuapy oxortea peteī-teī regua ombo'eapo aguā oikuua aguā, yvyīgueve ha'e yvatekueve, nhombo'ea ha'e hemimbo'e kuery guive.
- <sup>9</sup> Jypy xortea oexa vy oikuua Asafe ra'y kuery va'e regua José. Mokoīa ma Gedalias. Ha'e va'e ma guyvy ha'e gua'y kuery reve vy doze ikuai.
- <sup>10</sup> Ha'e gui mboapya ma Zetur. Ta'y ha'e tyvy kuery reve vy doze avi ikuai.
- <sup>11</sup> Irundaya ma Izri. Ta'y ha'e tyvy kuery reve vy doze avi ikuai.

12 Peteĩ nhiruĩa ma Netanias. Ta'y ha'e tyvy kuery reve vy doze avi ikuai.  
 13 Mboapy memea ma Buquias. Ta'y ha'e tyvy kuery reve vy doze avi ikuai.  
 14 Sete-a ma Jesarela. Ta'y ha'e tyvy kuery reve vy doze avi ikuai.  
 15 Oito-a ma Jesaías. Ta'y ha'e tyvy kuery reve vy doze avi ikuai.  
 16 Nove-a ma Matanias. Ta'y ha'e tyvy kuery reve vy doze avi ikuai.  
 17 Dez-a ma Simei. Ta'y ha'e tyvy kuery reve vy doze avi ikuai.  
 18 Onze-a ma Azarel. Ta'y ha'e tyvy kuery reve vy doze avi ikuai.  
 19 Doze-a ma Hasabias. Ta'y ha'e tyvy kuery reve vy doze avi ikuai.  
 20 Treze-a ma Subael. Ta'y ha'e tyvy kuery reve vy doze avi ikuai.  
 21 Catorze-a ma Matitias. Ta'y ha'e tyvy kuery reve vy doze avi ikuai.  
 22 Quinze-a ma Jerimote. Ta'y ha'e tyvy kuery reve vy doze avi ikuai.  
 23 Dezesseis-a ma Hananias. Ta'y ha'e tyvy kuery reve vy doze avi ikuai.  
 24 Dezessete-a ma Josbecasa. Ta'y ha'e tyvy kuery reve vy doze avi ikuai.  
 25 Dezoito-a ma Hanani. Ta'y ha'e tyvy kuery reve vy doze avi ikuai.  
 26 Dezenove-a ma Maloti. Ta'y ha'e tyvy kuery reve vy doze avi ikuai.  
 27 Vinte-a ma Eliata. Ta'y kuery, ha'e tyke'y tyvy kuery reve vy doze avi ikuai.  
 28 Vinte e um-a ma Hotir. Ta'y ha'e tyvy kuery reve vy doze avi ikuai.  
 29 Vinte e dois-a ma Gidalti. Ta'y ha'e tyvy kuery reve vy doze avi ikuai.  
 30 Vinte e três-a ma Maaziote. Ta'y ha'e tyvy kuery reve vy doze avi ikuai.  
 31 Vinte e quatro-a ma Romanti-Ézer. Ta'y ha'e tyvy kuery reve vy doze avi ikuai.

## 26

### *Okẽ rarõarã kuery omoñague*

- 1 Ha'e gui okẽ rarõarã omoña avi. Ha'e kuery va'e regua ma Coré ramymino kuery. Meselemias ma Coré ra'y, Asafe ramymino kuery va'e regua.
- 2 Meselemias ra'y kuery ma jypygua Zacarias, mokoña ma Jediael, mboapya ma Zebadias, irundaya ma Jatniel,
- 3 peteĩ nhiruĩa ma Elão, mboapy memea ma Joanã, ha'e sete-a ma Elioenai.
- 4 Obede-Edom ra'y kuery ma jypygua Semaías, mokoña ma Jeozabade, mboapya ma Joá, irundaya ma Sacar, peteĩ nhiruĩa ma Natanael,
- 5 mboapy memea ma Amiel, sete-a ma Issacar, ha'e oito-a ma Peuletai, mba'eta Nhanderuete ha'e rami aguã omoingo porã rire.
- 6 Ha'e gui ta'y Semaías ra'y kuery avi ikuai. Ha'e kuery ma nguu ro re opena okuapy, avakue ipy'a guaxukueve meme.
- 7 Semaías ra'y kuery ma Otni, Rafael, Obede ha'e Elzabade. Tyvy kuery Eliú ha'e Semaquias ma avakue ipy'a guaxukueve meme.
- 8 Ha'e kuery ha'e javi ma Obede-Edom ramymino meme. Ta'y ha'e tyvy kuery reve vy ma sessenta e dois ikuai, avakue mbaraetekue ha'e ombo'eapo kuaa va'e meme.
- 9 Meselemias ra'y kuery, ha'e tyvy kuery reve vy ma dezoito ikuai, avakue ipy'a guaxukueve meme.
- 10 Ha'e gui Merari ramymino Hosa ra'y ma Sinri. Ha'e va'e ma huvixarã tuu omoĩ va'ekue, jypygua e'ŷ teĩ.
- 11 Ha'e gui mokoña ma Hilquias, mboapya ma Tebalias, ha'e irundaya ma Zacarias. Hosa ra'y kuery, tyvy kuery reve vy ma treze ikuai.
- 12 Ha'e va'e okẽ rarõarã omoĩ mbyre ruvixa kuery pe ome'ëa ojapo va'erã, guexegua kuery rami ombo'eapo aguã SENHOR pegua opy rupi.
- 13 Peteĩ-teĩ okẽ ikuai va'e rarõarã re oexa okuapy oxortea, yvyigueve ha'e yvatekueve ojapo va'erã oikuaa aguã, peteĩ-teĩ regua ikuiaia rami vy.

**14** Ha'e rami vy okẽ kuaray oua katyguia rarõarã omoõ Selemias xortea oexaa rami vy. Ha'e va'e rire ma xortea oexa jevy vy omoõ ta'y Zacarias. Ha'e va'e ma nhomongetaa py ijayvu porã kuaa va'e. Ha'e ma kuaray ijapu'a'ia katy okẽ oĩ va'e rarõarã oiko.

**15** Obede-Edom ma kuaray puku-a katy oĩ va'e rarõarã oiko. Ha'e gui ta'y kuery ma mba'emo omoõ porãatay rarõarã ikuai.

**16** Supim ha'e Hosa ma kuaray oikea katy oĩ va'e rarõarã ikuai, okẽ Salequete 'ea va'e rexei'i rupi, tape yvy'ã katy oo va'e regua yvýry. Jovaive rupi harõarã ikuai.

**17** Ha'e gui kuaray oua yke katy ma mboapy meme Levi regua kuery ikuai oarõa py. Ha'e gui kuaray ijapu'a'ia katy ha'e ipuku-a katy irundy 'rã ikuai ára nhavõ. Ha'e gui oo mba'emo omoõ porãatay jovaive re ikuai 'rã mokõ-mokoõ oarõa py.

**18** Ha'e gui oka kuaray oikea katy oĩ va'e rarõarã ikuai irundaya tape joaxa va'e py, ha'e gui oka katyve'i ma mokoõ ju.

**19** Ha'e va'e kuery ma Coré ha'e Merari ramymino kuery va'e regua okẽ rarõarã omoõ mbyre.

### *Hepyve va'e rarõarã kuery omoõague*

**20** Tyvy kuery levita va'e regua ma omoõa mba'emo hepyve va'e Nhanderuete pegua opy ikuai va'e ha'e mba'emo iky'a e'ŷ va'e omoõ porã mbyre rarõarã.

**21** Gérson ra'y Ladã ramymino kuery re opena va'e ma Jeiel.

**22** Jeiel ra'y kuery ma Zetã ha'e tyvy Joel. Ha'e va'e kuery ma opena hepyve va'e SENHOR pegua opy ikuai va'e re.

**23** Ha'e gui Anrão ramymino kuery, Isar, Hebrom ha'e Uziel ramymino kuery va'e regua ma

**24** Gérson ra'y Sebuel, Moisés ramymino. Ha'e va'e ma oiko hepyve va'e omoõ porã mbyre rarõa kuery re openaa rupi.

**25** Tyvy kuery ma Eliézer, ha'e ta'y Reabias, Reabias ra'y ma Jesaías, Jesaías ra'y ma Jorão, Jorão ra'y ma Zicri, Zicri ra'y ma Selomite.

**26** Ha'e gui Selomite ha'e tyvy kuery reve omoõa oarõ aguã mba'emo hepyve va'e Nhanderuete pe omboaxa pyre. Ha'e va'e ma huvixa Davi, guetarã kuery re opena va'e kuery, ha'e xondaro kuery mil ha'e cem ikuai va'e ruvixa kuery omboaxa va'ekue.

**27** Joe opu'ãa py ha'e kuery mba'emo ojou va'ekue omboaxapa SENHOR pegua oo omoatyrõa aguã.

**28** Ha'e rami ae avi opa mba'e profeta Samuel ome'ẽ va'ekue, ha'e gui Quis ra'y Saul, Ner ra'y Abner, Zeruia pi'a Joabe, ha'e kuery ha'e javi omboaxa va'ekue ma Selomite ha'e tyvy kuery oarõ okuapy.

### *Yvatekueve ha'e mba'emo re oikuua pota va'erã kuery omoõague*

**29** Isar ramymino kuery regua Quenanias ha'e ta'y kuery avi omoõa Israel kuery re opena va'erã, yvatekueve mba'emo hovai rupi oiko va'e re oikuua pota aguã.

**30** Hebrom ramymino kuery va'e regua ma omoõa Hasabias ha'e tyvy kuery reve. Ha'e va'e kuery ma avakue ipy'a guaxukueve, mil e setecentos ikuai. Ha'e kuery ma Israel kuery re openaa rupi ikuai, Jordão yakã rovai kuaray oikea katy. SENHOR pe omba'eapoa rupi ikuai, huvixave mba'emo oguereko va'e re openaa rupi guive.

**31** Hebrom ramymino kuery ruvixa ma Jerias oĩ. Ha'e kuery va'e regua tamoõ kuery ha'e hamymino kuery rery ha'e javi re oikuua potaa, quarenta ma'etýa re ma Davi huvixave oĩ jave py. Ha'e rami vy ha'e kuery va'e regua ojoua avakue ipy'a guaxukueve Jazer pygua Gileade yvy re.

**32** Ha'e va'e ryvy kuery ma dois mil e seiscentos ikuai avakue ipy'a guaxukueve, guetarã kuery re opena va'e meme. Ha'e va'e kuery ma huvixa Davi omoõ Rúben, Gade ha'e Manassés ramymino kuery oja'o va'ekue re opena va'erã. Opena avi 'rã mba'emo Nhanderuete pegua re, huvixave mba'emo oguereko va'e ha'e javi re guive.

## 27

*Peteĩ-teĩ jaxy re huvixave pegua xondaro ikuai va'erã omoõague*

<sup>1</sup> Israel ramymino kuery mbovy pa ikuiaia rami vy peteĩ-teĩ regua re opena va'e rery, ha'e mil ha'e cem ikuai va'e ruvixa kuery rery oĩa. Ha'e va'e kuery ma nguvixave pe ombo'epo 'rã mba'emo ojapoa rupi, mba'eta peteĩ-teĩ jaxy re oike 'rã ha'e va'e jaxy reguarã, ha'e rã amboae kuery ma oẽ 'rã oje'oivy, ha'e rami ae tema ikuai ma'etýa pukukue re. Ha'e peteĩ-teĩ regua ma vinte e quattro mil ikuai.

<sup>2</sup> Ha'e gui jypygua, jaxy ijypyva re ikuai va'e kuery ruvixa ma Zabdiel ra'y Jasobeão. Ha'e va'e kuery regua ma vinte e quattro mil ikuai.

<sup>3</sup> Ha'e va'e ma Perez ramymino kuery va'e regua, jaxy ijypyva re xondaro kuery ikuai va'e ruvixa kuery re opena va'erã omoõ mbyre.

<sup>4</sup> Ha'e gui mokoĩ jaxyva re ikuai va'e re opena va'e ma Aoí ramymino Dodai. Ha'e va'e pytyvõarã oiko Miclote. Ha'e va'e kuery regua ma vinte e quattro mil avi ikuai.

<sup>5</sup> Ha'e gui mboapya xondaro kuery ruvixa, mboapy jaxyva re ikuai va'e re opena va'e ma Benaia. Ha'e va'e ma huvixa oiko, sacerdote Joiada ra'y. Ha'e va'e kuery regua ma vinte e quattro mil avi ikuai.

<sup>6</sup> Ha'e va'e Benaia ae trinta avakue ikuai va'e regua ipo'akave va'e, ha'e kuery akã oiko. Ha'e rami vy ojeupeguia kuery re opena uka gua'y Amizabade va'e pe.

<sup>7</sup> Ha'e gui irundyia, irundy jaxyva re ikuai va'e re opena va'e ma Joabe ryvy Asael. Ha'e va'e rire ma oiko ta'y Zebadias. Ha'e va'e kuery regua ma vinte e quattro mil avi ikuai.

<sup>8</sup> Peteĩ nhiruña huvixa, peteĩ nhiruñ jaxyva re ikuai va'e re opena va'e ma Isar ramymino Samute. Ha'e va'e kuery regua ma vinte e quattro mil avi ikuai.

<sup>9</sup> Mboapy memea huvixa, mboapy meme jaxyva reguarã ma Tecoa pygua Iques ra'y Ira. Ha'e va'e kuery regua ma vinte e quattro mil avi ikuai.

<sup>10</sup> Sete-a huvixa, sete jaxyva reguarã ma Pelom pygua Heles, Efraim ramymino kuery va'e regua. Ha'e va'e kuery regua ma vinte e quattro mil avi ikuai.

<sup>11</sup> Oito-a huvixa, oito jaxyva reguarã ma Husa pygua Sibecai, Zera ramymino kuery va'e regua. Ha'e va'e kuery regua ma vinte e quattro mil avi ikuai.

<sup>12</sup> Nove-a huvixa, nove jaxyva reguarã ma Anatote pygua Abiezer, Benjamim ramymino kuery va'e regua. Ha'e va'e kuery regua ma vinte e quattro mil avi ikuai.

<sup>13</sup> Dez-a huvixa, dez jaxyva reguarã ma Netofa pygua Maarai, Zera ramymino kuery va'e regua. Ha'e va'e kuery regua ma vinte e quattro mil avi ikuai.

<sup>14</sup> Onze-a huvixa, onze jaxyva reguarã ma Piratom pygua Benaia, Efraim ramymino va'e regua. Ha'e va'e kuery regua ma vinte e quattro mil avi ikuai.

<sup>15</sup> Doze-a huvixa, doze jaxyva reguarã ma Netofa pygua Heldai, Otniel ramymino kuery va'e regua. Ha'e va'e kuery regua ma vinte e quattro mil avi ikuai.

*Israel kuery peteĩ-teĩ regua ruvixa kuery rery oĩa*

<sup>16</sup> Ha'e gui Israel kuery peteĩ-teĩ regua rerekaoa ma po rami: Rúben ramymino kuery re opena va'e ma Zicri ra'y huvixa Eliézer. Simeão ramymino kuery re opena va'e ma Maaca ra'y Sefatias.

<sup>17</sup> Levi ramymino kuery re opena va'e ma Quemuel ra'y Hasabias. Arão ramymino kuery re opena va'e ma Zadoque.

<sup>18</sup> Judá ramymino kuery re opena va'e ma Davi ryke'y Eliú. Issacar ramymino kuery re opena va'e ma Micael ra'y Onri.

<sup>19</sup> Zebulom ramymino kuery re opena va'e ma Obadias ra'y Ismaías. Naftali ramymino kuery re opena va'e ma Azriel ra'y Jerimote.

<sup>20</sup> Efraim ramymino kuery re opena va'e ma Azazias ra'y Oséias. Manassés ramymino kuery mbyte rupi oja'o va'ekue re opena va'e ma Pedaías ra'y Joel.

<sup>21</sup> Ha'e rã Manassés ramymino kuery mboae Gileade yvy re hekoa va'e re opena va'e ma Zacarias ra'y Ido. Benjamim ramymino kuery re opena va'e ma Abner ra'y Jaasiel.

<sup>22</sup> Dã ramymino kuery re opena va'e ma Jeroão ra'y Azarel. Ha'e va'e kuery ma Israel kuery peteĩ-teĩ regua ruvixa kuery ikuai va'ekue meme.

<sup>23</sup> Ha'e gui Davi ma ndoipapa ukai vinte ma'etý teri ndoguerekoi va'e, mba'eta SENHOR ijayvu ae ma rire jaxy-tata yva re ikuai va'e rami Israel kuery omboetave aguã re.

<sup>24</sup> Ha'e gui Zeruia pi'a Joabe ma omboypy heta va'e kuery oipapa aguã teĩ ndoipapapai, oipapaa káuxa Israel kuery áry poxya ou ramo. Ha'e nunga rupi ae oipapaague nomboparaai huvixa Davi rekokue oña re.

### *Davi mba'emo oguereko va'e re opena va'e kuery rery oĩa*

<sup>25</sup> Adiel ra'y Azmavete ma huvixave mba'e hepyve va'e omoĩ porãaty re opena va'e. Ha'e rã yvy ituia rupi oguereko va'e re, tetã mboae rupi, tekao ha'e oo imbaraete va'e ikuai rupi oguereko va'e re opena va'e ma Uzias ra'y Jônatas.

<sup>26</sup> Mba'ety rupi ombo'eapo ha'e oma'etý va'e kuery re opena va'e ma Querube ra'y Ezri.

<sup>27</sup> Uva onhotý mbyre re opena va'e ma Ramá pygua Simei. Ha'e gui vinho omoĩ porã mbyre re opena va'e ma Sifã pygua Zabdi.

<sup>28</sup> Oliveira ha'e sicômoro rembypy mba'ety rupi ikuai va'e re opena va'e ma Gedera pygua Baal-Hanã. Ha'e gui azeite omoĩ porã mbyre re opena va'e ma Joás.

<sup>29</sup> Mymba kuery Sarom yvýry rupi okaru okuapy va'e re opena va'e ma Sarom pygua Sitrai. Ha'e rã yvyugua rupi mymba ikuai va'e re opena va'e ma Adlai ra'y Safate.

<sup>30</sup> Mymba camelô kuery re opena va'e ma Ismael ramymino Obil. Mburika'i kuery re opena va'e ma Meronote pygua Jedias.

<sup>31</sup> Ha'e rã mymba kyrígueve'i re opena va'e ma hagareno regua Jaziz. Ha'e va'e kuery ma huvixa Davi mba'emo oguereko va'e ha'e javi re opena va'ekue meme.

### *Huvixave mongetaa kuery rery oĩa*

<sup>32</sup> Ha'e gui Davi ruvy'i Jônatas ma nhomongetaa rupi oiko. Ha'e va'e ma lei re nhombo'e va'ety hi'arandu va'e. Ha'e rã Hacmoni ra'y Jeiel ma huvixa ra'y kuery re opena oikovy.

<sup>33</sup> Aitofel ma huvixave mongetaa oiko. Arquita regua Husai ma huvixave irũ ae oiko.

<sup>34</sup> Ha'e gui Aitofel noïvei ma rire Benaia ra'y Joiada ju oĩ, Abiatar guive. Ha'e gui Joabe ma huvixave pegua xondaro kuery ruvixa.

## 28

### *Davi rekovia Salomão ju oĩ aguã re ijayvuague*

<sup>1</sup> Ha'e gui Davi oenoimbá Israel regua yvatekueve, peteĩ-teĩ regua ruvixa kuery, ojeupegua xondaro kuery ruvixa kuery, xondaro mil ha'e cem ikuai va'e re opena va'e, mba'emo ha'e ae ha'e ta'y kuery oguereko va'e re opena va'e, guembiguai yvatekueve ha'e ipo'akave va'e, ha'e avakue ipy'a guaxukueve ha'e javi. Jerusalém tetã py onhem-boaty aguã oenoĩ.

<sup>2</sup> Ha'e rami vy Davi opu'ã ho'amy. Ha'e vy aipoe'i:

— Pendu ke, xeretarã kuery ha'e xevyguia kuery. Xee anhembopy'a va'ekue teĩ ajapo aguã peteĩ oo SENHOR guexeve guarã ojapo va'ekue ryru oĩ aguã, ha'e Nhanderuete py renderã. Ha'e rami vy xee areko katupa ma ajapo aguã.

<sup>3</sup> Ha'e rami teĩ Nhanderuete aipoe'i xevy: “Ndee ma nda'evei rejapo aguã oo xerery renderã, mba'eta ndee ma joe repu'ãa py jouguy remoẽ vaipa va'ekue”, he'i.

<sup>4</sup> Ha'e rami avi SENHOR Israel kuery ruete xeporavo xeru ro pygua kuery ha'e javi gui, Israel kuery ruvixarã aĩ aguã raka'e rã peve guarã. Mba'eta oiporavo raka'e Judá regua huvixarã, ha'e gui Judá regua mbyte gui ju oiporavo xeru ro pygua kuery, ha'e gui xeru ra'y kuery ikuai va'e gui xeporavo, Israel kuery ha'e javi ruvixaverã xemoĩ aguã.

<sup>5</sup> Ha'e gui xera'y kuery ha'e javi gui – mba'eta heta ete ikuai xera'y kueryrā SENHOR ome'ẽ va'ekue – ha'e kuery va'e regua peteĩ va'e oiporavo Salomão, SENHOR pegua tenda Israel kuery re openaaty áry oĩ aguã.

<sup>6</sup> Ha'e rami vy aipoe'i xevy: “Ndera'y Salomão ae 'rã xevy oo ojapo, oka guive, xera'yrã aiporavo rire, ha'e gui xee ma tuu 'rã aiko.

<sup>7</sup> Ha'e rami vy ajapo 'rã raka'e rã peve guarã ipo'akaa oĩ aguã rami, xapy'a rei xee ajapo uka va'e ha'e aipotaa ha'e javi ri ojapopa ramo, aÿ peve oikoa rami”, he'i.

<sup>8</sup> Ha'e gui aÿ Israel kuery SENHOR pe penhemboaty va'e ha'e javi renonde, ha'e Nhan-deruete xeayvua oendu va'e renonde py xee aipoa'e pãvy: Pejapopa ete ke SENHOR Penderuete ojapo uka va'e, penhea'ã ke ha'e va'e rupi anho pendekuai aguã, kova'e yvy porãa re pendekoa riae aguã, ha'e gui pendera'y kuery rekoarã ju peja aguã, raka'e rã peve guarã.

<sup>9</sup> – Ha'e gui ndee xera'y Salomão, eikuua porã pota ke nderu ruete. Ixupe ete ke eiko anhetê rupi ndepy'a ha'e nenhe'ẽ ha'e javi py. Mba'eta SENHOR ma oikuua pota katu'i li 'rã nhandepy'a re oĩ va'e re, oikuua 'rã nhanhembopy'aa ha'e javi. Ndee reka ri ramo ojejou uka 'rã ndevy. Ha'e rã reja ri ramo ha'e ju ndereja 'rã raka'e rã peve guarã.

<sup>10</sup> Ha'e gui aÿ ma, eikuua pota porã ha'e nunga ha'e javi re, mba'eta SENHOR ndeporavo ixupe rejapo aguã oo henda iky'a e'ÿi va'e oĩ aguã. Nembaraete ke ha'vy, ha'e ejapopa – he'i.

### *Guay Salomão pe Davi templo marã ramigua paa oexa ukaague*

<sup>11</sup> Ha'e gui Davi gua'y Salomão pe ome'ẽ oo ra'angaa ombopara pyre, ha'e rami vy ojapo kuua aguã oka pygua, oo mboae ikuai va'erã, hepyve va'e omoõi porãaty, opy ja'o yvate rupi ha'e opyve rupi ikuai va'erã, ha'e oo teko vai mbogue atyrã.

<sup>12</sup> Onhembopy'aa ha'e javi rami vy ome'ẽ oo ra'angaa opa mba'e oĩa, SENHOR pegua oo yvýry rupi oguy ha'e opy ja'o ikuai va'erã, ha'e ixupeguia opy mba'emo hepyve va'e ha'e ixupe omboaxa pyre omoõi porãaty guive,

<sup>13</sup> ha'e gui sacerdote ha'e levita kuery peteĩ-teĩ regua SENHOR pegua opy rupi omba'eapo aguã, tembiporu opy rupi oiporu va'erã guive.

<sup>14</sup> Davi oikuua uka avi tembiporu ouro guigua ikuai va'e ha'e javi poyia, peteĩ-teĩ omba'eapo rupi tembiporu ouro ha'e prata guigua ojapo pyrã mbovy pa opejaa aguã.

<sup>15</sup> Ha'e rami vy peteĩ-teĩ tataendy renda ha'e hi'áry tataendy ikuai va'erã ojapoa rã oikuua uka mbovy poyia ouro guigua pa peteĩ-teĩ re oiporu va'erãa,

<sup>16</sup> ha'e gui ouro guigua mbovy poyia avi Nhanderuete renonde mesa ikuai va'erã peguarã, peteĩ-teĩ oĩa rami vy, ha'e gui mesa prata guigua avi mbovy poyia paa.

<sup>17</sup> Ouro ete gui anho 'rã ojapoa kuxa rakuarã, hy'a ha'e karo. Ha'e gui hy'a'i ouro guigua ikuai va'e peguarã oikuua uka peteĩ-teĩ poyia. Hy'a'i prata guiguarã voi ha'e rami ae avi, peteĩ-teĩ poyia oikuua uka.

<sup>18</sup> Ha'e gui ouro oiky'a'opa pyre altar heakuã porã va'e rapyaty reguarã avi oikuua uka oa'angaague rami vy, ha'e ouro anjo ipopo va'e ra'angaa renderã oĩ aguã voi, mba'eta ha'e va'e pepo oĩ 'rã SENHOR guexeve guarã ojapo va'ekue ryru áry rupi ojao'ipa aguã.

<sup>19</sup> Ha'e nunga ha'e javi ra'angaa pejapo kuaapa aguã xevy pe omboparapa reve ome'ẽa SENHOR ijayvuague rami vy – he'i Davi nhomongeta vy.

<sup>20</sup> Ha'e gui gua'y Salomão pe ju Davi aipoe'i:

– Nembaraete ke, ndepy'a guaxu guive, rejapo va'erã va'e rejapopa aguã. Ekyje eme, ndekuerai eme guive, mba'eta SENHOR Nhanderuete, Xeruete va'e oiko 'rã ndereve. Nanderejai 'rã, nanepytyvõ e'ÿi 'rã guive, SENHOR pegua oo ha'e opy rupi oiporu pyrã rejapopa aguã.

<sup>21</sup> Apy ma ikuai sacerdote ha'e levita kuery SENHOR pegua opy rupi omba'eapo va'erã amoõi va'ekue. Ndereve ikuai avi opa mba'e py rei omba'eapo va'e o'arandua ha'e

ojapoxea'i py, opa mba'e rei tema ojapo kuaa va'e. Yvatekueve ha'e heta va'e kuery ha'e javi ikuai avi 'rã rejapo uka va'e rei ojapo aguã — he'i.

## 29

### *Davi ha'e yvatekueve mba'emo ome'ëague*

<sup>1</sup> Ha'e gui huvixa Davi ijayvuve ju onhemboaty va'e kuery ha'e javi pe. Ha'e vy aipoe'i:

— Xera'y Salomão ae Nhanderuete oiporavo teĩ kunumi'i ha'e mba'eve ndojapo kuaai teri. Ha'e rami avi kova'e nunga ojapo va'erã heta ete oĩ. Mba'eta oo tuvixa va'e ojapo pyrã ma avakue peguarã e'ŷ, ha'e rã SENHOR Nhanderuete peguarã.

<sup>2</sup> Ha'e nunga rupi xee ma xembaraetea ha'e javi py ajoupa ma Xeruete pegua oo reguarã: ouro mba'emo ouro gui anho guarã, prata ma prata gui anho guarã, overa va'e ma overa va'e gui anho guarã, ferro ma ferro gui anho guarã, ha'e yvyra ma yvyra gui anho guarã. Ajou uka va'ekue avi ita ônix, ita mba'emo jeguarã, ita joo rami e'ŷ-e'ŷ pytã va'e, ita mba'emo ra'angaa ojapo aguã va'e, ita porãgueve ha'e javi regua, ha'e gui ita mármore guive. Ha'e javi regua ma oata aguã rami e'ŷ oĩ.

<sup>3</sup> Ha'e rami ae avi Xeruete pegua oo xee ayvu ete vy ouro ha'e prata xemba'e ae areko va'e ame'eve ju 'rã Xeruete pegua oo reguarã, henda iky'a e'ŷ va'e reguarã areko katupa va'ekue áryve.

<sup>4</sup> Ha'e va'e ma cem mil quilos ouro Ofir yvy guigua, ha'e duzentos e trinta mil quilos prata oiky'a'o pyre, oo mbotya ha'e javi ao'iarã.

<sup>5</sup> Ouro oĩ 'rã mba'emo ouro gui anho guarã, prata guive oĩ prata gui anho guarã, opa marãgua ojapo kuaa va'e po py amboaxa va'e. Ha'e gui aŷ ma mava'e ju ome'ëxeia'i py ogueru 'rã SENHOR pe ome'ë va'erã? — he'i.

<sup>6</sup> Ha'e ramo guetarã kuery re opena va'e kuery ome'ëxeia'i py ogueru okuapy ome'ë va'erã, Israel kuery peteĩ-teĩ regua ruvixa kuery, xondaro kuery mil ha'e cem ikuai va'e ruvixa kuery, ha'e huvixave pe ombo'eapo va'e kuery re opena va'e kuery guive.

<sup>7</sup> Ha'e vy Nhanderuete pegua oo rupi ombo'eapo va'e kuery peguarã ome'ë okuapy cento e sessenta e cinco mil quilos ouro anho rei va'e, dez mil hatã'i va'e ouro guigua, trezentos e trinta mil quilos prata guigua, sessenta mil quilos overa va'e guigua, ha'e gui três milhões e trezentos mil quilos ferro guigua.

<sup>8</sup> Ita iporãve va'e oguereko va'e ogueru avi okuapy SENHOR pegua opy omoĩ porãaty pyguarã. Ha'e nunga re Gérson ramymino Jeiel opena aguã rami oiko.

<sup>9</sup> Ha'e rami vy heta va'e kuery ha'e javi ovypa okuapy ome'ëxeia'i py ome'ëmba vy. Mba'eta anhetê rupi ipy'a reve SENHOR pe ome'ë oata aguã rami e'ŷ. Ha'e ramo huvixa Davi voi ovypa vaipa avi.

### *Davi onhembo'eague*

<sup>10</sup> Ha'e gui onhemboaty va'e kuery ha'e javi oendua py Davi oguerovy'a SENHOR. Ha'e vy aipoe'i:

— SENHOR Israel kuery ruete, Oreruete reiko va'e, ndere ae ta'ima'endu'a porãa yma ete guive raka'eve rã peve.

<sup>11</sup> SENHOR, ndere ae oĩ po'akaa, tuvixaa, ima'endu'a porãa aguã, opa mba'e re ndepo'aka aguã, ha'e yvatea. Mba'eta nemba'e meme oĩ yva ha'e yvy re ikuai va'e. SENHOR, ndere ae oĩ ndepo'aka aguã, ha'e pavẽ ikuai va'e áryve rupi ndeyvateve va'e repenaa py.

<sup>12</sup> Ndegui ae ou amongue oguerekopa aguã, omboetea guive. Ndee ma ha'e javi áry rupi repena va'e. Ndepo py ae oĩ mbaraeetea ha'e po'akaa. Ndere anho oĩ renhomboyvatea ha'e renhomombaraeetea aguã.

<sup>13</sup> Ha'e gui aŷ ma Oreruete, roguerovy'a vy rogueroporaei rokuapy nderery hexakãmba va'e rupi.

<sup>14</sup> Mba'eta mava'e tu xee aiko, xevyguia kuery voi mava'e regua tu ikuai kova'e regua ha'e javi rome'ëxeal'i py rome'ë aguã ha'eve va'e? Mba'eta ndegui meme ou opa marâguia, ha'e ndepo guiguare meme rome'ë ju.

<sup>15</sup> Mba'eta ore kuery ma nerendone rupi oikuaapy e'ÿ rami orekuai, oreramoï kuery ikuaiague rami ore kuery voi oguata rei va'e orekuai. Ore kuery ára ma kuaray'ã okanhya rami oaxa pojava avi yvy re, ropyta riae aguã ndoroguerekoi va'e vy.

<sup>16</sup> Ha'e gui SENHOR Oreruete, kova'e nunga oata aguã rami e'ÿ rojou va'ekue peteñ oo rojapo aguã nderery iky'a e'ÿ va'e rendera. Ha'e rami avi ndepo gui ae ou va'ekue, nemba'e meme ae.

<sup>17</sup> Ha'e gui Xeruete, xee aikuua porã orepy'a re oï va'e reikuaapa va'ea, ha'e anhetë va'e rupi ikuai va'e anho rerovy'a va'ea. Ha'e gui xee voi xepy'a py anhetë rupi aiko vy kova'e nunga ha'e javi ame'ëxeal'i py ame'ë. Ha'e rami ae avi ndevyguia kuery apy onhemboaty va'e ome'ëxeal'i py mba'emo ndevy ome'ëmba rã aexa vy avy'a vaipa.

<sup>18</sup> Ha'e nunga rupi SENHOR, oreramoï Abraão, Isaque ha'e Israel ruete reiko va'e, emoï riae ke ndevyguia kuery py'a re ha'e rami onhembopy'a ha'e ome'ëmbaxe aguã. Ipy'a re emoï avi ndevy ete ikuai aguã.

<sup>19</sup> Xera'y Salomão re voi emoï anhetë rupi ipy'a aguã, rejapo uka va'ekue ojapopa aguã rami, ndeayvua ha'e ndeguigua lei ha'e javi guive. Tojapopa kova'e oo xee mba'emo areko katu rire – he'i.

<sup>20</sup> Ha'e gui Davi aipoe'i onhemboaty va'e kuery ha'e javi pe:

– Aÿ peporai SENHOR Penderuete pe – he'i. Ha'e ramo onhemboaty va'e ha'e javive oguerovy'a okuapy SENHOR guamoï kuery ruete. Yvy re oakã omovaë reve omboete okuapy SENHOR, nguvixa renonde guive ojero'a okuapy.

<sup>21</sup> Ko'ë jevy ma ha'e kuery ogueru SENHOR pe ome'ë va'erã. Ha'e vy ixupe oapy okuapy mil vaka ra'y, mil vexa'i ra'y ha'e mil vexa mba'emo rykue onhoë reve. Ome'ë mbyre guigua Israel kuery pe oata aguã rami e'ÿ ombojoja.

<sup>22</sup> Mba'eta ha'e va'e ára okaru ha'e oy'u okuapy SENHOR renonde, ov'y'a ete guive.

### *Salomão nguvixaverã omoï okuapyague*

Ha'e gui mokoïguea py ma Davi ra'y Salomão omoï okuapy nguvixaverã. Ha'e vy SENHOR renonde hexe omoïa azeite huvixaverã, ha'e rã Zadoque re ma omoï sacerdote-rã.

<sup>23</sup> Ha'e ramo Salomão oguapy oiny SENHOR pegua tenda openaaty py, nguu Davi rekovia huvixave oï vy. Ha'e rire oiko porã, ha'e rã Israel kuery ha'e javi onhe'ë rendu okuapy.

<sup>24</sup> Ha'e rami vy yvatekueve, omboetevepy ha'e Davi ra'y kuery mboae oguerovy'a okuapy huvixa Salomão.

<sup>25</sup> SENHOR voi omboyvate ete Salomão Israel kuery renonde rupi. Ha'e vy ixupe ome'ë huvixave rami ipo'aka aguã. Ha'e oï e'ÿ mbove neï peteïve Israel regua huvixa noï teri ha'e rami ete yvateve va'e.

### *Davi omanoague*

<sup>26</sup> Jessé ra'y Davi ma Israel kuery ha'e javi re opena va'ekue.

<sup>27</sup> Quarenta ma'etë re opena Israel kuery re. Hebrom py ranhe sete ma'etë re oï, ha'e gui Jerusalém tetã py ju trinta e três ma'etë re opena.

<sup>28</sup> Tuja'i raxa ma vy omano, heta ára oguerek reve. Iporiau e'ÿ re ha'e ipo'akapa va'e omano. Ha'e rã ta'y Salomão oï nguu rekovia.

<sup>29</sup> Ha'e gui huvixa Davi mba'emo ojapo va'ekue jypy guive opaa peve omboparaa ma imoiny kuaxia profeta Samuel, profeta Natã ha'e Gade ombopara va'ekue py voi.

<sup>30</sup> Oï avi ha'e opena jave py mba'emo oiko va'ekue ha'e javi, ipo'akaa ha'e hexe opa mba'emo oiko va'ekue, Israel kuery ha'e yvy mboae re ikuai va'e ha'e javi re voi.

## Mokoĩa Crônicas huvixa kuery rekoke oĩa Mokoĩa crônicas huvixa kuery rekoke oĩa

Kova'e kuaxia para re ma nomombe'ua vaipai Israel kuery regua ikuaria, ha'e rã Judá regua anho. Ha'e rami vy omombe'u huvixa Salomão Senhor pegua templo ojapoague. Ojapopaa ma ramo Salomão oguerovy'a ho'amy Nhanderuete, ijayvu guive ixupe heta va'e kuery ojapukai aguã re. Ha'e ramo Senhor ombovai: "Xapy'a rei xevygua kuery xerery rupi ae aenoĩ va'ekue onhembo'yvy'i vy onhembo'ea rupi xereka, ha'e gueko vaia gui ojeko rerova ri ramo xee aendu 'rã yva re aĩa gui. Ha'e vy aperdoa 'rã ojejavvyague ha'e amoingo porã ju 'rã ijyvy regua", he'i (7.14).

Opaa py omombe'u porãe mba'e re pa escravo-rã Nhanderuete ogueraa ukaague Judá kuery. Aipoe'i: "Senhor tamoĩ kuery Ruete va'e ma yma guive teĩ ijayvu ha'e kuery pe, ayvu mombe'ua kuery pe oayvu omombe'u uka tema, ojeupagua kuery omboaxy ha'e ojeupagua oo re oma'ẽ vy. Ha'e rami teĩ ha'e kuery ma Nhanderuete ayvu mombe'ua kuery ombojaru rei vy noendu potai, ojojai rei guive okuapy profeta kuery. Ha'e ramo Senhor ojeupagua kuery rovai opoxya ombou ramo ha'e kuery pe noïvei ma oo jepe aguã", he'i (36.15-16).

*Gibeão py Nhanderuete pe Salomão mba'emo ome'ëague*

*1 Reis 3.3,4*

<sup>1</sup> Davi ra'y Salomão imbaraeteve tema ovvy openaa rupi. Hexeve SENHOR tuuete oiko vy ombovateve tema.

<sup>2</sup> Ha'e gui Salomão ijayvu Israel kuery ha'e javi pe, xondaro kuery mil ha'e cem ikuai va'e re opena va'e, nhomboayvu va'ety, Israel regua yvatekueve ha'e hetarã kuery akã ikuai va'e pe guive,

<sup>3</sup> ha'e kuery ha'e javi reve oje'oi aguã Gibeão py ombojeroviaaty yvy'ã re oĩ va'e py, mba'eta ha'e py ma oĩ oguy nhemboaty oĩ atyrã tekao e'ŷa py SENHOR rembiguai Moisés ojapo va'ekue.

<sup>4</sup> Ha'e rã Nhanderuete ayvu ryru ma Quiriate-Jearim gui Davi ogueru ruka ma vy omoĩ hendarã oguerekat ma voiague py, Jerusalém tetã py ae peteĩ oo'i ojapo va'ekue py.

<sup>5</sup> Ha'e rã altar overa va'e guigua Uri ra'y Bezalel, Hur ramymino ojapo va'ekue ma SENHOR ombojeroviaaty renonde py oĩ. Ha'e py ae Salomão guetarã kuery reve oje'oi SENHOR pe oporandu okuapy aguã.

<sup>6</sup> Ha'e py SENHOR renonde py ma Salomão ome'ẽ mymba kuery, oguy nhemboaty oĩaty py altar overa va'e guigua oĩ va'e áry. Ha'e va'e áry ma mil mymba oapy reve ome'ẽ.

*1 Reis 3.5-15*

<sup>7</sup> Ha'e va'e pyavyve Nhanderuete ojexa uka Salomão pe. Ha'e vy aipoe'i:

— Ejerure ke xevy reipota va'e re, ha'e rã xee ame'ẽ 'rã.

<sup>8</sup> Salomão ombovai:

— Xeru Davi pe rexu uka raka'e opa mba'e py reayvua. Ha'e gui xee ju xemoĩ hekovia.

<sup>9</sup> Ha'e gui aŷ ma SENHOR Xeruete, ejapo xeru Davi pe ndeayvuague, ndee ae huvixarã xemoĩ rire kova'e kuery yvy ku'i rami heta ikuai va'e re apena kuaa aguã.

<sup>10</sup> Aŷ gui ma eme'ẽ xe'arandurã ha'e aikuaa aguã, kova'e kuery areko kuaa aguã rami. Mba'eta mava'e 'rã tu oguerekoo kuaa kova'e kuery heta va'e? — he'i.

<sup>11</sup> Ha'e rami rã Nhanderuete aipoe'i Salomão pe:

— Ha'e ramigua ae ndepy'a re oĩ ramo nderejerurei mba'emo rerekopa aguã re, nemba'e rei-reirã, neĩ renhemboyate aguã re, ndere ija'e e'ŷ va'e kuery omano aguã re, neĩ reiko pukuve aguã, ha'e rami 'rãgue py ne'arandurã ha'e reiko kuaa aguã re ae rejerure xevygua kuery rerekoo kuaa aguã, huvixarã romoĩ rire.

<sup>12</sup> Ha'e ramo ndevy pe xee ame'ẽ ae 'rã ne'arandurã ha'e reiko kuaa aguã. Ame'ẽ avi 'rã nandeporiauvei ha'e rerekopa aguã, rombovate 'rã guive. Ha'e ramigua neĩ peteĩve huvixa pe ma voi nome'ẽai va'ekue ndee reĩ e'ŷ mbove, ha'e ndee nereĩvei ma rire ndoikovei 'rã ndee rami guarã — he'i.

<sup>13</sup> Ha'e gui ma Salomão ma Gibeão py yvy'ã re ombojeroviaaty oĩ va'e gui ojevy ju Jerusalém tetã katy, oguy nhemboaty oĩaty renonde oĩague gui guive. Ha'e rami vy Israel kuery re opena oikovy ha'e py.

### *1 Reis 10.26-29*

<sup>14</sup> Salomão ma karóxa ha'e kavaju áry guarã oguerekopave ovy. Mil e quatrocentos karóxa oguerekoko, ha'e doze mil kavaju áry guarã. Ha'e va'e ma joa py e'ŷ-e'ŷ 'rã oguerekoko tetã karóxa ikuaiaty rupi, Jerusalém py ngoo katy'i guive.

<sup>15</sup> Jerusalém tetã py ma prata ha'e ouro ma ita rami rive huvixa omboetave, yvyra yary voi ojapo sicômoro'y teko a e'ŷa rupi ikuai va'e rami oata e'ŷ aguã.

<sup>16</sup> Salomão rymba kuery kavaju ma Egito ha'e Cilícia gui ogueru. Cilícia guigua ma huvixa rembiguai mba'emo vendea kuery ogueru hepy oĩa rami.

<sup>17</sup> Ha'e rã karóxa ma Egito yvy gui 'rã ogueru. Peteĩ-teĩ repy ma seiscentos hatã'i va'e repy prata guigua, ha'e rã kavaju repy ma cento e cinqüenta. Ha'e rami ae avi mba'emo vendea kuery amboae katy 'rã ogueraa heteu ha'e Síria pygua huvixa kuery peguarã.

## 2

### *1 Reis 5.1-12*

<sup>1</sup> Ha'e gui ma Salomão onhembopy'a templo ojapo aguã SENHOR rery oĩ atyrã, ngoo opena atyrã guive.

<sup>2</sup> Ha'e rami vy Salomão omoĩ setenta mil avakue mba'emo reraarã, ha'e oitenta mil ju yvyty ikuai va'e gui ita mbovoarã, ha'e gui três mil e seiscentos ju ombo'eapo va'e kuery re opena va'erã.

<sup>3</sup> Ha'e gui Salomão aipoe'i uka Tiro pygua huvixa Hirão pe:

— Xeru Davi ndee reipytyvõ vy ngoorã ojapo aguã ixupe yvyra yary reme'ẽ va'ekue. Ha'ekue rami ae ju ke xepytyvõ.

<sup>4</sup> Mba'eta ma'ẽ, xee aiko peteĩ oo SENHOR Xeruete rery oĩ atyrã ajapo aguã rami. Ixupe guarã ae amboaxa 'rã, henonde py heakuã porã va'e oapya aguã ha'e henonde mbojape omoĩa riae jepi aguã, ha'e gui aje'ive ha'e ka'aru nhavõ mymba kuery oapy reve ome'ẽa aguã, sábado nhavõ, ha'e jaxy pyau jave guarã, ha'e gui ngaru SENHOR Oreruete pe oikoa ára py guive. Mba'eta ha'e rami aguã ae ha'e oeja raka'e ore Israel kuery rekora raka'e 'rã peve guarã.

<sup>5</sup> Ha'e gui oo ajapo va'erã ma tuvixa 'rã, mba'eta Oreruete ma tuuete ra'angaa ikuai va'e gui yvateve va'e.

<sup>6</sup> Ha'e rami avi mava'e 'rã tu ojapo kuaa oo ixupe guarã? Mba'eta yva oĩ va'e, ha'e yva yvatea peve nda'evei ha'e oĩ aguã. Mava'e tu ha'vy xee aiko oo ixupe guarã ajapo aguã, henonde heakuã porã va'e oapya aguã e'ŷ vy?

<sup>7</sup> Ha'e nunga rupi aŷ emondouka xea katy peteĩ ava ouro re ombo'eapo kuaa va'e, ha'e prata re, overa va'e, ferro, púrpura guigua, pytã ha'e hovy va'e guigua re, yvyra ombojegua kuaa va'e, xereve Judá ha'e Jerusalém py mba'emo ojapo kuaa va'e kuery ikuai va'e reve ombo'eapo va'erã. Ha'e va'e kuery ma xeru Davi ombo'eapo va'erã omoĩ va'ekue.

<sup>8</sup> Emondouka avi Líbano gui yvyra yary, cipreste ha'e sândalo aygue. Mba'eta xee aikuua porã nerembiguai kuery oikuua yvyra Líbano regua ojaya aguã. Ne'exa, apy xerembiguai kuery ikuai va'e ma nerembiguai kuery reve 'rã ombo'eapo okuapy

<sup>9</sup> yvyra omoatyrõ retaa py. Mba'eta oo ajapo va'erã ma tuvixa ha'e iporã raxa 'rã.

<sup>10</sup> Ha'e ramo nerembiguai yvyra ayaa kuery pe xee ame'ẽ 'rã trinta mil ryru trigo ku'ikue, vinte mil ryru cevada, vinte mil ryru uva rykue, ha'e vinte mil ryru avi azeite – he'i.

<sup>11</sup> Ha'e ramo Tiro pygua huvixa Hirão ombovai vy kuaxia para ombou Salomão pe. Ha'e vy aipoe'i:

– Ndevygua kuery oayvu vy ae SENHOR nemoõ huvixaverã – he'i.

<sup>12</sup> Hirão aipoe'ive ju:

– Ima'endu'a porãmby toiko SENHOR Israel kuery ruete yva ha'e yvy apoare. Ha'e ma huvixa Davi pe ome'ẽ avi raka'e peteĩ ta'y hi'arandu va'erã, oiko kuaa ha'e mba'emo oikuaapa va'e, oo SENHOR peguarã ojapo va'erã, ha'e gui ha'e ae opena atyrã guive.

<sup>13</sup> Ha'e nunga rupi aÿ ambou 'rã peteĩ ava oikuaapa ha'e hi'arandu raxa va'e, Hirão-Abi hery va'e.

<sup>14</sup> Ha'e va'e xy ma Dã ramymino kuery regua, ha'e rã tuu ma Tiro tetã pygua ae. Ha'e ma mba'emo ojapo kuaa 'rã ouro gui, prata, overa va'e, ferro, ita ha'e yvyra gui, ajukue púrpura, hovy va'e, ipererí'i va'e ha'e pytã va'e gui. Ha'e ma yvyra ombojegua kuaa 'rã ixupe rexa ukaa rami rei, ndevygua ha'e xeruvixa Davi nderu oiko va'ekue pegua omba'eapo va'e kuery ha'e javi reve.

<sup>15</sup> Ha'e gui aÿ ma xeruvixa, xea py xerembiguai kuery ikuiaia katy eraa uka trigo, cevada, azeite ha'e vinho ndeayvuague.

<sup>16</sup> Ha'e ramo ore kuery ma Líbano yvy re rojayapa 'rã yvyra reipotaa rami. Ha'e gui ye'ẽ rupi 'rã romondouka ojokua-jokua pyre Jope tetã peve. Ha'e gui ndee ju 'rã reru ruka Jerusalém katy – he'i.

### *1 Reis 5.13-18*

<sup>17</sup> Ha'e gui ma Salomão oipapa ukapa avakue amboae guigua Israel yvy re hekoa va'e, nguu Davi ojapoague rami. Ha'e rami vy oikuaa cento e cinqüenta e três mil e seiscentos ha'e javi vy.

<sup>18</sup> Ha'e kuery va'e regua omoõ setenta mil mba'emo reraarã, oitenta mil yvyty rupi ita mbovoarã, ha'e gui três mil e seiscentos ju omba'eapo va'e kuery re opena va'erã.

## 3

### *1 Reis 6.1-10*

<sup>1</sup> Ha'e gui ma Jerusalém tetã py Salomão omboypy oo SENHOR peguarã ojapo aguã, Moriá yvyty áry. Ha'e py ma tuu Davi pe SENHOR ojexa ukaague, ha'e jebuseu Ornã mba'emo moa'yíaty py Davi oiporavo va'ekue.

<sup>2</sup> Salomão irundy ma'etýa re ma huvixa oĩ jave py, mokoõ jaxyta re ha'e mokoõ araa py omboypy ojapo aguã.

<sup>3</sup> Po rami ma Salomão oa'ã Nhanderuete pegua oo renderã: ipuku-a ma vinte e sete metros ymave rupi oa'ãague rami vy, ha'e rã ipya ma nove metros.

<sup>4</sup> Henonde py oguy oĩ va'e ipya ma nove metros, henda iky'a e'ŷ va'e ipya rami ae. Yvatea avi nove metros. Opy rupi ma ouro ete py onhovãmba.

<sup>5</sup> Ha'e gui opy ja'o tuvixave va'e mbotya rupi ma yvyrapé cipreste guigua anho omoõ, ha'e ouro ete py ju onhovãmba. Ha'e va'e rupi ombojegua imoiny pindo rakã ha'e corrente ra'angaa py.

<sup>6</sup> Opy ja'o ombojegua avi ita iporãve va'e ha'e ouro Parvaim guigua py.

<sup>7</sup> Ouro ete py onhovãmba opy rupi: yvyra hi'áry rupigua, okẽ yta, hi'áry rupigua ha'e okẽ ikuai va'e ha'e javi. Oo mbotya ha'e javi rupi ma ombojegua anjo ipepo va'e ra'angaa py.

<sup>8</sup> Ojapo avi henda iky'a e'ŷ ete va'erã. Ipuku-a ha'e ipya ma nove metros, opy ja'o tuvixave va'e rami avi ipya. Onhovãmba ouro ete vinte mil quilos va'e py.

<sup>9</sup> Ha'e rã karavo oiporu va'e ma cinqüenta hatã'i va'e ouro guigua rami ipoyi va'e. Opy ja'o yvate rupi ikuai va'e voi onhovãmba ouro py.

### *1 Reis 6.23-28*

<sup>10</sup> Ha'e gui henda iky'a e'ŷ ete va'e pyguarã ma yvyra gui ojapo avi mokoõ anjo ipepo va'e ra'angaa. Ouro py ju onhovã.

<sup>11</sup> Anjo pepo ha'e javi oipyo imoinya ma nove metros. Peteĩ va'e regua pepo ma mokoõ metros raxa'i ipuku-a va'e, ha'e oo mbotya re ovaõ oiny. Ha'e rã amboae pepo mokoõ metros raxa'i ipuku avi va'e ma ovaõ oiny amboae anjo hi'aõ va'e pepo re.

<sup>12</sup> Amboae anjo pepo voi mokoõ metros raxa'i ipuku va'e, ha'e oo mbotya mboae re ovaõ oiny. Ipepo mboae voi mokoõ metros raxa'i ipuku va'e avi, ha'e amboae anjo pepo re ovaõ oiny. Mokoõve anjo pepo ha'e javi vy ma nove metros ipuku-a va'e.

<sup>13</sup> Ha'e rami vy omopu'ã imo'amy mokoõve, henda iky'a e'ŷ va'e katy oma'ẽ ho'amy aguã rami.

<sup>14</sup> Okêrã ojapo avi hovy va'e, púrpura, pytã va'e ha'e ajukue iporâve va'e gui. Ombojegua avi imoiny anjo ipepo va'e ra'angaa py.

#### *1 Reis 7.15-22*

<sup>15</sup> Oo yvy'iry ojapo avi mokoõ oo ytarã dezesseis metros yvatea va'e. Peteĩ-teĩ áry guarã ma mokoõ metros raxa'i yvatea va'e.

<sup>16</sup> Ojapo avi corrente henda iky'a e'ŷ va'e py oĩ va'e rami guarã. Ha'e va'e ma omoõ ijyta hi'aõ va'e áry. Ojapo avi cem yvyra'a ra'angaa, ha'e vy corrente re omoõ.

<sup>17</sup> Oo ytarã ma omopu'ã imo'amy templo rokẽ py. Peteĩ ma omopu'ã oiporu kuaa regua re, ha'e rã amboae ma oiporu kuaa e'ŷa re. Oiporu kuaa regua re omopu'ã va'ekue ma omboery Jaquim, ha'e rã oiporu kuaa e'ŷa re omopu'ã va'ekue ma omboery Boaz.\*

## 4

#### *1 Reis 7.23-26*

<sup>1</sup> Ojapo avi peteĩ altar overa va'e guigua. Ipuku-a ma nove metros, ipya ma nove metros avi, ha'e rã yvatea ma irundy metros raxa.

<sup>2</sup> Overa va'e ryku gui ojapo avi peteĩ yy mbotyarã. Ha'e va'e ma ojere rei va'e, irundy metros raxa ipya va'e, ha'e rã yvatea ma mokoõ metros raxa'i. Ha'e gui ijyke rupi ixã treze metros raxa'i va'e oa'ãa.

<sup>3</sup> Iguýry rupi ma omoõ hy'akua ra'angaa, meio metro-a py dez kuerei 'rã omoõ. Mokoõ ryxy omoõ, yy mbotya reve jojaví ojapo vy.

<sup>4</sup> Yy mbotya ma doze vaka ra'angaa áry oĩ. Mboapy ma kuaray ijapu'a'ia katy hi'aõ, mboapy ma oikea katy, mboapy ma ipuku-a katy, ha'e rã mboapy ma kuaray oua katy hi'aõ. Hevi ma mbyte katy ovaõ oiny. Ha'e va'e kuery áry ae yy mbotya oĩ.

<sup>5</sup> Ipo guaxua ma irundy kuã oña rami. Ijyvýrykue ma karo rami hembe va'e, yvoty rami ojekuaa. Yy henyãa ma sessenta mil litros rivyvyi va'e.

#### *1 Reis 7.27-50*

<sup>6</sup> Ojapo avi dez hy'a. Ha'e va'e regua ma peteĩ nhiruõ omoõ oiporu kuaa regua re, ha'e rã peteĩ nhiruõ ma hovai re. Ha'e va'e ma ojoia aguã mba'emo oapy reve ome'ẽ mbyrã. Ha'e rã hy'a guaxu oĩ va'e ma sacerdote kuery anho ojejoi aguã.

<sup>7</sup> Ouro gui ojapo avi dez tataendy 'yrã, ojapo ukaague rami ae. Ha'e va'e ma omoõ templo py. Peteĩ nhiruõ omoõ oiporu kuaa regua re, ha'e rã peteĩ nhiruõ avi hovai re.

<sup>8</sup> Ojapo avi dez mesa-rã. Ha'e va'e voi omoõ templo py. Peteĩ nhiruõ ma oiporu kuaa regua re omoõ, ha'e peteĩ nhiruõ avi hovai re. Ha'e gui ojapo avi cem hy'a ouro gui.

<sup>9</sup> Oka korarã ojapo avi sacerdote kuery anho ikuai aguã, ha'e gui oka tuvixa va'e. Ha'e va'e rokêrã ojapo vy onhovãmba overa va'e py.

<sup>10</sup> Yy mbotya ma omoõ oiporu kuaa regua re, kuaray puku-a yke katy.

<sup>11</sup> Ha'e gui ma Hirão ojapo avi oja, pá iky'a'oarã ha'e hy'a. Ha'e rami py ojapopa ma Nhanderuete pegua oo pyguarã huvixa Salomão pe ojapo 'rã va'ekue.

\* <sup>3:17</sup> Tery Jaquim ma "Imoõ atãa" 'ea, ha'e rã Boaz ma "Imombaraetea" 'ea, Nhanderuete re ima'endu'aa rupi omboery vy.

<sup>12</sup> Ha'e va'e ma oo yta mokoõ va'e, mokoõ ijyta árygua ojere rei va'e, ha'e gui mokoõ kya yta árygua ojere rei va'e ao'iarã ojapopa.

<sup>13</sup> Quatrocentos yvyra'a ra'angaa ojapo avi mokoõ kya oĩ va'e reguarã, peteĩ-teĩ kya re mokoõ ryxy yvyra'a oĩ aguã. Ha'e va'e py ma ojao'i ojere rei va'e mokoõ oo yta áry oĩ va'e.

<sup>14</sup> Ojapo avi hy'arã ijyta reve,

<sup>15</sup> ha'e gui yy mbotya, hendarã doze vaka ra'angaa ikuai va'e reve.

<sup>16</sup> Ha'e rami py huvixa Salomão pe Hirão-Abi ojapopa oja, pá iky'a'oarã, kuxa rakua ha'e tembiporu ha'e javi. Overa va'e oiky'a'o pyre gui ojapo SENHOR pegua oo pyguarã.

<sup>17</sup> Jordão yakã katy'i yvy'ã guy py yvy yapo reveguia oĩa py ae huvixa ojapo uka overa va'e ryku gui, Sucote ha'e Zereda mbyte py.

<sup>18</sup> Ha'e va'e ha'e javi ma oata aguã rami e'ý Salomão ojapo uka. Neĩ overa va'e ipoyia ma voi ndopejaai.

<sup>19</sup> Salomão ojapo uka avi tembiporu henda SENHOR pegua iky'a e'ý va'e pyguarã: altar ouro guigua, mesa ouro guigua hi'áry SENHOR renonde mbojape omoõa aguã,

<sup>20</sup> tataendy ha'e hi'y ouro ete'i guigua meme, gueko rami vy henda iky'a e'ý ete va'e renonde rupi omoendya aguã,

<sup>21</sup> yvoty ra'angaa, tataendyrã ha'e tapyí jopyarã ma ouro guigua meme.

<sup>22</sup> Ha'e gui tapyí araa, hy'a, hy'a'i heakuã porã va'e oapy atyrã, tapyí ryrurã ma ouro ete'i guigua meme. Ha'e gui oo oike atyrã, henda iky'a e'ý ete va'e rokẽ ha'e templo ropy henda iky'a e'ý va'e rokẽ ma ouro gui meme ojapo.

## 5

### 1 Reis 7.51

<sup>1</sup> Ha'e rami py huvixa Salomão ojapo ukapa oo SENHOR peguarã. Ha'e py ogueru avi mba'emo nguû Davi omboaxa va'ekue: prata ha'e ouro guigua, tembiporu ha'e javi guive omoõ SENHOR pegua oo re mba'emo hepyve va'e reve.

### 1 Reis 8.1-11

<sup>2</sup> Ha'e gui Salomão omboatypa Israel regua nhomoneta va'ety kuery, peteĩ-teĩ regua akã ikuai va'e, Israel regua yvatekueve guive. Jerusalém py ae omboaty tetã Davi rekoague Sião va'e gui templo katy ogueru aguã SENHOR guexeve guarã ojapo va'ekue ryru.

<sup>3</sup> Ha'e ramo avakue Israel regua ha'e javi onhemboatypa okuapy huvixaa py. Ngaru ojapoa py ijaty sete jaxyaa py.

<sup>4</sup> Israel regua nhomoneta va'ety kuery oupa ramo levita kuery hyru oupi vy

<sup>5</sup> oguerova heravy yvy'ã katy. Ogyu nhemboaty oĩaty reve oguerova, ha'e tembiporu iky'a e'ý va'e ha'e py ikuai va'ekue ha'e javi. Levita regua sacerdote ikuai va'e ae ogueraa.

<sup>6</sup> Ha'e rã huvixa Salomão ha'e Israel kuery onhemboaty va'ekue ha'e javi reve ma hyru renonde rupi oje'oi. Vexa'i ha'e vaka ojuka oje'oviv. Mymba kuery heta raxa ramo oipapaa aguã voi nda'evei.

<sup>7</sup> Ha'e gui SENHOR guexeve guarã ojapo va'ekue ryru ma sacerdote kuery omoõ okuapy oĩ aguã py ae, templo ropyve henda iky'a e'ý va'e py, henda iky'a e'ý ete va'e py ae, anjo ipepo va'e ra'angaa ikuai va'e pepo guy py.

<sup>8</sup> Mba'eta anjo pepo ma oipyo imoiny hyru itui aguã áry rupi. Ha'e rami vy yvate rupi ojao'i hyru ha'e yvyra po'i'i hi'yrã ikuai va'e.

<sup>9</sup> Yvyra po'i'i ipuku ete ramo henda iky'a e'ý va'e gui ojekuaa henda iky'a e'ý ete va'e rexei'i. Ha'e rã oka katy gui ma ha'e nunga ndojekuaai.

<sup>10</sup> Ha'e py ma itui aÿ peve. Ha'e gui hyru py ma mba'eve nda'ipoi itape Moisés Horebe py omoõ va'ekue e'ý vy. Egito gui Israel kuery oje'opia jave py guexeve guarã SENHOR ojapo va'ekue.

<sup>11</sup> Ha'e gui sacerdote kuery oẽmba ju henda iky'a e'ŷ va'e gui. Ha'e va'e jave guarã sacerdote ikuai va'e ha'e javi ojeky'a'o uka ma voi va'ekue, ha'e va'e ára ombo'eapo aguã rami ikuai va'e anho e'ŷ.

<sup>12</sup> Levita kuery oporaei va'e ha'e javi ikuai avi ha'e py. Ha'e kuery va'e regua ma Asafe, Hemã, Jedutum ha'e tyvy kuery. Ha'e kuery ma ajukue ipererí'i va'e py onhemonde reve opu'ãmba okuapy altar yvýry, kuaray oua katy. Hy'a pu, mbaraka ha'e ixã reta va'e reve ikuai. Ha'e kuery reve ikuai avi cento e vinte sacerdote mimby guaxu monhe'ëa kuery.

<sup>13</sup> Ha'e jave py peteï rami omonhe'ë okuapy mimby guaxu ha'e oporaei okuapy pavẽ oendu aguã rami, SENHOR oguerovy'a ha'e omboetea rupi. Ha'e rami vy oporaei atãve tema mimby guaxu, hy'a pu ha'e mba'epu mboae reve SENHOR mboetea rupi, "Mba'eta ha'e ma porayvu va'e, iporayvua ma opa va'erã e'ŷ", he'ia rupi. Ha'e rami rã peteï arai ou vy omonyê templo SENHOR pegua opy rupi.

<sup>14</sup> Ha'e ramo sacerdote kuery nda'evei opy rupi ombo'eapo aguã, arai SENHOR guigua rexakãa oĩa opy rupi omonyê ramo.

## 6

### *1 Reis 8.12-21*

<sup>1</sup> Ha'e gui Salomão aipoe'i:

— SENHOR aipoe'i va'ekue peteï arai ana mbyte oĩ aguã re.

<sup>2</sup> Ha'e ramo SENHOR, xee ajapo peteï oo raka'e rã peve reï aguã — he'i.\*

<sup>3</sup> Ha'e gui ma huvixa ojere ju vy ogueroayvu porã Israel kuery onhemboaty va'e kuery ha'e javi, opu'ãmba teri okuapy reve.

<sup>4</sup> Ha'e vy aipoe'i:

— Ta'ima'endu'a porãa SENHOR Israel kuery ruete re, mba'eta xeru Davi pe ijayvuague ojapopa ma opo'akaa rupi. Ha'e vy aipoe'i va'ekue:

<sup>5</sup> "Egitó yvy gui xevyguia kuery Israel regua aipe'apa ára guive, Israel kuery ikuaria tetã neï peteïve ndaiporavoi ha'e py peteï oo rejapo aguã xerery amoï aguã. Ha'e rami ae avi neï peteïve ava ndaiporavoi va'ekue Israel kuery ruvixarã.

<sup>6</sup> Ha'e rami avi aiporavo Jerusalém ha'e py xerery oĩ atyrã, ha'e Davi voi aiporavo avi xevyguia kuery Israel regua ruvixarã", he'i va'ekue.

<sup>7</sup> Ha'e rami avi xeru Davi opy'a re omoï peteï oo SENHOR Israel kuery ruete rery oĩ atyrã ojapo aguã.

<sup>8</sup> Ha'e rami teï xeru Davi pe SENHOR aipoe'i: "Peteï oo xerery oĩ atyrã rejapoxea py ha'evea rami ndepy'a re remoï ha'e rami aguã.

<sup>9</sup> Ha'e rami teï ndee e'ŷ 'rã oo rejapo, ha'e rã nderay' ndegui oiko va'ekue ae 'rã ojapo xerery oĩ atyrã", he'i raka'e.

<sup>10</sup> Ha'e rami rire SENHOR ojapopa ma ijayvuague, mba'eta xeru Davi rekovia xee aĩ vy aguapy ma ainy tenda Israel kuery re openaaty áry, SENHOR ijayvuague rami vy. Ha'e rami vy ajapo ma oo SENHOR Israel kuery ruete rery oĩ atyrã.

<sup>11</sup> Ha'e py ma amoï avi ijayvu ryru. Ha'e va'e py oĩ itape Israel kuery reve SENHOR guexeve guarã ojapo va'ekue oĩa.

### *1 Reis 8.22-53*

<sup>12</sup> Ha'e gui ma Israel kuery ha'e javi oexaa py Salomão oĩ SENHOR pegua altar renonde py. Ha'e vy opo oupi ho'amy.

<sup>13</sup> Mba'eta Salomão ojapo uka ma voi va'ekue peteï pyrõarã overa va'e guigua. Ha'e va'e puku-a ha'e ipya ma mokoï metros raxa'i va'e, ha'e rã yvatekuea ma peteï metro raxa'i.

\* <sup>6:2</sup> Nhanderuete Moisés reve ijayvu jave aipoe'i va'ekue arai pytúa py oĩ aguã, heta va'e kuery ijayvua oendu teï oexa e'ŷ aguã (Êxodo 19.9). Ha'ekue rami ae avi templo ropy henda iky'a e'ŷ ete va'e py SENHOR ayvu ryru oĩa py ma pytúa rei, janela noï, ha'e oikeaty onhemboty ramo, ajukue hokérã amoï mbyre Jesus omano jave omondoroa peve (Mateus 27.51).

Ha'e va'e oka mbyte py omoī rire hi'áry hi'aī vy guenapy'ā re oī Israel kuery ha'e javi oexaa py. Ha'e vy yva katy opo oupi vy

**14** aipoe'i:

— SENHOR Israel kuery ruete, yva re neī yvy re ndoikoi amboae ndee rami guarā ete, mba'eta nerembiguai kuery opy'a ha'e javi py nerentonde rupi ikuai va'e ndee rerekō 'rā ndereve guarā rejapo va'ekue rami, ha'e remboaxya rupi.

**15** Mba'eta rejapo ae ma nerembiguai xeru Davi pe ndeayvuague. Ndee ae ndeayvu rire ndepo'akaa rupi rejapo, aŷ roexaa rami ae.

**16** Ha'e gui aŷ SENHOR Israel kuery ruete, ejapopa ke nerembiguai xeru Davi pe ndeayvuague. Ha'e vy aipo're va'ekue: "Xerenonde ndoatai 'rā nderekovia tenda Israel kuery re openaaty áry oguapy oiny va'erā, xapy'a rei xerenonde rupi ndera'y kuery avi lei rupi ikuai aguā omoī porā ramo, ndee reikoague rami ae", 're va'ekue.

**17** Ha'e gui aŷ SENHOR Israel kuery ruete, tojeupity nerembiguai Davi pe ndeayvuague.

**18** — Ha'e rami avi ha'eve 'rā ri nda'u ndee Oreruete yvy re reiko aguā ore avakue reve? Ma'ẽ, mba'eta yva neī yva yvatevea rupi peve voi nandejai 'rā, ha'e vy kova'e oo xee ajapo va'ekue py katuve ma nda'evei 'rā.

**19** Ha'e rami avi SENHOR Xeruete, endu pota ke xee nerembiguai anhembo'e vy ajerurea re, rendu aguā aŷ nerentonde xee nerembiguai ajapukai reve anhembo'ea.

**20** Ha'e rami vy ara py ha'e pyávy kova'e oo re rema'ẽ riae aguā, ha'e kova'e henda "Xerery oī atyrā", 'reague re, kova'e henda py nerembiguai onhembo'e oinya rendu aguā.

**21** Ha'e gui aŷ, endu nerembiguai ha'e Israel kuery ha'e javi kova'e henda py rojapukai rokuapya. Endu ke yva re reĩa gui. Endu ha'e oreperdoa guive.

**22** — Xapy'a rei amongue oirū pe otekoavy ramo ha'ekue re omboayvua ramo ou vy kova'e ndevygua opy altar oī va'e renonde py oura ramo

**23** endu ke yva re reĩa gui, ha'e embovai. Eikuua pota nerembiguai kuery re. Ha'e rami vy embopaga ojejavvy va'ekue, hexe ae ojeapa aguā ojapo vaiague. Ha'e rā ha'evea rami oiko va'e ma emboeko porā, ha'evea rami oikoa repy reme'ẽ vy.

**24** — Ha'e gui xapy'a rei ndevygua Israel kuery ndevy ojejavvy 'rā, ha'e gui ngovaigua kuery renonde rupi ho'apa ma vy ndevy ju ojeko rerova 'rā okuapy. Ha'e vy nderery rupi ojapukai vy kova'e oo py nerentonde py onhembo'e ha'e ojerure ramo

**25** endu ke yva re reĩa gui, ha'e vy eperdoapa ndevygua Israel kuery ojejavvyague. Ha'e gui ejapo tuu kuery yvyrā reme'ẽ va'ekue katy ju ojevy aguā rami.

**26** — Ha'e gui xapy'a rei yva rembotypa rā nda'okyvei 'rā, nderovai heta va'e kuery ojejavypa rire, ha'e gui kova'e henda py onhembo'e okuapy vy nderery rupi ojapukai 'rā, ha'e remoingo axy rire ojejavypaa gui ojeko rerova ramo

**27** endu yva re reĩa gui, ha'e vy eperdoapa nerembiguai kuery, ndevygua Israel kuery ojejavvyague. Embo'e ju tape porā rupi ikuai aguā, ha'e embou nho oky yvy ndevygua kuery ikuai aguā reme'ẽ va'ekue áry.

**28** — Ha'e gui ma xapy'a rei kova'e yvy re oiko 'rā karuai e'ŷ vy mba'eaxy vaikue, ha'e'ŷ vy hu'ũmbaa, hatãmba reia, e'ŷ vy tuku karu ha'e ape'i okaru va'e, xapy'a rei hovaigua kuery ojokopa 'rā ha'e kuery retā, ha'e'ŷ vy oiko 'rā ai vaikue e'ŷ vy mba'eaxy va'e rei,

**29** ha'e gui xapy'a rei mava'e rā rei onhembo'e vy ojerure 'rā, ha'e'ŷ vy ndevygua Israel kuery ha'e javi 'rā ojerure okuapy, peteĩ-teĩ haxy va'e ha'e poriaua hexe oī va'e oendu vy kova'e oo oĩa katy opo omoī ramo

**30** endu ke yva re ne'amba py reĩa gui, ha'e vy eperdoa. Eme'ẽ peteĩ-teĩ pe oikoague repy, ha'e kuery py'a re oī va'e reikuaapa va'e vy, mba'eta ndee anho'i pavē py'a regua oikuaa va'e reiko.

**31** Ha'e ramo nerentonde ha'e kuery ojererokyjea rupi ikuai aguā ndeguigua tape rupi, oreru kuery yvyrā reme'ẽ va'ekue re ikuiaia pukukue re.

<sup>32</sup> — Ha'e gui amboae regua voi, ndevygua Israel kuery regua e'ŷ ikuai va'eri oyvy mombyrya gui ou avi 'rā nderery tuvixa va'e rupi ikuai aguā, ndejyva reupi vy ndepo'akaa rexha ukaague ha'e kuery pe omombe'ua rā oendu rire. Ha'e gui ha'e kuery onhembo'e avi 'rā kova'e oo oña katy oma'ē reve, ha'e ramo

<sup>33</sup> endu yva re ne'amba py reña gui, ha'e ejapopa amboae regua kuery ndevy ojerurea, ha'e rami vy yvy regua ha'e javi nderery oikuua aguā, ndevygua Israel kuery rami ha'e kuery voi nerondenre ojererokyjea rupi ikuai aguā, ha'e oikuapa aguā kova'e oo xee ajapo va'ekue py nderery remoīague.

<sup>34</sup> — Ha'e gui xapy'a rei ndevygua kuery oje'oi 'rā ngovaigua kuery reve joe opu'ā aguā katy, ha'e gui tape rupi remondoukaa py onhembo'e 'rā ndevy, kova'e tetā reiporavo va'ekue ha'e kova'e oo nderery oī atyrā rejapo uka va'ekue katy oma'ē ramo

<sup>35</sup> endu yva re reña gui onhembo'e vy ojerure okuapya, ha'e ejapo ha'evea rami.

<sup>36</sup> — Xapy'a rei ma ha'e kuery ojejavy 'rā nderovai (mba'eta jipoi ava ojejavy e'ŷ va'erā), ha'e ramo ha'e kuery rovai ndepoxy vy remboaxapa 'rā hovaigua kuery po py, ha'e kuery guekoia katy ogueraapa aguā escravo-rā, mombyry e'ŷ vy ha'e'i rupi teī ae ma.

<sup>37</sup> Ha'e gui yvy mamo rā rei ogueraa ague re ikuiaia py ha'e kuery onhemboaxy vy ojeko rerova 'rā, ha'e yvy escravo ikuiaia py ae ndevy ojerure vy aipoe'i 'rā okuapy: "Rojejavypa, teko vai rupi anho orekuai va'ekue", he'i 'rā, ha'e ndevy guarā ju ojeko rerova 'rā opy'a ha'e onhe'ē ha'e javi py.

<sup>38</sup> Ha'e rami vy yvy escravo-rā ogueraapaague py ae ndevy onhembo'e 'rā okuapy oyvyrā tuu kuery pe reme'ē va'ekue katy oma'ē reve, kova'e tetā ha'e kova'e oo nderery oī atyrā ajapo va'ekue katy guive. Ha'e ramo

<sup>39</sup> endu ke yva re ne'amba py reña gui ha'e kuery onhembo'e vy ojerure okuapya, ha'e ejapo ha'evea rami. Eperdoa ndevygua kuery nderovai rupi ojejavyague.

<sup>40</sup> — Ha'e gui aŷ ma Xeruete, nderexa tojep'e'a, ha'e ndeapyxa toendu riae apy rojerure rā.

<sup>41</sup> Ha'e gui Xeruete, epu'ā ke, eike ejuvy repytu'u aguā py, ndee ha'e ndeayvu ryru ndepo'akaa kuaa ukkaa va'e reve. SENHOR Oreruete, tove ndevygua sacerdote kuery re toī reraa jepea kuaa ukkaa, ha'e ndevygua iky'a e'ŷ va'e kuery toguerovy'a iporā va'e.

<sup>42</sup> SENHOR Oreruete, eipytyvō e'ŷ eme huvixaverā remoī va'ekue. Nema'endu'a ke nerembiguai Davi reayvuague rami reiko riae aguā re — he'i.\*

## 7

### *Nhanderuete rexakāa templo ropy rupi tnyēague*

<sup>1</sup> Salomão onhembo'epa ma rire tata yva gui oguejy vy oapypa mymba kuery ome'ē va'erā ogueru va'ekue. Ha'e rami vy SENHOR rexakāa omonyēmba opy rupi.

<sup>2</sup> Neī sacerdote kuery ma voi nda'evei ikuaiive aguā SENHOR pegua opy, mba'eta opy rupi SENHOR rexakāa tnyē ramo.

<sup>3</sup> Ha'e ramo Israel ramymino kuery ikuai va'e ha'e javi ma tata reve SENHOR rexakāa oo re oguejy rā oexa vy ojero'a okuapy oka py ikuiaia py. Ngova yvy re omovaē reve omboete okuapy. Oguerovy'a okuapy SENHOR porayvua ha'e nhomboaxya opa e'ŷ va'e.

#### *1 Reis 8.62-66*

<sup>4</sup> Ha'e gui huvixa ha'e heta va'e kuery ha'e javi SENHOR renonde ome'ē okuapy mymba kuery.

<sup>5</sup> Huvixa Salomão avi ome'ē vinte e dois mil vaka ha'e cento e vinte mil vexa'i.

<sup>6</sup> Ha'e rami py huvixa ha'e heta va'e kuery ha'e javi reve Nhanderuete pegua oo omboaxa okuapy ipo py. Sacerdote kuery ha'e javi ma peteī-teī oī aguā py ae ikuai, levita kuery ha'e rami ae avi mba'epu reve oporaei okuapy SENHOR pe. Ha'e va'e ma Davi ojapo uka va'ekue ha'e kuery SENHOR oguerovy'aa rupi oiporu va'erā, mba'eta iporayvua oī riae

\* **6:42** Salmo 132.8-10

'rã. Ha'e kuery renonde py ma sacerdote kuery mimby guaxu monhe'ëa ikuai avi. Ha'e rami vy Israel kuery ha'e javi opu'ëmba nhogueno'amy.

<sup>7</sup> Ha'e va'e árave Salomão omboaxa avi oka SENHOR pegua oo rexei oï va'e. Mba'eta ha'e py ae ome'ë mymba oapy reve, hexeve peteñ rami ju ikuia regua kyrakue guive. Mba'eta altar overa va'e guigua Salomão ojapo uka va'ekue py ma noñmba reguai mymba oapy reve ome'ë va'e, mba'emo aju guigua ha'e hexeve peteñ rami ikuai aguã regua kyrakue oapy va'e.

<sup>8</sup> Ha'e rami py sete ára re Salomão ojapo ngaru. Hexeve ikuai avi Israel kuery heta ete ijaty va'e, Hamate tekaoa py nhavaëa'i ha'e Egito yakã katy'i gui ou va'ekue.

<sup>9</sup> Ha'e gui oito araa guive ma omboypy ju ngaru oguy'i py ikuai aguã regua, sete ára re ma altar omboaxa okuapy rire. Ha'e rami vy sete ára re ju ojapo ngaru.

<sup>10</sup> Ha'e gui sete jaxyha'e vinte e três araa py ma huvixa omondoukapa ju heta va'e kuery. Ha'e rã ha'e kuery oje'oipa ju ngoo katy, ov'y'a ete ha'e opy'a py oguerovy'a reve Davi pe SENHOR mba'emo porã ojapoague, Salomão ha'e ojeupegua Israel kuery ha'e javi pe guive.

### 1 Reis 9.1-9

<sup>11</sup> Ha'e rami py SENHOR pegua oo huvixa Salomão ojapopa ma, ngoorã ae ha'e opa mba'ë onhembopy'aa rami ojapoxe va'ekue voi. SENHOR pegua oo ha'e ngoo ae ojapoa py oiko porã.

<sup>12</sup> Ha'e gui ma pyávy SENHOR ojexa uka Salomão pe. Ha'e vy aipoe'i ixupe:

— Aendu rejerurea. Ha'e rami vy xevy guarã aiporavo kova'e oo mba'emo peme'ë atyrã.

<sup>13</sup> Ha'e gui ma xapy'a rei xee yva amboty 'rã nda'okyvei aguã rami, e'ë vy tuku karu yvy re onhoty mbyre ho'upa aguã re xeayvu, ha'e'ë vy xevyguia kuery ikuia rupi mba'emo vai ambou, ha'e ramo

<sup>14</sup> xapy'a rei xevyguia kuery xerery rupi ae aenoñ va'ekue onhemoyvy'i vy onhembo'ea rupi xereka, ha'e gueko vaia gui ojeko rerova ri ramo xee aendu 'rã yva re aña gui. Ha'e vy aperdoa 'rã ojejavyague ha'e amoingo porã ju 'rã ijyvy regua.

<sup>15</sup> Xerexa ojepe'a riae 'rã, xeapyxa py voi aendu riae 'rã apy xevy pejerurea.

<sup>16</sup> Mba'eta kova'e oo ma aiporavo vy xevy guarã ae aiky'a'opa, ha'e py xerery oï aguã raka'e rã peve guarã. Ha'e va'e re ama'ë vy xepy'a py xema'endu'a riae 'rã ára nhavõ.

<sup>17</sup> Ha'e gui ndee ma xapy'a rei xerenonde rupi nderu Davi oikoague rami ndee voi reiko ramo, ha'e ajapo uka va'ekue, xeayvuague ha'e aipotaa ha'e javi rejapopa ri ramo,

<sup>18</sup> ndevy pe voi amoñ atã 'rã ndepo'akaa raka'e rã peve guarã, nderu Davi pe xereve guarã ajapo va'ekue rami vy. Ha'e vy ixupe aipoa'e va'ekue: "Ndoiko e'ëi 'rã nderekovia Israel kuery re opena va'erã", ha'eague rami vy.\*

<sup>19</sup> — Ha'e rami avi xapy'a rei peñ ha'e pendera'y kuery xegui pejepe'a vy ajapo uka va'ekue ha'e xeayvuague ndapejapovei vy tuuete kuery mboae re peo vy pembojerovia ri ramo,

<sup>20</sup> ha'e ramo roipe'apa 'rã pendeyvyrã ame'ë va'ekue gui, ha'e kova'e oo xerery rupi aiky'a'opa va'ekue amombo'rã mombyry xerenonde gui. Ha'e rami rire yvy regua kuery ojojai rei ha'e ijayvu rei okuapy aguã rive 'rã oï.

<sup>21</sup> Mba'eta kova'e oo aÿ omboeteave va'eri ha'e jave py oïague rupi oaxa va'e kuery oexa vy onhemondyipa 'rã. Ha'e vy aipoe'i 'rã: "Mba'ë re tu SENHOR guñ rami ete ri oeja kova'e yvy ha'e kova'e oo?" he'i 'rã okuapy.

<sup>22</sup> Ha'e gui ombovaia 'rã: "Ha'e rami ete oeja mba'eta ha'e kuery oejapa rire SENHOR guamoñ kuery ruete Egito yvy gui oipe'a va'ekue, ha'e tuuete mboae pe ju ova vy omboete ha'e ombojerovia okuapy ramo. Ha'e nunga rupi ae rima ha'e kuery áry ombou raka'e guñ rami ete ojexavai aguã", 'ea 'rã.

\* <sup>7:18</sup> Ha'e rami Davi pe Nhanderuete ijayvu ma voi (1 Reis 9.6-9; 1 Crônicas 17.12-14).

## 8

*1 Reis 9.10-28*

- <sup>1</sup> Vinte ma'etŷa py mae ma Salomão ojapopa SENHOR pegua oo, ngoorã ae guive.
- <sup>2</sup> Omoatyrõ avi huvixa Hirão tetã ipo py omboaxa va'ekue. Ha'e va'e py ma Israel kuery ju omboekoa.
- <sup>3</sup> Ha'e va'e rire ma Hamate-Zoba tetã katy Salomão oo vy oipe'a.
- <sup>4</sup> Tekoa e'ŷa py ojapo avi Tadmor tetã. Hamate katy'i guive tetã ojapo reta tembi'u omoï porã atyrã.
- <sup>5</sup> Omoatyrõ avi Bete-Horam, yvy'ã katy ha'e yvy'ã guy katy. Ha'e va'e tetã ha'e javi omombaraete vy ojapo imoiny korarã, okẽ jokoarã guive.
- <sup>6</sup> Omombaraete avi imoiny Baalate ha'e tetã rupi tembi'u omoï porã atyrã ha'e oguereco va'e ha'e javi, ha'e gui tetã karóxa ha'e guymba kavaju ikuai atyrã. Jerusalém py voi ojapoxe va'ekue ojapopa, Líbano yvy re ha'e oyvy openaa ha'e javi rupi.
- <sup>7</sup> Ha'e gui heteu kuery regua okuave va'e, amorreu, ferezeu, heveu ha'e jebuseu kuery Israel kuery regua e'ŷ ikuai va'e,
- <sup>8</sup> ha'e ta'y kuery okuave va'e Israel kuery ndojukapai va'ekue, ha'e va'e kuery ae Salomão omomba'eapo nhea'ã, aŷ peve guarã.
- <sup>9</sup> Ha'e rã Israel kuery va'e regua ma neĩ peteĩve Salomão nomomba'eapoi escravo rami. Ha'e va'e kuery ma ixupe ikuai joe opu'ãa rupi, huvixa kuery, ha'e gui karóxa ha'e imboguataaty kuery re openaa rupi ikuai.
- <sup>10</sup> Ha'e kuery ae huvixa Salomão rembiguai yvatekueve, duzentos e cinqüenta ikuai guetarã kuery re openaa rupi.
- <sup>11</sup> Ha'e gui ma Salomão ojapo Faraó rajy tetã Davi rekoague py oñague gui ova aguã rami hoorã ojapo uka va'ekue py. Mba'eta aipoe'i: "Xera'xyx ma nda'evei Israel kuery ruvixa Davi rogue py oiko aguã, mba'eta SENHOR ayvu ryru oñague ma iky'a e'ŷ va'e meme", he'i.
- <sup>12</sup> Altar SENHOR peguarã Salomão ojapo va'ekue áry ome'ẽ jepi mymba kuery, oikeaty rexei'i.
- <sup>13</sup> Ko'ẽ nhavõ 'rã ome'ẽ Moisés ijayvuague rami vy, sábado nhavõ guive, ngaru jaxy ipyau'i jave ha'e oa'angaague ára py, mboapykue kuerei 'rã ome'ẽ ma'etŷa nhavõ: ngaru mbojape imbovua revegua e'ŷa ára, semana regua ngarua ára ha'e oguy'i py ikuiaia aguã ára guive.
- <sup>14</sup> Nguu Davi ojapo ukaague rami vy omoï avi sacerdote kuery peteĩ-teĩ regua omba'eapo aguã, levita kuery ha'e rami ae avi peteĩ-teĩ omoï omba'eapo aguã rami, Nhanderuete pe oporaei aguã, sacerdote kuery renonde rupi oipytyvõ aguã ko'ẽ nhavõ ojapo 'rã va'ekue ojapoa rupi, okẽ rarõa kuery peteĩ-teĩ regua okẽ ikuai va'e oarõ aguã rami guive, ha'e rami aguã ae Nhanderuete rembiguai Davi ojapo uka rire.
- <sup>15</sup> Neĩ peteĩve henda py ma voi sacerdote ha'e levita kuery ndojapo e'ŷi huvixa ojapo uka va'ekue, peráta omoï porãa rupi voi.
- <sup>16</sup> Ha'e rami py Salomão ojapopa SENHOR pegua oo rupi ojapoxe va'ekue, omboypyá ára guive ojapopa peve. Ha'e rami py ae ojapopa oo SENHOR pegua.
- <sup>17</sup> Ha'e gui ma Salomão oo Eziom-Geber ha'e Elate py ye'ẽ rembe re, Edom yvy re.
- <sup>18</sup> Ha'e py oña py huvixa Hirão guembiguai kuery pe ogueru ruka kanoã ha'e omboguata kuaa va'e kuery. Ha'e kuery ma Salomão rembiguai kuery reve Ofir py oje'oi vy ha'e gui ogueru okuapy quinze mil quilos ouro guigua. Huvixa Salomão pe ae ogueru.

## 9

*1 Reis 10.1-13*

- <sup>1</sup> Ha'e gui Sabá pygua huvixa kunha oendu Salomão reko omombe'ua rã. Ha'e rami vy Jerusalém py ou haxy-axy va'e re oporandu aguã. Guembiguai kuery heta va'e reve ovaẽ. Guymba camelo kuery ombovoyi heruvy tembi'u irûrã, ouro ha'e ita

iporãgueve va'e heta re guive. Ha'e gui Salomão renonde py ovaẽ vy ixupe oporandu onhembopy'aague ha'e javi rami.

<sup>2</sup> Ha'e ramo opa mba'e re oporandu rã Salomão ombovai, mba'eta ixupe ma neĩ peteĩ henda py ma voi ndaxyi omombe'u porãve aguã.

<sup>3</sup> Ha'e ramo Sabá pygua huvixa kunha oendu Salomão 'arandua ha'e javi, oexa avi oo ojapo uka va'ekue,

<sup>4</sup> mesa áry tembi'u oguerua va'e, yvatekueve ikuaiaty, hembiguai ha'e karo rerua kuery omba'eapoa, ijao guive, ha'e mymba kuery altar áry SENHOR pe oappyaty. Ha'e nunga ha'e javi oexa vy onhemondyi rei oiny.

<sup>5</sup> Ha'e vy aipoe'i huvixa pe:

— Anhetẽ ete ae ra'e ndereko regua ayvua xerekaoa py aendu va'ekue ha'e ne'arandua regua voi.

<sup>6</sup> Ha'e rami teĩ xee ma ha'e va'e ayvu ndaroviai va'ekue, apy aju vy xee ae rexu py aexa e'ŷa ja. Anhetẽ neĩ mbyte rupi peve ma voi xevy nomombe'uai va'ekue, mba'eta ndereko omombe'ua rã aenduague gui ne'arandupave ra'e, rerekopave ha'e ndere ima'endu'a porã mbyve ete va'e.

<sup>7</sup> Ovy'a ete 'rã okuapy ndevygua avakue, nerembiguai nerentonde rupi ikuai va'ety, mba'eta ha'e kuery oendu 'rã ne'arandua rupi ndeayvua.

<sup>8</sup> Ta'ima'endu'a porãa avi SENHOR Nderuete re, mba'eta ndererovy'a vy tenda Israel kuery re openaaty áry nemoĩ rire huvixa SENHOR nderuete peguarã. Mba'eta SENHOR ma Israel kuery raka'e rã peve omoingo porã aguã rami oayvu vy ae nemoĩ huvixarã, ha'evea rami rerekopave ha'e aguã teko porã rupi — he'i.

<sup>9</sup> Ha'e rami vy huvixa Salomão pe kunha va'e ome'ẽ quatro mil quilos ouro guigua, heta tembi'u irûrã, ita iporãve va'e guive. Neĩ peteĩgueve ma ndogueruai teri mba'emo porã Sabá pygua huvixa kunha Salomão pe ome'ẽ va'ekue ramigua ete.

<sup>10</sup> Ha'e gui huvixa Hirão ha'e Salomão rembiguai kuery Ofir gui ouro ogueru va'e ma ha'e katy gui ogueru avi yvyra sândalo aygue ha'e ita iporãve va'e.

<sup>11</sup> Yvyra sândalo gui ma huvixa Salomão ojapo uka jopy-jopy ovyaty SENHOR pegua opy ha'e ngopy guarã, ha'e gui harpa ha'e mbaraka oporaei va'e kuery peguarã. Ha'e nunga ma neĩ peteĩve ma Judá yvy re oexapy e'ŷ teri.

<sup>12</sup> Ha'e gui Sabá pygua huvixa kunha pe huvixa Salomão ju ome'ẽ ixupe ogueru va'ekue gui hetave, mba'emo oipota ha'e ojerurea ha'e javi. Ha'e ramo ojevy vy oyvy katy ju oo, guembiguai kuery ha'e javi reve.

### 1 Reis 10.14-29

<sup>13</sup> Ma'etŷa nhavõ ouro Salomão pe oguerua va'e poyikue ma vinte e dois mil quilos,

<sup>14</sup> mba'emo vendea kuery ha'e mba'emo mboekoviaaty gui ojou va'e áryve. Arábia pygua huvixa ha'e va'e yvy re opena va'ety kuery voi ome'ẽ 'rã ixupe ouro ha'e prata.

<sup>15</sup> Ha'e ramo ouro ombope pyre gui Salomão ojapo duzentos hu'y jokoa tuvixa va'e. Peteĩ-teĩ hu'y jokoarã ma seis quilos ouro opejaa.

<sup>16</sup> Ouro ombope pyre gui ojapo avi trezentos hu'y jokoa. Ha'e va'e regua hu'y jokoarã peteĩ-teĩ ma três quilos raxa ouro opejaa. Ha'e va'e ma huvixa omoĩ porã ukapa oo Líbano ka'aguy regua guigua py.

<sup>17</sup> Huvixa ojapo avi peteĩ tenda opena atyrã tuvixave va'e marfim guigua, ha'e vy onhovãmba ouro ete py anho.

<sup>18</sup> Tenda renonde guarã ma ojapo mboapy meme pyrõa. Oĩ avi peteĩ py renderã ouro gui ojapo pyre, tenda re omboja pyre. Ijyke joavaive re ma omoĩ avi jyva ytara oguapyaty yvýry, ha'e ijyva yta yvýry ma mokoĩ guary ra'angaa omopu'ã imo'amy.

<sup>19</sup> Mboapy meme pyrõa ikuai va'e áry ma doze avi omoĩ guary ra'angaa, peteĩ-teĩ pyrõa apy reguarã. Ha'e va'e nunga ma neĩ peteĩve huvixa pe ma voi ojapoa va'e'ŷ teri.

**20** Karo huvixa Salomão oy'uatya va'e ma guive rã ouro guigua meme. Oo Líbano ka'aguy regua guigua py ikuai va'e voi ouro guigua meme avi. Ha'e rã prata ma Salomão oĩ jave mba'everã nombovarei merami.

**21** Mba'eta huvixa oguereko reta kanoã guaxu Társis katy oo va'erã, Hirão rembiguai kuery reve omboguataa va'e. Mboapy ma'etýa py kuerei 'rã Társis gui kanoã guaxu ojevy okuapy vy ogueru ouro, prata, marfim, karaja ha'e jayru guaxu.

**22** Ha'e rami vy huvixa Salomão yvy jave re huvixa kuery ikuai va'e gui ipo'akave, o'arandua py ha'e mba'emo oguerekopaa py.

**23** Ha'e ramo yvy jave gui huvixa kuery ou 'rã ha'e oĩa py o'arandua rupi ijayvu rã oendu aguã.

**24** Ma'etýa nhavõ peteĩ-teĩ ogueru 'rã mba'emo ixupe ome'ẽ va'erã: ouro ha'e prata guigua, ajukue, tembiporu, kavaju ha'e mburika kunha, tembi'u irûrã guive.

**25** Ha'e gui Salomão oguereko quatro mil kavaju oguy py karóxa regua. Kavaju árygua doze mil ju oguereko imbgouataarã. Ha'e va'e kuery ma tetã ikuai va'e rupi oguereko karóxa, Jerusalém tetã py ngoo katy'i py guive.

**26** Ha'e gui Salomão ipo'aka oiny huvixa kuery ha'e javi re, Eufrates yakã guive filisteu kuery yvy peve, ha'e gui Egito yvy apy peve.

**27** Prata ma Jerusalém py huvixa omboetave ita rami rive, yvyra yary guive ojapo oata aguã rami e'ŷ sicômoro'y tekoa e'ŷa rupi ikuai va'e rami.

**28** Kavaju Salomão peguarã ma Egito yvy ha'e yvy jave gui oguerua.

### *1 Reis 11.41-43*

**29** Ha'e gui oïve rei tema Salomão rekukue regua. Ha'e rami avi mba'emo ojapo va'ekue jypy guive opaa peve noï'rã teve kuaxia Nebate ra'y Jeroboão rekukue profeta Natã ha'e Siloé pygua Aías ombopara va'ekue py, profeta Ido mba'emo oexa va'ekue ombopara va'ekue re guive?

**30** Quarenta ma'etý re Salomão opena oikovy Jerusalém py Israel kuery ha'e javi re.

**31** Ha'e gui guamoï kueryague rami ndoikovevei'i ma ramo onhono porãa tetã Davi rekoague py ae. Ha'e gui ta'y Roboão ju oĩ nguu rekoria.

## 10

### *1 Reis 12.1-15*

**1** Ha'e gui ma Roboão oo Siquém katy, ha'e py Israel kuery onhemboatypa ma ramo nguvixarã omoï aguã.

**2** Ha'e nunga Nebate ra'y Jeroboão avi oendu. (Ha'e va'e ma Egito yvy re teri oiko, huvixa Salomão gui onhaague py.) Ha'e gui Egito gui ojevy ju ramo

**3** oenoï ukka okuapy. Ha'e ramo Israel kuery ha'e javia py ou Roboão reve jogueroayvu aguã. Ha'e ramo ha'e kuery aipoe'i okuapy Roboão pe:

**4** — Nderu ma orerereko axy ete va'ekue. Ha'e gui aŷ ma orerereko porã'i ju nderu orembojexavai ha'e orerereko axyague gui. Ha'e ramo ma ndevy ae 'rã orekuai.

**5** Roboão ombovai ha'e kuery pe:

— Mboapy araa py ma peju ju xea py – he'i. Ha'e rã heta va'e kuery oje'oipa.

**6** Ha'e gui ma huvixa Roboão onhemongeta uka tujakueve nguu Salomão oikove teri jave henonde ikuai va'ekue pe. Ha'e vy aipoe'i:

— Mba'exa tu peẽ kuery xemongeta ta heta va'e kuery ambovai aguã?

**7** Ha'e kuery ombovai:

— Xapy'a rei kova'e kuery re repena porã, ha'e rerorya rupi ndeayvu porã'i ramo ha'e kuery raka'e rã peve 'rã ikuai nerembiguai – he'i okuapy.

**8** Ha'e rami teĩ ha'e noendu potai tujakueve omongeta rã. Ha'e vy guembiguai kunumigue ojavegua ngupive ikuai va'e pe ju onhemongeta uka.

**9** Ha'e vy aipoe'i ha'e kuery pe:

— Peẽ kuery, mba'exa tu xemongeta ta kova'e kuery ambovai aguã? Mba'eta xevy ojerure vy “Orererekro porã'i ju nderu orererekro axyague gui”, he'i okuapy ramo.

<sup>10</sup> Ha'e ramo kunumigue ijaveguia hupive ikuai va'e ombovai:

— Po rami 'rã ndeayvu ha'e va'e kuery aipoe'i va'ekue pe: “Nderu orererekro axy, va'eri ndee orererekro porã'i ju”, he'i va'e kuery pe. Po rami 'rã ndeayvu: “Xekuã kyrĩ'i ma xeru poataa gui tuvixave.

<sup>11</sup> Xeru pendererekro axy ae, ha'e rã xee ma roguerekro axyve ete 'rã. Xeru penembojexavai vaka pi py penenupã vy, ha'e rã xee ma japeuxa popia py 'rã rombojexavai”, 're 'rã — he'i okuapy.

<sup>12</sup> Ha'e va'e rire mboapy araa py Jeroboão ha'e heta va'e kuery reve joguerupa ju Roboão-a py, huvixa “Mboapy araa py pejevy ju xea py”, he'iague rami vy.

<sup>13</sup> Ha'e ramo huvixa Roboão ombovai vy ayvu poyi py ijayvu, tujakueve omongoetaa noendu potai rire.

<sup>14</sup> Kunumigue omongoetaaque rami rive ijayvu vy

— Xeru pendererekro axy, ha'e rã xee ma roguerekro axyve 'rã. Xeru ma penembojexavai vaka pi py, ha'e rã xee ma japeuxa popia py 'rã rombojexavai — he'i.

<sup>15</sup> Ha'e rami vy huvixa Roboão noendu potai heta va'e kuery ayvu re, mba'eta ha'e rami aguã ma Nhanderuete gui ae oiko, Nebate ra'y Jeroboão pe Siló pygua Aías ijayvuague SENHOR omoingo aguã.\*

### *1 Reis 12.16-20*

<sup>16</sup> Ha'e gui Israel kuery ha'e javi ayvu re huvixa Roboão ndojapyxaka potai ramo oexa vy ivai vaipa okuapy. Ha'e vy aipoe'i:

— Mba'e ha'vy jareko Davi ramymino kuery reve? Jessé ra'y reve guarã noïvei ri nhandevy! Israel kuery, jaje'oipa nhandro katy! Ha'vy Davi ramymino kuery, pepena pendero re ae! — he'i okuapy. Ha'e rami vy Israel kuery peteĩ-teĩ oje'oipa ju ngoo katy.

<sup>17</sup> Ha'e rã Israel kuery Judá regua tetã rupi hekoa va'e re ma Roboão ae opena oikovy.

<sup>18</sup> Ha'e gui huvixa Roboão omondouka omomba'eapo nhea'ämby kuery re opena va'ety Adorão, teĩ ha'e va'e ma Israel kuery ha'e javi ojapipa ita py, ha'e ramo omano. Ha'e rã huvixa Roboão ma okaróxa ogueraa nho vy onha ovvy Jerusalém katy.

<sup>19</sup> Ha'e rami py Israel kuery onhemoingo Davi ramymino kuery rovaigua, aÿ peve guarã.

## 11

### *1 Reis 12.21-24*

<sup>1</sup> Jerusalém tetã py Roboão ovaẽ ma vy omboatypa Judá ha'e Benjamim regua kuery, cento e oitenta mil oiporavo pyre, joe opu'ã kuaa va'e meme, Israel kuery rovai opu'ã aguã, ha'e rami vy Roboão pe ju omboaxa okuapy aguã ipo'akaague.

<sup>2</sup> Ha'e rami teĩ SENHOR oayvu ombou peteĩ ava guemimbo'e Semaías va'e pe. Ha'e vy aipoe'i:

<sup>3</sup> — Ndeayvu ke Salomão ra'y Roboão Judá pygua huvixa va'e pe, ha'e Israel kuery Judá ha'e Benjamim regua ikuai va'e ha'e javi pe. Ha'e vy aipo're:

<sup>4</sup> “Po rami SENHOR ijayvu: ‘Tapeo eme, pepu'ã eme penderyvy kuery rovai. Peteĩ-teĩ pejevy ju pendero katy, mba'eta xee ae ha'e nunga amoingo va'ekue’, he'i.” Ha'e rami SENHOR ijayvua ha'e kuery oendu vy ndoo nhoi teve Jeroboão kuery rovai opu'ã aguã.

### *Roboão peteĩ-teĩ tetã ikorarã ojapoague rery oña*

\* <sup>10:15</sup> Profeta Aías Jeroboão pe ijayvu ma voi Israel kuery Nhanderuete omboja'o va'erãa rami (1 Reis 11.29-33). Ha'e gui Judá ha'e Benjamim regua kuery reve kuaray puku-a katy ikuai va'e gui ma Efraim regua, ha'e kuaray ijapu'a'ia katy ikuai va'e regua reve oja'o. Mokoï regua “Judá kuery” 'ea va'e gui dez regua “Israel kuery” 'ea va'e oja'o, ha'e kuery ojejavyague re Nhanderuete ombopaga ramo.

<sup>5</sup> Roboão ma Jerusalém py hekoa oikovy vy ojapo Judá re tetã ikuai va'e korarã, ngovaigua kuery gui.

<sup>6</sup> Ha'e rami vy ojapo Belém tetã korarã, Etã, Tecoa,

<sup>7</sup> Bete-Zur, Socó, Adulão,

<sup>8</sup> Gate, Maressa, Zife,

<sup>9</sup> Adoraim, Laquis, Azeca,

<sup>10</sup> Zorá, Aijalom ha'e Hebron tetã guive. Ha'e va'e tetã ikorapa va'e ma Judá ha'e Benjamim yvy regua meme.

<sup>11</sup> Ha'e va'e tetã omombaraetepa ma vy ha'e py omoingo harõarã kuery. Omoĩ avi mba'emo ho'u va'erã, azeite, vinho guive.

<sup>12</sup> Peteĩ-teĩ tetã py omoĩ reta hu'y jokoa tuvixa va'e ha'e hu'y guaxu. Omombaraetepa. Ha'e rami vy Judá ha'e Benjamim yvy jave rupi ipo'aka.

### *Jerusalém py sacerdote ha'e levita kuery oupa okuapyague*

<sup>13</sup> Ha'e rami ae avi Roboão-a katy sacerdote ha'e levita kuery Israel ha'e javi rupi gui oupa.

<sup>14</sup> Mba'eta levita kuery tetã katy'i rupi gui ou vy mba'emo oguereko va'ekue oejapa vy oupa Judá ha'e Jerusalém katy, Jeroboão ha'e gua'y kuery omoxẽmba rire SENHOR pe ikuaise e'ŷ aguã.

<sup>15</sup> Ha'e kuery rekovia ma Jeroboão omoĩ sacerdote kueryrã ha'e ae oikuua rami, ombojeroviaaty yvy'ã rupi ikuai va'e pe, kavara ha'e vaka ra'y ra'angaa ojapo va'ekue peguarã rive.

<sup>16</sup> Ha'e rami rã Israel kuery ha'e javi regua Jerusalém tetã py ou, opy'a py SENHOR Israel kuery ruete oeka aguã omoĩ va'ekue ha'e javi, SENHOR guamoĩ kuery ruete pe mba'emo ome'ẽ aguã.

<sup>17</sup> Ha'e rami py ha'e kuery omombaraete Judá kuery, ojapo avi Salomão ra'y Roboão ipo'akave aguã rami, mboapy ma'etŷ re. Mba'eta mboapy ma'etŷa peve'i ikuai Davi ha'e Salomão oikoague rami.

### *Roboão ro pygua kuery rery oĩa*

<sup>18</sup> Ha'e gui ma Roboão gua'xyrã ogueraa Maalate. Ha'e va'e ru ma Davi ra'y Jerimote, ha'e rã ixy ma Jessé rajy Eliabe memby Abiail.

<sup>19</sup> Ha'e va'e omemby kuery oguereko va'ekue ma Jeús, Semarias ha'e Zaã.

<sup>20</sup> Ha'e va'e rire ma gua'xyrã ogueraa avi Absalão rajy Maaca. Ha'e va'e ma oguereko ju Abias, Atai, Ziza ha'e Selomite.

<sup>21</sup> Gua'xy ha'e gua'xy jevy kuery gui Roboão oayvuve va'e ma Absalão rajy Maaca. Mba'eta dezoito gua'xy ha'e sessenta gua'xy jevy kuery oguereko. Vinte e oito ta'y kuery ha'e sessenta tajy kuery ikuai raka'e.

<sup>22</sup> Maaca pi'a Abias ma Roboão omoĩ gua'y kuery mboae áryve, mba'eta oipota hekivia huvixarã oĩ.

<sup>23</sup> O'arandua rupi vy ojapo gua'y kuery Judá ha'e Benjamim oyvy jave rupi hekoa aguã rami, tetã ikorapa va'e rupi. Ha'e kuery pe ome'ẽ tembi'u oata aguã rami e'ŷ, ta'xyrã ojou reta avi.

## 12

### *1 Reis 14.25-28*

<sup>1</sup> Roboão opo'akaa py oĩ atã ha'e imbaraete ma vy oeja SENHOR guigua lei, Israel kuery ha'e javi reve.

<sup>2</sup> Ha'e gui peteĩ nhiruĩ ma'etŷa re ma Roboão huvixa oĩ jave py Egito pygua huvixa Sisaque ou Jerusalém re opu'ã aguã, ha'e pygua kuery SENHOR rovai ojejavy okuapy rire.

<sup>3</sup> Mil e duzentos karóxa ha'e sessenta mil kavaju árygua kuery reve ou. Hupive Egito yvy gui ou va'ekue ma hetá raxa ikuai, Líbia guigua, suquita ha'e Etiópia guigua kuery guive.

**4** Ha'e rami vy Judá regua tetã ikorapa va'e ha'e javi oipe'apa ma vy Jerusalém katy ju oo.

**5** Ha'e gui ma Roboão-a py ou profeta Semaías, Judá regua yvatekueve Sisaque gui Jerusalém tetã py ono'õ va'ekue ikuiaia py guive. Ha'e vy profeta aipoe'i ha'e kuery pe:

— Po rami SENHOR ijayvu: “Peẽ kuery ma xerejapa pekuapy. Ha'e nunga rupi xee voi roeja ma Sisaque ju pendere ipo'aka aguã”, he'i.

**6** Ha'e ramo Israel regua yvatekueve onhemo'yvyi'okuapy, huvixa guive. Ha'e rami vy aipoe'i okuapy:

— SENHOR ma ha'evea rami nhandererekva'e — he'i.

**7** Ha'e kuery onhemo'yvyi'okuapy rã SENHOR oexa vy teigue ju oayvu ombou uka Semaías pe. Ha'e vy aipoe'i:

— Ha'e kuery onhemo'yvyi'okuapy ramo xee namombai'rã. Ha'e rami'rãgue py are e'ŷ'i re araa jepe'rã, Jerusalém tetã re xepoxyambou uka e'ŷ aguã Sisaque po rupi.

**8** Ha'e rami avi ha'e kuery ikuai'rã hembiguairã, oikuua aguã yvy regua huvixa kuery pe ikuai gui xevy pe ikuai aguã ha'evevea — he'i.

**9** Ha'e gui ma Egito pygua Sisaque ou vy Jerusalém re opu'ã. Ha'e rami vy ogueraapa SENHOR pegua opy iporãgueve oĩ va'ekue, huvixa ropy gui guive. Ogueraa avi hu'y jokoarã ouro gui Salomão ojapo va'ekue.

**10** Ha'e va'ekue rekoria ma huvixa Roboão ojapo hu'y jokoa overa va'e gui rive. Ha'e va'e ma omboaxa huvixa rokẽ rarõa kuery rerekova po py.

**11** Ha'e gui SENHOR pegua oo py huvixa oike nhavõ harõa kuery ou vy ogueraaa avi'rã hu'y jokoa. Ha'e va'e rire ogueru kuerei'rã opy ja'o harõa kuery ikuaiaty py.

**12** Ha'e rami py huvixa onhemo'yvyi'rã rire ixugui SENHOR oipe'a ju opoxya, omomba vyvoi e'ŷ aguã. Mba'eta Judá yvy re ma ikuai teri heko porã va'e.

### 1 Reis 14.21-31

**13** Jerusalém py huvixa Roboão ipo'akave ovvy vy oïve tema huvixa rami. Ixy ma Amom guigua, Naamá hery va'e. Quarenta e um ma'etŷ ma oguerekova py Roboão omboopy huvixa oï aguã, ha'e gui dezessete ma'etŷ re opena Jerusalém py. Ha'e va'e tetã ma Israel re ikuai va'e gui SENHOR oiporavo va'ekue hery oï atyrã.

**14** Ha'e rami tei ha'eve'ŷ va'e ojapo oikovy, opy'a re nomoï guive SENHOR oeka aguã.

**15** Ha'e gui oïve tema Roboão rekukue regua. Ha'e rami avi mba'emo ojapo va'ekue jypy guive opaa peve noï'rã teve kuaxia yma guare kuery rekukue oña profeta Semaías ha'e Ído ombopara va'ekue py? Jeroboão kuery reve Roboão kuery joe opu'ã okuapy oikovea pukukue re.

**16** Ha'e gui Roboão ndoikovevei'i ma guamoï kueryague rami. Ha'e ramo ha'e kuery reve onhono porãa tetã Davi rekoague py. Ha'e gui ta'y Abias ju oïnguu rekoria.

## 13

### 1 Reis 15.1-8

**1** Jeroboão dezoito ma'etŷ re ma huvixa oï jave py Abias oï Judá pygua huvixarã. Ha'e vy mboapy ma'etŷ re opena Jerusalém py.

**2** Ixy ma Gibeá pygua Uriel rajy Micaía hery va'e. Ha'e gui ma Abias kuery joe opu'ã ju Jeroboão kuery reve.

**3** Ha'e rami vy Abias ma joe opu'ã aguã katy ogueraaa oxondaro kuery ipy'a guaxukueve quatrocentos mil avakue oiporavo va'ekue. Ha'e rã Jeroboão kuery ma hexe opu'ã aguã katy oje'oi oitocentos mil avakue reve, joe opu'ãa py ipy'a guaxukueve meme.

**4** Ha'e gui Abias ma Zemaraim yvyty áry opu'ã ho'amy, Efraim regua yvyty ikuai va'e mbyte. Ha'e vy aipoe'i ho'amy:

— Jeroboão ha'e Israel kuery pendekuai va'e ha'e javi, pendu ke xeayvua.

<sup>5</sup> Peẽ kuery ndapeikuuaai ri ty'y SENHOR Israel kuery ruete Davi pe ae ome'ëague ha'e kuery ruvixa oĩ riae aguã? Mba'eta hexeve, ha'e ta'y ra'y kuery reve ojapo oguerekó aguã juky revegua.\*

<sup>6</sup> Ha'e rami teĩ ha'e kuery re Jeroboão kuery opu'ã nho. Ha'e va'e ma Davi ra'y Salomão rembiguai Nebate ra'y. Ha'e rami py onhembopoxy nguvixa rovai.

<sup>7</sup> Ixupe guarã ono'õ avakue vare'ŷ, mba'emo vai apoa kuery rive. Ha'e va'e kuery reve onhemombaraete okuapy Salomão ra'y Roboão rovai. Ha'e jave py ma Roboão kunumi'i ha'e ndoiko kuaai teri vy ndojoko kuaai.

<sup>8</sup> — Aŷ ma peẽ kuery peikuaa teĩ SENHOR po'akaa Davi ra'y kuery po py ome'ẽ va'ekue gui pendepo'akavea, mba'eta pendeta raxa, ha'e pereko avi vaka ra'y ra'angaa penderuete ra'angaarã ouro guigua Jeroboão ojapo va'ekue.

<sup>9</sup> Ha'e rami teĩ ndapeipe'apai avi teve sacerdote kuery Arão ramymino SENHOR pe ikuai va'ekue, ha'e levita kuery voi? Ha'e kuery rekovia pendejeupe guarã sacerdote ramigua rive ju pejou, yvy mboae regua oguerekao rami. Mba'eta amongue va'e rei sacerdote-rã onhemoĩ ukaxe vy ogueru 'rã peteĩ vaka ra'y ha'e sete vexa'i ra'y ome'ẽ va'erã. Ha'e rami ramo peẽ kuery pemoĩ 'rã sacerdote-rã, Nhanderuete peguarã e'ŷ guive.

<sup>10</sup> Ha'e rã ore kuery ma SENHOR ae oiko Oreruete, ha'e neĩ peteigue ma voi ndoroejai 'rã. Ha'e gui sacerdote kuery ore roguerekó va'e ma SENHOR pe ae ombo'eapo va'e. Ha'e va'e kuery ma Arão ramymino meme, ha'e levita kuery voi ikuai avi ombo'eapoa rupi.

<sup>11</sup> Ha'e rami vy ko'ẽ nhavõ, aje'ive'i ha'e ka'aru ha'e kuery ome'ẽ 'rã mymba ha'e heakuã porã va'e oapy reve. Ha'e gui mesa iky'a e'ŷ va'e áry ma SENHOR renonde omoĩ 'rã mbojape. Tataendy 'y ouro guigua, tataendy reve opena avi 'rã ka'aru nhavõ, mba'eta ore kuery ae ma SENHOR Nhanderuete lei ojapo uka va'ekue rojapopa va'e. Ha'e rã peẽ kuery ma pejapa.

<sup>12</sup> Ha'e nunga rupi ne'exa, Nhanderuete ma ore kuery reve ae oiko, orerenonde oo. Ixupegua sacerdote kuery oje'oi avi mimby guaxu omonhe'ẽ heravy va'e, peẽ Israel kuery rovai roo aguã. Ha'e nunga rupi pepu'ã eme SENHOR peneramoĩ kuery ruete rovai, mba'eta peẽ kuery ma napendepo'akai 'rãe – he'i.

<sup>13</sup> Ha'e ramo Jeroboão ijayvu ixupegua kuery onhemia py ikuai va'e ejere vy amboae kuery hakykue katy gui ou aguã re. Ha'e rami py ha'e kuery amongue va'e ma Judá kuery renonde, ha'e rã amboae kuery ma hakykue katy ikuai.

<sup>14</sup> Ha'e ramo Judá kuery oma'ẽ vy oexa okuapy xondaro kuery henonde ikuai va'e, hakykue guive. Ha'e ramo SENHOR pe ojapukai okuapy, sacerdote kuery voi omonhe'ẽ okuapy mimby guaxu,

<sup>15</sup> ha'e Judá regua avakue ojapukai atã okuapy. Ojapukai okuapy ramo Nhanderuete omoingo axy Jeroboão ha'e Israel kuery ha'e javi, Abias ha'e Judá kuery renonde gui.

<sup>16</sup> Ha'e rami vy Judá kuery renonde gui Israel ramymino kuery onhamba, ipo py Nhanderuete omboaxa ramo.

<sup>17</sup> Ha'e kuery regua Abias ha'e hexeve ikuai va'e ojuka reta. Ha'e ramo Israel kuery va'e regua ho'apa okuapy quinhentos mil avakue oiporavo pyre meme.

<sup>18</sup> Ha'e va'e jave py ma Israel ramymino kuery omo'yvyimbaa raka'e. Judá ramymino kuery ae ipo'akapa okuapy, SENHOR guamoĩ kuery ruete re ojerovia ete vy.

<sup>19</sup> Ha'e gui Abias ma Jeroboão oakykue monha vy ixupe guare tetã re ipo'aka avi: Betel, Jesana, Efrom ha'e tekoa'i ha'e'i rupi ikuai va'e re voi.

<sup>20</sup> Ha'e va'e rire Abias oña pukukue re ma Jeroboão ndojouvei ipo'aka jevy aguã. SENHOR omomba'eaxy rã omano.

<sup>21</sup> Ha'e rã Abias ma imbaraeteve tema ový vy gua'yxyrã ojou catorze kunhague. Ha'e vy vinte e dois ta'y, ha'e dezesseis tajy kuery ikuai.

\* <sup>13:5</sup> Juky reve ma ha'e kuery ojapo 'rã peteĩ rami ikuai aguã. Juky ma anhetẽ etea kuaa ukaarã (Levítico 2.13).

<sup>22</sup> Ha'e gui oïve rei tema Abias rekukue regua. Ha'e rami avi mba'emo ojapo va'ekue ha'e javi noï 'rã teve kuaxia profeta Ido ombopara va'ekue re?

## 14

### *1 Reis 15.9-12*

<sup>1</sup> Ha'e gui ma Abias ndoikovevei'i ma guamoï kueryague rami. Ha'e ramo onhono porãa tetã Davi rekoague py. Ha'e gui ta'y Asa ju oï nguu rekoria. Ha'e va'e ma dez ma'etõ peve huvixa oña ja ijyvy re joe opu'ã va'e ndoikoi.

<sup>2</sup> Asa ma SENHOR nguuete renonde rupi ha'evea rami oiko, heko porã va'e vy.

<sup>3</sup> Mba'eta ombovaipa altar amboae regua ruete ra'angaa peguarã omopu'ã mbyre, ombovaipa avi ombojeroviaaty yvy'ã rupi ikuai va'ekue. Oitypa ita omopu'ã mbyre, oake'o avi ta'angaarã yvyra omopu'ã mbyre.

<sup>4</sup> Ha'e rami vy omongeta Judá kuery SENHOR guamoï kuery ruete oeka ha'e lei ojapo uka va'ekue rupi ikuai aguã re.

<sup>5</sup> Ha'e rami ae avi Judá re tetã ikuai va'e rupi gui omomba ombojeroviaaty yvy'ã rupi ikuai va'ekue, altar heakuã porã va'e rapyaty guive. Ha'e ramo huvixa oña pukukue re ma ikuai porã anho.

<sup>6</sup> Judá kuery ikuiaia jave rupi ojapo tetã korarã, ijyvy rupi ikuai porã ramo. Oña ma'etõ ha'e javi re ma jipoi hexe opu'ã va'e, ikuai rive aguã rami SENHOR ome'ẽ rã.

<sup>7</sup> Ha'e nunga rupi ae aipoe'i Judá kuery pe:

— Nhamombaraete ma'vy apy tetã ikuai va'e, ikorarã ha'e torre jajapo guive. Okẽrã ijokoa revegua avi jajapo, nhandeyvy nhancerononde itui va'e rupi mba'eve ndoikoi teria ja, mba'eta SENHOR Nhanderuete jaeka ramo jovaive rupi ome'ẽ nhandekuai rive'i aguã — he'i.

<sup>8</sup> Ha'e ramo ha'e kuery tetã omoatyrõ vy ikuai porã. Huvixa Asa ma Judá regua xondaro kuery hu'y jokoa ha'e imo'ãa tuvixa va'e revegua oguereko trezentos mil. Ha'e gui Benjamim regua ma duzentos e oitenta mil ju ikuai hu'y jokoa ha'e guyrapa oiporu kuaa va'e. Avakue ipy'a guaxukueve meme ikuai.

### *Etiópia pygua Zerá re Asa ipo'akaague*

<sup>9</sup> Ha'e gui ma ha'e kuery rovai guarã ou peteĩ Etiópia pygua Zerá. Avakue um milhão va'e reve ou, trezentos karóxa reve guive. Ha'e vy ovaëmba okuapy Maressa tetã peve.

<sup>10</sup> Ha'e ramo ha'e kuery rovai Asa oo. Ha'e vy Maressa katy'i Zefatá regua yvy'ã guy py ma oiko katupa okuapy joe opu'ã aguã.

<sup>11</sup> Ha'e rami vy Asa ojapukai SENHOR nguuete pe. Ha'e vy aipoe'i:

— SENHOR, ndee e'ý vy amboae ndoikoi ikangy va'e repyarã imbaraete va'e reve joe opu'ãa py. Ha'e nunga rupi SENHOR Oreruete, oreptyvõ ke. Mba'eta ore ma ndere ae rojerovia va'e, ha'e nderery rupi roju kova'e kuery heta ikuai va'e rovai. SENHOR, ndee ma Oreruete. Avakue rive ta'ipo'aka eme ndere — he'i.

<sup>12</sup> Ha'e ramo Asa ha'e Judá kuery renonde py SENHOR oitypa Etiópia guigua kuery. Ha'e ramo onhamba jogueravy.

<sup>13</sup> Hakykue rupi Asa ha'e hexeve ikuai va'e oje'oi Gerar peve. Ha'e gui Etiópia pygua kuery ho'apa, neĩ peteïve ma voi ndoikovevei. Ha'e kuery omboa'ypaa SENHOR ha'e ixupegua xondaro kuery renonde. Ha'e ramo ogueraapaa tembiporu oeja pyre.

<sup>14</sup> Gerar tetã yvy'iry ikuai va'e voi oitypa, SENHOR gui okyje reia anho okuapy rã. Ha'e ramo ha'e va'e tetã ikuai va'e gui oipe'apa heravy mba'emo, ha'e py heta ikuai va'ekue ogueraapa.

<sup>15</sup> Oitypa avi mymba ja kuery rekoa. Ha'e rami vy oipe'a reta heravy vexa'i ha'e camel. Ha'e gui ma ojevypa ju Jerusalém katy.

## 15

*Ha'evea rami ju Nhanderuete ombojeroviaa aguã rami Asa ojapoague*

- <sup>1</sup> Ha'e gui ma Obede ra'y Azarias re ou Nhanderuete Nhe'ë.
- <sup>2</sup> Ha'e ramo oẽ ovvy huvixa Asa oïa py. Ha'e vy aipoe'i ixupe:  
— Pendu ke xeayvua, Asa, Judá ha'e Benjamim kuery ha'e javi. SENHOR ma oiko peẽ kuery reve, hexeve peẽ kuery peikoa ja. Peẽ kuery peka ri ramo ha'e ojejou uka 'rã pãvy. Ha'e rã peja ri ramo ha'e voi pendereja 'rã.
- <sup>3</sup> Mba'eta Israel kuery are ete ikuai Nhanderuete anhetã va'e reve'ÿ, sacerdote imbo'earã ha'e lei e'ÿ re.
- <sup>4</sup> Ha'e rami teĩ ojexavai etea anho oendu vy SENHOR nguuete pe ju ikuai aguã ojevypa ha'e oeka okuapy ramo ojejou uka ju.
- <sup>5</sup> Ha'e va'e jave py ma oẽ ovvy va'e nda'ikuai porãi, neĩ ovaẽ ouvy va'e kuery voi. Mba'eta ha'e va'e yvy ikuai va'e ha'e javi nda'evei ete okuapy.
- <sup>6</sup> Mba'eta peteĩ-teĩ regua opu'ã 'rã amboae regua re, ha'e peteĩ-teĩ tetã opu'ã 'rã amboae tetã re. Ha'e rami vy nhomomba-mombave 'rã oje'ovy, Nhanderuete opa marãgua jexavaia py omoingo axy ramo.
- <sup>7</sup> Ha'e rami teĩ penembaraete ke, pemokangy eme pendepo. Mba'eta pemba'eapoague repy ome'ëmbaa 'rã — he'i.
- <sup>8</sup> Pova'e ayvu profeta Odede ra'y omombe'u rã huvixa Asa oendu vy ipy'a guaxu ju. Ha'e rami vy omombopa ojeguarupy Judá ha'e Benjamim yvy re ikuai va'ekue, Efraim regua tetã yvyty rupi ikuai va'e gui guive. Ha'e va'e tetã ma ha'e oipe'a va'ekue meme. Ha'e rami vy oiky'a'o ukapa ju altar SENHOR pegua, oo ixupegua okẽ renonde oĩ va'e.
- <sup>9</sup> Ha'e rami vy omboatypa Judá ha'e Benjamim kuery ha'e javi, ha'e kuery mbyte rupi Efraim, Manassés ha'e Simeão regua ikuai va'e guive. Mba'eta heta avi Israel yvy gui ou va'ekue hexe guarã, hexeve SENHOR Tuuete oiko rã.
- <sup>10</sup> Jerusalém py ha'e kuery onhemboaty okuapy mboapy jaxyap py, quinze ma'etÿa re ma huvixa Asa oï jave py.
- <sup>11</sup> Ha'e va'e ára ma SENHOR pe ome'ë okuapy joe opu'ãa gui ogueru va'ekue regua setecentos vaka ra'y ha'e sete mil vexa'i kuery.
- <sup>12</sup> Jomeme jogueroayvu okuapy SENHOR guamoĩ kuery ruete pe anho ikuai aguã re, opy'a ha'e onhe'ë ha'e javi py,
- <sup>13</sup> ha'e rã SENHOR Israel kuery ruete ndoekai va'e rei ojuka aguã, kyrigueve ha'e tuvix-akueve teĩ, avakue ha'e kunhague guive.
- <sup>14</sup> Ha'e rami aguã re oura okuapy SENHOR pe onhendu atã reve, oporaei vy mimby ha'e mimby guaxu reve.
- <sup>15</sup> Ha'e rami Judá kuery opy'a ha'e javi py oura ma vy ovvy'a okuapy. SENHOR oekaxeia'i py oeka ramo ha'e kuery pe ojejou uka. Ha'e rami vy ha'e kuery pe SENHOR ome'ëve ju ovvy jave rupi ikuai porã aguã.
- <sup>16</sup> Ojaryi Maaca eteve voi huvixa Asa oipe'a huvixa xy po'akaa gui, Aserá pe peteĩ ta'angaa ojeguarupy ojapo rire. Ta'angaa ojapo va'ekue ma Asa ombovaipa, ha'e iku'ikue oapypa Cedrom yvyugua py.
- <sup>17</sup> Ha'e rami teĩ Israel yvy re yvy'ã rupi ombojeroviaaty ikuai va'e ma nombovaipai, va'eri Asa oikovea pukukue re ha'evea rami anho oiko opy'a py.
- <sup>18</sup> SENHOR pegua opy ogueru mba'emo porã tuu ha'e rami aguã rami omboaxa va'ekue, ha'e ae omboaxa va'ekue voi: prata, ouro ha'e tembiporu.
- <sup>19</sup> Trinta e cinco ma'etÿ re huvixa Asa oï peve ma joe opu'ã va'e ndoikoi.

## 16

<sup>1</sup> Trinta e seis ma'etŷa re ma huvixa Asa oĩ jave py Israel pygua huvixa Baasa ou Judá kuery rovai. Ha'e rami vy omombaraete Ramá tetã, Judá pygua huvixa Asa openaa gui mava'eve oo e'ŷ aguã, neĩ ovaẽa e'ŷ aguã ha'e py.

<sup>2</sup> Ha'e ramo Asa oipe'apa ouro ha'e prata SENHOR pegua opy ha'e huvixa ropy omoĩ porã mbyre. Ha'e rami vy guembiguai kuery ayvu reraarã omondoukapa Síria pygua huvixa Ben-Hadade pe Damasco py oĩa py. Ha'e vy ixupe aipoe'i uka:

<sup>3</sup> — Jajapo ke jomeme nhandekuai porã'i aguã, nderu xeru reve ikuaiague rami. Ne'exa, aru ruka ndevy ame'ẽ rive va'e, prata ha'e ouro. Ha'e rã tereo, Israel pygua huvixa Baasa-a py embovaipa hexeve guarã rejapo va'ekue, xee apenaa ojokoa gui ojepe'a aguã — he'i uka.

<sup>4</sup> Ha'e ramo Asa ijayvua Ben-Hadade oendu vy omondouka xondaro ruvixa kuery Israel kuery retã re opu'ã aguã. Ha'e rami vy oitypa Ijom, Dã, Abel-Maim ha'e tetã tembi'u omoĩ porãaty Naftali yvy re ikuai va'e ha'e javi.

<sup>5</sup> Ha'e nunga Baasa oendu vy optyu'u Ramá tetã omombaraetea gui, ndojapove jeysi guive.

<sup>6</sup> Ha'e rire huvixa Asa ma Judá kuery ogueraapa vy Ramá tetã gui oguerupa ju ita ha'e yvyra Baasa omombaraetea py oiporu va'ekue. Ha'e va'ekue py ma huvixa Asa ju ojapo Geba ha'e Mispa tetã korarã.

### *Asa pe Hanani ijayvague*

<sup>7</sup> Ha'e va'e jave py Judá pygua huvixa Asa oĩ py ou Hanani. Ha'e vy aipoe'i ixupe:

— Ha'e gui Síria pygua huvixa re rive rejerovia vy SENHOR Nderuete re nderejeroviai ramo Síria pygua huvixa pegua xondaro kuery oo jepepa ma ndepo gui.

<sup>8</sup> Ha'e rami avi xondaro kuery Etiópia ha'e Líbia gui ou va'ekue pa heta raxa e'ŷ raka'e? Heta ete e'ŷ teve karóxa ha'e kavaju árygua kuery reve ou? Ha'e rami teĩ SENHOR re rejerovia ramo ndepo py omboaxapa raka'e.

<sup>9</sup> Mba'eta SENHOR ma yvy jave rupi oexa potapa oiny, opo'akaa oexa uka aguã opy'a ha'e javi py ixupe ete ikuai va'e pe. Ha'e rã ndee ma reikoague py ne'arandua rupi e'ŷ reiko. Ha'e nunga rupi aŷ gui ma oiko 'rã nderovai opu'ã va'e — he'i.

<sup>10</sup> Ha'e rami profeta ijayvu ramo Asa ivai vy omboty nhuã py, yvyra pa'ũ py ombo'a, ha'e nungakue re ixupe ipoxy vy. Ha'e va'e jave py Asa omoingo axyve ju heta va'e kuery regua.

### *1 Reis 15.23,24*

<sup>11</sup> Ha'e gui oĩve rei tema Asa rekukue regua. Ha'e rami avi mba'emo ojapo va'ekue jypy guive opaa peve oĩ 'rã kuaxia Judá ha'e Israel pygua huvixa kuery rekukue oĩa re.

<sup>12</sup> Trinta e nove ma'etŷa re ma Asa huvixa oĩ jave py opy raxy gui nopu'ãvei. Imba'eaxy raxa oupy. Ha'e rami teĩ SENHOR pe ma voi ndojerurei, poropoanoa kuery re rive ojeroviave vy.

<sup>13</sup> Ha'e gui ma Asa ndoikovevei'i ma guamoĩ kueryague rami. Quarenta e um ma'etŷa re openaa py ma omano.

<sup>14</sup> Ha'e ramo onhono porãa okuapy tetã Davi rekoague py nguparã ae ojo'o ukaague py. Ha'e rami vy peteĩ tupa áry onhono okuapy, ha'e ijyvýry rupi omonyê heakuã porã va'e, mba'emo heakuã porã va'e apoa kuery anho oikuua rami vy oguereko katu va'ekue. Heta raxa avi hexe ima'endu'aa rupi mba'emo oapy okuapy va'e.

## 17

### *Josafá po'akaa omoĩ atãague*

<sup>1</sup> Ha'e gui ma Judá pygua huvixa Asa rekoria ta'y Josafá ju oĩ. Ha'e rami vy mba'emo oguereko katu Israel kuery rovai guarã.

<sup>2</sup> Judá yvy rupi tetã ikorapa va'e ha'e javi rupi omoĩ xondaro kuery harõarã, ha'e Efraim yvy re tuu Asa tetã ojopy va'ekue rupi voi.

<sup>3</sup> SENHOR oiko Josafá reve, mba'eta tamoī Davi jypy oikoague rami oiko ramo, Baal ra'angaa pe'ŷ.

<sup>4</sup> Ha'e rami vy oeka oikovy nguu ruete, ojapo uka va'e rupi oiko vy, Israel kuery ikuai rami e'ŷ.

<sup>5</sup> Ha'e ramo ipo py SENHOR omoī atāve huvixa oī aguā, ha'e ixupe Judá kuery pavē ome'ẽ okuapy mba'emo hepyve ha'e iporā va'e oguerekopa peve.

<sup>6</sup> SENHOR guigua tape rupi oikoa rupi ipy'a guaxuve ovy. Ha'e vy Judá yvy jave gui ombovaipa yvy'ã rupi ombojeroviaaty ikuai va'ekue, mba'emo ra'angaarā yvyra omopu'ã mbyre guive.

<sup>7</sup> Ha'e gui mboapy ma'etŷa re ma huvixa oī jave py omondouka guembiguai yvatekueve Ben-Hail, Obadias, Zacarias, Natanael ha'e Micaías, Judá regua tetā ikuai rupi nhombo'e aguā.

<sup>8</sup> Ha'e va'e kuery reve omondouka avi levita kuery Semaías, Netanias, Zebadias, Asael, Semiramote, Jônatas, Adonias, Tobias ha'e Tobe-Adonias. Levita kuery reve omondouka avi sacerdote kuery Elisama ha'e Jeorão.

<sup>9</sup> Ha'e ramo Judá yvy jave rupi kuaxia SENHOR guigua lei oĩa ogueraa vy nhombo'e jogueravy. Ha'e rami vy Judá re tetā ikuai va'e ha'e javi rupi ombo'e oje'oivy heta va'e kuery.

<sup>10</sup> Ha'e ramo Judá yvýry rupi huvixa ikuai va'e áry ou SENHOR po'akaa gui okyjepa aguā, huvixa Josafá rovai nopus'ãi aguā rami.

<sup>11</sup> Ha'e rami ae avi filisteu kuery va'e regua ogueru okuapy mba'emo Josafá pe, prata voi ome'ẽ ukaa rami ome'ẽ. Ixupe Arábia pygua kuery voi ogueru okuapy mymba kyrigueve va'e: sete mil e setecentos vexa'i ava ha'e sete mil e setecentos kavara ava.

<sup>12</sup> Ha'e ramo Josafá ipo'akave tema ovy. Ha'e rami vy Judá re ojapove oo ikorapa va'e, ha'e tetā tembi'u omoī porā atyrā.

<sup>13</sup> Judá re tetā ikuai va'e rupi ojapo reta mba'emo. Jerusalém tetā py oguerekko avi avakue joe opu'ã aguā katy oo va'erā ipy'a guaxukueve anho.

<sup>14</sup> Po rami ma ha'e kuery mbovy pa peteī-teī regua ikuai: Judá re ma ikuai huvixa kuery mil xondaro re opena va'e. Ha'e kuery ruvixa ma Adna oiko, ha'e hexeve ikuai avi trezentos mil avakue ipy'a guaxukueve va'e meme.

<sup>15</sup> Ha'e rire ma huvixa Joanã, ha'e hexeveguia duzentos e oitenta mil.

<sup>16</sup> Ha'e gui ma Zicri ra'y Amasias ju. Ha'e va'e ma opy'a ha'e javi py SENHOR pe omba'eaxoxea rupi oiko. Hexeveguia ma duzentos mil avakue ipy'a guaxukueve ikuai ijayvua ojapo va'erā.

<sup>17</sup> Ha'e gui Benjamim kuery va'e regua ava ipy'a guaxuve va'e ma Eliada. Hexeveguia ma duzentos mil ikuai guyrapa ha'e hu'y jokoa reveguia.

<sup>18</sup> Ha'e va'e rire ma Jozabade ha'e hexeve cento e oitenta mil ikuai joe opu'ã aguā rami hembiporupa va'e.

<sup>19</sup> Ha'e va'e kuery ma huvixa pe ikuai va'e meme, xondaro kuery mboae Judá yvy re tetā ikuai va'e rupi huvixa omoī va'ekue jaipapa e'ŷ re.

## 18

### 1 Reis 22.1-4

<sup>1</sup> Josafá ma mba'emo hepyve ha'e iporā va'e anho oguerekko, oata aguā rami e'ŷ. Acabe reve onhemoirū guive.

<sup>2</sup> Ha'e rami vy mbovy ma'etŷ re rei e'ŷa py ma Acabe pou vy oo Samaria tetā py oĩa py. Ha'e ramo Acabe omovaẽ vy ojuka vexa'i ha'e vaka ra'y oata aguā rami e'ŷ, Josafá ha'e hupive ou va'ekue ha'e javi pe. Ha'e vy ijayvu joupive Ramote-Gileade re opu'ã aguā katy jogueraa aguā re.

<sup>3</sup> Ha'e vy huvixa Israel pygua Acabe oporandu Judá pygua huvixa Josafá pe:  
— Ndee pa reo avi 'rã xereve Ramote-Gileade katy?

Josafá ombovai:

— Xee ma aiko 'rā ndereve, ha'e xevyguá kuery voi ndevyguá kuery reveguá ae avi 'rā ikuai. Roje'oi 'rā nderupive joe nhapu'ã aguã — he'i.

*1 Reis 22.5-12*

<sup>4</sup> Ha'e gui ma Josafá aipoe'ive ju Israel pygua huvixa pe:

— Eikuua pota ranhe ke SENHOR ijayvua re.

<sup>5</sup> Ha'e ramo Israel pygua huvixa omboatypa profeta kuery, quattrocentos avakue ha'e javi vy. Ha'e vy aipoe'i ha'e kuery pe:

— Taa pa Ramote-Gileade re apu'ã aguã, tyrã pa taa eme?

Ha'e kuery ombovai:

<sup>6</sup> — Tereo oreruvixa, mba'eta Nhanderuete omboaxapa 'rā ndepo py — he'i okuapy.

Ha'e rā Josafá ma aipoe'i:

— Nda'ipoi teri pa apy profeta SENHOR pegua ete jaikuua pota ranhe aguã?

<sup>7</sup> Ha'e rā Israel pygua huvixa aipoe'i Josafá pe:

— Peteñ'i teri oiko ixupe SENHOR ayvu re nhaporandu uka aguã. Ha'e rā hexe ma xee ndaxe'a'ei, mba'eta xerenonderā re nomombe'ui teri iporā va'e, iporā e'ý va'e anho.

<sup>8</sup> Ha'e va'e ma Inlá ra'y Micaías — he'i.

Josafá ombovai:

— Huvixa, ha'e rami ndeayvu eme — he'i.

Ha'e gui ma Israel pygua huvixa peteñ guembiguai oenoñ vy ixupe aipoe'i:

— Tou pojava ta'vy xea py Inlá ra'y Micaías — he'i.

<sup>9</sup> Ha'e va'e jave py ma Israel pygua huvixa ha'e Judá pygua huvixa reve jogueroguapy nhoguenoiny peteñ-teñ guenda openaaty py ae, huvixa pegua ao py ae onhemonde reve, Samaria tetã kora rokẽ yvýry, mba'emo moa'yñaty py. Ha'e kuery renonde ma profeta kuery ha'e javi ijayvu okuapy.

<sup>10</sup> Ha'e gui Quenaana ra'y Zedequias ma oguerekó vaka rakua ra'angaa ferro gui ojapo va'ekue. Ha'e vy aipoe'i:

— Po rami SENHOR ijayvu: “Kova'e ramigua py reipyxo 'rā Síria pygua kuery reitypa peve”, he'i.

<sup>11</sup> Ha'e gui profeta kuery mboae ma ha'e va'e ayvu rupi meme ijayvu vy

— Tereo ke Ramote-Gileade katy, oreruvixa, ha'e py ma ndepo'aka 'rā, mba'eta SENHOR omboaxapa 'rā ndepo py — he'i okuapy.

*1 Reis 22.13-28*

<sup>12</sup> Ha'e gui Micaías reruarã tembiguai oo va'ekue ixupe ijayvu vy aipoe'i:

— Ma'ë, profeta kuery ikuai va'e ma peteñ'i rami ijayvu kuri huvixa pe mba'emo porã re anho. Ndeayvu 'râgue ha'e kuery ijayvuague rami ae, mba'emo porã re anho.

<sup>13</sup> Micaías ombovai:

— Ha'e rami avi anhetë SENHOR oikove va'e rupi aura vy aipoa'e: Xee ma Xeruete aipoe'i ukaa rami ae 'rā xeayvu — he'i.

<sup>14</sup> Ha'e gui huvixaa py ovaõ ramove ixupe oporandu:

— Micaías, toroo ae pa Ramote-Gileade re ropu'ã vy, tyrã pa toroo eme?

Jypy Micaías ombovai:

— Tapeo, ha'e vy pendepo'aka 'rā, mba'eta ndepo py SENHOR omboaxapaa 'rā — he'i.\*

<sup>15</sup> Ha'e rami rā huvixa aipoe'ive ju ixupe:

— Mbovykue ma tu ndevy xeayvu, SENHOR rery rupi anhetë va'e re anho ndeayvu aguã?

<sup>16</sup> Ha'e rā Micaías ombovai:

\* <sup>18:14</sup> Micaías ma profeta ramigua kuery ayvu rupi rive ranhe ijayvu, anhetë va'e'ýa rami oikuaa uka vy.

— Ha'e gui Israel kuery xee aexapa yyvty áry rupi omoaimbua ramo, vexa'i ija e'ý va'e rami. Ha'e ramo SENHOR aipoe'i: "Peva'e kuery ma ija e'ý va'e vy peteñ-teñ too porã ngoo katy", he'i xevy.

**17** Ha'e ramo Israel pygua huvixa aipoe'i Josafá pe:

— Aipo nda'eí ri ty'y ndevy: "Ha'e va'e ma xerenonderã re nomombe'ui ae iporã va'e, ha'e rã iporã e'ý va'e anho", ha'e ma voi kuri?

**18** Ha'e gui ma Micaías ijayvuve tema:

— Endu ha'vy SENHOR ayvu. Xee aexa SENHOR guenda openaaty py oguapy oiny rã, ha'e oña py ikuai avi ixondaro kuery yva pygua ha'e javi, ijaxu e'ýa re ha'e ijaxua re.

**19** Ha'e gui SENHOR oporandu: "Mava'e 'rã tu Acabe mbotavyarã oo, Ramote-Gileade py ho'a aguã?" Ha'e ramo peteñ ma peteñ rupi ijayvu, ha'e rã amboae ma amboae rami ijayvu.

**20** Ha'e gui peteñ nhe'ë ou vy ojexa uka SENHOR renonde. Ha'e va'e aipoe'i: "Xee ma aa 'rã ambotavy", he'i. Ha'e rã SENHOR oporandu: "Mba'e py ha'vy?"

**21** Ombovai: "Aa 'rã nhe'ë imbotavyarã aí ixupeguia profeta kuery ha'e javi juru re", he'i. Ha'e ramo SENHOR aipoe'i: "Ndee ma rembotavy 'rã, ndepo'aka 'rãe. Tereo, ejapo ha'e rami", he'i.

**22** Ha'e rami rã kova'e profeta kuery ndevyguia ikuai va'e juru re SENHOR omoí ra'e nhe'ë nembotavyarã. Ha'e rã SENHOR ma nderovai ijayvu guive mba'emo vai oiko aguã re – he'i.

**23** Ha'e gui Quenaana ra'y Zedequias onhemboja vy oipete Micaías. Ha'e vy aipoe'i:

**24** — Ma rupi tu ha'vy xegui SENHOR nhe'ë oë ndevy ijayvu aguã?

Micaías ombovai:

— Reikuaa 'rã opy ja'o py renhemí aguã reike jave – he'i.

**25** Ha'e gui ma Israel pygua huvixa ju aipoe'i:

— Pejopy ke Micaías, ha'e pemboaxa tetã ruvixa Amom ha'e huvixa ra'y Joás po py.

**26** Ha'e vy aipopeje: "Po rami huvixa ijayvu: 'Pemboty nhuã py kova'e ava, ha'e pembojexavai mbojape ha'e yy ruxã'i kuerei peme'ëa py, ajevy porã ju e'ýa ja', he'i uka", peje.

**27** Ha'e gui Micaías aipoe'i:

— Ha'e rami teñ xapy'a rei anhetë ri rejevy porã ramo SENHOR ayvu rupi e'ý xeayvu ramo ma 'rã. Pendu pota povae re, peñ kuery ha'e javi! – he'i.

**1 Reis 22.29-40**

**28** Ha'e gui ma Ramote-Gileade katy Judá pygua huvixa Josafá reve Israel pygua huvixa jogueraa.

**29** Israel pygua huvixa aipoe'i Josafá pe:

— Xee ma amboae rami anhemonde reve 'rã aa joe apu'ã aguã katy. Ha'e rã ndee ma ndeo py ae 'rã renhemonde – he'i. Ha'e rami vy Israel pygua huvixa amboae rami onhemonde reve oo joe opu'ãa py.

**30** Síria pygua huvixa aipoe'i ma voi okaróxa mboguataa trinta e dois huvixa ikuai va'e pe: "Ou va'e-va'e rovai rive pepu'ã eme yvatekueve teñ, ha'e rã Israel pygua huvixa rovai anho'i", he'i va'ekue.

**31** Ha'e gui huvixa karóxa mboguataa kuery ma Josafá oexa vy aipoe'i okuapy:

— Peva'e ae ri nhi'ã Israel pygua huvixa – he'i vy ha'e katy oje'oi ojoko aguã. Ha'e ramo Josafá ojapukai rã SENHOR oepy vy ojoko oña katy oje'oi ve'ý aguã.

**32** Ha'e gui huvixa karóxa mboguataa kuery ma Israel pygua huvixa e'ý ae ra'ea oikuaa vy oejapa ju.

**33** Ha'e gui peteñ ava guyrapa omoatã vy opoia katy rei opoi vy onhyvõ Israel pygua huvixa pexo regua pa'üa py rive. Ha'e ramo aipoe'i guembiguai karóxa mboguataa va'e pe:

— Ejere joe opu'ãa mbyte gui xereraa aguã, mba'eta xepyxoa ma – he'i.

<sup>34</sup> Ha'e va'e ára ma joe opu'ãve tema okuapy. Ha'e rã huvixa ma Síria kuery oexaa py opu'ã ho'amy okaróxa py ka'aru peve. Ha'e gui kuaray oike ma jave omano.

## 19

### *Josafá pe profeta Jeú ijayvu eteague*

<sup>1</sup> Ha'e gui Judá pygua huvixa Josafá ma oiko porã'i reve ojevy ju Jerusalém py ngoo oña katy.

<sup>2</sup> Ha'e rã Hanani ra'y profeta Jeú ma oẽ ouvy huvixa Josafá ovaexĩ aguã. Ha'e vy aipoe'i ixupe:

— Ha'eve nda'u heko vai va'e reipytyvõ SENHOR re nda'ija'ei va'e kuery reayvuvea rupi? Ha'e nunga rupi nde'áry ou 'rã SENHOR poxya.

<sup>3</sup> Ha'e rami avi ndere ojou guive iporã va'e, mba'eta nhandeyvy gui reipe'apa va'ekue ta'angaarã yvyra omopu'ã mbyre, ndepy'a re Nhanderuete reka aguã remoĩ guive — he'i.

### *Joguerekaoarã kuery omoïague*

<sup>4</sup> Josafá ma Jerusalém pygua ae oiko va'eri oo avi 'rã heta va'e kuery ikuiaia rupi Berseba guive Efraim re yvyty ikuai va'e rupi. Ojapo 'rã ovy SENHOR guamoĩ kuery ruete pe ju ojevy aguã.

<sup>5</sup> Ovvj ave rupi omoĩ joguerekaoarã kuery, tetã ikorapa va'e ha'e javi rupi, peteĩ-teĩ tetã py ikuai aguã.

<sup>6</sup> Joguerekaoa kuery omoĩ vy aipoe'i ha'e kuery pe:

— Pexa pota 'rã mba'exa pa pejapo aguã re, mba'eta avakue 'arandua rupi rive e'ý 'rã peikuua pota, SENHOR guigua rupi anho. Ha'e ramo penhomboayvua py ha'e oĩ 'rã peẽ kuery reve.

<sup>7</sup> Ha'e nunga rupi aÿ SENHOR renonde peiko tema pejererokyjea rupi. Penheangu tema pejoguerekaoa rupi, mba'eta SENHOR Nhanderuete re ma noĩ ha'eve'ÿa rami joguerekaoa aguã, mba'eta ha'e ma ndoayvuvei 'rã peteĩ anho, neĩ ndojopyi 'rã ome'ëmby — he'i.

<sup>8</sup> Ha'e rami ae avi Jerusalém tetã py ju Josafá ojevy ma rire ha'e py voi omoĩ levita ha'e sacerdote kuery va'e regua, Israel kuery akã ikuai va'e guive, SENHOR gui vy nhomboayvu ha'e joo rami e'ý-e'ý oikuua va'e re oikuua pota aguã.

<sup>9</sup> Ha'e kuery omoĩ vy aipoe'i:

— Peteĩ rami pendepy'aa py ojeroviapy 'rã peiko SENHOR renonde pejererokyjea rupi.

<sup>10</sup> Ha'e gui peẽ kuerya py ou 'rã penderyvy kuery tetã py ikuiaia gui, jouguy omoëague re oikuua pota uka vy, ha'e'ý vy lei re oĩ va'e re, ojapo uka pyre re, ombopara pyre e'ý vy imongetaague re mba'e. Ha'e ramo ha'e kuery pe pendeayvu 'rã SENHOR renonde ojejavý e'ý aguã, peẽ ha'e penderyvy kuery re ipoxya ou e'ý aguã. Ha'e rami ae ke peiko pejejavý e'ý aguã.

<sup>11</sup> Ha'e gui apy ma oĩ sacerdote yvateve va'e Amarias. Ha'e va'e ma opena 'rã mba'emo SENHOR regua ikuai va'e re. Ha'e rã mba'emo huvixa regua re opena va'e ma Ismael ra'y Zebadias, Judá regua yvateve va'e. Levita kuery voi ikuai 'rã penepytyvõarã. Penembaraete ke ha'vy pejoguerekaoa porã aguã. Ha'e gui SENHOR oiko 'rã heko porã va'e reve — he'i.

## 20

### *Moabe ha'e Amom pygua kuery re Josafá ipo'akaague*

<sup>1</sup> Ha'e va'e rire ma Moabe ha'e Amom ramymino kuery ou okuapy Josafá re opu'ã aguã, meunita kuery regua reve.

<sup>2</sup> Ha'e ramo amongue ou vy Josafá pe omombe'u. Ha'e vy aipoe'i:

— Heta raxa ou ta okuapy nderovai opu'ã aguã, ye'ẽ rovai gui ha'e Síria yvy gui ou. Ne'exa, Hazazom-Tamar py ma ovaẽ, En-Gedi py — he'i.

<sup>3</sup> Ha'e ramo Josafá okyje vy ojee omoĩ SENHOR oeka aguã. Ha'e rami vy ijayvu Judá regua ha'e javi okaru e'ŷ re ikuai aguã.

<sup>4</sup> Ha'e ramo Judá kuery onhemboatypa okuapy SENHOR oepy aguã re ojerure aguã. Judá regua tetã ha'e javi rupigua ou okuapy SENHOR oeka aguã.

<sup>5</sup> Ha'e gui ma Judá ha'e Jerusalém pygua kuery ijaty va'e renonde py Josafá opu'ã ho'amy, SENHOR pegua oo py, oka pyau yvy'iry.

<sup>6</sup> Ha'e vy aipoe'i:

— SENHOR oreramoĩ kuery ruete, ndee ae e'ŷ teve Oreruete yva pygua? Ndee ae e'ŷ teve ha'e javi regua ruvixa re ndepo'aka va'e? Mba'eta ndepo py oĩ mbaraetea ha'e po'akaa, nda'ipoi guive ndejokoarã.

<sup>7</sup> Ha'e gui Oreruete, ndee e'ŷ ri ty'y kova'e yvy regua reipe'apa va'ekue ndevygua Israel kuery renonde gui? Ha'e nerembiayvu Abraão ramymino kuery pe'ŷ teve kova'e yvy reme'ẽ raka'eve rã peve ikuai aguã?

<sup>8</sup> Ha'e ramo apy ae ha'e kuery hekoia ha'e ojapo okuapy peteĩ henda iky'a e'ŷ va'e nderery oĩ aguã. Ha'e vy aipoe'i:

<sup>9</sup> "Xapy'a rei mba'emo vai orere ou ramo, kyxe oremonoingo axyarã, vixo vaikue e'ŷ vy karuai mba'e, ha'e ramo kova'e oo py roexa uka 'rã ndevy, mba'eta kova'e oo re ae nderery oĩ. Ha'e gui rojexavai reia py rojapukai 'rã ndevy. Ha'e ramo ndee ma rojapukaia rendu vy orerepy 'rã", he'i okuapy raka'e.

<sup>10</sup> Ha'e gui aŷ ou ma Amom ha'e Moabe guigua, Seir yvyty guigua kuery guive. Ha'e va'e kuery yvy re ma Egito yvy gui Israel kuery reru jave nerembopo'akai va'ekue. Ha'e ramo oreramoĩ kuery amboae katy ojepekuavo vy nomombai raka'e.

<sup>11</sup> Ha'e rami va'ekue ri aŷ ha'e kuery ou okuapy ndevygua yvy gui oremoxẽmba aguã, oreyyvrã reme'ẽ va'ekue teĩ.

<sup>12</sup> Ha'e gui Oreruete, nerembopagai ta ri ty'y ha'e kuery? Mba'eta ore kuery re ma noĩ mbaraetea kova'e kuery orere opu'ã ouvy va'ekue rojoko aguã. Ore ma ndoroikuai rojapo aguã. Ha'e rami avi ndea katy roma'ẽ tema rokuapy — he'i.

<sup>13</sup> Ha'e jave SENHOR renonde py Judá kuery ha'e javi opu'ã okuapy, kyrigue'i, kunhague ha'e ta'y kuery ha'e javi reve.

<sup>14</sup> Ha'e gui ijaty va'e kuery mbyte py SENHOR Nhe'ẽ ou vy onhemonde Zacarias ra'y Jaaziel re. Ha'e va'e ma Benaia ra'y, Benaia ma Jeiel ra'y, Jeiel ma Matanias ra'y, Matanias ma levita, Asafe ramymino kuery va'e regua.

<sup>15</sup> Ha'e ramo ha'e va'e aipoe'i:

— Pendu ke, peẽ Judá ha'e Jerusalém py penderekoa va'e, ndee huvixa Josafá voi, pendevy SENHOR ijayvua rã. Pekyje eme, penhemondyi eme guive kova'e kuery gui heta teĩ. Mba'eta ha'e kuery re opu'ã va'erã ma peẽ e'ŷ, Nhanderuete ae.

<sup>16</sup> Ha'e nunga rupi ko'ẽ ramo peje'oi 'rã ha'e kuery rovai. Ha'e kuery ou 'rã okuapy Ziz yvy'ämbea rupi, ha'e Jeruel tekao e'ŷa renonde katy 'rã ovaẽ.

<sup>17</sup> Ha'e py peovaexi teĩ peẽ ma napepu'ãi 'rã ha'e kuery re. Pepyta ranhe pe'amy, ha'e gui pexa 'rã SENHOR pendereraa jepe ramo, Judá ha'e Jerusalém pygua kuery ha'e javi. Pekyje eme, penhemondyi eme guive. Ko'ẽ ramo tapeo ha'e kuery peovaexi aguã, mba'eta SENHOR oiko 'rã peẽ kuery reve — he'i.

<sup>18</sup> Ha'e ramo huvixa Josafá oĩ guenapy'ã re, ngova yvy re omovaẽ reve. Judá ha'e Jerusalém py hekoia va'e kuery voi guenapy'ã re ikuai SENHOR renonde py. Ha'e rami vy omboete okuapy.

<sup>19</sup> Levita Coate ha'e Corá ramymino kuery voi oporaei atã reve omboete okuapy SENHOR Israel kuery ruete.

<sup>20</sup> Ha'e gui ma ko'ëgue aje'ive'i reve ovypa ma vy tekao e'ŷa katy oje'oi, Tecoa tetã rupi. Ha'e kuery oje'oi jave Josafá opu'ã ho'amy vy aipoe'i:

— Judá ha'e Jerusalém py penderekaoa va'e, pendu ke xeayvu rã! Pejerovia tema SENHOR Penderuete re, ha'e ramo pei atã 'rã. Ixupegua profeta kuery ijayvuague perovia tema, ha'e ramo peiko porã 'rã — he'i.

<sup>21</sup> Heta va'e kuery reve ijayvu ju ranhe vy omoi SENHOR pe oporaei va'erã. Ha'e kuery ma ao iky'a e'ý va'e py onhemonde reve oje'oi xondaro kuery renonde rupi. Ha'e vy Nhanderuete pe oporaei vy aipoe'i:

— Perovy'a tema SENHOR, mba'eta nhanemboaxyo oí riae raka'e rã peve — he'i jogueravy.

<sup>22</sup> Ha'e gui ha'e kuery oporaei reve omboete aguã omboypy ramove SENHOR ojapo Amom, Moabe pygua ha'e Seir yvyty pygua kuery Judá rovai guarã ou va'ekue re opu'ãa aguã rami. Ha'e ramo oitypaa.

<sup>23</sup> Mba'eta Seir yvyty pygua kuery rovai re Amom ha'e Moabe pygua kuery ae opu'ã okuapy, omomba ha'e ojukapa aguã. Ha'e gui ha'e kuery omomba Seir pygua kuery rire jomeme nhomoirû-irû okuapy joava-jovai gui jojukapa peve.

<sup>24</sup> Ha'e gui Judá pygua kuery ma yvyty áry ovaëague gui yvy'ã guy katy oma'ẽ vy oexa pota rã heta va'ekue te'õgue anho rive ikuai ra'e yvy rupi ho'apaague py, peteïve ma ndoikovevei.

<sup>25</sup> Ha'e rami vy Josafá ngupivegua kuery reve oguejy jogueravy imba'e rei-reikue ogueraa aguã. Ha'e vy te'õgue ikuai va'e mbyte rupi ojou okuapy mba'emo porãgue ha'e ovare ete va'e oata aguã rami e'ý. Omba'erã oipe'apa vyvoi aguã nda'evei. Heta vaipa rã mboapy ára re oipe'a okuapy mba'emo ikuai va'ekue.

<sup>26</sup> Ha'e gui irundy araa py mae ma onhemboaty ju okuapy yvyugua "Nhomoingo porãa" 'epy va'e py. Ha'e py ma oporaei okuapy SENHOR pe. Ha'e nunga rupi ae ha'e va'e yvyugua pe "Nhomoingo porãa" 'ea aý peve.

<sup>27</sup> Ha'e gui Judá ha'e Jerusalém pygua avakue ojevypa ju. Ha'e kuery renonde ma Josafá oo. Ha'e rami vy Jerusalém katy ojevypa ju jogueravy ov'y a reve, hovaigua kuery re SENHOR ombopo'akapa vy ombovy'a rire.

<sup>28</sup> Jerusalém tetã py ju ovaëmba okuapy. Mbaraka, ixã reta va'e ha'e mimby guaxu py omonhe'ẽ reve jogueraa SENHOR pegua oo peve.

<sup>29</sup> Ha'e gui amboae yvy regua kuery ma Israel rovaigua kuery re SENHOR opu'ãague oendu okuapy ramo ha'e kuery re Nhanderuete ombou ndaekorãvei okuapy aguã.

<sup>30</sup> Ha'e rami py Josafá openaa rupi ikuai porã ju, joavaive-ive re optyu'u aguã Nhanderuete ome'ẽ rire.

### 1 Reis 22.41-50

<sup>31</sup> Ha'e rami py Josafá opena Judá kuery re. Huvixa oí ypy'i jave trinta e cinco ma'etý oguereko. Ha'e vy vinte e cinco ma'etý re opena Jerusalém py. Ixy ma Sili rajy Azuba.

<sup>32</sup> Ha'e ma nguu Asa oikoague rupi ae oiko. Ha'e va'e rupi oikoa gui ndojep'e ai vy ha'evea ramigua meme ojapo SENHOR renonde.

<sup>33</sup> Ha'e rami tei yvy'ã rupi ombojeroviaaty ikuai va'e ma nombovaipai, mba'eta heta va'e kuery opy'a re nomoí teri guamoí kuery ruete pe anho ikuai aguã.

<sup>34</sup> Ha'e gui oíve rei tema Josafá rekukue regua. Ha'e rami avi mba'emo ojapo va'ekue jypy guive opaa peve noí'rã teve kuaxia Israel pygua huvixa kuery rekukue Hanani ra'y Jeú ombopara va'ekue re?

<sup>35</sup> Ha'e va'e rire ma Judá pygua huvixa Josafá onhemoirû Israel pygua huvixa Acazias reve, heko vai ete va'eri.

<sup>36</sup> Hexeve onhemoirû kanoã guaxu ojapo okuapy aguã Társis katy oo va'erã. Eziom-Geber py ojapo.

<sup>37</sup> Ha'e rami tei Josafá rovai profeta Maressa guigua Dodavá ra'y Eliézer ijayvu. Ha'e vy aipoe'i:

— Acazias reve renhemoirû ramo SENHOR omomba ma 'rã mba'emo rejapo uka va'ekue — he'i. Ha'e rami rire kanoã guaxu ha'e javi opëmba vy Társis katy ndooi.

## 21

*2 Reis 8.16-24*

<sup>1</sup> Ha'e gui ma Josafá ndoikovevei'i ma guamoĩ kueryague rami. Ha'e ramo onhono porãa tetã Davi rekoague py. Ha'e gui ta'y Jeorão ju oĩ nguu rekoria.

<sup>2</sup> Ikuai avi tyvy kuery Josafá ra'ykue mboae: Azarias, Jeiel, Zacarias, Azarias, Micael ha'e Sefatias. Ha'e va'e kuery ma Israel pygua huvixa Josafá ra'y kuery meme.

<sup>3</sup> Ha'e kuery peguarã ma tuu ojapo uka reta va'ekue prata ha'e ouro guigua, mba'emo iporãgue ha'e Judá regua tetã ikorapa va'e voi. Ha'e rã huvixa oĩ aguã ma gua'y Jeorão pe oeja, jypykue ramo.

<sup>4</sup> Ha'e gui ma nguu rekoria Jeorão oĩ ma vy onhemombaraeve. Guyvy kuery voi ojukapa kyxé py, Israel pygua yvatekueve guive.

<sup>5</sup> Jeorão ma huvixa oĩ ypy'i jave py trinta e dois ma'etýa oguereco. Ha'e gui oito ma'etý re opena Jerusalém py.

<sup>6</sup> Ha'e ma Israel pygua huvixa kuery ikuaiague rupi rive oiko, Acabe ro pygua kuery ikuaiague rami avi, tajy re ae omenda rire. Ha'e rami vy SENHOR renonde rupi mba'emo vai anho ojapo oikovy.

<sup>7</sup> Ha'e rami teĩ SENHOR nomombaxeí Davi ramymino kuery, Davi reve ngupive guarã ojapo rire. Mba'eta ixupe ijayvuague rami vy hekoria nhomoexakãarã omoĩ riae aguã re, ha'e gui hamymino kuery rekoria ju.\*

<sup>8</sup> Jeorão oĩ jave ma Edom pygua kuery opu'ã okuapy Judá kuery rovai ipo'akaa guy py nda'ikuaxevei vy. Ha'e rami vy omoĩ okuapy nguvixarã ae.

<sup>9</sup> Ha'e nunga rupi Jeorão ma guembiguai yvatekueve ha'e karóxa oguereco va'e ha'e javi reve oje'oi ha'e katy. Ha'e rã Edom pygua kuery ojoko imbokuapy, ikaróxa ja ruvixa kuery guive. Ha'e rami teĩ pyavyve Jeorão kuery opu'ã vy oitypa.

<sup>10</sup> Ha'e rami py Edom pygua kuery opu'ãmba okuapy Judá kuery po'akaa gui oo jepe aguã, aÿ peve guarã. Ha'e va'e jave ae avi Libna pygua kuery opu'ã avi Jeorão rovai, SENHOR guamoĩ kuery ruete gui ojepe'a rire.

<sup>11</sup> Judá re yvy'ã ikuai va'e áry Jeorão ojapo aviombojerovia atyrã. Ha'e va'e py ma ojapo Jerusalém pygua kuery mba'emo ra'angaa re rive ojerovia aguã rami, Judá kuery ha'e javi ndojekoi aguã rami ojapo.

<sup>12</sup> Ha'e gui ipo py ome'ea peteĩ kuaxia para profeta Elias ombou va'ekue. Ha'e va'e re ipara oiny: "Po rami SENHOR neramoĩ Davi ruete ijayvu: 'Ndee ma nderu Josafá ha'e Judá pygua huvixa Asa oikoague rami e'ý reiko,

<sup>13</sup> Israel pygua huvixa ikuaiague rami anho reiko va'e. Ha'e vy rejapo Judá ha'e Jerusalém pygua kuery mba'emo ra'angaa re rive ojerovia aguã rami, Acabe ro pygua kueryombojeroviaa rami ae avi. Ha'e gui nderyvy kuery nderu ro pygua ae rejukapa, ha'e kuery ndegui hi'arandukueve va'eri.

<sup>14</sup> Ha'e rami rire SENHOR ombojexavai 'rã ndevygua kuery opa marãguia mba'eaxy py, ndera'y ha'e ndera'yxy kuery guive, ha'e gui ndejeupe guarã rejou va'ekue ha'e javi.

<sup>15</sup> Ha'e ramo rejexavai ete 'rã nderyekue rupi mba'eaxy rendu va'e gui, ko'ẽ nhavõ rejexavaive tema 'rã reovy, nderyekue oẽmba peve', he'i."

<sup>16</sup> Ha'e gui ma SENHOR ojapo Jeorão rovai filisteu kuery opu'ã aguã rami, Arábia pygua kuery Etiópia katy'i hekoa va'e guive.

<sup>17</sup> Ha'e ramo ha'e kuery oupa vy opu'ã okuapy Judá kuery rovai. Ha'e rami vy huvixa ro py imba'e rei-rei ojou va'e ogueraapa, ta'y ha'e ta'yxy kuery voi. Neĩ peteĩ ta'y kuery va'e regua ndoejai, kunumive'i va'e Jeoacaz anho e'ý vy.

<sup>18</sup> Ha'e nunga oikopa ma rire SENHOR omoingo axy hyekue rupi okuera aguã rami e'ý.

\* <sup>21:7</sup> Davi pe SENHOR ijayvuague ma 1 Reis 11.34-36, 15.4, 2 Crônicas 21.7 ha'e Salmo 132.17 py. Ha'e gui "Nhomoexakãã" he'ia ma huvixave raka'eve rã oiko va'erã re ijayvu vy, Jesus Cristo rekorã re guive (Lucas 2.30-32; João 8.12).

<sup>19</sup> Ko'ẽ nhavõ ojexavaive tema ovy. Ha'e gui mokoĩ ma'etŷa py ma mba'eaxyäa gui hyekue oẽmba oiny. Ha'e vy ojexavai ete reve omano. Ha'e rã ixupe guare kuery ma heakuã porã va'e ndoapyi ima'endu'a aguã, guamoĩ kuery omano rã ojapoaty rami e'ŷ.

<sup>20</sup> Ha'e va'e ma trinta e dois ma'etŷ oguereko huvixa oĩ ypy jave. Ha'e gui Jerusalém py opena oito ma'etŷ re. Omano ramo avave rei nda'ipy'a vai. Ha'e rami vy tetã Davi rekoague py onhono porãa teĩ yma guare huvixa kuery rupa yvýry e'ŷ guive.

## 22

### 2 Reis 8.25-29

<sup>1</sup> Jeorão rekoria Jerusalém pygua kuery nguvixarã omoĩ ta'y kyrïve va'ekue Acazias, mba'eta ha'e kuery ikuiaia py mba'emo pe'apaarã Arábia pygua kuery reve ovaẽ va'e tyke'y kuery ojukapa rire. Ha'e rami vy Jeorão ra'y Acazias ae oĩ Judá pygua ruvixarã.

<sup>2</sup> Acazias vinte e dois ma'etŷ oguereko jave oĩ ypy'i huvixa. Ha'e vy peteĩ ma'etŷ ete'i opena Jerusalém py.

<sup>3</sup> Ixy ma Onri rajy Atalia. Ixyombo'e vai rire Acazias oiko Acabe kuery ikuiaia rami.

<sup>4</sup> Acabe kuery ikuiaia rami ae mba'emo vai anho ojapo SENHOR renonde rupi, mba'eta tuu omano rire ha'e kuery ae omongoeta okuapy okanhy aguã rami.

<sup>5</sup> Ha'e kuery omongoetaa rami oiko vy Israel pygua huvixa Jorão reve jogueraa Ramote-Gileade katy Síria pygua huvixa Hazael rovai opu'ã aguã. Ha'e ramo Síria pygua kuery oipyxo Jorão.

<sup>6</sup> Ha'e ramo Acabe ra'y huvixa Jorão ma Ramá tetã py Síria pygua huvixa Hazael re opu'ãa py oipyxo okuapy. Ha'e ramo Jezreel tetã py ju ojevy okuera aguã. Ha'e gui Jezreel py Jorão imba'eaxy oupya py ou Judá pygua huvixa Jeorão ra'y Acazias oexa aguã.

### Jeú Acazias ojukaague

<sup>7</sup> Nhanderuete Acazias ojukaxe ramo ae oo huvixa Jorão pou vy. Mba'eta ha'e ou vyve Jorão reve jogueraa Ninsi ra'y Jeú rovai opu'ã aguã. Ha'e va'e ma SENHOR oiporavo ma voi huvixa Acabe ro pygua kuery mombaarã.

<sup>8</sup> Ha'e ramo Jeú Acabe ro pygua kuery ojukapa ma rire ojou avi Judá regua yvatekueve ha'e Acazias ryvy ra'y kuery oipytyvõa rupi ikuai va'ekue. Ha'e rami vy ha'e kuery voi ojukapa.

<sup>9</sup> Ha'e va'e rire oeka uka avi Acazias. Ha'e rã Samaria tetã py ojoua onhemia rupi oikoa py. Ha'e rami vy Jeú oĩa py ogueru vy ojuka okuapy. Hembiguai kuery ae onhono porã okuapy, mba'eta aipoe'i: "Josafá opy'a ha'e javi py SENHOR oeka va'ekue ra'y", he'i vy. Ha'e rami rire Acazias ro pygua kuery regua ndoikovei huvixa oĩ va'erã.\*

### 2 Reis 11.1-3

<sup>10</sup> Ha'e gui ma Acazias xy Atalia oendu opi'a omano maa. Ha'e vy opu'ã vy ojukapa Judá pygua huvixa ramyminokue ha'e javi.\*

<sup>11</sup> Ha'e rã Acazias ra'y Joás ma ha'e kuery ojukaa ta jave huvixa Jeroão rajykue Jeosabeate ogueraa jepe huvixa ra'y kuery mbyte gui. Ha'e rami vy onhomí peteĩ opy mbyteve katy hexe opena va'ety reve. Atalia gui Jeosabeate onhomí vy ndojuka ukai nho. Jeosabeate ma huvixa Jeroão rajykue, sacerdote Joiada ra'yxy, ha'e Acazias reindy.

<sup>12</sup> Ha'e ramo Joás ma mboapy meme ma'etŷa peve oiko ha'e kuery reve SENHOR pegua opy. Ha'e va'e jave ma Atalia ae huvixa oĩ ha'e va'e yvy re.

## 23

### 2 Reis 11.4-12

\* **22:9** 2 Reis 9.21-29 \* **22:10** Guemiarirõ kuery ojukapa ha'e ae onhembouvixaxe vy.

<sup>1</sup> Sete ma'et̄yā py ma Joiada\* ipy'a guaxu vy ojapo peteī rami ikuai aguā xondaro kuery ruvixa ikuai va'e reve. Ha'e va'e kuery ma Jeorão ra'y Azarias, Joanā ra'y Ismael, Obede ra'y Azarias, Adaías ra'y Maaséias ha'e Zicri ra'y Elisafate.

<sup>2</sup> Ha'e va'e kuery ma Judá yvy jave rupi oje'oi vy Judá regua tetā ha'e javi gui omono'õmba heruvy levita kuery ha'e Israel kuery akā ikuai va'e. Ha'e ramo oupa okuapy Jerusalém py.

<sup>3</sup> Ha'e va'e kuery ha'e javi Nhanderuete pegua opy oua py huvixa reve ojapo okuapy peteī rami ikuai aguā. Ha'e ramo ha'e kuery ha'e javi pe Joiada aipoe'i:

— Ne'exa, huvixa ra'ykue ae 'rā oĩ huvixarā, Davi ramymino kuery rekorā re SENHOR ijayvu ma voiague rami vy.

<sup>4</sup> Po rami 'rā peē kuery pendekuai. Mboapy henda py 'rā pendekuai. Ha'e gui peteī regua sacerdote ha'e levita kuery pendekuai va'e ma sábado ára py peike vy okē rarōa rupi 'rā pendekuai.

<sup>5</sup> Ha'e gui amboae regua ma huvixa ro py 'rā pearō. Ha'e gui mboapya va'e regua ma Okē Yta 'epy va'e py 'rā pearō. Ha'e rā heta va'e kuery ha'e javi 'rā ikuai SENHOR pegua oo roka py.

<sup>6</sup> Ha'e rami avi SENHOR pegua opy ete avave rei ndoikeai 'rā, sacerdote ha'e levita kuery ipytyvõa rupi ikuai va'e e'ŷ vy. Ha'e kuery anho 'rā oike, iky'a e'ŷ va'e vy. Ha'e rā heta va'e kuery ha'e javi ma SENHOR ijayvuague rami ae 'rā ikuai.

<sup>7</sup> Ha'e gui levita kuery pendekuai va'e ma huvixa yvýry ae 'rā pendekuai, peteī-teī pendepo py tembiporu perekō reve. Ha'e gui mava'e rā rei oo py oike ta va'e pejuka 'rā. Huvixa reve ae 'rā peiko oẽ ový jave, ha'e gui oike ouvy jave voi — he'i.

<sup>8</sup> Ha'e ramo levita ha'e Judá pygua kuery ha'e javi ma sacerdote Joiada ojapo ukaague rami ikuai. Ha'e rami vy peteī-teī ogueraa guexeveguá avakue, sábado ára py oike ha'e oẽ ta va'e kuery, mba'eta sacerdote Joiada nomondoukai om̄ba'epoaty gui.

<sup>9</sup> Ha'e ramo cem ikuai va'e-va'e ruvixa kuery pe sacerdote Joiada omboaxa huvixa Davi mba'ekue hu'y guaxu, hu'y jokoa ha'e imo'ãa tuvixa va'e, SENHOR pegua opy omoĩ porã mbyre.

<sup>10</sup> Ha'e gui heta va'e kuery ha'e javi ma peteī-teī opo py tembiporu oguereko va'e reve ha'e omoĩ huvixa ro yke jovaive re ha'e altar hi'aĩa peve, huvixa ombojere vy oarō okuapy aguā.

<sup>11</sup> Ha'e gui mae ma oguenoẽ heruvy huvixa ra'ykue. Inhakā re coroa omoĩ vy ixupe ome'ẽ kuaxia para Nhanderuete ayvu oĩa. Ha'e rami vy omoĩ okuapy nguvixarā. Inhakā rupi Joiada ha'e ta'y kuery azeite oikyty reve ojapukai okuapy:

— Toiko riae nhanderuvixa!

### **2 Reis 11.13-16**

<sup>12</sup> Ha'e gui heta va'e kuery onha-onhaa rupi huvixa pe oporai okuapy Atalia oendu vy ha'e kuerya py ou SENHOR pegua opy.

<sup>13</sup> Ha'e vy oma'ẽ rā huvixa hi'aĩ ma oikeaty py oo yta yvýry. Huvixa renonde ikuai avi harõa kuery ruvixa ha'e mimby guaxu monhe'ẽa kuery. Heta va'e kuery ha'e javi oguerovy'a okuapy, mimby guaxu omonhe'ẽ guive. Oporaei va'ety kuery voi om̄ba'epu reve ogueroporaei okuapy. Ha'e ramo Atalia oao omondoro reve ojapukai:

— Xerovaigua ra'e! Xerovaigua ra'e! — he'i.

<sup>14</sup> Ha'e ramo sacerdote Joiada xondaro ruvixa kuery oka katy ogueru vy aipoe'i ha'e kuery pe:

— Kunha va'e penoẽ ke heravy hyxy okuapy va'e kuery mbyte rupi. Amongue hupive oo ta ramo pejuka 'rā kyxe py — he'i. Mba'eta sacerdote ae “Pejuka eme SENHOR pegua opy” he'iague rami.

---

\* **23:1** Joiada ma sacerdote vy oipytyvõ SENHOR pegua templo ropy huvixa Joás onhomia aguā (22.11-12).

<sup>15</sup> Ha'e ramo kunha va'e ojopy okuapy vy kavaju rape oĩ va'e rupi ogueraa huvixa ro peve. Ha'e py mae ma ojuka.

*2 Reis 11.17-21*

<sup>16</sup> Ha'e gui ma Joiada ojapo SENHOR pe ete ha'e kuery ikuai aguã regua, ha'e ae ha'e heta va'e kuery ha'e javi reve.

<sup>17</sup> Ha'e ramo heta va'e kuery oyvy ha'e javi gui ou va'ekue ma Baal pegua oo py oike okuapy vy oitypa. Ixupegua altar ikuai va'ekue omopẽmba okuapy, ta'angaa ikuai va'e guive. Baal pegua sacerdote Matã voi ojuka altar yvy'iry.

<sup>18</sup> Ha'e gui sacerdote regua levita ikuai va'e po py Joiada omboaxa SENHOR pegua oo re opena ha'e opy rupi ha'e kuery omba'epo aguã Davi omoñaque rami, ha'e gui SENHOR pe mba'emo oapy reve ome'ẽ aguã, Moisés kuaxia re lei oĩa rami vy, ovv'a ha'e oporaei reve, Davi oejaague rami vy.

<sup>19</sup> Omoĩ avi SENHOR pegua oo rokẽ rarõarã kuery, ha'eve'ÿa oĩa va'e regua peteñve oike e'ÿ aguã.

<sup>20</sup> Joiada ogueraa xondaro kuery cem ikuai va'e-va'e ruvixa kuery, yvatekueve, guetarã kuery re opena va'e, ha'e ha'e va'e yvy regua kuery ha'e javi. Ha'e rami vy ha'e kuery reve SENHOR pegua oo gui ogueraa avi huvixave. Okẽ yvy'ã katy oĩ va'e rupi ogueroaxa heravy huvixa ro katy oje'oi vy. Ha'e py ma omboguapy imoiny tenda openaaty áry.

<sup>21</sup> Ha'e va'e yvy regua kuery ovv'a pavẽ okuapy. Tetã pygua kuery voi ikuai porã'i, Atalia kyxe py ojukaa rire.

## 24

*2 Reis 12.1-16*

<sup>1</sup> Joás ma sete ma'etÿ'i oguereko jave py oĩ ypy'i huvixa. Ha'e gui quarenta ma'etÿ re opena Jerusalém py.

<sup>2</sup> Ixy ma Berseba pygua Zíbia. Joás ma ha'evea ramigua ojapo oikovy SENHOR renonde rupi, sacerdote Joiada oĩa pukukue re.

<sup>3</sup> Ta'yxyrã Joiada ojou mokoĩ kunha. Ha'e rami vy ta'y ha'e tajy kuery ikuai.

<sup>4</sup> Ha'e va'e rire ma Joás onhembopy'a SENHOR pegua oo omoatyrõ uka aguã re.

<sup>5</sup> Ha'e rami vy sacerdote ha'e levita kuery omboatypa vy aipoe'i ha'e kuery pe:

— Tapeo Judá yvy re tetã ikuai va'e rupi. Ha'e vy pemono'õ peráta Israel kuery ha'e javi gui, ma'etÿa nhavõ ha'e kuery ome'ẽ va'erã, Penderuete pegua oo pemoatyrõmba aguã. Pejapo pojavave'i ke ha'e nunga — he'i. Ha'e rami teñ levita kuery ma nonhea'ãi okuapy ha'e rami aguã.

<sup>6</sup> Ha'e ramo huvixa oenoĩ uka sacerdote yvateve va'e Joiada. Ha'e vy oporandu ixupe:

— Mba'e re tu neremondoukai ri levita kuery Judá ha'e Jerusalém pygua kuery peráta ome'ẽ 'rã va'ekue ogueru aguã? Ha'e nunga Israel kuery ha'e javi pe SENHOR rembiguai Moisés ome'ẽ uka raka'e, oo ijayvu oĩaty omoatyrõba aguã — he'i.

<sup>7</sup> Mba'eta Atalia ha'e ipi'a kuery heko vaia rupi vy omboavaipa rei va'ekue Nhanderuete pegua oo. Mba'emo SENHOR pegua opy rupigua iky'a e'ÿ va'erã oĩ va'ekue oiporupa Baal kuery pe ikuaria rupi rive.

<sup>8</sup> Ha'e nunga rupi huvixa ijayvua rami vy ha'e kuery ojapo okuapy peráta ryrurã. Ha'e va'e ma omoĩ oka py, SENHOR pegua oo rokẽ rexei'i.

<sup>9</sup> Ha'e rami vy Judá yvy ha'e Jerusalém tetã rupi ijayvu SENHOR pe ogueru aguã peráta hembiguai Moisés ogueru rukaague rami vy, Israel kuery tekao e'ÿa rupi ikuai jave ome'ẽ uka va'ekue.

<sup>10</sup> Ha'e ramo yvatekueve ha'e heta va'e kuery ha'e javi ovv'a reve ogueru okuapy peráta ome'ẽ va'erã. Hyru py ae omoĩ, oo omoatyrõmbaa peve.

<sup>11</sup> Peráta ryru levita kuery ogueraa 'rã opena va'erã kuery huvixa omoĩ va'ekue ikuaria py. Ha'e gui heta peráta oĩ maa ha'e kuery oexa ramo ou ju 'rã huvixa rembiguai kuaxia para re opena va'ety ha'e sacerdote yvateve va'e oĩa py. Ha'e kuery ju hyru gui peráta

oguenoẽmba vy hyru omoĩ ju 'rã henda py ae. Ko'ẽ nhavõ ha'e rami ojapo vy peráta omono'õ reta okuapy oata aguã rami rei e'ŷ.

<sup>12</sup> Ha'e va'e ha'e javi ma huvixa ha'e Joiada ome'ẽmba SENHOR pegua oo moatyrõa kuery re opena va'e kuery po py. Opaga avi ita re ombo'eapo va'e ha'e oo apoarã kuery SENHOR pegua oo omoatyrõmba aguã. Ojou avi ferro ha'e overa va'e re ombo'eapo va'erã, SENHOR pegua oo omoatyrõmba aguã.

<sup>13</sup> Ha'e ramo ombo'eapo va'erã omoĩ mbyre ombo'eapo okuapy vy omoatyrõ porã heravy. Ha'e rami vy Nhanderuete pegua oo ha'ekue'i rami ae ju ojapo, omo'ã ratãmbave guive.

<sup>14</sup> Ha'e nunga ojapopa ma vy huvixa ha'e Joiada pe ogueru okuapy peráta rembyrekue. Ha'e va'ekue gui ma ojapo uka mba'emo SENHOR pegua opy ha'e ombojeroviaa rupi oiporu pyrã. Ouro ha'e prata gui ojapo mba'emo oapyaty rupi oiporu va'erã, hy'a'i ha'e tembiporu ha'e javi. Ha'e ramo Joiada oĩa pukukue re ma SENHOR pegua opy mba'emo oapy reve ome'ea jepi 'rã.

<sup>15</sup> Ha'e gui ma Joiada tuja'i, ha'e hi'ára reta ma vy omano. Cento e trinta ma'etý ma oguerekó reve omano.

<sup>16</sup> Ha'e ramo tetã Davi rekoague py onhono porãa huvixa kuery rupa yvýry, Nhanderuete pe ha'e ixupegua oo re vy ojapo porã rire Israel re.

### *Huvixa aipoe'iague rami vy Zacarias ojukaa okuapyague*

<sup>17</sup> Joiada omano ma rire ou okuapy Judá regua yvatekueve. Guenapy'ã re ikuai huvixa Joás renonde py. Ha'e kuery ijayvu rã huvixa oendu.

<sup>18</sup> Ha'e kuery oejapa ma okuapy SENHOR guamoĩ kuery Ruete pegua oo. Ha'e rami vy ta'angaarã yvyra omopu'ã mbyre pe rive ikuai, ta'angaa mboae pe guive. Ha'e kuery káuxa ae Judá ha'e Jerusalém re ou poxya.

<sup>19</sup> Ha'e rami teĩ ha'e kuerya py SENHOR omondouka profeta kuery ojeupe ju ogueru aguã teĩ. Ha'e ramo ha'e kuery rovai profeta kuery ijayvu rã noendu potai okuapy.

<sup>20</sup> Ha'e gui Nhanderuete Nhe'ẽ ou sacerdote Joiada ra'ykue Zacarias re. Ha'e ramo heta va'e kuery renonde py opu'ã ho'amy vy aipoe'i ha'e kuery pe:

— Po rami Nhanderuete ijayvu: “Mba'e re tu SENHOR ojapo uka va'ekue rupi e'ŷ pendekuai? Mba'eta napendekuai porãi 'rã. SENHOR pejapa ramo ha'e voi pendereja 'rã”, he'i.

<sup>21</sup> Ha'e ramo Zacarias rovai ha'e kuery jogueroayvu vy ojapipa ita py. Huvixa aipoe'ia rami ojuka, SENHOR pegua oo roka py ae.

<sup>22</sup> Ha'e rami py huvixa Joás na'ima'endu'ai Zacarias ru Joiada ixupe ojapo porãague re. Ha'e rami 'rãgue py ojuka uka ta'ykue. Ha'e va'e omano ta ma oupy vy aipoe'i:

— Rejapo va'e SENHOR oexa vy nembopaga 'rã — he'i.

### *Nhanderuete Joás ombopagaague*

<sup>23</sup> Ha'e va'e ma'etýa pyve ou Síria pygua xondaro kuery Joás rovai opu'ã okuapy aguã. Ha'e rami vy Judá ha'e Jerusalém peve ovaẽ vy heta va'e kuery yvatekueve ojukapa. Imba'e rei-reikue ma Damasco pygua huvixa pe omondoukapa.

<sup>24</sup> Síria guigua xondaro kuery mbovy'i ete ou teĩ SENHOR ombopo'aka Judá regua xondaro kuery heta raxa ikuai va'e re, guamoĩ kuery ruete oejapa rire. Nhanderuete huvixa Joás ombopaga aguã ae Síria pygua kuery ombou.

### *2 Reis 12.20,21*

<sup>25</sup> Joás oĩa gui Síria pygua kuery ojepe'apa vy oeja omano rai'i va'e. Ha'e ramo hovai hembigui kuery jogueroayvu. Ha'e rami vy hupa pyve ojuka, sacerdote Joiada ra'y kuery ruguy omoẽague re.

**26** Ha'e ramo onhono porãa tetã Davi rekoague py teĩ yma guare huvixa kuery rupa yvýry e'ŷ guive. Hovai jogueroayyu va'ekue ma po rami: Amom pygua Simeate pi'a Zabade ha'e Moabe pygua Sinrite pi'a Jeozabade.

**27** Ha'e gui ta'y kuery rekoke, hovai ijayvu jepiague, ha'e Nhanderuete pegua oo omoatyrõague, ha'e nunga ha'e javi ma ipara oiny huvixa kuery rekoke oĩa re. Ha'e gui ta'y Amazias ju oĩ nguu rekoria.

## 25

### 2 Reis 14.1-6

**1** Amazias ma vinte e cinco ma'etŷ oguereko huvixa oĩ ypy'i jave py. Ha'e vy vinte e nove ma'etŷ re opena Jerusalém py. Ixy ma Jeoadã, Jerusalém pygua ae.

**2** SENHOR renonde rupi ha'evea rami oiko va'eri opy'a ha'e javi py e'ŷ guive.

**3** Opo'akaa re oĩ atã ma rire ojuka ukapa guembiguai kuery tuu jukaare.

**4** Ha'e rã ijukaare ra'y kuery ma ha'e ndojuka ukai. Ha'e rami 'rãgue py Moisés kuaxia re omboparaague rami oiko, mba'eta SENHOR ojapo uka vy aipoe'i: "Tuu kuery ma ndojukaai 'rã ta'y kuery ojapo vaiague re, neĩ ta'y kuery ndojukaai 'rã tuu kuery ojapo vaiague re. Peteĩ-teĩ ojukaa 'rã ha'e ae ojejavvyague re", he'iague rami.

### 2 Reis 14.7

**5** Ha'e gui Amazias omboatypa Judá kuery ha'e javi. Ha'e vy peteĩ-teĩ ro pygua ikuai va'e omoĩ xondarorã, omoĩ avi mil ikuai va'e re ha'e cem ikuai va'e re opena va'erã. Judá ha'e Benjamim regua ha'e javi omoĩ ha'e rami aguã. Ha'e vy vinte ma'etŷ va'e guive tujakue peve oipapa vy oikuua trezentos mil ikuiaia oiporavo pyre joe opu'ãa py hu'y guaxu ha'e hu'y jokoa tuvixa va'e ogueraa va'e meme.

**6** Ha'e gui Israel kuery va'e regua ojoguave ju cem mil avakue ipy'a guaxukueve, três mil e trezentos quilos prata guigua re.

**7** Ha'e rami teĩ oĩa py ou peteĩ ava Nhanderuete remimbo'e. Ha'e vy aipoe'i ixupe:

— Xeruvixa, eraa eme Israel regua xondaro kuery. Mba'eta Israel ha'e Efraim kuery reve'ŷ SENHOR oiko.

**8** Ha'e nunga rupi tereo tema nhande kuery reve anho. Ha'e rami vy joe pepu'ã ramo ndepo'aka 'rã. Ha'e rami e'ŷ ri ramo Nhanderuete ojapo 'rã nhanderovaigua kuery renonde re'a aguã rami, mba'eta Nhanderuete ma nhopytyvõ ha'e joity aguã ipo'aka va'e — he'i.

**9** Ha'e ramo Nhanderuete remimbo'e pe Amazias oporandu:

— Ha'e rami avi mba'exa tu ha'vy ajapo 'rã três mil e trezentos quilos prata guigua ajou ju aguã, ha'e va'e re Israel regua xondaro kuery ajogua rire?

Nhanderuete remimbo'e ombovai:

— Ha'e va'ekue gui SENHOR hetave oguereko ndevy ome'ẽ va'erã — he'i.

**10** Ha'e ramo ojeupagua kuery ae gui huvixa Amazias omboja'opa xondaro kuery Efraim gui ou va'ekue, ngoo katy ju ojevypa aguã. Ha'e ramo ha'e kuery ivai ete okuapy Judá kuery rovai. Ipoxy reve ojevypa ju ngoo katy.

**11** Ha'e gui ma Amazias ipy'a guaxu reve ogueraa ojeupagua kuery ae. Ha'e rami vy oje'oi Yvyugua Juky 'ea va'e katy. Ha'e py ma dez mil ojuka Seir ramymino kuery va'e regua.

**12** Ha'e rami vy Judá kuery ma dez mil ju ojuka e'ŷ re ojopy vy ogueraapa peteĩ itaova yvatevea py. Ha'e va'e gui ma omombopa ramo omanomba hu'ũmba vy.

**13** Ha'e rami teĩ xondaro kuery Amazias ngupive joe opu'ãa katy oje'oi e'ŷ aguã omon-doukapa ju va'ekue ma ombovaipa Judá re tetã ikuai va'e Samaria guive Bete-Horom peve. Ha'e rami vy três mil ojuka okuapy ha'e pygua kuery, ha'e imba'e rei-reikue ma ogueraapa.

*Amazias mba'emo ra'angaa pe oikoa re Nhanderuete omongeta ukaague*

<sup>14</sup> Ha'e gui Edom pygua kuery ojukaague gui Amazias ojevy vy ogueru Seir ramymino kuery ruete ra'angaa oguerekva'ekue. Ha'e rami vy nguueterā ae rive omopu'ā imo'amy. Ha'e va'e omboetea rupi oapy imoiny heakuā porā va'e.

<sup>15</sup> Ha'e ramo Amazias rovai SENHOR poxya hendy rā oīa py ombou peteī profeta ixupe oporandu aguā:

— Mba'e re tu remboete reikovy ta'angaa, ndepo gui ojeupagua kuery ndogueraa jepei va'ekue ri? — he'i.

<sup>16</sup> Ha'e ramo profeta ixupe ijayvu teri reve huvixa ombovai:

— Xapy'a rei tu ndee huvixa mongetaarā renhemooī? Epytu'u ma ta'vy. Mba'e re tu rejapo rojuka aguā rami? — he'i.

Ha'e ramo profeta optyu'u va'eri aipoe'i nho ju:

— Ha'e rami ete reiko ramo xee aikuaa Nhanderuete nemomba taa, xee romongeta teī nerendui rire — he'i.

#### *2 Reis 14.8-14*

<sup>17</sup> Judá pygua huvixa Amazias ma amboae rami onhemongeta uka rire omondouka ayvu mombe'uarā Israel pygua huvixa Jeoacaz ra'y Jeoás pe, Jeú ramymino va'e pe. Ha'e vy aipoe'i uka:

— Peju, jajoguero'a.

<sup>18</sup> Ha'e rami teī Israel pygua huvixa Jeoás ombovai Judá pygua huvixa Amazias:

— Líbano vy re ma je peteī juu rakuaendy hi'aī va'e aipoe'i uka yary ha'e py hi'aī avi va'e pe: “Eme'ē na nderajy xera'y ra'yxyrā”, he'i. Ha'e rami teī mymba Líbano vy re ikuai va'e opyrōmba rive juu rakuaendy re.\*

<sup>19</sup> Ha'e gui ndee ma “Edom pygua kuery ma xee ajukapa” 're vy nekuraxō re oī renhemboyvate reixeia ha'e rejou porā rivea. Aŷ ndero py ae repyta 'rāgue. Mba'e re tu rejeity ukaxe ri mba'emo vai py, Judá pygua kuery reve? — he'i uka.

<sup>20</sup> Ha'e rami teī Judá pygua huvixa Amazias noendu potai. Mba'eta ha'e rami aguā ma Nhanderuete gui ae ou, hovaigua kuery po py omboaxa aguā, Edom pygua kuery ruete ra'angaa pe oiko ramo.

<sup>21</sup> Ha'e ramo Judá pygua huvixa Amazias oo nho Judá regua Bete-Semes tekoa py, Israel pygua huvixa Jeoás reve joe opu'ā aguā.

<sup>22</sup> Ha'e gui ma Israel kuery renonde py Judá pygua kuery oitypaa. Ha'e vy peteī-teī onhamba ngoo katy.

<sup>23</sup> Bete-Semes py ae Israel pygua huvixa Jeoás ombo'a Judá pygua huvixa Joás ra'y Amazias, Jeoacaz ramymino va'e. Ha'e rami vy Jerusalém re ogueraa vy oity tetā kora Efraim guive ojerea katy'i okē hi'aīague peve, cento e oitenta metros va'ekue ha'e javi.

<sup>24</sup> Tetā gui oipe'apa avi ouro, prata ha'e mba'emo ryru SENHOR ropy Obede-Edom openaague, ha'e huvixa ro py mba'emo omoī porā mbyre ha'e javi. Ogueraa avi avakue mba'emo re omboekovia va'erā. Ha'e gui ma Samaria tetā katy ju ojevy.

#### *2 Reis 14.17-20*

<sup>25</sup> Jeoacaz ra'y Jeoás Israel pygua huvixa va'e omano rire Joás ra'y Amazias Judá pygua huvixa oikove ranhe quinze ma'etý re.

<sup>26</sup> Ha'e gui oīve rei tema Amazias rekokue regua. Ha'e rami avi mba'emo ojapo va'ekue jypy guive opaa peve noī 'rā teve kuaxia Judá ha'e Israel pygua huvixa kuery rekokue oīa re?

<sup>27</sup> Amazias ma SENHOR pe oikoa gui ojepe'a ramo hovai jogueroayvua Jerusalém py. Ha'e ramo Laquis katy onha teī hakykue omondoukaa avakue. Ha'e ramo Laquis py ae ojuka.

<sup>28</sup> Ha'e rami vy kavaju áry ogueru vy Jerusalém py ae onhono porāa, tuu kuery rupa yvýry tetā Davi rekoague py.

\* <sup>25:18</sup> “Juu rakua endy” he'ia ma huvixa Amazias ombojaru reia rupi ijayvu vy, ha'e rā “Yary hi'aī va'e” he'ia ma ojee ae ijayvu vy.

## 26

### *2 Reis 14.21,22; 15.1-7*

<sup>1</sup> Ha'e gui ma Judá kuery ha'e javi oiporavo Uzias dezesseis ma'etŷ oguereko va'e. Ha'e rami vy nguvixarã omoõ okuapy nguu Amazias rekovia.\*

<sup>2</sup> Ha'e va'e ma ojapo Elate tetã, omoatyrõ avi Judá yvy ha'e javi rupi, tuu huvixa guamoõ kueryague rami ndoikovevei'i ma rire.

<sup>3</sup> Uzias ma dezesseis ma'etŷ oguereko huvixa oĩ ypy'i jave py. Ha'e gui cinqüenta e dois ma'etŷ re opena Jerusalém py. Ixy ma Jecolias, Jerusalém pygua ae.

<sup>4</sup> Ha'evea ramigua ojapo oikovy SENHOR renonde rupi, nguu Amazias ojapoague rami meme.

<sup>5</sup> Ha'e rami vy ojee omoõ Nhanderuete oeka aguã. Imongetaaty Zacarias Nhanderuete guigua oexaa py hi'arandu va'e oikoa pukukue re ha'e rami oiko. SENHOR oekaa ja ma omoingo porã.

<sup>6</sup> Ha'e gui ma filisteu kuery rovai opu'ã aguã oo vy ombovaipa Gate tetã kora, Jabné ha'e Asdode py guive. Ha'e gui Asdode katy'i rupi ojapove ju tetã, filisteu kuery yvy ha'e javi rupi guive.

<sup>7</sup> Nhanderuete oipytyvõ filisteu kuery rovai opu'ãa py, Arábia regua Gur-Baal pygua kuery rovai, meunita kuery rovai guive.

<sup>8</sup> Uzias ipo'akapa rã Egito py nhavaõa'i peve ima'endu'a porãa hexe. Ha'e ramo ixupe Amom pygua kuery voi ome'ẽ 'rã mba'emo.

<sup>9</sup> Jerusalém tetã py Uzias ojapo reta torre: Okẽ Ojerea 'epy va'e py, Okẽ Yvyugua ha'e Okẽ Hakua 'epy va'e py ojapo, ha'e vy omombaraetepa.

<sup>10</sup> Tekoa e'õa rupi guive ojapo torre, yguarã ojo'o reta guive hymba kuery heta ramo, yvyugua ha'e nhuündya rupi. Mba'ety rupigua oguerovy'a va'e vy guembiguai kuery oguereko mba'ety rupi ombo'eapo va'e, uva ty rupi, yvyty ikuai va'e rupi, ha'e mba'ety porãa rupi.

<sup>11</sup> Uzias rembiguai regua ikuai avi xondaro kuery tembiporu oiporu kuaa ete va'e. Ha'e kuery ma joe opu'ã aguã katy hyxy 'rã jogueravy. Ha'e kuery rery ma kuaxia re opena va'ety Jeiel omboparapa imoiny, huvixa Maaséias reve, huvixa rembiguai yvateve va'e Hananias openaa rupi.

<sup>12</sup> Ha'e gui hetarã kuery akã ikuai va'e rery oĩ va'ekue ma dois mil e seiscentos, avakue ipy'a guaxukueve meme.

<sup>13</sup> Hembiguai xondaro kuery ma trezentos e sete mil e quinhentos ikuai. Ha'e va'e kuery ma ombaraetea rupi opu'ã 'rã okuapy joe, hovaigua kuery gui huvixa oipytyvõ va'e.

<sup>14</sup> Xondaro kuery ha'e javi rembiporurã Uzias ojapo uka hu'y jokoa, hu'y guaxu, akã regua, pexo regua, guyrapa ha'e ita momboa.

<sup>15</sup> Jerusalém py ma mba'emo tuvixa va'e momboarã ojapo uka avi avakue ojapo kuaa va'e pe. Ha'e va'e ma torre ha'e kora ojerea áry omoõ 'rã hu'y ha'e ita tuvixakueve omombo aguã. Hexe ima'endu'aa mombyrya rupi peve, opa mba'e py SENHOR omombaraete ramo.

### *2 Reis 15.5-7*

<sup>16</sup> Ha'e gui Uzias ipo'aka ete ma vy opy'a py onhemboyvate rei, okanhy aguã rami oiko peve. Ha'e vy opa marã rei ojejavý SENHOR nguuete rovai. Ha'e rami vy ixupergua opy oike altar oĩ va'e áry heakuã porã va'e oapy aguã.

<sup>17</sup> Hakykue sacerdote Azarias oike avi SENHOR pegua sacerdote kuery oitenta ipy'a guaxukueve ikuai va'e reve.

<sup>18</sup> Ha'e vy huvixa Uzias reve nhombovake okuapy. Ha'e vy aipoe'i okuapy ixupe:

— Ndee huvixa Uzias pe ma nda'evei SENHOR renonde py heakuã porã va'e reapy aguã, sacerdote kuery Arão ramymino ikuai va'e pe anho, ha'e rami aguã rami omoña rire.

\* <sup>26:1</sup> Uzias rery mboae ma Azarias raka'e (2 Reis 14.21-22, 15.1-7).

Eẽ ke henda iky'a e'ŷ va'e gui, mba'eta rejavy ma. SENHOR Nhanderuete nanemboete ukavei ma 'rã — he'i okuapy.

<sup>19</sup> Ha'e ramo Uzias ivai vaipa, opo py heakuã porã va'e ryru oguereko reve. Sacerdote kuery pe ivai ramove hova mbyte re ojekuaa lepra ha'e kuery ha'e javi oexaa py, SENHOR pegua opy altar heakuã porã va'e oapyaty yvýry hi'aña pyve.

<sup>20</sup> Sacerdote yvateve va'e Azarias ha'e sacerdote kuery mboae hexe oma'ẽ vy oexa okuapy lepra hova re oĩ ra'ea. Ha'e ramo ogueraa pojava oka katy. Ha'e ae ma voi guive oẽ pojava ovy, SENHOR omoingo axy rire.

<sup>21</sup> Ha'e rami py huvixa Uzias ma omanoa ára peve lepra reveguia oiko. Lepra reveguia vy peteĩ oo ha'e ae'i oĩ aguã ojapo pyre py oiko, SENHOR pegua opy gui omoxẽ rire. Ha'e gui ta'y Jotão ju opena oikovy huvixa ro re. Oyvy re ikuai va'e re oikuua pota avi oikovy.

<sup>22</sup> Ha'e gui oĩve rei tema Uzias rekukue regua. Ha'e rami avi mba'emo ojapo va'ekue jypy guive opaa peve noĩ'rã teve kuaxia Amom ra'y profeta Isaías ombopara va'ekue re?

<sup>23</sup> Ha'e rire Uzias optyu'u ma guamoõ kueryague rami. Ha'e ramo tamoõ kuery onhono porãague rami avi onhono porãa peteĩ yvy yvyra ruparã huvixa kuery oguereko katu va'ekue py, ixupe "Lepra reveguia va'ekue" he'i okuapy vy. Ha'e gui ma ta'y Jotão ju oĩ nguu rekovia.

## 27

### 2 Reis 15.32-38

<sup>1</sup> Jotão ma vinte e cinco ma'etŷ oguereko jave py oĩ ypy'i huvixarã. Ha'e vy dezesseis ma'etŷ re opena Jerusalém py. Ixy ma Jerusa, Zadoque rajy.

<sup>2</sup> Ha'e ma ha'evea rami oiko SENHOR renonde rupi, nguu Uzias oikoague rami ae ju. Ha'e rami avi ndoikei guive SENHOR pegua opy. Ha'e rã heta va'e kuery ma mba'emo vai rupi tema ikuai.

<sup>3</sup> Jotão ojapo uka SENHOR pegua oo rokẽ yvate rupi guarã, ha'e tetã kora Ofel 'epy va'e áry rupi heta avi ojapo mba'emo.

<sup>4</sup> Judá re yvyty ikuai va'e rupi ojapo avi tetã, ha'e ka'aguy rupi ma oo ikorapa va'e ha'e torre ojapo.

<sup>5</sup> Ha'e gui ma Amom kuery ruvixa rovai re opu'ã vy ipo'aka ha'e kuery re. Ha'e ramo ha'e va'e ma'etŷ re ma ixupe Amom kuery ome'ẽ três mil e trezentos quilos prata guigua, ha'e dez mil vox trigó ha'e cevada. Ha'e ramigua ma Amom kuery mokoõ ma'etŷ, ha'e gui mboapy ma'etŷa peve ome'ẽ okuapy ixupe.

<sup>6</sup> Jotão ipo'akave tema ovy, SENHOR nguu ete oipotaa rami oiko va'e vy.

<sup>7</sup> Ha'e gui oĩve rei tema Jotão rekukue regua. Ha'e rami avi joe opu'ãague ha'e mba'emo ojapo va'ekue ha'e javi noĩ'rã teve kuaxia Israel ha'e Judá pygua huvixa kuery rekukue oĩa re?

<sup>8</sup> Vinte e cinco ma'etŷ oguereko jave py oĩ ypy'i huvixarã. Ha'e vy dezesseis ma'etŷ re opena Jerusalém py.

<sup>9</sup> Ha'e rire Jotão ndoikovevei'i ma guamoõ kueryague rami. Ha'e ramo onhono porãa tetã Davi rekoague py. Ha'e ramo ta'y Acaz ju oĩ nguu rekovia.

## 28

### 2 Reis 16.1-4

<sup>1</sup> Acaz oĩ ypy'i jave ma vinte ma'etŷ ramo'i oguereko. Ha'e gui dezesseis ma'etŷ re opena Jerusalém py. Ha'e ma ha'eve'ŷa ramigua ojapo oikovy SENHOR nguuete renonde rupi, guamoõ Davi rami e'ŷ.

<sup>2</sup> Israel pygua huvixa kuery reko rami oiko, ha'e Baal kuery ra'angaarã ojapo mba'emo ryku gui.

<sup>3</sup> Yvyugua Hinom ra'y rekoague py oapy avi heakuā porā va'e, gua'y kuery ae'i guive oapy, amboae regua kuery Israel kuery renonde gui SENHOR oipe'apa va'ekue opa marā rei ikuaiague rami ae.

<sup>4</sup> Ombojeroviaaty yvy'ã rupi ikuai va'e py voi mba'emo ome'ẽ oikovy, heakuā porā va'e oapy avi yvy'ã rupi, yvyra rogue ana ikuai va'e guýry rupi guive.

<sup>5</sup> Ha'e nunga rupi SENHOR tuete omboaxa Síria pygua huvixa po py. Ha'e va'e kuery ma hexe ipo'aka vy ixupequa kuery reve ogueraa Damasco tetā katy escravo-rã. Omboaxa avi Israel kuery ruvixa po py. Ha'e va'e ju ipo'aka vy omoingo axy raxa.

<sup>6</sup> Ha'e rami vy peteĩ ára pyve Remalias ra'y Peca ojuka cento e vinte mil avakue Judá regua imbaraetekueve, SENHOR guamoĩ kuery ruete gui hexarai rire.

<sup>7</sup> Ha'e gui ma peteĩ ava Efraim regua ipy'a guaxuve va'e Zicri hery va'e ojuka huvixa ra'y Maaséias. Ojuka avi huvixa ro re opena va'ety yvateve va'e Azricão, huvixa irũ Elcana guive.

<sup>8</sup> Ha'e gui Israel ramymino kuery ju Judá gui ogueraa duzentos mil kunhague, ipi'a ha'e imemby kuery, ha'e kuery reve joegua ikuai va'eri. Ha'e rami vy imba'e rei-rei va'ekue oipe'a reta vy Samaria py ogueraapa.

<sup>9</sup> Ha'e rami teĩ ha'e py oĩ peteĩ profeta SENHOR pega, Odede hery va'e. Ha'e va'e ma oẽ ov yondaro kuery Samaria katy ojevy jogueruvy va'e ovaexĩ aguã. Ha'e vy aipoe'i ha'e kuery pe:

— Ne'exa, SENHOR peneramoĩ kuery ruete Judá pygua kuery pe ipoxy vy omboaxapa pendepo py meme. Ha'e ramo peẽ kuery pendepoxy reve pejukapa yva peve oendua aguã rami.

<sup>10</sup> Ha'e rami vy aŷ escravo-rã peru ta Judá ha'e Jerusalém pygua avakue ha'e kunhague. Ha'e nunga py peẽ voi e'ŷ teve SENHOR Penderuete rovai pendepo ky'a?

<sup>11</sup> Ha'e gui aŷ ma pendu ke xeayvua. Pembojevypa ju penderegua kuery escravo-rã Peru va'ekue, mba'eta SENHOR guigua poxya hendy ma pende'áry — he'i.

<sup>12</sup> Ha'e ramo amongue avakue Efraim regua opu'ã okuapy nhombovake aguã joe opu'âague gui ojevy va'e kuery reve. Ha'e va'e kuery ma Joanã ra'y Azarias, Mesilemote ra'y Berequias, Salum ra'y Jeizquias ha'e Hadlai ra'y Amasa.

<sup>13</sup> Ha'e vy aipoe'i okuapy ha'e kuery pe:

— Peroike eme apy escravo-rã Peru va'ekue, mba'eta pemboetave 'rã SENHOR renonde py jajejavya ha'e nhandepo ky'aa. Nhandepo ky'aa tuvixa ma ramo nhande'áry hendy ma SENHOR guigua poxya — he'i okuapy.

<sup>14</sup> Ha'e ramo yvatekueve ha'e heta va'e kuery ha'e javi oexaa py xondaro kuery oejapa ojokua reve ogueru va'ekue, imba'e rei-rei va'ekue voi.

<sup>15</sup> Ha'e rami vy hery rupi oiporavo okuapy escravo-rã ogueru pyre re opena va'erã. Ha'e ramo ha'e kuery opu'ã vy omonhemondepa ju ipire rei va'ekue'-ekue mba'emo ogueru pyre py ae. Omonhemonde, ipy ryrurã ome'ẽ, omongarupa, omboy'u ha'e oipoano porãmba. Ha'e rã kangy gui ndoguatavei va'e ma mburika'i áry omoĩ vy ogueraa Jericó “Pindoty tetã” 'ea va'e py, hexegua kuery ikuai py. Ha'e gui ma ojevypa ju Samaria katy.

### Assíria pygua kuery pe Acaz oipytyvõ aguã re ojerureague

<sup>16</sup> Ha'e va'e jave py ma huvixa Acaz ojerure uka Assíria pygua huvixa kuery oipytyvõ aguã re.

<sup>17</sup> Mba'eta Edom pygua kuery teĩgue ju ou vy Judá kuery re ipo'aka ramo, escravo-rã ogueraa guive.

<sup>18</sup> Filisteu kuery voi ou vy opu'ã okuapy tetã yvy'ãmbe reia rupi, Judá regua kuaray puku-a katy ikuai va'e re guive. Ha'e rami vy ipo'aka Bete-Semes tetã re, Aijalom, Gederote, Socó, Timna ha'e Ginzo ha'e ijyvýry rupi tekoa ikuai va'e re. Ha'e rire ha'e kuery ju hekoa ha'e py.

**19** Israel pygua huvixa Acaz káuxa ae SENHOR omo'yvy'i Judá kuery, huvixa opa marã ikuai aguã rami ojapoague re. Ha'e va'e eteve voi ndojejokoi SENHOR rovai heko vai aguã gui.

**20** Ha'e ramo oña py ou Assíria pygua huvixa Tiglate-Pileser teñ oipytyvõ 'râgue py omoï vaive.

**21** Ha'e ramo Acaz ma mba'emo porã SENHOR pegua oo gui oguenoë vy omboaxapa Assíria pygua huvixa po py, ngoo gui ae, ha'e yvatekueve ikuai va'e ro gui guive. Ha'e rami teñ ae ma mba'eve py noipytyvõi.

### *Nhanderuete ramigua rive pe huvixa Acaz oikoague*

**22** Huvixa Acaz ojexavai jave pyve heko vai raxave SENHOR rovai.

**23** Ha'e rami vy mba'emo mymba ome'ẽ tema Damasco pygua kuery ruete ramigua ikuai va'e pe, hexe ha'e kuery ipo'aka rire. Mba'eta aipoe'i:

— Síria pygua huvixa kuery ruete ramigua ma ha'e kuery oipytyvõ rire xee voi ha'e kuery pe ame'ẽ ta mba'emo anhepytyvõ uka vy — he'i. Ha'e rami teñ ha'e rami oiko vy ojapo ha'e ae okanhy aguã rami, Israel kuery ha'e javi reve.

**24** Ha'e rami vy Acaz oipe'apa mba'emo ryru Nhanderuete pegua opy ikuai va'ekue. Omboa'ypa ma vy ombotypa ju SENHOR pegua okẽ ikuai va'e. Ha'e rami vy ojeupe guarã ojapo altar Jerusalém ha'e javi rupi.

**25** Judá regua tetã ha'e javi katy'i yvy'ã ikuai va'e rupi omopu'ã tuuete ra'angaa pe heakuã porã va'e oapy atyrã. Ha'e rami py ombopoxy SENHOR guamoï kuery ruete.\*

### *2 Reis 16.19,20*

**26** Ha'e gui oïve rei tema Acaz rekukue regua. Ha'e rami avi ha'e oikoa jypy guive opaa peve ipara oiny kuaxia Judá ha'e Israel pygua huvixa kuery rekukue oña re.

**27** Ha'e gui Acaz ndoikovevei'i ma guamoï kueryague rami. Ha'e ramo onhono porãa Jerusalém tetã py, teñ Israel pygua huvixa kuery rupa yvýry e'ý guive. Ha'e gui ma ta'y Ezequias ju oï nguú rekovia.

## 29

### *Ezequias templo oipe'a uka juague*

**1** Ezequias ma vinte e cinco ma'etõy oguerekó huvixa oï ypy'i jave py. Ha'e vy vinte e nove ma'etõy re opena Jerusalém py. Ixy ma Zacarias rajy Abia.

**2** Ha'e ma ha'evea rami oiko SENHOR renonde rupi, guamoï Davi ojapoague ha'e javi rami.

**3** Ha'e gui jypyguia ma'etõyha'e jypyguia jaxya pyve oipe'apa ju SENHOR pegua oo rokẽ ikuai va'e, omoatyrõmba guive.

**4** Ha'e rami vy sacerdote ha'e levita kuery oguerupa vy omboatypa kuaray puku-a katy oka oï va'e py.

**5** Ha'e vy aipoe'i ha'e kuery pe:

— Pendu ke xeayvua, levita kuery. Pejeky'a'o ukapa ke aý'i ma voi, ha'e gui peiky'a'opa avi SENHOR peneramoï kuery ruete pegua oo. Henda iky'a e'ý va'e gui peipe'apa ke mba'emo ky'akue oï va'e.

**6** Mba'eta nhaneramoï kuery ma anhetõrupi e'ý ikuai vy SENHOR Nhanderuete renonde py ha'eve'ýa ramigua ojapo. Oejapa okuapy vy SENHOR pegua oo oña katy gui ngova oguerova vy okupe rive oguerova okuapy.

**7** Oka rokẽ omboatypa, tataendy ikuai va'e omboguepa, ixupe ndoapyei guive heakuã porã va'e, neñ mymba ma voi nome'ẽvei okuapy Israel kuery ruete pegua henda iky'a e'ý va'e rupi.

\* **28:25** 2 Reis 16.10-16

<sup>8</sup> Ha'e nunga rupi Judá ha'e Jerusalém pygua kuery áry ou SENHOR poxya. Ha'e vy omboaxapa imongyjearã, imondyiaraõ ha'e ijojai reiarã pe, peẽ kuery penderexa py ae pexaa rami.

<sup>9</sup> Ha'e ramo nhaneramoõ kuery kyxé py ojukapaa, ha'e gui nhandera'y kuery, nhanderajy kuery ha'e nhandera'yxy kuery ju escravo-rã ogueraa ague py ikuai.

<sup>10</sup> Ha'e nunga rupi aÿ ma xejee amoõ SENHOR Israel kuery ruete reve ajapo aguã peteõ rami ju nhandekuai aguã, nhandegui oipe'a nho aguã opoxya tata rami nhanembojexavai va'e.

<sup>11</sup> Xera'y kuery, penderexarai eme pejapo 'rã va'e gui, mba'eta SENHOR ae pendeporavo henonde rupi pendekuai aguã, ixupe pembape'o ha'e heakuã porã va'e peapy aguã — he'i.

### *Levita kuery templo oiky'a'opa jevyague*

<sup>12</sup> Ha'e ramo levita kuery opu'ãmba okuapy. Coate ramymino kuery va'e regua ikuai Amasai ra'y Maate ha'e Azarias ra'y Joel. Merari ramymino regua ma Abdi ra'y Quis ha'e Jealelel ra'y Azarias. Ha'e gui Gérson ramymino regua ma Zima ra'y Joá ha'e Joá ra'y Éden.

<sup>13</sup> Elisafã ramymino regua ma Sinri ha'e Jeuel. Asafe ramymino regua ma Zacarias ha'e Matanias.

<sup>14</sup> Hemã ramymino regua ma Jeuel ha'e Simei. Jedutum ramymino regua ma Semaías ha'e Uziel.

<sup>15</sup> Ha'e kuery ma guyvy kuery omboaty ukapa vy ha'e kuery ae ranhe ojeky'a'o ukapa. Ha'e rire mae ma ou SENHOR pegua oo py ju huvixa aipoe'i ukaague rami vy oiky'a'opa aguã, SENHOR ijayvuague rupi guive.

<sup>16</sup> Ha'e rami vy sacerdote kuery ma SENHOR pegua opy rupi oike jogueravy oiky'a'o aguã. Ha'e rami vy oka py, SENHOR pegua oka oï va'e py oguenoëmba iky'akue templo ropy rupi ikuai va'ekue. Ha'e nunga levita kuery oipe'apa vy mombyrya py ogueraa, Cedrom yakã peve.

<sup>17</sup> Jypyguia jaxy ha'e ára ypy'i py ma omboypy okuapy oiky'a'o aguã. Ha'e gui ma oito araa py oiky'a'o ma SENHOR pegua oo oikeaty peve. Ha'e gui oito araa jevy py oiky'a'opa SENHOR pegua opy rupi. Jypyguia jaxy ha'e dezesseis araa py ma oiky'a'opa ma okuapy.

<sup>18</sup> Ha'e gui mae ma oje'oipa huvixa Ezequias ngoo py oïa py. Ha'e vy aipoe'i okuapy:  
— Roiky'a'opa ma SENHOR pegua oo, altar mymba rapyaty, tembiporu ikuai va'e, ha'e mesa SENHOR renonde mbojape omoñaty va'e, hexegua tembiporu ikuai va'e ha'e javi reve.

<sup>19</sup> Ha'e gui mba'emo huvixa Acaz oï jave heko vai reia rupi oka katy rive omombo va'ekue ma romoatyrõmba ju, romboaxapa ma guive SENHOR peguarã. Ha'e nunga ha'e javi ma SENHOR pegua altar renonde py ju ikuai — he'i okuapy.

### *Nhanderuete ombojeroviaa aguã Ezequias omboypy jevyague*

<sup>20</sup> Ha'e ramo huvixa Ezequias ma ko'ë rai'i teri reve ovv vy omboatypa yvatekueve tetã rupi ikuai va'e. Ha'e vy ogueraapa SENHOR pegua oo py.

<sup>21</sup> Ogueru ruka avi sete vaka ra'y, sete vexa'i, sete vexa'i ra'y ha'e sete kavara, jejavya regua ome'ë aguã huvixa openaa rupi ikuai va'e re vy, henda iky'a e'ë va'e ha'e Judá kuery re guive. Ha'e va'e ma Arão ramymino kuery sacerdote ikuai va'e pe ome'ë ukapa SENHOR pegua altar áry.

<sup>22</sup> Vaka ra'y ma sacerdote kuery ojukapa ma vy huguykue oupi vy omboayvipa altar áry rupi. Ha'e gui vexa'i ha'e vexa'i ra'y ikuai va'e ju ojukapa ma vy huguykue omboayvipa avi altar áry rupi.

<sup>23</sup> Ha'e gui jejavya regua ome'ë va'erã kavara kuery ju ogueru huvixa renonde heta va'e kuery oexaa py. Ha'e va'e kuery áry ma omoõ okuapy opo.

<sup>24</sup> Ha'e rami vy sacerdote kuery ojukapa ma vy huguykue ma jejavya reguarã ome'ẽ altar yvy'iry rupi onhoẽ vy, Israel kuery ha'e javi ojejavyague ojao'i uka aguã, mba'eta huvixa ijayvu rire Israel kuery ojejavyague re oapy reve ome'ẽ aguã re.

<sup>25</sup> Omoĩ avi levita kuery SENHOR pegua opy rupi hy'a pu, mbaraka ha'e ixã reta va'e reve ikuai aguã, Davi ojapo ukaague rami vy, huvixa pegua profeta kuery Gade ha'e Natã ijayvuague rami guive. Ha'e rami aguã ma SENHOR ae ojapo uka profeta kuery pe ijayvu vy.

<sup>26</sup> Ha'e gui ma levita kuery hi'aĩ okuapy mba'epu Davi oeja va'ekue reve, ha'e rã sacerdote kuery ma mimby guaxu reve ikuai.

<sup>27</sup> Ha'e gui mae ma Ezequias ijayvu altar áry mymba oapya aguã re. Ha'e ramo mymba oapya aguã omboypy ramove omboypy avi SENHOR pe oporaei okuapy aguã mimby guaxu omonhe'ẽ reve, mba'epu Israel pygua huvixa Davi oeja va'ekue reve guive.

<sup>28</sup> Ha'e ramo oporaei okuapy, ha'e mimby guaxu omonhe'ẽ atã ramove ijaty va'e kuery ha'e javi ikuai guenapy'ã re. Ha'e rami ae tema ikuai mymba oapypa e'ÿa ja.

<sup>29</sup> Ha'e gui mymba ome'ẽmba ma ramo huvixa Ezequias ha'e hexeve ikuai va'e ha'e javi voi guenapy'ã re ikuai avi omboetea py.

<sup>30</sup> Ha'e ramo huvixa ha'e hexeveguia kuery yvatekueve ijayvu levita kuery SENHOR pe oporaei okuapy aguã re, Davi ha'e profeta Asafe ijayvuague rupi. Ha'e ramo ha'e kuery ov'y a reve oporai, ha'e ojero'a reve avi omboete okuapy.

<sup>31</sup> Ha'e gui Ezequias aipoe'ive ju:

— Aÿ SENHOR peguarã pejeky'a'o ukapa ma. Penhemboja ke ha'vy, ha'e Peru mymba peme'ẽ va'erã, perovy'a reve Peru SENHOR pegua oo oña katy — he'i.

Ha'e ramo ijaty va'e kuery ogueru okuapy mymba ome'ẽ va'erã, SENHOR oguerovy'aa rupi. Opy'a re ome'ẽxe omoĩ va'ekue reve ogueru okuapy mymba oapy aguã py.

<sup>32</sup> Ijaty va'e kuery mymba ogueru va'e oipapaa rã setenta vaka ikuai, cem vexa'i ava ha'e gui duzentos vexa'i ra'y. Ha'e nunga ha'e javi SENHOR pe oapy okuapy.

<sup>33</sup> Ixupe ome'ẽ avi seiscentos vaka ra'y ha'e três mil vexa'i.

<sup>34</sup> Ha'e rã sacerdote kuery ma mbovy'i ete vy ndoipiropa reguai. Ha'e ramo hexegua levita kuery oipytyvõ okuapy oipiropa, ha'e sacerdote kuery mboae ojeky'a'o ukapa peve. Mba'eta sacerdote kuery gui levita kuery opy'a py heko porâve va'e ikuai ojeky'a'o ukaa py.

<sup>35</sup> Ha'e gui mymba oapy va'erã heta raxa ogueru va'ekue áryve oĩ avi mymba peteĩ rami ikuai aguã regua ome'ẽ va'ekue kyrakue, ha'e uva rykue mymba oapy reve ome'ẽ va'e. Ha'e rami py omboypy ju SENHOR pe ombo'eapo aguã.

<sup>36</sup> Heta va'e kuery ha'e javi reve Ezequias oguerovy'a ete Nhanderuete oipytyvõague, mba'eta ojapopa pojava okuapy vy.

## 30

### Páscoa regua ngaru ojapo okuapyague

<sup>1</sup> Ha'e va'e rire Ezequias omondouka ayvu reraarã Israel ha'e Judá ha'e javi rupi. Efraim ha'e Manassés kuery pe voi ombopara kuaxia Jerusalém py oupa avi aguã, SENHOR pegua oo py Páscoa ára py okaru okuapy aguã SENHOR Israel kuery ruete pe.

<sup>2</sup> Mba'eta huvixa ma guembiguai yvatekueve ha'e Jerusalém pygua kuery ha'e javi pe onhemongeta uka ma mokoĩ jaxyia py Páscoa regua ngaru ojapo aguã re.

<sup>3</sup> Mba'eta oa'angaague ára py porã nda'evei ngaru ojapo aguã, ha'e va'e ára peve sacerdote kuery mbovy'i ete ojeky'a'o uka ramo, ha'e pavẽ e'ÿ teri ono'õ Jerusalém py.

<sup>4</sup> Ha'e nunga rupi heta va'e kuery reve huvixa oikuua ha'e rami.

<sup>5</sup> Ha'e rami vy onhembopy'a Israel kuery ikuiaha'e javi rupi omombe'u uka aguã, Berseba guive Dã peve, Jerusalém py oupa aguã Páscoa regua ngaru SENHOR Israel kuery ruete peguarã. Ha'e va'e ngaru py ha'e javi ete e'ÿ teri ikuai raka'e, ipara oña rami e'ÿ tei.

<sup>6</sup> Ha'e gui huvixa ha'e yvatekueve kuaxia ombopara va'ekue reraa kuery oje'oipa Israel ha'e Judá jave rupi. Huvixa ijayvuague rami vy aipoe'i oje'oivy:

— Israel ramymino kuery, pejevy ju SENHOR Abraão, Isaque ha'e Israel ruetea katy. Ha'e ramo 'rāe ha'e ju ojevy Assíria pygua huvixa po'akaa gui peo jepe va'ekue repyarā.

<sup>7</sup> Pendekuai eme penderu ha'e penderyke'y kuery ikuaiague rami. Ha'e kuery ma ojejavy va'ekue SENHOR guamoī kuery ruete rovai. Ha'e nunga rupi ae omboaxapa imombaarā pe, aŷ pexaa rami ae.

<sup>8</sup> Aŷ gui ma peneakā ratāve eme penderu kuery ikuaiague rami e'ŷ. Pejerovia tema SENHOR re, ha'e peju ixupegua henda iky'a e'ŷ va'e raka'e rā peve guarā oiky'a'o va'ekuea katy. SENHOR Penderuete pe anho pendekuai, ipoxy etea peē kuery áry ou va'ekue oaxa nho aguā.

<sup>9</sup> Mba'eta xapy'a rei rā SENHOR peguarā ju pejeko rerova ramo omboaxy nho 'rā penderyvy ha'e pendera'y kuery escravo-rā ogueraapa pyre, kova'e yvy re ju ha'e kuery ojevypa aguā. Mba'eta SENHOR Nhanderuete nhomboaxy kuaa ha'e poroayvu va'e vy ngova nomo'āi 'rā peē kuerya gui, ixupe ete ri pejeko rerova ramo — he'i okuapy.

<sup>10</sup> Ha'e gui ma ayvu reraa kuery ma tetā nhavō rupi oguata oje'oivy, Efraim ha'e Manassés yvy guive Zebulom peve. Ha'e rami teĩ ojojai rei, ojavyky rei okuapy.

<sup>11</sup> Ha'e rami teĩ ma Aser, Manassés ha'e Zebulom regua amongue onhemō'yvȳ'i reve oje'oi Jerusalém tetā katy.

<sup>12</sup> Judá regua kuery voi oendu opy'a py Nhanderuete opo omoī rā peteĩ rami huvixa ha'e yvatekueve ojapo uka va'ekue ojapo aguā, SENHOR ijayvuague rami vy.

<sup>13</sup> Ha'e gui ma Jerusalém tetā py heta ono'ō okuapy ngaru mbojape imbovua reveguia e'ŷ ojapo aguā. Mokoī jaxyia py heta ete ou okuapy.

<sup>14</sup> Ha'e rami vy ikyre'ŷa oendu reve oipe'apa heravy altar mboae Jerusalém py ikuai va'ekue, altar heakuā porā va'e rapyaty guive. Ha'e va'e ma Cedrom yvjugua py omombopa.

<sup>15</sup> Ha'e ramo mae ma ojuka okuapy vexa'i Páscoa regua, mokoī jaxyia re ha'e catorze araa py. Sacerdote ha'e levita kuery ha'e nunga oexa vy oximbā vy ojeky'a'o ukapa okuapy. Ha'e rami vy ha'e kuery voi ogueru mymba SENHOR pegua oo py oapy reve ome'ē aguā py.\*

<sup>16</sup> Ha'e kuery ma ikuai aguā va'ekue py ae ju ikuai, Nhanderuete rembiguai Moisés lei omboparaague rami vy. Ha'e rami vy sacerdote kuery pe levita kuery mymba ruguykue ome'ē ramo omboayvi okuapy altar áry rupi.

<sup>17</sup> Mba'eta heta teri ikuai onhemboaty va'e kuery regua ndojeky'a'o ukai teri va'ekue. Ha'e nunga rupi ha'eve'ŷ teri va'e kuery re vy vexa'i Páscoa reguarā ogueru va'ekue levita kuery ju ojuka, SENHOR peguarā oiky'a'opa aguā.

<sup>18</sup> Mba'eta heta ete teri ikuai ndojeky'a'o ukai va'ekue: Efraim, Manassés, Issacar ha'e Zebulom kuery va'e regua. Ha'e kuery voi okuapy Páscoa regua re, ipara oña rami e'ŷ teĩ. Ha'e ramo Ezequias ojerure ha'e kuery re. Ha'e vy aipoe'i:

— SENHOR ha'evea rami orerereko va'e, esperdoapa ke

<sup>19</sup> opy'a py ndee SENHOR guamoī kuery ruete ndereka aguā omoī va'e ha'e javi, henda iky'a e'ŷ va'e regua lei rami ndojeky'a'o ukai teri va'e teĩ — he'i.

<sup>20</sup> Ha'e rami Ezequias ojerurea SENHOR oendu vy oiky'a'o heta va'e kuery py'a.

<sup>21</sup> Ha'e rami py Jerusalém py Israel ramymino kuery ikuai va'e ojapo okuapy ngaru mbojape imbovua reveguia e'ŷ. Sete ára re ojapo ovy'a ete reve. Ko'ē nhavō levita ha'e sacerdote kuery oporaei okuapy SENHOR pe, mba'epu omonhendu atā guive SENHOR omboetea rupi.

\* <sup>30:15</sup> Sacerdote kuery oximbā mba'eta na'ikyre'ŷi va'ekue ngaru oiko rā guarā ojeky'a'o uka aguā (versículo 3 ha'e 29.34).

**22** Ha'e gui levita kuery SENHOR pe o'arandua rupi ombo'eapo va'e kuery pe ma Ezequias ijayvu porã'i ombopy'a guaxua rupi. Ha'e ramo sete ára re ha'e kuery okaru okuapy ngaru pygumarã ome'ẽ mbyre re. Ome'ẽ avi peteĩ rami ikuai aguã regua, ha'e oporai okuapy SENHOR guamoĩ kuery ruete pe.

**23** Ha'e gui ijaty va'e kuery ojou porãmba okuapy sete ára re ju ngaru ojapove aguã. Ha'e rami vy ojapove ju oporaia rupi.

**24** Ijaty va'e kuery pe Judá pygua huvixa Ezequias ome'ẽ mil vaka ra'y ha'e sete mil vexa'i ojuka uka va'erã. Ha'e gui yvatekueve ju mil vaka ra'y ha'e dez mil vexa'i avi ome'ẽ ijaty va'e kuery pe. Ha'e gui sacerdote kuery regua heta ete ojeky'a'o uka.

**25** Ha'e rami vy Judá kuery ijaty va'e ha'e javi ovv'a okuapy, sacerdote ha'e levita kuery, Israel gui ou va'ekue ha'e javi reve, amboae regua kuery Israel yvy gui ou va'ekue ha'e Judá pygua kuery ae guive.

**26** Jerusalém tetã py ovv'a ete okuapy. Israel pygua huvixa Davi ra'y Salomão oña guive Jerusalém py ndoikoi teri va'ekue ha'e ramigua ngaru.

**27** Ha'e ramo sacerdote ha'e levita kuery opu'ã okuapy heta va'e kuery ogueroayvu porã aguã. Ha'e ramo ha'e kuery ijayvua ma Nhanderuete 'amba iky'a e'ŷa py onhendu, yvate etea peve.

## 31

**1** Ha'e nunga ha'e javi opa ma jave Israel kuery onhemboatypa va'ekue ma tetã Judá yvy re ikuai va'e rupi oje'oi vy omopẽmba ta'angaa ikuai va'e, oake'opa ta'angaarã yvyra omopu'ã mbyre, ha'e ombovaipa yvy'ã rupi ombojerovia atyrã ojapo pyre, altar Judá rupi ikuai va'ekue, Benjamim, Efraim ha'e Manassés rupi guive, omomba ete peve. Ha'e rami vy mae ma Israel ramymino kuery peteĩ-teĩ ojeyvypa ju oyvy katy, e'ŷ vy guetã katy.

### *Sacerdote ha'e levita kuery peguarã huvixa Ezequias mba'emo ome'ẽ ukaague*

**2** Ezequias omoĩ sacerdote ha'e levita kuery peteĩ-teĩ regua jorire-rire ombo'eapo aguã, ha'e kuery omoĩ ypyague rami ae. Ha'e ramo ha'e kuery ikuai mymba oapy reve ha'e peteĩ rami ikuai aguã regua ome'ẽ aguã rami, ha'e SENHOR pegua oo rokẽ py ombo'eapo ha'e oporaei okuapy aguã guive.

**3** Huvixa ma guymba kuery ae ome'ẽ oapy reve ome'ẽa va'erã. Aje'ive ha'e ka'aru ju 'rã ome'ẽa oapy reve, sábado ára, jaxy pyau'i ha'e ngaru oiko nhavõ guive, SENHOR guigua lei re ipara oinya rami vy.

**4** Ha'e rami vy heta va'e kuery Jerusalém py hekoa va'e pe ijayvu ha'evea rami ome'ẽ aguã re sacerdote ha'e levita kuery peguarã, ha'e va'e kuery SENHOR guigua lei oña rami anho ombo'eapo okuapy aguã.

**5** Ha'e va'e ayvu omombe'ua ramove Israel ramymino kuery oata aguã rami e'ŷ ogueru mba'emo aju omono'õ ypy'i va'ekue iporãgueve, vinho, azeite, ei ha'e mba'ety rupi onhotõ va'ekue guigua ha'e javi. Opa mba'e oguereko va'e gui ogueru okuapy dízimo oata aguã rami e'ŷ.

**6** Ha'e gui Israel ha'e Judá regua Judá yvy re hekoa va'e ma dízimo-rã ogueru okuapy guymba vaka ha'e vexa'i, SENHOR nguuetegueve peguarã omboaxa va'ekue guive. Ha'e nunga omboaty reta joapy e'ŷ-e'ŷ.

**7** Mboapy jaxyta py ma omboypy okuapy omono'õ aguã. Ha'e gui sete jaxyta py mae ma omono'õmba okuapy.

**8** Ha'e gui Ezequias ha'e yvatekueve ou vy ha'e nunga omboaty pyre oexa vy ogueroayvu porã SENHOR, ixupegu Israel kuery guive.

**9** Ha'e gui mba'emo omboaty pyre re Ezequias oporandu sacerdote ha'e levita kuery pe.

**10** Ha'e ramo Zadoque ramymino sacerdote yvateve va'e Azarias ombovai:

— Ha'e nunga gui ma ore kuery rokaru porã rokuapy SENHOR pegua opy oguerua ypya ára guive aŷ peve, ororevyatãmba guive. Ha'e gui hembyre ju oata aguã rami e'ŷ, SENHOR

ojeupegua kuery omoingo porã ramo. Guĩ rami ete tuvixa va'e ma hembyrekue itui – he'i.

<sup>11</sup> Ha'e ramo SENHOR pegua oo py Ezequias ojapo uka mba'emo omoĩ porã atyrã.

<sup>12</sup> Ha'e nunga ojapopaa ma ramo ha'e py omoĩ porã tema mba'emo ome'ẽ mbyre, dízimo ha'e mba'emo SENHOR pe omboaxa pyre. Ha'e nunga re openaa rupi oiko va'e ma levita Conanias. Ha'e rã ipytyvõarã ma tyvy Simei oĩ.

<sup>13</sup> Ha'e gui Conanias ha'e tyvy Simei pytyvõarã ma omoĩ avi Jeiel, Azarias, Naate, Asael, Jerimote, Jozabade, Eliel, Ismaquias, Maate ha'e Benaia. Ha'e va'e kuery ma huvixa Ezequias ha'e Nhanderuete pegua oo re opena va'ety Azarias ae omoĩ.

<sup>14</sup> Ha'e gui levita Imna ra'y Coré okẽ kuaray oua katy oĩ va'e rarõa ma omoĩa avi Nhanderuete pe ome'ẽxe'a'i py ome'ẽ mbyre re opena aguã. Ha'e nungakue ha'e javi omboja'o ju 'rã, SENHOR pe ome'ẽ mbyre, mba'emo iky'a e'ŷ ete va'e guive.

<sup>15</sup> Ha'e va'e rembiguairã ikuai Éden, Miniamim, Jesua, Semaías, Amarias ha'e Secanias. Ha'e kuery ma sacerdote kuery tetã ikuai va'e rupi oje'oi 'rã ha'evea rami guyvy kuery pe omboja'o aguã peteĩ-teĩ regua ikuiaia rami, yvyigüeve ha'e yvatekueve pe guive.

<sup>16</sup> Ha'e rã avakue mboapy ma'etŷ guive va'e kuaxia re hery omboparaa va'ekue ma any guive, mba'eta ha'e kuery ma omoïague rami vy ko'ẽ nhavõ SENHOR pegua opy 'rã oike ombo'eapo aguã.

<sup>17</sup> Sacerdote kuery rery omboparaa peteĩ-teĩ ramoĩ kuery ikuaiague rami, ha'e rã levita kuery vinte ma'etŷ guive va'e rery ma peteĩ-teĩ ombo'eapo aguã omoïague rami vy omboparaa.

<sup>18</sup> Kuaxia re omboparaa avi ha'e kuery regua kyrigue'i, kunhague, ta'y kuery ha'e tajy kuery rery ha'e javi. Heta ete ikuai, mba'eta ha'evea rami ombo'eapo okuapy mba'emo iky'a e'ŷ va'e ikuiaia rupi.

<sup>19</sup> Ha'e gui Arão ramymino sacerdote kuery peteĩ-teĩ tetã yvýry rupi hekoa va'e regua omoĩa hery rupi, sacerdote ha'e levita kuery mboae hery omboparaa va'ekue pe mba'emo omboja'o va'erã.

<sup>20</sup> Ha'e rami aguã huvixa Ezequias ojapo uka Judá yvy ha'e javi rupi. SENHOR nguuete renonde rupi iporã va'e, ha'evea ramigua ha'e anhetê va'e meme ojapo oikovy.

<sup>21</sup> Opy'a ha'e javi py ojapo mba'emo Nhanderuete pegua opy, lei ha'e ojapo uka pyre rami vy. Nhanderuete oekaa rupi ojapo vy oiko porã.

## 32

*2 Reis 18.13-18; Isaías 36.1-3*

<sup>1</sup> Ha'e gui ha'e rami Ezequias anhetê rupi oiko rire teĩ Síria pygua huvixa Senaqueribe kuery ou Judá yvy re. Ha'e kuery ovaëmba ma vy ojoko tetã ikorapa va'e ha'e javi, oipe'axe vy.

<sup>2</sup> Ha'e gui Senaqueribe kuery ou va'ekue Jerusalém tetã re opu'ã ta maa Ezequias oexa vy

<sup>3</sup> onhemongeta uka guembiguai yvatekueve ha'e avakue ipy'a guaxukueve pe. Ha'e rami vy onhemboyp'a yvu tetã rovai rupi ikuai va'e ojao'ipa aguã. Ha'e ramo ha'e kuery oipytyvõ okuapy.

<sup>4</sup> Ha'e rami vy heta va'e kuery onhemboaty okuapy vy ojao'ipa yvu ikuai va'e ha'e javi, yvyugua rupi yy oxyry oiny va'e guive. Ha'e vy aipoe'i:

– Mba'e re tu jaeja rive Assíria pygua huvixa kuery ou vy yvu ikuai va'e ojoupa aguã?  
– he'i okuapy.

<sup>5</sup> Ha'e ramo huvixa ipy'a guaxu vy omoatyrõ ukapa ju tetã kora ivaipaague ha'e javi, ha'e hi'áry rupi ma ojapo torre. Ojapo avi kora hovai rupi oĩ va'erã, ha'e tetã Davi rekoague py ojapo Milo korarã. Ojapo avi tembiporu ha'e hu'y jokoarã oata aguã rami e'ŷ.

<sup>6</sup> Heta va'e kuery rerekorã omoĩ avi xondaro ruvixa. Ha'e rami vy tetã rokẽ rexei omboatypa vy ha'e kuery pe ijayvu omboyp'a guaxua rupi. Ha'e vy aipoe'i:

**7** — Penembaraete ke, pendepy'a guaxu guive. Pekyje eme, penhemondyi eme guive Assíria pygua huvixa gui, neĩ hupive ou va'e kuery gui heta teĩ. Mba'eta hexeve ikuai va'e gui ma nhande kuery reve peteĩ oiko pavẽ gui ipo'akave va'e.

**8** Ha'e kuery reve ikuai va'e ma to'o guigua ijyva va'e. Ha'e rã nhandereveguia ma SENHOR Nhanderuete. Ha'e ma nhanepytyvõ aguã rami oiko, nhandere opu'ã va'e kuery rovai opu'ã aguã — he'i. Ha'e rami Judá pygua huvixa Ezequias ijayvu ramo heta va'e kuery ipy'a guaxuve okuapy.

*2 Reis 18.19-37; Isaías 36.4-22*

**9** Ha'e rire Assíria pygua huvixa Senaqueribe oxondaro kuery reve Laquis tetã ojoko okuapygui omondouka guembiguai kuery Jerusalém py Judá pygua huvixa Ezequias-a py. Ha'e vy aipoe'i uka:

**10** — Po rami Assíria pygua huvixa Senaqueribe ijayvu: “Mba'e nunga re tu peẽ kuery pejerovia pekuapy? Mba'eta Jerusalém tetã pejoko ukapa ri.

**11** Penhembotavy uka eme Ezequias pe, karuai ha'e yuvei gui rive pemanomba e'ỹ aguã. Mba'eta ha'e va'e aipoe'i: ‘Assíria pygua huvixa po gui ma SENHOR Nhanderuete nhandereraa jepe 'rã', he'i va'ekue teĩ.

**12** Ha'e gui Ezequias ae e'ỹ teve Penderuete pegua pembojeroviaaty ha'e altar ikuai va'e mboipaare? Ha'e vy Judá ha'e Jerusalém pygua kuery pe ijayvu vy aipoe'i va'ekue: ‘Peteĩ'i altar oĩ va'e py 'rã pejero'a. Ha'e va'e áry anho 'rã peapy heakuã porã va'e', he'i va'ekue.

**13** Peẽ kuery ndapeikuaai teve xee ha'e xeramoĩ kuery yvy regua kuery ha'e javi re rojapoague? Ha'e pygua kuery ruete ra'angaa ri ty'y ogueraa jepe raka'e xepo gui?

**14** Mba'eta xeramoĩ kuery omomba va'ekue ruete ra'angaa kuery va'e regua mava'e tu ojeupergua kuery ogueraa jepe raka'e xepo gui? Ha'e gui penderuete ju mba'exa tu xepo gui pendereraa jepe kuaa ta?

**15** Ha'e nunga rupi aỹ gui ma penhembotavy ukave eme Ezequias pe. Ixupe pejererek uka eme, neĩ pejerovia eme hexe. Mba'eta peteĩve yvy re ikuai va'e ruete, peteĩve yvy regua ruete ta'angaa nda'ipoi xepo gui ojeupergua kuery ogueraa jepe va'ekue, xeramoĩ kuery po gui e'ỹ guive. Ha'e gui penderuete katuve ma napendereraa jepei 'rã ri xepo gui', he'i uka teĩ.

**16** Ha'e rami vy Senaqueribe rembiguai kuery ijayvuve tema oje'oivy SENHOR Nhan-deruete ha'e hembiguai Ezequias rovai rupi.

**17** Senaqueribe ombopara avi kuaxia SENHOR Israel kuery rueteombojaru reia rupi. Hexe ijayvu vai vy aipoe'i: “Amboae yvy regua ruete ra'angaa xepo gui ojeupergua kuery ndogueraa jepeiaque rami ae avi Ezequias ruete voi ojeupergua kuery ndogueraa jepei avi 'rã xepo gui”, he'i.

**18** Hembiguai kuery voi judeu kuery ayvu py ojapukai atã okuapy Jerusalém pygua kuery tetã kora áry ikuai va'e rovai. Tetã re ipo'akaxe vy omondyi ha'e omongyea rupi ijayvu teĩ.

**19** Jerusalém pygua kuery ruete re ijayvu yvy regua kuery ruete ra'angaa re rami rive, avakue opo py ojapo va'ekue meme teĩ.

**20** Ha'e rami teĩ huvixa Ezequias ha'e Amoz ra'y profeta Isaías ojerure ha'e nunga re, Yva pygua pe ojapukai.

*Assíria pygua xondaro kuery omombaague*

**21** Ha'e gui ma SENHOR omondouka peteĩ anjo Assíria pygua huvixa rembiguai kuery ikuaria py. Ha'e rami vy ojukapa avakue ipy'a guaxukueve, huvixa kuery ha'e yvatekueve ha'e javi. Ha'e ramo huvixa ma oximbaa ngova re oexa uka reve onha ju ovv oyvy katy. Ha'e rami vy nguuete ra'angaa pegua opy oike ramo ta'y kuery ae ojuka kyxe py.

<sup>22</sup> Ha'e rami py SENHOR ogueraa jepe Ezequias ha'e Jerusalém pygua kuery ha'e javi, Assíria pygua huvixa Senaqueribe ha'e hovaigua kuery ha'e javi po gui, ha'e kuery pe ome'ẽ guive ov'y'a aguã opa rupi.

<sup>23</sup> Ha'e ramo heta ete Jerusalém py ou vy ogueru okuapy SENHOR pe ome'ẽ va'erã, ha'e Judá pygua huvixa Ezequias pe voi ogueru mba'emo hepyve va'e. Ha'e rami rire yvy jave regua kuery omboete pavẽ.\*

### *2 Reis 20.1-11; Isaías 38.1-8*

<sup>24</sup> Ha'e va'e jave py Ezequias imba'eaxy oupy vy omano aguã rami itui. Ha'e rami vy SENHOR pe ojerure ramo ombovai vy peteĩ mba'e oexa uka oikuua aguã.

<sup>25</sup> Ha'e rami teĩ Ezequias ma Nhanderuete omoingo porãague rekovia mba'eve ndojapoi. Ha'e rami 'rãgue py opy'a py onhembovate rei. Ha'e nunga rupi hexe ou ipoxy etea, Judá ha'e Jerusalém pygua kuery re guive.

<sup>26</sup> Ha'e gui ma Ezequias opy'a py onhemo'yvy'i ju onhembovateague gui, Jerusalém pygua kuery reve. Ha'e nunga rupi huvixa Ezequias oĩ teria ja SENHOR poxya ndouwei ha'e kuery rovai.

<sup>27</sup> Ha'e gui Ezequias ma oguerekopa oguerovy'aa anho oata rei aguã rami e'ŷ. Ojeupe guarã ojapo uka prata omoĩ porã atyrã, ouro, ita porãgueve, tembi'u irûrã, hu'y jokoa ha'e opa marãguia iporãve va'e oĩ aguã.

<sup>28</sup> Ojapo uka avi mba'emo ra'yigue omono'õ mbyre omoĩ porã atyrã, vinho ha'e azeite guive. Guymba kuery opa marãguia oguereko va'e ikuai atyrã voi ojapo, vexa'i korarã guive.

<sup>29</sup> Ojapo uka avi tetã. Guymba kuery vexa'i ha'e vaka ra'y oguereko avi oata aguã rami e'ŷ, ixupe Nhanderuete heta raxa ome'ẽ ramo.

<sup>30</sup> Ha'e va'e Ezequias ae ojao'i yvy'ã Giom guive yvu gui oxyry va'e, ha'e vy ojapo tetã Davi rekoague regua kuaray oua katy rupi ju oxyry aguã rami. Mba'emo ojapoa ha'e javi py Ezequias oiko porã.

<sup>31</sup> Ha'e rami teĩ ha'e oĩa py Babilônia pygua yvatekueve ayvu reraarã omondouka oikuua pota aguã ijyvy re iporã va'e ikuai va'e re. Ha'e va'e jave py ma Nhanderuete noipytyvõi merami, anhetẽ pa ipy'a re oĩ va'e ha'e javi re oikuua pota aguã.

### *2 Reis 20.20,21*

<sup>32</sup> Ha'e gui oĩve rei tema Ezequias rekokue regua. Ha'e rami avi mba'emo porayvua rupi ojapo va'ekue ha'e javi noĩ'rã teve kuaxia Amoz ra'y profeta Isaías mba'emo oexa va'ekue, ha'e Judá ha'e Israel pygua huvixa kuery rekokue oĩa re?

<sup>33</sup> Ha'e gui Ezequias ndoikoveei'i ma guamoĩ kueryague rami. Ha'e ramo onhono porã yvy'ã re Davi ra'y kuery rupa ikuaiia py. Ha'e omano ramo Judá ha'e Jerusalém pygua kuery ha'e javi ima'endu'a porã okuapy. Ha'e gui ta'y Manassés ju oĩ nguu rekovia.

## 33

### *2 Reis 21.1-9*

<sup>1</sup> Manassés ma doze ma'etõ oguereko jave py oĩ huvixarã. Ha'e vy cinqüenta e cinco ma'etõ re opena Jerusalém py.

<sup>2</sup> Ha'e va'e ma ha'eve'ŷ va'e ojapo oikovy SENHOR renonde rupi, amboae regua kuery Israel kuery renonde gui SENHOR oipe'apa va'ekue ikuaiague rami ae ju.

<sup>3</sup> Ha'e rami vy omoatyrõmba ju ombojeroviaaty yvy'ã rupi ikuai va'e nguu Ezequias ombovaipa va'ekue, ojapo avi altar Baal kuery peguarã. Omopu'ã avi imo'amy ta'angaarã yvyra guigua. Ha'e vy guenapy'ã re oĩ yva re jaxy-tata ikuaiia katy omboetea rupi.

<sup>4</sup> SENHOR pegua opy rupi eteve voi ojapo altar-rã, SENHOR aipoe'ague: "Jerusalém tetã py amoĩ'rã xerery raka'e rã peve guarã", he'ague py.

\* <sup>32:23</sup> 2 Reis 19.35-36; Isaías 37.36-37

<sup>5</sup> Ha'e vy SENHOR pegua oka mokoïve oĩ va'e rupi ojapo avi altar jaxy-tata yva re ikuai va'e ha'e javi peguarã.

<sup>6</sup> Ha'e rami vy yvyugua Hinom ra'y rekoague py gua'y ae oapy reve ome'ẽ, ha'e arai rupi rive imba'ekuaa ha'e oexa'ã oikovy. Ha'e vy imba'evykyra rupi oiko, ha'e omanogue mboayvua ha'e imba'evyky va'e kuery pe rive oporandu oikovy. Ha'e rami vy SENHOR renonde rupi ojapo oikovy ha'eve'õ va'e meme, ombopoxy aguã rami rive.

<sup>7</sup> Ha'e vy yvyra gui ta'angaarã ojapo uka va'ekue omoõ avi Nhanderuete pegua opy Davi ha'e ta'y Salomão pe aipoe'iague py: "Kova'e oo ha'e Jerusalém tetã aiporavo Israel regua ha'e javi gui, ha'e py xerery amoõ aguã raka'e rã peve guarã.

<sup>8</sup> Mba'eta xee namoxêvei 'rã Israel kuery tuu kuery yvyrã ame'ẽ va'ekue gui, xapy'a rei xeguigua lei, anhombo'ea ha'e aipotaa xerembiguai Moisés pe ame'ẽ uka va'ekue rupi ha'e kuery ikuai ramo", he'iague py.

<sup>9</sup> Ha'e rami py Manassés ojapo Judá ha'e Jerusalém pygua kuery ojejavý aguã rami. Ha'e ramo amboae regua Israel kuery renonde gui SENHOR omomba va'ekue gui eteve voi heko vaive okuapy.

### *Manassés ombo'aa jave ojerureague*

<sup>10</sup> Manassés ha'e ixupeguia kuery pe SENHOR ijayvu teĩ noendu potai okuapy.

<sup>11</sup> Ha'e nunga rupi ha'e kuery re SENHOR ombou Assíria pygua huvixa rembiguai yvatekueve oxondaro kuery reve. Ha'e va'e kuery ou vy ojopy okuapy Manassés ty'aõ py. Ha'e rami vy corrente py ju ojokua reve ogueraa Babilônia katy.

<sup>12</sup> Ha'e ramo ojexavaia oendu vy ojerure oiny SENHOR nguuete pe. Opa mba'e py onhemoyvy'i guamoõ kuery ruete renonde py.

<sup>13</sup> Ha'e rami ojerure ramo Nhanderuete omboaxy. Ojerurea oendu vy ojapo Jerusalém tetã katy ju ojevy aguã rami, huvixa ju oĩ aguã. Ha'e ramo mae ma Manassés oikuua SENHOR ae Nhanderuete oikoa.

<sup>14</sup> Ha'e va'e rire ma tetã Davi rekoague hovai katy rupi ojapo ikorarã, Giom regua kuaray oua katy, yvyugua rupi ha'e Okẽ Pira 'epy va'e rupi jaikea py. Ofel rupi ojapo ikora yvate ete va'erã. Ha'e gui Judá re tetã ikorapa va'e ha'e javi rupi omoõ harðarã kuery huvixa reve.

<sup>15</sup> Ha'e rami vy SENHOR pegua opy gui oipe'apa tuuete ramigua, ta'angaa hi'aõ va'ekue voi. Oipe'a avi altar SENHOR pegua yvyty áry ojapo pyre, Jerusalém tetã ha'e javi gui guive. Ha'e va'e ha'e javi omombo tetã gui mombyry'i.

<sup>16</sup> Ha'e rã SENHOR pegua altar ma omoatyrõmba ju, ha'e hi'áry ome'ẽ hexeve peteĩ rami ju ikuia regua ha'e oguerovy'aa rupigua. Ha'e rami vy Judá kuery pe ijayvu SENHOR Israel kuery ruete pe anho ikuai aguã re.

<sup>17</sup> Ha'e ramive ma yvy'ã ikuai va'e áry rupi teri heta va'e kuery mba'emo ome'ẽ okuapy, teĩ SENHOR Nhanderuete pe anho guive.

### *2 Reis 21.17,18*

<sup>18</sup> Ha'e gui oĩve rei tema Manassés rekukue regua. Ha'e rami avi Nhanderuete pe ojerureague, ha'e ixupe SENHOR Israel kuery ruete rery rupi profeta kuery ijayvuague, ha'e gui mba'emo ojapo va'ekue ha'e javi oĩ 'rã kuaxia Israel pygua huvixa kuery rekukue oĩa re.

<sup>19</sup> Ha'e ojerureague, Nhanderuete omboaxyague, ha'e ojejavýague ha'e javi, heko vai reiague, ha'e gui yvy'ã áry rupi ombojerovia atyrã ha'e yvyra gui ta'angaarã ojapoague, ha'e ta'angaa ita guigua voi onhemoyvy'i e'õ mbove omopu'ãmbaague, ha'e nunga ha'e javi ma oĩ profeta kuery rekukue ombopara pyre re.

<sup>20</sup> Ha'e gui Manassés ndoikovevei'i ma guamoõ kueryague rami. Ha'e ramo onhono porãa hekoague py ae. Ha'e gui ta'y Amom ju oĩ nguu rekovia.

### *2 Reis 21.19-26*

<sup>21</sup> Amom ma vinte e dois ma'etŷ oguereko huvixa oĩ ypy'i jave py. Ha'e gui mokoĩ ma'etŷ re ete'i opena Jerusalém py.

<sup>22</sup> Ha'e ma SENHOR renonde rupi ha'eve'ŷ va'e anho ojapo oikovy, nguu Manassés ojapoague rami. Mba'eta mba'emo ra'angaarã tuu Manassés ojapo va'ekue ha'e javi pe ta'y Amom ju ome'ẽ tema mymba, ha'e nunga pe rive oiko.

<sup>23</sup> Va'eri nguu Manassés oikoague rami e'ŷ Amom ma nonhemo'yvy'ixei SENHOR renonde py. Ha'e rami 'rāgue py ojejavyyve tema ovv.

<sup>24</sup> Ha'e ramo hovai hembiguai kuery jogueroayvu vy hoo py ae ojuka okuapy.

<sup>25</sup> Ha'e rami teĩ ha'e va'e yvy pygua kuery ojukapa ju huvixa Amom jukaare kuery ha'e javi. Ha'e rami vy hekoria omoĩ ju ta'y Josias.

## 34

### 2 Reis 22.1,2

<sup>1</sup> Josias ma oito ma'etŷ oguereko huvixa oĩ ypy'i jave py. Ha'e vy trinta e um ma'etŷ re opena Jerusalém py.

<sup>2</sup> Ha'e va'e ma SENHOR renonde rupi ha'evea ramigua ojapo oikovy, guamoĩ Davi ojapoague ha'e javi rupi. Ha'e vy ndojep'e ai oiporu kuaa katy, neĩ oiporu kuaa e'ŷa katy ma voi.

### 2 Reis 23.4-20

<sup>3</sup> Oito ma'etŷa re ma huvixa Josias oĩ jave py kunumi'i teri reve omboypy guamoĩ Davi ruete oeka aguã. Ha'e gui doze ma'etŷa py ma omboypy Judá ha'e Jerusalém oiky'a'o aguã yvy'ã áry rupi ombojerovia atyrã ojapo pyre gui, ta'angaarã yvyra omopu'ã mbyre, ha'e gui ta'angaa ita ha'e mba'emo ryku gui ojapo pyre ha'e javi gui.

<sup>4</sup> Ha'e ae oexaa py oity Baal kuery pegua altar ikuai va'ekue. Ha'e va'e áry rupi altar heakuã porã va'e rapyaty omoĩ mbyre ma ha'e ae ombovopa. Omopẽmba avi ta'angaarã yvyra omopu'ã mbyre, ha'e mba'emo ra'angaa ita ha'e mba'emo ryku gui ojapo pyre ha'e javi. Ha'e nunga omongu'ipa ma vy iku'ikue omombopa ha'e nunga pe mba'emo ome'ẽ va'ekue rupa rupi rive.

<sup>5</sup> Ha'e nunga pegua sacerdote ikuai va'ekue kãgue ma oapypa altar ha'e kuery ombojerovia áry ae. Ha'e rami py oiky'a'opa ju Judá ha'e Jerusalém ha'e javi rupi.

<sup>6</sup> Ha'e rami ae avi ojapo Manassés, Efraim ha'e Simeão regua tetã ikuai va'e rupi, Naftali yvy ha'e javi rupi peve, tekoague ikuai va'e rupi guive.

<sup>7</sup> Altar ha'e ta'angaa yvyra ha'e ita guigua oitypa ma vy omongu'ipa ju. Omboa'ypa avi altar heakuã porã va'e rapy atyrã Israel yvy jave rupi ojapo pyre. Ha'e gui ma ojevy ju Jerusalém katy.

### 2 Reis 22.3-7

<sup>8</sup> Dezoito ma'etŷa re ma huvixa Josias oĩ jave py ha'e va'e yvy ha'e Nhanderuete pegua oo oiky'a'o ukapa ma vy omboypy SENHOR nguuete pegua oo omoatyrõ uka aguã. Ha'e rami vy omondouka Azalias ra'y Safã, tetã re opena va'ety Maaséias, ha'e Joacaz ra'y kuaxia mboparaaty Joá.

<sup>9</sup> Ha'e kuery ma sacerdote yvateve va'e Hilquias-a py oje'oi vy ixupe ome'ẽ peráta SENHOR pegua opy ogueru pyre levita regua okẽ rarõa kuery omoĩ porã va'ekue. Ha'e va'e peráta ma Manassés, Efraim ha'e Israel kuery ikuiaia ha'e javi gui omono'õ mbyre, Judá ha'e Benjamim gui, Jerusalém tetã gui guive.

<sup>10</sup> Ha'e va'e ma ha'e kuery ome'ẽ okuapy SENHOR pegua oo py omba'eapo va'e kuery re opena va'e pe, omba'eapoague repy ome'ẽ aguã, oo omoatyrõ vy ombopyaupa ju aguã.

<sup>11</sup> Oo apoa ha'e ita re omba'eapo va'e kuery pe ome'ẽ peráta ita omoatyrõ mbyre ojogua aguã, ha'e yvyra oo ytarã ha'e hi'áry ipyaxa va'erã, Judá pygua huvixa kuery ivaipa aguã rami rive oeja rire.

<sup>12</sup> Ha'e va'e avakue ma anhetē rupi meme ikuai omba'epoa py. Ha'e kuery re opena va'e ma levita regua Merari ramymino kuery Jaate ha'e Obadias, Coate ramymino kuery Zacarias ha'e Mesulão guive, omba'epo va'e kuery re openaa rupi ikuai.

<sup>13</sup> Ha'e gui levita kuery mba'epu ombopu kuaa va'e opena avi okuapy mba'emo reraa kuery re, mba'emo py omba'epo va'e kuery ha'e javi re guive. Ha'e rā levita kuery mboae ma kuaxia re opena okuapy, ha'e'ý vy joe openaa ha'e okẽ rarõa rupi ikuai.

*2 Reis 22.8-10*

<sup>14</sup> Ha'e gui peráta SENHOR pegua opy ogueru pyre oguenoëa jave ma sacerdote Hilquias ojou kuaxia para SENHOR lei Moisés pe ome'ẽ uka va'ekue oña.

<sup>15</sup> Ha'e rami vy Hilquias aipoe'i kuaxia re opena va'ety Safã pe:

— SENHOR pegua opy xee ajou kuaxia para lei oña — he'i.

<sup>16</sup> Ha'e gui kuaxia ma Safã pe Hilquias ome'ẽ ramo ogueraa huvixa pe. Ha'e vy ixupe omombe'u vy aipoe'i:

— Nerembiguai kuery ojapopa ma rejapo uka va'ekue ha'e javi.

<sup>17</sup> Ha'e rami vy peráta SENHOR pegua opy oĩ va'ekue ha'e kuery oipapa ma vy ome'ẽmba omba'epo va'e kuery re opena va'e po py, ha'e mba'emo apoa kuery pe — he'i.

<sup>18</sup> Ha'e gui Safã omombe'uve ju huvixa pe. Ha'e vy aipoe'i:

— Sacerdote Hilquias ma xevy ome'ẽ kova'e kuaxia para — he'i. Ha'e rami vy huvixa renonde py Safã ogueroayvu.

*2 Reis 22.11-20*

<sup>19</sup> Ha'e gui ma kuaxia para lei oña ogueroayvu rā huvixa oendu vy omendoropa oao.

<sup>20</sup> Ha'e rami vy huvixa ijayvu Hilquias pe, Safã ra'y Aicão, Mica ra'y Abdom, nhomongeta va'ety Safã ha'e guembiguai Asaías pe. Ha'e vy aipoe'i ha'e kuery pe:

<sup>21</sup> — Tapeo ke, SENHOR pe peporandu uka xerekó re, ha'e Israel ha'e Judá pygua kuery ha'e javi re. Mba'eta nhande pavẽ áry SENHOR ombou opoxy etea, mba'eta kova'e kuaxia para re ayvu oĩ va'e rupi nhaneramoï kuery nda'ikuai raka'e, ipara oĩ va'e ha'e javi ndojapoi vy — he'i.

<sup>22</sup> Ha'e ramo Hilquias ha'e huvixa omondouka va'ekue mboae reve oje'oi Jerusalém tetã yvy'ã guy katy profeta kunha Hulda oikoa py. Ha'e va'e ma Harás ra'y Tocate ra'y Salum sacerdote kuery ao re opena va'ety ra'yxy. Ha'e gui kunha va'e pe ha'e kuery omombe'upa okuapy ha'e nunga.

<sup>23</sup> Ha'e ramo ha'e kuery pe kunha va'e aipoe'i:

— Po rami SENHOR Israel kuery ruete aipoe'i uka: Aipopeje ava xea py penembouare pe:

<sup>24</sup> Po rami SENHOR ijayvu: “Ma'ẽ, mba'emo vai ambou 'rā kova'e tekao ha'e apy ikuai va'e áry, ayvu vai kuaxia para Judá pygua huvixa pe ogueroayvuague ha'e javi rami vy.

<sup>25</sup> Mba'eta ha'e kuery xerejapa vy amboae regua tuuete ramigua kuery pe rive oapy okuapy heakuã porã va'e, opo py mba'emo ojapo va'ekue py xembopoxy aguã rami. Ha'e nunga rupi xepoxya ou ta ma kova'e tekao áry, ndoguei 'rā guive”, he'i.

<sup>26</sup> Ha'e gui pemombe'u 'rā Judá pygua huvixa SENHOR pe peporandu uka aguã penembouare pe: “Po rami SENHOR Israel kuery ruete ijayvu, ayvu rendu va'ekue omombe'u porãve vy:

<sup>27</sup> ‘Ndee ma kova'e tekao ha'e apy hekoáva rovai xeayvu rā rendu va'ekue, ha'e xee SENHOR renonde py renhemó'yvy'í vy ndeao remondoro ha'e rejae'o va'ekue guive. Ha'e ramo xee aendu', he'i SENHOR.

<sup>28</sup> ‘Ha'e nunga rupi xee romombytu'u 'rā neramoï kueryague rami, ha'e rā nenhono porãa 'rā. Ha'e gui ndee ae nderexai 'rā mba'emo vai kova'e tekao re ambou rā', he'i.”

Ha'e ramo kunha va'e ombovaiague ha'e kuery omombe'u okuapy huvixa pe.

*2 Reis 23.1-3*

<sup>29</sup> Ha'e rami rā huvixa ijayvu nhomongeta va'ety Judá re ha'e Jerusalém py ikuai va'e onhemboatypa okuapy aguã.

<sup>30</sup> Ha'e gui SENHOR pegua oo py huvixa oo Judá regua avakue, Jerusalém pygua, sacerdote, levita ha'e heta va'e kuery ha'e javi reve, yvyigueve ha'e yvatekueve guive. Ha'e kuery ha'e javi oendua py ogueroayvu kuaxia para SENHOR pegua opy ojou pyre re guexeve guarã ojapo va'ekue regua ayvu oĩ va'e ha'e javi.

<sup>31</sup> Huvixa hi'añaty py ae opu'ã ho'amy vy SENHOR renonde ojapo ixupe anho ha'e kuery ikuai aguã, ha'e vy opy'a ha'e onhe'ẽ ha'e javi py ojapopa okuapy aguã ha'e ojapo uka va'ekue, ijayvua ha'e oipotaa, ha'e rami vy ayvu kuaxia para re oĩ va'e rupi ikuai aguã, SENHOR guexeve guarã ojapo va'ekue rupi anho.

<sup>32</sup> Ha'e ramo Jerusalém ha'e Benjamim py ikuai va'e ha'e javi onhemboayvu okuapy ha'e va'e ayvu rupi ikuai aguã re. Ha'e rami vy Jerusalém pygua kuery ha'e javi ikuai Nhanderuete guamoõ kuery ruete va'e guexeve guarã ojapo va'ekue rupi.

<sup>33</sup> Ha'e gui Josias oipe'apa ojeguarupy Israel kuery oyvy re oguereko va'ekue ha'e javi. Ha'e rami vy ojapo Israel re hekoa va'e ha'e javi SENHOR nguuete pe anho ikuai aguã rami. Ha'e rami rire ha'e oikovea ja ha'e kuery ndojep'e ai SENHOR guamoõ kuery ruete pe ikuiai gui.

## 35

### 2 Reis 23.21-23

<sup>1</sup> Ha'e gui huvixa Páscoa ára py Josias ojapo SENHOR pegua ngaru Jerusalém py. Ha'e ramo jypyguia jaxy a catorze araa py ojuka okuapy Páscoa regua vexa'i.

<sup>2</sup> Ha'e omoõ sacerdote kuery om̄ba'eapo aguã rami. Ha'e vy ombopy'a guaxuve SENHOR pegua opy rupi om̄ba'eapoa py.

<sup>3</sup> Ijayvu avi levita kuery SENHOR peguarã ojeky'a'o uka va'ekue Israel kuery ha'e javi mbo'ea rupi ikuai va'e pe. Ha'e vy aipoe'i:

— Lei ryru iky'a e'ŷ va'e ma pemoõ ju oo hendarã Davi ra'y Israel pygua huvixa Salomão ojapo va'ekue py. Ndapevoyivei ma 'rã pendeaxi'y áry. Pemba'eapo 'rã SENHOR Penderuete pe, ixupegua Israel kuery pe guive.

<sup>4</sup> Peiko katu ke peteĩ-teĩ regua pendekuaia rami pemba'eapo aguã, penemoõague rami, pendevy Israel pygua huvixa Davi ha'e ta'y Salomão ijayvuague rami vy.

<sup>5</sup> Pemba'eapo ke henda iky'a e'ŷ va'e py, heta va'e kuery penderyvy ikuai va'e peteĩ-teĩ regua rekovia penemoõague rami. Heta va'e kuery peteĩ-teĩ regua rekovia toĩ peteĩ levita kuery va'e regua.

<sup>6</sup> Ha'e rami vy pejuka 'rã vexa'i Páscoa ára pyguarã. Pejeky'a'o uka reve perekó katu 'rã penderyvy kuery ho'u va'erã. Pejapopa tema SENHOR oayvu Moisés pe omombe'u uka va'ekue rami vy — he'i.

<sup>7</sup> Ha'e gui ma heta va'e kuery ha'e javi pe Josias ome'ẽ vexa'i ha'e kavara. Guymba kuery regua ae ome'ẽ Páscoa ára py ojuka va'erã. Ha'e javi vy trinta mil mymba ome'ẽ ha'e py heta va'e kuery mbovy pa ikuiai rami. Vaka ra'y ma três mil ju huvixa ome'ẽ, guymba kuery va'e regua meme.

<sup>8</sup> Hembiguai yvatekueve voi ome'ẽxe'a'i py avi ome'ẽ heta va'e kuery peguarã, sacerdote ha'e levita kuery pe guive. Nhanderuete pegua opy rupi openaa va'ety Hilquias, Zacarias ha'e Jeiel ma sacerdote kuery pe ome'ẽ dois mil e seiscentos vexa'i ha'e kavara, ha'e gui trezentos vaka ra'y Páscoa ára py oapy va'erã.

<sup>9</sup> Ha'e gui tyvy kuery Conanias, Semaías ha'e Natanael, ha'e gui levita kuery ruvixa Hasabias, Jeiel ha'e Jozabade reve ma levita kuery mboae pe ome'ẽ cinco mil vexa'i ha'e kavara, ha'e gui quinhentos vaka ra'y Páscoa ára py ome'ẽ va'erã.

<sup>10</sup> Ha'e rami py oguereko katupa ha'e kuery ojapo va'erã. Sacerdote kuery omoña ikuai aguã va'ekue py, levita kuery voi omoña avi peteĩ-teĩ regua om̄ba'eapo aguã rami, huvixa ojapo ukaague rami meme.

<sup>11</sup> Ha'e gui ma ojuka okuapy vexa'i Páscoa ára pyguarã ome'ẽ va'ekue. Huguykue ma levita kuery po gui sacerdote kuery ojopy vy omboayvi okuapy, oipiro avi ojuka va'ekue.

**12** Omboja'o okuapy heta va'e kuery oapy reve ome'ẽ va'erã, peteĩ-teĩ regua ikuaria rami, heta va'e kuery ae SENHOR pe ome'ẽ aguã, Moisés kuaxia omboparaague rami vy. Ha'e rami ae avi ojapo vaka ikuai va'e re.

**13** Tata py oexy okuapy vexa'i Páscoa ára pygua, hekorã oeja pyre rami vy. Oja py ombojoy okuapy ome'ẽmby iky'a e'ŷ va'e, oja guaxu ha'e oja pe py guive. Ha'e gui levita kuery ju omboja'opa okuapy heta va'e kuery ha'e javi pe.

**14** Ha'e va'e rire ma ojeupe guarã ju oexy okuapy, sacerdote kuery peguarã guive. Mba'eta sacerdote kuery Arão ramymino ikuai va'e ma pytû peve omba'eapo mymba ojukaa ha'e ikyrakue rapya rupi. Ha'e nunga rupi levita kuery ojeupe guarã ae oexy, sacerdote kuery Arão ramymino ikuai va'e pe guive.

**15** Ha'e gui Asafe ramymino kuery oporaei va'ety ikuai va'e ma ikuai aguã py meme ikuai, Davi ojapo ukaague rami vy, ha'e gui Asafe, Hemã ha'e huvixa pegua profeta Jedutum ojapo ukaague rami. Okẽ rarõa kuery voi okẽ nhavõ rupi ikuai. Neĩ peteïve ma voi ndojepé'ai okẽ oarõa gui, ha'e kuery peguarã tyke'y kuery levita regua oexy avi ramo.

**16** Ha'e rami py ha'e va'e ára peteĩ-teĩ regua omoimbaa SENHOR pe omba'eapo aguã py, Páscoa ára ngaru ojapo ha'e SENHOR pegua altar áry mymba ome'ẽ aguã, huvixa Josias ojapo ukaague rami vy.

**17** Ha'e va'e jave py Israel kuery ha'e py ikuai va'e ojapo okuapy ngaru Páscoa ára py, ha'e gui ngaru mbojape imbovua revegua e'ŷ ju. Sete ára re ojapo okuapy.

**18** Páscoa ára pygua ngaru ha'e ramigua Jerusalém py ndojapoai teri profeta Samuel oikoa ára guive. Mba'eta peteïve huvixa Israel py Páscoa ára pygua ngaru ndojapoi va'ekue Josias ngaru ojapoague ramigua, sacerdote ha'e levita kuery reve, ha'e gui Judá ha'e Israel kuery ha'e py ikuai va'e ha'e Jerusalém pygua kuery ha'e javi reve.

**19** Dezoito ma'etýa re ma huvixa Josias oĩ jave py Páscoa ára pygua ngaru ojapo.

### 2 Reis 23.28-30

**20** Ha'e nunga oikopa rire Josias templo omoatyrõ ukapa ma ramo ou Egito pygua huvixa Neco, Carquemis tetã py joe opu'ã aguã Eufrates yakã yvýry. Ha'e ramo Josias voi oẽ ový ha'e kuery re opu'ã aguã.

**21** Ha'e ramo Josias oĩ py Neco ombou ayvu reraarã kuery. Ha'e vy aipoe'i uka: "Judá pygua huvixa, mba'e tu areko ndereve? Xee ma aŷ nderovai guarã e'ŷ aju, xere opu'ã va'e kuery rovai anho. Ha'e gui Nhanderuete ijayvu xepojavave'i nho aguã re. Enheangu ke Nhanderuete re repu'ã e'ŷ aguã, ha'e ju nemomba e'ŷ aguã", he'i uka.

**22** Ha'e rami teĩ huvixa Josias guakykue re ndojevyi. Ha'e rami 'rãgue py amboae rami onhemonde ha'e kuery re opu'ã aguã. Noendu potai Nhanderuete ayvu rupi Neco ijayvuague re. Ha'e rami vy oo nho Megido yvyugua katy joe opu'ã aguã.

**23** Ha'e gui ma huvixa Josias-a katy guyrapa revegua kuery omombo okuapy. Ha'e ramo aipoe'i guembigui kuery pe:

— Xepe'a ke apy gui, mba'eta xenhyvõa ete ra'e – he'i.

**24** Ha'e ramo hembiguai kuery ma ikaróxa gui ae oguenoẽ vy amboae karóxa oguerekó va'e py oguerova vy ogueraa okuapy Jerusalém py. Ha'e py ma omano. Ha'e ramo onhono porãa guamoĩ kuery rupa yvýry. Huvixa Josias re Judá ha'e Jerusalém pygua kuery ha'e javi ojae'opa okuapy.

**25** Jeremias voi ombopara Josias re ipy'a vaia aguã regua. Ha'e gui aŷ peve guarã oporaei va'e kuery avakue ha'e kunhague ojae'o reve ima'endu'a 'rã Josias re. Ha'e rami aguã ojepokuaa okuapy Israel yvy re, kuaxia ipy'a vaia oĩ re ombopara guive imoiny.

**26** Ha'e gui oĩve rei tema Josias rekokue regua. Ha'e rami avi SENHOR guigua lei ipara oinya rami vy mba'emo porã ojapoague,

**27** ha'e mba'emo ojapo va'ekue jypy guive opaa peve noĩ 'rã teve kuaxia Israel ha'e Judá pygua huvixa kuery rekokue oĩ re?

## 36

### *2 Reis 23.31-34*

<sup>1</sup> Ha'e gui ma ha'e va'e yvy re hekoa va'e kuery Josias ra'y Jeoacaz ogueraa vy nguvixarã omoõ okuapy tuu rekoria, Jerusalém tetã py ae.

<sup>2</sup> Jeoacaz oĩ ypy'i jave py ma vinte e três ma'etã oguereko, ha'e gui mboapy jaxy re ete'i opena Jerusalém py.

<sup>3</sup> Mba'eta Egito pygua huvixa ma oipe'a Jeoacaz Jerusalém tetã py huvixa oĩa gui. Ha'e rami vy ijyvy re ikuai va'e gui okobra três mil e trezentos quilos prata ha'e trinta e três quilos ouro guigua.

<sup>4</sup> Jeoacaz rekoria Egito pygua huvixa omoõ tyvy Eliaquim Jerusalém ha'e Judá pygua kuery ruvixarã. Ha'e rami vy hery oguerova vy Jeaquim ju omboery. Ha'e rã tyke'y Jeoacaz ma Egito yvy katy Neco ogueraa.

### *2 Reis 23.36-24.6*

<sup>5</sup> Jeaquim ma vinte e cinco ma'etã oguereko jave py huvixa oĩ ypy. Ha'e gui onze ma'etã re opena Jerusalém py. Ha'e va'e ma ha'eve'ã va'e anho ojapo oikovy SENHOR nguuete renonde rupi.

<sup>6</sup> Ha'e ramo hexe ou Babilônia pygua huvixa Nabucodonosor. Ha'e vy mokoõ corrente overa va'e guigua py ojokua reve Babilônia katy ogueraa.

<sup>7</sup> Babilônia katy Nabucodonosor ogueraa avi mba'emo ryru SENHOR pegua opy ikuai va'ekue. Ha'e py ma nguuete pegua templo py ju omoõ.

<sup>8</sup> Ha'e gui oĩve rei tema Jeaquim rekoke regua. Ha'e rami avi ojeguarupy ojapoague, ha'e hexe oĩ va'ekue ha'e javi noĩ 'rã teve kuaxia Israel ha'e Judá pygua huvixa kuery rekoke oĩa re? Ha'e gui ta'y Joaquim ju oĩ nguu rekoria.

### *2 Reis 24.8,9*

<sup>9</sup> Ha'e gui Joaquim ma dezoito ma'etã oguereko jave py huvixa oĩ ypy. Ha'e gui mboapy jaxy ha'e dez ára re ete'i opena Jerusalém py. Ha'e va'e ma ha'eve'ã va'e anho ojapo oikovy SENHOR renonde rupi.

### *2 Reis 24.18,19*

<sup>10</sup> Ha'e va'e ma'etã kuaray aku ypy'i jave py huvixa Nabucodonosor ogueraa uka Babilônia katy, mba'emo ryru iporãgueve SENHOR pegua opy ikuai va'ekue reve. Hekoria tyvy Zedequias ju omoõ uka Judá ha'e Jerusalém pygua kuery ruvixarã.

<sup>11</sup> Zedequias ma vinte e um ma'etã oguereko jave py huvixa oĩ ypy. Ha'e gui onze ma'etã re opena Jerusalém py.

<sup>12</sup> Ha'e ma ha'eve'ã va'e anho ojapo oikovy SENHOR nguuete renonde rupi. Ixupe profeta Jeremias SENHOR gui ijayvu teĩ nonhemo'yvy'ixei.

<sup>13</sup> Nabucodonosor rovai opu'ã guive, Nhanderuete rery rupi oura aguã rami Nabucodonosor ojapo rire teĩ. Inhakã ratã vy opy'a py ndojeko rerovaxeit tema SENHOR Israel kuery ruete pe ojevy e'ã aguã.

<sup>14</sup> Ha'e gui sacerdote yvatekueve ha'e heta va'e kuery ha'e javi ojejavive tema oje'oivy, amboae regua kuery reko vaia rami rive. Ha'e rami vy omongy'apa okuapy oo SENHOR ojeupe guarã Jerusalém py oiky'a'o va'ekue.

<sup>15</sup> SENHOR tamoõ kuery Ruete va'e ma yma guive teĩ ijayvu ha'e kuery pe, ayvu mombe'ua kuery pe oayvu omombe'u uka tema, ojeupeguia kuery omboaxy ha'e ojeupeguia oo re oma'ẽ vy.

<sup>16</sup> Ha'e rami teĩ ha'e kuery ma Nhanderuete ayvu mombe'ua kuery ombojaru rei vy noendu potai, ojojai rei guive okuapy profeta kuery. Ha'e ramo SENHOR ojeupeguia kuery rovai opoxya ombou ramo ha'e kuery pe noïvei ma oo jepe aguã.

### *2 Reis 25.8-12; Jeremias 39.8-10; 52.12-16*

<sup>17</sup> Ha'e nunga rupi ae ha'e kuery rovai SENHOR ojapo caldeu kuery ruvixa opu'ã aguã rami.\* Ha'e va'e huvixa ma kyxe py ojuka kunumigue regua, oo henda iky'a e'ÿ va'e oĩa py eteve voi. Nomboaxyi kunumigue neĩ kunhataÿgue, tujakue'i neĩ tujakueve'i ma voi, ipo pyomboaxa pavẽ rire.

<sup>18</sup> Babilônia katy ogueraapa avi mba'emo ryru Nhanderuete pegua opy ikuai va'ekue, tuvixakue ha'e kyrígue'i voi. Ha'e rami vy mba'emo porã SENHOR pegua opy. ha'e huvixa ha'e yvatekueve ropy guive ikuai va'ekue ma Babilônia katy meme ogueraaa.

<sup>19</sup> Oapypa Nhanderuete pegua oo, oitypa guive Jerusalém kora. Huvixa ro ikuai va'ekue ha'e javi oapypa avi, ha'e py mba'emo porã ikuai va'ekue ombovaipa.

<sup>20</sup> Ha'e rã kyxe gui oo jepe va'ekue ma Babilônia katy ogueraaa. Ha'e py ma hembiguai ikuai, ta'y kuery rembiguai guive, Pérsia pygua huvixa ipo'aka e'ÿa ja.

<sup>21</sup> Ha'e nunga oiko SENHOR oayvu Jeremias pe omombe'u uka va'ekue ojeupity aguã, ha'e kuery yvy opyta rive aguã sábado regua opytu'u aguã ma'etÿ ha'e javi ojeupitypa e'ÿa ja. Yvy ivaipa reve opyta rive oiny ára nhavõ, setenta ma'etÿ oa'angaague ojeupitypa e'ÿa ja.<sup>†</sup>

#### *Esdras 1.1-4*

<sup>22</sup> Ha'e gui peteĩ ma'etÿ re ma Pérsia pygua huvixa Ciro oĩ jave py SENHOR ojapo oayvu Jeremias omombe'u va'ekue. Ha'e rami vy Ciro py'a re omoĩ openaa ha'e javi rupi pova'e ayvu omombe'u ukapa ha'e ombopara uka guive aguã. Ha'e vy aipoe'i uka:

<sup>23</sup> “Pérsia pygua huvixa Ciro po rami ijayvu: SENHOR Nhanderuete yvategua ma xevy omboaxapa yvy ha'e javi re apena aguã, xemoĩ guive peteĩ oo ixupe guarã ajapo uka aguã Judá re Jerusalém tetã py. Ha'e nunga rupi ixupeguia pendekuai va'e ha'e javi tapeo. SENHOR Penderuete toiko peẽ kuery reve”, he'i uka.\*

---

\* <sup>36:17</sup> Caldeu kuery ma Babilônia pygua kuery ae. Ha'e gui caldeu kuery ruvixa ma Nabucodonosor (versículo 6).

† <sup>36:21</sup> Nhanderuete lei oejaague rami vy ha'e kuery oyvy re nomba'eapoi 'rã teĩ sete ma'etÿa ojeupity nhavõ, ijyvy voi sábado regua ma'etÿ re oĩ rive aguã (Levítico 25.1-7). Ha'e rami teĩ ha'e kuery ma'etÿa nhavõ oyvy re omba'eapo tema ramo Nhanderuete oa'anga ju sábado regua ma'etÿ ijyvy noĩ riveiague rekovia, ha'e ramia peve yvy ivaipa reve opyta rive aguã (Levítico 26.40-45). Ha'e nunga rupi setenta ma'etÿ ijyvy noĩ riveiague rami avi setenta ma'etÿ re ju ivaipa reve opyta rive aguã rami ojapo, ha'e kuery Babilônia py escravo ikuai jave (Jeremias 25.1-14). Ha'e rami vy setenta ma'etÿ oaxapa rire ma ha'e kuery ojevy ju 'rã oyvy katy. \* <sup>36:23</sup> Esdras 1.1-3

## Esdras rekokue oĩa Esdras rekokue oĩa

Kova'e kuaxia re ma oĩ Israel kuery Babilônia py escravo-rã ogueraa pyre oyvy re ju ojevy va'ekue rekokue. Mba'eta huvixave Babilônia re opena va'e ae omondouka. Po rami ipara oiny: "Peteĩ ma'etý re ma Pérsia pygua huvixa Ciro oĩ jave py Senhor ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka: 'Pérsia pygua huvixa Ciro po rami ijayvu: Xevy pe Senhor Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py. Ha'e nunga rupi ixupeguia pendekuai va'e ha'e javi reve Penderuete toiko, ha'e tapeo Judá regua Jerusalém py, Senhor Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae', he'i" (1.1-3).

Ha'e gui ma omombe'u ha'e kuery oguataague, Jerusalém tetã py ovaãague, templo omoatyrõ aguã omboypyague, hovaigua kuery omombytu'u ranheague, ojapopaague, ha'e gui oguerovy'aague, Nhanderuete gui meme ha'e nunga oiko rire.

Esdras ma sacerdote oiko raka'e. Ha'e ae Jerusalém py ou vy opena oikovy templo omoatyrõa rupi. Ijayvu avi heta va'e kuery gueko vaia gui ojepe'a aguã rami.

### *Huvixa Ciro oayvu omondoukaague*

*2 Crônicas 36.22,23*

<sup>1</sup> Peteĩ ma'etý re ma Pérsia pygua huvixa Ciro oĩ jave py SENHOR ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka pova'e ayvu, ombopara uka guive. Ha'e vy aipoe'i uka:

<sup>2</sup> "Pérsia pygua huvixa Ciro po rami ijayvu: Xevy pe SENHOR Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py.

<sup>3</sup> Ha'e nunga rupi ixupeguia pendekuai va'e ha'e javi reve Penderuete toiko, ha'e tapeo Judá regua Jerusalém py, SENHOR Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae.

<sup>4</sup> Ha'e gui guekoa py ae avakue okuave va'e ha'e javi penepytyvõ 'rã prata ome'ẽ vy, ha'e gui ouro, ombo'e rei-rei ha'e mymba kuery oguerekva'e, Nhanderuete ro Jerusalém py oĩ va'e peguarã. Ha'e nunga ome'ẽ va'e áryve tome'ẽve ju ome'ẽxe'a'i rupi", he'i uka. \*

<sup>5</sup> Ha'e ramo Judá ha'e Benjamim kuery akã ikuai va'e opu'ãmba jogueravy, sacerdote ha'e levita kuery guive, amboae kuery reve. Ha'e kuery ha'e javi py'a re Nhanderuete omoĩ Jerusalém py oje'oi vy oo SENHOR pegua oĩ va'ekue ojapo jevy aguã.

<sup>6</sup> Ijyvýry rupi ikuai va'e voi oipytyvõ okuapy prata ome'ẽ vy, ha'e gui ouro, ombo'e rei-rei, mymba kuery oguerekva'e ha'e iporãgueve. Mba'emo ome'ẽ va'ekue áryve ome'ẽve ju ome'ẽxe'a'i rupi.

<sup>7</sup> Huvixa Ciro voi oguenoẽ tembiporu SENHOR ropy ikuai va'ekue, Jerusalém gui Nabucodonosor ogueru vy nguete ra'angaa pegua ropy ju omoĩ va'ekue.

<sup>8</sup> Ha'e va'e nunga ma Pérsia pygua huvixa Ciro ju oguenoẽ mba'emo re opena va'ety Mitredate oexaa py. Ha'e rã ha'e va'e oipapapa ma vy Judá regua yvateve va'e Sesbazar pe ju omboaxa.

<sup>9</sup> Apy ma oĩ mbovy pa oĩa regua: trinta hy'a ouro guigua, mil hy'a prata guigua, vinte e nove kyxe,

<sup>10</sup> trinta hy'a'i ouro guigua, quatrocentos e dez hy'a'i prata guigua amboae regua va'e, ha'e gui mil avi tembiporu mboae.

\* **1:4** 2 Crônicas 36.22-23

11 Tembiporu ouro ha'e prata guigua ha'e javi vy ma cinco mil e quatrocentos. Ha'e javi ma Sesbazar ogueraapa Babilônia gui, ogueru pyre kuery Jerusalém katy ju ojevy jogueravy java.

## 2

### *Babilônia gui ojevy va'ekue rery oña*

1 Pova'e ma ijyvy gui Babilônia pygua huvixa Nabucodonosor oyvy katy ogueraa va'ekue ramymino kuery. Ha'e va'e kuery ma escravo ikuaiague gui oẽ vy ojevy ju Jerusalém ha'e Judá katy, peteĩ-teĩ guekoa py ae.\*

2 Ha'e kuery ma oupa okuapy Zorobabel reve, Jesua, Neemias, Seraías, Reelaías, Mordecai, Bilsã, Mispar, Bigvai, Reum ha'e Baaná reve. Ha'e gui apy ma avakue Israel regua mbovy pa ikuiaia:

3 Parós ramymino kuery ma dois mil cento e setenta e dois.

4 Sefatias ramymino kuery ma trezentos e setenta e dois.

5 Ara ramymino kuery ma setecentos e setenta e cinco.

6 Paate-Moabe ramymino kuery Jesua-Joabe ra'y kuery regua ma dois mil oitocentos e doze.

7 Elão ramymino kuery ma mil duzentos e cinqüenta e quatro.

8 Zatu ramymino kuery ma novecentos e quarenta e cinco.

9 Zacai ramymino kuery ma setecentos e sessenta.

10 Bani ramymino kuery ma seiscentos e quarenta e dois.

11 Bebai ramymino kuery ma seiscentos e vinte e três.

12 Azgade ramymino kuery ma mil duzentos e vinte e dois.

13 Adonicão ramymino kuery ma seiscentos e sessenta e seis.

14 Bigvai ramymino kuery ma dois mil e cinqüenta e seis.

15 Adim ramymino kuery ma quatrocentos e cinqüenta e quatro.

16 Ater ramymino kuery Ezequias ro pygua kuery regua ma noventa e oito.

17 Bezai ramymino kuery ma trezentos e vinte e três.

18 Jora ramymino kuery ma cento e doze.

19 Hasum ramymino kuery ma duzentos e vinte e três.

20 Gibar ramymino kuery ma noventa e cinco.

21 Belém ramymino kuery ma cento e vinte e três.

22 Netofa guigua avakue ma cinqüenta e seis.

23 Anatote guigua avakue ma cento e vinte e oito.

24 Azmavete ramymino kuery ma quarenta e dois.

25 Quiriate-Arim, Cefira ha'e Beerote ramymino kuery ma setecentos e quarenta e três.

26 Ramá ha'e Geba ramymino kuery ma seiscentos e vinte e um.

27 Micmás guigua avakue ma cento e vinte e dois.

28 Betel ha'e Ai guigua avakue ma duzentos e vinte e três.

29 Nebo ramymino kuery ma cinqüenta e dois.

30 Magbis ramymino kuery ma cento e cinqüenta e seis.

31 Elão mboae guigua ramymino kuery ma mil duzentos e cinqüenta e quatro.

32 Harim guigua ramymino kuery ma trezentos e vinte.

33 Lode, Hadide ha'e Ono guigua ramymino kuery ma setecentos e vinte e cinco.

34 Jericó guigua ramymino kuery ma trezentos e quarenta e cinco.

35 Senaá guigua ramymino kuery ma três mil seiscentos e trinta.

36 Ha'e gui sacerdote kuery regua: Jedaías ramymino kuery Jesua ro pygua ikuai va'e regua ma novecentos e setenta e três.

\* **2:1** Neemias 7.6-73

<sup>37</sup> Imer ramymino kuery ma mil e cinqüenta e dois.

<sup>38</sup> Pasur ramymino kuery ma mil e duzentos e quarenta e sete.

<sup>39</sup> Harim ramymino kuery ma mil e dezessete.

<sup>40</sup> Ha'e gui levita kuery ju: Jesua ha'e Cadmiel ramymino kuery Hodavias ra'y kuery regua ma setenta e quatro.

<sup>41</sup> Oporaei va'e kuery Asafe ramymino kuery regua ma cento e vinte e oito.

<sup>42</sup> Okē rarõa kuery ramymino kuery ju: Salum ramymino kuery, Ater, Talmom, Acube, Hatita ha'e Sobai ramymino kuery, ha'e va'e kuery ha'e javi vy ma cento e trinta e nove.

<sup>43</sup> Templo py nhopytyvõ va'ety kuery ju: Zia ramymino kuery, Hasufa, Tabaote,

<sup>44</sup> Queros, Sia, Padom,

<sup>45</sup> Lebana, Hagaba, Acube, Hagabe,

<sup>46</sup> Sanlai, Hanã,

<sup>47</sup> Gidel, Gaar, Reaías,

<sup>48</sup> Rezim, Necoda, Gazão,

<sup>49</sup> Uzá, Paseá, Besai,

<sup>50</sup> Asná, meunita ha'e nefuseu kuery ramymino kuery,

<sup>51</sup> Baquebuque ramymino kuery, Hacufa, Harur,

<sup>52</sup> Baslute, Meída, Harsa,

<sup>53</sup> Barcos, Sísera, Tama,

<sup>54</sup> Nesias ha'e Hatifa ramymino kuery.

<sup>55</sup> Ha'e gui Salomão remiguai kuery ramymino kuery ju: Sotai ramymino kuery, Soferete, Peruda,

<sup>56</sup> Jaala, Darcom, Gidel,

<sup>57</sup> Sefatias, Hatil, Poquerete-Hazebaim ha'e Ami ramymino kuery.

<sup>58</sup> Templo py nhopytyvõ va'ety ha'e Salomão remiguai kuery ramymino kuery ha'e javi vy ma trezentos e noventa e dois.

<sup>59</sup> Pova'e kuery ma Tel-Melá gui oje'oi va'ekue, Tel-Harsa, Querube, Adã ha'e Imer gui, teñ ndoikuuai ae tema Israel regua ikuuai:

<sup>60</sup> Delaías ramymino kuery, Tobias ha'e Necoda ramymino kuery ma seiscentos e cinqüenta e dois.

<sup>61</sup> Ha'e gui sacerdote ramymino kuery voi: Habaías ramymino kuery, Coz ha'e Barzilai ramymino kuery. Ha'e va'e ma Barzilai Gileade pygua va'e rajy re omenda rire hery rupi ae oenoña.

<sup>62</sup> Ha'e va'e kuery ma guery oeka okuapy kuaxia tery oña re teñ ndojoui. Ha'e nunga rupi sacerdote ikuai aguã ha'eve'ý va'e.

<sup>63</sup> Ha'e ramo ha'e kuery pe huvixa aipoe'i:

— Pe'u eme tembi'u iky'a e'ý va'e, Urim ha'e Tumim rupi sacerdote oikuua va'e oiko e'ýa ja — he'i.

<sup>64</sup> Ha'e va'e kuery ha'e javi vy ma quarenta e dois mil trezentos e sessenta ikuai,

<sup>65</sup> hembiguai avakue ha'e kunhague sete mil trezentos e sete ikuai va'e reve'ý vy. Ha'e gui oporaei va'e avakue ha'e kunhague ma duzentos ju ikuai.

<sup>66</sup> Hymba kuery kavaju ma setecentos e trinta e seis. Ha'e gui mburika ma duzentos e quarenta e cinco ikuai.

<sup>67</sup> Mymba camelô ma quatrocentos e trinta e cinco ikuai. Mburika ra'y'i ma seis mil setecentos e vinte.

<sup>68</sup> Ha'e gui ovaẽ okuapy Jerusalém tetã py. SENHOR pegua oo oĩague py oo ramo hetarã kuery akã ikuai va'e regua ma mba'emo ome'ëxe'a'i rupi ome'ë okuapy oo oĩague pyve ju ojapo jevy aguã.

<sup>69</sup> Ha'e kuery mba'emo ojoua rami vy ome'ë okuapy ombo'eapo va'e kuery oiporu va'erã: sessenta e um mil hatã'i va'e ouro guigua, cinco mil prata guigua tuvixakueve va'e, ha'e gui cem ao sacerdote kuery pegua.

<sup>70</sup> Ha'e gui Israel kuery ha'e javi guetā rupi ae-ae ikuai: sacerdote kuery, levita ha'e heta va'e kuery regua, oporai va'e, okẽ rarõa, templo py nhopytyvõ va'ety kuery guive.

## 3

### *Altar ojapo jevy okuappyague*

<sup>1</sup> Sete jaxya ovaẽ jave Israel ramymino kuery ikuipa ma guetā py ae-ae. Ha'e rami vy peteĩ'i rami onhemboatypa okuapy Jerusalém py.

<sup>2</sup> Ha'e ramo Jozadaque ra'y Jesua ha'e tyvy kuery sacerdote ikuai va'e, Sealtiel ra'y Zorobabel tyvy kuery reve onhemoī okuapy altar Israel kuery ruete peguarā ojapo ju aguã, ha'e va'e áry mymba kuery oapy reve ome'ẽ aguã Nhanderuete remimbo'e Moisés lei ombopara va'ekue oĩa rami vy.

<sup>3</sup> Hendarā py ae ojapo okuapy altar. Hekoa yvýry ikuai va'e kuery gui okyje teri va'eri altar áry mymba kuery oapy reve ome'ẽ okuapy SENHOR pe, aje'ivekue, ka'arukue guive.

<sup>4</sup> Ipara re oĩa rami vy ojapo avi okuapy ngaru oo'i regua. Ha'e rami vy ko'ẽ nhavõ mymba kuery oapy vy ome'ẽ okuapy, mbovy-mbovy 'rã pa peteĩ-teĩ ára py ome'ẽ ukaague rami vy.

<sup>5</sup> Ha'e va'e rire mba'emo ome'ẽ jepi okuapy. Jaxy pyau nhavõ mba'emo ome'ẽ, ha'e gui ngaru SENHOR peguarā hi'ára py porã oiko aguã oa'angaague rami vy. Ikuai avi SENHOR pe mba'emo ome'ẽxe'a'i py ogueru va'e.

<sup>6</sup> Sete jaxya ijypy'i guive omboypy okuapy SENHOR pe mymba ome'ẽ aguã, ha'e jave py SENHOR pegua templo renderā nonhonombai teri teĩ.

<sup>7</sup> Oo apoa ha'e ita re ombo'eaapo va'e kuery pe ome'ẽ okuapy peráta. Sidom ha'e Tiro pygua kuery pe ome'ẽ avi tembi'u, oy'u va'erã ha'e azeite, Líbano gui yvyrá yary haygue ha'e kuery ogueru aguã. Ye'ẽ áry rupi 'rã ogueru Jope tetã peve, Pérsia pygua huvixa Ciro va'e ojapo ukaague rami vy.

### *Templo renderā onhonombaa ague*

<sup>8</sup> Jerusalém tetã py Nhanderuete pegua oo py ovaẽ rire mokoĩ ma'etýa ha'e mokoĩ jaxya ma ojapo jave Sealtiel ra'y Zorobabel omboypy ojapo jevy aguã, Jozadaque ra'y Jesua reve, ha'e tyvy kuery sacerdote ha'e levita regua, ha'e gui escravo-rã ogueraa pyre kuery Jerusalém katy ojevy va'ekue ha'e javi reve. Ha'e va'e kuery omboypy okuapy SENHOR pegua oo re ombo'eaapo aguã. Ha'e nunga re opena va'erã omoī okuapy levita kuery vinte ma'etý va'e guive tujakue peve.

<sup>9</sup> Jesua gua'y ha'e guyvy kuery reve, Cadmiel gua'y kuery reve guive onhemoirũ okuapy Judá ramymino kuery, Nhanderuete pegua oo rupi ombo'eaapo va'e kuery re opena aguã, Henadade ramymino kuery, ta'y ha'e tyvy kuery levita regua reve guive.

<sup>10</sup> Ha'e gui oo apoa kuery templo SENHOR pegua renderā onhonomba ramo sacerdote kuery onhemondepa reve ikuai mimby guaxu reve. Levita kuery Asafe ramymino kuery regua avi ikuai hy'a pu reve SENHOR omboete aguã, Israel kuery ruvixa Davi ojapo ukaague rami vy.\*

<sup>11</sup> Jorire-rire oporaei okuapy. SENHOR omboete ha'e oguerovy'a okuapy po rami: "Porayvu va'e vy oexa uka riae 'rã Israel kuery omboaxya", he'i okuapy. Ha'e gui ha'e kuery ha'e javive oguerovy'a vy onhendu atã reve oporaei okuapy SENHOR pe, oo renderā onhonomba ma rire.

<sup>12</sup> Heta avi ikuai sacerdote ha'e levita kuery jypy'igua oo oexa va'ekue, hetarā kuery akã tujakue'i guive. Ha'e rami vy ha'e kuery ma oo renderā onhonoa rã oexa vy ojae'o atã okuapy. Heta avi ikuai oguerovy'aa rupi ojapukai va'e.

\* **3:10** Hy'a pu ma hy'a overa va'e gui ojapo pyre, ombotaa rã onhendu va'e.

<sup>13</sup> Ha'e rami vy mava'eve noendu kuaai ovy'aa rupi ojapukai va'e, neñ ojae'o va'e kuery onhendua. Mba'eta pavẽ onhendu atã reve ojapukai okuapy mombyry rupi ikuai va'e voi oendu aguã rami.

## 4

### *Templo ojapo okuapya gui hovaigua kuery omombytu'uague*

<sup>1</sup> Judá ha'e Benjamim regua rovaigua kuery oendu avi okuapy ogueraapa pyre kuery ojevy ma vy SENHOR Israel kuery ruete pegua templo ojapo jevy okuapy.

<sup>2</sup> Ha'e rami vy ha'e kuery ovaẽmba okuapy Zorobabel ha'e hetarã kuery akã ikuiaia py. Ha'e vy aipoe'i okuapy:

— Ore voi toromba'eapo peẽ kuery reve, mba'eta peẽ kuery rami ae ore kuery voi Penderuete pe 'rã orekuai. Ore voi ixupe mba'emo rome'ẽ ae ma, Assíria pygua huvixa Esar-Hadom apy oreru guive — he'i.\*

<sup>3</sup> Ha'e rami teĩ Zorobabel, Jesua ha'e hetarã kuery akã ikuai va'e ombovai:

— Peẽ kuery ma mba'eve ndaperekoi ore kuery reve Oreruete pegua oo rojapo jevya py. Ore kuery ae'i teĩ rojapopa 'rã SENHOR Israel kuery ruete va'e pe, Pérsia pygua huvixa Ciro ojapo ukaague rami vy — he'i.

<sup>4</sup> Ha'e ramo ha'e va'e yvy regua kuery Judá kuery omba'eapoa py omongeta rei vy nomokyre'ývei.

<sup>5</sup> Ha'e rami vy peráta re ogueru ha'eve'ýa rami omongeta va'erã, Judá kuery ojapo 'rã va'ekue ndojapovei aguã. Pérsia pygua huvixa Ciro oĩa pukukue re ha'e rami ijayvu, huvixa Dario oĩa peve.

<sup>6</sup> Ha'e gui Assuero huvixa oĩ ypy'i guive ma voi hovaigua kuery ombopara okuapy Judá ha'e Jerusalém pygua kuery rekokeu ramigua rive.

<sup>7</sup> Ha'e rami ae avi Pérsia pygua huvixa Artaxerxes oĩ javé Bislão, Mitredate ha'e Tabeel oirũ kuery reve ixupe ombopara okuapy peteĩ kuaxia aramaico ha'e Síria pygua kuery ayvu py.

<sup>8</sup> Xondaro kuery ruvixa Reum ha'e kuaxia re opena va'ety Sinsai voi ombopara avi peteĩ kuaxia. Jerusalém pygua kuery rovai re ombopara huvixa Artaxerxes pe, po rami:

<sup>9</sup> “Rombopara va'e ma xondaro kuery ruvixa Reum ha'e kuaxia re opena va'ety Sinsai oirũ kuery reve: dinaíta kuery, afarsaquita, tarpelita, afarsita, arquevita, Babilônia guigua kuery, Susã guigua, deavita kuery, Elão guigua kuery,

<sup>10</sup> ha'e gui amboae kuery regua Samaria tetã py huvixa Osnapar ipo'akapa ha'e ima'endu'apy va'e orembou vy oremboekoa va'ekue, ha'e gui amboae kuery Eufrates yakã kyvõ rupi orerekaoa va'e.”

<sup>11</sup> Po rami ma kuaxia huvixa Artaxerxes pe ha'e kuery omboparaa ague:

<sup>12</sup> “Oreruvixa, ore nerembiguai kuery Eufrates yakã kyvõ rupi orerekaoa va'e, kova'e ára rombopara rokuapy ndevy. Reikuua ae ma judeu kuery ndea gui oje'oiague Jerusalém tetã katy orerekaoa peve ete. Aÿ ha'e kuery ma ojapo ju okuapy ha'e va'e tetã ayvu vaipy joe opu'ãaty. Ikora voi omoatyrõ heravy, omoatyrõ avi 'rã ijytarã.

<sup>13</sup> Oreruvixa, eikuua pota ke, mba'eta ha'e kuery tetã ojapo jevy vy ikora voi omoatyrõmba ma vy ndopagavei ma 'rã imposto neñ pedágio opaga 'rã va'ekue. Ha'e rami vy 'rã ojapo peráta nderejopyvei aguã rami.

<sup>14</sup> Ha'e rã ore kuery ma ndepo gui mba'emo rojopy jepi va'e vy orevy pe voi nda'evei ha'e kuery neremboetevei ramo. Ha'e nunga rupi ae oreayvua rogueru ruka ndevy.

<sup>15</sup> Eikuua pota ke ha'vy kuaxia neramoõ kuery rekokeu oĩa re. Ha'e va'e kuaxia rejou vy reikuua 'rã ha'e va'e tetã pygua kuery opu'ãmba vy ojapo raka'e huvixa kuery ojexavai

\* <sup>4:2</sup> Ha'e kuery ma Samaria pygua ikuai teĩ judeu regua e'ý, mombyry ikuaiague gui Assíria ruvixa kuery oguerova vy ha'e py omboekoa jevy va'ekue. SENHOR omboete merami teĩ nguu ete kuery ae omboete avi okuapy (2 Reis 17.24-41).

aguã rami, yvy openaa rupi voi. Yma guive tetã py oiko jepi joguero'aa. Ha'e nunga rupi ae tetã omombaa va'ekue.

<sup>16</sup> Ha'e nunga rupi oreruvixa, ndevy roikuua uka xapy'a rei ha'e va'e tetã ha'e kora omoatyrõmba ma ramo Eufrates yakã kyvõ rupi yvy itui va'e re nandepo'akavei 'rãa.'

<sup>17</sup> Ha'e ramo huvixa ombovai:

“Xondaro kuery ruvixa Reum, kuaxia re opena va'ety Sinsai ha'e irũ kuery Samaria py ikuai va'e pe xeayvu araa uka, Eufrates rovai hembyrekue ikuai va'e pe guive: Tapendekuai porã!

<sup>18</sup> Ha'e gui kuaxia para orevy pembou va'ekue ma aendu kuaa aguã rami ogueroayvua xerenonde py.

<sup>19</sup> Ha'e rami rã xee ajapo uka rã oeka vy oikuua yma guive ae ma ha'e va'e tetã pygua kuery opu'ã ae ri okuapyague huvixa kuery rovai re, ha'e gui ha'e py oiko raka'e joguero'aa ha'e joe ijayvu rei va'e.

<sup>20</sup> Jerusalém tetã py ikuai avi va'ekue huvixa ipo'akapa va'e. Ha'e va'e kuery ma Eufrates yakã rovai ha'e javi rupi ipo'aka va'ekue. Ha'e kuery pe ae opagapaa va'ekue imposto ha'e pedágio opaga 'rã va'ekue.

<sup>21</sup> Ha'e nunga rupi aÿ gui ma pendeayvu 'rã ha'e va'e avakue ombo'eapoa gui optyu'upa aguã rami, ha'e va'e tetã ndojapovei aguã, xee ajapo uka e'ÿa ja.

<sup>22</sup> Penekyre'ÿ ke ha'e pejapo ete xee aipotaa. Mba'e re tu huvixa roiko va'e ndorojopyive-ive ri rovy?" he'i.

<sup>23</sup> Ha'e va'e kuaxia huvixa Artaxerxes ombopara va'ekue ma ogueroayvupaa Reum, kuaxia re opena va'ety Sinsai ha'e irũ kuery renonde. Ha'e ramo ha'e kuery oje'oipa pojava Jerusalém tetã py judeu kuerya katy. Opo py tembiporu oguereko reve oo vy omombytu'u nhea'ã mba'emo ojapo okuapya gui.

<sup>24</sup> Ha'e rami py optyu'upa Nhanderuete pegua oo Jerusalém py oĩ va'e re ombo'eapoa gui. Ha'e rami vy Pérsia pygua huvixa Dario mokoõ ma'etÿ re ma oĩ peve ndojapovei.

## 5

### *Ageu ha'e Zacarias nhomokyre'ÿa rupi ijayvuague*

<sup>1</sup> Ha'e gui profeta Ageu ha'e Ido ra'y Zacarias ma ayvu omombe'u judeu kuery Judá ha'e Jerusalém py ikuai va'e pe. Mokoõve re Israel kuery ruete nhe'ẽ oĩ ramo hery rupi ae ijayvu.

<sup>2</sup> Ha'e ramo Sealtiel ra'y Zorobabel ha'e Jozadaque ra'y Jesua ma onhemoõ vy omboypy ju okuapy Nhanderuete pegua oo Jerusalém py oĩ va'e omoatyrõ aguã. Ha'e va'e kuery reve mokoõve profeta Nhanderuete pegua avi ikuai oipytyvõ vy.

<sup>3</sup> Ha'e va'e jave py ma ha'e kuerya py ou Eufrates yakã kyvõ rupi opena va'e Tatenai ha'e Setar-Bozenai oirũ kuery reve. Ha'e rami vy ha'e kuery pe oporandu okuapy:

— Mava'e tu pëvy ojapo uka ju upe va'e oo ha'e ikora?

<sup>4</sup> Ha'e gui marã rami tu upe va'e ojapoa rupi ikuai va'e rery? — he'i okuapy oporandu vy.

<sup>5</sup> Ha'e rami teĩ judeu kuery yvatekueve re Nhanderuete oma'ẽ ramo hovaigua kuery nomombytu'u reguai huvixa Dario-a py ayvu ogueraa ha'e kuaxia para rupi ombova-iague ou e'ÿa ja.

### *Huvixa Dario pe hovaigua kuery oayvu omondoukaague*

<sup>6</sup> Ha'e gui ma huvixa Dario pe Eufrates yakã kyvõ rupi opena va'e Tatenai peteĩ kuaxia para omondouka, Setar-Bozenai ha'e oirũ kuery afarsaquita va'e yakã kyvõ rupi ikuai va'e reve. Ha'e va'e kuaxia omboparaague ma apy ju oĩ.

<sup>7</sup> Kuaxia para re ma ixupe omondouka okuapy pova'e ayvu:

“Huvixa Dario, tove tereiko porã!

<sup>8</sup> Oreruvixa, reikuua ae ma ore kuery Judá yvy katy roje'oiague, Nhanderuete pegua oo tuvixa va'e py. Ha'e va'e ma ita tuvixa va'e gui anho ojapoave heravy va'e. Yvyrape py ma omboty-mbotyve heravy. Ombo'eapo aguā ikyre'ŷ okuapy vy ojapo pojava heravy.

<sup>9</sup> Ha'e gui ma yvatekueve pe roporandu vy 'Mava'e tu p̄evy ojapo uka ju upe va'e oo ha'e ikora?' ro'e va'ekue.

<sup>10</sup> Ha'e rami ae avi yvatekueve pe roporanduve tema hery re, ndevy romombe'u aguā, ndevy rombopara rā avakue opena va'e rery reikuaa aguā.

<sup>11</sup> Po rami orembovai vy ijayvu okuapy: 'Ore kuery ma Nhanderuete yva ha'e yvy apoare rembiguai. Ha'e vy romoatyrō ju rokuapy kova'e oo yma raxa ma ojapo pyre. Peteī huvixa Israel pygua yvateve va'e ojapopa ypy va'ekue.

<sup>12</sup> Ha'e va'e rire ma oreramoī kuery ma Nhanderuete yva pygua ipoxy aguā rami ikuai ramo omboaxapa raka'e Babilônia pygua huvixa Nabucodonosor caldeu va'e po py. Ha'e va'e ae ma kova'e oo omboavaipa, ha'e Babilônia katy oreretarā kuery ogueraapa raka'e.

<sup>13</sup> Ha'e rami teī Babilônia pygua huvixa Ciro ma jypy ma'etŷ re oī javé ojapo uka ju kova'e oo Nhanderuete peguarā.

<sup>14</sup> Ha'e gui ma tembiporu ouro ha'e prata guigua Jerusalém py templo py ikuaiague gui Nabucodonosor ogueraapa vy Babilônia py templo oī va'e py ju omoī va'ekue. Ha'e nunga huvixa Ciro ha'e gui oguenoēmba vy omboaxa raka'e peteī ava Sesbazar hery va'e pe. Ha'e va'e joe opena va'erā omoī vy

<sup>15</sup> aipoe'i ixupe: "Ejopy kova'e tembiporu ikuai va'e, ha'e tereo. Eraapa Jerusalém py templo oī va'e pyguarā. Ha'e gui ejapo uka ju Nhanderuete pegua oo, oīague py ae", he'i va'ekue.

<sup>16</sup> Ha'e gui ma Jerusalém py Sesbazar ou ma vy onhonomba ju Nhanderuete pegua oo renderā. Ha'e javé gui ma voi rojapo rokuapy teī ndorojapopai teri', ha'e kuery he'i va'ekue orevy.

<sup>17</sup> Ha'e ramo ndee oreruvixa rejou porā ri vy reikuua pota uka 'rāgue Babilônia py huvixa kuery kuaxia ikuai va'e re, roikuua aguā anhetē pa ra'e huvixa Ciro Nhanderuete pegua oo ojapo ukaague Jerusalém py, ha'e gui orevy pe ju mba'emo rejapo uka aguā", he'i okuapy.

## 6

### *Dario oayvu omondoukaague*

<sup>1</sup> Ha'e ramo huvixa Dario ijayvu rā oikuua potaa Babilônia py huvixa mba'e kuaxia para omoī porāaty rupi.

<sup>2</sup> Ha'e gui Média yvy re Acmetá py oo imbaraete va'e oī va'e py ojou peteī kuaxia oimama pyre. Ha'e va'e re ma nhomoma'endu'aarā ipara oiny po rami ijayvu va'e:

<sup>3</sup> "Huvixa Ciro ma peteī ma'etŷa re oī javé oikuua uka pova'e ayvu: 'Jerusalém py Nhanderuete pegua oo oī va'e ma ha'eve ojapoa ju aguā mymba oapy vy ome'ē atyrā. Ha'e rami aguā ma omoī atāave 'rā hendarā. Ijyvatea ma vinte e sete metros peve 'rā. Ipya voi vinte e sete metros ae avi 'rā. Mboapy ryxy ita tuvixa va'e anho omoīa 'rā, ha'e gui peteī ju yvyra pyau guigua.

<sup>4</sup> Huvixa ro gui ae 'rā ome'ēa mba'emo repyrā.

<sup>5</sup> Ha'e rami ae avi mba'emo ryru ouro ha'e prata guigua Nhanderuete pegua opygua Jerusalém py templo oī va'e gui Nabucodonosor oguenoē vy Babilônia katy ogueraa va'ekue ma ome'ēmbaa ju 'rā Jerusalém py templo oī va'e pyguarā. Peteī-teī tembiporu oīague py ae ju 'rā omoīa, Nhanderuete pegua opy', he'i va'ekue.

<sup>6</sup> "Ha'e nunga rupi Eufrates yakā rovai rupi repena va'e Tatenai, Setar-Bozenai ha'e peneirū kuery afarsaquita yakā rovai pendekuai va'e, pejepe'a ke ha'e gui mombyry katy.

<sup>7</sup> Pemombytu'uve eme Nhanderuete pegua oo re ombo'eapo va'e kuery. Tove judeu kuery ruvixa ha'e yvatekueve tojapo ju Nhanderuete pegua oo oīague py ae.

<sup>8</sup> Xeayvu avi judeu kuery regua yvatekueve pe mba'emo peme'ē aguā, Nhanderuete pegua oo ojapo ju aguā. Yakā rovai peráta huvixa pegua omoīaty py oī va'e regua ma ha'e va'e avakue pe peme'ē jepi 'rā hi'ára py porā, ombo'eapoa gui optyu'u e'ŷ aguā.

<sup>9</sup> Ha'e rami ae avi ha'e kuery pe ára nhavō peme'ē kuerei 'rā peme'ē aguā va'e: vaka ra'y, vexa'i ha'e vexa'i ra'y oapy vy Nhanderuete yva pygua pe ome'ē mbyrā. Trigo, juky, vinho ha'e azeite voi peme'ē 'rā, Jerusalém py sacerdote kuery mbovy pa ikuiaia rami vy,

<sup>10</sup> ha'e kuery ome'ē aguā mba'emo heakuā porā va'e Nhanderuete yva pygua ojou porā va'erā, huvixa ha'e ta'y kuery re ha'e kuery ojerure okuapy aguā guive.

<sup>11</sup> Po rami avi xeayvu: Ava oiko va'e rei kova'e kuaxia re oī va'e oguerova ramo ma hoo gui peteī vyvra omboia 'rā, ha'e gui ha'e va'e re ae oupia 'rā imoiny, ha'e rā hoogue ma ojapoa 'rā ytyrā.

<sup>12</sup> Ha'e rami ae avi xapy'a rei Jerusalém py Nhanderuete pegua oo oī va'e amongue huvixa e'ŷ vy pavē regua ombovaipaxe vy opo py kova'e ipara oguerova va'e rei tove Nhanderuete tomokanhymba, ha'e py guery omoī rire. Xee Dario ae kova'e ayvu amondouka va'e. Tojapopaa pojava."

### *Templo ojapopa ma okuapyague*

<sup>13</sup> Ha'e gui ma huvixa Dario ijayvuague rami ae Eufrates yakā kyvō rupi opena va'e Tatenai, Setar-Bozenai ha'e oirū kuery ojapopa pojava okuapy.

<sup>14</sup> Ha'e ramo judeu kuery regua yvatekueve ojapo tema heravy oo, ikuai porā guive profeta Ageu ha'e Ido ra'y Zacarias ijayvuague rami. Oo ojapopa Israel kuery ruete ojapo ukaague rami, ha'e gui huvixa Ciro, Dario ha'e Pérsia pygua Artaxerxes ijayvuague rami guive.

<sup>15</sup> Oo ojapopa okuapy jaxy Adar 'ea py mboapy araa py, huvixa Dario mboapy meme ma'etý re ma oī jave.

### *Nhanderuete po py templo omboaxa okuapyague*

<sup>16</sup> Ha'e gui Israel kuery, sacerdote, levita ha'e escravo ikuaiague gui ojevy va'ekue mboae kuery ou vy ma Nhanderuete pegua oo ojapopaague oguerovy'a reve omboaxa okuapy ipo py.

<sup>17</sup> Omboaxa vy ome'ē okuapy cem vaka ra'y, duzentos vexa'i ra'y, quatrocentos vexa'i ha'e doze kavara ra'y. Israel kuery ha'e javi ojejavyague reguarā ome'ē okuapy, mbovy regua pa ikuiaia rami.

<sup>18</sup> Omoī avi okuapy sacerdote ha'e levita kuery peteī-teī Nhanderuete pe ombo'eapo aguā Jerusalém py, Moisés kuaxia omboparaague rami vy.

### *Ngaru Páscoa regua ojapo okuapyague*

<sup>19</sup> Escravo ikuaiague gui ojevy va'ekue ha'e javi ma ngaru Páscoa regua ojapo okuapy peteī jaxyha'e catorze araa py.

<sup>20</sup> Mba'eta sacerdote ha'e levita kuery ma peteī'i rami ojeky'a'o ukapa ma vy ha'eve va'e ju ikuai. Ha'e rami vy ojuka okuapy Páscoa pygua vexa'i escravo ikuaiague gui ou va'ekue ha'e javi re, guyke'y kuery sacerdote ikuai va'e re, ojee ae guive.

<sup>21</sup> Ha'e rami vy Páscoa ára py Israel ramymino kuery escravo ikuaiague gui ou va'ekue ha'e javi okaru okuapy, ha'e gui ha'e kuery reve onhemoirū avi amboae regua kuery SENHOR Israel kuery ruete oeka aguā ha'e va'e yvy re amboae regua kuery hekoa va'e reko vaia gui ojepe'a va'ekue.

<sup>22</sup> Sete ára re ov'y'aa rupi ojapo okuapy ngaru mbojape mbovua revegua e'ŷ va'e regua, ov'y'a aguā SENHOR ombou ramo. Mba'eta ha'e kuery re oma'ē vy huvixa Assíria pygua py'a oguerova va'ekue, Israel kuery ruete pegua oo ojapoa py omombaraete aguā rami.

## 7

*Jerusalém katy huvixa Artaxerxes Esdras omondoukaague*

- <sup>1</sup> Ha'e va'e rire Pérsia pygua huvixa Artaxerxes oĩ jave ou Esdras. Ha'e va'e ma Seraías ra'y, Seraías ma Azarias ra'y, Azarias ma Hilquias ra'y,
- <sup>2</sup> Hilquias ma Salum ra'y, Salum ma Zadoque ra'y, Zadoque ma Aitube ra'y,
- <sup>3</sup> Aitube ma Amarias ra'y, Amarias ma Azarias ra'y, Azarias ma Meraiote ra'y,
- <sup>4</sup> Meraiote ma Zeraías ra'y, Zeraías ma Uzi ra'y, Uzi ma Buqui ra'y,
- <sup>5</sup> Buqui ma Abisua ra'y, Abisua ma Finéias ra'y, Finéias ma Eleazar ra'y, Eleazar ma Arão sacerdote yvateve va'e ra'y raka'e. Ha'e va'e jave py ma Esdras ou avi Babilônia gui.
- <sup>6</sup> Ha'e va'e ma SENHOR Israel kuery ruete lei oeja rã Moisés ombopara va'ekue re nhombo'e va'ety oikuaapa va'e. Hexe SENHOR Tuuete po oĩ ramo ixupe huvixa ome'ẽmba ojerurea rami tema.
- <sup>7</sup> Jerusalém katy jogueru avi Israel ramymino kuery va'e regua sacerdote, levita, oporaei va'ety, okẽ rarõa ha'e templo py nhopytyvõ va'ety kuery. Huvixa Artaxerxes sete ma'etõ re ma oĩ jave py jogueru.
- <sup>8</sup> Ha'e gui huvixa sete ma'etõ re ma oĩ jave peteĩ nhiruĩ jaxyia py Esdras ovaẽ Jerusalém py.
- <sup>9</sup> Mba'eta peteĩ jaxyia ára ypy'i py Babilônia gui ou rire peteĩ nhiruĩ jaxyia ára ypy'i py ma ovaẽ Jerusalém py, hexe Nhanderuete po oĩ ramo.
- <sup>10</sup> Mba'eta Esdras opy'a re omoĩ ae ma va'ekue SENHOR guigua lei oĩa rami ixupe ete oiko aguã, ha'e gui ojapopa aguã, ha'e Israel ha'e javi rupi nhombo'e aguã Nhanderuete ayvu ha'e oipotaa oeja va'ekue re.
- <sup>11</sup> Sacerdote Esdras ma SENHOR ayvu re nhombo'e va'ety, ojapo uka va'ekue ha'e oayvu Israel kuery peguarã oeja va'ekue ha'e javi re. Ixupe kuaxia para huvixa Artaxerxes ome'ẽ va'ekue ma po rami ipara oiny:
- <sup>12</sup> “Xee ma Artaxerxes huvixa ikuai va'e ruvixa aiko. Kova'e kuaxia amondouka sacerdote Esdras, Nhanderuete yva pygua va'e guigua lei re nhombo'e va'ety pe: Tove tereiko porã!
- <sup>13</sup> Po rami xeayvu: Xee apenaa rupi Israel kuery va'e regua ikuai va'e, sacerdote ha'e levita kuery nderupive Jerusalém tetã katy ooxe va'e rei toje'oi.
- <sup>14</sup> Ha'e gui ma xee ha'e xemongeta va'ety kuery reve romondouka Judá ha'e Jerusalém tetã re reikuua pota aguã, nderuete guigua lei ndepo py rerekva'e rami vy.
- <sup>15</sup> Reraa avi 'rã prata ha'e ouro xee ha'e xemongeta va'ety kuery Israel kuery ruete pe rome'ẽxe'a'i rupi rome'ẽ va'e, Jerusalém py ixupeguia oo oĩ ramo.
- <sup>16</sup> Ha'e rami ae avi prata ha'e ouro Babilônia yvy ha'e javi rupi rejou va'e reraapa avi 'rã, neretarã kuery ha'e sacerdote kuery ome'ẽxe'a'i py ome'ẽ va'e reve, Jerusalém py Nhanderuete pegua oo oĩ va'e pyguitarã.
- <sup>17</sup> Ha'e va'e peráta re ma rejogua 'rã vaka ra'y, vexa'i, vexa'i ra'y, mba'emo ra'yigue ha'e mba'emo rykue reme'ẽ va'erã. Ha'e nunga ha'e javi reme'ẽ 'rã Jerusalém py Nhanderuete pegua opy altar oĩ va'e áry.
- <sup>18</sup> Ha'e rã prata ha'e ouro rembyrekue ma ndee ha'e nderyvy kuery peikuaa rami ae 'rã peiporu. Penderuete oipotaa rami pejapo.
- <sup>19</sup> Ha'e gui tembiporu Nhanderuete pegua opy rupi oiporu pyrã ndevy ome'ẽ mbyre ma Penderuete renonde reme'ẽmba ju 'rã Jerusalém tetã py.
- <sup>20</sup> Ha'e rã amboae nunga Nhanderuete pegua opy guarã reikotevã va'e rei tema reraa avi 'rã xeropy mba'emo omoĩ porãatý gui ae.
- <sup>21</sup> “Ha'e gui ma Eufrates yakã rovai mba'emo re pepena va'ety kuery pe ju xee huvixa Artaxerxes xeayvu: Pendevy sacerdote Esdras Nhanderuete yva pygua lei re nhombo'e va'e mba'emo re ojerurea ramo peme'ẽmba vyvoi.

<sup>22</sup> Trinta e três mil quilos prata guigua peve teĩ, cem voxas trigo, cem ryru vinho ha'e cem ryru azeite peve, ha'e gui juky oata aguã rami e'ŷ 'rã peme'ê.

<sup>23</sup> Ha'e gui ma Nhanderuete yva pygua ojapo ukaague rami vy tojapopaa vyvoi ixupeguo oo pygumarã. Mba'eta nda'evei ipoxy etea ou aguã xee huvixa ha'e xera'y kuery ropaanare.

<sup>24</sup> Ha'e rami avi peteĩ re ju xeayvu pêvy. Sacerdote ha'e levita kuery, oporaei va'e, okẽ rarõa, Nhanderuete pegua opy ombo'eapo va'e kuery ha'e javi, ha'e kuery va'e regua pe ma peteive henda py napeme'ê ukai 'rã imposto neĩ pedágio.

<sup>25</sup> "Ha'e gui ndee Esdras, ne'arandua Nhanderuete gui ae rerekova va'e rami vy emoi joe opena va'erã ha'e nhomongetaarã. Ha'e va'e kuery ma opena 'rã Eufrates yakã rovai rupi ikuai va'e ha'e javi re, nderuete guigua lei oikuua va'e kuery ha'e javi re. Ha'e rã oikuua e'ŷ teri va'e ma ndee rembo'e avi 'rã.

<sup>26</sup> Ha'e rã Nhanderuete guigua ha'e huvixa guigua lei rupi e'ŷ ikuai va'e ma rembopaga vy rejuka 'rã, e'ŷ vy mombyrya katy 'rã remondouka, imba'e rei-rei va'ekue reipe'apa 'rã, e'ŷ vy rembo'a mba'e 'rã", he'i va'ekue.

<sup>27</sup> Ta'ima'endu'a porãa SENHOR nhaneramoĩ kuery ruete re, mba'eta ha'e rami aguã oguerova huvixa py'a, Jerusalém py Nhanderuete pegua oo oĩ va'e omoatyrõ uka aguã.

<sup>28</sup> Xevy pe ojapo avi huvixa xemboaxy aguã rami, imongeta va'ety kuery ha'e yvatekueve ipo'akapa va'e renonde py aĩ jave. Ha'e rã xere SENHOR Xeruete po oĩ ramo aendu xembaraetea. Ha'e rami vy Israel kuery ruvixa va'e kuery regua amboaty xerupive oje'oi aguã.

## 8

### *Esdras rupive ojevy ju va'ekue rery oĩa*

<sup>1</sup> Ha'e ramo Artaxerxes huvixa oĩ jave py heta va'e kuery akã regua oje'oi xerupive Babilônia gui. Ha'e kuery rery ma po rami:

<sup>2</sup> Finéias ramymino kuery va'e regua ma Gérson. Itamar ramymino kuery va'e regua ma Daniel. Davi ramymino kuery va'e regua ma Hatus.

<sup>3</sup> Secanias ha'e Parós ramymino kuery va'e regua ma Zacarias, ha'e gui hexeve cento e cinqüenta avakue rery avi omboparaa.

<sup>4</sup> Paate-Moabe ramymino kuery va'e regua ma Zeraías ra'y Elioenai, ha'e hexeveguia duzentos avakue ju.

<sup>5</sup> Secanias ramymino kuery va'e regua ma Jaaziel ra'y, ha'e hexeveguia trezentos avakue ju.

<sup>6</sup> Adim ramymino kuery va'e regua ma Jônatas ra'y Ebede, ha'e hexeveguia cinqüenta avakue.

<sup>7</sup> Elão ramymino kuery va'e regua ma Atalias ra'y Jesaías, ha'e hexeveguia setenta avakue ikuai.

<sup>8</sup> Sefatias ramymino kuery va'e regua ma Micael ra'y Zebadias, ha'e hexeveguia oitenta avakue ikuai.

<sup>9</sup> Joabe ramymino kuery va'e regua ma Jeiel ra'y Obadias, ha'e hexeveguia duzentos e dezoito avakue ikuai.

<sup>10</sup> Bani ramymino kuery va'e regua ma Josifias ra'y Selomite, ha'e hexeveguia cento e sessenta avakue ikuai.

<sup>11</sup> Bebai ramymino kuery va'e regua ma Bebai ra'y Zacarias, ha'e hexeveguia vinte e oito avakue ikuai.

<sup>12</sup> Azgade ramymino kuery va'e regua ma Hacatã ra'y Joanã, ha'e hexeveguia cento e dez avakue ikuai.

<sup>13</sup> Adonicão ramymino kuery va'e regua ma opa vyguo ovaëague. Ha'e kuery rery ma povae: Elifelete, Jeiel ha'e Semaías, ha'e gui ha'e kuery reveguia sessenta avakue ikuai.

<sup>14</sup> Bigvai ramymino kuery va'e regua ma Utai ha'e Zabude, ha'e hexevegua setenta avakue ikuai.

### *Esdras levita kuery ogueru rukaague*

<sup>15</sup> Ha'e va'e kuery ae amboatypa Aava katy yakã oxyry ovy va'e yvýry. Ha'e py ma mboapy ára re ranhe ropyta. Ha'e kuery ha'e sacerdote kuery re aikuua pota vy neĩ peteĩ ma voi ndajoui Levi ramymino va'e regua.

<sup>16</sup> Ha'e rami vy aenoĩ uka huvixa kuery Eliézer, Ariel, Semaías, Elnatã, Jariibe, Elnatã, Natã, Zacarias ha'e Mesulão, ha'e gui hi'arandukueve va'e Joiaribe ha'e Elnatã.

<sup>17</sup> Ha'e va'e kuery ma Casifia pygua huvixa Ido oña katy amondouka vy ha'e kuery pe ame'ẽ ayvu ixupe omombe'u va'erã, ha'e gui tyvy kuery Casifia pygua templo rupi nhopytyvõ va'ety kuery pe voi, orea py ha'e kuery ogueru aguã Nhanderuete pegua opy rupi opena va'erã.

<sup>18</sup> Ha'e ramo orere Nhanderuete po iporã va'e oĩ ramo orea py ogueru peteĩ ava hi'arandu va'e. Ha'e va'e ma Mali ramymino Serebias, Israel ra'y Levi ramymino va'e. Ta'y ha'e tyvy kuery reve vy dezoito ikuai.

<sup>19</sup> Ogueru avi Hasabias, Merari ramymino kuery va'e regua Jesaías guive. Ha'e va'e kuery ryvy ha'e ta'y kuery reve vy vinte ikuai.

<sup>20</sup> Ha'e gui templo rupi levita kuery pytyvõarã Davi ha'e yvatekueve omoĩ va'ekue ma duzentos e vinte ikuai. Ha'e va'e kuery ma hery rupi meme omoña.

### *Okaru e'ŷ re ikuaiague*

<sup>21</sup> Ha'e gui ma Aava yakã yvýry orekuuai pyve ae xeayvu rokaru e'ŷ re orekuai aguã, Nhanderuete renonde py ronhemo'yvy'i reve ixupe roguata porã aguã re rojapukai aguã, orera'y kue'iry ha'e oremba'e rei-rei ha'e javi reve guive.

<sup>22</sup> Mba'eta xee axã huvixa pe xondaro ha'e kavaju árygua kuery re ajerure aguã roguataa rupi orerovaigua kuery gui orerarõarã, mba'eta ixupe oreayvu ae ma va'ekue: "Nhanderuete oeka va'e kuery ha'e javi re ipo iporã va'e oĩ imoingo porãarã. Ha'e rã ixugui hexaraipa va'e ha'e javi rovai ma opo'akaa ha'e javi reve ombou 'rã opoxya", ro'e rire.

<sup>23</sup> Ha'e nunga rupi ore kuery rokaru e'ŷ re orekuai vy Nhanderuete pe rojerure tema rokuapy. Ha'e ramo oreayvua oendu vy oreptyvõ.

### *Sacerdote kuery pe mba'emo re opena ukaa ague*

<sup>24</sup> Ha'e ramo aiporavo doze yvatekueve va'e regua. Ha'e va'e kuery ma Serebias, Hasabias ha'e tyvy kuery dez ikuai va'e.

<sup>25</sup> Ha'e va'e kuery pe ma apena uka prata, ouro ha'e tembiporu Nhanderuete pegua opy guarã ome'ẽ mbyre re, apeja rire. Ha'e nunga ma huvixave, imongeta va'ety kuery, yvatekueve ha'e Israel kuery ha'e py ikuai va'e ome'ẽ va'ekue.

<sup>26</sup> Ha'e rami vy ha'e kuery po py amboaxa vinte mil quilos raxa prata guigua, tembiporu prata guigua três mil e trezentos quilos va'e, três mil e trezentos quilos ouro guigua,

<sup>27</sup> vinte karo ouro guigua oito quilos va'e meme, ha'e gui mokoĩ tembiporu overa va'e iporãve va'e guigua hexakãmba va'e, ouro rami avi hepy va'e.

<sup>28</sup> Ha'e rami vy aipoa'ha'e kuery pe:

— Peẽ kuery ma SENHOR pegua omboaxa pyre pendekuai, kova'e tembiporu ikuai va'e voi omboaxa pyre meme. Mba'eta kova'e prata ha'e ouro ma SENHOR peneramoĩ kuery ruete peguarã ome'ẽxe'a'i py ome'ẽ mbyre.

<sup>29</sup> Ha'e nunga rupi pepena porã 'rã, pearõ 'rã Jerusalém py sacerdote yvatekueve va'e, levita ha'e Israel kuery akã ikuai va'e renonde py ju pepeja reve pemboaxaa ára peve — ha'e.

<sup>30</sup> Ha'e ramo sacerdote ha'e levita kuery ma prata, ouro ha'e tembiporu opeja pyre ojopypa, Jerusalém py Nhanderuete pegua oo oĩ va'e pyguarã ogueraa aguã.

### *Jerusalém py ovaẽmbaague*

<sup>31</sup> Ha'e gui Aava yakã gui ma ijypy jaxyo doze araa py roje'oi, Jerusalém katy roo aguã. Orere Nhanderuete opo py opena porã vy orereraa jepe orerovaigua kuery ha'e tape rupi jojukaa kuery ikuai va'e ha'e javi gui.

<sup>32</sup> Ha'e rami vy rovaẽ ma Jerusalém py. Ha'e py ma mboapy ára re ranhe ropyta.

<sup>33</sup> Ha'e gui irundy araa py ma Nhanderuete pegua oo py roo vy ropeja ju prata, ouro ha'e tembiporu. Ha'e vy sacerdote Urias ra'y Meremote pe je romboaxapa. Ha'e va'e reve oĩ Finéias ra'y Eleazar. Ha'e kuery reve ikuai avi levita kuery Jesua ra'y Jozabade ha'e Binui ra'y Noadias.

<sup>34</sup> Ha'e nunga roipapa ha'e ropejapa ma rire ipoyia ha'e javi ombopara kuaxia re.

<sup>35</sup> Ha'e gui escravo ikuaiague gui ou va'ekue ma ome'ẽ okuapy mymba Israel kuery ruete peguarã. Noventa e seis vexa'i, setenta e sete vexa'i ra'y ome'ẽ. Ha'e gui ma doze kavara ava ju jejavya reguarã. Oapy reve meme ome'ẽ SENHOR pe.

<sup>36</sup> Ha'e gui ma huvixave ayvu omombe'u okuapy hembiguai huvixa kuery Eufrates yakã kyvõ rupi opena va'e pe. Ha'e ramo ha'e kuery orepytyvõ okuapy Nhanderuete pegua oo romoatyrõa py.

## 9

### *Esdras onhembo'e vy ha'e kuery reko vaia omombe'upaague*

<sup>1</sup> Ha'e nunga oikopa ma rire xea py ou okuapy yvatekueve va'e. Ha'e vy ha'e kuery aipoe'i okuapy:

— Israel kuery va'e regua sacerdote ha'e levita kuery ma ndojepe'ai okuapy amboae yvy regua reko vaia gui, cananeu kuery, heteu, ferezeu, jebuseu, Amom pygua, Moabe, Egito pygua ha'e amorreu kuery reko vaia gui.

<sup>2</sup> Mba'eta ha'e kuery va'e regua rajy kuery ae ogueraa gua'yxyrã, gua'y kuery ra'yxyrã guive. Ha'e rami vy nhande kuery nhandeky'a e'ŷ aguã va'ekue jaje'apa ma jakuapy kova'e yvy re ikuai va'e re. Yvatekueve ha'e huvixa kuery ranhe ho'apa ma ha'e ramo ojejavya py — he'i okuapy.

<sup>3</sup> Ha'e nunga xee aendu vy ajou vai vaipa. Ha'e rami vy amondoropa xeano, xe-manto guive. Xeaptye gui xe'a ha'e xerendyva aekyi reve aguapy ainy.

<sup>4</sup> Ha'e ramo xea py onhemboatypa okuapy Israel kuery ruete ayvu oendu vy oryryipa va'e, escravo ikuaiague gui ojevy va'ekue ojejavypa rei okuapya re nda'evei vy. Ha'e ramo xee ma aguapy tema ainy ajou vai ete reve, ka'aru mymba ome'ẽa jave peve.

<sup>5</sup> Ha'e gui ka'aru mymba ome'ẽa jave py ma apu'ã ha'amy anhemo'yvyř'i ainya gui, xeano ha'e manto oxorokue rei reve. Ha'e vy xerenapy'ã re ju aĩ vy xepo auipi SENHOR Xeruete oĩa katy.

<sup>6</sup> Ha'e vy aipoe'i:

— Xeruete! Xee nda'evei rei aiko, ndea katy ama'ẽ aguã aximba guive. Mba'eta rojejavya ma oĩ-oĩve tema oreakã áryve rupi, orereko vaia ma yva peve oo.

<sup>7</sup> Oreramoĩ kuery ikuiaia ára guive aŷ peve ore kuery voi orereko vai rokuapy. Rojejavypaague re ae oremboaxapa raka'e huvixa amboae yvy regua po py, oreruvixa ha'e sacerdote kuery voi. Ha'e rami vy orere ou kyxe revegua, escravo orekuai aguã, imonda va'e ha'e roximba aguã, aŷ peve roexaa ramo ae.

<sup>8</sup> Ha'e gui aŷ ma xapy'a'i ndee SENHOR Oreruete oremboaxya rexo uka vy rejapo roo jepe nho aguã rami, ha'e henda iky'a e'ŷ va'e py ju orekuai porã aguã. Ha'e rami vy Oreruete, orevy reme'ẽ orerexa pyxo'i jevy aguã, ha'e teigue ju nhoembiguai orekuai tei rokuave'i aguã.

<sup>9</sup> Ore kuery nhoembiguai roikoa py tei ndee Oreruete, norepytyvõ e'ŷi. Ha'e rami 'râgue py oremboaxya rexo uka vy Pérsia pygua huvixa kuery renonde rupi voi oremboaxya roendu. Ha'e rami vy orepy'a guaxuve ndevygua oo oitypaa va'ekue rojapo ju aguã,

ivaipaague romoatyrõ vy, ha'e gui Judá ha'e Jerusalém py orekuaiia rupi renhemoō kora rami orerepyarã.

<sup>10</sup> — Ha'e vy aŷ Oreruete, kova'e nunga oiko rire mba'e ro'e 'rã tu? Mba'eta roejapa ma rejapo uka va'ekue

<sup>11</sup> nerembiguai profeta kuery pe aipo're uka va'ekue: "Yvy pendekoa aguã peoa va'e re ma ha'eve'ya oĩ, ha'e pygua kuery omongy'apa rire, mba'eta joavaive-ive rupi ha'e kuery ojejavypaa rupi vy omoneȳmba okuapy ojeguarupy.

<sup>12</sup> Ha'e nunga rupi napeme'ei 'rã penderajy kuery ha'e kuery ra'y kuery ra'yxyrã, ha'e kuery rajy kuery re voi napemomendai 'rã pendera'y kuery. Ha'e kuery reve ndapejapoi 'rã peteĩ rami pendekuai aguã, neĩ pevy'a pekuapy aguã. Ha'e rami vy 'rãe penembaraeteve kova'e yvy re iporãgueve oiko va'e re pekaru pekuapy aguã, ha'e vy pendera'y kuery peguarã kova'e yvy peja aguã raka'e rã peve guarã", 're uka va'ekue.

<sup>13</sup> Ha'e gui Oreruete, ore kuery orerekoi vaiague re ha'e rami ete mba'emo vai oiko, ha'e rami avi rojeavyague re orembopaga aguã gui ndee norembopagaive guive, ha'e rami 'rãgue py rejapo rokuave'i va'ekue roo jepe nho aguã rami, roexaa rami.

<sup>14</sup> Ha'e rami teĩ ha'ekue rami ae tema roejapa ju rejapo uka va'ekue, ha'e vy apygua kuery re romenda rokuapy, ojeguarupy rojapo vy. Ha'e rami rire orerovai nandepoxyi 'rã teve oremomba peve, neĩ peteĩve oo jepe va'e naembyrei aguã rami?

<sup>15</sup> SENHOR Israel kuery ruete va'e! Ndee ma nderekoi porã va'e, ha'e rã ore kuery ma oo jepe va'ekue regua rembyrekue rive, aŷ roexaa rami. Apy ma nerenonde py ma orerekoi vaia py orekuai, nerenonde peteĩve heko vai va'e oĩ aguã nda'evei teĩ — he'i.

## 10

### *Avakue Israel regua gua'yxy heteu regua omondoukapa jevyague*

<sup>1</sup> Ha'e rami vy Nhanderuete pegua oo renonde py Esdras onhembo'e vy heta va'e kuery reko vaia omombe'u, ha'e ojero'a reve ojae'o oiny. Ha'e rami jave oĩa py ono'õ reta ete jogueruvy Israel kuery avakue, kunhague ha'e kyrigue guive. Ha'e rami vy pavẽ rei ojae'o vaipa okuapy.

<sup>2</sup> Ha'e ramo Elão ramymino kuery va'e regua Jeiel ra'y Secanias ijayvu vy aipoe'i Esdras pe:

— Ore kuery ma Nhanderuete rovai orerekoi vai va'ekue amboae regua kunhague re romendaa py, amboae regua re ae. Ha'e rami teĩ nhande Israel kuery pe oĩ teri nharõ jaikovy aguã.

<sup>3</sup> Mba'eta aŷ gui ma Nhanderuete reve rojapo 'rã ixupe ju orekuai aguã, orera'yxy kuery ha'e imemby kuery ha'e javi romondoukapa ju aguã Senhor ijayvuague rami vy, ha'e Nhanderuete ayvu gui oryryi va'e kuery ijayvua rami vy, lei oĩa rami ae 'rã rojapo.

<sup>4</sup> Ha'e nunga rupi epu'ã ke, mba'eta kova'e nunga re ma ndee ae repena va'erã reĩ. Ha'e rã ore ma ndereve meme 'rã roiko. Nembaraete ha'vy rejapo ete aguã — he'i.

<sup>5</sup> Ha'e ramo Esdras opu'ã vy ojapo sacerdote yvatekueve va'e oura aguã rami, levita ha'e Israel kuery ha'e javi guive, ha'e rami ijayvuague ha'e kuery ojapopa aguã. Ha'e ramo ha'e kuery oura okuapy ha'e rami.

<sup>6</sup> Ha'e gui Nhanderuete pegua oo renonde Esdras oĩague gui ojepe'a vy opy ja'o Eliasibe ra'y Joanã pegua py ju oike. Ha'e py ma ndo'ui oiny mbojape, neĩ ndoy'ui vinho. Ojae'o oiny escravo ikuaiague gui ojevy va'ekue ojejavypaa re.

<sup>7</sup> Ha'e gui Judá ha'e Jerusalém rupi omombe'ua escravo ikuaiague gui ojevy va'ekue ha'e javi onhemboatypa aguã Jerusalém py,

<sup>8</sup> ha'e gui xapy'a rei amongue mboapy araa py teĩ ndoui va'e ma imba'e rei-rei ha'e javi omomba aguã, yvatekueve ha'e nhomongeta va'ety kuery ijayvuague rami vy, ha'e gui ha'e ae ma voi oipe'aa aguã escravo ikuaiague gui ojevy va'ekue ikuaiia mbyte gui.

<sup>9</sup> Ha'e ramo mboapy araa py Judá ha'e Benjamim regua avakue ha'e javive onhem-boatypa okuapy Jerusalém py. Ha'e rami vy nove jaxyha'e vinte araa py ete ha'e kuery oguapypa okuapy Nhanderuete pegua oo rexei'i. Oryryi okuapy ha'e nunga káuxa, oky tuvixa va'e oiko va'e gui guive.

<sup>10</sup> Ha'e gui ma sacerdote Esdras opu'ã vy aipoe'i ha'e kuery pe:

— Peẽ kuery ma penderekova vai pekuapy amboae regua kunhague re pemendaa py. Ha'e rami vy pejapo Israel kuery re hetave oĩ aguã ojejavya.

<sup>11</sup> Ha'e gui aŷ ma penhemombe'upa 'rã SENHOR peneramoĩ kuery ruete pe, pejapo ha'e oipota va'e anho. Peje'ave eme amboae yvy regua re, amboae regua kunhague re guive — he'i.

<sup>12</sup> Ha'e ramo ha'e kuery ombovai vy ijayvu atã reve aipoe'i okuapy:

— Ha'e rami ma ha'eve 'rã. Ndeayvua rami orekuai aguã ae ha'eve.

<sup>13</sup> Ha'e ramive heta ae avi orekuai, oky vaipa ára guive. Ha'e nunga rupi nda'evei oka py nhandekuai aguã. Ha'e rami avi ha'e nunga ma peteĩ, mokoĩ ára'i guarã e'ý guive, mba'eta ha'e nunga py heta orekuai rojejavva'e.

<sup>14</sup> Ha'e nunga rupi aŷ gui ma yvatekueve toikuaa nhande kuery ha'e javi rekovia. Tove ára oa'angaague py ae ha'e kuerya py tou tetã ikuai va'e-va'e pygua amboae regua kunha re omenda va'ekue. Ha'e kuery reve tou avi peteĩ-teĩ tetã pygua nhomongetaa ha'e joguerekova kuery, nhandegui Nhanderuete oipe'apa peve orerekovaia káuxa opoxya ombou va'ekue — he'i okuapy.

<sup>15</sup> Ha'e rami aguã Asael ra'y Jônatas ha'e Ticvá ra'y Jazeías anho ndojou porãi. Ha'e kuery reve levita regua Mesulão ha'e Sabetai avi nhomoirû.

<sup>16</sup> Ha'e rami ae escravo ikuaiague gui ojevy va'ekue ojapo okuapy. Ha'e rami vy sacerdote Esdras oiporavo avakue hery rupi, dez jaxyha'e jypy'i araa py ha'e nunga re oikuua pota okuapy aguã. Ha'e va'e kuery ma hetarã kuery akã, nguu kuery ro pygua kuery ikuaia rami omoĩ mbyre.

<sup>17</sup> Ha'e rami vy peteĩ jaxyha'e jypy'ia ára py oikuua potapa ma okuapy amboae regua kunhague re avakue omenda va'ekue re.

<sup>18</sup> Ha'e gui sacerdote ramymino kuery va'e regua kunhague amboae regua re omenda va'ekue ma ojou okuapy povae: Jozadaque ra'y Jesua ramymino kuery ha'e tyvy kuery va'e regua ma Maaséias, Eliézer, Jaribe ha'e Gedalias.

<sup>19</sup> Ha'e va'e kuery ma jopopyy reve jogueroayvu okuapy kunhague omondoukapa aguã re. Ha'e rami vy ojejavvyague re peteĩ-teĩ ome'ẽ okuapy peteĩ vixa'i ikora py oguerekova'e gueko vaiague rekovia.

<sup>20</sup> Imer ramymino kuery va'e regua ma Hanani ha'e Zebadias.

<sup>21</sup> Harim ramymino kuery va'e regua ma Maaséias, Elias, Semaías, Jeiel ha'e Uzias.

<sup>22</sup> Pasur ramymino kuery va'e regua ma Elioenai, Maaséias, Ismael, Natanael, Jozabade ha'e Elasa.

<sup>23</sup> Ha'e gui levita kuery va'e regua ma Jozabade, Simei, Quelaías hery mboae va'e Quelita, Petaías, Judá ha'e Eliézer.

<sup>24</sup> Oporaei va'ety kuery va'e regua ma Eliasibe. Okẽ rarõa kuery va'e regua ma Salum, Telém ha'e Uri.

<sup>25</sup> Ha'e gui Israel kuery va'e regua ju. Parós ramymino kuery va'e regua ma Ramias, Jezias, Malquias, Miamim, Eleazar, Malquias ha'e Benaia.

<sup>26</sup> Elão ramymino kuery va'e regua ma Matanias, Zacarias, Jeiel, Abdi, Jerimote ha'e Elias.

<sup>27</sup> Zatu ramymino kuery va'e regua ma Elioenai, Eliasibe, Matanias, Jerimote, Zabade ha'e Aziza.

<sup>28</sup> Bebai ramymino kuery va'e regua ma Joanã, Hananias, Zabai ha'e Atlai.

<sup>29</sup> Bani ramymino kuery va'e regua ma Mesulão, Maluque, Adaías, Jasube, Seal ha'e Jerimote.

- <sup>30</sup> Paate-Moabe ramymino kuery va'e regua ma Adna, Quelal, Benaia, Maaséias, Matanias, Bezalel, Binui ha'e Manassés.
- <sup>31</sup> Harim ramymino kuery va'e regua ma Eliézer, Issias, Malquias, Semaías, Simeão,
- <sup>32</sup> Benjamim, Maluque ha'e Semarias.
- <sup>33</sup> Hasum ramymino kuery va'e regua ma Matenai, Matatá, Zabade, Elifelete, Jeremai, Manassés ha'e Simei.
- <sup>34</sup> Bani ramymino kuery va'e regua ma Maadai, Anrão, Uel,
- <sup>35</sup> Benaia, Bedias, Queluí,
- <sup>36</sup> Vania, Meremote, Eliasibe,
- <sup>37</sup> Matanias, Matenai, Jaasai,
- <sup>38</sup> Bani, Binui, Simei,
- <sup>39</sup> Selemias, Natã, Adaías,
- <sup>40</sup> Macnadbai, Sasai, Sarai,
- <sup>41</sup> Azarel, Selemias, Semarias,
- <sup>42</sup> Salum, Amarias ha'e José.
- <sup>43</sup> Nebo ramymino kuery va'e regua Jeiel, Matitias, Zabade, Zebina, Jadai, Joel ha'e Benaia.
- <sup>44</sup> Ha'e va'e kuery ha'e javive ma amboae regua kunhague gua'yxyrã ogueraa va'ekue meme, amongue ma kunhague re ta'y va'ekue guive.

## Neemias rekokue oĩa Esdras rekokue oĩa

Kova'e kuaxia re ma oĩ Israel kuery Babilônia py escravo-rã ogueraa pyre oyvy re ju ojevy va'ekue rekokue. Mba'eta huvixa Babilônia re opena va'e ae omondouka. Po rami ipara oiny: "Peteĩ ma'etã re ma Pérsia pygua huvixa Ciro oĩ jave py Senhor ojapo oayvu Jeremias omombe'u va'ekue ojeupity aguã rami. Ha'e vy Ciro py'a re omoĩ openaa ha'e javi rupi omombe'u uka povae ayvu, ombopara uka guive. Ha'e vy aipoe'i uka: 'Pérsia pygua huvixa Ciro po rami ijayvu: Xevy pe Senhor Nhanderuete yva pygua omboaxa yvy ha'e javi re apena aguã. Xemoĩ avi peteĩ oo ixupe guarã ajapo uka aguã Judá yvy re Jerusalém tetã py. Ha'e nunga rupi ixupeguia pendekuai va'e ha'e javi reve Penderuete toiko, ha'e tapeo Judá regua Jerusalém py, Senhor Israel kuery ruete pegua oorã pejapo jevy aguã. Ha'e va'e ma Jerusalém pygua kuery ruete ae', he'i" (1.1-3).

Ha'e gui ma omombe'u ha'e kuery oguataague, Jerusalém tetã py ovaëague, templo omoatyrõ aguã omboypyague, hovaigua kuery omombytu'u ranheague, ojapopaague, ha'e gui oguerovy'aague, Nhanderuete gui meme ha'e nunga oiko rire.

Esdras ma sacerdote oiko raka'e. Ha'e ae Jerusalém py ou vy opena oikovy templo omoatyrõa rupi. Ijayvu avi heta va'e kuery gueko vaia gui ojepe'a aguã rami.

### *Jerusalém tetã re Neemias ojerureague*

<sup>1</sup> Hacalias ra'y Neemias ayvu oĩa. Ha'e gui vinte ma'etã re, jaxya Quisleu 'ea jave py, Susã py huvixa ro imbaraete va'e oĩ va'e py xee aiko jave

<sup>2</sup> ou xeryvy Hanani. Avakue Judá yvy gui ou va'ekue reve ovaẽ. Ha'e rã ha'e kuery pe aporandu judeu kuery oo jepe rã escravo-rã ndogueraai va'ekue re. Jerusalém tetã re voi aporandu.

<sup>3</sup> Ha'e ramoombovai:

— Escravo-rã ndogueraapaai va'ekue ha'e py ae teri ikuai huvixa openaa yvy re. Ha'e va'e kuery ma ojexavai okuapy karuai gui, nda'ija'eai guive. Ha'e gui Jerusalém tetã kora ma oitypaa, hokẽ ikuai va'e voi oapypaa — he'i okuapy.

<sup>4</sup> Ha'e ramigua aendu vy ajae'o ainy. Mbovy ára re rei e'ý nda'evei ete aiko. Akaru e'ý re aiko reve ajerure ainy Nhanderuete yva pygua renonde py.

<sup>5</sup> Ha'e vy aipoa'e:

— Aý SENHOR, Oreruete yva pygua ndepo'akapa ha'e okyjevepy va'e! Ndereve guarã rejapo va'ekue ha'e ndeporayvua rupi reiko, nderayvu va'e kuery rejapo uka va'ekue rupi ikuai va'e ha'e javi pe.

<sup>6</sup> Tove ndeapyxa toendu, nderexa tojep'e a guive, xee nerembiguai ajerurea re reikuua pota aguã. Aý neretonde py aí. Ara py ha'e pyávy Israel kuery nerembiguai ikuai va'e re ajerure ainy. Amombe'u guive Israel kuery nderovai ojejavy okuapyague. Mba'eta xee ha'e xeru ro pygua kuery voi rojejavý va'ekue.

<sup>7</sup> Opa mba'e vai rojapo va'ekue nderovai, ndorojapoi guive rejapo uka va'ekue, ndeayvu reja va'ekue, neí reipota va'e nerembiguai Moisés rupi rejapo uka va'ekue.

<sup>8</sup> Nema'endu'a ke ayvu nerembiguai Moisés pe remombe'u va'ekue re. Ha'e vy aipo're va'ekue: "Xapy'a rei peẽ kuery naxenhe'ẽ rendui ramo romoañmba 'rã yvy regua kuery mbyte rupi.

<sup>9</sup> Ha'e rami teĩ xevy pe pejevy ju vy ajapo uka va'ekue rupi peiko vy pejapo ete ri ramo yva apy rupi ete penemomboa rire teĩ ha'e gui romboatypa ju 'rã heruvy henda xerery amoĩ aguã aiporavoague py", 're va'ekue.

<sup>10</sup> Mba'eta kova'e kuery ma nerembiguai ikuai, nembaraetepaa ha'e ndepo'akaa rupi ndejeupe guarã reraa jepe va'ekue.

**11** Ha'e nunga rupi SENHOR, ndeapyxa tojapyxaka tema xee nerembiguai ajerurea re, ha'e nerembiguai kuery ov'y a reve nderery oendu vy nemboete va'e ojerure okuapya re. Ejapo aŷ'i ma voi xee nerembiguai ajapo taa py aiko porā aguā rami. Ava renonde py aa rā ejapo ajerurea oendu aguā rami – ha'e, mba'eta ha'e va'e jave ma huvixave karo reruaty aiko.\*

## 2

### *Jerusalém tetā katy Neemias omondoukaa ague*

**1** Vinte ma'etŷ re ma huvixa Artaxerxes oŷ javé, jaxy nisā 'ea py ma vinho oy'u va'erā oguerua rā ajopy vy ame'ē ixupe. Ha'e va'e e'ŷ mbove ma neŷ peteŷgueve ma voi henonde xeporiaua ndaexa ukai teri.

**2** Ha'e ramo huvixa aipoe'i xevy:

– Mba'e re tu nemba'eaxy vy e'ŷ nderova poriau rei ri? Ndepy'a py ae 'rā ndeporiau – he'i.

Ha'e rā xee aendu akyje etea reve

**3** ambovai:

– Xeruvixa, tereikove riae! Ha'e rami avi mba'exa tu xerova re avy'aa aexa uka 'rā tetā xeramoŷ kuery rupa oŷ ivaipa teria ja, hokē tata py oapypaa rire guive? – ha'e.

**4** Huvixa oporandu ju xevy:

– Mba'e nunga re tu rejerure ta xevy?

Ha'e rā Nhanderuete yva pygua pe ranhe ajerure.

**5** Ha'e rami vy ambovai huvixa:

– Xeruvixa, ndevy pe ha'eve ramo, ha'e neretonde py xee nerembiguai xemboaxy ri ramo ajerure Judá yvy katy xemondouka aguā re, tetā xeramoŷ kuery rupa oŷ va'e amoatyrō ju aguā – ha'e.

**6** Ha'e gui huvixa, ijyvŷry ta'yxy oŷ avi va'e reve aipoe'i xevy:

– Raka'e peve 'rā tu nereīvei apy? Raka'e 'rā tu rejevy ju?

Ha'e rā amombe'u raka'e peve pa ha'e py aiko ha'e ajevy aguā.

**7** Ha'e gui aipoa'eve ju huvixa pe:

– Xeruvixa, rejou porā ri vy eme'ē ha'vy kuaxia para Eufrates yakā rovai rupi huvixa opena va'e kuery peguarā, ha'e kuery oyvy rupi xemboaxa rā Judá yvy re avaē aguā.

**8** Eme'ē avi kuaxia huvixa pegua ka'aguy re opena va'ety Asafe pegua, xevy yvyla ome'ē aguā templo kora rokē ytara, tetā korarā, ha'e oo aŷ aguā ojapoa avi aguā – ha'e. Ha'e ramo huvixa ome'ẽmba xevy, xere Nhanderuete po ipo'akapa va'e oŷ ramo.

**9** Ha'e gui ma Eufrates yakā rovai huvixa kuery openaa py avaē vy ha'e kuery pe amboaxa kuaxia para huvixa ogueru ruka va'ekue. Xerupive huvixa ombou avi xondaro ruvixa ha'e kavaju árygua kuery.

**10** Ha'e nunga ma Horonaim pygua huvixa Sambalate ha'e hembiguai Amom guigua Tobias oikuaa vy ndojou porāi. Ojou vai ete Israel kuery aipytyvō aguā ajuague.

### *Heta va'e kuery tetā kora omoatyrō ju aguā re Neemias ijayvuague*

**11** Ha'e gui Jerusalém tetā py avaē vy mboapy ára re ranhe aiko rive.

**12** Ha'e gui peteŷ pytū apu'ā avy. Xerupive mbovy'i ete avi avakue oje'oi, mba'eta avave pe namombe'ui teri Jerusalém py ajapo aguā xepy'a re Xeruete omoŷ va'ekue. Mymba kuery voi ndaraai xereve, xerymba aŷa e'ŷ vy.

**13** Pyavyve aē avy Yvyugua Rokē gui, ha'e gui Teju Jagua Yvu oŷa katy ju aa Yty Renda Rokē katy aa vy. Ha'e py mae ma aexa Jerusalém tetā kora ivaipaa ha'e hokē ikuai va'ekue tata py oapypaague.

\* **1:11** “Ava” he'ia ma huvixave Artaxerxes pe ae (2.1). Ha'e va'e jave huvixa karo reruaty Neemias oiko va'e vy onhembopy'a henonde guetarā kuery re ojerure aguā re. Ha'e rami aguā re ojerure ma voi Nhanderuete pe, oo vy huvixa pe ojerure aguā irundy jaxy teri oata reve.

**14** Ha'e gui ma aave Yvu Rokē ha'e huvixa pegua yy omboty pyre peve. Ha'e rami teĩ mamove noĩ xerymba aĩa oaxa aguã.

**15** Ha'e rami vy pytū teri reve aẽve avy yakã rembe rupi. Ha'e py aexave ju tetã kora oĩ va'e. Ha'e gui ajevy vy Yvyugua Rokē rupi aike vy xero py ju aa.

**16** Huvixa kuery ma ndoikuaai marã katy pa aa ague, neĩ mba'e pa ajapoague voi, mba'eta mba'eve rei namombe'ui teri judeu kuery pe, sacerdote kuery, yvatekueve, huvixa kuery, neĩ ombo'eapo va'erã kuery pe voi.

**17** Ha'e gui ma xee aipoa'e ha'e kuery pe:

— Pexa ma aĩ opa mba'e py nhandekuai axya. Jerusalém tetã ivaipa, hokẽ voi oapypaa tata py. Peju ha'vy nhamoatyrõ ju Jerusalém kora. Ha'e ramo 'rãe nanhandejajavei — ha'e.

**18** Ha'e kuery pe amombe'u avi Xeruete po ipo'akapa va'e xere oĩa ha'e huvixave xereve ijayvuague.

Ha'e ramo ha'e kuery aipoe'i:

— Ronhemooĩ 'rã ha'vy nhamoatyrõ aguã — he'i okuapy. Ha'e rami vy ikyre'ŷ okuapy ombo'eapo porã aguã.

**19** Ha'e rã Horonaim pygua huvixa Sambalate, hembiguai Amom guigua Tobias ha'e Arábia guigua Gesém ha'e nunga oikuua vy orejojai rei okuapy. Orembojaru reia rupi aipoe'i:

— Mba'e tu pejapo ta? Tyrã pa huvixave rovai pepu'ã ta?

**20** Ha'e rã xee ambovai:

— Oreruete yva pygua ae orepytyvõ 'rã rojapopa aguã rami. Ha'e nunga rupi hembiguai kuery orekuai va'e ronhemooĩ 'rã romoatyrõmba ju aguã. Ha'e rã peẽ kuery ma ore kuery reve mba'eve rei ndaperekoi Jerusalém tetã py. Ha'e py nda'evei guive peike aguã, pendere na'ima'endu'aai rã — ha'e.

### 3

#### *Tetã kora omoatyrõa rupi ombo'eapo va'e kuery rery oĩa*

**1** Ha'e gui sacerdote yvateve va'e Eliasibe voi onhemooĩ avi tyvy kuery sacerdote ikuai va'e reve Vexa'i Rokē omoatyrõ ju aguã. Ha'e va'e ma Nhanderuete peguarã omboaxa, ha'e hokẽrã omoĩ. Ha'e gui Torre dos Cem ha'e Torre Hananel pegua oĩa peve omoatyrõ heravy kora.

**2** Ha'e va'e kuery yvýry ma avakue Jericó guigua ju ombo'eapo okuapy. Ha'e va'e kuery yvýry Inri ra'y Zacur ju ombo'eapo.

**3** Ha'e gui Hassenaá ra'y kuery ma omoatyrõ okuapy Pira Rokē 'ea. Omboytapa ma vy okẽ ju omoĩ, ijokoarã ferro ha'e yvyra guigua reve.

**4** Ha'e kuery yvýry ma Urias ra'y Meremote ju ombo'eapo, Coz ramymino va'e. Ha'e va'e yvýry ma Berequias ra'y Mesulão ju omoatyrõ, Mesezabel ramymino. Ha'e va'e yvýry ma Baaná ra'y Zadoque ju omoatyrõ.

**5** Ha'e va'e kuery yvýry ma Tecoa tetã pygua kuery omoatyrõ. Ha'e rã ha'e pygua yvatekueve ma nomba'eapoxei okuapy opena va'erã oĩ va'e pe.

**6** Ha'e gui Paséia ra'y Joiada ha'e Besodias ra'y Mesulão omoatyrõ Okẽ Ymague. Ha'e rami vy omboyta vy omoĩ ju imo'amy okẽ, ijokoarã ferro ha'e yvyra guigua reve.

**7** Ha'e va'e kuery yvýry ma Gibeão pygua Melatias ha'e Merom pygua Jadom ju ombo'eapo, ha'e gui avakue Gibeão ha'e Mispa guigua, Eufrates yakã rovai huvixa oĩ va'e rembiguai ikuai va'ekue meme.

**8** Ha'e kuery yvýry ma ombo'eapo avi Haraías ra'y Uziel ouro re ombo'eapo va'ety. Ha'e va'e yvýry ma Hananias ju ombo'eapo, heakuã porã va'e apoa. Ha'e rami vy ha'e kuery Jerusalém rupi omoatyrõmba Kora Ipyve Va'e oĩa peve.

<sup>9</sup> Ha'e va'e kuery yvýry ombo'eapo avi Jerusalém tetā mbyte rupi opena va'e Hur ra'y Refaías.

<sup>10</sup> Ijyvýry ombo'eapo avi Harumafe ra'y Jedaías. Ngoo yvýry rupi ae omoatyrō. Ha'e va'e yvýry ma Hasabnēias ra'y Hatus ju ombo'eapo.

<sup>11</sup> Amboae rupi ma Harim ra'y Malquias ha'e Paate-Moabe ra'y Hassube omoatyrō heravy, Torre Tatakuá 'ea voi.

<sup>12</sup> Ijyvýry ombo'eapo avi Jerusalém tetā mbyte rupi opena va'e Haloés ra'y Salum. Guajy kuery reve ombo'eapo okuapy.

<sup>13</sup> Ha'e gui Yvyugua Rokē omoatyrō va'e ma Hanum, Zanoa pygua kuery mboae reve. Ha'e kuery omoatyrōmba imo'amy okē, ijokoarā ferro ha'e yvyra guigua reve. Kora quattrocentos e cinqüenta metros peve omoatyrō avi, Yty Renda Rokē oña peve.

<sup>14</sup> Ha'e gui Yty Renda Rokē ae ma Bete-Haquerém pygua huvixa Recabe ra'y Malquias omoatyrō. Ha'e va'e omoatyrō okē, ijokoarā ferro ha'e yvyra guigua reve.

<sup>15</sup> Yakā Ryapy Rokē omoatyrō va'e ma Mispa pygua huvixa Col-Hozé ra'y Salum. Omoatyrōmba ma vy ojao'i. Ha'e gui okē ju omoī imo'amy, ijokoarā ferro ha'e yvyra guigua reve. Kora omoatyrōve heravy yy omboty pyre Selá py oī va'e yvýry rupi, huvixa mba'e yvotyty rexei, Davi rekoague katy gui tape pyrō-pyrō'a'i oguejy ouvy va'e peve.

<sup>16</sup> Ha'e rire Bete-Zur pygua huvixa Azbuque ra'y Neemias ju omoatyrō heravy. Davi rupa rexei peve omoatyrō, yy omboty pyre ha'e ipy'a guaxukueve rogue rupi peve.

<sup>17</sup> Ha'e va'e rire levita kuery ju omoatyrō okuapy Bani ra'y Reum reveguia kuery. Ha'e va'e kuery yvýry ma Queila yvy mbyte rupi opena va'e Hasabias ju ombo'eapo.

<sup>18</sup> Ha'e va'e rire ma tyvy ju ombo'eapo, Queila yvy mbyte rupi opena va'e Henadade ra'y Bavai.

<sup>19</sup> Ijyvýry ma Mispa pygua huvixa Jesua ra'y Ezer ju omoatyrōve heravy tembiporu moī porāaty via tape oē ový va'e rupi, kora ojerea peve.

<sup>20</sup> Ha'e va'e rire ma Zabai ra'y Baruque ju ikyre'ŷ reve omoatyrō amboae rupi, kora ojerea guive sacerdote yvateve va'e Eliasibe ro rokē peve.

<sup>21</sup> Ha'e va'e rire ma Urias ra'y Meremote, Coz ramymino va'e ju omoatyrō heravy Eliasibe ro rokē guive hoo apy peve.

<sup>22</sup> Ha'e va'e rire sacerdote kuery tetā rovai rupi ikuai va'e ju ombo'eapo.

<sup>23</sup> Ha'e gui ma Benjamim ha'e Hassube ju omoatyrō heravy ngoo yvýry rupi ae. Ha'e va'e kuery rire ma Maaséias ra'y Azarias ju omoatyrō, Hananias ramymino, ngoo yvýry rupi.

<sup>24</sup> Ha'e va'e rire ma Henadade ra'y Binui ju omoatyrō amboae rupi, Azarias ro guive opa ovya'i peve, kora ojerea peve ete.

<sup>25</sup> Ha'e gui opa ovya'i guive ma Uzai ra'y Palal ju omoatyrō, ha'e nhuā roka yvýry huvixa ro oī va'e áry torre hi'aī va'e guive. Ha'e va'e rire ma Parós ra'y Pedaías ju omoatyrō,

<sup>26</sup> ha'e gui templo py ombo'eapo va'ety kuery Ofel py ikuai va'e guive. Yy Rokē oña guive omoatyrō heravy kuaray oua katy, torre yvateve va'e hi'aña peve.

<sup>27</sup> Ha'e va'e rire ma Tecoa tetā pygua kuery amboae rupi ju omoatyrō okuapy, torre guaxu hi'aña guive Ofel kora oña peve.

<sup>28</sup> Ha'e gui Kavaju Rokē rovai guive ma sacerdote kuery ae omoatyrō heravy, peteī-teī ngoo yvýry rupi ae.

<sup>29</sup> Ha'e va'e kuery rire ma Imer ra'y Zadoque ju omoatyrō heravy ngoo yvýry rupi ae. Ha'e va'e rire ma Secanias ra'y Semaías ju omoatyrō, okē kuaray oua katyguia rarōa.

<sup>30</sup> Ha'e va'e rire amboae rupi omoatyrō va'e ma Selemias ra'y Hananias ha'e Zalafe ra'y mboapy memea va'e Hanum. Ha'e va'e kuery rire ma Berequias ra'y Mesulão ju omoatyrō heravy ngoo yvýry rupi ae.

<sup>31</sup> Ha'e va'e rire omoatyrō va'e ma ouro re ombo'eapo va'ety ra'y Malquias. Ha'e va'e ma omoatyrō heravy templo py ombo'eapo va'ety ha'e mba'emo vendea kuery ro ikuai peve, Harōa kuery Rokē rexei rupi, kora ojerea py opy oña peve.

**32** Ha'e gui kora ojerea py opy oña guive Vexa'i Rokẽ peve omoatyrõ va'e ma ouro re ombo'epo va'ety ha'e mba'emo vendea kuery.

## 4

### *Ngovaigua kuery jokoarã omoñague*

**1** Ha'e gui kora romoatyrõmba maa Sambalate oendu vy ipoxy ete. Ivai vaipa reve ijayvu vai judeu kuery rovai.

**2** Guyvy kuery ha'e Samaria pygua xondaro kuery ha'e javi oendua py ijayvu. Ha'e vy aipoe'i:

— Mba'e tu peva'e judeu kuery ikangykue ojapo ta? Ha'e rami aguã ojapo ukaa 'rã ri nda'u? Mba'emo mymba ojuka vy nda'u ome'ẽ 'rã ri? Peteĩ ára pyve'i nda'u omomba 'rã? Ita ra'ykue oapypa pyre aty gui nda'u omoatyrõve ju 'rã? — he'i.

**3** Hexeve hi'aĩ avi Amom guigua Tobias. Ha'e vy aipoe'i avi:

— Kora ita gui anho ha'e kuery ojapo teĩ hi'áry mbyku rive ojeupi vy oitypa 'rã — he'i.

**4** Oreruete, endu ke mba'eta ombojaru reipy orekuai. Ha'e kuery re ae tojeapa ju orembojaru reiague. Escravo-rã togueraapaa guive yvy mboae katy.

**5** Ejao'i eme ha'e kuery reko vaiague, nerенонде gui embogue eme ojejavyague, mba'eta ombo'epo va'e kuery oendua py nembopoxy okuapy.

**6** Ha'e rami py romoatyrõ heravy kora. Ha'e vy yvatea mbyte peve rombotypa, heta va'e kuery ombo'epo aguã ikyre'ý ramo.

**7** Ha'e rami teĩ Sambalate ha'e Tobias ha'e nunga oendu. Arábia guigua kuery, Amom ha'e Asdode guigua kuery avi oendu okuapy Jerusalém kora romoatyrõve tema heravya. Kora pa'ú ikuai va'ekue rombotypa rai'i maa ha'e kuery oikuua vy ivai vaipa okuapy.

**8** Ha'e rami vy ha'e kuery peteĩ rami ono'õmba okuapy Jerusalém tetã re opu'ã vy oremoangeke rei aguã.

**9** Ha'e rami teĩ Nhanderuete pe rojerure rokuapy. Harðarã romoĩ guive kuery ara py ha'e pyávy ijokoarã.

**10** Ha'e gui Judá regua avakue aipoe'i:

— Mba'emo reraa kuery na'imbaraetevei ma, mba'emo ra'ykue-'ykue aty heta vai ete rã. Kora jajapopa aguã nda'eve reguai — he'i okuapy.

**11** Orerovaigua kuery aipoe'i avi:

— Ha'e kuery mba'eve ndoikuuai neĩ ndoexai 'rã ha'e va'e kuery mbyte rupi roike vy rojukapa rã. Ha'e rami vy romombytu'upa 'rã ombo'epo va'e kuery — he'i okuapy.

**12** Ha'e gui ha'e kuery yvy'iry judeu kuery hekoa va'e mbovykue rei e'ý ou vy aipoe'i orevy:

— Opa rupi ha'e kuery ikuiaia gui ou ta nhanderovai opu'ã aguã — he'i ramo

**13** heta va'e kuery peteĩ-teĩ hoo pygua ikuiaia rami amoĩ kora yvy'ã guy katy teri oña py oarõ aguã, onhembotypa e'ý teria rupi. Kora ropy katy amombytapa imo'amay kyxe, hu'y guaxu ha'e hapa reve-reve.

**14** Ha'e vy aexa potapa ma vy apu'ã reve aipoa'e yvatekueve, huvixa kuery ha'e heta va'e kuery mboae pe:

— Pekye rei eme. Penema'endu'a tema SENHOR re, mba'eta ha'e ma ipo'akapa ha'e okyjevepy va'e. Ha'e rami vy pejoguero'a penderyvy ha'e penderyke'y kuery repya rupi, pendera'y ha'e penderajy kuery, pendera'yxy ha'e pendero ikuai va'e repya rupi guive — ha'e.

**15** Ha'e gui orerovaigua kuery oendu okuapy roikuaa ae maa, Nhanderuete ojoko ramo ha'e kuery ojapoxea. Ha'e ramo kora oña katy ju roopa, peteĩ-teĩ romba'epo aguã katy ae.

**16** Ha'e va'e ára guive xerembiguai kunumigue regua mbytekue ma ombo'epo 'rã okuapy kora re, ha'e rã amboae kuery ma hu'y guaxu reve ikuai, hu'y jokoa, guyrapa

ha'e pexo regua reve guive. Ha'e gui opena va'e kuery ma Judá kuery mbopy'a guaxua rupi ikuai.

<sup>17</sup> Ha'e rā mba'emo reraa kuery ma peteī-teī opo rovai py oupi 'rā mba'emo, ha'e rā hovai re ma ojopy 'rā heravy guembiporu.

<sup>18</sup> Om̄ba'eapo va'e kuery ha'e rami ae avi peteī-teī oku'a re oguerekō 'rā kyxe. Ha'e rami py om̄ba'eapo okuapy. Ha'e rā mimby guaxu monhe'ēarā amoī va'ekue ma xeyvy'iry riae oiko.

<sup>19</sup> Aipoa'e yvatekueve, huvixa ha'e heta va'e kuery ha'e javi pe:

— Jajapo va'erā oī va'e ma tuvixa ete, joapy e'ŷ-e'ŷ guive. Ha'e rami avi kora áry rupi ikuai va'e ma joegui mombyry-mbyry ikuai.

<sup>20</sup> Ha'e nunga rupi mimby guaxu nhe'ē pendu vyve ta'vy penha reve peno'ōmba orea py. Mba'eta Nhanderuete ae 'rā opu'ā nhanderepya rupi — ha'e.

<sup>21</sup> Ha'e rami py tema romba'eapo. Amongue va'e ma opo py hu'y guaxu reve ikuai kuaray hexakā guive ka'aru jaxy-tata ojekuaapa peve.

<sup>22</sup> Ha'e va'e jave ma voi aipoa'e heta va'e kuery pe:

— Peteī-teī pepyta 'rā Jerusalém tetā py ae penerembiguai kunumigue reve, pyávy tetā rarōa rupi pendekuai, ha'e gui ara py ju pemba'eapo aguā — ha'e.

<sup>23</sup> Ha'e gui xee neī namboivei xeao xejegui, xeryvy kuery, xepytyvōa kuery, neī avakue tetā rarōa xerupive ikuai va'e ma voi. Peteī-teī roke rojupy orerembiporu reve.

## 5

### *Peráta omboekovia retave e'ŷ aguā re ijayvuague*

<sup>1</sup> Ha'e rami teī heta va'e kuery kunhague reve ojapukai okuapy guyvy kuery judeu regua rovai.

<sup>2</sup> Ha'e vy amongue aipoe'i:

— Orereta raxa rima, orera'y ha'e orerajy kuery reve. Ha'e rami vy peme'ē na trigo ro'u va'erā rokuave'i aguā — he'i.

<sup>3</sup> Ikuai avi aipoe'i va'e:

— Oreyvy, oremba'ety uva ha'e orero voi jopo py romboaxa ma trigo rekovia, kova'e karuai gui — he'i.

<sup>4</sup> Ha'e gui ikuaise ju aipoe'i va'e:

— Peráta orevy oiporukaa va'ekue orevy ha'e uvaty regua imposto ropaga aguā.

<sup>5</sup> Oreryvy kuery reve peteī'i to'o orekuai, orera'y kuery voi ha'e kuery ra'y kuery rami ae avi heko porā va'e. Ha'e rami teī ne'exa, orera'y ha'e orerajy kuery romboaxa ma oreryvy kuery escravo-rā. Orerajy kuery va'e regua ma ogueraa ma escravo-rā. Ndorepo'akavei ma guive rogueru ju aguā, mba'eta oremba'ety ha'e uvaty ma jopo py opyta — he'i okuapy.

<sup>6</sup> Ha'e rami ete ha'e kuery ojapukai reve ijayvu ramo aendu vy xeporiau vaipa.

<sup>7</sup> Ha'e rami vy xee ae aikuaa pota porā ma vy xeayvu ete yvatekueve ha'e huvixa kuery pe. Ha'e vy ha'e kuery pe aipoa'e:

— Peē kuery tu peteī-teī penderyvy kuery pe mba'emo peiporuka rire pemboekovia retave rima — ha'e.

Ha'e gui ma ha'e kuery ikuiae re aikuaa pota aguā ajapo nhemboaty guaxu.

<sup>8</sup> Ha'e vy aipoa'e ha'e kuery pe:

— Ore ma mba'emo rojou va'ekue re rojogua ju oreryvy kuery judeu ikuai va'e yvy regua kuery pe ovendeague gui. Ha'e rā peē ju ri ty'y penderyvy kuery pevende ta joupe, ore ju rojogua aguā? — ha'e.

<sup>9</sup> Ha'e rami rā ha'e kuery okyrirīmba okuapy nombovai kuaai vy. Ha'e ramo aipoa'e ju:

— Peẽ kuery pejapo va'e ma ha'eve e'ŷ. Nda'evei ri ty'y Nhanderuete renonde pejererokyje aguã, amboae regua nhanderovaigua ikuai va'e nhanembojaru rei e'ŷ aguã?

<sup>10</sup> Ha'e gui xee voi, xeryvy kuery ha'e xerembiguai kunumigue reve ha'e kuery pe roiporuka avi peráta ha'e trigo. Ha'e rami teĩ nhamboekovia retave eme jaiporuka va'ekue áryve.

<sup>11</sup> Ha'e nunga rupi aŷ'i ma voi peẽ kuery peme'ẽ ju ha'e kuery yvy, uvaty, oliveira ty ha'e hoo peipe'a va'ekue. Peme'ẽmba avi peráta pemboekovia retaveague, trigo, uvaty ha'e azeite ha'e kuery gui peipe'a va'ekue — ha'e.

<sup>12</sup> Ha'e ramo ombovai okuapy:

— Ha'e kuery pe rome'ẽmba ju 'rã ha'vy, ndorojerurevei ma 'rã guive. Ndee aipo'rea rami ae 'rã rojapo — he'i okuapy. Ha'e ramo aenoĩ avi sacerdote kuery, ha'e vy ajapo ha'e kuery oura aguã rami ha'e va'e ayvu ojapo avi aguã.

### *Neemias ojapo porãa re ijayvuague*

<sup>13</sup> Ha'e gui xeao ambovava ratã reve aipoa'e:

— Nami avi Nhanderuete tojapo, tombovava imondovy ava oayvuague ojapopa e'ŷ va'e. Ixugui toipe'apa hoo ha'e ombo'eapoa rupi ojou va'e ha'e javi — ha'e.

Ha'e ramo ijaty va'e kuery ha'e javi ombovai vy

— Ha'eve va'e! — he'i okuapy. Ha'e vy omboete okuapy SENHOR. Ha'e rire ma ha'e kuery ojapo oayvuague.

<sup>14</sup> Ha'e gui ma Judá yvy rupi opena va'erã xemoїague ára guive, Artaxerxes huvixa oĩa vinte ma'etŷa guive trinta e dois ma'etŷa peve, ha'e javi vy doze ma'etŷ re aĩ jave ma xee neĩ xeryvy kuery voi ndoro'ui tembi'u huvixa peguarã xevy ome'ëa va'ekue gui.

<sup>15</sup> Ha'e rã yma huvixa kuery xee aĩ e'ŷ mbove ikuai va'ekue ma heta va'e kuery ojavyky rei vy ha'e kuery gui oipe'apa va'ekue tembi'u ha'e vinho, quarenta hatã'i va'e prata guigua guive. Hembiguai kuery kunumigue voi oguereko rei va'ekue heta va'e kuery. Ha'e rã xee ma ha'ekue rami ndajapoi Nhanderuete renonde ajererokyje vy.

<sup>16</sup> Ha'e rami 'rãgue py tetã kora re ombo'eapoa py xee voi amoatyrõ aikovy. Neĩ peteĩ henda py ma voi ndajoguai xeyvyrã. Xerembiguai kunumigue voi ono'õmba ha'e py ombo'eapoa avi aguã.

<sup>17</sup> Ha'e rami ae avi xero py amovaẽ cento e cinqüenta avakue judeu regua huvixa kuery reve ou va'ekue, ha'e gui oreia py yvy regua orevvýry rupi hekoa va'e kuery ou rã amovaẽmba avi imbokuapy.

<sup>18</sup> Ára nhavõ ha'e kuery ho'u va'erã ajuka uka 'rã peteĩ vaka ha'e mboapy meme vexa'i oiporavo pyre. Uru ma heta ajuka uka avi, ha'e gui dez araa py nhavõ ajogua reta avi vinho joegua e'ŷ-e'ŷ. Ha'e rã tembi'u huvixa peguarã ome'ëa va'ekue ma xee ndajopyi xejeupe ae, kova'e kuery pe mba'emo ome'ë ucaa reta ae ma ramo.

<sup>19</sup> Ha'e nunga rupi Xeruete, nema'endu'a ke xere xemoingo porã aguã, kova'e kuery pe ajapo porã aikovya ha'e javi re.

## 6

### *Hovaigua kuery omongyjea rupi ijayvu okuapyague*

<sup>1</sup> Ha'e gui Sambalate, Tobias, Arábia pygua Gesém ha'e orerovaigua kuery ha'e javi oendupa okuapy kora romoatyrõmba maa, mba'eta nda'ipovei ma kora pa'ũ ikuai va'ekue, ha'e va'e jave kora rokẽ noromoĩ teri teĩ.

<sup>2</sup> Ha'e rami vy Sambalate aipoe'i uka xevy:

— Eju ke orerovaexĩ Ono yvyugua py tekua oĩa py — he'i, mba'emo vai xevy ojapoxe vy rive.

<sup>3</sup> Ha'e ramo ha'e kuery pe amondouka po rami omombe'ua aguã:

— Xee ndaa reguai teve, mba'emo tuvixa va'e rojapo rokuapy ramo. Mba'e re tu amba'eapoa gui apytu'upa ta, peẽ kuerya katy aa aguã rive? — ha'e uka.

<sup>4</sup> Irundykue ha'e kuery xerenoĩ uka ha'ekue rami ae. Ha'e rã xee voi ha'ekue rami ae tema ambovai.

<sup>5</sup> Ha'e gui peteĩ nhiruïguea ma xea py Sambalate ombou guembiguai opo py kuaxia para omboja pyre'õ ogueraa va'e.

<sup>6</sup> Ha'e va'e re ma po rami oĩ:

“Yvy regua kuery ikuiaia rupi oendu ndee ha'e judeu kuery ha'e javi reve nhanderuvixave re pepu'ãxe vy rive pemoatyrõ tetã kora. Gesém voi ha'e rami ae omombe'u. Ha'e kuery oikuaa rami vy ma je ndee ae reĩxe ha'e kuery ruvixarã.

<sup>7</sup> Ha'e rami aguã vy rive ae ma je profeta kueryrã remoĩ Jerusalém py, nderekorã re ijayvu vy ‘Ha'e va'e ma Judá pygua ruvixa’, he'iarã. Ha'e rami ha'e kuery ijayvua omombe'ua rã nhanderuvixave avi 'rã oendu. Eju vyvoi ha'vy ha'e nunga re ja-jogueroayvu aguã”, he'i uka xevy.

<sup>8</sup> Ha'e ramo xee aipoa'e uka ju:

— Ndeayvuague ma neĩ teǐgue ma ndoikoi. Neakã gui rive rima ndeayvu — ha'e uka.

<sup>9</sup> Ha'e kuery oremongyje reixe tema okuapy, mba'eta aipoe'i:

— Ha'e kuery ojepe'a 'rã ombo'eapoa gui, ombo'eapoague gui mba'eve oiko e'õ aguã rami — he'i. Ha'e nunga rupi Xeruete, xemombaraeke aõy.

<sup>10</sup> Ha'e gui ma aa Semaías ro py. Ha'e va'e Delaías ra'y, Meetabel ramymino, ngoo py ae onhemboty va'ekue. Ha'e gui ha'e va'e aipoe'i xevy:

— Jaa na Nhanderuete pegua oo py, ha'e templo ropy apy katy nhaĩ. Templo rokẽ ma nhamboty porã 'rã. Mba'eta pyávy oua 'rã ndejukaarã — he'i.

<sup>11</sup> Ha'e ramo xee aipoa'e:

— Ha'e rami avi ava xee ramigua teve onha 'rã? Mava'e tu xee ramigua oike 'rã templo ropy oikove aguã? Xee ndaikoi 'rã neĩ peteǐgueve — ha'e.

<sup>12</sup> Ha'e rami xeayvu mba'eta aikuua Nhanderuete e'õ ae ha'e va'e ayvu mbouare. Ixupe Sambalate ha'e Tobias peráta ome'ẽ rire rive ha'e rami ijayvu xerekorã re.

<sup>13</sup> Xemongyje reixe vy rive peráta ome'ẽ, xee ha'e ramia py ajejavu aguã, ha'e kuery xemboetea rupi e'õ ijayvu aguã.

<sup>14</sup> Ha'e nunga rupi Xeruete, nderexarai eme Tobias ha'e Sambalate ojapo vaiague re. Eikuua pota avi profeta kunha Noadia ha'e profeta ramigua mboae kuery re, xemongyje reia rupi ijayvu okuapy rã.

### Tetã kora omoatyrõmba ma okuapyague

<sup>15</sup> Tetã kora rojapopa aguã ma cinqüenta e dois ára re romba'eapo, jaxya elul 'epy va'e re vinte e cinco araa peve.

<sup>16</sup> Ha'e nunga orerovaigua kuery oendupa vy yvy regua kuery oreqvýry rupi ikuai va'e ha'e javi okyjepa rei, okangya anho oendu okuapy, mba'eta oikuaa nho Nhanderuete po'akaa rupi ha'e nunga rojapopaague.

<sup>17</sup> Ha'e va'e jave py Judá regua yvatekueve voi heta ombopara kuaxia Tobias pe ogueraa uka va'e, ha'e Tobias ju ha'e kuery pe kuaxia ombopara avi.

<sup>18</sup> Mba'eta Judá py mbovy e'õ ikuai Tobias pe ikuai aguã re oura va'ekue, Ará ra'y Secanias rajy me oiko ramo. Ha'e gui ta'y Joanã ma Mesulão rajy Berequias ramymino re omenda va'e.

<sup>19</sup> Ha'e kuery ma xee aendua py ijayvu okuapy mba'emo porã Tobias ojapoa re. Ha'e rami avi xeayvuague ju 'rã omombe'ua ixupe. Heta ma Tobias ombopara kuaxia xemongyje aguã.

<sup>1</sup> Ha'e gui tetā kora rojapopa ha'e okē romoīmba ma rire amoī okē rarōarā kuery, oporaei va'erā ha'e levita kuery.

<sup>2</sup> Jerusalém tetā re opena va'erā ma mokoī amoī: xeryvy Hanani ha'e huvixa ro re opena va'ety Hananias reve. Hananias ma Nhanderuete renonde ojererokyjea rupi oiko, amboae kuery gui ojerovia pyve guive.

<sup>3</sup> Ha'e gui ha'e kuery mokoīve pe xee aipoa'e:

— Peipe'a uka eme Jerusalém korarokē kuaray hakupa porā e'ŷa ja. Ha'e gui ka'aru'i pembedty ju 'rā imoiny okē rarōa kuery ikuai teria ja, ijokoa pemoī guive. Pemoī avi Jerusalém py hekoa va'e kuery harōarā, peteī-teī omoīague py toarō ngoo rexei rupi ae — ha'e,

<sup>4</sup> mba'eta tetā ma tuvixa va'eri mboapy'i orekuai ha'e py. Oo ikuai va'erā ma mbovy'i ete teri ojapoa.

### Esdras 2.1-70

<sup>5</sup> Ha'e gui xepy'a re Nhanderuete omoī amboatypa aguā yvatekueve, huvixa ha'e heta va'e kuery ha'e javi, tery ambopara uka aguā hamymino kuery rery oīa rami. Ha'e rami vy ajou kuaxia jypy'i ojevy va'ekue rery oīa. Ha'e va'e re ma po rami oī:

<sup>6</sup> Po rami ma yvy mboae re escravo-rā ogueraa ague gui ojevy ju va'ekue rery. Ha'e va'e kuery ma Babilônia pygua huvixa Nabucodonosor escravo-rā ogueraa uka va'ekue ri ojevypa ju Jerusalém tetā ha'e Judá yvy katy, peteī-teī guekoague py ae.

<sup>7</sup> Ha'e va'e kuery ma Zorobabel reve ojevy va'ekue, ha'e gui Jesua reve, Neemias, Azarias, Raamias, Naamani, Mordecai, Bilsā, Misperete, Bigvai, Neum ha'e Baaná reve. Pova'e ma Israel kuery va'e regua avakue meme.

<sup>8</sup> Parós ramymino kuery va'e regua ma dois mil e cento e setenta e dois ojevy.

<sup>9</sup> Sefatias ramymino kuery ma trezentos e setenta e dois.

<sup>10</sup> Ara ramymino kuery ma seiscentos e cinqüenta e dois.

<sup>11</sup> Paate-Moabe, Jesua ha'e Joabe ramymino kuery ma dois mil oitocentos e dezoito.

<sup>12</sup> Elão ramymino kuery ma mil duzentos e cinqüenta e quatro.

<sup>13</sup> Zatu ramymino kuery ma oitocentos e quarenta e cinco.

<sup>14</sup> Zaci ramymino kuery ma setecentos e sessenta.

<sup>15</sup> Binui ramymino kuery ma seiscentos e quarenta e oito.

<sup>16</sup> Bebai ramymino kuery ma seiscentos e vinte e oito.

<sup>17</sup> Azgade ramymino kuery ma dois mil trezentos e vinte e dois.

<sup>18</sup> Adonicão ramymino kuery ma seiscentos e sessenta e sete.

<sup>19</sup> Bigvai ramymino kuery ma dois mil e sessenta e sete.

<sup>20</sup> Adim ramymino kuery ma seiscentos e cinqüenta e cinco.

<sup>21</sup> Ater ha'e Ezequias ramymino kuery ma noventa e oito.

<sup>22</sup> Hasum ramymino kuery ma trezentos e vinte e oito.

<sup>23</sup> Bezai ramymino kuery ma trezentos e vinte e quatro.

<sup>24</sup> Harife ramymino kuery ma cento e doze.

<sup>25</sup> Gibeão ramymino kuery ma noventa e cinco.

<sup>26</sup> Avakue Belém ha'e Netofa guigua ma cento e oitenta e oito.

<sup>27</sup> Avakue Anatote guigua ma cento e vinte e oito.

<sup>28</sup> Avakue Bete-Azmavete guigua ma quarenta e dois.

<sup>29</sup> Avakue Quiriate-Jearim, Cefira ha'e Beerote guigua ma setecentos e quarenta e três.

<sup>30</sup> Avakue Ramá ha'e Geba guigua ma seiscentos e vinte e um.

<sup>31</sup> Avakue Micmás guigua ma cento e vinte e dois.

<sup>32</sup> Avakue Betel ha'e Ai guigua ma cento e vinte e três.

<sup>33</sup> Avakue Nebo mboae guigua ma cinqüenta e dois.

<sup>34</sup> Elão mboae guigua ramymino kuery ma mil duzentos e cinqüenta e quatro.

<sup>35</sup> Harim guigua ramymino kuery ma trezentos e vinte.

<sup>36</sup> Jericó guigua ramymino kuery ma trezentos e quarenta e cinco.

<sup>37</sup> Lode, Hadide ha'e Ono guigua ramymino kuery ma setecentos e vinte e um.

<sup>38</sup> Senaá guigua ramymino kuery ma três mil novecentos e trinta.

<sup>39</sup> Ha'e gui sacerdote kuery ju: Jedaías ramymino kuery Jesua ramymino ikuai va'e ma novecentos e setenta e três.

<sup>40</sup> Imer ramymino kuery ma mil e cinqüenta e dois.

<sup>41</sup> Pasur ramymino kuery ma mil duzentos e quarenta e sete.

<sup>42</sup> Harim ramymino kuery ma mil e dezessete.

<sup>43</sup> Ha'e gui levita kuery ju: Jesua, Cadmiel ha'e Hodeva ramymino kuery ma setenta e quatro.

<sup>44</sup> Oporai va'ety kuery: Asafe ramymino kuery ma cento e quarenta e oito.

<sup>45</sup> Oké rarõa kuery: Salum, Ater, Talmom, Acube, Hatita ha'e Sobai ramymino kuery ma cento e trinta e oito.

<sup>46</sup> Templo py ombo'eapo va'ety kuery ma Zia ramymino kuery, Hasufa, Tabaote,

<sup>47</sup> Queros, Sia, Padom,

<sup>48</sup> Lebana, Hagaba, Salmai,

<sup>49</sup> Hanã, Gidel, Gaar,

<sup>50</sup> Reaías, Rezim, Necoda,

<sup>51</sup> Gazão, Uzá, Paséia,

<sup>52</sup> Besai, Meunim, Nefusesim,

<sup>53</sup> Baquebuque, Hacufa, Harur,

<sup>54</sup> Bazlite, Meída, Harsa,

<sup>55</sup> Barcos, Sísera, Tama,

<sup>56</sup> Nesias ha'e Hatifa ramymino kuery guive.

<sup>57</sup> Salomão rembiguai kuery ramymino kuery ma Sotai ramymino kuery, Soferete, Perida,

<sup>58</sup> Jaala, Darcom, Gidel,

<sup>59</sup> Sefatias, Hatil, Poquerete-Hazebaim ha'e Amom ramymino kuery guive.

<sup>60</sup> Templo py ombo'eapo va'ety kuery Salomão rembiguai ramymino kuery reve ha'e javi vy ma trezentos e noventa e dois.

<sup>61</sup> Pova'e kuery ma Tel-Melá gui ojevy va'ekue, ha'e Tel-Harsa, Querube, Adom ha'e Imer gui teñndoikuuai ae tema Israel regua ikuai:

<sup>62</sup> Delaías, Tobias ha'e Necoda ramymino kuery ma seiscentos e quarenta e dois ikuai.

<sup>63</sup> Sacerdote kuery ha'e rami ae avi: Habaías, Coz ha'e Barzilai ramymino kuery ikuai. Ha'e va'e Barzilai ma Gileade pygua rajy re omenda rire hery rupi ae oenoña.

<sup>64</sup> Ha'e kuery ma kuaxia para tery oña re guery oeka teñndojooui okuapy. Ha'e nunga rupi nda'evei sacerdote ikuai aguã, ha'eve va'e ndoikoi va'e vy.

<sup>65</sup> Ha'e ramo ha'e kuery pe huvixa aipoe'i tembi'u iky'a e'ŷ va'e ho'u e'ŷ aguã, sacerdote Urim ha'e Tumim reveguia oiko e'ŷa ja.

<sup>66</sup> Ha'e va'e kuery ha'e javi vy ma quarenta e dois mil trezentos e sessenta ikuai,

<sup>67</sup> hembiguai avakue ha'e kunhague jaipapa e'ŷ re. Ha'e va'e kuery ju ma sete mil trezentos e trinta e sete ikuai. Ikuai avi duzentos e quarenta e cinco oporaei va'ety avakue ha'e kunhague.

<sup>68</sup> Ha'e kuery rymba kavaju ma setecentos e trinta e seis oguereko. Ha'e rã hymba mburika ma duzentos e quarenta e cinco ikuai.

<sup>69</sup> Hymba camelô ma quatrocetros e trinta e cinco. Mburika'i ma seis mil setecentos e vinte ha'e javi vy.

<sup>70</sup> Ha'e gui hetarā kuery akā ikuai va'e regua ma mba'emo ome'ẽ okuapy ombo'eapo va'e kuery peguarā. Huvixa ma mil hatā'i va'e ouro guigua ome'ẽ omoī porāaty py, cinqüenta hy'a ha'e quinhentos e trinta ao puku sacerdote pegua guive.

<sup>71</sup> Ha'e rā hetarā kuery akā mboae ma omoī porāaty py ome'ẽ avi vinte mil hatā'i va'e ouro guigua, ha'e dois mil e duzentos prata guigua tuvixakueve va'e.

<sup>72</sup> Heta va'e kuery mboae ma hatā'i va'e ouro guigua ome'ẽ vinte mil, ha'e dois mil prata guigua tuvixakueve va'e, sessenta e sete ao puku sacerdote pegua guive.

<sup>73</sup> Ha'e gui sacerdote kuery, levita, okē rarōa, oporaei va'ety, heta va'e kuery regua, templo py ombo'eapo va'ety ha'e Israel kuery ha'e javi ma guekoague py ae ju ikuai.

## 8

### *Heta va'e kuery oendua py Neemias lei ogueroayvuague*

<sup>1</sup> Ha'e gui sete jaxya py Israel kuery guekoa py ikuiaia gui ou vy peteī'i rami ono'õmba okuapy tetā mbyte py Yy Rokē oī va'e yvýry. Ha'e rami vy lei re nhombo'e va'ety Esdras pe ojerure okuapy kuaxia Israel kuery peguarā lei oĩa ogueru aguã, Moisés pe SENHOR ombopara uka va'ekue ae.

<sup>2</sup> Ha'e ramo heta va'e kuery ijatya py sacerdote Esdras ogueru lei. Avakue ha'e kunhague ikuai, ha'e javi oendu kuaa va'e reve. Ha'e va'e ára ma sete jaxya, jypy'ia ára.

<sup>3</sup> Ha'e gui ma Yy Rokē rexei tetā mbyte py Esdras ogueroayvu ho'amy kuaxia lei oĩa, ko'ẽmba'i guive kuaray mbyte peve ogueroayvu, avakue, kunhague ha'e ha'e javi oendu kuaa va'e pe. Kuaxia lei oĩa ogueroayvu rā heta va'e kuery ojapyxaka porā okuapy.

<sup>4</sup> Lei re nhombo'e va'ety Esdras ma hendarā yvyra gui ha'e va'e ára pyguarā ae ojapo pyre áry hi'aī. Oiporu kuaa regua re ikuai avi Matitias, Sema, Anaías, Urias, Hilquias ha'e Maaséias. Ha'e rā ijaxua re ma Pedaías, Misael, Malquias, Hasum, Hasbadana, Zacarias ha'e Mesulão ikuai.

<sup>5</sup> Ha'e gui ma heta va'e kuery áry Esdras hi'aīa py oipe'a kuaxia pavē oexaa py. Oipe'a ramove heta va'e kuery opu'ãmba okuapy.

<sup>6</sup> Ha'e ramo Esdras omboete SENHOR Nhanderuete ipo'akapa va'e. Ha'e ramo heta va'e kuery ha'e javi ombovai vy

— Amém, amém — he'i okuapy opo oupi reve. Ha'e rami vy ojero'a reve SENHOR omboete okuapy, ngova yvy katy omoī reve.

<sup>7</sup> Ha'e ramo Jesua, Bani, Serebias, Jamim, Acube, Sabetai, Hodias, Maaséias, Quelita, Azarias, Jozabade, Hanã ha'e Pelaías levita kuery ombo'e okuapy heta va'e kuery lei re. Ha'e ramia ja heta va'e kuery ikuiaia py ae opyta okuapy.

<sup>8</sup> Pavē oendu kuaa aguã rami ogueroayvu okuapy Nhanderuete guigua lei. Omombe'u porāve guive ogueroayvu rā heta va'e kuery oendu kuaa porāmba aguã rami.

<sup>9</sup> Lei regua ayvu heta va'e kuery ha'e javi oendu vy ojae'opa okuapy. Ha'e ramo huvixa Neemias, lei re nhombo'e va'ety sacerdote Esdras ha'e levita kuery omongoeta vy aipoe'i ha'e kuery pe:

— Kova'e ára ma SENHOR Nhanderuete peguarā ae nhamboaxa va'ekue. Ha'e nunga rupi pendeporiau eme, pejae'o eme — he'i.

<sup>10</sup> Aipoe'ive ju:

— Tapeo, pe'u xo'o ikyrave va'e, pey'u yre'ẽ, ha'e peraa uka oguerekō e'ŷ'i va'e-va'e pe ho'u va'erā. Mba'eta kova'e ára ma SENHOR Nhanderuete pegua. Ha'e nunga rupi pendeporiau eme, mba'eta Nhanderuete guigua vy'aa oī penembaraeterā — he'i.

<sup>11</sup> Levita kuery voi heta va'e kuery omokyririmba vy aipoe'i:

— Pekyirirī, mba'eta kova'e ára ma SENHOR pegua. Pendeporiau eme pekuapy — he'i okuapy.

**12** Ha'e ramo heta va'e kuery ngoo rupi ae ju oo okaru ha'e oy'u aguã, ha'e oguerek o e'ŷ'i va'e kuery pe tembi'u ogueraa uka avi. Ha'e rami vy ov'y'a porãmba rei okuapy, ayvu oendu va'ekue omombe'ua porãve rã oikuua porã rire.

### *Oguy'i py ikuai aguã regua ngaru ojapo okuapyague*

**13** Ko'ẽ jevy lei re nhombo'e va'ety Esdras oĩa py hetarã kuery akã ikuai va'e ha'e javi onhemboatypa ju okuapy sacerdote ha'e levita kuery reve, lei regua ayvu oikuua porãvexe vy.

**14** Ha'e rami vy lei Moisés pe SENHOR ombopara uka va'ekue re ojou imoiny sete jaxya regua ngaru oiko jave Israel kuery oguy'i py ikuai aguã.

**15** Ha'e ramo Jerusalém ha'e tetã ha'e javi rupi oje'oi vy omombe'u. Ha'e vy aipoe'i:

— Tapeo yvyty ikuai va'e rupi, peru oliveira rogue, zambujeiro, murta, pindo ha'e yvyra hovana va'e rogue, ipara oĩa rami vy oguy'i pejapo aguã — he'i.

**16** Ha'e ramo ha'e kuery oje'oi vy mba'emo rogue ogueru vy ojapo imoiny oguy'i ikuai aguã. Petei-tei ojapo ngoo ao'ia áry, ha'e'ŷ vy ngoka py, Nhanderuete pegua roka py mba'e, e'ŷ vy tetã mbyte py Yy Roké ha'e Efraim Roké avi va'e rexei.

**17** Escravo ikuaiague gui ojevy va'ekue ha'e javi oguy'i ojapo vy ikuai ha'e py. Teigueve ma voi ha'e ramigua Israel kuery ndojapoi va'e teri Num ra'y Josué oikoa guive ha'e va'e ára peve. Ha'e rami vy ov'y'a porãmba rei okuapy.

**18** Ko'ẽ nhavõ tema Esdras ogueroayvu kuaxia Nhanderuete guigua lei oĩa, jypy'ia ára guive opa peve. Sete ára re okaru okuapy. Ha'e gui oito araa py ma ipara oĩa rami vy oiko nhemboaty iky'a e'ŷ va'e.

## 9

### *Ojejavya omombe'u ha'e ojeko rerova okuapyague*

**1** Ha'e va'e jaxy re vinte e quatro araa py ma Israel kuery onhemboaty ju. Okaru e'ŷ re ikuai, voxvaikue py rive onhemonde okuapy, o'áry yvy ku'i omoĩ reve.

**2** Israel kuery amboae regua kuery gui oja'opa vy opu'ãmba reve omombe'upa okuapy ojejavya, guamoĩ kuery ojejavyague guive.

**3** Três horas re opu'ãmba okuapy jave ha'e kuery pe ogueroayvua kuaxia SENHOR Nguuete guigua lei oĩa. Ha'e gui três horas re ju ojejavya omombe'upa ha'e SENHOR Nguuete omboete okuapy.

**4** Ha'e gui levita kuery ikuai aguã pyrõa oĩ va'e áry ma Jesua, Bani, Cadmiel, Sebanias, Buni, Serebias, Bani ha'e Quenani opu'ã vy ojapukai atã okuapy SENHOR Nguuete pe.

**5** Ha'e rami vy levita kuery Jesua, Cadmiel, Bani, Hasabnéias, Serebias, Hodias, Sebanias ha'e Petaías aipoe'i okuapy:

— Pepu'ãmba ke, pemboete SENHOR Penderuete imarã e'ŷ va'e raka'e rã peve guarã.

Ha'e ramo heta va'e kuery aipoe'i okuapy:

— Tove nderery ima'endu'a porãmba toiko hexakãmba va'e, orema'endu'aa ha'e romboetea ha'e javi gui yvateve va'e vy.

**6** Mba'eta ndee anho SENHOR reiko. Rejapo raka'e yva yvate oĩ va'e hexe ikuai va'e ha'e javi reve, yvy ha'e ye'ẽ voi hexe ikuai va'e ha'e javi reve. Ha'e nunga ha'e javi moingovea ma ndee ae reiko. Ha'e ramo yva re ikuai va'e nemboete okuapy.

**7** Ndee SENHOR Oreruete, ndejeupe guarã Abrão reiporavo vy reipe'a raka'e caldeu kuery rekoia Ur gui. Ha'e vy remboery ju Abraão.

**8** Nerenonde py ojeroviapy oiko aguã ipy'a re oĩa reikuua vy ixupe rejapo raka'e nderupive guarã, hamymino kuery pe reme'ẽ aguã yvy cananeu kuery, heteu, amorreu, ferezeu, jebuseu ha'e girkaseu kuery ikuia. Ndeayvuague rejapopa guive, ndereko porã va'e vy.

<sup>9</sup> Ha'e rami vy Egito yvy re oreramoĩ kuery ojexavai rã rexa raka'e, rendu guive Ye'ẽ Pytã yvýry ojapukai okuapy rã.

<sup>10</sup> Ha'e rami vy huvixa Faraó rovai rejapo oikuua pyrã ha'e ndepo'akaa regua, hembiguai kuery ha'e ijyvy re ikuai va'e rovai, mba'eta reikuua ae onhembovate reia rupi ndevygua kuery oguerekao. Ha'e rami vy rejapo nderery re ima'endu'aa aguã rami, aÿ peve roexaa rami.

<sup>11</sup> Ha'e kuery renonde remboja'o avi ye'ẽ, yvy piru rupi oaxa aguã. Ha'e rã hakykue monhaa kuery ma yy ttypyea py remombopa, yy oxyry atã reia py ita oike vyvoi va'e rami.

<sup>12</sup> Ara py ndevygua kuery reraa peteĩ arai hi'aĩ va'e py, ha'e gui pyávy ma tata hexakãmba va'e hi'aĩ va'e py reraa, ha'e kuery oexa vy oo aguã.

<sup>13</sup> Ha'e gui Sinai yvyty apyte áry peve reguejy vy ha'e kuery reve ndeayvu raka'e yva py reĩa gui. Ha'e vy ha'e kuery pe reikuua uka reipota va'e ha'evea ramigua, lei anhetẽ va'e ha'e gui ndeayvu rejapo uka va'e iporã va'e ha'e javi.

<sup>14</sup> Ha'e kuery pe reikuua uka avi sábado ára iky'a e'ŷ va'erã reja va'ekue. Nerembigui Moisés pe remombe'u uka rejapo uka va'e, rembo'ea ha'e lei ha'e javi.

<sup>15</sup> Ha'e kuery inhembyayi ramo reme'ẽ raka'e mbojape yva guigua, ha'e gui ijy'uvei rã rejapo itaova gui yy oxyry ouvy aguã rami. Ha'e kuery pe aipo're avi oje'oi vy yvy ndepo reupi ha'e reura reve reme'ẽ aguã py hekoagruã.\*

<sup>16</sup> — Ha'e rami teĩ oreramoĩ kuery ndojapyxaka potai raka'e. Inhakã ratã vy noendu potai rejapo uka va'e re.

<sup>17</sup> Nanenhe'ẽ renduxei vy na'ima'endu'ai guive ha'e kuery pe mba'emo porã rejapo va'ekue re. Inhakã ratãve oje'oivy vy nderovai ete ikuai vy peteĩ omoĩ okuapy nguvixarã, Egito yvy re escravo ikuaiague py ju ojevypaxe vy. Ha'e rã ndee Oreruete oreperdoa kuaa va'e, orerayvu ha'e oremboaxy kuaa va'e. Nandevai voi va'e, ha'e opa mba'e py mborayvu rupi reiko va'e vy nderejai raka'e,

<sup>18</sup> ha'e kuery nguueterã vaka ra'y ra'angaa rive ojapo okuapy teĩ. Ha'e rami vy aipoe'i: "Kova'e ae ma Nhanderuete Egito yvy gui nhandereru va'ekue", he'i vy opa marã rei ijayvu okuapy nderovai.

<sup>19</sup> Ha'e rami teĩ ndee riae tema ndoporayvua ndopai va'e vy nderejai raka'e tekao e'ŷa re. Ha'e kuery renonde gui ndereipe'ai ara py arai hi'aĩ va'e oo aguã kuaa ukaa, neĩtataendy pyávy hi'aĩ va'e voi ndereipe'ai guive, rexa uka ae tema oo aguã.

<sup>20</sup> Ha'e kuery rekombo'earã rembou avi Nenhe'ẽ Porã. Maná voi nereme'ẽ e'ŷi guive ho'u va'erã, ha'e ijy'uvei rã reme'ẽ avi yy.

<sup>21</sup> Ha'e rami py quarenta ma'etý re tekao e'ŷa rupi rerekao jave ha'e kuery pe ndoatai mba'eve. Ijao voi na'inhymai, nda'ipy rurupai guive.

<sup>22</sup> Ha'e kuery po py remboaxa avi joyvy ha'e amboae regua kuery. Ha'e kuery peguarã remboja'o-ja'o yvy. Ha'e rami vy oyvyrã ojopy Hesbom pygua huvixa Seom ha'e Basã pygua huvixa Ogue yvykue.

<sup>23</sup> Ta'y kuery remboetave guive jaxy-tata yva re ikuai va'e rami. Ha'e rami vy reru yvy tuu kuery pe "Tapeo, pejopy penderekaoarã", 'reague py.

<sup>24</sup> Ha'e ramo ha'e va'e yvy re ta'y kuery oo vy ojopy. Ha'e kuery renonde gui cananeu kuery hekoagruã va'ekue reitypa vy ndevygua kuery po py ju remboaxa ijyvykue, ha'e pygua huvixa ha'e yvy regua kuery guive, oipotaa rami ae oguerekao aguã.

<sup>25</sup> Ha'e rami ramo ojopy tetã imbaraeteve va'ekue ha'e yvy porãa. Ojopy avi oo mba'emo porãgue anho oĩa, yy renderã yvy ojo'o pyre, uvaty, oliveira-ty ha'e yvyra oata aguã rami e'ŷ ikuai va'e. Ha'e ramo okaru porã okuapy hevyatãmba peve, ikyrapa guive. Iporã va'e re anho okaru, ndoporayvua rupi.

---

\* <sup>9:15</sup> João 6.31

<sup>26</sup> — Ha'e rami teĩ nanenhe'ẽ rendui jepi, nderovai guive opu'ã okuapy. Ndea katy okupe rive oguerova, ha'e profeta kuery ndevy pe ju ha'e kuery ojevy aguã re ijayvu ramo ojuka. Ha'e rami vy opa marã rei ijayvu okuapy nderovai.

<sup>27</sup> Ha'e nunga rupi imoingo axyarã kuery po py remboaxa ramo ombojexavai ete imbokuapy. Ha'e ramo ojexavai ma vy mae ojapukai okuapy ndevy. Ha'e rã yva py reĩa gui rendu. Ha'e rami vy ndee nhomboaxyo opa e'ŷ va'e vy rembou imoingo axy reia kuery po gui ogueraa jepe va'erã.

<sup>28</sup> Ha'e ramia gui ikane'õguapa ma vy nerенонде ojapove ju okuapy mba'emo vai. Ha'e ramo remboaxa ju hovaigua kuery po py ipo'aka aguã. Ha'e rami rã ha'e kuery ojeko rerova vy ojapukai ju okuapy ndevy. Ha'e ramo yva py reĩa gui rendu vy ndeporayvua rupi reraa jepe kuerei.

<sup>29</sup> Ha'e kuery pe ndeayvu jepi teĩ lei reja va'ekue rupi ikuai ju aguã. Ha'e rami teĩ ha'e kuery onhemboyvate rei vy noendu potai rejapo uka va'e. Ha'e rami vy ojejavvy tema okuapy ndeayvu rovai rupi, ha'e va'e rupi jaiko vy jaikove 'rã teĩ. Inhakã ratã vy okupe rive oguerova ndea katy. Onhemoakã ratã vy ndojapyxaka potai.

<sup>30</sup> Mbovy ma'etŷ re rei e'ŷ reropo'aka vy ha'e kuery rovai ndeayvu Nenhe'ẽ rupi, profeta kuery pe ndeayvu remombe'u uka vy. Ha'e rami teĩ ndojapyxakaxe'i ae okuapy. Ha'e rami rã remboaxa amboae yvy regua kuery po py.

<sup>31</sup> Ha'e rami teĩ Oreruete, ndeporayvua opa e'ŷ va'e rupi vy neremombai neĩ nderejai, ndeporayvu ha'e renhomboaxy va'e vy.

<sup>32</sup> — Ha'e nunga rupi aŷ Oreruete, ndeyvate ete ha'e ndepo'akapa va'e, okyjevepy guive reiko. Ndereve guarã rejapo va'ekue rupi, ha'e nhomboaxyo rupi reiko va'e vy "Mba'e'ŷ" 'ere eme rojexavaia ou va'ekue pe. Ha'e nunga ma ore kuery re, oreruvixa, yvatekueve, oreregua sacerdote ha'e profeta kuery, oreramoĩ kuery ha'e ndevygua kuery ha'e javi re ou va'ekue, Assíria pygua huvixa kuery ou guive aŷ peve.

<sup>33</sup> Ha'e nunga ha'e javi orere ou teĩ ndee ma ha'evea rami orererekoo. Ndee ma ojeroviapy reiko, ha'e rã ore ma ojeroviapy e'ŷ orekuai.

<sup>34</sup> Oreruvixa kuery, yvatekueve, sacerdote ha'e oreramoĩ kuery voi ojee nomoĩ ndeguigua lei rupi ikuai aguã, noendu potai guive rejapo uka va'ekue re, ha'e kuery rovai ndeayvu teĩ.

<sup>35</sup> Mba'eta ha'e kuery ma guetã py ikuiaia py, opa mba'e reme'ẽ va'ekue oguerekoo teĩ, yvy tuvixa ha'e iporã va'e ikuai aguã reme'ẽ va'ekue re ikuai teĩ ndevy pe ma ha'e kuery nda'ikuai, ndojeko rerovai guive mba'emo vai ojapoa gui.

<sup>36</sup> Ne'ixa, aŷ ma nhoembiguai orekuai. Yvy oreramoĩ kuery mba'emo aju re okaru porã aguã reme'ẽ va'ekue re ae orekuai teĩ ha'e py voi nhoembiguai orekuai.

<sup>37</sup> Mba'emo aju iporâve va'e ma huvixa kuery orere rembopo'aka va'ekue pe remboaxa jepi rojejavypaaque káuxa. Ha'e kuery oipotaa rami ae orererekoo, orerymba kuery guive. Ha'e rami rã ore kuery rojexavai ete rokuapy — he'i.

### *Heta va'e kuery lei rupi ikuai aguã ojapo okuapyague*

<sup>38</sup> Ha'e nunga ha'e javi rupi ore kuery rojapo rokuapy lei rupi ju orekuai aguã. Romoĩ atã aguã rombopara imoiny. Ha'e va'e re ma oreruvixa yvatekueve, levita ha'e sacerdote kuery ombopara imoiny guery.

## 10

<sup>1</sup> Kuaxia re guery ombopara va'ekue ma huvixa Hacalias ra'y Neemias, ha'e Zedekias,

<sup>2</sup> Seraías, Azarias, Jeremias,

<sup>3</sup> Pasur, Amarias, Malquias,

<sup>4</sup> Hatus, Sebanias, Maluque,

<sup>5</sup> Harim, Meremote, Obadias,

<sup>6</sup> Daniel, Ginetom, Baruque,

<sup>7</sup> Mesulão, Abias, Miamim,

<sup>8</sup> Maazias, Bilgai ha'e Semaías. Ha'e va'e kuery ma sacerdote ikuai.

<sup>9</sup> Ha'e gui levita kuery ma Azanias ra'y Jesua, ha'e gui Henadade ramymino kuery Binui, Cadmiel,

<sup>10</sup> tyvvy kuery reve: Sebanias, Hodias, Quelita, Pelaías, Hanã,

<sup>11</sup> Mica, Reobe, Hasabias,

<sup>12</sup> Zetur, Serebias, Sebanias,

<sup>13</sup> Hodias, Bani ha'e Beninu.

<sup>14</sup> Ha'e gui heta va'e kuery ruvixa ikuai va'e ma Parós, Paate-Moabe, Elão, Zatu, Bani,

<sup>15</sup> Buni, Azgade, Bebai,

<sup>16</sup> Adonias, Bigvai, Adim,

<sup>17</sup> Ater, Ezequias, Azur,

<sup>18</sup> Hodias, Hasum, Bezai,

<sup>19</sup> Harife, Anatote, Nebai,

<sup>20</sup> Magpias, Mesulão, Hezir,

<sup>21</sup> Mesezabel, Zadoque, Jadua,

<sup>22</sup> Pelatias, Hanã, Anaías,

<sup>23</sup> Oséias, Hananias, Hassube,

<sup>24</sup> Haloés, Pilha, Sobeque,

<sup>25</sup> Reum, Hasabna, Maaséias,

<sup>26</sup> Aías, Hanã, Anã,

<sup>27</sup> Maluque, Harim ha'e Baaná.

<sup>28</sup> Ha'e gui heta va'e kuery mboae, sacerdote ha'e levita kuery, okẽ rarõa, oporai va'ety kuery, templo py omba'eapo va'ety, amboae yvy regua kuery gui oja'o va'ekue Nhanderuete guigua lei rupi ikuai aguã, ha'e gui ha'e kuery ra'yxy, gua'y ha'e guajy kuery reve, oendu kuua va'e ha'e javive ma

<sup>29</sup> guyvy ha'e guyke'y kuery reve ojapo okuapy ha'e rami ikuai aguã. Ha'e rami vy huvixa kuery yvatekueve ou vy oura reve ojapo okuapy Nhanderuete guigua lei rupi anho ikuai aguã, Nhanderuete rembiguai Moisés rupi oikuua uka rire. Ha'e kuery ojee omoĩ SENHOR Nhanderuete ojapo uka va'ekue ojapopa aguã, oipotaa ha'e ijayvuague oeja va'ekue ha'e javi;

<sup>30</sup> ha'e gui yvy regua kuery re guajy kuery omomenda e'ŷ aguã, neĩ ha'e kuery rajy kuery re ma voi gua'y kuery omomenda e'ŷ aguã;

<sup>31</sup> ha'e gui sábado ára py yvy regua kuery guembiaipo e'ŷ vy mba'emo aju ovende va'erã ogueru ramo ha'e kuery gui mba'eve ojogua e'ŷ aguã sábado ára py, neĩ ára mboae Nhanderuete peguarã omboaxa pyre py ma voi; ha'e gui sete ma'etŷa re omba'eapoa gui opytu'u aguã, ha'e mba'emo oiporuka va'ekue áryve omboekoviave e'ŷ aguã.

<sup>32</sup> Ha'e rami ae orerekorã romoĩ avi ma'etŷa nhavõ hatã'i va'e irundy grama ipoyikue rome'ẽ aguã Nhanderuete pegua opy omba'eapo va'e kuery peguarã,

<sup>33</sup> ha'e henonde mbojape omoĩ mbyrã ojapo aguã, mba'emo aju guigua ha'e mba'emo oapy pyrã ome'ẽ jepi aguã, sábado pyguarã, ngaru jaxy pyau nhavõ guarã, ngarua ára oa'angaa ague py mba'emo ojapo aguã, mba'emo iky'a e'ŷ va'erã ojapo aguã, jejavya re mba'emo ome'ẽ aguã, Israel kuery ojejavya ojao'i uka aguã regua ome'ẽ aguã, ha'e Nhanderuete pegua oo pyguarã mba'emo ojapo aguã.

<sup>34</sup> Ha'e gui ore kuery regua sacerdote, levita ha'e heta va'e kuery ha'e javi reve roexa rokuapy xortea mava'e pa xakã Nhanderuete pegua opy ogueru aguã roikuua aguã. Ma'etŷa nhavõ, ára oa'angaa ague py porã, peteĩ-teĩ regua orekuaia rami vy rogueru aguã xakã SENHOR Nhanderuete pegua altar áry oapy pyrã, lei re oĩa rami vy.

<sup>35</sup> Ha'e gui ma'etŷa nhavõ oremba'ety gui rogueru aguã iporãgueve romono'õ ypy'i va'e, yvyra hi'a va'e gui jypy'igua guive SENHOR pegua opy guarã,

<sup>36</sup> ha'e jypygua orera'y oiko va'ekue, orerymba vaka kuery jypy oiko va'ekue guive rome'ẽ aguã lei re ipara oinya rami vy, kavara ha'e vexa'i kuery ha'e rami ae avi jypy oiko va'ekue rogueru aguã Nhanderuete pegua opy, ha'e py sacerdote kuery omba'epo va'e peguarã;

<sup>37</sup> ha'e gui romoapomo ypy va'ekue, ha'e mba'emo aju jypygua rome'ẽ avi aguã, opa marãgua yvyra'a gui, vinho ha'e azeite rogueru aguã sacerdote kuery pe Nhanderuete pegua opy. Ha'e gui oremba'ety gui oiko va'ekue guigua dízimo ma levita kuery pegua meme, mba'eta tetã oma'ety va'e ikuiaia va'e ha'e javi rupi ha'e kuery ae ikuai dízimo ojopy aguã rami.

<sup>38</sup> Sacerdote Arão ramymino va'e oĩ avi 'rã levita kuery dízimo ojopya py. Ha'e rã levita kuery oguerupa 'rã dízimo Nhanderuete pegua opy ja'o mba'emo omoĩ porãaty py.

<sup>39</sup> Mba'eta ha'e va'e opy ja'o py ae Israel ha'e Levi ramymino kuery ogueru 'rã mba'emo aju ome'ẽ mbyre, vinho ha'e azeite. Mba'eta ha'e py ae 'rã ikuai mba'emo ryru henda iky'a e'ŷ va'e pygua, sacerdote kuery voi ha'e py ae 'rã omba'epo, okẽ rarõa ha'e oporaei va'ety kuery guive. Ha'e rami vy 'rãe ndorerexarai Nhanderuete pegua oo gui.

## 11

### *Jerusalém py hekoa va'e kuery rery oĩa*

<sup>1</sup> Heta va'e kuery ruvixa kuery yvatekueve ma Jerusalém tetã py ae ikuai. Ha'e rã amboae kuery ma oexa okuapy xortea ikuai aguã oikuua aguã. Ha'e rami vy dez ikuai va'e-va'e gui peteĩ-teĩ ha'e kuery ogueru 'rã Jerusalém tetã iky'a e'ŷ va'e py ikuai aguã, ha'e rã nove va'e ma amboae tetã rupi 'rã ikuai.

<sup>2</sup> Heta va'e kuery ima'endu'a porã avakue Jerusalém py hekoa aguã oocea'i py oo va'ekue re.

<sup>3</sup> Pova'e ma huvixa kuery oyvy re openaa rupi Jerusalém py ikuai va'e. Ha'e rã Judá regua tetã ikuai va'e rupi ma peteĩ-teĩ guekoia py ae ikuai, guetã rupi ae. Ha'e va'e kuery ma Israel kuery, sacerdote ha'e levita kuery, templo py omba'epo va'ety ha'e Salomão rembiguai ramymino kuery.

<sup>4</sup> Ha'e gui Jerusalém tetã py ae ikuai Judá ha'e Benjamim ramymino kuery va'e regua. Judá kuery va'e regua ma Ataías. Ha'e va'e ma Uzias ra'y, Uzias ma Zacarias ra'y, Zacarias ma Amarias ra'y, Amarias ma Sefatias ra'y, Sefatias ma Maalalel ra'y, Maalalel ma Perez ra'y.

<sup>5</sup> Ha'e gui Maaséias ju. Ha'e va'e ma Baruque ra'y, Baruque ma Col-Hozé ra'y, Col-Hozé ma Hazaías ra'y, Hazaías ma Adaías ra'y, Adaías ma Joaribe ra'y, Joaribe ma Zacarias ra'y, Zacarias ma Siló pygua ra'y.

<sup>6</sup> Perez ramymino kuery Jerusalém py ikuai va'e ha'e javi vy ma quatrocentos e sessenta e oito avakue ipy'a guaxukueve.

<sup>7</sup> Ha'e gui Benjamim ramymino kuery ma pova'e: Salu ma Mesulão ra'y, Mesulão ma Joede ra'y, Joede ma Pedaías ra'y, Pedaías ma Colaías ra'y, Colaías ma Maaséias ra'y, Maaséias ma Itiel ra'y, Itiel ma Jesaías ra'y.

<sup>8</sup> Ha'e va'e rire jevygua ma Gabai ha'e Salai. Ha'e javi vy novecentos e vinte e oito ikuai.

<sup>9</sup> Zicri ra'y Joel ma ha'e kuery re opena va'e. Ha'e va'e rire ju Senua ra'y Judá voi opena avi 'rã tetã re.

<sup>10</sup> Ha'e gui sacerdote kuery ma Joaribe ra'y Jedaías, Jaquim

<sup>11</sup> ha'e Seraías. Ha'e va'e ma Hilquias ra'y, Hilquias ma Mesulão ra'y, Mesulão ma Zadoque ra'y, Zadoque ma Meraiote ra'y,

<sup>12</sup> Meraiote ma Aitube ra'y. Ha'e va'e ma Nhanderuete pegua opy re opena va'e. Guyvy kuery reve mba'emo ojapo okuapy templo py, oitocentos e vinte e dois ikuai. Ha'e gui Adaías ma Jeroão ra'y, Jeroão ma Pelalias ra'y, Pelalias ma Anzi ra'y, Anzi ma Zacarias ra'y, Zacarias ma Pasur ra'y, Pasur ma Malquias ra'y.

13 Tyvy kuery peteĩ-teĩ regua akã ikuai va'e reve ma duzentos e quarenta e dois ikuai. Ha'e gui Amasai ma Azarel ra'y, Azareel ma Azai ra'y, Azai ma Mesilemote ra'y, Mesilemote ma Imer ra'y.

14 Tyvy kuery avakue ipy'a guaxukueve ikuai va'e reve ma cento e vinte e oito ikuai. Ha'e kuery re opena va'e ma Gedolim ra'y Zabdiel.

15 Ha'e gui levita kuery ma Hassube ra'y Semaías. Hassube ma Azricão ra'y, Azricão ma Hasabias ra'y, Hasabias ma Buni ra'y.

16 Sabetai ha'e Jozabade ma levita kuery akã ikuai, Nhanderuete pegua oo roka rupi ombo'eapo va'e kuery re opena va'e.

17 Ha'e gui Mica ra'y Matatias. Mica ma Zabdi ra'y, Zabdi ma Asafe ra'y. Ha'e va'e ma onhembo'e okuapya py jogueroporaei rã. Ha'e gui Baquebuquias ma tyvy ju oiko. Ha'e va'e riregua ma Samua ra'y Abda. Samua ma Galal ra'y, Galal ma Jedutum ra'y.

18 Levita kuery tetã iky'a e'ý va'e py ikuai va'e ha'e javi vy ma duzentos e oitenta e quatro.

19 Ha'e gui okẽ rarõa kuery ma Acube, Talmom ha'e tyvy kuery. Okẽ rarõa kuery ha'e javi vy ma cento e setenta e dois ikuai.

### *Judá regua tetã ikuai va'e rupi hekoa va'e kuery rery oña*

20 Ha'e gui Israel kuery mboae, sacerdote ha'e levita kuery mboae voi tetã Judá yvy re ikuai va'e rupi hekoa, peteĩ-teĩ ijyvyrã oeja pyre py.

21 Templo py ombo'eapo va'e kuery ma Ofel py ikuai. Ha'e va'e kuery re opena va'e ma Zia ha'e Gispa.

22 Ha'e gui levita kuery Jerusalém py ikuai va'e re opena va'e ma Bani ra'y Uzi. Ha'e gui Bani ma Hasabias ra'y, Hasabias ma Matanias ra'y, Matanias ma Mica ra'y, Mica ma Asafe ra'y kuery Nhanderuete pegua opy oporai va'e regua.

23 MBA'eta ha'e kuery ombo'eapo aguã re huvixa ae ijayvu, jogueroporaei va'e kuery pe voi oeja avi ko'ë nhavõ ojapo aguã.

24 Ha'e gui Judá regua Mesezabel ra'y Petaías, Zera ramymino va'e ma huvixa ojapo ukaa rami oiko, heta va'e kuery re openaa ha'e javi rupi.

### *Tekoa ikuai va'e rupi hekoa va'e kuery rery oña*

25 Ha'e gui amongue Judá ramymino kuery hekoa okuapy imba'ety katy'i tekao ikuai va'e py: Quiriate-Arba ha'e ha'e'i rupi tekao ikuai va'e py, Dibom ha'e Jecabzeel ha'e ha'e'i rupi tekao ikuai va'e py voi,

26 ha'e gui Jesua py, Moladá, Bete-Pelete,

27 Hazar-Sual, ha'e gui Berseba ha'e ha'e'i rupi tekao ikuai va'e py,

28 Ziclague py, ha'e Mecona ha'e ha'e'i rupi tekao ikuai va'e py,

29 En-Rimom py, Zorá, Jarmute,

30 Zanoa, ha'e Adulão, Laquis ha'e Azeca ha'e ha'e'i rupi tekao ikuai va'e py. Berseba guive Hinom yvyugua peve ha'e kuery ikuai.

31 Ha'e gui Benjamim ramymino kuery ma Geba tekao py ikuai, Micmás, Aia, Betel ha'e ha'e'i rupi tekao ikuai va'e py voi,

32 Anatote, Nobe, Ananias,

33 Hazor, Ramá, Gitaim,

34 Hadide, Zeboim, Nebalate,

35 Lode, Ono, ha'e gui yvyugua mba'emo apoa kuery ikuiaia py.

36 Ha'e gui levita kuery va'e regua ma Judá ha'e Benjamim re ikuai.

## 12

### *Jerusalém py sacerdote kuery ou va'ekue rery oña*

1 Pova'e ma sacerdote ha'e levita kuery Sealtiel ra'y Zorobabel reve ojevy ju va'ekue, Jesua reve voi: Seraías, Jeremias, Esdras,

<sup>2</sup> Amarias, Maluque, Hatus,  
<sup>3</sup> Secanias, Reum, Meremote,  
<sup>4</sup> Ido, Ginetoí, Abias,  
<sup>5</sup> Miamim, Maadias, Bilga,  
<sup>6</sup> Semaías, Joiaribe, Jedaías,

<sup>7</sup> Salu, Amoque, Hilquias ha'e Jedaías. Ha'e va'e kuery ma Jesua oī jave sacerdote kuery re opena va'ekue, guyvy kuery re voi.

<sup>8</sup> Ha'e levita kuery regua ikuai avi Jesua, Binui, Cadmiel, Serebias, Judá ha'e Matanias. Ha'e va'e ma guyvy kuery reve jogueroporai va'e.

<sup>9</sup> Ha'e va'e kuery yvýry ma tyvy kuery Baquebuquias ha'e Uni ikuai, peteī-teī ojapo aguā va'ekue py ae.

<sup>10</sup> Ha'e gui Jesua ra'y ma Joiaquim, Joiaquim ra'y ma Eliasibe, Eliasibe ra'y ma Joiada,

<sup>11</sup> Joiada ra'y ma Jônatas, Jônatas ra'y ma Jadua.

<sup>12</sup> Sacerdote Joiaquim oī jave py sacerdote peteī-teī regua akā ma pova'e: Seraías ramymino kuery akā ma Meraías, Jeremias ramymino kuery akā ma Hananias,

<sup>13</sup> Esdras ramymino kuery akā ma Mesulão, Amarias ramymino kuery akā ma Joanā,

<sup>14</sup> Maluqui ramymino kuery akā ma Jônatas, Sebanias ramymino kuery akā ma José,

<sup>15</sup> Harim ramymino kuery akā ma Adna, Meraiote ramymino kuery akā ma Helcái,

<sup>16</sup> Ido ramymino kuery akā ma Zacarias, Ginetom ramymino kuery akā ma Mesulão,

<sup>17</sup> Abias ramymino kuery akā ma Zicri, Miniamim ha'e Moadias ramymino kuery akā ma Piltai,

<sup>18</sup> Bilga ramymino kuery akā ma Samua, Semaías ramymino kuery akā ma Jônatas,

<sup>19</sup> Joiaribe ramymino kuery akā ma Matenai, Jedaías ramymino kuery akā ma Uzi,

<sup>20</sup> Salai ramymino kuery akā ma Calai, Amoque ramymino kuery akā ma Héber,

<sup>21</sup> Hilquias ramymino kuery akā ma Hasabias, Jedaías ramymino kuery akā ma Natanael.

<sup>22</sup> Ha'e gui levita kuery va'e regua Eliasibe oī jave py pova'e kuery rery omboparaa peteī-teī regua akā ikuai ramo: Joiada, Joanā ha'e Jadua, sacerdote kuery rery omboparaague rami avi, Pérsia pygua huvixarā Dario oī peve.

<sup>23</sup> Levi ramymino kuery peteī-teī regua akā rery omboparaa kuaxia huvixa kuery rekukue oīa re, Eliasibe ra'y Joanā oī peve.

<sup>24</sup> Ha'e gui levita kuery va'e regua akā ma Hasabias, Serebias ha'e Cadmiel ra'y Jesua. Ha'e va'e kuery guyvy kuery reve ikuai jogueroporai ha'e ombojerovia aguā Nhan-deruete rembiguai Davi oejaague rami vy, jorire rire oporaei aguā rami ikuai.

<sup>25</sup> Ha'e okē rarōa kuery ma Matanias, Baquebuquias, Obadias, Mesulão, Talmom ha'e Acube. Ha'e va'e kuery okē katy'i mba'emo omoī porāaty oī va'e oarō avi okuapy.

<sup>26</sup> Ha'e va'e kuery ma Jesua ra'y Joiaquim, Jozadaque ramymino oī jave py ikuai, Neemias huvixa oī jave, ha'e Esdras sacerdote ha'e lei re nhombo'e va'ety oī jave voi.

### Nhanderuete po py tetā kora omboaxa okuapyague

<sup>27</sup> Ha'e gui Jerusalém tetā kora Nhanderuete po py omboaxa aguā ma oeka okuapy levita kuery opa rupi ikuiaia gui oupa aguā, ov'y'a reve kora omboaxa aguā, mboraei py, hy'a pu, mbaraka ha'e ixā reta va'e py guive.

<sup>28</sup> Ha'e ramo oporaei va'ety ra'y kuery voi oupa okuapy Jerusalém katy'i oyvy itui va'e gui, netofatita kuery rekoa ikuai va'e gui voi,

<sup>29</sup> ha'e gui Bete-Gilgal, Geba ha'e Azmavete katy'i yvvy itui va'e gui, mba'eta oporaei va'ety kuery ma guekoarā Jerusalém yvýry rupi ae ojou rire.

<sup>30</sup> Ha'e gui sacerdote kuery ojeky'a'o ukapa okuapy, levita kuery guive. Oiky'a'o avi heta va'e kuery, tetā rokē ha'e kora guive.

<sup>31</sup> Ha'e gui ma xee ajapo Judá pygua huvixa kuery yvatekueve ojeupipa aguã kora áry. Mokoñ henda rupi ajapo oporaei va'e kuery ojerojy jogueravy aguã rami. Peteñ regua ma kora áry rupi ojerojy aiporu kuaa regua re Yty Renda Rokë katy.

<sup>32</sup> Ha'e kuery rakykue rupi ma Hosaías ha'e Judá regua yvatekueve mbytekue oje'oi nhoguenoiny,

<sup>33</sup> ha'e gui Azarias, Esdras, Mesulão,

<sup>34</sup> Judá, Benjamim, Semaías ha'e Jeremias.

<sup>35</sup> Ha'e gui sacerdote ra'y kuery mimby guaxu revegua oje'oi avi va'e ma Jônatas ra'y Zacarias. Jônatas ma Semaías ra'y, Semaías ma Matanias ra'y, Matanias ma Micaías ra'y, Micaías ma Zacur ra'y, Zacur ma Asafe ra'y.

<sup>36</sup> Tyvy kuery oje'oi avi va'e ma Semaías, Azareel, Milalai, Gilalai, Maai, Natanael, Judá ha'e Hanani, mba'epu Nhanderuete rembiguai Davi oeja va'ekue revegua. Ha'e kuery renonde ma lei re nhombo'e va'ety Esdras oo oiny.

<sup>37</sup> Yakã Ryapy Rokë katy oẽ jogueravy tape pyrõ-pyrõ'a'i Davi rekoague katy oo va'e rupi. Ha'e py ma kora oaxa 'rã ovy Davi rogue áry rupi Yakã Rokë oĩ va'e peve, kuaray oua katy.

<sup>38</sup> Ha'e gui jevygua oporaei va'e kuery ma ha'e kuery rovai katy rupi oje'oi. Heta va'e kuery mboae oje'oi avi kora áry rupi Torre Tatakua hi'aña guive Kora Ipyve 'ea va'e peve.

<sup>39</sup> Ha'e gui Efraim regua Rokë guive oaxa jogueravy Okë Yma ha'e Pira Rokë oĩ va'e áry rupi. Ha'e gui Hananel Torre rupi oaxave vy Cem Torre rupi avi oaxa Vaka Rokë peve. Ha'e gui opytapa Okë Rarõa 'ea va'e py.

<sup>40</sup> Ha'e gui oporaei va'e kuery jovaive rupi gui ou va'ekue opytapa Nhanderuete pegua oo py, xee voi, xereve huvixa kuery mbytekue oje'oi va'ekue guive.

<sup>41</sup> Sacerdote kuery Eliaquim, Maaséias, Miniamim, Micaías, Elioenai, Zacarias ha'e Hananias ma mimby guaxu reve oje'oi,

<sup>42</sup> Maaséias, Semaías, Eleazar, Uzi, Joanã, Malquias, Elão ha'e Ezer guive. Ha'e gui oporaei va'e kuery ma Jezraías ogueroporaei rã oporaei nhendu okuapy.

<sup>43</sup> Ha'e va'e ára ae avi mymba kuery heta ete oapy vy ome'ẽ okuapy ovy'a reve, Nhanderuete ombovy'a ete ramo. Kunhague ha'e kunumigue ovy'apa avi okuapy. Mombyry rupi peve oendua Jerusalém tetã py ovy'a reve oporaei va'e.

### *Sacerdote ha'e levita kuery pegua ome'ẽa aguã re ijayvuague*

<sup>44</sup> Ha'e va'e árave omoña avakue templo ropy ja'o mba'emo porãgue omoõ porãaty re opena va'erã. Ha'e py ma mba'emo ome'ẽ mbyre, hi'aypy'i va'ekue regua iporãgueve ha'e dízimo guive omoõ porãa. Ha'e py ae ha'e kuery omono'õ 'rã tetã ikuai va'e gui sacerdote ha'e levita kuery peguarã ome'ẽa va'erã lei oĩa rami vy. Ha'e ramo Judá kuery ovy'apa okuapy ha'e py sacerdote ha'e levita kuery opena ramo.

<sup>45</sup> Mba'eta ha'e kuery ombo'eapo 'rã Nguuete pe anho, mba'emo oiky'a'o 'rã guive, oporaei va'e ha'e okë rarõa kuery rami ae avi, Davi ha'e ta'y Salomão ojapo ukaague rami vy.

<sup>46</sup> Mba'eta ymave rupi Davi ha'e Asafe oiko jave voi ikuai avi raka'e oporaei va'e kuery re opena va'e, jogueroporaei, ha'e Nhanderuete rerovy'aa kuery re opena va'e.

<sup>47</sup> Ha'e nunga rupi Zorobabel ha'e Neemias oĩ jave voi Israel kuery pavẽ ome'ẽ 'rã okuapy jogueroporaei va'e ha'e okë rarõa kuery pe ko'ẽ nhavõ ho'u va'erã. Ha'e kuery ome'ẽ avi 'rã levita kuery peguarã oipe'a pyre, ha'e gui levita kuery ju 'rã ome'ẽ Arão ramymino kuery peguarã.

<sup>1</sup> Ha'e va'e ára ma heta va'e kuery pe ogueroayvua Moisés ombopara va'ekue. Ha'e va'e re ojou "Amonita ha'e moabita kuery Nhanderuete pegua kuery re nda'evei ae onhemoirū aguā" he'ia oña,

<sup>2</sup> mba'eta ha'e va'e kuery ndogueraai raka'e tembi'u ha'e yy Israel kuery ovaexī aguā. Ha'e rami 'rāgue py Balaão pe opaga okuapy Israel kuery rovai ijayvu vai aguā re. Ha'e rami teĩ ijayvu vaikue 'rāgue py Nhanderuete ojapo ogueroayvu porā aguā rami.\*

<sup>3</sup> Ha'e va'e lei heta va'e kuery oendu vy Israel kuery mbyte gui oipe'a imondovy amboae regua ha'e javi.

### *Templo gui Tobias oipe'aaague*

<sup>4</sup> Ha'e va'e e'ŷ mbove ma sacerdote Eliasibe onhemoirū Tobias kuery re, Nhanderuete pegua opy mba'emo re opena aguā omoña teĩ.

<sup>5</sup> Ha'e rami vy Tobias pe omboaxa peteĩ opy ja'o tuvixa va'e mba'emo aju ome'ẽ mbyre omoñ porāaty va'ekue, ha'e heakuā porā va'e, mba'emo ryru, dízimo mba'emo ra'yī guigua, vinho ha'e azeite guigua omoñ porā aty. Ha'e nunga ma levita kuery peguarā ome'ẽ ukaa va'ekue, oporaei va'ety, okē rarōa ha'e sacerdote kuery peguarā avi.

<sup>6</sup> Ha'e nunga oiko Jerusalém tetā py xee naĩ jave, mba'eta trinta e dois ma'etŷ re ma Babilônia pygua huvixa Artaxerxes oĩ jave py ha'e oña katy aa rire. Ha'e gui kueve ma rire huvixa pe ajerure Jerusalém py ajevy ju aguā.

<sup>7</sup> Ha'e gui mae ma aendu Eliasibe mba'emo vai ojapoague Tobias ombopy'a porāxe vy, mba'eta ixupe omboaxa opy ja'o Nhanderuete pegua oo roka py.

<sup>8</sup> Ha'e nunga aendu vy xevai vaipa reve opy ja'o gui amombopa Tobias mba'e rei-rei.

<sup>9</sup> Ha'e rami vy opy ja'o ikuai va'e aiky'a'o ukapa vy ha'e py aru rukapa ju tembiporu Nhanderuete pegua opygua, mba'emo aju ome'ẽ mbyre, heakuā porā va'e guive.

### *Levita kuery pegua ome'ẽa jevyague*

<sup>10</sup> Ha'e gui aendu avi levita kuery peguarā nome'ẽaveia. Ha'e nunga rupi levita ha'e jogueroporaei va'e kuery Nhanderuete pe omba'eapo aguā omoñ mbyre teĩ oejapa ma ra'e oje'ovy peteĩ-teĩ guekoia katy.

<sup>11</sup> Ha'e rami vy huvixa kuery pe xeayvu vy aipoa'e:

— Mba'e re tu napenavei ri Nhanderuete pegua oo re? — ha'e. Ha'e rami vy levita kuery teĩgue ju aru vy amoñ ju ojapo aguā va'ekue py.

<sup>12</sup> Ha'e ramo Judá regua kuery ha'e javi ogueru ju okuapy dízimo mba'emo ra'yīguigua omoñ porāaty py, vinho ha'e azeite guigua guive.

<sup>13</sup> Ha'e gui mba'emo ome'ẽ mbyre re opena va'erā amoñ sacerdote Selemias, kuaxia re omba'eapo va'e Zadoque ha'e levita Pedaías. Ha'e kuery pytyvōarā amoñ avi Zacur ra'y Hanā, Matanias ramymino va'e. Mba'eta ha'e va'e kuery ma pavē oikuua ojeroviapy memea. Ha'e ramo ha'e kuery pe amboja'o uka tyvy kuery peguarā.

<sup>14</sup> Ha'e nunga rupi Xeruete, nema'endu'a ke xere. Embogue eme guive mba'emo ndee Xeruete pegua oo re ajapo porāague, ha'e py omba'eapo va'e kuery pe guive.

### *Sábado ára omboetea jevy aguā re ijayvuague*

<sup>15</sup> Ha'e va'e jave Judá py aexa avi sábado ára py teĩ uva onhami va'e, trigo py kavaju ombovoyi heruvy va'e guive. Ha'e gui vinho, uva, figo ha'e opa mba'e rei sábado ára py teĩ ogueru avi 'rā Jerusalém tetā katy. Ha'e kuery pe xeayvu ete ha'e va'e ára py tembi'u ovende okuapy rā.

<sup>16</sup> Ha'e gui Jerusalém py ikuai avi avakue Tiro tetā guigua. Ha'e va'e kuery ma sábado ára teĩ ogueru 'rā okuapy pira ha'e opa mba'e rei Judá kuery pe ovende va'erā, Jerusalém tetā rupi guive.

<sup>17</sup> Ha'e rami vy Judá regua huvixa kuery pe xeayvu vy aipoa'e:

\* <sup>13:2</sup> Balaão rekoke omombe'ua ma jaexa 'rā Deuteronômio 23.3-5 ha'e Números 22-24 py.

— Mba'e re tu mba'emo vai rive pejapo sábado ára pemongy'aa rupi?

<sup>18</sup> Peneramoï kuery ha'e ramigua ojapo rire e'ŷ nda'u nhandere Nhanderuete ombou raka'e opa mba'e vai, kova'e tetā re guive? Ha'e ramive ma poxya tuvixave va'e ju pejapo Israel áry ou aguã, sábado ára pemongy'aa py — ha'e.

<sup>19</sup> Xeayvu avi Jerusalém koraroké sábado ára ovaẽ ta nhavõ ombotya aguã kuaray'ã ojero'a ramove, ha'e gui sábado ára oaxa e'ŷ ja oipe'aa jevy e'ŷ aguã. Oké py amoï avi xerembiguai kuery, sábado ára peteïve ivoyi reveguia omoinge e'ŷ aguã.

<sup>20</sup> Ha'e gui ma mokoïgue mba'emo vendea ha'e ijoguaa kuery ipytū okuapy Jerusalém roka rupi.

<sup>21</sup> Ha'e ramo ha'e kuery pe xeayvu vy aipoa'e:

— Mba'e re tu penepytū rive pekuapy tetā kora yvýry? Ha'ekue rami ju pejapo ramo rombo'a 'rã — ha'e. Ha'e va'e rire ma ha'e kuery ndouwei sábado ára py.

<sup>22</sup> Ha'e gui levita kuery reve xeayvu koraroké oiky'a'o ju aguã, ha'e ou vy oarõ aguã, sábado ára iky'a e'ŷ va'e opyta aguã. Ha'e nunga rupi voi Xeruete, nema'endu'a ke xere. Xeperdoa avi opa mba'e py renhomboaxy va'e vy.

### *Amboae regua re omenda va'ekue pe ijayvuague*

<sup>23</sup> Ha'e va'e javé aexa avi Asdode guigua kunhague re judeu kuery omenda va'ekue, Amom ha'e Moabe guigua re guive.

<sup>24</sup> Ta'y kuery ma Asdode pygua ayvu py ijayvu vai-vai okuapy, nhande judeu ayvu py nda'ijayvu kuaai, amboae regua ayvu py anho rive.

<sup>25</sup> Ha'e nunga rupi ha'e kuery amongeta ete vy xeayvu vai, amondyi ete amongue, ha'e kuery regua'a voi amondoro. Ha'e vy Nhanderuete rery py aura reve aipoa'e:

— Pemomendave eme ta'vy penderajy kuery amboae regua ra'y kuery re. Peruve eme guive ha'e kuery rajy kuery penderajy kuery ra'yxyrã, neï penderajyxyrã eteve voi.

<sup>26</sup> Ha'e nunga py e'ŷ ri ty'y Israel kuery pegua huvixa Salomão ojejavý raka'e? Huvixa ha'e va'e ramigua ete ndoikoi raka'e yvy regua kuery mbovy e'ŷ mbyte rupi, tuuete rembiayvu oiko avi, Nhanderuete ae omoï va'ekue huvixarã Israel kuery ha'e javi re opena aguã. Ha'e ramive ma amboae regua kunhague oguerojejavý raka'e.

<sup>27</sup> Ha'e gui mba'exa tu roendu ha'e rami ete ha'eve'ŷ va'e pejapo? Mba'eta Nhanderuete rovai anheté rupi e'ŷ pendekuai amboae regua kunhague re pemendaa py — ha'e.

<sup>28</sup> Ha'e gui ma peteï ava sacerdote Joiada ra'y, Eliasibe ramymino va'e ma horonita pygua Sambalate rajy me oiko. Ha'e nunga rupi xee amoxë aña gui.

<sup>29</sup> Xeruete, eikuuaa pota ha'e kuery re, mba'eta omongy'apa sacerdote ikuiaia regua, sacerdote ha'e levita kuery rekora reja va'ekue guive.

### *Neemias joguereko kuaa jevyague*

<sup>30</sup> Ha'e rami py heta va'e kuery aiky'a'opa amboae regua kuery re onhemoirüague gui. Ha'e rami vy amoï ju sacerdote ha'e levita kuery peteï-teï ojapo 'rã va'ekue py ombo'eapo aguã.

<sup>31</sup> Ha'e gui ára oa'angaague py porã xakã oguerua aguã re xeayvu, ha'e mba'emo aju ypy'i va'ekue regua iporägueve ome'ëa aguã re. Xeruete, nema'endu'a ke xere aiko porã aguã.

## Ester rekokue oĩa Ester rekokue oĩa

Judeu kuery pavẽ e'ŷ ojevy raka'e Judá yvy re. Heta ete opyta Babilônia ha'e Pérsia yvy re. Ha'e va'e kuery regua ma Ester oiko raka'e, Pérsia regua Susã tetã py.

Ester ma kunha iporã ete va'e ramo huvixave oguerovy'a vy ogueraa gua'yxyrã. Ha'e rami rã oendu omombe'ua rã peteĩ ava heko vai va'e Hamã hery va'e judeu kuery ha'e javive ojuka ukaxe. Huvixa eteve voi ixupe ojuka uka, ndoikuuai vy gua'yxy Ester ae judeu oikoa. Ha'e nunga Ester oikuua vy huvixa renonde ojerure guetarã kuery ogueraa jepe aguã re. Jeavyuveikue'i py e'ŷ ojerure huvixa pe, guenonde py noenoĩ ramo. Ha'e rami teĩ Ester mongakuaare aipoe'i uka ixupe: "Huvixa ro py ndee reiko va'eri exa'ã eme ndee anho'i reo jepe aguã re, ore judeu kuery mboae orejukapaa teĩ. Mba'eta ha'e rami ete oiko taa ára rekyrirĩ ri ramo amboae henda gui ju 'rã oiko judeu kuery pytyvõarã ha'e heraa jepearã. Ha'e rã ndee ma rekanhy 'rã nderu ro pygua kuery ha'e javi reve. Xapy'a rei nhi'ã ha'e rami aguã ae nemoña raka'e huvixa ra'yxyrã" he'i uka. Ester ombovai: "Tereo ha'vy, emboatypa judeu kuery Susã tetã py ikuai va'e ha'e javi. Pekaru e'ŷ re pendekuai xere pejerure vy. Mboapy ára re pe'u eme mba'eve, pey'u eme guive, ara py ha'e pyávy. Xee voi xerembiguai kuery reve rokaru e'ŷ re avi 'rã orekuai. Ha'e va'e rire ma aa 'rã huvixa oĩa py, lei oĩ va'e rovai teĩ ae ma. Xapy'a rei xejukaa aguã rami ri rã amano 'rã", he'i (4.13-16).

Huvixa renonde py Ester ou ramo omovaẽ porã, ojapo guive ojerureague. Ha'e rami rã judeu kuery ndojukaaai raka'e. Ojukaa va'e ma ijukaxeare kuery anho. Ha'e rami rã judeu kuery ov'y'a vaipa okuapy, Nhanderuete ogueraa jepe ramo.

### *Huvixa Assuero ngaru tuvixa va'e ojapoague*

<sup>1</sup> Huvixa Assuero ma Índia guive Etiópia peve opena oikovy cento e vinte e sete yvy oĩ va'e re. Ha'e va'e javé py

<sup>2</sup> huvixa Assuero tenda openaaty áry oguapy oiny Susã tetã py oo yvateve va'e oĩ va'e py.

<sup>3</sup> Mboapy ma'etõa re ma huvixa oĩ javé ojapo peteĩ ngaru ojeupagua kuery yvatekueve ha'e guembiguai kuery ha'e javi pe. Ha'e kuery ma Pérsia ha'e Média pygua ipo'akave va'e. Ha'e ramo yvatekueve ha'e hembiguai kuery yvy ikuai va'e re opena va'e oupa vy henonde ikuai.

<sup>4</sup> Ha'e kuery pe huvixa oexa uka iporãgueve ha'e hepykueve openaa rupi oguereco va'e, yvate ete va'e vy iporãa guive. Heta ára ma ikuai, cento e oitenta ára peve.

<sup>5</sup> Ha'e gui ha'e va'e ára opa ma rire huvixa ojapo peteĩ ngaru tuvixa va'e. Susã tetã py oo yvateve va'e oĩ va'e py ojapo tetã pygua kuery ha'e javi pe, yvatekueve ha'e yvyigueve pe guive. Sete ára re ojapo ngoka py yvotyty oĩ va'e py.

<sup>6</sup> Ha'e py ma omoña ajukue xiõ ipererõ'i va'e ha'e púrpura regua, ixã ipererõ'i va'e ha'e púrpura py ojokua pyre. Ha'e va'e ma inhappyi va'e prata guigua re ojokua, oo yta ita alabastro guigua hi'aõ va'e re guive. Tenda ikuai va'e ma ouro ha'e prata guigua py ombojeguua. Pyrõa ma ita xiõ, mármore, alabastro ha'e ita iporãve va'e guigua anho.

<sup>7</sup> Ha'e kuery oy'u aguã ogueru ruka karo ouro guigua joegua e'ŷ-e'ŷ py. Heta avi oĩ vinho huvixa pegua anho rei, huvixa ome'ëxeal'i py ome'ë va'ekue.

<sup>8</sup> Ha'e ramo huvixa oipotaa ramo vy ha'e kuery oy'uxea ramo oy'u okuapy, mba'eta ngoo rupi opena va'e kuery ha'e javi pe huvixa ijayvu peteĩ-teĩ oy'uxea ramo ome'ë aguã re.

<sup>9</sup> Huvixa Assuero ro py ta'yxy Vasti voi ojapo avi ngaru tuvixa va'e kunhague pegua anho.

### *Ngarua py huvixa ra'yxy Vasti ndouxeiague*

<sup>10</sup> Sete araa py huvixa opy'a re vinho gui ovy'a anho rei. Ha'e rami vy ijayvu guembiguai kuery Meumā, Bizta, Harbona, Bigtā, Abagta, Zetar ha'e Carcas pe. Ha'e va'e avakue sete-ve va'e ma eunuco meme ikuai huvixa Assuero renonde rupi omba'epo va'e.

<sup>11</sup> Ha'e va'e kuery pe huvixa ijayvu henonde py ogueru aguā ta'yxy Vasti akā regua reve, iporā ete ramo amboae regua kuery ha'e yvatekueve ikuai va'e ha'e javi oexa aguā.

<sup>12</sup> Ha'e rami teī huvixa ra'yxy Vasti ma sete-ve eunuco kuery ijayvua rami e'ŷ ndouxei, huvixa ayvu ae ha'e kuery omombe'u teī. Ha'e rami rā huvixa oendu vy ojou vai, ipoxy vaipa guive.

<sup>13</sup> Ha'e gui ma huvixa oporandu hi'arandu va'e kuery ára nhavō mba'emo oikuaa porā va'e pe, (mba'eta ha'e rami ae 'rā huvixa oikuaa pota uka lei oña rami oikuaapa va'e kuery pe.

<sup>14</sup> Ha'e va'e regua irū kuery ae'ive va'e ma kova'e: Carsena, Setar, Admata, Társis, Meres, Marsena ha'e Memucā. Ha'e va'e sete-ve ma Pérsia ha'e Média pygua yvatekueve ikuai. Yvateve va'e vy huvixa renonde ikuai riae, openaa rupi okuapy avi 'rā okuapy.)

<sup>15</sup> Ha'e gui ha'e kuery ma lei oña rami vy jogueroayvu okuapy mba'exa pa huvixa Assuero gua'yxy Vasti re ojapo aguā re, huvixa ayvu eunuco kuery omombe'u rā ndojapoi rire.

<sup>16</sup> Ha'e gui ma Memucā aipoe'i huvixa ha'e yvatekueve va'e renonde py:

— Oreruvixa, nderā'yxy Vasti ma nderovai anho e'ŷ ojapo vai, ha'e javi regua yvatekueve ndee huvixa Assuero openaa ha'e javi rupi ikuai va'e rovai guive.

<sup>17</sup> Mba'eta nderā'yxy oikoague regua ma kunhague ikuai va'e ha'e javi oendupa 'rā. "Huvixa Assuero oña py gua'yxy Vasti oenoī uka teī ndoui", 'ea rā oendu vy nomboeteveipa 'rā ome kuery.

<sup>18</sup> Ange ma voi kunhague Pérsia ha'e Média pygua yvatekueve ma nderā'yxy oikoague oendupa vy ha'ekue rami ae ju 'rā ijayvu nerembiguai yvatekueve va'e pe. Ha'e rami rā heta 'rā ikuai nhomboetea rupi ve'ŷ, joupe ivaia rupi guive.

<sup>19</sup> Ha'e gui ndee xeruvixa, rejou porā ri vy embopara uka peteī ayvu Pérsia ha'e Média pygua lei reguarā, ombovaipa pyrā e'ŷ. Ha'e va'e re toī ndee huvixa Assuero renonde py ta'yxy Vasti ndouwei aguā, ha'e nderā'yxy oikoague gui oipe'aa vy amboae kunha ha'eveve va'erā pe ome'ēa aguā.

<sup>20</sup> Oreruvixa, ha'e va'e ayvu repenaa ha'e javi rupi remombe'u uka rā oikuaapa ramo pavē kunhague omboete 'rā okuapy ome, yvatekueve ha'e vvyīgueve guive — he'i.

<sup>21</sup> Ha'e ramo ha'e va'e ayvu huvixa ojou porā, yvatekueve ikuai va'e avi. Ha'e rami vy ojapo Memucā ijayvuague rami.

<sup>22</sup> Ha'e rami vy kuaxia huvixa ombopara uka ma vy omondouka openaa ha'e javi rupi. Peteī-teī vvy re ikuai va'e pe ombopara okuapy ha'e kuery oexa kuua aguā rami, peteī-teī regua ayvu py ombopara, peteī-teī ava ngoo pygua kuery re ipo'aka aguā, ha'e guetarā kuery ayvu py ae ijayvu aguā.

## 2

### *Ester ju huvixa gua'yxyrā oiporavoague*

<sup>1</sup> Ha'e va'e rire huvixa Assuero opoxya noenduvei ma vy ima'endu'a ju Vasti oikoague re, ha'e hexe ombopara uka va'ekue re.

<sup>2</sup> Ha'e ramo ixupe aipoe'i okuapy hembiguai kunumigue:

— Oreruvixa, toguerua nerенонде kunhataīgue'i iporāgueve va'e anho.

<sup>3</sup> Tove repenaa ha'e javi rupi tomoña ha'e nunga re opena va'erā, kunhataīgue'i iporāgueve va'e anho tomboatypa, Susā tetā py oupa aguā. Kunhague ro py ae toupa, nerembiguai eunuco Hegai kunhague ro rarōaty va'e opena aguā. Ha'e gui ma ha'e kuery pe tome'ē pire poā.

<sup>4</sup> Ha'e gui oreruvixa, kunhataĩ rexā vy reayvuve va'e rei tema toĩ Vasti rekovia – he'i. Ha'e rami ijayvu ramo huvixa ojou porã. Ha'e vy ojapo uka ha'e rami ae.

<sup>5</sup> Ha'e gui ma Susã tetã py oiko peteĩ ava judeu, Benjamim ramymino va'e, Mordecai hery va'e, Jair ra'y, ha'e Quis ra'y Simei ramymino va'e.

<sup>6</sup> Ha'e va'e ma Jerusalém tetã gui escravo-rã ogueraapa pyre regua. Babilônia pygua huvixa Nabucodonosor ae ogueraa uka va'ekue Judá pygua huvixa Jeconias kuery reve.

<sup>7</sup> Ha'e va'e ava ma omongakuaa otuty rajy ae'i Hadassa. Ha'e va'e ma Ester hery mboae, tuu ha'e ixy ve'ŷ va'e, kunhataĩ porã. Tuu ha'e ixy nda'ipovei ma ramo Mordecai ogueru va'ekue guajy ae'i rami omongakuaa aguã.

<sup>8</sup> Ha'e gui ma huvixa ojapo uka va'ekue, ixuguigua lei omombe'upaa ramo heta omboaty heruvy kunhataĩgue'i anho Susã tetã py oo yvateve va'e oĩ va'e py, Hegai opena aguã. Ha'e va'e kuery reve Ester voi herua huvixa ro py, kunhague re opena va'ety Hegai opena aguã py.

<sup>9</sup> Ha'e va'e ma kunhataĩ oexa rã iporã vaipa, ojou porã aguã rami oiko guive. Ha'e ramo Ester pe ojapura pire poã ogueru aguã, tembi'u ho'u va'erã guive. Hembiguairã ome'ẽ avi sete kunhataĩgue oiporavo pyre huvixa ro py ikuai va'e. Ha'e vy hembiguai kunhataĩgue reve omboaxapa kunhague pegua opy ja'o ha'eveea py.

<sup>10</sup> Ha'e va'e jave py Ester nomombe'u porã teri hetarã kuery mava'e regua pa ikuaria, neĩ imongakuaare voi, Mordecai nomombe'u ukai rire.

<sup>11</sup> Ha'e gui ko'ẽ nhavõ Mordecai ou 'rã kunhague ikuaria roka py, oikuaa pota 'rã Ester oiko porã paa, ha'e mba'e pa hexe oiko 'rãa re.

<sup>12</sup> Ha'e gui doze jaxy re ma kunhague rekora va'ekue oĩa rami vy openambaa ma rire ovaẽ ta ma ára peteĩ-teĩ kunhataĩ huvixa Assuero oĩa py ojexa uka aguã. (Mba'eta ha'e rami ae 'rã oiko kunhague onhemoatyrõa ára ojeupitypa peve. Mboapy memea jaxy re azeite mirra guigua oikyty 'rã ojee, ha'e gui mboapy memea jaxy re ju amboae regua heakuã porã va'e ha'e kunhague pegua pire poã ae 'rã oikyty.)

<sup>13</sup> Ha'e gui ma peteĩ-teĩ kunhataĩ ovaẽ 'rã huvixa oĩa py. Kunhague ikuaria gui huvixa ro katy oo ta ramo peteĩ-teĩ ome'ẽa 'rã ogueraaxe va'e rei.

<sup>14</sup> Ka'arukue ma oike 'rã opy, ha'e rã aje'ivekue ma oo ju 'rã amboae py kunhague ikuai aguã py. Ha'e va'e py huvixa rembiguai eunuco Saasgaz ju opena 'rã oikovy ta'yxy jevy kuery ikuai va'e re. Ha'e pygua kunhague neĩ peteĩve ndouvei ju 'rã huvixa oĩa py, huvixa oipota vy hery rupi ae oenoĩ uka e'ŷ ja.

<sup>15</sup> Ha'e gui ovaẽ ma Ester ju huvixa oĩa py oo aguã. Ha'e ma Mordecai ryvy Abial rajykue'i, guajy ae'i rami omongakuaa va'ekue. Ha'e gui oo ta ma vy ha'e ae ndojerurei mba'eve ogueraa va'erã re, huvixa rembiguai eunuco Hegai kunhague ro rarõaty va'e ogueraa uka va'e anho ogueraa. Ha'e rami vy Ester rexaa kuery ha'e javi ojou porã rei okuapy.

<sup>16</sup> Ha'e rami py huvixa Assuero ro py heraa Ester. Dez jaxy tebete 'ea va'e py ogueraa, sete ma'etŷ re ma huvixa opena oiny jave.

<sup>17</sup> Ha'e gui huvixa ma kunhague mboae gui oayvuve Ester. Kunhataĩgue'i mboae huvixa oĩa py ou va'e ha'e javi gui ojou porãve, oayvuve ete. Ha'e rami vy inhakã re akã regua ouro guigua huvixa omoĩ reve Vasti rekovia gua'yxyrã.

<sup>18</sup> Ha'e gui ma huvixa ojapo peteĩ ngaru tuvixa va'e ojeupegua kuery yvatekueve ha'e guembiguai kuery ha'e javi pe. Ester peguarã ae ojapo ngaru. Ha'e rami vy openaa ha'e javi rupi oikuua uka pavẽ opytu'u aguã ára, ha'e huvixa ome'ẽxe'a'i py mba'emo ome'ẽ rive pavẽ pe.

<sup>19</sup> Ha'e gui mokoĩguea kunhataĩgue omboaty ukaa jave ma Mordecai oguapy oiny tenda huvixa ro rokẽ py.

**20** Ha'e javé py ma Mordecai ijayvuague rami vy Ester ndoikuua ukai teri guetarã kuery ha'e imongakuaare mava'e regua paa. Ester onhe'ẽ rendu teri oikovy Mordecai omongakuaa javé rami ae.

### *Huvixa okuaxe rã Mordecai oikuua ague*

**21** Ha'e va'e javé huvixa rokẽ py Mordecai oguapy oiny javé py ma huvixa Assuero rembiguai mokoï ikuai eunuco meme va'e, okẽ rarõa va'e regua Bigtã ha'e Teres hery va'e. Ha'e va'e kuery ma nguvixa pe ivai vaipa vy jogueroayvu ojuka aguã re.

**22** Ha'e nunga Mordecai oikuua vy omombe'u uka huvixa ra'yxy Ester pe. Ha'e rã Ester ma huvixa pe ju omombe'u uka Mordecai rery rupi.

**23** Ha'e ramo ha'e nunga re oikuua potaa rã anhetêguá ra'e. Ha'e rã mokoïve ojyryvipy imoiny yvate. Ha'e nunga ma huvixa renonde py omboparaa imoiny kuaxia mba'emo oikoague oña re.

## 3

### *Mordecai re Hamã nda'ija'eiague*

**1** Ha'e nunga oikopa ma rire huvixa Assuero ombovate Hamedata ra'y Hamã, Agague ramymino va'e. Ha'e vy oirũ kuery yvatekueve ikuai va'e ha'e javi áry omoï.

**2** Ha'e ramo huvixa rembiguai kuery hokẽ py ikuai va'e ha'e javi ma Hamã oaxa nhavõ ojero'a vy guenapy'ã re 'rã ikuai henonde, ha'e rami ae huvixa ojapo uka rire. Ha'e rã Mordecai ma henonde ndojero'ai, guenapy'ã re noï guive.

**3** Ha'e rami rã huvixa rembiguai kuery hokẽ py ikuai va'e aipoe'i okuapy Mordecai pe:  
— Mba'e re tu huvixa ojapo ukaague rami e'ŷ reiko? — he'i okuap.

**4** Ko'ẽ nhavõ ixupe ha'e rami ijayvu okuapy teī ndojapyxaka potai. Ha'e ramo ha'e kuery omombe'u Hamã pe, oikuaxe vy Mordecai pa ayvu py ipo'aka 'rãa. Mba'eta ha'e kuery pe onhemombe'u ma voi judeu oikoa.

**5** Ha'e ramo Hamã oexa rã henonde py Mordecai ndojero'ai neñ guenapy'ã re voi noï ramo ipoxy ete ixupe.

**6** Ha'e rami avi onhembopy'a Mordecai ojuka uka aguã re, ha'e anho rive'ŷ guive ojukaxe. Mba'eta Hamã pe omombe'ua ma mava'e regua pa Mordecai oikoa. Ha'e rami vy Hamã onhembopy'a Mordecai retarã kuery judeu ikuai va'e ha'e javi ojuka uka aguã re, huvixa Assuero openaa ha'e javi rupi.

### *Hamã judeu kuery ojukapaxeague*

**7** Ha'e gui doze ma'etýa re ma huvixa Assuero oĩ javé, jaxy ijypy'ia nisã 'epy va'e py ma Hamã guenonde py oexa uka xortea Pur 'epy py. Ko'ẽ nhavõ guarã doze jaxya peve ojapo. Ha'e rami vy oikuua jaxy adar 'epy va'e py ha'eve 'rãa.

**8** Ha'e ramo Hamã aipoe'i huvixa Assuero pe:  
— Xeruvixa, repenaa ha'e javi rupi pavẽ regua mbyte rupi peteĩ regua ikuai. Ha'e va'e kuery reko ma amboae regua ikuai va'e reko reve joo rami e'ŷ rei, lei remombe'u uka va'e rami e'ŷ guive ikuai. Ha'e va'e kuery ma nda'evei reja rive aguã.

**9** Xeruvixa, ha'eve ri ramo embopara uka ha'e kuery ojukapaa aguã regua. Ha'e rami aguã ijukaarã kuery po py ame'ẽ 'rã trezentos e trinta mil quilos prata guigua, ndee huvixa mba'emo remoĩ porãaty pyguarã ae — he'i.

**10** Ha'e ramo huvixa okuã gui kuã regua omboi vy ome'ẽ Hamedata ra'y Hamã, Agague ramymino ha'e judeu kuery rovaigua oiko va'e pe.\*

**11** Ha'e vy aipoe'i ixupe:

— Ha'e va'e prata ma ndepo py ae topyta, judeu kuery ha'e rami ae avi. Ha'e kuery re ma reikuua rami ejapo.

\* **3:10** Kuã regua omboi vy Hamã pe ome'ẽ guery rupi ojapo uka aguã.

### *Judeu kuery ojukapaa aguã huvixa oikuaa ukaague*

<sup>12</sup> Ha'e gui peteĩ jaxyha ha'e treze araa py ma oenoĩa huvixa rembiguai kuaxia mboparaa kuery. Ha'e ramo Hamã ijayvua ombopara okuapy huvixa kueryrã huvixave omoĩ va'ekue peguarã, ijyvy ha'e javi re opena va'e pe, peteĩ-teĩ regua yvatekueve pe guive. Peteĩ-teĩ regua ayvu py ombopara okuapy, peteĩ-teĩ regua oendu kuaa aguã rami. Huvixa Assuero rery rupi ae ombopara, huvixa kuã regua py omboja vy hery omoĩ guive.

<sup>13</sup> Ha'e va'e kuaxia para omondouka ayvu reraaty kuery pe. Huvixa pegua yvy ha'e javi rupi omondouka judeu kuery omomba, ojukapa ha'e omokanhymba vyvoi aguã regua, kunumigue ha'e tujakue, kyrïgue'i ha'e kunhague guive. Peteĩ ára pyve ojukapa aguã, doze jaxyha adar 'epy va'e treze araa py, ha'e gui imba'e rei-reikue oipe'apa aguã guive.

<sup>14</sup> Ha'e va'e ayvu oguerova avi peteĩ-teĩ yvy re lei ojapo pyre ogueroayvua aguã. Ha'e vy oguerova va'ekue ma ha'e javi regua pe omondouka, ha'e va'e ára pyguarã oiko katu pavẽ aguã.

<sup>15</sup> Ha'e gui ma ayvu reraa kuery huvixa ojapo uka va'ekue oikuaa vy oje'oi pojava. Ha'e ramo Susã tetã py omombe'ua oo yvateve va'e oĩ va'e rupi. Huvixa ha'e Hamã ma oy'u aguã py oguapy okuapy, ha'e rã Susã tetã rupi ma onhemondyipa rei okuapy.

## 4

### *Judeu kuery re Ester ojerure aguã re ijayvuague*

<sup>1</sup> Ha'e nunga ha'e javi Mordecai oendu vy omondoro oao ha'e ajukue voxavaikue guigua py rive onhemonde, tanhimbu guive omoĩ ojee. Ha'e gui oẽ vy tetã rupi oiko-iko. Ipy'a vai nhendu rei ovy nda'evei etea oendu vy.

<sup>2</sup> Ha'e rami vy huvixa rokẽ peve'i ovaẽ, mba'eta huvixa rokẽ rupi ma avave rei nda'evei oike aguã voxavaikue guigua py onhemonde reve.

<sup>3</sup> Ha'e gui yvy mboae-mboae rupi huvixa ijayvuague ha'e lei ojapo va'ekue omombe'ua rupi judeu kuery ipy'a vai ete okuapy, okaru e'ý re ikuai, ojae'o ha'e hexay vaipa reve. Mbovy rei e'ý tanhimbu áry onheno okuapy voxavaikue guigua py onhemonde reve.

<sup>4</sup> Ha'e gui Ester oĩa py hembiguai kunhague ha'e eunuco kuery ou vy ixupe omombe'u okuapy Mordecai oikoa ha'e javi. Ha'e nunga huvixa ra'yxy oendu vy nda'evei etea oendu. Ha'e vy ajukue mboae omondouka Mordecai pe voxavaigui ojegui omboi vy onhemonde aguã. Ha'e rami teĩ ha'e ma ndoipotai.

<sup>5</sup> Ha'e ramo Ester oenoĩ huvixa rembiguai eunuco va'e regua Hataque hery va'e, Ester rembiguairã ju omboaxa va'ekue. Ha'e va'e ma Mordecai oĩa py Ester omondouka mba'e nunga pa oikoa oikuaa aguã.

<sup>6</sup> Ha'e ramo tetã mbyte py Hataque oo Mordecai reve nhovaexí aguã huvixa rokẽ py oguapy oinya py.

<sup>7</sup> Ixupe Mordecai omombe'upa hexe oiko va'ekue ha'e javi, huvixa pe Hamã prata ome'ẽ vy judeu kuery omomba aguã re ijayvuague guive omombe'u.

<sup>8</sup> Ixupe ome'ẽ avi ipara oguerova pyre Susã tetã rupi ogueraa uka pyre, judeu kuery omombaa aguã regua, Ester pe hembiguai oexa uka vy oikuaa avi aguã, ha'e ju huvixa oĩa py oo vy omboaxy aguã re ojerure aguã, henonde py guetarã kuery re ojerure aguã.

<sup>9</sup> Ester oĩa py Hataque ojevy vy omombe'upa Mordecai ijayvuague ha'e javi.

<sup>10</sup> Ha'e ramo Hataque pe Ester ombovai vy aipoe'i uka Mordecai pe:

<sup>11</sup> — Ha'e rami avi huvixa rembiguai kuery ha'e javi, ha'e ijyvy ikuai va'e regua oikuaa pavẽ ava e'ý vy kunha teĩ ha'e ae rive opy ja'o py huvixa pe ojexa uka vy oike va'e rei, ha'e va'e peguarã peteĩ'i ayvu oĩ, ojukaa aguã, xapy'a rei ixupe huvixa opo pygua ouro guigua omokuave'ẽ e'ý vy, oikove aguã. Ha'e gui xee ma kova'e jaxyha'e javi re huvixa naxerenoĩ teri oĩa py aa aguã — he'i.

<sup>12</sup> Ha'e rami Ester ijayvuague ma Mordecai pe ju omombe'ua.

<sup>13</sup> Ha'e ramo imombe'ua kuery pe Mordecai ombovai Ester pe omombe'u aguā:

— Ha'e rami avi huvixa ro py ndee reiko va'eri exa'ā eme ndee anho'i reo jepe aguā re, ore judeu kuery mboae orejukapaa teī.

<sup>14</sup> Mba'eta ha'e rami ete oiko taa ára rekyrirī ri ramo amboae henda gui ju 'rā oiko judeu kuery pytyvōarā ha'e heraa jepearā. Ha'e rā ndee ma rekanhy 'rā nderu ro pygua kuery ha'e javi reve. Xapy'a rei nhi'ā ha'e rami aguā ae nemoīa raka'e huvixa ra'yxyrā — he'i uka.

<sup>15</sup> Ha'e rami rā Ester ju aipoe'i uka Mordecai pe:

<sup>16</sup> — Tereo ha'vy, emboatypa judeu kuery Susā tetā py ikuai va'e ha'e javi. Pekaru e'ŷ re pendekuai xere pejerure vy. Mboapy ára re pe'u eme mba'eve, pey'u eme guive, ara py ha'e pyávy. Xee voi xerembiguai kuery reve rokaru e'ŷ re avi 'rā orekuai. Ha'e va'e rire ma aa 'rā huvixa oña py, lei oī va'e rovai teī ae ma. Xapy'a rei xejukaa aguā rami ri rā amano 'rā — he'i.

<sup>17</sup> Ha'e ramo Mordecai oo vy ojapo Ester ojapo uka va'ekue ha'e javi.

## 5

### *Huvixa ha'e Hamā okaru aguā py Ester oenoīague*

<sup>1</sup> Mboapy araa py Ester onhemoatyrō vy oao porāgueve py onhemonde. Ha'e vy oo vy huvixa ro roka py hi'aī, huvixa openaaty rexei. Ha'e rā huvixa ma guenda openaaty py oguapy oiny okē oī va'e yvy'iry.

<sup>2</sup> Ester oka py opyta ho'amay rā huvixa oexa vy oendu omovaēxea vy ixupe omokuave'ē po pygua ouro guigua. Ha'e rami rā Ester onhemboja vy po pygua apy re opoko.

<sup>3</sup> Huvixa aipoe'i ixupe:

— Xera'yxy Ester, mba'e tu rerek, mba'e nunga re ha'vy rejerure ta? Mba'eta apenaa mbyte rupi peve teī xee ame'ē 'rā.

<sup>4</sup> Ester ombovai:

— Xeruvixa, ndevy pe ha'eve ri ramo tereo ndee Hamā reve. Aŷ'i areko katupa ma ngaru ndevy — he'i.

<sup>5</sup> Ha'e ramo huvixa aipoe'i:

— Pejapo ha'vy Hamā ojapura aguā rami, Ester oipota va'e rei rojapo aguā — he'i.  
Ha'e gui huvixa ha'e Hamā ovaē ngaru tuvixa va'e Ester oguereko katu va'ekue py.

<sup>6</sup> Vinho oy'u okuapya py huvixa oporandu Ester pe:

— Mba'e nunga re tu rejerure? Mba'eta xee ame'ē 'rā. Mba'e tu rejapo ukaxe? Apenaa mbyte rupi peve rejerure teī ojapoa 'rā.

<sup>7</sup> Ha'e ramo Ester ombovai vy aipoe'i:

— Xee aipota va'e re ajerurea ma po rami:

<sup>8</sup> Xeruvixa, xapy'a rei xemboaxy ramo, ha'e aipota va'e ojapoa aguā ndevy ha'eve ri ramo tove ko'ē ramo ju terevaē Hamā reve ngaru areko katu aguā py. Ha'e ramo mae ma rombovai 'rā, xeruvixa — he'i.

<sup>9</sup> Ha'e va'e árave Hamā ojepe'a ov yvy'aa onhenhandu reve. Ha'e rami teī huvixa rokē py Mordecai oguapy oinya py oexa rā henonde py nopu'āi neī nomboetei guive oiny ramo oendu Mordecai rovai ipoxy etea.

<sup>10</sup> Ha'e rami teī Hamā ojejoko vy ngoo katy oo. Ha'e vy oirū kuery oenoī ukapa, gua'yxy Zeres guive.

<sup>11</sup> Ha'e kuery reve Hamā ijayvu iporiau e'ŷa re, gua'y kuery heta ikuia re, opa mba'e py huvixa omboete ukaague re, ha'e huvixa rembiguai kuery yvatekueve mboae áry omboyvateveague re guive.

<sup>12</sup> Ha'e vy aipoe'ive ju:

— Huvixa ra'yxy Ester ae ma voi avave noenoī ngaru oguereko katuague py oo aguā, xee e'ŷ vy. Ha'e rami ae avi ko'ē rā guarā voi xerenoī ju huvixa reve aa aguā.

<sup>13</sup> Ha'e rami teĩ ha'e nunga ha'e javi ma naxembovy'ai, huvixa rokẽ py judeu Mordecai oguapy oiny rã aexaa ja – he'i.

<sup>14</sup> Ha'e ramo ixupe ta'yxy Zeres ha'e irũ kuery ikuai va'e ha'e javi aipoe'i:

– Ejapo uka ha'vy peteĩ jojyryvipy rendarã, vinte e dois metros yvatea va'e ejapo. Ha'e gui ko'ẽ rã aje'ive'i reve huvixa pe aipo'ere Mordecai ojyryvipy aguã. Ha'e gui ma revy'a reve 'rã reo huvixa reve ngarua py – he'i. Ha'e rami ijayvua Hamã oendu vy ojou porã. Ha'e rami vy ojapo uka jojyryvipy rendarã.

## 6

### *Hamã pe Mordecai omboete ukaa ague*

<sup>1</sup> Ha'e va'e pyávy ma huvixa ndokei re oiko. Ha'e rami vy kuaxia mba'emo oiko va'ekue'-ekue oĩa ogueru ruka ramo henonde py ogueroayvua.

<sup>2</sup> Ha'e va'e kuaxia para re ojou Bigtã ha'e Teres ojapo vaixea Mordecai oikuaa ukaague. Mba'eta ha'e va'e mokoĩve eunuco huvixa rokẽ rarõa kuery va'e regua ae huvixa Assuero ojukaxe teĩ va'ekue.

<sup>3</sup> Ha'e gui ma huvixa oporandu:

– Mordecai ha'e rami ojapoague re mba'e nunga tu ixupe ojapo porãa raka'e omboete ukaa rupi?

Huvixa renonde hembiguai kuery ikuai va'e ombovai:

– Mba'eve rei ixupe ndojapo porãai teri – he'i okuapy.

<sup>4</sup> Ha'e va'e jave py Hamã oike ae ma ra'e huvixa roka apy rupi, jojyryvipy rendarã Hamã ojapo uka va'ekue py huvixa pe ojerure aguã Mordecai ojyryvipy uka aguã. Ha'e ramo huvixa va'e oporandu:

– Mava'e tu oĩ oka py? – he'i.

<sup>5</sup> Hembiguai kuery ombovai:

– Hamã rima oka py hi'aĩ – he'i. Ha'e ramo huvixa aipoe'i oike aguã.

<sup>6</sup> Hamã oike ma ramo huvixa oporandu ixupe:

– Ava xee amboete ukaxe va'e pe ma mba'exa nda'u ha'eve 'rã ojapo porãa aguã? – he'i.

Ha'e rami rã Hamã ojeupe ae “Mava'e ha'vy oiko huvixa omboete uka vy oguerovy'ave 'rã, xee e'ŷ vy?” he'i.

<sup>7</sup> Ha'e rami vy huvixa pe ombovai:

– Ava remboete ukaxe vy rejapo porãa va'e pe ma

<sup>8</sup> toguerua ijaorã iporãve va'e ndee xeruvixa ae renhemondea va'ety regua, ha'e kavaju hi'ary riae ndee xeruvixa reikoaty va'e guive. Inhakã re ma tomoĩa akã regua ndee xeruvixa pegua ae.

<sup>9</sup> Ndee xeruvixa rembiguai yvatekueve va'e ae tome'ẽ ijao ha'e kavaju ixupe, tomonhemonde avi ndee xeruvixa remboete ukaxe va'e. Ha'e gui ma kavaju áry togueraa tetã rupi tape ikuai va'e rupi, ha'e henonde rupi tomombe'u herekovy: “Ha'e rami ae ojapoa ava huvixa omboete ukaxe va'e pe”, te'i – he'i.

<sup>10</sup> Ha'e ramo huvixa aipoe'i Hamã pe:

– Ejapura ke ha'vy. Ndeayvuague rami ae ejopy ao ha'e kavaju, ha'e huvixa rokẽ py judeu Mordecai oguapy oiny va'e pe ejapo. Neĩ peteĩ henda'i py ma voi ejapo e'ŷ eme ndeayvuague – he'i.

<sup>11</sup> Ha'e gui Hamã ma ao ha'e kavaju ogueraa vy omonhemonde Mordecai. Ha'e vy kavaju áry omoĩ vy tetã rupi ogueraa. Henonde rupi omombe'u herekovy:

– Ha'e rami ae ojapoa ava huvixa omboete ukaxe va'e pe – he'i ov.

<sup>12</sup> Ha'e va'e rire ma huvixa rokẽ py ju Mordecai ojevy. Ha'e rã Hamã ma oẽ vy onha ov yngoo katy. Nda'evei ete reve oakã onhovãmba ov.

<sup>13</sup> Ha'e gui ma gua'yxy Zeres pe omombe'u oiko va'ekue ha'e javi, oirū kuery pe guive. Ha'e ramo irū kuery hi'aranduve va'e ta'yxy Zeres reve aipoe'i okuapy ixupe:

— Ha'e gui ma Mordecai renonde nemo'yvyī'ia ma. Judeu kuery regua oiko ramo nandepo'akai 'rā hexe. Ha'e rami 'rāgue py anhetē henonde py nemo'yvyī'i ete'rā — he'i.

<sup>14</sup> Hexeve ha'e kuery ijayvu teri reve ovaẽ okuapy huvixa rembiguai eunuco kuery. Ha'e vyve ogueraa pojava Hamā ngaru Ester oguereko katu va'ekue oiko aguā katy.

## 7

### *Hamā ojapoxea Ester omombe'u rire ojyryvipyague*

<sup>1</sup> Ha'e gui ma huvixa oguerovaẽ Hamā gua'yxy Ester reve oy'u okuapy aguā py.

<sup>2</sup> Mokoīguea ma vinho oy'u okuapya py huvixa oporandu Ester pe:

— Xera'yxy Ester, mba'e nunga re ete tu rejerure ta? Ndevy pe xee ame'ẽ 'rā. Mba'e ha'vy reipota? Xee ajapopa 'rā ndevy apenaa mbyte rupi peve rejerure tei.

<sup>3</sup> Ha'e ramo ta'yxy Ester ombovai:

— Xeruvixa, xapy'a rei nerondenonc py xemboaxy, ha'e ndevy pe ha'eve ri ramo eme'ẽ xee ajerurea xerekoverā re ae. Ha'e gui xee aipota va'e ma xeretarā kuery rejuka ukapa e'ŷ aguā.

<sup>4</sup> Mba'eta ore kuery ma orevendepaa ma, xee ha'e xeretarā kuery reve, oremomba aguā, orejukapa ha'e oremokanhymba vyvoi aguā. Nhoembiguarā rive orevendea va'e rire xee akyrirī 'rāgue, mba'eta xeruvixa, ha'e rami va'e rire orerovaigua káuxa nda'evei 'rāgue romoangeko aguā — he'i.

<sup>5</sup> Ha'e ramo huvixa Assuero oporanduve vy aipoe'i gua'yxy Ester pe:

— Mava'e tu ndeayvua va'e? Mamo tu oiko ha'e rami ete pendeapo aguā opy'a re oendu va'e?

<sup>6</sup> Ester ombovai:

— Orerovaigua oremombaxe va'e ma peva'e mba'emo vai apoa Hamā — he'i.

Ha'e rami rā Hamā ma huvixa ha'e ta'yxy renonde py okyje reia anho oendu.

<sup>7</sup> Huvixa ipoxy ete vy vinho oy'u oinya gui opu'ã vy oẽ ov yvotyty ngoka py oĩ va'e katy. Ha'e rā Hamā ma opy optya huvixa ra'yxy Ester pe ojerure aguā guekoverā re, mba'eta oikuua huvixa ombopaga aguā re onhembopy'a maa.

<sup>8</sup> Ha'e gui yvotyty ngoka py oĩ va'e gui huvixa oike ju ramo opy vinho oy'u okuapyague py, ha'e va'e jave tenda Ester oĩa áry Hamā ho'a ra'e. Ha'e nunga huvixa oexa vy aipoe'i:

— Peva'e ta'vy omoangeko teve ra'e xera'yxy Ester xerenonde, xero py ae?

Huvixa ha'e rami ijayvu ramove onhovāa Hamā rova.

<sup>9</sup> Ha'e ramo peteĩ huvixa rembiguai eunuco regua Harbona hery va'e aipoe'i:

— Hamā ro katy'i ko hi'aĩ peteĩ jojyryvipyague renderā ojapo va'ekue vinte e dois metros yvatea va'e, ha'e va'e py huvixa reraa jepeare Mordecai ojyryvipy aguā ojapo uka va'ekue — he'i.

Ha'e ramo huvixa aipoe'i:

— Ha'e va'e py ae pejyryvipy Hamā — he'i.

<sup>10</sup> Ha'e ramo Mordecai ojyryvipy aguā Hamā ojuka uka va'ekue py ae ojuka okuapy. Ha'e ramo mae ma huvixa noenduvei opoxyague.

## 8

### *Ngovaigua kuery re judeu kuery opu'ã aguā re ijayvuague*

<sup>1</sup> Ha'e va'e árave judeu kuery rovaigua Hamā rogue huvixa Assuero ome'ẽ gua'yxy Ester pe. Mordecai avi oguerua huvixa renonde py, huvixa pe Ester hetarā ae oikoa omombe'u rire.

<sup>2</sup> Ha'e ramo huvixa okuā regua Hamā gui ojopy ju va'ekue omboi vy Mordecai pe ju ome'ẽ. Hamā rogue re opena va'erā ma Ester omoī Mordecai ae.

<sup>3</sup> Huvixa renonde py Ester ijayvuve tema. Ha'e vy ipy rupi ojero'a oiny vy ojae'o reve ojerure oiny ombovaipa aguã Agague ramymino Hamã judeu kuery ojukapa aguã regua ombopara va'ekue.

<sup>4</sup> Ha'e ramo Ester-a katy peteïgue ju huvixa omokuave'ẽ po pygua ouro guigua. Ha'e ramo Ester opu'ã ho'amy huvixa renonde py.

<sup>5</sup> Ha'e vy aipoe'i ixupe:

— Xeruvixa, xapy'a rei ndevy pe ha'eve ramo, xemboaxya rendu ha'e ha'evea ramigua reikuaa ramo, po rami aguã rejou porã ri ramo tomboparaa Hamedata ra'y Hamã Agague ramymino onhembopy'aague ombovaipaa aguã regua, mba'eta yvy repenaa ha'e javi rupi judeu kuery ikuai va'e omombaa aguã ombopara uka.

<sup>6</sup> Mba'exa 'rã tu xee aexa ha'e rami ete mba'emo vai xeretarã kuery re oiko rã? Mba'exa 'rã tu aexa xeretarã kuery ojukapaa rã? — he'i.

<sup>7</sup> Ha'e ramo huvixa Assuero aipoe'i gua'yxy Ester ha'e judeu regua Mordecai pe:

— Ha'e gui ma Hamã judeu kuery ojukapaxe ramo Ester pe xee amboaxa ma hogue, ajyryvipy uka guive imo'amy.

<sup>8</sup> Aÿ ma pembopara avi ha'vy judeu kuery pe. Xee penderuvixa rery rupi pembopara peikuua rami ae. Ha'e gui pemboja avi xekuã regua py xerery remoñ reve. Mba'eta huvixa rery rupi pembopara vy ikuã regua py pemboja rire imbovaipa rive pyrã e'ÿ ae opyta — he'i.

<sup>9</sup> Ha'e ramove oenoñ huvixa rembiguai kuaxia mboparaaty kuery, mboapy jaxy sivã 'epy va'e ha'e vinte e três araa py. Ha'e vy Mordecai ijayvua ha'e javi rami ombopara okuapy judeu kuery pe, opena va'e ha'e huvixa kuery pe guive, ha'e yvy mboae Índia ha'e Etiópia rupi yvatekueve opena va'e kuery pe. Cento e vinte e sete yvy re opena va'e kuery pe ombopara peteñ-teñ regua ayvu py, peteñ-teñ regua oendu kuaa aguã rami. Judeu kuery pe voi ha'e rami ae avi ombopara ha'e kuery ayvu py, oendu kuaa aguã rami.

<sup>10</sup> Huvixa Assuero rery rupi ombopara, ha'e huvixa kuã regua py ju omboja. Ha'e rami vy kuaxia para ogueraa uka ayvu reraaty kuery pe. Ha'e va'e kuery ma kavaju iporãgueve huvixa rymbarã imoingo pyre áry oje'oi.

<sup>11</sup> Ha'e va'e kuaxia re ma tetã nhavõ rupi judeu kuery ikuai va'e pe huvixa po rami ojapo uka, ono'õmba okuapy vy guekove oepya rupi joe opu'ã aguã. Ha'e kuery re, kyrígue e'ÿ vy kunhague re ha'e va'e yvy regua amongue tembiporu reve ou va'e rei tema judeu kuery ha'eve ojuka aguã. Omomba 'rã okanhymba vyvoi aguã rami, oipe'apa 'rã guive imba'e rei-reikue.

<sup>12</sup> Peteñ ára pyve ha'e nunga ojapo 'rã okuapy yvy huvixa Assuero openaa ha'e javi rupi, doze jaxy adar 'epy va'e ha'e treze araa py.

<sup>13</sup> Ha'e va'e kuaxia lei ombopara pyre oña ma yvy ikuai va'e ha'e javi rupi ogueroayvu pavẽ aguã. Ha'e javi regua kuery pe ogueraa, ha'e va'e ára pyguarã judeu kuery oiko katu aguã, ngovaigua kuery re opu'ã okuapy aguã.

<sup>14</sup> Ha'e rami vy ayvu reraaa kuery ma huvixa rymba kavaju áry ikuai vy oje'oipa pojava. Huvixa ijayvuague oikuaa vy inhakuâve tema oje'oivy. Susã tetã rupi voi oikuaa ukapa.

<sup>15</sup> Ha'e gui Mordecai ma huvixa renonde gui oẽ vy onhemonde ovy ao iporãve va'e yva rami hovy ha'e xiñ rei va'e py. Inhakã re ma akã regua tuvixave va'e ouro guigua oĩ. Imanto-rã ma omoñ ajukue xiñ ipererñ'i va'e púrpura reveguia. Ha'e ramo Susã tetã rupi ovy'apa okuapy.

<sup>16</sup> Ha'e rami vy judeu kuery oendu okuapy ovy'aa. Oguerovy'apa okuapy, ha'e kuery omboetepaa ramo.

<sup>17</sup> Ha'e rami ae avi yvy ha'e javi ha'e tetã ikuai va'e rupi huvixa ayvu oikuaa ukaa py rei tema judeu kuery ovy'a vaipa okuapy, joguerovy'a, ngaru guive ojapo. Ha'e gui yvy regua kuery heta avi judeu rami onhemoingo, judeu kuery gui okyjea anho oendu okuapy vy.

## 9

*Ngovaigua kuery judeu kuery ojukapaague*

<sup>1</sup> Ha'e gui doze jaxya adar 'epy va'e ha'e treze araa py ma ojeupity ma huvixa ayvu ojapoa aguã. Ha'e rami vy judeu kuery re hovaigua kuery ipo'aka aguã re oarõ okuapyá ára ma oexa'âague rami e'ŷ oiko, mba'eta judeu kuery ae ipo'aka okuapy nda'iija'eí va'e kuery re.

<sup>2</sup> Mba'eta huvixa Assuero openaa yvy ha'e javi rupi judeu kuery ikuai va'e guekoia tetã nhavõ rupi ono'õmba okuapy imombaxeia kuery omomba aguã. Avave rei ndojoko kuaai, mba'eta yvy regua ha'e javi oendu okuapy okyje reia anho.

<sup>3</sup> Ha'e gui yvy ha'e javi pygua yvatekueve, opena va'e ha'e huvixa kuery huvixave omoï va'ekue ha'e javi ma oipytyvõ okuapy judeu kuery, Mordecai gui okyjepa vy.

<sup>4</sup> Mba'eta Mordecai ma huvixa ro pygua kuery gui yvateve va'e oiko, yvy ha'e javi rupi oikuua guive. Ha'e rami vy ipo'akave ovvy tema 'rã.

<sup>5</sup> Ha'e rami py judeu kuery oitypa ngovaigua kuery. Kyxe py ojukapa, omomba. Ngovaigua kuery oguerekoxea rami tema oguereko.

<sup>6</sup> Susã tetã py voi judeu kuery ojuka vy omomba quinhentos avakue ikuai va'ekue.

<sup>7</sup> Ha'e rami ae ojuka avi Parsandata, Dalfom, Aspata,

<sup>8</sup> Porata, Adalia, Aridata,

<sup>9</sup> Farmasta, Arisai, Aridai ha'e Vaizata.

<sup>10</sup> Ha'e va'e kuery ma judeu rovaigua Hamedata ra'y Hamã ra'y kuery dez ikuai va'ekue. Ha'e rã ha'e kuery mba'e rei-reikue re ma ndopokoi.

<sup>11</sup> Ha'e va'e árave huvixa pe omombe'ua mbovy pa Susã tetã py ojukapa pyre.

<sup>12</sup> Ha'e ramo huvixa aipoe'i gua'xyx Ester pe:

— Susã tetã py judeu kuery ojuka vy omomba va'ekue ha'e javi vy ma je quinhentos avakue, ha'e Hamã ra'y kuery dez va'ekue ju. Ha'vy yvy mboae rupi ikuai va'e ma mbovy ju 'rã nda'u ojukaa? Ha'e rami vy mba'e re tu aŷ rejerureve ju? Mba'eta ha'e nunga ome'ëa 'rã ndevy. Mba'e nunga ju reipota ajapo? Ha'e nunga ojapoa 'ræe — he'i.

<sup>13</sup> Ha'e ramo Ester ombovai:

— Ha'e rami rã xeruvixa, xapy'a rei rejou porã ramo tove Susã tetã py judeu kuery ikuai va'e ko'ë rã ju ta'ikuai aŷ guarã re ndeayyuague rami. Ha'e rã Hamã ra'y kuery dez ikuai va'ekue retekue ma tombovavaa imoiny jojyryvypy renderã ojapo pyre re — he'i.

<sup>14</sup> Ha'e ramo huvixa aipoe'i ha'e rami ae tojapoa. Ha'e ramo Susã tetã py oikuua ukapaa. Ha'e gui Hamã ra'y kuery dez va'ekue retekue ombovavaa imoiny.

<sup>15</sup> Ha'e gui jaxya adar 'epy va'e ha'e catorze araa py ma judeu kuery Susã tetã py ikuai va'e ono'õmba okuapy vy trezentos avakue ju ojuka. Ha'e rã imba'e rei-reikue re ma ndopokoi.

*Ngaru Purim 'epy va'e ojapo ypy okuapyague*

<sup>16</sup> Ha'e rami ae avi judeu kuery huvixa openaa yvy mboae rupi ikuai va'e voi ono'õmba okuapy vy guekove oepya rupi ikuai, ngovaigua kuery gui oo jepe aguã. Ha'e rami vy setenta e cinco mil ojuka ija'e e'ŷ va'ekue. Ha'e rã imba'e rei-reikue re ma ndopokoi.

<sup>17</sup> Ha'e nunga ma jaxy adar 'epy va'e re oiko treze araa py. Ha'e gui catorze araa py ma opytu'upa okuapy. Ha'e va'e ára ojapo okuapy ngaru ovvy'a aguã.

<sup>18</sup> Ha'e rã Susã tetã py judeu kuery ikuai va'e ma ha'e va'e jaxy re treze ha'e catorze araa py ju onhemboaty okuapy. Ha'e va'e kuery ma quinze araa py opytu'u vy ojapo ngaru ovvy'a aguã.

<sup>19</sup> Ha'e rami ae avi judeu kuery tetã'i ikora e'ŷ va'e py ikuai va'e ma jaxy adar 'epy va'e re catorze araa py ae avi ojapo ngaru ovvy'a okuapy vy. Ha'e va'e ára ngaru ojapoa gui tembi'u ogueraa vy joupe-upe omboja'o okuapy.

<sup>20</sup> Ha'e nunga Mordecai ombopara vy kuaxia omondouka huvixa Assuero openaa yvy ha'e javi rupi judeu kuery ikuai va'e pe, ha'e'i rupi ha'e mombyry rupi ikuai va'e pe guive.

<sup>21</sup> Ha'e kuery rekorā ombopara ma'etŷa nhavō jaxy adar 'epy va'e re catorze araa py ngaru ojapo aguã quinze araa peve,

<sup>22</sup> ha'e va'e ára py ae ngovaigua kuery gui oo jepepa rire. Ha'e va'e jaxy re ma iporiaupa okuapyague gui judeu kuery ov'y'aa rupi ju ikuai, ojae'opa reiague gui ngaru py ju ov'y'a okuapy. Ha'e nunga rupi ha'e oeja ov'y'a reve ngaru ojapo okuapy aguã, ha'e ngarua gui tembi'u ogueraa vy joupe-upe ome'ẽ aguã, iporiaukue'i pe guive.

<sup>23</sup> Ha'e ramo judeu kuery ojou porā okuapy guekorā va'ekue py ae ha'e rami ikuai aguã, Mordecai ojapo ukaague rami vy.

<sup>24</sup> Mba'eta ha'e va'e jave py Hamedata ra'y Hamā Agague ramymino judeu kuery rovaigua va'e onhembopy'a teĩ judeu kuery omomba aguã. Ha'e rami vy xorte Pur 'epy va'e oexa avi ombovaipa ha'e ojukapa aguã.

<sup>25</sup> Ha'e rami teĩ huvixa renonde py Ester oo ramo kuaxia ombopara vy ojapo Hamā judeu kuery ojukaxeа hexe ae ju ojeapa aguã rami. Ha'e rami vy ojyryvipy uka, ta'y kuery guive.

<sup>26</sup> Ha'e nunga rupi ae ha'e va'e ára pe "Purim" 'ea, tery Pur va'e rami. Mba'eta ha'e va'e kuaxia para re oĩa rami ha'e nunga ha'e javi oiko rã ha'e kuery oexa okuapy.

<sup>27</sup> Ha'e rami rire judeu kuery guekorā ojou porā okuapy ha'e va'e mokoĩ ára ojeupity nhavō ha'e rami ikuai aguã hexarai e'ŷ re, hamymino kuery ha'e onhemoirū va'e kuery ha'e javi peguarā. Ha'e rami vy ojee omoĩ ombopara pyre oĩa rami ikuai aguã, ma'etŷa nhavō oa'angaague ára ojeupity jave.

<sup>28</sup> Ha'e rami vy hamymino kuery ikuai jevy-jevy va'e peguarā ha'e va'e ára re ima'endu'a okuapy aguã, peteĩ-teĩ oo pygua kuery, yvy ha'e tetã ikuai va'e pygua ha'e javi. Ha'e rami vy Purim ára ojeupity nhavō judeu ha'e hamymino kuery hexarai e'ŷ aguã raka'e rã peve.

<sup>29</sup> Ha'e gui ma Abail rajy huvixa ra'yxy Ester, judeu Mordecai reve teĩgue ju ombopara kuaxia. Opo'akaa ha'e javi rupi ombopara Purim omombe'u ypy va'ekue omoĩ atâve aguã.

<sup>30</sup> Opa rupi judeu kuery pe kuaxia para ogueraa uka cento e vinte e sete yvy huvixa Assuero openaa ha'e javi rupi. Ombovy'a aguã ombopara ombopy'a guaxua rupi.

<sup>31</sup> Ha'e vy omoĩ atâve aguã Purim oa'angaague ára py porā ikuai aguã judeu Mordecai, huvixa ra'yxy Ester reve ojapo ukaague rami, mba'eta ha'e kuery ae ranhe ikuai ha'e rami, ha'e gui guamymino kuery peguarā ju oeja, iporiau vy okaru e'ŷ re ikuaiague re ima'endu'a aguã.

<sup>32</sup> Ha'e rami py Purim ára re marã rami pa ha'e kuery ikuai aguã Ester ae ojapo uka, kuaxia re ombopara vy.

## 10

### *Mordecai yvatevea re ijayvua*

<sup>1</sup> Ha'e nunga oikopa ma rire huvixa Assuero ojapo ha'e va'e yvy ha'e ye'ẽ rembe rupi ikuai va'e ha'e javi ixupe opaga aguã.

<sup>2</sup> Ha'e gui oïve rei tema huvixa Assuero rekoke regua. Ha'e rami avi opo'akaa rupi mba'emo ovareve va'e ojapo va'ekue, ha'e Mordecai ombovateveague ha'e javi noĩ 'rã teve kuaxia Média ha'e Pérsia pygua huvixa kuery rekoke oĩa re?

<sup>3</sup> Mba'eta judeu Mordecai ma huvixa Assuero rembiguai yvateve va'e oiko. Judeu kuery voi omboete vaipa, hetarã kuery ha'e javi omboetepa okuapy, mba'eta ha'e kuery pe mba'emo porā ojapoa rupi anho oiko, ha'e kuery ikuai porā aguã re onhea'ã oikovy guive.

## Jó rekukue oĩa Jó rekukue oĩa

Jó ma peteĩ ava iporayvu va'e, iporiaukue va'e'ŷ, Nhanderuete re ojerovia ete va'e ha'e ov'y'aa rupi tema oiko va'e. Ha'e gui Nhanderuete pe Satanás ojerure Jó oeko a'ã aguã re, anhetẽ ri Nhanderuete pe oikoa oexaxe vy. Ha'e ramo Nhanderuete oeko a'ã uka. Ha'e rami rã Jó mba'emo oguerekva'e opa vyvoi, ta'y kuery omanomba xapy'a, ha'e Jó re ae ou ai vaikue imbojexavaiarã.

"Ha'e ramo Jó opu'ã vy omondoro oao, onhopi oakã ha'e ipukupa oupy yvy rupi. Nhanderueteomboete vy aipoe'i: 'Xepire rei reve aiko'i va'ekue ha'i rye gui, ha'e xepire rei reve ju'rã aa. Senhor ma mba'emo me'ëa, ha'e oipe'a va'erã avi oiko. Ta'ima'endu'a porãa Senhor rery re!' he'i. Ha'e nunga ha'e javi py Jó ndojejavyi, neĩ nda'ijayvui Nhanderuete ha'eve'ŷa rami joguerekao rami" (1.20-22).

Ha'e gui ma ou Jó irũ kuery mboapy ikuai va'e. Oĩa py optya are rire hexeve jogueroayvu okuapy ojexavaia re. Ha'e kuery oikuua rami tei Jó gueko vaia re oiko axy. Ha'e rã Jó ma "Xerekoporã va'e" he'i, ndoikuuai guive mba'e re pa haxy va'e Nhanderuete ombouague. Amongue py Nhanderuete reko re ijayvu ndovy'aia rupi, ndoikuuai rei vy.

Ha'e gui opaa py ma Nhanderuete ombovai vy oexa uka pavẽ gui ipo'akapave ha'e hi'aranduve va'ea. Ha'e ramo Jó nda'evei ramo vy aipoe'i: "Anhetẽ ri aikuua vy e'ŷ xeayvu va'ekue, mba'emo xevy pe iporã vaipa ha'e aikuua va'erã e'ŷ re anho", he'i (42.3b). Ha'e rami rire jypy guare gui Nhanderuete omoingo porãave Jó.

### *Jó heko porã ha'e mba'emo oguerekopaa re ijayvua*

<sup>1</sup> Oiko peteĩ ava Uz yvy pygua, Jó hery va'e. Ha'e va'e ava ma anhetẽ rupi ipy'a ha'e heko porã va'e. Nhanderuete renonde ojererokyjea rupi vy mba'emo vai gui ojepe'a kuerei va'e.

<sup>2</sup> Sete gua'y ha'e mboapy guajy kuery oguerekovo.

<sup>3</sup> Hymba kuery ma sete mil vexa'i, três mil camelo, quinhentos toro meme ha'e quinhentos mburika'i. Ixupe ombo'eapo va'e kuery voi mbovy rei e'ŷ ikuai. Ha'e rami vy kuaray oua katy ikuai va'e gui oguerekopave va'e oiko.

<sup>4</sup> Ta'y kuery ma peteĩ-tei ro rupi oje'oi 'rã jorire-rire ngaru ojapo aguã. Ha'e rami vy mboapy gueindy kuery oenoĩ kuerei 'rã ha'e kuery reve okaru ha'e oy'u aguã.

<sup>5</sup> Ha'e kuery okarupa ma nhavõ Jó gua'y kuery oenoimba kuerei vy oiky'a'o ukapa 'rã teko vai gui. Ha'e rami vy ko'ẽ ramove opu'ã vy mymba oapy reve ome'ẽ 'rã Nhanderuete pe ha'e kuery mbovy pa ikuia rami vy, mba'eta aipoe'i: "Xapy'a rei ma xera'y kuery ojejavry ra'e, opy'a py nuguete rovai ijayvu vai vy", he'i vy. Ha'e ramigua ae Jó ojapo riae oikovy.

<sup>6</sup> Ha'e gui peteĩ ára Nhanderuete ra'y kuery ou okuapy SENHOR renonde ojexauka aguã. Ha'e kuery reve anha voi ou.\*

<sup>7</sup> Ha'e ramo SENHOR oporandu anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

<sup>8</sup> SENHOR oporanduve ju anha pe:

— Rexa pota pa xerembiguai Jó re? Mba'eta yvy re jipoi avave rei ha'e va'e ramigua anhetẽ rupi ipy'a ha'e heko porã va'e, Nguuete renonde ojererokyjea rupi vy mba'emo vai gui ojepe'a va'e — he'i.

\* <sup>1:6</sup> "Nhanderuete ra'y kuery" he'ia ma hembiguai anjo kuery re ijayvu vy.

<sup>9</sup> Ha'e ramo anha aipoe'i SENHOR pe:

— Jó nda'u rive teve nguete renonde ojererokyjea rupi oiko?

<sup>10</sup> Mba'eta ndee ma repena porã hexe, hoo re ha'e opa mba'e oguereko va'e re guive. Ha'e rami vy opo py ojapo va'e rei remoingo porã, ha'e rejapo mba'emo yvy re oguereko va'e hetave ovy aguã rami.

<sup>11</sup> Ha'e rami teĩ emokuave'ẽ ndepo, ha'e ixugui eipe'apa opa mba'e oguereko va'e. Ha'e rami vy rexâ 'rã nerondenope py ijayvu vai rã nderovai — he'i.

<sup>12</sup> Ha'e rã SENHOR aipoe'i anha pe:

— Ma'ẽ, Jó oguereko va'e ha'e javi ma ndepo'akaa py oĩ, ha'e rã hexe anho ta'vy emoi eme ndepo — he'i. Ha'e ramo SENHOR renonde gui anha oo ju.

### *Jó ojexavaia py teĩ ndojejavyiague*

<sup>13</sup> Peteĩ ára, ta'y kuery guyke'y jypygua ro py okaru ha'e vinho oy'u okuapy.

<sup>14</sup> Ha'e gui Jó-a py ou peteĩ hembiguai aipoe'i va'e:

— Vaka kuery reve yvy roikaraĩ, ha'e kuery katy'i rupi mburika kuery avi okaru jave

<sup>15</sup> ore kuery re sabeu kuery ou xapy'a vy ogueraapa. Ha'e rami vy nerembiguai kuery ikuai va'ekue ojukapa kyxe py. Xee anho'i aa jepe, ndevy pe amombe'u vy aju — he'i.

<sup>16</sup> Ha'e va'e ijayvu teri reve ou amboae ju. Ha'e vy aipoe'i:

— Tata Nhanderuete-a guigua yva gui ho'a vy oapypa ra'e veva'i ha'e nerembiguai kuery ikuai va'ekue. Ha'e vy omomba. Xee anho'i aa jepe, ndevy pe amombe'u vy aju — he'i.

<sup>17</sup> Ha'e va'e ijayvu teri reve ou amboae ju. Ha'e vy ha'e va'e aipoe'i:

— Caldeu kuery mboapy henda rupi nhomboja'o vy camelô kuery re ou vy ogueraapa ra'e. Ha'e vy ojukapa nerembiguai kuery kyxe py. Xee anho'i aa jepe, ndevy pe amombe'u vy aju — he'i.

<sup>18</sup> Ha'e va'e voi ijayvu teri reve ou amboae. Ha'e vy aipoe'i:

— Nderajy ha'e nderajy kuery tujave va'e ro py okaru ha'e vinho oy'u okuapy jave

<sup>19</sup> tekao e'ŷa katy gui yvytu atã opu'ã ouvy vy oo re ojeapi jova-jovai katy gui. Ha'e ramo ha'e kuery áry ho'a ramo omanomba. Xee anho'i aa jepe, ndevy pe amombe'u vy aju — he'i.

<sup>20</sup> Ha'e ramo Jó opu'ã vy omondoro oao, onhopi oakã ha'e ipukupa oupy yvy rupi. Nhanderuete omboete vy

<sup>21</sup> aipoe'i:

— Xepire rei reve aiko'i va'ekue ha'i rye gui, ha'e xepire rei reve ju 'rã aa. SENHOR ma mba'emo me'ëa, ha'e oipe'a va'erã avi oiko. Ta'ima'endu'a porã SENHOR rery re! — he'i.

<sup>22</sup> Ha'e nunga ha'e javi py Jó ndojejavyi, neĩ nda'ijayvui Nhanderuete ha'eve'ŷa rami joguerekoa rami.

## 2

<sup>1</sup> Peteĩ ára Nhanderuete ra'y kuery ou ju SENHOR renonde ojexa uka aguã, ha'e anha voi ha'e kuery reve ou henonde ojexa uka avi aguã.

<sup>2</sup> Ha'e ramo SENHOR aipoe'i anha pe:

— Magui tu reju?

Anha ombovai SENHOR:

— Yvy ha'e javi rupi aikoague gui aju — he'i.

<sup>3</sup> SENHOR oporandu anha pe:

— Rexa pota pa xerembiguai Jó re? Mba'eta yvy re jipoi avave rei ha'e va'e ramigua anhetê rupi ipy'a ha'e heko porã va'e, Nguete renonde ojererokyjea rupi vy mba'emo vai gui ojepe'a va'e. Ha'e ma oĩ atã ha'evea rami oikoa py, hovai apu'ã vy amomba rive aguã rami ndee xeapoxe teĩ — he'i.

<sup>4</sup> Ha'e ramo anha aipoe'i SENHOR pe:

— Opire ha'e javi'i ha'vy tome'ẽ, mba'eta avakue opa mba'e oguereko va'e ome'ẽ 'rã guekove rekovia.

<sup>5</sup> Ekuave'ẽe ju ha'vy, ikāgue ha'e ho'o re epoko. Ha'e rami vy rexha 'rã nerentonde py nderovai ijayvu vai rã — he'i.

<sup>6</sup> SENHOR aipoe'i anha pe:

— Ma'ẽ, ndepo'akaa py amboaxa, va'eri ejuka eme ta'vy — he'i.

<sup>7</sup> Ha'e gui SENHOR-a gui anha oo vy omomba'eaxy Jó ai vaikue py, ipy mbyte guive ijapte peve.

<sup>8</sup> Ha'e ramo Jó oguapy oiny tanhimbu áry, ha'e vy ojopy peteĩ nhae'ũ ra'ykue onhekaraĩ aguã.

<sup>9</sup> Ha'e gui ta'yxy ou vy aipoe'i ixupe:

— Reĩ atã teri va'e ty'y ha'evea rami reikoa py? Ndeayvu vai na Nhanderuete re, ha'e gui emano.

<sup>10</sup> Ombovai:

— Oikuaa ve'ŷ rei va'e rami ndeayvu. Nhanderuete gui iporã va'e anho ri ty'y jajopy 'rã, ha'e rã iporã e'ŷ va'e ma ndajajopyi avi 'rã teve? — he'i. Ha'e ramia ha'e javi py Jó ndojejavyi oayvu py.

<sup>11</sup> Ha'e gui ma mboapy Jó irũ kuery mba'emo vai hexe oikoague oendu vy peteĩ-teĩ ou guekoa gui: Temã pygua Elifaz, Sua pygua Bildade ha'e Naamá pygua Zofar. Ha'e va'e kuery jogueroayvu vy Jó oña katy jogueru omombaraete ha'e ombopy'a porã aguã.

<sup>12</sup> Mombyry rupi teri ha'e kuery oma'ẽ jogueru vy ndoexa kuaai okuapy. Ha'e rami vy onhendu ratã ha'e ojae'o okuapy. Ha'e vy peteĩ-teĩ oao puku omondoro, ha'e yvate rami oakã áry rupi omombo-mombo yvvy ku'i.

<sup>13</sup> Ha'e rami vy hexeve oguapy okuapy yvvy py. Sete ára ha'e sete pytû re ikuai va'erí peteĩve hexeve nda'ijayvui peteĩ ayvu py ma voi, haxy ete va'e oendua oexa vy.

### 3

#### *Jó otui'iague ára re ijayvu vaiague*

<sup>1</sup> Ha'e va'e rire Jó ae ijayvu. Ha'e vy ijayvu vai otui'iague ára re.

<sup>2</sup> Ha'e vy aipoe'i:

<sup>3</sup> — Xetui'iague ára ndoikoi ma voi va'e rire,  
ha'e va'e pytû "Ixy oguereko peteĩ ava'i", 'ea va'e avi.

<sup>4</sup> Ha'e va'e ára pytûmba va'e rire,  
Nhanderuete yvate gui nopenai ramo,  
yvate oña gui omoexakã e'ŷ va'e rire.

<sup>5</sup> Pytû reia ha'e kuaray'ã manoa anho oĩ va'e rire,  
hi'áry rupi araipa va'e rire guive.

Ha'e va'e ára omoñumba va'e rire opa marã rei.

<sup>6</sup> Ha'e va'e pyávy re ma pytû ete va'e omo'ã va'e rire.

Ma'etŷ re ára mboae ikuai va'e rami toguerovy'aave eme.  
Ha'e va'e jaxy pe "Jaxy ikuai va'e regua" ta'eave eme.

<sup>7</sup> Ha'e va'e pytû imemby e'ŷa va'e rire,  
ha'e va'e py nonhenduai va'e rire ový'a va'e.

<sup>8</sup> Ijayvu vai kuaa va'e kuery ma ha'e va'e ára re ijayvu vai ma va'e rire,  
vixo vaikue ye'ẽ rupigua momyĩ kuaa kuery ae.

<sup>9</sup> Tá, ha'e va'e pytû jaxy-tata ko'ẽ mbijarã ndojekuaai va'e rire,  
ha'e hendy va'e oarõmby ndojekuaai va'e rire.

Ko'ẽ rai jave ko'ẽ oexaxe va'e kuery ndoexai ma voi va'e rire.

<sup>10</sup> Mba'eta ha'e jave py nombotyi raka'e ha'i ryepy rokẽ,  
xerexa py ajexavaia aexa e'ŷ aguã.

- <sup>11</sup> — Mba'e re tu xee namanoi raka'e xeryru'i pyve?  
     Mba'e re tu ha'e gui aiko'i vy ndaxeayvuēvei?
- <sup>12</sup> Mba'e re tu oiko raka'e o'u áry xekuavāarā?  
     Mba'e re tu oī ikā xemokambuarā?
- <sup>13</sup> Mba'eta ha'e va'e ndoikoi va'e rire aŷ apytu'u porā rei 'rāgue.  
     Ake ramo xevy oī 'rāgue apytu'u aguā,
- <sup>14</sup> huvixave ha'e nhomongeta va'ety yvy re ikuai va'ekue  
     onhono porāa aguā ojapo ma voi va'ekue py itui va'e rami,
- <sup>15</sup> ha'e rami e'ŷ vy yvatekueve ouro ha'e prata oguereko va'ekue py  
     ngoo omonyē va'ekue itui va'e rami,
- <sup>16</sup> ha'e rami e'ŷ vy hyru'i py oī va'e ojuka nhemi va'e rami xee ndaikoi ma voi va'e rire,  
     kyrī'i va'e hexakāa peteīgueve oexa e'ŷ va'e rami.
- <sup>17</sup> Ha'e py ma ha'eve'ŷa rami ikuai va'ekue nanhomoangekovei ma 'rā.  
     Ikane'ō va'ekue guive ikane'ōgua nho 'rā ha'e py.
- <sup>18</sup> Ha'e py ma escravo-rā ogueraa pyre ikane'ōgua 'rā okuapy,  
     hereko kuery ayvu nonhenduvei ramo.
- <sup>19</sup> Ha'e py yvyīgueve ha'e yvatekueve ikuai va'ekue itui pavē 'rā,  
     tembiguai ikuai va'ekue voi opatō pe ve'ŷ ma 'rā ikuai.
- <sup>20</sup> — Mba'erā tu iporiaukue ojapoa ri hendy va'e oexa riae aguā rami?  
     Mba'erā tu ikuerai va'e okuave aguā rami ojapoa?
- <sup>21</sup> Ha'e kuery ma omano aguā anho oarō okuapy, ha'e rā novaēi.  
     Ha'e kuery omano aguā oekave 'rā okuapy hepyve va'e onhomni mbyre oekaa rupi  
     yvy ojo'o va'e gui.
- <sup>22</sup> Ha'e kuery ma onhono porāa rā ov'y'a 'rā okuapy,  
     oguerovy'a rei 'rā yvykua py ovaē vy.
- <sup>23</sup> Mba'erā tu avakue pe oexa ukaa 'rā hexakā va'e haperā oikuaa uka e'ŷ re?  
     Mba'eta Nhanderuete ojoko 'rā joa katy gui e'ŷ-e'ŷ.
- <sup>24</sup> Mba'e re tu xee ha'u va'erā 'rāgue py ajou xepytuē atā aguā,  
     ha'e yy onhoē va'e rami ajae'o ete aguā?
- <sup>25</sup> Mba'eta akyjea ou ma xe'áry,  
     aexā'āa oiko ma xere.
- <sup>26</sup> Ndapytu'upei, nañ rivevei, neñ naxekane'ōgua kuaavei,  
     xepy'a reta rei aguā anho ou ramo — he'i.\*

## 4

### *Jó pe Elifaz ijayvu eteague*

- <sup>1</sup> Ha'e ramo Temā pygua Elifaz ombovai. Ha'e vy aipoe'i Jó pe:
- <sup>2</sup> — Xapy'a rei amongue ndevy ijayvu ramo nerendui 'rā ri ty'y?  
     Ha'e rami avi mava'e tu ojejoko 'rā ijayvu e'ŷ aguā?
- <sup>3</sup> Ma'ē, ndee ma mbovy e'ŷ rei rekombo'e va'ekue,  
     ha'e ipo kangy va'e remombaraete kuerei va'ekue.
- <sup>4</sup> Ndeayvua py reipytyvō va'ekue onhepyxanga va'e kuery,  
     ha'e remombaraete ju va'ekue henapy'ā kangy va'e.
- <sup>5</sup> Ha'e rā aŷ ma ndere ju ha'e nunga ou ramo ndee nerenduxei 'rā.  
     Ndee rejexavai vy nanderekorāvei.
- <sup>6</sup> Nhanderuete renonde rejererokyjea rupi ve'ŷ ri ty'y rejerovia,  
     rearō reikovya ha'e nderekko porāa rupi ve'ŷ ri ty'y reiko?

\* **3:26** Jó ndoikuai raka'e mba'e re pa ojexavaia. Ha'e rami vy ndovy'aia rupi ijayvu Nhanderuete re. Ha'e gui opaa py Nhanderuete ijayvu ixupe omo'arandua rupi, capítulo 38 guive 40 peve, ha'e rā Jó ma nda'evei ramo ha'e rami ijayvuague re.

- 7 — Nema'endu'a pota ke: Ojejavy e'ŷ va'e pa okanhy 'rã?  
 Mamo tu heko porã va'e omombaague?
- 8 Xee aexaa rami, mba'emo vai nhotŷare kuery ma  
 ha'e nungakue ae ju 'rã omono'ō.
- 9 Nhanderuete ipytue ramo rive ha'e kuery ikuai axy 'rã.  
 Opoxya rupi oipeju rã okanhymba 'rã.
- 10 Ha'e ramo guary kuery voi inharõ teĩ okyrirî 'rã okororõa gui,  
 guary ra'y kuery raĩ guive opẽmba 'rã.
- 11 Ha'e rami vy guary kuery ikangy 'rã oje'oivy mba'eve ndojukavei vy.  
 Guary kunha ra'y kuery voi opa rupi 'rã oaĩmba.
- 12 — Peteĩ ayvu aendu xee ae'ia py omombe'ua rã.  
 Haxy'i py aendu kuaa xeapyxa py ijayvua mbegue rã.
- 13 Pyávy, ajexaa ra'ua re aikuua pota ete reve,  
 avakue oke vaipa jave
- 14 ou karamboae xemondyi ha'e xemboryryipaarã.  
 Xekägue eteve voi oryryipa.
- 15 Ha'e ramo peteĩ nhe'ẽ oaxa xerenonde rupi.  
 Ha'e rami vy ojapo xe'a xerete rupi ikuai va'e opu'ãmba aguã rami.
- 16 Ha'e va'e optyta ho'amy va'eri ndaexa kuaai hova.  
 Peteĩ mba'e rive ojekuaa aexaa py.  
 Jypy nonhendui mba'eve. Ha'e gui ma aendu peteĩ aipoe'i va'e:
- 17 "Imarã va'e kuery nda'u heko porã 'rã Nhanderuete renonde?  
 Avakue nda'u iky'a e'ŷ va'e 'rã oiko imoingoare renonde?"
- 18 Ma'ẽ, Nhanderuete ma guembiguai kuery re ndojeroviae 'rã.  
 Mba'eta guembiguai anjo kuery re eteve voi oikuua teko vai oĩa.
- 19 Ha'e rã yapo guigua py hoo va'e re katuve ma.  
 Ha'e kuery ma yvyku'i gui rive ojapo pyre,  
 ha'e tanambi rami rive ju 'rã omou'ũa.
- 20 Aje'ive ha'e kuery itui'i 'rã, ha'e gui ka'arukue ju omombaa 'rã.  
 Okanhy 'rã raka'e rã peve guarã, avave rei oikuua pota e'ŷ re.
- 21 Ha'e kuery rekove oipe'aa ramo  
 omano 'rã 'arandua oupity e'ŷ re", he'i.

## 5

### *Jó Nhanderuete oeka aguã re Elifaz ijayvuague*

- 1 — Ejapukai aŷ! Ha'e rami teĩ oiko ri nda'u nerendarã?  
 Mava'e anjo iky'a e'ŷ va'e pe tu renhepytvõ uka ta?
- 2 Mba'eta hi'arandu e'ŷ va'e ipoxya ae ombovaipa 'rã.  
 Inhakã porã e'ŷ va'e ivaia rive 'rã ojuka.
- 3 Xee ma aexaa porã hi'arandu e'ŷ va'e onhemingo porã merami ramo.  
 Ha'e rami teĩ are'ŷ'i re aikuua hoo oĩa ayvu vaipy oikoa.
- 4 Ta'y kuery voi mombyry ikuai ipytyvoarã gui.  
 Tetã kora rokẽ py ha'e kuery ojexaa uka rã ombopagaa,  
 heraa jepearã ndoikoi ramo.
- 5 Ha'e kuery onhotŷ va'ekue ma ijajupa rã ikuuai va'e kuery ho'upa rive 'rã,  
 juu mbyte rupi henhoi va'ekue voi oipe'apa 'rã.  
 Ha'e mba'emo oguereko va'ekue ma oikuua pota rei va'e kuery omokanhymba 'rã.
- 6 Mba'eta teko axy ma yvyku'i gui rive ndoikoi,  
 yvy gui e'ŷ henhoi jajexavai aguã.
- 7 Ha'e rami 'rãgue py avakue ojexavai aguã rami ae 'rã itui'i,

- tapyĩ gui tata raviju yvate katy ae 'rã ovevea rami.
- <sup>8</sup> – Ha'e gui xee va'e rire ma aeka 'rãgue Nhanderuete,  
ixupe anho amboaxa 'rãgue xerekoo.
- <sup>9</sup> Mba'eta ha'e ma ojapo 'rã mba'emo tuvixa va'e oikuaa pyrã e'ŷ,  
ha'e nhomondyipaarã omombe'u kuaa pyrã e'ŷ.
- <sup>10</sup> Ombo'oky 'rã yvy áry rupi,  
omoakŷ 'rã mba'ety ikuai va'e.
- <sup>11</sup> Ha'e rami vy ogueraa jepe 'rã yvyŷgue'i peteĩ henda yvatea py,  
ojae'o va'ekue oiko porãa rupi ov'y'a nho aguã.
- <sup>12</sup> Ha'e rã jokorea kuery onhembopy'aa ma ha'e ombovaipa 'rã,  
opo py ojapoxe va'ekue ndojapo kuaai aguã.
- <sup>13</sup> Ombo'a 'rã oikuaapave va'e nhombotavya py ae.  
Ha'e ramo oikuaapa va'e onhembopy'aague opa rive 'rã.\*
- <sup>14</sup> Ha'e kuery ma ara py teĩ ojou 'rã pytãa anho,  
kuaray mbyte jave teĩ pytã rupi merami ikuai, opovyvy 'rã oje'oivy.
- <sup>15</sup> Nhanderuete ma jogueraa jepe 'rã ha'e kuery juru gui kyxe oẽ va'e gui,  
ipo'akave va'e po gui ogueraa jepe 'rã ojexavai va'e.
- <sup>16</sup> Ha'e rami rã oĩ 'rã iporiaukue'i oarõ okuapy aguã,  
ha'e rã joapo vaia kuery ma okyririmb'a 'rã.
- <sup>17</sup> – Ovy'a ete 'rã avakue Nhanderuete omo'arandu va'e.  
Ha'e nunga rupi endu rive eme Ipo'akapave va'e nemo'arandu rã.
- <sup>18</sup> Mba'eta ha'e ma nhomboai 'rã, ha'e gui ha'e ae ju oipoano 'rã.  
Nhomomba'eaxy 'rã, ha'e gui opo py ae ju 'rã omonguera.
- <sup>19</sup> Seis-kue rejexavaia gui ha'e ndereraa jepe 'rã,  
ha'e sete-a py voi mba'emo vai nanderupityi 'rã.
- <sup>20</sup> Karuai py teĩ ndereraa jepe 'rã remano aguã gui,  
joe opu'ãa py guive ndereraa jepe 'rã kyxe po'akaa gui.
- <sup>21</sup> Nderepy 'rã ayvu vai gui,  
ha'e ramo mba'emo mbovaipaarã ovaẽ rã rexâ teĩ nderekyjei 'rã.
- <sup>22</sup> Mba'emo mbovaipaa ha'e karuai oiko rã repuka 'rã,  
vixo ka'aguy regua gui guive nderekyjei 'rã.
- <sup>23</sup> Mba'eta yvy rupi ita ikuai va'e reve voi rejapo 'rã peteĩ rami ikuai porã aguã,  
mymba yvy regua voi ndereve ikuai 'rã peteĩ rami.
- <sup>24</sup> Reikuua 'rã ndero py mby'a porã oĩa,  
ha'e mba'emo rerekoo va'e ikuia rupi reikuua pota reovy rã ndoatai 'rã mba'eve.
- <sup>25</sup> Reikuua avi 'rã neramymino kuery heta 'rãa,  
ndeguigua kuery yvy re jai rogue ikuai va'e rami 'rã heta.
- <sup>26</sup> Ndetuja'i jave teĩ nembaraete reve 'rã reo yvyra rupa py,  
trigo ojokua pyre hi'ára py porã omono'õa rami.
- <sup>27</sup> – Ma'ë, ha'e nunga re roikuua pota rã ha'e rami ae.  
Ejapyxaka ndee voi, ha'e nunga re eikuua pota avi reiko porã aguã – he'i.

## 6

*Jó onhemboeko porãa rupi ijayvuague*

- <sup>1</sup> Ha'e ramo Jó ombovai:
- <sup>2</sup> – Ai! Xeayvua re anhetê oikuua potaa va'e rire,  
ha'e mba'emo opejaa py xeporiaua opejaa va'e rire
- <sup>3</sup> ha'e va'e ma anhetê ita ku'i ye'ë rembe rupi ikuai va'e gui ipoyive 'rãgue.

---

\* <sup>5:13</sup> 1 Coríntios 3.19

- Ha'e nunga rupi ae xevai reve xeayvu va'ekue.
- <sup>4</sup> Mba'eta Ipo'akapave va'e ma guembiporu hu'y py xenhyvõmba,  
ha'e ramo xenhe'ë py aendu veneno ramigua.  
Xerovai meme Nhanderuete ombou xemongyjearā.
- <sup>5</sup> Mburika'i yvy'ää rupigua nda'u nhuū re okaru reve onhe'ë 'rā teve?  
Vaka kuery nda'u onhe'ë 'rā okaru porāa py?
- <sup>6</sup> Juky e'ŷ re teve ja'u 'rā he'ë e'ŷ va'e?  
Tyrā uru rupi'a xiña re oī 'rā teve heea?
- <sup>7</sup> Xenhe'ë py nda'uxei va'ekue  
aŷ ajeguaru reve teī ha'u.\*
- <sup>8</sup> — Nhanderuete ajerurea ojapo va'e rire,  
aipota va'e ha'e omoingo va'e rire!
- <sup>9</sup> Nhanderuete pe ha'eve va'e rire xemokanhy voi aguã,  
opo oupi vy xejuka ete aguã!
- <sup>10</sup> Ha'e nunga oiko ma va'e rire xepy'a guaxu 'rāgue,  
haxy aendu temaa py teī apo-apo 'rāgue avy.  
Mba'eta xee ma Iky'a e'ŷ va'e ayvu rovai xeayvu va'e'ŷ.
- <sup>11</sup> — Mba'e tu arõve ta, xembaraete vy e'ŷ?  
Mba'erā tu aikove riae ta, amano aguã rami tema aiko vy?
- <sup>12</sup> Xembaraetea nda'u ita rami hatā va'e?  
Xero'o nda'u overa va'e guigua rami hatā va'e?
- <sup>13</sup> Any! Naendui ae xepytyvõarā.  
Xegui oipe'apaa ma xembaraeterā va'ekue.
- <sup>14</sup> — Ojexavai va'e pe irū kuery omboaxya'i oexa uka va'e rire,  
Nhanderuete renonde ojererokyjea gui ojep'e a e'ŷ rā.
- <sup>15</sup> Ha'e rā xeryvy kuery ma anhetē rupi e'ŷ xerereko.  
Ha'e kuery ikuai peteī yakā oxyry atā vy hembe rupi oīa rami
- <sup>16</sup> yro'y ogueroxyry reve,  
yro'y apī hyku ov yave,
- <sup>17</sup> ha'e rami teī haku jave oxyry atā va'ekue typa rive va'e rami,  
ndaevovovei ha'e oxyryague rupindoxyryvei va'e rami.
- <sup>18</sup> Ha'e ramo oguata va'e kuery yy rekaa rupi ojepukuavo 'rā jogueravy tape oo aguã  
va'ekue gui,  
ha'e vy tekao e'ŷa katy oje'oi vy omanomba 'rā ha'e py.
- <sup>19</sup> Temá yvy gui oguata va'e kuery oeka teī yy oxyry atā va'e,  
Sabá gui oguata va'e kuery voi iporiaupa 'rā yy re.
- <sup>20</sup> YY oī aguã re ojerovia va'ekue oximba 'rā okuapy.  
Oxyryague py ovaē vy ndoikuaavei rei 'rā okuapy.
- <sup>21</sup> Ha'e rami ae peē kuery voi xevy pe mba'everā ovare e'ŷ va'e pendekuai.  
Mba'eta ajexavai rā pexa vy penhemondyipa rive.
- <sup>22</sup> Xee nda'u aipoa'e: "Peme'ë ke mba'emo xevy", ha'e teve?  
Tyrā pa "Peme'ë mba'emo perekō va'e xepytyvõ aguã", ha'e teve?
- <sup>23</sup> "Xereraa jepe ke xemoingo axya po'akaa gui",  
e'ŷ vy "Xerepy ke porayvu e'ŷ va'e kuery po gui", ha'e teve pēvy?
- <sup>24</sup> — Xerekombo'e na, ha'e rā xee akyrirī 'rā.  
Pemombe'u porāve na mba'e nunga py pa ajejavyague.
- <sup>25</sup> Anhetē ayvu ha'evea ramigua ma oenduxe vai pyrā meme!  
Ha'e rā peē kuery ma mba'erā tu pendeayvu ete xevy?

\* **6:7** Apy tembi'u hee e'ŷ va'e re Jó ombojoja, ojexavaia re ijayvu vy.

- <sup>26</sup> Peẽ kuery xemongetaxe ri ty'y xeayvua re,  
peteĩ ndaekorävei va'e yvytu pe rive ijayvu va'e rami xeayvu rire?
- <sup>27</sup> Tyre'ŷ kuery re teve pexa 'rã xortea,  
ha'e pejogueroayvu 'rã teve peneirũ repyrã re?<sup>†</sup>
- <sup>28</sup> Ha'e gui aŷ peẽ kuery xemboaxy'i ri vy pema'ẽ porã xere,  
ha'e pexa penerenonde ndaxeapuia.
- <sup>29</sup> Peikuaa pota ju ke, ajerure pëvy, ha'eve'ŷa rami xekuaa e'ŷ aguã.  
Peikuaa pota ju, ha'e vy peikuaa 'rã ha'evea rami aikoa.
- <sup>30</sup> Xeayvua py teve ha'eve'ŷa ramigua pendu?  
Xejuru py ha'eve'ŷ va'e re xeayvu va'e rire nda'u xee voi ndaikuuai 'rãgue teve?

## 7

*Nhanderuete pe Jó ijayvuague*

- <sup>1</sup> — Yvy re avakue ojexavai aguã rami e'ŷ teve ikuai?  
Oikovea ára om̄ba'epo va'e rami e'ŷ teve ojexavai?
- <sup>2</sup> Escravo kuaray'ã oeka teĩ va'e rami,  
ha'e om̄ba'epo va'e opagaa aguã oarõ va'e rami,
- <sup>3</sup> xevy pe ha'e rami ae avi ome'ëa mba'erã e'ŷ aiko aguã jaxy nhavõ re,  
ha'e pytû aiko axy aguã ome'ëa avi.
- <sup>4</sup> Anhenoy vý aipoa'e: "Mbovy hora nda'u ha'eve 'rã avy ju aguã?"  
Ha'e rami teĩ pytû ipuku ramo  
xerupa rupi ajere-jere tema ajupy ko'ë peve.
- <sup>5</sup> Xero'o re oï taxo ha'e pekue vaikue.  
Xepire re ipekue oï va'e gui ipeu jepi.
- <sup>6</sup> Xe'ára ma mba'emo mbovyvya gui ipojavave,  
ha'e vy opa 'rã arõ e'ŷkue re.
- <sup>7</sup> Nema'endu'a ke xerekovea yvytu rami rive oaxapa vyvoia re.  
Xerexa ndoexavei ma 'rã iporã va'e.
- <sup>8</sup> Aŷ xerexa okuapy va'e ma ndaxerexavei ma 'rã.  
Ha'e kuery rexaxareko rei teĩ xee ndajekuaavei ma 'rã.
- <sup>9</sup> Arai ivaipa reve oaxa va'e rami avi  
onhono porã mbyre noëvei 'rã.
- <sup>10</sup> Ha'e kuery ndojevyvei 'rã ngoo katy,  
ikuaiague py ae teĩ ha'e kuery re na'ima'endu'aavei ma 'rã.
- <sup>11</sup> — Ha'e nunga rupi ae xee ndajokoi xejuru.  
Ha'e rami vy xeayvu 'rã xenhe'ë py ajexavaia aendu va'e re,  
anhemombe'u 'rã xerekove re ajexavaia rupi.
- <sup>12</sup> Xee nda'u ye'ë, e'ŷ vy vixo ye'ë rupigua teve,  
ndee xerarõ uka aguã?
- <sup>13</sup> Xee aipoa'e: "Xerupa py aña py avy'a 'rã,  
xerupa py apytu'u 'rã ajexavaia re xeayvua gui", ha'e.
- <sup>14</sup> Ha'e rami teĩ ndee xemondyi 'rã mba'emo aexa ra'u va'e gui,  
xemongyje aexa merami va'e gui.
- <sup>15</sup> Ha'e nunga rupi xenhe'ë pe ha'eve 'rãgue xejyryvipyva va'e rire.  
Aiko axy 'rãgue py ha'eve amano aguã.
- <sup>16</sup> Xevy pe ha'eve ma aikovea.  
Raka'e rã peve xee ndaikovexei.  
Xereja ha'vy, mba'eta xe'ára ma yvytu rami rive oaxapa vyvoi.
- <sup>17</sup> Mba'e nunga tu avakue ikuai rejou porã aguã,

<sup>†</sup> 6:27 Apy Jó ijayvu oirũ kuery nomboaxyia re.

- ha'e kuery re repena aguã?
- <sup>18</sup> Mba'eta ára nhavõ reju reikuua pota aguã,  
ha'e hora nhavõ 'rã rexâ pota.
- <sup>19</sup> Raka'e peve tu ndereipe'ai 'rã nderexâ xegui?  
Raka'e peve 'rã nda'evei xerendyry amokõ aguã?
- <sup>20</sup> Xapy'a rei ajejavy vy mba'e nunga ha'eve'ŷ va'e tu ajapo ndevy,  
ndee avakue re reikuua pota va'e?  
Mba'e re tu xeapo hu'y rea'anga aguã,  
xejeupe ae ipoyi va'e apyta aguã rami?
- <sup>21</sup> Mba'e re tu neremboguei xerekâ vaia,  
ha'e ndereipe'ai ajejavyague?  
Mba'eta aŷ ha'a ta ma yvy rupi.  
Ha'e va'e rire ndee xerekâ vy ndaxejouvei ma 'rã — he'i.

## 8

*Nhanderuete reko porãa re Bildade ijayvuague*

- <sup>1</sup> Ha'e ramo Sua pygua Bildade ombovai:
- <sup>2</sup> — Raka'e peve 'rã tu pova'e nunga re ndeayvu?  
Raka'e peve 'rã tu ndejuru gui ndeayvuē yvytu atã va'e rami rive?
- <sup>3</sup> Nhanderuete nda'u ha'eve'ŷa rami 'rã oikuaa pota?  
Ipo'akapa va'e nda'u gueko porãa rupi e'ŷ 'rã nhanderereko?
- <sup>4</sup> Hovai ndera'y kuery ojejavy rire  
omombo ma ojejavyague re opaga aguã py.
- <sup>5</sup> Ha'e rami avi xapy'a rei ndee Nhanderuete reka rã,  
ha'e Ipo'akapa va'e pe nemboaxy aguã re rejerure rã,
- <sup>6</sup> xapy'a rei nandeky'aia ha'e ndereko porãa rupi ri reiko ramo,  
are'ŷ re ha'e onhemoi 'rã nepytyvõ aguã,  
ha'e vy nemoi ju 'rã ndereko porãa ojekuaa porã aguã py.
- <sup>7</sup> Jypy reikoague py ma anhetê ne'yvyi'i va'ekue,  
ha'e rã opaa py ma ndeyvate ete 'rã.
- <sup>8</sup> — Ha'e gui aŷ ma xee ajerure ndevy, eporandu na ymagua kuery rekokue re,  
eikuuaa pota neramoi kuery ikuaiague re.
- <sup>9</sup> Mba'eta nhande ma kue'ive guare jaiko vy mba'eve ndajaikuuai.  
Ha'e nhande'ára yvy re jaikoa ma kuaray'ã rami oaxa ový va'e.
- <sup>10</sup> Neramoi kuery nanembo'ei ri ty'y,  
ha'e kuery nanemongetai ri ty'y?  
Ha'e vy ha'e kuery ae o'arandua rupi nomombe'ui ri ty'y po rami?
- <sup>11</sup> Mba'eta papiro renhoi ma yapo py anho 'rã yvate,  
junco renhoi guive yy py anho 'rã oiko porã.
- <sup>12</sup> Ha'e va'e nunga ipyau teri reve ojaya e'ŷ re tei  
amboae jai rogue gui ipiru voive 'rã.
- <sup>13</sup> Ha'e rami ae avi ikuai Nhanderuete gui hexarai va'e kuery ha'e javi.  
Mba'eta heko vai va'e kuery mba'emo oarõ okuapy va'e opa rive 'rã.
- <sup>14</sup> Ha'e kuery oĩ atã merami tei opa xapy'a 'rã,  
ha'e kuery ojeroviaa ma nhandu kya rami rive 'rã ivaipa.
- <sup>15</sup> Ikya re amongue ojeko rã oxopa 'rã.  
Ha'e va'e re amongue ojopy rã ivaipa rive 'rã.
- <sup>16</sup> Ha'e kuery ma ikuai kuaray py mba'emo rogue oiko porã vy  
yvotyha'e javi rupi hoky pojava va'e rami.
- <sup>17</sup> Hapo ma onhemamamba 'rã ový ita ijaty oupy va'e áry rupi,

- henhoī vy oike 'rā kora hi'aī va'e re voi.
- <sup>18</sup> Ha'e rami teī xapy'a rei oīague gui Nhanderuete omondoro ramo  
oīague py ae teī hexe na'iima'endu'aavei ma 'rā.
- <sup>19</sup> Ha'e rami rire hekove mba'everā ndovarei!  
Ha'e gui yvy ku'i py henhoīague gui amboae ju 'rā henhoī.
- <sup>20</sup> – Ha'e rā anhetē rupi ipy'a va'e kuery ma Nhanderuete ndoejai 'rā,  
nomboaxai 'rā guive heko vai va'e kuery po py.
- <sup>21</sup> Ha'e ma ndejuru py omoī 'rā nderory nho aguā,  
nerembe re omoī 'rā revy'a aguā.
- <sup>22</sup> Ha'e rā ndejojai reiare kuery ma ojee ae omoī 'rā oxīmba reia.  
Heko vai va'e kuery ro okanhymba 'rā – he'i.

## 9

*Nhanderuete pe Jó nombovai kuaaia rami ijayvuague*

- <sup>1</sup> Ha'e ramo Jó ombovai vy aipoe'i:
- <sup>2</sup> – Anhetē, xee voi aikuaa rā ha'e rami ae.  
Ha'e rami teī marā rami vy 'rā tu avakue onhemboeko porā Nhanderuete renonde?
- <sup>3</sup> Mba'eta xapy'a rei hexeve avakue nhombojovake ramo  
mil-kue oporandua regua neī peteīve ma nombovai kuaai 'rā.
- <sup>4</sup> Ha'e ma opy'a py oikuaapa ha'e ipo'akapave va'e.  
Mava'e tu hexe opu'ã reiague gui oo porā ju 'rā?
- <sup>5</sup> Ha'e ma oipe'a 'rā yvyty ikuai va'e oikuaa okuapy e'ŷ re.  
Opoxya py ombovaipa 'rā.
- <sup>6</sup> Ha'e ma yvy omomyī vy oguerova 'rā oīa gui,  
ha'e ramo ijyta oī va'e oryryipa 'rā.
- <sup>7</sup> Kuaray pe ha'e ijayvu rā ndojopevei 'rā.  
Omo'ã 'rā guive jaxy-tata ikuai va'e.
- <sup>8</sup> Ha'e ae'i oipyo va'ekue yva,  
ha'e ye'ē áry rupi oguata 'rā oikovy.
- <sup>9</sup> Ha'e ma jaxy-tata apoare: Ursa, Hendy guaxu va'e,  
Eixu, jaxy-tata kuaray ijapu'a'ia katy ikuai va'e guive.
- <sup>10</sup> Ha'e ma mba'emo tuvixa va'e oikuaapy e'ŷ apoa,  
mba'emo porā omombe'u kuaapy e'ŷ guive.
- <sup>11</sup> Ma'ě, xapy'a rei xeyvy'iry rupi ha'e oaxa rā xee ndaexai 'rā.  
Xerenonde rupi ete oiko teī xee ndaikuai 'rā.
- <sup>12</sup> Mba'emo ha'e oipe'a ta ramo mava'e tu ojoko 'rā?  
Mava'e tu aipoe'i 'rā ixupe: "Mba'e tu rejapo?"
- <sup>13</sup> – Nhanderuete ma nomboaxa rivei 'rā opoxya.  
Ha'e ramo henonde rupi ojero'a 'rā okuapy Egito pygua pytyvōa kuery.
- <sup>14</sup> Ha'e ramo mba'exa tu xee ambovai ta?  
Mba'exa tu aikuaa 'rā xeayvurā, hexeve ajogueroayvu aguā?
- <sup>15</sup> Xee xerekō porā va'e rire teī ixupe ma ndaxeayvu kuaai 'rāgue.  
Ha'e ramí 'rāgue py xemboayvuarā pe ajerure 'rāgue xemboaxy aguā re.
- <sup>16</sup> Hery rupi ajapukai rā ombovai teī  
xee aikuaa rā noendui 'rā ajerurea.
- <sup>17</sup> Mba'eta xemou'ū yvytu atā va'e py,  
ha'e mba'e re'ŷ xemoingo axyve tema.
- <sup>18</sup> Ha'e ndoejai xepytuē aguā rive.  
Ha'e ramí 'rāgue py xere ombou xerekō axyarā.
- <sup>19</sup> Xapy'a rei ipo'akaa re aikuaa potaxe ramo ma ha'e aipoe'i 'rā: "Apy ma aī."

- Ha'e gui anhemboeko porãxe ri ramo "Mava'e tu xerenoĩ?" he'i 'rã.
- <sup>20</sup> Xee ma heko porã va'e aiko va'e rire teĩ xeayvu py ae rive 'rãgue aexa uka xerekova vai.  
Anhetẽ rupi xepy'a teĩ ae ma ha'e xekuaa 'rã otekoavy va'e rami.
- <sup>21</sup> — Ha'e rami avi xee ma anhetẽ rupi xepy'a va'e, xenhe'ẽ py ndajeayvuveikue py aiko, neĩ xerekove re ae ma voi napenai.
- <sup>22</sup> Xevy pe ma opa mba'e peteĩ'i rami meme merami.  
Ha'e rami vy aipoa'e: "Ha'e ma joo rami 'rã omomba anhetẽ rupi ipy'a va'e ha'e heko vai va'e", ha'e.
- <sup>23</sup> Mba'emo vai jojuka xapy'a ramo  
ha'e ojojai 'rã ojejavý e'ý va'e ojexavai rã.
- <sup>24</sup> Heko vai va'e kuery po py omboaxaa ma yvy  
teĩ Nhanderuete omo'ã joguerekoa kuery rova.  
Ha'e'ý ri ha'e nunga moingoa oiko ramo mava'e tu omoingo?
- <sup>25</sup> — Xe'ára aikoa ma onha va'e gui oaxa pojavave.  
Oaxa vyvoi, ha'e rã ndaexai xembovy'aarã va'ekue.
- <sup>26</sup> Oaxa pojava ovv kanoã jai rogue gui ojapo pyre rami,  
ha'e taguato vixo'i re oguejy xapy'a va'e rami.
- <sup>27</sup> Xapy'a rei xee aipoa'e 'rã: "Xee xerexarai 'rã ajexavaia re,  
ajepe'a 'rã xeporiaua gui, ha'e vy avy'a 'rã", ha'e.
- <sup>28</sup> Ha'e rami va'e rire teĩ haxy aendu va'e xemongyje teri 'rãgue,  
mba'eta aikuaa porã ndee xekuaa 'rã heko porã va'e rami e'ý.
- <sup>29</sup> Ha'e rami vy xembopaga 'rãe.  
Ha'e ramo mba'erã tu anhea'ãve ta?
- <sup>30</sup> Xapy'a rei yro'y rykukue py ajau,  
ha'e kavõ py xepo aiky'a'o
- <sup>31</sup> teĩ ndee yapo py ju 'rã xemombo.  
Ha'e ramo xeao ae voi ojapo 'rã xegui ojeguarua aguã rami.
- <sup>32</sup> Mba'eta Nhanderuete ma xee ramigua ava e'ý oiko.  
Ha'e rami e'ý va'e rire xee ambovai 'rãgue oremboayvu aguã katy rojoguerua rupi  
ma voi.
- <sup>33</sup> Ndoikoi orembyte  
ore mokoïve re opo omoï va'erã.
- <sup>34</sup> Xe'áry rupi gui yvyrá po'i'i ha'e oipe'a,  
ha'e naxemongyjevei ma va'e rire
- <sup>35</sup> ha'eve 'rãgue akyje e'ý re xeayvu aguã.  
Ha'e rami e'ý rã nda'evei xevy.

## 10

### *Nhanderuete rovai Jó ijayvuague*

- <sup>1</sup> — Xenhe'ẽ py ndarovy'avei ma xerekova.  
Xeayvu 'rã ndavy'aia ha'e javi re,  
xenhe'ẽ py ajexavaia aendu reve 'rã xeayvu.
- <sup>2</sup> Aipoa'e 'rã Nhanderuete pe: "Xembopagave eme.  
Eikuua uka porã ke mba'emo vai xere rejou va'e.
- <sup>3</sup> Ndee nda'u xembojexayaixe vai ri?  
Mba'eta reja merami neremimoingo ndepo py ae rejapo va'ekue.  
Tyrã pa heko vai va'e kuery onhembovy'aa rive rejou porãve?
- <sup>4</sup> Ndee voi teve to'o guigua nderexa va'e?  
Avakue oexaa rami ae avi teve ndee voi rejoexa?
- <sup>5</sup> Imarã va'e kuery oikoa ára rami teve nde'ára voi oĩ?

- Ha'e ndee reikoa ma'etŷ teve avakue oikoa ma'etŷ rami,  
<sup>6</sup>xereko vaia re reikuua pota aguã,  
 ha'e ajejavya re rexâ pota aguã?  
<sup>7</sup>Ndee ma reikuua porã ojejavy va'ety e'ŷ aikoa.  
 Ha'e rami teñ ndoikoi ndepo gui xereraa jepearã.  
<sup>8</sup>Ndepo py ae xemboypy ha'e xeapopa va'ekue.  
 Aŷ ma xemombaxe ju.  
<sup>9</sup>Nema'endu'a ke yapo gui rive xeapoague re.  
 Ha'e rã aŷ ta'vy yvy ku'i ju xemoingoxe?  
<sup>10</sup>Kamby rami e'ŷ teve renhoë xerekove,  
 ha'e kamby kekue rami rive teve xeapo?  
<sup>11</sup>Xepire ha'e xero'orã py xemonhemonde,  
 ha'e gui xekâgue ha'e xerajyrã reipopẽ va'ekue.  
<sup>12</sup>Xerekoverã reme'ê va'ekue ndeporayvua rupi,  
 ha'e xere repenaa rupi xerarõ va'ekue.  
<sup>13</sup>Ha'e nunga renhomî nekuraxõ py.  
 Va'eri aikuaa porã po rami renhembopy'aa.  
<sup>14</sup>Xapy'a rei ajejavvy ramo ndee reikuua pota 'rã.  
 Ha'e rami vy neremboguei 'rã xereko vaiague.  
<sup>15</sup>Xapy'a rei xereko vai ramo nda'evei ete 'rã xevy!  
 Ha'e rami avi xereko porã vy ma nda'evei avi xreakã amopu'ã aguã,  
 mba'eta aximba reve anho aexa xeporiaukuea.  
<sup>16</sup>Mba'eta xreakã amopu'ã ramo ndee xembo'a 'rã guary inharõ va'e rami.  
 Ha'e vy xerovai rexâ uka ju 'rã ndepo'akapaa.  
<sup>17</sup>Rembou ju 'rã xerovai ijayvu va'erã,  
 ha'e remboeta 'rã xerovai ndevaia.  
 Mba'emo vai anho rembou 'rã xere opu'ã va'erã.  
<sup>18</sup>Mba'erã tu ha'vy xerenoë raka'e ha'i rye gui?  
 Ai! Avave xerexa e'ŷ re amano ma voi va'e rire  
<sup>19</sup>xee ndaikoi ma voiague rami 'râgue aĩ,  
 ha'e xeryru'i py aĩa guive xereraa 'râgue xenhono porãa aguã katy.  
<sup>20</sup>Mbovy'i e'ŷ teve oĩ xe'ára?  
 Epytu'u ke ha'vy, xereja,  
 xapy'a'i ri jepe xekane'õgua aguã,  
<sup>21</sup>ha'e xee aa e'ŷ mbove peteñ henda ha'e gui ajevy ju e'ŷa katy,  
 yvy pytûa ha'e manoâ'ã oĩa py,  
<sup>22</sup>yvy huũ reia, pytû etea,  
 yvy manoâ'ã ha'eve'ŷa ramigua anho oĩa,  
 hendi va'e eteve voi pytûa py", he'i.

## 11

### *Jó ojejavya rami Zofar ijayvuague*

- <sup>1</sup>Ha'e ramo Naamá pygua Zofar ju ombovai:  
<sup>2</sup>— Nanembovaiai 'rã ri ty'y po rami ndeayvu reta rei rã?  
 Ha'evea rami teve reiko ndeayvu kuaa etea py?  
<sup>3</sup>Ndeayvu reta rivea gui teve avakue okyrirõ 'rã?  
 Ha'e rã ndee rejojai 'rã teve avave rei nemoximbaa ju e'ŷ re?  
<sup>4</sup>Mba'eta aipo're: "Xee ma anhetëguu meme aikuaa va'e,  
 ha'e nerentonde iky'a e'ŷ va'e aiko", 're va'ekue.  
<sup>5</sup>Ai! Nhanderuete ijayvu ma va'e rire,

- nderovai ojuru oipe'a va'e rire,  
<sup>6</sup> omombe'u porāve 'rāgue 'arandua ndoikuaa ukai teri va'e,  
 mba'eta hi'arandua ma anhetē va'e meme, joo rami e'ŷ-e'ŷ oikuua uka teī.  
 Ha'e rami teī reikuua pota pova'e re:  
 Amongue henda py Nhanderuete neī ndoikuaa potai rejavya ha'e javi re.  
<sup>7</sup> — Ndee teve reikuua 'rā Nhanderuete mba'emo oikuua uka e'ŷ va'e?  
 Reikuua pota ta teve Ipo'akapa va'e re oī va'e ha'e javi re?  
<sup>8</sup> Mba'eta hi'arandua ma yvatea rupi peve oo.  
 Mba'e tu ndee rejapo kuaa ta?  
 Hi'arandua ma yvykua vaikue gui ipy pukuve va'e.  
 Mba'e tu ndee reikuua ta?  
<sup>9</sup> Ko yvy gui eteve voi ipukuve va'e,  
 ha'e ye'ẽ gui ipyve va'e.  
<sup>10</sup> Xapy'a rei ha'e oaxaa rupi amongue ombo'a vy  
 omboayvu aguā katy ogueraa ta ramo mava'e 'rā tu ojoko?  
<sup>11</sup> Mba'eta ha'e ma oikuua avakue ovare e'ŷ va'e ha'e javi,  
 oexa pota e'ŷ re oexa ma voi 'rā heko vaia.  
<sup>12</sup> Ha'e gui ava hi'arandu e'ŷ va'e onhemoingo kuaa 'rā teve hi'arandu va'e?  
 Mburika'i yvy'ã rupigua ra'y ava ojeapo kuaa ramo mae ha'e nunga ha'eve.  
<sup>13</sup> — Xapy'a rei nekuraxõ rerova vy  
 Nhanderuete pe ndepo reupi,  
<sup>14</sup> xapy'a rei ndepo py rejapo vaiague mombyry remombo,  
 ha'e ndero gui ha'eve'ŷa ramigua reipe'a vy,  
<sup>15</sup> ha'e rami vy mae nderova reupi 'rā ndeky'a e'ŷ reve,  
 ha'e reī atā 'rā mba'eve nemongyjeve e'ŷ re.  
<sup>16</sup> Ha'e rami vy nderexarai 'rā rejexavaiague re,  
 ha'e nungakue re nema'endu'a teī yy oxyry ovvy va'ekue re rami rive.  
<sup>17</sup> Reikoa ma kuaray mbyte jave hexakāa gui hexakāve 'rā.  
 Pytū oīa py teī ko'ěa rami 'rā ndevy.  
<sup>18</sup> Renhenhandu porā 'rā, mba'eta oī ju 'rā rearō reikovy aguā.  
 Ndeyvýry rupi rema'ě ma vy reke porā 'rā.  
<sup>19</sup> Renheno rejupy ramo avave rei nanemondyi 'rā.  
 Heta 'rā ou ndevy onhepytyvõ uka vy.  
<sup>20</sup> Ha'e rā heko vai va'e ma ndaexa pyxovei 'rā,  
 ha'e kuery onhemi aguā va'ekue ivaipa 'rā.  
 Ha'e kuery oarō okuapya ma ojeapo 'rā inhe'ě okanhy aguā rami rive – he'i.

## 12

### *Oirū kuery ijayvuague Jó ombovaiague*

- <sup>1</sup> Ha'e ramo Jó ombovai:  
<sup>2</sup> — Peē kuery anho ma nhi'ā avakue peiko,  
 ha'e pemano ramo ndoikovei 'rā hi'arandu va'e.  
<sup>3</sup> Ha'e rami avi xee voi peē rami xe'arandu va'e.  
 Xee ma pendegui xe'yvyīve va'e'ŷ.  
 Mava'e tu ndoikuaai 'rā ha'e ramigua?  
<sup>4</sup> Ha'e gui xee ma xeirū kuery xejojai rei va'e aiko,  
 Nhanderuete pe ajapukai rā xembovai teī.  
 Mba'eta heko porā ha'e ha'evea rami ikuai va'e ma oojai rei pyrā meme ae ikuai.  
<sup>5</sup> Iporiau e'ŷ va'e kuery oikuua rā iporiaukue'i ojou vaipy ikuai.  
 Ha'e rami vy ha'e kuery omoanha-anha 'rā ho'a rai'i va'e oityxe vy.

- 6** Porayvu e'ŷ va'e kuery ikuiaia py ovy'apa rei 'rã,  
 Nhanderuete re ijayvu rei va'e kuery ma iporiau e'ŷ va'e meme merami.  
 Ha'e kuery nguueterã rami oguereko opo mbaraetea rive.
- 7** – Ha'e rami teĩ eporandu na aŷ mymba ikuai va'e pe.  
 Ha'e rã ha'e kuery nembo'e 'rã ha'e nunga re.  
 Guyra oveve va'e pe reporandu rã ha'e kuery oikuaa uka 'rã ndevy.
- 8** Ha'e rami e'ŷ vy eporandu na yvy pe,  
 ha'e ramo nembo'e 'rã.  
 Pira ye'ẽ rupigua voi omombe'u porã 'rã ndevy.
- 9** Mava'e nda'u ha'e va'e kuery regua ndokuaai 'rã  
 SENHOR opo py ha'e nunga ojapopaague?
- 10** Mba'eta opo py oguereko guemimoingo kuery ha'e javi,  
 avakue ha'e javive nhe'ẽ guive.
- 11** Xeapyxa py nda'u naendu kuaa potai 'rã ayvu aendu va'e,  
 xejurú py tembi'u heea aendua rami avi?
- 12** Tyrã pa tujakue'i re anho teve oĩ 'arandua?  
 Oikove puku va'ekue re anho teve oĩ mba'emo oikuaa aguã?
- 13** – Any! Nhanderuete re ae oĩ 'arandua ha'e mbaraetea.  
 Hexe ma oĩ nhomongeta ha'e mba'emo oikuaapa aguã.
- 14** Mba'emo ha'e oity va'ekue ma nomopu'ãavei 'rã.  
 Nhuã py ha'e ombo'a va'ekue avave rei ndoipe'a kuaai 'rã.
- 15** Yy ha'e ojoko ramo opa mba'e ipirupa 'rã.  
 Ha'e rã yy ha'e ombou ramo ombovaipa 'rã yvy.
- 16** Hexe anho oĩ mbaraetea ha'e 'arandua.  
 Ombotavy pyre ha'e imbotavya ma ha'e oguereko va'e meme.
- 17** Oipe'a 'rã nhomongeta va'ety kuery nhomongetaague gui,  
 nhomboayvua kuery voi ojapo 'rã na'inhakã porãvei aguã rami.
- 18** Ombovaipa 'rã huvinxave kuery po'akaa,  
 ha'e omoxã uka 'rã heravy iku'a rupi.
- 19** Sacerdote kuery ma ha'e oipe'a 'rã sacerdote ikuaiague gui,  
 ha'e iporiau e'ŷ va'ekue ma oitypa vyvoi 'rã.
- 20** Ijayvu kuaa va'e kuery gui ha'e oipe'a 'rã ayvu,  
 ha'e tujakueve gui ma oipe'a 'rã hi'arandua.
- 21** Yvatekueve re omoĩ 'rã nomboeteavei aguã,  
 ha'e ojora 'rã imbaraete va'e kuery ku'akuaa.
- 22** Pytû reia gui oexa uka 'rã mba'emo ndokuuaai pyre,  
 pytû ana eteve voi ogueru 'rã omoexakã aguã katy.
- 23** Yvy regua kuery ha'e omboetave 'rã, ha'e gui omokanhymba ju 'rã.  
 Omoaĩmba 'rã, ha'e gui omboatypa ju 'rã.
- 24** Yvy regua yvatekueve gui oipe'a 'rã 'arandua,  
 ojapo 'rã tekao e'ŷ rupi oguata rei aguã rami, tape rupi e'ŷ.
- 25** Ha'e ramo pytû reia rupi ha'e kuery opovyyv 'rã oje'oivy hendy va'e ndoguerekoi vy,  
 ojapo 'rã oka'u va'e rami ho'a-o'a oje'oivy aguã rami.

## 13

### *Jó anhetê va'e rupi oikoa re ijayvuague*

- 1** – Ma'ẽ, ha'e nunga ha'e javi xerexa oexa ma,  
 xeapyxa voi oendu ramo xee aikuua ae ma.
- 2** Peẽ kuery peikuua rami ae avi xee voi aikuua.  
 Xee ma pendegui xe'yvyïve va'e'ŷ.

- <sup>3</sup> Ha'e rami avi Ipo'akapa va'e pe anho 'rã anhemombe'u,  
Nhanderuete renonde ae anhemboeko porã ukaxe.
- <sup>4</sup> Mba'eta peẽ ma anhetēgu 'rãgue py apu rive pemoi.  
Peẽ kuery ha'e javi ma poropoanoa mba'everã ovare e'ŷ va'e rami peiko.
- <sup>5</sup> Peẽ pekyririmba vyvoi va'e rire!  
Ha'e rami vy 'rãe pexa uka pene'arandua!
- <sup>6</sup> Aŷ ma pejapyxaka xerekko amombe'u rã,  
pendu pota xejuru py mba'emo re xeayvua re.
- <sup>7</sup> Penhombotavya rupi nda'u pendeayvu ta Nhanderuete pemboete ukaxe vy?  
Pemboete ukaxe vy ri nda'u pendeayvu ta apu rupi?
- <sup>8</sup> Ixupe vy ae nda'u peikuua potaa py peteĩ peavyuve ta joegui?  
Ha'e rami ri ty'y peipytyvõ ta Nhanderuete?
- <sup>9</sup> Peẽ kuery re ha'e oikuua pota va'e rire nda'u peo jepe 'rãgue?  
Ha'e rami e'ŷ vy pembotavy kuaa 'rã teve, amongue va'e rei pembotavya rami?
- <sup>10</sup> Joegui peteĩ peavyuve nhemi ramo  
pendevy pe ijayvu atã 'rã.
- <sup>11</sup> Napanemongyjei 'rã teve guexakãmbaa py?  
Pende'ary nomboui 'rã teve penemongygearã?
- <sup>12</sup> Pendeayvu jepiaty ma ayvu tanhimbu ramigua rive,  
penhemboytaa ma yapo guigua rive.
- <sup>13</sup> — Pekyrirĩ ranhe ke xerenonde, xee ju xeayvu aguã.  
Ha'e va'e rire xere toiko oiko va'e rei.
- <sup>14</sup> Xeayvu ta xeraĩ py xero'o areko reve,  
ha'e xerekove xepo py ajopy reve.\*
- <sup>15</sup> Mba'eta anhetē ri ha'e ma xejuka ta ramo ndarekovei arõ aguã.  
Ha'e rami teĩ ae ma xeayvu 'rã xerekovo re.
- <sup>16</sup> Ha'e rami aiko vy aikuua aa jepe aguã,  
mba'eta heko vai va'e ma ndojexa ukai 'rã henonde.
- <sup>17</sup> Pendu pota ke xeayvua re,  
pejapyxaka amombe'u va'e re.
- <sup>18</sup> Areko katu porãmba ma xerekko amombe'u aguã.  
Aikuua porã guive Nhanderuete xemboeko porã aguã.
- <sup>19</sup> Mava'e tu xereve ijayvu ete 'rã?  
Ha'e rami oiko ramo xee akyrirĩ 'rã, ha'e xenhe'ẽ amondouka 'rã.
- <sup>20</sup> Eme'ẽ xevy po rami mokoĩ ete'i ajerurea.  
Ha'e rami ri rã nanhemivei 'rã nderova gui.
- <sup>21</sup> Eipe'a ke ndepo xegui,  
ha'e xemondyive eme xemongyjea py.
- <sup>22</sup> Ha'e gui eporandu xevy, ha'e rã xee rombovai 'rã.  
Ha'e rami e'ŷ vy xee ranhe taxeayvu, ha'e gui ndee ju xembovai 'rã.
- <sup>23</sup> — Mbovy henda py tu xerekko vai ha'e ajejavu?  
Emombe'u porã ke xerekko vaia ha'e ajejavu.
- <sup>24</sup> Mba'e re tu nderova remo'ã  
nderovaigua rami xererekovo vy?
- <sup>25</sup> Remongyje ta teve yvyra rogue yvytu ogueroveve heravy va'e rive?  
Remonha ta teve jai rogue pirukue?
- <sup>26</sup> Mba'eta xerovai rembopara mba'emo ipoyi va'e,  
xekunumi reve ajejavuague reikuaa vy.
- <sup>27</sup> Ha'e rami vy xepy remboty yvyra pa'ũ py,

\* **13:14** Apy ma ndojeayvuveikue py Jó ijayvu.

reikuuaa pota aikoa ha'e javi re.  
 Xejoko imoiny aẽ e'ŷ aguã,  
<sup>28</sup> mba'emo ru'ûgue opa ovya va'e,  
 e'ŷ vy ajukue vixo'i ho'upa va'e rami aiko teĩ.

## 14

### *Nhanderekove oaxa pojava ovya re Jó ijayvuague*

- 1 – Kunhague gui itui'i va'ekue ma xapy'a'i 'rã ikuai,  
     ha'e kuery re oĩ ojexavai aguã anho.
- 2 Itui'i 'rã yvoty ixorĩ va'erã rami rive.  
     Kuaray'ã rami okanhy vy ndojekuaavei 'rã.
- 3 Ha'e ramigua avakue re ri ty'y reikuuaa pota ta,  
     ha'e nerenonde remboayvu ta?
- 4 Mava'e nda'u ha'eve'ŷa gui oguenoẽ kuaa ta mba'emo ha'eve va'e?  
     Avave rei.
- 5 Ha'e kuery ikuai aguã ára reipapa ma voi imoiny,  
     ndereve ae oĩ mbovy jaxy pa ikuai aguã.  
     Avakue rekove rejoko rire  
     ha'e va'e rovai ndoaxai 'rãe.
- 6 Ha'e kuery re ema'êve eme ikane'õgu'a'i aguã,  
     omba'eapo va'e rami o'ára opaa py ovya'i aguã.
- 7 – Mba'eta yvyra voi oguerek oarõ aguã,  
     mba'eta ojaya ma teĩ hoky jevy nho 'rã,  
     mbovy rei e'ŷ 'rã ikuai henhoĩ ju va'ekue.
- 8 Yvy re hapo inhyma ramo,  
     ha'e yvy py hi'y ipiru ramo
- 9 yy reakuã gui rive ju 'rã henhoĩ.  
     Ha'e rami vy hapo ju 'rã ovya ipyau va'e rami.
- 10 Ha'e rã avakue ma omano ma vy itui tema 'rã.  
     Avakue omano rire mamo tu opyta?
- 11 Yupá py yy oĩ va'ekue typa,  
     ha'e yakã typa vy ipiru va'e rami,
- 12 ha'e rami ae avi avakue onheno vy nopu'âvei ma 'rã.  
     Yva oime teria ja nomyïvei 'rã,  
     okeague gui nombovy jaevyi 'rãe.
- 13 Xenhono porãa ma ramo ndee xemo'ã 'rãgue,  
     xenhomí 'rãgue ndepoxyá ára oaxa peve!  
     Ha'e gui peteĩ ára rea'anga 'rãgue  
     xere nema'endu'a ju aguã!
- 14 Avakue omano ma rire nda'u ovya ju 'rã ri?  
     Ha'e rami rã xee amba'eapo poyi aikovya pukukue re arõ 'rã aikovy  
     xerekoviarã ovaẽ peve.
- 15 Ndee xerenoĩ 'rã, ha'e rã xee ma rombovai 'rã.  
     Rexaxe ju 'rã neremimoingo ndepo py rejapo va'ekue.
- 16 Ha'e rami vy reipapapa 'rã aguataa,  
     ha'e nanema'endu'avei 'rã ajejavvyague re.
- 17 Xerekovaivague re nderexarai 'rã voxá py omboyrú pyre re rami,  
     rejao'ipa 'rã atekoavyague.
- 18 Ha'e rami avi yvyty iku'ipa ha'e ivaipa 'rã ovya,  
     itaova voi ho'a 'rã oñague gui,

- 19 yy omomba 'rã ita,  
   ha'e tyguaxu vy ogueroxyry 'rã heravy yvy ku'i.  
   Ha'e rami ae avi ndee rembovaipa 'rã mba'emo avakue oarõ va'e.
- 20 Ha'e kuery re ndepo'aka riae ramo  
   ha'e kuery opa 'rã oje'oivy.  
   Ha'e kuery pe nderova amboae rami rexu uka reve  
   remondouka 'rã mombyry.
- 21 Ta'y kuery omboetea teĩ tuu kuery ndoikuaai 'rã.  
   Ha'e rami e'ŷ vy omo'yvyi'ia teĩ ae ma tuu kuery ndoikuaai 'rã.
- 22 Ha'e kuery ma guete re anho 'rã oendu haxy va'e,  
   ha'e guekovea re ae 'rã ojexavai – he'i.

## 15

### *Jó reko vaia re Elifaz ijayvuague*

- 1 Ha'e ramo Temã pygua Elifaz ombovai:  
 2 – Hi'arandu va'e nda'u ombovai 'rã vytytu rami rive?  
   Onhemonye 'rã ri ty'y kuaray oua katy gui vytytu ou va'e py?
- 3 Ayvu mba'everã ovare'ŷ va'e py nda'u ijayvu 'rã,  
   ayvu nhomoingo porã va'erã py 'rãgue py?
- 4 Mba'eta ndee ma Nhanderuete renonde ojererokyje va'e pe “Ovare va'e'ŷ” 're,  
   ha'e rejapoxe nomboeteavei aguã rami.
- 5 Mba'eta nderekö vaia rupi ae ndeayvu,  
   ha'e nhombotavy va'e kuery ayvu anho rejou porãve.
- 6 Ndejuru guigua ae 'rã nembopaga, xee e'ŷ.  
   Nerembe ae ijayvu nderovai.
- 7 – Ndee teve ava jypy'i itui va'ekue reiko?  
   Yvyty ikuai e'ŷ mbove ma voi teve reiko raka'e?
- 8 Ndee teve rendu raka'e Nhanderuete opy'a re mba'emo omoi'rã?  
   Ndere anho'i teve oĩ 'arandua?
- 9 Mba'e nunga tu ndee reikuua, ore kuery roikuua avi va'e'ŷ?  
   Mba'e nunga 'arandu tu ndere oĩ, ore kuery re oĩ va'e'ŷ?
- 10 Mba'eta oreregua ikuai avi tujakue'i hi'a xiimba va'e,  
   nderu gui voi tujakue'ive va'e.
- 11 Ndee teve nerembovareive ta Nhanderuete nembopy'a guaxu ukaa,  
   ha'e ayvu porã'i rupi ndevy oreayvua?
- 12 Mba'e re tu rejereraa uka nekuraxõ py oĩ va'e rupi rive?  
   Mba'e re tu rema'ẽ vaikue rei ri,
- 13 Nhanderuete rovai ndevaia rupi,  
   ha'e rami ete ndeayvu aguã?
- 14 Marã ramigua tu avakue, iky'a e'ŷ va'e ikuai aguã?  
   Marã ramigua tu kunha gui itui'i va'ekue, heko porã va'e oiko aguã?
- 15 Ma'ẽ, Nhanderuete ma ndojeroviai nei ojeupagua iky'a e'ŷ va'e kuery re.  
   Ha'e oexa rã nei yva re voi iky'a e'ŷ va'e noi.
- 16 Avakue katuve ma ojou vaipy ha'e ojeguarupy meme ikuai,  
   yy oy'u va'e rami mba'emo vai ojee omoi va'e!

### *Heko vai va'e kuery opagaa aguã re Elifaz ijayvuague*

- 17 – Ejapyxaka ke xeayvua re, ha'e rã rombo'e 'rã.  
   Mba'emo aexa va'ekue amombe'u 'rã ndevy,
- 18 hi'arandu va'e kuery omombe'u va'ekue ae,  
   nguu kuery gui oendu vy ndoikuaa uka e'ŷi va'ekue.

- <sup>19</sup> (Ha'e va'e kuery pe ae yvy ome'ëa raka'e,  
peteïve henda rupi amboae regua kuery nda'ikuai.)
- <sup>20</sup> Ha'e rã heko vai va'e kuery ma ko'ë nhavõ 'rã ojexavai,  
ikuiaia ma'etÿ ijapu'a'i 'rã, nhomoingo axya kuery pegua ae.
- <sup>21</sup> Ha'e kuery apyxa py onhendu 'rã imongygearã.  
Mba'emo oguerekopa rei teñ ha'e kuery re ou 'rã imbovaipaarã.
- <sup>22</sup> Ha'e kuery ndogueroviai pytû vaikuea gui ojevy ju aguã,  
ha'e rami 'rãgue py oarõ kyxe imombaarã rive.
- <sup>23</sup> Ho'u va'erã oeka oje'oivy vy "Mamo tu oï?" he'i 'rã okuapy.  
Oikuaa porã avi pytû aguã ára hexe ou ta maa.
- <sup>24</sup> Jexavaia ha'e moingo axya ma omongyjepa rei 'rã.  
Ha'e kuery re ha'e nunga ipo'aka 'rãe, huvixave joe opu'ã aguã oiko katu porã  
va'ekue rami,
- <sup>25</sup> Nhanderuete rovai opo oupi rire,  
Ipo'akapa va'e ombojaru rei vy.
- <sup>26</sup> Ha'e rami vy hexe opu'ã okuapy onhea'ã rei reve,  
hu'y jokoa inhana va'e re rive ojerovia va'e rami.
- <sup>27</sup> Hova re ikyra anho oï,  
ijyke kyrapa avi
- <sup>28</sup> teñ tetã ivaipa va'ekue py hekoia,  
oo oï aguã nda'eveia py,  
ombovaipa pyrã py rive ikuai.
- <sup>29</sup> Ha'e nunga rupi ha'e kuery ndojou retai 'rã mba'emo,  
mba'emo ojapo va'e noï arei 'rã guive,  
imba'e rei-rei voi ndaetai 'rã yvy re.
- <sup>30</sup> Ha'e kuery ndoo jepei 'rã pytû vaikue gui.  
Tata rendy vuku-vuku overepa 'rã hoky.  
Ha'e gui Nhanderuete ojuru gui oipejua rive 'rã ogueraa.
- <sup>31</sup> Ha'e nunga rupi ovare e'ÿ va'e re ejerovia eme, ndee ae rejekore vy,  
mba'eta ovare e'ÿ va'e rive 'rã oï ndevy guarã.
- <sup>32</sup> Ha'e nunga omomba 'rã hi'ára ovaë e'ÿ mbove,  
ha'e ramo hakã nda'ipyauvei ma 'rã.
- <sup>33</sup> Ha'e kuery ikuai 'rã uva aky'i oitypa pyre rami,  
ha'e oliveira ipoty ho'apa va'ekue rami rive.
- <sup>34</sup> Mba'eta heko vai va'e kuery heta ikuai teñ ndata'yi 'rã,  
ha'e tata oapypa 'rã nhomba'e rei-rei pe'aare kuery ro.
- <sup>35</sup> Ha'e kuery ma mba'emo vai anho oguerekoi rire oikuavã'i 'rã teko vai,  
nhombotavy aguã rive opy'a re omoï rire – he'i.

## 16

### *Nhanderuete openaa re Jó ijayvuague*

- <sup>1</sup> Ha'e ramo Jó ombovai:  
<sup>2</sup> – Aendu riae ma ha'e ramigua.  
Peë ha'e javive ma xembopy'a porã 'rãgue py xemoangeko rei.
- <sup>3</sup> Ndopai 'rã teve yvytu rami pendeayvua?  
Mba'e tu pendu ra'e ha'e rami ete xembovai aguã?
- <sup>4</sup> Xee voi xeayvu kuaa peë pendeayvua rami.  
Xee aiko axya rami peë peiko axy va'e rire  
xee voi xeayvu reta kuaa 'rãgue peë kuery pe,  
penderovai xeakã ambovava reve.

- <sup>5</sup> Xee romombaraete kuaa avi 'rāgue xeayvua py,  
xejuru py romboaxy aexa uka va'e py aipe'a aguā haxy pendu va'e!
- <sup>6</sup> — Xeayvu ainy teī haxy aendu va'e ndoaxai 'rā.  
Ha'e rami e'ŷ vy akyrirī teī mba'e nunga py 'rā tu anhenhandu porā?
- <sup>7</sup> Anhetē opa ma xembaraetea areko va'ekue.  
Ndee Xeruete remomba ma xero pygua kuery ha'e javi.
- <sup>8</sup> Ha'e nunga aexa uka xexorīmbaa py,  
xeangaia voi xerovai opu'ā vy xembojexavai riae.
- <sup>9</sup> Ndepoxya py xemboa'ypa, xere nandea'eiv.  
Xerovai neraī jekyty ha'e rema'ě ratā xerovaigua rami.
- <sup>10</sup> Avakue voi xerovai oipe'a okuapy ojuru.  
Ha'e rami vy xere ija'e e'ŷa rupi xepetepa,  
xerovai ha'e javive ijaty okuapy.
- <sup>11</sup> Ojerovia e'ŷ va'e po py Nhanderuete xemboaxa,  
heko vai va'e kuery po py ha'a aguā rami xeapo.
- <sup>12</sup> Xee aiko porā rei va'ekue ri ha'e xemopēmba.  
Xeaju'y re ojopy vy xemboa'ypa.  
Xemoī guembiporu hu'y oa'anga aguā.
- <sup>13</sup> Xejoko ngu'y py,  
oipyxo xepyky raxī re xemboaxy e'ŷ re,  
ha'e ramo xepy'a upia onheē yvy re.
- <sup>14</sup> Xemboguaiague rupi ae ju xemboguai,  
ha'e vy xere ou joe opu'ā va'e ramigua.
- <sup>15</sup> Xejee amoī ae ajukue voxā guigua,  
ha'e yvy ku'i py aity anhemboyvate reia rupi aikoague.
- <sup>16</sup> Ajae'o rā xerova ma pytāmba rei,  
ha'e xerexa pepi ma manoa guigua omo'āmba,
- <sup>17</sup> xepo re ajojukaague noī,  
ha'e xeky'a e'ŷa rupi anhembo'e teī.
- <sup>18</sup> — Ndee yvy, ejao'i eme xeruguy,  
toī eme guive ajapukaia onhendu e'ŷa!
- <sup>19</sup> Ma'ē, aŷ ma voi xerekomo be'u porāvearā oī yva re,  
yvate ma oī xere ojerure va'erā.
- <sup>20</sup> Xeirū kuery xejojai rei okuapy ramo  
Nhanderuete renonde xerexay reve tema aī,
- <sup>21</sup> arō vy Nhanderuete pe ha'e va'e ojerure aguā avakue re,  
oirū pe avakue ra'y kuery joe ojerurea rami avi.
- <sup>22</sup> Mba'eta ma'etŷa oī reta ve'ŷa py  
aa 'rā peteī tape rupi ndajevyvei aguā.

## 17

### Jó mba'eve noarōveia re ijayvuague

- <sup>1</sup> — Xenhe'ē opa ovvma,  
xe'āra voi opa avi ovv,  
ha'e xerenonde oī va'e ma xenhono porāa aguā anho.
- <sup>2</sup> Anhetē porojojai rei va'e kuery xembojere rei okuapy,  
xerexa py xemoangeko reia kuery anho rei aexa.
- <sup>3</sup> Ha'e gui eme'ē xevy mba'emo aikuaa aguā ndee xemboeko porā 'rāa.  
Enhemoī ndee ae ha'e nunga kuaa ukaarā.  
Mba'eta ndee e'ŷ vy mava'e 'rā tu ikuaa ukaarā oī?

- <sup>4</sup> Mba'e ha'e kuery kuraxõ remboty ma hi'arandua oĩ e'ŷ aguã.  
Ha'e rami vy neremboyvatevei ma.
- <sup>5</sup> Amongue oirũ kuery imombaarã pe omboaxa ramo  
ta'y kuery voi ndaexa pyxovei 'rã.
- <sup>6</sup> – Ha'e rã xee ma xemoña heta va'e kuery xejojai rei okuapy aguã.  
Xemoingoa xerova re onyvõmbaa rei aguã.
- <sup>7</sup> Ha'e nunga rupi ae ndaxerexa pyxovei ma xeporiau rã,  
ha'e xerete regua ha'e javi kuaray'ã rami ndojekuaa porãvei.
- <sup>8</sup> Heko porã va'e kuery xerexa vy onhemondyipa rei okuapy.  
Ha'e rami vy ojejavvy e'ŷ va'e kuery opu'ã 'rã heko vai va'e rovai.
- <sup>9</sup> Ha'e rami tei heko porã va'e kuery oo tema 'rã guape rupi ae,  
ipo ky'a e'ŷ va'e kuery imbaraeteve 'rã oje'oivy.
- <sup>10</sup> Ha'e gui peẽ kuery ha'e javi pejevy, peju ju kyvõ katy.  
Ha'e rami avi peẽ kuery regua peteive ma ndajoui 'rã hi'arandu va'e.
- <sup>11</sup> Xe'ára oaxa ma ovyy,  
anhembopy'aague voi oaxa rivepa ma,  
xepy'a re aipotaa amoĩ va'ekue ha'e javi.
- <sup>12</sup> Xevy pe pytû peikuaa uka ára oña rami rive.  
Ha'e vy aipo peje: "Pytû teri tei hendy va'e ovaẽ rai'i ma", peje rive.
- <sup>13</sup> Ha'e rã xee ma xenhono porãa aguã py arõ xerorã,  
pytúa py ae xeruparã itui.
- <sup>14</sup> Xenhono porãarã pe ajapukai vy "Ndee ma xeru", ha'e.  
Taxo ikuai va'e pe voi "Peẽ ma ha'i ha'e xereindy kuery", ha'e.
- <sup>15</sup> Ha'e gui mba'e tu oĩ arõ aikovy aguã?  
Tá, xee arõ va'e mava'e 'rã tu oikuaa?
- <sup>16</sup> Ha'e nunga oguejy 'rã manoa rokẽ peve  
xereve yvy ku'i py apytu'u ma jave – he'i.

## 18

### *Heko vai va'e kuery opa aguã re Bildade ijayvuague*

- <sup>1</sup> Ha'e ramo Sua pygua Bildade ju ombovai:
- <sup>2</sup> – Raka'e peve 'rã tu ndeayvu aguã re renhea'ã?  
Eikuua pota porã ranhe, ha'e gui ma jajogueroayvu 'rã.
- <sup>3</sup> Mba'e re tu mymba rami ri ndee orekuaa,  
ha'e hi'arandu e'ŷ va'e roikoa rami reikuaa?
- <sup>4</sup> Ai! Ndee ndepoxya py ae renhemboa'ypa va'e,  
ndere vy ri nda'u roejapa ta yvy?  
Ha'e itaova ikuai va'e nda'u ova 'rã oĩague gui?
- <sup>5</sup> – Anhetẽ, heko vai va'e kuery rataendy ogue 'rã,  
neī hata raviju ma voi ndojekuaavei 'rã.
- <sup>6</sup> Ha'e kuery ro rupi hendy va'e oĩ va'ekue pytûmba 'rã,  
yvate tataendy oupi imoiny va'ekue ogue 'rã.
- <sup>7</sup> Oguata porã oje'oivyague gui ipyxxyry 'rã ovyy,  
ha'e gui onhembopy'aague py ae oitya 'rã.
- <sup>8</sup> Mba'eta ha'e kuery py ae ombo'a 'rã,  
nhuã juru áry rupi ae oo rire.
- <sup>9</sup> Mba'emo mbo'aa ojopy 'rã ipyta rupi,  
ha'e nhuã ojopy 'rã.
- <sup>10</sup> Ha'e kuery ndoexai 'rã ixã yvy rupi itui va'e,  
neī imbo'aarã tape py oĩ va'e.

- 11 Jova-jovai katy gui imongyjearã ou vy omondyi 'rã,  
omonha 'rã heravy oikoa nhavõ rupi.
- 12 Ha'e kuery áry ou 'rã imoingo axyarã omomba aguã,  
ha'e iporiau aguã oarõ 'rã ijvvýry.
- 13 Ha'e nunga ombovaipa 'rã hete regua ha'e javi.  
Manoa regua jypygua omomba 'rã.
- 14 Heko vai va'e kuery oipe'aa 'rã ngoo py ojerovia oinyague gui,  
ha'e vy ogueraa 'rã imongyjea tuvixave va'ea py.
- 15 Hoo pygua kuery peteïve ma noïvei 'rã hogue py,  
ha'e oïague rupi omoña 'rã enxofre.
- 16 Iguy rupi hapo ipirupa 'rã,  
ha'e rã hakã ma hi'áry rupi 'rã ipirupa.
- 17 Ha'e kuery re na'ima'endu'aavei 'rã yvy re,  
ha'e tetã mbyte gui nonhenduvei 'rã hery.
- 18 Hendya gui ha'e kuery omomboa 'rã pytãa py,  
oipe'apaa 'rã yvy gui.
- 19 Ndata'yi neñ namyminoi 'rã guetarã kuery mbyte,  
ha'e hoo pygua kuery peteïve ma ndoikovevei 'rã hogue py.
- 20 Okanhyague ára gui kuaray oikea katyguia kuery onhemondyipa 'rã,  
ko'ëa katyguia kuery voi okyjepa 'rã okuapy.
- 21 Anhetë ha'e rami ae heko vai va'e kuery reko,  
ha'e rami ae opa 'rã Nhanderuete oikuua e'ÿ va'e kuery – he'i.

## 19

### *Jó ojexavai teñ hepyarã oikoa rami ijayvuague*

- 1 Ha'e ramo Jó ombovai:
- 2 — Raka'e peve 'rã tu pemoingo axy xenhe'ë,  
ha'e ayvu py xemou'ümba rive?
- 3 Dez-kue ma pendeayvu rei xere,  
xembojexavai aguã napexí vy.
- 4 Xapy'a rei anhetë xee ajejavy va'e rire  
xere anho 'rãgue oï ajejavyague re apaga aguã.
- 5 Xapy'a rei xerovai penhemboyvatexe,  
ha'e xemo'yvyï'ague re pendeayvu reixe vy,
- 6 peikuua porã pota aÿ povae re:  
Nhanderuete ae xemoingo axy va'ekue okya py xejoko vy.\*
- 7 Ajapukai: "Xemomba ta!" ha'e teñ noenduai.  
"Xepytyvõ ke!" ha'e teñ ndoikoi xemboeko porãarã.
- 8 Xerape ha'e ojoko rã nda'evei aave aguã.  
Xee aa aguã rupi ha'e omoñ pytãa.
- 9 Omboetepy aikoague gui xepe'a vy  
xeakã gui omboi xembojeguaarã oï va'ekue.
- 10 Jova-jovaive gui xereity rire aa ma ainy.  
Xegui oipe'a arõ va'ekue yvyra hi'aïague gui oapo'o va'e rami.
- 11 Xerovai hendy ipoxya,  
ngovaigua rami xererekro ramo.
- 12 Ixondaroo kuery ou okuapy xere.  
Xerupity aguã ha'e kuery ogueroko katu guaperã,

\* **19:6** Jó ma "Nhanderuete xemoingo axy" he'i va'eri oayvu ha'e oguerovy'a (2.3-6).

- ha'e vy xero yvýry rupi xejoko okuapy.
- <sup>13</sup> Xegui ha'e oipe'a xeryvy kuery mombyry.  
Xekuaa va'e kuery voi ojepe'apa xegui, xerexa va'ety e'ŷ rami rive.
- <sup>14</sup> Xeretarā kuery xerejapa oje'oivy,  
ha'e xekuaa va'e kuery hexaraipa ma xegui.
- <sup>15</sup> Xero py amovaē va'ekue ha'e xerembiguai kuery ma amboae yvy regua rami xekuaa,  
ha'e kuery pe rā yvy mboae regua aiko.
- <sup>16</sup> Amongakuaa va'ekue ma aenoĩ teĩ naxembovaivei,  
mba'emo re xee ae ajerure porā'i teĩ.
- <sup>17</sup> Xera'yxy ma noetūxevei ma xepytuēa,  
ha'e xeryvy kuery pe ojeguarupy aiko xereakuā vaikue va'e vy.
- <sup>18</sup> Kyrīgue voi naxemovaẽxevei,  
xee apu'āxe rā xejojai rei okuapy.
- <sup>19</sup> Xerayvu ete va'ekue xembojeguarupa okuapy,  
ha'e xee ayvu va'ekue voi xerovaigua onhemoingo.
- <sup>20</sup> Xepire ojapa ma xekāgue ha'e xero'o re,  
ha'e haxy'i py aa jepe nho.
- <sup>21</sup> Xemboaxy ke, xerembiayvu kuery.  
Xemboaxy, mba'eta Nhanderuete po xerupity.
- <sup>22</sup> Mba'e re tu xemonha rei pekuapy Nhanderuete xemonhaa rami?  
Mba'e re tu ndapepytu'ui ri xero'o pemombaa gui?
- <sup>23</sup> Xeayvua omboparaa va'e rire!  
Kuaxia re ipara oiny va'e rire!
- <sup>24</sup> Ferro rakua ha'e chumbo reve  
ita re ipara va'e rire raka'e rā peve guarā!
- <sup>25</sup> – Mba'eta xee aikuua xerepyarā oikoa,  
ha'e opaa py opu'ā 'rā kova'e yvy re.
- <sup>26</sup> Ha'e va'e rire kova'e xepire ivaipa ma teĩ  
xero'o reve ae 'rā aexa Nhanderuete.
- <sup>27</sup> Aexa 'rā xee ae, xerexa py ae aexa 'rā, amboae nda'ei.  
Aexaxe ete rā  
kekuraxō na'imbaraetevei ma xeryepy py.
- <sup>28</sup> Xapy'a rei aipopeje 'rā: "Marā rami 'rā tu romoingo axy?  
Ndekáuxa ae upe va'e mba'emo vai oiko", peje teĩ
- <sup>29</sup> pejererokyje ikyxe gui,  
mba'eta xere pendeayvua re ou 'rā ipoxya,  
pendere oikuua pota va'erā oikoa peikuaa aguā – he'i.

## 20

*Heko vai va'e kuery ojexavai aguā re Zofar ijayvuague*

- <sup>1</sup> Ha'e ramo Naamá pygua Zofar ju ombovai:
- <sup>2</sup> – Aikuua va'e re xeayvuxe vy  
ajapura rombovai aguā.
- <sup>3</sup> Xee aendu ndeayvu etea xemoxīmba va'e,  
xenhe'ẽ py aendu aikuua va'e rupi rombovaixea.
- <sup>4</sup> Ndee ndereikuai teve ha'e javi oiko ypy guive,  
yvy re avakue omoingo ypya guive
- <sup>5</sup> heko vai va'e kuery xapy'a'i rive ov'y'a okuapya,  
ojerovia e'ŷ va'e kuery ov'y'a xapy'a'i 'rāa?
- <sup>6</sup> Ha'e kuery ojejou porāa yva re peve oo,

- ha'e arai re peve oakā oupi teĩ ae ma
- <sup>7</sup> hu'ũmba 'rā raka'e rā peve guarā, hepoxi rami rive.  
Ha'e rā oexa va'ety kuery "Mamo tu ikuai?" he'i 'rā okuapy.
- <sup>8</sup> Ha'e kuery ma oexa ra'u pyre rami okanhymba 'rā,  
ha'e rā ndojouavei 'rā.  
Omonhaa 'rā imondovy pyávy mba'emo oexa pyre rami.
- <sup>9</sup> Hexaare kuery ndoexavei ma 'rā,  
ikuaiague py ae teĩ ha'e kuery re na'ima'endu'aavei ma 'rā.
- <sup>10</sup> Ta'y kuery ju onhea'ã 'rā iporiaukue'i oguerorya rupi,  
ha'e vy opo py ae ome'ẽmba ju 'rā imba'e rei-rei oipe'aa va'ekue.
- <sup>11</sup> Ikāgue kunumi jave rami imbaraete teĩ,  
imbaraete reve 'rā itui yvy ku'i rupi.
- <sup>12</sup> — Ha'e kuery pe rā ijuru py mba'emo vai he'ẽ 'rā,  
ha'e vy oapekū guy py oguerekō.
- <sup>13</sup> He'ẽ ramo nomokõxei vy  
oguerekō ranhe 'rā ojuru py.
- <sup>14</sup> Ha'e rami teĩ hyepy py ma amboae rami 'rā ojeapo.  
Mboi guigua rami 'rā iro vaikue ojeapo hyepy py.
- <sup>15</sup> Mba'emo oguerekopa va'e omokõ va'ekue ombojevypa ju 'rā.  
Nhanderuete ae 'rā ojapo guyepy gui ombojevypa aguã rami.
- <sup>16</sup> Mboi guigua veneno oy'u rire  
inshapekū ae ju ojuka 'rā.
- <sup>17</sup> Ha'e kuery ndoguerovy'ai 'rā yakā'i oexa vy,  
neĩ ei ha'e kamby yakā rami oxyry va'e.
- <sup>18</sup> Mba'eta ombo'eapoague repy ojou va'ekue omokanhymba ju 'rā  
mba'eve ho'u e'ŷ re.  
Ojeupe guarā ojopy va'ekue regua peteĩve henda py ndojoui 'rā ombovy'aarā,
- <sup>19</sup> ha'e kuery iporiaukue'i omoingo axy ha'e noipytyvõi rire,  
ha'e oo ojapo va'ekue'ŷ gui mba'emo oipe'apa rire.
- <sup>20</sup> — Oipotapa reia gui ndojepo'eai rire  
nda'evei 'rā mba'emo oipota va'ekue ogueraa jepe aguã.
- <sup>21</sup> Oipotapa reia gui ndopytu'ui rire  
imba'e rei-rei noĩ arei 'rā.
- <sup>22</sup> Ojoupa ete maa py ae 'rā ojexavai.  
Ha'e kuery re ou 'rā opa marāguia imomboriauarā.
- <sup>23</sup> Ha'e kuery rye monyēarā Nhanderuete ombou 'rā opoxy etea.  
Temb'i'u 'rāgue py ha'e nunga anho ombou 'rā oky rami ha'e kuery áry.
- <sup>24</sup> Tembiporu ferro guigua gui ha'e kuery ojava teĩ  
guyrapa overa va'e guigua py 'rā onhyvõa.
- <sup>25</sup> Ha'e ramo okupe gui hu'y oekyi rā  
overa rei 'rā huguy re.  
Ha'e ramo oendu 'rā onhemondyia.
- <sup>26</sup> Ha'e kuery peguarā omoĩa 'rā opa marā ojexavai aguã.  
Tata omomba 'rā avave rei oipeju e'ŷ teĩ,  
hoo py opyta va'ekue'-ekue omomba peve.
- <sup>27</sup> Yva gui oikuua ukaa 'rā heko vaia.  
Ha'e rā yvy gui ma opu'ã 'rā hovai guarā.
- <sup>28</sup> Ngoo py oguerekopa va'ekue oipe'apaa 'rā  
Nhanderuete poxya ára py, yy onhoëa va'e rami.
- <sup>29</sup> Ha'e ramigua ae 'rā avakue heko vai va'e ojopy Nhanderuete po gui.

Ha'e nunga anho ha'e kuery peguarã oĩ Nhanderuete ijayvuague rami vy – he'i.

## 21

### *Heko vai va'e kuery ov'y'aa re Jó ijayvuague*

- 1 Ha'e ramo Jó ombovai:
- 2 – Pendu porã pota ke xeayvua.  
Ha'e ramia py peẽ xembopy'a porã 'rã.
- 3 Xereroangekove eme, ha'e rã xee ju xeayvu 'rã.  
Ha'e gui xeayvupa ma ramo mae ha'eve 'rã xejojaive aguã.
- 4 Avakue re rive teve xee xeayvu ndavy'aia rupi?  
Mba'e re'ý teve arõ are aguã nda'evei?
- 5 Pema'ẽ xere, ha'e vy pekyrirí 'rã.  
Ha'e rami vy pejoko 'rã pendejuru pendepo py.
- 6 MBA'eta ha'e nunga re xema'endu'a vy rive ndaxerekorãvei,  
ha'e xero'o ha'e javi re aendu xepirimbæa.
- 7 – Ha'e gui mba'exa tu heko vai va'e kuery okuave are?  
Mba'eta ha'e kuery tuja'i teñ ipo'akapave tema 'rã.
- 8 Henonde ma ta'y kuery ikuai porã 'rã.  
Guamymino kuery voi oexa avi 'rã.
- 9 Ha'e kuery ro rupi oĩ mby'a porã,  
ha'e Nhanderuete nombopagai 'rã yvyra po'i py.
- 10 Hymba toro ma ta'y'i 'rã ma'etý nhavõ,  
hymba vaka ta'y vy ndoityi 'rã.
- 11 Hoo pygua kyrigue'i ma onha-onha 'rã okuapy vexa'i rami,  
ta'y kue'iry voi opo-opo 'rã ov'y'a vy.
- 12 Oporaei 'rã okuapy pandeiro ha'e ixã reta va'e reve,  
mimby pu guive oendu vy oguerovy'a vaipa 'rã.
- 13 Ára nhavõ ha'e kuery oaxa 'rã oguerekopaa py,  
mby'a porã reve oguejy peve yvyra rupa py.
- 14 Ha'e kuery ae 'rã aipoe'i Nhanderuete pe: "Ejepe'a ke oregui!  
Ndoroikuaaxe i deguigua tape.
- 15 MBA'eta mava'e tu Ipo'akapa va'e, ixupe jaiko aguã?  
Mba'e tu jajopy 'rã ixupe nhanhembo'eague re?" he'i 'rã okuapy.
- 16 Ha'e rami teñ ma'ẽ, ha'e kuery oguerekopa aguã ma ipo gui ae e'ý ou.  
Xevy pe nda'evei ae heko vai va'e kuery onhemongetaa rami aiko aguã!
- 17 – Mbovykue tu heko vai va'e kuery rataendy omboguea?  
Mbovykue tu ha'e kuery áry omboua 'rã imombaarã?  
Mbovykue tu Nhanderuete opoxya rupi ombou 'rã ha'e kuery ikuai axy aguã?
- 18 Mbovykue tu ha'e kuery omoxëa 'rã jai pirekue yvytu ogueroveve heravy va'e rami,  
e'ý vy mba'emo pirekue yvytu jere ogueraa va'e rami?
- 19 Ha'e rã peẽ kuery aipopeje: "Nhanderuete ma oarõ 'rã heko vai va'e ra'y kuery  
ombopaga aguã", peje 'rã.  
Ha'e rami teñ ha'e kuery ae Nhanderuete ombopaga va'e rire, ha'e kuery ae oendu  
aguã haxya.
- 20 Ha'e kuery ae toexa imombaarã ou rã,  
ha'e kuery ae toy'u Ipo'akapa va'e poxya gui.
- 21 MBA'eta ha'e kuery omano ma rire, hekove oipe'aa ma ramo,  
mba'exa tu ha'e kuery oendu 'rã ngoo pyguare kuery reko gui?
- 22 Amongue nda'u omo'arandu kuaa 'rã Nhanderuete?  
Mba'eta ha'e ma yva re ikuai va'e re voi oikuua pota va'e.

- 23 Amongue ma imbaraete reve 'rā omano,  
heko eta rei e'ŷ, mba'eve rei oendu e'ŷ re guive,
- 24 imba'e yryru kamby tynyē reve,  
ha'e ikāgue ratā e'ŷa hexaimbā rei reve.
- 25 Ha'e rā amboae kuery ma ikuerai rei reve 'rā omano,  
mba'emo porā ndojoui rire.
- 26 Ha'e rami teī mokoīve regua joapy 'rā ikuai yvy ku'i py,  
taxo ojao'ipa aguā py.
- 27 — Ma'ẽ, xee aikuaa ae ma pejapoxea,  
mba'eta ha'eve'ŷa rami penhembopy'a xembojexavaive aguā re.
- 28 Mba'eta aipopeje: "Mamo tu opyta yvateve va'e  
teko vai rupi oiko va'e rogue?" peje 'rā.
- 29 Ha'e rami teī peporandu na oguataa rupi ikuai va'e pe.  
Napendu potai teve mba'emo ha'e kuery omombe'u rā?
- 30 Mba'eta aipoe'i 'rā: "Jexavaia ára py heko vai va'e kuery omboaxya 'rā,  
ogueraa jepea 'rā poxya ára gui", he'i 'rā.
- 31 Mava'e tu omboayvu 'rā ha'e kuery ikuia re?  
Mava'e tu ombopaga 'rā ojapo vaiague re?
- 32 Mba'eta opaa py ha'e kuery retekue ogueraa 'rā onhono porāa aguā katy,  
ha'e onhono porāague re openaa 'rā.
- 33 Ha'e kuery rupa áry yvy itui va'e nda'ipoyi 'rā,  
ha'e avakue ha'e javi oje'oi 'rā hetekue rakykue,  
henonde oje'oi va'e voi mbovy rei e'ŷa rami avi.
- 34 Ha'e nunga rupi mba'e re tu xembopy'a porāa rupi merami teī pendeayvu rive?  
Pembovaia ha'e javi re ma apu anho oĩ — he'i.

## 22

### *Jó ojejavy etea rami Elifaz ijayvuague*

- 1 Ha'e ramo Temā pygua Elifaz ju ombovai:
- 2 — Ha'e gui avakue nda'u mba'emo ovare 'rā ri Nhanderuete pe?  
Any, oikuaapa va'e teī ojeupe ae ovare va'e.
- 3 Tyrā pa ndereko porāa teve ombovy'a 'rā Ipo'akapa va'e?  
Xapy'a rei ndee rejajavy e'ŷ re reiko rā ha'e ojou porā 'rā teve?
- 4 Nhanderuete renonde rejererokyjea re teve nembopaga,  
nderovai oikuaa potaa py?
- 5 Ndereko vaia ndatuvixai teve?  
Rejejavya ma opa va'erā e'ŷ teve?
- 6 Mba'eta mba'e re'ŷ reipe'a mba'emo nderyvy gui,  
ha'e iporiaukue'i gui voi reipe'a ija.
- 7 Ikane'õ va'e pe ma yy nereme'ẽi oy'u aguā,  
okaruxe va'e pe voi nerakātē'ŷ tembi'u re.
- 8 Ipo'akakueve pe rive yvy itui,  
avakue yvatekueve anho 'rā ikuai ha'e py.
- 9 Ha'e rā imeve'ŷ va'e kuery ma ipo rei reve rembojevy,  
ha'e tyre'ŷ kuery mbaraetea remomba.
- 10 Ha'e nunga rupi ae nhuā ndejokopa,  
ha'e rekyjea rendu xapy'a vy renhemondyipa rei,
- 11 pytūa guive, mba'eve rexa e'ŷ teī.  
Ha'e ramo ae yy tyguaxu va'e ndeao'i 'rā.
- 12 — Yva re yvatevea py e'ŷ teve Nhanderuete oĩ?

- Ema'ẽ ha'vy jaxy-tata yva re ikuai va'e re.  
 Ha'e va'e ma nda'yvate ma ra'agai!
- <sup>13</sup> Ha'e rami teĩ aipo're: "Mba'e tu Nhanderuete oikuaa?  
 Ha'e nda'u oikuaa pota 'rã mba'emo re,  
 oexa 'rã teve pytū ana rupi?
- <sup>14</sup> Mba'eta yva apy rupi ha'e oguata oikovya rupi  
 arai ana ojao'i 'rã  
 mba'emo oexa aguã rami e'ŷ", 're.
- <sup>15</sup> Ha'e gui ndee nda'u reikoxe teri tape ymague rupi,  
 heko vai va'e kuery ikuaiaty rupi?
- <sup>16</sup> Ha'e va'e kuery ma oipe'apaa vyvoi raka'e hi'ára ovaẽ e'ŷ mbove.  
 Ha'e kuery ytarã oĩ va'ekue ma yxyry atã va'e ogueraapa.
- <sup>17</sup> Mba'eta Nhanderuete pe aipoe'i: "Ejepe'a ke orea gui!  
 Mba'e tu Ipo'akapa va'e ojapo 'rã orere?" he'i rire.
- <sup>18</sup> Ha'e rami teĩ ha'e kuery ro ha'e omonyẽ mba'emo porã anho.  
 Ha'e rã xevy pe nda'evei ae heko vai va'e kuery onhemongetaa rami aiko aguã.
- <sup>19</sup> Ha'e kuery opa rã heko porã va'e kuery oexa vy ov'y'a 'rã.  
 Ha'e kuery re ojejavy e'ŷ va'e opuka 'rã.
- <sup>20</sup> Ha'e vy aipoe'i 'rã: "Anhetẽ, nhanderovaigua kuery omombaa ra'e,  
 ha'e rã mba'emo oeja va'ekue ma tata ju omomba", he'i 'rã okuapy.
- <sup>21</sup> — Ha'e nunga rupi peteĩ rami ju pota ke eiko Nhanderuete reve,  
 revy'a nho aguã.  
 Ha'e ramo ndere ou 'rã iporã va'e.
- <sup>22</sup> Ajerure ndevy, ejapyxaka porã pota ke nembo'e rã,  
 ha'e ndepy'a re emoi ijayvua.
- <sup>23</sup> Mba'eta Ipo'akapa va'e pe rejeko rerova uka ramo reiko porã ju 'rã.  
 Xapy'a rei ndero gui mba'emo vai reipe'a ramo,
- <sup>24</sup> ha'e ouro rerekva'e yvy ku'i py remombo ramo,  
 ouro Ofir guigua rerekva'e yakã'i rupi ita ikuai va'e mbyte rupi remombo ri ramo,
- <sup>25</sup> ha'e ramo Ipo'akapa va'e ae 'rã ndevygua oiko  
 ouro ha'e prata oiporavo pyre rami.
- <sup>26</sup> Mba'eta rerovy'a 'rã Ipo'akapa va'e anho,  
 ha'e nderova rembovy 'rã Nhanderuete-a katy.
- <sup>27</sup> Ixupe rejapukai ramo oendu 'rã,  
 ha'e ixupe ju rejapo 'rã renhemboayvuague.
- <sup>28</sup> Mba'emo rejapo aguã re renhembopy'a ramo oiko porã 'rã,  
 ha'e tape reikoa rupi omoexakãmba 'rã.
- <sup>29</sup> Nhomo'yvy'iia rã rexava vy "Emopu'ã ju ke" 're ramo  
 Nhanderuete ogueraa jepe 'rã onhemo'yvy'i va'ekue,
- <sup>30</sup> oepy 'rã ojejavy va'ekue teĩ.  
 Ndepo iky'a e'ŷa re oma'ẽ vy 'rã ogueraa jepe – he'i.

## 23

### *Nhanderuete renonde Jó ojexa ukaxea re ijayvuague*

- <sup>1</sup> Ha'e ramo Jó ombovai:
- <sup>2</sup> — Aŷ voi ju xeayvu ta opu'ã rei va'e rami,  
 xepo py xepoaẽa ajoko teĩ.
- <sup>3</sup> Ai! Xee aikuua va'e rire Nhanderuete ajou aguã!  
 Ha'e rami vy ajexa uka 'rãgue oikuaa pota oinya py.
- <sup>4</sup> Henonde anhemombe'u porã 'rãgue,

- xejuru amonyẽ 'rāgue aikoa re xeayvu aguā.
- <sup>5</sup> Ha'e rami vy xembovai rā aikuua 'rāgue,  
aendu kuaa 'rāgue xevy ijayvu rā.
- <sup>6</sup> Opo'aka etea rupi nda'u ijayvu ete 'rāgue xevy?  
Any, oikuua pota porā'i 'rāgue xere.
- <sup>7</sup> Ha'e py ma heko porā va'e ijayvu 'rāgue hexeve,  
ha'e raka'e rā peve xee aa jepe 'rāgue xemboayvu aguā gui.
- <sup>8</sup> – Ha'e rami teī ma'ē, xerenonde katy xee aa rā noī 'rā ha'e py.  
Xerakykue katy ajevy teī ha'e py voi ndajoui.
- <sup>9</sup> Xeaxua katy mba'emo ojapo teī xee ndaexa reguai.  
Xeaxua katy voi onhemi rā xee ndaexai 'rāe.
- <sup>10</sup> Ha'e rā ha'e ma oikuapa xee aikoa.  
Xera'anga va'e rire ouro iky'a e'ŷ va'e rami ajekuaa 'rāgue.
- <sup>11</sup> Mba'eta xepy ma ha'e oikoa rupi anho oiko.  
Aī atā ixuguigua tape rupi aikoa rupi, ndajepe'ai ae.
- <sup>12</sup> Ojuru py ojapo uka va'e gui xee ndajepe'ai,  
xepy'apy py amoī porā ijayvuague.
- <sup>13</sup> Ha'e rā ha'e ma mba'emo ojapo aguā re onhembopy'a ramo  
mava'e 'rā tu ojoko?  
Mba'eta ha'e ojapoxe vy ojapo 'rāe.
- <sup>14</sup> Ha'e rami vy ojapopa avi 'rā xerekorā re ijayvuague.  
Ha'e va'e ramigua ma mbovy rei e'ŷ ojee omoī ojapo va'erā.
- <sup>15</sup> Ha'e nunga rupi xepy'a eta rei 'rā henonde.  
Ha'e nunga re aikuua pota vy akyje.
- <sup>16</sup> Nhanderuete ojapo xepy'a re xekangya aendu aguā rami,  
Ipo'akapa va'e ae xembopy'a eta rei.
- <sup>17</sup> Mba'eta pytū vaikue gui e'ŷ xekangya aendu,  
pytū reia xerova ojao'i va'e gui e'ŷ guive.

## 24

### *Mbovykue rei e'ŷ heko vai va'e kuery nombopagaaia rami Jó ijayvuague*

- <sup>1</sup> – Mba'e re nda'u Ipo'akapa va'e noa'angai ri joe oikuua pota aguā ára?  
Mba'e re tu oikuua va'e kuery ndoikuuaai ha'e va'e ára?
- <sup>2</sup> Mba'eta ikuai yvy markaa oguerova rive va'e,  
ha'e mymba re imonda vy guymba kuery reve ae omongaru va'e.
- <sup>3</sup> Ha'e kuery oipe'a 'rā tyre'ŷ rymba mburika,  
imeve'ŷ va'e gui voi oipe'a 'rā hymba vaka.
- <sup>4</sup> Ojexavai va'e kuery pe ojavy uka 'rā tape.  
Ha'e kuery gui iporiaukue'i yvy re ikuai va'e onhemimba 'rā okuapy,
- <sup>5</sup> Ha'e va'e kuery ma ombo'eapo aguā katy oje'oi 'rā kavaju'i tekao e'ŷa rupigua rami,  
iporiaukue'i voi yvy joja reia rupi oeka 'rā oje'oivy ho'u va'erā.  
Ha'e rami vy 'rāe ojou tembi'u ojeupe ha'e gua'y kuery pe.
- <sup>6</sup> Heko vai va'e mba'ety py omono'õ 'rā mba'emo aju,  
ha'e omondoro 'rā uva.
- <sup>7</sup> Ipire rei reve oaxa 'rā pytū ao oguerekoy e'ŷ vy.  
Onheovā aguā ndoguerekoi vy yro'y oendu.
- <sup>8</sup> Yvyty rupi inhakŷmba 'rā oky gui.  
Onhemi aguā oguerekoy e'ŷ vy itaova rupi rive 'rā onhemi okuapy.
- <sup>9</sup> Tyre'ŷ'i kuery omboia 'rā okambua gui,  
ha'e iporiaukue'i gui oipe'a 'rā oguerekoy i va'ekue.

- <sup>10</sup> Ha'e ramo ha'e va'e kuery ipire rei va'e ikuai ao oguerek e'ŷ vy.  
Karuai oendu vy ogueraa 'rã mba'emo aju ojokua pyre.
- <sup>11</sup> Heko vai va'e kuery roka py onhami 'rã azeite-rã,  
uva oumbiri avi teĩ oendu riae 'rã oy'uxea.
- <sup>12</sup> Tetã rupi voi avakue ipoaẽ 'rã okuapy, ojeaipy kuery ojapukai 'rã onhe'ẽ py.  
Ha'e rami teĩ ha'e nunga re Nhanderuete ndoikuua potai merami.
- <sup>13</sup> – Ha'e rã heko vai va'e ma hendy va'e rovaigua ikuai,  
ndoikuuai 'rã guive tape hendya katy oo va'e,  
ha'e va'e rupi ndooxei guive.
- <sup>14</sup> Ko'ẽ rai jave jojuka rive-rive va'e opu'ã vy  
ojuka 'rã iporiaukue'i ha'e ojexavai va'e.  
Ha'e gui pyávy ma oo ju 'rã imonda aguã katy.
- <sup>15</sup> Itavy rei va'e voi oarõ 'rã pytũ'i ta maa.  
Ha'e vy aipoe'i ojeupe: "Avave rei ndaxerexa kuaai 'rã", he'i vy omo'ã 'rã ov yngova.
- <sup>16</sup> Pytũ jave avakue oike 'rã joo rupi,  
ha'e gui ara py ma ngoo rupi ae 'rã ikuai.  
Neĩ ndoexaxevei 'rã hendy va'e.
- <sup>17</sup> Mba'eta ha'e kuery ma ko'ẽa pe "Manoa pytũ guigua" he'i 'rã,  
ha'e rã pyávy nhomongyje reia ma ha'e kuery oexa va'ety ae oiko.
- <sup>18</sup> – Peẽ aipopeje: "Heko vai va'e kuery ma ogueraapaa vyvoi 'rã yxyrya py.  
Yvy re ha'e kuery pegua oĩ va'e ma ayvu vaipy anho.  
Ndoovei 'rã tape uvaty katy oo va'e rupi ombo'eapo aguã.
- <sup>19</sup> Ipirua ha'e haku ma yro'y omboyku-a rami avi  
manoa voi omomba 'rã ojejavy va'e kuery.
- <sup>20</sup> Ha'e ramo ha'e kuery re ixy ae hexarai 'rã,  
ho'okue re taxo ov'y a reve okaru 'rã okuapy.  
Heko vai kuery re na'ima'endu'aavei ma 'rã.  
Ha'e kuery omopẽmbaa 'rã yvyra rami,
- <sup>21</sup> imemby va'erã e'ŷ ha'e kuery omomba rire,  
ha'e imeve'ŷ va'e pe ndojapo porãi rire", peje.
- <sup>22</sup> – Any! Ha'e rami 'rãgue py Nhanderuete ombaraetea rupi ombopukuve 'rã ojerovia  
rei va'e kuery ára.  
Ha'e kuery ndaekorãvei teĩ opu'ã ju nho 'rã.
- <sup>23</sup> Ha'e kuery pe ha'e ome'ẽ 'rã optyu'u aguã.  
Ha'e ramo ikuai atã 'rã.  
Nhanderuete oma'ẽ 'rã ha'e kuery ikuaria rupi.
- <sup>24</sup> Ha'e kuery ma xapy'a'i 'rã omboyvatea.  
Ha'e rire oaxa ju xapy'a 'rã, amboae kuery rami oipe'apaa 'rã,  
mba'emo ra'yigue rami avi ojaya 'rã.
- <sup>25</sup> Ha'e rami e'ŷ rã mava'e 'rã tu oikuua uka xeapua,  
ha'e ombovaipa xeayvua? – he'i.

## 25

*Nhanderuete renonde avave rei nonhemboeko porã kuaia rami Bildade ijayvuague*

- <sup>1</sup> Ha'e ramo Sua pygua Bildade ombovai:  
<sup>2</sup> – Ha'e rami avi Nhanderuete pegua anho oĩ opena ha'e ipo'aka aguã.  
Ha'e ma ojapo yva yvatevea rupi voi ikuai porãa aguã rami.
- <sup>3</sup> Guembiguai xondaro kuery ma ndajaipapapa kuaai 'rã.  
Ixuguigua hexakãa ojope 'rã ha'e javi áry.
- <sup>4</sup> Ha'e rami rã mba'exa tu avakue onhemboeko porã 'rã Nhanderuete renonde?

Mba'exa tu kunha gui itui'i va'ekue oiko 'rã iky'a e'ŷ va'e?  
 5 Ma'ẽ, ha'e oexa rã jaxy eteve voi naendyi  
   ha'e jaxy-tata ikuai va'e iky'a e'ŷ va'e ndoikoi.  
 6 Ha'e gui avakue katuve ma taxo rami rive 'rã yvyīgueve'i.  
   Avakue ra'y kuery ma taxo ramigua meme ae ikuai – he'i.

## 26

### *Nhanderuete ipo'akapaa re Jó ijayvuague*

1 Ha'e ramo Jó ombovai:  
 2 – Ikangy va'e pytyvõa merami rive reiko,  
   ijyva mbaraete e'ŷ va'e reipytyvõ merami rive!  
 3 Hi'arandu e'ŷ va'e remongeta kuaa merami rive,  
   ha'e anhetẽ va'e reikuua uka porãmba merami rive!  
 4 Mava'e nembo'ea rupi tu ndeayvu ha'e rami ete?  
   Mava'e guigua nhe'ẽ tu ndere oĩ ndeayvu kuaa aguã?  
 5 – Ha'e gui omano va'ekue nhe'ẽ ma oryryipa 'rã okuapy  
   yy guy py ikuiai py.  
 6 Nhanderuete gui manoa pygua kuery nonhemi kuaai,  
   yvykua vaikue ao'iarã noĩ ramo.  
 7 Mba'eve oĩ e'ŷa áry ha'e oipyo kuaray apu'a'ia katygua,  
   mba'eve oĩ e'ŷa áry ae avi onhono yvy.  
 8 Arai ana ikuai va'e mbyte ojoko 'rã yy,  
   ha'e rami teĩ arai ndoxoi 'rã iguy py.  
 9 Ojao'i 'rã guenda opena oinyaty,  
   hi'áry arai pytõa py ojao'i vy.  
 10 Omoĩ raka'e yy apyrã,  
   hexakãa ha'e pytõa mbyte py.  
 11 Ijayvu atã ramo yva yta  
   oryryi 'rã onhemondyipa vy.  
 12 Ombaraeeta rupi omboja'o raka'e ye'ẽ,  
   ha'e o'arandua rupi oity ngovaigua kuery.  
 13 Opejua py rive omoexakã 'rã yva,  
   ha'e opo py ojuka 'rã teju jagua inhakuã va'e.  
 14 Ma'ẽ, ha'e ramigua ma hembiapo ypy rive!  
   Mba'eta ixugui ma nhaendu mbeguei'i anho.  
   Ha'e gui mava'e tu oendu kuaa 'rã ipo'akaa ryapu atã va'e?

## 27

### *Heko vai va'e kuery ikuai axy aguã re Jó ijayvuague*

1 Jó ijayvuve tema. Ha'e vy aipoe'i:  
 2 – Anhetẽ ete Nhanderuete Ipo'akapa va'e xevy guarã va'ekue pe'aa  
   ha'e xenhe'ẽ moingo axya va'e rekove rupi aura vy aipoa'e:  
 3 xee aikove teria ja,  
   ha'e xeapyīguia py xepytuẽ aguã Nhanderuete ome'ẽ teria ja  
 4 xejuru nda'ijayvui 'rã ha'eve'ŷa rami,  
   xeapekũ nda'ijapui 'rã guive.  
 5 Nda'evei ete "Ha'evea rami pendeayvu", ha'e aguã!  
   Amano peve ndajep'eai 'rã anhetẽ rupi aikoa gui.  
 6 Aĩ atã 'rã xerekó porãa re, ndajep'eai 'rãe.  
   Aikoa ára nhavõ xepy'apy py ndaikuai ajejavya.

- 7 – Xerovaigua kuery topa heko vai va'e rami,  
xerovai opu'ã va'e kuery ma ha'eve'ÿa rami ikuai va'e rami topa.
- 8 Mba'eta ojerovia e'ÿ va'e kuery ma mba'e tu oĩ oarõ aguã,  
hekove ojaya,  
ha'e inhe'ẽ Nhanderuete oipe'a rã guarã?
- 9 Ha'e kuery áry teko axy ou ramo  
Nhanderuete oendu 'rã teve ojapukaia?
- 10 Heko vai va'e nda'u oguerovy'a 'rã Ipo'akapa va'e?  
Ixupe ojapukai 'rã teve oikoa ha'e javi py?
- 11 – Xee rombo'e 'rã Nhanderuete po'akaa re,  
namombe'u e'ÿi 'rã Ipo'akapa va'e reve mba'emo oĩ va'e.
- 12 Mba'eta peẽ kuery ha'e javi pexa ae ma ha'e nunga.  
Mba'e re tu ha'vy ovare e'ÿ va'e anho pejou porã?
- 13 Ma'ë, po ramigua anho heko vai va'e ojopy 'rã Nhanderuete po gui,  
Ipo'akapa va'e gui nhomoingo axya kuery ojopy 'rã po rami.
- 14 Ha'e kuery ra'y kuery hetave oje'oivy teĩ kyxe pyguarã meme ikuai,  
hamymino kuery voi ndojou retai 'rã ho'u va'erã.
- 15 Ha'e kuery va'e regua hembyre va'ekue ma mba'eaxy omomba 'rã,  
ha'e rã ta'yxykue ndojae'oi 'rã.
- 16 Heko vai va'e ma yvyku'i rami 'rã omboaty prata,  
oaorã guive yapo rami ojou-jouve 'rã.
- 17 Ha'e nunga omoï porã teĩ heko porã va'e kuery ju 'rã onhemonde,  
prata oguereko va'ekue voi ojejavý e'ÿ va'e kuery ju omboja'o 'rã okuapy.
- 18 Heko vai va'e ngoorã ojapo va'e ma tanambi raity rami,  
ha'e oguy'irã mba'ety rarõa ojapo va'e rami rive.
- 19 Iporiau e'ÿ va'e ma mba'emo oguerekopa va'e mbyte py onheno teĩ  
guexa oipe'a ju vy ndoexavei 'rã.
- 20 Ha'e kuery re imongyjeearã ou vy ipo'aka 'rã yy oxyry atã va'e rami,  
pyávy ma yvytu vaikue ogueraapa 'rã.
- 21 Kuaray oua katy gui yvytu ou va'e ogueraa ramo okanhymba 'rã.  
Oipe'apa 'rã heravy oĩague gui.
- 22 Nhanderuete po gui ojava vyvoixe teĩ  
hi'áry ha'e nunga ha'e javi ombou 'rã omboaxy e'ÿ re.
- 23 Heko vai va'e ho'a rã ojepopetepaa 'rã,  
okanhy ov y ramo otuvy nhe'ẽ pavẽ 'rã imondovy – he'i.

## 28

*Yvy guýry mba'emo porã oĩ va'e avakue oguenoẽ kuaa re Jó ijayvuague*

- 1 – Anhetẽ, prata re yvy jo'oa ikuai,  
oĩ avi ouro ky'a'oaty.
- 2 Ferro guive oguenoẽa 'rã yvy gui,  
ha'e rã overa va'e ma ita py ojoua.
- 3 Avakue omoexakã 'rã pytũ anaa rupi,  
ha'e hexakãa opaa peve oo vy oeka 'rã ita porãgueve  
pytũ anaa py oĩ va'e.
- 4 Ojo'o 'rã yvy oike aguã avakue ikuiai gui mombyry,  
oguata va'e kuery ikuuaa e'ÿa py.  
Ha'e kuery ikuiai gui mombyry 'rã ikuai  
peteĩ ixã re ovava-vava oinya py.
- 5 Yvy gui ma oiko 'rã tembi'u,

- ha'e rã iguýry ma tata py okaiague rami 'rã ojekuaa.
- <sup>6</sup> Ha'e pygua ita re oĩ 'rã safira,  
ha'e gui iku'ikue re ma ouro oĩ.
- <sup>7</sup> — Ha'e va'e tape ma guyra jo'ua kuery ndoikuuai,  
taguato ndoexai va'e ae.
- <sup>8</sup> Vixo inharõ ha'e tuvixa va'e nopyrõi 'rã ha'e rupi,  
guary ra'y voi ndoaxai ha'e rupi.
- <sup>9</sup> — Avakue opo py tembiporu oguereko va'e py ombota-mbota 'rã ita re,  
ha'e vy yvyty ikuai va'e oipe'a 'rã iguy peve.
- <sup>10</sup> Ombokua 'rã ita rupi  
oexa aguã hepyve va'e oĩ va'e ha'e javi.
- <sup>11</sup> Omboty 'rã yy rape ikuai va'e peteïve henda py otyky e'ŷ aguã rami,  
hexakãa katy oguerupa aguã hi'ã py oĩ va'ekue.

*Arandu anhetê va'e me'ëa Nhanderuete oikoa re Jó ijayvuague*

- <sup>12</sup> — Ha'e rã 'arandua ma mamo tu oĩ?  
Mamo tu oĩ mba'emo jaikuua ete aguã?
- <sup>13</sup> Ha'e va'e repy ma avave ndoikuuai,  
yvy re avakue ikuiaia rupi ndojouai 'rãe.
- <sup>14</sup> Yvykua vaikue aipoe'i: "Xere ma ha'e nunga noĩ",  
ye'ẽ voi "Xea py noĩ avi" he'i.
- <sup>15</sup> Ouro oiky'a'o pyre re teĩ nda'evei jajogua aguã,  
neĩ prata voi nda'evei hekovia jaapeja aguã.
- <sup>16</sup> Mba'eta ouro Ofir gui ogueru pyre ha'e javi gui ovareve va'e,  
ônix hepyve va'e ha'e safira ikuai va'e gui guive.
- <sup>17</sup> Ouro teĩ ma 'arandu rami e'ŷ iporã va'e, neĩ itaendy ma voi.  
Jeguaa ouro oiky'a'o pyre guigua re teĩ nanhamboekoviai 'rã.
- <sup>18</sup> 'Arandu oña py ma ita coral ha'e itaendy ikuai va'e re nhanderexaraipa 'rã.  
Pérola jajoua gui voi ha'eveve 'arandu jarekoa.
- <sup>19</sup> Etiópia gui topázio herua teĩ ha'e va'e ma 'arandu rami e'ŷ ovare,  
neĩ ouro iky'a e'ŷ va'e voi.
- <sup>20</sup> — Ha'e nunga rupi magui tu ou 'arandu?  
Mamo tu oĩ mba'emo jaikuua aguã?
- <sup>21</sup> Mba'eta temimoingo ikuai va'e oexaa gui onhomia,  
guyra yvate rupi oveve va'e gui guive.
- <sup>22</sup> Yvykua vaikue ha'e manoaa aipoe'i:  
"Oreapyxa py roendu rive 'arandu oikoa", he'i.
- <sup>23</sup> Nhanderuete anho oikuua 'arandua katy tape oo va'e,  
ha'e ae oikuua oña.
- <sup>24</sup> Mba'eta ha'e ma yvy apy rupi peve oexa pota,  
yva guýry ikuai va'e ha'e javi 'rã oexapa.
- <sup>25</sup> Yvytu poyia ha'evea'i rami Nhanderuete oeja  
yy guive ituia peve oa'anga jave,
- <sup>26</sup> oky nhavõ guarã oeja,  
ha'e yapu overa reve va'e raperã omoĩ jave,
- <sup>27</sup> ha'e va'e jave py ae 'arandu oexa avi vy oikuua uka raka'e.  
Ha'e va'e re oikuua pota ma vy omoĩ atã raka'e.
- <sup>28</sup> Ha'e vy aipoe'i avakue pe: "Pendu ke:  
SENHOR renonde pejererokyjea ma pene'arandurã oĩ  
ha'eve'ŷ va'e gui pejepa vy 'rãe peikuua mba'emo", he'i.

## 29

*Jó ymave rupi oiko porāague re ima'endu'aague*

- <sup>1</sup> Jó ijayvuve tema. Ha'e vy aipoe'i:
- <sup>2</sup> — Ai! Kueve'igua jaxy re aikoague rami ju aiko va'e rire,  
    Nhanderuete xere opena javegua re rami!
- <sup>3</sup> Ha'e jave ma xeakā áry rupi omoexakā va'ekue,  
    ha'e hendy va'e xererekö heravy ramo pytū rupi ete aguata aikovy va'ekue.
- <sup>4</sup> Ha'e jave ma xerexaī aikovy va'ekue,  
    xero áry rupi Nhanderuete xerayvua oexa uka rā.
- <sup>5</sup> Ha'e jave ma Ipo'akapa va'e oiko teri xereve,  
    ha'e xera'y kuery voi xeyvýry teri ikuai.
- <sup>6</sup> Kamby py xepy ajoi ainy va'ekue,  
    ha'e itaova gui yakā'i oxyry va'e rami azeite oxyry oiny jave.
- <sup>7</sup> — Tetā kora rokē katy aa,  
    ha'e tetā mbyte py guive aguapy ainy aguā ome'ēa jave
- <sup>8</sup> kunumigue xerexa vy ojepe'apa,  
    ha'e tujakue'i voi opu'āmba okuapy va'ekue.
- <sup>9</sup> Yvatekueve voi ijayvu ta vy ojuru ojoko okuapy va'ekue,  
    ojuru re opo omoī reve.
- <sup>10</sup> Omboetevepy kuery ayvu nonhenduvei va'ekue,  
    ijurupy py inhapekū nomyīvei ramo.
- <sup>11</sup> Xeayvua rendua kuery ma “Ovy'a va'e” he'i okuapy xevy,  
    xerexaa kuery voi xere ima'endu'a porā va'ekue.
- <sup>12</sup> Mba'eta xee ma iporiaukue'i ojapukai rā aepy va'ekue,  
    tyre'ŷ opytyvōarā oguerekö e'ŷ va'e kuery guive.
- <sup>13</sup> O mano ta va'e voi xereroayvu porā va'ekue,  
    xee ajapo avi va'ekue imeve'ŷ va'e kuery okuraxō py ovy'a aguā rami.
- <sup>14</sup> Xejee amoī va'ekue teko porā,  
    ha'e va'e anho oī va'ekue xeao rami.  
    Manto ha'e akā nhovāa rami oī va'ekue ha'evea rami joe apenaa.
- <sup>15</sup> Xee ajeapo va'ekue ára revegua e'ŷ rexarā rami,  
    hi'u rovaikue'i va'e pyrā rami guive.
- <sup>16</sup> Iporiaukue'i pe ma tuu aiko va'ekue,  
    oikuaapy e'ŷ ikuai va'e re guive aikuua pota va'ekue.
- <sup>17</sup> Ha'e rā porayvu e'ŷ va'e kuery raī'y kā ma xee amopēmba va'ekue,  
    ha'e kuery raī gui xee araa jepe va'ekue omokō ta va'e.
- <sup>18</sup> Xee aipoa'e va'ekue: “Xero py ae 'rā amano,  
    amboetave 'rā xe'ára ita ku'i rami.
- <sup>19</sup> Xee aiko 'rā yy peve yvyra rapo ovy va'e rami,  
    ha'e pyávy hakā re yxapy oīa va'e rami.
- <sup>20</sup> Xemboeteave tema 'rā,  
    ha'e xepo py xerapa ajopy atā tema 'rā aikovy”, ha'e va'ekue.
- <sup>21</sup> — Xeayvu rā ojapyxaka va'e kuery oarō okuapy va'ekue amongeta aguā,  
    xeayvua oendua rupi okyrirī pavē va'ekue.
- <sup>22</sup> Xee xeayvupa ma rā naxembovai kuaai va'ekue.  
    Ha'e kuery áry xeayvua oguejy va'ekue yxapy rami.
- <sup>23</sup> Ha'e kuery xerarō va'ekue oky re rami,  
    ojuru oipe'a reve oarō okuapy xeayvu aguā, haku-a ára py oky oarō va'e rami.
- <sup>24</sup> Ha'e kuery nda'ipy'a guaxui jave ha'e kuery pe xerory va'ekue.  
    Xerova omoexakā rā xererovy'a va'ekue.

<sup>25</sup> Ha'e kuery raperã xee aiporavo va'ekue huvixa rami aguapy ainy reve,  
    huvixave oxondaro kuery mbyte oĩ va'e rami,  
    ha'e ojae'o va'e kuery mbopy'a porãa rami ajoguereko va'ekue.

## 30

### *Jó iporiaua oguerojae'oague*

- <sup>1</sup> – Ha'e gui aŷ ma xegui kyrīgueve xejojai okuapy,  
    ha'e va'e kuery ru ma neĩ jagua reve xerymba vexa'i kuery oarõ aguã katy  
    namondoukai va'ekue ri.
- <sup>2</sup> Mba'eta ha'e kuery inhangaipa ramo  
    mba'e nunga py tu xevy ovare 'rāgue ipo mbaraetea?
- <sup>3</sup> Jexavai ha'e karuai gui ha'e kuery ikangypa okuapy.  
    Oixu'u okuapy mba'emo pirukue,  
    yma ma tekaoa noīveia rupi mba'emo vaikue ikuai va'e guive.
- <sup>4</sup> Jai rogue ha'e yvyra'i rogue rive oipo'o,  
    zimbro rapo guive ho'u okuapy.
- <sup>5</sup> Avakue mbyte gui omoxēa.  
    Ha'e kuery rovai ojapukaia okuapy imonda va'e rakykue ojapukaia rami.
- <sup>6</sup> Yvy'ã peguy kuaray'ã reia rupi ikuai,  
    yvykua ha'e itakua rupi.
- <sup>7</sup> Onhendu okuapy jai rupi,  
    juu guy rupi rive ijaty okuapy.
- <sup>8</sup> Inhakā porã e'ŷ va'e ra'y kuery ikuai,  
    ima'endu'apy e'ŷ regua,  
    ijyvy gui omoxēmba pyre.
- <sup>9</sup> – Ha'e rã aŷ ma ha'e kuery xembojaru rei okuapy,  
    ojojai pyrã aiko ramo.
- <sup>10</sup> Xegui ojeguaru vy ojepe'a 'rã mombyry'i,  
    ndokyjei guive xerova re onyvõ aguã.
- <sup>11</sup> Mba'eta Nhanderuete ombopyu xerapa xã xembojexavai vy.  
    Ha'e ramo ha'e kuery ndojejokovei ma xerenonde.
- <sup>12</sup> Ha'e rami vy xeaxu e'ŷa re opu'ã okuapy xemoanha rei aguã,  
    ha'e xerovai jogueroayyu okuapy xemomba vy ou aguã re.
- <sup>13</sup> Ombovaipa okuapy xee aa aguã va'e rupi,  
    xeapo ajexavai aguã rami.  
    Ha'e kuery ma oipytyvõ pyrã e'ŷ ae.
- <sup>14</sup> Xere ou okuapy tetã kora oitypaague rupi oike va'e rami,  
    ha'e kuery ouve tema 'rã ivaipaague mbyte rupi.
- <sup>15</sup> Xere ou xemongyjearã,  
    yvytu ombovevepa rire omboetepy aikoague.  
    Avy'aague oaxa ma ovy arai rami.
- <sup>16</sup> – Aŷ ma xepy'apy py anhenhandu xenhe'ẽ ivaipa maa rami.  
    Xembojexavaia ára ou ma xere.
- <sup>17</sup> Pyávy xekāgue hu'ũmba ha'e ovapa va'e ramigua aendu,  
    ha'e mba'emo vai xexu'u va'e ndopytu'ui.
- <sup>18</sup> Mba'emo vai aendu va'e gui xeao voi ojepokapa rei 'rã,  
    mba'emo vai xejyryvipy 'rã xeao puku jyryvi rami.
- <sup>19</sup> Xeruete, ndee ae xemombo yapo py,  
    ha'e ramo yvy ku'i ha'e tanhimbu rami aiko.
- <sup>20</sup> Ndevy ajapukai rã ndee naxembovai.

- Apu'ã ha'amy teĩ rema'ẽ rive xere.
- <sup>21</sup> Porayvu e'ỹ va'e renhemongo xevy.  
Ha'e vy ndepo mbaraete reve repu'ã xere.
- <sup>22</sup> Rejapo yvytu xereupi vy hi'áry xereraa aguã rami.  
Xemou'ũmba ára vai revovo rupi.
- <sup>23</sup> Ha'e gui xee aikuaa amano aguã katy xereraa,  
oikove va'e ha'e javi ikuai aguã katy.
- <sup>24</sup> – Ha'e rami avi yty áry ava omomboa imoinyague gui nokuave'ẽi 'rã teve,  
ojexavaia gui ndojapukai ratãi 'rã teve ipytyvõarã pe?
- <sup>25</sup> Xee ndajae'oi va'ekue teve ojexavai va'e re,  
ha'e xenhe'ẽ py namboaxyi teve oiko axy va'e?
- <sup>26</sup> Iporã va'e xee arõ teĩ xere ou mba'emo vai.  
Hendy va'e arõ va'e 'rãgue py pytã anho ou xere.
- <sup>27</sup> Xeryepy rupi omyi va'e ndopytu'ui,  
xere aiko axya ára ou ramo.
- <sup>28</sup> Xeporiau aikovy kuaray ojope e'ÿa rupi.  
Heta va'e kuery mbyte py ajerure ha'amy xepytyvõa aguã.
- <sup>29</sup> Xee ma jagua-tuvy nhe'ẽ ryke'y,  
ha'e guyra nhandu ryvy aiko.
- <sup>30</sup> Xepire hu'ũmba reve ho'apa xegui,  
zekãgue voi okai merami xepire raku gui.
- <sup>31</sup> Ha'e nunga rupi ixã reta va'e ambopu 'rãgue py xeraxẽ ainy xepy'a vai vy,  
ha'e mimby amonhe'ẽ 'rãgue py ojae'o va'e rami anhendu.

## 31

### *Jó anhetẽ rupi oikoa re ijayvuague*

- <sup>1</sup> – Xerexa reve ajapo ma areko aguã.  
Mba'exa tu ha'vy xee apena reia rupi ama'ẽ ta kunhataĩ re?
- <sup>2</sup> Ha'e rami rire mba'e 'rã tu xee ajopy Nhanderuete yvategua gui,  
mba'e nunga tu yvate oña gui ome'ẽ 'rã xevy?
- <sup>3</sup> Mba'eta heko vai va'e peguarã omoõ okanhy aguã,  
mba'emo vai apoa pe omoõ oiko axy aguã.
- <sup>4</sup> Ha'e rã xee aikoa ma Nhanderuete oexapa,  
oipapa aguataa ha'e javi.
- <sup>5</sup> – Ha'e gui aiko porã merami rive va'e rire,  
ha'e ajokore aguã katy xepy inhakuã ový va'e rire,
- <sup>6</sup> (Nhanderuete toikuua pota porã xere,  
anhetẽ rupi aikoa oikuua aguã,)
- <sup>7</sup> xapy'a rei tape porã gui ajep'e'a vy  
mba'emo aexa va'e rupi rive anhembopy'a,  
e'ÿ vy xepo re iky'a va'e oĩ va'e rire,
- <sup>8</sup> ha'e rami ri ramo amboae kuery rive to'u xee ama'etÿague gui,  
ha'e xemba'ety rupi henhoĩ va'ekue tomondoropa rive.
- <sup>9</sup> – Xapy'a rei xekuraxõ py kunha mboae re anhembotavy uka,  
ha'e xea katyguia rokẽ py ama'ẽ mbeguea rupi aiko va'e rire,
- <sup>10</sup> ha'e ramo xera'yxy tojapo tembi'u amboae ava pe,  
hexeve amboae tonheno.
- <sup>11</sup> Mba'eta ha'e rami aiko va'e rire nda'evei ete 'rãgue,  
ajejavuague re huvixa kuery xembopaga 'rãgue.
- <sup>12</sup> Ha'e ramigua ma tata rami ombovaipa 'rãgue opa peve,

- omomba 'rāgue mba'emo areko va'e ha'e javi.
- 13 — Xapy'a rei xerembiguai ava e'ŷ vy kunha mba'e  
ha'eve'ŷa rami xee areko va'e rire,
- 14 mba'e tu xee ajapo 'rāgue Nhanderuete xere opu'ā ramo?  
Xere oikuua pota ramo mba'exa tu xee ambovai 'rāgue?
- 15 Mba'eta xeryru'i py aī aguā xemoingo va'ekue e'ŷ ri ty'y ha'e kuery voi omoingo  
raka'e?  
Ha'e e'ŷ teve nhanderyru'i py nhanemoingo pavē va'ekue?
- 16 — Xapy'a rei iporiaukue'i oipota va'e name'ēi vy  
imeve'ŷ va'e ndaexa pyxovei aguā rami ajapo va'e rire,
- 17 ha'e rami e'ŷ vy xee ae'ia py akaru va'e rire  
tyre'ŷ pe amboja'o e'ŷ re,
- 18 (mba'eta xekunumi guive xereve ae areko tuu rami,  
ha'e xeryru'i py aī guive imeve'ŷ va'e rerekoa aiko,)
- 19 xapy'a rei ijao e'ŷ va'e ojexavai rā ama'ē rive va'e rire,  
e'ŷ vy onheovā aguā oguereko e'ŷ vy ojexavai rā,
- 20 xapy'a rei xerymba vexa'i rague py namboakui ramo  
ha'e kuery opy'a py ndaxereroayvu porāi va'e rire,
- 21 xapy'a rei okē py joguerekoa kuery ikuai va'e xemboeko porā reve tē  
tyre'ŷ rovai xepo aupi va'e rire,
- 22 ha'e rami ri ramo to'a rive xeaxi'y kāgue,  
ha'e tomboia xejyva oīague gui.
- 23 Mba'eta ha'e rami va'e rire Nhanderuete xembopaga aguā gui ndaxerekorāvei 'rāgue,  
hexakāa rive xee ndaropo'akai 'rāgue.
- 24 — Xapy'a rei ouro re rive ajerovia vy  
ouro oiky'a'o pyre pe "Ndere ajeko" ha'e va'e rire,
- 25 xapy'a rei arekopa etea  
ha'e xepo py ajou reta va'e arovya'a va'e rire,
- 26 xapy'a rei kuaray rexakāa re,  
e'ŷ vy jaxy hendy porāa re ama'ē reve
- 27 xepy'a py ajekore nhemia rupi  
xepo py ayvua aikuua uka va'e rire,
- 28 ha'e va'e py voi ajejavvy 'rāgue joguerekoa kuery xembopaga aguā rami,  
Nhanderuete yvategua e'ŷ amboete rire.
- 29 — Ha'e gui xere ija'e'ŷ va'e kuery ojexavai rā aexa vy ndavy'ai,  
ha'e kuery re mba'emo vai oiko rā ndarovy'ai.
- 30 Ha'e rami avi ndarojejavyyi xejuru  
ha'e kuery omano aguā re ajerurea py.
- 31 Ha'e xero py ikuai va'e aipo nde'i:  
"Xo'o ha'e nome'ē porāi rire ndajakaru porāi", nde'i,
- 32 mba'eta xee ndaejai yvy mboae guigua tape py rive pytū oaxa aguā,  
xerokē aipe'a jepi riae oguata va'e kuery amovaē vy.
- 33 Ha'e gui Adāo rami e'ŷ xepy'apy py nanhom  
xereko vaia ha'e ajejavya.
- 34 Mba'eta xee ma heta va'e kuery gui ndakyjei,  
xeretarā kuery xere ija'e e'ŷa naxemongyjei  
akyrirī ha'e xero gui naēi aguā rami.
- 35 Xeayvu renduarā oī va'e rire!  
Ma'ē, apy ma oī xereko regua xerery reve ambopara va'ekue!  
Ipo'akapa va'e xembovai va'e rire,

- ha'e rami e'ŷ vy xerovaigua ombopara va'e rire xere ijayvua!
- <sup>36</sup> Ha'e va'e kuaxia para araa 'rāgue xeaxi'y áry,  
xeakā áry ajokua 'rāgue coroa rami.
- <sup>37</sup> Nhanderuete pe xee aikuua uka 'rāgue aikoa ha'e javi.  
Ha'e oña py ajexa uka 'rāgue yvateve va'e rami.
- <sup>38</sup> – Xapy'a rei xemba'ety káuxa xere ijayvua,  
ha'e yvy aikaraĩ heravyague káuxa ojae'oa va'e rire,
- <sup>39</sup> xapy'a rei ijaju ma ramo ha'u ombo'eapo va'e kuery pe ha'evea rami apaga e'ŷ re,  
ha'e ijopyarã va'ekue amomba va'e rire,
- <sup>40</sup> ha'e rami ri ramo trigo 'rāgue py juu rive toiko xevy,  
ha'e cevada 'rāgue py toiko trigo ramigua rive – he'i.  
Apy ma opa ma Jó ijayvuague.

## 32

### *Jó ha'e irū kuery mboapy ikuai va'e pe Eliú ivaiague*

- <sup>1</sup> Ha'e gui mboapyve avakue optyu'u ma Jó onhemboeko porãa rupi ijayvu rã ombo-viai gui.
- <sup>2</sup> Ha'e ramo buzita Baraquel ra'y Eliú, Rão ramymino regua ju ivai Jó pe, Nhanderuete gui eteve voi onhemboeko porãvexe ramo.
- <sup>3</sup> Irū kuery mboapyve pe voi ivai, mba'eta ha'e kuery nombovai kuaavei va'eri Jó rovai tema ijayvu rire.
- <sup>4</sup> Ha'e gui Eliú ma Jó gui kunumive va'e vy oarõ ranhe ixupe ijayvu aguã.
- <sup>5</sup> Ha'e rami avi mboapy avakue nombovai kuaaveia Eliú oexa vy ivaive oiny.

### *Jó pe ombovai ypy vy Eliú ijayvuague*

- <sup>6</sup> Ha'e gui buzita Baraquel ra'y Eliú aipoe'i:  
– Xee ma xekunumive va'e, ha'e rã peẽ ma pendetujakueve meme.  
Ha'e rami vy xee arõ ranhe, pendua py xee aikuua va'e amombe'u aguã ndaxepy'a guaxui vy.
- <sup>7</sup> Xee aipoa'e va'ekue: "Heta ára ha'e ma'etŷ mbovy e'ŷ oguerekva'e kuery ranhe ta'ijayvu 'arandu re nhombo'ea rupi", ha'e va'ekue.
- <sup>8</sup> Ha'e rami teĩ anhetẽ avakue re oĩ 'rã peteĩ Nhe'ë,  
mba'eta Ipo'akapa va'e oipejua py rive nhomo'arandu 'rã.
- <sup>9</sup> Hi'arandukueve ma tujakueve anho e'ŷ ikuai,  
tujakue'i anho e'ŷ 'rã oikuaa ha'evea ramigua.
- <sup>10</sup> Ha'e nunga rupi xee aipoa'e: "Pejapyxaka ke xere,  
ha'e gui xee voi amombe'u 'rã aikuua va'e", ha'e.
- <sup>11</sup> – Ma'ë, xee amoĩ porã pendeayvuague,  
pendeayvua re ajapyxaka pota porã  
pendeayvurã re teri peikuaa pota peiny reve.
- <sup>12</sup> Ha'e gui pendeayvu aendu rã  
peẽ kuery peteïve ma voi ndapeikuaa ukai Jó ha'eve'ŷa rami ijayvua,  
napembovai kuaai pekuapy ha'e ae oikuaa rami ijayvu rã.
- <sup>13</sup> Ha'e gui nda'evei penhemboeko porã ukaa rupi aipopeje aguã:  
"Ore rojou ma 'arandu.  
Nhanderuete ju tombovai, avakue ma nda'evei", peje aguã.
- <sup>14</sup> Ma'ë, xevy pe'ŷ ha'e ijayvu rire  
xee ma pendeayvuague rupi e'ŷ 'rã ambovai.
- <sup>15</sup> – Jó, neirū kuery mboapyve onhemondyi vy nanembovai kuaavei,  
ha'e kuery pe oata ma merami ayvu.

- 16 Ha'e gui xee pa arõve ta ha'e kuery nda'ijayvui ma rire?  
 Mba'eta okyririmb'a ma, peteñ henda py ma voi nombovaivei vy.
- 17 Ha'e rami vy xee ju 'rã xeayvu,  
 amombe'u 'rã aikuaa va'e.
- 18 Mba'eta heta areko xeayvu aguã,  
 xenhe'ẽ oĩ va'e ae xemokyre'ỹ ramo.
- 19 Mba'eta xepy'apy rupi aendu vinho ryru mba'emo pirekue guigua ipyau va'e ramigua,  
 onhembotypa vy oxoro rai'i va'e rami.
- 20 Ha'e rami vy tove taxeayvu oẽmba ovvy aguã.  
 Aipe'a 'rã xejuru rombovaia rupi xeayvu vy.
- 21 Xee ma peteñ rive joegui ayvuvea rupi e'ỹ 'rã xeayvu,  
 neñ avakue pe ajejou porã ucaa rupi e'ỹ guive.
- 22 Mba'eta xee ma ajejou porã ucaa rupi ndaxeayvu kuaai.  
 Ha'e rami e'ỹ va'e rire xemoingoare xereraa voi 'rãgue.

## 33

### *Jó pe Eliú ijayvu eteague*

- 1 — Ha'e gui Jó, endu ke aikuaa va'e re xeayvu rã,  
 ejapyxaka xeayvua ha'e javi re.
- 2 Aÿ ma xeayvu ta,  
 xejuru py xeapekũ ijayvu aguã rami oĩ.
- 3 Xeayvua oikuua uka 'rã xepy'a re anhetẽ va'e anho oĩa,  
 xeayvu 'rã mba'emo aikuaa va'e re anho.
- 4 Nhanderuete Nhe'ẽ ae xemoingo va'ekue,  
 Ipo'akapa va'e oipejua py rive ome'ẽ xerekoverã.
- 5 Xapy'a rei rembovai kuaai vy ke xembovai,  
 ereko katu reikuaa va'e xevy pe remombe'u va'erã.
- 6 Ma'ẽ, Nhanderuete renonde ma ndee ramigua ae avi aiko,  
 Yapo gui avi xeapo rire.
- 7 Ha'e ramo xee noromongyjei 'rã,  
 nde'áry noĩ 'rã xepo poyia.
- 8 — Anhetẽ xee aendua py ndeayvu rã  
 ange aendu kuri
- 9 “Ha'eve va'e aiko, ajejavvy va'e'ỹ.  
 Xeky'a va'e'ỹ ha'e xerekovo vai va'e'ỹ”, 're ramo.
- 10 “Ma'ẽ, Nhanderuete xembopagaa rupi onhea'ã,  
 hovaigua aikoa rami xekuaa vy.
- 11 Ha'e rami vy yvyra pa'ũ py omboty xepy,  
 ha'e oikuua pota 'rã aikoa ha'e javi re”, 're va'ekue.
- 12 Ha'e rami ndeayvuague ha'eve'ỹa ramigua ramo  
 xee rombovai 'rã.  
 Mba'eta avakue ikuai va'e gui Nhanderuete yvateve va'e.
- 13 Mba'e re tu ixupe ndeayvu ete vy  
 “Peteñ henda py nerenhemombe'u porãi ri”, 're?
- 14 Ha'e rami 'rãgue py Nhanderuete ma peteñ rami ijayvu ma vy  
 teigüe ju 'rã omombe'u porãve.  
 Ha'e rami teñ ijayvua re avakue noendu porã potai 'rã.
- 15 Nhandedevy pe oexa ra'u uka 'rã mba'emo, pyávy mba'emo jaexaa rupi,  
 nhanderopeyi vaipa reve  
 nhanderupa rupi jake jajupy jave.

- <sup>16</sup> Nhandeapyxa voi oipe'a vy  
nhanembo'e 'rā oipota va'e re,
- <sup>17</sup> ojapo aguā nhanhembopy'aa gui jajepe'a aguā rami,  
jajejou porā reia gui nhandereraa jepe aguā,
- <sup>18</sup> yvykua katy nhanderekove oo rā ojoko vy,  
kyxe py nhandejukaa gui guive.
- <sup>19</sup> – Nhanderupa rupi nhendetui ramo nhanembopaga 'rā haxy va'e py,  
nhanekāgue re haxy nhaendu riae va'e py.
- <sup>20</sup> Ha'e ramo jajeguaru 'rā tembi'u gui,  
tembi'u hee va'e teī nhanenhe'ē py ndaja'uxei ae.
- <sup>21</sup> Nhandero'o oī porā va'ekue aŷ ndojekuaavei.  
Ha'e rā nhanekāgue ndojekuaai va'ekue ma aŷ ojekuaapa.
- <sup>22</sup> Nhanenhe'ē oo tema 'rā yvykua katy,  
nhanderekove onhemboja 'rā ov ype'aarā kuerya katy.
- <sup>23</sup> – Xapy'a rei ou 'rā peteī anjo nhandere ojerure va'erā, mbovy e'ŷ ikuai va'e regua,  
nhandevy oikuua uka aguā ha'evea ramigua jajapo aguā.
- <sup>24</sup> Ha'e ramo Nhanderuete nhanemboaxy vy aipoe'i 'rā anjo pe:  
“Eraa jepe ke, yvykua py ho'a e'ŷ aguā.  
Ajou ma hepyrā”, he'i 'rā.
- <sup>25</sup> Ha'e rami rā nhandero'o hexaī ju 'rā nhanekyrī jave nhanembaraeteague rami,  
nhanekunumi jave jaikoague rami ae ju 'rā jaiko.
- <sup>26</sup> Ha'e ramo jajerure 'rā Nhanderuete pe, ha'e rā nhanepytyvō 'rā.  
Ha'e ramo javy'a reve 'rā jaexa Nhanderuete rova.  
Ha'e ramo nhanemboeko porā ju 'rā.
- <sup>27</sup> Ha'e ramo avakue oendua py japoraei reve aipoja'e 'rā:  
“Ajejavy va'ekue, ha'eve'ŷa ramigua ajapo,  
teī apaga aguā va'ekue rami e'ŷ guive xembopagaa.
- <sup>28</sup> Nhanderuete ojogua xenhe'ē yvykua py ooa gui,  
xerekove reve aexa aguā hendy va'e”, ja'e 'rā.
- <sup>29</sup> – Ha'e va'e ha'e javi ma Nhanderuete ojapo  
nhandevy mokoīgue, mboapykue mba'e,
- <sup>30</sup> yvykua gui nhanderekove ogueru ju aguā,  
oikove va'e kuery moexakāa py nhanderexape avi aguā.
- <sup>31</sup> Ha'e nunga rupi Jó, endu ke, ejapyxaka xeayvua re.  
Ekyrirī ke, ha'e rā xee xeayvu 'rā.
- <sup>32</sup> Ndee ndeayvu aguā rereko ri vy xembovai.  
Ndeayvu ke, mba'eta xee romboeko porāxe.
- <sup>33</sup> Ha'e gui mba'eve ndererekoi ri ramo ejapyxakave tema xeayvua re.  
Ekyrirī, ha'e rā rombo'e 'rā 'arandu re – he'i.

## 34

### *Eliú Nhanderuete mboeko porāa rupi ijayvuague*

- <sup>1</sup> Ha'e gui Eliú aipoe'ive ju:
- <sup>2</sup> – Pene'arandu va'e, pendu ke xee aikuaa va'e.  
Penembo'epaa va'ekue, pejapyxaka xeayvua re.
- <sup>3</sup> Mba'eta nhandeapyxa py nhaendu kuaa 'rā ayvu,  
nhandejuru py tembi'u heea nhaendu kuaa rami avi.
- <sup>4</sup> Ha'evea ramigua jaiporavo 'rā nhandejeupe.  
Jojavi 'rā jaikuaa iporā va'e.
- <sup>5</sup> Mba'eta Jó aipoe'i: “Xerekoo porā va'eri

- Nhanderuete oipe'a xevy guarã va'ekue.
- <sup>6</sup> Ha'evea rami aiko teĩ ijapu va'e rami xekuaa.  
Xeai okuera va'erã e'ŷ oĩ, ajejavya oĩ ramo e'ŷ", he'i va'ekue.
- <sup>7</sup> — Oiko 'rã nda'u ava Jó ramigua?  
Mba'eta ha'e ma ojojai 'rã Nhanderuete, yy oy'u va'e rami rive.
- <sup>8</sup> Ha'e rami vy onhemoirũ 'rã oikovy ojapo vai rei va'e kuery re,  
avakue heko vai va'e kuery reve anho oiko.
- <sup>9</sup> Mba'eta aipoe'i: "Nhanderuete jarovy'a teĩ  
mba'everã ndovarei nhandevy", he'i va'ekue.
- <sup>10</sup> — Ha'e nunga rupi peẽ avakue peneakã porã va'e, pejapyxaka xeayvua re.  
Nhanderuete ma peteĩve henda py ndojapo vai 'rã,  
Ipo'akapa va'e ha'eve'ŷa rami ndajoguerekoi 'rã.
- <sup>11</sup> Mba'eta ome'ẽ 'rãe jaikoague repy,  
ojapo 'rã peteĩ-teĩ jaikoague repy jajou aguã rami.
- <sup>12</sup> Anhetẽ ete, Nhanderuete ha'eve'ŷa rami ndoikoi 'rã.  
Ipo'akapa va'e ndajoguerekoi 'rã ha'eve'ŷa rami.
- <sup>13</sup> Mba'eta mava'e tu omoõ raka'e yvy re opena va'erã?  
Mava'e tu ipo py omboaxa raka'e ha'e javi regua?
- <sup>14</sup> Xapy'a rei Nhanderuete ojee rive opena va'e rire,  
ha'e ojea katy onhe'ẽ ha'e pytuãa oguerupa va'e rire
- <sup>15</sup> to'o ikuai va'e ha'e javi omanomba 'rãgue,  
ha'e yvyku'i ju jajeapo 'rãgue.
- <sup>16</sup> — Ha'e gui Jó, ndere 'arandu oĩ ramo endu ke pova'e.  
Ejapyxaka xeayvua re.
- <sup>17</sup> Ha'eve'ŷa rami joguerekoo va'e teve oĩ 'rã joe opena aguã?  
Mba'e re tu ha'vy ndee ndeayvu Heko porã ha'e Ipo'akapa va'e ojejavya rami?
- <sup>18</sup> Huvixave oiko va'e pe nda'u "Mba'e vare'ŷ" 'ea 'rã teve?  
Ha'e rami e'ŷ vy yvatekueve pe: "Pendeko vai va'e" 'ea 'rã teve?
- <sup>19</sup> Yvatekueve rive oayvvu e'ŷ va'e pe katuve ma nda'evei.  
Ha'e ma iporiaukue'i gui ndoayvuvei 'rã oguerekopa rei va'e kuery.  
Mba'eta ha'e javive ma opo py ojapo va'ekue meme ikuai.
- <sup>20</sup> Ha'e kuery omano xapy'a va'erã meme.  
Pytû mbyte jave ha'e kuery oryryipa reve oaxa 'rã,  
ipo'aka va'ekue teĩ Ipo'akapa va'e jaexa e'ŷ va'e ogueraa 'rã.
- <sup>21</sup> — Nhanderuete ma oma'ẽ 'rã avakue ikuiaia rupi.  
Ha'e kuery oguataa ha'e javi ha'e oexapa 'rã.
- <sup>22</sup> Jipoi pytûa neĩ kuaray'ã ana  
mba'emo vai apoare kuery ixugui onhemi aguã.
- <sup>23</sup> Mba'eta Nhanderuete ma avakue reko re oikuua pota are e'ŷ teĩ  
ojapo 'rã henonde ojexa uka aguã rami omboayvu aguã.
- <sup>24</sup> Ha'e rami vy oikuua pota e'ŷ re omopẽmba 'rã imbaraete va'e kuery,  
ha'e vy hekovia omoõ 'rã amboae kuery.
- <sup>25</sup> Ha'e kuery ikuiaia ha'e oikuua ae vy  
pyávy oity ramo omongu'i pyre ikuai.
- <sup>26</sup> Pavẽ oexaa py  
omoingo axy 'rã heko vai va'e ha'e javi reve,
- <sup>27</sup> ixugui ha'e kuery ojepe'a rire,  
peteĩve ma voi ndoikuaaxe i xuguigua tape.
- <sup>28</sup> Ha'e kuery ojapo Nhanderuete renonde iporiaukue'i ojapukaia onhendu aguã rami.  
Ha'e ramo oendu ae ojexavai va'e kuery ojae'oa.

- <sup>29</sup> Nhanderuete okyirirī teĩ mava'e 'rā tu ombopaga?  
 Ngova omo'ã rā mava'e 'rā tu oexa, peteĩ regua ha'e javi e'ŷ vy peteĩ ava teĩ?
- <sup>30</sup> Ha'e rami oiko heko vai va'e ipo'aka e'ŷ aguā,  
 ha'e oiko e'ŷ aguā heta va'e kuery mbotavyarā.
- <sup>31</sup> — Xapy'a rei amongue aipoe'i 'rā Nhanderuete pe:  
 "Aiko axy vaipa ma, ndajejavyvei ma 'rā.
- <sup>32</sup> Xembo'e ke mba'emo xee ndaikuaai va'e re.  
 Ha'eve'ŷa rami ajapo va'ekue teĩ ndajapovei ma 'rā", he'i 'rā.
- <sup>33</sup> Ha'e rami rā Nhanderuete omboekovia kuaa aguā nda'u  
 oporandu 'rā teve ndee reipotaa e'ŷ vy ndee ndereipotaia re?  
 Ndevy pe teve aipoe'i 'rā: "Ndee ae eiporavo, xee'ŷ.  
 Emombe'u ke reikuaa va'e, ndeayvu ke", he'i 'rā teve?
- <sup>34</sup> — Avakue hi'arandukueve omombe'u 'rā xevy,  
 inhakā porā va'e kuery xeayvua re ojapyxaka vy aipoe'i 'rā xevy:
- <sup>35</sup> "Jó ma oikuua vy e'ŷ ijayvu,  
 ijayvua re 'arandua noĩ", he'i 'rā.
- <sup>36</sup> Ha'e nunga rupi tove Jó reko re toikuaa pota opa peve,  
 heko vai va'e rami ombovai rire.
- <sup>37</sup> Mba'eta ojejavya áryve omoĩ Nhanderuete re opu'ã rei aguā.  
 Nhanembyte py ojepopete ombojaru reia rupi,  
 ha'e Nhanderuete rovai ijayvu reta rive.

## 35

*Eliú "Ojerovia e'ŷ va'e kuery ojexavai vy ojapukai teĩ Nhanderuete noendui", he'iague*

- <sup>1</sup> Eliú aipoe'ive ju:
- <sup>2</sup> — Ha'evea rami teve aipo're:  
 "Nhanderuete gui xerekō porāve", 're va'ekue?
- <sup>3</sup> Mba'eta aipo're: "Mba'e nunga py tu xerekō porāa ovare?  
 Mba'e tu xerekō porāa py ajouve 'rā ajejavya py ajou va'e gui?" 're va'ekue.
- <sup>4</sup> Ha'e ramo xee rombovai 'rā,  
 ndee ha'e neirū kuery guive.
- <sup>5</sup> Ema'ẽ yva re ha'e exa.  
 Exa pota nde'áry rupi arai yva re ikuai va'e re.
- <sup>6</sup> Rejejavya py mba'e nunga py tu hexe rejapo vai?  
 Nderekō vaia hetave ový rā mba'e tu rejapo hexe?
- <sup>7</sup> Ha'e rami e'ŷ vy nderekō porāa py mba'e tu reme'ẽ ixupe?  
 Mba'e tu ojopy 'rā ndepo gui?
- <sup>8</sup> Ha'e rami 'rāgue py nderekō vaia ma avakue ndee ramigua pe ae 'rā ojapo vai.  
 Ha'e nderekō porāa ma voi ha'e rami ae avi avakue ra'y kuery pe anho 'rā ojapo  
 porā.
- <sup>9</sup> — Ha'e gui avakue omoingo axya vaipa rā haxē 'rā,  
 ha'e vy ojapukai 'rā ipo'aka va'e kuery po gui ogueraa jepea aguā.
- <sup>10</sup> Ha'e rami teĩ avave rei aipo nde'i 'rā: "Mamo tu oĩ Nhanderuete xemoingoare,  
 pyávy avy'a reve aporaei aguā ome'ẽ va'e?
- <sup>11</sup> Ha'e ma yvy rupi vixo ikuai va'e gui nhanderekombo'eve va'e,  
 ha'e guyra yvate rupi oveve va'e gui nhanemo'aranduve va'e", nde'i.
- <sup>12</sup> Ha'e kuery ojapukai teĩ ha'e nombovai,  
 gueko vaia rupi rive onhemboyvate ramo.
- <sup>13</sup> Ojapukai rive ramo Nhanderuete noendui 'rā,  
 ha'e kuery re Ipo'akapa va'e noma'ẽi 'rā.

- <sup>14</sup> Jó, ndee ma Nhanderuete nderexaia rami ndeayvu,  
ha'e rã henonde ma nderek ojekuaapa.  
Ha'e nunga rupi earõ hexe.
- <sup>15</sup> Aÿ peve Nhanderuete opoxya rupi nanhombopagai,  
neñ heko vai va'e re ndoikuua potai teri ramo
- <sup>16</sup> ndejuru reipe'a vy ayvu ovare'ÿ va'e rupi ndeayvu.  
Ndeayvu reta ma, reikuua vy e'ÿ.

## 36

*Eliú “Avakue ojexavaia py Nhanderuete oikuua uka 'rã iporã va'e”, he'iague*

- <sup>1</sup> Eliú ijayvuve tema. Ha'e vy aipoe'i:
- <sup>2</sup> – Ejapyxakave'i ranhe, ha'e rã amombe'u porâve 'rã ndevy  
Nhanderuete amboeko porâa rupi xeayvu aguã arekove teri va'e.
- <sup>3</sup> Mombyry gui 'rã aru xe'arandurã  
Xemoingoare amboeko porâa aguã.
- <sup>4</sup> Mba'eta anhetê, xeayvu ma rive'ÿ.  
Ndereve oï va'e ma mba'emo oikuuaapa va'e.
- <sup>5</sup> – Ne'ixa, Nhanderuete ma tuvixa ete va'e.  
Ha'e rami teñ nopena e'ÿi 'rã peteñve re.  
Oikuua py avi tuvixa ete va'e oiko.
- <sup>6</sup> Ndogueraa jepei 'rã heko vai va'e rekove,  
ha'e rã ojexavai va'e kuery ma ha'evea rami 'rã oguereko.
- <sup>7</sup> Ndopytu'ui 'rã heko porâa va'e kuery re oma'ëa gui.  
Ha'e rami 'rãgue py omboyvate vy huvixave kuery reve  
omboguapy 'rã henda openaaty py raka'e rã peve.
- <sup>8</sup> Xapy'a rei ha'e kuery corrente py ombo'aague py 'rã ikuai,  
ixã imoingo axyarã py ojokuaa rire.
- <sup>9</sup> Ha'e rami ha'e ojapo 'rã ha'e kuery ha'eve'ÿa rami ojapoague oikuua aguã,  
ojejou porâa reia rupi ikuai rire.
- <sup>10</sup> Ha'e kuery apyxa oipe'a 'rã ombo'e aguã.  
Ha'e rami vy ha'e kuery pe ijayvu 'rã heko vaia gui ojeko rerova aguã.
- <sup>11</sup> Xapy'a rei ha'e kuery onhe'ë rendu ha'e ixupe ju ikuai ramo  
opaa py oiko 'rã ha'e kuery ov'y'a aguã ára,  
ha'e ma'etÿ mba'emo re ov'y'a rei okuapy aguã.
- <sup>12</sup> Ha'e rã ha'e kuery noendu potai ri ramo  
hu'y guaxu py rami onhyvða 'rã,  
ha'e ramo omano 'rã hexa ogue reve.
- <sup>13</sup> Opy'a py heko vaia anho omoï va'e ma ojeupe guarã omboaty 'rã poxya.  
Nhanderuete ombo'a uka teñ ndojapukai 'rã okuapy heraa jepearâ va'ekue pe.
- <sup>14</sup> Ha'e rami vy kunumi teri reve teñ omokanhy 'rã guekove.  
Omano 'rã avakue ta'angaa pegua itavy rei va'e mbyte py.
- <sup>15</sup> Ha'e rã ojexavai va'e kuery ma ha'e ogueraa jepe 'rã ojexavaia py ae oeko mbo'e vy,  
mba'eta ombojexavaia rupi oipe'a 'rã ijapyxa.
- <sup>16</sup> – Ha'e rami ae ndee voi reiko axya gui Nhanderuete ndepe'axe avi  
peteñ henda tuvixaa py, reiko axy ve'ÿ aguã py,  
ha'e rekaru aguã mesa áry tembi'u hee va'e anho oïa py.
- <sup>17</sup> Ha'e rã ndee ma renhemonyë heko vai va'e kuery reve repaga aguã.  
Ha'e nunga rupi nderupity 'rã ndejou vaia ha'e nembopagaa aguã anho.
- <sup>18</sup> Enheangu ke ha'vy ipoxya rendua py rejojai rei e'ÿ aguã,  
ejepa uka eme guive “Xerekovia hetä ome'ëa” 're vy rive.

- <sup>19</sup> Rejae'o rei ha'e opa mba'e py renhea'ã ramo rive nda'u  
nemboaxy 'rã rejexavaia gui reo jepe aguã?
- <sup>20</sup> Earõ eme eikovy pytū pygumarã,  
mba'eta heta ikuaiague gui oipe'apaa heravy aguã ae oĩ.
- <sup>21</sup> Enheangu ke teko vai re reo e'ŷ aguã,  
ha'e va'e pe "Jexavai gui ha'eveva va'e" 're vy rive.
- <sup>22</sup> Ma'ë, Nhanderuete opo'akaa py yvate ete va'e ojekuaa!  
Mava'e porombo'ea 'rã tu ha'e rami oiko?
- <sup>23</sup> Mava'e tu omboeko mbo'e ta,  
ha'e'ŷ vy ixupe "Ha'eve'ŷa rami rejapo" he'i ta?

*Nhanderuete yvate etea re Eliú ijayvuague*

- <sup>24</sup>— Nema'endu'a porã Nhanderuete rembiapo  
avakue pavẽ oguerovy'a va'e re.
- <sup>25</sup> Ha'e nunga re avakue ha'e javi oma'ë vy  
mombyryy gui ojou porã 'rã okuapy.
- <sup>26</sup> Ma'ë, Nhanderuete ma yvate ete va'e, jaikuua aguã rami e'ŷ.  
Oikoa ma'etŷ guive ndajaipapa kuaai 'rã.
- <sup>27</sup> Mba'eta ojea katy ogueru 'rã yy tykyrã,  
yvyxí gui ombo'oky aguã.
- <sup>28</sup> Ha'e rami vy arai gui onhoë 'rã  
avakue áry otyky reta va'erã.
- <sup>29</sup> Amongue nda'u oikuua 'rã ri marã rami pa arai oipyo heravya,  
yapu guive oña gui omonhendua?
- <sup>30</sup> Ma'ë, ha'e va'e áry rupi oexa uka 'rã imondovy nhemboxi,  
ye'ë typyvea ha'e javi rupi peve omoexakã va'erã.
- <sup>31</sup> Ha'e nunga py oguereko 'rã yvy regua ikuai va'e,  
ha'e vy ha'e kuery pe ome'ë 'rã tembi'u oata aguã rami e'ŷ.
- <sup>32</sup> Opo py overa va'e ojopy reta vy  
omombo 'rã ngovaigua kuery re.
- <sup>33</sup> Ára vai revovo voi oikuua uka 'rã heko,  
mba'eta nda'evei etea oexa uka 'rã ha'eve'ŷa rami joguereko va'e rovai.

### 37

- <sup>1</sup>— Ha'e nunga re xema'endu'a vy xekuraxõ oryryi rei,  
opo-opo guive, oñaty gui oë ta merami.
- <sup>2</sup> Pendu pota ke Nhanderuete guigua yapu re,  
ijuru gui hevovo va'e onhendu va'e re.
- <sup>3</sup> Yva guy ha'e javi rupi gui omondouka 'rã  
ojea gui overa va'e reve yvy apy peve.
- <sup>4</sup> Ha'e va'e rire ijayvu atã nhendu 'rã,  
yvatevea py onhemboxi 'rã hyapu reve.  
Ha'e ndopoi e'ŷi 'rã overa va'e ijayvua onhendua rupi.
- <sup>5</sup> Nhanderuete ijayvu reve hyapu 'rã nhomondyipaa rupi.  
Ojapo 'rã mba'emo tuvixa va'e, jaikuua e'ŷ va'e.
- <sup>6</sup> Mba'eta yro'y apĩ pe aipoe'i 'rã: "He'a ke yvy áry",  
ha'e gui oky ha'e oky xapy'a-py'a va'e pe ma "Penembaraeteve ke", he'i 'rã.
- <sup>7</sup> Ha'e rami vy ojapo 'rã avakue ha'e javi po oĩ rive aguã rami,  
hembiapo re ju ha'e kuery oikuua pota aguã.
- <sup>8</sup> Vixo ikuai va'e voi oike 'rã onhemiatiy py,  
ha'e vy okua py 'rã ikuai.

- <sup>9</sup> Yvytu jere oẽ 'rã ouvy opy ja'o oĩaty gui,  
ha'e rã yvytu ro'y ma kuaray yke katy gui 'rã oipeju.
- <sup>10</sup> Nhanderuete oipejua py rive ho'a 'rã yro'y,  
ha'e ramo yupa itui va'e hatãmba 'rã oupy.
- <sup>11</sup> Arai ana overa va'e oua ma  
omonyẽ 'rã okyrã.
- <sup>12</sup> Ha'e ramo arai ikuai va'e omondouka rã  
oaĩmba 'rã oje'oivy opa rupi,  
yvy jave áry rupi, ijayvuague ojapo aguã.
- <sup>13</sup> Ha'e nunga ha'e javi ombou 'rã yvy regua kuery re oma'ẽ vy,  
omo'arandu e'ŷ vy omboaxy aguã.
- <sup>14</sup> — Jó, ejapyxaka pota na pova'e re,  
Nhanderuete rembiapo iporã va'e re reikuua pota aguã.
- <sup>15</sup> Ndee reikuua teve marã rami pa Nhanderuete ojapo  
overa va'e arai gui ojekuaa aguã rami?
- <sup>16</sup> Omombe'ua teve ndevy arai ikuai va'e marã rami pa yvate rupi ova-ova,  
e'ŷ vy Oikuaapa va'e rembiapo porãgue ha'e javi?
- <sup>17</sup> — Mava'e tu ojapo ndeaō raku-a rendu aguã rami  
kuaray puku-a katy gui yvytu ou rã yvy jave rupi okyririmba rei oiny jave?
- <sup>18</sup> Hexeve voi teve ndee yva reipyo kuaa avi yvate rupi,  
jajexaa mba'emo ryku guigua rami overa rei va'e?
- <sup>19</sup> Orembo'e ha'vy ore voi ixupe oreayvu kuaa avi aguã.  
Mba'eta ore ma pytã rupi orekuai va'e vy mba'eve noromombe'u kuaai ixupe.
- <sup>20</sup> Amongue nda'u ixupe omombe'u 'rã xeayvuague?  
Ha'e rami avakue ikuai va'e onhemomba ukaxe vy ma 'rã.
- <sup>21</sup> — Ma'ẽ, avakue ma yva re kuaray rexakãa re noma'ẽ mbaraetei 'rã,  
yvytu oipejua rupi yva oiky'a'opa ma jave.
- <sup>22</sup> Kuaray apu'a'ia katy gui hexakã 'rã ouvy iju va'e,  
Nhanderuete yvýry rupi ojekuaa 'rã hexakãa nhomondyipaarã.
- <sup>23</sup> Ipo'akapa va'e ma ndajaeko upityi 'rã.  
Ha'e ma opo'akaa py yvate ete va'e,  
ha'evea rami meme joguerekva'e guive, opa mba'e py heko porã va'e vy.
- <sup>24</sup> Ha'e rami rã henonde avakue ojererokyje 'rã.  
Ha'e ma onhemo'arandu rei va'e kuery re noma'ẽi 'rã – he'i.

## 38

### Jó ndoikuuaii va'e re SENHOR oporanduague

- <sup>1</sup> Ha'e va'e rire ma SENHOR peteĩ yvytu jere mbyte gui ijayvu vy ombovai Jó. Ha'e vy aipoe'i:
- <sup>2</sup> — Mava'e tu ndee mba'eve reikuua e'ŷ vy  
xepy'aa ha'eve'ŷa rami remombe'u va'e?
- <sup>3</sup> Eiko katu ha'vy ava rami,  
mba'eta xee aporandu 'rã ndevy.  
Ha'e rã ndee ma xembovai 'rã.
- <sup>4</sup> — Mamo tu reĩ raka'e yvy ytarã anhono jave py?  
Ndeayvu ke, anhetê ri ne'arandu va'e vy.
- <sup>5</sup> Mava'e tu oa'ã raka'e yvy, xapy'a rei reikuua rã?  
Mava'e tu ixã omoatã raka'e hi'áry rupi?
- <sup>6</sup> Mba'e nunga áry tu ijyta oĩ?  
Ha'e mava'e tu omoĩ raka'e ita jypy guarã?

- 7 Ha'e va'e jave py ma jaxy-tata ko'ẽ rai'i javegua ov'y'a ete reve oporaei okuapy,  
ha'e Nhanderuete ra'y kuery ikuai va'e oguerovy'a okuapy.
- 8 – Ha'e mava'e tu okẽ py rami ojoko raka'e ye'ẽ  
iguy gui ovu ouvy jave?
- 9 Mba'eta xee ae arai amoĩ ijaorã,  
ha'e pytū py anhovã ajukue py rami.
- 10 Xee ae amoĩ raka'e yy apyrã,  
okẽ py rami ajoko vy.
- 11 Ha'e vy aipoa'e: "Apy peve'i 'rã reju, ndereaxavei 'rã.  
Apy ae 'rã ndeguigua yai onhemboyvate reve ojeapi vy oxopa", ha'e va'ekue.
- 12 – Ndee teve reikoa ára guive ndeayvu raka'e ko'ẽ rai ouvya va'e pe,  
ko'ẽ va'e pe reikuua uka vy hexakã aguã,
- 13 yvy apy re ovaẽ aguã,  
heko vai va'e kuery omondyi heravy vy?
- 14 Yvy ojekuaa 'rã yapo omou'ũ mbyre  
ha'e ao ixorimba va'e rami.
- 15 Heko vai va'e kuery gui amokanhy 'rã "Nhandevyguia hexakã va'e" he'ia va'e,\*  
ha'e amopẽ 'rã ijyva jojuka aguã oupi va'e.
- 16 – Ndee teve revaẽ ma ye'ẽ ryapy py,  
e'ŷ vy reguata ma iguýry typyvea rupi?
- 17 Ndevy pe teve oexa ukaa omanogue ikuia rokẽ?  
Ndee rexma teve hokẽ pytū anaa py oĩ va'e?
- 18 Reikuua teve marã rami ete pa yvy ipya?  
Ndeayvu ke, xapy'a rei reikuua ri vy.
- 19 – Mamo rupi tu oĩ tape hendy va'e ro katy oo va'e?  
Pytū oĩaty voi mamo tu oĩ?
- 20 Erojevy ha'vy hekoa katy,  
hoo via reikuua ri vy.
- 21 Ndee nhi'ã reikuua 'rã, ha'e va'e jave reiko ae ma rire,  
ha'e reikoa ára mbovy rei e'ŷ!
- 22 – Ndee teve revaẽ ma yro'y apĩ amoĩ porãaty py,  
ha'e rexma teve amandau amoĩ porãaty?
- 23 Mba'eta ha'e va'e ma xee amboyu imoiny anhombojexavai aguã,  
joguero'a ha'e joe opu'ãa jave guarã.
- 24 – Mamo rupi tu oĩ tape hendy va'e oẽ ov'y aguã katy,  
ha'e yvytu kuaray oua katy gui yvy áry rupi oipeju ouvya katy?
- 25 Mava'e tu oipe'a 'rã oky xapy'a-py'a ou aguã,  
ha'e tape hyapu ha'e overa va'e ou aguã?
- 26 Mba'eta ambo'oky 'rã yvy áry  
avave rei oĩ e'ŷa py, tekao e'ŷa rupi ae,
- 27 amoakŷ aguã yvy tekao e'ŷa ipirupa va'e,  
ajapo aguã jai roky yvate ov'y aguã rami.
- 28 Oky nda'u tuu va'e oiko?  
Mava'e tu ojapo 'rã yxapy otyky aguã rami?
- 29 Magui nda'u oiko yro'y hatã va'e?  
Ha'e mava'e tu omoingo 'rã yro'y yva gui ho'a va'e?
- 30 Mba'eta yy hatã 'rã ita rami,  
yy typy rei teĩ hi'áry rupi ma hatãmba 'rã.

\* 38:15 Heko vai va'e kuery pegua hendy va'e ma pytū ae, pytū rupigua ae ikuai ramo (24.16-17).

- 31 — Tyrã ndee teve rejokua kuaa Eixu jaxy-tata,  
e'ŷ vy rejora kuaa Hendy guaxu va'e ojokuaague?
- 32 Ndee teve reru kuaa 'rã jaxy-tata ijaty va'e,  
e'ŷ vy reraa 'rã teve henoiny Ursu ta'y kuery reve?
- 33 Reikuua teve yva re ikuai va'e rekorã oeja pyre?  
Reikuua teve marã rami pa yvy re ha'e kuery ipo'akaa?
- 34 — Tyrã ndee teve renhendu kuaa 'rã arai ikuiaia peve,  
oky vaipa aguã yy ndeao'i peve?
- 35 Tyrã overa va'e pe ndeayvu kuaa 'rã teve,  
nembovai vy ha'e kuery "Apy ma roĩ" he'i okuapy aguã?
- 36 Mava'e tu omo'i 'arandu arai ikuai va'e áry?  
Ha'e mava'e tu omo'arandu jaxy-tata ova aguã re?
- 37 Mava'e nda'u o'arandu rupi oipapa kuaa 'rã arai ikuai va'e?  
Ha'e rami e'ŷ vy mava'e nda'u onhoẽ kuaa 'rã yy yva re yryru ikuai va'e gui,
- 38 yvy ku'i oĩ va'e ojeapo aguã oja va'e,  
ha'e yvy hakytã joe oje'apa aguã?
- 39 — Ndee teve rejuka 'rã guary kunha ho'u va'erã?  
Ha'e guary ra'y kue'iry okaruxe rã remoevyatã kuaa 'rã teve
- 40 okua rupi ikuai javé,  
e'ŷ vy onhemiaty gui oma'ẽ mbegue javé?
- 41 Mava'e tu uruvu kuery pe ojou uka 'rã ho'u va'erã,  
ta'y kue'iry Nguuete pe ojapukai reve  
ho'u va'erã recaa rupi ikuai ramo?

## 39

- 1 — Ndee teve reikuua kavara yvy'ãa rupigua ta'ya ára?  
Repena kuaa teve guaxu ta'y'i ta javé?
- 2 Reipapa kuaa teve mbovy jaxy peve pa ha'e kuery ipuru'aa?  
Reikuua teve ha'e kuery ta'y'i aguã ára?
- 3 Ha'e kuery ma ta'y'i aguã ojero'a 'rã,  
ha'e rami vy ojegui omoẽ 'rã haxy va'ekue.
- 4 Ta'y kuery ma imbaraetepa 'rã okuapy,  
nhuũndy rupi ae 'rã tuvixapa.  
Oopa vy ndojevyvei 'rã oxy kuerya py.
- 5 — Mava'e tu opoi 'rã mburika'i ka'aguy regua?  
Ha'e mava'e tu ojora kuaa 'rã mburika onha ratã va'e?
- 6 Ha'e va'e rekoarã ma tekao e'ŷa ame'ẽ,  
yvy re'ẽroa rive ame'ẽ ikuai aguã.
- 7 Ha'e kuery ojojai 'rã tetã revovo,  
noendui 'rã guive mymba reraa ojapuka-pukaia.
- 8 Yvy'ã ikuai va'e rupi ae okaruaty oĩ,  
mba'eta hogue pyau va'e recaa rupi ikuai.
- 9 — Toro ka'aguy rupigua teve ombo'eapoxe 'rã ndevy?  
Ha'e va'e teve pytû oaxa 'rã nerymba okaruaty py?
- 10 Remoxã kuaa 'rã teve yvy karaña re?  
Ha'e va'e nda'u nderakykue rupi oikaraĩ 'rã heravy yvy?
- 11 Hexe teve ndee rejerovia 'rã imbaraete vaipa va'e ramo?  
Ixupe teve reja 'rã remba'eapoa rupi opena aguã?
- 12 Hexe rejerovia teve renhotõ va'ekue nderopy ogueru aguã,  
e'ŷ vy mba'emo remoa'yĩ aguã py?

- 13 — Guyra-nhandu ma opepo ombota-mbota 'rã ov'y'a reve.  
 Ha'e rami teĩ guague ha'e opepo nda'u joayvu aguã ri oguereko?
- 14 Any, ngupi'a oeja 'rã ov'y py,  
 ov'y ku'i py rive haku aguã py.
- 15 Mba'eta hexarai 'rã amongue opyrõ vy ombovopa va'erãa gui,  
 vixo nhuündy rupi ikuai va'e opyrõmba va'erãa gui guive.
- 16 Nopena porãi 'rã gua'y kuery re, gua'y kuery e'ý re rami.  
 Ndoikuua potai 'rã gua'y'i okanhymba teĩ,
- 17 hi'arandurã Tuuete nome'ëi rire,  
 nome'ëi mba'emo re oikuua pota aguã.
- 18 Ha'e rami teĩ opo reve onha ov'y aguã opu'ã ma vy  
 ojojai 'rã heravy kavaju ha'e hi'árygua.
- 19 — Ha'e gui ndee teve kavaju pe reme'ë 'rã imbaraeterã,  
 e'ý vy ijaju'y áry rupi remoï 'rã haguerã?
- 20 Rejapo kuaa teve tuku rami opo ov'y aguã rami?  
 Nhomondyi 'rã oapyíguia gui ipytuë raku rei reve onhendu vy.
- 21 Ojo'o 'rã heravy yvyugua ombaraetea ae oguero'yaa rupi.  
 Ha'e vy ojepe'a 'rã ov'y tembiporu reveguia kuery reve joguero'a aguã.
- 22 Ojojai 'rã nhomongyjea kuery onhemondyi e'ý re.  
 Ha'e rami vy guakykue katy ndojevyi 'rã kyxe reveguia gui voi.
- 23 O'áry hu'y ryru ogueraa va'e omoparã 'rã heravy,  
 hu'y guaxu ha'e hu'y'i hexakã va'e reve.
- 24 Ipoxy ha'e ivai reve omou'ümba 'rã heravy tape,  
 mimby guaxu nhe'ë oendu ma vy ndojejokoi 'rã.
- 25 Mimby guaxu monhe'ëa ramo "Tenonde katy!" he'i 'rã.  
 Joe opu'ãa gui mombyry teri oo reve oetü 'rã,  
 oendu 'rã huvixa kuery ojapukai atãa ha'e tembiporu revovo.
- 26 — Ndee ne'arandua rupi teve taguato oveve,  
 kuaray apu'a'ia katy opepo oipyo reve?
- 27 Ndeayvua rupi teve taguato guaxu oo 'rã yvate,  
 ha'e yvatea py guaityrã ojapo?
- 28 Ha'e va'e ma itaova yvate va'e re oï 'rã guaityrã ojapo aguã py,  
 itaova yvate va'e apyte áry, mba'eve rei nomoangekoia py.
- 29 Ha'e py oïa gui oexa pota 'rã guembiarã.  
 Mombyry guive 'rã oexa.
- 30 Ha'e va'e rire ta'y kuery oipyte 'rã tuguy.  
 Mamo rã rei te'ögue ituia py ha'e voi ovaë 'rã — he'i.

## 40

- <sup>1</sup> Jó pe SENHOR aipoe'ive tema:  
<sup>2</sup> — Ha'e gui ijayvu poyi va'e nda'u nhombovake ta Ipo'akapa va'e reve?  
 Nguete rovai ijayvu va'ekue tombovai aÿ — he'i.

### *Jó onhemo'yvyi'ia rupi ombovaiague*

- <sup>3</sup> Ha'e ramo Jó ombovai SENHOR. Ha'e vy aipoe'i:  
<sup>4</sup> — Xevy pe ma nda'evei. Mba'exa tu rombovai ta?  
 Ajoko 'rã xejuru xepo py.  
<sup>5</sup> Peteïgue xeayvu rire teĩ nambovai kuaavei ma.  
 Mokoïgue katu va'eri ndaxeayvu reguavei ma — he'i.

*Nhanderuete po'akaa hembiapo oexa uka va'e re ijayvuague*

- <sup>6</sup> Ha'e ramo yvytu jere mbyte gui SENHOR ombovai ju. Ha'e vy aipoe'ive Jó pe:  
<sup>7</sup> — Eiko katu ha'vy ava rami.  
     Xee aporandu 'rā ndevey, ha'e rā ndee xembovai 'rā.
- <sup>8</sup> Ndee ta'vy remboyke rive 'rā xereko porāa?  
     Xemboeko vai 'rā teve renhemboeko porāvexe vy?
- <sup>9</sup> Tyrā ndee teve Nderuete rami ndejyva mbaraete va'e?  
     Ndee voi ndeayvu ryapu rei 'rā teve xee xeayvua rami?
- <sup>10</sup> — Ndejee emoī ha'vy ndeyvatea ha'e ndetuvixaa.  
     Enhemonde ndepo'akaa ha'e nerexakāa py.
- <sup>11</sup> Xevy pe exa uka ndepoxya.  
     Exa pota onhemboyvate rei va'e kuery re, ha'e eitypa.
- <sup>12</sup> Exa pota onhemboyvate rei va'e ha'e javi re, ha'e emo'yvyī'imba.  
     Epyrōmba vyvoi heko vai va'e kuery ikuaria re.
- <sup>13</sup> Ejatypa imbokuapy yvy ku'i py.  
     Ejao'ipa hova ituia py.
- <sup>14</sup> Ha'e rami rā mae 'rā xeayvu  
     reiporu kuaa regua py ae ndepo'akaa rami.
- <sup>15</sup> — Eikuua pota aŷ hipopótamo ndereve amoingo avi va'ekue re.  
     Ha'e va'e ma vaka rami nhuū ho'u oikovy va'e.
- <sup>16</sup> Imbaraetea ma hye re oĩ,  
     ipo'akaa ma hyepy ro'o re ae.
- <sup>17</sup> Huguai ma yary rakā rami hatā va'e.  
     Hi'u rajy ma oipopē mbyre rami oĩ.
- <sup>18</sup> Ikāgue ma overa va'e aygue rami imbaraete va'e.  
     Hetyma ma ferro aygue ramigua.
- <sup>19</sup> Ha'e va'e ma Nhanderuete remimoingo regua omboetevepy.  
     Imoingoare ae ome'ě kyxe hembiporurā.
- <sup>20</sup> Anhetē, yvy'ā ikuai va'e áry rupi oĩ nhuū ho'u va'erā,  
     vixo nhuūndy regua ikuaiaty rupi.
- <sup>21</sup> Onheno 'rā yvoty ikuai va'e guy rupi,  
     takua'i ha'e yapo oĩ va'e rupi.
- <sup>22</sup> Ha'e ramo yvoty ae omo'ā 'rā inony.  
     Yy rembe rupi yvyra ikuai va'e mbyte py itui.
- <sup>23</sup> Yakā tyguaxu teī ndojapurai 'rā.  
     Ijuru peve ete Jordāo yakā typy teī oiko porā rei 'rā.
- <sup>24</sup> Ha'e rā oma'ě ho'amy ramo amongue nda'u ojopy kuaa 'rā?  
     Ha'eve 'rā nda'u ixī rupi omoxāa aguā?

## 41

- <sup>1</sup> — Ndee renoē 'rā teve jakare pytā pinda py rive,  
     ha'e'ŷ vy inhapekū rejokua 'rā ixā py?
- <sup>2</sup> Jai 'ygue remboaxa 'rā teve inhapyīgua rupi?  
     Ha'e rami e'ŷ vy remombu 'rā teve haīnhykā jepo'oia py?
- <sup>3</sup> Ndevy pe ha'e ojerure 'rā teve mba'emo re?  
     Ijayvu porā'i 'rā teve ndereve?
- <sup>4</sup> Ndereve ojapo 'rā teve peteī rami pendekuai aguā?  
     Ha'eve 'rā teve reraa aguā nerembiguai raka'e rā peve guarā?
- <sup>5</sup> Rembojaru 'rā teve guyra'i rami?  
     Ha'e rami e'ŷ vy remoxā 'rā teve heruvy nderajy kuery rymbarā?
- <sup>6</sup> Neirū kuery teve jogueroayvu 'rā hepyrā oikuaa aguā?

- Ha'e rami e'ŷ vy mba'emo vendea kuery teve omboja'o 'rā ho'okue?
- <sup>7</sup> Pira kutua py teve reikutupa 'rā ipire,  
e'ŷ vy inhakā rupi renhyvō 'rā pira nhylvōa py?
- <sup>8</sup> Hexe repoko ri vy nema'endu'a riae 'rā nderero'aague re,  
ha'e rami vy neremoangekovei ma 'rā.
- <sup>9</sup> Ma'ě, pembo'a aguā pearō ri vy pejekore 'rā.  
Hexe avakue oma'ě vy rive 'rā ojeity uka.
- <sup>10</sup> Avakue ipy'a guaxukueve teī ndoikoi omyī va'erā.  
Ha'e rami rā xerenonde katuve ma mava'e tu ha'vy onhemboyvate aguā ha'eve va'e?
- <sup>11</sup> Mava'e tu ha'e ranhe xevy ome'ě mba'emo, xee ju amboekovia aguā?  
Mba'eta yva guy re ikuai va'e ma xemba'e meme.\*
- <sup>12</sup> — Xeayvuve ta jakare reko re,  
imbaraete etea ha'e iporāa re.
- <sup>13</sup> Mava'e tu oipiro 'rā ikupe rupi,  
e'ŷ vy oikutu 'rā ipekue jo'a va'e pa'ū rupi?
- <sup>14</sup> Mava'e tu oipe'a 'rā ijuru?  
Mba'eta haī re onhemboja va'e oendu 'rā ngyje.
- <sup>15</sup> Ipekue hyxy ovya re ma ojejou porā,  
peteī-teī joe oja 'rā omboja pyre rami.
- <sup>16</sup> Peteī-teī joe ovaē oiny  
ipa'ū rupi neī vvytu oike aguā rami e'ŷ.
- <sup>17</sup> Peteī-teī joe ovvy vy  
oja ratā oiny oja'o aguā rami e'ŷ.
- <sup>18</sup> Ipytuē nhavō ojekuaa 'rā hendy va'e,  
ha'e rā hexa ma ko'ēa rami hexakā va'e.
- <sup>19</sup> Ijuru gui ma oē 'rā hendy va'e,  
ixugui tata raviju opo 'rā.
- <sup>20</sup> Inhapyīguia gui ma oē 'rā hataxī,  
oja opupu va'e gui, e'ŷ vy jai rogue okai va'e gui rami.
- <sup>21</sup> Ipytuēa ma omoendy 'rā tapyīū.  
Ijuru gui ma oē 'rā tataendy vuku.
- <sup>22</sup> Ijaju'y re ma imbaraetea oī.  
Ha'e henonde gui opoa 'rā ovvy onhemondyipa reia rupi.
- <sup>23</sup> Ho'o regua ma oje'a ratā 'rā.  
Hexe oī atā 'rā, oi rive aguā rami e'ŷ.
- <sup>24</sup> Ipy'a ma ita rami hatā,  
ita mba'emo mongu'ia regua rami.
- <sup>25</sup> Ha'e opu'ā ramo ipy'a guaxukueve voi onhemondyi 'rā okuapy.  
Ha'e ou xapy'a ramo ndaekorāvei va'e rami ikuai.
- <sup>26</sup> Xapy'a rei kyxē py omboguaia teī mba'eve ndojapoi 'rā,  
neī hu'y guaxu py, hu'y'i e'ŷ vy hu'y ete py teī.
- <sup>27</sup> Ferro guigua ha'e oikuuaa rā jai rogue pirukue rami rive,  
ha'e overa va'e guigua ma yvyra ru'ūgue rami oikuuaa.
- <sup>28</sup> Hu'y gui ma ha'e nonhai 'rā.  
Ita momboa py omomboa rā ha'e oikuuaa kapi'i rami rive.
- <sup>29</sup> Yvyra aygue py ojapia rā jai 'ygue rami rive 'rā oendu,  
ojojai 'rā hu'y guaxu revegua.
- <sup>30</sup> Hye guy rupi oī ipekue hakua va'e.  
Yapo áry rupi otyryryague ma mba'emo ra'yī ykya rami ipore.

\* [41:11](#) Romanos 11.35

- 31 Yy guy katy oike vy ojapo 'rã oja opupu va'e yjuipaa rami,  
ye'ẽ eteve voi mba'emo rykue ombojyaty rami ombokururu 'rã.
- 32 Guakykue oeja 'rã hape ov y va'e overa aguã rami.  
Yy ha'e oĩa ma hi'a xiĩmba va'e rami yjuipa 'rã.
- 33 Yvy re jipoi 'rã ha'e ramigua,  
mba'eta okyjea oendu va'erã e'ŷ amoingo.
- 34 Yvatekueve ha'e javi re oma'ẽ vy nombovarei 'rã,  
vixo yvatekueve ikuai va'e ruvixave oiko vy – he'i.

## 42

### *Jó onhemombe'uague*

- 1 Ha'e ramo Jó ombovai vy aipoe'i SENHOR pe:  
2 – Aŷ aikuua porã ma opa mba'e rejapo kuaa va'ea,  
ha'e renhembopy'aague peteĩve ndoiko e'ŷi 'rãa.
- 3 Ange xevy reporandu vy “Mava'e tu ndee mba'eve reikuaa e'ŷ vy  
xepy'aa ha'eve'ŷa rami remombe'u va'e?” 're va'ekue.  
Anhetẽ ri aikuua vy e'ŷ xeayvu va'ekue,  
mba'emo xevy pe iporã vaipa ha'e aikuua va'erã e'ŷ re anho.
- 4 Aipo're avi: “Ejapyxaka ke xeayvu re, ha'e rã xee xeayvu 'rã.  
Xee aporandu 'rã ndevy, ha'e rã ndee xembovai 'rã”, 're va'ekue.
- 5 Ha'e rami avi xee roikuaa va'ekue omombe'ua rã aendu vy rive,  
ha'e rã aŷ ma xerexa py ae roexa ma.
- 6 Ha'e rami vy aŷ anhereroangeko vy anhemboaxy,  
yvy ku'i ha'e tanhimbu áry aguapy ainy reve – he'i.

### *Jó irũ kuery mboapyve pe Nhanderuete ijayvu eteague*

- 7 Ha'e rami Jó pe SENHOR ijayvupa ma rire aipoe'i avi Temã pygua Elifaz pe:  
– Xepoxya hendy ma nderovai, neirũ kuery mokoĩve rovai guive. Mba'eta anhetẽ rupi  
e'ŷ peẽ kuery xemombe'u, xerembiguai Jó rami e'ŷ.
- 8 Ha'e nunga rupi peraa sete vaka ra'y ha'e sete vexa'i ava, ha'e tapeo xerembiguai Jó-  
a py. Ha'e vy peapy reve peme'ẽ 'rã pejejavyague re. Ha'e gui xerembiguai Jó ojerure  
'rã pendere, mba'eta ha'e ojerurea ma aendu 'rã, pene'arandua rupi e'ŷ peikoague re  
rombopaga e'ŷ aguã. Mba'eta anhetẽ rupi e'ŷ peẽ kuery xemombe'u, xerembiguai Jó  
rami e'ŷ – he'i.
- 9 Ha'e ramo Temã pygua Elifaz, Sua pygua Bildade ha'e Naamá pygua Zofar oje'oi vy  
ojapo okuapy SENHOR ijayvuague. Ha'e ramo SENHOR oendu Jó ojerurea.

### *Nhanderuete Jó omoingo porã jevyague*

- 10 Ha'e gui Jó oirũ kuery re ojerure ma rire SENHOR omoingo porã ju. Ha'e vy mba'emo  
oguerekove ju'ekue gui mokoĩguea ju ome'ẽ retave ixupe.
- 11 Ha'e ramo ha'e oĩa py ou tyvy ha'e heindy kuery, ymave rupi oexa va'ety ha'e javi  
reve. Hexeve okaru okuapy hoo py. Omboaxy vy ombopy'a porã okuapy hexe SENHOR  
mba'emo vai ombouague ha'e javi gui. Ixupe peteĩ-teĩ ome'ẽ peráta ha'e kuã regua ouro  
guigua.
- 12 Ha'e rami py SENHOR omoingo porãve Jó jypy guare gui. Ha'e ramo vexa'i kuery  
oguerekove ju catorze mil, seis mil camelô, mil toro meme ha'e mil mburika.
- 13 Ta'y jevy avi sete ta'y ha'e mboapy tajy kuery re.
- 14 Jypyguia guajy omboery Jemima, amboae ma Quezia, ha'e rã mboapya ma Quéren-  
Hapuque.
- 15 Ijyvy ha'e javi rupi kunhague ndoikoi Jó rajy kuery rami iporã va'e. Ha'e ramo ha'e  
kuery pe tuu ome'ẽ mba'emo ikyvy kuery pe ome'ẽa ramigua ae.

<sup>16</sup> Ha'e va'e rire ma cento e quarenta ma'et̄y re ju Jó oiko. Ha'e rami vy oexa gua'y kuery, gua'y ra'y ha'e guajy memby kuery guive, irundykue ikuiaia peve.

<sup>17</sup> Ha'e rire Jó omano, tuja'i ha'e hi'ára mbovy rei e'ý ma vy.

## Salmos Israel kuery oporaeiaty

## Salmos Israel kuery oporaeiaty

Salmos ma yma gui oiporua Nhanderuete pe oporaeia rupi. Mbyte rupi peve huvixa Davi ojapo va'ekue, pova'e guive:

“Senhor ma vexa'i mongarua rami xere opena va'e oiko.

Ha'e ramo xevy pe ndoatai 'rā mba'eve rei” (23.1).

Davi omoī avi levita kuery Nhanderuete ombojeroviaa rupi oporai va'erā. Ha'e kuery va'e regua ojapove ju salmos. Três mil ma'etŷ ma ojapo, salmos ha'e javi rai'i ojapopaaague. Salmo 80 ma ymave ete, Moisés ojapo va'ekue.

Jypy Israel kuery ranhe oiporu raka'e salmos Nhanderuete pe oporaia rupi. Jesus ha'e hemimbo'e kuery voi oiporu raka'e. Ha'e gui aŷ ma yvy jave rupi oiporua, nhande kuery guive.

Salmos ma joo ramigua e'ŷ-e'ŷ ikuai. Nhanderuete oguerovy'aa oĩ, ixupe onhepytyvõ ukaa, ixupe gueko vai oeja vy omombe'ua, ixupe mba'emo vai oiko va'e re oporandua, ixupe joe ojerurea, ixupe ngovaigua kuery gui ojepy ukaa, ha'e oĩ avi ixuguigua re nhombo'ea. Nhanderuete pe oporaia meme. Oĩ avi salmos Jesus rekora re ijayvu ma voiaque, Novo Testamento py ma omombe'u porãave.

“Yvy jave re pendekuai va'e,

peroporaei Senhor pevy'aa rupi!

Pevy'aa rupi Senhor pe ete peiko.

Henonde pejexa uka pejuvy peporaei reve” (100.1-2).

“Peporaei Senhor pe!

Ha'eve ha'e iporã ete Nhanderuete pe japoraeia.

Jaroporaeia ma iporã ixupe voi” (147.1).

### 1

*Heko porã ha'e heko vai va'e ikuaria re ijayvua*

<sup>1</sup> Ovy'a ete 'rā ava heko vai va'e kuery nhomongetaa rami ndoikoi,  
ojejavypa rei va'e ikuaria rupi ndopytai,  
neĩ nhombojaru rei va'e kuerya py voi oguapy e'ŷ va'e.

<sup>2</sup> Ha'e rami 'rāgue py SENHOR ayvu oguerovy'a vy  
ara py ha'e pyávy ijayvua re anho oikuua pota oikovy va'e.

<sup>3</sup> Ha'e va'e ma yvyra yakā yvýry onhotŷ mbyre rami oiko,  
hi'a aguã ára py porã hi'a va'e rami,  
neĩ hogue ma ipiru rive'ŷ va'e rami.

Ha'e ma ojapo va'e ha'e javi oiko porã 'rā.\*

<sup>4</sup> Ha'e rā heko vai va'e ma ha'e rami e'ŷ ikuai.  
Ha'e kuery ma mba'emo pire yvytu opa rupi ogueraa va'e rami 'rā okanhy.

<sup>5</sup> Ha'e nunga rupi nhomboayvua ára heko vai va'e ndoo jepei 'rā,  
ojejavypa rei va'e ndopytai 'rā heko porã va'e ikuaria py.

<sup>6</sup> Mba'eta SENHOR oma'ẽ heko porã va'e oikoa re.  
Ha'e rā heko vai va'e oikoa ma okanhy 'rā.

### 2

*Huvixarã Nhanderuete omoī va'ekue po'akaa re ijayvua*

<sup>1</sup> Mba'e re tu yvy regua kuery ipoxypa ri?

---

\* **1:3** Jeremias 17.5-8

- Mba'e re tu yvy re ikuai va'e onhembopy'a okuapy ovare e'ŷ va'e re?
- <sup>2</sup> MBA'eta yvy regua huvixa kuery opu'ã okuapy,  
    huvixa ikuai va'e SENHOR rovai jogueroayvu okuapy,  
    huvixarã SENHOR omoĩ va'ekue rovai guive.\*  
    Ha'e vy aipoe'i:
- <sup>3</sup> "Nhamondo 'rã ha'e kuery nhanemoxãague,  
    jajora 'rã nhandepokuaague" he'i okuapy.
- <sup>4</sup> Ha'e rã yva re oguapy oiny va'e ma opuka 'rã,  
    SENHOR ojojai 'rã ha'e kuery.
- <sup>5</sup> Ha'e rami vy ipoxya rupi ijayvu ete 'rã ha'e kuery pe.  
    Opoxya oexa uka vy omondyipa 'rã.  
    Ha'e vy aipoe'i 'rã:
- <sup>6</sup> "Xee ma xejeupeguia huvixarã amoĩ ae ma  
    yvyty iky'a e'ŷ va'e Sião áry."
- <sup>7</sup> Ha'e rã ha'e va'e ju aipoe'i: "Xee amombe'u 'rã SENHOR ijayvuague.  
    Ha'e aipoe'i xevy: 'Ndee ma xera'y.  
    Kova'e ára romoĩ.\*
- <sup>8</sup> Ejerure ke xevy,  
    ha'e ramo ndevy guarã xee ame'ẽ 'rã amboae regua kuery,  
    yvy apy re peve ndepo'aka aguã.
- <sup>9</sup> Popygua ferro guigua py remopẽ 'rã,  
    hyru yapo guigua ombovopaa rami 'rã remopẽmba', he'i va'ekue xevy."\*
- <sup>10</sup> Ha'e nunga rupi huvixa kuery, penheangu ke aŷ,  
    yvy regua huvixa kuery, pendu ke penemongeta rã.
- <sup>11</sup> SENHOR pe ete ke pendekuai pejererokyjea rupi,  
    peporaei ixupe peryryipa reve.
- <sup>12</sup> Peayvua rupi pemboete Ta'y ipoxy e'ŷ aguã,  
    peikoa gui pekanhy e'ŷ aguã.  
    Ha'e rami e'ŷ rã are e'ŷ re oexa uka 'rã opoxya.  
Ovy'a ete 'rã hexe onhemi va'e kuery ha'e javi.

### *Ojexavai teĩ Nhanderuete re ojeroviaa re ijayvua*

Mboraearã Davi gua'y Absalão gui ojava jave py ombopara va'ekue (2 Samuel 15.1-30).

## 3

- <sup>1</sup> SENHOR, heta pojava va'e ty'y xerovaigua kuery ikuai!  
    Aipapapa aguã rami e'ŷ xere opu'ã va'e.
- <sup>2</sup> Heta ete xevy aipoe'i okuapy va'e:  
    "Nhanderuete tu ndogueraa jepei 'rã rima."
- <sup>3</sup> Ha'e rami teĩ SENHOR, ndee ma mba'emo vai jokoa reiko xevy.  
    Ndee ae roguerovy'a, ha'e rã xeakã remopu'ã kuerei 'rã.
- <sup>4</sup> Xeayvu atã reve ajapukai SENHOR pe.  
    Ha'e rã yvyty iky'a e'ŷ va'e áry gui xembovai.
- <sup>5</sup> Anheno vyve ake vyvoi 'rã,  
    avy ju 'rã guive, xere SENHOR opena ramo.
- <sup>6</sup> Xee ma ndakyjei 'rã mbovy e'ŷ  
    jovaive-ive re xere opu'ã va'e gui.
- <sup>7</sup> SENHOR, epu'ã ke.

---

\* **2:2** Atos 4.23-28    \* **2:7** Atos 13.33; Hebreus 1.5, 5.5    \* **2:9** Apy Ta'y omombe'u Nguu ixupe aipoe'iague (Atos 13.33; Hebreus 1.5, 5.5; Apocalipse 2.26-27, 12.5, 19.11-16).

Xerepy ke, Xeruete.  
 Xerovaigua kuery ha'e javi reunga 'rã hañhykã,  
 remopẽmba 'rã heko vai va'e kuery raĩ.  
<sup>8</sup> Mba'eta SENHOR gui ou 'rã jaa jepe aguã.  
 Tove ndevygua kuery re toĩ remoingo porãa.

## 4

*Oiko axy teĩ Nhanderuete re ojeroviaa re ijayvua*

Jogueroporaei va'e pe ixã va'e py ombojoguy reve guarã Davi ombopara va'ekue.

<sup>1</sup> Xeruete xemboeko porãa, xembovai ke ajapukai ramo.

Xee ajexavai ramo xemoingo porã jevy va'ekue.

Xemboaxy jevy ke, ha'e endu anhembo'ea.

<sup>2</sup> Peẽ avakue, raka'e peve 'rã tu aximba aguã rami xeapo pekuapy xemboete 'rãgue py?  
 Raka'e peve 'rã ovare e'ŷ va'e rive pejou porã,  
 ha'e peikuaa pota apu re?

<sup>3</sup> Peikuaa pota ke povae're:

SENHOR pe ikuai va'e kuery ma ha'e oiporavo 'rã ojeupe guarã.

Ha'e rami vy SENHOR oendu 'rã ixupe ajapukaia.

<sup>4</sup> Pendevai teĩ pejejavy eme.

Peneakãngta áry pendetui vy  
 pendep'y a py penhemongeta, ha'e pepytu'u.\*

<sup>5</sup> Peme'ẽ ha'evea ramigua,

ha'e pejerovia SENHOR re.

<sup>6</sup> Heta ikuai aipoe'i va'e: "Mava'e nda'u nhandevy ombou 'rã mba'emo porã?"  
 SENHOR, ore kuery pe exa uka nderova rexakãa.

<sup>7</sup> Xepy'a re ma remoĩ avy'a aguã.

Ha'e kuery mba'emo ra'yã ha'e vinho ojou reta vy ovy'a okuapya gui  
 xee avy'ave.

<sup>8</sup> Xepy'a porã reve anheno vyve ake 'rã,  
 mba'eta SENHOR, ndee anho xemombytu'u porã.

## 5

*Heko vai va'e kuery gui ogueraa jepe aguã re ojerurea ague*

Jogueroporaei va'e pe mimby py ombojoguy reve guarã Davi ombopara va'ekue.

<sup>1</sup> SENHOR, ejapyxaka ke xeayvu re,  
 endu ke xepoaẽ rã.

<sup>2</sup> Xeruvixa, Xeruete, endu ke ajapukai rã.  
 Ndevy pe ae ajapukai.

<sup>3</sup> SENHOR, aje'ive guive rendu 'rã xeayvua.  
 Aje'ive anhembo'e 'rã ndevy,  
 ha'e rire roarõ 'rã aikovy.

<sup>4</sup> Mba'eta ndee Xeruete, ndererovy'ai 'rã teko vai,  
 nerentonde ma heko vai va'e noĩ 'rã.

<sup>5</sup> Nerenonde ijayvu vaikue-ikue va'e ndopytai 'rã.  
 Teko vai re ikuai va'e rejou vai va'e meme.

<sup>6</sup> Ndee remomba 'rã ijapua re ikuai va'e.  
 SENHOR ojou vai 'rã jouguy moëa ha'e nhombotavypa rei va'e.

<sup>7</sup> Ha'e rã xee ma xemboaxy ete ramo aike 'rã ndevygua opy,  
 ndevygua templo iky'a e'ŷ va'e rexei,

\* **4:4** Efésios 4.25-27

- xerenapy'ã re aĩ 'rã nerondenon ajererokyjea rupi.
- <sup>8</sup> SENHOR, xerovaigua kuery gui  
xerereko ke heravy ndeguigua teko porã rupi,  
embo'yvi ke ndeguigua tape xerenonderã.
- <sup>9</sup> Mba'eta ha'e kuery ma ijuru re anhetẽ va'e noĩ.  
Joupe ojapo vai aguã re anho 'rã ipy'a okuapy.  
Ijyryvi ma omanogue rupa ojepe'a va'e rami.  
Oapekũ py ma ijayvu porã merami rive 'rã.\*
- <sup>10</sup> Ha'e nunga rupi Xeruete, eikuua uka ha'e kuery reko vaia.  
Embo'apa ke jogueroayyuague py ae.  
Opa marã rei ikuia ramo eipe'apa nerondenon gui,  
nderovai opu'ã rei rire.
- <sup>11</sup> Ha'e rã ndere ojerovia va'e kuery ma tovy'apa.  
Ndererovy'aa rupi toporaei atã okuapy raka'e rã peve,  
ndee repy ramo.  
Tove nderery oayvu va'e tandererovy'a okuapy.
- <sup>12</sup> Mba'eta ndee SENHOR, remoingo porã 'rã heko porã va'e.  
Reayvu ete vy rejoko 'rã opa mba'e vai gui.

## 6

*Nhanderuete omboaxy aguã re Davi ojchureague*

Jogueroporaei va'e pe ixã irundy meme va'e py ombojoguy reve guarã Davi ombopara va'ekue.

- <sup>1</sup> SENHOR, ndepoxya rupi e'ŷ ke xemongeta,  
ndevaia rupi e'ŷ xembopaga.
- <sup>2</sup> Xemboaxy ke SENHOR, mba'eta aendu xekangypaa.  
SENHOR, xemonguera ju ke, mba'eta xekâgue oku'epa rei ma,
- <sup>3</sup> xenhe'ẽ voi nda'evei ete.  
Ha'e gui ndee SENHOR, raka'e peve 'rã tu naxepytyvõi?
- <sup>4</sup> SENHOR, ejevy ju, eraa jepe xerekovea,  
xerepy ke xemboaxy vy.
- <sup>5</sup> Mba'eta manoa py ma ndoikoi 'rã ndere ima'endu'a va'e.  
Onhono porãague py ituia gui mava'e 'rã tu oporaei ndevy?
- <sup>6</sup> Xekane'õ ma xepoaẽ riae vy.  
Pytû nhavõ xerexay omoakŷ xerupa,  
inhakŷmba peve.
- <sup>7</sup> Xerovaigua kuery káuxa ajexavai ramo xerexa irurupa ma,  
tuja'i rami ndaexa porãi aikovy.
- <sup>8</sup> Teko vai rupi pendekuai va'e, pejep'eapa ke xea gui,\*  
mba'eta SENHOR oendu ma ajae'o reve xeayvu rã.
- <sup>9</sup> Ajapukaia oendu vy  
oikuua pota ma guive ajerurea re.
- <sup>10</sup> Ha'e ramo xerovaigua kuery oximba ha'e onhemondyipa 'rã okuapy.  
Ojepe'apa xapy'a 'rã oximba vy.

## 7

*Nhanderuete heko porã va'e kuery oepya re ijayvua*

Benjamim regua Cuxé ijayyuague Davi oendu vy SENHOR pe oporaeiague.

- <sup>1</sup> SENHOR Xeruete, ndere anhemi va'e.

\* 5:9 Romanos 3.9-20   \* 6:8 Mateus 7.23; Lucas 13.27

- Xerepy ke xerakykue ou va'e ha'e javi gui,  
xereraa jepe guive.
- <sup>2</sup> Ha'e rami e'ŷ rã xivi rami xerero'apa 'rã,  
xerepyarã ndoikoi ramo xemondoropa 'rã.
- <sup>3</sup> SENHOR Xeruete, xere ha'e kuery ijayvu reia va'e nunga xee ajapo va'e rire,  
xapy'a rei xepo py ajejavy,
- <sup>4</sup> e'ŷ vy xereve peteĩ rami ikuai porã va'e pe ajapo vai va'e rire –  
ha'e rã xee ma araa jepe kuerei mba'e py e'ŷ xembojexavai va'e –
- <sup>5</sup> ha'e rami ajoapo vai va'e rire ma  
xerovaigua kuery ha'evea rami 'rãgue xerakykue monha xenhe'ẽ oupity peve,  
xerekove re ha'evea rami opyrõ 'rãgue yvy re,  
yvy ku'i rupi arov'yave va'ekue ombotyryry vy.
- <sup>6</sup> SENHOR, epu'ã ke ndepoxya rupi.  
Exa uka ndepo'akaa xerovaigua kuery ipoxypaa rejoko vy.  
Epu'ã ke xerepy aguã,  
ha'e kuery rembopaga aguã re ndeayvua rami vy.
- <sup>7</sup> Nerenonde tonhemboatypa yvy regua kuery.  
Ha'e gui ha'e kuery áryve rupi ndee ke eĩ yvate.
- <sup>8</sup> Mba'eta SENHOR omboayvu 'rã yvy regua kuery.  
SENHOR, xere voi eikuua pota xerekoo porãa  
ha'e anhetẽ rupi aikoa re.
- <sup>9</sup> Topa heko vai va'e kuery reko vaia,  
ha'e rã heko porã va'e kuery ma emoĩ atãve.  
Mba'eta Xeruete nderekoo porã va'e,  
ndee reikuua pota nhane'arandua ha'e nhandepy'a re oĩ va'e re.\*
- <sup>10</sup> Nhanderuete ma xejoko 'rã opa mba'e va'e gui.  
Ogueraa jepe 'rã opy'a py heko porã va'e.
- <sup>11</sup> Nhanderuete ma anhetẽ rupi nhomboayvu va'e,  
ko'ẽ nhavõ oendu 'rã nhombopaga aguã.
- <sup>12</sup> Ha'e rami vy avakue ndojeko rerovai ri ramo  
Nhanderuete oaĩmbe'e 'rã okyxe.  
Omoxã ae ma guive guyrapa, oguereko katupa ma.
- <sup>13</sup> Oguereko katu avi  
hu'y hendy va'e ijukaarã.
- <sup>14</sup> Heko vai va'e ma imemby raxy va'e rami oendu 'rã teko vai ojapoxea,  
oguereko'i 'rã nhombotavy aguã,  
ha'e gui oikuavã 'rã apu.
- <sup>15</sup> Ojo'o puku 'rã yvy,  
teĩ ikua ojo'oague py ha'e ae ju 'rã ho'a.
- <sup>16</sup> Inhakã re ae ju ojeapa 'rã joupe ojapo vaiague,  
ijapute re ae 'rã ojeapa ipoxyague.
- <sup>17</sup> Ha'e rã xee ma arov'y'a 'rã SENHOR  
anhetẽ rupi joe oikuua potaa re,  
aporaei 'rã guive SENHOR yvate va'e rery rupi.

## 8

*Nhanderuete yvatea ha'e avakue po'akaa re ijayvua*

Jogueroporaei va'e pe Davi ombopara va'ekue "Uva'a nhamia" he'ia py oporaeia rami  
oporaei aguã.

\* 7:9 Apocalipse 2.23

- <sup>1</sup> SENHOR, ore kuery SENHOR,  
yvy jave re nderery iporã ete!  
Yva gui voi reikuua uka ndeyvatevea.
- <sup>2</sup> Kyrígue'i ha'e okambu va'e pe reme'lẽ oporaia aguã.  
Ha'e kuery oporaia ma remoĩ nderovaigua kuery jokoarã,  
remokyirirĩ aguã nderovaigua kuery ha'e joepya rupi jojuka va'e.\*
- <sup>3</sup> Ha'e gui ma yva regua aexa ndepo py rejapo va'ekue,  
jaxy, jaxy-tata remoĩ va'ekue ha'e javi —
- <sup>4</sup> marã ramigua tu avakue ikuai, ha'e kuery re nema'endu'a aguã?  
Marã ramigua ru avakue ra'y kuery, ha'e kuery pe rejekuaa uka aguã?
- <sup>5</sup> Ha'e rami teĩ rembopo'aka ha'e remboete uka vy  
rejapo Nhanderuete gui yvyïve'i ikuai aguã rami.\*
- <sup>6</sup> Ndepo py rejapo va'ekue re rembopo'aka vy  
opa marãguia remoĩ ipy guýry:\*
- <sup>7</sup> vexa'i ha'e vaka kuery ha'e javi,  
mymba oka regua guive,
- <sup>8</sup> ha'e gui guyra'i yva regua, pira ye'ẽ rupigua,  
ha'e ye'ẽ guýry rupi ikuai va'e ha'e javi.
- <sup>9</sup> SENHOR, ore kuery SENHOR,  
yvy jave re nderery iporã ete.

## 9

*Jarovy'a ete aguã regua*

Jogueroporaei va'e pe Davi ombopara va'ekue “Ta'y omano” he'ia py oporaeia rami oporaei aguã.

- <sup>1</sup> SENHOR, ndevy aporaei 'rã xepy'a ha'e javi py.  
Amombe'upa 'rã nerembiapo porãa.
- <sup>2</sup> Avy'a ndere, roguerovy'a 'rã.  
Ndeyvate ete va'e, aporaei 'rã nderery rupi.
- <sup>3</sup> Mba'eta xerovaigua kuery oguevipa.  
Onhepyxanga vy okanhymba nerentonide gui.
- <sup>4</sup> Mba'eta ndee xerepy 'rã xemboeko porã vy.  
Tenda repenaaty py reguapy vy ha'evea rami meme renhomboayvu reiny.
- <sup>5</sup> Ha'e rami vy yvy regua kuery pe ndeayvu ete 'rã,  
remomba 'rã heko vai va'e.  
Ha'e kuery rery voi rembogue raka'e rã peve guarã.
- <sup>6</sup> Ha'e ramo orerovaigua kuery okanhymba,  
hetã voi rembovaipa raka'e rã peve.  
Noïvei ma ha'e kuery re ima'endu'aa.
- <sup>7</sup> Ha'e rã SENHOR ma oĩ riae 'rã guenda openaaty py,  
nhomboayvu oiny aguã omoĩ va'ekue py ae.
- <sup>8</sup> Ha'e rami vy omboayvu 'rã yvy regua kuery ha'evea rami.  
Ha'evea rami meme oguerekoyvy regua kuery.\*
- <sup>9</sup> Ojexavai va'e pe ma onhemí aguã yvate va'e SENHOR oiko,  
omoingo axya rã onhemí kuerei aguã.
- <sup>10</sup> Ha'e nunga rupi SENHOR, nderery oikuua va'e kuery ojerovia ndere,  
mba'eta ndee nereipytyvõ e'ŷi 'rã ndereka va'e.
- <sup>11</sup> SENHOR Sião py oiko va'e pe peporaei pemboete vy.

---

\* **8:2** Mateus 21.14-17   \* **8:5** Gênesis 1.26-28; Hebreus 2.5-9   \* **8:6** 1 Coríntios 15.27; Efésios 1.22   \* **9:8** Atos 17.31

- Yvy regua kuery mbyte rupi peikuaa uka hembiapo porãa.  
 12 Mba'eta ima'endu'a 'rã jouguy moẽare nhombopaga aguã,  
     ndaexarai 'rã ojexavai va'e ojapukaia re.  
 13 SENHOR, xemboaxy ke.  
     Eikuua pota ke xerayvu e'ŷ va'e xemoingo axya re.  
     Ndee ma xemopu'ã ju manoa rokẽ gui,  
 14 Sião tetã rokẽ py ju amombe'u aguã ndereko porãa ha'e javi.  
     Roguerovy'a 'rã xereraa jepeague re.  
 15 Yvy regua kuery ma yvykuarã ojo'oague py ae ho'apa.  
     Nhuã omoõ nhemi va'ekue py ipy ae ojejura.  
 16 SENHOR ojekuaa uka 'rã ha'evea rami joguerekoa py.  
     Mba'eta heko vai va'e kuery ojexavai 'rã opo py ae ojapo va'ekue py.  
 17 Heko vai va'e kuery ma omomboa 'rã ikuai axya aguã py,  
     ha'e javi regua Nhanderuete gui hexarai va'e meme.  
 18 Ha'e rã ojexavai rei va'e kuery gui ma SENHOR ndaexarai riae'i 'rã,  
     nomboaxa rivei 'rã ojexavai va'e oarõ okuapya.  
 19 SENHOR, epu'ã ke.  
     Imarã va'e kuery ta'ipo'aka eme.  
     Yvy regua kuery tombopagapaa nerенонде.  
 20 SENHOR, emongyje ete ha'e kuery.  
     Yvy regua toikuaa imarã va'e meme ikuiaia.

## 10

### *Heko vai va'e kuery ho'apa aguã re ijayvua ague*

- 1 SENHOR, mba'e re tu mombyry reĩ?  
     Mba'e re tu rojexavai rã nderejekuaa ukai?  
 2 Mba'eta heko vai va'e kuery ma ayvu vaikue-ikue py omoingo axy 'rã iporiaukue'i.  
     Ha'e kuery tojejurapa jojopy aguã omoõ va'ekue py ae.  
 3 Mba'eta heko vai va'e ov'y'a 'rã oipotapa reia re rive,  
     mba'emo ojoupaxe va'e ijayvu vaikue-ikue 'rã SENHOR re,  
     ijayvu vai 'rã hexe.  
 4 Heko vai va'e ojee rive ojerovia vy ndoikuaa potai 'rã mba'eve re.  
     Ha'e rami vy "Nhanderuete ndoikoi", he'i 'rã.  
 5 Ha'e kuery oikoa nhavõ rupi ojoupa rei 'rã mba'emo.  
     Ndoikuuai 'rã guive ne'arandua rupi ndeayvua.  
     Ojojai rei 'rã okuapy ngovaigua kuery.  
 6 Mba'eta opy'a py aipoe'i: "Avave rei ndaxereityai 'rã.  
     Aŷ ha'e raka'e rã voi ndoui 'rã mba'emo vai xe'áry", he'i.  
 7 Ijuru tynyõ oiny ayvu vai, nhombotavyarã ha'e ayvu poyi,  
     ha'e rami vy nhomboeko vai ha'e joapo vai aguã re anho 'rã ijayvu.\*  
 8 Nhoarõ 'rã tetã yvýry jojuka aguã.  
     Ojuka 'rã heko porã'i va'e nhemia py.  
     Oma'ẽ mbegue 'rã openamby e'ŷ oity aguã.  
 9 Nhoarõ 'rã oiny guary okua yvy'ã peguy re oĩ va'e py nhoarõ oinya rami.  
     Oarõ 'rã oity aguã iporiaukue'i,  
     nhuã py ombo'a vy oimamamba aguã.  
 10 Onhemombe ov'y'rã,  
     ipo'akaa py iporiaukue'i ho'apa aguã.  
 11 Aipoe'i 'rã opy'a py: "Nhanderuete ma nopenai.

\* **10:7** Romanos 3.14

- Ngovaombojere vy peteīve henda py ndoexa potai 'rā ajapo va'e."
- <sup>12</sup> SENHOR, epu'ā ke!  
Xeruete, eupi ndepo!  
Nderexarai eme iporiaukue'i gui.
- <sup>13</sup> Mba'e nunga rupi tu heko vai va'e omboyke Nhanderuete?  
Mba'eta opy'a py "Nhanderuete nopenai 'rāe" he'i.
- <sup>14</sup> Ha'e rami teī ndee ma rexa ae,  
reikuua pota guive rojexavaia rupi romba'eapoa re,  
ndepo py orerepy aguā.  
Ndepo py onhemboaxa openamby e'ŷ ikuai va'e.  
Ha'e ramo repy 'rā tyre'ŷ.
- <sup>15</sup> Emopē ke heko vai ha'e joupe ojapo vai va'e jyva.  
Eikuua pota ha'e kuery reko vaia re  
rejoupa peve.
- <sup>16</sup> SENHOR ma Huvixave imarā e'ŷ va'e.\*  
Ijyvy gui okanhymba 'rā amboae regua kuery.
- <sup>17</sup> SENHOR, rendu ae ma onhemo'yvy'i va'e kuery oipotaa.  
Ha'e rami vy rembopy'a guaxu ha'e reraa jepe 'rā,
- <sup>18</sup> repy aguā tyre'ŷ ha'e omoingo axy reipy,  
avakue vvy regua nanhomongyjevei aguā.

## 11

### *SENHOR re nhanhemi aguā regua*

Jogueroporaei va'e pe Davi ombopara va'ekue.

- <sup>1</sup> Xee ma SENHOR re anhemi va'e.  
Ha'e nunga rupi mba'exa tu xenhe'ē pe aipopeje:  
"Ejava ke yvyty katy guyra'i rami.
- <sup>2</sup> Mba'eta heko vai va'e kuery omoxā ma guyrapa,  
ixā re ma omoī ma hu'y oa'anga vy,  
nhemia py heko porā va'e rovai opoi aguā.
- <sup>3</sup> Yvy ytarā omoī va'ekue omombaa ramo  
mba'e tu heko porā va'e ojapo 'rā?\*\*
- <sup>4</sup> Ha'e rā SENHOR ma oī ojeupegua templo iky'a e'ŷ va'e py.  
Yva re SENHOR oī guenda openaaty py.  
Oma'ē oiny avakue ojapo va'e re.
- <sup>5</sup> SENHOR oikuua pota 'rā heko porā ha'e heko vai va'e re.  
Ojou vai 'rā jojukaa rupi anho ikuaixe vai va'e.
- <sup>6</sup> Heko vai va'e áry ombou 'rā tapyī rexakā enxofre reveguia.  
Ha'e kuery oy'u aguā ombou 'rā yvytu tata reveguia.\*
- <sup>7</sup> Mba'eta SENHOR ma heko porā va'e oiko vy  
oayvu teko porā rupi ikuai va'e.  
Ha'e ramo heko porā va'e oexa 'rā hova.

## 12

### *Apu gui onhepytyvō ukaa ague*

Jogueroporaei va'e pe ixā irundy meme va'e py ombojoguy reve guarā Davi ombopara va'ekue.

\* **10:16** Apocalipse 11.15    \* **11:3** Apy ma huvixave irū kuery oguerokyje vy ixupe ijayvu okuapy hovaigua kuery ojukaxea gui onha aguā re. Ha'e gui "Yvy ytarā omoī va'ekue" he'ia ma huvixa openaa re ijayvu vy (Salmo 75.3, 82.5).

\* **11:6** Apocalipse 20.10, 21.8

- <sup>1</sup> SENHOR, orereraa jepe ke!  
 Mba'eta ndevygua avakue ndoikovei.  
 Avakue ra'y kuery mbyte gui okanhymba ma ojeroviapy.
- <sup>2</sup> Ha'e ramo anhetē rupi e'ŷ 'rā ijayvu jomeme,  
 opy'a py nhombotavy vy ijayvu mbegue rei okuapy.
- <sup>3</sup> SENHOR, ejaya ijayvu mbegue rei va'e kuery rembe,  
 opa marā rei ijayvu va'e apekū guive.
- <sup>4</sup> Mba'eta aipoe'i okuapy: "Nhaneapekū py 'rāe nhandepo'aka,  
 nhanerembe ma nhanemba'e ae.  
 Mava'e tu nhandere ipo'aka 'rā?" he'i okuapy.
- <sup>5</sup> Ha'e ramo SENHOR aipoe'i:  
 "Iporiaukue'i omoingo axya ha'e ojexavai va'e ipoaẽ ramo  
 xee aendu vy apu'ã ta aŷ.  
 Araa jepe 'rā aepy aguã oarõ oikovy va'e", he'i.
- <sup>6</sup> SENHOR ayvu ma iky'a e'ŷ va'e meme,  
 prata sete-kue oiky'a'o pyre rami,  
 tata rupa yapo gui ojapo pyre py.
- <sup>7</sup> Tá SENHOR, ndee ma orerepy 'rāe.  
 Aŷgua kuery gui orereraa jepe 'rā raka'e rā peve.
- <sup>8</sup> Ha'e rā heko vai va'e ma opa rupi ikuai,  
 avakue ra'y kuery ma teko vai anho oguerovy'a.

## 13

### *Ojeroviaa rupi ojerurea ague*

- Jogueroporaei va'e pe Davi ombopara va'ekue.
- <sup>1</sup> SENHOR, raka'e peve 'rā tu nderekarai xegui?  
 Raka'e peve 'rā tu xevy pe nderejexa ukavei?
- <sup>2</sup> Raka'e peve 'rā tu nda'evei riae xepy'a py?  
 Mba'eta ko'ě nhavõ xepy'a py aendu ndavy'aia.  
 Raka'e peve 'rā tu xerovaigua xere opu'ã rei?
- <sup>3</sup> SENHOR Xeruete, eikuua pota ke xere, xembovai guive!  
 Xemboexa pyxo, manoa py ake e'ŷ aguã,
- <sup>4</sup> xerovaigua kuery "Xepo'aka ma hexe" he'i e'ŷ aguã,  
 ha'e xerovaigua kuery xekangy ramo oexa vy ov'y'a rei e'ŷ aguã.
- <sup>5</sup> Ha'e rā xee ma ajerovia ndere xemboaxya rupi xererekoo aguã.  
 Xepy'a py arov'y'a xereraa jepea.
- <sup>6</sup> Aporaei 'rā SENHOR pe,  
 opa mba'e py xemoingo porā rire.

## 14

### *Salmo 53.1-6*

- Jogueroporaei va'e pe Davi ombopara va'ekue.
- <sup>1</sup> Hi'arandu e'ŷ va'e ma opy'a py:  
 "Nhanderuete ndoikoi" he'i.  
 Ha'e kuery opa marā ikuai ojejokoa rupi e'ŷ.  
 Neĩ peteĩve ma ndoikoi heko porā va'e.
- <sup>2</sup> Ha'e rā SENHOR ma yva gui oma'ě 'rā avakue ra'y kuery ikuiaia re,  
 oexa aguã amongue pa 'arandu rupi oikoa,  
 amongue pa oiko Nhanderuete oeka va'e.
- <sup>3</sup> Ha'e rami teĩ ha'e javive ojepe'a, opa marā rei ikuai pavē rei.  
 Ndoikovei ae teko porā rupi oiko va'e,

- neĩ peteĩve ma.\*  
**4** Teko vai rupi ikuai va'e 'arandurã noĩ teve?  
 Ha'e kuery ma xevyguia kuery omomba rivepa 'rã mbojape ho'ua rami.  
 Ndojapukai 'rã guive Nhanderuete pe.  
**5** Ha'e rami teĩ ha'e kuery onhemondyipa 'rã  
 oexa vy heko porã va'e kuery reve Nhanderuete oiko ramo.  
**6** Ha'e kuery ma yvyïgue'i nhomongoeta ramo ojojai rei okuapy,  
 ha'e rã SENHOR ma onhemoĩ ha'e kuery onhemi aguã.  
**7** Sião gui ou ma va'e rire Israel kuery reraa jepearã!  
 SENHOR ojeupeguia kuery omoingo porã jevy ramo  
 Jacó ramymino kuery, Israel kuery ový'apa 'rã okuapy.

## 15

### *Yva pygua re ijayvua*

- Mboraerã Davi ombopara va'ekue.  
**1** SENHOR, marã ramigua nda'u oiko 'rã ndevyguia opy?  
 Marã ramigua nda'u oĩ 'rã ndevyguia yvyty iky'a e'ŷ va'e py?\*  
**2** Teko porã rupi ikuai va'e anho,  
 gueko porãa oexa uka va'e,  
 opy'a py anhetẽ rupi ijayvu va'e,  
**3** oapekũ py joe ijayvu vai e'ŷ va'e,  
 amboae kuery pe ojapo vai e'ŷ va'e,  
 neĩ ngoo katy rai'i ikuai va'e re voi ima'endu'a vai e'ŷ va'e.  
**4** Ha'e kuery ndoguerovy'a rei 'rã ojou vaipy,  
 ha'e rã omboete 'rã SENHOR renonde ojererokyjea rupi ikuai va'e kuery anho.  
 Ijayvuague ndojapo e'ŷi 'rã guive,  
 ha'e nungakue py oiko axy teĩ.  
**5** Operáta oiporuka rire nomboekovia retavei 'rã,  
 neĩ nombopagai 'rã ojejavy e'ŷ va'e kuery mba'emo ome'ëa ta teĩ.  
 Ha'e rami ikuai va'e ma mba'eve py ndoitayai 'rã.

## 16

### *Nhanderuete pegua iky'a e'ŷ va'e reko re ijayvua*

- Davi oporaeiague.  
**1** Xeruete, epena porã ke xere,  
 ndere anhemi rire.  
**2** SENHOR pe aipoa'e: "Ndee ma xe-Senor.  
 Iporâve va'e xee ndarekoi ndee e'ŷ vy.  
**3** Ha'e gui ndevyguia iky'a e'ŷ va'e yvy re ikuai va'e ma  
 xee arov'y'a vy ha'e kuery pe 'Yvatekueve' ha'e."  
**4** Ha'e rã amboae tuueterã re SENHOR omboekovia va'e kuery ma ikuai axy 'rã.  
 Ha'e kuery ruete pe xee name'ëi 'rã tuguy reveguia,  
 neĩ ndaxeayvui 'rã hery rupi.  
**5** SENHOR anho oiko mba'emo xevyguia me'ëa, xekaro pygua me'ëa guive.  
 Ndee anho remoĩ xerenonderã.  
**6** Ha'e ramo xevyguia ma ha'eve va'e,  
 xevy guarã ma iporã va'e meme.  
**7** Aroayvu porã 'rã SENHOR xemo'arandua,  
 pyávy voi xemongoeta xepy'a re.

\* 14:3 Romanos 3.9-20 \* 15:1 Salmo 24.2-6

- <sup>8</sup> Xema'endu'a riae SENHOR xereve oikoa re.  
Xeyvýry oĩ ramo ndaxereityai 'rã.  
<sup>9</sup> Ha'e rã xekuraxõ py avy'a,  
xenhe'ẽ ov'y'a,  
xerete avi optyu'u porã 'rã.  
<sup>10</sup> Mba'eta xerekovea nderejai 'rã manoa py,  
Ndevyguia iky'a e'ŷ va'e nderejai 'rã ivaipa aguã py.  
<sup>11</sup> Xevy rexu uka 'rã tape tekove katy oo va'e.  
Nerenonde oĩ avy'a ete aguã,  
ndeyvýry oĩ xembovy'a va'e raka'e rã peve guarã.\*

## 17

*Nhanderuete oepy aguã re ojerurea ague*

Davi onhembo'eague.

- <sup>1</sup> SENHOR, endu ke ajerure ramo ha'evea rami xererekoo aguã,  
eikuua pota ajapukaia re,  
ejapyxaka ajerurea re,  
mba'eta ijapu va'e juru gui e'ŷ xeayvu onhendu.  
<sup>2</sup> Nerenonde gui eikuua uka xemboeko porãa regua.  
Mba'eta orerexu vy ha'evea rami meme reikuua pota.  
<sup>3</sup> Xekuraxõ re reikuua pota teĩ,  
pyávy voi reikuua pota vy  
tata py rami xerekoo rea'ã teĩ  
peteĩ henda py ma xere nderejoui 'rã teko vai.  
Xejuru gui noẽi 'rã ayvu vai.  
<sup>4</sup> Avakue opa marã ikuai teĩ xee ma ndeayvua rami vy  
ajejoko jojuka va'ety ikuiaia rupi aiko e'ŷ aguã.  
<sup>5</sup> Ndeguigua tape rupi anho aiko,  
ajavy e'ŷ re.  
<sup>6</sup> Xeruete, xee ajapukai ndevy,  
mba'eta ndee xembovai 'rã.  
Ejapyxaka ha'e endu xeayvua.  
<sup>7</sup> Exa uka opa mba'e py ndeporayvu etea.  
Mba'eta ndere onhemi va'e kuery reraa jepe 'rã  
ha'e kuery re opu'ã va'e gui.  
<sup>8</sup> Epena ke xere nderexa ra'yí re rami ae,  
xeao'i ke ndepopo guy py  
<sup>9</sup> heko vai va'e kuery xembojexavaia gui,  
xerovaigua kuery xejukaxeia gui.  
<sup>10</sup> Mba'eta ipy'a ratã va'e kuery ma opy'a omoboty reve  
ijayvu vaikue-ikue 'rã.  
<sup>11</sup> Aŷ voi orejoko rei okuapy,  
orere oma'ẽ vaipa yvy rupi orereityxe vy.  
<sup>12</sup> Guary guembiarã ojouxva'e rami ikuai,  
guary ra'y onhemia gui oma'ẽ mbegue va'e rami guive.  
<sup>13</sup> SENHOR, epu'ã ke, ejoko ha'e eitypa.  
Ndekyxe py eraa jepe xerekove heko vai va'e po gui.  
<sup>14</sup> SENHOR, ndepo py ae xereraa jepe avakue yvy regua gui.

\* **16:11** Kova'e ayvu rupi Pedro ijayvu Jesus rekoke omombe'u vy (Atos 2.22-36), ha'e gui Paulo ju ijayvu (Atos 13.32-37; 1 Coríntios 15.4).

Ha'e kuery ma aŷ oikove teri reve anho 'rã ojou iporã va'e.  
 Mba'eta ha'e kuery rye remonyẽ mba'emo porã.  
 Ha'e kuery ta'y reta 'rã.  
 Ha'e gui mba'emo ndoiporupai va'ekue ma oeja 'rã gua'y kuery pe.  
<sup>15</sup> Ha'e rã xee ma teko porã rupi vy ama'ẽ 'rã nderova re.  
 Apu'ã ju vy avy'a 'rã roexa vy.\*

## 18

### *2 Samuel 22.1-51*

Jogueroporaei va'e pe Davi SENHOR rembiguai ombopara va'ekue. SENHOR pe oporaei Saulo ha'e hovaigua kuery ha'e javi po gui oepy ramo. Ha'e vy aipoe'i:

<sup>1</sup> SENHOR xemombaraeeta, xee roayvu.

<sup>2</sup> SENHOR, ndee ma xe'itaova.

Ndee ma oo ikorapa va'e ha'e xerepya.  
 Xeruete ma xe'itaova anhemiaty,  
 mba'emo vai jokoa, xereraa jepea imbaraete va'e ha'e oo imbaraete ete va'e.

<sup>3</sup> SENHOR ogueroporaipy va'e pe xee ajapukai vy  
 aa jepe kuery 'rã xerovaigua kuery po gui.

<sup>4</sup> Nhuã manoa regua xejura va'ekue,  
 yai rami heko vai va'e xere opu'ã vy xemongyje.

<sup>5</sup> Manoa pygua xejokua,  
 nhuã xã xejura xapy'a.

<sup>6</sup> Ha'e ramo ajexavaia py ajapukai karamboae SENHOR pe.  
 Xeruete pe ajapukai xereraa jepe aguã.  
 Ha'e rã oĩaty templo gui oendu xeayvua,  
 ijapyxa peve ajapukaia ovaẽ ramo.

<sup>7</sup> Ha'e ramo yvy omiyã ha'e oryryi.  
 Yvyty yta ikuai va'e voi ovavapa, oryryipa,  
 SENHOR ogueropoxy ramo.

<sup>8</sup> Inhapyigua gui opu'ã hataxí,  
 ijuru gui ma tata nhomombaarã oẽ,  
 tapyã hexakã va'e avi.

<sup>9</sup> Yva omo'yvy'i vy oguejy,  
 ipy guýry pytû vaikue oĩ reve.

<sup>10</sup> Anjo ipepo va'e áry oĩ vy oveve ouvy,  
 yvytu opepo áry ou pojava.

<sup>11</sup> Pytû gui ojapo onheovã aguã.  
 Ha'e va'e ojee omoõ ouvy.

Yy ha'e arai pytû va'e hoo rami oĩ.

<sup>12</sup> Hexakã henonde oo va'e gui ma arai ivaipa,  
 amandau ha'e tapyã hexakã va'e ho'a.

<sup>13</sup> Ha'e gui ma SENHOR yapu yva re.  
 Yvate ete va'e ijayvu atã ramo  
 ho'a amandau ha'e tapyã hexakã va'e.

<sup>14</sup> Ngu'y omombo vy omoaõmba xerovaigua kuery.  
 Overa vy omondyipa.

<sup>15</sup> Ha'e ramo ojekuaa yy rupa peve,  
 yvy yta avi ojekuaapa,  
 ndeayvu atãa py SENHOR,

\* <sup>17:15</sup> Omanoague gui onhemboete ju aguã re ijayvu (Apocalipse 22.4).

- ndepoxya rupi neapyīguā gui nepytuē ramo.
- 16 Yvate gui SENHOR okuave'ē vy xerupity,  
xerenoē yy tuvixa va'e gui.
- 17 Xereraa jepe xerovaigua kuery imbaraete va'e gui,  
xemomboriau rei va'e kuery gui ae,  
xegui ipo'akave ete va'ekue ri.
- 18 Ha'e kuery ma ajexavai jave opu'āmba rei va'ekue xere,  
teī SENHOR onhemoī xepytyvōarā.
- 19 Ha'e rami vy xereru peteī henda ipa'ū ja'eavea py.  
Xererovy'a vy xereraa jepe.
- 20 Xerekō porāa rekovia SENHOR ome'ē iporā va'e,  
xevy ome'ē ndaxepo ky'aia repy.
- 21 Mba'eta xee ma SENHOR guigua tape rupi anho aiko va'e,  
Xeruete gui ndajepo ai guive ha'eve'ŷa rami aiko aguā.
- 22 Xejee amoī ijayvuague ha'e javi,  
xejegui ndaipē ai ayvu omoī va'ekue.
- 23 Henonde aiko anhetē rupi,  
ajejoko guive teko vai rupi aiko e'ŷ aguā.
- 24 Ha'e ramo xevy SENHOR ome'ē xerekō porāa repy,  
henonde rupi ndaxerekō ky'ai rire.
- 25 Heko porā va'e kuery pe rejekuaa uka 'rā heko porā va'e,  
anhetē rupi ikuai va'e pe rejekuaa uka anhetē rupigua avi,
- 26 iky'a e'ŷ va'e pe rejekuaa uka iky'a e'ŷ va'e,  
ha'e rā heko vai va'e pe ma rejekuaa uka 'rā nhombopaga kuaa va'e.
- 27 Mba'eta reraa jepe 'rā onhemo'vyvī'i va'e,  
ha'e rā oma'ē vaikue reia rupi onhemboyvate va'e ma remomba 'rā.
- 28 Ndee rejapo xerata endy hexakāvē aguā rami.  
Pytū rupi aikoa rupi ma ndee SENHOR Xeruete remoexakāmba.
- 29 Ndereve vy amomba 'rā xondaro kuery,  
Xeruete reve vy apo 'rā tetā kora áry rupi.
- 30 Nhanderuete guigua tape ma iky'a e'ŷ va'e,  
SENHOR ayvu ma oa'anga pyre.  
Hexe onhemi va'e ha'e javi pe ma mba'emo vai jokoa oī.
- 31 Mava'e tu Nhanderuete oiko SENHOR e'ŷ vy?  
Mava'e tu nhande'itaova oiko Nhanderuete e'ŷ vy?
- 32 Xeruete xemombaraetea oiko,  
omoatyrō 'rā aguata aguā rupi.
- 33 Xepy ojapo 'rā guaxu rami inhakuā aguā.  
Yvatea rupi aē teī xemoī atā.
- 34 Xepo pe voi ome'ē joe apu'ā kuaa aguā.  
Ha'e ramo guyrapa overa va'e guigua teī xee aipira 'rā.
- 35 Mba'emo vai jokoarā reme'ē xereraa jepea,  
reiporu kuaa regua xemoī atā,  
xemboaxyā rupi xemboyvate.
- 36 Apyrō aguā tape rembopyve ramo  
ndaxepyxyryi 'rā.
- 37 Xerovaigua kuery amonha 'rā aupitypa peve.  
Ha'e gui amomba rire ajevy ju 'rā.
- 38 Amou'ūmba opu'ā aguā nda'evevei peve.  
Xepy yvýry ho'apa.

- <sup>39</sup> Mba'eta ndee xemombaraete ajoguero'a kuaa aguã,  
rejapo xere opu'ã va'ekue re xepo'aka aguã rami.
- <sup>40</sup> Xerovaigua kuery rejapo ojavapa aguã rami.  
Xerayvu e'ý va'e amomba.
- <sup>41</sup> Guepyarã pe ha'e kuery ojapukai teĩ ndoepyai.  
SENHOR pe voi ha'e kuery ojapukai teĩ nombovai.
- <sup>42</sup> Ha'e ramo amongu'ipa yvy ku'i yvytu rupi ovevepa va'e rami,  
yapo tape guiguare nhamomboa rami amokanhymba.
- <sup>43</sup> Heta va'e kuery xere opu'ã teĩ xereraa jepe,  
xemoĩ yvy regua kuery ruvixarã.  
Amboae regua kuery ndaexai va'ety voi xevyguia ikuai.
- <sup>44</sup> Xeayvu oendu vyve xenhe'ẽ rendu okuapy.  
Yvy mboae regua oexa uka xevy ikuiaia,
- <sup>45</sup> amboae regua kuery okanhymba,  
onhemiague gui oẽmba onhemondyipa vy.
- <sup>46</sup> SENHOR ma oikove va'e, togueroayvu porãa xe'itaova!  
Tomboetea Nhanderuete xereraa jepea!
- <sup>47</sup> Nhanderuete xerepy vy jojukapa,  
heta va'e kuery re xembopo'aka.
- <sup>48</sup> Nhanderuete ae xereraa jepe xerovaigua kuery gui.  
Ndee ma xemboyvate xerovaigua kuery áryve,  
ha'e xerepy avakue jojuka va'ety po gui.
- <sup>49</sup> Ha'e ramo SENHOR, roguerovy'a 'rã yvy regua kuery oendua py,  
aporaei 'rã nderery rupi.\*
- <sup>50</sup> Ha'e ae ombopo'aka 'rã huvixaverã omoĩ va'ekue,  
oexa uka 'rã guembiporavo oayvua,  
Davi ha'e hamymino kuery pe, raka'e rã peve.

## 19

### *Nhanderuete rembiapo ha'e ijayvua oguerovy'aa ague*

Jogueroporaei va'e pe Davi ombopara va'ekue.

- <sup>1</sup> Yva re mba'emo ikuai va'e oikuua uka Nhanderuete hexakãmba va'ea,  
yvate rupi ikuai va'e oikuua uka 'rã opo py ojapoague.
- <sup>2</sup> Ára nhavõ oikuua uka 'rã ara pygua pe,  
ha'e pytû nhavõ oikuua uka 'rã pytû rupigua pe.
- <sup>3</sup> Nda'ijayvui 'rã, neĩ nda'ijayvuai 'rã,  
ha'e va'e gui mba'eve nonhendui 'rã.
- <sup>4</sup> Ha'e ramí teĩ ha'e nunga 'arandu ma yvy jave rupi oikuua,  
yvy apy peve 'rã ha'e nunga re ayyua.\*  
Ha'e vy yva apy re omoĩ kuaray oike aguã.
- <sup>5</sup> Ha'e va'e ma omenda ramo va'e ramí 'rã oẽ ouvy ngoo gui,  
ovy'a 'rã ovy imbaraetepa va'e onha ovya rami.
- <sup>6</sup> Yva apy gui oẽ vy  
oaxa 'rã ovy ijapy rovai peve.  
Jipoi 'rã haku-a oguerovy e'ýa.
- <sup>7</sup> Ha'e gui SENHOR guigua lei ma ha'eve vaipa ete vy  
omombaraete ju 'rã nhanderekove.  
SENHOR omombe'u va'e ma ogueroviapy vy

\* **18:49** Romanos 15.9   \* **19:4** Romanos 1.18-25, 10.16-18

- omo'arandu 'rã hi'arandu e'ŷ'i va'e.
- <sup>8</sup> SENHOR nhombo'ea ma ha'evea ramigua vy  
ombovy'a 'rã nhanekuraxõ.  
SENHOR ojapo uka va'e ma iky'a e'ŷ va'e vy  
omoexakã 'rã nhanderexa.
- <sup>9</sup> SENHOR renonde jajererokyjea ma iky'a e'ŷ va'e,  
raka'e rã peve guarã guive.  
SENHOR joe oikuaa potaa ma anhetẽ rupigua,  
ha'evea rami meme.
- <sup>10</sup> Ha'e nunga ma ouro gui jaipotave va'erã,  
ouro oiky'a'o pyre gui iporâve ramo.  
He'ëve 'rã ei  
hetägue gui onhami va'ekue gui.
- <sup>11</sup> Ha'e va'e rupi nerembiguai kuery remongeta 'rã guive.  
Ha'e va'e jajapo vy jajou reta 'rã iporã va'e.
- <sup>12</sup> Mava'e nda'u oikuaapa 'rã ha'e ae ojejavyague?  
Emboguepa ke aikuaa e'ŷ-e'ŷ va'e guive.
- <sup>13</sup> Xejoko xee nerembiguai anhemboyvate reia gui voi.  
Ha'e nunga ta'ipo'aka eme xere.  
Ha'e rami rã iky'a va'e'ŷ 'rã aiko,  
ha'e aa jepe 'rã ajejavyve etea gui.
- <sup>14</sup> SENHOR, xe'itaova ha'e xerepya,  
tove ayvu xejuru gui oẽ va'e ha'e xepy'aa xepy'a re oĩ va'e  
nerenonde toĩ nembovy'aarã.

## 20

### *Huvixave re ojerurea ague*

- Jogueroporaei va'e pe Davi ombopara va'ekue.
- <sup>1</sup> Rejexavaia ára tove SENHOR tanembovai.  
Jacó Ruete rery tandereraa jepe reĩ atã aguã py.
- <sup>2</sup> Tombou nderepyarã guenda iky'a e'ŷ va'e gui.  
Sião gui ma voi topena ndere.
- <sup>3</sup> Ta'ima'endu'a ixupe guarã reme'ẽ va'e ha'e javi re,  
tojou porã mba'emo ixupe reapy rã.
- <sup>4</sup> Tome'ẽmba ndepy'a re reipotaa oĩ va'e,  
tojapopa rejapoxe va'e ha'e javi.
- <sup>5</sup> Ha'e gui ma ndepo'aka ramo ore kuery rovy'a 'rã mboraei rupi,  
Nhanderuete rery rupi roupi 'rã imoiny bandeira.  
Ixupe SENHOR tomoingo renhemboayvua ha'e javi.
- <sup>6</sup> Aŷ ma xee aikuaa SENHOR ogueraa jepe 'rãa huvixarã omoĩ va'ekue.  
Ombovai 'rã o'amba iky'a e'ŷ va'e gui,  
ha'e rami vy opo py oexa uka 'rã opo'akaa.
- <sup>7</sup> Amongue ma ojerovia 'rã mba'eyru re,  
amboae kuery ma kavaju re 'rã ojerovia.  
Ha'e rã nhande kuery ma SENHOR Nhanderuete rery anho jarovy'a.
- <sup>8</sup> Ha'e kuery ma ojero'a vy ho'apa 'rã.  
Ha'e rã nhande kuery ma nhapu'ã 'rã jakuapy.
- <sup>9</sup> SENHOR, embopo'aka ke oreruvixave.  
Rojapukai ramo orembovai.

## 21

- Ngovaigua kuery re huvixave ipo'aka rã oguerovy'aa ague*  
 Jogueroporaei va'e pe Davi ombopara va'ekue.
- <sup>1</sup> SENHOR, nembaraetea re oreruvixave ov'y'a,  
 reraa jepeague re oporaei.
  - <sup>2</sup> Mba'eta rejapo ma opy'a py ojapoxe va'ekue,  
 nerendu e'ŷi ojapukaia.
  - <sup>3</sup> Mba'eta reayvu vy iporã va'e anho reme'ẽ ixupe.  
 Inhakã re remoĩ coroa ouro ete'i guigua.
  - <sup>4</sup> Guekove re ha'e ojerure ramo reme'ẽ,  
 raka'e rã peve guarã.
  - <sup>5</sup> Reraa jepeague ma pavẽ rei oguerovy'a okuapy.  
 Hexe remoĩ hexakãrã ha'e yvateve aguã.
  - <sup>6</sup> Raka'e rã peve guarã remoĩ nhomoingo porãarã.  
 Hexeve reiko ramo vy'a anho 'rã oendu.
  - <sup>7</sup> Mba'eta huvixave ojerovia SENHOR re.  
 Ha'e rami vy Yvate ete va'e omboaxy ramo peteĩve henda py ndo'ai 'rã.
  - <sup>8</sup> Ha'e rami vy ndepo oupity 'rã nderovaigua kuery ha'e javi,\*  
 reiporu kuaa regua ojopypa 'rã ndere ija'e e'ŷ va'e.
  - <sup>9</sup> Ha'e kuery pe rejekuaa uka vy  
 rejapo 'rã tata rupa haku raxa va'e rami.  
 SENHOR opoxya rupi omomba 'rã,  
 tata oapypaa rami.
  - <sup>10</sup> Yvy gui remomba 'rã hamymino kuery,  
 avakue ra'y kuery ikuaiia gui.
  - <sup>11</sup> Nderovai ha'e kuery mba'emo vai ojapoxe teĩ  
 nopus'ã kuaai 'rã, ndojapo kuaai 'rã ha'e nunga.
  - <sup>12</sup> Rejapo 'rã oguevipa aguã rami,  
 ha'e kuery rova re rea'anga 'rã nderapa.
  - <sup>13</sup> SENHOR, tandeyvate ndepo'akaa py.  
 Ha'e rã ore ma roporaei 'rã ndepo'akaa roguerovy'aa rupi.

## 22

- Messias oiko axy rire ipo'aka ju aguã re ijayvua*  
 Jogueroporaei va'e pe Davi ombopara va'ekue, "Guaxu aje'iveguia" he'ia py oporaeia  
 rami oporaei aguã.
- <sup>1</sup> Xeruete, Xeruete, mba'e re tu xereja ri?\*  
 Mba'e re tu ajexavaia rupi ajapukai teĩ  
 mombyry ri repyta xegui xereraa jepe e'ŷ aguã?
  - <sup>2</sup> Xeruete, ára py ajapukai ramo naxembovai,  
 pyávy voi ndapytu'ui ae.
  - <sup>3</sup> Ha'e rami teĩ ndee ma iky'a e'ŷ va'e reiko.  
 Nerenda repenaaty py reguapy reiny Israel kuery oporaei okuapy va'e mbyte.
  - <sup>4</sup> Oreramoĩ kuery ma ndere ojerovia raka'e.  
 Ojerovia ramo reraa jepe.
  - <sup>5</sup> Ndevy pe ha'e kuery ojapukai ramo reo jepe raka'e.  
 Ndere ojerovia, nda'eve e'ŷi nho guive.

---

\* **21:8** Apy guive huvixave pe ijayvu. \* **22:1** Kova'e salmo ha'e javi omombe'u ma voi Jesus kuruxu re omano jave guarã (Mateus 27.33-54, Marcos 15.22-32, João 19.17-30, Filipenses 2.5-11).

- 6 Ha'e rã xee ma taxo, ava e'ŷ merami,  
     mba'eta avakue pe ovare e'ŷ va'e,  
     heta va'e kuery oipota va'e'ŷ aiko.
- 7 Xerexaa kuery ha'e javi xejojai rei.  
     Hembe'a rei reve oakã ombovava vy aipoe'i:
- 8 "SENHOR re rejerovia ramo tanderepy.  
     Ha'e ae tandereraa jepe, hexe ndererovy'a ri vy", he'i okuapy.
- 9 Ha'e rami teĩ ndee ma xetui'i aguã rami xeapo va'ekue.  
     Xere repena porã va'ekue akambu'i teri jave.
- 10 Xetui'i guive ndevy aiko.  
     Xeryru'i py aia pyve ndee Xeruete reiko.
- 11 Aŷ ma enhemombyry eme xegui,  
     mba'eta ovaẽ ma ajexavai aguã,  
     ha'e xepytyvõarã ndoikoi.
- 12 Heta ikuai toro nharõ rami xejoko va'e,  
     toro mbaraetekueve Basã pygua xembojere rei okuapy.<sup>†</sup>
- 13 Xere ha'e kuery ijuru jai,  
     guary nhomboa'ypa va'e rami okororõ.
- 14 Yy rami anheẽ,  
     ha'e xekãgue ha'e javi oku'epa,  
     xeryepy re xekuraxõ ma ei raity hykupa va'e rami ojeapo.
- 15 Yapo guigua pêgue ipirupaa rami  
     xembaraetea voi opa ma,  
     xeapekũ guive xejurupy re oja ma oiny.  
     Ha'e rami py ndee xereity yvy ku'i rupi amano aguã.
- 16 Jagua kuery xembojere rei okuapy,  
     joapo vai va'ety kuery nhomoirõmba va'e.  
     Xepo ha'e xepy ombokuapa.
- 17 Aexapa xekãgue ha'e javi'i.  
     Ha'e kuery xere oma'ẽ okuapy xere ov'y'a reia py.
- 18 Xeo jomeme omboja'opa ma.  
     Xekamixa puku re oexa okuapy xortea.
- 19 Ha'e rã ndee SENHOR, ejep'e a eme xea gui.  
     Xemombaraetea, ejapura ke xerepy aguã.
- 20 Eraa jepe xerekove ha'e kuery kyxe gui,  
     jagua kuery oipe'a ta va'e gui.
- 21 Xereraa jepe ke guary juru gui,  
     búfalo rakua gui guive.  
     Tá, ndee ma xembovai ma!
- 22 Ha'e rami rire xeryvy kuery oendua py xema'endu'a 'rã nderery re,\*  
     heta va'e kuery mbyte rogueroporaei 'rã, po rami:
- 23 "SENHOR renonde pejererokyjea rupi pendekuai va'e, peroporaei.  
     Pembojerovia, peẽ Jacó ramymino kuery ha'e javi.  
     Israel ramymino kuery ha'e javi, pemboete pekuapy.
- 24 Mba'eta ha'e naxemboaxy e'ŷi ajexavai rã,  
     ndo jeguarui guive aiko axya gui,  
     ngova voi nomo'ãi xegui.  
     Ha'e rami 'rãgue py oendu xereraa jepe aguã ajapukai ramo", ha'e 'rã.

<sup>†</sup> 22:12 Basã yvy re ma heta ikuai raka'e vaka. Ha'e rã apy ma toro re ete'ŷ, heko vai va'e kuery re ijayvu. \* 22:22 Hebreus 2.10-12

- <sup>25</sup> Mba'eta ndegui ae ou ijaty va'e kuery mbyte xee rogueroporaei aguã.  
Nerenonde ojererokyjea rupi ikuai va'e oexaa py ajapo 'rã anhemboayvuague.<sup>‡</sup>
- <sup>26</sup> Ha'e ramo iporiaukue'i okaru 'rã okuapy hevyatãmba peve.  
SENHOR oeka va'e oguerovy'a 'rã okuapy.  
Ha'e kuery kuraxõ toikove riae!
- <sup>27</sup> Ha'e nunga rupi yvy apy peve ima'endu'aa 'rã SENHOR re,  
ixupe guarã ojeko rerova 'rã okuapy.  
Henonde guenapy'ã re yvy regua kuery ha'e javi oïmba 'rã okuapy.
- <sup>28</sup> Mba'eta SENHOR pegua ae ipo'aka aguã.  
Ha'e ae 'rã opena yvy regua kuery re.
- <sup>29</sup> Yvy regua oguerekopa rei va'e kuery voi okaru vy ombojerovia 'rã okuapy.  
Yvy re onhono porã mbyre ha'e javi 'rã oï guenapy'ã re henonde,  
guekove ae'i re nopena kuaai va'ekue.
- <sup>30</sup> Tamymino kuery voi ha'e oipotaa rami 'rã ikuai.  
Mba'eta raka'eve rã ikuai va'e pe ijayvua 'rã SENHOR reko re.
- <sup>31</sup> Ha'e kuery ou vy omombe'u 'rã ixuguigua teko porã.  
Raka'eve rã ikuai va'erã pe omombe'ua 'rã ha'e ojapo va'ekue.

## 23

### *"Xere SENHOR opena" he'ia*

Mboraerã Davi ombopara va'ekue.

- <sup>1</sup> SENHOR ma vexa'i mongarua rami xere opena va'e oiko.\*  
Ha'e ramo xevy pe ndoatai 'rã mba'eve rei.
- <sup>2</sup> Xemombytu'u 'rã inony nhuñdy porã py rami.  
Xereraa 'rã yy iky'a e'ÿ va'e py.
- <sup>3</sup> Omombaraete kuerei 'rã xenhe'ë.  
Tape teko porã rupi 'rã xerereko,  
guery omboete ucaa rupi vy.
- <sup>4</sup> Yvyugua manoa guy pytã reia rupi aiko teñ  
ndakyjei 'rã mba'eve rei gui,  
xereve ndee reiko ramo.  
Ndepo pygua ha'e ndepopoka ma xembopy'a guaxu.
- <sup>5</sup> Rerekó katu akaru aguã†  
xerovaigua kuery oexaa py.  
Xeakã re renhoë 'rã azeite.  
Xekaro remonyë 'rã onheëmba rei peve.
- <sup>6</sup> Anhetë xereve oï 'rã ndeporayvua ha'e xemboaxyá ára nhavõ, aikovea pukukue re.  
Ha'e gui SENHOR ro py aiko 'rã raka'e rã peve.

## 24

### *Huvixave hexakãmba va'e ou aguã re ijayvua*

Mboraerã Davi ombopara va'ekue.

- <sup>1</sup> SENHOR mba'e ae itui yvy ha'e opa mba'e hexe ikuai va'e,  
yvy regua kuery ha'e javi guive.\*
- <sup>2</sup> Mba'eta ha'e onhono raka'e ye'ë áry rupi,

‡ 22:25 “Anhemboayvuague ajapo 'rã” he'i vy ma mba'emo mymba ojuka aguã re ijayvuague re ima'endu'a. Ha'e gui ho'okue omboja'o 'rã guetarã kuery pe Nhanderuete oguerovy'a okuapy aguã (Levítico 7.15-16). \* 23:1 Apy ma vexa'i mongarua re ombojoja, Nhanderuete nhandere openaa re ijayvu vy (Apocalipse 7.15-17). † 23:5 Apy ma hoo va'e nhomovaë porã va'e re ombojoja. Ha'e va'e jave py hoo va'e ipoua kuery omovaë porã vy azeite onhoë'i vy oikyty 'rã inhakã re (Lucas 7.46). \* 24:1 1 Coríntios 10.23-26

- yy oxyry va'e áry omombyta.
- <sup>3</sup> Marā ramigua tu ha'eve SENHOR pegua yvyty re oẽ aguã?  
Marā ramigua nda'u ha'eve henda iky'a e'ŷ va'e py oiko aguã?
- <sup>4</sup> Opo py ojejavy e'ŷ va'e, ipy'a ky'a e'ŷ va'e,  
tuuete ramigua ovare e'ŷ va'e re onhe'ẽ nogueroma'endu'ai va'e,  
neĩ ndoura rivei va'e.
- <sup>5</sup> Ha'e va'e kuery re ma ou 'rã SENHOR omoingo porã,  
ha'e ramo Nhanderuete heraa jepea po gui ojopy 'rã teko porã.\*
- <sup>6</sup> Ha'e rami ikuai ixupe ojapukai va'e kuery,  
Jacó Ruete oekaa rupi ikuai va'e.
- <sup>7</sup> Peipe'a ke okẽ ikuai va'e,  
peipe'apave okẽ guaxu marã e'ŷ,  
Huvixave hexakãmba va'e oike aguã.
- <sup>8</sup> Mava'e tu Huvixave hexakãmba va'e?  
SENHOR imbaraete ha'e ipo'akapa va'e,  
SENHOR joe opu'ãa rupi ipo'aka va'e.
- <sup>9</sup> Peipe'a ke okẽ ikuai va'e,  
peipe'apave okẽ guaxu marã e'ŷ,  
Huvixave hexakãmba va'e oike aguã.
- <sup>10</sup> Mava'e tu Huvixave hexakãmba va'e?  
SENHOR ixondaro reta va'e,  
ha'e ae Huvixave hexakãmba va'e.

## 25

### *Nhanderuete pe onhepytvõ ucaa ague*

Davi ombopara va'ekue.

- <sup>1</sup> Ndere SENHOR, aroma'endu'a xenhe'ẽ.
- <sup>2</sup> Xeruete, ndere xee ajerovia va'e.  
Axĩmba rei aguã rami e'ŷ ke xererekoo,  
xerovaigua kuery xere ov'y'a rei e'ŷ aguã.
- <sup>3</sup> Ha'e rã nerarõ va'e kuery ma peteĩve noxĩmbai 'rã.  
Oxĩmba va'erã ma nhemi rupi joapo vai va'e kuery.
- <sup>4</sup> SENHOR, eikuaa uka xevy ndeguigua tape.  
Xembo'e ke reikoa rupi aiko avi aguã.
- <sup>5</sup> Xererekoo ndeguigua anhetẽ va'e rupi, xerekombo'e guive,  
mba'eta ndee ma Xeruete xereraa jepea,  
ndee ae roarõ aikovy ko'ẽ nhavõ.
- <sup>6</sup> SENHOR, nema'endu'a ke renhomboaxy ha'e ndeporayvua rupi  
jypy guive reikoa re.
- <sup>7</sup> Nema'endu'a eme ke xekunumi jave ajejavague re,  
neĩ nderovai xerekoo vaiague re.  
SENHOR, xemboaxy rupi anho ke nema'endu'a xere,  
ndeporayvu va'e vy.
- <sup>8</sup> SENHOR ma iporayvu ha'e heko porã va'e vy  
ojejavypa va'e kuery pe oikuua uka 'rã tape.
- <sup>9</sup> Yvyigüeve ma ha'e oguerekoo 'rã teko porã rupi,  
ombo'e 'rã ojeguigua tape rupi oiko aguã re.
- <sup>10</sup> SENHOR guigua tape ha'e javi rupi oĩ nhomboaxy ha'e anhetẽ va'e,  
guexeve guarã ojapo va'ekue ha'e ijayvuague rupi ikuai va'e pe.
- <sup>11</sup> SENHOR, nderery remboete ucaa rupi vy

\* **24:5** Mateus 5.8

- emboguepa xereko vaiague heta teĩ.
- <sup>12</sup> Avakue SENHOR renonde ojererokyjea rupi ikuai va'e pe  
oikuua uka 'rã tape oo aguã.
- <sup>13</sup> Ha'e ramo ha'e kuery nhe'ẽ opytu'u 'rã ov'y'a reve,  
ha'e gui hamymino kuery jevy ikuai porã 'rã yvy re.
- <sup>14</sup> SENHOR renonde ojererokyjea rupi ikuai va'e ma ha'e omonhemboja 'rã.  
Ha'e va'e kuery pe oikuua uka 'rã guexeve guarã ojapo va'ekue.
- <sup>15</sup> Ama'ẽ riae aikovy SENHOR re,  
mba'eta ha'e ae oipe'a 'rã xepy nhuã gui.
- <sup>16</sup> Ejevy ju xea py, xemboaxy ju,  
mba'eta xeae'i aĩ vy ajexavai.
- <sup>17</sup> Xemombytu'u ke xepy'a py nda'eveia gui,  
xepe'a ke ajexavaia gui.
- <sup>18</sup> Eikuua pota aiko axya ha'e ajexavaia re,  
ha'e emboguepa ajejavayague ha'e javi.
- <sup>19</sup> Eikuua pota ke xerovaigua kuery re,  
heta vaipa ramo.  
Xere ija'e e'ŷ va'e kuery xembojeguaru rei okuapy.
- <sup>20</sup> Earõ xenhe'ẽ re, ha'e xerepy.  
Taiko eme aximba rei aguã rami,  
ndere anhemi rire.
- <sup>21</sup> Anhetẽ rupi ha'e teko porã rupi aikoa tojapo akanhy e'ŷ aguã rami,  
mba'eta ndee ae xee roarõ.
- <sup>22</sup> Xeruete, eraa jepe Israel kuery  
ikuai axya ha'e javi gui.

## 26

### *Heko porã va'e ojapukaia*

Mboraerã Davi ombopara va'ekue.

- <sup>1</sup> SENHOR, xemboeko porã ke,  
anhetẽ rupi anho aiko  
ha'e SENHOR re ajeroviaa gui ndajepe'ai rire.
- <sup>2</sup> SENHOR, eikuua pota ke aikoa re ha'e xekuaa.  
Exa pota xepy'aa ha'e anhembopy'aa re.
- <sup>3</sup> Mba'eta ndeporayvua re xema'endu'a riae aikovy,  
ndeguigua anhetẽ va'e rupi aiko.
- <sup>4</sup> Ndaguapyi guive avakue nhombotavypa rei va'e reve,  
joayvu merami rive va'e kuery reve nanhemoirũi.
- <sup>5</sup> Opa marã rei ikuai va'e xee ndajou porãi,  
ha'e heko vai va'e kuery reve ndaguapyi.
- <sup>6</sup> Ajepoei ajejavý e'ŷa aikuua uka vy.  
Ha'e rami vy SENHOR, aiko ndevygua altar yvýry,
- <sup>7</sup> aporaei atã aguã ndevy,  
nerembiapo porãa amombe'upa aguã.
- <sup>8</sup> SENHOR, xee ma ayvu ndevygua oo,  
nerexakã olaty.
- <sup>9</sup> Eipe'a eme xerekove heko vai va'e kuery reve,  
xerekove eipe'a eme jouguy moëa kuery reve.
- <sup>10</sup> Ha'e kuery po ma jojukaague re iky'a,  
oiporu kuaa regua re ma teko vai repyrã rive oguereko.

11 Ha'e rã xee ma xereko porã rupi aiko.

Xerepy ke xemboaxy vy.

12 Xepy oĩ atã yvy joja reia py.

Ha'e rami vy heta va'e kuery oendua py xema'endu'a porã 'rã SENHOR re.

## 27

### *Nhanderuete reve oikoxea rupi ijayvua*

Mboraeirã Davi ombopara va'ekue.

1 SENHOR ma xemoexakãa ha'e xereraa jepea oiko.

Mava'e gui 'rã tu akyje?

SENHOR ma xerekovea onhemi aguã.

Mava'e gui tu akyje ta?

2 Ha'e gui joapo vai va'ety kuery xere ou vy xemomba aguã,

xeavyky rei va'e ha'e xerovaigua kuery,

ha'e kuery onhepyxanga vy ho'apa 'rã okuapy.

3 Xondaro kuery heta xembojere teĩ

xepy'a py nanhemondyi 'rã.

Xere anho opu'ãmba teĩ ajerovia riae 'rã.

4 Peteĩ regua re tema ajerure SENHOR pe,

ha'e va'e anho ajouxe:

ha'e va'e ma SENHOR pegua oo py aiko aguã aikovea pukukue re,

SENHOR rexakãa aexa aguã,

ha'e ixupegua templo py anhembo'e aguã.

5 Ha'e rami vy aĩ vaia ára xenhomí 'rã ojeupegua opy,

xemoinge 'rã ojeupegua oo py anhemi aguã.

Xereraa 'rã itaova áry.

6 Ha'e javé py xeakã ombo'yvate ju 'rã

xerovaigua kuery xembojere rei va'e áry.

Ixupegua oo py arový'a vy mba'emo ame'ẽ 'rã.

Aporaei ha'e ambopu 'rã SENHOR pe.

7 SENHOR, endu ke xeayvua,

ndevy ajapukai rã.

Xemboaxy ha'e xembovai.

8 Xepy'a re amoĩ "Xereka ke xereve reiko aguã" 'rea.

Ha'e ramo roeka 'rã SENHOR, ndereve aiko aguã.

9 SENHOR, ejexa uka e'ŷ eme xevy.

Ndepoxy reve xemoxê eme xee nerembigui.

Mba'eta ndee ma xepytyvõa reiko.

Xeruete xereraa jepea,

epena e'ŷ eme xere, xereja eme xeae'i.

10 Mba'eta xeru ha'e xexy xereja teĩ

SENHOR xereru 'rã.

11 SENHOR, xembo'e ke ndeguigua tape rupi aiko aguã,

tape jojaa rupi xerereko xere oma'ẽ mbegue va'e kuery gui.

12 Xemboaxa eme xerovaigua kuery oipotaa rami xerereko aguã.

Mba'eta xerovai opu'ã rei okuapy ayvu rive py,

joapo vai aguã re anho nhomongeta va'e.

13 Xee ajerovia SENHOR porayvua aexa aguã

yvy re aikove teri reve.

14 Pearõ ke SENHOR.

Pendekuerai eme, pendepy'a guaxu  
ha'e pearõ tema SENHOR.

## 28

### *Oguerovy'a reve ojerurea*

Mboraerā Davi ombopara va'ekue.

**1** SENHOR, ndevy pe ajapukai.

Xe'itaova, endu e'ŷ eme ke xeayvua,  
mba'eta naxembovai ramo  
yvykua py oguejy va'e kuery rami akanhy 'rã.

**2** Endu ke xereraa jepe aguã re ajapukai ramo,  
nerenda iky'a e'ŷ va'e katy xepo aupi reve.

**3** Xembotyryry eme ke heko vai va'e kuery  
opa marã rei ikuai va'e reve.

Ha'e kuery ma ikuai porã aguã re merami rive ijayvu oirũ pe,  
teĩ ipy'a re ma opa marâguia anho oĩ.

**4** Embopaga ke ha'e kuery ojapoague rami,  
mba'emo vai ojapoague re.

Eme'ẽ ha'e kuery opo py ojapoague rekovia,  
embojoja ha'e kuery ojapoague repy.\*

**5** Ha'e kuery ndoikuaa potai SENHOR ojapo va'e re,  
neĩ opo py ojapo va'ekue re.

Ha'e ramo SENHOR oitypa 'rã, nomopu'ã jevyvei 'rã guive.

**6** Ta'imma'endu'a porãa SENHOR re,  
xereraa jepe aguã re ajapukai ramo xerendu rire.

**7** SENHOR ae xemombaraetea ha'e mba'emo vai jokoa.  
Hexe xekuraxõ ojerovia.

Ha'e xereraa jepe ramo xekuraxõ ov'y'a,  
ha'e ixupe aporaei reve amboete 'rã.

**8** SENHOR omombaraete 'rã ixupe ikuai va'e,  
hembiporavo onhemi vy oo jepe aguã.

**9** Eraa jepe ke ndevygua kuery,  
emoingo porã ndevygua kuery.  
Ha'e kuery re epena ha'e emboiyvate raka'e rã peve.

## 29

### *Yapu ha'e overa rupi Nhanderuete ayvu onhendua re ijayvua*

Mboraerā Davi ombopara va'ekue.

**1** Nhanderuete ra'y kuery pendekuai va'e, pemboete SENHOR,\*  
perovy'a SENHOR rexakãa ha'e imbaraetea.

**2** Pemboete SENHOR hery pemboete aguã ha'evea rami.  
Pembojerovia SENHOR iky'a e'ŷa rexakãa py.

**3** Yy áry rupi onhendu SENHOR ijayvua.†  
Nhanderuete yapu guexakãa gui.  
Yy tuvixa va'e áry rupi SENHOR oiko.

**4** SENHOR ayvu ma ipo'akapa va'e.

\* **28:4** Mateus 16.27; Apocalipse 22.12   \* **29:1** “Nhanderuete ra'y kuery” he'ia ma amongue henda py yva pygua anjo kuery pe ijayvu vy (Salmo 103.20), ha'e rami e'ŷ vy ojerovia va'e kuery pe (Salmo 82.6, 96.7-9).   † **29:3** Apy ma omombe'u Nhanderuete opo'akaa oexa uka vy oky ryapu ha'e overa yvvytu reve ombou. Hyapu pe “Nhanderuete ijayvua” he'i.

- SENHOR ayvu re yvatea anho oĩ.
- <sup>5</sup> SENHOR ayvu omopẽ 'rã yary ikuai va'e.  
Tá, SENHOR omboa'ypa 'rã yary Líbano py ikuai va'e.
- <sup>6</sup> Líbano ha'e Siriom yvyty áry ikuai va'e  
ojapo 'rã vaka ra'y rami opo-opo aguã rami, vaka ka'aguy regua rami.
- <sup>7</sup> SENHOR ayvu ojapo 'rã tata hendy ov y aguã rami.
- <sup>8</sup> SENHOR ayvu omboryryi 'rã tekao e'ŷa.  
SENHOR ojapo 'rã Cades tekao e'ŷa rupi yvy oryryi aguã rami.
- <sup>9</sup> SENHOR ayvu ma ojapo 'rã guaxu kuery ta'y'i aguã rami,  
oitypa 'rã ka'aguy.  
Ha'e ramo ixupegua templo py ha'e javi "Iporã ete!" he'i okuapy.
- <sup>10</sup> SENHOR opena raka'e yy ou jave.  
Huvixave rami opena 'rã raka'e rã peve.
- <sup>11</sup> SENHOR omombaraete 'rã ojeupegua kuery.  
SENHOR omoingo porã 'rã ojeupegua kuery.

## 30

### *Omano ta ramo ogueraa jepe rire oguerovy'aa ague*

Mboraeirã Davi ombopara va'ekue oo guaxu Nhanderuete pe omboaxa jave.

- <sup>1</sup> SENHOR, xee ma romboete 'rã,  
xereraa jepe rire.  
Nderejapo xerovaigua kuery xere ov y'a rei aguã rami.
- <sup>2</sup> SENHOR Xeruete, ndevy pe ajapukai va'ekue xereraa jepe aguã.  
Ha'e ramo xemonguera.
- <sup>3</sup> Rejapo yvykua gui xenhe'ẽ oẽ ju aguã rami.  
Xerekove re repena yvykua py aguejy e'ŷ aguã.
- <sup>4</sup> Peẽ ixupegua pendeky'a e'ŷ va'e, peporaei pekuapy SENHOR pe,  
perovy'a hery iky'a e'ŷ va'e.
- <sup>5</sup> Mba'eta ipoxya ma xapy'a'i guarã anho.  
Ha'e rã nhanderayvua ma jaikovea pukukue re 'rã oĩ.  
Pytû ouvy rã onhendu 'rã ojae'o va'e.  
Va'eri ko'ẽ ma rã ou 'rã vy'a.
- <sup>6</sup> Xee aiko porã rei jave  
"Ndaxereityai 'rã" ha'e va'ekue.
- <sup>7</sup> Ndee SENHOR xemboaxy rupi ae  
rejapo xee aĩa yvyty oĩ atã aguã rami.\*  
Mba'eta nderejexa ukai ramo  
xee ajexavai.
- <sup>8</sup> SENHOR, ndevy pe ajapukai.  
SENHOR, ndevy ae ajerure.
- <sup>9</sup> Mba'erã tu xeruguy ovare 'rã yvykua py aguejy rã?  
Ndevy pe iku'ikue oporaei 'rã ri ty'y?  
Ha'e nunga oikuua uka 'rã teve ndeguigua anhetẽ va'e?
- <sup>10</sup> SENHOR, endu ha'e xemboaxy ke.  
SENHOR, enhemoĩ xepytyvõarã.
- <sup>11</sup> Xerexaya gui xemombytu'u avy'a ju aguã.  
Xegui reipe'a ma ajukue vaikue,<sup>†</sup>  
hekovia avy'a ete aguã ju remoĩ,

\* **30:7** "Xevygua yvyty" he'ia ma opo'akaa re ijayvu vy. † **30:11** Ajukue vaikue py ha'e kuery onhemonde 'rã ipy'a vai vy (Mateus 11.21).

<sup>12</sup> xenhe'ẽ opytu'u e'ŷ re oporaei aguã.  
SENHOR Xeruete, roguerovy'a 'rã raka'e rã peve.

## 31

### *Iporiauague gui oguerovy'aa ague*

Jogueroporaei va'e pe mboraeirã Davi ombopara va'ekue.

<sup>1</sup> SENHOR, ndere ae anhemi va'e.

Taiko eme oximba rei va'e.

Xereraa jepe ke nderekoo porãa rupi vy.

<sup>2</sup> Endu ke ndeapyxa py, xereraa jepe pojava aguã.

Enhemoi xevy oo ikorapa va'e,

oo imbaraete vaipa va'e aa jepe aguã.

<sup>3</sup> Mba'eta ndee ae xe'itaova ha'e oo ikorapa va'e reiko.

Nderery remboete ukaa rupi vy xererekoo ha'e xembo'e 'rã.

<sup>4</sup> Xepe'a 'rã nhuã nhemi rupi omoi mbyre gui,

mba'eta ndee ma xemombaraaetea.

<sup>5</sup> Ndepo py ae amboaxa xenhe'ẽ.\*

SENHOR Xeruete anhetẽ va'e, ndee ae xerepy.

<sup>6</sup> Rejou vai mba'emo ra'angaa ombojerovia va'e.

Ha'e rã xee ma SENHOR re anho ajerovia.

<sup>7</sup> Xee roguerovy'a, ajou porã 'rã ndeporayvua,

mba'eta reikuua pota ajaxavaia re,

reikuua xenhe'ẽ oiko axya.

<sup>8</sup> Naxemboaxai xerovaigua kuery po py.

Xemopu'ã imo'amy petei henda tuvixaa py aiko aguã.

<sup>9</sup> SENHOR, ajaxavaia aendu rã xemboaxy ke.

Xeporiau reia gui xerexa voi opa ov.

Xerekove, xerete guive opa.

<sup>10</sup> Xerekovea ma iporiaua re anho oaxa ov,

xepoaõa rupi tema aiko ma'etõa nhavõ.

Ajejavypa rire naxembaraaeteive-ive avy,

sekãgue voi opa ov.

<sup>11</sup> Xerovaigua kuery ha'e javi ojeguaru aguã rami aiko,

xero katy'i ikuai va'e kuery voi onhemondyipa xegui.

Xerexa va'ety kuery ndaxerexa xeveipa okuapy,

tape rupi xerexa va'e onha xegui.

<sup>12</sup> Xegui ha'e kuery hexaraipa ma opy'a py, omanogue gui rami,  
karo nhae'ũ guigua vokue rami aiko.

<sup>13</sup> Mba'eta xee aendu heta ijayvu mbegue okuapy ramo,

seyke jovaive rupi ikuai xemongyjexe vy.

Xere ijayvu mbegue vy

onhembopy'a okuapy xerekove oipe'a aguã.

<sup>14</sup> Ha'e rã xee ma ajerovia SENHOR re.

Ndevy pe "Ndee ma Xeruete" ha'e.

<sup>15</sup> Ndepo py oĩ xe'ára.

Xepe'a ke xerovaigua kuery po gui,

xerakykue monhaa kuery xejukaxea gui.

<sup>16</sup> Emoexakã ke nderova xee nerembiguai áry.

Xemboaxy vy xereraa jepe.

\* <sup>31:5</sup> Kova'e ayvu rupi Jesus Cristo ijayvu kuruxu re omano jave (Lucas 23.46).

- <sup>17</sup> SENHOR, ndevy pe ajapukai rire  
ejapo eme aximba aguã rami.  
Toximba heko vai va'e kuery ae,  
tokyririmba omanoa py.
- <sup>18</sup> Emokyrirĩ ijapu va'e kuery,  
heko porã va'e re opa marã rei ijayvu va'e,  
onhemboarai rei, ojee ae ojerovia okuapy va'e.
- <sup>19</sup> Ndeporayvua ma yvate ete va'e,  
nerenonde ojererokyjea rupi ikuai va'e pe rexu uka aguã rerekva'e.  
Ha'e va'e ma rexu uka 'rã avakue ra'y kuery gui ndere onhemi va'e kuery pe anho.
- <sup>20</sup> Ha'e kuery renhommi 'rã ndejee ae avakue ojapo vaixea gui.  
Ha'e py renhommi 'rã opa marãgua ayvu gui.
- <sup>21</sup> Ta'ima'endu'a porãa SENHOR re!  
Mba'eta xemboaxy ete  
peteĩ tetã py xejokopaa ramo.
- <sup>22</sup> Xee ajapura reve  
“Navaëvei ma 'rã nerendone py” ha'e va'ekue.  
Ha'e rami teĩ ndee rendu ajapukaia,  
xereraa jepe aguã re ajapukai ramo.
- <sup>23</sup> SENHOR pegua iky'a e'ý va'e ha'e javi, peayvu ke.  
SENHOR ndoity ukai 'rã hexe ojerovia va'e.  
Ha'e rã heko vai va'e ma ombopaga vaipa 'rã.
- <sup>24</sup> SENHOR pearõ va'e kuery,  
penembaraete ke, pendepy'a guaxu tema!\*

## 32

### *Ojejavyague omboguepa rire oguerovy'aa ague*

- Mboraeirã Davi ombopara va'ekue nhanembo'e aguã.
- <sup>1</sup> Ovy'a ete 'rã heko vaiague omboguepaa va'e,  
ojejavyague ojao'ipaa ma ramo.
- <sup>2</sup> Ovy'a ete 'rã ava ixupe SENHOR “Heko vai va'e” nde'i ramo,  
ipy'a re onhenhommi aguã noĩ va'e.\*
- <sup>3</sup> Xee ma ajejavyague namombe'ui teri jave  
xekägue voi inhymave ovy ko'ẽ nhavõ xepoaẽ ramo.\*
- <sup>4</sup> Mba'eta ara py ha'e pyávy xere aendu va'ekue ndepo poyia.  
Ha'e ramo xembaratea opa ovy kuaray puku py yy typaa ramo.
- <sup>5</sup> Ha'e gui ma ajejavyague amombe'upa ndevy,  
xereko vaia nanhomivei.  
Xejeupe aipoa'e: “Amombe'u 'rã SENHOR pe xereko vaia.”  
Ha'e ramo remboguepa ajejavyague.
- <sup>6</sup> Ha'e ramo ndevygua kuery ha'e javi tojapukai ndevy  
ndejou aguã ha'eve teria ja.  
Ha'e rami vy ha'e kuery re yy tyguaxu ouvy teĩ ndoguerovyi 'rã.
- <sup>7</sup> Ndee ma anhemiatiy.  
Xereraa jepe 'rã ajexavaia gui,  
ha'e xereraa jepelague re remoĩ avy'a reve roqueroporaei aguã.
- <sup>8</sup> Aipo're: “Romo'arandu ha'e rombo'e 'rã tape reo aguã re.  
Ndere ama'ẽ ha'e romongeta 'rã.

---

\* **31:24** 1 Coríntios 16.13    \* **32:2** Romanos 4.4-8    \* **32:3** Davi ojejavyague ha'e onhemombe'uangre re ijayvua  
ma 2 Samuel 11.1-12.14 py oĩ.

**9** Kavaju, mburika rami e'ŷ eme eiko.  
 Ha'e kuery ijuru xã, e'ŷ vy hova regua reve vy 'rãe rereko.  
 Ha'e rami e'ŷ ramo ndoikoi 'rã reipotaa rami" 're.†

**10** Heko vai va'e ma ojexavai ete 'rã.  
 Ha'e rã SENHOR re ojerovia va'e ma omboaxya rupi 'rã oguereko.  
**11** Penderekō porã va'e, perovy'a ke SENHOR, pevy'a ete.  
 Pevy'aa rupi peporaei atã,  
 pendepy'a re teko porã oĩa va'e ha'e javi.

## 33

### *Opa mba'e moingoare ha'e opena va'e pe oporaeia*

- 1** Penderekō porã va'e, perovy'a SENHOR!  
 Anhetẽ rupi ikuai va'e ogueroporaeia ma ha'eve va'e.  
**2** Penema'endu'a SENHOR re ixã reta va'e reve pembojoguy vy.  
 Ixupe peporaei mbaraka dez ixã va'e reve.  
**3** Pemonhendu mboraei pyau,  
 pembopu ke pevy'aa rupi.\*  
**4** Mba'eta SENHOR ayvu ma anhetẽ ete va'e,  
 ha'e mba'emo ojapoa ha'e javi rupi ojeroviapy oiko.  
**5** Oguerovy'a 'rã heko porã ha'e ha'evea rami joguereko va'e.  
 Yvy jave re oĩ SENHOR porayvua.  
**6** Yva ma oayvu py rive ojapo raka'e,  
 ijayvuẽ gui yva regua ha'e javi ikuai.  
**7** Yy avi omboaty raka'e ye'ẽ tuvixa va'erã,  
 ono'õ reta vy omonyẽ hendarã va'ekue.  
**8** Yvy jave re pendekuai va'e, pemboete SENHOR.  
 Yvy re pendekuai va'e ha'e javi, henonde pejererokyjea rupi pendekuai.  
**9** Mba'eta ijayvu ramo rive opa mba'e ojekua,  
 ha'e ijayvua rupi opa mba'e oiko raka'e.\*  
**10** SENHOR omboaxa rivepa 'rã yvy regua kuery onhembopy'a okuapya,  
 omboavaipa 'rã ha'e kuery ojapoxe va'e.  
**11** Ha'e rã SENHOR onhembopy'aa ma ndoaxa rivei 'rã raka'e rã peve guarã,  
 opy'a re omo'i va'e oĩ 'rã ta'y jevy-jevy ikuia peve.  
**12** SENHOR pe "Oreruete" he'i va'e regua ma ov'y'a ete 'rã,  
 ojeupe guarã ae oiporavo rire.  
**13** Yva gui SENHOR oma'ẽ oiny vy  
 oexapa 'rã avakue ra'y kuery ikuia.  
**14** O'amba gui oexapa yvy regua kuery.  
**15** Peteĩ-teĩ kuraxõ apoare  
 oexapa ha'e kuery ojapo va'e ha'e javi.  
**16** Nda'ipoi huvixave oxondaro kuery po'akaa rupi oo jepe va'erã,  
 ojerovia rei va'e teĩ ombaraetea py rive ndoo jepei 'rã.  
**17** Kavaju voi nanhombopo'akai 'rã.  
 Imbaraete teĩ ndogueraa jepei 'rã avave rei.  
**18** Ha'e rã SENHOR ma oma'ẽ 'rã oiny henonde ojererokyjea rupi ikuai va'e re,  
 omboaxy aguã oarõ okuapya va'e re.  
**19** Ha'e kuery rekovea ogueraa jepe 'rã omanoa gui,  
 karuai jave voi opena 'rã okuave aguã rami.

† 32:9 Apy ma Nhanderuete ijayvu nhandevy. \* 33:3 Apocalipse 5.9, 14.3 \* 33:9 Hebreus 11.3

- 20 Nhanenhe'ẽ py nharõ SENHOR nhanepytyvõ aguã,  
nhanderepya ha'e mba'emo vai jokoa oiko ramo.
- 21 Hexe ae nhanekuraxõ ov'y'a 'rã,  
hery iky'a e'ŷ va'e re jajerovia ramo.
- 22 SENHOR, orererekó ke oremboaxyá rupi,  
ndee ae roarõ ramo.

## 34

*"Peikuua pota SENHOR porayvua re", he'ia*

Abimeleque renonde Davi inhakã porã e'ŷa rami onhemoingo ramo omoxẽ jave oo vy mboraeirã ombopara va'ekue (1 Samuel 21.10-15).

- 1 Ára nhavõ xema'endu'a porã 'rã SENHOR re.  
Ixupe aporaei riae 'rã.
- 2 Xenhe'ẽ py voi aporaei 'rã SENHOR pe.  
Ha'e ramo yvyīgue'i oendu vy ov'y'a 'rã.
- 3 Pemboete ke SENHOR xereve,  
peteĩ rami jarovy'a hery.
- 4 SENHOR pe ajapukai ramo xere opena karamboae.  
Xereraa jepe guive akyjea ha'e javi gui.
- 5 Pema'ẽ hexe, ha'e ramo penemoexakã 'rã.  
Pendere noïvei 'rã peximbaa.
- 6 Xee ajexavai vy ajapukaia SENHOR oendu vy  
xereraa jepe karamboae opa mba'e py aiko axya gui.
- 7 SENHOR renonde ojererokyjea rupi ikuai va'e yvýry ma  
ixuguigua anjo oiko ogueraa jepe aguã.
- 8 Peikuua pota pexa aguã SENHOR porayvua.  
Ovy'a ete 'rã hexe onhemi va'e kuery.
- 9 SENHOR rembiporavo pendekuai va'e, pendekuai henonde pejererokyjea rupi,  
mba'eta ha'e rami ikuai va'e pe ndoatai 'rã mba'eve rei.
- 10 Guary ra'y kue'iry ojexavai ha'e oendu 'rã karuai.  
Ha'e rã SENHOR oeka va'e pe ma mba'emo porã ndoatai.
- 11 Xera'y kuery, peju ke, pejapyxaka xeayvu re.  
Kee rombo'e 'rã SENHOR renonde pejererokyjea rupi peiko aguã re.
- 12 Peẽ kuery tu pendekove reve peikoxe  
ha'e peikove pukuxe, iporã va'e rupi pevy'a aguã?
- 13 Ha'e rami ri vy pejoko peneapekũ mba'emo vaia rupi pendeayvua gui,  
pendejuru guive pejoko apu gui.
- 14 Pejep'e a mba'emo vai gui, iporã va'e rupi anho peiko.  
Peka peteĩ rami pendekuai aguã, penhea'ã ha'e rami aguã re ae.
- 15 Heko porã va'e re SENHOR oma'ẽ 'rã oiny,  
ojapyxaka oendu aguã ojapukaia.
- 16 Ha'e rã mba'emo vai apoa ma SENHOR ndoexaxe,  
yvy gui omboguepa 'rã ha'e kuery re ima'endu'aa.\*
- 17 Ha'e rã heko porã va'e ojapukai ramo ma SENHOR oendu 'rã,  
ogueraa jepe 'rã oiko axya ha'e javi gui.
- 18 SENHOR nonhemombyri 'rã opy'a py nda'evei va'ea gui,  
ogueraa jepe 'rã onhe'ẽ py ojexavai va'e.
- 19 Mbovykue rei e'ŷ 'rã oiko heko porã va'e ojexavai aguã.  
Ha'e rami teĩ SENHOR ogueraa jepe 'rã ha'e nunga ha'e javi gui.

\* **34:16** 1 Pedro 3.9-12

- <sup>20</sup> Opena 'rã ikãgue ha'e javi re,  
nei peteñ ma nomopẽ ukai 'rã.\*
- <sup>21</sup> Teko vai ae ojuka 'rã heko vai va'e.  
Heko porã va'e ndoayvui va'e kuery ombopagaa 'rã.
- <sup>22</sup> Ha'e rã guembiguai kuery rekove ma SENHOR oepy 'rã.  
Hexe ojerovia va'e regua peteñve nombopagaai 'rã.

## 35

*Hovaigua kuery ombopaga aguã re ojerurea ague*  
Mboraerã Davi ombopara va'ekue.

- <sup>1</sup> SENHOR, emoingo axy ke xemoingo axy va'e kuery,  
epu'ã xere opu'ã va'e re.
- <sup>2</sup> Eru hu'y jokoa ha'e nemo'ãa tuvixa va'e,  
epu'ã ejuvy xerepy aguã.
- <sup>3</sup> Eru hu'y guaxu,  
ha'e ejoko xerakykue monhaa kuery.  
Xenhe'ẽ pe aipo're:  
“Xee ma ndereraa jepea.”
- <sup>4</sup> Tove xejukaxe okuapy va'e nda'evei nho ta'ikuai ha'e toximba.  
Xere ijayvu mbegue rei va'e toguevipa oximba reve.
- <sup>5</sup> Ta'ikuai mba'emo pire vytytu omboveve heravy va'e rami,  
SENHOR-a guigua anjo omondyipa ramo.
- <sup>6</sup> Tojevy ju tape kyjea yxyi va'e rupi,  
ha'e SENHOR-a guigua anjo toakykue monha.
- <sup>7</sup> Mba'eta mba'e py e'ý ha'e kuery xembo'axe okuapy nhuã py,  
mba'e py e'ý vy ojo'o xerekovea oipe'a aguã.
- <sup>8</sup> Ha'e ramo xerovaigua kuery tokanhymba xapy'a  
noexa'ãvei ma jave.  
Ha'e kuery ae to'a nhuã nhemi rupi ojapo va'ekue py.  
Ha'e va'e py ae ho'a vy tokanhy.
- <sup>9</sup> Ha'e ramo xenhe'ẽ py xee avy'a 'rã SENHOR re,  
xereraa jepeague re xema'endu'a 'rã.
- <sup>10</sup> Xerete ha'e javi py aipoa'e 'rã:  
“SENHOR, mava'e nda'u ndee rami guarã oiko?  
Mba'eta ndee ma ojexavai va'e reraa jepe 'rã imbaraeteve va'e gui.  
Ndovy'ai va'e ha'e iporiaukue'i reraa jepe 'rã imbojexavaia kuery gui.”
- <sup>11</sup> Heko vai va'e kuery opu'ã vy  
xere ijayvu 'rã xee aikuaa va'e rupi e'ý.
- <sup>12</sup> Mba'emo porã ajapoague rekovia mba'emo vai ha'e kuery ojapo xere,  
xerekove omokanhixye vy.
- <sup>13</sup> Ha'e gui xee ma ha'e kuery imba'eaxy ramo  
ajukue vaikue py anhemonde va'ekue.\*  
Xepy'a vai aikovy va'ekue akaru e'ý re,  
seakã amboguejy reve anhembo'e ainy.
- <sup>14</sup> Ha'e kuery re xepy'a vai aikovy xeiru ae'i re rami, xeryyy re rami ae.  
Jexavai gui ajero'a rei'i aikovy oxy re ojae'o va'e rami.
- <sup>15</sup> Ha'e rã xee anhepyxanga ramo

\* **34:20** Kova'e ayvu rami vy Jesus omano jave ikãgue nomopẽai (João 19.28-37).

\* **35:13** Ajukue vaikue py onhemonde 'rã ipy'a vai vy (Salmo 30.11; Mateus 11.21).

- ha'e kuery ov'y'a vy onhemboaty okuapy xerovai.  
 Omboetepy e'ŷ neĩ xee aexa va'ety e'ŷ ijayvu rei okuapy xere.
- <sup>16</sup> Ngarua py opa marā ov'y'a va'e rami  
 ha'e kuery hāj jekyty okuapy xere.
- <sup>17</sup> SENHOR, raka'e peve 'rā tu rema'ē rive?  
 Eraa jepe xerekove ha'e kuery ipoxya gui,  
 guary kuery gui epy xerekove.
- <sup>18</sup> Ha'e ramo xee roguerovy'a 'rā heta va'e kuery ijatya py.  
 Ndevy aporaei 'rā heta mbyte.
- <sup>19</sup> Ha'e rā ndaxerayvui rive va'e ma tovy'a reive eme.  
 Mba'e py e'ŷ xere nda'ija'e'i va'e toxapymi reive eme.\*
- <sup>20</sup> Peteĩ rami ikuai aguã re e'ŷ ae ha'e kuery ijayvu.  
 Ha'e rami 'rāgue py yvy re ikuai rive'i va'e ombotavy aguã re anho jogueroayvu  
 okuapy.
- <sup>21</sup> Ijuruja-rujai 'rā okuapy xere.  
 Ha'e vy aipoe'i 'rā:  
 "Jajopy ma, jajopy ma teve!  
 Mba'emo ojapo rā nhanderexa py ae jaexa."
- <sup>22</sup> Ha'e rami teĩ ndee SENHOR rexia reiny ha'e kuery ikuiaia.  
 Ha'e rami vy ekyrirī eme.  
 SENHOR, ejep'e eme xea gui.
- <sup>23</sup> Emýi, evy ke xemboeko porā aguã.  
 Xe-SENHOR Xeruete, eikuua uka xerekko porāa.
- <sup>24</sup> SENHOR Xeruete, xerekko re eikuua pota nderekko porāa rupi.  
 Ejapo eme xere ha'e kuery ov'y'a rei okuapy aguã rami.
- <sup>25</sup> Ha'e kuery aipo te'i eme op'y'a py:  
 "Aŷ ma oiko ma jaipotaa rami!  
 Aŷ ma nhamomba 'rā!" te'i eme.
- <sup>26</sup> Ha'e rami 'rāgue py toximba, tojekuua heko vaia  
 ajexavai rā ov'y'a rei okuapyague re.  
 Ta'ikuai oximba ete va'e  
 xerovai onhemboyvate rei rire.
- <sup>27</sup> Ha'e rā xerekko porāa oguerovy'a va'e ma  
 toporaei okuapy ov'y'aa rupi.  
 Ha'e kuery ma aipo te'i riae: "Omboetepy toiko SENHOR,  
 hembiguai kuery ikuai porā rā ov'y'a va'e."
- <sup>28</sup> Xee avi xeayvu reve xema'endu'a 'rā ha'evea rami rejapoa re.  
 Ára pukukue re aporaei 'rā ndevy.

## 36

### *Avakue reko vaia ha'e Nhanderuete reko porāa re ijayvua*

Jogueroporaei va'e pe Davi SENHOR rembiguai ombopara va'ekue.

<sup>1</sup> Heko vai va'e py'a re ma oĩ heko vaixea anho.

Ha'e kuery re noĩ SENHOR renonde ojererokyje aguã.\*

<sup>2</sup> Mba'eta teko vai ojapo 'rā ojejou porā rei aguã rami rive.

Ha'e vy aipoe'i 'rā ojeupe: "Opa marā aiko teĩ avave rei ndoikuaai 'rā,  
 neĩ ndaxejou vai 'rā guive", he'i teĩ.

<sup>3</sup> Ijuru gui ayvu oẽ va'e ma ayvu vai anho, ha'e nhombotavyarā.

\* **35:19** João 15.25    \* **36:1** Romanos 3.18

- Hi'arandua rupi ve'ŷ oiko, joupe ndojapo porăvei ma guive.
- <sup>4</sup> Ngupa py voi opa mba'e vai re rive onhembopy'a.  
 Tape iporă e'ŷ va'e rupi anho ooxe,  
 ndojejokoi guive mba'emo vai py.
- <sup>5</sup> Ha'e ră ndee SENHOR, ndeporayvua ma yva peve 'ră oo,  
 arai peve 'ră oo ojeroviap reikoa.
- <sup>6</sup> Nderekō porăa ma ndevyguia yvyty rami tuvixa,  
 ha'e gui ne'arandua ma yvykua puku rami.  
 Ndee SENHOR rejapo 'ră avakue ha'e mymba okuave aguă rami.
- <sup>7</sup> Xeruete, ndeporayvua ma ha'eve ete!  
 Ha'e nunga rupi ae avakue ra'y kuery onhemi 'ră ndepopo 'ă py.
- <sup>8</sup> Ndero py ororevyată 'ră mba'emo poră re anho,  
 ha'e ră roy'u aguă ma orembovy'a va'e anho reme'ē.
- <sup>9</sup> Mba'eta ndere ae oĩ yvu tekove me'ëa.  
 Nerexakăa py anho roexa 'ră hexakă va'e.
- <sup>10</sup> Ndekuua va'e kuery pe exa uka riae reayvua,  
 ha'e nderekō porăa eikuua uka anhetë rupi ipy'a va'e pe.
- <sup>11</sup> Ojee rive ojerovia va'e kuery topyrō eme xere,  
 neĩ heko vai va'e tojapo eme ajepē'a aguă rami.
- <sup>12</sup> Mba'eta teko vai rupi ikuai va'e ho'apa 'ră.  
 Ha'e kuery ho'aague gui nopu'âvei 'ră guive.

## 37

- "Heko vai va'e ovy'aa opa voi 'ră" he'ia*
- Mboraeră Davi ombopara va'ekue.
- <sup>1</sup> Heko vai va'e kuery rexā teĩ eroangeko eme,  
 ejou vai eme guive joapo vai rei va'e oguerekopa ramo.
- <sup>2</sup> Mba'eta ha'e kuery ma are'ŷ re ipiru 'ră nhuū rami,  
 jai rogue pyau ipirua rami 'ră okanhy.
- <sup>3</sup> Ejerovia SENHOR re, nderekō poră tema.  
 Eiko tema yvy re, anhetë va'e re anho eĩ ată.\*
- <sup>4</sup> SENHOR ae erovy'a.  
 Ha'e ramo ha'e ojapo 'ră ndepy'a py reipotaa oĩ va'e.
- <sup>5</sup> SENHOR po py emboaxa reikoa, hexe ejerovia guive.  
 Ha'e ramo ha'e ojapopa 'ră.
- <sup>6</sup> Ha'e vy ojapo 'ră nderekō porăa tataendy rami ojekuaa aguă,  
 anhetë rupi reikoa oikuua uka 'ră kuaray mbyte rami.
- <sup>7</sup> Epytu'u ke SENHOR re, ha'e earō.  
 Eroangeko eme avakue mamo ră ooa rupi ojoupa ramo,  
 neĩ joapo vaixea rupi ikuai ramo voi.
- <sup>8</sup> Ejepē'a ndevaia gui, ndepoxyve eme.  
 Nda'evei opa mară ndepy'a aguă.  
 Ha'e rami e'ŷ vy ndee ju 'ră nderekō vai.
- <sup>9</sup> Mba'eta heko vai va'e ma omombaa 'ră.  
 Ha'e ră SENHOR oarō va'e ma ikuai poră 'ră yvy re.
- <sup>10</sup> Are'ŷ'i re heko vai va'e ndoikovei 'ră.  
 Oĩague py reka teĩ nderejouvei 'ră.
- <sup>11</sup> Ha'e ră oiko rive'i va'e ma ikuai poră 'ră yvy re,

\* 37:3 Apy "Yvy" he'ia ma ojeupagua kuery pe Nhanderuete oeja va'ekue re ijayvu vy.

- ha'e kuery ov'y'a 'rã okuapy ikuai porã aguã ojou vy.\*
- 12 Heko vai va'e onhembopy'a 'rã heko porã va'e rovai,  
haï jekyty 'rã ojukaxe vy.
- 13 Ha'e rami teĩ SENHOR ojojai 'rã,  
opaga aguã ára ovaẽ rai'i maa oikuua vy.
- 14 Heko vai va'e kuery oekyi okyxé, guapa guive oipira 'rã  
ojuka aguã iporiaukue'i ha'e ojexavai rei va'e,  
ojuka aguã tape porã rupi oiko va'e.
- 15 Ha'e rami teĩ ikyxe py ae 'rã oikutua ipy'a re,  
hapa avi omopẽmbaa 'rã.
- 16 Peteĩ heko porã va'e mbovy'i oguerekó teĩ  
mbovy e'ŷ heko vai va'e oguerekopa va'e gui ovareve.
- 17 Mba'eta heko vai va'e po'akaa ma omombaa 'rã.  
Ha'e rã heko porã va'e re ma SENHOR onhangareko.
- 18 SENHOR oikuua anhetẽ rupi oiko va'e oikoa,  
ha'e kuery pegua ma raka'e rã peve guarã oĩ.
- 19 Mba'emo vai oiko teĩ ha'e kuery noximbai 'rã,  
karuaia ára teĩ hevyatãmba 'rã.
- 20 Ha'e rã heko vai va'e ma okanhymba 'rã.  
Nhuündy rami 'rã SENHOR rovaigua kuery okanhymba,  
hataxirã rive nhuũ okai vy ojeapoa rami.
- 21 Heko vai va'e ma oiporu aguã re ojerure teĩ nomboekoviai 'rã.  
Ha'e rã heko porã va'e ma nhomboaxy vy ome'ẽ rive 'rã mba'emo.
- 22 SENHOR ogueroayvu porã va'e hekoa 'rã yvy re.  
Ha'e rã ijayvu vaia va'e ma okanhymba 'rã.
- 23 Heko porã va'e SENHOR oikoa oguerovy'a vy  
ojapo 'rã oĩ atã aguã rami.
- 24 Ha'e kuery ho'a teĩ nda'itui 'rã yvy rupi,  
ipo re SENHOR ojopy rã.
- 25 Xekunumi va'ekue ri aŷ ma xetuja'i ma  
va'eri xee ndaexai teri heko porã va'e re nopenaai rã,  
neñ hamymino kuery voi mbojape re ojerurea rupi ikuai rã ndaexai.
- 26 Ha'e kuery joayvua rupi vy oiporuka 'rã joupe.  
Hamymino kuery voi joapo porã va'e ikuai.
- 27 Ejep'e a ke mba'emo vai gui,  
ejapo iporã va'e anho.  
Ha'e rami vy reiko riae 'rã.
- 28 Mba'eta SENHOR oguerovy'a heko porã va'e.  
Ndoeja rivei 'rã ojeupagua iky'a e'ŷ va'e kuery.  
Ha'e kuery re opena 'rã raka'e rã peve guarã.  
Ha'e rã heko vai va'e ramymino kuery ma omombaa 'rã.
- 29 Heko porã va'e kuery ikuai porã 'rã yvy re,  
ha'e py ikuai 'rã raka'e rã peve.
- 30 Heko porã va'e ijayvu 'rã 'arandu re,  
anhetẽ rupi meme 'rã ijayvu.
- 31 Opy'a re omoї 'rã Nguuete guigua lei.  
Na'ikangyi 'rã guive oikoa rupi.
- 32 Heko porã va'e re ma heko va'e va'e ojukaxe vy  
oma'ẽ mbegue teĩ

\* **37:11** Mateus 5.5

- <sup>33</sup> SENHOR nomboaxai 'rã ipo py,  
nombopaga ukai 'rã guive omboayvua rã.
- <sup>34</sup> Earõ ke SENHOR, ha'e ixuguigua tape rupi eiko.  
Ha'e ramo nemboyvate 'rã vy re reiko porã aguã,  
ha'e rexa 'rã heko vai va'e omombaa rã.
- <sup>35</sup> Xee aexa va'ekue heko vai va'e ipo'akaa,  
yary Líbano regua rami ipo'akave ovy opa rupi.
- <sup>36</sup> Ha'e gui teïgue ju aaxa vy ama'ẽ rã okanhy ma ra'e.  
Aeka teï ndajouvei ma.
- <sup>37</sup> Eikuua pota ke anhetẽ rupi ikuai va'e re,  
exa pota heko porã va'e oikoa re.  
Mba'eta mby'a porã re ikuai va'e oguereko 'rã guamymino kuery.
- <sup>38</sup> Ha'e rã ojejavypa rei va'e ma omombaa voi 'rã.  
Heko vai va'e ramymino kuery voi omombaa 'rã.
- <sup>39</sup> SENHOR gui ae ou heko porã va'e oo jepe aguã.  
Ha'e kuery ojexavaia ára py hexe onhemi aguã onhemoi.
- <sup>40</sup> SENHOR oipptyvõ ha'e ogueraa jepe 'rã,  
heko vai va'e po gui oipe'a 'rã ogueraa jepe vy,  
hexe onhemi ramo.

*Ojejavague gui ojeko rerovaa rupi ijayvua ague*  
Mboraerã Davi ombopara va'ekue nhomoma'endu'a aguã.

## 38

- <sup>1</sup> SENHOR, ndepoxya rupi e'ý ke xemongeta,  
ndevaia rupi e'ý ke xembopaga.
- <sup>2</sup> Mba'eta xere nderu'y onhexyvõ ae,  
ha'e ndepo poyi xe'áry oí.
- <sup>3</sup> Ndepoxy ramo xero'o naexaívei,  
sekägue voi naexaívei ajejavague re.
- <sup>4</sup> Mba'eta xeakã áry peve ajejavague oo,  
ndaropo'akavei guive mba'emo ipoyi va'e rami.
- <sup>5</sup> Xeai ivaipa rei, ipeupa ma ovy,  
ajekoreague re.
- <sup>6</sup> Ojero'a rei va'e rami anhenhandu naxembaraetevei vy.  
Xepy'a vai rei aikovy ára pukukue re.
- <sup>7</sup> Xekupe oiko'õ rei,  
noívei ma xero'o rexai.
- <sup>8</sup> Ajaxavai aikovy, naxembaraetevei ma.  
Xepy'a py nda'evei ete vy xepoaë aikovy.
- <sup>9</sup> SENHOR, xee aipota va'e ha'e javi ndevy pe meme amboaxa,  
xepoaëa nerendu e'ýi 'rã.
- <sup>10</sup> Xekuraxõ ma otyty atã xembaraetea opa ramo,  
ndaxerexa pyxovei guive.
- <sup>11</sup> Xereve xeirũ kuery ikuai va'ekue ojepe'apa ma xemba'eaxyga gui,  
xeretarã kuery voi onheguæmba.
- <sup>12</sup> Xerekove oipe'axe va'e onhembopy'a okuapy xejopy aguã,  
xevy ojapo vaixe va'e opa marã ijayvu okuapy,  
ára pukukue re oikuua pota xembotavy aguã re.
- <sup>13</sup> Ha'e rami teï xee ma ijapyxa e'ý va'e rami aendu rive,  
ijayvu e'ý va'e rami nambovai.

- 14 Oendu e'ŷ va'e rami ajeapo,  
xejuru ndaipe'ai ambovai aguã.
- 15 Mba'eta SENHOR, ndee ae roarõ.  
SENHOR Xeruete, ndee ma xere reikuua pota 'rã.
- 16 Mba'eta aipoa'e jepi: "Ha'e kuery tovy'a rei eme xere,  
xepyxyry rã xerovai opu'ã rei e'ŷ aguã", ha'e.
- 17 Mba'eta xee ha'a aguã rami aiko,  
xejee nda'eveia aendu riae tema.
- 18 Ha'e rami vy amombe'u xerekova ia.
- Ajeavyague py aendu mboriau.
- 19 Ha'e rã xerovaigua kuery ma hexaï ha'e imbaraete.  
Heta ikuai mba'e py e'ŷ xere nda'ija'ei va'e.
- 20 Ha'e rami ae ikuai ojapo porã va'ekue pe ojapo vai va'e.  
Xerovaigua ikuai, teko porã rupi aiko rã.
- 21 SENHOR, xepytyvõ e'ŷ eme.  
Xeruete, ejepa eme xea gui.
- 22 SENHOR, xereraa jepea,  
ejapura ke xerepy aguã.

*Imarãa re ijayvua*

Jogueroporaei va'e Jedutum pe Davi ombopara va'ekue.

**39**

- 1 Xejeupe ae aipoa'e va'ekue: "Aŷ aiko kuaa pota 'rã  
xeayvu py ajeavy e'ŷ aguã.  
Amboty 'rã xejuru,  
heko vai va'e xerenonde ikuai javé" ha'e va'ekue.
- 2 Ha'e rami vy akyrirĩ, neĩ iporã va'e rupi voi ndaxeayvuvei.  
Ha'e rami teĩ haxy aenduve tema.
- 3 Xepy'a re aendu tata rami hendy va'e.  
Ha'e aikuaa pota rã hendyve ovu.  
Ha'e ramo xee anhemombe'u vy aipoa'e:
- 4 " SENHOR, eikuaa uka ndaikovei aguã ára,  
ha'e mbovy ára ete'i ma 'rã pa aiko,  
xemarãa aikuaa aguã.
- 5 Ndee aikoa ára reme'ẽ va'ekue mokoĩ, mboapy po puku-a'i rami ipuku aguã.  
Nerenonde aikoa opa rive va'erã.  
Anhetẽ ae avakue ha'e javi oĩ atãve va'ekue teĩ mba'e e'ŷ meme ikuai.
- 6 Ha'e rami ae avakue oaxa 'rã ovu kuaray'ã rami.  
Heko eta reia mba'everã ndovarei.  
Ojeupe guarã opa marãgua omoĩ porã teĩ ndoikuaai guive mava'e 'rã pa ogueraa.
- 7 Ha'vy xee, SENHOR, mba'e tu xee arõ?  
Ndee ae xee roarõ va'e.
- 8 Xereraa jepe ke xerekova ia que ha'e javi gui.  
Xembojaru uka eme heko vai va'e pe.
- 9 Akyrirĩ ha'e ndaxeayvui va'ekue  
ndee ae ha'e rami xemoingo ramo.
- 10 Eipe'a ke xegui ndee xemoingo axya.  
Ndepo ipoyi ramo akanhy ma avy.
- 11 Avakue ojejavypaague re ndeayvu ete ha'e rembopaga vy  
rembovaipa 'rã ha'e kuery oguerovy'a va'ekue, vixo'i mba'emo ho'upaa rami.

Avakue ikuai va'e ma opa rive va'erā meme.

**12** SENHOR, endu ke ajerurea.

Xerepy aguā re ajapukai ramo ejapyxaka.  
Ekyrirī eme xerekay rā rexā vy,  
mba'eta nerondenā ma mombyry guigua rami rive aiko,  
oguata rei va'e aiko xeru kuery ikuaiague rami avi.\*

**13** Eikuaa potave eme xere,  
akanhy avy e'ŷ re avy'a ju aguā."

*Salmo 70.1-5*

Jogueroporaei va'e pe Davi ombopara va'ekue.

## 40

**1** Arō SENHOR ajerovia ete reve.

Ha'e ramo xere oikuua pota vy  
oendu xereraa jepe aguā re ajapukaia.

**2** Ha'e rami vy xerenoē yvykua py akanhyague gui,  
yapo hu'ū rei va'e mbyte ha'aague gui.

Ha'e gui xepy omoī atā ju itaova áry.

**3** Ha'e xejuru py omoī mboraei pyau  
Nhanderuete arov'y'a aguā.

Ha'e nunga heta oendu vy  
ojererokyje 'rā SENHOR renonde, hexe ojerovia 'rā guive.

**4** Ovy'a ete 'rā SENHOR re ojerovia oikovy va'e.

Ha'e kuery nda'ikuai 'rā ojee anho rei ojerovia va'e rami,  
neī apu rupi oiko va'e rami guive.

**5** SENHOR Xeruete, heta ete ikuai iporā va'e remoingo va'ekue,  
orevy rejapo porā aguā re ndepy'aa guive.

Ndereve joo ramigua ndoikoi.  
Nderekō ha'e javi amombe'u ta va'e rire  
namombe'upai 'rāgue.

**6** Ndee ndereipotai mymba ajuka vy ame'ẽ ndevy.

Neī mba'emo apy reve jejavya regua nereme'ẽ ukai.  
Ha'e rami 'rāgue py reipe'a xeapyxa.

**7** Ha'e ramo xee aipoa'e: "Apy ma aĩ.

Kuaxia re ipara oiny xerekorā regua.

**8** Ndee reipota va'e xee ajapoxe, Xeruete.

Xepy'a re oī ndeguigua lei ajapo aguā", ha'e.\*

**9** Heta va'e kuery ijatya py

amombe'u ayvu porā teko porā regua.

Neī peteī henda py ma voi namombe'u e'ŷi.  
SENHOR, ndee ma reikuua.

**10** Xepy'a py ndakuua uka e'ŷi ndeguigua teko porā.

Arojapukai anhetē rupigua ha'e orereraa jepea reikoa.

Ijaty va'e kuery gui namombe'u e'ŷi ndee oremboaxya ha'e ndeguigua anhetē va'e.

**11** Ha'e nunga rupi SENHOR, exa uka e'ŷ eme xemboaxya.

Xemboaxya rupi riae ke xererekō,  
ndeguigua anhetē va'e rupi guive.

**12** Mba'eta mbovy e'ŷ ikuai mba'emo vai xejoko rei va'e.

Xerekō vaia xerupity ma.

\* **39:12** Hebreus 11.13; 1 Pedro 2.11    \* **40:8** Hebreus 10.5-10

Heta ete ramo ndaexapai.  
 Xe'a seakā re ikuai va'e gui voi hetave.  
 Xekuraxō voi okanhy ma.

<sup>13</sup> SENHOR, xereraa jepe na!  
 SENHOR, ejapura ke xerepy aguā.

<sup>14</sup> Xerekove oipe'axe va'e toxīmba,  
 oxīmbaa anho toendu.  
 Ajexavai ramo ov'y'a rei va'e kuery  
 oxīmba reve tojevypa ju guakykue katy.

<sup>15</sup> Tove "Ha'evea rami! Ha'evea rami!" he'i rive okuapy va'e  
 toxīmba nda'ijayvu kuaavei vy.

<sup>16</sup> Ha'e rā nderekā va'e kuery ha'e javi ma tandererovy'a oporaei reve.  
 Rejogueraa jepea oguerovy'a va'e  
 "SENHOR ima'endu'a porāmby toiko!" te'i riae okuapy.

<sup>17</sup> Ha'e gui xee ma iporiaukue'i, ojexavai rei'i va'e  
 teī xere SENHOR opena porā.  
 Ndee ma xepytyvōdarā ha'e xerepyarā.  
 Xeruete, ndeare eme ke!

*Hovaigua kuery ijayvu reia gui Nhanderuete oepyague re ijayvua*  
 Jogueroporaei va'e pe Davi ombopara va'ekue.

## 41

<sup>1</sup> Ovy'a ete 'rā iporiaukue'i mboaxyu kuery.  
 Ha'e va'e kuery SENHOR ogueraa jepe 'rā nda'eveia ára.

<sup>2</sup> SENHOR oepy ha'e opena porā 'rā hekovea re.  
 Ojapo 'rā yvy re ov'y'a aguā rami.  
 Nomboaxai 'rā hovaigua kuery po py ojavyky rei aguā.

<sup>3</sup> SENHOR omombaraete ju 'rā imba'eaxyu gui.  
 Imba'eaxy teī hupa ituia rejapo ha'eve rei'i aguā rami.

<sup>4</sup> Ha'e gui xee aipoa'e: "SENHOR, xemboaxy ke!  
 Emonguera xerekovea, ndevy ajejavry rire teī" ha'e.

<sup>5</sup> Xerovaigua kuery xere ijayvu vai vy  
 "Raka'e tu omano 'rā, ha'e hery na'ima'endu'aavei 'rā?" he'i okuapy.

<sup>6</sup> Ha'e kuery regua xerexa aguā ou vy ovare'ŷ va'e rupi 'rā ijayvu.  
 Opy'a re mba'emo vai anho omoī.  
 Oē vy ha'e nunga re teri rive 'rā ijayvu.

<sup>7</sup> Ndaxerayvui va'e kuery ijayvu mbegue rei 'rā xere.  
 Mba'emo vai rupi xere ijayvu vy

<sup>8</sup> "Mba'eaxy vaikue hexe oĩ va'e gui rima imba'eaxy oupy,  
 nopu'avei ma 'rā guive" he'i okuapy.

<sup>9</sup> Xeirū ayvuve vy ajeroviave va'ety voi  
 opu'ā avi xerovai, xereve okaru va'ety ae.\*

<sup>10</sup> Ha'e rā ndee SENHOR xemboaxy ke.  
 Xemopu'ā ju, ha'e kuery ambopaga aguā ojapo vaiague re.

<sup>11</sup> Ha'e nunga rupi xee aikuua ndee xemboaxyu,  
 mba'eta xerovaigua kuery pe ndaxereity ukai.

<sup>12</sup> Ha'e rami 'rāgue py anhetē rupi aikoa py xemombaraete,  
 ha'e xemoī nerondenre raka'e rā peve guarā.

\* **41:9** Judas rekorā re ijayvu ma voi Jesus ombo'a uka nhemi aguā re (João 13.18-30).

<sup>13</sup> SENHOR Israel kuery Ruete toiko ima'endu'a porãmby  
jypy'i guive raka'e rã peve.  
Amém, amém.

*Nhanderuete ombojeroviaaty py ooxea rami ijayvua ague*  
Jogueroporaei va'e pe Coré ra'y kuery nhombo'e aguã ombopara va'ekue.

## 42

- <sup>1</sup> Yy oxyry va'e gui guaxu oy'uxe va'e rami  
xenhe'ẽ py xee avi roeka, Xeruete.
- <sup>2</sup> Xepy'a py aendu Nhanderuete re nda'evei etea, Nhanderuete oikove va'e re.  
Raka'e nda'u aa 'rã Nhanderuete renonde aĩ aguã?
- <sup>3</sup> Ara py ha'e pyávy xerexay re anho aiko akaru e'ŷ re.  
Ha'e ramia ja xevy aipo'ea riae: "Mamo tu oĩ Nderuete?"\*
- <sup>4</sup> Ymave rupi aikoague re xema'endu'a vy  
xepy'a vai aikovy xenhe'ẽ py guive,  
mba'eta xema'endu'a heta va'e kuery reve aa ague re.  
Ajogueraa va'ekue Nhanderuete pegua oo katy.  
Rovy'aa rupi rojapukai rovy va'ekue roporaei reve,  
heta orekuai ngarua py.
- <sup>5</sup> Xenhe'ẽ, mba'e re tu ndeporiau ri?<sup>†</sup>  
Mba'e re tu nda'evei rei reĩ xepy'apy py?  
Earõ tema Nhanderuete, mba'eta aroporaei nho 'rã.  
Ha'e ma Xeruete xepytyvõa oiko.
- <sup>6</sup> Xepy'a py aendu nda'evei etea.  
Ha'e nunga rupi ndere xema'endu'a aikovy  
Jordão yvýry aikoa py, Hermom yvyty re ha'e Mizar yvy'ã'i re.
- <sup>7</sup> Peteĩ yvykua gui onhendu amboae yvykua peve ytu revovo.  
Ha'e rami aendu ndeguigua yai xe'áry oaxa-axa va'e.
- <sup>8</sup> Ha'e rami teĩ ara nhavõ SENHOR oexa uka 'rã xemboaxy,  
ha'e pytõ nhavõ ou 'rã ixupe aporaei aguã,  
xenhe'ẽ Ruete pe anhembo'e aguã.
- <sup>9</sup> Nhanderuete xe'itaova pe aipoa'e:  
"Mba'e re tu nderexarai xegui?  
Mba'e re tu ajexavai aikovy xerovaigua kuery xeavyky rei rã?" ha'e.
- <sup>10</sup> Mba'eta aendu xekãgue ha'ypa va'e rami,  
xerovaigua kuery xere ijayvu rei ramo.  
Ha'e kuery ijayvu vy  
"Mamo tu Nderuete oĩ?" he'i okuapy.
- <sup>11</sup> Xenhe'ẽ, mba'e re tu ndeporiau ri?  
Mba'e re tu nda'evei rei reĩ xepy'apy py?  
Earõ Nhanderuete, mba'eta aroporaei nho 'rã.  
Ha'e ma Xeruete xepytyvõa oiko.

## 43

*Henda iky'a e'ŷ va'e py ooxea rami ijayvua ague*

- <sup>1</sup> Xeruete, xemboeko porã ke  
xere opu'ã va'e kuery gui.

---

\* **42:3** Ipy'a vai oikovy mba'eta yvy mboae re heraa escravo-rã, Nhanderuete pegua templo gui mombyry. Ha'e py ma ooxea oendu, Nhanderuete ombojeroviaxe vy.    † **42:5** Apy "Xenhe'ẽ" he'ia ojeupe ae ijayvu vy.

- Xereraa jepe avakue nhombotavy ha'e ijapu va'e gui.
- <sup>2</sup> Mba'eta Xeruete, ndere ae anhemí.  
Mba'e re tu naxepytyvõi?  
Mba'e re tu ajexavai aikovy xerovaigua kuery xeavyky rei rã?
- <sup>3</sup> Emboguejy nerexakã ha'e anhetã va'e,  
xereraa aguã ndevyguá yvyty iky'a e'ý va'e áry  
nembojeroviaaty oï va'e py.
- <sup>4</sup> Ha'e ramo aa aguã Xeruete pegua altar oïa py,  
Xeruete arov'y a va'e renonde.  
Xeruete, roqueroporaei 'rã mba'epu ixã reta va'e amonhendu reve.
- <sup>5</sup> Xenhe'ë, mba'e re tu ndeporiau ri?  
Mba'e re tu nda'evei rei rei xepy'apy py?  
Earõ Nhanderuete, mba'eta aroporaei nho 'rã.  
Ha'e ma Xeruete xepytyvõa oiko.

### Nhanderuete pe ojepy ukaa ague

Jogueroporaei va'e pe Coré ra'y kuery nhombo'e aguã ombopara va'ekue.

## 44

- <sup>1</sup> Oreruete, oreramoï kuery orevy omombe'u rã  
roendu ma oreapyxa py  
yma rupi rejapo va'ekue, ha'e kuery ikuai teri jave.
- <sup>2</sup> Ha'e jave py ma ndepo py reipe'apa raka'e yvy regua kuery,  
ikuaiague py oreramoï kuery ju remoï atã aguã.  
Yvy regua kuery remoingo axy,  
ha'e rã oreru kuery pe ma reme'ë opa rupi ikuai aguã.
- <sup>3</sup> Okyxé py e'ý ha'e kuery oipe'a yvy,  
imbaraete vy e'ý guive ipo'aka.  
Ha'e rami 'rãgue py ndepo, ndejyva ha'e nderova rexakãa py  
rembopo'aka raka'e ha'e kuery reayvu vy.
- <sup>4</sup> Xeruete, ndee ma xeruvixave.  
Rejapo Jacó kuery ipo'aka aguã.\*
- <sup>5</sup> Ndee oreptyvõ ramo orepo'aka 'rã orerovaigua kuery re.  
Nderery rupi ropyrõ 'rã orere opu'ã va'e re.
- <sup>6</sup> Xerapa re e'ý ajerovia,  
xekeyxe e'ý guive xereraa jepe 'rã.
- <sup>7</sup> Mba'eta ndee anho orerovaigua kuery gui orerepya reiko,  
remoxõmba 'rã orere ija'e e'ý va'e.
- <sup>8</sup> Oreruete re ae rovy'a riae,  
raka'e rã peve roporaei 'rã nderery rupi.
- <sup>9</sup> Ha'e rã aÿ ma ndee oremombo ma mombyry,<sup>†</sup>  
ore kuery ju roxõmba aguã py oremoï.  
Ndereovei guive orexonitaro kuery reve,
- <sup>10</sup> oreapo guive orerovaigua kuery gui ronhamba aguã rami.  
Ha'e orere ija'e e'ý va'e kuery orereraa guembiguairã.
- <sup>11</sup> Vexa'i rami oremboaxa ma orejuka aguã katy.  
Oremoaimba yvy regua kuery mbyte rupi.
- <sup>12</sup> Mba'eve re'ý guive remboekovia ndevyguá kuery,  
hepykue re mba'eve rejou aguã e'ý guive.

\* 44:4 "Jacó kuery" he'ia ma Israel kuery re ijayvu vy. † 44:9 Apy ma ijayvu Nhanderuete ha'e kuery re hovaigua kuery ipo'aka aguã rami oejaague re.

- <sup>13</sup> Ndee oreapo orea katy'i ikuai va'e gui roximba aguã rami.  
Orembojere okuapy va'e orere ijayvu rei ha'e orejojai rei.
- <sup>14</sup> Omombe'u pyrã rami oremoõ yvy regua kuery mbyte.  
Amboae regua oremboetea rupi e'ŷ ombovava-vava oakã.
- <sup>15</sup> Aximbaa oĩ riae xere,  
xerova re aximbaa anho ojekuaa,
- <sup>16</sup> aendu xembojaru rei va'e, ijayvu vaikue-ikue va'e ojapukai ramo,  
xerovaigua kuery xejukaxea aikuaa vy.
- <sup>17</sup> Ha'e nunga ha'e javi orere oiko.  
Ha'e rami teñ ndorerexarai ndegui,  
ndorojepe'ai guive ndereve guarã rejapo va'ekue gui,
- <sup>18</sup> orepy'a py ndorojevyi ha'ekue py,  
ndorojavyi guive ndeguigua tape.
- <sup>19</sup> Oremou'ũ ukapa jagua-tuvy nhe'ẽ ikuiaia py,  
ha'e manoaa'ã py oreao'i.
- <sup>20</sup> Oreruete rery gui orerexarai va'e rire,  
ha'e rami e'ŷ vy tuuete ramigua rive pe orepo roupi va'e rire
- <sup>21</sup> ha'e ramo nda'u Oreruete ndoikuaai 'rãgue teve?  
Ha'e ma nhandepy'a re oĩ va'e oikuapa.
- <sup>22</sup> Ha'e rami avi ndevygua orekuai ramo ae  
ko'ẽ nhavõ oremboaxaa orejukaarã pe.  
Vexa'i ojukaa aguã katy heraa va'e rami orekuai.\*
- <sup>23</sup> Emyĩ ke! SENHOR, mba'e re tu reke?  
Ema'ẽ ju ke orere, orejou vai riae eme.
- <sup>24</sup> Mba'e re tu nderejexa ukavei?  
Nderexarai teve roiko axy vy rojexavaia re?
- <sup>25</sup> Mba'eta orerekovea ojexavai yvy ku'i peve,  
orerete voi yvy re oje'apa maa rami.
- <sup>26</sup> Epu'ã ke orerepy aguã.  
Orereraa jepe ndeporayvua rupi.

### *Huvixarã Nhanderuete omoõ va'e ha'e hembirekorã re ijayvua*

Jogueroporaei va'e pe Coré ra'y kuery nhombo'e aguã ombopara va'ekue. Mboraei mborayvu regua, "Yvoty lírio" he'ia py oporaeia rami oporaei aguã.

## 45

- <sup>1</sup> Ayvu porã anho oĩ xekuraxõ re.  
Huvixave peguarã ae kova'e mboraei ajapo.  
Ombopara porã kuaa va'e rami 'rã xeayvu.
- <sup>2</sup> Ndee ma avakue ra'y kuery ikuai va'e gui neporãve va'e.  
Ndejuru gui ayvu porã anho oẽ.  
Ha'e nunga rupi ae Nhanderuete nemoingo porã raka'e rã peve guarã.
- <sup>3</sup> Ndepy'a guaxuve va'e, emoõ ndejee ndekyxe.  
Emoõ avi ndeyvatea ha'e ndepo'akaa.
- <sup>4</sup> Ndepo'akaa rupi tereo kavaju áry,  
anhetẽ va'e ha'e teko porã re vy.  
Ha'e gui ndepo reiporu kuaa regua ojapo 'rã nhomondyipaarã ojekuaa aguã rami.
- <sup>5</sup> Oreruvixave, nderu'y ma hakua porã,  
nderovaigua kuery kuraxõ re oike 'rã.  
Ha'e ramo yvy regua kuery nenhe'ẽ rendua rupi 'rã ikuai.\*

\* 44:22 Romanos 8.36 \* 45:5 Apocalipse 19.11-16

- <sup>6</sup> Xeruete, ndepo'akaa ma raka'e rã peve 'rã oĩ.  
 Ndepo'akaa py anhetẽ rupi 'rã rejoguerek.
- <sup>7</sup> Rerovy'a teko porã, ha'e rã teko vai ma rejou vai.  
 Ha'e nunga rupi ae Nhanderuete Nderuete huvixaverã nemoĩ vy  
 neakã áry azeite omoĩ neirũ kuery gui ndererovy'ave vy.\*
- <sup>8</sup> Ndeao ma mirra, aloés ha'e cássia gui heakuã porãmba.  
 Ndero ma marfim gui ojapo pyre.  
 Opy ma onhendu 'rã ixã va'e pu nembovy'aarã.
- <sup>9</sup> Kunhague ikuai 'rã nerembiguai, huvixave rajy kuery guive.  
 Reiporu kuaa regua re oĩ ndera'yxy,  
 ouro iporãve va'e Ofir guigua py ombojegua pyre.
- <sup>10</sup> Xerajy, endu ke. Eikuua pota xeayvua re.\*  
 Nderexarai ke neretarã kuery ha'e nderu ro pygua kuery gui.
- <sup>11</sup> Ha'e ramo ma huvixave oguerovy'a 'rã neporãa.  
 Ha'e ma nde-Senhor ramo  
 henonde eĩ nerenaþy're.
- <sup>12</sup> Ndea py ou 'rã Tiro pygua rajy mba'emo ome'ẽ va'erã reve.  
 Heta va'e kuery regua oguerekopave va'e ojerure 'rã reipytyvõ aguã.
- <sup>13</sup> Opy ma oĩ 'rã huvixave rajy pavẽ gui iporãve va'e.  
 Ijao ma ouro guigua py ojegua va'e.
- <sup>14</sup> Ijao potypa va'e reve ogueroikea 'rã heruvy huvixave renonde.  
 Irã kunhataigüe hakykue ou va'e ogueru 'rã oĩ py.
- <sup>15</sup> Ovy'a ete reve 'rã ogueru,  
 huvixave ropy ogueroike 'rã.
- <sup>16</sup> Nderu kuery rekovia ndera'y kuery ikuai 'rã.  
 Ha'e va'e kuery remoĩ 'rã huvixarã vyv jave re.
- <sup>17</sup> Xee ajapo 'rã nderery re ima'endu'aa riae aguã rami.  
 Yvy regua kuery ndereroporaei 'rã raka'e rã peve.

*Nhanderuete nhanhemiaty imbaraete va'e re ijayvua*  
 Jogueroporaei va'e pe Coré ra'y kuery kunhague oporaei aguã ombopara va'ekue.

## 46

- <sup>1</sup> Nhanderuete ma nhanhemiaty imbaraete va'e oiko,  
 nhandereraa jepearã jajexavai jave nhanda'i pyve oĩ va'e.
- <sup>2</sup> Ha'e nunga rupi ndajakyjei 'rã amboae rami yvy ojeapo tei,  
 ha'e vytyt ikuai va'e ye'ẽ mbyte py onhemombo,
- <sup>3</sup> yy opu'ã-pu'ã vy yjuipa,  
 opu'ã ovy ramo vytyt voi oryryipa tei.\*
- <sup>4</sup> Oĩ peteĩ yakã Nhanderuete pegua tetã mbyte rupi oxyry vy  
 ombovy'a 'rã ha'e pygua kuery,  
 Yvate ete va'e pegua oo iky'a e'ŷ va'e rupi voi.
- <sup>5</sup> Tetã mbyte ma Nhanderuete ae oĩ.  
 Ha'e ramo nei peteĩ henda py ma voi ndoitayai 'rã.  
 Nhanderuete oipytyvõ 'rã ko'ẽmba guive.\*
- <sup>6</sup> Yvy regua kuery haxẽmba,  
 tetã ikuai va'e omyi 'rã.  
 Ha'e rã Nhanderuete oayvu omonhendu ramo yvy tykupa 'rã.

\* **45:7** Hebreus 1.8-9   \* **45:10** Apy ma huvixave ra'yxy pe ju ijayvu.   \* **46:3** Lucas 21.25-28   \* **46:5** Tetã Nhanderuete pegua omombe'u porãve Apocalipse 21.23-22.5 py.

- <sup>7</sup> Nhandereve ma oiko SENHOR ixondaro reta va'e,  
    Jacó Ruete ae oĩ nhanhemi aguã.
- <sup>8</sup> Peju ke pexa SENHOR rembiapokue,  
    yvy re mba'emo ombovaipaague.
- <sup>9</sup> Mba'eta yvy apy peve omomba joe opu'ãa.  
    Omopẽmba guyrapa ha'e yvyla rakua,  
        karóxa joe opu'ãa pygua guive oapypa tata py.
- <sup>10</sup> Aipoe'i: "Pepytu'u peikuaa aguã xee ae Penderuete aikoa.  
    Xee ma xeyvate 'rã yvy regua kuery áryve,  
        yvy jave re ete 'rã xeyvate", he'i.
- <sup>11</sup> Nhandereve oiko SENHOR ixondaro reta va'e,  
    Jacó Ruete ae oĩ nhanhemi aguã.

*Nhanderuete yvy regua kuery ruvixave pe oporaeia*

Jogueroporaei va'e pe Coré ra'y kuery ombopara va'ekue.

## 47

- <sup>1</sup> Ha'e javi regua kuery, pejepopete ke.  
    Penema'endu'a Nhanderuete re, pevy'aa rupi penhendu.
- <sup>2</sup> Mba'eta SENHOR yvateve ete va'e ma omboetevepy,  
    huvixave yvateve va'e yvy jave re ipo'aka va'e.
- <sup>3</sup> Amboae regua kuery re nhanembopo'aka vy  
    nhandepy guýry omoĩ yvy regua kuery.
- <sup>4</sup> Nhandevy guarã oiporavo nhandekuai aguã.  
    Ha'e va'e yvy ma hembiayvu Jacó ojou porã va'ekue.
- <sup>5</sup> Nhanderuete oẽ ovvy oguerojapukai va'e mbyte rupi.  
    Mimby guaxu pu rupi guive SENHOR oaxa ovvy.
- <sup>6</sup> Peporaei Nhanderuete pe,  
    peporaei porã ixupe.  
    Peporaei nhanderuvixave pe,  
    peporaei porã ixupe.
- <sup>7</sup> Nhanderuete ma yvy jave regua ruvixave oiko.  
    Ixupe peporaei mboraei porã rupi.
- <sup>8</sup> Nhanderuete ipo'aka 'rã yvy regua kuery re.  
    Oguapy 'rã tenda openaaty iky'a e'ŷ va'e py.
- <sup>9</sup> Yvy regua ruvixa kuery onhemboatypa vy  
    Abraão Ruete pegua ju ikuai.  
    Mba'eta Nhanderuete peguarã ae ikuai yvy regua kuery hu'y jokoa oguerek  
        va'ekue ha'e javi.\*  
    Ha'e anho yvate ete va'e oiko.

*Nhanderuete pegua tetã re ijayvua*

Mboraerã Coré ra'y kuery ombopara va'ekue.

## 48

- <sup>1</sup> Yvate ete va'e ma SENHOR oiko,  
    ha'evea rami jaroporaei  
        Nhanderuete pegua tetã py.
- <sup>2</sup> Ixupegua yvyty iky'a e'ŷ va'e ma yvate ete,  
    yvy jave re oguerovy'aa va'e.

\* **47:9** Ha'e va'e jave py xondaro kuery omoĩ 'rã imoiny hu'y jokoa nguvixa retã kora re, ixupegua ikuia oikuaa uka aguã (Cântico 4.4).

- Sião yvyty oĩ kuaray puku-a yke katy,  
huvixave retã oĩa.
- <sup>3</sup> Tetã py oo ikorapa va'e rupi  
Nhanderuete ojekuua uka nhanhemi aguã yvate va'e rami.
- <sup>4</sup> Ha'e nunga rupi huvixa kuery nhomoirũmba jogueruvy va'ekue  
okanhymba.
- <sup>5</sup> Tetã oexa vyve onhemondyipa.  
Okyjepa vy onhamba.
- <sup>6</sup> Ha'e py ngyje rive ipo'aka ha'e kuery re,  
oendu guive haxy imemby ta va'e rami.
- <sup>7</sup> Yvytu kuaray oua katy gui ou va'e py  
rembovaipa Társis gui kanoã ou va'ekue.
- <sup>8</sup> Omombe'ua rã nhaenduague rami  
jaexa SENHOR ixondaro reta va'e pegua tetã py oiko va'e,  
Nhanderuete pegua tetã py ae.  
Nhanderuete omoĩ atã 'rã raka'e rã peve.
- <sup>9</sup> Oreruete, renhomboaxya re orema'endu'a  
ndevygua templo mbyte roĩa py.
- <sup>10</sup> Oreruete, onderery oikuua pavẽ 'rã.  
Ha'e rami vy ndevy oporaei rã yvy apy peve 'rã onhendu.  
Ndepo py ha'evea rami rejoguerek.
- <sup>11</sup> Tovy'aa Sião yvyty re,  
Judá rajy kuery avi tovy'a ne'arandua re.
- <sup>12</sup> Peguata ke Sião rupi,  
ha'e javi rupi pejere.  
Peipapa torre ikuai va'e.
- <sup>13</sup> Peikuaa pota porã ikora yvatea re,  
ha'e pexa pota oo ikorapa va'e ikuai va'e re,  
raka'e rã ikuai va'erã pe pemombe'u kuaa aguã:
- <sup>14</sup> "Ha'e rami oiko Nhanderuete  
raka'e rã peve guarã.  
Nhandererek 'rã nhamano peve."

### *Avakue okanhymba aguã re ijayvua*

Jogueroporaei va'e pe Coré ra'y kuery ombopara va'ekue.

## 49

- <sup>1</sup> Ha'e javi regua, pendu pota ke pov'a.e.  
Yvy re pendekoa va'e ha'e javi, pejapyxaka ke.
- <sup>2</sup> Yvyigue'i ha'e yvatekueve,  
perekopa va'e ha'e pendeporiaukue'i ha'e javi.
- <sup>3</sup> Ha'e gui xejuru py xeayvu 'rã 'arandu re,  
xepy'a py 'arandua re anho 'rã aikuua pota.
- <sup>4</sup> Ajapyxaka porã 'rã mba'emo re ombojoja vy ijayvua rã,  
ndoikuuai pyre amombe'u porãve 'rã ixã reta va'e pu rupi.
- <sup>5</sup> Mba'e re tu jexavaia ára py akyje 'rã?  
Xerakykue monha okuapy va'e ma teko vai rupi xejoko rei tei.
- <sup>6</sup> Ha'e kuery ma ombo'e rei-rei re rive ojerovia,  
mba'emo oguerek va'e re rive ov'y'a va'e.
- <sup>7</sup> Anhetê avave rei ndojogua kuaai 'rã guyvy rekove.  
Nhanderuete pe nome'ẽ kuaai 'rã jogueraa jepe aguã regua.

- <sup>8</sup> Mba'eta joekove jajogua aguã ma hepy vaipa.  
Raka'e rã peve nanhanhea'âvei 'râgue
- <sup>9</sup> jajapo aguã oikove riae aguã rami,  
yvykua py oguejy e'ŷ aguã.
- <sup>10</sup> Ha'e gui jaexa rã hi'arandu va'e voi omano 'rã.  
Hi'arandu e'ŷ va'e ha'e ndokuuaii va'e joo rami meme 'rã opa,  
ha'e amboae pe ju oeja 'rã ombo'e rei-reikue.
- <sup>11</sup> Opy'a py aipoe'i: "Xero opa e'ŷ va'e hi'aĩ,  
xerekoague ma raka'eve rã ikuai va'e peguarã" he'i teĩ.  
Ha'e rami vy guery rupi ae 'rã omboery oyvy.
- <sup>12</sup> Ha'e rami teĩ avakue ojejou porã va'eri nda'ikuai riae 'rã.  
Ha'e rami 'râgue py mymba rami avi okanhy 'rã.
- <sup>13</sup> Ha'e rami ikuai ojee ae ojerovia va'e,  
hemimbo'e kuery ijayvua oguerovy'a va'e voi.
- <sup>14</sup> Ha'e rami teĩ vexa'i rami avi omboguejya 'rã yvykua py.  
Ha'e kuery re opena va'erã ma mano.  
Yvykua katy meme 'rã oguejy.  
Ha'e py ma iporãague hu'ũmba 'rã.  
Ha'e kuery rekoarã oĩ va'e ma yvykua ae.
- <sup>15</sup> Ha'e rã xerekove ma Nhanderuete oepy 'rã mano po'akaa gui,  
ojea py xereru vy.
- <sup>16</sup> Penhemondyi eme amongue imba'e rei-reipave ovv rã,  
ha'e ngoo pygumarã mba'emo porã ojouve ovv teĩ.
- <sup>17</sup> Mba'eta ha'e kuery omano vy mba'eve ndogueraai 'rã ngupive,  
mba'emo porã oguereko va'ekue nomoirûvei 'rã.
- <sup>18</sup> Oikove teri jave ojejou porã 'rã,  
ha'e ojeupe guarã ojou reta rã pavẽ ojou porã teĩ
- <sup>19</sup> ha'e va'e oo avi 'rã tuu kuery ooague py,  
hexakã ndoexavei aguã py.
- <sup>20</sup> Avakue ojou porãmby nai'arandui vy  
mymba rami avi 'rã okanhy.

*Anhetê rupi Nhanderuete nhamboute aguã regua  
Mboraerã Asafe ombopara va'ekue.*

## 50

- <sup>1</sup> SENHOR Nhanderuete Ipo'akapa va'e ijayvu vy  
oenõimba 'rã yvy regua kuery kuaray oua katy gui oikea katy peve ikuai va'e.
- <sup>2</sup> Sião tetã iporãve ete va'e gui  
Nhanderuete oexa uka 'rã guexakãa.
- <sup>3</sup> Ha'e rami vy Nhanderuete ou 'rã, nokyrirí 'rã guive.  
Henonde ma ou tata nhomombaarrã,  
ijyvýry rupi yvytu vaikue hevovo.
- <sup>4</sup> Ojeupeguia kuery omboayvu aguã ou.  
Ha'e rami vy yvate yva katy ojapukai 'rã,  
yvy katy guive. Ha'e vy aipoe'i:
- <sup>5</sup> "Pemboatypa ke xevyguia kuery iky'a e'ŷ va'e,  
Ha'e va'e kuery ma mba'emo ome'ë va'e py xereve guarã onhemoingo va'ekue", he'i.
- <sup>6</sup> Yva gui oikuua uka heko porãa,  
mba'eta nhomboayvua ma Nhanderuete ae.
- <sup>7</sup> "Xevyguia kuery, pejapyxaka ke, ha'e rã xee xeayvu 'rã.

- Israel kuery, amombe'u ta penderekokue.  
 Xee ma Penderuete, 'Oreruete' pejea va'e.
- <sup>8</sup> Mba'emo peme'ẽague re e'ŷ xeayvu pẽvy,  
 mba'emo peapy reve xerenonde pemoĩ riaeа re e'ŷ guive.
- <sup>9</sup> Ha'e rami teĩ pendero gui xee ndaiptai vaka ra'y,  
 neĩ kavara kora gui peme'ẽ va'e.
- <sup>10</sup> Mba'eta xerymba meme ikuai ka'aguy regua,  
 yvyty áry mbovy rei e'ŷ vaka ikuai va'e guive.
- <sup>11</sup> Xee aikuaa guyra yvyty áry ikuai va'e ha'e javi,  
 xerymba meme ikuai vixo nhuũndy rupigua.
- <sup>12</sup> Xee akaruxе va'e rire aipo nda'ei 'rãgue pẽvy,  
 mba'eta yvy ma xemba'e itui,  
 hexe ikuai va'e ha'e javi avi.\*
- <sup>13</sup> Tyrã xee nda'u ha'u 'rã ri vaka ro'o?  
 Ay'u 'rã ri nda'u kavara ruguy?
- <sup>14</sup> Any, Penderuete pe peme'ẽ perovy'aa,\*  
 ha'e Yvate ete va'e pe pejapo kuerei penhemboayvuague.
- <sup>15</sup> Pejapukai ke xevy pejexavaia ára.  
 Ha'e ramo xee rogueraa jepe 'rã,  
 ha'e rã peẽ ma xemboete 'rã", he'i.
- <sup>16</sup> Ha'e rã heko vai va'e pe ma Nhanderuete aipoe'i:  
 "Nda'evei peẽ kuery xeayvua aeja va'ekue re pendeayvu aguã ha'ekue'-ekue rami,  
 neĩ xereve guarã ajapo va'ekue rupi pendeayvu aguã.
- <sup>17</sup> Mba'eta napenhemo'arandu ukai,  
 xeayvua napendu potai vy.
- <sup>18</sup> Ha'e rã imonda va'e ma pexa vy perovy'a 'rã,  
 itavy rei va'e re guive penhemoirûxe vai.
- <sup>19</sup> Mba'emo vai re anho pendeayvu,  
 pendejuru py penhombotavya rupi anho pendekuai.
- <sup>20</sup> Pendeayvu rei peiny penderyvy re,  
 pendeayvu vaikue-ikue 'rã pendexy pi'a re ae.
- <sup>21</sup> Ha'e rami pendekuai teĩ xee akyrirõ ranhe va'ekue.  
 Ha'e ramo pexa'ã ndee ramigua ae xee aikoa re.  
 Ha'e rami teĩ xee romboayvu 'rãe.  
 Ha'e nunga ha'e javi amoimba 'rã pexaa py.\*
- <sup>22</sup> Peẽ kuery Penderuete gui penderexarai va'e,  
 peikuua pota povae re.  
 Ha'e rami e'ŷ ri ramo xee romondoropa 'rã,  
 ha'e ndoikoi 'rã penderepyarã.
- <sup>23</sup> Xererovy'aa ome'ẽ va'e ma xemboetea rupi ikuai.  
 Ha'e rami guape omoatyrõ va'e pe ma  
 aikuua uka 'rã Penderuete pendereraa jepea."

*Davi onhemombe'u ha'e ojeko rerovaa rupi ijayvuague*

Jogueroporaei va'e pe Davi ombopara va'ekue, Bate-Seba reve joguerekaoague re profeta Natã ou vy ijayvu jave guare (2 Samuel 11.1-12.20).

\* **50:12** Atos 17.24-25      \* **50:14** "Peme'ẽ 'rã perovy'aa", he'ia ma mboraei, e'ŷ vy nhandepy'a ha'e javi py nhambotea re ijayvu vy (Hebreus 13.15).      \* **50:21** Romanos 2.17-24

## 51

- <sup>1</sup> Xeruete, xemboaxy ke nderekō porāa rupi.  
Opa mba'e py renhomboaxya rupi vy emboguepa ke ajejavyague.
- <sup>2</sup> Xeky'a'o xerekō vaia gui,  
xejoi ke ajejavyague gui.
- <sup>3</sup> Mba'eta xee ma aikuaa ae xerekō vaia,  
xema'endu'a riae aikovy ajejavyague re.
- <sup>4</sup> Nderovai ae ajejavy va'ekue, ndevy anho,  
ndee rexaa py ajapo mba'emo vai.  
Ha'e nunga rupi xee aikuaa anhetē meme xere ndeayvua,  
ha'evea rami xembopagaa guive.\*
- <sup>5</sup> Xee ma tekō vai py ma voi aiko'i va'ekue,  
ha'i xererekō'i guive xere oī ae ma ajejavy aguā.
- <sup>6</sup> Ha'e rā ndee ma orepy'a re anhetē va'e oī va'e rerovy'a va'e,  
ha'e rami vy xepy'apy py reikuaa uka 'arandua.
- <sup>7</sup> Xeky'a'o ke hissopo rogue py iky'a e'ŷ va'e ju aiko aguā,\*  
xejoi ke, yro'y xiī va'e gui xiī porāve va'e aiko aguā.
- <sup>8</sup> Ejapo ke oporaeia ha'e ov'y'aa rā aendu ju aguā rami,  
zekāgue remou'ūmba rire teī avy'a nho aguā.
- <sup>9</sup> Ema'ẽ eme ajejavyague re,  
emboguepa ke xerekō vaia.
- <sup>10</sup> Xeruete, xere emōi kuraxō pyau iky'a e'ŷ va'e,  
xenhe'ẽ py xembopyau xereitya ve'ŷ aguā rami.
- <sup>11</sup> Xemoxē eme nerondené gui,  
neī xegui eipe'a eme guive Nenhe'ẽ Ky'a E'ŷ.
- <sup>12</sup> Xere emōi ju xereraa jepeague re avy'aa.  
Xenhe'ẽ py xemombaraete ju xekyre'ŷ aguā rami.
- <sup>13</sup> Ha'e ramo 'rāe ambo'e heko vai va'e kuery nderekō re,  
ha'e ramo ojejavypa va'ekue ojeko rerova 'rā ndevy.
- <sup>14</sup> Xeruete, xereraa jepe ke tuguy amoēague gui,  
Xeruete xereraa jepea.  
Ha'e ramo aporaei reve arov'y'a 'rā nderekō porāa.
- <sup>15</sup> SENHOR, eipe'a ke xejuru,  
ha'e ramo rogueroporaei 'rā.
- <sup>16</sup> Mba'eta ndererovy'ai mymba rojuka vy rome'ẽ va'e.  
Ha'e rami e'ŷ va'e rire xee ame'ẽ ma 'rāgue.  
Mba'emo roapy reve rome'ẽ va'e guive ndererovy'ai.
- <sup>17</sup> Ndee Oreruete pe rome'ẽ rā rerovy'a va'erā va'e ma orenhe'ẽ py nda'eveia roendua.  
Orep'y'a re rojejou vai ha'e ronhemboaxy ramo ma ndee Oreruete, noremboaxy e'ŷi  
'rā.\*
- <sup>18</sup> Emoingo porā ke Sião pygua kuery remboaxya rupi vy.  
Emoatyrō uka ju Jerusalém tetā kora.
- <sup>19</sup> Ha'e rami vy rerovy'a 'rā teko porā rupi ikuai va'e mba'emo ome'ẽ ramo,  
mba'emo oapy reve ome'ẽ va'e.  
Ndevygua altar áry ome'ẽ 'rā okuapy vaka ra'y.

\* **51:4** Romanos 3.4   \* **51:7** Ha'e kuery reko rami vy sacerdote kuery joky'a'o vy hissopo rogue ojopy 'rā mymba ruguy oĩa. Ha'e va'e py ojejavý va'ekue áry omboayvi 'rā oiky'a'o aguā (Levítico 14.1-7; Hebreus 9.19). Ha'e rā apy ma Nhanderuete pe ojapukai ipy'a oiky'a'o aguā.   \* **51:17** Mateus 5.3-6; Mateus 11.29-30; Lucas 18.9-14

### *Heko vai va'e ombopagaa aguã re ijayvua*

Jogueroporaei va'e pe nhombo'e aguã Davi ombopara va'ekue, Doegue Edom pygua Saul pe oikuua uka ramo Abimeleque ro py Davi ovaëague (1 Samuel 22.6-23).

## 52

- <sup>1</sup> Ava ndepo'akapa va'e, mba'e re tu teko vai ri rejou porã?  
Mba'eta Nhanderuete porayvua ma opa va'erã e'ŷ.
- <sup>2</sup> Ha'e rã ndee ma ndeayvu 'rã renhomomba aguã re anho.  
Kyxé haimbe va'e jojuka va'e rami 'rã ndeayvu,  
renhombotavy va'e vy.
- <sup>3</sup> Iporã va'e 'rãgue py mba'emo vai anho rejou porãve.  
Anheté rupi ndeayvu 'rãgue py ndeapuxe vai rive.
- <sup>4</sup> Ndee rejou porã va'e ma ayvu nhomokanhyarã anho,  
renhombotavya rupi rive ndeayvu va'e vy.
- <sup>5</sup> Ha'e rami avi Nhanderuete nemomba 'rã raka'e rã peve.  
Ndejopy vy ndepe'a 'rã heravy nderropy reĩa gui,  
okuave va'e vyv gui ndepe'a xapy'a 'rã.
- <sup>6</sup> Ha'e nunga oiko rã  
heko porã va'e kuery oexa vy ojererokyje 'rã.  
Ha'e rami vy ojojai rei vy aipoe'i 'rã:
- <sup>7</sup> "Ha'e rami 'rã okanhy avakue Nhanderuete re e'ŷ imbaraete va'e.  
Mba'eta ombo'e rei-rei retaa re rive ojerovia,  
ha'e opa marã rei ikuia re rive onhemombaraete va'e."
- <sup>8</sup> Ha'e rã xee ma oliveira rembypy ipyau va'e  
Nhanderuete pegua roka py hi'aĩ va'e rami aiko.  
Nhanderuete xemboaxya re ajerovia raka'e rã peve.
- <sup>9</sup> Ha'e rami repena rire  
xee roguerovy'a 'rã raka'e rã peve.  
Ndere ojerovia va'e kuery oendua py  
roarõ reve xema'endu'a 'rã nderery re, iporã ramo.

### *Salmo 14.1-7*

Jogueroporaei va'e pe nhombo'e aguã Davi ombopara va'ekue mbaraka py ombojoguy aguã.

## 53

- <sup>1</sup> Opa marã rei heko va'e ma opy'a py ijayvu vy  
"Ndoikoi rima Nhanderuete" he'i 'rã.  
Ha'e kuery opa marã 'rã ikuai teko vai ojapo vy.  
Neĩ peteĩve ma ndoikoi 'rã heko porãa rupi.
- <sup>2</sup> Ha'e rã Nhanderuete ma yva gui oma'ẽ 'rã avakue ra'y kuery re,  
oexa aguã amongue pa o'arandua rupi,  
Nhanderuete oekaa rupi ikuia oexa aguã.
- <sup>3</sup> Ha'e rami teĩ ha'e javive ojepe'a vy opa marã rei ikuai.  
Ndoikovei ma teko porã rupi oiko va'e,  
neĩ peteĩve.\*
- <sup>4</sup> "Teko vai rupi ikuai va'e 'arandurã noĩ teve?  
Ha'e kuery ma xevyguia kuery omomba rivepa 'rã mbojape ho'ua rami.  
Nhanderuete pe ndojapukai 'rã guive."†
- <sup>5</sup> Ha'e rami teĩ ha'e kuery onhemondyipa 'rã,

\* **53:3** Romanos 3.9-20 py. † **53:4** Apy ma Nhanderuete ijayvu heko vai va'e reko re.

okyje aguã jipoi teĩ.

Peẽ kuery re opu'ã rei va'ekue kãgue Nhanderuete omoaĩmba 'rã.

Ha'e kuery oxĩmba 'rã pendegui, Nhanderuete nopenavei ramo.

**6** Sião tetã gui Israel kuery reraa jepearã ou vy ojekuaa ma 'rãgue!

Nhanderuete ojeupagua kuery omoingo porã jevy ramo

Jacó ramymino kuery, Israel kuery ový'a ete 'rã okuapy.

### *Nhanderuete oepy aguã re ojapukaia ague*

Jogueroporaei va'e pe nhombo'e aguã Davi ombopara va'ekue mbaraka py ombojoguy aguã, Zife pygua kuery Saul pe aipoe'i ramo: "Orerekoa py e'ý teve Davi onhemi?" (1 Samuel 23.19, 26.1).

## 54

**1** Xeruete, xereraa jepe ke nderery rupi,  
xemboeko porã guive ndepo'akaa rupi.

**2** Xeruete, endu ke anhembo'e ramo,  
ejapyxaka ayvu xejuru gui oẽ va'e re.

**3** Mba'eta xere opu'ã okuapy porojajai va'e kuery,  
jojuka va'ety kuery xejukaxe okuapy.  
Ha'e kuery ma Nhanderuete re ima'endu'aa rupi nda'ikuai.

**4** Ha'e rã xee ma Nhanderuete oiko xepytyvõarã.  
SENHOR oiko xemoingovearã.

**5** Ombopaga 'rã heko vai va'e xemoingo axyague re.  
Ojeroviapi reikoa rupi remomba 'rã.

**6** Ndevy ame'ëxe'a'i py ame'ë 'rã ome'ëmby.  
SENHOR, aporaei 'rã nderery rupi iporã ramo.

**7** Mba'eta xereraa jepe ajexavaia ha'e javi gui.  
Ha'e ramo aexaa py xerovaigua kuery okanhymba.

### *Joapo vai va'e kuery omombaa aguã re ojerurea ague*

Jogueroporaei va'e pe nhombo'e aguã Davi ombopara va'ekue mbaraka py ombojoguy aguã.

## 55

**1** Xeruete, ejapyxaka ke ajerurea re.  
Endu e'ý eme ajapukaia.

**2** Eikuua pota ke xere, embovai xeayvua.  
Ajexavai vy ndaikuaai rei,  
nda'evei rei aikovy

**3** xerovaigua kuery ijayvu rei ha'e  
heko vai va'e xemoingo axy rei ramo.  
Mba'eta xere ha'e kuery ombou xembojexavaiarã.  
Xevy ipoxy vaipa vy xemomba 'rã.

**4** Xekuraxõ otytypaa aendu xepy'a re.  
Amano aguã gui akyjea aendu xere ou va'e.

**5** Aryryipa reve aendu akyjea,  
akyje vaipaa xere oĩ.

**6** Ha'e rami vy xee aipoa'e:  
"Apykaxu rami xepepo va'e rire  
aveve avy vy ajou 'rãgue apytu'u aguã.

**7** Ajava 'rãgue mombyry,  
tekoa e'ýa rupi aiko 'rãgue.

- <sup>8</sup> Ajou voi 'rāgue anhemí aguã,  
yvytu vaikue ha'e yai opu'ã va'e gui", ha'e.
- <sup>9</sup> SENHOR, emomba ke xerovaigua kuery,  
ejapo nhomongetaa py ndoikuaavei aguã rami,  
mba'eta tetã py xee aexa joguero'a ha'e joe nda'ija'ei va'e anho.
- <sup>10</sup> Ara py ha'e pyávy ojere okuapy tetã kora yvýry rupi.  
Kora mbyte py ikuai opa marã rei ha'e mba'emo vai apoa kuery.
- <sup>11</sup> Tetã mbyte oĩ 'rã nhomombaa.  
Tape rupi ma ikuai nhomoingo axya ha'e nhombotavya.
- <sup>12</sup> Ha'e rami avi xerovaigua e'ŷ va'ekue ae xembojaru rei oikovy.  
Ha'e rami e'ŷ va'e rire aropo'aka kuaa 'rāgue.  
Ndaxerexaxeい va'ekue e'ŷ xere ov'y'a rei,  
ha'e rami e'ŷ va'e rire ixugui anhemí 'rāgue.
- <sup>13</sup> Ha'e rami 'rāgue py ndee ava xee ramigua reiko va'e,  
xereve renhemoirũ va'ekue ae,  
xeirũ xepy'a py roayvuve va'e.
- <sup>14</sup> Joupive jaiko va'ekue, joupive javy'a va'ekue,  
teta rupi jaa va'ekue Nhanderuete pegua oo katy.
- <sup>15</sup> Manoa tojopy voi ha'e kuery,  
ha'e oikove reve toguejy yvykua py.  
Mba'eta ngoo rupi mba'emo vai re anho oikuua pota opy'a py.
- <sup>16</sup> Ha'e rã xee ma ajapukai 'rã Nhanderuete pe.  
Ha'e ramo SENHOR xereraa jepe 'rã.
- <sup>17</sup> Aje'ive, kuaray mbyte ha'e ka'aru'i ju  
amombe'u 'rã aikotevẽ va'e ajapukai reve.  
Ha'e ramo SENHOR oendu 'rã xeayvua.
- <sup>18</sup> Eraa jepe ke xerekovea xerakykue monha va'e kuery gui aiko porã ju aguã,  
mba'eta heta ete ikuai xerovaigua.
- <sup>19</sup> Nhanderuete oendu vy ombovai 'rã,  
jypy'i guive opena va'e vy.  
Mba'eta ha'e kuery re noĩ ojeko rerova aguã,  
Nhanderuete renonde teĩ ojererokyjea rupi e'ŷ ikuai.
- <sup>20</sup> Ha'e va'e ava ma opu'ã hexeve peteĩ rami ikuai va'ekue re,  
omboaxa rive peteĩ rami ikuai aguã ijayvuague.
- <sup>21</sup> Ijuru ma manteiga gui yxyïve,  
ha'e rã ipy'a re ma joe opu'ã aguã anho oĩ.  
Ijayvua ma azeite gui iporãve merami  
teĩ kyxe oekyi pyre rami nhomomba.
- <sup>22</sup> SENHOR po py pemboaxa pendep'y'a eta reia.  
Ha'e ramo penemombarae 'rã.  
Peteĩve henda py ndoity ukai 'rã heko porã va'e.\*
- <sup>23</sup> Xeruete, yvykua vaikue py remombo 'rã  
avakue tuguy moõa ha'e nhombotavypa rei va'e.  
Ha'e kuery ndoupityi 'rã oikove aguã va'ekue mbyte peve.  
Ha'e rã xee ma ajerovia tema 'rã ndere.

*Ojexavaia gui ombody'a guaxu aguã re ojerurea ague*

Jogueroporaei va'e pe "Apykaxu yvyra mombyrygua rupi ikuai" he'ia py oporaeia rami oporaei aguã Davi ombopara va'ekue Gate tetã py filisteu kuery ojopy ramo (1 Samuel 21.10-15).

\* 55:22 1 Pedro 5.7 py.

## 56

- <sup>1</sup> Xeruete, xemboaxy ke,  
    mba'eta avakue xejukaxe okuapy.  
    Ára pukukue re xemoingo axy xerero'a vy.
- <sup>2</sup> Xere opu'ã va'e xejukaxe okuapy.  
    Heta ete ikuai xere opu'ã va'e onhemboyvatevexe vy.
- <sup>3</sup> Akyjea aendu vy  
    ajerovia 'rã ndere.
- <sup>4</sup> Nhanderuete re ajerovia, ijayvua arov'y'a guive.  
    Nhanderuete re ajerovia vy  
    ndakyjei 'rã mba'eve gui.  
    Mba'e 'rã tu imarã va'e ojapo kuaa xere?
- <sup>5</sup> Ára pukukue re ha'e kuery omombe'u 'rã xeayvukue ramigua.  
    Onhembopy'aa ma xere ojapo vai aguã anho.
- <sup>6</sup> Nhomboatypa okuapy nhemi rupi,  
    oma'ẽ mbegue 'rã aikoa re oikuaa pota vy,  
    xemomba aguã oarõ vy.
- <sup>7</sup> Embopaga ha'e kuery ojapo vaiague re.  
    Xeruete, eitypa yvy regua kuery ndepoxya py.
- <sup>8</sup> Reipapa ma ajexavaia rupi aikoague.  
    Xerexay voi remboyrupa nde'ryryu py.  
    Xerekokue ha'e javi e'ŷ teve ipara ndekuaxia re?
- <sup>9</sup> Ndevy ajapukaia ára guive  
    xerovaigua kuery ojepe'apa 'rã.  
    Aikuaa porã Nhanderuete xereve oikoa.
- <sup>10</sup> Nhanderuete re ajerovia, ijayvua arov'y'a guive.  
    SENHOR re ajerovia, ijayvua arov'y'a guive.
- <sup>11</sup> Nhanderuete re ajerovia aguã amoĩ vy  
    ndakyjei 'rã mba'eve gui.  
    Mba'e 'rã tu avakue ojapo kuaa xere?
- <sup>12</sup> Xeruete, ndevy anhemboayvuague ajapo ete 'rã,  
    roguerovy'a ete 'rã guive.
- <sup>13</sup> Mba'eta manoa gui xerekovea reraa jepe,  
    xepy guive reraa jepe ha'a aguã gui,  
    Xeruete renonde aiko aguã hexakã nhomoingovea rupi.

## 57

### *Salmo 108.1-5*

Jogueroporaei va'e pe "Xemomba eme ke" he'ia py oporaeia rami oporaei aguã Davi ombopara va'ekue, Saul gui ojava vy itakua py onhemi jave (1 Samuel 24.1-7).

- <sup>1</sup> Xeruete, xemboaxy ke.  
    Xemboaxy mba'eta ndere ae xerekovea anhomí.  
    Ndepepo 'ã py anhemi,  
    mba'emo vai oiko va'e oaxapa peve.
- <sup>2</sup> Ajapukai Nhanderuete Yvate ete va'e pe,  
    mba'eta opa mba'e gui xerepy va'e.
- <sup>3</sup> Ha'e ramo yva gui xepytyvõarã ombou vy xereraa jepe.  
    Omximba xeavyky rei va'e kuery.  
    Exa uka renhomboaxya ha'e ojeroviapy reikoa.
- <sup>4</sup> Mba'eta xerekovea ma guary ikuai va'e mbyte oiko.

- Ha'e va'e kuery omondoropa 'rā avakue ra'y kuery.  
 Hu'y guaxu ha'e hu'y rami haĩ,  
 ha'e inhapekū ma kyxe haimbe porā va'e rami.
- <sup>5</sup> Xeruete, enhemboyvate yva áryve rupi,  
 ha'e yvy jave re tojekuaa nerexakāa.
- <sup>6</sup> Ha'e kuery ma xerenonde rupi omoĩ xembo'a aguā.  
 Ha'e ramo xerekovea oiko axy.  
 Xerenonde ojo'o okuapy yvy,  
 teĩ ha'e kuery ae ju ho'a ha'e va'ekue py.
- <sup>7</sup> Xeruete, xekuraxõ oĩ atā ma,  
 xekuraxõ oĩ atā.  
 Aporaei vy roguerovy'a 'rā.
- <sup>8</sup> Xenhe'ẽ, evy ke!  
 Mbaraka ha'e mba'epu ixā reta va'e, pevy avi ke.  
 Xee ambovy 'rā ko'ẽ ju.\*
- <sup>9</sup> Roguerovy'a 'rā yvy regua kuery mbyte,  
 ndevy aporaei 'rā ha'e javi regua mbyte.
- <sup>10</sup> MBA'eta renhomboaxya oo 'rā yva peve,  
 ndereko porāa avi arai peve 'rā oo.
- <sup>11</sup> Xeruete, enhemboyvate yva áryve rupi.  
 Yvy jave re tojekuaa nerexakāa.

### *Heko vai va'e kuery renonderā re ijayvua*

Jogueroporaei va'e pe Davi ombopara va'ekue "Xemomba eme ke" he'ia py oporaeia rami oporaei aguā.

## 58

- <sup>1</sup> Peẽ joe pepena va'e, ha'evea rami teve pendeayvu?  
 Anhetē rupi ri nda'u peikuaa pota avakue ra'y kuery re?
- <sup>2</sup> Any teve.  
 Ha'e rami 'rāgue py pendepy'a re pemoĩ teko vairā,  
 ha'e yvy jave re pejapo joguero'a aguā rami.
- <sup>3</sup> Heko vai va'e ma oguereko'i ramove ojepe'a 'rā ha'eve e'ŷa katy.  
 Itui'i vyve ojavy 'rā onhemboapu vy.
- <sup>4</sup> Jojukaarā oguereko mboi rami.  
 Oapyxa omboty 'rā mboi ijapyxa e'ŷ va'e rami,
- <sup>5</sup> oendu e'ŷ aguā imbo'ea ayvu,  
 ombo'e porāve teĩ.\*
- <sup>6</sup> Xeruete, emopẽ ke ha'e kuery raĩ ijuru py.  
 SENHOR, emboi guary ra'y kue'iry raĩnhykā.
- <sup>7</sup> Tokanhymba yy oxyry va'e rami,  
 ha'e hu'y omomboa rā opẽmba rive va'e rami.
- <sup>8</sup> Hevo'ipe yvy re ijayxy ovv va'e rami ta'ikuai,  
 ha'e kyr'i va'e ixy oity'i va'ekue rami kuaray oexa e'ŷ re ta'ikuai.
- <sup>9</sup> Juu'y okai vyvoi va'e e'ŷ vy ipyau va'e teĩ  
 oja omboaku e'ŷ mbove  
 yvytu jere ombovevepa va'e rami avi ta'ikuai.
- <sup>10</sup> Ha'e rā heko porā va'e ma hepyarā ou rā ovv'a 'rā.  
 Omoakŷ 'rā opy heko vai va'e ruguy py.

\* **57:8** "Xee ambovy 'rā ko'ẽ ju" he'i aje'ive'i reve Nhanderuete pe oporaei vy. \* **58:5** Apy ijayvu mboi mbo'ea re (Eclesiastes 10.11).

**11** Ha'e ramo aipo'ea 'rā:

“Anhetē ae ra'e heko porā va'e ojopy 'rā ojeupegua.  
Mba'eta Nhanderuete oiko yvy re nhombopaga va'e.”

*Ojepy ukaa rupi ojerurea ague*

Jogueroporaei va'e pe “Xemomba eme ke” he'ia py oporaeia rami oporaei aguā Davi ombopara va'ekue Saul ojukaxe vy oo py oīa oarō uka ramo (1 Samuel 19.11-12).

## 59

**1** Xeruete, xereraa jepe xerovaigua kuery gui.

Xereupi xerovaigua kuery xererovy e'ŷ aguā py.

**2** Xereraa jepe teko vai apoa kuery gui,  
xerepy avakue jouguy moēa gui.

**3** Mba'eta ha'e kuery ma nhuā ojayvy xerekove oipe'a aguā.

SENHOR, imbaraetekueve onhemboaty okuapy xerovai,  
xerekovai ramo e'ŷ, ajejavvy ramo e'ŷ guive.

**4** Mba'eve py atekoavy ramo e'ŷ ha'e kuery ojapura xemoingo axy aguā.  
Emyī ke, eju xerepy aguā, exa pota guive.

**5** Ndee ma SENHOR Xeruete ixondaro reta va'e,  
Israel kuery Ruete reiko.

Ha'e nunga rupi emyī, eju voi guive  
yvy regua kuery re reikuua pota aguā.  
Neī peteīve emboaxy eme hīā rupi teko vai ojapo va'ekue.

**6** Ha'e kuery ma pytū ma ramo onhendu okuapy jagua rami  
tetā yvýry rupi.

**7** Opa marā onhendu okuapy.  
Ijuru py ayvu oī va'e ma kyxe,  
“Mava'e tu oiko nhanerenduarā?” he'i guive.

**8** Ha'e rā SENHOR, ndee repuka 'rā ha'e kuery re.  
Rejojai rei 'rā yvy regua kuery ha'e javi.

**9** Xemombaraea, ndee ae roarō va'e,  
mba'eta ndee ma Xeruete anhemiaty yvate va'e.

**10** Xeruete xemboaxy vy ou 'rā xembojoyvyarā.  
Xerovaigua kuery re aipota va'e oiko ramo Nhanderuete oexa uka 'rā xevy.

**11** Ha'e rami avi ejukapa eme guive, xejaveguia kuery hexaraipa e'ŷ aguā.  
Ha'e rami 'rāgue py emoaimbā opa rupi ndepo'akaa py ho'apa peve,  
mba'eta SENHOR, orevy pe mba'emo vai jokoa reiko.

**12** Tove ha'e kuery onhembovatea rupi ae to'apa  
ojuru py ojejavvyague re, guembe rupi ayvu oēague re,  
opa marā ikuaiague re ha'e apu omombe'uague re.

**13** Emokanhy ndepoxya rupi, emokanhymba,  
ha'e kuery opa peve,  
yvy apy peve oikuaa pavē aguā  
Jacó ra'y kuery re Nhanderuete openaa.

**14** Pytū ma ramo jagua rami ha'e kuery onhendu okuapy  
tetā yvýry rupi.

**15** Opa rupi ikuai ho'u va'erā oeka va'e rami,  
ha'e naevyatāi vy opa marā onhendu okuapy.

**16** Ha'e rā xee ma aporaei 'rā ndepo'akaa re.  
Ha'e aje'ive reve aporaeive ju 'rā  
xemboaxy re avy'aa rupi.

Mba'eta ndee ae anhemiaty yvate va'e reiko,  
ajexavaia ára ndee ae xerepy 'rã.

- <sup>17</sup> Ha'e nunga rupi Xemombaraetea, ndevy pe aporaei 'rã aikovy.  
Xeruete anhemiaty yvate va'e reiko,  
Xeruete xemboaxy va'e.

## 60

### Salmo 108.6-13

Jogueroporaei va'e pe "Yvoty lírio omombe'ua va'e" he'ia py oporaeia rami oporaei aguã Davi ombopara va'ekue nhombo'e aguã, Síria regua kuery Mesopotâmia ha'e Zobá guigua re opu'ã jave, ha'e Joabe ou vy doze mil avakue Edom regua re Juky Ugua py ipo'aka jave (1 Samuel 8.13).

- <sup>1</sup> Xeruete, ndee nerepenavei va'ekue orere,  
oremoaïmba guive ndepoxy vy.  
Oremono'õmba ju ke aÿ.
- <sup>2</sup> Remomyïmba va'ekue yvy, rembovopa guive.  
Embotypa ju ke ipa'û,  
mba'eta oipave 'rã ovy.
- <sup>3</sup> Rejapo va'ekue ndevygua kuery mba'emo vai py ikuai axy aguã rami,  
oremboy'u vinho oremoakanhyarã.
- <sup>4</sup> Nerenonde ojererokyjea rupi ikuai va'e peguarã reupi uka bandeira,\*  
guyrapa reveguia gui onhemi kuaa aguã.
- <sup>5</sup> Ore kuery nerembiaiyvu orekuai va'e roo jepe aguã  
orereraa jepe ke reiporu kuaa regua py, ha'e orembovai.
- <sup>6</sup> Nhanderuete ijayvu oky'a e'ÿa rupi:  
"Xepo'akaa rupi vy amboja'o 'rã Siquém yvy,  
aa'ã 'rã Sucote regua yvyugua guive."†
- <sup>7</sup> Gileade ha'e Manassés yvy ma xemba'e meme itui.  
Efraim yvy ma xengora ratã.  
Judá ma xepo pygua.
- <sup>8</sup> Ha'e rã Moabe yvy ma hy'a ajejoiaty itui,  
Edom yvy áry amombo 'rã xepy regua,  
ha'e Filístia pygua kuery re xepo'aka vy avy'a nhendu 'rã."‡
- <sup>9</sup> Mava'e nda'u xereraa 'rã tetã ikorapa va'ea py?  
Mava'e nda'u xereraa 'rã Edom yvy re?
- <sup>10</sup> Mba'eta Oreruete, ndee orereja rive va'ekue.  
Oreruete, ndereovei ma orexonardo kuery reve!
- <sup>11</sup> Orereraa jepe nho ke rojexavaia gui,  
mba'eta avakue orereraa jepea ma mba'everã ndovarei.
- <sup>12</sup> Nhanderuete re vy ae 'rã nhandepo'aka,  
mba'eta ha'e opyrõ 'rã nhanderovaigua kuery re.

### Huvixave re ojerurea ague

Jogueroporaei va'e pe Davi ombopara va'ekue mbaraka py ombojoguy aguã.

## 61

- <sup>1</sup> Xeruete, endu ke ajapukaia.  
Eikuua pota anhembo'e ramo.

\* **60:4** Bandeira hi'y reve ma joe opu'ãa rupi 'rã ogueraa, oupia rã xondaro kuery oexa vy oña py oupa aguã (Jeremias 51.27). † **60:6** Apy ma ijayvu joyvy oipe'a va'ekue ojeupegua kuery pe omboja'o aguã re. ‡ **60:8** Ha'e jave py ma joyvy ojogua vy hi'áry omombo 'rã opy regua, oikuua uka aguã ija oikoa.

- <sup>2</sup> Yvy apy gui ajapukai ndevy,  
xepy'apy py ajexavai vy.  
Xereraa ke itaova xegui yvateve va'e áry.
- <sup>3</sup> Mba'eta ndee ma anhemiaty,  
xerovaigua kuery gui torre imbaraete va'e reiko.
- <sup>4</sup> Taiko riae nembojeroviaaty rupi raka'e rã peve.  
Ndepepo guýry xee anhemiaty va'e.
- <sup>5</sup> Mba'eta Xeruete, ndee rendu anhemboayvu rã.  
Ha'e rami vy xevy pe reme'ẽ iporã va'e,  
nderery oendu vy ojererokyje va'e kuery reve.
- <sup>6</sup> Remoïve 'rã huvixave ára.  
Hi'ára ipukuve ete 'rã aýgua ha'e raka'e rãgua ikuiaia peve.
- <sup>7</sup> Toĩ riae Nhanderuete renonde.  
Ndereko porãa ha'e ndeporayvua rupi vy toikove riae.
- <sup>8</sup> Ha'e rami rã nderery rupi aporaei 'rã raka'e rã peve,  
anhemboayvuague ajapo aguã ko'ẽ nhavõ.

*Jajerovia aguã regua*

Jogueroporaei va'e Jedutum oporaeia rami oporaei aguã Davi ombopara va'ekue.

**62**

- <sup>1</sup> Nhanderuete anho arõ aikovy xenhe'ẽ py, xeayvu e'ý re.  
Mba'eta ixugui ae ou xereraa jepearã.
- <sup>2</sup> Ha'e anho oiko itaova,  
xereraa jepea ha'e anhemiaty yvate va'e.  
Ha'e nunga rupi ndaxereityai 'rã.
- <sup>3</sup> Peẽ kuery ha'e javive, raka'e peve tu xee peteĩ ava re pepu'ã rei 'rã xereity aguã  
oo mbotya ojero'a va'e, e'ý vy kora ho'a rai'i va'e ramí.
- <sup>4</sup> Ha'e va'e kuery xereityxe okuapy naxemboeteavei aguã.  
Apu rive ha'e kuery ojou porãve.  
Ojuru py ijayvu porã teĩ  
opy'a py ma ijayvu vaikue-ikue 'rã.
- <sup>5</sup> Nhanderuete anho xenhe'ẽ py arõ aikovy xeayvu e'ý re,  
mba'eta ixugui ou 'rã arõ aikovy va'e.
- <sup>6</sup> Ha'e anho oiko itaova aĩ aguã,  
xereraa jepea, anhemiaty yvate va'e.  
Ha'e ramo ndaxereityavei 'rã.
- <sup>7</sup> Nhanderuete gui ae ou aa jepe aguã ha'e xemboetea aguã.  
Nhanderuete re oĩ xembaraete aguã ha'e itaova anhemiaty.
- <sup>8</sup> Xereveguá kuery, pejerovia hexe ára nhavõ.  
Ixupe pemombe'u guive pendepy'a re oĩ va'e ha'e javi.  
Nhanderuete ma nhanhemiaty oiko.
- <sup>9</sup> Avakue yvyigüe'i ma mba'e'ý ikuai,  
ijyvatekueve voi anhetẽ rupigua e'ý meme ikuai.  
Mba'emo opejaa py ipoyia oexaa rã  
ha'e kuery ha'e javi teĩ mba'e'ý va'e gui nda'ipoyive 'rã.
- <sup>10</sup> Pejerovia eme pejokorea re,  
neĩ penemondaa re pevy'a eme guive.  
Penemba'e rei-rei hetave ovy teĩ  
ha'e nunga re rive pejerovia eme pendepy'a py.\*

\* **62:10** Mateus 19.21-22; 1 Timóteo 6.17-19

**11** Petēgue Nhanderuete ijayvu, mokōguea ma aendu pova'e:

Po'akaa ma Nhanderuete guigua meme.

**12** SENHOR, ndere anho oĩ oremboaxy aguã.

Petē-tē pe reme'ẽ 'rã ojapoague repy.\*

### *Nhanderuete jaeka aguã regua*

Mboraeirã Judá regua teko e'ŷa rupi Davi oiko vy ombopara va'ekue (2 Samuel 15.1-30, 16.5-14).

## 63

**1** Xeruete, ndee ma Xeruete imbaraete va'e.

Xee ma roekaa rupi anhea'ã aikovy.

Ndere ma xerekovea nda'eveive.

Xerete re voi aendu ndere anhembojaxea,  
yvy ipiru reia rupi yy re nda'evei va'e rami.

**2** Mba'eta ndevyguia henda iky'a e'ŷ va'e py aĩ vy  
aikuua pota va'ekue nembaraetea ha'e nerexakãa re.

**3** Mba'eta xerekove 'rãgue py xee arov'yave ndee xemboaxya.  
Ha'e rami vy rogueroporaei 'rã.

**4** Ha'e rami vy roguerovy'a 'rã aikove teria ja,  
nderery rupi xepo auipi 'rã guive.

**5** Xenhe'ẽ py avy'a nhandy ha'e xo'o hee va'e ha'u vy avy'aa rami avi.  
Roguerovy'aa rupi xejuru py rogueroporaei.

**6** Xerupa py xetuia rupi voi xema'endu'a 'rã ndere,  
pyávy ndakevei vy aikuua pota 'rã ndere,

**7** xepytyvõa reiko ramo.

Ndepepo'ã py anhemi vy aporaei 'rã vy'a rupi.\*

**8** Xenhe'ẽ ma ndere anho oĩ.

Ndepo reiporu kuaa regua re xejopy.

**9** Ha'e rã xerekovea oipe'axe vy xereka va'e kuery ma  
ho'apa 'rã yvykua vaikue py.

**10** Remboaxa 'rã kyxe py ipo'aka va'e kuery pe,  
jagua-tuvy nhe'ẽ rembi'urã rive ikuai aguã.

**11** Ha'e rã huvixave ma ov'y'a 'rã Nhanderuete re.

Hery rupi oura va'e kuery avi ov'y'a 'rã okuapy.  
Ha'e rã apu rupi ikuai va'e ma okyririmba 'rã.

### *Hovaigua kuery gui oepy aguã re ojerurea ague*

Jogueroporaei va'e pe mboraeirã Davi ombopara va'ekue.

## 64

**1** Xeruete, endu ke ajexavai vy ajapukaia.

Eraa jepe xerekovea xerovaigua kuery poxya gui.

**2** Xenhomí heko vai va'e ojapoxe va'e gui,  
heko vai va'e opa marã onhendu okuapya gui.

**3** Ha'e va'e kuery ma kyxe oaĩmbe'ea rami oguerekó katu 'rã oapekũ,  
hu'y oa'angaa rami oguerekó katu 'rã ayvu vai,

**4** nhemi rupi ojapo vai aguã anhetê rupi ikuai va'e re,  
ha'e kuery re opoi xapy'a 'rã okyje e'ŷ re.

**5** Mba'emo vai rupi ikuiai gui ndojepo'ai 'rãe,

\* **62:12** Mateus 16.27; Romanos 2.6-16; Apocalipse 2.23   \* **63:7** "Ndepepo'ã py" he'ia ma Nhanderuete opena porãa re ijayvu vy (Mateus 23.37).

- nhemí rupi ijayvu 'rã joapo vai aguã re.  
 Ha'e vy joupe-upé "Mava'e tu nhanderexa 'rã?" he'i.
- <sup>6</sup> Teko vai re rive oikuua pota 'rã,  
 ha'e gui ojou 'rã ha'ekue rami ete ojapo aguã.  
 Yvykua vaikue rami onhembopy'aa ha'e peteñ-teñ py'a.
- <sup>7</sup> Ha'e gui ma ha'e kuery re Nhanderuete ju 'rã opoi ngu'y.  
 Ha'e kuery oendu xapy'a 'rã onhyvõague.
- <sup>8</sup> Po ramigua py ha'e kuery ho'a 'rã:  
 ijayvuague rami ae oiko 'rã ha'e kuery re.  
 Ha'e ramo hexaa kuery ha'e javi oakã ombovava 'rã,
- <sup>9</sup> ha'e avakue ikuai va'e ha'e javi ma ojererokyje reve  
 oikuua uka 'rã Nhanderuete rembiapo,  
 ha'e ojapo va'e oikuua vy.
- <sup>10</sup> Ha'e gui heko porã va'e ma oguerovy'a 'rã SENHOR,  
 hexe ojerovia 'rã guive.  
 Anhetã rupi ipy'a va'e ha'e javi ovy'a 'rã.

*Mba'emo aju omono'õmbaa ogueroma'endu'aa ague*  
 Jogueroporaei va'e pe mboraeirã Davi ombopara va'ekue.

## 65

- <sup>1</sup> Oreruete, ndere rojeroviaa rupi roqueroporaei 'rã Sião tetã py!  
 Ndevy pe rojapo 'rã ronhemboayvuague.
- <sup>2</sup> Ronhembo'ea rendu va'e,  
 ndea py ou 'rã opa marâguia avakue
- <sup>3</sup> gueko vaiague re ndovy'ai vy.  
 Rojejavvyague orere ipo'aka ramo  
 ndee rembogue 'rã.
- <sup>4</sup> Ovy'a ete 'rã ndejeupe guarã reiporavo va'ekue.  
 Ha'e va'e kuery onhemboja 'rã ndere, nderoka py ikuai aguã.  
 Ha'e ramo rovy'a vaipa 'rã ndero py oremboaxyá rexu uka va'e re,  
 ndevygua templo iky'a e'ý va'e py.
- <sup>5</sup> Oreruete orereraa jepea, ndeguigua teko porã re rojapukai ramo  
 ndee orembovai 'rã nhomondyipaarã rejapo vy.  
 Yvy apy re ikuai va'e ye'ẽ mombyryve oĩ va'e rupigua  
 ndee anho nerarõ okuapy.
- <sup>6</sup> Nembaraetea rupi vy remombyta porã raka'e yvyty,  
 ndepo'akaa py renhemonde reve.
- <sup>7</sup> Ye'ẽ revovo onhendu ramo remombytu'u ju,  
 yai opu'ã-pu'ã va'e revovo,  
 yvy regua kuery revovo guive.\*
- <sup>8</sup> Ha'e ramo hexa pyrã rejapo va'e  
 yvy apy re ikuai va'e oexa vy onhemondyipa 'rã okuapy.  
 Kuaray oua katy gui ha'e oikea katy gui ou va'e  
 rejapo 'rã ovy'a reve oporaei okuapy aguã rami.
- <sup>9</sup> Yvy re reikuua pota vy remoaký 'rã,  
 remoingo porã ete 'rã.  
 Yakã'i Nhanderuete pegua typy porã meme 'rã.  
 Mba'emo ra'yí oiko porã 'rã,  
 ha'e rami aguã rami remoingo rire.

\* **65:7** Lucas 8.12-15; 21.25-26

- 10 Ha'e rami vy remoakŷ 'rã yvy roikaraâgue rupi,  
rembojojapa 'rã yvy'ã ikuai va'e.  
Oky rayvi py remoakŷ  
ronhotŷ va'ekue remoingo porã vy.
- 11 Ma'etŷa opaa py rexa uka 'rã ndeporayvua coroa rami iporã va'e.  
Repyrõague rupi reja 'rã yvy moingo porãarã,
- 12 teko e'ŷa rupi jai rogue ikuai va'e re guive.  
Yvy'ã ikuai va'e voi ovy'a 'rã.
- 13 Mymba heta 'rã ikuai nhuündy rupi,  
ha'e yvy'ã guy rupi ma hary anho 'rã ikuai.  
Ha'e nunga ha'e javi ovy'a vy oporaei 'rã okuapy.

*Nhanderuete oguerovy'aa ague*  
Jogueroporaei va'e pe mboraеirã ombopara pyre.

## 66

- 1 Yvy jave re pendekuai va'e, peroporaei Nhanderuete!
- 2 Peporaei hery rupi iporã ramo,  
perovy'a mboraеi rupi.
- 3 Nhanderuete pe aipo peje: “Rejapo va'ekue ma iporã ete!  
Ndepo'aka etea rupi nderovaigua ikuai va'ekue ojexa uka 'rã nenhe'ẽ rendu vy.
- 4 Yvy jave regua neretonde 'rã oĩ guenapy'ã re,  
mboraеi rupi oporaei 'rã ndevy,  
nderery rupi oporaei 'rã okuapy.”
- 5 Peju ke, pexa Nhanderuete rembiapokue,  
avakue ra'y kuery pe mba'emo porã ojapo va'ekue ha'e javi.
- 6 Ye'ẽ omboypa raka'e yvy piru reia rive opyta aguã rami,  
ha'e yakã mbyte rupi guive oaxaa yvy rupi.\*  
Ha'e py ma javy'a hexe.
- 7 Opo'akaa rupi opena riae 'rã,  
oexa pota 'rã yvy regua kuery re.  
Nonhe'ẽ rendui va'e tonhemboyvate eme.
- 8 Yvy regua kuery, penema'endu'a porã ke Nhanderuete re,  
pendu uka peporaeia.
- 9 Ha'e ma ojapo jaikove aguã rami,  
ha'e ndojapoi 'rã nhandepyxyry aguã rami.
- 10 Mba'eta ndee Oreruete, orereko rexa,  
oreky'a'o prata oiky'a'oa rami.
- 11 Oreapo va'ekue nhuã py orembotya aguã rami,  
orevoyirã remoõ orekupe re.
- 12 Rejapo avakue kavaju árygua kuery oreakã áry rupi oo aguã rami.  
Oremboaxa va'ekue tata ha'e yy rupi.  
Ha'e rami rire teñ peteñ henda tuvixaa py ju orereru.
- 13 Aike 'rã nderopy mba'emo ame'ẽ va'erã reve,  
ndevy ajapo aguã anhemboayvuague,
- 14 ha'e rami aguã re xeayvu rire,  
mba'eta ajexavaia ára ha'e rami aguã xeayvu.
- 15 Ndevy ame'ẽ 'rã ikyra va'e ojuka pyre,  
kavara ro'okue reakuã reve.  
Ajuka 'rã vaka ha'e kavara ra'y.

\* **66:6** Éxodo 14.21-22, Josué 3.17

- <sup>16</sup> Nhanderuete renonde pejererokyjea rupi pendekuai va'e ha'e javi, peju ke, pendu,  
pēvy amombe'u 'rā xevy ojapo porā va'ekue.
- <sup>17</sup> Ixupe ajapukai karamboae,  
xejuru py aroporaei guive.
- <sup>18</sup> Xepy'a re ovare e'ŷ va'e amoī va'e rire  
SENHOR naxerendui 'rāgue.
- <sup>19</sup> Ha'e rami rā Nhanderuete xerendu ae,  
oikuaa pota guive ajerure vy xeayvu rā.
- <sup>20</sup> Ima'endu'a porāmby toiko Nhanderuete.  
Anhembo'ea noendu rivei,  
neī ndoexa uka e'ŷi guive xemboaxya.

*Yvy regua kuery oguerovy'a aguā regua*

Jogueroporaei va'e pe mboraеirā ombopara pyre mbaraka py ombojoguy aguā.

**67**

- <sup>1</sup> Nhanderuete topena porā nhandere,  
tanhaneingo porā,  
ha'e jaikoa rupi tomboguejy ngova rexakā,
- <sup>2</sup> yvy re ikuai va'e oikuaa aguā nderekō,  
yvy regua ha'e javi ikuia rupi oikuaa aguā rejogueraa jepea.
- <sup>3</sup> Oreruete, yvy regua kuery tandereroporaei,  
tandereroporaei ha'e kuery ha'e javi.
- <sup>4</sup> Amboae regua kuery voi tandererovy'a, tandereroporaei.  
Mba'eta yvy regua re reikuaa pota 'rā anhetē rupi,  
yvy re ikuai va'e rerekopa.
- <sup>5</sup> Oreruete, yvy regua kuery tandereroporaei,  
tandereroporaei ha'e kuery ha'e javi.
- <sup>6</sup> Nhanderuete nhanemoingo porā ramo  
yvy re oiko ma mba'emo'a.
- <sup>7</sup> Oreruete, oreingo porā ke,  
ha'e ramo yvy apy guive ojererokyjea rupi ikuai 'rā neronden.

*Nhanderuete ngovaigua kuery re ipo'akaa re ijayvua*

Jogueroporaei va'e pe mboraеirā Davi ombopara va'ekue.

**68**

- <sup>1</sup> Nhanderuete opu'ā vy omoaimbā ngovaigua kuery.  
Henonde gui onhamba oayvu e'ŷ va'e.
- <sup>2</sup> Hataxī oaimbā ovya rami ndee remoaī 'rā.  
Tata gui ei raity hykupaa rami avi  
heko vai va'e kuery okanhymba 'rā Nhanderuete renonde gui.
- <sup>3</sup> Ha'e rā heko porā va'e ma ovya'a 'rā okuapy,  
Nhanderuete renonde oporaei 'rā.  
Oguerovy'a pavē 'rā.
- <sup>4</sup> Peporaei ke Nhanderuete pe, hery rupi peporaei.  
Pemboete arai áry rupi oiko va'e.  
SENHOR ae hery. Pevy'a henonde.
- <sup>5</sup> Ha'e ma tyre'ŷ ikuai va'e ru, ha'e imeve'ŷ va'e re oikuaa pota va'e oiko.  
Nhanderuete oiko o'amba iky'a e'ŷ va'e py.
- <sup>6</sup> Nhanderuete ojapo 'rā amongue ha'e ae'i oiko va'ekue ngoo pygua heta reve ju oiko  
aguā rami.

- Nhuã py omboty pyre voi ogueraa jepe 'rã ikuai porã aguã py.  
 Onhe'ẽ rendu e'ŷ va'e kuery anho 'rã ikuai yvy porã e'ŷa re.
- <sup>7</sup> Oreruete, ndevygua kuery renonde reẽ reovy ramo,  
 teko a e'ŷa rupi reroguata ramo
- <sup>8</sup> yvy oryryipa raka'e,  
 yva voi otykypa ndee Oreruete renonde.  
 Sinai yvyty voi omyimba ndee ore Israel kuery Ruete renonde.\*
- <sup>9</sup> Oreruete, oky ja'ea rembou ndeyvy re.  
 Na'iporãvei ramo rembopyau.
- <sup>10</sup> Ha'e py ma ikuai nerymba kuery.†  
 Oreruete, oikotevẽ va'e pe rejou uka mba'emo ndeporayvua rupi.
- <sup>11</sup> SENHOR ae oikuua uka ayvu.  
 Heta ete ikuai kunhague ayvu porã mombe'ua.
- <sup>12</sup> Huvixave kuery onhamba, oxondaro kuery reve ojavapa,  
 ha'e gui imba'e rei-rei va'ekue ma kunha hoo va'e ju omboja'o.
- <sup>13</sup> Mba'e re tu pepytu'u peiny mymba kora yvýry?‡  
 Apykaxu pepo ma prata py onhovãmbaa mbyre,  
 hague ipukuve va'e re ma ouro rexakã oĩ.
- <sup>14</sup> Ha'e py Ipo'akapa va'e huvixave kuery omoaĩmba jave  
 Zalmom yvyty áry ho'a yro'y apí.
- <sup>15</sup> Nhanderuete pegua yvyty ma Basã,  
 yvy'ã yvateve va'e ma Basã regua yvyty.
- <sup>16</sup> Ha'e gui ndee yvyty yvateve va'e,  
 mba'e re tu remoaruã reia rupi rema'ẽ yvyty Nhanderuete oiporavo va'ekue re?  
 Ha'e py ma SENHOR oiko 'rã raka'e rã peve.
- <sup>17</sup> Nhanderuete pegua karóxa joe opu'ãa pygua ma vinte mil ikuai,  
 tá, mbovy rei e'ŷ oguereko.  
 Ha'e va'e kuery mbyte rupi SENHOR oiko.  
 Sinai yvyty ojeapo henda iky'a e'ŷ va'e rami.
- <sup>18</sup> Yvate katy reo ju vy reraa nerembiguairã rejopy va'ekue.  
 Rejopy avakue ndejeupe guarã, heko vai va'ekue guive,\*  
 SENHOR Oreruete, ha'e kuery mbyte reiko aguã.
- <sup>19</sup> Ima'endu'a porãmby toiko SENHOR ko'ẽ nhavõ nhandevoyi ogueraa va'e.  
 Nhanderuete ma nhanderepya oiko.
- <sup>20</sup> Nhanderuete ma jogueraa jepea.  
 Nhanderuete SENHOR reve vy jaa jepe 'rã manoa gui.
- <sup>21</sup> Mba'eta Nhanderuete ombovo ngovaigua kuery akã,  
 hi'a vuku va'e ha'e kuery ae oipotaa rupi ikuai va'ekue akã ombovopa.
- <sup>22</sup> SENHOR aipoe'i: "Basã yvy gui arojevy uka ju 'rã ha'e kuery,  
 ye'ẽ typyvea peve ojava teĩ ha'e gui aru rukapa ju 'rã", he'i.
- <sup>23</sup> Ha'e ramo pepyrõ 'rã penderovaigua kuery ruguy re,  
 ha'e penerymba jagua kuery oy'upa 'rã.
- <sup>24</sup> Xeruete, ojekuuaa ndevygua kuery hyxy ov y va'e.  
 Xeruete, Xeruvixave pegua hyxy jogueravy vy oike henda iky'a e'ŷ va'e py.
- <sup>25</sup> Henonde ma oje'oi oporaei va'e,

\* **68:8** Egito yvy gui Nhanderuete judeu kuery ogueraa jepe vy henonderã omondouka arai ha'e tata (Êxodo 13.21-22).  
 Ha'e gui Sinai yvyty yvýry ha'e kuery ovaẽ ramo ojapo yvy oryryi aguã rami (Êxodo 19.16-18). † **68:10** "Nerymba kuery" he'ia ma Nhanderuete pegua kuery re ijayvu vy (Salmo 100.3). ‡ **68:13** Kova'e ayvu rupi Débora ijayvu raka'e Rúben kuery pe joe opu'ã aguã katy ndooi ramo (Juízes 5.16). \* **68:18** Efésios 4.7-13

- hakykue ma ixã va'e mbopua kuery oje'oi.  
 Mbyte rupi ma kunhataigue oparã'i va'e revegua ou.
- <sup>26</sup> Teta mbyte penema'endu'a porã ke Nhanderuete re.  
 Peẽ Israel ramymino kuery, penema'endu'a porã SENHOR re.
- <sup>27</sup> Pe py ma oĩ kyrïve va'e Benjamim regua, amboae kuery renonde re oo,  
 ha'e Judá regua huvixa kuery ngupivegua kuery reve.  
 Ou avi huvixa kuery Zebulom ha'e Naftali regua.
- <sup>28</sup> Oreruete, exa uka ju ke nembaraetea,  
 mbaraete marã e'ŷ orerepya rupi reiporu va'ekue,
- <sup>29</sup> Jerusalém tetã py ndevygua templo guigua.  
 Huvixa kuery ome'ẽ 'rã mba'emo nemboetea rupi.
- <sup>30</sup> Emondyipa vixo takuaty rupigua,§  
 heta regua kuery guive vaka rami imbaraete teĩ,  
 ha'e gui amboae regua vaka ra'y rami ikuai va'e.  
 Epyrõ prata oipota rei va'e kuery re.  
 Emoaimbä joe opu'âxe vai va'e.
- <sup>31</sup> Huvixa kuery ou Egito yvy gui,  
 Etiópia pygua avi onha 'rã jogueruvy,  
 opo tynyẽ va'e omokuave'ẽ reve Nhanderuete pe.
- <sup>32</sup> Yvy regua pendekuai va'e, peporaei Nhanderuete pe,  
 peroporaei SENHOR.
- <sup>33</sup> Ha'e ma yva áryve rupi oĩ, yva ymave guare áry rupi.  
 Ha'e ojapo 'rã ijayvua oendua aguã rami,  
 ijayvua ipo'akapa ramo.
- <sup>34</sup> Peroporaei Nhanderuete Israel áry rupi ipo'akaa oexa uka va'e,  
 ombaraetea oexa uka arai yvatevegua re.
- <sup>35</sup> Oreruete, omboetevepy reiko ndevygua henda iky'a e'ŷ va'e py.  
 Israel kuery Ruete omombaraete ha'e ombopo'aka 'rã ojeupegua kuery.  
 Ima'endu'a porãmby toiko Nhanderuete!

### *Messias nda'eveia re ijayvua*

Jogueroporaei va'e pe Davi ombopara va'ekue “Yvoty lírio” he'ia py oporaeia rami  
 oporaei aguã.

## 69

- <sup>1</sup> Xeruete, xereraa jepe ke,  
 mba'eta yy ou ma xerekovea peve.
- <sup>2</sup> Xepija ma yapo py,  
 yvy ndarovyi.  
 Yy typyvea py aĩ.  
 Oxyry atã vy xemoinge.
- <sup>3</sup> Ajapukai riae ete vy xekane'õ ma,  
 xejjryvi pirupa ma guive.  
 Xerexa voi ndoexavei ma,  
 Xeruete arõ riae ete rã.
- <sup>4</sup> Mba'e py e'ŷ ndaxerayvui va'e kuery ma  
 xe'a xeakã regua gui hetave ikuai.  
 Xemombaxe va'e kuery ma ipo'aka va'e meme,  
 mba'e py e'ŷ xerovaigua kuery xere opu'ã va'e.\*

§ 68:30 “Vixo takua ty rupigua” he'ia ma Egito pygua ruvixa re ijayvu vy (Ezequiel 29.3, 32.2).

\* 69:4 João 15.25

- Ha'e rami vy xeapo okuapy xemonda ague'ŷ voi ame'ẽ ju aguã rami.
- <sup>5</sup> Xeruete, ndee reikuua porã xee ae 'arandua rupi e'ŷ aikoague,  
atekoavyague ndereikuua e'ŷi.
- <sup>6</sup> SENHOR, Xeruete nexondaro reta va'e,  
kekáuxa toximba eme ndere ojerovia va'e.  
Israel kuery Ruete,  
kekáuxa toĩ vai eme nderekva'e kuery.
- <sup>7</sup> Mba'eta ndevy aiko ramo xere ijayvua vaikue-ikue.  
Xerova re aximbaa anho ojekuaa.
- <sup>8</sup> Xeryvy kuery rexaaty ramo ve'ŷ ma aiko,  
ha'i pi'a kuery voi ndaxerexa kuaavei ma.
- <sup>9</sup> Mba'eta ndevyguoo ayvu etea xemomba,  
ndere ijayvu rei va'e kuery ijayvu reia ma xere ae ou.\*
- <sup>10</sup> Ajae'o akaru e'ŷ re aikoa py.  
Ha'e rami aikoa re ju ijayvua.
- <sup>11</sup> Ajukue voxaguigua py anhemonde ramo\*  
ha'e kuery xembojaru rei rive 'rã okuapy.
- <sup>12</sup> Okẽ py oguapy va'e opuka rei okuapy xere.  
Oka'u rei va'e kuery voi xerery rupi oporaei 'rã okuapy.
- <sup>13</sup> Ha'e rã SENHOR, xee ma ndevy anhembo'e ha'eve jave.  
Xembovai ke Xeruete, opa mba'e py renhomboaxy rupi,  
mba'eta ojeroviapreiko vy renhopytyvõ 'rã.
- <sup>14</sup> Xereraa jepe ke ijaxuru va'e py aike e'ŷ aguã.  
Xereraa jepe xere ija'e e'ŷ va'e kuery gui,  
yy typyvea py aikeague gui.
- <sup>15</sup> Xereroxyry uka eme yy oxyry atã va'e pe,  
yy jere py guive xemoinge uka eme,  
yykua voi xe'áry tonhemboty eme.
- <sup>16</sup> SENHOR, xembovai ke renhomboaxy rupi rejoayvu va'e vy.  
Opa mba'e py renhomboaxy va'e vy ejevy ju xea py.
- <sup>17</sup> Xee nerembiguai pe ejexa uka e'ŷ eme,  
ajexavai aikovy ramo.  
Xembovai voi ke.
- <sup>18</sup> Enhemboja xerekovea re, xerepy,  
xereraa jepe xerovaigua kuery gui.
- <sup>19</sup> Ndee ma reikuua ae xembojaru rei okuapy,  
xemoximbaa ha'e xemoi vai reia guive.  
Xerovaigua kuery ha'e javi rexaa rupi meme ikuai.
- <sup>20</sup> Aximbaa gui xepy'a ovopa, xekangy vy.  
Xemboaxyarã ma arõ rive,  
xembovy'aarã aeka tei ndajoui.
- <sup>21</sup> Ha'u va'erã iro va'e rive ome'ëa xevy,  
ha'e xey'uvei ramo vinagre ome'ëa.†
- <sup>22</sup> Ha'e kuery mesa tojeapo nhuã rami ha'e kuery renonde,  
imba'e rei-rei topyta imbo'aarã.
- <sup>23</sup> Ha'e kuery rexaa voi tapytumba ndoexavei aguã,  
ikupe ma ejapo oryryipa aguã rami.\*

\* **69:9** João 2.17; Romanos 15.3    \* **69:11** Ha'e kuery ipy'a vai vy onhemonde 'rã ajukue voxaguigua py gueko ramo vy (Lucas 10.13; Apocalipse 11.3).    † **69:21** Ha'e ramigua oiko Jesus kuruxu re oñi jave (Mateus 27.33-34, 48; João 19.28-30).    \* **69:23** Romanos 11.9-10

- <sup>24</sup> Ha'e kuery pe exa uka ndepoxya,  
ndepoxya toupitypa.
- <sup>25</sup> Hekoa topyta tekao e'ŷa rami,  
avave rei toiko eme hoogue py.<sup>‡</sup>
- <sup>26</sup> Mba'eta ha'e kuery omoingo axy raxave rire ndee remoingo axy va'e,  
ndee remboguai va'ekue ha'e kuery ojapo haxy oendu vaipave aguã rami.
- <sup>27</sup> Ha'e kuery re emõive tema teko vai káuxa opaga aguã,  
remboaxy aguã rami e'ŷ ikuai aguã.
- <sup>28</sup> Hery emboguepa kuaxia tekove oguereko va'e kuery rery oĩa gui,\*  
toõive eme heko porã va'e kuery rery reve.
- <sup>29</sup> Ha'e rã xee ma ndavy'ai ete aikovy ajexavai vy.  
Xeruete anhemiaty yvate va'e, exa uka ju xereraa jepea.
- <sup>30</sup> Nhanderuete rery rupi aporaei 'rã,  
amboete 'rã arov'y'a reve.
- <sup>31</sup> Namigua ma SENHOR ojou porãve 'rã  
vaka ra'y, e'ŷ vy vaka hakua ha'e ipyapẽ va'e ome'ẽmby gui.
- <sup>32</sup> Ha'e va'e ojexavai va'e kuery oexa vy ov'y'a 'rã okuapy.  
Peẽ Nhanderuete re penema'endu'a va'e,  
tapendeky'a guaxuve ju.
- <sup>33</sup> Mba'eta Nhanderuete ombovai 'rã iporiaukue'i ojapukaia,  
ndaexarai 'rã nhuã py ixupegua omboty pyre gui.
- <sup>34</sup> Ha'e gui yva ha'e yvy regua, toporaei ixupe,  
ye'ê ha'e opa mba'e hexe omyí va'e avi.
- <sup>35</sup> Mba'eta Nhanderuete ogueraa jepe 'rã Sião pygua kuery,  
ojapo ukapa ju 'rã guive Judá yvy regua tetã.  
Ha'e py ma ha'e kuery hekoju 'rã, ixupegua ae 'rã ikuai.
- <sup>36</sup> Ha'e gui hembiguai ramymino kuery ju 'rã ikuai porã ha'e py,  
hery oayvu va'e kuery ikuai avi 'rã ha'e py.

*Salmo 40.13-17*

Jogueroporaei va'e pe Davi ombopara va'ekue ima'endu'a aguã.

**70**

- <sup>1</sup> Xeruete, xereraa jepe ke.  
Ejapura ke SENHOR, xerepy aguã.
- <sup>2</sup> Tove xerekove oipe'axe va'e toximba,  
oximbaa anho toendu.  
Ajexavaia re ov'y'a rei va'e kuery  
oximba reve tojevypa guakykue katy.
- <sup>3</sup> Tove ov'y'a rei va'e xevy "Ha'evea rami! Ha'evea rami!"  
he'i va'e kuery toguevipa.
- <sup>4</sup> Ha'e rã nderekva'e kuery ha'e javi ma tandererovy'a oporaei reve.  
Rejogueraa jepea oguerovy'a va'e  
"Nhanderuete ima'endu'a porãmby toiko!" te'i riae okuapy.
- <sup>5</sup> Ha'e gui xee ma iporiaukue'i, ojexavai rei va'e aiko.  
Xeruete, ejapura xerepy aguã.  
Ndee ma xepytyvõa ha'e xerepyarã.  
SENHOR, ndeare eme ke!

<sup>‡</sup> **69:25** Kova'e ayvu rupi Judas rekokue re ijayvu Atos 1.15-26 py. \* **69:28** Filipenses 4.3; Apocalipse 3.5, 13.8, 17.8, 20.11-15, 21.27

## 71

*Tuja'i ojerureague*

- <sup>1</sup> SENHOR, ndere ae xee anhemi va'e.  
Taiko eme oxīmba rei va'e.
- <sup>2</sup> Xereraa jepe rejoguerekō porāa rupi vy, xejogua ju.  
Endu ke ndeapyxa py, ha'e xerepy.
- <sup>3</sup> Ndee ma xe'itaova anhemiaty.  
Ndeayvu aa jepe aguā re,  
mba'eta ndee ma xe'itaova ha'e oo imbaraete va'e.\*
- <sup>4</sup> Xeruete, xereraa jepe ke heko vai va'e po gui,  
avakue heko vai va'e, porayvu e'ŷ va'e xejopy va'e gui.
- <sup>5</sup> Mba'eta SENHOR Xeruete, ndee ma roarō aikovy va'e,  
xekunumi guive ndere ajerovia va'e.
- <sup>6</sup> Ndere ae ajeko va'e xetui'i guive.  
Xeryru'i gui xepe'a va'ekue.  
Ha'e gui ndere vy 'rāe aporaei ára nhavō.
- <sup>7</sup> Heta pe nhomondyipaa aiko,  
teĩ ndee ma anhemiaty imbaraete va'e reiko.
- <sup>8</sup> Ndevy anho 'rā aporaei,  
roguerov'y a 'rā ára nhavō.
- <sup>9</sup> Xetuja'i ma teĩ xereja eme xee ae'i.  
Xembaraetea opa ramo xerepy e'ŷ eme.
- <sup>10</sup> Mba'eta xerovaigua kuery ma ijayvu okuapy xere.  
Xerekovea oipe'axe va'e nhomboaty tema okuapy.
- <sup>11</sup> Ha'e vy aipoe'i: "Nhanderuete ndoepyvei ma 'rā.  
Nhamonha ke, jajopy,  
heraa jepearā ndoikoi ramo", he'i okuapy.
- <sup>12</sup> Xeruete, ejepē'a eme xea gui.  
Xeruete, ejapura ke xerepy aguā.
- <sup>13</sup> Ha'e rā xerekovea rovaigua kuery ma toxīmba ha'e tokanhymba.  
Ejapo ke xemoī vaise va'e kuery ae oxīmba aguā rami,  
omboeteve e'ŷpy ta'ikuai.
- <sup>14</sup> Ha'e rā xee ma ndee ae roarō ára nhavō,  
rogueroporaei riae guive.
- <sup>15</sup> Xejuru py amombe'u 'rā rejoguerekō porāa,  
ára nhavō amombe'u 'rā rejogueraa jepea,  
ndaikuaapai teĩ.
- <sup>16</sup> Anhenhandu SENHOR Xeruete mbaraetea rupi.  
Ha'e rami vy xema'endu'a jepi 'rā rejoguerekō porāa re,  
ndeguigua re anho.
- <sup>17</sup> Xeruete, ndee ma xekunumi guive xerekombo'e reikovy.  
Ha'e gui aŷ peve amombe'u aikovy iporā ete va'e rejapo va'ekue.
- <sup>18</sup> Ha'e nunga rupi Xeruete, xereja eme,  
xetuja'i ete ma, xe'a xiīmba ma teĩ,  
aŷguia kuery pe nembaraetea aikuua ukapa peve,  
ndepo'akaa guive raka'e rā ikuai va'erā pe.
- <sup>19</sup> Xeruete, nderekō porāa ma yva peve 'rā oo.  
Mba'emo vaipa ete rejapo va'e, Xeruete.  
Mava'e nda'u ndee ramigua ete 'rā oiko?

\* **71:3** Salmo 31.1-3

- <sup>20</sup> Opa mar̄guia teko vai ha'e jexavaia rupi xemboaxa rire tē  
xerekovea remōi porā jevy 'rā,  
yvykua vaikue gui xerenōi kuerei.
- <sup>21</sup> Xemoingo porā jevy ke,  
xemombaraeju.
- <sup>22</sup> Xee voi mbaraka py rogueroporaei 'rā.  
Xeruete, xema'endu'a 'rā ndeguigua anhetē va'e re.  
Ndevy aporaei 'rā mboraei ixā reta va'e pu rupi,  
Israel kuery ruete Iky'a e'ŷ va'e pe ae.
- <sup>23</sup> Roguerovy'aa rupi xejuru py aroporaei 'rā,  
xerekovea rupi voi roguerovy'a 'rā, xereraa jepe rire.
- <sup>24</sup> Xeapekū py ára nhavō aroma'endu'a 'rā rejoguereco porāa,  
mba'eta xemōi vaixe va'e oxīmba ha'e nda'evei nho okuapy.

*Huvixave raka'e rā peve ipo'aka aguā re ojerurea ague*  
Salomão ombopara va'ekue.

## 72

- <sup>1</sup> Oreruete, huvixave re emoī ke ne'arandua,  
huvixave ra'y guive emoīarandu joguereco porā aguā rami.
- <sup>2</sup> Ha'evea rami meme toikuua pota ndevygua kuery re,  
teko porā rupi topena ojexavai rei'i va'e re.
- <sup>3</sup> Yvyty ikuai va'e gui ou 'rā heta va'e kuery moingo porāarā,  
yvy'ā gui voi ou 'rā teko porā.
- <sup>4</sup> Ha'e gui huvixa toikuua pota heta va'e kuery iporiaukue'i re,  
toepy ojexavai va'e ra'y kuery,  
ha'e rā nhomoingo axyare ma tomou'ūmba.
- <sup>5</sup> Ha'e ma oiko riae 'rā kuaray hexakā teria ja,  
jaxy hexakā ja guive, yvy regua ha'e javi okuavea ja.
- <sup>6</sup> Huvixa toiko nhuūndy rupi oky ho'a va'e rami,  
oky xapy'a pyávy yvy omoakŷ va'e rami.
- <sup>7</sup> Ha'e oña ára heko porā va'e ta'ikuai porā,  
jaxy hexakā teria ja toiko ikuai porā aguā.
- <sup>8</sup> Ta'ipo'aka ye'ē ha'e javi peve,  
ha'e yakā oī va'e guive yvy apy peve.
- <sup>9</sup> Henonde tōi tekoa e'ŷa regua kuery ha'e javi guenapy'ā re.  
Hovaigua kuery tojero'apa yvy ku'i oere peve.
- <sup>10</sup> Ixupe Társis tetā ha'e yy pa'ū pygua huvixa kuery tome'ē imposto repy,  
Sabá ha'e Sebá pygua huvixa voi tome'ē mba'emo ixupe.
- <sup>11</sup> Henonde huvixave ikuai va'e tōmba guenapy'ā re.  
Ha'e javi regua ta'ikuai ixupe anho.\*
- <sup>12</sup> Mba'eta ha'e ma oepy 'rā iporiaukue'i ojapukai ramo,  
ojexavai va'e ha'e yvyīgue'i guive.
- <sup>13</sup> Omboaxy 'rā ikangy'i ha'e ojexavai va'e,  
ogueraa jepe 'rā iporiaukue'i rekove.
- <sup>14</sup> Ojogua 'rā omoingo axy rei pyre ha'e ojuka pyrā rekove.  
Ixupe rā ha'e kuery ruguy hepyve ete.
- <sup>15</sup> Toikove puku,  
ha'e gui ixupe ome'ēa 'rā ouro Sabá guigua.  
Hexe ojerurea riae 'rā,

\* **72:11** Apocalipse 21.22-26

- ima'endu'a porāa 'rā guive ko'ẽ nhavō.
- <sup>16</sup> Ijyvy re toiko porā mba'emo aju,  
tomȳmba jekuaa yvyty apyte peve.  
Tai'a porā Líbano yvy pygua rami.  
Tetā pygua kuery voi taetave ovy jai ipotya rami.
- <sup>17</sup> Hery re ta'ima'endu'aa riae raka'e rā peve,  
ta'ima'endu'a porāa kuaray hexakā teria ja.  
Hexe vy toiko porā ha'e javi regua avakue,  
ixupe yvy regua kuery "Ima'endu'a porāmby" te'i.
- <sup>18</sup> Ima'endu'a porāmby toiko SENHOR Nhanderuete, Israel kuery Ruete,  
ha'e anho nhomondyipaarā ojapo kuaa va'e ramo.
- <sup>19</sup> Ta'ima'endu'a porāa riae hery re, iporā ete ramo.  
Hexakāa tojekuaa yvy jave re.  
Amém! Amém!
- <sup>20</sup> Opa ma Jessé ra'y Davi onhembo'ea.

*Heko vai va'e kuery reko re ijayvua*  
Mboraerā Asafe ombopara va'ekue.

## 73

- <sup>1</sup> Nhanderuete anhetē Israel kuery oayvua rupi ete oiko,  
ipy'a ky'a e'ŷ va'e kuery pe.
- <sup>2</sup> Ha'e rā xee ma aikoa rupi ajavy rai,  
kyr̄l'i oata ajavy aguā aguataa py.
- <sup>3</sup> Mba'eta xee ma amoaruā va'ekue ojee rive ojerovia va'e kuery,  
opa marā rei ikuai va'e imba'e rei-reipa rā aexa vy.
- <sup>4</sup> Ha'e kuery re noī ipy'a eta reia merami.  
Hete rexaĩ, imbaraete rei guive.
- <sup>5</sup> Ha'e kuery ma avakue imarā va'e rami e'ŷ na'ikane'ōi,  
neī ndojexavai 'rā avakue mboae rami e'ŷ.
- <sup>6</sup> Ojee omoī 'rā ojejou porā reia mbo'y rami,  
jojukaxea omoī 'rā ao puku rami.
- <sup>7</sup> Ikyra ete gui hexa ēmba rei 'rā,  
ha'e ipy'a re ma opa marā rei ikuai aguā anho oī.
- <sup>8</sup> Nhombojaru rei ha'e ijayvu vai rei 'rā okuapy joe,  
nhomoingo axy rei aguā re anho 'rā ijayvu onhemboyvate vy.
- <sup>9</sup> Yva pygua gui onhemboyvateve aguā re tema ijayvu 'rā okuapy,  
yvy jave re ikuai va'e re ijayvu.
- <sup>10</sup> Ha'e nunga rupi heta va'e kuery oje'oi 'rā hupive,  
yvu gui oy'uxea rami oy'u va'e rami.
- <sup>11</sup> Aipoe'i 'rā: "Mba'exa nda'u Nhanderuete oikuua 'rā?  
Xapy'a rei nda'u Yvate ete va'e re oī ri oikuua aguā?" he'i.
- <sup>12</sup> Ha'e rami ae ikuai heko vai va'e.  
Ha'e kuery noī vai 'rāe,  
omba'e rei-reirā ojou-jouve 'rā.
- <sup>13</sup> Ha'e nunga rupi xepy'a ky'a e'ŷa rupi aikoa mba'everā ndovarei,  
neī xepo ky'a e'ŷa guive.
- <sup>14</sup> Mba'e re tu aiko axy riae  
ko'ẽ nhavō xembopagaa rupi?
- <sup>15</sup> Ha'e rami xeayvu va'e rire  
ajapo 'rāgue ndera'y kuery ha'e javive pe nda'evei aguā rami.

- <sup>16</sup> Ha'e rami avi ha'e nunga re aikuua pota vy  
xevy pe ipoyi ete va'e aikuua,  
<sup>17</sup> Nhanderuete pegua henda iky'a e'ŷ va'e py aike peve.  
Ha'e gui mae ma aikuua ha'e kuery opa aguã.  
<sup>18</sup> Anhetẽ ndee remoõ 'rã ha'e kuery yxyĩ reia py,  
rejapo 'rã ho'apa vy okanhy aguã rami.  
<sup>19</sup> Opa xapy'a 'rã,  
nhemondyi gui rive 'rã okanhymba.  
<sup>20</sup> Oexa ra'ua gui oma'ẽ xapy'a va'e rami 'rã  
ndee voi SENHOR repu'ã vy ha'e kuery re nerema'ẽvei.  
<sup>21</sup> Ha'e gui xepy'a raxy jave,  
xekuraxõ py nda'evei reia anho aendu vy  
<sup>22</sup> xevai rei aikovy va'ekue aikuua e'ŷ vy.  
Nerenonde hi'arandu e'ŷ va'e rami aiko va'ekue.  
<sup>23</sup> Ha'e rami avi ndereve riae xee aiko,  
ndee ma xepo aiporu kuaa regua re xejopy.  
<sup>24</sup> Ndee xererekoo 'rã xemongetaa rupi.  
Ha'e rire ma xemovaẽ 'rã nerexakãa py.  
<sup>25</sup> Mava'e 'rã tu areko yva re ndee e'ŷ vy?  
Yvy re voi ndoikoi ndee rami arov'y'a va'e.  
<sup>26</sup> Xero'o, xekuraxõ ikangypa teĩ  
Nhanderuete oiko xepy'a mombaraetearã,  
xevygua oĩ raka'e rã peve guarã.  
<sup>27</sup> Ndegui ojep'e a va'e ma okanhymba 'rã,  
remomba 'rã ndere ojeroviaague rupi ve'ŷ ikuai va'e.  
<sup>28</sup> Ha'e rã xevy ma ha'eve vaipa Nhanderuete reve aikoa.  
SENHOR Nhanderuete re anhemi,  
hembiapokue ha'e javi amombe'upa aguã.

*Oo iky'a e'ŷ va'e omongy'apaa re nda'eveia ague*

Mboraеirã nhombo'e aguã Asafe ombopara va'ekue.

## 74

- <sup>1</sup> Oreruete, mba'e re tu orereja raka'e rã peve?  
Mba'e re tu ndepoxy nerymba vixa'i kuery ndeyvy regua ae orekuai va'e pe?  
<sup>2</sup> Nema'endu'a ke ndevygua orekuai va'e re,  
yvy itui ypy'i guive ndejeupe guarã orejogua rire.  
Orejogua raka'e ndevy guarã orekuai aguã.  
Nema'endu'a ke Sião yvtyt py reikoague re.  
<sup>3</sup> Eju ke ndevygua oo ivaipa are ma va'e py,  
henda iky'a e'ŷ va'e nderovaigua kuery opa marã omongy'apaaque py.  
<sup>4</sup> Mba'eta ronhemboatyague py nderovaigua kuery hevovo rei okuapy,  
ha'e ojeupagua ra'angaa rive ju omopu'ã imo'amy.  
<sup>5</sup> Ha'e kuery ma ka'aguy re haxa oiporu va'e rami avi ombovaipa.  
<sup>6</sup> Ha'e gui aŷ yvyrage ombojegua pyre ha'e javi  
ha'e kuery omopẽmba va'ekue haxa ha'e karavo mbotaa py.  
<sup>7</sup> Ndevygua henda iky'a e'ŷ va'e re omboja tata,  
yvy peve oapy aguã nderery oĩague.  
<sup>8</sup> Ha'e kuery opy'a py "Aŷ ma nhamomba vyvoi", he'i okuapy.  
Ha'e rami vy orevvy jave re oapypa Nhanderuete pegua henda iky'a e'ŷ va'ekue ha'e  
javi.

- <sup>9</sup> Ha'e rami rire ndoroexavei ma orevy guarã oikuua uka pyre.  
 Jipovei ma profeta,  
 orembyte ndoikoi guive raka'e peve 'rã paa oikuua va'erã.
- <sup>10</sup> Oreruete, raka'e peve 'rã tu nderovaigua kuery orere opu'ã rei?  
 Raka'e peve nda'u nderovaigua kuery ijayvu vaikue rei 'rã nderery re?
- <sup>11</sup> Mba'e re tu ndereupivei ri ndepo reiporu kuaa regua,  
 ndepexo yvýry remboapu'a va'ekue?
- <sup>12</sup> Ha'e gui Xeruete Xeruvixave ma yvy itui ypy'i guive oiko.  
 Ha'e ae ojapo raka'e oo jepe aguã rami yvy mbyte.
- <sup>13</sup> Ndee ma ndepo'akaa rupi remboja'o raka'e ye'ẽ.  
 Ha'e gui yy re ae ju remou'ũ va'ekue ypo akã,\*
- <sup>14</sup> jakare akã rembovopa,  
 ha'e hetekue reme'ẽ vixo tekao e'ŷa rupigua ho'u aguã.
- <sup>15</sup> Ndee reipe'a va'ekue yvurã ha'e yakã ikuai va'erã,  
 ha'e rã yakã guaxu ma remboypa va'ekue.
- <sup>16</sup> Ára ha'e pytũ voi ndevyguia.  
 Jaxy ha'e kuaray guive ndee rejapo va'ekue meme.
- <sup>17</sup> Remoĩ avi yvy apy peve guarã.  
 Kuaray puku-a ha'e yro'ya ndee ae rejapo va'ekue.
- <sup>18</sup> Eikuua pota ke povae nunga re:  
 ndee SENHOR re nderovaigua kuery ijayvu rei okuapy,  
 hi'arandu e'ŷ va'e regua ijayvu vaikue-ikue nderery re.
- <sup>19</sup> Emboaxa eme nerymba pyku'i kuery ho'u va'erã pe,  
 nderexarai eme ndevyguia kuery rojexavai rokuapy va'e re.
- <sup>20</sup> Nema'endu'a ke ndereve guarã rejapo va'ekue re,  
 mba'eta yvy re nda'evei etea py heko vai va'e anho ikuai.
- <sup>21</sup> Ojexavai va'e toximba rei eme.  
 Ojexavai va'e ha'e iporiaukue'i togueroporaei nho nderery.
- <sup>22</sup> Xeruete, epu'ã ke, eikuua uka porã nderekoo.  
 Nema'endu'a heko vai va'e ko'ẽ nhavõ nembojaru reia re.
- <sup>23</sup> Nderexarai eme nderovaigua kuery ojapukai rei okuapy re,  
 mba'eta nderovaigua kuery opa marã ijayvuve tema okuapy.

### Nhanderuete nhomboayvua re ijayvua

Jogueroporaei va'e pe mboraeirã Asafe ombopara va'ekue "Xemomba eme" he'ia py oporaeia rami oporaei aguã.

## 75

- <sup>1</sup> Oreruete, roguerovy'a.  
 Roguerovy'a, rojapukai 'rã nderery rupi,  
 ha'e roikuua ukapa 'rã nerembiapo porãa.
- <sup>2</sup> Mba'eta aipo're: "Xee ma ambojeupity 'rã ára aa'angaague  
 ha'evea rupi anhomboayvu aguã."
- <sup>3</sup> Yvy omyimba, hexe ikuai va'e ha'e javi guive.  
 Ha'e rami tei xee amoĩ atãve 'rã ijytara.\*
- <sup>4</sup> Aipoa'e ojee ae ojerovia va'e pe: 'Penhemboyvate eme.'  
 Ha'e opa marã rei ikuai va'e pe voi: 'Peropu'ã eme penembaraetea.'
- <sup>5</sup> Peropu'ã rive eme penembaraetea pendeyvatea py,

\* 74:13 "Ypo" he'ia ma Egito pygua huvixa re ijayvu vy (Isaías 27.1, 51.9; Éxodo 14-15). \* 75:3 "Yvy yta" he'ia ma ha'evea rami joguerekoo re ijayvu vy (Salmo 11.3, 82.5).

- pendeayvu vaikue eme guive itaova aiko va'e re.' "
- <sup>6</sup> Mba'eta kuaray oua katy gui e'ŷ ou nhaneptyvðarã,  
kuaray oikea katy e'ŷ, neĩ tekao e'ŷa gui e'ŷ guive.
- <sup>7</sup> Nhanderuete ae joe oikuaa pota va'erã oiko.  
Amongue ma ha'e omomba 'rã,  
ha'e rã amboae kuery ma omboyvate 'rã.
- <sup>8</sup> Mba'eta SENHOR po py ma oĩ peteĩ karo.  
Ha'e va'e py ma oĩ vinho yjui va'e opa marãgua re omoirũ mbyre.  
Ha'e va'e gui ome'ẽ 'rã oy'ua aguã.  
Ha'e ramo heko vai va'e yvy re ikuai va'e ha'e javi  
oy'upa 'rã iky'akue reve.<sup>†</sup>
- <sup>9</sup> Ha'e rã xee ma raka'e rã peve 'rã aroporaei.  
Arov'yaa rupi aporaei 'rã Jacó Ruete pe.
- <sup>10</sup> Amomba 'rã heko vai va'e mbaraetea.  
Ha'e rã heko porã va'e mbaraetea ma omboyvatea 'rã.

### Nhanderuete yvatea ha'e ipo'akaa re ijayvua

Jogueroporaei va'e pe mboraerirã Asafe ombopara va'ekue mbaraka py ombojoguy reve  
oporaei aguã.

## 76

- <sup>1</sup> Nhanderuete reko ma Judá yvy re oikuaapy,  
hery ma omboetepy Israel kuerya py.
- <sup>2</sup> Salém tetã py oĩ ombojeroviaaty,  
Sião ma oĩaty ete.\*
- <sup>3</sup> Ha'e py omopẽmba hu'y rexakãgue,  
hu'y jokoa, kyxe ha'e joe opu'ã va'e ha'e javi.
- <sup>4</sup> Ndee ma yvate ete ha'e ipo'akapave va'e  
yvyty imarã e'ŷ va'e gui voi.
- <sup>5</sup> Ipy'a guaxukueve gui reipe'apa imba'e rei-rei.  
Ha'e kuery okepa ma oupy,  
peteĩve ojerovia vai va'ekue ndoiporuvei 'rã opo.
- <sup>6</sup> Ndee Jacó Ruete, ndeayvu atã ramo  
opytapa karóxa joe opu'ãa pygua ha'e kavaju.
- <sup>7</sup> Anhetẽ ndee ma nhomongyjea reiko.  
Ndepoxy ramo mava'e 'rã tu opyta neronden py?
- <sup>8</sup> Yva guive rendu uka ndeayvua.  
Yvy jave rupi oryryi ha'e okyririmba okuapy
- <sup>9</sup> Nhanderuete opu'ã ramo nhomboayvu aguã  
ha'e yvyigueve'i ogueraa jepe aguã.
- <sup>10</sup> Mba'eta avakue poxya voi rejapo 'rã ndereroporaeia aguã rami,  
ha'e gui poxya mboae ma ndejee ae 'rã remoĩ.
- <sup>11</sup> SENHOR Penderuete pe penhemboayvu vy pejapo ete.  
Ijyvýry pendekuai va'e Peru peme'ẽ va'erã,  
mba'eta nhomongyjea oiko.
- <sup>12</sup> Ha'e ma omomba 'rã huvixa kuery ojejou porãa.  
Ixugui huvixa yvy regua okyjepa 'rã okuapy.

### Nhanderuete rembiapokue ha'e nhanemboaxyu re ijayvua

Jogueroporaei va'e Jedutum pe mboraerirã Asafe ombopara va'ekue.

\* <sup>75:8</sup> Ha'e va'e karo re ijayvu ju Apocalipse 14.9-10 ha'e 16.19 py. \* <sup>76:2</sup> Salém ma Jerusalém tetã rery mboae,  
Sião voi.

## 77

- <sup>1</sup> Nhanderuete pe amonhendu xeayvua, ixupe ajapukai guive.  
 Amonhendu 'rā xeayvua Nhanderuete pe xere oikuaa pota aguā.
- <sup>2</sup> Xee ajexavai ára nhavō aeka SENHOR.  
 Pytū mbukukue re aupi xepo xekane'ō e'ŷ re,  
 xenhe'ē py nanhembovy'a ukaxeい vy.
- <sup>3</sup> Nhanderuete re xema'endu'a vy xepoae ainy.  
 Mba'emo re aikuaa pota ramo xenhe'ē na'imbaraetevei.
- <sup>4</sup> Ndee rejapo ake aguā xerexa nambotyvei aguā rami,  
 ajexavai ete rā xeayvu aguā voi nda'evevei.
- <sup>5</sup> Aikuaa pota ymave guare re,  
 xema'endu'a ymave rupi ma'etŷa oaxa va'ekue re.
- <sup>6</sup> Pyávy ma aikuaa pota xepy'a py,  
 ha'e rami vy xenhe'ē py aporandu:
- <sup>7</sup> “Raka'e rā peve 'rā nda'u SENHOR nopenavei?  
 Ndoexa ukavei 'rā nhanemboaxy?
- <sup>8</sup> Opa ete ma nda'u iporayvua?  
 Ijayvuague voi nda'u oaxa rive 'rā raka'eve rā peve?
- <sup>9</sup> Nhanderuete hexarai ma teve joavyua gui?  
 Tyrā ipoxy vy teve ndoexa ukavei nhanemboaxy?”
- <sup>10</sup> Aipoa'eve ju:  
 “Pova'e aroangeko aikovy,  
 mba'eta Yvate ete va'e oiporu kuaa regua oiporuaty rami ve'ŷ oiporu”, ha'e va'ekue.
- <sup>11</sup> Xema'endu'a SENHOR rembiapokue re,  
 mba'emo porā ymave rupi rejapo va'ekue re xema'endu'a aikovy.
- <sup>12</sup> Aikuaa pota nerembiapokue ha'e javi re,  
 xema'endu'a nhomondyipaarā rejapo va'ekue re.
- <sup>13</sup> Xeruete, ndee reikoa ma peteī tape iky'a e'ŷ va'e.  
 Marā ramigua tuuete nda'u ndee Oreruete rami ipo'aka 'rā?
- <sup>14</sup> Ndee ma Oreruete nhomondyipaarā rejapo va'e.  
 Yvy regua kuery pe rexu uka ndepo'akaa.
- <sup>15</sup> Ndejyva py reraa jepe va'ekue ndevyguia kuery,  
 Jacó ha'e José ramymino kuery.
- <sup>16</sup> Ha'e gui Oreruete, yy nderexa. Yy nderexa vy okyjea oendu raka'e.\*  
 Typya voi omyimba.
- <sup>17</sup> Arai inhana va'e ojeapo yy.  
 Yva re yapu atā onhendu.  
 Ha'e gui hu'y voi oaxa jekuaa joa katy e'ŷ-e'ŷ.
- <sup>18</sup> Ndeguihua yapua hi'âgue-'âgue nhendu opa rupi,  
 overa va'e voi omoexakā ovv yvy re.  
 Yvy omyi vy oryryi.
- <sup>19</sup> Ye'ẽ rupi nderape ojekuaa,  
 repyrōa ma yy tuvixa va'e rupi oo.  
 Ha'e rami teī ndepypo ete ndojekuaai.
- <sup>20</sup> Ndevyguia kuery rerekva'eke vexa'i rami,  
 Moisés ha'e Arão po rupi.

*Nhanderuete opena porāa re ijayvua*

Mboraeirā nhombo'e aguā Asafe ombopara va'ekue.

\* **77:16** Apy ijayvu Ye'ẽ Pytā Nhanderuete omboja'oague re (Êxodo 14). Ha'e gui yapu, overa va'e Nhanderuete ombou va'ekue re ijayvu.

## 78

- <sup>1</sup> Xeretarã kuery, pejapyxaka ke xee rombo'e ramo.  
Pejapyxaka porã ayvu xejuru gui oẽ va'e re.
- <sup>2</sup> Xeayvu 'rã mba'emo re ambojojaa rupi.  
Amombe'u porã 'rã ymagua kuery 'arandua.\*
- <sup>3</sup> Mba'emo nhanderu kuery nhandevy omombe'u rã  
nhaendu ha'e jaikuua va'ekue,
- <sup>4</sup> ha'e nungakue nanhamombe'u e'ŷi 'rã nhandera'y kuery pe.  
Raka'eve rã ikuai va'erã pe voi nhamombe'u 'rã  
SENHOR opo'akaa rupi opa mba'e porã ojapo va'ekue jarovy'a aguã.
- <sup>5</sup> Ha'e ae oeja raka'e oayvu Jacó kuery pe,  
Israel kuery pe oeja lei.  
Ha'e nhaneramoĩ kuery pe ijayvu  
gua'y kuery pe ju omombe'u aguã re,
- <sup>6</sup> ikuai jevy va'e kuery voi oikuaa aguã,  
kyrígue oiko'i va'erã teri va'e kuery voi.  
Ha'e gui ha'e kuery ju opu'ã vy ha'e nungakue re ijayvu aguã guamymino kuery pe,
- <sup>7</sup> Nhanderuete re ojerovia aguã,  
ha'e hexarai e'ŷi aguã Nhanderuete rembiapokue re,  
ha'e rami 'rãgue py ojapo uka va'ekue rupi ete ikuai aguã,
- <sup>8</sup> tamoi kuery ikuaiague rami e'ŷi ikuai aguã,  
nonhe'ẽ rendui va'e'ŷi ikuai aguã.  
Ha'e kuery ma ha'ekue'ŷi-kue'ŷi rami ipy'a va'e,  
onhe'ẽ py Nhanderuete pe e'ŷi ikuai raka'e.
- <sup>9</sup> Efraim ra'y kuery guyrapa reve-reve ikuai raka'e va'eri  
onhamba oje'oivy joe opu'ãa ára.
- <sup>10</sup> Ojepe'apa Nhanderuete guexeve guarã ojapo va'ekue gui,  
ixuguigua lei rupi nda'ikuaixei vy.
- <sup>11</sup> Hexaraipa okuapy hembiapokue  
ha'e opa mba'e porã oexa uka va'ekue gui.
- <sup>12</sup> Nhomondyipaarã tamoi kuery renonde ojapo tei,  
Egitio yvy Zoã regua nhuñdy rupi.\*
- <sup>13</sup> Ye'ẽ omboja'o vy omboaxapa heravy ha'e va'e rupi,  
yy omopu'ã imo'amy omboty vy.\*
- <sup>14</sup> Ara py peteĩ arai ojekuaa va'e rupi ogueraa,  
ha'e rã pyávy ma tata hexakãa rupi oguereko.\*
- <sup>15</sup> Tekoa e'ŷa py itaova ombovo vy  
omboy'u pavẽ typy vaipa va'e gui rami.
- <sup>16</sup> Ita gui omoẽ yy oxyry atã va'e,  
yakã rami omboxyry.\*
- <sup>17</sup> Ha'e rami tei ha'e kuery ojejavy tema okuapy henonde.  
Tekoa e'ŷa py ikuai raka'e Yvate ete va'e rovai.\*
- <sup>18</sup> Opy'a py Nhanderuete pe "Taexa" he'ia rupi ikuai.  
Ho'u va'erã re rive tema ojerure okuapy.
- <sup>19</sup> Nhanderuete re ijayvu vy aipoe'i okuapy:  
"Nhanderuete nda'u tekoa e'ŷa py ojou 'rã ja'u va'erã?"
- <sup>20</sup> Ita re ombota uka vy ha'e va'e gui yy omboxyry va'ekue

\* 78:2 Mateus 13.35 \* 78:12 Êxodo 7.8-11.10 \* 78:13 Êxodo 14.21-22 \* 78:14 Êxodo 13.21-22 \* 78:16

Êxodo 17.1-7; Números 20.1-13 \* 78:17 Êxodo 16; Números 11

- mbojape voi nda'u ome'ẽ kuaa 'rã ja'u va'erã?  
 Xo'o voi nda'u ojou uka 'rã ojeupegua kuery pe?" he'i okuapy.
- <sup>21</sup> Ha'e nunga SENHOR oendu vy ojou vai.  
 Ha'e rami vy Jacó ra'y kuery re omoendy tata,  
 Israel kuery pe oexa uka opoxya.
- <sup>22</sup> Mba'eta ha'e kuery ndojeroviai Nhanderuete re,  
 ndogueroviai guive ogueraa jepe aguã.
- <sup>23</sup> Ha'e rami teĩ yva pe ha'e ijayvu vy  
 oipe'a uka yva rokẽ.
- <sup>24</sup> Ojapo ha'e kuery áry ho'a aguã maná ho'u aguã.  
 Ha'e kuery pe ome'ẽ tembi'u yva guigua,\*
- <sup>25</sup> ha'e ramo peteĩ-teĩ ho'u okuapy mbojape anjo kuery rembi'u regua.  
 Hevyatãmba aguã rami ombou tembi'u.
- <sup>26</sup> Ha'e gui ojapo yva gui yvytu kuaray oẽa katy gui oipeju aguã rami,  
 opo'akaa rupi ombou yvytu kuaray puku-a katy gui.
- <sup>27</sup> Ha'e rami vy xo'o ju ombou ha'e kuerya py yvy ku'i rami,  
 guyra ombou ita ku'i ye'ẽ rembe re oĩ va'e rami heta va'e.
- <sup>28</sup> Ojapo ha'e kuery ikuiaia mbyte ho'a aguã rami,  
 ha'e kuery ro yvýry rupi ae.
- <sup>29</sup> Ha'e ramo ho'u okuapy hevyatãmba peve,  
 ha'e kuery oipota va'e ojapo ramo.
- <sup>30</sup> Ha'e rami teĩ ha'e kuery nonhandu kuaavei.  
 Ijuru py tembi'u oime rei teri reve
- <sup>31</sup> Nhanderuete oexa uka opoxya ha'e kuery rovai.  
 Ha'e kuery regua imbaraetekueve voi ojuka,  
 oity inony Israel regua kunumigue.
- <sup>32</sup> Ha'e rami rire teĩ ha'e kuery ojejavy riae tema,  
 ndojeroviai okuapy tembiapo porã ojapo teĩ.
- <sup>33</sup> Ha'e nunga rupi ha'e ojapo ha'e kuery oikovea yvytu rami rive oaxapa vyvoi aguã  
 rami,  
 oikovea pukukue re okyje reia rupi anho ikuai aguã.
- <sup>34</sup> Ojukapa ta ma ramo mae ma ojapukai okuapy ixupe,  
 onhemboaxyo oendu vy oeka okuapy Nhanderuete.
- <sup>35</sup> Ima'endu'a ju Nhanderuete ha'e kuery pegua itaova oikoa re,  
 Nhanderuete Yvate ete va'e heraa jepea re.
- <sup>36</sup> Ha'e rami teĩ ixupe ojapukai vy ijayvu porã merami rive okuapy,  
 oapekũ py ma ijapu.
- <sup>37</sup> Mba'eta opy'a py ndojerovia etei,  
 guexeve guarã ojapo va'ekue rupi e'ŷ ikuai.
- <sup>38</sup> Ha'e rami teĩ Nhanderuete nhomboaxy va'e vy  
 omboguepa 'rã teko vai, nanhomombai 'rã guive.  
 Ha'e rami 'rãgue py mbovykue rei e'ŷ nomoi 'rã ipoxy aguã,  
 opoxya oendu va'eri ndajoguerekoi 'rã ha'e rami.
- <sup>39</sup> Ima'endu'a ha'e kuery to'o rive ikuiaia re,  
 yvytu oaxa rire ndojevyveia rami ikuai va'e ramo.
- <sup>40</sup> Ha'e rami teĩ mbovykue rei e'ŷ hexe opu'ã rei okuapy tekao e'ŷa py,  
 ha'e kuery ae'i ikuiaia py ombopoxya rupi ikuai.
- <sup>41</sup> Nhanderuete pe "Taexa" he'i jepi,  
 ijayvu rei okuapy Israel kuery ruete Iky'a e'ŷ va'e re.

\* **78:24** João 6.30-35

- 42** Na'iima'endu'avei okuapy ipo'akaa re,  
hovaigua kuery gui ogueraa jepeague re voi,
- 43** neī Egito yvy re hexa pyrā ojapoague re,  
Zoā regua py nhomondyipaarā ojapoague re.
- 44** Mba'eta ha'e py yakā oī va'e tuguy ju ojapo va'ekue,  
yy gui ha'e kuery oy'u e'ŷ aguā.
- 45** Ha'e kuerya py ombou heta mberu oixu'upa aguā,  
ju'i voi heta ombou omomba aguā.
- 46** Ha'e kuery mba'emo omono'ō 'rā va'ekue omboaxapa yxo rembi'urā,  
tuku karu py omomba onhotŷ va'ekue'a.
- 47** Amandau ombou vy omomba va'ekue ha'e kuery uva ty,  
ha'e yvyra sicômoro ikuai va'e voi ojukapa yro'y py.
- 48** Amandau py omomba hymba vaka kuery,  
ha'e onhemboxi va'e py vexa'i kuery ojuka.
- 49** Ha'e kuery pe oexa uka opoxya,  
opa mba'e vai py omoingo axy opoxya rupi,  
anjo kuery mba'emo vai rerua pe omboaxa.
- 50** Opoxya rupi ete oiko va'ekue,  
ha'e kuery rekovea ndogueraa jepei manoa gui,  
ha'e rami 'rāgue py mba'eaxy vaikue pe omboaxa hekovea.
- 51** Ojukapa Egito pygua ra'y kuery jypyguare ha'e javi,  
jypyguia imbaraetekueve Cam regua.
- 52** Ha'e rā ojeupeguia kuery ma oipe'apa vexa'i rami,  
vexa'i rami oguereko tekao e'ŷa rupi.
- 53** Oguereko porā ramo okyjea noendui okuapy.  
Ha'e rā hovaigua kuery ma oikepa ye'ē py.
- 54** Ogueraa yvy iky'a e'ŷ va'e katy,  
yvyty opo'akaa rupi oipe'a va'ekue peve.\*
- 55** Ha'e kuery renonde gui omoxēmba ha'e va'e yvy pygua kuery,  
ha'e gui ijyvy va'ekue ma Israel kuery peguarā ju omboja'o ukapa,  
hoogue py omoingo Israel kuery.
- 56** Ha'e rami teī Nhanderuete Yvate ete va'e pe "Taexa" he'i ju okuapy,  
hexe opu'āa rupi.  
Ijayvuague rami e'ŷ ikuai.\*
- 57** Tamoī kuery ikuaiague rami ete ojepe'apa,  
ojeroviaa rupi ve'ŷ ikuai.  
Opa marā rei ikuai guyrapa hembia e'ŷ va'e rami.
- 58** Mba'eta yvy'ā rupi ombojerovia atyrā ojapo vy  
ombopoxy,  
mba'emo ra'angaa rive omboetea rupi ojapo okuapy nda'evei etea oendu aguā rami.
- 59** Ha'e nunga Nhanderuete oendu vy ipoxy.  
Ha'e vy nopenavei Israel kuery re.
- 60** Noīvei ombojeroviaaty Siló tetā py oī va'e py,  
avakue mbyte oo'i oī atyrā ojapo rire teī.\*
- 61** Lei ryru ipo'akaa kuaa ucaa voi ogueraa uka amboae yvy katy,  
hexakāa rexaa ucaa oī va'ekue guive ngovaigua kuery po py omboaxa.
- 62** Ojeupeguia kuery omboaxapa kyxe py ijukaarā pe,  
ojeupeguia kuery rovai ipoxy vy.

\* **78:54** Josué 3, 11   \* **78:56** Juízes 2.6-15   \* **78:60** 1 Samuel 4; Jeremias 7.12-15

- 63 Ha'e ramo kunumigue tata omomba ramo  
kunhataīgue ogueroporaei va'erā jipoi, neī omenda aguā.
- 64 Sacerdote kuery voi kyxe py ojukapaa rā  
ta'xykyue ojae'o aguā nda'evei.
- 65 Ha'e gui mae SENHOR oikuaa pota okeague gui omyī va'e rami,  
ipy'a guaxu va'e vinho oy'u vy ojapukai atā va'e rami avi.
- 66 Ha'e vy ngovaigua kuery ojuka vy omboguevi atāmba,  
ojapo raka'e rā peve oxīmba aguā rami.
- 67 Ha'e gui huvixarā ma José ramymino kuery va'e regua ndoiporavoi,  
neī Efraim regua.
- 68 Ha'e rami 'rāgue py Judá regua oiporavo,  
Sião vyty oayvu va'e guive.
- 69 Ha'e áry ojapo ojeupagua henda iky'a e'ŷ va'e yva rami ete oī atā va'erā,  
omoī atā raka'e rā peve guarā vyv onhono va'ekue rami.
- 70 Ha'e rami vy oiporavo guembiguai Davi  
vexa'i kora gui oipe'a vy.\*
- 71 Vexa'i re opena oikovyia gui ogueru vy  
omoī Jacó kuery re opena va'erā,  
ojeupagua kuery Israel re ae.
- 72 Ha'e ramo opena oikovy anhetē rupi ipy'a va'e vy,  
arandu rupi ete oguereko opo py.

*Ngovaigua kuery ombopaga aguā re ojerurea okuapyague*  
Mboraerā Asafe ombopara va'ekue.

## 79

- 1 Oreruete, vyv regua xondaro kuery ndevygua vyv re ou.  
Ndevygua templo iky'a e'ŷ va'e omongy'apa,  
ha'e Jerusalém tetā ha'e javi rupi ombovaipa.\*
- 2 Nerembiguai kuery retekue oeja guyra rembi'urā,  
ndevy ikuai va'ekue ro'okue ma ka'aguy rupigua rembi'urā oeja.
- 3 Jerusalém ha'e javi rupi omoē huguy yy rami,  
nda'ipovei guive hetekue nhono porāarā.
- 4 Ha'e ramo orea katy rai'i rupi ikuai va'e ijayvu vaikue-ikue orere.  
Opuka, ovy'a rei guive orere.
- 5 SENHOR, raka'e peve 'rā tu ha'e rami oiko?  
Orevy rexia uka riae 'rā teve nda'evei etea?  
Orejou vaia nda'u tata rami riae 'rā ri hendy?
- 6 Vyv regua kuery pe jevy ke ndepoxy,  
ndekuaa e'ŷ va'e kuery pe,  
nderery rupi e'ŷ ojapukai va'e pe.
- 7 Mba'eta ha'e kuery ma omokanhymba Jacó kuery,  
orerekaoa voi ombovaipa.
- 8 Orere emoī eme oreramoī kuery ojejavyague.  
Ha'e rami 'rāgue py orea py eju pojava oremboaxy aguā,  
noronhanimavei ma ramo.
- 9 Oreruete orereraa jepea, orepytvō ke  
nderery remboete ukaa rupi vy.  
Orereraa jepe, ha'e emboguepa rojejavyague

\* 78:70 1 Samuel 16.1-13 \* 79:1 2 Reis 25.1-21; 2 Crônicas 36.15-21; Jeremias 52.4-30

nderery re ae vy.

<sup>10</sup> Mba'erā tu yvy regua kuery "Mamo tu Penderuete oī?" he'i okuapy?  
Nerembiguai kuery ruguy onhoēague re  
yvy regua rembopaga vy exa uka orevy.

<sup>11</sup> Endu ke nhuā py ikuai va'e poaēa.  
Ndepo'akaa rupi emoingove ju omano aguā rami ikuai va'e.

<sup>12</sup> SENHOR, orea katy rai ikuai va'e ndere ijayvu vai rei ramo  
embopaga sete-kue áryve.

<sup>13</sup> Ha'e rā ore ma ndevyguia orekuai,  
nerymba vexa'i kuery remongaru va'e ae.  
Roguerovy'a riae 'rā.  
Aŷ guive raka'e rā peve roporaei 'rā ndevy.

*Omoingo porā ju aguā re ojerurea ague*

Jogueroporaei va'e pe Asafe ombopara va'ekue "Yvoty lírio" he'ia py oporaeia rami  
oporaei aguā.

## 80

- <sup>1</sup> Israel kuery re repena va'ety, ejapyxaka ke.  
Ndee rerekó José ramymino kuery mymba rami.  
Anjo ipepo va'e ikuiaia áry reĩa gui exa uka nerexakāa.
- <sup>2</sup> Efraim, Benjamim ha'e Manassés regua kuery pe  
exa uka ndepo'akaa, eju guive orereraa jepe aguā.
- <sup>3</sup> Oreruete, oremoingo porā ju ke.  
Orevy pe exa uka nderova rexakāa, roo jepe aguā.
- <sup>4</sup> SENHOR Oreruete nexondaro reta va'e,  
raka'e peve 'rā tu rendu rive ndevyguia kuery onhembo'ea?
- <sup>5</sup> Orerexay re ae oremongaru tembi'u 'rāgue py,  
karo remonyē orepy'a vaia roy'u aguā.
- <sup>6</sup> Rejapo orea katy'i ikuai va'e orere opu'ã aguā rami,  
ha'e orerovaigua kuery orere opuka rei aguā.
- <sup>7</sup> Oreruete nexondaro reta va'e, oremoingo porā ju ke.  
Orevy pe exa uka nderova rexakāa, roo jepe aguā.
- <sup>8</sup> Egito yvy gui reru raka'e peteĩ uva rakāgue'i.\*  
Yvy regua kuery remoxēague py renhoty.
- <sup>9</sup> Yvy remboa'eveague rupi hapo porā ovu,  
ha'e yvy áry rupi hakā'i oaĩ ovu.
- <sup>10</sup> Ha'e rami vy omokuaray'ãmba yvyty ikuai va'e,  
yary tuvixakueve va'e guive.
- <sup>11</sup> Ye'ẽ peve oo oiny hovapy,  
ha'e hoky ma yakā peve oo.
- <sup>12</sup> Ha'e rire teĩ mba'e re tu ha'vy reity uka ikora?  
Ha'e ramo tape rupi oaxa va'e tema omondo 'rā hi'a.
- <sup>13</sup> Tajaxu omou'ũmba 'rā,  
ha'e mymba kuery nhuñdy rupigua ho'upa 'rā.
- <sup>14</sup> Oreruete nexondaro reta va'e, rojerure ndevy:  
Ejevy ju orea py.  
Pe yva gui ema'ẽ orere,  
eju eikuua pota aguā ndevyguia uva rembypy re.

\* **80:8** "Uva rakāgue'i" he'ia ma Israel kuery re ijayvu vy (Isaías 5.1-7, 27.2-6; Lucas 20.9-19).

- 15 Epy ke ndepo py ae renhotŷ va'ekue,  
hakā pyau ndejeupe guarā ae remombaraete va'ekue.
- 16 Ojayapaa ma rire oapypaa ma tata py.  
Tokanhymba orerovaigua kuery ndepoxya nderova py rexu uka ramo.
- 17 Tove ndepo toĩ ndeyke re ikuai va'e kuery re,  
ava ra'y ndejeupe guarā ae remombaraete va'ekue re.
- 18 Ha'e rire ore kuery ndorojepe'avei ma 'rā ndea gui.  
Oremoingove ju ke.  
Ha'e ramo 'rāe nederery rupi rojapukai.
- 19 SENHOR Oreruete nexondaro reta va'e, oremoingo porā ju.  
Orevy exa uka nderova rexakāa, roo jepe aguā.

*Jaroporai ha'e nhanhe'ẽ rendu aguā regua*

Jogueroporaei va'e pe mboraerā Asafe ombopara va'ekue "Uva'a onhamiaty" he'ia py oporaeia rami oporaei aguā.

## 81

- 1 Peporaei ke pevy'aa rupi Nhanderuete nhanemombaraetea pe.  
Perovy'a Jacó Ruete.
- 2 Peporaei vy pembojoguy pandeiro pu py.  
Pembopu porā mba'epu ixā reta va'e ha'e mbaraka.
- 3 Pembopu ke mimby guaxu  
jaxy pyau ha'e jaxy inhypyttū nhavō,  
nhandevygua ngaru oikoa ára.
- 4 Ha'e rami aguā ae Jacó Ruete oeja va'ekue  
Israel kuery rekorā.
- 5 José kuery rekorā oeja raka'e  
Egito pygua kuery re opu'ã vy oo jave.  
Peteĩ ayvu xee naendu kuaai va'ekue aendu ju aipoe'i rā:
- 6 "Pendevoyi amboguejy va'ekue pendeaxi'y áry gui,  
pendepo voi aipe'a ajaka peupi heravyague gui.
- 7 Pejexavai vy xevy pejapukai ramo xee rogueraa jepe va'ekue.  
Yapu mbyte gui xee rombovai,  
roeko a'ã va'ekue guive Meribá py yy oĩ va'e yvýry", he'i.\*
- 8 "Xevygua kuery, pejapyxaka ke pendevy xeayvu rā.  
Israel kuery, peẽ kuery xenhe'ẽ rendu va'e rire.
- 9 Penembyte perekō eme Penderuete ramigua rive,  
tuuete mboae renonde pembojerovia eme.\*
- 10 Xee ae ma SENHOR Penderuete,  
Egito yvy gui penerenoẽare.  
Peipe'apa ke pendejuru, ha'e rā xee romongaru 'rā", ha'e va'ekue.
- 11 Ha'e rami teĩ xevygua kuery naxenhe'ẽ rendui.  
Israel kuery ndaxekuaa potai.
- 12 Ha'e rire xee ajapo ha'e kuery ae akā ratāa rupi ikuai aguā rami,  
ha'e kuery oipotaa rami rive ikuai aguā.
- 13 Xevygua kuery xenhe'ẽ rendu va'e rire,  
Xeguigua tape rupi ae Israel kuery oo va'e rire
- 14 xee amomba voi 'rāgue hovaigua kuery,  
xepo'aka 'rāgue ija'e e'ŷ va'e ha'e javi re.

\* **81:7** Meribá py oeko a'ãague re ijayvua ma Êxodo 17.1-7 py oĩ. \* **81:9** Êxodo 20.1-6

- <sup>15</sup> SENHOR re ija'e e'ŷ va'e kuery ikuai 'rāgue ixupe,  
ha'e rami ikuai 'rāgue raka'e rā peve.  
<sup>16</sup> Ha'e rā peẽ kuery ma trigo iporāve va'e re romongaru 'rāgue,  
ei ita pa'ũ gui guare ame'ê 'rāgue penevyatāmba peve.

*Ha'eve e'ŷa rami joe opena va'e kuery pe ijayvua*  
Mboraerā Asafe ombopara va'ekue.

## 82

- <sup>1</sup> Nhanderuete renonde ijapy okuapy ojeupagua kuery.  
Ha'e ramo tuuete kuery mbyte omboayvu oiny.\*  
<sup>2</sup> "Raka'e peve 'rā tu ha'eve'ŷa rami peikuaa pota joe?  
Heko vai va'ea katy jepi ri ty peiko.  
<sup>3</sup> Ha'evea rami ete 'rāgue peikuaa pota yvyīgue'i ha'e tyre'ŷ re.  
Pepena porā ke ojexavai va'e ha'e oipytyvō pyrā e'ŷ kuery re.  
<sup>4</sup> Peipytyvō yvyīgue'i ha'e iporiaukue'i,  
peraa jepe heko vai va'e po gui."  
<sup>5</sup> Ha'e kuery ma mba'eve ndoikuuai,  
neĩ ndoikuuai potai va'e,  
pytū reia rupi ikuai.  
Ha'e ramo yvy yta omyīmba.†  
<sup>6</sup> Xee aipoa'e va'ekue: "Peẽ kuery ma tuuete,  
Yvate ete va'e ra'y kuery pendekuai", ha'e va'ekue.\*  
<sup>7</sup> Ha'e rami teĩ avakue rami rive 'rā pemano,  
pendekovea opa 'rā huvixa kuery mboae rami.  
<sup>8</sup> Oreruete, epu'ã ke, eikuua pota yvy regua kuery re.  
Mba'eta yvy regua ma ndevy guarā meme.

*Nhanderuete nhombopaga aguā re ojerurea ague*  
Mboraerā Asafe ombopara va'ekue.

## 83

- <sup>1</sup> Oreruete, ekyrirĩ eme!  
Oreruete, ndeayvu e'ŷ eme, eĩ rive eme guive.  
<sup>2</sup> Mba'eta nderovaigua kuery opu'ãmba okuapy,  
ndere ija'e e'ŷ va'e onhemboyvatepa.  
<sup>3</sup> Nhomongeta rei okuapy ndevygua kuery rovai,  
jogueroayvu 'rā repenaa va'e kuery re.  
<sup>4</sup> Ha'e vy aipoe'i: "Peju ke, jaa jaipe'a yvy re ikuai va'e mbyte gui,  
Israel kuery re ima'endu'aave e'ŷ aguā", he'i okuapy.  
<sup>5</sup> Peteĩ rami 'rā jogueroayvu okuapy  
nderovaigua ikuai aguā:  
<sup>6</sup> Edom regua ha'e Ismael guigua kuery,  
Moabe regua ha'e Agar remiarirõ kuery,  
<sup>7</sup> Gibal pygua, ha'e Amom, Amaleque, Filístia  
ha'e Tiro pygua kuery ha'e javi.  
<sup>8</sup> Assíria pygua kuery voi onhemoirû 'rā ha'e kuery reve  
Ló ramymino kuery oipytyvō vy.  
<sup>9</sup> Ha'e kuery re ejapo Midiã regua kuery re rejapoague rami,

\* **82:1** "Tuuete kuery" he'ia ma joguerekooarã omoõ mbyre re ijayvu vy (João 10.34-36).    † **82:5** "Yvy yta" he'ia ma ha'evea rami joguerekooa re ijayvu vy (Salmo 11.3, 75.3).    \* **82:6** João 10.34

- Sísera ha'e Jabim kuery re Quisom yakã yvýry rejapoague rami.\*  
 10 Ha'e va'e kuery ma rejukapa va'ekue En-Dor py,  
     ha'e ramo hu'ũmba yvy re.  
 11 Ha'e kuery regua yvatekueve re ejapo Orebe ha'e Zeebe re rejapoague rami,  
     huvíxa kuery re ejapo Zeba ha'e Zalmuna re rejapoague rami.†  
 12 Mba'eta "Jajopy 'rã Nhanderuete yvy nhanderekarã", he'i okuapy.  
 13 Xeruete, emoaõmba ke yvyra rogue yvytu jere omboipa heravya rami,  
     mba'emo pire yvytu opa rupi ombovevea rami,  
 14 ka'aguy rupi tata oapypaa rami,  
     tata rendy yvyty ikuai va'e oapypaa rami.  
 15 Ha'e rami ae avi eakykue monha nde'yvytu vaikue py,  
     emondyipa heravy nde'yvytu atã py.  
 16 SENHOR, ejapo ha'e kuery oxõmba aguã rami,  
     nderery rupi ha'e kuery voi ndereká aguã.  
 17 Tove ha'e kuery toxõmba ha'e nda'evei nho ta'ikuai raka'e rã peve.  
     Nda'evei reia toendu ha'e tokanhymba.  
 18 Ha'e ramo 'rãe oikuua ndee anho SENHOR nderery va'e reikoa,  
     ha'e yvy jave áryve Yvate ete va'e.

*Templo re ima'endu'a etea*

Jogueroporaei va'e pe mboraeirã Coré ra'y kuery ombopara va'ekue "Uva'a onhamiaty"  
 he'ia py oporaeiaty rami oporaei aguã.

## 84

- 1 Xeruete nexondaro reta va'e,  
     xevy pe nembojeroviaaty ma iporã ete!  
 2 Xenhe'ê py xepoaẽ SENHOR pegua oka re nda'evei vy.  
     Mba'eta xepy'a, xerete ha'e javi py arov'y'a Nhanderuete oikove va'e.  
 3 Kyky'i ma oo 'rã ojou oke atyrã,  
     mbyju'i voi ojou 'rã guaityrã'i gua'y kue'iry oguereko aguã,  
     ndevygua altar yvýry,  
     SENHOR nexondaro reta va'e, Xeruvixa ha'e Xeruete.  
 4 SENHOR, ov'y'a ete 'rã ndevygua oo py ikuai va'e.  
     Ha'e kuery oporaei riae 'rã ndevy.\*  
 5 Ovy'a ete 'rã avakue ndere vy imbaraete va'e,  
     ha'e ipy'a re oĩ taperã omoatyrõ mbyre rupi oguata aguã.  
 6 Yvyugua ipiru rei va'e rupi oaxa teĩ  
     ha'e kuery pe ojeapo 'rã yy oxyry porã reia.  
     Oky ypy va'e omoakõ porãmba 'rã guive.  
 7 Ha'e kuery ma imbaraeteve teve 'rã oje'oivy.  
     Peteĩ-teĩ ojexa uka 'rã Nhanderuete renonde Sião py.†  
 8 SENHOR, Xeruete nexondaro reta va'e, endu anhembo'ea.  
     Jacó Ruete, ejapyxaka ke.  
 9 Oreruete mba'emo vai gui jokoa reiko va'e, eikuua pota ke,  
     ema'ẽ huvíxave reiporavo va'ekue re.  
 10 Amboae henda py mil ára aĩ'rãgue py  
     ha'eveve peteĩ'i ára ndevygua roka py aĩ aguã.

\* **83:9** Midiã regua re Nhanderuete mba'emo ojapoague omombe'u Juízes 7 py, ha'e rã Sísera ha'e Jabim re ojapoague ma Juízes 4 py. † **83:11** Ha'e va'e kuery Gideão ojukapa (Juízes 7.25–8.21). \* **84:4** "Ndevygua oo py ikuai va'e" he'ia ma levita ha'e sacerdote kuery templo py ikuai va'e re ijayvu vy. † **84:7** Apy ma ijayvu Jerusalém py Nhanderuete omboete aguã katy oguata va'e kuery re.

Heko vai va'e rekoia py xerekua 'rāgue py  
ha'eveve Xeruete pegua rokē arō aikovy aguā.

- <sup>11</sup> SENHOR Nhanderuete ma kuaray ha'e mba'emo vai jokoa.  
SENHOR nhanemboaxy ha'e nhanemoexakāarā.  
Teko porā rupi ikuai va'e pe nome'ē e'ŷi 'rā iporā va'e.

- <sup>12</sup> SENHOR nexondaro reta va'e,  
ndere ojerovia va'e ový'a ete 'rā.

*Ojejavyague Nhanderuete ombogue aguā re ojerurea ague*  
Jogueroporaei va'e pe mboraeirā Coré ra'y kuery ombopara va'ekue.

## 85

- <sup>1</sup> SENHOR, remoingo porā va'ekue ndeyvy,  
Jacó kuery guive remoingo porā ju.  
<sup>2</sup> Ndevyguia kuery ojejavyague remboguepa va'ekue,  
heko vaiague rejao'ipa.  
<sup>3</sup> Ndepoxya nderexa ukai orevy,  
ndeponya rupi e'ŷ orererekva'ekue.  
<sup>4</sup> Oreruete orereraa jepea, peteŷgue ju ke oremoingo porā,  
oregui eipe'a ju ndepoxya.  
<sup>5</sup> Tyrā ndepoxy riae 'rā teve orevy?  
Raka'e rā peve 'rā nda'u ndepoxy?  
<sup>6</sup> Noremoingo porāve jevyi 'rā ri ty'y,  
ndebyguia kuery ndererovy'a aguā?  
<sup>7</sup> SENHOR, exa uka ndeporayvua orevy,  
ejapo roo jepe aguā rami.  
<sup>8</sup> Ajapyxaka 'rā SENHOR ijayvua re,  
mba'eta ijayvu ojeupeguia iky'a e'ŷ va'e kuery omoingo porā aguā re,  
o'arandu e'ŷa py ho'a ve'ŷ aguā.  
<sup>9</sup> Ou ma oiny henonde ojererokyjea rupi ikuai va'ea py, ogueraa jepe aguā,  
nhandeyvy re hexakāa ojekuaa aguā.  
<sup>10</sup> Mborayvu nhomoirū anhetē va'e reve,  
teko porā ha'e jaiko porāa oje'a jova pyte va'e rami.  
<sup>11</sup> Yvy gui henhoi 'rā anhetē va'e,  
ha'e teko porā oma'ē 'rā yva gui.  
<sup>12</sup> SENHOR ome'ē 'rā iporā va'e,  
ha'e nhandeyvy re oiko 'rā mba'emo'a.  
<sup>13</sup> Teko porā oo 'rā henonde,  
oguerekva'ekue aguā haperā oo aguā.

*Ojerure ha'e ojerovia etea*  
Davi onhembo'eague.

## 86

- <sup>1</sup> SENHOR, ejapyxaka ke ajapukai rā, xembovai guive,  
mba'eta ajexavai vy xeporiau aikovy.  
<sup>2</sup> Ndere ajerovia ramo eraa jepe xerekove.  
Xeruete, reraa jepe 'rā nerembiguai ndere ojerovia rā.  
<sup>3</sup> SENHOR, xemboaxy ke,  
ára pukukue re ndevy ajapukai ramo.  
<sup>4</sup> Embovy'a ju nerembiguai py'a,  
ndere xenhe'ē aroma'endu'a ramo.

- <sup>5</sup> Mba'eta SENHOR, porayvu ha'e nhomboaxy va'e reiko,  
reayvu ete ndevy ojapukai va'e ha'e javi.
- <sup>6</sup> SENHOR, endu ke anhembo'ea,  
eikuua pota ajapukaia re.
- <sup>7</sup> Ajexavaia ára ajapukai 'rã ndevy,  
ndee xembovai ramo.
- <sup>8</sup> SENHOR, ndee ramigua tuuete mboae nda'ipoi.  
Nda'ipoi avi rejapo va'e ramigua.
- <sup>9</sup> Ha'e javi regua remoingo va'ekue ou vy  
guenapy'ã re oĩmba 'rã okuapy neronden,  
ha'e gui omboete 'rã nderery, SENHOR.\*
- <sup>10</sup> Mba'eta ndee ma yvate ete va'e, nhomondyipaarã apoa guive.  
Ndee anho Oreruete.
- <sup>11</sup> SENHOR, xembo'e ke nderape rupi aa aguã.  
Ha'e ramo aiko 'rã ndeguigua anhetẽ etea rupi.  
Xepy'a re emoĩ nderery aendu vy ajererokyjea rupi anho aiko aguã.
- <sup>12</sup> SENHOR Xeruete, xee roguerovy'a xepy'a ha'e javi py,  
nderery rupi aporaei 'rã raka'e rã peve,
- <sup>13</sup> mba'eta ndee xerayvu ete vy  
xerekove reraa jepe manoaa po'akaa gui.
- <sup>14</sup> Xeruete, ojejou porã rei va'e kuery opu'ã ma xere,  
ojerovia rei va'e xejukaxe okuapy.  
Ha'e kuery nemboetea rupi e'ŷ ikuai.
- <sup>15</sup> Ha'e rã ndee SENHOR Xeruete ma renhomboaxy ha'e ndeporayvu vaipa,  
nandekuerai, opa mba'e py renhomboaxy ha'e anhetẽ rupi reiko va'e.
- <sup>16</sup> Ema'ẽ ke xere, xemboaxy guive.  
Xemombarae, mba'eta nerembiguai aiko,  
eraa jepe nerembiguai pi'a.
- <sup>17</sup> Eikuua uka xerayvua,  
xere ija'e e'ŷ va'e kuery oexa vy oxĩmba aguã.  
Mba'eta SENHOR, ndee ae xepytyvõ ha'e xembopy'a guaxua.

*Nhanderuete Jerusalém tetã oayvua re ijayvua*  
Mboraeirã Coré ra'y kuery ombopara va'ekue.

## 87

- <sup>1</sup> Yvyty iky'a e'ŷ va'e áry SENHOR Sião\* tetã omoĩ atã rire  
<sup>2</sup> oayvu hokẽ ikuai va'e voi.  
Jacó kuery rekoa ikuai va'e ha'e javi gui oayvuve.
- <sup>3</sup> Ndevy Nhanderuete pegua tetã, ayvu iporã ete va'e 'ea:  
<sup>4</sup> “Xekuaa va'e kuery rekoa regua ma  
Egitó ha'e Babilônia.  
Oĩ avi 'rã Filístia, Tiro ha'e Etiópia,  
ha'e py ae itui'i rire.”
- <sup>5</sup> Mba'eta Sião tetã pe aipo'ea 'rã:  
“Kova'e ha'e peva'e voi ha'e pygua ae.  
Yvate ete va'e omoĩ atã 'rã.”
- <sup>6</sup> SENHOR yvy regua rery ombopara vy aipoe'i 'rã:  
“Kova'e ma ha'e pygua ae.”†

\* **86:9** Apocalipse 15.4   \* **87:1** Sião ma Jerusalém tetã rery mboae.   † **87:6** “Ha'e py itui'i” he'ia ma ojeupagua kuery re ijayvu vy, Jerusalém pygua ae pe rami, mombyry itui'i va'ekue tei.

**7** Oporaei va'e kuery ha'e javi opo-opo reve aipoe'i 'rā:  
“Ndere anho oī xemoingo porāa ha'e javi.”

*Ojexavai va'e ndovy'aia rupi ijayvuague*

Jogueroporaei va'e pe mboraeirā Coré ra'y kuery nhombo'e aguā ombopara va'ekue mbaraka py ombojoguy aguā, Ezra ramymino Hemā oporaei va'ekue.

## 88

- 1** SENHOR ma Xeruete xereraa jepea.  
Ára pukukue re, pyávy voi ajapukai ndevy.
- 2** Anhembo'ea tonhendu nerentonde.  
Ejapyxaka ke ajapukaia re.
- 3** Mba'eta xenhe'ē py aendu opa marāgua nda'eveia,  
xerekove ma manoaa katy'i ma ovaē.
- 4** Yvykua katy oguejy ma ovv va'e rami xekuaa,  
ava imbaraete va'e ve'ŷ ma aiko ramo.
- 5** Omanogue mbyte omombo pyre rami aiko,  
yvykua py ojuka pyre itui va'e rami.  
Ha'e kuery re ma nanema'endu'avei ma 'rā,  
ha'e ndepo py nereipytyvōvei 'rā.
- 6** Ndee ae xemombo yvykua pukuvea py,  
ijavaetevea ha'e yvykua vaikue py.
- 7** Mba'eta xe'áry ndepoxya ipoyi oiny,  
yai py rami ndeguigua xemokangy.
- 8** Rejapo xerexa va'ety kuery xerejapa aguā rami,  
ha'e kuery ojeguaru rei ma okuapy xegui.  
Nhuā py xembo'aa rire aa jepe aguā ndaikuaavei.
- 9** Ajexavai ete vy ndaxerexa pyxovei ma.  
SENHOR, ndevy pe anho ajapukai ko'ē nhavō,  
ndevy ae xepo upi.
- 10** Omanogue pe nda'u rejapo 'rā ri hexa pyrā?  
Ha'e kuery nda'u ovypa 'rā ri ndevy oporaei aguā?
- 11** Ha'e kuery nda'u ituia py ijayvu 'rā ri ndeporayvua re?  
Yvykua vaikue py nda'u ijayvu 'rā ri ojeroviapy reikoa re?
- 12** Pytū reia py nda'u ojekuaa 'rā ri hexa pyrā rejapo va'e?  
Yvy hexarai pyre ikuiaia re teñ nda'u ojekuaa 'rā ri ndereko porāa?
- 13** Ha'e gui SENHOR, xee ma ndevy ae ajapukai xepytyvō aguā.  
Ko'ē te'ŷ'i re xee anhembo'e ndevy.
- 14** SENHOR, mba'e re tu xereja ri?  
Mba'e re tu xevy pe nderejexa ukavei ri?
- 15** Xekunumi guive ajexavaia re aiko, amano rai'i ma aikovy.  
Ndee xemongyje ramo xee ndaikuaai rei aikovy.
- 16** Ndepoxya xere ou,  
ndeguigua ngyje xemomba ta ma.
- 17** Ha'e nunga ha'e javi xembojere riae yy ou va'e rami,  
jova-jovai gui xejoko.
- 18** Xerayvu va'e ha'e xeirū kuery ma xea gui mombyry reipe'apa.  
Ha'e ramo pytūa rive opyta aexa va'ety rami.

*Messias ipo'aka aguā re ijayvua*

Mboraeirā Ezra ramymino Etā nhombo'e aguā ombopara va'ekue.

## 89

- <sup>1</sup> SENHOR, aporaei riae 'rã renhomboaxya re,  
raka'e rã peve xejuru py aikuua uka 'rã ojeroviapy reikoa.
- <sup>2</sup> Mba'eta aipo'a'e: "Ndeporayvua ndopai 'rã,  
ha'e ndereko porãa yva re remoĩ atã", ha'e.
- <sup>3</sup> Aipo're: "Xerembiguai Davi aiporavo va'ekue pe  
aura reve ajapo xereve guarã. Ha'e vy aipo'a'e:
- <sup>4</sup> 'Neramymino kuery amoĩ atã 'rã raka'e rã peve guarã,  
raka'e rã peve amoĩ 'rã ndepo'akaa', ha'e", 're.\*
- <sup>5</sup> SENHOR, yva re oporaeia okuapy mba'emo porã rejapo va'ekue rupi,  
ndevygua iky'a e'ŷ va'e kuery ijatya py ogueroma'endu'a okuapy ojeroviapy reikoa.
- <sup>6</sup> Mba'eta mava'e nda'u SENHOR rami ete oiko 'rã yva re?  
Yva regua kuery mava'e 'rã tu SENHOR ramigua ete oiko?
- <sup>7</sup> Mba'eta ixupeguia iky'a e'ŷ va'e kuery ijatya py Nhanderuete yvateve ete va'e avi oĩ,  
ijyvýry ikuai va'e ha'e javi gui okyjevepy oiko.
- <sup>8</sup> SENHOR Oreruete nexondaro reta va'e,  
mava'e 'rã tu ndee rami ipo'akapa va'e oiko?  
SENHOR, ndejee remoĩ ojeroviapy reikoa aguã.
- <sup>9</sup> Ye'ẽ opa marã omyĩ teĩ ndee ndepo'aka 'rã.  
Yai opu'ã-pu'ã ramo remombytu'u.
- <sup>10</sup> Remokyrirĩ Raabe joguero'aa py ojuka pyre rami.†  
Ndejyva ipo'aka va'e py remoaimbä nderovaigua kuery.
- <sup>11</sup> Yva ma nemba'e oĩ, yvy voi.  
Yvy ha'e hexe ikuai va'e ha'e javi ndee ae rejapo va'ekue.
- <sup>12</sup> Ndee rejapo va'ekue kuaray puku-a ha'e ijapu'a'ia.  
Tabor ha'e Hermom yvyty oporaei 'rã okuapy nderery rupi.
- <sup>13</sup> Ndejyva ma opa mba'e gui ipo'akave.  
Reiporu kuaa regua reupi vy rexa uka ndepo mbaraetea.
- <sup>14</sup> Ha'evea rami rejoguerekoo, ndereko porãa rupi reiko huvixa reĩa py.  
Renhomboaxya ha'e anhetê va'e ma neronden 'rã ojekuaa.
- <sup>15</sup> Ovy'a ete 'rã ndereroporaeia rupi ikuai va'e.  
Mba'eta SENHOR, ha'e kuery ndereve vy ikuai 'rã nerexakãa rupi.
- <sup>16</sup> Nderery rupi ovy'a riae 'rã okuapy,  
oporaei 'rã ndereko porãa re.
- <sup>17</sup> Mba'eta ndee ma ha'e kuery mombaraetea ha'e imoexakãa.  
Ndee oremboaxy ramo 'rãe ojekuaa orepo'akaa.
- <sup>18</sup> Mba'eta orevygua mba'emo vai jokoarã ma SENHOR pegua ae oĩ,  
oreruvixaverã ma Israel kuery ruete Iky'a e'ŷ va'e pegua.
- <sup>19</sup> Ymave rupi ndevygua iky'a e'ŷ va'e kuery pe ndeayvu va'ekue mba'emo rexa ukaa  
rupi.  
Ha'e vy aipo're: "Xee ambopo'aka peteĩ ipy'a guaxu va'e penepytyvõ aguã.  
Peẽ kuery mbyte gui amboyvateve peteĩ aiporavo va'ekue.
- <sup>20</sup> Ha'e rami vy xerembiguairã Davi ajou vy  
amoĩ raka'e, azeite iky'a e'ŷ va'e amoĩ uka vy hexe.\*
- <sup>21</sup> Xepo py amoĩ atã 'rã,  
xepo'akaa py amombaraete 'rã.
- <sup>22</sup> Ha'e ramo hovaigua kuery nomoĩ vai 'rã,

\* **89:4** Davi reve Nhanderuete ijayvuague ma 2 Samuel 7 py oĩ. (Salmo 132.11-12; Atos 2.30). † **89:10** Apy "Raabe" he'ia ma ypo ye'ẽ rupigua re ijayvu vy. \* **89:20** 1 Samuel 13.14, 16.1-13

- heko vai va'e nomoingo axyi 'rã.
- <sup>23</sup> Henonde amou'ũmba 'rã hovaigua kuery,  
ajukapa 'rã hexe ija'e e'ŷ va'e.
- <sup>24</sup> Ojeroviapy aikoa ha'e xeporayvua rupi 'rã areko.  
Ha'e ramo xerery rupi vy ipo'akave 'rã ovy.
- <sup>25</sup> Ajapo 'rã ye'ẽ ha'e yakã ikuai va'e re  
ipo'aka aguã rami.
- <sup>26</sup> Xevy pe ojapukai vy aipoe'i 'rã:  
'Ndee ma Xeru, Xeruete,  
ha'e itaova xereraa jepea guive', he'i 'rã.
- <sup>27</sup> Ha'e rã ixupe aipoa'e: 'Xera'y jypy guare.  
Yvy regua ruvixave ikuai va'e gui ndeyvateve', ha'e 'rã.<sup>‡</sup>
- <sup>28</sup> Amboaxya rupi riae 'rã areko,  
ha'e hexeve amoĩ atãve 'rã xereve guarã ajapo va'ekue.
- <sup>29</sup> Hamymino kuery ajapo 'rã ikuai riae aguã rami,  
ipo'akaa voi yva rami 'rã oĩ riae.
- <sup>30</sup> Ha'e rã xapy'a rei ta'y kuery nda'ikuaixei 'rã lei aeja va'ekue rupi,  
ambo'eague rami e'ŷ ikuai vy,
- <sup>31</sup> xapy'a rei xeayvuague rami nda'ikuai 'rã,  
ajapo uka va'ekue ndojapoxei vy.
- <sup>32</sup> Ha'e rami ri ramo yvyra rovi py ambopaga 'rã otekoavyague re,  
ambopi 'rã ojejavvyague re.
- <sup>33</sup> Ha'e rami teĩ ixugui ma ndaipe'ai 'rã ayvua,  
ndajapo e'ŷi 'rã hexeve xeayvuague.
- <sup>34</sup> Xereve guarã ajapo va'ekue ndajapo e'ŷi 'rã,  
xeayvuague ndarovai 'rã guive.
- <sup>35</sup> Peteĩgue'i xee aura karamboae xeky'a e'ŷa rupi ae  
(ha'e xee aipo nda'e rivei 'rã Davi pe).
- <sup>36</sup> Aipoa'e: 'Hamymino kuery ikuai riae 'rã,  
ha'e ipo'akaa ma kuaray rami 'rã oĩ riae xerenonde.
- <sup>37</sup> Raka'e rã peve guarã amoĩ 'rã jaxy rami,  
oaxa rive va'e'ŷ 'rã oiko yva re ojekuaa va'e rami', ha'e va'ekue."
- <sup>38</sup> Ha'e rami teĩ SENHOR, oreruvixa re ndee nerepenavei vy reja.  
Ndevai guive nerembiporavo pe.
- <sup>39</sup> Nerembiguai pe ndereve guarã rejapo va'ekue rembovaipa,  
ixupeguia coroa nerembovarei vy remombo yvy re.
- <sup>40</sup> Ixupeguia tetã kora ma reitypa,  
hoo ikorapa va'ekue voi rembovaipa.
- <sup>41</sup> Mba'emo oguereko va'ekue-'ekue ma tape rupi oaxa va'e-va'e ogueraapa 'rã,  
hoo katy rai'i ikuai va'e voi ovy'a rei okuapy hexe.
- <sup>42</sup> Hovaigua kuery ma rembopo'aka,  
rejapo hexe ija'e e'ŷ va'e ha'e javi ovy'a aguã rami.
- <sup>43</sup> Ha'e rã ikyxe ma rejapo naĩmbei rei aguã rami,  
ha'e joguero'aa py oo ramo nereipytyvõvei.
- <sup>44</sup> Iporãague ma reipe'apa,  
ha'e henda oĩaty reity yvy rupi.
- <sup>45</sup> Ikunumia ára remomba voi,  
ha'e oxĩmba aguã rami rejapo.
- <sup>46</sup> SENHOR, raka'e peve 'rã ha'e ramigua oiko,

<sup>‡</sup> 89:27 Apocalipse 1.4-5 py.

- raka'e peve nda'u nderejexa ukai 'rā?  
 Ndepoxya nda'u hendy riae 'rā ri tata rami?
- <sup>47</sup> Nema'endu'a xapy'a'i aikoa re.  
 Mba'everā e'ŷ teve remoingo avakue ra'y kuery.
- <sup>48</sup> Mava'e ava nda'u oikove 'rā manoia oexa e'ŷ re?  
 Mava'e nda'u onhe'ẽ ae ogueraa jepe kuaa 'rā yvyra rupa po'akaa gui?
- <sup>49</sup> SENHOR, mba'e tu oiko ymave rupi ndeporayvu aguã re ndeayvuague,  
 ha'e rami aguã re ojeroviapy reikoa rupi Davi pe reuraague rire?
- <sup>50</sup> SENHOR, nema'endu'a ke nerembiguai kuery re ov'yaa rei okuapya re,  
 ha'e heta regua ombojaru reia aropo'aka va'e re.
- <sup>51</sup> Nderovaigua kuery ijayvu vaikue-ikue, SENHOR.  
 Nerembiporavo oikoa re ijayvu vaikue okuapya.
- <sup>52</sup> SENHOR re ta'ima'endu'a porãa raka'e rā peve.  
 Amém! Amém!

*Nhanderuete imarā e'ŷa ha'e avakue imarāa re ijayvua*  
 Nhanderuete remimbo'e Moisés onhembo'eague.

## 90

- <sup>1</sup> SENHOR, ndee ma ronhemiaty reiko,  
 ymave rupi oreramoĩ kuery ikuiaia guive.
- <sup>2</sup> Vvyty oiko e'ŷ mbove,  
 yvy renhono e'ŷ mbove ma voi,  
 jypy'i guive opa peve ndee ae SENHOR reiko.
- <sup>3</sup> Ndee ma avakue remombytapa ju 'rā yvy ku'i rive,  
 "Ha'ekue rami ju pepyta, avakue ra'y kuery", 're vy.
- <sup>4</sup> Ndevy pe mil ma'etŷ oaxa va'e ma kuegua ára guare rami,  
 peteĩ hora'i pyávy oaxa va'e rami guive.\*
- <sup>5</sup> Ndee ma orembotyryry 'rā yy mba'emo ogueroxyry heravy va'e rami.  
 Ha'e ramo oke va'e rami meme 'rā ropyta,  
 jai rogue aje'ive'i reve henhoĩ va'e rami.
- <sup>6</sup> Mba'eta ha'e nunga ma yvate vyve ipotypa 'rā  
 teĩ ka'aru jave he'õmba ha'e ipirupa 'rā.
- <sup>7</sup> Ndepoxya ma oremokanhy 'rā,  
 ndevaia oremondyi 'rā.
- <sup>8</sup> Mba'eta nerondenre reru orerekva vaia,  
 nhemi rupi rojejavyague voi remoĩ nderova rexakãa py.
- <sup>9</sup> Roikoa ára ma ndepoxya rupi meme 'rā oaxa ov'y,  
 ma'etŷa roguereko va'e ma xapy'a'i ropëxaaa rami 'rā oaxa.
- <sup>10</sup> Setenta ma'etŷ ete'i 'rā roiko.  
 Amongue'i imbaraeteve va'e tema oikove 'rā oitenta ma'etŷ peve'i.  
 Ha'e rami teĩ roiko porãvea py voi ngane'õ ha'e jexavai tema 'rā roendu.  
 Mba'eta roikovea oaxapa voi 'rā,  
 ha'e gui ma roopa 'rā.
- <sup>11</sup> Mava'eve ndoikuuai ndepo'aka etea rupi ndepoxya.  
 Mba'eta ndepoxya rupi orererekva gui ma rokyje ete.
- <sup>12</sup> Orerekombo'e ke roikoa ára re roikuua pota aguã re,  
 orepy'a re 'arandu oĩ aguã.
- <sup>13</sup> SENHOR, eju ju!  
 Raka'e peve 'rā tu nerepenai?

\* **90:4** 2 Pedro 3.8-9

Emboaxy ju nerembiguai kuery.

<sup>14</sup> Aje'ive'i reve exa uka orerayvua, roporaei aguā.  
Ha'e ramo rovy'a 'rā roikoa pukukue re.

<sup>15</sup> Orembovy'a ju orembojexavaia ára oñague rami,  
mbovy ma'etý rei e'ý rojexavaia anho roendu rire.

<sup>16</sup> Ore nerembiguai kuery pe ju tojekuaa mba'emo rejapo va'e,  
ha'e oreramymimo kuery pe exa uka ju nerexakāa.

<sup>17</sup> Orere toñ SENHOR Oreruete oremboaxya.  
Emoingo porā orepo py mba'emo rojapo va'e.  
Tá, emoingo porā mba'emo rojapo va'e.

## 91

*SENHOR re nhanhemi aguā regua*

<sup>1</sup> Yvate ete va'e oña py onhemi va'e,  
Ipo'akapa va'e 'ã py ikane'õgua va'e ma

<sup>2</sup> aipoe'i 'rā SENHOR pe: "Anhemia imbaraete va'e,  
Xeruete, hexe ajeroviaa va'e", he'i 'rā.

<sup>3</sup> Mba'eta ha'e ma ndereraa jepe 'rā nhuā py rami nembo'axe va'e gui,  
mba'eaxy jojuka va'e gui guive.

<sup>4</sup> Nemo'ã 'rā guague guy py.  
Ipepo guy py rei rā mba'eve rei ndoikoi 'rā.

Ixuguigua anhetē va'e ma hu'y jokoa ha'e nhomo'ãa tuvixa va'e rami oñ.

<sup>5</sup> Ha'e ramo pytū rupi jojukaa oiko tei ndee nderekjeyi 'rā,  
nei ára py hu'y ndere ou va'e gui,

<sup>6</sup> mba'eaxy pytū rupi jojuka va'e gui,  
nei mba'emo vai kuaray mbyte jave jojuka va'e gui ma voi.

<sup>7</sup> Ndeyvýry mil ho'a,  
ndeauxu e'ýa katy dez mil ho'a tei  
ndere ma mba'eve rei novaëi 'rā.

<sup>8</sup> Nderexa py rive 'rā rexá  
heko vai va'e ombopagaa ramo.

<sup>9</sup> Mba'eta Nhanderuete pe "Anhemia", 're,  
ha'e Yvate ete va'e pe "Xee aïaty" 're ramo

<sup>10</sup> nei peteï henda py ma voi nderejexavai 'rā,  
nei peteïve mba'emo vai novaëi 'rā ndero py.

<sup>11</sup> Mba'eta ndere omopena uka 'rā ojeupagua anjo kuery pe,  
reikoa ha'e javi rupi onhangareko aguā ndere.

<sup>12</sup> Ha'e ramo ha'e kuery opo py ndejopy 'rā  
peteïve ita re renhepyxanga e'ý aguā.\*

<sup>13</sup> Ha'e ramo repyrō 'rā guary ha'e mboi vaikue re,  
guary ra'y ha'e mboi re voi repyrō 'rā inony.

<sup>14</sup> Aipoe'i 'rā: "Xerayvu va'e ma araa jepe 'rā,  
aepy 'rā xerery oikuua va'e.

<sup>15</sup> Xevy pe ojapukai ramo xee ambovai 'rā.  
Ojexavaia py xee aí 'rā hexeve.

Araa jepe 'rā, ha'e amboete uka 'rā.

<sup>16</sup> Amoingo porā 'rā hekove puku aguā rami,  
ha'e ixupe aexa uka 'rā araa jepea."

\* **91:12** Kova'e ayvu rupi Satanás ijayvu Jesus omoangeko vy (Mateus 4.5-7; Lucas 4.9-12).

*Nhanderuete oguerovy'aa rupi oporaeia*  
Mboraei sábado pyguarã ombopara pyre.

## 92

- 1 SENHOR, ha'eve roguerovy'a  
ha'e nderery rupi aporaei, Yvate ete va'e.
- 2 Aje'ive aikuua uka 'rã ndeporayvua,  
ha'e pyávy ju aikuua uka 'rã ojeroviapy reikoa,
- 3 mbaraka dez ixã va'e, mbaraka reve,  
ha'e ixã reta va'e pu rupi guive.
- 4 Mba'eta SENHOR, mba'emo porã rejapo rã aexa vy avy'a.  
Arový'a mba'emo ndepo py rejapo va'e.
- 5 SENHOR, nerembia po ma tuvixa ete va'e!  
Ha'e renhembopy'aa guive haxy ete aikuua aguã.
- 6 Hi'arandu e'ý va'e ndoikuuai 'rã,  
inhakã porã e'ý va'e ndoikuuai 'rã pova'e:
- 7 Heko vai va'e kuery ma jai rogue opa rupi henhoï va'e rami ikuai,  
teko vai rupi ikuai va'e hetave oje'oivy teí  
omombaa 'rã raka'e rã peve.
- 8 Ha'e rã SENHOR, ndee ma Yvate ete va'e raka'e rã peve guarã.
- 9 SENHOR, eexa pota nderovaigua kuery re.  
Mba'eta nderovaigua kuery okanhymba 'rã,  
teko vai rupi ikuai va'e oaimb'a 'rã.
- 10 Ha'e rã xee ma xemombaraete 'rã toro ka'aguy regua rami,  
xere azeite iporãve va'e remoï vy.
- 11 Avy'a reve aexa 'rã xerovaigua kuery xemoï vai va'e re mba'emo oiko ramo,  
aendu 'rã guive heko vai va'e xere opu'ã rei va'e kuery ho'apa rã.
- 12 Ha'e rã heko porã va'e ma pindo rami 'rã oiko porã,  
yvateve 'rã Líbano yvy re yary ikuai va'e rami.
- 13 SENHOR roka py onhotý mbyre rami 'rã ha'e kuery ikuai,  
oiko porã 'rã okuapy Nhanderuete pegua roka rupi.
- 14 Ha'e nunga ma hi'yvyma ma teí hi'a riae 'rã,  
tykue tynyé riae, ha'e ipyau riae 'rã.
- 15 Ha'e rami vy oikuua uka 'rã SENHOR heko porã va'ea.  
Ha'e ma xe'itaova, hexe ma teko vai noí.

## 93

- Nhanderuete ipo'akaa ha'e yvatea re ijayvua*
- 1 SENHOR ma huvixave oí.  
Hexe oí yvatea,  
Ku'axã rami SENHOR ojee omoí opo'akaa.  
Omoí atã yvy omyí e'ý aguã rami.
  - 2 Jypy'i guive repenaa oí atã,  
jypy'i ete guive reiko.
  - 3 SENHOR, yakã ikuai va'e opu'ã okuapy,  
yakã opu'ã vy hevovo,  
yakã hyapu rei teí.
  - 4 Ha'e rã SENHOR yvate oí va'e ma  
yy tuvixa va'e revovo gui ipo'akapave,  
ye'ẽ py yai vaikue opu'ã-pu'ã va'e po'akaa gui voi.

**5** Ndeayvuague ma oaxa rive va'erã e'ŷ.  
 SENHOR, nderopy ma iky'a e'ŷ va'e anho 'rã oĩ  
 raka'e rã peve guarã.

## 94

*Nhanderuete ha'evea rami oikuua pota aguã re ojerurea ague*

- 1** Ndee SENHOR Oreruete ma nhombopaga va'e reiko.  
 Oreruete nhombopaga va'e, exa uka nerexakãa!
- 2** Epu'ã ke yvy regua ha'e javi remboayvu aguã.  
 Embopaga ojejou porã rei va'e kuery.
- 3** Raka'e peve 'rã nda'u heko vai va'e kuery ov'y'a rei?  
 SENHOR, raka'e peve 'rã nda'u ha'e ramigua oiko?
- 4** Ha'e kuery ma nhombojaru ha'e nhomotare'ŷ reia rupi ijayvu.  
 Teko vai rupi ikuai va'e ojejou porã reia rupi rive 'rã ijayvu.
- 5** SENHOR, ha'e kuery omou'ũmba ndevygua kuery,  
 ojavyky rei 'rã ndevygua ikuai va'e.
- 6** Ojuka 'rã imeve'ŷ va'e ha'e mombyry guigua,  
 tyre'ŷ kuery voi omomba 'rã.
- 7** Ha'e vy aipoe'i 'rã: “SENHOR ndoexai oiny.  
 Ha'e nunga re Jacó Ruete ndoikuua potai 'rã”, he'i okuapy.
- 8** Xeretarã kuery peikuua axy va'e, peikuua pota!  
 Pene'arandu e'ŷ va'e, raka'e nda'u pemoi 'rã pene'arandurã?
- 9** Apyxa apoare nda'u noendui 'rã ri pejapo va'e?  
 Texa apoare nda'u ndoexai 'rã ri?
- 10** Yvy regua kuery pe ijayvu va'e nda'u nanhombopagai 'rã?  
 Avakue mo'arandua re nda'u noĩ 'rã 'arandua?
- 11** SENHOR oikuua ae ma avakue onhembopy'aa,  
 oikuua ha'e kuery onhembopy'aa mba'everã ndovareia.\*
- 12** SENHOR, ov'y'a ete 'rã avakue remo'arandu va'e,  
 ndeguigua lei rupi rembo'e va'e.
- 13** Ha'e va'e kuery re ojexavaia ára ou tei remombytu'u 'rã,  
 yvykua heko vai va'e kuery mbo'aarã rejapo peve.
- 14** Mba'eta SENHOR ndoejai 'rã ojeupagua kuery,  
 noiptyvõ e'ŷi 'rã ixupe ikuai va'e.\*
- 15** Ha'e rami rã teko porã ojekuua nho 'rã nhomboayvuaty py.  
 Ha'e va'e rupi anho 'rã ikuai anhetẽ rupi ipy'a va'e.
- 16** Mava'e nda'u heko vai va'e re opu'ã 'rã xerepyarã?  
 Mava'e nda'u onhemoi 'rã xea katy mba'emo vai apoa jokoarã?
- 17** SENHOR naxepytyvõi va'e rire  
 xenhe'ẽ oo ma 'rãgue okyrirõi va'e anho ikuiaia katy.
- 18** Ha'e rami 'rãgue py “Xepyxry ta ma”, ha'e nhavõ  
 ndee xejoko 'rã xerayvua rupi.
- 19** Xepy'a eta reia aendu ramo  
 ndee xembopy'a porã ha'e xembovy'a ju.
- 20** Ndereve nda'u onhemoirõ 'rã ri teko vai rupi joe opena va'e,  
 lei oña rami merami joguerekoo tei joapo vai va'e?
- 21** Mba'eta ha'e kuery ma nhomoirõ 'rã heko porã va'e rekove rovai,  
 ijayvu 'rã okuapy heko porã va'e ojuka aguã re.

\* **94:11** 1 Coríntios 3.19-20    \* **94:14** Romanos 11.1-2

- 22 Ha'e rã xevy pe ma SENHOR oo ikorapa va'e oĩ,  
Xeruete ma itaova anhemiaty.  
23 Ha'e kuery ma ombopaga 'rã heko vaiague re,  
teko vai rupi ikuaiague re omokanhymba 'rã.  
SENHOR Nhanderuete ae 'rã omomba.

## 95

### *SENHOR pe japoraei aguã regua*

- 1 Peju ke, japoraei SENHOR pe!  
Jarovy'a nhande'itaova nhandereraa jepea!  
2 Jarovy'aa rupi jaa oĩa py,  
jaroporaei ipo'akaa jarovy'a vy.  
3 Mba'eta SENHOR ma Nhanderuete Yvate ete va'e,  
Huvixave ipo'akapa va'e oiko tuuete ikuai va'e áryve.  
4 Ipo py oĩ yvy guýry vegua,  
yvyty yvatevea voi ixupeguia meme.  
5 Ye'ẽ avi ixupeguia oĩ, ha'e ae ojapo rire,  
yvy voi opo py ojapo va'ekue itui.  
6 Peju ke, nhanderova yvy re nhamovaẽ nhamboete vy,  
nhanerenapy'ã re nhaĩ SENHOR nhanemoingoare renonde.  
7 Mba'eta ha'e ma Nhanderuete.  
Ha'e rã nhande ma hymba kuery vexa'i nhandekuai,  
ikora rupi opo py openaa va'e.  
Aŷ voi ijayvua pendu vy  
8 peneakã ratã eme, Meribá py guare rami e'ŷ,  
Massá teko a e'ŷa py guare rami e'ŷ.  
9 Mba'eta ha'e py ma peneramoĩ kuery xerek a'ã vy  
xembopoxya rupi ikuai va'ekue,  
opa mba'e porã ajapo rã oexa rire tei.  
10 Quarenta ma'etŷ re ajou vai ha'e kuery ikuiaia.  
Ha'e rami vy "Ha'e kuery ma opy'a py ojerovia e'ŷ va'e!  
Ndoikuuai ae xeguigua tape!" ha'e va'ekue.  
11 Ha'e nunga rupi xepoxya rupi aura:  
"Ha'e kuery ndoikei 'rãe opty'u aguã ame'ẽ va'e py."\*

## 96

### *1 Crônicas 16,23-33*

- 1 Pemonhendu ke SENHOR pe mboraei pyau!  
Yvy jave regua kuery, peporaei SENHOR pe!  
2 Peporaei SENHOR pe, peroma'endu'a hery re.  
Ko'ẽ nhavõ peikuaa uka nhandereraa jepea.  
3 Yvy regua kuery pe peikuaa uka hexakãa,  
ha'e javi regua pe pemombe'u mba'emo porã ojapoa.  
4 Mba'eta SENHOR ma yvate ete va'e.  
Ha'evea rami ixupe japoraeia,  
mba'eta tuuete ramigua ikuai va'e gui okyjevepy.  
5 Mba'eta yvy regua kuery ruete ha'e javi ma mba'emo ra'angaa rive.  
Ha'e rã SENHOR ma yva apoare.  
6 Guenonde oexa uka 'rã guexakãa ha'e ijyvatea.

\* 95:11 Hebreus 3.7-4.11; Éxodo 17.1-7; Números 13.25-14.23

- Ipo'akaa ha'e iporãa ojekuaa henda iky'a e'ŷ va'e py.  
**7** Yvy regua kuery, peroporaei ke SENHOR!  
 Peroporaei SENHOR rexakãa ha'e ipo'akaa.\*  
**8** Peroporaei SENHOR rery, iporã ete ramo.  
 Peme'ẽ va'erã peru vy peroike ixupegua roka py.  
**9** Pembojerovia SENHOR iky'a e'ŷa rexakãa py.  
 Yvy jave regua kuery, peryryipa henonde.  
**10** Yvy regua kuery ikuia rupi aipopeje: “SENHOR ma huvixave oĩ.  
 Yvy omoĩ atã raka'e omyi e'ŷ aguã rami.  
 Anhetã rupi oikuaa pota 'rã yvy regua kuery re”, peje.  
**11** Tovy'a yva ha'e yvy.  
 Taevovo ye'ẽ ha'e ha'e py ikuai va'e ha'e javi!  
**12** Tovy'a nhuñdy ha'e ha'e rupi ikuai va'e ha'e javi!  
 Tovy'apa yvyla ka'aguy re ikuai va'e  
**13** SENHOR renonde, mba'eta ou 'rã.  
 Ou vy oikuaa pota 'rã yvy regua kuery re.  
 Teko porã rupi 'rã oikuaa pota yvy ha'e  
 yvy regua kuery re, ojeroviapy oikoa rupi ae.

## 97

### *Nhanderuete yvatea ha'e ipo'akaa re ijayvua*

- 1** SENHOR ma huvixave oĩ.  
 Tovy'a yvy re ikuai va'e!  
 Tovy'a ypa'ũ heta ikuai va'e regua!  
**2** Ijyvýry rupi oĩ arai ha'e pytú reia.  
 Tenda openaaty ytarã ma teko porã ha'e ha'evea rami joguerekaoa oĩ.  
**3** Henonde oo 'rã tata  
 hovaigua kuery ijyvýry ikuai va'e rapypaarã.  
**4** Ixuguigua overa va'e ma omoexakã 'rã yvy.  
 Ha'e ramo yvy oexa vy oryryipa 'rã.  
**5** Yvyty ikuai va'e voi ei raity rami 'rã tykupa  
 SENHOR yvy jave re ipo'aka va'e renonde.  
**6** Yva ma oikuaa uka 'rã heko porãa.  
 Ha'e ramo ha'e javi regua oexa 'rã hexakãa.  
**7** Tove mba'emo ra'angaa pe ikuai va'e ha'e javi nda'evei nho ta'ikuai,  
 mba'emo ra'angaa rive oguerovy'a va'e.  
 SENHOR renonde toĩmba tuuete ramigua ikuai va'e SENHOR guenapy'ã re.  
**8** Sião tetã rupi ha'e nunga oendu vy ov'yaa 'rã okuapy,  
 Judá regua tekoa ikuai va'e rupi voi ov'yapaa 'rã,  
 SENHOR, ndereko porãa rexã uka ramo.\*  
**9** Mba'eta ndee anho SENHOR Yvate ete va'e reiko,  
 yvy jave re ndepo'aka va'e.  
 Ndee ma tuuete ikuai va'e áryve reĩ va'e.  
**10** Peẽ kuery SENHOR peayvu va'e, pembojeguaru ke teko vai.  
 Mba'eta onhangareko 'rã ojeupegua kuery iky'a e'ŷ va'e nhe'ẽ re,  
 ogueraa jepe 'rã guive heko vai va'e po gui.  
**11** Heko porã va'e pe ma ome'ẽ 'rã hexakã va'e,  
 ha'e anhetã rupi ipy'a va'e pe ome'ẽ 'rã ov'y'a aguã.

---

\* **96:7** Salmo 29.1-2    \* **97:8** “Judá rajy kuery” he'ia ma Judá yvy re tekoa ikuai va'e re ijayvu vy.

<sup>12</sup> Pendeko porã va'e, perovy'a ke SENHOR.  
Peporaei hery iky'a e'ŷ va'e rupi!

*SENHOR ha'evea rami joguerekoa re ijayvua*  
Mboraerā ombopara pyre.

## 98

- <sup>1</sup> Pemonhendu ke SENHOR pe mboraei pyau,  
mba'emo iporã ete va'e ha'e ojapo ramo.  
Ojyva oiporu kuua regua imbaraete ha'e iky'a e'ŷ va'e py ipo'aka.
- <sup>2</sup> SENHOR oikuua uka jogueraa jepeague.  
Yvy regua kuery oexaa rupi oexa uka ha'evea rami joguerekoa.
- <sup>3</sup> Ndaexarai guive Israel kuery omboaxy rupi ojeroviapy oiko aguā re.  
Ha'e ramo yvy jave re ha'e javi regua ikuai va'e oexa okuapy Nhanderuete nhan-  
dereraa jepeague.
- <sup>4</sup> Yvy jave re ha'e javi regua pendekuai va'e, peroporaei ke SENHOR pevy'aa rupi!  
Peporaei, pevy'a ha'e perovy'a mboraei py!
- <sup>5</sup> Mba'epu ixā reta va'e reve peroporaei SENHOR,  
ixā reta va'e pu rupi guive peporaei.
- <sup>6</sup> Pemonhe'ẽ mimby guaxu ha'e vaka rakuakue guigua.  
Pevy'a SENHOR renonde, huvixave oĩ ramo.
- <sup>7</sup> Tonhendu ye'ẽ ha'e hexe ikuai va'e ha'e javi,  
yvy ha'e hexe ikuai va'e guive!
- <sup>8</sup> Yakā ha'e javi tojepo pete!  
Yvyty ikuai va'e voi toporaei ov'y'aa rupi
- <sup>9</sup> SENHOR renonde,  
mba'eta ou yvy re ikuai va'e re oikuua pota aguā.  
Teko porã rupi oikuua pota 'rā yvy ha'e  
yvy regua kuery re, peteĩ rami joguerekoa rupi.

## 99

*Nhanderuete iky'a e'ŷ va'ea re ijayvua*

- <sup>1</sup> SENHOR ma huvixave oĩ.  
Yvy regua kuery toryryipa.  
Ha'e oguapy oiny anjo ipopo va'e kuery áryve.  
Yvy tomyimba.
- <sup>2</sup> SENHOR ma yvate ete Sião tetã py,  
yvy regua kuery ha'e javi áryve oĩ.
- <sup>3</sup> Ha'e kuery togueroporaei hery yvate ete va'e okyjepy,  
iky'a e'ŷ va'e ramo.
- <sup>4</sup> Ndee ma huvixave ipo'akapa va'e reiko,  
teko porã reayvu va'e.  
Peteĩ rami joguerekoa remoĩ.  
Jacó kuery mbyte rejoguerekoo anhetẽ ete rupi, ha'evea rami meme.
- <sup>5</sup> Pemboete ke SENHOR Nhanderuete!  
Ipyrõa renonde peĩ penerenapy'ã re,  
iky'a e'ŷ va'e ramo.
- <sup>6</sup> Moisés ha'e Arão ma ixupegua sacerdote ikuai raka'e,  
Samuel voi hery rupi ojapukai va'ekue regua.  
SENHOR pe ha'e kuery ojapukai ramo ombovai.

**7** Arai oĩ va'e gui ijayvu raka'e ha'e kuery pe.\*

Ha'e ramo ha'e kuery onhe'ẽ rendu,  
lei hekorã oeja va'ekue rupi ikuai raka'e.

**8** SENHOR Oreruete, ndee ma rembovai va'ekue ha'e kuery ojapukai rã.

Ha'e kuery pe rexu uka Oreruete joperdoa va'e reikoa,  
ojejavyague remboekovia va'e guive.

**9** Peroporaei SENHOR Nhanderuete.

Ixupegua vyty iky'a e'ŷ va'e renonde peĩ penerenapy'ã re,  
SENHOR Nhanderuete iky'a e'ŷ va'e ramo.

*Templo py oporaeia aguã regua*

Mboraei oguerovy'aa aguã regua.

## 100

**1** Yvy jave re pendekuai va'e,

peroporaei SENHOR pevy'aa rupi!

**2** Pevy'aa rupi pendekuai SENHOR pe ete.

Henonde pejexa uka pejuvy peporaei reve.

**3** Peikuua pota pova'e re: SENHOR ma Nhanderuete oiko.

Ha'e ae nhanemoingo rire ixupegua meme jaiko.

Nhande kuery ma ixupegua ae,

hymba kuery vexa'i openaa va'e.

**4** Ixupegua rokẽ rupi peike perovy'aa rupi,

hoka py peike mboraei reve.

Perovy'a, peroporaei hery rupi.

**5** Mba'eta SENHOR ma porayvu va'e.

Nhanemboaxya rupi oiko 'rã raka'e rã peve,

ojeroviapy 'rã oiko ikuai jevy-jevy va'e peve.

*Huvixave opena porã va'e reko re ijayvua*

Mboraearã Davi ombopara va'ekue.

## 101

**1** Xee aporaei 'rã ndeporayvu ha'e ha'evea rami rejoguerekao re.

SENHOR, ndevy pe ae aporaei.

**2** Anhea'ã 'rã xe'arandua rupi tape porã rupi anho aiko aguã.

Raka'e nda'u reju 'rã xea py?

Xero py aikoa py voi xepy'a ky'a e'ŷa rupi pota 'rã aiko.

**3** Xee aexaa py ma namoĩ 'rã teko vai.

Ndajou porãi ojepe'a va'e kuery ikuiaia.

Ha'e kuery reko neĩ peteĩ henda py voi noĩ 'rã xere.

**4** Xevy pe nda'evei ete xepy'a ky'aa oĩ aguã.

Xee ndaikuaaxe teko vai.

**5** Ha'e gui nhemi rupi joe ijayvu vai va'e ma amokanhy 'rã.

Opy'a py ojejou porã ha'e onhemboyvate rei va'e ma xee ndaropo'akai.

**6** Xee aexaxe va'e ma ojeroviapy yvy re ikuai va'e anho,

aru 'rã xero py xereve ikuai aguã.

Tape porã rupi ikuai va'e ma amoĩ 'rã xerembiguairã.

**7** Xero py ma neĩ peteĩve jokore va'e ndoikoi 'rã,

neĩ peteĩve ijapu va'e voi ndoikoi 'rã xerenonde.

**8** Ko'ẽ nhavõ amokanhy 'rã heko vai va'e yvy gui,

\* 99:7 Êxodo 33.7-11

SENHOR pegua tetã gui aipe'a aguã teko vai rupi ikuai va'e ha'e javi.

*Jajeko rerova vy Nhanderuete nharõ aguã regua*  
Ojexavai ha'e ikangy va'e SENHOR pe ojapukaiague.

## 102

- 1 SENHOR, endu ke ajerurea.  
Ndea py tonhendu ajapukaia.
- 2 Xee ajexavaia ára ejexa uka e'ÿ eme.  
Endu ke. Ajapukai ramo xepytvõ voi!
- 3 Mba'eta xerekove opa ma ov y hataxí rami,  
xeckague ma tata py okaia ramigua aendu.
- 4 Nhuû ojaya pyre ipirupaa rami avi xepy'a re oĩ va'e aendu.  
Akaru aguã voi xerexarai jepi.
- 5 Xepire voi ojapa ma xekâgue re,  
xepoaë atã ainya va'e gui.
- 6 Xee ma guyra tekao e'ÿa rupigua rami aiko,  
urukure'a oogue rupi rive oiko va'e rami.
- 7 Ndale kuaavei,  
guyra'i ha'e ae'i va'e oo áry oiko va'e rami.
- 8 Xerovaigua kuery ma ára pukukue re xere ov y'a reia rupi ikuai.  
Xevy ipoxy vy xerery rupi ijayvu vaikue-ikue.
- 9 Mbojape 'râgue py tanhimbu re akaru,  
xerexay re irûmba rei va'e ay'u aikovy.
- 10 Ha'e ramigua ae aendu ndee xejou vai vy ndevai ramo,  
mba'eta xemboyvate va'ekue ri aÿ ma xereity.
- 11 Xe'ára opa ov y ptû rai'i ouvy vy kuaray'ã ovya rami.  
Nhuû ipiru ov y va'e rami akanhy.
- 12 Ha'e rã ndee SENHOR, raka'e rã peve 'rã reiko.  
Nderery re ima'endu'aa 'rã avakue okuave teria ja.
- 13 Ndee repu'ã vy remboaxy 'rã Sião tetã pygua kuery.  
Ovaë ma ha'e kuery remboaxya rex a uka aguã,  
hi'ora ovaë ma.
- 14 Nerembiguai kuery oayvu Sião py ita ikuai va'e voi,  
ha'e pygua ku'ikue re eteve voi oexaxe vai okuapy.
- 15 Yvy regua kuery ha'e javi SENHOR rery oendu vy ikuai 'rã ojererokyjea rupi,  
yvy regua ruvixave kuery voi ogueroporaei 'rã hexakãa.
- 16 Mba'eta SENHOR Sião tetã omoï atã vy  
oexa uka guexakãa.
- 17 Oendu iporiaukue'i ojerurea,  
ndojaxpyaka e'ÿi ha'e kuery ojapukaia re.
- 18 Ha'e nunga ta'ipara toiny raka'eve rã guarã.  
Ha'e rire ikuai jevy va'e voi ogueroporaei 'rã SENHOR:
- 19 "Guenda iky'a e'ÿ va'e ijyvate va'ea gui,  
yva gui ae SENHOR oma'ë oiny yvy katy,
- 20 oendu aguã nhuã py ikuai va'e poaëa,  
ha'e ogueraa jepe aguã omano aguã rami omoingo pyre.
- 21 Sião tetã py ima'endu'aa aguã SENHOR rery re,  
ha'e Jerusalém py ogueroporaiae aguã.
- 22 Ha'e nunga oiko 'rã yvy regua kuery ono'õmba,  
huvixa kuery ipo'aka va'e voi

- SENHOR pe ikuai aguã oupa javé.”
- <sup>23</sup> Ha'e rami teĩ ha'e ma oipe'a xembaraetea,  
omboapu'a'ive aikovea.
- <sup>24</sup> Xee aipoa'e va'ekue:  
“Xeruete, xereraa eme ke, aikovea mbyte teria ja.  
Ha'e rã ndee ma reikove 'rã raka'e rã peve.
- <sup>25</sup> Jypy'i ete ma renhono va'ekue yvy ytara,  
ndepo py ae rejapo va'ekue yva.
- <sup>26</sup> Ha'e nunga ha'e javi okanhymba 'rã,  
ha'e rã ndee ma reiko riae 'rã.  
Ha'e nunga inhymave 'rã ov yajukue rami,  
ao rami remboekovia 'rã.  
Amboae rami 'rã opyta.
- <sup>27</sup> Ha'e rã ndee ma ha'ekue ae 'rã reiko.  
Nderekove ma opa va'erã e'ŷ.\*
- <sup>28</sup> Nerembiguai ra'y kuery voi ikuai porã 'rã,  
hamymino kuery ma remoingo 'rã nerendone.”

*Nhanderuete nhanemboaxya re ijayvua*  
Mboraerã Davi ombopara va'ekue.

## 103

- <sup>1</sup> Xenhe'ẽ, eroporaei ke SENHOR.  
Xere oĩ va'e ha'e javi togueroporaei hery iky'a e'ŷ va'e rupi!
- <sup>2</sup> Eroporaei SENHOR, xenhe'ẽ,  
nderexarai eme guive neĩ peteĩve xevy ojapo porãague re.
- <sup>3</sup> Mba'eta omboguepa ajejavyague,  
xemonguera 'rã guive xemba'eaxy gui.
- <sup>4</sup> Xereraa jepe 'rã amano aguã gui,  
ha'e xemboaxya ha'e xerayvua rupi xemoingo porã 'rã.
- <sup>5</sup> Xetuja'i teĩ xembovy'a 'rã opa mba'e porã py,  
taguato rami xembopyau vy.\*
- <sup>6</sup> SENHOR ha'evea rami joguerekoy  
oikuua pota 'rã ojexavai rei'i va'e re.
- <sup>7</sup> Moisés pe oikuua uka raka'e ojeguigua tape,  
Israel kuery pe oexa uka guembia.
- <sup>8</sup> SENHOR ma nhomboaxya ha'e iporayvua rupi oiko va'e.  
Ivai ma rei-rei 'rã e'ŷ, iporayvu vaipa guive.\*
- <sup>9</sup> Nhandevy nda'ijayvu ete riae 'rã,  
mboxy rupi riae ndoikoi 'rã.
- <sup>10</sup> Jajejavyague rami ete e'ŷ nhanembopaga,  
nhanderekoy vaia rami e'ŷ nhandererekoy.
- <sup>11</sup> Mba'eta yvy gui yva yvatevea rami avi  
SENHOR nhomboaxya voi yvate ete,  
oexa uka 'rã henonde ojererokyjea rupi ikuai va'e pe.
- <sup>12</sup> Kuaray oẽa gui kuaray oikea mombyrya rami avi  
jajejavyague oipe'a mombyrya ete nhandegui.
- <sup>13</sup> Tuu kuery gua'y kue'iry omboaxya rami  
SENHOR voi omboaxy 'rã henonde ojererokyjea rupi ikuai va'e.

\* **102:27** Hebreus 1.10-12    \* **103:5** Taguato rague hekoviaa rami ome'ẽ 'rã nhanembaraete pyaurã (Isaías 40.31).

\* **103:8** Tiago 5.11

- 14 Mba'eta oikuua mba'e nunga gui pa jaiko,  
oikuua ae ma yvy ku'i guigua rive jaikoa.
- 15 Ha'e rā avakue ma nhuū rami avi hekove apu'a'i,  
jai ipoty va'e rami rive 'rā ikuai.
- 16 Mba'eta yvytu oipeju ramo ipoty okanhymba 'rā.  
Ha'e rire ikuaiague py teĩ ha'e kuery re na'ima'endu'aavei ma 'rā.
- 17 Ha'e rā SENHOR ma jypy'i guive raka'e rā peve  
omboaxy 'rā henonde ojererokyjea rupi ikuai va'e.  
Gueko porāa oexa uka 'rā hamymino kuery raka'eve rāgua pe voi,
- 18 guexeve guarā ojapo va'ekue rupi ikuai va'e ha'e javi pe,  
ojapo uka va'ekue ojapo ete aguā re ima'endu'a va'e kuery pe.
- 19 SENHOR ma yva re omoī guenda opena atyrā.  
Huvixave vy opa mba'e re ipo'aka va'e.
- 20 Ixupegua anjo kuery, peroporaei ke SENHOR,  
penembaraete ha'e pendepo'akapa va'e,  
ojapo uka va'e pejapo, ha'e penhe'ẽ rendu va'e!
- 21 Ixonدارو kuery pendekuai va'e ha'e javi, peē kuery voi peroporaei SENHOR,  
peē hembiguai kuery oipota va'e pejapo va'e!
- 22 Hemimoingo pendekuai va'e ha'e javi, peroporaei SENHOR,  
mamo rā ipo'akaa py ma guive rā!  
Xenhe'ẽ, ndee voi eroporaei avi SENHOR!

## 104

### *Nhanderuete opa mba'e apoare pe japoraei aguā regua*

- 1 Xenhe'ẽ, eroporaei ke SENHOR!  
SENHOR Xeruete, yvate ete va'e reiko!  
Renhemonde 'rā nerexakāa py, nemarā e'ŷa py guive.
- 2 Ajukue puku py rami renheovā 'rā nerexakāa py.  
Yva ma reipyo 'rā heravy ajukue rami.
- 3 Yy yvate rupi oī va'e áry nderorā rejapo.  
Arai ma remboguata 'rā heravy ndekaróxarā.  
Yvytu ndereroveve 'rā heravy opepo áry.
- 4 Ndevygua anjo kuery rejapo 'rā yvytu,  
nerembiguai kuery rejapo 'rā hendy vuku aguā rami.\*
- 5 Yvy ma remboyta raka'e  
neĩ peteĩ henda py ma omyĩ e'ŷ aguā.
- 6 Ijaorā typa remoī vy renhovā.  
Ha'e ramo yvyty ikuai va'e áry rupi peve yy itui.
- 7 Ha'e gui ma ndeayvu ramove oxyry ju ovv,  
yapu rupi ndeayvua oendu vy ojepe'a vyvoi.
- 8 Ha'e ramo yvyty opu'ã jekuaa ju,  
yvyuguarā voi oguejy,  
hendarā rereko katu va'ekue peve.
- 9 Yy rememberā guive remoī oaxave e'ŷ aguā,  
yvy ojao'i jevy e'ŷ aguā.
- 10 Ha'e gui yvyugua rupi rejapo yvu oī aguā rami,  
yvyty pa'ũ-pa'ũ rupi yy oxyry aguā rami.
- 11 Ha'e va'e gui ka'aguy rupigua ha'e javi oy'u 'rā,  
mburika ka'aguy regua voi oy'u 'rā.

\* 104:4 Hebreus 1.7-14

- <sup>12</sup> Yakā yvýry ma guyra'i ojapo 'rã guaityrã,  
yvyra rakā mbyte 'rã onhe'ẽ okuapy.
- <sup>13</sup> Yva re reĩa gui remoaky 'rã yvyty ikuiaia rupi.  
Ha'e ramo ndepo py mba'emo rejapo ramo yvy oĩmba porã 'rã.
- <sup>14</sup> Nhuũ ma rejapo 'rã mymba kuery rembi'urã henhoĩ aguã rami,  
ha'e rã mba'emo rogue ma avakue pe reja.  
Ha'e ramo yvy re oiko va'e gui ojou 'rã guemb'iurã:
- <sup>15</sup> uva rykue imbovy'aarã,  
azeite hova moexakãarã,  
ha'e mbojape imombaraetearã guive.
- <sup>16</sup> Yvyra ikuai va'e voi SENHOR gui vy oiko porã avi 'rã,  
yary Líbano yvy re onhotõ va'ekue guive.
- <sup>17</sup> Ha'e va'e re ma guyra'i ojapo 'rã guaityrã.  
Ha'e rã oko ma cipreste rakã re 'rã ojapo.
- <sup>18</sup> Yvyty áry ikuai 'rã kavara ka'aguy regua,  
ha'e itape guy rupi ma tapixi kuery 'rã onhemi okuapy.
- <sup>19</sup> Jaxy ma rejapo ára kuaa ukaarã,  
ha'e rã kuaray ma oike aguã hora py porã 'rã oike.
- <sup>20</sup> Ha'e gui pytã ma rembou 'rã  
ka'aguy regua pyávy oẽmba oje'oivy aguã.
- <sup>21</sup> Guaryl ra'y kuery ma okororõ 'rã guembiarã re,  
oeka 'rã oje'oivy Nhanderuete ojou uka va'ekue ho'u va'erã.
- <sup>22</sup> Kuaray oẽ ju ramo ha'e kuery ojevypa ju 'rã,  
okua py 'rã oikepa.
- <sup>23</sup> Ha'e rã avakue ju ma oje'oi 'rã ombo'eapo aguã.  
Ka'aru peve 'rã ombo'eapo okuapy.
- <sup>24</sup> SENHOR, joo ramigua e'ŷ-e'ŷ rejapo va'ekue ikuai!  
Ne'arandua rupi rejapo.  
Yvy ma tynyẽ oiny mba'emo porã rejapo va'ekue.
- <sup>25</sup> Oĩ avi ye'ẽ hembe'ŷ ha'e tuvixa va'e.  
Ha'e va'e py mbovy e'ŷ ikuai neremimoingo kuery  
kyrĩ'i ha'e tuvixa va'e.
- <sup>26</sup> Hi'áry rupi oaxa 'rã kanoã guaxu.  
Oiko avi 'rã ypo guaxu remoingo va'ekue ha'e py ovy'a va'erã.
- <sup>27</sup> Ha'e kuery ha'e javi oarõ 'rã okuapy ndepo guigua  
hi'ára py porã ho'u va'erã reme'ẽ aguã.
- <sup>28</sup> Reme'ẽ ramo 'rãe ha'e kuery ojou.  
Rejou uka reta ramo ha'e kuery hevyatãmba 'rã.
- <sup>29</sup> Nderezexa ukai ri ramo okyjepa 'rã.  
Ipytuẽa reipe'a ramo omano 'rã,  
yvy ku'i ju 'rã opyta.
- <sup>30</sup> Ha'e gui ma nenhe'ẽ rembou vy remoingo'i 'rã.  
Ha'e rami vy rembopyau 'rã yvy re.\*
- <sup>31</sup> Tove SENHOR rexakãa toĩ raka'e rã peve.  
SENHOR toguerovy'a mba'emo omoingo va'ekue.
- <sup>32</sup> Yvy re ha'e oma'ẽ ramo rive oryryipa 'rã.  
Yvyty re opoko ramo oẽ 'rã hataxí.
- <sup>33</sup> Aporaei 'rã SENHOR pe aikovea ja.

\* **104:30** Yvy re ikuai va'e re Nhanderuete openaa re ijayvu avi Atos 17.24-28 ha'e Colossenses 1.15-17 py.

Xeruete pe aporaei 'rã aikoa pukukue re.  
 34 Hexe xema'endu'a ramo toguerovy'a.  
   Xee ma avy'a 'rã aikovy SENHOR re.  
 35 Ha'e rã ojejavypa rei va'e kuery ma tokanhymba yvy gui,  
   tokuave eme opa marã rei ikuai va'e.  
 Xenhe'ẽ, eroporaei ke SENHOR!  
 Aleluia!

## 105

*1 Crônicas 16.8-22*

- 1 Perovy'a SENHOR, hery rupi pejapukai.  
   Yvy regua kuery pe peikuaa ūka hembiapokue.
- 2 Peporaei ke ixupe, peporaei salmos rupi.  
   Pemombe'u ke nhomondyipaarã ojapo va'ekue.
- 3 Perovy'a hery iky'a e'ŷ va'e rupi.  
   SENHOR rekaa rupi ikuai va'e tovy'a opy'a py.
- 4 Peka ke SENHOR, ipo'akaa guive.  
   Peka riae ke henonde peĩ aguã.
- 5 Penema'endu'a ke mba'emo porã ojapo va'ekue re,  
   nhomondyipaa ha'e oipota va'e re ijayvuague re,
- 6 peẽ hembiguai Abraão ramymino kuery,  
   peẽ Jacó ra'y kuery hembiporavo pendekuai va'e.
- 7 Ha'e ma SENHOR Nhanderuete.  
   Oipotaa ma yvy jave re ojekuaa.
- 8 Ima'endu'a riae 'rã guexeve guarã ojapo va'ekue re,  
   mbovy rei e'ŷ ikuai va'erã pe ojapo ukaa rupi ijayvuague re,
- 9 Abraão reve ngupive guarã ojapo va'ekue re,  
   Isaque pe ouraa rupi ijayvuague re guive.\*
- 10 Ha'e nungakue re ma Jacó reve ju ijayvu,  
   raka'e rã peve guarã re ijayvu Israel reve.\*
- 11 Ha'e vy aipoe'i:  
   “Ndevy pe ame'ẽ 'rã Canaã pendeyvyrã”, he'i.
- 12 Ha'e jave py ha'e kuery mbovy'i teri ikuai,  
   yvy mboae guigua ikuai raka'e mbovy'i ete,
- 13 oguata va'ekue yvy mboae-ae ikuai va'e rupi,  
   joyvy-yvy re.
- 14 Ha'e rami teĩ avave rei pe SENHOR ndoguereko axy ukai.  
   Ha'e kuery re oma'ẽ vy ijayvu ete huvixave ikuai va'e pe.
- 15 Ha'e vy aipoe'i: “Xerembiporavo kuery re pemoĩ eme pendepo,  
   perekó axy eme xevygua profeta kuery”, he'i.\*
- 16 Ha'e gui ma yvy re ombou karuai,  
   ha'e vy ndojou ukavei tembi'u.\*
- 17 Ha'e kuery renonde omondouka peteĩ ava  
   José hery va'e, tembiguairã ovende pyre.
- 18 Ipy corrente py ojokua,  
   ferro guigua omoĩ reve,
- 19 hekorã re ijayvuague ojeupity peve,  
   SENHOR ijayvuague hexe oiko aguã.

---

\* **105:9** Gênesis 12.7, 26.2-5   \* **105:10** Gênesis 28.10-15   \* **105:15** Gênesis 20.3-7   \* **105:16** José rekokue ma Gênesis 37-50 py oĩ.

- <sup>20</sup> Ha'e ramo huvixave opoi uka,  
    yvy regua ipo'akapave va'e oipe'a uka.
- <sup>21</sup> Ha'e vy ngoo re ae opena uka,  
    mba'emo oguereko va'e ha'e javi re opena aguã.
- <sup>22</sup> Omoõ ha'e pygua ruvixa kuery re avi ipo'aka va'erã,  
    'arandu re ombo'e aguã nhomongeta va'e kuery.
- <sup>23</sup> Ha'e gui ma Egito yvy re Israel ju ovaõ,  
    Jacó onhemboekoa Cam ramymino kuery yvy re.
- <sup>24</sup> Nhanderuete ojapo ojeupeguia kuery ta'y reta aguã rami,  
    ojapo imoingo axya kuery gui imbaraeteve aguã rami.\*
- <sup>25</sup> Ha'e kuery py'a oguerovalpa guive ixupeguia kuery re nda'ija'evei aguã,  
    hembiguai kuery ombotavypaa rupi oguereko aguã rami.
- <sup>26</sup> Ha'e gui ha'e kuery ikuaria py ombou guembiguai Moisés,  
    hembiporavo Arão guive.
- <sup>27</sup> Ha'e va'e kuery po rupi ojapo uka hexa pyrã ikuaria mbyte,  
    nhomondyipaarrã ojapo Cam yvy re.
- <sup>28</sup> Ha'e rami vy pytã ombou ramo opa rupi pytã  
    tei Moisés ha'e Arão ndojapo e'ŷi ijayvuague.
- <sup>29</sup> Ha'e kuery ikuaria rupi yy itui va'e ojapo tuguy,  
    pira ikuai va'ekue ojukapa vy.
- <sup>30</sup> Ha'e kuery yvy re ju'i heta ombou,  
    huvixa ro py peve.
- <sup>31</sup> Ha'e ijayvu rã ou mberu arai rami,  
    ky voi ou yvy jave rupi.
- <sup>32</sup> Oky 'rãgue py ombou amandau,  
    ha'e overa va'e gui tata ou yvy re.
- <sup>33</sup> Omomba uva ha'e figo ty,  
    yvyra ikuai va'e rakã omopẽmba vy.
- <sup>34</sup> Ha'e ijayvu rã ou tuku-karu,  
    opo va'e heta ete ikuai oipapaa aguã rami e'ŷ.
- <sup>35</sup> Ha'e va'e kuery ma yvy jave rupi ho'upa jai rogue,  
    omono'õ va'erã ikuai va'ekue guive.
- <sup>36</sup> Ojukapa avi jypygua yvy re ikuai va'ekue,  
    jypygua imbaraete teri vy oguereko va'ekue.
- <sup>37</sup> Ha'e gui ojeupeguia kuery oguenoë  
    ouro ha'e prata reve.\*  
        Ha'e kuery regua peteñve jipoí hexaí e'ŷ va'e.
- <sup>38</sup> Ha'e kuery oje'oi ramo Egito pygua kuery ovypa okuapy,  
    ha'e kuery gui okyje teria ja.
- <sup>39</sup> SENHOR ombou peteñ arai ojeupeguia kuery áry rupi ijao'iarã,  
    ha'e pyávy tataendy ju ombou omoexakã aguã.
- <sup>40</sup> Ha'e kuery ojerure ramo ombou reta guyra,  
    yva gui mbojape ombou va'ekue re guive hevyatãmba.\*
- <sup>41</sup> Peteñ itaova ombovo uka ramo oẽ yy,  
    tekoa e'ŷa rupi oxyry ovypa yakã rami.
- <sup>42</sup> Ijayvuague iky'a e'ŷ va'e re ima'endu'a vy ojapo,  
    guembiguai Abraão re guive.
- <sup>43</sup> Ha'e rami py ojeupeguia kuery oguenoë ha'e gui,

hemciporavo kuery oporaei oje'oivy ov'y'aa rupi.  
 44 Ha'e kuery pe ome'ẽ amboae regua yvy va'ekue,  
     ha'e ramo oipe'apa amboae regua mba'ety,\*  
 45 ha'e kuery onhe'ẽ rendu aguã ijayvuague,  
     ha'e lei oeja va'ekue rupi ikuai aguã.  
 Aleluia!

## 106

*1 Crônicas 16.35,36*

**1** Aleluia!

Perovy'a ke SENHOR, porayvu va'e ramo,  
 mba'eta nhomboaxyo opa va'erã e'ŷ.  
**2** Mava'e nda'u omombe'u kuaa 'rã SENHOR opo'akaa rupi ojapo va'ekue,  
 tyra pa ogueroporaei kuaa 'rã?  
**3** Ovy'a ete 'rã anhetẽ rupi ikuai va'e,  
 ára nhavõ teko porã rupi ikuai va'e.

**4** SENHOR, nema'endu'a ke xere,  
 ndevygua kuery reayvua rexu uka vy.  
 Eikuua pota xere xereraa jepe aguã,  
**5** neremciporavo kuery ov'y'a rã xee aexa aguã,  
 ha'e avy'a avi aguã ndevygua kuery ov'y'aa py,  
 ndevygua kuery reve xee roguerovy'a aguã.  
**6** Ore kuery ma oreramoĩ kuery rami avi rojejavu rokuapy.  
 Opa marã orekuai, orereko vai guive rokuapy.

**7** Egito yvy re oreramoĩ kuery ikuai jave  
 ndoikuaa potai raka'e iporã ete va'e rejapo re.\*  
 Na'im'a endu'ai okuapy mbovykue rei e'ŷ omboaxyague re.  
 Ha'e rami vy ye'ẽ yv'yry nonhe'ẽ rendui okuapy, Ye'ẽ Pytã va'e py.  
**8** Ha'e rami teĩ SENHOR ogueraa jepe raka'e guery omboete ukaa rupi vy,  
 ha'e kuery pe opo'akaa oexa uka vy.  
**9** Ye'ẽ Pytã pe ijayvu ramo ipiru.  
 Ha'e vy ojapo yy rupakue rupi oaxapa aguã rami,  
 yvy piru reia rupi.  
**10** Ogueraa jepe ija'e e'ŷ va'e kuery po gui,  
 oepy hovaigua kuery po'akaa gui.  
**11** Imoingo axyare kuery áry rupi yy ojao'ipa,  
 ha'e kuery regua neĩ peteĩve ndoo jepet.

**12** Ha'e ramo mae oguerovia okuapy ijayvuague,  
 ha'e vy oporaei ixupe oguerovy'a rupi.  
**13** Ha'e gui are e'ŷ re hexaraipa ju ojapo va'ekue re,  
 ha'e oipotaa rupi ve'ŷ ju ikuai.\*  
**14** Tekoa e'ŷa py ha'e kuery ae oipotapa reia rupi rive ikuai vy  
 Nhanderuete pe "Taexa" he'i okuapy.  
**15** Ha'e rã ha'e ome'ẽmba ha'e kuery ojerurea,  
 va'eri ojapo avi ha'e kuery nhe'ẽ ikangy ov'y aguã rami.  
**16** Ha'e kuery rekoea py ijayvu rei okuapy  
 Moisés ha'e Arão SENHOR pegua iky'a e'ŷ va'e re.\*

---

\* 105:44 Josué 11.16-23    \* 106:7 Egito gui Nhanderuete ogueraa jepeague omombe'u Éxodo 14-15 py.    \* 106:13  
 Números 11    \* 106:16 Números 16

- <sup>17</sup> Ha'e ramo yvy ojepe'a vy omokõ Datã,  
Abirão kuery regua guive ojao'ipa.
- <sup>18</sup> Ha'e va'e kuery re tata omoendy vy  
oapypa raka'e heko vai va'e kuery.
- <sup>19</sup> Horebe yvyty py ojapo okuapy peteĩ vaka ra'y ra'angaa,  
ha'angaa ouro ryku gui ojapo pyre ombojerovia okuapy.<sup>†</sup>
- <sup>20</sup> Ha'e rami Nhanderuete rexakãa omboekovia  
mymba nhuû ho'u va'e ra'angaa re rive.
- <sup>21</sup> Hexaraipa Nhanderuete heraa jepeare gui,  
Egito yvy re mba'emo porã ojapo rire teĩ.
- <sup>22</sup> Nhomondyipaarã ojapo Cam yvy re,  
ha'e Ye'ẽ Pytã py mba'emo porã ete ojapo rire teĩ.
- <sup>23</sup> Hembiporavo Moisés henonde nonhemõi va'e rire  
ijayvuague rami vy omomba ete 'rãgue.  
Ha'e rami py Moisés ojapo raka'e opoxya rupi omomba e'ŷ aguã rami.
- <sup>24</sup> Ha'e rami avi ha'e kuery ndooxei yvy iporã va'e py,  
ijayvua ndogueroviai vy.<sup>‡</sup>
- <sup>25</sup> Ha'e rami 'rãgue py peteĩ-teĩ ropy rupi ijayvu rei okuapy,  
SENHOR ijayvua re noendu potai vy.
- <sup>26</sup> Ha'e ramo opo oupi reve oura ha'e kuery pe,  
tekoa e'ŷa rupi ae omokanhymba aguã re,
- <sup>27</sup> ha'e gui hamymino kuery ju yvy regua kuery ikuaia rupi oitypa vy  
yvy mboae rupi omoãmba aguã re.
- <sup>28</sup> Ha'e gui ovapa oje'ivy Peor pygua kuery ruete ramigua Baal re.  
Ha'e vy ho'u okuapy ta'angaa hekove e'ŷ va'e pe ome'ẽ mbyre.<sup>§</sup>
- <sup>29</sup> Ha'e rami ete ikuai vy ombopoxy rive Nhanderuete.  
Ha'e rami vy oendu okuapy mba'eaxy vaikue.
- <sup>30</sup> Ha'e ramo Finéias opu'ã vy otekoavy va'ekue ombopaga rire  
mba'eaxy optyu'upa.
- <sup>31</sup> Ha'e nunga py oexa uka heko porãa,  
raka'e rã peve guarã.
- <sup>32</sup> Ha'e gui ma Meribá py yy oña py ju ombopoxy.  
Ha'e va'e kuery káuxa mba'emo vai oiko raka'e Moisés pe.\*
- <sup>33</sup> Mba'eta Nhanderuete Nhe'ẽ rovai opu'ã rei okuapy ramo  
Moisés ijayvu 'rãgue'ŷ rupi ijayvu.
- <sup>34</sup> Ha'e kuery ndojukapa etei amboae regua kuery  
SENHOR ojapo ukaague rami e'ŷ.<sup>†</sup>
- <sup>35</sup> Ha'e rami 'rãgue py yvy regua kuery reve nhomomendapa vy  
ha'e pygua reko rami ikuai.
- <sup>36</sup> Ha'e vy ombojerovia okuapy ha'e pygua kuery ta'angaa.  
Ha'e nunga optya imbo'aarã.
- <sup>37</sup> Gua'y ha'e guajy kuery oapy ukapa  
anha kuery pe.
- <sup>38</sup> Ha'e vy omoẽ mba'eve py ojejavy e'ŷ va'e ruguy teĩ,  
gua'y, guajy kuery ruguy ae,  
mba'emo ra'angaa Canaã pygua pe ojuka uka vy.

<sup>†</sup> **106:19** Vaka ra'y ra'angaa ojapo okuapyague omombe'u Êxodo 32 py.   <sup>‡</sup> **106:24** Yvy porã py ndooxei okuapyague omombe'u Números 13-14 py.   <sup>§</sup> **106:28** Peor py ojejavyague omombe'u Números 25 py.   <sup>\*</sup> **106:32** Meribá py ojejavyague omombe'u Números 20 py.   <sup>†</sup> **106:34** Ha'e kuery ojejavy ramo Nhanderuete omboaxy kuereiague omombe'u Juízes 2 py.

Ha'e vy ijyvy iky'apa va'e opyta huguykue py.  
 39 Ha'e rami ikuai vy onhemongy'apa ha'e kuery ae ojapoa py,  
     itavy rei okuapy guembiapokue py.  
 40 Ha'e nunga rupi SENHOR poxya hendy ixupegua kuery rovai,  
     ha'e ojeguaru ojeupe guarã va'ekue gui ae.  
 41 Ha'e vy omboaxapa amboae regua po py.  
     Ha'e kuery re ija'e e'ŷ va'e kuery ipo'aka okuapy,  
 42 hovaigua kuery oguereko axy,  
     ha'e kuery po'akaa guy py omoingo.  
 43 Mbovykue rei e'ŷ ogueraa jepe,  
     ha'e rami teĩ ha'e kuery nhomongetaa rupi ikuai vy ombopoxy reive tema.  
     Gueko vaia py ojexavaive oje'oivy.  
 44 Ha'e rami rire teĩ ha'e oikuaa pota ju ojexavaia re,  
     ha'e oendu nho ha'e kuery ojapukaia.  
 45 Ha'e kuery re vy ima'endu'a guexeve guarã ojapo va'ekue re.  
     Ha'e vy porayvu ete va'e vy omboaxy ju.  
 46 Ojapo escravo-rã heraa are kuery ha'e javi  
     omboaxy nho aguã rami.  
 47 SENHOR Oreruete, orereraa jepe ke!  
     Oreno'õmba ju yvy regua kuery mbyte gui,  
     nderery iky'a e'ŷ va'e rupi roguerovy'a aguã,  
     ha'e rovy'aa rupi rogueroporaei aguã.  
 48 Ima'endu'a porãmby toiko SENHOR Israel kuery Ruete  
     aŷ, ha'e raka'e rã peve!  
     Heta va'e kuery ha'e javive aipo te'i: "Amém!"  
     Aleluia!

## 107

*Jajexavaia gui Nhanderuete nhandereraa jepea re ijayvua*

1 "Perovy'a ke SENHOR porayvu va'e ramo,  
     ha'e nhomboaxya opa va'erã e'ŷ",  
 2 te'i SENHOR oepy va'ekue,  
     hovaigua kuery po gui ogueraa jepe va'ekue.  
 3 Mba'eta ono'õmba ju amboae yvy re ikuaiague gui,  
     kuaray oua katy gui, oikea katy gui,  
     ipuku-a katy gui, ha'e ye'ẽ katy gui ma voi.  
 4 Tekoa e'ŷa rupi ha'e kuery oguata rei raka'e,  
     tape oikuaa e'ŷa rupi,  
     tetã ikuai aguã ndojoui guive.  
 5 Karuai ha'e yuvei  
     omokanhy ma heravy ha'e kuery nhe'ẽ.  
 6 Ha'e gui ojexavaia py ojapukai SENHOR pe.  
     Ha'e ramo ogueraa jepe ojexavaia gui.  
 7 Tape hi'yvi va'e rupi ogueraa  
     tetã ikuai aguã peve.  
 8 Ha'e kuery toguerovy'a SENHOR porayvua re,  
     avakue ra'y kuery pe mba'emo porã ojapo rire.  
 9 Mba'eta ijy'uvei va'e pe ome'ẽ oy'u aguã,  
     ha'e okaruxe va'e pe heta ojou uka mba'emo porã.  
 10 Amongue ma pytû reia rupi oiko, manoa guy py ae,

- ojexavai oiny nhuã py ferro guigua py ojokua pyre reve.
- <sup>11</sup> Nhanderuete nonhe'ẽ renduiague re ojexavai,  
Yvate ete va'e ombo'ea re ndojapyxakai rire.
- <sup>12</sup> Ha'e ramo ha'e kuery ikane'õmba omomba'eapoa vaipa ramo.  
Ho'a teĩ avave rei ndoikoi ipytyvõarã.
- <sup>13</sup> Ha'e gui ojexavaia py ojapukai SENHOR pe.  
Ha'e ramo ogueraa jepe ojexavaia gui.
- <sup>14</sup> Oguenoẽ pytũ vaikue ha'e manoa guy gui,  
ha'e kuery gui omondopa corrente ferro guigua.
- <sup>15</sup> Ha'e kuery toguerovy'a avi SENHOR porayvua re,  
avakue ra'y kuery pe mba'emo porã ojapo rire.
- <sup>16</sup> Mba'eta oitypa okẽ overa va'e guigua,  
ijokoa ferro guigua guive omopẽmba.
- <sup>17</sup> Ha'e gui hi'arandu e'ý va'e ojejavypaa rupi anho ikuiaia re  
ojexavai okuapy gueko vaia py.
- <sup>18</sup> Ojeguaru opa marãgua tembi'u gui.  
Ha'e rami vy ovaẽ manoa rokẽ peve.
- <sup>19</sup> Ha'e gui ojexavaia py ojapukai SENHOR pe.  
Ha'e ramo ogueraa jepe ojexavaia gui.
- <sup>20</sup> Oayvu ombou vy omonguerapa,  
ogueraa jepe omanomba 'rãgue gui.
- <sup>21</sup> Ha'e kuery toguerovy'a avi SENHOR porayvua re,  
avakue ra'y kuery pe mba'emo porã ojapo rire.
- <sup>22</sup> Ixupe tome'ẽ mba'emo oguerovy'a vy.  
Ovy'aa rupi toikuua ukapa ojapo va'ekue.
- <sup>23</sup> Ha'e gui amongue ma kanoã guaxu ojou vy ye'ẽ rupi oguata 'rã,  
mba'emo vendea kuery yy tuvixa va'e rupi oo va'e.
- <sup>24</sup> Ha'e va'e kuery oguataa rupi oexa SENHOR rembiapo,  
mba'emo porã ete yy typyvea rupi ojapo ramo.
- <sup>25</sup> Mba'eta ha'e ijayvu vy ojapo yvytu vaikue oipeju,  
ha'e yai opu'ã-pu'ã aguã rami.
- <sup>26</sup> Ha'e ramo yvate peve oje'oi,  
ha'e gui yai oguejy ju iguy katy peve.  
Ha'e rami ete ojexavai ramo inhe'ẽ ikangy ma ovy.
- <sup>27</sup> Oguataa rupi ho'a rai-rai'i okuapy oka'u va'e rami.  
Ha'e rami vy ndoikuaavei rei ma.
- <sup>28</sup> Ha'e gui ojexavaia py ojapukai SENHOR pe.  
Ha'e ramo ogueraa jepe ojexavaia gui.
- <sup>29</sup> Omombytu'u yvytu vaikue,  
yai guive omombytu'upa.
- <sup>30</sup> Ha'e ramo ovy'apa ju optytu'upa ramo.  
Ha'e rami ogueraa ojaaty py ovaẽxeague peve.
- <sup>31</sup> Toguerovy'a SENHOR porayvua re,  
avakue ra'y kuery pe mba'emo porã ojapo rire.
- <sup>32</sup> Tomboete avi heta va'e kuery onhemboatya py,  
toguerovy'a yvatekueve nhomongetaa py.
- <sup>33</sup> Ha'e ojapo yakã ikuai va'e typa aguã rami,  
ha'e rã yvu ma ipiru reia meme opyta aguã rami.
- <sup>34</sup> Yvy porã va'ekue ma ojapo juky re'ẽ rive opyta aguã rami,  
ha'e pygua kuery heko vai rei ramo.

- 35 Ojapo tekoa e'ŷa va'ekue yupá ju opýta aguã rami,  
ha'e vyv piru rei va'ekue ma yvu oĩ aguã rami.
- 36 Ha'e py omboekoa okaruxre ikuai aguã.  
Ha'e ramo ojapo okuapy peteĩ tetã ikuai aguã.
- 37 Mba'etyrã mba'emo omoaĩ, uva guive onhotõ.  
Ha'e vy heta ojou omono'õ va'erã.
- 38 SENHOR omoingo porã heta ete oje'oivy aguã rami,  
hymba kuery vaka ndoatai guive.
- 39 Ha'e rami teĩ ha'e kuery ojavyky reia ramo iporiaupa ha'e ndaetavei,  
ojexavai ha'e ikuai axy vy.
- 40 SENHOR ojapo huvixa kuery nomboeteavei aguã rami,  
ojapo avi oguata rei aguã rami tape oĩa rupi e'ŷ.
- 41 Ha'e rã iporiaukue'i ma ogueraa jepe 'rã  
ojexavai reia gui yvatea py oĩ porã aguã,  
hoo pygua kuery voi omboetave vexa'i rami.
- 42 Ha'e nunga heko porã va'e oexa vy ov'y'a 'rã.  
Ha'e rã heko vai va'e ha'e javi ma omboty 'rã ojuru.
- 43 Hi'arandu va'e ma toikuaa pota ha'e nunga re,  
toikuaa pota SENHOR nhomboaxya re.

## 108

Mboraeirã Davi ombopara va'ekue.

*Salmo 57.7-11; Salmo 60.5-12*

- 1 Xeruete, xekuraxõ oĩ atã ma.  
Aporaei vy roguerovy'a 'rã xenhe'ẽ ha'e javi py.
- 2 Mbaraka ha'e mba'epu ixã reta va'e, pevy ke.  
Xee ambovy 'rã ko'ẽ ju.
- 3 SENHOR, roguerovy'a 'rã vyv regua kuery mbyte,  
ndevy aporaei 'rã ha'e javi regua mbyte.
- 4 Mba'eta renhomboaxya oo 'rã yva peve,  
ha'e ndereko porãa ma arai rovai peve 'rã oo.
- 5 Xeruete, enhemboyvate yva áry rupi,  
ha'e vyv jave re tojekuaa nerexakãa,
- 6 ore nerembiaiyvu kuery roo jepe aguã.  
Orereraa jepe ke reiporu kuaa regua py, ha'e orembovai.
- 7 Nhanderuete ijayvu oky'a e'ŷa rupi:  
“Xepo'akaa rupi vy amboja'o 'rã Siquém vyv,  
aa'ã 'rã Sucote regua yvyugua guive.\*
- 8 Gileade ha'e Manassés vyv ma xemba'e meme itui.  
Efraim vyv ma xengora ratã.  
Judá ma xepo pygua.
- 9 Ha'e rã Moabe vyv ma hy'a ajejoiaty itui,  
Edom vyv áry ma amombo 'rã xepy regua,†  
ha'e Filístia pygua kuery re xepo'aka vy avy'a nhendu 'rã.”
- 10 Mava'e nda'u xereraa 'rã tetã ikorapa va'ea py?  
Mava'e nda'u xereraa 'rã Edom vyv re?
- 11 Mba'eta Oreruete, ndee orereja rive va'ekue.  
Oreruete, ndereovei ma orexonardo kuery reve!

\* 108:7 Apy ma ijayvu joyvy oipe'a va'ekue ojeupegua kuery pe omboja'o aguã re. † 108:9 Ha'e jave py ma joyvy ojogua vy hi'áry omombo 'rã opy regua, oikuua uka aguã ija oikoa.

<sup>12</sup> Orereraa jepe nho ke rojexavaia gui,  
mba'eta avakue orereraa jepea ma mba'everā ndovarei.

<sup>13</sup> Nhanderuete re vy ae 'rā nhandepo'aka,  
mba'eta ha'e opyrō 'rā nhanderovaigua kuery re.

*Ngovaigua kuery ombopagaa aguā re ojerurea ague*  
Jogueroporaei va'e pe mboraeirā Davi ombopara va'ekue.

## 109

<sup>1</sup> Xeruete roqueroporaei va'e, ekyrirī eme ke!

<sup>2</sup> Mba'eta xerovai ijapu va'e kuery ma nhombotavya rupi ijayvu,  
oapekū ijapu va'e py ijayvu okuapy xere.

<sup>3</sup> Ha'e kuery xembojere rei vy xerayvu e'ŷa rupi ijayvu,  
mba'e re'ŷ opu'ã okuapy xere.

<sup>4</sup> Xee ayvuague repy ma xevy ivai okuapya oī.  
Ha'e rā xee ma ajerure ainy.

<sup>5</sup> Ajapo porāague repy ome'ẽ mba'emo vai,  
ayvuague repy ma xere ija'e e'ŷa oī.

<sup>6</sup> Hovai guarā emoī peteī heko vai va'e.  
Oiporu kuaa regua re topu'ã hekokue mombe'uarā.

<sup>7</sup> Ha'e gui ma omboayvua py tombopagaa.  
Ojerureague tojekuaa teko vai rami.

<sup>8</sup> Hekove topa voi,  
ha'e gui ojapo aguā va'ekue amboae ju tojapo.\*

<sup>9</sup> Ta'y kuery ma tyre'ŷ meme ta'ikuai,  
ha'e rā ta'yxy ma imeve'ŷ va'e toiko.

<sup>10</sup> Ta'y kuery ma hoo e'ŷ va'e ta'ikuai  
mba'emo re ojerurea rupi.  
Tomoēmbaa hoo ombovaipaā va'ekue gui.

<sup>11</sup> Mba'emo oguereko va'ekue toipe'apaa oreveague re,  
amboae yvy guigua tojopy ombo'apoague repy.

<sup>12</sup> Avave rei tomboaxy eme,  
neī ta'ykue re voi avave rei toopena eme.

<sup>13</sup> Ta'ikuai eme hamymino kuery,  
ha'e kuery ikuai aguā 'rāgue ta'ima'endu'aa eme hery re.

<sup>14</sup> SENHOR ta'ima'endu'a riae tuu kuery ojejavyague re,  
tombogue eme ixy ojejavyague.

<sup>15</sup> Ha'e nunga tojekuaa riae SENHOR renonde,  
ha'e kuery re ta'ima'endu'aave eme yvy re.

<sup>16</sup> Mba'eta ojee nomoī rire nhomboaxya.  
Ha'e rami 'rāgue py oakykue monha ojexavai va'e ha'e iporiaukue'i,  
ipy'a vaia rupi ikuai va'e guive,  
manoa pe omboaxa aguā.

<sup>17</sup> Joe ijayvu vaia rupi anho oiko rire hexe ae ju ha'e nungakue tojeapa.  
Ndajogueroayvu porāxei rire togueroayvu porāa eme.

<sup>18</sup> Ojee ayvu vai ao puku rami omoī rire  
toike ipy'apy katy yy rami,  
ikāgue peve too azeite rami.

<sup>19</sup> Hexe toī oao onheovāa rami,

\* **109:8** Kova'e ayvu rupi ma Judas rekukue re ijayvu (Atos 1.20).

- ha'e ku'akuaa omoĩ va'ety rami.
- <sup>20</sup> Ha'e rami ae SENHOR tombopaga xerovaigua kuery,  
xerekove re ijayvu vai va'e.
- <sup>21</sup> Ha'e rã ndee SENHOR Xeruete, enhemoĩ xerepyarã nderery remboete ucaa rupi vy.  
Xereraa jepe ke, ndeporayvua tuvixa ramo.
- <sup>22</sup> Mba'eta xee ma ajexavai, iporiaukue'i aiko.  
Xepy'apy rupi ma xeaia anho aendu.
- <sup>23</sup> Xerekove opa ovy kuaray ojero'a ovya rami.  
Mombyry omombo pyre aiko tuku karu rami.
- <sup>24</sup> Akaru e'ŷ re riae aiko ramo  
xerenapy'ã ikangypa ma,  
xeangai gui xero'o voi ipiru ma ovy.
- <sup>25</sup> Ha'e kuery pe rã ojou vaipy aiko.  
Xerexa vy oakã ombovava-vava 'rã.<sup>†</sup>
- <sup>26</sup> SENHOR Xeruete, xepytyvõ ke!  
Xereraa jepe ke xemboaxya rupi,
- <sup>27</sup> ha'e kuery oikuaa aguã ndepo gui ae xereraa jepearã oua,  
ndee SENHOR rejapo rire.
- <sup>28</sup> Ha'e kuery joe ijayvu vai va'e.  
Ha'e rã ndee ma rejogueroayvu porã va'e.  
Tove xere opu'ã va'e kuery nda'evei nho ta'ikuai.  
Ha'e rã nerembiguai ma tovy'a.
- <sup>29</sup> Xerovaigua kuery re toĩ oxĩmbaa.  
Oxĩmbaa tojao'ipa ao puku py rami.
- <sup>30</sup> Xejuru py arov'y'a ete 'rã SENHOR.  
Rogueroporaei 'rã heta va'e kuery mbyte,
- <sup>31</sup> mba'eta iporiaukue'i ikuiaia katy onhemoĩ ramo,  
ojukaxe va'e kuery gui ogueraa jepe aguã.

*Messias ipo'akaa ha'e sacerdote oikoa re ijayvua*  
Mboraerã Davi ombopara va'ekue.

## 110

- <sup>1</sup> SENHOR aipoe'i xeruvixa pe:  
“Eguapy ke aiporu kuua regua re,  
nderovaigua kuery ndepy guýry amoĩ peve”, he'i.\*
- <sup>2</sup> Sião tetã gui SENHOR omboaxa 'rã po pygua ndepo'aka aguã.  
Ha'e vy aipoe'i 'rã: “Ndep'o'aka ke nderovaigua kuery re”, he'i 'rã.
- <sup>3</sup> Ha'e gui ma ndepo'akaa ára  
ndevygua kuery ojexa ukapa 'rã ndere ouxea'i rami.  
Ndevygua kunumigue ma iky'a e'ŷ va'e py onhemonde reve 'rã ikuai,  
aje'ive'i yxapy ojekuaa va'e rami.
- <sup>4</sup> SENHOR ouraague ndoguerovai 'rã:  
“Ndee ma sacerdote reĩ raka'e rã peve guarã,  
Melquisedeque reko rami ndereko va'e vy”, he'i rire.\*
- <sup>5</sup> Senhor reiporu kuua regua re oĩ va'e ma

<sup>†</sup> **109:25** Kova'e ayvu rupi ijayvu Jesus kuruxu re oĩ javegua re (Mateus 27.39-40). \* **110:1** Apy “Xeruvixa” he'ia ma Cristo re ae ijayvu vy. Ha'e gui “Eguapy ke aiporu kuua regua re” he'ia ma Nhanderuete ojee rami avi ombopo'aka aguã re ijayvu vy (Mateus 22.41-26; Marcos 12.36, Lucas 20.42-42, Atos 2.32-36; 1 Coríntios 15.24-28; Efésios 1.20; Colossenses 3.1; Hebreus 1.13, 8.1, 10.11-13). \* **110:4** Hebreus 5.1-10, 7.1-28

- ipoxya ára omou'úmba 'rã huvixave kuery.  
 6 Ombopaga 'rã yvy regua kuery,  
     omonyé 'rã te'õgue anho.  
     Nhoakã omou'úmba 'rã yvy jave re.  
 7 Oikoa rupi yxyry oĩ va'e gui oy'u 'rã oiny,  
     ha'e gui oakã omopu'â ju 'rã ovv.

## 111

*Nhanderuete opena porãague re ijayvua*

- 1 Aleluia!  
     Xepy'a ha'e javi py aroporaei 'rã SENHOR  
     heko porã va'e kuery ijatya py.  
 2 SENHOR rembiapokue ma tuvixa meme.  
     Oguerovy'a va'e kuery ha'e javi oikuua pota 'rã ha'e nunga re.  
 3 Guembiapo ha'e javi py oexa uka guexakãa ha'e opo'akaa,  
     heko porãa avi oĩ 'rã raka'e rã peve.  
 4 Hembiapo porã re nhanema'endu'a aguã rami ojapo.  
     SENHOR ma porayvu ha'e nhomboaxy va'e.  
 5 Omongaru 'rã henonde ojererokyjea rupi ikuai va'e,  
     ima'endu'a riae 'rã guexeve guarã ojapo va'ekue re.  
 6 Ojeupegua kuery pe oexa uka 'rã opo'akaa mba'emo ojapoa py,  
     ijyvyrã amboae regua kuery ikuaiague ome'ëa py.  
 7 Opo py ojapo va'e ma anhetê ha'e teko porã rupi meme ojapo,  
     nhanembo'ea voi ojeroviapy meme.  
 8 Ha'e nunga oĩ porã 'rã raka'e rã peve,  
     ojeroviapy oikoa ha'e teko porã rupi oeja rire.  
 9 Ojeupegua kuery pe ombou heraa jepearã,  
     guexeve guarã ojapo vy raka'e rã peve guarã.  
     Hery ma iky'a e'ë va'e ha'e nhomongyjea.  
 10 SENHOR renonde jajererokyjea rupi jaiko vy 'rãe jaupity 'arandua.  
     Ha'e rami ikuai va'e ha'e javi oexa uka 'rã 'arandu.\*  
     Jaroporaeia oĩ riae 'rã raka'e rã peve!

## 112

*Heko porã va'e oikove aguã re ijayvua*

- 1 Aleluia!  
     Ovy'a ete 'rã avakue SENHOR renonde ojererokyjea rupi ikuai va'e,  
     ha'e ojapo uka va'ekue oguerovy'a va'e.  
 2 Ha'e va'e kuery ramymino kuery voi ipo'akapa 'rã yvy re,  
     heko porã va'e ramymino kuery re ima'endu'a porãa 'rã.  
 3 Hoo py ma opa mba'e 'rã oguereko,  
     heko porãa oĩ 'rã raka'e rã peve.  
 4 Heko porã va'e pe ma pytû 'rãgue py ojekuaa 'rã imoexakãarã.  
     Porayvu, nhomboaxyha'e teko porã rupi ikuai.  
 5 Nhomboaxy vy mba'emo oiporuka va'e ma ovv'a 'rã,  
     ha'e imboayvua py teñ oikuua uka 'rã heko porã va'e oikoa.  
 6 Ha'e kuery ndoitayai 'rãe.  
     Ha'e kuery re raka'e rã peve 'rã ima'endu'aa.  
 7 Nhomondiyiarã oendu teñ nonhemondyi 'rã.

\* 111:10 Provérbios 9.10

Ipy'a guaxu 'rã, SENHOR re ojerovia vy.  
<sup>8</sup> Ipy'aa oĩ atã vy ndokyjei 'rã,  
     oexa 'rã oipotaague hovaigua kuery re ojeupity ramo.  
<sup>9</sup> Mba'emo oguerekva'e omboja'o vy ome'ẽ 'rã iporiaukue'i pe.  
     Heko porãa oĩ 'rã raka'e rã peve.\*  
     Ipo'aka ramo omboetea ha'e ima'endu'aa porã 'rã.  
<sup>10</sup> Ha'e nunga heko vai va'e oexa vy ivai 'rã teĩ,  
     haĩ jekyty rei 'rã okanhy peve.  
     Mba'eta heko vai va'e oipotaa ma opa 'rã.

## 113

*SENHOR jaroporaei aguã regua*

<sup>1</sup> Aleluia!  
     SENHOR rembiguai pendekuai va'e, peporaei ke,  
     peroporaei SENHOR rery.  
<sup>2</sup> Ta'ima'endu'a porãa SENHOR rery re,  
     aÿ ha'e raka'e rã peve!  
<sup>3</sup> Kuaray oëa guive oikea peve  
     togueroporaeia SENHOR rery!  
<sup>4</sup> SENHOR ma yvate ete va'e, yvy jave regua áryve,  
     hexakãa voi yva áryve oo.  
<sup>5</sup> Mava'e nda'u SENHOR Nhanderuete reve joo rami heko va'e?  
     Henda openaaty ma yvatea py oĩ.  
<sup>6</sup> Ojero'a 'rã guive oexa aguã  
     yva ha'e yvy re mba'emo oiko va'e.  
<sup>7</sup> Omopu'ã ju 'rã imo'amy yvy ku'i py omombo pyre,  
     fty gui oipe'a 'rã iporiaukue'i,  
<sup>8</sup> huvixa kuery yvýry ju omboguapy imoiny aguã,  
     tá, omoï 'rã ojeupegua ruvixa kuery reve guarã.  
<sup>9</sup> Ojapo 'rã kunha imemby e'ÿ va'ekue omemby kuery reve oiko aguã rami.  
     Ha'e ramo ovya'a 'rã, kyrígue xy oiko vy.  
     Aleluia!

## 114

*Egitoyvy gui oëmbajave guare re ima'endu'aague*

<sup>1</sup> Israel kuery Egito yvy gui oẽ jave,  
     Jacó ramymino kuery ayvu mboae py ijayvu va'e ikuiaigui oëmbajave ma  
<sup>2</sup> Judá kuery gui Nhanderuete ojapo guenda iky'a e'ÿ va'erã,  
     ojapo Israel kuery ojeupe guarã ete.  
<sup>3</sup> Ha'e nunga ye'ẽ oexa vy ojava ovy,  
     Jordão yakã voi guakykue katy oxyry raka'e.\*  
<sup>4</sup> Yvyty ikuai va'e opopa vexa ava rami,  
     yvy'ã'i voi vexa'i ra'y rami opopa okuapy.  
<sup>5</sup> Ye'ẽ, mba'e tu oĩ ha'e rami rejava aguã?  
     Ha'vy ndee Jordão, mba'e re tu nderakykue katy rejevy?  
<sup>6</sup> Peẽ yvyty, mba'e re tu pepopa ri vexa ava rami?  
     Ha'vy peẽ yvy'ã, mba'e re tu vexa'i ra'y rami pepo?  
<sup>7</sup> Ndee yvy, eryryi ke SENHOR Jacó Ruete renonde.

\* **112:9** 2 Coríntios 9.9    \* **114:3** Ye'ẽ Pytã ojavaague ma Êxodo 14 py omombe'u, ha'e rã Jordão yakã guakykue katy ojevyague ma Josué 3 py.

8 Mba'eta itaty gui ojapo yy ruparã,  
itaova ratã gui ojapo raka'e yvu.\*

## 115

### *Nhanderuete anho nhamboute aguã regua*

- 1 SENHOR, ore kuery e'ŷ toremboetea, ore e'ŷ,  
ha'e rami 'râgue py ndererry anho tomboetea,  
renhomboaxya ha'e ojeroviapy reikoa re.
- 2 Mba'e re tu amboae regua kuery joupe-upe oporandu vy  
“Mamo tu oĩ ha'e kuery Ruete?” he'i 'rã okuapy?
- 3 Mba'eta Nhanderuete ma yva re oĩ,  
opa mba'e ojapo oikovy ha'e ae oipotaa rami.
- 4 Ha'e rã ha'e kuery pegua tuuete ma prata e'ŷ vy ouro guigua rive,  
avakue opo py ojapo va'ekue meme.\*
- 5 Ijuru va'eri nda'ijayvui,  
hexa va'eri ndoexai,
- 6 ijapyxa va'eri noendui,  
inhapyïgua va'eri noetûi,
- 7 ipo va'eri mba'eve re ndopokoi,  
ipy va'eri ndoguatai,  
ijyryvi va'eri ha'e kuery gui neĩ peteĩ ayvu nonhendui.
- 8 Ijapoare kuery topyta ha'e nunga rami ae,  
hexe ojerovia va'e kuery voi.
- 9 Ha'e gui Israel kuery ma SENHOR re ae tojerovia.  
Ha'e anho ma ipytyvõa ha'e mba'emo vai jokoa oiko.
- 10 Arão ramymino kuery tojerovia SENHOR re.  
Ha'e anho ma ipytyvõa ha'e mba'emo vai jokoa oiko.
- 11 SENHOR renonde ojererokyjea rupi ikuai va'e ha'e javi tojerovia SENHOR re.  
Ha'e anho ma ipytyvõa ha'e mba'emo vai jokoa oiko.
- 12 Mba'eta nhandere SENHOR ima'endu'a vy nhanemoingo porã 'rã.  
Omoingo porã 'rã Israel kuery,  
omoingo porã 'rã Arão ramymino kuery,
- 13 omoingo porã 'rã henonde ojererokyjea rupi ikuai va'e,  
yvatekueve ha'e yvyïgueve voi.\*
- 14 SENHOR tomoõve tema peiko porã aguã,  
peẽ kuery ha'e penda'y kuery pe guive.
- 15 SENHOR yva ha'e yvy apoare va'e  
ogueroayvu porã va'e tapendekuai.
- 16 Yva ma SENHOR pegua oĩ.  
Ha'e rã yvy ma ome'ẽ avakue ra'y kuery pe.
- 17 Omanogue ma ndogueroporaei 'rã SENHOR,  
okyrirĩ va'e anho ikuaiia py oguejy va'ekue.
- 18 Ha'e rã nhande kuery ma jarovy'a 'rã SENHOR,  
aŷ guive raka'e rã peve.  
Aleluia!

## 116

### *Oporai vy Nhanderuete oguerovy'aague*

---

\* **114:8** Êxodo 17; Números 20   \* **115:4** Salmo 135.15-18   \* **115:13** Apocalipse 11.18, 19.5

- <sup>1</sup> Xee ma ayvu SENHOR,  
mba'eta ajerure ramo oendu xeayvua.
- <sup>2</sup> Xea katy ojero'a vy ojapyxaka rire  
ixupe ajapukai 'rã aikovea ja.
- <sup>3</sup> Manoa regua nhuã xemboty va'ekue,  
jexavaia yvykua vaikue guigua xere ipo'aka va'ekue.  
Ha'e ramo aiko axya ha'e ndavy'aia py ha'a karamboae.
- <sup>4</sup> Ha'e rami vy ajapukai SENHOR rery rupi:  
“SENHOR, eraa jepe ke xerekove!” ha'e va'ekue.
- <sup>5</sup> SENHOR ma porayvu ha'e heko porã va'e,  
Nhanderuete ma nhanemboaxya rupi oiko va'e.
- <sup>6</sup> SENHOR ma hi'arandu e'ŷ'i va'e kuery re opena porã va'e.  
Ha'e ramo vy ha'a ajupya py xerexa vy xereraa jepe karamboae.
- <sup>7</sup> Xenhe'ẽ, ejevy ju ke repytu'u aguã py,  
mba'eta xevy SENHOR mba'emo porã ome'ẽ oata aguã rami e'ŷ.
- <sup>8</sup> Ha'e rami vy xenhe'ẽ oepy amano taa gui.  
Oepy xerexa xerexaya gui,  
xepy guive oepy onhepyxangaa gui.
- <sup>9</sup> Ha'e ramo SENHOR renonde aiko 'rã  
okuave va'e yvy re.
- <sup>10</sup> Hexe ajerovia va'eri xejeupe xeayvu vy  
“Ajexavai ete rima aikovy”, ha'e va'ekue.\*
- <sup>11</sup> Xepy'a eta rei vy  
“Avakue ikuai va'e ma ijapu va'e meme”, ha'e va'ekue.
- <sup>12</sup> SENHOR opa mba'e py xevy ojapo porãague re  
mba'e nda'u ame'ẽ 'rã ixupe?
- <sup>13</sup> Xereraa jepeague arov'y a vy aupti 'rã karo,\*  
ha'e SENHOR rery rupi aroporai 'rã.
- <sup>14</sup> SENHOR pe ajapopa 'rã anhemboayvuague  
ixupeguia kuery ha'e javi oexaa py.
- <sup>15</sup> Hepy ete va'e SENHOR oexa 'rã  
ojeupeguia iky'a e'ŷ va'e kuery omano rã.
- <sup>16</sup> SENHOR, xee ma nerembiguai ete aiko,  
nerembiguai pi'a guive aiko.  
Remondopa ma xejokuaague.
- <sup>17</sup> Ha'e ramo ndevy ame'ẽ 'rã roquerovy'aa,  
ha'e SENHOR rery rupi aroporai 'rã.
- <sup>18</sup> SENHOR pe ajapopa 'rã anhemboayvuague,  
ixupeguia kuery ha'e javi ikuiaia py,
- <sup>19</sup> SENHOR pegua roka  
Jerusalém mbyte py ae.  
Aleluia!

## 117

*SENHOR pe ha'e javi regua oporaei aguã regua*

- <sup>1</sup> Peẽ yvy regua ha'e javi, peporaei ke SENHOR pe!  
Peroporaei, ha'e javi regua!\*

---

\* **116:10** 2 Coríntios 4:13    \* **116:13** Apy ijayvu judeu kuery gueko rami vy Nhanderuete pe mba'emo ome'ẽ aguã re. Tembi'u ha'e vinho oupi 'rã ixupe, ha'e gui oguerovy'aa rupi ho'u 'rã (Salmo 22:23-26; Levítico 7:11-16).    \* **117:1** Romanos 15:9-11

<sup>2</sup> Mba'eta SENHOR ma opa mba'e py nhanemboaxy,  
ha'e ojeroviapy 'rã oiko raka'e rã peve.  
Aleluia!

## 118

### *Nhandereraa jepea jarovy'a aguã regua*

- <sup>1</sup> Perovy'a ke SENHOR, porayvu va'e ramo.  
Mba'eta nhomboaxya opa va'erã e'ŷ.
- <sup>2</sup> Israel kuery aipo te'i:  
“Tá, nhomboaxya opa va'erã e'ŷ.”
- <sup>3</sup> Arão ramymino kuery aipo te'i:  
“Tá, nhomboaxya opa va'erã e'ŷ.”
- <sup>4</sup> SENHOR renonde ojererokyjea rupi ikuai va'e ha'e javi aipo te'i:  
“Tá, nhomboaxya opa va'erã e'ŷ.”
- <sup>5</sup> Ha'e gui xee ma ajexavaia py ajapukai SENHOR pe.  
Ha'e ramo SENHOR oendu vy xerepy karamboae.
- <sup>6</sup> Xereve SENHOR oiko ramo xee ndakyjei 'rã.  
Mba'e tu avakue ojapo 'rã xere?\*
- <sup>7</sup> SENHOR xereve oiko xepytyvõarã.  
Ha'e nunga rupi aexa 'rã xere ija'e e'ŷ va'e kuery re aipotaa ojeupity ramo.
- <sup>8</sup> Avakue re jajerovia 'rãgue py  
ha'eveve SENHOR re nhanhemi.
- <sup>9</sup> Huvixa kuery re jajerovia 'rãgue py  
ha'eveve SENHOR re nhanhemi.
- <sup>10</sup> Ha'e javi regua xembojere rei okuapy,  
teĩ SENHOR rery rupi amomba.
- <sup>11</sup> Jova-jovai gui xejokopa,  
teĩ SENHOR rery rupi amomba.
- <sup>12</sup> Eiru rami ete xeao'i okuapy,  
teĩ tata py juu okaia rami okaipa.  
SENHOR rery rupi amomba.
- <sup>13</sup> Opoxya rupi xemoanha ratã heravy xereity aguã,  
teĩ SENHOR xepytyvõ.
- <sup>14</sup> SENHOR ma xemombaraetea oiko, aroporaei va'e guive,  
xereraa jepe rire.\*
- <sup>15</sup> Heko porã va'e rekhoa rupi onhendu  
heraa jepeare oguerovy'a va'e:  
“SENHOR opo'akaa rupi ojapo mba'emo porã!
- <sup>16</sup> SENHOR opo oupi vy  
mba'emo porã ojapo” he'i va'e.
- <sup>17</sup> Xee ma namanovei 'rã.  
Ha'e rami 'rãgue py aikove 'rã,  
SENHOR ojapo va'ekue amombe'upa aguã.
- <sup>18</sup> SENHOR xembopaga ete,  
teĩ manoa pe naxemboaxai guive.
- <sup>19</sup> Peipe'a ke xevy tekó porã rokẽ,  
ha'e va'e rupi aike vy SENHOR aroporaei aguã.
- <sup>20</sup> Ha'e va'e ae ma SENHOR rokẽ,  
ha'e va'e rupi heko porã va'e anho 'rã oike.

\* **118:6** Hebreus 13.5-6    \* **118:14** Êxodo 15.1-2; Isaías 12.1-2

- 21 Xee rogueroporaei 'rã,  
xepytyvõ vy xereraa jepe rire.
- 22 Oo apoa kuery ita omombo va'ekue ma  
yvatevea py optya iporâvea pygumarã.
- 23 Ha'e nunga ma SENHOR ae ojapo,  
ha'e jaexa rã iporã ete va'e.\*
- 24 Kova'e ára ma SENHOR omoingo va'ekue.  
Ha'e ramo javy'a ha'e jarovy'a 'rã.
- 25 SENHOR, orereraa jepe ke, rojerure!  
Oremoingo porã ke, SENHOR!
- 26 Ima'endu'a porãmby toiko SENHOR rery rupi ou va'e!\*  
SENHOR pegua opy peẽ kuery ha'e javi peike va'e rogueroayvu porã.
- 27 SENHOR mã Nhanderuete ha'e nhanemoexakãa.  
Ngaru oiko aguã py pembojegua mba'emo rogue py,  
altar apy peve.
- 28 Ndee ma Xeruete, xee rogueroporaei 'rã.  
Ndee Xeruete, xee aikuua uka 'rã ndeyvatea.
- 29 Perovy'a ke SENHOR, porayvu va'e ramo.  
Mba'eta nhomboaxyo opa va'erã e'ŷ.

## 119

### *Nhanderuete guigua lei iporãa re ijayvua*

- <sup>1</sup> Ovy'a ete 'rã iky'a e'ŷa rupi oiko va'e,  
SENHOR guigua lei rupi ae.
- <sup>2</sup> Ovy'a ete 'rã oikuua uka va'ekue rupi oiko va'e,  
opy'a ha'e javi py onhe'ẽ rendu va'e.
- <sup>3</sup> Ha'e va'e kuery ma mba'emo vai rupi e'ŷ ikuai,  
Nhanderuete guigua tape rupi anho.
- <sup>4</sup> Rejapo uka va'e reikuaa uka  
rojapopa ete aguã.
- <sup>5</sup> Aguataa toĩ atã  
ndeayvu reja va'ekue rupi aiko aguã.
- <sup>6</sup> Ha'e rami vy aximba aguã rami e'ŷ 'rã aiko  
rejapo uka va'e ha'e javi re aikuua pota vy.
- <sup>7</sup> Peteĩ rami xepy'a reve roguerovy'a 'rã,  
ha'veea rami ndeayvuague aikuua rire.
- <sup>8</sup> Xee ma ajapo 'rã ndeayvu reja va'ekue.  
Xereja eme ke.
- <sup>9</sup> Mba'exa vy nda'u kunumigue onhemongy'a e'ŷ re oiko 'rã?  
Ndeayvu rupi oiko ri vy tema.
- <sup>10</sup> Xee ma xepy'a ha'e javi py roeka va'e.  
Ejapo eme rejapo uka va'ekue gui ajepe'a aguã rami.
- <sup>11</sup> Xepy'a re amoĩ 'rã ndeayvuague  
nderovai ajejavý e'ŷ aguã.
- <sup>12</sup> SENHOR, xee ma rogueroporaei 'rã.  
Xembo'e ke ndeayvua reja va'ekue rupi aiko aguã re.
- <sup>13</sup> Xeayvu tema xema'endu'a vy  
reikuaa potaa rupi ndeayvuague ha'e javi re.

\* **118:23** Mateus 21.42, Marcos 12.10-11, Lucas 20.17, Atos 4.11; 1 Pedro 2.7  
Marcos 11.9; Lucas 13.35, 19.38; João 12.13

\* **118:26** Mateus 21.8-9, 23.37-39;

- <sup>14</sup> Opa mba'e porã gui  
arovy'ave ndee reikuua uka va'ekue.
- <sup>15</sup> Anhembo'e aikovy ndee orembo'ea re,  
aikuua pota 'rã reikoa re.
- <sup>16</sup> Ndeayvua reja va'ekue re xee avy'a.  
Ndaxerexarai 'rã ndeayvuague re.
- <sup>17</sup> Ejapo porã xee nerembiguai pe,  
aikove ha'e ndeayvuague rupi aiko aguã.
- <sup>18</sup> Eipe'a ke xerexa jokoa,  
aexa kuua aguã ndeguigua lei re iporã ete va'e oĩ va'e.
- <sup>19</sup> Ko yvy re aikoa ja hekoa e'ŷ va'e rami aiko.  
Eikuua uka e'ŷ eme ke rejapo uka va'ekue.
- <sup>20</sup> Xepy'a py aendu nda'evei etea,  
ne'arandua rupi ndeayvuague aenduxe riae vy.
- <sup>21</sup> Ndee ma ojejou porã rei va'e ha'e ayvu vaipy kuery pe ndeayvu ete va'e.  
Ha'e kuery ojepe'a okuapy rejapo uka va'ekue gui.
- <sup>22</sup> Eipe'a ke xere ijayvu reia ha'e ov'y'a reia,  
mba'eta xee ma reikuua uka va'ekue rupi aiko ramo.
- <sup>23</sup> Xere huvixa kuery ijayvu aguã nhomboatypa teĩ  
xee nerembiguai aikuua pota aikovy ndeayvu reja va'ekue re.
- <sup>24</sup> Reikuua uka va'ekue ma xembovy'a va'e.  
Ha'e va'e ma xemongetaa guive.
- <sup>25</sup> Yvy rupi xereitya ma.  
Xemoingo porã ju ke ndeayvuague rami vy.
- <sup>26</sup> Xerekokue amombe'upa ramo ndee xembovai.  
Xembo'e ke ndeayvua reja va'ekue rupi aiko aguã.
- <sup>27</sup> Eikuua uka ke renhombo'eague rami aiko aguã,  
ha'e xee aikuua pota 'rã iporã ete va'e reikuaa uka va'e re.
- <sup>28</sup> Xepy'a py xeporiau ndavy'avei vy.  
Xemombaraete ju ke ndeayvuague rami vy.
- <sup>29</sup> Xepe'a ke ijapu va'e kuery rape gui.  
Xemboaxy ke ndeguigua lei re oĩa rami vy.
- <sup>30</sup> Aiporavo tape vy'aa katygua,  
amoĩ ne'arandua rupi aiko aguã.
- <sup>31</sup> Reikuua uka va'ekue rupi pota aiko.  
SENHOR, xeapo eme aximba aguã rami.
- <sup>32</sup> Anha 'rã avy tape rejapo uka va'ekue oĩa rupi,  
xepy'a py xembovy'a rire.
- <sup>33</sup> SENHOR, xembo'e ke ndeayvua reja va'ekue rupi aiko aguã.  
Ha'e va'e rupi aiko 'rã opa peve.
- <sup>34</sup> Xemo'arandu ke, ha'e ramo aiko 'rã ndeguigua lei rupi.  
Xepy'a ha'e javi py 'rã ajapo.
- <sup>35</sup> Xererekko ke tape rejapo uka va'ekue oĩa rupi,  
mba'eta ha'e va'e anho arov'y'a.
- <sup>36</sup> Xepy'a re emoĩ reikuua uka va'ekue rupi aiko aguã,  
mba'emo ajoupave aguã rupi e'ŷ.
- <sup>37</sup> Xemoma'ẽ eme ovare e'ŷ va'e re.  
Xembopy'a guaxu ke ndeguigua tape rupi.
- <sup>38</sup> Nerembiguai pe emoĩ atâve ndeayvuague,  
nerenonde ojererokyjea rupi ikuai va'e pe reme'ẽ rire.

- 39 Eipe'a ke xere ijayvu reia xemongyje va'e,  
      mba'eta ne'arandua anho ha'eve.
- 40 Ma'ẽ, ndee xembo'ea rami anho aikoxe va'e.  
      Xembopy'a guaxu ke nderekō porāa rupi.
- 41 SENHOR, exa uka xemboaxy.
- Xereraa jepe guive ndeayvuague rami vy.
- 42 Ha'e ramo 'rãe ambovai kuaa xembojaru rei okuapy va'e,  
      ndeayvua re ajerovia vy.
- 43 Xejuru gui eipe'a eme ayvu anhetē rupigua,  
      mba'eta xee ma arõ aikovy ne'arandua.
- 44 Ha'e rami vy ndeguigua lei rupi aiko riae 'rã,  
      raka'e rã peve.
- 45 Aiko 'rã aa jepea rupi,  
      ndee xembo'ea rupi pota aiko vy.
- 46 Huvixave kuery renonde voi axi e'ŷ re  
      amombe'u 'rã reikuaa uka va'ekue.
- 47 Xee arov'y'a 'rã rejapo uka va'ekue,  
      xee ayvu vy.
- 48 Rejapo uka va'ekue ayvu vy audi 'rã xepo,  
      ndeayvua reja va'ekue re aikuua pota 'rã guive.
- 49 Nema'endu'a ke xee nerembiguai pe ndeayvuague re,  
      mba'eta xeapo arõ aguã rami.
- 50 Ajexavaia py xembovy'a va'e ma pova'e:  
      ndeayvu xembopy'a guaxua.
- 51 Ojejou porã rei va'e kuery xejajai riae,  
      tei xee ndajepe'ai ndeguigua lei gui.
- 52 Xema'endu'a ymave ne'arandua rupi ndeayvuague re.  
      Ha'e va'e ma xembopy'a guaxu, SENHOR.
- 53 Xee aendu xevaia,  
      heko vai va'e ndeguigua lei rupi ve'ŷ ikuai ramo.
- 54 Mamo rã aguataa rupi oo py akepa py  
      aroporaei aikovy ndeayvua reja va'ekue.
- 55 SENHOR, pyávy xema'endu'a 'rã nderery re.  
      Ha'e rami vy ndeguigua lei rupi 'rã aiko.
- 56 Pova'e ma xevy guarã oĩ va'e,  
      ndee xembo'ea rupi aiko aguã.
- 57 SENHOR ae xevygua oiko.  
      Ha'e ramo aipoa'e: "Ajapo 'rã ndeayvuague", ha'e.
- 58 Xepy'a ha'e javi py ajerure xemboaxy aguã.  
      Xemboaxy ke ndeayvuague rami vy.
- 59 Xee ae aikoa re aikuua pota vy  
      ajevy ju ndee reikuua uka va'ekue rupi aiko aguã.
- 60 Anhea'ã 'rã, namboarei guive  
      rejapo uka va'ekue ajapo aguã.
- 61 Heko vai va'e kuery nhuã xejura  
      tei ndaxerexarai 'rã ndeguigua lei gui.
- 62 Pytã mbyte jave tei apu'ã 'rã roporaei aguã,  
      ne'arandua rupi ndeayvuague anhetê va'e meme ramo.
- 63 Anhemoirã 'rã neronden ojererokyjea rupi  
      ha'e rembo'eague rami ikuai va'e reve.
- 64 SENHOR, yvy jave re rexu uka ndeporayvua.

- Xembo'e ke ndeayvua reja va'ekue re.
- 65 SENHOR, xee nerembiguai pe rejapo porã,  
ndeayvuague rami vy.
- 66 Xembo'e ke 'arandu ha'e aikuaa aguã re,  
rejapo uka va'ekue rupi ajerovia ramo.
- 67 Ajexavai e'ÿ mbove ha'eve e'ÿa rami aiko va'ekue,  
tei aÿ ma ajapo aikovy ndeayvua.
- 68 Ndee ma heko porã ha'e ojapo porã va'e.  
Xembo'e ke ndeayvua reja va'ekue re.
- 69 Ojejou porã rei va'e kuery ma xere ijayvu rive  
tei xepy'a ha'e javi py ajapo renhombo'eague.
- 70 Ha'e kuery ma ipy'a ratã va'e.  
Ha'e rã xee ma arov'y'a ndeguigua lei.
- 71 Ajexavaiague ma ojapo porã xevy,  
ndeayvu reja va'ekue aikuaa nho aguã.
- 72 Mbovy e'ÿ ouro ha'e prata guigua oÿ va'e rire  
xevy pe ovareve 'râgue ndejuru gui lei oë va'e.
- 73 Ndepo py ae xeapo ha'e xemoingo raka'e.  
Xembo'e ke aikuaa aguã rejapo uka va'ekue.
- 74 Nerenonde ojererokyjea rupi ikuai va'e xerexa vy ovy'a okuapy,  
ndeayvuague re ajerovia ramo.
- 75 SENHOR, xee aikuaa porã ha'evea rami ndeayvua,  
ojeroviapy reikoa rupi ae xemoingo axy va'ekue.
- 76 Tou ha'vy ndeporayvua xembopy'a guaxu aguã,  
xee nerembiguai pe ndeayvuague rami vy.
- 77 Xere embou xemboaxy aikove aguã,  
mba'eta ndeguigua lei re xee avy'a.
- 78 Ojejou porã rei va'e kuery toximba, mba'e py e'ÿ xembojexavai rire.  
Ha'e rã xee ma aikuaa pota 'rã ndee xembo'ea re.
- 79 Nerenonde ojererokyjea rupi ikuai va'e toupa xeirûrã,  
reikuua uka va'ekue oikuua va'e guive.
- 80 Xepy'a py tajapopa ndeayvu reja va'ekue,  
aximba e'ÿ aguã.
- 81 Ndee xereraa jepe aguã arõ vy xenhe'ë ikangy.  
Ha'e rami tei arõ tema ndeayvuague.
- 82 Xerexa ikane'õmba ma ndeayvuague arõ rã.  
"Raka'e 'rã tu xembopy'a guaxu?" ha'e.
- 83 Tata áry hyru ipirekue guigua omoÿ mbyre ipirupaa ramigua aiko,\*  
tei ndaxerexarai ndeayvu reja va'ekue gui.
- 84 Mbovy ára teri 'rã nda'u xee nerembiguai aikove?  
Raka'e nda'u xerepy 'rã xerakykue monhaa kuery gui?
- 85 Ojejou porã rei va'e kuery ndeguigua lei rupi e'ÿ ikuai va'e ma  
yvykua ojo'o okuapy xembo'a aguã.
- 86 Rejapo uka va'ekue ma anhetê va'e meme.  
Xerepy ke mba'e py e'ÿ xerakykue monhaa kuery gui.
- 87 Ha'e kuery xemomba rai'i ma ko yvy re.  
Ha'e rami tei xee ndajepo ai 'rã renhombo'ea gui.
- 88 Xembopy'a guaxu ke xemboaxy rupi vy,

\* **119:83** Ha'e va'e jave py vinho ryrurã ojapo 'rã vexa'i e'ÿ vy kavara pirekue gui. Hataxã py omoña ramo ipiru ha'e ivaikueve 'rã ovy.

- ha'e rã ajapo 'rã ayvu ndejuru gui oẽ va'e.
- 89 SENHOR, yva re ndeayvuague oĩ atã 'rã  
raka'e rã peve guarã.
- 90 Ojeroviapy riae 'rã reiko raka'e rã peve guarã.  
Yvy renhono rire ha'ekue py ae oĩ.
- 91 Ndeayvuague rami vy opa mba'e oĩmba porã aỹ peve,  
mba'eta ndevygua meme ikuai.
- 92 Ndeguiuga lei re'ŷ avy'a va'e rire  
yma ma amano 'rãgue aiko axy vaipa vy.
- 93 Xee ma ndaxerexarai 'rã renhombo'eague re,  
ha'e va'e rupi xemoingove rire.
- 94 Xereraa jepe ke ndevygua aiko ramo,  
mba'eta aeka renhombo'eague.
- 95 Heko vai va'e kuery xerarõ okuapy xemokanhy aguã,  
ha'e rã xee ma aikuaa pota 'rã reikuaa uka va'ekue re.
- 96 Xee aexa rã iporâgue ikuai va'e ha'e javi opa va'erã.  
Ha'e rã rejapo uka va'ekue ma opa va'erã e'ŷ.
- 97 Xee ma ayvu ete ndeguiuga lei!  
Ára pukukue re hexe anho aikuaa pota.
- 98 Rejapo uka va'ekue ojapo xerovaigua kuery gui xe'aranduve aguã rami,  
xepy'a re amoĩ riae ramo.
- 99 Xembo'ea kuery ha'e javi gui xee aendu kuaave,  
reikuaa uka va'ekue re aikuaa potaa rupi vy.
- 100 Tujakue gui voi xe'aranduve,  
renhombo'eague rami aiko vy.
- 101 Tape vai ha'e javi gui xee ajepe'a,  
ndeayvuague re aikuaa pota aguã.
- 102 Ha'e rã ndeayvuague gui ma xee ndajep'e ai 'rã,  
ndee xerekombo'e ramo.
- 103 Ndeayvu aa'anga rã he'ẽ va'e ramigua,  
ei gui he'ẽve xejuru pe.
- 104 Renhombo'eague rupi vy xe'arandu 'rã.  
Ha'e rã tape anhetẽ e'ŷ va'e ma ajeguarua meme.
- 105 Ndeayvu ma tataendy oĩ aguata aguã,  
aikoa rupi omoexakã va'e.
- 106 Aura karamboae, ha'e auraague amoĩ atã guive,  
ha'evea rami ndeayvuague rupi aiko aguã.
- 107 Xee ma aiko axy vaipa ma.  
SENHOR, xemoingove ke ndeayvuague rami vy.
- 108 SENHOR, ejopy ke ame'ẽxe'a'i py xeayvu ame'ẽ va'e,  
ha'e xembo'e ndeayvuague re.
- 109 Xejukaxea kuerya rupi riae aiko,  
teĩ ndeguiuga lei gui ndaxerexarai 'rã.
- 110 Heko vai va'e kuery ma nhuã omoĩ xerovai,  
teĩ xee ndajep'e ai 'rã renhombo'ea gui.
- 111 Reikuaa uka va'ekue ma raka'e rã peve guarã amoĩ xejee,  
mba'eta xepy'a py arov'y'a.
- 112 Xepy'a re amoĩ ndeayvu reja va'ekue rupi aiko aguã,  
raka'e rã ha'e opa peve.
- 113 Mokoĩ rupi rei ijayvu va'e ma xee ajou vai.

- Ha'e rã ndeguigua lei ma arov'y'a.
- <sup>114</sup> Ndee ma anhemiaty ha'e mba'emo vai jokoa reiko.  
Ndeayvua re ae ajerovia.
- <sup>115</sup> Mba'emo vai rupi pendekuai va'e, pejepe'a ke xea gui.  
Xee ma ajapoxe Xeruete ojapo uka va'e.
- <sup>116</sup> Xepytyvõ ke ndeayvuague rami vy, aikove aguã.  
Emoingo e'ÿ eme arõ va'e, axõmba e'ÿ aguã.
- <sup>117</sup> Xemombaraete ramo 'rãe aa jepe,  
ha'e ndeayvu reja va'ekue rupi aiko.
- <sup>118</sup> Rejou vai ndeayvuague gui ojepe'a va'e,  
mba'eta apu py ae ha'e kuery nhombotavypa 'rã.
- <sup>119</sup> Yty rami rive remombo 'rã heko vai va'e yvy jave re ikuai va'e.  
Ha'e nunga rupi xee arov'y'a reikuua uka va'ekue.
- <sup>120</sup> Nerenonde ajererokyje vy xero'o pirõmba,  
ndeayvua re ae ajererokyje.
- <sup>121</sup> Xee ma anhetẽ ha'e teko porã rupi ajoguereko va'e.  
Xemboaxa eme ke xerovaigua kuery po py.
- <sup>122</sup> Xee nerembiguai xerepy ke aiko porãve ju aguã.  
Xembojexavai uka eme ojejou porã rei va'e kuery pe.
- <sup>123</sup> Xerexa ikane'õmba ma xereraa jepearã arõ riae vy,  
nderekõ porãa rupi ndeayvuague ojeupity aguã guive.
- <sup>124</sup> Ereko nerembiguai remboaxyu rupi.  
Xembo'e ke ndeayvu reja va'ekue re.
- <sup>125</sup> Xee ma nerembiguai aiko.  
Xemo'arandu ke reikuua uka va'ekue aikuua aguã.
- <sup>126</sup> SENHOR, ovaõ ma reikuua pota aguã ára,  
mba'eta ndeguigua lei rupi nda'ikuai ramo.
- <sup>127</sup> Xee ma ouro gui arov'y'ave rejapo uka va'ekue,  
ouro oiky'a'o pyre gui voi.
- <sup>128</sup> Ha'e nunga rupi renhombo'eague pe "Anhetẽ va'e meme" ha'e.  
Ha'e rã ijapu va'e kuery reko ma ajou vai.
- <sup>129</sup> Reikuua uka va'ekue ma iporã ete.  
Ha'e va'e rupi aiko xepy'a ha'e javi py.
- <sup>130</sup> Ndeayvu reikuua uka ramo omoexakã vy  
omo'arandu 'rã hi'arandu e'ÿ'i va'ekue.
- <sup>131</sup> Xejuru aipe'a vy xepytuë atã,  
rejapo uka va'ekue aikuua porãvexe vy.
- <sup>132</sup> Eju ju xea py, ha'e xemboaxy,  
nderery oayvu va'e kuery pe rejapoaty rami vy.
- <sup>133</sup> Emoï atã ke ndeayvuague rupi aikoa.  
Ha'e rã teko vai va'e guive rã ta'ipo'aka eme xere.
- <sup>134</sup> Xerepy ke avakue xemoingo axy reia gui,  
ha'e ramo aiko 'rã renhombo'eague rami.
- <sup>135</sup> Xee nerembiguai áry taexakã nderova,  
ha'e xembo'e ndeayvu re.
- <sup>136</sup> Xerexay ma yakã rami oxyry,  
ndeguigua lei rupi e'ÿ avakue ikuai rã aexa vy.
- <sup>137</sup> SENHOR, ndee ma nderekõ porã va'e,  
ndeayvua guive anhetẽ va'e meme.\*

\* <sup>119:137</sup> Apocalipse 16.5-7, 19.2

- 138 Reikuua uka va'ekue ma anhetē rupi reja,  
ojeroviapy guive.
- 139 Ndeayvu gui xerovaigua kuery hexaraipa rā aexa vy  
nda'evei etea aendu va'e xemomba rai'i.
- 140 Ndeayvua ma iky'a e'ŷ ete va'e.  
Ha'e nunga rupi xee nerembiguai arovya.
- 141 Xee ma yvyi'i va'e, oayvupy e'ŷ aiko va'eri  
ndaxerexarai renhombo'eague re.
- 142 Ndegugua teko porā ma opa va'erā e'ŷ,  
ndegugua lei ma anhetē va'e meme.
- 143 Xe'ary jexavai ha'e ndavy'ai etea ou tei  
rejapo uka va'ekue ma xembovy'a kuerei.
- 144 Reikuua uka va'ekue ma ha'evea ramigua meme raka'e rā peve guarā.  
Xemo'arandu ke ha'e va'e rupi, ha'e ramo aikove 'rā.
- 145 Xepy'a ha'e javi py xee ajapukai ndevy.  
SENHOR, xembovai ke, ha'e ramo ajapo 'rā ndeayvu reja va'ekue.
- 146 Ndevy ajapukai. Xereraa jepe ke,  
ha'e ramo aiko 'rā reikuua uka va'ekue rupi.
- 147 Ko'ë e'ŷ mbove'i ajapukai,  
ndeayvua arō ajerovia reve.
- 148 Pytū mbukukue re xerexa ndokei,  
ndeayvuague re aikuua pota aguā.
- 149 SENHOR, ndeporayvua rupi endu ke xeayvua.  
Ndeayvuague rami vy xemoingove.
- 150 Teko vai rupi ikuai va'e ovaẽ rai'i ma xea py.  
Ha'e kuery ma ndegugua lei gui ojepe'a va'e.
- 151 SENHOR, mombyry e'ŷ ndee reiko,  
rejapo uka va'ekue ma anhetē va'e meme.
- 152 Yma ma aikuua ndeayvuague  
raka'e rā peve guarā reja va'ekue.
- 153 Eikuua pota ke aiko axya re, xereraa jepe guive,  
mba'eta xee ma ndegugua lei gui ndaxerexarai 'rā.
- 154 Xerepy ke, ha'e xereraa jepe.  
Ndeayvuague rami vy xemoingove.
- 155 Heko vai va'e kuery ma oo jepe aguā gui mombyry ikuai,  
ndeayvu reja va'ekue ndoikuaxeiy vy.
- 156 SENHOR, opa mba'e py ndee oremboaxy 'rā!  
Ndeayvuague rami vy xemoingove.
- 157 Heta ete ikuai xerovaigua kuery xerakykue monha va'e,  
tei xee ndajepe'ai 'rā reikuua uka va'ekue gui.
- 158 Ojerovia e'ŷ va'e kuery aexa vy aendu ndajou porāia,  
ndeayvuague rami e'ŷ ikuai rā.
- 159 Eikuua pota ke renhombo'eague arovya'aa re.  
SENHOR, ndeporayvua rupi xemoingove.
- 160 Ndeayvua ma jypy guive anhetē va'e meme.  
Ha'evea ramu ndeayvuague raka'e rā peve guarā.
- 161 Huvixa kuery mba'e py e'ŷ xemoingo axy  
tei xepy'a py ajererokyjea va'e ma ndeayvu ae.
- 162 Mba'emo rejapo aguā re ndeayvuague aendu vy avy'a,  
amongue ojou reta va'e ramu.

- <sup>163</sup> Xee ma ajeguaru apu gui, ajou vai ete guive.  
Ha'e rã ndeguigua lei ma arovy'a.
- <sup>164</sup> Ára nhavõ sete-kue kuerei 'rã rogueroporaei,  
ndeayvuague ha'evea ramigua meme ramo.
- <sup>165</sup> Ndeguigua lei oguerovy'a va'e ma ovy'a ete 'rã,  
ndoikoi 'rã guive ha'e kuery reityarã.
- <sup>166</sup> SENHOR, arõ aikovy ndee xereraa jepe aguã,  
rejapo uka va'ekue ajapo reve.
- <sup>167</sup> Xepy'a py aiko reikuua uka va'ekue rupi,  
arovy'a ete vy.
- <sup>168</sup> Renhombo'eague ha'e reikuua uka va'ekue rupi aiko,  
mba'eta neronden ojekuaa aikoa ha'e javi.
- <sup>169</sup> SENHOR, ajapukaia tovaẽ ndea peve.  
Xemo'arandu ke ndeayvuague rami vy.
- <sup>170</sup> Nerenonde py tovaẽ ajerurea.  
Xereraa jepe ke ndeayvuague rami vy.
- <sup>171</sup> Xejuru tandereroporaei,  
mba'eta xembo'e ndeayvu reja va'ekue re.
- <sup>172</sup> Xeayvu py tarovy'a ndeguigua lei,  
mba'eta rejapo uka va'ekue ha'evea ramigua meme.
- <sup>173</sup> Embou ndepo xerepy aguã,  
renhombo'eague aiporavo rire.
- <sup>174</sup> SENHOR, arõ ete xereraa jepe aguã.  
Ndeguigua lei anho arovy'a.
- <sup>175</sup> Emoingove xenhe'ẽ rogueroporaei aguã.  
Ndeayvuague taxepytyvõ.
- <sup>176</sup> Vexa'i kanhygue rami aiko. Xereka ke,  
mba'eta xee nerembiguai ndaxerexarai 'rã rejapo uka va'ekue gui.

*Ijayvu rei va'e kuery rovai ojerureague*

Oguataa rupi ikuai va'e oporaei aguã.

## 120

- <sup>1</sup> Ajexavaia py ajapukai SENHOR pe.  
Ha'e ramo oendu xeayvu.
- <sup>2</sup> SENHOR, xereraa jepe ke apu rupi ijayvu va'e gui,  
nhombotavypaa rupi ijayvu va'e kuery gui.
- <sup>3</sup> Nhombotavypaa rupi ndeayvu va'e,  
mba'e 'rã tu nderekko rekoria ome'ẽa,  
mba'e 'rã tu ndevy guarã omboua?
- <sup>4</sup> Nembopagaa 'rã ipy'a guaxuve va'e ru'y hakua va'e py,  
tapyĩ hexakã va'e zimbro guigua py guive.
- <sup>5</sup> Xevy pe nda'evei ete yvy mboae regua Meseque,  
Quedar pygua kuery rekaoa rupi aikoa.
- <sup>6</sup> Yma ete ma ha'e py aiko,  
peteĩ rami nda'ikuaixei va'e kuery mbyte.
- <sup>7</sup> Xee ma peteĩ rami orekuai aguã re xeayvu teĩ  
ha'e kuery ma joe opu'ã aguã re anho onhea'ã okuapy.

*Nhandere Nhanderuete onhangareko re ijayvua*

Oguataa rupi ikuai va'e oporaei aguã.

## 121

- <sup>1</sup> Yvyty katy ama'ẽ.  
     Magui nda'u ou 'rã xerepyarã?
- <sup>2</sup> SENHOR yva ha'e yvy apoare va'e gui ae  
     ou xerepyarã.
- <sup>3</sup> Ha'e ma nandereity ukai 'rã.  
     Nerarõa rupi ndoke oinyi 'rã.
- <sup>4</sup> Israel kuery rarõa ma oke va'erã e'ŷ,  
     ndojaparai 'rã guive.
- <sup>5</sup> SENHOR ae opena porã 'rã ndere.  
     Nemo'ãarã SENHOR oĩ reiporu kuaa regua re.
- <sup>6</sup> Ha'e ramo ara py kuaray nandeapo vai 'rã,  
     pyávy teĩ jaxy voi nandeapo vai 'rã.
- <sup>7</sup> SENHOR ndereraa jepe 'rã opa mba'e vai gui.  
     Nderekovea re opena porã 'rã.
- <sup>8</sup> Reẽ ha'e reike ju ramo SENHOR onhangareko 'rã ndere  
     aŷ guive raka'e rã peve.

*Jerusalém tetã oĩ porã aguã re ojerurea*

Oguataa rupi ikuai va'e oporaei aguã Davi ombopara va'ekue.

## 122

- <sup>1</sup> Xevy pe “Jaje'oi ke SENHOR pegua oo py”  
     'ea rã aendu vy avy'a ete.
- <sup>2</sup> Ndee Jerusalém tetã,  
     orepy ovaẽ ma nerokẽ py.
- <sup>3</sup> Jerusalém ma tetã peteĩ henda'i py ojapo pyre.
- <sup>4</sup> Ha'e katy oje'oi 'rã SENHOR pegua kuery ha'e javi regua,  
     SENHOR rery oguerovy'a aguã  
     Israel kuery oje'oi aguã va'e.
- <sup>5</sup> Ha'e py ma ikuai ha'evea rami oikuua pota va'e renda,  
     Davi ramymino kuery openaaty ikuai.
- <sup>6</sup> Pejerure ke Jerusalém oĩ porã aguã.  
     Ndererovy'a va'e kuery ta'ikuai porã avi.
- <sup>7</sup> Ndekora mbyte ikuai va'e ta'ikuai porã,  
     huvixave ro pygua kuery voi toptytu'u porã.
- <sup>8</sup> Xeryvy kuery, xeirũ kuery re ama'ẽ vy  
     Jerusalém tetã re ajerure:  
     “Toĩ ha'e py ikuai porã aguã”, ha'e.
- <sup>9</sup> SENHOR Nhanderuete pegua oo re ama'ẽ vy  
     anhea'ã 'rã aikovy oĩ porã aguã.

*Nhanderuete oipytyvõ aguã ojerureague*

Oguataa rupi ikuai va'e oporaei aguã.

## 123

- <sup>1</sup> Xee ama'ẽ ne'amba re reiko va'ea katy.
- <sup>2</sup> Tembiguai hereko po gui mba'emo oarõ va'e,  
     tembiguai kunha mba'e hereko po re oma'ẽ va'e rami  
     ore kuery voi roma'ẽ ndea katy  
     oremboaxy peve, SENHOR Oreruete.
- <sup>3</sup> SENHOR, endu ke oremboaxy, oremboaxy ke,

mba'eta orere ija'e e'ŷ va'e anho ikuai.

<sup>4</sup> Orenhe'ẽ py roendu ha'e kuery ae oipotaa rami orembojaru reia anho,  
ojejou porã rei va'e kuery orere nda'ija'eia roendu.

*Nhanderuete nhanderepya ha'e nhandereraa jepea re ijayvua*  
Oguataa rupi ikuai va'e oporaei aguã Davi ombopara va'ekue.

## 124

- <sup>1</sup> SENHOR e'ŷ nhanda katy oiko va'e rire –  
Israel kuery aipo te'i –
- <sup>2</sup> Nhandere avakue opu'ã ramo  
SENHOR e'ŷ nhanda katy oiko va'e rire
- <sup>3</sup> ha'e kuery jaikove reve nhanemokõmba 'rãgue,  
nhandevy ipoxypa vy.
- <sup>4</sup> Nhande'áry yy ou 'rãgue,  
ty guaxu vy oaxa 'rãgue nhanderekove áry,
- <sup>5</sup> yy oxyry atã va'e  
oaxa 'rãgue nhanderekove áry.
- <sup>6</sup> Ta'imáendu'a porãa SENHOR re,  
ha'e kuery pe nanhanemondoro ukai rire haĩ py.
- <sup>7</sup> Ha'e rami rã nhanenhe'ẽ oo jepe  
guyra mbo'aa nhuã gui oo jepea rami.  
Nhuã omondo ramo jaa jepe.
- <sup>8</sup> SENHOR yva ha'e yvy apoare rery rupi  
jajapukai ramo ou nhanepytyvõarã.

*Jajeroviaa re nhaĩ atã aguã regua*  
Oguataa rupi ikuai va'e oporaei aguã.

## 125

- <sup>1</sup> SENHOR re ojerovia va'e ma Sião yvyty rami ikuai.  
Ha'e va'e ma nomyí'rã, oĩ atã 'rã raka'e rã peve guarã.
- <sup>2</sup> Jerusalém tetã yvýry rupi yvyty ikuai va'e rami  
SENHOR opena 'rã ojeupequa kuery yvýry,  
aÿ guive raka'e rã peve.
- <sup>3</sup> Heko porã va'e kuery re  
heko vai va'e nda'ipo'aka riaeí 'rã,  
heko porã va'e opo py ojapo vai e'ŷ aguã.
- <sup>4</sup> SENHOR, emingo porã ke heko porã va'e,  
anhetê rupi ipy'a va'e kuery.
- <sup>5</sup> Ha'e rã tape karê rupi opia va'e ma  
SENHOR ombopaga 'rã heko vai va'e kuery reve.  
Israel kuery re toĩ ikuai porã aguã.

*Ojae'o va'e ombopy'a porãa jevy aguã regua*  
Oguataa rupi ikuai va'e oporaei aguã.

## 126

- <sup>1</sup> SENHOR Sião tetã py nhanemoingo porã ju ramo  
oexa ra'u va'e rami nhandekuai va'ekue.
- <sup>2</sup> Ha'e jave py nhanderory,  
javy'aa rupi nhandeayvu guive.  
Ha'e ramo amboae regua kuery joupe-upa aipoe'i:

“Ha'e kuery pe SENHOR ojapo porã ete”, he'i okuapy.

<sup>3</sup> Anhetẽ SENHOR nhanemoingo porã va'ekue.

Ha'e nunga rupi ae javy'a.

<sup>4</sup> SENHOR, peteigue ju ke oremoingo porã,

Neguebe rupi yy oxyry va'e rami.

<sup>5</sup> Hexay reve mba'emo ra'yigue onhotõ va'ekue ma

ovy'a reve ju 'rã omono'õ.

<sup>6</sup> Ojae'o reve onhotõ ovy va'ekue ma

ovy'a vaipa reve 'rã ojevy ouvy,

mba'emo aju jokuaa ogueru vy.

*Nhanderuete gui iporã va'e ha'e javi oua re ijayvua*  
Oguataa rupi ikuai va'e Salomão ombopara va'ekue.

## 127

<sup>1</sup> SENHOR ae oorã ojapo e'ŷ ramo  
ijapoa kuery omba'eapoa mba'everã ndovarei 'rã.  
Tetã re SENHOR nonhangarekoi ri ramo  
harõa kuery onhangareko mba'everã ndovarei 'rã.

<sup>2</sup> Nda'eve ranhei ko'ẽ e'ŷ mbove nhapu'ãa,  
ndajake voia, neĩ jajexavaia rupi mbojape jajoua.  
Mba'eta hembiayvu kuery okepa okuapy reve voi  
ha'e kuery pe ome'ẽ 'rã mba'emo.

<sup>3</sup> Nhandera'y kuery ma SENHOR ome'ẽ va'ekue meme,  
guyru'i gui oiko'i va'e ma nhandevy guarã ome'ẽ.

<sup>4</sup> Nhanekunumi jave nhandera'y kuery jareko va'e ma  
opo py xondaro hu'y oguereko va'e rami.

<sup>5</sup> Ovy'a ete 'rã avakue hyru py oguereko reta va'e.  
Tetã rokẽ py ngovaigua kuery reve jogueroayvu  
teĩ nda'ipo'aka e'ŷi 'rã.

*Nhanderuete renonde jajererokyjea rupi vy javy'a aguã regua*  
Oguataa rupi ikuai va'e oporaei aguã.

## 128

<sup>1</sup> Ovy'a ete 'rã SENHOR renonde ojererokyjea rupi ikuai va'e,  
ixuguihua tape rupi ikuai vy.

<sup>2</sup> Remba'eapoa rupi rejou 'rã re'u va'erã.

Revy'a ete 'rã, ha'e opa mba'e oiko porã 'rã ndevy.

<sup>3</sup> Ndero py ma ndera'yxy uva hi'a reta va'e rami 'rã oiko,  
ha'e ndera'y kuery ma oliveira rembypy pyau'i rami meme 'rã ikuai mesa yvýry  
oguapya py.

<sup>4</sup> Ha'e rami SENHOR renonde ojererokyjea rupi ikuai va'e ma omoingo porã 'rã.

<sup>5</sup> SENHOR tanemoingo porã Sião tetã gui,  
reikove reve rexâ aguã

Jerusalém tetã py omoingo porã rã.

<sup>6</sup> Rexa 'rã neramymino kuery.

Israel kuery re toĩ ikuai porã aguã.

*Ogueraa jepeague re ima'endu'aa*  
Oguataa rupi ikuai va'e oporaei aguã.

**129**

- 1** Xekunumi guive mbovykue rei e'ŷ xembojexavaia –  
Israel kuery aipo te'i –
- 2** Xekunumi guive xembojexavaia okuapy  
teĩ xere nda'ipo'akaai.
- 3** Xekupe rupi xekaraĩmbaa ma,  
yvy karaĩa py rami xemboperepa vy.
- 4** Ha'e rami teĩ SENHOR heko porã va'e vy  
ojayapa heko vai va'e xejokuaague.
- 5** Sião tetã re opu'ã va'e ha'e javi  
toxĩmba, tojavapa guive.
- 6** Oo áry mba'emo rogue henhoĩ vy  
ipoty e'ŷ re ipirupa va'e rami avi tokanhymba.
- 7** Ha'e nunga mba'everã ndovarei ramo  
avave rei opo py nomono'ðai,  
neĩ ojyva áry ndojokuaai heruvy guive.
- 8** Ha'e kuerya rupi oaxa va'e kuery aipo te'i eme:  
“SENHOR topena porã pendere!  
SENHOR rery rupi ore rogueroayvu porã!” te'i eme.

*Yy typyvea gui ojapukaia ague*

Oguataa rupi ikuai va'e oporaei aguã.

**130**

- 1** SENHOR, yy typyve etea gui ajapukai ndevy.
- 2** SENHOR, endu ke ajapukaia!  
Ndevy pe ajerurea re ejapyxaka pota ke.
- 3** SENHOR, rojejavyague re reikuaa pota va'e rire  
mava'e 'rãgue tu oo jepe?
- 4** Ha'e rami avi ndere oĩ oreperdoa aguã,  
nerenonde rojererokyjea rupi roiko aguã.
- 5** Xee ma arõ aikovy SENHOR,  
xenhe'ẽ py arõ ijayvuague rupi.
- 6** Tetã rarõa kuery ko'ẽ aguã re ojapuraa gui  
xenhe'ẽ py SENHOR arõve.\*  
Harõa kuery ko'ẽ aguã re ojapuraa gui
- 7** Israel kuery toarõve SENHOR.  
Mba'eta SENHOR re oĩ nhomboaxy aguã,  
opa mba'e gui joepy aguã guive.
- 8** Ha'e ae ma ogueraa jepe 'rã Israel kuery  
heko vai ha'e javi gui.

*Nhanderuete re vy japytu'u aguã regua*

Oguataa rupi ikuai va'e oporaei aguã Davi ombopara va'ekue.

**131**

- 1** SENHOR, xepy'a py xee ajejou porã rei va'e'ŷ.  
Ama'ẽa py nanhemboyvatei guive,  
mba'emo tuvixa va'e re nda'eveia rupi e'ŷ aiko.  
Mba'eta mba'emo iporãve ete va'e ma xevy guarã e'ŷ ae.

\* **130:6** Ha'e va'e jave py pytû mbukukue re tetã rarõa kuery opyta 'rã ikora áry, ngovaigua kuery ovaẽ rã oexa aguã.

- <sup>2</sup> Ha'e rami 'rāgue py akyrirī vy apytu'u 'rā xepy'a py.  
 Kyrī'i va'e nokambuvei va'e oxy jyva áry oī rive'i va'e rami ae avi  
 xekuraxō voi oī xepy'a py.
- <sup>3</sup> Israel kuery, pearō ke SENHOR,  
 aŷ guive raka'e rā peve.

*Ymave ijayvua ague*

Oguataa rupi ikuai va'e oporaei aguã.

**132**

- <sup>1</sup> SENHOR, nema'endu'a ke Davi re,  
 opa mba'e py oiko axy ramo.
- <sup>2</sup> SENHOR pe Davi onhemboayvu vy  
 Jacó "Ipo'akapa va'e" he'ia va'e pe ijayvu raka'e po rami:
- <sup>3</sup> "Xee ma akeaty py ndaikevei 'rā,  
 tupu anheno ajupyaty py ndajeupivei 'rā,
- <sup>4</sup> xerexa nambotyvei 'rā ake aguã,  
 neĩ petēgue'i nanhenovei 'rā xerexa amombytu'u aguã,
- <sup>5</sup> SENHOR oī aguã ajou e'ŷa ja,  
 Jacó Ruete Ipo'akapa va'e oī atyrā", he'i.\*
- <sup>6</sup> Nhaendu omombe'ua rā Efrata yvy re lei ryru oĩa,  
 ha'e ramo Jaar yvy re ae jajou.†
- <sup>7</sup> Ha'e gui ma jaike ke oĩaty py.  
 Nhambojerovia ipy renda renonde.
- <sup>8</sup> SENHOR, epu'ã ke, eike ejuvy repytu'u aguã py,  
 ndee ha'e hyru ndepo'akaa kuaa ukaa reve.
- <sup>9</sup> Ndevygua sacerdote kuery re toĩ teko porā,  
 ha'e ndevy ete ikuai va'e toporaei ov'y'a vy.
- <sup>10</sup> Nerembiguai Davi re nema'endu'a vy  
 ema'ẽ e'ŷ eme nerembiporavo rova re.
- <sup>11</sup> Davi pe SENHOR oura ete raka'e,  
 oayvuague gui ndaexarai 'rā guive. Aipoe'i:  
 "Nderekovia petēi ndero'o guigua ae  
 amoī 'rā tenda repenaaty py opena oiny aguã rami.
- <sup>12</sup> Xapy'a rei xereve guarā ajapo va'ekue ndero'y kuery ikuai ramo,  
 xeayvua re ambo'eague rupi guive,  
 ha'e ramo ha'e kuery ra'y kuery ju 'rā oguapy  
 tenda repenaaty py raka'e rā peve."\*
- <sup>13</sup> Mba'eta SENHOR oiporavo raka'e Sião tetā,  
 ha'e py oī riae aguã. Aipoe'i:
- <sup>14</sup> "Apy apytu'u riae 'rā raka'e rā peve,  
 apy ae 'rā apena ainy, aĩxeá py ae.
- <sup>15</sup> Ha'e py anhomongo porā 'rā tembi'u oata aguã rami e'ŷ ajou uka vy,  
 iporiaukue'i pe voi ame'ẽ reta 'rā tembi'u.
- <sup>16</sup> Ha'e pygua sacerdote kuery ma amonhemonde 'rā ajogueraa jepea kuaa ukaa py.  
 Ha'e pygua ojerovia va'e kuery ov'y'a vy oporaei 'rā okuapy.
- <sup>17</sup> Ha'e py ajapo 'rā Davi po'akakue ojekuaa jevy aguã rami.

\* **132:5** Apy ma oī Davi ouraague Nhanderuete ayvu ryru ogueru vy hendarā py porā omoī aguã re (1 Crônicas 13.1-4).

† **132:6** Jaar yvy Efrata regua yvy re Quiriate-Jearim tetā py ranhe Nhanderuete ayvu ryru opyta raka'e, Jerusalém py Davi ogueru ruka e'ŷ mbove (1 Crônicas 13.5-6). \* **132:12** 2 Samuel 7.1-17; Atos 2.30

Xerembiporavo rekovia ambou 'rã nhomoexakãarã.<sup>‡</sup>

<sup>18</sup> Hexe coroa oĩ va'e ma ipoty 'rã.

Ha'e rã hovaigua kuery re ma ambou 'rã imoximbaarã."

### *Joequa-egua peteĩ rami ikuiaia re ijayvua*

Oguataa rupi ikuai va'e oporaei aguã Davi ombopara va'ekue.

## 133

<sup>1</sup> Joequa kuery peteĩ rami ikuiaia ma  
ha'eve 'rã, iporã ete guive.

<sup>2</sup> Ha'e rami ikuiaia ma azeite hepyve va'e  
sacerdote Arão akã re onhoẽ ramo  
hendyva re oxyry ovvy vy  
ijao aju'y peve ovaẽ va'e rami.\*

<sup>3</sup> Ha'e rami ikuiaia ma Hermom yvyty gui yxapy ou va'e  
Sião yvyty ombo'yxapypa va'e rami.<sup>†</sup>  
Mba'eta ha'e py SENHOR ombou nhomoingo porãarã,  
ha'e tekove raka'e rã peve guarã.

### *Ka'aru'i jave oporaeia aguã oenoia ague*

Oguataa rupi ikuai va'e oporaei aguã.

## 134

<sup>1</sup> Peroporaei ke SENHOR, hembiguai pendekuai va'e ha'e javi,  
Pyávy SENHOR pegua opy rupi pemba'epo va'e.

<sup>2</sup> Henda iky'a e'ý va'e katy peupi ke pendepo  
SENHOR peroporaei vy.

<sup>3</sup> Sião tetã gui SENHOR yva ha'e yvy apoare  
tapendereroayvu porã.

## 135

### *Nhanderuete pe japoraei aguã regua*

<sup>1</sup> Aleluia!

Pejoraei SENHOR rery rupi,  
peroporaei SENHOR, hembiguai pendekuai va'e,

<sup>2</sup> ixupegua oo rupi pemba'epo va'e,  
Nhanderuete pegua roka rupi guive.

<sup>3</sup> Peroporaei ke SENHOR, porayvu va'e ramo.  
Pejoraei hery rupi, iporã ete ramo.

<sup>4</sup> Mba'eta ojeupe guarã SENHOR oiporavo Jacó,  
oiporavo Israel kuery oguereko aguã.

<sup>5</sup> Xee aikuua ae SENHOR yvate ete va'ea,  
mba'eta tuuete ikuai va'e áryve Nhanderuete oiko.

<sup>6</sup> SENHOR ma oipota va'e ha'e javi ojapo va'e,  
yva ha'e yvy re, ye'ë py ha'e iguýry rupi.

<sup>7</sup> Arai omopu'ã 'rã heruvy yvy apy katy gui,  
overa va'e voi oguereko katu 'rã oky aguã.

<sup>‡</sup> **132:17** Kova'e ayvu rupi ijayvu 1 Reis 11.34-36, 15.4, 2 Reis 8.19 ha'e 2 Crônicas 21.7 py. Ha'e gui "Hendy va'erã" he'ia ma huvixa raka'eve rã oiko aguã re ijayvu vy, ha'e Jesus Cristo rekorã re guive (Lucas 2.30-32; João 8.12). \* **133:2** Sacerdote-rã Arão omoña vy inhakã re omoñ raka'e azeite (Êxodo 29.1-9), Nhanderuete ojeupegua kuery omoingo porã aguã kuua ukaarã (Êxodo 29.43-46). † **133:3** Yxapy py Nhanderuete omoingo porã 'rã ha'e kuery onhoty va'ekue (Gênesis 27.28).

- Yvytu ma ojapo 'rã oĩa gui oipeju aguã rami.
- <sup>8</sup> Egito yvy re ha'e ae ojukapa va'ekue ta'y kuery jypy guare,  
avakue ha'e mymba kuery guive.
- <sup>9</sup> Ha'e py ojapo hexa pyrã ha'e nhomondyipaarã  
Faraó ha'e hembiguai kuery rovai.
- <sup>10</sup> SENHOR ma heta regua omomba va'ekue,  
huvixave ipo'akapa va'e guive ojuka.
- <sup>11</sup> Ojuka amorreu kuery ruvixa Seom  
ha'e Basã pygua huvixa Ogue,  
ha'e gui Canaã yvy regua huvixa kuery ha'e javi.
- <sup>12</sup> Ha'e gui ma ijyvykue  
ojeupegua Israel kuery pe omboaxapa.
- <sup>13</sup> SENHOR, nderery oĩ 'rã raka'e rã peve,  
raka'e rã ikuai va'e voi ima'endu'a 'rã ndere.
- <sup>14</sup> MBA'eta SENHOR ma ojeupegua kuery re oikuaa pota 'rã,  
omboaxy 'rã guembiguai kuery.\*
- <sup>15</sup> Ha'e rã yvy regua kuery ruete kuery ma  
prata ha'e ouro guigua rive, avakue ae opo py ojapo va'ekue meme.\*
- <sup>16</sup> Ijuru va'eri nda'ijayvui,  
hexa va'eri ndoexai,
- <sup>17</sup> ijapyxa va'eri noendui,  
ipytuẽ aguã voi nda'evei.
- <sup>18</sup> Ijapoare kuery ma ha'e rami ae ju 'rã ikuai,  
hexe ojerovia va'e kuery ha'e javi guive.
- <sup>19</sup> Israel ramymino kuery, penema'endu'a porã SENHOR re!  
Arão ramymino kuery, penema'endu'a porã SENHOR re!
- <sup>20</sup> Levi ramymino kuery, penema'endu'a porã SENHOR re!  
SENHOR renonde pejererokyjea rupi pendekuai va'e, penema'endu'a porã SENHOR  
re!
- <sup>21</sup> Sião tetã guive ta'ima'endu'a porãa  
SENHOR Jerusalém py oĩ va'e re.  
Aleluia!

## 136

### Nhanderuete nhomboaxy re ijayvua

- <sup>1</sup> Perovy'a ke SENHOR porayvu va'e ramo,  
mba'eta nhomboaxy opa va'erã e'ŷ.
- <sup>2</sup> Perovy'a tuuete ikuai va'e Ruete,  
mba'eta nhomboaxy opa va'erã e'ŷ.
- <sup>3</sup> Perovy'a senhor ikuai va'e SENHOR,  
mba'eta nhomboaxy opa va'erã e'ŷ.
- <sup>4</sup> Ha'e anho ojapo mba'emo porã tuvixa va'e,  
mba'eta nhomboaxy opa va'erã e'ŷ.
- <sup>5</sup> O'arandua rupi ojapo raka'e yva,\*  
mba'eta nhomboaxy opa va'erã e'ŷ.
- <sup>6</sup> Yvy avi onhono raka'e yy áry rupi,  
mba'eta nhomboaxy opa va'erã e'ŷ.
- <sup>7</sup> Ojapo raka'e omoexakã va'erã tuvixa va'e,  
mba'eta nhomboaxy opa va'erã e'ŷ.

\* 135:14 Hebreus 10.30 \* 135:15 Salmo 115.4-8 \* 136:5 Gênesis 1

- 8 Kuaray ojapo ara py ojope aguã,  
    mba'eta nhomboaxya opa va'erã e'ÿ.  
 9 Jaxy ha'e jaxy-tata ojapo avi pytû omoexakã va'erã,  
    mba'eta nhomboaxya opa va'erã e'ÿ.  
 10 Egito pygua kuery ra'y jypy guare ojukapa raka'e,\*  
    mba'eta nhomboaxya opa va'erã e'ÿ.  
 11 Ha'e vy ha'e kuery mbyte gui oipe'a Israel kuery,  
    mba'eta nhomboaxya opa va'erã e'ÿ.  
 12 Opo oupi vy oexa uka opo'akaa,  
    mba'eta nhomboaxya opa va'erã e'ÿ.  
 13 Omboja'o Ye'ẽ Pytã mokoñ'henda rupi,  
    mba'eta nhomboaxya opa va'erã e'ÿ.  
 14 Omboja'oague rupi ojapo Israel kuery oaxa aguã rami,  
    mba'eta nhomboaxya opa va'erã e'ÿ.  
 15 Ha'e gui ye'ẽ py omoinge Faraó, oxondaro kuery ha'e javi reve,  
    mba'eta nhomboaxya opa va'erã e'ÿ.  
 16 Tekoa e'ÿa rupi ogueroguata heravy ojeupeguia kuery,  
    mba'eta nhomboaxya opa va'erã e'ÿ.  
 17 Ojuka huvixave kuery ipo'akapa va'ekue,†  
    mba'eta nhomboaxya opa va'erã e'ÿ.  
 18 Huvixave omboetevepy ojuka,  
    mba'eta nhomboaxya opa va'erã e'ÿ.  
 19 Ojuka amorreu kuery ruvixa Seom,  
    mba'eta nhomboaxya opa va'erã e'ÿ.  
 20 Ojuka avi Basã pygua kuery huvixa Ogue,  
    mba'eta nhomboaxya opa va'erã e'ÿ.  
 21 Ha'e kuery yvykue omboaxa ojeupeguia kuery pe,  
    mba'eta nhomboaxya opa va'erã e'ÿ.  
 22 Guembiguai Israel kuery yvyrã ome'ẽ,  
    mba'eta nhomboaxya opa va'erã e'ÿ.  
 23 Nanhanembaraetevei ramo ima'endu'a nhandere,  
    mba'eta nhomboaxya opa va'erã e'ÿ.  
 24 Ha'e vy nhanderovaigua kuery po gui nhandereraa jepe,  
    mba'eta nhomboaxya opa va'erã e'ÿ.  
 25 Guemimoingo kuery ha'e javi pe ojou uka 'rã ho'u va'erã,  
    mba'eta nhomboaxya opa va'erã e'ÿ.  
 26 Peroporaei ke Nhanderuete yva regua,  
    mba'eta nhomboaxya opa va'erã e'ÿ.

## 137

### *Guetã oexa nga'ua rupi ijayvuague*

- 1 Babilônia tetã py yakã oĩ va'e yvýry roguapy roinya py  
    rojae'o va'ekue Jerusalém tetã re orema'endu'a vy.\*  
 2 Oremba'epu ixã reta va'e roupi imoiny va'ekue  
    ha'e py yvyrá ikuai va'e rakã re.  
 3 Mba'eta escravo-rã orereraa are kuery ojerure roporaei aguã.  
    “Peporaei na orevy Sião regua mboraei”, he'i okuapy.

\* **136:10** Egito gui ogueraa jepeague omombe'u Éxodo 12-14 py. † **136:17** Huvixave ojukaague omombe'u Números 21 py. \* **137:1** Babilônia pygua kuery ma oipe'a raka'e Jerusalém tetã, ha'e guembiguairã ogueraa ha'e pygua judeu kuery regua.

- <sup>4</sup> Ha'e gui mba'exa 'rã tu roporaei mboraei SENHOR pegua  
yvy mboae re orekuai vy?  
<sup>5</sup> Mba'eta ndee Jerusalém tetã gui xerexarai ri ramo  
xepo aiporu kuaa regua ta'ipirupa.  
<sup>6</sup> Xeapekũ tojapa xejuru py re  
xapy'a rei ndere naxema'endu'avei rã,  
e'ŷ vy Jerusalém gui mba'emo arov'y'ave ramo.  
<sup>7</sup> SENHOR, nema'endu'a ke Edom pygua kuery rembopaga aguã  
Jerusalém tetã oitya jave ikuaiague re.<sup>†</sup>  
Mba'eta ha'e kuery ma  
“Peitypa ke, peitypa yvy katy peve!” he'i okuapy va'ekue.  
<sup>8</sup> Babilônia tetã pygua kuery, peneretã voi ombovaipa pyrã oĩ.  
Ovy'a ete 'rã orere pejapoague re penembopaga va'e.<sup>‡</sup>  
<sup>9</sup> Ovy'a 'rã penda'y kuery voi ojopy vy  
ita re omou'ũmba avi va'e.

*Nhanderuete ojeroviapy oikoa jarovy'a aguã regua*  
Mboraeirã Davi ombopara va'ekue.

## 138

- <sup>1</sup> SENHOR, xee roguerovy'a 'rã xepy'a ha'e javi py.  
Ipo'akakueve oendua py rogueroporai 'rã.  
<sup>2</sup> Ndevygua templo iky'a e'ŷ va'e oĩa katy ama'ẽ reve  
aĩ 'rã xerenapy'ã re nderery aroporaei aguã,  
ndeporayvu ha'e nderekro porã va'e ramo.  
Mba'eta opa mba'e gui rembovateve nderery ha'e ndeayvu.  
<sup>3</sup> Mba'eta ndevy pe ajapukai ramo xerepy,  
xembopy'a guaxu vy xemombaraeleteve guive.  
<sup>4</sup> SENHOR, yvy regua huvixave kuery ha'e javi oporaei 'rã okuapy ndevy,  
ndejuru gui ndeayvua oendu vy.  
<sup>5</sup> Ogueroporaei 'rã SENHOR reko,  
SENHOR rexakãa tuvixa ete ramo.  
<sup>6</sup> SENHOR ma yvate ete va'eri  
yvỹgue'i re oma'ẽ avi 'rã.  
Ojejou porã rei va'e kuery ha'e oikuaa mombyry gui tẽ.  
<sup>7</sup> Xee ajexavai aikovy ramo  
rembopyau 'rã xerekovea.  
Ndepo reupi 'rã xerovaigua kuery poxya káuxa.  
Reiporu kuaa regua py xereraa jepe 'rã.  
<sup>8</sup> Xevy pe SENHOR ojapo 'rã ojapo 'rã va'ekue ha'e javi.  
SENHOR, renhomboaxya ma opa va'erã e'ŷ.  
Eja eme ndepo py ae remoingo va'ekue.

*Nhanderuete oikuaapa ha'e ipo'akapa va'ea re ijayvua*  
Jogueroporaei va'e pe mboraeirã Davi ombopara va'ekue.

## 139

- <sup>1</sup> SENHOR, ndee ma xere reikuaa pota vy xekuaa porã va'e.  
<sup>2</sup> Reikuaa 'rã aguapy ha'e apu'ã ju rã.

<sup>†</sup> 137:7 Jerusalém tetã re Babilônia pygua kuery ipo'aka rã Edom pygua kuery oexa vy ovy'a rei okuapy, judeu kuery regua rai tẽ (Obadias 8-14).    <sup>‡</sup> 137:8 Babilônia pygua kuery ombopaga aguã re Apocalipse 18 py ijayvu.

- Mombyry gui teĩ reikuua xepy'a re oĩ va'e ha'e javi.
- <sup>3</sup> Aguata ha'e anheno ramo ndee xerexa 'rã.  
Reikuaapa 'rã aikoa ha'e javi.
- <sup>4</sup> Xeayvu aguã xejuru py oĩ e'ŷ mbove voi  
ndee SENHOR reikuaapa 'rã.
- <sup>5</sup> Xejoko 'rã xerakykue ha'e xerenonde katy,  
xere ndepo remoĩ vy.
- <sup>6</sup> Ha'e rami xekuaapaa ma iporã ete xevy.  
Yvate ete rã ndaikuuaai 'rãe.\*
- <sup>7</sup> Marã katy nda'u anhemombyry 'rãgue Nenhe'ẽ gui?  
Marã katy nda'u ajava 'rãgue rexaa gui?
- <sup>8</sup> Yva re aa teĩ ha'e py ndee reĩ 'rãgue.  
Yvykua vaikuevea py anhemboupa teĩ ha'e py voi reĩ 'rãgue.
- <sup>9</sup> Kuaray oẽa katy aveve avy vy  
ye'ẽ apy peve aa teĩ
- <sup>10</sup> ha'e py voi ndepo xererekoo 'rãgue,  
reiporu kuaa regua xemombaraete 'rãgue.
- <sup>11</sup> Xee aipoa'e ramo: "Pytũ xeao'i 'rã,  
hexakã xeyvýry rupigua pytũmba 'rã' ha'e teĩ
- <sup>12</sup> ndevy pe pytûvea ete voi napytûi 'rãgue,  
mba'eta ndevy pe pytû ha'e hexakãa ma joo rami meme.
- <sup>13</sup> Mba'eta ndee ma xepy'a apoare,  
xexy rye py xemoingo va'ekue.
- <sup>14</sup> Xee roguerovy'a, anhemondyi aguã rami xeapo rire.  
Nerembiapokue ma iporã ete va'e meme.  
Ha'e rami aikuaa porã xepy'a py.
- <sup>15</sup> Xekãgue nderejao'i teri jave hi'ã py xeapo,  
ha'e gui xembotuvixa'i imoiny yvy guy py rami.
- <sup>16</sup> Naxeratãi teri jave ndee ma xerexa.  
Ndekuaxia re ipara ma voi xee aiko aguã ára ha'e javi,  
peteĩ-teĩ ipara oiny peteĩve oiko e'ŷ mbove ma voi.
- <sup>17</sup> Xeruete, renhembopy'aa ma iporã ete xevy.  
Mbovy rei e'ŷ oĩ.
- <sup>18</sup> Xee aipapa va'e rire ita ku'i gui hetave 'rãgue.  
Aipapa, aipapa teĩ ndaipapapai 'rãgue.
- <sup>19</sup> Xeruete, remomba voi 'rãgue heko vai va'e!  
Avakue tuguy moẽa, pejepe'apa xea gui!
- <sup>20</sup> Ha'e kuery ma ndere opu'ã rei okuapy,  
nderovaigua kuery ijayvu vaikue-ikue 'rã.
- <sup>21</sup> SENHOR, xee ajou vai ndejou vaia kuery.  
Ndere opu'ã rei va'e kuery gui xee ajeguaru.
- <sup>22</sup> Ha'e kuery re ndaxe'aeveia oĩmba,  
nderovaigua kuery ete ikuiaia aikuaa.
- <sup>23</sup> Xeruete, xerexa pota,  
ha'e eikuaapa xepy'a re oĩ va'e.  
Xera'anga, ha'e eikuaa anhembopy'aa ha'e javi.
- <sup>24</sup> Exa xere pa oĩ ha'eve'ŷa rami aikoa,  
ha'e xererekoo tape imarã e'ŷ va'e rupi.

---

\* **139:6** Romanos 11.33

*Ngovaigua kuery apu gui oo jepe aguã ojerureague*  
Jogueroporaei va'e pe mboraeirã Davi ombopara va'ekue.

**140**

- 1 SENHOR, xereraa jepe ke heko vai va'e gui.  
Xerepy avakue ojerovia rei va'e gui.
- 2 Ha'e kuery ma mba'emo vai anho opy'a re omoõ.  
Joguero'axea rupi rive ikuai.
- 3 Mboi rami oaĩmbe'e 'rã oapekũ,  
ijayvua ma mboi guigua veneno rami ae.\*
- 4 SENHOR, xerepy ke heko vai va'e po gui,  
xereraa jepe avakue ojerovia rei va'e gui,  
xembojepekuavo aguã re onhea'ã okuapy va'e kuery gui.
- 5 Ojejou porã rei va'e kuery ma nhemi rupi omoõ 'rã nhuã xã xembo'a aguã,  
tape yvýry oipyo 'rã xembo'aarã.  
Omoõ 'rã nhuã xembo'a aguã.
- 6 Aipoa'e SENHOR pe: "Ndee ma Xeruete."  
SENHOR, ajerure ramo xepytyvõ ke.
- 7 SENHOR xereraa jepea ndepo'akapa va'e,  
joe opu'ãa ára py ndee xeakã rejao'i.
- 8 SENHOR, emoingo eme heko vai va'e oipota va'e.  
Eja eme joapo vaixea rupi ikuai aguã rami.
- 9 Xejokopa rei va'e kuery onhemboyvate ri ramo  
ejapo ha'e kuery re ae ju ijayvu vaiague ojeapa aguã rami.
- 10 Ha'e kuery áry tou tapyã, tomomboa tata py.  
Yvykua vaikue py tomomboa, opu'ã ve'ŷ aguã py.
- 11 Joe ijayvu rei va'e toĩ atã eme yvy re.  
Teko vai toakykue monha avakue ojerovia rei va'e, omomba peve.
- 12 Xee aikuua SENHOR oepy 'rãa iporiaukue'i,  
opena 'rã oikotevẽ rei'i va'e kuery re.
- 13 Ha'e ramo heko porã va'e kuery oguerovy'a 'rã nderery,  
anhetẽ rupi ipy'a va'e ikuai 'rã nerенонde.

*Ka'aru'i jave oiky'a'o ha'e oipytyvõ aguã re ojerureague*  
Mboraeirã Davi ombopara va'ekue.

**141**

- 1 SENHOR, ndevy ae ajapukai.  
Eju pojava ke xepytyvõ!  
Ndevy pe ajapukai ramo endu.
- 2 Ajerurea toẽ ndea py heakuã porã va'e rami.\*  
Xepo aupia toĩ ka'aru'i jave ome'êmby rami.
- 3 SENHOR, ejoko xejuru,  
earõ xeayvua rokê.
- 4 Ajapo vaixea toĩ eme xepy'a re,  
teko vai rupi aiko e'ŷ aguã  
avakue joapo vai va'e ikuiaia rupi e'ŷ,  
ha'e kuery okaru okuapya py xee voi akaru e'ŷ aguã.
- 5 Xevy pe heko porã va'e ijayvu ete teĩ ajou porã 'rã.  
Xevy rã ijayvu okuapya ma azeite xeakã re omoña rami.

\* 140:3 Romanos 3.13 \* 141:2 Apocalipse 5.8

- Xee ma naendu e'ŷi 'rã.  
 Heko vai va'e jajapo vai okuapy teĩ xee anhembo'e 'rã.
- <sup>6</sup> Ha'e kuery rerekoa kuery omombopaa 'rã itaova guy katy.  
 Ha'e kuery oendu 'rã ha'evea rami xeayvua anho,
- <sup>7</sup> xerupa gui xekāgue oipe'a vy ijyvýry rupi omoaĩmba teĩ,  
 yvy oikaraĩague rupi rive.
- <sup>8</sup> Mba'eta SENHOR, ndere ae ama'ẽ aikovy.  
 Ndere ae ajerovia va'e.  
 Ejá eme xerekovea.
- <sup>9</sup> Xereraa jepe ke heko vai va'e kuery  
 nhuã xã xembo'aarã omoĩ va'ekue gui.
- <sup>10</sup> Heko vai va'e ae to'a nhuã omoĩ va'ekue py,  
 ha'e rã xee ma aikove reve taa jepe.

*Ijava etea py ojerureague*

Itakua py Davi oĩ jave py onhembo'eague ombopara va'ekue nhombo'e aguã (1 Samuel 24).

**142**

- <sup>1</sup> SENHOR pe ajapukai, xeayvu ainy.  
 Ajapukai vy xepytyvõ aguã re ajerure.
- <sup>2</sup> Ixupe amombe'upa ndavy'aia,  
 henonde amombe'upa ajexavaia.
- <sup>3</sup> Xee nanhanimavei ma aikovy ramo  
 ndee reikuua 'rã aikoa ha'e javi.  
 Tape aguata aguã rupi xerovaigua kuery omoĩ 'rã nhuã.
- <sup>4</sup> Ema'ẽ na aiporu kuaa regua re, ha'e exa pota,  
 mba'eta avave rei ndoikoi xerexa kuaa va'e.  
 Jipoi anhemi aguã,  
 xere avave rei noma'ẽ potai guive.
- <sup>5</sup> SENHOR, ndevy pe ae ajapukai.  
 Ha'e vy aipoa'e: "Ndee ae anhemiatiy.  
 Xevy guarã ndee anho reiko ko yvy re aikoa py."
- <sup>6</sup> Endu ke ajapukaia,  
 xekangy vaipa ete ramo.  
 Xereraa jepe xerakykue monha va'e kuery gui,  
 xegui ha'e kuery imbaraeteve ramo.
- <sup>7</sup> Enoẽ xerekovea nhuã gui,  
 nderery rupi arov'y'a aguã.  
 Heko porã va'e kuery oupa 'rã xeyvýry,  
 xevy pe ha'e rami rejapo porã rire.

*Ogueraa jepe aguã ojerureague*

Mboraеirã Davi ombopara va'ekue.

**143**

- <sup>1</sup> SENHOR, endu ke anhembo'ea.  
 Ejapyxaka ajerurea re.  
 Xembovai ke, ojeroviapy ha'e heko porã va'e reiko vy.
- <sup>2</sup> Nerembiguai aiko ramo xemboayvu eme,  
 mba'eta nerentonde heko porã ete va'e ndoikoi.\*

\* 143:2 Romanos 3.20; Gálatas 2.16

- <sup>3</sup> Ha'e gui xerovaigua kuery ma xerakykue monha,  
yvy rupi xereity vy xere opyrõmba.  
Xemoï pytña py,  
yma ete ma omano va'ekue rami.
- <sup>4</sup> Ha'e nunga rupi xenhe'ẽ nonhanimavei,  
xepy'a eta rei ma guive.
- <sup>5</sup> Xema'endu'a teĩ yma guare re.  
Aikuaa pota aikovy nerembiapokue ha'e javi re,  
xema'endu'a ndepo py rejapo va'ekue re.
- <sup>6</sup> Ha'e nunga rupi xepo audi ndevy.  
Xenhe'ẽ nda'evei ndere, yvy ipiru reia rami.
- <sup>7</sup> SENHOR, xembovai voi ke,  
mba'eta xenhe'ẽ py nanhanimavei ma.  
Ejexa uka e'ŷ eme xevy,  
omanogue rupa py oguejy va'e rami apyta e'ŷ aguã.
- <sup>8</sup> Ndere ajerovia ramo  
aje'ive reve taendu ndegui xemboaxya.  
Ndere xenhe'ẽ aroma'endu'a ramo  
exa uka tape aguata aguã va'e.
- <sup>9</sup> SENHOR, xereraa jepe ke xerovaigua kuery gui,  
mba'eta ndee ma anhemiaty.
- <sup>10</sup> Xembo'e ke ndee reipotaa rupi aiko aguã,  
mba'eta ndee ae Xeruete.  
Nenhe'ẽ Porã taxererekoo  
yvy joja porãa rupi.
- <sup>11</sup> SENHOR, nderery re vy xemoingove.  
Ha'evea rami rejoguerekoo rupi  
eipe'a xenhe'ẽ ojexavaia gui.
- <sup>12</sup> Xemboaxya rupi emokanhymba xerovaigua kuery.  
Emomba ke xenhe'ẽ mbojexavaia kuery ha'e javi,  
nerembiguai aiko ramo.

*Nhanderuete oepy rire oguerovy'aa ague*  
Mboraerâ Davi ombopara va'ekue.

## 144

- <sup>1</sup> Ima'endu'a porãmby toiko SENHOR xe'itaova.  
Ha'e ma omombaraete 'rã xepo joe apu'ã aguã,  
xekuã voi ombo'e 'rã joe apu'ã aguã.
- <sup>2</sup> Ha'e ma xemboaxya ha'e oo ikorapa va'e aĩ aguã,  
anhemiaty yvate va'e ha'e xereraa jepea,  
mba'emo vai jokoa oiko ramo ajerovia hexe.  
Ha'e ojapo xeretarã kuery apenaa rupi ikuai aguã rami.
- <sup>3</sup> SENHOR, marã ramigua tu avakue, ha'e kuery re reikuaa pota aguã?  
Marã ramigua tu avakue ra'y kuery, reayvu aguã?\*
- <sup>4</sup> Mba'eta avakue ma yvytu rami rive ikuai.  
Oikovea ára ma kuaray'ã rami 'rã oaxa ov yva'e.
- <sup>5</sup> SENHOR, eipe'a ke yva, ha'e eguejy.  
Epoko yvyty re, ha'e ramo oẽ 'rã hataxi.
- <sup>6</sup> Embou overa va'e xerovaigua kuery moaõmbaarã.

---

\* **144:3** Salmo 8.4

- Emombo nderu'y omondyipa aguã.
- <sup>7</sup> Ekuave'ẽ yvate gui,  
xereraa jepe ha'e xerenoẽ yy typa gui,  
amboae regua kuery po'akaa gui ae.
- <sup>8</sup> Ha'e kuery ojuru gui apu rupi anho 'rã ijayvu,  
ha'e oiporu kuaa regua py anhetẽ va'e'ỹ 'rã ojapo.
- <sup>9</sup> Xeruete, ndevy pe amonhendu 'rã mboraei pyau.  
Mbaraka dez ixã va'e ambopu vy rogueroporaei 'rã.
- <sup>10</sup> SENHOR ojapo 'rã huvixa kuery ipo'aka aguã rami.  
Guembiguai Davi ogueraa jepe 'rã kyxo jojukaa gui.
- <sup>11</sup> Xereraa jepe ke, xepe'a amboae regua po'akaa gui.  
Ha'e kuery ojuru gui apu rupi anho 'rã ijayvu,  
ha'e oiporu kuaa regua py anhetẽ va'e'ỹ 'rã ojapo.
- <sup>12</sup> Orera'y kuery ipyau va'e ta'ikuai mba'emo rogue iporã va'e rami,  
ha'e orerajy kuery ta'ikuai ita oo ytarã rami,  
huvixave ro reguarã ombojegua pyre rami.
- <sup>13</sup> Oreroguy tatynyẽ romono'õ va'ekue,  
opa marãgua tembi'u toĩ.  
Orerymba kuery vexa'i taetave tovy,  
oreyvy rupi mbovy rei e'ỹ tata'y.
- <sup>14</sup> Orerymba vaka voi ta'imbaraete,  
toity eme gua'y'i, ta'ikuai porã e'ỹ eme guive.  
Oreretã mbyte rupi tonhendu eme ipy'a vaia rupi ojae'o va'e.
- <sup>15</sup> Ovy'a ete 'rã ha'e rami ikuai va'e kuery.  
Tá, ovy'a ete 'rã SENHOR pe "Nhanderuete" he'i okuapy va'e.

*Nhanderuete porayvu, yvate ete ha'e opena porãa re ijayvua*  
Ogueroporaeia rupi Davi ombopara va'ekue.

## 145

- <sup>1</sup> Xeruete xeruvixave, xee romboete 'rã.  
Raka'e rã peve rogueroporaei 'rã nderery rupi.
- <sup>2</sup> Ko'ẽ nhavõ roguerovy'a 'rã,  
nderery rogueroporaei 'rã raka'e rã peve.
- <sup>3</sup> SENHOR yvate ete ramo ha'evea rami jaroporaei.  
Yvate etea ma jaikuaapa va'erã e'ỹ.
- <sup>4</sup> Tuu kuery voi gua'y kuery oendua py ogueroporaei 'rã nerembiapo,  
omombe'upa 'rã ndepo'akaa rupi rejapo va'ekue.
- <sup>5</sup> Aikuua pota 'rã ndeyvate etea ha'e nerexakãa re,  
mba'emo porã rejapo va'ekue re guive.
- <sup>6</sup> Ijayvua 'rã okuapy ndepo'akaa rupi rejapo va'ekue re,  
xee voi amombe'u 'rã ndeyvatea.
- <sup>7</sup> Nhomoma'endu'aa 'rã ndeporayvu etea re,  
ovy'aa rupi ogueroporaeia 'rã nderekoo porãa.
- <sup>8</sup> SENHOR ma porayvu ha'e nhomboaxy kuaa va'e.  
Nda'ivai voi kuaai, nhomboaxy aguã oĩ riae va'e.
- <sup>9</sup> Pavẽ pe SENHOR oexa uka 'rã mborayvu,  
nhomboaxya rupi opena porã 'rã guemimoingo kuery ha'e javi re.
- <sup>10</sup> SENHOR, remoingo va'ekue ha'e javi ndereroporaei 'rã.  
Ndevygua iky'a e'ỹ va'e kuery voi ndererovy'a ete 'rã okuapy.
- <sup>11</sup> Ijayvu 'rã ndepo'akaa rupi nerexakãa ojekuaa va'e re,

omombe'u porã 'rã ndepo'akaa,  
 12 avakue ra'y kuery oikuua aguã ndepo'akaa rupi rejapo va'ekue,  
     ha'e repenaa rupi ndeyvatea ha'e nerexakãa ojekuaa va'e.  
 13 Ndepo'akaa ma raka'e rã peve guarã,  
     ndee ma huvixave riae 'rã reĩ, ikuai jevy va'e peve.  
 SENHOR ijayvua ha'e javi py ojeroviapy oiko,  
     ojapo va'e ha'e javi py oexa uka 'rã iky'a e'ŷ va'ea.  
 14 SENHOR oipytyvõ 'rã ikangy va'e ha'e javi,  
     omopu'ãmba ju 'rã ho'a va'ekue.  
 15 Ndere anho pavẽ oma'ẽ 'rã okuapy  
     hi'ára py porã ho'u va'erã rejou uka aguã oarõ vy.  
 16 Ndepo reipe'a vy  
     neremimoingo ha'e javi pe reme'ẽ 'rã oikotevẽ va'e.  
 17 SENHOR ha'evea rami nhandererek oikoa ha'e javi py,  
     opa mba'e ojapoa py oexa uka 'rã oporayvua.  
 18 Ixupe ojapukai va'e ha'e javi yvýry onhemoi 'rã,  
     anhetẽ ete rupi ojapukai ramo.  
 19 Henonde ojererokyjea rupi ikuai va'e pe ojapo 'rã oipota va'e.  
     Ojapukaia oendu vy ogueraa jepe 'rã.  
 20 SENHOR opena porã 'rã oayvu va'e kuery re.  
     Ha'e rã heko vai va'e ma omomba 'rã.  
 21 Xejuru py taroporaei SENHOR.  
     Temimoingo kuery ha'e javi togueroporaei hery iky'a e'ŷ va'e rupi, raka'e rã peve.

## 146

### *Nhanderuete ojeroviapy oikoa re ijayvua*

<sup>1</sup> Aleluia!  
     Xenhe'ẽ, eroporaei ke SENHOR.  
<sup>2</sup> Xee aikovea pukukue re aroporaei 'rã.  
     Xeruete pe aporaei 'rã aikovea ja.  
<sup>3</sup> Pejerovia eme huvixa ikuai va'e re rive.  
     Pejerovia eme avakue ra'y kuery ikuai va'e re,  
     mba'eta ha'e kuery re noĩ jogueraa jepe aguã.  
<sup>4</sup> Ha'e kuery nhe'ẽ oẽ ramo yvy ku'i ju 'rã optyta.  
     Ha'e va'e árave opa 'rã ojapo 'rã va'ekue ha'e javi.  
<sup>5</sup> Ovy'a ete 'rã Jacó Ruete pe "Xepytyvõa" he'i va'e,  
     SENHOR Nguuete oarõ va'e.  
<sup>6</sup> Ha'e ae yva ha'e yvy apoare,  
     ye'ẽ ha'e opa mba'e hexe ikuai va'e guive.  
     Raka'e rã peve oiko 'rã ojeroviapy.\*  
<sup>7</sup> Ha'evea rami oikuua pota 'rã ombojexavaia va'e kuery re,  
     ha'e okaruxe va'e pe ma ome'ẽ 'rã tembi'u.  
 SENHOR oguenoẽmba 'rã nhuã py ikuai va'ekue.  
<sup>8</sup> SENHOR oipe'a 'rã ára revegua e'ŷ va'ekue rexia.  
     SENHOR omopu'ã 'rã omo'yvyi' mbyre.  
     SENHOR oayvu 'rã heko porã va'e.  
<sup>9</sup> SENHOR opena porã 'rã oyvy rupi e'ŷ oguata va'e re.  
     Oipytyvõ 'rã imeve'ŷ va'e ha'e tyre'ŷ kuery.  
     Ha'e rã heko vai va'e ikuiaia ma ombovaipa 'rã.

\* **146:6** Atos 4.24, 14.15

<sup>10</sup> SENHOR oĩ 'rã huvixave raka'e rã peve.

Sião pygua kuery, Penderuete ipo'aka 'rã aŷ guive raka'e rã peve.  
Aleluia!

## 147

### *Nhanderuete ipo'akapa va'e ogueroporaiae*

<sup>1</sup> Peporaei SENHOR pe!

Ha'eve ha'e iporã ete Nhanderuete pe japoraeia.  
Jaroporaeia ma iporã ixupe voi.

<sup>2</sup> SENHOR omoatyrõ ju Jerusalém tetã,

oguerupa ju Israel kuery omoaĩmba pyre.

<sup>3</sup> Omonguerapa 'rã opy'a py ikangy va'e,  
ijai oipoanomba 'rã guive.

<sup>4</sup> Oipapa jaxy-tata ikuai va'e,  
peteĩ-teĩ hery rupi 'rã oenoĩ.

<sup>5</sup> Nhande-Senhor ma yvate ete ha'e ipo'akapa va'e.  
Hi'arandua ndajaikuaapai 'rã.

<sup>6</sup> SENHOR ma yvȳigue'i repya oiko,  
ha'e rã heko vai va'e ma omombo 'rã yvy rupi.

<sup>7</sup> Peporaei SENHOR pe perovy'aa rupi.  
Mba'epu ixã reta va'e py pembojoguy vy peporaei Nhanderuete pe.

<sup>8</sup> Ha'e ma yva onhovã 'rã arai py.

Oky oguereko katu yvy re guarã.  
Yvyty ikuai va'e re ojapo mba'emo henhoĩ aguã rami.

<sup>9</sup> Mymba kuery pe ome'ẽ 'rã ho'u va'erã,  
uruvu ra'y kuery pe guive, ojapukai ramo.

<sup>10</sup> Ha'e ma kavaju mbaraetea oguerovy'a va'e'ŷ,  
neĩ xondaro mbaraetea e'ŷ guive.

<sup>11</sup> SENHOR oguerovy'a 'rã henonde ojererokyjea rupi ikuai va'e,  
ha'e nhomboaxya oarõ okuapy va'e anho.

<sup>12</sup> Jerusalém pygua kuery, peroporaei ke SENHOR!  
Sião tetã pygua, peroporaei Penderuete!

<sup>13</sup> Mba'eta peneretã mbyte rupi omoĩ atãve ikora rokẽ jokoa,  
ha'e penda'y kuery omoingo porã 'rã.

<sup>14</sup> Pendeyvy katy rai'i rupi ikuai va'e reve omoĩ pendekuai porã aguã,  
ha'e trigo iporãve va'e re penemongaru.

<sup>15</sup> Yvy rupi ha'e oikuua uka 'rã ojapo uka va'e,  
ijayvua ojekuua pojava 'rã ovy.

<sup>16</sup> Vexa'i rague rami ombou 'rã yro'y apĩ,  
yro'y xiĩ voi omoaĩ 'rã tanhimbu rami.

<sup>17</sup> Yro'y hatã va'e ha'e omombo 'rã ikurekue rami.  
Mava'e nda'u ogueropo'aka 'rã yro'y ombou rã?

<sup>18</sup> Ha'e gui ma oayvu ombou ramo tykupa ju 'rã.  
Yvytu oipeju aguã rami ojapo ramo  
yy oxyry 'rã.

<sup>19</sup> Oayvu oikuua uka Jacó kuery pe,  
ojeguigua lei ha'e nhombo'ea oeja Israel kuery pe.

<sup>20</sup> Ha'e ramigua ma amboae regua pe ma ndoejai.  
Amboae kuery ma nhombo'ea ndoikuuaai okuapy.  
Aleluia!

## 148

*Pavē ogueroporaei aguā regua*

- <sup>1</sup> Aleluia!  
Peroporaei SENHOR yva áryve rupi,  
peroporaei yvate etea rupi!
- <sup>2</sup> Ixupegua anjo kuery ha'e javi, peroporaei pekuapy.  
Ixondaro kuery yva regua ha'e javi, peroporaei pekuapy!
- <sup>3</sup> Kuaray ha'e jaxy, peroporaei pekuapy!  
Jaxy-tata hendy va'e ha'e javi, peroporaei pekuapy!
- <sup>4</sup> Yva yvatevea rupi oĩ va'e, eroporaei avi,  
yva áry yy ikuai va'e voi.
- <sup>5</sup> Togueroporaei okuapy SENHOR rery!  
Mba'eta ha'e ijayvu ramo opa mba'e oiko raka'e.
- <sup>6</sup> Omoĩ atā guive raka'e rā peve guarã.  
Ha'e kuery ikuai aguā oeja va'ekue oaxa va'erā e'ŷ.
- <sup>7</sup> Yvy re pendekuai va'e, peroporaei SENHOR,  
ypo tuvixa va'e ha'e typya regua ha'e javi!
- <sup>8</sup> Onhemboxi va'e ha'e amandau,  
yro'y apĩ ha'e yvy rataxĩ,  
yvytu atā onhe'ẽ rendu va'e,
- <sup>9</sup> yvyty ha'e yvy'ã'i ikuai va'e,  
yvyra hi'a va'e ha'e yary ikuai va'e,
- <sup>10</sup> mymba inharõ va'e ha'e vaka kuery,  
yvy rupi otyryry ha'e guyra'i oveve va'e,
- <sup>11</sup> yvy regua huvixave kuery, ha'e javi regua guive,  
yvatekueve ha'e yvy regua joe oikuaa pota va'e kuery ha'e javi,
- <sup>12</sup> kunumigue ha'e kunhataĩgue,  
kakuakueve'i va'e ha'e kyrīgue.
- <sup>13</sup> Togueroporaei okuapy SENHOR rery,  
mba'eta hery anho yvateve va'e.  
Hexakāa ma yvy ha'e yva áryve rupi oĩ.
- <sup>14</sup> Ombopo'akave ojeupagua kuery,  
ixupegua iky'a e'ŷ va'e kuery ha'e javi ogueroporaei aguā,  
hembiajvu Israel kuery regua guive.  
Aleluia!

## 149

*Nhanderuete re ojerovia va'e kuery ogueroporaei aguā regua*

- <sup>1</sup> Aleluia!  
Pemonhendu SENHOR pe mboraei pyau!  
Peroporaei ixupegua kuery iky'a e'ŷ va'e ijatya py.
- <sup>2</sup> Israel kuery toguerovy'a imoingoare.  
Sião pygua kuery toguerovy'a nguvixave.
- <sup>3</sup> Peroporaei hery mimby pemonhe'ẽ reve.  
Ixupe peporaei salmos, pandeiro ha'e mba'epu ixã reta va'e pembojoguy vy.
- <sup>4</sup> Mba'eta SENHOR oguerovy'a ojeupagua kuery.  
Yvyīgue'i re omoĩ oo jepe aguā.
- <sup>5</sup> Ixupegua kuery iky'a e'ŷ va'e toguerovy'a hexakāa.  
Ovy'aa rupi toporaei ngupa py.
- <sup>6</sup> Ha'e kuery juru py toĩ Nhanderuete pe oporaei atā aguā,

ha'e ipo py ma toĩ kyxé haimbe jovai va'e,  
 7 yvy regua kuery ikuiaia rupi nhombopaga aguã,  
     amboae regua ombopaga aguã,  
 8 huvinave kuery corrente py oipokua aguã,  
     ha'e yvatekueve ferro guigua py  
 9 ha'e kuery ombopaga aguã ayvu ombopara pyre rami vy,  
     ixupegua kuery iky'a e'ŷ va'e ha'e javi omboetea aguã.  
 Aleluia!

## 150

### *Oguerovy'aa opa vygua*

- 1 Aleluia!  
     Peroporaei Nhanderuete, ixupegua henda iky'a e'ŷ va'e py!  
     Peroporaei yvate ipo'akaa oĩa rupi!
- 2 Peroporaei opo'akaa rupi ojapo va'ekue re!  
     Peroporaei, yvate ete va'e ramo!
- 3 Peroporaei mimby guaxu pu rupi!  
     Peroporaei mbaraka ha'e mba'epu ixã reta va'e reve!
- 4 Peroporaei pandeiro py ha'e pejeroky reve!  
     Peroporaei mba'epu ixã va'e ha'e mimby reve!
- 5 Peroporaei hy'a pu reve!  
     Peroporaei hy'a pu onhendu ratãve va'e reve!
- 6 Ipytuẽ va'e ha'e javi togueroporaei SENHOR!  
     Aleluia!

**'Arandu regua ayvu Provérbios Salomão omombe'u  
va'ekue oĩa**  
**'Arandu regua ayvu provérbios Salomão omombe'u  
va'ekue oĩa\***

Avakue ma opa marāgua re oikuua pota 'rã oikuaaxe vy. "Ha'e rã 'arandua ma mamo tu oĩ? Mamo tu oĩ mba'emo jaikuua ete aguã?" (Jó 28.12). Kova'e kuaxia para re ma ombovaia: "Senhor renonde jajererokyjea rupi jaiko vy 'rãe jaupity 'arandua, Iky'a e'ŷ va'e jaikuua vy 'rãe jaiko kuaa" (9.10).

Huvixa Salomão pe ma Nhanderuete ome'ẽ raka'e pavẽ gui hi'aranduve aguã. Salomão ae ombopara va'ekue 'arandu regua ayvu kova'e kuaxia re oĩ va'e. Amongue henda py ete'i amboae kuery ombopara avi va'ekue. Ha'e va'e regua ayvu ma ijapu'a'i meme, nhanderexarai e'ŷ aguã.

Kova'e kuaxia para re ma avakue 'arandua rive'ŷ oĩ, Nhanderuete guigua anho. Ha'e vy "yvate guigua 'arandua ma jypy'i nhandeapo 'rã nhanderek ky'a e'ŷ aguã rami, ha'e gui nanhandevai rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhanderek porã merami rivei 'rã guive" (Tiago 3.17).

*Mba'erã pa 'arandu regua ayvu omombe'uague*

- <sup>1</sup> 'Arandu regua ayvu Davi ra'y Salomão Israel pygua huvixave va'e omombe'u va'ekue,
- <sup>2</sup> jaikuua porã aguã 'arandua ha'e nhanembo'eague,  
jaikuua avi aguã hi'arandu va'e kuery ijayvua,
- <sup>3</sup> ha'e nhanembo'ea nhaendu vy 'arandua rupi jaiko aguã,  
teko porã rupi jaiko vy jaikuua pota, ha'e joo-joo'i rami jajoguereko aguã,
- <sup>4</sup> hi'arandu e'ŷ'i va'e kuery nhamo'arandu kuaa aguã,  
kunumigue pe voi jaikuua uka 'arandua rupi ikuai aguã.
- <sup>5</sup> Hi'arandu va'e toendu hi'aranduve aguã,  
ombo'e pyre voi toendu oikuua porãve aguã,
- <sup>6</sup> oikuua aguã 'arandu regua ayvu ha'e mba'emo re ombojoja reve ijayvua,  
hi'arandu va'e kuery haxy-axyve va'e re ijayvu teĩ.
- <sup>7</sup> SENHOR renonde jajererokyjea rupi jaiko vy 'rãe mba'emo jaikuua.  
Ha'e rã hi'arandu e'ŷ va'e kuery ma noenduxei 'rã hi'arandurã re ombo'ea teĩ.

*Heko vai va'e kuery ayvu rupi jaiko e'ŷ aguã*

- <sup>8</sup> Xera'y, endu ke nderu nembo'e ramo,  
ejepe'a eme ndexy ijayvuague rupi reikoa gui.
- <sup>9</sup> Mba'eta ha'e nunga ndeapo porã 'rã akã regua iporã va'e rami,  
ha'e mbo'y ndeaju'y re oĩ va'e rami.
- <sup>10</sup> Xera'y, heko vai va'e kuery nembotavy aguã rupi ri ijayvu rã  
enhembotavy uka eme.
- <sup>11</sup> Ha'e kuery aipoe'i 'rã: "Eju ke orerupive,  
jaa nhanhemi vy,  
nhama'ẽ mbegue ikuai rive'i va'e ruguy nhamoẽ aguã.
- <sup>12</sup> Ha'e kuery ma oikove reve teĩ nhamomba 'rã yvykua py rami,  
oikove teĩ yvyra rupa py onhono porã mbyre rami optyta aguã", he'i 'rã.
- <sup>13</sup> "Iporãgue jajou 'rã opa marãgua nhanemba'erã,

\*

: "Provérbios" 'epy va'e ma ayvu ijapu'a'i va'e 'arandu regua.

- ha'e vy nhanderopy nhamonyē 'rā nhanemondakue.
- <sup>14</sup> Eju ha'vy enhemoirū ore kuery reve,  
ha'e rami vy peteī'i voko jareko aguā", he'i 'rā okuapy.
- <sup>15</sup> Xera'y, ha'e rami ijayvu ramo eiko eme ha'e kuery reve,  
neī epyrō eme ha'e kuery ikuiaia rupi.
- <sup>16</sup> Mba'eta ha'e kuery onha-onha 'rā mba'emo vai ojapo aguā,  
ojapura 'rā jogueravy tuguy omoē aguā katy.
- <sup>17</sup> Guyra kuery oexaa py  
nda'evei imbo'aarā jajapo aguā.
- <sup>18</sup> Ha'e rami teī ha'e kuery ma nguguy ae 'rā omoē uka oma'ẽ mbeguea py,  
guekove ae oipe'a uka 'rā nhemi rupi joapo vaia py.
- <sup>19</sup> Ha'e rami ojoupa reixe va'e kuery ha'e javi opyta vai 'rā,  
ipy'a re oguerekopa reixea oī va'e ma hekove ae oipe'a 'rā heravy.

### *Arandua ijayvua*

- <sup>20</sup> Ha'e gui 'Arandua ojapukai 'rā tape rupi,  
tetā mbyte rupi onhendu atā 'rā oikovy.
- <sup>21</sup> Tetā kora áry gui voi ijayvu 'rā,  
okē jaikea py ha'e tetā ikuai va'e rupi ijayvu 'rā po rami:<sup>†</sup>
- <sup>22</sup> "Pene'arandu e'ŷ'i va'e! Raka'e peve 'rā tu perovy'a pene'arandu e'ŷ'a?  
Pendeporojojai rei va'e, raka'e peve 'rā tu pendeporojojai reia rive pejou porā?  
Pene'arandu e'ŷ va'e, raka'e peve 'rā tu pejou vai 'arandua?
- <sup>23</sup> Pendu pota ke xeayvu re,  
mba'eta pēvy amombe'upa 'rā xepy'a re oī va'e,  
ajapo 'rā xeayvua peikuaapa aguā rami.
- <sup>24</sup> Peē kuery xee roenoī teī napendu potai,  
pendea katy akuave'ẽ ramo oikuua pota va'e ndoikoi.
- <sup>25</sup> Ha'e rami 'rāgue py pendu rivepa apomongetaa,  
napenduxei xeayvua.
- <sup>26</sup> Ha'e nunga rupi pejexavai rā xee ju 'rā rojojai.  
Penemongyjeārā ou rā aexa vy apuka rei 'rā peē kuery re,
- <sup>27</sup> mba'eta penemongyjea ou 'rā yvytu atā rami,  
penemombaarā ou 'rā yvytu jere rami,  
ha'e penembojexavaiarā ha'e penemoingo axyarā ovaē avi 'rā.
- <sup>28</sup> Ha'e jave py peē pejapukai 'rā xevy teī xee nambovai 'rā.  
Opa rupi peē kuery xereka teī ndaxejoui 'rā,
- <sup>29</sup> Mba'eta 'arandua ndapeipotai rire,  
SENHOR renonde pejererokyje aguā napemoīxei vy.
- <sup>30</sup> Xee apomongeta ramo napenduxei,  
pendevy xeayvu rā ndapeikuaaxei,
- <sup>31</sup> ha'e rami rire ma peikoague repy ae 'rā pejopy,  
pejeguaru 'rā penhemongetaague gui ae.
- <sup>32</sup> Mba'eta hi'arandu e'ŷ'i va'e kuery omanomba 'rā ojepe'aague py,  
hi'arandu e'ŷ va'e ojeupe 'Aiko porā' he'i riveague py ae 'rā okanhymba.
- <sup>33</sup> Ha'e rā xeayvu oendu va'e ma oī atā 'rā,  
ikuai porā rei 'rā mba'eve gui okyje e'ŷ re."

### *Arandua iporā va'e re ijayvua*

<sup>†</sup> 1:21 Apy gui ma ijayvu va'e ma Arandua. Ha'e rami avi jaikuua pota porā vy Nhanderuete ae ijayvua.

- <sup>1</sup> Xera'y, xeayvu rejopy vy,  
ha'e ndejee ajapo uka va'e remoĩ ri vy,
- <sup>2</sup> 'arandua re rejapyxaka pota vy,  
ha'e ndepy'a re mba'emo reikuua aguã re rejerure ri vy,
- <sup>3</sup> xapy'a rei ne'arandurã re rejapukai vy,  
ha'e rendu kuaa aguã re rejerure ete vy,
- <sup>4</sup> ne'arandurã reka reikovy vy prata oeka va'e rami,  
mba'emo porã onhomí mbyre recaa rami reka vy,
- <sup>5</sup> ha'e rami vy 'rã reikuua SENHOR renonde rejererokyjea rupi reiko aguã,  
ha'e rejou 'rã Nhanderuete reikuua aguã.
- <sup>6</sup> Mba'eta SENHOR ae ome'ẽ 'arandurã,  
ijuru gui ae ou nhane'arandurã ha'e jaikuua aguã.
- <sup>7</sup> Heko porã va'e kuery peguarã omoĩ porã 'rã 'arandua anhetẽ ete va'e,  
ha'e ramo anhetẽ rupi ikuai va'e pe oĩ 'rã mba'emo vai jokoarã.
- <sup>8</sup> Opena porã 'rã teko porã rupi ikuai va'e re,  
opena 'rã Nhanderuete pegua kuery iky'a e'ŷ va'e oikoa rupi.
- <sup>9</sup> Ha'e rami vy reikuua 'rã teko porã rupi reikoa, mba'emo re reikuua potaa, ha'e joo-joo'i  
rami rejoguereko aguã.  
Ha'e rami jaikoa ma tape porã meme.
- <sup>10</sup> Mba'eta ndepy'a re oĩ 'rã ne'arandurã,  
reikuuaave reikovya voi nenhe'ẽ py nembovy'ave 'rã heravy.
- <sup>11</sup> Ha'e ramo 'arandua opena 'rã ndere,  
ne'arandua ae nemoingo porã 'rã.
- <sup>12</sup> Ha'e rami vy ndereraa jepe aguã tape vai rupi ikuai va'e gui,  
ha'e avakue nda'eveia rupi ijayvu va'e gui,
- <sup>13</sup> teko porã gui ojepe'a vy  
pytũ rupi anho ikuai va'e gui.
- <sup>14</sup> Ha'e kuery ma teko vai ojapo vy ov'y'a rei 'rã,  
heko vai va'e kuery oexa vy anho 'rã ov'y'a okuapy,
- <sup>15</sup> tape karẽ rupi ikuai vy  
oiko aguã va'ekue gui ojepe'apa va'e.
- <sup>16</sup> 'Arandua ndereraa jepe 'rã kunha itavy rei va'e gui voi,  
kunha mboae tavy reia rupi ijayvu va'e gui.
- <sup>17</sup> Ha'e nunga ma oeja 'rã kunhataĩ guive ome reve joguerekaoa gui,  
ha'e Nhanderuete pe oiko aguã re ijayvuague gui voi hexaraipa 'rã.
- <sup>18</sup> Mba'eta ha'e va'e ro katy reo vy manoia katy ae 'rã reo.  
Ha'e oikoa ha'e javi ndereraa 'rã pytũ guy py manoia po'akaa katy.
- <sup>19</sup> Ha'e ramo ha'e va'e kunha pou vy oo va'e ma ndojevyvei 'rã,  
ndojourvei 'rã tape tekove katy oo va'e.
- <sup>20</sup> 'Arandua rupi vy reiko 'rã avakue heko porã va'e ikuaia rupi,  
nderejavyi 'rã teko porã rupi ikuaia.
- <sup>21</sup> Mba'eta yvy pyau ma heko porã va'e peguarã itui,  
ha'e va'e yvy re ikuai va'erã ma anhetẽ rupi oiko va'e kuery anho.
- <sup>22</sup> Ha'e rã opa marã heko va'e kuery ma oipe'apaa 'rã yvy gui,  
jokorepa va'e kuery omoëmbaa 'rã ha'e gui.

## 3

*SENHOR nhanhe'ẽ rendu aguã rupi nhanemo'arandua*

- <sup>1</sup> Xera'y, nderexarai eme xee rombo'egue re.  
Ndepy'a re emoĩ porã ke ajapo uka va'ekue.

- <sup>2</sup> Mba'eta ha'e nunga ma nemoingove puku 'rã,  
ndere omoĩ retave 'rã ma'etŷa re reiko aguã.
- <sup>3</sup> Nderexarai eme mborayvu ha'e anhetẽ va'e rupi reikoa aguã gui.  
Ha'e rami reiko aguã emoĩ ndeaju'y re mbo'y remoña rami.  
Ndepy'a re embopara vyvrape re rami.
- <sup>4</sup> Ha'e rami vy reupity 'rã Nhanderuete nemboaxyta,  
avakue voi nemboete 'rã.
- <sup>5</sup> Ndepy'a ha'e javi py ejerovia tema SENHOR re ae,  
ha'e rã ndee ae 'arandua re ma ejerovia eme.
- <sup>6</sup> Opa mba'e rejapoa py nema'endu'a hexe.  
Ha'e ramo ha'e oipe'a 'rã nerenderã.
- <sup>7</sup> Enhemo'arandu eme ndee ae reikuua rupi rive.  
Eiko tema SENHOR renonde rejererokyjea rupi, ha'e ejep'e a teko vai gui.
- <sup>8</sup> Ha'e rami reikoa ma ojapo 'rã nderete imbaraeteve aguã rami,  
nekãgue voi omokane'õguá 'rã.
- <sup>9</sup> Emboete ke SENHOR mba'emo rerekva'e py,  
ha'e jypy'i rejou va'ekue'-ekue reme'ëa py.
- <sup>10</sup> Ha'e ramo nderoguy tynyẽmba 'rã mba'emo ra'yigue,  
vinho hyru gui voi onheẽmba rei 'rã.
- <sup>11</sup> Xera'y, endu rive eme ta'vy SENHOR nemo'arandu rã,  
ndekuerai eme guive ndevy ijayvu ramo,
- <sup>12</sup> mba'eta SENHOR ma guembiajvu kuery pe ae 'rã ijayvu,  
tuu gua'y oayvu va'e pe ijayvua rami avi.\*
- <sup>13</sup> Ovy'a ete 'rã ava o'arandurã ojou va'e,  
oikuua aguã oupity va'ekue.
- <sup>14</sup> Mba'eta ha'e rami jaikoague repy ma prata gui ovareve,  
ouro iporãve va'e gui ovareve.
- <sup>15</sup> Pérola gui voi ovareve 'rã.  
Opa mba'e reipota va'e ma 'arandu gui ndovareive.
- <sup>16</sup> Opo oiporu kuaa regua re 'arandu oguerekove nderekove ombopukuve aguã,  
ha'e rã oiporu kuaa e'ŷa re ma oĩ mba'emo porã ha'e nemboetea aguã regua.
- <sup>17</sup> Ha'e va'e tape ma iporã va'e meme.  
Ha'e va'e rupi jaa vy jaupity 'rã mby'a porã.
- <sup>18</sup> Oupity va'e pe ma vyvra tekove me'ëa hi'aï.  
Ovy'a ete 'rã oupity va'e ha'e javi.
- <sup>19</sup> O'arandua rupi SENHOR yvy onhono raka'e,  
oikuapaa rupi ojapo imoiny yva.
- <sup>20</sup> Opa mba'e oikuapa va'e vy yy omboru raka'e yvy guýry oíague gui,  
ha'e rã arai gui ma ombou yxapy.
- <sup>21</sup> Xera'y, emboyke eme rexaa py remoĩ va'ekue,  
erekriae ke 'arandu anhetẽ va'e reiko kuaa aguã.
- <sup>22</sup> Mba'eta nenhe'ë pe ome'ë 'rã tekove,  
ndeaju'y re mbo'y remoĩ vy renhembojeguaa rami avi.
- <sup>23</sup> Ha'e rami vy tape rupi reikoa rupi voi reiko porã 'rã,  
renhepyxanga e'ŷ re.
- <sup>24</sup> Renheno ta ma vy nderekjeyi 'rã,  
ha'e gui renheno ma vy reke porã 'rã.
- <sup>25</sup> Enhemondyi eme mba'emo oiko xapy'a tei,  
nei heko vai va'e kuery mokanhyařa ou va'e gui.

\* **3:12** Hebreus 12.5-6

- 26 Mba'eta SENHOR oĩ 'rã ndere ou va'e jokoarã,  
    ndepy re voi opena 'rã nembo'aa e'ŷ aguã.
- 27 Eipytyvõ e'ŷ eme ojexavai rei'i va'e kuery,  
    ndepo py remboja'o aguã rereko ri vy.
- 28 Xapy'a rei aŷ ma voi mba'emo rereko ri vy  
    aipo're eme neirũ pe: "Tereo ju, ha'e gui ko'ẽ rã ma eju ju.  
    Ha'e ramo ma ame'ẽ 'rã mba'emo", 're eme.
- 29 Enhembopy'a eme neirũ re rejapo vai aguã,  
    ndere ojeroviaa rupi ndero katy'i oĩ ramo.
- 30 Nda'evei joupe ndeayvu ete-ete aguã mba'eve py e'ŷ,  
    ndevy ojapo vai e'ŷ re.
- 31 Erov'y'a rei eme ojerovia rei va'e,  
    eiko eme guive ha'e kuery ikuiaia rami,
- 32 mba'eta SENHOR ojeguaru heko vai va'e gui,  
    ha'e rã heko porã va'e ma oirũ ae rami 'rã oguerek.
- 33 SENHOR ijayvu vaiague opyta 'rã heko vai va'e ro re,  
    ha'e rã heko porã va'e rekoa re ma imoingo porãarã anho oĩ 'rã.
- 34 Mba'eta ha'e oojai 'rã oojai reia rupi ikuai va'e,  
    ha'e rã yvyigueve'i ma omboaxy 'rã.\*
- 35 Hi'arandu va'e omboetepy 'rã ikuai,  
    ha'e rã hi'arandu e'ŷ va'e ma oximba aguã rami ikuai.

## 4

*Nhanderuete nhanemongetaa*

- 1 Xera'y kuery, pendu ke penderu penembo'ea.  
    Pejapyxaka porã ke peikuua porã aguã.
- 2 Mba'eta xee ma iporã va'e re rombo'e.  
    Ha'e nunga rupi penderexarai eme rombo'eague re.
- 3 Ha'e gui xee voi ta'y aiko va'ekue xeru ro py.  
    Naxembaraetei teri va'ekue, ha'i reve îpi'a peteî'i va'e aiko vy.
- 4 Ha'e javé py xeru xembo'e vy aipoe'i:  
    "Emoï ke xeayvua ndepy'a re.  
    Ejapo tema ajapo uka va'e, ha'e vy 'rã reikove.
- 5 Emoï ne'arandurã ha'e mba'emo reikuua aguã.  
    Nderexarai eme, ejope'a eme guive xeayvua gui.
- 6 Ejope'a eme 'arandua rupi reikoa gui. Ha'e ramo 'rãe ndere opena porã.  
    Embovare ke, ha'e ramo 'rã nderepy.
- 7 'Arandua ma iporâve va'e ramo emoï ne'arandurã.  
    Tá, mba'emo rejoua rupi rejou avi 'rã mba'emo reikuua aguã.
- 8 Embovare ete ke 'arandua, ha'e ramo 'rã nemboyvateve.  
    Remoï ete ramo nemoingo 'rã omboetepy.
- 9 Neakã re omoï 'rã akã regua iporâve va'e,  
    coroa hexakâmba va'e ome'ẽ 'rã ndevy", he'i va'ekue xevy.
- 10 Xera'y, ejapyxaka ke, ha'e ejopy xeayvu.  
    Ha'e vy 'rãe reikove puku.
- 11 Mba'eta xee rombo'ea ma tape 'arandua katy oo va'e rupi reo aguã,  
    heko porã va'e ikuiaia rupi avi reiko aguã.
- 12 Ha'e va'e rupi reguata ramo  
    mba'eve rei nandejokoi 'rã reikoa rupi.

\* 3:34 Tiago 4.6, 1 Pedro 5.5

- Renha teñ nerenhelyxangai 'rã.
- <sup>13</sup> Ha'e nunga rupi emoi porã ete rombo'eague, nderexarai eme.  
Emoi atã ndejee, mba'eta ha'e va'e rupi vy 'rãe reupity nderekoverã.
- <sup>14</sup> Nderepiai 'rã heko vai va'e kuery ooa katy.  
Eiko eme heko vai va'e ikuiaia rupi.
- <sup>15</sup> Ejapo eme ha'e kuery ojapo va'e.  
Ejepe'a, tereo eme ha'e rupi.  
Ejepekuavo mombyry rupi.
- <sup>16</sup> Mba'eta ha'e kuery ma mba'emo vai ojapo e'ÿa ja ndokei 'rã.  
Ndokei 'rã joity e'ÿa ja.
- <sup>17</sup> Mba'eta ha'e kuery mbojape ho'u va'e ma teko vai anho,  
ha'e vinho oy'u va'e ma ojerovia reia.
- <sup>18</sup> Ha'e rã heko porã va'e ikuiaia ma ko'ë ouvy va'e rami hexakã,  
hexakã porã-porãve 'rã ovy ko'ëmba porã peve.
- <sup>19</sup> Ha'e rã heko vai va'e reko ma pytû rupi oo va'e rami.  
Ha'e kuery ndokuaai mba'e nunga re 'rã pa onhepyxanga aguã voi.
- <sup>20</sup> Xera'y, endu pota xeayvua re.  
Ejapyxaka ke xee rombo'ea re.
- <sup>21</sup> Emboyke eme nderexa py rexaa va'ekue.  
Ndepy'a py re 'rã remoï.
- <sup>22</sup> Mba'eta oupity va'e pe ma tekove me'ëa oï,  
ome'ë avi 'rã hete rexãrã.
- <sup>23</sup> Opa mba'e re repenaa gui epena porãve ndepy'a re,  
mba'eta ha'e py ae oï nderekoverã.
- <sup>24</sup> Emombytu'u ndejuru ndeapu reiaty gui,  
eipe'a ndejegui ayvu vai rupi ndeayvua.
- <sup>25</sup> Nderexa toexa porã ovy nerentonnderã ae.  
Nderova ma nerentonnderã ae.
- <sup>26</sup> Eikuua pota porã ke repyrða re,  
reikoa ha'e javi hi'yvi aguã.\*
- <sup>27</sup> Epia eme reiporu kuaa katy neñ reiporu kuaa e'ÿa katy.  
Ejoko ndepy teko vai katy oo ta ramo.

## 5

*Tavy reia rupi jaiko e'ÿ aguã re ijayvua*

- <sup>1</sup> Xera'y, eikuua pota ke 'arandu rupi xeayvua re.  
Ejapyxaka, aikuua va'e re xeayvu rã endu,
- <sup>2</sup> 'arandu re reiko aguã,  
ha'e reikuua va'e rupi anho ndeayvu aguã.
- <sup>3</sup> Ha'e rã kunha itavy rei va'e ijayvua ma ei rami ete he'ë,  
azeite gui iporãve merami teñ
- <sup>4</sup> opaa py ma tai va'e rami 'rã haxy ndevy,  
kyxe hakua hañmbe jovai va'e rami.
- <sup>5</sup> Ipy ma manoa katy oguejy ovy,  
oguata 'rã tata ogue'ÿ va'e katy.
- <sup>6</sup> Ndoikuua potai ovy tape tekove katy oo va'e re,  
ooa katy rei-rei oo va'e rupi 'rã oo oiny oikuua e'ÿ vy.
- <sup>7</sup> Ha'e nunga rupi aÿ xera'y, ejapyxaka xeayvu re,  
ejepe'a eme aipoa'eague rami reikoa gui.

\* **4:26** Hebreus 12.13

- <sup>8</sup> Ejep'e a ke kunha tavy rei gui,  
neñ hoo rokẽ katy ma voi enhemboja eme,
- <sup>9</sup> joupe remboaxa e'ŷ aguã nemboetea aguã va'ekue,  
ha'e joayvu e'ŷ va'e pe reperde e'ŷ aguã nderekovea,
- <sup>10</sup> reikuua e'ŷ va'e pe rive remboaxa e'ŷ aguã nemba'e rei-rei,  
ha'e remba'eapoague repy optya e'ŷ aguã amboae kuery peguarã.
- <sup>11</sup> Ha'e rami e'ŷ vy remano ta ma vy nepoaë 'rã rejupy,  
ndero'o ha'e nderete opave ovv ramo.
- <sup>12</sup> Ha'e vy aipo're 'rã:  
“Mba'e re tu xee naenduxei karamboae xembo'ea rã!  
Xepy'a re namoixei xemongetaa ramo.
- <sup>13</sup> Naendu potai xembo'ea kuery ijayvua,  
ndajapyxakaxe karamboae xemo'aranduxea rã.
- <sup>14</sup> Mba'eta aŷ ma aĩ vai aguã rami aiko  
heta va'e kuery ijaty va'e oexaa py", 're 'rã.
- <sup>15</sup> Ha'e nunga rupi ey'u nde'ygua gui ae,  
ndevey guarã yxyry oiny va'e gui ae.\*
- <sup>16</sup> Tyrã pa oka katy rive ri ty'y renhoë ta nde'ygua gui,  
tetã mbyte rupi rive oxyry ovv aguã rami?
- <sup>17</sup> Ha'e rami 'rãgue py ndevey guarã ae 'rã rereko,  
amboae kuery pe rive remboaxa va'erã e'ŷ.
- <sup>18</sup> Toiko porã nde'ygua,  
ha'e erovy'a ke nekunumi guive remendaague va'e.
- <sup>19</sup> Ha'e ae ndevygua toiko guaxu iporã va'e rami.  
Ikã anho erovy'a riae.  
Reikoa pukukue re erovy'a pejoayvua rupi.
- <sup>20</sup> Xera'y, mba'e re 'rã tu renhembotavy uka kunha mboae pe?  
Mba'e re 'rã tu kunha mboae kã rupi reikuavã?
- <sup>21</sup> Mba'eta nhande jaikoa ma SENHOR oexapa,  
oikuua pota 'rã jaikoa ha'e javi re.
- <sup>22</sup> Heko vai va'e ma mba'emo vai ojapoague py ae 'rã ho'a.  
Ha'e ae ojejavvyague py ojejokua uka 'rã.
- <sup>23</sup> Omano 'rã ndojejokoi reia py,  
ho'a-o'a rei 'rã oikovy okanhy peve.

## 6

*Jarevea re jaiko e'ŷ aguã re ijayvua*

- <sup>1</sup> Xera'y, xapy'a rei neirũ orevea repaga aguã rami reiko 'rã,  
e'ŷ vy rex a va'ety e'ŷ reve ha'e rami aguã re pejogueroayvu 'rã.
- <sup>2</sup> Xapy'a rei rã aipo'reague py ae reiko 'rã ojokua pyre,  
ndeayvua py renhembo'a uka vy.
- <sup>3</sup> Xera'y, ha'e rami ri ramo aŷ ma po rami 'rã reiko  
reo jepe aguã, neirũ po py re'a ma rire tei  
tereo pojava, ejerure tema einy neirũ pe.
- <sup>4</sup> Nda'evei reke ranhe aguã,  
emboty eme ranhe nderexa.
- <sup>5</sup> Tereo jepe nho pota ke, guaxu e'ŷ vy guyra  
imba'ejuka va'e po gui oo jepea rami.

\* **5:15** Apy ma ijayvu nhandera'yxy ae'i reve anho jajoguerek aguã re (Cântico 4.15).

*Nhaneate'ŷ e'ŷ aguã re ijayvua*

- <sup>6</sup> Ndee inhate'ŷ va'e, tereo eikuua pota tay kuery reko re,  
ha'e kuery reko re reikuua pota vy ne'arandu nho aguã.
- <sup>7</sup> Ha'e kuery ma ndoguerekoi nguvixa,  
neĩ hereko, neĩ imomba'eapoarã.
- <sup>8</sup> Ha'e rami teĩ kuaray puku py voi ha'e kuery omoõ porã 'rã ho'u va'erã,  
nhamono'õa ára ha'e kuery voi omono'õ 'rã guembi'urã.
- <sup>9</sup> Ndee inhate'ŷ va'e, raka'e peve tu renheno 'rã rejupy?  
Raka'e peve 'rã tu reke rejupy?
- <sup>10</sup> Mba'eta "Takeve'i ju ranhe" 're vy repytu'uve tema 'rã,  
ha'e renhekuavã 'rã rejupy.
- <sup>11</sup> Ha'e rami ae 'rã ovaẽ xapy'a nemomboriauarã imonda va'e rami,  
nemoõ axyarã ou xapy'a 'rã ava guembiporu revegua rami avi.

*Teko vai rupi jaiko e'ŷ aguã re ijayvua*

- <sup>12</sup> Avakue mba'everã ovare e'ŷ va'e, heko vai va'e ma  
opa marã rei 'rã ijayvu.
- <sup>13</sup> Oxapymi-pymi ha'e opy omomy-momyí rei 'rã okuapy,  
opo ombovava-vava 'rã guive nhombotavya rupi.
- <sup>14</sup> Ha'e gui ipy'a re ma ha'eve e'ŷ va'e anho 'rã oĩ,  
teko vai re ae 'rã onhembopy'a okuapy,  
ha'e joo rami e'ŷ-e'ŷ nhomoingoa re 'rã ikuai.
- <sup>15</sup> Ha'e nunga rupi imokanhyarã ou xapy'a 'rã.  
Ou xapy'a 'rã imopẽmbaarã, ha'e jipoi 'rã imongueraarã.
- <sup>16</sup> Mba'eta mboapy meme regua oiko SENHOR ndojou porãi va'e,  
sete-a voi oiko onhe'ẽ py ojou vai va'erã:
- <sup>17</sup> ha'e va'e ma guexa py onhemboyvate rei va'e,  
oapekũ py ijapu va'e,  
opo py heko porã'i va'e ruguy omoẽ va'e,
- <sup>18</sup> opy'a py mba'emo vairã re rive oikuua pota va'e,  
opy py mba'emo vai ojapo aguã katy ojapurave va'e,
- <sup>19</sup> joekokue ramigua rive ijapu vy omombe'u va'e,  
ha'e joegua kuery joo rami e'ŷ-e'ŷ ikuai aguã rami ojapo va'e.

*Kunha mboae reve nhandetavy rei e'ŷ aguã re ijayvua*

- <sup>20</sup> Xera'y, nderexarai eme nderu ijayvuague re,  
ejep'e a eme ndexy nembo'eague rupi reikoa gui.
- <sup>21</sup> Emoõ porã ke ndepy'a re,  
mbo'y ndeaju'y re remoõa rami emoõ riae ndejee.
- <sup>22</sup> Mba'eta ha'e va'e ayvu ma reguataa rupi nderereko 'rã,  
reke jave voi opena porã 'rã ndere,  
ha'e rekeague gui revy jave nemo'arandu teri 'rã.
- <sup>23</sup> Mba'eta ojapo uka pyre ma tataendy rami 'rã oĩ,  
nhanembo'ea nhanemoexakã 'rã,  
arandu rupi nhanemongetaa ma tape tekove katy oo va'e oĩ,
- <sup>24</sup> ndejoko aguã kunha itavy rei va'e gui,  
kunha mboae nembotavy aguã rupi ijayvu va'e gui.
- <sup>25</sup> Ha'e nunga iporãa rexâ teĩ emoaruã rei eme,  
enhembotavy uka eme oma'ẽ ngatu teĩ.
- <sup>26</sup> Mba'eta kunha itavy rei va'e pe ma mbovy'i 'rã opagaa peteĩ mbojape repyrã rive,  
ha'e rã omenda va'e reve itavy reia rekovia ma guekove ae 'rã ome'ẽ.

- 27 Amongue opexo re tata oikuavã heravy ramo  
ijao ndokai 'rã ri?
- 28 Ha'e rami e'ÿ vy tapyí áry oguata vy nda'u  
ipy ndokai 'rã ri?
- 29 Ha'e rami ae 'rã oirũ ra'yxy reve itavy va'e re oiko.  
Hexeve itavy rei va'ekue ma ndopaga e'ÿi 'rã.
- 30 Imonda va'e minha karuai gui imonda teĩ  
ndajajou vai 'rã ri ty'y?
- 31 Mba'eta ha'e nunga ojoua ri vy sete-kue áryve 'rã ombopagaa.  
Ngoo py oguereko va'ekue ha'e javi ome'ëmba 'rã.
- 32 Ha'e rã kunha mboae reve itavy rei va'e ma na'inhakã porãvei ae.  
Ha'e rami ikuai va'e ma ha'e kuery ae onhemomba ukaxe vy.
- 33 Ha'e rire oendu 'rã oinupãmba rã oximba aguã.  
Raka'e rã peve ima'endu'aa riae 'rã ha'ekue re.
- 34 Mba'eta ime hakate'ÿ vy ipoxy 'rãe,  
ha'e vy ombopaga aguã ára py noendui 'rã omboaxy.
- 35 Neñ mba'eve ndojopyxei 'rã onhemboaxy ukaa rupi ome'ë va'e voi,  
ixupe mba'emo porã ome'ë reta ta teĩ.

## 7

*Kunha itavy rei va'e re ijayvu jevyague*

- <sup>1</sup> Xera'y, nderexarai eme xeayvua re,  
emoï ndepy'a re ajapo uka va'e.
- <sup>2</sup> Ejapo ke ajapo uka va'e, ha'e vy 'rã reikove.  
Ndejee emoï atã xeguigua lei, nderexa ra'yñ huña'i re repenaa rami.
- <sup>3</sup> Emoï ke xee rombo'ea nekuã regua rami,  
ndepy'apy re emoï, vvyrake re remboparaa rami.
- <sup>4</sup> 'Arandua pe ma aipo'ere: "Xereindy ae'i",  
ha'e mba'emo reikuua aguã pe ma "Xeretarã ae'i" 'ere.
- <sup>5</sup> Mba'eta ha'e nunga ndejoko 'rã kunha mboae gui,  
kunha itavy reia rupi ijayvu va'e gui.
- <sup>6</sup> Ha'e gui xero re janela yvate oï gui,  
janela jokoa pa'ü rupi ama'ë ainy vy
- <sup>7</sup> aexa reta karamboae hi'arandu e'ÿ va'e.  
Ha'e va'e kunumigue aexa va'e mbyte py  
peteï aexa avi hi'arandu e'ÿ ete va'e.
- <sup>8</sup> Ha'e va'e ma peteï tape'i rupi oo oiny,  
kunha tavy rei va'e ro rexei'i rupi.  
Ha'e vy hoo via rupi ae oo
- <sup>9</sup> ka'aru'i, kuaray oike ramo'i javé,  
pytû ho'a javé.
- <sup>10</sup> Ha'e gui ma ha'e va'e kunha oë ovaexi aguã.  
itavy rei va'e ao py onhemonde ouvy,  
ombotavy aguã re onhembopy'aa rupi.
- <sup>11</sup> Itavy aguã re anho 'rã ipy'a va'e,  
ndopytai 'rã guive ngoo py, ndopyta kuaai rei 'rã.
- <sup>12</sup> Amongue py tape pia rupi 'rã hekony,  
amongue py ma tetã mbyte rupi 'rã oo,  
opa rupi oma'ë 'rã oikovy nhoarõa rupi.
- <sup>13</sup> Ha'e gui ma kunumi va'e re onhemboja vy oayvu.

- Ha'e vy oma'ẽ tavy rei reve aipoe'i ixupe:  
 14 "Tembi'u areko ja'u aguã, ange amboaxa va'ekue regua.  
     Ange ajapopa ma kuri anhemboayvuague.  
 15 Ha'e rami vy aju ainy roeka vy.  
     Ha'e vy aÿ ma rovaexĩ ma.  
 16 Ha'e gui xerupa ma anhovãmba ma voi  
     ajukue iporãve va'e Egito guigua py.  
 17 Xerupa amoekauãmba ma avi mirra py,  
     aloés ha'e cinamomo py guive.  
 18 Jaa ke, jajoayvua py nhaï pytû mbukukue re.  
     Javy'a vaipa 'rã jajoayvua rupi anho.  
 19 Ha'e gui xeme ma noï xero py.  
     Mombyry ete rupi oguata oikovy.  
 20 Peráta heta ogueraa ovoko py.  
     Raka'eve rã jaxy inhypyttû javé mae ma ou ju 'rã", he'i.  
 21 Ha'e rami vy kunha va'e ijayvu porã kuaa vy ombotavy ete,  
     oayvu kuaa rupi ojopy heravy aguã.  
 22 Ha'e ramo kunumi va'e ma are'ÿ'i re oo oiny hexeve,  
     vaka ojukaa aguã katy oo va'e rami,  
     ha'e rami e'ÿ vy guaxu nhuã oña katy onha ový va'e rami,  
 23 ipy'a rupi hu'y onhyvõ peve,  
     ha'e rami e'ÿ vy guyra'i mondepí katy oveve ový va'e rami,  
     ha'e py omano aguã oikuua e'ÿ vy.  
 24 Aÿ ma xera'y, ejapyxaka porã ke,  
     eikuua pota porã xeayvua re.  
 25 Neñ ndepy'a eme ha'e va'e nunga kunha reve rejereraa uka aguã,  
     enhemokanhy uka eme oikoa rupi reoa py.  
 26 Mba'eta ha'e nunga heta ma oity avakue, ombojexavai guive.  
     Mbovy e'ÿ ma omano ikáuxa.  
 27 Ha'e va'e ro via ma yvyra rupa katy nhandereraa va'e,  
     nhandereroguejy 'rã heravy manoa katy.

## 8

*Arandua opa mba'e gui iporãve va'ea re ijayvua*

- 1 Arandua voi nda'u ndojapukai avi 'rã ri?  
     Ha'e rami vy nanhanerenoï 'rã ri ty'y mba'emo kuaa ukaa rupi?  
 2 Mba'eta oï 'rã yvyty yvateve va'e áry,  
     tape yvýry, tape pia rexei rupi guive,  
 3 tetã kora rokẽ py nhavaë'i javya py,  
     okẽ py ojapukai 'rã oiny.  
 4 Ha'e vy aipoe'i 'rã: "Xee voi aï peẽ avakue roenoï ainya py,  
     xeayvu ainy avakue ha'e javi pe.  
 5 Ha'e gui pene'arandu e'ÿ'i va'e,  
     peikuaa pota ke peiko kuaa aguã re.  
     Peẽ hi'arandu e'ÿ va'e, peikuaa ke 'arandua.  
 6 Mba'emo iporã va'e re xeayvu rã pendu pota ke.  
     Xeayvu 'rã ha'evea rami anho.  
 7 Mba'eta xeayvua ma anhetë meme,  
     ha'e rã apu gui ma xee ajeguaru.  
 8 Xee aipoa'ea ma anhetë ete va'e meme.

- Xeayvua re ma peteīve henda py noī nhombotavyarā, neī opa marā nhomoingoarā.
- <sup>9</sup> Oendu kuaa va'e pe ma anhetē va'e meme,  
ha'eve va'e meme oikuaa aguā oupity va'e pe.
- <sup>10</sup> Prata 'rāgue py pejopy ke rombo'ea,  
ouro oiporavo pyre 'rāgue py pejopy mba'emo aikuaa uka va'e.
- <sup>11</sup> Mba'eta 'arandua ma ita ovareve va'e gui iporāve va'e,  
opa mba'e peipotaa gui ha'eve.
- <sup>12</sup> Xee 'Arandua ma peiko kuaa aguā rupi aī.  
Xee areko va'e ma peikuaa aguā ha'e penemonetaarā.
- <sup>13</sup> SENHOR renonde ojererokyjea rupi oiko va'e ma ojou vai 'rā teko vai.  
Ha'e gui xee ajou vai va'e ma nhemboyvate reia, jejou porā reia,  
teko vai rupi ikuiaia ha'e opa marā ayvua.
- <sup>14</sup> Xegui ae 'rā pendu penemonetaa ha'e 'arandua anhetē ete va'e.  
Xee ma peikuaa porā aguā ae aī, ha'e penembopo'akaarā.
- <sup>15</sup> Xegui ae huvinxave kuery opena kuaa,  
ha'e huvinxa ikuai va'e anhetē rupi 'rā ijayvu kuaa.
- <sup>16</sup> Xegui ma joguerekoa kuery opena kuaa 'rā,  
yvatekueve ha'e nhomboayvua kuery ha'e javi.
- <sup>17</sup> Xee ma ayvu 'rā xerayvu va'e kuery,  
ha'e xereka va'e ma xejou 'rā.
- <sup>18</sup> Xereve vy 'rā pejou mba'emo porā, ha'e omboetepy peiko,  
mba'emo porā ivaipa va'erā e'ŷ ha'e teko porā 'rā pejou.
- <sup>19</sup> Mba'emo xee areko va'e ma ouro gui ovareve ete, ouro oiky'a'o pyre  
ha'e prata oiporavo pyre gui ha'eveva'e.
- <sup>20</sup> Xee ma tape teko porā rupi anho aiko va'e,  
tape joguerekoo kuua aguā oīa va'e mbyte rupi aguata va'e,
- <sup>21</sup> ha'e rami vy xerayvu va'e kuery pe ame'ē aguā iporā va'e,  
ha'e kuery ro amonyē aguā iporā va'e anho.

### *Jypy'i guive 'Arandu oikoague re ijayvua*

- <sup>22</sup> SENHOR mba'emo omoingo ypy'i guive xee ma voi xererekoo,  
guembiapo ymavegua ojapo e'ŷ mbove ma voi.
- <sup>23</sup> Yma voi xemoī, jypy'i ete guive,  
yvy onhono e'ŷ mbove.
- <sup>24</sup> Ye'ē oiko e'ŷ mbove voi xee aiko ae ma va'ekue,  
yvu ndoikoi teri reve.
- <sup>25</sup> Yvyty onhono e'ŷ mbove,  
yvy'ā hendarā py omoī e'ŷ mbove xee aiko ae ma va'ekue.
- <sup>26</sup> Ha'e va'e jave py ma yvy ha'e nhuūndy nomoingoi teri,  
neī yvy ku'i nomboypyi teri.
- <sup>27</sup> Ha'e gui yva hendarā py omoī jave xee aī ae ma,  
ha'e yva apy ye'ē áry rupi oa'anga jave.
- <sup>28</sup> Yva re arai omoī jave py xee aī ae ma,  
ye'ē iguy gui oē aguā oipe'a jave,
- <sup>29</sup> ye'ē remberā oa'anga jave voi  
ha'e va'e rupi yy oxyry ov y e'ŷ aguā,  
ha'e yvy ytarā omoī jave py,
- <sup>30</sup> ha'e va'e jave py ma xee aī ae ma hexeve, ha'e oipota va'e apoarā.  
Ko'ē nhavō aī va'ekue ambovy'aa rupi,  
henonde avy'aa rupi tema aiko.

- <sup>31</sup> Xee arov'y a va'ekue yvy tekoarã ojapo va'ekue,  
avakue ra'y kuery ha'e javi guive.
- <sup>32</sup> Aÿ ma xera'y kuery, pendu ke.  
Ovy'a ete 'rã xee aïkoa rupi oiko va'e.
- <sup>33</sup> Pendu ke xee rombo'ea pene'arandu aguã,  
penduxe e'ÿ eme.
- <sup>34</sup> Ovy'a ete 'rã xenhe'ẽ rendu va'e,  
ko'ẽ nhavõ xerokẽ py oĩ va'e,  
xero katy aikea'i py xerarõ oiny va'e.
- <sup>35</sup> Mba'eta xejou va'e ojou avi 'rã tekove,  
ha'e oupity 'rã SENHOR oguerovy'a aguã.
- <sup>36</sup> Ha'e rã xerovai ojejavvy va'e ma onhe'ẽ pe ae ojapo vai.  
Ha'e javi xejou vai va'e omano aguã rive oguerovy'ave vy."

## 9

*Arandua ngaru ojapo va'e re ijayvua*

- <sup>1</sup> 'Arandua ojapo ngoorã,  
ha'e vy omoatyrõ sete ijytarã.\*
- <sup>2</sup> Ojuka uka mymba ngaru ojapo aguã,  
oguereko katu ma vinho, ha'e gui mesa áry omoõmba.
- <sup>3</sup> Ha'e rami vy guembiguai kuery omondouka  
tetã yvateve va'e áry rupi nhoenoï aguã. Aipoe'i uka:
- <sup>4</sup> "Ndapeikuaai rei va'e, peikepa ke apy!" he'i uka.  
Hi'arandu e'ÿ va'e kuery pe aipoe'i uka:
- <sup>5</sup> "Peju ke pe'u mbojape xea py,  
ha'e pey'u vinho areko katupa va'ekue.
- <sup>6</sup> Pendekuaive eme 'arandu e'ÿa rupi, ha'e vy 'rã peiko areve.  
Tape 'arandu oña rupi anho peïko", he'i uka.
- <sup>7</sup> Ha'e gui porojajai rei va'e kuery pe pendeayvu vy  
peẽ ae pejejojai uka rei,  
heko vai va'e kuery pe pendeayvu vy pejeavyky uka rei 'rã.
- <sup>8</sup> Nda'evei ae porojojaia pe nhandeayvu aguã, nhandevy ipoxy e'ÿ aguã.  
Ha'e rã hi'arandu va'e pe nhandeayvu ramo ma nhanderayvu 'rã.
- <sup>9</sup> Hi'arandu va'e nhambo'e ramo ma hi'aranduve 'rã,  
heko porã va'e nhambo'e ramo oiko kuaave 'rã ovy.
- <sup>10</sup> SENHOR renonde jajererokyjea rupi jaiko vy 'rãe jaupity 'arandua,  
Iky'a e'ÿ va'e jaikuua vy 'rãe jaiko kuaa.
- <sup>11</sup> Mba'eta xereve vy anho peiko pukuve 'rã,  
penerenonderã ma'etÿa amoï retave ramo.
- <sup>12</sup> Pene'arandu ri vy pendejeupe guarã ae 'rã pejou,  
ha'e rã pejojajai reia py ma peẽ ae 'rã penhemooï vai.

*Kunha hi'arandu e'ÿ va'e nhoenoï oinya*

- <sup>13</sup> 'Arandu e'ÿa ma kunha ojejoko kuaa e'ÿ ha'e opa marã rei onhendu va'e.  
Ha'e nunga ma mba'eve ndoikuaai 'rã.
- <sup>14</sup> Oguapy 'rã oiny ngokẽ py,  
tetã yvatevea py tenda áry oĩ 'rã,
- <sup>15</sup> oaxa va'e-va'e ha'e ombo'eapo vy  
oje'oi va'e pe aipoe'i aguã:

\* <sup>9:1</sup> Apy ma Arandua re ijayvu, hoo va'e ngaru pavẽ pe ojapo va'e re rami.

- 16 "Ndapeikuaai rei va'e, pejupa ke apy!"  
 Hi'arandu e'ŷ va'e kuery pe aipoe'i 'rā:  
 17 "Yy mondakue ma yro'yxā porāve,  
 ha'e mbojape nhemi rupi ja'u va'e ma heeve", he'i.<sup>†</sup>  
 18 Ha'e rā ha'e pyguarā oenoī va'ekue ma ndoikuaai oĩa py manogue anho ikuiaia,  
 ha'e py oike va'ekue ma yvykua manoia py meme ikuai.

*Heko porā ha'e heko vai va'e reko re ijayvua*

*Arandu regua ayvu Salomão omombe'u va'ekue*

## 10

- 1 Ta'y kuery hi'arandu va'e ombovy'a 'rā nguu,  
 ha'e rā ta'y kuery hi'arandu e'ŷ va'e ma omomboriau 'rā oxy.  
 2 Mba'emo jajejavya rupi jajou va'e ma mba'everā ndovarei,  
 ha'e rā teko porā ma nhandereraa jepe 'rā manoia gui.  
 3 SENHOR ndoejai 'rā heko porā va'e karuai oendu oikovy aguā,  
 ha'e rā heko vai va'e ma SENHOR ojoko 'rā oipotapa rei va'e ojou e'ŷ aguā.  
 4 Inhate'ŷa rupi ombo'eapo va'e ndojoui 'rā mba'eve,  
 ha'e rā ikyre'ŷa rupi ombo'eapo va'e ma ojou-jouve 'rā oipota va'e.  
 5 Kuaray aku porā jave ta'y hi'arandu va'e omono'õ 'rā mba'emo,  
 ha'e rā mba'emo omono'õa ára py oke rive va'e ma omoximba rei 'rā nguu kuery.  
 6 Heko porā va'e akā re oĩ 'rā imoingo porāarā,  
 ha'e rā heko vai va'e ma nhomoingo vai aguā rupi anho ijayvu.  
 7 Heko porā va'e re nhanema'endu'aa ma nhanemoingo porā 'rā,  
 ha'e rā heko vai va'e rery re nhanema'endu'aa ma mba'emo ru'ügue rami rive.  
 8 Opy'a py hi'arandu va'e omoī porā 'rā ojapo uka pyre,  
 ha'e rā o'arandua rupi e'ŷ ijayvu va'e ma oĩ vai 'rā.  
 9 Anhetē rupi ikuai va'e oĩ atā 'rā,  
 ha'e rā tape karē rupi ikuai va'e re ma oikuua potaa 'rāe.  
 10 Nhombotavya rupi oxapymi-pymi va'e ma nhomomboriau va'e vy,  
 o'arandua rupi e'ŷ ijayvu va'e oĩ vai 'rāe.  
 11 Heko porā va'e ayvu ma tekove me'ea ae,  
 ha'e rā heko vai va'e ma jojuka aguā rupi anho ijayvu.  
 12 Mborayvu rupi e'ŷ ikuai va'e nhomopu'ãmba rei 'rā.  
 Ha'e rā porayvu va'e ma ojao'i uka 'rā ojejavya ague.\*  
 13 Oiko kuaa va'e ijayvu rā nhaendu vy jajou 'rā nhane'arandurā,  
 ha'e rā hi'arandu e'ŷ va'e ma oinupāa aguā rami ikuai.  
 14 Hi'arandu va'e omoī porā 'rā 'arandua,  
 ha'e rā heko vai va'e ma onhemokanhy uka aguā rupi rive ijayvu.  
 15 Oguerekopa va'e ma ombo'e rei-rei re oĩ atā, tetā ikorapa va'e py rami,  
 ha'e rā iporiaukue'i ma ikuai axy 'rā mba'eve ndoguerekoiia py.  
 16 Heko porā va'e oikoague repy ma tekove,  
 ha'e rā heko vai va'e ma ojejavvyague repy ae 'rā ojou.  
 17 Ombo'ea ague rami ikuai va'e ma tape tekove katy oo va'e rupi oje'oi,  
 ha'e rā omongeta ague rupi e'ŷ ikuai va'e ma ha'eve e'ŷa katy 'rā oje'oi.  
 18 Ijapu va'e ma opy'a re omoī 'rā joe nda'ija'eia,  
 joekokue omombe'u merami rive va'e ma hi'arandu e'ŷ va'e ae.  
 19 Ijayvu reta rei va'e ojejavvy 'rāe,  
 ha'e rā ayvu py ojejoko kuaa va'e ma oiko kuaa va'e vy ae.

<sup>†</sup> 9:17 Apy ma ijayvu nhemi rupi jajejavya re. \* 10:12 1 Pedro 4.8

- <sup>20</sup> Heko porā va'e ayvu ma prata oiporavo pyre rami,  
ha'e rā heko vai va'e kuraxō ma mba'erā ndovarei.
- <sup>21</sup> Heko porā va'e ayvu ma tetā omongaru va'e rami,  
ha'e rā hi'arandu e'ŷ va'e kuery ma omanomba rive 'rā, ndoikuua potaxei rire.
- <sup>22</sup> SENHOR nhandereroayvu porā vy ojapo jajou-jouve aguā rami,  
neī peteīve henda py nanhanemomboriaui 'rā.
- <sup>23</sup> Hi'arandu e'ŷ va'e oikuua ramo opa marā rei nhandekuaia rupi merami 'rā javy'a,  
ha'e rā avakue oikuua ete va'e pe ma nhane'arandua rupi vy 'rāe javy'a.
- <sup>24</sup> Heko vai va'e mba'emo gui okyjea va'e ae 'rā oiko hexe,  
ha'e rā heko porā va'e oarō oikovya ma Nhanderuete ojapo 'rā ojeupity aguā rami.
- <sup>25</sup> Yvytu vaikue optytu'u xapy'aa rami avi heko vai va'e kuery reko voi okanhy xapy'a 'rā,  
ha'e rā heko porā va'e ma oī atā riae 'rā.
- <sup>26</sup> Nhaneraī pe vinagre nda'evei, ha'e nhanderexa pe ma hataxī nda'evei,  
ha'e rami ae inhate'ŷ va'e nda'evei avi ijokuaia pe.
- <sup>27</sup> SENHOR renonde jajererokyjea rupi vy jaikove puku 'rā,  
ha'e rā heko vai va'e ikuaia ma ijapy voi 'rā.
- <sup>28</sup> Heko porā va'e oarōa ma ombovy'a 'rā,  
ha'e rā heko vai va'e oarōa ma oaxa rive 'rā.
- <sup>29</sup> SENHOR guigua tape ma anhetē rupi ikuai va'e onhemi aguā,  
ha'e rā heko vai va'e pe ma imombhaarā rive oī.
- <sup>30</sup> Heko porā va'e ma raka'eve rā peve ndoitayai 'rā,  
ha'e rā heko vai va'e ma nomombytaai 'rā yvy re.
- <sup>31</sup> Heko porā va'e ayvu nhomo'aranduve 'rā,  
ha'e rā ijayvu vaikue rei va'e ma omombaa 'rā.
- <sup>32</sup> Heko porā va'e ayvu nhombovy'a 'rā,  
ha'e rā heko vai va'e ma ha'eve'ŷa rupigua re anho 'rā ijayvu.

## 11

- <sup>1</sup> Jokorea rupi mba'emo opeja va'e gui SENHOR ojeguaru,  
ha'e rā ha'evea'i rami opeja va'e ma oguerovy'a 'rā.
- <sup>2</sup> Jajejou porā rei rive ramo avave rei nanhanemboeteai 'rā,  
teī nhanhemo'yvyi'i vy ma jajou 'rā nhane'arandurā.
- <sup>3</sup> Heko porā va'e anhetē rupi ikuiaia ma oguerekō 'rā ha'evea rupi,  
ha'e rā anhetē rupi e'ŷ ikuai va'e ma anhetē e'ŷa ae 'rā omomba.
- <sup>4</sup> Nhombopagaa ára py opa mba'e jarekopa va'ekue ndovarei 'rā mba'everā,  
ha'e rā nhanderekō porāa ma nhandereraa jepe 'rā manoia gui.
- <sup>5</sup> Anhetē rupi ipy'a va'e pe ma heko porāa ae omoatyrō 'rā haperā,  
ha'e rā heko vai va'e ma ho'apa 'rā ha'e kuery ae reko vaia py.
- <sup>6</sup> Heko porā va'e oo jepe 'rā ha'e kuery ae reko porāa py,  
ha'e rā jokorea rupi ikuai va'e ma ha'e kuery ae reko vaia py 'rā ombo'aa.
- <sup>7</sup> Heko vai va'e omano ramo mba'emo oarōague voi opa 'rā,  
heko vai va'e oarōague opa rive 'rāe.
- <sup>8</sup> Heko porā va'e ogueraa jepea 'rā ojexavaia gui,  
ha'e gui heko vai va'e re jevy 'rā ha'e nunga ou.
- <sup>9</sup> Anhetē rupi e'ŷ ikuai va'e ma ayvu py rive oity 'rā oirū kuery,  
ha'e rā heko porā va'e ma mba'emo oikuua rupi oo jepe 'rā.
- <sup>10</sup> Heko porā va'e ikuai porā ramo tetā pygua kuery ha'e javi 'rā ov'y'a okuapy,  
ov'y'a avi 'rā okuapy heko vai va'e okanhy ramo.
- <sup>11</sup> Heko porā va'e ogueroayvu porāa rupi tetā ha'e javi rupi 'rā ikuai porā,  
ha'e rā heko vai va'e kuery ijayvua rupi ma oitya 'rā.

- 12 Oirū pe "Mba'e vare'ŷ" he'i va'e re ma noĩ 'arandua,  
ha'e rã ava hi'arandu va'e ma okyrirí 'rã oikovy.
- 13 Joekokue ramigua rive omombe'u va'e onhea'ã 'rã onhomí mbyre oikuua aguã,  
ha'e rã ojeroviapy ma onhomí mbyre nomboaxai 'rã.
- 14 Juguerekoa hi'arandu va'e ndoikoi ramo avakue pavẽ 'rã ho'apa,  
teĩ nhomongetaa heta ikuai ramo ma ikuai porã 'rã.
- 15 Oirū orevea opaga aguã rami oiko va'e ojexavai 'rã,  
ha'e rã ha'e rami ndoikoi va'e ma oĩ atã 'rã.
- 16 Kunha porayvu va'e ojou 'rã imboetearã,  
ipo'akakueve ojou-joupavea rami avi.
- 17 Mborayvu rupi ikuai va'e ma ha'e kuery pe ae ojapo porã,  
ha'e rã joapo vai rei va'e ma ha'e kuery ae onhemoĩ vai uka.
- 18 Heko vai va'e ojeupe guarã ojou va'e ma imarã va'erã,  
ha'e rã teko porã rupi oiko va'e ma anhetẽ ete va'e guigua ojou 'rã oikoague repy.
- 19 Heko porã va'e oo 'rãe tekove katy,  
ha'e rã teko vai rupi ikuai va'e ma omano ete 'rãe.
- 20 Opy'a py opa marã ikuai va'e gui SENHOR ojeguaru ete 'rã,  
ha'e rã anhetẽ rupi ikuai va'e ma oguerovy'a 'rã.
- 21 Heko vai va'e nombopagaa e'ŷi 'rã, jaikuaa,  
ha'e rã heko porã va'e kuery regua ma oo jepe 'rã.
- 22 Ouro guigua ma poryko xĩ jeguarã oĩ ramo nda'evei.  
Ha'e rami ae kunha porã re hi'arandu e'ŷa oĩ ramo nda'evei.
- 23 Heko porã va'e oipotaa rami vy oiko 'rã nhomoingo porãarã,  
ha'e rã heko vai va'e ma mba'emo oarõ va'ekue 'rãgue py oiko 'rã imbopagaarã.
- 24 Joupe mba'emo ome'ẽ rive-rive'i va'e ojou retave 'rã heravy,  
ha'e rã nome'ẽ rivexei va'e ma oipotapa rei 'rã.
- 25 Imba'eme'ẽ porã kuaa va'e ma oiko porã 'rã,  
joupe oy'u va'erã ome'ẽ va'ekue ju omboy'ua 'rãe.
- 26 Mba'emo aju nomboja'oxei va'e re ma heta va'e kuery ijayvu vai 'rã okuapy,  
ha'e rã ivendeare ma ogueroayvu porãa 'rã.
- 27 Joupe ojapo porãa rupi ikuai va'e omboetea 'rã,  
ha'e rã teko vai rupi rive ikuai va'e ma ha'e kuery re ae ju 'rã ojeapa heko vaiague.
- 28 Ombo'eme'rei re rive ojerovia va'e ho'a 'rã,  
ha'e rã heko porã va'e ma ijaguyje 'rã mba'emo rogue ipyaupaa rami.
- 29 Ngopygua kuery ndoguerekoo kuaai va'e ojou 'rã yvytu rive,  
ha'e hi'arandu e'ŷ va'e ikuai 'rã hi'arandu va'e rembiguairã.
- 30 Heko porã va'e ma yvyra'a tekove me'ea rami ikuai,  
tekoverã joua ma hi'arandu va'e ae vy ma 'rã.
- 31 Yvy re heko porã va'e ikuai teria ja ombopagaa 'rã.  
Heko vai ha'e ojejavypa rei va'e kuery katuve ma ombopagaa 'rã.\*

## 12

- <sup>1</sup> Onhemo'arandu uka va'e ogueroovy'a 'arandua,  
ha'e rã nonhemongeta ukai va'e ma hi'arandu e'ŷ va'e ae.
- <sup>2</sup> Heko porã va'e oupity 'rã SENHOR omboaxya,  
ha'e rã opa marã rei onhembopy'a va'e ma ombopaga 'rã.
- <sup>3</sup> Avakue ojejavypa reia rupi ikuai va'e noĩ atã kuaai 'rã,  
ha'e rã heko porã va'e ma ndoipe'aai 'rã.
- <sup>4</sup> Kunhague hi'arandu va'e ma ime ogueroovy'a 'rã,

\* 11:31 1 Pedro 4.18

- ha'e rã oximba rei aguã rami ikuai va'e ma ikãgue omou'ũmba heravy va'e rami.
- 5 Heko porã va'e ipy'a 'rã ha'evea rupi anho,  
ha'e rã heko vai va'e ma nhombotavya rupi rive 'rã nhomongeta.
- 6 Heko vai va'e ayvu ma joguy omoëxe vy oma'ẽ mbegue va'e rami,  
ha'e rã heko porã va'e ayvu ma jogueraa jepearã.
- 7 Heko vai va'e oitya rã noïvei ma 'rã,  
ha'e rã heko porã va'e ramymino kuery ma ikuai riae 'rã.
- 8 Avakue hi'arandu va'e re ima'endu'a porã 'rã,  
ha'e rã opa marã onhemboyate rei tei karuai nhaendu jepi 'rãgue py  
ha'eveve nhanhemo'yvy'i reve nhamba'epo jaikovy aguã.
- 10 Heko porã va'e opena porã 'rã guymba kuery re,  
ha'e rã heko vai va'e py'a re ma nhomoingo axyxea rive oĩ.
- 11 Oyy re ombo'epo va'e oguereko reta 'rã tembi'u,  
ha'e rã hi'arandu e'ŷ va'e kuery ma mba'emo rive ojou aguã rupi ikuai.
- 12 Heko vai va'e ikuai 'rã teko vairã joua rupi rive,  
ha'e rã heko porã va'e ma yvyra hapo porã ha'e hi'a porã va'e rami.
- 13 Heko vai va'e onhembo'a uka 'rã ha'e ae ijayvua py,  
ha'e rã heko porã va'e ma oo jepe 'rã ojexavai aguã gui.
- 14 Avakue ijayvu porãa rupi ojou 'rã imoingo porãarã,  
peteï-tei ojou 'rã opo py ojapoague repy.
- 15 Hi'arandu e'ŷ va'e ma ojeupe ae ha'evea rami merami oiko,  
ha'e rã hi'arandu va'e ma omongetaa rã ojapyxaka pota 'rã.
- 16 Hi'arandu e'ŷ va'e ma opoxya oexa uka vyvoi 'rã,  
ha'e rã hi'arandu va'e ma hexe ijayvua tei ojejoko kuaa 'rã.
- 17 Anhetã rupi ijayvu va'e ojapo ha'evea rami oikuua potaa aguã rami,  
ha'e rã ijapu va'e ma ojapo nhombotavypaa aguã rami.
- 18 Kyxe xí py rami avi ijayvuxa va'e ayvu nhomboperepa 'rã,  
ha'e rã hi'arandu va'e ayvu ma moã.
- 19 Anhetã rupi ijayvu va'e ikuai riae 'rã,  
ha'e rã ijapu va'e ma xapy'a'i guarã rive.
- 20 Heko vai va'e py'a re oĩ nhombotavy aguã rive,  
ha'e rã peteï rami ikuai aguã re nhomongeta va'e ma oendu 'rã ov'y'aa.
- 21 Heko porã va'e re mba'emo vai ndoikoi 'rã,  
ha'e rã heko vai va'e re ma imoingo axyarã rive 'rã ou.
- 22 Ijapu va'e gui SENHOR ojeguaru,  
ha'e rã anhetã rupi ikuai va'e ma oguerovy'a.
- 23 Hi'arandu va'e ndoikuua ukapa rei 'rã mba'emo oikuua va'e,  
ha'e rã hi'arandu e'ŷ va'e ma oexa ukapa vyvoi 'rã o'arandu e'ŷa.
- 24 Ikyre'ŷ va'e ipo'aka 'rã joe,  
ha'e rã inhate'ŷ va'e ma omomba'epo nhea'ãa rive 'rã.
- 25 Avakue py'a re heko eta reia oĩ va'e ombojero'a rei 'rã,  
ha'e rã ayvu porã'i ma ombovy'a 'rã.
- 26 Heko porã va'e oguereko 'rã heravy oirũ kuery,  
ha'e rã heko vai va'e kuery ma ojavy uka 'rã tape.
- 27 Inhate'ŷ va'e ndoexyi 'rã xo'o ojuka va'ekue,  
ha'e rã ikyre'ŷ va'e ma mba'emo ojou va'ekue ombovare ete 'rã.
- 28 Teko porã rupi oo va'e ojou 'rã tekove,  
ha'e va'e tape rupi manoa noï.

## 13

- <sup>1</sup> Ta'y hi'arandu va'e oendu pota porã 'rã tuu ombo'e rã,  
ha'e rã jojojai rei va'e ma noendu potai 'rã omongoetaa rã.
- <sup>2</sup> Avakue ijayvu porãa rupi vy ojou 'rã iporã va'e,  
ha'e rã anhetẽ rupi e'ŷ ikuai va'e ma joguero'axe vai rive.
- <sup>3</sup> Ayvu py ojejoko va'e omoõ atã 'rã guekovea,  
ha'e rã ijayvu katu raxa va'e ma ha'e ae onhemoõ vai.
- <sup>4</sup> Inhate'ŷ va'e ma mba'emo oipota rei teĩ ndojoui 'rã,  
ha'e rã ikyre'ŷ va'e ma ojoupave 'rã mba'emo.
- <sup>5</sup> Heko porã va'e ndojou porãi 'rã apu,  
ha'e rã heko vai va'e ma oxõmba rei 'rã, ojou vaipy ae vy.
- <sup>6</sup> Teko porã ogueraa jepe 'rã anhetẽ rupi ikuai va'e,  
ha'e rã ojejavypa rei va'e ma teko vai oity 'rã.
- <sup>7</sup> Amongue ma "Arekopa" he'i va'eri mba'eve oguerekoo vy e'ŷ,  
ha'e rã amboae kuery ma "Xeporiau'i" he'i va'eri opa mba'e oguerekoo.
- <sup>8</sup> Avakue oguerekopa va'e ome'ëmba 'rã guekovia,  
ha'e rã iporiaukue'i ma avave nomoangekoai 'rã.
- <sup>9</sup> Heko porã va'e rataendy hexakã porã 'rã,  
ha'e rã heko vai va'e rataendy ma oguepa rive 'rã.\*
- <sup>10</sup> Jajejou porã reia ma joe nhapu'ã rei aguã rive oĩ,  
teĩ nhanhemoneta uka vy ma jajou 'rã 'arandu.
- <sup>11</sup> Mba'e rei-rei jajou rive va'ekue opa rive avi 'rã,  
ha'e rã nhamba'eapoa rupi jajou va'ekue ma hetave 'rã ovy.
- <sup>12</sup> Mba'emo nharõ jaikovya ndoiko voi ramo nhandekuerai 'rã,  
teĩ jaipota va'ekue ojeupity rã yvyra tekove me'ëa rami oĩ.
- <sup>13</sup> Omongoetaa rã noendu potai va'ekue ombopagaa 'rã,  
ha'e rã ijayvua oendu vy ojererokyjea rupi ikuai va'e pe ma ome'ëa reta 'rã.
- <sup>14</sup> Hi'arandu va'e nhanembo'ea ma tekoverã me'ëa,  
nhuã manoa gui jaa jepo aguã.
- <sup>15</sup> Hi'arandu porã va'e omboetea 'rã,  
ha'e rã anhetẽ rupi e'ŷ ikuai va'e reve ma nda'evei nhandekuai aguã.
- <sup>16</sup> Hi'arandu va'e ha'e javi oiko kuua 'rã,  
ha'e rã hi'arandu e'ŷ va'e ma oexa uka 'rã o'arandu e'ŷa.
- <sup>17</sup> Heko vai va'e pe mba'emo omombe'u ukaa ramo oiko 'rã mba'emo vai,  
ha'e rã ojeroviapy pe ri omombe'u ukaa ramo ma moã rami oiko.
- <sup>18</sup> Omongoetaa rã noendu potai va'e ma iporiau ha'e oxõmba rei aguã rami ikuai,  
ha'e rã omongoetaa rã oendu porã pota va'e ma omboetea 'rã.
- <sup>19</sup> Jaipota va'ekue oiko ramo javy'a 'rã nhandeypy'a py,  
ha'e rã hi'arandu e'ŷ va'e ma ojeguaru 'rã gueko vaia gui ojepe'a va'e gui.
- <sup>20</sup> Hi'arandu va'e reve ikuai va'e hi'aranduve 'rã,  
ha'e rã hi'arandu e'ŷ va'e reve onhemoirũ va'e ma ojexavai rive 'rã.
- <sup>21</sup> Mba'emo vai oupity 'rã ojejavypa rei va'e,  
ha'e rã heko porã va'e pe ma mba'emo porã anho 'rã ome'ëa.
- <sup>22</sup> Avakue heko porã va'e ma gua'y ra'y kuery pe 'rã oeja ombo'e rei-reikue,  
ha'e rã ojejavypa rei va'e mba'e rei-reikue ma heko porã va'e peguarã ae 'rã optyta.
- <sup>23</sup> Iporiaukue'i oyvy omboa'eve ramo'lague py opa mba'e hi'a porã 'rã,  
ha'e rã teko porã rupigua ndoikoi ramo oipe'apaa 'rã.
- <sup>24</sup> Gua'y kuery noinupã potai va'e ma ndoayvui vy,  
ha'e rã oayvu vy are e'ŷ re omo'arandu pota 'rã.

\* **13:9** "Hataendy" he'ia py ma tekove re ijayvu vy.

<sup>25</sup> Heko porã va'e oguerekó reta 'rã ho'u va'erã,  
ha'e rã heko vai va'e ma oendu 'rã karuai.

## 14

- <sup>1</sup> Kunha hi'arandu va'e ojapo porã 'rã ngoorã,  
ha'e rã hi'arandu e'ŷ va'e ma opo py ae ngoo ombovaipave 'rã heravy.
- <sup>2</sup> Heko porã va'e ma SENHOR renonde ojererokyjea rupi 'rã ikuai,  
ha'e rã tape vai rupi ikuai va'e maomboete e'ŷ va'e.
- <sup>3</sup> Hi'arandu e'ŷ va'e oiko axy 'rã ojejou porã reia rupi ijayvuague py,  
ha'e rã hi'arandu va'e ma ijayvu porãague py oo jepe 'rã.
- <sup>4</sup> Toro ra'y ombo'eapo va'e ndoikoi rã mba'emo ra'yí mboapy'i ae 'rã jareko nhamoĩ  
porãaty py,  
ha'e rã toro ra'y ovare va'e jareko vy nhamono'õ retave 'rã.
- <sup>5</sup> Anhetẽ rupi joeko mombe'ua nda'ijapui 'rã,  
ha'e rã anhetẽ rupi e'ŷ nhomombe'u va'e ma opa mba'e py 'rã ijapu.
- <sup>6</sup> Jojojai rei va'e o'arandurã oeka teĩ ndojoui 'rã,  
ha'e rã hi'arandu va'e pe ma ndaxyi 'rã mba'emo oikuua aguã.
- <sup>7</sup> Ejepe'a ke avakue hi'arandu e'ŷ va'ea gui,  
mba'eta ha'e kuery ijayvu teĩ peteĩve henda py ndereikuaa porãi 'rã.
- <sup>8</sup> Hi'arandu va'e oexa uka o'arandua ojee ae oikuuaa potaa py,  
ha'e rã hi'arandu e'ŷ va'e ma ijarakuaa e'ŷa py ojekore.
- <sup>9</sup> Hi'arandu e'ŷ va'e ojejavý teĩ "Mba'e'ŷ" he'i rive 'rã,  
ha'e rã heko porã va'e ma joayvua rupi 'rã ikuai.
- <sup>10</sup> Nhandepy'a re nda'eveia oĩ va'e nhande ae 'rã nhaendu,  
ha'e javy'aa voi ndajaexa uka kuaai 'rã jaexa va'ety e'ŷ pe.
- <sup>11</sup> Heko vai va'e kuery ro ombovaipaa 'rã,  
ha'e rã heko porã va'e roguy rupi ma ipotypa 'rã.
- <sup>12</sup> Oĩ tape jaexa rã ha'eve rei va'e merami,  
ha'e rami teĩ opaa py ma nhandereraa 'rã manoakaty.
- <sup>13</sup> Nhanderory rei reve teĩ nhandepy'a py ma ndajavý'ai,  
javy'aa opa ramove mboriau ju 'rã nhaendu.
- <sup>14</sup> Opy'a py anhetẽ rupi e'ŷ ikuai va'e ojopy 'rã ikuaiague repy ha'e javi,  
heko porã va'e oiko porãague repy ojopy va'erã ramigua e'ŷ.
- <sup>15</sup> Hi'arandu e'ŷ va'e ma ijayvua rã oendu vy ogueroviapa rei 'rã,  
ha'e rã hi'arandu va'e ma oikuuaa pota 'rã oiko aguã re.
- <sup>16</sup> Hi'arandu va'e oikuuaa pota vy ojepe'a 'rã mba'emo vai gui,  
ha'e rã hi'arandu e'ŷ va'e ma ivai vyvoi 'rã ojee ae rive ojerovia vy.
- <sup>17</sup> Ipoxy rei rive va'e opa marã 'rã ikuai,  
avakue joapo vai rei va'e re nda'ija'eai 'rãe.
- <sup>18</sup> Hi'arandu e'ŷ va'e ma 'arandu rupi e'ŷ 'rã ikuai,  
ha'e rã hi'arandu va'e ma oiko kuaa-a py ijegua.
- <sup>19</sup> Heko vai va'e guenapy'ã re 'rã oĩ heko porã va'e renonde,  
anhetẽ rupi e'ŷ oiko va'e ojerure 'rã oiny heko porã va'e rokẽ py.
- <sup>20</sup> Iporiaukue'i re hoo katy'igua kuery ae voi nda'ija'ei 'rã,  
ha'e rã oguerekopa va'e ma irũ reta 'rã.
- <sup>21</sup> Ngoo katy'i rupi ikuai va'e re ija'e'ŷ va'e ojejavý,  
ha'e rã iporiaukue'i mboaxya ma ový'a 'rã.
- <sup>22</sup> Mba'emo vairã rupi rive onhembopy'a va'e ndojejavyi 'rã teve?  
Ha'e rã iporã re nhanhembopy'a ramo nhanderayvua ha'e ojeroviaa 'rã nhandere.
- <sup>23</sup> Nhamba'eapoa ha'e javi rupi jajou retave 'rã,

- teĩ nhandeayvu katu rivea py ma nhandeporiauve rive 'rã.
- <sup>24</sup> Hi'arandu va'e mba'e rei-rei retaa ijegua 'rã,  
ha'e rã hi'arandu e'ŷ va'e pegua ma nda'ijarakuaai reia.
- <sup>25</sup> Anhetẽ va'e rupi joeko mombe'ua ma ogueraa jepe 'rã joekove,  
ha'e rã ijapu rei va'e ma nhombotavypa rive 'rã.
- <sup>26</sup> SENHOR renonde jajererokyjea rupi vy jajou nhanhemi aguã imbaraete va'e,  
nhandera'y kuery voi ojou'rã onhemi aguã.
- <sup>27</sup> SENHOR renonde jajererokyjea rupi vy jaupity 'rã yvu tekove me'ëa,  
nuhã manoa py ja'a e'ŷ aguã.
- <sup>28</sup> Huvixa pegua kuery heta ramo oguerovy'a 'rã,  
ha'e rã oatapa ramo huvixa nda'evei rei 'rã.
- <sup>29</sup> Ivai rive e'ŷ va'e ma opa mba'e py oexa uka 'rã o'arandu,  
ha'e rã ipoxy rive va'e ma oguerovy'a 'rã hi'arandu e'ŷa rive.
- <sup>30</sup> Ha'eve rei'ia nhaendu vy nhanderete ha'e javi oiko porã 'rã,  
ha'e rã joe nhanda'e e'ŷa py ma nhanekãgue hu'ũmbaa rami.
- <sup>31</sup> Iporiaukue'i momboriau reia kuery ma Imoingoare re voi opu'ã rei,  
ha'e rã iporiaukue'i mboaxyu kuery ma Nhanderuete mboetea rupi avi ikuai.
- <sup>32</sup> Heko vai va'e ho'a 'rã gueko vaia py ae,  
ha'e rã heko porã va'e ma omanoa py voi oguereko 'rã oarõ aguã.
- <sup>33</sup> Hi'arandu va'e py'a re oĩ hi'arandua,  
ha'e rã heko vai va'e py'a re oĩ va'e ma oikuaa pavẽ 'rã.
- <sup>34</sup> Peteĩ-teĩ regua teko porã rupi ikuai va'e ma ojou vai pavẽ 'rã.  
ha'e rã jejavya re anho ikuai va'e ma ojou vai pavẽ 'rã.
- <sup>35</sup> Huvixave oguerovy'a 'rã tembiguai kuery hi'arandu va'e,  
ha'e 'rã ha'eve'ŷa rami ikuai va'e ma ombopaga vaipa 'rã.

## 15

- <sup>1</sup> Nhambovai porã'i ramo ipoxy va'e opytu'u 'rã ipoxya gui,  
va'eri nhandeayvu poyi rei vy ma nhambopoxyve 'rã.
- <sup>2</sup> Hi'arandu va'e ijayvu rã jajou porã 'rã hi'arandua,  
ha'e rã hi'arandu e'ŷ va'e ijayvu rã jaikuua 'rã nda'ijarakuaia.
- <sup>3</sup> SENHOR oexa 'rã opa rupi,  
heko vai va'e ha'e heko porã va'e kuery ha'e javi re onhangareko oiny vy.
- <sup>4</sup> Ayvu porã ma yvyra tekove me'ëa,  
ha'e rã ayvu vaikue rei ma nhanemonguerai rive 'rã.
- <sup>5</sup> Hi'arandu e'ŷ va'e ma tuuombo'e ta teĩ noenduxei 'rã,  
ha'e rã omongetaa rã oendu va'e ma oupity 'rã 'arandu.
- <sup>6</sup> Heko porã va'e ro py heta 'rã oĩ iporã va'e anho,  
ha'e rã heko vai va'e ma ojou 'rã ojexavai aguã rive.
- <sup>7</sup> Hi'arandu va'e ijayvua py oexa uka 'rã hi'arandua,  
ha'e rã heko vai va'e ma ha'e ramigua re'ŷ ae ipy'a.
- <sup>8</sup> Heko vai va'e SENHOR pe mba'emo ome'ë teĩ ojeguaru 'rã,  
ha'e rã heko porã va'e onhembo'ea oendu vy oguerovy'a 'rã.
- <sup>9</sup> Heko vai va'e reko gui SENHOR ojeguaru,  
ha'e rã teko porã rupi ikuai va'e ma oayvu.
- <sup>10</sup> Tape porã gui ojepa'e va'e ma ombopagaa raxa 'rã,  
omongetaa rã noenduxei va'e omano 'rãe.
- <sup>11</sup> Yvy manoa ha'e ikua vaikue SENHOR oikuaapa va'e vy  
avakue ra'y kuery py'a re oĩ va'e katuve ma oikuaapa!
- <sup>12</sup> Jojojai rei va'e ma imongetaa re nda'ija'ei 'rã,

- neĩ nonhembojai 'rã hi'arandu va'e re.
- <sup>13</sup> Nhandepy'a re vy'a oĩ va'e ojapo 'rã nhanderova porã rei aguã rami,  
ha'e rã nhandeporiau reia ma nhanemonguerai reive 'rã.
- <sup>14</sup> Hi'arandu va'e py'a re oĩ oiko kuaaxeia,  
ha'e rã hi'arandu e'ŷ va'e ijayvua py voi nda'ijarakuaaive tema.
- <sup>15</sup> Ojexavai rei va'e ára ma nda'evei va'e meme,  
ha'e rã nhandepy'a py mby'a oĩ vy ojapo 'rã nhanhenhandu porã riae aguã rami.
- <sup>16</sup> Jarekopa reve nhanderekota eta rei 'rãgue py  
ha'eveve nhandeporiaukue'i teĩ SENHOR renonde jajererokyjea rupi jaiko.
- <sup>17</sup> Jajoayvua rupi e'ŷ vaka ikyrave va'e ro'o mbixy ja'u 'rãgue py  
ha'eveve tembi'u jaexa'i va'e tema ja'u jajoayvua rupi.
- <sup>18</sup> Ivai ja rei va'e jogueropoxy rive 'rã,  
ha'e rã ivai rive e'ŷ va'e ma nhomombytu'u 'rã joguero'aa gui.
- <sup>19</sup> Inhate'ŷ va'e oikoa ma tape juu anho ikuiaia rami,  
ha'e rã heko porã va'e oikoa ma tape ijoja porã va'e rami.
- <sup>20</sup> Ta'y hi'arandu va'e ombovy'a 'rã nguu,  
ha'e rã hi'arandu e'ŷ va'e ma neĩ oxy voi ndoayvui.
- <sup>21</sup> Hi'arandu e'ŷ va'e oguerovy'a rei 'rã ijarakuaa e'ŷa,  
ha'e rã avakue hi'arandu va'e ma ha'evea rami 'rã ikuai.
- <sup>22</sup> Nhanemongetaarã ndoikoi ramo jaipota va'e voi ndoikoi avi 'rã,  
ha'e rã nhanemongetaa heta ikuai rã ha'eve 'rã.
- <sup>23</sup> Avakue ha'evea rami ombovai vy ov'y'a 'rã,  
ayvu oĩ porã aguã rami ijayvua py.
- <sup>24</sup> Hi'arandu va'e tape ooa va'e ma yvate 'rã oo tekove katy,  
manoa katy oguejy ov'y'rãgue py.
- <sup>25</sup> SENHOR oitypa 'rã ojejou porã rei va'e ro,  
ha'e rã imeve'ŷ va'e kuery pegua ma omoĩ atã 'rã.
- <sup>26</sup> SENHOR ojeguaru heko vai va'e kuery onhembopy'aa gui,  
ha'e rã ayvu porã ma oendu vy oguerovy'a 'rã.
- <sup>27</sup> Jokorea rupi ojou-joupavexe va'e ombojexavai 'rã ngoo pygua kuery,  
ha'e rã teko vai rekoviatarã ndojopyi va'e ma oikove riae 'rã.
- <sup>28</sup> Heko porã va'e onhembopy'a porã ranhe 'rã ombovai kuaa aguã,  
ha'e rã heko vai va'e ma opa marã rei 'rã ijayvu.
- <sup>29</sup> Heko vai va'e ikuiaia gui SENHOR mombyry oĩ,  
ha'e rã heko porã va'e onhembo'ea ma oendu 'rã.
- <sup>30</sup> Nhandererovy'aa rupi oma'ëa ramo javy'a 'rã,  
ayvu porã omombe'ua rã nhaendu vy nhanekägue rupi voi nhanembaraeteve avi  
'rã.
- <sup>31</sup> Ha'evea rupi nhanemongetaa rã jajapyxaka vy  
hi'arandu va'e kuery reve 'rã nhanhemoirû.
- <sup>32</sup> Nonhemo'arandu ukai va'e ha'e ae guekove nombovarei,  
ha'e rã omongoetaa rã oendu pota va'e ma ojou 'rã 'arandu.
- <sup>33</sup> SENHOR renonde jajererokyjea rupi jaiko ramo nhanembo'e 'rã 'arandu re,  
ha'e nhanhemo'yvy'i ramo nhanemboetea 'rã.

## 16

- <sup>1</sup> Nhande nhanhembopy'a 'rã mba'emo jajapo aguã,  
ha'e rã SENHOR gui ae 'rã ou nhambovai kuaa aguã.
- <sup>2</sup> Nhandevy ma jaikoa ha'e javi ha'evepa rei teĩ  
SENHOR oikuua pota 'rã nhandepy'a re.

- <sup>3</sup> Emboaxa SENHOR po py mba'emo rejapoxe va'e,  
ha'e ramo omoingo 'rã reipotaa ha'e javi.
- <sup>4</sup> SENHOR opa mba'e omoingo ha'e ae oipotaa rami,  
heko vai va'e voi omoingo ojexavai aguã.
- <sup>5</sup> Opy'a py ojejou porã rei va'e gui SENHOR ojeguaru vy  
nombopaga e'ŷi 'rãe.
- <sup>6</sup> Nhanhomboaxyha'e anhetẽ rupi jaiko ramo jajeavyague ojao'ipaa 'rã,  
SENHOR renonde jajererokyjea rupi vy jaa jepe 'rã mba'emo vai gui.
- <sup>7</sup> Xapy'a rei ava oikoa SENHOR oguerovy'a vy  
ojapo 'rã ngovaigua kuery reve voi irũ jevy aguã rami.
- <sup>8</sup> Jarekopa rei reve teko vai rupi jaiko 'rãgue py  
ha'eveve mboapy'i jareko reve teko porã rupi jaiko.
- <sup>9</sup> Jaiko aguã re nhande nhanhembopy'a teĩ  
jaguataa rupi nhanderereko va'e ma SENHOR ae.
- <sup>10</sup> Huvixa ijayvu 'rã oikuaapaa rupi ae.  
Ha'e ramo nemboayvu rã ejavy eme ndeayvua py.
- <sup>11</sup> SENHOR gui ae 'rã ou ha'evea rami mba'emo japeja ha'e nha'anga aguã,  
voko py ha'evea ramigua poyia oĩ va'e ma ixuguigua meme.
- <sup>12</sup> Huvixa kuery ojeguaru 'rã teko vai ha'e javi gui,  
gueko porãa rupi ae 'rã opena oiny.
- <sup>13</sup> Anhetẽ rupigua ayvu huvixa oendu vy oguerovy'a 'rã,  
oayvu 'rãe anhetẽ rupi ijayvu va'e.
- <sup>14</sup> Huvixa ipoxya nhaendu vy jaikuua 'rã jojuka ukaxeia,  
teĩ ha'e ramia gui hi'arandu va'e omombytu'u kuaa 'rã.
- <sup>15</sup> Huvixa ovya ramo jaikuua nhomoingove ju aguã.  
Iporayvua ma ára pyau py arai gui okya rami.
- <sup>16</sup> Ouro jajoua gui ha'eveve nhane'arandurã jajou,  
prata gui ha'eveve va'e ma jaiko kuaavea.
- <sup>17</sup> Heko porã va'e oikoa ma teko vairã katy e'ŷ 'rã oo,  
oiko aguã oikuuaa pota porã va'e ma ogueraa jepe 'rã guekove.
- <sup>18</sup> Jajejou porã reia ma opaa py nhanembojexavai 'rã,  
ha'e nhandepy'a py nhanhemboyvate reia ma nhandereityarã oĩ.
- <sup>19</sup> Yvatekueve reve mba'emo jajoupa va'ekue nhamboja'o 'rãgue py  
ha'eveve yvyigueve'i reve nhanhemo'yvyi'i.
- <sup>20</sup> Ombo'ea rã ojapyxaka va'e ojou 'rã mba'emo porã,  
ha'e SENHOR re ojerovia va'e ovya ete 'rã.
- <sup>21</sup> Okuraxõ py hi'arandu va'e pe "Oiko kuaa va'e" 'ea 'rã,  
ha'e ijayvu porã kuaa va'e ma nhombo'e porã 'rã.
- <sup>22</sup> 'Arandu ojou va'e pe ma tekove me'earã oĩ,  
ha'e rã hi'arandu e'ŷ va'e ma opaga 'rã nda'ijarakuaai reiague re.
- <sup>23</sup> Hi'arandu va'e okuraxõ py onhembo'e ranhe 'rã ijayvu kuaa aguã,  
ha'e ramo onhe'ẽ rendu pavẽ 'rã.
- <sup>24</sup> Ayvu porã ma ei he'ea ramí oĩ nhanekuraxõ re,  
moã nhanderete moexaĩa rami guive.
- <sup>25</sup> Oĩ tape avakue oexa rã ha'eve rei va'e merami teĩ  
opaa py ma mano a katy 'rã ogueraa.
- <sup>26</sup> Ombo'ea po va'e ma nhembyayi gui ae 'rã ombo'ea po,  
okaruxea ae omokyre'ŷ.
- <sup>27</sup> Avakue vare'ŷ va'e onhea'ã 'rã okuapy teko vai re anho,  
ha'e ijayvua ma tata mba'emo rapyara.

- <sup>28</sup> Avakue heko vai va'e ojapo 'rã joguero'a rei aguã rami,  
    ijayvu rei va'e ma joe irã porã va'ekue teĩ omomboi 'rã joegui.
- <sup>29</sup> Avakue ojerovia rei va'e oirã kuery ombotavy vy  
    oguereko 'rã tape vai rupi.
- <sup>30</sup> Oxapymi rei va'e onhembopy'a 'rã oiny teko vai re,  
    ha'e gui onhembexu'u reve ojapo ete 'rã.
- <sup>31</sup> Omboetepy 'a xiã ma ijeguarã oĩ,  
    tape teko porã katy oo va'e rupi oje'oí va'e pegua ae.
- <sup>32</sup> Joe nhapu'ã rei aguã re jajerovia rei 'rãgue py ha'eveve nhandevai vyvoi e'ŷa,  
    tetã ha'e javi re nhandepo'aka 'rãgue py ha'eveve nhande ae jajejoko kuaa.
- <sup>33</sup> Xortea jaexa teĩ  
    SENHOR gui meme ou jaikuua aguã.

## 17

- <sup>1</sup> Nhandero py jajoguero'apa rei reve xo'o ja'u vaipa 'rãgue py  
    ha'eveve nhandekuai rivea py peteĩ'i mbojape ja'u.
- <sup>2</sup> Ta'y kuery oximba aguã rupi ikuai va'e gui ma tembiguai kuery hi'arandu va'e ipo'akave  
    'rã,  
    ha'e rami vy ojopy 'rã ta'y kuery peguarã va'ekue ae.
- <sup>3</sup> Prata ma hi'angaarã py 'rã nhamoĩ, ha'e ouro ma tata py,  
    ha'e rã nhandepy'a re oikuaa pota va'e ma SENHOR ae.
- <sup>4</sup> Heko vai va'e ojapyxaka 'rã mba'emo vai rupi ijayvu va'e re,  
    ijapu va'e oenduxe vai 'rã ayvuxa.
- <sup>5</sup> Iporiaukue'i jojai reia kuery ma Imoingoare re voi ijayvu rei rire  
    jexavaia oguerovy'a rei va'e ndopaga e'ŷi 'rã.
- <sup>6</sup> Tamõi kuery oguerovy'a 'rã guamymino kuery,  
    ha'e rami ae avi ta'y kuery oguerovy'a 'rã nguu kuery.
- <sup>7</sup> Hi'arandu e'ŷ va'e nda'ijayvu porã kuaai 'rãe,  
    ha'e huvinha kuery nda'evei ijapu aguã.
- <sup>8</sup> Ha'eve'ŷa rami ojapo ukaxe vy mba'emo ome'ẽ va'e oikuaa teĩ oipota va'e rei ita ojapoa  
    rami,  
    mba'eta mamo rã oikoa py tema oipotaa oiko 'rã.
- <sup>9</sup> Amboae kuery ojejavyague ndoikuaa ukai va'e oexa uka oayvua,  
    ha'e rã mba'ekue omboaxa-axa rei va'e ma ojapo 'rã joe irãve va'ety joegui oja'o aguã  
    rami.
- <sup>10</sup> Hi'arandu e'ŷ va'e cem-kue oinupãa teĩ noendui 'rã merami,  
    ha'e rã hi'arandu va'e ma omongoetaa rã oenduxe ete 'rã.
- <sup>11</sup> Nanhonhe'ẽ rendui va'e kuery onhea'ã mba'emo vai re anho.  
    Ha'e nunga rupi ha'e kuery rovai omboua 'rã imbojexavaiarã.
- <sup>12</sup> Urso gua'y'i re inharõ va'e reve nhanhovaexiã gui nda'eveive  
    hi'arandu e'ŷ va'e ijarakuaa rupi e'ŷ ikuai va'e reve nhanhovaexi.
- <sup>13</sup> Amongue pe ojapo porãa 'rãgue py mba'emo vai re omboekovia rire  
    hoo py oiko riae 'rã mba'emo vai.
- <sup>14</sup> Yy ombotyague gui oxyry xapy'aa rami avi jajoguero'a ypya.  
    Ha'e nunga rupi ha'eveve japytu'u voi, joegui jaja'o e'ŷ aguã.
- <sup>15</sup> SENHOR ndojou porãi 'rã heko vai va'e omboeko porã rivea rã,  
    neĩ heko porã va'e ombopaga rivea rã guive.
- <sup>16</sup> Hi'arandu e'ŷ va'e o'arandurã ojoguaxe vy merami peráta oguereko opo py,  
    nai'arandui ae ma va'eri.
- <sup>17</sup> Nhaneirã kuery nhanderayvu 'rã jaikoa jave re,  
    ha'e rami vy jajexavaia py onhemoingo 'rã nhanceretarã ae'i rami.

- 18 Avakue hi'arandu e'ŷ va'e onhemoĩ vai uka rive vy  
ojea katy'igua orevea opaga aguã rami ikuai.
- 19 Juguero'a reixe vai va'e ojejavy reia rupi rive 'rã ikuai,  
ha'e ngokẽ omobotuvixa va'ekue py ae 'rã ojeity uka.
- 20 Anhetẽ rupi e'ŷ ipy'a va'e ndojoui 'rã ha'eve va'e,  
peteĩ rupi e'ŷ ijayvu va'e ho'a 'rã mba'emo vai py.
- 21 Ta'y hi'arandu e'ŷ va'e omomboriau 'rã nguu kuery.  
Ndoiko kuaai rei va'e ru kuery ma ndovy'ai 'rã.
- 22 Nhandepy'a py vy'aa ma moã porã rami 'rã oĩ,  
ha'e rã nhanenhe'ẽ py nhandekueraia oĩ vy ma omombirupa 'rã nhanekãgue.
- 23 Heko vai va'e onhevende nhemi 'rã peráta re,  
ha'eve e'ŷa ramigua rupi joguereko aguã.
- 24 Mba'emo oikuaa va'e onhea'ã 'rã hi'aranduve aguã anho,  
ha'e rã hi'arandu e'ŷ va'e ma yvy re mba'emo ikuai va'e re rei 'rã oma'ẽ oikovy.
- 25 Ta'y hi'arandu e'ŷ va'e omomboriau 'rã nguu,  
omonguerai rei avi 'rã hereko'iare.
- 26 Heko porã va'e nhambopaga aguã nda'evei,  
huvíxa nhamoingo axy reia ma ha'eve'ŷ va'e ae.
- 27 Ayvu py ojejoko va'e ma hi'arandu va'e,  
oiko rive'i va'e ma oiko kuaa va'e ae.
- 28 Hi'arandu e'ŷ va'e teĩ okyrirĩ oiny rã jaikuua 'rã hi'arandua rami,  
ijayvua py ojejoko va'e jaikuua 'rã oiko kuaa va'e rami ae.

## 18

- <sup>1</sup> Joexaxe e'ŷ rei va'e ma ha'e kuery ae oipotaa rami rive ikuai,  
ha'e vy noenduxei 'rã 'arandu anhetẽ ete va'e.
- <sup>2</sup> Hi'arandu e'ŷ va'e ndoikuaaxe'i 'rã 'arandu,  
ha'e kuery ae akã gui rive 'rã ijayvu.
- <sup>3</sup> Teko vai oĩ ramo oĩ avi 'rã jojou vaia,  
ha'e nhaximba aguã rami nhandekuai ramo nanhanemboeteavei ma 'rã.
- <sup>4</sup> Avakue ijayvua ma yy typy va'e ramigua,  
ha'e hi'arandu va'e ayvu ma yakã'i oxyry va'e rami 'rã.\*
- <sup>5</sup> Nda'evei otekoavy va'ekue nhambopaga aguã guive.  
neĩ heko porã'i va'e nhambopaga aguã guive.
- <sup>6</sup> Hi'arandu e'ŷ va'e ijayvua ojapo 'rã juguero'a rei aguã rami,  
onhenupã ukaa rupi merami ijayvu.
- <sup>7</sup> Hi'arandu e'ŷ va'e ayvu ma ha'e kuery ae imombaarã rive,  
ijayvua ma nhuã py inhe'ẽ mbo'aarã.
- <sup>8</sup> Ijayvuxe reia ma he'ẽve va'e rami  
oguejy 'rã ipy'apy katy.
- <sup>9</sup> Inhate'ŷa rupi rive omiba'eapo va'e ma  
mba'emo ojavyky rei va'e regua ae ikuai.
- <sup>10</sup> SENHOR rery ma torre imbaraeteve va'e,  
ha'e py heko porã va'e onhemi vy oiko porã aguã.
- <sup>11</sup> Oguerekopa va'e pe rã imba'e rei-rei ma tetã ikorapa va'e rami,  
ha'e oikuua rã ikora yvate va'e rami ae.
- <sup>12</sup> Avakue ikuai axy e'ŷa ja ojejou porã rei 'rã opy'a py,  
ha'e rã onhemo'yvy'i va'e ma omboetea 'rã.

\* **18:4** Yy typyve va'e ramigua ayvu ma haxyve va'e (20.5). Ha'e rã yakã'i oxyry ov yvate va'e ramigua ayvu ma nhanembovy'a va'e.

- <sup>13</sup> Nhaendu kuaa e'ŷ re nhambovai vy  
nhaximba rei 'rã nhane'arandu e'ŷa py.
- <sup>14</sup> Avakue imba'eaxy teĩ ipy'a guaxua omombarae 'rã,  
ha'e rã onhe'ẽ py ikuera ma noguerombaraei 'rã.
- <sup>15</sup> Hi'arandu va'e opy'a re omoi 'rã oikuaa porãe aguã,  
oapyxa rupi voi onhea'ã 'rã oikuaa aguã.
- <sup>16</sup> Joupe avakue mba'emo ome'ẽ 'rã tape oipe'a uka vy,  
yvatekueve reve ijayvu aguã peve.
- <sup>17</sup> Ha'e ranhe ojepy ukaa rupi ijayvu rã ixupe "Ha'evea ramigua" ja'e ranhe 'rã,  
amboae kuery ou vy omboayvu e'ŷa ja.
- <sup>18</sup> Nhombovake va'e kuery xortea oexa vy optyu'upa 'rã joupe ijayvu atãa gui,  
ipo'akakueve teĩ oikuaa vyvoi 'rã.
- <sup>19</sup> Nhanderegua nhambopoxy rire haxy ete 'rã ha'eve vai ju aguã,  
ijayvu atãa rupi onhemboty 'rã oo ikorapa va'e rokẽ jokoa rami.
- <sup>20</sup> Nhandeayvuague rami oiko ramo javy'a 'rã nhanekuraxõ py,  
nhandeayvua ojeupity ramo jarovy'a 'rã.
- <sup>21</sup> Nhandeayvua py jajoapo 'rã omano, e'ŷ vy oikove aguã rami.  
Ijayvu porã kuaa va'e oiko porã 'rã.
- <sup>22</sup> Nhandera'yxyrã jajou vy mba'emo porã jajou,  
ha'e jaupity SENHOR nhanemoingo porãa.
- <sup>23</sup> Iporiaukue'i ma mba'emo re ojerurea rupi 'rã ijayvu,  
ha'e rã oguerekopa va'e ma ombovai atã rei 'rã.
- <sup>24</sup> Avakue irũ reta va'e omokanhy tema 'rã imondovy.  
Ha'e rami teĩ peteĩ oiko avi nhaneirũ nhanderegua ae'i gui nhanderayvuve va'e.

## 19

- <sup>1</sup> Nanhamboetei 'rã hi'arandu e'ŷ va'e kuery anhetẽ rupi e'ŷ ijayvu va'e.  
Ha'e rã iporiaukue'i va'eri anhetẽ rupi ikuai va'e ma nhamboete.
- <sup>2</sup> Jaikuua porã pota e'ŷ re mba'emo jajapo aguã nda'evei,  
mba'eta oikuaa pota porã e'ŷ va'e ojejavvy 'rã.
- <sup>3</sup> Nhande ae 'arandu e'ŷa rupi vy jajavy 'rã tape,  
va'eri SENHOR rovai ae 'rã nhandevai nhandepy'a py.
- <sup>4</sup> Oguererekopa rei va'e heta 'rã ojou oirûrã,  
ha'e rã iporiaukue'i gui ma irũ kuery ae voi ojepe'apa 'rã.
- <sup>5</sup> Joekokue ramigua rive mombe'uare ma nombopagaa e'ŷi 'rã,  
ha'e apu rupi ijayvu va'e voi ndoo jepei 'rã.
- <sup>6</sup> Mba'emo omboja'o-ja'o va'e oguerovy'a pavẽ 'rã,  
mba'emo ome'ẽ rive va'e re onhemoirũ pavẽ 'rã.
- <sup>7</sup> Iporiaukue'i ma hexegua kuery ae'i voi ndoexaxeit 'rã,  
irũ kuery katuve ma ojepe'apa 'rã ixugui.  
Ha'e kuery rakykue mba'emo re ojerure aguã onha teĩ ndouesityi 'rã.
- <sup>8</sup> O'arandurã ojou va'e ma guekove oayvu vy ae,  
mba'emo re oikuaa pota porã va'e ojou 'rã ha'eve va'e.
- <sup>9</sup> Joekokue ramigua rive mombe'uare ma nombopagaa e'ŷi 'rã,  
ijapu rei va'e okanhya 'rãe.
- <sup>10</sup> Hi'arandu e'ŷ va'e oguerekopa rei aguã nda'evei,  
tembiguai katuve ma nda'eveive huvixa kuery re ipo'aka aguã.
- <sup>11</sup> Jajejokoa rupi vy nanhandevai vyvoi 'rã,  
nhandere ijayvu vaiague japerdoaa ma nhandejeguarã oĩ.
- <sup>12</sup> Huvixa ipoxya ma guary okororõa rami,

- ha'e rã iporayvua ma yxapy jai rogue omoak  a rami.
- 13 Ta'y kuery hi'arandu e'   va'e omox  mba rei 'r   nguu,  
ha'e ta'xxy ijayvu mbegue rei va'e ma otyky tema oiny va'e rami.
- 14 Nguu kuery gui avakue ojopy 'r   ngoor   ha'e ombo'e rei-reir  ,  
ha'e r   gua'yxyr   hi'arandu va'e ma SENHOR gui ae 'r   ojou.
- 15 Ate'   gui ae nhanderopeyi riae 'r  ,  
ha'e nha   rive riae vy nhaendu 'r   karuai.
- 16 Ojapo uka pyre rami ikuai va'e ma guekove re ae onhangareko va'e,  
ha'e r   ojee ndoikuua potai va'e ma omano 'r  .
- 17 Iporiaukue'i mboaxya ma SENHOR pe ae oiporuka va'e,  
ha'e ramo ha'e ju 'r   omboekovia joapo por  ague repy.
- 18 Ha'eve teri reve emo'arandu ke ndera'y,  
te   rejuka agu   peve'   ta'vy.
- 19 Ivai ja topaga ipoxy reiague re,  
mba'eta ndee repy te   ha'ekue rami ae ju 'r   oiko.
- 20 Nemongetaa r   ejapyxaka por   ke, endu pota nembo'ea r  ,  
hi'arandu va'e reiko agu   reikoa pukukue re.
- 21 Avakue ma opa mba'e re onhembopy'a te  ,  
ha'e r   SENHOR onhembopy'aa ma oiko 'r  e.
- 22 Nhanhomboaxya rupi nhandekuai ramo nhandererovy'aa 'r  ,  
ijapu rei va'e 'r  gue py oguerovy'aave 'r   iporiaukue'i.
- 23 SENHOR renonde jajererokyjea rupi vy jaupity 'r   tekove.  
Ha'e ramo ikuai va'e ov'y a 'r  , ha'e kuery re ndoui 'r   mba'emo vai.
- 24 Inhate'   va'e ma hy'a py opo'   te    
ojuru katy ndogueru potai 'r  .
- 25 Jojojai rei va'ekue nhambopaga ramo hi'arandu e'   va'ekue oexa vy oiko kuaa pota  
nho 'r   okuapy,  
ha'e hi'arandu va'e nhamongeta r   oiko kuaave 'r  .
- 26 Ta'y nguu ojavyky rei, ha'e oxy omox   rire ma  
nomboeteavei ramo ox  mba rei 'r  .
- 27 Xera'y, nembo'ea nerendu potai ri vy  
rejepe'a 'r   nemo'aranduar   va'ekue ayvu gui.
- 28 Heko vai va'e joekokue omombe'ua py ombojaru rei 'r   imboayvua,  
heko vai va'e kuery teko vai re anho 'r   ijayvu.
- 29 Jojojai rei va'ekue ma ombopagaa agu   rami ae ikuai,  
hi'arandu e'   va'e ma oinup  mbaa agu   rami ikuai.

## 20

- <sup>1</sup> Vinho nhomoingo 'r   jojojai rei agu   rupi, iro va'e ma nhomoingo 'r   joguero'a rei agu   rupi.  
Ha'e nunga ha'e javi py ojeity uka va'e ma hi'arandu e'   va'e ae vy ma 'r  .
- <sup>2</sup> Guary okoror  a rami huvixa oexa uka 'r   opoxya.  
Amongue ombopoxyve rive vy ha'e ae rekove rovai ojejavy.
- <sup>3</sup> Avakue omboetepy ojepe'a 'r   joguero'apa reia gui,  
ha'e r   hi'arandu e'   va'e ma oike 'r   ov'y ijayvu ete va'e kuery mbyte py.
- <sup>4</sup> Inhate'   va'e yro'y py ombo'etyr   ndogueroko katui rire  
omono'   agu   va'ekue py ndojou'i 'r   mba'eve.
- <sup>5</sup> Avakue py'a re o   va'e ma yy typy va'e rami rive,  
te   hi'arandu va'e ma oikuua pota kuaa 'r  .
- <sup>6</sup> Heta 'r   iporayvua rami rive onhemombe'u,

- ha'e rã ava ojeroviapy ete va'e ma mava'e 'rã tu ojou kuaa?
- <sup>7</sup> Heko porã va'e anhetẽ rupi 'rã ikuai,  
ha'e rire ta'y kuery ju ovy'a 'rã okuapy.
- <sup>8</sup> Huvixa nhomboayvuaty py oguapy va'e  
oma'ẽ vy rive omomba 'rã mba'emo vai.
- <sup>9</sup> Mava'e tu ha'eve 'rã aipoe'i aguã: "Xee ae py'a aiky'a'opa ma vy  
iky'a e'ŷ va'e ju aiko ajejavyague gui" he'i aguã?
- <sup>10</sup> Jokorea rupigua poyia ha'e hyru mba'emo oa'ã pyrã oiporua teĩ  
mokoïve ma SENHOR ojeguarua meme.
- <sup>11</sup> Kyrigue teĩ mba'emo ojapoa jaexa vy jaikuua 'rã  
ojapo porãa, ha'e ha'evea rami pa oikoa.
- <sup>12</sup> Nhandeapyxa nhaendu aguã, ha'e nhanderexa jaexa aguã,  
SENHOR ojapo va'ekue meme.
- <sup>13</sup> Enhembopeyi pota rei eme, iporiau va'e reiko e'ŷ aguã.  
Eipe'a nderexa, ha'e vy 'rãe rejou reta tembi'u.
- <sup>14</sup> Mba'emo ojoguaxe va'e ma ha'e nunga pe "Ovare va'e'ŷ, ovare va'e'ŷ", he'i 'rã.  
Ha'e gui ma ojogua ma rire oguerovy'a rei 'rã.
- <sup>15</sup> Heta oiko ouro ha'e ita iporãve va'e,  
ha'e rã 'arandu rupi ijayvu va'e ma ovareve ete va'e.
- <sup>16</sup> Oreve va'e rekovia opaga aguã rami amongue oiko rire ixugui ijao oipe'aa 'rã,  
oexa va'ety e'ŷ rekovia onhemoingo va'ekue gui katuve ma oipe'aa 'rã.
- <sup>17</sup> Jokorepa reia rupi avakue mbojape ojou va'ekue ma hee 'rã merami,  
ha'e rami teĩ opaa py ma ita ra'y ku'i rami rive 'rã oĩ ijuru py.
- <sup>18</sup> Nhanhemongeta ucaa rupi nhanhembopy'aa ma oiko porã 'rã.  
Ha'e nunga rupi eikuua pota porã ranhe joe repu'ã aguã.
- <sup>19</sup> Ijayvu katu raxa va'e omombe'upa 'rã nda'evei rei va'e.  
Ha'e nunga rupi neirũ eme ijayvuxre rei va'e re.
- <sup>20</sup> Nguu ha'e oxy re ijayvu vai va'ekue rekovea ogue rive 'rã  
tataendy rami pytûve etea py.
- <sup>21</sup> Mba'emo jajopy aguã ára ovaẽ e'ŷ re ri jajopy ramo  
opaa py noĩ porãi 'rã nhandevy.
- <sup>22</sup> "Xee ae ajepy 'rã mba'emo vai re", 're eme.  
Earõ tema SENHOR, ha'e ramo nderepy 'rã.
- <sup>23</sup> Jokorea rupigua poyia ma SENHOR jeguarua meme,  
jokorea rupi mba'emo oa'ãa ma na'iporãi.
- <sup>24</sup> Avakue oguataa rupi SENHOR ae 'rã oguereco.  
Mba'exa tu ha'e kuery ae oikuua 'rã tape oo aguã?
- <sup>25</sup> Jaikuua pota e'ŷ re mba'emo pe "Iky'a e'ŷ va'e" ja'e vy jajekore 'rã,  
nhanhemboayvupa rire mae ma nda'evei ramo 'rã.
- <sup>26</sup> Huvixa hi'arandu va'e oikuua pota kuaa 'rã heko vai va'e re,  
ombopaga aguã.
- <sup>27</sup> Nhanenhe'ẽ ma SENHOR ae omoĩ nhanemoexakãarã,  
nhandepy'apy rupi oĩ va'e ha'e javi oikuua uka aguã.
- <sup>28</sup> Huvixa ma porayvua ha'e ojeroviapy oiko vy 'rãe oĩ atã,  
nhomboaxyra rupi ipo'akave tema 'rã oiny.
- <sup>29</sup> Kunumigue imbaraetea ma ijeguarã oĩ,  
ha'e rã ikakuua jeguaarã ma hi'a xiĩ porãa.
- <sup>30</sup> Nhandeai pore ojapo 'rã mba'emo vai gui iky'a e'ŷ va'e ju jaiko aguã rami,  
nhanenupãa ma nhanekuraxõ oĩ porã aguã rami ojapo.

## 21

- <sup>1</sup> Yxyry rami huvixa py'a oĩ SENHOR po py,  
mba'eta SENHOR oipotaa rupi ae 'rã oguereko.
- <sup>2</sup> Avakue pe rã ikuiaia ha'e javi ha'evea rami meme,  
ha'e rami teĩ SENHOR oikuua pota 'rã ipy'a re.
- <sup>3</sup> SENHOR pe mymba nhame'ëa gui  
oguerovy'ave 'rã nhanderekoo porãa ha'e ha'evea rami jajoguerekooa.
- <sup>4</sup> Jejou porã reia ha'e opy'a py nhemboyvate reia ma  
heko vai va'e kuery pe rã tataendy rami teĩ jejavya meme.
- <sup>5</sup> Oikuua pota porãa rupi onhembo'b'y'a va'e ojoupa 'rã,  
ha'e rã ojapura rei va'e ma iporiau 'rã.
- <sup>6</sup> Apu rupi nhanhea'ã vy mba'emo jajoupa va'ekue ma  
opaa py ma mba'everã ndovarei 'rã, ha'e nhanembo'a 'rã manoia nhuã py.
- <sup>7</sup> Heko vai va'e ma nhomoingo axyague py ae omombaa 'rã,  
teko porã rupi ndoikoxei rire.
- <sup>8</sup> Ava otekoavypa rei va'e oikoa ma ikarë rei,  
ha'e rã heko porã va'e oikoa ma hi'yvi porã.
- <sup>9</sup> Nhanderopy kunha ivai ja rei va'e reve nhaña gui  
ha'eveve 'rãgue oo apyte áry nhañ.
- <sup>10</sup> Heko vai va'e opy'a re omoï 'rã mba'emo vai anho,  
neñ nomboaxyi 'rã ngoo katy'igua voi.
- <sup>11</sup> Jojojai rei va'ekue ombopagaa rã hi'arandu e'ÿ va'ekue oexa vy hi'arandu nho 'rã  
okuapy,  
ha'e hi'arandu va'eombo'ea rã oiko kuaave 'rã.
- <sup>12</sup> Heko vai va'e ngoo py ae ojapo va'e re Heko porã ete va'e oikuua pota vy  
omokanhymba 'rã heko vaia rupi ae.
- <sup>13</sup> Iporiaukue'i ojapukaia noendu potai va'ekue ma  
ha'e ju ojapukai rã noendu potaai avi 'rã.
- <sup>14</sup> Mba'emo nhemi rupi amongue ome'ë rã nhomombytu'u 'rã ipoxy reiague gui,  
mba'emo oexaa py e'ÿ ome'ë rã nda'ipoxy reiavei 'rã.
- <sup>15</sup> Ha'evea rami jajoguerekoo ramo heko porã va'e kuery ov'y'a 'rã,  
ha'e rã heko vai va'e kuery ma onhemondyipa rei 'rã.
- <sup>16</sup> Oiko kuaa rupi oikoa gui ojepé'a va'ekue ma  
omanogue ikuiaia py 'rã opyta oupy.
- <sup>17</sup> Vy'aa rive oguerovy'a va'ekue ma iporiaupa 'rã,  
vinho ha'e azeite ho'uxe riae va'e ma mba'eve ndojouvei 'rãe.
- <sup>18</sup> Heko vai va'e ome'ëa 'rã heko porã va'e rekovia,  
ha'evea rupi ikuai va'e 'rãgue py ha'eve e'ÿa rupi ikuai va'e ojexavai aguã.
- <sup>19</sup> Kunha ivai rei ha'e ijayvu vaipa-ipa va'e reve nhañ 'rãgue py  
ha'eveve peteï yvy tekao e'ÿa py nhañ.
- <sup>20</sup> Hi'arandu va'e ro py oĩ 'rã imba'e rei-rei ha'e ho'u va'erã,  
ha'e rã hi'arandu e'ÿ va'e ma ha'e nunga mokanhymbaarã.
- <sup>21</sup> Teko porã ha'e porayvua rupi ikuai va'e  
ojou 'rã tekove, teko porã ha'e omboetea aguã.
- <sup>22</sup> Ojerovia rei va'e kuery retã kora re hi'arandu va'e ojeupi vy  
oitypa 'rã ha'e kuery onhemiaty ojeroviavea va'ekue.
- <sup>23</sup> Ojuru py ijayvu aguã gui ojejoko va'e ma  
ojoko avi onhe'ë imoingo axyarã gui.
- <sup>24</sup> Onhemboyvatea py ojejou porã rei va'e rery ma jojojai rei va'e.  
Ha'e kuery ma ojerovia rei ha'e nda'ija'ei rei va'e ae.

- <sup>25</sup> Inhate'ŷ va'e omano 'rã mba'emo oikotevẽa py,  
      opo py nomba'epoxei rire.
- <sup>26</sup> Mba'emo omoaruã rei va'e ma ko'ẽ nhavõ 'rã omoaruã,  
      ha'e rã heko porã va'e ma ome'ẽ 'rã hakate'ŷ reve'ŷ.
- <sup>27</sup> Heko vai va'e mba'emo ome'ẽ va'e ma jeguarua meme,  
      otekoavypa rei reve ome'ẽ rã katuve ma.
- <sup>28</sup> Joekokue ramigua rive omombe'u va'ekue okanhy 'rã,  
      ha'e rã mba'emo oendu porã va'ekue mombe'ua ma nombovaia kuaai 'rã.
- <sup>29</sup> Ava heko vai va'e ma ngova re voi oexa uka 'rã ipy'a ratãa,  
      ha'e rã heko porã va'e ma oikuua pota 'rã oiko aguã re.
- <sup>30</sup> SENHOR rovai rupi ma ndoikoi 'arandua, neĩ mba'emo kuaapa va'e,  
      neĩ nhomongeta kuaa va'erã voi.
- <sup>31</sup> Joe opu'ã aguã kavaju oguerekopakatupaa teĩ  
      ipo'aka aguã ma SENHOR gui ae 'rã ou.

## 22

- <sup>1</sup> Nhanemba'e rei-rei retaa gui ovareve va'e ma nhanderery re ima'endu'a porãa.  
      Prata ha'e ouro gui ha'eveve va'e ma nhanemboetea.
- <sup>2</sup> Oguerekopa rei va'e ha'e iporiaukue'i ma peteĩ'i guigua meme,  
      mokoïve moingoare SENHOR ae oiko.
- <sup>3</sup> Hi'arandu va'e mba'emo vai oexa vy onhemi 'rã,  
      ha'e rã hi'arandu e'ŷ va'e ma oo tema 'rã ojexavai aguã katy rive.
- <sup>4</sup> SENHOR renonde jajererokyjea rupi vy nhanhemo'yvy'i vy  
      jaupity'rã mba'emo porã, nhanemboetea aguã ha'e tekove.
- <sup>5</sup> Heko vai va'e oikoa rupi oĩ nhuã ha'e juu vaikue,  
      ha'e rã guekovea ombovare va'e ma ha'e va'e gui mombyrya rupi 'rã oo.
- <sup>6</sup> Pembo'e ke kyrigue oiko aguã re.  
      Ha'e rami rire tuja ma teĩ ndojope'ai 'rã pembo'eague gui.
- <sup>7</sup> Oguerekopa va'e oguerekopaxy'rã iporiaukue'i,  
      ha'e nhomba'e oiporu va'ekue ma oiko 'rã iporukaare rembiguai rami.
- <sup>8</sup> Teko vai rive omoã va'ekue omono'õ 'rã mba'emo vai ae,  
      ha'e yvyra py nhombojexavaiague opa 'rã.
- <sup>9</sup> Akate'ŷa rupi e'ŷ ome'ẽ va'ekue omoingo porãa 'rã,  
      iporiaukue'i pe ho'u va'e regua ome'ẽ rire.
- <sup>10</sup> Pemoxẽ ke jojojai reiaty, ha'e ramo opa avi 'rã joguero'a reiaty,  
      opytu'upaa 'rã nda'evei rei ha'e nanhomboetei reiague gui.
- <sup>11</sup> Opy'a re teko porã anho omoã reve ijayvu porã kuaa va'e ma  
      oiko 'rã huvixave irũ.
- <sup>12</sup> Hi'arandu va'e re SENHOR oma'ẽ vy omoã atã 'rã,  
      ha'e rã heko vai va'e ijayvua ma omboaxapa rive 'rã.
- <sup>13</sup> Inhate'ŷ va'e aipoe'i 'rã: "Guary oka py hiny,  
      tape rupi aa ramo xejuka 'rã", he'i rive 'rã.
- <sup>14</sup> Kunha reko rei ijayvua ma yvykua puku rami,  
      ha'e py ho'a 'rã SENHOR ombopaga aguã rami ikuai va'e.
- <sup>15</sup> Kyrigue py'a re oĩ 'rã 'arandu e'ŷa,  
      teĩ yvyra rovi py nhamo'arandu vy jaipe'a 'rã.
- <sup>16</sup> Iporiaukue'i gui omba'e rei-reirã oipe'a va'e,  
      ha'e oguerekopa va'e pe mba'emo me'ëa kuery ma iporiau va'erã meme.
- Nhanembo'ea ha'e nhanemongetaa oĩa*
- <sup>17</sup> Ejapyxaka porã ke rendu aguã hi'arandu va'e kuery ijayvua.

- Emoĩ ndepy'a re mba'emo aikuaa uka va'e.  
 18 Mba'eta ndepy'a re remoĩ ramo nembovy'a 'rã,  
     ha'e nunga ha'e javi re ndeayvu kuaa aguã.  
 19 SENHOR re rejerovia riae aguã rami  
     aÿ ame'ë ne'arandurã, ndevy ae.  
 20 Xapy'a rei nda'u ndevy namboparai ri ty'y mba'emo iporã ete va'e re,  
     nhomogetaa ha'e mba'emo kuaa ukaa regua,  
 21 ndevy aikuaa uka aguã ayvu anhetẽ ete va'e,  
     nemondoukaare kuery rembovai porã aguã?  
 22 Nemonda eme iporiaukue'i gui, mba'eta iporiaukue'i ae ma,  
     ojexavai'i va'e ekorepa rei eme guive omboayvua py.  
 23 Mba'eta ha'e va'e regua ma SENHOR ae oepy 'rã,  
     ha'e vy oipe'a 'rã imbojexavaire rekove.  
 24 Neirũ eme ivai ja rei va'e re,  
     neñ eiko eme avakue ojerovia rei va'e reve,  
 25 ndee avi reiko e'ÿ aguã ha'e kuery reko vaia rupi,  
     mba'eta ha'e ramia py rembo'a uka 'rã nderekovea.  
 26 Nda'evei ndee voi reiko aguã ha'e ae oĩ vai aguã rami ijayvu va'e regua,  
     oreve va'e rekoria opaga aguã rami opyta va'e kuery rami,  
 27 mba'eta xapy'a rei nderejoui 'rã repaga aguã.  
     Mba'e re 'rã tu nderupa reipe'a uka ndeguy gui?  
 28 Erova eme yvy markaarã  
     neramoĩ kuery yma omo'ã va'ekue.  
 29 Rexa pa avakue ombo'eapo porã kuaa va'e?  
     Ha'e kuery ma huvixa kuery renonde 'rã omoĩa, yvyigüeve mbyte py e'ÿ.

## 23

- 1 Huvixa reve rekaru aguã nemboguapy ri ramo  
     eikuaa pota porã neronden py marã ramigua pa oĩ va'e re.  
 2 Emboaxa peteĩ kyxre ndejyryvi re,  
     okaru guaxu va'e ri reiko vy.  
 3 He'uxepa rei eme tembi'u porã omoimba teĩ  
     mba'eta tembi'u ma nembotavyarã oĩ.  
 4 Enhea'ã rei eme rerekopaxea rupi rive,  
     emoĩ eme ha'e nunga ne'arandua py.  
 5 Mba'emo rei re rive teve rema'ë riae ta?  
     Mba'eta anhetẽ ete nemba'e rei-rei okanhymba vyvoi 'rã ipopo va'e rami,  
     taguato yvate rupi oveve ovya rami.  
 6 Nda'evei hakate'ÿ va'e rembi'u re rekaru aguã,  
     neñ he'upaxe rei eme tembi'u porã omoĩ teĩ.  
 7 Mba'eta ha'e va'e oikuua pota rei 'rã ndere, ha'e ramigua ae vy.  
     Ndevy pe "He'uve ha'e ey'uve tema" he'i 'rã  
     teĩ opy'a py anhetẽ rupi e'ÿ oĩ ndereve.  
 8 Ha'e gui rembojevypa ju 'rã re'u vaipa vyvoi va'ekue,  
     ha'e ijayvu porãa rerovy'aague oaxapa rive 'rã.  
 9 Ndeayvu eme hi'arandu e'ÿ va'e kuery oendu aguã,  
     mba'eta oendu rivepa 'rã 'arandu rupi ndeayvua.  
 10 Perova eme yvy markaarã yma omo'ã mbyre,  
     neñ peike eme ta'vy tyre'ÿ kuery yvy re,  
 11 mba'eta ha'e kuery Repyarã ma imbaraete,

- ha'e penderovai onhemoï 'rã ha'e kuery repyarã.
- <sup>12</sup> Emoï ndepy'a re nembo'eague,  
ha'e ejapyxaka ayvu mba'emo kuaa ucaa re.
- <sup>13</sup> Emo'arandu e'ŷ eme kyrīgue.  
Mba'eta yvyra rovi py reinupãa gui rive nomanoi 'rã.
- <sup>14</sup> Yvyra rovi'i py reinupã vy  
inhe'ẽ reraa jepe 'rã omano aguã gui.
- <sup>15</sup> Xera'y, ndepy'a py ne'arandu ramo  
xee voi xepy'a py roguerovy'a 'rã.
- <sup>16</sup> Ha'evea rupi ndeayvu ramo  
xepy'apy re avy'a riae.
- <sup>17</sup> Ndepy'a py eroangeko rei eme ojejavypa rei va'e ikuiaia.  
Ha'e rami 'rãgue py SENHOR renonde rejererokyjea rupi eiko ára nhavõ.
- <sup>18</sup> Mba'eta ha'e rami vy 'rãe nerenonde oĩ porã,  
ha'e rearõ reikovsky ndoaxa rivei 'rã.
- <sup>19</sup> Xera'y, endu ke ne'arandu aguã,  
ha'e ereko nekuraxõ tape hi'yvi va'e rupi.
- <sup>20</sup> Enhemoirũ eme vinho gui oka'u rei va'e kuery reve,  
neĩ xo'o ho'u raxa rei va'e kuery reve.
- <sup>21</sup> Mba'eta oy'u raxa ha'e okaru guaxu va'e ma iporiaupa 'rã,  
avakue hopeyi rei va'e ijao vaikue rei 'rã okuapy.
- <sup>22</sup> Endu ke nderu ndere ta'y va'ekue ayvu.  
Ndexy gui nderexarai rei eme guive, guaimi'ive'i ma ovv ramo voi.
- <sup>23</sup> Ejogua ke anhetẽ va'e, ha'e gui emboekovia ju eme.  
Ejogua avi 'arandu ha'e nembo'earã, reiko kuaa aguã.
- <sup>24</sup> Heko porã va'e ru ma ovv'a vaipa 'rã,  
hi'arandu va'e re ta'y va'e ma oguerovy'a 'rã.
- <sup>25</sup> Tandererovy'a nderu ha'e ndexy,  
ejapo ndererekoiare ndererovy'a aguã ramo.
- <sup>26</sup> Xera'y, eme'ẽ xevy nekuraxõ,  
ha'e nderexa toguerovy'a xee aikoa.
- <sup>27</sup> Mba'eta kunha itavy rei va'e ma yvykua puku va'e rami,  
ha'e amboae ava ra'yxy ma yguarã ojo'o po'i'i pyre rami.
- <sup>28</sup> Ha'e nunga kunha ma jojuka va'ety rami oma'ẽ mbegue 'rã oiny joe,  
heta avakue ma ojapo heko vai aguã ramo.
- <sup>29</sup> Mava'e pe 'rã tu haxypa rei?  
Mava'e pe 'rã tu ipoyi ete?  
Mava'e re 'rã tu joguero'aa rei?  
Mava'e pe 'rã tu onhemombe'u?  
Mava'e 'rã tu mba'e py e'ŷ ojejukapa rei?  
Mava'e 'rã tu hexa pytã rei va'e?
- <sup>30</sup> Vinho oy'ua rupi tema ikuai va'e pegua ae,  
oy'u va'erã omoirũ mbyre re onhea'ã va'e.
- <sup>31</sup> Ema'ẽ rive ke vinho pytã porã rei va'e re,  
karo py oĩ va'e jaexa rã hexakã rei'i ha'e onheẽ porã rei'i oiny tei,
- <sup>32</sup> va'eri opaa py ma ndexu'u 'rã mboi ramo,  
nekaraĩ 'rã jai ra'y ramo.
- <sup>33</sup> Rexa 'rã mba'emo vaikue,  
ha'e opa marã 'rã ndeayvu ndepy'a py.
- <sup>34</sup> Renhenhandu 'rã ye'ẽ mbyte oguataa rupi onheno oupy va'e ramo,

ajukue 'y áry itui va'e rami.

- <sup>35</sup> Ha'e vy aipo're 'rã: "Xepetea ra'e va'eri ndaxyi!  
Xenupää ra'e teĩ naendui!  
Raka'e 'rã tu akuera ju?  
Ay'uve ju ramo 'rãe ma ha'eve", 're 'rã.

## 24

- <sup>1</sup> Eroangeko rei eme avakue heko vai va'e ikuaria,  
neirũ eme guive ha'e kuery re.
- <sup>2</sup> Mba'eta ha'e kuery ma opy'a re omoĩ 'rã jojukaxe aguã,  
ha'e ojuru py ijayvu 'rã teko vairã re rive.
- <sup>3</sup> 'Arandu rupi vy jajapo 'rã nhanderorã,  
mba'emo jaikuaa rupi nhamo'ã atã 'rã.
- <sup>4</sup> Jaiko kuaa vy 'rãe opy ja'o'i ha'e javi rupi nhamonyẽ  
opa mba'e porã nhanembovy'aarã.
- <sup>5</sup> Imbaraete va'e gui hi'arandu va'e ipo'akave,  
hexaĩ rei va'e gui oiko kuaa va'e mba'emo ojapo kuaave 'rã.
- <sup>6</sup> Mba'eta jaikuaa pota vy 'rãe joe nhapu'ã kuaa,  
nhanemongetaarã heta ikuai ramo nhandepo'aka 'rã.
- <sup>7</sup> Hi'arandu e'ŷ va'e pe haxy ete 'rã 'arandu oikuaa aguã,  
omboayvua py nombovai kuaai 'rã guive.
- <sup>8</sup> Teko vairã re rive onhembopy'a va'e pe ma  
"Nhombo'e vaikue ya'e" 'ea 'rã.
- <sup>9</sup> Hi'arandu e'ŷ rupi onhembopy'aa ma jejavya meme,  
jojojai rei va'e re avakue nda'ija'ei 'rã.
- <sup>10</sup> Rejexavaia ára py nekangy ri vy ma  
nembaraetea ruxã'i ae.
- <sup>11</sup> Peepy pota ke omano aguã katy heraa va'e kuery,  
peraa jepe ojukaa aguã katy ho'a-o'a jogueravy va'e.
- <sup>12</sup> Xapy'a rei aipopeje 'rã: "Ndoroikuuai va'ekue rima",  
teĩ nhandepy'a ha'e javi Rexaa ndoexai 'rã ri ty'y?  
Nhondereko Kuaa potaa ndoikuuai 'rã ri ty'y?  
Ha'e nombopagai 'rã ty'y peteĩ-teĩ oikoague re?\*
- <sup>13</sup> Xera'y, he'u ke ei, mba'eta nemoexaĩ 'rã,  
hetãgue guive, mba'eta ndejurupy rupi voi he'ẽmba 'rã.
- <sup>14</sup> Ha'e rami ae avi 'arandu voi nemoingo porã 'rã nenhe'ẽ py.  
Ha'e va'e rejou ramo ojapo 'rã nerenderõ oĩ porã aguã rami,  
rearõ reikovsky voi ndoaxa rivei 'rã.
- <sup>15</sup> Ndee heko vai va'e, nda'evei rema'ẽ mbegue aguã  
heko porã va'e ro gui nemondaxe vy.  
Embovaipa eme ha'e kuery opytu'uat,
- <sup>16</sup> mba'eta heko porã va'e ma sete-kue ho'a rire teĩ opu'ã ju 'rã.  
Ha'e rã heko vai va'e ma jexavaia py 'rãe ho'a.
- <sup>17</sup> Nderovaigua ho'a ramo nda'evei revy'a rei aguã,  
onhepyxanga rã nda'evei ndepy'a py rerovy'a rei aguã,
- <sup>18</sup> ndereko SENHOR oexa vy ndojou porãi vy  
nderovaigua gui oipe'a e'ŷ aguã opoxya.
- <sup>19</sup> Mba'emo vai apoa kuery káuxa eiko eme nda'evei reia rupi,  
neĩ eroangeko rei eme heko vai va'e ikuaria,

\* **24:12** Mateus 16.27, Romanos 2.6

- <sup>20</sup> mba'eta heko vai va'e renonderã ma iporã va'e'ŷ,  
ha'e kuery rataendy oguepa rive 'rã.
- <sup>21</sup> Xera'y, eiko SENHOR ha'e huvixa kuery renonde rejererokyjea rupi.  
Enhemoirũ eme opu'ã rei va'e kuery reve,
- <sup>22</sup> mba'eta ha'e kuery mombaarã ou xapy'a 'rã.  
SENHOR ha'e huvixa gui imoingo axyarã ou va'e tu mava'e 'rã oikuua?

*Hi'arandu va'e kuery 'arandu regua omombe'u va'ekue oĩa*

- <sup>23</sup> Pova'e ayvu voi 'arandu regua hi'arandu va'e kuery omombe'u va'ekue.  
Renhomboayvua py nda'evei peteĩ reepyvea rupi rejoguereko aguã.
- <sup>24</sup> Heko vai va'e mboeko porãare re  
heta va'e kuery voi ijayvu vai 'rã, amboae regua avi nda'ijs'e 'rã okuapy.
- <sup>25</sup> Ha'e rã heko vai va'e mbopagaare re ma ima'endu'a porãa 'rã,  
ha'e hexe oĩ reta 'rã imoingo porãarã.
- <sup>26</sup> Jojuru rayvu va'e rami avi  
ayvu porã rupi nhombovaia iporã.
- <sup>27</sup> Enheia'ã oka rupi mba'emo rejapo aguã,  
erekko katupa nemba'etyrã,  
ha'e gui mae ma ejapo nderorã.
- <sup>28</sup> Ndero katy'igua re ndeayvu rive eme mba'e py e'ŷ,  
embotavy eme guive ndeayvua py.
- <sup>29</sup> Aipo're eme: "Ha'e va'e xere ojapo vaiague rekovia hexe ju 'rã xee ajapo ha'ekue rami.  
Peteĩ-teĩ pe amboekovia 'rã ojapo vaiague re", 're eme.
- <sup>30</sup> Xee aaxa avy inhate'ŷ va'e mba'ety rupi,  
ava hi'arandu e'ŷ va'e uva onhotŷague rupi.
- <sup>31</sup> Ha'e vy aexa rã juuty anho itui,  
pyno ojao'ipa ma yvy,  
ikora ita guigua voi ivaipa ma.
- <sup>32</sup> Ha'e nunga aexa vy aikuua porã pota  
vy ajopy xe'arandurã:
- <sup>33</sup> Xapy'a'i rekeve jave, xapy'a'i nderopeyi vy  
repytu'ua py renhekuavã jave ma
- <sup>34</sup> ou xapy'a 'rã nemomboriauarã imonda va'e rami,  
nembojexavaiarã ou 'rã ava guembiporu revegua rami.

## 25

*Mba'emo re ombojoja reve nhanderekombo'ea oĩa*

- <sup>1</sup> Po rami voi 'arandu regua ayvu Salomão omombe'u rã Judá pygua huvixa Ezequias  
rembiguai kuery ombopara va'ekue.
- <sup>2</sup> Nhanderuete gueko ndoikuua ukapai ramo nhamboete,  
ha'e rã huvixa kuery ma mba'emo re oikuua pota porã ramo nhamboete.
- <sup>3</sup> Huvixa kuery py'a re oĩ va'e jaikuua va'erã e'ŷ,  
yva yvatea ha'e yvy guýry oĩ va'e rami avi.
- <sup>4</sup> Prata gui iky'a oĩ va'ekue oipe'aa ramo  
opyta 'rã mba'emo ryrurã apoa pe.
- <sup>5</sup> Huvixa renonde gui heko vai va'e oipe'aa ramo  
ipo'akaa oĩ atãve 'rã teko porã rupi anho.
- <sup>6</sup> Enhemboyvate rei eme huvixa renonde,  
eĩ eme guive yvatekueve mbyte,
- <sup>7</sup> mba'eta huvixa renonde rei jave nemo'yvyi' i 'rãgue py

- ha'eveve ndevy "Ejuve kylvõ katy" he'i.  
 Mba'emo nderexa py rexa va'ekue  
<sup>8</sup> nda'evei remombe'upa vyvoi rei aguã nemboayvua py.  
 Mba'eta opaa py mba'exa 'rã tu rejapo nderovaigua nemoi vai ramo?  
<sup>9</sup> Eikuaa pota ha'e nungakue re ndea katy'igua reve anho'i,  
 eikuua uka eme oikuua uka e'ÿ pyre,  
<sup>10</sup> nerenduare ijayvu rei e'ÿ aguã ndere,  
 ha'e reximbua py rei vai e'ÿ aguã.  
<sup>11</sup> Ha'eve jave ayvu nhamombe'u va'e ma  
 maçã ouro guigua prata py ombojeguaa rami avi.  
<sup>12</sup> Namixã ha'e jegua ouro ete'i gui ojapo pyre rami avi,  
 hi'arandu va'e nhomongetaa ha'eve 'rã ojapyxaka porã va'e pe.  
<sup>13</sup> Mba'emo omono'ða ára py yro'y nhanemoro'yxãmba va'e rami avi  
 tembiguai ojeroviapy ombovy'a 'rã imondoukaare kuery,  
 ipatõ kuery onhe'ẽ py oguerovy'a ramo.  
<sup>14</sup> Mba'emo ome'ẽ aguã re ijayvu rive va'e ma  
 arai ha'e vvytu oky vy e'ÿ va'e rami avi.  
<sup>15</sup> Nhandevaia rupi e'ÿ nhandeayvu ramo huvixa kuery ojapo 'rã jajerurea,  
 nhandeayvu porã'ia ma ombovopa 'rã mba'emo kãgue voi.  
<sup>16</sup> Ei rejou ri vy he'u vaipa eme,  
 re'u vaipa vy rembojevypa e'ÿ aguã.  
<sup>17</sup> Tereo riae eme ndero katy'i oĩ va'ea py,  
 ndejou vai vy ndereroporiau e'ÿ aguã.  
<sup>18</sup> Avakue guetarã rekoke rive mombe'ua ma  
 nhomboguaiaty, kyxe ha'e hu'y haimbe va'e rami avi 'rã nhomomba.  
<sup>19</sup> Jajexavaia py ojeroviapy re'ÿ jajeroviaa ma  
 nhaneraí opê va'e py jakaru, e'ÿ vy nhandepy vaikue'i py jaguataa rami avi.  
<sup>20</sup> Iporiau'i va'e oĩa py oporaei rive reia ma  
 yro'y tei oao omboi va'e rami,  
 e'ÿ vy joai py vinagre oikyty va'e rami avi.  
<sup>21</sup> Ndere ija'e e'ÿ va'e kuery okaruxe ramo eme'ẽ ho'u va'erã,  
 ijj'yuvei ramo eme'ẽ oy'u aguã,  
<sup>22</sup> mba'eta ha'e rami vy 'rã rejapo inhakã áry tapyi hexakã va'e ramigua oendu aguã  
 rami,\*  
 ha'e rã ndevy pe ma SENHOR ome'ẽ 'rã mba'emo porã.  
<sup>23</sup> Kuaray apu'a'ia katy gui vvytu oky oguerua rami avi  
 nhombotavya rupi ijayvu va'e nhombopoxyapa 'rãe.  
<sup>24</sup> Opy kunha ivai ja rei va'e reve nhaiai  
 ha'eveve 'rã oo apyte áry nhaiai.  
<sup>25</sup> Tekoa mombyrya guigua ayvu porã omombe'u rã nhaendua ma  
 nhandey'uvei reve yro'yxã jay'ua rami avi.  
<sup>26</sup> Heko porã va'ekue ri heko vai va'e pe ojererekoo uka va'e ma  
 yvu yapo rei ha'e iky'a rei va'e rami avi.  
<sup>27</sup> Nhande ae rive jajejou porã reia ma  
 ei ja'u vaipa rã nda'eveia rami avi.  
<sup>28</sup> Avakue ojejoko e'ÿ va'e ma  
 peteñ tetã nda'ikoravei vy oitypa pyre rami avi ikuai.

\* <sup>25:22</sup> Apy ma ijayvu nhanderovaigua kuery oximbua oendu va'e re (Romanos 12.20-21).

## 26

- <sup>1</sup> Hi'arandu e'ŷ va'e nda'eve ranhei nhamboete aguã,  
kuaray puku py yro'y apĩ ho'aa rami,  
e'ŷ vy mba'emo nhamono'õa ára py oky riae rã nda'eveia rami avi.
- <sup>2</sup> Mba'e py e'ŷ joe ijayvu vaia oaxapa rive 'rã,  
guyra'i ha'e mbyju'i oveve jogueravya rami avi.
- <sup>3</sup> Vakapi ma kavaju peguarã,  
juruxã ma mburika peguarã,  
ha'e rã yvyra rovi'i ma hi'arandu e'ŷ va'e kupe peguarã.
- <sup>4</sup> Hi'arandu e'ŷ va'e embovai eme 'arandu e'ŷa rupi ijayvuague rami,  
ha'e va'e reko rami ndee voi reiko e'ŷ aguã.
- <sup>5</sup> Hi'arandu e'ŷ va'e 'arandu e'ŷa rupi ijayvu rã rembovai 'rãe,  
ha'e ae oikuaapa va'e rami rive onhemoingo e'ŷ aguã.
- <sup>6</sup> Hi'arandu e'ŷ va'e pe ri ayvu nhamombe'u uka vy jajexavai 'rã  
nhandepy rupi nhanhekyxí, e'ŷ vy veneno jay'u rivea rami avi.
- <sup>7</sup> Hetyma rovaikue va'e oguata aguã nda'eveia rami avi  
arandu regua ayvu rupi hi'arandu e'ŷ va'e ijayvu aguã nda'evei.
- <sup>8</sup> Hi'arandu e'ŷ va'e nda'eve ranhei nhamboete aguã,  
ita hepyve va'e mba'emo vaikue reiaty py omombo va'e rami avi.
- <sup>9</sup> Oka'u va'e opo py juu rakãgue oguereko aguã nda'eveia rami avi  
arandu regua ayvu rupi hi'arandu e'ŷ va'e ijayvu aguã nda'evei.
- <sup>10</sup> Hi'arandu e'ŷ va'e ha'e otekoavy rei va'e kuery omba'eapo aguã ojou va'e ma  
hana va'e nhonhyvõmbaa rami avi.
- <sup>11</sup> Hi'arandu e'ŷ va'e ijarakuaa e'ŷague rami ae ikuai va'e ma  
jagua ha'e ae ombojevyague py ju oo va'e rami avi.\*
- <sup>12</sup> Rexa ma pa peteĩ ava ha'e ae oikuaa rami rive onhemo'arandu va'e?  
Ha'e va'e gui hi'arandu e'ŷve va'ekue oikuaave 'rã.
- <sup>13</sup> Inhate'ŷ va'e ma aipoe'i:  
“Peteĩ guary oiko tape rupi, peteĩ guary oĩ tape'i py”, he'i rive 'rã.
- <sup>14</sup> Inhate'ŷ va'e ngupa py itui va'e ma  
okẽ oĩa re ae ojevy-jevy va'e rami.
- <sup>15</sup> Inhate'ŷ va'e hy'a py opo'ẽ teĩ  
ndogueru potai 'rã ojuru katy.
- <sup>16</sup> Inhate'ŷ va'e ha'e ae oikuaa rami rive  
sete avakue ombovai porã kuaa va'e gui oikuaave merami 'rã.
- <sup>17</sup> Jagua oaxa ovu va'e nambi re omoatã va'e ma  
joe rive oikuaa pota va'e reve joo rami.
- <sup>18</sup> Inhakã porã e'ŷ va'e jojukaxe vy  
tata ha'e hu'y omombo rive va'e rami,
- <sup>19</sup> ha'e rami ae ava oirũ ombotavypa rire teĩ  
“Xeroryai vy rima ha'e rami ajapo”, he'i va'e.
- <sup>20</sup> Yxakã e'ŷ ramo tata ogue 'rã,  
ha'e rami ae avi ijayvu vaikue rei va'e ndoikoia py optyu'upa 'rã joguero'a rei va'e.
- <sup>21</sup> Tapyígue ma tapyírã, ha'e yxakã ma tatarã oĩa rami avi  
ava ivai ja va'e ojapo 'rã joguero'a rei aguã rami.
- <sup>22</sup> Ijayvu vaikue rei va'e ijayvua ma  
tembi'u hee va'e rami oguejy 'rã nhandepy'apy katy.
- <sup>23</sup> Porayvua rupi merami ijayvu va'eri ipy'a re mba'emo vai anho oĩ va'e ma  
mba'emo ryru yapo guigua hi'áry rupi rive prata py onhovã mbyre rami avi.

\* 26:11 2 Pedro 2.22

- <sup>24</sup> Porayvu vy e'ŷ ijayvu porã'i merami va'e ma  
      opy'a re omoi'rã nhombotavypa aguã rive.
- <sup>25</sup> Ndereve ha'e va'e ijayvu porã'i teĩ erovia eme,  
      mba'eta ipy'a re oĩ sete-kue otekoavy aguã.
- <sup>26</sup> Ha'e va'e onhenhomí 'rã ndajoayvui reia jaikuua e'ŷ aguã,  
      teĩ jaikuua pavẽ nho 'rã.
- <sup>27</sup> Yvy jo'oare ho'a 'rã ha'ekue py ae,  
      ha'e ita mbojerea áry ae 'rã ojere.
- <sup>28</sup> Apu rupi rive ijayvu va'e ombojexavai 'rã hendua kuery,  
      anhetẽ rupi e'ŷ ijayvu va'e ma nhomoingo axy 'rãe.

## 27

- <sup>1</sup> Nda'evei ko'ẽ rã guarã rerovy'a ma voi aguã,  
      mba'eta ndereikuuai mba'e pa oiko 'rãa.
- <sup>2</sup> Tove amboae kuery tandererovy'a, ndee ae e'ŷ.  
      Mombry guigua tandererovy'a, ndee ae 'rãgue py.
- <sup>3</sup> Ita ma ipoyi va'e, ita ku'i voi voyi avi,  
      ha'e rami teĩ mokoõve gui ipoyive va'e ma hi'arandu e'ŷ va'e ipoxya rupi ijayvua.
- <sup>4</sup> Ivai ja rei va'e nhomoingo axy 'rã, ojerovia rei va'e voi nhombojexavai 'rã,  
      ha'e rã oexa'ã vaikue rei va'e ma mava'e 'rã tu ojoko kuaa?
- <sup>5</sup> Jajoayvua ndajaexa ukai 'rãgue py  
      ha'eve anhetẽ ete va'e rupi nhanhomongeta porãa.
- <sup>6</sup> Nhanderayvu va'e nhandevy ijayvu ete teĩ ojapo porã 'rã,  
      ha'e rã nhandere ija'e e'ŷ va'e ma nhandejuru rayvu teĩ jaikuua 'rã nhanembotavy  
      vy ria.
- <sup>7</sup> Hevyatã va'e ma ei retãgue omombo rive 'rã,  
      ha'e rã inhembyayi va'e pe ma iro va'e teĩ he'ẽ 'rã.
- <sup>8</sup> Ngoo gui mombyry rupi ava oguata rei oikovy va'e ma  
      guyra'i guaity gui mombyry oveve oikovy va'e rami avi.
- <sup>9</sup> Nhaneirũ nhanemongeta porã ramo jajou porã 'rã,  
      azeite ha'e heakuã porã va'e nhanembovy'aa rami avi.
- <sup>10</sup> Nderexarai rei eme neirũ gui, neĩ nderu irũ gui,  
      ha'e rã nderegua ro py ma evaẽ eme rejexavaia ára.  
      Mba'eta ndero katy'i oĩ va'e nepytyvõve 'rã nderegua ae'i mombyry oĩ va'e gui.
- <sup>11</sup> Xera'y, ne'arandu ke. Ha'e ramo 'rãe avy'a xepy'a py,  
      xere ijayvu rei va'e kuery pe ambovai kuaa 'rã guive.
- <sup>12</sup> Hi'arandu va'e ma mba'emo vai ou rã oexa vy onhemi 'rã,  
      ha'e rã hi'arandu e'ŷ va'e ma oove tema vy oiko axyve rive 'rã.
- <sup>13</sup> Orevea rekovia opaga aguã rami opyta va'ekue gui ijao oipe'aa 'rã,  
      oexa va'ety e'ŷ rekovia onhemoingo va'ekue gui katuve ma oipe'aa 'rã.
- <sup>14</sup> Aje'ive'i reve ngoo katy'igua pe oxarura atã va'e ma  
      ijayvu vai va'e rami rive ojeapo.
- <sup>15</sup> Oky vaipa oiny jave otyky tema va'e ma  
      kunha ivai ja rei va'e reve joo rami;
- <sup>16</sup> ha'e va'e nanhamokyrirĩ kuaai 'rã yvytu nanhamombytu'u kuaaia rami,  
      ha'e azeite nhandepo py rive nanhanoẽ kuaaia rami avi.
- <sup>17</sup> Ferro guigua ma ferro py ae nhaĩmbe'e,  
      ha'e rami ae avi avakue oirũ reve nhomombaraete.
- <sup>18</sup> Figo rembypy re opena porã va'e pe ha'eve 'rã hi'a gui ho'u aguã,  
      ha'e opatõ re oikuua pota porã va'ety ma omboetea 'rã.

- <sup>19</sup> Yy py nhanderova 'ã ojekuaa 'rã,  
ha'e rami ae avi nhandepy'a re oĩ va'e ojekuaa 'rã nhandekuaia re.
- <sup>20</sup> Manoa ha'e yvykua vaikue py oĩve tema 'rã,  
ha'e avakue rexa voi oexapavexe tema.
- <sup>21</sup> Prata nhamboyku-a py, ha'e ouro tata rupa py jaiky'a'oa rami avi,  
nhande voi nhanera'angaa 'rã nhandererovy'aa rã nhaendua py.
- <sup>22</sup> Mba'emo ra'yã nhamongu'ia rami avi  
hi'arandu e'ŷ va'e re jajeai teĩ,  
ndajaipe'ai 'rã ijarakuaa e'ŷa.
- <sup>23</sup> Eikuua pota porã ke nerymba vexa'i ikuiaia re,  
ha'e epena porã nerymba kuery re,
- <sup>24</sup> mba'eta mba'emo jareko va'e noĩ riae'i 'rã,  
huvixa po'akaa voi ndoiko riae'i 'rã hamymino jevy-jevy kuery peve.
- <sup>25</sup> Yvyty ikuai va'e gui jai rogue reru aguã rejaya rire  
hokypa ju 'rã,
- <sup>26</sup> ha'e rire rereko 'rã vexa'i rague ndeaorã,  
ha'e kavara ava gui rejou 'rã yvy repyrã.
- <sup>27</sup> Kavara kunha gui ndoatai 'rã kamby rey'u aguã,  
ndero pygua kuery ha'e javi okaru porã aguã,  
nerembiguai kunhague ikuai va'e voi.

## 28

*Arandu regua ayvu joo ramigua e'ŷ-e'ŷ oĩa*

- <sup>1</sup> Heko vai va'e ojava 'rã ov yokyue monhaa e'ŷ teĩ,  
ha'e rã heko porã va'e ma guary rami 'rã ipy'a guaxu.
- <sup>2</sup> Yvy re ikuai va'e heko vai rei ramo huvixa kuery nhomboekovia jepi 'rã,  
va'eri peteĩ hi'arandu ha'e oiko kuaa va'e oĩ vy  
ojapo 'rã ikuai porã ha'e oĩ atã aguã rami.
- <sup>3</sup> Ava iporiaukue oirũ kuery iporiaukue'i avyky reia omomba 'rã,  
oky mba'emo aju ogueroxyrypa ha'e neĩ mba'eve ndoejai va'e rami.
- <sup>4</sup> Lei rupi e'ŷ ikuai va'e oguerovy'a rei 'rã heko vai va'e reko,  
ha'e rã lei rupi ete ikuai va'e ma ndojou porã 'rã.
- <sup>5</sup> Avakue heko vai va'e ndoikuuai 'rã mba'e pa teko porã,  
ha'e rã SENHOR oeka va'e ma oikuaapa 'rã.
- <sup>6</sup> Iporiau e'ŷ va'e teko vai rupi ikuai va'e gui  
ha'eveve iporiaukue'i iky'a e'ŷa rupi ikuai va'e.
- <sup>7</sup> Lei rupi ta'y oiko va'e ma hi'arandu va'e,  
ha'e rã opa marã rei ikuai va'e reve onhemoirũ va'e ma omoximba rei 'rã nguu.
- <sup>8</sup> Jokorea ha'e ojou retavexea rupi mba'emo ojouve heravy va'e ma  
iporiaukue'i mboaxyo peguarã ae omono'õ.
- <sup>9</sup> Lei py oĩ va'e re ndojapyxakaxe'i vy oapyxa omboty va'ekue ma  
mba'emo re ojerure ára teĩ ixugui ojeguarua 'rã.
- <sup>10</sup> Tape vai rupi heko porã va'e reropiaare kuery ma  
ha'e kuery ae ho'a 'rã yvykua ojo'oague py,  
ha'e rã anhetẽ rupi ikuai va'e ma iporã va'e anho 'rã ojou.
- <sup>11</sup> Avakue oguerekopa va'e ha'e kuery ae oikuua rami ojeupe "Hi'arandupa va'e", he'i 'rã,  
ha'e rã iporiaukue'i hi'arandu va'e ma oikuua pota kuaa 'rã.
- <sup>12</sup> Heko porã va'e ipo'aka ramo ov y'a pavẽ 'rã,  
ha'e rã heko vai va'e ipo'akave ramo ma avakue onhemimba 'rã.
- <sup>13</sup> Ojeavyague onhomí va'e ndoiko porã 'rã,

- ha'e rã ojejavyague omombe'u ha'e oejapa va'e ma oupity 'rã omboaxya aguã.
- <sup>14</sup> Ovy'a ete 'rã Nhanderuete renonde ojererokyjea rupi oĩ atã va'e,  
ha'e rã inhakã ratã va'e ma ho'a 'rã teko vai py.
- <sup>15</sup> Heko vai va'e guetarã kuery iporiaukue'i va'e re ipo'aka va'e ma  
guary okororõ, e'ŷ vy urso joguero'a va'e rami avi.
- <sup>16</sup> Huvixa hi'arandu e'ŷ va'e nhombojexavaive rive 'rã,  
ha'e rã akate'ŷ reia ojou vai va'e ma oikove riae 'rã.
- <sup>17</sup> Avakue tuguy moẽa rupi ikuai va'e okanhy 'rã yvykua katy oo vy.  
Mava'eve rei tojokoa eme.
- <sup>18</sup> Anhetẽ rupi ikuai va'e oo jepe 'rã,  
ha'e rã teko vai rupi ikuai va'e ma ho'apa vyvoi 'rã.
- <sup>19</sup> Ovyv karaĩ riae va'e ojou reta 'rã mbojape,  
ha'e rã ovare e'ŷ va'e kuery reve onhemoirũ va'e ma iporiaukue riae 'rã.
- <sup>20</sup> Avakue ojeroviapy va'e omoingo porãa 'rã,  
ha'e rã oguerekopa aguã re rive nda'eveive va'e ma ndopaga e'ŷi 'rã.
- <sup>21</sup> Peteĩ rive jayvuve ramo nda'evei,  
mba'eta avakue onhemboapu 'rã peteĩ juru'i mbojape re rive.
- <sup>22</sup> Guexa py oipotapa rei va'e ma omba'e rei-reirã rakykue rupi rive 'rã onha-onha  
oikovy,  
va'eri ndoikuuai guive imomboriauarã ou oinya.
- <sup>23</sup> Oapekũ py ijayvu porã rei rive va'e 'rãgue py  
nhomongeta porã va'e omboeteave 'rã.
- <sup>24</sup> Nguu e'ŷ vy oxy gui imonda vy “Ajejavya e'ŷ” he'i va'e ma  
nhomombaaty irũ oiko.
- <sup>25</sup> Oipotapa rei va'e ojapo 'rã joguero'apa rei aguã rami,  
ha'e rã SENHOR re ojerovia va'e ma oiko porã 'rã.
- <sup>26</sup> Opy'a py ojee ae ojerovia va'e ma hi'arandu e'ŷ va'e,  
ha'e rã 'arandu rupi ikuai va'e ma oo jepe 'rã.
- <sup>27</sup> Iporiaukue'i pe mba'emo ome'ẽ va'e pe ma mba'eve ndoatai 'rã,  
ha'e rã iporiaukue'i gui ojeova mo'ã va'e re ma ijayvu vaia 'rã.
- <sup>28</sup> Heko vai va'e ipo'akave ovy ramo avakue onhemimba 'rã,  
ha'e gui heko vai va'e okanhymba ma rire heko porã va'e hetave 'rã.

## 29

- <sup>1</sup> Ava omongetaa riae teĩ inhakã ratã va'e pe ma  
ou xapy'a 'rã heityarã, oo jepe e'ŷ re.
- <sup>2</sup> Heko porã va'e heta-etave ramo heta va'e kuery ovy'a 'rã,  
ha'e rã heko vai va'e ipo'aka ramo heta va'e kuery ndovy'ai 'rã.
- <sup>3</sup> Ava hi'arandu va'e ombovy'a 'rã nguu,  
ha'e rã kunha itavy rei va'e re irũ va'e ma omokanhymba rive 'rã oguereko va'ekue.
- <sup>4</sup> Huvixa heko porã va'e opena porã 'rã yvy re,  
ha'e rã imposto re anho oiko va'e ma nhomoingo axy rei 'rã.
- <sup>5</sup> Ava ojea katy'igua oguerorya rupi rive oiko va'e ma  
nhuã omoĩ oikoaty rupi ae.
- <sup>6</sup> Heko vai va'e ojejavya py oĩ nhuã imbo'aarã,  
ha'e rã heko porã va'e ma oporai 'rã ovy'aa rupi.
- <sup>7</sup> Heko porã va'e oikuaa pota 'rã iporiaukue'i re,  
ha'e rã heko vai va'e ma ha'e kuery re ndoikuuaa potai 'rã.
- <sup>8</sup> Avakue porojai rei va'e ojapo 'rã tetã ha'e javi rupigua joguero'a aguã rami,  
ha'e rã hi'arandu va'e ma omombytu'u 'rã ipoxy va'e.

- <sup>9</sup> Heko vai va'e pe hi'arandu va'e ijayvu ramo  
ipoxy, e'ŷ vy jojojai reia gui optyu'u e'ŷ re ae 'rã oiko.
- <sup>10</sup> Jouguy moēaty kuery nda'ija'ei 'rã anhetē rupi ipy'a va'e re,  
ha'e vy onhea'ã 'rã oipe'a aguã heko porã va'e rekove.
- <sup>11</sup> Heko vai va'e oexa ukapa rei 'rã opoxya,  
ha'e rã hi'arandu va'e ma onhenhomu kuaa 'rã.
- <sup>12</sup> Ayvu anhetē e'ŷ va'e re rive huvixa ojapyxaka ramo  
hembiguai kuery ha'e javi heko vai 'rã.
- <sup>13</sup> Iporiaukue'i ha'e imbojexavaiare pe joo ramigua oiko,  
mba'eta mokoīve pe ma SENHOR oiko omoexakã va'e.
- <sup>14</sup> Iporiaukue'i re huvixa ha'evea rami oikuaa pota va'e  
ojapo opo'akaa oĩ atã aguã raka'e rã peve guarã.
- <sup>15</sup> Yvyra rovi'i py 'rã nhanhomo'arandu, oikuaa aguã,  
ha'e rã kyrigue ha'e kuery ae oikuaa rami rive ikuai vy omoximba rei 'rã oxy kuery.
- <sup>16</sup> Heko vai va'e hetave ovu ramo teko vai voi hetave 'rã ovu,  
va'eri ha'e kuery okanhymba rã heko porã va'e kuery oexa 'rã.
- <sup>17</sup> Emo'arandu ke ndera'y kuery, ha'e ramo nembovy'a 'rã,  
ojapo 'rã nenhe'ẽ py revy'a aguã rami.
- <sup>18</sup> Profeta ayvu nonhendui rã heta va'e kuery opa marã rei 'rã ikuai,  
ha'e rã lei rupi ikuai va'e ma ovu'a 'rã.
- <sup>19</sup> Tembiguai ma nomo'aranduai 'rã ayvu py rive,  
oendu kuaa rei teĩ nanhonhe'ẽ rendui 'rã.
- <sup>20</sup> Rexa ma pa peteĩ ava oikuaa pota e'ŷ re ijayvu va'e?  
Ha'e va'e gui hi'arandu e'ŷ ve va'ekue hi'aranduve 'rã.
- <sup>21</sup> Nerembiguai kuery kyr'i guive rerory rive rire  
raka'eve rã onhemoingoxe 'rã ndera'y ae'i rami.
- <sup>22</sup> Ivai ja rei va'e ojapo 'rã joguero'apa rei aguã rami,  
ojerovia rei va'e joapo 'rã otekoavyve aguã rami.
- <sup>23</sup> Onhemboyvate va'e omo'yvy'iave 'rã,  
ha'e rã onhe'ẽ py onhemo'yvy'i ve'ekue maomboeteave 'rã.
- <sup>24</sup> Imonda va'e re onhemoirũ va'e ma onhe'ẽ re ae nda'ija'ei,  
ayvu poyi oendu teĩ mba'eve py nonhemombe'ui 'rã.
- <sup>25</sup> Avakue gui okyjea rupi rive ikuai va'e ojejopy uka 'rã nhuã py,  
ha'e rã SENHOR re ojerovia va'e ma oĩ atã 'rã.
- <sup>26</sup> Heta 'rã ikuai huvixa ojou porãa aguã rive onhea'ã va'e,  
ha'e rã ava mboeko porãarã ma SENHOR gui ae ou.
- <sup>27</sup> Heko porã va'e pe rã heko vai va'e ma ojeguarupy,  
ha'e rã heko vai va'e ma ojeguaru 'rã heko porãa rupi oiko va'e gui.

## 30

### *Agur ayvu oĩa*

<sup>1</sup> Massá pygua Jaque ra'y Agur ijayvuague oĩa:  
Amongue aipoe'i: "Xeruete, anhea'ã riae ete ma.

Anhea'ã riae ete ma, Xeruete.  
Ha'e rami vy xekane'õ ma.

<sup>2</sup> Mba'eta xee ma ava rami e'ŷ aikuaa axy raxa,  
neĩ ava 'arandua xee ndarekoi,

<sup>3</sup> ndaikuai 'arandu,  
neĩ Iky'a e'ŷ va'e guigua voi ndaikuai va'e.

<sup>4</sup> Mava'e tu yva re oo, ha'e gui oguejy ju?

- Mava'e tu opo py ojopy kuaa ta yvytu?  
 Mava'e tu yy ojokua 'rã oao apy py?  
 Mava'e tu onhono raka'e yvy ha'e javi, ijapy peve?  
 Mba'exa tu hery, ha'e ta'y rery?  
 Ndee nda'u ndereikuuai ri?" he'i 'rã.
- <sup>5</sup> Nhanderuete ayvu ma iky'a e'ŷ va'e meme,  
 hexe ojerovia va'e kuery pe mba'emo vai jokoa oiko.
- <sup>6</sup> Emoïve eme ijayvuague ramigua,  
 ndevy ijayvu atã e'ŷ aguã, ha'e ijapu va'e reikoa oikuaa e'ŷ aguã.
- <sup>7</sup> Mokoï regua re ajerure ndevy,  
 eme'ẽ e'ŷ eme, aikove teria ja.
- <sup>8</sup> Eipe'a ke xegui anhetẽ rupi e'ŷ aikoa ha'e xeapu reixeia.  
 Eme'ẽ eme xeporiaukue aguã, neĩ arekopa aguã.  
 Eme'ẽ tembi'u aikotevẽ nhavõ,
- <sup>9</sup> xapy'a rei arekopa ma rire ndegui xerexarai vy  
 "Mava'e tu SENHOR?" ha'e e'ŷ aguã.  
 Ha'e rami e'ŷ vy xeporiaukue'i vy xemonda aikovya rupi  
 Nhanderuete rery iky'a va'ea rami aikuaa uka e'ŷ aguã.
- <sup>10</sup> Tembiguai re ndeayvu rei eme ipatõ renonde,  
 ha'e va'e ju ndere ijayvu poyi e'ŷ aguã, ha'e repaga aguã rami reiko e'ŷ aguã.
- <sup>11</sup> Ikuai nguу kuery re ijayvu vai va'e,  
 ha'e oxy voi ndogueroayvu porãi va'e.
- <sup>12</sup> Ikuai ha'e kuery ae ojeupe ae "Ojeavy va'e'ŷ" he'i va'eri  
 peteigueve ma voi gueko vaia gui ndojeky'a'o ukai.
- <sup>13</sup> Ikuai ojejou porã rei va'e,  
 onhemboyvate rei va'e ha'e kuery ae oikuaa rami, ha'e yvate rupi rei oma'ẽ va'e.
- <sup>14</sup> Ikuai kyxe guaxu rami haĩ va'e,  
 kyxe rami haimbe va'e oguereko  
 yvy gui omomba aguã iporiaukue'i,  
 ha'e oipotapa rei va'e kuery, avakue mbyte gui.
- <sup>15</sup> Tuguy pytea ma oguereko mokoï guajy,  
 ha'e va'e ma "Eme'ẽ, eme'ẽ", he'i va'e.  
 Ha'e mboapy oiko hevyatã kuaa e'ŷ va'e,  
 tá, irundy ikuai "Ha'eve ma!" nde'i kuaai va'e.
- <sup>16</sup> Ha'e va'e ma yvyra rupa,  
 kunha imemby e'ŷ va'e ae,  
 yvy pirukue yy noña,  
 ha'e tata voi "Ha'eve ma" nde'i va'e.
- <sup>17</sup> Nguу ojojai rei va'e,  
 ha'e oxy nonhe'ẽ rendui va'e rexma  
 xapirẽ yakã yvýrygua omondoropa 'rã,  
 ha'e taguato ra'y kuery ho'upa 'rã.
- <sup>18</sup> Mboapy nunga oiko xevy iporã ete va'e,  
 tá, irundy ikuai aikuaa e'ŷ va'e:
- <sup>19</sup> ha'e va'e ma taguato yvate rupi oveve oikovy va'e,  
 mboi ita áry otyryry ov yva'e,  
 kanoã guaxu ye'ẽ mbyte rupi oaxa ov yva'e,  
 ha'e avakue kunhataígue reve joayvua.
- <sup>20</sup> Po rami ma kunha itavy rei va'e reko.  
 Okaru ha'e ojuru oiky'a'opa ma vy

- “Mba'eve py ndatekoavyi”, he'i 'rã.\*
- <sup>21</sup> Mboapy oiko yvy yta mboryryiarã,  
tá, irundy jaexa vy jaropo'aka va'erã e'ŷ:
- <sup>22</sup> ha'e va'e ma tembiguai huvixarã oĩxe va'e,  
hi'arandu e'ŷa rupi tembi'u re hevyatã oikovy va'e,
- <sup>23</sup> kunha omenda va'eri oayvupy e'ŷ,  
ha'e gui tembiguai kunha herekoa rekovia ha'e ju onhemoingo va'e.
- <sup>24</sup> Irundy regua ikuai yvy re kyrĩ'i va'eri  
hi'arandu va'e kuery gui hi'aranduve va'e:
- <sup>25</sup> ha'e va'e ma tay'i, ha'e kuery ma imbaraete va'e'ŷ va'eri  
kuarayaku py guembi'urã omoĩ porã va'e;
- <sup>26</sup> ha'e anguja guaxu ipo'aka va'e'ŷ,  
ha'e rami teĩ ita pa'ũ re ae 'rã hoo;
- <sup>27</sup> tuku karu ma huvixa va'e'ŷ va'eri  
oguataa rupi hyxy porã'i 'rã jogueravy;
- <sup>28</sup> ha'e gui ambere'i ma nhandepo py jajopy rive'i va'erã,  
teĩ huvixa ro py ae oiko va'e.
- <sup>29</sup> Mboapy ikuai jaexa rã ojejou porã reia rupi oguata va'e,  
tá, irundy onhemboyvate reia rupi ikuai va'e:
- <sup>30</sup> ha'e va'e ma guary mymba kuery pavẽ gui imbaraeteve va'e,  
ha'e neĩ avave gui guakykue katy ojevy va'erã e'ŷ;
- <sup>31</sup> ha'e uru ava opexo omopu'ã rei reve oguata va'e,  
ha'e kavara ava,  
ha'e gui huvixave ma hexe nhapu'ã aguã voi nda'evei va'e.
- <sup>32</sup> Ne'arandua rupi e'ŷ renhemboyvate ri vy,  
e'ŷ vy ndepy'a re mba'emo vairã remoĩ ri vy  
ejoko ndejuru ndepo py.
- <sup>33</sup> Mba'eta kamby nhamomy-momyĩ ramo manteiga ojeapoa rami,  
ha'e oxĩmba rã huguy oẽa rami avi,  
ipoxy aguã rami joapo ramo joguero'apa rei 'rã.

## 31

### *Huvixave Lemuel ixy omongetaague*

- <sup>1</sup> Pova'e ayvu ma Massá pygua huvixave Lemuel ixy ombo'e vy ijayvuague regua.
- <sup>2</sup> Xepi'a, mba'e pa aipoa'e 'rã ndevy, xepi'a xeryepy pyguare?  
Mba'e pa ndevy aipoa'e 'rã, xepi'a anhemboayvu ma voi va'ekue?
- <sup>3</sup> Emboaxa rive eme nembaraetea kunhague mboae káuxa,  
emboaxa eme reikoa huvixave reitya kuery pe.
- <sup>4</sup> Lemuel, nda'evei huvixave ha'e rami oiko aguã,  
nda'evei huvixave vinho oy'u oikovy aguã,  
neĩ iro va'e re rive yvatekueve ikuai aguã.
- <sup>5</sup> rey'ua rupi rive lei gui nderexarai vy  
ojexavai rei'i va'e repya gui rejep'e a e'ŷ aguã.
- <sup>6</sup> Iro va'e ma omano rai'i va'e pe anho 'rã nhame'ẽ,  
ha'e vinho ma ipy'a raxy va'e kuery pegua anho,
- <sup>7</sup> ha'e kuery oy'u vy hexaraipa aguã iporiau reia re,  
ojexavai reia re riae ima'endu'a e'ŷ aguã.
- <sup>8</sup> Ndeayvu ke ijayvu e'ŷ va'e repya rupi,  
openamby e'ŷ ikuai va'e ha'e javi repy aguã.

\* **30:20** Apy ma ijayvu itavy reia re.

<sup>9</sup> Ha'evea rami ke ndeayvu renhomboayvua py,  
reikuaa pota porã aguã iporiaukue'i ha'e oipotapa rei'i va'e pytyvõa rupi.

*Kunhague hi'arandu va'e oguerovy'aa*

<sup>10</sup> Mava'e nda'u ojou kuaa 'rã kunha hi'arandu va'e?  
Ha'e ramigua ma ita iporäve va'e gui voi ovareve va'e.

<sup>11</sup> Ha'e va'e re ime ojerovia 'rã okuraxõ py,  
ixupe ndoatai 'rã mba'emo repyrã.

<sup>12</sup> Ome pe ojapo vai rei 'rãgue py ojapo porã 'rã,  
ára nhavõ oikovea pukukue re.

<sup>13</sup> Ogueru 'rã vexa'i rague ha'e nhimbo,  
ha'e gui ov'yaa rupi 'rã ombo'eapo opo py.

<sup>14</sup> Kanoã guaxu mba'emo rerua rami avi  
mombryy gui 'rã kunha va'e ogueru tembi'u.

<sup>15</sup> Pytû rei teri reve opu'ã 'rã  
omongaru aguã ngoo pygua kuery,  
ha'e guembiguai kuery kunhague pe mba'emo ojapo uka 'rã.

<sup>16</sup> Mba'etyrã re oikuua pota porã ma vy ojogua 'rã,  
uva renhoï onhoty 'rã ombo'eapoague repykue re ojogua va'ekue.

<sup>17</sup> Kyre'ÿ py onhemonde vy  
omombaraete 'rã ojyva ombo'eapo aguã.

<sup>18</sup> Mba'emo repyrã ojouxre ramo  
pyávy teñ hataendy ndoguei.

<sup>19</sup> Okuave'ë 'rã nhimbo onhemama va'e re,  
opo rovai py hi'y re ojopy reve.

<sup>20</sup> Opo oipe'a 'rã ojexavai va'e  
ha'e oipota va'e kuery oipytyvõ aguã.

<sup>21</sup> Ha'e gui ngoo py ikuai va'e re oma'ë vy ndoguerokyjei 'rã yro'y vaipa teñ,  
ao raku py peteñ-teñ onhemonde ramo.

<sup>22</sup> Kunha va'e ojapo avi 'rã onheovã aguã,  
ha'e onhemonde 'rã ao porã púrpura guigua py anho.

<sup>23</sup> Ime ma huvixa kuery omboete pavẽ 'rã,  
oyvy re ikuai va'e mongetaa kuery reve oguapy oiny ramo.

<sup>24</sup> Ta'yxy ma nhimbo porägue gui ojapo 'rã aorã, ovende 'rã guive,  
ku'axã ma mba'emo vendea kuery peguarã voi.

<sup>25</sup> Ojee omoñ va'e ma ombaraeterã ha'e omboetepy oiko aguã.  
Ha'e rami vy ko'ë rã guarã re ma ndojapura rei 'rã.

<sup>26</sup> 'Arandu rupi 'rã ijayvu,  
ha'e joayvua rupi nhombo'e kuaa 'rã.

<sup>27</sup> Opena porã 'rã ngoo pygua kuery re,  
ha'e inhate'ÿ reiague re e'ÿ 'rã omongaru.

<sup>28</sup> Ha'e ramo imemby kuery opu'ãmba vy oxy pe "Ovy'a ete va'e" he'i 'rã okuapy.

Ime voi oguerovy'a vy aipoe'i 'rã:

<sup>29</sup> "Kunhague hi'arandu va'e heta ikuai  
teñ ndee ma pavẽ gui ne'aranduve va'e", he'i 'rã.

<sup>30</sup> Onhemoporãa re ikuai va'e ojekore 'rã, onhemootyrrõa voi opa rive 'rã.  
Ha'e rã kunhague SENHOR renonde ojererokyjea rupi ikuai va'e ma oguerovy'aa riae  
'rã.

<sup>31</sup> Nhanema'endu'a porã 'rã opo py ojapo porãa re,  
pavẽ oendua py jarovy'a 'rã oiko porãa.

## Eclesiastes ayvu mombe'ua ombopara va'ekue

## Eclesiastes ayvu mombe'ua ombopara va'ekue

Kova'e kuaxia ma ha'eve jaikuua porâve aguã Jesus aipoe'iague: "Mba'e 'rã tu avakueojou, yvy regua ha'e javi ojou va'eri guekove ae omokanhy vy?" he'iague (Marcos 8.36). Mba'eta kova'e kuaxia apoare ma opa marâguo ojeupe guarâ ojou tei ha'e nunga ha'e javipe "Opa rive va'erâ meme" he'i.

Ojeupe ae "Ayvu mombe'ua" he'i. "Ha'e vy ayvu mombe'ua aipoe'i: 'Opa va'erâ rive, opa mba'e ikuai va'e opa rive va'erâ meme', he'i" (1.2). Aipoe'i avi: "Xejeupe ajapo yvotyty ha'e yvyraty, ha'e py yvyratya hi'a va'erâ ha'e javi regua anhoty. Xejeupe yy ajoko vy yvyraty amoaký, yvyratya ikuai va'e iporâ aguã. Heta guive ajogua xerembiguairâ avakue ha'e kunhague. Xero py ae itui'i avi xerembiguairâ. Areko avi va'ekue vaka ha'e vexa'i, xee aiko e'ý mbove Jerusalém tetâ py ikuai va'ekue gui hetave areko. Xejeupe ajou reta avi prata ha'e ouro, mba'emo hepyve va'e ajogua avi amboae yvy re huvixave kuery opena va'e gui. ... Ha'e gui tembiapo xepo py ajapo va'ekue ha'e javi re aikuaapota, xekane'õ peve amba'epoa ha'e javi re guive. Ha'e rã ha'e nunga ha'e javi ma opa rive va'erâ meme ae ra'e, yvytu jere'i rakykue amongue onha rivea rami. Ha'e nunga ha'e javi py mba'eve rei ndajoui iporâ va'e kuaray guýry", he'i (2.5-8a, 11).

Opaa py ayvu mombe'ua aipoe'i: "Opa mba'e rendu va'ekue gui ma yvateve va'e po rami: Nhanderuete renonde eiko rejererokyjea rupi, ha'e emoï porâ ojapo uka va'ekue, mba'eta ha'e va'e ma avakue pavê ojapo aguã va'e. Mba'eta Nhanderuete oikuaapota 'rã jaikoa ha'e javi re, ojekuaa voi e'ý va'ekue guive, iporâ va'e, ha'e iporâ e'ý va'e tei" (12.13-14).

### *"Opa rive va'erâ meme", he'iague*

<sup>1</sup> Kova'e ma ayvu mombe'ua ijayvuague. Ha'e va'e ma Davi ra'y oiko Jerusalém pygua huvixave.\*

<sup>2</sup> Ha'e vy ayvu mombe'ua aipoe'i: "Opa va'erâ rive, opa mba'e ikuai va'e opa rive va'erâ meme.

<sup>3</sup> Mba'e nda'u avakue ojou 'rã kuaray guýry rupi ombo'epoa ha'e javi rekovia?" he'i.

### *Mba'emo ikuai va'e ha'ekue rami ae ju ikuiaia re ijayvuague*

<sup>4</sup> Petei javegua kuery oaxa 'rã, ha'e gui amboae javegua ju 'rã ikuai. Ha'e rã yvy ma itui riae 'rã.

<sup>5</sup> Kuaray ma oë 'rã, ha'e gui oike ju 'rã. Ha'e gui oïague katy ju 'rã oo, oë ju aguã.

<sup>6</sup> Yvytu ma oo 'rã kuaray puku-a katy, ha'e gui ojere vy kuaray ijapu'a'ia katy ju 'rã oipeju. Ojeapa 'rã ovu, ha'e gui ojevy ju 'rã ojeapaaty rupi.

<sup>7</sup> Yakâ ikuai va'e ma ye'ë katy oxyry va'e meme, ha'e rami tei ye'ë ndatyguauxui 'rã. Yakâ oxyry oinyague katy ae ju 'rã oxyry oiny.

<sup>8</sup> Opa mba'e ma nhanemongueraiarâ ae ikuai, avave rei nomombe'u porâ kuaai 'rã, guexa py oma'ë ha'e oapyxa py ojapyxakave riae tema tei.

<sup>9</sup> Mba'emo oiko va'ekue ramigua ae ju 'rã oiko. Mba'emo ojapo pyre ae ju 'rã ojapoa. Ha'e rami vy ipyau ete va'e ndoikoi 'rã kuaray guýry rupi.

<sup>10</sup> Oiko ri nda'u mba'emo jaexa vy "Ma'ë, kova'e ma ipyau va'e", ja'e aguã? Any! Jaiko e'ý mbove ára oiko jave py ma voi oiko va'ekue ae.

<sup>11</sup> Avave rei na'ima'endu'ai 'rã mba'emo ymave rupi oiko va'ekue re. Ha'e rami ae mba'emo oiko va'erâ re voi ha'e rire ikuai va'erâ kuery na'ima'endu'ai avi 'rã.

\* <sup>1:1</sup> Huvixa Davi ra'y Salomão ma nguu rekovia oï raka'e Jerusalém pygua huvixa. Ha'e va'e ma pavê gui hi'aranduve va'e, oguerekopa rei va'e guive (1 Reis 4.29-34, 10.14-29).

### *Ayvu mombe'ua gueko re ae ijayvuague*

- <sup>12</sup> Xee ayvu mombe'ua ma Israel pygua huvixave aĩ Jerusalém py.
- <sup>13</sup> Ha'e rami vy xepy'a re amoĩ xe'arandua rupi aikuua pota aguã mba'emo yva guýry rupi ikuai va'e ha'e javi re. Ha'e va'e tembiapo poyi ma avakue ra'y kuery re Nhan-deruete omoĩ imo'aranduarã.
- <sup>14</sup> Ha'e rami vy aikuua pota tembiapo kuaray guýry rupi ojapoa va'e ha'e javi re. Ha'e nunga ha'e javi ma opa rive va'erã meme, yvytu jere'i rakykue amongue onha rivea rami.
- <sup>15</sup> Ikarẽ va'e ma nombo'yviavei 'rã, ha'e mba'emo noĩ va'e ma ndoipapaai 'rã guive.
- <sup>16</sup> Xejeupe ae aipoa'e: "Ma'ë, xee ma xeyvate, ha'e vy xee aiko e'ŷ mbove Jerusalém py ikuai va'ekue ha'e javi gui xe'aranduve va'e", ha'e va'ekue, mba'eta anhetẽ ete aikoa ha'e javi rupi xekuraxõ py xe'arandu ha'e mba'emo aikuua potaa rupi aiko va'e.
- <sup>17</sup> Ha'e rami vy xepy'a re amoĩ aikuua aguã mba'e pa 'arandu ha'e 'arandu e'ŷa ovare e'ŷ va'e. Ha'e rami teĩ aikuua ha'e rami aguã voi yvytu jere'i rakykue onha rive va'e rami aikoa.
- <sup>18</sup> Mba'eta 'arandua retaa py ma heta oĩ avi kueraia. Mba'emo oikuaapave va'ea py ma heta oĩ avi 'rã poriaua.

## 2

### *Mba'emo oguerekova'e opa rive aguã re ijayvuague*

- <sup>1</sup> Aipoa'e xejeupe ae: "Aa ta! Xejee ae aikuua pota 'rã vy'aa py. Taendu ha'vy vy'aa", ha'e va'ekue ri ha'e va'e voi opa rive va'erã.
- <sup>2</sup> Mba'eta xerorya pe ae "Ovare e'ŷ va'e" ha'e. Avy'aa ma mba'erã tu ovare?
- <sup>3</sup> Ha'e gui xepy'a re amoĩ vinho ay'ua rupi aiko aguã, teĩ xe'arandua py ajejoko teri reve. Ha'e rami vy anhemboaxa ovare e'ŷa rupi aiko aguã, aikuua peve avakue ra'y kuery yva guýry rupi ikuai va'e o'ára mboapy'i oĩ teri jave py ojapo aguã ha'eveva va'e.
- <sup>4</sup> Ajapo avi tembiapo tuvixa va'e. Xejeupe guarã ajapo reta oo, ha'e anhotŷ uva tyrã.
- <sup>5</sup> Xejeupe ajapo yvotyty ha'e yvyraty, ha'e py yvyla hi'a va'erã ha'e javi regua anhotŷ.
- <sup>6</sup> Xejeupe yy ajoko vy yvyraty amoakŷ, yvyla ikuai va'e iporã aguã.
- <sup>7</sup> Heta guive ajogua xerembiguarã avakue ha'e kunhague. Xero py ae itui'i avi xerembiguarã. Areko avi va'ekue vaka ha'e vexa'i, xee aiko e'ŷ mbove Jerusalém tetã py ikuai va'ekue gui hetave areko.
- <sup>8</sup> Xejeupe ajou reta avi prata ha'e ouro, mba'emo hepyve va'e ajogua avi amboae yvy re huvixave kuery opena va'e gui. Xejeupe ajou avakue ra'y kuery ojou porãve va'e: oporaei va'erã avakue ha'e kunhague, ha'e kunhague oata aguã rami e'ŷ guive.\*
- <sup>9</sup> Ha'e gui xeyvate ha'e arekopave xee aiko e'ŷ mbove Jerusalém py ikuai va'ekue ha'e javi gui. Xere oĩ tema avi xe'arandua.
- <sup>10</sup> Mba'emo aeaxeve va'e rei tema xerexa pe ndaexa uka e'ŷi, ha'e peteĩve py nambovy'a e'ŷi xekuraxõ, mba'eta ha'e nunga py amba'eapoague rekovia ajou. Xee arov'y'a va'ekue mba'emo ajapo va'e ha'e javi.
- <sup>11</sup> Ha'e gui tembiapo xepo py ajapo va'ekue ha'e javi re aikuua pota, xekane'õ peve amba'eapoaa ha'e javi re guive. Ha'e rã ha'e nunga ha'e javi ma opa rive va'erã meme ae ra'e, yvytu jere'i rakykue amongue onha rivea rami. Ha'e nunga ha'e javi py mba'eve rei ndajoui iporã va'e kuaray guýry.

### *Hi'arandua voi opa rive 'rãa re ijayvuague*

- <sup>12</sup> Ha'e gui aikuua pota 'arandu re, ha'e gui akã porã e'ŷa ha'e 'arandu e'ŷ reia re guive. Mba'eta huvixave rekovia ju ava mboae oĩ va'e, mba'e tu ojapove 'rã? Mba'eta amboae kuery ojapo va'ekue ramigua ae ju 'rã ojapo.

\* **2:8** Huvixa Salomão ma heta oguerekovo raka'e gua'yxy ha'e gua'yxy jevy kuery. Ha'e va'e kuery ta'angaa re ojerovia va'e káuxa Salomão ojepe'a Nhanderuete pe oikoa gui (1 Reis 11.1-8).

<sup>13</sup> Ha'e gui aikuaa rā 'arandu e'ŷ reia gui 'arandu ha'eveve, pytū va'e gui hendy va'e ha'evevea rami.

<sup>14</sup> Hi'arandu va'e ma oakā re guexa oguerekō 'rā oexa aguā, ha'e rā hi'arandu e'ŷ rei va'e ma pytūa rupi 'rā oiko. Ha'e rami teĩ aikuaa avi mokoīve pe joo ramigua oiko 'rāa.

<sup>15</sup> Ha'e nunga rupi xejeupe ae aipoa'e: "Hi'arandu e'ŷ va'e pe oiko va'e ramigua ma xevy pe voi oiko avi 'rā. Ha'e rami rā mba'erā tu xee aekave ta xe'arandurā?" ha'e. Xejeupe ae aipoa'e avi: "Xe'arandua voi opa rive va'erā", ha'e.

<sup>16</sup> Mba'eta hi'arandu va'e re ha'e hi'arandu e'ŷ va'e re teĩ na'ima'endu'aa riae'i 'rā. Mba'eta are'i e'ŷ re opa mba'e re hexaraia 'rā. Mba'eta hi'arandu e'ŷ va'e omamo 'rā, ha'e rami ae avi hi'arandu va'e voi omamo 'rā.

<sup>17</sup> Ha'e nunga rupi xekuerai xerekove re, mba'eta xee ndajou porāvei ma kuaray guýry rupi amba'eapo. Anhetē ete, ha'e nunga ha'e javi ma opa rive va'erā meme, yvytu jere'i rakykue amongue onha rivea rami.

### *Omba'eapo regua voi opa rive aguā re ijayvuague*

<sup>18</sup> Xekuerai avi kuaray guýry rupi amba'eapo poyia ha'e javi re, mba'eta hekovia repykue aejapa 'rā aiko rire ikuai va'erā kuery pe.

<sup>19</sup> Ha'e mava'e tu oikuaa ha'e nunga jopyarā hi'arandu va'e, e'ŷ vy hi'arandu e'ŷ va'e oiko 'rāa? Ha'e rami teĩ ma ha'e va'e ae 'rā ojopypa kuaray guýry xe'arandua rupi amba'eapoague repy. Ha'e va'e voi opa rive va'erā.

<sup>20</sup> Ha'e rami vy amboae rami aikuaa vy xekuraxō py xekuerai etea aendu kuaray guýry rupi amba'eapo poyia ha'e javi re.

<sup>21</sup> Mba'eta ikuai avakue o'arandua rupi ombo'eapo va'e, oikuaa ha'e ikyre'ŷa rupi. Ha'e rami teĩ ha'e kuery ombo'eapoague repy oeja 'rā ha'e va'e re nombo'eapoi va'ekue peguarā. Ha'e va'e voi opa rive va'erā, ha'e nda'evei ete va'e.

<sup>22</sup> Ha'e gui mba'e 'rā tu avakue ojou kuaray guýry rupi opy'a py guive ombo'eapo poyiague ha'e javi re?

<sup>23</sup> Mba'eta ára nhavō haxy oendu, ha'e ombo'eapo re ikuerai 'rā. Pyávy teĩ ipy'a ndopytu'ui ae. Omba'eapo regua voi opa rive va'erā.

<sup>24</sup> Avakue pe ha'eveve va'e ma okaru, oy'u ha'e ombo'eapo oguerovy'a aguā. Mba'eta ha'e rami aguā aikuaa Nhanderuete po gui meme oua.

<sup>25</sup> Mba'eta ixugui e'ŷ vy mba'exa 'rā tu jakaru, e'ŷ vy javy'a?

<sup>26</sup> Mba'eta avakue Nhanderuete mbovy'aa va'e pe ha'e ome'ẽ 'rā hi'arandurā, oikuaa ha'e ov'y'a aguā. Ha'e rā ojejavvy va'e pe ma ome'ẽ 'rā ombo'eapo aguā, mba'emo omomo'õ ha'e omboaty aguā Nhanderuete mbovy'aa kuery pe ju ome'ẽ va'erā. Ha'e va'e voi opa rive va'erā, yvytu jere'i rakykue amongue onha rivea rami.

## 3

### *Opa mba'e oiko aguā ára re ijayvuague*

<sup>1</sup> Opa mba'e yva guýry ikuai va'e pe oiko aguā ára oī.

<sup>2</sup> Ovaẽ 'rā nhandedui'i aguā ha'e nhamano aguā ára. Ovaẽ 'rā nhama'etŷ aguā ha'e nhanhotŷ va'ekue nhamondoropa ju aguā ára.

<sup>3</sup> Oĩ jojukaa aguā ha'e nhomongueraa aguā ára. Oĩ mba'emo nhambovaipa aguā ha'e jajapo aguā ára.

<sup>4</sup> Ovaẽ 'rā jajae'o aguā ha'e japuka aguā ára. Ovaẽ 'rā nhandedpy'a vai aguā ha'e gui jajeroky aguā ára.

<sup>5</sup> Oiko 'rā ita nhamoai aguā ha'e nhambooty aguā ára. Ovaẽ 'rā nhanhokuavā aguā ha'e nhanhokuavā ve'ŷ aguā ára.

<sup>6</sup> Oĩ mba'emo jaeka aguā ha'e nhamokanhy aguā ára. Oĩ mba'emo nhamoī porā aguā ha'e nhamombo aguā ára.

<sup>7</sup> Oĩ mba'emo nhamondoro aguã ha'e nhambovyvy aguã ára. Oĩ nhakyrirĩ aguã ha'e nhandeayvu aguã ára.

<sup>8</sup> Oĩ jajoayvu aguã ha'e ndajajoayvuvei aguã ára. Oĩ joe nhapu'ã aguã ha'e nhandekuai porã'a'i aguã ára.

### *Ára oa'angaague avakue ndoikucaaia re ijayvuague*

<sup>9</sup> Mba'e tu ombo'eapo va'e ojou 'rã ombo'eapo poyi oikovyague rekovia?

<sup>10</sup> Mba'eta xee aexa rã avakue ra'y kuery ombo'eapo aguã ma imo'aranduarã Nhanderuete ombou va'ekue.

<sup>11</sup> Opa mba'e Nhanderuete ojapo hi'ára py iporã aguã rami. Avakue py'a re omoõ avi opa e'ý va'erã nunga, teí ha'e kuery ndoikuapai 'rã mba'emo Nhanderuete jypy guive opaa peve ojapo va'e ha'e javi.

<sup>12</sup> Aikuua avakue pe ha'eveva va'e ov'y'a ha'e ikuai porã aguã.

<sup>13</sup> Avakue pe Nhanderuete ome'ë avi okaru, oy'u ha'e ombo'eapoague rekovia oguerovy'a aguã.

<sup>14</sup> Xee aikuua rami Nhanderuete ojapo va'e ha'e javi ndopai va'erã meme. Ha'e va'e re nda'evei mba'eve omoõave aguã neñ oipe'aa aguã guive. Ha'e rami Nhanderuete ojapo, henonde avakue ojererokyje aguã.

<sup>15</sup> Mba'emo aÿ oï va'e ramigua oiko va'ekue ae ma, ha'e oiko va'erã ramigua voi oiko ae ma. Mba'eta Nhanderuete ojapo 'rã mba'emo oaxa va'ekue ramigua oiko jevy-jevy aguã rami.

### *Mymba rami avi avakue omano aguã re ijayvuague*

<sup>16</sup> Peteí mba'e ju aexa kuaray guýry. Mba'eta ha'evea rami joguerekao aguã 'rãgue py ha'eve'ýa ramigua oiko, teko porã oï 'rãgue py ha'eve'ýa ramigua ae tema oiko.

<sup>17</sup> Ha'e ramo aipoa'e xejeupe: "Nhanderuete ma omboayvu 'rã heko porã va'e ha'e heko vai va'e. Mba'eta oï ae ha'e oipota va'e ha'e javi oiko aguã ára, ha'e hembiaporã ha'e javi pe", ha'e.

<sup>18</sup> Aipoa'eve ju xejeupe: "Nhanderuete oeko a'ã 'rã avakue ra'y kuery, ha'e kuery oikuua okuapy aguã mymba kuery rami ikuiaia", ha'e.

<sup>19</sup> Mba'eta avakue ra'y kuery re oiko va'e ramigua ae oiko avi 'rã mymba kuery re. Peteí regua omanoa rami ae avi 'rã amboae regua omano. Oikove va'e ha'e javi joo rami ipytuë 'rã. Ndoikoi avakue mymba gui oiko areve va'erã, mba'eta ha'e javi ma opa rive va'erã meme.

<sup>20</sup> Pavẽ rei 'rã oo peteí henda py anho. Yvy ku'i gui meme oiko rire yvy ku'i ae ju 'rã opyta.

<sup>21</sup> Mava'e oikuua ta avakue ra'y kuery nhe'ë yva re oo 'rãa, ha'e rã mymba nhe'ë ma yvy katy, yvy re rive oo 'rãa?

<sup>22</sup> Aikuua rã avakue pe ha'eveva va'e ma ombo'eapoa oguerovy'a aguã, mba'eta ha'e kuery peguarã oeja. Mba'eta ha'e kuery oiko rire mava'e tu ogueru ju 'rã mba'e pa oikoa oexa aguã?

## 4

### *Jajexavai jaikovya re ijayvuague*

<sup>1</sup> Aexa avi nhomoingo axy reia kuaray guýry rupi ikuai va'e ha'e javi. Aexa oguerekao axy reipy kuery rexay, avave rei nombopy'a guaxuai rã. Aexa avi joguerekao axy reia kuery imbaraeteve okuapya, ha'e ikuai axy va'e pytyvõarã ndoikoia.

<sup>2</sup> Ha'e nunga rupi aikuua rã okuave va'e kuery gui omano va'ekue ov'y'ave va'e ikuai.

<sup>3</sup> Ha'e gui ha'e va'e mokoõ gui ov'y'ave va'e ma ndoikoi teri va'e, mba'eta ha'e va'e ma mba'emo vai kuaray guýry rupi ojapoa rã neñ ndoexai.

<sup>4</sup> Ha'e ramo aexa avakue ombo'eapoa ha'e mba'emo ojapo kuaa ha'e javi ojapo, oirū kuery gui oguerekopavexe vy rive. Ha'e va'e voi opa rive va'erā, yvytu jere'i rakykue amongue onha rivea rami.

<sup>5</sup> Hi'arandu e'ŷ va'e ma onhekuavā 'rā oiny ngo'o ae ho'upa peve. Mba'eta aipoe'i:

<sup>6</sup> "Xepo jovaive py amba'eapo vaipa vy yvytu jere'i rakykue anha 'rāgue py ha'eveve peteī po renyē reve apytu'u ainy aguā", he'i.

<sup>7</sup> Ha'e ramo kuaray guýry amboae nunga aikuua avi opa rive va'erā.

<sup>8</sup> Ha'e va'e ma peteī ava ha'e ae'i oiko va'e, ta'y va'e'ŷ neī heindy e'ŷ va'e. Ha'e rami teī ombo'eapoa gui ndopytu'ui va'e, ha'e ndoexaxe ve'ŷi oguerekopaa. Ha'e rami teī aipo nde'i: "Mava'e pe tu xee amba'eapo aikovy? Mba'erā pa xenhe'ē py ajejoko mba'emo porā arov'y a aguā gui?" nde'i. Ha'e nunga voi opa rive va'erā, tembiapo nhomongueraiarā rive.

<sup>9</sup> Ha'e ae'i oiko 'rāgue py ha'eveve mokoī joguereko, mba'eta ombo'eapoa py ojouve 'rā.

<sup>10</sup> Mba'eta xapy'a rei ho'a ramo peteī-teī omopu'ā ju 'rā oirū. Ha'e rā ha'e ae'i oiko va'e pe nda'evei ete, mba'eta ho'a ramo ndoikoi 'rā imopu'āarā.

<sup>11</sup> Ha'e mokoī joyvy okea py ha'e kuery oendu 'rā haku. Ha'e rā peteī'i oña py ma marā rami 'rā tu haku?

<sup>12</sup> Ha'e rami ae avi peteī'i re opu'āa vy ipo'akaa 'rā, ha'e rā mokoī ikuai vy ojoko 'rā. Ixā mboapy ombojoyvy pyre rā nomondoia voi 'rā.

<sup>13</sup> Peteī kunumi poriaukue'i hi'arandu va'e ma opena porāve 'rā huvixave tuja'i hi'arandu e'ŷ va'e vy nonhemongoeta ukai va'e gui.

<sup>14</sup> Xapy'a rei kunumi va'e huvixave oī aguā oguenoēa 'rā nhuā gui, e'ŷ vy ha'e va'e yvy py ae iporiaukue'i reve itui va'ekue teī ae ma.

<sup>15</sup> Mba'eta aexa kuaray guýry ikuai va'e ha'e javi huvixave tuja'i rekovia kunumi oī va'ekuea katy anho oje'oi rā.

<sup>16</sup> Ha'e ramo opena 'rā oikovy mbovy rei e'ŷ re. Ha'e rami teī ha'e va'e rire ju oī va'e na'ima'endu'a porāi 'rā hexe. Anhetē, ha'e nunga voi opa rive va'erā, yvytu jere'i rakykue amongue onha rivea rami.

## 5

*"Nda'evei jaikuuaa pota porā e'ŷ re nhanhemboayvu ma voi mba'emo jajapo aguā re", he'iague*

<sup>1</sup> Nhanderuete pegua opy reike ta vy eikuuaa pota porā ranhe reiko aguā re. Hi'arandu e'ŷ va'e kuery mba'emo ome'ē va'e rami rejapo vy reike 'rāgue py ha'eveve ayvu rendu aguā, mba'eta ha'e kuery ma gueko vaia re oikuuaa pota e'ŷ re ome'ē mba'emo.

<sup>2</sup> Ejapura eme ndejuru py, neī nekuraxō py ma voi Nhanderuete renonde renhemboayvu aguā. Mba'eta Nhanderuete oī yva re, ha'e rā ndee ma yvy py reiko. Ha'e nunga rupi mbovy'i tandeayvu.

<sup>3</sup> Mba'eta nhamba'eapo vaipaa gui ou nhandeke raia, ha'e rami ae avi nhandeayvu retaa py ha'eve'ŷa rami 'rā nhandeayvu.

<sup>4</sup> Nhanderuete pe mba'emo rejapo aguā re renhemboayvu rire ejapo voi. Mba'eta ha'e ma ndoguerovy'ai 'rā hi'arandu e'ŷ va'e. Ejapo ete ndeayvuague.

<sup>5</sup> Renhemboayvuague nderejapoia gui ha'eveve 'rāgue nerenhemboayvui ma voi va'e rire.

<sup>6</sup> Ndeayvuague tojapo eme rejavy aguā rami, ha'e aipo're eme Nhanderuete ayvu mombe'ua pe: "Ha'e rami e'ŷ xeayvu ta va'ekue ri", 're eme. Mba'erā tu ndeayvua káuxa rejapo Nhanderuete ivai aguā rami, ndepo py rejapo va'ekue ombovaipa aguā?

<sup>7</sup> Mba'e ta, nhandeke raia ha'e nhandeayvu reta reia ma opa rive va'erā. Ha'e nunga rupi Nhanderuete renonde rejererokyjea rupi eiko.

*Mba'emo jareko va'e opa rive 'rāa re ijayvuague*

<sup>8</sup> Xapy'a rei yvy re rex'a 'rā iporiaukue'i oguereko axya rei rā, ha'e ha'evea rami joguerekoa 'rāgue py imonda va'e rive oī rā. Ha'e ramigua rex'a vy enhemondyi eme. Mba'eta joe opena va'e kuery áryve ikuai yvatekueve imbopagaarā, ha'e ha'e va'e kuery áryve amboae yvateve ete va'e ju imbopagaarā oī.

<sup>9</sup> Ha'e rā yvy ma pavē oiporu va'erā itui. Huvixave voi okaru 'rā oikovy mba'ety gui.

<sup>10</sup> Peráta re nda'eveive va'e ma ojouvexe tema 'rā. Mba'emo oguerekopa va'e voi ojouvexe avi 'rā. Ha'e ramigua voi opa rive va'erā.

<sup>11</sup> Omono'ō mbyre heta ramo heta avi 'rā ikuai okaru va'erā. Ha'e nunga rupi mba'e 'rā nda'u ija kuery ojou, guexa py oexa rive aguā e'ŷ vy?

<sup>12</sup> Om̄ba'eapo va'e oke porā 'rā, okaru porā e'ŷ vy ndokaru porāi teī. Ha'e rā oguerekopa va'e ma mba'emo oguerekopa va'e káuxa rive ndoke porā kuaai 'rā.

<sup>13</sup> Amboae nunga ju aexa kuaray guýry nda'evei ete va'e, mba'eta amongue ojouve 'rā om̄ba'e rei-reirā ojeupe ae ojapo vai aguā rive.

<sup>14</sup> Ha'e rami avi xapy'a rei mba'emo oiko rā ija omokanhymba ramo ta'y kuery voi mba'eve ndoguerekoi 'rā opo py.

<sup>15</sup> Guyru'i gui mba'eve reve'ŷ oikoague ramo avi, mba'eve reve'ŷ ae ju 'rā oo. Ouague ramo ae ju 'rā oo, mba'eta mba'eve ndogueraai 'rā om̄ba'eapoague gui.

<sup>16</sup> Ha'e nunga voi nda'evei ete 'rā, mba'eta ouague ramo ae ju 'rā oo. Ha'e gui mba'e 'rā tu ojou yvtyu pe rive om̄ba'eapoague re?

<sup>17</sup> Mba'eta ára nhavō om̄ba'eapopa ma rire okaru 'rā pyávy, ikuerai ha'e imba'eaxy reve vy ndovy'ai reve.

<sup>18</sup> Ha'e gui xee aexa avi jakaru ha'e jay'u aguā ma ha'eve ha'e iporā va'e meme, ha'e kuaray guýry nhamba'eapo poyi rire nhamba'eapoague peteī-teī jarovy'a aguā, mbovy'i ára re jaiko aguā Nhanderuete ome'ēa pukukue re. Mba'eta ha'e va'e ma nhandevyguae ae.

<sup>19</sup> Ha'e gui amongue avakue pe ma Nhanderuete ome'ē 'rā oguerekopa aguā mba'emo porā anho, ome'ē avi 'rā ha'e nunga gui okaru ha'e hekovia ojoupa aguā, om̄ba'eapoague oguerovy'a aguā guive. Ha'e ramigua voi Nhanderuete ome'ē va'e meme.

<sup>20</sup> Ha'e va'e avakue ma ndoikuua pota vaipai 'rā ha'e kuery ae reko re, mba'eta ipy'a re Nhanderuete omoī ov'y'a aguā anho.

## 6

<sup>1</sup> Ha'e gui peteī ju aexa kuaray guýry nda'evei ete va'e avakue áry ipoyi va'erā.

<sup>2</sup> Mba'eta amongue py avakue pe Nhanderuete ome'ē 'rā oguerekopa aguā mba'emo porā anho, ha'e omboetevepy ikuai aguā guive. Ha'e kuery pe mba'eve ndoatai 'rā op'y'a py oipota va'e ha'e javi. Ha'e rami teī ha'e kuery pe Nhanderuete nome'ēi 'rā ha'e nunga gui okaru aguā. Ha'e rami 'rāgue py oexa va'ety e'ŷ kuery 'rā ho'u okuapy. Ha'e nunga voi opa rive va'erā, ha'e ojexavai etea.

<sup>3</sup> Xapy'a rei amongue oguereko 'rā cem gua'y kuery, ha'e vy heta ma'etŷ re 'rā oiko tuja'i ete peve. Ha'e rami teī xapy'a rei onhe'ē py mba'emo porā ndoguerovy'ai, neī nonhono porāai 'rā guive. Xee aikuua rā ha'e va'e gui ma hyru'i gui oity pyre ov'y'ave.

<sup>4</sup> Mba'eta hyru'i gui oity pyre ma ou 'rā opa aguā rive, ha'e gui oo ju 'rā pytūa katy. Ha'e rami rire pytū py ma hery noenduai.

<sup>5</sup> Ha'e va'e ma neī ndoexai 'rā kuaray, mba'eve ndoikuuaai 'rā guive. Ha'e rami teī amboae kuery gui opytu'u porāve 'rā,

<sup>6</sup> amboae kuery iporā va'e oguerovy'a e'ŷ va'e dois mil ma'etŷ re oiko teī. Mba'eta mokoīve e'ŷ 'rā teve joa katy oo?

<sup>7</sup> Avakue om̄ba'eapo 'rā ojuru py guarā re anho teī noendu ve'ŷi 'rā okaruxea.

<sup>8</sup> Tyrā hi'arandu va'e ma hi'arandu e'ŷ va'e gui ojouve 'rā teve? Mba'e 'rā tu iporiaukue'i ojouve amboae kuery oexaa py oiko kuaa rupi?

<sup>9</sup> Mba'emo jarekopave 'rāgue py ha'eveve nhanderexa py jaexa va'e jarovy'aa. Ha'e rami e'ŷ rā opa rive va'erā jaiko, yvytu jere'i rakykue amongue onha rivea rami.

<sup>10</sup> Mba'emo oiko va'erā rery ma oikuua pyre ae. Oikuua avi marā ramigua pa avakue ikuiaia, ha'e imbaraeeteve va'e reve joguero'a aguā nda'eveia guive.

<sup>11</sup> Anhetē heta ikuai mba'emo ndovarevei va'e. Ha'e rami teī mba'erā tu avakue pe ha'e nunga ha'eve?

<sup>12</sup> Mava'e nda'u oikuua 'rā mba'e nunga pa avakue pe ha'eveve va'ea? Mba'eta ha'e kuery ikuiaia ma kuaray'ā rami xapy'a'i 'rā oaxa, mba'emo opa rivea rami. Mava'e nda'u avakue pe omombe'u kuaa 'rā ha'e va'e rire mba'emo kuaray guýry oiko va'erā?

## 7

### *Arandua ha'e 'arandu e'ŷa re ijayvuague*

<sup>1</sup> Heakuā porā va'e hepyve va'e gui ha'eveve nhandere ima'endu'a porāa rā. Nhandedtuiague ára gui nhamanoa ára ha'eveve avi.

<sup>2</sup> Ngarua py jaa aguā gui ha'eveve peteī oo py ojae'o va'e ikuiaia py jaa aguā, mba'eta ha'e py jaikuua 'rā avakue ha'e javi opa aguā. Ha'e nunga re ma nhande jaikove va'e jaikuua pota aguā ha'eve.

<sup>3</sup> Nhanderorya gui ha'eveve nhandeporiaua, mba'eta nhandeporiaua nhanderova py jaexa uka va'e ma ojapo porāve 'rā nhanekuraxō pe.

<sup>4</sup> Hi'arandu va'e okuraxō py ima'endu'a 'rā ojae'o va'e ikuiaia re, ha'e rā hi'arandu e'ŷ va'e ma okuraxō py ima'endu'a 'rā ov'y'a rei va'e ikuiaia re rive.

<sup>5</sup> Hi'arandu e'ŷ va'e oporaia nhaendu 'rāgue py ha'eveve hi'arandu va'e nhandevy ijayvu etea nhaendu.

<sup>6</sup> Hi'arandu e'ŷ va'e kuery opuka okuapya ma juu'y pirukue oja guy py hendy vy hevovo ramigua rive. Ha'e nunga voi opa rive va'erā.

<sup>7</sup> Anhetē hi'arandu va'e voi omoingo axya rā na'inhakā porāvei 'rā, ha'e ome'ẽmby ojopy rā ombovaipa 'rā ikuraxō.

<sup>8</sup> Mba'emo ypya gui ha'eveve 'rā opaa. Onhembovate va'e gui ha'eveve oarō are kuaa va'e.

<sup>9</sup> Ndevai vyvoi eme, mba'eta hi'arandu e'ŷ va'e py'a re ae 'rā oĩ ivai aguā.

<sup>10</sup> Aipo're eme: "Mba'exa tu aŷgua ára gui yma guare ha'eveve raka'e?" 're eme, mba'eta ha'e rami oporandu va'e ma nai'arandui.

<sup>11</sup> Mba'emo ojou va'e pe ma 'arandua ha'eve. Ojapo porā avi 'rā kuaray rexaa kuery pavē pe.

<sup>12</sup> Peráta rami avi 'arandua nhanderepy 'rā mba'emo vai gui. Hi'arandu va'e pe 'arandu ome'ẽ avi 'rā tekove.

<sup>13</sup> Eikuua pota ke Nhanderuete rembiapokue re, mba'eta mava'e tu ombo'yvi kuaa 'rā mba'emo ha'e omokarē va'ekue?

<sup>14</sup> Mba'emo rejoupaa ára erovy'a tema iporā va'e. Ha'e rā reiko axya ára ma eikuua pota pov'a re: Nhanderuete ae mokoïve ombou, ha'e ramo avakue ndoikuuai 'rā ha'e kuery oiko ma rire mba'e pa oiko 'rāa.

### *Opa mba'e py jaiko kuaa aguā re ijayvuague*

<sup>15</sup> Opa rive va'e rami aiko vy po ramigua avi aexa: Heko porā va'e ikuai gueko porā reve omano va'erā, ha'e heko vai va'e ikuai gueko vai reve oïkove pukuve va'erā.

<sup>16</sup> Enhemboeko porā raxa rei eme, enhemo'arandu raxa eme guive. Mba'erā tu ndee ae renhemomba uka ta?

<sup>17</sup> Eiko eme heko vai ete va'e, neñ inhakā porā e'ŷ va'e. Mba'e re tu remano ta nde'ára ovaẽ e'ŷ re?

<sup>18</sup> Neñ peteī rupi, neñ amboae rupi eiko eme. Mba'eta Nhanderuete renonde ojererokyjea rupi ikuai va'e ma oo jepe 'rā opa mba'e gui.

<sup>19</sup> 'arandu ojapo 'rã hi'arandu va'e dez ipo'akakueve tetã py ikuai va'e gui imbaraeteve aguã rami.

<sup>20</sup> Yvy re ndoikoi ava heko porã va'e, ojejavy e'ŷ re iporã va'e anho ojapo va'e.\*

<sup>21</sup> Ndepy'a py erovia eme ayvu omombe'ua va'e ma guive rã, endu rive guive nerembiguai ndere ijayvu vai rã,

<sup>22</sup> mba'eta nema'endu'a mbovykue rei e'ŷ ndee voi amboae kuery re ndeayvu vaiague re.

### *Kunhague nhombotavya re ijayvuague*

<sup>23</sup> Ha'e nunga ha'e javi re aikuua pota va'ekue xe'arandua rupi. Aipoa'e avi: "Xe'arandu pota 'rã", ha'e va'eri ndaupityi ae 'arandua.

<sup>24</sup> Mava'e tu oupity 'rã mba'emo mombyry ha'e haxy ete va'e?

<sup>25</sup> Ha'e gui anhea'ã 'arandu aikuua porã aguã, ha'e gui aikuua pota ha'e aeka ete aguã opa mba'e ikuai va'e ha'e javi regua aikuua aguã. Aikuaxe avi heko vai va'e 'arandu e'ŷa, ha'e hi'arandu e'ŷ va'e akã porã e'ŷa guive.

<sup>26</sup> Ha'e rami vy peteĩ ajou manoa gui nda'eveive va'e: peteĩ kunha opy'a re jojopy ha'e nhombo'a aguã anho omoï va'e, ha'e opo py corrente jokuaarã oguereko va'e. Ha'e va'e gui Nhanderuete renonde heko porã va'e oo jepe 'rã, ha'e rã ojejavy va'ety ma ou vy onhembo'a uka 'rã ixupe.

<sup>27</sup> Ayvu mombe'ua aipoe'i: "Ma'ë, po ramigua xee ajou va'ekue. Mba'emo amboae ramigua re ambojoja vy aikuua porã aguã

<sup>28</sup> aikuua pota aikovy teĩ ndaikuua porã teri: mil avakue mbyte peteĩ'i anho ajou ha'eve va'e, ha'e rã mbovy rei e'ŷ kunha mbyte ma peteĩ've ma voi xee ndajoui.

<sup>29</sup> Ma'ë, peteĩ anho aikuua: Nhanderuete omoingo avakue heko porã va'erã, va'eri ha'e kuery opa marã onhembopy'a okuapy."

## 8

### *Huvixave nhanhe'ẽ rendu aguã re ijayvuague*

<sup>1</sup> Mava'e tu oiko hi'arandu va'e rami mba'emo omombe'u porãve kuaa 'rã? Mba'eta avakue 'arandua ma omoexakã 'rã hova, oguerova 'rã ivaia oexa ukaa gui.

<sup>2</sup> Xee aipoa'e ndevy: Enhe'ẽ rendu ke huvixave Nhanderuete renonde reuraague rami vy.

<sup>3</sup> Ejapura eme huvixave renonde gui rejape'a aguã, neĩ enhea'ã eme mba'emo vai rejapoa py, mba'eta ha'e ae oikuua rami 'rã ojapo.

<sup>4</sup> Mba'eta huvixave ayvu ma ipo'akave va'e. Mava'e tu ixupe "Mba'ë tu rejapo?" he'i 'rã?

<sup>5</sup> Ha'e ojapo uka va'e moï porãa ma ndoiko axyi 'rã. Hi'arandu va'e opy'a py oikuua 'rã raka'e ha'e marã rami pa mba'emo ojapo aguã.

<sup>6</sup> Mba'eta opa mba'e pe oĩ oiko aguã ára ha'e marã rami pa ojapo aguã, avakue re mba'emo vai ipoyi ete teĩ.

<sup>7</sup> Mba'eta ha'e kuery ndoikuuai 'rã mba'e pa oiko 'rãa. Marã rami paa guive nomombe'uai 'rã ha'e kuery pe.

<sup>8</sup> Avave rei ndojoko kuaai 'rã yvtyu oipejua, ha'e omano aguã ára re katuve ma nda'ipo'akaai 'rã. Ha'e nunga re nhanhe'ãa py ma noĩ 'rã japytu'u aguã, heko vai va'e kuery katuve ma ndoo jepei 'rã gueko vaia rupi.

<sup>9</sup> Ha'e nunga ha'e javi kuaray guýry aexa mba'emo ojapo pyre re aikuua potaa rupi, mba'eta amongue py avakue joe ipo'aka 'rã omomba aguã rive.

### *Joo rami e'ŷ-e'ŷ jajopy aguã re ijayvuague*

---

\* **7:20** Romanos 3.10

<sup>10</sup> Alexa avi heko vai va'e kuery onhono porāa py opytu'u rā, ha'e rā henda iky'a e'ŷ va'e py oo jepi va'ekue re ma hexaraipaa, ikuai porāague tetā py voi. Ha'e nunga voi opa rive va'erā.

<sup>11</sup> Joapo vaiare nombopagaa voi ramo avakue ra'y kuery opy'a re omoī'rā ojapo vai aguā anho.

<sup>12</sup> Ha'e gui xapy'a rei ojejavvy va'ety cem-kue 'rā ojapo vai va'eri hi'ára ipuku teī, aikuaa porā Nhanderuete renonde ojererokyjea rupi ikuai va'e ojou 'rāa iporā va'e.

<sup>13</sup> Ha'e rā heko vai va'e kuery ma iporā va'e ndojoui 'rāe, hi'ára nda'ipukui 'rā guive. Kuaray'ā rami oaxa 'rā, Nhanderuete renonde ojererokyje rupi e'ŷ ikuai rire.

<sup>14</sup> Oīve teri amboae nunga ju opa rive va'erā yvy re. Mba'eta heko porā va'e ikuai heko vai va'e rami ombopagaa va'e, ha'e heko vai va'e avi ikuai heko porā va'e rami omboekoviaa va'e. Aipoa'e ha'e nunga voi opa rive va'erā.

<sup>15</sup> Ha'e nunga rupi xevy pe ha'eveva va'e ma vy'aa, mba'eta avakue pe kuaray guýry ha'eveva va'e ma okaru, oy'u ha'e ovyy'a aguā. Mba'eta ha'e ramigua ombovy'a 'rā ombo'eapo oikovya rupi, kuaray guýry Nhanderuete hi'ára ome'ēa pukukue re.

<sup>16</sup> Anhea'ā avi aikuaa aguā 'arandu, ha'e aexa aguā yvy re ombo'eapo ha'e javi, mba'eta ara py neī pyávy voi avakue ndoke kuaai 'rā.

<sup>17</sup> Ha'e rami vy Nhanderuete rembiapokue ha'e javi re aikuaa pota vy aikuaa rā avakue ndoikuaapa reguai 'rā mba'emo kuaray guýry ikuai va'e. Avakue oikuaa aguā onhea'ā vaipa teī ndoupityi 'rā. Hi'arandu va'e voi "Aikuua 'rā", he'i teī ndoupityi 'rāe.

## 9

### *Ha'e javi pe joo rami merami ome'ēa re ijayvuague*

<sup>1</sup> Anhea'ā ete ha'e nunga ha'e javi aikuua aguā, mba'eta Nhanderuete po py ikuai heko porā ha'e hi'arandu va'e kuery, ha'e kuery reko ha'e javi guive. Ha'e rami teī avakue ndoikuaai guenonderā mborayvu tyrā pa ivaia oīa. Henonde guarā ha'e javi ma oikuapay e'ŷ.

<sup>2</sup> Opa mba'e oiko 'rā joo rami ae ha'e kuery ha'e javi re. Joo rami ae 'rā oiko heko porā va'e ha'e heko vai va'e re, mba'emo ome'ē va'e ha'e ome'ē e'ŷ va'e re, ojapo porā va'e ha'e ojejavvy va'e re, oura va'e ha'e oura aguā gui okyje va'e re guive.

<sup>3</sup> Ha'e ramigua nda'evei va'e oiko kuaray guýry pavē ikuia re, mba'eta pavē re 'rā oiko joo ramigua ae. Avakue py'a voi tynyē mba'emo vai, ha'e kuery re oī 'rā akā porā ve'ŷ oikovea ja. Ha'e rire ma manoa katy oje'oi.

<sup>4</sup> Oikove va'e pe ma oī teri oarō oikovy aguā, mba'eta guary omano va'ekue gui ha'eveva jagua oikove va'e.

<sup>5</sup> Mba'eta oikove va'e kuery oikuua omano 'rāa, ha'e rā omanogue ma mba'eve ndoikuaavei, oikoague repy ndojouvei 'rā guive, mba'eta ha'e kuery re ima'endu'aa 'rāgue py oī hexaraipaa.

<sup>6</sup> Ha'e kuery joayvua, ndajoayvua ha'e nda'evei reia opa ma. Ha'e kuery raka'e rā peve mba'eve ndoguerekovei 'rā kuaray guýry ombo'eapo teri va'e kuery reve.

<sup>7</sup> Ha'e nunga rupi tereo, he'u mbojape revy'a reve, ha'e ey'u porā vinho, mba'eta Nhanderuete ndererovy'a ae mba'emo rejapoa py.

<sup>8</sup> Taxiī porā riae renhemondea, ha'e toata eme neakā remoatyrō porāa.

<sup>9</sup> Evy'a ke kunha reayvu va'e reve, nde'ára kuaray guýry Nhanderuete ome'ē va'e re, reikovea opa voi va'e pukukue re. Ha'e nunga ma Nhanderuete ome'ē kuaray guýry remba'eapo poyia rupi nekane'ōague rekivia.

<sup>10</sup> Mba'emo ndepo py rejapo aguā rejou va'e ha'e javi ke ejapo nembaraetea rupi, mba'eta ha'e va'e rire reo aguā py noīvei 'rā remba'eapo aguā, mba'emo re renhem-bopy'a e'ŷ vy reikuua pota aguā, neī ne'arandu aguā.

### *Onhea'ā rive va'e re ijayvuague*

<sup>11</sup> Kuaray guýry aexave ju inhakuã va'e kuery peguarã e'ý oĩ hekovia, ha'e ipy'a guaxukueve pegua e'ý oĩ ipo'aka aguã, hi'arandu va'e peguarã e'ý guive oĩ mbojape ho'u aguã, ha'e oiko kuaa va'e kuery peguarã e'ý oĩ mba'emo oguerekopa aguã, neĩ oikuaapa rei va'e kuery peguarã e'ý oĩ ogueroovy'aa aguã. Ha'e rami 'rāgue py pavẽ ára oaxa 'rā ovv, ha'e pavẽ re oiko 'rā oexa'ãmby e'ý.

<sup>12</sup> Mba'eta avakue ndoikuuai o'ára ae. Pira imbo'aa py ho'a xapy'a, ha'e guyra'i nhuã py ojejura va'e rami ae avi avakue ra'y kuery voi ojejopy uka 'rā mba'emo vai oiko ramo, ha'e kuery re oiko xapy'a rã.

### *Arandu ovarea kuaa ukaa omombe'uague*

<sup>13</sup> Kuaray guýry peteĩ aexa avi 'arandu kuaa ukaa, xevy pe rã tuvixa va'e.

<sup>14</sup> Mba'eta oĩ peteĩ tetã kyrí'i va'e mbovy'i avakue ikuai. Ha'e va'e tetã re ou peteĩ huvixa ipo'akave va'e. Ojokopa ha'e hovai re omopu'ã okuapy tetã kora mbovaipaarrã.

<sup>15</sup> Ha'e py oiko peteĩ ava poriaukue hi'arandu va'e. Ha'e va'e ma o'arandua rupi ogueraa jepe guetã. Ha'e rami rire teĩ ha'e va'e iporiaukue re avave rei na'ima'endu'aavei.

<sup>16</sup> Ha'e ramo "Imbaraete va'e gui hi'arandu va'e ha'eveve", ha'e, iporiaukue'i 'arandua ndojou porãai, ha'e ijayvu noenduai teĩ.

<sup>17</sup> Mba'eta hi'arandu e'ý va'e kuery ruvixa ojapukaia gui ha'eveve hi'arandu va'e ijayvu rã nhakyrirí reve nhaendu.

<sup>18</sup> Tembiporu joe opu'ãa pygua gui voi 'arandua ha'eveve. Ha'e rami avi peteĩ'i ojejavy va'e teĩ mba'emo porã heta 'rā ombovai.

## 10

### *Arandu iporãa re ijayvuague*

<sup>1</sup> Heakuã porã va'e ryru py mberu omano va'ekue omoeakuã vaikuea rami ae avi nhane'arandu e'ýa ruxã'i oĩ teĩ ombovai 'rā nhane'arandua ha'e nhanemboetea.

<sup>2</sup> Hi'arandu va'e ipy'a 'rā oiporu kuaa katy oo aguã re, ha'e rã hi'arandu e'ý va'e ma oiporu kuaa e'ýa katy oo aguã re ipy'a.

<sup>3</sup> Hi'arandu e'ý va'e ma tape rupi oo vy voi ndoiko kuai 'rā. Ha'e rami vy pavẽ pe oexa uka 'rā o'arandu e'ýa.

<sup>4</sup> Nderovai huvixa ivai reve opu'ã teĩ ejep'e eme reña gui, mba'eta ndepy'a guaxua omombytu'u 'rā opa marã ojapo vaixe va'e kuery.

<sup>5</sup> Peteĩ ju aexa mba'emo vai kuaray guýry, huvixa ha'eve'ýa rami opena va'e.

<sup>6</sup> Ha'e va'e ma omo'i 'rā hi'arandu e'ý va'e yvatevea py, ha'e rã oguerekopa va'e kuery ma yvyí'ia py omo'i.

<sup>7</sup> Aexa tembiguai kuery kavaju áry oo va'e, ha'e rã yvatekueve ma yvy rupi oguata oje'iviy tembiguai rami.

<sup>8</sup> Yvykua ojo'o va'ekue ma ha'e py ae ju 'rā ho'a, ha'e kora ombovo va'e ma mboi oixu'u 'rā.

<sup>9</sup> Ita omboi va'e ma ha'e va'e py ae 'rā oiko axy, ha'e yxakã ombovo va'e ma oexa 'rā ijavaete va'e.

<sup>10</sup> Tembiporu ferro guigua naímbei va'e avave noaímbe'eai ramo iporua onhemomburuve 'rā. Ha'e rã hi'arandu va'e omoatyrõ porã kuai 'rā.

<sup>11</sup> Xapy'a rei mboi ombo'e porãa e'ý re ri joxu'u ramo imbo'eare ndojopyi 'rā hepyrã va'ekue.

<sup>12</sup> Hi'arandu va'e oayvu py onhemboete uka 'rā, ha'e rã hi'arandu e'ý va'e ma oayvu py onhemomba uka 'rā.

<sup>13</sup> Jypy hi'arandu e'ý va'e ijayvu 'rā oikuua e'ý reia rupi, ha'e rã opaa py ma ijayvu 'rā 'arandu e'ýa ha'e joguerojejavya rupi anho.

<sup>14</sup> Ava hi'arandu e'ý va'e ijayvu reta 'rā, mba'emo oiko va'erã avave ndoikuuai teĩ. Mava'e 'rā tu oikuua ha'e rire oiko va'erã?

<sup>15</sup> Hi'arandu e'ŷ va'e ombo'eapoa rupi ikane'ō 'rā, tetā re oo aguā ma voi ndoikuuai.

<sup>16</sup> Yvy huvixave kyrī va'e openaa pe nda'evei ete 'rā, yvatekueve ko'ẽmba ramove ngaru ojapo okuapy pe guive.

<sup>17</sup> Ha'e rā yvy yvateve va'e kuery ra'y huvixave openaa pe ma ha'eve 'rā, mba'eta ha'eve jave py yvatekueve oguapy 'rā okuapy mesa py onhemombarae Aguā, oka'u okuapy aguā nda'e.

<sup>18</sup> Hoo va'e inhate'ŷ ramo oo ao'ia ho'apa 'rā. Opo py nomba'eapoxei ramo otykypa 'rā.

<sup>19</sup> Ngaru ojapoa 'rā ov'y'a aguā, vinho nhombovy'a 'rā oikoa'i py, ha'e rā peráta ma opa mba'e repyrā ha'eve.

<sup>20</sup> Ndepy'a py voi ndeayvu vai eme huvixave re, neĩ nderopy ja'o ndeayvu eme oguerekopa rei va'e re. Mba'e guyra oveve va'e ogueraa 'rā ndeayvu, ipepo va'e kuery oendu uka 'rā ndeayvuague.

## 11

### *Hi'arandu va'e oiko kuaa-a re ijayvuague*

<sup>1</sup> Yy áry rupi emoaĩ nerembi'u, mba'eta hare ma rire rejou ju 'rā.\*

<sup>2</sup> Emboja'o sete e'ŷ vy oito pe, mba'eta ndereikuuai mba'emo vai yvy re ou va'erā.

<sup>3</sup> Araipa ramo oky xapy'a va'e ho'a 'rā yvy áry. Yvyra kuaray puku-a katy e'ŷ vy ijapu'a'ia katy ho'a rire ha'ekue py ae 'rā itui.

<sup>4</sup> Yvytu re oma'ẽ-ma'ẽ oikovy va'e mba'eve 'rā nonhotŷi, ha'e arai re oma'ẽ-ma'ẽ va'e nomono'õi 'rā guive.

<sup>5</sup> Ndee ndereikuuai marupi pa yvytu rape oĩa, neĩ kunha hye guaxu'i va'e ryepy kyrī'i va'e kãgue'i ojeapo tema ovya voi. Ha'e rami ae avi Nhanderuete opa mba'e apoare rembiapokue katuve ma ndereikuuai.

<sup>6</sup> Aje'ive reve ke enhotŷ ha'yigue, ka'arukue voi emombytu'u eme ndepo, mba'eta ndereikuuai marā ramigua pa oiko porā 'rāa, jypygua tyrā amboae, tyrā mokoïve joo rami oiko porā 'rā paa.

<sup>7</sup> Hendy va'e ma ha'eve, ha'e kuaray rexakāa jaexa rā iporā.

<sup>8</sup> Ava heta ma'etŷ oguerekovo va'e ta'ima'endu'a o'ára oaxa va'ekue ha'e javi re. Ha'e rami teĩ toikuua pota avi pytū aguā ára heta ou va'erā re. Mba'emo oiko va'e ha'e javi ma opa rive va'erā meme.

### *Kunumi teri va'e pe ijayvuague*

<sup>9</sup> Kunumi, erovy'a ke ndepyaua, ha'e nekuraxõ py erovy'a nekunumia. Eiko tape nekuraxõ ha'e nderexa ov'y'a aguā rupi. Ha'e rami teĩ eikuaa pota, mba'eta ha'e nunga ha'e javi re Nhanderuete nemboayvu 'rā.

<sup>10</sup> Ha'e nunga rupi nekuraxõ gui eipe'a imongueraiarā ha'e ndero'o moingo axyarā, mba'eta nekunumia ha'e ndepyaua ma opa rive va'erā meme.

## 12

### *Tuja'i ma va'e pe ijayvuague*

<sup>1</sup> Nema'endu'a ke nemoingoare re nekunumi teri reve, ára vai ha'e "Noĩvei avy'a aguā" 'rea ma'etŷa ovaẽ e'ŷ re.

<sup>2</sup> Mba'eta ha'e va'e jave py ma kuaray pytūmba merami 'rā, jaxy ha'e jaxy-tata nderekove rupi nemoexakā va'ekue guive, ha'e oky rire teĩ arai ou ju 'rā.

<sup>3</sup> Oo re opena va'e rami ndejyva oryryipa 'rā, ha'e ava imbaraete va'ekue rami neretyma ikarē rei 'rā. Mba'emo mongu'ia ndejuru py ikuai va'e mbovy'i ma vy nomba'eapo porāvei 'rā, ha'e janela rupi hendy va'ekue rami nanderexa pyxovei 'rā.

\* **11:1** Apy ma ijayvu mba'emo Nhanderuete ojou uka va'ekue nhambuja'o aguā re, mba'eta omboekovia ju 'rā nhandevy.

<sup>4</sup> Ha'e gui okẽ tape katyguia rami nerembeta onhemboty 'rã. Renhendu atã aguã nda'eveei 'rã, ha'e guyra'i nhe'ẽ rendu vyve 'rã revy. Ha'e rami teĩ kunhague oporaei va'e ayvu ma nonhendu atãvei merami 'rã.

<sup>5</sup> Ha'e rami ae avi rekyje 'rã yvate va'e gui, ha'e tape rupi oo va'e gui rive renhemondyi 'rã. Ha'e gui nde'a xiimba 'rã yvyra ipoty xiĩ va'e rami. Tuku rive teĩ ipoyi 'rã ndevy, ha'e rekaruxea nerenduvei 'rã, mba'eta reo 'rã reiny oo opa e'ŷ va'e katy, ha'e ojae'o va'e kuery ikuai 'rã tape rupi.

<sup>6</sup> Ha'e va'e javé py ixã prata guigua oxo 'rã, ha'e karo ouro guigua ovo 'rã, ha'e ygua py ovo 'rã yryru, ha'e yvu áry yryru renoẽa oĩ va'ekue ivaipa 'rã.

<sup>7</sup> Ha'e rire yvy ku'i reikoague ojevy ju 'rã yvy re, ha'e rã nenhe'ẽ ma ojevy 'rã Nhanderuete imbouarea py.

<sup>8</sup> Opa va'erã rive, opa mba'e ikuai va'e opa rive va'erã meme, he'i ayvu mombe'ua.

### *Opa vy ijayvuague*

<sup>9</sup> Ayvu mombe'ua hi'arandu va'e vy ombo'e heta va'e kuery oikuua aguã rami. Ha'e gui ayvu re ojapyxaka ha'e oikuua potaa rupi heta omombe'u ayvu 'arandu regua.

<sup>10</sup> Ayvu mombe'ua onhea'ã ayvu iporãgueve ojou aguã, ha'e ha'evea rami ombopara aguã ayvu anhetẽ va'e.

<sup>11</sup> Hi'arandu va'e kuery ayvu ma yvyra rakua mymba mondyia ha'e karavo ombota porã mbyre rami oĩ, Opena va'e pete'i'i oiko va'e ome'ẽ va'ekue meme.

<sup>12</sup> Xera'y, enheangu ke ha'e nunga rovai rupi reiko e'ŷ aguã. Mba'eta kuaxia ombopara pyre ma ndoatai 'rãe, ha'e va'e re nhanhembo'e riae vy nhandro'o kane'õmba 'rã.

<sup>13</sup> Ha'e gui opa mba'e rendu va'ekue gui ma yvateve va'e po rami: Nhanderuete renonde eiko rejelerokyjea rupi, ha'e emoi porã ojapo uka va'ekue, mba'eta ha'e va'e ma avakue pavẽ ojapo aguã va'e.

<sup>14</sup> Mba'eta Nhanderuete oikuua pota 'rã jaikoa ha'e javi re, ojekuua voi e'ŷ va'ekue guive, iporã va'e, ha'e iporã e'ŷ va'e teĩ.

## **Mboraei iporāve va'e Cântico Salomão ojapo va'ekue Mboraei iporāve va'e cantares Salomão ojapo va'ekue**

Kova'e kuaxia para py ma ijayvu peteĩ ava ha'e peteĩ kunha reve joayvua re. "Xee ma xerembiayvu mba'e, ha'e xerembiayvu ma xemba'e", he'i (6.3). Ha'e ramigua ayvu oĩ va'e ma iporā va'e meme.

Jypy'i Nhanderuete omenda va'e kuery oguerovy'aa rupi ijayvu vy aipoe'i va'ekue: "Avakue oeja 'rã nguu ha'e oxy, gua'yxy reve joguerek aguã, mokoõ gui peteĩ'i to'o oiko aguã", he'i va'ekue (Gênesis 2.24). Ha'e va'e ayvu Jesus omombe'u porâve vy aipoe'i: "Yvy itui ypy'i guive ma Nhanderuete omoingo ava ha'e kunha. Ha'e nunga rupi ava oeja 'rã nguu ha'e oxy, gua'yxy reve onhemoirũ aguã. Ha'e gua'yxy reve mokoõ 'rãgue py peteĩ to'o ma ikuai. Ha'e rami vy mokoõ ve'ŷ ikuai, peteĩ'i to'o ma. Ha'e nunga rupi Nhanderuete omoirũ rire avave rei tomboja'oeme", he'i (Marcos 10.6-9).

<sup>1</sup> Kova'e mboraei iporâve va'e Salomão ojapo va'ekue.

### *Ta'yxy ijayvuague*

<sup>2</sup> Xerayvu ndejuru py,  
mba'eta vinho gui ha'eveve ndee xerayvua.

<sup>3</sup> Nereakuã porâa aetû rã iporâ,  
nderery voi heakuã va'e onhoẽ mbyre rami ha'eve va'e.  
Ha'e ramo kunhataigue ha'e javi 'rã nderayvu.

<sup>4</sup> Xereraa ndereve! Jaa pojava!  
Xeruvixave xereraa ndero py.

### *Irû kuery ijayvuague*

Ndee ae roguerovy'a rovy'a etea rupi.

Rejoayvua re orema'endu'a porâ 'rã, vinho gui ha'eveve ramo.  
Ha'evea rami ha'e kuery nderayvu.

### *Ta'yxy ijayvuague*

<sup>5</sup> Kunhague Jerusalém pygua, xeũ va'eri xeporâ.  
Xepire ma Quedar rupi oo pirekue guigua rami huû va'e,  
ha'e ajukue Salomão ro py oĩ va'e rami.

<sup>6</sup> Pema'ẽ ngatu eme xepire huûa re,  
mba'eta kuaray ae ma xemoũmba.  
Xekyvy kuery xemotare'ŷ rei vy  
xemondouka karamboae uvaty re apena aguã.  
Ha'e rami rã xemba'e uvaty re ma xee napenai.\*

<sup>7</sup> Ha'e gui ndee xerekovea rembiayvu, emombe'u xevy:  
Mamo tu remongaru 'rã herekoyv nerymba kuery?  
Mamo tu remombytu'u 'rã kuaray mbyte jave?  
Emombe'u ke, xee roekaa rupi avaẽ e'ŷ aguã  
neirũ kuery guymba re openaa py.

### *Ime ijayvuague*

<sup>8</sup> Kunhague pavẽ gui neporâve va'e, ha'e nunga ndereikuaai ri vy  
tereo ha'vy mymba kuery pypo rupi,  
ha'e emongaru nerymba kavara kuery vexa'i re opena va'e kuery ikuiaia rupi.

<sup>9</sup> Xerembiayvu, neporâ vaipa

\* <sup>1:6</sup> "Xemba'e uvaty re napenai" he'ia ma ojee ae ijayvu vy, ipire kuaray omoũmba ramo.

kavaju kunha Faraó mba'e karóxa regua rami.

<sup>10</sup> Nderova ma iporã nenamixã mbyte,  
ndeaju'y voi mbo'y oĩ reve.

<sup>11</sup> Ndejeguarã rojapo 'rã ouro gui,  
prata py ijeguapa va'e gui voi.

### *Ta'xy ijayvuague*

<sup>12</sup> Xeruvixave okaruaty py oĩa py  
oetũ 'rã oiny xereakuã porãa.

<sup>13</sup> Xevy pe ma xerembiayvu iporã  
heakuã porã va'e ryru xekã mbyte oĩ va'e rami.

<sup>14</sup> Yvoty En-Gedi katy uvaty ikuai va'e rupi henhoĩ va'e rami,  
xevy pe xerembiayvu ha'e rami ae ha'eve.

### *Ime ijayvuague*

<sup>15</sup> Ma'ẽ xerembiayvu, ndee ma neporã.  
Nderexa voi apykaxu rexa rami iporã.

### *Ta'xy ijayvuague*

<sup>16</sup> Xerembiayvu, ndee voi neporã, roayvu.  
Nhanderupa ma jai rogue pyau guigua.

<sup>17</sup> Nhandro yta rami guarã yary ikuai,  
ha'e rã yvyra ijao'ia ma cipreste guigua.

## 2

<sup>1</sup> Xee ma rosa poty Sarom rupigua rami,  
ha'e yvoty yvjugua rupi ikuai va'e rami.

### *Ime ijayvuague*

<sup>2</sup> Yvoty juu mbyte oĩ va'e rami ae avi  
kunhataĩgue mbyte xerembiayvu iporã.

### *Ta'xy ijayvuague*

<sup>3</sup> Ha'e gui yvyra ikuai va'e mbyte maçã'y hi'aĩ va'e rami  
kunumigue mbyte xerembiayvu iporã.  
Ikuaray'ã py aguapyxe vai,  
ha'e hi'a voi he'ẽ porã xevy.

<sup>4</sup> Xereraa opy ja'o okaruaty py,  
ha'e xe'áry rupi omopu'ã bandeira xerayvua kuaa ukaarã.

<sup>5</sup> Anhemombaraete 'rã uva pirekue py,  
anhenhandu porã 'rã maçã ha'u vy.  
Mba'eta ayvu vaipa vy naxepytuẽ kuaavei.

<sup>6</sup> Ijaxua regua toĩ xeakã guýry,  
ha'e rã oiporu kuaa regua ma taxekuavã.

<sup>7</sup> Jerusalém memby kuery, pendevy pe ajerure  
guaxu ha'e guaxu kunha ka'aguy rupi ikuai va'e rupi:  
Pemomyĩ eme rojoayvua, tove toke ranhe,  
ha'e ae ovyxé e'ÿa ja.

<sup>8</sup> Aendu xerembiayvu ijayvu rã.  
Ma'ẽ, ha'e ou pojava yvyty áry rupi,  
yvy'ã ikuai va'e rupi opo-opo ouvy.

<sup>9</sup> Xerembiayvu ma guaxu e'ÿ vy guaxu ra'y'i rami inhakuã va'e.  
Ne'exa, orero mbotya kupe py hi'aĩ,

janelas rupis oma'ẽ ho'amy,  
oexa pota ho'amy janelas jokoa pa'ũ gui.

**10** Ha'e gui xerembiayvu ijayvu vy aipoe'i xevy:

*Ime ijayvuague*

Xerembiayvu, epu'ã ke.  
Xemba'e porã, eju.

**11** Mba'eta yro'y oaxa ma,  
oky voi oaxapa ma.

**12** Yvoty henhoimba ma yvy re,  
ovaẽ ma guyra kuery onhe'ẽ aguã ára.  
Pyku'i voi onhe'ẽ nhendu ma nhandeyvy rupi.

**13** Figo'y voi ijypy ma hi'a aguã,  
uva poty reakuã voi nhaetã ma.  
Epu'ã na xerembiayvu.  
Xemba'e porã, eju ke.

**14** Xerymba apykaxu,  
ita pa'ũ ha'e itaova yvateve renhemia rupi reiko va'e,  
exa uka na nderova,  
ha'e taendu ndeayvu.  
Mba'eta ndeayvua he'ẽ,  
ha'e nderova ma aexaxe vai va'e.

*Talxy ijayvuague*

**15** Pejopy na mbyku ha'e mbyku'i uvaty ombovaipa va'e,  
mba'eta oremba'e uvaty rupi ipotypa ma.

**16** Xerembiayvu ma xemba'e, ha'e xee ma imba'e aiko.  
Ha'e ma omongaru 'rã guymba kuery yvoty ikuiaia rupi.

**17** Xerembiayvu, ára yro'y rei'i ha'e pytã e'ŷ teria ja ejevy ju.  
Enha ejuvy guaxu e'ŷ vy guaxu ra'y'i rami, yvyty itatya rupi.

### 3

**1** Pyávy xerupa py xetui jave  
akea xerekovea rembiayvu.  
Aeka-eka teĩ ndajoui.

**2** Ha'e gui apu'ã avy vy tetã rupi ajere aikovy.  
Tetã mbyte ha'e tape ikuai va'e rupi aa vy  
akea xerekovea rembiayvu, aeka teĩ ndajoui.

**3** Ha'e gui tetã rarõa kuery xerovaexi tetã rupi onhangarekoia rupi.  
Ha'e rã ha'e kuery pe xee aporandu: "Pexa pa xerembiayvu?" ha'e.

**4** Ha'e gui ma ajep'e a'i avy vy mae ma aovaexi xerembiayvu.  
Aikuavã vy namondoukavei.  
Ha'e gui aroike ha'i xemokambuare ro py.

**5** Jerusalém memby kuery, pendevy pe ajerure  
guaxu ha'e guaxu kunha ka'aguy rupi ikuai va'e rupi:  
Pemomyi eme rojoayvua, tove toke ranhe,  
ha'e ae ovyxé e'ŷa ja.

*Irũ kuery ijayvuague*

**6** Mba'e tu peva'e tekaoa e'ŷa gui jogueru jekuaa nhoguenoiny va'e?  
Tata rataxi opu'ã va'e ramigua ou,  
ha'e heakuãmba ouvy mirra ha'e heakuã porã va'e okaia py,

- opa marāgua heakuā porā va'e vendeaty kuery ogueru va'ekue py.
- <sup>7</sup> Ne'exa, huvixa Salomão karóxa ae ou jekuaa.  
Ijyke joavaive rupi sessenta avakue ogueru,  
Israel regua ipy'a guaxukueve.
- <sup>8</sup> Ha'e kuery ha'e javi ma kyxe oiporu kuaa,  
joe opu'ã kuaa va'e vy.  
Peteĩ-teĩ oku'a re kyxe oguereko,  
pytū rupigua gui joepy aguã.
- <sup>9</sup> Karóxa ma huvixa Salomão ojeupe guarã ae ojapo uka va'ekue  
yvyra Líbano regua gui.
- <sup>10</sup> Ijytarã ma ojapo prata gui,  
hendarã ma ojapo ouro gui,  
ha'e rã oguapya aguã ma púrpura gui ojapo.  
Opy ha'e javi rupi Jerusalém pygua kunhague  
ombojegua porã'i oayvua rupi.
- <sup>11</sup> Ha'e gui Sião memby kuery, peju, pema'ẽ  
huvixa Salomão akã re coroa oĩ va'e re.  
Ha'e va'e ma ixý ae ome'ẽ va'ekue  
omendaa ára py, opy'a py oguerovy'a vy.

## 4

*Ime ijayvuague*

- <sup>1</sup> Ma'ẽ xerembiaiyvu, ndee neporã vaipa!  
Neporã ete!  
Nderexa ma apykaxu rexâ rami iporã,  
nderova mo'ãa rovai teĩ nderexa pyxo porã.  
Nde'a ma kavara kuery Gileade regua yvyty áry gui oguejy jogueruvy va'e rami huû.
- <sup>2</sup> Neraĩ ma vexa'i kuery hague ojayapaa ramo'i va'ekue  
ombojauague gui oẽ jogueravy va'e rami xiî.  
Ha'e kuery peteĩ-teĩ oguereko moko'i ma voi va'e,  
ha'e neĩ peteĩve ma voi ndata'y e'ŷi va'e rami.
- <sup>3</sup> Nerembe ma nhimbo pytã iporã va'e rami.  
Ndejuru ma iporã ete.  
Nderova ma romã'a omboja'o pyre rami xiî porã rei,  
nderova mo'ãa rovai teĩ iporã jekuaa.
- <sup>4</sup> Ndeaju'y ma Davi torre tembiporu moĩ porã atyrã ojapo va'ekue rami.  
Ha'e va'e re mil hu'y jokoa ikuai xondaro ipy'a guaxukueve oupi imoiny va'ekue rami.
- <sup>5</sup> Nekã mokoïve ma guaxu ta'y'iague meme  
yvoty ikuai va'e rupi okaru okuapy va'e rami.

*Ta'yxy ijayvuague*

- <sup>6</sup> Ára yro'y rei'i ha'e pytû e'ŷ teria ja  
aa 'rã yvy'ã mirra ha'e heakuã porã va'e oĩa py.

*Ime ijayvuague*

- <sup>7</sup> Xerembiaiyvu, ndee ma neporã.  
Ndere jipoi ndevaikuea.
- <sup>8</sup> Xerembireko, eju xereve Líbano gui,  
eguejy xereve yvyty Líbano regua gui.  
Ema'ẽ Amana yvyty apyte gui,

- Senir ha'e Hermom yvyty gui,  
guary kua ha'e yvyty xivi ikuiaia gui.
- <sup>9</sup> Xereindy xerembireko, reipe'a ma xekuraxõ.  
Reipe'a ma xekuraxõ rema'ëa py rive'i,  
ha'e peteï'i apu'a'i ndepo'y re oï va'e py.
- <sup>10</sup> Ndee xerayvua ha'eve vaipa, xereindy xerembireko.  
Vinho gui xeayvua ha'eveve,  
ha'e nereakuãa ma pavẽ heakuã va'e gui iporãve va'e.
- <sup>11</sup> Xerembireko, ndejuru gui ei rami he'ë va'e otyky,  
neapekû guy py ma ei ha'e kamby oï.  
Ndetupyja ma Líbano yvy regua rami heakuã porã.
- <sup>12</sup> Xereindy xerembireko, ndee ma yvotyty ikorapa va'e rami reiko,  
peteï yvu ojao'i pyre rami.
- <sup>13</sup> Nderegua ma romã'y ty ikuiaia va'e rami,  
hi'a porã va'e meme.  
Ha'e py ikuai hena ha'e nardo'y,
- <sup>14</sup> nardo ha'e açafrão'y, cálamo ha'e canela'y.  
Opa marãgua yvyra ikuai avi heakuã porã va'e:  
mirra ha'e aloés, ha'e heakuã porãgueve ha'e javi ikuai.
- <sup>15</sup> Ndee ma yvu yvotyty moakÿa rami,  
yguia yy oxyry va'e oïa,  
yakã Líbano regua yvyty gui oxyry atã va'e rami!

*Ta'xy ijayvuague*

- <sup>16</sup> Yvytu kuaray apu'a'ia katyguia, eju na.  
Eju, ndee yvytu kuaray puku-a katyguia.  
Eipeju xe yvotyty rupi,  
eraa heakuã porã va'e oetüa aguã katy.  
Ha'e gui ma xerembiayvu tou ombo'a'e yvotyty py,  
to'u yvyra'a iporãve va'e!

## 5

*Ime ijayvuague*

- <sup>1</sup> Xereindy xerembireko, xee aike ma xeyvotyty py.  
Xee amono'õ ma mirra heakuã porã va'e reve.  
Ha'u ma ei hetã revedua,  
ha'e ay'u ma vinho kamby reve.  
Xeirû kuery, pekaru ha'e pey'u.  
Pey'u ndapey'uxevei peve, xerembiayvu kuery.

*Ta'xy ijayvuague*

- <sup>2</sup> Xee ake teï xekuraxõ ma ndokei.  
Aendu xerembiayvu okë re ombota nhendu reve aipoe'i rã:

*Ime ijayvuague*

- “Xereindy xerembiayvu, eipe'a na.  
Xerymba apykaxu, ndevaikuea oï e'ÿ va'e.  
Mba'eta xeakã inhakÿmba yvyxí rayvi gui,  
xe'a yxapypa ma”, he'i.

*Ta'xy ijayvuague*

- <sup>3</sup> Ha'e gui xee ma amboipa ma xeao puku.  
Amoï ju 'rã nda'u?

- Ha'e xepy voi ajoipa ma,  
teĩ amongy'a ju 'rã nda'u?
- <sup>4</sup> Peteĩ vyvra pa'ũ oĩ va'e rupi xerembiayvu opoko rã  
xekuraxõ omyĩmba ayvu vaipa rã.
- <sup>5</sup> Ha'e rami vy avy okẽ aipe'a aguã xerembiayvu pe.  
Xepo gui mirra amoekauãague otyky rei oiny,  
xekuã gui voi okẽ pe'aa áry otyky ajopy rã.
- <sup>6</sup> Xerembiayvu pe aipe'a va'eri ojepe'a ju ma, oo ma ra'e.  
Ha'e rami rã xenhe'ẽ py xekangypa ijayvu rire.  
Aeka avy teĩ ndajoui, ha'e aenoĩ aikovy teĩ naxembovai.
- <sup>7</sup> Tetã rarõa kuery xerovaexi tetã re onhangarekoa rupi.  
Ha'e rami vy xepetepa vy xembojexavai.  
Ha'e gui tetã kora rarõa kuery ju omboi xeao puku.
- <sup>8</sup> Jerusalém memby kuery, ajerure pévy.  
Xerembiayvu pexa vy mba'e pa pendeayvu 'rã ixupe?  
Pemombe'u xee amano ta maa ayvu vaipa vy.

*Irũ kuery ijayvuague*

- <sup>9</sup> Ha'e gui ndee pavẽ kunhague gui neporãve va'e,  
mba'e py tu nerembiayvu amboae kuery gui ha'eve?  
Mba'e tu nerembiayvu amboae kuery gui iporãve va'e oguerekó,  
ha'e rami aguã re orevy rejerure aguã?

*Ta'yxy ijayvuague*

- <sup>10</sup> Xerembiayvu ma xiĩ pytã rei,  
ha'e ma dez mil ikuai va'e gui teĩ omboetevepy.
- <sup>11</sup> Inhakã ma ouro oiky'a'o porã mbyre rami.  
Hi'a ma guapytã xã ha'e xapirẽ rague rami huũ va'e.
- <sup>12</sup> Hexa ma apykaxu yakã rembe re ikuai va'e rexa rami.  
Kamby py omoxiĩ ha'e ombojegua pyre rami hexa.
- <sup>13</sup> Hova ma yvyra bálsamo ty rami heakuã va'e,  
ha'e yvyra rogue heakuã porã va'e omboaty pyre rami.  
Hembe ma yvoty gui mirra iporãve va'e otyky rami.
- <sup>14</sup> Ijyva ma ouro guigua ayscale ita porãgueve oĩa rami.  
Iku'a ma marfim xiĩ va'e ita safira py ombojegua pyre rami.
- <sup>15</sup> Hetyma ma ita mármore guigua yta ouro ete áry omo'ã mbyre rami.  
Yvatea ma Líbano yvoty rami, yvyra yvate va'e rami ete.
- <sup>16</sup> Ijayvua ma he'ẽ porã va'e rami.  
Ha'e ma opa mba'e py xembovy'a.  
Ha'e rami rima xerembiayvu oiko.  
Ha'e rami xeme, Jerusalém memby kuery.

## 6

*Irũ kuery ijayvuague*

- <sup>1</sup> Kunhague pavẽ gui neporãve va'e,  
marã katy tu oo ra'e nerembiayvu?  
Mava'e tape rupi tu nerembiayvu oo ra'e?  
Ore roipytyvõ 'rã reka aguã.

*Ta'yxy ijayvuague*

- <sup>2</sup> Xerembiayvu ma ojeupegu yvotyty ha'e bálsamo ty katy oguejy,  
guymba kuery omongaru aguã yvotyty rupi, ha'e yvoty ikuai va'e oiporavo aguã.

<sup>3</sup> Xee ma xerembiayvu mba'e, ha'e xerembiayvu ma xemba'e.  
Yvotyty rupi omongaru oikovy guymba kuery.

### *Ime ijayvuague*

- <sup>4</sup> Xerembiayvu, Tirza tetā rami neporā,  
ha'e xembovy'a Jerusalém rami.  
Xondaro kuery bandeira revegua rami omboete reipy reiko.
- <sup>5</sup> Erova nderexa xegui, mba'eta xembopy'a eta rei.  
Nde'a ma kavara kuery Gileade yvyty áry gui oguejy jogueruvy va'e rami huű.
- <sup>6</sup> Neraí ma vexa'i kuery ombojauague gui oẽ jogueravy va'e rami xiñ.  
Ha'e kuery peteñ-teñ oguereko mokoñ'i ma voi va'e,  
ha'e neñ peteñve ma voi ndata'y e'ýi va'e rami.
- <sup>7</sup> Nderova ma romã'a omboja'o pyre rami xiñ porā rei,  
nderova mo'ña oĩ teñ iporāa ojekuaa.
- <sup>8</sup> Sessenta huvixa ra'yxy ikuai, ha'e oitenta ikuai ta'yxy jevy.  
Hembiguai kunhataí ma mbovy rei e'ý ikuai.
- <sup>9</sup> Ha'e rã ayvu ete va'e ma peteñ'i ae,  
xerymba apykaxu rami ivaikuea oĩ e'ý va'e.  
Ha'e ma peteñ'i va'e ixo oguereko vy ikuavãare oayvuve va'e.  
Kunhataígue oexa vy ijayvu okuapy iporāa rami.  
Huvixa ra'yxy ha'e ta'yxy jevy ikuai va'e voi oexa vy oguerovy'a vaipa okuapy.

### *Irû kuery ijayvuague*

- <sup>10</sup> Mava'e tu peva'e ko'ẽ ramo'ia rami ojekuaa va'e?  
Ha'e va'e ma jaxy rami iporā ha'e kuaray rexakã rami iky'a e'ý va'e.  
Xondaro kuery bandeira revegua rami omboete reipy oiko.

### *Ta'yxy ijayvuague*

- <sup>11</sup> Aguejy avy yvotyty ha'e yvyraty katy,  
mba'emo renhoñ pyau yvyugua rupi ikuai va'e aexa aguã,  
ha'e uva henhoñ paa aexa aguã, ha'e yvyla romã'y ipotypaa re.
- <sup>12</sup> Mba'exa vy ete rã  
xeretarã kuery yvatekueve mba'e karóxa py merami aĩ.

### *Irû kuery ijayvuague*

- <sup>13</sup> Sulamita, ejevy ju na.  
Ejevy ju, ore kuery roexaxeve ju.

### *Ta'yxy ijayvuague*

- Mba'e re tu pexaxe sulamita  
Maanaim py ojeroky rã?

## 7

### *Ime ijayvuague*

- <sup>1</sup> Huvixa rajy, ndepy regua reve reguataa ma iporā meme.  
Neretyma ku'a ma mbo'y hembiapo kuaa va'e rembiapo rami iporā.
- <sup>2</sup> Nepuru'ã ma karo ojere va'e vinho oĩ riaeae rami.  
Ndeku'a ma trigo omboaty pyre yvoty ombojerepy rami.
- <sup>3</sup> Nekã mokoñve ma guaxu ta'y'iague meme rami.
- <sup>4</sup> Ndeaju'y ma torre marfim guigua rami iporā.  
Nderexa ma yy omboty pyre Hesbom py, Bete-Rabim rokẽ yvy'iry oĩ va'e rami.  
Nexi ma Líbano yvy re torre Damasco katy ooa py hi'aĩ va'e rami.
- <sup>5</sup> Neakã ma Carmelo yvyty rami.

- Nde'a ma púrpura rami iporã.  
 Huvixave ojejopy uka nde'a reipopẽ va'ekue re.
- <sup>6</sup> Ndee ma neporã ha'e arov'y'a vaipa,  
 xembovy'a ete xerayvua py.
- <sup>7</sup> Nde'yvia ma pindo rami,  
 ha'e rã nekã ma guapytã rami.
- <sup>8</sup> Xee aipoa'e: "Ajeupi rã pindo re,  
 ajopy 'rã ixã rapo re", ha'e.  
 Nekã toĩ xevy uva arupõ xã rami,  
 nepytuã taeakuã porã maçã rami.
- <sup>9</sup> Xerayvua ma vinho iporã va'e rami.

*Ta'yxy ijayvuague*

- Ha'e va'e vinho ma xerembiayvu toy'u tema,  
 toxryr ovvijuru ha'e haï rupi.
- <sup>10</sup> Xee ma xerembiayvu mba'e,  
 ha'e rã ha'e xepota.
- <sup>11</sup> Eju xerembiayvu, jaa nhuñdy rupi jaiko,  
 pytû jaaxa aguã teko'a'i rupi.
- <sup>12</sup> Ko'ëmba'i ramove javy voi vy jaa uvaty re nhama'ẽ vy.  
 Jaexa uva poty ojepe'a ma paa,  
 ha'e yvyra hi'a va'e henhoï paa.  
 Ha'e py ma xee aexa uka 'rã roayvu etea.
- <sup>13</sup> Mandrágora reakuã nhaetû,  
 ha'e nhanerokẽ rupi ikuai yvyra'a iporãgueve,  
 ipyau ha'e yma guare guive.  
 Xerembiayvu, ha'e nunga ha'e javi xee amoï porã ndevy peguarã.

**8**

- <sup>1</sup> Ndee xekyvy va'e rire, xexy omokambu va'ekue ae!  
 Ha'e rami va'e rire tape rupi rovaexí vy  
 xee roayvu 'rãgue avave rei xejou vai e'ŷ re.
- <sup>2</sup> Xee rogueraa vy rogueroike 'rãgue xexy ropy.  
 Ha'e gui ndee xembo'e 'rãgue.  
 Ha'e rã ndevy ame'ẽ 'rãgue rey'u aguã vinho iporãve va'e regua,  
 ha'e xe yvyra'a rykue.
- <sup>3</sup> Ndeaxua regua oĩ 'rãgue xekã guýry,  
 ha'e rã reiporu kuua regua ma xekuavã 'rãgue.
- <sup>4</sup> Jerusalém memby kuery, ajerure pêvy:  
 pemomyĩ eme rojoayvua, tove toke ranhe,  
 ha'e ae ovyxé e'ŷa ja.

*Irũ kuery ijayvuague*

- <sup>5</sup> Mava'e tu peva'e, teko'a e'ŷa katy gui oẽ ouvy vy  
 guembiaiyvu reve joe ojeko jogueruvy va'e?

*Ime ijayvuague*

- Maçã'y rembypy guy py xee romomyĩ.  
 Ha'e py ae ndexy ndererek'o'i raka'e.  
 Ha'e py ae ju nekuavãare oendu raka'e haxy va'e.
- <sup>6</sup> Emoï xerery nekuraxõ re imbojaarã rami, ndejyva re guive.  
 Mba'eta jajoayvua ma manoá rami ipo'aka.

Ha'e rã takãte'ŷ ma yvyra rupa rami nda'evei ete va'e.  
 Ha'e va'e regua tapyĩ ma hendy rewegua,  
 tata rami okai oiny va'e.

- <sup>7</sup> Yy tuvixa va'e teĩ nomboguei 'rã jajoayvua,  
 yakã ikuai va'e ndojao'i 'rã.  
 Joayvua repyrã amongue oguereko va'e ha'e javi ome'ẽ teĩ mba'everã ndovarei.

### *Irũ kuery ijayvuague*

- <sup>8</sup> Ore kuery ororeindy roguereko ikã e'ŷ teri va'e.  
 Mba'e tu rojapo 'rã ixupe gua'yxyrã re ojerurea ramo?  
<sup>9</sup> Tetã kora ha'e oiko va'e rire  
 ixupe rojapo 'rãgue peteĩ torre prata guigua.  
 Ha'e rã okẽ va'e rire  
 ronhovã 'rãgue yvyrapé yary guigua py.

### *Ta'yxy ijayvuague*

- <sup>10</sup> Xee ma tetã kora, ha'e rã xekã ma torre rami oĩ.  
 Ha'e rami rã xerembiayvu xerexa vy xererovy'a 'rã.

### *Irũ kuery ijayvuague*

- <sup>11</sup> Baal-Hamom py Salomão oguereko peteĩ uvaty.  
 Ha'e va'e omboaxa raka'e opena va'erã kuery pe.  
 Ha'e ramo hi'a rekovia peteĩ-teĩ ogueru ixupe mil hatã'i va'e prata guigua.

### *Ta'yxy ijayvuague*

- <sup>12</sup> Ha'e rã xe uvaty ma xereve ae oĩ xee aipotaa rami areko aguã.  
 Ha'e gui ndee Salomão, eju ejopy mil hatã'i va'e,  
 ha'e hi'a re opena va'e kuery ju duzentos 'rã ojopy.

### *Ime ijayvuague*

- <sup>13</sup> Ndee yvotyty rupi reiko va'e,  
 nhaneirũ kuery oenduxe okuapy ndeayvua.  
 Xee voi taendu.

### *Ta'yxy ijayvuague*

- <sup>14</sup> Xerembiayvu, eju pojava!  
 Enha ejuvy guaxu e'ŷ vy guaxu ra'y  
 yvity heakuã va'e áry rupi opo-opo ouvy va'e rami.

## Isaiás ayvu oĩa

### Isaiás ayvu oĩa

“Kova'e ma Amos ra'y Isaías pe oexa uka pyre Judá ha'e Jerusalém pygua kuery reko re, Judá pygua huvixa Uzias oĩ jave, ha'e gui Jotão, Acaz ha'e Ezequiasju. 'Ndee yva, endu ke, ha'e ndee yvy, eikuua pota ke, mba'eta ijayvu va'e ma Senhor ae. Aipoe'i: “Amongakuaa xera'y kuery, ha'e kuery ambotuvixapa rire teĩ xere opu'ã rei okuapy. Vaka kuery minha oikuua 'rã oja, ha'e mburika'i voi oikuua 'rã ija omongaruaty. Ha'e rã Israel kuery ma ndoikuuaai mba'eve, xevyguia kuery ndoikuuaai mba'eve ete”, he'i” (1.1-2). Profeta Isaías ijayvu raka'e Nhanderuete po'akaa ha'e peteĩ'i oikoa re, guembiguai jogueraa jepearã ombou aguã re guive. Ha'e va'e ma Jesus Cristo.

Capítulo 1 guive 39 peve ijayvu Assíria pygua kuery Judá kuery ombojexavaia re. Ha'e rami teĩ profeta pe nda'eveive va'e ma hetarã kuery ojejavvy reia, Nhanderuete nonhe'ẽ renduia ha'e hexe ndojeroviai okuapya.

Capítulo 40 guive 66 peve omombe'u ha'e kuery yvy mboae rupi ombojexavaia teĩ Nhanderuete omboaxy vy oguerojevy ju ha'e ogueraa jepe aguã. “Nhanderuete aipoe'i: ‘Xevyguia kuery pe pendeayvu pembovy'aa rupi, pembovy'a ju ke. Pendeayvu porã'i ke Jerusalém pygua kuery pe. Ha'e vy aipopeje: “Opa ma pendere opu'ãa ague, mba'eta penderekovaia que omboguepaa ma. Pejejavvyague re pepaga aguã va'ekue mokoigüe ma pejopy Senhor po gui”, peje” (40.1-2).

#### *Ojejavypa va'e kuery pe ijayvuague*

<sup>1</sup> Kova'e ma Amoz ra'y Isaías pe oexa uka pyre Judá ha'e Jerusalém pygua kuery reko re, Judá pygua huvixa Uzias oĩ jave, ha'e gui Jotão, Acaz ha'e Ezequias ju.\*

<sup>2</sup> Ndee yva, endu ke, ha'e ndee yvy, eikuua pota ke, mba'eta ijayvu va'e ma SENHOR ae. Aipoe'i: “Amongakuaa xera'y kuery, ha'e kuery ambotuvixapa rire teĩ xere opu'ã rei okuapy.

<sup>3</sup> Vaka kuery minha oikuua 'rã oja, ha'e mburika'i voi oikuua 'rã ija omongaruaty. Ha'e rã Israel kuery ma ndoikuuaai mba'eve, xevyguia kuery ndoikuuaai mba'eve ete”, he'i.†

<sup>4</sup> Nda'evei ete 'rã ha'e rami ete pendeko vai va'e pe. Peẽ kuery pejejavya anho perekova'e, heko vai va'e regua, ha'e iky'apa va'e ra'y kuery pendekuai. Pepoipa ma SENHOR gui, pendeayvu vai Israel kuery Ruete Iky'a e'ŷ va'e pe, ha'e vy jypy guare rami ju pendekuai.

<sup>5</sup> Mba'e re tu pendekuai axy reivexe ri pejejavypa vy? Mba'eta peneakã raxypa, pendepy'a voi ijaipa ma.

<sup>6</sup> Pendepy mbyte guive pendeapyte peve penderete ivaipa ma, opa marãgua ai vaikue oĩ penderete re. Ha'e nunga ndoiky'a'oai 'rã, ndojokuaai 'rã, nei azeite py voi noipoanoai 'rã.

<sup>7</sup> Pendeyvy ma ivaipa ma, peneretã ikuai va'e voi omombaa ma tata py. Peẽ kuery pexaa py amboae yvy guigua kuery ho'upa penereminhotŷgue. Ha'e ramo pendeyvy rupi tekoague rive opyta, amboae yvy guigua omomba rire.

<sup>8</sup> Sião memby‡ voi opyta ha'e ae'i, oguy vaikue'i uvaty, e'ŷ vy pepino-ty mbyte py oĩ va'e rami, ha'e e'ŷ vy tetã ojokopaa va'e rami.

---

\* **1:1** Judá kuery kuaray puku-a katy, ha'e gui Israel kuery kuaray apu'a'ia katy ikuai va'e. Judá regua tetã tuvixave va'e ma Jerusalém Isaías reko, ha'e rã Israel regua tetã tuvixave va'e ma Samaria. † **1:3** Amongue py “Israel kuery” 'ea 'rã Israel kuery pe ae, ha'e rã amboae henda py ma mokoïve regua Judá ha'e Israel pe ijayvu. Apy ma mokoïve re ijayvu. ‡ **1:8** “Sião memby” he'ia ma Jerusalém tetã re ae ijayvu vy.

<sup>9</sup> Ha'e gui SENHOR ixondaro reta va'e amongue'i jakuave aguã rami ndoejai va'e rire nhakanhymba 'rãgue Sodoma ha'e Gomorra tetã rami.§

### *Ombojerovia merami rive va'e re ijayvuague*

<sup>10</sup> Peẽ Sodoma pygua huvixa kuery, pendu ke SENHOR ayvu! Gomorra tetã py pendekuai va'e, pejapyxaka Nhanderuete guigua lei rupi penembo'ea re.\*

<sup>11</sup> SENHOR aipoe'i: "Mba'erã tu ha'e rami ete xevy peme'ẽ mba'emo? Xee ndaipotavei ma veva'i ava ha'e mymba ikyra va'e peapy reve peme'ẽ va'e. Xee ndarovy'avei ma toro ra'y ruguy, xee ndaipotavei ma veva'i ha'e kavara.

<sup>12</sup> Xerenonde pejexa uka aguã peju vy mava'e oipotaa rami tu penha-penha xevygua templo roka rupi?

<sup>13</sup> Peruve eme xevy ndovarei va'e regua peme'ẽ va'erã. Heakuã porã va'e xevy peapy va'e xembojeguaru ma, ha'e jaxy pyau'i ára ngaru pejapo va'e, ha'e gui sábado ha'e amboae ára py pendeatya voi, mba'eta ndaropo'akavei ma nhemboaty iky'a e'ý va'e oiko aguã py pejejavy pekuapya.

<sup>14</sup> Jaxy pyau'i ára ngaru oikoa py, ha'e amboae ára pendeatya py ma xembopoxy pekuapya, ndaropo'akavei ma. Xekane'õ ma arojexavai vy.

<sup>15</sup> Ha'e nunga rupi xevy pe pejapukaia rupi pendepo peupi ramo xee nama'ëi 'rã. Mbovykue rei e'ý pejerure tei xee naendui 'rã, jouguy py pendepo ky'a ramo.

<sup>16</sup> Pejejoi ke, pejeky'a'o, penderekvaia peipe'a xerenonde gui! Pejep'e a pejapo vaia gui,

<sup>17</sup> ha'e peikuua pota iporã va'e rupi ju pendekuai aguã. Pejogueroko pota teko porã rupi. Pejoko nhombojexavaixe va'e, pepy tyre'ý kuery ojavyky reia rã, ha'e peipytyvõ imeve'ý va'e", he'i.

### *Imboaxya rupi "Peju ke" he'iague*

<sup>18</sup> SENHOR aipoe'i: "Peju ke toromongeta. Pejejavya pytã rei rire tei xee romoxiõ 'rã yro'y rami. Pytã huũ rei tei romoxiõ 'rã veva'i rague rami.

<sup>19</sup> Ha'e rami peikoxe, ha'e xenhe'ẽ rendu ri ramo romongaru 'rã mba'emo porã yvy omoingo va'e re anho.

<sup>20</sup> Ha'e rã naxenhe'ẽ rendui vy pepu'ã rei ramo pendejukapaa 'rã kyxe py." SENHOR ae ha'e rami ijayvu va'ekue.

### *Jerusalém pygua kuery ombopaga rire oepy ju aguã re ijayvuague*

<sup>21</sup> Tetã Nhanderuete pe ojeroviapy peiko va'ekue ri kunha itavy rei va'e rami ju pendekuai. Pendea py heta ikuai va'ekue ri iporayvu'i ha'e peteĩ rupi ikuai va'e. Ha'e rã aý ma jojukaa rive anho ikuai.

<sup>22</sup> Prata perekvaia ma omombo pyrã rive opyta. Pende-vinho iporãve va'ekue ri yy re rive omoirã.

<sup>23</sup> Pendea py huvixa kuery ikuai va'e voi heko vai va'e anho ikuai, imonda va'e kuery irã. Ha'e kuery peteĩ-tei ojeupe guarã mba'emo ome'ẽ uka opena aguã, ojoupave aguã re rive 'rã oo. Ha'e rami avi ndoepyvei ma tyre'ý kuery, imeve'ý va'e re voi nopenavei ma.

<sup>24</sup> Ha'e nunga rupi SENHOR ixondaro reta va'e, Israel kuery Ruete ipo'akapa va'e aipoe'i: "Aý gui xepoxy aexa uka ta ma xerovaigua kuery pe. Ajepy 'rã ndaxerayvuvei okuapague re.

<sup>25</sup> Penderovai audi 'rã xepo, roiky'a'o 'rã kavõ py rami, pendea gui aipe'a aguã iky'a va'e ha'e javi.

<sup>26</sup> Xee amoï ju 'rã joguerekooarã yma guare rami. Amoï 'rã penemonetaarã jypy guare rami. Ha'e ramo mae peneretã pe 'Teko porã oña' ha'e 'Ojeroviapy ikuaria' 'ea ju 'rã.

§ <sup>1:9</sup> Tetã Sodoma ha'e Gomorra ma Nhanderuete omomba vyvoi raka'e tata omboguejy vy, ha'e pygua kuery opa marã rei ikuai rire (Gênesis 18.1-19.29). Romanos 9.29 \* <sup>1:10</sup> Apy ma guetarã kuery pe ae "Sodoma ha'e Gomorra pygua" he'i.

**27** “Aepy ju 'rã Sião tetã ha'evea rami, teko porã rupi araa jepe 'rã ojeko rerova uka va'e ha'e javi.

**28** Ha'e rã teko vai rupi ikuai va'e ha'e ojejavypa rei va'e ma amomba vyvoi 'rã. Ha'e ramo SENHOR gui ojepe'a va'ekue okanhymba 'rã.

**29** Mba'eta peẽ kuery peximba 'rã yvyra pejou porã reiague re, ha'e nda'evei nho 'rã yvotyty pejou porãveague re.<sup>†</sup>

**30** Ha'e nunga rupi yvyra rogue omanomba rei va'ekue rami 'rã pendekuai, ha'e yvotyty ipirupa va'ekue rami avi.

**31** Peẽ kuery va'e regua ipo'akave va'ekue ri mba'emo pire rami 'rã ikuai, ha'e ha'e kuery mba'emo ojapo va'ekue ma tata raviju rami 'rã opyta, mba'eta mokoõve okanhymba 'rã tata py, imboguearã ndoikoi 'rã guive”, he'i.

## 2

### *Miqueías 4.1-5*

**1** Pova'e ma Amoz ra'y Isaías pe mba'emo oexa uka reve ayvu ombou va'ekue Judá ha'e Jerusalém re.

**2** Ha'e gui opaa ára yvotyty SENHOR pegua oo oña ombo'yvateve 'rã yvotyty ikuai va'e áry. Ha'e ramo yvy regua kuery ha'e javi oje'o'i 'rã ha'e katy.

**3** Heta regua kuery oo vy aipoe'i 'rã joupe-upé: “Peju ke, jajaje'o'i SENHOR pegua yvotyty re, Jacó kuery Ruete pegua oo oña katy. Ha'e ma nhanembo'e 'rã oikoa re, ha'e va'e rupi nhande kuery voi nhandekuai aguã. Mba'eta Sião gui ma oikuua ukaa 'rã lei, Jerusalém gui onhendu 'rã SENHOR ayvu”, he'i 'rã okuapy.

**4** Ha'e gui ma SENHOR oikuua pota 'rã yvy regua kuery re, omo'arandu 'rã heta regua. Ha'e ramo ha'e kuery okyxé gui ojapo 'rã yvy karaíarã, ha'e hu'y guaxu gui ojapo 'rã kyxé yvyra rakã ayaarã. Mba'eta yvy regua kuery okyxé ndoguerojeroviavei 'rã, neñjoe opu'ã aguã voi ndoikuaavei ma 'rã.

**5** Peju ke Jacó ramymino kuery, nhande kuery voi nhandekuai SENHOR rexakãa rupi.

### *Avakue onhemboyvate va'ekue omo'yvyi'i aguã re ijayvuague*

**6** Ha'e gui SENHOR, ndee rejapa va'e ty'y ndevygua Jacó ramymino kuery. Mba'eta ndevygua kuery ma kuaray oua katyguia gui oikuua amboae rami onhembo'e aguã, filisteu kuery rami ae 'rã imba'ekuaa, yvy mboae regua ra'y kuery re 'rã irã okuapy.

**7** Ijyvy re ma heta oĩ prata ha'eouro. Ndoipapa kuaavei ma opa mba'e porã oguerekova'e. Ha'e py oĩ kavaju anho, ha'e karóxa'i voi mbovy rei e'ý ikuai.

**8** Ha'e kuery yvy re tynyé avi mba'emo ra'angaa ombojeroviapy. Ha'e kuery guenapy'ã re oĩ 'rã ha'e kuery ae po py ojapo va'ekue renonde, omboete 'rã ha'e kuery ae rembiapo.

**9** Ha'e va'e rire ma omo'yvyi'imbaa, avakue pavẽ omoximbaa tei ndereperdoai ha'e kuery ojejavya.

**10** Tapeo, peike itakua py penhemi! Yvy ku'i py penhemi SENHOR gui pekyje vy, hexakãa ha'e ipo'akaa gui.

**11** Mba'eta omomba 'rã avakue ojejou porã reiague, omo'yvyi'i 'rã onhemboyvate rei va'ekue. Mba'eta ha'e va'e ára SENHOR anho yvate 'rã.

**12** Mba'eta ovaẽ 'rã ára SENHOR ixondaro reta va'e omo'yvyi'imba aguã ojejou porã rei va'ekue, onhemboyvateve va'ekue-'ekue ha'e yvateve va'ekue ha'e javi oitypa aguã,

**13** oity aguã yvyra yary Líbano yvy regua yvatekueve, ha'e carvalho Basã yvy re ikuai va'e ha'e javi,

**14** ha'e gui yvotyty yvate va'e ha'e javi, yvy'ã ikuai va'e,

**15** ha'e gui torre yvate va'e ha'e javi, ha'e tetã kora oĩ atã va'ekue meme,

**16** ha'e gui kanoã guaxu Társis katy oo va'e ha'e javi, jaexa rã iporãve va'ekue tei.

<sup>†</sup> **1:29** Ha'e kuery ma yvyra ikuai va'e guýry, ha'e yvotyty rupi onhembo'e va'ekue amboae rami rei. Mba'emo ra'angaa ombojeroviaa rupi opa marã rei ikuai.

<sup>17</sup> Ha'e rami vy omomba 'rã avakue ojejou porãague, omo'yvy'í'imba 'rã onhembovate-vea. Mba'eta ha'e va'e ára SENHOR anho yvate 'rã.

<sup>18</sup> Ha'e gui ombovaipa 'rã mba'emo ra'angaa ha'e javi.

<sup>19</sup> Ha'e ramo avakue onhemimba 'rã itakua py ha'e yvykua rupi SENHOR gui okyje vy, hexakãa ha'e ipo'akaa gui, ko yvy regua omondyipa aguã opu'ã ramo.

<sup>20</sup> Ha'e va'e ára anguja ha'e mbopi pe rive avakue omombo 'rã mba'emo ra'angaa prata ha'e ouro guigua, ha'e kuery ae omboete va'erã ojapo va'ekue.

<sup>21</sup> Ha'e rami vy onhemimba 'rã itakua py ha'e itaova guy rupi SENHOR gui okyje vy, hexakãa ha'e ipo'akaa gui, ko yvy regua omondyipa aguã ha'e opu'ã ramo.

<sup>22</sup> Ha'e nunga rupi pejeroviave eme avakue oapy'ígua rupi rive ipytue va'e re. Mba'erã tu ha'e kuery ovare?

### 3

*Judá ha'e Jerusalém pygua kuery ikuai re guive SENHOR oikuua pota aguã re ijayvuague*

<sup>1</sup> Mba'eta ma'ë, Jerusalém ha'e Judá gui SENHOR ixondaro reta va'e oipe'a 'rã mbojape, yy ha'e guekoverã oguerekva'ekue ha'e javi,

<sup>2</sup> ha'e gui ipy'a guaxukueve, xondaro kuery, nhomboayvu va'ety, profeta, imba'ekuaa va'e kuery, ha'e tujakueve,

<sup>3</sup> ha'e xondaro ruvixa cinqüenta re opena va'e, ha'e omboetevepy, nhomongetaa kuery, mba'emo ojapo kuaa va'e ha'e imba'evyky va'e kuery ha'e javi 'rã oipe'apa.

<sup>4</sup> Ha'e rire huvixa ikuai va'ekue 'rãgue py kunumigue'i ju 'rã omoï. Ha'e ramo kyrígue po py oï 'rã ha'e kuery re opena aguã.

<sup>5</sup> Ha'e rire nhomoingo axy 'rã jomeme, peteñ-teñ ngoo katy'i ikuai va'e reve. Kunumigue'i opu'ã 'rã tujakueve re, ha'e opa marã rei ikuai va'e opu'ã 'rã omboetevepy re.

<sup>6</sup> Ha'e va'e jave ma amongue nguu ro py ovaë vy guyke'y pe aipoe'i 'rã: "Ndee tu ndeaorima. Ha'eve reiko aguã oreruvixarã. Epena ha'vy kova'e tekoia ivaipa va'ekue re", he'i 'rã.

<sup>7</sup> Ha'e rami teñ ha'e va'e árave tyke'y ombovai vy aipoe'i 'rã: "Xee tu poropoanoa e'ý, ha'e xero py ndarekoi mbojape, neñ ao. Nda'evei xee aï aguã heta va'e kuery ruvixarã", he'i 'rã.

<sup>8</sup> Mba'eta Jerusalém ivaipa, Judá regua voi oitypaa, mba'eta oayvu py ha'e mba'emo ojapoa py ha'e kuery SENHOR re opu'ã okuapy, Hexakãmba va'e ombopoxya rupi rive ikuai.

<sup>9</sup> Ha'e kuery rova re ojekuaa ojejavypa va'ea. Sodoma pygua kuery rami ete oexa uka 'rã ojejavypa reia onhomí e'ý re. Nda'evei ete 'rã ha'e kuery pe, ojeupe ae ojapo vai rire.

<sup>10</sup> Ha'e rã heko porã va'e kuery pe ma aipo're: "Pêvy pe iporã va'e oiko 'rã", 're, mba'eta ha'e kuery ojopy 'rã ikuai porãague repy.

<sup>11</sup> Ha'e rã heko vai va'e pe ma nda'evei ete 'rã, opa mba'e py ikuai axy 'rã. Mba'eta ojapo vaiague ae ju 'rã ojeapa ha'e kuery re.

<sup>12</sup> Xeretarã kuery re opena va'e ma kunumigue meme, ha'e kuery re opena aguã ma kunhague po py oï. Xeretarã kuery, pendererekaoa kuery ma penembatavypa, mba'eta ombovaipa tape peo aguã va'e.

<sup>13</sup> Ha'e nunga rupi SENHOR ae 'rã oikuua pota, oiko katu ma omboayvu aguã yvy regua kuery ha'e javi.

<sup>14</sup> SENHOR omboayvu 'rã ojeupergua kuery monogetaaty ha'e huvixa kuery. Ha'e vy aipoe'i 'rã: "Peñ kuery ae ma xe'uvaty mombaare peiko. Iporiaukue'i gui peraa rive va'ekue ma pendero py ae oï.

<sup>15</sup> Mba'e nunga rupi tu pemoingo axy xevygua kuery, ha'e pembojexavai iporiaukue'i?" he'i SENHOR ixondaro reta va'e.

*Sião pygua kunhague ombopaga aguã re ijayvuague*

<sup>16</sup> Ha'e gui SENHOR aipoe'ive ju: "Pexa na Sião pygua kunhague ojejou porã rei okuapy va'e! Oaju'y omoatã reve rei 'rã oguata, oma'ẽ 'rã nda'evei reia rupi, opyrõ py'i'i rei, ha'e opy nhu'ã regua oparã rei reve 'rã oguata", he'i.

<sup>17</sup> Ha'e nunga rupi Sião pygua memby kuery akã SENHOR omboaipa 'rã, oexa ukapa 'rã guive ha'e kuery oximba aguã.

<sup>18</sup> Ha'e va'e ára SENHOR oipe'apa 'rã onhembojeguua ha'e kuery opy nhu'ã re oguereko va'e, akã regua ha'e ijegua jaxy pëgue ramigua,

<sup>19</sup> ha'e namixã, poapy regua, hova mo'ãa ovava va'e,

<sup>20</sup> ajukue akã regua, corrente'i opy nhu'ã re oguereko va'e, ku'axã, heakuã porã va'e ryru, mba'ekuaa ryru,

<sup>21</sup> kuã regua, xĩ apy regua,

<sup>22</sup> ao iporãve va'e, manto, aju'y regua, voko,

<sup>23</sup> ojexaa, kamixa perirõ'i, 'a regua ha'e tova mo'ãa ipukuve va'e ha'e javi.

<sup>24</sup> Ha'e va'e rire ha'e kuery onhemoeakuãmba rei oikovy 'rãgue py heakuã vaikue rei 'rã oikovy. Iku'axã 'rãgue py oiporu 'rã ixã va'e. Ha'e gui oje'avky porã rei 'rãgue py inhakã pire rei 'rã. Ao iperirõ'i va'e 'rãgue py voxá inhana rei va'e guigua 'rã oiporu. Ha'e iporã rei 'rãgue py opyta 'rã ipere okaiague rupi.

<sup>25</sup> Ime kuery ma ojukapaa 'rã kyxe py, ipy'a guaxukueve voi omanomba 'rã joe opu'ãa rupi.

<sup>26</sup> Ha'e ramo tetã rokẽ py kunhague opa marã ojae'o 'rã okuapy ipy'a vai vy. Sião tetã ivaipa ramo vyv py rive oguapy 'rã.

## 4

<sup>1</sup> Ha'e va'e ára sete kunhague ojopy 'rã peteñ'i ava, ixupe aipoe'i 'rã: "Ore ae rojou 'rã ro'u va'erã ha'e oreaorä, ri teñ tove nderery rupi toronhemboery rive, roximba reia rupi ve'ý roiko aguã", he'i 'rã okuapy.

### *SENHOR guigua Yvyra Rapytakue Renhoï re ijayvuague*

<sup>2</sup> Ha'e va'e ára ma SENHOR guigua Yvyra Rapytakue Renhoï oiko vy yvate porã 'rã, ojou porãmbaa 'rã guive. Ijyvy rupi ikuai va'e voi iporã va'erã meme, Israel kuery oo jepe va'ekue oguerovy'apa ha'e ojou porã aguã.

<sup>3</sup> Ha'e gui Sião pygua okuave va'e Jerusalém py opyta va'ekue pe ma "Iky'a e'ý va'e" 'ea 'rã, oikove aguã Jerusalém py guery ombopara uka va'ekue ha'e javi pe.

<sup>4</sup> Mba'eta SENHOR oiky'a'opa ju 'rã Sião memby kuery, Jerusalém pygua kuery gui omboguepa 'rã tuguy omoëague ha'e kuery re oí va'e, Onhe'ë teko porã rexaa ukaa ha'e joky'a'o va'e rupi ae.

<sup>5</sup> Ha'e gui Sião vytyt áry, ha'e ha'e py ijatypa okuapy va'e áry SENHOR omoï 'rã peteñ arai ara py, ha'e gui pyávy ma ombou 'rã tata rendy vuku hataxí reve. Ha'e ramo ha'e javi áry rupi hexakãa ojao'i 'rã oo ao'ia rami.

<sup>6</sup> Ha'e nunga ma ara py oí 'rã kuaray'ärã, mba'eta ha'e py onhemi okuapy va'e pe ojoko 'rã kuaray haku, vytytu atã ha'e oky.

## 5

### *SENHOR mba'e uvaty re ijayvuague*

<sup>1</sup> Aý ma aporaei ta xerembiayvu pe, ixupegua uvaty re 'rã aporaei. Mba'eta xerembiayvu ma peteñ uvatyrã onhoty raka'e vyv porãa py.

<sup>2</sup> Ha'e rami vy ojo'o vyv, oguenoëmba ita ikuai va'ekue, ha'e gui uva yky porãgueve anho onhoty. Uvaty mbyte ojapo torre yvate va'e oma'ẽ jepi atyrã, ojapo avi oja guaxu uva'a oumbiri atyrã. Ha'e gui ma oarõ oikovy onhoty va'ekue hi'a porã aguã. Ha'e rami teñ ha'e va'e 'rãgue py iro va'e anho oiko hi'a.

<sup>3</sup> Ha'e rire aipoe'i: "Aŷ ma Jerusalém ha'e Judá py pendekoa va'e, ajerure pëvy: Peikuaa pota xere ha'e xe'uvaty re.

<sup>4</sup> Mba'e nunga tu anhotŷ va'ekue re ajapove aguã ha'eve 'rāgue ajapoague áryve? Ha'e mba'e re tu iporã va'e arõ va'e 'rāgue py iro va'e anho oiko?

<sup>5</sup> Aŷ ma xee amombe'u ta pëvy xe'uvaty re ajapo aguã. Aipe'apa 'rā ikorarã juu anhotŷ va'ekue, xe'uvaty opyta aguã mymba okaru atyrâ rive. Aity 'rā ikora mymba kuery opyrõmba aguã.

<sup>6</sup> Ajapo 'rā opyta rive aguã rami. Ha'e ramo uva rembypy nomoatyrõavei 'rā, neñ yvy voi nomboa'eveavei 'rā. Ha'e rami 'rāgue py juu ha'e juu rakuaendy rive 'rā ikuai. Ha'e arai pe xeayvu 'rā hi'áry nda'okyvei aguã re", he'i.

<sup>7</sup> Mba'eta uvaty ojeupe guarã SENHOR onhotŷ va'ekue ma Israel kuery ae, uva rembypy oguerovy'a va'ekue ma Judá kuery. Ha'e oarõ oikovy teĩ ha'e kuery teko porã rupi ikuai aguã oexaxe vy. Ha'e rami teĩ lei rovai rupi rive ikuai ra'e. Teko porã 'rāgue py haxë reia rupi anho ikuai.

### *"Heko vai va'e pe nda'evei ete 'rā" he'iague*

<sup>8</sup> Nda'evei ete 'rā peẽ kuery penderorã pejapo-japove va'e ha'e pendeyvyrã pejoujoue va'e pe, amboae kuery oĩ aguã nda'evevei peve. Ha'e rami vy peẽ kuery anho peiko pendeyvy mbyte rupi.

<sup>9</sup> Ha'e gui SENHOR ixondaro reta va'e aipoe'i xevy: "Anhetẽ heta oo opyta rei 'rā, tuvixakueve ha'e iporãgueve voi, avave rei noñavei rā.

<sup>10</sup> Ha'e va'e jave petei alqueire uvaty rape ome'ẽ 'rā vinte litro ete'i, ha'e dez vox trigora'yigue gui ma teĩ dez quilo ete'i 'rā ome'ẽ", he'i.

<sup>11</sup> Nda'evei ete 'rā oka'u va'e kuery pe. Ha'e va'e kuery ma ko'ẽ'i ramove vinho oy'u aguã omboopy vy pytû mbyte raxa peve 'rā oo, vinho py onhemboakupa peve!

<sup>12</sup> Ha'e kuery ngaru ojapoaa py ogueru 'rā mbaraka, mba'epu ixã reta va'e, pandeiro ha'e mimby. Vinho heta avi 'rā oĩ oy'u va'erã. Ha'e rā SENHOR ojapo va'e re ma ha'e kuery ndoikuua potai, na'ima'endu'ai guive opo py mba'emo ojapo va'ekue re.

<sup>13</sup> Ha'e nunga rupi xevygua kuery ogueraapaa 'rā escravo-rā, mba'eve re ndoikuua potaiague re rive. Ha'e kuery va'e regua yvatekueve teĩ oendu 'rā karuai, ha'e heta va'e kuery ojexavai 'rā okuapy ijy'uvei gui.

<sup>14</sup> Ha'e nunga rupi yvykua omokõvexe vy oipe'a vaipa 'rā ojuru, ha'e py Jerusalém pygua omboeteve pyre kuery oguejypa aguã, ovy'a vy hevovo reia rupi ikuai va'ekue, ha'e rami ikuia rupi oguerovy'a rei va'ekue voi.

<sup>15</sup> Ha'e rami vy heta va'e kuery opa 'rā oje'oviv, avakue omo'yvyi'imbaa 'rā. Ojejou porã rei va'ekue voi yvy katy rive 'rā oma'ẽ okuapy.

<sup>16</sup> Ha'e rā SENHOR ixondaro reta va'e ma yvate 'rā joe oikuua potaa py. Nhanderuete iky'a e'ŷ va'e gueko porãa rupi vy oexa uka 'rā iky'a e'ŷ va'ea.

<sup>17</sup> Ha'e py ma vexa'i kuery okaru 'rā okuapy ha'e kuery ae okaruaty py rami, ha'e hoo va'e'ŷ ju 'rā ojou okuapy guembi'urã oguerekopa rei va'ekue oyvy oejaague rupi.

<sup>18</sup> Nda'evei ete 'rā teko vai rupi onhea'ã va'e kuery pe, mba'emo ixã py oguerua rami nhombotavypa vy! Ha'e kuery ma karóxa omoatãa rami omoatã 'rā heravy gueko vaia.

<sup>19</sup> Ha'e rami teĩ ha'e kuery aipoe'i 'rā: "Tove Nhanderuete tojapura, tojapopa vyvoi ojapoxe va'e, nhande kuery jaexa aguã. Tove Israel kuery ruete iky'a e'ŷ va'e onhembopy'aa toiko pojava jaikuua aguã mba'e nunga paa", he'i 'rā okuapy.

<sup>20</sup> Nda'evei ete 'rā iporã va'e pe "Mba'emo vai" he'i va'e kuery pe, ha'e rā mba'emo vai pe ma "Iporã" he'i va'e kuery pe. Ha'e kuery ma "Hexakãa" he'i 'rā pytû va'e pe rive, ha'e rā hexakãa pe ma "Pytûa" he'i 'rā. He'ẽ va'e pe "Iro va'e" he'i 'rā, ha'e rā iro va'e pe ma "He'ẽ va'e" he'i 'rā.

<sup>21</sup> Nda'evei ete 'rā ojeupe ae "Hi'arandupa va'e" he'i va'e pe, mba'eta ha'e kuery anho oikuuaapa va'ea rami oexa'ã teĩ.

<sup>22</sup> Nda'evei ete 'rā vinho oy'u aguã anho ipy'a guaxuve va'e pe, ha'e iro va'e joo ramigua e'ŷ-e'ŷ omoirũa rupi ojerovia ete va'e kuery pe.

<sup>23</sup> Ha'e kuery ma ome'ẽmby ojopy 'rā omboeko porã aguã otekoavypa va'e, ha'e heko porã va'e omboeko vai aguã.

<sup>24</sup> Ha'e nunga rupi ha'e kuery opa 'rā tata mba'emo pire oapya rami, tataendy nhuũ pirukue omombaa rami. Ha'e rami ae avi ha'e kuery voi okanhymba 'rā, mba'emo rapo hu'ũmbaa rami avi, ha'e ipotykue yvytu ogueraapaa rami, yvy ku'i rami rive, mba'eta ha'e kuery nda'ikuaxiei rire SENHOR ixondaro reta va'e guigua lei rupi, noenduxei Israel kuery ruete iky'a e'ŷ va'e ayvu.

<sup>25</sup> Ha'e nunga rupi ae SENHOR poxya hendy ojeupeguia kuery pe. Ha'e kuery rovai opo oupi reve ombopaga ramo yvyty ikuai va'e voi oryryipa. Ha'e ramo ha'e kuery re'õgue ma yty rami rive optyta tape rupi. Ha'e rami ete teĩ ipoxya ndoaxai teri. Opo oupi ae tema.

<sup>26</sup> Ha'e gui ma SENHOR oupi 'rā peteĩ bandeira oenoĩ aguã mombyry ikuai va'e. Ha'e pygua xondaro kuery pe otuvy nhe'ẽ 'rā yvy apy re ikuiai gui ou aguã. Ha'e ramo ha'e kuery onha 'rā jogueruvy.

<sup>27</sup> Ha'e kuery va'e regua oua rupi neĩ peteĩve na'ikane'õi 'rā, nonhepyxangai 'rā guive. Neĩ peteĩve ma ndopytu'ui 'rā, neĩ ndokei 'rā. Ha'e kuery ku'akuaa voi oĩ atã porã 'rā, ixapatu xã voi ndoxo rivei 'rā.

<sup>28</sup> Hu'y voi hakua porã 'rā, guyrapa oguereko va'e xã voi oĩ atã porã va'e meme. Hymba kavaju pyapẽ voi ita rami hatã 'rā, ha'e karóxa joe opu'ãa rupi oiporu va'e ruéra ma yvytu jere rami ojere pojava 'rā.

<sup>29</sup> Ha'e kuery ma reõ rami 'rā okororõ okuapy, reõ ra'y kuery rami ete. Ha'e kuery onhendu reve guembia ombotyryry 'rā heravy mombyry, ipo gui avave rei ojoguaa e'ŷ aguã.

<sup>30</sup> Ha'e va'e ára ha'e va'e kuery ye'ẽ rami 'rā onhendu Israel kuery rovai. Ha'e ramo amongue yvy re oma'ẽ va'e oexa 'rā pytúa ha'e jexavai anho. Mba'eta arai pytú va'e ojao'ipa ramo kuaray rexakãa ndojekuaavei 'rā.

## 6

### *Isaiás pe mba'emo oexa ukaa ha'e ojapo ukaa ague*

<sup>1</sup> Huvixave Uzias omanoa ma'etŷ re ma xee aexa SENHOR. Peteĩ tenda openaaty yvate ha'e iporã ete va'e áry oguapy oiny rã aexa. Ijao ma templo ha'e javi rupi ojepyo oiny.

<sup>2</sup> Hi'áry rupi anjo kuery hexakãmba va'e ojekuaa. Ha'e kuery peteĩ-teĩ oguereko mboapy meme opepo: mokoĩ py ojao'i ngova, mokoĩ py ma ojao'i opy, ha'e gui amboae mokoĩ py ma oveve 'rā oikovy.

<sup>3</sup> Ha'e kuery ijayvu atã reve joupe-upe aipoe'i:

— SENHOR ixondaro reta va'e ma iky'a e'ŷ, iky'a e'ŷ, iky'a e'ŷ va'e ae. Hexakãa ma yvy jave rupi omonyẽ! — he'i okuapy.\*

<sup>4</sup> Ha'e kuery ayvu revovo gui templo yta ikuai va'e omyimba, ha'e opy rupi hataxí omonyẽmba ový.

<sup>5</sup> Ha'e rami rã xee aipoa'e:

— Nda'evei ete 'rā xevy! Akanhy ta ma rima aŷ! Mba'eta xejuru ky'a va'e vy, ha'e ijuru ky'a va'e kuery mbyte rupi guive aiko vy ae xerexa py aexa Huvixave SENHOR ixondaro reta va'e! — ha'e.

<sup>6</sup> Ha'e gui ma xea katy peteĩ anjo hexakãmba va'e oveve ouvy. Opo py ogueru peteĩ tapyí altar áry gui tapyí araa py oguenoẽ va'ekue.

<sup>7</sup> Ha'e vy ma tapyí omboja xejuru re. Ha'e vy aipoe'i:

---

\* **6:3** Apocalipse 4.8

— Aŷ kova'e ma ndejuru re oja ma rire retekoavyague oipe'apaa ma, rejeadvyague omboguepaa ma — he'i.

<sup>8</sup> Ha'e rire'ive aendu SENHOR ayvu aipoe'i ramo:

— Mava'e nda'u amondouka ta? Mava'e nda'u oo 'rã oreayvu mombe'uarã?

Ha'e ramo xee ambovai vy

— Xee ma apy aĩ. Xee ri xemondouka — ha'e.

<sup>9</sup> Ha'e ramo SENHOR aipoe'i:

— Tereo ha'vy, aipo're heta va'e kuery pe: “Peẽ kuery pejapyxaka porã teĩ napendui 'rã mba'eve. Pexa porã nhea'ã teĩ ndapexai 'rã mba'eve rei”, 're.

<sup>10</sup> Ha'e rami vy emoakã ratã kova'e kuery. Ejapo nda'ijapyxakavei ha'e hexa pytumba aguã rami, guexa py oexa e'ŷ aguã, oapyxa py oendu e'ŷ aguã, ha'e opy'a py oikuaa e'ŷ aguã, ha'e kuery xea py ojevypa ju vy ojereraa jepe uka e'ŷ aguã rami — he'i.\*

<sup>11</sup> Ha'e ramo xee aporandu:

— SENHOR, raka'e peve nda'u ha'e rami tema rerek 'rã?

Ombovai:

— Ha'e kuery retã ombovaipa peve, ha'e pygua va'ekue jipoavei peve, ha'e oo ikuai va'e voi opyta rivepa aguã, ijyvy voi omombaa peve,

<sup>12</sup> xee SENHOR mombyry amondoukapa peve, ha'e ijyvy py hepyarã ndoikoi ramo.

<sup>13</sup> Xapy'a rei dez ikuaiague py pete'i opyta teĩ ha'e va'e voi ojukaa 'rã. Ha'e rami avi yvyra terebinto ha'e carvalho oake'oa rã hapytakue opytaa rami avi xevyguia kuery iky'a e'ŷ va'e voi opyta 'rã hapytakue re, ha'yigue re rami ae — he'i.

## 7

### *Israel ha'e Síria pygua kuery rovai ijayvuague*

<sup>1</sup> Ha'e gui Jotão ra'y Acaz, Uzias ramymino va'e Judá pygua huvixa oĩ jave ma Jerusalém tetã re ou okuapy Síria pygua huvixa Rezim ha'e Israel pygua huvixa Remalias ra'y Peca. Tetã re ha'e kuery opu'ã okuapy teĩ nda'ipo'akai.

<sup>2</sup> Ha'e jave Davi ramymino kuery oendu okuapy “Israel kuery reve Síria kuery onhemoirũ okuapy nhanderovai”, 'ea rã.\* Ha'e rami vy Acaz ha'e heta va'e kuery ha'e javi opy'a py okyjepa ete, yvyra ka'aguy re ikuai va'e yvytu atã omomyimbaa rami oryryipa okuapy.

<sup>3</sup> Ha'e ramo SENHOR aipoe'i Isaías pe:

— Aŷ tereo, ha'e eraa ndera'y hery “Okuave va'e ojevy va'erã” 'ea va'e, huvixa Acaz reve penhovaexi aguã. Ha'e va'e ma oĩ 'rã tape ajukue joiaty via rupi yupa yvy'ã katyve oĩ va'e py, yy rape apy py ae.

<sup>4</sup> Ixupe ma aipo'ere: “Enhearõ kuaa ke, enhemondyi eme guive huvixa Rezim poxya gui, Síria pygua kuery ha'e huvixa Peca gui. Ekyje eme, ndepy'a py ndekuerai rei eme guive. Ha'e kuery ma moko'i tata'y hataxi oupy va'e rami rive ikuai.

<sup>5</sup> Anhetê Síria kuery jogueroayvu okuapy va'ekue ndere ojapo vai aguã re, Efraim kuery ha'e Remalias ra'y reve. Ha'e vy aipoe'i okuapy:

<sup>6</sup> 'Nhapu'ã ke Judá yvy re. Nhamondyipa vy nhandepo'aka 'rã nhanemba'erã. Ha'e vy ha'e kuery mbyte nhamo'i 'rã Tabeal ra'y huvixaverã', he'i va'ekue.

<sup>7</sup> Ha'e rã SENHOR Nhanderuete ma aipoe'i: ‘Ha'e nunga ndoikoi 'rã.

<sup>8</sup> MBA'eta Síria re pete'i anho oĩ tetã yvateve va'e. Ha'e va'e ma Damasco. Ha'e Damasco tetã py opena va'e ma Rezim anho. Ha'e rami ae avi Efraim kuery voi sessenta e cinco ma'etýa py omombaa 'rã, ha'e rire nda'ikuavei 'rã.

\* <sup>6:10</sup> Mateus 13.14-15, Marcos 4.12, Lucas 8.10, João 12.40, Atos 28.26-27    \* <sup>7:2</sup> Judá yvy re Síria kuery opu'ã okuapy Israel kuery rupive. Judá pygua ruvixave ma Acaz oĩ tamo'i Davi oïague py.

<sup>9</sup> Efraim re tetā yvateve va'e ma Samaria, ha'e Samaria py opena va'e ma Remalias ra'y anho. Ha'e gui peē kuery voi ndapejeroviai ri vy ndapekuavei avi 'rā', he'i."

### *Emanuel rekorā re ijayvu ma voiague*

<sup>10</sup> Ha'e Acaz pe SENHOR oayvu omombe'u ukave ju:

<sup>11</sup> — Ejerure SENHOR nderuete pe hexa pyrā reikuua aguā, yvy katy ooa katy e'ŷ vy yvatea katy ojekuaa aguā teī — he'i.

<sup>12</sup> Ha'e ramo Acaz aipoe'i:

— Xee ma ndajerurei 'rā, ndaeko a'āi 'rā SENHOR — he'i.

<sup>13</sup> Ha'e ramo profeta aipoe'i:

— Davi ramymino kuery, pendu ha'vy! Ha'e rami avi nda'evei teri teve avakue pemomboriaua? Ha'e gui aŷ ma Nhanderuete eteve voi pemomboriauxe.

<sup>14</sup> Ha'e rami teī SENHOR ae 'rā oexa uka peikuua aguā. Ha'e gui peteī kunhataī oguereko'i 'rā kyrī va'e, oikuavā'i 'rā opī'a'i. Ha'e vy omboery 'rā Emanuel.<sup>†</sup>

<sup>15</sup> Ha'e va'e ma teko vai 'rāgue py iporā va'e ojapo kuaa jave kamby kekue ha'e ei rive 'rā ho'u oikovy.

<sup>16</sup> Mba'eta ava'i mba'emo vai 'rāgue py iporā va'e ojapo kuaa e'ŷ mbove voi mokoī huvixave gui rekyje reia va'e yvy ombovaipa'a 'rā — he'i.

### *Jerusalém re mba'emo vai ou aguā re ijayvuague*

<sup>17</sup> — Ha'e gui ma nde'áry SENHOR ombou 'rā ha'e rami ete aguā ára, ndevyguia kuery ha'e nderu ro pygua kuery áry guive. Ha'e rami aguā ma Judá gui Efraim kuery ojepe'aague guive ndoikoi teri va'e ramigua. Assíria pygua huvixave rupi vy ombou 'rā.

<sup>18</sup> Mba'eta ha'e va'e ára SENHOR otuvy nhe'ē 'rā mberu yakā mombyry Egito re ikuai va'e pe, ha'e eiru Assíria yvy re ikuai va'e pe.

<sup>19</sup> Ha'e rā ha'e va'e kuery oupa 'rā, oguejypa 'rā yvyty pa'ū ha'e javi re, itakua rupi, juu'y ha'e mymba oy'uaty ha'e javi re.

<sup>20</sup> — Ha'e va'e ára ma SENHOR onhopīmba 'rā peneakā, ha'e hi'a penderete regua. Omboipa avi 'rā penerendyva. Tendyva ayaa rami oiporu 'rā yakā rovai guigua, Assíria pygua huvixa ae.

<sup>21</sup> Ha'e va'e ára ma avakue oguerekove 'rā peteī'i vaka ta'y'i ramo va'e ha'e mokoī vexa'i anho.

<sup>22</sup> Ha'e rami teī ha'e va'e ae ikamby porā ete 'rā ha'e kuery ho'u aguā kamby kekue. Oyvy re okuave va'e ha'e javi ho'u 'rā kamby kekue ha'e ei.

<sup>23</sup> Ha'e va'e ára ma mil uva rembypy mil hatā'i va'e prata guigua re hepy 'rā va'ekue ikuaiague py opyta 'rā juu ha'e juu rakuaendy tyrā rive.

<sup>24</sup> Ha'e py ma hu'y ha'e guyrapa reve 'rāe avakue oike, mba'eta juu'y ha'e juu rakuaendy ojao'i 'rā yvy ha'e javi.

<sup>25</sup> Ha'e gui yvyty avakue enxada reve oo jepiaty ha'e javi rupi ndoovei ma 'rā, juu ha'e juu rakuaendy gui okyje vy. Ha'e py ma vaka anho 'rā ha'eve okaru aguā, ha'e vexa'i opyrōmba aguā.

## 8

### *Assíria pygua kuery ou aguā re ijayvuague*

<sup>1</sup> SENHOR aipoe'i avi xevy:

— Ejopy peteī kuaxia tuvixa va'e, ha'e embopara porā'i pavē oexa kuaa aguā rami: "Eipe'a pojava ndejeupe guarā, ejopy ratā!" he'ia va'e.

<sup>2</sup> Ha'e nunga kuaa ukaarā ojeroviapy va'e xee ajou sacerdote Urias ha'e Jeberequias ra'y Zacarias.

<sup>†</sup> **7:14** Tery Emanuel ma "Nhandereve Senhor oī" 'ea, Mateus 1.23 py oīa rami avi.

<sup>3</sup> Ha'e ramo xee ma profeta kunhaa py aa. Ha'e ramo oguereko'i kyrī va'e, ha'e vy oikuavā'i ava'i. Ha'e ramo SENHOR aipoe'i xevy:

— Heryrā emoī “Eipe'a pojava ndejeupe guarā, ejopy ratā” 'ea.

<sup>4</sup> Mba'eta ava'i “Xeru” e'ŷ vy “Xexy” he'i kuua e'ŷ mbove voi Damasco ha'e Samaria tetā pygua kuery mba'e rei-rei ogueraapaa 'rā Assíria pygua huvixave renonde guarā — he'i.

<sup>5</sup> Ha'e gui SENHOR ijayuve tema. Ha'e vy aipoe'i xevy:

<sup>6</sup> — Kova'e kuery ma Siloé yakā oxyry mbeguei'i va'e ndojou porāi ramo, ha'e Rezim renonde ha'e Remalias ra'y oua gui okyje ete okuapy rire,

<sup>7</sup> ha'e rami rire ha'e kuery áry SENHOR ombou 'rā Eufrates yakā guigua, imbaraete ha'e oxyry atā va'e. Ha'e va'e ma Assíria pygua huvixave ae ou va'erā, mba'emo porā oguereko va'e ha'e javi reve. Ha'e nunga yy ma omonyē 'rā yakā rugua ha'e javi rupi, ha'e oē-oē rei 'rā ovv yvy'ā rupi peve.

<sup>8</sup> Ha'e vy Judá yvy re ae oo vy omonyēmba 'rā. Ha'e va'e rupi oaxa vy ijaju'y peve 'rā ovaẽ. Mba'eta xondaro kuery jova-jovai gui oua rupi ojao'ipa 'rā ndeyvy, Emanuel.

### *SENHOR anho nharō aguā re ijayvuague*

<sup>9</sup> Peē yvy regua kuery, pendepoxypa teĩ penembo'ipaa 'rā. Yvy mombyrygua re pendekuai va'e, pendu ke. Peiko katu teĩ penembo'ipaa 'rā, peiko katu teĩ penembo'ipaa 'rā.

<sup>10</sup> Pejogueroayvu 'rā mba'emo pejapo aguā re, ha'e rami teĩ nda'evei 'rā pejapo ete aguā. Mba'emo pejapo uka teĩ ha'e nungakue ndojapoai 'rā, Nhanderuete orereve oiko ramo.

<sup>11</sup> Mba'eta xevy SENHOR ijayvu opo imbaraete va'e xere omoī reve. Ha'e vy ijayvu kova'e kuery ikuia rupi xee aiko e'ŷ aguā. Ha'e vy aipoe'i:

<sup>12</sup> — Amongue pe kova'e kuery “Opu'ā nhemimba ra'e” he'i okuapy teĩ peē kuery ma nda'evei “Opu'ā nhemimba” peje aguā. Pekyje eme ha'e kuery mba'emo okyjea va'e gui, nda'evei ha'e nunga pe “Nhanemondyipaarā” peje aguā.

<sup>13</sup> Ha'e rami 'rāgue py SENHOR ixondaro reta va'e pe ae “Iky'a e'ŷ va'e” peje. Henonde pejererokyje, ixugui anho peryryi.\*

<sup>14</sup> Ha'e ramo ha'e oī 'rā penhemī atyrā. Ha'e rā Israel kuery mokoīve regua pe ma oī 'rā ita onhepyxanga aguā ha'e kuery ho'apa aguā. Jerusalém py ikuai va'e pe oī 'rā nhuā xā ha'e nhuā.\*

<sup>15</sup> Ha'e kuery regua heta 'rā onhepyxanga vy ho'a. Ha'e rami vy ha'e kuery opēmba 'rā, ojurapaa ha'e ombo'apaa 'rā.

<sup>16</sup> Ha'e nunga rupi emoī porā aikuua uka va'ekue, emboty lei xeremimbo'e kuery py'a re — he'i.

<sup>17</sup> Ha'e rami rā xee arō 'rā SENHOR, Jacó ramymino kuery gui ngova omo'ā ranhe teĩ. Hexe ae xee ama'ena 'rā.

<sup>18</sup> Apy ma aī, xera'y kuery SENHOR xevy ome'ē va'ekue reve.\* Ore kuery ma hexa pyrā, ha'e Israel kuery mondyipaarā. Ha'e rami aguā SENHOR ixondaro reta va'e Sião yvyty re oī va'e oremoingo. \*

<sup>19</sup> Ha'e gui pendevy aipo'ea 'rā: “Peporandu ke omanogue mboayvua kuery pe, ha'e imba'ekuaa va'e, ojapukai rei ha'e ijayvu mbegue rei va'e kuery pe”, 'ea 'rā. Ha'e rami teĩ nhande kuery nda'u nanhaporandui 'rā Nhanderuete pe? Jaikove va'e nhanheptyvō uka 'rā nda'u omano va'ekue pe?

<sup>20</sup> Ha'e rami 'rāgue py lei ha'e ayvu oikuua uka pyre re tapeo! Mba'eta ha'e va'e ayvu rupi e'ŷ ri ha'e kuery ijayvu vy ndoexai 'rā hexakā va'e.

<sup>21</sup> Ha'e rami vy yvy ha'e javi rupi ha'e kuery oguata rei vy ojexavai ha'e okaruxe reve 'rā ikuai. Ha'e gui okaruxe vy ipoxypa vy ijayvu vai 'rā nguvixave ha'e Nguuete re, yvate katy oma'ē vy.

---

\* **8:13** 1 Pedro 3.14-15    \* **8:14** Romanos 9.32-33, 1 Pedro 2.8    \* **8:18** “Xera'y kuery SENHOR xevy ome'ē va'ekue”  
Isaías he'ia ma guemimbo'e kuery re ijayvu vy.    \* **8:18** Hebreus 2.13

<sup>22</sup> Ha'e gui yvy re ju oma'ẽ vy oexa 'rã jexavai, pytũ vaikue ha'e kuaray'ã reia mboriau anho. Ha'e gui ma omombopaa 'rã pytũ vaikuea katy.

## 9

### *Huvixa Nhomongo porãa oiko ha'e ipo'aka aguã re ijayvuague*

<sup>1</sup> Ha'e rami teĩ yvy re ojexavai va'ekue ma pytũ vaikuea rupi riae e'ŷ 'rã ikuai. Mba'eta jypy'i ma Nhanderuete omo'yvy'i raka'e Zebulom ha'e Naftali yvy re ikuai va'e. Ha'e rã opaa py ma ojapo 'rã Galiléia judeu e'ŷ va'e kuery rekaoa ojou porãmbaa aguã rami, tape ye'ẽ rembe rupi oaxa va'e guive Jordão yakã kyvõ rami peve.

<sup>2</sup> Ha'e kuery pytũ reia rupi ikuai va'ekue ri oexa okuapy peteĩ hendy guaxu va'e. Hendy va'e ma hexakãmba kuaray'ã reia manoa rupi ikuai va'ekue ikuiaia rupi.\*

<sup>3</sup> Ha'e kuery va'e regua ndee remboetave ju vy rembovy'ave ete. Ha'e ramo nerendonde ov'y'a 'rã okuapy, mba'emo omono'õa rupi ov'y'aa rami, ha'e rami e'ŷ vy mba'emo porã ojou va'ekue omboja'o-ja'oa py rami.

<sup>4</sup> Mba'eta ndee remopẽ ma canga ha'e kuery aju'y rupi ipoyi oiny va'ekue, yvyra ikupe rupi oinupãaty, ha'e herereko axya po'akaa, midianita kuery remomba jave guare rami.

<sup>5</sup> Mba'eta oapypaa 'rã xondaro kuery xapatu ikuai va'e, ijao tuguy py iky'apa rei va'ekue voi okaipa 'rã mba'emo pirekue rami rive.

<sup>6</sup> Mba'eta peteĩ ava'i oiko nhandevy, peteĩ gua'y ome'ẽa nhandevy. Ha'e gui ijaxi'y áry ma oĩ 'rã ipo'aka aguã. Hery ma po rami 'rã 'ea va'e: Nhomongeta Porã va'e, Nhanderuete Imbaraete va'e, Nhanderu Imarã e'ŷ va'e, ha'e Huvixa Nhomongo porãa.

<sup>7</sup> Ipo'akave 'rã ov'y, mby'a porã voi opa e'ŷ va'e 'rã ou. Tenda Davi openaaty áry 'rã oĩ vy opena 'rã oikovy Davi ipo'akaague re ae. Ha'e rami vy anhetẽ va'e ha'e teko porã rupi vy ipo'akaa oĩ atã 'rã, aŷ guive raka'e rã peve guarã. SENHOR ixondaro reta va'e ae 'rã ojapo, nhanderayvu etea rupi.

### *Israel kuery ikuai axy aguã re ijayvuague*

<sup>8</sup> Ha'e gui ma peteĩ ayvu SENHOR ombou Jacó kuery rovai guarã, ha'e ramo Israel kuery re ou.

<sup>9</sup> Ha'e va'e ma heta va'e kuery ha'e javi oikuaapa 'rã okuapy, Efraim ha'e Samaria pygua kuery, ojejou porã ha'e opy'a py onhemboyvate reia rupi aipoe'i va'e kuery:

<sup>10</sup> "Yvy jykue ombojo'a pyre yvy py oitypaa teĩ oo jajapo ju 'rã ita ombope pyre gui. Yvyra sicômoro oitypaa ramo yary guigua py ju 'rã jajapo oïague py", he'i va'e kuery.

<sup>11</sup> Ha'e rami teĩ ha'e kuery rovai guarã SENHOR omopu'ã 'rã Rezim rovaigua kuery, omboupa 'rã hovaigua kuery.\*

<sup>12</sup> Kuaray oua katy gui ou 'rã Síria pygua kuery, ha'e kuaray oikea katy gui ma filisteu kuery ou 'rã. Ha'e ijuru jai vy omokõmba 'rã Israel kuery. Ha'e rami ete teĩ SENHOR poxya ndoaxai 'rã, opo oupi ae tema 'rã.

<sup>13</sup> Ha'e rami ete teĩ kova'e kuery ndojeviyi okuapy Imoingo axyare pe, ndoekai okuapy SENHOR ixondaro reta va'e.

<sup>14</sup> Ha'e nunga rupi peteĩ ára pyve SENHOR ojayapa 'rã Israel regua akã ha'e huguai, pindo ha'e nhuû'y.

<sup>15</sup> Inhakã ma nhomongeta va'ety kuery omboetevepy, ha'e rã huguai ma profeta ramigua kuery ijapu va'e.

<sup>16</sup> Mba'eta kova'e kuery rerekaoa ma nhombotavypa rei va'e meme. Ha'e ramo ha'e kuery oguereko va'e kuery voi omombaa.

<sup>17</sup> Ha'e nunga rupi SENHOR ndoguerovy'avei ha'e kuery va'e regua ipyaukue, nomboaxyvei 'rã guive tyre'ŷ neĩ imeve'ŷ va'e kuery, mba'eta ha'e kuery ha'e javi heko vai

\* <sup>9:2</sup> Mateus 4:15-16 \* <sup>9:11</sup> "Rezim rovaigua kuery" he'ia ma Israel kuery re Assíria pygua kuery opu'ã aguã re ijayvu vy.

va'e ikuai, joapo vai ha'e ijayvu vaikue-ikue va'e meme. Ha'e rami ete teĩ ndoaxai 'rã ipoxya, opo oupi teri 'rã imoiny.

<sup>18</sup> Mba'eta teko vai omomba 'rã heravy tata rami, omokanhya 'rã juu'y ha'e juu rakuaendy. Yvyra ka'aguy re ikuai va'e okaipa 'rã, hataxí arai huũ vaikue rami opu'ã ový reve.

<sup>19</sup> SENHOR ixondaro reta va'e ipoxy ramo yvy opyta tapyí rami, ha'e rã heta va'e kuery ma nhuũ oapy pyrã rami ikuai. Avave rei nomboaxyvei ma 'rã guyvy kuery.

<sup>20</sup> Mba'emo oiporu kuaa re oĩ va'e omokõmba ma teĩ okaruxeve 'rã. Oiporu kuaa e'ŷa re oĩ va'e ju omokõmba teĩ nonhandui 'rã. Ha'e vy peteĩ-teĩ ho'u 'rã oirũ kuery ro'okue.

<sup>21</sup> Manassés kuery omokõ 'rã Efraim kuery, ha'e rã Efraim regua ma Manassés regua ju 'rã omokõ. Ha'e gui ha'e kuery mokoïve ma opu'ã 'rã Judá kuery re. Ha'e rami ete teĩ ndoaxai 'rã SENHOR poxya, opo oupi teri 'rã imoiny.

## 10

<sup>1</sup> Ha'e kuery va'e regua ojapo 'rã lei ha'eve e'ŷa ramigua nhombojexavai aguã rive. Nda'evei ete 'rã ha'e kuery pe,

<sup>2</sup> mba'eta opa marã oguereko 'rã iporiaukue'i, neĩ noipytyvõ ukai 'rã xevyguia kuery ojexavai rei va'e, oipe'apa 'rã imeve'ŷ va'e kuery gui, imondapa 'rã tyre'ŷ kuery gui.

<sup>3</sup> Ha'e rami rire teĩ ma mba'e nda'u peẽ kuery pejapo 'rã nhombopagaa ára py jexavaia mombyry gui ou jave py? Mava'e pe tu pejapukai 'rã penderepy aguã? Mamo tu ha'eve 'rã mba'emo pejou porã va'e penhomí aguã?

<sup>4</sup> Po rami anho 'rã ha'eve pendekuai aguã: pejero'a 'rã ombo'a pyre mbyte, e'ŷ vy pe'a 'rã omanogue mbyte. Ha'e rami ete teĩ SENHOR poxya ndoaxai 'rã, opo oupi teri 'rã imoiny.

### Assíria pygua kuery rovai ijayvuague

<sup>5</sup> — Nda'evei ete 'rã Assíria pygua kuery pe, xepoxya rupi nhombopaga aguã amondouka va'ekue ri. Mba'eta yvyra ha'e kuery opo py oguereko va'e ma xepoxya aixa uka aguã ae.

<sup>6</sup> Xee amondouka ma heko vai va'e ha'e xembopoxya kuery rovai. Ha'e vy aipoa'e ha'e kuery gui imba'e rei-rei oipe'apa vy opyrõmba aguã, tape rupi yapo oĩ va'e re rami.

<sup>7</sup> Ha'e rami teĩ ha'e kuery ma ha'e rami e'ŷ oexa'ã, opy'a py ha'e rami e'ŷ oikuua. Ha'e rami 'rãgue py opy'a re omoï heta regua omokanhymba ha'e omomba ete aguã.

<sup>8</sup> Mba'eta aipoe'i: "Xevyguia yvatekueve nda'u huvixave meme e'ŷ teve?

<sup>9</sup> Calno tetã namombai ri ty'y Carquemis rami? Hamate tetã Arpade rami e'ŷ ri ty'y opyta? Ha'e Samaria tetã Damasco rami e'ŷ ri ty'y opyta?

<sup>10</sup> Xepo'aka ma tetã mba'emo ra'angaa oĩa re, Jerusalém ha'e Samaria py ikuai va'e gui ipo'akave va'ekue teĩ.

<sup>11</sup> Ha'e gui Samaria ha'e mba'emo ra'angaa hexe ikuai va'e re ambovaipaague rami ae ju ndajapoi 'rã teve Jerusalém ha'e hexe ikuai va'e re?" he'i va'ekue.

<sup>12</sup> Ha'e nunga rupi Sião yvyty ha'e Jerusalém re SENHOR oipotaa rami nhombopagapa ma vy Assíria pygua huvixa ju 'rã ombopaga, opy'a py onhemboyvateve ha'e ojejou porã reiague re.

<sup>13</sup> Mba'eta aipoe'i rire: "Ha'e nunga ha'e javi xee ae po'akaa py ajapo, xe'arandu ha'e aikuapa va'e vy. Ha'e rami vy amarka pyau amboae regua kuery yvy, ha'e aipe'apa imba'e rei-rei va'ekue ha'e javi. Ipy'a guaxuve va'e rami aipe'a huvixa kuery henda py oñague gui.

<sup>14</sup> Aipe'apa amboae regua kuery mba'emo oguereko va'ekue. Guyra'i rupi'a oeja pyre pe'aa rami xee voi xemba'erã ajopy yvy jave rupi. Mava'eve nomboguyi opepo, neĩ naxê'i guive", he'i va'ekue.

<sup>15</sup> Ha'e rami avi haxa nda'u ha'eve ri ava iporua gui ojejou porâve aguã? Yvyra kyxña nda'u ha'eve ri oiporu oiny va'e gui oikuaave aguã? Ha'e rami va'e rire ma yvyra rovi ha'e ae porua oinupã 'râgue, ha'e yvyra rive opu'ã 'râgue ava yvyra guigua e'ý va'e re.

<sup>16</sup> Ha'e nunga rupi SENHOR ixondaro reta va'e ombou 'râ mba'eaxy ha'e va'e regua avakue mbaraetea mombaarã, ikyrakueve meme tei. Ha'e kuery mba'emo ojou porâ va'e omoendy 'râ, tata rami oapypa va'erâ py.

<sup>17</sup> Mba'eta Israel kuery moexakãa ma omomba 'râ tata rami, peteñ ára pyve Nhanderuete Iky'a e'ý va'e oapypa 'râ juu'y ha'e juu rakuaendy Assíria yvy re ikuai va'e.

<sup>18</sup> Oapypa 'râ ha'e va'e regua ka'aguy ha'e mba'ety oiko porâve va'e tei. Omomba 'râ ha'e kuery nhe'ê ha'e hete, imba'eaxy vy ikangyve ovv va'e rami optyta, kyrigue tei oipapa vy ombopara kuaa 'râ mbovy paa.

<sup>20</sup> Ha'e va'e ára Israel kuery Jacó ramymino okuave va'e ma ijukaare kuery re ndojeroviae ma 'râ. Ha'e rami 'râgue py ojerovia 'râ okuapy SENHOR Israel kuery ruete Iky'a e'ý va'e re anho.

<sup>21</sup> Ha'e rami vy Jacó ramymino kuery rembyrekue ojevy ju 'râ Nhanderuete imbaraete va'e pe.

<sup>22</sup> Mba'eta peñ Israel kuery, peñ kuery aÿ peve ita ku'i ye'ë rembe rupigua rami pendereta teri tei amongue ete'i 'râ ojevy. Mba'eta oiko 'râe nhomombaarã teko porâ rupigua, yy tyguaxua rami 'râ ou.

<sup>23</sup> Mba'eta SENHOR ixondaro reta va'e nhomomba aguã re onhembopy'a ma voiague rami omoingo 'râ ha'e va'e yvy ha'e javi rupi.\*

<sup>24</sup> Ha'e nunga rupi ae SENHOR ixondaro reta va'e aipoe'i:

— Xevyguá kuery Sião re penderekoa va'e, pekyje eme Assíria pygua kuery gui yvyra rovi py penemoingo axy tei, ha'e Egito pygua kuery pendererekoague rami yvyra py pendeavyky rei tei.

<sup>25</sup> Mba'eta are'i e'ý re opa 'râ peñ kuery rombopagaa. Ha'e rami vy ha'e kuery ju amomba 'râ xepoxya rupi.

<sup>26</sup> Ha'e rami vy SENHOR ixondaro reta va'e oinupã 'râ midianita kuery re ojukapaague rami, itaova Orebe py hi'aï va'e katy'i. Ye'ë áry rupi oupi ju 'râ opopoka Egito yvy re ojapoague rami.\*

<sup>27</sup> Ha'e va'e ára pendekupe áry gui aipe'a 'râ ipoyi va'e, pendeaju'y gui aipe'a 'râ canga omoñ mbyre. Ha'e nunga ma opê 'râ pendekyraa gui rive — he'i.

<sup>28</sup> Ha'e gui ma Assíria pygua kuery ou 'râ Aiate py, ha'e oaxa 'râ Migrom rupi. Ha'e gui Micmás py ovaë vy omboguejy 'râ ovoyi.

<sup>29</sup> Ha'e gui oaxa 'râ oje'oivy yvyty pa'ü rupi, ha'e oke 'râ okuapy Geba py. Ha'e ramo Ramá pygua kuery oryryipa rei 'râ okyje vy, ha'e Saul rekoague Gibeá pygua kuery ojavapa 'râ.

<sup>30</sup> Galim re penderekoa va'e, pejapukai atâ ke! Laís pygua kuery, pendu ke! Nda'evei ete 'râ peñ Anatote pygua kuery pe!

<sup>31</sup> Ha'e gui Madmena re hekoa va'e kuery voi ojavapa 'râ oje'oivy, ha'e Gebim pygua kuery voi ojavapa 'râ oo jepe aguã.

<sup>32</sup> Ha'e va'e árave Assíria pygua kuery optytu'u 'râ okuapy Nobe rekoaa py. Ha'e gui ma opo oupi 'râ, Sião yvyty memby kuery Jerusalém py ikuai va'e omongyje aguã.

<sup>33</sup> Ha'e rami tei SENHOR ixondaro reta va'e ojaya 'râ yvyra rakâ ikuai va'e. Ha'e rami vy oitypa 'râ yvyra yvatekueve, ha'e omo'yvy'imbâ 'râ onhembovateve va'ekue.

<sup>34</sup> Haxa py oitypa 'râ yvyra ka'aguy regua. Ha'e ramo Líbano re yvyra ikuai va'e ho'apa 'râ imbaraete va'e oake'oa rami.

\* <sup>10:23</sup> Romanos 9.27-28 \* <sup>10:26</sup> Orebe py Nhanderuete omomba raka'e midianita ruvixa kuery (Juízes 7.25). Ha'e gui Egito py ma Egito pygua kuery ju omomba ye'ë mbyte py (Êxodo 14.26-28).

## 11

### *Jessé ramymino opena porã va'e rekorã re ijayvuague*

<sup>1</sup> Ha'e gui Jessé rembypykue gui oiko 'rã peteĩ hoky, hapytakue rapo gui oiko 'rã henhoĩ pyau jevy va'e.

<sup>2</sup> Ha'e va'e re ma oĩ 'rã SENHOR Nhe'ẽ. Ha'e va'e Nhe'ẽ ma imo'aranduarã ha'e oikuaa ukapa va'e, imongetaa ha'e imbopo'akaarã, ha'e gui SENHOR kuaa ukaa ha'e henonde ojererokyje aguã re imbo'ea.

<sup>3</sup> Ha'e ramo ov'y'a reve 'rã oiko SENHOR renonde ojererokyjea rupi. Mba'emo oexa vy rive e'ŷ 'rã oikuaa pota, ha'e mba'emo oendu vy rive e'ŷ nhomongeta 'rã.

<sup>4</sup> Ha'e rami 'rãgue py teko porã rupi ete 'rã oikuaa pota iporiaukue'i re, ha'evea rami oepy 'rã iporiaukue'i yvy re ikuai va'e. Oayvu py rive 'rã ombopaga yvy re ikuai va'e yvyra rovi py rami, optyuẽ py rive ojuka 'rã heko vai va'e.

<sup>5</sup> Ku'akuua rami ojee omoĩ 'rã teko porã, ha'e joguerekoo rã ojeroviapy oikoa rupi.

<sup>6</sup> Ha'e rami ramo vexa'i kuery reve aguara'i ikuai porã 'rã, ha'e xivi ipara va'e teĩ kavara ra'y'i reve optyu'u 'rã okuapy joa py. Reõ reve vaka ra'y ikuai 'rã peteĩ rami, kyr'i'i va'e rive oguerekopa 'rã.

<sup>7</sup> Urso reve vaka kuery okaru 'rã joa py, ha'e ta'y'i kuery optyu'u 'rã joa py. Reõ voi nhuũ re okaru 'rã vaka rami.

<sup>8</sup> Kyrigue okambu'i va'e teĩ onhemboarai 'rã mboi ituia rupi, ha'e nokambuvei va'e ikua py opo'ẽ teĩ mba'eve ndoikoi 'rã.

<sup>9</sup> Mba'eta xevyguia yvyty iky'a e'ŷ va'e py ma ndoikovei ma 'rã mba'emo vai neĩ joapo vai va'e, mba'eta yvy jave re tynyẽ 'rã SENHOR oikuua va'e, ye'ẽ renda ha'e javi rupi yy tynyẽa rami avi.

<sup>10</sup> Ha'e va'e ára ma Jessé rapokue gui oiko 'rã peteĩ henhoĩ pyau jevy va'e. Ha'e va'e ma opu'ã 'rã bandeira oupi imo'amy mbyre rami, oña katy ha'e javi regua kuery oexa vy oo aguã. Guexakãa re ae 'rã heko.\*

### *Israel kuery moexakãa oiko pyau va'erã re ijayvuague*

<sup>11</sup> Ha'e va'e ára SENHOR opo omokuave'ẽ 'rã oguerupa ju aguã ojeupeguia kuery rembyrekue oejaague gui: Assíria yvy gui, Egito, Patros, Etiópia, Elão, Babilônia, Hamate ha'e ye'ẽ yvýry rupi yvy ikuai va'e gui.

<sup>12</sup> Peteĩ bandeira oupi 'rã yvy regua mbyte rupi ikuai va'e oexa aguã. Ha'e rami vy omboatypa 'rã Israel kuery yvy mboae re ikuaiague gui, ha'e Judá kuery oguerupa ju 'rã yvy apy jovaive irundy henda katy omoãa ague gui.

<sup>13</sup> Ha'e ramo Efraim kuery noenduvei ma 'rã ndajoayvua, ha'e Judá kuery rovaigua kuery ha'e javi 'rã ndojouavei. Efraim kuery ndoayvu e'ŷvei 'rã Judá regua, ha'e Judá kuery voi nomoingo axyvei 'rã Efraim regua.

<sup>14</sup> Ha'e rami 'rãgue py jogueraa 'rã kuaray oikea katy filisteu kuery rovai opu'ã aguã. Jojavi 'rã ipo'aka kuaray oua katy ikuai va'e re. Ha'e vy ojopy 'rã amboae kuery oguerekoo va'ekue'-ekue ha'e javi. Edom ha'e Moabe pygua kuery re voi ipo'aka 'rã. Amom pygua kuery voi ikuai 'rã hembiguairã.

<sup>15</sup> SENHOR omboypa 'rã ye'ẽ rakã Egito yvýry oĩ va'ekue. Yvytu atã ombou vy ipo'aka 'rã Eufrates yakã re voi. Ha'e rami vy omboja'o 'rã sete yakã raperã, ipy regua va'e teĩ oaxa aguã ha'eve va'e.

<sup>16</sup> Ha'e ixupeguia kuery Assíria re optya teri va'ekue pe oĩ 'rã peteĩ tape porã ojevy aguã, Egito yvy gui Israel kuery oẽmba jave guare rami.

## 12

### *Israel kuery oguerupa jevy rã oporaei okuapy aguã re ijayvuague*

---

\* **11:10** Romanos 15.12

<sup>1</sup> Ha'e va'e ára ma aipopeje 'rā: “ SENHOR, xee rogueroporaei, mba'eta xevy ndepoxy va'ekue ri aŷ oaxapa ma ndepoxyague. Ha'e gui aŷ ma xembovy'a ju ma.

<sup>2</sup> Nhanderuete ma xereraa jepea oiko. Hexe ajerovia 'rā akyje e'ŷ re, mba'eta SENHOR Nhanderuete xemombaraetea ha'e aroporaei va'e. Ha'e gui aŷ ma xereraa jepea ju oiko.

<sup>3</sup> Peju nhandereraa jepea re javy'a, yvu gui yy porā nhanoē vy javy'aa rami avi”, peje 'rā.

<sup>4</sup> Ha'e va'e ára aipo pejeve ju 'rā: “Peroporaei ke SENHOR! Pejapukai hery rupi, ha'e javi regua pe peikuua uka hembiapokue. Hery yvate ete ramo penhogueroma'endu'a.

<sup>5</sup> Peroporaei ke SENHOR, mba'emo porā ete ojapo rire. Yvy jave rupi toikuaapa ha'e nunga!

<sup>6</sup> Ha'e peẽ Sião pygua kuery voi pevy'a peporaei reve, mba'eta Israel kuery ruete iky'a e'ŷ va'e penembyte oĩ va'e yvate ete ramo”, peje.

## 13

### Babilônia pygua kuery rovai ijayvuague

<sup>1</sup> Kova'e ma Isaías mba'emo oexa reve Babilônia pygua kuery rovai ayvu oendu va'ekue.

<sup>2</sup> “Eupi peteĩ bandeira yvyty ikatu rei va'e áry, ha'e ejapukai xondaro kuery pe ou aguã. Enoĩ ndepo py ha'e kuery oike aguã nhomoingo axya kuery retā rokẽ rupi.

<sup>3</sup> Mba'eta po rami xeayvu xevygua kuery pe, aenoĩmba xevygua xondaro kuery ipy'a guaxukueve, ha'e kuery nhombopaga aguã xepoxya rupi. Ha'e kuery ma xepo'akaa re anho 'rā ov'y'a.

<sup>4</sup> Ha'e ramo yvyty áry onhendu 'rā heta va'e ojapukaia! Heta regua joe opu'ã aguã py nhomboaty okuapy. SENHOR ixondaro reta va'e oexa pota 'rā oxondaro kuery joe opu'ã aguã katy oo ta va'e re.

<sup>5</sup> “Mba'eta ha'e kuery ou 'rā yvy mombyrygua gui, yva apy guive 'rā ou SENHOR guembiporu opoxya oexa uka va'e reve, omomba aguã ha'e va'e yvy ha'e javi.

<sup>6</sup> Pejae'o ke, mba'eta ovaẽ ta ma SENHOR ára. Ipo'akapa va'e ombou 'rā nhomombaarrā.

<sup>7</sup> Ha'e ramo pavẽ jyva na'imbaraetevei 'rā, avakue nda'ipy'a guaxuveipa 'rā.

<sup>8</sup> Onhemondyipa rei 'rā okuapy, ha'e kuery oendu 'rā haxy ogueroaxẽ peve. Kunha imemby raxy va'e rami 'rā ojepoka-poka. Joe-joe oma'ẽ 'rā okyje rei reve, ha'e hova pytãmba rei 'rā oximba vy.

<sup>9</sup> “Ema'ẽ, ovaẽ ma ouvy SENHOR ára. Ha'e va'e ma nanhomboaxyvei aguã ára, poxya rexu ukaarã, yvy omomba ha'e ojejavypa va'ekue omokanhymba aguã yvy gui.

<sup>10</sup> Jaxy-tata ijaty va'e yva re ikuai va'e naendyvei 'rā. Kuaray oẽ ouvy vyve pytãmba 'rā, jaxy voi naexakãvei 'rā.\*

<sup>11</sup> Xee ambopaga 'rā yvy re ikuai va'e heko vaiague re, ha'e opa marã rei ikuai va'e ojejavague re. Amomba 'rā ojejou porā rei va'e kuery onhembovatea, ha'e amo'yvyimba 'rā ojerovia rei va'e.

<sup>12</sup> Ajapo 'rā avakue ouro porãguevee gui ndaetaive aguã rami, ouro ete Ofir regua gui.

<sup>13</sup> Ajapo 'rā yva oryryipa aguã rami, ha'e yvy voi oryryi ete vy guenda gui ojepe'a aguã rami, SENHOR ixondaro reta va'e poxya gui, nhombopagapa ete aguã ára ovaẽ 'rā.

<sup>14</sup> Ha'e kuery peteĩ-teĩ onha 'rā oje'oivy guaxu ijukaarã gui onha va'e rami, ha'e vexa'i kuery ija e'ŷ va'e rami. Peteĩ-teĩ ojevy 'rā guetarã kuery rekooa katy, ojava 'rā oje'oivy oyvy katy ae.

<sup>15</sup> Ha'e gui ojou pyre-pyre ma oixyvõmbaa 'rā, ojopy pyre ma ojukapaa 'rā kyxé py.

<sup>16</sup> Ha'e kuery oexaa py ta'y kuery omou'ũmbaa 'rā. Hoo gui oipe'apaa 'rā, ha'e ta'yxy kuery voi oguero'aa 'rā.

\* **13:10** Mateus 24.29, Marcos 13.24-25

<sup>17</sup> “Mba'eta Babilônia pygua kuery rovai xee ambou 'rã Média pygua kuery. Ha'e va'e kuery ma prata re nda'evei rei va'e'ŷ, neĩ ouro re voi ndoikuaa potai va'e.

<sup>18</sup> Ha'e kuery guapa py ojukapa 'rã kunumigue. Neĩ kyr̄gue'i itui ramo'i va'e voi nomboaxyi 'rã, kyr̄i' i va'e oexa vy ndojuka e'ŷi 'rã.

<sup>19</sup> Babilônia ma yvy regua ojou porâve ha'e caldeu kuery oguerovy'ave va'ekue ri Nhanderuete omomba rã opyta 'rã Sodoma ha'e Gomorra rami.

<sup>20</sup> Ha'e py ma avave ndopytaavei ma 'rã, noňavei 'rã ha'e py. Neĩ árabe voi ha'e py ndoupivei 'rã ngoorã, ha'e vexa'i re opena va'e ndogueraavei 'rã guymba kuery ha'e py omongaru aguã.

<sup>21</sup> Ha'e rami 'rãgue py vixo ka'aguy regua rive 'rã ikuai ha'e py, ha'e oogue ikuai va'e rupi urukure'a anho 'rã ikuai. Guyra nhandu rive avi 'rã heko ha'e py. Ha'e kavara ka'aguy regua opo-opo 'rã okuapy ha'e rupi.

<sup>22</sup> Oo tuvixakueve rendakue rupi ma aguara'i ha'e jagua-tuvy nhe'ẽ tema onhe'ẽ 'rã. Ha'e nunga oiko aguã ovaẽ ma ouvy, oa'angaague ára ndarei 'rã.”

## 14

### *Babilônia tetã opa rã oguerovy'a okuapy aguã re ijayvua*

<sup>1</sup> Mba'eta teĩgue ju SENHOR omboaxy 'rã Jacó kuery, oiporavo nho 'rã Israel kuery. Ha'e rami vy ogueru ju 'rã ijyvy re ae. Ha'e kuery reve amboae yvy regua kuery voi ikuai 'rã, onhemoirũ 'rã okuapy Jacó kuery re.

<sup>2</sup> Heta regua ma Israel kuery ogueraa vy oguerojevy 'rã ijyvy re. Ha'e gui SENHOR pegua yvy re ma Israel kuery ju oguerek 'rã yvy regua kuery guembiguairã. Yma rupi hexe hembiguai ha'e ipo'aka va'ekue re ha'e kuery ju 'rã ipo'aka.

<sup>3</sup> Mba'eta ovaẽ 'rã Nhanderuete ou vy pemba'eapo poyiague gui penemombytu'u aguã ára, pejexavai reiague ha'e ipoyi va'e rupi amboae regua escravo rami pemba'eapoague gui.

<sup>4</sup> Ha'e va'e ára pevy'a rei 'rã Babilônia pygua huvixave re. Ha'e vy aipopeje 'rã:

“Pexa ke nhanemoingo axyare okanhy ra'ea! Opa ra'e nhandererek 'axy reiague!

<sup>5</sup> Mba'eta SENHOR omopẽ ma heko vai va'e yvyra, omomba ma nhanemoingo axya po'akaa.

<sup>6</sup> Ha'e kuery ma ipoxy vy amboae kuery oguerek 'axy va'ekue, jojukaa gui ndopytu'ui va'ekue guive. Opoxya rupi ipo'aka va'ekue yvy regua kuery re, opytu'u e'ŷ re oakykue monha jepi va'ekue.

<sup>7</sup> Ha'e gui aŷ ma yvy jave rupi opytu'u, mby'a porã oĩ. Ha'e rami vy pavẽ oporaei okuapy ov'y'a vy.

<sup>8</sup> Yvyra cipreste ha'e yary Líbano re ikuai va'e voi ov'y'a rei 'rã ndere. Ha'e vy aipoe'i 'rã okuapy: ‘Ndee ndereitya ma rire avave rei ndouavei orerake'oarã’, he'i okuapy.

<sup>9</sup> “Pe yvy guy py manogue yvy re ma omyimba okuapy revaẽ taa oendu vy. Ha'e rami vy oẽmba 'rã jogueravy nerovaexi aguã. Nemovaẽ aguã opu'ãmba 'rã jogueruvy yvatekueve ha'e huvixave yvy re ikuai va'ekue 'âgue. Yvy regua ruvixa ikuai va'ekue opu'ã 'rã okuapy guenda py oĩa gui.

<sup>10</sup> Ha'e vy ha'e kuery ha'e javi ijayvu vy aipoe'i 'rã ndevy: ‘Ndee voi nanembaraetevei teve ra'e! Aŷ ndee voi ore rami ae ma repyta!’ he'i 'rã okuapy.

<sup>11</sup> Yvykua py ndereitya ma rejou porâveague gui, ha'e ixã reta va'e pu renduxe vaiague gui. Ha'e gui ndeguýry nderuparã oĩ va'e ma mberu ra'y anho, ha'e hevo'i anho 'rã neovâarã ikuai.

<sup>12</sup> “Jaxy-tata ko'ẽ mbija rami reĩ va'ekue ri re'a ma yvate reiague gui. Yvy re ju ndereitya, yvy regua kuery re ndepo'aka va'ekue ri.

**13** Ndepy'a py ndee aipo're va'ekue: 'Xee ajeupi 'rã yva re peve. Ha'e vy aguapy'rã apena aguã Nhanderuete pegua jaxy-tata áryve. Xepo'aka 'rã ainy yvyty nhomboaty aty oĩ va'e áry, pe kuaray ijapu'a'ia apy katy.

**14** Ajeupi 'rã arai yvateve va'e áry, ha'e vy Nhanderuete yvateve va'e rami ete 'rã aiko', 're va'ekue.

**15** Ha'e rami teñ omanogue ikuiaia py nemomboa 'rã, yvykua pukuvea py.

**16** "Ha'e ramo omanogue nderexa vy onhemondyipa rei reve oma'ẽ ngatu 'rã ndere. Ha'e vy ndere ijayvu vy aipoe'i 'rã okuapy: 'Kova'e ava e'ŷ teve yvy omboryryipa va'ekue, ha'e yvy jave re ikuai va'e oryryi aguã rami ojapo va'ekue?

**17** Ha'e e'ŷ ri nda'u yvy jave re ojapo raka'e tekao ve'ŷ opyta aguã rami, ha'e tetã mbovaipaare? Ha'e gui guembiguairã ogueraa va'ekue voi ndopoi raka'e ngoo katy ojevy aguã', he'i 'rã okuapy.

**18** Ha'e gui amboae yvy regua huvixave ikuai va'ekue onhono porãa raka'e omboetea rupi, peteñ-teñ huparã va'ekue py ae.

**19** Ha'e rã ndee ma nembojeguarua vy nenhono porãa aguã ojo'o pyre gui mombyry nemomboa va'ekue yvyra rakã ojaya pyre rami rive. Ha'e gui nde'áry omomboa 'rã kyxe py ojuka pyre retekue, yvykua py ita reve opyrõa rire.

**20** Ndee ma amboae kuery rami e'ŷ nanenhono porãai va'ekue, mba'eta yvy remomba ha'e ndevygua kuery ae rejukapa rire. Tove heko vai va'e ramymino kuery rery re ta'ima'endu'aave eme.

**21** Ta'y kuery voi tojukapaa tuu kuery heko vaiague re, ha'e kuery ju opu'ã vy yvy re ipo'aka e'ŷ aguã, ha'e yvy omonyë e'ŷ aguã ha'e kuery retã", peje 'rã pekuapy.

**22** Ha'e gui SENHOR ixondaro reta va'e aipoe'i:

— Xee apu'ã 'rã ha'e kuery re, Babilônia yvy gui ambogue 'rã hery. Amomba 'rã okuave va'ekue, ta'y kuery ha'e hamymino kuery ha'e javi guive.

**23** Ha'e gui hetã ikuaiague ajapo 'rã yapo opyta aguã rami, kuĩ'i rive ikuai aguã. Ha'e xee aipei 'rã yty peia nhomokanhymbaa va'e py – he'i SENHOR ixondaro reta va'e.

### *Assíria pygua kuery rovai ijayvuague*

**24** SENHOR ixondaro reta va'e oura vy aipoe'i:

— Xee anhembopy'aa oiko 'rãe. Xee ajapo ukaa rami ae 'rã ojapoa.

**25** Ha'e rami vy amomba 'rã Assíria pygua kuery xeyvy re ou va'ekue. Xevygua yvyty re apyrõ 'rã, Israel kuery re ha'e kuery po'akaague opa aguã, ha'e kuery voyi aipe'a aguã ijaxi'y áry gui.

**26** Ha'e rami ae xee anhembopy'a yvy jave re oiko aguã. Kova'e ma xepo yvy regua ha'e javi áry rupi amokuave'ẽ va'e – he'i.

**27** Mba'eta SENHOR ixondaro reta va'e ha'e rami aguã rami onhembopy'a ma rire mava'e tu omboaxa rive ta? Opo omokuave'ẽ imoiny rire mava'e tu ojapo 'rã omboapu'a ju aguã rami?

### *Filístia pygua kuery rovai ijayvuague*

**28** Ha'e gui huvixave Acaz omanoa ma'etŷ re ma povae ayvu aendu omombe'ua rã.

**29** — Peẽ filisteu kuery, nda'evei pevy'a aguã penenupãaty yvyra opěague pendu vy rive. Mba'eta mboi omano va'ekue gui oiko 'rã amboae nda'eveive va'e, hupi'a gui ma oiko 'rã mboi opo va'e.

**30** Ha'e gui iporiaukue'i ra'y jypygua kuery re ma apena porã 'rã, oipotapa rei'i va'e kuery ma opytu'u porã 'rã okuapy. Ha'e rã pendera'y kuery re ma ajapo 'rã karuai gui omanomba aguã rami, ha'e pekuave va'ekue voi penemombaa 'rã.

**31** Ndee tetã rokẽ, neraxẽ ke. Ha'e ndee tetã, ejapukai. Peẽ filisteu kuery ha'e javi, peryryipa ke. Mba'eta kuaray ijapu'a'ia katy gui ou 'rã hataxã rami, ha'e jipoj hyxy va'e gui ojepe'a va'erã – he'i.

<sup>32</sup> Marã rami nda'u pembovai 'rã judeu e'ŷ va'e regua ayvu mombe'ua pe oporandu rã? Aipopeje 'rã: "SENHOR Sião tetã ojapo rire ha'e py ae 'rã ixupegua kuery ojexavai rei'i va'e ojou onhemi aguã", peje 'rã.

## 15

### *Moabe pygua kuery rovai ijayvuague*

<sup>1</sup> Po rami ma Moabe pygua kuery rovai ayvu ou va'ekue.

"Anhetẽ ete peteĩ pytũ pyve omombaa 'rã Ar tetã Moabe yvy re oĩ va'e. Quir tetã voi peteĩ pytũ pyve avi 'rã omombaa.

<sup>2</sup> Ha'e gui Dibom tetã gui ha'e pygua kuery oẽ 'rã jogueravy ta'angaa pegua templo katy ojae'o aguã. Moabe pygua kuery ojae'o 'rã okuapy Nebo ha'e Medeba yvyty áry. Ha'e kuery ha'e javi 'rã oakã onhopi ha'e guendyva ojayapa reve oo.

<sup>3</sup> Ao vaikue voxá guigua py onhemonde reve 'rã ikuai tape rupi. Ngoo áry ha'e tetã mbyte rupi haxẽ 'rã okuapy ojae'o vaipa reve.

<sup>4</sup> Hesbom ha'e Eleale pygua kuery voi ojapukai avi 'rã. Jaza tetã peve 'rã onhendu. Ha'e nunga rupi Moabe pygua xondaro kuery voi ojapukai 'rã okuapy, ipy'a tytypa 'rã", he'i.

<sup>5</sup> Xepy'a py xee voi ajapukai Moabe re nda'evei vy. Mba'eta ha'e kuery ojava 'rã Zoar tetã "Vaka ra'y mboapy ma'etý va'e" 'ea va'e peve. Ojae'o reve oẽ 'rã jogueravy Luíte yvyty re, ha'e tape Horonaim katy oo va'e rupi ojapukai nhendu 'rã nda'evei ete vy.

<sup>6</sup> Mba'eta Ninrim re yy oĩ va'e typa ma. Ipirupa ma nhuũ mymba rembi'urã, ha'e jai rogue nda'ipovei.

<sup>7</sup> Ha'e gui ha'e kuery mba'emo omoĩ porã va'ekue, ojou ma vyomboyrupa va'ekue ha'e kuery ae ju 'rã ogueroaxa Salgueiros yakã rovai re.

<sup>8</sup> Mba'eta ha'e kuery raxẽa ma Moabe yvy ha'e javi rupi onhendu. Eglaim peve ete onhendu 'rã ojapukaia, ha'e Beer-Elim peve 'rã ojae'oa onhendu.

<sup>9</sup> Mba'eta Dimom yvy rupi yakã ikuai va'e ma tynyemba tuguy. Ha'e rami teĩ amoĩve ju 'rã Dimom mbopagaarã. Ha'e ramo Moabe gui oo jepe va'ekue ha'e yvy re okuave va'e ha'e javi re ou 'rã reõ.

## 16

<sup>1</sup> Peraa uka ke vexa'i yvy re ipo'aka va'e peguarã. Sela gui peraa uka tekaoa e'ŷa rupi Sião yvyty áry oĩ va'e pe.

<sup>2</sup> Moabe memby kuery ma guyra'i haity gui omomboa rã onhemondyi ovvy va'e rami ikuai Arnom yakã rugua rupi. Ha'e vy aipoe'i okuapy:

<sup>3</sup> "Oremongeta ke, peikuua pota orekuuaia re, penhemoĩ oremokuaray'ãarã, kuaray mbyte javegua rami. Oreyvy gui orepe'apaa ramo orenhomni ke, orerexa uka eme guive ronhemi va'ekue.

<sup>4</sup> Tove penembyte ta'ikuai Moabe yvy gui oipe'a pyre, pendea py tonhemi imombaxeia kuery gui", he'i okuapy. Ha'e gui ava ojerovia rei va'e okanhy ma ramo, nhomombaare noĩvei ha'e nhombojexavai va'ety yvy gui oo ju ma ramo

<sup>5</sup> tenda openaaty py oĩ 'rã peteĩ teko porã rupi opena va'e. Davi ro openaaty py oĩ 'rã oikuua potaa py ojeroviap. Ha'e ma opena 'rã teko porã rupi, oikuua pota voi 'rã joe.

<sup>6</sup> Nhande kuery ma nhaendu Moabe pygua kuery onhemboyvate rei okuapya. Ha'e kuery ma amboae kuery gui onhemboyvateve ojejou porã rei vy, ipoxy rei guive. Ha'e rami teĩ ha'e kuery onhemboyvatea opa rive 'rã.

<sup>7</sup> "Ha'e nunga rupi Moabe pygua kuery haxẽmba 'rã peteĩ-teĩ Moabe re ipy'a vai vy. Mby'a vai rupi ipoaẽ 'rã okuapy, Quir-Haresete py uva pirukue ikuai jave ho'u va'ekue re ima'endu'a vy.

<sup>8</sup> Mba'eta Hesbom re mba'ety oĩ va'e ipirupa ma. Ha'e amboae regua huvixa kuery omomba uva rakā iporāve va'e Sibma pygua, Jazer ha'e tekao e'ŷa peve oo va'ekue, ha'e gui oove vy ye'ẽ rovai re oaxa va'ekue.

<sup>9</sup> Ha'e nunga rupi xee voi ajae'o 'rā Jazer tetā pygua kuery Sibma re uvaty oĩ va'ekue re ojae'o okuapya rami. Peē Hesbom ha'e Eleale pygua, romoakŷ 'rā xerexay py. Mba'eta pendea py kuaray puku py uva'a oiko va'e oumbiri va'e kuery ov'y'a okuapy 'rāgue py onhendu nderovaigua kuery opu'ã vy ojapukaia.

<sup>10</sup> Opa ma vy'aa ha'e poraeia uvaty rupi onhendu va'ekue. Uvaty rupi avave rei ndoporaeiavei ma, ndovy'a nhenduavei ma. Neĩ uva'a ma voi noumbiriavei oumbiriaty py. Mba'eta xee ajapo 'rā oumbiri va'e kuery ov'y'aa nonhenduvei aguã rami.

<sup>11</sup> Ha'e nunga rupi xee voi Moabe re nda'evei vy xekuraxõ oryryi ixã reta va'e rami, Quir-Heres re voi xepy'a vai.

<sup>12</sup> Pexa 'rā Moabe pygua kuery yvyty ikuai va'e áry rupiombojeroviaa py ikane'õmba rive rã, mba'eta ta'angaa oñaty py oike vy onhembo'e rã noenduai", he'i.

<sup>13</sup> Ha'e va'e ayvu ma SENHOR yma ma voi Moabe rovai omombe'u uka va'ekue.

<sup>14</sup> Ha'e rã aŷ ma ijayvu jevy vy aipoe'i:

— Mboapy ma'etŷa py omba'epo va'e oipapaa rami Moabe pygua kuery mba'emo oguerovy'a va'ekue ndojou porâavei 'rā, tetā pygua kuery mbovy e'ŷ va'ekue ha'e javi guive. Ha'e gui oo jepe va'ekue ma mboapy'i ete 'rā ikuai, ndaetavei neĩ na'imbaraetevei 'rā — he'i.

## 17

### Damasco ha'e Efraim pygua kuery rovai ijayvuague

<sup>1</sup> Kova'e ma Damasco pygua kuery rovai ayvu ou va'ekue.

“Damasco tetā optya 'rā tekao ve'ŷ ha'e ombovaipa pyre rive.

<sup>2</sup> Aroer regua tetā ikuai va'e voi oejapaa 'rā. Ha'e py ma vexa'i kuery rive 'rā onheno, imondiyarã ndoikoi rã.

<sup>3</sup> Efraim py voi okanhymba 'rā oo ikorapa va'ekue, Damasco pygua huvixa openaa ha'e javi rupi avi. Ha'e gui Assíria pygua kuery okuave va'e ndaetavei 'rā, Israel kuery mba'emo oguerovy'ave va'ekue rami avi", he'i SENHOR ixondaro reta va'e.

<sup>4</sup> “Ha'e va'e ára ma Jacó kuery mba'emo oguerovy'a va'ekue okanhya 'rā, ikyraa voi okanhymba 'rā.

<sup>5</sup> Ha'e kuery oipe'apaa 'rā, trigo mono'õa kuery hi'ygue ojopy vy hi'a omono'õa rami avi, Refaim yakã rugua rupi trigo omono'õague rami.

<sup>6</sup> Ha'e rami teĩ amongue henda py ete'i optya 'rā hembyrekue'i, azeitona omono'õa ma rire rami: mokoõ, mboapy azeitona optya 'rā hovapy yvatevea re, irundy, e'ŷ vy peteĩ nhiruña hakã mbyte pyve oĩ va'e yvyra hi'a va'e re optya va'e rami", he'i SENHOR Israel kuery ruete.

<sup>7</sup> “Ha'e va'e ára ma avakue oma'ẽ ju 'rā Imoingoare re, ima'endu'a 'rā Israel kuery Ruete iky'a e'ŷ va'e re anho.

<sup>8</sup> Ha'e kuery noma'ẽvei 'rā altar opo py ae ojapo va'ekue re, ndoexaxevei 'rā okuã py ojapo va'ekue, mba'emo ra'angaa, neĩ altar mba'emo heakuã porã va'e oapayaty.

<sup>9</sup> Ha'e va'e ára ma Israel kuery gui ha'e kuery oejapa 'rā guetā ikorapa va'ekue. Ha'e ramo optya 'rā peteĩ oguy ka'aguy re e'ŷ vy yvyty áry oeja pyre rami. Oĩ 'rā ombovaipa pyre rive,

<sup>10</sup> mba'eta Nhanderuete pendereraa jepea gui penderexaraipa vy napenema'endu'avei Itaova imbaraete va'e penhemiaty re. Ha'e nunga rupi mba'ety porâve va'erã pejapo vy mba'emo renhoõ mombyry guigua penhotŷ teĩ,

<sup>11</sup> penhotŷ árave yvate aguã, ha'e ko'ẽ ju ipotypa aguã rami pejapo teĩ hi'a opa rive 'rā jexavaia ára py, teko axy okueraa ve'ŷ va'e oiko jave.

<sup>12</sup> “Nda'evei etea gui yvy regua kuery hevovo rei 'rā, onhendu 'rā ye'ẽ onhendua rami, yvy regua kuery opoxya rupi onhendu 'rā ye'ẽ revovo rami.

<sup>13</sup> Ha'e kuery hevovo rei 'rā yai revovo rami, teĩ ha'e kuery pe Nhanderuete ijayvu ete 'rā, ha'e ramo ojavapa 'rā mombyry. Okanhymba 'rā mba'emo pirekue yvy'ã re oĩ va'e yvytu ogueroveve heravya rami, ha'e yvy rataxī yvytu hatā va'e oupi heravy va'e rami.

<sup>14</sup> Mba'eta pytū ovaẽ ramo ha'e kuery oendu 'rā okyjea. Ha'e gui ko'ẽ e'ŷ mbove ndokuavei 'rā. Ha'e rami ae 'rā oiko nhandegui mba'emo oipe'apa ha'e imonda va'e kuery re.”

## 18

### *Etiópia pygua kuery rovai ijayvuague*

<sup>1</sup> Nda'evei ete 'rā Etiópia yvy pe. Ha'e va'e yvy ma yakā rovai re vixo ipopo nhe'ẽ rei va'e ikuia.

<sup>2</sup> Ha'e pygua kuery omondouka 'rā oayvu mombe'uarā ye'ẽ rovai katy peve, jai rogue guigua kanoã py. Ha'e ramo ha'e kuery pe aipo're: “Peẽ ayvu mombe'ua kuery, tapeo pojava ke peteĩ regua yvateve ha'e ipire vera rei va'e ikuia py. Ha'e va'e kuery gui okyje 'rā mombyrygua kuery ha'e'i rupi ikuai va'e. Ha'e kuery ma ipo'akapa ha'e nhomou'ũmba va'e, ijyvýry rupi yakā oxyrya va'e.

<sup>3</sup> Ha'e gui peẽ kuery yvy jave re pendekuai va'e, yvy re pendekoa va'e ha'e javi, pexa 'rā yvyty áry bandeira oupia rā, ha'e pendu 'rā mimby guaxu omonhe'ea rā.

<sup>4</sup> Mba'eta SENHOR xevy aipoe'i: ‘Xee ma xerenda aña gui ama'ẽ vy akyrirī 'rā ainy ranhe kuaray hexakāa rupi haku nonhendu reia rami, ha'e mba'emo omono'õa ára kuaray aku-a rupi arai yxapy revegua oaxa oinya rami’, he'i.

<sup>5</sup> Mba'eta uva omono'õa e'ŷ mbove ipoty ho'a vy hi'a ijaju ma ramo, ha'e gui mae ma imoatyrõa kyxe py ojaya 'rā hakā mombyry-mbyry oo va'e.

<sup>6</sup> Ha'e rami ae avi ha'e kuery oejapaa 'rā yvyty rupi guyra ha'e mymba yvy regua ho'upa aguã rive. Ha'e kuery retekue re uruvu okaru 'rā okuapy kuaray aku-a pukukue re, ha'e gui yro'ya pukukue re ma mymba yvy regua ju okaru 'rā hetekue re.

<sup>7</sup> “Ha'e va'e jave py ma SENHOR ixondaro reta va'e pe peteĩ regua yvateve ha'e ipire overa rei va'e ogueraa 'rā mba'emo ome'ẽ va'erā. Ha'e kuery gui ma mombyry ha'e'i rupi ikuai va'e okyjea, ipo'akapa ha'e nhomou'ũmba va'e, ijyvýry rupi yakā oxyrya va'e. Ha'e kuery voi mba'emo ogueraa avi 'rā SENHOR ixondaro reta va'e pe, Sião yvyty re hery oĩa py ae”, he'i.

## 19

### *Egitópygua kuery rovai ijayvuague*

<sup>1</sup> Kova'e ayvu ma Egito pygua kuery rovai ou va'ekue.

“Ma'ẽ, SENHOR ma arai inhakuã va'e áry rupi oiko vy ou oiny Egito yvy katy. Ha'e ramo henonde Egito re mba'emo ra'angaa ikuai va'e oryryipa 'rā. Egito pygua kuery voi nda'ipy'a guaxuveipa 'rā.

<sup>2</sup> Ha'e gui xee ajapo 'rā Egito pygua kuery joe-joe opu'ã aguã rami, peteĩ-teĩ opu'ã 'rā okuapy guyvy ha'e oirũ re. Peteti-teĩ tetā pygua kuery opu'ã 'rā amboae tetā pygua re, ha'e peteĩ-teĩ yvy guigua amboae yvy guigua re 'rā opu'ã.

<sup>3</sup> Ha'e ramo Egito pygua kuery nda'ipy'a guaxuvei 'rā onhe'ẽ py, nhomongetaa amboaxa rivepa ramo. Ha'e ramo ha'e kuery oporandu 'rā mba'emo ra'angaa pe, imba'ekuua va'e, omanogue mboayvua ha'e imba'evyky va'e pe.

<sup>4</sup> Ha'e gui Egito pygua kuery amboaxa 'rā peteĩ huvixa nhomboaxy e'ŷ va'e po py, huvixave nda'evei ete va'e ha'e kuery re opena poyi va'erā pe”, he'i SENHOR ixondaro reta va'e.

<sup>5</sup> “Ha'e gui ma yy noïvei rā Nilo yakā typa 'rā, yakā ikuai va'e typa avi 'rā.

<sup>6</sup> Yy rape ikuai va'e heakuā vaikue rei 'rā, ha'e Nilo py yakā'i ho'a va'e voi typave ovy 'rā opa peve. Ha'e ramo takua ha'e jai rogue ipirupa 'rā.

<sup>7</sup> Ha'e gui Nilo yakā yvýry rupi nhuū ikuai va'e ipirupa 'rā, ha'e py yakā'i ho'a va'e rembe rupi, ha'e ijyvýry rupi mba'emo onhoty mbyre ha'e javi. Yvytu ogueraapa ramo okanhymba 'rā.

<sup>8</sup> Ha'e nunga rupi pira mbo'aa rupi ikuai va'ekue ipoaē 'rā okuapy, ipytuē atā 'rā. Yy py pinda ha'e pira mbo'aa omombo va'e ikuerai rei rive 'rā okuapy.

<sup>9</sup> Ha'e gui ajukue perirī'i apoa kuery ojexavai 'rā, mandyju gui ajukue apoa kuery voi.

<sup>10</sup> Yvatekueve ikangypa 'rā, hembiguai kuery voi iporiaupa 'rā okuapy.

<sup>11</sup> "Anhetē ete ae Zoā tetā pygua yvatekueve nai'aranduvei. Faraó monogetaaty kuery hi'arandukueve teī ha'eve'ŷ rami rei omongoeta 'rā. Mba'exa tu peē kuery Faraó pe aipopeje ta: 'Xee ma hi'arandu va'e ra'y, yma ete huvixave oiko va'ekue ramymino aiko', peje ta?

<sup>12</sup> Mamo tu ha'vy oĩ nemongetaa kuery hi'arandu va'ekue? Tove ha'vy ndevy ha'e kuery tomombe'u, toikuaa ukapa Egito pygua kuery rovai SENHOR ixondaro reta va'e ojapo taa.

<sup>13</sup> Zoā pygua huvixa kuery ma hi'arandu e'ŷ va'e ikuai, Mēnfis pygua yvatekueve teī ojekorepa okuapy. Mba'eta Egito regua joguerekao kuery ojapo ojeupegua kuery ojavy aguā rami.

<sup>14</sup> Mba'eta ha'e kuery py'a re SENHOR omoĩ na'inhakā porāvei aguā. Ha'e ramo ha'e kuery ju ojapo Egito pygua kuery ha'eve'ŷa rami ikuai aguā mba'emo ojapoa ha'e javi py, oka'u va'e ha'e ae ombojevyague py rive ho'a va'e rami avi.

<sup>15</sup> Ha'e rami vy nda'evei 'rā Egito py mba'eve avave rei ojapoa aguā, inhakā neĩ huguai, pindo neĩ jai rogue voi.\*

<sup>16</sup> "Ha'e va'e ára ma Egito pygua kuery kunha rami rive 'rā ikangypa. Ngyje gui oryryipa 'rā okuapy SENHOR ixondaro reta va'e gui, ha'e kuery rovai opo oupi reve omongyje ramo.

<sup>17</sup> Ha'e gui Egito pygua kuery onhemondyipa 'rā okuapy, Judá yvy gui mba'emo omombe'ua rā oendu vy rive. Ha'e nunga re oikuua pota vy nda'evei ete 'rā, okyje reia oendu 'rā SENHOR ixondaro reta va'e ha'e kuery rovai ojapo taa oikuua vy.

<sup>18</sup> "Ha'e va'e ára ma oĩ avi 'rā peteĩ nhiruĩ tetā Egito yvy re, Canaã pygua ayvu py ijayvu ha'e SENHOR ixondaro reta va'e rery rupi oura va'e kuery ikuaria.† Ha'e va'e regua peteĩ ma Tetā Kuaray hery va'erā.

<sup>19</sup> "Ha'e va'e ára ma SENHOR peguarā ojapoa 'rā peteĩ altar Egito yvy mbyte py, yvy ja'oa rupi voi ita omopu'ā 'rā imo'amy SENHOR pe.

<sup>20</sup> Ha'e va'e nunga oĩ 'rā Egito yvy regua kuery SENHOR ixondaro reta va'e re ima'endu'a aguā. Ha'e ramo SENHOR pe ha'e kuery ojapukai 'rā omoingo axy reia rā, ha'e ramo ombou 'rā heraa jepearā ha'e hepyarā.

<sup>21</sup> Ha'e rami py SENHOR ojekuaa uka 'rā Egito pygua kuery pe. Ha'e ramo ha'e va'e ára Egito pygua kuery oikuua nho vy omboete 'rā okuapy, ixupe ogueru 'rā guive mymba ha'e mba'emo aju ome'ẽ va'erā. Ha'e rami vy SENHOR pe anho 'rā onhemboayvu, ijayvuague ojapo ete 'rā guive.

<sup>22</sup> SENHOR ombojexavai 'rā Egito pygua kuery, ha'e gui ombojexavai rire omoingo porā ju 'rā, mba'eta SENHOR pe ha'e kuery ojeko rerova 'rā. Ha'e ramo ha'e kuery ojapukaia re oikuua pota vy omonguerapa 'rā.

<sup>23</sup> "Ha'e va'e ára oĩ 'rā peteĩ tape Egito yvy gui Assíria peve oo va'e. Ha'e va'e rupi ma Assíria pygua kuery ou 'rā Egito py, ha'e Egito pygua kuery ma Assíria katy 'rā oo. SENHOR pe Egito pygua kuery oporaei 'rā okuapy Assíria pygua kuery reve.

\* <sup>19:15</sup> "Inhakā ha'e pindo" he'ia ma Egito pygua kuery va'e regua yvatekueve re ijayvu vy, ha'e rā "Huguai ha'e jai rogue" he'ia ma yvyīgueve re (9.14-15). † <sup>19:18</sup> Canaã ma judeu kuery ikuaria.

**24** Ha'e va'e ára ma Israel kuery mboapya 'rã ikuai Egito ha'e Assíria pygua kuery reve. Yvy mbyte nhomoingo porãarã 'rã ikuai.

**25** Mba'eta SENHOR ixondaro reta va'e ogueroayvu porã vy aipoe'i 'rã ha'e kuery pe: 'Ima'endu'a porãmby ta'ikuai xevyguia Egito pygua kuery, Assíria pygua kuery xepo py amoingo va'ekue, ha'e Israel kuery xevy guarã aiporavo va'ekue', he'i 'rã."

## 20

### *Egito ha'e Etiópia pygua kuery escravo-rã heraapaa aguã re ijayvuague*

**1** Ha'e gui Assíria pygua huvixave Sargão ma Asdode tetã katy omondouka guembiguai Tartã, joe opu'ã vy oipe'a aguã.

**2** Ha'e va'e ma'etõa re ae SENHOR oayvu omombe'u uka Amoz ra'y Isaías pe. Ha'e vy aipoe'i:

— Tereo, ndeaxi'y áry gui emboi ajukue puku inhana rei va'e profeta pegua reiporu va'e. Emboi avi ndepy regua — he'i. Ha'e rami ojapo vy omboipa, ha'e ipy rei oikovy.\*

**3** Ha'e gui SENHOR aipoe'i:

— Guĩ rami xerembiguai Isaías mboapy ma'etõ re ipire rei ha'e ipy rei oikovyague rami avi oiko 'rã Egito ha'e Etiópia pygua kuery re, mba'eta ikuua ukaarã Isaías oiko.

**4** Mba'eta Assíria pygua huvixave ogueraapa 'rã Egito ha'e Etiópia pygua kuery escravoorã. Kunumigue ha'e tujakue'i voi oje'oi 'rã ipire rei, ipy rei ha'e ho'oa ojekuaa rei reve, Egito pygua kuery oximba aguã rami.

**5** Ha'e ramo Israel kuery ha'e nunga oexa vy onhemondyipa rei, oximba rei 'rã okuapy Etiópia pygua kuery re ojerovia rire, ha'e Egito pygua kuery pe voi "Ipo'akapave va'e" he'i rire.

**6** Ha'e va'e ára ha'e va'e yvy re hekoa va'e kuery aipoe'i 'rã okuapy: "Pexa, evoko rami ete va'e ty'y oiko nhande kuery nharõ jakuapy va'ekue re, mba'eta ha'e katy ae jajava Assíria pygua huvixa gui, ha'e kuery nhandereraa jepe aguã tei! Mba'exa 'rã'vy jaa jepe?" he'i 'rã okuapy.

## 21

### *Babilônia pygua kuery rovai ijayvuague*

**1** Kova'e ayvu ma ye'ẽ yvýry tekao e'ŷa oĩ va'e pygua kuery rovai ou va'ekue.\* Mba'eta kuaray puku-a katy gui yvytu vaikue ou va'e rami avi peteĩ ou 'rã vai tekao e'ŷa gui, nhomongyea kuery ikuiai gui ae.

**2** Ipoyi ete va'e xevy oexa ukaa po rami amombe'u va'erã: "Anhetẽ rupi e'ŷ ikuai va'e anhetẽ rupi e'ŷve 'rã ikuai, ha'e mba'emo mombaa rupi ikuai va'e nhomombave 'rã heravy. Elão pygua kuery, pepu'ã ke ha'e kuery re. Média pygua kuery, pejoko ke. Mba'eta xee amombytu'upa ma ha'e kuery ipoaõa", he'i.

**3** Ha'e nunga aendu vy xerye rupi haxy va'e anho aendu, xere tekoaxy ipo'aka ma imemby raxy va'e rami. Haxy rã ajepoka-poka vy naendu kuaavei rei, xekangya gui ndaexa kuaavei ma guive.

**4** Teko vai gui anhemondyi vy xepy'a tytypa. Pytû xee arõ tei xemongyjarã rive ju oĩ.

**5** Ha'e kuery omoi ma mesa, pyrõa rupi popõ mbyre guive omoi, okaru ha'e oy'u okuapy aguã. Yvatekueve, pepu'ã ke, perekó katu hu'y jokoa.

**6** Mba'eta po rami SENHOR ijayvu xevy: "Tereo, emoi peteĩ oikuaa pota va'erã, ha'e tomombe'u ou va'e-va'e oexa vy.

**7** Ha'e gui kavaju áryguia mokõ-mokoõ ou ramo, e'ŷ vy mburika, cameló áryguia kuery ou ramo oexa vy ke tojapyxaka porã", he'i.

\* **20:2** Isaías pe ijayvu escravo rami onhemonde aguã kaxõ py rive, ha'e kuery oikuaa aguã Egito ha'e Etiópia pygua kuery voi escravo ikuai 'rãa. \* **21:1** Apy ma Babilônia tetã rovai ijayvu.

<sup>8</sup> Ha'e ramo oikuaa pota va'e ojapukai 'rā guary rami: "SENHOR, torre oikuaa potaaty áry ára pukukue re ma apu'ã ha'amy, pytū mbukukue re guive ha'ã anhangarekoá rupi.

<sup>9</sup> Pee ma avakue ou reta, kavaju árygua kuery mokō-mokoí jogueru jekuaa", he'i. Ha'e gui teīgue ju ojapukai vy aipoe'i: "Oitya ma, oitypaa ma Babilônia tetā! Ha'e rami vy ha'e kuery ruete ra'angaa ha'ypa oupy yvy rupi", he'i.

<sup>10</sup> Ma'ẽ, xeretarã kuery! Ojyky ha'e oinupã mbyre penemoingoa, mba'emo moa'yīaty rupi oĩ va'e rami rive! Ha'e ramigua SENHOR ixondaro reta va'e Israel kuery ruete gui aendu va'ekue ae amombe'u pêvy.

### *Dumá pygua kuery rovai ijayvuague*

<sup>11</sup> Kova'e ma Dumá pygua kuery rovai ayvu ou va'ekue. Seir yvy gui ojapukaia xevy: "Nhoarõa, mbovy hora ma tu nhaĩ pytū py? Nhoarõa, mbovy hora ma tu?"

<sup>12</sup> Ha'e ramo nhoarõa ombovai 'rā: "Ovaẽ ma ouvy ko'ẽ, ha'e gui pytū ju 'rā ou. Reporanduvexe vy ke eporandu. Any vy ejevy, ha'e gui eju ju", he'i 'rā.

### *Arábia pygua kuery rovai ijayvuague*

<sup>13</sup> Kova'e ayvu ma Arábia pygua kuery rovai ou va'ekue.

"Peẽ Dedã pygua kuery peguataa rupi Arábia ka'aguy re peaxa 'rā pekuapy pytū."†

<sup>14</sup> Peraa ke yy oy'uxe va'e kuery pe. Ha'e peẽ Tema yvy re pendekoa va'e, peraa ke mbojape ojava oje'oivy va'e pe.

<sup>15</sup> Mba'eta ha'e kuery ma ojukapaa ta rā ojava, kyxe oekyia ha'e guyrapa omoatāa va'e gui ojava va'e, ha'e opoxya rupi ha'e kuery re opu'ã va'e gui."

<sup>16</sup> Mba'eta xevy pe SENHOR aipoe'iague rami: "Peteĩ ma'etŷ'a'i pyve omba'eapo va'e oipapaa rami okanhymba 'rā Qedar yvy re mba'emo porã oĩ va'ekue.

<sup>17</sup> Hapa va'e kuery opave ovy 'rā, Qedar pygua ipy'a guaxukueve voi mbovy'i ete 'rā ikuai", ha'e rami ae SENHOR Israel kuery Ruete ijayvu rire.

## 22

### *Jerusalém pygua kuery rovai ijayvuague*

<sup>1</sup> Kova'e ayvu ma yvyugua mba'emo oexa ukaaty peguarã ou va'ekue. Mba'e tu oĩ ndea pygua kuery ha'e javi ngoo áry ojeupi okuapy aguã?

<sup>2</sup> Ndee tetā renhendu porã riae va'ety, tetā oguerovy'a ha'e ovy'a rei va'e anho ikuaiaty reiko va'ekue ri! Ndea py manogue ikuai va'erã ma kyxe py ojuka pyre'ŷ, neĩ joe opu'ãa py e'ŷ ojukaa va'ekue.

<sup>3</sup> Ndea pygua yvatekueve ojavapa vyvoi teĩ ombo'apaa guyrapa e'ŷ re. Ndea pygua ovaexĩa ma guive rā ombo'apaa, mombyry ma oo teĩ.

<sup>4</sup> Ha'e nunga rupi aipoa'e: "Xere e'ŷ ke pema'ẽ, nda'evei etea rupi ajae'ove aguã. Nda'evei xembovy'a ju pekuapy aguã, xeretarã rajy kuery omombaa rire", ha'e.

<sup>5</sup> Mba'eta kova'e ára ma hevovo, joguero'apa rei ha'e ndoikuaai reipa aguã ára SENHOR ixondaro reta va'e oa'anga va'ekue. Yvyugua mba'emo oexa ukaaty py ha'e nunga oiko 'rā. Ha'e ramo tetā kora oitya rā ojapukaia onhendu 'rā yvyty áry peve.

<sup>6</sup> Mba'eta Elão pygua kuery hu'y ryru reve ou ma okuapy, karóxa ha'e kavaju árygua kuery reve. Quir pygua kuery voi hu'y jokoa moĩ porãaty oipe'a vy ojopypa heruvy.

<sup>7</sup> Ha'e rami py peneretã yvýry rupi yvyugua iporãve va'e-va'e tynyê 'rā oiny karóxa anho, penerokẽ py kavaju árygua kuery voi optyapa ma okuapy.

<sup>8</sup> Mba'eta oipe'apaa ma Judá pygua kuery repyarã va'ekue. Ha'e va'e ára penema'endu'a 'rā penembiporu oo yvyra gui ojapo pyre py pemoĩ porã va'ekue re.

<sup>9</sup> Ha'e gui Davi rekoague tetā kora pexa pota vy ipa'ũ pejou reta 'rā. Ha'e vy pemboyrú 'rā yy omboty pyre gui Peru va'e.\*

† 21:13 Dedã (versículo 13), Tema (versículo 14) ha'e Qedar (versículos 16-17) ma Arábia yvy regua meme. \* 22:9 Ha'e kuery omboyrú yy hovaigua kuery ou rā guarã, yy oata e'ŷ aguã.

<sup>10</sup> Peipapa 'rā Jerusalém tetā py oo ikuai va'e, ha'e va'e regua peity 'rā tetā kora pemoatyrō aguā.

<sup>11</sup> Ha'e gui mokoī kora oī va'e mbyte pemboty 'rā ygua ymague gui yy ou va'e. Ha'e rami teī napenema'endu'ai 'rā yva pygua re, ha'e nunga ha'e javi ombou aguā re onhembopy'a va'ekue teī.

<sup>12</sup> SENHOR ixondaro reta va'e ijayvu ha'e va'e ára pejae'o aguā re, ha'e pendepy'a vai vy peneakā penhopīmba, ha'e ajukue vaikue py penhemonde aguā re.

<sup>13</sup> Ha'e rami teī peē kuery pevy'a rei ha'e penderory rive anho teri pekuapy. Ha'e rami vy pejuka 'rā vaka, pejyryvi kyxī 'rā vexa'i. Pe'u 'rā xo'o, ha'e pey'u 'rā vinho. Ha'e rami vy aipopeje 'rā: "Jakaru ha'e jay'u, mba'eta ko'ẽ rā nhamanomba 'rā", peje pekuapy.\*

<sup>14</sup> Ha'e ramo xee aendua py SENHOR ixondaro reta va'e ijayvu. Ha'e vy aipoe'i: "Anhetē ae, guī rami ete pendeko vaia namboguei 'rā pemanomba peve", he'i SENHOR ixondaro reta va'e.

### *Sebna omo'yvyī'i aguā, ha'e rā Eliaquim ma ombovateve aguā re ijayvuague*

<sup>15</sup> Ha'e gui SENHOR ixondaro reta va'e aipoe'i:

— Epu'ā ke, tereo huvixave ro re opena va'ety Sebna oīa py. Ha'e rami vy eporandu ixupe:

<sup>16</sup> "Mba'e tu apy oī? Mava'e tu ndevy upe va'e ojapo uka, apy ndevyguia yvyra ruparā rejo'o aguā? Mba'eta apy yvyty áry rejapo ndevyguia yvyra ruparā, itaova re ndetui aguā.†

<sup>17</sup> Ha'e rami avi SENHOR nemokanhy 'rā peteī ava imbaraete vaipa va'e rami. Ndejopy ratā vy

<sup>18</sup> nenhovā 'rā peteī nheovāa py. Ha'e vy bola rami nembojere 'rā heravy peteī yvy tuvixaa katy. Ha'e py ma remano 'rā. Ha'e py ae avi opa 'rā karóxa'i rejou porāve va'ekue. Ha'e ramo ndekáuxa nderuvixa ro pygua kuery oxīmba 'rā okuapy.

<sup>19</sup> Xee romombo 'rā reīaty gui mombyry. Roipe'a 'rā mba'emo rejapo aguā rami reikoague gui.

<sup>20</sup> "Ha'e va'e ára ma aenoī 'rā xerembiguai Eliaquim, Hilquias ra'y.

<sup>21</sup> Ha'e va'e ju amonhemonde 'rā ao puku remoī va'ekue py, ha'e neku'axāgue py amoku'axā 'rā. Ipo py ju amboaxa 'rā ndepo'akaague. Ha'e ramo oiko 'rā Jerusalém ha'e Judá pygua kuery rurā.

<sup>22</sup> Ijaxi'y áry xee amoī 'rā Davi ro pe'aa. Ha'e rami rire amongue henda py oipe'a ramo avave rei nombotyavei 'rā. Ha'e gui omboty ri ramo avave avi ndoipe'aai ju 'rā.

<sup>23</sup> Amoī atā 'rā yvyra rakua peteī henda oī atā aguā py rami. Ha'e ramo opyta 'rā nguu ro pygua kuery omboetepa aguā rami.

<sup>24</sup> Hexe oī 'rā tuu ro py ikuai va'e ha'e javi re opena aguā, guetarā kuery, guamymino kuery, ha'e gui tembiporu kyrīgueve, hy'a'i ha'e hy'a kua ikuai va'e re voi", he'i.

<sup>25</sup> Ha'e gui SENHOR ixondaro reta va'e aipoe'i: "Ha'e va'e ára yvyra rakua oekyia ju 'rā oī atāague gui. Oipe'aa ramo ho'a 'rā. Ha'e ramo hexe oupi pyre voi ho'apa avi 'rā", he'i. Po rami ae SENHOR ijayvu, 're 'rā.

## 23

### *Tiro pygua kuery rovai ijayvuague*

<sup>1</sup> Kova'e ayvu ma Tiro pygua kuery rovai ou va'ekue.

"Kanoā guaxu Társis guigua py peguata va'e, pendepy'a vai ke, mba'eta peneretā ombovaipaa 'rā. Oo ikuai va'e noīvei 'rā, neī kanoā onhembojaaty ma voi.\* Chipre yvy gui ha'e nunga omombe'ua.

\* <sup>22:13</sup> 1 Coríntios 15.32   † <sup>22:16</sup> Ha'e va'e jave py ojejou porā rei va'e ha'e ae ruparā ojapo ma voi 'rā iporāvea py, hexe ima'endu'a porā aguā.   \* <sup>23:1</sup> Tiro tetā ma ye'ē yvýry oī kanoā guaxu onhembojaaty. Sidom voi ha'e kuery va'e regua retā.

<sup>2</sup> Ye'ẽ yvýry rupi penderekao va'e, pekyririmbä ke. Peẽ kuery ma Sidom tetä gui mba'emo pejogua vy perekopa rei, ye'ẽ rupi riae pendekuai vy.

<sup>3</sup> Paraguaxu rupi ndevy guarã oguerua va'ekue mba'emo ra'yigue yy rape Egito re ikuai va'e ha'e Nilo yakã yvýry omono'õ va'ekue. Tiro tetä, ndea py ma yvy regua kuery mba'emo vendeaty oĩ va'ekue.

<sup>4</sup> Peẽ Sidom pygua kuery ye'ẽ yvýry tetä ikorapaa py penderekao va'e, peximbä ke, mba'eta ye'ẽ ijayvu vy aipoe'i: 'Xee naendui kyrĩ va'e raxy, neĩ kyrĩ va'e voi naikuavãi. Xee nambotujai avakue'i, neĩ kunhataigue voi nambo'e'i', he'i.<sup>†</sup>

<sup>5</sup> Ha'e gui Tiro pygua kuery re oiko va'ekue Egito py omombe'ua ramo ha'e pygua kuery voi oendu 'rã nda'evei etea.

<sup>6</sup> Ye'ẽ yvýry rupi pendekoa va'e, tapeo ke Társis katy pejae'o reve.

<sup>7</sup> Ha'e rami ete ri ty'y oiko xapy'a peneretä pejou porã rei va'ekue re, yma pejapo va'ekue teĩ, ha'e mombyry katy ju peo pendekoa aguã?

<sup>8</sup> "Ha'e gui mava'e nda'u Tiro pygua kuery re ha'e rami ete oiko aguã re onhembopy'a va'ekue? Mba'eta ha'e va'e tetä pygua ma heta regua pe ovende va'ekue akã pyxña. Ha'e pygua mba'emo joguaa rupi ikuai va'e ma yvatekueve meme, ha'e mba'emo vendea rupi ikuai va'e yvy jave rupi omboetevepy ikuai va'ekue.

<sup>9</sup> SENHOR ixondaro reta va'e ae onhembopy'a ha'e rami, omomba aguã pavẽ gui ojejou porãve va'e, ha'e omo'yvy'imba aguã yvy jave rupi omboetevepy.

<sup>10</sup> Társis pygua memby kuery, peguata ke peovy peguataxæa katy rei pendeyvy rupi, Nilo yakã oxyrya rami. Ndóikovei 'rã pendejokoarã.

<sup>11</sup> Mba'eta ye'ẽ áry rupi SENHOR opo oupi vy omoingo axy tetä ikuai va'e. Ha'e rami vy ijayvu Canaã re voi oo ikorapa va'e ombovaipa aguã re.

<sup>12</sup> Ha'e vy aipoe'i: 'Aÿ ma Sidom pygua memby, nemoingo axya rire nerenduvei ma 'rã rejou porã reia. Epu'ã ke, tereo Chipre katy. Ha'e rami teĩ neĩ ha'e py voi nderejoui 'rã repytu'u aguã', he'i.

<sup>13</sup> "Peikuuaa pota ke caldeu kuery yvy re oiko va'ekue re. Ha'e pygua kuery ma kue'i peve peteĩ regua neĩ nda'ikuaivei va'ekue, ha'e ijyvy Assíria kuery ombovaipa va'ekue vixo tekao e'ÿa rupigua rive ikuai aguã. Ha'e rami teĩ ha'e kuery ae torre ojapo vy ombovaipa raka'e Tiro pygua huvinxave ro, ha'e vy omomba ete.

<sup>14</sup> Kanoã guaxu Társis guigua py peguata va'e, pejae'o ke, mba'eta omombaa ma penhemiaty ikorapa va'ekue.

<sup>15</sup> "Ha'e va'e ára rire ma Tiro tetä re hexaraia 'rã setenta ma'etÿ re, huvinxave oiko pukua ára peve. Ha'e gui setenta ma'etÿ opaa py ma Tiro re oiko ju 'rã kunha itavy rei va'e regua mboraei py oĩ va'e rami, po rami:

<sup>16</sup> 'Kunha itavy rei va'e hexaraipy, ejopy ju ke mba'epu ixã reta va'e, ha'e tereo tetä rupi. Eporaei porã ke, rembopu vy ke jovaive-ive tema eovy, ndere ima'endu'aa nho aguã', 'ea va'e rami.

<sup>17</sup> Mba'eta setenta ma'etÿ ojeupity maa py ma SENHOR omoingo porã ju 'rã Tiro tetä. Ha'e ramo ha'e kuery gueko vaia rupi ju ojouve 'rã oje'oivy. Ha'e rami vy yvy jave rupi itavy 'rã huvinxave ikuai va'e reve.

<sup>18</sup> Ha'e rami teĩ gueko vaia rupi ojou va'ekue SENHOR pe ae 'rã omboaxaa. Hepykue nomoï 'rã hyru py, neĩ nomoï porãi 'rã. Ha'e rami 'rãgue py hepykue opyta 'rã SENHOR renonde ikuai va'e pe, ha'e kuery ojou reta aguã ho'u va'erã, ha'e iporã va'e py anho onhemonde aguã."

## 24

<sup>1</sup> Ma'ẽ, SENHOR omomba 'rã yvy, ombovaipa ete 'rã. Amboae rami ojapo 'rã hi'áry rupi, ha'e omoaimbä 'rã ha'e py hekoaa va'ekue.

<sup>†</sup> **23:4** Tiro ha'e Sidom pygua kuery pe "Ye'ẽ ra'y kuery" 'ea va'ekue teĩ ha'e kuery okanhymba rire ye'ẽ "Xera'y kuery ndokuavei" he'i.

<sup>2</sup> Ha'e rami vy heta va'e kuery re mba'emo oiko va'e ma sacerdote kuery re avi 'rā oiko. Tembiguai kuery re oiko va'e ma ipatō re avi 'rā oiko. Tembiguai kunha re oiko va'e ma hereko re avi 'rā oiko. Mba'emo joguaa re oiko va'e ma mba'emo vendea re avi 'rā oiko. Mba'emo oiporuka va'e re oiko va'e ma iporua re avi 'rā oiko. Nhomboreve va'e re oiko va'e ma oreve va'e re avi 'rā oiko.

<sup>3</sup> Mba'eta yvy ha'e javi rupi omombaa 'rā, hexe ikuai va'ekue oipe'apaa 'rā guive, SENHOR ae ha'e rami aguā re ijayvu rire.

<sup>4</sup> Ha'e gui yvy jave rupi ipirupa vy overepa 'rā. Na'iporāvei ha'e ipirupa 'rā, yvy regua yvatekueve voi nda'eveive ovy 'rā.

<sup>5</sup> Anhetē ae yvy iky'apa va'e itui hekoa va'e kuery káuxa, lei ha'e hekorā ome'ẽ mbyre rovai ikuai ramo, ha'e ombovaipa rive rire Nhanderuete guexeve guarā imarā e'ŷ va'e ojapo va'ekue.

<sup>6</sup> Ha'e nunga rupi ayvu vai omokanhy heravy yvy, hexe ikuai va'e voi iky'a va'e meme ikuai. Ha'e nunga rupi yvy regua kuery oapypaa 'rā, mbovy'i ete 'rā okuave.

<sup>7</sup> Vinho opa ovy, uva'y ikuai va'e voi ipirupa ma. Ha'e ramo opy'a py ovy'a va'ekue ipoaëmba.

<sup>8</sup> Opytu'upa pandeiro pu rupi ovy'a va'ekue, opa ovy'a nhendu ha'e ixā reta va'e pu rupi ovy'a va'ekue.

<sup>9</sup> Ndoporaeiavei 'rā vinho oy'u reve. Iro va'e oy'u va'e kuery pe ma iro raxa 'rā.

<sup>10</sup> Ha'e rire tetā oeja rive pyre ma ombovaipaa ete. Oo ombotypaa ramo avave rei nda'evevei ma oike aguā.

<sup>11</sup> Ha'e kuery ojapukai okuapy tape rupi vinho re ojerure vy. Vy'a oĩ aguā va'ekue py pytū vaikue rive oĩ, ovy'a va'ekue oipe'apaa ma rire yvy gui.

<sup>12</sup> Tetā rupi ma omomba pyre anho oĩ, tetā rokē voi ombovaipaa ma.

<sup>13</sup> Mba'eta ko yvy regua kuery ma mbovy'i ete okuave 'rā yvy re, azeitona'y gui hi'a oipo'opaague rami, ha'e uva ono'õa ma rire nomono'õmbai'i va'ekue oeka jevya rami.

### *Heko porā va'e kuery ovy'a aguā re ijayvuague*

<sup>14</sup> Ha'e gui okuave va'e kuery ma oporaei nhendu 'rā ovy'a vy. Ye'ẽ guive SENHOR rexakā oguerovy'a 'rā okuapy.\*

<sup>15</sup> Ha'e nunga rupi peẽ kuaray oua katy pendekuai va'e peroporaei ke SENHOR, ye'ẽ yvýry penderekao va'e voi peporaei SENHOR Israel kuery ruete rery rupi.

<sup>16</sup> Ha'e ramo yvy apy gui nhaendu "Toguerovy'aa Heko porā ete va'e pe" oporaeia rā.

### *Heko vai va'e kuery okanhymba aguā re ijayvuague*

Ha'e rami teĩ xee aipoa'e: "Xee ma ndavy'aia anho aendu, nda'evei ete xevy. Mba'eta anhetē rupi e'ŷ ikuai va'e ma nhombotavya rupi ae 'rā ikuai", ha'e.

<sup>17</sup> Ha'e nunga rupi yvy re penderekao va'e, pendere ou 'rā ngyje, yvykua ha'e nhuā.

<sup>18</sup> Mba'eta ngyjea gui ojava va'e ho'a 'rā yvykua py, ha'e yvykua gui oẽ ramo nhuā ju 'rāojura. Mba'eta yy yvate rupi ojoko pyre onhoëmba 'rā, ha'e yvy yta ikuai va'e omyïmba 'rā.

<sup>19</sup> Ha'e vy yvy opẽmba rei 'rā oiny, ha'ypa ha'e oryryi atā ete 'rā.

<sup>20</sup> Yvy ho'apa rei 'rā ovy oka'u va'e rami, ovava 'rā kya okeaty rami. Yvy re hekoa va'e kuery reko vaia ma ipoyi ete ma oiny yvy re. Ha'e nunga rupi ho'a vy nopu'ãvei ma 'rā.

<sup>21</sup> Ha'e va'e ára SENHOR yva re ranhe ombopaga 'rā yva re ikuai va'e, ha'e gui yvy re ju ombopaga 'rā huvinxave kuery yvy regua.

<sup>22</sup> Ha'e kuery omono'õmba 'rā monde py ho'a va'ekue rami. Ha'e vy ombotypa 'rā nhuā py. Mbovy ára re rei ve'ŷ ma rire teĩ ombopagapa 'rā.

\* **24:14** Apy ma ijayvu heko porā va'e kuery oo jepe vy ovy'aa re.

23 Jaxy oxīmba vy naendyvei 'rā, kuaray voi okanhy 'rā SENHOR ixondaro reta va'e ou ramo Sião yvyty áry opena aguã Jerusalém tetã py. Ha'e rami vy ojeupagua ruvixa kuery oexaa py oexa uka 'rā guexakāa.

## 25

### *SENHOR nhomboaxya ogueroporaeiague*

<sup>1</sup> SENHOR, ndee ma Xeruete. Xee romboete ha'e aroporaei 'rā nderery, nerembiapokue iporã ete ramo. Yma rupi ndeayvuague anhetẽ ete ha'e ojeroviapy va'e meme rupi reiko.

<sup>2</sup> Mba'eta tetã ikuai va'e rembovaipa rire itaty rive opyta, tetã imbaraete va'e teĩ tekoague rejapo. Yvy mboae regua tetã voi tetã ve'ý meme opyta, nomoatyrõavei ma 'rā.

<sup>3</sup> Ha'e nunga rupi yvy regua imbaraetekueve nemboete 'rā okuapy, ha'e tetã pygua nhomoingo axy reia rupi ikuai va'ekue okyjepa 'rā ndegui.

<sup>4</sup> Mba'eta renhemoi iporiaukue'i onhemi aguã, oipotapa rei'i va'e onhemi atyrã reiko ikuai axy rã, yvytu atã gui renhomí aguã, ha'e kuaray aku gui kuaray'ã rami. Mba'eta joguereko axy va'e poxya ma tetã kora re yvytu atã oipejua rami ou,

<sup>5</sup> ipiru reia rupi kuaray ojope raxya rami avi. Ha'e rã ndee ma remomba 'rā yvy mboae regua poxya. Mba'eta arai huã va'e kuaray aku ojokoa rami avi ndee remokyrirĩ 'rā joguereko axy va'e kuery ov'y'a reia rupi oporaeia.

<sup>6</sup> Ha'e gui kova'e yvyty re SENHOR ixondaro reta va'e ojapo 'rā peteĩ ngaru guaxu yvy regua kuery ha'e javive pe, ngaru vinho ymague oĩa, ha'e hy'a xo'o kyra ha'e vinho xiñ porã va'e ikuiaia.

<sup>7</sup> Kova'e yvyty re ombovaipa 'rā ajukue heta va'e kuery ojao'iague, ha'e yvy regua kuery ha'e javi rexia mbotyarã omoĩa va'ekue.\*

<sup>8</sup> Ha'e rami vy omomba 'rā manoia po'akaa raka'e rã peve. SENHOR Nhanderuete texay omombirupa 'rã pavẽ rova gui, ha'e ojapo 'rã ixupeguia kuery oxīague noenduvei aguã rami yvy jave rupi, SENHOR ae ha'e rami ijayvu rire.\*

<sup>9</sup> Ha'e va'e ára aipo'ea 'rã: "Upe ma Nhanderuete nharõ jakuapy va'ekue. Ha'e ae ma nhanderepy 'rã. Upe va'e ma SENHOR nharõ jakuapy va'ekue. Ha'e nhandereraa jepe ramo jaroporaei ha'e jarovy'a 'rã", 'ea 'rã.

<sup>10</sup> Mba'eta kova'e yvyty re SENHOR omoĩ 'rã opo. Ha'e rã Moabe yvy re ma opyrõmba 'rã, mba'emo pire mba'emo repoxi re nhapyrõmbaa rami.

<sup>11</sup> Ha'e nunga mbyte gui ma ha'e kuery okuave'ẽ 'rã, o'ytá va'e o'ytá rupi okuave'ẽ-ve'ẽ rami. Ha'e rami teĩ SENHOR omomba 'rã onhemboyvate reia, okuave'ẽ teĩ.

<sup>12</sup> Oitypa 'rã tetã kora yvate ha'e imbaraete va'ekue. Ombovaipa 'rã, oitypa 'rã yvy rupi yvy ku'i opyta peve.

## 26

### *SENHOR opena ramo ojerovia etea rupi oporaeiague*

<sup>1</sup> Ha'e va'e ára ma Judá yvy rupi oporaeia 'rã po rami:

"Nhanceretã ma imbaraete ete. Ikora ha'e torre nhanhemi aguã ma Nhanderuete ae omoĩ nhandereraa jepearã.

<sup>2</sup> Peipe'a ke okẽ yvy regua kuery heko porã ha'e ojeroviaa rupi ikuai va'e oike aguã.

<sup>3</sup> Ndee SENHOR, rembopy'a porã riae 'rã ndere ojerovia aguã omoĩ atã va'e.

<sup>4</sup> Pejerovia riae ke SENHOR re, mba'eta Nhanderuete ma itaova imarã e'ý va'e oiko.

<sup>5</sup> Ha'e oitypa 'rã yvy'ã áry tetã oĩ va'e pygua kuery. Oity vy omo'yvyi'i 'rã yvy re, yvy ku'i opyta peve.

<sup>6</sup> Ha'e ramo opyrõa 'rã opy py. Oiko axy rei'i va'e ha'e iporiaukue'i ae 'rã opyrõmba.

\* <sup>25:7</sup> Apy ma ijayvu manoia po'akaa SENHOR ombovaipa aguã re (1 Coríntios 15.54-58). \* <sup>25:8</sup> 1 Coríntios 15.54, Apocalipse 7.17, 21.4

<sup>7</sup> "Heko porā va'e oguataa ma ijoja porā rei va'e meme. Ndee nderekō porā va'e ae rembojoja porā 'rā heko porā va'e oiko aguā.

<sup>8</sup> SENHOR, roarō rokuapy reipotaa oiko aguā. Orep'y'a re oī nderery re orema'endu'a riae aguā.

<sup>9</sup> Xenhe'ē py pyávy xepytuē atā ndere. Xenhe'ē ha'e xepy'a py roeka riae aikovy. Mba'eta yvy re reipotaa oiko ramo mae ma yvy regua kuery oikuua 'rā teko porā rupi ikuai aguā.

<sup>10</sup> Mba'eta heko vai va'e remboaxya rexā uka teī ha'e kueryndoikuua 'rā teko porā rupi ikuai aguā. Ha'e kuery ma heko porā va'e ikuiaia rupi teī gueko vaia rupi tema ikuai, ndoikuua potai 'rā SENHOR yvatea re.

<sup>11</sup> SENHOR, ndepo reupi reiny teī ha'e kueryndoexai. Ha'e rami teī ndevyguia kuery repy ramo ha'e kuery oexa vy oximb'a 'rā. Ndepoxya rupi emokanhymba nderovaigua kuery.

<sup>12</sup> Ha'e rā orevy pe ma SENHOR, eme'ē ke mby'a porā, mba'eta mba'emo rojapo va'e ha'e javi ma ndee ae rejapo orevy.

<sup>13</sup> SENHOR Oreruete, huvixa kuery mboae orere ipo'aka va'ekue, teī nderery anho 'rā ore roqueroporaei.

<sup>14</sup> Ha'e kuery omanomba ma, ndoikove jevyi 'rā guive, hi'āgue rive nonhemboetevei 'rā. Ha'e rami aguā ae rembopaga vy remomba ete. Rejapo ha'e kuery re na'ima'endu'aavei aguā rami.

<sup>15</sup> Ha'e rā ndevyguia kuery ma remboetave 'rā. SENHOR, ndevyguia kuery remboetave ramo nemboetepa. Ijyvy voi rembotuvixave heravy.

<sup>16</sup> Ha'e kuery ojexavai vy nderekā 'rā. SENHOR, ha'e kuery remo'arandu ramo onhembo'ea re 'rā ikuai.

<sup>17</sup> Kunha hye guaxu'i va'e oikuavā'i aguā ovaē rai'i ma ramo ojepoka-poka ha'e haxy rā haxē 'rā, ha'e rami ae avi ore voi orekuai va'ekue nerentonde, SENHOR.

<sup>18</sup> Mba'eta ore voi roguereko'i ma, rojepoka-poka haxy ramo oiko aguā, ha'e rā roguereko'i va'ekue ma yvytu rive. Ha'e rami vy ore ma yvy re ndoroguerui jogueraa jepearā, ndorojapo kuaai yvy re oikoave aguā rami.

<sup>19</sup> Ha'e rami teī penderegua omano va'ekue oikove ju 'rā, onhemboetepa ju 'rā, xeretekue voi. Yvy ku'i guýry pendekuai va'e, pemyī ke, ha'e pevy'a. Oreruete, ndeguigua ae nhomoingovearā rembou, ko'ē rai'i jave yxapy remboua rami avi. Ha'e ramo yvy gui oikove ju 'rā omano va'ekue."

<sup>20</sup> Ha'e nunga rupi xeretarā kuery, tapeo ranhe, peike opy ja'o'i py, ha'e pemboty okē peike rire. Penhemi ranhe xapy'a'i, ipoxya oaxa peve.

<sup>21</sup> Mba'eta SENHOR oē 'rā ouvy oīatygui, yvy regua kuery ombopaga aguā heko vaiague re. Ha'e gui yvy re ojekuaapa 'rā tuguy omoē mbyre, ndojao'ivei ma 'rā omano va'ekue.

## 27

### Nhanderuete ojeupergua kuery oayvu vy ogueraajepé aguā re ijayvuague

<sup>1</sup> Ha'e va'e ára SENHOR ombopaga 'rā teju-jagua mboi inhakuā va'e, teju-jagua mboi ikarē-karē va'e. Okyxē hatā va'e, tuvixa ha'e imbaraete va'e py 'rā ojuka. Ojuka avi 'rā vixo tuvixa va'e ye'ē rupigua.

<sup>2</sup> Ha'e va'e ára SENHOR aipoe'i 'rā: "Peroporaei uva he'ē va'e 'y.

<sup>3</sup> Xee SENHOR ma ha'e va'e re apena riae amoakŷ vy, avave rei ojapo vaia e'ŷ aguā apena aikovy, ara py ha'e pyávy.

<sup>4</sup> Xere ma noī ha'e nunga pe xepoxya. Ha'e gui juu e'ŷ vy juu rakuaendy xerenonde hi'aī va'e rire ma apu'ā 'rāgue hovai, apypa vyvoi 'rāgue.

<sup>5</sup> Ha'e rami e'ŷ vy tove ha'e kuery tojepy uka xevy xepo'akapa va'e ramo. Xereve peteī rami ta'ikuai. Tá, tojapo xereve peteī rami orekuai aguā", he'i 'rā.

<sup>6</sup> Ha'e gui raka'eve rā Jacó kuery hapo porā 'rā, Israel kuery hoky vy ipoty 'rā. Ha'e rami vy yvy jave re tynyē 'rā hi'a.

<sup>7</sup> Xapy'a rei nda'u SENHOR ju omoingo axy ri Israel kuery imoingo axyare omoingo axyague rami? Xapy'a rei nda'u ha'e kuery va'e regua ojuka ri ijukaare ojukaague rami?

<sup>8</sup> Any teve! Ha'e rami 'rāgue py escravo-rā ogueraa ukaa py rive omoingo axy. Oipeju ratā reve omondouka yvytu kuaray oua katy guigua oipejua rami.

<sup>9</sup> Ha'e gui po rami ojao'i 'rā Jacó kuery heko vaiague, po rami oikuaa uka 'rā ojejavyague omboguepa maague: Mba'eta ita ha'e kuery altar re oī va'e ha'e javi SENHOR omboa'ypa 'rā ita cal ha'ykue-'ykue'i rami. Ha'e ramo nomopu'āvei ma 'rā ta'angaarā yvyra gui ojapo va'ekue, neī altar heakuā porā va'e oapy atyrā voi.\*

<sup>10</sup> Mba'eta tetā ikorapa va'ekue ma ha'e ae'i optyta, omboyke ha'e oejapa pyre, teko a e'ŷa rami. Ha'e py ma vaka ra'y kuery rive 'rā okaru, onheno ha'e ho'upa hoky.

<sup>11</sup> Ha'e py hakā ikuai va'e ipirupa ramo omopēmbaa 'rā. Ha'e ramo kunhague ou vy omoī 'rā tata py. Ha'e rami oiko 'rā kova'e kuery o'arandua rupi e'ŷ ikuai rire. Ha'e nunga rupi ijapoare noenduvei 'rā omboaxya, imoingoare ndoperdoavei 'rā.

<sup>12</sup> Ha'e va'e ára SENHOR oipo'o 'rā mba'emo ra'yī Eufrates yakā guive Egito katy'i yakā'i oī va'e yvýry peve. Ha'e rami vy peē Israel kuery pendeporavo 'rā peteī-teī.

<sup>13</sup> Ha'e va'e ára ma omonhe'ēa 'rā peteī mimby guaxu. Ha'e ramo Assíria yvy rupi okanhague rami ikuai va'e, ha'e Egito yvy katy omondoukapa pyre voi ojevypa ju 'rā. Ha'e vy omboete 'rā okuapy SENHOR Jerusalém py, yvyty iky'a e'ŷ va'e áry.

## 28

### *Efraim kuery ombopaga aguā re ijayvuague*

<sup>1</sup> Nda'evei ete 'rā Efraim kuery retā oka'u va'e kuery ikuiaia "Coroa" 'ea va'e pe. Ha'e nunga ma yvoty iporā va'ekue teī ipirupa 'rā, yvy'ā re oī yvyugua vinho gui oka'u rei va'e ikuiaia áry.\*

<sup>2</sup> Mba'eta SENHOR oiporavo peteī ava ipy'a guaxuve ha'e ipo'akapa va'e. Ha'e va'e ma amandau ho'a xapy'a va'e rami 'rā ou, yvytu vaikue omomba va'e rami, oky yvytu reve yy omonyē vyvoi va'e rami oitypa 'rā yvy py.

<sup>3</sup> Ha'e va'e ma opyrō 'rā Efraim kuery oka'u va'e coroa oguerovy'a va'ekue re.

<sup>4</sup> Ipoty ipiru va'ekue ma ha'e kuery ojou porā va'e yvy'ā re yvyugua opa mba'e oiko porāa áry oī va'e, ha'e va'e ma figo ijajua ára py e'ŷ ijaju va'e rami optyta, mba'eta amongue oexa vai-vai'i vyve oipo'o vy ho'upa vyvoi 'rā.

<sup>5</sup> Ha'e va'e ára ma SENHOR ixondaro reta va'e ae 'rā oiko ojeupagua okuave va'e kuery coroa oguerovy'a va'e, ipoty pa ha'e iporā ete va'e.

<sup>6</sup> Inhe'ē oī 'rā joe opena oiny va'ety mo'aranduarā anhetē rupi oikuaa pota kuaa aguā, ha'e ngovaigua kuery tetā rokē gui omoanha va'e mombaraetearā.

### *Jerusalém pygua kuery rovai ijayvuague*

<sup>7</sup> Ha'e rami teī kova'e kuery voi ho'a-o'a 'rā okuapy vinho gui, nopu'ā ho'amy kuaavei 'rā iro va'e gui. Sacerdote ha'e profeta kuery voi ho'a-o'a 'rā iro va'e gui, vinho pe 'rā ojeity uka. Neī opu'ā ho'amy aguā voi nda'evei 'rā iro va'e gui. Ha'e nunga rupi ha'e kuery ojavy 'rā mba'emo oexa ukaa rā ndoexa kuaa porāi vy, ha'e onhepyxanga 'rā joe oikuaa potaa py.

<sup>8</sup> Mba'eta ha'e kuery mesa ha'e javi rupi ombojevyague anho oī, iky'a e'ŷa noī.

<sup>9</sup> Ha'e ramo xevy oporandu rive vy "Mava'e tu rembo'e ta 'arandu re?" he'i okuapy. "Mava'e pe tu reikuua uka ta rendu va'ekue? Xapy'a rei nda'u nokambuvei va'e ixy kā gui omboia ramo'i pyre pe ri reikuua uka?

---

\* **27:9** Romanos 11.27 \* **28:1** Efraim kuery retā ma Samaria. Peteī yvyugua yvýry oī yvy'ā re, ikorapa va'e guive. Ha'e nunga rupi jaexa rā coroa rami ojekuaa, e'ŷ vy yvoty rami. Ha'e pygua kuery ma oka'u rupi anho ikuai. Ha'e kuery judeu regua ikuai teī Nhanderuete nomboetevei okuapy. Ha'e ramo ha'e kuery rovai Nhanderuete ombou Assíria pygua kuery omomba aguā.

<sup>10</sup> Mba'eta orembo'eague áryve orembo'e riae 'rã, orembo'e-mbo'eve tema. Reikuua ukaague áryve reikuua uka riae 'rã, reikuua ukaague ramive reikuua ukave tema. Mbovy'i 'rã apy ndeayvu, ha'e mbovy'i avi 'rã upe py ndeayvu", he'i okuapy xevy.

<sup>11</sup> Ha'e nunga rupi xeretarã kuery pe SENHOR ijayvu 'rã ijayvu kuaa porã e'ŷ va'e rami, ayvu mboae rupi guive.

<sup>12</sup> Ha'e kuery pe aipoe'i va'ekue: "Kova'e ma aikuua uka pepytu'u aguã, ikane'õ va'e pe ame'ẽ 'rã optytu'u aguã. Kova'e ae ma pepytu'u aguã ame'ẽ va'e", he'i rire teĩ ha'e kuery noendu potai.\*

<sup>13</sup> Ha'e rami rire ha'e kuery pe SENHOR ayvu ou 'rã po rami: "Penembo'eague áryve 'rã penembo'e, penembo'ea ramive penembo'eve tema. Oikuua ukaague áryve oikuua uka 'rã, oikuua ukaague oikuua ukave tema 'rã. Mbovy'i 'rã apy ijayvu, ha'e mbovy'i avi 'rã upe py ijayvu", he'i 'rã. Ha'e rami vy ha'e kuery oje'oia rupi ho'apa aguã guakykue katy, opẽmba ha'e ojejurapa vy onhemoĩ vai aguã.

<sup>14</sup> Ha'e gui peẽ avakue penhombojaru reia rupi Jerusalém pygua kuery re pendepo'aka va'e, pendu ke SENHOR ayvu.

<sup>15</sup> Mba'eta aipopeje: "Ore ma manoa ha'e yvyra rupa reve rojapo orepe'a e'ŷ aguã. Ha'e rami rire yy oxyry atã va'e rami orenupãarã ou teĩ ndorerupityi 'rã, mba'eta ronhemi aguã ma roguereko apu, ronhombotavya py ae 'rã ronhemi", peje.

<sup>16</sup> Ha'e nunga rupi SENHOR Nhanderuete aipoe'i: "Ha'e gui xee ma peteĩ ita amoĩ Sião py, ita oiporavo pyre, ovare ete va'e, iporãvea py amoĩ atã va'e. Ha'e va'e re ojerovia va'e ma ndojapurai 'rã.†

<sup>17</sup> Ha'e gui xee amoĩ 'rã ha'evea rami oikuua pota va'erã metro rami, ha'e teko porã ma prumo rami 'rã aikuua uka penera'ãarã. Ha'e rã apu penhemiague ma amandau ombovaipa 'rã, yy ogueroxyrypa 'rã penhemiaty", he'i.

<sup>18</sup> Ha'e ramo manoa reve pejogueroayvuague oaxapa rive 'rã, yvyra rupa reve pendeyvuague ndoikovei 'rã. Ha'e gui yy rami penenupãarã ou vy penemou'ũmba 'rã.

<sup>19</sup> Ha'e nunga oaxa nhavõ pendereraa 'rã. Ko'ẽ nhavõ oaxa 'rã, pytû nhavõ guive. Ha'e nunga oendu va'e okyjepa rei 'rã.

<sup>20</sup> Mba'eta ha'e nunga tupa ma ijapu'a'i ete ramo nda'evei 'rã hi'áry avave rei onheno aguã. Nheovãa voi ipo'i'i ete ramo avave rei nda'evei 'rã onheovã aguã.

<sup>21</sup> Mba'eta SENHOR opu'ã 'rã Perazim yvyty áry rami, opoxya oexa uka 'rã Gibeão yvyugua py rami,‡ ojapo aguã guembiapo ojapo va'ety e'ŷ, ha'e nhaendu va'ety e'ŷ teri.

<sup>22</sup> Ha'e nunga rupi aŷ pendeayvu vaikue-ikueve eme, corrente pendepokua ratãve heravy e'ŷ aguã. Mba'eta SENHOR Nhanderuete ixondaro reta va'e gui aendu penemombaarã ou aguã re ijayvu rã. Ha'e nunga ma pendeyvy ha'e javi re oiko 'rãe.

### *Nhanderuete opa mba'e py hi'arandua re ijayvuague*

<sup>23</sup> Peipe'a ke pendeapyxa, ha'e pendu xeayvua. Peikuua pota porã xeayvua pendu kuaa aguã.

<sup>24</sup> Xapy'a rei nda'u yvy oikaraĩ va'e ko'ẽ nhavõ 'rã ri oyvy oikaraĩ riae mba'emo ra'yí omoaĩ aguã? Ko'ẽ nhavõ 'rã ri ty'y oyvy ojo'o ha'e oikaraĩa rupi ikuai?

<sup>25</sup> Ha'e rami 'rãgue py yvy ombojopata ma rire omoaĩ 'rã endro ha'e cominho ra'yígue. Omoaĩ 'rã trigo hi'a aguã rupi, ha'e e'ŷ vy cevada mba'e omoaĩ 'rãgue py, e'ŷ vy amboae nunga ra'yígue voi omoaĩ 'rã ijyvýry rupi.

<sup>26</sup> Mba'eta ha'e kuery Ruete ma ha'e rami aguã rami ae omo'arandu, ha'evea rami meme 'rã ombo'e.

---

\* <sup>28:12</sup> 1 Coríntios 14.21    † <sup>28:16</sup> Ha'e va'e ita omombe'u porãve Romanos 9.33–10.11 ha'e 1 Pedro 2.4-8 py, Jesus reko re ijayvu vy.    ‡ <sup>28:21</sup> Perazim yvyty áry ha'e Gibeão yvyugua py ma SENHOR opu'ã raka'e ojeupergua kuery repy vy (2 Samuel 5.17-25).

<sup>27</sup> Mba'eta endro ma nanhamoa'yī 'rā mba'emo moa'yīguea py, neĩ cominho ra'yīgue áry voi namboaxai 'rā karóxa ruéra. Ha'e rami 'rāgue py endro ma nhainupā'i 'rā yvyra rovi'i py, cominho ra'yī guive.

<sup>28</sup> Xapy'a rei nda'u nhamboa'ypa ete 'rā ri mba'emo ra'yī? Any. Oma'etŷ va'e ma riae e'ŷ 'rā ojyky mba'emo ra'yī, riae e'ŷ 'rā guive omboaxa karóxa ruéra hi'áry rupi guymba kavaju reve.

<sup>29</sup> Ha'e nunga ha'e javi ma SENHOR ixondaro reta va'e gui meme jaikuua. Ha'e nhanemongeta rā jarovy'a ete, opa mba'e py hi'arandu va'e ramo.

## 29

### *Jerusalém tetā ha'e hovaigua kuery re ijayvuague*

<sup>1</sup> Nda'evei ete 'rā tetā "Nhanderuete peguarā oappyaty" 'epy va'e pe! Ha'e va'e tetā ma Nhanderuete peguarā oappyaty ae, Davi rekoague guive. Toĩ-toĩve ma'etŷa nhavō, ha'e tojeupity-pityve tema ngarua ma'etŷa pukukue re ha'e py oiko va'e.

<sup>2</sup> Ha'e rami teĩ xee amoĩ vai 'rā "Nhanderuete peguarā oappyaty" 'epy va'e. Ha'e ramo ha'e kuery ojae'o ha'e hexay 'rā okuapy. Ha'e gui ma optya 'rā xevy guarā oappyaty ete rami.

<sup>3</sup> Mba'eta pendekuaia jovaive rupi rombojere uka 'rā, rojoko uka 'rā torre py, ha'e penderovai rupi amopu'ã 'rā pendejokoarā.

<sup>4</sup> Ha'e gui yvy rupi romombo rire yvy gui ju pendeayvu 'rā. Yvy ku'i gui onhendu vai-vai'i 'rā pendeayvua. Yvy gui oẽ 'rā pendeayvu 'âgue rami, ayvu mbegue rami 'rā pendeayvua onhendu yvy ku'i gui.

<sup>5</sup> Ha'e rā penderovaigua kuery heta ete va'eri yvy ku'i'i rami 'rā amoingo, ojerovia reia rupi ikuai va'e ma mba'emo pire yvytu omboveve heravy va'e rami 'rā okanhymba. Ha'e nunga ma oiko xapy'a 'rā, xapy'a'i pyve.

<sup>6</sup> Mba'eta SENHOR ixondaro reta va'e gui ou 'rā imbopagaarā yapu reve, yvy ryryi, opororo hatā va'e, yvytu apu'a, yvytu vaikue ha'e tataendy nhomombaarā reve.

<sup>7</sup> Pyávy jaexa ra'ua rami yvy regua kuery heta 'rā ou Nhanderuete peguarā oappyaty re opu'ã aguã. Ha'e rami vy pavē 'rā opu'ã tetā ha'e torre imbaraete va'e re. Ha'e vy omoĩ vai 'rā.

<sup>8</sup> Ha'e gui ha'e kuery re oiko 'rā jakaruxe vaipa vy jakaru nhainy taa rami jaexa ra'u rire teĩ javy vy nhanenhembyayia ju nhaendua rami avi, ha'e rami e'ŷ vy nhandey'uvei vy jay'u taa rami jaexa ra'u rire teĩ javy vy nhandey'uvei ae tema nhainya rami. Ha'e rami ae avi 'rā yvy regua kuery re oiko, Sião yvyty re opu'ã javé.

### *Israel kuery onhe'ẽ py oexa e'ŷa ha'e anhetē rupi e'ŷ ikuia re ijayvuague*

<sup>9</sup> Peguejy ke, ha'e pendepukupa tema pejupy. Pejexa mboguepa ke, ára revegua ve'ŷ riae pendekuai. Oka'upa rei va'e rami pendekuai teĩ vinho gui e'ŷ ta'vy. Pe'a-pe'a rei teĩ iro va'e gui e'ŷ.

<sup>10</sup> Mba'eta pendere SENHOR ombou nhe'ẽ penembopeyiarā. Ha'e rami vy omboty penderexa (ha'e va'e ma profeta kuery), ha'e onhovā peneakā (ha'e va'e ma oexa ukapy oexa va'e kuery).\*

<sup>11</sup> Ha'e nunga rupi pendevy pe oexa ukapy ha'e javi ma kuaxia para imbojaa py omboty pyre rami rive optya. Ha'e nunga ma ogueroayvu kuaa va'e pe ome'ẽa vy "Ajerure, eroayvu kova'e", he'i ramo "Nda'evei, mba'eta imbojaa py omboty rire", he'i 'rā.

<sup>12</sup> Ha'e gui ogueroayvu kuaa e'ŷ va'e pe ju ome'ẽa vy "Eroayvu kova'e, ajerure", he'i ramo "Xee tu ndaroayvu kuaai rima", he'i 'rā.

<sup>13</sup> Ha'e ramo SENHOR aipoe'i: "Kova'e kuery xere onhemboja teĩ ojuru py, oayvu py rive xemboete, ha'e rā opy'a py ma xegui mombyry ikuai. Xerenonde ojererokyje merami teĩ avakue ojapo ukaa rupi rive ikuai".\*

\* <sup>29:10</sup> Romanos 11.8 \* <sup>29:13</sup> Kova'e ayvu rupi Jesus ijayvu heta va'e kuery pe, hexe ndojeroviai ramo (Mateus 15.8-9, Marcos 7.6-7).

**14** Kova'e kuery mbyte rupi ajapo riae 'rā tembiapo porā, tembiapo porā ete imondyi-paarā. Ha'e nunga rupi ha'e kuery regua hi'arandukueve 'arandua voi opa aguā, ha'e ikuai kuaakue ikuiaia voi okanhymba aguā", he'i.\*

**15** Nda'evei ete 'rā opy'a re oī va'e SENHOR gui onhomí va'e pe, ha'e pytū rupi mba'emo ojapo oikovy va'e pe. Ha'e kuery ma joupe-upé "Mava'e tu nhanderexa? Mava'e tu nhandekuaia oikuua ta?" he'i tei.

**16** Teko vai rupi ete rima pendekuai! Mba'eta nhae'ū re omba'eapo va'e rovai nhae'ū onhembovate va'e rami pendekuai, ha'e tembiapokue ijapoare pe "Ha'e e'ŷ ae ma xeapo", he'i va'e rami, tembiapokue ijapoare pe "Ha'e tu ndoikuaai rima", he'i va'e rami avi.\*

### *Israel kuery ogueraa jepea aguā re ijayvuague*

**17** Ha'e rami tei ma are e'ŷ'i re Líbano yvy ha'e javi rupi ojeapo 'rā yvyra'a tyrā, ha'e yvyra'a ty ikuai va'e ma ka'aguy regua rami ete 'rā oiko porā.

**18** Ha'e va'e ára ma ijapyxa e'ŷ va'ekue oendu 'rā ayvu kuaxia para re oī va'e, ára revegua e'ŷ va'ekue voi oexa 'rā, pytūa gui oo jepe ma rire.

**19** Yvyigüeve'i va'e ovya'rā SENHOR re, iporiaukue'i ovya'rā Israel kuery Ruete Iky'a e'ŷ va'e re.

**20** Ha'e rā joguereco axy va'e ma omombaa 'rā, ijayvu vaikue-ikue va'e nda'ikuaivei 'rā, mba'eta teko vai re anho ipy'a va'e opa 'rā.

**21** Ha'e kuery ma peteĩ ayvu'i py rive nhomboeko vai 'rā, ha'e ombotavy 'rā huvixa kuery okẽ py oikuua pota oiny va'e, ha'e gui mba'eve py e'ŷ onhemboapu vy nomboeko porai heko porā va'e.

**22** Ha'e nunga rupi SENHOR Abraão reraa jepeare aipoe'i Jacó ramymino kuery pe: "Jacó pe ma ndoikovei ma 'rā oximba aguā rami, ndaova mboae reivei ma 'rā.

**23** Ha'e rami 'rāgue py ha'e kuery, ha'e ta'y kuery hexeve ikuai va'e xepo py mba'emo ajapo ramo oexa vy omboete 'rā okuapy xerery. Tá, Jacó ruete Iky'a e'ŷ va'e pe 'Iky'a e'ŷ va'e he'i avi 'rā, Israel kuery ruete renonde ikuai 'rā ojererokyjea rupi.

**24** Ha'e gui onhe'ē py ojavy va'ekue ma oikuua nho 'rā, ha'e joe ijayvu rei va'ety voi onhembo'e uka 'rā", he'i.

## 30

### *Egitó pygua kuery pe ha'e kuery ojereraa jepe uka e'ŷ aguā re ijayvuague*

**1** SENHOR aipoe'i: "Nda'evei ete 'rā xera'y kuery xenhe'ẽ rendu e'ŷ va'e pe. Ha'e kuery ma xee ajapo uka va'e rupi e'ŷ ikuai. Mba'eta amboae regua pe ojereraa jepe uka 'rā xee aipota ramo e'ŷ, ojejavya áryve ojejavye rive.

**2** Mba'eta xevy pe oporandu e'ŷ re oje'oi 'rā Egito yvy katy, ha'e Faraó pe rive 'rā ojereraa jepe uka, Egito re kuaray'ã oī va'e py onhemi.

**3** Ha'e rami tei pendereraa jepea Faraó ma penemoximbaarā rive 'rā oiko, ha'e Egito re kuaray'ã py penhemia py ma penemoi vaia 'rā.

**4** Mba'eta Judá pygua huvixa kuery ma Zoã tetã py ikuai, ayvu reraa kuery ma Hanes py ovaẽ.\*

**5** Ha'e ramive ma ha'e kuery ha'e javi oximba 'rā peteĩ regua mba'everā ndovarei va'e gui, mba'eta Egito pygua kuery ma nda'evei 'rā oipytyvõ nei omoingo porā aguā, ha'e rā omoximba aguā rive, omboete uka aguā e'ŷ", he'i.

**6** Ha'e gui kova'e ayvu ma vixo kuery kuaray puku-a katyguia re ou va'ekue.

"Peteĩ yvy ma jexavai ha'e ngije oña, guar y ha'e guar y kunha, ha'e gui mboi ha'e mboi opo va'e ikuiaia. Ha'e va'e yvy rupi mburika'i áry ogueraa 'rā mba'emo ovareve

---

\* **29:14** 1 Coríntios 1.19 \* **29:16** Romanos 9.20 \* **30:4** Judá kuery re Assíria pygua kuery opu'ã okuapy ramo onhepytyvõ uka okuapy Egito pygua huvixa Faraó pe. Egito regua tetã Zoã ha'e Hanes py ha'e kuery oo raka'e onhepytyvõ uka vy, Nhanderuete re ojerovia 'rāgue py (31.1).

va'e, camelo kupe áry mba'emo porã ogueraa 'rã peteĩ regua noipytyvõi va'erã pe ome'ẽ va'erã.

<sup>7</sup> Mba'eta Egito pygua kuery oipytyvõa ma mba'everã ndovarei 'rã. Ha'e nunga rupi ha'e kuery pe 'Mba'eve ojapo vy e'ŷ ijayvu rive rei va'e', ha'e.

<sup>8</sup> "Tereo, embopara yvyrapo'i re ha'e kuery oexaa py, embopara kuaxia re oĩ riae aguã raka'e rã peve guarã.

<sup>9</sup> Mba'eta kova'e kuery ma xenhe'ẽ raxave va'e, ta'y kuery ijapu ha'e SENHOR guigua lei noendu potai va'e.

<sup>10</sup> Ha'e kuery aipoe'i 'rã oexa ukapy oexa va'e kuery pe: 'Pexave eme oexa ukapy', he'i 'rã. Ha'e gui profeta kuery pe aipoe'i: 'Pemombe'uve eme orevy anhetẽ va'e. Ha'e rami 'rãgue py roenduxe vai va'e anho ke pemombe'u orembotavya rupi rive.

<sup>11</sup> Pejepekuavo ke tape gui, pejepe'a ke roiko aguã gui. Orevy pendeayvuve eme Israel kuery Ruete Iky'a e'ŷ va'e re', he'i 'rã okuapy."

<sup>12</sup> Ha'e nunga rupi Israel kuery ruete Iky'a e'ŷ va'e aipoe'i: "Pova'e ayvu napendu potai, ha'e rami 'rãgue py joavyky rei va'e re anho pejerovia, teko vai re guive. Ha'e nunga re rive pejeko va'e.

<sup>13</sup> Ha'e rami ete pendeko vaia pendevy opyta 'rã tetã kora yvate va'e re ipa'ũ oĩ va'e rami, mba'eta tye rami ojeapo vy ho'a xapy'a 'rã pexa'ã e'ŷ javé.

<sup>14</sup> SENHOR ae ombovo 'rã, nhae'ũ guigua hy'a ombovo vy omboa'ypa katuĩ'ia rami. Ha'e nungakue mbyte py ma ndojouai 'rã ipêgue neĩ tataypy gui tapyĩ ojopy aguã, neĩ yy renda gui ojaraa aguã voi."

<sup>15</sup> Mba'eta SENHOR Nhanderuete, Israel kuery Ruete Iky'a e'ŷ va'e aipoe'i: "Pejeko rerova ha'e pejerovia vy 'rãe peo jepe. Pejapura rei e'ŷ re pejerovia ete vy 'rãe penembaraete. Ha'e rami teĩ peẽ kuery ma ndapeikuaaxeí ha'e rami.

<sup>16</sup> Ha'e rami 'rãgue py aipopeje: 'Any, kavaju áry rojavapa 'rã', peje rire ha'e rami ae 'rã pejava. Ha'e 'Kavaju inhakuã va'e áry roguata 'rã', peje rire penderakykue monhaa kuery inhakuãe 'rã.

<sup>17</sup> Peẽ va'e regua mil onha 'rã peteĩ'i gui rive. Peteĩ nhiruĩ'i gui rive peẽ kuery ha'e javi penhamba 'rã, mba'emo'y e'ŷ vy bandeira yvy'ã re ha'e ae'i oeja pyre rami penderejaa peve", he'i.

### *Sião pygua kuery omboypy'a guaxua rupi ijayvuague*

<sup>18</sup> Po ramigua ae SENHOR oarõ penemboaxy aguã. SENHOR Nhanderuete ma oiko katu ma penderepy aguã, teko porã rupi joguerekaoa va'e vy. Ha'e ramo hexe ojerovia va'e ový'a ete va'erã meme.

<sup>19</sup> Mba'eta ha'e kuery ikuai nho 'rã Sião ha'e Jerusalém tetã py. Ndapejae'ovei 'rã, mba'eta anhetẽ ae pejapukaia oendu vy penemboaxy 'rã. Ha'e rami pendeayvu rã oendu vy penembovai 'rãe.

<sup>20</sup> Ha'e gui SENHOR penembojexavai vy mbojape ha'e yy rive ojou uka teĩ nonhomivei ma 'rã penembo'ea kuery, penderexa py ae pexa 'rã.

<sup>21</sup> Ha'e gui peiporu kuaa regua katy pejavy ta vy, e'ŷ vy peiporu kuaa e'ŷa katy mba'e, ha'e rami vy pendeapyxa py pendu 'rã penderakykue katy gui ijayvu vy "Kova'e ae ma tape, kova'e rupi 'rã peiko", he'i va'e.

<sup>22</sup> Ha'e ramo prata mba'emo ra'angaa penhovãague pe ma "Ojeguarupy" peje 'rã, ouro mba'emo ra'angaa penhovãague pe guive. Ha'e nunga pemombopa 'rã mba'emo ovare e'ŷ va'e rami. Ha'e vy peteĩ-teĩ aipopeje 'rã: "Topa vyvoi apy gui."

<sup>23</sup> Ha'e gui mae ma SENHOR ombou 'rã oky yvy mba'emo ra'ŷi pemoaŷague áry. Ha'e ramo mbojape heta ju 'rã oiko yvy gui, penemombaraeetearã. Ha'e va'e ára penerymba vaka kuery voi okaru 'rã nhuñdy tuvixa va'e rupi.

<sup>24</sup> Ha'e gui penerymba vaka ha'e mburika yvy oikaraõi va'e ma ho'u 'rã mba'emo kure juky reve, pá ha'e yvyra rakãmby py hembi'urã pemono'õ va'ekue.

<sup>25</sup> Ha'e gui yvyty yvate va'e, yvy'ã tuvixave va'e ha'e javi rupi ikuai 'rã yy oxyry'i va'e, jojukapa etea ára torre oitypaa jave py guive.

<sup>26</sup> Ha'e jaxy voi kuaray rami ete 'rã ojope, ha'e kuaray ma sete-kue ojope ratâve 'rã, sete ára pukukue ojope vyvoia rami 'rã hexakã. Ha'e va'e ára py ma SENHOR ojokuapa 'rã ojeupegua kuery ai, omonguera ju 'rã ha'e ae oikyxíague.

### *Assíria pygua kuery ombopaga aguã re ijayvuague*

<sup>27</sup> Ha'e gui SENHOR guery oendu uka reve 'rã ou mombyry gui. Ipoxya hendy reve 'rã ou, arai huũ rei va'e mbyte rupi. Ijuru py ma ipoxya anho 'rã oĩ, ha'e inhapekû ma tata nhomombaarã rami ojekuaa.

<sup>28</sup> Ipytuêa ma nhomomba 'rã yy oxyry atâ va'e nhandejyryvi peve oua rami avi, mba'eta omomba 'rã yvy regua kuery yrupê py rami. Ha'e gui yvy regua kuery juru re omoï 'rã ijuru xârã ojavy uka aguã.

<sup>29</sup> Ha'e rã peẽ kuery mbyte ma onhendu 'rã peteñ mboraei, pyávy ngaru iky'a e'ý va'e oikoa py ovy'a va'e kuery onhendua rami. Pendepy'a py pevy'a 'rã pekuapy, mimby omonhe'ẽ reve SENHOR pegua yvyty katy oẽ ovy va'e rami, Israel kuery pegua itaova oña katy.

<sup>30</sup> Ha'e gui SENHOR oendu uka 'rã oayvu ipo'akapa va'e, oexa uka 'rã opo jojuka va'e opoxya rupi omboguejy vy tataendy nhomombaarã mbyte, oky vaipa, yvytu vaikue ha'e amandau reve.

<sup>31</sup> Mba'eta SENHOR ayvu gui Assíria pygua kuery onhemondyipa 'rã okuapy, yvyra rovi'i py ombopi ramo.

<sup>32</sup> Ha'e gui SENHOR ombopaga vy yvyra rovi py ombopi nhavõ pandeiro ha'e ixã reta va'e ombopua reve 'rã ombopi. Ha'e kuery re opu'ã vy 'rã ipo'aka.

<sup>33</sup> Mba'eta yma ete guive ma oguereco katu tata guaxu ha'e kuery ruvixave rapyarã. Oapy aguã ma yvate ha'e ipyve va'e oĩ, tata ha'e yxakã reve. Ha'e gui SENHOR oipejua py omoendy 'rã enxofre rami.

## 31

### *"Egitu pygua kuery avakue rive ikuai, Nhanderuete e'ý", he'iague*

<sup>1</sup> Nda'evei ete 'rã Egito yvy katy ojereraa jepe uka vy oje'oi va'e pe, neñ kavaju re rive ojerovia va'e kuery pe. Ha'e kuery ma karóxa re ojerovia 'rã heta ramo, kavaju árygua re ojerovia imbaraete rã. Ha'e rã Israel kuery Ruete Iky'a e'ý va'e re ma na'ima'endu'ai, SENHOR pe ndojapukai.

<sup>2</sup> Ha'e ma hi'arandu va'e ha'e nhomombaarã mboua, ijayvuague gui ojepe'a e'ý va'e. Ha'e ma opu'ã 'rã joapo vai va'e ha'e teko vai apoa rupi nhomoirü va'e kuery re.

<sup>3</sup> Mba'eta Egito pygua kuery ma avakue rive ikuai, Nhanderuete e'ý. Hymba kavaju kuery voi ho'o va'e, nhe'ẽ e'ý. Ha'e gui Nhanderuete okuave'ẽ ramo yvy re ho'apa 'rã nhopytyvõa ha'e onheptyvõ uka va'e ha'e javi. Ha'e rami vy mokoïve okanhymba vyvoi 'rã.

<sup>4</sup> Mba'eta po rami SENHOR ijayvu xevy: "Guary gua'y kuery reve guembia re okororõ oiny rã hovai vexa'i re opena va'e heta ete ou teñ nonhemondyi 'rã ha'e kuery ijayvua gui, nonhai 'rã guive heta ikuai teñ, ha'e rami ae avi SENHOR ixondaro reta va'e ou 'rã Sião ojeupegua yvyty áry joe opu'ã aguã.

<sup>5</sup> Guyra'i yvate rupi oveve-vevea rami avi SENHOR ixondaro reta va'e voi oarõ 'rã Jerusalém. Onhangareko vy ogueraa jepe 'rã, omboaxy vy oepy 'rã.

<sup>6</sup> "Ha'e nunga rupi Israel kuery, pejeko rerova ju opa marã rei pendekuai vy penderekarai va'ekue re.

<sup>7</sup> Ha'e va'e ára ma peteñ-teñ pemombo 'rã mba'emo ra'angaa pereko va'ekue prata ha'e ouro guigua, pejejavy aguã pendepo py ae pejapo va'ekue.

<sup>8</sup> Ha'e gui Assíria pygua kuery oiko vai 'rã avakue kyxé gui e'ŷ. Avakue kyxé py e'ŷ 'rã omombaa. Onhamba 'rã kyxé gui ramo ha'e kuery va'e regua kunumigue omomba'eapo nhea'aa 'rã imbokuapy.

<sup>9</sup> Okyje vy rive ha'e kuery oeja 'rã itaova onhemiaty. Huvixa kuery voi onhemondyipa rei vy onhamba 'rã oje'oivy bandeira omopu'aa rã oexa vy", he'i SENHOR Sião py hataypy va'e, Jerusalém py hata rupa va'e.

## 32

### *Huvixave teko porã rupi opena va'erã re ijayvuague*

<sup>1</sup> Ha'e gui oĩ 'rã peteĩ huvixave teko porã rupi opena va'e, anhetẽ rupi 'rã oguereco yvatekueve.

<sup>2</sup> Ha'e ramo ha'e kuery peteĩ-teĩ oĩ 'rã yvytu ha'e yvytu vaikue gui onhemia aguã, yvy piru reia rupi yy oxyry va'e rami, ha'e itaova tuvixa va'e 'ã yvy piru reia py oĩ va'e rami.

<sup>3</sup> Ha'e javé py ma oma'ẽ oiny va'e ndoexa e'ŷvei ma 'rã, ojapyxaka oiny va'e voi oendu potapa 'rã.

<sup>4</sup> Inhakã porã e'ŷ va'ekue ma opy'a py oikuaa nho 'rã, ijayvu e'ŷ va'ekue apekũ ma ijayvu kuaa vy ha'eve rei ju 'rã.

<sup>5</sup> Ha'e rã hi'arandu e'ŷ va'e pe ma "Hi'arandu va'e" nda'eavei ma 'rã, jokorepa rei va'e pe "Iporayvu'i va'e" nda'eavei ma 'rã.

<sup>6</sup> Mba'eta hi'arandu e'ŷ va'e ma o'arandu e'ŷa rupi ae 'rã ijayvu, ha'e mba'emo vai re anho 'rã ipy'a opa marã rei ikuai aguã, SENHOR rovai eteve voi onhemboapu aguã, okarux'e'i va'e pe ojou uka e'ŷ aguã ho'u va'erã, ha'e gui oy'uxe rei va'e pe ojou uka e'ŷ aguã oy'u aguã.

<sup>7</sup> Jokorepa rei va'e guembiporu oguereco va'e ma nda'evei va'e meme. Mba'eta nhombotavypaa rupi anho 'rã onhembopy'a, ojexavai va'e ojavyky aguã apu rupi ijayvu vy, iporiaukue'i ha'evea rami ae ikuai tei.

<sup>8</sup> Ha'e rã heko porã va'e ma teko porã rupi oiko aguã re anho 'rã onhembopy'a, teko porã re ae 'rã guive oĩ atã.

### *Jerusalém pygua kunhague pe ijayvuague*

<sup>9</sup> Kunhague mba'eve re peikuaa pota e'ŷ va'e, pepu'ã ke ha'e pendu xeayvu. Tajy kuery pevy'a rive va'e, pejapyxaka porã ke xeayvua re.

<sup>10</sup> Kunhague mba'eve re peikuaa pota e'ŷ va'e, peteĩ ma'etŷa py ovaẽ 'rã peryryipa aguã, mba'eta uva opa 'rã, ndai'avei 'rã.

<sup>11</sup> Peryryipa ke, kunhague mba'eve re peikuaa pota e'ŷ va'e, tajy kuery pevy'a rive va'e. Pemboi ke penhemondea pendepire rei aguã, ha'e gui voxá guigua py ju penhemonde.

<sup>12</sup> Pendepexo re peipete-pete mba'ety oiko porã va'ekue ha'e uva hi'a porã va'ekue re pendepy'a vai vy.

<sup>13</sup> Mba'eta xeretarã kuery yvy re oiko 'rã juu ha'e juu rakuaendy rive, oo ov'y'a okuapy va'e ikuaiague ha'e javi rupi, tetã ov'y'apa okuapyaty rupi guive.

<sup>14</sup> Huvixave ro voi oeja 'rã, mba'eta tetã heta va'e kuery ikuaiague opyta rive 'rã. Torre ha'e oikuaa potaaty ma itakua rami rive 'rã opyta raka'e rã peve, mburika ka'aguy rupigua opytu'u aguã ha'e vexa'i okaru atyrã rive.

<sup>15</sup> Ha'e ramo 'rã oiko pe yvate gui Nhe'ẽ ombou peve nhandere. Ha'e ramo teko a e'ŷague ojeapo 'rã yvyra'a tyrã, ha'e gui yvyra'a ty ikuai va'e ma ka'aguy regua ramo 'rã oiko porã.

<sup>16</sup> Ha'e vy teko a e'ŷaty rupi anhetẽ rupi joguereco va'e ju 'rã ikuai, ha'e yvyra'a ty rupi ma heko porã va'e ikuai 'rã.

<sup>17</sup> Ha'e ramo vy teko porã rupi ikuai vy ikuai porã 'rã okuapy. Teko porã gui ma ojeroviaa ha'e oĩ atãa 'rã oiko raka'e rã peve.

**18** Ha'e rami vy xeretarã kuery rekoa py oĩ 'rã mby'a porã anho. Hekoa oĩ atã 'rã, mba'eve ndoikoia ha'e mba'eve rei jipoia meme.

**19** Xapy'a rei amandau vaikue gui ka'aguy ho'apa ha'e tetã ha'e javi rupi ombovaipa teĩ,  
**20** peẽ ma pevy'a ete reve 'rã mba'emo ra'yĩ pemoaĩ yy ikuai va'e yvýry, ha'e penerymba vaka, mburika pepoi okaruxea rupi rei okaru aguã.

## 33

### *Jerusalém pygua kuery ojexavaiaque gui ogueraa jepea aguã re ijayvuague*

**1** Nda'evei ete 'rã peẽ kuery penhomomba va'ety ri napenemombaai teri va'e, ha'e anhetẽ rupi e'ŷ pejoguereko va'eri anhetẽ rupi e'ŷ napendererekaoi teri va'e pe. Mba'eta penhomomba ma rire peẽ ju 'rã penemombaa, ha'e anhetẽ rupi e'ŷ pejoguereko rire peẽ ju 'rã anhetẽ rupi e'ŷ pendererekao.\*

**2** SENHOR, endu ke oremboaxya. Ndee ae roarõ rokuapy va'e. Ko'ẽ nhavõ ke eiko oremombaraetearã, rojexavaia ára py orereraa jepearã eiko.

**3** Mba'eta ndeguigua hevovo va'e yvy regua kuery oendu vy onhamba 'rã. Joe repu'ã ramo yvy regua kuery oaĩmba 'rã.

**4** Ha'e kuery mba'e rei-rei oipe'apaa 'rã tuku ono'õ va'e rami. Tuku opo-opoa rami avi avakue opo 'rã ha'e nunga áry.

**5** Ha'e rã SENHOR ma yvate ete 'rã, yvate etea py ae oĩ va'e. Sião py omonyẽ 'rã anhetẽ rupi joguerekao ha'e teko porã.

**6** Ha'e ramo Sião pygua kuery, peikovea ja oĩ 'rã peĩ atã aguã. Opa rupi oiko 'rã oo jepe va'e, hi'arandu ha'e oikuua va'e. SENHOR renonde pejererokyjea rupi peiko ramo ha'e nunga ha'e javi 'rã oĩ pendevy guarã.

**7** Ha'e rã nhande kuery va'e regua ipy'a guaxukueve ma ojae'o 'rã okuapy oka rupi. Peteĩ rami ikuai aguã re ojerure oje'oivy va'ekue ojae'o 'rã ipy'a vaia rupi.

**8** Tape ikuai va'e opyta rivepa, ha'e rupi oguata va'ekue opytu'upa rã. Mba'eta ombovaipaa ma peteĩ rami ikuai aguã re ijayvuague. Tetã ikuai va'e voi oejapaa ma, ha'e jipovei ma nhomboete va'e.

**9** Yvy voi ipoaẽ vy opa ma ovy. Líbano rupi oxĩmba vy ipirupa. Sarom ma tekao e'ŷa rami opyta. Basã ha'e Carmelo gui oipe'apaa ma mba'emo rogue.

**10** SENHOR aipoe'i: "Aŷ ma xee apu'ã 'rã. Xee ae apu'ã 'rã, xemboyvatea 'rã guive.

**11** Mba'emo pirukue perekoo va'ekue gui mba'emo 'ygue rive pejou. Ha'e gui pendepoxya rupi pendekuiaque ma tata rami 'rã penemomba.

**12** Ha'e ramo heta va'e kuery oapypaa 'rã tata rugue rami opyta peve, juu'y ojaya pyre tata py okaipa vyvoia rami.

**13** Peẽ mombyry pendekuai va'e, pendu ke ajapo va'ekue omombe'ua rã. Ha'e peẽ ha'e'i py pendekuai va'e ma peikuaa pota xepo'akaa re", he'i.

**14** Ha'e gui Sião pygua kuery ojejavypa va'e ma okyjepa 'rã, heko vai va'e oryryipa 'rã okuapy. Ha'e rami vy ha'e kuery oporandu 'rã: "Nhande kuery regua mava'e nda'u ogueropo'aka 'rã tata nhomombaarrã ha'e tataendy ogue e'ŷ va'e mbyte py?" he'i 'rã.

**15** Teko porã rupi ikuai va'e anho 'rã ha'eve, ha'e anhetẽ rupi ijayvu va'e, nhomoingo axya rupi ojoupa va'e'ŷ. Mba'eta ha'e kuery ma opo py "Any" he'i reve ndojopyi 'rã teko vai repyrã. Oapyxa omboty 'rã oendu e'ŷ aguã jojuka aguã re ijayvua rã, ha'e guexa omboty 'rã teko vai oexa e'ŷ aguã.

**16** Ha'e kuery anho 'rã ikuai yvatevea py. Itaova yvatevea oĩ 'rã onhemí atyrã. Ho'u va'erã ome'ëa kuerei 'rã, oy'u aguã guive ojou ukaa 'rã.

**17** Ha'e gui penderexa py ae pexa 'rã huvixave guexakãa rupi opena rã yvy mombyry peve oo va'e re.

\* **33:1** Apy ma ijayvu Israel kuery rovaigua kuery re.

<sup>18</sup> Pendepy'a py mba'emo vai ete oiko va'ekue re penema'endu'a vy "Mamo tu opyta tery mboparaa, mamo tu opyta imposto-rã opejaa kuery? Ha'e mamo tu opyta torre ikuai va'e papaaty?" peje 'rã.<sup>†</sup>

<sup>19</sup> Mba'eta ha'e kuery ojejou porã rei va'ekue teĩ ndapexavei ma 'rã, neĩ amboae rami ijayvu va'e napendu kuaai rei va'ekue, amboae ayvu jaikuua e'ŷ va'e py ijayvu va'ekue.

<sup>20</sup> Pema'ẽ ke Sião tetã re. Ha'e py ma nhemboaty iky'a e'ŷ va'e jajapoaty. Ha'e vy penderexa py pexa 'rã Jerusalém ha'evepa reia, oguy oguerova pyrã ve'ŷ rami avi oĩ atã, yvyra rakua omo'ã mbyre ndoekyiaveia, ha'e ixã ikuai va'e nomondoa riveia rami.

<sup>21</sup> Ha'e py ma SENHOR jaexa rã yvate ete 'rã. Ojapo 'rã yakã ipyve va'e oxyry aguã rami. Ha'e rami teĩ peteĩve kanoã oipykui va'e ma voi novaẽi 'rã ha'e rupi, neĩ kanoã tuvixa va'e voi ha'e rupi ndoui 'rã.

<sup>22</sup> Mba'eta SENHOR ae 'rã oĩ nhandere oikuua pota va'e, nhanderekorã rejaa ha'e nhanderuvixave. Ha'e ae 'rã nhandereraa jepe.

<sup>23</sup> Ha'e rã aŷ ma ixã ikuai va'e ma ipyupa, hi'y nai'aĩ atãvei, ha'e ajukue oipyo aguã voi nda'evevi. Ha'e ramo ha'e kuery mba'emo oguerekopa va'ekue omboja'opaa 'rã. Ha'e nungakue oguata e'ŷ va'e kuery voi oipe'a 'rã heravy.

<sup>24</sup> Ha'e gui raka'eve rã Jerusalém py hekoaa va'e kuery neĩ peteĩve "Xemb'eaxy" nde'i 'rã, ha'e kuery ojejavyague omboguepaa 'rã guive.

## 34

### *Yvy regua kuery pe Nhanderuete ipoxya re ijayvuague*

<sup>1</sup> Yvy regua kuery, penhemboja ke pendu aguã. Heta va'e kuery, pejapyxaka pekuapy. Pendu ke yvy ha'e opa mba'e hexe oĩ va'e, hexe ikuai va'e ha'e javi.

<sup>2</sup> Mba'eta yvy regua ha'e javi pe SENHOR ipoxy, opoxya oexa uka ha'e kuery regua xondaro kuery ha'e javi pe. Ha'e rami vy imombaarã ha'e ijukapaarã pe omboaxapa.

<sup>3</sup> Ha'e kuery va'e regua ojukaa ma rire omombopaa 'rã mombyry. Hetekue heakuã vaikue 'rã, ha'e huguy ma ojao'ipa 'rã yvyty ikuai va'e.

<sup>4</sup> Ha'e gui yva re ikuai va'e okanhymba 'rã, ha'e yva oĩ va'e onhemama 'rã ovy mba'emo pirekue rami. Yva regua ha'e javi ho'apa 'rã, uva ha'e figo'y rogue ho'apaa rami avi.\*

<sup>5</sup> Mba'eta xekyxe oka'u va'e rami oguejy 'rã yva gui. Edom yvy re 'rã oguejy nhombopaga aguã, ha'e kuery opa aguã rami amboaxa rire.

<sup>6</sup> SENHOR kyxe re ma tuguy anho oĩ, vexa'i ha'e kavara ava ruguy, vexa'i pyky raxĩ kyra anho oĩ. Mba'eta SENHOR oa'anga Bozra tetã py jojuka aguã, ojukapa ete 'rã Edom yvy re.

<sup>7</sup> Toro ka'aguy regua voi oity 'rã ha'e kuery reve, vaka ra'y ho'a avi 'rã toro reve. Ha'e ramo ijyvy tynyẽ 'rã huguy, ha'e yvy ku'i 'rãgue py yvy porã opyta 'rã ikyrakue gui.

<sup>8</sup> Mba'eta ha'e va'e ára ma SENHOR nhombopaga aguã ára, ha'e va'e ma'etý ma Sião pygua kuery oepy aguã oa'anga.

<sup>9</sup> Ha'e ramo yakã'i Edom yvy re ikuai va'e ojeapo 'rã piche rami, yvy ku'i ma enxofre rami 'rã opyta. Ha'e va'e yvy ma opyta 'rã piche hendy va'e rami.\*

<sup>10</sup> Ha'e va'e ndoguei 'rã ara py neĩ pyávy. Hataxĩ opu'ã 'rã raka'e rã peve. Ha'e ramo ijyvy opyta rivepa 'rã ta'y kuery ra'y kuery ikuai jevy-jevy peve. Ha'e vy raka'e rã peve ha'e va'e rupi ndoaxaavei 'rã.

<sup>11</sup> Ha'e rami 'rãgue py pelicano ha'e kuĩ'i rive ha'e py ikuai 'rã. Ju'i ha'e xapirẽ ikuai 'rã ha'e py. Ha'e va'e áry rupi omoatãa 'rã ixã nhomombaarã, ha'e prumo nhomokanhymbaarã.

<sup>†</sup> **33:18** Hovaigua kuery imbojexavaiare ha'e tetã re opena va'ekue re ima'endu'a, ndoikovei ma rire. \* **34:4** Mateus 24.29, Marcos 13.24-25 \* **34:9** Piche ha'e enxofre ma hendy vuku va'e meme, mba'emo moendya guive.

<sup>12</sup> Ha'e rami vy ndoikovei ma 'rã yvatekueve nguvixaverã omoõ va'erã, huvixa kuery voi nda'ikuaiyei 'rã.

<sup>13</sup> Ha'e gui huvixave rogue py voi juu rive 'rã henhoõ, pyno guive. Oo ikorapa va'e py ha'e kuery onhemiaty va'ekue voi jaipa 'rã. Ha'e py ma jagua-tuvy nhe'ẽ rive 'rã ikuai, ha'e guyra nhandu onhemboaitry 'rã.

<sup>14</sup> Vixo vaikue tekoa e'õa regua anho 'rã ikuai aguara para reve, ha'e sátiro kuery rive 'rã onhe'ẽ okuapy joupe-up. Ha'e py ma pyavygua voi ojou 'rã opytu'u aguã.

<sup>15</sup> Urukure'a onhemboaitry 'rã ha'e py. Ombo'a ha'e omboaku 'rã guive, kuaray'ã py oguereko 'rã gua'y kuery. Xapirẽ voi ha'e py ae avi 'rã ijaty, peteõ-teõ oirũ reve.

<sup>16</sup> Peikuaa pota ke SENHOR guigua kuaxia re, ha'e peroayvu. Mba'eta ha'e va'e regua temimoingo neõ peteõve ndoiko e'õi 'rã, peteõve irõ ndoatai 'rã, ha'e rami ae SENHOR ijayvu rire. Inhe'ẽ ae omboatypa 'rã.

<sup>17</sup> Mba'eta oexa ma ixortea ha'e kuery ikuai aguã oa'anga vy, opo py ijyvyrã omboja'o ixã py. Ha'e py ae ha'e kuery ikuai 'rã raka'e rã peve, ta'y kuery jevy-jevy peve ikuai 'rã ha'e py.

## 35

### *Sião pygua kuery ovy'a okuapy aguã re ijayvuague*

<sup>1</sup> Tekoa e'õa rupi ovy'aa 'rã, yvy ha'e javi rupi guive. Yvy joja reia voi ovy'a vy ipoty 'rã yvotyty rami.

<sup>2</sup> Ipoty reta rã oporaeia 'rã oguerovy'a ete vy. Ha'e py ma omoporãa 'rã Líbano rami. Carmelo ha'e Sarom rami ete 'rã iporã. Ha'e gui ha'e pygua kuery oexa 'rã SENHOR rexakãa, Nhanderuete po'akaa.

<sup>3</sup> Penhemombaraete ju ke napendepo mbaraeteveia gui, ha'e penerenapy'ã ryryipaa gui.

<sup>4</sup> Aipopeje ipy'a kangy va'e pe: "Penembaraete ke, pekyje eme. Upé ma Nhanderuete ou. Nhanderepya ou ma oiny, Nhanderuete nhombopagaa va'e. Ha'e ou vy nhandereraa jepe 'rã", peje.

<sup>5</sup> Ha'e rami rã ára reveguia e'õ rexia ojepe'a 'rã, ojepe'a avi 'rã ijapyxa e'õ va'e apyxa.

<sup>6</sup> Oguata e'õ va'ekue opo 'rã guaxu rami, ha'e ijayvu e'õ va'ekue ma oporaei 'rã. Mba'eta tekoa e'õa rupi oxyry xapy'a 'rã yy, yakã'i oxyry 'rã yvy joja reia rupi.

<sup>7</sup> Ha'e ramo ita ku'i xiõ reia va'ekue ojeapo 'rã yuparã, yvy yy jipoi reiague voi yvupa 'rã. Ymave rupi jagua-tuvy nhe'ẽ oikoague rupi henhoõmba 'rã yvyra, takua ha'e jai rogue.

<sup>8</sup> Ha'e va'e rupi ma oõ 'rã peteõ tape porã. Ha'e va'e tape pe ma "Tape iky'a e'õ va'e" 'ea 'rã. Ha'e va'e rupi ma ndojeky'a'o ukai va'e kuery ndoguatai 'rã, ixupeguia kuery anho. Ha'e va'e rupi oguata va'e ma ndojavyi 'rã, ndoiko kuaai teõ.

<sup>9</sup> Ha'e rupi ndoikoi 'rã guary, peteõve mymba inharõ va'e ndoexaai 'rã ha'e rupi. Mba'eta ha'e rupi oguata va'e ma ogueraa jepe pyre anho.

<sup>10</sup> Ha'e rami vy SENHOR ogueraa jepe va'ekue ojevypa 'rã, Sião py oupa 'rã ovy'aa rupi oporaei reve. Ha'e kuery re oõ 'rã vy'a opa e'õ va'e, inhakã re coroa oõa rami. Ha'e kuery oupity va'erã va'e ma mby'a porã ha'e vy'a anho. Ha'e rã mboriau ha'e mby'a vai ma okanhymba 'rã.

## 36

### *2 Reis 18.13-18; 2 Crônicas 32.1-8*

<sup>1</sup> Ha'e gui catorze ma'etõ re ma huvixave Ezequias oõ javi re Assíria pygua huvixa Senaqueribe ou Judá yvy re tetã ikorapa va'e ha'e javi re opu'ã aguã. Ha'e vy oipe'apa ha'e kuery oguereko va'ekue ha'e javi.

<sup>2</sup> Ha'e gui huvixa Ezequias-a katy Assíria pygua huvixave omondouka guembiguai Rabsaqué. Laquis tetã gui omondouka Jerusalém katy xondaro kuery heta ikuai va'e

reve. Ha'e vy ha'e kuery ijatypa okuapy yy omboty pyre yvy'ã re oĩ va'e gui yy rape ou va'e rovai katy, tape ao joiaty kuery yvy via yvýry.

<sup>3</sup> Ha'e ramo Rabsaqué reve nhovaexí vy oje'oi Hilquias ra'y Eliaquim huvixa ro re opena va'ety, kuaxia mboparaa Sebna ha'e Asafe ra'y mba'emo oiko va'ekue mboparaaty Joá.

*2 Reis 18.19-37; 2 Crônicas 32.9-19*

<sup>4</sup> Ha'e ramo ha'e kuery pe Rabsaqué aipoe'i:

— Aipopeje ke Ezequias pe: “Po rami Assíria pygua huvixa yvateve va'e ijayvu: ‘Mba'e nunga re tu rejerovia?

<sup>5</sup> Ndevy pe ae xee xeayvu: Ndee ore kuery re repu'ã aguã re renhembopy'aa ma ayvu rive'i. Marã ramigua kuery re tu rejerovia reikovy, xerovai repu'ã aguã?

<sup>6</sup> Egito pygua kuery re ri rejerovia, ha'e rami teĩ ha'e kuery ma popoka takua ovopa va'e ramigua rive, mba'eta ha'e va'e re amongue ojeko rã ipo py oixu'upa 'rã. Ha'e ramigua ae 'rã oiko Egito pygua huvixa Faraó ha'e hexe ojerovia va'e kuery ha'e javi re.

<sup>7</sup> Ha'e rã xapy'a rei xevy aipo're 'rã: “Ore ma SENHOR Oreruete re ae rojerovia va'e”, 're teĩ ha'e va'e peguare e'ÿ teveombojeroviaaty yvyty rupi ikuai va'e ha'e altar Ezequias oitypa va'ekue? Mba'eta ha'e ma Judá ha'e Jerusalém pygua kuery pe aipoe'i va'ekue: “Kova'e altar Jerusalém py oĩ va'e katy anho 'rã pembojerovia pekuapy”, he'i va'ekue pendevy.”

<sup>8</sup> Ha'e nunga rupi ejerure na xeruvixa Assíria pygua pe, ha'e gui xee ma ndevy ame'ë 'rã dois mil kavaju, xapy'a rei avakue hi'áry guarã rejou ri ramo.

<sup>9</sup> Ha'e gui mba'e re tu rejerovia Egito pygua karóxa ha'e kavaju árygua kuery re? Mba'eta xeruvixa rembiguai yvyigüeve re teĩ napendepo'aka kuaai ri.

<sup>10</sup> Ha'e gui xapy'a rei xee nda'u SENHOR reve'ÿ ri aju peneretã amomba aguã? Any, mba'eta SENHOR ae xevy aipoe'i: ‘Tereo ke, epu'ã ha'e kuery yvy re, ha'e emomba’, he'i xevy.”

<sup>11</sup> Ha'e ramo Rabsaqué pe Hilquias ra'y Eliaquim, Sebna ha'e Joá ombovai vy aipoe'i okuapy:

— Rojerure ndevy: Ndeayvu ke aramaico ayvu py anho ore nerembiguai kuery pe, mba'eta ore roendu kuaa rã. Ndeayvuve eme judeu kuery ayvu py, heta va'e kuery tetã kora áry rupi ikuai va'e oendu kuaa e'ÿ aguã — he'i.

<sup>12</sup> Ha'e rami teĩ Rabsaqué ombovai:

— Ha'e gui pêvy ha'e penderuvixa remiendurã anho teve xeruvixa xembou xeayvu aguã? Avakue tetã kora áry rupi ikuai va'e pe guive e'ÿ teve xeayvu, mba'eta peẽ kuery rami avi ha'e kuery voi ikuai guepoxi ho'u, otyrai ae oy'u okuapy aguã rami — he'i.\*

<sup>13</sup> Ha'e rami vy Rabsaqué opu'ã vy ijayvu atã ho'amy judeu kuery ayvu py. Ha'e vy aipoe'i:

— Pejapyxaka ke Assíria pygua huvixa yvateve va'e ayvu re.

<sup>14</sup> Po rami xeruvixa ijayvu: “Penhembotavy uka eme Ezequias pe, mba'eta ha'e ma napendereraa jepei 'rã.

<sup>15</sup> Neĩ Ezequias tapendeapo eme SENHOR re pejerovia aguã rami, mba'eta aipoe'i: ‘SENHOR nhandereraa jepe 'rã, ha'e vy kova'e tetã nomboaxai 'rã Assíria pygua huvixa po py', he'i 'rã.

<sup>16</sup> Pejapyxaka eme Ezequias ayvu re. Mba'eta po rami Assíria pygua huvixa ijayvu: ‘Pejapo ke xereve peteĩ rami nhandekuai aguã, ha'e vy peju xea katy. Ha'e rami vy peteĩ-teĩ pekaru 'rã penemba'e vinho ha'e figo'a re, ha'e penemba'e ygua gui ae 'rã pey'u pekuapy,

<sup>17</sup> xee pendea py aju peve. Ha'e gui xee rogueraa 'rã peteĩ yvy pendeyvy rami ae itui va'e katy. Ha'e va'e yvy ma mba'emo aju ha'e uva rykue oña, mbojape ha'e uva oata e'ÿa.

\* <sup>36:12</sup> Ha'e rami ijayvu, mba'eta tetã ojokopa ramo ha'e pygua kuery ndojoui 'rã ho'u va'erã neĩ yy oy'u aguã.

**18** Penhembotavy uka eme Ezequias pe “ SENHOR nhandereraa jepe 'rā”, he'i ramo. Mba'eta yvy regua kuery ruete ra'angaa ikuai va'e nda'u ogueraa jepe ri yvy Assíria pygua huvixa po gui?

**19** Mba'eta mamo tu ikuai Hamate ha'e Arpade pygua kuery ruete? Mamo tu ikuai Sefarvaim pygua kuery ruete ra'angaa? Ha'e kuery nda'u xepo gui ogueraa jepe raka'e Samaria tetā?<sup>†</sup>

**20** Ha'e va'e yvy re ikuai va'e ruete ra'angaa regua mava'e tu ogueraa jepe oyvy xepo gui? Mba'exa 'rā tu ha'vy SENHOR ogueraa jepe Jerusalém xepo gui?' he'i.”

**21** Ha'e ramo heta va'e kuery okyrirīmba okuapy, peteīve ma voi nombovai, huvixa “Pembovai eme” he'i rire.

**22** Ha'e ramo Hilquias ra'y mba'emo re opena va'ety Eliaquim, kuaxia re opena va'ety Sebna ha'e Asafe ra'y mba'emo oiko va'ekue ombopara va'ety Joá jogueraa ju Ezequias oña py. Oao omondoropa va'ekue reve ovaē vy ixupe omombe'u okuapy Rabsaqué ijayvuague ha'e javi.

## 37

### 2 Reis 19.1-7

**1** Ha'e nunga huvixa Ezequias oendu vy omondoro oao, ha'e ajukue voxā guigua py rive onheovāmba vy oike SENHOR pegua oo py.

**2** Ha'e rami vy Amoz ra'y profeta Isaías oña katy omondouka ngoo re opena va'ety Eliaquim, kuaxia re opena va'ety Sebna ha'e sacerdote yvatekueve va'e. Ha'e ramo ha'e kuery ajukue voxā guigua py onheovā va'ekue reve jogueraa

**3** Isaías pe aipoe'i aguā:

— Po rami Ezequias aipoe'i: “Kova'e ára ma jajexavai aguā ha'e nhanembopagaa rā nhaxīmba aguā ára, kunha oikuavā'i ta teī oguerekō ete aguā na'imbaraetevei va'e rami nhandekuai.

**4** Mba'eta Assíria pygua huvixa remimbou Rabsaqué ijayvu va'ekue Nhanderuete oikove va'e rovai. Ijayvua SENHOR Nderuete oendu vy ijayvu ete 'rāgue ixupe. Ha'e nunga rupi ejapukai ke ixupe jakuave'i teri va'e re”, he'i aguā.

**5** Ha'e ramo Isaías oña py huvixa Ezequias rembiguai kuery ovaē ramo

**6** Isaías aipoe'i ha'e kuery pe:

— Aipopeje ke penderuvixa pe: “Po rami SENHOR ijayvu: Ekyje eme ayvu rendu va'ekue káuxa. Ha'e va'e ayvu rupi ma Assíria pygua huvixa rembiguai kuery xerovai ae ijayvu okuapy.

**7** Ha'e rami teī hexe ambou 'rā peteī nhe'ẽ imongygearā. Ha'e ramo ixupe mba'emo omombe'ua rā oendu vy ojepe'a ju 'rā ovv oyvy katy ae. Ha'e gui ma ha'e py ajapo 'rā kyxe py ojukaa aguā rami”, he'i.

### 2 Reis 19.8-13

**8** Ha'e gui ma Rabsaqué oo ju vy oikuua Assíria pygua huvixa kuery Libna tetā re opu'ā okuapya, mba'eta oendu ma voi huvixa Laquis tetā re opu'āa gui ojepe'a ma ovvyague.

**9** Assíria pygua huvixa oendu avi “Etiópia pygua huvixa Tiraca ma je ou oiny nderovai opu'ā vy”, 'ea ramo. Ha'e rami oendu vyve peteīgue ju omondouka guembiguai kuery Ezequias oña katy. Ha'e vy aipoe'i uka ha'e kuery pe:

**10** — Po rami pendeayvu 'rā Judá pygua huvixa Ezequias pe: “Enhembotavy uka eme nderuete re rejeroviaa py. Mba'eta aipo're: ‘Jerusalém tetā ma nomboaxai 'rā Assíria pygua huvixa po py’, 're.

**11** Ndee nerendui teve Assíria pygua huvixa kuery yvy jave re ojapo va'ekue? Mba'eta omomba ete. Ha'e nunga rupi ndee rexā'ri ty'y reo jepe aguā?

<sup>†</sup> **36:19** Hamate, Arpade, Sefarvaim ha'e Samaria.

<sup>12</sup> Mba'eta yvy regua ruete ra'angaa ikuai va'e nda'u ogueraa jepe ri raka'e xeramoĩ kuery omomba aguã gui? Ha'e va'e kuery ma Gozã, Harã ha'e Rezefe pygua, ha'e Éden ramymino kuery Telassar py ikuai va'ekue.

<sup>13</sup> Ha'e mamo tu oiko aŷ Hamate pygua huvixa, ha'e Arpade, Sefarvaim tetã, Hena ha'e Iva pygua huvixa kuery?" – he'i uka.

**2 Reis 19.14-19**

<sup>14</sup> Ha'e gui ma tembiguai kuery po gui kuaxia para Ezequias ojopy vy ogueroayvu. Ha'e rami vy SENHOR pegua oo py oike vy oexa uka imoiny henonde.

<sup>15</sup> Ha'e rami vy SENHOR renonde ojapukai vy aipoe'i:

<sup>16</sup> — SENHOR Israel kuery ruete, anjo kuery pepo áry rupi reguapy reiny va'e repenaa py, ndee anho'i reiko yvy jave regua kuery ruete. Ndee ma yva ha'e yvy apoare.

<sup>17</sup> SENHOR, ejapyxaka rendu pota aguã. Eipe'a ke nderexa, rexâ pota aguã. Ha'e vy endu pota Senaqueribe ijayvuague ha'e javi re, mba'eta ndee Oreruete reikove va'e, nderovai ae ijayvu.

<sup>18</sup> Ha'e gui SENHOR, anhetẽ ete ae Assíria pygua huvixa kuery omomba raka'e yvy regua ikuai va'e, ha'e kuery yvy guive.

<sup>19</sup> Ha'e gui oapypa guive ha'e kuery ruete ra'angaa oguereko va'ekue. Ha'e rami avi ha'e nunga ma tuuete e'ŷ ae, avakue rembiapo, yvyra ha'e ita guigua rive. Ha'e nunga rupi ae omomba.

<sup>20</sup> Ha'e ramo SENHOR Oreruete, orereraa jepe ke ipo gui, yvy regua ha'e javi oikuua aguã ndee anho SENHOR reikoa – he'i.

**2 Reis 19.20-34**

<sup>21</sup> Ha'e gui Amoz ra'y Isaías oayvu ogueraa uka Ezequias pe:

— Po rami SENHOR Israel kuery ruete ijayvu: Assíria pygua huvixa Senaqueribe káuxa xevy rejerure ramo

<sup>22</sup> po rami xee SENHOR xeayvu hexe. Ndere ma kunhataĩgue'i Sião pygua rajy kuery opuka rei okuapy. Nderakykue Jerusalém pygua rajy kuery oguerova-rova oakã.

<sup>23</sup> Mba'eta mava'e re tu ndeayvu vai? Mava'e tu rejojai? Mava'e rovai rupi tu ndeayvu ha'e nderexa py rema'ẽ vaikue rei? Xee Israel kuery ruete xeky'a e'ŷ va'e rovai ae.

<sup>24</sup> Mba'eta nerembiguai kuery rembo'e SENHOR rovai ijayvu aguã re. Ha'e vy aipo're: "Xekaróxa reta va'e vy ajeupi 'rã yvyty áry peve, Líbano yvy re mombyryvea rupi tei. Xee aitypa 'rã ha'e py yary yvatekueve ha'e cipreste iporãgueve ikuai va'e, avaẽ 'rã mombyryvea py apyta aguã, ka'aguy inhanavea py peve.

<sup>25</sup> Ha'e gui yvy ajo'o vy ay'u amboae regua kuery pegua yy gui, ha'e Egito yvy re apyrõ vy rive amombirupa yakã ikuai va'e", 're va'ekue.

<sup>26</sup> — Ha'e rami teī nerendui teve yma rupi ma voi xee ae amoĩ ha'e va'e nunga oiko aguã, ymave guive anhembopy'a ae ma ha'e rami aguã re? Ha'e rami vy aŷ ma amoingo ete ma ha'e nungakue. Xee ae aipotaa rami vy ndee rembovaipa karamboae tetã ikorapa va'ekue.

<sup>27</sup> Ha'e nunga rupi ae ha'e pygua kuery ikangypa, okyjepa ha'e oximba rei raka'e. Ha'e rami vy okanhymba vyvoi nhuū rami rive, e'ŷ vy jai rogue pyau, nhuū oo ao'ia áry henhoĩ rive va'e rami, e'ŷ vy mba'emo onhotõ mbyre ijaju e'ŷ re okaipa va'e rami rive.

<sup>28</sup> Ha'e rã xee ma aikuua porã reguapy reiny rã, repu'ã reovy ha'e reike ju rejuvy nhavõ, ha'e gui xerovai repu'ã reia guive.

<sup>29</sup> Ha'e ramo xerovai repu'ã reia ha'e renhemboyvate reia aendupa ma vy aŷ ma nexī re amoĩ 'rã ty'aĩ ndereruarã, ndejuru re amoĩ avi 'rã juru xã, ha'e rami vy ajapo 'rã rejuvenue rupi ae ju rejevy aguã rami.

<sup>30</sup> — Ha'e gui ndee Ezequias reikuua aguã ma pova'e 'rã oiko: Aŷ kova'e ma'etõ ma peẽ kuery pekaru 'rã mba'emo ha'e ae gui henhoĩ va'ekue re, ha'e gui amboae ma'etõ ma ha'e va'ekue gui ikuai va'ekue re ju 'rã pekaru. Ha'e rã mboapy ma'etõ py ma penhotõ ju 'rã mba'emo, ha'e gui pemono'õ 'rã. Penhotõ 'rã uva, hi'a pe'u aguã.

<sup>31</sup> Ha'e gui Judá regua rembyre oo jepe va'ekue ma hapo ju 'rã yvy katy, ha'e vy hi'árykue ma hi'a ju 'rã.

<sup>32</sup> Mba'eta Jerusalém tetã py ikuai 'rã okuave va'e, Sião yvyty re ikuai 'rã oo jepe va'ekue. SENHOR ixondaro reta va'e ae 'rã ojapo, nhanderayvu etea rupi.

<sup>33</sup> — Mba'eta po rami SENHOR ijayvu Assíria pygua huvixa rekorã re: “Ha'e ma kova'e tetã py ndoikei 'rãe, neĩ peteĩve hu'y nomomboi 'rã tetã katy, hu'y jokoa reve nonhembojai 'rã ouvy, neĩ yvy nombo'yvatei 'rã guive tetã kora áry rupi ojeupi aguã.”

<sup>34</sup> Ha'e rami 'rãgue py tape ouague rupi ae ju 'rã ojevy. Kova'e tetã py ndoikei 'rãe”, he'i SENHOR.

<sup>35</sup> “Mba'eta xee ae ajoko 'rã tetã araa jepe vy, xejee ha'e xerembiguai Davi re ama'ẽ vy”, he'i.

### *2 Reis 19.35-37, 2 Crônicas 32.21,22*

<sup>36</sup> Ha'e gui ma anjo SENHOR-a guigua ou vy Assíria pygua kuery ijatya rupi ojuka cento e oitenta e cinco mil. Ko'ëgue okuave'i va'e ovvy vy oexa rã hetekue rive ikuai.

<sup>37</sup> Ha'e ramo Assíria pygua huvixa Senaqueribe ojepe'a ju ovvy. Ojevy vy guetã ae Nínive py ju opyta.

<sup>38</sup> Ha'e gui ma nguuete ra'angaa Nisroque pegua opyomboetea py oï jave ta'y kuery ae Adrameleque ha'e Sarezer ojuka kyxé py. Ha'e vy onhamba jogueravy Ararate yvy katy. Ha'e ramo ta'y Esar-Hadom ju oï nguu rekovia.

## 38

### *2 Reis 20.1-11, 2 Crônicas 32.24-31*

<sup>1</sup> Ha'e va'e jave py huvixa Ezequias imba'eaxy vy omano ta ma oupy. Ha'e ramo oña py ou Amoz ra'y profeta Isaías. Ha'e vy aipoe'i ixupe:

— Po rami SENHOR ijayvu: “Emoatyrõ mba'emo ndero py ikuai va'e, mba'eta remano 'rã, ndereikovevei ta ma”, he'i.

<sup>2</sup> Ha'e ramo Ezequias ojere vy ngoo mbotya re ngova omboja oupy. Ha'e vy SENHOR pe ojerure vy

<sup>3</sup> aipoe'i:

— SENHOR, ajerure ndevy. Nema'endu'a ke neronden rupi ha'evea rami aikoague re, xepy'a ha'e javi py. Ha'evea ramigua ajapo aikovy va'ekue neronden rupi — he'i. Ha'e vy ojae'o vaipa oupy.

<sup>4</sup> Ha'e gui Isaías pe SENHOR ombou ju oayvu. Ha'e vy aipoe'i:

<sup>5</sup> — Ejevy ke, ha'e vy aipo're Ezequias pe: Po rami SENHOR neramoí Davi ruete va'e ijayvu: “Xee aendu ma renhembo'ea, nderekay aexa guive. Ha'e vy amoïve 'rã nde'ára quinze ma'etý peve ju.

<sup>6</sup> Ha'e vy rogueraa jepe 'rã Assíria pygua huvixa po gui, kova'e tetã guive. Aepy 'rã kova'e tetã”, he'i.

<sup>7</sup> Pova'e nunga SENHOR oexa uka 'rã ndevy, reikuua aguã oayvuague ojapo 'rãa.

<sup>8</sup> “Tape pyrõ-pyrðarã Acaz ojapo va'ekue re ajapo 'rã kuaray'ã dez pyrõa hakykue katy ju ojevy aguã rami”, he'i. Ha'e gui ha'ekue rami ae ojapo kuaray'ã dez pyrõa peve hakykue katy ju ojevy aguã rami.

### *Ezequias oporaeiague*

<sup>9</sup> Ha'e ramo Judá pygua huvixa Ezequias imba'eaxy vaipa oupyague gui opu'ã ju ma rire po rami oporaei:

<sup>10</sup> — Xee aipoa'e va'ekue:

“Xembaraete rei reve aikovea py teĩ  
aÿ aike ta yvyra rupa rokẽ rupi.

Mba'eta xegui oipe'aa ta ma aikovea ma'etý”, ha'e va'ekue.

<sup>11</sup> Aipoa'eve ju va'ekue:

“Okuave va'e yvy re xee ndaexavei ma 'rã SENHOR.

- Neĩ peteĩve ava ma voi ndaexavei ma 'rã yvy re hekoia va'e.
- <sup>12</sup> Mba'eta xegui aikovea'i oipe'aa ta heravy mombyry,  
vexa'i re opena va'e okeaty ombovaipaa rami.  
Ajukue apoa rami rejaya ta xerekovea nhimbo rami.  
Ára oaxa rã pytūa rami rejapo xerekovea opa aguã rami.
- <sup>13</sup> Xee arõ are ma ainy ko'ẽ rai peve,  
ha'e rã ha'e ma guary rami omopẽmba xekãgue.  
Ára oaxa rã pytūa rami rejapo xerekovea opa aguã rami", ha'e va'ekue.
- <sup>14</sup> — Mbyju'i e'ŷ vy jeruxi rami avi anhe'ẽ aikovy va'ekue,  
apykaxu rami xepoãe rei va'ekue.  
Xerexa voi ikangypa ma yvate katy ama'ẽ riae ete rã.  
" SENHOR, ajexavai rei aikovy, xembovai ke", ha'e va'ekue.
- <sup>15</sup> — Ha'e gui aŷ ma marã rami nda'u xeayvu 'rã?  
Ndee ndeayvuague rami ae xererekro.  
Ha'e nunga rupi aikovea pukukue re ha'evepa rei'i 'rã aikovy,  
xerekovea ojexavai vaipa rire.
- <sup>16</sup> SENHOR, ha'e rami ndee orerekro ramo ore avakue roikove,  
xenhe'ẽ voi ha'e nunga re ae 'rã oĩ.  
Mba'eta xemoexaĩ vy xemoingove ju.
- <sup>17</sup> Xembopy'a porã ju aguã ae xembojexavai va'ekue.  
Mba'eta ndee ma xerekovea reayvu vy  
xereraa jepe yvykua py xevaipa aguã gui,  
mba'eta nderakykue katy remombopa ma ajejavyague ha'e javi.
- <sup>18</sup> Ha'e gui yvyra rupa py ma avave nandererovy'aai 'rã,  
manoa py nanemboeteai 'rã.  
Yvy kua katy oguejy va'ekue ma noarõvei 'rã okuapy anhetẽ ete va'e rupi reikoa.
- <sup>19</sup> Okuave va'e anho 'rã ndereroporaei,  
kova'e ára xee rogueroporaeia rami.  
Ha'e tuu kuery omombe'u 'rã gua'y kuery pe anhetẽ ete va'e rupi reikoa.
- <sup>20</sup> Mba'eta SENHOR ou vy xereraa jepe.  
Ha'e nunga rupi mba'epu ixã va'e nhambojoguy reve  
jaroporaei 'rã ára nhavõ jaikovea pukukue re,  
SENHOR pegua oo py – he'i.
- <sup>21</sup> Mba'eta Isaías aipoe'i ae va'ekue: "Peru figo'a oumbiri pyre, ha'e pemboja ijai re.  
Ha'e ramo okuera 'rã imba'eaxyia gui", he'i va'ekue.
- <sup>22</sup> Ezequias voi aipoe'i va'ekue: "Mba'e nunga tu oiko 'rã aikuua aguã SENHOR ro py ju aa  
'rãa?" he'i va'ekue.

## 39

### 2 Reis 20.12-19

- <sup>1</sup> Ha'e va'e jave py Babilônia pygua huvixa Baladã ra'y Merodaque-Baladã va'e ma  
"Huvixa Ezequias haxy oupy" 'ea rã oendu vy oĩa katy ombou kuaxia para, mba'emo  
ome'ẽ va'erã reve.
- <sup>2</sup> Ha'e ramo herua kuery ovaẽ rã Ezequias oguerovy'a vy ha'e kuery pe oexa uka  
mba'emo omoõ porãaty py oguerekro va'e ha'e javi: prata, ouro, tembi'u irûrã, azeite  
iporãve va'e ha'e tembiporu joe opu'ãa pygua. Omoõ porãaty py ikuai va'e ha'e javi oexa  
uka. Neĩ peteĩ'i voi Ezequias ndoexa ukai ha'e kuery pe, ngoo py ae, neĩ openaa ha'e javi  
rupi oguerekro va'e.

- <sup>3</sup> Ha'e ramo huvixa Ezequias oĩa py profeta Isaías ou vy oporandu ixupe:  
— Mba'e nunga re tu avakue ou va'ekue ijayvu okuapy ra'e? Magui tu ou okuapy ndea  
py?

Ezequias ombovai:

— Peteĩ yvy mombyryvea gui ou, Babilônia gui ae — he'i.

<sup>4</sup> Ha'e ramo oporanduve ju:

— Mba'e tu ha'e kuery oexa okuapy ndero py?

Ezequias ombovai:

— Xero py oexa okuapy mba'emo ikuai va'e ha'e javi. Xemba'e amoĩ porãaty py oĩ va'e regua neĩ peteĩve ndaexa ukai ha'e kuery pe — he'i.

<sup>5</sup> Ha'e gui ma Isaías aipoe'i Ezequias pe:

— Endu ha'vy SENHOR ayvu.

<sup>6</sup> “Ovaẽ 'rã ára ndero py ikuai va'e ha'e javi Babilônia yvy katy ogueraapaa aguã, ymave guive neramoĩ kuery omoĩ porã va'ekue kova'e ára peve. Ndoejaa'i 'rã neĩ peteĩ regua ma voi”, he'i SENHOR.

<sup>7</sup> Ndera'y kuery rerekro va'ekue ae voi ogueraapaa avi 'rã okuapy, Babilônia pygua huvixa ro py oa'yíjo pyre meme ikuai aguã — he'i.\*

<sup>8</sup> Ha'e ramo Ezequias aipoe'i Isaías pe:

— Pova'e ayvu SENHOR guigua remombe'u va'e ma ha'eve va'e — he'i, ojeupe ae “Xee aikuua rã aikovea ja mby'a porã anho ha'e ha'evepa rei'i ta merami”, he'i vy.

## 40

### *SENHOR ou aguã re ijayvuague*

<sup>1</sup> Nhanderuete aipoe'i: “Xevygua kuery pe pendeayvu pembovy'aa rupi, pembovy'a ju ke.

<sup>2</sup> Pendeayvu porã'i ke Jerusalém pygua kuery pe. Ha'e vy aipopeje: ‘Opa ma pendere opu'ãa ague, mba'eta penderekro vaiague omboguepaa ma. Pejejavyague re pepaga aguã va'ekue mokoïgue ma pejopy SENHOR po gui’, peje.”

<sup>3</sup> Ha'e gui ma onhendu 'rã tekao e'ýa rupi ojapukai va'e po rami: “Perekro katu ke SENHOR raperã. Pembo'yvi ke tape tekao e'ýa rupi oo va'e Nhanderuete ou aguã.

<sup>4</sup> Mba'eta yvyugua ha'e javi omonyëmba 'rã. Ha'e gui yvyty ha'e yvy'ã ikuai va'e ombojopaja 'rã. Ikarẽ rei va'ekue-'ekue ombo'yvipa 'rã, ha'e yvy'ã guy rei va'ekue ijojapa 'rã.

<sup>5</sup> Ha'e gui ma ojekuaa 'rã SENHOR rexakãa. Avakue ha'e javi 'rã oexa, SENHOR ojuru py ae ijayvu rire.”\*

<sup>6</sup> Ha'e gui peteĩ ayvu onhendu vy “Ejapukai”, he'i.

Ha'e gui amongue oporandu: “Mba'e tu arojapukai ta?”

“Aipo'ere: ‘Avakue ha'e javi ma jai rogue, ha'e ha'e kuery oguerovy'ave va'e ha'e javi ma ipoty rami rive oĩ.

<sup>7</sup> Mba'eta jai rogue ipiru 'rã, ha'e ipoty okuipa 'rã, ha'e va'e re SENHOR oipeju ramo rive. Anhetẽ avakue ma jai rogue rami meme ikuai.

<sup>8</sup> Jai ipiru ramo ipoty okuipa 'rã. Ha'e rã Nhanderuete ayvu ma oĩ riae 'rã raka'e rã peve guarã', 'ere.”\*

<sup>9</sup> Ha'e gui ndee Sião pygua, eẽ ke yvyty yvateve va'e áry mba'emo pyau remombe'u aguã. Remombe'u 'rã mba'emo pyau Jerusalém pygua kuery pe, ayvu atã reve 'rã ndeayvu. Epu'ã ke, ekyje eme, emombe'u porã Judá tetã pygua kuery pe: “Pee ma ou oiny Nhanderuete!” 'ere.

<sup>10</sup> Mba'eta SENHOR Nhanderuete ma opo'akaa reve ou 'rã, ojyva py ipo'aka aguã. Ha'e ogueru 'rã jaikoague repy, guenonde ombou 'rã nhandevy ome'ẽ va'erã.

\* <sup>39:7</sup> Ha'e va'e jave ma huvixave kuery oa'yíjo uka 'rã guembiguai kuery ngoo rupi guarã. \* <sup>40:5</sup> Kova'e ayvu rupi João Batista ijayvu Jesus ou 'rãa omombe'u vy (Mateus 3.3, Marcos 1.3, Lucas 3.4-6, João 1.23). \* <sup>40:8</sup> 1 Pedro 1.24-25

11 Ha'e rami vy onhangareko 'rã ojeupegua kuery re vexa'i re opena va'e rami. Ojyva áry ogueru 'rã vexa'i ra'y, oikuavã 'rã heruvy. Ha'e ta'y'i va'e ma mbegue'i 'rã oguerek.

*SENHOR yvateve va'ea re ijayvuague*

12 Ha'e gui mava'e nda'u opo ruguaa py yy oa'anga, ha'e okuã py yva oa'ã raka'e? Mava'e nda'u yvy ku'i ojopy ajaka py rami, ha'e gui yvyty ha'e yvy'ã ikuai va'e mba'emo opejaa py oa'ã raka'e?

13 Mava'e nda'u ombo'e raka'e SENHOR Nhe'ẽ? Mava'e nda'u imongetaarã oiko raka'e ombo'e aguã?\*

14 Mava'e pe nda'u onhemoneta uka raka'e oikuaapa aguã rami? Mava'e nda'u ombo'e raka'e tape teko porã rupi oo aguã re, e'ý vy ombo'e 'arandu re, ha'e rami e'ý vy ixupe oikuaa uka tape oikuaa aguã katy oo va'e?

15 Mba'eta ixupe rã yvy regua ikuai va'e ma yryru gui peteĩ otyky va'e rami ikuai, ha'e e'ý vy mba'emo opejaa py peteĩ ku'i apĩ'i oĩ va'e rami. Ixupe rã yy pa'ũ ikuai va'e voi yvy ku'i opu'ã va'e rami ikuai.

16 Ixupe guarã japy aguã neĩ Líbano yvy re yvyra ikuai va'e ha'e javi nda'evei, ha'e py mymba ikuai va'e voi nda'evei japy reve nhame'ẽ aguã.

17 Ha'e oexa rã yvy regua ha'e javi mba'everã ndovarei va'e rami ikuai. Ha'e oikuua rã mba'eve gui ma voi ndovareive va'e, mba'eve oĩ e'ý va'e rami.

18 Mava'e nda'u Nhanderuete reve joo rami ete 'rã heko va'e? Mba'e nunga nda'u hexe nhambojoja 'rã?

19 Mba'eta mba'emo apoa ma ojapo 'rã mba'emo ra'angaa. Ha'e gui ouro re omba'eapo va'e ju 'rã onhovãmba ouro py, ha'e gui ixãrã ma prata gui ojapo 'rã.

20 Ha'e rã iporiaukue'i ma yvyra ovo rive va'erã e'ý 'rã oiporavo 'rã. Ha'e vy ojou 'rã ojapo kuaapa va'e ojapo aguã ta'angaa omyĩ aguã rami e'ý.

21 Xapy'a rei nda'u ha'e nunga ndapeikuuai ri? Napendui teve? Pẽvy nda'u nomombe'uai ri jypy guive ma voi? Tyrã pa ndapeikuua potai ae yvy omboytaa ára guive?

22 Mba'eta Nhanderuete ma yvy apy jerekue áryve oguapy oiny va'e, ha'e oexa rã ha'e py hekoa va'e kuery tuku rami avi kyri'i. Ha'e ae avi oipyo raka'e yva ajukue puku rami, oo'i ajukue guigua rami ojora vy oupi ha'e py oĩ aguã.

23 Ha'e ae avi omo'yvy'i 'rã huvixa kuery ikuai va'e, omokanhymba 'rã yvy regua joe oikuua pota va'e.

24 Ha'e kuery ma mba'emo ra'yigue rami onhotõa e'ý vy omoaõa ramo yvy re hapo vy hi'y ypy'i 'rã, ha'e rami teĩ ha'e va'e rupi yvytu oipeju ov yamo ipirupa vyvoi 'rã, ha'e gui ma yvytu vaikue ogueraapa 'rã mba'emo pirekue rami avi.

25 Ha'e nunga rupi Iky'a e'ý va'e aipoe'i: "Mava'e re nda'u peẽ kuery xembojoja 'rã? Mava'e tu xee ramigua oiko?" he'i.

26 Penderova yva, ha'e pema'ẽ. Mava'e tu ha'e nunga ha'e javi ojapo raka'e? Ha'e ma jaxy-tata oipapa porãmba rire oxondaro kueryrã rami oguenoõ 'rã heravy, peteĩ-teĩ rery rupi oenoõ vy. Mba'eta imbaraete ha'e ipo'akapa va'e ramo peteĩve ma voi ndoatai 'rã.

27 Ha'e nunga rupi mba'e re tu peẽ Jacó ha'e Israel kuery pendeayvu vy aipopeje: "Xee aikoa re ma SENHOR ndoexa potai, Nhanderuete ndoikuua potai anheptyvõ uka teĩ", peje.

28 Ha'e rami teĩ ndapeikuuai, napendui ri ty'y Nhanderuete Imarã e'ý va'e, SENHOR yvy apy apoare na'ikane'õi ha'e ndaxypai 'rãa? Hi'arandua re ma nhande ndajaikuua pota kuuai 'rã.

29 Ha'e rami 'rãgue py ha'e ae omombaraete ju 'rã ikane'õ va'e, omombaraeteve 'rã na'imbaraetevei va'ekue.

30 Mba'eta ipyaukue voi ikane'õ ha'e haxypa 'rã. Kunumigue ikangypa vy ho'apa 'rã.

\* 40:13 Romanos 11.34, 1 Coríntios 2.16

<sup>31</sup> Ha'e rã SENHOR oarõ oikovy va'e kuery ma ojouve ju 'rã ombaraeterã. Ha'e rami vy opu'ã ju 'rã taguato oveve ovy va'e rami. Onha teĩ na'ikane'õi 'rã, oguata teĩ ndaxypai 'rã.

## 41

### *Nhanderuete re ojerovia e'ŷ va'e kuery oenoĩ vy omboayvuague*

<sup>1</sup> “Peẽ kuery yy pa'ũ re pendekoa va'e, pekyrirĩ ke xerenonde. Ha'e pygua pendekuai va'e, penhemombaraete ke, ha'e gui mae ma penhemboja xere, xee romboayvu rã pembovai aguã. Peju, jajogueroayvu.

<sup>2</sup> Ha'e gui mava'e tu kuaray oua katy gui ombou oguataa rupi rei joe ipo'aka va'erã? Mava'e tu ojapo heta va'e kuery onhe'ẽ rendu aguã rami, ha'e huixave kuery ikuai va'e re opyrõ oiny aguã, okyxé py yvy ku'i rami omboa'ypa aguã, ha'e guapa py omoaõmba aguã yvvytu mba'emo pirekue ombovevepa heravya rami?

<sup>3</sup> Mba'eta ha'e ma oakykue monhamba ma vy henonderã oove 'rã mba'eve oiko e'ŷ re, oguataaty rupi e'ŷ teĩ.

<sup>4</sup> Mava'e tu ojapo ha'e nunga ha'e javi oiko aguã rami? Jypy'i guive oayvu py rive heta va'e kuery omoingo va'ekue ae. Xee ae SENHOR jypy'i guive ha'e opaa py guarã aiko”, he'i.

<sup>5</sup> Ha'e nunga ye'ẽ yvýry hekoa va'e kuery ha'e nunga oexa vy onhemondyipa 'rã. Yvy apy gui voi oryryipa reve 'rã onhemboja jogueruvy.

<sup>6</sup> Peteĩ-teĩ nhomombaraete 'rã. Ha'e vy oirũ kuery pe “Nembaraete ke”, he'i 'rã.

<sup>7</sup> Ha'e rami vy mba'emo ra'angaa apoa omokyre'ŷ 'rã ouro re ombo'eapo va'e, ha'e gui karavo mbotaa py ombojoja va'e ju aipoe'i 'rã ferro áry ombope va'e pe: “Rejapo porã rima ra'e”, he'i 'rã. Ha'e rami vy karavo py mba'emo ra'angaa re ombota 'rã ho'a e'ŷ aguã.

<sup>8</sup> “Ha'e rã ndee Israel ma xerembiguai reiko. Ndee Jacó ma xerembiporavo, xeirũ Abraão ramymino.

<sup>9</sup> Ndee ma yvy apy gui rogueru va'ekue, roenoĩ mombyryvea py reĩa gui. Ha'e vy aipoa'e: ‘Ndee ma xerembiguai. Xee roiporavo rire ndoroejai 'rã.

<sup>10</sup> Ekyje eme, mba'eta xee aiko ndereve. Enhemondyi eme, mba'eta xee ma Nderuete. Xee romombaraete 'rã, roipytyvõ ha'e teko porã rupi roguereko 'rã aiporu kuaa regua py.

<sup>11</sup> Ha'e rã nderovai ipoxypa va'e kuery ma oximba rei ha'e nda'evei nho 'rã okuapy. Ha'e va'e kuery ma omomba rivea 'rã ovare'ŷ va'e rami. Ha'e rami vy ndere ija'e e'ŷ va'e kuery okanhymba 'rã.

<sup>12</sup> Ha'e va'e rire ndere opu'ã va'ekue reka teĩ nderejouwei 'rã. Nderovai opu'ã va'ekue omombytaa 'rã ovare'ŷ va'e.

<sup>13</sup> Mba'eta xee SENHOR Nderuete ma rojopy 'rã ndepo reiporu kuaa regua re. Ha'e vy aipoa'e 'rã: “Ekyje eme ke, xee roipytyvõ 'rã”, ha'e.

<sup>14</sup> “ ‘Ekyje eme Jacó ha'e Israel kuery, taxo'i rami mbovy'i ete pendekuai teĩ. Xee roipytyvõ 'rã’, he'i SENHOR penderepya, Israel kuery ruete Iky'a e'ŷ va'e.

<sup>15</sup> Ha'e gui peẽ rojapo 'rã mba'emo moa'yña haimbe ha'e ipyau va'e, haĩ jovai va'e rami. Ha'e ramo yvvytu ikuai va'e pemboa'y 'rã pemongu'ipa peve, yvy'ã ikuai va'e voi pemombytapa 'rã mba'emo pirekue aty rami.\*

<sup>16</sup> Pembovevepa ramo yvvytu ogueraapa 'rã, yvvytu jere omoaĩ 'rã. Ha'e rã peẽ ma perovy'a 'rã SENHOR, pemboete 'rã Israel kuery ruete Iky'a e'ŷ va'e.

<sup>17</sup> “Ha'e gui ojexavai ha'e oipota rei'i va'e kuery ma yy oeka teĩ ndojoui 'rã. Inhapekũ ipirupa 'rã yuvei gui. Ha'e rami teĩ xee SENHOR aendu 'rã. Xee Israel kuery Ruete vy ndaeja rivei 'rã.

\* <sup>41:15</sup> Apy ma ijayvu ngovaigua kuery omomba aguã re.

18 Ha'e rami vy yvy'ã ipiru reia gui teĩ xee amboxyry 'rã yy, ajapo 'rã yvyugua mbyte rupi yvu oiko aguã. Tekoa e'ÿa rupi voi ajapo 'rã yupa oĩ aguã, ha'e yvy piru reia va'ekue ajapo 'rã yypa aguã rami.

19 Tekoa e'ÿa py anhoty 'rã yary, acácia, murta ha'e oliveira. Ha'e joyvy-yvy tekaoa e'ÿa py amoenhoï 'rã cipreste, olmeiro ha'e buxo,

20 pavẽ oexa vy oikuaa aguã, oikuaa pota ha'e oikuaa porã aguã SENHOR po ae ha'e nunga ojapoague, Israel kuery ruete Iky'a e'ÿ va'e omoingoague."

### *Amboae regua kuery ruete ramigua kuery pe SENHOR ijayvuague*

21 SENHOR aipoe'i: "Pemombe'u porã ke peikuaa va'e. Pendeayvu anhetẽ rupi peikoa re", he'i Jacó kuery Ruvixave.<sup>†</sup>

22 "Peru ke peikuaa va'e, pemombe'u mba'emo oiko va'erã. Pemombe'u ke ayvu yma guare, ha'e nunga re jaikuua pota aguã, jaikuua aguã ojeupity ete ma paa. Ha'e rami e'ÿ vy raka'eve rã guarã pemombe'u roendu aguã.

23 Peikuaa uka ke raka'eve rã guarã, peẽ kuery ete pa tuuete peikoa roikuua aguã. Pemoingo ke mba'emo porã, e'ÿ vy mba'emo vai teĩ, ha'e rami vy rokyjepa aguã, ha'e jaexa pavẽ aguã.

24 Ha'e rami avi peẽ kuery ma mba'everã ndapevarei, penerembiapokue voi ndovareive va'e meme. Pendoporavoa kuery voi ojeguarupy ikuai.

25 "Ha'e gui xee ma kuaray apu'a'ia katy gui peteĩ ambou ramo ou 'rã. Kuaray oẽa katy oiko teri reve aenoĩ ramo ojapukai xerery rupi. Ha'e va'e ma opyrõ 'rã huvixa kuery re yapo rami, nhae'ũ re ombo'eapo va'e yapo omou'ũa rami avi.

26 Mava'e nda'u jypy'i guive ha'e nunga omombe'u, oiko e'ÿ mbove ma voi jaikuua vy 'Ha'e rami ae ri', ja'e aguã? Ha'e rami avi jipoi avave rei imombe'uarã, ikuua ukaarã ndoikoi, pendeayvu oendu va'ekue voi ndoikoi.

27 Xee ae ma jypy Sião pe amombe'u vy 'Ma'ë, upe ma oĩ' ha'e va'ekue. Mba'eta Jerusalém pygua kuery pe ambou ayvu porã mombe'uarã.

28 Xee ama'ë vy ndaexai peteĩve, peẽ kuery va'e regua ndoikoi nhomongeta kuaa va'e, ha'e va'e pe nhaporandu rã ombovai va'erã.

29 Peẽ kuery ha'e javi ma mba'everã ndapevarei. Penerembiaipo voi mba'e e'ÿ meme. Mba'eta mba'emo ra'angaa ojapo pyre ma yvytu rive, hyrukue rei va'e ae."

## 42

### *SENHOR rembiguai reko re ijayvuague*

1 "Apy ma oĩ xerembiguai ambopo'aka va'e. Xerembiporavo oiko, xenhe'ẽ py arov'y'a va'e. Hexe amoĩ Xenhe'ẽ. Ha'e ramo amboae regua kuery pe oikuaa uka 'rã teko porã regua.

2 Ha'e rami avi ha'e ma nanhomotare'ÿi 'rã, ndojapukai atãi 'rã, neĩ tetã mbyte rupi voi noendu ukai 'rã oayvu.

3 Takua omopẽ mbyre nomou'ũi 'rã, neĩ nomboguei 'rã tataendy ra'y hataxí rive'i va'e voi. Ha'e rami 'rãgue py anhetẽ va'e rupi 'rã oikuaa uka teko porã regua.

4 Ha'e ma ndopai 'rã, nokanhyi 'rã guive, yvy jave re teko porã regua oikuaa ukapa e'ÿa ja. Ha'e gui ye'ẽ yvýry ikuai va'e voi oarõ 'rã okuapy oeko mbo'e aguã."\*

5 Po rami ijayvu SENHOR Nhanderuete yva ojapo ha'e oipyo va'ekue, ko yvy onhono vy opa mba'e hi'a aguã rami ojapo va'ekue. Ha'e ae yvy regua kuery pe ome'ẽ raka'e ipytuerã oikove aguã, ha'e kuery re omoĩ avi inhe'ẽrã. Ha'e vy aipoe'i:

<sup>†</sup> 41:21 Apy ma tuuete ramigua kuery pe Nhanderuete ijayvu. \* 42:4 Apy ma ijayvu ikangy va'e ha'e iporiaukue'i Jesus Cristo nomombai 'rãa re, ha'e rami 'rãgue py ogueraa jepe 'rã (Mateus 12.15-21).

**6** “Xee SENHOR ma roenoĩ va'ekue teko porã rupi. Ha'e rami rire ajopy'rã ndepo re. Ndere anhangareko reve romoĩ'rã neretarã kuery pe xereve guarã ajapo va'ekue reikuua uka aguã, ha'e amboae regua kuery voi remoexakã aguã rami.

**7** Ha'e rami vy reipe'a aguã oma'ẽ e'ŷ va'e rexa, ha'e nhuã gui reipe'a aguã omboty pyre, nhuã pytãa py oĩ va'ekue voi.

**8** Xee ma SENHOR, po rami ae xerery. Ha'e rami vy xerexakãa ma name'ẽi'rã amboae pe, xerekovia namboete ukai'rã mba'emo ra'angaa ojapo pyre.

**9** Ma'ẽ, jypy amombe'u va'ekue'-ekue ma ojeupitypa ma, ha'e gui mba'emo ipyau va'e ju aikuaa uka pãvy. Ha'e nunga oiko e'ŷ mbove xee ajapo'rã pendu aguã rami.”

### *Nhandereraa jepea re japoraei aguã*

**10** Pemonhendu ke SENHOR pe mboraei pyau. Peẽ kuery ye'ẽ rupi peguata va'e, pendu uka peporaeia yvy apy peve, ye'ẽ rupigua ha'e javi reve, ha'e ye'ẽ yvýry rupi pendekoa va'e ha'e javi.

**11** Pemonhendu ke pendeayvua tekao e'ŷa rupi, tetã ha'e tekao Qedar regua py pendekuai va'e voi. Itaova rupi pendekoa va'e, pevy'a ke, pejapukai yvyty apyte áry pendekuaia gui.

**12** Pemboete SENHOR. Pemombe'u hexakãa ye'ẽ yvýry rupi ikuai va'e pe.

**13** Mba'eta SENHOR ma ipy'a guaxuve va'e rami avi oẽ ouvy vy kyre'ŷ re'rã oo joe opu'ã va'e rami. Ojapukai atã'rã joe opu'ã aguã katy oo va'e rami. Ha'e rami vy ngovaigua kuery pe oexa uka'rã opo'akaa.

**14** Ha'e gui Nhanderuete aipoe'i: “Xee ma yma ete guive akyrirĩ va'ekue, ajejoko vy mba'eve nda'e'i va'ekue. Ha'e rã aŷ ma ajapukai'rã imemby raxy va'e rami, anhea'ã'rã ipytuã atã va'e rami.

**15** Mba'eta amomba'rã yvyty ha'e yvy'ã ikuai va'e, ha'e amombirupa'rã jai ha'e rupi ikuai va'e ha'e javi. Yakã ikuai va'ekue ajapo'rã yvy piru rei oĩ aguã rami, ha'e yupu ikuai va'ekue amombirupa'rã.

**16** Ha'e gui ára revegua e'ŷ va'e kuery ma areko'rã heravy tape ndoikuuaii va'e rupi, aroguata'rã oikuua e'ŷa rupi. Ha'e kuery renonde amoexakãmba'rã pytã rei oĩ va'ekue rupi, tape vaikue rei va'ekue voi ambojojapa'rã. Ha'e nunga ajapo'rã ha'e kuery pe, ndaejai'rãe.

**17** Ha'e rã mba'emo ra'angaa ojapo pyre re ojerovia va'e kuery ma ojevy rivepa'rã. Ha'e rami vy oximba'rã okuapy ndoikuuaii rei vy, mba'emo ra'angaa ojapo pyre pe rive 'Oreruete', he'i rire.”

### *Israel kuery ára revegua e'ŷ rami ikuiaia re ijayvuague*

**18** Pendeapyxa e'ŷ va'ekue, pendu ke. Ha'e peẽ ára revegua e'ŷ va'e, pema'ẽ pexa aguã.

**19** Mava'e nda'u oiko ára revegua e'ŷ, xerembiguai e'ŷ vy? Mava'e nda'u xeayvu mombe'uarã amondouka va'e rami nda'ijapyxai va'e oiko? Mava'e nda'u xerevegua “SENHOR rembiguai” ha'ea va'e rami ára revegua e'ŷ oiko?<sup>†</sup>

**20** Mba'eta peẽ kuery ma opa mba'e pexa teĩ peteïve ndapexa kuaai. Pendeapyxa ojepe'a porã va'eri napendui'rã mba'eve.

**21** SENHOR gueko porãa oikuua uka vy ojeguigua lei omboyvate ha'e omoexakãmba raka'e, oipotaa rami vy.

**22** Ha'e rã kova'e kuery ma oipe'apaa rã okanhigue rami avi ikuai. Ha'e kuery ha'e javi ma itakua py ojokuapaa reve ombotya, nhuã py omboty pyre ikuai. Ho'u pyrã rami rive ombotya, heraa jepearã ndoikoi guive. Heraapa pyre ikuai, ha'e avave rei aipo nde'i'rã: “Tapeo porã ju.”

**23** Ha'e gui peẽ kuery va'e regua mava'e tu oendu kuaa'rã ha'e nunga? Mava'e nda'u oikuua pota reve oendu kuaa'rã ha'e va'e rire mba'emo oiko va'erã?

<sup>†</sup> **42:19** Apy “Xerembiguai” he'ia ma ojeupe guarã oiporavo va'ekue re ijayvu vy.

<sup>24</sup> Mava'e tu Jacó regua kuery omboaxa raka'e heraapa pyrã, ha'e Israel kuery omboaxa ipe'aarã pe? SENHOR e'ŷ ri nda'u omboaxa raka'e, hovai ha'e kuery ojeavy rire? Mba'eta ixuguigua tape rupi ha'e kuery nda'ikuaxiei, ixuguigua lei re ndojapyxakaxe guive.

<sup>25</sup> Ha'e nunga rupi ae ha'e kuery re ombou opoxy etea, joe opu'ãa py ho'apa aguã. Ha'e rami py tata omboja ijyvýry rupi. Ha'e rami ete teĩ ha'e kuery ndoikuaai. Oapypaa teĩ ha'e nunga re ndoikuaa potai.

## 43

### *Nhanderuete anho Israel kuery reraa jepea oikoa re ijayvuague*

<sup>1</sup> Ha'e gui aŷ ma po rami ijayvu SENHOR nemoingoare, Jacó ha'e Israel kuery apoare. Aipoe'i: "Pekyje eme ke, mba'eta xee ma roepy. Penderery rupi roenoĩ rire xemba'e pendekuai.

<sup>2</sup> Ha'e rami rire yy rupi peaxa ramo xee aiko 'rã pendereve. Yakã rupi peaxa teĩ napendeao'i 'rã. Tata rupi peaxa ramo napenderapyi 'rã, hendy va'e voi napendeoverei 'rã.

<sup>3</sup> Mba'eta xee ma SENHOR Penderuete, Israel kuery ruete Iky'a e'ŷ va'e ha'e pendereraa jepea aiko. Ha'e rami vy penderekovia ame'ẽ 'rã Egito pygua kuery. Etiópia ha'e Sebá pygua voi ame'ẽ 'rã pendere.

<sup>4</sup> Mba'eta xevy rã ovare ete va'e ha'e omboeteve pyrã pendekuai, xee roayvu guive. Ha'e nunga rupi ae penderekovia ame'ẽ 'rã amboae regua kuery, penderekovia aepy vy.

<sup>5</sup> Ha'e nunga rupi pekyje eme, pendereve xee aiko ramo. Ha'e rami vy peneramymino kuery arupa ju 'rã kuaray oëa ha'e oikea katy gui amono'õmba vy.

<sup>6</sup> Kuaray ijapu'a'ia katyguia pe aipoa'e 'rã: 'Eme'ẽmba ju ke.' Ha'e kuaray puku-a katyguia pe avi 'Ejoko eme', ha'e 'rã. Peru ke xera'y kuery mombyry gui, peru xerajy kuery yvy apy gui,

<sup>7</sup> xerery rupi aenoĩ va'ekue ha'e javi, xee ae anhemboete uka vy amoingo ha'e ajapo va'ekue.

<sup>8</sup> "Peru ke hexa oĩ va'eri ndoexai va'e kuery, ha'e ijapyxa oĩ va'eri ndojapyxakaxe vi va'e guive.

<sup>9</sup> Tou avi yvy regua kuery ha'e javi, ta'ijatypa opa marãgua kuery ikuai va'e. Ha'e kuery va'e regua mava'e tu omombe'u kuaa 'rã ha'e nunga, ha'e nhandevy oikuaa uka yma rupi amombe'u uka va'ekue-ekue? Ha'e rami vy toexa uka imombe'uarã oguereko ri vy, heko porãa kuaa ukaarã, nhaendu vy 'Anhetẽ ete ae' ja'e aguã.

<sup>10</sup> "Ha'e rã peẽ ae ma xereko mombe'uarã pendekuai", he'i SENHOR. "Peẽ ma xerembiguarã aiporavo va'ekue xeayvua pendu vy perovia aguã, ha'e rami vy xee anho aikoa peikuaa aguã, mba'eta xee aiko e'ŷ mbove peteĩve tuuete ndoikoi raka'e, ha'e xee aiko rire voi amboae ndoikoi 'rã.

<sup>11</sup> Xee, xee ae ma SENHOR. Xee e'ŷ vy ndoikoi jogueraa jepearã.

<sup>12</sup> Xee ma amombe'u uka ma voi ajogueraa jepe aguã. Ha'e va'e ambou ma vy aikuaa uka ju. Penembyte ndoikoi amboae ramigua tuuete, ha'e rã peẽ kuery ma xekuaa ukaarã pendekuai", he'i SENHOR. "Xee ae ma Penderuete.

<sup>13</sup> Ára oiko e'ŷ mbove ma voi xee ae aiko raka'e. Ndoikoi guive xepo gui jope'aarã. Mba'eta xee mba'emo ajapo ta ramo mava'e tu xejoko ta?" he'i.

### *Babilônia pygua po'akaa gui ogueraa jepe aguã re ijayvuague*

<sup>14</sup> SENHOR pendereraa jepea, Israel kuery ruete Iky'a e'ŷ va'e ma po rami ijayvu: "Peẽ kuery roayvu vy Babilônia yvy re amondouka 'rã hovaigua kuery tetã re opu'ã okuapy va'erã. Ha'e rã ha'e pygua caldeu kuery ma ajapo 'rã onhamba aguã rami. Kanoã ha'e kuery oguerovy'a rei va'ekue py ae 'rã ojava.

<sup>15</sup> Xee ma SENHOR Penderuete Iky'a e'ŷ va'e, Israel kuery moingoare, penderuvixave", he'i.

<sup>16</sup> Po rami SENHOR ijayvu. Ha'e ma ymave ye'ẽ rupi ojapo va'ekue peteĩ tape, yy oxyry atã va'ekue mbyte rupi ixupegua kuery oaxa aguã.\*

<sup>17</sup> Ha'e gui ha'e kuery rakykue ojapo va'ekue karóxa ha'e kavaju oje'oi avi aguã rami, xondaro kuery imbaraetkueve guive. Ha'e py ae ha'e kuery ho'apa, nopus'avei, neĩ ndoikovei 'rã guive, tataendy ogue va'ekue rami avi. Ha'e vy SENHOR aipoe'i:

<sup>18</sup> "Aŷ gui ma penema'endu'ave eme mba'emo oiko va'ekue re rive, yma guare-guare re anho pendepy'a eme.

<sup>19</sup> Mba'eta xee ajapo 'rã mba'emo pyau aŷ'i ma voi ojekuaa oiny aguã rami. Xapy'a rei nda'u ndapexai ri? Mba'eta teko a e'ŷa rupi ju 'rã xee aexa uka tape, ha'e yvy piru reiague rupi ajapo 'rã yakã oxyry aguã rami.

<sup>20</sup> Ha'e ramo mymba ka'aguy regua voi xemboete 'rã okuapy, jagua-tuvy nhe'ẽ ha'e guyra nhandu ra'y, teko a e'ŷa rupi yy amoĩ ramo, ha'e yakã yvy piru reiague rupi. Xevy guarã aiporavo va'ekue oy'u aguã rami ajapo,

<sup>21</sup> peteĩ regua xejeupe guarã ae amoingo va'ekue pe, xere ima'endu'aa rupi xereroporaei aguã."\*

### *SENHOR nhanemboanya rupi nhandererekao re ijayvuague*

<sup>22</sup> "Ha'e rami teĩ Jacó kuery, xevy pe ma peẽ kuery ndapejapukai. Ha'e rami 'rãgue py Israel kuery, penekane'õmba rive xevy pe pendekuaia gui.

<sup>23</sup> Mba'eta xevy pe ete ndaperui vexa'i ra'y peapy reve peme'ẽ va'erã, naxemboetei guive mba'emo pejukaa py. Xee ma norombovoyi mba'emo aju xejeupe guarã ame'ẽ uka vy, noromokane'õi guive heakuã va'e aapy uka vy.

<sup>24</sup> Xevy peguarã ndapejoguai takua heakuã porã va'e pendeperáta re, naxembovy'ai guive mba'emo peapy aguã pejuka va'ekue kyra peme'ẽ vy. Ha'e rami 'rãgue py pejejavya py rive xembovoyi, xemokane'õ guive pendeko vaia py.

<sup>25</sup> Ha'e ramive ma xee, xee ae penderekovaity ambogue va'e, xejee ae ama'ẽ vy. Ha'e rami vy naxema'endu'avei ma pejejavyague re.

<sup>26</sup> Xemoma'endu'a ke, jaa ke romboayvu aguã py. Penhemombe'u porã ke romboeko porã kuua aguã.

<sup>27</sup> Mba'eta penderu ypy ma heko vai, ha'e gui nhanembyte guarã amoĩ va'ekue ju ojejavy okuapy xerovai.

<sup>28</sup> Ha'e nunga rupi ae amboyke 'rã pembojeroviaaty rupigua yvatekueve. Jacó kuery ma amboaxa 'rã imombaarã pe, Israel kuery amboaxa 'rã ijojaiarã pe."

## 44

### *SENHOR anho Nhanderuete oikoa re ijayvuague*

<sup>1</sup> "Aŷ ma peẽ Jacó kuery xerembiguai, ha'e Israel kuery xerembiporavo pendekuai va'e, pendu ke.

<sup>2</sup> Po rami ijayvu SENHOR penemoingoare, penderyru'i py ma voi pendeapo va'ekue, ha'e penepytyvõa: Jacó kuery xerembiguai, xerembiaiyvu kuery roiporavo va'ekue, pekyje eme.

<sup>3</sup> Mba'eta oy'uxe rei va'e kuery pe anhoẽ 'rã yy, amboxyry 'rã yvy piru reiague rupi. Ha'e rami ae avi Xenhe'ẽ voi anhoẽ 'rã neramymino kuery áry, ha'e kuery áry anhoẽ 'rã amoingo porã aguã.

<sup>4</sup> Ha'e ramo ha'e kuery ma jai ipotypa va'e rami avi ikuai porã 'rã, ha'e yakã yvýry yvyra hi'aĩ va'e rami.

<sup>5</sup> Ha'e kuery va'e regua ma 'Xee ma SENHOR pegua', he'i 'rã. Ha'e rã amboae ma Jacó rery rupi onhemboery uka 'rã. Ha'e rã amboae ju opo re ae ombopara 'rã: 'Xee ma SENHOR pegua' he'ia va'e, ha'e guery apyrã omoĩ 'rã Israel rery py.'

\* **43:16** Apy ma ijayvu Ye'ẽ Pytã mbyte rupi Israel kuery oaxapaague re (Êxodo 14-15). \* **43:21** 1 Pedro 2.9

<sup>6</sup> Po rami ijayvu SENHOR Israel kuery ruvixave, heraa jepea, SENHOR ixondaro reta va'e: "Xee ma jypy'i guive ha'e opaa py guarã aiko. Xee e'ŷ vy ndoikoi tuuete mboae.

<sup>7</sup> Mava'e nda'u xee ramigua oiko ymave rupi mba'emo oiko va'erã mombe'ua, ymavegua kuery amoingo guive? Ha'e rami ri ramo tove toikuaa uka, tomombe'u porã ha'vy xerenonde. Tomombe'u mba'emo oiko va'erã, mba'emo ndojeupityi teri va'e.

<sup>8</sup> Penhemondyi eme, pekyje eme guive. Ha'e va'e ára guive namombe'ui teve ha'e nunga pêvy? Ndaikuaa ukai ri ty'y? Peẽ kuery ma xekuaa ukaarã pendekuai. Oiko avi 'rã nda'u amboae tuuete xee ramigua? Any, amboae itaova ndoikoi xee aikuaa va'e."

### *Mba'emo ra'angaa mbojeroviaa rupi ikuai va'e nai'aranduia re ijayvuague*

<sup>9</sup> Mba'emo ra'angaa apoa ikuai va'e ha'e javi ma mba'everã ndovarei, ta'angaa ha'e kuery ojou porãve va'e voi. Ha'e kuery ae oikuaa uka mba'eve ndoexai ha'e ndoikuaaia, nda'evei nho aguã rami.

<sup>10</sup> Mava'e nda'u tuueterã ojapo, e'ŷ vy mba'emo ryku gui mba'emo ra'angaa rã ojapo 'rã, mba'everã ndovarei va'erã rive?

<sup>11</sup> Mba'eta ha'e nunga mboetea ma guive rã nda'evei nho 'rã, ijapoare ava meme ramo. Ha'e kuery toupa xerenonde ojexa uka aguã. Ha'e gui ma tonhemondyipa ju oje'oivy oximba vy.

<sup>12</sup> Ha'e gui ferro re ombo'eapo va'e ma ojapo 'rã peteĩ haxa. Ha'e gui ma tata py ombo'eapo vy mba'emo ra'angaa ju 'rã ojapo ombota-mbota vy. Ojapo 'rã heravy oyiva mbaraeetea py. Ha'e rami teĩ okaruxe vy ikane'õ 'rã, yy ndoy'ui vy na'imbaraetevei 'rã.

<sup>13</sup> Ha'e gui yvyra gui mba'emo ra'angaa ojapo kuaa va'e voi ixã omoatã vy lápis py oa'ã 'rã heravy mba'emo ra'angaa rã. Ha'e rami vy yvyra nhopã py ju 'rã onhopi-nhopi, ha'e oa'ã ju 'rã imarkaa py. Ha'e vy ojapo 'rã ava rami ete iporã rei va'e, oo'i oĩ atyrã py oĩ aguã.

<sup>14</sup> Ha'e rami aguã ma avakue oake'o 'rã yary, ha'e e'ŷ vy cipreste, carvalho, yvyra ka'aguy re ikuai va'e gui oiporavo vy. Xapy'a rei onhoty 'rã pinho yky, oky ramo yvate ovvy va'erã.

<sup>15</sup> Ha'e nunga yvyra ma avakue oapy aguã ikuai. Amongue yvyra pêgue omoendy vy ojape'e 'rã oiny, mbojape ombojy 'rã guive. Ha'e va'e yvyra gui ae avi ojapo 'rã nguuete ra'angaa rã. Ha'e rami vy henonde oĩ 'rã guenapy'ã re. Mba'emo ra'angaa rã ojapo va'ekue renonde oĩ 'rã guenapy'ã re ombojerovia vy.

<sup>16</sup> Peteĩ ijaygue ma oapy 'rã tata py. Ha'e va'e py ma ombojy 'rã xo'o ho'u aguã. Oexy ma vy hevyatã 'rã, ha'e ojape'e vy aipoe'i 'rã oiny: "Ha'eve ajape'e ma, ha'e aexa hexakãa", he'i 'rã.

<sup>17</sup> Ha'e gui ijaygue mboae gui ma ojapo 'rã nguueterã, mba'emo ra'angaa rive. Ha'e va'e renonde ma oĩ 'rã guenapy'ã re. Ngova yvy re omovaẽ reve ojerure 'rã oiny ha'e nunga pe. Ha'e vy aipoe'i 'rã: "Xereraa jepe ke, mba'eta ndee ma xeruete", he'i 'rã.

<sup>18</sup> Ha'e kuery ma mba'eve ndoikuaai, o'arandurã nomoĩ, hexa ojapa ma oexa e'ŷ aguã, ikuraxõ py voi ndoikuaavei ma.

<sup>19</sup> Neĩ peteĩve ma ndoikuaa pota porãi 'rã, nai'arandui ha'e mba'eve ndoikuaai aipoe'i aguã: "Peteĩ ijaygue ma apy tata py, ha'e tapyi áry aexy mbojape. Hi'áry ma xo'o aexy ma vy ha'u. Ha'e ijaygue mboae gui nda'u ajapo 'rã ri ojeguaru pyrã? Xerenapy'ã re 'rã ri nda'u aĩ yvyra pêgue renonde?" nde'i 'rã.

<sup>20</sup> Ha'e nunga avakue ma tanhimbu rive ho'u oiny va'e rami ikuai, okuraxõ py onhembotavy uka vy ojekore va'e. Ha'e va'e ma ndogueraa jepe kuaai guekove, neĩ aipo nde'i kuaai: "Apu re e'ŷ ri nda'u ajerovia?" nde'i.

### *Ogueraa jepe aguã re ijayvuague*

<sup>21</sup> "Jacó ha'e Israel kuery, penema'endu'a ke pova'e nungakue re, mba'eta peẽ ma xerembiguai kuery! Xee ae rojapo va'ekue xerembiguairã. Israel kuery, xee ndaxerexarai 'rã pendegui.

**22** Ha'e rami 'rāgue py pejeavyaty amokanhymba 'rā yvyxī rami, ha'e pendereko vaiaty amomba 'rā arai rami. Pejevy ju ha'vy xea katy, xee rogueraa jepe rire."

**23** Ha'e nunga SENHOR ojapo rire peporai ke, yva regua pendekuai va'e. Ha'e peē yvy guyrygua kuery, peroporaei avi ke. Peē yvyty ha'e ka'aguy pendekuai va'e, ha'e yvyra pendekuai va'e ha'e javi, penhendu ke mboraei rupi, mba'eta SENHOR oepy Jacó kuery, ha'e Israel kuery ogueraa jepe vy onhemboete uka rire.

**24** Po rami ijayvu SENHOR pendereraa jepea, penderyru'i py ma voi penemboete'i va'ekue: "Xee ma SENHOR opa mba'e apoa. Xee ae'i aipyo va'ekue yva, ha'e anhono va'ekue yvy.

**25** Xee ajapo profeta ramigua rive apu rupi ijayvua ojeupity e'ŷ aguã rami, ha'e namo'aranduveipa 'rā imba'ekuua va'e. Mba'eta hi'arandu va'ekue ajapo 'rā ndoikuaavei aguã rami, hi'aranduague mba'emo vairã opytapa aguã.

**26** Ha'e rā xerembiguai ijayvuague ma xee amoingo 'rā, ajapo 'rā xeayvu mombe'ua kuery ijayvua ojeupity aguã rami. Ha'e rami vy Jerusalém tetā pe aipoa'e: 'Ha'e py ma ikuia ju 'rā.' Ha'e Judá yvy re tetā ikuai va'ekue pe ma 'Ojapoa ju 'rā', ha'e. Ha'e py oogue ho'apa va'ekue pe ma 'Xee amoatyrõmba ju 'rā', ha'e.

**27** Yy tyguaxu va'e pe aipoa'e: 'Ndepiru ke, ha'e nderegua yakã ikuai va'e voi xee amombirupa 'rā.'

**28** Ha'e gui Ciro pe ma aipoa'e: 'Ha'e ma xerymba vexa'i kuery re opena va'e vy ojapopa 'rā xee aipotaa ha'e javi', ha'e.\* Jerusalém tetā pe avi aipoa'e: 'Omoatyrõda ju 'rā.' Templo pe voi 'Omboytaa ju 'rā', ha'e."

## 45

### *Huvixa Ciro Israel kuery omondoukapa ju aguã re ijayvuague*

**1** Po rami SENHOR ijayvu guembiporavo huvixave Ciro reko re: "Ipo oiporu kuaa regua re ajopy herekovy, ha'e henonde gui aipe'apa 'rā yvy regua kuery. Hexe ama'ẽ vy amokangy 'rā huvixave ikuai va'e, henonde rupi okẽ ikuai va'e aipe'apa 'rā nombotyavei aguã rami.

**2** Ha'e rami vy xee aa 'rā nerentonnde rupi. Ndevy ambo'yvi 'rā tape ikarẽ-karẽ va'e, amopẽmba 'rā okẽ overa va'e guigua, ha'e ambovopa 'rā ijokoa ferro guigua oĩ va'e.

**3** Ndevy pe amboaxapa 'rā mba'emo porã onhomí mbyre, ha'e hepykueve ojao'i pyre, reikuua aguã xee ae SENHOR aikoa, Israel kuery ruete nderery rupi roenoĩ va'e.

**4** Xerembiguai Jacó kuery, xerembiporavo Israel kuery ayvu vy ae xee roenoĩ nderery rupi, ha'e ndere amoĩ nderery apyrã, ndee ndaxekuaai tei.

**5** Xee ma SENHOR, ndokoi amboae. Xee e'ŷ vy ndokoi tuuete. Xee ma romombaraete 'rā ndaxekuaai tei.

**6** Ha'e ramo kuaray oua ha'e oikea katy peve oikuua pavẽ aguã xee e'ŷ vy amboae ndoikoia. Xee ae SENHOR, ndokoi amboae.

**7** Xee ma hendy va'e rexa ukaa aiko, ha'e pytū moĩa guive. Ha'e rami ae avi ambou 'rā mby'a porã ha'e mba'emo vai. Xee SENHOR ae ha'e nunga ha'e javi moingoa aiko."

### *SENHOR opa mba'e apoare oikoa re ijayvuague*

**8** "Toguejy teko porã yva yvatevea gui, ta'oky arai gui. Ha'e yvy re ma teko porã toike jogueraa jepea oiko aguã, toiko avi teko porã. Xee SENHOR ae ha'e nunga amoingo va'e", he'i.

**9** Nda'evei ete 'rā imoingoare re opu'ã rei va'e kuery pe, mba'eta nhae'ũ pêgue ramigua rive ikuai. Tyrã nhae'ũ guigua aipoe'i 'rā teve ijapoa pe: "Mba'e tu rejapo?" ha'e rami e'ŷ vy "Nerembiapo tu oata rima ixãrã", he'i 'rā teve?\*

\* **44:28** Ciro ma Pérsia pygua huvixave. Babilônia re ipo'aka ma vy Israel kuery omondoukapa ju ijypy katy (Esdras 1-3). \* **45:9** Romanos 9.20

**10** Nda'evei ete avi 'rā nguu pe "Mba'erā tu xemoingo?" he'i va'e, e'ŷ vy oxy pe "Mba'e re tu xererek'o'i raka'e?" he'i va'e pe.

**11** Po rami ijayvu SENHOR Israel kuery ruete Iky'a e'ŷ va'e, ha'e kuery moingoare: "Peikuaaxe ri ty'y raka'eve rā guarā? Xapy'a rei nda'u peẽ xembo'exe ri xera'y kuery ha'e xepo py ae ajapo va'ekue areko aguā re?

**12** Mba'eta xee ma ajapo yvy, ha'e hexe guarā amoingo va'ekue avakue. Xepo py ae aipyo yva, ha'e hexe ikuai va'e ha'e javi 'rā ajokuai.

**13** Ha'e gui xerek'o porā rupi vy amoĩ Ciro huvixaverā, ha'e ambo'yvi oguata aguā ha'e javi'i rupi. Ha'e ramo ha'e omoatyrō uka ju 'rā xevyguia tetā, ha'e omboupa ju 'rā xevyguia kuery mombyry ogueraa pyre. hepy re e'ŷ 'rā ojapo, mba'emo ome'ẽ rivepy re e'ŷ guive", he'i SENHOR ixondaro reta va'e.

**14** Po rami ijayvu SENHOR: "Ndepo py amboaxapa 'rā mba'emo porā Egito ha'e Etiópia yvy re ikuai va'e, avakue Sabeu regua tuvixakueve guive. Ha'e va'e kuery ma nderakykue 'rā oje'oi oipokuapaa reve, ha'e vy nerendirre ju 'rā ikuai guenapy'ã re mba'emo re ojerurea py. Ha'e vy aipoe'i 'rā: 'Ndereve anho Nhanderuete oiko, ha'e Nhanderuete mboae ndoikoi ha'e e'ŷ vy', he'i 'rā okuapy."

**15** Anhetē ete ndee ma Oreruete nderek'o roikuaapa 'rā e'ŷ, Israel kuery ruete orereraa jepea.

**16** Ha'e gui ta'angaa ojapo va'e kuery ma oximb'a ha'e nda'evei nho 'rā okuapy. Ho'apa 'rā oximb'aa py.

**17** Ha'e rā Israel kuery ma SENHOR ogueraa jepe 'rā raka'e rā guarā. Ha'e kuery ma noximbai 'rā, nda'eve e'ŷi nho 'rā raka'e rā peve.

**18** Mba'eta po rami ijayvu SENHOR yva moingoare, Nhanderuete yvy nhono porāare, ha'e yvy oĩ atā aguā rami ojapo va'ekue. Opyta rive aguā e'ŷ onhono, nhanderek'oarā ae ojapo va'ekue: "Xee ae SENHOR, ndoikoi amboae", he'i.

### *SENHOR ha'e mba'emo ra'angaa re ijayvuague*

**19** "Xee ma nhemi rupi e'ŷ xeayvu, neĩ yvy pytūa py e'ŷ guive. Jacó ramymino kuery pe aipo nda'e: 'Xereka rive rima', nda'e. Xee SENHOR ma anhetē rupi xeayvu, anhetē ete va'e anho aikuua uka.

**20** Ha'e nunga rupi peẽ kuery yvy regua ikuiai gui peo jepe va'ekue, penhemboaty ke pejuvy. Jojavi pevaemb'a, mba'eta yvyra gui mba'emo ra'angaa ojapo va'ekue ojaxei heravy va'e kuery ma mba'eve ndoikuaai, ojapukai 'rā okuapy nguuete ndogueraa jepei va'erā pe rive.

**21** Penhemombe'u ke, pemombe'u peikuaa va'e. Penhomongeta porā ranhe pekuapy. Mava'e tu ha'e nunga ymave guive oikuua uka? Mava'e tu ha'e va'e ára guive omombe'u uka? Xee SENHOR aiko va'e e'ŷ ri ty'y? Mba'eta ndoikoi tuuete mboae xee e'ŷ vy. Tuuete heko porā va'e jogueraa jepea ndoikoi, xee e'ŷ vy.

**22** Peẽ yvy regua kuery ha'e javi, xere ae ke pema'ẽ peo jepe aguā. Mba'eta xee ae ma Penderuete, ndoikoi amboae.

**23** Xejee ae aura va'ekue, xejuru gui anhetē ete va'e oẽ, ha'e xeayvuague ndopyta rivei 'rā. Ha'e vy aipoa'e: 'Xerenonde ma pavē guenapy'ã re oĩ 'rā, pavē oapekū py oura 'rā xerery rupi', ha'e.\*

**24** Ha'e ramo xevy pe aipo'ea 'rā: 'SENHOR re anho oĩ teko porā ha'e mbaraete. Ha'e oĩa py oximb'a reve oupa 'rā hexe nda'iya'e i va'ekue ha'e javi', 'ea 'rā.'

**25** Ha'e rā Israel ramymino kuery ma SENHOR re vy omboeko porāmbaa 'rā, hexe anho ov'y a 'rā okuapy.

---

\* **45:23** Kova'e ayvu rupi ma Jesus reko re ijayvu (Romanos 14.11, Filipenses 2.9-11).

## 46

### *Babilônia py mba'emo ra'angaa ikuai va'ekue okanhymba aguã re ijayvuague*

<sup>1</sup> Bel ha'e Nebo ra'angaa ma ojero'a-ro'a rei 'rã oiny, mba'eta ta'angaa omoña 'rã mymba áry. Nguete ra'angaa ma ogueraa 'rã guymba kuery áry. Hymba kuery ikane'õ ma teī omokane'õve 'rã heravy ta'angaa ogueraa uka vy.\*

<sup>2</sup> Ha'e rami vy tuuete ra'angaa ojero'a rei 'rã oiny. Ha'e nunga ma ndogueraa jepei 'rã hexe ojerovia va'e. Ha'e rami 'rãgue py ha'e nunga ae heraa 'rã amboae yvy re oguereko aguã katy.

<sup>3</sup> "Jacó ha'e Israel kuery pekuave va'e, pendu ke xeayvu. Peẽ kuery ma peiko'i guive xee roguereko, penderyru'i py peī reve rogueraa va'e xejyva áry.

<sup>4</sup> Ha'e gui pendetuja'ipa peve xee ha'ekue ae 'rã aiko, pende'a xiimba peve xee roguereko 'rã. Ha'e rami vy 'rãe xee rogueraa, romombaraete ha'e rogueraa jepe.

<sup>5</sup> Mava'e nda'u xere pembojoja 'rã joo rami ete roikoa rami? Mba'e nunga xee ramigua nda'u pemombe'u kuaa?

<sup>6</sup> Amongue ma ovoko gui ouro oguenoë 'rã, e'ý vy mba'emo opejaa py prata oa'ã vy opaga 'rã ouro re ombo'eapo va'e pe nguuerterã ojapo uka vy. Ha'e rami vy henonde oĩ 'rã guenapy'ã re yvy re ngova omovaẽ reve.

<sup>7</sup> Ha'e gui oaxi'y áry ogueraa 'rã hendarã py omoñ aguã. Ha'e rã ha'e py ae 'rã oĩ. Guenda gui ndovai 'rã. Ha'e nunga pe ojapukai teī nombovai 'rã, neī peteïve ndogueraa jepei 'rã guive ojexavaia gui.

<sup>8</sup> "Penema'endu'a ke pova'e re, pendepy'a guaxu aguã. Pejejavy va'ety kuery, pemoñ pendepy'a re.

<sup>9</sup> Penema'endu'a ke ymave rupi oiko va'ekue re, mba'eta xee ae Penderuete, ndoikoi amboae xee ramigua.

<sup>10</sup> Mba'eta jypy'i guive aikuua uka va'ekue mba'emo oiko va'erã, yma voi mba'emo ndoikoi teri va'e aikuua uka. Ha'e vy aipoa'e: 'Xeayvua oiko ae 'rã, ajapo 'rã aipota va'e ha'e javi', ha'e.

<sup>11</sup> Ha'e rami vy kuaray oua katy gui aenoñ peteñ xapiro, yvy mombyrya gui peteñ ava aenoñ xee amogetaa rupi oiko va'erã. Ha'e rami aguã re xeayvu rire amoingopa avi 'rã. Ha'e nunga xepy'a re amoñ rire ha'e rami ae ju 'rã ajapo.

<sup>12</sup> "Pendu ke xeayvua, mba'eta peneakã ratã va'e vy teko porã gui mombyry peiko.

<sup>13</sup> Ajapo 'rã xeguigua teko porã ovaẽ aguã rami, namombyryvei ma ouvy, ajogueraa jepe aguã voi ndarei 'rã. Ha'e rami vy aexa uka 'rã ajogueraa jepea Sião py, Israel kuery mbyte py aexa uka 'rã xerexakãa."

## 47

### *Babilônia tetã okanhymba aguã re ijayvuague*

<sup>1</sup> "Kunhataī Babilônia pygua rajy, eguejy ke reiñ gui, ha'e yvy ku'i py ju eguapy.\* Caldeu rajy, eguapy ke yvy py ae, mba'eta jipovei ma tenda repenaaty, ha'e ndevy pe 'Kunhataī porã ojou porãvepy' nda'eavei ma 'rã.

<sup>2</sup> Ejopy ke mba'exoa, ha'e emongu'i mba'emo ra'yí. Eipe'a nderova mo'ãa reiporu va'ety, eupi ndeao apy, ha'e neretyma rei reve eaxa eovy yakã.

<sup>3</sup> Mba'eta ndepire reia oexa pavẽ 'rã, oexa 'rã reximba rei rã. Mba'eta xee ajoepy vy namboaxyi 'rã avakue ma guive rã", he'i.

<sup>4</sup> Mba'eta nhande kuery repya ma SENHOR ixondaro reta va'e, Israel kuery ruete Iky'a e'ý va'e hery.

---

\* **46:1** Bel ha'e Nebo ma Babilônia pygua kuery ruete ramigua oguereko va'ekue. Ha'e gui apy ma omombe'u ha'e kuery ojava vy mymba áry ta'angaa omoñ rã ojero'a-ro'ave 'rã oje'oivy. \* **47:1** "Babilônia pygua rajy" he'ia ma tetã Babilônia pygua kuery ha'e javi re ijayvu vy. Ha'e gui apy omombe'u ha'e kuery ikuai axy 'rãa.

<sup>5</sup> "Caldeu rajy, eguapy ke rekyrirī reve, ha'e gui tereo pytūa katy, mba'eta ndevy pe 'Tetā ikuai va'e re ipo'aka va'e' nda'eavei 'rā.

<sup>6</sup> Anhea'ā ete ma xevygua kuery re, ambovaipa uka xemba'erā va'ekue. Ha'e rami vy amboaxa ndepo py, teī ndee ma remboaxyu rupi e'ŷ rerek, tujakue'i voi rerek axy.

<sup>7</sup> Ndee ma 'Xee ma xepo'aka 'rā raka'e rā peve!' 're va'ekue teī aŷ peve xeguigua neremoi ndepy'a re, neī repa aguā re voi ndereikuua potai.

<sup>8</sup> "Ha'e nunga rupi reipotaa rupi rei reiko va'e, endu pova'e nunga. Reī atā teri vy ndejeupe ae aipo're: 'Xee anho aiko, xee e'ŷ vy ndoikoi amboae. Xee ma imeve'ŷ va'e ndaikoi 'rā, neī xememby kueryndoatai 'rā guive', 're.

<sup>9</sup> Ha'e rami teī ha'e nunga mokoīve ma ou xapy'a 'rā ndere, mba'eta peteī ára pyve nememby kuery omanomba 'rā, ha'e imeve'ŷ va'e reiko 'rā. Ha'e nunga ha'e javi oiko xapy'a 'rā ndere, ndevygua imba'evyky ha'e imba'ekuaa va'e heta ete teī.

<sup>10</sup> Mba'eta nderekvaia re rive rejerovia vy 'Jipoi avave rei xerexa va'erā', 're. Ha'e rami teī ne'arandua ha'e reikuaapaa py ae rejekore 'rā, ndejeupe ae: 'Xee anho aiko, xee e'ŷ vy ndoikoi amboae', 're teī.

<sup>11</sup> Ha'e nunga rupi ndere ou 'rā mba'emo vai. Ha'e va'e ma ndevygua kuery mba'ekuaa rupi ikuai va'e ndojoko kuaai 'rā. Ha'e rami ete jexavai oiko 'rā ndere, ha'e va'e gui ndereo jepei 'rā nderekove rekoria mba'emo reme'ē teī. Mba'eta ndere oiko xapy'a 'rā ha'e ramigua ete tekovai nerexa'āi va'ekue.

<sup>12</sup> "Tereove tema mba'evyky ha'e mba'ekuaa rupi nekunhataī guive reikoague rami. Xapy'a rei ma mba'emo rejou nho 'rā ha'e nunga py, xapy'a rei renhomongyje 'rā.

<sup>13</sup> Ndekueraimaha'e rami ete rejekuaa pota ukaaguegui! Toupa aŷ yva regua re oikuuaa pota va'e, jaxy-tata re oma'ē oiny va'e, jaxy pyau'i nhavō mba'emo ndere oiko va'erā mombe'ua kuery.

<sup>14</sup> Ha'e rami teī ha'e kuery re oiko 'rā mba'emo pirekue tata oapypaa ramigua. Ha'e vy ndojereraa jepe kuaai 'rā tata gui. Ha'e va'e rire neī peteī tapyī ma ndopytai 'rā ojape'ea aguā, neī tataypy yvýry oguapya aguā ma voi.

<sup>15</sup> Ha'e rami py ndovareveipa 'rā ndevy omiba'epo vaipa va'ekue, nekunhataī guive ha'e kuery reve mba'emo rejapoa va'ety. Ha'e kuery ma oka'u va'e rami oaimbā 'rā peteī-teī guape rupi ae. Ha'e gui avave rei nandereraa jepel 'rā.

## 48

### *Israel kuery anhetē rupi e'ŷ ikuiaia re ijayvuague*

<sup>1</sup> "Peē Jacó kuery, pendu ke pova'e nunga. Israel rery rupi penderery va'e, ha'e Judá ramymino kuery pendekuai, ha'e SENHOR rery rupi peura va'e. Nhanderuete Israel kuery Ruete pe pejapukai va'eri anhetē rupi e'ŷ, teko porā rupi e'ŷ pendekuai.

<sup>2</sup> Pendejeupe 'Tetā iky'a e'ŷ va'e pygua' peje, ha'e 'Ore roī atā Israel kuery ruete SENHOR ixondaro reta va'e hery va'e re', peje teī.

<sup>3</sup> Ha'e gui xee ma jypy mba'emo amombe'u yma guive. Xejuru rupi ae amombe'u, aendu uka porā guive. Ha'e gui ma amoingo xapy'a ramo ojeupitypa.

<sup>4</sup> Mba'eta xee aikuuaa peneakā ratāha'e pendeajuy kāgue ferro rami hatā va'ea, penderova voi overa va'e gui ojapo pyre rami ete hatā va'e.

<sup>5</sup> Ha'e nunga rupi ae amombe'u ha'e va'e ára guive, ha'e nunga oiko e'ŷ mbove voi aikuuaa uka pēvy, peē kuery aipopeje e'ŷ aguā: 'Ha'e nunga ma oreruete ra'angaa omoingo', e'ŷ vy 'Ta'angaa mba'emo ryku guigua omoingo', peje e'ŷ aguā.

<sup>6</sup> Ha'e nunga pendu ae ma rire aŷ peikuuaa pota ke ha'e nunga ha'e javi re. Ha'e nunga pe 'Anhetē ete va'e' ndapejei 'rā teve? Ha'e gui aŷ ma mba'emo pyau ju aendu uka 'rā pendevy, mba'emo ndaikuua ukai teri ha'e ndapeikuuaai va'ekue.

<sup>7</sup> Ha'e nunga ma aŷ mae amoingo, ymave rupi e'ŷ. Kova'e ára e'ŷ mbove napendui, 'Aikuua ae ma' peje e'ŷ aguā.

<sup>8</sup> Mba'eta ha'e nunga peẽ napendui, ndapeikuaai teri, neĩ napendui guive pendeapyxa py, mba'eta xee aikuaa anhetẽ rupi e'ŷ pendekuaia, penderyru'i gui peiko'i guive 'Heko vai va'e' 'ea pendevy.

<sup>9</sup> Ha'e rami ete teĩ xerery amboete ukaa rupi vy ndaexa uka voi 'rã xepoxya, xee anhemboete ukaa re ae ajejoko 'rã romomba vyvoi e'ŷ aguã.

<sup>10</sup> Ha'e rami avi xee roiky'a'opa teĩ prata rami ndapejekuaai, tata kua jexavaia py roa'anga teĩ.

<sup>11</sup> Ha'e rami ete teĩ xejee ae vy aiko ha'e rami. Mba'exa tu xee roguereko ta xerery nomboeteai aguã rami? Xee ma xerexakãa namboaxai 'rã amboae pe.

<sup>12</sup> "Jacó ha'e Israel kuery roenoĩ va'ekue, pejapyxaka ke. Xee ma ha'ekue ae aiko. Xee ma jypy'i guive ha'e opaa pygularã.

<sup>13</sup> Xepo py ae yvy anhono va'ekue, ha'e aiporu kuaa regua py ae aipyo yva. Ha'e nunga xee aenoĩ ramo ojekuaapa raka'e.

<sup>14</sup> Penhemboatypa ke, ha'e pendu: Mava'e ta'angaa ikuai va'e regua nda'u ha'e nunga oikuaa uka ma voi? Mba'eta xee SENHOR ma Ciro ayvu vy aity uka 'rã Babilônia tetã aipotaa rami, caldeu kuery rovai xejyva upi vy.

<sup>15</sup> Xee amombe'u ae ma, ha'e gui xee ae ju aenoĩ xerembiguarã. Xee aru vy ajapo 'rã oikoa ha'e javi rupi ojapopa aguã rami.

<sup>16</sup> Penhemboja ke xere, pendu pova'e nunga: Nhemi rupi e'ŷ xeayvu jypy guive. Ha'e nunga oiko ypy'i guive xee aiko ha'e py", he'i. Ha'e gui aŷ ma SENHOR Nhanderuete xembou, Onhe'ẽ reve.

<sup>17</sup> Po rami SENHOR ndereraa jepea ijayvu, Israel kuery ruete Iky'a e'ŷ va'e: "Xee ma SENHOR Nderuete. Rombo'e iporã va'e re, ha'e tape reiko aguã rupi roguereko va'e.

<sup>18</sup> Ha'e rami avi xeayvuague rendu va'e rire reiko porã 'rãgue yakã rami, ha'e nderekoporã opa rupi ojekuaa 'rãgue ye'ẽ re yai ikuai va'e rami.

<sup>19</sup> Neramymino kuery ma ita ku'i ha'e mba'emo ra'yã rami 'rãgue heta. Hery voi xerenonde gui nomokanhyai ha'e ndoipe'aai 'rãgue guive.

<sup>20</sup> "Ha'e nunga rupi tapeopa Babilônia tetã gui, pejava caldeu kuery mbyte gui. Ha'e gui pova'e nunga peikuaa uka ke peporaeia rupi. Perojapukai ke, yvy apy peve peikuaa uka. Ha'e vy aipopeje: 'SENHOR ogueraa jepe ma guembiguai Jacó kuery', peje.

<sup>21</sup> Mba'eta peneramoĩ kuery ma tekao e'ŷa rupi SENHOR ogueraa teĩ noendui raka'e yuvei. Ha'e kuery pe ojapo avi itaova gui yy oẽ aguã rami. Itaova ombovo rã yy onheẽ raka'e.

<sup>22</sup> Ha'e rã heko vai va'e kuery pe ma noĩ 'rã ikuai porã aguã", he'i SENHOR.

## 49

### *Judeu e'ŷ va'e ikuiaia rupi avi SENHOR rembiguai omoexakã aguã re ijayvuague*

<sup>1</sup> "Peẽ ye'ẽ yvýry pendekuaai va'e, pendu ke xeayvu. Peẽ mombyrygua kuery, pejapyxaka ke. Mba'eta aiko'i ramove SENHOR xerenoĩ, xeryru'i pyve ma voi omombe'u xerery.

<sup>2</sup> Ha'e vy xejuru gui oẽ va'e ojapo kyxe haimbe porã va'e rami, ha'e opo py xemo'ã. Xeapo hu'y hyxyï porã va'e rami, ha'e ngu'y ryru py xererekoo.

<sup>3</sup> Ha'e vy aipoe'i xevy: 'Ndee ma xerembiguai, Israel reiko. Ndee reikoa re vy xemboetea 'rã', he'i.

<sup>4</sup> "Ha'e ramo xee aipoa'e: 'Ha'e rami avi xee amba'eapo rive, mba'everã ndovarei anhea'âague. Ha'e rami teĩ SENHOR renonde ma oĩ xemboeko porã aguã, amba'eapo repy oĩ Xeruete po py', ha'e.

<sup>5</sup> "Ha'e gui aŷ ma SENHOR xeryru'i py guembiguarã xemboeteare va'e ijayvu Jacó regua kuery aru ju aguã, ha'e oĩa py Israel kuery amboatypa aguã, mba'eta SENHOR ae xemboyvate, Xeruete xemombaraete.

<sup>6</sup> Ha'e rami vy aipoe'i xevy: 'Tá, ha'e rami avi Jacó ha'e Israel regua okuave va'e rerupa ju aguã anho e'ŷ romoĩ xerembiguairã. Amboae regua kuery moexakãarã guive romoĩ, yvy apy rupi peve jogueraa jepearã', he'i.\*

<sup>7</sup> Po rami SENHOR Israel kuery reraa jepea Iky'a e'ŷ va'e ijayvu guembiguai avakue ndoayvui ete va'e pe, mba'eta heta va'e kuery ndoiptai ae, huvixa kuery ojokuai guive. Ha'e vy aipoe'i ixupe: 'Huvixave kuery nderexa vyve opu'âmba 'rã, yvatekueve voi. Ha'e kuery nemboete 'rã okuapy xee SENHOR Israel kuery ruete Iky'a e'ŷ va'e re vy, ojeroviapy aikoa rupi roiporavo rire', he'i.'

### *Israel kuery oguerupa ju aguã re ijayvuague*

<sup>8</sup> Ha'e gui SENHOR aipoe'i avi: "Xee romboaxy aguã ára aendu ndeayvua, rogueraa jepe aguã ára roipytyvõ. Ha'e rami vy anhangareko 'rã ndere, ha'e xevygua kuery pe rome'ẽ 'rã xereve guarã ajapo vy. Ha'e ramo rembopyau ju 'rã ha'e kuery yvy omombyta rive pyre, ha'e peteĩ-teĩ pe reme'ẽ ju 'rã."\*

<sup>9</sup> Ha'e rami vy nhuã py omboty pyre pe aipo're aguã: 'Peẽ ke', ha'e pytû rupi ikuai va'e pe 'Peju, pejekuaa ju', 're 'rã. Ha'e ramo ha'e kuery ikuai 'rã vexa'i tape rupi okaru va'e rami, ha'e yvy'ã piru reia rupi teĩ ojou 'rã ho'u va'erã.

<sup>10</sup> Ha'e rami vy ha'e kuery noenduvei 'rã kuarai neĩ yuvei. Haku-a neĩ kuaray ojopea voi nomoingo axyvei 'rã. Mba'eta imboaxyo oguerekoy vy ogueraa 'rã yy porã oĩa py.\*

<sup>11</sup> Xeyvy re yvyty ikuai va'e rupi ajapo 'rã haperã, ha'e amoatyrõmba ju 'rã tape ikuai va'e.

<sup>12</sup> Ma'ẽ, xevygua kuery ou 'rã mombyry gui, amongue ma kuaray ijapu'a'ia katy gui, amboae kuery ma kuaray oikea katy gui, ha'e rã amboae kuery ma Sinim yvy gui 'rã ou."

<sup>13</sup> Yva, eporaei ke! Yvy, evy'a ke! Ha'e peẽ yvy'ã pendekuai va'e voi pemonhendu mboraei, mba'eta SENHOR omboovy'a ju ojeupagua kuery, ikuai axy va'e omboaxy vy.

<sup>14</sup> Ha'e rami teĩ Sião aipoe'i: " SENHOR xereja ri, SENHOR hexarai ma xere", he'i.\*

<sup>15</sup> "Ha'e rami teĩ imemby kambu va'e nda'u hexarai 'rã ri omemby'i re, nomboaxyi 'rã ri nda'u oguerekoi va'ekue? Xapy'a rei omemby re hexaraia teĩ xee ma ndaxerexarai 'rã ndere.

<sup>16</sup> Ema'ẽ, xepo mbyte re ambopara nderery, xejee riae amoĩ ndekora re xema'endu'a aguã.

<sup>17</sup> Ha'e ramo nememby kuery ha'e ndepi'a kuery ma ojevy voi 'rã okuapy. Ha'e rã nemombaare ha'e ndererekoy axy reia kuery ma ojepe'a 'rã reĩa gui.

<sup>18</sup> Ema'ẽ ndeyvýry rupi rexa aguã, mba'eta ndea py ono'õ jogueruvy. Anhetẽ ete xee ae rekove rupi aura vy aipoa'e: 'Ha'e kuery ma ndejee remoĩ 'rã renhembojeguaa rami, ha'e kuery re vy neporã 'rã kunhataõ omenda ta va'e rami', he'i SENHOR.

<sup>19</sup> "Nerenda ma tekao ve'ŷ ha'e ombovaipa pyre ranhe itui va'ekue. Ndeyvy voi ombovaipa pyre itui va'ekue teĩ aŷ ma ndee Sião, nekyrĩ'i vai ete 'rã ndere hekoa va'e kuery ha'e javi oĩmba aguã. Ha'e gui nemombaare kuery ma mombyry 'rã ikuai ndea gui.

<sup>20</sup> Nememby kuery ha'e ndepi'a kuery ndegui oipe'aa pyre heta ju vy aipoe'i 'rã okuapy ndevy: 'Kova'e henda ma kyrĩ'i vai ete orevy. Embotuvixave ke roĩ aguã', he'i 'rã okuapy.

<sup>21</sup> Ha'e gui ndejeupe ae aipo're 'rã: 'Mava'e tu kova'e kuery omoingo va'ekue xememby ha'e xepi'arã? Mba'eta xegui ma xememby kuery ha'e xepi'a kuery oipe'apaa, ha'e na'imembyvei aguã rami aiko va'ekue, amboae yvy katy xereraa, ha'e oayvupy e'ŷ aiko va'ekue. Mava'e tu ha'vy omoingo kova'e kuery xememby ha'e xepi'arã? Xee ma xae'i xerejaa va'ekue ri kova'e kuery magui tu ou?' 're 'rã'."

---

\* **49:6** Atos 13.47    \* **49:8** 2 Coríntios 6.2    \* **49:10** Apocalipse 7.16    \* **49:14** Apy ma Sião Jerusalém tetã ma peteĩ kunha rami ijayvu, ha'e rami SENHOR ombovai 'rã tetã pe.

<sup>22</sup> Ha'e gui po rami SENHOR ijayvu: "Xee ma upi 'rā xepo yvy regua kuery oexa pavẽ aguã, heta va'e kuery oexaa py upi 'rā xevyguia bandeira. Ha'e ramo ha'e kuery ojyva áry oguerupa 'rā nememby kuery ha'e ndepi'a kuery, oaxi'y áry guive.

<sup>23</sup> Ha'e ramo huvixave kuery ma onhemoingo 'rā tuvyrā, ha'e huvixa kunha ma omokambu 'rā. Ha'e rami vy nerondenon ha'e kuery guenapy'ã re ikuai 'rā, ha'e yvy re ngova omovaẽ reve onhemo'yvy'í'i 'rā okuapy ndepy yvýry. Ha'e ramo reikuua 'rā xee ae SENHOR aikoa, ha'e xere ojerovia va'e kuery noximbai 'rāa", he'i.

<sup>24</sup> Peteĩ ipy'a guaxuve va'e gui nda'u oipe'aa 'rā ombo'erā ojou va'ekue? Peteĩ joguerekoxya gui nda'u oo jepe 'rā teve nhuã py ombo'a va'ekue?

<sup>25</sup> Ha'e rami teĩ po rami SENHOR ijayvu: "Ha'e rami avi nhuã py ombo'a pyre kuery oo jepe nho 'rā ipy'a guaxuve va'e gui, joguerekoxya gui ombo'a va'ekue ojepe'a 'rāe, mba'eta ndere opu'ã va'e kuery re xee apu'ã vy araa jepe 'rā nememby kuery ha'e ndepi'a kuery.

<sup>26</sup> Ha'e rami vy ajapo 'rā ndereroko axyare kuery ngo'o re ae okaru aguã rami, ha'e nguguy py ae vinho py rami oka'u okuapy aguã rami. Ha'e rami rā avakue ha'e javi oikuaapa 'rā xee ae SENHOR aikoa, ndereraa jepea ha'e nderepya, Jacó kuery ruete Ipo'akapa va'e aiko."

## 50

### *SENHOR rembiguai ojavykyarei teĩ ojeroviapyoikoa reijayvuague*

<sup>1</sup> Po rami SENHOR ijayvu: "Mamo tu oĩ kuaxia para pendexy re amendaas gui xee ajape'a ha'e amondouka aguã regua?\* Ha'e nunga ndoikoi ae. Ha'e rami e'ŷ vy mava'e tu xemboreveaty oiko ixupe peẽ kuery rovendeague? Any, penderekovaia káuxa ae penevendepaa, pejejavague re pendexy omondoukaa.

<sup>2</sup> Mba'exa tu ha'vy xee aju teĩ avave rei ndojekuaai, ha'e xee roenoĩ teĩ avave rei nax-embovai? Xepo nda'u ijapu'a'i vai ete ri rogueraa jepe aguã? Tyrā pa naxembaraevei ma rogueraa jepe aguã? Mba'eta ye'ẽ pe xeayvu vy rive amombirupa, ha'e yakā 'rāgue py ajapo tekao e'ŷa opyta aguã rami, pira ha'e py ikuai va'e inemba peve. Yy jipoi ramo omanomba 'rā yuvei gui.

<sup>3</sup> Xee ae ma yva amoũmba va'e, inhovãarã ajukue voxaxigua ramigua amoĩ vy", he'i.

<sup>4</sup> "Ha'e gui xevy pe SENHOR Nhanderuete ome'ẽ hi'arandu va'e ayvu, ikane'õ va'e pe xeayvu kuaa aguã ambopy'a guaxua rupi. Ko'ẽ nhavõ aje'ive xembovy 'rā, xeapyxa oipe'a 'rā hembiguai rami ajapyxaka aguã.

<sup>5</sup> SENHOR Nhanderuete xeapyxa oipe'a ramo xee nanhe'ẽ rendu e'ŷi, ixugui ndajepe'ai guive.

<sup>6</sup> Ha'e rami vy xekupe rupi anhenupã ukapa, xerova voi nanhomni xe'a moatãa kuery gui, xerova ndarovai xere ijayvu vaikue-ikue ha'e onyvõmba rei va'e gui.

<sup>7</sup> Mba'eta Nhanderuete xepytyvõ aximbai e'ŷ aguã rami. Ha'e ramo xerova ajapo ita rami hatã aguã, mba'eta aikuaa naximbai 'rāa.

<sup>8</sup> Xemboeko porã va'e xea katy'i oĩ ramo mava'e tu ijayvu rei ta xere? Jajexa uka ha'vy joa py. Mava'e tu xerovai guarã oiko ta? Penhemboja ke ha'vy nhanhomboayvu aguã.

<sup>9</sup> SENHOR Nhanderuete ae xepytyvõarã oiko ramo mava'e tu xembopaga 'rā? Ha'e rā ha'e kuery ma okanhymba 'rā ajukue vixo'i ho'upaa rami."

<sup>10</sup> Mava'e peẽ kuery regua nda'u SENHOR mboetea rupi ete peiko, ha'e hembiguai penhe'ẽ rendu va'e? Pytū rupi tataendy reve'ŷ oiko va'e ma tojerovia SENHOR rery re, toĩ atã Nhanderuete re.

---

\* <sup>50:1</sup> Apy ma Israel kuery pe SENHOR ijayvu. Mba'eta SENHOR e'ŷ opoi Israel gui, ha'e rā Israel kuery ae ojejavypaa rupi ojepe'a okuapy ixugui.

**11** Ha'e rā peẽ kuery tata pemoendy ha'e hu'y endy va'e perekō katu va'e ma tata ha'e hu'y pemoendy va'ekue rexakāa rupi tema peiko. Ha'e rami avi xegui ae 'rā ou penembopagaarā, roitypa 'rā pejexavai aguā py.

## 51

### *Sião pygua kuery ov'y a ju aguā re ijayvuague*

**1** “Teko porā rupi peikoxe ha'e SENHOR peka va'e, pendu ke xeayvua. Penema'endu'a ke itaova ha'e itakua ha'e va'e gui penemoingoague va'e re.

**2** Penema'endu'a ke penderu Abraão ha'e penekuavāare Sara re ae. Mba'eta Abraão aenoī jave petei'i oiko. Ha'e gui aroayvu porā vy amboetave karamboae.

**3** Mba'eta xee SENHOR ma Sião voi amboaxy. Amboaxy avi 'rā tetā rupi tekoague ikuai va'e ha'e javi. Ha'e vy ajapo 'rā ha'e rupi tekao e'ŷ oĩ va'e Éden pyguare rami iporā ju aguā, ajapo 'rā opyta rei va'ekue-'ekue xevyguia yvotyty rami. Ha'e ramo oendua ju 'rā ov'y a va'e ha'e py, oguerovy'aa rupi oporaei va'e mba'epu reve.

**4** “Peikuaa pota ke, xevyguia kuery. Xevyguia tetā pygua kuery, pendu ke xeayvua. Mba'eta xegui ae ojekuaa 'rā lei, xeguigua teko porā aikuua uka 'rā yvy regua kuery moexakāmbaarā.

**5** Mba'eta xeguigua teko porā ma mombyry e'ŷ oĩ, ojekuaa ma ajogueraa jepea voi. Ha'e rami vy xepo'akaa rupi areko 'rā yvy regua kuery. Ye'ẽ yvýry ikuai va'e voi xerarō okuapy, xere ojerovia xepo'aka aguā.

**6** Pema'ẽ ke yva re, ha'e gui yvy katy ju pema'ẽ. Mba'eta yva okanhymba 'rā hataxī rami, ha'e yvy ma inhymamba 'rā ao vaikue rami, hexe hekoa va'e kuery voi omanomba vyvoi 'rā mbarigui rami rive. Ha'e rā ajogueraa jepea ma oĩ riae 'rā, xeguigua teko porā voi nombovaipaai 'rā.

**7** “Peẽ kuery teko porā peikuaa va'e, pendu ke xeayvu, penekuraxõ re xeguigua lei oĩa va'e. Pekyje eme avakue pendejojai rei tei, penhemondyi eme pendere ijayvua rei ramo.

**8** Mba'eta ha'e kuery ma omombaa 'rā ajukue vaikue rami, vixa'i rague vixo'i ho'upaa rami ae. Ha'e rā xeguigua teko porā ma oĩ riae 'rā, ha'e ajogueraa jepea ma ta'y jevy-jevy ikuiaia peve 'rā oĩ.”

**9** Emyī ke, SENHOR ndepo'akapa va'e, emyī ke. Ndejee emoī nembaraetea rexa uka aguā. Emyī ke ymave rupi ymagua kuery ikuai jave guare rami. Ha'e rami vy ndee e'ŷ ri ty'y Egito yvy mombaare, ha'e ye'ẽ rupigua jukaare?

**10** Ndee e'ŷ ri ty'y ye'ẽ typya mombiruare? Mba'eta ye'ẽ mbyte rupi taperā rejapo va'ekue, reraa jepe va'e kuery oaxapa aguā.

**11** Ha'e rami vy SENHOR oepy va'e kuery ojevypa ju 'rā. Sião tetā py oupa 'rā okuapy oporaei reve. Ha'e kuery akā re ma vy'a opa e'ŷ va'e 'rā oĩ coroa rami. Ha'e kuery oupity va'erā va'e ma mby'a porā ha'e vy'a anho. Ha'e rā mboriau ha'e mby'a vai ma okanhymba 'rā.

**12** “Xee, xee ae rombovy'a va'e. Mba'exa tu ha'vy ndee rekyje 'rā avakue omano va'erā gui rive, ha'e avakue ra'y kuery jai rogue rami okanhya va'erā va'e gui?

**13** Mba'exa 'rā tu ndee nderexarai SENHOR nemoingoare gui? Mba'eta ha'e ae yva pyoare ha'e yvy nhonoare oiko. Mba'e re tu ndee ko'ẽ nhavõ rekyje reikovy joavyky rei va'e nhomomba aguā rami ikuai va'e poxya gui rive? Mamo tu opyta joavyky rei va'e poxya?

**14** Mba'eta escravo-rā heraa pyre opoipaa voi 'rā, nomanoi 'rā ha'e py, yvyra rupa py nomboguejyai 'rā ha'e py. Ha'e rami 'rāgue py ho'u va'erā ndoatai 'rā.

**15** Mba'eta xee ma SENHOR Nderuete. Yai revovo onhendu aguā ye'ẽ omomyī va'e ma xee ae. SENHOR ixondaro reta va'e xerery.

**16** Amoī 'rā xeayvu ndejuru py, ha'e romo'ã 'rā xepo py, yva pyau aipyo ha'e yvy pyau anhono aguā. Ha'e rami vy Sião pygua kuery pe ‘Peẽ ma xevyguia kuery’, ha'e 'rā.”

<sup>17</sup> Emyī ke, ndee Jerusalém tetā! Emyī ke, ha'e epu'ā ju! SENHOR po gui karo ipoxya oĩa rejopy va'ekue gui rey'u ae ma. Karo nhomoakanhybaarā oĩa va'e gui rey'upa ma.

<sup>18</sup> Nememby kuery, ndepi'a kuery rereko'i va'ekue regua neĩ peteĩve ma nanepytyvõia rupi oiko. Remongakua'i va'ekue neĩ peteĩve ma ndepo re ndojopy herekovyi.

<sup>19</sup> Mava'e tu nemboaxyarā oĩ? Mba'eta ndere ou va'ekue mokoĩ regua: nembojexavaia ha'e nemombaa, karuai ha'e kyxe. Mba'exa tu ha'vy nembovy'aarā noĩ?

<sup>20</sup> Mba'eta nememby kuery ha'e ndepi'a kuery ho'apa ma inhakanhy vy. Tape oĩ va'e va'e rupi ma onheno okuapy, nhuã py guaxu ombo'a pyre rami. Mba'eta ha'e kuery re ou SENHOR poxya, Nhanderuete ijayvu eteague.

<sup>21</sup> Ndee rejexavai ha'e reka'u ri teĩ vinho gui e'ŷ ta'vy. Ha'e nunga rupi endu ke pova'e nunga.

<sup>22</sup> SENHOR Nderuete, ojeupequa kuery repya aipoe'i: "Ndepo gui aipe'a ju 'rā karo nemoakanhyarā ha'e xepoxya oĩa. Ha'e va'e gui ma nderey'uvei 'rā.

<sup>23</sup> Ha'e gui nembojexavai reia kuery po py ju 'rā amoĩ, ndevy pe 'Ejero'a ke, nde'áry rupi roaxa aguã', he'i va'ekue po py ae. Mba'eta renheno ramo ndekupe áry rupi ha'e kuery oguataa va'ekue, yvy e'ŷ vy tape oĩ va'e rupi oguataa rami."

## 52

<sup>1</sup> Emyī ke, ndee Sião tetā. Emyī ke, emoi nembaraete aguã. Ndee Jerusalém tetā iky'a e'ŷ va'e, enhemonde ke ndeoao iporãve va'e py. Mba'eta ndea py ma opire omboi uka va'e e'ŷ ndoikevei 'rā, neĩ ndojeky'a'o ukai va'e kuery voi.

<sup>2</sup> Enhembojaity ke yvy ku'i gui. Evy ke Jerusalém, ha'e eguapy ju einy. Eipe'a ke corrente ndeaju'y jokuaague, Sião memby escravo-rā ndereraa va'ekue.

<sup>3</sup> Mba'eta po rami SENHOR ijayvu: "Hepy re e'ŷ nevendeague rami peráta re e'ŷ ju 'rā rojogua", he'i.

<sup>4</sup> SENHOR Nhanderuete aipoe'ive ju: "Jypy'i ma xevyguia kuery Egito yvy katy oje'oi raka'e ha'e py ikuai aguã. Ha'e gui ma Assíria pygua kuery ju mba'e py e'ŷ ombojexavai.

<sup>5</sup> Ha'e gui aŷ teĩgue ju mba'e tu ha'e py oiko? Mba'eta xevyguia kuery ogueraapaa rive ju hepy re'ŷ. Ijavyky reia kuery ojapukai atã okuapy. Ha'e nunga rupi xerery re ijayvu vaikue-ikuea ko'ẽ nhavõ", he'i SENHOR.\*

<sup>6</sup> "Ha'e rami teĩ xevyguia kuery oikuuaa nho 'rā xerery. Ha'e va'e ára ma oikuuaa 'rā okuapy xee 'Apy ma aĩ' ha'e va'ea", he'i SENHOR.

<sup>7</sup> Iporã ete! Yvyty áry rupi mba'emo pyau mombe'ua ou jekuaa! Ha'e va'e ma omonhendu ouvy nhandekuai porã ju aguã, omombe'u iporã va'e, nhandereraa jepea regua. Ha'e vy Sião pygua kuery pe ma "Penderuete ipo'aka ma", he'i.\*

<sup>8</sup> Aipo ma, peneretã rarõa kuery ojapukai nhendu. Ha'e kuery ov'y a reve ojapukai atã okuapy, mba'eta oexa Sião tetā katy SENHOR ou jeyv rā.

<sup>9</sup> Peporaei ke pekuapy, peẽ tekoague Jerusalém py pendekuai va'e. Pevy'a pekuapy peteĩ rami, mba'eta SENHOR ombovy'a ju ma ojeupequa kuery, oepy ma Jerusalém tetā.

<sup>10</sup> Yvy regua kuery ha'e javi oexaa py SENHOR oupi ojyva iky'a e'ŷ va'e. Ha'e ramo yvy apy guive oexapa 'rā Nhanderuete nhandereraa jepe rā.

<sup>11</sup> Ha'e nunga rupi pejep'e a ke, pejep'e a upe gui, ha'e peju ju. Pejopy eme ha'eve'ŷ va'e re. Pejep'e a ke ha'e kuery mbyte gui. SENHOR pegua tembiporu peraa va'e kuery, pejeky'a'o ke.\*

<sup>12</sup> Pejep'e a pojava rei eme guive, pejava eme, mba'eta SENHOR oo 'rā penerononde, Israel kuery ruete penderakykue rupi avi 'rā oo penerarõ vy.

*Nhanderekovia SENHOR rembiguai oiko axy aguã re ijayvuague*

\* 52:5 Romanos 2.24

\* 52:7 Romanos 10.15

\* 52:11 2 Coríntios 6.17

**13** “Ha'e gui xerembiguai ma oiko kuaa 'rã. Ha'e ramo omboyvatea ha'e omboetea ete 'rã, pavẽ áryve 'rã oiko.

**14** Ha'e rami avi heta oexa vy onhemondyi, mba'eta pavẽ gui ombovaikueave, ava rami ve'ŷ omombytaa rã.

**15** Ha'e rami ae avi yvy regua kuery áry rupi omboayvi 'rã. Ha'e ramo huvixave kuery onhemondyipa vy ombotypa 'rã ojuru, mba'eta oexa 'rã ha'e kuery pe omombe'ua va'ekue'ŷ, ha'e oikuaa nho 'rã oendu va'ekue'ŷ.”\*

## 53

**1** Mava'e tu oguerovia ayvu romombe'u va'ekue? Mava'e pe tu SENHOR oikuaa uka opo'akaa?\*

**2** Mba'eta henonde hembiguai yvate-vateve ov yvyra rapytakue renhoĩ rami, yvy piru reia py yvyra rapo gui hi'yky hoky va'e rami. Jaexa rã omboete pyrã e'ŷ merami, na'iporãi guive. Neĩ peteĩ henda py voi noĩ iporãa jarovy'a va'erã.

**3** Oayvupy e'ŷve oiko, avakue pavẽ gui oipotapy e'ŷve ete. Ava oiko axy va'e, tekoaxy oendu jepi va'e guive. Ha'e ma avakue ndoayvui vy ixugui ngova omo'ã okuapy. Ha'e ramo nhande voi ndajaikuaa potai va'ekue hexe.

**4** Mba'eta anhetẽ ojee ae ogueraa nhanderekox akykue, nhanemba'eaxy omoimba ojee. Ha'e rã nhande ma jaikuaa va'ekue ombopaga pyrã rã Nhanderuete omoingo axy ha'e ombojexavaia rami.\*

**5** Ha'e rami teĩ nhande nhanderekox vaiaty py ma oipyxoa, jajeavyague re ae omou'üa. Hexe oĩ tekoaxy nhanemoingo porãarã, ha'e oinupãa ague re vy nhande jakuera.

**6** Nhande kuery ha'e javi nhakanhymba javy vexa'i rami, peteĩ-teĩ jajepe'a va'ekue tape gui. Ha'e ramo hexe ma SENHOR omoĩ nhande kuery ha'e javive reko vaitaty.\*

**7** Ha'e ma omoingo axya ha'e omo'yvy'iia teĩ ndoipe'ai ojuru. Vexa'i ojukaa aguã katy ogueraa va'e rami, vexa'i rague ayaa renonde ogueraa rã okyrirĩ ratã'i va'e rami ogueraa teĩ ojuru ndoipe'ai.

**8** Anhetẽ rupi e'ŷ oikuaa potaa reve ogueraa. Ha'e rami rã ta'y kuery re avave rei neĩ noexa'ãi. Mba'eta oikove va'e kuery ikuiaigui oipe'aa. Xeretarã kuery ojeavyague re ae ojukaa.\*

**9** Ha'e hetekue ruparã ma ojoua heko vai va'ekue mbyte py, omano vy iporiau e'ŷ va'e revogua opyta teĩ. Ha'e rami avi teko vai ndojapoi, neĩ peteĩ henda py ma ayvu vai noenduai ijuru gui.\*

**10** Ha'e rami teĩ SENHOR oipotaa rami ae omou'ü ha'e omoingo axy uka. Ha'e ramo jeavya regua ome'ẽ mbyrã guekove ome'ẽ rire oexa nho 'rã gua'y kuery, oiko pukuve 'rã guive. Ha'e ramo ipo py SENHOR oipota va'e oiko porã 'rã.

**11** Ha'e gui ojexavaiague gui iporã va'e oiko ramo oexa vy ov yvaipa 'rã. Mba'eta Xerembiguai heko porã va'e oikuaa rupi vy heta 'rã omboeko porã, ojee ae ha'e kuery ojeavyague ogueraa rire.

**12** Ha'e nunga rupi heta 'rã xee ame'ẽ ixupe guarã. Ha'e ramo ipo'akapa va'e kuery mbyte omboja'o 'rã mba'emo porã, omanoa py guekovea ome'ẽ rire. Heko vai va'e oikoa rami jaikuaa va'ekue teĩ ojee ae ogueraa heta ojeavyague, heko vai va'e kuery re ojerure guive.\*

## 54

*Sião pygua kuery ikuai porã aguã re ijayvuague*

---

\* **52:15** Romanos 15.21 \* **53:1** João 12.38, Romanos 10.16 \* **53:4** Mateus 8.17, 1 Pedro 2.24 \* **53:6** 1 Pedro 2.25 \* **53:8** Atos 8.32-33 \* **53:9** 1 Pedro 2.22 \* **53:12** Lucas 22.37

<sup>1</sup> SENHOR aipoe'i: "Ndee kunha, nememby e'ŷ va'e ae kyrĩ va'e nereikuavãi va'ekue, eporaei ke revy'aa rupi. Kyrĩ va'e raxy nerendui teri va'ekue, evy'a ke reporaei reve, erojapukai. Mba'eta kunha opoi pyre rami reiko va'ekue ri nememby kuery hetave 'rã ome reve riae oiko va'e memby kuery gui.\*

<sup>2</sup> Ha'e nunga rupi embopyve ke ndero reña renda, emoatãve ke ndero ao'ia peñ aguã. Embotuvixa e'ŷ eme, embopukuve ikuaarã, ha'e emo'ã ratãve ke yvyra rakua ijytarã.

<sup>3</sup> Mba'eta peẽ kuery penderetave 'rã peovy reiporu kuaa regua ha'e reiporu kuaa e'ŷa katy. Ha'e gui neremiarirõ kuery ipo'aka 'rã yvy regua kuery re, ha'e hekoia ju 'rã tetã opyta rei va'ekue py.

<sup>4</sup> "Ekyje eme, mba'eta nanemoximbaavei 'rã. Eximba rei eme, nanemo'yvyiavei 'rã. Mba'eta nderexaraipa 'rã nekunhatai jave reximba reia rupi reikoague re, imeve'ŷ va'e rami reikoague re guive.

<sup>5</sup> Mba'eta nemoingoare ae oiko neme, SENHOR ixondaro reta va'e ma hery. Israel kuery ruete Iky'a e'ŷ va'e ma nderepya, 'Yvy jave regua ruete' 'epy va'e ae.'

<sup>6</sup> Nderuete aipoe'i: "Kunha opoi pyre iporiau rei va'e, ha'e kunhatai oeja pyre rami reiko va'ekue ri SENHOR nerenoju.

<sup>7</sup> Xapy'a rai'i xee roeja va'ekue ri romboaxy etea rupi ju 'rã rogueru.

<sup>8</sup> Xepoxy etea rupi ndegui xerova amo'ã xapy'a'i va'ekue ri romboaxya opa e'ŷ va'e ju aendu", he'i SENHOR nderepya.

<sup>9</sup> "Xevy pe rã ha'e nunga Noé oiko jave guare rami, mba'eta aura Noé oiko jave guare rami ve'ŷ yy py yvy ndajao'ivei aguã re. Ha'ekue rami ae aŷ ma ndevy pe ju aura ndaxevaivei, neñ ndorojou vaivei aguã re.

<sup>10</sup> Mba'eta yvyty ikuai va'e ojepe'apa, ha'e yvy'ã voi ovapa 'rã teñ romboaxya ma ndopai 'rã, ha'e ndevy pe xereve guarã ajapo va'ekue nombovaipaai 'rã", he'i SENHOR nemboaxy va'e.

<sup>11</sup> "Ndee Sião tetã, reiko axy ha'e nanembovy'aavei rã rejexavai rei va'ekue. Ha'e rami teñ ema'ë, ndea py ita oity pyre ambojo'a ju vy pytã va'e py 'rã amboja, ha'e ita safira py ju 'rã amboyta.†

<sup>12</sup> Ndea py torre ajapo ju 'rã rubi gui, kora rokë ma carbúnculo gui, ha'e tetã kora ha'e javi rupi ma itaendy iporãve va'e gui 'rã ajapo.

<sup>13</sup> Nememby kuery ha'e ndepi'a kuery ha'e javi ma xee SENHOR ae 'rã ambo'e. Ha'e ramo ikuai porã 'rã opa mba'e py.\*

<sup>14</sup> Teko porã rupi 'rã anhangareko ndere nemoingo axyarã va'ekue gui mombyry, ha'e ramo nderekjyevei 'rã. Nemondyiara va'ekue gui voi mombyry 'rã reiko, ndouvei 'rã ndere.

<sup>15</sup> Xapy'a rei ndere opu'ã va'e oiko teñ xee ambou va'e e'ŷ 'rã. Ha'e ramo ndere opu'ã va'e oitypaa 'rã nerentonde.

<sup>16</sup> Mba'eta xee ma ferro re ombo'eapo va'e moingoare, tata py hatapyi re oipeju vy tembiporurã ojapo va'ety. Amoingo avi nhomombaara mba'emo ombovaipa aguã.

<sup>17</sup> Ha'e rã nderovai ma tembiporu revegua ou vy ndojapoi 'rã mba'eve. Ndere ijayvu rei va'e ou teñ ndee 'rã ndepo'aka. Ha'e ramigua ma xee SENHOR ambou xerembiguai kuery peguarã amboeko porã vy", he'i SENHOR.

## 55

### Nhomboaxypa aguã re ijayvuague

\* <sup>54:1</sup> Apy ma Israel kuery ha'e Jerusalém tetã opyta rei va'ekue pe ijayvu, peteñ kunha opoi pyre pe rami (Gálatas 4.27). † <sup>54:11</sup> Safira ma itaendy hovy va'e, rubi ma pytã va'e, ha'e rã carbúnculo ma pytã va'e tuvixave va'e. Ita hepyve va'e meme. \* <sup>54:13</sup> João 6.45

<sup>1</sup> “Peẽ kuery pendey'uvei va'e, pendu ke, ha'e peju yvu oĩa py pey'u. Pendeperáta e'ŷ va'eri peju pejogua ha'e pekaru. Tá, peju ke pejogua vinho ha'e kamby, peráta re'ŷ, hepy re'ŷ.

<sup>2</sup> Mba'e re tu peráta peme'ẽ 'rã tembi'u re'ŷ? Mba'e re tu pendery'ai 'rã penembovy'aarã re'ŷ? Pendu ke, pe'u iporã va'e. Ha'e rami vy pevy'a 'rã iporã ete va'e re.

<sup>3</sup> Pejapyxaka porã ke, ha'e peju xea py. Pendu, peikove riae aguã. Mba'eta pendevy ajapo 'rã xereve guarã raka'e rã peve guarã, ha'e romboaxy 'rã Davi pe xeayvuague rami vy.\*

<sup>4</sup> Mba'eta ha'e va'e ma amoĩ raka'e xepo'akaa kuaa ukaarã yvy regua kuery pe, huvixa yvateve va'e ha'e kuery re opena va'erã.

<sup>5</sup> Ma'ẽ, peẽ kuery penoĩ 'rã pexa va'ety e'ŷ regua kuery. Ha'e kuery penderexa va'ety e'ŷ tei onha 'rã jogueruvy pendea katy. Ha'e kuery ma SENHOR Penderuete, Israel kuery ruete Iky'a e'ŷ va'e re ojerovia etea rupi ou okuapy, penemboete uka ramo.”

<sup>6</sup> Peka ke SENHOR ojejou uka teria ja, pejapukai ixupe ha'e'i py teri oĩa ja.

<sup>7</sup> Tove heko vai va'e tojepo'a oikoaty gui, ojeavy rei va'e tojepo'a ha'e've'ŷa rami onhembopy'aa gui. Tojeko rerova SENHOR pe, mba'eta omboaxy 'rã. Tojevy Nhanderuetea py, opa mba'e py joperdoa va'e ramo.

<sup>8</sup> “Mba'eta xee anhembopy'aa ma peẽ kuery penhembopy'aa ramigua e'ŷ, ha'e xerekovo pei peẽ kuery reko ramigua e'ŷ”, he'i SENHOR.

<sup>9</sup> “Mba'eta yvy gui yva yvate etevea rami avi penderekoi xerekovo pei yvateve, ha'e peẽ kuery penhembopy'aa gui anhembopy'aa yvateve avi.

<sup>10</sup> Mba'eta oky ha'e yro'y yva gui ho'a vy ha'ekue katy ju ndooi 'rã yvy omoakŷ e'ŷ re, ha'e rami vy ojapo 'rã mba'emo ra'yĩ moaĩare ojouve ju aguã rami, ha'e mbojape ho'uxe va'e voi ojou aguã rami,

<sup>11</sup> ha'e rami ae avi xeayvu xejuru gui oẽ va'e voi ndojevy rivei 'rã xea py. Ha'e rami 'rãgue py ojapo 'rã xee aipota va'e, anhembopy'aague ojapopa 'rã, ha'e rami aguã ae ambou rire.

<sup>12</sup> “Ha'e rami rã peẽ kuery peo 'rã pevy'a reve, pendekuai porã'ia rupi roguereko 'rã heravy. Penerenonde yvyty ha'e yvy'ã ikuai va'e poraei onhendu 'rã, yvyra ikuai va'e voi ojepopete 'rã okuapy.

<sup>13</sup> Ha'e gui juu'y ikuaiague py yvyra tuvixa va'e henhoi 'rã, jai rogue rekoria henhoi 'rã murta.\* Ha'e nunga ma SENHOR re ima'endu'a porãa ha'e omboetea aguã oiko 'rã imarã e'ŷ va'e, raka'e rã peve guarã.”

## 56

### Judeu e'ŷ va'e kuery avi oenoĩ aguã re ijayvuague

<sup>1</sup> SENHOR aipoe'i: “Teko porã rupi ete ke peiko, anhetẽ rupi pendekuai, mba'eta rogueraa jepea ovaẽ rai'i ma, xeguigua teko porã ojekuaa rai'i ma.

<sup>2</sup> Ovy'a ete 'rã avakue ha'e rami ikuai va'e, avakue ra'y kuery ha'e nunga re oĩ atã va'e, sábado ára omongy'a rei e'ŷ aguã ojejoko, ha'e opo py mba'emo vai ojapo rei e'ŷ va'e.”

<sup>3</sup> Amboae yvy guigua SENHOR re onhemboja va'e aipo te'i eme: “SENHOR xepe'a 'rã ojeupagua kuery mbyte gui.” Nei eunuco voi ojeupe “Yvyra pirukue rami rive aiko”, te'i eme.\*

<sup>4</sup> Mba'eta SENHOR aipoe'i: “Eunuco tei xevygua sábado ára nhavõ xemboetea rupi oiko, xee aipota va'e ojee amoĩ ha'e xereve guarã ajapo va'ekue rupi oiko ramo

<sup>5</sup> xero py ajapo 'rã ha'e va'e re ima'endu'a porãa aguã rami, xero korapy py, ha'e ixupe ame'ẽ 'rã peteĩ tery gua'y ha'e guajy kueryrã va'ekue gui oguerovy'ave va'erã. Ha'e kuery peteĩ-tei pe ame'ẽ 'rã heryrã imarã e'ŷ va'e, ivaipa va'erã e'ŷ.

\* 55:3 Atos 13.34 \* 55:13 Murta ma yvyra tuvixa ha'e ovareve va'e. \* 56:3 Eunuco ma tembiguai oa'yijo pyre. Ymave rupi eunuco ha'e amboae yvy guigua kuery ma nda'evei va'ekue Nhanderuete pegua kuery mbyte py ikuai aguã (Deuteronomio 23.1-3). Aŷ gui ma ha'eve, apy ijayvua rami.

**6** Ha'e gui amboae yvy regua teĩ SENHOR omboete aguã onhemboja, ha'e SENHOR rery omboetea rupi hembiguairã ikuai aguã, tá, sábado ára omongy'aa rupi e'ŷ omboete, ha'e xereve guarã ajapo va'ekue rupi ikuai ramo

**7** ha'e kuery voi xee araa 'rã xevyguia yvity iky'a e'ŷ va'e py, ambovy'a 'rã xevyguia oo onhembo'eaty py. Ha'e ramo ha'e kuery ome'ẽ 'rã mba'emo ogueru va'e, ha'e xee ajou porã 'rã xevyguia altar áry mba'emo ha'e kuery ome'ẽ va'e. Mba'eta xevyguia oo pe ma 'Yvy regua kuery ha'e javi onhembo'e atyrã oĩ, 'ea 'rã.'<sup>†</sup>

**8** Israel kuery opa rupi oaĩmba va'ekue SENHOR Nhanderuete omboaty ju vy aipoe'i: "Xee amboatyve ju 'rã, ono'õ ma voi okuapy va'ekue amboetave vy", he'i.

### *Israel kuery rerekoa kuery ára reveguia e'ŷ rami ikuai re ijayvuague*

**9** Peẽ mymba jai rupi pendekuai va'e, ha'e ka'aguy rupigua inharõ va'e, peju ke pekaru. **10** Mba'eta ha'e kuery retã rarða kuery ma ára reveguia e'ŷ rami meme ikuai, mba'eve ndoikuuai. Jagua onhe'ẽ e'ŷ va'e ikuai va'e meme, onhe'ẽ aguã nda'evei va'e. Ha'e kuery ma oexa ra'ua re rive 'rã ikuai, inhate'ŷ vy okexe vai va'e.

**11** Ha'e kuery regua ma jagua rami ho'upa rei va'e guive, okaru teĩ naevyatãi 'rã. Joe opena va'e mba'eve oikuua va'e'ŷ ikuai. Peteĩ-teĩ oiko 'rã ha'e ae oipotaa rami, peteĩ-teĩ ojoupavexea rupi rive 'rã oiko, ha'e rami ikuai va'e ma guive rã.

**12** Ha'e kuery joupe-upa aipoe'i 'rã: "Peju ke, aru 'rã vinho irove va'e jaka'u aguã. Ha'e gui ko'ẽ rã ange guare rami ae ju 'rã nhandekuai, ha'e rami e'ŷ vy jaka'upave 'rã", he'i okuapy.

## 57

### *Mba'emo ra'angaa mboetea rupi Israel kuery ikuai re ijayvuague*

**1** "Heko porã va'e kuery omano teĩ avave rei ndoikoi ha'e nunga re oikuua pota va'e. Avakue ojeroviapy heraa ramo avave rei noexalâi 'rã ha'e nunga re, mba'eta heko porã va'e kuery ranhe 'rã heraa nhomoingo axyarã ou e'ŷ re,

**2** ha'e ramo oike 'rã mby'a porã oendu aguã py. Mba'eta teko porã rupi ikuai va'ekue opytu'u 'rã ngupa rupi.

**3** "Ha'e gui peẽ kunha imba'evyky va'e pi'a kuery, peju ke apy, itavy rei rã ojavyky reipy pi'a kuery.

**4** Mba'exagua tu pembojaru rei pekuapy? Mba'exagua rovai tu peipe'a pendejuru, ha'e pendeayvu rei? Peẽ kuery tu teko vai ha'e apu guigua meme.

**5** Peẽ kuery ma tavy reia rupi anho pendekuai yvyra hogue ana va'e mbyte rupi. Ha'e py ma pendera'y kuery ae pejuka uka 'rã yvyugua oĩ va'e py, ha'e itaova pa'ũ rupi.

**6** Ha'e rami vy ita yxyi rei va'e mbyte rupi penderek rami ae 'rã pendekuai. Ha'e va'e áry ae avi penhoë 'rã heakuã porã va'e, ha'e ta'angaa pe rive peme'ẽ 'rã mba'emo aju. Xee nda'u arovya'a 'rã ri ha'e rami pendekuia?

**7** Ha'e gui yvity yvateve va'e áry remoĩ 'rã nderupa. Ha'e katy ju reẽ 'rã ta'angaa pe mba'emo reme'ẽ aguã.

**8** Nerokẽ kupe ha'e okenda rupi rembopara 'rã nda'evei ete va'e py. Ha'e gui remoatã 'rã nheovãa, ha'e rejeupi 'rã tupu py, rembopy 'rã ndetavy aguã. Ha'e kuery reve pejogueroayvu 'rã reipota va'e re. Ha'e vy 'Nhantetavy ha'vy' 're vy rema'ẽ 'rã ipire reia re.

**9** Ha'e gui huvixavea py reo 'rã mba'emo kyra ha'e heakuã porã va'e reme'ẽ va'erã reve. Ha'e gui mombyry katy 'rã remondouka ndeayvu reraarã, yvyra rupa peve.

**10** Mombyry ete reguata vy nekane'õ teĩ 'Ovare va'e'ŷ ma ta'vy ajapo', nderei 'rã. Mba'eta rejou 'rãe reka va'e. Ha'e nunga rupi ae nanekangyi 'rã.

<sup>†</sup> 56:7 Kova'e ayvu rupi Jesus ijayvu Mateus 21.13, Marcos 11.17 ha'e Lucas 19.46 py.

**11** “Ha'e gui mava'e gui nda'u rekyje, apu rupi reiko aguã? Mba'eta nanema'endu'ai xere, xerekoo re ndereikuua potai guive. Yma guive akyrirĩ teve xerenonde nderejerokyjei aguã?

**12** Xee aikuaa ukapa 'rã ha'e rami ete reikoa. Ha'e ramo nerembiapokue ma mba'everã ndovarei 'rã ndevy.

**13** Rejapukai ramo tove mba'emo ra'angaa rereko va'e ae tandereraa jepe! Ha'e nunga ma yvytu rive 'rã ombovevepa heravy, peteĩgue'i oipeju teĩ ogueraapa vyvoi 'rã. Ha'e rã xere ojerovia va'e kuery pe ma yvy ame'ẽ 'rã imba'erã, ha'e ramo hekoa 'rã xevyguia yvyty iky'a e'ŷ va'e áry.”

### *Ojeko rerova va'e kuery ikuai porã aguã re ijayvuague*

**14** Aipo'ea 'rã: “Pembojoja ke taperã, pembojoja ha'e perekoo katu, xevyguia kuery renonde gui peipe'apa onhepyxanga aguã oĩ va'ekue.”

**15** Mba'eta po rami ijayvu Yvate ete va'e, Ipo'akapa va'e, Hi'amba marã e'ŷ va'e, Iky'a e'ŷ va'e hery va'e. Ha'e vy aipoe'i: “Xee ma yvate ete iky'a e'ŷa py aiko va'e. Aiko avi iporiau rei ha'e ikangy va'e reve, ambopy'a guaxu aguã ikangy va'e, ha'e ambovy'a ju aguã iporiau rei va'e.

**16** Mba'eta riae e'ŷ 'rã xee ajojou vai, ndaxepoxy riae'i 'rã guive. Mba'eta ha'e rami aiko va'e rire ha'e kuery nhe'ẽ ikangypa vy ho'apa 'rãgue xerenonde, ha'e xee amoingo va'ekue pytuẽa opa 'rãgue.

**17** Heta va'e kuery mba'emo oipotapa reia rupi ikuai ramo ma xepoxy vy amoingo axy va'ekue. Ha'e rami vy xerova amo'ã, xepoxy teĩ xenhe'ẽ rendu e'ŷ va'e ma ha'e kuery ae oipotaa rami rive ikuai.

**18** Ha'e kuery ikuiaia aexa teĩ amonguera 'rã. Ha'e vy areko ha'e ambovy'a ju 'rã ojae'o okuapy va'e.

**19** Ha'e kuery xereroporai ramo ame'ẽ 'rã mby'a porã. Mby'a porã ame'ẽ 'rã mombyry ikuai va'e pe, ha'e'i py ikuai va'e pe guive. Ha'e rami vy xee amonguerapa 'rã”, he'i SENHOR.

**20** “Ha'e rã heko vai va'e ma ye'ẽ omyĩ va'e rami ikuai. Mba'eta ha'e nunga ndopytu'ui 'rã, yy ojegui ae omombo 'rã yapo ha'e iky'akue.

**21** Ha'e rami vy heko vai va'e re ma noĩ 'rãe mby'a porã”, he'i Nhanderuete.

## 58

### *Ha'evea rami okaru e'ŷ re ikuai aguã re ijayvuague*

**1** “Ejapukai atã, ejejoko eme, ejapukai mimby guaxu rami. Xevyguia kuery pe eikuua uka heko vaia, Jacó kuery pe emombe'u ojejavya.

**2** Ha'e rami ete ikuai teĩ xereka merami 'rã ko'ẽ nhavõ. Ovy'a merami xevyguia tape oikuua vy teko porã rupi ikuai va'e rami teĩ, ha'e nguute reko gui ndojepe'ai va'e rami. Ha'e rami vy xevy oporandu 'rã teko porã re, onhemboja merami xee Nguute va'e re.

**3** Ha'e rami vy aipoe'i 'rã: ‘Mba'e re tu rokaru e'ŷ re orekuai teĩ ndee ndereikuua potai? Mba'e re tu orenhe'ẽ py rojexavai ramo ndee nderexa potai ri?’ he'i okuapy. Mba'eta peẽ kuery pekaru e'ŷ re pendekuaia ára peẽ ae peipota va'e re rive 'rã pepena, ha'e pejapopa 'rã penerembiaporã oĩ va'e.

**4** Ha'e rami vy pejoguero'aa rupi rive 'rã pendekuaia pekaru e'ŷ re, penhomotare'ŷ, ha'e pendepo iky'a va'e py pejojuka aguã. Aŷ ha'e rami ete pekaru e'ŷ re pendekuaia ramo pendeayvua noenduai 'rã yva re.

**5** Ha'e rami ete ri nda'u pekaru e'ŷ re pendekuaia aguã xee aeja raka'e? Mba'eta peteĩ'i ára re avakue ojexavai 'rã onhe'ẽ py, oakã oity 'rã jai rogue rami, ha'e oguýry rupi oipyo 'rã ajukue voxá guigua tanhimbu reve. Ha'e ramia pe ri nda'u 'Jakaru e'ŷ re nhandekuaia ára SENHOR nhandejou porã 'rã', peje?

<sup>6</sup> “Ha'e rami 'rāgue py po rami aguā e'ŷ teve pekaru e'ŷ re pendekuai aguā aeja raka'e? Teko vai py ojokua pyre pepoi aguā e'ŷ teve, ha'e tembiguai jokuaa pejora aguā, ombojexavaipy peraa jepe, ha'e peteī-teī oguereko axya pemomba aguā e'ŷ teve?

<sup>7</sup> Okaruxe va'e pe mbojape pemboja'o aguā e'ŷ teve, ha'e pendero py iporiaukue hoo e'ŷ va'e pemovaē aguā, ipire rei va'e pexa vy pemonhemonde, ha'e peē ramigua gui napenhemi aguā e'ŷ teve?

<sup>8</sup> Ha'e rami ri pekaru e'ŷ re pendekuai ramo penerekakāa ojekuaa porā 'rā ko'ē rami, ha'e are e'ŷ re pekuera aguā avi 'rā ojekuaa. Pendereko porāa ojekuaa 'rā penerenonde, ha'e penderakykue ma SENHOR guexakāa rupi onhangareko 'rā pendere.

<sup>9</sup> Ha'e ramo pejapukai ramo SENHOR ombovai 'rā. Pendereraa jepe aguā re pejapukai ramo 'Apy ma aĩ', he'i 'rā. Xapy'a rei penembyte gui peipe'a ramo pejoguerereko axya, penhomongyje reia ha'e ayvu rei guive,

<sup>10</sup> xapy'a rei okaruxe va'e pe mba'emo pemboja'o aguā pendepy'a re pemoĩ, ha'e ojexavai rei va'e pemoevyatāmba aguā, ha'e ramo ma penerekakāa ojekuaa 'rā pytūa py, pendea py pytūa oĩ va'ekue ma kuaray mbyte rami 'rā hexakā.

<sup>11</sup> Ha'e ramo SENHOR penderereko riae 'rā, penemoevyatā 'rā tekao e'ŷa py teī, ha'e omombaraetepa 'rā penekāgue. Peiko porā 'rā yvotyty omoakŷ riaepy rami, ha'e yvu peteīgieve ma ipiru e'ŷ va'e rami avi.

<sup>12</sup> Ha'e gui penda'y kuery ju omoatyrō 'rā tekao ivaipa va'ekue. Pemboyta pyau ju 'rā oo ymague. Pendevy aipo'ea 'rā 'Kora pa'ũ moatyrōa', ha'e 'Tekoa ha'e tape ymague mbopyaua', 'ea 'rā.

<sup>13</sup> Xapy'a rei sábado ára penhemongy'aa gui pejejoko, ha'e mba'emo peē ae pejapoxe va'e pejapoa gui xevygua ára iky'a e'ŷ va'e py, ha'e rami 'rāgue py sábado ára pe 'Iporā ete SENHOR ára iky'a e'ŷ va'e nhamboete aguā' peje ramo, ha'e pendekuaiaty rami ve'ŷ xemboete ramo, peē ae peipotaa rami ve'ŷ pendekuai aguā, neī ayvu reko rei py voi pendeayvu e'ŷ aguā,

<sup>14</sup> ha'e rami rā xee SENHOR re ae 'rā pevy'a. Ha'e ramo xee ajapo 'rā yvypyty yvate va'e re peē peovy aguā rami, ha'e romombaraete 'rā peneramoĩ Jacó peguarā ame'ẽ va'ekue re", he'i. SENHOR ojuru py ae ijayvu.

## 59

### *Israel kuery reko vaia re ijayvuague*

<sup>1</sup> SENHOR po ma ijapu'a'i va'e'ŷ pendereraa jepe e'ŷ aguā, nda'ijapyxa ve'ŷi guive pendeayvua oendu e'ŷ aguā.

<sup>2</sup> Ha'e rami 'rāgue py pejejavya rima penemboja'o Nhanderuete gui, pendereko vaia ae ojapo pendegui ngova omo'ã aguā rami, pendeayvua oendu e'ŷ aguā.

<sup>3</sup> Mba'eta pendepo huguypa riae, ha'e penekuā re ma pejejavya anho oĩ. Pendejuru ma apu rupi 'rā ijayvu, ha'e peneapekū re ma teko vai anho 'rā oĩ.

<sup>4</sup> Mba'eta avave rei ndoikoi teko porā re ojapukai va'erā, ndoikoi anhetēa rupi ojexa uka va'erā huvixa kuery renonde. Ha'e rami 'rāgue py ovare e'ŷ va'e re rive ojerovia, ijapu rei 'rā okuapy. Ojejavy aguā tema oguereko'i 'rā, ha'e teko vai ju oikuavā.

<sup>5</sup> Omboaku 'rā mboi rupi'a, ojapo 'rā nhandu kya. Hupi'a ho'u va'e omano 'rā, ha'e hupi'a re opyrōa ramo oiko 'rā mboi.

<sup>6</sup> Ha'e gui ikya ojapo va'ekue ma ndovarei 'rā aorā, mba'eta ha'e kuery rembiapo py avave rei nonheovāai 'rā. Ha'e rami 'rāgue py ha'e kuery rembiapo ma teko vai anho, ha'e ipo re ma jojukaague oĩ.

<sup>7</sup> Ipy ma onha 'rā ojejavy aguā katy, ojapura 'rā heko porā'i va'e ruguy omoẽ aguā. Ha'e kuery ma teko vairā re rive 'rā ipy'a. Ha'e kuery ikuia rupi ma nhomombaague ha'e jojukaague anho oĩ.

<sup>8</sup> Ndoikuaavei ma tape peteī rami ikuai aguā katy oo va'e, teko porā noī avi 'rā ikuiaia re. Ha'e kuery ma teko vai rupi rive ikuai. Ha'e va'e rupi ikuai va'e ma ndoikuaai 'rā mby'a porā.\*

<sup>9</sup> Ha'e nunga rupi rima nhandegui mombyry oī anhetē rupi jajoguerekao, teko porā voi nanhanderovy. Nharō tema hexakāa, ha'e rami teī pytū anho oī. Hexakāa rupi 'rāgue py pytūa rupi nhandekuai.

<sup>10</sup> Oo mbotya rupi japovyya rupi jaiko, ára revegua e'ŷ rami avi, hexa e'ŷ va'e rami japovyya jaikovy. Kuaray mbyte teī nhanhepyxanga 'rā javy pytū rupi rami. Imbaraetekue mbyte rupi teī omanogue rami jaiko.

<sup>11</sup> Nhande kuery ha'e javi nhakororō 'rā urso rami, ha'e apykaxu rami 'rā nhanepoaē rei. Anhetē rupi joguerekorā nharō teī ndajajoui. Jaa jepe aguā jaeka teī mombyry oī nhandegui.

<sup>12</sup> Mba'eta nerendonde ma rojejavyague heta-etave ovyy, orereko vaitaty ma orekuua ukaarā oī, mba'eta orere oī 'rā orereko vaitaty anho, roikuua guive rojeyavya.

<sup>13</sup> Mba'eta SENHOR rovai jajekore ha'e nhandeapu 'rā. Jajep'e a Nhanderuete gui, nhandeayvu 'rā nhanhombojexavai ha'e nhanhe'ē raxave aguā re anho. Nhandepy'a re nhamoīa rami apu rupi anho 'rā nhandeayvu.

<sup>14</sup> Ha'e nunga rupi ae anhetē rupi jajoguerekao aguā ojepe'a, teko porā ma mombyry oī. Mba'eta anhetē va'e ma onhepyxangapa oikovy nhaneretā mbyte rupi, ha'e teko porā ma nda'evei ovaē aguā.

<sup>15</sup> Tá, anhetē va'e ma okanhy. Ha'e gui teko vai rupi oikoa gui ojepe'a va'ekue ma ojuka pyrā ikuai. Ha'e ramo SENHOR ma ha'e rami nhandekuaia oexa vy ndojou porāi, teko porā noī rā.

<sup>16</sup> Joepyarā SENHOR oeka teī ndojoui, onhemondyi guive nhandere ojerure va'erā ndoikoi rā. Ha'e ramo ha'e ae onhemoī ojyva py nhandereraa jepe aguā, gueko porāa rupi ae imbaraete.

<sup>17</sup> Ha'e rami vy pexo regua py rami onhemonde teko porā py, ha'e oakā re ma ngora ratā rami omoī jogueraa jepea. Ha'e vy ao rami omoī joepya rupi oiko aguā, ha'e ajukue puku py rami onhemonde ikyre'ŷa py.

<sup>18</sup> Ha'e rami vy nhombopaga 'rā peteī-teī ikuaiague rami. Opoxya oexa uka 'rā hexe ija'e e'ŷ va'e kuery pe, ngovaigua kuery ombopaga 'rā ha'evea rami. Ye'ē yvýry rupi ikuai va'e voi ombopaga avi 'rā.

<sup>19</sup> Ha'e rami vy kuaray oikea katyguia kuery SENHOR rery oendu vy ojererokyjea rupi 'rā ikuai, ha'e kuaray oua katyguia kuery ma oexa 'rā hexakāa. Mba'eta yy oxyry atā xapy'a va'e rami 'rā ou, SENHOR guigua Nhe'ē ombou va'e.

<sup>20</sup> SENHOR aipoe'i: "Ha'e gui ma Sião py ou 'rā joepyarā, Jacó regua kuery ojeko rerova va'ekue ikuiaia py 'rā ou.

<sup>21</sup> Ha'e gui xee ma po rami 'rā ajapo xereve guarā ha'e kuery pe. Mba'eta xeguigua Nhe'ē pendere oī va'e, ha'e xeayvu pendejuru py amoī va'ekue ma ndojep'e ai 'rā. Neī pendera'y kuery gui, neī pendera'y ra'y kuery gui voi ndojep'e ai 'rā, aŷ guive raka'e rā peve", he'i SENHOR.\*

## 60

### *Jerusalém pyau hexakāmba va'e re ijayvuague*

<sup>1</sup> "Epu'ã ke, enhemoexakā uka, mba'eta nemoexakāarā ou ma oiny, SENHOR rexakāa ojekuaa ma nde'áry.\*

---

\* **59:8** Romanos 3.15-17 \* **59:21** Romanos 11.26-27 \* **60:1** Apy ma Jerusalém tetā pe ijayvu peteī kunha pe rami, capítulo 54 py oña rami avi.

<sup>2</sup> Mba'eta ma'ẽ, yvy re pytũ anho oĩ, yvy regua kuery áry oĩ pytũ reia. Ha'e rã nde'áry rupi ma SENHOR omoexakãmba ma, nde'áry hexakãa ojekuaa.

<sup>3</sup> Ha'e ramo nemoexakãa katy yvy regua kuery oupa 'rã, huvixave kuery voi ou 'rã hexakã va'e ndea py ojekuaa va'e katy.

<sup>4</sup> Ema'ẽ ke ndeyvýry rupi rexa aguã. Mba'eta kova'e kuery ono'õmba va'e ha'e javi ma ou ndea py. Ndepi'a kuery ou ju 'rã mombyry gui, nememby kuery voi oguerua 'rã ojyva áry.

<sup>5</sup> "Ha'e nunga rexa vy revy'a ete 'rã. Revy'aa rupi ndepy'a tytypa ha'e ndepy'a guaxu 'rã, mba'eta ye'ẽ rupi mba'emo porã ikuai va'ekue oguerupaa 'rã ndevy, ha'e yvy regua kuery mba'emo oguerekopa va'ekue oguerupa 'rã ndea py.

<sup>6</sup> Mymba camelô heta ou vy omonyẽ 'rã nderekoa rupi, camelô iporãve va'e Midiã ha'e Efa guigua. Sabá pygua kuery voi oupa vy ogueru 'rã ouro ha'e heakuã porã va'e. Ha'e rami vy oguerovy'a 'rã okuapy SENHOR.

<sup>7</sup> Ndea py oguerua avi 'rã vexa'i kuery Quedar yvy gui. Nerymbarã oguerua 'rã vexa'i ava Nebaiote gui. Ha'e rami vy xemboetea rupi oguerupaa 'rã xevygua altar peve. Ha'e nunga py amboete ukave 'rã xevygua oo xerexakãa oĩa.

<sup>8</sup> "Mba'exagua nda'u ou arai yvate rupigua rami, e'ẽ vy apykaxu guaity katy oveve va'e rami?<sup>†</sup>

<sup>9</sup> Mba'eta anhetẽ ye'ẽ yvýry ikuai va'e kuery xerarõ avi okuapy. Jypy'i ma Társis guigua kanoã ranhe ou ndepi'a kuery ha'e nememby kuery mombyry gui ogueru va'e. Ha'e kuery reve ndea py ogueru avi 'rã ouro ha'e prata oguerekó va'ekue, SENHOR Nhanderuete, Israel kuery ruete Iky'a e'ẽ va'e rery omboetea rupi, nemoexakãmba rire.

<sup>10</sup> "Ha'e gui amboae regua kuery omoatyrõ 'rã tetã kora ndevy, huvixave voi onhemingo 'rã nerembiguairã. Mba'eta xepoxya rupi rombopaga va'ekue tei roayvua rupi ju romboaxy.

<sup>11</sup> Neretã kora rokẽ ikuai va'e ojepe'a riae 'rã. Ara py ha'e pyávy tei nonhembotyi 'rã, ndea py yvy regua kuery mba'emo porã ogueru aguã. Ha'e nunga reve ndevy ogueru avi 'rã nguvixave kuery.

<sup>12</sup> Ha'e rã amongue yvy regua, e'ẽ vy tetã pygua ndevy ndoikoi va'e ma omombaa 'rã. Ha'e va'e tetã ombovaipaai katuñi 'rã.

<sup>13</sup> "Líbano yvy gui yvyra porãgueve oguerua 'rã ndea py: cipreste, olmeiro ha'e buxo oguerua 'rã xevygua henda iky'a e'ẽ va'e ombojegua aguã. Ha'e rami py ajapo 'rã xepy renda iporã ete aguã rami.

<sup>14</sup> Ndea py jogueru avi 'rã nembojexavaiare ra'y kuery. Ndepy yvýry ndere nda'iija'eí va'ekue ojero'a reve 'rã onhemboja okuapy, ha'e guenapy'ã re oĩ 'rã ngova yvy re omovaẽ reve. Ha'e rami vy ndevy pe 'Sião tetã SENHOR pegua, Israel kuery ruete Iky'a e'ẽ va'e oĩa', he'i 'rã okuapy.

<sup>15</sup> "Hexarai reipy ha'e oeja reipy reiko va'ekue, ha'e ndea rupi avave rei ndoaxaai va'ekue. Ha'e rã xee ma ndere amoĩ 'rã hexakãa imarã e'ẽ va'e, neremiarirõ jevy-jevy ikuai va'erã va'e ndererovy'a okuapy aguã rami.

<sup>16</sup> Rey'u 'rã yvy regua kamby, huvixa kunhague ae 'rã nemokambu. Ha'e ramo reikuaa 'rã xee SENHOR ae ndereraa jepea aikoa, nderepya ha'e Jacó kuery ruete ipo'akapa va'e.

<sup>17</sup> Ha'e gui ndea py overa va'e oĩague py aru ruka 'rã ouro, ferro rekovia ma prata 'rã aru ruka, yvyra rekovia ma overa va'e, ha'e ita rekovia ma ferro 'rã aru ruka. Ha'e gui ndere oikuua pota va'ekue rekovia ma amoĩ 'rã mby'a porã, nembopagaare kuery rekovia ma teko porã 'rã oĩ.

<sup>18</sup> Ha'e gui ndeyvýy rupi noenduavei 'rã jojukaa, nhomombaa, neĩ ombovaipa pyre. Ha'e rami 'rãgue py neretã kora pe 'Jogueraa jepea' ea 'rã, ha'e rã tetã rokẽ pe ma 'Mboraei rokẽ' ea 'rã.

<sup>†</sup> **60:8** Apy ma ijayvu kanoã ajukue tuvixa xii rei va'e ojekuaa ouvy va'e re.

19 Ha'e gui ara py kuaray naexakāvei 'rā nde'áry, jaxy voi nanderexapevei 'rā. Mba'eta SENHOR ae 'rā oī nemoexakāarā opa e'ŷ va'e, Nderuete oī 'rā nerexakārā.  
 20 Ha'e rami vy nde'áry rupi kuaray ndoikevei 'rā, ha'e jaxy ndopave ovyi 'rā. Mba'eta SENHOR ae 'rā oī nemoexakāarā opa e'ŷ va'e, ha'e rā ndeporiau reia ára ma opa 'rā.  
 21 Ndea pygua kuery ma heko porā va'erā meme, ha'e hekoa 'rā yvy re. Ha'e kuery ikuai 'rā yvyra renhoī xee anhotŷ va'ekue rami xepo py ae amoingo rire, xemboete pavē aguā.  
 22 Ha'e kuery va'e regua mbovyve'i va'ekue hetave 'rā mil ikuai peve, ha'e ikangyve va'ekue oiko 'rā imbaraeteve va'e. Ha'e rami aguā xee SENHOR ajapopa vyvoi 'rā hi'ára py porā."

## 61

### *Jogueraa jepea regua ayvu porā rupi ijayvuague*

<sup>1</sup>"Xere oī SENHOR Nhanderuete Nhe'ẽ, mba'eta SENHOR xemoī ojexavai rei va'e pe ayvu porā amombe'u aguā. Xembou ikuraxō raxy vaikue rei va'e amonguera aguā, nhuā py omboty pyre pe amombe'u aguā oo jepe ju aguā, ha'e oipokua pyre ajorapa ju aguā,"  
<sup>2</sup> SENHOR nhomboaxy aguā va'e ma'etŷ ovaẽ 'rāa amombe'u avi aguā, Nhanderuete nhombopaga aguā ára ovaẽ 'rāa guive amombe'u aguā, ha'e gui ojae'o va'e kuery ambovy'apa ju aguā,  
<sup>3</sup> ha'e Sião tetā py iporiaupa rei va'e kuery re tanhimbu 'rāgue py amoī aguā coroa iporāve va'e, texay 'rāgue py azeite imbovy'aarā, mby'a vai 'rāgue py xererovy'aa py amonhemonde aguā, ha'e kuery pe 'Yvyra imbaraetekueve va'e teko porā kuaa ukaa, SENHOR onhotŷ va'ekue omboete pavē aguā', 'ea aguā rami.

<sup>4</sup> "Ha'e kuery omoatyrõmba ju 'rā tetā ymague ombovaipa pyre, ojapo ju 'rā ymave rupi oity pyre, ha'e omoatyrõmba 'rā tetā ivaipa va'ekue-'ekue, yma guive ombovaipa pyre.

<sup>5</sup> Pexa va'ety e'ŷ pendevy ojexa uka jogueruvy vy opena 'rā penerymba kuery re. Amboae yvy regua kuery ombo'eapo 'rā pendevy mba'ety ha'e uvaty rupi.

<sup>6</sup> Ha'e vy pendevy 'SENHOR pegua sacerdote kuery' ha'e 'Nhanderuete rembiguai' 'ea 'rā. Pe'u 'rā yvy regua kuery rembi'u iporāve va'e gui, ha'e penhembojegua 'rā mba'emo porāgueve oguerekva'ekue py.

<sup>7</sup> Peximba 'rāgue py penemboeteave 'rā, ha'e penembojarua rei 'rāgue py pevy'a 'rā pendevy guarā oī va'e re. Ha'e nunga rupi pendeyvy re pendekuaia py hetave ete 'rā perekva'ekue py.

<sup>8</sup> Mba'eta xee SENHOR ayvu anhetē rupi joguerekva'ekue py, ha'e rā imondaa rupi heko vai va'e ma ajou vai. Ha'e rami vy xevyguia kuery pe ame'ẽ 'rā ixupe guarā, ha'e kuery pe ajapo avi 'rā xereve guarā imarā e'ŷ va'e.

<sup>9</sup> Hamymino kuery voi omboete pavē 'rā yvy regua kuerya rupi, mba'eta hexaa kuery ha'e javi oikuua 'rā SENHOR ra'y kuery amoingo porā va'ea."

<sup>10</sup> Xee arovya'vaipa SENHOR, xenhe'ẽ py avy'a ete Nhanderuete re, mba'eta xemonhemonde ao jogueraa jepea regua py, ao puku py rami xemonheovā teko porā py, ava omenda va'erā onhemoatyrõ porā va'e rami, ha'e omerā oarõ va'e iporā va'e py anho onhembojegua va'e rami.

<sup>11</sup> Mba'eta yvy re mba'emo roky, ha'e yvotyty rupi onhotŷ mbyre henhoīa rami ae avi SENHOR Nhanderuete amoingo 'rā teko porā ha'e mboraei, yvy regua kuery ha'e javi oexaa py.

## 62

### *Jerusalém tetā re SENHOR omenda va'erāa rami ijayvuague*

\* **61:1** Apy ma "Xee" he'ia py SENHOR rembiguai jaikuua. Ha'e gui kova'e ayvu rupi Jesus ijayvu ojee ae, Lucas 4.16-21 py.

- <sup>1</sup> Sião tetã re xea'e vy nakyrirĩ 'rã hexe ajerurea gui, Jerusalém re xea'e vy ndapytu'ui 'rã heko porãa overa va'e rami ojekuaa e'ŷa ja, ha'e oo jepea tataendy rami ojekuaa peve.
- <sup>2</sup> Mba'eta yvy regua kuery oikuaa pavẽ 'rã nderekõ porãa, huvixave kuery voi oexa 'rã nerexakãa. Ha'e vy nemboerya 'rã tery pyau SENHOR ae oikuaa uka va'erã py.\*
- <sup>3</sup> SENHOR po py reiko vy coroa hexakãmba va'e rami 'rã reiko, Nderuete po py vy akã pyxã huvixave pegua rami 'rã rei.
- <sup>4</sup> Ndevy aipo nda'eavei 'rã "Oejapa reipy", neĩ ndeyvy pe voi "Ombovaipa pyre" nda'eavei 'rã. Ha'e rami 'rãgue py ndevy aipo'ea 'rã "Oguerovy'apy", ha'e ndeyvy pe ma "Omenda va'e" 'ea 'rã, mba'eta SENHOR ový'a 'rã ndere, ha'e ndeyvy re omenda va'e rami 'rã oiko.
- <sup>5</sup> Mba'eta kunhataĩ re ava omendaa rami avi ndepi'a kuery hekoa 'rã ndere. Gua'yxyrã ava oguerovy'aa rami avi Nderuete ndererovy'a 'rã.
- <sup>6</sup> Jerusalém tetã, ndevygua kora áry xee amoĩ 'rã harõarã. Ha'e kuery ma nokyrirĩ 'rã ára pukukue neĩ pytû mbukukue re. Peẽ SENHOR pemoma'endu'a va'e voi pepytu'u eme ixupe pejapukaia gui,
- <sup>7</sup> pemombytu'u uka eme guive Jerusalém tetã ombopyau e'ŷa ja, yvy regua kuery ogueroporaei aguã rami.
- <sup>8</sup> Po rami SENHOR oura opo oiporu kuaa regua ha'e ojyva ipo'akapa va'e rupi ae. Ha'e vy aipoe'i: "Aŷ gui ma mba'emo ra'yĩ remono'õ va'ekue namboaxavei 'rã nderovaigua kuery pe ho'u aguã, neĩ amboae yvy regua pe voi nday'u ukavei ma 'rã vinho remba'eapo vy rejapo va'ekue.
- <sup>9</sup> Ha'e rami 'rãgue py mba'emo ra'yĩ mono'õare kuery ae 'rã ho'u, SENHOR ogueroporaei reve. Ha'e uva po'oare kuery ae 'rã oy'u tykue, xevygua oo iky'a e'ŷ va'e roka py", he'i.
- <sup>10</sup> Tapeo, peẽ ke tetã rokẽ oĩ va'e rupi, ha'e perekó katu tape heta va'e kuery ou aguã. Pembojojapa ke tape, pemboa'eve ita gui. Ha'e gui pemopu'ã bandeira yvy regua kuery oexa pavẽ aguã.
- <sup>11</sup> Mba'eta yvy apy peve SENHOR omonhendu 'rã pova'e ayvu. Aipopeje ke Sião memby kuery pe: "Upe ma ou pendereraa jepearã. Pendevy guarã ogueru, henonde oguerua peikoague rekovia", peje.
- <sup>12</sup> Ha'e ramo pendevy "Iky'a e'ŷ va'e regua SENHOR ogueraa jepe va'ekue" 'ea 'rã. Ha'e gui Sião, ndevy pe ma "Oipotapy" ha'e "Tetã tekoague rei e'ŷ", 'ea 'rã.

## 63

### Nhanderuete ojeupergua kuery oepy aguã re ijayvuague

- <sup>1</sup> Mava'e nda'u peva'e Edom yvy gui guexakãa rupi ou va'e? Mava'e nda'u Bozra tetã gui ou ao omoptãmba pyre py onhemonde reve, ombaraetea rupi oguata va'e?
- "Xee ma teko porã rupi xeaxvu, ha'e ajogueraa jepe aguã xepo'akapa va'e", he'i.
- <sup>2</sup> Mba'e re tu ha'vy renhemondea pytãmba rei, uva oumbiria rupi ikuai va'e rami ndeao pytãmba?
- <sup>3</sup> "Mba'eta uva aumbiria rupi xee ae'i apyrõ aikovy va'ekue, peteĩve ava yvy regua xereve ndoikoi ramo. Xepoxya rupi uva re apyrõ, xevaia rupi amou'ũmba va'ekue. Ha'e ramo tykue hayvipa vy omongy'apa anhemondea ha'e javi.
- <sup>4</sup> Mba'eta ajoepy aguã ára reguarã amoĩ xepy'a re, ajogueraa jepe aguã ma'etý ovaẽ ma ramo.
- <sup>5</sup> Ha'e rami avi aexa rã ndoikoi xepytyvõ va'erã. Xereve guarã ndoikoi ramo anhemondyi. Ha'e nunga rupi xee ae jyva py ajogueraa jepe, xepoxya ae xereveguia oiko.
- <sup>6</sup> Ha'e rami vy yvy regua kuery re apyrõ xepoxya rupi, xevaia rupi ajapo oka'u va'e rami ikuai aguã. Ha'e vy huguy amoẽ heravy yvy rupi", he'i.

### Peteĩgue ju profeta Isaías ojerureague

\* **62:2** Apy "Ndee" he'ia ma Jerusalém tetã re ijayvu vy.

<sup>7</sup> Aroporaei 'rã SENHOR porayvua ha'e hembiapokue iporã ete memea re, mba'eta nhandevy pe SENHOR opa mba'e py ojapo porã, Israel kuery ha'e javi oayvua rupi. Mba'eta ha'e kuery omboaxy ha'e opa mba'e py oayvu vy ojapo porã ete.

<sup>8</sup> Mba'eta aipoe'i: "Ha'e kuery ma anhetẽ xevygua ikuai, xera'y kuery ijapu va'erã e'ŷ", he'i vy onhemoingo raka'e ha'e kuery reraa jepearã.

<sup>9</sup> Ha'e kuery ikuai axya ha'e javi py ha'e voi oendu oiko axya, ha'e ramo ixuguigua anjo ogueraa jepe. Oayvu ha'e omboaxy rupi oepy. Ha'e rami vy ogueraa vy ára nhavõ oguereko raka'e.

<sup>10</sup> Ha'e rami teĩ ha'e kuery onhe'ẽ raxave okuapy, ha'e omomboriau Inhe'ẽ ky'a e'ŷ. Ha'e ramo hovaigua ju onhemoingo vy ha'e ae opu'ã raka'e ha'e kuery re.

<sup>11</sup> Ha'e ramo ma ha'e kuery ima'endu'a ju yma Moisés oiko jave guare re. Ha'e vy aipoe'i: "Mamo tu aŷ oĩ SENHOR ye'ẽ rupi ojeupeguia kuery renoẽare, ha'e kuery re opena va'ety reve? Mamo tu oĩ hexe Onhe'ẽ iky'a e'ŷ va'e moĩare?" he'i okuapy.

<sup>12</sup> "Mba'eta opo'akaa hexakãmba va'e ombou raka'e Moisés yvýry guarã. Ha'e kuery renonde rupi omombyta imoiny yy, raka'e rã peve hery re ima'endu'apaa aguã.

<sup>13</sup> Ha'e gui yy typyague rupi ogueroaxapa raka'e, kavaju onhepyxanga e'ŷ ovy va'e rami ha'e kuery oakapa peve tekaoa e'ŷa", he'i okuapy.

<sup>14</sup> Mba'eta mymba kuery yvy'ã guy katy ikane'õgua aguã oguejy va'e rami avi ojeupeguia kuery pe SENHOR Nhe'ẽ ome'ẽ raka'e optytu'u aguã. Ha'e rami ae rerekko raka'e ndejeupeguia kuery, nderery re ima'endu'a porã pavẽ aguã rami.

<sup>15</sup> Ha'e gui aŷ ma eikuua pota ke yva reĩa gui, ne'amba iky'a e'ŷ ha'e hexakãmba va'e py reĩa gui ema'ẽ orere. Mamo tu oĩ nekyre'ŷa, ndepo'akaa rupi mba'emo porã rejapoa py rexa uka va'ekue? Mba'eta xee aexa rã ndojekuaavei rejoayvu ha'e renhomboaxy ndeyp'a re oĩ va'e.

<sup>16</sup> Ha'e rami teĩ ndee ma Oreruete ae reiko, Abraão ndorekuaavei teĩ. Israel voi ndorerexa kuaavei teĩ ndee ma SENHOR oreru reiko. Nderery ma Orerepya yma ae.

<sup>17</sup> SENHOR, mba'e re tu rejapo ndeguigua tape rupi ve'ŷ roo aguã rami? Mba'e re tu oreapo oreakã ratã aguã rami, ndere rojerovia ve'ŷ aguã? Eju ju ke nerembiguai kuery reayvua rupi, ndevygua kuery re rema'ẽ vy.

<sup>18</sup> Mba'eta xapy'a rai'i ndevygua kuery po py oĩ raka'e ndevygua henda iky'a e'ŷ va'e. Ha'e gui ma orerovaigua kuery ou vy opyrõmba nemboeteaty re.

<sup>19</sup> Ha'e ramo ore ma ndee nerepenai ae va'ety rami orekuai, ha'e nderery rupi onhemboery uka e'ŷ va'e rami.

## 64

<sup>1</sup> Ha'e gui yva rembovo vy reguejy 'rãgue! Ha'e ramo yvyty ikuai va'e oryryipa 'rãgue nerondenon.

<sup>2</sup> Tata yvyra ra'ykue'i re hendya rami, ha'e yy ombopupu va'e rami ke ndee voi eguejy nderovaigua kuery nderery oikuaa pavẽ aguã rami, nerondenon yvy regua kuery oryryipa aguã.

<sup>3</sup> Mba'eta ymave rupi reguejy vy rejapo nda'evei ete va'e noroexa'ãi va'ekue, ha'e ramo yvyty ikuai va'e oryryipa raka'e nerondenon.

<sup>4</sup> Mba'eta yvy itui ypy'i guive noenduai, apyxa noendui, neĩ texa voi ndoexai tuuete harõa kuery pe mba'emo ojapo va'e, ndee e'ŷ vy.\*

<sup>5</sup> Ndererovy'a reve teko porã rupi ikuai, ha'e ndereko re ima'endu'a va'e kuery ikuaiia py ndee reo 'rã reovaexi vy. Ha'e rami avi rojejavvy ramo ndepoxy 'rã guive. Yma ete rojejavvy re orekuai rire teĩ roo jepe nho 'rã teve?

\* **64:4** 1 Coríntios 2.9

<sup>6</sup> Mba'eta ore kuery ha'e javi ma ha'eve'ŷ va'e orekuai, ha'e ore ae orereko porãa ma ajukue iky'apa rei va'e rami meme opyta. Ore kuery ha'e javive orere'õguepa 'rã jai rogue ixorimbaa rami, ha'e orereko vaia ma yvytu rami 'rã orereraa.

<sup>7</sup> Mava'eve rei ndoikoi nderery rupi ojapukaia rupi, neĩ reikuua pota aguã re oma'ena rupi. Mba'eta nderova remo'ã oregui, ha'e vy orereko vaia re oremomba heravy.

<sup>8</sup> Ha'e rami avi aŷ ma SENHOR, ndee ae oreru reiko. Ore kuery ma nhae'ũ rami, ha'e rã ndee ma nhae'ũ re ombo'eapo va'e rami reiko. Ore kuery ha'e javi ma ndepo py remingo va'ekue orekuai.

<sup>9</sup> SENHOR, ndepoxy ete eme, ha'e nema'endu'a riae eme rojejavyague re. Rojerure, ema'ẽ ju ke orere, mba'eta ore ha'e javive ma ndevyguia orekuai.

<sup>10</sup> Ndevyguia tetã iky'a e'ŷ va'e ikuai va'ekue ma tekoague meme opyta. Sião tetã voi tekaoa e'ŷa, Jerusalém omombaa.

<sup>11</sup> Orevy pegua templo iky'a e'ŷ ha'e hexakãmba va'e oreramoĩ kuery nemboeteague ma oapypaa tata py, ha'e mba'emo porã rougereko va'ekue ma ombovaipa pyre meme opyta.

<sup>12</sup> Ha'e ramigua ete oiko teĩ ndereikuua potai teri ty'y? Rekyrirĩ reve orembojexavaive tema 'rã teve?

## 65

### *Nhanderuete ombovai vy “Ambopaga 'rã xenhe'ẽ raxave va'ekue”, he'iague*

<sup>1</sup> SENHOR aipoe'i: “Ha'e gui xere oporandu e'ŷ va'e kuery pe ma ajeka uka, xereka e'ŷ va'ekue pe ajejou uka. Xerery rupi omboery e'ŷ pyre kuery pe ‘Apy ma aĩ, apy aĩ’, ha'e.

<sup>2</sup> Ko'ẽ nhavõ xepo py ‘Peju ke’ ha'e rami ajapo xenhe'ẽ raxave va'e kuery pe. Ha'e kuery ma tape porã rupi e'ŷ ikuai va'e, ha'e kuery ae onhembopy'aa rupi rive ikuaixe vy.\*

<sup>3</sup> Ha'e kuery ma xembopoxy riae tema okuapy oxĩa py e'ŷ, mba'eta ta'angaa pe mba'emo ojuka 'rã okuapy yvotyty rupi, ha'e heakuã porã va'e oapy 'rã altar yvy jykue gui ojapo va'ekue áry rive.\*

<sup>4</sup> Yvyra rupa rupi ha'e kuery ikuai, ha'e pyávy henda nda'evei reia rupi 'rã oo. Ho'u 'rã poryko ro'okue, ha'e oy'a py ojara 'rã mymba nda'evei va'e ro'o rykue.

<sup>5</sup> Ha'e kuery joupe-upe aipoe'i 'rã: ‘Peĩ ke peĩa py ae, pevaẽ eme xere, mba'eta xee ma pendegui ndaxekey'aise va'e', he'i rive 'rã. Ha'e nunga ma hataxĩ ko'ẽ nhavõ xeapyigua ko'õ va'e rami ikuai.

<sup>6</sup> Ma'ẽ, ha'e nunga ha'e javi omboparaa imoiny xerenonde. Ha'e ramo xee nakyrirĩvei 'rã. Rombopaga 'rãe, romomba 'rã peẽ kuery ha'e javi,

<sup>7</sup> pendereko vaitaty ha'e peneramoĩ kuery reko vaiague re. Mba'eta ha'e kuery voi heakuã porã va'e oapy rire yvotyty ikuai va'e áry rupi, ha'e xembopoxya rupi ikuai yvy'ã ikuai va'e áry. Ha'e nunga rupi ambopagapa 'rã yma guive ojejavyague re”, he'i SENHOR.

### *Nhanderuete “Araa jepe 'rã xere ojerovia va'e”, he'iague*

<sup>8</sup> SENHOR aipoe'i: “Peẽ kuery ma peteĩ xã uva revegua peipo'o vy amongue py hykue iro va'e pejou vy aipopeje 'rã: ‘Nhamombo va'erã e'ŷ, mba'eta iporã va'e oĩ ruxã'i teĩ, pejea rami avi xee voi amboaxy 'rã xerembiguai kuery, ha'e vy namombai 'rã.

<sup>9</sup> Ha'e rami vy amoingo 'rã Jacó ramymino kueryrã, ha'e Judá ramymino kuery va'e regua amoingo avi 'rã xevyguia yvotyty re ipo'aka va'erã. Ha'e rami vy xerembiporavo kuery hekoa ju 'rã yvy re, ha'e py ae 'rã xerembiguai kuery hekoa.

<sup>10</sup> Ha'e rami vy Sarom yvy itui 'rã nhuñdy vexa'i rembi'u tyrã, ha'e Acor yvyugua rupi 'rã vaka kuery opytu'u. Xevyguia kuery xereka va'e pe ae 'rã ajapo.

\* **65:2** Romanos 10.20-21 \* **65:3** Altar-rã ha'e kuery ojapo vy nda'evei yvy jykue oiporu aguã (Êxodo 20.24-25).

**11** “Ha'e rā peẽ kuery ma SENHOR gui ojepe'a rive va'e pendekuai, xevyguia yvyty iky'a e'ŷ va'e gui penderexarai guive. Pereko katu ngaru pendexyete ramigua Xortea hery va'e pe, ha'e vinho pemoirū tuuete ramigua Renonderā hery va'e peguarā.

**12** Ha'e rami rā peẽ kuery xee romboaxa 'rā kyxe reveguia pe. Ha'e ramo peẽ kuery ha'e javive penerenapy'ā re pei 'rā pendejukaarā renonde. Mba'eta xee roenoī ramo napembovai rire, xeayvu teī ndapeikuua potai guive. Ha'e rami 'rāgue py teko vai rupi tema pendekuai xerenonde, ha'e peiporavo xee arovya e'ŷ va'e.”

**13** Ha'e nunga rupi SENHOR Nhanderuete aipoe'i: “Xerembiguai kuery okaru 'rā, ha'e rā peẽ kuery ma pendu 'rā karuai. Xerembiguai kuery oy'u 'rā, ha'e rā peẽ kuery ma pendu 'rā yuvei. Xerembiguai kuery ovya 'rā, ha'e rā peẽ kuery ma peximba 'rā.

**14** Xerembiguai kuery oporaei 'rā ipy'a py ovya vy, ha'e rā peẽ kuery ma peneraxē 'rā pendepy'a raxy vy, pejae'o 'rā penenhe'ē py peiko axya anho pendu vy.

**15** Penderery peja 'rā xerembiporavo kuery ima'endu'a vai aguā. SENHOR Nhanderuete pendejukapa 'rā, ha'e rā guembiguai kuery ma omboery pyau ju 'rā.

**16** Ha'e nunga rupi yvy re jogueroayvu porā va'e ma Nhanderuete anhetē ete va'e rupi meme 'rā jogueroayvu porā, ha'e yvy re oura va'e ma Nhanderuete anhetē ete va'e rupi 'rā oura. Mba'eta hexaraipaa 'rā ikuai axya oaxapa va'ekue re, xee voi naxema'endu'avei 'rā.

### *Yva pyau ha'e yvy pyau re ijayvuague*

**17** “Ha'e gui ma xee ajapo 'rā yva pyau ha'e yvy pyau. Ha'e rami rire na'ima'endu'aavei ma 'rā mba'emo oaxa va'ekue re, avave reī ndoikuaavei 'rā ha'e nungakue.\*

**18** Ha'e ramo peẽ kuery pevy'a ete 'rā pekuapy, raka'e rā peve perovy'a 'rā mba'emo xee amoingo va'e. Mba'eta Jerusalém py amoingo 'rā vy'a oendua va'erā, ha'e pygua kuery oguerovy'a ete 'rā.

**19** Arovya 'rā Jerusalém, arovya avi 'rā xevyguia kuery. Mba'eta ha'e py ma noenduavei 'rā ojae'o ha'e haxē va'e.

**20** Ha'e py ma ndoikovei 'rā kyrī va'e xapy'a'i peve oiko va'e, neī tuja'i voi oikove aguā ára ndoupityi va'e. Mba'eta cem ma'etŷ oguerekao py omano va'e pe ma 'Ipyau reve teri omano' 'ea 'rā, ha'e cem ma'etŷa peve ndoupityi va'e pe ma 'Ojejavy va'e vy ayvu vaipy oiko vy ma 'rā' 'ea 'rā.

**21** Ha'e pygua kuery ngoorā ojapo vy ha'e py ae 'rā ikuai. Uva onhotŷ ma vy ho'u 'rā hi'a.

**22** Ngoorā va'ekue ndojapovei 'rā amboae kuery rive oī aguā, ha'e mba'emo nonhotŷvei 'rā amboae kuery rive ju ho'u aguā. Mba'eta xevyguia kuery oiko puku 'rā yvyla rami, xerembiporavo kuery oiporu kuerei 'rā opo py ojapo va'ekue'-ekue.

**23** Ha'e rami vy nomba'eapo rivevei 'rā, neī kyrīgue ndoguerekoi 'rā oiko vai va'erā, mba'eta SENHOR ogueroayvu porā va'e meme ikuai, ta'y kuery voi ikuai 'rā ha'e kuery reve.

**24** Ha'e kuery ojapukai e'ŷ mbove ma voi xee ambovai 'rā. Ijayvu teri reve xee aendu 'rā.

**25** Aguara ha'e vexa'i ra'y reve joa py 'rā okaru okuapy, ha'e guary ma vaka rami avi 'rā ho'u oikovy mba'emo pirekue. Mboi ma yvy ku'i re rive 'rā okaru. Mba'eta joupe ndojapo vaiavei 'rā, mba'eve ndoikoi 'rā guive xevyguia yvyty iky'a e'ŷ va'e áry ha'e javi rupi”, he'i SENHOR.

## 66

### *Jerusalém pyau py Nhanderuete pe onhembo'e merami rive va'e kuery oike e'ŷ aguā re ijayvuague*

**1** SENHOR aipoe'i: “Yva ma xerenda apenaaty, ha'e rā yvy ma xepy rupa itui. Mba'e nunga oo tu xevy pe pejapo ta? Mamo tu apytu'u atyrā oī?

---

\* 65:17 2 Pedro 3.13

<sup>2</sup> Mba'eta xepo py ae ha'e nunga ha'e javi ajapo raka'e. Ha'e ramo mae opa mba'e oiko", he'i SENHOR. "Ha'e rami avi xee ma po ramigua re ama'ẽ 'rã: onhe'ẽ py ojexavai rei'i ha'e ipy'a raxy rei va'e, ha'e xeayvu oendu vy oryryi va'e.\*

<sup>3</sup> Ha'e rã vaka xevy ojuka va'e ma jojukaa rami 'rã aikuaa, vexa'i ra'y oapy va'e ma jagua aju'y omopẽ va'e rami rive, ha'e mba'emo aju xevy ome'ẽ va'e ma poryko ruguy ome'ẽ va'e rami aikuaa. Ha'e rami ae avi heakuã porã va'e oapy va'e ma mba'emo ra'angaa ogueroayvu porã va'e rami aikuaa. Mba'eta ha'e kuery ae oipotaa rami rive ikuai, onhe'ẽ py ojeguarupy anho oguerovy'a va'e.

<sup>4</sup> Ha'e ramo xee aipotaa rami vy amoingo axy'rã, ha'e kuery re ambou 'rã okyje etea va'e. Mba'eta aenoĩ ramo pete'ive rei nombovai, xeayvu ramo noendu potai guive. Ha'e rami 'rãgue py mba'emo vai anho ojapo okuapy xerenonde, ha'e oipota xee arov'y'a e'ŷ va'e", he'i.

<sup>5</sup> Ha'e gui peẽ SENHOR renonde pejererokyjea rupi pendekuai va'e, pendu ke ijayvu: "Penderyvy kuery ma xerery rupi pendekuai ramo pendere nda'ija'eí vy penemoxẽ mombyry. Ha'e vy pendejojai vy 'SENHOR toexa uka guexakãa, pevy'a ri rã roexa aguã', he'i okuapy. Ha'e rami tei ha'e kuery nda'evei nho 'rã okuapy.

<sup>6</sup> Mba'eta tetã gui onhendu 'rã joe opu'ã ete va'e ayvu ramigua, templo gui ae 'rã onhendu. SENHOR ijayvu 'rã ngovaigua kuery ombopaga vy.

<sup>7</sup> "Petei kunha ma kyrĩ va'e raxy oendu e'ŷ mbove oikuavã'i ma 'rã kyrĩ va'e, haxy e'ŷ mbove oiko'i 'rã ava'i.

<sup>8</sup> Mava'e nda'u ha'e ramigua oendu, e'ŷ vy oexa ma? Ha'eve ri nda'u pete'i yvy ha'e javi re ikuai va'erã pete'i ára pyve oiko aguã? Ha'eve ri nda'u pete'i regua kuery ha'e javi oiko vyvoi aguã? Ha'e rami avi Sião ma haxy oendu e'ŷ mbove oguerekoi 'rã omemby kuery.

<sup>9</sup> Mba'eta kyrĩ va'e ryru'i xee aipe'a tei namoingoi 'rã teve? Xee nda'u anhomoingo va'eri amboty 'rã teve kyrĩ va'e ryru oiko e'ŷ aguã?" he'i SENHOR Nhanderuete.

### *Sião tetã py raka'e rã peve ov'y'aa aguã re ijayvuague*

<sup>10</sup> "Peẽ kuery Jerusalém tetã peayvu va'e ha'e javi, pevy'a ke ha'e pygua kuery reve. Perovy'a ke, hexe pejae'o va'ekue ha'e javi.

<sup>11</sup> Mba'eta ikã penembovy'a va'e re pekambu vy penerevyatã 'rã, penhemongaru vy perovy'a 'rã hexakãa oĩ va'e ha'e javi pexa vy."\*

<sup>12</sup> Mba'eta SENHOR aipoe'i: "Peẽ kuery pe ame'ẽ 'rã mby'a porã yakã oxyry va'e rami, ha'e yvy regua kuery mba'emo porã oguerekoyva'ekue ma peẽ kuery pe ju 'rã amboaxa yakã tyguaxu va'e rami. Ha'e ramo pekambu 'rã peiny. Ojyva áry pendereru 'rã, ha'e o'u áry pendererovy'a 'rã.

<sup>13</sup> Ixy omemby omombo'o va'e rami avi xee rombovy'a 'rã peẽ kuery, ha'e pevy'a ju 'rã Jerusalém tetã re.

<sup>14</sup> Peẽ ae pexa 'rã, pendepy'a py pevy'a 'rã, penekãgue voi ipyau 'rã jai rogue pyau rami. Mba'eta ha'e jave py SENHOR oexa uka 'rã opo'akaa guembiguai kuery pe, ha'e rã ngovaigua kuery pe ma ipoxy 'rã."

<sup>15</sup> Mba'eta SENHOR ou 'rã tata rupi, ikaróxa ma yvytu jere rami 'rã ou, ipoxya oexa uka aguã nhomombaa rupi. Ijayvu ete 'rã tataendy rami.

<sup>16</sup> Mba'eta tata ha'e kyxe reve SENHOR ou vy oikuuaa pota 'rã avakue ha'e javi re. Ha'e ramo heta ete 'rã SENHOR ojuka.

<sup>17</sup> SENHOR aipoe'i: "Amongue kuery oxyete ramigua oguerekoyva'e peguarã rive onhemboaxa ha'e ojeky'a'o va'ekue, ha'e rami vy yvotyty mbyte peve oike vy ho'u okuapy poryko ro'o, tembi'u ojeguarupy ha'e anguja ro'o rive. Ha'e va'e kuery ma omombaa vyvoi 'rã.

\* **66:2** Atos 7.49-50 \* **66:11** Apy ma Jerusalém tetã re ijayvu ha'e kuery xy re rami.

**18** Mba'eta xee aikuua ae ha'e kuery ikuiaia ha'e onhembopy'aa ha'e javi. Ha'e rami vy aju 'rã amboatypa aguã yvy regua kuery ha'e amboae ayvu py ijayvu va'e ha'e javi. Ha'e ramo ha'e kuery ou vy oexa 'rã okuapy xerexakã.

**19** Ha'e kuery mbyte amoõ 'rã xekuaa ukaarã. Ha'e araa jepe va'ekue regua amongue amondouka 'rã yvy regua kuerya katy, Társis tetã katy, guyrapa oiporu kuaa va'e ikuiaia Pul ha'e Lude yvy katy, ha'e gui Tubal, Javã ha'e ye'ẽ yvýry mombyryvea peve guive. Ha'e pygua kuery ma noendui teri xeregua ayvu, ndoexai teri guive xerexakã. Ha'e va'e yvy regua kuery pe ae 'rã ha'e kuery omombe'u xerexakã.

**20** Ha'e gui ma oguerupa 'rã penderyvy kuery ha'e javi. Yvy regua kuery mbyte gui ogueru 'rã SENHOR pe ome'ẽ va'erã rami. Kavaju áry 'rã ogueru, karóxa py, mburika ha'e camelo áry ogueru 'rã Jerusalém tetã py xevygua yvyty iky'a e'ŷ va'e py, hyru iky'a e'ŷ va'e py Israel kuery mba'emo aju ome'ẽ va'erã oguerua rami avi SENHOR pegua oo py", he'i.

**21** "Ha'e ramo ha'e va'e regua voi amoõ 'rã sacerdote ha'e levita-rã", he'i SENHOR.

**22** "Mba'eta yva pyau ha'e yvy pyau ajapo va'erã va'e ma xerenonde riae 'rã oĩ. Ha'e rami ae peneramymino kuery ikuai avi 'rã, penderery voi.

**23** Jaxy pyau ha'e sábado ojeupity nhavõ ma avakue ha'e javi ou 'rã xerenonde xemboete aguã", he'i SENHOR.

**24** "Ha'e gui ha'e kuery oo vy oexa 'rã okuapy xere opu'ã rei va'ekue retekue. Ha'e py ma taxo nomanovei 'rã, hata voi ndoguevei 'rã. Ha'e nunga gui ma avakue ha'e javi ojeguaru 'rã."\*

## Jeremias ayvu oĩa Jeremias ayvu oĩa

Profeta Jeremias ma ijayvu Judá pygua kuery re Babilônia pygua kuery opu'ã vy escravo-rã ogueraapa aguã re. Ha'e rami aguã ma Nhanderuete ae ombou ha'e kuery ojejavyague re. Mba'eta Jeremias oikuua nhandepy'a ky'a va'e memea: "Ha'e gui avakue py'a ma opa mba'e gui nhombotavypave ha'e nda'evei va'e ae. Mava'e nda'u oikuua 'rã?" he'i (17.9).

Ha'e rami teĩ Jeremias omombe'u avi Nhanderuete ojeupeguia kuery omboaxy vy ogueru ju aguã. "Senhor aipoe'i: 'Ne'exa, ou ma oiny ára Israel ha'e Judá kuery reve xereve guarã ajapo pyau aguã, tamoĩ kuery reve ajapo va'ekue ramigua e'ÿ. Ha'e jave ma ha'e kuery po re ajopy reve anoëmba va'ekue Egito yvy gui. Ha'e rami teĩ ha'e kuery ombovaipa xereve guarã ajapo va'ekue, ime rami aiko teĩ. Ha'e gui ha'e va'e ára oaxapa ma rire po rami 'rã Israel kuery reve ajapo pyau xereve guarã. Ha'e kuery py'a re 'rã ambopara xeguigua lei, ikuraxõ re ae 'rã ambopara. Xee aiko 'rã Tuuete, ha'e rã ha'e kuery ma ikuai 'rã xevygua. Ha'e ramo peteĩ-teĩ nombo'evei ma 'rã oirũ neĩ guyvy kuery, "Peikuua na Senhor", he'ia py, mba'eta ha'e javive xekuua 'rã, yvyigueve ha'e yvatekueve voi. Mba'eta amboguepa 'rã heko vaiague, ojejavyague re naxema'endu'avei 'rã guive', he'i Senhor" (31.31-34). "Ha'e kuery pe ame'ẽ 'rã peteĩ'i rupi ipy'a aguã ha'e peteĩ'i tape, ko'ẽ nhavõ xerenonde ojererokyjea rupi ikuai aguã, ha'e kuery ikuai porã aguã, ha'e gui ta'y kuery voi" (32.39).

### *Jeremias pe jypy'i SENHOR ijayvuague*

<sup>1</sup> Hilquias ra'y Jeremias ayvu oĩa. Ha'e va'e ma Benjamim yvy re Anatote tetã py sacerdote ikuai va'e regua.

<sup>2</sup> Ixupe ma SENHOR ombou oayvu Amom ra'y Josias Judá pygua huvixa treze ma'etÿ re ma oĩ jave py.

<sup>3</sup> Ha'e gui Josias ra'y Jeoacuim Judá pygua huvixa oĩ jave ju ayvu omombe'u Josias ra'y Zedequias treze ma'etÿ re oĩa peve, ha'e gui Jerusalém tetã gui escravo-rã ogueraapaa ma rire peteĩ nhiruĩ jaxy peve ju.

<sup>4</sup> Ha'e gui xevy pe SENHOR oayvu ombou vy aipoe'i:

<sup>5</sup> — Nderyru'i py xee romingo e'ÿ mbove xee roikuua ma voi, ndetui'i e'ÿ mbove roiporavo vy romoĩ profeta-rã yvy regua kuery pe xeayvu remombe'u aguã — he'i.

<sup>6</sup> Ha'e ramo xee ambovai:

— Ai SENHOR Xeruete! Ne'exa, xee ma ndaxeayvu kuaai, mba'eta xekyrí teri.

<sup>7</sup> Va'eri SENHOR aipoe'i xevy:

— Nda'evei "Xekyrí teri" 're aguã. Mba'eta reo 'rã xee romondoukaa katy rei, ha'e remombe'upa 'rã ndevy xeayvuague ha'e javi.

<sup>8</sup> Ekyje eme ha'e kuery renonde, mba'eta xee aiko 'rã ndereve rogueraa jepe aguã — he'i SENHOR.

<sup>9</sup> Ha'e gui SENHOR okuave'ẽ vy opoko xejuru re. Ha'e vy aipoe'i xevy:

— Ne'exa, ndejuru py amoĩ xeayvu.

<sup>10</sup> Ha'e rami vy kova'e ára guive ma rombopo'aka yvy regua kuery ha'e huvixa kuery openaa ikuai va'e re, reipe'a ha'e reity aguã, rembovaipa ha'e remboa'y aguã, ha'e gui remopu'ã ha'e renhotÿ ju aguã.

### *Amêndoа 'y oexa ukaague*

<sup>11</sup> Teĩgue ju SENHOR ijayvu vy aipoe'i xevy:

— Jeremias, mba'e nunga tu rex?

Ambovai:

— Aexa peteĩ yvyra'i amêndoа 'y – ha'e.

<sup>12</sup> Ha'e rami rã SENHOR aipoe'ive ju:

— Ha'evea rami rexa, mba'eta xeayvuague re xee ama'ẽ 'rã ojeupitypa aguã.\*

### *Oja tata áry oĩ va'e oexa ukaague*

<sup>13</sup> Teĩgue ju SENHOR ombou oayvu xevy. Ha'e vy aipoe'i:

— Mba'e tu rexa?

Ambovai:

— Aexa peteĩ oja tata áry oĩ va'e. Ha'e va'e ma ijuru kuaray ijanpu'a'ia katy gui ojero'a oiny – ha'e.

<sup>14</sup> Ha'e ramo SENHOR aipoe'ive ju xevy: “Kuaray ijanpu'a'ia katy gui onheẽ 'rã ouvy mba'emo vai yvy re ikuai va'e ha'e javi áry.

<sup>15</sup> Mba'eta xee aenoimba 'rã kuaray ijanpu'a'ia katy ikuai va'e regua. Ha'e ramo ha'e kuery oupa 'rã. Ha'e rami vy Jerusalém tetã rokẽ katy'i peteĩ-teĩ regua ruvixa omoĩ 'rã guenda opena atyrã, tetã kora yvýry, Judá regua tetã ha'e javi kora yvýry guive”, he'i SENHOR.

<sup>16</sup> “Ha'e va'e tetã pygua kuery rovai xeayvu 'rã heko vaiague re ambopaga aguã. Mba'eta xerejapa vy amboae ramigua nguuete pe oapy okuapy heakuã porã va'e, opo py ae ojapo va'ekue rive ombojerovia vy.

<sup>17</sup> Ha'e rã ndee ma eiko katu ke. Ha'e vy tereo, ha'e kuery pe emombe'u xeayvuague ha'e javi. Enhemondyieme ha'e kuery renonde, ajapo e'ý aguã ha'e kuery renonde renhemondiyive ete aguã rami.

<sup>18</sup> Ne'exa, kova'e ára romoĩ peteĩ tetã ikorapa va'e rami, ha'e ijyta ferro guigua ha'e tetã kora overa va'e guigua rami neretã pygua kuery ha'e javi rovai ndeayvu aguã, Judá pygua huvixa kuery, yvatekueve, sacerdote kuery ha'e neretarã kuery rovai.

<sup>19</sup> Ha'e kuery ndere opu'ã teĩ nda'ipo'akai 'rã, xee rogueraa jepe aguã ndereve aiko ramo”, he'i SENHOR.

## 2

### *Nhanderuete oayvu teĩ heta va'e kuery onhe'ẽ raxavea re ijayvuague*

<sup>1</sup> Ha'e gui xevy SENHOR oayvu ombou vy aipoe'i:

<sup>2</sup> “Tereo, ha'e ejapukai Jerusalém pygua kuery oendupa aguã: Po rami SENHOR ijayvu: ‘Xee ma xema'endu'a nekunhatai jave xee aipotaa rami reikoague re, ha'e xere remenda ramo jave xerayvuague re, tekaoa e'ýa, yvy mba'ety jipoia rupi teĩ xerupive reikoague re.”\*

<sup>3</sup> Mba'eta ha'e va'e jave py ma SENHOR pe ete Israel kuery ikuai, mba'emo ra'yigüe porägueve ixupe guarã omono'õ upy pyre rami. Ha'e kuery mombaxeaa kuery ma ipo ky'a va'e meme onhemoingo, hi'ary mba'emo vai ou guive”, he'i SENHOR.

<sup>4</sup> Pendu ke SENHOR ayvu, Jacó ha'e Israel kuery ha'e javi.

<sup>5</sup> Po rami SENHOR ijayvu: “Mba'e nunga nda'u peneramoĩ kuery oexa xere, xegui ojep'apa aguã? Mba'eta mba'emo ra'angaa ovare e'ý va'e re rive ovapa vy ha'e kuery ae ju ovare e'ý va'e onhemoingo.

<sup>6</sup> Ha'e kuery joupe-upé neĩ noporandui: ‘Mamo nda'u oĩ SENHOR Egito yvy gui nhancerenoëare? Mba'eta tekaoa e'ýa rupi nhandereraa va'ekue, yvy piru reia ha'e yvykua anho oĩa, yvy piru ha'e manoia 'ã oĩa rupi, yvy avave rei oguataa e'ýa ha'e noĩaia rupi’, nde'i.

<sup>7</sup> Ha'e gui xee rogueru va'ekue yvy porãa re, pekaru aguã mba'emo'a ha'e mba'emo porã oiko va'e re. Ha'e rami teĩ ha'e py pevaëmba ma rire pemongy'apa, yvy xevy guarã va'ekue pejapo ojeguaru pyrã.

\* <sup>1:12</sup> Ha'e kuery ayvu py ma ayvu “Amêndoа 'y” nhaendu rã “Ama'ẽ 'rã” nhaendua rami rai'i. \* <sup>2:2</sup> Apy ma ojeupagua kuery pe Nhanderuete ijayvu gua'yxy pe rami.

**8** Sacerdote kuery ‘Mamo tu oĩ SENHOR?’ nde'i, lei re nhombo'e va'ety voi ndaxekuaa potai okuapy. Joe opena va'ety kuery xenhe'ẽ raxave okuapy, ha'e rã profeta kuery ma Baal rery rupi rive ijayvu vy ovare e'ŷ va'e rakykue rupi ikuai.”

### *Ndojeroviae reipa okuapyague re ijayvuague*

**9** SENHOR aipoe'ive ju: “Xeayvuve tema 'rã peẽ kuery reko re. Pendera'y ra'y kuery pe voi xeayvu.

**10** Peaxa ha'vy ye'ẽ rovai Chipre ha'e ijyvýry yvy ikuai va'e re, ha'e peikuua pota. Quedar katy guive pemondouka penembiguai kuery, toikuua pota porãmba, peikuua aguã ha'e ramigua peteïve henda py ndoikoi paa re.

**11** Tyrã pa oiko teve amboae regua nguete kuery omboekovia va'e, nguete e'ŷ guive oguereko tei? Ha'e rami tei xevygua kuery tu mba'everã ovare e'ŷ va'e re omboekovia Omoexakãa.

**12** Yva regua kuery, penhemondyi ke ha'e nunga gui! Pekyjepa, ha'e peryryipa”, he'i SENHOR.

**13** “Mba'eta xevygua kuery ma mokoĩ henda py ojapo vai: jypy ojepe'apa yy imarã e'ŷ va'e xee ame'ẽ va'e gui, ha'e gui ygua ojeupe guarã ae ojo'o. Ha'e va'e ma ovopa rei vy yy ndopytaia guive.

**14** “Israel kuery nda'u escravo ikuai teve? Joo py tembiguairã ha'e kuery itui'i va'ekue teve? Ha'e rami e'ŷ ramo mba'e re tu ombo'a pyrã ikuai?

**15** Ha'e kuery rovai ma guary ra'y kuery okororõ ratã 'rã okuapy, ombovaipa 'rã guive ijyvý.† Ha'e ramo ha'e kuery retã okaipa, jipovei ha'e py oĩ va'erã.

**16** Neakã ma Mênfis ha'e Tafnes pygua kuery voi onhopimba.‡

**17** Ha'e nunga ha'e javi oiko ndevy, tape porã rupi SENHOR nderuete ndererekotei ixugui rejep'e a rire.

**18** Ha'e gui aŷ mba'erã tu Egito yvy katy reo 'rã Nilo yakã gui rey'u aguã? Ha'e rami e'ŷ vy, mba'erã tu Assíria katy reo 'rã Eufrates yakã gui rey'u aguã?

**19** Nderekotei vaia ae ndeapo vai 'rã, rejerovia etea rupi e'ŷ reikoa oikuua ukaa 'rã nderekotei vaia. Ha'e gui ma eikuua pota povae nunga re, mba'eta SENHOR nderuete gui rejep'e a rire rendu 'rã nda'evei etea ha'e iro vaikue va'e anho, xerenonde nderejererokyjei rire”, he'i SENHOR ixondaro reta va'e.

### *Baal pe rive Israel kuery ikuia re ijayvuague*

**20** “Yma ma canga ndere oĩ va'e amopẽmba, ha'e ndejokuaague amondopa 'rãgue, tei ndee ma ‘Xee ndaikoxei ndevy’, 're xevy. Mba'eta yvy'ã yvate ikuai va'e rupi, ha'e yvyra hovana va'e ha'e javi guy rupi renheno vy ndetavy.

**21** Xee ae ronhotõ va'ekue uva rembypy iporã va'e rami, ha'yigue iporãve va'e anho regua. Ha'e rami rire tei mba'exa tu uva iro va'e anho reme'ẽ xevy?

**22** Kavõ py rejau, ha'e iky'akue mboia reikyty vaipa tei xerenonde ojekuaa teri nderekotei vaia ky'a”, he'i SENHOR Nhanderuete.

**23** “Mba'exa tu aipo're: ‘Xeky'aa noĩ, xee tu ndaikoi rima Baal ra'angaa kuery re’, 're? Ha'e rami tei ema'ẽ na yvy'ã guy rupi ndepypo ojekuaa va'e re, eikuua pota na mba'e pa rejapoague re. Camelô ra'y inhakuã va'e tape rupi ojevy-jevy oikovy va'e rami reiko,

**24** ha'e mburika ka'aguy regua tekao e'ŷa rupi ava oeka vy yvytu rupi oetû oikovy va'e rami. Avave rei ndojokoi 'rã ojapoxe va'e ojapo aguã gui, hekaa kuery ikane'õ e'ŷ re ojou 'rã guive, ha'e rami aguã jaxy ovaẽ nhavõ.

**25** Enheangu ke ndepy rei re e'ŷ renha aguã, nei ndejyryvi remo peve e'ŷ guive. Va'eri ndee aipo're: ‘Any, nda'evei teve. Mba'eta amboae regua ruete kuery xee ayvu vy aa 'rãe hakykue’, 're.

† 2:15 Apy guary ra'y kuery re ijayvua py ma ha'e kuery rovaigua kuery re ijayvu (50.7; Salmo 57.4; Isaías 5.29).

‡ 2:16 Ha'e va'e jave py hovaigua kuery ojavyky rei 'rã inhakã onhopimbaa py (Isaías 7.20).

<sup>26</sup> “Ha'e gui imonda va'e ojopya rā oxīmbaa rami avi Israel kuery voi oxīmba aguā rami ikuai: heta va'e kuery, huvixa kuery, yvatekueve, sacerdote ha'e profeta kuery voi.

<sup>27</sup> Mba'eta ha'e kuery ma yvyra guigua pe rive 'rā 'Ndee ma xeruete', he'i, ha'e ita guigua pe 'Ndee ma xemoingoare', he'i 'rā. Mba'eta xea katy ha'e kuery ikupe okuapy, hova e'ŷ. Ha'e rami teī ikuai axy vy ma 'Epu'ā ke, orereraa jepe', he'i 'rā xevy.

<sup>28</sup> Ha'e gui mamo tu ikuai penderuete kueryrā peē ae pejapo va'ekue? Tove ha'e kuery ae tomyī, pendekuai axy rā pendereraa jepe aguā. Mba'eta peē Judá pygua kuery, penderuete ramigua heta perekō, peteī-teī tetā py.

<sup>29</sup> Mba'e re tu pendeayvu rei ri xere? Mba'eta peē kuery ha'e javi xerovai pejejavy va'e", he'i SENHOR.

<sup>30</sup> “Pendera'y kuery ambopaga rive, mba'eta xevy pe nonhemo'arandu ukai. Ha'e peē kuery ma pendekyxe py ae pejuka profeta kuery, guary nhomondoropa va'e rami.

<sup>31</sup> Peē aŷguia kuery, peikuua pota na SENHOR ayvu re. Xee nda'u peē Israel kuery pe ajapo vai ri teve tekao e'ŷa, e'ŷ vy yvy ptytū poivea py rami? Ha'e rami teī mba'e re tu xevygua kuery aipoe'i: ‘Ore ma rooxea katy rei 'rā roo! Ndorojevyvei 'rā ndevy!' he'i okuapy?

<sup>32</sup> Ha'e rami avi kunhataŷgue nda'u hexarai 'rā ri ojeguaarā re, ha'e rami e'ŷ vy omenda va'erā va'e hexarai 'rā ri oku'akuaa re? Ha'e rami teī xevygua kuery ma hexaraipa xegui, mbovy ára rei e'ŷ.

<sup>33</sup> “Peē ma peikuua porā pemoaruā va'e rakykue rupi peo aguā. Ha'e rami aguā re kunhague itavy rei va'e voi oikuaa 'rā pendegui.

<sup>34</sup> Ha'e rami teī pendeao apy re ma iporiaukue'i ha'e oiko rive'i va'ekue ruguy oī. Ha'e kuery imondaa rupi e'ŷ teī pexa vy pejuka va'ekue. Ha'e ramigua ha'e javi pejapo

<sup>35</sup> teī aipopeje 'rā: ‘Xee ma xepo ky'a va'e'ŷ teve. Xere ma ndoui 'rā Nhanderuete poxya', peje. Ne'exa, ‘Ndajejavyi’ peje ramo xee aikuaa pota 'rā pendere.

<sup>36</sup> Peikoaty gui pejepe'a merami rive 'rā. Mba'eta Assíria pygua kuery napenepytyvōi vy penemoxīmbaague rami avi Egito pygua kuery voi penemoxīmba 'rā.

<sup>37</sup> Mba'eta ha'e kuerya gui peo ju 'rā peneakā re pepoko reve, mba'eta pejeroviaa va'e kuery ma SENHOR oeja ramo ha'e kuery po py ndapejoui 'rā mba'eve.”

### 3

#### *Heta va'e kuery ojejavy va'ekue ri Nhanderuete omboaxy ju aguā re ijayvuague*

<sup>1</sup> “Xapy'a rei peteī ava opoi 'rā gua'yxy gui, ha'e rā kunha va'e omeguea gui oo vy omenda ju 'rā ava mboae re. Ha'e gui ha'e va'e kunhaa py nda'u ime ae ojevy 'rā imerā? Any, ha'e ramigua oiko va'e rire yvy ha'e javi opyta 'rāgue omongy'a pyre.\* Ha'e gui peē kuery voi mbovy e'ŷ pemoaruā va'e kuery reve pendetavy rei va'ekue. Ha'e rami ete teī pejevy ju xevy”, he'i SENHOR.

<sup>2</sup> “Pema'ě na yvyty ita anho reia re, ha'e pexa. Mamo tu oī pendetavy rei e'ŷague? Mba'eta tape ikuai va'e rupi peguapy pemoaruā va'e kuery pearō vy, Arábia pygua tekao e'ŷa rupi oma'ě mbegue oinya rami. Ha'e rami vy pemongy'apa ma pendeyvy pendetavy reia ha'e pendereko vaia py.

<sup>3</sup> Ha'e nunga rupi ae xee nambo'okyvei, ma'etŷa pyau jave teī. Ha'e rami teī peē ma itavy rei va'e rami penderova re pexa uka napexī kuaaveia.

<sup>4</sup> Anhetē aŷ ma voi xevy pejapukai rive vy aipopeje: ‘Xeru, ndee ma xekyrī guive xerayvu va'e reiko.

<sup>5</sup> Raka'e peve 'rā tu ndepoxya rupi reiko? Tyrā pa opa peve ete 'rā teve ndepoxy? peje. Tá, ha'e rami ae xevy pendeayvu va'eri pejejavyve tema 'rā peē ae peipotaa rami rive”, he'i SENHOR.

\* <sup>3:1</sup> Ha'e kuery pegua lei rami vy itavy reia py ijyvy opyta 'rā iky'apa va'e (Levítico 18.24-28).

<sup>6</sup> Ha'e gui huvixa Josias oĩ jave SENHOR aipoe'ive ju xevy: “Rexa teve Israel kuery kunha itavy rei va'e rami anhetẽ rupi e'ŷ ikuia? Mba'eta oopa 'rã yvyty yvate va'e áry, ha'e yvyra hovana va'e ha'e javi guy rupi, opa marã rei 'rã itavy ha'e py.

<sup>7</sup> Ha'e gui xee aexa'ã teĩ ha'e rami ete oiko ma rire xevy ju ojevy aguã, va'eri ndojevyi. Ha'e nunga ma ikypy'y itavy rei va'e Judá oexapa.

<sup>8</sup> Mba'eta Israel kuery itavy reia ha'e javi re xee amondoukapa, ha'e ixupe ame'ẽ imondovy kuaxia romendaague ambovaipa aguã regua. Ha'e rami teĩ ikypy'y Judá nonhemboaxyi aexaa py. Ha'e rami 'rãgue py ha'e voi oo vy itavy reia rupi oiko avi.<sup>†</sup>

<sup>9</sup> Ha'e gui itavy reia gui nonhemboaxyi vy omongy'apa oyvy. Mba'eta ita ha'e yvyra guigua pe rive oikoa py itavy rei tema oikovy.

<sup>10</sup> Ha'e rami ete teĩ ikypy'y Judá anhetẽ rupi e'ŷgua va'e vy ndojevyi xevy opy'a ha'e javi py, ojevy merami rive”, he'i SENHOR.

<sup>11</sup> SENHOR aipoe'i xevy: “Ha'e rami ete Israel kuery itavy rei va'eri Judá kuery gui heko porâve va'e ikuai.

<sup>12</sup> Ha'e nunga rupi tereo, pova'e ayvu emombe'u kuaray ijapu'a'ia katy rupi. Ha'e vy aipo're: ‘Israel kuery pendetavy rei va'e, pejevy na. Ha'e ramo ma pende'áry xee nambouvei 'rã xepoxya, anhomboaxy va'e vy’, he'i SENHOR. ‘Ndaxepoxy riaevei 'rã guive.

<sup>13</sup> Ha'e rami avi peikuua pota na pendeko vaia re, peikuua pota SENHOR penderuete rovai pejejavyague re, mba'eta yvyra hovana va'e ha'e javi guy rupi pendetavy rei, xeayvu re ndapejapyxakai guive’, he'i SENHOR.”

### *“Pejeko rerova ke”, he'iague*

<sup>14</sup> “Xera'y kuery xenhe'ẽ rendu e'ŷ va'e, pejeko rerova ke, mba'eta xee ae ma peneme rami aiko. Ha'e nunga rupi peteĩ-teĩ tetã gui xee rogueru 'rã peteĩ, ha'e peteĩ-teĩ regua gui mokõ-mokoĩ 'rã rogueru. Ha'e vy rogueraa ju 'rã Sião py”, he'i SENHOR.

<sup>15</sup> “Ha'e py amoĩ 'rã peẽ kuery re opena va'erã xee rami ipy'a va'e. Ha'e va'e kuery ma pendere opena 'rã oikuaapa ha'e o'arandu reve.

<sup>16</sup> Ha'e rami rire pendereta ju 'rã yvy re, pendera'y kuery reta 'rã guive. Ha'e va'e jave ma napendeayvuvei 'rã SENHOR guexeve guarã ojapo va'ekue ryru re, mba'eta ha'e nunga re na'ima'endu'aavei 'rã, ‘Oata’ nda'eai 'rã guive. Neĩ hekovia ndojapoai 'rã amboae”, he'i SENHOR.

<sup>17</sup> “Ha'e va'e jave ma Jerusalém tetã pe ‘SENHOR renda’ 'ea 'rã. Ha'e py ma ha'e javi regua ono'õmba 'rã SENHOR rery rupi, ha'e vy inhakã ratã reia rupi ve'ŷ 'rã ikuai.

<sup>18</sup> Ha'e va'e ára ma Judá kuery peteĩ rami 'rã ikuai Israel kuery reve. Ha'e vy kuaray ijapu'a'ia katy yvy itui va'e gui joupive peju 'rã pendeyvyrã peneramoĩ kuery pe ame'ẽ va'ekue katy.

<sup>19</sup> “Xejeupe ae aipoa'e va'ekue: ‘Xee rogueruxe teĩ xera'y kuery mboae mbyte, ha'e pendevy ame'ẽxe yvy oipotavepy, amboae regua kuery yvy gui iporâve va'e.’ Aipoa'eve ju: ‘Xevy pe “Xeru” peje 'rã, xegui ndapejepe'avei 'rã guive’, ha'e.

<sup>20</sup> Ha'e rami teĩ peẽ Israel kuery, kunha ome gui opoi nhemi va'e rami avi peẽ voi xero py peiko itavy nhemi va'e rami”, he'i SENHOR.

<sup>21</sup> “Yvyty yvateve va'e-va'e rupi onhendu peteĩ ayvu, Israel kuery ojae'o ha'e ojerure nhendu okuapy ramo. Mba'eta ha'eve e'ŷa rami rei pendekuai, SENHOR penderuete gui penderexaraipa rire.

<sup>22</sup> Pejevy ke, xera'y kuery xenhe'ẽ rendu e'ŷ va'e. Ha'e ramo xee amonguera 'rã xenhe'ẽ rendu e'ŷague gui”, he'i.

<sup>†</sup> 3:8 Apy mokoĩ kunha joegua oikoa rami ijayvu Israel ha'e Judá kuery re, Israel kuery ojejavyague rami ae ju Judá kuery ojejavy avi ramo. Ha'e va'e jave py ma Israel kuery ojejavyague re Nhanderuete escravo-rã omondoukapa ijyvy gui mombyry (2 Reis 17.6-20).

Ha'e ramo aipo'ea: "Apy ma orekuai, roju ma ndea py. Mba'eta ndee ma SENHOR oreruete.

<sup>23</sup> Anhetē ete ae yvy'ā ikuai va'e áry rupi rojekorea rupi orekuai, yvyty áry rupi oretavy rei va'ekue. Mba'eta SENHOR Oreruete re anho oī ore Israel kuery roo jepe aguā.

<sup>24</sup> Mba'emo orekyrī jave guive oremoxīmbaarā pe rive orekuia rupi rombovaipa oreramoī kuery ombo'eapoa rupi ojou va'ekue. Ha'e ramo hymba vexa'i kuery, vaka jipovei, ta'y kuery ha'e tajy kuery voi.

<sup>25</sup> Ro'apa 'rā'vy roxīmbaa py, mba'eta roiko kuaa e'ŷ reia oreao'ipa. Mba'eta rojejavy SENHOR Oreruete rovai, ore ha'e oreru kuery, orekyrī guive kova'e ára peve. Noroendu potai va'ekue SENHOR Oreruete ayvu", 'ea.

## 4

<sup>1</sup> "Ha'e ramo Israel kuery, pejevyxe ri vy ke xevy pe ete pejevy", he'i SENHOR. "Peipe'apa ojeguarupy xerenonde gui, ha'e pejepe'ave eme xegui.

<sup>2</sup> Anhetē rupi, 'arandua ha'e teko porāa rupi pendekuai reve peura xee SENHOR aikove va'e rery rupi. Ha'e rami ri pendekuai ramo yvy regua kuery xereroporaei 'rā okuapy, ha'e rā xee amoingo porāmba 'rā", he'i.

<sup>3</sup> Mba'eta SENHOR aipoe'i Judá ha'e Jerusalém pygua avakue pe: "Pereko katu pyau penemba'etyrā, ha'e penhotŷve eme juu mbyte rupi.

<sup>4</sup> Avakue Judá ha'e Jerusalém pygua, pendepire pemboiague rami SENHOR peguarā peiky'a'o avi ke penekuraxō, xepoxya tata rami oē vy penderapy e'ŷ aguā imboguearaā oiko e'ŷ re, pendeko vaia rupi pendekuai rire."

### Kuaray ijapu'a'ia katy gui mba'emo vai ou aguā re ijayvuague

<sup>5</sup> "Pendu uka na Judá yvy re, pejapo Jerusalém tetā py oendua aguā rami. Ha'e vy aipopeje: 'Pemonhe'ẽ ke mimby guaxu yvy re!' Pejapukai ratā vy aipopeje: 'Peno'õmba ke, nhanha jaike tetā ikorapa va'e py!' peje.

<sup>6</sup> Pemopu'ā ke imo'amy bandeira Sião katy peo aguā. Pejava na, pemboare eme. Mba'eta xee ajapo 'rā kuaray ijapu'a'ia katy gui mba'emo vai ou aguā rami nhomomba etearā.

<sup>7</sup> Mba'eta guary ma ituiaty gui oē ma ouvy yvy regua kuery mombaarā.\* Ou ae ma, oĩaty oeja ma ouvy pendeyvy ha'e peneretā ikuai va'e ombovaipa aguā, avave rei noĩavei aguā rami.

<sup>8</sup> Ha'e nunga rupi pendejee pemoī ao penhemboaxyo regua. Peneraxē ha'e pejae'o, mba'eta SENHOR ipoxy etea ndoaxa rivei 'rā nhandegui.

<sup>9</sup> Ha'e va'e ára ma huvixa kuery nda'ipy'a guaxuvei 'rā, sacerdote kuery onhemondyipa 'rā, ha'e profeta kuery voi okyjepa 'rā", he'i SENHOR.

<sup>10</sup> Ha'e ramo xee aipo'a: "Ai SENHOR Xeruete! Kore rembotavy uka ra'e kova'e tetā Jerusalém pygua kuery, 'Pendekuai porā 'rā', 're uka vy. Ha'e rami tei kyxe ou ma orenhe'ẽ re peve", ha'e.

<sup>11</sup> Ha'e va'e jave py kova'e tetā Jerusalém pygua kuery pe SENHOR aipoe'i 'rā: "Xevygua kuery re yvytu haku va'e oipeju 'rā yvy'ā ita anho reia gui, mba'emo pirekue omboveve aguā e'ŷ guive, nei oky'a'o aguā e'ŷ.

<sup>12</sup> Ha'e rami aguā gui yvytu xea guigua ou va'e ma hatāve ete 'rā. Ha'e rami vy xeayvu 'rā ha'e kuery opaga aguā re", he'i.

<sup>13</sup> Ne'exa, pee ma arai rami ou oiny imombhaarā, ikaróxa ma yvytu atā va'e rami ou. Hymba kavaju kuery ma taguato gui inhakuāve va'e. Nda'evei ete nhandevy! Nhanemomba ta ma!

<sup>14</sup> "Ha'e gui Jerusalém pygua kuery, peo jepe aguā peiky'a'o ke penekuraxō mba'emo vai oī va'e gui! Raka'e peve tu pendepy'a re pemoī 'rā ha'eve'ŷa rami rei pendekuai aguā?

\* <sup>4:7</sup> "Guary" he'ia ma Babilônia pygua kuery ombou aguā re Nhanderuete ijayvu vy, ojeupagua kuery ojejavyague re ombopaga aguā.

<sup>15</sup> Mba'eta Dā tetā guive peteī ayvu onhendu, yvy'ā reia Efraim re oī va'e guive omombe'ua mba'emo vai oikoague.

<sup>16</sup> Perojapukai yvy regua ikuai va'e pe, pendu uka Jerusalém tetā re mba'emo oiko va'erā. Ha'e vy aipo peje: ‘Peteī yvy mombyry ete va'e gui ou tetā jokoarā kuery, ojapukai jogueruvy Judá yvy re tetā ikuai va'e ha'e javi re’, peje.

<sup>17</sup> Mba'eta ha'e kuery ojokopa 'rā Jerusalém mba'ety re opena va'e oarõa rami, ha'e pygua kuery xerovai ikuai rire”, he'i SENHOR.

<sup>18</sup> “Mba'eta pendereko vai ha'e mba'emo vai pejapoaty ojapo ha'e nunga pende'áry ou aguã rami. Pendere oiko ta va'e ma iro vaikue va'e, penekuraxō re peve 'rā oo.”

<sup>19</sup> Ai xekuraxō, xekuraxō! Xee narombaraetevei ma haxy! Ai xekuraxō renda! Xekuraxō otytypa rei oiny! Akyrirī aguã nda'evei, mba'eta xenhe'ē py aendu mimby guaxu joe opu'āa pygua omonhe'ēa va'e ramigua.

<sup>20</sup> Mba'emo vai oiko jepi rā omombe'ua, yvy jave re ombovaipaa ramo. Xerekoa voi ombovaipaa vyvoi, xapy'a'i py aīaty ivaipa.

<sup>21</sup> Raka'e peve nda'u aexa 'rā ha'e kuery bandeira omopu'ā rā, ha'e aendu 'rā mimby guaxu omonhe'ē rā?

<sup>22</sup> “Xevygua kuery ma na'inhakā porâveipa, ndaxe kuaavei ma rire. Ta'y kuery hi'arandu e'ŷ va'e ikuai, oendu kuaa ve'ŷ va'e. Mba'emo vai ojapo aguã re anho hi'arandu, ha'e rā iporā va'e ma ndojapo kuaavei.”

<sup>23</sup> Yvy re ama'ē rā natāi, mba'eve noī. Yva re ju ama'ē rā peteīve henda py naexakāi.

<sup>24</sup> Yvyty ikuai va'e re ama'ē rā oryryipa, yvy'ā ikuai va'e voi oryryipa avi.

<sup>25</sup> Ama'ē rā avakue jipoavei, guyra yvate rupi oveve va'e voi ojavapa ra'e.

<sup>26</sup> Ama'ēve ju rā yvy iporā va'ekue opyta ra'e tekao e'ŷa, ha'e tetā ikuai va'ekue oitypaa SENHOR renonde, ipoxy ete ramo.

<sup>27</sup> Mba'eta po rami SENHOR ijayvu: “Yvy jave rupi ivaipa 'rā. Ha'e rami teī pavē e'ŷ 'rā amokanhy.

<sup>28</sup> Ha'e nunga rupi yvy re ojae'oa 'rā, yva pytūmba 'rā guive. Mba'eta xeayvu ha'e anhembopy'a ae ma rire ndajeko rerovai 'rā, ha'ekue py ndajevyi 'rā guive.

<sup>29</sup> Kavaju árygua ha'e hu'y revegua kuery revovo gui tetā pygua kuery ojavapa. Ka'aguy re oikepa, yvy'ā ikuai va'e rupi oē. Guetā ikuai va'e ha'e javi oeja rive, avave rei noñavei.

<sup>30</sup> “Ha'e gui aŷ ma ndee tetā ombovaipa pyre, mba'e re tu guĩ rami rejapo? Mba'eta pytā va'e py renhemonde, ouro guigua remoī, nderexa rembojegua, ha'e renhemoporā rive. Ha'e rami teī remoaruā va'ekue ndere nda'ija'evei vy ndejukaxe okuapy.<sup>†</sup>

<sup>31</sup> Mba'eta peteī ayvu onhendu rā aendu kyrī va'e oikuavā'i ta va'e rami, jypyguia kyrī va'e raxy oendu vy ojexavai va'e rami haxē va'e. Ha'e va'e ma Sião memby raxē, ipytuē atā reve opo oupi vy aipoe'i va'e: ‘Aŷ nda'evei ete xevy! Mba'eta xenhe'ē py xekangy ma xejukaarā kuery gui’, he'i va'e.”

## 5

### *Jerusalém ha'e Judá pygua kuery ojejavya re ijayvuague*

<sup>1</sup> “Peiko-iko Jerusalém tetā py tape ikuai va'e rupi. Pixa pota aŷ, peikuaa pota, peka tetā mbyte rupi peteī'i ri jepe pejou aguã ava teko porā rupi oiko va'e, anhetē va'e rekaa. Mba'eta pejou ri ramo xee aperdoa 'rā tetā pygua kuery ha'e javi.

<sup>2</sup> Mba'eta ha'e kuery oura vy ‘Anhetē ete SENHOR oikove va'e rery rupi aura’ he'i va'eri anhetē rupi e'ŷ oura”, he'i.

<sup>3</sup> Ha'e gui SENHOR, anhetē rupi ikuai va'e e'ŷ ri ty'y rexaxe? Ndee rembojexavai teī ha'e kuery ma haxy noendui. Remomba teī ha'e kuery nonhemo'arandu ukai. Itaova gui hova ratāve va'e vy ndojevyxei ae ma ndevy.

<sup>†</sup> **4:30** Judá kuery ma Nhanderuete gui ojepe'apa vy kunha itavy va'e rami ikuai, amboae regua pe onhepytvō ukaxe vy. Ha'e rami teī ha'e kuery nda'ija'ei vy noipytyvōi.

<sup>4</sup> Xejeupe ae aipoa'e: "Iporiaukue'i anho rima nai'arandui, mba'eta ndoikuaai SENHOR guigua tape neĩ nguete oipota va'e.

<sup>5</sup> Ha'e nunga rupi aa 'rã yvatekueve ikuaria py, ha'e kuery reve xeayvu aguã. Mba'eta ha'e kuery nhi'ã oikuua 'rã SENHOR guigua tape ha'e nguete oipota va'e", ha'e va'ekue. Ha'e rami teĩ ha'e kuery voi peteĩ rami omopẽ okuapy canga, ha'e omondopa ijokuaarã omoĩ mbyre.\*

<sup>6</sup> Ha'e nunga rupi guary ka'aguy regua ojukapa 'rã, aguara'i guaxu tekao e'ŷa regua ombovaipa 'rã, ha'e xivi oma'ẽ mbegue 'rã oiny ha'e kuery retã yvýry. Ha'e ramo tetã gui peteĩ va'e rei oẽ ramo omboa'ypa 'rã, mba'eta gueko vaia ha'e itavy nhemia rupi ikuaiive tema oje'iviy.

<sup>7</sup> "Ha'e rami pendekuaia xee aexa vy mba'exa 'rã tu roperdoa? Mba'eta pendera'y kuery ma xerejapa vy oura 'rã okuapy nguete e'ŷ rery rupi. Ha'e kuery xee amoevyatãmba rire teĩ itavy rei okuapy, ono'õ ete okuapy kunhague ro py.

<sup>8</sup> Kavaju omongaru porãmby rami ha'ekue'-ekue'ŷ katy onha va'e rami peteĩ-teĩ opena rei 'rã okuapy oirũ ra'yxy re ae.

<sup>9</sup> Xee nda'u aeja rive 'rã ri ha'e rami ikuaria ambopaga e'ŷ re? Nambopagai 'rã teve ha'e rami ete ikuai va'e regua?" he'i SENHOR.

<sup>10</sup> "Tapeo ke uvaty ikuai va'e rupi, peitypa, va'eri ha'e javi e'ŷ ta'vy. Pemopẽ ke hakã, mba'eta SENHOR pegua e'ŷ ramo.†

<sup>11</sup> Mba'eta anhetê rupi e'ŷ Israel ha'e Judá kuery ikuai xerovai", he'i SENHOR.

<sup>12</sup> "Mba'eta SENHOR gui ojepe'apa vy aipoe'i: 'Ha'e'ŷ rima Nhanderuete', ha'e 'Mba'emo vai peteĩve henda py ndoikoi 'rã nhandere. Ndajaexai 'rã kyxe revegua, neĩ karuai', he'i okuapy.

<sup>13</sup> Profeta kuery eteve voi yvytu rami rive ikuai, mba'eta ayvu ndoguererekoi. Ha'e kuery nhomongyjeague ha'e kuery re ae ju 'rã ojeapa."

<sup>14</sup> Ha'e nunga rupi SENHOR Nhanderuete ixondaro reta va'e aipoe'i: "Ha'e rami ete ha'e kuery ijayvu ramo ndejuru py xeayvu amoĩ 'rã tata rami, ha'e rã ha'e kuery ma ajapo 'rã xakã rami huguepa aguã.

<sup>15</sup> Ne'ixa peẽ Israel kuery, mombyry gui ambou 'rã peteĩ regua pende'áry. Ha'e va'e kuery ma imbaraete va'e, yma guare ha'e ijayvu peikuaa e'ŷ va'e. Ha'e kuery ijayvu rã peẽ napendu kuaai 'rã", he'i SENHOR.

<sup>16</sup> "Ha'e kuery ru'y ryru ma yvyra rupa py ikua ojepe'a va'e rami nhomomba va'e. Ha'e va'e regua avakue ma ipy'a guaxuve va'e meme.

<sup>17</sup> Ha'e kuery ho'upa 'rã mba'emo pemono'õ ha'e mbojape pejapo va'ekue. Omomba 'rã pendera'y ha'e penderajy kuery. Ho'upa 'rã penerymba vexa'i ha'e vaka kuery. Uva ha'e figo penhotŷ va'ekue voi ho'u 'rã. Okyxé py oitypa 'rã peneretã ikorapa va'e pejeroviaague ha'e javi.

<sup>18</sup> Ha'e rami avi ha'e va'e ára teĩ xee noromomba katu'i 'rã", he'i SENHOR.

<sup>19</sup> "Ha'e gui ndevy pe ha'e kuery oporandu 'rã: 'Mba'e re tu SENHOR Nhanderuete ha'e nunga ha'e javi omoingo nhandere?' he'i 'rã ndevy. Ha'e ramo rembovai 'rã: 'Peẽ kuery xereja, ha'e pendeyvy re amboae ramigua tuuete pe pendekuai rire amboae regua kuery pe ju 'rã pendekuai pendeyvy re e'ŷ', 're 'rã'.

<sup>20</sup> "Po rami emombe'u Jacó ramymino kuery pe, ejapo Judá kuery oendupa aguã rami. Ha'e vy aipo're:

<sup>21</sup> 'Napene'arandui ha'e napendu kuaai va'e kuery, pendu ke aŷ pova'e ayvu, mba'eta penderexa oĩ teĩ ndapexai, ha'e pendeapyxa oĩ teĩ napendui va'e.

\* <sup>5:5</sup> Apy "Canga" he'ia ma Israel kuery reko re ijayvu vy, mba'eta vaka ombo'eapo va'eri inharõ teri, imãxo porã e'ŷ va'e rami ikuai (Deuterônômio 32.15; Atos 26.14). † <sup>5:10</sup> Apy ma Israel rovaigua kuery pe ijayvu.

<sup>22</sup> Xerenonde ndapejererokyjei 'rã teve?' ” he'i SENHOR. “Xerenonde teĩ napekyrirĩ 'rã ri? Mba'eta xee ma ita ku'i reia amoĩ va'ekue ye'ẽ jokoa raka'e rã peve guarã. Ha'e va'e re yai ojeapi-api teĩ ndojapoi 'rã mba'eve, hevovo ratã teĩ ndoaxai 'rã.

<sup>23</sup> Ha'e rã kova'e kuery ma opy'a re omoĩ xevy e'ŷ ikuai aguã, inhakã ratãa rupi. Ha'e rami vy xere opu'ã vy xerejapa oje'oivy.

<sup>24</sup> Mba'eta ha'e kuery aipo nde'i: ‘Aŷ ma nhandekuai 'rã SENHOR Nhanderuete gui jajererokyjea rupi, mba'eta ha'e ma ha'evea ára py oky ombou va'e, haku-a ypya ára ha'e opaa py voi, ha'e mba'emo nhamono'õ aguã ára ojeupity aguã ojapo va'e’, nde'i.

<sup>25</sup> Ha'e rami 'rãgue py penderekvaia ojapo mba'emo porã noĩvei aguã, pejejavya ojapo pendekuai porã aguã va'ekue novaõi aguã rami.

<sup>26</sup> “Mba'eta xevygua kuery mbyte ikuai mba'emo vai ojapo va'e. Peteĩ-teĩ joe oma'ẽ mbegue 'rã okuapy guyra'i ombo'axe va'e rami. Ha'e kuery nhuã ojayvy 'rã avakue ombo'a aguã.

<sup>27</sup> Guyra'i gaiola tynyẽ va'e rami ha'e kuery ropy tynyẽ 'rã jokoreague repy. Ha'e rami vy ipo'akave ha'e oguerekopave 'rã oje'oivy.

<sup>28</sup> Ikyrapa 'rã guive, hevyatãmba riae. Pavẽ gui heko vai raxave 'rã. Noipytyvõi 'rã tyre'ŷ kuery mba'emo oguerekoko'i aguã, iporiaukue'i reko re ndoikuaa potai 'rã guive.

<sup>29</sup> Xee nda'u aeja rive 'rã ri ha'e rami ikuia ambopaga e'ŷ re? Nambopagai 'rã teve ha'e rami ete ikuia re?” he'i SENHOR.

<sup>30</sup> “Ha'e gui ma mba'emo nhomondyipaarã ha'e nhomokanhyarã oiko yvy re.

<sup>31</sup> Mba'eta profeta kuery omombe'u merami rive 'rã xeayvu, ha'e ha'e kuery re sacerdote kuery onhemoirũ vy joguerekopoyi 'rã okuapy. Ha'e nunga ae rima xevygua kuery ojou porã okuapy. Ha'e rami teĩ mba'e tu ha'e kuery ojapo 'rã ovaõ ramo ha'e nunga opa aguã ára?”

## 6

### *Jerusalém tetã ojokopaa aguã re ijayvuague*

<sup>1</sup> “Benjamim kuery, penhamba ke Jerusalém tetã mbyte gui. Pemonhe'ẽ mimby guaxu Tecoa tetã py, ha'e Bete-Haquerém áry rupi pemoendy tata ikuua ukaarã, mba'eta kuaray ijanp'a'ia katy gui ou 'rã mba'emo ja'ea ha'eve'ŷ va'e nhomomba etearã.

<sup>2</sup> Mba'eta tetã porã Sião memby 'epyre ma xee aeja 'rã omboa'ypa pyrã.

<sup>3</sup> Ha'e ramo hovaigua kuery ou 'rã guymba kuery reve. Ijyvýry rupi ojapo 'rã oo'i. Ha'e vy peteĩ-teĩ guymba kuery omongaru 'rã ikuai aguã py ae.”\*

<sup>4</sup> “Peiko katu ke tetã re pepu'ã aguã! Pepu'ã ke, jaje'oi kuaray mbyte javé. Ai kore, nda'evei ete 'rã nhandevy! Ka'aru ma, ka'arua omokuaray'ã ma heravy.

<sup>5</sup> Pepu'ã ke, ha'e kuery rovai jaje'oi pyavyve. Nhambovaipa ha'e kuery ro ikorapa va'e onhemiaty”, he'i 'rã okuapy.<sup>†</sup>

<sup>6</sup> Mba'eta SENHOR ixondaro reta va'e aipoe'i: “Pejayapa yvyra, ha'e pemopu'ã Jerusalém pejoko aguã. Ha'e va'e tetã ma ambopaga va'erã ae oĩ. Mba'eta mbyte rupi ma nhomoingo axya anho ikuai.

<sup>7</sup> Yguarã ojo'o pyre yy oĩ riae va'e rami avi tetã re oĩ riae heko vai va'e. Ha'e py ikuai jojukaa ha'e mba'emo mbovaipaarã. Xerenonde ma imba'eaxyha'e ijai oĩ riae.

<sup>8</sup> Ndee Jerusalém, enhemo'arandu uka nho ke, ndegui xee ajepe'a e'ŷ aguã, ha'e gui xee rombovaipa vy oĩ ve'ŷ aguã rami rojapo e'ŷ aguã.”

### *Ha'e kuery ojejavya py hetã ombovaipaagaa aguã re ijayvuague*

<sup>9</sup> SENHOR ixondaro reta va'e aipoe'i: “Kyre'ŷ rupi oeka-ekaa 'rã Israel kuery okuave'i va'e, uva'a mono'õa hakã ikuai va'e mbyte rupi opovyvya rami”, he'i.

\* <sup>6:3</sup> Apy xondaro kuery Jerusalém jokoarã ou va'e re ijayvu. “Guymba kuery reve 'rã ou” he'ia ma xondaro kuery re ijayvu vy. † <sup>6:5</sup> Apy ma xondaro kuery jogueroayvu tetã re opu'ã aguã.

<sup>10</sup> Ha'e rami xeayvu vy ndeayvu amombe'u teĩ mama'e tu oendu 'rã? Ne'exa, ha'e kuery oappya ombotypa rire noendui 'rã. Ha'e kuery pe rã SENHOR ayvu ma ojeguarupy rami, noenduxei ramo.

<sup>11</sup> Ha'e rã xere ma oĩ SENHOR poxya amombe'u aguã. Xekane'õ ma aendu riae vy. Mba'eta aipoe'i: "Anhoẽ 'rã xepoxya kyrigue tape rupi ikuai va'e ha'e kunumigue nhomboaty va'e áry. Ha'e ramo ombo'apaa 'rã ime kuery ta'yxy reve, tujakue'i ha'e ikarẽmba rei'i va'e voi.

<sup>12</sup> Ha'e kuery rogue omboaxapaa 'rã amboae kuery pe, imba'ety ha'e ta'yxy oguerekva'ekue voi, kova'e yvy re ikuai va'e rovai xepo auipi ramo", he'i SENHOR.

<sup>13</sup> "Mba'eta peteĩ-teĩ ojou reta-retavea rupi ikuai, kyrigueve ha'e tujakueve voi. Profeta ha'e sacerdote kuery voi jokorepa rei okuapy.

<sup>14</sup> Ha'e kuery ma hi'a'iry rive 'rã omonguera xevyguia kuery. Ha'e vy 'Ha'evepa rei, mba'eve ndoikoi 'rã', he'i rive 'rã okuapy, ha'evepa rei ramo e'ŷ.

<sup>15</sup> Ha'e kuery oximba 'rã, mba'eta oxí e'ŷa py ojapo okuapy ojeguarupy, noxí kuaavei guive. Ha'e nunga rupi ho'apa 'rã amboae kuery ho'aague rami. Xee ambopaga rã onhepyxangapa 'rã", he'i SENHOR.

<sup>16</sup> "Po rami SENHOR ijayvu: 'Pepyta pe'amy tape joaxaa yvýry peexa pota aguã. Peporandu tape porã yma oĩ va'ekue re, ha'e tapeo ha'e va'e rupi ae. Ha'e rami vy pejou 'rã penenhe'ẽ opytu'u aguã', ha'e va'ekue teĩ ha'e kuery ma 'Ore ma ndorooi 'rã' he'i okuapy.

<sup>17</sup> Ha'e rami rã amoĩ peẽ kuery rekaoa rarõarã kuery. Ha'e vy aipoa'e: 'Pejapyxaka ke peiny mimby guaxu ipu rã guarã', ha'e teĩ ha'e kuery 'Ore ma noroendui 'rã', he'i okuapy.

<sup>18</sup> Ha'e rami rire yvy regua kuery, pendu ke. Peno'õ va'e kuery, peikuua pota ke xevyguia kuery mbyte oiko va'erã va'e re.

<sup>19</sup> Yvy regua kuery, pendu ke! Mba'eta ha'e kuery áry xee ambou 'rã mba'emo vai. Ha'e kuery ae ikuaixeague repy 'rã ambou, xeayvu re ndojapyxakai ha'e xeguigua lei omboyke okuapy rire.

<sup>20</sup> Ha'e nunga rupi mba'erã tu xea py ha'e kuery ogueru Sabá yvy guigua heakuã porã va'e ha'e yvyra aygue'i heakuã porã va'e yvy mombyryve guigua oapy aguã? Mba'eta xevy guarã peapy va'e ma xee ndarovy'ai, xee ndajou porãi peme'ẽ va'e."

<sup>21</sup> Ha'e nunga rupi SENHOR aipoe'i: "Ne'exa, xee amoĩ 'rã kova'e kuery reityarã. Ha'e ramo ho'apa 'rã okuapy, tuu kuery ha'e ta'y kuery voi. Ha'e katy'i rupi ikuai va'e voi omanomba 'rã, irũ kuery guive."

### *Kuaray ijapu'a'ia katy gui hovaigua kuery ou aguã re ijayvuague*

<sup>22</sup> SENHOR aipoe'i: "Peteĩ regua ou 'rã kuaray ijapu'a'ia katy gui, heta ete va'e regua opu'ã 'rã jogueruvy yvy apy gui.

<sup>23</sup> Guyrapa ha'e hu'y reve 'rã ou. Ha'e kuery ma porayvu va'e'ŷ, nhomboaxy kuaa va'e'ŷ. Ye'ẽ rami 'rã hevovo. Kavaju áry 'rã ou. Ha'e rami vy xondaro kuery hyxypa 'rã jogueruvy peẽ Sião pygua kuery re opu'ã okuapy aguã", he'i.

<sup>24</sup> "Ha'e kuery oua omombe'ua rã nhaendu vy nhandepo hu'ũmba. Nanhan-derekorãveipa, omemby oikuavã'i ta va'e raxy ramigua nhaendu guive.

<sup>25</sup> Tapeo eme mba'ety rupi, neĩ peguata eme tape rupi, mba'eta nhanderovaigua kuery kyxe reve ou. Jova-jovai re ikuai nhanemongyjeiarã.

<sup>26</sup> Xeretarã rajy kuery, pemoĩ ke ao penhemboaxya regua, ha'e penhembojere pejupy tanhimbu rupi. Pejae'o ipi'a peteĩ'i va'e re ojae'o va'e rami, pejexavaia gui ae. Mba'eta nhande'áry ou xapy'a 'rã nhanemombaarã."

### *Oiky'a'o nhea'ã rivea re ijayvuague*

<sup>27</sup> "Xevyguia kuery mbyte ndee romoĩ prata ky'a'oarã, ha'e oo imbaraete va'e rami, ha'e kuery reko rexia vy reikuua pota aguã.

**28** Mba'eta ha'e kuery ma naxenhe'ẽ renduia rupi tema ikuai, joekokue mombe'u rivea rupi guive. Overa va'e ha'e ferro rami rive ikuai iky'apa va'e vy.

**29** Mba'eta tata áry prata ky'a'oa oipeju atã tei chumbo anho rei opyta tata opa rire. Aiky'a'o nhea'ã rive, ha'e kuery mbyte gui heko vai va'e ndojepe'ai ramo.

**30** Ha'e kuery pe ma 'Prata ky'akue rive' 'ea 'rã, SENHOR omombopa ramo."

## 7

### *Templo re rive ha'e kuery ojeroviaa re ijayvuague*

**1** Po rami SENHOR oayvu ombou Jeremias pe:

**2** "Ei ke SENHOR pegua oo rokẽ py xeayvu remombe'u aguã. Ha'e vy aipo'ere: 'Judá regua kuery kova'e okẽ rupi SENHOR pemboete aguã peike va'e ha'e javi, pendu ke SENHOR ayvu', 're.'

**3** Mba'eta SENHOR ixondaro reta va'e Israel kuery ruete aipoe'i: "Pejeko rova ke amboae rami pendekuai aguã. Ha'e ramo xee ajapo 'rã kova'e tekao py pendekuaive aguã rami.

**4** Pejeroviave eme po ramigua ayvu rive: 'Apy ma oĩ templo SENHOR pegua, templo SENHOR pegua, templo SENHOR pegua', he'i va'e re pejerovia eme.

**5** Ha'e rami 'rãgue py pejeko rova ke amboae rami pendekuai aguã, ha'e peteĩ-tei ha'evea rami pejapo peneirũ kuery reve.

**6** Pejavyky rive eme amboae yvy regua, tyre'ŷ nei imeve'ŷ va'e kuery guive. Kova'e henda py pemoêve eme heko porã va'e ruguy, peiko eme guive amboae ramigua tuuete kuery re, pendejeupe ae pejapo vai e'ŷ aguã.

**7** Ha'e rami ri pendekuai ramo xee ajapo 'rã kova'e yvy re pendekuaive aguã rami, yma guive peneramoï kuery yvy raka'eve rã peve guarã ame'ẽ va'ekue py.

**8** "Ne'exa, peẽ kuery ma ayvu rive perovia va'e, pendevy mba'everã ovare'ŷ va'eri.

**9** Mba'e tu pejapo? Penemonda, pejojuka, pendetavy rei ha'e peura merami rive. Heakuã porã va'e peapy 'rã tuuete ramigua Baal pe, ha'e amboae ramigua tuuete peikuua e'ŷ va'e katy peo.

**10** Ha'e rire tei peju vy xerenonde pepu'ã 'rã pekuapy kova'e oo xerery oĩaty py. Ha'e vy aipopeje 'rã: 'Jaa jepe ma', peje tei mba'emo vai pejapove tema rive.

**11** Kova'e oo xerery oĩaty ma imonda va'e kuery onhemiaty rami teve peikuua? Ne'exa, xee ma ha'e nunga ha'e javi aexapa", he'i SENHOR.\*

**12** "Ha'e gui tapeo opy xevygua Siló tetã py oĩague katy. Ha'e py ma jypy'i xerery amoĩague. Ha'e gui pexa ke ha'e py ajapo va'ekue, xevygua Israel kuery heko vaiague re ambopagaague.\*

**13** Aŷ ma ha'ekue nunga ae peẽ voi pejapo avi", he'i SENHOR. "Pendevy xeayvu jepi ko'ẽ rai guive tei napendui. Peẽ kuery xee roenoï tei peẽ naxembovai.

**14** Ha'e ramo Siló tetã re ambovaipaague rami ambovaipa avi 'rã kova'e oo xerery oĩaty re, ha'e va'e re rive pejerovia ramo, ha'e kova'e tekao re guive, pendevy ha'e peneramoï kuery pe ame'ẽ va'ekue ri.

**15** Ha'e rami vy peẽ kuery roipe'apa 'rã xerenonde gui, pendervy kuery Efraim regua aipe'apaague rami ae ju."

### *Guetarã kuery re profeta ojerure e'ŷ aguã re ijayvuague*

**16** "Ha'e nunga rupi ejerureve eme kova'e kuery re, ejapukaive eme, enhea'ãve eme renhembo'ea py, mba'eta xee naendui 'rã.

**17** Ndee nda'u nderexai teve ha'e kuery ojapo va'e Judá re tetã ikuai va'e ha'e Jerusalém py tape ikuai va'e rupi?

\* **7:11** Mateus 21.13, Marcos 11.17, Lucas 19.46

\* **7:12** Ha'e kuery tuuete mboae ramigua re ikuai ramo SENHOR omboavaipa raka'e Siló tetã (1 Samuel 4.1-11).

18 Mba'eta ta'y kuery ogueru 'rā yxakā, ha'e tuu kuery ju omoendy 'rā tata. Ha'e rā kunhague ma omoapomo 'rā trigo mbojape ojapo aguā xyete ramigua yva pygua peguarā.<sup>†</sup> Tuuete kuery mboae pe voi ome'ē 'rā mba'emo rykue, xembopoxy aguā rami rive.

19 Ha'e rami avi xee ae ri nda'u ha'e kuery ombopoxya? Tyrā pa ha'e kuery ae e'ŷ teve onheroangeko, oximba rei aguā rami?" he'i SENHOR.

20 Ha'e nunga rupi SENHOR Nhanderuete aipoe'i: "Ne'exa, kova'e tekao áry anhoē 'rā xepoxya ha'e ajou vaia, avakue ha'e mymba ikuai va'e áry, yvyra ikuai va'e ha'e mba'emo aju yvy gui oiko va'ekue áry guive. Ha'e gui ha'e nunga okai vy ndoguei 'rāe."

### *Mba'emo nhame'ē jepia rive mba'everā ndovareia re ijayvuague*

21 SENHOR ixondaro reta va'e, Israel kuery ruete aipoe'i: "Mymba peapy reve peme'ē va'erā peru teī pendejeupe ae topyta ho'okue pe'u aguā.

22 Mba'eta jypy'i Egito yvy gui peneramoī kuery anoēmba jave py ma ndaxeayvui va'ekue mba'emo oapy aguā re, neī mba'eve name'ē ukai xejeupe.

23 Ha'e rami 'rāgue py pov'a'e nunga anho ajapo uka ha'e kuery pe. Aipoa'e: 'Pejapyxaka ke xeayvu re. Ha'e ramo xee aiko 'rā Penderuete, ha'e rā peē ma xevygua kuery 'rā peiko. Peiko ke ajapo uka va'ekue ha'e javi rupi, pendekuai porā aguā', ha'e va'ekue.<sup>‡</sup>

24 Ha'e rami teī ha'e kuery ndojapyxakai, noendu potai. Ha'e rami vy ha'e kuery ae onhemongetaa rupi ikuai, inhakā ratā reia rupi guive. Ha'e rami vy guakykue katy ojevy, guenonde katy ndooi.

25 Egito gui peneramoī kuery anoēmba ára guive aŷ peve pendea py ambou xerembiguai profeta kuery, ko'ē nhavō, ko'ē rai guive ambou.

26 Ha'e rami teī peē kuery ndapejapyxakai xeayvu re, ndapeikuaa potai guive. Ha'e rami 'rāgue py peneakā ratā va'e vy peneramoī kuery gui nda'eveive va'e pejapo.

27 "Ha'e nunga rupi ha'e kuery pe xeayvu ha'e javi remombe'u teī ha'e kuery ndojapyxakai 'rā ndeayvu re. Renoī teī nanembovai 'rā okuapy.

28 Aipo'ere ha'e kuery pe: 'Peē kuery ma SENHOR Penderuete ayvu re peikuua pota va'e'ŷ, napenhemo'arandu ukai guive. Ha'e ramo anhetē va'e nonhenduvei ma, pendejuru py noīvei ma', 're."

### *Judá kuery re Nhanderuete nopenavei aguā re ijayvuague*

29 Peē Jerusalém pygua kuery, pejayapa ke pende'a xevy pe iky'a e'ŷ va'erā pemboaxa va'ekue, ha'e pejae'o peovy yvyty yvateve va'e áry katy. Mba'eta SENHOR nopenavei ma 'rā peē aŷgua kuery re, pendejou vai vy napendereraa jepevei ma 'rā guive.

30 Mba'eta SENHOR aipoe'i: "Xerenonde Judá kuery heko vai okuapy. Ha'e rami vy xerery oīaty py omoī okuapy mba'emo ra'angaa ojeguarupy, omongy'apa aguā rami rive.

31 Hinom ra'y rekoague yvyugua py voi ojapo avi altar Tofete 'epy va'e, ha'e py gua'y kuery ha'e guajy kuery oapy aguā. Ha'e ramigua ma xee ajapo uka va'ekue'ŷ, neī nanhembopy'ai guive.

32 Ne'exa, ou 'rā ára ha'e va'e pe 'Tofete' nda'eavei aguā, neī 'Hinom ra'y rekoague yvyugua' nda'eavei voi. Ha'e rami 'rāgue py 'Yvyugua jojukaaty' 'ea 'rā. Mba'eta Tofete py ma ojatya 'rā omano va'ekue retekue, amboae henda py nda'evei ramo", he'i SENHOR.

33 "Ha'e ramo ha'e kuery retekue opyta 'rā guyra yvate rupi oveve va'e ha'e mymba yvy guy rupigua ho'u va'erā. Ha'e nunga mondyiarā ndoikoi 'rā guive.

34 Mba'eta Judá re tetā ikuai va'e ha'e Jerusalém py tape ikuai va'e rupi amombytu'upa 'rā ov'y a rei va'e ayvu, omenda va'erā avakue ha'e kunhague ayvu guive. Ijyvy ojeapo 'rā omboavaipa pyre."

<sup>†</sup> 7:18 Apy "Xyete yva pygua" he'ia ma Babilônia pygua kuery xyete "Rainha" 'epy va'e re ijayvu vy (44.17-19, 25).

<sup>‡</sup> 7:23 Egito gui Nhanderuete ha'e kuery oguenoē jave py ma onhe'ē rendu aguā re anho ranhe ijayvu, mba'emo ome'ē aguā re'ŷ (Êxodo 19.3-6). Mba'eta mba'emo ixupe nhame'ēa gui oipotave nhanhe'ē rendu (6.20; Salmo 40.6-8; Isaías 1.11-17).

## 8

<sup>1</sup> SENHOR aipoe'i: "Ha'e va'e jave ma Judá regua huvixa kuery ha'e yvatekueve kāgue oguenoēmbaa 'rā onhono porāague gui, sacerdote ha'e profeta kuery, ha'e Jerusalém pygua kuery kāgue ha'e javi.

<sup>2</sup> Ha'e rami vy omoaīmbaa 'rā kuaray ojopea ha'e jaxy rexakāa rupi, ha'e yva re ikuai va'e ha'e javi guýry rupi, mba'eta ha'e nunga ha'e javi ha'e kuery omboete vy ha'e va'e pe ikuai rire, hakykue rupi mba'emo re oporandua rupi oo, ha'e henonde guenapy'ā re oī rire. Ha'e va'e rire ma ikāgue nomono'ōave imbokuapyi 'rā, nonhono porāa jevyvei 'rā guive. Mymba reposi rami rive 'rā opyta yvy re.

<sup>3</sup> Kova'e kuery heko vai va'e okuave va'e amoāi 'rā opa rupi. Ha'e ramo ha'e kuery oikovexe 'rāgue py omano voice 'rā okuapy", he'i SENHOR ixondaro reta va'e.

### *Nhombopaga aguā re ijayvuague*

<sup>4</sup> Aipo'ereve tema: "Po rami SENHOR ijayvu: Avakue ho'a vy nda'u nopus'ā jevyi 'rā ri? Tape ojavy va'ekue nda'u ndojevyi 'rā ri guape py?

<sup>5</sup> Ha'e rami teī mba'exa tu Jerusalém pygua kuery ojeroviaa gui ojepe'a ma vy oeja riae ri? Mba'eta ha'e kuery ojekorea rupi ae tema ikuai, ndojevyxei vy.

<sup>6</sup> Xee ajapyxaka, aendu pota ainy teī ha'e kuery nda'ijayvui ae ha'evea ramigua re. Avave rei ndoikoi heko vaia gui onhemboaxy vy 'Mba'e tu ajapo?' he'i va'e. Mba'eta peteī-teī ma guape rupi ae oiko atā 'rā, kavaju joe opu'āa katy onha atā va'e rami.

<sup>7</sup> Ha'e rā cegonha yvate rupi oveve va'e ma oikuaa 'rā ojevy aguā ára. Pyku'i'i, mbyju'i ha'e grou voi oveve ovvy aguā ára re oikuaa pota va'erā meme. Ha'e rā xevygua kuery ma ndoikuaa potai xee SENHOR ambopaga ta rā.

<sup>8</sup> Mba'exa tu peē kuery aipopeje: 'Nhande kuerya py SENHOR guigua lei oī ramo nhane'arandupa va'e', peje? Mba'eta lei re nhombo'e va'ety kuery lei oguerova vy penembotavy.

<sup>9</sup> Ha'e ramo hi'arandupa va'ekue oxīmba 'rā, ombo'apaa rā ndaekorāvei rei vy. SENHOR ayvu ha'e kuery oeja ma ramo mba'e nunga 'arandu tu ha'e kuery re oī?

<sup>10</sup> Ha'e nunga rupi ta'yxy kuery amboaxa 'rā amboae kuery pe, imba'ety guive amboaxapa 'rā ija pyaurā pe. Mba'eta peteī-teī jokorepaa rupi ikuai, yvyī'igueve ha'e yvatekueve voi. Profeta ha'e sacerdote kuery ma apu rupi ikuai va'e meme.

<sup>11</sup> Ha'e kuery ma hi'a'iry rive 'rā omonguera xevygua kuery. Ha'e vy 'Ha'evepa rei, mba'eve ndoikoi 'rā', he'i rive 'rā okuapy teī ha'evepa rei ramo e'ŷ.

<sup>12</sup> Ha'e nunga rupi ha'e kuery omoxīmbaa 'rā, mba'eta oxī e'ŷa py ojapo okuapy ojeguarupy, noxī kuaavei guive. Ha'e nunga rupi ho'apa 'rā amboae kuery ho'aague rami. Xee ambopaga rā onhepyxangapa 'rā okuapy", he'i SENHOR.

<sup>13</sup> "Mba'eta xee amokanhymba 'rāe. Noīvei ma 'rā uva'a hakā re, neī figo hi'y re. Hogue voi overepa ma. Xeayvu ae ma ha'e kuery áry ha'e nunga ou aguā re", he'i SENHOR.

<sup>14</sup> Mba'e re tu apy teri jaguapy nhainy? Pendeaty ke tetā ikorapa va'e py jaikepa aguā nhamanomba aguā ha'e py. Mba'eta SENHOR ijayvu ae ma nhandejuka aguā re, jay'u aguā ome'ē ma yy veneno re irū va'e, SENHOR rovai jajejavvy rire.

<sup>15</sup> Mba'emo porā nharō teī iporā va'e jipoi, jakuera aguā ára 'rāgue py nhanemongy-jepaarā ou.

<sup>16</sup> Dā tetā guive onhendu ma nhanderovaigua kuery renda kavaju pytuē. Yvy ha'e javi rupi oryryipa hymba kavaju onhendua gui. Ha'e kuery ou 'rā, ombovaipa 'rā nhandeyvy, yvy re mba'emo ikuai va'e ha'e javi guive, tetā ha'e ha'e pygua kuery ha'e javi reve.

<sup>17</sup> "Mba'eta penembyte ambou 'rā mboi vaikue ha'e popia va'e, imomāxoarā jipoi 'rā guive. Ha'e ramo pendexu'upa 'rā", he'i SENHOR.

### *Hetarā kuery ikuai axy rā profeta ndovy'aiague*

<sup>18</sup> Ai, xee anhembopy'a porā kuaa va'e rire xeporiaua gui! Xekuraxō voi ikangypa ma.  
<sup>19</sup> Mba'eta xeretarā rajy kuery yvy mombyrya py ikuiai py ojapukai okuapy: "Siāo tetā py nda'u SENHOR noīvei teve? Noīvei teve ha'e py Nhanderuvixave?" he'i okuapy.

Ha'e ramo aipoe'i: "Ha'e rami avi mba'e re tu xembopoxy pekuapy mba'emo ra'angaa pejapo va'ekue py, ha'e amboae regua kuery pegua ta'angaa pemboetea py?" he'i.

<sup>20</sup> Oaxa ma mba'emo nhamono'ō aguā ára, opa ma haku-a teī nhande ma ndajaa jepei teri.

<sup>21</sup> Xeretarā kuery ikuai axy rā xee nda'evei ete aiko, ajae'o aikovy ha'e kuery re. Anhemondyi reia anho aendu.

<sup>22</sup> Gileade yvy re jipovei teve moā? Ha'e py nhanepoanoarā jipovei teve? Mba'exa tu ndoikoi ri xeretarā kuery mongueraarā?

## 9

<sup>1</sup> Xeakā yvu ramigua ojeapo vy xerexay oē riae va'e rire ara py ha'e pyávy xee ajae'o 'rāgue xeretarā kuery regua omanogue re.

<sup>2</sup> Ha'e rami e'ŷ vy tekao e'ŷa py oguata va'e okeaty ramigua areko va'e rire xeretarā kuerya gui mombyry 'rāgue aī, ha'e kuerya gui ajepe'a 'rāgue. Mba'eta ha'e kuery ma itavy rei ha'e nhombotavy rei va'e meme.

<sup>3</sup> SENHOR aipoe'i: "Ha'e kuery ma guyrapa rami oapekū omokarē va'e, ijapu aguā rive. Yvy re imbaraeteve 'rā oje'oviy va'eri anhetē rupi e'ŷ. Heko vaive aguā katy oove tema 'rā, ha'e rā xee ma ndaxekuaai okuapy.

<sup>4</sup> Penheangu ke peteī-teī peneirū kuery gui, pejerovia eme penderyvy ae re teī. Mba'eta penderyvy kuery nhombotavypa reia rupi anho ikuai, ha'e peneirū kuery omombe'u rive 'rā joekokue ramigua.

<sup>5</sup> Peteī-teī ojojai rei 'rā ojea katy'i rupi ikuai va'e, ha'e anhetē va'e rupi e'ŷ 'rā ijayvu. Apu rupi rive onhembo'e 'rā ijayvu aguā re. Ikane'ō 'rā okuapy mba'emo vai ojapoa rupi.

<sup>6</sup> Anhetē rupi e'ŷ ikuai, anhetē rupi e'ŷ vy ndaxekuaa potai guive", he'i SENHOR.

### *Ha'e kuery operdepa, ha'e escravo-rā ogueraapaa aguā re ijayvuague*

<sup>7</sup> Ha'e nunga rupi SENHOR ixondaro reta va'e aipoe'i: "Ne'exa, ha'e kuery xee aiky'a'o vy aa'anga 'rā. Tyrā pa marā rami pa areko ta xevygua kuery?

<sup>8</sup> Mba'eta ha'e kuery apekū ma hu'y jojukaarā ramigua oī, nhombotavya rupi rive ijayvu va'e vy. Ojuru py ijayvu 'rā oirū kuery reve ikuai porā aguā re, ha'e rā opy'a py ma omoī 'rā ojuka aguā.

<sup>9</sup> Xee nda'u aeja rive 'rā ri ha'e rami ikuiai ambopaga e'ŷ re? Nambopagai 'rā teve ha'e rami ete ikuai va'e regua?" he'i SENHOR.

<sup>10</sup> Xee ajae'o 'rā yvyty ikuai va'e re, xerexay vaipa 'rā nhuūndy tekao e'ŷa rupi ikuai va'e re. Mba'eta okaipa ma, ha'e avave rei ndoaxaavei ma ha'e rupi. Vaka voi nonhe'ē nhenduvei ma ha'e py. Guyra yvate rupi oveve va'e ha'e mymba kuery okanhymba ma oje'oviy.

<sup>11</sup> Mba'eta aipoe'i: "Xee ajapo 'rā Jerusalém tetā mba'emo ra'ykuerā rive, ha'e jaguatuvy nhe'ē ikuai atyrā. Ha'e Judá yvy re tetā ikuai va'e ma ajapo 'rā tekoague oī aguā, avave rei noīavei aguā rami", he'i rire.

<sup>12</sup> Ha'e gui mava'e ava nda'u hi'arandu va'e ha'e nunga oendu kuaa aguā, ixupe SENHOR oayvu oikuua uka rā? Mava'e nda'u omombe'u porāve kuaa 'rā mba'e re pa yvy ivaipa ha'e okai tekao e'ŷa rami, ha'e rupi avave rei ndoaxaavei aguā rami?

<sup>13</sup> Ha'e ramo SENHOR ombovai: "Mba'eta ha'e kuery rekorā xeguigua lei aeja va'ekue gui ojepe'apa rire. Ha'e kuery ndojapyxakai xeayvua re, neī ha'e va'e rupi nda'ikuai guive.

<sup>14</sup> Ha'e rami 'rāgue py inhakā ratā va'e vy ta'angaa Baal ikuai va'e re rive ikuai, tuu kuery ombo'eague rami ae", he'i.

<sup>15</sup> Ha'e nunga rupi SENHOR ixondaro reta va'e, Israel kuery Ruete aipoe'i: "Ne'exa, ha'e kuery xee amongaru 'rã veneno re, ha'e yy veneno re irũ va'e ame'ẽ 'rã oy'u aguã.

<sup>16</sup> Amoaĩmba 'rã yvy regua ha'e kuery tuu kuery oikuua e'ŷ va'e ikuia rupi. Ha'e gui ha'e kuery rakykue amondouka 'rã kyxe revegua, amomba peve", he'i.

<sup>17</sup> SENHOR ixondaro reta va'e aipoe'i: "Pendu ke! Penoĩ ke kunhague joguerojae'o kuaa va'e, peka uka ou aguã", he'i.

<sup>18</sup> Tove ha'e kuery tou pojava, nhande áry rupi tajoguerojae'o rei nhendu, nhande voi nhanderexaya ha'e nhanderexa gui yy oẽ vaipa aguã.

<sup>19</sup> Mba'eta Sião tetã gui onhendu peteĩ ojae'o va'e: "Nhanemoingo axya ha'e nhanemoximbaa ete ma! Mba'eta jaeja 'rã nhandeyvy, nhanderovaigua kuery nhanderekoa ombovaipa rire.

<sup>20</sup> Peẽ kunhague, pendu ke SENHOR ayvu, pejapyxaka ijuru gui onhendu va'e re. Pembo'e penememby kuery ojae'o avi aguã re, peteĩ-teĩ pembo'e 'rã peneirũ kuery ojae'o ete aguã.

<sup>21</sup> Mba'eta manoa oike ma nhande janela ikuai va'e rupi, oo tuvixave va'e rupi guive. Ha'e rami vy omomba ma kyrigue tape rupi, kunumigue tetã mbyte rupi ikuai va'ekue guive ojuka."

<sup>22</sup> Ndeayvu ke: "SENHOR aipoe'i: 'Avakue re'õgue mba'emo repoxi rami 'rã ikuai mba'ety rupi, mba'emo ra'yĩ imono'õa kuery rakykue rupi ho'aa rami. Ha'e rã ndoikoi 'rã avave rei imono'ðarã'", 'ere.

### *Nhanderuete jaikuua rupi anho jarovy'a aguã re ijayvuague*

<sup>23</sup> SENHOR aipoe'i: "Tove hi'arandu va'e toguerovy'a rei eme o'arandua, imbaraete va'e toguerovy'a eme ombaraetea, ha'e oguerekopa rei va'e ma toguerovy'a eme mba'emo oguerekopaa.

<sup>24</sup> Ha'e rami 'rãgue py mba'emo rerovy'aa tovy'a xekuua ha'e SENHOR aikoa oikuua re anho. Mba'eta xee yvy re aexa uka va'e ma anhomboaxya, anhetẽ rupi ajoguerekoa ha'e teko porã. Mba'eta xee arovya va'e ma ha'e nunga anho", he'i SENHOR.\*

<sup>25</sup> SENHOR aipoe'ive ju: "Ne'exa, ovaẽ ta ma ouvy ára ambopaga aguã opire omboi uka va'ekue ha'e omboi uka e'ŷ va'e kuery ha'e javi.

<sup>26</sup> Ha'e kuery ma Egito pygua, Judá ha'e Edom pygua kuery, Amom ha'e Moabe pygua kuery, o'a ojaya apu'a'i va'e, ha'e yvy piru reia rupi ikuai va'e ha'e javi. Mba'eta yvy regua ma guive rã opire omboi uka e'ŷ va'e ikuai, Israel kuery voi opire omboi uka e'ŷ va'e rami ikuai opy'a py."

## 10

### *Mba'emo ra'angaa rami e'ŷ SENHOR oikoa re ijayvuague*

<sup>1</sup> Peẽ Israel kuery, pendu ke SENHOR pendevy ijayvu rã.

<sup>2</sup> SENHOR aipoe'i: "Penhembo'eve eme amboae regua kuery reko rami pendekuai aguã re, penhemondyi eme guive yva re hexa pyrã oiko va'e gui, ha'e nunga gui amboae regua okyjepa rei teĩ.

<sup>3</sup> Mba'eta yvy regua kuery reko ma mba'everã ndovarei. Mba'eta ha'e kuery ma ka'aguy re oo vy ojaya 'rã peteĩ yvyra, ha'e gui hembiapo kuaa va'e ma omoatyrõ 'rã heravy haxa py.

<sup>4</sup> Ha'e guiombojegua 'rã prata ha'e ouro py, ha'e gui martelo py ombota-mbota 'rã karavo re ho'a e'ŷ aguã.

<sup>5</sup> Ha'e nunga ijayvu va'e'ŷ vy mba'emo ra'angaa ma pepino-ty py guyra mondyiarã omo'ã mbyre rami rive hi'aĩ. Oguata va'e'ŷ vy amongue ogueraa ramo mae ma 'rã oo. Ha'e

\* **9:24** 1 Coríntios 1.31, 2 Coríntios 10.17

nunga gui pekyje eme, mba'eta pendevy ndojapo vai 'rã, hexe noĩ guive pendevy ojapo porã aguã", he'i.

<sup>6</sup> Ha'e rã ndee SENHOR, avave rei ndoikoi 'rã ndee ramigua. Ndee ma ndeyvate, nderery voi ipo'aka ete va'e.

<sup>7</sup> Ndee ma yvy regua kuery ruvixave. Mava'e tu ndojererokyjei 'rã neronden? Mba'eta ha'e rami aguã ma ndevygua ae. Ha'e rã yvy regua hi'arandukueve mbyte ndoikoi 'rã ndee ramigua, ha'e kuery openaa ha'e javi rupi tei.

<sup>8</sup> Ha'e kuery ma nai'aranduvei ha'e na'inhakã porãvei va'e meme. Ha'e kuery mbo'ea ma mba'everã ndovarei, yvyra pëgue oikove va'e'ý vy.

<sup>9</sup> Ha'e nunga peguarã Társis gui ogueru 'rã prata ombole pyre, ha'e Ufaz yvy gui ogueru 'rã ouro. Ta'angaa ikuai va'e ma hembiapo kuaa va'e rembiapo, ha'e ouro re ombo'eapo va'e opo py ojapo va'ekue rive. Omonhemonde 'rã heravy hovy va'e ha'e púrpura guigua py. Ha'e nunga ma avakue hembiapo kuaa va'e rembiapo meme.

<sup>10</sup> Ha'e rã SENHOR Nhanderuete ma anhetã ete va'e. Nhanderuete oikove va'e oiko, Nhanderuvixave imarã e'ý va'e. Ipoxy ramo yvy oryryipa 'rã, yvy regua kuery voi ndogueropo'akai 'rã ipoxya.

<sup>11</sup> "Ha'e kuery pe aipo'ere: 'Penderuete kuery ramigua ma yva ha'e yvy apoare e'ý vy okanhymba 'rã yvy gui, ha'e yva guýry gui.'

<sup>12</sup> Mba'eta yvy ma SENHOR ae ojapo raka'e opo'akaa rupi. O'arandua rupi onhono yvy, ha'e rã yva ma oikuaapaa rupi oipyo.

<sup>13</sup> Ha'e ma yapu onhendu atã aguã rami ojapo ramo yva re yy oĩ va'e omyimb'a 'rã, ha'e yvy apy gui opu'ã 'rã ouvy yvyxí. Omoingo avi 'rã overa va'e oky aguã, yvytu guive oguenoẽ 'rã oïaty gui.

<sup>14</sup> Ha'e rã avakue ma nai'arandui ha'e mba'eve ndoikuuaii va'e meme. Ouro re ombo'eapo va'e kuery voi oximb'a va'erã meme ikuai mba'emo ra'angaarã ojapoague re, mba'eta ta'angaa ikuai va'e avi anhetã va'e'ý meme, ipytuẽ va'e'ý guive.

<sup>15</sup> Ha'e nunga ma mba'everã ndovarei va'e, ojojai rei pyrã rive. Nhombopagaa ára py okanhymba 'rã.

<sup>16</sup> Ha'e rã Jacó Ruete ma ha'e rami e'ý. Mba'eta ha'e ma opa mba'e moingoare, Israel kuery voi ixupegua ikuai. Hery ma SENHOR ixondaro reta va'e.

### *Judá yvy ombovaipaa ague re ijayvuague*

<sup>17</sup> Ndee tetã ojokopaa va'e py nderekoa va'e, eupi ke yvy gui nemba'e rei-rei reraa aguã.

<sup>18</sup> Mba'eta SENHOR aipoe'i: "Ne'exa, aý ma amoëmba 'rã xeyvy re ikuai va'e, amoingo axypa 'rã jexavaia oendu aguã", he'i.

<sup>19</sup> Nda'evei ete xevy, apave'i avy! Xeai ma haxy vai ete. Ha'e ramo xee aipoa'e: "Kova'e haxy ma ajexavai aguã ou, aropo'aka va'erã", ha'e.

<sup>20</sup> Xeroguy ombovaipaa ma, ixã voi omondopaa. Xera'y kuery oopa ma, nda'ikuaivei. Avave rei ndoikoi xeroguy moatyrõ jevyarã, nei ijao'iarã omoõ ju va'erã.

<sup>21</sup> Mba'eta joe opena va'e kuery ma nai'arandui vy ndoekavei okuapy SENHOR. Ha'e rami vy nda'ikuaivi porãvei, hymba kuery oaõmb'a guive.

<sup>22</sup> Ne'exa, omombe'ua peteĩ ayvu! Mba'eta kuaray ijapu'a'ia katy gui ou oiny hevovo rei va'e. Ha'e nunga ma Judá regua tetã mbovaipaarrã ou, jagua-tuvy nhe'ẽ ikuai atyrã rive omombyta aguã.

<sup>23</sup> SENHOR, xee aikuua avave rei ndoiporavo kuaai 'rãa oiko aguã, oguata va'e ndoiporavo kuaai oguata aguã.

<sup>24</sup> SENHOR, xembopaga tei ke aropo'aka peve'i, ndepoxya py e'ý, ovare va'e'ý xee apyta e'ý aguã.

<sup>25</sup> Yvy regua kuery ndekuaa e'ŷ va'e áry enhoẽ ndepoxya, nderery rupi ojapukai e'ŷ va'e kuery áry. Mba'eta ha'e kuery ma omomba ma Jacó kuery, omokanhymba ha'e hekoague omboavaipa.

## 11

*SENHOR guexeve guarã ojapo va'ekue rupi e'ŷ ikuia re ijayvuague*

<sup>1</sup> Jeremias pe SENHOR oayyu ombou vy aipoe'i:  
<sup>2</sup> “Endu ke xereve guarã ajapo va'ekue re ayvu oĩ va'e, ha'e emombe'u porã avakue Judá ha'e Jerusalém py ikuai va'e pe.

<sup>3</sup> Ha'e vy aipo're: ‘Po rami SENHOR Israel kuery ruete ijayvu: Ayvu vaipy oiko 'rã avakue kova'e ayvu xereve guarã ajapo va'ekue regua noendu potai va'e.

<sup>4</sup> Ha'e va'e ayvu ma peneramoĩ kuery pe xee aeja va'ekue Egito yvy gui anoẽmba jave, ha'e tatakua ferro guigua gui. Ha'e vy aipo'a'e va'ekue: “Pendu ke xeayvu, ha'e pejapopa pendevy ajapo uka va'e ha'e javi. Ha'e rami vy 'rã xevygua kuery pendekuai, ha'e rã xee ma aiko 'rã Penderuete.

<sup>5</sup> Ha'e rami vy 'rã ajapo xeayvuague peneramoĩ kuery yvyrã kamby ha'e ei oata e'ŷa ame'ẽ aguã re, aŷ ojekuaa rami”, ha'e va'ekue’ ”, he'i.

Ha'e ramo xee ambovai vy aipoa'e: “Ha'eve va'e, SENHOR!”

<sup>6</sup> Ha'e gui SENHOR aipoe'ive ju xevy: “Emombe'u ke pova'e ayvu ha'e javi Judá regua tetã ikuai va'e, ha'e Jerusalém py tape ikuai va'e rupi. Ha'e vy aipo're: ‘Pendu ke pova'e ayvu Nhanderuete guexeve guarã ojapo va'ekue regua, ha'e pejapopa', 'ere.

<sup>7</sup> Mba'eta Egito yvy gui peneramoĩ kuery anoẽ guive kova'e ára peve xeayvu pendevy ko'ẽ nhavõ, ko'ẽ rai guive aipoa'e: ‘Pendu na xeayvu', ha'e.

<sup>8</sup> Ha'e rami teĩ ha'e kuery noendu potai, ndojapyxakai. Ha'e rami 'rãgue py peteĩ-teĩ inhakã ratãa rupi ikuai. Ha'e rami rire ha'e kuery áry ambou ayvu vai xeayvuague ha'e javi, mba'eta ha'e kuery pe ajapo uka teĩ ndojapoi rire.”

<sup>9</sup> SENHOR aipoe'ive ju xevy: “Judá ha'e Jerusalém pygua avakue ma nhemi rupi jogueroayvu teko vai rupi.

<sup>10</sup> Mba'eta yma tamõi kuery xeayvu re ndojapyxakaxeague rami ae ju ikuai, ha'e rami vy amboae ramigua tuuete re ju ovapa ixupe ikuai aguã. Ha'e rami py Israel ha'e Judá kuery ma tamõi kuery pe xereve guarã ajapo va'ekue rupi e'ŷ ikuai.”

<sup>11</sup> Ha'e nunga rupi SENHOR aipoe'i: “Ne'exa, ha'e kuery áry xee ambou 'rã mba'emo vai, ndoo jepe kuaai aguã rami. Xevy pe ha'e kuery ojapukai teĩ xee naendui 'rã.

<sup>12</sup> Ha'e ramo Judá regua tetã ha'e Jerusalém py ikuai va'e ovapa 'rã tuuete ramigua kuery re, ha'e va'e pe heakuã porã va'e oapy ha'e ojapukai okuapy vy. Ha'e rami teĩ tuuete kuery ma neĩ peteĩve henda py ndogueraa jepei 'rã ikuai axya gui.

<sup>13</sup> Mba'eta peẽ Judá pygua kuery, penderuete ramigua rive heta perek, peteĩ-teĩ tetã py. Jerusalém tetã py voi peteĩ-teĩ tape py heta pejapo altar ojeguarupy Baal peguarã rive heakuã porã va'e peapy aguã.

<sup>14</sup> Ha'e nunga rupi ndee Jeremias, ejerureve eme ha'e kuery re, ejapukaive neĩ enhembo'eve eme, mba'eta xevy pe ha'e kuery ojapukai teĩ xee naendui 'rã heko vaiaty káuxa.

<sup>15</sup> “Xevygua opy rupi xerembiayvu oiko teĩ opa marã ojejavva rupi rive. Ndee xerembiayvu, renhemboayvua ha'e xo'o reapy va'e ndeky'a'o 'rã ri ty'y nderekvaia oĩ va'e gui? Ha'e rami va'e rire revy'a ete 'rãgue.

<sup>16</sup> Ndevy pe SENHOR ‘Oliveira ipyau ha'e hi'a iporãve va'e' he'i va'ekue ri aŷ ma hevovo rei va'e kuery ndeyvýry omoendy ma tata, ha'e vy oapypa 'rã nerakãgue.

<sup>17</sup> Mba'eta xee SENHOR ixondaro reta va'e nenhotýare ae xeayvu ndere mba'emo vai ou aguã re. Ha'e nunga ma Israel ha'e Judá kuery o'áry ae ombou uka, Baal ra'angaa pe heakuã porã va'e oapya py xembopoxy vy rive.”

### *Jeremias ojuka aguā re jogueroayvu nhemi okuapyague*

- <sup>18</sup> Ha'e kuery nhemi rupi jogueroayvua ma SENHOR xevy oikuua uka rā aikuua ma voi.
- <sup>19</sup> Xee ma vexa ra'y'i ojukaa aguā katy heraapy rami ha'evepa rei va'ekue, xerovai ojapo vai aguā re jogueroayvu okuapy teī xee ndaikuuaai va'ekue. Ha'e rami vy aipoe'i okuapy: "Jajayapa ke yvyla hi'a reve. Nhamomba okuave va'e kuery yvyla gui, hery re na'ima'endu'aavei aguā rami", he'i okuapy.
- <sup>20</sup> Ha'e rā ndee ma SENHOR ixondaro reta va'e ha'evea rami reikuua pota, ha'e nhan-depy'a re oī va'e rexapa va'e. Ha'e nunga rupi taexa ha'e kuery rembopaga rā, mba'eta ndevy pe aikuua pota uka xereko re.

<sup>21</sup> Ha'e gui SENHOR ijayvu Anatote pygua avakue xejukaxe va'e re. Mba'eta ha'e kuery aipoe'i: "Ndeavyuve eme SENHOR rery rupi, orepo py ae rojuka e'ŷ aguā", he'i xevy.

<sup>22</sup> Ha'e ramo SENHOR ixondaro reta va'e aipoe'i: "Ne'ixa, xee ae 'rā ambopaga ha'e kuery. Ha'e ramo ipyaukue omamo 'rā kyxe py, ta'y kuery, tajy kuery ma karuai gui 'rā omanomba.

<sup>23</sup> Ha'e kuery va'e regua neī peteīve ndoikovevei 'rā, mba'eta Anatote pygua avakue áry ambou 'rā mba'emo vai ambopaga vy."

## 12

### *Nhanderuete pe Jeremias oporanduague*

<sup>1</sup> SENHOR, ndee ma ha'evea rami meme 'rā xererekko nerendirre xee ajexa uka ramo. Ha'e rami avi ndevy pe aporandu ta rejoguerekko re. Mba'e re tu heko vai va'e kuery ikuai porā? Mba'eta anhetē rupi e'ŷ rei ikuai va'e pe mba'eve ndoikoi.

<sup>2</sup> Ha'e kuery ma ndee renhotŷ ramo hapo porā ha'e yvate 'rā, hi'a porāmba 'rā guive. Ndere ima'endu'a 'rā ojuru py rive, ha'e rā opy'a py ma ndegui mombyry 'rā ikuai.

<sup>3</sup> Ha'e rā xee ma ndee xekuaa porā. SENHOR, ndee xerexa vy rea'ā 'rā xepy'a py ndere apēxaa oī va'e. Ha'e rā ha'e kuery ma eraapa vexa'i ojukaa aguā katy ogueraa va'e rami, emōimba na ojukaa ára pyguitarā.

<sup>4</sup> Araka'e peve tu yvy nda'evei 'rā, ha'e nhuñdy rupi jai rogue ipirupa? Mymba ha'e guyra omanomba ha'e pygua kuery reko vaia káuxa. Ha'e rami teī ha'e kuery aipoe'i: "Ha'e ma ndoexai 'rā opaa py nhandere oiko va'e", he'i.

### *Nhanderuete ombovaiague*

<sup>5</sup> "Ha'e rami avi avakue yvy rupi oguata va'e reve renha vy ri nekane'ō vy mba'exa 'rā tu renha kuaa kavaju árygua kuery reve? Peteī yvy mba'eve ndoikoa py ri rekyjea rendu vy mba'exagua 'rā tu rendu Jordāo yakā yvýry ka'aguy re reo vy?"\*

<sup>6</sup> Mba'eta nderyvy ha'e nderu ro pygua kuery eteve voi nembo'a nhemixe okuapy. Ha'e kuery ae 'rā nderakykue monha okuapy ojapukai atā reve. Ha'e kuery re ejerovia eme, ndereve ijayvu porā'i merami teī."

### *Yvy mbovaipaare kuery ombopaga aguā re ijayvuague*

<sup>7</sup> "Xee aeja ma xevygua oo, aeja xevy guarā va'ekue ha'e javi. Xerembiajvu voi amboaxa ma hovaigua kuery po py.

<sup>8</sup> Mba'eta xevygua kuery ma guary ka'aguy regua rami onhendu ratā xerovai. Ha'e ramo xee ndaiotavei ma.

<sup>9</sup> Ha'e rami vy xevy pe rā xevygua kuery ma peteī guyra vaikue pytāmba rei va'e rami ikuai, mba'eta amboae guyra te'ōgue 'ua ou vy oipyxopa 'rā. Ha'e nunga rupi tapeo tema, Peru mymba kuery inharō va'e nhuñdy rupi ikuai va'e ho'upa aguā.

<sup>10</sup> Mba'eta joe opena va'e kuery mbovy e'ŷ ou vy ombovaipa xemba'e uvaty, opyrōmba xemba'ety re. Ha'e rami vy xevygua arovy'a va'ekue ma tekota e'ŷa omombyta.

\* <sup>12:5</sup> Jordāo yakā yvýry ka'aguy oī va'e re ma mymba inharō va'e ikuai (49.19, 50.44).

<sup>11</sup> Ombovaipa ramo xevy pe ju ojapukai okuapy avave rei noipytyvõavei rã. Yvy ha'e javi rupi noñavei, ha'e va'e re opena va'erã ndoikoi ramo.

<sup>12</sup> Vyty ita anho reia ha'e tekao e'ý regua áry rupi ou imbovaipaarã kuery, mba'eta SENHOR guigua kyxé nhomokanhymba 'rã vy apy peve, ha'e avave rei pe noñvei 'rã ikuai porã aguã.

<sup>13</sup> Ha'e rami vy trigo pemoaõ teí juu rive ju pemono'õ. Pemba'eapoa rupi penekane'õmba va'eri mba'eve rei ndapejoui. Mba'eve napemono'õi ma vy peximb'a 'rã, pendere SENHOR poxya ou rire."

### *Mba'erã pa Nhanderuete nhombopagaa re ijayvua*

<sup>14</sup> SENHOR aipoe'i: "Xevyguia Israel kuery peguarã aeja va'ekue ma ijvvýry ikuai va'e heko vai va'e oipe'apa. Ne'exa, ha'e va'e kuery ma xee aipe'apa 'rã ijvvýgui, ha'e gui ha'e kuery mbyte gui araa jepe 'rã Judá kuery.

<sup>15</sup> Ha'e kuery aipe'apa ma rire amboaxy ju 'rã. Ha'e vy ajapo 'rã peteí-teí guekoa ha'e oyvy katy ju ojevy aguã rami.

<sup>16</sup> Ha'e gui xapy'a rei xevyguia kuery reko ramo ha'e kuery voi ikuaixe 'rã, ha'e xerery rupi anho oura vy 'Anhetê ete SENHOR oikove va'e rery rupi aura' he'i 'rã okuapy, ymave rupi xevyguia kuery Baal rery rupi oura aguã re ombo'e va'ekue ri. Ha'e rami rã ha'e kuery voi amoõ 'rã xevyguia kuery mbyte ikuai aguã.

<sup>17</sup> Ha'e rã peteí va'e regua noendu potai ri ramo xee aipe'a 'rã. Aipe'a vy amokanhymba 'rã", he'i SENHOR.

## 13

### *Ku'akuua ajukue iporãve va'e guigua py mba'emo oikuua ukaague*

<sup>1</sup> SENHOR aipoe'i xevy:

— Tereo, ejogua peteí ku'akuua iporãve va'e. Ha'e gui ejeku'a jokua, yy py emoaký eme guive.

<sup>2</sup> Ha'e ramo SENHOR aipoe'iague ramo vy ajogua ku'akuua, ha'e ajeku'a jokua.

<sup>3</sup> Ha'e ramo mokoñguea ma SENHOR oayvu xevy ombou vy aipoe'i:

<sup>4</sup> — Ejopy ju ku'akuua rejogua ha'e rejeku'a jokuaague. Ha'e gui epu'ã, tereo Eufrates yakã katy, ha'e enhomi ha'e py peteí itakua py – he'i.

<sup>5</sup> Ha'e ramo SENHOR aipoe'iague ramo vy aa vy anhomni Eufrates rembe re.

<sup>6</sup> Ha'e gui kueve ma rire SENHOR aipoe'i ju xevy:

— Epu'ã, tereo ju Eufrates katy, ha'e ejopy ju ku'akuua ha'e py anhomni uka va'ekue – he'i.

<sup>7</sup> Ha'e ramo Eufrates py aa vy yvy ajo'o vy anoë ju ku'akuua anhomiaague gui. Ha'e rã ku'akuua hu'ñmba ma, ndovarevei ma mba'everã.

<sup>8</sup> Ha'e ramo SENHOR oayvu xevy ombou vy aipoe'i:

<sup>9</sup> "Po rami SENHOR ijayvu: Nami ae avi xee ambovaipa 'rã Judá ha'e Jerusalém pygua kuery onhemboyvate rei okuapy.

<sup>10</sup> Mba'eta ha'e kuery heko vai va'e vy noenduxei okuapy xeayvu, inhakã ratãa rupi anho ikuai va'e, ha'e vy amboae ramigua tuuete kuery re ovapa, ixupe rive ikuai ha'e omboete aguã. Ha'e rami vy kova'e ku'akuua ramo 'rã ikuai mba'everã ndovarevei vy.

<sup>11</sup> Mba'eta ku'akuua avakue ku'a re oña rami avi xee voi aipota teí Israel ha'e Judá kuery xere ikuai xevy guarã, xerery oguerovy'a ha'e xemboete pavẽ aguã, va'eri ha'e kuery ma ndojapyakai okuapy", he'i SENHOR.

### *Hyru omboa'ypaa py mba'emo oikuua ukaague*

<sup>12</sup> "Ha'e kuery pe emombe'u povae ayvu. SENHOR Israel kuery Ruete aipoe'i: 'Peteí-teí hyru tynyemba 'rã vinho', 'ere. Ha'e rã ha'e kuery aipoe'i 'rã ndevy: 'Ore kuery ndoroikuua porãi ri ty'y hyru ikuai va'e vinho tynyemba aguã?' he'i 'rã okuapy.

13 Ha'e rã ndee ju aipo're 'rã ha'e kuery pe: 'SENHOR aipoe'i: "Ne'exa, kova'e yvy re ikuai va'e ha'e javi xee amonga'upa 'rã, huvixa kuery Davi renda openaaty py oguapy va'e, sacerdote, profeta kuery ha'e Jerusalém py ikuai va'e ha'e javi.

14 Amboa'ypa 'rã joe-joe amombo vy, tuu ha'e ta'y kuery voi. Ndaraa jepei 'rã, amboaxy a naendui 'rã, namboaxyi 'rã guive amokanhy e'ý aguã", he'i SENHOR.' "

### *Ojeko rerova ha'e ombopagaa aguã re ijayvuague*

15 Pendu ke, ha'e peikuaa pota. Penhemboyvate rei eme, mba'eta SENHOR ae ijayvu.

16 Pemboete na SENHOR Penderuete, pytû ombou e'ý aguã, ha'e yvy'ã vaikuea re pejeapi e'ý aguã, ha'e hexakãa pearõ 'rãgue py mano a'ha'e pytû reia anho ombou e'ý aguã.

17 Mba'eta napendu potai ri ramo xepy'a py ajae'o nhemi 'rã penhemboyvate reia re. Xerexa ojae'o vaipa ete 'rã, xerexay vaipa ete 'rã, peẽ SENHOR rymba vexa'i kuery escravo-rã pendereraapaa rire.

18 "Aipo're huvixa ha'e ixys pe: 'Penhemo'yvy'i ke, ha'e pei yvy py, mba'eta peneakã gui ho'a ma coroa penemboyvateague.

19 Mba'eta kuaray puku-a katy tetã ikuai va'e tynyëmba ma mba'emo ra'ykue, ipe'aarã ndoikoi guive. Judá kuery voi escravo-rã ogueraapaa ma, oipokuapaa heravy.

20 Pema'ë kuaray ijapu'a'ia katy pexa aguã ou va'e. Aý ma mamo tu ikuai vexa'i kuery ndevy apena uka va'ekue, iporãgue anho rerekva'ekue?

21 Mba'e 're 'rã tu neirû kuery ikuai va'ekue ndere ipo'aka va'erã omoña ramo? Ndere haxy va'e nda'ipo'akai 'rã teve, kunha oikuavã'i ta va'e rami?

22 Ndejeupe ae ndeayvu vy "Mba'e re tu ha'e nunga ou xere?" 're 'rã. Ha'e rami vy reikuua 'rã rejejavypaaty re ae ndeao oupia, ha'e rejexavai ete aguã rami reikoa.

23 Etiópia pygua kuery nda'u omboekovia kuaa 'rã ri opire, e'ý vy xivi voi nda'u omboekovia kuaa 'rã ri oparaa?\* Ha'e rami aguã nda'evei ramo ae peẽ kuery voi mba'emo vai pejapo va'ety vy ndapejapo kuaai 'rã iporã va'e.

24 Ha'e nunga rupi ha'e kuery amoã 'rã mba'emo pirukue yvytu tekua e'ýa guigua ogueraa va'e rami.

25 Ha'e nunga ae oiko 'rã pendere, pendevy guarã amoã 'rã, xegui penderexarai vy apu rive perovia rire', he'i SENHOR.

26 'Ha'e nunga rupi pendeao auipi uka 'rã peneakã áry peve, peximbaa ojekuaapa aguã.

27 Mba'eta aexa ma yvy'ã ikuai va'e ha'e nhuündy rupi ojeguarupy pejapo pekuapya. Ha'e va'e ma pendetavy reia, penhomoaruãa ha'e pendetavyxeia rupi pendekuaia. Nda'evei ete 'rã pendevy, Jerusalém pygua kuery! Raka'e peve teri 'rã tu ndapejeky'a'oi?' he'i."

## 14

### *Judá yvy re nda'okyvei puku-a re ijayvuague*

1 Nda'okyvei puku jave SENHOR ombou ju oayvu Jeremias pe. Ha'e vy aipoe'i:

2 "Judá kuery ojae'opa okuapy, ha'e tetã rokë re nopenavei ma. Ojae'o reve oakã omboguejy yvy peve. Jerusalém py voi ojapukai ratâve ovu.

3 Ha'e pygua ipo'akakueve omondouka 'rã guemimongakuua kuery yy re. Ha'e rã ha'e va'e kuery ygua py oo vy yy ndojouvei vy yryru oguerojevypa rive ju 'rã. Onhemondyi ha'e ndoikuaavei rei vy onheakã ao'i 'rã jogueruvy.

4 Yvy re nda'okyvei ramo ikangypa. Ha'e nunga rupi mba'ety rupi ombo'eapo va'e kuery onhemondyi rei reve 'rã onheakã ao'i okuapy.

5 Guaxu voi nhuündy rupi ta'y vy oeja rive 'rã, jai rogue ndojouvei vy.

\* 13:23 Etiópia pygua ma kamba va'e. Ha'e gui ha'e kuery opire nomboekovia kuaia rami avi nhande voi ndajapytu'u kuaai 'rã jajejavya gui.

<sup>6</sup> Mburika ka'aguy regua voi yvy'ã ita anho reia rupi ipoaẽ reve oetũ-etũ 'rã jagua-tuvy nhe'ẽ rami. Ndaexa pyxovei ma, nhuũ jipovei ramo."

### *Jeremias jypy ojerure rã "Nda'evei" he'iague*

<sup>7</sup> Ha'e nunga rupi SENHOR, ore kuery orerekko vaia anho roexa uka teĩ orepytyvõ ke nderery remboete ukaa rupi vy. Mba'eta ore ma nenhe'ẽ raxave va'ekue. Nderovai ae rojeavy va'e.

<sup>8</sup> Ndee ma Israel kuery oarõ okuapy va'e, ha'e ikuai axy jave heraa jepea reiko. Mba'e re tu ha'vy yvy mboae regua rami reiko, peteĩ oguata va'e pytû oaxa aguã amboae rupi oo va'e rami reiko?

<sup>9</sup> Mba'e re tu ava ojopy xapy'a reipy rami reiko, ipy'a guaxuve va'eri jogueraa jepe kuaa e'ŷ va'e rami? Ha'e rã ndee SENHOR ma reĩ ae orembyte, ha'e ore ma nderery rupi oenoimby roiko. Orerepy e'ŷ eme.

<sup>10</sup> Ha'e ramo SENHOR ijayvu xeretarã kuery reko re. Ha'e vy aipoe'i: "Ha'e rami avi ha'e kuery ma oguata reixe vai 'rã, ndojejokoi 'rã oo aguã gui. Ha'e nunga rupi SENHOR ndoguerovy'avei vy ima'endu'a 'rã ha'e kuery reko vaiague re, ombopaga 'rãe ojeavyague re."

<sup>11</sup> SENHOR aipoe'ive ju xevy: "Ejerureve eme ha'e kuery amoingo porã aguã re.

<sup>12</sup> Mba'eta ha'e kuery okaru e'ŷ re ikuai teĩ xee naendui 'rã ojapukaia. Mymba ha'e mba'emo aju guigua oapy reve ome'ẽ va'erã ogueru teĩ xee ndarovy'ai 'rã. Ha'e rami 'rãgue py amomba 'rã kyxe py, karuai ha'e mba'eaxy vaikue py."

### *Teigue ju Jeremias ojerure ramo "Nda'evei" he'iague*

<sup>13</sup> Ha'e ramo xee aipoa'e:

— Ai SENHOR Xeruete! Ne'exa, profeta kuery ma aipoe'i va'ekue heta va'e kuery pe: "Ndoui 'rã kyxe rewegua neĩ karuai. Ha'e rami 'rãgue py kova'e teko a py ou 'rã pendekuai porã aguã anho", he'i va'ekue — ha'e.

<sup>14</sup> Ha'e ramo SENHOR aipoe'i xevy:

— Profeta ramigua kuery ma apu rive omombe'u okuapy xerery rupi. Teigueve xee namboui, neĩ namombe'u ukai ha'e kuery pe, ha'e kuery pe ndaxeayvui guive. Ha'e kuery pendevy omombe'u va'e ma oexa ra'u merami rivea, imba'ekuaa ramigua, ovare e'ŷ va'e rupi ikuaria, ha'e opy'a py onhembotavy ukaa rive.

<sup>15</sup> Ha'e nunga rupi SENHOR aipoe'i profeta ramigua kuery re: "Xerery rupi omombe'u va'eri xee amombe'u uka ramo e'ŷ. Ha'e kuery ma 'Kyxe rewegua ha'e karuai ndoui 'rã kova'e yvy re' he'i okuapy teĩ ha'e va'e profeta kuery ae 'rã kyxe ha'e karuai py opa.

<sup>16</sup> Mba'eta ijayvu renduare kuery karuai ha'e kyxe gui omano va'ekue retekue omombopaa 'rã Jerusalém py tape ikuai va'e rupi. Jipoi 'rã avave rei inhono porãarã: ha'e kuery, ta'yxy, ta'y ha'e tajy kuery reve. Mba'eta ha'e kuery áry ambou 'rã heko vaiague rekoria.

<sup>17</sup> "Ha'e gui ha'e kuery pe remombe'u 'rã po rami: 'Xerexay oẽ 'rã ara py ha'e pyávy. Ndopytu'ui 'rã, mba'eta xeretarã kuery omoingo axya ramo ai haxy ete va'e py.

<sup>18</sup> Ha'e rami vy mba'ety rupi aa vy aexa kyxe py ojuka pyre. Ha'e rã tetã py ju aike vy aexa 'rã karuai gui omano va'ekue. Profeta ha'e sacerdote kuery oguata rei 'rã yvy re, oo aguã ndoikuaavei vy.' "

### *Mboapykuea Jeremias ojerure rã "Nda'evei ae ma" he'iague*

<sup>19</sup> Ha'e rami avi rejapa ma teve Judá kuery? Ndepy'a py nderexaxevei teve Sião tetã? Mba'e re tu oremingo axy oremonguera e'ŷ re? Oremingo porã ju aguã roarõ rokuapy va'eri iporã va'e ndoikoi ae. Rokuera aguã 'rãgue py ndorerekorãveia anho roendu.

<sup>20</sup> SENHOR, ore kuery ma roikuaa orerekko vaia ha'e oreru kuery ojapo vaiague, mba'eta nderovai ae rojeavy va'e.

21 Ha'e rami avi nderery remboete ucaa rupi vy orereja eme. Mba'emo vai py ejao'i uka eme nerenda iporâve va'e. Nema'endu'a na orevy ndereve guarâ rejapo va'ekue re, embovaipa eme.

22 Mba'eta oiko 'râ teve mba'emo ra'angaa amboae regua kueryomboete va'e regua ombo'oky kuaa va'e? Ha'e rami e'ý vy yva ha'e ae ombou 'râ teve oky? Ha'e nunga moingoa ma ndee SENHOR Oreruete anho reiko. Ha'e nunga rupi ndegui ae roarô oky, mba'eta ndee anho ha'e nunga ha'e javi mboua reiko.

## 15

<sup>1</sup> Ha'e ramo SENHOR aipoe'i xevy: "Moisés ha'e Samuel xerenonde ojerure va'e rire xepy'a re noï 'râgue kova'e kuery amboaxy aguâ. Toipe'apa ha'e kuery xerenonde gui, toópa.

<sup>2</sup> Ha'e gui ndevy pe ha'e kuery oporandu vy 'Marâ katy 'râ tu roo?' he'i ramo aipo're 'râ ha'e kuery pe: 'Po rami SENHOR ijayvu: Omano va'erâ kuery too omano aguâ katy, ha'e râ kyxe py ojuka pyrâ too kyxe rewegua ikuia katy, karuai pyguarâ ma too karuaia katy, ha'e gui escravo-râ ogueraa pyrâ ma ogueraa katy too.'

<sup>3</sup> Mba'eta SENHOR aipoe'i: 'Xee ma irundy rupi 'râ ambopaga ha'e kuery. Kyxe py ojukaa 'râ, jagua kuery omoatâ heravy 'râ, ha'e gui guyra yvate rupi oveve va'e ha'e mymba inharô va'e nhuündy rupi ikuai va'e ma omondoropa vy ho'upa 'râ.

<sup>4</sup> Amboaxapa 'râ yvy regua kuery oexa vy onhemondyipa aguâ, Ezequias ra'y Judá pygua huvixa Manassés Jerusalém tetâ py ojapo vaiague ha'e javi káuxa.' "

<sup>5</sup> "Ha'e gui ndee Jerusalém, mava'e tu oiko 'râ nemboaxyarâ? Mava'e tu ojae'o 'râ ndere? Mava'e tu ovaë 'râ reiko porâ paa re oporandu aguâ?

<sup>6</sup> Mba'eta rejep'e a xegui, nderakykue katy ju rejevy vy. Ha'e ramo nderovai audi 'râ xepo romomba aguâ. Xekane'õ ma romboaxy py", he'i SENHOR.

<sup>7</sup> "Ndeyvy re tetâ ikuai va'e rokë py ambogua uka yrupê py rami, amokanhy ta'y kuery, amomba xevygua kuery teñ ikuaiaty gui ndojep'e ai.

<sup>8</sup> Ha'e pygua imeve'ý va'e hetave ye'ë rembe rupi ita ku'i ikuai va'e gui. Kuaray mbyte jave teñ ambou kyrígue'i xy kuery mombaarâ. Ha'e kuery áry ambou xapy'a ojexavai ha'e okyje aguâ teñ.

<sup>9</sup> Sete opi'a kuery oguerekva'ekue ma omano xapy'a inhe'ë oata va'e rami, ara py teri teñ ha'e kuery pe râ pytumba ma. Oximbâ, nda'evei nho okuapy. Ha'e gui ha'e pygua okuave'i va'e ma amboaxapa kyxe rewegua pe hovaigua kuery renonde", he'i SENHOR.

### Ojeupagua profeta SENHOR ombopy'a guaxuve juague

<sup>10</sup> Nda'evei ete xevy, ha'e ha'i pe voi xekuavâ'i rire, mba'eta ava opu'âa rei pyrâ, pavê rei oguero'a rei va'erâ oikuavâ! Mba'eta xee nanhomborevei mba'emo hi'âryve ajopyve vy, amboae kuery voi naxemborevei ojopyve vy. Ha'e rami teñ ha'e kuery peteñ-teñ ijayvu vai xere.

<sup>11</sup> Ha'e ramo SENHOR aipoe'i: "Ha'e gui anhetê xee romombaraete 'râ reiko porâ aguâ. Ha'e râ nderovaigua kuery ma ojexavai ha'e ikuai axya ára ajapo 'râ ndere onhemboja vy ojerure porâ'i aguâ rami", he'i.

<sup>12</sup> "Ha'e gui amongue nda'u omopê kuaa 'râ ri ferro kuaray ijapu'a'ia katy gui ou va'e, e'ý vy overa va'e?

<sup>13</sup> Ha'e rami râ peñ kuery romoingo axy 'râ pendeyvy jave rupi teko vai pejapoague re. Ha'e rami vy penemba'e rei-rei pemoñ porâ va'ekue hepy re'ý amboaxapa 'râ heraarâ pe.\*

<sup>14</sup> Ha'e rami vy penderovaigua kuery pe xee rogueraa uka 'râ yvy peikuaa e'ýa katy, mba'eta pende'âry xepoxya hendy ae ma, tata hendy va'e rami okai va'erâ."

\* <sup>15:13</sup> Apy ma judeu kuery pe ijayvu.

<sup>15</sup> Ha'e gui SENHOR, ndee ma reikuua. Ha'e rami avi nema'endu'a ke xere, xepytyvõ ha'e xerepy ke xerakykue monhaa kuery gui. Renhomboaxya rupi vy xereraa uka eme. Reikuua ma roayvu vy ae ajejojai ukaa.

<sup>16</sup> Ndeayvu ajou vy ha'u vyvoi. Mba'eta ndeayvu ma arov'y'a va'e xekuraxõ mbovy'aarã, mba'eta nderery rupi anherenoĩ uka ramo, SENHOR Xeruete nexondaro reta va'e.

<sup>17</sup> Ha'e nunga rupi peteĩgueve ma voi aguapy va'e'ŷ teri ovy'a rei va'e kuery reve, ndarov'y'ai guive. Ha'e rami 'râgue py ndepo poyia xe'áry oĩ ramo xee ae'i aguapy ainy, mba'eta xee aendu va'e ma ndepoxya anho.

<sup>18</sup> Mba'e re tu haxy va'e aendu riae tema? Mba'e re tu xeai haxy riae oiny ndokuera reguai vy? Ndee nda'u xembotavy 'rã teve yy ramo'i typa vyvoi va'e rami?

<sup>19</sup> Ha'e ramo SENHOR aipoe'i xevy: "Ha'e gui rejeko rerova ri ramo xee rogueru ju 'rã xerenonde rupi reiko aguã. Ovare e'ŷ va'e 'râgue py ha'evea ramigua re anho ndeayvu ri vy reiko 'rã xeayvu mombe'uarã. Ha'e kuery regua toje'oi ndea katy, ha'e rã ndee ma ndereaxai 'rã ha'e kuerya katy.

<sup>20</sup> Ha'e ramo ha'e kuery rovai xee romombaraete 'rã tetã kora overa va'e guigua rami. Ha'e ramo nderovai ha'e kuery opu'ã teĩ nda'ipo'akai 'rã ndere, mba'eta ndereve xee aiko 'rã ha'e kuery gui rogueraa jepe aguã.

<sup>21</sup> Ha'e rami vy roipe'a 'rã heko vai va'e kuery po gui, rogueraa jepe 'rã ipy'a ratã va'e kuery po gui", he'i SENHOR.

## 16

### *Profeta ha'e ae'i oiko aguã re ijayvuague, heta va'e kuery oikuua aguã*

<sup>1</sup> Ha'e gui SENHOR oayvu ombou ju xevy. Ha'e vy aipoe'i:

<sup>2</sup> "Ejou eme nderayxyrã, nderay ha'e nderajy e'ŷ aguã kova'e tekao py", he'i.

<sup>3</sup> Mba'eta po rami SENHOR ijayvu kova'e tekao py ta'y ha'e tajy kuery itui'i va'erã rekorã re, tuu ha'e ixy kuery rekorã re guive. Ha'e vy aipoe'i:

<sup>4</sup> "Ha'e kuery omano 'rã mba'eaxy gui teĩ ndojae'oai 'rã, nonhono porãai 'rã guive. Yvy irûrã rive 'rã opyta. Kyxe ha'e karuai py 'rã omano, ha'e he'õgue opyta 'rã guyra yvate rupi oveve va'e ha'e mymba yvy rupigua rembi'urã."

<sup>5</sup> Mba'eta po rami SENHOR ijayvu: "Eike eme omanogue re ojae'o okuapya py, ndepy'a vai eme, eronhemboaxy eme guive, mba'eta ha'e kuery gui aipe'a ma mby'a porã, ayvua ha'e amboaxya rupi aiko aguã", he'i SENHOR.

<sup>6</sup> "Mba'eta kova'e yvy re omano 'rã yvatekueve ha'e yvyigueve. Ha'e va'e kuery ma ndojatyai 'rã, ndojae'oai 'rã, ha'e kuery re ipy'a vaia rupi nonhekyximba reiai 'rã, neĩ oakã nonhopiñai 'rã guive.\*

<sup>7</sup> Ojae'o va'e kuery pe ma nome'ẽavei 'rã mbojape omanogue re ombopy'a porã ju aguã, neĩ peteĩve karo yy nome'ẽai 'rã opo'o aguã regua, tuu e'ŷ vy ixy omano rire teĩ.

<sup>8</sup> Eike eme oo ngaru oikoa py, ha'e kuery reve reguapy vy rekaru ha'e rey'u e'ŷ aguã."

<sup>9</sup> Mba'eta SENHOR ixondaro reta va'e, Israel kuery Ruete aipoe'i: "Ne'ixa, peikove teri reve, ha'e pexaa py ae amombytu'u 'rã pevy'aa kova'e tekao gui, peporaeia, ha'e omenda va'erã oguerovy'aa rupi oporaeia guive.

<sup>10</sup> "Neretarã kuery pe remombe'u 'rã pova'e ayvu ha'e javi. Ha'e ramo ha'e kuery oporandu 'rã: 'Mba'e re tu SENHOR ha'e rami ete oremongye nda'evei ete va'e py? Mba'e nunga py tu orereko vai ha'e rojejavý SENHOR Nhanderuete rovai?' he'i 'rã ndevy.

<sup>11</sup> Ha'e ramo ndee rembovai 'rã: 'Mba'eta peneramoĩ kuery xerejapa', he'i SENHOR. 'Ha'e rami vy oje'oi amboae ramigua tuuete kuery re rive, ha'e kuery pe ju ikuai vy ombojerovia aguã. Ha'e rã xee ma xerejapa okuapy, xeguigua lei rami voi nda'ikuaipei raka'e.

\* **16:6** Hetarã omano rã amongue onhekyximba rei 'rã, ha'e'ŷ vy oakã onhopi 'rã ipy'a vai vy (41.5; Ezequiel 7.18; Miquéias 1.16).

**12** Ha'e gui peẽ kuery ma peneramoĩ kuery ikuaiague gui penderekko vaive ju, mba'eta peneakã ratãa rupi peteĩ-teĩ pendekuai, xenhe'ẽ rendu e'ŷ vy.

**13** Ha'e nunga rupi kova'e yvy gui roipe'apa 'rã peteĩ yvy peẽ ha'e peneramoĩ kuery ndapeikuaaiague katy. Xee noromboaxyvei ramo ha'e py ju 'rã pendekuai amboae ramigua tuuete pe, ara py ha'e pyávy.'

**14** SENHOR aipoe'ive ju: "Ha'e rami teĩ ne'exa, ou ma oiny ára, 'Anhetẽ ete SENHOR oikove va'e Egito yvy gui Israel kuery oguenoẽ va'ekue rery rupi aura', ndapejeveia ára.

**15** Ha'e rami 'rãgue py po rami 'rã peura: 'Anhetẽ ete SENHOR oikove va'e kuaray apu'a'ia katy gui ha'e yvy jave rupi omondoukapaague gui Israel kuery ogueru va'ekue rery rupi aura', peje'rã. Mba'eta xee ajapo 'rã pendeyvy katy ae ju pejevypa aguã rami, peneramoĩ kuery yvyrã ame'ẽ va'ekue py ae."

**16** SENHOR aipoe'i: "Ne'exa, ambou reta 'rã pira mbo'aa kuery. Ha'e va'e kuery ma Judá regua kuery ae 'rã ombo'a. Ha'e va'e rire ma imba'ejuka va'e kuery ju 'rã ambou reta, pira mbo'aa kuery ojuka aguã yvyty ha'e yvy'ã ikuai va'e áry rupi, ita pa'ũ rupi guive ikuai va'e ojuka aguã.

**17** Mba'eta aexa pota 'rã ha'e kuery ikuiaia ha'e javi rupi. Avave rei nonhemi 'rã xegui, gueko vai voi nonhomí 'rã aikuua pota aguã gui.

**18** Jypy'i ma ambopagave ete 'rã heko vaiague ha'e ojejavyague re, mba'eta xevyguia yvy omongy'apa rire mba'emo ra'angaa ojou vaipy peguare kuery re'õgue py, yvy xevy guarã va'ekue omonyêmba ojeguarupy rive."

**19** Ha'e gui ndee SENHOR ma xemombaraetea reiko, ajexavaia ára anhemi aguã. Ha'e gui ndea py ou 'rã yvy regua kuery yvy apy guive. Ha'e vy aipoe'i 'rã okuapy: "Oreramoĩ kuery ma apu regua anho oguereko va'ekue, mba'emo ra'angaa ovare'ŷ va'e, iporã va'e noĩa.

**20** Ha'e gui avakue ha'e kuery ae nda'u ojapo 'rã ri nguueterã? Ha'e rami avi ha'e nunga ma tuuete e'ŷ ae guive", he'i 'rã okuapy.

**21** "Ne'exa, aŷ ha'e kuery pe aexa uka 'rã xembaraetea ha'e xepo'akapaa. Ha'e ramo ma ha'e kuery oikuua 'rã SENHOR aikoa."

## 17

### *Teko vai nhanembotavy ha'e nhanemokanhya re ijayvua*

**1** "Ha'e gui Judá kuery ojejavya ma ferro rakua py ipara oiny, diamante omboakua pyre py guive. Ha'e nunga ma ha'e kuery kuraxõ re ae ipara, ha'e altar ojapo va'ekue apy re guive.

**2** Ha'e va'e altar re ta'y kuery voi ima'endu'a 'rã, ha'e mba'emo ra'angaa yvyra hovana va'e guýry ha'e yvy'ã áry rupi omopu'ã imo'amy va'ekue re.

**3** Ha'e gui ndee yvy mbyte yvyty repu'ã va'e, ndere mba'emo porã ha'e hepykueve oĩ va'ekue. Ha'e nunga ha'e javi ma jejavya káuxa amboaxa 'rã ipe'aarã pe, ombojeroviaaty ndee yvyty áry ikuai va'e guive.

**4** Ndekáuxa ae oipe'apaa 'rã ndevy guarã ame'ẽ va'ekue. Ha'e ramo ajapo 'rã nderovaigua kuery pe reiko aguã rami yvy reikuua e'ŷa re, xepoxyaa tata rami raka'e rã peve guarã remoendy rire."

**5** SENHOR aipoe'i: "Ayvu vaipy 'rã ikuai avakue re rive ojerovia va'e. Ha'e kuery ma to'o imarã va'erã re rive ojerovia, ha'e opy'a py SENHOR gui mombyry ikuai.

**6** Ha'e kuery ikuai 'rã jai rogue ha'e ae'i tekao e'ŷa py henhoĩ va'e rami. Iporã va'e teĩ ndoexai 'rã, mba'eta tekao e'ŷa py ae tema 'rã ikuai, yvy piru reia ha'e juky rive oĩa rupi, avave rei noĩaveia rupi.

**7** Ha'e rã ayvu porãmby 'rã ikuai SENHOR re ojerovia ha'e SENHOR oarõ oikovy va'e.

<sup>8</sup> Mba'eta ha'e kuery ikuai porā 'rā yy yvýry yvyra onhotŷ mbyre rami. Hapo yakã'i peve oo ramo ndokyjei 'rā haku gui. Hogue ma hovy porā riae 'rā. Nda'okyveia ára teĩ nda'ipirui 'rā, ndai'a e'ŷi 'rā guive.

<sup>9</sup> "Ha'e gui avakue py'a ma opa mba'e gui nhombotavypave ha'e nda'evei va'e ae. Mava'e nda'u oikuua 'rā?

<sup>10</sup> Xee SENHOR ae aikuua pota 'rā ipy'a re, xee ha'ā 'rā guive onhembopy'aa, oikoague rekovia ame'ẽ aguã, peteĩ-teĩ oikoague rami ae.

<sup>11</sup> Inambu pytã ngupi'a ae e'ŷ omboaku-a rami avi ha'evea rami e'ŷ ojoupave va'e. Ha'e kuery oikove teri reve ha'e nunga oipe'apaa xapy'a 'rā, ha'e gui opaa py hi'arandu e'ŷ va'e 'rā ikuai."

### *Nhanderuete oepy aguã re Jeremias ojapukaiague*

<sup>12</sup> Ore rombojerovia atyrã ma hexakãmba ha'e iky'a e'ŷ va'e, jypy'i guive yvate ete va'e oĩ.

<sup>13</sup> Ndee SENHOR ma Israel kuery oarõ okuapy va'e reiko. Ha'e rã nderejaare kuery ma oximba va'erã meme.

"Tá, xegui ojepe'a va'e rery ma yvy py rive 'rā ipara oiny, SENHOR yy marã e'ŷ me'ẽa oeja rire", he'i.

<sup>14</sup> SENHOR, xemonguera ke akuera ete aguã. Xereraa jepe ke aa jepe ete aguã. Mba'eta ndee anho rogueroporai.

<sup>15</sup> Ne'ixa, xevy pe ha'e kuery aipoe'i 'rā okuapy: "Mamo tu oĩ SENHOR ayvu? Tojeupity vyvoi!" he'i okuapy.

<sup>16</sup> Xee ndajepé'ai ndevygua kuery re apenaa gui, ikuai axy ára ou rã ndaexaxeit teĩ. Ndee ma reikuaa. Xeayvu xejurú gui oẽ va'e voi reikuaapa.

<sup>17</sup> Enhemoingo eme xemondyiärã, mba'eta nda'eveia ára ma ndere anho 'rã anhemi.

<sup>18</sup> Xeavyky reia kuery toximba, ha'e rã xee ma taximba eme. Ha'e kuery tonhemondyipa, ha'e rã xee ma tanhemondyi eme. Ha'e kuery áry ae embou ára vai, ha'e emokanhymba jevy-jevy.

### *Sábado ára omboetea aguã re ijayvuague*

<sup>19</sup> SENHOR aipoe'i xevy: "Tereo, epu'ã e'amy ha'e kuery retã rokẽ py, Judá pygua huvixa kuery oike ha'e oẽaty py, ha'e Jerusalém tetã rokẽ ikuai va'e ha'e javi yvýry.

<sup>20</sup> Ha'e vy aipo'ere 'rã ha'e kuery pe: 'Peẽ Judá pygua huvixa kuery, pendu ke SENHOR ayvu, Judá ha'e Jerusalém pygua kuery kova'e okẽ rupi peike va'e ha'e javive.'

<sup>21</sup> Po rami SENHOR ijayvu: Peẽ kuery peikove pukuxé vy sábado ára pevoyive eme mba'emo, peroike eme guive Jerusalém tetã rokẽ rupi.

<sup>22</sup> Sábado ára penoëve eme voyi pendero gui, mba'eve pejapo eme guive. Ha'e rami 'rãgue py pemboete 'rã sábado ára, peneramoĩ kuery pe ajapo ukaague rami vy.

<sup>23</sup> Ha'e rami teĩ ha'e kuery ma xeayvua re nopenai vy ndojapyxakai raka'e. Ha'e rami 'rãgue py inhakã ratã okuapy xeayvua noendu potai vy, onhemo'arandu uka e'ŷ aguã.

<sup>24</sup> "SENHOR ijayvuve ju: Ha'e rã peẽ kuery ma pendu ke xeayvua, ha'e pemboete sábado ára, tetã rokẽ rupi voyi peroike ve'ŷ ha'e mba'eve pejapo e'ŷ aguã.

<sup>25</sup> Ha'e rami ri ramo kova'e tetã rokẽ rupi oike nho 'rã penderuvixave kuery guembiguai yvatekueve reve, tenda Davi openaaty áry oguapy va'erã. Guembiguai kuery yvatekueve reve 'rã oaxa jogueruvy karóxa py, ha'e kavaju áry, avakue Judá ha'e Jerusalém pygua kuery reve. Ha'e rami rire kova'e tetã py ikuiaia 'rã raka'e rã peve.

<sup>26</sup> Ha'e gui oupaa 'rã Judá regua tetã ha'e Jerusalém yvýry rupi ikuiaia gui, Benjamim yvy, yvy reia ha'e yvy'ã reia kuaray puku-a katy gui. Ha'e rami vy ogueru 'rã mymba oapy reve ome'ẽ va'erã, mba'emo aju guigua ha'e heakuã porã va'e, SENHOR oguerovy'aa rupi ome'ẽ aguã ixupegua opy.

27 Ha'e rami avi napendu potai vy sábado ára napemboetei ramo, xapy'a rei sábado ára Jerusalém tetã rokẽ rupi voyi peroike ramo tata py apypa 'rã okẽ ikuai va'e. Ha'e va'e tata omomba 'rã Jerusalém py huvixa ro ikuai va'e, ndoguevei 'rã guive."

## 18

### *Mba'emo ryru nhae'ũ guigua re ijayvuague*

<sup>1</sup> Jeremias pe SENHOR oayvu ombou vy aipoe'i:

<sup>2</sup> — Epu'ã ke, tereo nhae'ũ gui mba'emo apoa ro py. Ha'e py ma rendu 'rã xeayvu — he'i.

<sup>3</sup> Ha'e ramo aa nhae'ũ gui mba'emo apoa ro py. Ha'e py ama'ẽ rã ha'e va'e omba'eapo oiny ojere va'e áry.

<sup>4</sup> Ha'e gui mba'emo ryrurã nhae'ũ gui ojapo va'ekue ivaipa ramo ha'e va'ekue gui amboae ju ojapo ha'e ae oipotaa rami.

<sup>5</sup> Ha'e ramo SENHOR oayvu ombou xevy.

<sup>6</sup> Ha'e vy aipoe'i: "Upe va'e nhae'ũ gui mba'emo apoa ojapoa ramo ha'eve xee voi peẽ Israel kuery roguereko aguã. Ne'exa, ipo py yapo oĩ va'e rami peẽ Israel kuery voi xepo py peĩ.

<sup>7</sup> Mba'eta peteĩ regua e'ŷ vy peteĩ tetã re mba'e xeayvu 'rã aipe'apa aguã, aity ha'e ambovaipa aguã re.

<sup>8</sup> Ha'e rami teĩ ha'e kuery gueko vai gui ojeko rerova ri ramo xee voi amboae ramo 'rã areko, mba'emo vai ambou aguã re anhembopy'aague ramo ve'ŷ.

<sup>9</sup> Ha'e rami avi peteĩ regua e'ŷ vy peteĩ tetã re xeayvu 'rã amombaraete ha'e anhotõ aguã re.

<sup>10</sup> Ha'e ramo xapy'a rei ha'e kuery ma xerenonde rupi tekó vai rupi tema 'rã ikuai xeayvua noendu potai vy. Ha'e ramo xee amboae ramo 'rã areko amoingo porã aguã re anhembopy'aague ramo ve'ŷ.

<sup>11</sup> Ha'e nunga rupi aŷ ma ndeayvu ke Judá regua avakue ha'e Jerusalém pygua kuery pe. Ha'e vy aipo're 'rã: 'Po rami SENHOR ijayvu: Ne'exa, xee ma ambou ta mba'emo vai, peẽ kuery rovai aiko aguã re anhembopy'a rire. Ha'e nunga rupi aŷ peteĩ-teĩ pejeko rerova na ha'eve'ŷa rami pendekuaia ha'e mba'emo vai pejapoa gui,' re 'rã.

<sup>12</sup> Ha'e rami teĩ ha'e kuery aipoe'i 'rã: 'Nda'evevei ae ma teve, mba'eta ore kuery ma orekuave tema 'rã ore ae roipotaa rami. Peteĩ-teĩ roiko 'rã oreakã ratãa rupi, orereko vaia rami ae', he'i 'rã okuapy.

<sup>13</sup> "Ha'e nunga rupi SENHOR aipoe'i: 'Peporandu na aŷ amboae regua kuery ikuaria rupi mava'e pa ha'e nunga oenduague re. Mba'eta ha'e ramigua ete Israel kuery ojapo va'ekue!

<sup>14</sup> Ha'e gui Líbano yvyty re itaova oĩ va'e áry yro'y apĩ oĩaty gui nda'u okanhy 'rã ri? Tyrã pa typa 'rã ri yro'y rykukue mombyry guigua?\*

<sup>15</sup> Any, teĩ xevygua kuery ma hexaraipa okuapy xegui. Ha'e rami vy mba'emo ra'angaa pe rive oapy 'rã okuapy heakuã porã va'e. Ha'e nunga ma ojapo tape yma guare rupi ikuai vy onhepyxangapa aguã ramo, tape joja e'ŷa rupi ju oje'oi aguã,

<sup>16</sup> ha'e kuery yvy nhomondyipaarã opyta aguã ramo, ha'e amboae kuery ojojai rei aguã ramo. Mba'eta ha'e rupi oaxa va'e kuery onhemondyi vy ombovava 'rã oakã.

<sup>17</sup> Mba'eta yvytu kuaray oua katy gui ou va'e py amoâimba 'rã hovaigua kuery renonde rupi. Ha'e kuery ikuai axya ára aexa uka 'rã xekupe, xerova e'ŷ."

### *Ngovaigua kuery rovai profeta ojerureague*

<sup>18</sup> Ha'e ramo aipoe'i okuapy: "Peju ke, mba'emo jajapo Jeremias rovai. Mba'eta oiko riae 'rã lei rupi sacerdote ha'e hi'arandu va'e nhanemonetaarã, ha'e profeta ayvu

\* **18:14** Líbano rery ma "Yvyty xiñ va'e" 'ea, yvate etea py yro'y ojekuaa riae ramo. Ha'e gui yro'y rykukue oxyry ouvy vy oata e'ŷ re omoakŷ 'rã ha'e va'e yvy.

omombe'u va'erã. Peju na, nhamoĩ vai ayvu py, ijayvua nhaendu ve'ŷ aguã", he'i okuapy xere.

<sup>19</sup> Ha'e gui SENHOR, ema'ẽ na xere, ha'e endu pota xere ijayvu rei va'e kuery ijayvua.

<sup>20</sup> Iporã va'e re omboekovia 'rã teve ha'eve'ŷa ramigua? Mba'eta ha'e kuery ojo'o yvykua xenhe'ẽ ombo'a aguã. Nema'endu'a ke nerentonde xee ajexa ukaague re, mba'eta ha'e kuery remoingo porã aguã re ajerure va'ekue, rejou vai aguã re'ŷ.

<sup>21</sup> Ha'e nunga rupi ha'e kuery ra'y kuery emboaxa karuai pe, ejapo ke ta'y kuery karuai ha'e kyxe py omano aguã rami. Tove ta'yxy kuery gui toipe'apaa imemby kuery, imeve'ŷ va'e ta'ikuai. Tove ime kuery tomanomba mba'eaxy gui. Ha'e gui kunumigue ma joe opu'ãa py tojukapaa kyxe py.

<sup>22</sup> Ha'e kuery re opu'ã va'erã kuery rembou xapy'a ramo tojapukai okuapy ngoo gui. Mba'eta ha'e kuery yvy ojo'o okuapy rire xejopy aguã, xepy rupi ojokua nhuã xembo'axe vy.

<sup>23</sup> Ha'e rã SENHOR, ndee reikuaa ae ma xejukaxe vy nhomoneta okuapya ha'e javi. Eperdoa eme ha'e kuery reko vaiague re, embogue eme ojejavvyague nerentonde gui. Nerentonde ojexa uka vy to'apa. Ndepoxya ára py embopaga ke.

## 19

### *Yryru ombovo aguã re ijayvuague*

<sup>1</sup> SENHOR aipoe'i: "Tereo, ejogua peteĩ yryru nhae'ũ gui ojapo pyre. Nderupive eraa avi neretarã kuery regua ha'e sacerdote regua nhomonetaa kuery.

<sup>2</sup> Tapeo Hinom ra'y rekoague yvyugua py, nhae'ũ gui mba'emo apoa rokẽ katy. Emombe'u ha'e py ndevy amombe'u uka va'e.

<sup>3</sup> Ha'e vy aipo're 'rã: 'Judá pygua huvixa kuery ha'e Jerusalém py pendekuai va'e, pendu ke SENHOR ayvu. Po rami ijayvu SENHOR ixondaro reta va'e, Israel kuery Ruete: Ne'exa, kova'e tekao áry ambou 'rã mba'emo vai. Ha'e ramo ha'e nunga oendu va'e ha'e javi nhemondyi gui ijapyxa nhe'ẽmba 'rã.

<sup>4</sup> Mba'eta ha'e kuery xerejapa vy omongy'apa rei kova'e tekao, nguuete mboae pe heakuã porã va'e oapy vy, ha'e nunga peteĩgueve oexa va'e'ŷ teri, tuu kuery, neĩ Judá pygua huvixa kuery voi. Ha'e vy kova'e tekao ha'e javi rupi omoẽ okuapy heko porã va'e ruguy.

<sup>5</sup> Ha'e vy yvy'ã ikuai va'e áry rupi ojapo okuapy Baal ra'angaa mbojerovia atyrã, tata py gua'y kuery oapy aguã Baal pe ome'ẽ vy. Teĩgueve ma ha'e ramigua ajapo uka va'e'ŷ, ha'e rami aguã re ndaxeayvui, neĩ nanhembopy'ai guive.

<sup>6</sup> Ha'e nunga rupi ou ma oiny ára kova'e tekao pe neĩ "Tofete", neĩ "Hinom ra'y rekoague yvyugua" 'ea ve'ŷ aguã. Ha'e rami 'rãgue py "Yvyugua jojukapaaty" 'ea 'rã, he'i SENHOR.

<sup>7</sup> Mba'eta kova'e tekao py ambovaipa 'rã Judá ha'e Jerusalém pygua kuery nhomongetaague, ajapo 'rã kyxe gui ho'apa aguã rami ngovaigua kuery renonde, ijukaxeia kuery po py. Ha'e vy he'õgue amboaxa 'rã guyra yvate rupi oveve va'e ha'e mymba yvy rupi ikuai va'e rembi'urã.

<sup>8</sup> Kova'e tetã amoĩ 'rã nhomondyipaarã, amboae kuery oojai rei aguã. Ha'e rupi oaxa va'e ha'e javi onhemondyi vy oojai rei 'rã, ha'e kuery re ha'e rami ete mba'emo vai oiko rire.

<sup>9</sup> Hovaigua ijukaxeia kuery ojokopa vy omoingo axy ramo ajapo 'rã ha'e kuery gua'y kuery ha'e guajy kuery ro'okue ho'u aguã rami, ha'e peteĩ-teĩ ho'u 'rã oirũ ro'okue', 're 'rã.

<sup>10</sup> "Ha'e ramo avakue nderupive oo va'ekue oexaa py rembovo 'rã yryru.

<sup>11</sup> Ha'e vy aipo're 'rã ha'e kuery pe: 'Po rami SENHOR ixondaro reta va'e aipoe'i: "Guĩ rami xee amomba 'rã kova'e kuery ha'e kova'e tetã, yryru nhae'ũ gui ojapo pyre ombovoa rire ndojeapoveia rami avi. Ha'e ramo hetekue ojatya 'rã Tofete py, amboae henda py ojatya aguã jipoí ramo.

**12** Ha'e rami ae ajapo 'rã kova'e teko a re, ha'e py ikuai va'e kuery re guive", he'i SENHOR. "Kova'e tetã amombyta 'rã Tofete ramigua ete.

**13** Mba'eta Judá pygua huvixave kuery ha'e Jerusalém pygua kuery ro ha'e javi ma Tofete rami avi 'rã ha'eve'ý va'e meme, yva re ikuai va'e pe heakuã porã va'e oapyague ha'e amboae tuuete pe vinho onhoëague guive", he'i."

**14** Ha'e gui Tofete py SENHOR ayvu omombe'u aguã omondoukaague gui Jeremias ojevy vy opu'ã ho'amy SENHOR pegua oo roka py. Ha'e vy aipoe'i heta va'e kuery ha'e javi pe:

**15** "Po rami ijayvu SENHOR ixondaro reta va'e, Israel kuery Ruete: Ne'exa, kova'e tetã ha'e teko a'i ikuai va'e áry ambou 'rã mba'emo vai xeayvuague ha'e javi, mba'eta xeayvu noenduxei vy inhakã ratãmba rire."

## 20

### *Profeta Jeremias jokuaare re ijayvuague*

**1** Ha'e va'e ayvu Jeremias omombe'u rã sacerdote Imer ra'y Pasur oendu. Ha'e va'e ma SENHOR pegua oo pygua ruvixa oiko.

**2** Ha'e vy Pasur profeta Jeremias oinupã uka ma vy ipy ojokua uka yvyra re. Ha'e va'e ma oí Benjamim regua okẽ yvatevea py, SENHOR pegua oo yvýry. Ha'e gui ko'ëgue ma Pasur ojora ju Jeremias yvyra gui.

**3** Ha'e ramo ixupe Jeremias aipoe'i:

— SENHOR nanemboeryvei ma 'rã Pasur, ha'e rã "Jovaive-ive re nhomongyje reia" he'ia anho.

**4** Mba'eta po rami SENHOR ijayvu: "Ne'exa, xee rojapo 'rã ndee ae renhemongyje aguã rami, neirũ kuery ha'e javi pe guive. Mba'eta rexaa py ae hovaigua kuery ojukapa 'rã kyxe py. Judá yvy ha'e javi amboaxa 'rã Babilônia pygua huvixa po py. Ha'e ramo ogueraapa 'rã Babilônia katy escravo-rã, kyxe py ojuka 'rã guive.

**5** Kova'e tetã py perekopa va'ekue amboaxa avi 'rã, pemba'eapoa gui pejoupa va'ekue ha'e hepykueve ha'e javi. Tá, Judá regua huvixa kuery omoí porã va'ekue ha'e javi amboaxa 'rã hovaigua kuery po py. Ha'e ramo ha'e kuery oipe'apa 'rã heravy Babilônia katy.

**6** Ha'e gui ndee Pasur ndero py ikuai va'e ha'e javi reve penembo'a vy pendereraapa avi 'rã. Ha'e ramo Babilônia tetã katy 'rã peo. Ha'e py ma pemanomba 'rã, pendeatya 'rã guive: ndee ha'e neirũ kuery ha'e javi, ha'e va'e kuery pe ayvu porã merami rive remombe'ua va'ekue reve."

### *Profeta iporiau reia rupi ijayvuague*

**7** SENHOR, guĩ rami aiko aguã re ndeayvu ramo aiko. Xegui nembaraeteve va'e vy ndepo'aka. Ha'e ramo ko'ë nhavõ ombojaru reipy aiko. Ha'e kuery va'e regua peteĩ-teĩ xejojai rei 'rã okuapy.

**8** Mba'eta ajapukai ha'e xeayvu atã reve anho amombe'u aikovy remokanhy ha'e rembopaga aguã regua. Ha'e rami py ndee SENHOR ayvu káuxa aiko ovare e'ý va'e ha'e omoximba pyrã, ko'ë nhavõ.

**9** Ha'e gui anhembopy'a vy "Ha'e nunga namombe'uvei, ndaxeayvuvei ma 'rã hery rupi", ha'e teĩ xekuraxõ re ndeayvua hendy 'rã tata rami, xekägue mbyte tata omboty pyre rami hendy. Ha'e ramo aiko axy vaipaa py xekane'õ ma, narombaraetevei ma 'rã guive.

**10** Mba'eta mbovy rei e'ý aendu ijayvu rei rã: "Jovaive-ive re nhomongyjea! Pendeayvu na hexe, nhandeayvu na!" he'i va'e. Xerayvu ete va'ekue eteve voi anhepyxanga aguã oarõ vy aipoe'i 'rã okuapy: "Onhembotavy uka ramo nhandepo'aka 'rã hexe, ha'e vy jajepy 'rã", he'i okuapy.

**11** Ha'e rami teĩ SENHOR ma xereve oiko joe opu'ã va'ety ipo'akapa va'e rami. Ha'e ramo xeavyky reia kuery ae 'rã onhepyxangapa, nda'ipo'akai 'rãe. Ha'e kuery oximba ete 'rã.

Hi'arandu rupi e'ŷ ikuai rire ha'e kuery re ou 'rã oxĩmba aguã raka'e rã peve guarã, ha'e va'e re ndaexaraivei 'rã.

<sup>12</sup> Ha'e gui ndee SENHOR ixondaro reta va'e, rexa 'rã heko porã va'e, reikuua pota 'rã jopy'a ha'e nhokuraxõ re oĩ va'e re. Tove xee taexa ha'e kuery re repu'ã rã, ndepo py xerekove amboaxa rire.

<sup>13</sup> Peporaei ke SENHOR pe, perovy'a SENHOR, mba'eta ojexavai rei va'e nhe'ẽ ogueraa jepe ojavyky rei va'e kuery po gui.

### *Jeremias itui'iague ára re ijayvu vaiague*

<sup>14</sup> Ayvu vaipy toiko xetui'iague ára. Togueroayvu porãa eme ha'i xekuavã'iague ára.

<sup>15</sup> Ayvu vaipy toiko xeru pe ava ha'e nunga mombe'uare, ov'y'a ete reve "Itui ma ndera'y", he'i va'e.

<sup>16</sup> Tove ha'e va'e ava toiko tetã SENHOR omboaxy e'ŷ re ombovaipa va'ekue rami. Ko'ẽmba jave toendu ojapukai va'e, ha'e rã kuaray mbyte jave ma taevovo rei.

<sup>17</sup> Mba'e re tu Nhanderuete ndaxejukai raka'e xeryru'i pyve? Mba'e re tu ha'i ryepy aĩ reve norenhonu porãai raka'e? Ha'e'ŷ vy raka'e rã peve ndaye guaxu'i ma voi va'e rire.

<sup>18</sup> Mba'e re tu xeryru'i gui aẽ raka'e amba'eapo ha'e xeporiaua aendu aguã rive, ha'e aikoa ára opa peve axĩmba aguã?

## 21

### *Nabucodonosor Jerusalém tetã ombovaipa aguã re ijayvu ma voiague*

<sup>1</sup> Jeremias pe SENHOR oayvu ombou va'ekue, mba'eta huvixa Zedequias ombou Malquias ra'y Pasur ha'e Maaséias ra'y sacerdote Sofonias aipoe'i aguã:

<sup>2</sup> "Eporandu na SENHOR pe orere, mba'eta Babilônia pygua huvixa Nabucodonosor ou orere opu'ã aguã. Xapy'a rei SENHOR oreptytyvõ 'rã hexa pyrã ojapo vy, orea gui orerovaigua kuery ojape'a aguã", he'i.

<sup>3</sup> Ha'e ramo Jeremias aipoe'i ha'e kuery pe: "Po rami pendeayvu 'rã huvixa Zedequias pe.

<sup>4</sup> Po rami SENHOR Israel kuery Ruete ombovai: Ne'exa, xee ajapo 'rã tembiporu joe opu'ãa pygua pendepo py perekovai ju oiporua aguã rami. Mba'eta peneretã kora rovai Babilônia pygua huvixa ha'e caldeu kuery re pepu'ã aguã py tembiporu peiporu va'ekue xee ajapo 'rã peneretã mbyte ju omboatypaa aguã rami.

<sup>5</sup> Xee ae apu'ã 'rã peẽ kuery rovai xepo upi vy xepo'akaa aexa uka reve, xepoxya, rojou vaia ha'e rombopaga etea rupi.

<sup>6</sup> Ha'e ramo vy kova'e tetã pygua kuery ajukapa 'rã, avakue ha'e mymba kuery guive. Mba'eaxy vaikue gui 'rã omanomba."

<sup>7</sup> SENHOR aipoe'ive ju: "Ha'e va'e rire ma amboaxa 'rã Judá pygua huvixa Zedequias hembiguai kuery reve. Kova'e tetã pygua kuery mba'eaxy gui, kyxe ha'e karuai gui nomanombai va'ekue ha'e javi amboaxa 'rã Babilônia pygua huvixa Nabucodonosor po py, hovaigua ijukaxea kuery po py guive. Ha'e ramo ojukapa 'rã kyxe py. Ndojuka e'ŷi 'rã, noendui 'rã nda'evei nhoa neĩ omboaxy.

<sup>8</sup> "Ha'e gui heta va'e kuery pe ju aipo're 'rã: 'Po rami SENHOR ijayvu: "Ne'exa, penerenonde amoĩ 'rã tape tekove katy oo va'e, ha'e manoat katy oo va'e guive.

<sup>9</sup> Kova'e tetã py opyta va'ekue omanomba 'rã kyxe py, karuai e'ŷ vy mba'eaxy gui. Ha'e rã caldeu kuery tetã jokopaa va'e pe ojereraa uka va'e ma oikove 'rã, guekove ogueraa jepe uka 'rã.

<sup>10</sup> Mba'eta kova'e tetã katy xerova ha'amys mba'emo vai ambou aguã, iporã va'e e'ŷ", he'i SENHOR. "Ha'e ramo vy amboaxa 'rã Babilônia pygua huvixa po py oapypa aguã", 're 'rã.'

<sup>11</sup> "Ha'e gui Judá pygua huvixa ro pygua kuery pe ju aipo're 'rã: 'Pendu ke SENHOR ayvu.

<sup>12</sup> Davi ramymino kuery, po rami SENHOR ijayvu: “Aje'ive reve peikuua pota na anhetē rupi, peraa jepe ikuai axy va'e imoingo axya po gui, xepoxya tata rami hendy e'ŷ aguā ha'e'ŷa rami rei pendekuaia rovai, imboguarā oiko e'ŷ re.”

<sup>13</sup> SENHOR aipoe'i: “Ne'exa, peẽ yvyugua pygua ha'e ita guaxu nhuündy reia mbyte oĩ va'e rami pepu'ã va'e kuery, xee ma pendovaigua aiko. Peẽ kuery aipopeje: ‘Mava'e tu ou 'rā nhanderovai?’ ha'e ‘Mava'e tu oike 'rā nhanderekoa py?’ peje teĩ penderovaigua aiko.

<sup>14</sup> Ha'e rami vy rombopaga 'rā pendekuaiaque re. Peneretā re amoendy 'rā tata, ka'aguy re rami avi. Ha'e va'e ma pendeyvýrykue ha'e javi 'rā omomba”, he'i SENHOR.’ ”

## 22

### *Judá pygua huvixa ro pygua kuery rovai ijayvuague*

<sup>1</sup> SENHOR aipoe'i: “Tereo ke Judá pygua huvixa ro py, ha'e emombe'u pova'e ayvu ha'e py.

<sup>2</sup> Ha'e vy aipo're 'rā: ‘Ndee Judá pygua huvixa, tenda Davi openaaty py reguapy va'e, endu ke SENHOR ayvu, nerembiguai kuery ha'e ndevygua kuery kova'e okẽ rupi oike va'e ha'e javi reve.

<sup>3</sup> Po rami SENHOR ijayvu: “Pejogueroko ke anhetē rupi, pepena porã. Ojexavai va'e peraa jepe imbojexavai reia kuery po gui. Pembojexavai rei eme amboae yvy regua, neĩ tyre'ŷ ha'e imeve'ŷ va'e. Emoẽ eme heko porã va'e ruguy kova'e tekao re.

<sup>4</sup> Mba'eta pova'e ayvu pejapo ete ramo kova'e okẽ rupi oike nho 'rā huvixa kuery tenda Davi openaaty py oguapy va'erã, karóxa py ha'e kavaju áry, guembiguai ha'e ojeupegua kuery reve.

<sup>5</sup> Ha'e rā pova'e ayvu napenduxei ramo xee ae rery rupi 'rā aura kova'e oo ombovaipa pyre rive amombyta aguā re”, he'i SENHOR.’ ”

<sup>6</sup> Mba'eta po rami SENHOR ijayvu Judá pygua huvixa ro re: “Ndee ma Gileade ha'e Líbano yvyty apyte rami ajou porã va'eri anhetē rojapo 'rā tekoague rive, tetã oĩa ve'ŷ aguā rami.\*

<sup>7</sup> Nderovai ambou 'rā nemombaarã. Ha'e ramo peteĩ-teĩ guembiporu reve ou vy ojayapa 'rā yary reiporavo va'ekue, ha'e vy omombo 'rā tata py.

<sup>8</sup> Ha'e rami rire pavẽ regua kova'e tetã rupi oaxa vy peteĩ-teĩ aipoe'i 'rā oirũ pe: ‘Mba'e re tu SENHOR guĩ rami ete ojapo kova'e tetã guaxu re?’ he'i 'rā.

<sup>9</sup> Ha'e ramo ha'e kuery pe ombovaia 'rā: ‘Mba'eta ojepe'apa rire SENHOR nguuete guexeve guarã ojapo va'ekue gui, ha'e amboae ramigua tuuete ombojerovia, ha'e ixupe rive ikuai rire.’ ”

### *Judá pygua huvixa Salum rovai ijayvuague*

<sup>10</sup> Pejae'o eme huvixa omano va'ekue re, penhendu eme. Ha'e rami 'rāgue py pejae'o vaipa ete 'rā ta'ykue ogueraa pyre re. Mba'eta ha'e va'e ma ndojevyvei 'rā, ndoexavei 'rā yvy itui'ague.<sup>†</sup>

<sup>11</sup> Mba'eta SENHOR ijayvu Josias ra'y Judá pygua huvixa Salum, nguu Josias rekovia oĩ va'ekue re, kova'e tekao gui oipe'a pyre re guive. Ha'e vy aipoe'i: “Ndojevyvei ma 'rā apy.

<sup>12</sup> Ha'e rami 'rāgue py escravo-rā ogueraa ague py ae 'rā omano. Ndoexavei 'rā kova'e yvy”, he'i.

### *Judá pygua huvixa Jeoaquim rovai ijayvuague*

---

\* **22:6** Gileade ha'e Líbano yvyty apyte re ikuai yvyra tuvixakueve anho, yary, ha'e nunga. Ha'e gui huvixave ro pe “Oo Líbano regua ka'aguy guigua” 'ea (1 Reis 7.1-7). Ha'e gui versículo 23 py ma huvixave pe ae “Líbano pygua, yary guigua py ndero va'e” 'ea. † **22:10** Huvixave Josias heko porã va'e omano rire Israel kuery ojae'o vaipa okuapy hexe. Ha'e rā ta'y Salum ma Egito pygua huvixa ogueraa oyvy re omano aguā py (2 Reis 23.34). Ha'e gui Salum Jeoacaz hery mboae va'e ogueraa ma rire tyke'y Jeoaquim ju oĩ hekovia.

<sup>13</sup> “Nda'evei ete 'rã anhetẽ rupi e'ŷ joguerekoa rupi ngoo ojapo va'e, jokorea rupi ngoorã ojapo aguã mba'emo ojou va'e pe. Ha'e va'e ma ojeupegua kuery omomba'epo teĩ ndopagai, omiba'epoague repy nome'ẽi va'e.

<sup>14</sup> Mba'eta aipo're: ‘Xerorã ajapo 'rã tuvixa va'e, ha'e opy ja'oa ikuai va'e ambopyve 'rã. Yvate rupi amoĩ 'rã janela-rã, yary guigua py aipyovãmba ha'e amopytã 'rã pytã va'e py', 're.

<sup>15</sup> Ha'e rami teĩ ndee nda'u huvixa kuery mboae rami yary rereko reta vy rive teve huvixa rei? Nderu nda'u ndokarui ha'e ndoy'ui teve raka'e? Ha'e nda'u ha'evea rami ndajoguerekoi, ha'e joe ndokuua pota porãi teve? Ha'e ramo opa mba'e py oiko porã.

<sup>16</sup> Ha'e ma oikuua pota va'ekue iporiaukue'i ha'e ojexavai va'e kuery re. Ha'e ramo ixupe ha'evea rami meme oiko. Ha'e rami e'ŷ teve xekuaa va'e kuery ikuai?” he'i SENHOR.

<sup>17</sup> “Ha'e rã ndee ma nderexa ha'e ndepy'a py reikuaa pota reikovy ndee ae reipota va'e re anho, heko porã va'e ruguy remoẽ aguã, ha'e rejerovia reia ha'e rejokorea rupi reiko aguã re anho.”

<sup>18</sup> Ha'e nunga rupi po rami SENHOR ijayvu Josias ra'y Judá pygua huvixa Jeoaquim re: “Pejae'o eme hexe, joupe-upa aipopeje eme guive: ‘Ai, xervyvy!’ ha'e'ŷ vy ‘Ai, xereindy!’ peje eme. Nei hexe pendepy'a vaia rupi ‘Ai, xeruvixa!’ ha'e'ŷ vy ‘Ai, ipo'akapa va'ekue’, peje eme.

<sup>19</sup> Mba'eta mburika re'õgue omomboa rami avi hetekue omomboa 'rã. Ha'e rami vy ombotyryrya 'rã heravy Jerusalém rokẽ gui mombyry omombo aguã.

<sup>20</sup> “Ndee Jerusalém, ejeupi na Líbano yvyty áry, ha'e ejapukai. Enhendu Basã yvy rupi, ha'e ejapukai Abarim guive, mba'eta neirũ kuery re opyrõmbaa ma.

<sup>21</sup> Ndeporiaua rupi e'ŷ reiko jave ndevy xeayvu ramo ndee ‘Naendui 'rã’, 're va'ekue. Ha'e rami ete reiko ndepyau guive, peteĩgueve ma voi nerendui xeayvu.

<sup>22</sup> Ha'e nunga rupi yvytu ogueraapa 'rã ndere opena va'ekue, neirũ kuery voi escravo-rã ogueraapaa 'rã. Ha'e ramo nderekoi vaiague káuxa reximba ha'e nda'evei nho 'rã.

<sup>23</sup> Ndee Líbano pygua rami yary guigua py ndero va'e! Ha'e rami teĩ rejexavai aguã ou ramo nepoaẽ ete 'rã, omemby oikuavã ta va'e rami reiko axy aguã.”

### *Judá pygua huvixa Jeconias rovai ijayvuague*

<sup>24</sup> SENHOR aipoe'i: “Anhetẽ ete xee ae rekove rupi aura vy aipoa'e: Jeoaquim ra'y Judá pygua huvixa Jeconias ma aiporu kuaa regua re xekuã regua xerery oĩ va'e oĩ va'e rire xee amboi 'rãgue ha'e gui.

<sup>25</sup> Ndee huvixa, romboaxa 'rã ndejukaxe ha'e rekyjea va'e kuery po py. Ha'e kuery ma Babilônia pygua huvixa Nabucodonosor ha'e caldeu kuery.

<sup>26</sup> Yvy mboae ndetui'iague katy e'ŷ 'rã romombo, ndexy nekuavã'iare reve. Ha'e py ma pemano 'rã.

<sup>27</sup> Ha'e rã yvy pexaxea katy ma ndapejevyvei 'rã.

<sup>28</sup> Ha'e gui ndee ava Jeconias nda'u ojou vaipy, omopẽ rive pyre ha'e oguerovy'a e'ŷpy reiko? Mba'eta ndera'y kuery reve penemomboa oka katy, yvy pexa e'ŷa katy pendereraa”, he'i.

<sup>29</sup> Ndee yvy, yvy, yvy! Endu na SENHOR ayvu.

<sup>30</sup> Po rami SENHOR ijayvu: “Jeoaquim rery oĩ py pembopara ta'y e'ŷ va'e rami, ha'e ava oikoa pukukue re ndoiko porãi va'e, ha'e peteĩve ta'y nda'ipo'akai 'rã tenda Davi openaaty py oguapy aguã Judá pygua huvixarã.”

### *Ha'eve'ŷa rami opena va'e kuery rovai ijayvuague*

<sup>1</sup> “Nda'evei ete 'rã xerymba vexa'i kuery re opena va'erã amoĩ va'ekue pe, mba'eta omokanhymba ha'e nhuñdy okaruaty gui omoaimbä”, he'i SENHOR.

<sup>2</sup> Ha'e nunga rupi po ramí SENHOR Israel kuery Ruete ijayvu ojeupegua kuery re openava'e re: "Peẽ kuery ma pemoaĩmba xerymba kuery, pemondoukapa, napenepenai ha'e kuery re. Ha'e nunga rupi xee ma apena 'rã peẽ kuery pepaga aguã re pejapo vaiague re", he'i SENHOR.

<sup>3</sup> "Ha'e gui ma xee ae 'rã arupa xerymba kuery rembyrekue yvy jave mamo rã rei okanhymbaague gui. Ajapo 'rã okora py ae ju ojevypa aguã rami. Ha'e ramo ta'y reta ha'e hetave ju 'rã ovy.

<sup>4</sup> Ha'e gui ha'e kuery re opena va'erã amoõ 'rã omongaru porã va'erã kuery. Ha'e ramo xerymba kuery ndokyjevei neõ nonhemondyivei 'rã. Peteõve ma voi nokanhyvei 'rã', he'i SENHOR.

### *Jeremias 33.14-16*

<sup>5</sup> SENHOR aipoe'i: "Ne'exa, ou ma oiny ára peteõ amoingo 'rã Davi rapytakue renhoõ, hamymino heko porã va'erã. Ha'e va'e ma huvixa oĩ vy o'arandua rupi 'rã ipo'aka ha'e opena. Ha'evea rami 'rã oikuua pota ha'e joguereko yvy re.\*

<sup>6</sup> Ha'e oĩ jave ma Judá kuery oo jepe 'rã, Israel kuery voi mba'eve gui okyjea rupi e'ý 'rã ikuai. Pova'e tery rupi 'rã omboerya: 'SENHOR nhanderek porãrã me'ëa', 'ea."

<sup>7</sup> SENHOR aipoe'ive ju: "Ou ma oiny ára oura va'e aipo nde'ivei aguã: 'Anhetõ ete SENHOR oikove va'e Egito yvy gui Israel kuery oguenoõ va'ekue rery rupi aura', nde'ivei 'rã.

<sup>8</sup> Ha'e rami 'rãgue py aipo'ea 'rã: 'Anhetõ ete SENHOR oikove va'e yvy kuaray ijapu'a'ia katyguha'e yvy jave rupi Israel ramymino kuery mamo rã rei heraapaague gui guerupa va'ekue rery rupi aura', 'ea 'rã. Ha'e ramo ha'e kuery ikuai 'rã oyvy re ae."

### *Profeta ramigua rive ikuai va'e rovai ijayvuague*

<sup>9</sup> Ha'e gui profeta kuery reko gui xekuraxõ opẽmba xepy'apy py, xekãgue voi oryryipa. Xee ma ava oka'u va'e rami avi aiko, vinho oy'u vaipa va'e rami, teõ SENHOR gui, ha'e ijayvu iky'a e'ý va'e amombe'ua káuxa ae nda'evei aikovy.

<sup>10</sup> Mba'eta yvy tynyõ ma tavy reia, ha'e rupi ojae'oa oiny Nhanderuete ijayvu vai rire. Tekoa e'ýa rupi nhuñdy ikuai va'e ipirupa ma. Mba'eta itavy rei va'e ikuaia ma nda'evei, ha'eve'ýa rami rive 'rã ipo'aka joe.

<sup>11</sup> "Mba'eta profeta ha'e sacerdote kuery onhemongy'apa okuapy. Xevygua oo py eteve voi ajou ha'eve'ýa rami ikuaia", he'i SENHOR.

<sup>12</sup> "Ha'e nunga rupi ha'e kuery ma tape yxyõ reia rupi pytõ rupi ooa rami ikuai. Ha'e ramo omoanhambaa rã ho'apa 'rã. Mba'eta ha'e kuery áry ambou 'rã mba'emo vai ambopaga vy", he'i SENHOR.

<sup>13</sup> "Samaria pygua profeta ramigua kuery re ma xee aexa hi'arandu e'ýa. Mba'eta Baal rery rupi rive ayvu omombe'u vy oguerojejavypa xevygua Israel kuery.

<sup>14</sup> Jerusalém pygua profeta kuery re voi aexa nda'evei ete va'e. Mba'eta ha'e kuery itavy rei 'rã okuapy, anhetõ rupi e'ý 'rã ikuai, ha'e omombarae 'rã joapo vaia kuery po, avave rei gueko vai gui ojeko rerova e'ý aguã rami. Xevy pe rã Sodoma pygua kuery ikuaiague rami meme, ha'e rã Jerusalém pygua kuery ma Gomorra pyguare rami ikuai."

<sup>15</sup> Ha'e nunga rupi po ramí SENHOR ixondaro reta va'e ijayvu profeta ramigua kuery reko re: "Ne'exa, ha'e kuery xee amongaru 'rã veneno re, ha'e yy veneno re irõ va'e ame'ë 'rã oy'u aguã. Mba'eta profeta ramigua kuery Jerusalém pygua ojapo yvy jave rupi ha'eve e'ýa rami ikuaia aguã."

<sup>16</sup> SENHOR ixondaro reta va'e aipoe'i: "Pejapyxaka eme profeta kuery penembyte rupi ayvu omombe'u va'e re, mba'eta ha'e kuery penemonyõ 'rã pearõ rive aguã anho. Mba'emo ha'e kuery ae oexa va'ekue 'rã omombe'u, SENHOR juru guigua e'ý.

---

\* **23:5** Isaías 4.2; Zacarias 3.8, 6.12

<sup>17</sup> Xere ija'e e'ŷ va'e kuery pe ha'e kuery aipoe'i riae 'rā: 'SENHOR ijayvu mba'eve ndoikoi aguā re pendere', he'i 'rā. Inhakā ratāa rupi ikuai va'e pe 'Pendere ndoui 'rā mba'emo vai', he'i.

<sup>18</sup> Ha'e rami avi ha'e kuery va'e regua mava'e tu oĩ SENHOR reve onhembopy'a oinya py, mba'emo oexa ha'e ijayvu oendu aguā rami? Mava'e tu SENHOR ayvu re ojapyxaka porā vy oendu ete va'e?

<sup>19</sup> Ne'exa, SENHOR-a gui ou oiny ára vai! Ipoxya ou ma, yvytu jere vaikue 'rā ou heko vai va'e kuery áry.

<sup>20</sup> Ha'e rami vy SENHOR opoxya gui ndojep'e ai 'rā, opy'a re omoĩ va'ekue ojeupity 'rā oikopa peve. Opaa ára py ma pexa kuaa porā 'rā ha'e nunga.

<sup>21</sup> Xee ma ha'e ramigua profeta kuery namboui teĩ ha'e kuery onhamba 'rā oje'oivy. Ha'e kuery pe mba'eve namombe'u ukai teĩ omombe'u 'rā oje'oivy ayvu.

<sup>22</sup> Ha'e gui anhetē ri anhembopy'a ainya py ha'e kuery ikuai va'e rire ha'e kuery pe aendu uka ete 'rāgue xeayvu xevyguia kuery peguarā, ha'e ajapo 'rāgue ha'e kuery ha'eve'ŷa rami ikuiai gui ojep'e a aguā rami, tape porā rupi ju oo aguā.

<sup>23</sup> "Xee nda'u Penderuete ha'e'i rupi anho ri apena? Mombyry rupi guive e'ŷ teve apena?" he'i SENHOR.

<sup>24</sup> "Amongue nda'u aexaa gui onhemi kuaa 'rā? Xee nda'u yva ha'e yvy ha'e javi rupi naĩ 'rā?" he'i SENHOR.

<sup>25</sup> "Mba'eta aendu ae ma profeta ramigua kuery ijayvu rā, xerery rupi apu omombe'u vy 'Peteĩ mba'e aexa ra'u, aexa ra'u ae ri' he'i ramo.

<sup>26</sup> Raka'e peve nda'u ha'e nunga oĩ 'rā profeta kuery apu mombe'ua py'a re, opy'a re ojekorea oĩ va'e anho omombe'u va'e?

<sup>27</sup> Mba'eta ha'e kuery oexa ra'uague peteĩ-teĩ oirū kuery pe omombe'u vy ojapoxe xevyguia kuery xerery gui hexarai aguā rami, Baal ra'angaa pe tuu kuery ikuiai rupi xerery gui hexaraiague rami avi.

<sup>28</sup> Ha'e gui profeta oexa ra'u va'ekue tomombe'u oexa ra'u rive va'ekue rami. Ha'e rā amongue hexe xeayvu oĩ va'e ma tomombe'u porā xeayvu anhetē rupi. Mba'eta mba'e tu trigo 'ygue rive oguerekohi'a reve?" he'i SENHOR.

<sup>29</sup> "Mba'eta xeayvu ma tata oiko, ha'e martelo ita guaxu mbovoa ramigua", he'i SENHOR.

<sup>30</sup> "Ha'e nunga rupi xee ma ha'e va'e profeta kuery rovaigua aiko. Mba'eta peteĩ-teĩ oirū gui imonda 'rā xeayvu merami rive omombe'u va'e re", he'i SENHOR.

<sup>31</sup> "Ne'exa, xee ma ha'e va'e profeta kuery rovaigua aiko", he'i SENHOR. "Mba'eta oayvu ae omombe'u vy 'Po rami SENHOR ijayvu', he'i rive 'rā.

<sup>32</sup> Ne'exa, xee ma apu rupi oexa ra'u va'ekue mombe'ua kuery rovaigua aiko", he'i SENHOR. "Mba'eta ha'e nunga anhetē rupi e'ŷ omombe'u vy oguerojejavypa xevyguia kuery, xee namboui, mba'eve namombe'u ukai guive teĩ. Peteĩve henda py ha'e kuery ndojapoi 'rā heta va'e kuery ikuai porā aguā rami", he'i SENHOR.

<sup>33</sup> "Ha'e gui ma ndevy pe heta va'e kuery, e'ŷ vy profeta, sacerdote mba'e oporandu vy aipoe'i 'rā: 'Mba'exa tu SENHOR guigua ayvu ipoyi va'e?' he'i 'rā. Ha'e ramo rembovai 'rā: 'Peẽ ae ma ipoyi va'e pendekuai, ha'e rā xee ma roipe'apa 'rā', he'i SENHOR', 're 'rā.

<sup>34</sup> Mba'eta profeta, e'ŷ vy sacerdote mba'e, ha'e rami e'ŷ vy heta va'e kuery regua 'Pova'e ayvu ma SENHOR guigua ipoyi va'e', he'i va'e ma ambopaga 'rā, hoo pygua kuery ha'e javi reve.

<sup>35</sup> Ha'e rami teĩ peteĩ-teĩ peneirū kuery pe aipopeje: 'Mba'e he'i tu SENHOR? Mba'exa tu SENHOR ijayvu ipoyi va'e?' peje pekuapy.

<sup>36</sup> Ha'e rami teĩ nda'evevei ma 'SENHOR guigua ayvu ipoyi va'e' peje aguā, mba'eta peteĩ-teĩ re ijayvuague ae 'rā oĩ ipoyi va'e. Mba'eta peẽ kuery ma ha'eve'ŷa rami pemombe'u ayvu Nhanderuete oikove va'e, SENHOR ixondaro reta va'e, nhande kuery Ruete guigua.

<sup>37</sup> Profeta ikuai va'e pe aipopeje: 'Mba'e he'i tu ndevy SENHOR? Mba'exa tu SENHOR ayvu ipoyi va'e?' peje.

**38** Ha'e rami teñ 'SENHOR ayvu ipoyi va'e', peje rire po rami SENHOR ijayvu peñ kuery pe: 'Xee aipotaa rami e'ý " SENHOR ayvu ipoyi va'e" peje rire

**39** xee roipe'apa 'rã xerenonde gui, tetã penderekoarã ha'e peneramoñ kuery rekoarã aeja va'ekue reve.

**40** Ha'e rami vy pende'áry ambou 'rã pevare ve'ý ha'e peximba aguã opa e'ý va'e, hexarai pyrã e'ý', he'i."

## 24

### *Mokoñ varai figo'a oña oexa ukaague*

**1** Ha'e gui SENHOR oexa uka xevy mokoñ varai figo'a oña, SENHOR pegua templo rexei omoñ mbyre. Ha'e nunga oiko Babilônia pygua huvixa Nabucodonosor ha'e pygua kuery escravo-rã ogueraa rire: Jeoaquim ra'y Judá pygua huvixa Jeconias, Judá regua yvatekueve, ha'e gui Jerusalém pygua mba'emo apoa ha'e ferro re ombo'eapo va'e kuery. Babilônia katy ogueraapa.

**2** Peteñ varai py figo'a oí va'e ma iporãgueve, hi'a ypy'i va'ekue. Ha'e rã amboae py ma oí ivaikueve va'e, ja'u aguã nda'evei va'e.

**3** Ha'e gui SENHOR oporandu xevy:

— Jeremias, mba'e tu ndee rexa?

Ambovai:

— Xee aexa va'e ma figo iporãgueve, ha'e gui ivaikueve ju, ja'u aguã nda'evei va'e — ha'e.

**4** Ha'e gui xevy pe ou SENHOR ayvu. Ha'e vy aipoe'i:

**5** "Po rami SENHOR Israel kuery Ruete ijayvu: Peva'e figo porãgueve aexa vy ajou porãa rami avi Judá regua kuery escravo-rã ogueraa pyre aexa vy ajapo porã 'rã ha'e kuery pe, kova'e yvy gui caldeu kuery yvy katy araa uka va'ekue pe.

**6** Ha'e kuery re ame'ë 'rã amoingo porã reve, ha'e vy ajapo 'rã kova'e yvy re ojevypa aguã rami. Amombaraete'rã, amomba'rã nda'e. Anhoty'rã, ha'e namondoroi 'rã guive.

**7** Ha'e kuery pe ame'ë 'rã kuraxõ SENHOR aikoa rami xekuaa aguã regua. Ha'e kuery ikuai 'rã xevygua, ha'e rã xee ma aiko 'rã ha'e kuery Ruete, mba'eta opy'a ha'e javi py ojevy 'rã xere.

**8** "Ha'e rã figo vaikueve ja'u aguã nda'evei va'e ndajou porãia rami ae amoingo axy 'rã Judá pygua huvixa Zedequias ha'e hembiguai yvatekueve, Jerusalém pygua kuery mboae, kova'e yvy re opyta va'ekue ha'e Egito yvy re ikuai va'e ha'e javi", he'i SENHOR.

**9** "Ha'e kuery xee amoingo 'rã yvy jave regua kuery mondyipaarã ija'e e'ý aguã. Oximba aguã, ijayvua rei ha'e ojojai reipy, ha'e ayvu vaipy 'rã ikuai yvy jave rupi araa ukapaa rupi rei.

**10** Ha'e kuery re ambou 'rã kyxe, karuai ha'e mba'eaxy vaikue, ha'e kuery ha'e tuu kuery yvyrã ame'ë va'ekue gui okanhymba peve."

## 25

### *Setenta ma'etýa peve escravo ikuai aguã re ijayvuague*

**1** Ha'e gui Jeremias pe ou ayvu Judá pygua kuery regua. Josias ra'y Judá pygua huvixa Jeoaquim irundy ma'etý re ma oí jave py ou. Ha'e va'e ma'etýa ma Babilônia pygua huvixa Nabucodonosor peteñ ma'etý re oña va'e.

**2** Ha'e gui ha'e va'e ayvu profeta Jeremias omombe'u Judá ha'e Jerusalém pygua kuery ha'e javi pe. Ha'e vy aipoe'i:

**3** "Vinte e três ma'etýa re ma SENHOR ayvu ou xevy, Amom ra'y Judá pygua huvixa Josias treze ma'etý re ma oí guive aý peve. Ha'e ramo ko'ë rai guive pendevy xee amombe'u aikovy, ha'e rã peñ ma napendu potai.

<sup>4</sup> Ha'e rami ae avi ko'ẽ rai'i guive pendevy SENHOR ombou guembiguai profeta kuery ha'e javi, ha'e rã peẽ kuery ma ndapejapyxakai, neĩ pendeapyxa ndaperova-rovai pendu aguã.

<sup>5</sup> Ha'e kuery aipoe'i: 'Peteĩ-teĩ pejeko rerova ke ha'eve'ŷa rami pendekuatiy ha'e pejapo vai reiaty gui, penderekoa aguã yvy peneramoĩ kuery pe yma ma voi SENHOR ome'ẽ va'ekue py raka'e rã peve guarã.

<sup>6</sup> Tapeo eme amboae ramigua tuuete re ixupe peiko ha'e pemboete aguã, xembopoxy eme guive pendepo py mba'emo pejapo va'e py. Ha'e ramo peteigueve voi xee ndajapo vai 'rã peẽ kuery re', he'i.

<sup>7</sup> Ha'e rami xeayvu va'ekue teĩ peẽ kuery ndapejapyxakai. Ha'e rami 'rãgue py xembopoxy pekuapy pendepo py mba'emo vai pejapoa py, pendejee ae pejapo vai", he'i SENHOR.

<sup>8</sup> Ha'e nunga rupi SENHOR ixondaro reta va'e aipoe'i: "Xeayvua re ndapejapyxakai ramo

<sup>9</sup> ne'ixa, kuaray ijapu'a'ia katy gui ambou 'rã ha'e javi regua", he'i SENHOR. "Ambou avi 'rã xerembiguai Babilônia pygua huvixa Nabucodonosor. Ha'e kuery ambou 'rã kova'e yvy re, apygua kuery ha'e ha'e'i rupi ikuai va'e kuery rovai. Ha'e vy amomba katui'i 'rã, amoĩ 'rã nhomondyipaarã ha'e ojojai rei pyrã, ivaipa aguã raka'e rã peve.

<sup>10</sup> Ha'e kuery ikuiaia gui xee amombytu'u 'rã ikuai porã reia ha'e ov'y'aa, omenda va'erã ijayvua, ha'e mba'emo mongu'ia onhendua, tataendy ikuai va'e voi amboguepa 'rã.

<sup>11</sup> Ha'e ramo kova'e yvy ha'e javi opyta 'rã tekao e'ŷa ha'e nhomondyipaarã. Ha'e gui ha'e kuery regua ma setenta ma'etõ re ikuai 'rã huvixa Nabucodonosor rembiguai.

<sup>12</sup> Ha'e gui setenta ma'etõ ojeupitypa maa py ma ambopaga 'rã Babilônia pygua huvixa ojapo vaiague re, kova'e yvy regua kuery guive", he'i SENHOR. "Caldeu kuery yvy re voi anhombopaga 'rã, raka'e rã peve ivaipa aguã.

<sup>13</sup> Ha'e va'e yvy ha'e javi re ajapo 'rã xeayvuague ojeupitypa aguã rami, kova'e kuaxia re ipara oĩ va'e ha'e javi, yvy regua ha'e javi rovai Jeremias omombe'u va'ekue.

<sup>14</sup> Mba'eta ha'e kuery voi ikuai 'rã hetu regua ha'e huvixa guaxu kuery rembiguai. Ha'e rami vy ha'e kuery ambopaga 'rã ojapo vaiague ha'e opo py mba'emo ojapoague re."

### Karo Nhanderuete poxya oĩa re ijayvuague

<sup>15</sup> Ha'e gui SENHOR Israel kuery Ruete aipoe'i xevy:

— Ejopy ke xepo gui kova'e karo vinho xepoxya regua oĩa. Ha'e vy eme'ẽ yvy regua ha'e javi pe oy'u aguã, mamo rã romondoukaa rupi rei,

<sup>16</sup> ha'e kuery oy'u vy oryryipa ha'e na'inhakã porâvei aguã, ha'e kuery mbyte rupi kyxe amondouka va'e gui — he'i.

<sup>17</sup> Ha'e ramo SENHOR po gui xee karo ajopy vy ame'ẽ yvy regua ha'e javi pe oy'u aguã, mamo rã SENHOR xemondoukaa rupi rei:\*

<sup>18</sup> Jerusalém, Judá regua tetã ikuai va'e, ha'e pygua huvixa kuery ha'e hembiguai yvatekueve pe, ha'e kuery yvy opyta aguã ombovaipa pyre nhomondyipaarã, ojojai reipy ha'e ayvu vaipy opyta aguã, aý jaexaa rami;

<sup>19</sup> ha'e gui Egito pygua huvixa Faraó pe, hembiguai kuery, yvatekueve ha'e heta va'e kuery ha'e javi pe,

<sup>20</sup> joegua e'ŷ-e'ŷ kuery ha'e javi, Uz yvy regua huvixa kuery, filisteu kuery yvy re huvixa ikuai va'e, Asquelom tetã, Gaza, Ecrom ha'e Asdode pygua okuave va'e,

<sup>21</sup> Edom, Moabe ha'e Amom ramymino kuery,

<sup>22</sup> Tiro ha'e Sidom tetã pygua huvixa kuery, ha'e ye'ẽ rovai re huvixa ikuai va'e ha'e javi,

<sup>23</sup> Dedã, Tema, Buz ha'e o'aojaya apu'a'i va'e kuery ha'e javi,

<sup>24</sup> Arábia pygua huvixa kuery, ha'e tekao e'ŷa re joegua e'ŷ-e'ŷ ikuai va'e ruvixa kuery,

\* <sup>25:17</sup> Apy ma karo re ombojoa Nhanderuete ayvu Jeremias omombe'u va'erã yvy regua kuery pe, ha'e kuery ombopaga aguã regua (versículo 16).

<sup>25</sup> Zimri, Elão ha'e Média pygua huvixa kuery,

<sup>26</sup> kuaray ijapu'a'ia katy huvixa ikuai va'e, ha'e'i rupi ha'e mombyry rupi ikuai va'e, ha'e yvy jave rupi tetā ikuai va'e ha'e javi oy'u va'erā joakykue-kykue. Ha'e gui opa vygua ma Babilônia pygua huvixa ju 'rā oy'u.

<sup>27</sup> "Ha'e gui ha'e kuery pe aipo're 'rā: 'Po rami SENHOR ixondaro reta va'e, Israel kuery Ruete ijayvu: Pey'u na peka'upa ha'e pembojeyvypa peve. Pe'a ha'e napepu'āvei 'rā, kyxe peē kuery mbyte rupi amondouka va'e gui', 're.

<sup>28</sup> Ha'e gui karo ndepo gui oy'u aguã ha'e kuery ndojopyxei ramo aipo're 'rā ha'e kuery pe: 'Po rami SENHOR ixondaro reta va'e ijayvu: Pey'u 'rā.

<sup>29</sup> Mba'eta ne'exa, tetā xerery rupi oĩa gui amboypy 'rā anhombopaga aguã. Ha'e rā peē peo jepe 'rā teve? Any, ndapeo jepoi 'rā, mba'eta yvy jave re ikuai va'e áry ambou 'rā kyxe', he'i SENHOR ixondaro reta va'e.

<sup>30</sup> "Ha'e gui ndee remombe'u 'rā pova'e ayvu ha'e javi. Ha'e vy aipo're 'rā ha'e kuery pe: 'SENHOR okororō 'rā yvate o'amba iky'a e'ŷ va'e gui, ijayvu nhendu 'rā. Guary rami okororō ratā 'rā ojeupagua kuery rovai. Ijayvu atā 'rā yvy re ikuai va'e ha'e javi rovai, uva onhami okuapya py ojapukaia rami avi.

<sup>31</sup> Ha'e ramo yvy apy peve 'rā oendua ojapukaia, mba'eta SENHOR oguereko yvy regua kuery pe ijayvu ete aguã, to'o ha'e javi omboayvu aguã oĩ. Ha'e vy heko vai va'e omboaxapa 'rā kyxe reveguape, he'i SENHOR."

<sup>32</sup> SENHOR ixondaro reta va'e aipoe'i: "Ne'exa, mba'emo vai oaxa 'rā ov yvy regua ikuai va'e-va'e ha'e javi rupi, yvy apy gui omboypy 'rā ouvy ára vai", he'i.

<sup>33</sup> Ha'e va'e ára ojuka pyrā SENHOR omboaxa va'ekue retekue ma ha'e va'e yvy jave rupi 'rā ikuai. Ha'e rami teī ndojae'oai 'rā, nomboatyai 'rā, nonhono porāai 'rā guive. Ha'e rami 'rāgue py mba'emo repoxi rami rive 'rā ikuai yvy áry.

<sup>34</sup> Joe pepena va'e kuery, penhendu atā na, peneraxēmba rei. Peē mymba ja kuery, penhembojere-jere pejupy tanhimbu rupi, mba'eta ojeupity ma pendejukaa ha'e penemoaimbāá ára. Ha'e rami vy peē ae pe'apa 'rā yryru hepyve ovopa va'e rami.

<sup>35</sup> Ha'e ramo joe opena va'e kuery ndojouwei 'rā onhemi aguã, mymba ja kuery ndojoui 'rā oo jepe aguã.

<sup>36</sup> Ne'exa, onhendu joe opena va'e kuery ojapukaia, kora ja kuery ojae'o ratā rei nhendu rā! Mba'eta SENHOR omboavaipa ma nhuündy ikuaiaty.

<sup>37</sup> Kora ikuai porāaty ivaipa 'rā, SENHOR poxya hendy va'e gui.

<sup>38</sup> Mba'eta o'amba gui oẽ 'rā ouvy guary ra'y rami. Ha'e rami vy ojerovia rei va'e kyxe py omboavaipa 'rā ha'e kuery yvy, opoxya hendy va'e py guive.

## 26

### *Jeremias ojukaxe okuapyague*

<sup>1</sup> Ha'e gui Josias ra'y Jeaquim Judá pygua huvixa oĩ ypy'i jave py ou pova'e ayvu SENHOR gui.

<sup>2</sup> Ha'e vy SENHOR aipoe'i: "Tereo xeroka py. Ha'e vy Judá regua tetā pygua kuery xevygua oo py omboete vy ou ramo ha'e kuery pe emombe'u xeayvua ha'e javi. Neī peteīve ayvu emombe'u e'ŷ eme.

<sup>3</sup> Ha'e ramo ha'e kuery xeayvu oendu vy ojeko rerova 'rā ha'eve'ŷa rami ikuaiia gui. Ha'e ramo xee voi amboae rami 'rā areko, ha'e kuery ikuaiia re ambopaga aguã re xeayvuague rami ve'ŷ.

<sup>4</sup> Ha'e nunga rupi aipo're ha'e kuery pe: 'Po rami SENHOR ijayvu: Xeayvu re ndapejapyx-akai ri ramo xeguigua lei penerononde amoĩ va'ekue rupi pendekuai aguã,

<sup>5</sup> ha'e xerembiguai profeta kuery ko'ẽ rai guive pendea py ambou va'e ayvu pendu aguã, aŷ peve xeayvu napenduxeiague rami ae ju,

<sup>6</sup> ha'e ramo ma kova'e oo ambovaipa 'rã Siló tetã re ambovaipaague rami, ha'e vy kova'e tetã ajapo 'rã ayvu vaipy opyta aguã rami, yvy regua kuery ha'e javi pe', 're 'rã.'\*

<sup>7</sup> Ha'e rami SENHOR pegua oo py Jeremias ijayvu ramo sacerdote kuery, profeta ha'e heta va'e kuery ha'e javi oendu okuapy.

<sup>8</sup> Heta va'e kuery pe SENHOR ijayvuague ha'e javi Jeremias omombe'upa ma ramo sacerdote kuery, profeta ha'e heta va'e kuery pavẽ ojopy okuapy. Ha'e vy aipoe'i Jeremias pe:

— Rojuka 'rã.

<sup>9</sup> Mba'eta SENHOR rery rupi ndeayvu vy aipo're: "Kova'e oo ombovaipa 'rã Siló tetã rami, ha'e kova'e tetã ivaipa 'rã. Ha'e rã noñavei 'rã ha'e py", 're rire — he'i okuapy. Ha'e rami vy heta va'e kuery ha'e javi ono'õ Jeremias rovai, SENHOR pegua oo pyve.

<sup>10</sup> Ha'e gui Judá regua yvatekueve ma pova'e ayvu oendu vy huvixa ro gui jogueru SENHOR pegua oo py. Ha'e vy oguapy okuapy SENHOR pegua oo rokẽ ipyau va'e py.

<sup>11</sup> Ha'e ramo sacerdote ha'e profeta kuery jogueroayvu yvatekueve ha'e heta va'e kuery ha'e javi reve. Ha'e vy aipoe'i:

— Kova'e ava ma jajuka va'erã kova'e tetã re ijayvu rire, peẽ pendeapyxa py ae pendua rami — he'i okuapy.

<sup>12</sup> Ha'e ramo Jeremias ju ijayvu yvatekueve ha'e heta va'e kuery ha'e javi pe. Ha'e vy aipoe'i:

— SENHOR ae ma xembou kova'e oo ha'e kova'e tetã re ayvu pendu va'ekue ha'e javi amombe'u aguã.

<sup>13</sup> Ha'e gui aÿ ma pejeko rerova ke, ha'e pendu SENHOR Penderuete ijayvua. Ha'e ramo SENHOR ndojapovei 'rã peẽ kuery rovai ijayvuague.

<sup>14</sup> Ha'e rã xee ma pendepo py aĩ. Xerereko peẽ ae peipotaa rami.

<sup>15</sup> Ha'e rami avi peikuaa pota porã pova'e re. Xejuka ri vy pendejee ae 'rã pemoõ heko porã va'e ruguy pemoëague re pepaga aguã, kova'e tetã ha'e apygua kuery ha'e javi re guive. Mba'eta anhetẽ ete SENHOR xembou peẽ kuerya py, pova'e ayvu amombe'u rã pendu aguã — he'i.

<sup>16</sup> Ha'e ramo yvatekueve aipoe'i okuapy sacerdote ha'e profeta kuery pe:

— Kova'e ava ma pejuka aguã nda'evei, SENHOR Nhanderuete rery rupi nhandevy ijayvu ramo — he'i.

<sup>17</sup> Ha'e gui opu'ã avi ha'e va'e yvy re nhomoneta va'ety kuery regua. Ha'e vy heta va'e kuery ijaty okuapy va'e pe ijayvu vy aipoe'i:

<sup>18</sup> — Judá pygua huvixa Ezequias oĩ jave Moresete pygua Miquéias ayvu omombe'u oikovy vy ha'e voi ijayvu raka'e Judá pygua kuery ha'e javi pe. Ha'e vy aipoe'i: "Po rami SENHOR ixondaro reta va'e ijayvu: Sião tetã oikaraña 'rã mba'etyrã rami, Jerusalém opyta 'rã mba'emo ra'ykue atyrã, yvy'ã templo oña ma jaipa rive 'rã guive", he'i va'ekue.

<sup>19</sup> Ha'e rami Miquéias ijayvu tei Judá pygua huvixa Ezequias ojuka teve Judá pygua kuery reve? Ha'e rami 'rãgue py SENHOR renonde huvixa ojererokyjea rupi oiko raka'e, ha'e rami vy SENHOR pe ojapukai omboaxy aguã re. Ha'e ramo SENHOR ndojapovei ha'e kuery rovai ijayvuague. Ha'e nunga rupi aÿ mba'e re tu jaru 'rã ha'e rami ete nda'evei va'e nhanenhe'ẽ mombaarã? — he'i.

### *Profeta Urias ojukaa ague*

<sup>20</sup> Oiko avi raka'e amboae ava Quiriate-Jearim pygua, Semaías ra'y Urias. Ha'e va'e voi SENHOR rery rupi ayvu omombe'u va'ety. Ha'e rami vy ha'e va'e tetã ha'e yvy re ijayvu avi, Jeremias ijayvuague ha'e javi rami ae.

\* <sup>26:6</sup> Siló tetã py SENHOR ojapo va'ekue ma tetã ombovaipa, ha'e kuery tuuete mboae ramigua re ikuai ramo (1 Samuel 4.1-11).

<sup>21</sup> Ha'e ramo ha'e ijayvu ramo huvixa Jeoaquim ha'e ixupegua ipy'a guaxukueve ha'e yvatekueve ha'e javi oendu vy ojukaxe. Ha'e rami teñ Urias ha'e nunga oendu vy okyje vy ojava ovv Egito katy.

<sup>22</sup> Ha'e gui Egito katy huvixa Jeoaquim omondouka Acbor ra'y Elnatā avakue mboae reve.

<sup>23</sup> Ha'e kuery ma Egito yvy gui Urias oguenoẽ vy huvixa Jeoaquim-a py ju ogueru. Ha'e ramo huvixa ojuka uka kyxe py, he'õgue ogueraa uka guive iporiaukue'i pegua yvyrarupa py.

<sup>24</sup> Ha'e rã Jeremias ma Safã ra'y Aicão va'e oepy vy nomboaxa ukai raka'e heta va'e kuery ojukaxe va'e po py.

27

*Canga mba'emo kuāa ukaarā omoī aguā re ijayvuague*

<sup>1</sup> Josias ra'y Judá pygua huvixa Zedequias oĩ ypy'i jave povae ayvu SENHOR ombou Jeremias pe.

<sup>2</sup> "Po rami SENHOR ijayvu xevy: Ejapo peteī canga ixā va'e, ha'e emoi ndeaju'y rupi.

<sup>3</sup> Ha'e gui emondouka ayvu mombe'uarã Edom ha'e Moabe pygua huvixaa py, Amoramymino kuery ruvixaa py, Tiro ha'e Sidom tetã pygua huvixaa py guive. Ha'e guigua kuery Jerusalém py Judá pygua huvixa Zedequias pe ayvu reruare ae ha'eve ndeayvu reraara.

<sup>4</sup> Ha'e kuery pe aipo're uka 'rã huvixa kuery pe: 'Po rami SENHOR ixondaro reta va'e Israel kuery Ruete ijayvu. Po rami pendeayvu 'rã penderuvixa kuery pe:

<sup>5</sup> Xee ae kova'e yvy apoare, ha'e gui avakue ha'e mymba yvy re ikuai va'e amoingo va'ekue, xepo'aka etea rupi, ha'e xepo aupti reve. Ha'e rami vy amboaxa 'rã arov'yaa va'e pe rei.

<sup>6</sup> Aÿ ma yvy ha'e javi amboaxa 'rã xerembiguai Babilônia pygua huvixa Nabucodonosor po py. Ixupe amboaxa avi mymba nhuündy rupi ikuai va'e, ixupeagua ikuai aguã.

<sup>7</sup> Ixupe mà yvy regua ha'e javi 'rã ikuai, ta'y ha'e hamymino pe guive, ovaẽ peve ijyvy ju amboaxa aguã. Ha'e va'e jave py heta regua ha'e huvixa kuery ipo'aka ete va'e ombo'a 'rã escravo-rã', he'i.

<sup>8</sup> “Ha'e gui xapy'a rei amongue regua, e'ŷ vy amongue tetã pygua nda'ikuaixei 'rã Babilônia pygua huvixa Nabucodonosor pe, ha'e oaju'y rupi nomoĩ ukaxeい 'rã ixuguigua canga. Ha'e ramo ha'e va'e regua ambopaga 'rã kyxe py, karuai ha'e mba'eaxy vaikue py, ipo py amomba uka peve', hei' SENHOR.

<sup>9</sup> 'Ha'e nunga rupi pendea py profeta, imba'ekuaa va'e, oexa ra'u kuaa va'e, oexa'ã va'ety ha'e imba'evyky va'e kuery ou vy ijayvu teī pejapyxaka eme, pendevy "Ndapeikoi 'rã Babilônia pygua huvixa rembiguai" he'i ramo.

<sup>10</sup> Mba'eta pendevy ha'e kuery omombe'u 'rã apu rive pendeyvy gui mombyry peo aguã. Ha'e ramo xee rogueraa ukapa 'rã pemanomba aguã.

<sup>11</sup> Ha'e rã yvy regua oaju'y rupi Babilônia pygua huvixa guigua canga omoï uka, ha'e ixupe ikuai va'e ma xee aeja 'rã ijyvy re ae ikuai aguã. Ha'e py ae 'rã oma'etõ ha'e hekoa 'rã' he'i SFNHOB "

<sup>12</sup> Ha'e ramo ha'e va'e ayvu ha'e javi amombe'u Judá pygua huvixa Zedequias pe. Ha'e vy aipoa'e: "Pendeaju'y rupi ke pemoï uka Babilônia pygua huvixa guigua canga, ixupe pendekuai, guembiguai kuery pe guive. Ha'e ramj vy neikove 'rã

<sup>13</sup> Mba'e re tu remano ta ndevyguá kuery reve, kyxe py, karuai ha'e mba'eaxy vaikue py? Mba'eta ha'e rami aguã SENHOR ijayvu yvy regua Babilônia pygua huvixa pe nda'ikuaixei ya'a re.

<sup>14</sup> Pejapyxaka eme profeta kuery ayvu re, pendevy 'Ndapeikoi 'rã Babilônia pygua huyixa rembiguai', he'i ramo. Mba'eta pendevy omombe'u va'e ma apu meme.

<sup>15</sup> Mba'eta SENHOR aipoe'i: ‘Ha'e kuery ma xee namboui. Xerery rupi teĩ omombe'u merami rive 'rã ayvu. Mba'eta xee roipe'apa 'rã pemanomba aguã katy, pendevy ayvu omombe'u merami rive va'e reve', he'i.’

<sup>16</sup> Ha'e ramigua amombe'u sacerdote kuery ha'e heta va'e kuery ha'e javi pe. Ha'e vy aipoa'e: “Po rami SENHOR ijayvu: Pendu pota eme profeta kuery ayvu re, mba'eta pendevy omombe'u vy aipoe'i 'rã: ‘Ne'exa, mba'emo ryru SENHOR pegua oo pyguare ma are e'ÿ re oguerojevypaa 'rã Babilônia gui’, he'i 'rã. Ha'e ramigua ha'e kuery pendevy omombe'u va'e ma apu.

<sup>17</sup> Pejapyxaka eme ha'e kuery ayvu re. Pendekuai tema Babilônia pygua huvixa pe. Ha'e rami vy pekuave 'rã. Mba'e re tu kova'e tetã okanhymba ta?

<sup>18</sup> Xapy'a rei ha'e kuery profeta ete ri ikuai rã, ha'e kuery re anhetẽ ri SENHOR ayvu oĩ ramo tojerure ha'vy SENHOR ixondaro reta va'e pe, Jerusalém py SENHOR pegua oo py ha'e huvixa Judá pygua ropy tembiporu ndogueraapaaai va'ekue ogueraa uka e'ÿ aguã Babilônia katy.

<sup>19</sup> Ha'e rami avi po rami SENHOR ixondaro reta va'e ijayvu oo yta hi'aĩ va'e re, yy mbotya, hy'a yta ha'e tembiporu mboae tetã py opyta va'ekue,

<sup>20</sup> Babilônia pygua huvixa Nabucodonosor Babilônia katy ndogueraapai va'ekue Jeoaquim ra'y Judá pygua huvixa Jeconias Jerusalém gui ogueraa jave, Judá ha'e Jerusalém pygua yvatekueve ha'e javi reve,

<sup>21</sup> tá, po rami SENHOR ixondaro reta va'e Israel kuery Ruete ijayvu Jerusalém py SENHOR pegua oo py ha'e Judá pygua huvixa ropy mba'emo opyta va'ekue re:

<sup>22</sup> ‘Ha'e nunga ma Babilônia katy ogueraapaa va'erã meme. Ha'e py ma opyta 'rã ha'e kuery re aikuua pota aguã ára ovaë e'ÿa ja. Ha'e gui mae ma aru rukapa 'rã. Ha'e ramo kova'e tekao py ae ju 'rã oguerupaa', he'i SENHOR.’

## 28

### *Profeta ramigua rive Hananias va'e reve Jeremias ayvu py joakaague*

<sup>1</sup> Ha'e va'e ma'etÿa py ae, Judá pygua huvixa Zedequias oĩ ypy jave, irundy ma'etÿ ha'e peteĩ nhiruĩ jaxy re, ha'e va'e jave py ma Azur ra'y profeta Hananias Gibeão pygua ijayvu xevy. SENHOR pegua oo py, sacerdote kuery ha'e heta va'e kuery ha'e javi oendua py ijayvu xevy. Ha'e vy aipoe'i:

<sup>2</sup> — Po rami SENHOR ixondaro reta va'e, Israel kuery Ruete ijayvu vy aipoe'i: “Amopẽ ma Babilônia pygua huvixa guigua canga.

<sup>3</sup> Ha'e rami vy mokoĩ ma'etÿa py apy ju aru rukapa 'rã tembiporu SENHOR pegua oo py oĩ va'ekue ha'e javi, apy gui Babilônia pygua huvixa Nabucodonosor oipe'a vy Babilônia katy ogueraa va'ekue.

<sup>4</sup> Aru avi 'rã Jeoaquim ra'y Judá pygua huvixa Jeconias, ha'e Judá regua kuery Babilônia tetã katy escravo-rã ogueraapa pyre. Babilônia pygua huvixa guigua canga amopẽ ma vy arupa 'rã apy”, he'i SENHOR — he'i profeta ramigua rive.

<sup>5</sup> Ha'e ramo profeta Jeremias ombovai profeta Hananias, sacerdote kuery ha'e SENHOR pegua opy heta va'e kuery oendua py.

<sup>6</sup> Ha'e vy profeta Jeremias aipoe'i:

— Ha'eve va'e! Tove ha'e rami ae ri SENHOR tojapo. Tove SENHOR tojapopa ndeayvuague remombe'u va'ekue rupi, apy toguerupa ju Babilônia gui tembiporu SENHOR pegua oo pyguare, ha'e escravo-rã ogueraapa pyre ha'e javi.

<sup>7</sup> Ha'e rami avi endu pova'e ayvu ndevy ha'e heta va'e kuery ha'e javi pe amombe'u va'e.

<sup>8</sup> Profeta kuery yma ma voi xee neĩ ndee reiko e'ÿ mbove ikuai va'ekue ma omombe'u joe opu'ña va'erã, mba'emo vai ha'e mba'eaxy vaikue oiko 'rãa heta yvy regua ha'e tetã tuvixa va'e re.

<sup>9</sup> Ha'e gui peteĩ profeta mba'eve ndoikoi 'rãa rami omombe'u teĩ ijayvuague rami ete oiko ramo mae jaikuua 'rã anhetẽ SENHOR remimbou oikoa — he'i.

<sup>10</sup> Ha'e ramo profeta Hananias ma canga profeta Jeremias aju'y rupi oĩ va'e gui omboi vy omopẽmba.

<sup>11</sup> Ha'e rami vy heta va'e kuery oendua py ijayvu:

— Po rami SENHOR ijayvu: “Guĩ rami mokoĩ ma'etýa py amopẽ 'rã Babilônia pygua huvixa Nabucodonosor guigua canga yvy regua ha'e javi aju'y rupi oĩ va'e”, he'i. Ha'e rami rã profeta Jeremias ojepe'a ovy tape rupi.

<sup>12</sup> Ha'e gui ma profeta Hananias canga profeta Jeremias aju'y gui omopẽ rire Jeremias pe SENHOR ombou ju oavyu. Ha'e vy aipoe'i:

<sup>13</sup> — Tereo, Hananias pe ndeayvu ju. Ha'e vy aipo're: “Canga yvyra guigua remopẽ teĩ hekivia ferro guigua ju 'rã ajapo.

<sup>14</sup> Mba'eta po rami SENHOR ixondaro reta va'e Israel kuery Ruete ijayvu: Ha'e va'e regua kuery ha'e javi aju'y rupi amoĩ 'rã canga ferro guigua, Babilônia pygua huvixa Nabucodonosor rembiguai ikuai aguã. Ha'e ramo ikuai 'rãe ixupe. Ixupe guarã amboaxa avi mymba nhuündy rupi ikuai va'e”, he'i.

<sup>15</sup> Ha'e gui profeta Jeremias aipoe'i profeta Hananias pe:

— Hananias, endu ke aÿ. SENHOR nanemboui va'eri ndee rejapo heta va'e kuery apu re rive ojerovia aguã rami.

<sup>16</sup> Ha'e nunga rupi po rami SENHOR ijayvu: “Ne'exa, roipe'a 'rã yvy áry reikoa gui. Kova'e ma'etýa reve 'rã remano, mba'eta remombe'u SENHOR pe e'ÿ nhandekuai aguã regua”, he'i.

<sup>17</sup> Ha'e gui ha'e va'e ma'etýa reve profeta Hananias omano, sete jaxyta py.

## 29

### *Babilônia katy ogueraa pyre kuery pe Jeremias kuaxia omboparaague*

<sup>1</sup> Pova'e ayvu profeta Jeremias ogueraa uka kuaxia para py. Jerusalém gui ogueraa uka nhomongeta va'ety kuery mboae escravo-rã ogueraa pyre pe, sacerdote ha'e profeta kuery, ha'e heta va'e kuery Jerusalém gui Nabucodonosor Babilônia katy ogueraa va'ekue ha'e javi pe guive.

<sup>2</sup> Jerusalém gui huvixa Jeconias oo rire, ixy ha'e jopya kuery reve, Judá regua yvatekueve, ha'e Jerusalém pygua oo apoa ha'e ferro re omba'eapo va'e kuery reve ogueraa avi rire ogueraa uka kuaxia.

<sup>3</sup> Safã ra'y Elasa ha'e Hilquias ra'y Gemarias pe ae ogueraa uka kuaxia para. Ha'e ramo ha'e kuery Judá pygua huvixa Zedequias omondouka Babilônia katy, Babilônia pygua huvixa Nabucodonosor oexa va'erã. Kuaxia re oĩ va'e ma po rami:

<sup>4</sup> “Po rami SENHOR ixondaro reta va'e Israel kuery ruete ijayvu Jerusalém tetã gui Babilônia katy escravo-rã araa uka va'ekue ha'e javi pe.

<sup>5</sup> Pejapo ke penderorã, penderekoa guive Babilônia py pendekuaia py ae. Penhotý yvyra hi'a va'erã, ha'e pe'u hi'a.

<sup>6</sup> Pejou ke pendera'yxyrã, pendera'y ha'e penderajy aguã. Pejou avi pendera'y kuery ra'yxyrã, penderajy kuery guive pemomenda 'rã imemby ha'e ipi'a aguã. Penderetave peovy ha'e py, pepave peovy eme.

<sup>7</sup> Penhea'ã ke tetã rogueraa ukaague oĩ porã aguã re, SENHOR pe pejerure guive tetã re, mba'eta ha'e va'e tetã oĩ porã ramo peẽ voi pendekuaia porã 'rã.

<sup>8</sup> Mba'eta po rami SENHOR ixondaro reta va'e Israel kuery Ruete ijayvu: Penhembotavy uka eme profeta ha'e imba'ekuaa va'e kuery penembyte ikuai va'e pe. Pejapyxaka eme oexa ra'u kuaa va'e kuery ayvu re, mba'eta penduxea rami rive oexa ra'u ramo.

<sup>9</sup> Ha'e kuery ma xerery rupi omombe'u merami rive 'rã. Xee ma namboui”, he'i SENHOR.

<sup>10</sup> Po rami ijayvu SENHOR: “Ha'e gui Babilônia tetã ára setenta ma'etÿa ojeupitypa ma ramo aikuua pota ju 'rã peẽ kuery re. Ha'e rami vy amoingo 'rã rogueroayvu porãague, kova'e teko a py roguerupa ju aguã.

<sup>11</sup> Xee anho'i aikuua penerenonderã re anhembopy'aa”, he'i SENHOR. “Anhembopy'a pendekuai porã aguã re, pendekuai axy aguã nda'e, opaa py pearõa rami romoingo porã aguã.

<sup>12</sup> Ha'e va'e jave pejapukai 'rã xevy, xevy ju 'rã pejerure. Ha'e ramo xee aendu 'rã pejerurea.

<sup>13</sup> Peẽ kuery xereka ju 'rã, xejou ete 'rã guive, pendepy'a ha'e javi py xereka vy.

<sup>14</sup> Peẽ kuery xejou 'rãe. Ha'e ramo ambopyau 'rã pendekuaia. Romboatypa ju 'rã ha'e javi regua pendekuaia rogueraa ukaague gui, roguerupa ju 'rã escravo-rã rogueraa ukapaague gui”, he'i SENHOR.

<sup>15</sup> “Ha'e rami teĩ peẽ kuery ma aipopeje: ‘Babilônia tetã py ae SENHOR omoingo profeta kuery nhandevy’, peje.”

<sup>16</sup> Ha'e rami avi po rami SENHOR ijayvu tenda huvixa Davi openaaty py oguapy va'e, ha'e Jerusalém tetã pygua kuery ha'e javi re, penderyke'y kuery escravo-rã pendereve ndogueraai va'ekue re.

<sup>17</sup> Po rami SENHOR ixondaro reta va'e ijayvu: “Ne'exa, ha'e kuery rovai ambou 'rã kyxe, karuai ha'e mba'eaxy vaikue. Ha'e kuery re ajapo 'rã figo'a vaikueve ja'u aguã nda'evei va'e re rami.

<sup>18</sup> Mba'eta ha'e kuery rakykue xee amondouka 'rã kyxe revegua, karuai ha'e mba'eaxy vaikue. Ajapo 'rã yvy regua tetã ikuai va'e mongyjearã ikuai aguã rami, amoï 'rã nhomondyipaarã ha'e ojojai rei pyrã. Ha'e ramo yvy regua ha'e javi mbyte ikuai 'rã oximba reia rupi mamo rã amondoukaague py,

<sup>19</sup> xeayvu re ha'e kuery ndojapyxakai rire”, he'i SENHOR. “Ha'e va'e ayvu mombe'uarã ma ha'e kuerya py ambou xerembiguai profeta kuery ko'ẽ rai guive. Ha'e rã peẽ kuery napendui”, he'i SENHOR.

<sup>20</sup> Ha'e nunga rupi pendu na SENHOR ayvu, Jerusalém gui Babilônia katy escravo-rã pendereraa va'ekue ha'e javi.

<sup>21</sup> SENHOR ixondaro reta va'e, Israel kuery Ruete ma po rami ijayvu hery rupi merami rive ayvu mombe'ua kuery Colaías ra'y Acabe ha'e Maaséias ra'y Zedequias rekora re: “Ne'exa, ha'e kuery ma xee amboaxa 'rã Babilônia pygua huvixa Nabucodonosor po py. Ha'e ramo ojuka 'rã peẽ kuery pexaa py.

<sup>22</sup> Ha'e rami rire Judá gui escravo-rã ogueraa pyre kuery ijayvu vai vy aipoe'i 'rã: ‘Tove SENHOR tandeapo Acabe ha'e Zedequias re ojapoague rami, mba'eta Babilônia pygua huvixa oapy tata py

<sup>23</sup> Israel kuery mbyte ha'eve'ÿa rami ojapoague re’, he'i 'rã. Mba'eta ha'e kuery itavy rei oirã ra'yxy kuery reve, ha'e xerery rupi merami rive omombe'u ayvu xee amombe'u uka va'ekue'ÿ. Xee aikuua ha'e aexa ae ha'e nunga”, he'i SENHOR.

<sup>24</sup> “Ha'e gui ndeayvu ke Neelão pygua Semaías pe. Ha'e vy aipo're:

<sup>25</sup> ‘Po rami SENHOR ixondaro reta va'e, Israel kuery Ruete ijayvu: Ndee ma nderery rupi rive kuaxia para remondouka Jerusalém pygua kuery pe, Maaseías ra'y sacerdote Sofonias ha'e sacerdote kuery ha'e javi pe guive. Ha'e vy aipo're va'ekue:

<sup>26</sup> “Sacerdote-rã SENHOR nemoï raka'e sacerdote Joiada rekovia, SENHOR pegua oo re repena aguã. Ha'e ramo ava inhakã porã e'ÿ va'e profeta onhemoingo va'e rei rembo'a aguã, ha'e yvyra re rejokua uka aguã.

<sup>27</sup> Ha'e gui aÿ, mba'e re tu nandeayvu etei profeta Jeremias Anatote pygua ayvu omombe'u va'ety pe?

<sup>28</sup> Mba'eta ha'e va'e ma Babilônia katy omondouka po rami ayvu mombe'uarã kuery: 'Are teri 'rã escravo pendekuaia. Ha'e nunga rupi pejapo penderorã, penderekua ha'e py ae. Penhotõ yvyra hi'a va'erã, ha'e pe'u hi'a', he'i va'ekue kuaxia para re.' ''

<sup>29</sup> Kuaxia para ha'e va'e ayvu oĩa ma sacerdote Sofonias ogueroayvu profeta Jeremias oendua py.

<sup>30</sup> Ha'e ramo Jeremias pe SENHOR ombou oayvu. Ha'e vy aipoe'i:

<sup>31</sup> "Aipo'ere uka ke escravo-rã ogueraa pyre ha'e javi pe: 'Po rami SENHOR ijayvu Neelão pygua Semaías re: "Semaías ma xee namboui va'eri pendevy ayvu omombe'u apu re rive perovia aguã."

<sup>32</sup> Ha'e ramo po rami SENHOR ijayvu: "Ne'exa, ambopaga 'rã Neelão pygua Semaías, hamymino kuery reve. Ha'e ramo hamymino ndoikoi 'rã kova'e kuery mbyte hekoá va'e, ndoexai 'rã guive mba'emo porã xevygua kuery pe ajapo rã, xerovai ijayvu rire", he'i SENHOR.' "

## 30

### *Nhanderuete ojeupagua kuery ogueru ju aguã re ijayvuague*

<sup>1</sup> Jeremias pe SENHOR oayvu ombou vy aipoe'i:

<sup>2</sup> "Po rami SENHOR Israel kuery Ruete ijayvu: Embopara ke peteĩ kuaxia re ayvu xee aipoa'ea ha'e javi.

<sup>3</sup> Mba'eta ou ma oiny ára xevygua Israel ha'e Judá kuery ikuiaia ambopyau aguã. Ha'e vy ajapo 'rã tamoi kuery yvyrã ame'ẽ va'ekue py ju ojevypa aguã rami, ha'e py ae hekoá aguã", he'i SENHOR.

<sup>4</sup> Ha'e gui Israel ha'e Judá kuery reko re ju SENHOR ijayvu.

<sup>5</sup> Ha'e vy aipoe'i: "Roendu oryryipaa ha'e okyjea nhendu, ikuai porãa e'ŷ.

<sup>6</sup> Ha'e gui peporandu, pexa pota na pova'e re: Avakue nda'u oendu 'rã ri kyrĩ va'e raxy? Ha'e ramigua ndoikoi ramo mba'e re tu ha'vy aexa peteĩ-teĩ ava guye rupi opo omoi rã, kyrĩ va'e oikuavã'i ta va'e rami? Mba'e re tu hova xiñguepa rei okuapy?

<sup>7</sup> Mba'eta ha'e va'e ára nda'evei ete 'rã, amboae ndoikoi 'rã guive ha'e ramigua! Jacó ramymino kuery ojexavai aguã ára ae 'rã. Ha'e rami teĩ ha'e kuery oo jepe 'rã.

<sup>8</sup> Ha'e va'e ára ma xee amopẽmba 'rã pendeaju'y rupi canga oĩ va'e, amondopa 'rã guive ixã pendejokuaa", he'i SENHOR ixondaro reta va'e. "Ha'e rami rire yvy mboae regua ndogueraavei 'rã xevygua kuery escravo-rã.

<sup>9</sup> Mba'eta SENHOR nguuete pe ae 'rã xevygua kuery ikuai, Davi ha'e kuery ruvixarã amoí va'erã pe guive.

<sup>10</sup> "Ha'e nunga rupi xerembiguai Jacó regua, ekyje eme. Israel regua, enhemondyi eme", he'i SENHOR. "Mba'eta rogueraa jepe 'rã yvy mombyrya escravo-rã ndereraa ague gui, neramymino kuery guive. Ha'e ramo Jacó kuery ojevypa ju vy ikuai rive'i 'rã avave rei nomoangekoai rã. Ndoikoi 'rã imongyjarã.

<sup>11</sup> Mba'eta xee aiko 'rã ndereve rogueraa jepe aguã", he'i SENHOR. "Ha'e rami aguã rami ae amomba 'rã yvy regua ha'e kuery mbyte rupi romoañague va'e. Ha'e rã pende ma noromomba rivei 'rã. Ha'e rami avi rombopaga 'rã ha'evea rami, opa marã pendekuaiaque re norombopaga e'ŷi 'rã."

<sup>12</sup> Mba'eta SENHOR aipoe'i: "Reiko axya ma omonguera pyrã e'ŷ, ndeai ma haxy ete va'e.

<sup>13</sup> Avave ndoikoi nderepyarã. Ndeai pe ma jipoi moã, neĩ imbojaarã.

<sup>14</sup> Neirũ kuery hexaraipa ma ndegui, noroporanduvei ma ndere. Nderekoi vai ha'e rejeyavy ete rire rojapo vai nderovaigua rami, ipy'a ratã va'e nhombopagaa rami.

<sup>15</sup> Mba'e re tu neraxê ri reikovy ndeai gui? Haxy rendu va'e ma omonguera pyrã e'ŷ. Nderekoi vai ha'e rejeyavy ete ramo ae roguereko ha'e rami.

<sup>16</sup> Ha'e rã nemombaare kuery voi omombaa 'rã, nderovaigua kuery peteĩ-teĩ oguerapaa 'rã escravo-rã. Nemba'e rei-rei pe'aare kuery mba'e rei-rei ju oipe'apaa 'rã, ndegui ha'e kuery oipe'apa rive rire amboaxa 'rã oipe'apa rive va'erã po py.

<sup>17</sup> Ha'e gui xee ae romoexaĩ ju 'rã", he'i SENHOR. "Xee ae romonguera ju 'rã ndeai, ndevy pe 'Oeja pyre' ha'e 'Sião tetã re noporanduavei ma 'rã', he'i okuapy rire teĩ."

<sup>18</sup> SENHOR aipoe'i: "Ne'exa, amoĩ porã ju 'rã Jacó kuery rekoia, amboaxy 'rã ikuiaia rupi. Guetã ma ojapo ju 'rã mba'emo ra'ykue aty áry, ha'e huvixa oĩ ju 'rã ngoo py, jypy guare rami ae.

<sup>19</sup> Ha'e kuery oporaei 'rã joguerovy oguerovy'a vy, ov'y'a ete vy oguerory 'rã okuapy. Amboetave 'rã, ha'e nomombaavei 'rã. Amboyvateve 'rã, ha'e nomo'yvyi'avei 'rã.

<sup>20</sup> Ta'y kuery ha'e tajy kuery ikuai porã 'rã jypy guare rami, ha'e kuery rekoia voi amoĩ atã 'rã xerenonde. Ha'e rã imoingo axyare kuery ma ambopagapa 'rã.

<sup>21</sup> Huvixarã ma ha'e kuery regua ae 'rã oĩ, ha'e kuery mbyte gui oiko 'rã opena va'erã. Ha'e va'e amonhemboja ramo onhemboja 'rã xere. Mba'eta mava'e 'rã tu oakã gui ae ipy'a guaxu xere onhemboja aguã?" he'i SENHOR.

<sup>22</sup> "Ha'e ramo peẽ kuery ma xevyguia 'rã pendekuai, ha'e rã xee ma aiko 'rã Penderuete", he'i.

<sup>23</sup> Ne'exa, ou oiny SENHOR-a guigua yvytu atã! Ipoxya ojekuaa ma ouvy, yvytu jere rami heko vai va'e kuery akã áry ou aguã.

<sup>24</sup> SENHOR poxya raku ma ha'ekue py ndojevyi 'rã guive, op'y'a re oipotaa oĩ va'e ojeupitypa e'ŷa ja. Ha'e nunga ma opaa ára py peikuaa porã 'rã.

## 31

### *Iporiauague gui ombovy'a ju aguã re ijayvuague*

<sup>1</sup> SENHOR aipoe'i: "Ha'e va'e jave py aiko 'rã Israel regua ha'e javi Ruete, ha'e rã ha'e kuery ma ikuai 'rã xevyguia."

<sup>2</sup> Po rami SENHOR ijayvu: "Xevyguia kuery kyxe gui oo jepe va'ekue amboaxy ju 'rã tekao e'ŷa rupi ikuiaia py. Xee anhemboja vy amokane'ōgua 'rã Israel kuery."

<sup>3</sup> Mombyry gui SENHOR xevy ojexa uka vy aipoe'i: "Mborayvu opa e'ŷ va'e rupi roayvu. Ha'e rami vy roayvua rupi rogueru.

<sup>4</sup> Peẽ kunhataĩgue Israel regua, romopu'ã ramo pepu'ã ju 'rã pe'amy! Teĩgue ju pandeiro reve peo 'rã ojeroky va'e kuery reve peporaeia rupi.

<sup>5</sup> Samaria yvyty re penhotŷ nho 'rã uva. Inhotŷare kuery hi'a ho'u vy oguerovy'a 'rã okuapy.

<sup>6</sup> Mba'eta oiko 'rã ára Efraim regua yvyty rupi tetã re opena va'e kuery 'Pepu'ã ke, jaje'oi Sião tetã py SENHOR Nhanderuete oĩa katy', he'i okuapy aguã."

<sup>7</sup> Mba'eta po rami SENHOR ijayvu: "Peroporaei ke Jacó kuery pevy'a reve, yvy regua kuery akã ikuai ramo perovy'a. Pejapukai, peporaei. Ha'e vy aipopeje: 'SENHOR, eraa jepe avi ke ndevyguia Israel kuery rembyrekue', peje.

<sup>8</sup> Mba'eta ne'exa, aru 'rã yvy kuaray ijapu'a'ia katy itui va'e gui, amboatypa 'rã yvy jave rupi gui. Ha'e ramo ha'e kuery oupa 'rã: ára revegua e'ŷ, oguata vaikue'i va'e, imemby ryru va'e ha'e oikuavã va'erã teĩ. Ojevy pavẽ 'rã kyvõ katy.

<sup>9</sup> Ojae'o reve 'rã ou, xevy pe ojapukai 'rã joguerovy arua rupi. Areko 'rã heruvy yakã'i oxyry porã va'e yvýry rupi, ha'e tape hi'yvi porã va'e onhepyxanga e'ŷ aguã rupi, mba'eta Israel kuery ru aiko, Efraim kuery ma xera'y jypyguia", he'i.

<sup>10</sup> Peẽ yvy regua kuery, pendu ke SENHOR ayvu. Pemombe'u ke ye'ẽ yvýry mombyry etea rupi. Ha'e vy aipopeje: "Israel kuery moaĩmbaare ae ju omboatypa ta, ha'e kuery re opena 'rã vexa'i re opena va'e rami.

<sup>11</sup> Mba'eta SENHOR oepy Jacó kuery, ogueraa jepe ha'e kuery gui imbaraetekueve po gui.

12 Ha'e ramo ou vy oporaei 'rā okuapy Sião yvyty áry, ha'e kuery pe SENHOR mba'emo ome'ẽ rā oguerovy'a ete 'rā guive, mba'emo aju, vinho, azeite, vexa'i ha'e vaka ra'y. Ha'e kuery nhe'ẽ oiko porā 'rā yvotyty omoakŷmbi rami, nda'ipiruvei ma 'rā guive.

13 Ha'e va'e jave py kunhataŷgue ov'y'a 'rā okuapy ojerokya py, kunumigue ha'e tujakue'i voi. Hexayague xee amombo'opa ramo ov'y'a ju 'rā. Ndov'y'aiague gui ambovy'a ju 'rā.

14 Sacerdote kuery guive amongaru 'rā ikyra va'e re, xevygua kuery hevyatâmba 'rā mba'emo porā ame'ẽ va'e re", he'i SENHOR.

15 Po rami SENHOR ijayvu: "Ramá tekaoa py onhendu va'ekue hevovo rei va'e, hexay ha'e ipy'a vai ete va'e. Ha'e va'e ma Raquel omemby kuery re ojae'oa. Imemby kuery jipovei ma ramo nonhembovy'a ukai."\*

16 Ha'e rami teī po rami SENHOR ijayvu: "Ejae'ove eme, nderexayve eme guive. Mba'eta nememby kuery ojevypa ju 'rā ngovaigua kuery yvy gui.

17 Raka'eve rā oiko nho 'rā rearō reikovy va'e, mba'eta nememby kuery ojevypa ju 'rā oyvy re ae", he'i SENHOR.

18 "Xee aendu Efraim kuery ijayvu vy aipoe'i rā: 'Vaka ra'y imâxo porā e'ŷ va'e rami aiko va'ekue teī ndee xemo'arandu. Aŷ gui ma xerekoreroa ke teko pyau re ju aiko aguã, mba'eta ndee ma SENHOR Xeruete.

19 Anhetê, ajeko rerova rire anhemboaxy va'ekue, xekunumi jave aikoague re xema'endu'a vy. Xerekombo'e rire xepexo re aipete-pete. Aximba ha'e ndaikuaavei rei va'ekue", he'i.

20 Ha'e rami avi Efraim e'ŷ teve xera'y arov'y'a ha'e ayvu ete va'e? Mba'eta ixupe xeayvu nhavõ xema'endu'a ju hexe ayvu etea rupi. Hexe vy xepy'a tyt atâ amboaxy ete vy", he'i SENHOR.

21 "Pemopu'ã ke pemo'amy yvy markaarã, peguataa rupi peja tape kuaa ukaarã, pexa pota ke peovy tape rupi peikoa re. Ha'e gui ma kunhataī Israel regua, ejevy ke, ejevy ke neretâ rejaague katy.

22 Xerajy xenhe'ẽ rendu e'ŷ va'e, raka'e peve 'rā tu ha'eve'ŷa rami rei reiko? Mba'eta yvy re SENHOR omoingo mba'emo pyau: kunha oikuavã 'rā ava."

23 Po rami ijayvu SENHOR ixondaro reta va'e, Israel kuery Ruete: "Judá kuery ikuia ambopyau ramo oyvy ha'e guetâ ikuai va'e rupi ha'e kuery aipoe'i ju 'rā: 'Ndee yvyty iky'a e'ŷ va'e teko porā oña, tove SENHOR tandereroayvu porā', he'i rā okuapy.

24 Mba'eta ha'e va'e yvyty re ju 'rā Judá kuery ikuai, tetâ ikuai va'e ha'e javi re guive, mba'ety rupi omba'epo va'e ha'e vexa'i re opena va'e kuery voi.

25 Mba'eta amombaraete inhe'ẽ kangy va'e, amongaru guive ho'a rai'i va'e", he'i.

26 Ha'e gui amyí vy ama'ẽ ju. Akea ma xembovy'a ete va'ekue.

27 Ha'e gui SENHOR aipoe'i: "Ne'exa, ou ma oiny ára Israel ha'e Judá kuery amboetave ju aguã, avakue ha'e mymba kuery guive.

28 Mba'eta ymave rupi ha'e kuery re aikuaa pota va'ekue aipe'a aguã, aity, ambojexavai, ambovaipa ha'e amoingo axy aguã, teī aŷ gui ma ha'e kuery re aikuaa pota 'rā amopu'ã ha'e anhotŷ ju aguã", he'i SENHOR.

29 "Ha'e va'e ára ma aipo nda'eavei ma 'rā: 'Tuu kuery uva aky'i ho'u rire ta'y kuery raĩ voi nda'eavei', nda'eavei 'rā.

30 Ha'e rami 'râgue py ma peteī-teī omano 'rā gueko vaiague re ae. Uva aky'i 'uare kuery raĩ ae ma nda'eavei 'rā."

### *Israel kuery pe Nhanderuete guexeve guarã ojapo pyau aguã re ijayvuague*

31 SENHOR aipoe'i: "Ne'exa, ou ma oiny ára Israel ha'e Judá kuery reve xereve guarã ajapo pyau aguã,

\* 31:15 Raquel ma Jacó ra'y José xy, ha'e Israel kuery jaryi jypy raka'e (Gênesis 30.22-24). Ha'e gui Ramá tekaoa ma Babilônia katy escravo-rã ogueraa pyrã kuery ojokuapaague (Jeremias 40.1). Aŷ ma Mateus 2.17-18 py kova'e ayvu rupi ijayvu ju, mba'eta Jesus ou jajae'oa gui nhanemombo'o aguã.

<sup>32</sup> tamoĩ kuery reve ajapo va'ekue ramigua e'ŷ. Ha'e jave ma ha'e kuery po re ajopy reve anoẽmba va'ekue Egito yvy gui. Ha'e rami teĩ ha'e kuery ombovaipa xereve guarã ajapo va'ekue, ime rami aiko teĩ.

<sup>33</sup> Ha'e gui ha'e va'e ára oaxapa ma rire po rami 'rã Israel kuery reve ajapo pyau xereve guarã. Ha'e kuery py'a re 'rã ambopara xeguigua lei, ikuraxõ re ae 'rã ambopara. Xee aiko 'rã Tuuete, ha'e rã ha'e kuery ma ikuai 'rã xevygua.

<sup>34</sup> Ha'e rami rire peteĩ-teĩ nombo'evei ma 'rã oirũ neĩ guyvy kuery, 'Peikuaa na SENHOR' he'ia py, mba'eta xekuaa pavẽ 'rã, yvyigueve ha'e yvatekueve voi. Mba'eta amboguepa 'rã heko vaiague, ojejavyague re naxema'endu'avei 'rã guive", he'i SENHOR.\*

<sup>35</sup> Po rami ijayvu SENHOR ara py kuaray ojope aguã rami ojapo va'ekue, ha'e gui jaxy ha'e jaxy-tata pyávy hendy aguã oeja va'ekue, ye'ẽ omyĩ aguã ha'e yai opu'ã-pu'ã va'e hevovo-vovo aguã rami. Hery ma SENHOR ixondaro reta va'e. Ha'e vy aipoe'i:

<sup>36</sup> "Ha'e rami aguã aeja va'ekue xerenonde oaxa rive e'ŷa ja Israel kuery voi nokanhymbai 'rã xerenonde gui, peteĩ regua riae 'rã ikuai", he'i SENHOR.

<sup>37</sup> SENHOR aipoe'ive ju: "Yvate yva ha'e javi rupi peã kuaapa e'ŷa ja, ha'e kyvõ yvy guýry pexa pota kuaapa e'ŷa ja xee ndaejapa rivei 'rã Israel kuery, ha'e rami ete ha'e kuery ikuai rire teĩ", he'i SENHOR.

<sup>38</sup> SENHOR aipoe'ive ju: "Ne'exa, ou ma oiny ára kova'e tetã SENHOR peguarã ojapoa ju aguã, Hananel torre hi'aĩa guive tetã koraojerea py okẽ oĩa peve.

<sup>39</sup> Ha'e gui henondeve katy ju 'rã ixã oa'ãaty omoatãa heravy Garebe yvy'ã peve, ha'e gui Goa katy ju 'rã ojere ovy.

<sup>40</sup> Ha'e gui yvyugua te'õgue ha'e tanhimbu ikuaiaty, ha'e nhuñdy Cedrom yakã'i peve itui va'e, okẽ kavaju oikeaty kuaray oua katy oĩ va'e peve, ha'e va'e voi omboaxapaa 'rã SENHOR peguarã. Ha'e va'e rire Jerusalém tetã ndoityavei 'rã, nombovaipaavei 'rã guive."

## 32

### Peteĩ yvy Anatote py itui va'e Jeremias ojoguaague

<sup>1</sup> Jeremias pe SENHOR oayvu ombou ju dez ma'etŷa re ma Judá pygua huvixa Zedequias oĩ jave py, ha'e dezoito ma'etŷ re ma huvixa Nabucodonosor oĩ jave py guive.

<sup>2</sup> Ha'e va'e jave py Babilônia pygua huvixa xondaro kuery ojokopa Jerusalém tetã, ha'e profeta Jeremias ombotya imoiny Judá pygua huvixa roka py harõa xondaro kuery ikuaiaty py.

<sup>3</sup> Mba'eta Judá pygua huvixa Zedequias omboty uka vy aipoe'i va'ekue:

— Mba'e re tu ndee remombe'u SENHOR aipoe'ia rami: "Kova'e tetã omboaxa 'rã Babilônia pygua huvixa po py, ha'e rã oipe'apa 'rã", 're?

<sup>4</sup> "Ha'e gui Judá pygua huvixa Zedequias ndoo jepei 'rã caldeu kuery po gui. Ha'e rami 'rãgue py omboaxaa 'rã Babilônia pygua huvixa po py. Ha'e ramo jomeme ijayvu 'rã jova re oma'ẽ reve.

<sup>5</sup> Ha'e rire ha'e va'e ma Babilônia katy ogueraa 'rã Zedequias, ha'e py opyta aguã SENHOR hexe oikuaa pota ju peve, aipoe'iaque rami vy. Ha'e gui caldeu kuery re pepu'ã teĩ napendepo'akai 'rã", 're va'ekue — he'i.

<sup>6</sup> Ha'e ramo Jeremias ombovai:

— SENHOR oayvu xevy pe ombou vy aipoe'i:

<sup>7</sup> "Ne'exa, nderuvy'i Salum ra'y Hananel ndea py ou vy aipoe'i 'rã: 'Ejogua na xeyvy Anatote py itui va'e, mba'eta ndee anho ha'eve rejogua aguã, he'i 'rã."

<sup>8</sup> Ha'e gui SENHOR ayvu aipoe'iaque rami xea py ou xeruvy'i ra'y Hananel oka harõa xondaro kuery ikuaiaty py. Ha'e vy aipoe'i xevy: "Ejogua na xeyvy Anatote py

---

\* <sup>31:34</sup> Hebreus 8.8-12, 10.16-17

Benjamim regua yvy re itui va'e, mba'eta ndee anho ha'eve rejogua vy rejopy aguã. Ejogua na ha'vy", he'i. Ha'e rami aendu vy aikuua SENHOR ijayvuague rami oikoa.

<sup>9</sup> Ha'e rami vy xeruvy'i ra'y Hananel gui ajogua yvy Anatote py itui va'e. Hepyrã dezessete hatã'i va'e prata guigua aa'ã karamboae.

<sup>10</sup> Kuaxia re xerery ambopara rire amboja selo py, ikuaa ukaarã aenoĩ guive. Ha'e vy hepyrã aa'ã mba'emo opejaa py.

<sup>11</sup> Ha'e rami vy araa ipara va'e ajoguaague regua. Lei re oña rami vy amboja va'ekue araa, ha'e oguerova pyre amboja e'ý va'ekue guive.

<sup>12</sup> Kuaxia mokoïve amboaxa Nerias ra'y Maaséias ramymino Baruque po py. Hananel xeruvy'i ra'y oexaa py amboaxa, ajoguaague regua kuaa ukaarã kuery guery ombopara va'ekue oexaa py, ha'e gui judeu kuery oka py xondaro harõa kuery ikuaiaty py oguapy okuapy va'e ha'e javi oexaa py guive.

<sup>13</sup> — Ha'e kuery oendua py Baruque pe xeayvu vy aipoa'e va'ekue:

<sup>14</sup> “Po rami SENHOR ixondaro reta va'e Israel kuery Ruete ijayvu: ‘Ejopy ke kuaxia para yvy rejoguaague regua. Omboja pyre ha'e omboja pyre'ý reraa vy emoĩ porã hyru nhae'ü guigua py, heta ára re oĩ porã aguã.

<sup>15</sup> Mba'eta po rami SENHOR ixondaro reta va'e Israel kuery Ruete ijayvu: Kova'e yvy re ma pejogua nho 'rã oo, mba'ety ha'e uvaty', he'i", ha'e va'ekue.

### *Nhanderuete omombe'u porãve aguã re Jeremias ojerureague*

<sup>16</sup> Ha'e gui kuaxia para yvy ajoguaague regua ma Nerias ra'y Baruque pe amboaxa ma rire SENHOR pe anhembo'e ainy. Ha'e vy aipoa'e:

<sup>17</sup> — Ai SENHOR Xeruete! Yva ha'e yvy rejapo va'ekue ndepo'aka etea rupi ha'e ndepo reupi reve. Mba'eve rei nda'ipoi ndevy haxy va'e nemondyiariã.

<sup>18</sup> Ndee ma mbovy e'ý pe rexia uka 'rã remboaxya, ha'e oreramoĩ kuery ojejavyague re rembopagaague regua ta'y kuery re remoĩ va'e guive. Ndee ma Oreruete yvate ha'e ipo'aka ete va'e. Nderery ma SENHOR ixondaro reta va'e.

<sup>19</sup> Renhomongeta porã ha'e nerembiapo porã ete va'e. Mba'eta nderexa ojepe'a oiny avakue ra'y kuery ikuiaia rexapa aguã, peteĩ-teĩ pe ikuaiague rekovia reme'ẽ aguã, mba'emo ojapoague rami ae.

<sup>20</sup> Ndee ma hexa pyrã ha'e nhomondyipaarã rejapo va'ekue Egito yvy re, kova'e ára peve Israel kuery mbyte rupi guive, amboae regua ikuiaia rupi teĩ. Ha'e rami rejapo nderery oikuua pavẽ aguã rami, aÿ peve rejapoa rami.

<sup>21</sup> Ndevyguia Israel kuery Egito yvy gui renoẽmba va'ekue hexa pyrã ha'e nhomondyipaarã rexia uka vy, ndepo reupi vy ndepo'akaa rexia uka reve nhomondyipa etea rupi.

<sup>22</sup> Ha'e kuery pe kova'e yvy reme'ẽ va'ekue, tamoĩ kuery pe reura reve ndeayvuague ae, kamby ha'e ei oata e'ýa.

<sup>23</sup> Ha'e ramo ha'e py ha'e kuery ovaẽ vy hekoia okuapy teĩ nanenhe'ẽ rendui raka'e, ndeguigua lei rupi nda'ikuaxiei vy. Rejapo uka va'ekue ma peteĩve voi ha'e kuery ndojapoi. Ha'e nunga rupi ha'e kuery áry rembou guĩ nunga mba'emo vai.

<sup>24</sup> Ne'exa, kova'e tetã jokoa kuery ma yvy ojo'o heruvy ipo'aka aguã. Anhetẽ tetã omboaxaa ma caldeu kuery orere opu'ã va'e kuery po py. Kyxe, karuai ha'e mba'eaxy vaikue py ndeayvuague rami meme oiko. Ndee ae rexapa.

<sup>25</sup> Ha'e rami teĩ SENHOR Oreruete, mba'exa ru ndee aipo're xevy: “Ejogua ke yvy peráta re, ha'e enoĩ ikuua ukaarã guive”, 're va'ekue, caldeu kuery po py tetã omboaxaa ma teĩ? — ha'e.

### *Nhanderuete ombovaiague*

<sup>26</sup> Ha'e ramo SENHOR ombou oayvu Jeremias pe. Ha'e vy aipoe'i:

<sup>27</sup> “Ne'exa, xee ma SENHOR, oikove va'e ha'e javi Ruete aiko. Ha'e rami vy oiko 'rã ri nda'u xevy pe haxy vai ete va'erã?”

<sup>28</sup> Ha'e nunga rupi SENHOR ijayvu po ramí: “Ne'exa, kova'e tetã amboaxa 'rã caldeu kuery po py. Babilônia pygua huvixa Nabucodonosor po py ae 'rã amboaxa. Ha'e ramo oipe'a 'rã.

<sup>29</sup> Kova'e tetã re caldeu kuery opu'ã vy ovaẽmba 'rã okuapy. Tetã re tata omoĩ vy oapypa 'rã oo ikuai va'e ha'e javi, ijapte áry Baal ra'angaa pe heakuã porã va'e ha'e pygua kuery oapyague, ha'e nguuete ramigua mboae pe mba'emo rykue onhoẽague guive, xembopoxy aguã rami rive.

<sup>30</sup> Mba'eta Israel ha'e Judá kuery ma kunumi guive xerenonde ojapo mba'emo vai anho, mba'eve ndojapoi 'rã okuapy xembopoxyarã e'ŷ vy”, he'i SENHOR.

<sup>31</sup> “Mba'eta kova'e tetã pygua kuery ma xembopoxy ha'e ndaxeia'eveia rupi anho ikuai, tetã ojapoa ára guive aŷ peve, xerenonde gui aipe'apa aguã rami.

<sup>32</sup> Israel ha'e Judá kuery ojapo vaia ha'e javi rupi xembopoxy okuapy, huvixa kuery, yvatekueve, sacerdote ha'e profeta kuery, avakue Judá ha'e Jerusalém pygua ha'e javi guive.

<sup>33</sup> Ha'e kuery ma okupe rive oguerova xea katy, ngova e'ŷ. Ko'ẽ rai guive ambo'e teĩ ha'e kuery ndojapyxakai, xeayvua ndojopyxei vy.

<sup>34</sup> Ha'e ramí 'rãgue py xerery oĩaty opy ete omoĩ okuapy ojeguarupy, omongy'apa rei vy.

<sup>35</sup> Baal ra'angaa pe ojapo okuapy imbojerovia atyrã Hinom ra'y rekoague yvyugua py, ha'e py gua'y kuery ha'e guajy kuery oapy aguã nguuete ramigua Moloque pe. Ha'e ramí aguã ma teigueve xee ajapo uka va'e'ŷ, neĩ nanhembopy'ai guive ha'e ramigua ete ojeguarupy ha'e kuery ojapo aguã, Judá regua kuery oguerojejavy aguã.”

<sup>36</sup> Ha'e rã aŷ ma, po ramí SENHOR Israel kuery Ruete ijayvu kova'e tetã re: “Tetã re peẽ kuery pendeayvu vy ‘Omboaxaa ae ma Babilônia pygua huvixa po py, kyxe py, karuai ha'e mba'eaxy vaikue py guive’, peje teĩ.

<sup>37</sup> Ne'exa, tetã pyguare kuery ma xee amono'õmba ju 'rã heruvy yvy jave rupi ikuaiague gui. Ha'e katy xepoxya rupi, xea'e e'ŷa ha'e ajou vai etea rupi amondoukapa va'ekue teĩ kova'e tekaoa py ju 'rã arupa. Ha'e ramí vy ajapo 'rã ha'e kuery mba'eve gui okyjea rupi e'ŷ ikuai aguã rami.

<sup>38</sup> “Ha'e ramí ha'e kuery ikuai 'rã xevygua, ha'e rã xee aiko 'rã Tuuete.\*

<sup>39</sup> Ha'e kuery pe ame'ẽ 'rã peteĩ'i rupi ipy'a aguã ha'e peteĩ'i tape, ko'ẽ nhavõ xerenonde ojererokyjea rupi ikuai aguã, ha'e kuery ikuai porã aguã, ha'e gui ta'y kuery voi.

<sup>40</sup> Ha'e kuery pe ajapo 'rã xerevegua opa e'ŷ va'erã. Ha'e va'e rupi vy ndajapo porã e'ŷi 'rã ha'e kuery pe. Ha'e ramí 'rãgue py ha'e kuery kuraxõ re amoĩ 'rã xerenonde ojererokyjea rupi ikuai aguã, xegui ojepe'a ve'ŷ aguã.

<sup>41</sup> Ha'e kuery arovya'a vy amoingo porã 'rã. Amoĩ atã 'rã kova'e yvy re, xekuraxõ ha'e xenhe'ẽ ha'e javi py.”

<sup>42</sup> Mba'eta po ramí SENHOR ijayvu: “Ha'e kuery áry ha'e ramí ete mba'emo vai ambouague ramí avi ha'e kuery re ambou avi 'rã iporã ete va'e xeayvuague ha'e javi ramí vy.

<sup>43</sup> Ha'e ramo kova'e yvy re ojogua ju 'rã ombo'etyrã, ha'e va'e pe ‘Tekoa ve'ŷ oĩ, avakue neĩ mymba kuery jipoveia. Caldeu kuery po py ae ma omboaxaa’, pejeague py ae.

<sup>44</sup> Peráta re ojogua ju 'rã ombo'etyrã, ha'e gui ombopara uka 'rã ojoguaague regua kuaxia, selo py omboja 'rã, ha'e oenoĩ 'rã guive ikuua ukaarã. Benjamim yvy re voi 'rã ojogua, Jerusalém ha'e Judá re tetã ikuai va'e yvýry, yvy'ã reia ha'e yvyugua rupi tetã ikuai va'e yvýry, ha'e kuaray puku-a katy tetã ikuai va'e yvýry ojogua 'rã mba'etyrã, mba'eta ha'e kuery ikuaiia xee ambopyau 'rã”, he'i SENHOR.

## 33

*Ha'e kuery ikuai porã ha'e mba'emo ojoupa ju aguã re ijayvuague*

\* <sup>32:38</sup> 2 Coríntios 6.16

<sup>1</sup> Ha'e gui SENHOR oayvu mokoīguea ombou Jeremias pe oka py xondaro harōa kuery ikuaiaty py ombotya teri reve. Ha'e vy aipoe'i:

<sup>2</sup> "Po rami ijayvu SENHOR opa mba'e moingoare: Xee SENHOR ae amoingo mba'emo oī atāmba aguā. Xerery ma SENHOR.

<sup>3</sup> Ejapukai ke xevy, ha'e ramo rombovai 'rā. Ha'e vy ndevy amombe'u 'rā mba'emo porā anhomī rā ndee reikuaa e'ŷ va'ekue", he'i.

<sup>4</sup> Mba'eta po rami SENHOR Israel kuery Ruete ijayvu kova'e tetā py oo ikuai va'e re, ha'e Judá regua huvixa kuery ro ikuai va'e re guive, mba'eta ngoo oitypa va'ekue ngovaigua kuery yvy jo'oa ha'e kyxe rewegua ou va'ekue jokoarā,

<sup>5</sup> caldeu kuery jokoa rupi ha'e pygua kuery opu'āa py. Ha'e ramo SENHOR aipoe'i: "Penderogue ma xee amonyē 'rā avakue re'ōgue xepoxya ha'e ajou vaia rupi ajuka va'ekue. Mba'eta pendereko vaiague ha'e javi kāuxa ndajexa ukai 'rā kova'e tetā pygua kuery pe.

<sup>6</sup> Ne'exa, ha'e py ae ambou avi 'rā hexaī porāmba ju aguā amonguerapa vy. Mba'eta ha'e kuery pe ambou 'rā opa mba'e py ikuai porā aguā, mba'eve gui okyje ve'ŷ re.

<sup>7</sup> Ambopyau 'rā Judá ha'e Israel kuery ikuia. Amoatyrō ju 'rā jypy guare rami.

<sup>8</sup> Aiky'a'opa 'rā heko vaia rupi xerovai ojejavyague ha'e javi gui. Amboguepa 'rā heko vaiague, ojejavyague ha'e xerovai ikuaiague guive.

<sup>9</sup> Ha'e ramo Jerusalém tetā oī 'rā xerery omboetepaa ha'e xererovy'aa aguā, yvy regua kuery ha'e javi oendua py, mba'eta ha'e kuery oendu 'rā omombe'ua rā tetā re iporā va'e ajapoa. Ha'e rami vy onhemondyipa ha'e oryryipa 'rā okuapy peē kuery romoingo porā vy iporā va'e ambou rā oendu vy."

<sup>10</sup> Po rami SENHOR ijayvu: "Kova'e tekaoa pe peē kuery 'Tekoa ve'ŷ oī, avakue ha'e mymba kuery ikuai e'ŷa', peje, mba'eta Judá regua tetā ha'e Jerusalém py tape ikuai va'e rupi aŷ ombovaipaa, avakue ha'e mymba jipoí guive. Ha'e rami teī ha'e py oendua nho 'rā

<sup>11</sup> ov'y'a ha'e opuka nhendu va'e, omenda va'erā ijayvu ha'e oporaei nhendu vy aipoe'i va'e: 'Perovy'a ke SENHOR ixondaro reta va'e, mba'eta joayvua ha'e nhomboaxya opa va'erā e'ŷ', he'i va'e. Ha'e gui oguerovy'a reve mba'emo ome'ē 'rā SENHOR ro py. Mba'eta pendeyvy ambopyau 'rā jypy guare rami", he'i SENHOR.

<sup>12</sup> SENHOR ixondaro reta va'e aipoe'ive ju: "Kova'e tekaoa aŷ tekaoa e'ŷa, avakue ha'e mymba kuery jipoí teī tetā yvýry ha'e javi rupi vexa'i re opena va'e kuery hekoju 'rā guymba kuery omombytu'ua rupi.

<sup>13</sup> Mba'eta yvy'ā ha'e yvyugua reia rupi tetā ikuai va'e yvýry rupi mymba kuery omboaxaa ju 'rā ipapaa kuery po guy rupi, kuaray puku-a katy Benjamim yvy re, Jerusalém yvýry ha'e Judá re tetā ikuai va'e ha'e javi rupi guive", he'i SENHOR.

### *Jeremias 23.5,6*

<sup>14</sup> SENHOR aipoe'i: "Ne'exa, ou ma oiny ára Israel ha'e Judá kuery aroayvu porāague ojeupity aguā", he'i SENHOR.

<sup>15</sup> "Ha'e va'e ára, ha'e va'e jave py ma peteī amoingo 'rā Davi rapytakue renhoī, hamymino heko porā va'erā. Ha'e va'e ma ha'evea rami meme 'rā joguerek, ha'e tekō porā rupi opena 'rā yvy re.

<sup>16</sup> Ha'e va'e ára ma Judá regua kuery oo jepe 'rā, ha'e Jerusalém tetā py hekoju 'rā mba'eve gui okyjea rupi e'ŷ. Ha'e ramo ixupe 'SENHOR nhanderek, porārā me'ēa' 'ea 'rā."

<sup>17</sup> Mba'eta SENHOR aipoe'i: "Davi rekoria ndoatai 'rā ava Israel kuery ruvixa tenda openaaty áry oguapy va'erā.

<sup>18</sup> Neī sacerdote kuery levita regua voi ndoatai 'rā xerenonde ikuai va'erā, ko'ē nhavō xevy mba'emo aju ha'e mymba oapy reve ome'ē aguā", he'i.

<sup>19</sup> Ha'e gui Jeremias pe SENHOR oayvu ombou vy aipoe'i:

<sup>20</sup> “Po rami SENHOR ijayvu: Ára ha'e pytū oiko riae aguā re xeayvuague peẽ napembo-vaipa kuaia rami avi

<sup>21</sup> xee voi nambovaipai 'rā xerembiguai Davi reve xerupive guarā ajapo va'ekue, tenda openaaty áry hamymino oĩ aguā, ha'e gui levita regua sacerdote kuery xevy ikuai riae aguā.

<sup>22</sup> Ha'e rami ae avi mba'emo yva re ikuai va'e ndapeipapa kuaai, ha'e ita ku'i reia ye'ẽ rembe rupi oĩ va'e napea'ã kuaia rami avi ndapeipapa kuaai 'rā xerembiguai Davi ramymino kuery, neĩ levita regua xerenonde ombo'eapo va'e kuery guive.”

<sup>23</sup> Ha'e gui Jeremias pe SENHOR ijayvuve vy aipoe'i:

<sup>24</sup> “Endu rive heta va'e kuery ndevy ‘Mokoĩ regua SENHOR oiporavo va'ekue ri aỹ ma ndoayvuvei ri?’ he'i ramo. Mba'eta ha'e kuery xevyguia kuery ovare e'ŷa rami rive ijayvu. Ha'e kuery pe rā xevyguia kuery peteĩ regua ve'ŷ ma merami ikuai.”

<sup>25</sup> Mba'eta SENHOR aipoe'i: “Ára ha'e pytū oiko aguā re xeayvuague namboaxa riveia rami, ha'e yva ha'e yvy re ikuai va'e xee ndaeja riveia rami

<sup>26</sup> xee ndaejai avi 'rā Jacó ramymino kuery neĩ xerembiguai Davi ramymino kuery. Mba'eta hamymino regua amoĩ'rāe Abraão, Isaque ha'e Jacó ramymino kuery re opena va'erā. Mba'eta ambopyau ju 'rā ha'e kuery ikuiaia, amboaxya aexa uka vy.”

## 34

### Zedequias rekorā re ijayvuague

<sup>1</sup> Pova'e ayvu ma Babilônia pygua huvixa Nabucodonosor oĩ teri reve SENHOR ombou Jeremias pe. Mba'eta ha'e va'e jave ha'e va'e ogueru ojeupeguia xondaro kuery ha'e openaa ha'e javi pygua kuery, Jerusalém tetā re opu'ãmba okuapy aguā, ijvvýry tetā ikuai va'e re guive. Ha'e rami rā SENHOR aipoe'i:

<sup>2</sup> “Po rami SENHOR Israel kuery Ruete ijayvu: Tereo ndeayvu Judá pygua huvixa Zedequias pe. Ha'e vy ixupe aipo're 'rā: ‘Po rami SENHOR ijayvu: Ne'exa, kova'e tetā xee amboaxa 'rā Babilônia pygua huvixa po py. Ha'e ramo oapypa 'rā tata py.

<sup>3</sup> Ndee voi ndereo jepe'i 'rā ipo gui. Ha'e rami 'rāgue py nembo'aa vy nemboaxaa 'rā ipo py. Ha'e ramo Babilônia pygua huvixa reve pejogueroayvu 'rā joa'i gui jova re pema'ẽ reve. Ha'e ramo ndereraa 'rā Babilônia tetā py.

<sup>4</sup> Ha'e rami teĩ ndee Judá pygua huvixa Zedequias, endu ke SENHOR ayvu. Po rami SENHOR ijayvu nderekorā re: Kyxe py e'ŷ 'rā remano.

<sup>5</sup> Ha'e rami 'rāgue py remano porã'i 'rā, ha'e ndere ima'endu'aa rupi heakuã porã va'e oapya 'rā guive, reiko e'ŷ mbove neramoĩ kuery huvixa ikuai va'ekue re ima'endu'aague rami ae. Ojae'o vy “Ai SENHOR!” he'i 'rā okuapy, xee ae ha'e rami aguā re xeayvu rire’, he'i SENHOR.”

<sup>6</sup> Pova'e ayvu ha'e javi rupi profeta Jeremias omombe'u Judá pygua huvixa Zedequias pe, Jerusalém py oĩa py.

<sup>7</sup> Ha'e va'e jave Babilônia pygua huvixa kuery opu'ã okuapy Jerusalém re, ha'e Judá regua tetā oĩve teri va'e Laquis ha'e Azeca re guive. Mba'eta ha'e va'e anho'i optya Judá regua tetā ikorapa va'e ikuai va'ekue gui.

### Escravo rerekaoa kuery rovai Nhanderuete ijayvuague

<sup>8</sup> Ha'e gui pova'e ayvu ma Jeremias pe SENHOR ombou va'ekue. Ha'e va'e jave py Jerusalém pygua kuery reve huvixa Zedequias ijayvu okuapy escravo oguerekoo va'e opoipa ju aguā re.

<sup>9</sup> Ha'e ramo peteĩ-teĩ opoi imondovy escravo hebreu regua avakue ha'e kunhague, guetarã kuery regua ae avave rei oguerekoo ve'ŷ aguā escravo.

<sup>10</sup> Ha'e ramo yvatekueve ha'e heta va'e kuery ha'e javi reve ha'e rami aguā re ijayvu va'ekue onhe'ẽ rendu, ha'e vy peteĩ-teĩ escravo avakue e'ŷ vy kunhague opoipa. Onhe'ẽ rendu vy omondoukapa.

**11** Ha'e rami teĩ ha'e va'e rire ma nda'evei nho ju ikuai. Ha'e rami vy ojapo escravo avakue ha'e kunhague omondouka va'ekue ojevypa ju aguã rami. Ha'e vy escravo-rã ju omoingopa.

**12** Ha'e gui ma Jeremias pe SENHOR oayvu ombou vy aipoe'i:

**13** "Po rami SENHOR Israel kuery Ruete ijayvu: Egito yvy peneramoĩ kuery escravo ikuaiague gui anoẽmba vy ha'e kuery reve ajapo va'ekue xereve guarã. Ha'e vy aipoa'e va'ekue:

**14** "Sete ma'etõa opa nhavõ peteĩ-teĩ pepoi 'rã peneretarã hebreu regua pendevy ovende pyre. Mboapy meme ma'etõa re ndevy ha'e kuery ombo'epo rire pepoi 'rã imondovy escravo ve'ý ikuai aguã", ha'e va'ekue.\* Ha'e rami teĩ peneramoĩ kuery naxenhe'ẽ rendui, xeayvu re ndojapyxaka potai guive okuapy.

**15** Ha'e gui peẽ kuery ma aý rai'i pejogueroayvu xerenonde ha'evea rami pejapo aguã re. Ha'e vy peteĩ-teĩ pendeayvu peneretarã pepoi aguã re. Xerery oñaty oo py ae pejogueroayvu ha'e rami aguã.

**16** Ha'e rami teĩ ha'ekue rami e'ý pendekuai, xerery pemongy'apaa rupi. Mba'eta peteĩ-teĩ pende-escravo avakue ha'e kunhague pejapo ojevy ju aguã rami, escravo ve'ý ikuai aguã rami pemondouka va'ekue ri. Ha'e rami vy avakue ha'e kunhague pemoingo ju escravo-rã."

**17** Ha'e nunga rupi po rami SENHOR ijayvu: "Peẽ kuery ma naxenhe'ẽ rendui, mba'eta ndapepoi etei penderyvy ha'e peneretarã kuery escravo rami perekva'e. Ha'e ramo ne'exa, xee ma peẽ kuery ropoipa ta imondovy kyxe, mba'eaxy vaikue ha'e karuai py pemanomba aguã katy. Xee rojapo 'rã yvy regua kuery ha'e javi penderexa vy onhemondyipa aguã rami", he'i SENHOR.

**18** "Mba'eta xereve guarã ajapo va'ekue rupi e'ý ikuai va'e, xerenonde ijayvuague ndojapoi va'e ma xee ajuka ukapa 'rã vaka ra'y re ha'e kuery ojukaaty rami avi, mba'eta ha'e kuery vaka ra'y ojuka vy mokoĩ rupi ojaya va'ekue mbyte rupi oaxa va'ekue.†

**19** Mba'eta Judá ha'e Jerusalém pygua yvatekueve, huvixa ha'e sacerdote kuery reve oaxa va'ekue vaka ra'y ojaya va'ekue mbyte rupi, ijyvy re ikuai va'e ha'e javi reve.

**20** Ha'e rami ae avi xee amboaxa 'rã hovaigua ijukaxeia kuery po py. Ha'e ramo hetekue opyta 'rã guyra yvate rupi oveve va'e ha'e mymba yvy rupigua rembi'urã rive.

**21** Ha'e rami vy Judá pygua huvixa Zedequias ha'e ixupeguia yvatekueve amboaxapa 'rã hovaigua kuery Babilônia pygua huvixa ijukaxeia xondaro kuery po py, peneretã ojokoague gui ha'e kuery ojepe'a ranhe teĩ.

**22** Mba'eta xeayvu vy rive ajapo 'rã kova'e tetã re ju ha'e kuery ojevypa aguã rami. Tetã re opu'ã okuapy vy oipe'a ha'e oapypa 'rã. Judá yvy re tetã ikuai va'e guive amboavaipa ukapa 'rã, tekoá ve'ýrã", he'i SENHOR.

## 35

### *Recabe ramymino kuery gueko rami vy ae ikuaria re ijayvuague*

**1** Ha'e gui Jeremias pe SENHOR oayvu ombou ju, Josias ra'y Jeaquim Judá pygua huvixa oñave. Ha'e vy aipoe'i:

**2** — Tereo Recabe ramymino kuerya py, ha'e ndeayvu ha'e kuery reve. Ha'e gui eraapa SENHOR pegua oo py, peteĩ opy ja'o oñ va'e py. Ha'e py ma ha'e kuery pe reme'ẽ 'rã vinho oy'u aguã — he'i.

**3** Ha'e ramo araa Recabe ramymino kuery ha'e javi: Jeremias ra'y Jazanias, Habazinias ramymino va'e, tyke'y ha'e ta'y kuery ha'e javi araaa.

\* **34:14** Ha'e rami aguã ma Nhandeuete oeja Éxodo 21.1 ha'e Deuterônômio 15.12 py. † **34:18** Ha'e kuery reko rami vy ha'e rami ikuai jogueroayvuague omoĩ atã vy (Gênesis 15.9-17).

<sup>4</sup> Ha'e rami vy SENHOR pegua oo py araa peteĩ opy ja'o oĩ va'e py, Nhanderuete remimbo'e Jigdalias ra'y Hanã ra'y kuery ikuaiaty py. Ha'e va'e opy ja'o ma yvatekueve ikuaiaty oĩ va'e yvy'iry, Salum ra'y oikeaty rarõa Maaséias oĩaty áry guive.

<sup>5</sup> Ha'e gui Recabe ramymino kuery amboguapypa ma vy henonde amoĩ reta hyru vinho oĩa, karo guive. Ha'e vy ha'e kuery pe aipoa'e:

— Pey'u ke vinho.

<sup>6</sup> Ha'e rã ha'e kuery ombovai:

— Ore kuery ma nda'evei vinho roy'u aguã, mba'eta oreramoĩ Recabe ra'y Jonadabe orevy aipoe'i rire: “Pey'u eme vinho, neĩ pendera'y kuery voi.

<sup>7</sup> Pejapo eme guive penderorã neĩ mba'etyrã. Pema'etý eme, uvaty perekó eme guive. Ha'e rami 'rãgue py oguy'i py rive 'rã pendekuai peikovea pukukue re, yvy peguata peikovya rupi peikove puku aguã”, he'i rire.

<sup>8</sup> Ha'e nunga rupi ore kuery ma ronhe'ẽ nhendu 'rã oreramoĩ Recabe ra'y Jonadabe orevy ijayvuague ha'e javi rupi. Ha'e rami vy ae vinho ndoroy'ui 'rã roikovea pukukue re, orera'yxy kuery, orera'y kuery ha'e orerajy kuery voi.

<sup>9</sup> Ha'e rami ae ore ndorojapoi orerorã roĩ aguã. Ndoroguererekoi uvaty, mba'ety, neĩ mba'emo ra'yigue ma voi.

<sup>10</sup> Ha'e rami 'rãgue py oguy'i py rive ore kuery orekuai. Ha'e rami py rojapopa rokuapy aguã oreramoĩ Jonadabe ijayvuague.

<sup>11</sup> Ha'e rami avi kova'e yvy re Babilônia pygua huvixa Nabucodonosor ou ramo aiporo'e joupe-upe: “Peju ke, jaje'oi Jerusalém tetã py xondaro kuery Caldéia ha'e Síria pygua gui nhanhemi aguã”, ro'e va'ekue. Ha'e rami vy ae Jerusalém py ju orekuai – he'i okuapy.

<sup>12</sup> Ha'e gui Jeremias pe SENHOR oayvu ombou vy aipoe'i:

<sup>13</sup> “Po rami ijayvu SENHOR ixondaro reta va'e Israel kuery Ruete: Tereo, aipo'ere avakue Judá ha'e Jerusalém pygua kuery pe: ‘Romo'arandua rupi xeayvu rã napendui 'rã teve xenhe'ẽ rendu aguã?’ he'i SENHOR.

<sup>14</sup> ‘Mba'eta Recabe ra'y Jonadabe guamymino kuery pe ijayvu vy “Pey'u eme vinho”, he'iague rami ha'e kuery ikuai pavê. Ha'e rami vy aÿ peve ha'e kuery ndoy'ui 'rã okuapy vinho, guamoĩ ijayvuague rami ae 'rã ikuai. Ha'e rã peẽ kuery ma ko'ẽ rai guive pendevy xeayvu teĩ naxenhe'ẽ rendui pekuapy.

<sup>15</sup> Mba'eta ko'ẽ rai guive peẽ kuerya py xerembiguai kuery ambou vy aipoa'e uka: “Peteĩ-teĩ pejeko rerova ke aÿ pendeko vaiaty gui, iporã va'e anho pejapo aguã. Tapeove eme guive amboae ramigua tuuete kuery re ha'e kuery pe pendekuai aguã. Ha'e rami vy 'rãe pendekuai puku pendevyvrã peneramoĩ kuery pe ame'ẽ va'ekue re”, ha'e uka. Ha'e rami teĩ peẽ kuery ma ndapejapyxakai, naxenhe'ẽ rendui guive.

<sup>16</sup> Recabe ra'y Jonadabe ramymino kuery minha ojapo ete okuapy guamoĩ ojapo ukaague rami. Ha'e rã kova'e kuery ma naxenhe'ẽ rendui ae', he'i.

<sup>17</sup> Ha'e nunga rupi SENHOR ixondaro reta va'e, Israel kuery Ruete aipoe'i: ‘Ne'exa, Judá ha'e Jerusalém py ikuai va'e áry xee ambou 'rã xeayvu vaiague ha'e javi. Mba'eta ha'e kuery pe xeayvu teĩ naxenhe'ẽ rendui okuapy, ajapuka-pukai teĩ ha'e kuery naxembovai’, he'i.”

<sup>18</sup> Ha'e gui ma Recabe ramymino kuery pe ju Jeremias aipoe'i:

— Po rami ijayvu SENHOR ixondaro reta va'e, Israel kuery Ruete: “Peẽ kuery ma peneramoĩ Jonadabe ijayvuague rupi ae pendekuai, ojapo uka va'ekue ha'e javi pejapo vy.

<sup>19</sup> Ha'e nunga rupi po rami SENHOR ixondaro reta va'e, Israel kuery Ruete ijayvu: Xerenonde ikuai riae 'rã Recabe ra'y Jonadabe ramymino regua”, he'i.

<sup>1</sup> Ha'e gui Josias ra'y Jeoquim Judá pygua huvixa va'e irundy ma'etý re ma oĩ jave py pova'e ayvu SENHOR ombou Jeremias pe. Ha'e vy aipoe'i:

<sup>2</sup> — Ejou ke peteĩ kuaxia onhemama va'e. Ha'e va'e re ke embopara Israel kuery rovai xeayvuague ha'e javi, Judá kuery ha'e amboae regua ha'e javi rovai guive, huvixa Josias oĩ ypya ára xeayvu guive aÿ peve.

<sup>3</sup> Mba'eta xapy'a rei Judá kuery ma mba'emo vai ha'e kuery re ambou taa remombe'u rã oendu vy peteĩ-teĩ ojeko rerova 'rã ha'eve e'ÿa rami ikuiai gui. Ha'e rami ri ramo xee ambogue 'rã heko vaia ha'e ojeavyague – he'i.

<sup>4</sup> Ha'e gui Jeremias oenoñ Nerias ra'y Baruque. Ha'e ramo kuaxia onhemama va'e re Baruque ombopara Jeremias ijayvua ha'e javi, ixupe SENHOR ijayvuague ha'e javi rami.

<sup>5</sup> Baruque pe Jeremias ijayvuve ju vy aipoe'i:

— Xee ma xembotyague py aĩ vy nda'evei SENHOR pegua oo py xee aa aguã.

<sup>6</sup> Ha'e rami rã ndee ae ha'e py reo vy heta va'e kuery oendua py reroayvu 'rã SENHOR ayvu amombe'u rã kuaxia onhemama va'e re rembopara va'ekue ha'e javi. SENHOR pegua opy ae 'rã reroayvu, ha'e kuery okaru e'ÿ re ikuiai ára, Judá regua kuery guetã gui ou va'ekue ha'e javi oendua py.

<sup>7</sup> Xapy'a rei ha'e kuery onhemo'yyv'iia rupi ojapukai ramo SENHOR oendu 'rã, peteĩ-teĩ ojeko rerova ramo ha'eve e'ÿa rami ikuiai gui. Mba'eta kova'e kuery rovai SENHOR oexa uka reta ma ipoxya ha'e nda'evei etea – he'i.

<sup>8</sup> Ha'e ramo Nerias ra'y Baruque ojapopa profeta Jeremias ijayvuague ha'e javi. Ha'e rami vy SENHOR pegua opy oike vy ogueroayvu SENHOR ayvu kuaxia re oĩ va'e.

<sup>9</sup> Mba'eta peteĩ nhiruĩ ma'etý ha'e nove jaxyo re ma Josias ra'y Jeoquim Judá pygua huvixa oĩ jave py oenoñmba Jerusalém pygua ha'e Judá regua tetã guigua kuery Jerusalém py ou aguã, SENHOR renonde okaru e'ÿ re ikuai aguã.

<sup>10</sup> Ha'e gui ma Baruque ogueroayvu kuaxia re Jeremias ayvu oĩa. SENHOR pegua opy ogueroayvu, Safã ra'y Gemarias lei re nhombo'e va'ety oĩaty py, oka yvateve oĩ va'e py, SENHOR pegua oo rokẽ pyau rexei, heta va'e kuery ha'e javi oendua py.

### *Yvatekueve oendua py ju kuaxia ogueroayvuague*

<sup>11</sup> Ha'e va'e kuaxia re SENHOR ayvu oĩ va'e ha'e javi Gemarias ra'y Micaías, Safã ramymino va'e oendu vy

<sup>12</sup> huvixa ro py oo, opy ja'o kuaxia mboparaaty oĩaty py ae. Ha'e py ma yvatekueve ha'e javi oguapy okuapy: kuaxia mboparaaty Elisama, Semaías ra'y Delaías, Acbor ra'y Elnatã, Safã ra'y Gemarias, Hananias ra'y Zedequias ha'e yvatekueve mboae kuery.

<sup>13</sup> Ha'e va'e kuery pe ju Micaías omombe'upa, heta va'e kuery oendua py kuaxia para Baruque ogueroayvu rã oendu va'ekue ha'e javi.

<sup>14</sup> Ha'e ramo Baruque-a katy yvatekueve omondouka Netanias ra'y Jeudi, Selemias ramymino, Cusi ramymino jevy va'e. Ha'e va'e pe aipoe'i uka Baruque pe: "Eru ke apy kuaxia para heta va'e kuery oendua py reroayvu va'ekue", he'i uka. Ha'e ramo Nerias ra'y Baruque kuaxia para ogueraa amboae kuerya py.

<sup>15</sup> Ha'e ramo ixupe ha'e kuery aipoe'i:

— Aÿ ma eguapy, orevy ju ke eroayvu – he'i ramo Baruque ogueroayvu ju oiny ha'e kuery oendua py.

<sup>16</sup> Ha'e va'e ayvu ha'e kuery oendupa ma vy joe-joe oma'ë okuapy onhemondyi vy. Ha'e vy aipoe'i Baruque pe:

— Huvixa pe romombe'u mate 'rãe pova'e ayvu ha'e javi – he'i.

<sup>17</sup> Ha'e gui ha'e kuery ijayvuve ju vy oporandu Baruque pe:

— Emombe'u porã ke orevy, mba'exa tu rembopara ha'e nunga? Profeta e'ÿ teve ndevy omombe'u pova'e ayvu ha'e javi?

<sup>18</sup> Baruque ombovai:

— Ha'e ete ae ri omombe'u povae ayvu xevy, ha'e rā xee ju ambopara kuaxia re tinta py — he'i.

<sup>19</sup> Ha'e ramo yvatekueve aipoe'i Baruque pe:

— Tereo, enhemi, Jeremias voi. Avave rei toikuaa eme mamo pa peña.

### *Tata py huvixa kuaxia oapypaague*

<sup>20</sup> Ha'e gui yvatekueve ma kuaxia para onhemama va'e omoī porā ranhe opy ja'o kuaxia mboparaa Elisama oīaty pyve. Ha'e rire mae jogueraa huvixa oka py oguapy oinya py. Ha'e vy huvixa pe omombe'u okuapy ha'e va'e ayvu ha'e javi.

<sup>21</sup> Ha'e ramo huvixa omondouka guembiguai Jeudi kuaxia para ogueru aguā. Ha'e rā Jeudi ma opy ja'o kuaxia mboparaaty Elisama oīaty gui ojou vy ogueru huvixa ha'e hexevegua yvatekueve ikuaria py.

<sup>22</sup> Nove jaxya huvixa oguapy oinya py yro'y oendu ramo ijyvýry oī peteī tapyī ryru hexakāmba oiny va'e.

<sup>23</sup> Ha'e gui kuaxia para mboapy e'ŷ vy irundy henda py Jeudi ogueroayvu nhavō huvixa ojaya 'rā kyxē'i kuaxia mboparaa rembiporu oguerekō va'e py, ha'e vy omombo 'rā tapyī ryru tata oīa py.

<sup>24</sup> Mba'eta huvixa ha'e hembiguai kuery ikuai va'e ha'e va'e ayvu ha'e javi oendu teī peteīve ma voi nonhemboaxyi, oao nomondoroi guive.

<sup>25</sup> Ha'e rami avi Elnatā, Delaías ha'e Gemarias ma kuaxia para oapy e'ŷ aguā re huvixa reve onhea'ā okuapy teī ha'e kuery ayvu re ndojapyxakai.

<sup>26</sup> Ha'e rami 'rāgue py ijayvu Hameleque ra'y Jerameel pe, ha'e Azriel ra'y Seraías ha'e Abdeel ra'y Selemias pe, ha'e kuery ombo'a aguā kuaxia mboparaare Baruque ha'e profeta Jeremias. Ha'e rami teī SENHOR onhomni voi.

### *Teīgue ju Baruque kuaxia omboparaague*

<sup>27</sup> Ha'e ramo kuaxia Jeremias ijayvuague Baruque ombopara va'ekue huvixa oapypa ma rire teīgue ju SENHOR oayvu ombou Jeremias pe. Ha'e vy aipoe'i:

<sup>28</sup> “Ejou kuaxia onhemama va'e mboae, ha'e va'e re ju embopara uka jypyguia Judá pygua huvixa Jeoaquim oapy va'ekue re oīague ha'e javi rami.

<sup>29</sup> Judá pygua huvixa Jeoaquim pe aipo're 'rā guive: Po rami ijayvu SENHOR: Ndee ma kuaxia onhemama va'e reapy vy aipo're va'ekue: ‘Mba'e re tu rembopara Babilônia pygua huvixa ou vy kova'e yvy ombovaipa, ha'e avakue ha'e mymba kuery omomba 'rāa rami?’ 're va'ekue.

<sup>30</sup> Ha'e nunga rupi po rami SENHOR ijayvu ndee Judá pygua huvixa Jeoaquim rekora re: ‘He'ōgue ma omomboa 'rā, ara py kuaray ojopea py rive itui aguā, pyávy yro'y ho'aague rupi guive. Ha'e gui ta'y ha'e hamymino kuery neī peteīve ma voi noī 'rā tenda Davi openaaty áry.

<sup>31</sup> Mba'eta ambopaga 'rā ojejavyaty re, hamymino ha'e hembiguai kuery guive. Ha'e rami vy hi'áry, Jerusalém ha'e Judá pygua avakue áry guive ambou 'rā xeayvu vaiague ha'e javi, noendui potai rire', he'i.”

<sup>32</sup> Ha'e gui ma Jeremias kuaxia onhemama va'e mboae ojou vy omboaxa Nerias ra'y kuaxia mboparaaty Baruque pe. Ha'e ramo ha'e ju ombopara Jeremias ayvu kuaxia Judá pygua huvixa Jeoaquim oapy va'ekue re oīague ha'e javi rami. Omombe'uve ju ayvu mboae jypyguia ramigua.

### *Nhuā py Jeremias ombotya ague*

<sup>1</sup> Ha'e gui ma Jeoquim ra'y Conias rekoria Babilônia pygua huvixa Nabucodonosor omoī Josias ra'y Zedequias. Ha'e ramo ha'e va'e ju opena Judá yvy re.

<sup>2</sup> Ha'e rami teĩ ndojapyxakai SENHOR oayvu profeta Jeremias omombe'u va'e re. Hembiguai kuery ha'e ijyvy re ikuai va'e voi ndojapyxakai okuapy.

<sup>3</sup> Ha'e rami avi profeta Jeremias oña py huvixa Zedequias ombou Selemias ra'y Jucal ha'e Maaséias ra'y sacerdote Sofonias, ixupe ojerure vy "SENHOR Nhanderuete pe ejapukai, ha'e eporandu ke orere", he'i aguã.

<sup>4</sup> Ha'e jave ma Jeremias oiko porã rei heta va'e kuery mbyte, nombo'aai teria ja.

<sup>5</sup> Ha'e e'ŷ mbove ma Egito yvy gui Faraó pegua xondaro kuery ou. Ha'e nunga omombe'ua rã caldeu kuery oendu vy onheguãembä Jerusalém tetã ojokoague gui.

<sup>6</sup> Ha'e ramo profeta Jeremias pe SENHOR oayvu ombou:

<sup>7</sup> "Po rami ijayvu SENHOR Israel kuery Ruete: Po rami 'rã peẽ kuery pembovai Judá pygua huvixa pe, xevy pe ojerure uka aguã penembou rire: 'Ne'exa, Faraó pegua xondaro kuery penderepyarã ou va'ekue ri ojevypa rive ju 'rã Egito yvy katy.

<sup>8</sup> Ha'e ramo caldeu kuery ma oupa ju vy opu'ã 'rã okuapy kova'e tetã re. Ha'e rami vy tetã re oipe'a ha'e oapypa 'rã', peje 'rã.

<sup>9</sup> Mba'eta po rami SENHOR ijayvu: 'Pejekore eme "Caldeu kuery oopa 'rã ri nhanderekaoa gui", pejea py. Mba'eta ha'e kuery ndojepé 'ai 'rãe.

<sup>10</sup> Mba'eta caldeu regua xondaro kuery penderovai opu'ã va'e peitypa teĩ ae ma, ha'e kuery va'e regua mbovy'i ojuka rai'i pyre anho opyta va'e rire peteĩ-teĩ oguy'i py ituiague gui opu'ã vy oapypa 'rãgue kova'e tetã, he'i."

<sup>11</sup> Ha'e gui caldeu regua xondaro kuery ma Faraó kuery oua omombe'ua rã oendu vy onheguãembä ranhe Jerusalém tetã gui.

<sup>12</sup> Ha'e va'e rire Jerusalém gui Jeremias oo ta Benjamim yvy katy, peteĩ yvy ojeupe guarã ojopy aguã hetarã kuery rekaoa py itui va'e.

<sup>13</sup> Ha'e vy Benjamim yvy rape rokẽ py ovaẽ jave ha'e py oĩ peteĩ xondaro ruvixa Jerias hery va'e, Selemias ra'y, Hananias ramymino va'e. Ha'e va'e ma profeta Jeremias ojoko vy aipoe'i:

— Ndee tu rejava ta rima reovy caldeu kuerya katy – he'i.

<sup>14</sup> Jeremias ombovai:

— Apua rima, xee ndajavai caldeu kuerya katy – he'i. Ha'e rami teĩ ijayvua re Jerias ndojapyxakai. Ha'e rami vy Jeremias oipokuaa vy ogueraa yvatekueve ikuiaia py.

<sup>15</sup> Ha'e ramo yvatekueve ipoxypa okuapy Jeremias pe. Ha'e vy oinupã ukapa vy omboty nhuã py kuaxia mboparaaty Jônatas ro py, nhuãrã ju oejaia rire.

<sup>16</sup> Opy ja'o'i Jeremias omoinge rire mbovy ára rei e'ŷ oĩ ha'e py.

<sup>17</sup> Ha'e rire ma huvixa Zedequias ogueru ruka ju ngoo py. Ha'e vy nhemi rupi oporandu ixupe:

— Oĩ 'rã pa ayvu SENHOR ombou va'ekue?

Jeremias ombovai vy

— Oĩ rima. Nemboaxaa 'rã Babilônia pygua huvixa po py – he'i.

<sup>18</sup> Jeremias aipoe'ive ju huvixa Zedequias pe:

— Mba'e py tu ajejavy raka'e nderovai, nerembiguai kuery, e'ŷ vy heta va'e kuery rovai, nhuã py xemboty uka aguã?

<sup>19</sup> Mba'eta mamo tu aŷ ikuai profeta ramigua kuery pendevy aipoe'i va'ekue: "Babilônia pygua huvixa ndoui 'rã peẽ kuery re, neĩ kova'e yvy re opu'ã aguã", 'eare kuery?

<sup>20</sup> Ha'e nunga rupi aŷ xeruvixa, endu ke. Tove ajerurea toiko. Xemondouka eme ju kuaxia mboparaaty Jônatas ro katy, ha'e py amano e'ŷ aguã – he'i.

<sup>21</sup> Ha'e ramo huvixa Zedequias ogueraa uka Jeremias harõa kuery ikuaiaty roka py ju opyta aguã. Ára nhavõ ixupe ogueru ruka guive peteĩ mbojape, mbojape apoa gui ae, tetã rupi mbojape jipovei peve. Ha'e rami py harõa kuery ikuaiaty roka py Jeremias opyta.

## 38

### *Yy kuarã va'ekue gui Jeremias ogueraa jepea ague*

<sup>1</sup> Ha'e gui ma Matã ra'y Sefatias, Pasur ra'y Gedalias, Selemias ra'y Jucal ha'e Malquias ra'y Pasur oendu okuapy ayvu Jeremias heta va'e kuery pe omombe'u oikovy va'e. Mba'eta aipoe'i:

<sup>2</sup> “Po rami SENHOR ijayvu: Kova'e tetã py opyta va'e kuery omano 'rã ma kyxe py, karuai ha'e mba'eaxy vaikue gui. Ha'e rã caldeu kuerya katy oo va'e ma oikove 'rã. Ha'e rami vy guekove reve 'rã oo jepe, oikove 'rã.

<sup>3</sup> Po rami SENHOR ijayvu: Kova'e tetã omboaxaa ma 'rã Babilônia pygua huvixa pegua xondaro kuery po py. Ha'e rã ha'e kuery oipe'apa 'rã", he'i va'ekue Jeremias.

<sup>4</sup> Ha'e ramo yvatekueve aipoe'i huvixa pe:

— Peva'e ava tomano, mba'eta ha'e rami ijayvu ramo heta va'e kuery joe opu'ã va'e ha'e kova'e tetã py ikuai va'e ha'e javi oendu vy ipo ikangypa 'rã. Mba'eta peva'e ava ma ndojapo porãi 'rã heta va'e kuery pe, ojapo vai 'rã anho.

<sup>5</sup> Huvixa Zedequias ombovai:

— Ne'ixa, pendepo py Jeremias oĩ. Penderuvixave aiko va'eri mba'eve ndajapoi 'rã peẽ kuery peipotaa rami e'ŷ – he'i.

<sup>6</sup> Ha'e rami rã ha'e kuery Jeremias ogueraa vy omombo peteĩ yguarã ojo'o pyre, huvixa ra'y Malquias pegua py, harõa kuery ikuaiaty roka py ae. Ha'e va'e py ma omboguejy peteĩ ixã py. Yguarã ojo'o pyre py ma yy jipoi, yapo rive oĩ. Ha'e ramo Jeremias ipija ov yapo py.

<sup>7</sup> Huvixa ropy oĩ peteĩ Etiópia pygua Ebede-Meleque hery va'e, eunuco oiko. Ha'e va'e ma oendu Jeremias yguarã ojo'o pyre py omboguejyague omombe'ua rã. Ha'e jave py huvixa oguapy oiny oka py, Benjamim yvy rape rokẽ py.

<sup>8</sup> Ha'e gui Ebede-Meleque ma huvixa ropy gui oẽ ov yv aipoe'i ixupe:

<sup>9</sup> — Xeruvixa, profeta Jeremias re avakue ojapo vai ete, yguarã ojo'o pyre py omombo vy. Mba'eta ha'e py oĩa py omano 'rã karuai gui, tetã py mbojape jipovei ramo.

<sup>10</sup> Ha'e ramo huvixa ma Etiópia pygua Ebede-Meleque ombovai vy aipoe'i:

— Tereo, eraa trinta avakue apy gui, ha'e enoẽ profeta Jeremias yvykua gui, omano e'ŷ aguã – he'i.

<sup>11</sup> Ha'e ramo Ebede-Meleque ma avakue ogueraa vy oo ranhe huvixa ropy ja'o mba'emo omoĩ porãaty guýry oĩ va'e py. Ha'e vy ao ymague ha'e ajukue ra'ykue-'ykue ojou vy ogueraa ha'e gui. Ha'e rami vy ixã rupi ha'e nunga omboguejy Jeremias oĩa peve.

<sup>12</sup> Ha'e rami vy Etiópia pygua Ebede-Meleque aipoe'i Jeremias pe:

— Aŷ ma ndejyva guy rupi emoĩ upe va'e ao ymague ha'e ajukue ra'ykue, ha'e ejavoa ixã ha'e va'e py – he'i ramo Jeremias ojapo ha'e rami.

<sup>13</sup> Ha'e rami vy ixã re omoatã heruvy vy oguenoẽ okuapy Jeremias yvykua gui. Ha'e rire xondaro harõa kuery ikuaiaty roka py ju Jeremias oiko.

### *Profeta pe Zedequias oporanduague*

<sup>14</sup> Ha'e gui ma huvixa Zedequias oĩa py ogueru ruka profeta Jeremias, mboapya okẽ SENHOR pegua opy oikea va'e py. Ha'e vy aipoe'i ixupe:

— Peteĩ re ma aporandu ta ndevy. Emombe'u e'ŷ eme mba'eve – he'i.

<sup>15</sup> Jeremias ombovai Zedequias:

— Ha'e gui ndevy pe amombe'u rã ndaxejukai 'rã ri ty'y? Xee romongeta ramo ndee nerendu potai 'rã guive – he'i.

<sup>16</sup> Ha'e ramo Zedequias oura Jeremias pe ha'e kuery ae'ia py. Ha'e vy aipoe'i:

— Ha'e rami avi anhetẽ ete SENHOR oikove va'e nhanderekoverã me'ëa rery rupi aura vy aipoa'e: Xee ndorojukai 'rã, noromboaxai 'rã guive avakue ndejukaxeia kuery po py.

<sup>17</sup> Ha'e gui ma Jeremias aipoe'i Zedequias pe:

— Po rami ijayvu SENHOR ixondaro reta va'e, Israel kuery Ruete: Babilônia pygua yvatekueve re reaxa ri vy reikove 'rã, kova'e tetã ndokai 'rã guive. Ndero pygua kuery reve peikovepa 'rã.

<sup>18</sup> Ha'e rã Babilônia pygua huvixa rembiguai yvatekueve re ndereaxai ri ramo kova'e tetã amboaxa 'rã caldeu kuery po py. Ha'e ramo oapypa 'rã, ha'e ndee voi ndereo jepei 'rã ha'e kuery po gui — he'i.

<sup>19</sup> Ha'e ramo huvixa Zedequias aipoe'i Jeremias pe:

— Ha'e rami avi xee akyje nhaneretarã judeu kuery caldeu kuery re oaxa va'ekue gui. Mba'eta ha'e kuery po py Babilônia pygua kuery xemboaxa ramo xeavyky rei 'rã okuapy — he'i.

<sup>20</sup> Jeremias ombovai:

— Any, nanemboaxai 'rãe. Endu ke SENHOR ijayvua ndevy amombe'u va'e, ajerure. Ha'e rami vy 'rãe reo porã, reikove guive.

<sup>21</sup> Ha'e rã ha'e kuerya katy ndereoi ri ramo pova'e ae ayvu SENHOR xevy oikuua uka va'ekue:

<sup>22</sup> “Ne'exa, kunhague Judá pygua huvixa ropy opyta va'e ogueraapaa 'rã Babilônia pygua huvixa rembiguai kuery yvatekueve peguarã. Ha'e ramo ha'e va'e kunhague aipoe'i 'rã ndevy: ‘Neirũ kuery ae'i nembotavy vy ipo'aka okuapy ndere. Ha'e gui aý ndepy yapo py ipija ma ramo ha'e kuery nderejapa’, he'i 'rã okuapy.

<sup>23</sup> Ha'e rami py ndea pygua kunhague oguerapaa 'rã caldeu kuery peguarã, ndera'y kuery guive. Ndee voi ndereo jepei 'rã ha'e kuery po gui. Ha'e ramo 'rãgue py Babilônia pygua huvixa opo py ae 'rã nembo'a, ha'e ramo ndekáuxa ae kova'e tetã oapypaa 'rã”, he'i.

<sup>24</sup> Ha'e ramo Zedequias aipoe'i Jeremias pe:

— Avave rei toikuua eme jajogueroayvuague. Ha'e rami e'ý vy remano 'rã.

<sup>25</sup> Ha'e gui xapy'a rei yvatekueve oendu 'rã ndereve xeayvuague, ha'e ndea py ou vy aipoe'i 'rã ndevy: “Emombe'u ke aý huvixa reve ndeayvuague, ndereve ijayvuague guive. Mba'eve emombe'u e'ý eme orevy. Ha'e ramo e'ý ramo rojuka 'rã”, he'i okuapy ramo

<sup>26</sup> aipo're 'rã ha'e kuery pe: “Xee rima ajerure huvixa pe Jônatas ro py xemondouka ju e'ý aguã, ha'e py amano e'ý aguã”, 're 'rã.

<sup>27</sup> Ha'e va'e rire yvatekueve Jeremias-a py ovaëmba vy oporandu okuapy ixupe. Ha'e ramo ha'e kuery pe ombovai huvixa ijayvuague ha'e javi rupi. Ha'e ramo oeja porã ju, mba'eve ndoikuuai vy.

<sup>28</sup> Ha'e gui Jeremias ma xondaro harõa kuery ikuaiaty roka py oiko, Jerusalém tetã oipe'aa ára peve.

## 39

*2 Reis 24.20-25.12; 2 Crônicas 36.17-21; Jeremias 52.1-16*

<sup>1</sup> Po rami Jerusalém tetã oipe'aa raka'e. Nove ma'etý ha'e dez jaxyia re ma Judá pygua huvixa Zedequias oïjave py ou Babilônia pygua huvixa Nabucodonosor oxondaro kuery ha'e javi reve. Jerusalém tetã re ou vy ojokopa okuapy.

<sup>2</sup> Ha'e gui onze ma'etýha'e irundy jaxyia re, nove araa py ma ombokua okuapy tetã kora.

<sup>3</sup> Ha'e rami vy Babilônia pygua huvixa rembiguai kuery yvatekueve oikepa vy oguapy okuapy Okẽ Mbyteguia py. Ha'e va'e kuery ma Nergal-Sarezer, Sangar-Nebo, Sarsequim, Rabe-Saris, Nergal-Sarezer, Rabe-Mague ha'e Babilônia pygua huvixa rembiguai yvatekueve ha'e javi.

<sup>4</sup> Ha'e kuery oike rã Judá pygua huvixa Zedequias oexa vy ojava ojeupagua avakue opu'ãa pygua ha'e javi reve. Pyávy oëmba tetã gui. Huvixa pegua yvotyty via tape rupi oo, mokoñ kora mbyte py okẽ oï va'e rupi. Ha'e rã Zedequias ma yvy joja reia via rupi oo.

<sup>5</sup> Ha'e ramo caldeu regua xondaro kuery huvixa Zedequias rakykue oje'oi vy ouputy Jericó katy'i nhuündy oĩ va'e py. Ha'e vy ombo'a vy Ribla tetã py ogueraa, Hamate yvy re. Babilônia pygua huvixa Nabucodonosor oĩa py ogueraa. Ha'e ramo ha'e va'e ju ijayvu ombopaga aguã re.

<sup>6</sup> Ha'e rami vy Babilônia pygua huvixa Ribla pyve ju ojuka uka Zedequias ra'y kuery, tuu oexaa py. Ojuka uka avi Judá regua yvatekueve.

<sup>7</sup> Ha'e gui ma omombu Zedequias rexa jovaive, ha'e mokoõ corrente overa va'e guigua py ojokua vy Babilônia katy ogueraa.

<sup>8</sup> Ha'e gui ma Jerusalém tetã py caldeu kuery oapypa huvixa ro, ha'e pygua kuery ro ha'e javi guive. Oitypa avi tetã kora.

<sup>9</sup> Ha'e py ikuai amongue tetã py optya va'ekue, ojejopy uka ha'e heta va'e kuery okuave va'e. Ha'e kuery ma jopya kuery ruvixa Nebuzaradã escravo-rã ogueraapa Babilônia katy.

<sup>10</sup> Ha'e rã Judá yvy re iporiaukue'i, mba'eve ndoguerekoi va'e ma jopya kuery ruvixa Nebuzaradã oeja ijyvy re ae. Ha'e va'e jave py ha'e kuery pe omboaxa uvaty ha'e mba'ety.

### *Jeremias re Nabucodonosor opena porã ukaague*

<sup>11</sup> Ha'e gui Jeremias re ma Babilônia pygua huvixa Nabucodonosor opena uka ma voi va'ekue jopya kuery ruvixa Nebuzaradã pe. Ha'e vy ixupe aipoe'i:

<sup>12</sup> “Eraa Jeremias nderupive, epena porã guive hexe. Mba'eve py ejapo vai eme hexe. Ha'e rami 'rãgue py erekha'e ae ijayvua rami”, he'i va'ekue.

<sup>13</sup> Ha'e rami ae ju jopya ruvixa Nebuzaradã ijayvu guembiguai kuery Nebusazbã, Rabe-Saris, Nergal-Sarezer, Rabe-Mague ha'e Babilônia pygua huvixa rembiguai kuery yvatekueve ha'e javi pe.

<sup>14</sup> Ha'e ramo ogueraa uka Jeremias harõa kuery ikuaiaty roka py oïague gui. Ha'e vy omboaxa Aicão ra'y Gedalias, Safã ramymino va'e pe, hoo py ae ogueraa aguã. Ha'e ramo oiko tema heta va'e kuery mbyte.

<sup>15</sup> Harõa kuery ikuaiaty roka py teri Jeremias oĩ jave ixupe SENHOR oayvu ombou vy aipoe'i va'ekue:

<sup>16</sup> “Tereo, ndeayvu Etiópia pygua Ebede-Meleque pe. Ha'e vy aipo're 'rã ixupe: ‘Po rami ijayvu SENHOR ixondaro reta va'e, Israel kuery Ruete: “Ne'exa, kova'e tetã re xee ambou 'rã xeayvu vaiague, aroayvu porãague ndaiei. Ndee ae rexaa py ojeupitypa 'rã ha'e va'e ára.

<sup>17</sup> Ha'e rã ndee ma rogueraa jepe 'rã ha'e va'e ára”, he'i SENHOR. “Avakue rekyjea va'e po py nanemboaxaai 'rã.

<sup>18</sup> Mba'eta rogueraa jepe 'rãe, ndorojuka ukai 'rã kyxe py. Xere rejerovia va'e vy reraa jepe 'rã nderekove”, he'i.”

## 40

### *Gedalias openaa py Jeremias ha'e okuave va'e kuery ikuaiague*

<sup>1</sup> Ha'e gui ma Jeremias pe SENHOR oayvu ombou Ramá tetã py jopya kuery ruvixa Nebuzaradã opoi ju rire. Mba'eta ha'e va'e jave py Jerusalém ha'e Judá gui Babilônia katy ogueraa pyre kuery mbyte Jeremias avi oĩ corrente py ojokua reve.

<sup>2</sup> Ha'e gui jopya kuery ruvixa ma Jeremias ojou vy aipoe'i ixupe:

— SENHOR nderuete ma kova'e tekoa re ha'e rami ete oiko aguã re ijayvu va'ekue.

<sup>3</sup> Ha'e nunga ma SENHOR ombou ete, ijayvuague ojapo vy. Peẽ kuery SENHOR rovai pejejavý, ha'e ijayvua napendui rire ha'e nunga ha'e javi oiko pendere.

<sup>4</sup> Ha'e gui aÿ ma ne'exa, kova'e ára ropoi 'rã ndepo jovaive corrente py ndejokuaague gui. Babilônia tetã katy reoxe ri vy ke eju, ha'e ramo xee apena porã 'rã ndere. Ha'e rã xerupive Babilônia katy ndereoxei ri ramo ha'eve avi. Ne'exa, kova'e yvy ha'e javi itui nerentonide. Reoxea katy rei ha'eve reo aguã, tereo ha'e katy ae — he'i.

<sup>5</sup> Jeremias nombovai voi ramo huvixa aipoe'ive ju:

— Ejevy ju ha'vy Aicão ra'y Gedalias, Safã ramymino va'e ro py. Ha'e va'e ma Babilônia pygua huvixa omoī Judá regua tetā pygua kuery ruvixarā. Eiko hexeve ae, neretarā kuery mbyte. Ha'e rami e'ŷ vy amboae katy reoxe vy ke ha'e katy tereo — he'i. Ha'e rami vy ixupe jopya kuery ruvixa ome'ẽ rive'i mba'emo, tembi'u guive. Ha'e rami vy omondouka.

<sup>6</sup> Ha'e ramo Jeremias ma Mispa tetā py oo Aicão ra'y Gedalias oĩa py. Ha'e va'e oĩa py ju oiko, heta va'e kuery oyvy re opyta va'ekue mbyte.

<sup>7</sup> Tetā rovai rupi ikuai teri Judá pygua xondaro kuery huvixa kuery reve. Ha'e kuery oendupa okuapy Babilônia pygua huvixa omoīague Aicão ra'y Gedalias yvy re opena va'erā. Ikuai avi Babilônia katy ndogueraapaaí va'ekue avakue, kunhague, kyrīgue ha'e iporiaukue'i, oyvy re ae opyta va'ekue. Ha'e kuery ma Gedalias po py pavē omboaxaague xondaro kuery oendu vy

<sup>8</sup> oupa Mispa py Gedalias oĩa py. Po rami ma ou va'ekue rery: Netanias ra'y Ismael, Careá ra'y kuery Joanã ha'e Jônatas, Tanumete ra'y Seraías, Netofa pygua Efai ra'y kuery, Maaca pygua ra'y Jazanias ha'e hexeveguia avakue ha'e javi.

<sup>9</sup> Ha'e va'e kuery ha'e hexeveguia avakue pe Aicão ra'y Gedalias, Safã ramymino va'e oura. Ha'e vy aipoe'i ha'e kuery pe:

— Peteīve henda py pekyje eme caldeu kuery gui. Pendekuai tema nhandeyvy re, pemba'eapo Babilônia pygua huvixa pe. Ha'e rami vy pendekuai porā 'rā.

<sup>10</sup> Ha'e gui xee ma apyta 'rā Mispa py, caldeu kuery nhandea py ou va'ekue ayvu rupi apena aguā. Ha'e rā peē ma pemono'õ vinho-rā, ha'e gui kuaray puku jave py ma hi'a ha'e azeite-rā pemono'õ. Pemboyrū 'rā hyrurā pereko va'e py. Ha'e rami vy 'rā pendekuai tetā pendekoague py ae — he'i.

<sup>11</sup> Ha'e rami ae avi Moabe yvy re judeu kuery ikuai va'e, Amom ramymino kuery mbyte, Edom ha'e yvy ha'e javi rupi ikuai va'e avi oendu okuapy Babilônia pygua huvixa oejaague Judá regua okuave va'ekue. Oendu avi Aicão ra'y Gedalias, Safã ramymino va'e ha'e kuery re opena va'erā omoīague.

<sup>12</sup> Ha'e rami oendu vy ojevypa ju opa rupi omoāña ague gui. Judá yvy re ju ou, Mispa tetā py Gedalias oĩa py. Ha'e rami vy omono'õ reta okuapy uva, kuaray puku jave py hi'a va'e guive.

### *Gedalias rovai Ismael opu'āague*

<sup>13</sup> Ha'e gui Careá ra'y Joanã ha'e xondaro ruvixa kuery nhuñdy rupi ikuai va'ekue ou okuapy Mispa tetā py Gedalias oĩa py.

<sup>14</sup> Ha'e vy ixupe aipoe'i okuapy:

— Reikuua pa Amom kuery ruvixa Baalis ombouague Netanias ra'y Ismael ndejuka aguā? — he'i teī Aicão ra'y Gedalias ndogueroviai.

<sup>15</sup> Ha'e ramo Careá ra'y Joanã ma Mispa pyve ijayvu Gedalias pe ha'e ae'ia py. Ha'e vy aipoe'i:

— Aŷ ma aa 'rā nhemi rupi Netanias ra'y Ismael ajuka aguā. Mba'e re tu ha'e ou 'rā ndejuka aguā? Ha'e rami ri ramo Judá kuery ndereve ikuai va'e ha'e javi oaīmba 'rā, Judá regua okuave va'ekue okanhymba 'rā guive — he'i.

<sup>16</sup> Ha'e rami teī Aicão ra'y Gedalias ombovai vy aipoe'i Careá ra'y Joanã pe:

— Ejuka eme. Mba'eta Ismael rovai ndeayvua ma anhetē e'ŷ.

## 41

<sup>1</sup> Ha'e gui sete jaxyä py Netanias ra'y Ismael ou. Ha'e va'e ma Elisama ramymino va'e oiko, huvixa ro pyguare. Ngupive ogueru avi dez avakue huvixa rembiguai kuery. Mispa tetā py ovaīmba Aicão ra'y Gedalias oĩa py. Ha'e rami vy hexeve okaru okuapy Mispa py.

<sup>2</sup> Ha'e jave py Netanias ra'y Ismael dez avakue ngupivegua kuery reve opu'ã vy kyxé py ojuka Aicão ra'y Gedalias, Safã ramymino va'e, yvy re opena va'erã Babilônia pygua huvixa omoõ va'ekue.

<sup>3</sup> Mispa py Ismael ojuka avi judeu kuery Gedalias reveguia ikuai va'ekue ha'e javi, caldeu kuery joe opu'ãa pygua ha'e py ikuai va'ekue guive.

<sup>4</sup> Gedalias ojukaague avave rei ndoikuuai ranhe jave ko'ẽ ju

<sup>5</sup> ha'e py ovaõ avakue Siquém, Siló ha'e Samaria tetã gui. Oitenta avakue ou guendyva onhopõmba reve, oao omondoropa ha'e onhekyxõmba rei reve guive.\* Ha'e va'e kuery ogueru okuapy tembi'u ha'e heakuã porã va'e SENHOR pegua opy ome'ẽ va'erã.

<sup>6</sup> Ha'e ramo Netanias ra'y Ismael ma ha'e kuery ovaexí vy oẽ Mispa tetã gui. Ojae'o reve oo. Ha'e rami vy ovaexí vy aipoe'i ha'e kuery pe:

— Peju ke Aicão ra'y Gedalias oña py — he'i.

<sup>7</sup> Ha'e gui tetã mbyte peve ha'e kuery ovaõ ramo Netanias ra'y Ismael ngupivegua kuery reve ojukapa. Ha'e vy tetekue omombopa yvykua oĩ va'e py.

<sup>8</sup> Ha'e rã ha'e kuery va'e regua dez avakue okuave va'e aipoe'i okuapy Ismael pe:

— Orejuka eme, mba'eta roguereko trigo, cevada, azeite ha'e ei romoõ porã va'ekue. Peteõ mba'ety py ma ronhomí — he'i okuapy. Ha'e ramo ojuka e'ý re oeja, amboae kuery ojukaague rami e'ý.

<sup>9</sup> Yvykua Gedalias reveguia avakue re'õgue Ismael omomboague ma huvixa Asa ojo'o va'ekue, hexe Israel pygua huvixa Baasa opu'ã ramo ojoko aguã. Ha'e va'ekue ae ju Netanias ra'y Ismael omonyê te'õgue.

<sup>10</sup> Ha'e gui Mispa tetã py optya va'ekue Ismael ogueraapa oipokua reve, huvixa rajy kuery ha'e heta va'e kuery Mispa py optya va'ekue ha'e javi. Ha'e va'e kuery re jopya kuery ruvixa Nebuzaradã opena ukaague Aicão ra'y Gedalias pe. Ha'e kuery ae Netanias ra'y Ismael ogueraapa oipokua reve. Amom ramymino kuery yvy katy oo.

### *Oipokuaa reve ogueraa pyre kuery Joanã ogueraa jepepaague*

<sup>11</sup> Ha'e nunga Careá ra'y Joanã oendu, hexevegua xondaro ruvixa kuery ha'e javi voi. Netanias ra'y Ismael ojapo vaiague ha'e kuery oendu vy

<sup>12</sup> ogueraa ojeupergua avakue ha'e javi. Ha'e vy oje'oi Netanias ra'y Ismael re opu'ã aguã. Ha'e vy ojeupity yupa tuvixa va'e Gibeão py oĩ va'e yvýry.

<sup>13</sup> Ha'e ramo heta va'e kuery Ismael ogueraa va'ekue ma Careá ra'y Joanã ha'e hupivegua xondaro ruvixa kuery ou rã oexa vy ov'y'a rei okuapy.

<sup>14</sup> Ha'e rami vy Mispa gui Ismael oipokua reve ogueraa va'ekue ojevy vy oopa okuapy Careá ra'y Joanã-a katy.

<sup>15</sup> Ha'e rã Netanias ra'y Ismael ma oo jepe Joanã gui. Oito avakue reve oo Amom ramymino kuery yvy re.

<sup>16</sup> Ha'e gui Careá ra'y Joanã ha'e hexevegua xondaro ruvixa kuery ogueru ju heta va'e kuery Netanias ra'y Ismael oipokua reve Mispa gui ogueraa va'ekue, Aicão ra'y Gedalias ojuka ma rire. Ha'e va'e kuery ma avakue ipy'a guaxukueve joe opu'ãa pygua, kunhague, kunumigue'i ha'e eunuco kuery Gibeão py ojou vy ogueraa va'ekue.

<sup>17</sup> Ha'e kuery ogueraa vy optya ranhe Gerute-Quimã tekoa Belém katy'i oĩ va'e py, Egito yvy katy ojavaxe vy

<sup>18</sup> caldeu kuery gui. Mba'eta okyje rei okuapy, mba'eta Aicão ra'y Gedalias yvy re opena va'erã Babilônia pygua huvixa omoõ va'ekue ri Netanias ra'y Ismael ojuka rire.

## 42

### *Egitó katy heta va'e kuery oo e'ý aguã re Jeremias ijayvuague*

\* <sup>41:5</sup> Ha'e rami ha'e kuery ikuai Jerusalém tetã ombovaipaague re ipy'a vai vy.

<sup>1</sup> Ha'e gui Careá ra'y Joanã reve xondaro ruvixa kuery ovaẽmba, Hosaías ra'y Jezanias ha'e heta va'e kuery ha'e javi, yvatekueve ha'e yvyigueve voi.

<sup>2</sup> Ha'e rami vy aipoe'i okuapy profeta Jeremias pe:

— Ndevy pe rojerure SENHOR Nderuete pe reporandu aguã orere ha'e kova'e kuery okuave'i va'e ha'e javi re. Mba'eta heta orekuai va'ekue ri mbovy'i aÿ orekuai, nderexa py ae rexaa rami.

<sup>3</sup> Eporandu ke SENHOR Nderuete pe orevy oikuaa uka aguã tape marã katy roo aguã, ha'e mba'e pa rojapo aguã re — he'i.

<sup>4</sup> Ha'e ramo ha'e kuery pe profeta Jeremias aipoe'i:

— Pendeayvua xee roendu ma vy aporandu 'rã SENHOR Penderuete pe pendeayvuague rami. Pendevy guarã SENHOR ijayvua ha'e javi ma amombe'u porã 'rã pendevy. Pendevy namombe'u e'ÿi 'rã mba'eve — he'i.

<sup>5</sup> Ha'e kuery aipoe'ive ju Jeremias pe:

— Ha'e gui SENHOR Nderuete ayvu orevy guarã ndevy ombou va'e ndorojapopai ri ramo tove SENHOR anhetê rupi ha'e ojeroviapy oikoa rupi topu'ã orerovai.

<sup>6</sup> Ijayvua iporã e'ÿ vy ipoyi va'e tei ronhe'ë rendu 'rã SENHOR Nhanderuete, ixupe ndevy roporandu uka rire. SENHOR Nhanderuete ronhe'ë rendu 'rã oremoingo porã aguã — he'i okuapy.

<sup>7</sup> Ha'e gui ma dez araa py SENHOR oayvu ombou Jeremias pe.

<sup>8</sup> Ha'e ramo oenoí Careá ra'y Joanã, hexeveguia xondaro ruvixa kuery ha'e heta va'e kuery ha'e javi, yvyigueve ha'e yvatekueve voi.

<sup>9</sup> Ha'e vy aipoe'i ha'e kuery pe:

— Po rami ijayvu SENHOR Israel kuery Ruete, henonde peẽ kuery xevy pejerure uka rire.

<sup>10</sup> “Kova'e yvy re ri pepyta ramo romboyvate 'rã, roity 'rã nda'ei. Xee ronhoty 'rã, noromondorovei 'rã guive, mba'eta xee nda'evei aiko mba'emo vai pendere ambouague re.

<sup>11</sup> Pekyje eme guive Babilônia pygua huvixa gui, pekyjeague rami e'ÿ. Pekyjeve eme ixugui, mba'eta xee ae aiko 'rã peẽ kuery reve, rogueraa jepe ha'e ipo gui roipe'a aguã”, he'i SENHOR.

<sup>12</sup> “Ha'e rami vy xee roipytyvõ 'rã, romboaxya rupi roguereko 'rã pendeyvy re ae penderekao aguã.

<sup>13</sup> Ha'e rami avi xapy'a rei ‘Oreyvy re ndoropytai 'rã’ peje 'rã, xapy'a rei SENHOR Nhanderuete ayvu napendui vy

<sup>14</sup> aipopeje 'rã: ‘Any, Egito yvy re 'rã roo, mba'eta ha'e py ma ndoroexavei 'rã joe opu'ã va'e, noroenduvei 'rã guive mimby guaxu pu, ha'e mbojape ndoatavei 'rã orevy. Ha'e py ae 'rã orekuai’, peje 'rã.

<sup>15</sup> Ha'e rami ri aipopeje ramo aÿ pejapyxaka SENHOR ayvu re, Judá pygua pekuave'i va'e. Po rami ijayvu SENHOR ixondaro reta va'e, Israel kuery Ruete: Egito yvy re penderekao aguã katy peo aguã pendejee pemoi ete ramo

<sup>16</sup> povae'nunga oiko 'rã pendere: kyxe revegua pekyjeague penderupity 'rã Egito yvy re, karuai pekyjeague voi penderakykue monha 'rã, ha'e py pemanomba aguã rami.

<sup>17</sup> Ha'e ramigua ae 'rã oiko avakue Egito katy oo aguã ojee omoi va'e ha'e javi re. Ha'e kuery omanomba 'rã kyxe gui, karuai ha'e mba'eaxy vaikue gui. Ha'e kuery va'e regua ndokuavei 'rã peteive, ndoo jepei 'rã mba'emo vai ha'e kuery áry ambou va'e gui.”

<sup>18</sup> Mba'eta po rami ijayvu SENHOR ixondaro reta va'e, Israel kuery Ruete: “Jerusalém pygua kuery áry xepoxyha'e ajou vaia ambouague rami avi pende'áry voi ambou 'rã xepoxyha'e, Egito katy peo ramo. Ayvu vaipy 'rã peiko, nhomondyipaarã guive. Pendeavykya rei 'rã, napendejou porãavei 'rã. Ha'e ramo ndapexavei 'rã kova'e teko.”

<sup>19</sup> Mba'eta Judá regua pekuave'i va'e, pendevy pe SENHOR “Tapeo eme Egito katy” he'i rire penderexarai eme kova'e ára pendevy xeayvuague re.

<sup>20</sup> Mba'eta peẽ ma penderekove rekovia ae pejekore, mba'eta SENHOR Penderuete pe aporandu aguã peju vy aipopeje va'ekue: “Eporandu orere SENHOR Nhanderuete pe. Ha'e gui orevy pe emombe'u ju SENHOR ijayvuague ha'e javi. Ha'e ramo ma rojapopa 'rã', peje va'ekue ri.

<sup>21</sup> Ha'e rami teĩ ha'e nunga ha'e javi aãy peẽ kuery pe amombe'u porã teĩ ndapejapyakai pekuapy SENHOR Penderuete peteĩve ayvu pendevy amombe'u va'e re voi.

<sup>22</sup> Ha'e nunga rupi aãy gui ma peikuua pota porã pova'e re: Pemanomba 'rã kyxé gui, karuai ha'e mba'eaxy vaikue gui, Egito yvy re penderekoa aguã peoxeague py ae.

## 43

### *Egito katy heta va'e kuery Jeremias ogueraa okuapyague*

<sup>1</sup> Ha'e rami py heta va'e kuery pe Jeremias omombe'upa SENHOR Nguuete ijayvuague ha'e javi, SENHOR Tuuete omombe'u aguã ombou va'ekue.

<sup>2</sup> Ha'e ramo Jeremias pe ijayvu okuapy Hosáias ra'y Azarias, Careá ra'y Joanã ha'e avakue onhemboyvate rei va'e. Ha'e vy aipoe'i okuapy:

— Po rami ndeayvua ma apu, mba'eta SENHOR Nhanderuete nanemboui aipo're aguã: “Peo eme Egito katy penderekoa aguã ha'e py”, 're aguã.

<sup>3</sup> Nerias ra'y Baruque rima nembo'e ra'e orerovai, caldeu kuery po py oremboaxa aguã, ha'e kuery orejukapa, e'ãy vy Babilônia katy escravo-rã orereraapa aguã — he'i okuapy.

<sup>4</sup> Ha'e rami py Careá ra'y Joanã nonhe'ẽ rendui SENHOR Judá yvy re opyta aguã, xondaro ruvixa kuery, neĩ heta va'e kuery voi.

<sup>5</sup> Ha'e rami 'rãgue py Careá ra'y Joanã ha'e xondaro ruvixa kuery ogueraapa Judá regua kuery okuave'i va'ekue. Ha'e javi regua mbyte rupi ojavapaague gui ojevypa va'ekue Judá yvy re ju ikuai aguã teĩ.

<sup>6</sup> Ogueraa avakue, kunhague, kunumigue'i, ha'e huvixa rajy kuery. Ogueraa avi heta va'e kuery Aicão ra'y Gedalias, Safã ramymino va'ea py jopya kuery ruvixa Nebuzaradã oeja va'ekue ha'e javi. Ogueraa avi profeta Jeremias, Nerias ra'y Baruque guive.

<sup>7</sup> Ha'e rami vy ovaẽmba Egito yvy re, SENHOR ayvu noendu potai vy. Tafnes tetã py ovaẽmba okuapy.

### *Egito yvy re Nabucodonosor ipo'aka aguã re Jeremias ijayvuague*

<sup>8</sup> Ha'e gui ma Tafnes tetã py SENHOR oayvu ombou ju Jeremias pe. Ha'e vy aipoe'i:

<sup>9</sup> “Eraa ndepo py ita tuvixakueve'i, ha'e emboje'apa pyrõa yvy jykue guigua py, Faraó rokẽ rexei'i Tafnes py oĩ va'e py. Judeu regua avakue oexaa py ejapo.

<sup>10</sup> Ha'e vy aipo're 'rã ha'e kuery pe: ‘Po rami ijayvu SENHOR ixondaro reta va'e, Israel kuery Ruete: Ne'exa, apy ae xee ambou 'rã xerembiguai Babilônia pygua huvixa Nabucodonosor. Ha'e vy henda opena atyrã amoĩ uka 'rã kova'e ita amboje'a uka va'ekue áry. Ha'e ramo kova'e ita áry rupi ojapo 'rã oguy'i guenda openaaty ao'iarã.

<sup>11</sup> Ha'e va'e ou vy ombovaipa 'rã Egito yvy. Ha'e rami vy ojuka 'rã ojuka pyrã ikuai va'e ha'e javi, escravo-rã heraa pyrã ma ogueraa 'rã escravo-rã, ha'e rã kyxé py ojuka pyrã ma kyxé py ae 'rã ojukapa.

<sup>12</sup> Mba'eta omoendy 'rã oo Egito pygua kuery ruete peguare, oapypa 'rã. Ha'e rã mba'emo ra'angaa opyta va'e ma oipe'apa 'rã heravy. Oipe'apa 'rã heravy mba'emo Egito yvy re ikuai va'ekue, vexa'i re opena va'e kamixa puku py onhemonde ovya ramí avi. Ha'e rami vy oo porã ju 'rã ha'e gui.

<sup>13</sup> Omboa'ypa 'rã ita mba'emo ra'angaarã Egito yvy re omopu'ã mbyre, Bete-Semes py ikuai va'ekue. Oapypa 'rã guive oo Egito pygua kuery ruete peguare.’ ”

## 44

### *Egito yvy re judeu kuery ikuai va'e ojerovia e'ãya re ijayvuague*

<sup>1</sup> Ha'e gui SENHOR oayvu ombou Jeremias pe, judeu kuery Egito yvy re ikuai va'e ha'e javi reko re, Migdol tetā py, Tafnes, Mēnfis ha'e Patros yvy re ikuai va'e re guive. Ha'e vy aipoe'i:

<sup>2</sup> "Po rami SENHOR ixondaro reta va'e, Israel kuery Ruete ijayvu: Pexa ma opa mba'e vai Jerusalém ha'e Judá re tetā ikuai va'e áry ambou va'ekue. Ne'exa, aŷ minha tekao ve'ŷ ma opyta, ha'e py ikuai va'ekue jipoavei.

<sup>3</sup> Ha'e kuery re ha'e nunga oiko mba'emo vai anho ojapoague re. Xembopoxy rive okuapy amboae ramigua tuuete re ovapa vy, ha'e va'e pe heakuã porã va'e oapy aguã. Ha'e nunga ma teigueve voi ha'e kuery oikuaa va'ekue'ŷ, neĩ peẽ kuery, peneramoĩ kuery voi oexa kuaa va'ekue'ŷ teĩ.

<sup>4</sup> Xee ma ko'ẽ rai'i guive ha'e kuery pe ambou va'ekue xerembiguai profeta kuery, ha'e kuery pe aipoe'i aguã: 'Nda'evei guĩ nunga ojeguarupy xee ajou vai va'e pejapoa rupi pendekuai aguã', he'i aguã.

<sup>5</sup> Ha'e rami teĩ ha'e kuery noendu potai, neĩ ndojapyxakai gueko vai gui ojeko rerova e'ŷ aguã, amboae ramigua tuuete kuery pe mba'emo oapy okuapy guive.

<sup>6</sup> Ha'e ramo mae ambou xepoxyha'e namboaxyveia. Judá re tetā ikuai va'e áry ou, Jerusalém py tape ikuai va'e rupi guive. Ha'e ramo ombovaipa pyre, tekao ve'ŷ opyta, aŷ minha jaexaa rami", he'i.

<sup>7</sup> Aŷ ma po rami ju ijayvu SENHOR ixondaro reta va'e, Israel kuery Ruete: "Mba'e re tu pendejeupe ae ri pejapo vaia rupi pendekuai? Mba'eta Judá kuery mbyte gui pemokanhymba avakue, kunhague, kyrīgue ha'e okambu va'e kuery voi, peẽ kuery va'e regua oikove e'ŷ aguã.

<sup>8</sup> Mba'e re tu xembopoxy teri pekuapy mba'emo pendepo py pejapoa py rive? Mba'eta mba'emo ra'angaa pe rive 'rã peapy heakuã porã va'e Egito yvy re peoague py. Ha'e rami py peẽ ae penhemokanhy peovy, ha'e penhemingo yvy regua kuery ojojai rei ha'e ojou vai va'erã.

<sup>9</sup> Penderexarai ma teve peneramoĩ kuery reko vaiague re, ha'e Judá pygua huvixa kuery avakue ha'e kunhague reko vaiague re? Penderexarai teve pendera'yxy kuery reve penderekoi vaiague re, ha'e Judá yvy re ha'e Jerusalém mbyte rupi ae pendekuaiague re?

<sup>10</sup> Mba'eta aŷ peve peẽ kuery napenhemo'yvy'í, xerenonde teĩ pejererokyje rupi e'ŷ pendekuai, mba'eta xeguigua lei rupi e'ŷ pendekuai, pendevy ha'e peneramoĩ kuery pe xeayvu aeja va'ekue rupi e'ŷ guive."

<sup>11</sup> Ha'e rami vy SENHOR ixondaro reta va'e Israel kuery Ruete aipoe'i: "Ne'exa, aŷ penderovai arova 'rã xerova pendere ajapo vai aguã, Judá regua kuery amokanhymba aguã.

<sup>12</sup> Ha'e rami vy aipe'apa 'rã Judá regua okuave'i va'e Egito yvy re ikuai aguã onhea'ã rei va'ekue. Ha'e ramo ha'e kuery omanomba 'rã ha'e py ae. Kyxe py ojukaa 'rã, e'ŷ vy karuai gui 'rã ho'a. Kyrīgue'i ha'e tujakue'i okanhymba 'rã. Kyxe py, e'ŷ vy karuai gui omanomba 'rã. Ayvu vaipy 'rã ikuai, nhomondyipaarã, ojou vaipy ha'e ojojai reipy.

<sup>13</sup> Mba'eta Jerusalém tetā re ajapoague rami ae xee ambopaga 'rã Egito yvy re ikuai va'e, kyxe, karuai ha'e mba'eaxy vaikue ambou vy.

<sup>14</sup> Ha'e va'e gui ma mava'eve ndoo jepeai 'rã, Judá gui Egito yvy re ikuai aguã oo va'ekue regua. Ndoikoavei 'rã Judá yvy katy ojevy va'erã, ha'e katy ju ojevyxe teĩ. Ha'e katy ndojevyavei 'rã, amongue ete'i oo jepe va'ekue e'ŷ vy."

### *Jeremias ayvu ombovai atā okuapyague*

<sup>15</sup> Ha'e gui Egito yvy re Patros py heta ikuai kunhague tuuete kuery mboae pe rive heakuã porã va'e rapya kuery. Kunhague ha'e rami ikuiai ma ime kuery oikuaa avi. Ha'e rami vy ome kuery reve ijaty okuapy, heta va'e kuery ha'e javi reve. Jeremias pe ha'e kuery ombovai vy aipoe'i okuapy:

<sup>16</sup> — Nhanderuete rery rupi ayvu orevy remombe'u teĩ ore ma ndorojapoi 'rã ndeayvua.

<sup>17</sup> Ha'e rami 'rãgue py oreayvua rami ae 'rã rojapo. Ha'e rami vy mba'emo heakuã porã va'e roapyve tema 'rã yva re orexyete oĩ va'e pe. Ixupe rome'ẽ avi 'rã mba'emo rykue orekuaiaty rami ae, oreramoĩ kuery ikuaiague rami guive, oreruvixave kuery ha'e yvatekueve Judá regua tetã ikuai va'e rupi ha'e Jerusalém tetã mbyte rupi ikuaiague rami. Mba'eta ha'e va'e jave ma orevyndoatai va'ekue mbojape. Roiko porã va'ekue, mba'emo vai ndoikoi guive.

<sup>18</sup> Ha'e gui aŷ ma orexyete yva pygua pe heakuã porã va'e roapyaty gui roipytu'u rire, ha'e ixupe mba'emo rykue norome'ẽvei ma rire opa mba'e oatapa orevy. Kyxe py roiko vaipa, karuai ha'e mba'eaxy vaikue gui guive.

<sup>19</sup> Ha'e rami avi oreme kuery reve e'ŷ ri ty'y orexyete yva pygua pe rome'ẽ heakuã porã va'e ha'e mba'emo rykue roapy? — he'i okuapy.

### *Ha'e kuery ombopagaa aguã re Jeremias ijayvuague*

<sup>20</sup> Ha'e ramo Jeremias ombovai heta va'e kuery ha'e javi: avakue, kunhague ha'e pavẽ rei ha'e rami ete ixupe ijayvu va'ekue guive. Ha'e vy aipoe'i:

<sup>21</sup> — SENHOR nda'u hexarai ha'e ndokuuaa potai 'rã ri ha'e nungakue re, Judá regua tetã ha'e Jerusalém mbyte rupi mba'emo peapy pekuapyague re, peneramoĩ kuery voi, penderuvixa kuery, yvatekueve, ha'e pendeyvy jave rupi ikuai va'e ojapoague re?

<sup>22</sup> Any, pendeko vai pekuapya ma SENHOR ndogueropo'akavei ma, ojeguarupy anho pejapo ramo. Ha'e nunga rupi ae pendeyvy optya tekao ve'ŷ ha'e nhomondyipaarã, ha'e py jipoavei aguã, aŷ jaexaa rami ae.

<sup>23</sup> Mba'eta SENHOR rovai ae pejejavvy heakuã porã va'e peapy pekuapya py. Napendu potai guive SENHOR ayvu. Ixuguiqua lei ojapo uka va'ekue rupi e'ŷ pendekuai. Ha'e nunga rupi ae ri pendere ou mba'emo vai, aŷ jaexaa rami — he'i.

<sup>24</sup> Jeremias aipoe'ive ju heta va'e kuery pe, kunhague pe guive:

— Peẽ kuery Judá regua Egito yvy re pendekuai va'e ha'e javi, pejapyxaka ke SENHOR ijayvua re.

<sup>25</sup> Mba'eta SENHOR ixondaro reta va'e, Israel kuery Ruete aipoe'i: “Peẽ ha'e pendera'yxy kuery reve ma pendejuru py anho e'ŷ pejejavypa pekuapy, pendepo py ae pejapo penhemboayvuague. Mba'eta aipopeje: ‘Orexyete yva pygua pe ronhemboayvu rokuapy mba'emo roapy ha'e mba'emo rykue rome'ẽ aguã re. Ha'e gui oreayvuague rojapopa 'rã', peje va'ekue. Ha'e nunga rupi aŷ pejapopa na pendeayvuague, ojeupitypa ete aguã rami pejapo”, he'i.

<sup>26</sup> Ha'e rami avi Judá regua Egito yvy re pendekuai va'e, pendu ke SENHOR ayvu: “Ne'exa, xee ma aura 'rã xerery ipo'akapa va'e rupi ae, raka'e rã teĩ Egito yvy jave rupi Judá kuery juru gui nonhenduvei ma 'rã xerery rupi oura vy ‘Anhetẽ ete SENHOR oikove va'e rery rupi aura’, he'i va'e.

<sup>27</sup> Mba'eta ne'exa, ha'e kuery re xee aikuuaa pota 'rã mba'emo vai ambou aguã, mba'emo porã nda'ei. Ha'e ramo Judá kuery Egito yvy re ikuai va'e ha'e javi oiko vai 'rã kyxe py e'ŷ vy karuai gui, okanhymba peve.

<sup>28</sup> Amongue ete'i 'rã kyxe gui oo jepe vy Egito yvy gui ojevy Judá yvy katy. Ha'e rã Judá kuery Egito yvy re ikuai aguã oo va'ekue mboae ma oikuaapa 'rã xeayvu pa ojeupity va'ea, tyrã pa ha'e kuery ayvu.

<sup>29</sup> Pova'e nunga ajapo 'rã peikuaa aguã kova'e tekao py rombopaga 'rãa, ha'e anhetẽ xeayvuague ojeupitypa 'rãa peẽ kuery re mba'emo vai ambou aguã regua”, he'i SENHOR.

<sup>30</sup> “Ne'exa, po rami 'rã peikuaa. Egito pygua huvixa Faraó Hofra hery va'e ma xee amboaxa 'rã hovaigua ijukaxe kuery po py, Judá pygua huvixa Zedequias minha hovaigua ijukaxe Babilônia pygua huvixa Nabucodonosor po py amboaxaague rami ae”, he'i SENHOR.

## 45

### *Baruque pe Jeremias ayvu omombe'uague*

<sup>1</sup> Josias ra'y Joaquim Judá pygua huvixa va'e irundy ma'etŷ re ma oĩ jave profeta Nerias ra'y Baruque ombopara oiny Jeremias ayvu kuaxia re. Ha'e gui ixupe ju Jeremias ijayvu vy aipoe'i:

<sup>2</sup> — Baruque, po rami SENHOR Israel kuery Ruete ijayvu ndereko re.

<sup>3</sup> Ndee ma aipo're va'ekue: “Xee tu nda'evei ete aikovy! Mba'eta xee aiko axya áryve SENHOR ombou ndavy'aive aguã. Xekane'õ ma xepoaẽ riae py, ndajoui apytu'u aguã”, 're va'ekue.

<sup>4</sup> Ha'e ramo aipoe'i uka ndevy: “Po rami ijayvu SENHOR: Ne'exa, xee ma aitypa ju 'rã amopu'ã va'ekue, ha'e amondoro ju 'rã anhotŷ va'ekue. Ha'e nunga oiko 'rã vvy jave re.

<sup>5</sup> Ha'e gui ndee ha'vy ndeyvateve nhea'ã teve? Enhea'ave eme ha'e rami. Mba'eta ne'exa, avakue ha'e javi áry xee ambou 'rã mba'emo vai. Ha'e rã ndee ma rojapo 'rã nderekoverã rejou aguã rami, mamo rã rei reoa py”, he'i SENHOR.

## 46

### *Egito pygua kuery rekorã re ijayvuague*

<sup>1</sup> Po rami profeta Jeremias pe SENHOR ombou oayvu vvy regua kuery rovai.

<sup>2</sup> Egito vvy re ranhe ayvu oĩ, Egito pygua huvixa Faraó Neco xondaro kuery rovai. Mba'e ha'e va'e xondaro kuery re Babilônia pygua huvixa Nabucodonosor opu'ã vy ipo'aka. Carquemis tetã re ipo'aka Eufrates yakã yvýry, irundy ma'etŷ re ma Josias ra'y Jeoaquim Judá pygua huvixa oĩ jave py. Ha'e vy aipoe'i:

<sup>3</sup> “Perekó katu ke hu'y jokoarã ha'e nhomo'ãa tuvixa va'e. Ha'e vy tapeo joe pepu'ã aguã katy.

<sup>4</sup> Pembokupe árygua kavaju, kavaju árygua kuery guive toĩmba. Ha'e vy ngora hatã va'e reve pejexa uka pavẽ. Perekó katu ke hu'y, penhemonde guive pexo regua py.

<sup>5</sup> Ha'e rire teĩ mba'exa tu aexa okyje va'e ojevypa jogueruvy rã? Mba'eta ipy'a guaxukueve re ipo'akaa ra'e. Ha'e ramo ha'e kuery ma guakykue re oma'ẽ e'ŷ re onhamba oje'oivy, jobaive-ive re imongygearã ombojere ouvy ramo”, he'i SENHOR.

<sup>6</sup> “Ha'e kuery onha ratã teĩ nda'evei ojava ete aguã, ipy'a guaxukueve teĩ ndoo jepei. Mba'eta kuaray ijapu'a'ia katy Eufrates yakã yvýry rupi onhepyxanga vy ho'apa joguerupy.

<sup>7</sup> “Mava'e kuery tu Nilo yakã oxyry atãa rami oẽ jogueruvy va'e, yakã yy omyĩ atã-atã va'e rami?

<sup>8</sup> Egito pygua kuery ae ri Nilo yakã oxyry atãa rami oẽ jogueruvy va'e. Mba'eta ha'e kuery aipoe'i okuapy: ‘Nhaẽ vy jajao'ipa 'rã vvy jave rupi, nhambovaipa 'rã tetã ikuai va'e, ha'e pygua kuery ha'e javi guive’, he'i teĩ.

<sup>9</sup> Neĩ ke kavaju árygua kuery, tapeo, pemondyi heravy karóxa mboguataa kuery, ipy'a guaxukueve ha'e javi toẽmba avi. Etiópia pygua ha'e Pute pygua kuery voi oo hu'y jokoa reve, Líbia pygua kuery guyrapa oiporu kuaa va'e voi.

<sup>10</sup> Mba'eta ha'e va'e ára ma SENHOR ára, SENHOR ixondaro reta va'e ngovaigua kuery ombopaga aguã. Ha'e nunga rupi omomba 'rã kyxe py. Ha'e ramo nhomomba 'rã inhakanhyumba ha'e tuguy py oka'upa peve. Mba'eta SENHOR ixondaro reta va'e ae oa'anga jojuka aguã, kuaray ijapu'a'ia katy Eufrates yakã yvýry.

<sup>11</sup> “Ha'e gui Egito pygua rajy kuery, tapeo Gileade katy moã Peru aguã. Ha'e rami avi moã pejou reta teĩ nda'evei, mba'eta moã jipoi penemongueraarã.

<sup>12</sup> Yvy regua kuery oendu ma okuapy penemoximbaarã ou rã, vvy jave rupi peneraxẽ rei nhendu ramo. Ha'e vy pendea pygua ipy'a guaxukueve onha jogueravy vy ojeapi 'rã ipy'a guaxukueve mboae re. Ha'e rami vy jojavi 'rã ho'apa.”

<sup>13</sup> Ha'e gui po rami SENHOR ijayvu profeta Jeremias pe. Babilônia pygua huvixa Nabucodonosor ou vy Egito yvy regua kuery re opu'ã aguã re ijayvu.

<sup>14</sup> "Pemombe'u ke pova'e ayvu Egito yvy re. Migdol py ke pendu uka, Mênfis ha'e Tafnes tetã py guive. Ha'e vy aipopeje 'rã: 'Pejexa uka ke, peiko katupa, mba'eta kyxe omomba ma heravy pendeyvýry ikuai va'e ha'e javi', peje 'rã.

<sup>15</sup> Mba'exa tu oitya ma penderuete ra'angaa Toro pejea? Nai'aĩ ranhei ma voi, SENHOR ae oity ramo.

<sup>16</sup> SENHOR ma heta ete ojapo onhepyxanga vy ho'a aguã rami. Ha'e kuery jo'a-jo'a ho'a ovv vy aipoe'i 'rã: 'Pevy ke, jajevypa ju nhaneretarã kuerya katy, nhanekyrí'ague py, kyxe py nhanemombaa gui', he'i 'rã.

<sup>17</sup> Ha'e py ma Egito pygua huvixa Faraó ojavykya rei vy ixupe 'Hevovo rei va'e rive', he'i 'rã okuapy, mba'emo ojapoa ára omboaxa rive rire", he'i.

<sup>18</sup> Ha'e gui ma Huvixa SENHOR ixondaro reta va'e hery va'e aipoe'i: "Anhetẽ ete xee ae rekove rupi aura vy aipoa'e: Ou 'rã peteĩ ipo'akave ete va'e, Tabor yvyty pavẽ gui yvatevea rami, ha'e Carmelo yvyty ye'ë yvýry oïa rami ojekuaa porã va'e.

<sup>19</sup> Ha'e nunga rupi Egito pygua rajy kuery, perekko katu ke penemba'e rei-rei peraa aguã escravo-rã pendereraa katy. Mba'eta Mênfis tetã ma ombovaipaa ma, omokanhymbaa ma avave rei noñavei aguã rami.

<sup>20</sup> Egito yvy ma vaka ra'y iporãve va'e ramigua teĩ ou ma oiny mbytu kuaray ijapu'a'ia katy gui.

<sup>21</sup> Ha'e ramo xondaro kuery peráta re ha'e kuery ojou va'ekue voi vaka omongyra pyre rami ikuai teĩ ojekupe rerova vy ojavapa 'rã jogueravy. Joe nopu'ãi 'rãe, mba'eta ha'e pygua kuery re ou imombaarrã ha'e ombopagaa aguã ára.

<sup>22</sup> Ha'e rami vy Egito pygua kuery ma mboi onha vy hevovo rei ovya rami 'rã onhendu, mba'eta ha'e kuery rovai hovaigua kuery ou ma oiny haxa reve, yvyra rake'oa rami.

<sup>23</sup> Ha'e kuery ojayapa 'rã ka'aguy inhana ete teĩ", he'i SENHOR. "Ha'e kuery ma tuku-karu gui hetave 'rã, mbovy e'ë 'rã ikuai.

<sup>24</sup> Ha'e nunga rupi Egito pygua rajy kuery oximba ma, kuaray ijapu'a'ia katy guigua kuery po py omboaxaa rire."

<sup>25</sup> Ha'e gui ma SENHOR ixondaro reta va'e, Israel kuery Ruete aipoe'i: "Ne'exa, ambopaga 'rã Nô tetã pygua kuery ruete Amom, ha'e gui Faraó, Egito yvy regua kuery, ha'e pygua tuuete ramigua kuery guive. Faraó reve ambopaga avi 'rã hexe ojerovia va'e kuery.

<sup>26</sup> Ha'e kuery amboaxapa 'rã ijukaxeia kuery po py, Babilônia pygua huvixa Nabucodonosor po py ae, hembiguai kuery po py guive. Ha'e rami teĩ ha'e va'e rire ma ha'e py hekoa ju 'rã yma guare rami ae", he'i SENHOR.

<sup>27</sup> "Ha'e nunga rupi xerembiguai Jacó kuery, pekyje eme. Israel kuery, penhemondyi eme. Mba'eta xee rogueraa jepe 'rã yvy peoague gui mombyry teĩ, peneramymino kuery arupa ju 'rã yvy escravo-rã ogueraa ague gui. Ha'e ramo Jacó kuery ojevypa ju 'rã, opytu'ha'e ikuai porã'i 'rã, imongygearã jipovei ramo.

<sup>28</sup> Ha'e nunga rupi xerembiguai Jacó kuery, pekyje eme, mba'eta xee aiko pendereve. Xee amomba 'rã yvy regua kuery romondoukaague pygua. Ha'e rã peẽ kuery ma noromombai 'rã. Xee rombopaga 'rã teĩ ha'evea peve'i, mba'eta noromboeko porã rivei 'rã", he'i SENHOR.

<sup>2</sup> Ha'e vy SENHOR aipoe'i: "Ne'exa, kuaray ijapu'a'ia katy gui yy opu'ã-pu'ã vy oxyry atã 'rã ouvy. Ha'e rami vy ojao'ipa 'rã heravy yvy ha'e ikuai va'e ha'e javi, tetã ha'e ha'e pygua kuery guive.\* Ha'e ramo avakue ojapukai pavẽ 'rã, yvy re ikuai va'e ojae'opa 'rã okuapy, <sup>3</sup> mba'eta oendu 'rã kavaju pyambu ha'e hevovo rei ouvya, karóxa parãa ha'e iruéra nhe'ẽ reia. Ha'e rami vy tuu kuery noipytyvõ kuaavei 'rã gua'y kuery, ipo kangypaa gui rive.

<sup>4</sup> Mba'eta omombaa aguã ára ovaẽ ma oiny filisteu kuery, Tiro ha'e Sidom tetã pytyvðarã ikuai va'ekue rembyrekue omokanhymbaa aguã. Ha'e rami vy SENHOR omomba 'rã filisteu kuery, Caftor ye'ẽ pa'ũ re okuave'i va'ekue guive.

<sup>5</sup> Ha'e ramo Gaza tetã pygua kuery onhopõimba 'rã oakã, Asquelom pygua kuery voi okyrirõimba 'rã okuapy, yvyugua rupi ikuai va'e ha'e javi reve. Raka'e peve tu pen-hekyxõimba rei 'rã?

<sup>6</sup> "Aipopeje: 'Ai SENHOR guigua kyxe, raka'e peve nda'u repytu'ua rupi e'ŷ 'rã reiko? Ejevy ju ke nderyru py, repytu'u ha'e reĩ rive ju aguã', peje tei."

<sup>7</sup> "Ha'e rami avi kyxe, mba'exa tu repytu'u ta SENHOR ndevy mba'emo ojapo uka teri ramo? Mba'eta reo 'rã Asquelom tetã re, ye'ẽ yvýry ikuai va'e re guive, mamo rã nemondoukaa katy rei."

## 48

### *Moabe pygua kuery rekorã re ijayvuague*

<sup>1</sup> Ha'e gui Moabe yvy regua ayvu ju SENHOR ixondaro reta va'e, Israel kuery Ruete ombou va'ekue: "Nda'evei ete 'rã Nebo tetã pygua kuery pe, ombovaipaa ma ramo. Quiriataim pygua kuery voi oxõimba 'rã, ha'e kuery re ipo'akaa rire. Tetã ikorapa va'e py voi oxõimba ha'e onhemondyipa 'rã okuapy.

<sup>2</sup> Mba'eta Moabe yvy re ndojouavei ma iporãgueve ikuai va'ekue. Hesbom tetã py jogueroayvua 'rã ha'e kuery rovai opu'ã aguã re. Ha'e vy aipo'ea 'rã: 'Peju ke, nhamomba, peteĩ regua ikuai ve'ŷ aguã', 'ea. Ha'e ramo ndee Madmém tetã pygua kuery voi pekyrirõimba 'rã, ha'e kyxe reveguia penderakykue monha 'rã.

<sup>3</sup> Horonaim gui voi haxẽ rei va'e onhendu, ombovaipaa ha'e omombaa ete rire.

<sup>4</sup> Ha'e rami py Moabe yvy ivaipa ma. Ha'e ramo ha'e pygua ra'y kue'iry ojapukai nhendu 'rã okuapy.

<sup>5</sup> Luíte yvy'ã katy oẽ ovya rupi ojae'oa 'rã jogueravy opo'o e'ŷ re. Ha'e gui Horonaim yvy'ã guy katy oguejy ovya rupi ipy'a vai nhendu 'rã jogueravy omokanhymbaa rã.

<sup>6</sup> Pejava ke penderekove peraa jepe aguã, yvy piru reia py peteĩ yvyra'i ha'e ae'i hi'aĩ va'e rami tei.

<sup>7</sup> Ndee ae mba'emo rejapo va'e re ha'e mba'emo rerekopa va'ekue re rive rejerovia rire ndee voi ndepe'aa 'rã. Mba'eta tuuete ramigua Quemos voi heraa 'rã, ixupeguia sacerdote kuery ha'e yvatekueve guive.

<sup>8</sup> Mba'eta peteĩ-tei tetã re ou 'rã imbovaipaarrã, neĩ peteĩve ma ndoo jepei 'rã. Ha'e ramo yvyugua rupi ikuai va'ekue omanomba 'rã, nhuündy rupi ikuai va'e voi, ha'e rami aguã SENHOR ijayvu rire.

<sup>9</sup> "Moabe pygua kuery pe tome'ea ipeporã, oveve vy oo jepe aguã. Mba'eta ha'e kuery retã ombovaipaa 'rã, avave rei noñavei ma 'rã ha'e py.

<sup>10</sup> Ayvu vaipy toiko SENHOR pe kyre'ŷa rupi e'ŷ omiba'eapo va'e, jouguy moẽa py okyxe ndoiporui va'e.

<sup>11</sup> Mba'eta Moabe pygua kuery ma jypy'i guive ikuai porã'i va'ekue, vinho hyru py oky'akue reve opyta riae oiny va'e rami, ha'e hyru mboae py teigueve ndoguerovaai teri va'e rami, mba'eta ha'e kuery ma peteigueve ma voi escravo-rã heraa va'e'ŷ teri. Ha'e rami vy jypy guare rami ae hee ha'e heakuã porã tema va'e rami ikuai tei."

\* **47:2** "Yy ou" he'ia ma Babilônia pygua kuery joe opu'ã vy ou aguã re ijayvu vy.

<sup>12</sup> Mba'eta SENHOR aipoe'i: "Ne'exa, ou ma oiny ára ha'e kuery rovai ambou aguã vinho onhoëa rami avi oipe'apa va'erã kuery. Ha'e ramo ha'e kuery onhoëmba 'rã hyru gui, hyrukue ombovopa 'rã guive.

<sup>13</sup> Ha'e ramo Moabe pygua kuery oximba 'rã nguuete ramigua Quemos re rive ojeroviaague gui, Israel kuery Betel py mba'emo re ojeroviaague gui oximba okuapyague rami.

<sup>14</sup> Mba'exa vy tu aipopeje: 'Ore kuery ma orepy'a guaxukueve, ava mbaraetekue joe ropu'ãa pyguarã meme orekuai', peje?

<sup>15</sup> Mba'eta Moabe yvy ombovaipa ramo ha'e pygua kuery oëmba ma jogueravy guetã gui. Ha'e pygua kunumigue xondarorã oiporavo pyre voi heraapa ma ojukaa aguã katy", he'i Huvixa guaxuve, SENHOR ixondaro reta va'e hery va'e.

<sup>16</sup> "Ovaõ rai'i ma Moabe pygua kuery okanhymba aguã, ovaõ rai'i ete ma mba'emo vai.

<sup>17</sup> Ha'e kuery ijyvýry pendekuai va'e pemboaxy ke, hery peikuaa va'e ha'e javi. Ha'e vy aipopeje: 'Mba'exa tu yvyra imbaraete, popoka iporã va'ekue opẽ vyvoi!' peje.

<sup>18</sup> Ha'e gui Dibom pygua rajy kuery, peguejy ma penerenda porã gui, ha'e yvy py rive ju peguapy peiny. Mba'eta penderovai oẽ ma ouvy Moabe yvy mombaarã, peneretã ikorapa va'ekue guive ombovaipa.

<sup>19</sup> Ha'e gui Aroer pygua kuery voi, peī ke tape yvýry, ha'e pexa pota peiny. Ha'e vy peporandu ke ojava ha'e oo jepe va'e kuery pe: 'Mba'e tu oiko?' peje.

<sup>20</sup> Ombovai 'rã: 'Moabe pygua kuery oximba ma okuapy, onhemondyipa rei guive. Penhendu ha'e pejapukai, ha'e Arnom yakã peve pemombe'u Moabe yvy ombovaipa maa', he'i 'rã.

<sup>21</sup> Nhuñdy ikuai va'e re voi ou imokanhymbaarã, Holom tetã, Jaza ha'e Mefaate áry,

<sup>22</sup> ha'e gui Dibom, Nebo ha'e Bete-Diblataim áry,

<sup>23</sup> Quiriataim, Bete-Gamul ha'e Bete-Meom áry,

<sup>24</sup> Queriote ha'e Bozra áry, Moabe yvy re tetã ikuai va'e ha'e javi áry, mombyry ha'e ha'e'i rupigua guive.

<sup>25</sup> Omombaa ma Moabe pygua kuery po'akaa, ijyva omopëmbaa ma", he'i SENHOR.

<sup>26</sup> "Pemoakanhymba oka'u va'e rami, SENHOR rovai onhemboyvate rei rire. Ha'e ramo Moabe pygua kuery onhembojere-jere 'rã nhoguenoiny ombojevyague rupi ae, ijojai reia kuery oexaa py.

<sup>27</sup> Mba'eta peī kuery nda'u Israel kuery napendejajai rei avi? Ha'e kuery nda'u imonda va'e kuery reve ri ombo'aa, pejajai reia rupi pendeayvu aguã?

<sup>28</sup> Ha'e nunga rupi Moabe pygua kuery, pejapa ke peneretã, itaova guýry rive ju pendekuai aguã. Itakua rupi apykaxu onhemboaitya rami rive pendekuai.

<sup>29</sup> Roendu ma Moabe pygua kuery onhemboyvate reia omombe'ua rã. Mba'eta opa mba'e py onhemboyvate ha'e ojejou porã rei okuapy opy'a py. Okuraxõ py ojee anho rei ojerovia."

<sup>30</sup> SENHOR aipoe'i: "Xee aikuua ma ha'e kuery ojerovia reia. Ha'e rami teī ha'e rami ikuua ma mba'everã ndovarei. Ijapu reia ndoikoi 'rãe.

<sup>31</sup> Ha'e nunga rupi ae xepoaõ Moabe yvy re, Moabe py ikuai va'e ha'e javi re ajae'o, ha'e avakue Quir-Heres pygua re xepy'a vai.

<sup>32</sup> Jazer kuery ojae'oa gui xee ajae'ove peī Sibma tetã pygua kuery uva rembypy hi'aï va'e rami pendekuai va'ekue re. Mba'eta jypy ma penderapo oo ye'ẽ rovai peve, ye'ẽ rembe Jazer oña peve ete oo va'ekue. Ha'e rami teī imokanhyarã ou ma nde'a kuaray puku jave py ikuai va'ekue re.

<sup>33</sup> Ha'e rami vy Moabe yvy gui oipe'apa ma ikuai rive reia ha'e mba'ety porã re ov'y'a rei okuapya. Mba'eta ajapo uva oumbiriaty gui vinho nonheëvei aguã rami, ha'e ramo ndoikoavei ma 'rã ov'y'a reve vinho oumbiri va'era. Ojapukai va'e ma ov'y'aa rupi ve'ý 'rã ojapukai.

**34** Ha'e rami 'rāgue py oendua 'rā Hesbom pygua kuery haxēa, Eleale ha'e Jaza peve. Zoar guive oendua 'rā Horonaim ha'e Eglate-Selisias peve. Ninrim py yy oī va'e typa avi.

**35** Mba'eta Moabe gui amokanhymba 'rā yvy'ā rupi ngueute ramigua pe mba'emo oapy va'ekue, heakuā porā va'e rapyare kuery guive", he'i SENHOR.

**36** "Ha'e nunga rupi Moabe pygua kuery re xepy'a py xepoāē ratā mimby pu rami. Mimby rami ajae'o Quir-Heres pygua avakue re, ha'e kuery oguerekopa va'ekue okanhymba ramo.

**37** Ha'e nunga rupi ha'e kuery ha'e javi ojajapa o'a ha'e guendyva. Opo rupi guive onhekxyximba, ha'e voxvaikue py rive onhemama.\*

**38** Moabe yvy jave rupi ikuai ojae'o va'e ngoo áry ha'e tetā mbyte rupi, Moabe amboa'ypa rire mba'emo ryrukue nhae'ū guigua ndoipotaaveipy rami. Ha'e nunga rupi ae ombovaipa pyre opyta", he'i SENHOR.

**39** "Ha'e ramo ha'e kuery hevovo rei okuapy. Moabe pygua kuery okupe rive oguerova okuapy oximba rei vy. Mba'eta ijyvýry ikuai va'e regua pe Moabe yvy itui ojojai reipy ha'e nhomondyipaarrā."

**40** Mba'eta po rami SENHOR ijayvu: "Ne'exa, Moabe rovaigua kuery ma taguato ovevea rupi opepo oipyo va'e rami ou.

**41** Ha'e ramo tetā ikuai va'e oipe'apa, oo ikorapa va'ekue guive. Ha'e va'e ára ma Moabe pygua ipy'a guaxukueve va'ekue ipy'a tytypa rei 'rā kunha imemby raxy va'e rami.

**42** Ha'e rami Moabe pygua kuery okanhymba 'rā, petei regua ikuai ve'ý aguā, SENHOR rovai onhemboyvate rire.

**43** Moabe pygua kuery, pende'áry ou oiny tekorā ve'ý, yvykua ha'e nhuā xā", he'i SENHOR.

**44** "Ha'e gui tekorā ve'ý gui onha va'e ho'a 'rā yvykua py, ha'e yvykua gui oē ovvy va'e ma nhuā xā re ju 'rā ho'a. Mba'eta Moabe pygua kuery áry ambou 'rā ambopaga aguā ma'etý", he'i SENHOR.

**45** "Ha'e gui oo jepe va'ekue ikangypa vy opyta 'rā okuapy Hesbom tetā yvýry. Ha'e rami teī Hesbom gui oē 'rā tata, Siom mbyte gui oē 'rā hendy vuku-a Moabe pygua kuery apyte rapyarā. Ha'e rami vy oapypa 'rā hevovo rei va'ekue inhakā áry rupi.

**46** Moabe pygua kuery, nda'evei ete 'rā pendevy. Pekanhymba ma, Quemos guigua pendekuai va'e. Ha'e ramo pendera'y kuery escravo-rā heraapaa ma, nderajy kuery guive.

**47** Ha'e rami teī opaa ára py ma ambopyau 'rā Moabe pygua kuery ikuiaia", he'i SENHOR. Apy peve opa ma Moabe rovai ayvu ombou va'ekue.

## 49

### *Amom pygua kuery rekorā re ijayvuague*

**1** Ha'e gui Amom ramymino kuery re ma po rami SENHOR ijayvu: "Xapy'a rei nda'u Israel kuery ndoikoi ri? Neī teīve Israel ramymino teve ndoikoi? Ha'e rami ri ramo mba'e re tu tuuete ramigua Milcom pegua kuery ikuai Gade regua yvy re? Ha'e katy'i tetā ikuai va'e rupi voi ixupagua kuery ikuai."\*

**2** Ha'e nunga rupi SENHOR aipoe'i: "Ne'exa, ovaē ma ára ajapo aguā Amom regua Rabá tetā pygua kuery mimby guaxu oendupa aguā rami, ha'e kuery re opu'āa ta ouvy rā. Ha'e ramo tetā opyta 'rā mba'emo ra'ykue aty rive, ha'e katy'i tekaoa ikuai va'e okaipa 'rā guive. Ha'e gui Israel kuery ju oipe'a 'rā guetā jopyare kuery retā", he'i SENHOR.

**3** "Ha'e nunga rupi Hesbom pygua kuery, penhendu rei pekuapy, mba'eta Ai tetā ombovaipaa ma. Ha'e Rabá tetā pygua kuery, pejapukai ke ha'e penhemonde ajukue

\* **48:37** Gueko rami vy ha'e rami 'rā ikuai onhemboaxya oendu vy. \* **49:1** Milcom ma Amom pygua kuery ruete ramigua. Ha'e gui ixupagua kuery Amom regua ma Israel kuery retā oipe'a vy Gade yvy re heko, amboae kuery Israel kuery re opu'āa jave.

vaikue voxua guigua py. Pejae'o reve pejere-jere peneretā kora rupi, mba'eta penderuete ramigua Milcom ogueraa avi 'rā, ixupegua sacerdote kuery ha'e yvatekueve reve.

<sup>4</sup> Ha'e gui tajy onhe'ẽ raxave va'e, mba'e re tu yvyugua mba'emo porā oĩa ndeyvvy re ikuai va'e rejou porāa rupi anho rei ri ndeayvu? Mba'emo rerekopa va'e re anho rejerovia. Ha'e vy aipo're: 'Mava'e tu ou 'rā xerovai?' 're.'

<sup>5</sup> Ha'e nunga rupi SENHOR ixondaro reta va'e aipoe'i: "Nde'áry ambou 'rā nanderekorāvei rei aguã, ndeyvýry ikuai va'e ha'e javi gui. Ha'e rami vy peẽ kuery peteĩ-teĩ penemoxẽa 'rā heravy hovai katy, ndoikoai 'rā guive penha va'ekue pendereru ju va'erā."

<sup>6</sup> Ha'e rami teĩ ha'e va'e rire ma ambopyau 'rā Amom kuery ikuiaia", he'i SENHOR.

### *Edom pygua kuery rekorā re ijayvuague*

<sup>7</sup> Ha'e gui Edom pygua kuery re ma po rami SENHOR ixondaro reta va'e ijayvu: "Temā tetā py nda'u ndoikoi ri hi'arandu va'e? Ha'e va'e kuery hexaraipa ma nda'u hi'arandu va'e omonogetaague re? Tyrā pa hi'arandua okanhymba ete teve?"\*

<sup>8</sup> Dedā py pendekoa va'e, pejava, pejere peovy, ha'e peike itakua ikuai va'e py. Mba'eta peẽ kuery áry xee ambou 'rā Esaú ramymino kuery penembopagaarā, pepaga aguã ára ovaẽ ma ramo.

<sup>9</sup> Ha'e gui uva mono'õa kuery pendea py ou va'e rire ndoejai 'rāgue nda'u amongue uva xã? E'ỹ vy pyávy imonda va'e ou va'e rire oipota va'e anho'i ri nda'u ogueraa 'rāgue?

<sup>10</sup> Ha'e rā xee ma aipe'apa rei 'rā Esaú kuery gui, ha'e onhemiaty ajou ukapa ramo nonhemeti kuaavei ma 'rā. Ha'e rami vy hamymino kuery omokanhymbaa 'rā, ta'y kuery, ha'e'i rupigua kuery guive. Ha'e rami rire ndoikovei ma 'rā.

<sup>11</sup> Peja ke tyre'ỹ kuery, ha'e rā xee anhangareko 'rā okuave aguã rami. Pendegua imeve'ỹ va'e kuery voi tojerovia xere."

<sup>12</sup> Mba'eta po rami SENHOR ijayvu: "Ne'exa, karo gui oy'u aguã rami e'ỹ ikuai va'ekue oy'upa ma. Ha'e rā ndee nda'u romboeko porā rive 'rā ri? Any, xee noromboeko porāi 'rāe, ha'e ramo ndee voi rey'u 'rā."

<sup>13</sup> Mba'eta SENHOR aipoe'i: "Xerery rupi ae aura Bozra tetā optya aguã re nhomondyipaarā, ojou vaipy, ombovaipa pyre ha'e ayvu vaipy. Ha'e katy'i tetā ikuai va'e voi optya 'rā tekao ve'ỹ meme, raka'e rā peve."

### *Edom pygua kuery ojejavayague re ombopagaa aguã re ijayvuague*

<sup>14</sup> Ha'e gui SENHOR gui ayvu mboae ju aendu ombou va'ekue. Mba'eta yvy regua kuery pe peteĩ ayvu mombe'uarā omondouka. Ha'e ramo aipoe'i 'rā: "Penhemboaty ke, tapeo ha'e kuery rovai, peiko katupa ke Edom yvy re pepu'ã aguã", he'i 'rā.\*

<sup>15</sup> "Mba'eta ne'exa, yvy regua kuery mbyte rupi xee rojapo 'rā mbovy'i ete pendekuai aguã, ha'e avave rei napenemboeteavei aguã rami.

<sup>16</sup> Mba'eta renhomongyjea ha'e renhemboyvate reia ndepy'a re remoña py ndee ae rejkore. Itakua ha'e yvyty áry rupi reiko, ha'e taguato rami yvate ete rupi renhemboaity teĩ xee roity 'rā ha'e gui", he'i SENHOR.

<sup>17</sup> "Ha'e nunga rupi Edom yvy itui 'rā nhomondyipaarā. Pavẽ rei ha'e rupi oaxa va'e onhemondyipa ha'e ojojai rei 'rā jogueravy, ikuai axy ete rā oexa vy.

<sup>18</sup> Mba'eta Sodoma ha'e Gomorra minha, ha'e tetā ha'e katy'i ikuai va'e amokanhymbaaque rami avi Edom yvy re voi avave rei ndaekoavei 'rā, avave rei noñavei 'rā ha'e py", he'i SENHOR.

<sup>19</sup> "Ne'exa, guarý minha Jordão yakã yvýry ka'aguy oĩ va'e gui oẽ 'rā ouvy vexa'i nhuñdy hovy rei va'e rupi okaru okuapy va'e re. Ha'e rami ae xee voi amondyipa vyvoi 'rā imondovy Edom pygua kuery. Ha'e rami vy ha'e py amoĩ 'rā aiporavo va'e rei. Mba'eta mava'e tu oiko xee rami etegua? Mava'e tu oiko xemboayvuarā? Mava'e joe opena va'e tu oiko xejokoarā?"

\* 49:7 Obadias 5-6 \* 49:14 Obadias 1-4

<sup>20</sup> Ha'e nunga rupi pendu Edom rovai SENHOR onhembopy'aa, Temã pygua kuery rovai guive. Mba'eta mymba kuery regua kyrïve'i va'e teñ anhetë oipe'apaa 'rã, ikuaiaty guive ombovaipa 'rã ha'e kuery káuxa ae.

<sup>21</sup> Ha'e kuery ho'apa rã yvy oryryipa rei 'rã tevovo onhendu va'e gui. Ha'e kuery raxëa ma Ye'ë Pytã rupi peve 'rã onhendu.

<sup>22</sup> Ne'exa, taguato ovevea rupi opepo oipyo ovya rami avi peteñ oë 'rã ouvy Bozra tetã re. Ha'e va'e ára Edom pygua ipy'a guaxukueve ikuai va'ekue teñ ipy'a tytypa 'rã okuapy, kunha imemby raxy va'e rami.

### *Damasco pygua kuery rekorã re ijayvuague*

<sup>23</sup> Ha'e gui Damasco tetã pygua kuery regua ayvu ma po rami: "Hamate ha'e Arpade pygua kuery oxïmba rei 'rã okuapy. Mba'emo omombe'ua rã oendu vy onhemondyipa 'rã, ye'ë omyï reia rami avi ndopytu'u kuaavei 'rã okuapy.

<sup>24</sup> Mba'eta Damasco pygua kuery ikangypa. Onhamba aguã ojere va'eri oryryipa rive okuapy. Nhemondyia ha'e haxy va'e anho oendu, kunha imemby raxy va'e rami.

<sup>25</sup> Mba'exa tu Damasco tetã oejapaa, pavë ojou porã va'ekue ha'e xee voi arov'y'a va'ekue ri!

<sup>26</sup> Ha'e rami teñ tetã mbyte rupi ho'apa 'rã kunumigue. Ha'e va'e ára ha'e pygua avakue joe opu'ã va'ety omokyrirïmbaa 'rã", he'i SENHOR ixondaro reta va'e.

<sup>27</sup> "Amoendy 'rã tata Damasco tetã kora re, huvixa Ben-Hadade ro guive imombaarã."

### *Arábia pygua kuery rekorã re ijayvuague*

<sup>28</sup> Ha'e gui SENHOR ijayvu Quedar ha'e Hazor yvy re tetã ikuai va'e re Babilônia pygua huvixa Nabucodonosor opu'ã aguã re. Ha'e vy aipoe'i: "Pepu'ã ke, tapeo Quedar yvy re, pemomba kuaray oua katyguia kuery.

<sup>29</sup> Peipe'apa ha'e kuery rekoia, hymba kuery, ajukue oo ao'ia, imba'e rei-rei, hymba camelio kuery guive peraapa penemba'erã. Ha'e ramo ha'e kuery pe 'Jova-jovai katygui ou penemongyjeearã', 'ea 'rã ojojai rei vy.

<sup>30</sup> Ha'e nunga rupi Hazor py penderekia va'e, pejavapa, tapeo mombyry, itakua rupi ju pendekuai", he'i SENHOR. "Mba'eta Babilônia pygua huvixa Nabucodonosor onhemongeta vy onhembopy'a peñ kuery rovai opu'ã aguã re.

<sup>31</sup> Ha'e gui peñ Babilônia pygua kuery, pepu'ã ke. Tapeo peteñ yvy regua ikuai porã'i ha'e mba'eve gui okyjea rupi e'ŷ ikuai va'e rovai", he'i SENHOR. "Ha'e va'e kuery retã re ma okë noñ, ijokoa voi jipoi. Ha'e kuery ae'i ikuai va'e.

<sup>32</sup> Ha'e kuery rymba camelio ma omoxãmbaa 'rã heravy, hymba vaka voi mbovy e'ŷ ikuai teñ oipe'apaa 'rã. Ha'e rami vy yvytu oipejua katy rei amoäi 'rã imondovy o'a apy ojaya va'e ha'e javi. Jova-jovai gui ambou 'rã imbovaipaarã", he'i SENHOR.

<sup>33</sup> "Ha'e rire ma Hazor tetã opyta 'rã jagua-tuvy nhe'ë ikuai atyrã rive, raka'e rã peve 'rã ivaipa. Mava'eve noñai 'rã ha'e py, peteñive avakue ma voi noñavei 'rã."

### *Elão pygua kuery rekorã re ijayvuague*

<sup>34</sup> Ha'e gui profeta Jeremias pe ayvu Elão pygua kuery rovai SENHOR ombou, Zedequias Judá pygua huvixa oñ ypy'i jave py. Ha'e vy aipoe'i:

<sup>35</sup> "Po rami ijayvu SENHOR ixondaro reta va'e: Ne'exa, xee amopë 'rã Elão pygua kuery rapa, ha'e va'e rupi vy ipo'akapa rei ramo.

<sup>36</sup> Mba'eta Elão re ambou 'rã yvytu yva apy irundy oñ va'e gui oipeju va'e. Ha'e rami vy amoäimba 'rã imondovy yvytu oipejua ha'e javi rupi. Ha'e ramo yvy ha'e javi rupi 'rã Elão guigua ojava.

<sup>37</sup> Mba'eta ajapo 'rã ngovaigua kuery renonde Elão pygua kuery oryryipa reve ojexa ukapa aguã rami, ijukaxea kuery renonde ae. Elão pygua kuery áry ambou 'rã mba'emo vai, xepoxya hendy va'e", he'i SENHOR. "Ha'e gui hakykue ju ambou 'rã kyxe rewegua, omomba peve.

<sup>38</sup> Ha'e gui Elão py xerenda apena atyrã amoĩ vy amokanhymba 'rã ha'e pygua huvixa ha'e yvatekueve", he'i SENHOR.

<sup>39</sup> "Ha'e rami teĩ opaa ára py ma Elão pygua kuery arupa ju 'rã escravo-rã ogueraa ague gui", he'i SENHOR.

## 50

### *Babilônia pygua kuery rekora re ijayvuague*

<sup>1</sup> Ha'e gui pova'e ayvu ma Babilônia ha'e caldeu yvy re SENHOR omombe'u uka va'ekue profeta Jeremias pe.

<sup>2</sup> "Emombe'u ke pova'e yvy regua ikuiaia rupi. Endu ukapa, emopu'ã bandeira-rã, ha'e emombe'u porãve. Eikuaa uka e'ý eme. Ha'e vy aipo're 'rã: 'Babilônia yvy ma oipe'aa ma. Ha'e ramo tuuete ramigua Bel nda'evei nho, Merodaque voi ndovy'avei ma oikovy. Ha'e pygua ta'angaa ikuai va'e re ma oximbaa anho oĩ, oryryipa oiny guive okyjepa vy.

<sup>3</sup> Mba'eta ha'e kuery rovai jogueru kuaray ijapu'a'ia katy gui peteĩ regua Babilônia tetã mbovaipaarrã. Ha'e ramo nda'ipoavei 'rã ha'e py, avakue ha'e mymba kuery onhamba jogueravy rire', 're 'rã."

<sup>4</sup> Mba'eta SENHOR aipoe'i: "Ha'e va'e ára, ha'e va'e jave ma Israel kuery ojevypa ju 'rã jogueruvy, Judá kuery reve. Ojae'o reve 'rã oguata jogueruvy, SENHOR Nguuete oeka jevy vy.

<sup>5</sup> Ha'e kuery oporandu 'rã tape Sião katy oo va'e re. Ha'e katy oma'ẽ reve anho 'rã aipoe'i okuapy: 'Peju, nhano'õmba ju SENHOR peguarã. Nhandekuai 'rã guexeve guarã ojapo va'ekue opa e'ý va'e, hexaraipy e'ý rupi', he'i 'rã okuapy.

<sup>6</sup> Mba'eta xevygua kuery ma mymba vexa'i okanhylgue rami ikuai. Ha'e kuery re opena va'erã omoĩ mbyre ojapo okuapy ojavy aguã rami rive, oejapa yvy'ã ikuiaia katy rupi oguata rei aguã rami. Ha'e ramo yvy'ã ikuai va'e-va'e rupi oguata rei 'rã, okora ikuaiaty re hexaraipa rire.

<sup>7</sup> Ha'e ramo ojou va'e rei ojuka 'rã. Ha'e vy hovaigua kuery aipoe'i 'rã: 'Jajukapa teĩ nanhandepo ky'ai 'rã, mba'eta ha'e kuery ae SENHOR rovai ojejavy rire. Hexe anho teko porã oĩ, tamoi kuery oarõ okuapy va'ekue', he'i 'rã.

<sup>8</sup> Ha'e nunga rupi pejava Babilônia mbyte gui, pejep'e caldeu kuery yvy gui. Mymba kuery renonde rupi kavara ava oo va'e rami peiko.

<sup>9</sup> Mba'eta ne'exa, Babilônia yvy re xee ambou reta 'rã yvy regua kuery joe onhemoirũ va'e. Kuaray ijapu'a'ia katy oyvy itui va'e gui 'rã ou. Babilônia pygua kuery rovai ou 'rã opu'ã aguã, oipe'apa 'rã guive. Hu'y ma joe opu'ã kuaa porã va'e mba'e rami 'rã omombo, mba'eta ha'e kuery ndojevy rivei 'rã oipe'apa e'ý re.

<sup>10</sup> "Ha'e rami py oipe'apa 'rã caldeu kuery yvy gui. Ipe'aa kuery oguerekopa rei 'rã", he'i SENHOR.

<sup>11</sup> "Ha'e nunga rupi peẽ kuery xevygua yvy gui peipe'apa va'ekue pevy'apa rei pekuapy teĩ, vaka ra'y nhuündy rupi opo-opo va'e rami pevy'a, kavaju ojeupixe va'e rami penhendu teĩ

<sup>12</sup> pendexy oximbaa ete 'rã, penekuavãare ndovy'ai ete 'rã.\* Ha'e rami vy opyta 'rã yvy regua pavẽ gui nomboetei vepy, tekaoa ve'ý, yvy piru reia ha'e avave rei noĩaveia.

<sup>13</sup> SENHOR ipoxy ramo ae 'rã noĩai. Ha'e rami 'rãgue py opa rupi ojeapo 'rã tekaoa e'ýa. Ha'e rami rire Babilônia yvy rupi oaxa va'e rei tema onhemondyi 'rã, ojojai rei 'rã ov y mba'emo vai oikoague oexa vy.

<sup>14</sup> Ha'e gui penderyxy porã ke Babilônia re pepu'ã aguã, penerembiporu guyrapa reve. Ha'e rami vy pemombo hu'y ha'e kuery re, pemombo e'ý eme, SENHOR rovai ha'e kuery ojejavy rire.

\* <sup>50:12</sup> Apy "Pendexy" he'ia ma ha'e kuery retã Babilônia re ijayvu vy.

15 Pejapukai tetā katy pembojere vy. Ha'e rami avi ha'e kuery ojejopy uka ma. Oo ikorapa va'ekue ho'apa ma, tetā kora hi'aĩ va'ekue oitypaa, ha'e rami ete SENHOR opoxya oexa uka ramo. Ha'e nunga rupi pembopagapa, ha'e kuery re ju pejapo joe ojapoague rami.

16 Babilônia tetā gui pemomba oma'etŷ va'e ha'e foice py mba'emo omono'õ va'e kuery. Ha'e kuery kyxe py nhomomba rire ha'e gui tojevy peteĩ-teĩ guetarã kuerya katy, peteĩ-teĩ tojava oyvy katy ae.

17 Mba'eta Israel kuery ma vexa'i kanhygue rami ikuai, guary omonhamba va'ekue rami. Jypy ho'u va'ekue ma Assíria pygua huvixa, ha'e gui opa vyguia ma Nabucodonosor ju omokãguepa."

18 Ha'e ramo po rami SENHOR ixondaro reta va'e, Israel kuery Ruete ijayvu: "Ne'exa, ambopaga 'rã Babilônia pygua huvixa, ijyvy guive, Assíria pygua huvixa ambopagaague rami avi.

19 Ha'e rã Israel kuery ma ajapo 'rã guekoa katy ae ju ojevypa aguã rami. Ha'e ramo ha'e kuery okaru ju 'rã okuapy nhuündy Carmelo ha'e Basã regua rupi, Efraim regua yvyty rupi, ha'e Gileade yvy re ju ikuai vy okaru porã 'rã."

20 SENHOR aipoe'i: "Ha'e va'e ára, ha'e va'e jave ma Israel kuery ojejavyague oekaa teĩ ndojouavei 'rã. Judá regua ojejavya voi ndojouai 'rã, mba'eta aperdoa 'rã okuave va'erã aeja va'ekue.

21 "Ha'e gui ndee kyxe reveguia, tereo naxenhe'ẽ rendui ete va'ekue yvy re, tereo ha'e va'e yvy regua opaga aguã rami ikuai va'e kuery rovai. Emokanhymba ete, ha'e gui ha'e kuery rakykue rupi reo vy embovaipave ju heravy. Ejapopa tema ajapo ukaa rami ae", he'i SENHOR.

22 "Yvy re oiko joe opu'ã nhendua ha'e nhomombhaarã.

23 Yvy jave rupi karavo mbotaa nhomboa'ypaare ma omboa'ypaa avi. Ha'e ramo Babilônia tetā optya yvy regua kuery onhemondyipa aguã.

24 Mba'eta ndee Babilônia pygua, ndere nhuã ajayvy vy rombo'a vyvoi, reikuaa e'ý re. Xapy'a py rojopy vy rombo'a, SENHOR rovai reiko rire.

25 SENHOR guembiporu omoõ porãaty oipe'a vy ha'e gui oguenoẽ opoxya rupi oiporu va'erã. Mba'eta SENHOR ixondaro reta va'e ma mba'emo oguerek caldeu kuery yvy re ojapo va'erã.

26 Ha'e gui yvy apy re pendekuai va'e, peju, pepu'ã hovai, peipe'a mba'emo omoõ porãaty, pemombyta mba'emo ra'ykue aty rive, pembovaipa katuñ'i, hembyre aguã rami e'ý.

27 Kyxe py pejukapa toro kuery ipy'a guaxukueve. Ha'e kuery toguejypa ojukapaa aguã katy. Nda'evei ete 'rã ha'e kuery pe, hi'ára ou ma ramo ambopaga aguã.

28 Ha'e gui Babilônia yvy gui onha vy oo jepe va'ekue ma Sião py ovaẽa py omombe'u 'rã okuapy SENHOR Nhanderuete pegua templo oepy vy nhombopagaague.

29 "Penoõmba guyrapa revedua kuery Babilônia re oupa aguã. Pendeaty ijerea jovaive rupi, mava'eve too jepe eme. Pemboekovia peteĩ-teĩ ojapo vaiague. Ojapoague ha'e javi rami ae pembopaga, mba'eta SENHOR Israel kuery Ruete Iky'a e'ý va'e rovai onhemboyvate rei rire.

30 Ha'e nunga rupi ha'e pygua kunumigue ho'apa 'rã tape rupi, avakue joe opu'ãa pyguare voi okyirirõmba 'rã ha'e va'e ára", he'i SENHOR.

31 "Renhemboyvate rei va'e, ne'exa, xee ma nderovai aiko", he'i SENHOR ixondaro reta va'e. "Mba'eta ou ma rombopaga aguã ára.

32 Ha'e ramo onhemboyvate va'ekue onhepyxanga vy ho'apa 'rã, imopu'ãarã ndoikoi 'rã guive. Ha'e rami vy ha'e kuery retã ikuai va'e re amboja 'rã tata jova-jovaive rupi omomba va'erã."

33 Ha'e gui po rami SENHOR ixondaro reta va'e ijayvu: "Israel ha'e Judá kuery ojexavai okuapy. Heraare kuery oguerek temo guekoa py, nomondoukai ae.

<sup>34</sup> Ha'e rami teĩ ha'e kuery repyarã ma imbaraete, SENHOR ixondaro reta va'e hery va'e. Ha'e ma oikuaa pota 'rãe ha'e kuery re. Ha'e rami vy omombytu'u 'rã ha'e kuery yvy, ha'e rã Babilônia yvy ma nomombytu'ui 'rãe.

<sup>35</sup> Ha'e rami 'rãgue py caldeu kuery áry ombou 'rã kyxe revegua, Babilônia pygua kuery ha'e yvatekueve áry", he'i SENHOR.

<sup>36</sup> "Kyxe ou 'rã ijayvu rive va'e kuery áry, ha'e ramo opyta 'rã inhakã porã e'ŷ va'e meme. Ha'e pygua ipy'a guaxukueve áry guive ou 'rã, ha'e ramo onhemondyipa 'rã.

<sup>37</sup> Kyxe ou avi 'rã hymba kavaju kuery, joe opu'ãa pygua karóxa, ha'e joegua e'ŷ-e'ŷ ikuai va'e áry. Ha'e ramo kunhague rami meme 'rã opyta. Kyxe ou avi 'rã mba'emo porã omoõ porãaty áry, ha'e ramo oipe'apaa 'rã.

<sup>38</sup> Kyxe ou avi 'rã yy itui va'e áry, ha'e ramo typa 'rã. Mba'eta ha'e va'e yvy ma ta'angaa ojapo pyre pegua, ha'e py ikuai va'e na'inhakã porãi okuapy ha'e nunga nda'evei ete va'e rupi vy rive.

<sup>39</sup> Ha'e nunga rupi Babilônia opyta 'rã mymba inharõ va'e tekao e'ŷa regua ikuaiaty rive, jagua-tuvy nhe'ẽ, ha'e nunga. Guyra-nhandu voi ikuai 'rã ha'e py. Nda'ipoavei riae 'rã, ikuai jevy-jevy peve noñavei 'rã ha'e py.

<sup>40</sup> Mba'eta Nhanderuete Sodoma ha'e Gomorra ombovaipaague rami tetã ha'e katy'i rupi ikuai va'e reve, ha'ekue rami ae Babilônia py voi avave noñavei 'rã, neñ peteñve ava ma voi ndoikoai 'rã", he'i SENHOR.

<sup>41</sup> "Ne'exa, kuaray ijapu'a'ia katy gui ou ma oiny peteñ regua. Yvy apy gui yvy regua opu'ã reta 'rã jogueruvy, heta avi 'rã huvixa kuery.

<sup>42</sup> Guembiporu ogueru 'rã guyrapa ha'e hu'y guaxu. Ha'e kuery ma ipy'a ratã va'e, nanhomboaxy kuaai vy. Ha'e kuery onhendua ma ye'ẽ revovo ratãa rami 'rã nhaendu. Kavaju áry jogueru, peteñ-teñ hyxy porã'i 'rã pendere opu'ã aguã, Babilônia pygua kuery.

<sup>43</sup> Ha'e kuery reko omombe'ua rã Babilônia pygua huvixa oendu avi. Ha'e rami vy ipo kangypa. Tekorã ve'ŷ anho oendu, kunha imemby raxya ramigua.

<sup>44</sup> Ne'exa, guary ra'y minha Jordão yakã yvýry ka'aguy oĩ va'e gui ou 'rã vexa'i nhuñ hovya rupi okaru okuapy va'e rovai, ha'e rami ae avi xee voi aipe'apa vyvoi 'rã Babilônia tetã gui, ha'e hekovia amoõ 'rã xee ae amoõxe va'e. Mava'e tu xee rami ete oiko? Mava'e tu xere oikuaa pota kuaa 'rã? Mava'e joe opena va'e tu xejoko 'rã?"

<sup>45</sup> Ha'e nunga rupi pendu pota Babilônia rovai SENHOR onhembopy'aa oikuaa uka va'e, caldeu kuery yvy re ojapo aguã ojee omoõ va'ekue re. Mba'eta anhetẽ mymba kuery regua kyrive'i va'e teñ oipe'apaa 'rã, ikuaiaty voi ombovaipa 'rã ha'e pygua kuery káuxa.

<sup>46</sup> Ha'e gui Babilônia oipe'aa rã onhendu va'e gui oryryipaa 'rã yvy javé rupi. Yvy regua ikuai rupi haxëa onhendu.

## 51

### Babilônia pygua kuery ipo'akapa va'ekue oitypaa aguã re ijayvuague

<sup>1</sup> Ha'e gui SENHOR ijayvu po rami: "Ne'exa, Babilônia pygua kuery rovai xee ambou 'rã yvytu tetã mbovaipaarrã, Lebe-Camai pygua kuery rovai guive.

<sup>2</sup> Babilônia re ambou 'rã mba'emo pirekue mbovevea kuery. Ha'e va'e kuery ma omboveve vy oipe'apa 'rã ha'e va'e yvy gui. Mba'eta okanhya ára ou 'rã jova-jovai gui imbojexavaiarã.

<sup>3</sup> Tove hu'y momboa kuery tomoxã guapa ngovaigua kuery hu'y momboa ha'e hu'y jokoa revegua rovai. Pejuka e'ŷ eme ha'e kuery regua kunumigue, pemokanhymba ixondaro kuery ha'e javi.

<sup>4</sup> Ha'e kuery omano vy to'apa caldeu kuery yvy re, tape ikuai va'e rupi topyaxapa oupy.

<sup>5</sup> Mba'eta Israel ha'e Judá kuery ma Nhanderuete SENHOR ixondaro reta va'e ndoejai imeve'ŷ va'e rami ikuai aguã. Ha'e rã caldeu kuery ma ipo ky'apa va'e ikuai Israel kuery ruete Iky'a e'ŷ va'e renonde.

<sup>6</sup> Pejavapa ke Babilônia mbyte gui, peteĩ-teĩ penderekove reve peo jepe. Penhemokanhya uka eme ha'e kuery reko vaia py. Mba'eta ovaẽ ma SENHOR ombopaga aguã ára. Ha'e rami vy omboekovia 'rã ha'e kuery ikuaiague.

<sup>7</sup> “Babilônia ma karo ouro guigua SENHOR po py oĩ va'ekue. Ha'e va'e py ma omonga'upa va'ekue yvy regua kuery ha'e javi. Mba'eta vinho ha'e py oĩ va'e ma yvy regua kuery oy'u vy na'inhakã porãvei va'ekue.

<sup>8</sup> Ha'e gui ma Babilônia oitya xapy'a ramo ivaipa. Pejae'o hexe, ha'e peru moã ijai reguarã. Xapy'a rei okuera nho 'rã.”

<sup>9</sup> “Ha'e rami avi nhamongueraxe teĩ Babilônia va'eri ndokuerai ae. Peja ha'vy, peteĩ-teĩ tapeo pendeyvy katy ae. Mba'eta yva re peve ovaẽ ha'e kuery opaga aguã, arai yvateve va'e peve.

<sup>10</sup> SENHOR nhanemboeko porã ju. Peju, nhamombe'u Sião py SENHOR Nhanderuete ojapo va'ekue.”

<sup>11</sup> “Pemboakua hu'y! Pereko katu hu'y jokoa! Mba'eta SENHOR omokyre'ŷ Média pygua huvixa kuery Babilônia rovai guarã, omombaxe vy. Ha'e rami vy SENHOR joepy 'rã, ojeupegua templo oepya rupi.

<sup>12</sup> Pemopu'ã bandeira Babilônia tetã kora rovai pepu'ã aguã. Pemoĩ retave jopya kuery, pemoĩ nhoarðarã, pema'ẽ mbegue joe pepu'ã xapy'a aguã. Mba'eta SENHOR ha'e rami aguã re onhembopy'a, ha'e gui ojapo ete Babilônia pygua kuery re ijayvuague.

<sup>13</sup> Ndee Babilônia, yy heta rei va'e yvýry reĩ ha'e mba'emo rerekopa va'e, ovaẽ ma rekanhy aguã, rejoupaxe reiague reve.

<sup>14</sup> Mba'eta ojee ae SENHOR ixondaro reta va'e oura vy aipoe'i: ‘Anhetê ndere ambou 'rã avakue tuku-karu rami heta va'e nemonyearã. Ha'e ramo ha'e kuery ndere ov'y'a rei 'rã uva umbiria kuery ov'y'a reve ojapukaia rami’, he'i.

<sup>15</sup> “Ha'e ae ma ko yvy ojapo va'ekue opo'akaa rupi. Oikuaapaa rupi onhono yvy, ha'e o'arandua rupi oipyo yva.

<sup>16</sup> Ha'e gui yapu onhendu atã aguã rami ojapo ramo yva re yy oĩ va'e omyi' 'rã, ha'e yvy apy gui opu'ã 'rã ouvy yvyxí. Omoingo avi 'rã overa va'e oky aguã, oguenoẽ yvytu guive oïaty gui.

<sup>17</sup> Ha'e rã avakue ma nai'arandui ha'e mba'eve ndoikuuaii va'e meme. Ouro re ombo'eapo va'e kuery voi oximbá va'erã meme mba'emo ra'angaarã ojapoague re, mba'eta ta'angaa ikuai va'e ma anhetëguia e'ŷ meme, ipytuë va'e'ŷ guive.

<sup>18</sup> Ha'e nunga ma mba'everã ndovarei va'e, ojojai rei pyrã rive. Nhombopagaa ára py okanhymba 'rã.

<sup>19</sup> Ha'e rã Jacó peguarã Me'ëare ma ha'e rami e'ŷ. Mba'eta ha'e ma opa mba'e moingoare, ha'e Israel kuery ma ixupegaia ikuai. Hery SENHOR ma SENHOR ixondaro reta va'e.

<sup>20</sup> “Ha'e gui ndee Babilônia ma xerembiporu mba'emo mbotaa rami areko, joe apu'ãa rupi aiporu va'ekue. Ndevy pe ambovaipa uka yvy regua, amokanhya uka huvixa kuery guive.

<sup>21</sup> Ndevy pe amokanhya uka kavaju ha'e hi'arygua kuery. Amokanhya uka karóxa ha'e ija kuery.

<sup>22</sup> Ndevy amokanhya uka avakue ha'e kunhague, tujakue ha'e ipyaukue, kunumigue ha'e kunhataïgue.

<sup>23</sup> Ndevy amokanhya uka vexa'i re opena va'e ha'e hymba kuery, yvy oikaraĩ va'e ha'e vaka ombo'eapo va'e, yvy re opena va'e kuery ha'e yvatekueve guive.

<sup>24</sup> Ha'e rami teĩ pexaa py ae ambopaga 'rã Babilônia ha'e caldeu kuery ha'e javi, Sião tetã py ojapo vaiague re”, he'i SENHOR.

<sup>25</sup> “Ne'ëxa, ndee ma yvyty nhomokanhya yvateve va'ekue, yvyty ha'e javi mokanhya reiko va'ekue ri xee ma nderovai aiko”, he'i SENHOR. “Nderovai upi 'rã xepo, itaova

áry gui roity 'rã yvy'ã guy katy, ha'e reñague ajapo 'rã mba'emo ra'ykue aty okai oiny va'e rive.

<sup>26</sup> Reñague gui ma noguenoëai 'rã ita, neñ oo ytarã ha'e oo renderã, teko a ve'ý rojapo rire raka'e rã peve guarã", he'i SENHOR.

<sup>27</sup> "Pemopu'ã bandeira yvy re, pemonhe'ẽ mimby guaxu guive yvy regua kuery ikuiaia rupi. Penoïmba yvy regua kuery Babilônia rovai guarã. Penoï Ananote, Mini ha'e Asquenaz tetã pygua kuery. Hovai guarã pemoï xondaro kuery ruvixa, peru ruka kavaju tuku-karu rami.

<sup>28</sup> Hovai guarã penoï yvy regua kuery, Média pygua huvixave kuery voi, ha'e pygua opena va'e ha'e huvixa kuery, openaa rupigua kuery ha'e javi guive."

<sup>29</sup> Ha'e gui yvy oryryi vy omyï rei oiny haxyo re, mba'eta Babilônia rovai SENHOR onhembopy'aa oï atã va'e meme, Babilônia yvy teko a ve'ý ojapo aguã, ha'e py noñavei aguã.

<sup>30</sup> Ha'e ramo Babilônia pygua ipy'a guaxukueve teñ nopo'avei 'rã joe, oo ikorapa va'e py tema 'rã onhemi. Na'imbaraetevei ma, kunhague rami ikangy va'e. Ha'e kuery ro okaipa, ha'e tetã kora rokẽ jokoa omopëmbaa ma.

<sup>31</sup> Ha'e nunga rupi kuaxia reraa ha'e ayvu mombe'uarã kuery jorire-rire oẽ 'rã oje'oivy, Babilônia pygua huvixa pe omombe'u aguã joavaive gui hetã oipe'apaague,

<sup>32</sup> yakã oaxaaty ikuai va'e re ipo'akapaague, oo ikorapa va'ekue oapypaague, ha'e gui joe opu'ãa pygua kuery ndaekorâveipa okuapya guive.

<sup>33</sup> Mba'eta po rami SENHOR ixondaro reta va'e, Israel kuery Ruete ijayvu: "Babilônia tetã opyta mba'emo moa'yïaty ombojoja pyre, opyrõmba porã'i mbyre rami, mba'eta hare'ý re ovaë 'rã omono'õa aguã ára", he'i.

<sup>34</sup> "Babilônia pygua huvixa Nabucodonosor ma oremokanhymba, oremou'õmba ha'e oreapo mba'emo ryrukue oiporuve pyrã e'ý. Yy rupigua rami rive oremondoropa, ha'e vy guye omonyë tembi'u iporâve va'e orerereko va'ekue, ha'e gui ma orembojevypa ju.

<sup>35</sup> Ha'e gui ma Sião pygua aipote'i: 'Tove Babilônia re toiko xeapo vaiague ha'e xero'o ombovaipaague ramigua.' Jerusalém pygua aipote'i: 'Tove caldeu kuery re toï xeruguy omoëague re opaga aguã', te'i."

<sup>36</sup> Ha'e nunga rupi SENHOR aipoe'i: "Ne'exa, aikuaa pota 'rã penderekro re, ha'e roepy 'rã pendeapo vaiague re. Ha'e rami vy amboypa 'rã ha'e kuerya py yy ha'e ygua ikuai va'e.

<sup>37</sup> Ha'e ramo Babilônia opyta 'rã mba'emo ra'ykue aty, jagua-tuvy nhe'ẽ ikuai atyrã rive, nhomondyipaarã ha'e ojojai rei pyrã. Ha'e gui nda'ipoai 'rã ha'e py oï va'erã.

<sup>38</sup> Guary onhendua rami ha'e kuery onhendu teñ, guary ra'y kuery okororõ reia rami.

<sup>39</sup> Ha'e gui ha'e kuery okaruxe ramo ha'e kuery pe ajapo uka 'rã peteñngaru, amonga'upa 'rã guive. Ha'e ramo ha'e kuery ovypa rei ma vy okepa 'rã okuapy, raka'eve rã peve 'rã nomyïvei", he'i SENHOR.

<sup>40</sup> "Ajapo 'rã vexa'i ra'y kuery ojukaa aguã katy oguejypaa rami avi ha'e kuery voi okanhymba aguã, vexa'i ha'e kavara rami ete.

<sup>41</sup> "Ha'e rami py ae 'rã Babilônia tetã oitya. Oipe'aa xapy'a 'rã, yvy regua ojou porãmba teñ. Babilônia opyta 'rã yvy regua kuery onhemondyipa reia va'e rive.

<sup>42</sup> Babilônia áry rupi ye'ẽ ou ramo yai opu'ã-pu'ã vy ojao'ipa 'rã.

<sup>43</sup> Tetã ikuai va'e ivaipa, yvy voi ipiru ha'e teko a ve'ý opyta avave rei oï e'ý aguã, ha'e rupi avakue ndoaxavei 'rã guive.

<sup>44</sup> Babilônia py ambopaga avi 'rã ta'angaa Bel. Ha'e vy ajapo 'rã mba'emo omokõ va'ekue ombojevypa ju aguã rami. Ha'e rire yvy regua kuery ndooovei 'rã ixupe ikuai aguã. Babilônia tetã kora guive oitypaa 'rã.

<sup>45</sup> "Ha'e nunga rupi xevygua kuery, tapeopa ha'e kuery mbyte gui. Peteñ-teñ peraa jepe penderekovea SENHOR opoxya tapyï rami oexa uka va'e gui.

<sup>46</sup> Pendeporiau eme pendepy'a py, pekyje eme guive yvy jave rupi ayvu omombe'ua rā pendu vy. Mba'eta peteī ma'etŷa omombe'ua 'rā peteī ayvu, ha'e rā ma'etŷa jevy py amboae rami ju 'rā omombe'ua. Yvy re oiko 'rā ipo'aka va'e kuery meme joe opu'āa.

<sup>47</sup> Mba'eta ne'exa, ovaē ma oiny ára mba'emo ra'angaa Babilônia pygua kuery ojapo va'ekue ambopagapa aguā. Ha'e ramo ijyvy ha'e javi rupi omoximba 'rā okuapy, ha'e yvy mbyte py ha'e va'e regua oipyxoa rā ho'apa 'rā.

<sup>48</sup> Ha'e ramo yva ha'e yvy, ha'e hexe ikuai va'e ha'e javi oguerovy'a 'rā Babilônia tetā re oiko va'e, kuaray ijapu'a'ia katy gui imbovaipaarrā ou ramo", he'i SENHOR.

<sup>49</sup> "Mba'eta Babilônia pygua kuery Israel kuery oipyxo vy oitypaague rami ae Babilônia py ju yvy jave guigua oipyxo vy oitypa 'rā.

<sup>50</sup> "Ha'e nunga rupi peē kuery kyxe gui peo jepe va'ekue, tapeo na, pepytave eme ha'e py. Mombyry peikoa py penema'endu'a ke SENHOR re, ha'e pemoī pendepy'a re Jerusalém katy peguata aguā.

<sup>51</sup> Aipopeje: 'Nhaximba jakuapy, nhanembojaru reia rupi ijayvu va'e nhaendu rire. Nhanderova re ojekuaa nhaximbaa anho rei, mba'eta amboae regua ou vy SENHOR pegua oo iky'a e'ŷ va'e py oikepa ramo', peje.

<sup>52</sup> Ha'e rami teī ou ma oiny ára mba'emo ra'angaa ha'e kuery pegua ambopaga aguā", he'i SENHOR. "Ha'e ramo oipyxoa rā onhendu rei 'rā okuapy ha'e kuery yvy ha'e javi rupi.

<sup>53</sup> Mba'eta Babilônia pygua kuery yvate ojeupi, ha'e oo ikorapa va'e yvate rupi omombaraeteve teī xea gui ou 'rā imbovaipaarrā", he'i SENHOR.

<sup>54</sup> "Babilônia gui haxē va'e onhendu, caldeu kuery yvy gui onhendu ratā opa rupi ombovaipaarrā hevovo rei va'e.

<sup>55</sup> Ha'e gui SENHOR Babilônia ombovaipa vy omokyririmba 'rā onhendu va'e. Ha'e gui ma onhendu 'rā yy heta va'e yai revovo rami avi hovaigua kuery onhendu ratā rei va'e.

<sup>56</sup> Mba'eta Babilônia pygua kuery rovai ou oiny imbovaipaarrā. Ha'e ramo ombo'apaa ma ipy'a guaxukueve, ha'e kuery rapa guive omopembaa ma. Mba'eta SENHOR Nhanderuete ombopaga 'rā, omboekovia 'rāe.

<sup>57</sup> "Amonga'upa 'rā ha'e pygua huvixa kuery, hi'arandu va'e, yvy re opena va'e, huvixa irū kuery ha'e ipy'a guaxukueve teī. Ha'e ramo ha'e kuery oke riae 'rā okuapy, ndovyvei 'rā", he'i Huvixave SENHOR, ixondaro reta va'e hery va'e.

<sup>58</sup> Po rami SENHOR ixondaro reta va'e ijayvu: "Babilônia tetā kora hi'aī va'e ipo ruxu teī oitypaa 'rā. Hokē ikuai va'e voi yvateve teī tapyimba 'rā tata gui. Mba'eta yvy regua kuery omomba'emo pyre ojapo rive okuapy, tata peguarā rive ikane'õmba okuapy tetā ojapoa py", he'i.

<sup>59</sup> Pova'e ayvu ma Babilônia katy profeta Jeremias omondouka va'ekue Nerias ra'y Seraías, Maaséias ramymino va'e po py, Judá pygua huvixa Zedequias reve ogueraa jave, irundy ma'etŷ re ma oī jave py. Seraías ma hembiguai opy rupi opena va'ekue.

<sup>60</sup> Peteī kuaxia re Jeremias ombopara vy omombe'u Babilônia áry ha'e rami ete mba'emo vai ou va'erā. Babilônia rovai ayvu ha'e javi ombopara.

<sup>61</sup> Ha'e vy Seraías pe Jeremias aipoe'i: "Babilônia py revaē vy ne'exa, eroayvu ratā ha'e va'e ayvu ha'e javi.

<sup>62</sup> Aipo're 'rā guive: 'SENHOR, kova'e tekaoa re ndeayvu va'ekue remomba ete aguā re, ha'e py mba'eve re nda'ipoavei aguā, avakue neī mymba, ha'e raka'e rā peve ivaipa ete va'e optya aguā re', 're 'rā.

<sup>63</sup> Kuaxia reroayvupa ma vy ejokua ju peteī ita re, ha'e emombo Eufrates yakā mbyte py.

<sup>64</sup> Ha'e vy aipo're: 'Nami 'rā Babilônia omoingea, noēvei 'rā guive, hexe mba'emo vaia ára ambou rire. Ha'e py ikuai va'e omanomba 'rā', 'ere."

Apy ma Jeremias ayvu oīa opa ma.

## 52

*2 Reis 24.18-25.22; 2 Crônicas 36.10-21; Jeremias 39.1-10*

<sup>1</sup> Zedequias ma vinte e um ma'etŷ oguereko jave py oĩ ypy huvixa. Ha'e gui onze ma'etŷ re opena Jerusalém py. Ixy rery ma Hamutal, Libna pygua Jeremias rajy.

<sup>2</sup> Zedequias ma ha'eve'ŷ va'e anho ojapo oikovy SENHOR renonde rupi, guyke'y Jeoaquim ojapoague ha'e javi rami.

<sup>3</sup> Ha'e nunga oiko Jerusalém ha'e Judá pygua kuery rovai SENHOR ipoxy ramo, guenonde gui oipe'apa aguã. Ha'e gui huvixa Zedequias ju opu'ã Babilônia pygua huvixa rovai.

<sup>4</sup> Huvixa Zedequias nove ma'etŷ re ma huvixa oĩ jave, dez jaxyia ha'e dez araa py ma Babilônia pygua huvixa Nabucodonosor ou Jerusalém py. Oxondaro kuery ha'e javi reve oupa vy ijaty okuapy tetã rovai rupi. Jovaive re omopu'ã imo'amy ijokoarã.

<sup>5</sup> Onze ma'etŷa re ma huvixa Zedequias oĩ peve ojokopa tetã.

<sup>6</sup> Ha'e gui irundy jaxyia re nove araa py ma tetã ha'e javi rupi karuai oiko rã ha'e pygua kuery ndojouvei ho'u va'erã.

<sup>7</sup> Ha'e va'e jave py ombokuua tetã kora. Ha'e ramo ha'e va'e pygua avakue joe opu'ãa pygua onhamba pyávy. Mokoï kora pa'ũ okẽ oĩ va'e rupi oje'oi, huvixa mba'e yvotyty oĩ va'e yvýry tape oĩ va'e rupi, caldeu kuery tetã jovaive re ikuai tei. Ha'e rã huvixa ma yvy joja rupi tape oĩ va'e rupi onha.

<sup>8</sup> Ha'e ramo caldeu regua xondaro kuery huvixa Zedequias rakykue oje'oi vy ouputy Jericó katy'i nhuündya oĩ va'e py. Ha'e ramo hexeveguia xondaro kuery oaimbã vy oejapa oje'oivy.

<sup>9</sup> Ha'e ramo ojopy vy ogueraa Ribla py Babilônia pygua huvixa oĩa py, Hamate yvy re. Ha'e ramo ijayvu ombopaga aguã re.

<sup>10</sup> Ha'e rami vy Babilônia pygua huvixa ojukapa Zedequias ra'y kuery tuu oexaa py. Ribla tetã pyve ojukapa avi Judá regua yvatekueve.

<sup>11</sup> Ha'e rami vy omombupa Zedequias rexia. Ha'e vy mokoï corrente overa va'e guigua py ojokua reve ogueraa Babilônia katy. Ha'e py oĩ tema nhuã py omano peve.

<sup>12</sup> Ha'e gui dezenove ma'etŷ re ma Babilônia pygua huvixa Nabucodonosor oĩ jave py, peteĩ nhiruĩ jaxyia re dez araa py ma peteĩ ou Jerusalém py, Babilônia pygua huvixa rembiguai, jopya kuery ruvixa Nebuzaradã hery va'e.

<sup>13</sup> Ha'e va'e ma oapypa SENHOR pegua oo, huvixa rogue, ha'e Jerusalém tetã rupi oo ikuai va'ekue ha'e javi. Oapypa avi oo iporãgueve ikuai va'ekue.

<sup>14</sup> Ha'e rami vy jopya kuery ruvixa reve caldeu regua xondaro kuery ou va'ekue oitypa okuapy Jerusalém tetã yvýry rupi kora oĩ va'ekue.

<sup>15</sup> Tetã py iporiaukueve ha'e amboae kuery optya va'ekue ma jopya kuery ruvixa Nebuzaradã ogueraapa escravo-rã, Babilônia pygua huvixa pe oejopy uka va'ekue guive.

<sup>16</sup> Ha'e rã yvy re iporiaukueve'i regua ma jopya kuery ruvixa Nebuzaradã oeja ha'e py ae, uva nhotŷarã ha'e mba'ety rupi ombo'eapo va'erã.

<sup>17</sup> Ha'e gui caldeu kuery omopẽmba okuapy SENHOR pegua oo ytarã overa va'e guigua hi'aĩ va'ekue. Ha'e vy overa va'e oĩ va'ekue ogueraapa Babilônia katy.

<sup>18</sup> Ogueraa avi oja, pá, tapyi araa, heakuã porã va'e ryru, ha'e tembiporurã overa va'e gui ojapo pyre ha'e javi. Ha'e nunga Nhanderuete mboetea rupi oiporu va'ekue meme.

<sup>19</sup> Jopya kuery ruvixa ogueraa avi karo, tapyi ryru, hy'a guaxu, oja, tata renda, heakuã porã va'e ryru, hy'a'i, ha'e gui tembiporu ouro ha'e prata guigua ha'e javi.

<sup>20</sup> Ha'e gui mokoï ooyta hi'aĩ va'ekue, mba'emo ojoiaty ha'e henda SENHOR pegua oo pyguarã Salomão ojapo va'ekue, ha'e nunga ha'e javi re overa va'e oĩ va'ekue poyia ma noa'ã kuaai.

<sup>21</sup> Ha'e gui ooyta hi'aĩ va'ekue yvatea ma oito metros, ha'e rã ojerea rupi ma peteĩ ixã cinco metros raxa'i va'e oo. Ipo guaxua ma irundy kuã, inhyvyi rei va'e vy.

<sup>22</sup> Hi'árygua rupi oĩ imbojeguaarã overa va'e guigua. Peteĩ-teĩ yvatea ma mokoĩ metros raxa'i. Ha'e gui ijegua áry rupi oĩ kya ha'e yvyra'a ra'angaa overa va'e guigua.

<sup>23</sup> Ha'e rami ae ju amboae ijyta re yvyra'a ra'angaa oĩ avi. Ijyvýry rupi oĩ raka'e noventa e seis yvyra'a. Ha'e gui ijyvýry yvyra'a ra'angaa kya áry ikuai va'e ha'e javi vy cem.

<sup>24</sup> Jopya kuery ruvixa ogueraa avi sacerdote yvateve va'e Seraías, sacerdote yvyíve va'e Sofonias, ha'e gui okẽ rarõa kuery mboapy ikuai va'ekue guive.

<sup>25</sup> Tetã gui ogueraa avi peteĩ xondaro kuery ruvixa oĩ va'ekue, ha'e gui sete avakue huvixa mongetaaty tetã py ojou va'ekue, ha'e xondarorã ha'e py ikuai va'e rery ombopara va'ety, ha'e gui sessenta avakue ha'e pygua tetã rupi ojou va'ekue.

<sup>26</sup> Ha'e va'e kuery ma jopya kuery ruvixa Nebuzaradã ojopy vy ogueraapa Babilônia pygua huvixa Ribla py oĩa py.

<sup>27</sup> Ha'e ramo Babilônia pygua huvixa oipyxo uka vy ojuka ukapa Ribla py, Hamate yvy re.

<sup>28</sup> Ha'e rami py Judá kuery escravo-rã ogueraa ijyvy gui. Nabucodonosor escravo-rã ogueraa va'ekue ma po rami: sete ma'etýa re ma três mil e vinte e três judeu kuery ogueraa,

<sup>29</sup> ha'e gui dezoito ma'etýa re ma Nabucodonosor oĩ jave py Jerusalém gui escravo-rã ogueraa avi oitocentos e trinta e dois ju,

<sup>30</sup> ha'e gui vinte e três ma'etýa re ma Nabucodonosor oĩ jave py jopya kuery ruvixa Nebuzaradã escravo-rã ogueraa avi judeu kuery regua setecentos e quarenta e cinco. Ha'e javi vy ogueraa raka'e quatro mil e seiscentos.

### *<sup>2 Reis 25.27-30</sup>*

<sup>31</sup> Ha'e gui Judá pygua huvixa Joaquim trinta e sete ma'etý re ma ombo'aa jave, vinte e dois jaxyá re vinte e cinco araa py, Babilônia pygua huvixa Evil-Merodaque oĩ ypy'i vyve opoi uka. Ha'e rami vy omondouka ju nhuã py ombo'aague gui.

<sup>32</sup> Hexeve ijayvu ha'eve vai'i reve. Ha'e vy omoĩ amboae huvixa kuery Babilônia py hexeve ikuai va'e gui omboetevea rupi.

<sup>33</sup> Ha'e ramo Joaquim oao nhuã py oiporu va'ekue omboekovia vy huvixa renonde ae okaru oikovy ko'ẽ nhavõ, oikovea pukukue re.

<sup>34</sup> Ko'ẽ nhavõ oikovea ja Babilônia pygua huvixa po gui ixupe ome'ẽa mba'emo oipota va'e repyrã, omano 1peve.

## **Jeremias nhogueronhemboaxy rupi ijayvuague Jeremias nhogueronhemboaxy lamentações [esta palavra em português] rupi ijayvuague**

Kova'e kuaxia para re ma Jeremias ipy'a vaia rupi ijayvu Babilônia pygua kuery Jerusalem tetā oitypaague re. Ha'e rami teĩ kuaxia mbyte py ma ojerovia etea rupi ijayvuague avi oĩ:

“Mba'eta Senhor nhanemboaxy ramo ma nanhanemombaai,  
mba'eta nhanemboaxy ma opa va'erã e'ŷ.

Opa mba'e py ojeroviapy reiko vy  
rexia uka pyau 'rã ko'ẽ nhavõ.

Xejeupe ae aipoa'e: ‘Xevy guarã oĩ va'e ma Senhor ae.  
Ha'e nunga rupi arõ tema 'rã hexe', ha'e.

Senhor opena porã 'rã harõa kuery re,  
onhe'ẽ py oeka va'e kuery ae.

Ha'eve nharõ Senhor nhandereraa jepe aguã,  
nhakyrirõ reve” (3.22-26).

### *Jerusalém tetā ombovaipa ha'e oejapaa ague re ndovy'aaiague*

<sup>1</sup> Tetā yma heta riae ikuaiague teĩ aŷ ma oejapaa ma!\*

Aŷ ma kunha imeve'ŷ va'e rami optyta,  
yvy regua kuery omboeteve va'ekue ri.  
Amboae tetā ikuai va'e gui huvixa rajy rami yvateve va'ekue ri  
aŷ joupe rive ha'e kuery omomba'eapo nhea'ãa.

<sup>2</sup> Ojae'o, ojae'o tema okuapy pyávy,  
hexay oxyry tema 'rã hetovape rupi.  
Ndoikoi imbopy'a porãarã  
hembiajyu heta ikuai va'ekue ri.  
Hembiajyu ikuai va'ekue ha'e javi ma anhetẽ rupi e'ŷ oguereko,  
ha'e hovai guarã rive ju ikuai.

<sup>3</sup> Mba'eta Judá kuery ma escravo-rã ogueraapaa,  
oguereko axya ha'e omomba'eapoa poyi anho rei.  
Yvy regua kuery mbyte rupi ikuia py  
ndojouri optytu'u aguã voi.  
Ikuai axy reia py  
hakykue monhaa kuery oupitypa ma.

<sup>4</sup> Sião tetā katy tape oo va'e rupi ojae'o,  
mba'eta ndoikovei ma nhemboaty iky'a e'ŷ va'e katy oo va'e.  
Tetā kora rokẽ ha'e javi ombovaipaa.  
Ha'e pygua sacerdote kuery ipoaẽ rei,  
kunhataigue voi iporiaupa okuapy.  
Tetā py ojexavaia anho oendu.

<sup>5</sup> Ha'e rami rã hovaigua kuery ovypa rei okuapy,  
ija'e'ŷ va'e kuery ikuai porãmba rei,  
ha'e pygua kuery anhetẽ rupi e'ŷ riae ikuai ramo  
SENHORomoingo axy rã oexa vy.

\* **1:1** “Tetā” he'ia ma Jerusalém re ae ijayvu vy, Babilônia pygua kuery ombovaipa rire (2 Reis 24-25; 2 Crônicas 36; Jeremias 39, 52).

Ta'y kue'iry voi hovaigua kuery  
omondyi heravy escravo-rã.

<sup>6</sup> Sião pygua kuery gui oaxapa ma  
iporãa oĩ va'ekue ha'e javi.

Ha'e py yvatekueve ikuai va'ekue voi  
guaxu ho'u va'erã ndojouvei va'e rami ma ikuai,  
ikangypa rei vy ho'apa rive 'rã okuapy  
imonhaa kuery renonde py tei.

<sup>7</sup> Aŷ mombyry ogueraa ague py ombojexavaia rã  
Jerusalém guigua kuery ima'endu'a 'rã okuapy  
omba'e rei-rei oguerovy'a va'ekue re,  
ymave rupi mba'emo oguereko va'ekue re,  
heraa jepearã ndoikoi ramo  
ngovaigua kuery po py ho'apaague re guive,  
ha'e gui ho'a rã hovaigua kuery oexa vy  
ojojai rei okuapyague re.

<sup>8</sup> Jerusalém pygua kuery ojejavvy vaipa ete okuapy.  
Ha'e rami vy ae ojeguaru reipy ikuai.  
Imboeteare kuery ma nonhemoirüvei okuapy  
ipire reia rupi ikuai rã oexa vy.  
Ha'e kuery ae voi ipoaẽ reve  
ojepe'a 'rã okuapy oximba rei vy.

<sup>9</sup> Ijao re ojekuaa ha'eve'ŷa,  
noexa'ãi guive va'ekue omombaa aguã re.  
Ha'e rami vy oitya rã onhemondyipa rei okuapy,  
ha'e avave rei ndoikoi imbopy'a porã jevyarã.  
SENHOR, exa ke aiko axya,  
mba'eta hovaigua kuery ijayvu vaive rive tema okuapy.<sup>†</sup>

<sup>10</sup> Ore kuery mba'e rei-rei roquerovy'ave va'ekue ma  
orerovaigua kuery ojopy vy omba'erã ae ogueraapa.  
Roexa avi yvy regua kuery oike okuapy rã  
rombojeroviaaty iky'a e'ŷ va'e py voi,  
“Nda'evei xevygua kuery ijatya py ha'e kuery ikuai avi aguã” aipo're va'ekue ri.

<sup>11</sup> Tetã pygua kuery ha'e javi ipoaẽ 'rã okuapy  
tembi'u'i rekaa rupi ikuai vy.  
Om̄ba'e rei-rei ha'e kuery oguerovy'ave va'ekue ome'ẽmba ma  
tembi'u ho'u va'erã rekoria, imbaraeteve'i ju aguã.  
SENHOR, exa ke, eikuaa pota guive,  
mba'eta xere nda'ija'eavei ma.

<sup>12</sup> Peẽ kuery tape rupi peaxa va'e,  
ha'e nunga pexa vy napendui ri ty'y oremboaxya?  
Pema'ẽ ha'e peikuaa pota.  
Oiko 'rã nda'u haxy va'e xee aendu va'e ramigua,  
xe'áry ou va'ekue ramigua ete?  
Mba'eta SENHOR opoxya oexa ukaa ára xemoingo axy avi.

<sup>13</sup> Ha'e rami vy yvate gui tata ombou xekãgue ikuai va'e re  
ipo'aka ete vy.  
Ha'e gui xepy rupi ju kya omoĩ va'e py

<sup>†</sup> 1:9 Jeremias “Aiko axya” he'i mba'eta ha'e ae voi opyta Judá yvy re Babilônia pygua kuery ndogueraapai va'ekue reve (Jeremias 40.1-6).

xerakykue katy gui xemoatã vy xereity.  
 Ha'e rami vy xemomba tema heravy,  
 xemomba'eaxy ko'ẽ nhavõ.

<sup>14</sup> Ajejavyague ma opo py ae ojokua vy  
 ojapo xe-cangarã rami.  
 Ha'e vy oipopẽ va'ekue xeaju'y rupi peve ovaẽ.  
 Ha'e rami py SENHOR omomba ma xembaraetea,  
 xemboaxa guive xegui ipo'akave va'e kuery po py.

<sup>15</sup> SENHOR omoaĩmba avi ma ipy'a guaxukueve  
 xereve ikuai va'ekue.  
 Ombou reta xerovai ono'õ va'erã,  
 xea pygua kunumigue omou'ũmba avi aguã.‡  
 Kunhatai'i rami Judá pygua kuery ndojexavai va'ekue ri  
 SENHOR opyrõ ukapa uva omou'ũaty py rami.

<sup>16</sup> Ha'e nunga re ae xee ajae'o,  
 xerexay gui xerexa ndoexavei.  
 Xegui ojepe'a ma xembopy'a guaxuarã  
 xembaraete ombopyau'rã va'ekue.  
 Xera'y kuery voi ojexavai reia rupi ikuai,  
 hovaigua ipo'aka ramo.

<sup>17</sup> Sião pygua kuery opo oupi teĩ  
 avave rei ndoikoi ipytyvõarã.  
 Mba'eta Jacó regua kuery re SENHOR ijayvu rire  
 ha'e katy'i rupi ikuai va'e hovaigua ju ikuai.  
 Ha'e ramo Jerusalém tetã pe ha'e kuery  
 "Ha'eve'ý va'e" he'i okuapy.

<sup>18</sup> Ha'e rami avi SENHOR ma heko porã va'e,  
 ha'e rã xee ma nanhe'ẽ renduxei va'ekue.  
 Peẽ yvy regua kuery ha'e javive, pendu ke,  
 pema'ẽ guive haxy aendu va'e re.  
 Xea pygua kunhataigue ha'e kunumigue  
 ogueraapaa ma escravo-rã.

<sup>19</sup> Xeirũ kuery aenoĩ  
 teĩ ha'e kuery xembotavy.  
 Xea pygua sacerdote ha'e nhomongeta va'ety kuery voi  
 omanomba tetã rupi,  
 tembi'u recaa rupi ikuai vy  
 imbaraaetepa'i ju aguã.

<sup>20</sup> Ema'ẽ SENHOR, mba'eta xee ajexavai.  
 Xenhe'ẽ py nda'evei ete aikovy,  
 xekuraxõ py ndaxerekorãvei ma xeryepy rupi,  
 opa mba'e py noronhe'ẽ rendui rire.  
 Oka rupi xera'y kuery ojukapaa kyxe py,  
 ha'e rã opy rupi ma mano anho oiko.

<sup>21</sup> Xepoaa onhendu  
 teĩ avave rei ndoikoi xepytyvõarã.  
 Mba'emo vai aendua xere ija'e'ý va'e kuery oikuua vy  
 ovy'a reipa okuapy, ndee xemoingo axy ramo.  
 Ha'e rami avi ára ndeayvuague ovaẽ ramo

‡ 1:15 Apy "Xee" he'ia ma Jerusalém ae ijayvua rami Jeremias ijayvu vy, ojee e'ý.

xee aiko axya rami avi ha'e kuery voi ikuai axy 'rã.  
 22 Tove ha'e kuery ojejavvyague tojekuaapa nerentonde.  
 Ereko ha'e kuery voi xere rejapoague rami,  
 xee anhetẽ rupi e'ŷ aikoa py.  
 Mba'eta xepoaẽ vaipa ete,  
 xekuraxõ opa rai'i ma.

## 2

*"SENHOR gui ae ou Sião pygua ikuai axy aguã", he'iague*

- <sup>1</sup> Arai rami SENHOR ojao'i Sião pygua kuery opoxya py.  
 Yva gui oity Israel kuery po'akaa yvy py,  
 Opoxya oexa ucaa ára ovaẽ ramo  
 na'ima'endu'avei ipy renda oĩ va'ekue re.\*  
<sup>2</sup> Ha'e rami vy SENHOR omboaxy e'ŷ re  
 omboavaipa Jacó regua kuery rekoa ha'e javi.  
 Opoxya rupi oity  
 Judá kuery ro ikorapa va'ekue.  
 Yvy rupi oitypa, nombovarevei ae  
 yvatekueve ha'e openaague.  
<sup>3</sup> Opoxya py omomba Israel kuery po'akaa ha'e javi.  
 Hovaigua kuery ou teĩ omboapu'a ju oiporu kuaa regua.  
 Ha'e vy Jacó kuery rovai imoendyará ombou  
 tata rendy vuku ijvvýry rupi oapypa va'erã.  
<sup>4</sup> Ha'e kuery re oipira guapa hovaigua rami.  
 Hovaigua rami ete onhemomburu oiporu kuaa regua re.  
 Ha'e vy omokanhymba iporã va'ekue ha'e javi.  
 Tata rami opoxya omonhemboja Sião tekao áry.  
<sup>5</sup> Hovaigua rami SENHOR oiko vy  
 omokanhymba Israel kuery.  
 Omboavaipa huvixa kuery ro ha'e javi,  
 oo ikorapa va'ekue oitypa.  
 Ha'e vy Judá kuery ikuiaia py omboetave tema  
 ojae'o ha'e ipy'a vai va'e.  
<sup>6</sup> Ojeupagua templo voi omboavaipa vyvoi  
 mba'emo rogue'i onhotŷ mbyre rami rive.  
 Omboavaipa ojeupagua kuery ombojeroviaaty.  
 SENHOR ojapo orerexaraipa aguã rami  
 Sião py ngaru rojapo ha'e sábado ára romboeteague re.  
 Opoxya rupi omboyke avi  
 huvixa ha'e sacerdote ikuai va'ekue.  
<sup>7</sup> SENHOR ndoiptavei ojeupagua altar,  
 ojeupagua oo iky'a e'ŷ va'e ndojou porãvei vy.  
 Hovaigua kuery po py omboaxa  
 oo tuvixakueve kora.  
 Ha'e ramo SENHOR pegua opy rupi ha'e kuery ojapukai okuapy  
 ngaru oikoa ára py rami.  
<sup>8</sup> SENHOR ojee omoĩ avi  
 Sião tetã kora omboavaipa uka aguã.  
 Ha'e rami vy omoatã uka ixã mba'emo a'ãarã,

\* **2:1** "Ipy renda" he'ia ma Jerusalém py templo oĩ va'ekue re ijayvu vy (Salmo 132.7).

ndoipe'ai guive opo ombovaipa e'ŷa ja.  
 Ojapo kora ha'e imbotya opurupa rei aguã rami,  
 ha'e nunga ha'e javi ikangypave ov.

<sup>9</sup> Kora rokẽ voi oitypa yvy rupi.

Okẽ jokoa voi omopẽ, omboa'ypa ete.  
 Ha'e pygua huvixa ha'e yvatekueve reve ma  
 yvy regua ikuiaia rupi rive ikuai,  
 lei oikuaa e'ŷ va'e ikuiaia rupi,  
 ha'e profeta kuery pe ma SENHOR ndoexa ukavei mba'eve.

<sup>10</sup> Sião pygua nhomongeta va'ety kuery ma

okyririmbã reve oguapy okuapy yvy py.  
 Oakã re omoĩ okuapy yvy ku'i,  
 ajukue vaikue py rive onhemonde reve.  
 Jerusalém pygua kunhataigue voi  
 oakã oity okuapy yvy peve.

<sup>11</sup> Xerexay py rive xerexa nda'evevei ma,

xenhe'ẽ py ndaxerekorâvei aikovy,  
 xekuraxõ voi ojero'a oiny aiko axy ramo,  
 xevygua kuery omombaa ague re xepy'a vaia py.  
 Mba'eta kyrigue okambu'i va'e voi omanomba  
 tetã rupi tape ikuai va'e rupi.

<sup>12</sup> Oxy kuery pe kyrigue aipoe'i:

“Mamo nda'u jajou 'rã mbojape ha'e vinho?”  
 he'i okuapy teĩ tetã rupi tape ikuai va'e rupi,  
 ha'e rami teĩ kyxe gui rami ho'apa okuapy,  
 ha'e rami e'ŷ vy oxy kuery jyva áry oĩ reve  
 onhe'ẽ oeja ov.

<sup>13</sup> Ndee Jerusalém pygua, marã rami tu xee rombovai ta?

Ndee Sião pygua, mba'e nunga re tu rombojoja 'rã,  
 mava'e re tu romboje'a 'rã rombopy'a porã aguã?  
 Mba'eta nemombaarã ou va'e ma ye'ẽ rami tuvixa.  
 Mava'e tu nepytyvõ 'rã?

<sup>14</sup> Ndea pygua profeta kuery ma ndevy pe omombe'u

oexa ra'u va'ekue ramigua mba'eve ovare'ŷ va'e.  
 Ha'e rã ndereko vaia re ma ha'e kuery nda'ijayvui  
 nemoingo porã ju aguã.  
 Ha'e rami 'rãgue py oexa ra'u va'ekue ramigua rive omombe'u vy  
 ojapo escravo-rã ndereraa aguã rami.

<sup>15</sup> Ha'e nunga rupi tape rupi oaxa va'e kuery ma

ojepopete ha'e oakã ombovava reve oje'oi  
 Jerusalém pygua kuery ojojai rei vy.  
 “Peva'e tetã pe teve ‘Pavê gui iporâve va'e,  
 yvy jave regua oguerovy'a va'e', 'ea va'ekue?” he'i oje'oivy.

<sup>16</sup> Ndere ija'e'ŷ va'e kuery

ojuru oipe'a 'rã nderovai,  
 ndejojai rei reve haĩ jekyty rei 'rã okuapy.  
 Ha'e vy aipoe'i 'rã: “Nhamondoropa ke.  
 Anhetê ete, kova'e ára ae nharõague.  
 Ojeupity rã jaexa ma”, he'i okuapy.

<sup>17</sup> Mba'eta SENHOR ae ojapo onhembopy'aague.

- Yma guive nderovai ijayvuague  
ojapo ojeupitypa aguã rami.  
Ha'e rami vy nemboaxy e'ŷ re ndereity.  
Ojapo nderovaigua kuery ndere ov'y'apa rei aguã rami,  
ha'e kuery ombopo'akapave vy.
- <sup>18</sup> Jerusalém pygua kuery okuraxõ py ojapukai okuapy SENHOR pe.  
Ndee Sião tetã kora,  
nderexay toxryr yakã'i rami,  
ara py ha'e pyávy.  
Epytu'u eme, nderexa topytu'u eme ojae'oa gui.
- <sup>19</sup> Epu'ã ke, ejapukai pyávy  
ptyû ypy'i ramove.  
SENHOR renonde enhoẽ yy rami ndepy'a re oĩ va'e.  
Ixupe eupi ndepo ndera'y ha'e nderajy kue'iry rekove re.  
Mba'eta ha'e kuery ma karuai gui rive ho'apa okuapy  
tape ikuai va'e ha'e javi rupi.
- <sup>20</sup> Ema'ẽ SENHOR, ha'e eikuua pota  
marã ramigua kuery ha'e rami ete remoingoa re!  
Mba'eta kunhague ho'u 'rã teve oikuavã va'ekue ae,  
omemby kuery oayvua'i rupi oguereko va'ekue?<sup>†</sup>  
Ha'e rami e'ŷ vy SENHOR pegua oo iky'a e'ŷ va'e py  
ojukapaa 'rã teve sacerdote ha'e profeta kuery?
- <sup>21</sup> Mba'eta kunumigue ha'e tujakue'i re'õgue  
yvy rupi ikuai tape ikuai va'e rupi.  
Xea pygua kunhataõgue ha'e kunumigue  
ojukapaa kyxe py.  
Ndee ae ma rejuka uka ndepoxya ára py.  
Remboaxy e'ŷ re rejuka uka.
- <sup>22</sup> Opa rupi gui rembou xemongyjearã,  
ndevygua nhemboaty oikoa py rami.  
SENHOR opoxya oexa ucaa ára ma  
ndoikoi oo jepe va'e neĩ opyta va'erã.  
Mba'eta hovaigua kuery omomba ma  
xee ayvua'i rupi amongakuaa va'ekue.

### 3

#### *Ojexavaia re ijayvuague*

- <sup>1</sup> Xee ma ava jexavai aendu va'ekue  
Nhanderuete opoxya rupi yvyra po'i'i ombou rã.  
<sup>2</sup> Mba'eta xereraa vy ojapo karamboae ptyû rupi aiko aguã,  
hexakãa rupi e'ŷ.  
<sup>3</sup> Mbovykue rei e'ŷ xerovai omoõ opo,  
ára pukukue re.  
<sup>4</sup> Omoxorõmba xero'o, xepire voi.  
Xekãgue omopẽmba guive.  
<sup>5</sup> Xerovai omopu'ã xejokoarã kuery.  
Veneno ha'e haxy va'e py ae xejoko.  
<sup>6</sup> Ojapo ptyûa py xerekao aguã rami,

<sup>†</sup> **2:20** Ha'e nunga ae oiko tetã ojokopaa rã. Tembi'u oata rã ix ykuery ho'u omemby kuery ae (Jeremias 19.9; Levítico 26.29).

- raka'e rã peve guarã omano va'ekue rami.
- <sup>7</sup> Kora py xejoko rã nda'evevei ma aẽ aguã.  
Corrente overa va'e guigua py xejokua.
- <sup>8</sup> Ajerure ha'e ajapukai teĩ  
noendui anhembo'ea.
- <sup>9</sup> Ita guaxu omoatyrõ mbyre py ojopia xerape,  
omokarẽ rei guive.
- <sup>10</sup> Xerarõ oiny urso oma'ẽ mbegue va'e rami,  
ha'e xivi onhemi oiny va'e rami avi.
- <sup>11</sup> Ha'e rami vy xerape gui xepe'a xapy'a vy xemboa'ypa.  
Omboavaipa pyre rami xereja inony.
- <sup>12</sup> Guapa oipira vy  
xemoĩ guembiarã.
- <sup>13</sup> Xekuraxõ re oipyxo  
ngu'y hyru guigua py.
- <sup>14</sup> Xeapo xeretarã kuery ha'e javi xejojai aguã rami.  
Ára pukukue re xembojaru rei okuapy.
- <sup>15</sup> Jexavaia re anho xemongaru,  
xevy ho'u uka reta haxy va'e.
- <sup>16</sup> Xeapo ita ra'y re xeraĩ amopẽmba aguã rami.  
Xeao'i tanhimbu py rive.
- <sup>17</sup> Xenhe'ẽ gui oipe'a aiko porã aguã va'ekue.  
Ha'e ramo xerexarai iporã va'e aexaague re.
- <sup>18</sup> Ha'e rami vy "Opa ma xeporãague,  
SENHOR aarðague voi", ha'e.
- <sup>19</sup> Nema'endu'a nho ajexavaia ha'e ajae'o aikovya re,  
haxy va'e ha'e veneno ay'u va'e re guive.
- <sup>20</sup> Xee ma ha'e nunga re xema'endu'a riae aikovy xenhe'ẽ py.  
Ha'e ramo xeryepy rupi xenhe'ẽ nda'evei ju.
- <sup>21</sup> Ha'e rami teĩ xema'endu'axe ju  
pova'e nunga arõ aikovy va'e re.
- Nhanderuete omboaxy a rupi oipytyvõ aguã re ojerureague*
- <sup>22</sup> Mba'eta SENHOR nhanemboaxy ramo nanhanemombaai,  
mba'eta nhanemboaxy ma opa va'erã e'ŷ.
- <sup>23</sup> Opa mba'e py ojeroziapy reiko vy  
rexu uka pyau 'rã ko'ẽ nhavõ.
- <sup>24</sup> Xejeupe ae aipoa'e: "Xevy guarã oĩ va'e ma SENHOR ae.  
Ha'e nunga rupi arõ tema 'rã hexe", ha'e.
- <sup>25</sup> SENHOR opena porã 'rã harõa kuery re,  
onhe'ẽ py oeka va'e kuery ae.
- <sup>26</sup> Ha'eve nharõ SENHOR nhandereraa jepe aguã,  
nhakyrirĩ reve.
- <sup>27</sup> Nhandevy pe ha'eve  
nhanekunumi teri reve canga jexavaia regua jaropo'aka kuaa.
- <sup>28</sup> Ha'e rami vy tajaguapy nhande ae'ia py, tanhakyrirĩ nhainy,  
mba'eta ha'e va'e canga ae nhandere Nhanderuete omoĩ va'e.
- <sup>29</sup> Tajajero'a nhanderova yvy ku'i re omovaẽ peve.  
Xapy'a rei ma oiko nho 'rã nharõ jaikovy va'ekue.
- <sup>30</sup> Tanhaunga uka nhanderova nhaneungaxe va'e pe.

- Tanhaendu rive opa marã nhandejojai reia teĩ.
- 31 Mba'eta SENHOR ma  
nanhandereja riae 'rã.
- 32 Xapy'a rei nhanemomboriau ranhe teĩ  
nhomboaxy ete va'e vy oexa uka nho 'rã nhanemboaxya.
- 33 Mba'eta nhomoingo axyxe reia py e'ŷ  
ombojexavai avakue ra'y kuery.
- 34 Xapy'a rei amongue opyrõ imoiny 'rã  
nhuã py ikuai va'e re,
- 35 ha'e rami e'ŷ vy Yvate ete va'e renonde teĩ  
ha'eve'ŷa rami oikuua pota 'rã joe,
- 36 ha'e rami e'ŷ vy avakue ojerure rã oendu rive 'rã,  
teĩ SENHOR ndoexai 'rã teve ha'e rami oikoa?
- 37 Mava'e ayvu rupi rive tu mba'emo oiko 'rã,  
SENHOR omoingo e'ŷ rã?
- 38 Yvate ete va'e gui nda'u ndoikoi 'rã ri  
mba'emo vai ha'e iporã va'e?
- 39 Mba'e re tu ha'vy avakue imarã va'e ndojou porãia rupi ijayvu,  
ojeavyague re ombopaga rã?
- 40 Jaikuua pota ke jaikoa re ae.  
Ha'e gui jaikuua porã ma vy jajevy ke SENHOR pe.
- 41 Nhandepo jaipi reve ke nhanekuraxõ voi jaipi  
Nhanderuete yva re oĩ va'e pe. Ha'e vy aipo ja'e:
- 42 "Rojeavy, noronhe'ẽ rendui guive ramo  
ndee ma ndoreperdoai teri.
- 43 Ndee ma ndepoxya py oreao'i reve orerakykue monha.  
Oremboaxy e'ŷ re oremokanhymba.
- 44 Arai py renhemi  
ndeia py peve ronhembo'ea onhendu e'ŷ aguã.
- 45 Yty omombo pyrã rami rive oremoingo  
yvy regua kuery ikuia rupi.
- 46 Orerovai orerovaigua kuery ha'e javi  
oipe'a okuapy ojuru.
- 47 Ore'áry ou ndorerekorãvei aguã ha'e yvykua py orembo'aarã,  
orereityarã ha'e oremokanhymbaarã."
- 48 Xeretarã kuery omokanhymbaa rã  
xerexay oxyry atã ete.
- 49 Xerexa ojae'o tema.  
Ndopo'oi, ndopytu'ui 'rã guive
- 50 SENHOR opena e'ŷa ja,  
ha'e yva gui oexa pota peve.
- 51 Mba'emo aexa va'e gui xeporiau xenhe'ẽ py,  
kunhague xeretã rupi ikuai va'e re mba'emo oiko va'ekue káuxa.
- 52 Mba'e re'ŷ xerovaigua kuery  
xejukaxe okuapy guyra'i rami rive.
- 53 Xemombaxe vy xemombo yvykua py,  
ha'e ita py xeapipa.
- 54 Xeakã áry rupi yy oxyry atã ouvy.  
Ha'e ramo "Akanhy ta ma!" ha'e.
- 55 Ha'e gui ma SENHOR, yvykua pukuvea py aĩa gui

- ajapukai nderery rupi.
- <sup>56</sup> Ha'e ramo ndee rendu xeayvua.  
Emboty eme ndeapyxa ajae'oa ha'e ajapukaia gui.
- <sup>57</sup> Ndevy pe ajapukaia ára ndee ae renhemboja xere.  
Ha'e rami vy xevy pe "Ekyje eme" 're.
- <sup>58</sup> SENHOR, xerekove re reikuua pota vy  
xereraa jepe va'ekue aikove aguã rami.
- <sup>59</sup> SENHOR, rexua reiny ha'eve'ÿa rami xererekoo okuapyague.  
Eikuua pota 'rãgue xere!
- <sup>60</sup> Rexapa xeapo vai okuapya  
ha'e xerovai onhembopy'aa ha'e javi.
- <sup>61</sup> SENHOR, rendu xere ijayvu rei okuapy rã,  
xerovai onhembopy'aa nhavõ,
- <sup>62</sup> xerovaigua kuery xerekokue ramigua rive omombe'u rã,  
ha'e ára pukukue re xere ijayvu mbegue rei okuapy rã.
- <sup>63</sup> Exa pota tema ha'e kuery re, oguapy ha'e opu'ã ju ramo.  
Mba'eta xembojaru rei rive okuapy.
- <sup>64</sup> SENHOR, ndee rembopaga 'rã  
opo py mba'emo ojapoague re.
- <sup>65</sup> Remopytûmba 'rã ha'e kuery py'a,  
ha'e kuery re rembou 'rã ayvu vai.
- <sup>66</sup> Ndepoxya py remonha 'rã heravy.  
Ha'e rami vy remokanhymba 'rã ndevyguia yva guy gui.

## 4

*Tetã ojokopaa jave ikuai axya re ijayvuague*

- <sup>1</sup> Mba'exa vy nda'u ouro oĩ va'ekue huñmba?  
Mba'exa vy tu ouroombovera pyre ndoveravei?  
Ha'e rami ae avi oo iky'a e'ÿ va'e re ita ikuai va'ekue  
omoañmbaa tape joaxa-axaa ha'e javi rupi!
- <sup>2</sup> Mba'eta Sião pygua yvatekueve ma  
ouro oiky'a'o pyre rami ikuai va'ekue ri  
aÿ ma ha'e kuery pe "Yapo guigua rive" 'ea,  
nhae'ü re ombo'epo va'e rembiapo ramigua!
- <sup>3</sup> Jagua-tuvy nhe'ë minha omokambu 'rã gua'y kue'iry.  
Ha'e rã xeretarã kuery ma porayvu ve'ÿ ma ikuai  
guyra-nhandu tekao e'ÿa rupigua rami.\*
- <sup>4</sup> Ha'e ramo kyrígue okambu va'e apekû ipirupa ma,  
ijy'uvei gui oja ijuru re.  
Kyrígue mbojape re ojerurea rupi ikuai  
teñ avave rei nome'ëai 'rã.
- <sup>5</sup> Tembi'u porã re okaru va'ekue ma  
ho'apa 'rã okuapy tape rupi.  
Onhemonde porãa rupi ikuai va'ekue ma  
fty rupi rive ikuai.
- <sup>6</sup> Sodoma tetã minha xapy'a'i py omokanhymbaa raka'e  
avave po py e'ÿ.  
Ha'e rami teñ Sodoma pygua kuery ojejavyague gui voi  
xeretarã kuery ojejavyve va'e ikuai.

\* **4:3** Guyra-nhandu ma ombo'a ma vy ngupi'a oeja rive 'rã (Jó 39.13-18).

- <sup>7</sup> Mba'eta yvatekueve ma yro'y ha'e kamby gui xiñve va'ekue,  
 ita coral va'e gui ipire pytāve va'ekue,  
 ha'e ita safira rami iporā va'ekue ri
- <sup>8</sup> aÿ ma hova tapyí gui ete huûve va'e.  
 Tape rupi ooa rupi avave rei ndoexa kuaavei.  
 Ipire ma ojapa ikāgue re,  
 yvyra rakā rami ipirupa va'e vy.
- <sup>9</sup> Mba'eta karuai gui omano va'e kuery gui  
 ov'y'ave kyxe py ojukapy.  
 Mba'eta ndokarui va'e ma mbeguei'i opa oje'oivy.  
 Ho'u va'erā mba'ety rupi ndoikovei ramo omano tema 'rā oje'oivy.
- <sup>10</sup> Kunhague ymave rupi porayvu va'ekue ri  
 aÿ ma opo py ae omomimoï 'rā omemby kuery.  
 Ha'e kue'iry re ae 'rā okaru  
 xeretarā kuery omokanhymbaa ramo.
- <sup>11</sup> SENHOR opoxya rupi oiko vy  
 ombou opoxya nhomoendyarā.  
 Sião re tata omonhemboja vy  
 ijyta peve oapypa.
- <sup>12</sup> Yvy regua ruvixa kuery ha'e yvy re ikuai va'e ha'e javi  
 ndogueroviai okuapy omombe'ua rā  
 Jerusalém rokē rupi hovaigua kuery oikepa maague.
- <sup>13</sup> Ha'e va'e oiko ha'e pygua profeta kuery ojejavyague re,  
 sacerdote kuery ojapo vaiague re guive,  
 mba'eta tetā mbyte rupi  
 omoë okuapy heko porā va'e ruguy.
- <sup>14</sup> Ha'e kuery ma ára revegua e'ÿ rami oguata rei tape rupi,  
 tuguy omoë va'ekue py iky'apa va'e ikuai,  
 ha'e ijaõ re ma voi avave rei ndovyxeai.
- <sup>15</sup> Ha'e kuery pe ojapukaia: "Ha'eve'ÿ va'e kuery, pejep'e a ke!  
 Pejep'e a ke, pexyry ke, pepoko eme orere!" 'ea.  
 Ha'e ramo ojava oje'oivy, ha'e ovaëa py rei  
 ha'e kuery pe yvy regua kuery  
 "Apy ma nda'evei ae pendekuai aguã."
- <sup>16</sup> Mba'eta SENHOR ae omoaï imondovy opoxya rupi.  
 Ha'e rami vy nopenavei ma ha'e kuery re.  
 Hovaigua kuery katuve ma nomboetei 'rā sacerdote kuery,  
 ha'e nhomboaxya rupi e'ÿ 'rā oguereko nhomongeta va'ety kuery.
- <sup>17</sup> Ha'e gui ma ore kuery rexâ ikangypa ma  
 oreptyvõarā ou va'erā re roma'ena vy teî.  
 Roikuua potaaty py roarõ reve roma'ẽ tema  
 peteî regua orereraa jepe va'erā re teî ndoui ae.
- <sup>18</sup> Orerovaigua kuery ma orekuia rupi oma'ẽ mbegue okuapy ramo  
 oreretâ mbyte rupi orekuai aguã voi nda'evevei.  
 Ropa aguã ovaë rai'i ma,  
 ore'ára ojeupity ma,  
 aÿ ovaë ma ropa aguã ára.
- <sup>19</sup> Oremonhaa kuery ma  
 guyra yvate rupi oveve va'e gui inhakuâve va'e.  
 Yvyty ikuai va'e áry rupi ete oremonha,

- teko a e'ŷa rupi voi nhuã omoõ okuapy orembo'a aguã.
- <sup>20</sup> Ha'e gui oreruvixave orerekombo'earã SENHOR omoõ va'ekue ae  
ombo'a ma okuapy nhuã py.  
Ixupe ma ore kuery "Nekuaray'ã py 'rã orekuai  
yvy regua kuery mbyte rupi teĩ", ro'e va'ekue ri.
- <sup>21</sup> Peẽ Edom pygua kuery Uz yvy re pendekuai va'e,  
orejorai tema, pevy'a rei tema 'rã orere.  
Ha'e rami avi pendea py voi 'rã omboaxaa kova'e karo.  
Ha'e ramo peka'upa vy pendepire reipa 'rã peikovy.
- <sup>22</sup> Ha'e rã peẽ Sião pygua kuery, opa ma pendeko vaiague re penembopagaague.  
SENHOR napendereraa ukavei ma 'rã escravo-rã.  
Ha'e rã peẽ Edom pygua kuery, araka'eve rã ojekuaapa 'rã  
pendeko vaia ha'e pejeavyague.

## 5

*"Oremboaxy ke" he'iague*

- <sup>1</sup> SENHOR, nema'endu'a ke mba'emo vai orere oiko va'ekue re.  
Eikuua pota ha'e ema'ẽ roiko axya re.
- <sup>2</sup> Oreyvyrã reme'ẽ va'ekue oaxapa ma amboae regua kuery pe,  
orerogue voi amboae yvy guigua kuery pe ju oaxa.
- <sup>3</sup> Ore kuery ma tyre'ŷ tuu ve'ŷ va'e rami orekuai.  
Ha'e rã orexy kuery ma imeve'ŷ va'e ikuai.
- <sup>4</sup> Yy roy'u va'erã ma peráta re rive 'rã rojogua,  
yxakã voi peráta re anho 'rã rojou.
- <sup>5</sup> Orerakykue monhaa kuery ma oreaju'y re ma ikuai.  
Orekane'õ ma teĩ ropytu'u aguã voi noĩ.
- <sup>6</sup> Egito ha'e Assíria pygua kuery pe rojejopy uka  
ro'u va'erã rojou aguã teĩ.
- <sup>7</sup> Oreru kuery ma ojejavypa rire jipovei ma.  
Ha'e gui ore kuery ju 'rã roiko axy ha'e kuery ojapo vaiague re.
- <sup>8</sup> Escravo kuery rive 'rã ipo'aka orere.  
Ndoikoi avave rei ha'e kuery po gui orereraa jepe va'erã.
- <sup>9</sup> Rojeayvu e'ŷkue py 'rã rojou ro'u va'erã,  
kyxe teko a e'ŷa rupi oguereko va'e gui.
- <sup>10</sup> Karuai roendu vaipa ramo  
oreppire ma tata kua rami hakupa rei.
- <sup>11</sup> Sião py oguero'apaa kunhague ikuai va'e,  
kunhataigue guive, Judá tetã ikuai va'e rupi.
- <sup>12</sup> Hovaigua kuery ojyryvipypa yvatekueve va'ekue,  
tujakue'i voi ojou vy ombojaru rei okuapy.
- <sup>13</sup> Ha'e rã kunumigue ma ogueraa 'rã mba'emo mongu'ia py ombo'eapo aguã,  
avakue'i voi yxakã re ombovoyi rã onhepyxanga rive oje'oivy.
- <sup>14</sup> Ha'e ramo nhomongetaa rupi ikuai va'ekue ma ndoguapyvei ma tetã kora rokẽ py,  
kunumigue ndoporaeivei ma guive.
- <sup>15</sup> Rovy'aague okanhymba ma orekuraxõ gui.  
Rojeroky'rãgue py mboriau anho rei roendu.
- <sup>16</sup> Oreakã gui ho'a ma akã regua oĩ va'ekue.  
Nda'evei ete orevy, rojeavy rire!
- <sup>17</sup> Ha'e nunga rupi ae orekuraxõ py oremba'eaxy,  
ndorerexa pyxoveipa guive.

- 18 Sião yvyty ombovaipaa rire  
mbyku anho ikuai ha'e rupi.
- 19 Ha'e rã ndee SENHOR, ndepo'aka riae 'rã.  
Tenda repenaaty oĩ 'rã raka'e rã peve guarã.
- 20 Mba'e re tu riae ta ri nderexarai orere?  
Mba'e re tu remboare oreptyvõ aguã?
- 21 SENHOR, orerekó rerova ju ke ndejeupe guarã.  
Ha'e ramo 'rãe rojeko rerova.  
Embopyau ju ore'ára yma guare rami.
- 22 Mba'e re tu orerejapa ete ri?  
Mba'e re tu ndepoxy anho ta ore kuery rovai?

## Ezequiel ayvu oĩa

### Ezequiel ayvu oĩa

Profeta Ezequiel ma Babilônia tetã py ae hekoia, ha'e py escravo-rã Israel kuery mboae reve heraa rire. Israel kuery ha'e javi pe ayvu omombe'u raka'e, Babilônia py ikuai va'e pe, Jerusalém pygua kuery pe guive. Nhanderuete mba'emo oexa uka reve oayvu ombou raka'e Ezequiel pe. Ha'e gui Ezequiel ju mba'emo ojapoa py oikuaa uka guetarã kuery pe, oayvu py anho e'ŷ.

Nhanderuete rexakãa re ijayvu. “Ha'e gui oky jave arai re karugua ojekuaa va'e rexakãa rami ae avi hexakã jekuaa ijyvýry rupi. Ha'e va'e ma Senhor rexakãa ae aexa. Ha'e nunga aexa vy xerenapy'ã re aĩ, yvy re xerova amovaẽ reve. Ha'e vy ma aendu ijayvua” (1.28).

Ijayvu avi nhandereko vaia káuxa omano va'ekue rami jaiko teĩ Nhanderuete opo'akaa rupi nhanemoingove ju aguã re. “Ha'e gui xere Senhor opo omoĩ vy xereraa Onhe'ẽ rupi. Ha'e vy xemoĩ peteĩ yvyugua ikãgue anho ikuiaia mbyte py. ... Aipoe'ive ju xevy: ‘Ndeayvu na kova'e ikãgue ikuai va'e pe, ha'e vy aipo're: “Ikãgue ymague, pendu ke Senhor ayvu.” ... Ha'e ramo ijayvuague rami ae xeayvu. Xeayvu teri reve hevovo rei nhendu va'e aendu, peteĩ-teĩ kãgue joe onhembota-mbota vy oparãgue rei. Ha'e rami vy peteĩ-teĩ kãgue onhemboje'apa joe. Ha'e ramo ama'ẽ rã ikãgue hajy ha'e ho'opa ma. Ipire voi ojekuaa, ha'e rã inhe'ẽrã ma noĩ teri. Ha'e gui Senhor aipoe'i xevy: ‘Ava ra'y, Nhe'ẽ pe ju ndeayvu. Ndeayvu vy aipo're ixupe: “Po rami Senhor Nhanderuete ijayvu: Ndee Nhe'ẽ, eju irundy henda yvytu oipejua katy gui. Ha'e vy ke eipeju kova'e omanogue áry rupi, okuave ju aguã rami”, 're. Ha'e ramo ijayvuague rami xeayvu ramo ikãgue ikuai va'e re ou Nhe'ẽ. Ha'e ramo oikovepa jevy vy opu'ãmba ju joguerokuapy, xondaro kuery rami mbovy rei e'ŷ ikuai” (37.1, 4, 7-10).

#### *Irundy temimoingo kuery oexaague*

<sup>1</sup> Trinta ma'etŷ re, irundy jaxyha ha'e peteĩ nhiruĩ araa py xee aiko Quebar yakã yvýry rupi, xeretarã kuery escravo-rã ogueraapa pyre mbyte.\* Ha'e va'e jave py ma yva ojepe'a rã aexa mba'emo Nhanderuetea oexa uka rã.

<sup>2</sup> Ha'e va'e jave py peteĩ nhiruĩ ma'etŷ ma ojapo huvixa Joaquim escravo-rã ogueraa ague. Ha'e gui ha'e va'e jaxy re peteĩ nhiruĩ araa py ae

<sup>3</sup> SENHOR ombou oayvu xee Buzi ra'y Ezequiel aiko va'e pe. Sacerdote aiko caldeu kuery yvy re, Quebar yakã yvýry rupi. Ha'e py ae xere SENHOR opo omoĩ rã aendu.

<sup>4</sup> Ha'e gui ma ama'ẽ rã kuaray ijapu'a'ia katy gui ou oiny peteĩ arai tuvixa va'e, tata rami joa py e'ŷ-e'ŷ hexakã va'e. Arai yvýry rupi hendy va'e ojekuaa avi. Ha'e va'e mbyte py ma peteĩ aexa overa va'e rykukue ramigua, tata mbyte gui ojekuaa oiny.

<sup>5</sup> Arai mbyte gui oẽ avi irundy temimoingo kuery. Ha'e va'e kuery jaexa rã ava ramigua meme.

<sup>6</sup> Peteĩ-teĩ re ma irundy kuerei hova oĩ, ipepo ma irundy-rundy avi.

<sup>7</sup> Hetyma ma hi'yvi va'e meme. Ha'e rã ipy ma vaka ra'y py rami ojekuaa, overa va'e omoexakã mbyre rami hendy guive.

<sup>8</sup> Ipepo guy rupi ma avakue po ramigua oĩ, irundy henda jovaive rupi. Irundyve temimoingo ma irundy-rundy ngova ha'e opepo ogueraeko.

<sup>9</sup> Ha'e kuery ma ovaẽ okuapy joe, amboae katy ova-ova e'ŷ re oguata guive. Peteĩ-teĩ ma guenonde katy anho oguata oje'oivy.

\* <sup>1:1</sup> Ha'e jave py ma profeta Ezequiel Babilônia yvy re oiko, heta va'e kuery ogueraapaa ague py.

**10** Ha'e kuery rova ma avakue rova rami. Oiporu kuaa re ma guary rami hova. Ijaxua re ma vaka rova. Irundyve peteī-teī oguereko avi taguato guaxu rova.\*

**11** Ha'e rami ae hova ojekuaa. Ipepo ma mokō-mokoī oupi 'rā o'áry rupi, temimoingo kuery mboae pepo re omovaē reve. Ha'e rā opepo mboae mokoī py ma ojao'i imoiny guete.

**12** Ha'e kuery peteī-teī guenonde rami anho 'rā oguata oje'oivy. Mamo rā rei Nhe'ē ooa katy ha'e kuery voi oje'oi avi. Amboae katy ova-ova e'ŷ re oguata oje'oivy.

**13** Temimoingo kuery jaexa rā tapyī hexakā va'e rami hendy, tataendy rami guive. Ha'e kuery mbyte rupi ma tata rendy vuku oaxa-axa. Ha'e kuery gui oẽ avi overa va'e.

**14** Temimoingo kuery oguata vy overa va'e rami avi ojevy-jevy ha'ekue'ŷ-kue'ŷ katy.

### *Irundy iruéra oexaague*

**15** Ha'e gui temimoingo kuery aexa rā peteī-teī yvýry oĩ avi peteī ruéra yvy rupi oo va'e.\*

**16** Iruéra ikuai va'e jaexa rā itaendy berilo rami hexakā va'e. Irundyve ma joo rami ae ojekuaa. Peteī-teī ruéra jaexa rā amboae ruéra mbyte rupi joaxa oiny.

**17** Ha'e va'e ma ooa katy rei 'rā oo. Amboae katy ova-ova e'ŷ re oguata ovy.

**18** Inhapyī va'e ma yvate ete nhomongyje aguã rami. Peteī-teī ruéra apyī re ma texa anho tynyē ha'e javi rupi.

**19** Temimoingo kuery oguata oje'oivy reve iruéra ijyvýry ikuai va'e oo avi 'rā. Ha'e kuery ojeupi ramo iruéra voi ojeupi avi 'rā hexeve.

**20** Nhe'ē ooa katy rei tema ha'e kuery oo avi 'rā, Nhe'ē oguerekao rupi. Ha'e kuery reve iruéra ikuai va'e oo avi 'rā, mba'eta iruéra ikuai va'e re ae temimoingo kuery nhe'ē oĩ.

**21** Ha'e kuery oguata oje'oivy ramo iruéra ikuai va'e voi oo avi 'rā. Ha'e kuery opyta ramo iruéra voi opyta avi 'rā. Yvy gui ha'e kuery opu'ã oje'oivy ramo ha'e kuery reve opu'ã avi 'rā iruéra ha'e javi, mba'eta iruéra ikuai va'e re ae oĩ temimoingo kuery nhe'ē.

**22** Temimoingo kuery akā áry rupi ma peteī ijaō'ia oĩ itaendy guigua rami nhomongy-jea. Ha'e kuery akā áry rupi ojekuaa oiny.

**23** Ijaō'ia guýry rupi ae ha'e kuery opepo oupi imoiny, peteī-teī joa katy. Peteī-teī ma mokoī opepo ju oguerekao jovaive rupi ojeao'i aguã.

**24** Ha'e kuery oguata oje'oivy ramo aendu ipopo revovo reia yy revovo rami, Ipo'akapa va'e onhendua rami avi. Hevovo aendu rā xondaro kuery pyambu rami onhendu. Ha'e gui ha'e kuery opyta vy opepo voi omboguejypa ju avi 'rā.

**25** Ha'e gui ma ha'e kuery akā áry rupi ijaō'ia oĩ va'e áry gui aendu peteī ayvu. Ha'e ramo ha'e kuery opytapa okuapy, opepo guive omboguejypa.

### *Nhanderuete rexakāa oexaague*

**26** Ha'e gui ha'e kuery akā áry rupi ijaō'ia oĩ va'e áry aexa peteī tenda huvixa openaaty ramigua, itaendy safira guigua rami. Ha'e va'e tenda áry ma peteī oguapy jekuaa oiny ava ramigua.

**27** Ha'e va'e aexa rā iku'a guive yvate katykue ma itaendy rami ojekuaa oiny, ha'e ijyvýry rupi ma tata rami avi hexakā. Ha'e gui rā iku'a guive yvy katykue ma tata ete rami ojekuaa. Ijyvýry ha'e javi rupi tata rami hexakāmba.

**28** Ha'e gui oky jave arai re karugua ojekuaa va'e rexakāa rami ae avi hexakā jekuaa ijyvýry rupi. Ha'e va'e ma SENHOR rexakāa ae aexa. Ha'e nunga aexa vy xerenapy'ã re aĩ, yvy re xerova amovaē reve. Ha'e vy ma aendu ijayvua.

## 2

### *Ezequiel reve ijayvuague*

**1** Ijayvu va'e ma aipoe'i xevy:

— Ava ra'y, epu'ã ke he'amy, ha'e ramo xeayvu 'rā ndereve – he'i.

\* **1:10** Apocalipse 4.8    \* **1:15** Ezequiel 10.9-17

<sup>2</sup> Ha'e ramo xereve ijayvu jave xere Nhe'ẽ oĩ vy xemopu'ã imo'amy. Ha'e rami vy aendu xevy ijayvu rã.

<sup>3</sup> Ha'e ramo aipoe'i xevy:

— Ava ra'y, xee romondouka 'rã Israel kuery pe. Ha'e kuery ma peteĩ regua xerovai opu'ã okuapy va'e. Nguu kuery rami avi anhetẽ rupi e'ŷ ikuai xerovai, aŷ peve.

<sup>4</sup> Mba'eta ta'y kuery voi inhakã ratã okuapy, ipy'a ratã guive. Ha'e kuery pe ae xee romondouka ta. Ha'e vy ha'e kuery pe "Po rami SENHOR Nhanderuete ijayvu" 're 'rã.

<sup>5</sup> Ha'e ramo ha'e kuery xere opu'ã va'ety ikuai va'e oikuua 'rã okuapy ha'e kuery mbyte rupi profeta oikoa, oendu pota, e'ŷ vy noendu potai teĩ.

<sup>6</sup> Ha'e rã ndee ava ra'y, ekyje eme. Ekyje eme guive ha'e kuery ndere ijayvua gui, ha'e nunga juu ha'e juu rakuaendy rami ndekutu teĩ, mba'eta japeuxa ramigua mbyte rupi reiko 'rã. Ekyje eme ndere ha'e kuery ijayvua gui, enhemondyi eme guive ha'e kuery rova gui, mba'eta xere opu'ã va'ety ae ikuai.

<sup>7</sup> Ha'e rã ndee ma ha'e kuery pe remombe'u 'rã xeayvu, oenduxe, e'ŷ vy noenduxei teĩ, mba'eta xere opu'ã rei va'ety ae ikuai.

### *Kuaxia para onhemama va'e oexaague*

<sup>8</sup> — Ndee ava ra'y, endu ke ndereve xeayvu rã. Epu'ã rei eme xerovai opu'ã rei va'ety kuery rami e'ŷ. Eipe'a ke ndejuru, ha'e vy he'u ame'ẽ ta va'e – he'i.

<sup>9</sup> Ha'e ramo ama'ẽ rã ha'e py peteĩ po xea katy okuave'ẽ jekuua va'e. Ha'e va'e py oĩ peteĩ kuaxia para onhemama va'e.

<sup>10</sup> Ha'e va'e ma xerenonde rupi oipyo inony rã hi'ary ha'e iguy rupi ipara oiny ra'e. Ha'e va'e re ipara oiny ojae'oa aguã, ipy'a vaia ha'e nda'evei va'e oiko va'erã regua.

## 3

<sup>1</sup> Ha'e gui aipoe'ive ju xevy:

— Ava ra'y, he'u rejou va'e. He'u ke kova'e kuaxia para. Ha'e gui ma tereo Israel kuery pe ndeayvu – he'i.

<sup>2</sup> Ha'e ramo xejuru aipe'a ramo xevy pe ome'ẽ kuaxia para ha'u aguã.

<sup>3</sup> Ha'e vy aipoe'i xevy:

— Ava ra'y, emokõ nderyepy katy peve guarã. Emonyẽ ete nderye kova'e kuaxia para ndeayvu ame'ẽ va'e – he'i. Ha'e ramo xee ha'u ramo xejuru py ei rami he'ẽ va'e aendu.\*

### *Profeta-rã Ezequiel omoīague*

<sup>4</sup> Ha'e gui aipoe'ive ju:

— Ava ra'y, tereo aŷ Israel kuery ikuaiia py, ndeayvu ha'e kuery pe xeayvu rupi.

<sup>5</sup> Mba'eta amboae rami rei ijayvu va'e kuery pe e'ŷ xee romondouka, ha'e rã Israel kuery pe ae.

<sup>6</sup> Heta regua pe e'ŷ guive romondouka, amboae rami ijayvu va'e nerendu kuaai aguã katy e'ŷ. Ha'e va'e kuery regua pe xee romondouka va'e rire ma anhetẽ ojapyxaka 'rãgue okuapy ndeayvua re.

<sup>7</sup> Ha'e rã Israel kuery ma ndojapyxakai 'rã, xeayvu re eteve voi ndojapyxakaxeい va'e vy. Mba'eta Israel kuery ma inhakã ratã ha'e opy'a py oikuua axy va'e meme.

<sup>8</sup> Ha'e nunga rupi nderova ajapo 'rã hatã aguã rami ha'e kuery rova rami avi, ha'e kuery akã ratã rami ae avi 'rã rojapo ha'e kuery rovai neakã ratã aguã rami.

<sup>9</sup> Diamante rami hatã va'e ajapo 'rã nderova, itaendy gui hatãve va'e. Ha'e ramo ekyje eme ha'e kuery gui, neñ enhemondyi eme guive ha'e kuery ngova re oexa uka va'e gui, mba'eta xere opu'ã rei va'ety ae ikuai – he'i.

<sup>10</sup> Ha'e gui aipoe'ive ju xevy:

\* <sup>3:3</sup> Apocalipse 10.9-10

— Ava ra'y, endu ke ndeapyxa py ndevy pe xeayvu ha'e javi, emoī porāmba guive ndepy'a re.

**11** Ha'e gui ma tereo, neretarā kuery escravo-rā ogueraa pyre ikuiaia py. Ha'e kuery oenduxe, e'ŷ vy noenduxei teĩ ndeayvu tema ha'e kuery pe. Ha'e vy "Po rami SENHOR Nhanderuete ijayvu", 're 'rā – he'i xevy.

**12** Ha'e gui ma Nhe'ẽ xereupi heravy. Ha'e ramo xerakykue katy gui aendu peteĩ hyapu rei va'e. Ha'e va'e ma oĩa gui onhendu vy aipoe'i:

— Ta'ima'endu'a porāa SENHOR rexakāa re – he'i.

**13** Aendu avi temimoingo kuery opepo jopepo re ombota-mbota rā, iruéra ha'e kuery reve ikuai va'e revovo guive. Aendu avi hyapu ratāve va'e.

**14** Ha'e rami py Nhe'ẽ xereupi heravy. Xenhe'ẽ py nda'evei etea aendu reve aa ainy. Ha'e rami teĩ xere SENHOR opo imbaraete va'e omoī xejokoarā.

**15** Ha'e ramo Tel-Abibe tetā katy aa, Quebar yakā yvýry xeretarā kuery escravo-rā ogueraa pyre ikuiaia py. Ha'e vy ha'e kuery ikuiaia py ju aĩ. Ha'e kuery mbyte py sete ára re aguapy ainy nda'evei etea aendu reve.

### *Tetā rarõa rami Israel kuery pe ijayvu aguã omoñague*

**16** Ha'e gui sete araa py ma xevy pe SENHOR ombou oayvu. Ha'e vy aipoe'i:

**17** — Ava ra'y, xee ma tetā rarõa rami romoī Israel kuery pe ayvu remombe'u aguã. Ha'e rami rā xejuru gui ayvu rendu va'e remombe'u 'rā ha'e kuery pe xerekovia.

**18** Ha'e gui ma xapy'a rei heko vai va'e kuery pe "Pemano 'rā" ha'e teĩ ndee ju ha'e kuery pe neremombe'ui ramo tape vai gui ojepe'a vy oo jepe aguã, ha'e rami ri ramo heko vai va'e omano 'rā gueko vaia py, teĩ ndee rombopaga avi 'rā huguy ndepo re oĩ va'e káuxa.

**19** Ha'e rā xapy'a rei heko vai va'e kuery pe ha'e rami ndeayvu teĩ ha'e kuery ndojeko rerovai 'rā teko vai rupi ikuiaia gui. Ha'e ramo ha'e kuery omano 'rā gueko vaia py ae, ha'e rā ndee ma reo jepe 'rā.

**20** Ha'e gui xapy'a rei heko porā va'ekue ma heko porāague gui ojepe'a 'rā ha'eve'ŷ va'e ojapo vy. Ha'e gui ha'e kuery renonde py xee amoī 'rā onhepyxanga aguã, ha'e ramo omano 'rā. Ndee nandeayvui ramo ha'e kuery omano 'rā gueko vaia py, ha'e na'ima'endu'aavei 'rā teko porā rupi oikoague re. Ha'e rami teĩ ndee rombopaga avi 'rā huguy ndepo re oĩ va'e káuxa.

**21** Ha'e rami teĩ heko porā va'e pe ojejavvy e'ŷ aguã re ndee ndeayvu ramo ndojavvyi vy anhetē oikove 'rā ha'e rami ndeayvu rire. Ndee voi reo jepe 'rā – he'i.

**22** Ha'e gui xere SENHOR opo omoī vy aipoe'i xevy:

— Epu'ã ke, tereo yvyugua katy, ha'e py ma ndereve xeayvu aguã – he'i.

**23** Ha'e ramove apu'ã vy yvyugua katy aa. Ha'e py ama'ẽ rā SENHOR rexakāa oĩ ra'e, Quebar yakā yvýry hexakāa aexaague rami. Ha'e vy xerenapy'ã re aĩ xerova yvy re amovaẽ reve.

**24** Ha'e ramo xere Nhe'ẽ oĩ vy xemopu'ã imo'amy. Ha'e rami vy xevy ijayvu vy aipoe'i:

— Tereo ndero katy, ha'e enhemboty ha'e py.

**25** Mba'eta ava ra'y, ma'ẽ. Ha'e kuery ma ndea py ixā ogueru vy ndejokua 'rā imoiny, ha'e kuery mbyte katy reo ve'ŷ aguã.

**26** Ha'e gui xee ajapo 'rā neapekū ndejuru re ojapa aguã rami, ha'e kuery pe ndeayvu e'ŷ aguã. Ha'e ramo ijayvu e'ŷ va'e 'rā reiko remonheangu ve'ŷ ranhe aguã, mba'eta xere opu'ã rei va'ety ae ikuai.

**27** Ha'e rami teĩ ndereve xeayvu jevy vy aipe'a ju 'rā ndejuru ndeayvu aguã. Ha'e ramo ha'e kuery pe "Po rami SENHOR Nhanderuete ijayvu", 're 'rā. Ha'e ramo oenduxe va'e toendu, ha'e rā noenduxei va'e ma tove toendu eme, mba'eta xere opu'ã rei va'ety ae ikuai.

## 4

*Jerusalém tetā jokoarā ramigua oexaague*

<sup>1</sup> — Ha'e gui aŷ ndee ava ra'y, eru peteĩ yvy jykue, enhono imoiny nerенонde'i py, ha'e vy ha'e va'e re embopara Jerusalém tetā ra'angaarā.

<sup>2</sup> Ha'e va'e rovai emoi ijokoarā ra'angaa jovaive rupi, ejapo oo imbaraete va'e ra'angaarā, tetā kora re emopu'ā yvy ivā va'erā, jova-jovaive re ejapo xondaro kuery nhoarō aguā, ha'e ijyvýry rupi emoi tetā kora reityarā.

<sup>3</sup> Eru avi peteĩ oja ferro guigua, ha'e vy ndee ha'e tetā oña mbyte py emopu'ā imo'amy oja ferro guigua kora rami. Ha'e vy ema'ē einy tetā katy. Ha'e rami 'rā optya tetā ojokopy rami, ijokoarā remoi ramo. Ha'e va'e ma Israel kuery oikuaa aguā 'rā oī.

<sup>4</sup> — Ha'e gui ma enheno ejupy reiporu kuaa e'ŷa re, ndejee remoi aguā Israel kuery reko vaia. Renheno rejupya ára ha'e javi re ndere oī 'rā heko vaia.

<sup>5</sup> Mba'eta ndee romoi 'rā ha'e kuery reko vaia ma'etŷa kuaa ukaarā, peteĩ-teĩ ára renhenoa ma peteĩ ma'etŷ ovare aguā, ha'e javi vy trezentos e noventa ára peve. Ha'e rami rā ndejee meme 'rā rerekoo Israel kuery ojeavyague.

<sup>6</sup> Ha'e va'e ára opa ma rire reiporu kuaa regua re ju 'rā renheno rejupys, Judá kuery ojeavyague ju ndejee rerekoo aguā.

<sup>7</sup> Ha'e rami vy quarenta ára re ju ajapo 'rā renheno aguā rami, peteĩ-teĩ ára peteĩ ma'etŷ ovare aguā. Ha'e ramo Jerusalém tetā ojokoa katy rema'ē reiny 'rā ndejyva pire rei reve. Ha'e rami vy 'rā ndeayvu ete ha'e kuery rovai.

<sup>8</sup> Aŷ rojokua uka 'rā ixā py, hovai katy nei kylvõ katy rema'ē e'ŷ aguā, tetā ojokoa aguā ára opa e'ŷa ja.

<sup>9</sup> — Eru avi trigo ha'e cevada, kumanda ha'e kumanda pe'i. Emoi peteĩ oja py mbojaperā, trezentos e noventa ára re ndeyke re renheno peve re'u rejupys aguā.

<sup>10</sup> Opeja pyre anho 'rā re'u, duzentos e quarenta gramas 'rā ko'ē nhavō. Ha'eve jave-jave 'rā re'u.

<sup>11</sup> Ha'e gui yy voi oa'ā mbyre meme 'rā rey'u, peteĩ karo'i ha'eve jave-jave 'rā rey'u.

<sup>12</sup> Re'u va'e ma mbojape cevada guigua rami 'rā. Rexy 'rā avakue repoxi pirukue áry, heta va'e kuery oexaa py.

<sup>13</sup> Mba'eta ha'e rami ae 'rā Israel kuery ho'u okuapy tembi'u ha'eve'ŷ va'e, pavē regua ikuia rupi aipe'a ukaague py – he'i SENHOR.

<sup>14</sup> Ha'e ramo xee aipoa'e:

— Kore SENHOR Xeruete! Ma'ē, xekunumi guive aŷ peve xee nanhemongy'ai ae va'eri, mba'eta ha'u va'e'ŷ teri mymba omano rive va'ekue nei ka'aguy rupigua omondoropa pyre, xo'o nda'evei va'e xejuru py amoï e'ŷ aguā – ha'e.\*

<sup>15</sup> Ha'e ramo aipoe'i xevy:

— Ha'e ramo avakue repoxi 'rāgue py ha'eve 'rā vaka repoxi áry mbojape rembojy aguā – he'i.

<sup>16</sup> Aipoe'ive ju xevy:

— Ava ra'y, mba'eta ma'ē, Jerusalém tetā py ajapo 'rā tembi'urā ojoua ve'ŷ aguā rami. Ha'e kuery ho'u 'rā tembi'u opeja pyre nda'evei rei etea oendu reve, ha'e yy oa'ā mbyre oy'u 'rā okuapy ndaekorāveia reve.

<sup>17</sup> Ha'e kuery pe tembi'u ha'e yy oata ramo joexa vy rive onhemondyipa 'rā, gueko vai reia py opa jogueravy vy.

\* <sup>4:14</sup> Ezequiel ma avakue repoxi pirukue áry mbojape oexy aguā re SENHOR ijayvu, mba'eta tetā ojokoa jave heta va'e kuery ndojoui 'rā xakārā. Ha'e ramo Ezequiel ndojou porāi, mba'eta ha'e nunga áry oexy pyre nda'evei sacerdote kuery ho'u aguā, onhemongy'a e'ŷ aguā.

## 5

<sup>1</sup> — Ha'e gui ava ra'y, eru peteī kyxe haimbe porā va'e nerendyva ayaarā. Ha'e vy enhopīmba neakā ha'e nerendyva ha'e javi rupi. Eru avi mba'emo opejaa nde'ague repeja aguā. Repejaa rupi emboja'o mboapy henda py.

<sup>2</sup> Peteī henda py oī va'e ma reapy 'rā tetā mbyte py, ojokoa aguā ára opa ma rire. Ha'e rā amboae henda py nde'ague oī va'e ma reikutu 'rā kyxe py tetā yvýry. Ha'e rā amboae ju ma yvytu ombovevea rupi 'rā remoaīmba imondovy. Ha'e va'e kuery rakykue rupi aekyi uka 'rā kyxe.

<sup>3</sup> Ha'e gui mboapya regua amongue ete'i ma rejokua 'rā ndeo apy'i re.

<sup>4</sup> Ha'e va'e regua gui ae ju remombo 'rā tata py okai aguā. Ha'e va'e gui ma tata oē 'rā Israel kuery ha'e javi rovai.

*Mba'e re pa Jerusalém tetā SENHOR ojoko uka 'rāa re ijayvuague*

<sup>5</sup> Ha'e gui SENHOR Nhanderuete po rami ijayvu:

— Jerusalém tetā upe py oī va'e ramigua ma yvy regua mbyte py amoī va'ekue, ha'e ijyvýry rupi ikuai va'e yvy mbyte.

<sup>6</sup> Ha'e rami teī ha'e kuery xee aipota va'e rovai opu'ā vy yvy regua kuery gui voi ojapo vaive tema okuapy, ha'e oyvýry rupi ikuai va'e gui omboykepave xeayvu aeja va'ekue. Hexaraipa okuapy xee aipotaa gui, xeayvu rupi nda'ikuai guive.

<sup>7</sup> Ha'e nunga rupi po rami SENHOR Nhanderuete ijayvu:

— Peē kuery ma amboae regua pendeyvýry rupi ikuai va'e gui pepu'āve xerovai, ndapejapoxei guive xee aipotaa rami, neī amboae kuery pendeyvýry rupi ikuai va'e reko ndapeupityi.

<sup>8</sup> Ha'e nunga rupi xee, xee ae ju 'rā aiko nderovai guarā — he'i SENHOR Nhanderuete. — Ha'e rami vy penembyte py rombopaga 'rā yvy regua kuery oexaa py.

<sup>9</sup> Ojeguarupy pejapoa ha'e javi káuxa penembyte py ajapo 'rā peteīgueve ajapo e'ŷ teri va'e, ha'e neī ndajapovei 'rā va'e.

<sup>10</sup> Ha'e rami rā penembyte py tuu kuery ho'u 'rā okuapy gua'y kuery ae, ha'e ta'y kuery ho'u 'rā nguu kuery ae. Penembyte py rombopaga 'rā, ha'e gui penderegua hembyre va'ekue ma amoāīmba 'rā imondovy yvytu ha'e javi rupi.

<sup>11</sup> Ha'e nunga rupi anhetē ete xee SENHOR Penderuete xee ae rekove rupi aura vy aipoa'e: Xevygua oo iky'a e'ŷ va'e pemongy'apa rei rire mba'emo vai pejapo ha'e ojeguarupy pembojeroviaa py, ha'e ramo xee nama'ēvei 'rā pendere romboaxya rupi, ndorogueraa jepoi 'rā guive.

<sup>12</sup> Ha'e ramo pende kuery regua peteī henda py pemano 'rā mba'eaxy vaikue gui, ha'e penembyte py pekanhymba 'rā karuai gui. Ha'e rā amboae henda py ma pendeyvýry rupi pe'a 'rā pekuapy kyxe gui. Ha'e gui amboae henda py ju romoaīmba 'rā yvytu ha'e javi rupi, ha'e vy penderakykue rupi aekyi uka 'rā kyxe.

<sup>13</sup> — Ha'e rami vy 'rāe xepoxya oaxa. Ha'e kuery re xepoxya amboupa ma rire “Ha'eve ma” ha'e 'rā apytu'u vy. Ha'e ramo oikuaapa 'rā xekyre'ŷa rupi xeayvuague, ha'e kuery áry ambou ramo.

<sup>14</sup> Mba'eta ombovaipa pyre rami romoī 'rā yvy regua pendea katy'i rupigua kuery pendejojai aguā, oaxa va'e kuery ha'e javi oexaa py.

<sup>15</sup> Ha'e rami rā pepyta 'rā ombojaru rei ha'e ojojai pyrā, yvy regua kuery pendea katy'i ikuai va'e oikuaa vy onhemondyipa aguā, mba'eta rombopaga 'rā xepoxya ha'e rojou viai rupi, opa marā romoingo axya py, po rami xee SENHOR ae xeayvu rire.

<sup>16</sup> Ha'e kuery rovai ma hu'y rami ambou 'rā karuai. Hu'y nhomombaarā ambou 'rā penemomba aguā. Ha'e rami vy karuai amoīve ju 'rā peē kuery re, peē kuery gui mbojape pe'u 'rā va'ekue aipe'apa vy.

**17** Peẽ kuery re ambou 'rã karuai ha'e mymba nharõ penderajy kuery mokanhymbaarã. Pendere ou 'rã mba'eaxy vaikue ha'e tuguy moëarã. Kyxe reveguia voi ambou 'rã pendere. Xee SENHOR ae xeayvu.

## 6

### *Israel kuery mba'emo ra'angaa re rive ojerovia okuapya re ijayvuague*

**1** Ha'e gui ma xevy pe SENHOR ombou ju oayvu. Ha'e vy aipoe'i:

**2** — Ava ra'y, ema'ẽ Israel regua yvyty ikuaria katy, ha'e kuery re ndeayvu aguã. Ha'e vy aipo're:

**3** Israel regua yvyty pendekuai va'e, pendu ke SENHOR Nhanderuete ayvu. Po rami SENHOR Nhanderuete ijayvu yvyty, yvy'ã, yakã ha'e yvyugua ikuai va'e pe:<sup>\*</sup> Aÿ xee, xee ae ambou 'rã kyxe peẽ kuery re, pende'áry ta'angaa ombojeroviaaty ikuai va'e mbovaipaarã.

**4** Ha'e ramo pende altar ombovaipaa 'rã, ha'e altar heakuã porã va'e rapyaty ikuai va'e voi omopẽmbaa 'rã. Kyxe py ajuka uka va'ekue aejapa 'rã imbokuapy ta'angaa ombojeroviaague renonde rupi ae.

**5** Ta'angaa ikuai va'e renonde rupi aeja 'rã Israel kuery retekue, ha'e rã ikãgue ma amoãmba 'rã altar ombojeroviaague renonde rupi.

**6** Ha'e gui tekoia ha'e tetã pendekuaiague ha'e javi rupi omombaa 'rã, ta'angaa pembojeroviaague ombovaipaa 'rã, altar pembojeroviaague ha'e javi oitya ha'e ombovaipaa aguã, ha'e ta'angaa voi omopẽmbaa ha'e omombaa aguã. Altar heakuã porã va'e peaptyy voi oipe'apaa 'rã, penerembiapokue ha'e javi ombovaipaa 'rã.

**7** Ha'e gui penembyte rupi kyxe py ojuka pyre ho'apa 'rã, xee ae SENHOR aikoa peikuaa aguã.

**8** — Ha'e rami avi aeja 'rã hembyrekue'i, mba'eta peẽ kuery regua amongue ete'i 'rã oo jepe kyxe gui yvy regua kuery ikuaria rupi, ha'e kuery yvy rupi romoaĩ jave.

**9** Ha'e gui amboae kuery yvy rupi escravo-rã ogueraa ague py oo jepe va'ekue ima'endu'a ju 'rã xere. Mba'eta xee ma nda'evei ete aiko opa marã pendepy'aa rupi xegui pejepe'a ramo, ha'e penderexa ta'angaa anho rive oexaxe rã xegui pejepe'a ramo. Ha'e gui ma ha'e kuery ojeguaru 'rã ojegui ae, opa marã ikuaria rupi nda'evei ete va'e ojapoague re.

**10** Ha'e rami vy ma ha'e kuery oikuua 'rã xee ae SENHOR aikoa, mba'eta ha'e kuery re mba'emo vai ambou aguã re ndaxeayvu rivei.

**11** Po rami SENHOR Nhanderuete aipoe'i xevy:

— Ejepopete ke, embota-mbota ndepy, ha'e vy aipo're: “Nda'evei teve, mba'eta Israel kuery opa marã ojeguarupy ojapoague re ho'apa 'rã kyxe py, karuai ha'e mba'eaxy vaikue gui”, 're.

**12** Mba'eta mombyry rupi ikuai va'e omano 'rã mba'eaxy vaikue gui, ha'e rã ha'e'i rupigua ma kyxe py 'rã omano. Ha'e gui amongue hembyrekue ma ojokoa rã omano 'rã karuai gui. Ha'e rami vy 'rãe ha'e kuery pe xepoxyague oaxa.

**13** Ha'e ramo peikuaa 'rã xee ae SENHOR aikoa, peẽ kuery regua ta'angaa mbyte rupi kyxe py ojuka pyre ikuai ramo, ha'e altar ikuai va'e yvýry rupi, yvy'ã ha'e yvyty apyte ikuai va'e ha'e javi rupi, ha'e yvyra hogue ana ha'e yvyra porãgueve ikuai va'e guy rupi, mba'eta ha'e rupi ae opa marãguia ta'angaa pe heakuã porã va'e peme'ëaty ikuai.

**14** Ha'e nunga áry rupi xepo amoĩ vy ambovaipa 'rã yvy tekoia e'ÿa guive Ribla peve, tekoia ikuaiague ha'e javi rupi nda'ikuaiavei aguã. Ha'e ramo peikuaa 'rã xee ae SENHOR aikoa.

## 7

### *“Opa ta ma! Opa ta ma!” he'iague*

\* **6:3** Israel regua yvyty, yvy'ã, yakã ha'e yvyugua ikuai va'e pe Nhanderuete ijayvu mba'eta ha'e va'e rupi ma ikuai mba'emo ra'angaa mbojeroviaaty.

**1** Tēgue ju SENHOR oayvu ombou xevy. Ha'e vy aipoe'i:

**2** — Ava ra'y, po rami SENHOR Penderuete ijayvu Israel kuery yvy re: Opa ta ma! Irundy henda rupi ha'e ijyvy apy rupi ikuia peve 'rā ou opa aguā.

**3** Ha'e rami vy aŷ ma ou ma pepa aguā ára. Mba'eta pendere ambou 'rā xepoxya, rombopaga 'rā pendekuaiague re, pendere ambou 'rā ojeguarupy rupi pendekuaiague rekovia.

**4** Mba'eta pendere nama'ēvei 'rā rogueraa jepea rupi nēi romboaxya rupi. Ha'e rami 'rāgue py pendere ambou 'rā pendekuaiague rekovia, ha'e ojeguarupy rupi pendekuaiague ojekuaapa 'rā penembyte. Ha'e ramo peikuua 'rā xee ae SENHOR aikoa.

**5** Po rami SENHOR Nhanderuete ijayvu:

— Ma'ē, mba'emo vai ou-ouve tema 'rā.

**6** Ovaē ta ma opa aguā, ou ma oiny, opu'ā ma penderovai.

**7** Yvy regua kuery, ou ma pekanhy aguā. Ovaē ma ára, yvyty ikuai va'e áry rupi vy'aa 'rāgue py ovaē ma opa marā ipy'aa aguā.

**8** Aŷ pende'áry anhoē ta xepoxya, roguereko 'rā xepoxya rupi. Aikuua pota 'rā pendekuaiague re, ha'e pende'áry ambou 'rā ojeguarupy rupi pendekuaiague rekovia ha'e javi.

**9** Ha'e rami vy pendere nama'ēvei 'rā rogueraa jepea rupi, nēi romboaxya rupi. Pendekuaiague re ae 'rā rombopaga. Ha'e ramo ojeguarupy rupi pendekuaiague ojekuaapa 'rā penembyte. Ha'e ramo peikuua 'rā xee SENHOR ae ajapoague.

**10** — Ma'ē, ára ovaē ma ouvy. Ojekuaa ma rombopagapa aguā, mba'eta yvyra rovi'i ipotypa ma, onhemboyvate reia voi hokypa ma.

**11** Jojukaa kuery opu'ā ma yvyra rovi'i nhombojexavaiarā. Ha'e ramo mba'eve nōvei ma ha'e kuery peguare, imba'e rei-reikue, ha'e kuery re ima'endu'aague, nēi oguerovy'aa ague ma voi.

**12** Mba'eta hi'ára ou ma oiny, ovaē ae ma. Ha'e nunga rupi mba'emo joguaa tovy'a eme, ha'e rā mba'emo vendea ma ta'iporiau eme. Mba'eta ha'e kuery ha'e javi re ou poxya hendi va'e.

**13** Mba'eta yvy vendearre ma ndojevyvei ma 'rā ovende va'ekue oiporu ju aguā, oikove'i tēi ae ma. Mba'eta ndoiko e'ŷi 'rā heta va'e kuery regua ayvu omombe'u pyre. Ha'e ramo avave rei ndoiko pukuvei 'rā gueko vaia py onhemombaraetea rupi.

**14** — Omonhe'ēa ma mimby guaxu, oguereko katupaa ma tēi joe opu'ā aguā katy ndooai 'rā, mba'eta ha'e kuery ha'e javi re ou xepoxya hendi va'e.

**15** Oka rupi ma kyxe revegua ikuai, ha'e rā opy ma mba'eaxy vaikue ha'e karuai ōi. Mba'ety rupi oiko va'ekue ojukaa 'rā kyxe py, ha'e rā tetā pygua kuery ma karuai ha'e mba'eaxy vaikue gui 'rā opa.

**16** Xapy'a rei ha'e kuery regua amongue ojava vy oo jepe 'rā. Ha'e rami vy yvyty áry rupi 'rā ikuai, yvyugua rupigua apykaxu rami petēi-tēi ipoāē rei 'rā ojejavyague gui.

**17** Pavē po ma ikangypa 'rā, ha'e pavē renapy'ā ma yy ramo meme 'rā ikangy.

**18** Ajukue voxua guigua py onhemonde 'rā okuapy tekorā vēy anho oendu vy. Ha'e javi rova re ojekuaa 'rā oxia, oakā voi onhopimba 'rā.

**19** Ha'e kuery prata oguereko va'ekue ma omombopa 'rā tape rupi, ouro eteve voi ha'e kuery pe rā iky'apa va'e rami 'rā. Mba'eta SENHOR poxya ára py ma prata nēi ouro ma voi ndogueraa jepei 'rā. Ha'e nunga py nda'eveei 'rā ha'e kuery okaru nēi guye omonyē aguā, mba'eta ha'e nunga ma teko vai py ho'a aguā imonhepyxangaarā rive.

**20** Ha'e kuery ita porāgueve oguerovy'a rei va'e py ma ta'angaa ojeguaru pyrā ojapo va'ekue, mba'emo vai ra'angaa ombojerovia pyrā guive.

**21** Ha'e rami tēi xee ma ha'e nunga ajapo iky'apa va'e rami ha'e kuery pe opyta aguā rami, ha'e gui amboae regua kuery po py amboaxapa ogueraa rive va'erā. Yvy regua heko vai rei va'e kuery pe ete amboaxa ogueraa va'erā. Ha'e ramo ojavyky rei 'rā.

<sup>22</sup> Ha'e kuery gui xerova arova rã omongy'apaa rive 'rã xembojeroviaaty. Ha'e py imongy'aarã kuery oike vy oipe'apa 'rã mba'emo.

<sup>23</sup> — Tojapoа corrente jojokuaarã, mba'eta kova'e yvy tynyẽ ma jouguy omoõa va'ekue. Tetã rupi voi opa mba'e vai anho oĩ.

<sup>24</sup> Ha'e ramo yvy regua mbyte gui ambou 'rã heko vaive va'e hoogue pe'aarã. Ha'e rami vy amomba 'rã ojerovia rei va'e kuery onhemboyvatea. Ha'e ramo ha'e kuery pegua henda iky'a e'ŷ va'ekue omongy'apaa 'rã.

<sup>25</sup> Ovaẽ ma imbovaipaarã. Ha'e ramo ha'e kuery oeka 'rã ikuai porã aguã teĩ noïvei ae ma.

<sup>26</sup> Ou 'rã imbojexavaiarã ha'e ayvuxe áry jevy-jevygua. Ha'e ramo oporandu 'rã okuapy profeta kuery mba'emo oexaa re, teĩ sacerdote kuery ndoguerekovei lei, ha'e nhomongeta va'ety kuery nanhomongeta kuaavei 'rã.

<sup>27</sup> Huvixave ojae'o 'rã oiny, yvatekueve re voi oĩ 'rã tekorã ve'ŷ. Yvy re ikuai va'e po ma oryryipa 'rã ngyje gui. Mba'eta ambopaga 'rã ha'e kuery ikuaiague rami ae, ha'e aikuaa pota 'rã ha'e kuery re joe oikuuaa potaa rami ae avi. Ha'e ramo oikuuaa 'rã xee ae SENHOR aikoa.

## 8

### *Jerusalém py ojeguarupy ikuai va'e oexaague*

<sup>1</sup> Ha'e gui mboapy meme ma'etŷa va'e mboapy meme jaxyä py, teĩ nhiruĩ araa py xero py aguapy ainy. Xerenonde py Judá pygua nhomongeta va'ety kuery oguapy avi okuapy. Ha'e gui aĩa py SENHOR Nhanderuete omboguejy opo xe'áry.

<sup>2</sup> Ha'e ramo ama'ẽ rã oĩ peteĩ ava ramigua tata guigua. Iku'a guive yvy katykue ma tataendy anho oĩ. Ha'e rã iku'a guive yvate katykue ma overa va'e rami hexakã.

<sup>3</sup> Opo ramigua oguereko va'e ma omokuave'ẽ vy ojopy xeakã re xe'a oĩ va'e. Ha'e rami vy yvate katy Nhe'ẽ xereupi heravy yvy áry rupi. Ha'e vy Nhanderuete guigua aexa rã xereraa Jerusalém tetã re, templo roka py okẽ kuaray apu'a'ia katy oĩ va'e peve. Ha'e py ma oĩ ra'e ta'angaa Nhanderuete nda'evei etea oendu aguã rami ojapo va'e.

<sup>4</sup> Ha'e py ojekuaa avi Israel kuery ruete rexakãa, tekoa e'ŷa py hexakãa aexaague rami ae ju.

<sup>5</sup> Ha'e gui ha'e va'e aipoe'i:

— Ava ra'y, ema'ẽ ke aŷ kuaray apu'a'ia katy — he'i. Ha'e ramo ha'e katy ama'ẽ rã altar rokẽ katy oĩ ae tema ta'angaa Nhanderuete nda'evei etea oendu aguã rami ojapo va'e, jaikea'i py.

<sup>6</sup> Aipoe'ive ju xevy:

— Ava ra'y, rexa pa ha'e kuery ojapo okuapy va'e? Ha'e va'e ma ojeguarupy tuvixa va'e Israel kuery apy ojapo va'e, xevygua oo iky'a e'ŷ va'e gui ajep'e a aguã rami. Ha'e rami avi rexa ju 'rã ojeguarupy nda'eveive va'e — he'i.

<sup>7</sup> Ha'e gui okẽ jaikea'i katy ju xereraa. Ha'e py oo imbotya oĩ va'e re oĩ peteĩ kua. Ha'e vy aipoe'i xevy:

— Ava ra'y, ejo'o pova'e imbotya re.

<sup>8</sup> Ha'e ramo imbotya re ajo'o ma vy ama'ẽ rã oĩ peteĩ okẽ.

<sup>9</sup> Aipoe'i xevy:

— Eike na, ha'e vy rexa 'rã ojeguarupy tuvixa va'e ha'e py ojapo okuapy va'e — he'i.

<sup>10</sup> Ha'e gui aike vy aexa. Ha'e rã ha'e py imbotya jova-jovaive rupi iparapa ra'e opa marãguia yvy rupi otytyry va'e ha'e mymba ojeguarupy, ha'e gui ta'angaa Israel kuery ombojerovia va'ety ha'e javi.

<sup>11</sup> Ha'e va'e ta'angaarã ombopara pyre renonde rupi opu'ã okuapy setenta avakue Israel kuery mongetaa kuery regua. Ha'e kuery mbyte py hi'aĩ avi Safã ra'y Jazanias. Ha'e

kuery peteĩ-teĩ opo py oguereko heakuã porã va'e hy'a'i py okai va'e. Heakuã porã va'e rataxã ma ojeipi ovy arai rami.

<sup>12</sup> Ha'e gui aipoe'i xevy:

— Ava ra'y, rexpa pa Israel kuery mongetaa kuery pytû guy rupi ojapo okuapy va'e? Ha'e kuery peteĩ-teĩ ikuai 'rã oo'i ta'angaa kuery oïaty rupi. Mba'eta ha'e kuery aipoe'i: "SENHOR ma nanhanderexai 'rã, nopenavei ma kova'e yvy re", he'i okuapy teĩ.

<sup>13</sup> Ha'e gui aipoe'ive ju xevy:

— Rexave tema 'rã ojeguarupy nda'eveive va'e ha'e kuery ojapo okuapy va'e – he'i.

<sup>14</sup> Ha'e gui xereraa ju SENHOR pegua oo rokẽ kuaray apu'a'ia katy oï va'e peve. Ha'e py aexa tuuete ramigua Tamuz omanoague re kunhague oguapy reve ojae'o okuapy va'e.\*

<sup>15</sup> Ha'e vy aipoe'i:

— Ava ra'y, rexpa pa? Ha'e rami avi ojeguarupy rexave ju 'rã kova'e gui nda'eveive va'e – he'i.

<sup>16</sup> Ha'e gui ma SENHOR pegua oo katy ju xereraa. Ha'e py ikuai SENHOR pegua opy oikea'i okẽ ha'e altar oï va'e mbyte aexa rã vinte e cinco avakue ikuai. Ha'e kuery ma ikupepa okuapy SENHOR pegua templo katy, ha'e gui kuaray oua katy hova okuapy. Kuaray omboetea rupi ikuai, kuaray oua katy oma'ẽ okuapy reve.

<sup>17</sup> Ha'e ramo aipoe'i xevy pe:

— Ava ra'y, rexpa pa? Ha'e gui Judá kuery ma apy namigua ojeguarupy ojapo va'e pe "Mba'e'ý" he'i okuapy, ha'e gui oyvy rupi joguero'a 'rã okuapy xembopoxya rupi. Ma'ẽ, oxí re omovaẽ okuapy yvyra rakã'i.

<sup>18</sup> Ha'e ramo xepoxya rupi ae 'rã areko. Ha'e kuery re nama'ẽvei 'rã araa jepea rupi neĩ amboaxyo rupi. Ha'e gui xeapyxa py ha'e kuery ojapukai atã teĩ xee naendu potai 'rã.

## 9

### *Jerusalém pygua kuery mbopagaarã re ijayvuague*

<sup>1</sup> Ha'e ramo aendu rã ojapukai atã reve aipoe'i:

— Peju ke, peẽ tetã pygua jukaarã kuery, peteĩ-teĩ pendepo py tembiporu nhomombaaraã reve – he'i.

<sup>2</sup> Ha'e ramo ama'ẽ rã kuaray apu'a'ia katy okẽ tuvixa va'e oï va'e gui ou okuapy mboapy meme avakue. Ha'e kuery ma peteĩ-teĩ opo py ogueru tembiporu nhomombaaraã. Ha'e kuery mbyte ma ou peteĩ ava ijaõ xiõ rei va'e, oku'a re oguereko voko mba'emo mboparaaty ryru. Ha'e gui ha'e kuery oike oje'oivy vy altar overa va'e guigua yvy'iry ovaẽ nhogueno'amy.

<sup>3</sup> Ha'e gui ma Israel kuery ruete rexakãa opu'ã ov yvy anjo ipopo va'e ikuai va'e mbyte gui. Ha'e vy oẽ ov yvy okẽ jaikea'i peve ranhe. Ha'e gui ava ijaõ xiõ rei va'e pe SENHOR ijayvu, mba'emo mboparaaty ryru oku'a re oguereko va'e pe ae.

<sup>4</sup> Ha'e vy aipoe'i ixupe:

— Eaxa ke eovy Jerusalém tetã mbyte rupi, ha'e gui emoi "x" avakue ha'e kuery mbyte rupi ojeguarupy ojapo okuapya káuxa ojae'o ha'e ipoaẽ rei va'e rova re – he'i.\*

<sup>5</sup> Ha'e gui xee aendua py amboae kuery pe ju aipoe'i avi:

— Peẽ voi peaxa ke peovy tetã rupi ha'e va'e rakykue rupi. Ha'e rami vy pejojuka 'rã peovy. Ha'e kuery re pema'ẽ eme peraa jepea rupi neĩ pemboaxyo rupi.

<sup>6</sup> Pejuka 'rã tujakue'i, kunumigue ha'e kunhataigüe'i, kyrigüe'i ha'e kunhague, pemomba peve. Ha'e rã avakue "x" py omarka pyre re ma napevaëi 'rã. Pemboypy 'rã xevygua oo iky'a e'ý va'e gui ranhe – he'i.

\* <sup>8:14</sup> Tamuz ma amboae regua kuery ruete ramigua. Ha'e kuery oikuaa rã ma'etý nhavõ omano 'rã yro'y ypy'i jave, ha'e gui ára pyau py onhemboete kuerei 'rã. Imbojeroviaa kunhague ma ojae'o 'rã okuapy omano rã, ha'e opa marã 'rã itavy rei okuapy onhemboete ju aguã. \* <sup>9:4</sup> Apocalipse 7.3

<sup>7</sup> Ha'e ramo ha'e kuery jypy ojuka oo renonde rupi nhomongeta va'ety kuery ikuai va'ekue. Ha'e gui jojukaa kuery pe Nhanderuete aipoe'ive ju:

— Pemongy'apa ke oo. Ha'e vy pemonyē oka omanogue anho. Ha'e gui ma peē ju — he'i. Ha'e ramo oẽmba vy jojukave jogueravy tetā rupi.

<sup>8</sup> Ha'e gui ha'e kuery jojukaa rupi oje'oi jave xee ae'i apyta ha'e py. Ha'e rami vy xerenapy'ã re aĩ, xerova yvy re amovaẽ reve. Ha'e vy ajapukai reve aipoa'e:

— Ai SENHOR Xeruete! Remomba ta pa Israel regua kuery rembyrekue ha'e javi, Jerusalém áry ndepoxya renhoẽa py?

<sup>9</sup> Ha'e ramo xembovai:

— Israel ha'e Judá kuery reko vaia ma tuvixa ete. Ijyvy tynyẽ ma tuguy, ha'e tetā rupi voi ha'eve'ýa rami joguerekoa anho ikuai. Ha'e rami teĩ ha'e kuery aipoe'i: “SENHOR ma kova'e yvy re nopenavei ma, nanhanderexai ae 'rã”, he'i okuapy.

<sup>10</sup> Ha'e nunga rupi ae ha'e kuery re nama'ẽvei 'rã araa jepea rupi neĩ amboaxya rupi. Ha'e rami 'rãgue py ha'e kuery akã re ae ambojeapa 'rã hembiapokue — he'i.

<sup>11</sup> Ha'e gui ava ijao xiĩ rei va'e ou, oku'a re mba'emo mboparaaty ryru oguereko va'e. Ha'e rami vy omombe'u vy aipoe'i:

— Ajapopa ma rejapo uka va'ekue — he'i.

## 10

### *Tapyĩ hexakã va'e oexaague*

<sup>1</sup> Ha'e gui ama'ẽ rã anjo ipopo va'e kuery akã áry rupi ojekuaa peteĩ tenda huvixave openaaty ramigua ita safira gui ojapo pyre.

<sup>2</sup> Ha'e ramo SENHOR ijayvu ava ijao xiĩ va'e pe. Ha'e vy aipoe'i:

— Tereo iruéra ikuai va'e mbyte rupi, anjo ipopo va'e ikuai va'e mbyte peve. Ha'e vy emonyē ndepo tapyĩ hexakã va'e anjo ikuiai gui. Tetā áry rupi remombopa 'rã — he'i. Ha'e ramo ha'e va'e oike ov y aexaa gui.

<sup>3</sup> Ava oike jave ma anjo ipopo va'e templo yke oiporu kuaa regua re ikuai. Ha'e gui peteĩ arai omonyē opy ja'o mbyte pygua.

<sup>4</sup> Ha'e ramove anjo ikuai va'e áry gui SENHOR rexakãa opu'ã ov y oo jaikea'i oĩ va'e katy. Ha'e ramo oo ha'e javi rupi tynyẽ jekuaa arai. Oka rupi voi hexakãmba oiny SENHOR po'akaa gui.

<sup>5</sup> Anjo kuery pepo ma hevovo rei nhendu oka apy peve, Nhanderuete Ipo'akapa va'e ijayvu vy onhendua rami.

<sup>6</sup> Ha'e gui ma ava ijao xiĩ rei va'e pe SENHOR ijayvu. Ha'e vy aipoe'i:

— Eru tata iruéra ikuai va'e mbyte gui, anjo kuery ikuiai gui ae — he'i. Ha'e ramo ha'e oike vy iruéra ikuai va'e mbyte hi'aĩ.

<sup>7</sup> Ha'e ramo peteĩ anjo okuave'ẽ anjo kuery mbyte tata oĩ va'e katy. Ha'e va'e oguenoẽ vy ma ava ijao xiĩ va'e po py omoĩ. Ha'e va'e ju ojopy vy oẽ ov y.

<sup>8</sup> Anjo ikuai va'e ma avakue po ramigua oguereko opepo guýry.

### *Irundy iruéra oexaague*

<sup>9</sup> Ha'e gui ama'ẽ rã anjo ikuai va'e yvýry ikuai irundy ruéra.\* Peteĩ-teĩ anjo ikuai va'e yvýry ma iruéra ikuai. Iruéra ikuai va'e jaexa rã itaendy berilo rami hexakãmba.

<sup>10</sup> Irundyve jaexa rã joo rami meme ojekuaa. Jaexa rã peteĩ-teĩ ruéra amboae ruéra mbyte rupi joaxa oiny.

<sup>11</sup> Iruéra oguata vy ha'eve rei irundyve katy rei oo aguã. Amboae katy ova-ova e'ŷ re oguata ov y. Tenondegua ooa rupi tema amboae kuery voi oje'oi 'rã, amboae katy ndovai guive oguata oje'oivya rupi.

\* **10:9** Ezequiel 1.5-25

12 Anjo ikuai va'e rete ha'e javi rupi hexa oïmba rei, ikupe, ipo ha'e ipopo ikuai va'e re guive, ha'e iruéra irundyve ikuai va'e re voi.

13 Iruéra ikuai va'e pe ma xee aendu rã "Opyryryĩ va'e" 'ea.

14 Temimoingo kuery peteĩ-teĩ ma hova irundy va'e. Jypygua hova ma anjo rova ae, mokoña ma ava rova, mboapya ma guary rova, ha'e rã hova irundaya ma taguato rova.

15 Ha'e gui anjo ikuai va'e ojeupive'i. Ha'e va'e kuery ma temimoingo kuery Quebar yakã yvýry jypy aexa va'ekue ae.\*

16 Ha'e gui anjo kuery oguata rã iruéra ikuai va'e voi oje'oi avi 'rã ha'e kuery reve. Anjo kuery ma yvy áry ojeupi aguã opepo oupi okuapy teĩ ha'e kuerya gui iruéra ikuai va'e ndoi.

17 Anjo kuery optya ramo iruéra optya avi. Ojeupi jogueravy ramo iruéra ojeupi avi 'rã, mba'eta iruéra ikuai va'e re oĩ temimoingo kuery nhe'ẽ.

### *Templo gui Nhanderuete rexakãa ojepe'aague*

18 Ha'e gui SENHOR rexakãa ma oo jaikea'i áry oĩa gui ova ov y vy anjo kuery áry rupi ju optya.

19 Ha'e gui xee aexa rã anjo kuery opepo oupipa okuapy reve ojeupi yvy gui. Ha'e kuery oje'oi rã iruéra ikuai va'e voi oje'oi avi hexeve. Optyapa okuapy SENHOR pegua oo rokẽ kuaray oua katy oĩ va'e áry. Ha'e kuery áry rupi ma Israel kuery ruete rexakãa ojekuaa oiny.

20 Ha'e va'e kuery ae temimoingo Israel kuery ruete oĩa guy rupi aexa va'ekue, Quebar yakã yvýry. Ha'e ramo mae aikuaa anjo ipopo va'e ikuiaia.

21 Ha'e kuery peteĩ-teĩ ma irundy hova ha'e irundy ipopo va'e. Ha'e rã opepo guýry ma avakue rami ipo va'e.

22 Ha'e kuery rova ma Quebar yakã yvýry aexa va'ekue rova rami. Joo rami ae ojekuaa, temimoingo kuery ae vy. Ha'e peteĩ-teĩ ma guenonde katy anho 'rã oguata oje'oivy.

## 11

### *Nhanderuete yvatekueve omnopaga aguã re ijayvuague*

1 Ha'e gui ma Nhe'ẽ xereupi vy xereraa SENHOR pegua oo rokẽ kuaray oua katy oĩ va'e py. Okẽ jaikea'i py ikuai vinte e cinco avakue. Ha'e kuery mbyte aexa heta va'e kuery regua yvatekueve Azur ra'y Jaazanias ha'e Benaia ra'y Pelatias.

2 Ha'e vy SENHOR aipoe'i xevy:

— Ava ra'y, kova'e avakue ma mba'emo vairã re rive jogueroayvu, ha'eve'ŷa rupi nhomongoeta okuapy kova'e tetã py.

3 Mba'eta ha'e kuery aipoe'i okuapy: "Novaẽi teri ri ty'y oorã jajapo aguã? Mba'eta kova'e tetã ma oja rami oĩ, ha'e rã nhande kuery ma xo'o rami", he'i okuapy.\*

4 Ha'e nunga rupi ndeayvu 'rã ha'e kuery rovai. Ndee ava ra'y ae 'rã ndeayvu – he'i.

5 Ha'e gui xe'áry peve SENHOR Nhe'ẽ oguejy vy aipoe'i xevy:

— Emombe'u ke: Po rami SENHOR ijayvu: Israel kuery, nami ae pendeayvu pekuapy, mba'eta mba'emo re penhembopy'aa ma xee aikuaapa ae ma.

6 Kova'e tetã rupi heta ma pejuka, ha'e tetã regua tape ikuai va'e rupi pemonyẽ ma tetekue.

7 Ha'e nunga rupi Nhanderuete aipoe'i: Pejuka ha'e tetã mbyte rupi pemombo va'ekue ae rima xo'o rami, ha'e rã tetã ma oja rami oĩ. Ha'e rã peẽ kuery ma roipe'apa 'rã ha'e gui.

\* 10:15 Capítulo 1 py "Temimoingo kuery aexa" he'ia ma anjo ipopo va'e kuery re ijayvu vy, Nhanderuete po'akaa kuaa ukaa. \* 11:3 Ha'e rami ijayvu okuapy ojee anho ojeroviaa rupi, Nhanderuete omomba ta maa ndogueroviai vy. Tetã pe "Oja" he'i mba'eta oexa'ã teĩ tetã kora mba'emo vai ojoko aguã re.

<sup>8</sup> Kyxe gui pekyje pekuapy va'eri kyxe ae 'rã ambou peẽ kuery re – he'i SENHOR Nhanderuete.

<sup>9</sup> – Tetã mbyte gui xee roipe'a vy romboaxapa 'rã amboae regua kuery po py. Ha'e rami py 'rã rombopaga.

<sup>10</sup> Ha'e ramo pendereitya 'rã kyxe py. Israel yvy jave rupi 'rã rombopaga. Ha'e ramo peikuua aguã xee ae SENHOR aikoa.

<sup>11</sup> Ha'e gui kova'e tetã ma oja rami e'ŷ 'rã oĩ peẽ kuery pe, ha'e tetã mbyte py xo'o rami e'ŷ 'rã pendekuai. Mba'eta rombopaga 'rã Israel yvy jave rupi.

<sup>12</sup> Ha'e ramo 'rã peikuua xee ae SENHOR aikoa. Mba'eta xeayvuague rupi e'ŷ pendekuai, xee aipotaa ndapejapoi guive. Ha'e rami 'rãgue py amboae regua kuery pendeyvýry rupi ikuai va'e oipotaa rupi rive pendekuai – he'i.

<sup>13</sup> Ha'e gui xeayvu teri reve Benaia ra'y Pelatias omano xapy'a. Ha'e ramo xerenapy'ã re aĩ, xerova yvy re amovaẽ reve. Ha'e vy ajapukai atã reve aipoa'e:

– Ai SENHOR Xeruete! Israel kuery ha'e javi ri ty'y remomba ta? – ha'e.

### *Israel kuery ogueru ju aguã re ijayvuague*

<sup>14</sup> Ha'e gui xevy SENHOR oayvu ombou vy aipoe'i:

<sup>15</sup> – Ava ra'y, nderyvy kuery, neretarã kuery ae'i, ha'e Israel kuery ha'e javi pe Jerusalém pygua kuery aipoe'i okuapy: “Peẽ kuery ma SENHOR gui pejepé'apa mombyrya py. Ha'e rã orevy pe ma kova'e yvy ome'ẽ orekuai aguã”, he'i okuapy.

<sup>16</sup> Ha'e nunga rupi aipo're: Po rami SENHOR Nhanderuete ijayvu: Ha'e kuery ma mombyry aipe'a amboae regua ikuiaia rupi, ha'e amboae yvy rupi amoã teĩ ha'e kuery pe xee ae aiko 'rã oo iky'a e'ŷ va'erã, yvy mboae rupi ooague py xapy'a'i ikuiaia ja.

<sup>17</sup> Aipo'reve ju: Po rami SENHOR Nhanderuete ijayvu: Xee amono'õmba ju 'rã amboae regua kuery ikuiaia mbyte gui, arupa ju 'rã yvy araa ukaague gui. Ha'e rami vy ha'e kuery pe ae ju 'rã ame'ẽ Israel yvy.

<sup>18</sup> Ha'e py ojevypa ju ma vy ha'e gui oipe'apa 'rã ta'angaa ojou vaipy ha'e ojeguarupy oguerekva'ekue ha'e javi.

<sup>19</sup> Ha'e ramo ha'e kuery pe ame'ẽ 'rã peteĩ'i rami ipy'a aguã, ha'e kuery re amoã 'rã nhe'ẽ pyau. Ha'e kuery gui amboi 'rã ikuraxõ ita guigua, ha'e hekivia ame'ẽ 'rã kuraxõ ho'o guigua,

<sup>20</sup> xeayvua rupi ju ha'e kuery ikuai aguã, ha'e xee aipotaa omoã porã vy ojapo ete aguã. Ha'e kuery ikuai 'rã xevygua, ha'e rã xee ma aiko 'rã Tuuete.

<sup>21</sup> Ha'e rã amboae kuery opy'a py ta'angaa ojou vaipy ha'e ojeguarupy rive oguerovy'a va'e ma ajapo 'rã inhakã re ae ikuaiague ojeapa aguã rami – he'i SENHOR Nhanderuete.

<sup>22</sup> Ha'e gui ma anjo ikuai va'ekue opepo oupi reve ojeupi, iruéra ikuai va'e voi ojeupi avi ov yha'e kuery reve. Ha'e rã ha'e kuery áry oime Israel kuery ruete rexakãa yvateve rupi.

<sup>23</sup> Ha'e gui tetã mbyte gui SENHOR rexakãa ojeupi ov y opyta oiny tetã gui mombyry'i yvyty kuaray oua katy oĩ va'e áry.

<sup>24</sup> Ha'e gui ma ra'u rupi Nhanderuete guigua Nhe'ẽ xereupi ju vy xereraa henoiny Caldéia yvy re escravo-rã ogueraapa pyre ikuiaia katy. Ha'e gui ma xee ndaexavei mba'emo oexa uka pyre.

<sup>25</sup> Ha'e gui escravo-rã ogueraa pyre ikuai va'e pe amombe'upa SENHOR xevy oexa uka va'ekue ha'e javi.

## 12

### *Escravo-rã ogueraa pyre kuery ikuiaia re ijayvuague*

<sup>1</sup> Ha'e gui ma xevy SENHOR oayvu ombou vy aipoe'i:

<sup>2</sup> — Ava ra'y, ndee ma xere opu'ã va'e kuery mbyte rupi reiko. Ha'e kuery ma guexa oguerek oma'ẽ aguã va'eri ndoexai va'e, oapyxa oguerek oendu aguã va'eri noendui va'e, mba'eta xere opu'ãa rupi ae ikuai.

<sup>3</sup> Ha'e rã ndee ava ra'y, ereko katu ke nemba'e rei-rei amboae katy reguata aguã merami. Ha'e gui ára pyve eẽ ha'e kuery oexaa py, amboae yvy katy reo aguã merami. Tereo nderekoa gui amboae katy ha'e kuery oexaa py ju. Xapy'a rei ma ha'e kuery oikuaa 'rã okuapy, xere opu'ãa rupi ae ikuai va'eri.\*

<sup>4</sup> Ara py ae eraa tape py ha'e kuery oexaa py pendevoyirã reguata aguã. Ha'e gui ka'aru'i jave tereo ha'e kuery oexaa py, amboae yvy katy amongue oguata va'e rami.

<sup>5</sup> Ha'e kuery oexaa py embokua ndero mbotya, ha'e eẽ eovy ha'ekue rupi.

<sup>6</sup> Pavẽ oexaa py 'rã rejaxe. Pytû rai'i reve 'rã reraa. Ejeova mo'ãmba eovy yvy reoa rex a'e'ý aguã. Mba'eta ndee romoï Israel kuery nderexa vy oikuaa aguã — he'i.

<sup>7</sup> Ha'e rami rã xevy ojapo ukaague rami ae xee ajapo. Ha'e rami vy ara py araa oka py amboae yvy katy araa va'erã merami. Ha'e gui ka'aru'i jave xepo py ae ambokua xero mbotya. Pytû ma jave xee aẽ vy pavẽ oexaa py xekupe re amoimba xevoyi araa va'erã.

<sup>8</sup> Ha'e gui ko'ẽgue ju xevy SENHOR oayvu ombou vy aipoe'i:

<sup>9</sup> — Ava ra'y, Israel kuery xere opu'ã okuapy va'e noporandui teve ndevy: "Mba'e tu ndee rejapo reiny?" nde'i okuapy?

<sup>10</sup> Aipo're ha'e kuery pe: Po rami SENHOR Nhanderuete ijayvu: Kova'e ma Jerusalém pygua huvixa ha'e Israel kuery ha'e javi oikuaa aguã.

<sup>11</sup> Aipo're: Xee aikoa ma peẽ kuery peikuaa aguã. Xee ajapoague rami ae peẽ kuery re ojapoa 'rã. Ha'e ramo escravo-rã pendereraa 'rã amboae yvy katy pendekuai aguã.

<sup>12</sup> Peẽ kuery ruvixa peẽ kuery mbyte oiko va'ekue voi ogueraa 'rã ovoyi okupe re ae. Pytû jave 'rã oẽ. Ha'e va'e oo jepe aguã ma ombokuaa 'rã tetã kora. Ojeova mo'ãmba 'rã ov yvy ooa oexa e'ý aguã.

<sup>13</sup> Ha'e rami tei hi'ary rupi aipyo 'rã xekya, ha'e ramo ho'a 'rã xenhuã py. Araa uka 'rã Babilônia yvy katy, caldeu kuery yvy re ae. Ha'e rami tei ha'e va'e yvy ndoexavei 'rã, omano peve ha'e py ae oiko tei.<sup>†</sup>

<sup>14</sup> Ha'e rã hexeveguia kuery oipptyvõa rupi ikuai va'ekue ma amoimba 'rã yvytu ikuai va'e oipejua katy, ixupegua xondaro kuery guive. Ha'e kuery rakykue rupi aekyi uka 'rã kyxe.

<sup>15</sup> Ha'e ramo oikuaa pavẽ 'rã xee ae SENHOR aikoa, amboae regua ikuia rupi araa uka vy amboae yvy rupi amoimba ramo.

<sup>16</sup> Ha'e rami avi amongue ete'i 'rã aeja kyxe gui oo jepe va'ekue, karuai ha'e mba'eaxy vaikue gui guive, amboae regua ikuia rupi ha'e kuery omombe'u aguã ojeguarupy ojapoague ha'e javi. Ha'e ramo oikuaa 'rã xee ae SENHOR aikoa — he'i.

<sup>17</sup> Ha'e ramo xea py SENHOR oayvu ombou vy aipoe'i:

<sup>18</sup> — Ava ra'y, rekyje reve 'rã re'u reiny mbojape, ha'e reryryipa ha'e nanderekorãveia py rey'u 'rã yy.

<sup>19</sup> Ha'e rami vy aipo're 'rã yvy re ikuai va'e kuery pe: Po rami SENHOR Nhanderuete ijayvu Israel yvy re Jerusalém pygua kuery ha'e javi pe: Pe'u 'rã mbojape napenderekorãveia py, ha'e pey'u 'rã yy penhemondyipa reve, mba'eta pendeyvy gui oipe'apaa 'rã mba'emo ikuai va'ekue ha'e javi, ha'e pygua kuery ojapo vaiague ha'e javi re.

<sup>20</sup> Ha'e rami vy tetã ikuai va'ekue ho'apa 'rã ivaipa reve, yvy voi ombovaipa pyre 'rã opyta. Ha'e ramo peikuua 'rã xee ae SENHOR aikoa — he'i.

<sup>21</sup> Ha'e gui xevy SENHOR oayvu ombou vy aipoe'ive:

---

\* **12:3** Ezequiel ma oguata ete aguã re'ý ijayvu, ha'e kuery pe Nhanderuete guigua oikuaa uka aguã rive. † **12:13** Huvixa Zedequias ndoexai raka'e Babilônia yvy, mba'eta ha'e py ovaẽ e'ý mbove hexa omombua (2 Reis 25.7).

<sup>22</sup> – Ava ra'y, mba'e nunga ayvu tu nami peẽ kuery pemombe'u va'ety Israel yvy re? Mba'eta aipopeje: “Are teri ha'e va'e ára ovaẽ aguã, ayvu SENHOR ombou va'ekue ndojeupityi 'rãe guive”, peje.

<sup>23</sup> Ha'e nunga rupi aipo're ha'e kuery pe: “Po rami SENHOR Nhanderuete ijayvu: Xee ajapo 'rã ha'e va'e ayvu rupi pendeayvu ve'ý aguã rami, Israel kuerya rupi nomombe'uavei 'rã. Mba'eta ára ovaẽ ma ouvy xee SENHOR ayvu ha'e javi ojeupitypa aguã”, 're ha'e kuery pe.

<sup>24</sup> Mba'eta Israel kuery mbyte rupi ndoikovei ma 'rã anhetëgu e'ý oexa ra'u va'e, neĩ nhombotavya rupi imba'ekuaa va'e.

<sup>25</sup> Mba'eta xee SENHOR ae xeayvu 'rã, ha'e ramo ayvu xee amombe'u va'e ma are'i e'ý 'rã oiko. Mba'eta xere pepu'ã rei va'e kuery, pekuave teri reve xeayvu 'rã, ha'e ayvu amombe'u va'ekue oiko 'rã – he'i SENHOR Nhanderuete.

<sup>26</sup> Ha'e gui xevy pe tēgue ju SENHOR oayvu ombou vy aipoe'i:

<sup>27</sup> – Ava ra'y, ma'ẽ, Israel kuery aipoe'i okuapy: “Ezequiel pe oexa ukaa va'ekue ma mbovy rei e'ý ára reguarã, ayvu omombe'u va'e ma raka'eve rã teri oiko va'erã”, he'i okuapy.

<sup>28</sup> Ha'e nunga rupi aipo're ha'e kuery pe: Po rami SENHOR Nhanderuete ijayvu: Xeayvu petēve ma voi ndarei 'rã, ha'e ayvu amombe'u va'e oiko 'rãe – he'i SENHOR Nhanderuete.

## 13

### *Profeta kuery ramigua rive rovai ijayvuague*

<sup>1</sup> Ha'e gui ma xevy SENHOR oayvu ombou vy aipoe'i:

<sup>2</sup> – Ava ra'y, ndeayvu Israel pygua profeta kuery rovai, mba'eta ha'e kuery ma oakã gui rive ayvu omombe'u vy “Pendu SENHOR ayvu”, he'i 'rã okuapy.

<sup>3</sup> Po rami ijayvu SENHOR Nhanderuete: Nda'evei ete 'rã profeta kuery hi'arandu e'ý va'e pe, mba'eta ha'e kuery ma onhe'ẽ ae gui 'rã ijayvu mba'eve oexa e'ý re.

<sup>4</sup> Israel kuery, penderegua profeta kuery ma aguara'i tetã ivaipaague rupi ikuai va'e rami rive.

<sup>5</sup> Mba'eta ha'e kuery ma nomoatyrõi Israel kuery retã kora pa'ũ, neĩ kora ndojapo retavei guive peẽ kuery retã rupi, SENHOR poxya ára py peẽ kuery re opu'ã okuapy va'e rovai pēi atã aguã.

<sup>6</sup> Ha'e kuery ma anhetẽ rupi e'ý oexa ra'u, ha'e nhombotavya rupi imba'ekuaa 'rã okuapy. Mba'eta “SENHOR ae ijayvu”, he'i 'rã okuapy xee namboui va'eri. Ha'e kuery oarõ okuapy tēi oayvuague oiko aguã.

<sup>7</sup> Ha'e kuery anhetẽ rupi e'ý oexa ra'u, nhombotavya rupi rive imba'ekuaa guive. Mba'eta “SENHOR ae ijayvu”, he'i 'rã okuapy xee ndaxeayvui va'eri.

<sup>8</sup> Ha'e nunga rupi po rami SENHOR Nhanderuete ijayvu:

– Anhetẽ rupi e'ý mba'emo pexa ra'u, ha'e penhombotavya rupi penemba'ekuaa ramo xee aiko peẽ kuery rovai, he'i SENHOR Nhanderuete.

<sup>9</sup> Ha'e gui xepo amokuave'ẽ 'rã profeta kuery anhetẽ rupi e'ý oexa ra'u ha'e nhombotavya rupi imba'ekuaa va'e rovai. Ha'e rami rire ha'e kuery nomongetavei 'rã xevygua kuery, hery noïvei 'rã kuaxia Israel kuery rery oña re, neĩ ndoikevei 'rã guive Israel yvy re. Ha'e rami rã peikuaa 'rã xee ae SENHOR Penderuete aikoa.

<sup>10</sup> Mba'eta ha'e kuery ma xevygua kuery mbotavypaa rupi ikuai. Ha'e vy “Mba'eve ndoikoi 'rã”, he'i 'rã okuapy, opa marãgua oiko ta va'eri. Kora ojapoa nhavõ profeta kuery omoxiõi rei rive 'rã.

<sup>11</sup> Ha'e nunga rupi imoxiõa kuery pe “Kora ho'apa ta ma” 're. Mba'eta oiko 'rã oky ja'ea. Peẽ amandau kuery, pe'a ke, ha'e gui ndee yvytu guaxu, eipeju.

<sup>12</sup> Ha'e gui ne'xa, kora ho'a ma jave “Mamo tu optya xiõ va'e ha'e va'e py pemoxiõague?” 'ea 'rã pendevy.

**13** Ha'e nunga rupi po rami SENHOR Nhanderuete ijayvu: Xepoxya rupi ambou 'rā yvytu guaxu, oky ja'ea nhombopagaarā ha'e amandau jojukapaarā, amomba aguā.

**14** Ha'e rami vy aitypa 'rā kora pemoxiī va'ekue, ajapo 'rā yvy py rive itui aguā, ha'e aexa uka 'rā ijytarā va'ekue. Kora ho'a ramo pekanhymba 'rā iguy rupi. Ha'e ramo peikuaa 'rā xee ae SENHOR aikoa.

**15** Ha'e rami py aexa ukapa 'rā xepoxya kora rovai, pemoxiī rive va'e kuery rovai guive. Ha'e vy aipoa'e 'rā pendevy: "Kora ma noīvei ma, imoxiīare kuery okanhymba avi.

**16** Ha'e va'e kuery ma Israel pygua profeta kuery, mba'eta Jerusalém tetā re mba'eve ndoikoi 'rāa rami ijayvu, opa marāgua oiko ta va'eri", he'i SENHOR Nhanderuete.

### *Kunhague profeta ramigua rive rovai ijayvuague*

**17** — Ava ra'y, xevygua kunhague regua ma oakā gui rive omombe'u SENHOR guigua. Eiko ke ha'e kuery rovai, ndeayvu guive ha'e kuery rovai,

**18** ha'e vy aipo're: Po rami SENHOR Nhanderuete ijayvu: Nda'evei ete 'rā peē kunhague opa marāgua poapy kuaa ha'e tova mo'āa joo rami e'ŷ-e'ŷ pajerā pejapo va'e pe, nphonhe'ẽ pendea katy guarā pejopy aguā rive! Tyrā pa pemokanhyme vi xevygua kuery nhe'ẽ, ha'e rā amboae kuery ma peraaxe pendejeupe guarā?

**19** Peē kuery ma xevygua kuery mbyte naxemboetei pekuapy, peteī po'i cevada ha'e peteī pēgue mbojape rekovia rive. Ha'e rami vy pejuka 'rā okuave aguā rami ikuai va'ekue, ha'e rā omano aguā rami ikuai va'ekue ma ndapejukai. Xevygua kuery pe pendeapu rive, apu oenduxe vai okuapy ramo.

**20** — Ha'e nunga rupi po rami SENHOR Nhanderuete ijayvu: Ma'ẽ, xee ma aiko pajerā pejapo va'e rovai, mba'eta ha'e va'e py nphonhe'ẽ pejopy guyra mbo'aa rami. Ha'e rami vy aipe'apa 'rā pendepo gui, ha'e guyra rami araa jepepa 'rā nphonhe'ẽ pejopy va'ekue.

**21** Pendegui amondoropa avi 'rā pendeova mo'āa peiporu va'ety. Ha'e rami vy xevygua kuery araa jepepa 'rā pendepo gui. Ha'e rami rire ha'e kuery nonhembojavei 'rā pendere pejopy ve'ŷ aguā. Ha'e ramo peikuaa 'rā xee ae SENHOR aikoa.

**22** Pendeapua rupi pemomboriau heko porā va'e kuery py'a xee namomboriau ukai va'eri, ha'e rā heko vai va'e po ma pemombaraete, ha'e kuery tape vai gui ojepe'a e'ŷ aguā, tekove oupity e'ŷ aguā.

**23** Ha'e nunga rupi ndapexavei 'rā anhetē rupi e'ŷguia, napenemba'ekuaavei 'rā guive. Xevygua kuery araa jepepa 'rā pendepo gui. Ha'e ramo peikuaa 'rā xee ae SENHOR aikoa.

## 14

### *Ta'angaa mbojeroviaa kuery ombopaga aguā re ijayvuague*

**1** Ha'e va'e rire xea py ovaē Israel regua nhomoneta va'ety kuery. Ha'e kuery ovaēmba ma vy oguapy okuapy xerenonde.

**2** Ha'e ramo SENHOR oayvu ombou vy aipoe'i xevy:

**3** — Ava ra'y, kova'e avakue ma opy'a py ae omopu'ā okuapy ta'angaa ombojerovia aguā. Ha'e nunga ma guenonde py oguerekō riae teko vai py ojeity uka aguā. Xapy'a rei nda'u xee aeja 'rā ri ha'e kuery oporandu uka aguā xevy? Any.

**4** Ha'e nunga rupi ha'e kuery pe ndeayvu vy aipo're: Po rami SENHOR Nhanderuete ijayvu: Israel kuery va'e regua ma ta'angaa omopu'ā 'rā opy'a py ae, ha'e gui ha'e nunga teko vai py ojeity uka aguā oguerekō teri reve ou 'rā profeta oĩa py oporandu aguā. Ha'e kuery ou ramo xee SENHOR ae ambovai vy xeayvu 'rā ta'angaa mbovy rei e'ŷ oguerekoa re.

**5** Ha'e rami aiko 'rā xejeupe guarā ajopy ju aguā Israel kuery py'a, ta'angaa re oje'oi vy xegui ojepe'apa rire.

**6** — Ha'e nunga rupi aipo're Israel kuery pe: Po rami SENHOR Nhanderuete ijayvu: Pejeko rerova ke, ha'e pejepa ta'angaa perekō va'e gui. Pendekupe ke ojeguarupy perekō va'e ha'e javi katy.

<sup>7</sup> Mba'eta Israel kuery va'e regua, e'ŷ vy Israel yvy re amboae regua ikuai va'e teĩ xegui ojepe'a vy opy'a py ae omopu'ã 'rã ta'angaa, ha'e gui ma teko vai py ojeity uka aguã oguereko teri reve ou 'rã profeta oĩa py ixupe oporandu uka aguã xevy. Ha'e va'e ma xee SENHOR ae 'rã ambovai.

<sup>8</sup> Ha'e va'e avakue rovai arova 'rã xerova ajou vaia rupi. Ha'e rami vy ajapo 'rã ojojai ha'e ayvu vai pyrã, xevygua kuery mbyte gui aipe'a 'rã guive. Ha'e ramo peikuaa 'rã xee ae SENHOR aikoa.

<sup>9</sup> Ha'e gui xapy'a rei peteĩ profeta mba'emo omombe'u 'rã ojekorea rupi, ha'e va'e ma xee SENHOR ae ambotavy uka rã ijayvu. Ha'e rami teĩ hexe xepo amokuave'ẽ vy aipe'a 'rã xevygua Israel kuery mbyte gui.

<sup>10</sup> Ha'e rami rã mokoïve re 'rã oĩ ojejavyague re opaga aguã: xevy pe oporandu uka rive va'e opaga 'rã, profeta ramigua opagaa rami avi.

<sup>11</sup> Ha'e ramo Israel kuery xea gui ojepe'a ve'ŷ aguã, nonhemongy'avei aguã gueko vaia ha'e javi py. Ha'e ramo xevygua 'rã ikuai, ha'e rã xee ma Tuuete 'rã aiko – he'i SENHOR Nhanderuete.

### *Nhanderuete ha'evea rami nhombopaga aguã re ijayvuague*

<sup>12</sup> Ha'e gui teĩgue ju SENHOR oayvu ombou xevy. Ha'e vy aipoe'i:

<sup>13</sup> – Ava ra'y, xapy'a rei peteĩ yvy regua kuery ojejavy 'rã xerovai nda'evei ete va'e ojapoa py. Ha'e ramo ha'e kuery rovai xepo amokuave'ẽ vy ha'e kuery pe ndajou ukavei 'rã ho'u va'era. Ha'e rami vy ha'e kuery re ambou 'rã karuai avakue ha'e mymba kuery amomba aguã ha'e va'e yvy gui.

<sup>14</sup> Ha'e va'e yvy re mboapy avakue, Noé, Daniel ha'e Jó ikuai teĩ guekove anho ha'e kuery ogueraa jepe 'rãgue gueko porãa re – he'i SENHOR Nhanderuete.

<sup>15</sup> – Ha'e gui ma xapy'a rei ha'e va'e yvy re xee ambou 'rã mymba inharõ va'e nhomombaarã. Ha'e ramo ha'e va'e yvy ombovaipa pyre ae 'rã opyta, ha'e inharõ va'e kuery gui avave rei ndoaxavei 'rã ha'e rupi.

<sup>16</sup> Ha'e gui anhetẽ ete xee ae rekove rupi aura vy aipoa'e: Ha'e va'e yvy re ha'e va'e mboapyve avakue ikuai teĩ ndogueraa jepei 'rãgue gua'y neĩ guajy kuery ma voi. Ha'e kuery anho'i 'rãgue oo jepe, ha'e rã yvy ma ombovaipa pyre 'rãgue opyta – he'i SENHOR Nhanderuete.

<sup>17</sup> – Ha'e rami e'ŷ vy xapy'a rei ha'e va'e yvy re kyxe ambou vy aipoa'e 'rã: "Kyxe, eaxa ke ha'e va'e yvy rupi, avakue ha'e mymba kuery amomba aguã", ha'e 'rã.

<sup>18</sup> Anhetẽ ete xee ae rekove rupi aura vy aipoa'e: Ha'e va'e yvy re ha'e va'e mboapyve avakue ikuai teĩ ndogueraa jepei 'rãgue neĩ gua'y neĩ guajy kuery ma voi. Ha'e kuery anho'i 'rãgue oo jepe – he'i SENHOR Nhanderuete.

<sup>19</sup> – Ha'e rami e'ŷ vy ha'e va'e yvy rovai xapy'a rei ambou 'rã mba'eaxy vaikue, e'ŷ vy anhoẽ 'rã xepoxya tuguy moẽarã ambou vy, ha'e gui amokanhymba aguã avakue va'e mymba kuery.

<sup>20</sup> Anhetẽ ete xee ae rekove rupi aura vy aipoa'e: Ha'e va'e yvy re Noé, Daniel ha'e Jó ikuai teĩ ndogueraa jepei 'rãgue gua'y neĩ guajy kuery. Gueko porãa re guekove anho 'rãgue ogueraa jepe – he'i SENHOR Nhanderuete.

<sup>21</sup> Mba'eta SENHOR Nhanderuete aipoe'i:

– Jerusalém tetã re katuve ma avakue ha'e mymba kuery okanhy 'rã, nhombopagaarã irundyve regua ambou ramo: kyxe, karuai, mymba inharõ va'e ha'e mba'eaxy vaikue.\*

<sup>22</sup> Ha'e rami teĩ hembyrekue opyta 'rã mbovy'i ete. Ha'e va'e kuery ma ogueraa jepe 'rã gua'y ha'e guajy kuery. Ha'e gui ma peẽ kuerya py ju ovaẽ ramo pexa 'rã ha'e kuery reko mba'emo vai ojapo rã. Ha'e ramo pendepy'a porã ju 'rã mba'emo vai Jerusalém re ambou va'ekue ha'e javi gui.

\* **14:21** Apocalipse 6.8

23 Ha'e rami py ha'e kuery penembopy'a porã ju 'rã pexa ramo ha'e kuery reko mba'emo vai ojapo rã. Ha'e gui ma peikuua 'rã rive e'ŷ Jerusalém re mba'emo vai ambouague – he'i SENHOR Nhanderuete.

## 15

### *Yxypo 'ygue re Jerusalém tetã ombojojaague*

- 1 Ha'e gui SENHOR oayvu ombou vy aipoe'i xevy:
- 2 – Ava ra'y, yxypo 'ygue ma amongue henda py nda'u amboae yvyra ka'aguy re ikuai va'e gui ha'eveva'e?
- 3 Yxypo 'ygue nda'u pejou 'rã mba'emo pejapo aguã? Tyrã pa oo mbotya re pemo'ã 'rã imoiny, mba'emo peupi imoiny aguã?
- 4 Any, yxypo 'ygue ma tata py pemombo rive 'rã okai aguã. Ha'e gui xapy'a rei ijapy'i jovaive re, ha'e mbyte rupi voi okaipa ma ramo ha'eve 'rã teve peiporu aguã mba'emo pejapo aguã?
- 5 Ha'e nunga rupi ne'ixa, okai e'ŷ mbove mba'everã ndovarei va'ekue ma tata py okai rire katuve ma ndovarei, tapyñu rive opyta rire. Ha'e nungakue gui nda'eve 'rã mba'emo pejapo aguã.
- 6 Ha'e nunga rupi yxypo 'ygue yvyra ka'aguy rupi ikuai va'e mbyte gui Peru va'ekue tata py pemombo rivea rami avi xee voi ajapo 'rã Jerusalém pygua kuery re – he'i SENHOR Nhanderuete.
- 7 – Ha'e rami vy ha'e kuery re aikuua pota 'rã ambopaga aguã. Xapy'a rei tata gui ha'e kuery va'e regua oo jepe teĩ tata omomba nho 'rã. Ha'e rã peikuua 'rã xee ae SENHOR aikoa, ha'e kuery re aikuua pota ramo.
- 8 Ha'e rami vy ambovaipa 'rã ha'e kuery yvy, teko vai rupi anho ikuai rire – he'i SENHOR Nhanderuete.

## 16

### *Jerusalém pygua kuery itavy reia re ijayvuague*

- 1 Ha'e gui SENHOR oayvu ombou vy aipoe'i xevy:
- 2 – Ava ra'y, ndeayvu ke Jerusalém pygua kuery pe ojeguarupy ojapo okuanya re.
- 3 Ha'e vy aipo're: Po rami SENHOR Nhanderuete ijayvu Jerusalém tetã pe:<sup>\*</sup> Cananeu kuery yvy re neramoï kuery ikuia py ae reiko'i raka'e. Nderu ma amorreu, ha'e rã ndexy ma heteu raka'e.
- 4 Ha'e gui ndetui'ia ára py ma nepuru'ã ndojayaai raka'e, yy py nanemoakýai guive ndeky'a'o aguã, juky py nandekytyai, neĩ nanenhovãai raka'e ajukue py.
- 5 Avave rei nanemboaxyai vy ndere noma'ëai raka'e ha'e rami opena aguã. Ha'e rami 'rãgue py reiko'ia ára py nemomboa raka'e mba'ety rupi rive, ndegui ojeguaru pavẽ vy.
- 6 – Ha'e nunga rupi ndea'i rupi xee aaxa vy aixa nderuguy re remy-remyí rejupy rã. Ha'e vy ndevy pe aipoa'e va'ekue: "Nderuguy re teri ndetui teĩ eikove. Tá, nderuguy re teri ndetui teĩ eikove tema", ha'e va'ekue.
- 7 Ha'e gui ma xee romboetave mba'ety henhoï pyaupaa rami. Ha'e ramo ndeyvate, ndetuvixave reovy vy neporã ete. Nekãrã ojeapo, nde'a voi ipuku. Ha'e rami teĩ ndepire rei teri, nerenhemondei vy.
- 8 Ha'e gui ndea katy'i rupi aaxa avy vy roexa rã ovaẽ ma ra'e rejoayvu aguã ára. Ha'e ramo nde'áry aipyo xeao puku apy'i, ndepire reia anhovã aguã. Ha'e vy ndevy pe aura reve ajapo xereve guarã. Ha'e rire xera'xyrã reiko – he'i SENHOR Nhanderuete.
- 9 – Ha'e gui ma yy py rombojau vy roiky'a'opa nderuguy gui, ha'e gui roikyty azeite py.

\* **16:3** Kova'e capitulo py Jerusalém tetã re Nhanderuete ijayvu, peteĩ kunha re ombojoja vy.

<sup>10</sup> Romonhemonde avi ao ombojegua pyre py, ndepy reguarã ame'ẽ mba'emo pirekue iporãve va'e guigua, romoku'axã ajukue ipererĩ'i va'e py, romonheovãmba guive ajukue seda guigua py.

<sup>11</sup> Rombojeguapa avi poapy regua py voi, ndeaju'y re amoĩ guive mbo'y.

<sup>12</sup> Nexĩ re ma rombojegua peteĩ ojere'i va'e py, romonamixã, ha'e neakã re ma akã regua iporã va'e amoĩ.

<sup>13</sup> Ha'e rami py ouro ha'e prata py ndejeguapa. Ndeao ma ajukue pererĩ'i, seda guigua ha'e ombojegua pyre py. Romongaru trigo iporãve, ei ha'e azeite py. Ha'e ramo neporã ete vy huvixave ra'yxy rami reiko.

<sup>14</sup> Yvy regua ikuiaia rupi nderekoo oendupaa neporã ete rã, mba'eta ndevaikuea noĩ, ndere xerexakãa amoĩ rire – he'i SENHOR Nhanderuete.

<sup>15</sup> — Ha'e rami teĩ neporã reia re rive rejerovia vy ndetavy reia rupi reiko, nderekoo pavẽ oendu rã. Ha'e rami vy oaxa va'e pe rei renheme'ẽ ixupe guarã rive.

<sup>16</sup> Ha'e rami vy ajukue rerekoo va'ekue regua reiporu yvy'ã áry ombojerovia atyrã joegua e'ŷ-e'ŷ pytã va'e py rembojegua vy. Ha'e py ma ndetavy rei. Ha'e va'e nunga ma nda'evei ae oiko aguã.

<sup>17</sup> Ita porãgueve, ouro ha'e prata ndejeguarã ame'ẽ va'ekue remboi vy ava ra'angaarã rejapo. Ha'e rami vy rejeyavy ha'e nunga re.

<sup>18</sup> Ha'e nunga ndeoao ombojegua pyre remboi avi vy ta'angaa renhovãmba. Ha'e gui azeite ha'e heakuã porã va'e ame'ẽ va'ekue ma ta'angaa renonde py remoĩ.

<sup>19</sup> Ha'e gui tembi'u ame'ẽ va'ekue, trigo iporãve va'e, azeite ha'e ei romongaruague voi remoimba ha'e nunga renonde py heakuã porãve va'e reve. Ha'e rami ete rejapo reikovy – he'i SENHOR Nhanderuete.

<sup>20</sup> — Ha'e ramigua áryve nememby kuery ha'e ndepi'a kuery xera'yague ae reraa avi vy rejuka uka ta'angaa pe rive oapya py. Ha'e rami ete ndetavy reia nda'u mba'e e'ŷ'i ri?

<sup>21</sup> Mba'eta xera'y kuery rejuka uka vy ta'angaa pe remboaxapa tata py reapy reve.

<sup>22</sup> Ha'e rami ojeguarupy rejapoa ha'e ndetavy reia ha'e javi py nderekoxaraipa nekunhataĩ rã guare re, ndepire rei ha'e nandearoi reve nderuguy py remy-remyĩ rejupy jave guare re guive.

<sup>23</sup> SENHOR Nhanderuete aipoe'ive ju:

— Nda'evei, nda'evei ete 'rã ndevy! Mba'eta opa marãguia ha'eve'ŷ va'e rejapo ma rire

<sup>24</sup> tetã mbyte ha'e javi rupi ae ju rejapo rembojerovia atyrã, altar-rã heta guive rejapo.

<sup>25</sup> Mba'eta ndea py tape ojerea ikuai va'e ha'e javi rupi rejapo altar-rã, neporãague remongy'apa vy. Ha'e rami vy oaxa va'e pe rei tema reipe'a neretyma, tavy rei rejapove tema reovy vy.

<sup>26</sup> Ndetavy rei avi ndea katyguia kuery Egito guigua ra'y kuery hete guaxupa rei va'e reve. Ha'e rami py xembopoxy aguã rami remboetave tema ndetavy reia.

<sup>27</sup> Ha'e nunga rupi ae nderovai amoĩ xepo ndeyvy namboetaive vy. Romboaxa avi filisteu kuery ndere ija'e'ŷ va'e kuery pe, ha'e kuery oipotaa rami rei ndererekoo aguã, opa marã rei reikoa gui ha'e kuery ojeguaru rire.

<sup>28</sup> Assíria pygua ra'y kuery reve voi ndetavy rei, ha'e rami reiko aguã anho tema nda'eveive vy. Ha'e kuery reve ndetavy rei va'eri nderepytu'uxei.

<sup>29</sup> Ha'e rami 'rãgue py Canaã yvy ha'e javi rupi ndetavy reive tema Caldéia yvy peve. Ha'e rami teĩ nderepytu'uxei ae tema.

<sup>30</sup> Ha'e gui ma SENHOR Nhanderuete aipoe'ive ju:

— Ha'e rami reikoa py ndepy'a re nekangya anho oĩ, kunha tavy rei oxĩ kuaa e'ŷ va'e rami reiko vy.

<sup>31</sup> Ha'e rami vy tetã rupi jaikea'i nhavõ rupi rejapo reikovy ombojerovia atyrã, ha'e rã tetã mbyte rupi ma altar-rã rejapo. Ha'e rami avi kunha tavy rei rami e'ŷ guive reiko, mba'eta peráta re'ŷ ndetavy rei vy.

**32** Ta'yxy itavy rei va'e rami ae reiko, ome 'rāgue py avakue mboae omovaẽ va'e rami rive.

**33** Mba'eta kunha tavy rei pe ma mba'emo ome'ẽa 'rā, ha'e rā ndee ma mba'emo reme'ẽ rivepa jepi 'rā repenaa kuery pe, ndea katy opa rupi gui ou aguã ndereve itavy rei aguã.

**34** Ha'e nunga rupi ndetavy reia py kunha tavy rei rami e'ŷ reiko, mba'eta itavy rei aguã ndereka okuapy va'e ndevy mba'emo ome'ẽ 'rāgue py ndee ae mba'emo reme'ẽ 'rā ha'e kuery pe – he'i.

**35** – Ha'e nunga rupi kunha tavy rei reiko va'e, endu ke SENHOR ayvu.

**36** Po rami SENHOR Nhanderuete ijayvu: Repenaa kuery reve opa marã ndetavy rei reikovy ndepire reia rupi. Ha'e gui ta'angaa remopu'ã va'ekue pe ojeguarupy anho rejapo, mba'eta ha'e nunga pe nememby kuery ha'e ndepi'a kuery rejuka vy remoẽ huguykue.

**37** Ha'e nunga rupi ma'ẽ, aŷ ma amboatypa 'rā ndere opena va'ekue ha'e repenaa va'ekue ha'e javi, ndere ija'e'ŷ va'e kuery ha'e javi reve. Nderovai ae ambou 'rā opa rupi gui. Ha'e rami vy ha'e kuery renonde py rombopire reipa 'rā ha'e kuery pavẽ nderexa aguã.

**38** Ha'e rami vy xee rombopaga 'rā itavy rei va'e ha'e jojukaare ombopagaa rami. Ha'e vy romoingo axy 'rā xepoxy ha'e nda'evei etea rupi.

**39** Ha'e rami vy romboaxa 'rā ha'e kuery po py. Ha'e ramo ha'e kuery oitypa 'rā ombojerovia atyrã ha'e altar-rã rejapo va'ekue. Omboipa 'rā ndeo, oipe'apa 'rā guive ita porãgueve ndejeguaague. Ha'e rami vy ndereja 'rā ndepire rei ha'e nandeaovei reve.

**40** Ha'e gui ma ha'e kuery heta ombou 'rā nderovai guarã. Ha'e ramo ndeapipa 'rā okuapy ita py, kyxé py ndepyxo 'rā guive.

**41** Oapypa 'rā oo ndea py ikuai va'e, ha'e gui nembopaga 'rā mbovy e'ŷ kunhague oexaa py. Ha'e rami vy amombytu'upa 'rā ndetavy reiague, ha'e ramo mba'eve nereme'ẽvei ma 'rā ndetavy rei aguã.

**42** Ha'e rami vy mae anhenhandu porã ju 'rā ndevy xepoxyague ha'e nda'evei ete aikoague gui. Apytu'u ete 'rā, ndevy ndaxepoxyvei aguã rami.

**43** Mba'eta nekunhataĩ rã guare re nanema'endu'avei vy ha'e rami ete xembopoxy rire, aŷ nde'áry ambou 'rā reikoague rekoria, ojeguarupy rejapoague áryve rejapo ve'ŷ aguã ha'e rami ete ha'eve'ŷ va'e – he'i SENHOR Nhanderuete.

**44** – Ha'e gui aŷ gui ma ijayvuxa va'e meme 'rā nderovai aipoe'i: “Oxy rami ae avi 'rā imemby voi oiko”, he'i 'rā.

**45** Mba'eta ndee ma ndexy ramigua ae ju, mba'eta ndexy ma ome ha'e omemby kuery gui ojeguaru raka'e. Ha'e ndekypy'y kuery rami ae avi reiko, mba'eta ha'e kuery ma ome ha'e omemby kuery gui ojeguaru va'ekue meme. Ndexy ma heteu, ha'e rã nderu ma amorreu raka'e.

**46** Ha'e gui nderyke ma Samaria tetã, kuaray apu'a'ia katy heko omemby kuery reve. Ha'e rã ndekypy'y ma Sodoma tetã, kuaray puku-a katy omemby kuery reve heko va'e.

**47** Ha'e gui ndee ma ha'e kuery rami avi reiko ha'e kuery ojeguarupy ojapoa ha'e javi rupi. Ha'e rami anho e'ŷ, ha'e kuery rami ete reikoa áryve ma ha'e kuery gui renhemongy'ave tema reikoa ha'e javi rupi.

**48** Ha'e nunga rupi anhetẽ ete xee SENHOR Penderuete xee ae rekove rupi aura vy aipoa'e: Sodoma tetã omemby kuery reve ma ndaeko vai raka'e ndee tyke nememby kuery reve penderekko vaia rami ete.

**49** Mba'eta po rami ma ndekypy'y Sodoma heko vai: Omemby kuery reve ojejou porã reia rupi tembi'u ndoatai ha'e ov'y'a rei va'eri peteïve henda py noipytyvõi iporiaukue'i ha'e ojexavai va'e kuery.

**50** Ha'e rami vy xerenonde rupi ojeguarupy anho ojapo okuapy ojejou porã reia rupi. Ha'e ramo ha'e nunga aixa vy aipe'apa vyvoi ikuaiague gui.

<sup>51</sup> Ha'e gui Samaria tetā ma ndee rejeyavya ramigua neĩ mbyte rupi peve ndojapoi. Mba'eta ndee ma ndekypy'y kuery áryve rejapove tema heravy ojeguarupy, ha'e rami vy ndejegui remboeko porāve ndekypy'y kuery, opa mba'e vai rejapoa py rive.

<sup>52</sup> Ha'e gui ma ndere oĩ 'rā ndetavyague gui rexī aguā. Rejapo ndekypy'y kuery nombopagaave aguā rami, mba'eta ha'e kuery gui ojeguaruvepy py rejeyavy rā ndegui ha'e kuery heko porāve. Ha'e nunga rupi rexī voi, ndere toĩ rexīa, ndejegui ndekypy'y kuery nerembopaga ukaive rā.

<sup>53</sup> — Ha'e gui amoingo porā ju 'rā ndekypy'y kuery, Sodoma ha'e imemby kuery reve, Samaria imemby kuery reve guive. Ha'e kuery reve ndee voi romoingo porā ju 'rā,

<sup>54</sup> ha'e rami reikoague ha'e javi gui rexīa oĩ aguā ha'e kuery rembopy'a porā ju aguā rami.

<sup>55</sup> Ha'e gui ndekypy'y kuery Sodoma ha'e Samaria imemby kuery reve jypy ikuai porāague rami ae ju ikuai ramo ndee ha'e nememby kuery voi pendekuai porā ju 'rā jypy pendekuaiague rami ae.

<sup>56</sup> Ha'e gui rejeyou porā rei vy ndeayvu rei va'ekue ndekypy'y Sodoma re,

<sup>57</sup> nderekvaia ndojekuaai teri jave. Ha'e gui aŷ ma ndere voi ha'e kuery re rami avi Síria ha'e Filístia pygua kunhague ijayvu rei okuapy, ijyvýry rupi ikuai va'e ha'e javi voi.

<sup>58</sup> Mba'eta ndere oĩ 'rā repaga aguā opa marā reikoague ha'e ojeguarupy rejapoague re – he'i SENHOR.

<sup>59</sup> Mba'eta po rami SENHOR Nhanderuete ijayvu:

— Xee ma ndere ajapo 'rā ndee ae rejapoague rami, mba'eta ndee ma remboyke rive aura vy xereve guarā ajapo va'ekue.

<sup>60</sup> Ha'e rami teĩ xema'endu'a nho 'rā nekunhataĩ jave py xereve guarā ndevy ajapo va'ekue re. Ha'e rami vy ndevy ajapo ju 'rā xereve guarā raka'e rā peve oĩ va'erā.

<sup>61</sup> Ha'e va'e ára py reikoague re nema'endu'a vy rexīmba 'rā ndekypy'y kuery removaẽ vy. Mba'eta nderyke ha'e ndekypy'y ikuai va'ekue ma ndevy ame'ẽ 'rā nememby kuery rami, va'eri xereve guarā ajapo va'ekue rami vy e'ŷ ta'vy.

<sup>62</sup> Mba'eta ndevy pe ajapo 'rā xereve guarā, ha'e peikuua 'rā xee ae SENHOR aikoa,

<sup>63</sup> nema'endu'a ha'e rexīmba aguā, ha'e romo'yvy'i rire rejeyou porā reia rupi ve'ŷ ndeayvu aguā, reikoague ha'e javi gui roperdoapa rire – he'i SENHOR Nhanderuete.

## 17

### *Mba'emo re ombojojaa rupi mokoĩ taguato ha'e uva'y omombe'uague*

<sup>1</sup> Ha'e gui xevy SENHOR oayvu ombou vy aipoe'i:

<sup>2</sup> — Ava ra'y, emombe'u peteĩ ayvu mba'emo re rembojoja vy Israel kuery oikuua aguā.

<sup>3</sup> Ha'e vy aipo're: Po rami SENHOR Nhanderuete ijayvu: Oiko peteĩ taguato tuvixa va'e. Ipepo ha'e hague ma ipuku, hague ma joo rami e'ŷ-e'ŷ pytā va'e. Ha'e va'e ma Líbano yvy re ou. Ha'e vy oipe'a heravy yary rovapy.

<sup>4</sup> Yvyra rovapy omondo heravy vy ogueraa peteĩ yvy mba'emo vendea ikuiaia py. Mba'emo vendea kuery retā py ae oeja ovy.

<sup>5</sup> Ha'e gui henhoĩgue pendeyvy guigua ju ogueraa vy onhotŷ peteĩ yvy porāa py. Ojopy vy onhotŷ yy reia py, yy rembe rupi yvyra ikuai va'e rami oiko porā aguā.

<sup>6</sup> Ha'e va'e ma yvate vy uva'y hovana rei va'e oiko. Nda'yvatei rei va'eri hakā ma taguato-a katy ova oiny, iguy rupi hapo porā guive. Ha'e rami vy uva'y ete oiko, hakā porā ha'e hoky pyau guive.

<sup>7</sup> — Ha'e gui oiko taguato tuvixa va'e mboae. Ha'e va'e ma ipopo puku va'e, hague reta guive. Ha'e ramo ha'e katy ju ova uva'y rapo, hakā guive. Hi'yvypy guive oo ha'ea katy, onhemoakŷ uka vy.

<sup>8</sup> Yvy porāa py, ha'e yy anho oĩa rupi onhotŷ hakā ha'e hi'a reta aguā, ha'e uva'y iporāve va'e oiko aguā.

<sup>9</sup> Aipo're: Po rami SENHOR Nhanderuete ijayvu: Ha'e va'e uva'y oiko porã 'rã teve? Taguato jypygua ou vy nomondoroi 'rã teve hapo, ha'e ndojayai 'rã ri hi'a, hogue ha'e ipyau jevy va'ekue ipirupa aguã? Mba'eta imbaraete e'ÿ va'e, avakue mbovy'i ete teĩ oapo'opa 'rã.

<sup>10</sup> Ha'e gui amboae henda py onhotÿ ramo ha'e py nda'u oiko porã 'rã ri? Any, mba'eta yvytu kuaray oua katy oipeju ramo ipirupa rive 'rã. Hi'yvypy guive 'rã ipirupa ovy.

<sup>11</sup> Ha'e ramo xevy pe SENHOR oayvu ombou vy aipoe'i:

<sup>12</sup> — Aÿ ma aipo're xere opu'ã rei va'e kuery pe: Ndapeikuaai teve mba'erã pa kova'e nunga oikoa? Ma'ë, Babilônia pygua huvixa Jerusalém tetã re ou vy oipe'a heravy raka'e huvixave ha'e yvatekueve ikuai va'ekue. Babilônia tetã katy ogueraapa.

<sup>13</sup> Ha'e vy huvixave ra'y kuery regua peteĩ ojou vy hexeve ojapo peteĩ rami ikuai aguã, oura uka guive. Ha'e gui ijyvy gui ogueraapa ipo'aka va'ekue

<sup>14</sup> openaa ha'e javi rupi yvyïve'i aguã nonhemboyvatevei aguã rami. Ha'e rami avi peteĩ rami ikuai aguã regua ojapo va'ekue rami ikuai va'e rire okuave'i nho 'rãgue.

<sup>15</sup> Ha'e rami teĩ ha'e va'e huvixa ma Babilônia pygua huvixa rovai opu'ã vy guembiguai kuery omondouka raka'e Egito katy, kavaju ha'e heta avakue ogueru aguã ha'e gui. Ha'e rami ete mba'emo vai apoare nda'u oo jepe 'rã ri? Peteĩ rami ikuai aguã ojapo pyre ombovaipa rire nda'u oo jepe 'rã teve?

<sup>16</sup> Any, anhetẽ ete xee SENHOR Penderuete xee ae rekove rupi aura vy aipoa'e: Ha'e va'e omano 'rã Babilônia yvy py, huvixarã moĩare yvy py ae, ha'e oĩa py ae 'rã omano, ourague ha'e peteĩ rami ikuai aguã ojapoague ombovaipa rire.

<sup>17</sup> Ha'e rã Egito pygua huvixa Faraó ma ixondaro ha'e hexegua kuery heta teĩ noipytyvõi 'rã joe opu'ãa py, mba'eta tetã rovai yvy omboaty 'rã kora áry rupi oaxa aguã jojuka retaa rupi.

<sup>18</sup> Mba'eta ourague omboyke, ha'e peteĩ rami ikuai aguã jopopyy ratã reve ojapo va'ekue ombovaipa vy ha'e nunga ha'e javi ojapo raka'e. Ha'e nunga rupi ae ndoo jepei 'rã.

<sup>19</sup> Ha'e nunga rupi anhetẽ ete xee SENHOR Penderuete xerekove rupi aura vy aipoa'e: Xerery rupi ourague omboykeague ha'e peteĩ rami ikuai aguã ojapo va'ekue ombovaipaague ma ajapo 'rã inhakã re ae ojeapa aguã rami.

<sup>20</sup> Ha'e rami vy hi'áry aipyo 'rã xekya, ha'e vy ambo'a 'rã xenhuã py. Babilônia yvy katy araa uka vy ha'e py aikuua pota 'rã xerovai opu'ã reiague re.

<sup>21</sup> Hexeve ojava va'ekue, ixondaro kuery ha'e javi reve ojukapaa 'rã kyxe py. Ha'e rã okuave'i va'e ma amoaimba 'rã yvytu ha'e javi oipejua katy. Ha'e ramo peikuaa 'rã xee SENHOR ae xeayvuague.

<sup>22</sup> — Po rami SENHOR Nhanderuete aipoe'i: Xee ma teĩgue ju aipe'a 'rã peteĩ yary rovapy anhotÿ aguã. Hakã iporãvea gui ajaya 'rã ipyauvea oĩ va'ekue, ha'e gui peteĩ yvyty yvateve ha'e iporãve va'e áry ju 'rã anhotÿ.

<sup>23</sup> Israel regua yvyty re ae 'rã anhotÿ. Ha'e ramo hakã reta ha'e hi'a porã 'rã. Ha'e rami vy yary iporãve va'e 'rã oiko. Iguýry ma opa marâgua mymba kuery ikuai 'rã. Hakã rupi ma kuaray'ãa py opa marâgua guyra ju 'rã onhemboaty okuapy.

<sup>24</sup> Ha'e rami rire yvyra ikuai va'e ha'e javi oikuua 'rã xee SENHOR ae yvyra yvatekueve reitya aiko, ha'e rã yvyigueve ma ambo'yvate va'e. Yvyra pyau amombiru va'e, ha'e rã ipirukue ma ambopyau ju va'e. Xee aipoa'egue xee SENHOR ae ajapo ju.

## 18

### Peteĩ-teĩ gueko re ae oikuua pota aguã re ijayvuague

<sup>1</sup> Ha'e gui SENHOR oayvu ombou vy aipoe'i xevy:

<sup>2</sup> — Mba'ixa tu peẽ kuery Israel yvy re mba'emo oiko va'e pexa vy aipopeje: "Tuu kuery uva aky ho'u rire ta'y kuery raĩ ju nda'evel", peje?

<sup>3</sup> Anhetē ete xee SENHOR Penderuete xerekove rupi aura vy aipoa'e: Pova'e ayvu ma napemombe'uvei ma 'rā Israel yvy rupi.

<sup>4</sup> Mba'eta temimoingo nhe'ẽ ha'e javi ma xevyguia meme. Tuu kuery nhe'ẽ ha'e ta'y kuery nhe'ẽ voi xevyguia ae. Ojejavy va'e ae omano 'rā.

<sup>5</sup> — Ha'e gui xapy'a rei peteĩ ava heko porã va'e vy ojapo 'rā ha'evea ramigua joguerekao py.

<sup>6</sup> Ha'e rami vy ndo'ui 'rā xo'o yvyty áry rupi ta'angaa pe ome'ẽ mbyre, neĩ noma'ẽi 'rā guive Israel kuery ta'angaa oguerekoo va'e re, ndoguerojejavyi 'rā oirũ ra'yxy, neĩ nonhembojai 'rā kunha gueko re oĩ va'e re.

<sup>7</sup> Nombojexavai 'rā avave rei, mba'emo oiporu va'ekue ome'ẽ kuerei 'rā iporukaare pe, na'imondai 'rā, guembi'u omboja'o 'rā okaruxe va'e pe, ha'e omonhemonde 'rā guive ijao e'ŷ va'e kuery.

<sup>8</sup> Ha'e va'e ma operáta oiporu uka rire nomboekovia retavei 'rā, hi'áryve ndojopyi 'rāe. Ojoko 'rā opo ha'eve'ŷa rami ojapo e'ŷ aguã, ha'e vy avakue re oikuua potaa py ha'evea rami meme 'rā joguerekoo anhetē ete rupi.

<sup>9</sup> Ha'e va'e xeayvu aeja va'ekue rupi vy ojapo 'rā aipota va'e, ha'evea rami meme 'rā oiko. Ha'e gui ma ha'e va'e heko porã va'e oikove 'rā — he'i SENHOR Nhanderuete.

<sup>10</sup> — Ha'e gui xapy'a rei ha'e va'e oguerekoo 'rā gua'y imonda va'e, jojukaa, e'ŷ vy ha'e nunga va'e rei tema guyvy kuery pe ojapo va'e.

<sup>11</sup> Ha'e va'e ma peteĩve ojapo 'rā va'ekue ndojapoi. Ha'e rami 'rāgue py ho'u 'rā xo'o yvyty áry rupi ta'angaa pe rive ome'ẽ mbyre, oguerojejavyi 'rā oirũ ra'yxy,

<sup>12</sup> ombojexavai 'rā iporiaukue'i ha'e oipotapa rei va'e, imondaa rupi 'rā oiko, nome'ẽvei ojerureague, ta'angaa re rive oma'ẽ, ojeguarupy anho ojapo,

<sup>13</sup> peráta oiporu uka rire ojopy retavexe 'rā guive. Ha'e gui ma ha'e va'e nda'u oikove 'rā? Ndoikovei 'rāe. Ha'e ramigua ojeguarupy ha'e javi ojapo rire ojukaa 'rā, ha'e hexe ae 'rā oĩ huguy omoëague re opaga aguã.

<sup>14</sup> — Ha'e gui aŷ ma, xapy'a rei oiko 'rā peteĩ ta'y nguu ojejavy rā oexapa teĩ ha'ekue ramigua ndojapoi va'e.

<sup>15</sup> Ha'e rami vy ndo'ui 'rā xo'o yvyty áry rupi ta'angaa pe ome'ẽ mbyre, noma'ẽi 'rā ta'angaa Israel kuery oguerekoo va'e re, oirũ ra'yxy ndoguerojejavyi 'rā guive.

<sup>16</sup> Neĩ nanhomomboriau rei 'rā, nome'ẽ e'ŷi 'rā ojerureague, na'imondai 'rā, guembi'u omboja'o 'rā okaruxe va'e pe, omonhemonde 'rā ijao e'ŷ va'e,

<sup>17</sup> opo ndoipe'a e'ŷi 'rā iporiaukue'i pe, peráta oiporu uka rire nomboekovia retavei 'rā, hi'áryve ndojopyi 'rā, ojapo 'rā guive xee aipota va'e xeayvuague rupi oiko vy. Ha'e va'e ma nomanoi 'rā nguu ojejavyague re. Oikove 'rāe.

<sup>18</sup> Ha'e rā tuu ma ojukaa 'rā heko vaiague re, jokorea rupi oiko rire, oirũ kuery gui imondaa rupi, ha'e heta va'e kuery mbyte rupi ha'eve'ŷa ramigua ojapo guive rire.

<sup>19</sup> — Ha'e rami teĩ peporandu 'rā: "Mba'e re tu ta'y ndopagai 'rā nguu ojejavyague re?" peje 'rā. Ha'e rami mba'eta ta'y ma teko porã ha'e ha'evea ramigua ojapo oikovy, ha'e xeayvuague omoĩ porã vy ojapo avi oikovy. Ha'e nunga rupi ae oikove 'rā.

<sup>20</sup> Mba'eta ojejavy va'e ae 'rā omano. Ta'y ma ndopagai 'rā nguu ojejavyague re, neĩ tuu ma voi ndopagai 'rā gua'y ojejavyague re. Heko porã va'e re oĩ 'rā teko porã rekovia, ha'e gui heko vai va'e re ma oĩ 'rā gueko vaiague re opaga aguã.

<sup>21</sup> — Ha'e rami avi xapy'a rei ojejavy va'ekue ojeko rerova 'rā ojejavyague ha'e javi gui, ha'e xeayvuague omoĩ porãmba vy ojapo 'rā teko porã ha'e ha'evea ramigua. Ha'e rami vy oikove 'rā, nomanoi 'rāe.

<sup>22</sup> Ha'eve'ŷa ramigua ojapoague re ma na'ima'endu'aavei 'rā. Teko porã rupi oiko rire oikove 'rā.

<sup>23</sup> Mba'eta xee nda'u arovya'r i heko vai va'e omano rā? Any, xee aipota ojejavyague gui ojeko rerova oikove aguã — he'i SENHOR Nhanderuete.

<sup>24</sup> — Ha'e rami teĩ xapy'a rei heko porã va'ekue ma gueko porãague gui ojepe'a vy ojejavy ju'rã, heko vai va'e ojeguarupy ojapoa rami avi ojapo oikovy vy. Ha'e va'e nda'u oikove 'rã teve? Any, mba'eta teko porã rupi oikoague ha'e javi re na'ima'endu'aavei 'rã. Ha'e va'e omano 'rã gueko vai ha'e ojejavy reia py.

<sup>25</sup> — Ha'e rami teĩ aipopeje 'rã: “ SENHOR reko ma ha'eve'ÿa ramigua”, peje 'rã. Aÿ ma Israel kuery, pendu ma: Xereko nda'u ha'eve'ÿa ramigua teve? Peẽ kuery reko e'ÿ teve ikarẽ-karẽ va'e?

<sup>26</sup> Ha'e nunga rupi xapy'a rei heko porã va'ekue ma gueko porãague gui ojepe'a vy teko vai rupi anho ri oiko vy omano 'rã ha'e nunga py. Gueko vaia py ae 'rã omano.

<sup>27</sup> Ha'e rami teĩ xapy'a rei heko vai va'e ma gueko vaiague gui ojeko rerova vy teko porã ha'e ha'evea ramigua anho ri ojapo vy ojapo 'rã onhe'ë oikove aguã rami.

<sup>28</sup> Mba'eta ojee ae oikuaa pota vy teko vai rupi oikoague gui ojeko rerova ri vy oikove 'rã, nomanovei 'rãe.

<sup>29</sup> Ha'e rami teĩ Israel kuery ma “ SENHOR reko ma ha'eve'ÿa ramigua”, he'i okuapy. Xereko nda'u ha'eve'ÿa ramigua teve? Israel kuery, peẽ kuery reko e'ÿ teve ikarẽ-karẽ va'e?

<sup>30</sup> — Ha'e nunga rupi Israel kuery, xee roikuaa pota 'rã peteĩ-teĩ reko re — he'i SENHOR Nhanderuete. — Pejeko rerova ha'e pejepo a ke pendeko vaia ha'e javi gui. Ha'e ramo 'rãe teko vai napendereityvei.

<sup>31</sup> Ha'e rami vy peipe'a pendejegui penderekoy vaia ha'e javi, ha'e gui pendejee pemoõ uka penekuraxõ pyaurã ha'e penenhe'ë pyaurã. Mba'eta Israel kuery, mba'e re 'rã tu pemano?

<sup>32</sup> Mba'eta xee ma ndarovy'ai peteĩve pemano rã. Ha'e nunga rupi pejeko rerova peikove aguã — he'i SENHOR Nhanderuete.

## 19

### *Guary re Israel kuery ombojojaague*

<sup>1</sup> — Ha'e gui ndeayvu ke Israel regua yvatekueve pe omboaxy va'e rami.

<sup>2</sup> Ha'e vy aipo're 'rã: Marã ramigua tu pendexy raka'e? Peteĩ guary kunha guary kuery mbyte oiko, ha'e gua'y kuery mbyte onheno oupy va'e. Ha'e va'e ma omongakuaa gua'y kuery.

<sup>3</sup> Peteĩ gua'y oguereco va'ekue tuja ma vy imba'ejuka kuaa, avakue ho'upa peve.

<sup>4</sup> Ha'e ramo ha'e nunga omombe'ua rã vy regua ikuai va'e oendupa okuapy. Ha'e rami vy ombo'a yvykua ha'e kuery ojapo va'ekue py. Ha'e vy ty'aï re ogueraa Egito yvy katy.

<sup>5</sup> Ha'e ramo ix y guary kunha va'e ma gua'y oarõ va'ekue ogueraa rã nda'evei oikovy. Ha'e rami vy gua'y mboae ju omongakuaa.

<sup>6</sup> Ha'e ramo ha'e va'e ju tuja guary kuery mbyte rupi. Ha'e vy imba'ejuka kuaa, avakue ho'upa peve.

<sup>7</sup> Avakue ojukaa rupi ojapo reta avi imeve'ÿ aguã, ha'e tetã ikuai va'e omombytapa tekao ve'ÿ. Ha'e ramo okororõ rã vy regua kuery oendu vy ndaekorãvei rei okuapy.

<sup>8</sup> Ha'e rami vy vy regua kuery ha'ea katy ikuai va'e onhemboatypa okuapy hovai. Ha'e rami vy hi'áry rupi kya omombo vy ombo'a yvykua ojapo va'ekue py.

<sup>9</sup> Ty'aï py ojopy vy ombo'a nhuã py. Ha'e rami vy Babilônia pygua huvixaa py ogueraa. Ha'e py ma omboty peteĩ henda ikorapa va'e py, Israel regua yvyty rupi ijayvua noenduavei aguã.

### *Uva'y re ju ombojojaague*

<sup>10</sup> — Ha'e gui pendexy ma uva'y yakã yvýry onhotÿa mbyre rami oiko. Yy reia py onhotÿa rire hi'a porã, hakã reta guive.

<sup>11</sup> Hakã ma imbaraete raxa, huvixa po pyguarã. Ha'e vy hakã ha'e hoguepa reve yvateve ov yvateve ov rã pavẽ rei oexa okuapy yvateve etea.

<sup>12</sup> Ha'e rami teĩ opoxy reve omondoroa, ha'e yvy rupi oitya. Ha'e ramo hi'a ma yvytu kuaray oua katy gui oipeju va'e omombirupa. Hakā mbaraetekue ma omopẽmbaa rã ipirupa. Ha'e gui tata py ju oapypaa.

<sup>13</sup> Ha'e gui aŷ ma tekao e'ŷa py rive ju onhotŷa yvy piru reia ha'e yy noĩa py.

<sup>14</sup> Ha'e gui peteĩ hakā tuvixave'i va'e gui ma tata ou vy omomba hi'a. Ha'e ramo hexe noĩvei hakā imbaraete va'e huvixa po pygurarā – he'i.

– Po rami 'rã reronhemboaxy, ha'e peronhemboaxy pavē aguā.

## 20

### *Egitoyvygui Israel kuery oo rire ojeguarupy rupi ae temaikuaiareijayvuague*

<sup>1</sup> Ha'e gui sete ma'etŷa ha'e peteĩ nhiruĩ jaxy re, dez araa py ma Israel regua nhomoneta va'ety kuery jogueru xea py, SENHOR pe oporandu uka aguā. Ha'e rami vy oguapypa okuapy xerenonde.

<sup>2</sup> Ha'e ramo xevy pe SENHOR ombou oayvu. Ha'e vy aipoe'i:

<sup>3</sup> – Ava ra'y, ndeayvu ke Israel regua nhomoneta va'ety kuery pe. Ha'e vy aipo're: Po rami SENHOR Nhanderuete ijayvu: Peẽ kuery pa xevy peporandu ukaxe vy peju? Anhetẽ ete xee SENHOR Penderuete xee ae rekove rupi aura vy aipoa'e: Nda'evei peẽ kuery peporandu uka aguā xevy.

<sup>4</sup> Ha'e gui ndee ava ra'y, ndeayvu ta pa ha'e kuery reko vaia re? Eikuua uka ke ha'vy tamoi kuery ojeguarupy ojapoague.

<sup>5</sup> Ha'e vy aipo're: Po rami SENHOR Nhanderuete ijayvu: Israel kuery xejeupe guarā aiporavo vy xepo aypi reve aura va'ekue Jacó ramymino kuery pe ajekuaa uka reve. Egito yvy re ikuai jave xepo aypi reve ha'e kuery pe aura vy "Xee ma SENHOR Penderuete", ha'e va'ekue.

<sup>6</sup> Ha'e va'e ára xepo aypi reve ha'e kuery pe aura Egito yvy gui aipe'apa aguā re, peteĩ yvy ha'e kuery peguarā aiporavoague py araa aguā, kamby ha'e ei ndoataia ha'e yvy jave gui iporāvea py.

<sup>7</sup> Ha'e rami vy aipoa'e ha'e kuery pe: "Peteĩ-teĩ peipe'a 'rã pendejegui mba'emo ojeguarupy pexaxe vai va'ekue. Penhemongy'ave eme Egito pygua ta'angaa pembojeroviaa py. Mba'eta xee ae ma SENHOR Penderuete aiko", ha'e va'ekue.

<sup>8</sup> Ha'e rami teĩ ha'e kuery naxenhe'ẽ reduxei vy opu'ãmba okuapy xerovai. Ha'e rami vy mavae'rei ojegui ndoipe'ai ojeguarupy oexaxe vai va'e, ndojope'ai guive Egito pygua ta'angaa ombojeroviaa gui.

– Ha'e ramo xee aipoa'e va'ekue ha'e kuery áry xepoxya anhoẽ aguā re, ha'e kuery pe xepoxya aexa ukapa peve Egito yvy re ikuaiia py.

<sup>9</sup> Ha'e rami teĩ amboae rami ju ha'e kuery re ajapo xerery amboete ukaa rupi vy, xerery re yvy regua ijayvu rei e'ŷ aguā ha'e kuery yvy re xevygua kuery ikuaiia rupi, mba'eta yvy regua kuery oexaa py ae xevygua kuery pe ajekuaa uka rire Egito yvy gui aipe'apaa py.

<sup>10</sup> Ha'e rami vy aipe'apa Egito yvy gui, ha'e tekao e'ŷa katy ju araa.

<sup>11</sup> Ha'e kuery pe ame'ẽ xeayvua, aikuua uka guive aipota va'e. Ha'e va'e ma avakue ojapopa ri vy okuave 'rã ha'e va'e rupi.

<sup>12</sup> Ha'e kuery rekorā ame'ẽ avi sábado ára omboete aguā, xee aeko mbo'e aguā, ha'e gui ha'e kuery oikuua aguā xee SENHOR ae iky'a'oa aikoa.

<sup>13</sup> Ha'e rami teĩ Israel kuery ma tekao e'ŷa py araa ague py ju opu'ãmba okuapy xerovai. Ha'e rami vy nda'ikuaixei xeayvuague ha'e aipotaa aikuua uka va'ekue rupi, ha'e va'e avakue ojapopa vy okuave 'rã va'eri. Ha'e rami vy opa mba'e py omongy'a okuapy sábado ára pygurarā aeja va'ekue. Ha'e nunga rupi tekao e'ŷ pyve xeayvu ha'e kuery áry xepoxya anhoẽ aguā re, amokanhymba ete aguā.

**14** Ha'e rami teĩ ha'e kuery re amboae rami ju ajapo xerery amboete ucaa rupi vy, xerery re yvy regua kuery ijayvu rei e'ŷ aguã, ha'e kuery yvy gui xevyguia kuery aipe'apa rire.

**15** Ha'e rami vy tekao e'ŷa py ju xepo aupti reve ha'e kuery pe aura va'ekue ijyvyrã va'ekue py araa ve'ŷ aguã re, kamby ha'e ei ndoataia ha'e yvy jave gui iporâvea py.

**16** Mba'eta ha'e kuery ndojapoxei okuapy xeayvuague, aipotaa rami nda'ikuaixei guive, sâbado ára pygumarã amoï va'ekue voi omongy'apa, mba'eta okuraxõ py ta'angaa kuery re rive oje'oixe.

**17** Ha'e rami teĩ ha'e kuery re ama'ẽ aperdoaa rupi, amokanhymba 'râgue py, namomba etei tekao e'ŷa rupi ikuia py.

**18** — Ha'e rami teĩ ha'e kuery ra'y kuery pe ma xeayvu tekao e'ŷa py. Ha'e vy aipoa'e va'ekue: "Peiko eme penderu kuery ikuaiague rupi, pejapo eme ha'e kuery oipotaa rami, penhemongy'a eme guive ha'e kuery ta'angaa oguereko va'e rupi rive.

**19** Mba'eta xee ae ma SENHOR Penderuete aiko. Pendekuai ke xeayvuague rupi, ha'e pemoï porã xee aipota va'e pejapopa aguã.

**20** Pemboete sâbado ára pygumarã aeja va'ekue, mba'eta oï 'rã xee roeko mbo'e aguã, xee ae SENHOR Penderuete aikoa peikuua aguã", ha'e va'ekue.

**21** Ha'e rami teĩ ta'y kuery voi opu'ãmba okuapy xerovai. Ha'e rami vy xeayvuague rupi nda'ikuai, nomoï porãi guive aipota va'e, ha'e va'e avakue ojapopa vy okuave 'rã va'eri. Ha'e rami 'râgue py omongy'apa rei okuapy sâbado ára pygumarã aeja va'ekue.

— Ha'e rami rire xee xeayvu ha'e kuery áry xepoxya anhoë aguã re, tekao e'ŷa py ikuia py ha'e kuery pe xepoxya aexa ukapa peve.

**22** Ha'e rami teĩ xerery amboete ucaa rupi vy xepo ajoko va'ekue, xerery re yvy regua kuery ijayvu rei e'ŷ aguã ha'e kuery oexaa py xevyguia kuery aipe'apa rire.

**23** Ha'e rami vy tekao e'ŷa py xepo aupti reve ha'e kuery pe aura yvy regua kuery ikuia rupi amoaimba aguã re, ijyvy ha'e javi rupi.

**24** Mba'eta xevyguia kuery ndojapoi karamboae xeayvuague, nda'ikuaixei aipotaa rami, omongy'apa sâbado ára pygumarã aeja va'ekue, ha'e ta'angaa nguu kuery oguereko va'ekue oexa vy oendu avi ombojeroviaxea.

**25** Ha'e nunga rupi ha'e kuery pe aeja uka amboae regua ayvu iporã e'ŷ va'e rupi ikuai aguã, ha'e heko mboaerã ha'e va'e rupi ikuai aguã va'ekue'ŷ.

**26** Ha'e rami vy aeja ta'angaa pe mba'emo ome'ëa py onhemongy'apa rei aguã, gua'y kuery oiko ypy'i va'ekue tata py oapya py. Ha'e rami ikuai aguã aeja namboekorâvei aguã, xee ae SENHOR aikoa oikuua pavê aguã.

**27** — Ha'e nunga rupi ndee ava ra'y, ndeayvu ke Israel kuery pe. Ha'e vy aipo're: Po rami SENHOR Nhanderuete ijayvu: Peneramoï kuery ma pova'e py ju opu'ã rei okuapy xerovai.

**28** Mba'eta yvy ha'e kuery pe ame'ẽ aguã re xepo aupti reve auraague py araa ma rire teĩ, ha'e kuery peteĩ yvy'ã yvate va'e, e'ŷ vy peteĩ yvyra hogue ana va'e oexa nhavõ ha'e py rive mba'emo ome'ẽ okuapy ta'angaa pe, heakuã porã va'e omoï ha'e mba'emo rykue onhoë okuapy xembopoxy aguã rami rive.

**29** Ha'e ramo xee aipoa'e ha'e kuery pe: "Mba'e yvyty tu kova'e, ha'e katy peẽ kuery peo pekuapy aguã?" ha'e va'ekue. Mba'eta hery ma Yvyty Ombojeroviaaty oïa, kova'e ára peve.

**30** Ha'e nunga rupi aŷ aipo're Israel kuery pe: Po rami SENHOR Nhanderuete ijayvu: Peẽ kuery voi penhemongy'apa pekuapy, peneramoï kuery rami ae ju. Mba'eta peẽ kuery ju pendetavy tema ojeguarupy ha'e kuery oguereko va'ekue rupi peo vy.

**31** Mba'eta aŷ peve penhemongy'apa 'rã ta'angaa pe mba'emo peme'ëa py, pendera'y kuery ae peapy vy guive. Ha'e rami teĩ Israel kuery, peju ri ty'y xevy peporandu uka vy? Anhetê ete xee SENHOR Penderuete xerekove rupi aura vy aipoa'e: Peẽ kuery ma nda'evei ae xevy peporandu uka aguã.

**32** Peē kuery aipopeje: “Ore ma yvy regua kuery reko rami 'rā orekuai yvyra ha'e ita guigua rive rombojeroviaa rupi, amboae yvy re ikuai va'e reko rami”, peje. Ha'e rami teī peneakā gui rive ha'e rami pendekuaixeal ndoikoi 'rāe.

**33** Mba'eta anhetē ete xee SENHOR Penderuete xerekove rupi aura vy aipoa'e: Peē kuery re xepo'aka 'rā xepo'aka aexa uka reve, xepoxya anhoēa rupi.

**34** Ha'e rami vy roipe'apa ju 'rā yvy regua kuery ikuia mbyte romoaīague gui, romboatypa ju 'rā yvy pendekuaiaeague gui. Xepo'aka aexa uka reve 'rā ajapo, xepoxya anhoēa rupi guive.

**35** Ha'e rami vy yvy regua ikuia katy ju rogueraa 'rā tekao e'ŷa katy rami. Ha'e gui ha'e py ma aikuua pota 'rā peē kuery re, jova re nhama'ē reve.

**36** Mba'eta Egito regua tekao e'ŷa rupi peneramoī kuery re aikuua potaague rami ae ju peē kuery re voi aikuua pota 'rā – he'i SENHOR Nhanderuete.

**37** — Ajapo 'rā xepopoka guýry rupi peaxa aguā rami. Ha'e rami vy romo'arandu 'rā xereve guarā ajapo va'ekue rami vy.

**38** Penembyte gui aipe'apa 'rā xere opu'ā ha'e naxenhe'ē rendui va'ekue. Ha'e kuery ikuiaeague yvy gui aipe'a teī ndooi 'rā Israel yvy re. Ha'e ramo peikuaa 'rā xee ae SENHOR aikoa.

**39** — Ha'e rā peē Israel kuery pe xee SENHOR Penderuete aipoa'e: Naxenhe'ē renduxei vy tapeo, peteī-teī pendekuaia ta'angaa pe rive aŷ ha'e raka'eve'i peve. Ha'e rami teī pemongy'a reive eme xerery iky'a e'ŷ va'e, ta'angaa pe mba'emo peme'ēa py.

**40** Mba'eta xevygua yvyty iky'a e'ŷ va'e, Israel regua yvyty yvatevea áry ma Israel kuery ha'e javi 'rā xembojerovia okuapy – he'i SENHOR Nhanderuete. — Ha'e va'e yvy re ae 'rā ha'e javive xembojerovia. Ha'e py ma xee arovya'ju 'rā. Ha'e py ae aipota 'rā mba'emo xevy peme'ē, mba'emo perekva'e jypygua iporāgueve, mba'emo iky'a e'ŷ va'e guive.

**41** Yvy regua kuery mbyte gui roipe'a vy peaīmbaague gui romboatypa ju rire xee rojou porā 'rā heakuā porā va'e rami. Ha'e ramo yvy regua kuery oexaa py aikuua uka 'rā iky'a e'ŷ va'e aikoa, peē kuery pendekuaiaeague rupi.\*

**42** Ha'e gui Israel yvy re roguerupa ma ramo peikuaapa 'rā xee ae SENHOR aikoa, ha'e va'e yvy xepo'aka renekuai re ame'ē aguā re auraague py ae.

**43** Ha'e py ma penema'endu'a 'rā mba'emo vai rupi pendekuaiaeague py penhemongy'apaague re. Ha'e rami vy pejeguaru 'rā pekuapy pendejegui ae, pendekuaiaeague re.

**44** Ha'e gui xerery amboete ukaa rupi vy romboaxy ju ramo peikuaa 'rā xee ae SENHOR aikoa. Mba'eta Israel kuery, pendeko vaiague re norombopagavei 'rā, opa marā pendekuaiaeague re'ŷ guive – he'i SENHOR Nhanderuete.

### *Kuaray puku-a katygua kuery rovai ijayvuague*

**45** Ha'e gui SENHOR oayvu ombou ju vy aipoe'i xevy:

**46** — Ava ra'y, ema'ē kuaray puku-a katy, ha'e vy ndeayvu ha'e kuery rovai. Emombe'u xeayvu ka'aguy kuaray puku-a katygua rovai.\*

**47** Ha'e vy aipo're ha'e py ikuai va'e pe: Pendu ke SENHOR ayvu. Po rami SENHOR Nhanderuete ijayvu: Aŷ ma amoendy 'rā tata penda py yvyra pyau ha'e ipirukue ha'e javi mokanhyařā. Ndoguevei 'rā tata rendy. Ha'e rami 'rāgue py penderova okaipa 'rā kuaray puku-a katy guive ijapu'a'ia katy peve.

**48** Pavē avakue oikuua 'rā xee SENHOR ae imoendyare aikoa. Ndoguevei 'rāe – he'i.

**49** Ha'e ramo xee aipoa'e:

— Ai SENHOR Xeruete! Ha'e kuery ijayvu 'rā xere: “Ha'e va'e e'ŷ ri ty'y ayvu rive mombe'uaty oiko?” he'i 'rā okuapy xevy – ha'e.

\* **20:41** 2 Coríntios 6.17 \* **20:46** Apy ma profeta ijayvu Jerusalém tetā ha'e Judéia yvy regua kuery re.

## 21

*SENHOR guigua kyxe re ijayvuague*

<sup>1</sup> Ha'e gui xevy SENHOR oayvu ombou vy aipoe'i:

<sup>2</sup> — Ava ra'y, ema'ẽ Jerusalém katy. Ha'e vy ndeayvu ha'e kuery ombojeroviaaty ikuai va'e rovai. Emombe'u xeayvu Israel yvy ha'e javi rovai.

<sup>3</sup> Ha'e vy aipo're: Po rami SENHOR Nhanderuete ijayvu: Ma'ẽ, peẽ kuery rovai aiko. Ha'e rami vy xekyxe aekyi 'rã hyru gui penembyte gui amomba aguã heko porã ha'e heko vai va'e guive.

<sup>4</sup> Mba'eta penembyte gui amomba 'rã heko porã ha'e heko vai va'e. Xekyxe aekyi 'rã hyru gui temimoingo ha'e javi rovai rupi, kuaray puku-a katy guive ijapu'a'ia katy peve.

<sup>5</sup> Ha'e ramo oikuua pavẽ aguã xee SENHOR ae hyru gui xekyxe aekyi va'ea, hyru py noĩ jeyvei 'rã guive.

<sup>6</sup> — Ha'e nunga rupi ndee ava ra'y, nepoaẽ nhendu ke. Ha'e kuery oendua py nepoaẽ nhendu 'rã ndepy'a py nda'evei ete reve.

<sup>7</sup> Ha'e gui ha'e kuery oporandu 'rã ndevy: "Mba'e re tu ha'e rami ete nepoaẽ ri?" he'i 'rã ndevy. Ha'e ramo aipo're 'rã: "Mba'emo aendu ramo'i va'ekue re rima xepoaẽ. Mba'eta ha'e nunga oiko rã pavẽ opy'a py onhemondyipa 'rã, pavẽ po ikangypa, pavẽ rei onhe'ẽ py ndaekorãvei 'rã okuapy, pavẽ renapy'ã yy rami rive 'rã opyta na'imbaraetevei vy. Ha'e nunga ou ma oiny, ojeupity 'rãe, he'i SENHOR Nhanderuete", 're 'rã.

<sup>8</sup> Ha'e gui teĩgue ju SENHOR oayvu xevy ombou. Ha'e vy aipoe'i:

<sup>9</sup> — Ava ra'y, emombe'u ju xeayvu. Ha'e vy aipo're: Po rami SENHOR ijayvu: Kyxe oaĩmbe'epa ha'e omboverapa pyre oĩ.

<sup>10</sup> Jojuka aguã oaĩmbe'ea, ha'e overa va'e rami ete omboveraa.

— Ha'e rami teĩ Israel kuery aipoe'i 'rã: "Javy'a nho 'rã jakuapy! Xera'y po pygua ma yvyra amboae kuery oguereko va'e gui ipo'akapave", he'i 'rã okuapy.\*

<sup>11</sup> Ha'e rami teĩ Nhanderuete ombovai:

— Ha'e va'e kyxe ma omboveraa rei mba'eta oiporua 'rãe. Oaĩmbe'e ha'e omboverapaa ma jojukhaarã po py amboaxa aguã.

<sup>12</sup> Ha'e nunga rupi ndee ava ra'y, neraxẽ ha'e nepoaẽ rei ke, mba'eta xevygua kuery rovai 'rã oiporua, Israel regua yvatekueve ha'e javi rovai guive. Ha'e va'e kuery ma amboaxapa 'rã kyxe rewegua pe, xevygua kuery ha'e javi reve. Ha'e nunga rupi eipete-pete nde'u rupi.

<sup>13</sup> Mba'eta ou 'rã penderekko a'ãarã. Ha'e gui penderuvixa ipo pygua va'e nhomoingo axy va'ekue noĩvei ramo mba'exa 'rã tu peiko? — he'i SENHOR Nhanderuete.

<sup>14</sup> — Ha'e gui ndee ava ra'y, emombe'u ke xeayvu, ejepopete-pete guive. Tove kyxe mokoĩgue tajopyxo, mboapykue peve tajojuka, jova-jovaive gui tou jojukaa rupi.

<sup>15</sup> Ha'e kuery okuraxõ py onhemondyi rei aguã, ha'e okẽ oẽaty ha'e javi rupi heta ho'a aguã. Ajapo 'rã kyxe overa va'e rami hexakã aguã. Mba'eta jojuka aguã ae omboveraa ha'e oaĩmbe'epaa.

<sup>16</sup> Ha'e gui ndee kyxe, tereo reiporu kuaa katy nembaraetea ha'e javi reve, ha'e gui reiporu kuaa e'ŷa katy ju tereo, reoa katy rei.

<sup>17</sup> Ha'e ramo xee voi ajepopete avi 'rã xepoxyague gui apytu'u vy. Xee SENHOR ae xeayvu va'e — he'i.

<sup>18</sup> Ha'e gui xevy SENHOR ombou ju oayvu. Ha'e vy aipoe'i:

<sup>19</sup> — Ndee ava ra'y, ejapo ke mokoĩ tape ra'angaa, ha'e va'e regua peteĩ rupi Babilônia pygua huvixa okyxe reve ou aguã. Mokoĩve ma peteĩ'i yvy gui ou va'e. Ha'e gui tetã oẽaty katy'i emoĩ avi mokoĩ yvyrage'i tape rexa ukaa.

\* **21:10** Israel kuery "Xera'y" he'ia ma nguvixave re ijayvu vy, hexe anho rei ojeroviaa rupi.

<sup>20</sup> Embopara imoiny peteī tape Amom kuery rekoia Rabá katy kyxē reve oo aguā, ha'e rā amboae ma Judá ha'e Jerusalém tetā ikorapa va'e katy oo aguā.

<sup>21</sup> Mba'eta Babilônia pygua huvixa optya 'rā ho'amy tape rakāmby py, mokoī tape joa katy e'ŷ oĩa py, nguu ete kuery pe ranhe imba'ekuaa aguā. Ha'e rami vy hu'y ombovava-vavaa ma ramo peteī oekyi 'rā, ta'angaa ngoo gui ogueru va'ekue pe oporandu 'rā, ha'e mba'emo py'akue rupi avi 'rā imba'ekuaa.

<sup>22</sup> Ha'e gui imba'ekuaa rupi oikuaa 'rā oiporu kuaa regua re Jerusalém tetā katy ae oo aguā. Ha'e rami vy oiko katu 'rā tetā rokē omopē aguā, jojuka aguā re ijayvu atā, joe opu'āa aguā re ojapukai, okē mopēa py tetā rokē re ombota, tetā kora re yvy omboaty vy omovā, ha'e torre ojapo aguā.

<sup>23</sup> Ha'e gui judeu kuery hexeve peteī rami ikuai aguā re oura va'ekue ma ha'e nunga oendu vy "Apu" he'i 'rā okuapy. Ha'e rami teī ha'e kuery reko vaiague re Nhanderuete oikuaa pota 'rā ombo'a ukapa aguā.

<sup>24</sup> Ha'e nunga rupi SENHOR Nhanderuete aipoe'i:

— Anhetē ae peē kuery xemoma'endu'a penderekvaia re aikuua pota aguā, mba'eta penderekvaia ojekuaa porā, mba'emo pejapoa ha'e javi py pexa uka pejejavya. Ha'e rami ete xemoma'endu'a rire rombo'apa 'rā ha'e nungakue re.

<sup>25</sup> Ha'e gui ndee Israel kuery ruvixa opa marā rei nderekvaia vai ete va'e, ovaē ma oiny nde'āra opaa py rombopaga aguā.

<sup>26</sup> Po rami SENHOR Nhanderuete ijayvu ndevy: Emboi ke neakā regua ha'e coroa, mba'eta ha'ekue rami ve'ŷ 'rā oiko. Mba'eta yvyīgueve'i omboyvatea 'rā, ha'e rā yvatekueve ma omo'yvyī'ia 'rā.

<sup>27</sup> Ivaipa, ivaipa 'rā! Aŷ ma xee ambovaipa 'rā neretā, ha'e ramo noīvei 'rā, opena kuaa va'erā ou e'ŷa ja. Ha'e va'e pe ma amboaxa ju 'rā.

<sup>28</sup> — Ha'e gui ndee ava ra'y, emombe'u ke xeayvu. Po rami SENHOR Penderuete ijayvu Amom pygua kuery ijayvu reia re. Ha'e gui aipo're 'rā: Kyxe, kyxē hyru gui oekyia ma, omboveraa jojuka aguā, nhomomba ha'e overa va'e rami hexakā aguā.

<sup>29</sup> Ha'e va'e ma ojaya 'rā opa marā heko vai va'e kuery aju'y, mba'eta ovaē ma hi'āra opaa py ambopaga aguā, mba'eta peē kuery rekorā oexa'āa rupi rive omombe'u rire, ha'e kuery ae oexa ra'uague rupi.

<sup>30</sup> — Ha'e gui emoi ju ndekyxe hyru py. Mba'eta yvy reikoague py ae ju 'rā rombopaga.<sup>†</sup>

<sup>31</sup> Ha'e rami vy nde'āry amboi 'rā xepoxy, nderovai rupi aipeju 'rā tata rami xepoxy regua, ha'e gui romboaxa 'rā avakue nhomboaxy rupi e'ŷ nhomoingo axy raxa va'e kuery po py.

<sup>32</sup> Ha'e ramo reiko 'rā mba'emo pirekue oapy pyrā rami. Nderuguy omoēa 'rā ndeyvy re ae. Ndere na'ima'endu'aavei 'rā, xee SENHOR ae xeayvu rire.

## 22

### *Jerusalém pygua kuery ojeguarupy ojapo okuapya re ijayvuague*

<sup>1</sup> Ha'e gui xevy SENHOR oayvu ombou ju vy aipoe'i:

<sup>2</sup> — Ha'e gui ndee ava ra'y, ndeayvu ta pa tetā pygua kuery jouguy omoēague re? Ndeayvu ke ha'vy ojeguarupy ojapo okuapya ha'e javi re.\*

<sup>3</sup> Ha'e gui aipo're: Po rami SENHOR Nhanderuete ijayvu: Nda'evei ete 'rā tetā jouguy moēa ikuiaia va'e pe. Mba'eta ta'angaa pejapo va'ekue rupi penhemongy'a vy pen-derovairā ae pejapo pekuapy pepagaa ára pyguarā ovaē peve.

<sup>4</sup> Mba'eta jouguy pemoēa py pendepo ae pemongy'apa. Mba'eta ta'angaa peē ae pejapo va'ekue rupi penhemongy'a vy pejapo pepaga aguā ára ovaē aguā rami. Penema'etŷa

<sup>†</sup> **21:30** Apy ma Babilônia pygua huvixa pe ju Nhanderuete ijayvu ombopaga aguā re. \* **22:2** "Tetā" he'ia ma Jerusalém ae (Mateus 23.37; Lucas 13.34).

opa ta ma. Ha'e nunga rupi ae xee ajapo amboae regua kuery yvy jave rupi ikuai va'e pendejojai rei ha'e penembojaru rei aguā rami.

<sup>5</sup> Pendea katy'i ha'e mombyry rupi ikuai va'e voi ijayvu vaikue rei 'rā okuapy pendere, mba'eta oikuua pavē opa marā rei pendekuaia.

<sup>6</sup> — Ha'e gui Israel regua yvatekueve voi, peteī-teī opo'akaa rupi mba'eve ndojapoi 'rā jouguy omoē e'ŷ vy.

<sup>7</sup> Ha'e rami vy penembyte rupi ha'e kuery nomboetei 'rā nguu ha'e oxy, okorepa rei 'rā amboae regua, ha'e ha'eve'ŷa rami 'rā oguerekō tyre'ŷ ha'e imeve'ŷ va'e kuery.

<sup>8</sup> Nomboetei mba'emo xevygua iky'a e'ŷ va'e, omongy'apa guive sábado ára pyguarā aeja va'ekue.

<sup>9</sup> Penembyte rupi ikuai avi avakue jouguy omoē ukaxe vy joe ijayvu rei va'erā. Penembyte rupi ae ho'u 'rā okuapy xo'o ta'angaa pe ome'ẽ mbyre vvyty áry rupi, opa marā rei ikuai vy.

<sup>10</sup> Pendekuaia mbyte rupi ojejavvy 'rā nguu pe, onhemboja 'rā guive kunhague gueko re oiko va'e re.

<sup>11</sup> Amongue ma ojejavvy 'rā oirū ra'yxy reve, amboae ma omongy'apa rei 'rā gua'y ra'yxy ae, ha'e rā amboae ma onheno 'rā gueindy nguu rajy reve ae.

<sup>12</sup> Pendekuaia rupi mba'emo ome'ẽa rā ojopy 'rā jouguy omoē aguā. Peráta oiporu uka rire oipe'a retave 'rā okorea rupi. Oirū kuery ombotavypaa py oipe'apa 'rā oguerekō va'ekue. Ha'e ramia py na'ima'endu'avei okuapy xere – he'i SENHOR Nhanderuete.

<sup>13</sup> — Aŷ ma pejokore ha'e jouguy pemoēa py pendepo ky'apa ramo ajepopete 'rā xepoxya aexa uka vy. Ha'e ramo penembaraete 'rā ri ty'y pendepy'a py?

<sup>14</sup> Pendepo imbaraete avi 'rā ri ty'y rombopaga vy ajua ára pyguarā? Mba'eta xee SENHOR xeayvu rire ajapo 'rāe.

<sup>15</sup> Ha'e rami vy romoaĩmba 'rā vvy regua kuery ikuiaia rupi, ha'e rogueraa ukapa 'rā vvy mboae rupi. Ha'e rami vy 'rāe pendegui aipe'a ha'eve'ŷa oĩ va'e.

<sup>16</sup> Ha'e gui vvy regua kuery oexaa py penhemongy'apa ma rire peikuua 'rā xee ae SENHOR aikoa.

<sup>17</sup> Ha'e gui SENHOR oayvu ombou vy aipoe'i xevy:

<sup>18</sup> — Ava ra'y, xevy pe rā Israel kuery ikuai tata rupa py prata oiky'a'oa rā mba'emo ky'akue opytā va'e rami: overa va'e, estanho, ferro ha'e chumbo ky'akue rami rive.

<sup>19</sup> Ha'e nunga rupi po rami SENHOR Nhanderuete ijayvu: Mba'emo ky'akue peẽ kuery pendekuai ramo aŷ xee romboatypa 'rā Jerusalém mbyte py.

<sup>20</sup> Mba'eta prata, overa va'e, ferro, chumbo ha'e estanho ma omoĩmbaa 'rā tata rupa py, oipejua rā tata raku py hykupa aguā. Ha'e rami ae avi xepoxya rupi rojou vai reve romono'õmba vy ha'e py roeja 'rā romboykupa aguā.

<sup>21</sup> Romono'õague py peẽ kuery áry rupi aipeju 'rā xepoxya reve. Ha'e ramo penderykupa 'rā Jerusalém mbyte py.

<sup>22</sup> Tata rupa py prata hykupaa rami avi peẽ kuery penderykupa 'rā ha'e py. Ha'e ramo peikuua 'rā xee SENHOR ae peẽ kuery áry xepoxya anhoëague – he'i.

<sup>23</sup> Ha'e gui SENHOR oayvu xevy ombou ju. Ha'e vy aipoe'i:

<sup>24</sup> — Ava ra'y, aipo're ha'e kuery vvy pe: Ndee vvy, nderejeky'a'o ukai rire xepoxya aexa ukaa ára nda'oky'i 'rā nde'áry.

<sup>25</sup> Yvy mbyte rupi profeta kuery jogueroayvu 'rā nhonhe'ẽ mombaxe vy, guary okororõ reve guaĩ axĩ re guembia omoatāa rami. Mba'eta oipe'apa 'rā joperáta ha'e nhomba'e rei-rei. Ha'e rami vy vvy mbyte rupi omboetave tema imeve'ŷ va'e kuery.

<sup>26</sup> Ha'e kuery regua sacerdote kuery voi xeguigua lei rupi nda'ikuai, omongy'apa 'rā guive mba'emo xevygua iky'a e'ŷ va'e. Ha'e kuery oikuua rā iky'a e'ŷ va'erā omboaxa pyre ha'e omboaxa pyre'ŷ ma joo ramigua. Ndoikuuaai merami ha'eve va'e ha'eve'ŷ

va'e joo ramigua e'ŷa. Ha'e rami vy sâbado ára aeja va'ekue py oiko va'e gui omboty 'rã guexa. Ha'e rami vy omboetepy e'ŷ rami aiko ha'e kuery mbyte.

<sup>27</sup> Ha'e kuery regua yvatekueve ma aguara'i guaŷ axí py guembia omoatãa rami avi omoë 'rã jouguy, nhonhe'ẽ omombaa rupi ojopy aguã jokoreague rive.

<sup>28</sup> Ha'e gui ha'e kuery regua profeta kuery ma cal py ha'e nunga ha'e javi omoxiimba rive 'rã apu oexa ra'uague omombe'ua py. Mba'eta ijapua rupi rive ayvu omombe'u vy aipoe'i 'rã: " SENHOR Nhanderuete ma po rami ijayvu", he'i 'rã SENHOR ijayvuague rupi e'ŷ va'eri.

<sup>29</sup> Ha'e rami vy yvy re ikuai va'e jokorea rupi ikuai, imondaa rupi oguereko axy 'rã ojexavai va'e ha'e iporiaukue'i, mba'e re'ŷ omoingo axy 'rã guive amboae guigua kuery.

<sup>30</sup> Ha'e kuery mbyte xee aeka teĩ peteĩ ri jepe ava xerenonde py tetã kora omoatyrõ nho aguã, ha'e rami e'ŷ vy ipa'ũ py oĩ aguã mba'emo jokoarã, kova'e yvy xee amokanhymba e'ŷ aguã. Ha'e rami teĩ ndajoui peteïve.

<sup>31</sup> Ha'e nunga rupi ae ha'e kuery áry anhoë xepoxya tata rami, amokanhymba aguã ajou vaia rupi. Ha'e rami vy ha'e kuery áry ambou ikuaiague re opaga aguã – he'i SENHOR Nhanderuete.

## 23

### *Kunhague itavy rei va'e Oolá ha'e Oolibá hery va'e re ijayvuague*

<sup>1</sup> Ha'e gui SENHOR ombou ju oayvu xevy pe. Ha'e vy aipoe'i:

<sup>2</sup> — Ava ra'y, ikuai karamboae mokoï kunhague, peteï'i re ixy va'e.

<sup>3</sup> Ha'e va'e kuery ma Egito yvy re ikuia rupi itavy rei okuapy. Kunhataï teri reve itavy rei. Ha'e rami rã okãmbiripaa, kunhataï teri reve okã rupi onhekuavã ukapa.

<sup>4</sup> Tyke ma Oolá hery va'e, ha'e rã ikypy'y ma Oolibá. Ha'e va'e kuery ma xemba'e ae, ha'e ikuai avi ipi'a ha'e imemby kuery. Ha'e gui hery reikuaa porâve aguã Oolá ma Samaria, ha'e rã Oolibá ma Jerusalém.

<sup>5</sup> — Ha'e gui Oolá ma xemba'e teri reve teĩ itavy rei. Ha'e rami vy oendu avakue mboae reve itavyxea, ha'e katy'i Assíria pygua kuery ikuai va'e reve.

<sup>6</sup> Ha'e va'e kuery ma hovy porã rei va'e py anho onhemonde va'e, huvixa joe opena va'e kuery, avakue pyau omoaruãmby, kavaju árygua meme.

<sup>7</sup> Ha'e va'e avakue reve ae kunha va'e itavy, Assíria pygua ra'y kuery iporâve va'e ramo. Ha'e kuery ha'e javi reve itavyxea oendu, ha'e ta'angaa oguereko va'e rupi onhemongy'a avi.

<sup>8</sup> Ha'e rami vy ndoejai ae ojeguarupy Egito gui ogueru va'ekue, mba'eta kunhataï teri reve hexeve onhenoa vy okãmbiripaa rire, hexeve itavy reia py.

<sup>9</sup> Ha'e nunga rupi Assíria pygua ra'y kuery po py amboaxa hexeve itavy rei va'e, ha'e kuery reve itavyxea anho rei oendu ramo.

<sup>10</sup> Ha'e ramo ha'e kuery ombopire reipa okuapy ha'e oipe'apa heravy ipi'a kuery ha'e imemby kuery. Ha'e rã kunha va'e ma ha'e kuery ojuka okuapy kyxe py. Ha'e ramo ixupe "Kunhague pavê gui ayvu vaivepy", 'ea, ombopagaa rã.

<sup>11</sup> — Ha'e gui ikypy'y Oolibá ma ha'e nunga oexapa teĩ guyke gui oenduve itavy reixe. Ha'e rami vy guyke gui voi itavyve.

<sup>12</sup> Ha'e rami vy itavyxe ha'e katy'i rupi Assíria pygua ra'y kuery ikuai va'e reve, mba'eta huvixa joe opena va'e, ao hepyve va'e py onhemonde va'e, kavaju árygua, ha'e avakue omoaruãmby meme ramo.

<sup>13</sup> Ha'e gui xee aexa rã onhemongy'apa ma, guyke reve joo rami ae tema heko vai vy.

<sup>14</sup> Ha'e gui ojejavyve tema, mba'eta oo mbotya re oexa avakue caldeu kuery oo ra'angaa pytã va'e py ombopara pyre.

<sup>15</sup> Ha'e kuery ma iku'akuua porã ha'e inhakã regua va'e. Ha'e javi oexa rã Babilônia pygua ra'y kuery yvatekueve rami, Caldéia yvy re itui'i va'ekue meme.

<sup>16</sup> Ha'e kuery ra'angaa oexa vy itavy reixeaa anho oendu. Ha'e rami vy Caldéia yvy katy omondouka oayvu reraa.

<sup>17</sup> Ha'e ramo Babilônia pygua ra'y kuery oupa kunha va'e reve guarã. Avakue reve hupa onhenoaty py onhemboja vy omongy'apa okuapy itavy reia py. Ha'e ramo kunha va'e ma ha'e kuery reve onhemongy'apa ma vy ojeguarupa. Ha'e vy oejapa.

<sup>18</sup> Ha'e va'e ojekuaa uka ha'e ipire reia rupi oiko rire ma xenhe'ẽ py aendu ndaxeaa'eveia, tyke re ndaxeaa'eveiague rami.

<sup>19</sup> Ha'e rã ikypy'y ma heko vaive tema, mba'eta ima'endu'a Egito yvy re kunhataĩ teri reve itavy rei oikovyague re.

<sup>20</sup> Ha'e py oendu avakue reve itavyxea, mburika rami hakuaĩ ha'e kavaju rami ityy va'e rami ikuai rã.

<sup>21</sup> Ha'e ramia py ima'endu'a kunhataĩ teri reve ha'eve'ŷ va'e rupi anho oikoague re, Egito pygua kuery okãmbiripa jave guare re.

<sup>22</sup> Ha'e nunga rupi po rami SENHOR Nhanderuete ijayvu Oolibá pe:

— Aŷ ma xee ajapo 'rã avakue ndereve guare nderovai opu'ãmba aguã rami. Ha'e kuery re rejeguaru reve rejapa va'ekue ri nderovai arupa ju 'rã jova-jovai rupi gui.

<sup>23</sup> Ha'e kuery ma Babilônia pygua ra'y kuery, ha'e caldeu kuery Pecode, Soa ha'e Coa guigua, ha'e gui ha'e kuery reve ou avi 'rã Assíria pygua ra'y kuery ha'e javi, avakue pyau omoaruãmby, huvixa joe opena va'e kuery, yvatekueve ha'e omboetevepy, kavaju áry ou va'e meme 'rã.

<sup>24</sup> Nderovai kuaray apu'a'ia katy gui jogueru 'rã karóxa, mba'eyru ha'e heta va'e reve. Nderovai 'rã ikuai jova-jovaive rupi hu'y jokoa ha'e imo'ãa tuvixa va'e, ha'e gui ngora ratã reve. Ha'e kuery pe xee rombopaga uka ramo nembopaga 'rã okuapy ha'e kuery ae oikuua rami vy.

<sup>25</sup> Nderovai aiko 'rã nda'evei etea rupi, ha'e ramo ha'e kuery voi ndeavyky rei 'rã opoxya rupi. Ha'e vy ojaya 'rã nexõ ha'e nenambi, ha'e gui hembyrekue ma ojukapa 'rã kyxe py. Ha'e vy nememby kuery ha'e ndepi'a kuery oipe'apa 'rã heravy, ha'e gui hembyrekue ma omokanhymba 'rã tata py.

<sup>26</sup> Ndeao oipe'apa 'rã, ha'e gui ogueraapa 'rã renhembojeguaague.

<sup>27</sup> Ha'e rami py amomba 'rã ha'eve'ŷ va'e rupi Egito yvy guive reikoague, ndetavy reia rupi. Ha'e rami rire nerema'ẽvei 'rã Egito pygua kuery re, ijyvy re voi nanema'endu'avei 'rã.

<sup>28</sup> Mba'eta po rami SENHOR Nhanderuete ijayvu: Aŷ ma xee romboaxa 'rã ndereavyuvei va'e kuery po py, ha'e kuery gui rejeguaru reve reja va'ekue.

<sup>29</sup> Ha'e ramo ha'e kuery ndererekko axy 'rã opoxya rupi, ndegui oipe'apa 'rã remba'eapoague repy. Ndeao oipe'apa ma vy ndereja 'rã ndepire rei reve, ojekuaapa aguã ndetavy reiague, ha'eve'ŷ va'e rupi anho reikoague ha'e renhemongy'apa reiague.

<sup>30</sup> Ha'e rami ete ndererekko 'rã amboae regua kuery reve ndetavy rei rire, ha'e kuery ta'angaa oguerekoo va'e reve renhemongy'apa rei rire guive.

<sup>31</sup> Nderyke oikoague rami ae reiko rire ndepo py ju ame'ẽ 'rã karo ixupe guare.

<sup>32</sup> Po rami SENHOR Nhanderuete ijayvu: Rey'u 'rã nderyke peguare karo tuvixa ha'e iporuxu va'e gui. Ha'e va'e py heta oõ ojojai reipy ha'e ayvu vaipy anho.

<sup>33</sup> Ha'e va'e ma nemonga'u 'rã, nemoingo axy 'rã guive. Mba'eta karo nderyke Samaria peguare ma nhomondyi rei ha'e nhombovaipaarrã.

<sup>34</sup> Ha'e va'e gui ma ndee rey'upa 'rã. Iky'akue voi re'upa 'rã, ha'e nekã rupi reikaraĩmba 'rã. Xee ae ha'e rami xeayvu — he'i SENHOR Nhanderuete.

<sup>35</sup> Ha'e nunga rupi po rami ijayvu SENHOR Nhanderuete:

— Xegui nderexarai vy xea katy ndekupe rive rerova rire ndere oõ 'rã repaga aguã rejelou porã reiague ha'e ndetavy reiague re — he'i.

<sup>36</sup> Ha'e gui SENHOR aipoe'ive ju xevy:

— Ava ra'y, aÿ ndeayvu ta pa Oolá ha'e Oolibá reko vaia re? Eikuaa uka ha'vy ojeguarupy ha'e kuery ojapoague.

<sup>37</sup> Mba'eta ha'e kuery itavy rei, ipo ky'apa ma guive jouguy omoëague re. Ta'angaa oguereko va'e reve avi itavy rei, ha'e omemby kuery xera'y kueryrã oguereko va'ekue ri ta'angaa kuery pe rive ome'ẽ tata py omombaa py.

<sup>38</sup> Ha'e gui ma po ramigua ju ojapo avi xerovai: Ha'e va'e árave ma voi omongy'apa xevygua oo iky'a e'ÿ va'e, omboyke guive sábado ára pyguarã aeja va'ekue.

<sup>39</sup> Mba'eta ta'angaa pe omemby kuery ha'e opi'a kuery oapy okuapy ma rire ha'e va'e árave ju xevygua oo iky'a e'ÿ va'e re ou okuapy omongy'a rei aguã. Ha'e rami ete ojapo okuapy xevygua opy rupi.

<sup>40</sup> Ha'e gui oïve teri, mba'eta penoï uka avakue mombyry gui. Ha'e vy ha'e kuerya katy pemondouka pendeayvu reraa, ha'e ramo ou okuapy. Ha'e kuery reve pendetavy rei aguã ma pejau, penderexa rupi pemopytã, ha'e penhembojegua porã rei.

<sup>41</sup> Ha'e vy tenda iporãve va'e áry peguapy peiny, peteñ mesa oguereko katupa pyre yvýry. Ha'e va'e áry pemoï avi heakuã porã va'e ha'e azeite xevy guarã va'ekue.

<sup>42</sup> Ha'e gui kunhague yvýry rupi onhendu heta ete ov'y'a reia rupi ikuai va'e. Avakue ojou vaipy reve tekao e'ÿa gui oguerua oka'u va'e regua. Ha'e kuery ma kunhague po re omoï okuapy poapy regua, ha'e gui inhakã re ma akã regua iporãgueve omoï.

<sup>43</sup> Ha'e nunga rupi xee aipoa'e ymave guive itavy rei va'e re: "Itavy reia rupi ae ta ri ty'y oiko?" ha'e.

<sup>44</sup> Ha'e ramo kunha va'e re onhemboja pavã, kunha itavy rei va'e reve joguereko va'e rami. Ha'e rami vy joguereko okuapy Oolá ha'e Oolibá reve, kunhague itavy rei va'e ae rã.

<sup>45</sup> Ha'e gui avakue heko porã va'e ma ombopaga 'rã kunhague tavy rei ha'e jojukaa kuery ombopagaa rami. Mba'eta kunhague itavy rei va'e ikuai, ha'e ipo ky'apa jouguy omoëa py.

<sup>46</sup> Ha'e nunga rupi SENHOR Nhanderuete aipoe'i:

— Ha'e va'e kunhague rovai ma heta 'rã ambou, mba'eta opa marã oguereko va'erã pe amboaxa 'rã, mba'emo pe'apaarã kuery pe guive.

<sup>47</sup> Ha'e ramo heta ete va'e ojapipa 'rã ita py, kyxe py oikyximba 'rã guive. Ojukapa 'rã imemby kuery ha'e ipi'a kuery, ha'e oapypa 'rã hoo.

<sup>48</sup> Ha'e rami vy ha'e kuery yvy gui amomba 'rã ha'eve'ÿ va'e rupi anho ikuaiague, kunhague mboae kuery oexa vy onheangu aguã ha'e va'e kunhague ojejou porã reiague rami e'ÿ ikuai aguã. Mba'eta pende'áry ou 'rã ha'eve'ÿ va'e rupi anho peikoague re pepaga aguã, ta'angaa reve pejejavyague re voi. Ha'e ramo peikuaa 'rã xee ae SENHOR aikoa.

## 24

### *Mba'emo re ombojoja vy oja omombe'uague*

<sup>1</sup> Ha'e gui nove ma'etÿa ha'e dez jaxya va'e, dez araa py SENHOR ombou oayvu xevy. Ha'e vy aipoe'i:

<sup>2</sup> — Ava ra'y, embopara ke kova'e ára rery. Mba'eta kova'e ára ae Babilônia pygua huvixa ou 'rã Jerusalém tetã re.

<sup>3</sup> Ha'e nunga rupi kova'e kuery naxenhe'ẽ rendui va'e rovai emombe'u peteñ ayvu mba'emo re rembojoja vy. Ha'e vy aipo're ha'e kuery pe: "Po rami SENHOR ijayvu: Pemoï oja tata áry, pemoï ke aÿ, ha'e gui pemoï avi yy.

<sup>4</sup> Ha'e va'e py pemoï avi xo'o ra'ykue. Iporãgueve anho pemoï, hi'ugue ha'e ijaxi'ykue. Pemonyê ikâgue peiporavo va'ekue,

<sup>5</sup> penerymba kuery vexa'i gui iporãve va'e regua anho. Ha'e gui oja guýry rupi pemoï reta yxakã. Pemboaku opupu porã aguã rami, oja py ojypa porã aguã ikâgue", 're.

<sup>6</sup> Mba'eta po rami SENHOR Nhanderuete ijayvu:

— Nda'evei ete 'rā kova'e tetā jouguy moēa kuery ikuaria pe, mba'eta oja iky'apa rei va'e rami opyta, ndojeky'a'o ukai rire! Penoēmba ke xo'o ra'ykue oja gui, peiporavo e'ŷ re.

<sup>7</sup> Mba'eta tetā mbyte rupi ikuai jouguy omoēague re ipo ky'a va'e. Itaova áry ae omoē, yvy rupi yvy ku'ikue ojao'i aguā rupi e'ŷ.

<sup>8</sup> Ha'e gui xee ma itaova áry rupi ju amoī tuguy ojao'ipaa e'ŷ aguā py, opoxya rupi nhombopagaarā ambou aguā.

<sup>9</sup> Ha'e nunga rupi po rami SENHOR Nhanderuete ijayvu: Nda'evei ete 'rā kova'e tetā jouguy moēa kuery ikuaria pe! Mba'eta xee voi amoī reta 'rā yxakā.

<sup>10</sup> Yxakā amoī reta ma vy amoendy 'rā tata, xo'o ambojy ha'e tykue amoana aguā, ikāgue ikuai va'e okaipa peve.

<sup>11</sup> Ha'e gui pemoī oja tapyī áry, hexakāmba peve haku aguā, ha'e rami vy iky'akue iporā e'ŷague ha'e javi oipa aguā.

<sup>12</sup> Ha'e ramia py xee anhea'ā rive, mba'eta iky'akue heta oī rā ndoipai, tata áry teī.

<sup>13</sup> Mba'eta pendeky'aa ma ha'eve'ŷ va'e rupi anho pendekuaia. Ha'e gui xee roiky'a'oxe teī peē ma ndapejeky'a'o ukaxe. Ha'e nunga rupi napendeky'a'oai 'rāe, pendevy xepoxya aexa ukapa e'ŷa ja.

<sup>14</sup> Xee SENHOR ae aipoa'e: Ha'e rami ae 'rā oiko, xee ajapo 'rāe. Ndajevyi 'rā ha'ekue py, noromboaxyi 'rā, amboae rami ndajapoi 'rā guive. Mba'eta rombopaga 'rā pendekua-iague ha'e pejapo vaiague re — he'i SENHOR Nhanderuete.

### *Ezequiel ra'yxy omanoague*

<sup>15</sup> Ha'e gui SENHOR oayvu ombou vy aipoe'i xevy:

<sup>16</sup> — Ava ra'y, ma'ě, ndegui aipe'a xapy'a ta reayvuve va'ekue. Ha'e rami teī ndepy'a vai eme, ejae'o eme, neī nderexay eme guive.

<sup>17</sup> Nepoaē 'rā rekyrirī reve, erojae'o eme omano va'ekue. Ha'e rami 'rāgue py neakā re emoī akā regua, ndepy re ma py regua emoī, nerendyva voi ta'ipuku eme, ha'e ipy'a vai va'e pegua tembi'u oguerua teī he'u eme — he'i.

<sup>18</sup> Ha'e gui ko'ēgue aje'ive'i reve heta va'e kuery pe xeayvu rire ka'arukue xera'yxy omano ma. Ha'e gui ko'ě jevy ma Nhanderuete aipoe'iague rami aiko.

<sup>19</sup> Ha'e rami rā heta va'e kuery aipoe'i xevy:

— Emombe'u ke orevy mba'erā pa nami reikoa.

<sup>20</sup> Ha'e rā xee ambovai:

— Xevy pe SENHOR oayvu ombou. Ha'e vy aipoe'i:

<sup>21</sup> Aipo're Israel kuery pe: Po rami SENHOR Nhanderuete ijayvu: Aŷ ma xee ae ajapo 'rā xevygua oo iky'a e'ŷ va'e nomboeteavei aguā rami, ha'e va'e perovy'ave ha'e pexaxeve va'e, ha'e pejou porā ete va'e teī. Ha'e gui pendera'y kuery ha'e penderajy kuery ha'e py peja va'ekue ojukapaa 'rā kyxe py.

<sup>22</sup> Ha'e rire teī peē voi peiko avi 'rā xee aikoa rami. Ha'e vy penerendyva ndapejai 'rā ipuku aguā rami, ha'e ndape'ui 'rā tembi'u ipy'a vai va'e pegua oguerua ramo voi.

<sup>23</sup> Peneakā re perekō 'rā akā regua, ha'e pendepy re oī 'rā py regua. Napendepy'a vai 'rā, ndapejae'oi 'rā. Ha'e rami avi pepa 'rā peovy pejejavyague re, ha'e vy peteī-teī penepoāē 'rā joa py.

<sup>24</sup> Mba'eta Ezequiel ma nami oiko peikuua aguā, ha'e oikoa rami ae avi peē kuery voi pendekuai 'rā. Ha'e nunga oiko ramo peikuua 'rā xee ae SENHOR aikoa — he'i.

<sup>25</sup> — Ava ra'y, raka'eve rā ha'e kuery gui aipe'a 'rā ojou porāve ha'e oguerovy'ave va'e, oexaxeve ha'e onhe'ě py ogueroporaei va'e. Aipe'a avi 'rā ta'y kuery ha'e tajy kuery.

<sup>26</sup> Ha'e va'e ára ndea py ou 'rā peteī oo jepe va'ekue, ha'e ae ma voi omombe'u 'rā ndevy.

<sup>27</sup> Ha'e va'e ára ma ndeayvu nho 'rā oo jepe va'ekue oīa py. Ndeayvu 'rā, nerekyrirīvei 'rā. Ha'e rami reiko 'rā ha'e kuery oikuua aguā. Ha'e ramo ha'e kuery oikuua 'rā xee ae SENHOR aikoa.

## 25

### *Amom pygua kuery rovai ijayvuague*

- <sup>1</sup> Peteīgue ju SENHOR oayvu ombou. Ha'e vy aipoe'i xevy:  
<sup>2</sup> — Ava ra'y, ema'ẽ e'amy Amom ra'y kuery ikuiaia katy. Ha'e vy xeayvu emombe'u ha'e kuery pe.  
<sup>3</sup> Aipo're Amom ra'y kuery pe: Pendu ke SENHOR Nhanderuete ayvu. Po rami ijayvu: Peẽ kuery ma xevyguia oo iky'a e'ŷ va'e omongy'apaa rã "Ha'evea rami!" peje va'ekue, Israel yvy ombovaipaa, ha'e Judá kuery escravo-rã ogueraapaa ramo.  
<sup>4</sup> Ha'e nunga rupi aŷ romboaxapa 'rã kuaray oua katyguia kuery pe. Ha'e ramo pendeyvy re ha'e kuery ovaẽmba vy hekoia 'rã penembyte py. Ha'e vy ha'e kuery ho'u 'rã okuapy mba'emo pemboaju va'ekue, oy'u 'rã guive kamby penoẽ va'ekue.  
<sup>5</sup> Ha'e gui Rabá tetã ajapo 'rã camelo kuery ikuai atyrã, ha'e Amom kuery rekoague ajapo 'rã vexa'i kuery korarã. Ha'e ramo peikuaa 'rã xee ae SENHOR aikoa.  
<sup>6</sup> — Mba'eta po rami ijayvu SENHOR Nhanderuete: Peẽ kuery ma Israel yvy re pevy'a reia rupi pejepopete-pete ha'e pendepy pembota-mbota va'ekue penenhe'ẽ py mba'emo vai perekva'e ha'e javi rupi.  
<sup>7</sup> Ha'e rami rire penderovai xepo audi vy rojapo 'rã amboae regua kuery pendepe'apa aguã rami. Yvy regua mbyte gui roipe'a vy romokanhymba 'rã yvy gui. Romomba ete 'rã. Ha'e ramo peikuaa 'rã xee ae SENHOR aikoa.

### *Moabe pygua kuery rovai ijayvuague*

- <sup>8</sup> Ha'e gui SENHOR Nhanderuete aipoe'i:  
— Moabe ha'e Seir pygua kuery aipoe'i: "Ma'ẽ, Judá kuery ma yvy regua kuery ha'e javi rami opyta ikangy va'e", he'i okuapy ramo  
<sup>9</sup> aŷ aipe'a 'rã Moabe yvy ja'oa tetã oguerovy'ave va'e Bete-Jesimote, Baal-Meom ha'e Quiriataim guive.  
<sup>10</sup> Ha'e va'e tetã amboaxapa 'rã kuaray oua katyguia kuery rekoarã, Amom kuery re ajapoague rami avi, ha'e kuery re na'ima'endu'aavei aguã yvy regua ikuiaia rupi.  
<sup>11</sup> Ha'e rami vy ambou 'rã Moabe pygua kuery mbopagaarã. Ha'e ramo ha'e kuery voi oikuuaa 'rã xee ae SENHOR aikoa.

### *Edom pygua kuery rovai ijayvuague*

- <sup>12</sup> Po rami SENHOR Nhanderuete ijayvu:  
— Edom pygua kuery ma Judá kuery rovai opu'ãmba vy ipo ky'apa va'ekue ha'e kuery re opu'ãa py.  
<sup>13</sup> Ha'e rami rire SENHOR Nhanderuete aipoe'i: Edom pygua kuery rovai voi xepo audi vy amomba 'rã avakue ha'e hymba kuery, tekoia e'ŷa ju oĩ aguã. Ha'e vy Temã tetã guive Dedã peve ojukapaa 'rã kyxé py.  
<sup>14</sup> Edom pygua kuery ambopaga uka 'rã xevyguia Israel kuery pe. Ha'e ramo ha'e kuery ombopaga 'rã Edom kuery xepoxya ha'e ajou vaia rupi. Ha'e ramo Edom kuery xekuaa avi 'rã ambopaga rã — he'i SENHOR Nhanderuete.

### *Filisteu kuery rovai ijayvuague*

- <sup>15</sup> Po rami SENHOR Nhanderuete ijayvu:  
— Filisteu kuery ma onhe'ẽ py Israel kuery jou vai etea rupi opu'ã rei okuapy ha'e kuery re, raka'e rã peve guarã omomba aguã teī.  
<sup>16</sup> Ha'e ramo SENHOR Nhanderuete aipoe'i: Ma'ẽ, xepo audi 'rã filisteu kuery rovai, queretita kuery amomba, aguã, ha'e ye'ẽ yvýry ikuai va'e voi amokanhymba avi aguã.  
<sup>17</sup> Opa marã ambopaga 'rã xepoxya rupi ajou vai reve. Ha'e ramo ha'e kuery ambopaga ma rire oikuuaa 'rã xee ae SENHOR aikoa.

## 26

### *Tiro pygua kuery rovai ijayvuague*

<sup>1</sup> Ha'e gui onze ma'et̄yā, jaxyā ypy'ia ára py SENHOR ombou ju oayvu xevy. Ha'e vy aipoe'i:

<sup>2</sup> — Ava ra'y, Jerusalém tetā ombovaipa rā Tiro pygua huvixa ijayvu: "Ha'evea rami! Opēmba ma tetā rokē yvy regua oikeaty. Ha'e vy ojepe'a oiny xevy. Ha'e ramo ajoupa 'rā mba'emo, tetā ombovaipa rire", he'i.

<sup>3</sup> Ha'e ramo tei SENHOR Nhanderuete ijayvu po rami: Ha'e gui Tiro pygua kuery, xee ma penderovai aiko. Ha'e ramo vy ajapo 'rā peneretā re heta regua opu'ā aguā rami, ye'ē rupi yai opu'ā-pu'āa rami.

<sup>4</sup> Ha'e ramo ha'e kuery oitypa 'rā Tiro tetā kora, torre ikuai va'e guive. Tetā gui xee aipe'a ukapa 'rā yvy ku'i peve, ita mbeju rive aejapa aguā.

<sup>5</sup> Ha'e gui ye'ē pa'ū peñague optya 'rā pira mbo'aa mombiru atyrā, ha'e ramo xeayvu ma voi rire — he'i SENHOR Nhanderuete. — Optya 'rā yvy regua kuery mba'emo oipe'apa aguā rive.

<sup>6</sup> Ha'e rā peneretarā kuery ye'ē rembe rupi ikuai va'e ma kyxe py meme 'rā ojukapaa. Ha'e ramo peikuaa 'rā xee ae SENHOR aikoa.

<sup>7</sup> Mba'eta po rami SENHOR Nhanderuete ijayvu:

— Mba'eta Tiro tetā re ambou 'rā Babilônia pygua huvixa Nabucodonosor, huvixa ikuai va'e ruvixave va'e. Ha'e ramo kuaray apu'a'ia katy gui 'rā ou kavaju reve, karóxa, kavaju árygua kuery ha'e heta regua reve.

<sup>8</sup> Ha'e ramo peneretarā kuery ye'ē rembe rupi ikuai va'e ha'e ojukapa 'rā kyxe py. Ha'e gui peneretā rovai'i ojapo 'rā torre, ha'e tetā kora re xondaro kuery omboaty 'rā imoiny yvy, hu'y jokoa tuvixakueve o'áry rupi oguereko reve.

<sup>9</sup> Ha'e gui tetā kora re ombota-mbota 'rā yvyra aygue py. Torre ikuai va'e voi oitypa 'rā ferro guigua py.

<sup>10</sup> Hymba kuery kavaju ma heta ete vy peneretā py oikepa vy ojao'ipa 'rā yvy ku'i py. Tetā rokē rupi kavaju árygua kuery, karóxa kyrīve ha'e tuvixakueve oike ramo tetā kora omyimba 'rā hevovo rei va'e gui rive, tetā kora omopa'ūague rupi oikepa ramo.

<sup>11</sup> Hymba kavaju opoapē py ma ombovaipa rive 'rā tetā rape ikuai va'e. Hi'árygua kuery ma kyxe py ojukapa 'rā peneretarā kuery, ha'e ita tuvixa va'e pemopu'ā va'ekue oitypa 'rā yvy rupi.

<sup>12</sup> Ha'e gui ogueraapa 'rā mba'emo porā perekva'e ekue, oipe'a 'rā mba'emo pevende 'rā va'ekue, oitypa 'rā tetā kora ha'e oo porāgueve penderekva'e ekue. Ha'e gui ita, yvyra ha'e mba'emo ku'ikue penda py ikuai va'ekue omombopa 'rā ye'ē mbyte rupi.

<sup>13</sup> Ha'e ramo py amombytu'upa 'rā peporaeia revovo. Ha'e rire nonhenduvei 'rā ixā reta va'e pembopua.

<sup>14</sup> Peneretā aeja 'rā ita mbeju rive, pira mbo'aa mombiru atyrā rive optya aguā. Ndojapoavei 'rā guive, mba'eta xee SENHOR ae ha'e ramo xeayvu rire — he'i SENHOR Nhanderuete.

<sup>15</sup> Ha'e gui po rami SENHOR Nhanderuete ijayvu Tiro pygua kuery pe:

— Ye'ē rembe rupi ikuai va'e ma peneretā oitypaa rā hyapu rei va'e gui ndoryryipai 'rā ri ty'y, penepoaē reia ha'e tetā mbyte rupi pendejukapaa rā oendu avi vy?

<sup>16</sup> Ha'e ramo vy ye'ē rembe rupigua huvixa ikuai va'e ma oguejypa 'rā guenda openaatygui, ha'e ojegui omboipa 'rā kamixa puku ha'e oao ombojeguapa pyre. Pendegui onhemondyipa rei vy oryryipa reve 'rā oguapypa yvy py, oryryipa rei anho 'rā oiny.

<sup>17</sup> Ha'e ramo vy ijayvu 'rā penereronhemboaxya rupi. Ha'e vy aipoe'i 'rā okuapy: "Ndee tetā omboetevepy ha'e heta ikuia reiko va'ekue, mba'exa tu rekanhy xapy'a? Mba'eta yy áry rupi ndea pygua kuery oje'oia rupi pendepo'akapa va'ekue, ha'e ndea katy'i ikuai va'e kuery remongyjepa rei va'ekue!"

<sup>18</sup> Ha'e gui aŷ ma ye'ẽ pa'ũ pygua kuery ha'e javi oryryipa 'rã re'a rã oendu vy, nda'evei ete 'rã ikuai nereĩvei ma ramo", he'i okuapy.

<sup>19</sup> Mba'eta po rami SENHOR Nhanderuete ijayvu:

— Xee ma rojapo tetã oejapa pyre, tetã avave rei nda'ipoaveia rami, ha'e gui pende'áry rupi ambou yai, yy reta pendeao'ipa aguã.

<sup>20</sup> Ajapo avi 'rã peguejypa aguã rami, yvykua py oguejy va'e kuery reve. Ha'e rami vy ymagua kuery ikuaria py romoingo 'rã yvy guyvea py, tekao e'ŷa ymavea py pepyta aguã yvykua py oguejy va'ekue ikuaria py, penderekaoague py nda'ikuaiavei aguã. Ha'e rã temimoingo kuery ikuaria rupi ma ajapo 'rã mba'emo porã ete.

<sup>21</sup> Rojapo 'rã nhomondyipaarã, mba'eta naapeĩvei ma 'rã. Penderekaa teĩ napendejouavei 'rã — he'i SENHOR Nhanderuete.

## 27

### *Tiro tetã omboaxy vaipaa rupi ijayvuague*

<sup>1</sup> Ha'e gui SENHOR oayvu xevy ombou ju. Ha'e vy aipoe'i:

<sup>2</sup> — Ha'e gui ndee ava ra'y, ndeayvu ke Tiro tetã pe omboaxy va'e rami.

<sup>3</sup> Mba'eta Tiro ma ye'ẽ pa'ũ re oĩ, ha'e tetã mboae ye'ẽ yvýry rupi ikuai va'e katy ha'e kuery oo va'ekue mba'emo vendea rupi. Aipo're Tiro tetã pe: Po rami SENHOR Nhanderuete ijayvu: Ndee Tiro aipo're: "Xee ma kanoã guaxu opa mba'e py iporãve va'e rami aiko", 're.

<sup>4</sup> Mba'eta anhetẽ ye'ẽ mbyte rupi peve ndepo'aka, ha'e ndeapoa kuery neporã aguã rami ete ndeapo va'ekue.

<sup>5</sup> Ha'e rami vy nderegua pyrõa ma yvyra cipreste Senir gui ogueru pyre gui ojapoa va'ekue. Nderegua ajukue 'yrã ma Líbano gui oguerua yary.\*

<sup>6</sup> Ndepykuiarã ma yvyra carvalho Basã gui ogueru pyre gui ojapo. Tendarã ma ojapo marfim gui, yvyra pinho yy pa'ũ Quitim gui ogueru pyre py ombojegua vy.

<sup>7</sup> Ndere ajukue oipyo va'erã ma Egito guigua iperirĩ'i va'e ha'e ombojeguapa pyre anho omoĩ, bandeira-rã guive. Ndeao'iarã ma ajukue hovy ha'e púrpura va'e ogueru yy pa'ũ Elisá gui.

<sup>8</sup> Ndepykui va'erã ma Sidom ha'e Arvade pygua kuery ojou. Nemboguataarã ma ndee Tiro tetã pygua hi'arandukueve ae ojou.

<sup>9</sup> Ndere mba'emo moatyrõarã ma Gebal pygua nhomongeta va'ety ha'e hi'arandukueve ojou. Ha'e gui ndere onhembojapa okuapy kanoã ye'ẽ rupigua ha'e imboguataa kuery ha'e javi, mba'emo rerekova vy.

<sup>10</sup> — Ha'e gui ndevygua xondarorã ma Pérsia, Lídia ha'e Pute gui ou va'ekue, ndevygua ikuai joe opu'ã va'e meme. Ha'e kuery ma omba'e hu'y jokoa ha'e ngora ratã oupipa imoiny tetã kora ha'e javi rupi, ndepo'akaa oikuaa uka aguã.

<sup>11</sup> Ha'e gui ndekora áry rupi nerarõa kuery ma ndea pygua ae, Arvade guigua xondaro kuery guive. Ha'e gui torre ikuai va'e py nerarõa kuery ma Gamade pygua. Ha'e kuery voi tetã kora rupi oupipa imoiny hu'y jokoa, nembojegua porãmba aguã.

<sup>12</sup> — Opa mba'e rerekopa ramo Társis pygua kuery voi mba'emo omboekovia va'ekue ndereve. Mba'emo rerekova va'e re omboekovia prata, ferro, estanho ha'e chumbo.

<sup>13</sup> Javã, Tubal ha'e Meseque tetã pygua kuery voi mba'emo omboekovia va'ekue ndereve. Ha'e kuery ma mba'emo rerekova va'e re omboekovia va'ekue escravo kuery ha'e tembiporu overa va'e guigua.

<sup>14</sup> Ha'e rã Togarma guigua kuery ma mba'emo rerekova va'e rekovia ome'ẽ kavaju, kavaju joe opu'ãa rupigua ha'e mburika.

\* <sup>27:5</sup> Apy ma Tiro tetã ombojoja kanoã guaxu re ajukue oipyo imoinya rami, mba'eta ha'e pygua kuery ma ye'ẽ áry rupi 'rã oo mba'emo vendea rupi.

15 Dedã ramymino kuery voi mba'emo omboekovia va'ekue ndereve. Heta ikuai va'ekue ye'ẽ yvýry rupigua mba'emo ndea py ojapo pyre joguaarã. Ha'e nunga rekovia ogueru elefante raígue marfim ha'e yvyra Ébano guigua.

16 Síria pygua kuery voi omboekovia va'ekue mba'emo ndea py ojapo pyre re. Ha'e nunga rekovia ome'ẽ va'ekue ita esmeralda, ajukue púrpura ha'e iperirí'i va'e ombojegua pyre, ha'e gui ita coral, ita hepykueve guive.

17 Judá ha'e Israel yvy regua kuery voi mba'emo ojogua va'ekue ndegui. Mba'emo rerekva'e rekovia ome'ẽ va'ekue trigo Minite guigua, tembi'u porãgueve, ei, azeite ha'e yvyra bálsamo.

18 Damasco pygua kuery voi mba'emo ojogua reta va'ekue ndea py ojapo pyre. Opa mba'e porã rerekva'e rekovia ome'ẽ va'ekue Helbom guigua vinho ha'e Saar guigua vexa'i rague.

19 Dã ha'e Javã pygua kuery voi Uzal yvy gui ou vy mba'emo rerekva'e rekovia ome'ẽ va'ekue ferro guigua, cássia ha'e cálamo. Ha'e ramigua reve ou mba'emo ojogua aguã.

20 Dedã pygua kuery ma ndevy ovende va'ekue kavaju kupe áry guarã.

21 Ha'e gui Arábia ha'e Quedar pygua yvatekueve ikuai va'e voi ojogua va'ekue mba'emo ndea py ojapo pyre. Ha'e rami vy ndevy ome'ẽ va'ekue vexa'i ra'y, vexa'i ha'e kavara ava. Ha'e nunga re ndereve imba'ejogua va'ekue.

22 Sabá ha'e Ramá pygua kuery voi mba'emo ojogua va'ekue ndegui. Mba'emo rerekva'e re omboekovia va'ekue heakuã porã va'e, ita hepykueve va'e ha'e ouro.

23 Ndereve mba'emo re omboekovia avi va'ekue Harã, Cane ha'e Éden pygua kuery, ha'e gui Seba, Assíria ha'e Quilmade pygua mba'emo ojogua va'ety kuery voi.

24 Ha'e kuery ma ndereve omboekovia va'ekue ajukue púrpura ombojegua pyre, tapete joo rami e'ŷ-e'ŷ pytã va'e, ha'e ixã oipoka pyre ijy ete va'e.

25 Ha'e gui kanoã Társis guigua ma ndea gui mba'emo ogueraa va'ekue. Ha'e ramo opa mba'e rejoupa ramo ye'ẽ rupigua kuery ha'e javi oendupa va'ekue ndereko.

26 Ha'e ramo ndevyguia kanoã pykuia kuery ma ndereraa yy ja'ea áry rupi, teĩ kuaray oua katy gui yvytu ou va'e nemopẽmba 'rã yy mbyte py.

27 Ha'e ramo opa mba'e rerekva'e oikepa 'rã yy guy py. Hepykueve rerekva'e oikepa, mba'emo rejapo ha'e revende va'ekue, ndevyguia ye'ẽ rupigua kuery, kanoã mboguataa, mba'emo moatyrõaty, mba'emo vendeaty, xondaro kuery, ha'e kanoã py oguata va'ekue ha'e javi. Ndevaipa ramo yy guy py meme 'rã oike.

28 Ha'e gui kanoã mboguataa kuery haxẽmba rei rã yy rembe rupi ikuai va'e ha'e javi oendu vy oryryipa 'rã okuapy.

29 Ha'e gui yy rupi ikuai va'ekue ma kanoã gui oguejypa vy yvy reia py ju 'rã ikuai: kanoã pykuia kuery, imboguata ha'e yy rupigua ha'e javi.

30 Ha'e rami vy pavẽ 'rã ojae'o rei nhendu okuapy ndere. Oakã áry omombo-mombo 'rã yvy ku'i, ha'e tanhimbu rupi onhembojere-jere 'rã okuapy.

31 Ndere vy o'a onhopõmba 'rã oakã gui. Onhele'ẽ py ndere nda'eveia anho oendu vy onhemonde 'rã ajukue vaikue voxá guigua py rive, ojae'o ha'e ipy'a vai reve.

32 Ha'e rami vy ojae'o reve nereronhemboaxy 'rã okuapy nda'evei etea rupi. Ha'e vy aipoe'i 'rã: "Mava'e kuery tu Tiro pygua kuery rami ikuai, ye'ẽ mbyte py okyrirí aguã katy oguejy va'ekue rami?\*

33 Mba'eta mba'emo revende va'erã ye'ẽ rupi ogueraa jave ma heta regua kuery rejapo oguerekopa aguã rami, mbovy rei e'ŷ rerekva'e revende rupi rejapo va'ekue yvy regua huvixa kuery ojoupa aguã.

34 Ha'e rami teĩ aŷ ma yy mbyte py remopẽmbaa rã mba'emo revende 'rã va'ekue oikepa ma yy typyvea py, ndereveguia kuery ha'e javi reve", he'i 'rã okuapy.

\* 27:32 Apocalipse 18.13-19

<sup>35</sup> Ha'e rami ye'ẽ yvýry rupi ikuai va'e onhemondyipa rei 'rã okuapy ndere. Ha'e kuery regua huvixave kuery voi oryryipa reve ngova re oexa uka 'rã nda'evei etea.

<sup>36</sup> Ha'e kuery regua imba'ejogua va'ety kuery voi ndejojai rei 'rã jogueravy, nhomondyiärã rive repyta rire. Ha'e va'e rire nanemopu'ãavei 'rã.

## 28

### *Tiro pygua huvixave rovai ijayvuague*

<sup>1</sup> Ha'e gui SENHOR oayvu xevy ombou ju. Ha'e vy aipoe'i:

<sup>2</sup> — Ava ra'y, ndeayvu Tiro pygua huvixa pe: Po rami SENHOR Nhanderuete ijayvu: Ndepy'a py renhemboyvate rei, ha'e vy aipo're: "Xee ma tuuete aiko. Ha'e rami vy tenda tuuete openaaty py ae aguapy ainy ye'ẽ jova-jovai rupi oĩ va'e mbyte", 're va'eri ava rive reiko, tuuete e'ŷ, xee Nderuete rami ndepy'a reikovy va'eri.

<sup>3</sup> Tá, Daniel gui renhememo'aranduve, reikuaa e'ŷ va'e jipoi merami.

<sup>4</sup> Ha'e rami vy ne'arandua ha'e reikuaapaa rupi vy ndepo'aka ha'e rejoupa va'ekue ouro ha'e prata remoĩ porã aguã.

<sup>5</sup> Mba'eta mba'emo vendea rupi reiko kuaa va'e vy rejoupave tema reovy va'ekue. Ha'e rami vy ae renhemboyvate rei ndepy'a py.

<sup>6</sup> Ha'e nunga rupi SENHOR Nhanderuete aipoe'i:

— Xee Nderuete rami ndepy'a reikovy ramo

<sup>7</sup> ma'ẽ, aŷ ma ndere ambou 'rã amboae regua kuery pavẽ gui ijavaeteve va'e. Ha'e va'e kuery ma okyxe oekyi 'rã okuapy neporã ha'e ne'arandupa reia rovai. Ha'e vy ombovaipa 'rã ndepo'akaa ha'e javi.

<sup>8</sup> Ha'e rami vy ha'e kuery ndereity 'rã yvykua py, ha'e ramo reiko vai 'rã ye'ẽ mbyte py ojukapy rami.

<sup>9</sup> Ha'e ramo ndejuka ta va'e pe nda'u "Xee ma tuuete", 're 'rã ri ty'y? Mba'eta ndejukaarã po py romboaxa ramo ava rive 'rã repyta, tuuete e'ŷ.

<sup>10</sup> Ha'e rami vy remano 'rã xevygua kuery omanoa rami, amboae regua po py, ha'e rami ae xeayvu rire — he'i SENHOR Nhanderuete.

### *Tēgue ju Tiro pygua huvixave omboaxy va'e rami ijayvuague*

<sup>11</sup> Ha'e gui SENHOR oayvu ombou ju xevy. Ha'e vy aipoe'i:

<sup>12</sup> — Ava ra'y, ndeayvu ke Tiro pygua huvixave re omboaxy va'e rami. Ha'e vy aipo're ixupe: "Po rami SENHOR Nhanderuete ijayvu: Ndee ma pavẽ gui reiko porãve va'ekue, ne'arandua ha'e neporãa py.

<sup>13</sup> Nhanderuete pegua yvotyty Éden py ae reiko va'ekue. Ita iporãve va'e anho ndejee remoĩ va'ekue: sárdio, topázio, diamante, berilo, ônix, jaspe, safira, carbúnculo ha'e esmeralda. Ndejeguaarã ma ouro gui ojapoa. Nemoingoa ára guive ma voi ha'e nunga ojapoa ndevy.

<sup>14</sup> Ndee ma anjo ipopo va'e nhoarõarã roiporavo va'ekue, ha'e rami aguã rami ae romoĩ. Ha'e ramo Nderuete pegua yvyty iky'a e'ŷ va'e rupi reiko va'ekue, itaendy ikuiaia rupi.

<sup>15</sup> Nemoingoa ára guive ha'evea ramigua meme rejapo va'ekue, ndere teko vai ajou peve.

<sup>16</sup> Ha'e gui ma mba'emo vendea rupi reiko vy ndepy'a re remoĩ rejojukaa anho. Ha'e rami vy rejjav. Ha'e rami rã romombo 'rã xevygua yvyty gui mombyry, renhemongy'apa rire. Itaendy ikuiaia mbyte gui romokanhy 'rã, anjo ipopo va'e nhoarõarã roiporavo rire tēi.

<sup>17</sup> Mba'eta neporã va'e vy nekuraxõ py renhemboyvate, ha'e nerexakãmba va'e vy renhemongy'a ne'arandupaa py. Ha'e rami rire huvixa kuery ikuai va'e renonde py romombo 'rã yvy katy, ha'e kuery nderexa okuapy aguã.

<sup>18</sup> Opa mba'ẽ py rejjav. Ha'e mba'emo vendea rupi rejoguerekó axya py remongy'apa oo iky'a e'ŷ va'e ndea py ikuai va'ekue. Ha'e nunga rupi ndegui ae xee amoẽ

tata romomba aguã. Ha'e rami vy pavẽ oexaa py ajapo yvy re tanhimbu rive repyta aguã rami.

<sup>19</sup> Mba'eta yvy regua nderexaaty kuery onhemondyipa ndegui. Nhomondyipaarã repyta, nerepu'ãvei 'rã guive."

### *Sidom tetã pygua kuery rovai ijayvuague*

<sup>20</sup> Ha'e gui ma xevy SENHOR oayvu ombou ju vy aipoe'i:

— Ava ra'y, ema'ẽ Sidom tetãa katy, ha'e kuery rovai ndeayvu aguã.

<sup>22</sup> Aipo're 'rã: Po rami SENHOR Nhanderuete ijayvu: Ma'ẽ, xee aiko peẽ Sidom pygua kuery rovai, ha'e gui pendekuaia mbyte xemboetea 'rã. Ha'e gui peneretã mbyte py rombopaga, ha'e iky'a e'ŷ va'e aikoa aikuua uka ramo peikuaa 'rã xee ae SENHOR aikoa.

<sup>23</sup> Mba'eta peẽ kuery rovai ambou 'rã mba'eaxy vaikue tape rupi tuguy onheẽ peve. Kyxe revegua jova-jovai gui ou ramo oipyxo pyre kuery ho'a 'rã peneretã mbyte rupi. Ha'e ramo peikuaa 'rã xee ae SENHOR aikoa.

<sup>24</sup> Ha'e rã Israel kuery re ma imbojaru reia kuery ijyvýry ikuai va'e regua ndouvei 'rã juu ikutuarã, neĩ juu rakuaendy rami. Ha'e ramo ha'e kuery voi oikuua 'rã xee ae SENHOR Tuuete aikoa.

<sup>25</sup> Po rami SENHOR Nhanderuete ijayvu:

— Xee amono'õmba ju 'rã Israel kuery yvy regua ikuiaia rupi amoãague gui, ha'e kuery mbyte rupi aikuua uka 'rã guive iky'a e'ŷ va'e aikoa yvy regua kuery oexaa py. Ha'e ramo ha'e kuery ikuai 'rã oyvy re ae, xerembiguai Jacó pe ame'ẽ va'ekue py.

<sup>26</sup> Ha'e py ma ikuai porã 'rã, ojapo 'rã ngoorã, uva onhoty 'rã guive. Tá, ha'e py ikuai porã 'rã, mba'eta ijyvýry rupi ikuai va'e ha'e javi ambopaga 'rã ombojaru reiague re. Ha'e ramo oikuua 'rã okuapy xee ae SENHOR Tuuete aikoa.

## 29

### *Egitó pygua kuery rovai ijayvuague*

<sup>1</sup> Ha'e gui dez ma'etã ha'e dez jaxya re, doze araa py ju SENHOR oayvu ombou xevy. Ha'e vy aipoe'i:

— Ava ra'y, ema'ẽ Egito pygua huvixa Faraó-a katy, hovai ndeayvu aguã, Egito pygua kuery ha'e javi rovai guive.

<sup>3</sup> Ndeayvu vy aipo're 'rã: Po rami SENHOR Nhanderuete ijayvu: Egito pygua huvixa Faraó, xee aiko nderovai. Ndee ma jakare tuvixa ete va'e yy py itui va'e rami reiko, mba'eta aipo're: "Kova'ye yy ma xemba'e ae, xejeupe guarã ae ajapo", 're.

<sup>4</sup> Ha'e rami tei neraï'ykã re xee amoï rã pinda, ha'e ajapo 'rã ndepukue re pira yakã rupigua ojapa aguã rami. Ha'e rami vy yy reia mbyte gui xee roguenoë 'rã, ndepukue re pira ojapa va'e ha'e javi reve.

<sup>5</sup> Romombo 'rã tekao e'ŷ katy, ndee ha'e pira ndere oja va'e ha'e javi reve. Ha'e ramo yvy piru reia py 'rã re'a. Ndereruavei 'rã, nderetekue ndojatyai 'rã guive. Ha'e rami 'rãgue py romboaxa 'rã mymba kuery yvy regua ha'e guyra yva regua rembi'urã.

<sup>6</sup> Ha'e ramo Egito pygua kuery oikuapa 'rã xee ae SENHOR aikoa. Ndee ma Israel kuery pe repyta popoka takua'i guigua rive.

<sup>7</sup> Mba'eta ha'e kuery ma opo py takua ojopy vy ojepytaxo ramove ovo rive vy ijaxi'y peve oixu'upa. Ha'e rami ae avi ndere ha'e kuery ojeko rã ndee nemopẽa ramo ha'e kuery oendu 'rã haxy va'e, ha'e guyepy rupi voi oryryipa 'rã okuapy.

<sup>8</sup> Ha'e nunga rupi po rami SENHOR Nhanderuete ijayvu:

— Ma'ẽ, ndere ambou 'rã kyxe revegua, ndea gui avakue ha'e mymba kuery mom-baarã.

<sup>9</sup> Ha'e ramo Egito yvy opyta 'rã ombovaipa pyre ha'e tekao ve'ŷ. Ha'e ramo peikuaa 'rã xee ae SENHOR aikoa.

<sup>10</sup> — Mba'eta ndee aipo're va'ekue: "Yakā oī va'e xemba'e ae, xee ae ajapo va'ekue", 're rire aÿ ma nderovai aiko, ndea py yakā ikuai va'e rovai guive. Ha'e rami vy ajapo 'rā Egito ombovaipa pyre yvy tekao ve'ÿ opyta aguā rami Migdol guive Sevēne peve, ha'e Etiópia yvy apy peve.

<sup>11</sup> Ha'e va'e rupi ndoaxavei 'rā avakue neī mymba kuery ma voi, quarenta ma'etÿ peve 'rā ndaekoavei 'rā ha'e py.

<sup>12</sup> Mba'eta ajapo 'rā Egito yvy ivaipa va'e gui ivaipave aguā rami. Ha'e va'e re tetā ikuai va'e voi tetā ivaipa va'e gui ivaipave 'rā opyta, quarenta ma'etÿ opa peve. Ha'e rami vy Egito pygua kuery amoāmba 'rā yvy regua kuery ikuiaia rupi, yvy jave rupi 'rā araa ukapa.

<sup>13</sup> Ha'e rami teī SENHOR Nhanderuete ma po rami ijayvu avi:

— Quarenta ma'etÿ opaa py ma Egito pygua kuery arupa ju 'rā yvy regua ikuiaia rupi amoāague gui.

<sup>14</sup> Ha'e rami vy amoingo porā ju 'rā. Patros yvy oje'oiague re ju aru rukapa 'rā. Ha'e py ma peteī tetā kyrī'ia py 'rā ikuai.

<sup>15</sup> Tetā mboae ikuai va'e gui kyrī'ive 'rā opyta, neī amboae regua áryve nonhemboyvat-evei ma 'rā. Xee amo'yvy'i ma rire nda'ipo'akavei 'rā amboae regua kuery re.

<sup>16</sup> Ha'e rami rire ha'e kuery re Israel kuery ndojeroviavei 'rā. Ha'e rami 'rāgue py Egito kuery re ojerovia ha'e onhepytvō ukaague re ha'e kuery ima'endu'a nhavō oikuaa 'rā ojejavyaague. Ha'e rami vy oikuaa 'rā okuapy xee ae SENHOR aikoa — he'i.

<sup>17</sup> Ha'e gui sete ma'etÿ ha'e jypygua jaxy, jypy'ia ára py ju SENHOR oayvu ombou xevy. Ha'e vy aipoe'i:

<sup>18</sup> — Ava ra'y, Babilônia pygua huvixa Nabucodonosor ma Tiro tetā re oxondaro kuery omondoukaa py om̄ba'eapo vaipa va'ekue xevy. Mba'eta peteī-teī akā rupi ipire rei, ha'e peteī-teī kupe rupi haxypa. Ha'e rami teī ixupe ma Tiro gui ndogueraa porāi om̄ba'eapoague repy, neī ixondaro kuery pe voi.

<sup>19</sup> Ha'e nunga rupi SENHOR Nhanderuete aipoe'i:

— Aÿ ma Babilônia pygua huvixa Nabucodonosor pe amboaxave ju 'rā Egito yvy. Ha'e ramo ha'e gui ogueraapa 'rā ha'e pygua kuery, oipe'apa 'rā imba'e rei-rei va'ekue ha'e javi, oxondaro kuery peguarā.

<sup>20</sup> Tiro tetā re oje'opia py om̄ba'eapoague repyrā amboaxa 'rā Egito yvy, xevy pe ojapo rire — he'i SENHOR Nhanderuete.

<sup>21</sup> — Ha'e va'e ára ma ajapo 'rā Israel kuery imbaraete ju aguā rami. Ndee voi rojapo avi 'rā ha'e kuery mbyte rupi ndeayvu reikovy aguā rami. Ha'e ramo ha'e kuery oikuaa 'rā xee ae SENHOR aikoa.

## 30

### *Egito yvy re Babilônia pygua kuery ipo'aka aguā re ijayvuague*

<sup>1</sup> Ha'e gui xevy SENHOR oayvu ombou vy aipoe'i:

<sup>2</sup> — Ava ra'y, emombe'u ke xeayvu. Ha'e vy aipo're: Po rami SENHOR Nhanderuete ijayvu: Ha'e va'e ára re peē kuery penepoaë 'rā.\*

<sup>3</sup> Mba'eta ha'e va'e ára ovaē rai'i ma. Tá, ovaē rai'i ma SENHOR ára. Araipa 'rā ha'e va'e ára, mba'eta amboae regua kuery ikuai axy aguā ára.

<sup>4</sup> Ha'e rami vy Egito yvy re ou 'rā kyxe reveguia. Etiópia rupi voi ikuai axya ete 'rā, Egito rupi oipyxo pyre ho'apa jave. Mba'eta ha'e pygua kuery ogueraapaa 'rā escravo-rā, omombaa 'rā guive imbaraetekueve.

<sup>5</sup> Ha'e ramo amboae regua kuery Egito reve onhemoirū va'ekue ho'apa avi 'rā kyxe gui: Etiópia, Pute, Lude, Arábia pygua ha'e javi, ha'e Cube pygua kuery voi.

<sup>6</sup> Po rami SENHOR ijayvu:

---

\* <sup>30:2</sup> Apy ma Egito pygua kuery pe ijayvu.

— Egito yvy pygua ptyvõare kuery ho'apa 'rã, opo'akaa re ojejou porã reiague re omo'yvy'i'a rã. Migdol teko guive Sevne peve 'rã ho'a kyxe gui — he'i SENHOR Nhanderuete.

<sup>7</sup> — Ha'e ramo yvy mboae ivaipa va'ekue mbyte ombovaipa pyre 'rã opyta, ha'e tetã mboae opa va'ekue rami avi 'rã omombaa tetã.

<sup>8</sup> Ha'e ramo Egito yvy re tata amboja, ha'e ipytyvõare kuery amokanhymba ma ramo ha'e kuery oikuua 'rã xee ae SENHOR aikoa.

<sup>9</sup> Ha'e va'e ára ma xerenonde rupi ayvu reraa kuery kanoã guaxu py oje'oi 'rã Etiópia katy, ha'e ramo omondyipa 'rã onheangu e'ý rei va'ekue. Mba'eta ha'e va'e yvy re voi ou 'rã teko vai, Egito pygua kuery ára py rami avi. Ha'e nunga ou ae ma oiny — he'i.

<sup>10</sup> Po rami SENHOR Nhanderuete ijayvu:

— Babilônia pygua huvixa Nabucodonosor pe xee amomba uka 'rã Egito pygua kuery onhemboyvate reia.

<sup>11</sup> Ha'e rami vy hexeveguia kuery reve amondoukapa 'rã Egito yvy mombaarã, mba'eta pavẽ regua gui ijavaeteve va'e. Ha'e ramo okyxe oekyi 'rã okuapy Egito yvy re, ha'e yvy jave rupi omonyembã 'rã ojukapa va'ekue.

<sup>12</sup> Xee amboypa 'rã yakã ikuai va'e, ijyvy voi amboaxapa 'rã heko vai va'e kuery po py. Amboae kuery pe ambovaipa ukapa 'rã yvy, hexe ikuai va'e ha'e javi guive. Xee SENHOR ae ma ha'e rami xeayvu va'e.

<sup>13</sup> Po rami SENHOR Nhanderuete ijayvu:

— Amokanhymba avi 'rã ha'e kuery ruete kuery ra'angaa, ta'angaa Mênfis py ikuai va'ekue voi amomba 'rã. Egito yvy re yvatekueve nda'ikuaivei 'rã. Ijyvy jave rupi ambou 'rã ndaekorãveia.

<sup>14</sup> Ha'e rami vy ambovaipa 'rã Patros tetã, Zoã re amboja uka 'rã tata, ha'e anhombopaga 'rã Nô py.

<sup>15</sup> Sim tetã Egito yvy re ikorapave va'e áry anhoë 'rã xepoxya, ha'e heta 'rã amomba Nô py.

<sup>16</sup> Egito yvy jave rupi amboja 'rã tata. Ha'e ramo Sim py oendua 'rã ojexavai etea, Nô py okanhymbaa 'rã, ha'e ara py tei Mênfis rovaigua kuery ojekuaapa 'rã.

<sup>17</sup> Kunumigue Áven ha'e Pi-Besete pygua ho'apa 'rã kyxe gui. Ha'e va'e tetã gui ma ogueraapaa 'rã escravo-rã.

<sup>18</sup> Tafnes py ma ára pytumba 'rã, mba'eta ha'e py amopẽmba 'rã Egito pygua po'akaa, amomba avi 'rã opo'akaa re onhemboyvate reia. Petei arai ojao'ipa 'rã, ha'e rã tajy kuery ma escravo-rã meme 'rã ogueraapaa.

<sup>19</sup> Ha'e rami 'rã anhombopaga Egito yvy rupi. Ha'e ramo ha'e kuery oikuaapa 'rã xee ae SENHOR aikoa — he'i.

<sup>20</sup> Ha'e gui onze ma'etýa, jypygua jaxyre, sete araa py ju pe SENHOR ombou oayvu xevy. Ha'e vy aipoe'i:

<sup>21</sup> — Ava ra'y, xee amopẽ ma Egito pygua huvixa Faraó jyva. Ha'e rami tei ndojokuaai, noipoanoai, nei nomboje'aa jevyi, ha'e rami e'ý rã imbaraete ma vy kyxe oiporu ju aguã.

<sup>22</sup> Ha'e nunga rupi po rami ijayvu SENHOR Nhanderuete:

— Ma'ẽ, xee aiko Egito pygua huvixa Faraó rovai. Ha'e ramo vy ijyva rovai imbaraeteveague ju 'rã amopẽ, hovai amopẽ ma voiague rami. Ha'e ramo vy ajapo 'rã ipo gui kyxe ho'a aguã rami.

<sup>23</sup> Ha'e gui Egito pygua kuery amoaimba 'rã yvy regua ikuia rupi, araa ukapa 'rã yvy jave rupi.

<sup>24</sup> Ha'e rã Babilônia pygua huvixa jyva ma amombaraete 'rã, ha'e ipo py amoï 'rã xekyxe. Ha'e rã Faraó jyva ma amopẽ 'rã. Ha'e ramo Babilônia pygua renonde ipoaê rei 'rã oipyxo pyre rami.

<sup>25</sup> Aupi 'rã Babilônia pygua huvixa jyva, ha'e rã Faraó jyva ma ho'a rive 'rã. Ha'e gui Babilônia pygua huvixa po py xekyxe amoï va'ekue Egito yvy rupi oiporu ramo oikuaapa 'rã xee ae SENHOR aikoa.

<sup>26</sup> Mba'eta Egito pygua kuery amoâimba 'rã yvy regua ikuai rupi, araa ukapa 'rã yvy jave rupi. Ha'e ramo oikuua pavẽ 'rã xee ae SENHOR aikoa.

## 31

### *Egito yvy re mba'emo oiko aguã re ijayvuague*

<sup>1</sup> Ha'e gui onze ma'etõa, mboapy jaxyre, ijypy'ia ára py ju SENHOR ombou oayvu xevy. Ha'e vy aipoe'i:

<sup>2</sup> — Ava ra'y, aipo're Egito pygua huvixa Faraó ha'e ixupeguia kuery ha'e javi pe: Mava'e regua tu ndee rami ipo'akapa va'e?

<sup>3</sup> Eikuua pota ha'vy Assíria yvy re oiko va'ekue re. Ha'e kuery ma peteñ yary Líbano py hi'añ va'e rami ikuai va'ekue, mba'eta hakã porã va'e vy ka'aguy rupi kuaray'ã porã va'ekue. Yvateve va'e hi'añ, hovapy ma yvyra rovapy rogue áryve rupi ovaë va'ekue.

<sup>4</sup> Yvy guy katy gui yvu oĩ va'e omoakã vy ojapo va'ekue yvate aguã rami. Ojapo avi ijyvypa gui yy omboxyry opa rupi, yvyra yvy re ikuai va'e ha'e javi omoakã aguã.

<sup>5</sup> Ha'e nunga rupi ae onhemboyvate va'ekue yvyra yvy re ikuai va'e ha'e javi áryve, hakã retave ha'e ipukuve ovu guive, heta yy omoakã vy ombotuvixa ramo.

<sup>6</sup> Hakã'i ikuai va'e rupi guyra ojeaity apo va'ekue, hakã guy rupi ha'e javi mymba ta'y'i okuapy, ha'e ikuaray'ã py ma yvy regua ipo'akakueve oguapypa okuapy va'ekue.

<sup>7</sup> Ha'e rami vy heta yy rupi hapo va'e vy tuvixaa ha'e hakã retaa py iporã ete va'ekue.

<sup>8</sup> Yary Nhanderuete pegua yvotyty rupi ikuai va'e gui iporãve va'ekue. Yvyra cipreste voi ha'e va'e rami e'ý hakã va'ekue, yvyra plátano voi ha'e va'e rami ndaokyi va'e. Mba'eta iporã rami peteñ yvyra Nhanderuete pegua yvotyty py hi'añ va'e ndoikoi va'ekue.

<sup>9</sup> Ha'e rami ajapo va'ekue hakã reta vy iporã rei aguã rami. Yvyra Éden py Nhanderuete pegua yvotyty rupi ikuai va'e ha'e javi ojou porãmba rei okuapy va'ekue.

<sup>10</sup> Ha'e gui SENHOR Nhanderuete ijayvuve ju:

— Ha'e va'e yvyra yvateve tema ovu yvyra hovana va'e áryve ramo okuraxõ py onhemboyvate rei.

<sup>11</sup> Ha'e ramo xee amboaxa 'rã yvy regua ipo'akakueve po py, ha'e kuery omoingo axy aguã heko vaia re. Ha'e rami vy aipe'a 'rã oka katy.

<sup>12</sup> Ha'e ramo amboae regua kuery pavẽ gui ijavaeteve va'e ou vy oake'o 'rã, oeja rive 'rã guive. Ha'e ramo hakãgue ho'apa yvyty ha'e yvyugua ha'e javi rupi. Hoky voi omopẽmbaa 'rã yvy jave rupi yakã ikuai va'e yvýry. Ikuaray'ã py yvy regua ikuai va'ekue ha'e javi ojepe'apa 'rã oje'oivy.

<sup>13</sup> Hapytakue re ma ha'e javi regua guyra 'rã ikuai, ha'e rã hakãgue guy rupi ma ha'e javi regua vixo ojeaity apo 'rã okuapy.

<sup>14</sup> Ha'e rami yvate etea rami amboae yvyra yy rembe rupi ikuai va'e onhemboyvate e'ý aguã, amboae yvyra ikuai va'e gui yvate ve'ý aguã, neñ yy reta oĩa py yvateve hi'añ va'e voi ojee ojerovia rei e'ý aguã. Mba'eta ojejou porã reia ha'e javi ma okanhy aguã rami omboaxaa. Ha'e ramo ho'apa 'rã yvykua vaikue py, avakue ra'y kuery yvykua py omboguejy pyre mbyte py optya aguã.

<sup>15</sup> Po rami ijayvu SENHOR Nhanderuete:

— Ha'e va'e yvyra okanhy jave xee ajapo yvy jave re ipy'a vaia aguã rami. Mba'eta ha'e va'e káuxa yvy guýry yvu ikuai va'e ajao'ipa vy ajokopa yy oxyry va'ekue, yy heta ve'ý aguã. Ikáuxa ma Líbano yvy ha'e javi rupi ajao'ipa ajukue huñ rei va'e py, ha'e ramo yvy re yvyra ikuai va'e ipirupa.

<sup>16</sup> Ha'e va'e yvyra ho'a rã hevovo reia gui ajapo yvy regua ha'e javi oendu vy okyjepa aguã, yvykua vaikue py omanogue mbyte amboguejy ramo. Ha'e ramo yvyra ho'a

va'ekue ov'y'apa ju 'rā okuapy yvy guýry rupi ikuai py, Éden pyguare, Líbano yvy regua iporâve va'ekue, ha'e yy etaa rupi ikuai va'ekue ha'e javi.

<sup>17</sup> Ha'e gui ma amboae regua kuery ipytyvõare ha'e ikuaray'ã py oguapy okuapy va'ekue voi oopa 'rā hexeve yvykua vaikue py kyxe py ojuka pyre reve optyta aguã.

<sup>18</sup> — Ha'e gui Faraó, ndee voi yvyra Éden py ikuai va'e ha'e javi gui neporâve ha'e ndeyvateve va'e. Ha'e rami teĩ ha'e kuery reve reguejy avi 'rā yvy guy katy. Ha'e rami vy repyta 'rā opire omboi uka e'ŷ va'ekue mbyte, kyxe py ojuka pyre kuery reve guive. Ha'e rami vy Faraó ha'e iporâague ha'e javi okanhymba 'rā — he'i SENHOR Nhanderuete.

## 32

### *Egitopygua huvixa Faraó omboaxy va'e rami ijayvuague*

<sup>1</sup> Ha'e gui doze ma'etŷa, doze jaxya re ijypy'ia ára py ju SENHOR oayvu ombou. Ha'e vy aipoe'i xevy:

<sup>2</sup> — Ava ra'y, ndeayvu ke Egito pygua huvixa Faraó pe omboaxy va'e rami. Ha'e vy aipo're 'rā ixupe: Ndevy ma "Guary ra'y yvy regua mondoroa", 'ea va'eri peteĩ jakare yakã oña py opyrõmba reve yy omongy'apa rei va'e rami rive reiko.\*

<sup>3</sup> Po rami ijayvu SENHOR Nhanderuete:

— Nde'áry amombo 'rā xekya yvy regua kuery mbyte, ha'e ramo ha'e kuery nemoatã 'rā heravy xekya py.

<sup>4</sup> Ha'e rami vy xee roeja 'rā imoiny yvy py, romombo 'rā nhuũ reia py. Ha'e vy nde'áry ambou 'rā opa marâgua guyra, mymba yvy regua voi okaru 'rā okuapy ndero'o re.

<sup>5</sup> Ndero'okue amoai 'rā yvyty áry rupi, ha'e yvyugua ikuai va'e rupi amonyê 'rā ndekyrakue.

<sup>6</sup> Nderuguy onheẽ va'ekue ma omoakŷmba 'rā yvy yvyty áry peve, amonyê avi 'rā yakã.

<sup>7</sup> Xee rojuka ma vy ajao'ipa 'rā yva, jaxy-tata ikuai va'e voi amopytûmba 'rā. Kuaray ma amo'ãmba 'rā arai py, jaxy voi naexakâvei 'rā.

<sup>8</sup> Ndekáuxa ajapo 'rā yva re hexakã va'ekue pytûmba aguã rami, ha'e nderekooague rupi ambou 'rā pytû reia — he'i SENHOR Nhanderuete.

<sup>9</sup> — Ajapo 'rā yvy regua heta rei ipy'a vai aguã rami, mba'eta pavẽ regua oendu 'rā rekanhymba maa omombe'ua rã, yvy reikuaa e'ŷague rupi voi.

<sup>10</sup> Nderekoo heta regua oendu vy onhemondyipa rei 'rā, huvixa kuery voi nderovai xekyxé aekyi rã oexa vy oryryipa 'rā. Ndee re'a ramo peteĩ-teĩ oryry-ryryipa 'rā, guekove oguerojeayvu vy.

<sup>11</sup> Mba'eta po rami SENHOR Nhanderuete ijayvu:

— Ndea py ou 'rā Babilônia pygua huvixa okyxe reve.

<sup>12</sup> Ndevyguia kuery heta va'ekue teĩ ajapo 'rā ipy'a guaxukueve pavẽ regua gui ijavaeteve va'e oitypa aguã rami okyxe py. Ha'e ramo ha'e kuery omomba 'rā Egito yvy re onhembovate va'e ikuai va'e, mba'emo porã oĩ va'ekue ha'e javi guive.

<sup>13</sup> Nerymba kuery ma amokanhymba 'rā yy heta ikuai va'e rupi. Ha'e gui avakue neĩ mymba ma voi nomongy'avei 'rā yy.

<sup>14</sup> Ha'e rami vy yy ha'e py ikuai va'e ajapo 'rā itui porã ju aguã rami. Yakã ikuai va'e ma ajapo 'rã azeite rami oxyry porã aguã — he'i SENHOR Nhanderuete.

<sup>15</sup> — Mba'eta ambovaipa uka 'rã Egito yvy, opa mba'e ikuai va'ekue noïvei aguã rami. Ajuka ukapa 'rã ha'e py ikuai va'ekue. Ha'e ramo peikuaa 'rã xee ae SENHOR aikoa.

<sup>16</sup> Ha'e rami yvy regua kuery ijayvu 'rã Egito yvy ha'e mba'emo porã oĩ va'ekue ha'e javi ogueronhemboaxya rupi — he'i SENHOR Nhanderuete.

### *Egitopygua kuery amboae regua reve manoa py ikuai aguã re ijayvuague*

\* **32:2** Apocalipse 1.15

**17** Ha'e gui doze ma'et̄a ha'e jypygua jaxyar e, quinze araa py ju SENHOR oayvu ombou vy aipoe'i xevy:

**18** — Ava ra'y, ejae'o ke Egito yvy re heta ikuai va'ekue re, mba'eta ha'e kuery oguejypa 'rā yvy guyve katy, amboae regua kueryomboeteve pyre yvykua katy oguejy va'e kuery reve.

**19** Peē nda'u amboae gui peneporāve ri ty'y? Peguejy ke ha'vy, ha'e penheno pejupy opire omboi uka e'ŷ va'ekue reve.

**20** Mba'eta peē kuery voi pe'a 'rā kyxe py ojuka pyre mbyte. Kyxe omboaxaa ma penderovaigua pe: "Pembovaipa 'rā Egito yvy, ha'e py ikuai va'ekue ha'e javive reve", 'ea ixupe.

**21** Ha'e ramo ipy'a guaxukueve regua ipo'akave va'ekue ha'e ipytyvōare kuery reve ma pendevy ojapukai 'rā okuapy manoa py ikuiai gui. Ha'e py opire omboi uka e'ŷ va'ekue oguejy vy onhonomba inony kyxe py ojukapa pyre.

**22** — Ha'e py ma itui Assíria pygua huvixa ojeupergua kuery ha'e javi reve. Ijyvýry rupi ikuai kyxe py ojukaa rā onhono porāmba pyre, kyxe py ho'apa va'ekue meme.

**23** Mba'eta ha'e kuery rupa ma yvykuapy rupi ikuai, ha'e onhono porāague yvýry ikuai ha'e pyguare kuery ha'e javi. Kyxe py oipyxo vy ojuka pyre meme, okuave teri jave joyvy rupi nhomongyjepa rei va'ekue ri.

**24** — Ha'e py oī avi Elāo pygua ojeupergua kuery ha'e javi reve, onhono porā mbyte yvýry rupi. Ha'e kuery ma kyxe py oipyxo vy ojuka pyre meme. Ha'e rami vy opire nomboi ukai va'ekue oguejypa yvykua py. Okuave teri jave joyvy rupi nhomongyjepa rei va'ekue ri oximba reve opytapa yvykua py oguejy va'ekue mbyte.

**25** Ojuka pyre kuery mbyte rupi ma ojapoa huparā, ojeupergua kuery ha'e javi mbyte. Ha'e kuery rupa ma ijyvýry rupi ikuai. Opire omboi uka e'ŷ va'ekue meme, kyxe py ojukapa pyre. Okuave teri jave joyvy rupi nhomongyjepa rei va'ekue ri oximba reve opytapa yvykua py oguejy va'ekue mbyte, ojuka pyre mbyte rupi onhono porāa.

**26** — Ha'e gui ha'e py ma ikuai Meseque ha'e Tubal pygua ojeupergua kuery ha'e javi reve. Ha'e kuery rupa ma ijyvýry rupi ikuai. Opire omboi uka e'ŷ va'ekue meme, kyxe py ojukapa pyre, okuave teri jave joyvy rupi nhomongyjepa rei va'ekue ri.

**27** Ha'e kuery ma ymave rupigua ipy'a guaxukueve mbyte rupi e'ŷ ikuai, opire nomboi ukai va'ekue yvykua py oguejy va'ekue guembiporu joe opu'āa py oiporu va'ekue inhakā guýry omoña reve-reve ikuiai rupi e'ŷ. Mba'eta ha'e kuery reko vaiague re opaga aguā ma inhakā re ae opyta. Okuave teri jave joyvy rupi ipy'a guaxukueve voi nomboekorāvei va'ekue ri.

**28** Ha'e gui peē Egito pygua kuery voi penemopēmbaa avi 'rā opire omboi uka e'ŷ va'e kuery mbyte py, penenhono porāa 'rā guive kyxe py ojuka pyre kuery mboae reve.

**29** — Ha'e py ma Edom pygua huvixa kuery ha'e yvatekueve ha'e javi ikuai. Ha'e kuery ipo'akapa va'ekue ri omboguejypaa kyxe py ojuka pyre-pyre reve. Ha'e ramo opire omboi uka e'ŷ va'ekue reve onhonoa yvykua py omboguejy pyre ha'e javi reve.

**30** — Ha'e py ikuai avi kuaray apu'a'ia katygua yvatekueve. Ha'e kuery ma Sidom pygua kuery oipyxo pyre reve omboguejya avi, oximba reve ikuai, opo'akaa py nanhomboekorāvei va'ekue ri. Ha'e py opire omboi uka e'ŷ va'ekue reve ikuai, kyxe py ojuka pyre kuery oximba rei reve yvykua py omboguejypaa va'ekue mbyte.

**31** — Faraó ma ha'e kuery ha'e javi oexa vy ov'y'apa 'rā ojeupergua kuery reve. Tá, Faraó ha'e ixondaro kuery ha'e javi 'rā ov'y'a, kyxe py ojukaa avi va'ekue mbyte onhono porāa ramo — he'i SENHOR Nhanderuete.

**32** — Mba'eta Faraó ha'e ixondaro kuery ha'e javi ma nhomondyipaarrā amoī va'ekue okuave va'e kuery yvy re. Va'ekue ri ha'e voi onhono porāa 'rā opire omboi uka e'ŷ va'ekue kyxe py ojuka pyre mbyte py — he'i SENHOR Nhanderuete.

## 33

*Tetā rarōa oikuua pota porā aguā re ijayvuague*

<sup>1</sup> Ha'e gui SENHOR oayvu ombou ju xevy. Ha'e vy aipoe'i:

<sup>2</sup> — Ava ra'y, ndeayvu ke neretarā kuery pe. Ha'e vy aipo're ha'e kuery pe: Peteī yvy re kyxe revegua ambou ramo ha'e pygua kuery oiporavo 'rā peteī ava ha'e pygua ae, ha'e vy omoī 'rā guetā rarōarā.

<sup>3</sup> Ha'e ramo ha'e va'e ma yvy re kyxe revegua ou rā oexa vy mimby guaxu omonhe'ē 'rā guetarā kuery omonheangu aguā.

<sup>4</sup> Ha'e gui xapy'a rei mimby guaxu nhe'ē amongue oendu teī nonheangui rei ramo kyxe revegua ou vy ojuka 'rā. Ha'e rami rā hexe ae 'rā oī huguy omoēague re opaga aguā,

<sup>5</sup> mba'eta mimby guaxu nhe'ē oendu teī nonheangui rire. Hexe ae 'rā oī huguy omoēague re opaga aguā. Ha'e rā mimby nhe'ē oendu vy onheangu va'e ma ogueraa jepe 'rā guekove.

<sup>6</sup> Ha'e rami teī xapy'a rei tetā rarōarā omoī mbyre ma kyxe revegua ou rā oexa teī mimby guaxu nomonhe'ēi tetā pygua kuery omonheangu aguā. Ha'e gui kyxe revegua ou vy oipe'apa 'rā tetā pygua rekove. Xapy'a rei ojuka pyre heko vaia reve 'rā ojukaa teī huguy omoēague re ambopaga 'rā tetā rarōa.

<sup>7</sup> — Ha'e gui ma ndee ava ra'y, xee romoī Israel kuery rarōarā, ayvu xejuru guigua ndee rendu vy ha'e kuery pe ju remombe'u aguā.

<sup>8</sup> Xapy'a rei heko vai va'e kuery pe aipoa'e 'rā: "Ndee ndereko vai va'e, anhetē ete remano 'rā", ha'e teī ndee ha'e kuery pe nandeayvui 'rā ikuaiaty gui ojepe'a aguā re. Ha'e rami rā ha'e kuery omano 'rā gueko vaiague py teī huguy onheēague re ndee 'rā rombopaga.

<sup>9</sup> Ha'e gui xapy'a rei heko vai va'e kuery pe ndeayvu ikuaiaty gui ojepe'a aguā re, va'eri ha'e kuery ndojeko rerovai vy ma omano 'rā gueko vaia py ae. Ha'e rā ndee ma reo jepe 'rā.

<sup>10</sup> — Ha'e gui ndee ava ra'y, ndeayvu ke Israel kuery pe. Ha'e vy aipo're 'rā: Peē kuery aipopeje: "Nhandeapua ha'e jajejavya nhandere oī va'e káuxa ae japa javy. Mba'exa 'rā tu ha'vy jaikove?" peje.

<sup>11</sup> Aipo're ha'e kuery pe: Anhetē ete xee SENHOR Penderuete xee ae rekove rupi aura vy aipoa'e: "Xee ndavy'ai heko vai va'e kuery omano rā, ha'e rā gueko vaiaty gui ojeko rerova vy oikove ju ramo anho. Ha'e nunga rupi Israel kuery, pejeko rerova, pejeko rerova ke pendeko vaia gui. Mba'erā tu pemano rive?" ha'e.

<sup>12</sup> — Ha'e nunga rupi ava ra'y, aipo're 'rā neretarā kuery pe: Xapy'a rei heko porā va'ekue heko vai ri ramo ymave rupi teko porā rupi oikoague ndogueraa jepei 'rā. Ha'e rami ae avi heko vai va'ekue ojeko rerova ri ramo ymave rupi teko vai rupi oikoague ma nomokanhysi 'rā. Ha'e rami ae avi heko pora va'ekue ri ojejavya ára py heko porāague rive ndojapoī 'rā oikove aguā rami.

<sup>13</sup> Ha'e gui xapy'a rei heko porā va'e pe "Anhetē ete reikove riae 'rā" ha'e teī ha'e va'e ma gueko porāa re rive ojeroviaa rupi ojejavvy ramo xee naxema'endu'avei 'rā teko porā rupi oikoague re. Ha'e rami 'rāgue py omano 'rā gueko vaia py ae.

<sup>14</sup> Ha'e rami ae avi xapy'a rei heko vai va'e pe "Anhetē remano 'rā" ha'e teī ojejavvyaty gui ojeko rerova vy ha'evea rami ha'e teko porā rupi anho ju 'rā oiko.

<sup>15</sup> Ha'e rami vy ha'e va'e heko vai va'ekue omboekovia ju 'rā mba'emo oiporu uka va'ekue, opaga 'rā ju mba'emo re imondaague repy, ha'e ayvu tekove me'ea rupi oiko, heko vaiague rupi 'rāgue py. Ha'e rami ri vy oikove 'rā, nomanovei 'rā.

<sup>16</sup> Mba'eta heko vaiague re naxema'endu'avei 'rā hovai. Ha'evea rami ha'e teko porā rupi ju oiko vy oikove 'rā.

<sup>17</sup> — Ha'e rami teī neretarā kuery aipoe'i: "SENHOR ma ha'eve'ÿa rami nhanderereko", he'i va'eri ha'e kuery ae ha'eve'ÿa rami ikuai va'e.

<sup>18</sup> Mba'eta heko porã va'ekue ma xapy'a rei teko porã gui ojepe'a vy teko vai rupi ju oiko vy ma omano 'rã gueko vaia káuxa rive.

<sup>19</sup> Ha'e rã heko vai va'ekue ma heko vaitaty gui ojeko rerova vy ha'evea rami ha'e teko porã rupi ju oiko vy ma oikove 'rã.

<sup>20</sup> Ha'e ramive ma peẽ kuery aipopeje: "SENHOR ma ha'eve'ÿa rami nhanderereko", peje. Ha'e nunga rupi peẽ Israel kuery, xee aikuua pota 'rã peteĩ-teĩ peikoa re.

### *Israel kuery ojee rive ojeroviaa re ijayvuague*

<sup>21</sup> Ha'e gui doze ma'etý re ma escravo-rã nhandereraa ague py nhandekuai jave, dez jaxya ha'e cinco araa py ma peteĩ ava ou xea py Jerusalém gui onha va'ekue. Ha'e vy aipoe'i:

— Tetã oipe'aa ma — he'i.

<sup>22</sup> Ne'exa, ha'e va'e ka'aru ma xere SENHOR po oĩ va'ekue, onha va'ekue ovaë e'ÿ mbove. Ha'e rami vy ko'ëgue ju ha'e va'e ava xea py ou e'ÿ mbove'i xejuru oipe'a ju. Ha'e ramo xeayvuve ju, nakyrirívei.

<sup>23</sup> Ha'e ramo xevy SENHOR ombou oayvu. Ha'e vy aipoe'i:

<sup>24</sup> — Ava ra'y, Israel kuery regua tetã ombovaipa pyre rupi ikuai va'e ijayvu vy aipoe'i okuapy: "Abraão ma ha'e ae'i oiko va'eri ipo py omboaxaa raka'e kova'e yvy. Ne'exa, nhande kuery katuve ma nhandereta ete ramo kova'e yvy ome'ëa ae nhandekuai aguã", he'i okuapy.

<sup>25</sup> Ha'e rami teĩ aipo're ha'e kuery pe: Po rami ijayvu SENHOR Nhanderuete: Peẽ kuery ma xo'o ha'e huguy revegua pe'u, ha'e tuuete ra'angaa perekoyva que re pema'ë, jouguy pemoë pekuapy guive. Ha'e nunga rupi peẽ kuery nda'u penderekaoa 'rã teve yvy re?

<sup>26</sup> Peẽ kuery ma pendekyxre rive pejeroviave va'e, ojeguarupy pejapo, peneirû kuery ra'xyx reve guive pejejav. Ha'e nunga rupi nda'u yvy re penderekaoa 'rã teve?

<sup>27</sup> — Aipo're ha'e kuery pe: Anhetê ete xee SENHOR Penderuete xee ae rekove rupi aura vy aipoa'e: Tetã ombovaipa pyre ikuai va'e ojukaa 'rã kyxe py, ha'e rã tetã rovai rupi ikuai va'e ma amboaxa 'rã mymba nharõ omondoropa ha'e ho'upa aguã. Ha'e gui onhemiaty ha'e itakua rupi onhemi va'e ma mba'eaxy gui 'rã omano.

<sup>28</sup> Mba'eta pendeyvy xee ambovaipa uka 'rã tekaoa ve'ÿ opyta aguã, ha'e ramo pendepo'akaa pejou porã 'rãgue py penemo'yvyf'ia 'rã. Israel regua yvyty ikuai va'e rupi voi jipoavei 'rã avave rei, ha'e rupi ndoaxaavei 'rã guive.

<sup>29</sup> Ha'e ramo peikuaa 'rã xee ae SENHOR aikoa, pendeyvy tekaoa ve'ÿ opyta aguã xee ambovaipa uka ramo, ojeguarupy pejapo rupi pendekuaia re.

<sup>30</sup> — Ha'e gui ndee ava ra'y, tetã kora ha'e ngoo rokë rupi neretarã kuery ijayvu okuapy ndere. Joupe-upé 'rã ijayvu peteĩ-teĩ guyvy ha'e guyke'y kuery reve. Ha'e vy aipoe'i 'rã: "Ajerure pëvy, peju ke, jaa nhaendu aguã SENHOR ayvu omombe'ua rã", he'i okuapy.

<sup>31</sup> Ha'e rami vy ha'ekue rami ae 'rã ou ndea py, ha'e neretonde rupi oguapypa 'rã okuapy xeayguva kuery rami. Ha'e vy ndeayvua oendu 'rã teĩ nda'ikuaixei ha'ekue rami. Ojuru py porayvu va'e ramo ijayvu, ha'e rã opy'a py ma jokorepaa rupi anho ikuai.

<sup>32</sup> Mba'eta ha'e kuery pe rã ndee mborayvu rupi oporai va'e rami reiko, amongue oporai porã ha'e imba'epu kuaa va'e rami rive. Mba'eta ndeayvua oenduxe vai merami teĩ nda'ikuaixei ha'ekue rami.

<sup>33</sup> Ha'e nunga ha'e javi oiko, ojeupitypa ramo ha'e kuery oikuua 'rã ha'e kuery mbyte rupi profeta oiko ra'eague.

## 34

### *Israel kuery re nopena porãi va'e kuery rovai ijayvuague*

<sup>1</sup> Ha'e gui SENHOR oayvu ombou vy aipoe'i xevy:

<sup>2</sup> — Ava ra'y, ndeayvu ke Israel kuery re opena va'e kuery rovai. Ha'e vy aipo're: Po rami ijayvu SENHOR Nhanderuete. Nda'evei ete 'rã Israel kuery re opena va'erã omoï

mbyre va'eri ojee ae rive opena va'e kuery pe! Xevyguua vixa'i kuery re opena va'eră omoī mbyre e'ŷ teve?

<sup>3</sup> Mba'eta xo'o ikyra-kyrave va'e pe'upa pekuapy, hague py ma penhemonde, ha'e pemongyrapa va'ekue ma pejuka tema pekuapy. Ha'e rami teĩ vixa'i kuery re ma napepenai.

<sup>4</sup> Mba'eta ikangykue napemombaraetei, imba'eaxy va'e napeipoanoi, opě va'ekue napemboje'ai, ojep'a va'ekue ndaperu jevyi, ha'e okanhugue ma voi ndapeka jevyi. Ha'e rami 'rāgue py perekoyi, pemboaxya rupi e'ŷ.

<sup>5</sup> Xerymba kuery re opena poră va'e ndoikoi ramo oaīmba oje'oivy, ha'e mymba inharō va'e nhuūndy rupigua rembi'ură rive ikuai.

<sup>6</sup> Ha'e ramo xerymba kuery ma opa rupi ikuai yvyty ha'e yvy'ă ikuai va'e áry rupi. Yvy jave rupi oaīmba okuapy, hekaară ha'e heru jevyară ndoikoi ramo.

<sup>7</sup> — Ha'e nunga rupi joe opena va'eră omoī mbyre kuery, pendu ke SENHOR ayvu:

<sup>8</sup> Anhetē ete xee SENHOR Penderuete xee ae rekove rupi aura vy aipoa'e: Xevyguua vixa'i kuery pemboaxapa hi'uară kuery pe, ha'e ramo mymba inharō va'e nhuūndy rupigua kuery rembi'ură ikuai, opena va'eră ndoikoi ramo, mba'eta joe opena va'eră amoī va'ekue ndoekai okuapy xevyguua kuery, ojee ae rive opena okuapy, xevyguua kuery re'ŷ.

<sup>9</sup> Ha'e nunga rupi joe opena va'eră romoī va'ekue, pejapyxaka ke SENHOR ayvu re.

<sup>10</sup> Po rami ijayvu SENHOR Penderuete: Ne'exa, xee ma aiko joe opena va'e kuery rovai, ha'e rami vy ha'e kuery po py ndaejavei 'rā xevyguua vixa'i kuery. Amomba 'rā joe openaa, ojee ae rive nopenavei aguă. Ha'e kuery juru gui xee araa jepepa 'rā xevyguua vixa'i kuery, ho'u va'eră rive ikuai ve'ŷ aguă.

### *Ojeupagua kuery re SENHOR opena poră aguă re ijayvuague*

<sup>11</sup> Ha'e nunga rupi po rami SENHOR Nhanderuete ijayvu:

— Ne'exa, xee ae aeka 'rā xevyguua kuery, arupa 'rā guive.

<sup>12</sup> Mba'eta mymba kuery re opena va'e ma ha'e kuery oaīmba ră oexa vy oguerupa ju 'ră. Ha'e rami ae avi xee voi aru 'rā xevyguua kuery. Araipa ha'e pytūmbaa ára py ha'e kuery omoaīague ha'e javi rupi gui xee araa jepe 'ră.

<sup>13</sup> Opa rupi yvy regua ikuiai gui aipe'a vy amboatypa 'ră, ha'e vy ijyvy re ae ju 'ră aru. Amongaru 'ră Israel regua yvyty ikuai va'e rupi, yakă ikuai va'e yvýry, tekao rupi guive.

<sup>14</sup> Nhuūndy porăa rupi 'ră areko, Israel regua yvyty yvateve va'e ikuiai rupi. Ha'e ramo onheno 'ră okuapy nhuūndy poră reia rupi Israel regua yvyty re.

<sup>15</sup> Xee ae 'ră apena xevyguua kuery re, amombytu'u 'ră guive — he'i SENHOR Nhanderuete.

<sup>16</sup> — Ha'e rami vy aeka 'ră okanhugue, ojavy va'ekue ma arupa ju 'ră, opěgue ha'e ikangykue ma amombaraete ju 'ră. Ha'e ră ikyra rei va'e ha'e ipo'akakueve ma amomba 'ră. Mba'eta teko poră rupi 'ră apena.

<sup>17</sup> — Ha'e gui peě kuery xevyguua pendekuai va'e re ma po rami SENHOR Penderuete ijayvu: Ne'exa, aikuua pota 'ră xerymba kuery ha'e javi re, vixa'i ava ha'e kavara ava re guive.

<sup>18</sup> Peě kuery peguară nhuūndy poră reia ame'ë va'e nda'u nda'evei ri? Mba'exa tu ha'vy nhuūndy mboae rupi voi pepyrōmba rei rive? Peě kuery pe nda'evei ri ty'y yy poră ame'ë va'ekue? Mba'exa tu ha'vy yy mboae voi pepyrō vy pemongy'apa rei?

<sup>19</sup> Mba'eta xerymba kuery ma nhuūn pepyrōmbaague rupi rive okaru, ha'e yy pemongy'apa va'ekue oy'u okuapy.

<sup>20</sup> Ha'e nunga rupi po rami SENHOR Nhanderuete ijayvu joguereko axya kuery pe:

— Ne'exa, xee ae aikuua pota 'ră vixa'i kuery ikyrakueve ha'e iporiaukue re.

<sup>21</sup> Mba'eta peě kuery ma pendeaxi'y py penhomoaña-anha heravy, ha'e penderakua py peikutu pekuapy ikangykue'i, pemoxēmba peve.

**22** Ha'e rã xee ma araa jepepa 'rã xevyguia kuery ho'upa pyrã rive ikuai e'ŷ aguã, vexa'i ikuai va'e re aikuua potaa py.

**23** Ha'e kuery pe peteĩ ambou 'rã opena va'erã omongaru porã aguã. Xerembiguai Davi ae 'rã omongaru ha'e opena.

**24** Xee aiko 'rã ha'e kuery ruete, ha'e rã xerembiguai Davi ma ha'e kuery mbyte rupi 'rã oiko huvinxave. Xee SENHOR ae xeayvu ha'e rami.

**25** — Ha'e gui ha'e kuery pe ajapo 'rã xereve ikuai porã aguã. Ha'e rami vy amomba 'rã mymba nharõ yvy re ikuai va'ekue. Ha'e ramo xevyguia kuery tekoia e'ŷa rupi ikuai, ha'e ka'aguy rupi oke teĩ mba'eve ndoikoi 'rã.

**26** Mba'eta xee amoingo porã 'rã, xevyguia yvyty yvýry rupi voi. Ha'e rami vy hi'ára py porã 'rã ambou oky amoingo porãa rupi.

**27** Ha'e gui yvyra ikuai va'e hi'apa 'rã, ha'e yvy re oiko 'rã mba'emo aju pyau. Ha'e ramo yvy re ha'e kuery ikuiaia rupi mba'eve ndoikoi 'rã. Ha'e kuery oikuua 'rã xee ae SENHOR aikoa, mba'eta ha'e kuery re canga omoĩ mbyre amopẽmba vy aipe'apa 'rã escravo-rã ogueraa va'ekue po gui.

**28** Ha'e rami rire ha'e kuery nda'ikuaivei ma 'rã amboae regua kuery omokõ va'erã, mymba yvy re ikuai va'e voi nomondorovei 'rã. Ha'e rami 'rãgue py ikuai porã 'rã, imondiyarã ndoikoi rã.

**29** Ha'e kuery pe ajapo 'rã onhotŷ va'ekue oiko porã ete aguã, ha'e ramo yvy re ikuai teri reve karuai omomba ve'ŷ aguã. Noenduvei 'rã guive amboae regua kuery ojojai reia.

**30** Ha'e ramo oikuua 'rã ha'e kuery reve xee SENHOR tuuete aikoa, ha'e rã Israel kuery ae xevyguia ikuiaia — he'i SENHOR Nhanderuete.

**31** — Peẽ xerymba vexa'i kuery pendekuai va'e ma avakue peiko, ha'e rã xee ma Penderuete — he'i SENHOR Nhanderuete.

## 35

### *Seir yvyty re ikuai va'e kuery rovai ijayvuague*

**1** Ha'e gui xevy SENHOR oayvu ombou vy aipoe'i:

**2** — Ava ra'y, ema'ẽ na Seir yvyty katy, ha'e vy ndeayvu ke ha'e kuery rovai.\*

**3** Aipo're ha'e kuery pe: Po rami SENHOR Nhanderuete aipoe'i: Ne'exa Seir yvyty re pendekuai va'e, xee ma penderovai aiko. Ha'e rami vy penderovai xepo aupti vy ajapo 'rã pekanhymba aguã rami nhomondyipaarrã.

**4** Peẽ kuery retã ambovaipa uka 'rã tekoague opyta aguã. Ha'e ramo peikuua 'rã xee ae SENHOR aikoa.

**5** Mba'eta Israel kuery re napendea'ei riae vy pemboaxa kyxe py ojuka va'erã pe, ha'e kuery opaa py omoingo axya ete javé.

**6** Ha'e nunga rupi anhetẽ ete xee SENHOR Penderuete xee ae rekove rupi aura vy aipoa'e: Peẽ kuery voi xee romboaxa 'rã penderuguy moẽarã pe, penderakykue monha aguã. Jouguy pexaxe vai rire penderuguy moẽarã ju 'rã ou penderakykue.

**7** Mba'eta Seir yvyty ambovaipa ete vy ha'e gui amomba 'rã oaxa ha'e ojevy aguã va'ekue ha'e javi.

**8** Ha'e va'e yvyty amonyẽ 'rã oipyxo pyre anho. Mba'eta kyxe py oipyxo pyre ho'a 'rã pendeyvy rupi yvyty, yvyugua ha'e yakã ikuai va'e yvýry.

**9** Ha'e rami vy pendekuaia ma raka'eve rã peve ajapo 'rã tekoia ve'ŷ oĩ aguã rami, peneretã py noĩavei aguã. Ha'e ramo peikuua 'rã xee ae SENHOR aikoa.

**10** — Mba'eta aipopeje va'ekue: "Mokoĩ regua ha'e mokoive yvy opyta 'rã xemba'e ae. Xee ae 'rã aiko ha'e py, SENHOR ha'e py oiko avi teĩ", peje va'ekue.†

\* **35:2** Seir yvyty ma Edom kuery ikuiaia. Ha'e kuery ma Israel kuery rovaigua ikuai raka'e. † **35:10** "Mokoĩ regua" he'ia ma Judá ha'e Israel kuery re ijayvu vy.

**11** Ha'e nunga rupi anhetē ete xee SENHOR Penderuete xee ae rekove rupi aura vy aipoa'e: Xee rombopaga 'rā joupe pendepoxy ha'e joe napenda'eia rami ae, mba'eta pendevai rei reve perekoxa va'ekue xevyguia kuery. Ha'e gui peē kuery re aikuua pota ramo ha'e kuery voi oikuua 'rā xereko.

**12** Israel regua yvyty re pendeayvu vai vy aipopeje: "Ombovaipaa ma ramo nhandevy pe ju optya 'rā nhuündyrā rive", peje va'ekue. Ha'e rami pendeayvu rā xee SENHOR aendupa, ha'e peē voi peikuua 'rā xee aenduague.

**13** Mba'eta peē kuery ma pendeayvu py penhemboyvate reive va'ekue xerovai, xere pendeayvu rei vaipa. Ha'e ramo xee aendupa.

**14** Ha'e nunga rupi SENHOR Penderuete ijayvu po rami: Yvy jave rupi ovy'a pavē jave teī peē kuery ma xee romokanhymba 'rā.

**15** Israel kuery omokanhymbaa jave pevy'a reiague rami ae 'rā xee ju ajapo pendere. Mba'eta peē Seir yvyty re Edom kuery pendekuai va'e, penemokanhymbaa katuī'i 'rā. Ha'e ramo peikuua 'rā xee ae SENHOR aikoa.

## 36

### *Israel regua yvyty ikuai va'e pe ijayvuague*

**1** — Ndee ava ra'y, emombe'u ke xeayvu Israel regua yvyty ikuai va'e pe. Ha'e vy aipo're: Israel regua yvyty pendekuai va'e, pendu ke SENHOR ayvu.

**2** Po rami SENHOR Nhanderuete ijayvu: Penderovaigua kuery pendevy aipoe'i: "Ha'evea rami! Tekoa imarā e'ŷ va'ekue ma nhandevy meme optya", he'i okuapy.

**3** Ha'e rami rā ndee Ezequiel, emombe'u ke xeayvu, ha'e vy aipo're yvyty ikuai va'e pe: Po rami ijayvu SENHOR Nhanderuete: Amboae regua kuery penemomba ha'e jovajovai katy gui penemombaxe ojeupe ju penemombyta aguā, xevyguia kuery re ijayvu vai guive ojojai reia rupi.

**4** Ha'e rami teī, peē Israel regua yvyty pendekuai va'e, pendu ke SENHOR Nhanderuete ayvu. Po rami SENHOR ijayvu yvyty ha'e yvy'ā ikuai va'e pe, yakā ha'e yvyugua ikuai va'e pe, ha'e tekoa e'ŷa ombovaipa pyre, ha'e tetā oeja pyre ikuai va'e pe, mba'eta ha'e katy'i rupi amboae regua kuery ikuai va'e oipe'apa, ojojai rei okuapy guive.

**5** Ha'e rami teī po rami SENHOR Nhanderuete ijayvu: Anhetē xee nda'evei etea hendy va'e rupi xeayvu yvy regua kuery ha'e Edom pygua ha'e javi pe, mba'eta xeyvy ha'e kuery ojopy va'ekue om̄ba'erā, okuraxō py ovy'a rei ha'e onhe'ē py xejojai rei reve. Ha'e ramo vy oipe'apa hekoa va'ekue, ogueraapa guive imba'e rei-rei va'ekue.

**6** Ha'e nunga rupi emombe'u xeayvu Israel yvy re. Ha'e vy aipo're yvyty ha'e yvy'ā, yakā ha'e yvyugua ikuai va'e pe: Po rami ijayvu SENHOR Nhanderuete: Ne'exa, xee ma nda'evei etea ha'e xepoxya rupi xeayvu, mba'eta yvy regua kuery pendejobjai rei okuapy.

**7** Ha'e nunga rupi po rami ijayvu SENHOR Nhanderuete: Xepo aupti reve xee aura yvy regua kuery pendejobjai reiague ma pendeyvýry rupi ikuai va'e áry ae ju 'rā ojeapa.

**8** — Ha'e rā peē Israel regua yvyty pendekuai va'e, pendere ikuai nho 'rā yvyra hakā ha'e hi'a va'e xevyguia Israel kuery pe, mba'eta ha'e kuery ou ju aguā rami ikuai.

**9** Mba'eta ne'exa, xee aiko 'rā pendereve. Ajevy 'rā pendea py. Ha'e ramo pende'áry rupi yvy oikaraña ha'e oma'etŷa ju 'rā.

**10** Pende'áry amboeta ju 'rā avakue, Israel kuery ha'e javi regua, tá, ha'e javi 'rā ikuai. Ha'e ramo ha'e kuery ma guetā rupi ae ju 'rā ikuai, mba'eta ivaipaague py ojapo ju 'rā ngoorā.

**11** Pende'áry rupi amboeta 'rā avakue ha'e mymba kuery. Ha'e kuery hetia ha'e ta'y reta 'rā ovy. Jypy guare gui xee romoingo porāve 'rā. Ha'e ramo peikuua 'rā xee ae SENHOR aikoa.

**12** Pende'áry rupi ajapo 'rā xevyguia Israel kuery oguata ju aguā rami. Pepyta 'rā ha'e kuery pegua, ndapejapovei 'rā guive ta'y kuery okanhy aguā rami.

**13** Po rami SENHOR Nhanderuete ijayvu ha'e kuery yvy pe:

— Ndevy pe aipo'ea: “Ndee ma yvy avakue mombaa, ha'e ta'y kuery okanhymba aguã rami rejapo va'e”, 'ea va'ekue teĩ.

**14** Ha'e nunga rupi ndee neremombavei ma 'rã avakue, nderejapovei 'rã ndea pygua ra'y kuery okanhymba aguã rami — he'i SENHOR Nhanderuete.

**15** — Xee ma amboae regua kuery pe ndorojojai rei ukavei 'rã rendu aguã, ha'e ramo nerenduvei 'rã yvy regua kuery nembojaru reia, nderejapovei 'rã guive ndea pygua kuery ojejavy aguã rami — he'i SENHOR Nhanderuete.

### *Israel kuery omoingo porã ju aguã re ijayvuague*

**16** SENHOR oayvu ombou vy aipoe'i xevy:

**17** — Ava ra'y, Israel kuery oyvy re ikuai teri reve opa marã ikuai ha'e mba'emo ojapoa py omongy'apa rei va'ekue. Kunha gueko re oiko va'e rami ha'e kuery voi ha'eve'ÿ va'ekue xerenonde.

**18** Ha'e nunga rupi ha'e kuery re ambou xepoxya, ha'e kuery yvy re jouguy omoë okuapy ha'e mba'emo ra'angaa py omongy'apaague re.

**19** Ha'e rami vy amoãmba va'ekue yvy regua kuery ikuiaia rupi, araa ukapa yvy jave rupi. Xee ambopaga opa marã ikuai ha'e mba'emo ojapoague re.

**20** Ha'e rami py yvy regua kuery ikuiaia py mamo rã ha'e kuery oje'opia rupi ojapo okuapy xerery iky'a va'ea rami rive oikuaa aguã rami, mba'eta ha'e kuery pe aipo'ea: “Peva'e kuery ma SENHOR pegua va'eri ijyvy gui omoxëmba va'ekue”, 'ea.

**21** Ha'e rami rã Israel kuery oje'opia rupi ojapo okuapy yvy regua kuery xerery iky'a e'ÿ va'e nomboetei aguã rami. Ha'e rami teĩ xee amboete uka ntho.

**22** — Ha'e nunga rupi aipo're Israel kuery pe: Po rami SENHOR Nhanderuete ijayvu: Peẽ Israel kuery re ama'ë vy e'ÿ ha'e nunga ajapo, ha'e rã xerery iky'a e'ÿ va'e amboete ukaa rupi vy, mba'eta pee kuery ma yvy regua kuery mbyte rupi peoa py xerery napemboete ukai ramo.\*

**23** Ha'e nunga rupi amboete uka ju 'rã xerery yvate ha'e iky'a e'ÿ va'e, yvy regua kuery mbyte peoa rupi pemongy'a uka va'ekue ri. Ha'e ramo yvy regua kuery oikuaa 'rã xee SENHOR ae aikoa, ha'e kuery renonde iky'a e'ÿ va'e aikoa aexa uka ramo — he'i SENHOR Nhanderuete.

**24** — Ha'e rami vy yvy regua kuery mbyte gui xee roguenoë 'rã, ha'e yvy jave rupi gui pendeyvy py ae ju rogueru vy romboaty 'rã ha'e py.

**25** Ha'e vy pende'áry rupi amboayvi 'rã yy iky'a e'ÿ va'e, napendeky'avei aguã. Ha'e rami vy roiky'a'o 'rã ha'eve'ÿa ha'e mba'emo ra'angaa perekro va'ekue ha'e javi gui.

**26** Pendevy ame'ë 'rã kuraxõ pyau, pendere amoï 'rã nhe'ë pyau. Pendegui aipe'a 'rã kuraxõ ita guigua, ha'e vy hekivia amoï 'rã pendero'o guigua.

**27** Pendere amoï 'rã Xenhe'ë ae, ajapo 'rã guive xeayvu rupi pendekuai aguã, xee aipota va'e pemoï porã vy pejapopa aguã rami.

**28** Ha'e ramo pendekuai 'rã pendeyvyrã peneramoï kuery pe ame'ë va'ekue re. Peiko 'rã xevygua kuery, ha'e rã xee ma aiko 'rã Penderuete.

**29** Rogueraa jepe 'rã ha'eve'ÿa ha'e javi gui. Trigo voi ambou reta 'rã, ha'e rã karuai ma nambouvei 'rã pendere.

**30** Ajapo 'rã yvyra hi'a porã ha'e mba'ety rupi ipyau va'e oiko porã aguã rami, karuai káuxa yvy regua kuery pendejojai rei ve'ÿ aguã.

**31** Ha'e ramo penema'endu'a 'rã ha'eve'ÿa rami pendekuaiague ha'e ha'eve'ÿ va'e pejapoague re. Pendejegui ae 'rã pejeguaru penderekro vai ha'e penhemongy'apaague káuxa.

**32** Peikuaa porã pota ke: pendere ama'ë vy e'ÿ ha'e nunga ajapo. Israel kuery, pexõmba ke ha'e perovy'ave eme pendekuaiague — he'i SENHOR Nhanderuete.

---

\* **36:22** Romanos 2.24

**33** Po rami SENHOR Nhanderuete ijayvu:

— Pendereko vaia ha'e javi gui roiky'a'o vy ajapo avi 'rā peneretā rupi pendekuai ju aguā rami. Ha'e ramo penderorā pejapopa ju 'rā teko a e'ŷague rupi.

**34** Peikaraī ju 'rā yvy teko a e'ŷa rupi, oaxa va'e kuery oexa vy "Oeja pyre itui" nde'ivei 'rā.

**35** Ha'e rami 'rāgue py aipo'ea 'rā: "Kova'e yvy oeja pyre ma Éden yvotyty rami ju iporā. Tetā teko a e'ŷa, oeja pyre ha'e ombovaipa pyre voi ikorapa ha'e oimbaa ju", 'ea 'rā.

**36** Ha'e ramo yvy regua kuery pendeyvýry rupi okuave va'e oikuua 'rā xee SENHOR ae tetā ombovaipa pyre ajapo juague, ha'e pendeyvy oeja pyre rupi ama'etý juague. Xee SENHOR ha'e rami aguā re xeayvu rire ajapopa 'rā.

**37** Po rami SENHOR Nhanderuete ijayvu:

— Israel kuery ha'eve ju 'rā xevy ojerure aguā mymba kuery rami amboetave aguā.

**38** Ha'e ramo tetā oeja pyre rupi heta ju 'rā xevy guarā omboaxa pyre, Jerusalém tetā py ngaru oiko jave py mymba kuery heta valéku rami. Ha'e ramo oikuapa 'rā xee ae SENHOR aikoa.

## 37

### *Yvyugua py ikāgue pirukue ikuai va'e oexaague*

**1** Ha'e gui xere SENHOR opo omoī vy xereraa Onhe'ē rupi. Ha'e vy xemoī peteī yvyugua ikāgue anho ikuia mbyte py.

**2** Ha'e vy ojapo ikāgue yvýry rupi aguata aguā rami. Ikāgue heta ete ikuai yvyugua rupi, ipiru ratā guive.

**3** Ha'e gui ma oporandu xevy:

— Ava ra'y, kova'e ikāgue nda'u okuave ju 'rā?

Xee ambovai:

— SENHOR Xeruete, ndee ae 'rā reikuua — ha'e.

**4** Aipoe'ive ju xevy:

— Ndeayvu na kova'e ikāgue ikuai va'e pe, ha'e vy aipo're: Ikāgue ymague, pendu ke SENHOR ayvu.

**5** Po rami SENHOR Nhanderuete ijayvu ikāgue ikuai va'e pe: Ne'exa, peē kuery re amoī 'rā Xenhe'ē peikove ju aguā.

**6** Ha'e gui pendere amoī 'rā hajykuerā, ajapo 'rā guive pendero'o ha'e pendepirepa ju aguā rami. Ha'e gui ma pendere amoī 'rā Nhe'ē. Ha'e ramo peikove ju 'rā, ha'e peikuua 'rā xee ae SENHOR aikoa — he'i.

**7** Ha'e ramo ijayvuague rami ae xeayvu. Xeayvu teri reve hevovo rei nhendu va'e aendu, peteī-teī kāgue joe onhembota-mbota vy oparāgue rei. Ha'e ramo vy peteī-teī kāgue onhemboj'apa joe.

**8** Ha'e ramo ama'ē rā ikāgue ikuai va'e hajy ha'e ho'opa ma. Ipire voi ojekuaa, ha'e rā inhe'ērā ma noī teri.

**9** Ha'e gui SENHOR aipoe'i xevy:

— Ava ra'y, Nhe'ē pe ju ndeayvu. Ndeayvu vy aipo're ixupe: "Po rami SENHOR Nhanderuete ijayvu: Ndee Nhe'ē, eju irundy henda yvytu oipejua katy gui. Ha'e vy ke eipeju kova'e omanogue áry rupi, okuave ju aguā rami", 're — he'i.

**10** Ha'e ramo ijayvuague rami xeayvu ramo ikāgue ikuai va'e re ou Nhe'ē. Ha'e ramo oikovepa jevy vy opu'āmba ju joguerokuapy, xondaro kuery rami mbovy rei e'ŷ ikuai.

**11** Ha'e gui ma aipoe'ive ju xevy:

— Ava ra'y, kova'e kāgue ma Israel kuery ikuai. Mba'eta aipoe'i okuapy: "Orekāgue ma ipirupa ma, ha'e vy roarō rokuapya voi opa ma. Noīvei ma orerekovea", he'i okuapy.

**12** Ha'e nunga rupi ndeayvu ke. Aipo're ha'e kuery pe: " SENHOR Nhanderuete ma po rami ijayvu: Ne'exa xevyguage kuery, aipe'apa ju 'rā penderupa penhono porāague, ha'e ramo vy roguenoēmba ju 'rā ha'e gui, Israel yvy re rogueru aguā.

<sup>13</sup> Ha'e ramo xevyguua kuery, penderupa gui roguenoẽmba ma ramo peikuaa 'rã xee ae SENHOR aikoa.

<sup>14</sup> Ha'e gui ma pendere amoĩ 'rã Xenhe'ẽ, ha'e gui peikove ju 'rã. Rogueru 'rã pendeyvy re ae pendekuai aguã. Ha'e ramo peikuaa 'rã xee SENHOR ae ha'e rami aguã re xeayvu ha'e ajapo ete guive", he'i SENHOR.

### *Judá ha'e Israel kuery reve peteĩ'i regua ju ikuai aguã re ijayvuague*

<sup>15</sup> Ha'e gui SENHOR oayvu ombou vy aipoe'i xevy:

<sup>16</sup> — Ndee ava ra'y, ejou ke peteĩ yvyra'i, ha'e va'e re embopara po rami: Judá kuery regua, ha'e gui ha'e kuery reve Israel kuery onhemoirũ va'ekue regua guive. Ha'e gui ma amboae yvyra'i ju ejopy vy ha'e va'e re embopara: José ha'e Efraim regua, ha'e gui ha'e kuery reve Israel kuery onhemoirũ va'ekue regua guive.

<sup>17</sup> Ha'e gui emboje'a mokoõve, peteĩ'i yvyra rami ndepo py rerekro aguã.

<sup>18</sup> Ha'e gui ma neretarã kuery oporandu 'rã ndevy. Ha'e vy aipoe'i 'rã: "Emombe'u ke orevy mba'erã he'ia pa nami rejapo va'e?" he'i 'rã okuapy.

<sup>19</sup> Ha'e ramo ndee aipo're 'rã ha'e kuery pe: "Po rami SENHOR Nhanderuete ijayvu: Ne'exa, xee ajopy 'rã José regua yvyra'i Efraim po py oĩ va'ekue, ha'e gui ha'e kuery reve Israel kuery onhemoirũ va'ekue regua guive. Ha'e gui ha'e va'e ma amboje'a 'rã yvyra'i Judá regua reve, peteĩ'i yvyra rami areko aguã, mba'eta peteĩ'i 'rã ojeapo xepo py", 're.

<sup>20</sup> Ha'e kuery renonde ndeayvu reve ndepo py rerekro 'rã mokoõve yvyra'i ipara oĩa va'e.

<sup>21</sup> — Ha'e gui aipo're 'rã ha'e kuery pe: Po rami SENHOR Nhanderuete ijayvu: Ne'exa, xee anoẽmba 'rã Israel kuery yvy regua kuery mbyte ha'e kuery ooague gui, opa rupi gui 'rã amboatypa. Ha'e rami vy arupa ju 'rã ijyvy re ae.

<sup>22</sup> Ha'e vy ha'e va'e yvy re ajapo 'rã peteĩ'i regua ikuai aguã, Israel regua yvyty re. Peteti'i 'rã oĩ avi ha'e kuery ha'e javi ruvixaverã. Mokoõ regua ve'ý ma 'rã ikuai. Raka'eve rã teindoja'ovei 'rã mokoõ reguarã.

<sup>23</sup> Nonhemongy'avei 'rã guive ta'angaa oguereko va'ekue py rive, neĩ ojeguarupy ha'e teko vai rupi ikuiaia py ma voi. Mba'eta araa jepepa 'rã xegui ojepe'aa rupi ojeavyague gui, ha'e gui aiky'a'opa ju 'rã. Ha'e rami vy ikuai 'rã xevyguua kuery, ha'e rã xee aiko 'rã Tuuete.

<sup>24</sup> — Ha'e kuery re xerembiguai Davi ae 'rã opena. Peteti'i 'rã oiko ha'e kuery re opena va'e. Ha'e ramo xee aipotaa rami anho 'rã ikuai, omoĩ porã 'rã okuapy xeayvu ojapo ete aguã.

<sup>25</sup> Ha'e kuery ikuai 'rã yvy xerembiguai Jacó pe ame'ẽague re, tamoĩ kuery ikuaiague re ae. Ha'e py ae 'rã hekoa, ta'y kuery ha'e hamymino kuery voi, raka'eve rã peve. Huvixaverã ma xerembiguai Davi ae 'rã oiko raka'e rã peve guarã.

<sup>26</sup> Ha'e kuery pe ajapo 'rã xereve ikuai porã aguã regua raka'e rã peve guarã. Amoingo porã, amboetave 'rã guive. Ha'e kuery mbyte amoĩ 'rã xevyguua oo iky'a e'ý va'e raka'e rã peve guarã.

<sup>27</sup> Ha'e kuery mbyte ae 'rã oĩ xembojerovia aty. Xee aiko 'rã Tuuete, ha'e rã ha'e kuery ma ikuai 'rã xevyguua.\*

<sup>28</sup> Yvy regua kuery voi oikuua 'rã okuapy xee SENHOR ae Israel kuery ky'a'oa aikoa, ha'e kuery mbyte xevyguua oo iky'a e'ý va'e oĩ ramo raka'eve rã peve.

## 38

### *Huvixa Gogue rovai ijayvuague*

<sup>1</sup> Ha'e gui ma SENHOR oayvu ombou vy aipoe'i xevy:

<sup>2</sup> — Ava ra'y, ema'ẽ Magogue pygua huvixa Gogue oĩa katy. Ha'e va'e ma Rôs, Meseque ha'e Tubal pygua kuery re opena va'e.\* Ndeayvu ke hovai,

\* 37:27 2 Coríntios 6.16 \* 38:2 Apocalipse 20.8-9

<sup>3</sup> ha'e vy aipo're: SENHOR Nhanderuete po rami ijayvu: Ndee Gogue, Rôs, Meseque ha'e Tubal pygua kuery ruvixa reiko va'e, xee ma nderovai aiko.

<sup>4</sup> Xee rojapo 'rã rejere aguã rami. Ndejuru py pinda amoï reve rogueraa 'rã mombyry, nexondaro kuery ha'e javi reve. Kavaju ha'e hi'árygua kuery hembiporupa va'e meme, heta 'rã oje'oi hu'y jokoa ha'e imo'ãa tuvixa va'e reve, opo py kyxe reve guive.

<sup>5</sup> Ha'e kuery irûrã oje'oi avi 'rã Pérsia, Etiópia ha'e Pute pygua kuery, hu'y jokoa ha'e ngora ratã revegua meme.

<sup>6</sup> Oje'oi avi 'rã Gômer pygua oxondaro kuery ha'e javi reve, ha'e kuaray ijapu'a'ia katy gui jogueru 'rã Togarma pygua oxondaro kuery ha'e javi reve. Heta ete 'rã oje'oi nderupive.

<sup>7</sup> — Ha'e nunga rupi Gogue, eiko katu ke. Epu'ã ke nderupivegua kuery ha'e javi reve, ha'e vy epena ha'e kuery re.

<sup>8</sup> Mba'eta hare ma rire roenoï 'rã. Ma'etýa opaa py ma reo 'rã peteï yvy kyxe gui ndokyjeaveia katy. Ha'e va'e kuery ma yvy regua ikuaiague gui ono'õmba 'rã jogueruvy Israel regua yvyty hare ma ivaipa va'ekue áry. Ha'e kuery ma yvy regua kuery mbyte gui oipe'aa heruvy rire ikuai porâmba ju 'rã mba'eve gui okyje rei e'ý re.

<sup>9</sup> Ha'e gui ma ha'e kuery rovai peju 'rã yvytu atã rami. Peju 'rã arai yvy ojao'ipa va'e rami, nexondaro kuery ha'e mbovy e'ý regua nderupive ou va'e reve.

<sup>10</sup> — Po rami ijayvu SENHOR Nhanderuete: Ha'e va'e ára ma ndepy'a re remoï 'rã mba'emo vai rejapo aguã.

<sup>11</sup> Ha'e vy aipo're 'rã: "Aa 'rã peteï yvy tekao ikora e'ý va'e re apu'ã aguã, aa 'rã opty'u'rei va'e kuery rovai. Ha'e kuery ma ikuai porã rei tekao ikora e'ý va'e rupi, okẽ neĩ okẽ jokoa noña rupi", 're 'rã.

<sup>12</sup> Ha'e rami vy reo 'rã imba'e rei-rei reipe'a aguã, mba'emo reraapa ha'e ha'e kuery rovai ndepo reupi aguã, mba'eta yvy oeja pyre py ha'e kuery heko 'rã yvy regua mbyte gui ono'õ jogueruvy rire. Ha'e kuery ma guymba ha'e omiba'e rei-rei oguerekopa, ha'e yvy mbyte py ikuai va'e.

<sup>13</sup> Ndevy pe Sabá ha'e Dedã pygua kuery oporandu 'rã okuapy, Társis tetã py mba'emo vendea ha'e huvixa mba'emo pe'aaty kuery voi. Ha'e vy aipoe'i 'rã okuapy ndevy: "Nhomba'e rei-rei peraa aguã pa peju? Mba'emo peipe'a aguã pa nderupivegua kuery remboatypa? Peipe'a ta pa prata ha'e ouro, peraa ta pa mymba kuery ha'e mba'e rei-rei? Peipe'apa ete 'rã teve?" he'i 'rã okuapy.

### *Israelyvy re Gogue kuery ou aguã re ijayvuague*

<sup>14</sup> — Ha'e gui ava ra'y, ndeayvu ke Gogue pe, ha'e vy aipo're: Po rami ijayvu SENHOR Nhanderuete: Ha'e va'e ára xevygua Israel kuery ikuai porã jave ndee Gogue nda'u ndereikuaai 'rã ri ndere oiko va'erã?

<sup>15</sup> Mba'eta kuaray ijapu'a'ia katy nderekaoa gui reju 'rã mbovy e'ý regua reve. Kavaju árygua meme 'rã peju, xondaro kuery heta rei ha'e imbaraete va'e meme reve.

<sup>16</sup> Ha'e vy peju 'rã xevygua kuery Israel regua rovai, arai yvy ojao'ipa va'e rami avi. Opaa ára rogueru 'rã xeyvy rovai guarã pavê regua xekuaa aguã, mba'eta ha'e kuery oexaa py aexa uka 'rã iky'a e'ý va'e aikoa, ndee Gogue re mba'emo ajapoa py.

<sup>17</sup> Po rami SENHOR Nhanderuete ijayvu:

— Nderekorã re yma ma voi xeayvu va'ekue, xeremimbo'e kuery Israel regua profeta ikuai va'e rupi, mba'eta ha'e kuery mbovy e'ý rei ma'etý re ijayvu va'ekue xevygua kuery rovai guarã xee rogueru aguã re — he'i.

<sup>18</sup> SENHOR Nhanderuete aipoe'ive ju:

— Ha'e va'e ára Israel yvy re Gogue ou ramo aexa uka ete 'rã xepoxy.

<sup>19</sup> Mba'eta xee nda'evei ete ha'e xepoxya hendy va'e rupi aipoa'e: Ha'e va'e ára ambo-rryryipa 'rã Israel yvy jave rupi.

<sup>20</sup> Ha'e ramia gui xerenonde oryryipa 'rã pira ye'ẽ rupigua, guyra yva regua, mymba yvy regua, yvy rupi otyryry va'e, ha'e avakue yvy re ikuai va'e ha'e javi. Yvyty ikuai va'e

ho'apa 'rã yvy'ã guy katy, itaova ha'ypa 'rã, ha'e tetã kora ikuai va'ekue voi ho'apa 'rã yvy py.

<sup>21</sup> SENHOR Nhanderuete aipoe'i:

— Ha'e gui Gogue kuery rovai ambou 'rã kyxe, yvyty re ha'e kuery ikuiaia rupi. Ha'e ramo peteĩ-teĩ okyxe oiporu 'rã oirũ kuery rovai ae.

<sup>22</sup> Mba'eta ambopaga 'rã mba'eaxy ha'e huguy moearã py. Hi'áry ambou 'rã oky ja'ea, amandau tuvixa va'e ha'e tata enxofre revegua. Ha'e nunga ho'a 'rã ixondaro kuery ha'e hexeveguia yvy regua kuery heta ikuai va'e áry.

<sup>23</sup> Ha'e rami vy xee anhemboyvate 'rã, aexa uka 'rã guive iky'a e'ý va'e aikoa. Pavẽ regua oexaa py 'rã ajekuaa uka. Ha'e ramo pavẽ 'rã oikuuaa xee ae SENHOR aikoa.

## 39

### *Gogue kuery oitypaa aguã re ijayvuague*

<sup>1</sup> — Ha'e nunga rupi ndee ava ra'y, ndeayvuve ju Gogue rovai. Ha'e vy aipo're: Po ramí ijayvu SENHOR Nhanderuete: Ne'exa Gogue, xee aiko nderovai, Rôs, Meseque ha'e Tubal pygua ruvixa reiko va'e.

<sup>2</sup> Xee rojapo 'rã rejere aguã rami, kuaray ijapu'a'ia katy gui roguenoẽ 'rã heruvy Israel regua yvyty ikuai va'e re.

<sup>3</sup> Ha'e gui nderapa aipe'a 'rã ndeaxua gui, ha'e hu'y ma aitypa 'rã reiporu kuaa regua gui.

<sup>4</sup> Ha'e ramo re'a 'rã Israel regua yvyty re nexondaro kuery ha'e yvy regua kuery nderupive ou va'ekue ha'e javi reve. Ha'e ramo romboaxapa 'rã opa marãguia guyra ha'e mymba yvy regua pe pende'u aguã.

<sup>5</sup> Pe'a 'rã nhuñdy rupi rive, ha'e rami aguã re xeayvu rire — he'i SENHOR Nhanderuete.

<sup>6</sup> — Amboja 'rã tata Magogue yvy re ha'e ye'ë yvýry okyje e'ý re ikuai va'ekue re. Ha'e ramo oikuuaa pavẽ 'rã xee ae SENHOR aikoa.

<sup>7</sup> Xevygua Israel kuery mbyte rupi aikuuaa uka 'rã xerery iky'a e'ý va'e, namongy'a ukavei ma 'rã guive. Ha'e ramo yvy regua kuery oikuapa 'rã Israel kuery mbyte rupi xee SENHOR iky'a e'ý va'e aikoa.

<sup>8</sup> Ne'exa, ha'e nunga ou ma oiny, oiko ta ma. Kova'e ára re ae xeayvuague — he'i SENHOR Nhanderuete.

<sup>9</sup> — Ha'e gui ma Israel regua tetã pygua kuery oẽmba jogueruvy vy oapypa 'rã ngovaigna kuery rembiporukue: hu'y jokoa, imo'ãa tuvixa va'e, guyrapa, hu'y, yvyra raimbe ha'e hu'y guaxu. Sete ma'etõ peve 'rã ogueraa ha'e nunga ha'e javi oapypa aguã.

<sup>10</sup> Ha'e va'e jave ma ndoguerui 'rã yxakã mba'ety gui neĩ ka'aguy gui, mba'eta tembi-porukue gui ae 'rã ojapo tata. Ha'e rami vy ogueraapa ju 'rã mba'emo reraa are kuery mba'ekue, oipe'apa ju 'rã mba'emo pe'aare kuery mba'ekue — he'i SENHOR Nhanderuete.

### *Gogue pegua xondaro kuery re'õgue ojatypaa ague*

<sup>11</sup> — Ha'e va'e ára Gogue kuery pe ame'ë 'rã Israel yvy re he'õgue ruparã rive, yvyugua ye'ë regua kuaray oua katy oguataaty rupi. Ha'e py ma ojaty 'rã Gogue ixondaro kuery ha'e javi reve. Ha'e rami rire omboerya 'rã yvyugua Gogue kuery ikuiaia.

<sup>12</sup> Sete jaxy peve 'rã Israel kuery ojaty he'õgue, oyvy oiky'a'opa ju aguã.

<sup>13</sup> Ha'e va'e yvy regua kuery ha'e javi 'rã ojaty. Ha'e kuery ima'endu'a riae 'rã xee anhemboyvatea ára re — he'i SENHOR Nhanderuete.

<sup>14</sup> — Ha'e gui oiporavoa 'rã avakue yvy jave rupi oiko-oiko tema va'erã, oeka vy amboae guigua re'õgue ojaty pyrã, yvy oiky'a'opa ju aguã. Sete jaxy rire mae ma omboypy 'rã te'õgue oeka aguã.

<sup>15</sup> Ha'e kuery ma yvy jave rupi oiko-oiko temaa rupi ava kãgue oexa nhavõ omarka 'rã ijyvýry rupi, ha'e gui ijatyarã ju ou vy ojaty aguã yvyugua Gogue kuery ikuiaia py.

<sup>16</sup> Ha'e va'e tetã voi omboery 'rã Gogue kuery ikuiaia. Ha'e rami vy 'rã oiky'a'opa ju oyvy.

*SENHOR peguarã ojukapaa aguã re ijayvuague*

<sup>17</sup> — Ha'e gui ndee ava ra'y, endu ke. Po rami SENHOR Penderuete ijayvu. Aipo're 'rã guyra ikuai va'e ha'e mymba ka'aguy regua pe: Peno'õmba pejogueruvy, opa rupi gui peju ajuka uka va'ekue pe'upa aguã. Pendevy pe areko katu, Israel regua yvyty ikuai va'e rupi ajuka uka reta. Ha'e ramo pe'u 'rã xo'o ha'e pey'u 'rã tuguy.

<sup>18</sup> Mba'eta pe'u 'rã ipo'akapa va'e ro'okue, ha'e pey'u 'rã yvy regua yvatekueve ruguy, vexa'i ava ha'e ta'y'i, kavara ha'e vaka ra'y Basã yvy re omongyra pyre ro'okue ramigua.

<sup>19</sup> Xee ajuka uka va'ekue, pendevy pe areko katu va'ekue gui pe'u 'rã ikyrakue penevy-atãmba peve, ha'e pey'u 'rã huguy peka'upa peve.

<sup>20</sup> Ngaru ajapoa py pe'u 'rã pekuapy kavaju ha'e ija kuery, ipy'a guaxukueve ha'e joe opu'ãa rupigua ro'okue – he'i SENHOR Nhanderuete.\*

<sup>21</sup> — Ha'e rami vy aexa uka 'rã xerexakãa yvy regua kuery mbyte, ha'e ramo pavẽ regua 'rã oexa xee aikuaa pota rã, ha'e kuery áry xepo audi ramo.

<sup>22</sup> Ha'e va'e ára guive ma Israel kuery oikuua 'rã xee ae SENHOR Tuuete aikoa.

<sup>23</sup> Yvy regua kuery voi oikuua 'rã okuapy Israel kuery ojejavyague py ae escravo-rã ogueraapaague, mba'eta xere ndojeroviai rã ha'e kuery gui amo'ã va'ekue xerova. Hovaigua kuery po py amboaxapa ramo ojukapa kyxe py.

<sup>24</sup> Ha'e kuery onhemongy'apa rei ha'e heko vai reia py ae areko ha'e rami, xerova amo'ã reve.

<sup>25</sup> Ha'e nunga rupi po rami ijayvu SENHOR Nhanderuete:

— Ha'e rami tei aý ma ambopyau ju 'rã Jacó kuery ikuia, amboaxypa ju 'rã Israel kuery, xerery iky'a e'ý va'e amboete uka ju vy.

<sup>26</sup> Ha'e gui oyvy re ae ju ikuia py imondiyiarã ndoikoi ramo ha'e kuery hexaraipa 'rã oximbaague ha'e xere ojerovia e'ýa rupi naxenhe'ẽ rendui okuapyague re.

<sup>27</sup> Mba'eta arupa ju 'rã yvy regua kuery ikuia mbyte rupi gui, amboatypa ju 'rã heruvy hovaigua kuery yvy gui. Ha'e rami vy ha'e javi regua oexaa py xee aexa uka 'rã iky'a e'ý va'e aikoa, ha'e kuery mbyte.

<sup>28</sup> Ha'e ramo ha'e kuery oikuua 'rã xee ae SENHOR Tuuete aikoa, oexa vy yvy regua ikuia rupi araa uka rã, ha'e gui oyvy katy ju amono'õ ukapa heruvy rã guive, ha'e kuery va'e regua neí peteíve aeja e'ý re.

<sup>29</sup> Ha'e kuery pe xee ndajexa uka ve'ýi ma 'rã. Ha'e rami 'rãgue py Israel kuery áry ambou 'rã Xenhe'ẽ – he'i SENHOR Nhanderuete.

## 40

*Templo pyau oexaague*

<sup>1</sup> Ha'e gui vinte e cinco ma'etý re ma amboae yvy re orereraapaa rire, ma'etý ypy'i jaxya ha'e dez araa py, catorze ma'etý re ma Jerusalém tetã oipe'aa rire, ha'e va'e ára py ae xere SENHOR opo omoí vy xereraa ha'e katy.

<sup>2</sup> Mba'emo xevy oexa ukaa rupi Nhanderuete xereraa Israel yvy katy. Ha'e vy xemopu'ã imo'amy peteí yvyty yvateve va'e áry. Ha'e va'e re ma kuaray puku-a katy ojekuaa oo guaxu tetã regua.\*

<sup>3</sup> Ha'e katy ae ju xereraa rã oí peteí ava overa va'e rami hexakãmba va'e. Ha'e va'e ma oo kora rokë py hi'aí, ha'e opo py oguerekoo ixã ipo'i'i va'e, ha'e gui peteí yvyra'i mba'emo a'ãarã.\*

<sup>4</sup> Ha'e gui ava va'e aipoe'i xevy:

— Ava ra'y, exa mba'emo nderexa py, ha'e endu ndeapyxa py. Ha'e rami vy ndeypy'a re emombe ke aexa uka ta va'e, mba'eta ha'e rami aguã ae ndererua apy peve. Ha'e gui ma Israel kuery pe ju emombe'u rexaa va'ekue ha'e javi – he'i.

\* **39:20** Apocalipse 19,17-21

\* **40:2** Apocalipse 21,10

\* **40:3** Apocalipse 11,1

<sup>5</sup> Ha'e gui aexa oo roka ha'e javi rupi peteī kora ojere oiny va'e. Ava va'e opo py yvyra'i mba'emo a'āarā oguerekva'e ma mboapy metros ipuku-a, mba'eta mba'emo nhaa'āaty ipukuve'i. Ha'e gui ma ha'e va'e py oa'ā oiny ikora. Ha'e rā ikora po guaxua ma peteī yvyra, ha'e rā yvatea voi peteī yvyra avi.

<sup>6</sup> Ha'e gui ma okē kuaray oua katy oī va'e py ju ovaē vy ojeupi ovy pyrōa oī va'e rupi. Ha'e vy okē oī va'e oa'ā rā peteī yvyra ipya, ha'e amboae voi ha'e rami ae avi peteī yvyra ipya va'e.

<sup>7</sup> Ha'e gui opy ja'o'i ikuai va'e ma peteī yvyra ipuku-a ha'e peteī yvyra ipya joo rami meme. Ha'e rā opy ja'o'i mboae gui ma mboapy metros. Ha'e rā okē oguy puku regua pya ma peteī yvyra.

<sup>8</sup> Ha'e gui oguy puku okē opy katy oī va'e regua oa'ā avi rā peteī yvyra ipya.

<sup>9</sup> Okē rexei opy ja'o'i oī va'e oa'ā avi rā irundy metros ipya, ha'e rā ijyta po guaxua ma peteī metro meme. Oguy puku ma opy guive okē peve oo.

<sup>10</sup> Ha'e gui okē kuaray oikea katy oī va'e jova-jovai rupi ikuai mboapy opy ja'o'i joo rami meme tuvixa va'e. Ijyta jovaive rupi ikuai va'e voi joo rami meme tuvixa va'e.

<sup>11</sup> Ha'e gui oa'āve ju okē oikeaty. Ha'e va'e pya ma cinco metros, ha'e rā ipuku-a seis metros raxa'i.

<sup>12</sup> Ha'e gui opy ja'o'i ikuai va'e renonde rupi ma meio metro va'e meme. Peteī-teī opy ja'o'i ma mboapy metros ipya ha'e ipuku-a.

<sup>13</sup> Ha'e gui opy ja'o'i rokē ikuai va'e ma joexei'i meme. Oa'ā rā peteī opy ja'o'i rokē guive amboae oīa peve ma doze metros raxa'i ipya.

<sup>14</sup> Oo yta ikuiaia peve oa'ā rā trinta metros. Opy ja'o mbyte pygua ma oo yta okē yvýry hi'aī va'e peve ovaē ovy.

<sup>15</sup> Okē oka katyguia guive opy oguy puku oī va'e peve ma vinte e cinco metros oī.

<sup>16</sup> Ikuai avi janela yvyra po'i'i reve oo mbotya re yvate rupi, opy ja'o'i ikuai va'e ha'e opy ja'o okē rexei oī va'e mbotya jerea rupi. Ha'e va'e re ma pindo ra'angaa hiny.

<sup>17</sup> Ha'e gui ma oka oī va'e py ju xereraa. Ha'e va'e yvýry oī opy ja'o'i, ha'e oka ha'e javi rupi ita itui pyrōarā. Ha'e va'e rexei rupi ikuai avi trinta opy ja'o'i.

<sup>18</sup> Ha'e va'e pyrōa ma okē ikuai va'e rupi peve itui, pyrōa yvýīve'i va'e itui.

<sup>19</sup> Ha'e gui ipya ju oa'ā okē yvýīve va'e guive opy ja'o mbyte pygua peve, kuaray oua katy ha'e ijapu'a'ia katy rupi ma cinqüenta metros meme.

<sup>20</sup> Ha'e gui okē kuaray ijapu'a'ia katy oī va'e, oka katy oī va'e ma oa'ā avi ipuku-a ha'e ipya.

<sup>21</sup> Jovaive re mboapy opy ja'o'i ikuai va'e ma jypyguia rami tuvixa va'e, ijyta voi. Ha'e okē rexei opy ja'o oī va'e ma jypyguia rami avi tuvixa va'e. Ipuku-a ma vinte e cinco metros, ha'e rā ipya ma doze raxa'i.

<sup>22</sup> Ha'e gui janela ikuai va'e, oguy puku ha'e pindo ra'angaa ojapo pyre ma kuaray oua katy okē oī va'e regua rami tuvixa va'e. Okē rexei ma sete pyrōa oī, opy ja'o voi.

<sup>23</sup> Ha'e gui opy ja'o mbyte pygua rokē ma okē kuaray ijapu'a'ia katy ha'e kuaray oua katyguia rexei'i oī. Mokoīve okē mbyte rupi oa'ā rā cinqüenta metros.

<sup>24</sup> Ha'e gui kuaray puku-a katy ju xereraa. Ha'e py ma aexa peteī okē kuaray puku-a katy oī va'e. Ha'e va'e yta ha'e oguy puku oa'ā rā ha'ekue rami ae tuvixa.

<sup>25</sup> Opy ja'o ikuai va'e jerea rupi ikuai avi janela, janela aexa ypy va'ekue ramigua. Opy ja'o puku-a ma vinte e cinco metros, ha'e rā ipya ma doze raxa'i.

<sup>26</sup> Okē rexei oī sete pyrōa, ha'e henonde ma oguy puku oī. Ijyta jovaive re hi'aī va'e re hiny pindo ra'angaa.

<sup>27</sup> Ha'e gui kuaray puku-a katy oī avi peteī okē opy ja'o mbyte pygua re. Ha'e ramo kuaray puku-a katy rupi oa'ā rā cinqüenta metros peteī okē guive amboae peve.

<sup>28</sup> Ha'e gui ma okē kuaray puku-a katy oī va'e rupi xereraa ju opy ja'o mbyte pygua py. Okē kuaray puku-a katy oī va'e oa'ā rā ha'ekue rami ae tuvixa va'e.

**29** Ha'e gui opy ja'o'i, ijyta ha'e oguy puku ikuai va'e ma jypygua reve joo rami meme tuvixa avi. Oka jerea rupi ikuai avi janela. Oka puku-a ma vinte e cinco metros, ha'e rā ipya ma doze raxa'i.

**30** Ijyvýry rupi oĩ oguy puku. Ipuku-a ma doze metros raxa'i, ha'e rā ipya ma mokoĩ raxa'i.

**31** Oguy puku oĩ va'e ma opy ja'o mbyte pygua katy oo, oka katy. Ijyta re hiny pindo ra'angaa, ha'e rā pyrõa oito oĩ va'e.

**32** Ha'e gui ma kuaray oua katy ju xereraa opy ja'o mbyte pygua py. Ha'e py ma okẽ oa'ã rā ha'ekue rami ae tuvixa va'e.

**33** Opy ja'o'i, ijyta ha'e oguy puku ikuai va'e voi ha'ekue rami ae ju tuvixa. Oka jerea rupi ikuai avi janela. Oguy puku-a ma vinte e cinco metros, ha'e rā ipya ma doze raxa'i.

**34** Oguy puku ma opy ja'o mbyte pygua katy oo, oka katy ae. Ijyta joavaive re hiny pindo ra'angaa. Okẽ rexei pyrõa oito oĩ va'e.

**35** Ha'e gui ma okẽ kuaray ijapu'a'ia katy oĩ va'e katy ju xereraa vy oa'ã avi ha'e py. Ha'e rā ha'ekue rami ae tuvixa.

**36** Opy ja'o'i, ijyta ha'e oguy puku, ha'e gui ojerea rupi janela ikuai va'e oa'ã avi rā oguy puku-a ma vinte e cinco metros, ha'e rā ipya ma doze raxa'i.

**37** Ijyta ikuai va'e ma opy ja'o mbyte pygua katy opyta. Ijyta joavaive re hiny pindo ra'angaa. Okẽ rexei pyrõa oito oĩ va'e.

**38** Ha'e va'e regua opy ja'o'i ha'e oikeaty ma oka py ijyta ikuai va'e rexei'i opyta, mymba oapy reve ome'ẽ mbyrã ojoiaty oĩa py ae.

**39** Okẽ rexei oguy puku oĩ va'e joavaive re ma mokoĩ mesa oĩ. Ha'e va'e áry ma ojukaa 'rā mymba kuery, oapy vy ome'ẽ mbyrã, ha'e gui jejavya regua ha'e mba'emo omboekovia aguã regua ome'ẽ mbyrã.

**40** Ha'e gui kuaray ijapu'a'ia katy okẽ oĩ va'e rexei ma mokoĩ mesa oĩ, oikeaty rexei pyrõa oĩ va'e yvýry. Okẽ rexei oka oĩ va'e rovai re ma mokoĩ ju mesa oĩ.

**41** Ha'e rami vy joavaive re ma irundy mesa ikuai. Okẽ rexei ma ha'e javi vy oito mesa ikuai mymba kuery ojuka vy onhono aty.

**42** Irundy mesa mymba kuery oapy reve ome'ẽ mbyrã ojukaaty ma itape gui ojapo pyre. Ipuku-a ha'e ipya ma meio metro raxa'i, ha'e rā yvatea ma meio metro ete'i. Ha'e va'e áry omoña 'rā kyxe mymba oapy reve ome'ẽ mbyrã ojuka aguã.

**43** Oo mbotya jerea rupi ikuai ty'aĩ peteĩ po ipuku va'e. Ha'e rā mesa áry ma omoña 'rā xo'o ome'ẽ mbyrã.

**44** Ha'e gui okẽ opyve katy oĩ va'e rovai mokoĩ opy ja'o'i opyta oporai va'e ikuai atyrã, opy ja'o mbyte pygua py. Peteĩ ma kuaray ijapu'a'ia katy okẽ oĩ va'e rexei, ha'e rā amboe ma okẽ kuaray puku-a katy oĩ va'e rexei.

**45** Ha'e gui ava va'e aipoe'i xevy:

— Kova'e opy ja'o'i kuaray puku-a katy ojepe'a va'e ma templo rarõa sacerdote kuery pegua.

**46** Ha'e rā opy ja'o'i kuaray ijapu'a'ia katy ojepe'a va'e ma altar rarõa sacerdote kuery pegua. Ha'e va'e kuery ma Žadoque ramymino ikuai, Levi ramymino kuery regua SENHOR renonde rupi ombo'eapo va'erã — he'i.

**47** Ha'e gui opy ja'o mbyte pygua oa'ã rā ipuku-a ha'e ipya ma cinqüenta metros meme. Ha'e rā altar ma templo rexei oĩ.

**48** Ha'e gui ma templo rupi oguy puku oĩ va'e py ju xereraa vy oa'ã ijyta ikuai va'e. Jovaive re ma mokoĩ metros raxa'i. Ha'e rā okẽ pya ma mokoĩ metros rai'i joavaive re.

**49** Ha'e rā oguy puku-a ma dez metros, ha'e rā ipya ma mboapy meme. Pyrõa oĩ va'e rupi jaike. Okẽ yta ikuai va'e oo yta ikuai joavaive re.

## 41

**1** Ha'e gui ma templo ropy ju xereraa vy oa'ã okẽ yta, mboapy metros ipya va'e meme, ombojerovia aty pya rami ae.

<sup>2</sup> Oikeaty pya ma cinco metros, ha'e rã ikyke jobaive pya ma mokoĩ metros raxa'i meme. Oikea rupi oa'ã avi rã vinte metros, ha'e rã ipya ma dez.

<sup>3</sup> Ha'e gui oike ma vy templo rokẽ yta ju oa'ã rã peteĩ metro ipo guaxua. Oikea yvatea ma mboapy metros, ha'e rã ipya ma mboapy raxa'i.

<sup>4</sup> Ipuku-a oa'ã avi rã dez metros, ha'e gui ipya ma dez avi templo renonde rupi. Ha'e vy aipoe'i xevy:

— Kova'e ma henda iky'a e'ŷ ete va'e — he'i.

<sup>5</sup> Ha'e gui ma templo mbotya po guaxua oa'ã rã mboapy metros. Ha'e gui ikyke rupi opy ja'o'i ikuai va'e ma mokoĩ metros meme, templo jerea ha'e javi rupi.

<sup>6</sup> Ijerea rupi opy ja'o'i ikuai va'e ma mboapy henda rupi yvate ikuai. Peteĩ-teĩ pyrõa re ma trinta ikuai. Templo mbotya jerea rupi oĩ opy ja'o'i pyrõa yta renderã, templo mbotya rupi omoña e'ŷ aguã.

<sup>7</sup> Ha'e gui opy ja'o'i yvateve ikuai va'e ma ipyve 'rã ovvyvõive rupigua gui, templo mbotya jerea rupi ipo'i've ovya rami. Ha'e rami py templo ropy ja'o'i ikuai va'e ma yvatevea rupi ipyve va'e 'rã. Ha'e gui opy rupi oĩ peteĩ tape pyrõ-pyrõa'i vyvõ guive yvatevea katy peve nhaẽ aguã.

<sup>8</sup> Ha'e gui templo yvýry rupi aexa pyrõa yvateve va'e. Ha'e va'e ma opy ja'o'i ikuai va'e yta renderã opyta. Yvatea ma peteĩ yvyra pukukue mboapy metros va'e.

<sup>9</sup> Ha'e rã opy ja'o'i ijerea rupi ikuai va'e mbotya oka katyguia po guaxua ma mokoĩ metros raxa'i. Ha'e gui templo ropy ja'o'i ikuai va'e guive

<sup>10</sup> opy ja'o'i mboae ikuia peve ma dez metros va'e ipya templo jerea ha'e javi rupi.

<sup>11</sup> Ha'e gui opy ja'o'i oikea ma oka katy opyta mokoĩ, kuaray ijapu'a'ia katy ha'e ipuku-a katy. Opy ma mokoĩ metros raxa'i ijerea rupi.

<sup>12</sup> Ha'e gui oĩ avi peteĩ oo ha'e ae'ia py, kuaray oikea katy. Ha'e va'e ma trinta e cinco metros ipya va'e. Oo mbotya po guaxua ma mokoĩ metros raxa'i ijerea rupi, ha'e rã ipuku-a ma quarenta e cinco metros.

<sup>13</sup> Ha'e gui ma oa'ã templo. Ipuku-a ma cinqüenta metros, oka ha'e oo mbotya reve joo rami ipuku cinqüenta metros meme.

<sup>14</sup> Ha'e gui kuaray puku-a katy rupi templo mbotya ma cinqüenta metros avi, oka puku-a rami avi, ijapy ikuai va'e mbyte.

<sup>15</sup> Ha'e gui templo rovai oo ha'e ae'ia py oĩ va'e oa'ã rã cinqüenta metros avi ipuku, jobaive re oguy ikuai va'e reve.

Templo ropy rupi ete ma ojao'ipaa, henda iky'a e'ŷ ete va'e ha'e opy ja'o mbyte pygua jerea ha'e javi rupi voi.

<sup>16</sup> Ha'e va'e mboapyve henda yvýry rupi ma janela ikuai, yvyra po'i'i reve. Opy ha'e javi rupi ma oo mbotya ojao'ia yvyrapo py, pyrõa guive janela ikuia peve. Ikuai avi janela mbotyarã.

<sup>17</sup> Okẽ áry rupi ha'e templo jerea rupi ikuai mba'emo ra'angaa ojapo pyre, oo mbotya ha'e javi rupi, opy katy ha'e oka katy voi,

<sup>18</sup> anjo ipepo va'e ha'e pindo ra'angaa hiny. Pindo ra'angaa nhavõ ma mokoĩ anjo ra'angaa mbyte oĩ. Ha'e rã anjo ma mokoĩ hova va'e meme.

<sup>19</sup> Peteĩ hova ava rova ramigua ma oma'ẽ 'rã pindo ra'angaa oyke katy, ha'e 'rã amboae guary ra'y rova ramigua ma pindo mboae katy 'rã oma'ẽ. Ha'e rami tema ojapoa oo mbotya ha'e javi rupi.

<sup>20</sup> Pyrõa guive okẽ áry peve ojapoa anjo ha'e pindo ra'angaa, templo mbotya ha'e javi rupi.

<sup>21</sup> Templo rokẽ ma ijapy irundy va'e. Henda iky'a e'ŷ ete va'e rokẽ ma ha'e rami ae avi ojapoa.

**22** Ha'e rã altar ma yvyrape gui ojapo pyre. Yvatea ma mokoõ metros rai'i, ha'e rã ipuku-a ma peteõ'i. Ijapy, henda ha'e imbotya ma yvyra guigua meme. Ha'e vy ava va'e aipoe'i xevy:

— Kova'e mesa ma SENHOR renonde 'rã oĩ — he'i.

**23** Ha'e gui templo ha'e henda iky'a e'ŷ ete va'e rokẽ re ma mokoõ ojepe'aa oĩ.

**24** Peteõ-teõ okérã ma mokoõ yvyrape guigua ojapoa. Mokoõve yvyrape ma ojerea oĩ va'e meme.

**25** Templo rokẽ re ma ojapoa avi anjo ipepo va'e ha'e pindo ra'angaa, oo mbotya rupi ojapoague rami avi. Oĩ avi okẽ ao'iarã yvyra guigua, oguy puku oka katy oĩ va'e re.

**26** Ha'e gui oguy puku jovaive rupi, templo ropy ja'o'i ikuai va'e rupi ha'e okẽ ao'ia rupi ikuai janela, yvyra ipo'i'i va'e ha'e pindo ra'angaa py ombojegua pyre.

## 42

**1** Ha'e va'e rire ma kuaray ijapu'a'ia katy oka oĩ va'e py ju ava va'e xereraa, opy ja'o'i kuaray ijapu'a'ia katy ikuiaia peve. Ha'e va'e opy ja'o'i ma oo ha'e ae'ia py oĩ va'e rexei, kuaray ijapu'a'ia katy oo ojepe'a va'e rexei.

**2** Ha'e va'e oo kuaray ijapu'a'ia katy ojepe'a va'e ma cinqüenta metros ipuku va'e, ha'e rã ipya ma vinte e cinco.

**3** Ha'e py ma opy ja'o'i ikuai mboapy henda rupi yvatea py, oka dez metros va'e renonde rupi, ha'e opy ja'o mbyte pygua pyrõa rexei.

**4** Ha'e gui opy ja'o'i ikuiaia rupi oĩ peteõ oguy puku cinco metros ipya va'e opy rexei'i, ha'e cinqüenta metros ipuku, opy katy rupi oo va'e. Opy ja'o'i rokẽ ikuai va'e ma kuaray ijapu'a'ia katy meme ojepe'a.

**5** Opy ja'o'i yvatevea py ikuai va'e ma ipo'ive'i va'e, mba'eta oguy puku oĩ va'e ma opy katy oove iguyvea rupi ha'e mbyte rupi oĩ va'e gui.

**6** Mba'eta ha'e va'e opy ja'o'i ma mboapy henda rupi yvate. Ijytarã ma noĩ, opy ja'o mbyte pygua rami e'ŷ. Ha'e nunga rupi ae yvatevea py oĩ va'e ma mbyte ha'e iguyve rupi oĩ va'e gui ipo'ive'i.

**7** Ha'e gui opy ja'o'i ikuai va'e rexei'i oĩ oka kora. Ha'e va'e ma oka yvýry rupi oĩ, opy ja'o'i rexei'i, vinte e cinco metros ipuku va'e.

**8** Mba'eta opy ja'o'i oka katy ikuai va'e puku-a ma vinte e cinco metros ae. Ha'e rã templo renonde rupi oka oĩ va'e ma cinqüenta metros va'e.

**9** Ha'e va'e opy ja'o'i ma iguyve rupi 'rã oikea oĩ, oka katy gui 'rã oike kuaray oua katy gui.

**10** Ha'e gui kuaray oua katy oka oĩ va'e kora rupi ikuai avi opy ja'o'i, oo ha'e ae'ia py oĩ va'e rexei'i.

**11** Oĩ avi peteõ oguy puku. Opy ja'o'i kuaray ijapu'a'ia katy ikuai va'e rami ae avi ojapoa, ipuku-a ha'e ipya ma joo rami ae, oëaty voi joo rami ae, opa mba'e py joo rami ae. Oikeaty voi

**12** opy ja'o'i kuaray puku-a katy hokẽ ikuai va'e rami ae avi, mba'eta oguy puku kuaray oua katy oĩ va'e apy rupi gui 'rã oikea ha'e va'e opy ja'o'i py.

**13** Ha'e gui ma ava va'e aipoe'i xevy:

— Kuaray ijapu'a'ia katy ha'e ipuku-a katy oka ha'e ae'ia py oĩ va'e rexei opy ja'o'i ikuai va'e ma iky'a e'ŷ va'e meme, mba'eta ha'e va'e rupi sacerdote kuery SENHOR renonde ombo'eapo va'e okaru 'rã okuapy, mba'emo iky'a e'ŷ va'e omoõ porã aguã. Ha'e va'e ma mba'emo aju guigua ome'ẽ mbyre, jejavya regua ha'e mba'emo omboekovia aguã regua ome'ẽ mbyre. Ha'e nunga rupi ha'e va'e henda ma iky'a e'ŷ va'e.

**14** Ha'e va'e py sacerdote kuery oike vy ma oo iky'a e'ŷ va'e gui noõi 'rã oka katy oao ombo'eapoaa py onhemondea oejapa e'ŷ re, iky'a e'ŷ va'e ramo. Amboae regua ao py onhemonde ma vy 'rã oẽ heta va'e kuery ikuiaia katy — he'i.

**15** Ha'e gui ava va'e templo oa'ãmba ma rire kuaray oua katy okẽ oĩ va'e rupi ju xerenoõ. Ha'e vy oka ju oa'ã ijyvýry rupi.

- <sup>16</sup> Kuaray oua katy rupi yvyra py oa'ã rã quinhentos yvyra pukukue.  
<sup>17</sup> Kuaray ijapu'a'ia katy rupi ju oa'ã rã quinhentos yvyra pukukue.  
<sup>18</sup> Kuaray ipuku-a katy rupi oa'ã rã quinhentos yvyra pukukue.  
<sup>19</sup> Ha'e gui kuaray oikea katy ju ojevy vy oa'ã rã quinhentos yvyra pukukue avi.  
<sup>20</sup> Ha'e rami py irundy henda katy rupi oa'ãmba. Oka yvýry rupi kora oĩ va'e ma quinhentos yvyra ipuku ha'e ipya, omboja'o aguã mba'emo iky'a e'ŷ va'erã omboaxa pyre, ha'e omboaxa pyre'ŷ.

## 43

### *Templo ropy rupi SENHOR rexakãa omonyẽmbaague*

- <sup>1</sup> Ha'e gui ma okẽ kuaray oua katy oĩ va'e py ju ava va'e xereraa.  
<sup>2</sup> Ha'e ramo ama'ẽ rã kuaray oua katy gui tape ou va'e rupi ou jekuaa Israel kuery ruete rexakãa. Ijayvua ma heta yy revovo rami, ha'e rã hexakãa ma yvy rupi omoexakãmba.  
<sup>3</sup> Aexa va'e ma jypy rã Jerusalém tetã ombovaipa aguã ou jave aexa va'ekue ramigua, ha'e Quebar yakã yvýry aexa va'ekue rami avi. Ha'e rami vy ajero'a, yvy re xerova amovaẽ peve.  
<sup>4</sup> Ha'e gui ma SENHOR rexakãa ma templo py oike kuaray oua katy okẽ oĩ va'e rupi.  
<sup>5</sup> Ha'e gui Nhe'ẽ xereupi heravy opy ja'o mbyte pygua oĩ va'e katy. Ha'e ramo aexa rã SENHOR rexakãa templo ropy rupi omonyẽmba.  
<sup>6</sup> Ha'e ramo peteĩ ayvu aendu templo mbyte gui onhendu va'e. Ha'e ramo ava va'e opu'ã ho'amy xeyvýry, ha'e SENHOR aipoe'i xevy:  
 — Ava ra'y, kova'e henda ma xerenda apenaaty oĩa, apyrõ ainyaty guive, Israel kuery mbyte rupi aiko riae aguã. Ha'e gui ma Israel kuery nomongy'avei 'rã xerery iky'a e'ŷ va'e, neĩ huvixa kuery voi, mba'eta itavy reia rupi neĩ ombojeroviaaty py nguvixa kuery re'õgue ojatya rupi ve'ŷ 'rã ikuai.  
<sup>8</sup> Mba'eta ha'e kuery ngoorã ojapo vy ngokẽ omboje'a va'ekue xevygua oo rokẽ re rive, ijyta voi omboje'a va'ekue xero yta re, ha'e kuery ha'e xee aĩa mbyte peteĩ oo mbotya rive oĩ aguã. Ha'e rami ojeguarupy anho ojapo okuapy vy xerery omongy'apa rei va'ekue. Ha'e nunga rupi xee amomba va'ekue xepoxya rupi.  
<sup>9</sup> Ha'e gui aŷ ma ha'e kuery tomombopa xea gui mombyry itavy reiague ha'e nguvixa kuery re'õgue mboetea rupi ikuaiague. Ha'e rami rã ha'e kuery mbyte rupi aiko riae 'rã.

### *Altar mba'emo oapy reve ome'ẽ atyrã re ijayvuague*

- <sup>10</sup> — Ha'e gui ndee ava ra'y, Israel kuery pe exa uka ke kova'e templo, gueko vaia gui oximba aguã. Ha'e kuery ju templo ra'angaa aexa uka va'ekue oa'ã vy toikuaa pota porã.  
<sup>11</sup> Ha'e gui xapy'a rei ha'e kuery gueko vaia ha'e javi gui oximba ri ramo ha'e kuery pe eikuua ukapa kova'e oo mba'exa pa oĩa, mamo pa mba'emo ikuai, oẽaty ha'e oikeaty ikuai va'e, mba'emo ikuai va'e ha'e javi, ha'e gui hexegua ayvu, aipota va'e ha'e lei oĩ va'e ha'e javi. Embopara ke ha'e nunga ha'e javi ha'e kuery oexaa py, ayvu oĩ va'e ha'e lei aeja va'ekue re oikuua pota vy ojapopa ete aguã.  
<sup>12</sup> Po rami ma templo regua lei. Yvyty templo oĩa áry ha'e ijjyvýry rupi ma iky'a e'ŷ ete va'e meme 'rã. Ha'e rami ma lei templo regua.  
<sup>13</sup> — Po rami ma altar oa'ãague, mba'emo pea'ãaty raxa'i py. Ijjyvýry rupi guarã pejo'o 'rã meio metro ipy puku-a, ha'e ipya ma meio metro va'e avi 'rã. Ha'e rã hembe ha'e javi rupi ma peteĩ po 'rã yvatea. Ha'e va'e optya 'rã altar yvýry rupi.  
<sup>14</sup> Ha'e gui yvy guive iguy rupi ita ombojo'aa peve ma peteĩ metro. Ha'e rã ipya ma meio metro. Ita kyrigueve'i ombojo'aa gui tuvixakueve ombojo'aa peve ma mokoĩ metros. Ha'e rã ipya ma meio metro.  
<sup>15</sup> Tata renderã oĩ va'e ma mokoĩ metros yvatea va'erã. Ha'e gui tata renda áry ma omoĩ avi 'rã irundy hakua va'e.

**16** Tata renda puku-a ha'e ipya ma seis metros meme, jovaive rupi ijapy irundy va'erã.  
**17** Ita ombojo'aa puku-a ha'e ipya ma sete metros meme 'rã, ijapy irundyve oña rupi. Ijyvýry rupi hemberã oĩ va'e ma peteĩ po pukukue. Altar yvýry rupi ojo'oague ma meio metro ete'i 'rã. Ha'e gui kuaray oua katy 'rã oĩ pyrõa yvate katy oo va'e.

### *Altar Nhanderuete pe omboaxaa aguã re ijayvuague*

**18** Ha'e gui SENHOR aipoe'i xevy:

— Ava ra'y, po rami SENHOR Penderuete ijayvu: Po rami pejapo va'erã altar pemboaxaa ára, hi'áry mba'emo peapy reve peme'ẽ, ha'e hi'áry rupi tuguy pemboayvi aguã.

**19** Sacerdote kuery levita regua Zadoque ramymino ikuai va'e ma xea katy onhemboja 'rã xevy pe mba'emo ojapo aguã. Ha'e kuery pe reme'ẽ 'rã peteĩ vaka ra'y ha'e kuery ojejavyague regua ome'ẽ va'erã — he'i SENHOR Nhanderuete.

**20** — Ha'e gui ma huguy reru vy altar áry 'rã remoĩ irundy hakua ikuai va'e re, ita ombojo'aa irundyve apy re, ha'e gui hembe ojerea ha'e javi rupi voi. Ha'e rami 'rã reiky'a'o altar pejejavyague rejao'i uka vy.

**21** Ha'e gui jejavya regua vaka ra'y ome'ẽ mbyre ma oo iky'a e'ŷ va'e gui mombyry'i 'rã reraa peteĩ henda oo oĩ va'e py oapya aguã.

**22** Ha'e gui mokoĩ araa py ma reme'ẽ 'rã peteĩ kavara ava ivaikue rei e'ŷ va'e jejavya regua. Ha'e gui altar peiky'a'o ju 'rã vaka ra'y py peiky'a'oague rami ae.

**23** Reiky'a'opa ma vy reme'ẽ 'rã peteĩ vaka ra'y ha'e peteĩ vexa'i ivaikue rei e'ŷ va'e meme.

**24** SENHOR renonde py ae 'rã reme'ẽ. Hi'áry ma sacerdote kuery juky omoĩ vy ome'ẽ 'rã SENHOR pe oapya reve.

**25** Ha'e gui sete ára re ma ko'ẽ nhavõ reru 'rã peteĩ kavara ava pejejavya regua peme'ẽ va'erã. Peru avi 'rã peteĩ vaka ra'y ha'e peteĩ vexa'i ivaikue rei e'ŷ va'e.

**26** Sete ára re 'rã peiky'a'o altar pejejavya pejao'i uka vy. Ha'e rami py pemboaxa 'rã xevy guarã.

**27** Ha'e va'e ára ha'e nunga sacerdote kuery ojapopa ma vy oito araa guive altar áry mba'emo ome'ẽ 'rã oapy reve, ha'e gui Nhanderuete reve peteĩ rami ju ikuia regua guive. Ha'e ramo xee roguerovy'a 'rã — he'i SENHOR Nhanderuete.

## 44

### *Oo iky'a e'ŷ va'e rupi ombo'eapo va'erã kuery omoĩ jevyague*

**1** Ha'e gui ma oo iky'a e'ŷ va'e rokẽ py ju ava va'e xereraa kuaray oua katy, oka katy ojepa va'e py. Ha'e rami teĩ ha'e va'e okẽ onhemboty ra'e.

**2** Ha'e gui SENHOR aipoe'i xevy:

— Kova'e okẽ ma onhemboty ae 'rã oiny, ndojepe'aai 'rãe. Avave rei ndoikeai 'rã ha'e rupi, ha'e rupi SENHOR Israel kuery ruete oike rire. Ha'e rami rire onhemboty ae 'rã oiny.

**3** Ha'e rã huvixave ma ha'e py oguapy 'rã SENHOR renonde okaru aguã, huvixave ae vy. Okẽ regua oguy puku rupi 'rã oike ha'e oẽ ju 'rã ovu — he'i.

**4** Ha'e gui ma kuaray ijapu'a'ia katy oo rokẽ oĩ va'e py ju ava va'e xereraa. Ha'e py ma ama'ẽ rã SENHOR rexakãa omonyẽmba ra'e ixupegua opy rupi. Ha'e ramo ajero'a yvy re xerova amovaẽ peve.

**5** Ha'e ramo SENHOR aipoe'i xevy:

— Ava ra'y, eikuaa pota porã ke. Exa nderexa py, ha'e endu ndeapyxa py SENHOR pegua oo re xeayvu ramo, ha'e va'e regua lei ha'e javi re guive. Eikuaa pota porã ke mava'e pa templo py oike aguã ha'evea re, ha'e oo iky'a e'ŷ va'e py oike aguã nda'eveia re guive.

**6** Ha'e gui ma aipo're Israel kuery naxenhe'ẽ rendui va'e pe: Po rami ijayvu SENHOR Nhanderuete: Israel kuery, ha'eve ma pendekuai ojeguarupy pejapoa rupi!

**7** Mba'eta xevygua oo iky'a e'ŷ va'e py peroike va'ekue amboae regua kuery, ngo'o py ha'e opy'a py opire omboi uka e'ŷ va'ekue. Ha'e rami vy pemongy'apa rei xevygua oo, xevy

pe mbojape, mba'emo kyrakue ha'e tuguy peme'ẽ teĩ. Opa marãgua ojeguarupy pejapo vy xereve guarã ajapo va'ekue rupi e'ŷ pendekuai va'ekue.

<sup>8</sup> Pendevy mba'emo iky'a e'ŷ va'e xevy omboaxa pyre regua ayvu aeja teĩ ha'e va'e rupi e'ŷ pendekuai va'ekue. Ha'e rami 'rãgue py amboae regua rive pemoĩ xevygua oo iky'a e'ŷ va'e re opena va'erã.

<sup>9</sup> — Po rami SENHOR Nhanderuete ijayvu: Amboae regua Israel kuery mbyte rupi ikuai va'e neĩ peteĩ ma voi ndoikevei 'rã xevygua oo iky'a e'ŷ va'e py, opy'a py ha'e ngo'o py opire omboi uka va'e'ŷ vy.

<sup>10</sup> Ha'e rã levita kuery ma xegui ojepe'apa va'ekue Israel kuery ha'eve'ŷ rami ikuai vy ta'angaa re oje'opia rupi xegui mombyry ojepe'apa va'e reve. Ha'e rire levita kuery re 'rã oĩ ojeavyague re opaga aguã.

<sup>11</sup> Ha'e rami teĩ ha'e kuery ma ha'eve nho 'rã xevygua oo iky'a e'ŷ va'e rupi ombo'eapo aguã. Ha'e rami vy templo rokẽ rarõa rupi 'rã ikuai, opy rupi voi. Ha'e kuery ojuka 'rã guive mymba oapy reve ome'ẽ va'erã heta va'e kuery rekovia. Heta va'e kuery renonde 'rã ikuai mba'emo ojapoa py.

<sup>12</sup> Mba'eta Israel kuery mba'emo ra'angaa ombojerovia va'e reve ha'e kuery voi ombojerovia avi va'ekue, ha'e rami vy nhomonhepyxangaarã ikuai va'ekue mba'emo vai ojapoa py. Ha'e nunga rupi xepo aupi reve aura ha'e kuery re oĩ aguã gueko vaiague re opaga aguã — he'i SENHOR Nhanderuete.

<sup>13</sup> — Ha'e rami vy sacerdote rami e'ŷ ha'e kuery nonhembojavei 'rã xere, neĩ novaẽi 'rã guive peteĩve ma voi mba'emo xevygua iky'a e'ŷ va'e re. Ha'e rami 'rãgue py ojee ae meme 'rã ogueraa ojeguarupy anho ojapoaque re oximba aguã.

<sup>14</sup> Ha'e rami teĩ xee amoĩ 'rã templo rarõarã, mba'emo apoa re opena aguã guive.

### *Sacerdote kuery mba'emo ojapo aguã re ijayvuague*

<sup>15</sup> — Ha'e gui levita regua sacerdote kuery Zadoque ramymino ikuai va'e, xegui Israel kuery ojepe'apa teĩ ha'e kuery ma xevygua oo iky'a e'ŷ va'e regua ojapopa ete va'ekue. Ha'e rami rire ha'e kuery onhemboja 'rã xere, xevy pe ombo'eapo aguã. Ha'e kuery ma xerenonde 'rã ikuai mba'emo kyrakue ha'e tuguy ome'ẽ aguã — he'i SENHOR Nhanderuete.

<sup>16</sup> — Ha'e kuery ma xevygua oo iky'a e'ŷ va'e py oike vy onhemboja 'rã xe-mesa re, xevy pe ombo'eapo ha'e ajapo uka va'ekue ojapopa aguã.

<sup>17</sup> Ha'e rami avi opy ja'o mbyte pygua rokẽ rupi ha'e kuery oike vy ma ao iporâve va'e py anho 'rã onhemonde. Vexa'i rague guigua ma ojee nomoĩ 'rã templo ropy rupi opy ja'o mbyte pygua py ombo'eapo aguã.

<sup>18</sup> Onheakã jokua 'rã ajukue iporâve va'e py, kaxõ iporâve va'e py 'rã onhemonde guive. Nonheovãi 'rã imboy'aipaarã py.

<sup>19</sup> Ha'e gui opy ja'o mbyte pygua gui ha'e kuery oẽ ju vy heta va'e kuery ikuiai katy oka katy, ha'e vy omboipa 'rã ao ombo'eapo aguã onhemondeague, ha'e vy omoĩ porã ju 'rã opy ja'o'i iky'a e'ŷ va'e py. Ha'e rami vy amboae ao py ju 'rã onhemonde, jypygua ao py heta va'e kuery iky'a e'ŷ va'e rami rive opyta e'ŷ aguã.

<sup>20</sup> Nonhopĩ 'rã o'a oakã regua, neĩ ndai'a vukui 'rã guive. Ha'evea rami anho 'rã ojaya o'a.

<sup>21</sup> Peteĩve sacerdote ndoy'ui 'rã vinho opy ja'o mbyte pygua py oike ta jave.

<sup>22</sup> Nomendai 'rã guive imeve'ŷ va'e re, neĩ opoi pyre re. Ha'e rami 'rãgue py gua'yxyrã ogueraa 'rã Israel regua kunhatai'i, e'ŷ vy sacerdote ra'yxykue'i.

<sup>23</sup> Ha'e kuery ombo'e 'rã xevygua kuery mba'emo iky'a e'ŷ va'erã omboaxa pyre ha'e omboaxa pyre'ŷ reve joo rami e'ŷa oikuaa aguã rami, ha'eve va'e ha'eve'ŷ va'e guive.

<sup>24</sup> Ha'e gui jojoko-jokoa ramo ha'e kuery oikuaa potaa rupi 'rã ikuai. Xeguigua teko porã rupi anho 'rã oikuaa pota. Ha'e gui ngaru oiko nhavõ py ojapo uka 'rã xeguigua lei ha'e

xeayvu aeja va'ekue. Ojapo 'rã guive xevyguá sábado ára iky'a e'ý va'ea oikuaa pavẽ aguã rami.

<sup>25</sup> Nonhembojai 'rã omanogue re onhemongy'a e'ý aguã. Nguu e'ý vy oxy ae, gua'y, guajy, guyvy, gueindy imeve'ý va'e ae rã tema ha'eve onhemongy'a aguã.

<sup>26</sup> Ha'e gui ojeky'a'opa ma rire sete ára peve ranhe 'rã oarõ.

<sup>27</sup> Ha'e gui mae ma toike ju henda iky'a e'ý va'e py ombo'eapo aguã, opy ja'o mbyte pygua py ae. Ha'e rami vy ome'ë 'rã jejavya regua — he'i SENHOR Nhanderuete.

### *Ha'e va'e yvy omboja'oa aguã re ijayvuague*

<sup>28</sup> — Sacerdote kuery pe ma oĩ ae 'rã imba'erã, mba'eta xee ae aiko ha'e kuery mba'e. Ha'e nunga rupi ha'e kuery pe napeme'ëi 'rã ijyvyrã Israel yvy re. Xee ae aiko ha'e kuery pegua.

<sup>29</sup> Ha'e kuery ho'u 'rã mba'emo aju guigua ome'ë mbyre gui, jejavya regua ha'e mba'emo rekovia regua guive. Israel kuery iky'a e'ý va'erã omboaxa va'ekue ma ha'e kuery mba'e meme 'rã.

<sup>30</sup> Ha'e rami vy sacerdote kuery mba'erã opyta 'rã mba'emo aju jypyguá ha'e mba'emo ome'ë mbyre gui iporãgueve ha'e javi. Sacerdote kuery pe peme'ë avi 'rã jypyguá trigó guigua, penderopy oï aguã penemoingo porãarã.

<sup>31</sup> Ha'e rã mymba omano rive va'ekue ma sacerdote kuery ndo'ui 'rã, neï guyra e'ý vy mymba omondoropa va'ekue guive.

## 45

<sup>1</sup> — Ha'e gui yvy ma xortea rami 'rã pemboja'o peteñ-teñ mba'erã peikuua aguã. Ha'e jave py ma SENHOR pe ranhe pemboaxa 'rã peteñ henda iky'a e'ý va'erã. Ha'e va'e puku-a ma doze quilômetros raxa'i 'rã, ha'e rã ipya ma dez 'rã. Ha'e javi rupi oï 'rã iky'a e'ý va'e.

<sup>2</sup> Ha'e rã oo iky'a e'ý va'e ma ipuku-a ha'e ipya joo rami, duzentos e cinqüenta metros meme. Ijyvýry rupi oï 'rã yvy vinte e cinco metros ipya va'e.

<sup>3</sup> Ha'e va'e yvy iky'a e'ý va'e puku-a ma doze quilômetros raxa'i 'rã, ha'e rã ipya ma cinco 'rã. Ha'e py ae 'rã oï oo iky'a e'ý va'e. Ha'e va'e henda ma iky'a e'ý ete va'e.

<sup>4</sup> Ha'e gui yvy iky'a e'ý va'e ma sacerdote kuery rekoarã itui, mba'eta oo iky'a e'ý va'e re opena va'e, ha'e SENHOR re onhemboja 'rã ombo'eapo aguã. Ha'e va'e henda ma ha'e kuery pe peme'ë 'rã hoo ikuai aguã, oo iky'a e'ý va'e oï aguã guive.

<sup>5</sup> Ha'e rã levita kuery oo re opena va'e pe ma peme'ë avi 'rã yvy doze quilômetros raxa'i ipuku-a, ha'e cinco ipya va'e, ha'e kuery rekoarã vinte ikuai aguã.

<sup>6</sup> Ha'e rã tetã yvýry rupi guarã ma peme'ë 'rã yvy dois quilômetros raxa'i ipya, ha'e gui doze quilômetros raxa'i ipuku-a va'e. Ha'e rã tetã ma yvy iky'a e'ý va'e rexei'i 'rã oï, Israel regua ha'e javi ikuai aguã.

<sup>7</sup> Ha'e rã huvinxave yvyrã ma yvy iky'a e'ý va'e ha'e tetã yvýry rupigua jovaive re, kuaray oikea katy ha'e oua katy. Ipuku-a ma peteñ regua yvy oï va'e reve joo rami 'rã, kuaray oikea katy guive oua katy peve.

<sup>8</sup> Ha'e va'e yvy ma huvinxave mba'e 'rã itui Israel yvy re. Ha'e gui xevyguá yvatekueve ma nombojexavaivei 'rã xevyguá kuery. Ha'e rami 'rãgue py omboja'opa 'rã Israel kuery yvyrã, peteñ-teñ regua ikuia rami vy.

### *Yvatekueve ikuai va'e pe ijayvuague*

<sup>9</sup> Po rami SENHOR Nhanderuete ijayvu:

— Peñ Israel kuery yvatekueve, ha'eve ma pejoguereko axy. Pejepe'a pejogukaa ha'e penhombojexavaia gui, ha'e vy pejapo ha'evea ramigua ha'e teko porã. Pekoreve eme ma xevyguá kuery — he'i SENHOR Nhanderuete.

<sup>10</sup> — Ha'evea rami anho ke pepeja mba'emo, ajaka ha'e hy'akua ha'evea'i rami meme 'rã guive peiporu.

<sup>11</sup> Ha'e gui ajaka renyẽ ma oja guaxu reve joo rami 'rã. Ha'e rã peteĩ ômer ma dez oja guaxu renyẽ, ha'e dez ajaka renyẽ 'rã oĩ. Ômer py ae 'rã mba'emo pe'aã kuaa.

<sup>12</sup> Ha'e gui peteĩ hatã'i va'e ma doze gramas 'rã ipoyi. Ha'e rã peteĩ hatã'i va'e ovareve va'e ma sessenta hatã'i va'e mboae rami 'rã ipoyia.

<sup>13</sup> — Po rami 'rã ma peru peme'ẽ va'erã: trigo ma dez oja guaxu nhavõ gui mboapy litros 'rã peru, cevada ma ha'e rami ae avi mboapy litros 'rã peru.

<sup>14</sup> Ha'e gui azeite ma mba'emo pirekue renyẽ nhavõ gui mokoõ litros 'rã peru, mba'eta mba'emo pirekue ma peteĩ ômer rami avi 'rã dez oja guaxu renyẽ va'e.

<sup>15</sup> Ha'e gui vexa'i kuery ma peteĩ-teĩ kora duzentos ikuaiia nhavõ gui peteĩ peipe'a 'rã Israel re nhuündy porävea rupi pemongaru va'ekue anho. Ha'e nunga ha'e javi peme'ẽ 'rã mba'emo aju guigua, oapy reveguia, e'ý vy Nhanderuete reve peteĩ rami ju pendekuaia reguarã. Ha'e rami vy 'rã pejao'i uka heta va'e kuery ojeavyague — he'i SENHOR Nhanderuete.

<sup>16</sup> — Pendeyvy re ikuai va'e ha'e javive 'rã ome'ẽ mba'emo Israel pygua huvixave pe.

<sup>17</sup> Ha'e rã huvixave ma ogueru 'rã mba'emo oapy reve ome'ẽ mbyrã, mba'emo aju guigua ha'e mba'emo rykue, jaxy pyaua ára py ngaru pygurarã, sábado ára nhavõ, ha'e ngaru Israel kuery peguarã oa'angapy oiko nhavõ. Ogueru avi 'rã jejavya regua, mba'emo aju guigua, mba'emo oapy reveguia mymba ha'e Nhanderuete reve peteĩ rami ju pendekuaia reguarã, Israel kuery ojeavyague ojao'i uka aguã.

### *Ára pyau py mba'emo ome'ẽa aguã re ijayvuague*

<sup>18</sup> Po rami SENHOR Nhanderuete ijayvu:

— Jypygua jaxya ha'e jypy'i araa py ma Peru 'rã peteĩ vaka ra'y ivaikue rei e'ý va'e, ha'e va'e py oo iky'a e'ý va'e peiky'a'o aguã.

<sup>19</sup> Huguykue ma sacerdote ogueru vy templo rokẽ yta ikuai va'e rupi 'rã omoõ, ha'e gui altar irundy henda py ijapy ikuai va'e py, ha'e opy ja'o mbyte pygua rokẽ yta rupi guive.

<sup>20</sup> Ha'ekue rami ju 'rã pejapo sete araa py. Potae vy e'ý, peikuaa vy e'ý pejejavyague re 'rã pejapo. Ha'e rami py 'rã peiky'a'o templo.

### *Páscoa ára pygurarã re ijayvuague*

<sup>21</sup> — Ha'e gui jypygua jaxya ha'e catorze araa py ma pejapo 'rã ngaru Páscoa. Sete ára re 'rã pejapo. Mbojape imbovua reveguia e'ý 'rã pe'u.

<sup>22</sup> Ha'e va'e árave ma huvixave ogueru 'rã peteĩ vaka ra'y ha'e ae ojeavyague reguarã, vyv re ikuai va'e ha'e javi pe guive.

<sup>23</sup> Ha'e gui sete ára re ngaru oikoa ja ma ogueru 'rã SENHOR pe oapy reve ome'ẽ mbyrã, sete vaka ra'y ha'e sete vexa'i ra'y ivaikue rei e'ý va'e, sete ára pygurarã. Ha'e gui ko'ẽ nhavõ ome'ẽ 'rã peteĩ kavara jejavya re.

<sup>24</sup> Ogureko katu avi 'rã mba'emo aju guigua ome'ẽ mbyrã. Vaka ra'y nhavõ reve guarã ogueru 'rã peteĩ ajaka, vexa'i nhavõ guive, ha'e gui peteĩ galão azeite ju ajaka mba'emo aju oĩ nhavõ.

<sup>25</sup> Ha'e gui sete jaxya ha'e quinze araa guive ha'ekue rami ae tema 'rã ojapo sete ára re ngaru oikoa ja. Jejavya regua 'rã ome'ẽ ha'ekue rami ae, mba'emo oapy reveguia, mba'emo aju guigua ha'e azeite guive.

## 46

### *Sábado ára ha'e jaxy pyau nhavõ ngaru oiko jave pygurarã re ijayvuague*

<sup>1</sup> Po rami ijayvu SENHOR Nhanderuete:

— Opy ja'o mbyte pygua rokẽ kuaray ou katy oĩ va'e ma onhemboty tema 'rã pemba'eapoa ára mboapy meme va'e re. Sábado ára anho 'rã ojepe'a, ha'e gui jaxy pyau jave ngaru oikoa ára py guive.

<sup>2</sup> Ha'e gui huvixave ma oka katy gui oike 'rā okē regua oguy puku rupi. Okē yvýry opyta 'rā ho'amy. Ha'e ramia ja sacerdote kuery ma mba'emo oguerekō katu 'rā oapy reve ome'ẽ va'erā huvixave ogueru va'ekue, Nhanderuete reve peteī rami ikuiaia regua guive. Ha'e ramo huvixave ombojerovia 'rā okē py hi'aĩ reve, ha'e gui oẽ ju 'rā. Ka'aru e'ŷa ja okē nombotyai 'rā.

<sup>3</sup> Ha'e va'e okē rexei ae avi yvy re ikuai va'e kuery ombojerovia 'rā okuapy SENHOR renonde, sábado ha'e jaxy pyau ngaru oikoa ára py guive.

<sup>4</sup> Sábado ára ma huvixave oapy reve ome'ẽ 'rā SENHOR pe mboapy meme vexa'i ra'y ha'e peteī vexa'i ava ivaikue rei e'ŷ va'e meme.

<sup>5</sup> Mba'emo aju guigua ma vexa'i ava ome'ẽ nhavõ ome'ẽ avi 'rā peteī ajaka. Ha'e rā vexa'i ra'y ikuai va'e reve guarã ma ome'ẽxe'a'i py 'rā ome'ẽ. Ha'e gui mba'emo aju peteī ajaka ome'ẽ nhavõ ome'ẽ avi 'rā mboapy litros azeite.

<sup>6</sup> Ha'e rā jaxy pyau jave ngaru oikoa ára py ma peteī vaka ra'y 'rā ome'ẽ mboapy meme vexa'i ra'y ha'e peteī vexa'i ava reve, ivaikue rei e'ŷ va'e meme.

<sup>7</sup> Vaka ra'y ha'e vexa'i ava ome'ẽ nhavõ ogueru avi 'rā peteī ajaka mba'emo aju guigua. Ha'e rā vexa'i ra'y ikuai va'e reve guarã ma ome'ẽxe'a'i py 'rā ome'ẽ. Ha'e gui mba'emo aju peteī ajaka ome'ẽ nhavõ ome'ẽ avi 'rā mboapy litros azeite.

<sup>8</sup> Ha'e gui huvixave ma okē regua oguy puku rupi 'rā oike, ha'e gui ha'ekue rupi ae ju 'rā oẽ.

### *Mba'emo ome'ẽmbi re ijayvuague*

<sup>9</sup> — Ngaru oikoa py MA yvy re ikuai va'e ou 'rā okuapy SENHOR renonde omboete aguã. Ha'e kuery va'e regua kuaray ijapu'a'ia katy okē oĩ va'e rupi oike va'ekue ma kuaray puku-a katy ju 'rā oẽ, ha'e rā kuaray puku-a katy gui oike va'ekue ma kuaray ijapu'a'ia katy 'rā oẽ jogueravy. Okē oikeague rupi e'ŷ ju 'rā oẽ, hovai re 'rā oẽ.

<sup>10</sup> Ha'e kuery oike joguerovy jave huvixave voi oike 'rā ha'e kuery mbyte rupi. Ha'e gui ma ha'e kuery oẽ jogueravy jave ma ha'e voi oẽ ju 'rā ový.

<sup>11</sup> Nhemboaty iky'a e'ŷ va'e ha'e ngaru oiko va'e py ma vaka ra'y ha'e vexa'i ava ome'ẽ nhavõ mba'emo aju guigua peteī ajaka ome'ẽa avi 'rā. Ha'e rā vexa'i ra'y ikuai va'e reve guarã ma ome'ẽxe'a'i py 'rā ome'ẽ. Ha'e gui mba'emo aju peteī ajaka ome'ẽ nhavõ ome'ẽ avi 'rā mboapy litros azeite.

<sup>12</sup> Xapy'a rei huvixave ome'ẽxe'a'i py 'rā SENHOR pe ogueru mba'emo oapy reve, e'ŷ vy hexeve peteī rami ikuiaia reguarã. Ha'e ramo ixupe oipe'aa 'rā okē kuaray oua katy oĩ va'e, mba'emo oapy reve ome'ẽ aguã, hexeve peteī rami ikuiaia regua guive, sábado ára py ojapoaty rami ae. Ha'e gui oẽ ma ramo okē ombotyai ju 'rā.

<sup>13</sup> — Ko'ẽ nhavõ SENHOR pe peme'ẽ 'rā peteī vexa'i ra'y peteī ma'etŷ va'e ivaikue rei e'ŷ va'e peapy reve. Ko'ẽ nhavõ tema 'rā peme'ẽ.

<sup>14</sup> Ha'e va'e reve guarã ma ko'ẽ nhavõ perekō katu avi 'rā mba'emo aju guigua SENHOR pe peme'ẽ va'erā. Mboapy litros 'rā perekō katu, azeite peteī litro raxa'i reve, trigo reve omoapomoa aguã. Ha'e va'e ayvu ma ko'ẽ nhavõ 'rā pejapo raka'e rā peve guarã.

<sup>15</sup> Ha'e rami ae ko'ẽ nhavõ jepi 'rā perekō katu vexa'i ra'y, mba'emo aju guigua ha'e azeite, oapy reve ome'ẽ mbyrã.

<sup>16</sup> Po rami ijayvu SENHOR Nhanderuete:

— Amongue py huvixave peteī yvy oguerekō va'e ome'ẽ 'rā gua'y kuery pe. Ha'e ramo ta'y kuery mba'e ae 'rā opyta, raka'e rā peve guarã.

<sup>17</sup> Ha'e rā guembiguai kuery pe ri yvy ome'ẽ ramo imba'e opyta 'rā ma'etŷ jubileu 'epy va'e oiko peve'i. Ha'e ramo huvixave pe ae ju 'rā opyta, mba'eta ta'y kuery mba'erā ae.

<sup>18</sup> Huvixave ma neĩ ruxã'i ma voi ndogueraai 'rā guembiguai kuery pegua oĩ va'e, ndoipe'ai 'rā guive ijyvy gui. Oyvy gui ae 'rā ome'ẽ gua'y kuery pe, xevygua kuery peteī-teī ijyvy gui ndoipe'aai aguã — he'i.

<sup>19</sup> Ha'e va'e rire ava xereraa va'e ma oikeaty yke katy okẽ oĩ va'e rupi ju xereraa. Kuaray ijapu'a'ia katy xereraa sacerdote kuery pegua opy ja'o'i iky'a e'ŷ va'e py. Ha'e vy ijapy kuaray oikea katy oĩ va'e re oexa uka peteĩ henda.

<sup>20</sup> Ha'e vy aipoe'i xevy:

— Kova'e henda py ma sacerdote kuery ombojy 'rã mba'emo omboekovia aguã regua ome'ẽ mbyre, jejavya regua ha'e mba'emo aju guigua guive, oka katy amboae henda py heta va'e kuery ikuaria py ogueraa e'ŷ aguã, heta va'e kuery iky'a e'ŷ va'e rami rive opyta e'ŷ aguã — he'i.

<sup>21</sup> Ha'e gui ma oka katy oguy oĩ va'e py ju xereraa, irundy henda py oguy apy ikuai va'e rupi. Ha'e gui ijapy oĩ va'e py oguy mboae aexa avi.

<sup>22</sup> Mba'eta oguy apy ikuai va'e re oguy kyrĩve'i va'e ju oĩ, vinte metros ipuku-a ha'e quinze ipya va'e. Ha'e va'e oguy irundyve va'e ma joo rami ae tuvixa.

<sup>23</sup> Ha'e gui oguy ikuai va'e nhavõ rupi oĩ ikora, irundyve rupi. Kora yvy'iry ha'e javi rupi ikuai tata rupa.

<sup>24</sup> Ha'e ramo xevy pe aipoe'i:

— Koropi ma templo re opena va'e kuery ombojy 'rã heta va'e kuery mba'emo ome'ẽ va'ekue.

## 47

### *Yy mba'emo ky'a'oarã oxyry va'e re ijayvuague*

<sup>1</sup> Ha'e va'e rire ma teĩgue ju xereraa templo rokẽ py. Ha'e py aexa templo rokẽ guy rupi yy oẽ oiny rã. Kuaray oua katy oxyry. Mba'eta templo ma kuaray oua katy ae ojepe'a oiny. Ha'e gui yy ma iguy oiporu kuaa regua gui oẽ ouvy, altar regua kuaray puku-a katy gui.\*

<sup>2</sup> Ha'e gui kuaray ijapu'a'ia katy okẽ ojepe'a va'e py ju xereraa, ha'e vy oka katy xererojere heravy, kuaray oua katy okẽ oĩ va'e peve. Aexa rã yy oxyry oiny oiporu kuaa regua rupi.

<sup>3</sup> Ha'e gui ava va'e ma kuaray oua katy ju oẽ ovy, opo py ixã mba'emo a'ãarã oguerek reve. Ha'e vy quinhentos metros oa'ãa py xemboaxa yy rupi. Ha'e rã yy ovaẽ ouvy xepy nhu'ã peve.

<sup>4</sup> Ha'e vy quinhentos metros ju oa'ãea py ma teĩgue ju xemboaxa yy rupi. Ha'e ramo xerenapy'ã peve yy ovaẽ. Ha'e gui quinhentos metros ju oa'ãa py ma yy rupi xemboaxa rã xeku'a peve ovaẽ.

<sup>5</sup> Ha'e gui quinhentos metros ju oa'ãa py ma yakã ete ma oxyry, aaxa aguã nda'evei va'e, mba'eta yakã ma typy raxa ja'yta reve jaaxa aguã ha'eve va'e, avave rei oaxaa va'erã nunga e'ŷ.

<sup>6</sup> Ha'e gui aipoe'i xevy:

— Ava ra'y, rexa pa ha'e nunga? — he'i vyve yakã rembe peve ju xereraa.

<sup>7</sup> Ha'e py avaẽ ju ma vy yakã rembe rupi heta aexa yvyra, jovaive rupi ikuai va'e.

<sup>8</sup> Ha'e vy aipoe'i xevy:

— Kova'e yy ma kuaray oua katy oẽ vy oxyry 'rã ovy yvy joja reia rupi, ha'e gui Ye'ẽ Manoa 'epy va'e py 'rã ovaẽ. Ha'e ramo yy ha'e py voi iporã rei ju 'rã.

<sup>9</sup> Kova'e yakã oxyry oinya rupi rei ma temimoingo kuery omyĩ va'e heta ete ikuai, pira voi. Mamo rã rei yy ovaẽa py ma ye'ẽ rupi teĩ yy porã ete 'rã opyta. Yakã oaxaa rupi ma opa marãgua ikuai.

<sup>10</sup> Hembe rupi ma pira mbo'aa kuery ikuai. En-Gedi guive En-Eglaim peve oĩ 'rã pira mbo'aa omomboa aguã. Pira peteĩ-teĩ regua ikuai va'e ma ye'ẽ tuvixa va'e py rami heta ete.

<sup>11</sup> Ha'e rã yapo jaxuru reia rupi ma yy na'iporãi 'rã, jukyrã rive opyta.

\* **47:1** Apocalipse 22.1-2

**12** Yakā rembe jovaive rupi ma yvyra ikuai. Opa marāgua hi'a va'e ikuai, ja'u va'erā meme. Hogue na'ixorī 'rā, ndai'a e'ŷi 'rā guive. Jaxy nhavō 'rā hi'a, oo iky'a e'ŷ va'e gui yy oẽ rire. Hi'a ma ja'u va'erā, ha'e rā hogue ma moã meme.

### *Israel yvy apy re ijayvuague*

**13** Ha'e gui po rami SENHOR Nhanderuete ijayvu:

— Po rami 'rā yvy pemboja'o Israel kuery regua doze ikuai va'e peguarā. José kuery ma mokoĩ henda py 'rā ojopy.\*

**14** Peteĩ-teĩ regua pe pemboja'o 'rā joo rami guarā. Mba'eta xepo aupi reve aura ae ma karamboae peneramoĩ kuery pe ame'ẽ aguā. Ha'e rami rire pendevy pe ju kova'e yvy ome'ẽa 'rā.

**15** — Po rami 'rā oĩ pendeyvy apy. Kuaray ijapu'a'ia katy rupi oo 'rā yakā guaxu guive Hetlom tetā via rupi Zedade py nhavāea peve.

**16** Ha'e gui ma Hamate rupi, Berota, Sibraim tetā (ha'e va'e ma Damasco ha'e Hamate mbyte oĩ va'e), Hazer-Haticom tetā Haurā yvy apy katy'i oĩ va'e rupi voi oo.

**17** Ha'e rami py ye'ẽ guive Hazar-Enom peve 'rā oo, Damasco tetā katy'i peve. Ha'e gui kuaray ijapu'a'ia katyve opyta 'rā Hamate yvy. Ha'e rami 'rā opyta yvy apy kuaray ijapu'a'ia katy rupi oo va'e.

**18** Ha'e gui kuaray oua katy rupi ma Haurā ha'e Damasco guive oo 'rā Gileade ha'e Israel yvy mbyte rupi, Jordão yakā rupi ae. Ha'e gui kuaray ijapu'a'ia katy oĩ va'e guive ye'ẽ kuaray oua katyguia peve 'rā pea'ā.

**19** Kuaray puku-a katy rupi ma Tamar guive 'rā oo Meribá-Cades regua yy peve, ha'e yakā Egito katy'i oĩ va'e guive ye'ẽ tuvixa va'e peve. Ha'e rami 'rā yvy apy kuaray puku-a katyguia oĩ.

**20** Ha'e rā yvy apy kuaray oikea katyguia ma ye'ẽ tuvixa va'e guive Hamate tetā py nhavāea peve. Ha'e rami 'rā kuaray oikea katyguia oĩ.

**21** — Ha'e rami py pemboja'opa 'rā yvy peẽ kuery peguarā, Israel regua ikuai va'e peteĩ-teĩ pe.

**22** Xortea pexaa rupi 'rā peme'ẽ peẽ kuery pe ae ha'e amboae regua penembyte ikuai va'e ta'y va'e kuery pe. Pendevy rā ha'e kuery Israel kuery mbyte ikuai 'rā ha'e pygua ae rami avi. Peẽ kuery reve avi ojopy 'rā oyvyrā Israel regua ikuai va'e mbyte rupi.

**23** Amboae regua kuery mamo rā ikuaria py ae 'rā peme'ẽ ijyvyrā — he'i SENHOR Nhanderuete.

## 48

### *Sete regua ha'e sacerdote kuery yvyrā re ijayvuague*

**1** — Po rami ma Israel regua rery oĩ. Dã regua yvy apy ma kuaray ijapu'a'ia katy guive oo 'rā Hetlom rupi Hamate yvy re nhavaẽa ha'e Hazar-Enom peve, ha'e gui Damasco yvy apy kuaray ijapu'a'ia katyguia rupi Hamate peve, kuaray oua katy guive oikea katy peve.

**2** Ha'e gui Dã yvy re ma Aser yvy ju 'rā oje'a, kuaray oua katy guive oikea katy peve.

**3** Ha'e gui Aser yvy re ma Naftali yvy ju 'rā oje'a, kuaray oua katy guive oikea katy peve.

**4** Ha'e gui Naftali yvy re ma Manassés yvy ju 'rā oje'a, kuaray oua katy guive oikea katy peve.

**5** Ha'e gui Manassés yvy re ma Efraim yvy ju 'rā oje'a, kuaray oua katy guive oikea katy peve.

**6** Ha'e gui Efraim yvy re ma Rúben yvy ju 'rā oje'a, kuaray oua katy guive oikea katy peve.

**7** Ha'e gui Rúben yvy re ma Judá yvy ju 'rā oje'a, kuaray oua katy guive oikea katy peve.

\* **47:13** José ma mokoĩ ta'y raka'e, Efraim ha'e Manassés, ha'e José pe ome'ẽa ta'y jypyguia pegua (1 Crônicas 5.1). Ha'e nunga rupi guyvy kuery gui ojopyve, mokoĩ henda py.

**8** Ha'e gui Judá yvy re ma oje'a 'rã yvy iky'a e'ŷ va'e pemboja'o va'erã, kuaray oua katy guive oikea katy peve. Israel regua yvy rami avi 'rã doze quilômetros raxa'i ipya ha'e ipuku-a, kuaray oua katy guive oikea katy peve. Mbyte py oĩ 'rã oo iky'a e'ŷ va'e.

**9** SENHOR peguarã yvy pemboja'o va'erã puku-a ma doze quilômetros raxa'i, ha'e rã ipya ma cinco.

**10** Ha'e va'e yvy sacerdote kuery pegua iky'a e'ŷ va'e puku-a ma doze quilômetros raxa'i 'rã kuaray ijapu'a'ia ha'e ipuku-a katy rupi, ha'e rã ipya ma cinco quilômetros 'rã kuaray oikea ha'e oua katy rupi. Mbyte py oĩ 'rã SENHOR pegua oo iky'a e'ŷ va'e.

**11** Ha'e va'e yvy optya 'rã Zadoque ramymino kuery sacerdote-rã oiky'a'o pyre peguarã, mba'eta ha'e kuery ma ojapo 'rã va'ekue ojapo ete raka'e, Israel kuery mboae opa marã rei ikuai teĩ, levita kuery eteve voi.

**12** Ha'e va'e yvy ma yvy iky'a e'ŷ va'e mbyte py oĩ 'rã iky'a e'ŷ ete va'e, ha'e oje'a 'rã levita kuery yvy re.

### *Levita kuery yvyrã re ijayvuague*

**13** — Ha'e gui levita kuery yvy ma sacerdote kuery yvy re oje'a 'rã. Ipuku-a ma doze quilômetros raxa'i, ha'e rã ipya ma cinco. Ha'e rami 'rãe ipuku-a ha'e ipya.

**14** — Ha'e kuery ma neĩ peteĩ henda py novendei 'rã, nomboekoviai, neĩ yvy porãa nomboaxai 'rã amboae kuery peguarã, SENHOR pe iky'a e'ŷ va'e ramo.

### *Tetã oĩ aguã re ijayvuague*

**15** — Ha'e gui yvy rembyrekue dois quilômetros raxa'i ipya ha'e doze raxa'i ipuku-a va'e ma optya 'rã tetã pygua kuery ikuai aguã, tetã yvýry rupi guarã. Ha'e rã tetã ma mbyte py 'rã optya.

**16** Po rami 'rã tuvixaa oĩ: dois quilômetros raxa'i 'rã oo kuaray ijapu'a'ia katy, ipuku-a katy, oua katy ha'e oikea katy.

**17** Ha'e rã tetã yvýry rupigua ma cento e vinte cinco metros 'rã oo kuaray ijapu'a'ia katy, ipuku-a katy, oua katy ha'e oikea katy.

**18** Ha'e gui yvy iky'a e'ŷ va'e re oje'a va'e rembyrekue ma cinco quilômetros peve 'rã oo kuaray oua katy ha'e oikea katy, yvy iky'a e'ŷ va'e apy peve. Ha'e va'e rupi mba'emo aju oiko va'e optya 'rã tetã py ombo'eapo va'e kuery peguarã.

**19** Tetã py ombo'eapo va'e kuery ae 'rã oma'etý okuapy ha'e py, Israel kuery ha'e javi regua.

**20** Ha'e va'e yvy ma doze quilômetros raxa'i jova-jovaive re, yvy iky'a e'ŷ va'e ha'e tetã yvýry rupigua reve.

### *Huvixave yvy re ijayvuague*

**21** — Yvy iky'a e'ŷ va'e ha'e tetã yvýry rupigua rembyrekue ma huvixave pe 'rã optya. Huvixave pegua ma yvy iky'a e'ŷ va'e doze quilômetros raxa'i ipya va'e regua kuaray oua katy ha'e oikea katy oo, Israel regua kuery yvy ooa rami avi. Ha'e va'e mbyte py 'rã oĩ yvy iky'a e'ŷ va'e ha'e henda iky'a e'ŷ va'e templo regua.

**22** Ha'e rami vy Judá ha'e Benjamim regua yvy mbyte oĩ va'e ma huvixave peguarã 'rã optya, mbyte py levita kuery pegua ha'e tetã oĩ va'e reve'ŷ vy.

### *Peteĩ nhiruĩ regua kuery pegua yvy re ju ijayvuague*

**23** — Ha'e gui Israel regua kuery mboae pegua yvy ju peikuaa aguã, Benjamim kuery yvy ma kuaray oua katy guive oikea katy peve 'rã oo.

**24** Ha'e gui Benjamim yvy re ma Simeão yvy ju 'rã oje'a, kuaray oua katy guive oikea katy peve.

**25** Ha'e gui Simeão yvy re ma Issacar yvy ju 'rã oje'a, kuaray oua katy guive oikea katy peve.

**26** Ha'e gui Issacar yvy re ma Zebulom yvy ju 'rã oje'a, kuaray oua katy guive oikea katy peve.

<sup>27</sup> Ha'e gui Zebulom yvy re ma Gade yvy ju 'rã oje'a, kuaray oua katy guive oikea katy peve.

<sup>28</sup> Ha'e vy Gade yvy apy ma kuaray puku-a katy rupi oo 'rã Tamar guive Meribá-Cades regua yy ituia peve, ha'e Egito katy'i yakã oĩ va'e pukukue rupi ye'ẽ tuvixave va'e peve ju.

<sup>29</sup> Ha'e rami ae 'rã itui yvy xortea pexaa rupi Israel regua kuery pe pemboja'o va'erã, peteĩ-teĩ regua ikuiaia rami vy – he'i SENHOR Nhanderuete.

*Tetã kora rokẽ re ijayvuague*

<sup>30</sup> — Ha'e gui tetã kora rokẽ ma po rami 'rã opyta: Kuaray ijapu'a'ia katyguia dois quilômetros raxa'i oo va'e re ma

<sup>31</sup> mboapy okẽ 'rã ikuai: Rúben rokẽ, Judá ha'e Levi rokẽ, mba'eta tetã rokẽ ikuai va'e ma Israel kuery rery rupi 'rã omboerya.

<sup>32</sup> Ha'e gui kuaray oua katyguia dois quilômetros raxa'i oo va'e re ma mboapy okẽ ju 'rã ikuai, José, Benjamim ha'e Dã rokẽ.

<sup>33</sup> Kuaray puku-a katyguia dois quilômetros raxa'i oo va'e re ma mboapy okẽ ju 'rã ikuai, Simeão, Issacar ha'e Zebulom rokẽ.

<sup>34</sup> Ha'e gui kuaray oikea katyguia dois quilômetros raxa'i oo va'e re ma mboapy okẽ ju 'rã ikuai, Gade, Aser ha'e Naftali rokẽ.

<sup>35</sup> Tetã ojerea ha'e javi vy ma nove quilômetros. Ha'e va'e ára guive tetã omboerya 'rã “Ha'e py SENHOR oĩ” 'ea.\*

---

\* **48:35** Apocalipse 21.12-13

## Daniel ayvu oĩa

### Daniel ayvu oĩa

Daniel ma kunumi teri reve Babilônia katy escravo-rã heraa va'ekue, irũ kuery reve. Ixupe Nhanderuete oexa uka mba'emo, ome'ẽ avi oexa ra'u pyre omombe'u porãve aguã. Ha'e nunga rupi Babilônia pygua huvixa ogueru guembiguarã. Heko vai va'e kuery mbyte Daniel oirũ kuery reve ikuai tei Nhanderuete pe ikuiaia py oĩ atã okuapy. Ha'e ramo opo'akaa oexa uka vy ogueraa jepe tata ha'e guary kora gui voi (capítulos 3 ha'e 6).

Nhanderuete po'akaa re ae Daniel ijayvu. “Mba'eta ixuguigua hexa pyrã ha'e oexa uka va'e ma tuvixa ete. Nhomondyipaarã omoingo va'e py oexa uka imbaraetea. Ipo'akaa ma opa va'erã e'ŷ, openaa ma raka'e rã peve guarã” (4.3).

Petei ava ra'y rami ojekuaa va'e rekorã re avi ijayvu, Nhanderuete ombopo'aka aguã re: “Pyávy aexa va'e re ama'ẽ ajupy vy petei ju aexa arai reve yva gui ou ramo, ava ra'y rami ojekuaa va'e. Ha'e va'e ma Jypy guive guare oĩa py oo ramo omonhemboja. Ombopo'aka ha'e omboyvate ete huvixave oĩ aguã, ixupe hetia ikuai aguã, amboae regua kuery ha'e ayvu mboae py ijayvu va'e guive. Ipo'akaa ma opa va'erã e'ŷ, ndoaxai 'rãe, openaa nombovaipaa 'rã guive” (7.13-14). Novo Testamento py ma Jesus Cristo ha'e rami ae ijayvu ojee: “Xee ae ha'e. Ha'e gui pexa 'rã Ipo'akapa va'e oiporu kuaa regua re Ava ra'y ojeapo va'ekue oguapy ha'e yva gui ou ramo arai rupi”, he'i (Marcos 14.62).

#### *Daniel ha'e irũ kuery oeko a'ãa ague*

<sup>1</sup> Mboapy ma'etõ re ma Judá pygua huvixa Jeoaquim oĩ jave, Babilônia pygua huvixa Nabucodonosor ou Jerusalém tetã py. Ha'e vy ojokopa tetã.

<sup>2</sup> Ipo py SENHOR omboaxa Judá pygua huvixa Jeoaquim, Nhanderuete pegua opy mba'emo ryru ikuai va'ekue guive. Ha'e ramo Sinar yvy re mba'emo ryru ogueraapa nguuete pegua oo oĩ va'e pyguarã. Ha'e vy omoĩ porãmba nguuete pegua va'e py.

<sup>3</sup> Ha'e gui huvixa aipoe'i tembiguai kuery rerekao Aspenaz pe, ogueru avi aguã amongue Israel kuery regua, huvixa ra'y kuery, yvatekueve,

<sup>4</sup> kunumigue ivaikue reia peteí henda py ma voi oĩ e'ŷ va'e, hova porã rei va'e, 'arandua ha'e javi re ombo'e pyre, mba'emo ojapo kuaa va'e guive huvixave ro py ombo'eapo aguã, caldeu kuery reko ha'e ijayvu re ombo'e porãa ma ramo.\*

<sup>5</sup> Ha'e va'e kunumingue pe ma ko'ẽ nhavõ huvixave ome'ẽ uka 'rã tembi'u iporãve va'e anho, huvixave ho'u va'e regua ae. Ome'ẽ uka avi vinho ha'e oy'u va'e regua, mboapy ma'etõ re ha'e kuery ikuai aguã ha'e nunga re, ha'e va'e ára opaa py huvixave ro py ombo'eapo aguã.

<sup>6</sup> Ha'e kuery regua ma Daniel, Hananias, Misael ha'e Azarias, Judá regua meme ikuai.

<sup>7</sup> Ha'e kuery rery ma tembiguai kuery rerekao oguerova ju, po rami: Daniel ma Beltesazar, Hananias ma Sadraque, Misael ma Mesaque, ha'e rã Azarias ma Abede-Nego.†

---

\* <sup>1:4</sup> Caldeu kuery ma Babilônia pygua ae. Babilônia rery mboae ma Sinar (versículo 2). † <sup>1:7</sup> Nguete ramigua rery rupi omboery oayvu py ae, Israel kuery ayvu py Nhanderuete rery rupi 'rãgue py. Tery Daniel ma “Nhanderuete xerepya” 'ea rekoria omboery Beltesazar “Bel oeko repya” 'ea nguuete ramigua Bel rery rupi. Ha'e gui tery Hananias “SENHOR nhanemboaxy” 'ea rekoria omboery Sadraque “Aku rembiguai” 'ea nguuete ramigua Aku rery rupi. Ha'e gui tery Misael “Nhanderuete rami oiko va'e” 'ea rekoria omboery Mesaque “Aku rami oiko va'e” 'ea nguuete ramigua Aku rery rupi ae. Ha'e gui Azarias “SENHOR oipytyvõ va'e” 'ea rekoria ma omboery Abede-Nego “Nego pegua” 'ea nguuete ramigua Nego rery rupi.

<sup>8</sup> Ha'e rami teĩ Daniel opy'a re omoĩ onhemongy'a e'ŷ aguã huvixave ho'u va'e ha'e vinho oy'u va'e regua py. Ha'e vy tembiguai kuery rerekaoa pe ojerure onhemongy'a e'ŷ aguã.

<sup>9</sup> Ha'e ramo Nhanderuete ojapo tembiguai kuery rerekaoa Daniel ojou porã ha'e omboaxy aguã rami.

<sup>10</sup> Tembiguai kuery rerekaoa ombovai Daniel pe:

— Ha'e rami avi xee ma xeruvixa gui akyje, pe'u ha'e pey'u va'erã ome'ẽ uka rire. Mba'exa 'rã tu peẽ kuery pendejavegua kunumigue ikuai va'e gui penderova re penekangyve oexa aguã? Ha'e rami vy pendekáuxa huvixave ojaya 'rã xeakã — he'i.

<sup>11</sup> Oiko avi peteĩ ava Daniel, Hananias, Misael ha'e Azarias mongaruarã tembiguai kuery rerekaoa omoĩ va'ekue. Ha'e va'e pe ju Daniel ojerure vy aipoe'i:

<sup>12</sup> — Xee ajerure ndevy ore nerembiguai kuery orera'anga aguã dez ára peve, ha'e rami vy ro'u va'erã reme'ẽ aguã mba'emo rogue rive, ha'e yy roy'u aguã guive.

<sup>13</sup> Ha'e gui mae ma reikuaa pota 'rã orerova re, kunumigue huvixave tembi'u ho'u va'e regua ho'u va'e rova re guive. Ha'e gui rexaa kuaa rami 'rã orerereko nerembiguai kuery rami — he'i.

<sup>14</sup> Ha'e rami rã ojou porã vy dez ára re oa'anga.

<sup>15</sup> Dez ára opaa py ma ha'e va'e oexa rã ha'e kuery rova iporãve kunumigue huvixave rembi'u ho'u va'e kuery gui, imbaraetepave okuapy guive.

<sup>16</sup> Ha'e rami rã tembi'u mbojya ha'e kuery pe nome'ẽ evei tembi'u iporã rei va'e regua ho'u va'erã neĩ vinho oy'u va'erã va'ekue. Mba'emo rogue'i anho ome'ẽ ha'e kuery pe ho'u aguã.

<sup>17</sup> Ha'e va'e irundy kunumigue pe ma Nhanderuete ome'ẽ oiko kuaa aguã, mba'emo ojapo kuaa aguã guive guekorã ombopara pyre ha'e 'arandua ha'e javi py. Ha'e rã Daniel pe ma omo'aranduve, mba'emo oexa uka pyre ha'e oexa ra'u pyre oikuua aguã.

<sup>18</sup> Ha'e gui ma huvixave ogueru ruka aguã ára oa'angaague ovaẽ ma ramo tembiguai kuery rerekaoa oguerupa Nabucodonosor renonde.

<sup>19</sup> Ha'e kuery reve huvixave ijayvu vy oikuua pavẽ gui Daniel, Hananias, Misael ha'e Azarias hi'aranduve va'ea. Ha'e rami vy ha'e kuery ma huvixave ro py ikuai mba'emo ojapoa py.

<sup>20</sup> Mba'eta opa mba'e py ha'e kuery oikuua ha'e hi'arandu aguã re huvixave oporandu vy oikuua ha'e kuery dez-kue hi'aranduvea imba'ekuaa ha'e mba'emo oikuua va'e kuery openaa rupi ikuai va'e ha'e javi gui.

<sup>21</sup> Ha'e gui Daniel ma ha'e py ae oiko tema huvixave Ciro peteĩ ma'etŷ re ma oĩ peve.

## 2

### *Nabucodonosor oexa ra'uague mba'erã paa Daniel omombe'u porãveague*

<sup>1</sup> Huvixave Nabucodonosor mokoĩ ma'etŷ re ma oĩ py peteĩ mba'e oexa ra'u. Ha'e vy onhe'ẽ py onhemondyi rei vy ndoke kuaavei.

<sup>2</sup> Ha'e rami vy huvixave oenoĩ uka imba'ekuaa va'e kuery, hexa pyrã apoa, imba'evyky va'e ha'e caldeu kuery, huvixa oexa ra'u va'ekue omombe'u porãve aguã. Ha'e kuery oupa ma vy huvixave renonde ojexa uka okuapy.

<sup>3</sup> Huvixa aipoe'i ha'e kuery pe:

— Xee aexa ra'u kuri peteĩ. Xenhe'ẽ py nda'eveia aendu guive aikuaaxe vy teĩ.

<sup>4</sup> Ha'e ramo huvixa pe caldeu kuery aipoe'i okuapy aramaico ayvu py:

— Toikove huvixa raka'e rã peve! Emombe'u ke ha'vy rexaa ra'u va'ekue ore nerembiguai kuery pe. Ha'e ramo romombe'u porãve 'rã ndevy — he'i okuapy.

<sup>5</sup> Huvixa ombovai vy aipoe'i caldeu kuery pe:

— Peteĩ mba'e ma xee po rami aikuaa: Jypy xevy pemombe'u 'rã aexa ra'uague, ha'e gui mba'erã paa guive. Ha'e nunga napemombe'u porã ri ramo pendeayapaa 'rã, pendero voi ombovaipaa 'rã.

<sup>6</sup> Ha'e rã xapy'a rei aexa ra'u va'ekue ranhe pemombe'u porã, ha'e guive mba'erã paa guive pemombe'u ri ramo mba'emo porã ete ame'ẽ 'rã pãvy, romboete uka 'rã guive. Ha'e nunga rupi pemombe'u xevy aexa ra'u va'ekue, ha'e gui mba'erã paa guive — he'i.

<sup>7</sup> Ha'e gui mokoigaea ma ombovai vy

— Oreruvixave, ore nerembiguai kuery pe jypy remombe'u 'rãgue rexaxa ra'u va'ekue. Ha'e ramo ma romombe'u 'rã mba'erã paa — he'i okuapy.

<sup>8</sup> Ha'e gui ma huvixa ijayvu vy aipoe'i:

— Xee aikuaa pemboare rivea teĩ, mba'eta peikuua xeayvuague oiko ete 'rãa,

<sup>9</sup> po rami: Aexa ra'u va'ekue napemombe'ui ri ramo peteigueli pyve rombopagapa 'rã. Mba'eta apu rupi pejogueroayvu ra'e, xerenonde xembotavya rupi pendeayvu teĩ, pemboare xemboexaraixe vy. Nda'evei. Pemombe'u na aexa ra'u va'ekue. Ha'e ramo mae ma aikuaa 'rã mba'erã paa voi pemombe'u porã kuaa — he'i.

<sup>10</sup> Ha'e ramo huvixave renonde caldeu kuery ombovai vy aipoe'i:

— Ha'e rami avi oreruvixave, yvy re jipoi ndee remombe'u uka va'e omombe'u kuaa va'erã. Mba'eta huvixa yvatekueve ha'e ipo'akapave va'e teĩ ae ma, peteive ma voi pova'e ramigua nomombe'u ukaai 'rã guembiguai kuery imba'ekuaa va'e pe, hexa pyrã apoa, neĩ caldeu kuery pe guive.

<sup>11</sup> Oreruvixave, ndeayvua ma haxy vai ete va'e. Avave rei jipoi ndevy omombe'u kuaa va'erã, tuuete kuery e'ŷ vy. Ha'e rami avi ha'e va'e kuery ma nhande kuery reve ndoikoi — he'i okuapy.

<sup>12</sup> Ha'e rami rã huvixave ivai vy ipoxy vaipa. Ha'e vy oayvu omondouka imba'ekuaa va'e kuery Babilônia py ikuai va'e ha'e javi ojukapaa aguã.

<sup>13</sup> Ha'e ramo ijayvuague imba'ekuaa va'e kuery ojukapaa aguã regua oikuaa pavẽ ramo Daniel ha'e irã kuery voi oekaa avi ojuka aguã.

<sup>14</sup> Babilônia pygua imba'ekuaa va'e kuery jukapaarã oo va'e ma huvixave pegua xondaro ruvixa Arioque hery va'e. Ha'e va'e reve ma Daniel o'arandua ha'e oiko kuaa rupi jogueroayvu.

<sup>15</sup> Ha'e vy huvixave rembiguai Arioque pe Daniel aipoe'i:

— Mba'e re tu po rami ete huvixave ijayvu? — he'i. Ha'e ramo Arioque ombovai vy Daniel pe omombe'u mba'emo oiko va'ekue.

<sup>16</sup> Ha'e ramo huvixavea py Daniel oo vy ixupe ojerure oa'anga pukuve'i ju aguã re, huvixave pe omombe'u porã aguã oexa ra'u va'ekue mba'erã paa.

<sup>17</sup> Ha'e gui ma Daniel ngoo py oo vy oirã kuery Hananias, Misael ha'e Azarias pe ju omombe'u.

<sup>18</sup> Ha'e kuery reve Nhanderuete yva pygua pe ojerure okuapy, omboaxy vy oikuaa e'ŷ pyre oikuaa uka aguã re, Babilônia py imba'ekuaa va'e kuery ojukapaa py Daniel ha'e irã kuery ojukaa avi e'ŷ aguã.

<sup>19</sup> Ha'e ramo oikuaa e'ŷ pyre Daniel pe oikuaa uka pyávy mba'emo oexa ukaa py. Ha'e ramo Nhanderuete yva pygua re Daniel ima'endu'a porã.

<sup>20</sup> Ha'e vy aipoe'i:

— Tove Nhanderuete rery re ta'ima'endu'a porãa raka'e rã peve, mba'eta ixuguigua ae ou 'arandu ha'e po'akaa.

<sup>21</sup> Ha'e ae ma oguerova 'rã ára, hi'ára py porã mba'emo ojapoa aguã. Oipe'a 'rã huvixa kuery, ha'e gui amboae ju 'rã omoõ huvixarã. Omo'aranduve 'rã hi'arandu va'e, mba'eta oendu kuaa va'e pe oikuaa ukave 'rã mba'emo.

<sup>22</sup> Ha'e rami vy oikuaa uka 'rã ndoikuaai pyre ha'e onhomni mbyre voi. Ha'e ma pytãa py mba'emo oĩ va'e voi oikuaa va'e. Ha'e gui hendy va'e ma hexegua ae.

**23** Xeru kuery ruete, ndee ae roguerovy'a ha'e romboete, mba'eta xevy pe reme'ẽ xe'arandurã ha'e xembaraete aguã. Ange reikuaa uka kuri huvixave oexa ra'u va'ekue xee rojerureague – he'i.

**24** Ha'e gui ma Babilônia py imba'ekuaa va'e kuery jukapaarã omoĩ mbyre Arioque va'ea py ju Daniel oo. Ha'e py oike vy aipoe'i ixupe:

— Ejuka eme imba'ekuaa va'e kuery Babilônia pygua. Xereroike huvixave renonde, ha'e ramo huvixave pe xee amombe'u 'rã oexa ra'u va'ekue mba'erã paa – he'i.

**25** Ha'e rami rã Arioque ma huvixave renonde ogueroike pojava Daniel. Ha'e vy aipoe'i ixupe:

— Peteĩ ava ajou Judá gui escravo-rã jaru va'ekue regua. Ha'e va'e ma omombe'u 'rã rexâa ra'u va'ekue mba'erã paa – he'i.

**26** Ha'e ramo huvixave ombovai vy Daniel Beltessazar hery mboae va'e pe aipoe'i:

— Ndee pa remombe'u ta aexa ra'u va'ekue, ha'e gui mba'erã paa?

**27** Ha'e ramo huvixave renonde Daniel oĩa py ombovai:

— Xeruvixa, oikuua e'ỹ pyre remombe'u uka teĩ avave rei nomombe'u kuaai 'rã ndevy, imba'ekuaa va'e kuery, hexa pyrã apoa, neĩ imba'evyky va'e kuery voi.

**28** Ha'e rami teĩ peteĩ oiko Nhanderuete yva re. Ha'e va'e ae ma oikuua uka 'rã ndajaikuuaai va'e. Ha'e rami vy xeruvixa Nabucodonosor, ndevy pe oikuua uka opaa ára mba'emo oiko va'erã. Ha'e gui ma nderupa py reke rejupya py ndeke rupi rexâa ra'u va'ekue ma po rami:

**29** Xeruvixa, nderupa rupi ndetui reve repẽxa rejupya va'ekue raka'eve rã mba'emo oiko va'erã re. Ha'e ramo ndajaikuuaai va'e kuaa ukaa ae oikuua uka ndevy mba'emo oiko va'erã.

**30** Ha'e gui ma xevy pe ju oikuua uka, pavẽ hi'arandu va'e gui xe'aranduve ramo e'ỹ guive, ha'e rã ndee xeruvixa pe amombe'u aguã mba'erã paa, ndee reikuaa porãve aguã ndeke rupi repẽxa reiague.

**31** — Ha'e gui xeruvixa, ndee rexâa rã peteĩ ava ra'angaa tuvixa va'e ojekuaa. Ha'e va'e ma tuvixa ete, overaa nda'evei ete va'e opu'ã ho'amy nerendone, jaexa rã nhanemongyje rei va'e.

**32** Inhakã ma ouro guigua. Ipexo ha'e ijyva ma prata guigua. Hye ha'e hi'u rupi peve ma overa va'e guigua.

**33** Hetyma ma ferro guigua. Ha'e rã ipy ma ferro ha'e yapo guigua.

**34** Rema'ẽ rã peteĩ ita oi ouvy oĩague gui, avave rei omboia ramo e'ỹ. Ha'e va'e ma ipy ferro ha'e yapo guigua áry ho'a vy omongu'ipa.

**35** Ha'e rami vy ta'angaa ha'e javi iku'ipa vyvoi: ferro guigua, yapo, overa va'e, prata ha'e ouro guigua. Iku'ipa vy mba'emo pirekue aty ramigua rive ojeapo rã yvytu oguerovevepa heravy. Oĩague py ha'e nungakue jipovei. Ha'e rã ita ava ra'angaa omboavaipa va'ekue ma yvyty guaxu ojeapo vy yvy jave re omonye.

**36** — Ha'e ramigua rima rexâa ra'u va'ekue. Ha'e gui xeruvixa, mba'erã paa voi romombe'u avi 'rã ndevy.

**37** Xeruvixa, ndee ae ma huvixa ikuai va'e ruvixave rei. Ndevy pe Nhanderuete yva pygua ome'ẽ huvixa rei aguã. Ha'e rami vy nembopo'aka, nemombaraete ha'e nemboyvate.

**38** Ndepo py omboaxa guive avakue opa rupigua, mymba nhuñdy rupi ikuai va'e, ha'e guyra oveve va'e, ha'e kuery ha'e javi re ndepo'aka aguã. Ndee ae ma inhakã ouro guigua.

**39** Ha'e gui ndee ndereikovei ma ramo nderekovia amboae ju 'rã ipo'aka ndegui ipori-avue va'erã. Ha'e gui peteĩ ju 'rã opu'ã mboapya ipo'aka aguã. Ha'e va'e ma overa va'e guigua, yvy jave re ipo'aka avi va'erã.

**40** Ha'e va'e gui irundaya ipo'aka va'e ma ferro rami ete 'rā imbaraete, ferro nhomopēmbaa ha'e nhomboa'ypaa rami 'rā joguerek. Ferro opa mba'e omopēmbaa rami ha'e va'e voi nhomopēmba ha'e nhomboa'ypa 'rā.

**41** Ha'e rami avi ipy ha'e ipyxā rex a va'ekue ma amongue henda py yapo guigua, ha'e rā amboae henda py ma ferro guigua 'rā oī, mba'eta ha'e va'e openaa ma oja'o 'rā. Ha'e rami teī hexe oī 'rā ferro rami oī atā aguā, ferro ha'e yapo re irū va'e rexaague rami.

**42** Ipyxā ma ferro guigua ha'e yapo guigua reve ikuia rami avi ha'e va'e po'akaa voi amongue henda py imbaraete 'rā, ha'e rā amboae rupi ma ikangy 'rā.

**43** Ha'e gui ferro yapo re irū va'e rexaague rami ha'e va'e kuery voi amboae regua re omenda vy irūmba 'rā okuapy teī joe nonhembojai 'rā guive, ferro yapo re ndoje'aia rami.

**44** Ha'e gui ma ha'e va'e huvinave kuery oī jave Nhanderuete yva pygua peteī omoī 'rā ipo'akapa va'e omomba pyrā e'ŷ. Ha'e va'e po'akaa ma amboae regua pe ndoaxai 'rā. Ha'e rami 'rāgue py omboa'ypa ha'e ombovaipa 'rā amboae kuery po'akaa ha'e javi, ha'e vy ha'e ae oī 'rā raka'e rā peve.

**45** Ha'e rami vy yvyty gui ita omboia ramo e'ŷ oi ouvy va'e rexa va'ekue ma omboa'ypa 'rā: ferro guigua, overa va'e, yapo, prata ha'e ouro guigua ha'e javi. Ha'e rami xeruvixa, ndevy pe Nhanderuete yvate ete va'e oikuua uka ra'e raka'eve rā oiko va'erā. Pova'e ae rexa ra'u va'ekue, ha'e mba'erā paa voi ha'e rami ae, oguerovia pyrā meme – he'i.

**46** Ha'e gui ma huvinave Nabucodonosor guenapy'ā re oī Daniel renonde, ngova yvy re omovaē reve. Ha'e vy ijayvu tembi'u ha'e heakuā porā va'e ixupe oguerua aguā re.

**47** Huvinave aipoe'i Daniel pe:

— Anhetē ete peē kuery ruete ma tuuete ikuai va'e gui yvateve va'e, huvinave ikuai va'e ruvixa, oikuua e'ŷ pyre kuaa ukaa guive, mba'eta aikuua e'ŷ va'ekue reikuua uka xevy – he'i.

**48** Ha'e ramo huvinave omboyvate Daniel. Ha'e vy ixupe ome'ē reta iporā ete va'e, omoī guive Babilônia katy'i rupi ikuai va'e ha'e javi re opena aguā, Babilônia py imba'ekuaa va'e kuery ha'e javi ruvixarā guive omoī.

**49** Daniel ojerure rā huvinave irū kuery omoī avi Babilônia py mba'emo ikuai va'e re opena aguā: Sadraque, Mesaque ha'e Abede-Nego hery va'e. Ha'e rā Daniel ma huvinave ro py ae oiko.

### 3

#### *Daniel irū kuery tata gui oo jepeague*

**1** Huvinave Nabucodonosor ojapo uka peteī ta'angaa ouro guigua. Yvatea ma trinta metros, ha'e rā ipya ma mboapy metros. Ha'e va'e ma Dura nhuūndy py omopu'ā imo'amy, Babilônia katy'i.

**2** Ha'e gui huvinave Nabucodonosor omboaty ukapa huvinava kuery mboae, tetā ha'e estado re opena va'e, nhomboayvu va'ety, peráta re opena va'e, joe opena va'e, nhomongeta va'ety, ha'e openaa rupi guembiguai ikuai va'e ha'e javi, ha'e kuery ou vy huvinave Nabucodonosor ta'angaa omopu'ā uka va'ekue omboete ypy aguā.

**3** Ha'e ramo huvinava kuery ijatypa okuapy, tetā ha'e estado re opena va'e, nhomboayvu va'ety, peráta re opena va'e, joe opena va'e, nhomongeta va'ety, ha'e openaa rupi hembiguai ikuai va'e ha'e javi. Ha'e kuery ijatypa okuapy huvinave Nabucodonosor ta'angaa omopu'ā uka va'ekue omboete ypy aguā. Ha'e vy opu'āmba okuapy ta'angaa Nabucodonosor omopu'ā uka va'ekue renonde rupi.

**4** Ha'e gui ma huvinava ayvu mombe'ua ijayvu atā vy aipoe'i:

— Peē kuery pe ma po rami huvinava ojapo uka, heta va'e kuery, amboae yvy regua ha'e ayvu mboae py pendeayvu va'e ha'e javi pe:

<sup>5</sup> Mimby guaxu pendu vy, mimby, ixā reta va'e, mbaraka ixā irundy va'e, mbaraka, gaita ha'e opa marāgua mba'epu ombopua rā pendu vy ma pejero'apa 'rā pekuapy yvy re, ta'angaa ouro guigua huvixave Nabucodonosor omopu'ā uka va'ekue pemboete aguā.

<sup>6</sup> Ha'e rā peteī va'e rei xapy'a rei ndojero'ai ha'e nomboetei va'e ma ha'e ramove omomboa 'rā tata rupa haku ratāvea py – he'i.

<sup>7</sup> Ha'e rami rā ha'e kuery ha'e javi ma mimby guaxu, mimby, ixā reta va'e, mbaraka ixā irundy va'e, mbaraka, gaita ha'e opa marāgua mba'epu ombopua rā oendu vy ojero'apa okuapy: heta va'e kuery, amboae yvy regua ha'e ayvu mboae py ijayvu va'e ha'e javive. Ha'e vy omboetepa okuapy ta'angaa ouro guigua huvixave Nabucodonosor omopu'ā uka va'ekue.

<sup>8</sup> Ha'e rami jave amongue avakue caldeu regua ou vy ijayvu okuapy judeu kuery re.

<sup>9</sup> Ha'e vy huvixave Nabucodonosor pe aipoe'i okuapy:

— Oreruvixave, tereikove riae!

<sup>10</sup> Ha'e gui oreruvixave, po rami ndeayvu va'ekue: avakue ha'e javive mimby guaxu oendu vy, mimby, ixā reta va'e, mbaraka ixā irundy va'e, mbaraka, gaita ha'e opa marāgua mba'epu ombopua rā oendu vy ojero'apa reve ta'angaa ouro guigua omboete aguā.

<sup>11</sup> Ha'e rā peteī va'e rei ndojero'ai ha'e nomboetei va'e ma omomboa 'rā tata rupa haku ratāvea py.

<sup>12</sup> Ha'e gui apy ikuai amongue avakue judeu regua Babilônia katy'i rupi ikuai va'e re opena va'erā remoī va'ekue. Ha'e va'e kuery ma Sadraque, Mesaque ha'e Abede-Nego. Oreruvixave, ha'e va'e avakue ma nanemboetei. Mba'eta ndojeroviai nderuete kuery rerekva'e re, nomboetei guive ta'angaa ouro guigua remopu'ā uka va'ekue – he'i okuapy.

<sup>13</sup> Ha'e rami Nabucodonosor oendu vy ivai ha'e ipoxy vaipa. Ha'e rami vy oenoī uka Sadraque, Mesaque ha'e Abede-Nego. Ha'e rā huvixave renonde oguerua.

<sup>14</sup> Ha'e ramo Nabucodonosor aipoe'i ha'e kuery pe:

— Sadraque, Mesaque ha'e Abede-Nego, anhetē teve peē ndapejeroviai xeruete kuery re, neī napemboetei guive ta'angaa ouro guigua amopu'ā uka va'ekue?

<sup>15</sup> Ha'e gui aŷ ma pendu pota 'rāgue mimby guaxu, mimby, ixā reta va'e, mbaraka ixā irundy va'e, mbaraka, gaita ha'e opa marāgua mba'epu ombopua rā, pejero'a vy ta'angaa ajapo uka va'ekue pemboete aguā. Mba'eta napemboetei ramo ha'e ramove'i penemomboa 'rā tata rupa haku ratāvea py. Ha'e va'e rire mava'e tuuete 'rā tu pendereraa jepe xepo gui? – he'i.

<sup>16</sup> Ha'e ramo Sadraque, Mesaque ha'e Abede-Nego ombovai huvixave pe:

— Oreruvixa Nabucodonosor, ha'e nunga py ma ore kuery rombovai e'ŷ teī ha'eve.

<sup>17</sup> Mba'eta oreruete ixupe roikoa va'e ma tata rupa gui orereraa jepe kuaa va'e, ndepo gui guive.

<sup>18</sup> Ha'e rami e'ŷ teī oreruvixave, eikuua pota ke pova'e re: Ore ma nderuete kuery pe ndoroikoi 'rā, noromboetei 'rā guive ta'angaa ouro guigua remopu'ā uka va'ekue – he'i.

<sup>19</sup> Ha'e ramo Nabucodonosor ipoxy vaipa vy Sadraque, Mesaque ha'e Abede-Nego pe hova vaikuepa. Ha'e rami vy tata rupa py omoendy jepiaty áryve sete-kue omoendy ukave vy

<sup>20</sup> ijayvu oxondaro kuery imbaraeteve va'e pe ojokuapa aguā Sadraque, Mesaque ha'e Abede-Nego, ha'e gui tata rupa haku ratāvea py omombopa aguā.

<sup>21</sup> Ha'e ramo ha'e kuery ijao puku, kamixa, xapeo ha'e ijao mboae reve-reve ojokuapa vy omombo tata mbyte py.

<sup>22</sup> Huvixave ojapo uka vyvoi, ha'e tata kua py hendy guaxu oiny ramo hendy vuku va'e ojukapa avakue Sadraque, Mesaque ha'e Abede-Nego momboa kuery.

<sup>23</sup> Ha'e rā mboapy avakue Sadraque, Mesaque ha'e Abede-Nego ma ojokuapaa ague reve meme ho'apa tata mbyte py.

<sup>24</sup> Ha'e gui ma huvixave Nabucodonosor oma'ẽ vy onhemondyi, ha'e opu'ã pojava ov y aipoe'i ojeupagua nhomongeta va'ety kuery pe:

— Mboapy avakue e'ỹ ri ty'y ojokua pyre tata py nhamombo va'ekue?

Ombovai okuapy huvixave pe:

— Anhetē ma oreruvixa — he'i.

<sup>25</sup> Ha'e gui ijayvuve ju vy aipoe'i:

— Mba'exa tu ha'vy irundy avakue aexa ojokua pyre e'ỹ tata mbyte rupi oguata okuapy rā, mba'eve py ikuai axy e'ỹ re. Irundaya ma tuuete kuery ra'y rami ojekuaa — he'i.

<sup>26</sup> Nabucodonosor onhembojave ov y tata rupa py hendy oiny va'e rokē katyve'i. Ha'e vy ojapukai vy aipoe'i:

— Sadraque, Mesaque ha'e Abede-Nego, tuuete yvateve va'e rembiguai kuery, peẽ ke upe gui, peju! — he'i. Ha'e ramo Sadraque, Mesaque ha'e Abede-Nego ma tata mbyte gui oẽmba jogueruvy.

<sup>27</sup> Ha'e ramo ikuiaia py ono'õmba okuapy huvixa mboae kuery, tetā ha'e estado re opena va'e, ha'e huvixave pegua nhomongeta va'ety kuery. Ha'e kuery oexa okuapy rā mboapy avakue re mba'eve py tata ndojapo vai ra'e, hi'a inhakā áry ndoverei, oao oguerekva'e amboae rami ndopytai, neĩ tata pixe noĩ ra'e ha'e kuery re.

<sup>28</sup> Ha'e rami rā Nabucodonosor ijayvu vy aipoe'i:

— Ta'ima'endu'a porā Sadraque, Mesaque ha'e Abede-Nego ruete re, mba'eta ojeupagua anjo ombou vy ogueraa jepe guembigui kuery. Ha'e kuery ma hexe ojerovia vy huvixave ayvu rupi e'ỹ ikuai. Amboae ramigua tuuete re ojerovia ha'e omboete 'rāgue py omboaxa guete, nguete pe anho ikuai vy.

<sup>29</sup> Ha'e nunga rupi xee ma po rami ajapo uka: Xapy'a rei heta va'e kuery regua, amboae regua ha'e ayvu mboae py ijayvu va'e ma Sadraque, Mesaque ha'e Abede-Nego ruete re ijayvu vai ramo ojayapaa 'rā, hoo ombovaipaa 'rā guive. Mba'eta tuuete mboae jipoi kova'e rami nhandereraa jepe va'erā — he'i.

<sup>30</sup> Ha'e rami vy Babilônia yvy re huvixave omoingo porā Sadraque, Mesaque ha'e Abede-Nego.

## 4

### *Huvixa Nabucodonosor na'inhakā porāvei ranhe oikovyague re ijayvua*

<sup>1</sup> Ha'e gui huvixave Nabucodonosor oayvu omondouka yvy regua kuery ha'e javive pe, amboae regua ha'e ayvu mboae py ijayvu va'e yvy jave re ikuai va'e pe. Ha'e vy aipoe'i: "Toĩ pendekuai porā ete aguā!"

<sup>2</sup> Peẽ kuery pe xee amombe'ux hexa pyrā ha'e iporā ete va'e Nhanderuete yvate ete va'e xere ojapo va'ekue.

<sup>3</sup> Mba'eta ixuguigua hexa pyrā ha'e oexa uka va'e ma tuvixa ete. Nhomondyipaarā omoingo va'e py oexa uka ipo'akaa. Ipo'akaa ma opa va'erā e'ỹ, openaa voi raka'e rā peve guarā.

<sup>4</sup> "Ha'e gui xee Nabucodonosor ma xero py aiko porā va'ekue, xevygua opy avy'a aikovy va'ekue.

<sup>5</sup> Ha'e gui ma peteĩ aexa ra'u va'e xemondyi. Xerupa rupi xetui jave apẽxaaa ha'e xeke rupi aexa va'e xembopy'a eta rei.

<sup>6</sup> Ha'e rami vy aenoĩ ukapa imba'ekuaa va'e Babilônia py ikuai va'e ha'e javi, xevy pe omombe'u aguā aexa ra'u va'ekue mba'erā paa.

<sup>7</sup> Ha'e ramo oike okuapy imba'ekuaa va'e kuery, hexa pyrā apoa, caldeu ha'e imba'evyky va'e kuery ha'e javi. Ha'e kuery pe amombe'u aexa ra'u va'ekue, va'eri ha'e kuery ma nomombe'u kuaai mba'erā paa.

<sup>8</sup> Opaa py ma ou Daniel. Ha'e va'e ma Beltessazar hery va'e xeruete rery rupi ae. Ha'e rā ha'e va'e re ma oī Nhanderuete iky'a e'ŷ va'e Nhe'ē. Ha'e ramo ixupe aexa ra'u va'ekue amombe'u vy aipoa'e:

<sup>9</sup> 'Beltessazar, imba'ekuaa va'e kuery ruvixa, xee ma aikuaa ndere oīa Nhanderuete iky'a e'ŷ va'e Nhe'ē. Ha'e nunga rupi oikuaa e'ŷ pyre teī ndevy pe ndaxyi 'rā. Po rami ma xeke rupi aexa ra'u va'ekue. Emombe'u ke mba'erā paa.

<sup>10</sup> Xerupa rupi xetui vy xeke rupi aexa va'ekue ma po rami: Xee ama'ē vy peteī aexa yvy mbyte yvyra hi'aī va'e, yvate ete va'e.

<sup>11</sup> Ha'e va'e yvyra ma yvateve ha'e imbaraeteve ovv, yva re ovaē peve. Yvy apy rupi gui voi oexaa.

<sup>12</sup> Hogue ma iporā, hi'a reta guive. Hexe oī opa marāgua rembi'urā. Hi'yvypy rupi ma mymba nhuūndy rupigua ojou kuaray'ā. Hakā re ma guyra oveve va'e onhemboaitiy okuapy. Hexe ma temimoingo kuery ha'e javi okaru.

<sup>13</sup> Xerupa rupi xetui vy aexa ra'u va'e py ma peteī ju aexa mba'emo rarōa iky'a e'ŷ va'e. Ha'e va'e ma oguejy ouvy yva gui.

<sup>14</sup> Ijayvu atā ete vy aipoe'i: "Peake'o ke yvyra, hakā pejajapa guive. Pemboipa hogue, hi'a voi pemombopa. Pemondyipa mymba iguy gui, ha'e rā hakā gui ma pemondyi imondovy guyra kuery.

<sup>15</sup> Ha'e rā hapytakue ma yvy re topyta hapo reve. Pejokua ke ferro ha'e overa va'e guigua corrente py, nhuūndy mbyte oīa py ae. Yxapy yva guigua tomoakŷ, ha'e mymba ikuai va'e rami tokaru oikovy jai rogue yvy re ikuai va'e re.

<sup>16</sup> Amboae rami ta'ikuraxō, avakue regua kuraxō oī ve'ŷ aguā rami. Ha'e rami 'rāgue py ixupe tome'ēa kuraxō mymba regua. Ha'e nunga toī hexe sete ma'etŷ oaxa peve", he'i.\*

<sup>17</sup> Ha'e rami ae mba'emo rarōa kuery ijayvuague, iky'a e'ŷ va'e kuery oayvu omondouka va'ekue, ha'e ramo okuave va'e ha'e javi oikuaa aguā avakue ipo'aka va'e gui Yvate ete va'e ipo'akapave va'ea. Ha'e rami vy ombopo'akaxe va'e rei 'rā ombopo'aka, avakue regua yvy'ī'igieve teī omoī 'rā pavē re opena aguā.

<sup>18</sup> Ha'e nunga ma xee huvixave Nabucodonosor aexa ra'u va'ekue. Ha'e gui ndee Beltessazar, emombe'u ke mba'erā paa, mba'eta imba'ekuaa va'e kuery apenaa rupi ikuai va'e ha'e javi nomombe'u kuaai. Ha'e rā ndee ma remombe'u kuaa 'rā, mba'eta ndere oī Nhanderuete iky'a e'ŷ va'e Nhe'ē', ha'e.

<sup>19</sup> "Ha'e ramo Daniel Beltessazar hery avi va'e onhemondyi rei reve opyta are ranhe, opēxa ha'e ipy'a eta reia py. Ha'e rami rā xee huvixave teīgue ju xeayvu vy aipoa'e ixupe: 'Beltessazar, ndepy'a eta rei eme aexa ra'uague gui, neī mba'erā paa re voi', ha'e.

"Ha'e ramo Beltessazar ombovai vy aipoe'i: 'Xeruvixa, rexā ra'uague ma ndere ija'e e'ŷ va'e kuery re oiko va'e rire, mba'erā paa voi oiko va'e rire nderovaigua kuery re anho.

<sup>20</sup> Ha'e gui yvyra rexā va'ekue ma yvateve ha'e imbaraeteve ovv yva re peve, yvy jave gui oexaa guive.

<sup>21</sup> Hogue porā, hi'a reta guive pavē ho'u va'erā va'e re. Iguy py ma mymba nhuūndy rupigua ojou kuaray'ā, ha'e hakā re ma guyra oveve va'e onhemboaitiy okuapy.

<sup>22</sup> Ha'e va'e yvyra ma ndee ae, xeruvixa. Mba'eta ndeyvateve reovy, nembaraete guive. Ndeporiau e'ŷa ma yva re peve ojekuaave ovv, ndepo'akapaa yvy apy re peve oendua.

<sup>23</sup> Ha'e gui ndee xeruvixa rexā avi mba'emo rarōa iky'a e'ŷ va'e yva gui oguejy ouvy rā. Ha'e va'e aipoe'i: "Peake'o ke yvyra, pemboipa ete. Ha'e rā hapytakue ma yvy re topyta hapo reve, nhuūndy mbyte oīa py ae topyta ferro ha'e overa va'e guigua corrente py pejokua reve. Yxapy yva guigua tomoakŷ, ha'e tokaru oikovy mymba nhuūndy rupi ikuai va'e okarua rami, sete ma'etŷ oaxa peve", he'i.

\* <sup>4:16</sup> Apy ma huvixave ojee ae ijayvu vy "Yvyra" he'i. Mba'eta Nhanderuete oipe'a ranhe huvixa oīague gui, Nhanderuete ipo'akapa va'e oikuaa peve.

<sup>24</sup> Xeruvixa, po rami ma mba'erā paa, pova'e ma Yvate ete va'e oikuua uka va'ekue. Ha'e nunga ma ndere ae 'rā ou, xeruvixa.

<sup>25</sup> Mba'eta nemoxēa 'rā avakue ikuiaia gui. Ha'e ramo mymba nhuūndy rupi ikuai va'e mbyte ju 'rā nderekaoa. Ndevyguia ma nhuū vaka ho'ua rami re'u reiny aguā. Neakŷ 'rā yxapy yva guigua py. Ha'e nunga ma sete ma'etŷ re oiko 'rā ndere, avakue ipo'aka va'e gui Yvate ete va'e ipo'akapave va'ea reikuua peve, mba'eta ombopo'akaxe va'e rei ombopo'aka 'rā.

<sup>26</sup> Ha'e gui "Hapytakue peja 'rā hapo reve", he'ia ma ha'ekue rami ae nembopo'aka ju aguā re ijayvu vy, Yva pygua ipo'akapave va'ea reikuua ma rire.

<sup>27</sup> Ha'e nunga rupi xeruvixa, ejapyxaka ke xeayvu re, ha'e teko porā rupi vy ejep'e a rejejavya ha'e nderekko vaia gui, iporiaukue'i remboaxya rupi ju reiko aguā. Ha'e rami ri reiko vy reiko porā pukuve 'rā', he'i Daniel xevy.

<sup>28</sup> "Ha'e gui ma ha'e nunga ha'e javi oiko xee huvixave Nabucodonosor re.

<sup>29</sup> Doze jaxy opaa py xee huvixave xero Babilônia tetā py oĩ va'e py aĩ jave

<sup>30</sup> xeayvu vy aipo'a'e: 'Kova'e Babilônia tetā tuvixa va'e e'ŷ teve xerekoarā ajapo va'ekue, xepo'akaa ha'e xeyvate etea aexa uka aguā?' he'i.

<sup>31</sup> Ha'e rami xee huvixave xeayvu teri reve yva gui oguejy peteĩ ayvu aipoe'i va'e: 'Huvixave Nabucodonosor, ndevy aipo'ea: Ndegui oaxa ma ndepo'aka reinyague.

<sup>32</sup> Ha'e rami vy nemoxēa 'rā avakue ikuiaia gui, ha'e mymba nhuūndy rupi ikuai va'e reve ju 'rā reiko. Ndere omoňa 'rā vaka rami nhuū re'u aguā. Ha'e nunga ma sete ma'etŷ re oiko 'rā ndere, reikuua peve avakue ipo'aka va'e gui Yvate ete va'e ipo'akapave va'ea, mba'eta ombopo'akaxe va'e pe rei ombopo'aka 'rā', he'i.

<sup>33</sup> Ha'e ramove ojeupity xee Nabucodonosor regua ayvu. Ha'e rami vy xemoxēa avakue ikuiaia gui. Ha'e ramo vaka rami ha'u aikovy nhuū. Xerete ma yxapy yva guigua py inhakŷ. Xe'a ma taguato rague rami ipuku, ha'e rā xepoapē ma guyra poapē rami optya.

<sup>34</sup> "Ha'e va'e ára opaa py ma xee Nabucodonosor yva re ama'ẽ ramo oĩ ju xe'arandua. Ha'e vy Yvate ete va'e re xema'endu'a porā, arov'y a guive raka'e rā peve oikove va'erā, mba'eta ha'e va'e openaa ma opa va'erā e'ŷ, ipo'akaa ma raka'e rā peve guarā.

<sup>35</sup> Ixupe rā yvy re ikuai va'e ha'e javi ma mba'everā ndovarei. Ha'e oipotaa rami ae 'rā opena oxondaro kuery yva re ikuai va'e re, yvy regua kuery re guive. Avave rei jipoi hexe opo omoň va'erā, neĩ ixupe 'Mba'e tu rejapo?' he'i va'erā.

<sup>36</sup> Ha'e gui xe'arandua ou jevy ramove ou avi huvixa rami apena ju aguā, apenaague ha'e javi re. Xeyvatea ha'e xeporāa voi ou xere pavē oikuua aguā rami. Xevyguia nhomongetaaty kuery ha'e huvixa kuery xea py oupa ju okuapy. Ha'e rami py xemoňa ju huvixave aĩ aguā. Ha'e vy xeyvateve ete.

<sup>37</sup> Ha'e gui aŷ ma xee Nabucodonosor arov'y a ha'e ambojerovia Huvixave yva pygua. Mba'eta ha'e va'e mba'emo ojapo va'e ma anhetē meme, oikoa voi ha'evea rami meme. Omo'yvyi'i kuaa avi 'rā onhemboyvate va'ekue", he'i.

## 5

### Oo mbotya re ipara va'e ojekuua ague

<sup>1</sup> Ha'e gui huvixave Belsazar ojapo peteĩ ngaru tuvixa va'e mil huvixa kuery pe. Ha'e vy mil va'e oexaa py oy'u oiny vinho.\*

<sup>2</sup> Belsazar vinho oy'uxea rupi oy'u tema oiny vy ima'endu'a mba'emo ryru ouro ha'e prata guigua Jerusalém py templo oñague gui tuu Nabucodonosor ogueru va'ekue re. Ha'e va'e ma ogueru ruka huvixave ha'e hexeve huvixa kuery ikuai va'e ha'e va'e py oy'u okuapy aguā, ta'yxy ha'e ta'yxy jevy kuery reve.

\* <sup>5:1</sup> Belsazar ma Nabucodonosor ramymino raka'e. Daniel tuja'i ma jave oĩ Babilônia pygua huvixave.

<sup>3</sup> Ha'e ramo oguerua mba'emo ryru ouro guigua Nhanderuete pegua oo Jerusalém py oñague gui ogueru pyre. Ha'e va'e py ma huvixave ha'e hexeve huvixa ikuai va'e oy'u okuapy, ta'yxy ha'e ta'yxy jevy kuery reve.

<sup>4</sup> Vinho oy'u reve omboete okuapy nguuete kuery ouro guigua, prata, overa va'e, ferro, yvyla ha'e ita guigua rive.

<sup>5</sup> Ha'e ramove peteī ojekuaa ava po. Ha'e va'e ma huvixave ro mbotya xiā re ombopara oiny tataendy rexei. Ha'e rā huvixa oexa oiny ipo ombopara va'e.

<sup>6</sup> Ha'e ramo huvixave ndaekorāvei vy onhemondyi rova vyvoi. Ijaxi'y oku'ea, henapy'ā voi onhembotapa rei joe.

<sup>7</sup> Ha'e gui huvixave ojapukai reve ijayvu oguerupaa aguā hexa pyrā apoa kuery, caldeu ha'e imba'evyky va'e kuery. Oguerua rā huvixave aipoe'i Babilónia pygua imba'ekuaa va'e kuery pe:

— Peteī va'e rei kova'e ipara ogueroayvu ha'e mba'erā paa xevy omombe'u porā va'e ma amonhemonde 'rā púrpura py, ha'e ijaju'y reguarā oguerua 'rā mbo'y ouro guigua. Ha'e gui xee reve mboapya 'rā oī apenaa re ipo'akaa py — he'i.

<sup>8</sup> Ha'e ramo huvixave pegua imba'ekuaa va'e kuery oike va'ekue ndogueroayvu kuaai, neī mba'erā paa nomombe'u kuaai guive huvixave pe.

<sup>9</sup> Ha'e ramo huvixave Belsazar onhemondyi ete vy hova mboaepe vaipa. Hexeve huvixa kuery ikuai va'e voi onhemondyipa okuapy.

<sup>10</sup> Ha'e gui ma huvixave ha'e hexeve ikuai va'e re mba'emo oiko rā ixy oendu vy oike avi okaruaty py. Ha'e vy aipoe'i:

— Xeruvixa, tereikove riae! Ndepy'a eta rei eme, nderova mboae rei eme guive.

<sup>11</sup> Mba'eta repenaa re ma oiko peteī ava. Hexe ma oī Nhanderuete iky'a e'ŷ va'e Nhe'ē. Nderu oī jave py ma roikuua hexe oīa mba'emo oikuua aguā, ha'e hi'arandu ha'e imba'ekuaa nguuete 'arandua rupi. Ha'e nunga rupi nderu rāgue'i huvixave Nabucodonosor oī jave omoīa imba'ekuaa va'e kuery ruvixarā, hexa pyrā apoa kuery, caldeu ha'e imba'evyky va'e kuery ha'e javi ruvixarā guive.

<sup>12</sup> Mba'eta Daniel re nhe'ē oī va'e ma omo'arandu porā 'rā mba'emo oikuua aguā, oexa ra'u pyre omombe'u aguā, ha'e oikuua e'ŷ pyre haxyve va'e teī oikuua uka aguā. Ha'e va'e reryrā nderu rāgue'i omoī va'ekue ma Beltesazar. Ha'e nunga rupi enoī uka Daniel. Ha'e ramo ndevy pe omombe'u 'rā mba'erā paa — he'i.

<sup>13</sup> Ha'e ramo huvixave renonde omoingea Daniel. Huvixa ijayvu vy aipoe'i Daniel pe:

— Ndee pa Daniel, Judá pygua escravo-rā xeru rāgue'i huvixave oī jave Judá gui ndereru va'ekue?

<sup>14</sup> Ha'e gui xee aendu omombe'ua rā ndere Nhanderuete Nhe'ē oīa, mba'emo reikuua aguā, ne'arandu ha'e nemba'ekuaa ete aguā guive.

<sup>15</sup> Ange'i xerenonde ogueroikea imba'ekuaa va'e ha'e hexa pyrā apoa kuery, kova'e ipara va'e ha'e kuery ogueroayvu vy xevy pe omombe'u aguā mba'erā paa. Ha'e rami teī ha'e kuery ma kova'e ayvu mba'erā paa nomombe'u kuaai.

<sup>16</sup> Ha'e rā ndere ima'endu'aa rā xee aendu remombe'u kuaa va'ea mba'erā paa, ha'e mba'emo haxyve va'e teī remombe'u porāve va'ea. Aŷ ma, xapy'a rei kova'e ipara va'e reroayvu vy mba'erā paa xevy remombe'u ramo nemonhemondea 'rā púrpura py, rerekō 'rā mbo'y ouro guigua ndeajuy're, ha'e xee rire mboapya 'rā reī apenaa re ndepo'akaa py — he'i.

<sup>17</sup> Ha'e rami rā Daniel ombovai vy aipoe'i huvixave renonde:

— Mba'emo reme'ē aguā ndeayvuague ma ndereve ae topyta, e'ŷ vy eme'ē amboae pe. Ha'e rami avi ndevy pe xee aroayvu 'rā ipara va'e, mba'erā paa amombe'u 'rā guive.

<sup>18</sup> Xeruvixa, ne'exa! Nderu rāgue'i Nabucodonosor pe Nhanderuete yvate ete va'e ome'ē va'ekue huvixave oī aguā, ipo'aka, iporā ha'e yvate aguā guive.

<sup>19</sup> Ipo'aka aguã ome'ẽ rire ma henonde heta regua, amboae yvy regua ha'e ayvu mboae py ijayvu va'e kuery oryryi reve ojererokyjepa okuapy. Mba'eta ojukaxe va'e rei ojuka raka'e, ha'e rã omoingovexe va'e ma omoingove. Omboyvate omboyvatexe va'e, ha'e rã omo'yvyñ'ixe va'e ma omo'yvyñ'i raka'e.

<sup>20</sup> Ha'e rami avi opy'a py onhemboyvate ete, onhe'ẽ py guive ndoikuua potavei ha'e ojejou porãve rive. Ha'e rami rã oipe'aa raka'e huvixave oña gui, ixupe oaxapa guive mba'emo oguerovy'aague.

<sup>21</sup> Omoxẽa raka'e avakue mbyte gui. Ikuraxõ ma ojapoa mymba kuraxõ rami, ha'e omboekoa mburika ka'aguy rupi ikuai va'e reve. Vaka pe rami ome'ëa nhuñ ho'u aguã, omoaký guive yxapy yva guigua py, oikuua peve Nhanderuete yvate ete va'e avakue po'akaa ha'e javi re ipo'aka va'ea, ha'e ombopo'akaxe va'e rei ombopo'aka 'rã avakue re opena va'erã.

<sup>22</sup> Ha'e gui ndee Belsazar ma ta'y reiko vy ha'e nunga ha'e javi reikuapa teñ ndepy'a py nerenhemo'yvyñ'i.

<sup>23</sup> Ha'e rami 'rãgue py repu'ã raka'e SENHOR yva pygua rovai. Ha'e rami vy hoo gui nerendirne mba'emo ryru oguerua ramo ha'e va'e py ndee ha'e huvixa kuery ndereve ikuai va'e pey'u pekuapy vinho, pendera'xyy ha'e pendera'xyy jevy kuery reve. Ha'e rami avi remboete tuuete ramigua kuery prata guigua, ouro, overa va'e, ferro, yvyra ha'e ita guigua rive, ha'e nunga oma'ẽ e'ŷ va'e, noendui va'e, neñ mba'eve ndoikuuai va'e teñ. Nhanderuete po py reikovea oĩ va'eri neremboetei.

<sup>24</sup> — Ha'e rami rire ixugui ae ou ipo kova'e mboparaarã.

<sup>25</sup> Pova'e ma ipara oiny va'e: *Mene, mene, tequel* ha'e *parsim*.

<sup>26</sup> Ha'e rã mba'erã paa ma po rami: "Mene" he'ia py ma ndepo'akaa Nhanderuete oipapa vy omomba maa, reikuua aguã.

<sup>27</sup> "Tequel" he'ia py ma mba'emo opejaa py ndepeja vy ojoua oataa, reikuua aguã.

<sup>28</sup> Ha'e rã "Peres" he'ia py ma ndepo'akaa omboja'oa ma, ha'e Média ha'e Pérsia pygua kuery pe ju omboaxa maa, reikuua aguã — he'i.<sup>†</sup>

<sup>29</sup> Ha'e rami rã Belsazar ijayvu Daniel omonhemondea aguã púrpura py, ha'e ijaju'y re mbo'y ouro guigua omoña aguã, ha'e gui omombe'ua aguã ha'e openaa re ipo'akaa py mboapya oña rami.

<sup>30</sup> Ha'e va'e pyavyve ojukaa caldeu regua huvixave Belsazar.

<sup>31</sup> Ha'e rire openaague re Média pygua huvixa Dario ju ipo'aka, sessenta e dois ma'etý oguereko reve.

## 6

### *Yvykua guary ikuaria py Daniel omomboa ague*

<sup>1</sup> Ha'e gui huvixave Dario ma oipotaa rami omoñ raka'e cento e vinte huvixarã, ha'e kuery opena aguã huvixave openaa ha'e javi rupi.

<sup>2</sup> Ha'e va'e kuery áry mboapy ju omoñ huvixa yvatekueverã. Ha'e va'e kuery regua ma Daniel. Ha'e va'e kuery ma huvixa kuery mboae re opena, huvixave pegua nome'ëa e'ŷi aguã.

<sup>3</sup> Ha'e rã Daniel ma huvixa yvatekueve ha'e huvixa kuery mboae gui hi'aranduve, mba'eta hexe nhe'ë oĩ va'e ma imo'arandu porã etea. Ha'e nunga rupi huvixave onhembopy'a openaa ha'e javi re ombopo'aka aguã.

<sup>4</sup> Ha'e ramo huvixa yvatekueve ha'e huvixa mboae kuery ma Daniel openaa re oikuua pota okuapy hexe ijayvu reixe vy. Ha'e rami teñ hexe ndojoui ha'eve'ŷa rami oikoa. Daniel ojeroviapy ramo hexe ndojoui ojavya, neñ ojejavya.

<sup>5</sup> Ha'e gui ma ha'e va'e avakue joupe-upa aipoe'i okuapy:

<sup>†</sup> **5:28** Ayvu *mene, mene, tequel* ha'e *parsim* he'ia ma "Oipapa, oipapa, opeja ha'e omboja'o" 'ea. Ha'e gui Média ha'e Pérsia pygua kuery ma Babilônia pygua kuery rovaigua ikuai raka'e.

— Mba'eve py ndajajoui 'rã Daniel re nhandeayvu aguã, nguuete guigua lei rupi oikoa py e'ŷ vy — he'i okuapy.

<sup>6</sup> Ha'e ramo huvixa yvatekueve ha'e huvixa mboae kuery ma huvixavea py jogueraa. Ha'e vy aipoe'i ixupe:

— Oreruvixa Dario, tereikove raka'e rã peve.

<sup>7</sup> Repenaa py huvixa orekuai va'e ha'e javi, tetã ha'e estado re ropena va'e, huvixa mboae ha'e ronhomongeta va'ety kuery rojerure ndee oreruvixa remombe'u uka aguã peteĩ ayvu, po ramigua rejapo uka aguã: Avakue ha'e javive ma trinta ára peve ojerure e'ŷ aguã nguuete va'e pe rei, neĩ avakue va'e pe rei, ha'e rã ndevy pe anho. Ha'e rami e'ŷ rã ndee oreruvixa remombo 'rã yvykua guary ikuia py.

<sup>8</sup> Ha'e gui aŷ ma ndee oreruvixave, embopara uka ke ndeayvu, nderery emoĩ guive avave rei oguerova e'ŷ aguã, mba'eta Média ha'e Pérsia pygua kuery pegua lei ma oguerova pyrã e'ŷ ae — he'i okuapy.

<sup>9</sup> Ha'e rami rã huvixave Dario ma ha'e va'e ayvu ombopara uka, guery omoĩ guive.

<sup>10</sup> Ha'e gui Daniel ma ombopara ha'e guery omoĩ maa oendu vy ngoo py ranhe oike. Ha'e rami vy opy ja'o yvate oĩ va'e py oo, okẽ'i Jerusalém katy ojepe'a va'e oĩa py. Ha'e py ma ára nhavõ mboapykue kuerei 'rã guenapy'ã re oĩ. Ha'e py ae onhembo'e oiny ha'e oguerovy'a nguuete, jepiati rami ae.

<sup>11</sup> Ha'e ramo ha'e va'e avakue jogueraa vy oexa okuapy Daniel nguuete pe onhembo'e ha'e ojerure oiny rã.

<sup>12</sup> Ha'e rami vy huvixavea py ju oo vy huvixave omoma'endu'a oayvu omombe'u uka va'ekue re. Ha'e vy aipoe'i ixupe:

— Oreruvixa, nerembopara ukai ri ty'y ha'e javive avakue nguuete va'e pe rei e'ŷ vy avakue pe ojerure ramo yvykua guary ikuia py omomboa aguã, ha'e rã ndevy pe anho?

Huvixave ombovai:

— Ha'e va'e ayvu ma anhetẽ, Média ha'e Pérsia pygua kuery pegua lei oguerova pyrã e'ŷ ae — he'i.

<sup>13</sup> Ha'e ramo ha'e kuery aipoe'i huvixave pe:

— Ha'e gui Oreruvixave, Judá gui escravo-rã heru pyre Daniel ma nanemboetei, neĩ ayvu rembopara uka va'ekue guive ndojapoi. Ha'e rami 'rãgue py ára nhavõ mboapykue kuerei 'rã ojerure oikovy — he'i okuapy.

<sup>14</sup> Ha'e nunga huvixave oendu vy onhemboaxy ete vy ha'e ae onhembopy'a Daniel ogueraa jepe aguã re. Ha'e vy kuaray oike peve onhea'ã teĩ oikovy ogueraa jepexe vy.

<sup>15</sup> Ha'e ramo ha'e va'e avakue ma huvixavea py ojevy vy aipoe'i okuapy ixupe:

— Ha'e rami avi Oreruvixa, ndeayvuague ma Média ha'e Pérsia pygua kuery pegua lei oguerova pyrã e'ŷ ae. Ha'e nunga rupi nda'evei ae oaxa rive aguã — he'i okuapy.

<sup>16</sup> Ha'e ramo mae ma huvixave ijayvu Daniel heru ha'e omomboa aguã yvykua guary ikuia py. Huvixa aipoe'i Daniel pe:

— Tove nderuete renhe'ẽ rendu reikovy va'e tandereraa jepe — he'i.

<sup>17</sup> Ha'e gui ma peteĩ ita oguerua vy omboty guary ikuia rokẽ. Ombojaague py ma huvixave okuã regua py ae hery omoĩ, ixupeguia yvatekueve voi ha'e rami ae avi ojapo okuapy, Daniel oguenoẽa e'ŷ aguã ha'e gui.

<sup>18</sup> Ha'e gui huvixave ngoo katy oo vy okaru e'ŷ re oaxa pytû, guenonde mba'epu ndogueru rukai guive. Ndoke kuaavei ae.

<sup>19</sup> Ha'e gui ma ko'ẽ aje'ive'i reve huvixave ovv vy onha ovv yvykua guary ikuia katy.

<sup>20</sup> Ha'e py ovaẽ vy Daniel pe ojapukai nda'evei ete reve. Po rami huvixave ijayvu Daniel pe:

— Daniel, Nhanderuete oikove va'e rembiguai, nderuete renhe'ẽ rendu va'e nda'u ndereraa jepe ri ra'e guary kuery gui?

<sup>21</sup> Ha'e ramo Daniel ombovai huvixave pe:

— Xeruvixa, tereikove riae!

**22** Xeruete ma ojea pygua anjo ombou va'ekue guary kuery juru omboty aguã xere ojapo vai e'ŷ aguã, henonde ojejavy e'ŷ va'e aiko ramo. Ndee xeruvixa rovai voi xee ndajapo vai mba'eve – he'i.

**23** Ha'e ramo huvixave ov'y a ete vy yvykua gui oguenoẽ uka. Ha'e gui Daniel oguenoẽa ramo neĩ peteĩ henda py ma voi hexe ndojouai guary raĩgua, nguuete re ojerovia ramo.

**24** Ha'e ramo huvixave ma teĩgue ju ijayvu vy ogueru ruka avakue Daniel re ijayvu rei va'ekue. Ha'e ramo yvykua guary kuery ikuiaia py omombo ukapa, ta'y kuery ha'e ta'yxy kuery reve. Ha'e gui yvy py ovaẽ e'ŷ re guary kuery ojukapa, ikãgue omopẽmba guive.

**25** Ha'e ramo huvixave Dario ombopara heta regua kuery pe, amboae regua ha'e ayvu mboae py ijayvu va'e yvy jave re ikuai va'e pe. Ha'e vy aipoe'i: “Toĩ peẽ kuery re pendekuai porã aguã!

**26** Xee ma po rami ajapo uka: Apenaa ha'e javi rupi avakue oryryipa reve tojererokyje Daniel ruete renonde. Mba'eta ha'e va'e tuuete anho ma oikove va'e, raka'e rã peve oiko va'erã guive. Ipo'akaa ma nombovaipaai 'rã, openaa ma ndopai 'rã.

**27** Ha'e ma joepy ha'e jogueraa jepe 'rã. Yva ha'e yvy re ojapo avi 'rã hexa pyrã ha'e nhomondyipaaraã”, he'i.

**28** Ha'e rire Daniel ma huvixave Dario oĩ pukukue re oiko porã ae tema, ha'e gui Pérsia pygua huvixa Ciro oĩ jave voi.

## 7

### *Irundy mymba Daniel oexa ra'uague*

**1** Peteĩ ma'etŷ re ma Babilônia pygua huvixave Belsazar oĩ jave Daniel ngupa rupi itui vy oexa ra'u peteĩ. Ha'e rami vy oexa ra'u va'ekue ombopara vyvoi, omombe'upa.

**2** Daniel ijayvu vy aipoe'i:

– Ha'e gui pyávy xevy pe oexa ukaa rã aexa ra'u irundy henda gui yvytu oipeju va'e ye'ẽ tuvixa va'e omomyimba rã.

**3** Ha'e gui ye'ẽ gui oẽ jogueruvy irundy mymba tuvixa va'e joo ramigua e'ŷ-e'ŷ.\*

**4** Jypyguia ma guary rami ojekuaa, taguato pepo rami ipepo va'e guive. Xee ama'ẽ rã ipepo oguereko va'ekue omboipaa. Ha'e vy yvy gui omopu'ã imo'amy ipy mokoĩ'i re, ava rami ae. Ixupe ome'ea avi ava rami hi'arandu aguã.

**5** Ama'ẽve tema. Ha'e vy ma mokoĩa mymba ju aexa, kaguare-jagua ramigua. Ha'e va'e ma opy jovaive re opu'ã ouvy. Ojuru py ma guaĩ re ogueru mboapy inharukãgue. Ha'e rã ixupe aipo'ea: “Epu'ã ke, he'u porã xo'o”, 'ea.

**6** Ha'e va'e rire ama'ẽve tema. Ha'e vy amboae ju aexa xivi pytã ramigua. Ha'e va'e kupe re ma irundy guyra pepo oĩ. Ha'e va'e mymba ma inhakã irundy va'e. Ixupe ome'ea joe ipo'aka aguã.

**7** Ha'e va'e rire ama'ẽve tema pyávy aexa va'e re. Ha'e vy mymba irundaya ju aexa nda'evei ete va'e, nhomondiyiarã ha'e imbaraete vaipa va'e. Haĩ ma tuvixa va'e, ferro guigua meme. Nhomondoropa, nhomboa'ypa, ha'e rã hembyrekue re ma opyrõmba 'rã. Mymba kuery mboae ojekuaa ma va'ekue rami e'ŷ ojekuaa va'e, dez hakua va'e guive.

**8** – Hakua ikuai va'e re xee aikuaa pota vy aexa mbyte gui hakua kyrĩ'i va'e ju oẽ oiny rã. Ha'e va'e renonde gui ma mboapy hakua jypy guare omboia. Ha'e va'e hakua re ma oĩ hexa ava rexa ramigua, ha'e rã ojuru py ma onhemboyvatea rupi ijayvu.

**9** – Ama'ẽve tema vy aexa tenda omoĩa rã huvixa kuery opena atyrã. Ha'e va'e áry ma Jypy'i guive guare ranhe oguapy oiny. Ijao ma yro'y rami xiñ va'e. Hi'a inhakã regua ma vexa'i rague rami ete. Henda ma tata rendy, iruéra ikuai va'e voi hendy oiny.†

\* **7:3** Apocalipse 13.1 py oĩ rami mymba ye'ẽ gui ou va'e oexa. Ha'e gui amongue py “Ye'ẽ” he'ia py Nhanderuete rovai opu'ã va'e kuery re ijayvu vy (Isaías 57.20-21). † **7:9** Apy ma ijayvu Nhanderuete renda oexa ukaague re. Karóxa'i tata rendy ramigua ojekuaa, iruéra va'e (Ezequiel 1).

10 Henonde gui ma tata oẽ ouvy yakã rami. Henonde ma heta ete ikuai ixupegua kuery, jaipapapa aguã rami e'ŷ. Ha'e gui ma nhomboayvu va'erã kuery ju oguapypa. Oipe'aa avi kuaxia para ikuai va'e.\*

11 Ha'e ramo ama'ẽve tema vy hakua oẽ va'ekue aendu onhemboyvate etea rupi ijayvu rã. Ama'ẽ vy aexa mymba ojukaa rã. Ha'e gui he'õgue ma ombovaipa vy tata py omombo okaipa aguã.

12 Ha'e gui mymba kuery mboae gui ma oipe'aa ipo'akaague. Ha'e rami teĩ ha'e kuery pe ome'ẽ avi ikuaive ranhe aguã, oa'angaague ára ovaẽ e'ŷa ja.

13 — Pyávy oexa ukaa va'e re ama'ẽ ajupy vy peteĩ ju aexa arai reve yva gui ou ramo, ava ra'y ramo ojekuaa va'e. Ha'e va'e ma Jypy'i guive guare oĩa py oo ramo omonhemboja. ‡

14 Ombopo'aka ha'e omboyvate ete huvixave oĩ aguã, ixupe heta ikuai aguã, amboae regua kuery ha'e ayvu mboae py ijayvu va'e guive. Ipo'akaa ma opa va'erã e'ŷ, ndoaxai 'rãe, openaa nombovaipaai 'rã guive.\*

15 — Ha'e gui xee Daniel ma xepy'a py aendu xenhe'ẽ onhemondyi rã, xeke rupi aexa va'ekue nda'evei rei ramo.

16 Ha'e gui ma ha'e'i py ikuai va'e regua peteĩ re anhemboja vy ixupe ajerure ha'e nunga ha'e javi omombe'u porãve aguã re. Ha'e ramo po rami omombe'u xevy, ha'e nunga mba'erã paa omombe'u porãve vy.

17 Myumba tuvixakue irundy aexa va'ekue ma irundy huvixaverã yvy gui oẽ ouvy va'erã.

18 Ha'e rami teĩ Yvate ete va'e pegua iky'a e'ŷ va'e kuery pe 'rã ome'ẽ ipo'aka aguã. Ha'e rã ha'e kuery ma ipo'aka riae 'rã raka'e rã peve.

19 Ha'e gui mymba irundaya va'e reko ju aikuaaa porãvexe. Ha'e va'e ma amboae kuery ramigua e'ŷ, mba'eta nhomongyje ete va'e, haĩ ferro guigua va'e, ipoapẽ overa va'e guigua, nhomondoropa, nhomboa'ypa ha'e hembyrekue re opyrõmba va'e.

20 Ha'e gui ma inhakã re dez hakua oĩ va'ekue reko aikuaaxe avi, amboae ju oẽ va'ekue guive, ha'e va'e renonde mboapy oitya va'ekue. Ha'e va'e hakua re ma hexa oĩ, ha'e ojuru py ojejou porã reia rupi ijayvu, ha'e aexa rã jypy guare kuery gui imbaraeteve va'e.

21 Ama'ẽ vy aexa rã ha'e va'e hakua ma iky'a e'ŷ va'e kuery rovai opu'ã vy ipo'aka ete ha'e kuery re,\*

22 Jypy guive guare ou peve. Ha'e va'e ma ou vy oepy 'rã Yvate ete va'e pegua iky'a e'ŷ va'e kuery. Ha'e gui ovaẽ 'rã ha'e kuery ju ipo'aka aguã ára.

23 — Ha'e ramo anjo aipoe'i: "Irundaya mymba ma irundaya ae 'rã ipo'aka yvy re. Ha'e va'e ma amboae po'akaague rami e'ŷ 'rã ipo'aka. Ha'e vy omondoropa 'rã yvy jave re ikuai va'e, opyrõmba ha'e omboa'ypa 'rã.

24 Ha'e gui dez hakua ikuai va'e ma dez huvixave ikuai va'erã ha'e va'e jave py ae. Ha'e va'e kuery oaxapa ma rire amboae ju 'rã oiko. Ha'e va'e ma jypy guare rami e'ŷ va'e vy oity 'rã mboapy huvixa.\*

25 Yvate ete va'e re voi ijayvu vai 'rã, ixupegua iky'a e'ŷ va'e kuery ojavyky rei 'rã guive. Oguerova 'rã mba'emo ojapoaty ára ha'e lei. Ipo py ma peteĩ ma'etŷ re omboaxapaa 'rã iky'a e'ŷ va'e kuery, ha'e gui mokoĩ ma'etŷ re ju, irundaya ma'etŷ mbyte peve. §

26 Ha'e rami teĩ ha'e va'e rire ma nhomboayvu va'erã kuery ou vy oipe'a 'rã ipo'akaague. Ha'e rami vy omomba ha'e omokanhy 'rã raka'e rã peve guarã.

27 Ha'e gui ma Yvate ete va'e pegua iky'a e'ŷ va'e kuery pe ju ome'ẽ 'rã ipo'aka aguã yva guy ha'e javi rupi ikuai va'e re. Ha'e kuery pe ome'ẽ avi 'rã opena ha'e yvateve aguã.

\* 7:10 Apocalipse 20.12    ‡ 7:13 Mateus 24.30 ha'e 26.64 py oĩa rami oexa Jesus Cristo Ava ra'y ojeapo va'ekue ipo'aka aguã ou ramo (Apocalipse 11.15, 14.14).    \* 7:14 Mateus 24.30, 26.64; Marcos 13.26, 14.62; Lucas 21.27; Apocalipse 1.13, 14.14    \* 7:21 Daniel 8.24, 11.33; Apocalipse 13.7    \* 7:24 Apocalipse 17.12    § 7:25 Apy ma três anos e meio re ijayvu (Daniel 12.7; Apocalipse 11.2-3, 12.14).

Mba'eta Yvate ete va'e ma raka'e rā peve 'rā ipo'aka. Ixupe ma ha'e javi regua 'rā ikuai, onhe'ẽ rendu pavē 'rā okuapy", he'i.\*

<sup>28</sup> — Ha'e rami py opa aexa ha'e aendu va'ekue. Ha'e gui xee Daniel ma nda'evei rei ete ranhe aiko, xerova voi xiimba rei. Ha'e rami teī ha'e nunga ha'e javi amoī porā herekovy xepy'a re.

## 8

### *Vexa'i ava ha'e kavara tuja oexaaque*

<sup>1</sup> Mboapy ma'et̄y re ma huvixave Belsazar oī jave xee Daniel peteī ju aexa ra'u, jypy'i aexa ra'u va'e rire.

<sup>2</sup> Ha'e gui aexa ra'u vy Susā tetā ikorapa va'e py merami aiko, Elāo yvy re. Ha'e vy ama'ẽ rā Ulai yakā yvy'iry merami ha'ā.

<sup>3</sup> Ha'e gui ama'ẽ vy peteī vexa'i ava aexa yakā rembe re hi'aī va'e. Ha'e va'e ma mokoī hakua va'e. Ha'e gui mokoī hakua oguereko va'e ma yvate ovv va'eri peteī ma amboae gui yvateve. Ha'e rami vy takykue yvate ovv va'e ma yvateve.

<sup>4</sup> Aexa rā vexa'i ma guakua py jopyxo oikovy kuaray oikea katy, ijapu'a'ia katy ha'e ipuku-a katy guive. Ha'e va'e re ma peteīv mymba ikuai va'e nda'ipo'akai, ipo'akaa gui ndoo jepe kuaai guive. Ha'e rami vy ha'e ae oipotaa rami ojapo oikovy, imbaraeteve tema ovv guive.

<sup>5</sup> Xee aexa pota vy peteī aexa kavara tuja, kuaray oikea katy gui ou oiny rā. Yvy jave áry rupi ou va'eri yvy re opyrō vy e'ŷ. Ha'e va'e kavara ma peteī guakua oguereko ngova mbyte re.

<sup>6</sup> Kavara ma vexa'i hakua mokoī va'ea katy oo oiny, yakā rembe re hi'aī rā aexa va'ekuea py. Ha'e vy onha ovv opo'akaa rupi ipoxy reve.

<sup>7</sup> Aexa rā vexa'ia py ovaē vy ixupe ipoxy etea rupi ombota. Ha'e vy omopē hakua mokoīve. Ha'e rā vexa'i ma na'imbaraetevei hexe opu'ā aguā. Ha'e ramo kavara oity yvy rupi, opyrōmba hexe. Jipoi avi ipo'akaa gui vexa'i reraa jeppearā.

<sup>8</sup> Kavara ma ipo'akave ete. Ha'e rami teī onhemombaraaetea pyve hakua tuvixa va'e omopēa. Hakua opēague gui irundy ju oē tuvixa va'e. Ha'e va'e nunga joa katy e'ŷ-e'ŷ oje'oi irundy henda yvvtu oipejua katy.

<sup>9</sup> Hakua ikuai va'e regua peteī oī hakua kyrī'i va'e. Ha'e va'e ma imbaraete ete oiny kuaray puku-a yke katy ha'e kuaray oēa katy, yvy porā katy guive.

<sup>10</sup> Yvate ete vy oupity yva pygua kuery po'akaa peve. Ha'e vy oity yva pygua regua yvy rupi, amongue regua jaxy-tata guive. Ha'e vy opyrōmba.

<sup>11</sup> Tá, yva pygua ruvixa rami ete onhemboyyate vy omomba ixupe guarā oapy jepiaty va'e. Ixupergua oo iky'a e'ŷ va'e voi oity yvy katy.

<sup>12</sup> Onhe'ẽ raxavea py hakua va'e pe yva pygua kuery omboaxapaa, mba'emo ome'ẽ jepi va'e regua guive. Ha'e ramo oity yvy rupi anhetē va'e ae, mba'emo ojapo va'e ha'e javi oiko porā guive.

<sup>13</sup> Ha'e va'e rire aendu iky'a e'ŷ va'e kuery regua peteī ijayvu rā. Ha'e rā amboae iky'a e'ŷ va'e aipoe'i:

— Araka'e peve nda'u oī 'rā oexa ra'u pyre ojeupitypa aguā, mba'emo ome'ẽ jepi va'e ha'e onhe'ẽ raxavea py nhomombaarā va'e regua? Mba'eta oexa ra'ua ague rami vy oo iky'a e'ŷ va'e omboaxaa 'rā, yva pygua kuery guive, opyrōmbaa aguā — he'i.

<sup>14</sup> Ha'e ramo xevy pe ju ombovai:

— Dois mil e trezentos ka'aru ha'e ko'ẽ jevy peve 'rā oo. Ha'e rire ma oo iky'a e'ŷ va'e oiky'a'oa ju 'rā — he'i.

<sup>15</sup> Ha'e ramo xee Daniel aikuaaxe aexa ra'u va'ekue mba'erā paa. Ha'e rā peteī ou xea py ava rami hova va'e.

\* <sup>7:27</sup> Apocalipse 11.15

**16** Ha'e gui peteĩ ava aendu Ulai yakã rembe gui ijayvu nhendu rã. Ha'e va'e ma ojapukai vy aipoe'i:

— Gabriel, upe va'e pe eikuua uka na oexa ra'u va'ekue mba'erã paa — he'i.

**17** Ha'e ramo xee aĩa katy'i ou. Ovaẽ ramo xee akyje. Ha'e vy xerenapy'ã re aĩ, xerova yvy re amovaẽ reve. Ha'e rami teĩ aipoe'i xevy:

— Ava ra'y, endu kuaa ke, mba'eta rexaa ra'u va'ekue ma opaa pygurarã — he'i.

**18** Xereve ijayvu ramo ha'a vy ndaikuaavei ranhe ajupy, xerova yvy re amovaẽ reve. Ha'e ramo xere opoko reve xemopu'ã imo'amy xe'añague py.

**19** Ha'e vy aipoe'i:

— Ne'exa, ndevy pe xee aikuua uka ta poxya opaa ára py mba'emo oiko va'erã. Mba'eta rexaa ra'u va'ekue ma opaa pygurarã.

**20** Vexa'i ava hakua mokoï va'e rexaa va'ekue ma Média ha'e Pérsia pygua huvixave.

**21** Ha'e rã kavara tuja hague vuku va'e ma Grécia pygua huvixave. Hova mbyte re hakua tuvixa va'e oĩ va'e ma jypyguia huvixave.

**22** Ha'e va'e omopõa ague gui irundy ju oẽ va'e ma irundy huvixave ha'e va'e regua ae. Ha'e va'e kuery opu'ã avi 'rã teĩ jypyguia imbaraeteague rami ha'e kuery imbaraete va'erã e'ý ta'vy.

**23** Ha'e rã ha'e va'e huvixave kuery openaa ára opa ramo, ha'e anhetẽ rupi e'ý ikuai va'e opa ma ramo peteĩ ju opu'ã 'rã huvixave ipoxy ete reve, nhombotavy kuaapa va'e.

**24** Ha'e va'e ma ipo'aka ete 'rã, va'eri ha'e ae opo'akaa rupi e'ý guive. Opa rupi ombovaipa 'rã oikovy mba'emo, ha'e imbaraeteve ovvy vy ojapoxea rami rei 'rã ojapo. Ojukapa 'rã ipo'akakueve va'ekue, iky'a e'ý va'e kuery guive.

**25** Ijapua rupi onhembo'arandu oikovy vy ojapo 'rã apu ipo'akave aguã rami. Opy'a py onhembovate 'rã, ha'e mbovy e'ý ojuka 'rã ikuai rive'i va'e. Opu'ã 'rã yvatekueve re Ipo'aka va'e rovai. Ha'e rã omopõa 'rã avakue po'akaa py e'ý ta'vy.

**26** Ka'aru ha'e ko'ẽ rã guarã rexaa va'ekue amombe'u porãvea ma anhetẽ va'e meme. Ha'e rami teĩ emoĩ porã rexaa va'ekue, mba'eta heta ete ára guarã teri — he'i.

**27** Ha'e gui ma xee Daniel xekangy vy mbovy ára rei e'ý xemba'eaxy. Ha'e gui apu'ã ju vy apena aikovy huvixave pegua ikuai va'e re. Aexa ra'u va'ekue gui anhemondyi rei aikovy, oikuua ete va'erã jipoí ramo.

## 9

### Guetarã kuery re Daniel ojerureague

**1** Peteĩ ma'etõ re ma Média pygua Assuero ra'y Dario oĩ jave caldeu kuery ruvixa,

**2** ha'e va'e ma peteĩ ma'etõ re ma opena jave xee Daniel aikuua mbovy ma'etõ re pa Jerusalém tetã ombovaipa pyre opyta 'rãa, kuaxia para profeta Jeremias pe SENHOR ijayvuague oĩa rami vy. Ha'e rami vy setenta ma'etõ 'rãa aikuua.\*

**3** Ha'e nunga rupi SENHOR Nhanderuetea katy ama'ẽ reve anhembo'e ha'e ajerurea rupi aeka aguã, akaru e'ý re, ao voxu guare py anhemonde ha'e tanhimbu xejee amongure-ngure reve guive.

**4** Ha'e rami vy anhembo'e SENHOR xeruete pe. Anhemombe'u vy aipoa'e:

— Xe-SENHOR! Xeruete ndepo'akapa ha'e okyjevepy va'e, ndereve guarã rejapo va'ekue rupi reiko va'e, renhomboaxya re ndeayvuague re nderexarai e'ý va'e.

**5** Ore kuery ma rojejavu, teko vai rojapo. Orerekoo vaia rupi orekuai, orekuai vaikue rei nderovai, rejapo uka va'ekue ha'e ndereve guarã rejapo va'ekue gui rojepe'apa vy.

**6** Nerembiguai profeta kuery re ndorojapyxakai guive, ha'e kuery nderery rupi ijayvu teĩ oreruvixa kuery pe, oreru kuery ha'e yvy jave re ikuai va'e pe guive.

\* **9:2** Apy 70 ma'etõ re ijayvu (Jeremias 25.11-12, 29.10). Mba'eta Jerusalém pygua kuery SENHOR pe ojejavu ramo ombovaipa uka tetã (2 Crônicas 36.11-21).

<sup>7</sup> SENHOR, ndere ma oĩ teko porã. Ha'e rã orere ma oĩ roximbua rive oĩ, aÿ ojekuaa rami. Mba'eta ore Judá pygua avakue ha'e javi re oĩ, Jerusalém py orekuai va'ekue re, Israel kuery ha'e javi, ha'e'i rupi ha'e mombyry orekuai va'e, yvy jave re mamo rã rei oremomboague rupi orekuai va'e re guive oĩ roximbua, ha'eve'ÿa rami nderovai orekuaiague re.

<sup>8</sup> SENHOR, orere ma roximba reia oĩ, oreruvixa kuery re, yvatekueve ha'e oreru kuery re, nderovai rojejavypa rire.

<sup>9</sup> Ha'e rã SENHOR Oreruete, ndere ma oĩ oremboaxy ha'e oreperdoa aguã, mba'eta ndere ore kuery ropu'ã rei.

<sup>10</sup> SENHOR Oreruete, ndorojapoí ndeayvua, ndeguigua lei rupi ndorekuai vy, nerembiguai profeta kuery rupi orerekorã reja va'ekue ri.

<sup>11</sup> Tá, Israel kuery ha'e javive ma ndeguigua lei ndojapoí okuapy, ojepe'apa guive ndeayvu oendu e'ÿ aguã. Ha'e nunga rupi ae orere ayvu vai ou nderovai rojejavya re. Mba'eta Oreruete, nerembiguai Moisés lei ombopara va'ekue re oĩa rami vy ae oiko mba'emo vai.\*

<sup>12</sup> Mba'eta ndee rejapo ndeayvu ojeupitypa aguã rami, orerovai ha'e oreruvixa oremboayvu va'ety kuery rovai ndeayvuague. Ha'e rami vy mba'emo vai ete rembou ore'áry. Mba'eta yva guy jave rupi oiko va'e'ÿ teri Jerusalém tetã re oiko va'ekue ramigua.

<sup>13</sup> Moisés rupigua lei re oĩa rami vy ha'e ramigua ete ou ore'áry. Ha'e rami tei ore ma ndee SENHOR Oreruete pe ndorojerurei rokuapy orepytyvõ aguã, orerekro vaia gui rojeko rerova aguã, nei ndeguigua anhetê va'e rupi orekuai aguã.

<sup>14</sup> Ha'e nunga rupi ae SENHOR, renhembopy'aague rami vy rembou ore'áry. Mba'eta ndee SENHOR Oreruete ma nderekro porã ete va'e opa mba'e rejapoa py. Ha'e rã ore ma noronhe'ẽ rendui.

<sup>15</sup> SENHOR Oreruete, anhetê Egito yvy gui ndevyguia kuery renoë raka'e ndepo'akaa rexu uka vy, nemboete pavã aguã rami rejapo aguã guive, aÿ peve ojekuaa rami. Ha'e rã ore ma rojejav, ha'eve'ÿa rami ete orekuai.

<sup>16</sup> SENHOR, opa mba'e py nderekro porãa rupi eipe'a nho ke ndepoxya ha'e ndevaia ndevyguia tetã Jerusalém ha'e ndevyguia yvyty iky'a e'ÿ va'e re rembou va'ekue. Rojejavý ha'e oreru kuery voi heko vai rire orea katy'i rupi ikuai va'e ojojai okuapy Jerusalém tetã, ore ndevyguia kuery guive.

<sup>17</sup> Ha'e gui aÿ ma Oreruete, xee nerembiguai anhembo'e ha'e ajerure ramo endu. Ha'e vy SENHOR, ndeporayvua rupi vy tove nderova tomoexakã ju ndevyguia oo iky'a e'ÿ va'e omboavaipa pyre áry.

<sup>18</sup> Xeruete, ejapyxaka ke ha'e endu. Eipe'a nderexa, ha'e ema'ẽ orekuai axya re, tetã nderery oĩa re guive, mba'eta ore kuery ma ore ae reko porãa rupi e'ÿ rojerure nerentonde ha'e rami, ha'e rã ndee renhomboaxy ete va'e ramo anho.

<sup>19</sup> SENHOR, endu ke. SENHOR, oreperdoa ke. SENHOR, eikuua pota orere, ha'e orepytyvõ. Xeruete, emboare eme guive, ndee ae renhemboete uka aguã. Mba'eta ndevyguia tetã ha'e ndevyguia kuery re ma nderery oĩ – he'i.

### *Setenta vezes sete ma'etý re ijayvuague*

<sup>20</sup> Ha'e rami xeayvu ainy, ha'e anhembo'e vy amombe'u ainy xee ae ajejavvyague, xeretarã Israel kuery ojejavvyague guive. Ha'e vy SENHOR Xeruete renonde ajerure ainy Xeruete pegua yvyty iky'a e'ÿ va'e re.

<sup>21</sup> Xee xeayvu ha'e anhembo'e teri ainy reve ava rami aexa ra'u ypy va'ekue ou pojava, Gabriel hery va'e. Oveve ouvy vy opoko xere. Ha'e rami oiko ka'arukuegua ome'ëa jave.

<sup>22</sup> Ha'e va'e ma xereve ijayvu xembo'e vy. Ha'e vy aipoe'i:

– Daniel, aÿ ma apy aju, ndevy pe amombe'u porãve aguã ha'e nunga mba'erã paa.

\* <sup>9:11</sup> Deuterônômio 28.15-68

23 Rejerure ypy ramove xemboua. Ha'e ramo xee aju amombe'u aguã ndevy, hayvupy ete reiko ramo. Ha'e ramo eikuaa pota ha'e nunga re, mba'emo rexa va'ekue reikuaa aguã.

<sup>24</sup> — Setenta vezes sete ma'etý teri oata neretarã kuery ha'e peneretã iky'a e'ý va'e renonderã oa'angaague, teko vai omombaa aguã, ojejavya opa aguã, ojapo vaiague gui oiky'a'oa aguã, teko porã opa e'ý va'e oguerua aguã, oexa ra'u pyre ha'e profeta kuery ijayvuague ojeupitypa aguã, ha'e Iky'a e'ý ete va'e huvixarã omoña aguã.<sup>†</sup>

<sup>25</sup> Endu ke ha'vy reikuaa porã aguã. Jerusalém tetã omoatyrõa ha'e ojapopaa ju aguã re ijayvua ára guive huvixarã Omoñ mbyrã oiko peve ma sete vezes sete ma'etý oiko 'rã, ha'e gui sessenta e duas vezes sete ju.<sup>‡</sup> Tape ikuai va'e ha'e tetã kora ma teigue ju 'rã omoatyrõmbaa, ikuai axy ete ma jave ta'vy.

<sup>26</sup> Ha'e gui sessenta e duas vezes sete ma'etý oaxa ma rire ojukaa 'rã huvixarã Omoñ mbyre, ha'e ramo noívei 'rã ranhe. Ha'e rã huvixa oiko teri va'erã retã pygua kuery ju ou vy omomba 'rã Jerusalém tetã, oo iky'a e'ý va'e guive. Imombaarã ma yy rami 'rã ou xapy'a. Ha'e gui opaa ára peve oiko 'rã joe opu'ã va'e. Mba'emo mombaarã ou aguã va'ekue avi 'rã ou.

<sup>27</sup> Ha'e gui ha'e va'e ma heta va'e kuery reve ojapo 'rã peteñ rami oguereko aguã sete ma'etý peve guarã. Ha'e rami teñ ha'e va'e jave mbyte py ma ha'e kuery pe nome'ê ukavei 'rã mymba neñ mba'emo aju guigua. Mba'emo ojeguarupy reve 'rã ou nhomombaarã, hexe ju ou peve imombaarã va'ekue.<sup>§</sup>

## 10

### Tigre yakã yvýry Daniel mba'emo oexaague

<sup>1</sup> Mboapy ma'etý re ma Pérsia pygua huvixa Ciro oñ jave peteñ ayvu oikuaa ukaa xee Daniel Beltesazar xerery mboae va'e pe. Ha'e va'e ayvu ma anhetê va'e, joe heta opu'ã aguã regua guive. Xee aendu kuaa aguã rami ayvu ou, mba'emo oexa ukaa reve.

<sup>2</sup> Ha'e va'e ára guive ma xee Daniel nda'evei ete aiko mboapy semana re.

<sup>3</sup> Tembi'u ha'uxe vai va'ety regua nda'upei, xo'o neñ vinho namoñ xejuru py. Neñ azeite ma voi ndaikytyi xejee, mboapy semana oaxapa peve.

<sup>4</sup> Ha'e gui jypygua jaxy vinte e quatro araa py ma Tigre yakã guaxu yvýry xee aiko vy

<sup>5</sup> xerova yva vy ama'ë. Ha'e vy peteñ ava aexa ajukue perirõ'i py onhemonde va'e. Ijaxi'y rupi ma ouro iky'a e'ý va'e guigua oñ, Ufaz gui heru pyre.

<sup>6</sup> Hete ma itaendy berilo rami hendy. Hova ma overa va'e rami, hexa ma tataendy rami ojekuaa. Ipo ha'e ipy ma overa va'e guigua ombovera pyre rami overa rei. Ha'e rã ijayvu vy mbovy e'ý ikuai va'e ayvu rami onhendu.\*

<sup>7</sup> Xee Daniel anho'i aexa ha'e nunga. Ha'e rã avakue xereve ikuai va'e ma mba'eve ndoexai. Ha'e rami avi ha'e kuery okyje ete aguã ou xapy'a rã onhamba, onhemimba okuapy.

<sup>8</sup> Ha'e gui ma xee ae'i apyta. Ha'e rami vy aexave tema ha'e va'e iporã ete va'e ojekuaa rã. Ha'e vy naxembaraeteveia aendu. Naxembaraetevei vy xerova xiñguepa rei, ha'ekue rami ve'ý oñ.

<sup>9</sup> Ha'e rami teñ aendu porã ijayvu nhendu va'e. Aendu vyve ha'a, xerova yvy re amovaë reve ndaikuaavei ranhe ajupy.

### Daniel omombaraetea juague

<sup>†</sup> **9:24** Apy “setenta vezes sete ma'etý” he'i, versículo 2 py setenta ma'etý re Daniel oikuaa potaague, ha'e va'e rire raka'eve rã guarã omombe'u vy (Levítico 25.8). Ha'e javi py ma 490 ma'etý oa'angaa. <sup>‡</sup> **9:25** Apy ma ijayvu 483 ma'etý re (7x7=49 mais 62x7=434). Ha'e gui versículo 27 py omombe'u porâve sete ma'etý opaa pygua ju, ha'e javi vy 490 ma'etý ojapo aguã. Ha'e gui “Huvixarã Omoñ mbyrã” he'i a ma Cristo re ae ijayvu vy, hebraico ayvu py “Messias” 'ea. <sup>§</sup> **9:27** Daniel 11.36 py oña rami ijayvu templo py mba'emo vai nhomokanhyarã ou aguã re (Mateus 24.15, Marcos 13.14). <sup>\*</sup> **10:6** Apocalipse 1.13-15

<sup>10</sup> Ha'e gui peteĩ ou vy xere opoko. Xemomy-momyĩ vy xerenapy'ã ha'e xepo re xemoĩ.  
<sup>11</sup> Ha'e va'e ma aipoe'i xevy:

— Daniel ava oayvupy ete va'e, ejapyxaka ke ayvu re ndevy pe aipoa'e rã. Epu'ã ke he'amy, mba'eta ndea py xemboua — he'i. Po rami xereve ijayvu ramo xee apu'ã ha'amy aryryipa reve.

<sup>12</sup> Ha'e ramo aipoe'ive ju xevy:

— Daniel, ekyje eme, mba'eta ndepy'a re reikuaaxe remoĩ. Ha'e ramo Nderuete renonde renhemo'yvy'ĩ iypyá ára guive oendu ndeayvu. Ha'e gui ndeayvua rupi vy ae aju.

<sup>13</sup> Ha'e rã Pérsia yvy re ipo'aka va'e ma xejoko ranhe vinte e um ára peve. Ha'e rami teĩ anjo yvateve va'e Miguel ou vy xepytyvõ. Ha'e ramo mae ma xepo'aka Pérsia pygua huvixa kuery re.

<sup>14</sup> Aÿ ma aju ndevy pe aikuua uka aguã neretarã kuery opaa ára py oiko va'erã. Mba'eta mba'emo rexia va'ekue ma raka'e rã ete guarã — he'i.

<sup>15</sup> Ha'e rami xevy ijayvu ramo xee akyrirĩ vy ama'ẽ ha'amy yvy re.

<sup>16</sup> Ha'e gui peteĩ ava ra'y ramigua opoko xejuru re. Ha'e ramo xeayvu jevy vy aipoa'e xerenonde hi'ai va'e pe:

— Xeruvixa, ange mba'emo aexa rire ou xere haxy va'e. Ha'e ramo naxembaraetevei ete.

<sup>17</sup> Ha'e nunga rupi Xeruvixa, mba'exa 'rã tu ndereve SENHOR rembiguai aiko va'e xeayvu? Mba'eta xere noïvei ete xembaraetea, neï xepytuë aguã ma voi noïvei ma — ha'e.

<sup>18</sup> Ha'e ramo ava ramigua va'e teïgue ju opoko xere. Ha'e vy xemombaraeteve.

<sup>19</sup> Ha'e vy aipoe'i:

— Ava oayvu etepy, ekyje eme. Evy'a ju. Nembaraete ke, nembaraete.

Po rami ijayvu ramove xembaraete. Ha'e vy aipoa'e:

— Xeruvixa, ndeayvu ke aÿ, xembaraete ju rire — ha'e.

<sup>20</sup> Ha'e ramo aipoe'i:

— Reikuaa pa mba'e re pa aju ndea py? Mba'eta aa ju ta Pérsia pygua huvixa re apu'ã aguã. Ha'e gui xee aa ma rire Grécia pygua huvixa ju 'rã ou.

<sup>21</sup> Ha'e rã ndevy amombe'u porâve 'rã ipara re anhetẽ va'e oña rami. Ha'e gui ha'e va'e kuery rovai apu'ãa py jipoi avave rei xereve guarã, peñ kuery re opena va'e Miguel e'ÿ vy.

## 11

### *Huvixa kuery kuaray ijapu'a'ia katy ha'e ipuku-a katyguare anjo ijayvuague*

<sup>1</sup> — Peteĩ ma'etÿ re ma Média pygua huvixa Dario oï jave xee apu'ã amombaraete ha'e amokyre'ÿ aguã.

<sup>2</sup> — Aÿ ma amombe'u porã ta ndevy anhetẽ va'e. Ne'exa, mboapy huvixa teri 'rã ikuai Pérsia pygua. Ha'e gui irundaya ma pavẽ gui oguerekopave 'rã. Ha'e va'e ma iporiau e'ÿ va'e vy imbaraeteve 'rã ov. Ha'e rami vy opa mba'e py 'rã opu'ã Grécia pygua huvixa re.\*

<sup>3</sup> Ha'e va'e rire ma peteĩ huvixa ju oiko 'rã ipo'aka va'e. Ha'e va'e ma ipo'aka etea rupi 'rã joguerek. Ha'e vy oiko 'rã ha'e ae oipotaa rami rei.

<sup>4</sup> Ha'e rã ipo'akapave ma jave openaa omboja'oa, ha'e omboaxaa 'rã irundy henda yvytu oipejua katy ikuai va'e pe. Va'eri ta'y kuery pe e'ÿ 'rã omboaxaa, ha'e ipo'akaague rami e'ÿ ipo'aka va'e kuery opena 'rã, mba'eta ipo'akaague oipe'aa vy amboae kuery pe ju 'rã omboaxaa, ta'y kuery pe 'rãgue py.

\* <sup>11:2</sup> Apy ma omombe'u porâve ju Pérsia ha'e Grécia pygua huvixa kuery joe opu'ã aguã (capítulo 8 py voi).

<sup>5</sup> — Ha'e gui kuaray puku-a katyguia huvixa ma imbaraete 'rã, peteĩ hembiguai yvateve va'e voi. Ha'e va'e ma herekoare gui voi imbaraeteve 'rã. Ha'e vy ha'e ju 'rã oĩ huvixa, openaa tuvixa 'rã guive.

<sup>6</sup> Ha'e gui oĩ ma'etõ opaa py ma ha'e kuery onhemoirũ 'rã joe. Ha'e rami vy kuaray ijapu'a'ia katyguia huvixa ma omenda 'rã kuaray puku-a katyguia huvixa rajy re, peteĩ rami ikuai aguã. Ha'e rami teĩ kunha va'e ma ndajoguereko kuaai 'rã, ime voi nda'ipo'aka pukui 'rã. Mba'eta kunha va'e ma omboaxaa 'rã joupe, heruare kuery guive, tuu ha'e ojeupe guarã heruare voi.

<sup>7</sup> Ha'e rã hemiarirõ kuery va'e regua peteĩ oĩ 'rã hekoria. Ha'e va'e ma kuaray ijapu'a'ia katyguia huvixa xondaro kuery re opu'ã vy oike 'rã ha'e kuery onhemiatiy py. Ha'e kuery re opu'ã vy ipo'aka 'rã.

<sup>8</sup> Ha'e kuery nguete ramigua oguereko va'e ha'e javi voi ogueraapa 'rã Egito yvy katy ojeupe guarã, mbovy e'ŷ ta'angaa mba'emo rykukue gui ojapo pyre, mba'emo hepyve va'e ha'e ouro guigua guive. Ha'e gui ma mbovy ma'etõ re rei e'ŷ nopo'avei 'rã kuaray ijapu'a'ia katyguia huvixa re.

<sup>9</sup> Ha'e va'e rire mae ma ou vy opu'ã kuaray puku-a katyguia huvixa re. Ha'e rami teĩ ojevy rive ju 'rã oyvy katy.

<sup>10</sup> — Ha'e gui ma ta'y kuery ju joe opu'ãa rupi 'rã ikuai. Ha'e vy mbovy e'ŷ xondaro kuery omono'õ. Ha'e kuery va'e regua peteĩ ma ou pojava 'rã. Opa marãgua ombovaipa ma vy oove 'rã guenonde katy. Ha'e vy joe opu'ã ju 'rã oyvy kuaray puku-a katyguia huvixa onhemiatiy oĩ peve.

<sup>11</sup> Ha'e ramo ha'e va'e ipoxy reve oo 'rã opu'ã aguã huvixa kuaray ijapu'a'ia katyguia re. Ha'e rã ha'e va'e ma heta ete ogueraa 'rã hexe opu'ã aguã py teĩ hexeve oo va'ekue omboaxapaa 'rã ipo py.

<sup>12</sup> Huvixa kuaray puku-a katyguia ma heta va'e kuery omomba vy onhembovate 'rã opy'a py. Mbovy e'ŷ ojuka 'rã teĩ nda'ipo'akai 'rã.

<sup>13</sup> Mba'eta hexe kuaray ijapu'a'ia katyguia huvixa ou jevy vy jypy guare gui hetave 'rã ogueru joe opu'ã aguã. Ha'e gui mbovy rei e'ŷ ma'etõ opaa py ma ou pojava 'rã mbovy e'ŷ xondaro kuery ha'e mba'emo oiporu va'ety reve.

<sup>14</sup> Ha'e jave ma mbovy e'ŷ 'rã opu'ã huvixa kuaray puku-a katyguia re. Neretarã kuery va'e regua ojerovia rei va'e voi hexe opu'ã 'rã profeta ijayvuague ojeupity aguã rami. Ha'e rami teĩ ha'e kuery nda'ipo'akai 'rã.

<sup>15</sup> Ha'e gui huvixa kuaray ijapu'a'ia katyguia ou vy omopu'ã 'rã tetã kora áry rupi ojeupi aguã. Ha'e rami vy oipe'a 'rã tetã ikorapa va'e. Ha'e rã kuaray puku-a katyguia ipo'akakueve teĩ ndojoko kuaai 'rã. Ha'e kuery va'e regua oiporavo pyre voi nda'ipo'akai 'rã ojoko aguã.

<sup>16</sup> Ha'e nunga rupi hovaigua ou va'e ma oipotaa rami ete 'rã ojapo. Avave rei ndojoko kuaai 'rã. Yvy porãa py ma voi opyta 'rã, ipo py opa mba'e omboaxaa ramo.

<sup>17</sup> Openaa jave rupi ojeupegua ipo'akakueve oenoĩ vy ogueru vy huvixa kuaray puku-a katyguia reve ojapo 'rã peteĩ rami ikuai aguã. Ha'e rami vy ixupe ome'ẽ 'rã peteĩ kunhataĩ omenda aguã, ipo'akaa ombovaipa aguã. Ha'e rami teĩ ha'e nunga oaxa rive 'rã, ixupe ndovarei 'rã mba'everã.

<sup>18</sup> Ha'e va'e rire ma ye'ẽ yvýry ju 'rã oo joe opu'ã aguã, ha'e vy heta re ipo'aka 'rã. Ha'e rami teĩ peteĩ yvateve va'e omomba 'rã ojerovia reia. Ha'e vy ojapo 'rã ojerovia reiague hi'áry ae ju ojeapa aguã rami.

<sup>19</sup> Ha'e ramo ojevy rive 'rã oyvy re onhemiatiy oĩ va'e katy. Va'eri onhepyxanga vy ho'a 'rã. Ha'e va'e rire ma ndojouavei 'rã.

<sup>20</sup> — Ha'e va'e rire ma hekoria oĩ ju 'rã peteĩ. Ha'e va'e ma oyvy iporãvea rupi omondouka 'rã peteĩ guembiguai imposto re nhombopagaa rupi oiko aguã. Ha'e rami teĩ are e'ŷ re omomba 'rã, ixupe ivaia py e'ŷ, neĩ hexe opu'ã reia rupi e'ŷ guive.

<sup>21</sup> Ha'e va'e rire ha'e va'e rekovia oĩ ju 'rã peteĩ ava heko vai ete va'e, huvixarã nomoĩai va'eri. Ha'e rami 'rãgue py okyrirĩ reve ou vy nhemi rupi 'rã oĩ huvixarã.

<sup>22</sup> Henonde ma xondaro kuery heta ou teĩ omokanhymba 'rã. Omomba ete 'rã, guexeve peteĩ rami omoingo va'ekue regua yvateve va'e voi.

<sup>23</sup> Ha'e va'e reve peteĩ rami ikuai aguã ojapo ramive ma ombotavy 'rã. Ha'e rami vy mbovy'i reve va'eri opu'ãve vy ipo'akave 'rã ovy.

<sup>24</sup> Okyrirĩ rei reve ovaẽ avi 'rã oguerekopave ete va'e rekoa rupi. Ha'e rami py ojapo vai 'rã tuu kuery ha'e tamoĩ kuery ojapoague ramigua e'ŷ. Ha'e rami vy mba'emo oipe'a vy omboja'o 'rã ojeupegua kuery pe, imba'e rei-rei va'ekue ha'e javi. Ha'e gui onhembopy'a 'rã oo ikorapa va'e re voi opu'ã aguã, teĩ xapy'a'i guarã rive.

<sup>25</sup> Ha'e gui onhemombaraete ha'e onhembopy'a guaxu 'rã huvixa kuaray puku-a katygua re opu'ã aguã, oxondaro kuery imbaraetekueve mbovy e'ŷ ogueraa vy. Ha'e rami teĩ nda'ipo'akai 'rã, hovai opu'ãa nhemi ramo.

<sup>26</sup> Ha'e gui ma hembi'u gui okaru va'e kuery omokanhhy 'rã. Oitypa 'rã okuapy ixondaro kuery, ha'e ramo heta ete ho'a 'rã oipyxopa rã.

<sup>27</sup> Ha'e va'e huvixa kuery mokoĩve ma mba'emo vai ojapo aguã ramo anho 'rã ikuai. Petei'i mesa pyve oguapya py ijapu 'rã oiny joupe. Ha'e rami teĩ ha'e nunga oaxa rive 'rã, mba'eta oa'angaague ára py ou 'rã imombaarã.

<sup>28</sup> Ha'e ramo ava heko vai ete va'e ojevy 'rã oyvy katy. Oguerekopa vy ov'y'a reve 'rã ou. Ha'e gui onhembopy'a 'rã omomba aguã Nhanderuete guexeve guarã ojapo va'ekue iky'a e'ŷ va'e rupi ikuai va'e pe. Ha'e ae oipotaa rami 'rã oiko. Ojevy ma ramo Nhanderuete guexeve guarã ojapo va'ekue iky'a e'ŷ va'e gui amongue ojepe'a ramo oguerovy'a 'rã.

<sup>31</sup> Ixupegua imbaraetekueve oo vy omongy'a rei 'rã oo iky'a e'ŷ va'e, oo yvate va'e guive. Ha'e vy ko'ë nhavõ ome'ë mbyrã va'ekue oipe'a vy omoĩ 'rã ojeguarupy nhomokanhyarã.<sup>†</sup>

<sup>32</sup> Ombotavy 'rã Nhanderuete guexeve guarã ojapo va'ekue iky'a e'ŷ va'e gui ojepe'a va'e kuery, ijayvu porã'ia rupi rive. Ha'e rã Nguuete oikuua va'e kuery ma imbaraete vy ojapo 'rã okuapy mba'emo.

<sup>33</sup> Ha'e kuery va'e regua hi'arandu va'e ma ombo'e 'rã heta va'e kuery. Ha'e rami teĩ ojukaa 'rã kyxe ha'e tata py, escravo-rã ogueraa rupi, ha'e ogueraa rive-rivea rupi. Are peve 'rã ha'e nunga oiko.

<sup>34</sup> Ha'e kuery va'e regua ho'a ramo ma xapy'a'i oipytyvõa 'rã. Ha'e rã ha'e kuery re heta onhemoirũ 'rã anhetẽ rupi e'ŷ.

<sup>35</sup> Mba'eta hi'arandu va'e regua ho'a 'rã oeko a'ãa aguã, oiky'a'oa ha'e omoxiãa aguã opa rã guarã, mba'eta oa'angaague ára py ha'e nunga oiko 'rãe.

<sup>36</sup> — Ha'e gui huvixa ma ha'e ae oipotaa rami 'rã oiko. Ha'e vy opu'ã vy onhemboyvateve 'rã tuuete ramigua ikuai va'e ha'e javi áry. Tuuete ikuai va'e gui Nhanderuete yvateve va'e rovai eteve voi 'rã ijayvu nda'evei etea rupi. Ha'e rami teĩ mba'emo ojapo kuaapa ranhe 'rã, ixupe ipoxya aguã ojeupity peve. Mba'eta hexe ijayvuague oiko 'rãe.<sup>‡</sup>

<sup>37</sup> Ha'e va'e ma nomboetei 'rã nguu kuery ruete, neĩ kunhague ojou porãve va'e, neĩ tuuete ramigua va'e rei guive, pavẽ áry onhemboyvate va'e vy.

<sup>†</sup> **11:31** Apy ha'e Daniel 9.27 py "Ojeguarupy nhomokanhya" he'ia ma Jesus omombe'u porãve Mateus 24.15 ha'e Marcos 13.14 py. <sup>‡</sup> **11:36** Nhanderuete re ijayvu vaia re Apocalipse 13.6 py voi ijayvu avi.

38 Tuuete ramigua ikuai va'e omboete 'rāgue py omboete 'rā imbaraete va'e ruete ramigua anho, ha'e nunga tuuete ma tuu kuery ndoikuaai va'ekue ri. Ouro py 'rā ombojerovia, prata py, ita hepyve va'e ha'e mba'emo iporāve va'e py guive.

39 Ha'e gui amboae regua ruete pe onhepytvõ uka vy opu'ã 'rā oo ikorapa va'e re. Ha'e gui amongue omovaẽ porā ramo omboete uka ete 'rā. Ha'e vy omoõ 'rā mbovy e'ŷ re ipo'aka aguã, ha'e kuery pe omboja'o 'rā guive yvy.

40 — Ha'e gui opa aguã ára ovaẽ ramo hexe opu'ã 'rā huvixa kuaray puku-a katygua. Huvixa kuaray ijapu'a'ia katygua voi opu'ã 'rā hexe karóxa ha'e kavaju árygua kuery reve, ha'e mbovy e'ŷ kanoã guaxu py ikuai va'e reve. Heta yvy re ha'e kuery ovaẽ vy omonyẽmba 'rā, ha'e gui amboae katy ju 'rā oo.

41 Yvy porāa re voi ovaẽ avi vy heta 'rā oity. Ha'e rā ipo'akaa gui amongue oo jepe 'rā, Edom, Moabe ha'e Amom pygua yvatekueve anho.

42 Heta yvy áry oupi 'rā opo. Egito yvy re ikuai va'e voi ndoo jepei 'rā.

43 Oipe'apa 'rā ouro ha'e prata guigua, hepykueve Egito yvy re ikuai va'e guive. Líbia ha'e Etiópia pygua kuery voi oje'oi 'rā hembiguairā.

44 Ha'e rami teĩ kuaray oua katy ha'e ijapu'a'ia katy gui mba'emo omombe'ua rā oendu vy onhemondyi 'rā. Ha'e vy oove ju 'rā ipoxy reve, mba'emo ombovaipa ha'e ojuka reta aguã.

45 Ha'e rami vy ye'ẽ pa'ũ py oupi 'rā ngoorā tuvixa ete va'e, yvyty porā iky'a e'ŷ va'e rovai. Ha'e rami teĩ ovaẽ 'rā imombaarā, ha'e ndoikoi 'rā heraa jepearā.

## 12

### *Opaa ára py guarã re ijayvuague*

1 — Ha'e va'e jave ma anjo yvateve va'e Miguel opu'ã avi 'rā, neretarã kuery repya va'e. Ha'e va'e ára ma ikuai axy ete aguã. Ha'e ramigua oiko va'e'ŷ teri, ha'e kuery va'e regua ikuai ypya ára guive ha'e va'e ára peve. Ha'e rami teĩ ha'e jave py neretarã kuery ogueraa jepe 'rā, kuaxia re hery oĩ va'e ha'e javive.

2 Yvy re onhono porā mbyre heta 'rā onhemboete ju okeague gui. Amongue oo 'rā tekove marã e'ŷ oupity aguã katy, ha'e rā amboae kuery ma oximba ha'e raka'e rā peve ikuai axy aguã katy 'rā oo.

3 'Arandua rupi ikuai va'ekue ma hexakã 'rā yva re ikuai va'e rami. Teko porā katy jogueraa reta va'ekue ma jaxy-tata rami 'rā hexakã riae, raka'e rā peve.

4 Ha'e gui ndee Daniel, emoõ porā ha'e va'e ayvu, emboja guive kuaxia mbojaa py, opaa ára py guarã. Heta oikuaa pota 'rā, ha'e oikuaave 'rā oje'oviv — he'i.\*

5 Ha'e ramo xee Daniel ama'ẽ vy mokoõ ju aexa hi'aĩ va'e. Peteĩ ma yakã kyvõgua re, ha'e rā amboae ma hovaigua re hi'aĩ.

6 Ha'e kuery va'e regua peteĩ ma aipoe'i yy áry ava hi'aĩ va'e ajukue perirĩ'i py onhemonde va'e aexa va'ekue pe:<sup>†</sup>

— Raka'e tu ojeupity 'rā ha'e va'e nhomondyipaarā? — he'i.

7 Ha'e ramo yy áry ava hi'aĩ va'e ajukue perirĩ'i py onhemonde va'e ombovai rā xee aendu. Mba'eta yva re opo oiporu kuaa ha'e oiporu kuaa e'ŷa regua oupi vy oura raka'e rā peve oiko va'erā va'e rery rupi. Ha'e vy aipoe'i:

— Ha'e nunga oiko 'rā peteĩ ma'etŷ, ha'e gui mokoõ ma'etŷ ju, ha'e irundy ma'etŷa mbytea py. Iky'a e'ŷ va'e kuery po'akaa ombovaipa ma jave mae ojeupity 'rā ha'e nunga ha'e javi — he'i.<sup>‡</sup>

8 Ha'e rami xee aendu va'eri naendu kuaai. Ha'e vy xee aporandu:

\* 12:4 Apocalipse 10.4 py oĩ rami avi profeta kuery pe nomombe'u ukapaaai ayvu oendu va'ekue, ára novaëi teri ramo. † 12:6 “Ava ajukue perirĩ'i py onhemonde va'e” he'ia va'e ma Daniel oexa ma voi va'ekue (10.4). ‡ 12:7 Apy ma três anos e meio re ijayvu (Daniel 7.25 ha'e Apocalipse 12.14 py oĩ rami).

— Xeruvixa, opaa py ha'e nunga oiko ramo mba'exa tu 'rã oiko orere?

<sup>9</sup> Ombovai:

— Tereo Daniel, mba'eta pova'e ma nomombe'u porãavei 'rã ranhe. Omoõ porãa ma opaa ára peve guarã.

<sup>10</sup> Heta 'rã oiky'a'oa, omoxiña ha'e oeko a'ãa guive. Ha'e rã heko vai va'e kuery ma heko vaive tema 'rã, ha'e kuery va'e regua neĩ peteĩve noendu kuaai 'rã. Ha'e rã 'arandua rupi ikuai va'e ma oendu kuaapa 'rã.

<sup>11</sup> Ha'e rami avi mymba ko'ẽ nhavõ ome'ẽ jepiaty omombaa ma rire, ha'e ojeguarupy nhomokanhyarã omoña ma rire mil duzentos e noventa ára ju 'rã oaxa.

<sup>12</sup> Ovy'a ete 'rã amongue oarõ porãa rupi mil trezentos e trinta e cinco ára peve oupity va'e.

<sup>13</sup> Ha'e rã ndee ma tereo tema tape reikoa va'e rupi ae, opa peve. Mba'eta repytu'u 'rã, ha'e gui opaa ára py repu'ã ju 'rã ndevygua oĩ va'e rejopy aguã — he'i.

## Oséias ayvu oĩa Oséias ayvu oĩa

Profeta Oséias ayvu omombe'u jave ma hetarã kuery Israel regua ipo'akave ha'e heko vaive okuapy, mba'emo ra'angaa riveombojeroviaa py. Ha'e kuery pe Oséias ijayvu ojeko rerova aguã, Nhanderuete ombopaga e'ŷ aguã. Mba'eta nhanderekovaity jaeja vy Nhanderuete pe jajeko me'ẽ ramo nhanemboaxy vy ojee nhandereru ju 'rãe.

Ayvu py anho e'ŷ Oséias oikuua uka raka'e Nhanderuete nhomboaxy, ha'e ae oikoa py, Nhanderuete ojapo ukaague rami vy. Mba'eta "Oséias pe oayvu omombe'u uka aguã Senhor ijayvu ypy'i vy aipoe'i: 'Tereo, ndera'yxyrã eraa peteĩ kunha itavy rei va'erã, itavy reia rupi omemby oguereko va'erã, mba'eta pendeyvy re ikuai va'e Senhor gui opoipa vy itavy rei avi okuapy', he'i" (1.2). Ha'e ramo Oséias ha'e rami ojapo vy omenda rire ta'yxy itavy rei vy opoi ixugui.

Ha'e rami teĩ "Senhor aipoe'ive ju xevy: 'Teigue ju tereo, eayvu ju kunha neirũ oayvu va'ekue itavy rei teĩ. Senhor Israel kuery oayvua rami eiko, ha'e kuery nguuete ramigua pe mbojape uva pirukue revegua ome'ẽxe vai va'eri', he'i. Ha'e ramo xee ma xera'yxyrã ju ajogua. ... Ha'e vy ixupe aipoa'e: 'Ha'e gui ndee ma heta ára re teri 'rã xerarõ. Ndetavy reive eme, amboae ava reve eiko eme guive. Ha'e ramo xee voi roarõ 'rã aikovy', ha'e. Mba'eta Israel kuery voi heta ma'etõ re 'rã ikuai nguvixa e'ŷ re, opena va'e e'ŷ re, Nhanderuete pe mba'emo ome'ẽ e'ŷ re, ta'angaarã ita omopu'ã mbyre e'ŷ re, sacerdote pegua manto e'ŷ re, ha'e mba'emo ra'angaa oo rupi oguereko va'ekue e'ŷ re guive. Ha'e va'e rire ma Israel kuery ojevypa vy oeka 'rã okuapy Senhor nguuete ha'e Davi nguvixarã. Ha'e ramo vy opaa ára ha'e kuery oryryipa reve 'rã onhemboja jogueruvy Senhor re onhemboaxy uka vy" (3.1-2a, 3-5).

Profeta Oséias gua'yxy oayvu jevyague rami ae avi "Nhanderuete ma po rami oexa uka nhanderayvua: jajejavya rupi teri jaiko reve Cristo omano raka'e nhandere" (Romanos 5.8).

### *Oséias omenda aguã re ijayvuague Israel kuery ndojeroviaia oikuua uka aguã*

<sup>1</sup> Beeri ra'y Oséias pe SENHOR oayvu ombou va'ekue. Ha'e va'e ayvu ma Judá pygua huvixa kuery Uzias, Jotão, Acaz ha'e Ezequias ikuai jave ombou, Israel pygua huvixa Joás ra'y Jeroboão oĩ jave guive.

<sup>2</sup> Oséias pe oayvu omombe'u uka aguã SENHOR ijayvu ypy'i vy aipoe'i:

— Tereo, ndera'yxyrã eraa peteĩ kunha itavy rei va'erã, itavy reia rupi omemby oguereko va'erã, mba'eta pendeyvy re ikuai va'e SENHOR gui opoipa vy itavy rei avi okuapy – he'i.

<sup>3</sup> Ha'e ramo oo vy gua'yxyrã ojou Diblaim rajy Gômer. Ha'e rã ha'e va'e oguereko'i vy oikuavã peteĩ ava'i.

<sup>4</sup> Ha'e gui SENHOR aipoe'ive ju Oséias pe:

— Pemboery 'rã Jezreel, mba'eta are e'ŷ re ambopaga 'rã Jeú ramymino kuery Jezreel tetã py jouguy omoëague re.\* Ha'e ramo vy amomba 'rã Israel kuery re ipo'akaa.

<sup>5</sup> Ha'e va'e ára py amopẽmba 'rã Israel kuery rapa Jezreel katyi' i yvugua oĩ va'e py ae – he'i.

<sup>6</sup> Ha'e gui ta'yxy oguereko'i vy kunha'i ju oikuavã. SENHOR aipoe'i Oséias pe:

— Ha'e va'e ma pemboery 'rã Omboaxypy e'ŷ, mba'eta xee namboaxyvei 'rã Israel kuery, aperdoaa rupi ve'ŷ 'rã areko.\*

\* **1:4** Jezreel tetã py ma Jeú jojuka vy ojopy va'ekue Israel kuery re ipo'aka aguã (2 Reis 9.14-27). Ha'e gui Jeroboão versículo 1 py ijayvua ma Jeú ramymino. \* **1:6** 1 Pedro 2.10

**7** Ha'e rã Judá kuery ma amboaxy 'rã. Ha'e rami vy araa jepe 'rã xee SENHOR Tuuete po'akaa rupi ae. Guyrapa rupi e'ŷ 'rã araa jepe, kyxe rupi e'ŷ, joe opu'ãa rupi e'ŷ, kavaju rupi e'ŷ, neĩ kavaju árygua kuery rupi e'ŷ guive – he'i.

**8** Ha'e gui Omboaxypy e'ŷ nokambuvei ma jave oguerekju ava'i.

**9** Ha'e ramo SENHOR aipoe'i Oséias pe:

– Ha'e va'e ma pemboery 'rã Xevygu e'ŷ, mba'eta xevygu e'ŷ peẽ kuery pendekuai, ha'e xee voi Penderuete e'ŷ 'rã aiko.

**10** Ha'e rami avi Israel kuery ma ye'ẽ rembe rupi ita ku'i oĩa rami 'rã heta, mba'eta ita ku'i oa'ãa va'erã e'ŷ, neĩ oipapa kuaa va'erã e'ŷ guive. Ha'e gui “Peẽ ma xevygu e'ŷ” 'ea 'rãgue py “Nhanderuete oikove va'e ra'y kuery”, 'ea 'rã pãvy.\*

**11** Ha'e rami vy Judá ha'e Israel kuery reve ju 'rã nhomoirũmba. Petei'i 'rã omoĩ okuapy nguvixarã. Ha'e rami vy yvy pendekuaia gui peopa ju 'rã, mba'eta iporã vaipa 'rã Jezreel ára py.†

## 2

**1** – Ha'e gui penderyvy kuery pe “Xevygu kuery” peje 'rã, ha'e rã penereindy kuery pe ma “Omboaxypy” peje.

### *Ha'e kuery ndojeroviae tei Nhanderuete ojeroviap oikoa re ijayvuague*

**2** – Pendeayvu pendexy pe, pendeayvu ete ixupe, mba'eta xera'yxy ve'ŷ ma oiko, xee voi imeve'ŷ ma. Ha'e rami ajapo ojegui oipe'a aguã itavy reia, okã mbyte gui gueko vaia oipe'a aguã guive.\*

**3** Ha'e rami e'ŷ rã xee aeja 'rã ipire rei va'e, oiko ramo'i jave guare rami ae. Ha'e rami tekao e'ŷa rami amoingo 'rã, yvy piru reia rami ete ajapo 'rã yuvei py ajuka vy.

**4** Neĩ imemby kuery voi xee namboaxyi 'rã, itavy reia rupi ixy oguerekri rire.

**5** Mba'eta ixy ma itavy raka'e, ikuavãare gueko vaia rupi anho oiko. Ha'e rami vy aipoe'i: “Xee aa 'rã apena va'e kuery rakykue. Ha'e ramo ha'e kuery ma xevy pe ome'ẽ 'rã mbojape, yy, vexa'i rague, ajukue perirõ'i, azeite ha'e ay'u va'erã”, he'i.

**6** Ha'e rami tei xee ajoko 'rã hape rupi juu amoĩ vy. Hovai ajapo 'rã kora, tape oo aguã ojou e'ŷ aguã.

**7** Ha'e ramo opena va'ekue rakykue oo tei ndoupityi 'rã. Oeka tema tei ndojoui 'rã. Ha'e rami vy aipoe'i 'rã: “Aa 'rã, xeme ypya py ae ju ajevy, mba'eta aÿguia gui ha'eveve xevy guare”, he'i.

**8** Mba'eta ndoikuuai xee ae trigo, vinho, azeite ha'e nunga ome'ẽ va'ekuea. Ixupe guarã xee ae amboetave va'ekue prata ha'e ouro. Ha'e rã ha'e ma Baal ra'angaa pe rive ome'ẽ va'ekue.

**9** Ha'e nunga rupi xee ma trigo omono'õa ára, vinho ojapoa ára aju vy aipe'apa ju 'rã ixugui. Aipe'apa ju 'rã vexa'i rague ha'e ajukue perirõ'i, ha'e nunga opire reia ojao'i aguã ame'ẽ va'ekue.

**10** Aÿ ma oxõa aexa uka 'rã opena va'ekue oexaa py. Xepo gui avave rei ndogueraa jepei 'rã guive.

**11** Amomba 'rã ovy'aague ha'e javi, jaxy pyau nhavõ ngaru ojapo jepiague, sábado nhavõ ijatyague, ha'e ngaru oa'anga va'ekue ha'e javi.

**12** Ambovaipa 'rã ha'e kuery mba'e uvaty ha'e figoty aipoe'ia va'e: “Kova'e ma apena va'e kuery opaga vy xevy ome'ẽ va'ekue”, he'ia. Ha'e nunga ma xee ajapo 'rã ka'aguy rive, ha'e ramo ka'aguy regua mymba nharõ kuery ho'upa 'rã.

\* **1:10** Romanos 9.25-26    † **1:11** Tery Jezreel ma “Nhanderuete omoãi va'e” 'ea. Jypy ma Nhanderuete omoãimba ijyvy gui omoxõe vy, ha'e gui opaa py ma mba'emo ra'yigue nhamoãia rami ju omoãi 'rã heruvy omboetave aguã (2.22-23).    \* **2:2** “Pendexy” he'ia py ma Israel kuery re ae ijayvu vy.

13 Xee ambopaga 'rã Baal ra'angaa pe heakuã porã va'e oapy okuapyague re. Ha'e va'e jave ojere'i va'e ha'e ita hepykueve py onhembojegua vy opena va'e kuery rakykue oo. Ha'e rã xegui ma hexaraipa – he'i SENHOR.

14 — Ha'e rami teĩ ajapo 'rã xere ju ima'endu'a aguã rami. Ha'e rami vy tekao e'ÿa katy araa vy xeayvu porã'i 'rã opy'a py oendu va'erã re.

15 Ha'e gui ma ame'ẽ ju 'rã uvaty oguerekva'ekue ramigua. Ixupe Acor yvyugua ajapo 'rã peteĩ okẽ rami, ha'e va'e rupi oaxa vy oendu ju aguã oarõ oikovy aguã.<sup>†</sup> Ha'e ramo xererovy'a ju 'rã, kuhnataĩ jave Egito yvy gui oẽ jave guare rami.

16 Ha'e va'e ára ju xevy pe "Xeme" he'i 'rã, xevy pe "Baal" nde'ivei ma 'rã – he'i SENHOR.

17 — Mba'eta ha'e kuery juru gui anoẽmba 'rã Baal rery, hery re ima'endu'a ve'ÿ aguã rami.<sup>‡</sup>

18 Ha'e va'e ára ha'e kuery re ama'ẽ vy mymba ka'aguy re ikuai va'e ajapo 'rã ha'e kuery pe inharõ ve'ÿ aguã rami, guyra yvate rupi oveve va'e ha'e vixo yvy rupi onhembotyryry va'e guive. Ha'e gui ha'e kuery yvy gui ma aipe'a 'rã guyrapa ha'e kyxe oiporu pyre ha'e javi, joe opu'ãa ve'ÿ aguã. Ha'e rami vy xevygua kuery ajapo 'rã optytu'u okuapy aguã rami, mba'eve oiko e'ÿa py.

19 Xejee ae romomenda ju 'rã raka'e rã peve. Teko porã rupi roguerekva'romomenda 'rã xejee, ha'evea rami aikuua potaa py, roguerekva'porã'ia ha'e romboaxya rupi guive.

20 Ojeroviapy aikoa rupi 'rã romomenda xejee. Ha'e rami vy reikuua 'rã SENHOR aikoa – he'i.

21 SENHOR aipoe'i:

— Ha'e va'e ára py ma xee rombovai 'rã roayvu porã vy. Yva voi aroayvu porã rã omoingo porã ju 'rã yvy.

22 Ha'e gui yvy ju omoingo porã 'rã trigo, vinho ha'e azeite. Ha'e ramo ha'e nunga omoingo porã 'rã xevygua kuery Jezreel pygua kuery.

23 Mba'eta Israel kuery yvy jave rupi xee amoai 'rã mba'emo ra'yí rami, xevy guarã. Amboaxy aguã rupi e'ÿ ikuai va'ekue pe xee aexa uka ju 'rã amboaxya. "Xevygua e'ÿ" ha'e va'ekue pe aipoa'e 'rã: "Ndee ma xevygua ae!" Ha'e ramo ombovai vy "Ndee ma Xeruete!" he'i 'rã xevy.\*

### 3

#### *Nhanderuete nhomboaxy aguã re ijayvuague*

1 SENHOR aipoe'ive ju xevy:

— Teĩgue ju tereo, eayvu ju kunha neirũ oayvu va'ekue itavy rei teĩ. SENHOR Israel kuery oayvua rami eiko, ha'e kuery ma nguuete ramigua pe mbojape uva pirukue revogua ome'ẽxe vai va'eri – he'i.\*

2 Ha'e ramo xee ma xera'yxyrã ju ajogua, quinze hatã'i va'e prata guigua ha'e quinze vox cevada ame'ẽ vy.

3 Ha'e vy ixupe aipoa'e:

— Ha'e gui ndee ma heta ára re teri 'rã xerarõve. Ndetavy reive eme, amboae ava reve eiko eme guive. Ha'e ramo xee voi roarõ 'rã aikovy – ha'e.

4 Mba'eta Israel kuery ma heta ma'etõ re 'rã ikuai nguvixa e'ÿ re, opena va'e e'ÿ re, Nhanderuete pe mba'emo ome'ẽ e'ÿ re, ta'angaarã ita omopu'ã va'ekue e'ÿ re, sacerdote i-manto va'e e'ÿ re, ha'e mba'emo ra'angaa ngoo rupi oguerekva'ekue e'ÿ re guive.

<sup>†</sup> 2:15 Tery Acor ma "Jexavaia" 'ea. Yma Acor yvyugua py Israel kuery Egito gui ovaẽ jave ojejavvy ramo ombopaga'a raka'e (Josué 7.24-26). Ha'e rami teĩ aÿ ha'e va'e rupi oaxa jevy vy ojou 'rã oarõ va'e. <sup>‡</sup> 2:17 Tery Baal ma "Nhandererekoa" 'ea. Nhanderuete ndoiptavei ha'e va'e rery rupi ojapukai okuapy. <sup>\*</sup> 2:23 Romanos 9.25-26,

1 Pedro 2.10 <sup>\*</sup> 3:1 Apy ma Nhanderuete ijayvu Oséias gua'yxy ogueru ju aguã re, ha'e ae nhandererua rami avi jajejavvy va'eri. Gua'yxy escravo oikoague gui Oséias ojogua, nhande voi jejavya pe jaikoague gui Nhanderuete nhandejoguaague rami.

<sup>5</sup> Ha'e va'e rire Israel kuery ojevypa vy oeka ju 'rā okuapy SENHOR nguuite ha'e Davi nguvixarā. Ha'e rami vy opaa ára ha'e kuery oryryipa reve 'rā onhemboja jogueruvy SENHOR re onhemboaxy uka vy.

## 4

### *Israel kuery opa mba'e py ojejavya re ijayvuague*

<sup>1</sup> — Peē Israel kuery, pendu ke SENHOR ayvu, mba'eta SENHOR oguereko yvy regua kuery re oikuua pota aguā, mba'eta ha'e kuery re ma anhetē va'e noī, neī mborayvu, neī Nhanderuete oikuaxea guive.

<sup>2</sup> Ha'e kuery oguerovy'ave va'e ma oura rivea, apu, jojukaa, imondaa ha'e tavy reia rive. Ha'e rami vy joo oipe'a rive 'rā, ha'e jojuka vyve jojuka vyvoi ju 'rā.

<sup>3</sup> Ha'e nunga rupi ae ijyvy nda'evelei, hexe ikuai va'e voi ikangypa okuapy, mymba nhuūndy rupi ikuai va'e, guyra yvate rupi oveve va'e guive. Pira ye'ẽ rupi ikuai va'e voi omanomba.

<sup>4</sup> — Ha'e rami teī mava'eve ndoikuua potai, nanhomongetaai guive. Mba'eta peē kuery ma sacerdote kuery ojou vaipy rami pendekuai.

<sup>5</sup> Mba'eta ara py teī penhepyxanga 'rā, pendereve profeta kuery ikuai va'e voi onhepyxanga 'rā pyávy. Ha'e nunga rupi xee amomba 'rā pendexy.

<sup>6</sup> Xevyguia kuery ma hi'arandurā va'ekue noī ramo omombaa ma heravy. Ndee sacerdote, 'arandua reja rire xee ju roeja 'rā, xerenonde sacerdote reiko ve'ỹ aguā. Nderuete guigua lei gui nderexarai ramo xee voi xerexarai 'rā ndera'y kuery gui.

<sup>7</sup> Ha'e kuery heta-etave ovya ramive ma xerovai ojejavye tema 'rā oje'oivy. Ha'e nunga rupi ha'e kuery omboetepy ikuai 'rāgue py xee ajapo 'rā oxīmba aguā rami.

<sup>8</sup> Ha'e kuery ma xevyguia kuery ojejavya re rive 'rā onhemongaru, opa marā rei ikuai rā oexa vy rive 'rā ov'y'a.

<sup>9</sup> Ha'e nunga rupi heta va'e kuery xee areko 'rā sacerdote kuery arekoaa rami avi. Mba'eta mokoīve ambopagapa 'rā heko vaiague re, ame'ẽ 'rā ikuaiague repy ae.

<sup>10</sup> Ha'e ramo ha'e kuery okaru teī naevyatāi 'rā. Itavy reia rupi ikuai va'eri ndaetave ovyi 'rā, SENHOR ombojeroviaa gui ojepe'apa rire.

<sup>11</sup> Mba'eta ha'e kuery itavy reia, vinho ha'e vinho pyau re oka'upa reia oipe'apa hi'arandua.

<sup>12</sup> Xevyguia kuery oporandu 'rā yvyra ra'ykue oguereko va'e pe rive, ha'e ramo yvyra ipo'i'i va'e ju ombovai 'rā. Nhe'ẽ imbotavy reia pe onhembotavy uka vy Nguuite gui hexaraipa okuapy itavy reia rupi.

<sup>13</sup> Yvy'ã yvate va'e-va'e rupi rive 'rā ome'ẽ okuapy mba'emo, heakuā porā va'e voi oapy 'rā yvy'ã-vy'ã'i rupi, yvyra carvalho, choupo ha'e terebinto ikuai va'e guy rupi guive, kuaray'ã porā rei ramo rive. Ha'e nunga rupi ae penderajy kuery itavy rei okuapy, pendera'y ra'yxy kuery voi.

<sup>14</sup> — Ha'e rami teī penderajy kuery ma xee nambopagai 'rā itavy reia re, neī pendera'y ra'yxy kuery guive. Mba'eta avakue ae oje'oi 'rā kunhague tavy rei reve itavy rei aguā, ha'e kuery regua reve mba'emo ome'ẽ 'rā ta'angaa pe. Ha'e rami vy hi'arandu e'ỹ va'e kuery ma okanhy aguā katy oo.

<sup>15</sup> — Ha'e gui peē Israel kuery, pendetavy reia rupi tema peoxe teī tove Judá tojejavy eme ha'e nunga py. Too eme Gilgal py, too eme Bete-Áven py, neī ouraa rupi “ SENHOR oikove va'e rupi aura” te'i eme.\*

<sup>16</sup> Mba'eta vaka oja rovai opu'ã va'e rami Israel kuery opu'ã okuapy xere. Mba'exa 'rā tu ha'vy SENHOR omongaru herekovy nhuūndy tuvixave va'e rupi, vexa'i ra'y'i rami?

\* <sup>4:15</sup> Tery Bete-Áven ma “Jejavya ro” 'ea. Ha'e va'e tery py Betel “Nhanderuete ro” 'ea va'e re ijayvu, mba'eta ha'e katy'i huvixa omopu'ã rire vaka ra'y ra'angaa ha'e ombojerovia atyrā (10.5,8). Jaikuua porāve aguā jaexa avi 'rā 1 Reis 12.28-33 py.

<sup>17</sup> Mba'eta Efraim kuery ma ta'angaa pe rive onheme'ẽmba. Tove ta'ikuai.

<sup>18</sup> Ha'e kuery oka'upa rei vy itavy reia rupi ju 'rã ikuai. Yvatekueve voi oximba reia rupi rive ikuaxeve.

<sup>19</sup> Ha'e rami rire yvytu atã ogueraapa 'rã opepo py. Ha'e ramo oximba 'rã ta'angaa pe mba'emo ome'ẽague re.

## 5

### *Sacerdote kuery ha'e yvatekueve pe ijayvu atãague*

<sup>1</sup> — Sacerdote kuery, pendu ke. Israel kuery, pejapyxaka. Huvixave ro py pendekuai va'e, pejapyxaka avi. Mba'eta pova'e ayvu ma penderovai ae. Mispa tetã py nhuã pejayvy, ha'e Tabor yvyty áry rupi guyra'i mbo'aa ramigua peipyo.

<sup>2</sup> Opa marã pendekuaive peovy pavẽ gui. Ha'e rã xee rombopagapa 'rã ha'e nunga ha'e javi re.

<sup>3</sup> Aikuua Efraim kuery reko ha'e javi, Israel kuery nonhemi 'rã xegui. Mba'eta aŷ Efraim kuery, pendetavya py Israel kuery ha'e javi voi onhemongy'apa rei.

<sup>4</sup> Ha'e rami ikuai riae vy nda'eveei Nguuete pe ojevy aguã. Ha'e kuery mbyte nhe'ẽ imbotavyarã oĩ ramo ndoikuaavei okuapy SENHOR.

<sup>5</sup> — Israel kuery onhemboyvatea py ae onhemoĩ vai. Israel ha'e Efraim kuery ma ha'e kuery reko vaia re ae 'rã ho'a, Judá kuery voi ho'a avi 'rã ha'e kuery reve.

<sup>6</sup> Ha'e va'e kuery ma guymba kuery vexa'i ha'e vaka ome'ẽ va'erã reve 'rã oo SENHOR reka vy merami teĩ ndojoui 'rã, ha'e kuery gui ojepe'a ma rire.

<sup>7</sup> SENHOR pe e'ŷ ha'e kuery ikuia rupi kyrigue oguereco va'e omendaa py e'ŷ. Aŷ jaxy pyau re ngaru ojapoa py omokanhymbaa 'rã, ijyvy guive.

<sup>8</sup> — Tombopua mimby guaxu Gibeá py, Ramá tetã py voi tonhendu! Tojapukaia Bete-Áven py! Penheangu ke, Benjamim kuery!

<sup>9</sup> Efraim kuery opaga aguã ára py ivaipa ete 'rã. Israel kuery mbyte rupi aikuua uka ma mba'emo oiko va'erã.

<sup>10</sup> Judá regua yvatekueve ma yvy markaa oguerova rive va'e rami ikuai. Ha'e nunga rupi ha'e kuery áry anhoë 'rã xepoxya yy rami.

<sup>11</sup> Efraim kuery ambopaga rã ikuai axy, iporiaupa rei guive, ovare e'ŷ va'e re nda'eveia rupi ikuai rire.

<sup>12</sup> Ha'e nunga rupi amomba 'rã Efraim kuery vixo'i rami, Judá kuery guive hu'ügue rami 'rã amomba.

<sup>13</sup> Efraim kuery oikuua ombo'eaxy, ha'e Judá kuery voi oai vaikue oexa vy Efraim kuery ma Assíria katy oo. Ha'e pygua huvixave pe ojerure oipytyvõ aguã. Ha'e rami teĩ nomonguera kuaai imba'eaxygui, neĩ ijai gui guive.

<sup>14</sup> Mba'eta Efraim kuery amomba 'rã guary rami, Judá kuery guive amomba 'rã guary ra'y rami. Xee, xee ae amopẽmba, aejapa 'rã guive. Xee aipe'apa heravy ramo nda'ipoi 'rã xegui ogueraa jepea va'erã.

### *Anhetẽ rupi e'ŷ ojeko rerova okuapya re ijayvuague*

<sup>15</sup> — Ha'e rami vy xee aa ju 'rã aikoaty py ranhe apyta aguã, ha'e kuery ojejavya omombe'u vy xereka peve. Mba'eta ha'e kuery ojexavai vy xereka voi 'rã. Aipoe'i:

## 6

<sup>1</sup> “Peju, jajevy ju SENHOR pe. Mba'eta nhanemopẽmba teĩ nhanemonguera ju 'rã. Nhanemboaipa teĩ nhanepoano ju 'rã.

<sup>2</sup> Mokoï ára rire nhanemombaraete ju 'rã. Mboapy araa py ma nhanemopu'ã 'rã. Ha'e ramo teigue ju 'rã nhandekuai henonde rupi.

<sup>3</sup> Jaikuaa ke SENHOR, nhanhea'ã temaa jaikuaa ete peve. Mba'eta ou 'rã kuaray oua rami. Nhandere oguejy 'rã oky rami, ára pyau jave oky ou vy yvy omoaký va'e rami", he'i okuapy.

<sup>4</sup> — Efraim kuery, mba'e 'rã tu ajapo pendere? Ha'e vy peẽ Judá kuery, mba'e 'rã tu ajapo pendere? Mba'eta peẽ kuery ma ko'ëmba'i arai ojekuaa rive ouvy va'e rami xerayvu, ha'e yxapy ko'ë rai ramove ipirupa ovv yva'e rami guive.

<sup>5</sup> Ha'e nunga rupi xee roitypa 'rã profeta kuery ayvu py rive. Xejuru gui ayvu oẽ va'e py ae rojuka, rombopaga aguã ma hexakã va'e rami ojekuaa.

<sup>6</sup> Mba'eta xee aipota va'e ma penhomboaxya, mba'emo rive xevy pe peme'ẽ nda'ei. Mba'emo peapy reve peme'ẽa gui aipotave Nhanderuete peikuaa ete.\*

<sup>7</sup> — Ha'e rami teĩ ha'e kuery ma Adão rami ae avi nda'ikuaxei xereve guarã ajapo va'ekue rami. Xerovai ha'e kuery ikuai anhetẽ rupi e'ŷ.

<sup>8</sup> Mba'eta Gileade tetã ma heko vai va'e anho ikuaria, jouguy gui iky'apa guive.

<sup>9</sup> Sacerdote kuery voi ikuai tape rupi oguata ou va'e ojukaxe vy oma'ẽ mbegue va'e rami, mba'eta Siquém katy tape oo va'e py jojuka ma. Ha'e rami vy ojapo okuapy ojeguarupy.

<sup>10</sup> Peteĩ mba'e aexa nda'evei ete va'e Israel kuery ikuaria mbyte. Ha'e py oĩ Efraim kuery itavy rei okuapya. Ha'e va'e gui ma Israel kuery ha'e javi onhemongy'apa.

<sup>11</sup> Judá kuery, peẽ voi pendeayapaa 'rã.

## 7

### *Huvixa kuery ha'e yvatekueve ojejavvy okuapya re ijayvuague*

<sup>1</sup> — Xevygua kuery aipytyvõ ta ha'e Israel kuery amonguera ta nhavõ ojekuaa kuerei Efraim kuery ojejavva ha'e Samaria pygua kuery reko vai, mba'eta anhetẽ va'e rupi e'ŷ ikuai. Opy rupi imonda va'e anho ikuai, oka rupi voi jojuka va'e kuery imonda 'rã okuapy.

<sup>2</sup> Ha'e kuery opy'a py aipo nde'i: "Nhanderekvaia re Nhanderuete oikuaa pota 'rã", nde'i. Ha'e nunga rupi aŷ ha'e kuery ojapo vaia ae ojoko, xerenonde voi ojekuaapa.

<sup>3</sup> Ha'e kuery reko vaia anho rive 'rã huvixa oguerovy'a. Yvatekueve voi oguerovy'a rei okuapy ijapua.

<sup>4</sup> Itavy reia rupi meme ikuai. Mbojape apoa imbojyaty py omoendyague rami hakupa. Mba'eta omoendy ma vy omoapomo oiny jave omoendy ve'ŷ ranhe teĩ ha'eve mbojaperã ovu porã peve.

<sup>5</sup> Huvixave pegua ngaru oikoa ára py yvatekueve imba'eaxy rai okuapy vinho py oka'ua gui. Huvixa eteve voi onhemoirũ nhombojaru rei va'e kuery reve.

<sup>6</sup> Ha'e rã ha'e kuery opy'a re omoõ mbojape mbojyaty ramigua, joe oma'ẽ mbegue okuapy vy. Pyávy ipoxya opty'u teĩ kol'gue hendy ju 'rã tataendy rami.

<sup>7</sup> Ha'e kuery ha'e javi ma tata rami inhakã raku vy omomba nguvixa kuery. Ha'e ramo huvixa ikuai va'ekue omanomba. Ha'e rami teĩ peteĩve ma xevy pe ndojapukaai.

<sup>8</sup> — Ha'e gui ma Efraim kuery onhemoirũ 'rã okuapy amboae regua kuery reve. Mbojape ombojere e'ŷ re oexy pyre rami ndovarei.

<sup>9</sup> Imbaraetea ma amboae regua kuery ombovaipa teĩ ndoikuuai rei. Ijapte rupi hi'a xiimba ma teĩ ndoikuuai potai.

<sup>10</sup> Israel kuery onhemboyvatepa rei pavẽ oexaa py. Ha'e rami teĩ SENHOR Nguuete pe ndojeysi. Ha'e kuery re ha'e rami ete oiko teĩ ndoeka potai okuapy.

<sup>11</sup> Mba'eta Efraim kuery ma apykaxu ombotavy pyre rami ndoiko kuaai rei okuapy. Egito kuery pe oenoï 'rã onhepytyvõ uka vy, Assíria yvy katy avi 'rã oo.

<sup>12</sup> Ha'e katy oo ramo ha'e kuery áry rupi xee aipyo 'rã xekya, ambo'apa 'rã guyra yvate rupi oveve va'e rami. Ha'e rami vy ambopaga 'rã, ha'e kuery ijatya py ayvu aendu ukaague rami vy ae.

\* <sup>6:6</sup> Mateus 9.13, 12.7

13 Nda'evei ete 'rā ha'e kuery pe, xegui ojepe'a rire! Xere opu'ã rei rire hi'áry ho'a 'rā imombhaarā! Xee aepy 'rāgue teĩ xerovai ijapu okuapy.

14 Ngupa py onheno oupya py haxē rive okuapy teĩ opy'a py e'ŷ ojapukai xevy. Trigo ha'e vinho ojouxe vy onhemboaty, ha'e rā xere ma opu'ã rei 'rā okuapy.

15 Xee amo'arandu, amombaraete guive teĩ ijayvu vai 'rā xerovai.

16 Ha'e kuery ma Yvate ete va'ea katy e'ŷ ojevy. Guyrapa ikarẽ rive va'e rami ikuai. Ha'e nunga rupi ha'e kuery va'e regua yvatekueve ojukapaa 'rā kyxe py, onhemboyvatea rupi rei ijayvu rire. Egito yvy re oo teĩ ha'e pygua kuery ojojai rei 'rā okuapy.

## 8

### *Opagaa aguã ovaẽ rai maa re ijayvuague*

1 — Pemoĩ pendejuru py mimby guaxu! Mba'eta xee SENHOR pegua oo re hovaigua kuery ou oiny taguato rami,\* xereve guarã ajapo va'ekue rupi ha'e kuery nda'ikuaixei rire, xeguigua lei rovai rupi rive ikuai.

2 Xevy pe ojapukai vy “Oreruete! Ore Israel kuery ma ndekuaa va'e roiko”, he'i okuapy

3 teĩ Israel kuery omboyke ma iporã va'e. Ha'e nunga rupi ae hovaigua kuery ou hakykue.

4 Ha'e kuery ma nguvixaverã omoĩ teĩ xegui e'ŷ ojou. Nguvixa kueryrã omoĩ teĩ xee aikuua ukaa rupi e'ŷ. Ojeupeguia mba'emo ra'angaarã ojapo prata ha'e ouro gui. Ha'e ramia py onhemokanhy uka rive. he'ia

5 Samaria pygua kuery vaka ra'y ra'angaa omboete va'e ma xee ndajou porãi. Ha'e nunga rupi ha'e kuery rovai xepoxya hendy. Raka'e peve 'rā tu ha'e kuery ndojeky'a'o ukaxeí okuapy?

6 Mba'eta ha'e nunga ma Israel kuery rembiapo ae, hembiapo kuaa va'e ojapo va'ekue rive, xee e'ŷ aï. Ha'e ramo vaka ra'y ra'angaa Samaria py oĩ va'e omboa'ypaa 'rā.

7 — Yvytu ha'e kuery onhotŷ rire yvytu vaikue 'rā omono'õ. Ndoikoi 'rā mba'emo aju omono'õ aguã. Trigo rembypy gui ndoikoi 'rā iku'ikuerã. Ha'e rami e'ŷ vy oiko teĩ amboae guigua kuery ho'upa 'rā.

8 Israel kuery eteve voi ho'upaa. Aŷ ma voi amboae regua ikuiaia rupi ikuai ojou vaipy rami.

9 Mba'eta Assíria yvy katy ha'e kuery oo mburika yvy'ã regua ha'e ae'i oiko va'e rami. Efraim kuery opaga okuapy opena va'ety repyrã.

10 Ha'e rami avi ojereraa jepe ukaxe vy amboae regua ikuiaia rupi oo teĩ xee ae amboatypa 'rā. Huvixa ha'e yvatekueve omoingo axy rā mboapy'ive ma ovy.

11 Efraim kuery ojejavvyague re altar ojapo reta va'ekue ri ojejavvyve aguã ae ha'e nunga optyta.

12 Xapy'a rei xeguigua lei dez mil ayvu py xee ambopara va'e rire ha'e va'e pe “Mba'emo rei rive” he'i 'rāgue.

13 Ha'e kuery ojukaxe vai mymba xevy ome'ẽ aguã. Ha'e rami avi mymba ojuka 'rā xo'o ho'uxe vai vy rive. Ha'e kuery ho'u rā xee SENHOR ndajou porãi. Aŷ ma ha'e kuery reko vaia re aikuua pota vy ambopaga 'rā ojejavya re. Ha'e ramo ha'e kuery ma Egito katy ju 'rā ojevypa.

14 Mba'eta Israel kuery ma imoingoare gui hexarai vy ngoo tuvixa va'erã rive ojapo. Judá kuery voi heta-etave ojapo heravy guetã ikorapa va'erã. Ha'e rami teĩ ha'e kuery retã re xee ambou 'rā tata. Ha'e va'e tata ma oapypa 'rā oo guaxu ha'e kuery ojapo va'ekue.

## 9

### *Israel kuery ombopagaa maague re ijayvuague*

\* **8:1** “Taguato rami ou va'e” he'ia ma Assíria pygua kuery re ijayvu vy.

<sup>1</sup> Israel kuery, pevy'a eme, amboae kuery rami e'ŷ pevy'a eme. Mba'eta pendetavya py pejep'e'a Penderuete gui. Peipotave va'e ma pendetavya repy mba'emo ra'yigue ojykyaty ha'e javi rupi pejopy va'e.

<sup>2</sup> Ha'e rami avi nda'evei pekaru riae aguã mba'emo ra'yigue ha'e vinho re rive. Mba'eta opa 'rã vinho pyau.

<sup>3</sup> Napendekuai riae 'rã SENHOR pegua yvy re. Ha'e rami 'rãgue py Efraim kuery ma Egito katy 'rã ojevy. Assíria yvy re voi ho'u 'rã okuapy ha'eve'ŷ va'e imongy'aarã.

<sup>4</sup> Ha'e py ma SENHOR pe napenhoëvei 'rã uva rykue. Mymba kuery ixupe peme'ẽ va'e voi ndoguerovy'ai 'rã. Mbojape pe'u va'e ma ipy'a vai va'e rembi'u, ha'e va'e re okaru va'e ma ha'eve'ŷ va'e 'rã ikuai. Ha'e va'e mbojape ma peñ kuery ae 'rã pe'u, mba'eta SENHOR pegua opy peme'ẽ aguã nda'evei.\*

<sup>5</sup> Mba'exa tu pejapo 'rã SENHOR pegua ngaru ojapoa ára py, ha'e penhemboatya ára ojeupity jave?

<sup>6</sup> Mba'eta imombaarã ou va'e gui penetarã kuery oopa va'eri Egito pygua kuery ju 'rã ombo'apa. Ha'e rami vy Mênfis tetã py 'rã ojatypaa. Prata guigua hepykueve ha'e kuery oguereko va'ekue ma pynondy mbyte rive 'rã opyta. Ha'e kuery rekoague rupi ma juu rive 'rã ikuai.

<sup>7</sup> Ovaë ma ha'e kuery re oikuaa potaa ha'e opaga aguã ára. Ha'e nunga oiko rã Israel kuery oikuaa 'rã. Israel kuery, pendeko vai riae ha'e joe napendea'evei ete vy profeta kuery pe "Oikuaa e'ŷ rei va'e" peje, ha'e avakue Nhe'ë oña va'e pe "Inhakã porã e'ŷa va'e" peje.

<sup>8</sup> Mba'eta ore profeta kuery ma Efraim kuery reko re ijayvu va'erã oremoña va'ekue, Xeruete rami ae avi. Ha'e rami teñ ore kuery roo aguã ha'e javi rupi omoña guyra'i mbo'aa ramigua, Nguuete pegua opy rupi eteve voi ikuai ore kuery re opu'ã rei va'e.

<sup>9</sup> Opa mba'e py heta va'e kuery onhemongy'a Gibeá py ojapoague rami ae ju.<sup>†</sup> Ha'e kuery reko vaia re SENHOR oikuaa pota vy ombopaga 'rã ojeavyague re.

<sup>10</sup> SENHOR aipoe'i:

— Israel kuery ajou ypy vy uva rembypy tekao e'ŷa py ojou va'e rami arov'y'a raka'e. Peneramoñ kuery aexa vy figo'y hi'a ramo'i va'e ojou va'e rami raka'e. Ha'e rami teñ Baal-Peor ra'angaa katy ha'e kuery oopa vy ta'angaa imoxia pe rive ikuai. Ha'e rami vy ojeguarupy ikuai, ta'angaa omboete va'e rami avi.

<sup>11</sup> Mba'eta Efraim kuery mba'emo oguerovy'ave va'e ma guyra oveve va'e rami 'rã okanhymba vyvoi. Ndoikovei ma 'rã imembya, imemby ryru'i va'e, neñ kyrñ va'e oguereko'i va'e ma voi.

<sup>12</sup> Gua'y kuery omongakuaa teñ xee aipe'apa 'rã, neñ peteñve ava oikove aguã rami e'ŷ. Ha'e kuery gui ajepe'a ramo nda'evei ete 'rã ha'e kuery pe!

<sup>13</sup> Xee anhembopy'aague rami vy Tiro tetã rami Efraim tetã voi iporâvea py mba'emo renhoñ onhoty mbyre rami oñ. Ha'e rami teñ gua'y kuery ae Efraim kuery ogueraa 'rã ojukaa aguã katy — he'i.

<sup>14</sup> Ha'e nunga rupi SENHOR, eme'ẽ ha'e kuery pe ... mba'e tu ha'evea rami reme'ẽ 'rã? Ejapo ha'e kuery imemby e'ŷ va'erã, ha'e ikãry e'ŷ va'e ikuai aguã rami.

<sup>15</sup> SENHOR aipoe'i:

— Gilgal py ha'e kuery heko vai okuapy rã ha'e py aendu ndaxea'eveia. Ha'e kuery ojapo vai rei okuapy ramo aipe'apa 'rã xevygua oo gui, ndayvuvei ma 'rã guive. Ha'e kuery va'e regua yvatekueve ma xenhe'ẽ rendu e'ŷ va'e meme.

<sup>16</sup> Efraim kuery ma imba'eaxy okuapy, mba'emo renhoñ hapo guive ipirupa va'e rami ikuai. Ndai'avei ma 'rã. Gua'y kuery, guajy kuery oguereko teñ hyru'i pyve xee ajuka uka 'rã, oayvuve va'e voi — he'i.

\* <sup>9:4</sup> Ha'e rami ijayvu mba'eta amboae yvy re escravo-rã ogueraa ague py jipoi 'rã Nhanderuete pegua oo, ha'e py mba'emo ome'ẽ aguã. † <sup>9:9</sup> Gibeá py ojapo va'ekue mba'emo vai ete (Juízes 19-21).

<sup>17</sup> Xeruete xeretarā kuery nonhe'ẽ renduvei ramo oejapa 'rā. Ha'e ramo oguata rei va'e rami 'rā ikuai yvy regua ikuaia rupi.

## 10

### *Israel kuery mba'emo vai onhoty rire imombhaarā omono'õ aguā re ijayvuague*

<sup>1</sup> — Israel kuery ma uva rembypy porā hi'a riae va'e rami ikuai va'ekue. Ha'e rami teī hi'a retaa rami heta avi ojapo altar. Ha'e kuery yvy iporâvea rupi heta-etave tema omopu'ã avi ita ombojerovia aguā.

<sup>2</sup> Ha'e kuery ma anhetē rupi e'ŷ ipy'a va'e. Ha'e nunga rupi ipo ky'a va'e ikuai. Altar ojapo va'ekue SENHOR omopêmba 'rā, oitypa avi 'rā ita ombojerovia atyrā ojapo va'ekue.

<sup>3</sup> Ha'e rami teī aŷ ha'e kuery aipoe'i: “SENHOR renonde jajererokyjea rupi e'ŷ nhan-dekuai rire ndajarekovei huvixave. Ha'e gui nhanderuvixa oĩ va'e rire mba'exa ha'vy nhanepytyvõ 'rāgue?” he'i okuapy.

<sup>4</sup> Ayvu rive rupi ijayvu: oura rive 'rā okuapy, amboae regua reve nhopytyvõ aguā ojapo guive. Ha'e nunga rupi joekokue re oikuaa pota va'e oiko jepi, mba'ety rupi mba'emo rogue jojukaarā oikoa rami avi.

<sup>5</sup> — Bete-Áven py Samaria pygua kuery vaka ra'y ra'angaaomboete va'ety oipe'aa ramo okyjepa rei 'rā okuapy.\* Iporā etea okanhya ramo ixupe guare kuery ojae'o 'rā, ta'angaa pegua sacerdote kuery voi oryryipa 'rā okuapy.

<sup>6</sup> Vaka ra'y ra'angaa oipe'aa vy heraa 'rā Assíria yvy katy huvixave pe ome'ẽ va'erā. Ha'e ramo Efraim kuery oendu 'rā oximbaa anho, Israel kuery oximbā 'rā ha'e kuery oipotaa rami rive ikuai rire.

<sup>7</sup> Oipe'aa avi 'rā Samaria pygua huvixa, yy áry yvyra ra'ykue'i ogueroxyry heravy va'e rami.

<sup>8</sup> Áven tetā katy'i yvy'ã áry ombovaipaa avi 'rā ombojeroviaaty Israel kuery ojejavyaty. Ha'e py altar ojapo va'ekue áry ma jaia ha'e juutya anho 'rā ikuai. Ha'e ramo yvyty pe aipoe'i 'rā okuapy: “Oreao'il!” Ha'e yvy'ã-vy'ã pe ma “Pe'a ore'áry!” he'i avi 'rā okuapy.<sup>†</sup>

<sup>9</sup> — Israel kuery, Gibeá py pejejavyague ára guive pejejavya re ae tema pendekuai. Ha'e rami rire Gibeá pyve e'ŷ 'rā teve penderupity heko vai va'e mbopagaarā?

<sup>10</sup> Mba'eta xee aipotaa rami ae 'rā anhombopaga. Mokoī rupi ha'e kuery ojejavy rire ambopaga ramo yvy regua ha'e javi 'rā ijaty ha'e kuery rovai.

<sup>11</sup> Mba'eta Efraim kuery ma vaka ra'y kunha ombo'ea pyre trigo oipiroa rupi ombo'eapoxe vai va'e rami ikuai va'ekue. Ha'e gui aŷ ijaju'y porāa re kanga amoī vy karóxa re amoxā 'rā Efraim kuery. Judá kuery voi oikaraī 'rā yvy, Jacó guigua kuery ha'e javi oikaraī 'rā heravy yvy atāa.

<sup>12</sup> Ha'e gui xee aipoa'e: “Mba'emo ra'yigue ramo pemoaī peikovy pendereko porārā, ha'e rami vy 'rāe pemono'õ penemboaxya. Peikaraī yvy pema'etŷague rupi e'ŷ. Mba'eta ovaẽ ma SENHOR peka aguā, ha'e ou vy oky rami pendere teko porā omboguejy peve”, ha'e va'ekue.

<sup>13</sup> Ha'e rami teī peē ma teko vai rive penhoty aguā yvy peikaraī rire teko vaia anho pemono'õ. Ha'e rami vy apua'a rive pe'u, mba'eta pendekaróxa re ae pejerovia vy, penderegua ipy'a guaxukueve re guive.

<sup>14</sup> Ha'e rami teī pendekuaia py voi onhendu 'rā joe opu'ã va'e. Ha'e rami vy oitypa 'rā peneretā ikorapa va'ekue ha'e javi, joe Salmā opu'ã vy Bete-Arbel tetā oitypaague rami avi. Ha'e jave py ma ixy kuery ojukapaa imemby kuery reve.

<sup>15</sup> Ha'ekue ramigua ae ju 'rā ojapoa peē Betel pygua kuery re voi, pendereko vaia tuvixa ramo. Ko'ẽ rai'i jave hexakāa oaxa ouvya rami avi ojukaa 'rā Israel pygua huvixa.

\* **10:5** Kova'e ayvu omombe'u porâve 4.15 py.    † **10:8** Ha'e rami ijayvu 'rā ojeayvua oendu vy (Lucas 23.30; Apocalipse 6.16).

## 11

### *Nhanderuete oayvu ete va'eri Israel kuery ndoikuaxeia re ijayvuague*

- <sup>1</sup> — Israel kyrī teri reve xee ayvu vy Egito yvy gui aenoī raka'e xera'y.\*
- <sup>2</sup> Ha'e rami aguā aenoīvea ramive ma ojepe'ave tema xegui. Ha'e rami vy Baal ra'angaa pe rive ome'ē okuapy mba'emo, heakuā porā va'e guive oapy ta'angaa ojapo pyre pe.
- <sup>3</sup> Ha'e ramive ma Efraim kuery xee ambo'e raka'e oguata aguā re, xejyva py aikuavā guive teī ndoikuua potai okuapy xee apena aikovya re.
- <sup>4</sup> Ha'e kuery aru raka'e ixā avakue oendu va'e nunga py, ayvua py ae. Ha'e kuery aju'y gui kanga oipe'a va'e rami aiko, ajero'a guive ho'u va'erā ame'ē aguā.
- <sup>5</sup> — Ha'e kuery ndojevyi 'rā Egito yvy katy. Ha'e rami 'rāgue py Assíria pygua ae 'rā huvinxarā, ndojeko rerovaxei rire.
- <sup>6</sup> Ha'e kuery retā re ou 'rā kyxe. Ha'e rami vy omopēmba 'rā okē jokoa, omomba ete 'rā, ha'e kuery oipotaa rami ae ikuai rire.
- <sup>7</sup> Mba'eta xevygua kuery ma xegui ojepe'a aguā rami ae ikuai. Yvate ete va'e pe ojapukai aguā re ombo'ea teī ae ma avave rei ndojapoi.
- <sup>8</sup> — Ha'e rami teī Efraim kuery, mba'exa tu 'rā xee roeja? Israel kuery, mba'exa tu 'rā romboaxa joupe? Mba'exa vy 'rā tu rojapo Admá e'ŷ vy Zeboim tetā re ajapoague rami teve? Xekuraxō omyī nhendu, xee romboaxya aendu xapy'a hendy va'e rami.
- <sup>9</sup> Ha'e rami vy xepoxya rupi ve'ŷ ma 'rā aiko. Efraim kuery, xee noromombavei ma 'rā, mba'eta xee ma Penderuete, ava e'ŷ aiko, Iky'a e'ŷ va'e aiko penembyte. Xepoxya rupi ndajuvei 'rā pendere.
- <sup>10</sup> — Ha'e va'e kuery oguata 'rā SENHOR rakykue rupi. SENHOR onhendu 'rā guary rami. Ha'e rami onhendu rā ta'y kuery oryryipa reve 'rā ou kuaray oikea katy gui.
- <sup>11</sup> Oryryipa reve 'rā ou Egito yvy gui, guyra'i rami, apykaxu rami 'rā ou Assíria gui. Ha'e ramo ajapo 'rā ngoo py ae ju ikuai aguā rami — he'i SENHOR.
- <sup>12</sup> — Efraim kuery xembojere va'ekue oapua rupi, Israel kuery nhombotavya aendu va'ekue joavaive rupi gui. Ha'e rā Judá ma Nguuete reve vy ipo'aka nho 'rā, ojeroviapy teri 'rā ikuai Iky'a e'ŷ va'e reve.

## 12

### *Jacó rekokue rupi Israel kuery ombo'eague*

- <sup>1</sup> Efraim kuery ma yvytu re rive onhemongaru, ára pukukue re oo 'rā yvytu kuaray oikea katy guigua rakykue rive. Ijapu ha'e nhomombave tema ovu. Ha'e rami vy Assíria kuery reve ojapo nhopytyvō aguā, Egito katy guive ogueraa azeite.
- <sup>2</sup> Judá kuery re voi SENHOR oguereco oikuua pota aguā. Ombopaga 'rā Jacó kuery heko vaia re. Ojapo vaiague repy ae 'rā omboaxa.
- <sup>3</sup> Mba'eta guyru'i py Jacó oī teri jave ojopy oiny guyke'y pya re. Ha'e gui tuja ha'e imbaraete ma vy Nhanderuete reve ju joguero'a.
- <sup>4</sup> Ha'e rami vy anjo reve joguero'aa py ipo'aka raka'e. Ojae'o reve ojerure omboaxy aguā re. Betel py ma ojou raka'e Nhanderuete. Ha'e ramo nhandereve Nhanderuete ijayvu raka'e ha'e py.\*
- <sup>5</sup> SENHOR Nhanderuete ixondaro reta va'e, SENHOR ae hery va'e.
- <sup>6</sup> Ejeko rerova Nderuete peguarā reiko aguā. Eiko mborayvu ha'e teko porā rupi. Ha'e vy earō riae Nderuete.
- <sup>7</sup> Ha'e gui Efraim kuery ma mba'emo vendea rupi ikuai. Opo py oguereco mba'emo opejaa jokorearā. Nhombojexavaia rupi anho ikuaxeve.
- <sup>8</sup> Ha'e rami teī aipoe'i: “Anhetē arekopa, heta ma ajogua rire. Ha'e rami aguā rami anho anhea'ā teī xere ndojouai teko vai, ajejavya noī”, he'i.

\* **11:1** Mateus 2.15   \* **12:4** Jacó Israel hery mboae va'e rekokue omombe'u Gênesis 28-31 py.

<sup>9</sup> — Ha'e rami ndeayvu teĩ xee ma SENHOR Nderuete, Egito yvy gui rogueruague ára guive. Teĩgue ju ajapo 'rã oo'i py reĩ aguã rami, ngarua ára javegua rami.

<sup>10</sup> Xeayvu ambou profeta kuery pe, mba'emo aexa uka jepi guive. Mba'emo re ambojaa rupi guive xeayvu amombe'u uka profeta kuery pe.

<sup>11</sup> — Gileade py ikuai ojejavy va'e, mba'eta ndovarei va'e meme ae. Gilgal py ikuai avi vaka ojuka reve ome'ẽ va'e, teĩ altar oguereko va'e ma mba'ety rupi ita omboaty pyre rami rive 'rã optyta.

<sup>12</sup> Jacó Israel hery va'e ma Assíria yvy katy ojava vy, peteĩ kunha re omba'eapo oikovy va'ekue. Hexe omenda aguã mymba kuery re opena oikovy va'ekue.

<sup>13</sup> Ha'e gui SENHOR ma peteĩ profeta pe oguenoẽ uka raka'e Israel kuery Egito yvy gui, profeta pe guive opena uka ha'e kuery re.

<sup>14</sup> Ha'e rami teĩ Efraim kuery ma ombopoxy vaipa. Ha'e nunga rupi ha'e kuery re SENHOR oeja 'rã jouguy omoẽ va'ekue opaga aguã, ojapo 'rã guive ha'e kuery re ae ju joapo vaiague ojeapa aguã rami.

## 13

### *Nhombopaga aguã re ijayvuague*

<sup>1</sup> — Efraim ijayvu ramo oryryipaa va'ekue, Israel kuery voi omboetepa va'ekue. Ha'e rami teĩ Baal ra'angaa pe olkoa rupi onhemongy'a vy omano raka'e.

<sup>2</sup> Aÿ ma ha'e kuery ojejavyve tema oje'iviy. Ha'e rami vy prata oguereko va'e ryku gui ojapo 'rã ta'angaa, mba'emo ra'angaa ha'e kuery ojapo oíkuua rami rive. Ha'e nunga ha'e javi ma avakue ojapo kuaa va'e rembiapo rive. Ha'e gui ma joupe-upé "Peme'ẽ mba'emo ha'e nunga pe", he'i 'rã okuapy. Ha'e ramo avakue oova rayvu 'rã okuapy vaka ra'y ra'angaa!

<sup>3</sup> Ha'e nunga rupi ha'e kuery okanhy 'rã ov yvy aje'ive'i arai ojekuaa va'e rami, yxapy ko'ëmba'i ramove ipirupa vyvoi va'e rami, mba'emo pirukue oka gui omomboa rive va'ekue, ha'e hataxí janela rupi oẽ ovya rami.

<sup>4</sup> Ha'e rã xee ma SENHOR Nderuete, Egito yvy re pendekuaia ára guive. Ha'e nunga rupi amboae tuuete ramigua ndapeikuuai 'rã xee e'ÿ vy, mba'eta xee e'ÿ vy pendereraa jepea ndoikoi.

<sup>5</sup> — Xee roikuaa raka'e tekao e'ÿa py, yvy piru reia py.

<sup>6</sup> Nhuũ ikuaia ja ma ha'e kuery hevyatãmba. Ha'e gui hevyatãmba vy onhemboyvate opy'a py. Ha'e rami vy xegui hexaraipa okuapy.

<sup>7</sup> Ha'e rami rã xee ma guary rami 'rã ajekuaa uka ha'e kuery pe, xivi ipara va'e tape py oma'ẽ mbegue oiny va'e rami.

<sup>8</sup> Urso kunha ta'y'i re imondaa pyre rami avi xee ha'e kuery aro'a vy amondoropa 'rã ipy'a ryru guive. Guary rami amokõmba 'rã ha'e py, inharõ va'e ka'aguy rupi ikuai va'e omboa'ypaa rami avi.

<sup>9</sup> Israel kuery, pekanhy aguã ma pendegui ae ou, ha'e rã peo jepe aguã ma xeguigua anho.

<sup>10</sup> Mamo tu aÿ penderuvixa oĩ, peneretã ha'e javi rupi pendereraa jepe aguã? Ha'vy pendererekao kuery, ha'e kuery pe "Pejou nhanderuvixaverã ha'e yvatekueve va'erã kuery" pejeague va'e?

<sup>11</sup> Ha'e ramo penderuvixaverã ma xepoxya rupi ambou raka'e, ha'e gui xepoxya rupi ae ju xee aipe'a.

<sup>12</sup> — Efraim kuery reko vaiague ma ojokuaa ma imoiny, ojejavyague regua oĩa ma omoĩ porãmbaa avi.

<sup>13</sup> Ha'e kuery re ou 'rã kunha kyrĩ va'e oguereko rai'i rã haxya ramigua. Ta'y hi'arandu e'ÿ va'e ikuai, guyru'i gui hexakãa py noẽ kuaai va'e rami avi, itui'i aguã ovaẽ ma teĩ.

<sup>14</sup> Xee araa jepe 'rã tata ogue'ŷ va'e po'akaa gui, aepy 'rã manoa gui. Ndee manogue, mamo tu oĩ renhomingo axy aguã? Ha'vy ndee tata ogue'ŷ va'e, mamo tu oĩ renhomomba aguã? Teĩve henda py xee ndaexai anhomboaxy aguã.\*

<sup>15</sup> Guyvy kuery gui ha'e kuery imbaraeeteve teĩ kuaray oikea katy gui ou 'rã yvytu SENHOR-a guigua. Tekoa e'ŷa gui ou vy omombirupa 'rã ijyvy re yakã ikuai va'e, omombirupa 'rã yvu ha'e py. Oipe'a ukapa 'rã guive mba'emo porã omoĩ porãaty py oguereko va'ekue.

<sup>16</sup> Samaria pygua kuery re oĩ 'rã ojejavyague re opaga aguã, Nguuete rovai opu'ã rire. Ha'e kuery ho'apa 'rã kyxe py, ta'y kuery omboa'ypaa 'rã, ha'e ta'yxy kuery imemby ryru'i va'e rye oipe'ãa 'rã guive.

## 14

### *Joperdoa aguã re ijayvuague*

<sup>1</sup> — Israel kuery, pejevy ju Penderuete pe, mba'eta pejejavya ae pendereity.  
<sup>2</sup> Pejeko rerovaa rupi pendeayvu reve pejeko me'ẽ SENHOR pe. Aipopeje: “Embogue ke rojejavya ha'e javi ha'e oremovaẽ porã ju, mba'eta vaka ra'y 'rãgue py ayvu orejuru py roguereko va'e rome'ẽ ndevy.

<sup>3</sup> Assíria kuery ma ndorereraa jepei 'rã. Kavaju áry ore ndoroovei 'rã ha'e katy. Orepo py rojapo va'ekue pe 'Ndee ma oreruete' ndoro'evei 'rã guive. Ndere anho tyre'ŷ kuery ojou 'rã imboaxyarã", peje.

<sup>4</sup> — Ha'e rami rã xee romonguera 'rã pejeroviaa rupi e'ŷ pendekuaiague gui. Xejegui ae roayvu ju 'rã, mba'eta peẽ kuery pe xepoxyague oaxapa ma.

<sup>5</sup> Israel kuery pe xee aiko 'rã yxapy rami. Ha'e rami vy amoingo porã 'rã yvoty lírio rami, ha'e Líbano regua yary rami avi hapove ovu aguã rami.

<sup>6</sup> Ha'e rami vy hakã ipukupave 'rã ovu, oliva'y rami ete 'rã iporã, ha'e Líbano regua yary rami 'rã heakuã porã.

<sup>7</sup> Ha'e gui ma Israel kuaray'ã py oguapy va'ekue ojevypa ju 'rã. Mba'emo aju rami 'rã ikuai porã ju, ipotypa ju 'rã uva rakã rami avi. Uva rykue Líbano guigua rami oikuaa pavẽ 'rã.

<sup>8</sup> — Ha'e gui Efraim kuery, mba'e tu xee areko mba'emo ra'angaa reve? Pendeayvua xee aendu vy apena 'rã pendere. Yvyra pyau rami xee aiko, mba'eta xere anho oĩ pendekuai porã aguã.

### *Opa vy ijayvuague*

<sup>9</sup> — Hi'arandu va'e kuery toikuaa kova'e nunga. Oiko kuaa va'e kuery toikuaa avi. Mba'eta SENHOR reko ma tape hi'yvi porã va'e meme. Ha'e va'e rupi anho 'rã heko porã va'e kuery oo. Ha'e rã heko vai va'e kuery ma ho'apa 'rã ha'e py.

---

\* **13:14** 1 Coríntios 15.55

## Joel ayvu oĩa Joel ayvu oĩa

Judá yvy re tuku-karu ou vy nhuũ ha'e ojou va'e tema ho'upa, yakã voi omombirupa ramo mymba kuery omanomba yuvei gui. Profeta Joel oikuua rã ha'e rami ae 'rã oiko araka'eve rã Nhanderuete ojejavvy rei va'e kuery ombopaga ramo. Ha'e va'e ára pe ma "Senhor ára" he'i. "Ha'e va'e ára ma ha'e rami ete 'rã! Mba'eta ovaẽ rai'i ma Senhor ára. Mba'emo mbovaipaa rami 'rã ou Ipo'akapa va'e gui" (1.15). "Ha'e va'e ára ma pytãmba 'rã, arai huãmba rei 'rã. Yvyty áry ko'ẽ jekuua ouvya rami avi ou 'rã peteĩ regua heta ha'e imbaraete ete va'e. Ha'e ramigua ma yma guive oiko e'ŷ va'ekue teri, neĩ ha'e va'e rire voi ndoikovei 'rã, ikuai jevy-jevy va'e pe voi. Ha'e kuery renonde oo oiny tata nhomombaarrã, ha'e rã hakykue ma tataendy joapy va'e ou. Henonde ma Éden yvotatty rami yvy itui, ha'e rã hakykue ma yvy mbovaipaa. Avave rei ndoo jepeai 'rã" (2.2-3).

Senhor aipoe'i avi: "Araka'eve rã avakue ha'e javi re anhoẽ 'rã imbouvy Xenhe'ẽ. ... Yva ha'e yvy re aexa uka 'rã nhomondyipaarrã: tuguy, tata ha'e hataxí. Senhor ára opa mba'e py nda'evei va'e ou ra ramo kuaray pytãmba 'rã, ha'e rã jaxy ma tuguy rami 'rã ojekuua. Ha'e ramo ha'e javi Senhor rery rupi ojapukai va'e oo jepe 'rã" (2.28a, 30-31a).

### *Tuku-karu ha'e nda'okyveia pukukue gui ikuai axypaa re ijayvuague*

- <sup>1</sup> Ayvu SENHOR guigua Petuel ra'y Joel pe ombou va'ekue.
- <sup>2</sup> Peẽ tujakue, pendu povae. Nhandeyvy re pendekuai va'e, pejapyxaka pavẽ. Oiko ma pa ha'e ramigua pendekuai jave? Tyrã pa penderu kuery ikuai jave oiko?
- <sup>3</sup> Pemombe'u ha'e nunga pendera'y kuery pe, ha'e pendera'y kuery ju tomombe'u gua'y kuery pe, ha'e gui ta'y kuery jevy pe guive.
- <sup>4</sup> Mba'eta tuku mba'emo ayaa ndo'upai va'ekue ma tuku oguata va'e ho'u, ha'e tuku oguata va'e ndo'upai va'ekue ma tuku mba'emo 'ua ho'u, ha'e gui tuku mba'emo 'ua ndo'upai va'ekue ma tuku mba'emo mbovaipaa ho'u.\*
- <sup>5</sup> Peka'u rei va'e, pemyí ke, ha'e pejae'o. Vinho pey'u peikovy va'e ha'e javi penhendu ratã vinho pyau káuxa, mba'eta pendejuru pyguarã va'ekue oipe'aa.
- <sup>6</sup> Mba'eta xeyvy rovai guarã ou oiny peteĩ regua imbaraetekue mbovy e'ŷ va'e. Haĩ ma guary raĩ rami, guary kunha rami ete haĩ apĩ va'e.<sup>†</sup>
- <sup>7</sup> Xeyvy re ha'e kuery ombovaipa uva rembypy onhotŷ mbyre, figo'y guive omomba. Oipiropa vy ipirekue rive omombo yvy re, rire hakã ha'e javi ma ojepiropa rei va'e optya.
- <sup>8</sup> Pejae'o ke kunhatai'i voxvaikue py onhemonde reve omerã va'ekue kunumi re ipy'a vai va'e rami.
- <sup>9</sup> Ha'e gui SENHOR pegua oo py nda'ipovei mba'emo aju ha'e mba'emo rykue peme'ẽ 'rã va'ekue, rire SENHOR rembiguai sacerdote kuery voi iporiaupa rei okuapy.
- <sup>10</sup> Mba'ety ikuai va'e ivaipa, yvy ipirupa oiny guive, mba'emo aju ivaipa, uva rembypy ipirupa, ha'e oliveira'a hu'ãmba.
- <sup>11</sup> Mba'ety rupi peiko va'e, peximba ke. Ha'e uva re pepena va'e, penhendu ratã, trigo ha'e cevada re guive, mba'eta okanhymba ma pemono'õ 'rã va'ekue.
- <sup>12</sup> Uva rembypy ikuai va'e ipirupa, figo'y na'iporãvei, romã rogue, pindo ha'e maçã 'y voi. Yvyra yvy re ikuai va'e ha'e javi ipirupa. Ha'e va'e gui noïvei ma avakue ra'y kuery ov'y'a aguã.

\* **1:4** Apy ijayvu irundy regua tuku ha'e py ikuai va'e re. Ha'e nunga ombovaipa ha'e kuery yvy, ho'upa mba'emo rogue, uva rogue, ha'e yvyra pire guive. Nhanderuete ombou ojejavvy re, raka'eve rã SENHOR ára py mba'emo vai ombou va'erã rami avi.    † **1:6** "Guary rami haĩ va'e" he'ia ma tuku-karu re ijayvu vy, mba'emo 'ua ramo.

<sup>13</sup> Sacerdote kuery, penhemonde ke ajukue voxā guigua py, ha'e pejae'o. Penhendu ratā, altar rupi pemba'apo va'e. Xeruete ropy rupi pendekuai va'e ha'e javi ke peju. Voxā guigua py penhemonde pytū mbukukue re, mba'eta Nhanderuete pegua oo py mba'emo aju ha'e mba'emo rykue ndogueruavei ramo.

<sup>14</sup> Pavē pe pendu ukapa okaru e'ŷ re ikuai aguā, pejapo nhemboaty iky'a e'ŷ va'e, penoimba yvatekueve ha'e nhandeyvy re ikuai va'e ha'e javi SENHOR Nhanderuete ropy oupa aguā. Ha'e gui pejapukai SENHOR pe.

<sup>15</sup> Ha'e va'e ára ma ha'e rami ete 'rā! Mba'eta ovaē rai'i ma SENHOR ára.<sup>‡</sup> Mba'emo mbovaipaa rami 'rā ou Ipo'akapa va'e gui.

<sup>16</sup> Pexaa py e'ŷ ri ty'y pe'u 'rā va'ekue okanhymba? Ha'e Nhanderuete ro gui voi ndoipe'aai 'rā ri ty'y javy'aa ha'e mby'a porā?

<sup>17</sup> Mba'eta mba'emo ra'yīgue ma ipirupa oiny yvy guýry. Mba'emo moī porāaty ivaipa, mba'emo pemono'ō va'ekue moī porāaty ho'apa, pemono'ō 'rā va'ekue okanhymba ramo.

<sup>18</sup> Nhuū nda'ipovei rā vaka kuery iporiaupa okuapy, penerymba kuery ha'e javi nda'evevei rei ikuai. Vexa'i kuery voi okanhymba oje'oivy.

<sup>19</sup> SENHOR, ndevy pe ajapukai, mba'eta nhuūndy ikuai va'e ma tata oapypa, yvyra voi tata omotapyīmba.

<sup>20</sup> Yy ipirupa rā ha'e javi mymba'i nhuūndy rupigua onhe'ē rei okuapy ndevy pe ipoaē vy, ha'e nhuūndy ikuai va'ekue tata omomba rire guive.

## 2

<sup>1</sup> Pemonhe'ē ke mimby guaxu Siāo py, pemonhendu atā xevyguā yvyty áry. SENHOR ára ou oiny ramo toryryipa yvy re ikuai va'e, mba'eta ovaē rai'i ma.

<sup>2</sup> Ha'e va'e ára ma pytūmba 'rā, arai huūmba rei 'rā. Yvyty áry ko'ē jekuaa ouvya rami avi peteī regua ou 'rā heta ha'e imbaraete ete va'e. Ha'e ramigua ma yma guive oiko va'ekue'ŷ teri, neī ha'e va'e rire voi ndoikovei 'rā guive, ikuai jevy-jevy va'e pe voi.

<sup>3</sup> Ha'e kuery renonde oo oiny tata nhomombaarā, ha'e rā hakykue ma tataendy joapy va'e ou. Henonde ma Éden yvotyty rami yvy itui, ha'e rā hakykue ma yvy mbovaipaa. Avave rei ndoo jepeai 'rā.

<sup>4</sup> Ha'e kuery jaexa rā kavaju rami ojekuaa. Kavaju joe opu'āa rupigua rami ete onha oje'oivy.

<sup>5</sup> Omoparāgue rei jogueruvy karóxa kavaju regua rami. Yvyty áry rupi oaxa, ombopororo-roro 'rā jogueravy ka'aguy okai vy opororo-roroa rami, avakue heta vaipa ete joe opu'ā aguā katy oje'oi va'e rami avi.

<sup>6</sup> Henonde ma yvy regua okyjepa, hova xiīguepa rei 'rā guive.

<sup>7</sup> Ha'e kuery ma ipy'a guaxukueve rami 'rā onha. Avakue joguero'aa py ikuai va'e rami 'rā ojeupi tetā ikuai va'e kora áry. Peteī-teī oje'oi 'rā guape rupi ae, hyxy jogueravya gui ndojepai 'rā.

<sup>8</sup> Nanhomoanha-anhai 'rā guive, peteī-teī ma oo aguā va'ekue rupi ae 'rā oo. Ndopyta rive-rivei 'rā tape rupi.

<sup>9</sup> Oje'oi pojava 'rā tetā re opu'ā vy. Onha 'rā kora áry rupi, ojeupi 'rā oo ikuai va'e oipe'axe vy, imonda va'e rami 'rā oike janela rupi.

<sup>10</sup> Ha'e kuery renonde yvy oryryi 'rā, yva omyī 'rā guive. Kuaray ha'e jaxy pytūmba 'rā. Jaxy-tata voi naendyvei 'rā.

<sup>11</sup> SENHOR ma guembiguai kuery heta raxa ikuai va'e renonde ijayvu ratā 'rā. Mba'eta ijayvua rupi ikuai va'e ma ipo'aka ete. Tá, SENHOR ára ma ipoyi ete 'rā, ivaikue raxa 'rā guive! Mava'e tu ogueropo'aka 'rā?

<sup>‡ 1:15</sup> Apy "SENHOR ára" he'ia py ma raka'eve rā SENHOR nhombopaga aguā re ijayvu vy (Ezequiel 30.1-3; Joel 2.1-2; Amós 5.18-20; Obadias 15-17; Sofonias 1.7-18; 2 Pedro 3.10-13).

*SENHOR nhomboaxy rupi ijayvuague*

**12** Ha'e rami teĩ SENHOR aipoe'i:

— Aŷ'i ma voi pejeko rerova pendepy'a ha'e javi py, xevyguia eterā. Pekaru e'ŷ re pendekuai, pejae'o ha'e penhemboaxy rei reve.

**13** Pemondoro pendepy'a, pendeao e'ŷ — he'i. Ha'e rami vy pejeko rerova SENHOR peguarā. Mba'eta nhomboaxy kuaa ha'e poroayvu va'e oiko. Nda'ivai rive-rivei 'rā, nhanderayvu ete ha'e mba'emo vai gui ojejoko va'e.

**14** Xapy'a rei ma nhandere SENHOR ojevy vy ndojapovei 'rā ojapo 'rā va'ekue, ha'e rami 'rāgue py oeja 'rā nhanemoingo porāarā, ha'e ramo mba'emo aju ha'e mba'emo rykue teĩgue ju jajou aguã SENHOR Nhanderuete pe nhame'ẽ va'erā.

**15** Ha'e nunga rupi mimby guaxu pemonhe'ẽ Sião py, peikuua uka aguã pekaru e'ŷ re pendekuai ha'e nhemboaty iky'a e'ŷ va'e pejapo aguã.

**16** Pemboaty ke heta va'e kuery ha'e javi, peiky'a'o ukapa guive onhemboaty va'e. Pemono'õ tujakueve, pemboaty pendera'y kue'iry, okambu'i va'e guive. Tou ava omenda ramo va'e, ta'yxy voi toẽ ouvy opy ja'o oĩague gui.

**17** SENHOR rembiguai sacerdote kuery avi tojae'o templo rokẽ ha'e altar mbyte rupi ikuia py. Tojerure po rami: “SENHOR, emomba ukaeme ndevyguia kuery. Emboaxa eme ndevyguia kuery ija'e e'ŷ va'e pe ojojai rei aguã, amboae regua kuery ‘Mamo tu Penderuete oĩ?’ he'i e'ŷ aguã”, te'i.

**18** Ha'e rami rā SENHOR oexa uka oyvy re opena porāa, ojeupegua kuery omboaxy ju guive.

**19** Ha'e rami vy ombovai vy aipoe'i ha'e kuery pe:

— Ne'ixa, pendevy ambou 'rā mba'emo aju, uva rykue ha'e azeite. Ha'e va'e gui penerevyatā ju 'rā. Peẽ kuery noromboaxavei 'rā amboae regua kuery pe pendejoiar rei aguã.

**20** Ha'e rā kuaray ijapu'a'ia katy gui xondaro kuery ou va'ekue ma peẽ kuerya gui aipe'apa ju 'rā mombyry. Peteĩ yvy piru reia katy 'rā amondouka, teko a e'ŷa re. Henon-deveguia kuery amondouka 'rā kuaray oua katy ye'ẽ oĩ va'e re, ha'e rā hakykueguia kuery ma ye'ẽ kuaray oikea katy 'rā. He'ögue ma heakuã vaikue 'rā, xepo'akaa rupi roepy rire — he'i.

**21** Ha'e nunga rupi ndee yvy, ekyjeve eme. Evy'a ha'e eĩ porā, SENHOR mba'emo porā ete ojapo ramo.

**22** Ha'e mymba nhuñdy rupi pendekuai va'e, pekyjeve eme mba'eta nhuñ iporãmba ju 'rā teko a e'ŷa rupi, yvyra ikuai va'e voi hi'apa ju 'rā, figo ha'e uva voi hi'a porãmba 'rā.

**23** Peẽ Sião pygua kuery, pevy'a avi ke, perovy'a SENHOR Penderuete, mba'eta ombo'oky ju 'rā ha'evea rupi. Ha'ekue rupi ae ju 'rā ombo'oky pema'etý jave, ha'e gui henhoimba jave guive.

**24** Mba'emo ra'yigue ykya ma tynyẽ ju 'rā trigo, ha'e mba'emo ryru ikuai va'e tynyẽmba 'rā uva rykue ha'e azeite.

**25** — Pendevy amboekovia 'rā ma'etý oaxa va'ekue py tuku oguata va'e ho'upa va'ekue, ha'e tuku mba'emo mbovaipaa, tuku mba'emo ayaa ho'u va'ekue guive, mba'eta xevyguia xondaro kuery penderovai ambou va'ekue meme.

**26** Ha'e ramo pekaru porā ju 'rā penevyatãmba peve. Ha'e rami vy perovy'a 'rā SENHOR Penderuete rery, pendererekoo porā ramo. Ha'e va'e rire xevyguia kuery nomoximbaavei ma 'rā.

**27** Ha'e gui peikuua 'rā Israel kuery mbyte aĩa, ha'e xee SENHOR Penderuete aikoa, mba'eta ndoikoi amboae. Ha'e ramo xevyguia kuery nomoximbaavei ma 'rā raka'e rā peve.

*Nhe'ẽ Ky'a E'ŷ omboaguã re ijayvuague*

<sup>28</sup> — Araka'eve rã avakue ha'e javi re anhoẽ 'rã imbouvy Xenhe'ẽ. Ha'e ramo pendera'y ha'e penderajy kuery ijayvu 'rã xegui. Kakuaakueve ma oexa ra'u 'rã mba'emo, ipyaukueve pe voi aexa uka 'rã.

<sup>29</sup> Tembiguai kuery avakue ha'e kunhague re voi ambou 'rã Xenhe'ẽ ha'e va'e ára.

<sup>30</sup> Yva ha'e yvy re aexa uka 'rã guive nhomondyipaarã: tuguy, tata ha'e hataxã.

<sup>31</sup> SENHOR ára opa mba'e py nda'evei va'e ou ta ramo kuaray pytãmba 'rã, ha'e rã jaxy ma tuguy rami 'rã ojekuaa.

<sup>32</sup> Ha'e ramo ha'e javi SENHOR rery rupi ojapukai va'e oo jepe 'rã. Sião yvyty re ha'e Jerusalém tetã py ikuai 'rã oo jepe va'e, SENHOR ijayvuague rami. Okuave va'e ha'e javi 'rã ikuai SENHOR oenoĩ va'ekue.\*

### 3

#### *Ngovaigua kuery Nhanderuete ombopaga aguã re ijayvuague*

<sup>1</sup> — Ne'exa, ha'e va'e ára, ha'e va'e jave ma ambopyau ju 'rã Judá ha'e Jerusalém pygua kuery ikuiaia.

<sup>2</sup> Amono'õmba avi 'rã ha'e javi regua, ajapo 'rã Josafá yvyugua py oguejypa aguã rami. Ha'e py ma ambopagapa 'rã xevygua kuery káuxa, mba'eta xevygua Israel kuery ha'e kuery omoaõmba rire amboae regua ikuiaia rupi, xeyvy guive jomeme omboja'o-ja'o va'ekue.

<sup>3</sup> Xevygua kuery re ha'e kuery oexa okuapy va'ekue oxortea. Avakue'i ha'e kuery omboekovia itavy rei va'e re, ha'e kunhague'i ma vinho oy'u va'erã re rive omboekovia va'ekue.

<sup>4</sup> Tiro ha'e Sidom pygua, ha'e Filístia pygua ha'e javi, mba'e tu perekoxereve? Pepu'âxe ri ty'y xere? Ha'e ramo are'ý re xee ajapo 'rã pendevaia peneakã re ae ju ojeapa aguã rami.

<sup>5</sup> Mba'eta peraa va'ekue xevygua prata ha'e ouro. Xemba'e iporãgue voi templo perekoxa'ekue pemoi,

<sup>6</sup> ha'e Judá ha'e Jerusalém pygua kuery ma peráta re pevendepa va'ekue grego kuery pe, oyvy gui mombyry ikuai aguã rami.

<sup>7</sup> Ne'exa, xee arupa ju 'rã pemboaxaague gui. Ha'e vy pendevaia ajapo 'rã peneakã re ae ju ojeapa aguã rami.

<sup>8</sup> Pendera'y kuery ha'e penderajy kuery ju amboaxa 'rã Judá regua kuery pe. Ha'e gui ha'e va'e kuery ju ome'ẽ 'rã sabeu kuery mombyry raxa ikuai va'e pe, SENHOR ae ijayvu rire.

<sup>9</sup> — Peikuaa uka povae nunga amboae regua kuery pe: “Pemombe'u joe pepu'â aguã, penoõmba ipy'a guaxukueve. Ha'e ramo avakue joe opu'âa pygua tovaõmba, ha'e toõmba ju oje'oivy.

<sup>10</sup> Yvy karaña perekoxa'ekue pejapo kyixerã, ha'e mba'emo 'ygue gui pejapo hu'yrã. Tove ikangy va'e 'Xee ma xembaraete va'e', te'i.

<sup>11</sup> Ijyvýry pendekuai va'e ha'e javi, pejapura pejuvy, penhemboatypa”, peje.

Ha'e gui SENHOR, ha'e py embou avi ke ndeguigua ipy'a guaxukueve.

<sup>12</sup> — Topu'â yvy regua kuery, Josafá yvyugua katy toupa. Mba'eta ha'e py ma xee aguapy 'rã ainy yvy regua kuery ambopaga aguã.

<sup>13</sup> Pejopy pavẽ ke foice, mba'ety ijajupa ma ramo. Peju, pepyrõ, mba'eta uva rykue oubiriatiy py tynyẽ ma hi'a, hyru ikuai va'e tynyõmba guive, ha'e kuery ojejavvyague tuvixa ete rire.\*

\* <sup>2:32</sup> Kova'e ayvu rupi ijayvua Pentecostes ára py (Atos 2.1-21, 38-40). Ha'e gui “SENHOR rery rupi ojapukai va'e oo jepe 'rã” he'ia ma Romanos 10.12-13 py omombe'u porâve avi. \* <sup>3:13</sup> Ha'e va'e jave py ha'e kuery oubiri 'rã uva opyrõ vy. Ha'e rami avi apy ijayvu Nhanderuete nhombopaga aguã re (Apocalipse 14.14-20).

<sup>14</sup> Ha'e gui heta-etave 'rã ou yvyugua ombopagaa aguã katy! Mba'eta SENHOR ára ovaẽ rai'i ma yvyugua nhombopaga aguã py.

<sup>15</sup> Kuaray ha'e jaxy pytumba, jaxy-tata voi naendyvei.

<sup>16</sup> Ha'e gui SENHOR ijayvu atã 'rã Sião gui, Jerusalém gui oendu uka 'rã. Ha'e ramo yva ha'e yvy oryryipa 'rã. Ha'e rami tei SENHOR oiko 'rã ixupegua kuery onhemí atyrã, Israel kuery pegua oo imbaraete va'e 'rã oiko.

<sup>17</sup> — Ha'e ramo mae peikuaa 'rã xee SENHOR Penderuete aikoa, ha'e xevyguia yvyty iky'a e'ý va'e Sião py aí va'ea. Ha'e gui Jerusalém tetã nda'iky'avei 'rã. Ha'e rupi ndoaxavei ma 'rã amboae regua.

### *Israel kuery omoingo porã ju aguã re ijayvuague*

<sup>18</sup> — Ha'e va'e ára ma yvyty ikuai va'e gui oxyry 'rã oiny uva rykue. Yvy'ã áry gui oxyry avi 'rã kamby. Ha'e ramo Judá regua yakã ha'e javi tyguaxupa 'rã. Ha'e gui SENHOR pegua oo gui yy oxyry ouvy vy omoakýmba 'rã Sitim yvyugua ha'e javi rupi.

<sup>19</sup> Ha'e rã Egito yvy ma ombovaipaa 'rã, Edom voi yvy piru reia oejapa pyre 'rã opyta, Judá regua kuery jukaa rupi ikuaiague re, oyvy re huguy omoë rire mba'e re'ý tei.

<sup>20</sup> Ha'e rã Judá yvy ma hekoa riae 'rã, Jerusalém tetã voi, ta'y jevy-jevy ikuai peve.

<sup>21</sup> Xee anhombopaga 'rã huguy omoëague nambopagai teriague re — he'i, mba'eta SENHOR oiko 'rã Sião py.

## Amós ayvu oĩa

## Amós ayvu oĩa

Amós ma vexa'i re openaa rupi oiko jave ixupe Nhanderuete oayvu ombou Israel kuery peguarã, mba'eta ha'e va'e kuery heko vai ete ramo Nhanderuete ombopaga aguã rami oiko. Ha'e kuery heko porã merami rive va'e vy ha'eve'ÿa rami joguerek, nhomboaxy 'rãgue py jokorepa. Ha'e rami nhandekuaia Senhor ndojou porãi vy nhanembopaga 'rã. "Senhor onhendu atã 'rã Sião gui, Jerusalém tetã guive oendupaa aguã ijayvua. Ha'e ramo nhuündy vexa'i re openaaty overepa 'rã, Carmelo yvyty apyte peve 'rã ipirupa", he'i (1.2).

Marã rami tu ha'vy nhandekuai aguã re profeta ijayvu? "Peka ke mba'emo porã peikove aguã, mba'emo vai nda'e. Ha'e ramo 'rãe Senhor oiko peẽ kuery reve, aipopejeaty rami ae. Pejeguaru ke mba'emo vai gui, perovy'a iporã va'e anho. Ha'evea rami pota ke pejoguerek tetã rokë py. Ha'e ramo José ramymino kuery pekuave'i va'e, xapy'a rei Senhor Nhanderuete ixondaro reta va'e penemboaxy nho 'rã" (5.14-15).

### *Yvy regua kuery rovai ijayvuague*

<sup>1</sup> Kova'e ayvu ma Amós pe mba'emo oexa ukaa rupi ombou pyre. Ha'e va'e ma Tecoa tetã pygua, vexa'i re opena va'ety kuery va'e regua. Israel kuery reko re ijayvu Judá pygua huvixa Uzias ha'e Joás ra'y Israel pygua huvixa Jeroboão oĩ jave, mokoĩ ma'etÿ teri yvy oryryi aguã oata jave guive.

<sup>2</sup> Ha'e gui ma aipoe'i: SENHOR onhendu atã 'rã Sião gui, Jerusalém tetã guive oendupaa aguã ijayvua. Ha'e ramo nhuündy vexa'i re openaaty overepa 'rã, Carmelo yvyty apyte peve 'rã ipirupa.

<sup>3</sup> Po rami SENHOR ijayvu:

— Mboapykue, irundykue Damasco pygua kuery ojapo vaiague re nambopaga e'ÿvei ma 'rã, mba'eta ferro guigua py ha'e kuery omou'ÿmba rire Gileade pygua kuery.

<sup>4</sup> Ha'e nunga rupi amboja 'rã tata Hazael ro re. Ha'e rami vy oapypa 'rã Ben-Hadade ro tuvixa va'e ha'e javi.\*

<sup>5</sup> Amopẽmba 'rã Damasco kora rokë jokoa. Amomba avi 'rã Biqueate-Áven ikuai va'e, Bete-Éden re opena va'e guive. Ha'e gui Síria pygua kuery escravo-rã ogueraapaa 'rã Quir katy – he'i SENHOR.

<sup>6</sup> Po rami SENHOR ijayvu:

— Gaza pygua kuery ju mboapykue, irundykue ojapo vaiague re xee nambopaga e'ÿvei ma 'rã, tetã re ikuai va'e ha'e javi escravo-rã ogueraapa rire Edom pygua kuery po py omboaxapa aguã.

<sup>7</sup> Ha'e nunga rupi Gaza tetã kora re amboja 'rã tata oo tuvixakueve mbovaipaarrã.

<sup>8</sup> Amomba 'rã Asdode pygua kuery, Asquelom re opena va'e guive. Ha'e gui Ecrom rovai ju 'rã apu'ã xepo'akaa rupi. Ha'e ramo filisteu kuery rembyrekue omanomba 'rã – he'i SENHOR.

<sup>9</sup> Po rami SENHOR ijayvu:

— Tiro tetã pygua kuery ju mboapykue, irundykue ojapo vaiague re xee nambopaga e'ÿvei ma 'rã, ha'e kuery ma nhombo'a vy omboaxapa rire Edom pygua kuery po py. Na'ima'endu'ai okuapy joegua kuery reve ikuai porã aguã ojapo va'ekue re.

<sup>10</sup> Ha'e nunga rupi Tiro tetã kora re amboja 'rã tata oo tuvixakueve ikuai va'e mbovaipaarrã.

<sup>11</sup> Po rami SENHOR ijayvu:

---

\* <sup>1:4</sup> Hazaél ha'e Ben-Hadade ma Síria yvy regua huvixa ikuai raka'e. Ha'e kuery retã ma Damasco.

— Edom pygua kuery voi mboapykue, irundykue ojapo vaiague re xee nambopaga e'ŷvei ma 'rã, ha'e kuery ma guyvy kuery ae kyxé reve omonha rire, omboaxya noendui guive. Ha'e rami 'rãgue py opoxya anho oendu vy nhomboa'ypa tema, ha'e nunga anho oendu, raka'e rã peve guarã.

<sup>12</sup> Ha'e nunga rupi Temã tetã re amboja 'rã tata Bozra py oo tuvixakueve ikuai va'e mbovaipaarã.

<sup>13</sup> Po rami SENHOR ijayvu:

— Amom pygua kuery ju mboapykue, irundykue ojapo vaiague re xee nambopaga e'ŷvei ma 'rã, ha'e kuery ma Gileade pygua kuery memby ryru'i omondoropa rire oyvyrã ombotuvixave aguã rive.

<sup>14</sup> Ha'e nunga rupi Rabá tetã kora re amboja 'rã tata oo tuvixakueve ikuai va'e mbovaipaarã, joe opu'ã va'e ojapukaia reve, ára vai py yvytu vaikue ramigua.

<sup>15</sup> Ha'e ramo ha'e pygua huvixa heraa 'rã escravo-rã, hembiguai yvatekueve reve – he'i SENHOR.

## 2

<sup>1</sup> Po rami SENHOR ijayvu:

— Moabe pygua kuery voi mboapykue, irundykue ojapo vaipaague re xee nambopaga e'ŷvei ma 'rã, ha'e kuery ma Edom pygua huvixa kãgue oapypa rire, iku'ikue rive optya peve.

<sup>2</sup> Ha'e nunga rupi Moabe yvy re amboja 'rã tata, Queriote tetã py oo tuvixakueve ikuai va'e mbovaipaarã. Ha'e ramo Moabe pygua kuery omanomba 'rã yapu rei, tevovo rei ha'e mimby guaxu omonhe'ëa mbyte py.

<sup>3</sup> Ha'e kuery mbyte gui amomba 'rã joguerekao, ajuka ukapa avi 'rã ixupeguia yvatekueve ha'e javi – he'i SENHOR.

### *Judá kuery rovai ijayvuague*

<sup>4</sup> Po rami SENHOR ijayvu:

— Ha'e gui Judá kuery ju mboapykue, irundykue ojapo vaiague re nambopaga e'ŷvei ma 'rã, ha'e kuery ma SENHOR guigua lei rupi nda'ikuaikei vy ovapa rire ojapo uka va'ekue gui. Ha'e gui anhetë va'e rupi e'ŷ ombojeroviaa rupi ju onhembotavy uka okuapy, guamoñ kuery ikuaiague rami ae.

<sup>5</sup> Ha'e nunga rupi Judá re amboja 'rã tata, Jerusalém py oo tuvixakueve ikuai va'e mbovaipaarã.

### *Israel kuery rovai ijayvuague*

<sup>6</sup> Po rami SENHOR ijayvu:

— Ha'e gui Israel kuery ju mboapykue, irundykue ojapo vaiague re nambopaga e'ŷvei ma 'rã, mba'eta joguerekao kuery ma peráta re rive omoingo axy heko porã va'e, iporiaukue'i ombo'apa 'rã py regua repy re rive.

<sup>7</sup> Ha'e kuery ombojexavai 'rã iporiaukue'i oakã áry yvy ku'i omombo peve, ha'e oiko rive'i va'e pe omokarë tape. Ta'y peteñ kunhatañ ogueronheno va'ekue ae tuu ju 'rã ojopy. Ha'e rami vy omongy'a rive okuapy xerery iky'a e'ŷ va'e.

<sup>8</sup> Ha'e gui altar oĩ va'e yvýry onheno 'rã oupy ajukue nhomborevea rupi ojopy va'ekue áry. Nguuete ropy eteve voi oy'u 'rã okuapy vinho jokorepaa rupi oipe'a va'ekue.

<sup>9</sup> Ha'e rami teñ ha'e kuery renonde gui amomba va'ekue amorreu kuery yary rami yvate va'ekue teñ, yvyra carvalho rami imbaraete va'ekue. Amomba va'ekue yvy guy hapo oña guive hovapy rupi hi'a ikuaipe.

<sup>10</sup> Ha'e rami ae avi Egito yvy gui xee roquerupa vy quarenta ma'etý re roguereko va'ekue tekao e'ŷa rupi, amorreu kuery yvy re penderekao aguã.

**11** Pendera'y kuery va'e regua amoĩ va'ekue profeta-rã, ha'e peneramymino kuery ju amoĩ nazireu regua ikuai va'erã. Ha'e rami e'ŷ ri ty'y Israel kuery? — he'i SENHOR.\*

**12** — Ha'e rami teĩ nazireu kuery pe peẽ kuery pey'u uka vinho, ha'e profeta kuery pe pendeayvu vy "Pemombe'uve eme na ayvu", peje.

**13** Ha'e nunga rupi ne'exa, yvy amboryryipa 'rã peẽ kuerya rupi, karóxa mba'emo aju ojokuapaa rã tynyẽ vy ovava rei ovya rami.

**14** Peneakuãve va'e teĩ nda'evei 'rã pejava aguã, imbaraetekueve voi nda'evei 'rã ombaraetea rupi ikuai aguã, neĩ ipy'a guaxukueve ma voi ndoo jepei 'rã.

**15** Hapa va'e ma nopus'a kuaavei 'rã joe, ipojava va'e voi ndoo jepei 'rã, kavaju árygua eteve voi ndoo jepei 'rã.

**16** Ha'e va'e ára ma ojeroviakue ipy'a guaxukueve ikuai va'ekue ma opire rei reve rive 'rã onhamba — he'i SENHOR.

### 3

#### *Israel kuery ojapo vaia re ombopaga aguã re ijayvuague*

**1** Peẽ Israel kuery, pendu ke SENHOR penderovai ijayvu rã, Egito yvy gui pendererupa va'ekue ha'e javi avi. Ha'e vy aipoe'i:

**2** — Yvy regua kuery ha'e javi gui peẽ kuery anho'i aiporavo va'ekue ri rombopaga 'rã pejejavypa reia re.

**3** Ha'eve 'rã nda'u mokoĩ joupive oguata aguã jogueroayvu e'ŷ re?

**4** Xivi nda'u mba'eve ojou e'ŷ re ri okororõ rei 'rã ka'aguy rupi? Ha'e xivi ra'y nda'u guaity py ikuiaia py hevovo rei 'rã ri ho'u va'erã oguereko e'ŷ vy?

**5** Guyra'i nda'u yvy py rive ho'a 'rã ri nhuã'i ojayvya e'ŷ re? Nhuã yvy py oĩ va'e ov yxapy'a 'rã ri mba'emo ho'a e'ŷ re?

**6** Tetã rupi mimby guaxu omonhe'ea 'rã nda'u ha'e pygua kuery oryryipa e'ŷ re? Tetã re oiko 'rã nda'u mba'emo vai ete SENHOR ombou e'ŷ re?

**7** Mba'eta jaikuua porã SENHOR Nhanderuete mba'eve ndojapoi 'rã guembiguai profeta kuery pe ranhe onhemboypy'aa oikuua uka e'ŷ re.

**8** Xivi okororõ rã nda'u ndokyjeai 'rã? Ha'e SENHOR Nhanderuete oayvu ombou rã mava'e profeta nda'u nomombe'ui 'rã?

**9** — Pova'e nunga ke pendu uka Asdode py ha'e Egito yvy re hoo tuvixakueve ikuiaia rupi. Ha'e vy aipopeje uka 'rã: "Penhemboatypa ke pejogueruvy Samaria regua yvyty ikuai va'e áry. Ha'e vy pexa 'rã ha'e kuery hevovo rei ha'e nhomoingo axya rupi ikuai va'e."

**10** Mba'eta Israel kuery ma ndoikuuai ha'evea ramigua. Ha'e rami vy ha'e kuery ngoo tuvixa va'e py omoĩ porã 'rã jojukaa rupi ojou va'ekue, mba'emo mbovaipaa rupi guive — he'i SENHOR.

**11** Ha'e nunga rupi po rami SENHOR Nhanderuete ijayvu:

— Penderovaigua kuery peteĩ regua ojokopa 'rã pendeyvy. Ha'e rami vy penhemiaty ikorapa va'ekue oity vy oipe'apa 'rã heravy mba'emo pendero tuvixakueve py oĩ va'ekue.

**12** Po rami SENHOR ijayvu:

— Xivi juru gui vexa'i re opena va'e ogueraa jepe 'rã ipykue mokoĩve, ha'e'ŷ vy inambi apyreku'i, ha'e rami ae 'rã Israel kuery Samaria py ikuai va'e voi amongue'i oo jepe ngupa pêgue'i reve, e'ŷ vy okeaty ra'ykue'i rive.

**13** Pendu ke, ha'e pendeayvu Jacó kuery rovai — he'i SENHOR Nhanderuete ixondaro reta va'e.

**14** — Israel kuery ojejavyague re ambopagaa ára py ma Betel py altar ojapo va'ekue re avi 'rã aikuaa pota. Ha'e ramo altar apy ikuai va'e ojaya rã ho'apa 'rã yvy rupi.

\* **2:11** Nazireu ma Nhanderuete pe anho'i oiko aguã rami onhemboayvu va'ekue. Ha'e rami vy ndojayai 'rã o'a, ha'e ndoy'ui 'rã vinho (Números 6.1-12).

15 Aity 'rã oo yro'y jave ikuai aguã, kuaray aku pygua guive. Marfim gui oo ojapo pyre okanhymba 'rã, oo guaxu ikuai va'e ivaipa 'rã – he'i SENHOR.

## 4

### *Samaria pygua kunhague pe ijayvuague*

<sup>1</sup> — Vaka kunha Basã pygua rami Samaria yvyty re pendekuai va'e, pendu ke pova'e ayvu: Pereko axy rei iporiaukue'i, pemokanhy inhembyayi'i va'e, peneme kuery pe "Eruve na vinho jay'u aguã", peje guive.

<sup>2</sup> Ha'e nunga rupi SENHOR Nhanderuete oky'a e'ŷa rupi ae oura vy aipoe'i:

— Pendere ovaẽ 'rã ára pinda py rami tetã gui penerenoëmbaa heravy aguã, ha'e penerembyrekue ma pira renoëa py 'rã pendereraa.

<sup>3</sup> Peteĩ-teĩ peẽ 'rã peje'oivy tetã kora pa'ũ ikuai va'e gui. Ha'e rami teĩ Hermom katy 'rã penemombopaa – he'i SENHOR.

### *Israel kuery onhe'ẽ py ára revegua e'ŷ rami ikuiaia re ijayvuague*

<sup>4</sup> — Pejejavyxe vy tapeo ha'vy Betel py, Gilgal py voi peo pejejavyve aguã py rive. Ko'ẽ nhavõ peru mymba kuery peme'ẽ va'erã, ha'e mboapy ára rire kuerei 'rã Peru dízimo.\*

<sup>5</sup> Mbojape mbovua revegua Peru perovy'aa rupi peme'ẽ va'erã, pemombe'upa rive 'rã mba'emo peme'ẽxea'i py peme'ẽ va'e, mba'eta ha'e rami anho rive peikoxeve, peẽ Israel kuery – he'i SENHOR Nhanderuete.

<sup>6</sup> — Ha'e nunga rupi ae peneretã ikuai va'e rupi ajapo tembi'u pejou ve'ŷ aguã rami, penderekaoa nhavõ rupi mbojape oata ramo. Ha'e rami teĩ xevy peguarã ndapejeko rerovai – he'i SENHOR.

<sup>7</sup> — Ha'e rami rã mboapy jaxy re nambo'okyvei pende'áry, mba'emo pemono'õ aguã ára e'ŷ mbove. Amongue tetã rupi ambo'oky, ha'e rã amboae tetã rupi ma nambo'oky. Amongue mba'ety áry oky, ha'e rã amboae áry ma nda'okyi rã ipirupa.

<sup>8</sup> Mokoĩ, mboapy tetã pygua kuery pejogueraa tetã mboae py yy pey'uxe vy, teĩ nda'evei pey'u porã aguã. Ha'e rami ete teĩ ndapejeko rerovai xevy guarã – he'i SENHOR.

<sup>9</sup> — Xee romoingo axy va'ekue mba'emo rogue verepa ha'e imou'ũmbaarã ambou vy. Mba'emo rogue'i pereko va'e tuku ho'upa, uvaty, figoty ha'e oliveira-ty voi. Ha'e rami teĩ ndapejeko rerovai xevy guarã – he'i SENHOR.

<sup>10</sup> — Pendere ambou mba'eaxy Egito py pendu va'ekue ramigua. Pendera'y kuery avi ajuka uka kyxe py. Penerymba kavaju araa ukapa guive. Ha'e rami ete ajapo pendekuaia rupi heakuã vaikue peetã aguã rami. Ha'e rami teĩ ndapejeko rerovai xevy guarã – he'i SENHOR.

<sup>11</sup> — Penembyte gui amokanhy amongue, Sodoma ha'e Gomorra amokanhyague rami ae. Peẽ kuery ma tata gui tata'y oguenoë mbyre rami pepyta va'ekue ri ndapejeko rerovai xevy guarã – he'i SENHOR.

<sup>12</sup> — Ha'e nunga rupi peẽ Israel kuery, po rami 'rã rojapo. Ha'e po rami ete rojapo ta ma ramo peiko katu ke Penderuete pe pejexa uka aguã – he'i.

<sup>13</sup> Mba'eta Nhanderuete ae yvyty onhono va'ekue, yvytu omoingo, ha'e avakue pe oikuua uka opy'a re oĩ va'e ha'e javi. Ko'ẽ jave teĩ omopytũmba 'rã, ha'e yvyty áry rupi opyrõ 'rã ovu. SENHOR Nhanderuete ixondaro reta va'e ae hery va'e.

## 5

### *"Peka Nhanderuete peikove aguã", he'iague*

<sup>1</sup> Peẽ Israel kuery, pendu ke pova'e ayvu peẽ kuery re nda'eveia rupi xeayvu rã.

---

\* <sup>4:4</sup> Betel ha'e Gilgal py ha'e kuery ombojeroviaaty oĩ, teĩ Nhanderuete pe ikuaxea rupi e'ŷ oo ha'e py, onhemboeko porãxe vy rive.

<sup>2</sup> Mba'eta ho'a ma Israel kuery kunhataigue rami ikuai va'ekue, nopus'ā kuaavei ma guive. Oyvy re ae ho'a oupy, ha'e ndoikoi imbovyarā.

<sup>3</sup> Mba'eta po rami SENHOR Nhanderuete ijayvu:

— Tetā gui mil Israel regua joe opu'āa katy oje'oi teī cem ete'i ju 'rā ojevy, ha'e cem oo va'ekue regua ma dez ete'i 'rā ojevy.

<sup>4</sup> Ha'e gui po rami SENHOR ijayvu Israel kuery pe:

— Xereka ke peikove aguā.

<sup>5</sup> Peka eme mba'emo Betel py oī va'e, neī Gilgal ha'e Berseba katy ma voi tapeove eme. Mba'eta Gilgal pygua kuery ma ogueraapaa 'rā escravo-rā, Betel tetā voi ombovaipaa 'rā — he'i.

<sup>6</sup> Peka ke SENHOR anho peikove aguā. Ha'e rami e'ŷ rā José kuery ikuiaia py ou 'rā tata rami imokanhymbaarā. Ha'e va'e mboguearā ma ndoikoi 'rā Betel tetā py.

<sup>7</sup> Peē kuery ma ha'evea rami pejoguerekaoa gui pejep'e vy penhombojexavai, yvy py rive peity vy teko porā rupi pejoguerekaoa aguā va'ekue.

<sup>8</sup> Peka ke jaxy-tata Eixu ha'e Órion apoare, ha'e ko'ē ju aguā pytū reia oguerova va'e, ha'e pytū aguā ju ára oguerova va'e. Ha'e ma ye'ē ogueru vy yvy áry rupi ju onhoē va'e. SENHOR ma hery va'e.

<sup>9</sup> Ha'e ae ombou 'rā imbaraetekueve mokanhymbaarā, oo ikorapa va'e mbovaipaarrā guive.

<sup>10</sup> Ha'e rā peē kuery ma napenduxei tetā rokē py penemonetaa rā, anhetē rupi ijayvua rā pejou vai guive.\*

<sup>11</sup> Ha'e nunga rupi iporiaukue'i re pepyrōmba rei vy ha'e kuery pe trigo pendejeupe guarā ae peme'ē uka rire napeīvei 'rā penderorā ita gui pejapo va'ekue py, ndapey'uvei 'rā guive vinho uva porāgueve penhotŷ va'ekue guigua.

<sup>12</sup> Mba'eta xee aikuua mbovykue rei e'ŷ pendeko vai rā, opa marā rei pejejavy ramo guive. Mba'eta pembojexavai heko porā va'e, ha'eve'ŷa rami guarā pejopy peráta, ha'e tetā rokē py iporiaukue'i ojerure rā peē kuery napepenai.

<sup>13</sup> Ha'e nunga rupi oiko kuaa va'e kuery okyrirī 'rā, mba'eta kova'e ára nda'evei va'e.

<sup>14</sup> Peka ke mba'emo porā peikove aguā, mba'emo vai nda'e. Ha'e ramo 'rāe SENHOR oiko peē kuery reve, aipopejeaty rami ae.

<sup>15</sup> Pejeguaru ke mba'emo vai gui, perovy'a iporā va'e anho. Ha'evea rami pota ke pejoguerekaoa tetā rokē py. Ha'e ramo José ramymino kuery pekuave'i va'e, xapy'a rei SENHOR Nhanderuete ixondaro reta va'e penemboaxy nho 'rā.

<sup>16</sup> Mba'eta po rami SENHOR nhandererekaoa ijayvu, Nhanderuete ixondaro reta va'e:

— Tetā mbyte ha'e javi rupi onhendu 'rā ojae'o va'e. Tape ikuai va'e rupi "Ai! Ai!" 'ea 'rā. Ombo'eapo va'e kuery voi oenoīmbaa 'rā ojae'o aguā, ojae'o kuaa va'e kuery reve.

<sup>17</sup> Uvatty ha'e javi rupi ikuai 'rā ojae'o va'e, pendekuaia mbyte rupi aaxa ramo — he'i SENHOR.<sup>†</sup>

<sup>18</sup> Nda'evei ete 'rā SENHOR ára pearō va'e pe! Mba'erā tu pearō pekuapy SENHOR ára? Mba'eta ha'e va'e ára ma pytūmba rive 'rā, hexakā 'rā e'ŷ.

<sup>19</sup> Mba'eta oiko 'rā xivi gui ava onha rā urso ju ojoua rami, ha'e'ŷ vy ngoo py oike vy oo mbotya re opoko ho'amy ramo mboi oixu'ua rami.

<sup>20</sup> SENHOR ára ma hexakā aguā e'ŷ, pytū vaikue anho 'rā. Ha'e javi ete rupi pytūmba 'rā, hexakā va'e peteīve henda py ojekuaa e'ŷ re.

*"Nhanderuete oipota mba'emo nhame'ē 'rāgue py ha'evea rami ja joguerekaoa", he'iague*

<sup>21</sup> SENHOR aipoe'i:

\* <sup>5:10</sup> Ha'e kuery reko rami vy tetā rokē py huvixa kuery nhomoneta ha'e mba'emo re oikuua pota raka'e. † <sup>5:17</sup> Nhanderuete Egito pygua kuery ombopaga vy ha'e kuery mbyte rupi oaxa ovvy va'ekue, ha'e rā ojeupegua kuery áry rupi ma oaxa rive ogueraa jepe vy (Êxodo 12.12-13). Ha'e rā apy ma ijayvu Israel kuery mbyte rupi ombopaga vy oaxa aguā re.

— Xee ndajou porã; ajou vai ete ngaru pejapo pekuapya, peteñ henda py ma voi xevy guarã nhemboaty pejapo va'e ndarovy'ai guive.

<sup>22</sup> Xevy pe mba'emo peapy va'erã peru, mba'emo aju guigua guive teñ ha'e nunga xee ndarovy'ai, xereve peteñ rami pendekuaia regua mymba iporãgueve peme'ë teñ xee nama'ëi 'rã ha'e nunga re.

<sup>23</sup> Xee naenduxei peporaeia revovo rive, naendui 'rãe penembaraka pu.

<sup>24</sup> Ha'e rami 'rãgue py toñ ha'evea rami pejoguerekao yy oxyry va'e rami, toñ penderekoo porãa yakã oxyry riae va'e rami.

<sup>25</sup> Ha'e gui peñ Israel kuery, quarenta ma'etÿ re tekao e'ÿa rupi pendekuai jave py xevy pe teve peme'ë raka'e mymba ha'e mba'emo aju guigua?

<sup>26</sup> Mba'eta Sicute ra'angaa rive peraa va'ekue penderuvixarã, Quium ra'angaa, jaxy-tata ra'angaa guive penderueterã peñ ae pejapo va'ekue.

<sup>27</sup> Ha'e nunga rupi xee ma Damasco tetã rovai peve rogueraa ukapa 'rã escravo-rã – he'i SENHOR Nhanderuete ixondaro reta va'e hery va'e.\*

## 6

### *Israel kuery opa marã ikuaria re omokanhymba aguã re ijayvuague*

<sup>1</sup> Nda'evei ete 'rã Sião py ha'e kuery ae oipotaa rami ikuai va'e pe, Samaria tetã py mba'eve gui okyje e'ÿa rupi ikuai va'e pe voi. Peñ kuery ma omboetevepy pendekuai yvatekueve regua, peñ kuerya katy anho 'rã ou Israel kuery!

<sup>2</sup> Peaxa ha'vy Calné py pexa aguã. Ha'e gui ma tetã guaxu Hamate py ju tapeo, ha'e gui filisteu kuery rekao Gate py ju tapeo pexa pota. Ha'e va'e kuery rekao teve peñ kuery rekao gui iporãve? Ha'e kuery yvy teve pendeyvy gui tuvixave?

<sup>3</sup> Mba'eta peñ kuery ma “Ára vai novaë voi 'rã” peje teñ pejapo penembojexavai arã ovaë voi aguã rami.

<sup>4</sup> Peke pekuapy tupu marfim guigua áry, peneate'ÿ rei 'rã pejupy hi'áry. Pekaru 'rã vexa'i ha'e vaka ra'y iporãgueve ro'o re anho.

<sup>5</sup> Peporaei 'rã guive mbaraka pembojoguy reve. Davi rami ae pejapo mba'epurã pendejeupe ae.

<sup>6</sup> Vinho pey'u 'rã pekuapy karo iporã-porãve va'e py, ha'e pendejee peikyty 'rã azeite iporãve va'e. Ha'e rami teñ José regua kuery ojexavai rã pexa vy napemboaxyi.

<sup>7</sup> Ha'e nunga rupi ae aÿ peneranhe pendereraapaa 'rã escravo-rã ogueraa va'e kuery reve. Ha'e ramo ndoikovei 'rã peneate'ÿa rupi pekaru guaxua.

<sup>8</sup> Mba'eta SENHOR Nhanderuete ixondaro reta va'e guery rupi ae oura vy aipoe'i:

— Ambojeguaru Jacó kuery onhemboyvatepa reia, ajou vai ete ha'e kuery ro tuvix-akueve va'e ojapo rã. Ha'e rami vy napenavei 'rã hetã re, neñ ha'e py ikuai va'e re guive — he'i.

<sup>9</sup> Peteñ'i oo py dez avakue opyta teñ ha'e kuery voi omanomba avi 'rã.

<sup>10</sup> Ha'e gui xapy'a rei ovaë 'rã hetarã ae'i hetekue oapy aguã. Ha'e vy hetekue oka katy ogueraa aguã oupi vy oporandu 'rã opy rupi okuave va'e pe rei: “Oña pa ndee reve?” he'i rã ombovai vy “Noíavei” he'i ramo ixupe ju aipoe'i 'rã: “Ekyrirí ha'vy, ndeayvu eme SENHOR rery rupi”, he'i 'rã.

<sup>11</sup> Mba'eta ma'ë, SENHOR ojapo ukaague rami vy ombovaipaa 'rã oo guaxu ikuai va'ekue, omboa'ypaa avi 'rã oo kyrí'i va'e.

<sup>12</sup> Itaova áry rupi nda'u kavaju kuery onha 'rã? Ha'e rami e'ÿ vy vaka kuery nda'u yvy oikaraí 'rã ri ha'e rupi? Ha'e rami teñ peñ kuery ma pejoguerekoo porã 'rãgue py peme'ë veneno, ha'e teko porã 'rãgue py penhombojexavai.

<sup>13</sup> Peñ kuery ma Lo-Debar tetã peity vy pevy'a rei va'ekue. Aipopeje avi: “Nami ma Carnaim re voi nhandepo'akapa nhande ae mbaraetea py”, peje.

\* 5:27 Atos 7.42-43

**14** Ha'e rami teñ SENHOR Nhanderuete ixondaro reta va'e aipoe'i:

— Peẽ Israel kuery, penderovai xee ambou 'rã peteñ regua penembojexavai arã, Hamá tetã re oikea guive Arabá yakã oña peve — he'i.

## 7

### *Tuku-karu, tata ha'e ixã oexaague*

**1** Ha'e gui pova'e SENHOR oexa uka xevy. Xee aexa rã omoingo tuku-karu mba'emo roky henhoñ ngypa'i jave, huvixave pegua omono'õmbaa ma rire henhoñ jave.

**2** Ha'e gui tuku-karu ma mba'emo renhoñ yvy gui oiko va'ekue ha'e javi ho'upa ma ramo xee aexa vy aipoa'e:

— SENHOR Oreruete, oreperdoa ke, ajerure. Ha'e rami e'ý rã mba'exa 'rã tu ore Jacó kuery rokuave? Mba'eta mbovy'i ete orekuai — ha'e.

**3** Ha'e ramo SENHOR ha'e nunga nomboui.

— Ha'e nunga ma ndoikoi 'rã ha'vy — he'i SENHOR.

**4** Ha'e gui peteñ ju SENHOR Nhanderuete oexa uka xevy. Aexa rã SENHOR Nhanderuete ombou tata nhombopagaarã. Ha'e va'e ma omboypa yvy guýry yy oĩ va'ekue. Omomba avi heravy SENHOR pegua yvy itui va'ekue.

**5** Ha'e ramo xee aipoa'e:

— SENHOR Oreruete, ha'eve ma. Mba'exa 'rã tu ore Jacó kuery rokuave? Mba'eta mbovy'i ete orekuai — ha'e.

**6** Ha'e ramo ha'e nunga voi SENHOR Nhanderuete nomboui vy

— Ha'e nunga voi ndoikoi 'rã — he'i.

**7** Ha'e gui ma pova'e nunga avi oexa uka. Aexa rã SENHOR hi'añ peteñ ikora hi'yvi porã va'e áry. Opo py omboguejy ho'amy peteñ ixã oo mbotya ra'ãarã.

**8** SENHOR aipoe'i xevy:

— Amós, mba'e tu rexas?

Xee ambovai vy

— Peteñ ixã oo mbotya ra'ãa — ha'e.

Ha'e ramo SENHOR aipoe'i ju xevy:

— Ne'exa, ixã py xee aa'ã 'rã xevygua Israel kuery reko. Ha'e va'e rire xee ndaaxa rivevei ma 'rã ha'e kuery mbyte rupi.

**9** Mba'eta ambovaipa 'rã Isaque ramymino kuery ombojerovia aty yvy'ã rupi ikuai va'e, Israel kuery pegua henda iky'a e'ý va'e voi amomba 'rã. Jeroboão ro pygua kuery rovai avi 'rã apu'ã kyxe reve — he'i.

### *"Amós ma je huvixa rovai ijayvu", he'iague*

**10** Ha'e gui Betel pygua sacerdote Amazias omombe'u uka Israel pygua huvixa Jeroboão pe:

— Amós ma je nderovai ijayvu vai ra'e Israel kuery mbyte. Ha'e va'e ijayvua ma nda'evei nhandeyvy pe.

**11** Mba'eta po rami Amós ijayvu: "Jeroboão oiko vai 'rã kyxe py. Ha'e gui Israel kuery ma escravo-rã ogueraapaa 'rã oyvy gui mombyry", he'i va'ekue.

**12** Ha'e gui Amós pe ju Amazias aipoe'i:

— Ndee profeta, ejepa ke apy gui. Enha Judá yvy katy. Ha'e py ju ekaru ha'e ayvu emombe'u eikovy.

**13** Ha'e rã apy Betel py ma aý guive emombe'uve eme ayvu. Mba'eta apy ma oĩ huvixa pegua oo iky'a e'ý va'e ha'e orerekaoa pygua templo — he'i.

**14** Ha'e ramo Amós ombovai vy aipoe'i Amazias pe:

— Xee ma profeta e'ý aiko va'ekue, neñ profeta remimbo'e e'ý guive. Ha'e rami 'rãgue py mymba re apenaa rupi aiko va'ekue, sicômoro'a mono'õa rupi guive.

15 Va'eri mymba re apenaa gui SENHOR xepe'a vy aipoe'i xevy: "Tereo ke xeayvu emombe'u xevyguia Israel kuery pe", he'i karamboae.

16 Ha'e nunga rupi endu ke SENHOR ayvu. Ndee aipo're: "Emombe'uveeme ayvu Israel kuery rovai regua, Isaque ramymino kuery rovai ndeayvu eme guive", 're.

17 Ha'e rā SENHOR ma aipoe'i ndevy: "Nderayxy ma itavy rei 'rā oikovy tetā rupi. Ha'e gui ndera'y kuery ha'e nderajy kuery oiko vai 'rā kyxe py. Ndeyvy rerekova'ekue ma omboja'opaa 'rā ixā py oa'āa vy. Ha'e vy remano 'rā peteī yvy ha'eve'ŷ va'e oña re. Ha'e gui Israel kuery ma herapaa 'rāe, escravo-rā ogueraapaa 'rā oyvy gui mombyry", he'i.

## 8

### *Ajaka yvyra'a oña oexa ukaague*

<sup>1</sup> Ha'e gui xevy pe SENHOR oexa uka avi peteī ajaka yvyra'a kuaray aku javegua oña.

<sup>2</sup> Ha'e vy oporandu xevy:

— Amós, mba'e tu rexa?

Xee ambovai vy

— Peteī ajaka yvyra'a kuaray aku javegua oña aexa — ha'e.

Ha'e rā SENHOR aipoe'i:

— Ovaē ma xevyguia Israel kuery opa aguā ára. Ha'e kuery rupi xee ndaaxa rivevei ma 'rā.

<sup>3</sup> Ha'e va'e ára ma templo ha'e kuery oporaeiaty py taxēmbei 'rā oiko. Mba'eta ha'e kuery re'ōgue heta-etave 'rā ovy. Opa rupi omombopaa 'rā oka rupi. Ha'e gui nonhenduavei 'rā mava'eve rei — he'i SENHOR Nhanderuete.

### *"Israel kuery okanhymba aguā ovaē rai'i ma", he'iague*

<sup>4</sup> Peē kuery ma pekore iporiaukue'i, ha'e yvy ha'e javi rupi pemokanhymba ojexavai rei va'e. Ha'e nunga rupi pendu ke pova'e.

<sup>5</sup> Mba'eta aipopeje: "Topa voi ngaru jaxy pyau regua, jaa vy mba'emo aju nhavende ju aguā. Ha'e sábado ára topa voi avi, trigo omoī porāaty jaipe'a aguā. Ha'e rami vy nhaa'ā ajaka kyrī'i va'e py hepyrā jajopyve aguā, ha'e mba'emo opeja ha'eve'ŷa ramigua py jajokore aguā.

<sup>6</sup> Ha'e rami vy peráta re rive 'rā jajogua iporiaukue'i, ha'e gui py regua repy re rive 'rā jajogua ojexavai'i va'e kuery, trigo ipire ku'ikue revegua nhavendea py", peje.

<sup>7</sup> Ha'e nunga rupi SENHOR Nhanderuete oura guery Jacó oguerovy'a va'ety rupi ae:

— Xee ma raka'e rā peve teī ndaxerexarai 'rā pejapo vaia re!

<sup>8</sup> Ha'e nunga gui yvy oryryipa 'rā. Ha'e ramo hexe ikuai va'e ipy'a vai 'rā okuapy. Mba'eta yvy ha'e javi omy-omyī vy opu'ā-pu'ā 'rā Nilo yakā rami, ha'e gui typa 'rā Egito katy'i yakā oī va'e rami.

<sup>9</sup> Ha'e va'e ára ma ajapo 'rā kuaray mbyte teī oike aguā rami. Ha'e rami vy ara py teī amopytūmba 'rā yvy jave rupi — he'i SENHOR Nhanderuete.

<sup>10</sup> — Ngaru pejapo va'ety xee amboekovia 'rā pendep'y'a vai aguā. Peporaeia amboekovia 'rā pejae'o anho aguā. Romonhemonde 'rā ajukue voxaguigua py, peneakā penhopimba reve. Ha'e rami romoingo 'rā gua'y peteī'i va'ekue re ipy'a vai va'e rami. Ha'e gui opaa py ma oiko 'rā py'a vai etea ára.

<sup>11</sup> SENHOR Nhanderuete aipoe'i:

— Ne'exa, ovaē ouvy ára yvy jave re karuai ambou aguā, tembi'u re okaruxea e'ŷ, neī yy re ijy'uveia e'ŷ guive, ha'e rā SENHOR ayvu oenduxea regua ae.

<sup>12</sup> Ha'e ramo SENHOR ayvu oenduxa va'e oguata 'rā ye'ē nhavō rupi, kuaray ijapu'a'ia katy guive kuaray oua katy peve. Opa rupi 'rā ikuai ayvu rekaa rupi teī ndojoui 'rā.

<sup>13</sup> Ha'e va'e ára kunhataī porāgueve ha'e kunumigue ma ho'apa 'rā yuvei gui.

**14** Samaria py ta'angaa oĩ va'e rupi oura va'ekue voi ho'apa 'rã, "Anhetẽ Ete Dã e'ŷ vy Berseba pygua tuuete ramigua rekove rupi aura", he'i va'ekue. Ha'e kuery ma ho'apa ma vy ndovyvei 'rã – he'i.

## 9

### *Nhombopagaarã Nhanderuete ombou aguã re ijayvuague*

**1** Ha'e gui aexa altar yvýry SENHOR hi'aĩ rã. Ha'e vy aipoe'i xevy:

— Emboguai na oo yta ikuai va'e, okẽ pyrõa peve omyimba aguã. Emboa'ypa, opy ikuai va'e akã áry ho'apa aguã rami. Mba'eta ha'e kuery ajukapa katu'i 'rã kyxe py. Peteïve ndojavai 'rã, peteïve ma voi ndoo jepei 'rã.

**2** Yvykua vaikue py ha'e kuery oo teĩ ha'e gui anoẽ 'rã xepo py ae. Yva re peve oo teĩ ha'e gui voi amboguejy ju 'rã.

**3** Carmelo yvyty áry onhemi aguã oo teĩ hakykue aa 'rã ha'e gui aru aguã, aipe'apa 'rã ikuiai gui. Ye'ẽ guyýry xegui onhemi aguã oo teĩ ha'e py ambou 'rã mboi ixu'upaarrã.

**4** Escravo-rã hovaigua kuery ogueraapa ramo ha'e py voi ajuka ukapa 'rã kyxe py. Ha'e kuery re ama'ẽ 'rã amoingo axy aguã, amoingo porã aguã e'ŷ – he'i.

**5** Mba'eta Nhandererekoa SENHOR ixondaro reta va'e ma yvy re opoko ramo hykupa rive 'rã, yvy re ikuai va'e ha'e javi ojexavai 'rã okuapy. Opu'ã-pu'ã 'rã Nilo yakã rami, ha'e gui typa 'rã Egito katy'igua yakã rami.

**6** Nhanderuete ma yva re ojapo oĩ aguã, ha'e rã yvy re ma ijytarã omoõi va'ekue. Ha'e gui ye'ẽ gui yy oĩ va'e oenoõi vy onhoëmba 'rã yvy re. SENHOR ae hery va'e.

**7** SENHOR aipoe'i:

— Peẽ Israel kuery, Etiópia pygua kuery arekoague rami avi e'ŷ ri ty'y xee roguereko? Mba'eta Israel kuery ma Egito yvy gui anoẽ va'ekue, filisteu kuery Caftor yvy gui, ha'e Síria pygua kuery Quir yvy gui anoëague rami avi.

**8** Ne'exa, xee SENHOR aiko kova'e kuery ojejavypa va'e rovai. Ha'e rami vy amomba 'rã yvy gui. Ha'e rami teĩ namokanhymbai 'rã Jacó kuery – he'i SENHOR.

**9** — Mba'eta xeayvu rã ombovavaa 'rã yvy regua mbyte rupi Israel kuery ikuia, yrupẽ py trigo ra'yigue omboguaa rami avi, peteïve ra'yñ'i yvy py ho'a e'ŷ re.

**10** Xevygua Israel kuery va'e regua ojejavý va'ekue ma omanomba 'rã kyxe py, "Mba'emo vai nanhanderupityi 'rã, nhandere ndoikoi 'rãe!" he'i okuapy va'ekue ri.

### *Nhe'ẽ rupi Israel kuery ikuai va'e omoingo porã ju aguã re ijayvuague*

**11** — Ha'e va'e ára ma ajapo ju 'rã Davi rogue ho'a va'ekue, amoatyrõmba ju 'rã ovoague. Ho'aague gui amopu'ãmba vy jypy guare rami ju 'rã ajapo,

**12** xevygua kuery oguereko aguã Edom pygua kuery okuave'i va'e, amboae regua kuery xerery rupi oenoõmba ha'e javi guive – he'i SENHOR ha'e nunga apoarã va'e.\*

**13** SENHOR aipoe'i:

— Ne'exa, ovaẽ ma ouvy ára yvy karaõa kuery oupity aguã mba'emo mono'õa kuery, ha'e uva umbiria kuery oupity aguã ha'yigue nhotõa kuery. Yvyty gui uva rykue oxyry 'rã ouvy, yvy'ã ikuai va'e gui oxyrypa 'rã.

**14** Mba'eta ambopyau 'rã xevygua Israel kuery ikuia. Ha'e ramo ojapo ju 'rã guetã ombovaipa pyre, ha'e gui ikuai ju 'rã ha'e py. Onhotõ ju 'rã uva, ha'e oy'u 'rã hykue. Onhotõ avi 'rã yvyra hi'a va'erã, ha'e gui ho'u 'rã hi'a.

**15** Mba'eta ha'e kuery voi xee anhotõ ju 'rã ijyvvy re. Ha'e rami rire ijyvyrã ame'ẽ va'ekue gui ndoipe'aavei 'rã – he'i SENHOR Penderuete.

---

\* **9:12** Kova'e ayvu rupi Tiago ijayvu Atos 15.16-18 py. Ha'e gui "Davi rogue ho'a va'ekue" he'ia ma Davi ramymino kuery na'imbaraetei va'e re ijayvu vy, mba'eta Nhanderuete omoatyrõ uka ju 'rã, ha'e amboae regua voi ogueru avi 'rã.

## Obadias ayvu oĩa Obadias ayvu oĩa

Babilônia pygua kuery Jerusalém tetã oitypa ramo Edom pygua kuery ov'y'a rei okuapy, oipe'apa guive tetã pygua kuery mba'e rei-rei va'ekue. Ha'e nunga rupi profeta Obadias ijayvu Edom pygua kuery ojeavyague káuxa Nhanderuete ombopaga aguã re. Ha'e rã Israel kuery ma omoingo porã ju 'rã. Ha'e rami aguã ma Edom ha'e Israel kuery pegua anho e'ý oĩ. "Mba'eta Senhor ára ou ma oiny ha'e javi regua áry. Ha'e rami vy joe pejapoague ramigua pendere ae ju 'rã oiko. Joupe pejapo vaiague peneakã re ae ju 'rã ojeapa" (versículo 15). Ha'e jave py "opo'akaa rupi opena va'e ma Senhor ae 'rã oĩ" (versículo 21b).

*Edom pygua kuery ojeavyague re ombopaga aguã re ijayvuague  
Jeremias 49.14-16*

<sup>1</sup> Kova'e ma Obadias pe oexa uka pyre oĩa. Ha'e gui SENHOR Nhanderuete ijayvu Edom yvy re.\* Roendu ma SENHOR po rami ijayvu rã:

— Amboae regua kuery pe peteĩ omboua ayvu mombe'uarã, "Pepu'ã ke, Edom yvy re nhapu'ã jajojuka aguã", he'i va'erã.

<sup>2</sup> Ne'ixa, Edom pygua kuery, peẽ kuery rojapo amboae regua gui pene'yvy'iive aguã rami, ija'epy e'ý guive.

<sup>3</sup> Mba'eta pendepy'a py penhemboyvate reia oĩ va'e penembotavy. Yvatea py itaova pa'ũ rupi penderekoa va'e vy pendepy'a py "Mava'e tu xereity 'rã yvy katy?" peje.

<sup>4</sup> Ha'e rami avi taguato rami pendeyvate peovy teĩ, ha'e jaxy-tata mbyte peve pejeaity apo va'e rire ha'e gui voi xee roity 'rãgue — he'i SENHOR.

<sup>5</sup> — Peẽ ma omomba pyrã pendekuai! Mba'eta pyávy imonda va'e kuery oo py ovaẽ vy nhomba'e rei-rei oiporavopa 'rã iporãgueve anho ogueraa vy. Uva re imonda va'e voi ou vy ndoejai 'rã teve amongue uva'a xã ri jepe?

<sup>6</sup> Ha'e rami teĩ Esaú kuery, mba'ex'a'vy tu penemba'e rei-rei ogueraapaa!† Mba'ex'a'vy peráta penhomí va'ekue ojoupaa?

<sup>7</sup> Mba'eta peneirã va'ekue ae pendepe'a penderekoa gui. Pendereve peteĩ rami ikuai va'ekue penembotavy vy ipo'aka okuapy pendere. Pendereve okaru va'ekue ae omoi nhuã pendepy rupi penembo'a aguã. Ha'e rami teĩ Edom yvy re ndoikoi 'rã ha'e nunga oikuua va'e.

<sup>8</sup> Ha'e va'e ára amomba 'rã Edom pygua hi'arandukueve, Esaú yvyty re ikuai va'e 'arandua guive — he'i SENHOR.

<sup>9</sup> — Temã tetã pygua ipy'a guaxukueve okyjepa 'rã, ha'e ramo Esaú yvyty áry peteĩ-teĩ ojukapaa 'rã.

<sup>10</sup> Penderyvy Jacó ramymino kuery rovai pejapo vai raka'e. Ha'e ramo peximba ha'e penemokanhya 'rã raka'eve rã peve.

<sup>11</sup> Ha'e va'e jave Israel kuery mba'e rei-rei amboae regua ogueraapa teĩ peẽ kuery ma peĩ rive rei pekuapy. Mombyry guigua kuery Jerusalém rokẽ rupi oike vy oexa okuapy oxortea mba'emo ogueraa aguã. Ha'e kuery reve peẽ kuery voi penhemoirã va'ekue.

<sup>12</sup> Ha'e rami avi penderyvy kuery ojexavaia ára ndaperovy'a rei va'e rire, Judá ramymino kuery omombaa ára. Ha'e kuery iporiau reia ára ha'e kuery re napendeayvui va'e rire pekaru porã rei reve.

\* <sup>1:1</sup> Israel kuery re Babilônia pygua kuery opu'ã jave ma Edom pygua kuery voi ha'e kuery re opu'ã avi, Israel kuery reve joegua'i ae va'eri (versículos 10-14; 2 Crônicas 28.17; Salmo 137.7; Amós 1.11-12). Ha'e nunga rupi Edom pygua kuery pe SENHOR ijayvu ombopaga aguã re (Isaías 34.5-15; Jeremias 49.7-22). † <sup>1:6</sup> Edom pe "Esaú" he'i, mba'eta Esaú ma ha'e kuery ramoõ oiko raka'e (Gênesis 36.9).

<sup>13</sup> Xevyguá kuery ikuai axya ára ma hetã rokẽ rupi ndapeikei, ha'e perovy'a rei reve ikuai axya re napema'ẽi, neĩ imba'e rei-rei ndapeipe'ai heravy raka'e va'e rire.

<sup>14</sup> Tape rakãmby ha'e kuery regua onha va'e pejukaxe vy napearõi, neĩ joupe okuave'i va'e napemboaxai raka'e va'e rire ha'e kuery ojexavaia ára.

*Israel kuery ikuai porã ha'e ov'y'apa ju aguã re ijayvuague*

<sup>15</sup> Mba'eta SENHOR ára ou ma oiny ha'e javi regua áry. Ha'e rami vy joe pejapoague ramigua pendere ae ju 'rã oiko. Joupe pejapo vaiague peneakã re ae ju 'rã ojeapa,

<sup>16</sup> mba'eta xevyguá yvyty iky'a e'ŷ va'e áry peka'u pekuapy raka'e. Ha'e rami ae ju ha'e javi regua oy'upa 'rã okuapy. Ha'e kuery oy'u tema 'rã hevyatãmba peve.<sup>‡</sup> Ha'e rami vy opyta 'rã ndoikoi ae va'ekue rami.

<sup>17</sup> Ha'e rã Sião yvyty re ikuai va'e pe ma ojekuaa 'rã oo jepe aguã. Ha'e va'e yvyty ma iky'a va'erã e'ŷ. Ha'e gui Jacó kuery ojopy 'rã ojeupe guarã va'ekue.

<sup>18</sup> Jacó kuery ma tata rami 'rã, ha'e José kuery ma hendy 'rã, ha'e rã Esaú kuery ma mba'emo pirekue rami 'rã ikuai. Ha'e gui ha'e kuery omoendy 'rã Esaú kuery, oapypa 'rã. Ha'e ramo mava'eve ndoikovei 'rã Esaú regua, ha'e rami aguã re SENHOR ijayvu rire.

<sup>19</sup> Ha'e rire Esaú yvyty ma Neguebe pygua kuery pe 'rã itui. Ha'e rã filisteu kuery yvy ma yvy joja reia rupi ikuai va'e pe 'rã itui. Ha'e kuery ipo'aka avi 'rã Efraim ha'e Samaria nhuündya re, ha'e rã Benjamim kuery ma Gileade regua re 'rã ipo'aka. §

<sup>20</sup> Israel kuery escravo-rã ogueraa pyre ma cananeu kuery rekoar re ipo'aka 'rã Sarepta peve. Ha'e rã Jerusalém guigua kuery escravo-rã ogueraa pyre Sefarade tetã py ikuai va'e ma tetã kuaray puku-a katy ikuai va'e re 'rã ipo'aka.

<sup>21</sup> Ha'e rami vy jogueraa jepea kuery oẽ 'rã Sião yvyty áry, Esaú yvyty regua kuery re oikuua pota aguã. Ha'e gui opo'aka rupi opena va'e ma SENHOR ae 'rã oĩ.

---

<sup>‡</sup> **1:16** “Oy'u” he'ia ma ha'e kuery opaga aguã re ijayvu vy (Isaías 51.17; Habacuque 2.16; Apocalipse 14.10). § **1:19** Apy ma ijayvu Israel kuery hovaigua kuery rekoague re ipo'aka aguã re. Ha'e va'e ma SENHOR ipo'aka ramo 'rã oiko (versículo 21).

## Jonas rekokue oĩa

### Jonas rekokue oĩa

Profeta Jonas ma Nhanderuete omondouka Assíria regua Nínive tetã katy ayvu porã omombe'u aguã. Ha'e va'e kuery ma Israel kuery reve joe opu'ã va'e. Jonas ndooxei vy amboae henda katy oo. Yy rupi ooa rupi Nhanderuete ojapo peteĩ pira guaxu omokõ aguã rami. Nhanderuete ogueraa jepe ramo oo nho Nínive tetã py. Ayvu omombe'u ramo ha'e kuery ojeko rerova okuapy. Ha'e ramo Nhanderuete nombopagai raka'e.

Ha'e rami rã Jonas ndojou porãi, ha'e pygua kuery nomboaxyi vy. Ha'e rã Nhanderuete ma nhomboaxy va'e ae. Ha'e rami Jonas pe ijayvu vy aipoe'i: "Ha'e gui xee ma ha'evea rami e'ý teve tetã guaxu Nínive amboaxy? Ha'e py ma cento e vinte mil raxa ikuai opo oiporu kuua regua ha'e oiporu kuua e'ýa oikuaa e'ý va'e. Heta avi ikuai mymba kuery", he'i (4.11). Ha'e ramia py Nhanderuete oexa uka nhanderayvu etea.

#### *Nhanderuete Jonas oenoĩ rã ojava ramo omoingo axyague*

<sup>1</sup> SENHOR oayvu ombou Amitai ra'y Jonas pe. Ha'e vy aipoe'i:

<sup>2</sup> — Eiko katu ke ha'e tereo tetã guaxu Nínive katy.\* Ndeayvu ha'e kuery rovai, mba'eta xea py peve heko vaia onhendu — he'i.

<sup>3</sup> Ha'e ramo Jonas oiko katu va'eri SENHOR renonde gui oo aguã Társis katy ojava vy. Ha'e rami vy Jope py ovaẽ vy ojou peteĩ kanoã guaxu Társis katy oo va'erã. Oo aguã repy opaga ma vy ha'e va'e py oĩ ha'e kuery reve oje'oi aguã Társis katy, SENHOR renonde gui mombyry.

<sup>4</sup> Ha'e gui ma ye'ẽ áry ha'e kuery ooa rupi SENHOR ombou peteĩ yvytu atã. Yvytu vaikue omoingo ye'ẽ áry rupi. Ha'e ramo kanoã opẽmba aguã rami ma oo.

<sup>5</sup> Ha'e ramo kanoã mboguataa kuery onhemondyipa vy peteĩ-teĩ ojapukai nguuete ramigua pe. Ha'e rami vy kanoã py mba'emo ipoyikueve oĩ va'ekue omombopa yy py ivevuive aguã. Ha'e rã Jonas ma yapy py oguejy ma vy oke rei oupy.

<sup>6</sup> Ha'e ramo Jonas ituia py kanoã ja kuery ruvixa ou vy aipoe'i ixupe:

— Mba'e tu oiko ndereve? Reke porã rei ri ty'y rejupy? Epu'ã ke, ndee voi ejapukai avi nderuete pe. Xapy'a rei nderuete nhandere ima'endu'a nho 'rã nhakanhymba e'ý aguã — he'i.

<sup>7</sup> Ha'e gui ha'e kuery joupe-upe aipoe'i:

— Peju ke, jaexa xorte, mava'e káuxa pa guĩ nunga nda'evei ete va'e oiko jaikuua aguã — he'i. Ha'e vy oexa okuapy xorte. Xorte oexaa py oikuaa okuapy Jonas re ae.

<sup>8</sup> Ha'e ramo aipoe'i okuapy ixupe:

— Aý ma enhemombe'u porã orevy. Mava'e káuxa tu kova'e nunga ete ou nhande'áry? Mba'e nunga rupi tu ndee reiko? Mamo gui tu reju? Mamo ndeyvy va'e tu? Mava'e regua tu ndee?

<sup>9</sup> Ha'e ramo ombovai vy aipoe'i ha'e kuery pe:

— Xee ma hebreu, SENHOR re ae ajerovia va'e. Ha'e va'e ma Nhanderuete yva pygua, ye'ẽ ha'e yvy apoare — he'i.

<sup>10</sup> Ha'e rami rã avakue okyje vaipa ete okuapy. Ha'e vy aipoe'i ixupe:

— Mba'e tu ha'vy rejapo? — he'i. Mba'eta oikuaa okuapy SENHOR renonde gui ojava ovya, ha'e kuery pe omombe'u ae rire.

<sup>11</sup> Ha'e gui ye'ẽ opu'ã-pu'ã-ave tema ovvy ramo aipoe'ive ju okuapy ixupe:

— Mba'e ha'vy torojapo ndere ye'ẽ optyu'u aguã?

<sup>12</sup> Ombovai:

---

\* <sup>1:2</sup> Nínive tetã ma Assíria regua tuvixave va'e. Ha'e pygua kuery ma Israel kuery rovaigua ikuai, nhomboaxy kuua e'ý va'e guive.

— Xejopy ha'e xemombo ye'ẽ py. Ha'e ramo ye'ẽ optyu'upa 'rã. Mba'eta xee aikuaa xekáuxa ae ha'e rami etegua vyvty vaikue oikoa — he'i.

<sup>13</sup> Ha'e rami teĩ avakue oipykui atãve tema okuapy, onhea'ãve tema vvy'ã re ovaẽ aguã. Ha'e rami teĩ nda'evei, mba'eta ye'ẽ nda'eveive tema ovv ha'e kuery oove e'ý aguã.

<sup>14</sup> Ha'e ramo mae ma ojapukai okuapy SENHOR pe. Ha'e vy aipoe'i:

— Ha'e gui SENHOR, rojerure ndevy kova'e ava káuxa rokanhymba e'ý aguã. Orere emoi eme kova'e ava ruguy onheéague re ropaga aguã, mba'eta orevy rã mba'eve py ndojapo vai. Mba'eta ndee SENHOR rejapo reipotaa rami anho oiko aguã rami — he'i.

<sup>15</sup> Ha'e rami vy Jonas ojopy okuapy vy omombo ye'ẽ py. Ha'e ramo ye'ẽ ma porã opu'ã-pu'ãa gui optyu'upa porã.

<sup>16</sup> Ha'e rami rã ha'e kuery okyje ete okuapy SENHOR gui. Ha'e vy SENHOR pe mba'emo ome'ẽ okuapy, onhemboayvu guive mba'emo ojapo aguã re.

<sup>17</sup> Ha'e gui Nhanderuete ma peteĩ pira guaxu ombou Jonas omokõ aguã. Ha'e ramo pira rye py ma Jonas oĩ mboapy ára ha'e mboapy pytû re.\*

## 2

### *Pira rye py Jonas oĩa gui ojapukaiague*

<sup>1</sup> Ha'e gui Jonas ma pira rye py oĩa gui ojerure SENHOR Nguuete pe.

<sup>2</sup> Ha'e vy aipoe'i:

— Ajexavai vy ajapukai SENHOR pe.

Ha'e ramo xembovai.

Pytû vaikue reia gui ajapukai ramo  
ndee rendu xeayvua.

<sup>3</sup> Mba'eta ndee ae xemombo uka ye'ẽ typya py,

ye'ẽ mbyte py.

Ha'e ramo yy oxyry atã vy xejoko.

Ndeguigua yai opu'ã-pu'ã vy oaxa tema xe'áry rupi.

<sup>4</sup> Ha'e ramo xee aipoa'e:

“Xemombo ma rexaa gui mombyry.

Xapy'a rei nda'u aexa ju 'rã ri

ndevygua templo iky'a e'ý va'e?”

<sup>5</sup> Yy xeao'i xerekovea peve,

yy typya ma xejoko.

Yxypo ikuai va'e onhemama xreakã rupi.

<sup>6</sup> Yvy'ã guy py peve aguejy avy,

yvy peve ete aguejy.

Ha'e nunga raka'e rã peve xe'áry rupi xejokopa ta va'ekue.

Ha'e rami teĩ omanogue ikuiaia gui ndee renoẽ ju xerekovea,  
SENHOR Xeruete.

<sup>7</sup> Xeryepy py xenhe'ẽ oĩ va'e ikangy ramo

xema'endu'a SENHOR re.

Ha'e vy ajerurea re aroma'endu'a ndea py,

Ndevygua templo iky'a e'ý va'e py ae.

<sup>8</sup> Amongue mba'emo ra'angaa pe rive ojeko me'ẽ vy

ojepe'a imboaxyarã va'ekue gui.

<sup>9</sup> Ha'e rã xee ma avy'aa amonhendu reve

ame'ẽ 'rã mba'emo ndevy,

ha'e ajapo 'rã va'ekue ajapopa nho 'rã — he'i.

<sup>10</sup> Ha'e gui ma pira pe SENHOR ijayvu ramo ombojevy Jonas yy rembe re.

\* <sup>1:17</sup> Mateus 12.40

## 3

### *Nínive tetā py Nhanderuete ayvu Jonas omombe'uague*

<sup>1</sup> Ha'e gui teīgue ju SENHOR oayvu ombou Jonas pe. Ha'e vy aipoe'i:

<sup>2</sup> — Eiko katu ke, ha'e tereo tetā guaxu Nínive katy. Emombe'u ke ha'e kuery pe aipoa'e uka va'e ndevy – he'i.

<sup>3</sup> Ha'e ramo Jonas ma SENHOR ijayvuague rami vy opu'ã vy oo Nínive tetā katy. Nínive tetā ma tuvixa ete itui Nhanderuete renonde. Ha'e javi rupi mboapy ára mae ma jaexapa 'rā.

<sup>4</sup> Ha'e gui Jonas omboypy tetā rupi oiko aguã. Peteĩ ára re oguata oikovy. Ayvu omombe'u oikovy vy aipoe'i:

— Quarenta araa py Nínive tetā omombaa 'rā – he'i.

### *Nínive pygua kuery ojeko rerova okuapyague*

<sup>5</sup> Ha'e gui ma Nínive pygua kuery ojerovia okuapy Nhanderuete re. Ha'e rami vy ojapo okaru e'ŷ re ikuai aguã. Onhemonde okuapy ajukue voxua guigua py, yvatekueve, yvyigueve guive.\*

<sup>6</sup> Ha'e rami ikuiaia Nínive pygua huvixa voi oendu. Ha'e rami vy guenda openaaty gui opu'ã ho'amy vy omboi oao huvixa pegua, ha'e vy ajukue vaikue voxua guigua py ju onhemonde, tanhimbu py oguapy oiny guive.

<sup>7</sup> Ha'e rami vy Nínive tetā ha'e javi rupi omondouka po rami omombe'u va'erā: “Huvixa ha'e ixupeguia yvatekueve ojapo ukaa rami vy avakue, mymba kuery vaka ha'e vexa'i kuery voi ndo'ui 'rā mba'eve, ndaperaai 'rā okaruaty py, neĩ yy ndoy'ui 'rā guive.

<sup>8</sup> Ha'e rami 'rāgue py avakue ha'e javi tonhemonde ajukue voxua guigua py, mymba kuery voi. Pejapukai atā ke Nhanderuete pe. Peteĩ-teĩ pejeko rerova ke ha'eve e'ŷa rami rei peikoa gui, mba'emo vai pendepo py pejapoaty gui guive.

<sup>9</sup> Xapy'a rei nhi'ã Nhanderuete amboae rami onhembopy'a vy ojepe'a 'rā ojapo taa gui, ha'e vy nda'ipoxyvei 'rā nhamanomba e'ŷ aguã”, he'i.

<sup>10</sup> Ha'e rami ha'e kuery ikuai ramo Nhanderuete oexa, mba'eta ha'eve e'ŷa rami ikuiaia gui ojeko rerova okuapy. Ha'e ramo Nhanderuete nomoingoi mba'emo vai ombou 'rā va'ekue, ndojapoi oayvuague.

## 4

### *Jonas ndovy'aiague*

<sup>1</sup> Ha'e rā Jonas ma ha'e rami ha'e kuery ikuiaia ndojou porāi ete vy ivai oiny.

<sup>2</sup> Ha'e rami vy onhembo'e Nhanderuete pe. Aipoe'i:

— Ai SENHOR! Po rami e'ŷ teve xeayvu va'ekue xeyvy re teri aiko reve? Ha'e nunga rupi ae aa pojava va'ekue Társis katy ajava vy, mba'eta aikuua ndee Nhanderuete poroayvu va'e reikoa, renhomboaxy, nandevai voi, ha'e opa mba'e py rejapo porā va'ea. Ha'e rami vy aikuua mba'emo vai rejapo taa gui rejape'a 'rāa.

<sup>3</sup> Ha'e nunga rupi SENHOR, ndevy pe ajerure, eipe'a na xerekove, mba'eta aikove 'rāgue py ha'eve amano aguã – he'i.\*

<sup>4</sup> Ha'e ramo SENHOR aipoe'i:

— Ha'evea rami ri ty'y evoko rami ete ndevaia? – he'i.

<sup>5</sup> Ha'e gui ma tetā gui Jonas ojepe'a vy mombyry'i oguapy oiny kuaray oua katy. Ha'e py ojapo ngoguyrā, iguy py optyu'u aguã kuaray'ã py, mba'emo tetā re oiko va'e oexaxe vy.

### *SENHOR ombo'eague Jonas*

---

\* <sup>3:5</sup> Ha'e kuery ma ha'e rami ikuai onhemboaxy rupi. \* <sup>4:3</sup> Jonas ndovy'ai mba'eta ndoipotai Nhanderuete omboaxy vy ogueraa jepe Nínive pygua kuery, hovaigua ikuai ramo. Ha'e rā Nhanderuete ma nhomboaxy va'e vy ndoipotai okanhy (Ezequiel 33.11; João 3.16; 2 Pedro 3.9).

<sup>6</sup> Ha'e ramo Nhanderuete ojapo mba'emo roky henhoĩ aguã rami. Ha'e va'e ma ojeupi ov y Jonas áry, inhakã áry rupi omokuaray'ã, ome'ẽ aguã opytu'u aguã. Ha'e ramo Jonas ma mba'emo roky oexa vy ov y'a ete oiny.

<sup>7</sup> Ko'ẽ jevy rã kuaray oẽ ov y jave Nhanderuete ombou avi peteĩ mbii. Ha'e va'e ma mba'emo roky ho'u rã ipirupa.

<sup>8</sup> Kuaray yvateve ov y ramo Nhanderuete ombou avi peteĩ yvytu aku kuaray oẽa katy gui oipeju va'e. Jonas akã re kuaray ojope ratã ramo ikangypaa oendu. Ha'e rami vy omano aguã re ojerure. Ha'e vy aipoe'i:

— Aikove 'rãgue py ha'eveve amano aguã — he'i.

<sup>9</sup> Ha'e ramo Nhanderuete oporandu Jonas pe:

— Ha'evea rami ri ty'y evoko rami ete ndevai reiny mba'emo roky re rive?

Ombovai:

— Anhetẽa rupi xevai vy amanoxe guive — he'i.

<sup>10</sup> Ha'e ramo SENHOR aipoe'i:

— Ndee ma remboaxy ri mba'emo roky'i remba'eapo ramo e'ŷ henhoĩ va'ekue, ha'e rembo'yvate va'ekue'ŷ teĩ. Ha'e nunga ma peteĩ pytũ re henhoĩ rire amboae pytũ ju okanhy ju va'e.

<sup>11</sup> Ha'e gui xee ma ha'evea rami e'ŷ teve tetã guaxu Nínive amboaxy? Ha'e py ma cento e vinte mil raxa ikuai opo oiporu kuaa regua ha'e oiporu kuaa e'ŷa oikuaa e'ŷ va'e. Heta avi ikuai mymba kuery — he'i.

## Miquéias ayvu oĩa Miquéias ayvu oĩa

Profeta Miquéias ijayvu raka'e Judá ha'e Israel kuery heko vai ramo Nhanderuete ombopaga aguã re. "Ha'e nunga rupi pendekáuxa Sião tetã ombovaipaa 'rã mba'etyrã yvy karaña rami, Jerusalém opyta 'rã mba'emo ra'ykue aty rive. Yvyty templo oĩa voi opyta 'rã yvy'ã'i jaipa va'e rive" (3.12).

Ijayvu avi araka'eve rã Senhor ogueraa jepe vy omoingo porã ju aguã re. Judeu kuery anho e'ý guive, yvy jave re ikuai va'e ixupe anho 'rã ikuai. "Opaa ára py ma yvyty Senhor pegua oo oĩa va'e ombo'yvateve 'rã yvyty ha'e yvy'ã ikuai va'e áry. Ha'e ramo yvy regua kuery oje'oi 'rã ha'e katy. Heta va'e regua kuery oo vy aipoe'i 'rã joupe-upe: 'Peju ke, jaje'oi Senhor pegua yvyty re, Jacó kuery Ruete pegua oo oĩa katy. Ha'e ramo nhanembo'e 'rã oikoa re, ha'e va'e rupi nhande kuery voi nhandekuai aguã', he'i 'rã okuapy" (4.1-2a).

### *Israel ha'e Judá kuery rovai opu'ã okuapya re ijayvuague*

<sup>1</sup> Moresete pygua Miquéias pe SENHOR oayvu ombou va'ekue. Judá pygua huvixa Jotão, Acaz ha'e Ezequias ikuai jave ijayvu Samaria ha'e Jerusalém tetã re.

<sup>2</sup> Yvy regua kuery ha'e javi, pendu ke. Ndee yvy, ejapyxaka avi ke, ha'e yvy re pendekuai va'e ha'e javi. SENHOR Nhanderuete ijayvu ta penderovai, ojeupagua templo iky'a e'ý va'e gui ae.

<sup>3</sup> Mba'eta ne'exa, SENHOR ma o'amba gui oguejy ouvy vy oguata 'rã ovy yvyty yvateve va'e áry rupi.

<sup>4</sup> Iguýry yvyty ikuai va'e ma hykupa 'rã, yvyugua voi ovopa 'rã tata raku py iraity omoõ mbyre hykua rami, yvy'ã guy katy yy oxyry atã va'e rami guive.

<sup>5</sup> Ha'e nunga ha'e javi oiko 'rã Jacó kuery heko vaia re, Israel kuery ojejavya re ae. Ha'e gui mava'e kuery tu ikuai Jacó regua heko vai va'e? Samaria pygua kuery e'ý teve? Ha'e mamo tu oĩ yvyty áry Judá kuery ta'angaa mbojerovia atyrã ojapo va'ekue? Jerusalém tetã py e'ý teve?

<sup>6</sup> Ha'e nunga rupi SENHOR aipoe'i:

— Samaria tetã ma xee ajapo 'rã mba'ety mbyte ita omboaty pyre rami rive, ha'e uva onhotýa aguã. Mba'eta ha'e py ita ombojoja pyre ambojerepa 'rã heravy yvy'ã guy katy, oo renda ojekuaapa peve.

<sup>7</sup> Ha'e gui ta'angaa ojapo pyre ma omboa'ypaa 'rã, onhemongy'a reia repy oapypaa 'rã, ha'e ta'angaa oguereco va'e ha'e javi xee ambovaipa 'rã. Mba'eta ha'e kuery itavy reia repykue re rive ojou rire ha'e rami ikuai va'e pe ae ju 'rã ogueraa uka — he'i.

<sup>8</sup> Ha'e nunga rupi xee ajae'o, anhendu ratã aikovy, xeporiaua rupi aiko xepire rei reve. Jagua-tuvy nhe'ë rami ajae'o aikovy, ha'e guyra-nhandu rami xepy'a vai nhendu.

<sup>9</sup> Mba'eta xeretarã kuery ai ma okuera ve'ý ae va'e. Mba'emo vai ete ou Judá re, ovaẽ ma xeretarã kuery rekoa Jerusalém rokẽ peve ete.

<sup>10</sup> — Ha'e nunga pemombe'ueme Gate tetã py, pejae'oeme guive.\* Bete-Leafra py penhembojere-jere yvy ku'i rupi.

<sup>11</sup> Peẽ Safir pygua kuery, pendepire rei ha'e peximba reve 'rã peo. Zaanã pygua kuery voi ndoo jepei 'rã. Bete-Ezel pygua kuery ojae'o reia pendu vy peikuua 'rã napenepytyvõvei 'rãa.

<sup>12</sup> Mba'eta Jerusalém tetã rokẽ peve SENHOR guigua mba'emo vai ou ramo Marote pygua kuery oarõ okuapy mba'emo porã oiko 'rã.

\* **1:10** Profeta Miquéias ndoiptai hovaigua kuery Gate py ikuai va'e ha'e nunga oendu, oojai rei e'ý aguã.

<sup>13</sup> Ha'e gui Laquis pygua kuery, pemoxāmba kavaju kuery karóxa re. Mba'eta peē kuery ranhe pejapo Sião pygua kuery ojejavý aguã rami, pendere oĩ ra'e Israel kuery heko vai aguã.

<sup>14</sup> Ha'e Moresete-Gate pygua kuery pe ma peme'ẽ 'rã mba'emo oxẽ ta ma ramo. Aczibe py oo ikuai va'e ma Israel pygua huvixa kuery ojekore aguã rive opyta.

<sup>15</sup> Ha'e gui Maressa pygua kuery, pendea py voi ambou 'rã pendere ipo'aka va'erã. Adulão peve voi ovaẽ 'rã Israel regua yvatekueve.

<sup>16</sup> Pejayapa pende'a hi'yvypy'i rupi pendera'y kuery perovy'a va'ekue re pendepy'a vai vy. Pendeapte rupi penhopimba ke xapirẽ rami, pendegui ha'e kuery oipokuaa reve ogueraapaa fa ma ramo.

## 2

### *"Joguereco axya kuery pe nda'evei ete 'rã", he'iague*

<sup>1</sup> Nda'evei ete 'rã ngupa py oĩa py ojejavý aguã anho opy'a re omoĩ va'e kuery pe. Ha'e va'e kuery ma ko'ëgueve ha'ekue rami ae 'rã ikuai, ha'e rami aguã ipo'aka va'e vy.

<sup>2</sup> Ha'e kuery ma nhomba'ety ojopyxea oendu vy oipe'a 'rã, joo voi ojopy 'rã. Ha'e rami vy omokanhy 'rã avakue ha'e hoo py ikuai va'e guive. Omomba 'rã hoo va'e imba'e rei-rei reve.

<sup>3</sup> SENHOR aipoe'i:

— Ha'e nunga rupi ha'e kuery re ambou 'rã mba'emo vai. Ha'e va'e gui ma ndapeo jepevei 'rã. Penhemboyvatea rupi ve'ỹ 'rã pendekuai, mba'emo vai oikoa ára.

<sup>4</sup> Ha'e va'e ára penderovai omombe'ua 'rã peteĩ ayvu penereronhemboaxya rupi merami. Ha'e vy aipo'ea 'rã: "Nhanemokanhymba ma! Nhanderuete joupe omboaxapa ma xeretarã kuery yvy oguereco va'ekue! Xegui voi oipe'apa! Nhande kuery mba'ety ikuai va'ekue ma anhetẽ rupi e'ỹ ikuai va'e pe ju omboaxa", 'ea 'rã.

<sup>5</sup> Ha'e nunga rupi SENHOR pegua kuery teĩgue ju ijaty okuapy teĩ pendeyvyrã oa'ã va'erã ma ndoikoi 'rã, xorte oexaa rupi, neĩ ixã omoatãa rupi voi.

### *Profeta ramigua rive re ijayvuague*

<sup>6</sup> Ha'e rã heta va'e kuery ma aipoe'i okuapy xevy:

— Ndeayvuve eme ha'e rami, ndeayvu riae eme. Mba'eta orere ndoui 'rã roximbä aguã.

<sup>7</sup> Jacó kuery re ma ndoui 'rã remombe'u reikovy va'e. Tyrã pa SENHOR Nhe'ẽ ivai vi nhandevy? Po ramigua ae 'rã teve ojapo? — he'i okuapy.

SENHOR ombovai:

— Tá, teko porã rupi ikuai va'e pe ma xeayvu ojapo porã 'rã.

<sup>8</sup> Ha'e rã xevyguia kuery ma kue'i teri xere opu'ã okuapy xerovaigua rami. Ha'e rami vy pendea rupi oaxa rive'i ový va'e gui peipe'a 'rã ijaõ, i-capá voi, pendere opu'ã aguã re onhembopy'a e'ỹ teĩ.

<sup>9</sup> Xevyguia kunhague gui voi peipe'a ngoo py ový'a aguã va'ekue. Imemby kuery gui voi peipe'a mba'emo porã raka'e rã peve guarã ame'ẽ aguã va'ekue.

<sup>10</sup> Pepu'ã ma ha'vy, tapeopa, mba'eta peiague py nda'evei pepytu'uve aguã. Tapeo, mba'eta penhemongy'apaague ojapo penemokanhymba aguã rami, penemokanhya 'rãe.

<sup>11</sup> Ha'e gui penembyte xapy'a rei oiko 'rã yvvtu rami rive ijapu vy aipoe'i va'e: "Xee ma vinho ha'e nga'ua rupigua rive amombe'u va'e", he'i. Ha'e va'e rive 'rã ha'eve peē kuery pegua profeta oiko aguã.

### *Israel kuery okuave'i va'e SENHOR omono'õ ju aguã re ijayvuague*

<sup>12</sup> — Ha'e gui peē Jacó regua kuery ma xee romono'õmba ju 'rã. Amboatypa 'rã Israel kuery okuave'i va'e. Joa py meme 'rã romoĩ, vexa'i kuery ma kora py, e'ỹ vy nhuñdy mbyte py ikuai va'e rami. Ha'e ramo hetu ete ju ikuai vy onhendu ratã rei 'rã okuapy.

13 Ha'e kuery renonde rupi peteñ oo 'rã tape apoarã. Ha'e ramo ha'e kuery oëmba 'rã, okë rupi oike ha'e oë ju 'rã jogueravy. Ha'e kuery renonde rupi oo 'rã Huvixave ae. Tá, SENHOR ae 'rã oo ha'e kuery renonde rupi – he'i.

### 3

#### *Huvixa, sacerdote ha'e profeta kuery rovai ijayvuague*

<sup>1</sup> Ha'e gui xee aipoa'e:

– Peẽ Jacó akã ha'e Israel kuery ruvixa pendekuai va'e, pendu ke aÿ. Peẽ kuery e'ÿ teve ha'evea rami joguerekooarã penemoingoa pyre?

<sup>2</sup> Mba'eta peẽ kuery ma ndaperovy'ai 'rã iporã va'e, ha'e rã mba'emo vai rive pejou porã. Ha'e rami vy peipiropa 'rã heta va'e kuery, ho'o voi pemboi 'rã ikãgue gui.

<sup>3</sup> Ha'e rami vy pe'u 'rã xevygua kuery ro'okue, ipire pemboipa 'rã, ha'e ikãgue ma pemopëmba rive 'rã. Ha'e vy pembo'ipa 'rã ho'okue oja py, oja ixã va'e pygurarã guive.

<sup>4</sup> Ha'e rami rire SENHOR pe pejapukai ramo noendui 'rã pendeayvua. Ha'e rami 'rãgue py ha'e va'e jave peẽ kuery pe ndojexa ukavei 'rã, ha'eve e'ÿa rami pendekuai ramo.

<sup>5</sup> Ha'e gui profeta ramigua kuery xeretarã kuery oguerojejavy ramo po rami SENHOR ijayvu avi ha'e kuery re.

– Peẽ kuery ma pe'u va'erã ome'ëa ja “Ha'evepa rei 'rã” peje. Ha'e rã pe'u va'erã nome'ëi va'e kuery pe ma “Ou 'rã pendere opu'ã va'erã” peje.

<sup>6</sup> Ha'e nunga rupi peẽ kuery áry ou 'rã pytû mba'eve ndapexavei aguã, oiko 'rã pytû reia mba'eve penemba'ekuaa e'ÿ aguã. Profeta kuery pe ma kuaray oike xapy'a 'rã, ha'e kuery pe ara py teñ pytûmba 'rã.

<sup>7</sup> Ha'e ramo mba'emo oexa va'ety kuery oximba 'rã, imba'ekuaa va'e kuery ndoikuaavei rei 'rã. Tá, ha'e kuery ojoko 'rã ojuru, Nhanderuete mba'eve py nombovai ramo – he'i.

<sup>8</sup> Ha'e rã xere ma SENHOR Nhe'ë po'akaa anho oï. Ha'e rami vy xere oï ha'evea rami ajoguerekoo aguã ha'e xembaraeterã, Jacó kuery pe amombe'u porã aguã heko vaia, ha'e Israel kuery ojejavya.

<sup>9</sup> Peẽ Jacó akã ha'e Israel kuery ruvixa peiko va'e, pendu ke aÿ, mba'eta ha'eve'ÿa rami pejoguerekoo, ha'e ha'evea ramigua pe “Nda'evei va'e” peje.

<sup>10</sup> Peẽ kuery ma tuguy pemoëa rupi rive pejapove oorã Sião tetã re, mba'emo vai rupi anho pejapo Jerusalém re.

<sup>11</sup> Ha'e pygua huvixa pendekuai va'e ma peráta pejopy vy rive 'rã peikuaa pota mba'emo re, sacerdote kuery ma nhombo'e 'rã mba'emo ojouxe vy rive, ha'e profeta kuery ma peráta re rive 'rã imba'ekuaa. Ha'e rami teñ SENHOR re pejeroviaa rupi merami pendeayvu vy “Nhanembyte e'ÿ teve SENHOR oï? Ha'e ramo nhandere ndoui 'rã mba'emo vai”, peje rive 'rã.

<sup>12</sup> Ha'e nunga rupi pendekáuxa Sião tetã ombovaipaa 'rã mba'etyrã yvy oikaraña rami, Jerusalém opyta 'rã mba'emo ra'ykue aty rive. Yvyty templo oña voi opyta 'rã yvy'ã'i jaipa va'e rive.

### 4

#### *Isaías 2.1-4*

<sup>1</sup> Ha'e rami teñ opaa ára py ma yvyty SENHOR pegua oo oña va'e ombo'yvateve 'rã yvyty ha'e yvy'ã ikuai va'e áry. Ha'e ramo yvy regua kuery oje'oi 'rã ha'e katy.

<sup>2</sup> Heta va'e regua kuery oo vy aipoe'i 'rã joupe-up: “Peju ke, jaje'oi SENHOR pegua yvyty re, Jacó kuery Ruete pegua oo oña katy. Ha'e ramo nhanembo'e 'rã oikoa re, ha'e va'e rupi nhande kuery voi nhandekuai aguã”, he'i 'rã okuapy. Mba'eta Sião gui ma oikuua ucaa 'rã lei, Jerusalém gui onhendu 'rã SENHOR ayvu.

<sup>3</sup> Ha'e gui ma SENHOR oikuua pota 'rã yvy regua mbovy e'ÿ ikuai va'e re, omo'arandu 'rã yvy regua ipo'akave va'e ha'e mombyrya rupigua. Ha'e ramo ha'e kuery kyxe gui

ojapo 'rã yvy karaïarã, ha'e hu'y guaxu gui ojapo 'rã kyxe yvyra rakã ayaarã. Mba'eta yvy regua kuery ndoguerojeroviavei 'rã kyxe, neĩ joe opu'ã aguã voi ndoikuaavei ma 'rã.

<sup>4</sup> Ha'e rami 'rãgue py peteĩ-teĩ oguapy 'rã okuapy om̄ba'e uva rembypy, e'ŷ vy figo'y guy rupi, mba'eta ndoikovei 'rã imondiarã, SENHOR ixondaro reta va'e ojuru py ae ijayvu rire.

<sup>5</sup> Yvy regua kuery ma nguuete ramigua rery rupi peteĩ-teĩ ikuai. Ha'e rã nhande ma SENHOR Nhanderuete rery rupi 'rã nhandekuai, raka'e rã peve.

<sup>6</sup> Ha'e gui SENHOR aipoe'i:

— Ha'e va'e ára ma arupa 'rã oguata vaikue'i va'e kuery, amono'õmba avi 'rã ambopagaa rupi araa uka va'ekue.

<sup>7</sup> Oguata vaikue'i va'e amoingo 'rã peteĩ regua okuave va'e, ha'e mombyry ogueraa pyre ma amoingo 'rã ipo'akave va'e. Ha'e rami vy ha'e kuery re apena 'rã Sião yvyty áry, aŷ guive raka'e rã peve.

<sup>8</sup> Ha'e gui ndee torre vexa'i kuery rarõaty, Sião yvyty, tá, ndea py 'rã ou jypy guare rami ipo'aka va'erã, Jerusalém pygua ae ipo'aka ju aguã.

<sup>9</sup> Ha'e gui aŷ ma, mba'ete re tu ha'e rami ete peneraxẽ? Noĩ teve penderuvixave? Penemoneta va'ety okanhy ae teve? Pendere teve imemby raxy va'e rami haxy va'e ou?

<sup>10</sup> Peẽ Sião pygua kuery, aŷ pejexavai reve penhea'ã peiny imemby raxy va'e rami, mba'eta aŷ peo 'rã peneretã gui hovai rupi rive pendekuai aguã. Babilônia tetã peve 'rã peo. Ha'e rami teĩ penemondoucaa ju 'rã ha'e gui, mba'eta ha'e gui SENHOR pendereraa jepe 'rã penderovaigua kuery po gui.

<sup>11</sup> Aŷ ma heta ete ikuai yvy regua kuery pendere opu'ã okuapy va'e. Ha'e kuery aipoe'i: "Sião tetã tomongy'apaa, nhanderexa py ae tajaexa jaipota va'e, ha'e pygua kuery re oiko rã", he'i okuapy.

<sup>12</sup> Ha'e rami teĩ ha'e kuery ndoikuai SENHOR opy'a re oguereco va'e, ndoikuai onhem-bopy'aague mba'emo aju jokuaa ojykya aguã py rami omono'õmba aguã.

<sup>13</sup> Ha'e nunga rupi Sião pygua kuery, pepu'ã ke ha'e pejyky. Ha'e rami aguã ame'ẽ penderakuarã ferro guigua, ha'e penepoapẽrã overa va'e guigua. Ha'e ramo heta 'rã pejyky yvy regua kuery.\* Ha'e rã ha'e kuery oguereco va'ekue ma pemboaxapa 'rã SENHOR pe, imba'e rei-reikue peme'ẽ 'rã SENHOR yvy jave re ipo'aka va'e pe.

## 5

<sup>1</sup> Ha'e nunga rupi aŷ pemboatypa ke pendea pygua xondaro kuery. Mba'eta nhande-jokoa 'rã okuapy, ha'e yvyra py oinupã 'rã Israel kuery rerekao rova rupi.

### *Huvixaverã SENHOR ombou rã itui'i ha'e ipo'aka aguã re ijayvuague*

<sup>2</sup> Ha'e gui ndee Belém tekoia Efrata 'epy va'e, ndee ma kyri'i ete Judá regua ikuai aguã teĩ ndegui ae 'rã ou xevygua Israel kuery re opena va'erã. Ha'e va'e ma yma guive ijypy va'e, ijypy ete ára guive.\*

<sup>3</sup> Ha'e rami teĩ ha'e va'e kuery SENHOR omboaxa 'rã ranhe, imemby raxy va'e oikuavã'ia ára peve. Ha'e va'e jave py ma tyvy kuery mboae ojevypa ju 'rã Israel kuery ikuaria py.

<sup>4</sup> Ha'e gui guetarã kuery re opena va'e oĩ atã vy SENHOR po'akaa rupi 'rã opena oikovy, SENHOR nguuete rery iporã ete va'e rupi. Ha'e ramo ha'e kuery ikuai porã 'rã, mba'eta ha'e jave py huvixa pe "Yvate ete va'e" 'ea 'rã yvy apy peve.

<sup>5</sup> Ha'e ae 'rã oiko nhanemoingo porãarã.

\* <sup>4:13</sup> Ha'e jave py ma mba'emo ra'yí ha'e kuery ojykya 'rã vaka opyrõa rupi. Ha'e gui apy ma Jerusalém pygua kuery pe Nhanderuete ijayvu guymba pe rami, yvy regua kuery ombopaga aguã. \* <sup>5:2</sup> Belém tekoia ma huvixa Davi itui'iague (Rute 1.2; 1 Samuel 17.12). Ha'e nunga rupi Belém pe "Davi rekoague" 'ea (Lucas 2.4). Ha'e gui kova'e ayvu rupi vy Jesus voi itui'i raka'e Belém py (Mateus 2.3-6).

Ha'e gui Assíria pygua kuery ma nhandeyvy re ou vy huvixa ro ikuai va'e rupi oaxa jogueravy ramo nhande kuery va'e regua opu'ã 'rã ha'e kuery rovai, sete joe opena va'e ha'e irundy meme avakue rerekaoa 'rã opu'ã.

<sup>6</sup> Ha'e va'e kuery ma kyxe py ombovaipa 'rã Assíria ha'e Ninrode yvy, ha'e kuery ropy ae. Ha'e rami py nhandereraa jepe 'rã Assíria pygua kuery gui, ha'e kuery nhandeyvy re ou vy nhanderekaoa re opyrõ ramo.

<sup>7</sup> Ha'e gui Jacó regua rembyrekue ma yvy regua kuery mbyte rupi 'rã ikuai SENHOR guigua yxapy rami, jai rogue áry oky rayvi ho'a va'e rami guive, mba'eta ha'e nunga ma avakue re'ý oarõ va'e, avakue ra'y kuery re'ý ojeko va'e.

<sup>8</sup> Ha'e rami vy Jacó regua kuery rembyrekue ma amboae regua kuery mbyte rupi ikuai 'rã mymba kuery ka'aguy regua mbyte rupi guary oiko va'e rami. Yvy regua kuery ikuia rupi ikuai 'rã vexa'i kuery ikuia rupi guary ra'y oiko va'e rami, mba'eta guary oaxaa rupi joe opyrõ reve omboa'ypa 'rã, heraa jepearã ndoikoi rã guive.

<sup>9</sup> Ha'e rami ae avi ndepo'aka 'rã nderovaigua kuery re. Ha'e ramo ha'e kuery omokanhymbaa 'rã.

<sup>10</sup> SENHOR aipoe'i:

— Ha'e va'e ára ma penembyte gui aipe'apa 'rã penerymba kavaju kuery, ha'e ambovaipa 'rã penerenda karóxa joe opu'ãa pygua.<sup>†</sup>

<sup>11</sup> Pendeyvy re ambovaipa 'rã tetã ikuai va'e, ha'e aitypa 'rã oo ikorapa va'e pejapo va'ekue.

<sup>12</sup> Pendepo gui aipe'apa 'rã mba'evyky, ndapejouvei ma 'rã imba'ekuaa va'erã.

<sup>13</sup> Peẽ kuery mbyte gui aipe'a 'rã mba'emo ra'angaa pejapo va'ekue, ha'e ita pembojerovia aguã pemopu'ã va'ekue. Ha'e rami rire ndapejero'avei 'rã pendepo py ae pejapo va'ekue renonde.

<sup>14</sup> Penembyte gui aipe'apa 'rã ta'angaarã yvyra pemopu'ã va'ekue, ha'e ambovaipa 'rã peneretã ikuai va'e.

<sup>15</sup> Ha'e gui ajou vai ha'e xepoxya rupi ambopaga 'rã yvy regua xenhe'ẽ rendu e'ý va'ekue.

## 6

### Ojeupagua kuery re oikuua pota aguã re Nhanderuete ijayvuague

<sup>1</sup> Pendu ke aÿ SENHOR ayvu. Aipoe'i:

— Pepu'ã ke, yvyty ikuai va'e renonde pemombe'u pendereko, yvy'ã ikuai va'e oendu aguã pendeayvua.\*

<sup>2</sup> Ha'e peẽ yvyty pendekuai va'e voi ke pendu SENHOR oikuua va'e omombe'u rã, ha'e peẽ yvy yta ymagua peiko va'e reve. Mba'eta SENHOR oguerekoojeupagua kuery regua omombe'u va'erã, Israel kuery omboayvu aguã.

<sup>3</sup> — Ha'e gui xevygua kuery, mba'e tu ajapo pendere? Mba'e nunga py tu rombovoyi? Xembovai na!

<sup>4</sup> Mba'eta Egito yvy gui roguenoë va'ekue, escravo pendekuaiague gui roepy vy. Ha'e gui penerenonderã amondouka raka'e Moisés, Arão ha'e Miriã.

<sup>5</sup> Xevygua kuery, penema'endu'a ke aÿ Moabe pygua huvixa Balaque penemombax-eague re, ha'e ixupe Beor ra'y Balaão ombovaiague re. Penema'endu'a avi Sitim guive Gilgal peve pendere oiko va'ekue re, peikuua aguã SENHOR ha'evea rami meme pendererekaoague — he'i.

<sup>6</sup> Ha'e gui SENHOR pe ajexa ukaxe vy mba'e nunga 'rã tu aru, xerenapy'ã re aĩ aguã Nhanderuete yvate ete va'e renonde? Henonde aju vy mba'emo aapy reve ame'ẽ va'erã teve 'rã aru? Vaka ra'y peteñ ma'etý va'e aru 'rã teve?

<sup>†</sup> **5:10** Ha'e kuery ma joe opu'ã aguã anho oguerekoojeupagua kuery oenoï guenonde ojexa uka aguã, ha'e kuery omboayvu aguã. Ha'e gui yvyty ha'e yvy'ã ikuai va'e oenoï avi henduarã rami.

<sup>\*</sup> **6:1** Apy ma Nhanderuete ojeupagua kuery

<sup>7</sup> SENHOR oguerovy'a 'rã teve mbovy e'ŷ vexa'i, ha'e e'ŷ vy dez mil yakã'i azeite anho tynyẽ va'e? Xerekovaigue re ame'ẽ 'rã teve xera'y peteĩ'i va'ekue, xerete guigua ae'i teve ame'ẽ 'rã xepy'a guive ajejavyague rekovia?

<sup>8</sup> Any avakue, mba'eta pendevy pe SENHOR omombe'u ae ma iporã va'e oipota va'e. Ha'e va'e ma ha'evea rami pejoguerekovaigue rupi pejoayvu aguã, ha'e Penderuete reve penhemboyvate reia rupi e'ŷ peiko aguã.

### *Ha'eve'ŷa rami joguerekovaigue omnopaga aguã re Nhanderuete ijayvuague*

<sup>9</sup> Ha'e gui SENHOR oenoĩ 'rã tetã pygua kuery. Ha'e ramo hi'arandu va'e kuery ma hery oendu vy ojererokyjea rupi 'rã ikuai. Ha'e gui ma SENHOR aipoe'i:

— Yvy regua kuery, pendu ke penerenoña.

<sup>10</sup> Heko vai va'e ro py oĩ teri teve jokorea rupi ojou va'ekue, ha'e mba'emo ryru jokore aguã va'e?

<sup>11</sup> Xee amboeko porã 'rã teve mba'emo opejaa ha'eve'ŷ ramigua peiporu rã, e'ŷ vy poyia jokore aguã regua hyru gui penoẽ rã?

<sup>12</sup> Mba'eta tetã py oguerekopa rei va'e kuery jojukaa rupi anho ikuai, ha'e pygua kuery ha'e javi ijapu va'e meme, nhombotavya rupi anho ae 'rã ijayvu.

<sup>13</sup> Ha'e rami rã xee rombojexavai 'rã, pejekavya káuxa aipe'apa 'rã pendegui.

<sup>14</sup> Ha'e ramo mba'emo pe'u teĩ napenhandui 'rã, penderye py pendu riae 'rã penenhembyayia. Penemba'e rei-rei pemoĩ porãmba teĩ ndapejouvei 'rã. Ha'e rã mba'emo pejou nho va'e ma xee amboaxa 'rã kyxereveguape.

<sup>15</sup> Mba'emo penhoty teĩ napemono'õi 'rã. Azeitona reumbiri teĩ azeite ndaperekoi 'rã pendejee peikyty va'erã. Uva voi peumbiri teĩ ndapey'ui 'rã vinho.

<sup>16</sup> Mba'eta huvixa Onri ojapo uka va'ekue rupi rive pendekuai, Acabe ro pygua kuery ikuaiague ha'e nhomogetaa rami guive.<sup>†</sup> Ha'e nunga rupi xee romokanhymba 'rã. Peneretã ikuai va'e ajapo 'rã ojojai rei pyrã. Ha'e rami vy ajapo 'rã yvy regua kuery pendejou vai aguã rami.

## 7

### *Israel kuery opa marã ikuai re ijayvuague*

<sup>1</sup> Nda'evei ete 'rã xevy, mba'eta xee ma kuaray puku jave mba'emo'a omono'õmbaague rupi ndojouvei va'e rami aiko, ha'e rami e'ŷ vy uva omono'õmbaa ma rire ivaikue anho ojou va'e rami avi, mba'eta nda'ipovei ma hi'a oipyte pyrã, neĩ figo jypyguja ja'uxe vai va'e nunga voi.

<sup>2</sup> Mba'eta yvy gui okanhymba ma porayvu va'ekue. Avakue ikuai va'e regua peteĩve jipo heko porã va'erã. Pavẽ rei oma'ẽ mbegue 'rã okuapy jouguy omoẽ aguã. Peteĩ-teĩ ma kya py rami guyvy kuery ae ombo'aa rupi 'rã ikuai.

<sup>3</sup> Ha'e kuery opo py ojapo 'rã mba'emo vai anho, onhea'ã 'rã guive ojapo ete peve. Huvixa ma nhombopagaxea rupi anho oiko, joe oikuua pota va'e kuery ma peráta re anho ojapo, yvatekueve ma ijayvu 'rã okuapy opy'a py ojapo vaixea oĩ va'e re. Ha'e rami vy peteĩ rami ete 'rã ikuai mba'emo vai apoa rupi.

<sup>4</sup> Ha'e kuery va'e regua heko porãve va'e ma juu rami nhomoingo axy va'e, ha'evevea ramive merami ikuai va'e ma juuty gui nda'eveive va'e. Ha'e nunga rupi ovaẽ ma ára peneretã rarõa kuery omombe'u va'ekue, pejexavai aguã ára ae. Ovaẽ ma ha'e kuery ndoikuaavei rei aguã.

<sup>5</sup> Pejerovia eme peneirũ re, pejerovia eme peneirũ kuery re. Pejoko ke pendejuru pendepexo re ojero'a va'e pe eteve voi mba'eve pemombe'u e'ŷ aguã.

<sup>†</sup> **6:16** Huvixave Onri ha'e Acabe ma pavẽ gui heko vaive va'e (1 Reis 16.25, 30).

<sup>6</sup> Mba'eta ta'y kuery ndoayvuvei 'rã nguu kuery, tajy kuery voi opu'ã 'rã oxy kuery rovai, ipi'a ra'yxy kuery voi ome xy kuery rovai 'rã opu'ã. Ha'e rami vy peteĩ-teĩ rovaigua kuery ma ngoo pygua ae 'rã ikuai.\*

<sup>7</sup> Ha'e rã xee ma ama'ẽ tema 'rã SENHOR re, arõ 'rã Nhanderuete xereraa jepea. Ha'e ramo Xeruete oendu 'rã xeayvua.

*Israel kuery omboaxy aguã re SENHOR ijayvuague*

<sup>8</sup> Ha'e gui xerovaigua kuery, pevy'a rei eme xere. Xee ha'a rire teĩ apu'ã ju 'rã. Pytû rupi aiko teĩ SENHOR omoexakã 'rã aikoa'i rupi.

<sup>9</sup> SENHOR pe ajejavý rire ajexavai 'rã ipoxya gui, teĩ xerekó re oikuua pota vy xemboeko porã peve'i. Ha'e rami vy xerenoẽ ju 'rã guexakãa py, ha'e ramo xee aexa 'rã ha'evea rami xererekoa.

<sup>10</sup> Ha'e nunga xerovaigua okuapy oexa vy oendu 'rã oximbaa, xevy pe "Mamo tu SENHOR Nderuete oĩ?" he'i rire. Ha'e nunga oiko rã aexa 'rã xerexa py ae, tape rupi yapo oĩ va'e rami opyrõa ramo.

<sup>11</sup> Ha'e gui peneretã kora omoatyrõa jevya ára py penembotuvixave 'rã.

<sup>12</sup> Ha'e va'e ára ma pendea py jogueru 'rã Assíria guive Egito peve ikuai va'ekue, ha'e Egito tetã guive Eufrates yakã peve, ye'ẽ guive ye'ẽ mboae peve, ha'e yvyty oĩa guive yvyty mboae peve ikuai va'ekue.

<sup>13</sup> Ha'e rami teĩ pendeyvy omboavaipaa 'rã ha'e py ikuai va'e káuxa, ojapo vai rei rire.

<sup>14</sup> Epena ke ndevygua kuery re ndepopoka py. Ha'e kuery ma nerymba rami ikuai. Ha'e kuery ae'i ikuai yvyraty reia rupi, yvy porã reia mbyte. Tove yma guare rami tokaru okuapy Basã ha'e Gileade yvy rupi.

<sup>15</sup> — Ha'e ramo peẽ kuery pe xee aexa uka 'rã mba'emo porã, Egito yvy gui roguenoẽ jave guare rami — he'i.

<sup>16</sup> Yvy regua kuery ha'e nunga oexa vy oximba 'rã okuapy ipo'akaa gui. Ojuru ojoko 'rã opo py, ijapyxa voi opyta 'rã oendu ve'ẽ va'e.

<sup>17</sup> Mboi rami oere 'rã nhoguenoiny yvy ku'i. Mboi minha yvy rupi otyryry vy onhemiaque gui oryryipa reve oẽ va'e rami avi ha'e kuery voi oryryipa reve 'rã ojexa uka SENHOR Nhanderuete renonde, ixugui okyje vaipa reve.

<sup>18</sup> Oreruete, mava'e tu oiko ndee rami ete? Ndee ma remboguepa 'rã orerekó vaiague, nderexaraipa 'rã guive ndevygua kuery rokuave va'e orerekó vaiague re. Mba'eta SENHOR nhomboaxyxe vai va'e vy riae e'ẽ 'rã oĩ ivaia.

<sup>19</sup> Ha'e rami vy nhanemboaxy ju 'rã, opyrõmba 'rã nhanderekó vaiague re, jajejavýague omombopa 'rã ye'ẽ typyvea py.

<sup>20</sup> Ha'e ramo Jacó kuery pe oexa uka 'rã anhetẽ rupi oikoa, Abraão kuery pe oexa uka 'rã omboaxy, yma guive nhaneramoĩ kuery pe ouraague rami vy.

---

\* <sup>7:6</sup> Mateus 10.35, Lucas 12.53

## Naum ayvu oĩa Naum ayvu oĩa

Profeta Naum oiko jave ma Assíria pygua kuery omongyje rei okuapy Judá kuery. Ha'e kuery ma nhomboaxy va'e'ŷ ha'e ipo'akapave va'e ikuai, oitypaxe guive Judá kuery. Mava'e 'rã tu ojoko Judá kuery omomba e'ŷ aguã? Naum ombovai: "Senhor Nhanderuete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe Senhor ipoxy vy ombopaga 'rã ija'e e'ŷ va'e. ... Senhor ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive" (1,2,6).

Ha'e rã Nhanderuete pegua kuery pe ma aipoe'i: "Senhor ma poroayvu va'e. Jajexavaia ára ma nhanhemi aguã oiko, mba'eta oikuua hexe onhemi va'e kuery ha'e javi", he'i(1.7). Ha'e nunga rupi mba'emo oiko teñjarovy'a 'rã Nhanderuete nhandere openaa.

### *Nhanderuete poxya ha'e nhomboaxy re ijayvua*

<sup>1</sup> Nínive tetã pygua kuery rovai ayvu oĩa.\* Kova'e kuaxia para re oĩ Elcos pygua Naum pe oexa uka pyre.

<sup>2</sup> SENHOR Nhanderuete ma nda'evei etea ha'e opoxya oexa uka va'e. Opoxya rupi nhombopaga 'rã opa mba'e py. Ngovaigua kuery pe SENHOR ipoxy vy ombopaga 'rã ija'e e'ŷ va'e.

<sup>3</sup> SENHOR ma nda'ivai ma rei 'rã va'eri ipo'akapa va'e vy nomboeko porãi 'rã heko vai va'e. Yvytu jere ha'e yvytu atãa rupi SENHOR oguata va'e, ha'e arai re opyrõ 'rã yvy ku'i rupi rami.

<sup>4</sup> Ye'ẽ pe ijayvu vyomboypa, yakã ikuai va'e voi omboypa kuaa va'e. Ha'e ramo Basã ha'e Carmelo yvy rupi ipirupa. Líbano yvy re yvoty ikuai va'e voi ixorimbã 'rã.

<sup>5</sup> Henonde ma yvyty ikuai va'e oryryipa, yvy'ã ikuai va'e voi okanhymba. Henonde rupi yvy opu'ã 'rã ho'amy, yvy ha'e javi, ha'e yvy re ikuai va'e voi.

<sup>6</sup> SENHOR ipoxy rã mava'e 'rã tu ogueropo'aka kuaa? Mava'e tu oikoveve 'rã opoxy etea oexa uka va'e renonde? Mba'eta ipoxya ma tata rami 'rã ou, itaova ikuai va'e omboa'ypa 'rã guive.

<sup>7</sup> SENHOR ma poroayvu va'e. Jajexavaia ára ma nhanhemi aguã oiko, mba'eta oikuua hexe onhemi va'e kuery ha'e javi.

<sup>8</sup> Ha'e rã Nínive tetã ma SENHOR omomba vyvoi 'rã, yy tuvixa va'e oua rami. Ngovaigua kuery oakykue monha 'rã pytã rupi.

<sup>9</sup> Mba'exa tu penhembopy'a pekuapy SENHOR rovai? Ha'e ae 'rã penemomba vyvoi. Penembojexavaiarã ou vy peteigüe'i pyve penemokanhymba 'rã.

<sup>10</sup> Mba'eta peẽ kuery ma juuty mbyte py penhemimba, ha'e oka'u va'e rami vinho pendejee penhoëmba teñpenemokanhymba 'rã mba'emo pirekue okaia rami.

<sup>11</sup> Nínive tetã pygua kuery, pendea gui peteõ oo SENHOR rovai onhembopy'a va'e, ha'eve'ŷa rami nhomoneta va'e.

<sup>12</sup> Po rami SENHOR ijayvu:

— Penembaraete ha'e pendereta teñpenemombaa 'rã. Ha'e rami vy pekanhymba 'rã. Xee ae 'rã rombojexavai, ha'e gui ma norombojexavaivei 'rã.

<sup>13</sup> Ha'e gui peẽ Judá kuery, pende'áry gui ma amopëmba 'rã ha'e kuery canga omoï va'ekue. Amondopa 'rã ixã pendejokuaague.

\* <sup>1:1</sup> Nínive tetã ma Assíria yvy regua tuvixave va'e. Ha'e katy Nhanderuete omondouka Jonas ojeko rerova aguã regua omombe'u aguã. Ha'e kuery ojeko rerova va'eri ha'ekue rami ae ikuai, nanhomboaxyi vy amboae regua omokanhymbaa rupi.

**14** Ha'e rã peẽ Assíria pygua kuery, SENHOR ijayvuague rami vy nda'ipoavei 'rã pener-amymino kuery penderery rupi oenoĩ mbyrã. Penderuete ramigua kuery pegua oo gui ma amomba 'rã ta'angaa ikuai va'e, mba'emo ryku guigua guive. Penderekko vai ramo ajapo 'rã yvykua py penenhonoa aguã rami. – he'i.

**15** Ne'exa, yvyty áry rupi ou oiny ayvu porã mombe'ua, pendekuai porã aguã regua omombe'u va'erã. Ha'e nunga rupi Judá kuery, pejapo ju ngaru, ha'e pejapo penhem-boayvuague, mba'eta pendea py avakue heko vai va'e ndouvei ma 'rã. Ha'e va'e kuery ma omokanhymbaa ae ma.

## 2

### *Nínive tetã ojokoa vy ipo'akaa ete aguã re ijayvuague*

**1** Nínive tetã pygua kuery, ou ma oiny penemokanhyarã. Penhangareko oo ikorapa va'e re, pearõ tape, pemombaraete pendekupe, pemono'õmba pendexondaro kuery tei.\*

**2** (Ha'e rami avi SENHOR omoõmba ju 'rã Jacó kuery po'akaa, Israel kuery po'akaa omoõ ju 'rãa rami ae avi, imba'e rei-rei oguereko va'ekue oipe'apaa ha'e uva'y ikuai va'ekue ombovaipaa rire tei.)

**3** Nínive pygua kuery va'e regua imbaraetekueve ma oguereko hu'y jokoa pytã va'e, avakue ipy'a guaxukueve ma pytã va'e py 'rã onhemonde, karóxa oguereko katupa ára py aço oĩ va'e overapa, hu'y guaxu voi overa rei va'e.

**4** Tape ikuai va'e rupi karóxa oaxa-axa va'e ma oo atã, ha'e tetã mbyte rupi joaxa-axa 'rã inhakuã reve. Tataendy rami 'rã onha, overa va'e rami.

**5** Ha'e pygua yvatekueve oenoĩ ukapaa va'eri ha'e kuery onhepyxangapa 'rã ouvy tape rupi. Tetã kora yvýry ovaẽ aguã ojapura jogueravy tei nhovaexi 'rã ngovaigua kuery ojerovia rei ha'e hembiporupa va'e reve.

**6** Yakã jokoa ikuai va'e oipe'aa rã ombovaipa huvixa ro.

**7** Nínive tetã ma huvixa kunha rami opyta va'ekue ri ijayvuague rami vy ixugui oipe'apaa mba'emo, ha'e pygua kuery escravo-rã ogueraapaa guive. Ha'e ramo hembiguai kunhataigüe apykaxu rami ojae'o okuapy opexo re oipete-pete reve.

**8** Nínive tetã ma oiko ypy guive yy omботы pyre rami ae tema oĩ va'ekue ri aŷ ma okanhymba ma ovy. Ojapukai reve "Pepyta! Pepyta!" 'ea tei mava'eve ndojevyai.

**9** Ha'e gui "Peipe'a na prata ha'e ouro oĩ va'e, mba'eta mba'emo omoõ porã mbyre ndogueraapaa teri. Oĩ reta teri opa mba'e oipotapy", 'ea.

**10** Ha'e gui ma "Aikore! Mba'eve noĩvei ma, ivaipa va'e anho, ombovaipaa ma!" 'ea. Ha'e rami vy ha'e kuery py'a hykupa, henapy'ã ryryipa rei guive, pavẽ ryepy rupi ojexavaia anho oendu, ha'e javi rova xiñguepa rei guive.

**11** Mamo tu oĩ aŷ guary kuery kua ha'e ta'y'i kuery okaruaty? Mba'eta ha'e va'e rupi guary oiko-ikoaty, guary kunha ta'y'i reve mava'eve omondyi e'ŷ re oiko va'ekue.†

**12** Guary ojuka reta va'ekue gua'y kue'iry ho'u va'erã, guaĩ py ojuka va'ekue guary kunha pe omboja'o va'erã. Itakua oĩaty omonyẽmba va'ekue ojuka va'ekue-ekue re'õgue, xo'o anho ikua rupi oĩ va'ekue.

**13** SENHOR ixondaro reta va'e aipoe'i:

– Ne'exa, xee ma nderovai aiko. Ha'e rami vy aapypa 'rã ndekaróxa hataxí reta reve, kyxe py ajuka ukapa 'rã ndera'y kue'iry, ha'e ndeyvy gui aipe'a ukapa 'rã nerembia. Ha'e ramo noenduavei ma 'rã ndeayvu reraa kuery – he'i.

## 3

### *Nínive tetã ombovaipaa aguã re ijayvuague*

\* **2:1** Apy ma Nhanderuete omombe'u uka ma voi Nínive tetã re hovaigua kuery opu'ã okuapy 'rãa. † **2:11** Nínive tetã pygua huvixa kuery pe ma "Guary kuery" 'ea raka'e.

<sup>1</sup> Nda'evei ete 'rā tetā jouguy moña anho ikuai va'e pe. Ijapua ha'e mondaa tynyē va'e, ha'e mba'emo oipe'aague oī riae!

<sup>2</sup> Pendu ke: vaka pi revovo, karóxa ruéra ryapu, kavaju ou nhendua, ha'e karóxa oaxa nhendu va'e.

<sup>3</sup> Ne'exa, kavaju árygua kuery ogueronha atā, kyxe hexakāmba, hu'y guaxu overapa, oikutu pyre heta ikuai, manogueaty, manogue opa e'ŷ va'e. Omanogue ikuai va'e re onhepyxangapaa rive.

<sup>4</sup> Ha'e nunga ha'e javi ma kunha tavy reia iporā va'e káuxa. Ha'e va'e ma mba'evyky ja avi. Ovende amboae regua otavya py, oo pygua kuery ovende avi ombo'evyky py.\*

<sup>5</sup> SENHOR ixondaro reta va'e aipoe'i:

— Ne'exa, xee aiko nderovai. Aupi 'rā ndetupyja hapy gui nderova áry peve. Ha'e rami vy amboae regua kuery pe aexa uka 'rā ndepire reia, ha'e tetā ikuai va'e pe aexa uka 'rā rexīa.

<sup>6</sup> Nde'áry amombo 'rā ha'eve'ŷ va'e, rombojaru rei 'rā, ha'e roeja 'rā pavē rembiexarā.

<sup>7</sup> Ha'e ramo nderexaa kuery onhamba 'rā ndegui. Ha'e vy aipoe'i 'rā: “Nínive tetā ivaipa ma. Mava'e tu omboaxy 'rā? Magui tu ajou 'rā heronhemboaxyarā?” he'i 'rā.

<sup>8</sup> Nínive tetā, ndee teve Nô-Amom gui ha'eveva va'e? Mba'eta ha'e va'e tetā ma Nilo yakā ha'e yy omboty pyre mbyte py oī va'ekue. Jovaive rupi yy oī. Ha'e rami vy tetā kora 'rāgue py ye'ē oī va'ekue hovaigua jokoarā.<sup>†</sup>

<sup>9</sup> Etiópia ha'e Egito yvy pygua opa mba'e py oipytyvō aguā rami ikuai va'ekue. Pute ha'e Líbia yvy pygua voi ipytyvōarā ikuai avi va'ekue.

<sup>10</sup> Ha'e rami teī ogueraapaa raka'e escravo-rā. Ta'y kuery voi ojukapa tape ojerea ikuai va'e rupi. Yvatekueve re oexaa okuapy xortea, ha'e ipo'akakueve voi ombo'apaa corrente py ojokua reve.

<sup>11</sup> Ha'e rami ae avi Nínive tetā, ndee voi neakanhy vy renhemi 'rā. Ndee reka avi 'rā nderovaigua kuery gui renhemi aguā.

<sup>12</sup> Ndea py oo ikorapa va'e ha'e javi ma ára pyau jave figo'a rami rive optyta. Mba'eta ombovavaa ramo rive ho'apa 'rā hi'uxea kuery juru py.

<sup>13</sup> Ne'exa, ndea py xondaro kuery ikuai va'e ma kunhague rami meme optyta. Ndeyvy rupi tetā kora rokē ikuai va'e ojepe'apa 'rā nderovaigua kuery oikepa aguā, okē jokoa okaipa rire.

<sup>14</sup> Penoē yy peneretā ojokoa jave guarā, pemombaraeteve pendero ikorapa va'e. Tapeo yapo py, pepyrō yapo hapomo rei re, yvy jykue ombojo'aague pemoatyrō aguā.

<sup>15</sup> Ha'e rami teī penemombaa 'rā tata py, kyxe py guive pendejukaa 'rā. Tuku rami 'rā penemokanhymba. Tuku rami pendereta, tuku-karu gui penderetave teī,

<sup>16</sup> jaxy-tata yva re ikuai va'e gui mba'emo vendea kuery perekva'e hetave teī tuku-karu oike 'rā penda py, ha'e gui oē ju 'rā oveve reve.

<sup>17</sup> Penderegua yvatekueve ma tuku rami ikuai, ha'e penda py joe opena va'e kuery ma tuku tuvixakueve rami, mba'eta yro'y jave py onhemi 'rā oo mbotya re, va'eri kuaray yvate'i ramo ovevepa 'rā oje'oivy. Ha'e ramo ndoikuaavei 'rā ooague.

<sup>18</sup> Ndee Assíria pygua huvixave, ndevygua joe opena va'e kuery oikepa okuapy, yvatekueve voi. Ndevygua kuery oaīmba ma yvy'ā ikuai va'e katy, ha'e ndoikoi imono'ō jevyarā.

<sup>19</sup> Ndeai pegua moā ma ndoikoi, okuera e'ŷ va'erā ae. Nderekokue oendu va'e kuery ojepopetepa 'rā nderovai. Mba'eta ha'e javi regua re rembou va'ekue imoingo axyarā.

---

\* <sup>3:4</sup> Nínive tetā pe ae “Kunha tavy reia” he'i profeta.    † <sup>3:8</sup> Nô-Amom ma tetā guaxu Egito yvy re oī va'ekue ri Assíria pygua kuery ombovaipa raka'e.

## Habacuque ayvu oĩa Habacuque ayvu oĩa

Profeta Habacuque ma ngovaigua kuery Babilônia pygua po py hetarã kuery ojexavai taa oikuua vy oporandu Nhanderuete pe: “Senhor, raka'e peve 'rã tu ndevy ajapukai teĩ ndee nerendui? Ndevy ajapukai vy 'Joguero'a reia rupi ikuai!' ha'e teĩ ndee ma ndorereraa jepei”, he'i (1.2). Ha'e ramo Nhanderuete ombovai vy ijayvu ojeupegua kuery ombopaga aguã re. Ha'e va'e ayvu “ndoaxa rivei 'rã. Hare teĩ earõ tema, mba'eta anhetẽ ou 'rãe are e'ý re. Peikuua pota ke onhemboyvate rei va'e kuery re! Ha'e kuery nhe'ẽ ma ha'eve e'ýa rami oĩ. Ha'e rã heko porã va'e ma ojeroviaa rupi 'rã ikuai” (2.3b-4).

Nhanderuete nhombopaga aguã ára ou aguã Habacuque pe omombe'u ramo aipoe'i: “Ha'e nunga aendu vy anhemondyipa. Ndeayvua gui xerembe ryryipa. Xekãgue hu'ũmba rei, xerenapy'ã voi ikangypa. Ha'e rami teĩ akyrirĩ reve 'rã arõ aikovy jexavaia ára ovaẽ aguã, mba'eta ou 'rãe orere opu'ã rei va'e kuery áry. Xapy'a rei figo'y nda'ipoty porãi 'rã, ha'e uva'y re hi'a noĩ, oliveira ndai'a porãi, ha'e mba'ety rupi voi ja'u va'erã ndoikoi, vexa'i kuery oipe'apaa 'rã heravy ikora gui, ha'e vaka voi ikora py nda'ipovei teĩ, xee ma arov'y'a riae 'rã Senhor, avy'a 'rã Nhanderuete xereraa jepea re”, he'i (3.16-18). Salmo py oĩa rami: “Pearõ ke Senhor. Pendekuerai eme, pendepy'a guaxu ha'e pearõ tema Senhor” (Salmo 27.14).

### *Judá kuery reko vaia re ijayvuague*

<sup>1</sup> Kova'e ayvu ma profeta Habacuque pe oikuua uka va'ekue.

<sup>2</sup> SENHOR, raka'e peve 'rã tu ndevy ajapukai teĩ ndee nerendui? Ndevy ajapukai vy "Joguero'a reia rupi ikuai!" ha'e teĩ ndee ma ndorereraa jepei.

<sup>3</sup> Mba'e re tu xevy pe rexu uka heko vaia, ha'e xeapo nhombojexavaia aexa aguã rami? Mba'eta xerenonde oĩ riae mba'emo mbovaipaa ha'e joguero'a reia. Jojoko-joko reia rupi ikuai, nhombojovake kuerei 'rã.

<sup>4</sup> Ha'e nunga rupi lei rupi ve'ý joguerekao, ha'evea rami joguerekao ndojekuaavei ma. Heko vai va'e kuery heko porã va'e ojokopa rei ramo ha'eve'ýa rami joguerekao.

### *Judá pygua kuery heko vai ramo Nhanderuete ombopaga uka aguã re ijayvuague*

<sup>5</sup> SENHOR aipoe'i:

— Pexa pota ha'vy yvy regua kuery re ajapo taa re. Pema'ẽ vy penhemondyipa rei 'rã peneakanhymba peve. Mba'eta peikove teri reve voi ajapo 'rã mba'emo, pendevy omombe'ua teĩ perovia va'erã nunga e'ý.\*

<sup>6</sup> Mba'eta ambou 'rã caldeu kuery. Ha'e va'e kuery ma nhomoingo axy etea ha'e ivai ja. Yvy ha'e javi rupi oguataa rupi oipe'apa 'rã okuapy amboae kuery reko.

<sup>7</sup> Ha'e kuery ma nhomongyje ha'e ijavaeteve va'e. Ha'e kuery ae guekorã oeja, ha'e onhemboyvate rei okuapy.

<sup>8</sup> Hymba kavaju kuery ma xivi para gui inhakuãve va'e. Kavaju árygua kuery voi guary pytû rupigua gui inharõve va'e, opa rupi ogueronhaa rupi. Ha'e va'e regua kavaju árygua kuery mombyry gui ovaẽ xapy'a vy oveve merami jogueruvy, taguato ho'u va'erã re ho'a xapy'a va'e rami avi.

<sup>9</sup> Ha'e kuery ma joguero'a reia rupi anho 'rã ou. Ngova re onhea'ã rei 'rã oove tema aguã, ha'e escravo-rã ojou va'ekue ma ita ku'i reia rami heta.

<sup>10</sup> Ha'e kuery ma huvixave kuery mbojaru reia rupi ikuai. Yvatekueve teĩ ojojai rive 'rã okuapy. Ojojai avi 'rã oo ikorapa va'e ha'e javi, mba'eta yvy omboaty vy oipe'a kuaa.

\* <sup>1:5</sup> Atos 13.41

<sup>11</sup> Ha'e gui yvvytu oipejua rami oopa ju 'rā. Ipo ky'apa va'e meme, ha'e ae po'akaa pe rive "Nhanderuete" he'i guive.

### *Heta va'e kuery re profeta ojerureague*

<sup>12</sup> Ha'e gui SENHOR Xeruete iky'a e'ŷ va'e, ndee ma jypy'i guiveguia e'ŷ teve reiko? Ha'e ramo ore kuery noromanoi 'rā. SENHOR, ndee reiporavo Babilônia pygua kuery orembopaga aguã ae. Xe'itaova, ndee ae rembou oremo'arandu aguã.

<sup>13</sup> Nderexa ky'a e'ŷ va'e vy nda'evei mba'emo vai rexia aguã, nhombojexavaia re nda'evei rema'ẽ rive aguã. Mba'e re 'rā tu ha'vy nerembopagai anhetẽ rupi e'ŷ ikuai va'e, mba'e re rekyrirĩ 'rā heko vai va'e omokanhy ramo ha'e kuery gui heko porãve va'e?

<sup>14</sup> Mba'e re tu remoingo uka avakue pira ye'ẽ rupigua rami, ha'e e'ŷ vy yvvy rupi onhembotyryry va'e rami? Mba'eta ha'e va'e kuery ma nguvixa ndoguerekoi.

<sup>15</sup> Mba'eta avakue ha'e javi re hovaigua kuery pinda reve opu'ã ovvy vy oguenoẽ atã 'rā. Pira mbo'aa py omono'õmba 'rā. Ha'e nunga anho ha'e kuery oguerovy'a vy ovvy'a rei 'rā okuapy.

<sup>16</sup> Ha'e nunga rupi omba'e pira mbo'aa pe ae 'rā ha'e kuery ome'ẽ mba'emo ombojerviaa rupi, pira renoẽa pe rive 'rā oapy okuapy heakuã porã va'e. Mba'eta ha'e va'e rupi ae 'rā ojouve tema ovvy. Ha'e ramo vy guembi'u mba'emo kyrakue py omoirũ reve 'rā ho'u okuapy.

<sup>17</sup> Ha'e ramo ete pira mbo'aa py ha'e kuery nhoguenoẽ tema 'rā teve? Nhomboaxyia rupi e'ŷ ojuka tema 'rā teve yvvy regua kuery?

## 2

### *SENHOR ombovaiague*

<sup>1</sup> Ha'e gui xee ma apu'ã 'rā ha'amy aarõaty torre py. Oo ikorapa va'e áry aĩaty py ama'ẽ 'rā aikuaa pota aguã ajerurea Nhanderuete ombovai vy mba'e he'i pa ra'ea re.

<sup>2</sup> Ha'e gui SENHOR xembovai vy aipoe'i:

— Embopara ndevy aexa uka ta va'e. Yvyrapo re emboparapa, onha reve oaxa va'e teiñ oexa kuaa aguã.

<sup>3</sup> Mba'eta aexa uka va'e ma raka'e rā teri ojeupity va'erã, hi'ára py porã. Oo pojava guive ojeupitypa aguã, ndoaxa rivei 'rā. Hare teiñ earõ tema, mba'eta anhetẽ ou 'rāe are e'ŷ re.

<sup>4</sup> Peikuaa pota ke onhemboyvate rei va'e kuery re! Ha'e kuery nhe'ẽ ma ha'eve e'ŷa rami oĩ. Ha'e rā heko porã va'e ma ojeroviaa rupi 'rā ikuai.\*

<sup>5</sup> Ha'e gui vinho nhombotavya rami ae avi onhemboyvate va'e kuery voi noĩ riae 'rā. Ha'e kuery ho'upaxe vy ojuru oipe'a yvyra rupa rami, manoa rami ae avi "Ha'eve ma" nde'i kuaai va'e. Ha'e kuery voi ojeupe guarã oguerupa 'rā yvvy regua kuery, amboae regua ha'e javi re 'rā ipo'aka.

### *Caldeu kuery pe "Nda'evei ete 'rā pendekuai" he'iague*

<sup>6</sup> Ha'e nunga rupi ha'e kuery rovai amboae kuery ijayvu 'rā okuapy porojajai va'e ayvu rupi. Ha'e vy aipoe'i 'rā okuapy:

"Nda'evei ete 'rā imondaague omboaty va'e pe, ha'e oreve va'ekue ombopagaa rupi rive oguerekopa va'e pe! Raka'e peve 'rā tu ha'e rami reiko?"

<sup>7</sup> Mba'eta oreve va'e kuery opu'ãmba 'rā ndere. Ha'e kuery omýi vy nemondyipa xapy'a 'rā. Ha'e ramo mba'emo rerekva'e optyta 'rā ha'e kuery oipe'apa va'erã.

<sup>8</sup> Yvvy regua heta va'e mba'e rei-rei reipe'apa rire amboae regua kuery ju oipe'apa 'rā ndea gui, avakue ruguy remoëague ha'e ijyvy rembovaipaague re, tetã ha'e tetã pygua kuery ha'e javi guive.

<sup>9</sup> "Nda'evei ete 'rā jokorea rupi oipe'a va'ekue ngoo py omboaty va'e pe. Yvatea py renhemixe teiñ mba'emo vai gui reo jepe aguã.

\* <sup>2:4</sup> Romanos 10.17, Gálatas 3.11, Hebreus 10.37-38

<sup>10</sup> Ndero pygua kuery oximba aguã rami rejapo. Heta regua remombaa py nenhe'ẽ pe ae rejapo vai.

<sup>11</sup> Mba'eta ndero mbotya re ita oĩ va'e ae 'rã ijayvu nderovai, ha'e yvyra opyaxa va'e nemombe'u 'rã.

<sup>12</sup> "Nda'evei ete 'rã jouguy moõa rupi rive guetã ojapo va'e pe, ha'e teko vai rupi omoõ atã va'e pe.

<sup>13</sup> Mba'eta SENHOR ixondaro reta va'e gui ae povae ou: Yvy re ikuai va'e ombo'eapoa rupi mba'emo ojou va'ekue ma tata oapypa va'erã meme. Ha'e nunga rupi ha'e javi regua haxypa rive 'rã.

<sup>14</sup> Mba'eta yvy jave re tynyẽ 'rã SENHOR rexakãa oikuaa va'e, ye'ẽ yy tynyẽa rami avi.

<sup>15</sup> "Nda'evei ete 'rã oirũ kuery omonga'upa va'e pe, ha'e vinho reve nda'evei va'e omoirũ vy oirũ kuery oxia oexaxe va'e pe.

<sup>16</sup> Mba'eta nemboetepaa 'rãgue py reximba 'rã. Ndee voi rey'u 'rã ha'e nunga, ha'e rexu uka 'rã ndepire regua remboi uka e'õ va'ekue reikoa. Mba'eta ovaõ 'rã ndee voi rey'u aguã karo SENHOR oiporu kuaa regua py ome'ẽ va'e gui. Ha'e ramo reximbaa ojao'ipa 'rã ndepo'akaague.

<sup>17</sup> Mba'eta Líbano yvy rembovaipaague rekoria ndeao'i 'rã, mymba inharõ va'e rejukaague regua voi nemongyje rei 'rã, avakue ruguy remoëague re, ha'e yvy, tetã ha'e tetã pygua kuery remokanhymbaague re guive.

<sup>18</sup> "Mba'erã tu ovare mba'emo ra'angaa, ijapo kuery ae ojapo rire? Ta'angaa mba'emo ryku guigua voi apu ja meme. Mba'exa 'rã tu ijapoare ojerovia ha'e ae ojapo va'ekue re, mba'eta ta'angaa ijayvu e'õ va'e rive ojapo rire?

<sup>19</sup> "Nda'evei ete 'rã yvyra guigua pe rive 'Evy ke!' he'i va'e kuery pe, ha'e ita ijayvu e'õ va'e pe 'Endu ke!' he'i va'e pe guive. Ta'angaa rive nda'u nhanderekombo'e 'rã? Ne'exa, ouro ha'e prata py ojao'ipa va'eri iguýry ma ipytuëna noï.

<sup>20</sup> Ha'e rã SENHOR ma ojeupagua templo iky'a e'õ va'e py oĩ. Tove yvy jave re ikuai va'e tokyririmba henonde."

### 3

#### *Nhanderuete pe Habacuque onhembo'eague*

<sup>1</sup> Po rami ma profeta Habacuque onhembo'e mboraei ojapo reve.

<sup>2</sup> SENHOR, ndeayvua aendu vy  
aendu avi anhemondya.

SENHOR, ore kuery ára py ju ejapo ymave rupi rejapo va'ekue ramigua.

Ore'ára py ju ejapo ha'e nunga oikuaapaa aguã rami.

Ndepoxya ramive ma nema'endu'a avi ke renhomboaxy aguã re.

<sup>3</sup> Nhanderuete ma ou oiny Temã gui,  
Parã yvyty gui ou Iky'a e'õ va'e.

Hexakãa omonyẽ yva,

yvy voi tynyẽ ogueroporai va'e.

<sup>4</sup> Hexakãa ma tataendy rexakã rami,  
ipo gui ma nhemboxi ojekuaa,  
opo'aka onhomiague gui.

<sup>5</sup> Guenonde rupi ombou mba'eaxy vaikue,  
guakykue rupi voi nhomoingo axya omoingo.

<sup>6</sup> Ha'e opyta vy rive ojapo yvy oryryipa aguã rami.  
Oma'ẽ ho'amy vy rive ombojaity yvy regua kuery.  
Ha'e ramo yvy jypygua va'e iku'ipa,  
yvy'ã oĩ riae 'rã va'ekue voi ho'apa.  
Ha'e rã Nhanderuete oikoa ma imarã e'õ va'e.

<sup>7</sup> Cusã yvy re aexa oguy py ikuai va'e ojexavai rã,  
ha'e Midiã yvy re ijaty va'e kuery oryryipa.

<sup>8</sup> SENHOR, yakã pe teve ndepoxy?

Yakã'i ikuai va'e pe teve,  
e'ý vy ye'ë pe ndevai?  
Mba'eta reguata reovy nerymba kavaju áry,  
ndekaróxa py reju ndepo'akaa rexu uka vy.

<sup>9</sup> Nderapa renoë renhomiaque gui,

nderu'y ryru ma tynyë vaipa.  
Yvy remboja'o yakã renhono vy.

<sup>10</sup> Yvyty ikuai va'e nderexu vy ojero'a okuapy,

ha'e vy ojapo yvy'ã guy katy yy oxyry atã aguã rami.  
Ye'ë voi typyvea guive hevovo nhendu,  
ha'e yvate katy oupi opo.

<sup>11</sup> Kuaray ha'e jaxy ma oña py ae optya

nderu'y onhe'ë ovu va'e hexakãmba rã,  
ha'e nderu'y guaxu hexakã va'e overa gui.

<sup>12</sup> Rejou vaia rupi reguata reovy yvy jave rupi,

ndepoxya rupi repyrõmba yvy regua kuery re.

<sup>13</sup> Ndejeupeguia kuery reraa jepe vy ae reo,

huvixarã remoï va'ekue reraa jepe aguã.  
Ha'e rami vy rembovaipa heko vai va'e kuery ro ao'ia,  
hoo yta voi remboipa.

<sup>14</sup> Nderovaigua xondaro kuery ru'y py ae reikutu inhakã rupi,

ha'e kuery yvytu atã rami xemokanhy aguã ou jave.  
Ovy'a reve ou va'ekue nhemi rupi iporiaukue'i omokanhymbaa rami.

<sup>15</sup> Ha'e gui ndee ma ye'ë áry rupi reguata rejuvy nerymba kavaju kuery reve,  
yy oje'apa va'e rupi ae.

<sup>16</sup> Ha'e nunga aendu vy anhemondyipa.

Ndeayvua gui xerembe ryryipa.  
Xekãgue hu'ũmba rei,  
xerenapy'ã voi ikangypa.  
Ha'e rami teñ akyrirñ reve 'rã arõ aikovy jexavaia ára ovaë aguã,  
mba'eta ou 'ræe orere opu'ã rei va'e kuery áry.

<sup>17</sup> Xapy'a rei figo'y nda'ipoty porai 'rã,

ha'e uva'y re hi'a noï,  
oliveira ndai'a porai,  
ha'e mba'ety rupi voi ja'u va'erã ndoikoi,  
vexa'i kuery oipe'apaa 'rã heravy ikora gui,  
ha'e vaka voi ikora py nda'ipovei teñ,

<sup>18</sup> xee ma arov'y a riae 'rã SENHOR,

avy'a 'rã Nhanderuete xereraa jepea re.

<sup>19</sup> SENHOR Nhanderuete ma anhemiaty oï.

Ha'e ojapo xepy oï atã aguã rami guaxu rami ae,  
yvate rupi aiko aguã.

Jogueroporaei va'e pe ombopara pyre, mbaraka ixã va'e pyombojoguy reve guarã.

## Sofonias ayvu oĩa

## Sofonias ayvu oĩa

Profeta Sofonias omombe'u Nhanderuete ombopaga ete aguã Judá ha'e Jerusalém py ikuai va'e, mba'eta aipoe'i: "Aupi 'rã xepo Judá kuery ha'e Jerusalém pygua kuery rovai. Ha'e va'e gui amomba 'rã Baal pegua ra'angaa pegua ha'e javi, ta'angaa pe mba'emo ome'ẽ va'e rery, ta'angaa pegua sacerdote ikuai va'ekue guive", he'i (1.4). Ha'e pygua kuery anho e'ŷ ombopaga 'rã. "Ha'e nunga rupi Senhor aipoe'i: 'Xerarõ ke pekuapy, anhomokanhymba aguã apu'ãa ára peve. Ha'e rami vy amboatypa 'rã peteĩ-teĩ regua, ha'e kuery re xeayvu vaiague amoingo aguã, xepoxya ha'e javi guive. Mba'eta tata py amomba 'rã kova'e yvy ha'e javi, nda'evei etea aexa uka vy' ", he'i (3.8).

Ha'e rã hexe ojerovia va'e kuery pe ma aipoe'i: "Sião pygua kuery, peporaei ke. Israel pygua kuery, pevy'a vaipa ke. Jerusalém pygua kuery, pevy'a ke pendepy'a ha'e javi py, pevy'a. Mba'eta Senhor omboguepa ae ma pepaga aguã va'ekue, omoxẽ ma guive penderovaigua kuery. Penembyte oĩ Senhor Israel kuery ruvixa va'e. Ha'e ramo mba'emo vai ndouvei ma 'rã pexa aguã", he'i (3.14-15).

### *Judá ha'e Jerusalém pygua kuery rovai ijayvuague*

<sup>1</sup> SENHOR oayvu Sofonias pe ombou va'ekue. Ha'e va'e ma Cusi ra'y, Cusi ma Gedalias ra'y, Gedalias ma Amarias ra'y, ha'e Amarias ma Ezequias ra'y. Amom ra'y Josias Judá pygua huvixa oĩ jave py oayvu ombou.

<sup>2</sup> Ha'e vy SENHOR aipoe'i:

— Anhetẽ ete, amomba 'rã yvy re ikuai va'e ha'e javi.

<sup>3</sup> Amomba 'rã avakue ha'e mymba, guyra yvate rupi oveve va'e ha'e pira ye'ẽ rupigua. Amomba avi 'rã nhomboeko ky'aa rupi ikuai va'e, heko vai reve. Yvy gui amokanhymba 'rã avakue — he'i SENHOR.

<sup>4</sup> — Aupi 'rã xepo Judá kuery ha'e Jerusalém pygua kuery rovai. Ha'e va'e gui amomba 'rã Baal ra'angaa pegua ha'e javi, ta'angaa pe mba'emo me'ẽa kuery rery, ta'angaa pegua sacerdote ikuai va'ekue guive.

<sup>5</sup> Amomba avi 'rã oo áry yva re ikuai va'e mbojeroviaa kuery, ha'e SENHOR ombojerovia vy hexe oura reve tuuete ramigua Milcom re voi oura avi va'e.

<sup>6</sup> Amomba avi 'rã SENHOR gui ojepe'a va'e, ha'e SENHOR oeka e'ŷ, neĩ ixupe noporandui va'e kuery guive — he'i.

### *SENHOR opoxya oexa uka aguã ára re ijayvuague*

<sup>7</sup> Pekyrirĩ SENHOR Nhanderuete renonde, mba'eta ovaẽ rai'i ma SENHOR ára. Mba'eta SENHOR oguerekó katu mba'emo ojuka vy ixupe ome'ẽa aguã, oiky'a'opa ma guive ha'e py ou aguã oenoĩ va'ekue.

<sup>8</sup> SENHOR aipoe'i:

— Ha'e va'e ára ma ambopaga 'rã joe opena va'e, huvixave ra'y kuery, ha'e amboae regua ao py onhemonde va'e ha'e javi.

<sup>9</sup> Ha'e va'e ára ambopaga avi 'rã ta'angaa pegua opy oike va'e ha'e javi, ha'e opatõ kuery ro py jojukaa ha'e jokorea rupi rive ikuai va'e.

<sup>10</sup> Ha'e va'e ára peteĩ haxẽ va'e onhendu 'rã Pira vendeaty rokẽ oĩa guive, ojae'o nhendu 'rã tetã yvy'ã guyve rupi guive, hevovo rei nhendu 'rã yvy'ã'i ikuai va'e guive — he'i SENHOR.

<sup>11</sup> — Mactés tetã pygua kuery, peneraxẽ avi, mba'eta Canaã yvy pygua kuery ha'e javi omokanhymbaa ma, prata opeja va'e kuery guive omombaa.

**12** Ha'e va'e jave ma Jerusalém tetā ha'e javi rupi aikuaa pota 'rã aikovy tataendy reve, ambopaga aguã avakue vinho gui oka'upa rei vy opy'a py " SENHOR ma iporã va'e moingoa e'ŷ, neĩ mba'emo vai omoingo va'e'ŷ guive", he'i va'e kuery.

**13** Ha'e nunga rupi ha'e kuery mba'e rei-rei oipe'apaa 'rã, hoo ombovaipaa 'rã guive. Ha'e kuery ngoorã ojapo ju teĩ noĩ 'rã ha'e py, uva onhoty teĩ ndoy'ui 'rã vinho.

**14** Ovaẽ rai'i ma SENHOR ára ijavaete va'e. Ovaẽ rai'i ma, ou atã oiny. Pejapyxaka ke! SENHOR ára ma nhomoingo axy aguã, avakue ipo'akapa va'e voi haxẽmba rei aguã guive.

**15** Ha'e va'e ára ma opoxya oexa uka rã ojexavaia aguã ára, nda'ikuai kuaavei rei ha'e okanhymbaa aguã ára, pytû vaikue rei ete 'rã, arai ha'e pytû vaipaa ára,

**16** mimby guaxu omonhe'ea aguã, ha'e gui tetã ikorapa va'e ha'e torre yvateve va'e re opu'ã va'e kuery ojapukai aguã ára.

**17** SENHOR aipoe'i:

— Avakue ikuai va'e re ambou 'rã imbojexavaiarã. SENHOR rovai ha'e kuery ojejavý rire ára rewegua e'ŷ rami 'rã ikuai. Ha'e kuery ruguy onhoëa 'rã yvy ku'i rami, ha'e rã ho'okue ma mba'emo repoxi rami 'rã omomboa — he'i.

**18** Ha'e kuery prata ha'e ouro oguerekó va'ekue ma SENHOR opoxya oexa ukaa ára ndogueraa jepéi 'rã. Mba'eta nda'evei etea rupi yvy ombovaipa 'rã tata nhombopagaarã py. Anheté ete omokanhymba vyvoi 'rã yvy re ikuai va'e ha'e javi.

## 2

### *Filisteu kuery rovai ijayvuague*

**1** Peẽ pexí kuaa e'ŷ va'e, penhemboaty ke ha'e peikuaa pota porã pendereko re,

**2** oa'angaague ára ovaẽ e'ŷ mbove, mba'eta ha'e va'e ára ou ma oiny mba'emo pirekue oveve ovya rami. Pende'áry SENHOR opoxya oexa uka aguã ou e'ŷ mbove peikuaa pota pendejee, tá, pendere ou e'ŷ mbove SENHOR opoxya oexa uka aguã ára.

**3** Ha'e gui peẽ yvy re peiko rive'ia rupi SENHOR ayvu pejapopa va'e, peka pota ke SENHOR. Teko porã rupi pota ke pendekuai, peiko rive'ia rupi reve. Ha'e rami rã SENHOR poxya ára py xapy'a rei penenhomí 'rã.

**4** Mba'eta Gaza tetã ma oeja'a 'rã, Asquelom voi opyta 'rã tekoa e'ŷa. Asdode gui ma kuaray mbyte jave py omoëmbaa 'rã, ha'e Ecrom gui ma oipe'apaa 'rã.

**5** Nda'evei ete 'rã Quere pygua kuery ye'ë yvýry ikuai va'e pe. Ha'e gui ndee Canaã yvy filisteu kuery ikuia, nderovai SENHOR ijayvu vy "Xee romomba 'rã, heko va'ekue ndoikoavei peve", he'i 'rã.

**6** Ye'ë yvýry ma opyta 'rã nhuñdy vexa'i okaru atyrã rive, vexa'i re opena va'e rekoarã, ha'e vexa'i kuery kora oĩ aguã.

**7** Ye'ë yvýrygua ma Judá kuery mba'erã opyta 'rã. Ha'e py omongaru 'rã guymba kuery, ha'e ka'aru nhavõ onhenomba 'rã Asquelom tetã py oo ikuai va'e py, mba'eta ha'e kuery re SENHOR Tuuete oikuuaa pota vy ombopyau 'rã ikuiaia.

### *Moabe ha'e Amom pygua kuery rovai ijayvuague*

**8** — Xee aendu ma Moabe pygua kuery nhombojaru reia rupi ijayvu va'e, Amom pygua kuery jojojai reia guive. Xevygua kuery rovai ijayvu rei okuapy, ijyvy re guive.

**9** Ha'e nunga rupi anheté ete xee ae rekove rupi aura vy aipoa'e: Moabe opyta 'rã Sodoma tetã rami, ha'e Amom pygua kuery ma Gomorra pygua rami 'rã opyta, pynondyrã, ygua juky rei va'erã ha'e ombovaipa pyre raka'e rã peve guarã. Ha'e rã xevygua kuery rembyrekue ma mba'emo oipe'apa 'rã ha'e gui, xevygua kuery okuave va'e ojopy 'rã ombo'erã — he'i SENHOR ixondaro reta va'e, Israel kuery Ruete.

**10** Ha'e kuery re ha'e nunga oiko 'rã onhemboyvate reiague re, mba'eta ojojai reia rupi onhemboyvate rei okuapy SENHOR ixondaro reta va'e pegua kuery rovai.

**11** Ha'e ramo ha'e kuery rovai SENHOR oexa uka 'rā oavaetea, yvy gui tuuete ramigua ikuai va'e omokanhymba vy. Ha'e rami rire yy pa'ū rupi ikuai va'e kuery ombojerovia 'rā okuapy, peteī-teī guekoa py ae.

### *Etiópia ha'e Assíria pygua kuery rovai ijayvuague*

**12** Ha'e gui peē Etiópia pygua kuery ma pendejukapaa 'rā SENHOR guigua kyxe py.

**13** Kuaray ijapu'a'ia katy opo oupi vy ombovaipa avi 'rā Assíria yvy. Ha'e rami vy Nínive tetā ombovaipa ramo yvy piru reia 'rā optyta mba'eve jipovei rā.

**14** Ha'e va'e tetā mbyte py vexa'i kuery optytu'u 'rā okuapy, mymba kuery mboae ijaty avi 'rā. Oo ytakue ikuai va'e áry ma oko guaxu ha'e kuī'i onhemboaity 'rā. Janel a ikuaiague rupi onhendu 'rā guyra nhendua, ha'e rā okē py ma yty rive 'rā optyta, yvyrage yary guigua oipe'apaa rire.

**15** Ha'e va'e tetā py ma ov'y'a rei ha'e okyjea rupi e'ŷ ikuai va'ekue. Ha'e pygua kuery ojeupe ae "Xee ma peteī'i va'e aiko, xee rami etegua jipoi avave", he'i va'ekue. Ha'e rami teī tetā ombovaipa pyre optyta, ka'aguy rupigua optytu'u atyrā rive! Oaxa va'e kuery oojai reia rupi otuvy nhe'ē ha'e okuave'ē 'rā jogueravy.

## 3

### *Jerusalém pygua kuery re ijayvuague*

**1** Ha'e gui nda'evei ete 'rā nhomoingo axya kuery retā pe, mba'eta nonhe'ē rendui ha'e iky'apa va'e ikuai.

**2** Ha'e kuery ma nomboetei avave rei, onhemo'arandu ukaxe e'ŷ va'e, SENHOR re ojerovia e'ŷ va'e, neī Nguuete re onhembojaxe e'ŷ va'e.

**3** Ha'e pygua yvatekueve ma guary okororō va'e rami joguerek. Nhomboayvua kuery ma aguara'i pytū guýry joguero'aa rami ikuai, ikāgue rive'i ma voi ko'ēgue jevy guarā ndoejai va'e rami.

**4** Ha'e pygua profeta kuery voi hi'arandu e'ŷ va'e, anhetē rupi e'ŷ ikuai va'e meme. Ha'e pygua sacerdote kuery ma omongy'apa 'rā oo iky'a e'ŷ va'e, lei rupi e'ŷ ikuai vy.

**5** Ha'e rā SENHOR ma heko porā ete va'e oiko ha'e kuery mbyte, teko vai ojapo va'e'ŷ. Ko'ē nhavō 'rā oexa uka teko porā rupi oikoa. Ha'e ma ndojapo e'ŷi oayvuague. Ha'e rā heko vai va'e kuery ma noxī kuaai.

**6** Ha'e nunga rupi SENHOR aipoe'i:

— Amokanhymba yvy regua, ha'e kuery pegua torre ikuai va'ekue voi ambovaipa ma. Hetā mbyte rupi ajapo noīavei aguā rami, ha'e rupi oaxa va'erā jipoi ramo. Ha'e kuery retā ikuai va'ekue ambovaipa ma, mava'eve ete noīavei aguā.

**7** Ha'e rire xee aipoa'e: "Aŷ ma ri nhi'ā peē kuery xerenonde pejererokyjea rupi 'rā pendekuai, xevy pe penhemo'arandu uka 'rā guive, penderekao ombovaipaa e'ŷ aguā, ambovaipa aguā re xeayvu teī", ha'e. Ha'e rami teī ha'e kuery ko'ē rai reve ov'y vy onhemongy'apa reive okuapy.

### *Jerusalém pygua kuery ogueraa jepe aguā re ijayvuague*

**8** Ha'e nunga rupi SENHOR aipoe'i:

— Xerarō ke pékuapy, anhomokanhymba aguā apu'āa ára peve. Mba'eta xepy'a re amoī yvy regua kuery amono'ōmba aguā. Ha'e rami vy amboatypa 'rā peteī-teī regua, ha'e kuery re xeayvu vaiague amoingo aguā, xepoxya ha'e javi guive. Mba'eta tata py amomba 'rā kova'e yvy ha'e javi, nda'evei etea aexa uka vy.

**9** Ha'e gui ma yvy regua kuery pe ame'ē ju 'rā ijuru iky'a e'ŷ va'erā, SENHOR rery rupi ojapukai ha'e hexeve peteī rami ikuai aguā.

**10** Ha'e ramo Etiópia yvy regua yakā ikuai va'e rovai rupi ikuai avi xemboetea kuery, amoāmba va'ekue ramymino kuery. Ha'e va'e kuery voi xevy pe ogueru 'rā ome'ē va'erā.

<sup>11</sup> Ha'e va'e ára xee noromoximbai 'rã mba'emo pejapoague gui, naxenhe'ẽ rendui rire teĩ. Mba'eta penembyte gui aipe'apa 'rã onhemboyvatea rupi ov'y'a rei va'e. Ha'e rami rire napenhemboyvatevei ma 'rã xevyguá yvyty iky'a e'ŷ va'e áry.

<sup>12</sup> Ha'e rami 'rãgue py penembyte aeja 'rã ikuai rive'i ha'e onhemoyvy'i kuaa va'e, xee SENHOR rery rupi ojerovia va'erã.

<sup>13</sup> Ha'e ramo Israel kuery rembyrekue ndojejavyvei ma 'rã, neĩ nda'ijapuvei ma 'rã. Ha'e kuery juru py noĩvei 'rã apekũ nhombotavya rupi ijayvu va'e, mba'eta arupa 'rã mymba kuery nhuñndy rupi onhenomba va'e rami ikuai aguã, ha'e jipoavei 'rã imondiyarã.

<sup>14</sup> Sião pygua kuery, peporaei ke. Israel pygua kuery, pevy'a vaipa ke. Jerusalém pygua kuery, pevy'a ke pendepy'a ha'e javi py, pevy'a.

<sup>15</sup> Mba'eta SENHOR omboguepa ae ma pepaga aguã va'ekue, omoxẽ ma guive penderovaigua kuery. Penembyte oĩ SENHOR Israel kuery ruvixa va'e. Ha'e ramo mba'emo vai ndouvei ma 'rã pexa aguã.

<sup>16</sup> Ha'e va'e ára py Jerusalém pe aipo'ea 'rã: "Sião pygua kuery, pekyje eme. Pemoe'õgue eme pendejyva.

<sup>17</sup> Mba'eta penembyte rupi oiko SENHOR Penderuete. Ha'e ma ipo'akapa va'e pendereraa jepe aguã, pendererovy'a ete 'rã guive. Penderayvua rupi vy penembopyau 'rã, pendererovy'a 'rã oporaeia rupi", 'ea 'rã.

<sup>18</sup> SENHOR aipoe'i:

— Xevyguá ngaru oiko aguã py ndoo reguai vy iporiaupa va'ekue ma xee arupa ju 'rã. Ha'e va'e kuery ma penderegua ae teĩ ojojai poyi pyrã ikuai va'ekue.

<sup>19</sup> Ne'exa, ha'e va'e jave py ambopagapa 'rã penembojexavaiare kuery. Ha'e rã oguata vaikue'i va'e ma xee araa jepe 'rã, omoxẽ mbyre arupa ju 'rã. Ha'e rami vy ha'e kuery ajapo 'rã omboetepaa ha'e hery re ima'endu'aa aguã rami, yvy ha'e javi oximba rei okuapyague nhavõ rupi ae.

<sup>20</sup> Ha'e va'e jave py xee roguerupa vy romono'õmba ju 'rã. Ha'e rami vy anhetẽ ete ajapo 'rã yvy regua kuery ha'e javi guí penderery re ima'endu'a porãave ha'e penemboeteave aguã rami, pexaa py pendekuaia ambopyau ramo — he'i SENHOR.

## Ageu ayvu oĩa Ageu ayvu oĩa

Israel kuery Babilônia py escravo-rã heraapague gui Jerusalém tetã py ju ojevy teĩ nomoatyrõi ranhe Nhanderuete pegua templo. Ha'e ramo “Po rami ijayvu Senhor ixondaro reta va'e: Kova'e kuery aipoe'i: ‘Novaẽi teri Senhor pegua oo jajapo ju aguã’, he'i okuapy. Ha'e nunga rupi profeta Ageu pe Senhor oayvu ombou vy aipoe'i: ‘Ha'evea rami teve xevyguia oo ivaipa oiny teri reve peẽ kuery ro yvyrape py penhovã porãmba va'ekue py peĩ aguã? Ne'exa ha'vy. Po rami ijayvu Senhor ixondaro reta va'e: Peikuua pota nho ke pendere mba'emo oiko va'e-va'e re. Mba'eta mba'emo penhoty vaipa va'eri mbovy'i rive pemono'õ. Pekaru va'eri napenhandu kuaai. Pey'u va'eri pendu teri y'uvei. Penhemonde va'eri peteïve henda py napenderete rakui. Peráta'i pejou va'eri pendevoko opukue py merami pembolsru”, he'i (1.2-6). Mba'eta Nhanderuete oipota raka'e ha'e kuery omoatyrõ ixupeguia templo, peteï-teĩ ngoo anho e'ý.

Nhanderuete re nhanema'endu'a e'ý re nhandejeupe guarã re anho nhanhea'ã aguã nda'evei, Nhanderuete nanhanemoingo porãi 'rã guive. “Ha'e rami 'rãgue py jypy'i peka 'rã ipo'akaa ha'e ixuguigua teko porã. Ha'e ramo 'rãe peikotevã va'e ha'e javi ome'ẽ avi pêvy” (Mateus 6.33).

### *Guetarã kuery pe Ageu ijayvuague templo ojapo ju aguã re*

<sup>1</sup> Mokoĩ ma'etý re ma huvixa Dario oĩ jave, mboapy meme jaxya, ijypy'ia ára py ma SENHOR ombou oayvu. Profeta Ageu rupi ombou Salatiel ra'y Judá pygua huvixa Zorobabel pe, Jozadaque ra'y sacerdote yvateve va'e Josué pe guive. Ha'e vy aipoe'i:

<sup>2</sup> — Po rami ijayvu SENHOR ixondaro reta va'e: Kova'e kuery aipoe'i: “Novaẽi teri SENHOR pegua oo jajapo ju aguã”, he'i okuapy.\*

<sup>3</sup> Ha'e nunga rupi profeta Ageu pe SENHOR oayvu ombou vy aipoe'i:

<sup>4</sup> — Ha'evea rami teve xevyguia oo ivaipa oiny teri reve peẽ kuery ro yvyrape py penhovã porãmba va'ekue py peĩ aguã?

<sup>5</sup> Ne'exa ha'vy. Po rami ijayvu SENHOR ixondaro reta va'e: Peikuua pota nho ke pendere mba'emo oiko va'e-va'e re.

<sup>6</sup> Mba'eta mba'emo penhoty vaipa va'eri mbovy'i rive pemono'õ. Pekaru va'eri napenhandu kuaai. Pey'u va'eri pendu teri yuvei. Penhemonde va'eri peteïve henda py napenderete rakui. Perata'i pejou va'eri pendevoko opukue py merami pembolsru.

<sup>7</sup> Po rami ijayvu SENHOR ixondaro reta va'e:

— Peikuua pota ke pendere mba'emo oiko va'e-va'e re.

<sup>8</sup> Aÿ ma tapeo, yvyty gui Peru yvyra xevyguia oorã pejapo aguã. Ha'e va'e ma arov'y'a 'rã, xemboyvatea 'rã guive — he'i.

<sup>9</sup> SENHOR ixondaro reta va'e aipoe'ive ju:

— Mba'emo pemono'õ va'erã pearõ reta teĩ mbovy'i ete oiko. Ha'e gui mbovy'i va'ekue pendero py peraa ramo ma xee aipeju vy rive amoaimba imondovy. Mba'e re tu oiko ha'e rami? Mba'eta xevyguia oo ivaipa teri oiny, ha'e rã peẽ kuery peteï-teĩ pendero re anho nda'eveive peovy.

<sup>10</sup> Ha'e nunga rupi ae yva gui nda'okyvei pende'áry, ha'e yvy gui voi mba'eve ndoikoi.

<sup>11</sup> Pendeyvy ha'e yvyty ikuai va'e rupi amombirupa. Mba'emo aju ikuai va'e re, vinho, azeite, ha'e yvy gui mba'emo oiko 'rã va'ekue ha'e javi re ambou ipirupa aguã, avakue re guive, mymba kuery ha'e pendepo py pejapo va'e ha'e javi re guive.

\* <sup>1:2</sup> Ha'e va'e e'ý mbove ma Nhanderuete pegua oo ha'e kuery ojapo aguã omboypy teĩ hovaigua kuery omombytu'u ojapopa ete aguã gui (Esdras 3.8-4.5, 24). Ha'e gui apy ma Ageu rupi Nhanderuete ijayvu ojapopa ete aguã re.

### *Heta va'e kuery SENHOR onhe'ẽ rendu okuapyague*

<sup>12</sup> Ha'e ramo Salatiel ra'y Zorobabel ha'e Jozadaque ra'y sacerdote yvateve va'e Josué onhe'ẽ rendu okuapy SENHOR Nguuete heta va'e kuery ha'e javi reve, profeta Ageu pe SENHOR oayvu omombe'u uka va'ekue ojapopa vy. Ha'e rami vy ha'e kuery ojererokyjea rupi ikuai SENHOR renonde.

<sup>13</sup> Ha'e gui SENHOR remimbou Ageu ijayvu heta va'e kuery pe. SENHOR ijayvuague omombe'u vy aipoe'i:

— SENHOR aipoe'i: “Xee aiko peẽ kuery reve”, he'i.

<sup>14</sup> Ha'e rami vy SENHOR omokyre'ŷ Salatiel ra'y Judá pygua huvixa Zorobabel ha'e Jozadaque ra'y sacerdote yvateve va'e Josué, heta va'e kuery ha'e javi guive. Ha'e ramo ha'e kuery oupa vy onhemoi ju okuapy oo ojapoa rupi Nguuete SENHOR ixondaro reta va'e peguarã.

<sup>15</sup> Mboapy meme jaxya ha'e vinte e quatro araa py ma ha'e rami ikuai.

## 2

### *Mokoĩa templo omoexakã aguã re Nhanderuete ijayvuague*

<sup>1</sup> Ha'e gui mokoĩ ma'etŷ re ma huvixa Dario oĩ jave py, sete jaxya ha'e vinte e um araa py profeta Ageu pe SENHOR ombou ju oayvu. Ha'e vy aipoe'i:

<sup>2</sup> — Ndeayvu ke aŷ Salatiel ra'y Judá pygua huvixa Zorobabel pe, Jozadaque ra'y sacerdote yvateve va'e Josué pe, ha'e heta va'e kuery ha'e javi pe guive. Ha'e vy aipo're:

<sup>3</sup> “Mava'e peẽ kuery aŷ peve pekuave va'e regua pa pexa raka'e kova'e oo jypy guare iporãmba teri jave? Ha'e gui aŷ ma mba'exa tu pexa? Mba'everã ndovarevei va'e rami e'ŷ teve optya aŷ?”

<sup>4</sup> Ha'e rami teĩ po rami aŷ SENHOR ijayvu: “Zorobabel, ndepy'a guaxu ke. Jozadaque ra'y sacerdote yvateve va'e Josué, ndee voi ke ndepy'a guaxu. Ha'e heta va'e kuery pendeyvy re pendekuai va'e voi ke pendepy'a guaxu pemba'eapo aguã, mba'eta peẽ kuery reve xee aiko”, he'i SENHOR ixondaro reta va'e.

<sup>5</sup> “Egitó yvy gui pejupa jave xereve guarã ajapo va'ekue rami vy Xenhe'ẽ oiko 'rã penembyte rupi. Pekyje eme ha'vy.”

<sup>6</sup> Mba'eta po rami ijayvu SENHOR ixondaro reta va'e: “Teigue ju amboryryipa 'rã yva ha'e yvy, ye'ẽ ha'e yvy yy e'ŷa guive.\*

<sup>7</sup> Amboryryi 'rã yvy regua ha'e javi. Ha'e ramo yvy regua ha'e javi oguerupa 'rã mba'emo ojou porãve va'e. Ha'e rã kova'e oo xee amonyêmba 'rã hexakã va'e”, he'i SENHOR ixondaro reta va'e.

<sup>8</sup> “Prata ha'e ouro oĩ va'e ma xemba'e meme”, he'i SENHOR ixondaro reta va'e.

<sup>9</sup> “Kova'e oo ma jypy guare gui hexakãmbave 'rã. Ha'e rami vy kova'e henda re ambou 'rã pendekuai porã aguã”, he'i SENHOR ixondaro reta va'e.

### *Heta va'e kuery ndojeroviai ramo ijayvu eteague*

<sup>10</sup> Ha'e gui mokoĩ ma'etŷ re ma huvixa Dario oĩ jave py, nove jaxya ha'e vinte e quatro araa py SENHOR peteigüe ju oayvu ombou profeta Ageu pe. Ha'e vy aipoe'i:

<sup>11</sup> — Po rami ijayvu SENHOR ixondaro reta va'e: Eporandu ke sacerdote kuery ikuai va'e pe lei re oĩ va'e re. Ha'e vy aipo're:

<sup>12</sup> “Xapy'a rei amongue xo'o iky'a e'ŷ va'erã omboaxa pyre onhovãa 'rã heravy oao py. Ha'e gui xapy'a rei xo'o ombovya rive 'rã mbojape, tembi'u ombojy pyre, vinho ryru, azeite ryru, ha'e'ŷ vy tembi'u oĩ va'e re rei. Ha'e rami rã ha'e va'e tembi'u voi nda'u optya 'rã iky'a e'ŷ va'e?” 're.

Ha'e rami sacerdote kuery pe aporandu rã ombovai:

— Any – he'i okuapy.

<sup>13</sup> Ha'e ramo Ageu oporanduve ju:

\* **2:6** Hebreus 12.26-27

— Ha'e gui xapy'a rei amongue mba'emo re'ōgue re opoko vy ha'eve'ŷ va'e opyta rire ma kova'e nunga iky'a e'ŷ va'e re ju ojopy 'rã. Ha'e rami rã kova'e nunga ju nda'u opyta 'rã ha'eve'ŷ va'e?

Sacerdote kuery ombovai:

— Tá, opyta 'rã ri ha'eve'ŷ va'e — he'i.

<sup>14</sup> Ha'e ramo Ageu aipoe'ive ju:

— SENHOR aipoe'i: “Ha'e rami ae avi kova'e kuery ikuai, mba'eta kova'e regua ma ha'eve'ŷ va'e meme ikuai xerenonde. Ha'e rami ae ju opyta opo py mba'emo ojapo va'e, xevy pe ome'ẽ va'e voi. Iky'a va'e meme opyta.”\*

<sup>15</sup> Aŷ ma peikuaa porã pota ha'e va'e ára jave guive pendere oiko va'ekue ha'e javi re. Mba'eta templo SENHOR peguarã pejapo aguã ita pembojoja ypy e'ŷ mbove,

<sup>16</sup> ha'e va'e jave e'ŷ mbove ma vinte ryru mba'emo pemoĩ porãague py peo vy dez ete'i 'rã pejou va'ekue. Vinho voi cinqüenta ryru pemboyruague py peo peraa aguã vy ma vinte ete'i 'rã pejou va'ekue.

<sup>17</sup> Ha'e rami avi peẽ kuery re xee ambou yvytu raku, mba'emo ru'ũ ha'e amandau, pendepo py pejapo va'e ha'e javi áry. Ha'e ramive ma peẽ kuery neĩ peteĩve ndapejeko rerovai xevy guarã”, he'i SENHOR.

<sup>18</sup> “Xee xeayvu ju: Aŷ guive peikuaa porã pota, nove jaxya ha'e vinte e quatro ára guive, SENHOR pegua templo pejapo aguã pemboypyá ára guive, peikuaa pota ha'e nunga ha'e javi pendere oiko va'ekue re.

<sup>19</sup> Mba'eta jipovei ma mba'emo ra'yigue pemoĩ porãague py. Uva'y ndai'avei avi, figo voi, romã, neĩ oliva voi. Ha'e rami teĩ kova'e ára guive xee romoingo porã 'rã”, he'i.

### *Zorobabel pe SENHOR ojapo porã aguã re ijayvuague*

<sup>20</sup> Ha'e gui nove jaxya ha'e vinte e quattro araa pyve SENHOR teígue ju ombou oayvu Ageu pe. Ha'e vy aipoe'i:

<sup>21</sup> — Aipo're ke Judá pygua huvixa Zorobabel pe: “Amboryryipa 'rã yva ha'e yvy.

<sup>22</sup> Aity 'rã huvixa ikuai va'e po'akaague, ambovaipa 'rã yvy regua kuery imbaraeteague. Ambovaipa 'rã karóxa, ogueroguata va'e kuery guive. Ha'e ramo kavaju ha'e hi'árygua kuery ho'apa 'rã kyxe py peteĩ-teĩ jokutu vy.”

<sup>23</sup> — SENHOR aipoe'ive ju: “Ha'e gui ndee Salatiel ra'y Zorobabel xerembiguai reiko va'e, ha'e va'e ára py rogueru vy roguereko 'rã xekuã regua xerery oĩa va'e rami, xee ae roiporavo rire”, he'i SENHOR ixondaro reta va'e.

---

\* <sup>2:14</sup> Ha'e kuery reko rami vy mba'emo iky'a va'e amboae regua re ombovy rive teĩ ha'e va'e voi opyta 'rã iky'a va'e. Ha'e kuery voi Nhanderuete nonhe'ẽ renduia rupi ikuai vy ixupe iky'a va'e opyta.

## Zacarias ayvu oĩa

### *"Pejeko rerova ke", he'iague*

<sup>1</sup> Mokoĩ ma'etŷa ha'e oito jaxyo re ma huvixave Dario oĩ jave py SENHOR ombou oayvu Berequias ra'y profeta Zacarias, Ido ramymino va'e pe. Ha'e vy aipoe'i:

— Peneramoĩ kuery pe SENHOR ipoxy ete va'ekue.

<sup>3</sup> Ha'e nunga rupi aipo're neretarã kuery pe: Po rami SENHOR ixondaro reta va'e ijayvu: Pejevy ju ke xevy. Ha'e ramo xee voi aiko ju 'rã peẽ kuery reve.

<sup>4</sup> Pendekuaive eme peneramoĩ kuery ikuaiague rami. Mba'eta ha'e kuery pe ma profeta kuery yma guare ijayvu vy aipoe'i va'ekue: "Po rami ijayvu SENHOR ixondaro reta va'e: Pejeko rerova ke aŷ opa marã rei pendekuaia ha'e mba'emo vai pejapoa gui", he'i va'ekue ri ha'e kuery noendui, naxenhe'ẽ rendui guive – he'i SENHOR.

— Mamo tu aŷ peneramoĩ kuery ikuai? Profeta kuery voi ndokuave riae avi.

<sup>6</sup> Ha'e rã xeayvu ha'e aipota va'e xerembigua profeta kuery pe aikuaa uka va'ekue ma ojeupitypa ma peneramoĩ kuery ambojexavaia py. Ha'e gui ma ha'e kuery ojeko rerova vy aipoe'i: "SENHOR ixondaro reta va'e ma nhanembopaga aguã re onhembopy'a raka'e nhanderekovaia ha'e mba'emo vai jajapoague re. Ha'e rami vy ojapo ae ma", he'i okuapy.

### *Jypy kavaju kuery oexaague*

<sup>7</sup> Ha'e gui mokoĩ ma'etŷa ha'e onze jaxyo sebate 'epy va'e, vinte e quattro araa py, huvixa Dario mokoĩ ma'etŷa re ma oĩ jave py SENHOR oayvu ombou ju Berequias ra'y profeta Zacarias, Ido ramymino va'e pe.

<sup>8</sup> Ha'e ramo peteĩ pytû aexa ra'u rã ojekuaa peteĩ ava kavaju pytã va'e árygua. Ha'e va'e ma peteĩ yvyugua puku py oĩ, yvyra murteira ikuai va'e mbyte. Hakykue re ojekuaave ju kavaju pytã va'e, xiñ rai'i va'e ha'e xiñ va'e guive.

<sup>9</sup> Ha'e ramo xee aporandu:

— Xeruvixa, marã ramigua tu peva'e?

Ha'e ramo anjo xereve ijayvu va'e ombovai:

— Xee aikuaa uka 'rã marã ramigua paa – he'i.

<sup>10</sup> Ha'e ramo yvyra ikuai va'e mbyte ava oĩ va'e ju ombovai. Ha'e vy aipoe'i:

— Ha'e va'e kuery ma yvy jave rupi oguata va'erã SENHOR ombou va'ekue – he'i.

<sup>11</sup> Ha'e gui ha'e va'e kuery ju ijayvu SENHOR pegua anjo yvyra ikuai va'e mbyte oĩ va'e pe. Ha'e vy aipoe'i:

— Ore ma yvy jave rupi roikopa ma. Ha'e ramo ha'e pygua kuery optyu'upa, yvy ha'e javi rupi ikuai porãmba guive – he'i okuapy.

<sup>12</sup> Ha'e ramo anjo SENHOR pegua ombovai:

— SENHOR nexondaro reta va'e, raka'e peve 'rã tu remboaxya nderexa ukavei Jerusalém tetã pygua kuery pe, neñ Judá regua tetã ikuai va'e pygua kuery pe? Mba'eta ha'e kuery re setenta ma'etŷ re ma ndepoxya oĩ – he'i.

<sup>13</sup> Ha'e gui anjo xereve ijayvu va'e pe SENHOR ijayvu porã'i nhombopy'a porãa rupi.

<sup>14</sup> Ha'e ramo ha'e va'e ju ijayvu xevy:

— Emombe'u atã ke: Po rami SENHOR ixondaro reta va'e ijayvu: Xee ma nda'evei etea aendifu Jerusalém ha'e Sião pygua kuery re.

<sup>15</sup> Ha'e rã amboae regua kuery pe ma xepoxy ete, mba'eve gui okyje e'ŷ re ikuai va'e pe. Mba'eta ha'e kuery pe amongue py ete'i xepoxy va'ekue ri aŷ ma ha'e kuery xembopoxyve ete.

**16** Ha'e nunga rupi po rami SENHOR ijayvu: Xee ma Jerusalém tetā re ajevy ju 'rã anhomboaxya rupi. Ha'e gui xevyguia oo ma ojapoa ju 'rã ha'e py. Teīgue ju ixã mba'emo a'ää omoatää 'rã Jerusalém tetā rupi – he'i SENHOR ixondaro reta va'e.

**17** – Ha'e gui teīgue ju remombe'u atã vy aipo're 'rã: Po rami ijayvu SENHOR ixondaro reta va'e: “Xevyguia tetā ikuai va'e tynyë nho 'rã mba'emo porã”, he'i. Mba'eta SENHOR ombopy'a guaxu nho 'rã Sião pygua kuery, Jerusalém tetā oiporavo ju 'rã guive.

### *Irundy vaka rakuakue oexaague*

**18** Ha'e gui teīgue ju ama'ë vy aexa irundy vaka rakuakue.

**19** Ha'e rami vy aporandu anjo xereve ijayvu va'e pe:

– Mba'e nunga tu peva'e?

Ha'e rã xembovai:

– Peva'e vaka rakuakue ma Judá, Israel ha'e Jerusalém pygua kuery moaïmbaare – he'i.

**20** Ha'e rire ma SENHOR oexa uka avi irundy ferro re omba'eapo va'e kuery.

**21** Ha'e rã xee aporandu:

– Ha'vy peva'e kuery, mba'erã tu ou?

Ombovai:

– Vaka rakuakue ma yvy regua kuery Judá kuery rovai opu'ã vy opo'akaa rupi omoaïmba va'ekue, neñ avave rei oakã nomopu'ã kuaavei aguã rami. Ha'e gui kova'e ferro re omba'eapo va'e kuery ma vaka rakuakue mongygearã ha'e heitypaarã ou – he'i.

## 2

### *Jerusalém tetā rupi mba'emo a'ääarã oexaague*

**1** Ha'e gui ama'ë vy peteñ ava hi'añ va'e ju aexa. Ha'e va'e ma opo py oguerekó peteñ ixã mba'emo a'ää.

**2** Ha'e ramo aporandu ixupe:

– Marã katy reo?

Ombovai:

– Jerusalém tetā ra'ã vy aa, ipya ha'e ipuku-a aikuua aguã – he'i.

**3** Ha'e gui anjo xereve ijayvu va'e oo ta ma ramo amboae anjo ou vy ovaexi.

**4** Ha'e vy aipoe'i ixupe:

– Tereo pojava ke, ha'e emombe'u peva'e kunumi va'e pe: “Jerusalém tetā re heta ete avakue ha'e mymba kuery ikuai ramo tekoa'i rami 'rã opyta ikora ve'ý va'e”, 're.

**5** Mba'eta SENHOR aipoe'i: “Xee ae 'rã aí tetā korarã tata guigua rami. Xee aiko 'rã ha'e kuery mbyte rupi imoexakãarã”, he'i.

### *Sião tetā katy ju Israel kuery ojevy aguã re ijayvuague*

**6** Ha'e gui SENHOR aipoe'i:

– Pendu ke! Pendu ke! Pevapa ke peovy aý kuaray ijapu'a'ia katy yvy oí va'e gui, irundy henda katy yvytu yva rupi oipejua katy xee romoaïmba rire teí.

**7** Pendu ke! Peñ Sião pygua kuery Babilônia kuerya py pendekuai va'e, tapeo jepe ke.

**8** Mba'eta SENHOR ixondaro reta va'e po rami SENHOR ijayvu: “ SENHOR onhemboete ukaa rupi xembou yvy regua penemba'e rei-rei pe'apaare kuery rovai, mba'eta ixupe rã penderovai opo oupity va'e ma hexa ra'yí re opoko va'e reve nda'eveia rami.

**9** Ma'ë, ha'e kuery rovai xee xepo audi ramo hembiguai ikuai va'ekue ae ju 'rã oipe'apa imba'e rei-rei. Ha'e ramo peikuua 'rã SENHOR ixondaro reta va'e ae xembouague”, he'i.\*

**10** SENHOR aipoe'i:

– Sião pygua kuery, peporai ke pevy'a reve, mba'eta aju 'rã penembyte aiko aguã.

\* **2:9** Apy ma SENHOR ae ijayvu vy “ SENHOR xembou”, he'i. Mba'eta SENHOR remimbou hexeve joo rami ete, Marcos 12.35-37 py Jesus ojee ae ijayvua rami.

<sup>11</sup> Mba'eta ha'e va'e ára ma hetu regua 'rā onhemboaty xee SENHOR re, xevy guarã. Ha'e gui penembyte aiko ramo peikuua 'rā SENHOR ixondaro reta va'e ae pendea py xembouague.

<sup>12</sup> Ha'e va'e jave py SENHOR ojeupe guarã ogueru 'rā Judá kuery. Yvy iky'a e'ŷ va'e re jevy 'rā ogueru, ha'e teīgue ju oiporavo 'rā Jerusalém tetã.

<sup>13</sup> Ha'e nunga rupi peē avakue ha'e javi, pekyririmba ke SENHOR renonde, mba'eta o'amba iky'a e'ŷ va'e gui opu'ã ma ouvy.

## 3

### *Sacerdote yvateve va'e Josué oexaague*

<sup>1</sup> Ha'e gui xevy pe Nhanderuete oexa uka sacerdote yvateve va'e Josué, SENHOR guigua anjo renonde hi'aĩ rā. Ha'e va'e oiporu kuaa regua re Satanás hi'aĩ avi hovai ijayvu aguã.

<sup>2</sup> Ha'e rā SENHOR ma aipoe'i Satanás pe:

— Satanás, SENHOR ta'iijayvu ete ndevy. Tá, SENHOR Jerusalém tetã poravoare ta'iijayvu ete ndevy. Mba'eta peva'e ava ma tata'y tata py okaia gui oipe'a pyre rami — he'i.

<sup>3</sup> Josué ma anjo renonde hi'aĩ reve ao iky'apa va'e py onhemonde ho'amy.

<sup>4</sup> Ha'e gui ma anjo ju ijayvu. Ha'e vy aipoe'i guenonde ikuai va'e pe:

— Pemboi ijaoo iky'apa rei va'e — he'i.

Josué pe aipoe'i avi:

— Ne'ixa, ndegui aipe'apa ma ndereko vaiague, ha'e gui ao porâgue py ju 'rā romonhemonde — he'i.

<sup>5</sup> Ha'e ramo xee ju aipoa'e:

— Inhakã re ma pemoĩ avi akã regua iky'a e'ŷ va'e — ha'e. Ha'e ramo inhakã re omoĩ akã regua iky'a e'ŷ va'e, ao ha'evea ramigua py omonhemonde guive.\*

Ha'e gui ma SENHOR guigua anjo hi'aĩ va'e ju

<sup>6</sup> aipoe'i Josué mongetaa rupi:

<sup>7</sup> — Po rami ijayvu SENHOR ixondaro reta va'e: Xee aikoa rupi ndee reiko, ha'e ajapo uka va'e rejapopa ri vy ndee repena 'rā xevyguia oo re, xevyguia oguy ikuai va'e re avi 'rā renhangareko. Ha'e gui ajapo 'rā apy ikuai va'e rami avi ndee voi xere renhemboja aguã rami.

<sup>8</sup> Ha'e gui sacerdote yvateve va'e Josué, endu ke, neirũ kuery neronden oguapy va'e ha'e javi reve, mba'eta peē avakue ma raka'eve rā guarã kuaa ukaarã peiko. Mba'eta ne'ixa, ambou 'rā xerembiguai Yvyra Rapytakue Renhoï 'epy va'e.

<sup>9</sup> Mba'eta ma'ë, apy Josué renonde itui peteĩ ita aeja va'ekue. Kova'e ita peteĩ'i va'e re ma sete texa oï. Ha'e va'e ita re ambopara 'rā, mba'eta peteĩ ára pyve aipe'apa 'rā kova'e yvy regua kuery reko vaia — he'i SENHOR ixondaro reta va'e.

<sup>10</sup> — Ha'e va'e ára ma peē kuery peteĩ-teĩ pendea katy'i ikuai va'e penoĩ 'rā pendereve oguapy aguã uva'y ha'e figo'y guy py — he'i SENHOR ixondaro reta va'e.

## 4

### *Mokoõ oliveira rembypy mbyte py tataendy'y hi'aĩ va'e oexaague*

<sup>1</sup> Ha'e gui teīgue ju anjo xereve ijayvu va'ekue ou vy xemomyi imo'amy, avakue okeague gui omomyia rami.

<sup>2</sup> Ha'e rami vy oporandu xevy:

— Mba'eta nunga tu rex?

\* <sup>3:5</sup> Sacerdote yvateve va'e Josué ma anjo renonde hi'aĩ guetarã kuery rekavia ojejavya ombogue uka aguã, teĩ ha'e voi iky'a va'e py onhemonde ho'amy ojejavva va'e vy. Satanás ha'e py hi'aĩ avi Josué ojejavva rami ijayvu aguã. Ha'e rami teĩ anjo SENHOR rery rupi oï va'e ma ojejavvague ombogue vy ao porã py ju omonhemonde, Nhanderuete pe oiko aguã sacerdote-rã (Êxodo 39.1-31). Kova'e Josué ma Moisés irũ e'ŷ, amboae ava Jesua hery avi va'e, Esdras ha'e Neemias javegua sacerdote yvateve va'e (Esdras 2.2; Neemias 7.7).

**Ambovai:**

— Xee aexa peteī tataendy'y ouro guigua hi'aī va'e, ha'e gui hi'áry oī peteī azeite ryru. Tataendy'y re ma sete tataendy renda ikuai, ha'e sete ikuai avi tataendy rykue raperā, peteī-teī tataendy peve azeite ovaē aguā.\*

<sup>3</sup> Ha'e nunga yvýry ma mokoī oliveira rembypy hi'aī. Peteī ma azeite ryru oiporu kuaa regua re, ha'e rā amboae ma oiporu kuaa e'ŷa re hi'aī — ha'e.\*

<sup>4</sup> Ha'e gui xee aporandu ju anjo xereve ijayvu va'e pe:

— Xeruvixa, mba'erā tu peva'e?

<sup>5</sup> Ha'e ramo anjo xereve ijayvu va'e ombovai:

— Ndee ndereikuuai teri va'e ty'y peva'e nunga mba'erā paa?

Xee ambovai vy — Any, xeruvixa — ha'e.

<sup>6</sup> Ha'e ramo ijayvuve vy aipoe'i xevy:

— Peva'e ma Zorobabel pe SENHOR ixondaro reta va'e aipoe'iague: “Ndee ae mbaraetea rupi e'ŷ 'rā mba'emo rejapo, ndee ae po'akaa rupi e'ŷ guive, ha'e rā Xenhe'ē rupi ae 'rā rejapo”, he'iague.<sup>†</sup>

<sup>7</sup> Ha'e gui ndee yvyty tuvixa va'e, marā ramigua tu ndee? Mba'eta Zorobabel renonde ma yvy joja reia rive 'rā repyta. Mba'eta ita opa vy guarā Zorobabel omoī ramo pavē oguerovy'a vy “Tomoingo porā! Tomoingo porā!” he'i 'rā okuapy.

<sup>8</sup> Teīgue ju xevy pe SENHOR ombou oayvu. Ha'e vy aipoe'i:

<sup>9</sup> — Zorobabel ma opo py ae kova'e oo omboypy rire ha'e ae ju 'rā omomba, ha'e rami peikuaa aguā SENHOR ixondaro reta va'e pendea py xembouague.

<sup>10</sup> Ha'e gui mba'emo kyr'i va'e anho ojapoa rā amongue oexa vy nombovarei teī ha'e kuery ae ju 'rā oguerovy'a oexa vy Zorobabel opo py peteī ixā oo mbotya ra'āa oiporu ramo — he'i. Ha'e gui sete texa ikuai va'e ma SENHOR rexaxa yvy jave rupi oexa pota oikovy va'e.<sup>‡</sup>

<sup>11</sup> Ha'e gui xee aporanduve ju ixupe:

— Mba'erā tu mokoī oliveira rembypy oiporu kuaa ha'e oiporu kuaa e'ŷa re tataendy'y jovaive re hi'aī va'e?

<sup>12</sup> Teīgue ju xeayvu vy aporandu avi:

— Ha'vy mba'erā tu mokoī oliveira rakāgue yvy'iry azeite iju porā rei va'e rape ouro guigua oī va'e?

<sup>13</sup> Aipoe'i:

— Ndereikuuai teri va'e ty'y?

Xee ambovai vy

— Any, xeruvixa — he'i.

<sup>14</sup> Ha'e ramo aipoe'i:

— Peva'e mokoī ma SENHOR yvy jave re ipo'aka va'e pe omba'eapo va'erā omoī mbyre — he'i.

## 5

### *Kuaxia oveve va'e oexaague*

<sup>1</sup> Ha'e gui teīgue ju ama'ē vy aexa peteī kuaxia oveve-veve rā.

<sup>2</sup> Ha'e ramo anjo oporandu xevy:

— Mba'e nunga tu rexaxa?

\* **4:2** Judas 9    \* **4:3** Apocalipse 11.3-4 py oī rami mokoī oliveira rembypy ma mokoī ava Nhanderuete pegua, Nhe'ē rupi vy mba'emo ojapo kuaa va'e. Apy ma Josué ha'e Zorobabel 'rā jaikuua (versículos 13-14 py).    † **4:6** Ha'e va'e jave ma Zorobabel oī Israel kuery ruvixa Jerusalém py. Sacerdote yvateve va'e Josué reve Zorobabel ojapo ju Nhanderuete pegua templo oity pyre, amboae regua kuery ndojapo ukaxeit teī (Esdras 3-6).    ‡ **4:10** Templo omboyta jave py hetarā kuery amongue ojae'o rei templo yma guare tuvixave ete va'ekue re ima'endu'a vy (Esdras 3.10-12). Sete texa ikuai va'e re ma ijayvu ju 'rā Apocalipse 5.6 py.

Xee ambovai:

— Peteī kuaxia oveve va'e rima aexa — ha'e. Ha'e va'e puku-a ma dez metros, ha'e rā ipya ma irundy raxa'i.

<sup>3</sup> Ha'e ramo xevy pe anjo aipoe'i:

— Peva'e ma ayvu vai mbouarā yvy jave rupi oo va'e. Mba'eta peva'e ayvu vai rami vy imonda va'e ha'e oura rive va'e omoxēmbaa 'rā.

<sup>4</sup> Mba'eta SENHOR ixondaro reta va'e aipoe'i: “Xee ha'e nunga ambou vy ajapo 'rā imonda va'e kuery ro py oike aguā rami, xerery rupi oura rive va'e ro py guive. Ha'e va'e ma opy pytū oaxa vy ombovaipa 'rā oo regua yvyra ha'e ita”, he'i.

### *Ajaka py kunha oī va'e oexaague*

<sup>5</sup> Ha'e gui anjo xee reve ijayvu va'e ou jevy vy aipoe'i xevy:

— Aÿ ma yvate katy ju ema'ẽ rexa aguā mba'emo ou oiny va'e.

<sup>6</sup> Xee aporandu:

— Mba'e tu peva'e nunga?

Xembovai:

— Ha'e va'e ou jekuaa va'e ma peteī ajaka. Ha'e va'e py ma oī yvy jave rupigua kuery reko vaia — he'i.

<sup>7</sup> Ha'e gui ajaka juru mbotya chumbo guigua oipe'aa ramo peteī kunha va'e oguapy oiny ra'e ajaka py.

<sup>8</sup> Ha'e gui anjo aipoe'ive ju:

— Peva'e ma teko vai — he'i vyve ajakapy py ju kunha va'e omoanha vy omboty ju chumbo guigua ipoyi ete va'e py.

<sup>9</sup> Ha'e gui teīgue ju ama'ẽ vy aexa mokoī kunhague jogueru nhoguenoiny rā. Guyra guaxu rami ipopo va'e vy ipopo rupi yvytu oipeju reve ou. Ha'e va'e kuery ma ajaka oupi heravy yvy gui yvatevea peve.

<sup>10</sup> Ha'e gui xee aporandu anjo xereve ijayvu va'e pe:

— Marā katy tu ha'e kuery ogueraa 'rā ajaka?

<sup>11</sup> Ombovai:

— Sinar yvy katy rima ogueraa, kunha va'e rorā ojapo aguā py. Ha'e gui ojapopa ma vy omoī 'rā ha'e py, henda py ae — he'i.\*

## 6

### *Irundy karóxa oexaague*

<sup>1</sup> Teīgue ju ama'ẽ vy aexa mokoī yvyty overa va'e guigua. Ha'e va'e yvyty mbyte gui ma irundy karóxa joe opu'āa pygua omoatāa heruvy.

<sup>2</sup> Jypygua karóxa re kavaju ikuai va'e ma pytā va'e anho. Ha'e rā mokoīa re kavaju ikuai va'e ma huū va'e anho.

<sup>3</sup> Mboapya re ma xiī va'e, ha'e rā irundaya re kavaju ikuai va'e ma xiī rai'i va'e. Ha'e va'e kuery ma imbaraete va'e meme.\*

<sup>4</sup> Ha'e ramo anjo xereve ijayvu va'e pe xee aporandu:

— Xeruvixa, mba'e nunga tu peva'e?

<sup>5</sup> Anjo ombovai:

— Peva'e kuery ma yva rupi irundy henda gui yvytu oipeju va'e, SENHOR yvy jave re ipo'aka va'e renonde ikuaiague gui ou.

<sup>6</sup> Ha'e gui karóxa kavaju huū va'e omoatā va'e oo 'rā kuaray ijapu'a'ia katy yvy itui va'e re. Ha'e va'e rakykue rupi ma xiī va'e ju 'rā oo. Ha'e rā xiī rai'i va'e ma kuaray puku-a katy 'rā oo yvy itui va'e re — he'i.

\* <sup>5:11</sup> Sinar ma Babilônia rery mboae. Babilônia tetā ma teko vai renda ae raka'e (Apocalipse 17). \* <sup>6:3</sup> Apocalipse 6.2-8 py oīa rami oexa irundy kavaju joo rami e'ŷ-e'ŷ ojekuaa va'e, mba'eta joo rami e'ŷ-e'ŷ 'rā ou nhomoingo axyarā.

<sup>7</sup> Ha'e gui ma kavaju kuery pe SENHOR ijayvu vy "Tapeo, yvy jave rupi peiko", he'i. Ha'e ramo imbaraetea rupi oje'oi vy onhea'ã jogueravy yvy jave rupi oguata aguã. Ha'e rami py yvy jave rupi ete oje'oi.

<sup>8</sup> Ha'e gui SENHOR xerenoĩ vy aipoe'i xevy:

— Kuaray ijapu'a'ia katy yvy itui va'e re kavaju oo vy ojapo 'rã ha'e py Xenhe'ẽ opytu'u aguã rami — he'i.<sup>†</sup>

### *Josué akā re coroa omoĩ, ha'e Yvyra Rapytakue Renhoĩ omombe'u porãveague*

<sup>9</sup> Ha'e gui teĩgue ju SENHOR oayvu ombou xevy. Ha'e vy aipoe'i:

<sup>10</sup> — Ndevy pe neretarã kuery escravo-rã ogueraa pyre regua ome'ẽ 'rã mba'emo. Ha'e va'e kuery ma Heldai, Tobias ha'e Jedaías, Babilônia tetã gui ou va'ekue meme. Ha'e nunga rejopy vy ha'e va'e árave eraa, ha'e eike Sofonias ra'y Josias ro py.

<sup>11</sup> Prata ha'e ouro ha'e kuery ome'ẽ va'ekue rejopy va'ekue gui ejapo coroa. Ha'e va'e ma emoĩ Jozadaque ra'y sacerdote yvateve va'e Josué akā re.

<sup>12</sup> Ha'e rami vy aipo're 'rã ixupe: "Po rami SENHOR ixondaro reta va'e ijayvu: Ne'exa, apy ava oĩ va'e pe ma 'Yvyra Rapytakue Renhoĩ 'ea 'rã. Mba'eta ha'e va'e ma oĩague gui henhoĩ jevy vy ojapo 'rã templo SENHOR peguarã.

<sup>13</sup> Ha'e ae 'rã oiko SENHOR pegua templo apoa rupi. Hexakãa py onhemonde reve oguapy 'rã oiny guenda openaaty áry. Joe opena 'rã oikovy, ha'e guenda py joe opena oiny reve oiko avi 'rã sacerdote. Mokoĩ rupi 'rã oiko va'eri ha'evea rupi meme", 're 'rã.

<sup>14</sup> Ha'e gui coroa ma remoĩ porã uka ju 'rã Helém, Tobias, Jedaías ha'e Sofonias ra'y Hem pe. SENHOR pegua templo py ae 'rã omoĩ porã penema'endu'a pavẽ aguã.

<sup>15</sup> Mba'eta mombyry guigua kuery voi ou 'rã penepytyvõ aguã SENHOR pegua templo pejapoa rupi, ha'e rami peikuaa aguã SENHOR ixondaro reta va'e ae pendea py xembouague. SENHOR Penderuete ayvu pejapopa ete ramo ha'e nunga ha'e javi 'rã oiko.

## 7

### *Okaru e'ŷ re ikuai teĩ Nhanderuete ndoguerovy'aia re ijayvuague*

<sup>1</sup> Ha'e gui irundy ma'etŷ re ma huvixave Dario oĩ jave py SENHOR ombou oayvu Zacarias pe, nove jaxya quisleu 'epy va'e ha'e irundy araa py.

<sup>2</sup> Mba'eta Betel pygua kuery ombou va'ekue Sarezer ha'e Regén-Meleque hexeveguia avakue reve, SENHOR pe ojapukai vy oporandu uka aguã.

<sup>3</sup> Ha'e ramo ha'e kuery ma SENHOR ixondaro reta va'e pegua ropy sacerdote kuery ikuai va'e pe oporandu, profeta kuery pe guive: "Ha'evea rami pa peteĩ nhiruĩ jaxya py rokaru e'ŷ re rojae'ove ju aguã mbovy ma'etŷ re'ŷ ma orekuaiague rami?" he'i okuapy.

<sup>4</sup> Ha'e ramo SENHOR ixondaro reta va'e ombou oayvu xevy. Ha'e vy aipoe'i:

<sup>5</sup> — Rembovai 'rã sacerdote kuery ha'e kova'e yvy re ikuai va'e ha'e javi pe. Ha'e vy aipo're: "Setenta ma'etŷ oaxa va'ekue re ma peteĩ nhiruĩ jaxya ha'e sete jaxya py ju pekaru e'ŷ re pendekuai va'ekue pejae'o reve, ha'e rami teĩ xevy pe ete ri nda'u pekaru e'ŷ re pendekuai? Xevy pe ete nda'u pejapo?

<sup>6</sup> Ha'e rami ae avi pekaru ha'e pey'ua ára py ma pendejeupe ae e'ŷ ri ty'y pekaru ha'e pey'u?

<sup>7</sup> Mba'eta ymave rupi Jerusalém tetã py nhande kuery ikuai porã'i jave, ijvvýry rupi tekaoa ikuai va'e py guive, kuaray puku-a katy ha'e yvy joja reia ha'e javi rupi tekaoa ikuai jave ma profeta kuery pe SENHOR omombe'u uka ae ma raka'e oayvu. Peẽ kuery napendui ri ty'y ha'e nunga?" 're 'rã.

### *Ha'e kuery Nhanderuete nonhe'ẽ rendui rire ogueraa ukapaague re ijayvua*

<sup>†</sup> **6:8** Kuaray ijapu'a'ia katy oĩ Babilônia ha'e amboae regua Israel kuery rovai opu'ã va'ekue, Nhanderuete pe e'ŷ ikuai va'e meme. Ha'e gui kavaju oo 'rã ha'e kuery ombopaga aguã heko vaia re. Ha'e ramo ma Nhanderuete Nhe'ẽ opytu'u 'rã.

<sup>8</sup> Ha'e gui Zacarias pe SENHOR oayvu ombou vy aipoe'i:

<sup>9</sup> — Po rami SENHOR ixondaro reta va'e ijayvu va'ekue: “Pejoguereko ke ha'evea rami, anhetē rupi ete. Peteī-teī ke pexa uka mborayvu ha'e penderyvy kuery pemboaxya.

<sup>10</sup> Pembojexavai eme imeve'ŷ va'e kuery, tyre'ŷ, mombyry guigua kuery, neī ipori-aukue'i ma voi. Ha'e peteī-teī pendep'y'a re pemoīve eme peneirū kuery pe pejapo vai aguā”, he'i va'ekue.

<sup>11</sup> Ha'e rami teī ha'e kuery noendu potai okuapy. Ha'e rami vy ivai rei reve okupe rive oguerova xea katy, oapyxa omboty guive, noenduxei vy.

<sup>12</sup> Ha'e rami py ha'e kuery diamante rami onhemoakā ratā okuapy, lei aeja va'ekue oendu e'ŷ aguā, neī SENHOR ixondaro reta va'e oayvu Onhe'ē rupi ae ombou va'ekue, neī profeta kuery ymave rupigua omombe'u va'ekue guive. Ha'e nunga rupi ae ou SENHOR ixondaro reta va'e poxya.

<sup>13</sup> Xee aenoī ramo ha'e kuery noendu potai rire ha'e kuery xevy ojapukai rā xee voi naendu potai va'ekue – he'i SENHOR ixondaro reta va'e.

<sup>14</sup> — Ha'e rami vy yvytu guaxu rami amoāimba yvy regua ikuia rupi, ha'e kuery ndoexai teri va'e rupi ae. Ha'e oyvy oejaague voi ombovaipaa avi, ha'e va'e rupi avave rei ndoaxaavei neī ndojevyavei aguā rami. Mba'eta yvy porā rei va'ekue ojapoa na'iporāvei aguā rami.

## 8

### *Sião tetā ojapo ju aguā re ijayvuague*

<sup>1</sup> Ha'e gui teīgue ju SENHOR ixondaro reta va'e ombou oayvu xevy. Ha'e vy aipoe'i:

<sup>2</sup> — Po rami SENHOR ixondaro reta va'e ijayvu: Xee aendu Sião pygua kuery re nda'evei etea. Ndajou porāi etea ha'e nda'eveia aendu ha'e kuery ikuai axya re.

<sup>3</sup> Po rami ijayvu SENHOR: Aju ju 'rā Sião tetā py, aiko ju 'rā Jerusalém tetā mbyte rupi. Ha'e ramo Jerusalém pe “Tetā anhetē rupi ikuia” 'ea 'rā, ha'e SENHOR ixondaro reta va'e pegua yvyty pe ma “Yvyty ky'a e'ŷ” 'ea 'rā.

<sup>4</sup> Po rami ijayvu SENHOR ixondaro reta va'e: Teīgue ju Jerusalém tetā mbyte rupi tujakue'i ha'e guaimigue'i oguapy 'rā okuapy. Okakua'i ete ma vy peteī-teī opo py oguereko 'rā popoka.

<sup>5</sup> Tetā mbyte rupi avakue'i ha'e kunhague'i ono'ō avi 'rā okuapy onhevangaa rupi ikuai va'e.

<sup>6</sup> Po rami ijayvu SENHOR ixondaro reta va'e: Ha'e nunga kova'e kuery rembyrekue oexa vy onhemondyipa rei teī xee voi teve 'rā anhemondyi? Any – he'i SENHOR.

<sup>7</sup> — Po rami ijayvu SENHOR ixondaro reta va'e: Ne'ixa, mba'eta xee araa jepe 'rā xevygua kuery. Ha'e rami vy aipe'a 'rā kuaray oua katy ha'e oikea katy yvy itui va'e gui.

<sup>8</sup> Xee aru ramo Jerusalém tetā py ju 'rā ikuai. Ha'e gui ha'e kuery ikuai 'rā xevygua, ha'e rā xee ma tuuete 'rā aiko. Anhetē rupi ha'e teko porā rupi 'rā areko.

<sup>9</sup> — Po rami ijayvu SENHOR ixondaro reta va'e: Aŷ ma peē kuery pendu pekuapy kova'e ayvu profeta kuery yma guare omombe'u va'ekue SENHOR pegua oo ojapo ypy'i jave. Ha'e nunga rupi aŷ ma pemombaraete pendepo xevygua templo pejapopa ju aguā.

<sup>10</sup> Mba'eta ha'e va'e jave e'ŷ mbove ma avakue neī mymba kuery mba'eve ndojoui omba'eapoague gui. Ngovaigua kuery káuxa oẽ va'e neī ovaẽ va'e kuery ma voi ndojoui ikuai porā aguā, mba'eta xee ajapo avakue peteī-teī oirū kuery re opu'ā aguā rami.

<sup>11</sup> Ha'e rami teī aŷ gui ma kova'e kuery okuave'i va'e jypy arekoague rami ve'ŷ 'rā areko – he'i SENHOR ixondaro reta va'e.

<sup>12</sup> — Mba'eta mba'emo ra'yīgue onhotŷ ramo oiko porā 'rā. Uva'y hi'a porā 'rā guive, yvy gui mba'emo pyau henhoi 'rā, ha'e yva gui ho'a 'rā oky rayvi. Mba'eta kova'e kuery rembyrekue pe ajapo 'rā ha'e nunga ha'e javi oiko aguā rami.

**13** Ha'e gui peẽ Judá ha'e Israel kuery, amboae regua kuery ikuai rupi ayvu vaipy pendekuai va'ekue ri aŷ ma rogueraa jepe rire ayvu porãmbju 'rã peiko. Ha'e nunga rupi pekyjeve eme, ha'e vy pemombaraeke pendepo.

**14** Mba'eta po rami SENHOR ixondaro reta va'e ijayvu: Peneramoĩ kuery xembopoxya rupi ikuai jave py penderovai anhembopy'a mba'emo vai ajapo aguã re, ndajapo e'ŷi guive.

**15** Ha'e rami teĩ aŷ gui ma anhembopy'a Jerusalém ha'e Judá pygua kuery pe ajapo porã ju aguã re. Pekyjeve eme ha'vy.

**16** Po rami 'rã pendekuai: Peteĩ-teĩ anhetẽ rupi 'rã pendeayvu peneirũ kuery pe, ha'evea rami 'rã pejoguerekopeneretã kora rokẽ py, anhetẽ rupi ha'e peteĩ rami penhomoingoa rupi.\*

**17** Peteĩve opa marã penhembopy'a eme peneirũ kuery rovai, pendejee pemoĩ eme guive peura rivea rupi pendekuai aguã, mba'eta ha'e nunga ha'e javi xee ajou vai ete – he'i SENHOR.

**18** Ha'e gui SENHOR ixondaro reta va'e oayvu ombou ju xevy. Ha'e vy aipoe'i:

**19** — SENHOR ixondaro reta va'e po rami ijayvu: Peẽ Judá kuery, irundy jaxyaprekaru e'ŷ re pendekuai va'ekue, ha'e gui peteĩ nhiruĩ jaxyap, sete ha'e dez jaxyaprekaru e'ŷ re pendekuai va'ekue. Ha'e rami teĩ aŷ gui ma ha'e va'e jave opyta 'rã pevy'a aguã. Pevy'a reve 'rã pejapo ngaru iky'a e'ŷ va'e, pendejee pemoĩ avi ke anhetẽ rupi ha'e peteĩ rami penhomoingo aguã.

**20** Po rami ijayvu SENHOR ixondaro reta va'e: Pova'e nunga oiko avi 'rã: heta regua, heta tetã pygua kuery jogueru 'rã okuapy.

**21** Ha'e rami vy peteĩ-teĩ tetã pygua kuery amboae tetã katy oo vy ha'e kuery pe aipoe'i 'rã: "Pejapura ke, jaje'oi SENHOR pe jajapukai aguã. Jaeka SENHOR ixondaro reta va'e. Xee avi aa 'rã", he'i 'rã okuapy.

**22** Jerusalém tetã py heta regua ipo'akakueve va'e jogueru 'rã SENHOR ixondaro reta va'e reka vy, ixupe ojapukai aguã.

**23** Po rami ijayvu SENHOR ixondaro reta va'e: Ha'e va'e ára ma dez avakue ou vy peteĩ judeu reve onhemoirũ 'rã okuapy. Joo rami e'ŷ-e'ŷ ijayvu va'e, ha'e javi regua ou 'rã peteĩ judeu oikuavã vy ija opy rupi ojopy reve. Ha'e vy aipoe'i 'rã ixupe: "Ore avi toroo nderupive, mba'eta omombe'ua rã roendu pende kuery reve Nhanderuete oikoa", he'i 'rã.

## 9

### *Yvy regua kuery ombopaga aguã re ijayvuague*

**1** — Kova'e ayvu ma Hadraque yvy regua kuery rovai SENHOR omombe'u uka va'ekue, Damasco tetã re guive ombou. Mba'eta SENHOR ma avakue ha'e javive re oma'ẽ 'rã oikovy, Israel regua ikuai va'e re guive.

**2** Ha'e rami vy oayvu ombou Hamate yvy re voi. Ha'e va'e ma Hadraque yvy katy'i itui. Ha'e gui Tiro ha'e Sidom tetã pygua kuery re voi ombou, ha'e kuery hi'arandupa va'eri teĩ.

**3** Mba'eta Tiro pygua kuery ma heta ojapo oo ikorapa va'e onhemis aguã. Prata heta avi omoĩ porã yvy ku'i rami, ouro guive omoĩ porã yapo tape rupi oĩ va'e rami rive.

**4** Ha'e rami teĩ ne'exa, ha'e kuery mbaraetea SENHOR oipe'apa vy omombopa 'rã ye'ẽ mbyte py. Ha'e rã hetã ma tata py 'rã ombovaipa.

**5** Ha'e nunga Asquelom pygua kuery oexa vy okyjepa 'rã okuapy. Gaza pygua kuery voi ikuai axy 'rã. Ecrom pygua kuery ha'e rami ae avi 'rã ikuai, guenonderã rupi oarõ va'e ndoikovei rã. Gaza pygua huvinxave omano 'rã, ha'e Asquelom py voi noñavei 'rã.

---

\* **8:16** Efésios 4.25

<sup>6</sup> Asdode py ma peteĩ regua joegua e'ŷ-e'ŷ heko 'rã. Ha'e rami py xee amomba 'rã filisteu kuery onhemboiyate reia.

<sup>7</sup> Ha'e kuery juru gui anoẽ 'rã ta'angaa pe mymba ome'ẽ va'ekue ruguykue nomokõmbai va'ekue, ha'e haĩ ma'ũ gui ma amboi 'rã xo'o ra'ykue'i. Ha'e rire okuave'i va'e ma peteĩ regua 'rã ikuai Nhanderuete peguarã. Judá pygua kuery va'e regua 'rã ikuai. Ecrom pygua kuery voi jebuseu kuery rami avi 'rã okuave.

<sup>8</sup> Ha'e gui xee ma xevygua oo aarõ 'rã aikovy ijyvýry rupi, xondaro kuery hexe opu'ã va'e ajoko aguã, ha'e va'e rupi ndoaxaavei neĩ ndoikeavei aguã, ha'e pygua kuery re imbojexavaiarã ndouvei aguã, mba'eta aŷ gui ma aexa pota 'rã xerexa py ae.

### *Sião gui Huvixave ou aguã re ijayvuague*

<sup>9</sup> — Peẽ Sião pygua kuery, pevy'a ete ke. Jerusalém pygua kuery, pevy'a avi ke. Mba'eta ne'exa, ou ma oiny Penderuvixaverã. Ha'e va'e ma heko porã va'e ha'e jogueraa jepea. Onhemo'yvy'i va'e vy ou 'rã mburika áry, mburika ombovoyipy ra'y áry.\*

<sup>10</sup> Mba'eta Efraim gui ambovaipa 'rã karóxa joe opu'ãa pygua, ha'e Jerusalém gui ma amokanhymba 'rã kavaju kuery. Guyrapa joe opu'ãa pygua guive ambovaipa 'rã. Mba'eta Huvixave ma yvy regua kuery pe omombe'u 'rã peteĩ rami ikuai aguã. Ipo'akaa oo 'rã ye'ẽ nhavõ rupi, Eufrates yakã guive 'rã oo yvy apy peve.

<sup>11</sup> — Ha'e gui peẽ Sião pygua kuery, tuguy amoẽ uka reve xereve guarã ajapo va'ekue rami vy roguenoẽ 'rã yvykua py yy noĩa py penembo'aague gui.

<sup>12</sup> Escravo-rã pendereraa teĩ pearõ nho peikovy va'e, pejevy ju ke penetratã ikorapa va'e katy. Aŷ guive pendevy amombe'u mba'emo ame'ẽ retave ete aguã, perekoo ae ma va'ekue áryve.

<sup>13</sup> Ha'e gui Judá kuery aiporu 'rã guyrapa oipiraxa va'e rami, ha'e hu'yrã amoĩ 'rã Efraim kuery. Mba'eta peẽ Sião pygua kuery, pendera'y kuery ajapo 'rã Grécia pygua ra'y kuery rovai opu'ã aguã rami. Xee roiporu 'rã ojerovia rei va'e kyxe rami.

<sup>14</sup> Ha'e gui Sião ra'y kuery ikuiaia áry rupi ojekuaa 'rã SENHOR, ha'e oĩa gui hu'y hendy va'e omombo 'rã overa va'e rami. SENHOR Nhanderuete mimby guaxu omonhe'ẽ uka reve oo 'rã kuaray puku-a katyguia yvvytu jere áry rupi.

<sup>15</sup> Ha'e rami vy SENHOR ixondaro reta va'e oepy 'rã ojeupeguia kuery. Ha'e ramo ha'e kuery omokanhymba 'rã inhyvõare kuery, opyrõmba 'rã guive. Vinho rami oy'upa 'rã huguy, ome'ẽ mbyre hy'a tynyẽ va'e rami 'rã hevyatãmba, opyta 'rã altar yvýry mba'emo ruguykue onhoëague rami.

<sup>16</sup> Ha'e va'e ára ma Tuuete SENHOR ogueraa jepe 'rã ojeupeguia kuery guymba kuery rami. Mba'eta ixupe rã ha'e kuery coroa re ita porãgueve oĩ va'e rami ikuai, ixupega yvy re overa 'rã okuapy.

<sup>17</sup> Mba'eta ha'e kuery ma opa mba'e py porayvu ha'e iporã va'e 'rã ikuai! Kunumigue hexaïmba 'rã mba'emo aju gui, ha'e kunhataïgue ma hexaï avi 'rã vinho gui.

## 10

### *Judá ha'e Israel kuery omoingo porã aguã re Nhanderuete ijayvuague*

<sup>1</sup> Ára pyau jave pejerure ke oky re SENHOR pe, mba'eta SENHOR ae 'rã ojapo arai oky aguã. Ha'e rami vy avakue pe ombou oky porã, ha'e nhuñdy rupi omoingo nhuñ roky.

<sup>2</sup> Ha'e rã ta'angaa oo pygua ma nhombotavya rupi 'rã ijayvu. Imba'ekuaa va'e voi ijapua meme oikuua. Nhombotavya rupi meme 'rã omombe'u oexa ra'uague, ijayvu porã merami rive 'rã guive, anhetẽ rupi e'ŷ. Ha'e nunga rupi ae heta va'e kuery ojexavai rei 'rã vexa'i kuery re opena va'e ndoikoia rami.

<sup>3</sup> Ha'e nunga rupi xepoxya hendy joe opena va'e kuery rovai. Ha'e rami vy ambopaga 'rã kavara joguerekooarã omoĩ mbyre. Ha'e gui SENHOR ixondaro reta va'e ae 'rã opena

\* <sup>9:9</sup> Kova'e ayvu rami ae oiko Jesus re (Mateus 21.1-5; João 12.14-16).

guymba kuery Judá regua ikuai va'e re, oguerovy'a 'rã guive, kavaju joe opu'ã aguã katy oo va'e rami.

<sup>4</sup> Mba'eta Judá gui ma oiko 'rã ita omboeteve pyrã, ha'e kuery gui oiko avi 'rã oguy ytarã, guyrapa joe opu'ãa pygua ha'e huvixarã ha'e javi.

<sup>5</sup> Ha'e kuery ikuai 'rã ipy'a guaxukueve, joe opu'ãa py ngovaigua kuery re opyrõmba va'e rami. Ha'e vy opyrõmba 'rã tape rupi yapo oĩ va'e re rami. Ha'e kuery reve SENHOR oiko ramo opu'ã kuaa 'rã. Ha'e rami vy ojapo 'rã hovaigua kuery kavaju áry ou va'ekue voi oximba aguã rami.

<sup>6</sup> SENHOR aipoe'i:

— Xee amombaraete 'rã Judá kuery, araa jepe avi 'rã José kuery. Amboaxy ete vy ajapo 'rã ojevypa ju aguã rami. Ha'e ramo ha'e kuery ikuai 'rã namoxẽi va'ekue rami, mba'eta xee SENHOR Tuuete aendu 'rã ijayvua.

<sup>7</sup> Ha'e ramo Efraim kuery ikuai porã 'rã ipy'a guaxukueve rami. Opy'a py ovy'a 'rã okuapy vinho gui rami. Ta'y kuery voi oexa vy ovy'a vaipa avi 'rã, ha'e opy'a py xee SENHOR xererovy'a 'rã.

<sup>8</sup> Mba'eta ha'e kuery aepy rire aenoĩ vy amono'õmba ju 'rã. Ha'e gui amboeta ju 'rã ymave rupi hetaague rami.

<sup>9</sup> Yvy regua kuery mbyte rupi amoãmba teĩ mombyry ikuaria py ima'endu'a 'rã okuapy xere. Gua'y kuery reve okuave ha'e ojevypa ju 'rã.

<sup>10</sup> Mba'eta xee ae ajapo 'rã Egito yvy gui ojevypa aguã rami, Assíria gui voi amono'õmba 'rã heruvy. Gileade ha'e Líbano yvy gui 'rã aru, hoo renderã noïvei peve.

<sup>11</sup> Ye'ẽ rupi ramo ha'e kuery oaxa 'rã ojexavaia rupi. Ha'e ramo teĩ yai ainupã rã typa 'rã, Nilo yakã typyveague rupi voi ipirupa 'rã. Ha'e ramo py amomba 'rã Assíria pygua kuery onhemboyvate reia. Egito pygua kuery po'akaa voi omokanhymbaa 'rã.

<sup>12</sup> Ha'e gui ajapo 'rã xee SENHOR re vy imbaraeetepa aguã rami. Ha'e ramo vy xerery rupi ae 'rã ikuai — he'i SENHOR.

## 11

<sup>1</sup> Ha'e gui Líbano pygua kuery, peipe'a ke peneretã rokẽ, tata oapypa aguã yary pendeyvy re ikuai va'e.

<sup>2</sup> Ha'e ndee voi yvyra cipreste ne'aĩ va'e, ejae'o avi yary oitypaa ma rire. Yvyra iporãgueve ikuai va'ekue ombovaipaa ma. Peẽ voi yvyra carvalho Basã yvy re pendekuai va'e, pejae'o, ka'aguy re yvyra heta ikuai va'ekue oake'opaa ma rire.

<sup>3</sup> Pendu ke vexa'i re opena va'e raxẽmbei reia, mba'eta ha'e kuery ojou porãve va'ekue ombovaipaa ma ramo. Pendu ke guary ra'y kuery hevovo reia, Jordão yakã yvýry rupi ka'aguy iporãve va'ekue ombovaipaa ma ramo.

### Vexa'i re ha'evea rami opena va'e re mba'emo ombojoja vy ijayvuague

<sup>4</sup> Po rami ijayvu SENHOR Xeruete:

— Epena ke vexa'i kuery ojuka pyrã ikuai va'e re.

<sup>5</sup> Mba'eta ijoguaare kuery ojuka rive 'rã, ombopagaa e'ŷ re. Ha'e gui ivendeare kuery ma aipoe'i 'rã okuapy: “Tomboetea SENHOR, mba'eta aŷ arekopa 'rã”, he'i. Vexa'i re opena aguã omoĩ mbyre voi noendui okuapy omboaxya.

<sup>6</sup> Ha'e ramo ae avi xee voi namboaxyvei ma 'rã kova'e yvy re ikuai va'e — he'i SENHOR. — Ha'e ramo vy peteĩ-teĩ amboaxapa 'rã irũ kuery ha'e huvixave po py. Ha'e ramo ha'e va'e kuery ma kova'e yvy regua omoingo axy teĩ xee ndaraa jepei 'rã ipo'akaa gui.

<sup>7</sup> Epena ha'vy vexa'i kuery ojuka pyrã ikuai va'e, vexa'i mboae gui iporiaukueve'i va'e re — he'i.

Ha'e ramo xee araa mokoĩ yvyra'i. Peteĩ ma amboery “Nhomboaxy aguã”, ha'e rã amboae ma “Peteĩ ramo nhomoingo aguã.” Ha'e ramo py apena aikovy vexa'i kuery re.

<sup>8</sup> Ha'e gui peteī jaxy pyve amoxē mboapy avakue opena va'erā omoī mbyre. Ha'e rami teī ndaropo'akavei ma vexa'i kuery. Ha'e kuery voi ndaxerayvuvei.

<sup>9</sup> Ha'e ramo xee aipoa'e ha'e kuery pe:

— Napenavei ma'rā peē kuery re. Pemanoxe va'e pemanoxe tema. Pekanhixxe va'e ma pekanhy tema. Ha'e gui penerembyrekue ma peteī-teī'rā pe'u peneirū kuery ro'okue ae — ha'e.

<sup>10</sup> Ha'e rami vy yvyra'i "Nhomboaxy aguā" amboery va'ekue ajopy vy amopē, ambovaipa aguā yvy regua ha'e javi areko aguā ajapo va'ekue.

<sup>11</sup> Ha'e va'e árave ambovaipa. Ha'e rā vexa'i poriaukue'i xerexa vy oikuua okuapy SENHOR ayvu rupi ae ri ty ajapo ra'ea.

<sup>12</sup> Ha'e gui xee aipoa'e vexa'i kuery pe:

— Peē kuery pe ha'eve ri ramo peme'ē ha'vy amba'eapoague repy. Ha'e rami e'ŷ vy tove ri — ha'e. Ha'e ramo xevy pe opeja okuapy trinta hatā'i va'e prata guigua amba'eapoague repyra.

<sup>13</sup> Ha'e ramo SENHOR aipoe'i xevy:

— Hatā'i va'e emombopa ke nhae'ū re ombo'eapo va'e pe, remba'eapoague repyrā mbovy rei e'ŷ ome'ē rire — he'i. Ha'e ramo trinta hatā'i va'e prata guigua ajopy vy araa SENHOR pegua oo py, nhae'ū re ombo'eapo va'e oī va'e peguarā.\*

<sup>14</sup> Ha'e gui yvyra'i mboae ju amopē avi, "Peteī rami nhomoingo aguā" 'epy va'e, Judá ha'e Israel kuery joegua rami ve'ŷ ikuai aguā.

### *Vexa'i re o'arandua rupi e'ŷ opena va'e re ijayvuague*

<sup>15</sup> Ha'e gui SENHOR aipoe'ive ju xevy:

— Aŷ ma ndejeupe guarā eru vexa'i re o'arandua rupi e'ŷ opena va'e rembiporu,

<sup>16</sup> mba'eta ne'exa, ijyvy re peteī amoī'rā joe opena va'erā teī ha'e va'e ma ndoikuua potai'rā omamo rai'i ma okuapy va'e re, okanhixxe ndoekai'rā, ijaipa va'e noipoanoi'rā, neī hexaī va'e nomongarui'rā guive. Ha'e rami'rāgue py ho'u'rā oikovy ikyrakueve ro'o, ipyapē voi omboi'rā.

<sup>17</sup> Nda'evei ete'rā o'arandua rupi e'ŷ opena, ha'e mymba kuery oejapa ovvy va'ekue pe. Mba'eta ha'e va'e jyva ma oikyxīa'rā kyxe py, hexa oiporu kuaa regua rupi avi oikyxīa'rā. Ha'e ramo ijyva ipirupa'rā, hexa oiporu kuaa regua voi oguepa'rā.

## 12

### *Jerusalém pygua kuery SENHOR ogueraa jepe aguā re ijayvuague*

<sup>1</sup> Po rami SENHOR ijayvu Israel kuery rovai. SENHOR yva pyoare, yvy nhonoare ha'e avakue re inhe'ērā omoī va'ekue aipoe'i:

— Ne'exa, Jerusalém tetā ma xee ajapo'rā peteī karo ha'e javi regua ijyvýry ikuai va'e oy'u aguā, ha'e rami vy inhakanhyumba aguā, ha'e kuery Jerusalém tetā ojokopa rire, Judá yvy guive.

<sup>3</sup> Ha'e va'e ára ma Jerusalém tetā ajapo'rā peteī ita ipoyi ete va'e, ha'e javi regua kuery pe. Ha'e ramo ha'e va'e oupi va'e rei oiko axy ete'rā. Mba'eta yvy jave regua ha'e javi'rā ono'ōmba okuapy Jerusalém re opu'ā aguā.

<sup>4</sup> SENHOR aipoe'i:

— Ha'e va'e ára ma amoingo axy'rā kavaju kuery nhemondyi gui rive, ha'e rā hi'árygua kuery ma akā porā ve'ŷ rupi'rā amoingo axy. Aipe'a'rā Judá kuery rex, ha'e yvy regua kuery rymba kavaju rex, voi amboguepa avi'rā.

<sup>5</sup> Ha'e ramo Judá pygua huvixa kuery ma oexa'ā'rā: "Aŷ ma Jerusalém pygua kuery ha'e javi ma SENHOR ixondaro reta va'e nguuete re vy imbaraete'rā okuapy", he'i'rā.

\* **11:13** Profeta hetarā kuery nombovarei vy trinta hatā'i va'e ete'i ome'ē okuapy ixupe, escravo repy rami rive (Êxodo 21.32). Ha'e gui Jesus oiko jave hemimbo'e Judas ombo'a uka ramo ixupe ha'e rami ae avi opagaa (Mateus 26.14-16, 27.3-10).

<sup>6</sup> Mba'eta ha'e va'e ára ajapo 'rã Judá pygua huvixa kuery tapyí yxakã guýry hendy va'e rami. Ajapo 'rã takua ryxa mba'emo 'ygue hendy va'e rami ikuai aguã rami. Mba'eta oiporu kuaa regua ha'e oiporu kuaa e'ÿa rupi ha'e kuery omokanhymba 'rã ijyvýry ikuai va'e regua ha'e javi. Ha'e ramo Jerusalém pygua kuery ma Jerusalém tetã py oikoague py ae ju 'rã heko.

<sup>7</sup> Judá regua rekoa ikuai va'e ranhe 'rã SENHOR ogueraa jepe, Judá kuery áry gui Davi ramymino kuery ha'e Jerusalém pygua kuery onhembovate e'ÿ aguã.

<sup>8</sup> Ha'e va'e ára SENHOR opena 'rã Jerusalém pygua kuery re. Ha'e ramo ha'e pygua ikangykueve va'ekue ma Davi rami 'rã imbaraete, ha'e rã Davi ramymino kuery ma Nhanderuete rami 'rã imbaraete, mba'eta ha'e kuery renonde SENHOR guigua anjo oo 'rã.

<sup>9</sup> Ha'e va'e ára guive amboypy 'rã amomba aguã ha'e javi regua Jerusalém tetã re opu'ã aguã ou va'ekue.

### *Jerusalém pygua kuery ojeko rerovapa aguã re ijayvuague*

<sup>10</sup> — Ha'e gui Davi ramymino kuery ha'e Jerusalém pygua kuery re ambou 'rã Nhe'ë amboaxya rexu ukaarã, xevy pe ju ha'e kuery ojapukai aguã rami ojapo va'erã. Ha'e ramo ha'e kuery oexa ju 'rã oipyxo va'ekue. Ha'e va'e re ipy'a vai 'rã okuapy gua'y peteñ'i va'e re ipy'a vai va'e rami, hexe ojae'o 'rã gua'y jypy guare re ojae'o raxa va'e rami.\*

<sup>11</sup> Ha'e va'e ára Jerusalém tetã py heta ete 'rã ikuai ojae'o va'e, Megido yvyugua re Hadade-Rimom py ojae'oague rami.

<sup>12</sup> Ha'e rami vy oyvy ha'e javi rupi ojae'o 'rã okuapy, peteñ-teñ oo pygua kuery ikuiaia py ae. Ha'e rami vy Davi ramymino kuery ma ha'e kuery ae'ia py 'rã ojae'o, ta'yxy kuery voi ha'e kuery ae'ia py ae, Natã ramymino kuery ma ha'e kuery ae'ia py ae, ha'e gui ta'yxy kuery voi ha'e kuery ae'ia py ae ju 'rã ojae'o okuapy,

<sup>13</sup> ha'e gui Levi ramymino kuery ma ha'e kuery ae'ia py ae, ta'yxy kuery ma ha'e kuery ae'ia py ae, Simei ramymino kuery ma ha'e kuery ae'ia py ae, ta'yxy kuery voi ha'e kuery ae'ia py ae 'rã ojae'o.

<sup>14</sup> Ha'e gui amboae oo pygua kuery voi ha'e rami ae tema 'rã ikuai. Peteñ-teñ oo pygua kuery ha'e kuery ae'ia py ae ojae'o, ta'yxy kuery voi ha'e kuery ae'ia py ae ju 'rã ojae'o okuapy.

## 13

### *Mba'emo ra'angaa ha'e profeta kuery ramigua rive oipe'apaa aguã re ijayvuague*

<sup>1</sup> Ha'e va'e ára ma ojekuaa 'rã peteñ yvu Davi ramymino kuery ha'e Jerusalém pygua kuery ha'e javi pe, ojejavuague ha'e iky'apaa gui oiky'a'o va'erã.

<sup>2</sup> Mba'eta SENHOR ixondaro reta va'e aipoe'i: — Ha'e va'e ára ma ijyvy gui amokanhymba 'rã mba'emo ra'angaa rery ha'e javi, ha'e va'e re rive na'ima'endu'aavei aguã. Ijyvy gui aipe'a avi 'rã profeta ramigua kuery, nhe'ë vai guive.

<sup>3</sup> Ha'e gui xapy'a rei amongue onhemoingo 'rã profeta ramigua. Ha'e ramo ha'e va'e pe tuu ha'e ixy imbotujaare kuery ae aipoe'i 'rã: "Nda'evei reikoveve aguã, SENHOR ayvu rupi merami rive ndeapu rire", he'i 'rã okuapy. Ha'e rami vy tuu ha'e ixy imbotujaare kuery ae 'rã ojuka profeta ramigua rive onhemoingo rire.

<sup>4</sup> Ha'e va'e ára ma profeta kuery peteñ-teñ oximb'a rei 'rã oexa ra'uague rive omombe'uague re. Ha'e rami vy nhombotavya rupi nonhemondevei ma 'rã mba'emo rague py.

<sup>5</sup> Ha'e rami 'rãgue py aipoe'i 'rã: "Xee ma profeta e'ÿ aiko, ama'etÿa rupi rive xee aiko va'e. Mba'eta xekunumi guive escravo-rã xejoguua va'ekue", he'i 'rã.

\* **12:10** Kova'e ayvu rupi ma João 19.37 py Jesus reko re ijayvu. Ha'e gui raka'eve rã judeu kuery hexe vy ojeko rerovapa 'rã (Romanos 11.25-27; Apocalipse 1.7).

**6** Ha'e gui xapy'a rei ixupe amongue oporandu 'rā: "Mba'exá vy tu ndepo re kyxíague oī?" he'i ramo ombovai vy "Kyxíague xere oī va'e ma xeirū kuery ro py aī jave xekyxia rive", he'i rive 'rā.\*

### *Nhanderuete remimbou joe opena va'e ojukaa aguã re ijayvuague*

**7** Ha'e gui SENHOR ixondaro reta va'e aipoe'i:

— Ha'e gui ndee kyxe, epu'ā ke xeremimbou xea katyguá ete joe opena va'e rovai. Ejuka ke joe opena va'e. Ha'e ramo hymba vexa'i kuery ma oaīmba 'rā.† Mba'eta xepo aupi 'rā yvyīgueve'i rovai — he'i.

**8** SENHOR aipoe'i:

— Ijyvy ha'e javi rupi mboapy ikuai nhavō py mokō-mokoī ojukaa kuerei 'rā, okanhy ete 'rā. Ha'e rā mboapya va'e regua ma oikoveve 'rā.

**9** Mba'eta mboapya va'e regua ma ajapo 'rā tata rupi oaxa aguã rami. Ha'e rami vy aiky'a'o 'rā prata oiky'a'oa rami, aa'anga 'rā ouro oa'angaa rami. Ha'e ramo mae ma ha'e kuery ojapukai 'rā xerery rupi, ha'e ramo xee aendu 'rā. Ha'e kuery pe "Xevygua" ha'e 'rā. Ha'e rā ha'e kuery ma "SENHOR ae ma Xeruete" he'i 'rā okuapy.

## 14

*Jerusalém tetā pygua kuery ha'e imbojexavaia kuery moingo axyarā ou aguã re ijayvuague*

**1** Ne'exa, ovaē ma ouvy SENHOR ára, mba'emo perekó va'ekue omboja'opaa aguã pendekuaia mbyte gui.

**2** Mba'eta yvy regua ha'e javi amono'ōmba 'rā imbouvy Jerusalém tetā re opu'ā aguã. Ha'e ramo ha'e kuery ipo'aka ete 'rā tetā re. Ha'e rami vy mba'emo oipe'apa 'rā oo ikuai va'e gui, kunhague ikuai va'e ma oguero'apaa rive 'rā guive. Tetā pygua kuery mbytekue peve 'rā ogueraa escravo-rā, ha'e rā hembyrekue ma tetā gui ndoipe'aai 'rā.

**3** Ha'e gui ma SENHOR oē 'rā ouvy yvy regua kuery rovai opu'ā aguã, joe opu'ā va'e rami ae.

**4** Ha'e va'e ára ma SENHOR hi'aī 'rā Jerusalém regua kuaray oua katy Oliveiras yvyty oī va'e áry. Ha'e ramo ha'e va'e yvyty ma xapy'a 'rā ovo mbyte rupi, kuaray oua katy gui oikea katy peve. Ha'e rami vy yvyty mbyte rupi ojekuaa 'rā peteī yvy'ā ugua, mba'eta yvyty mbytekue oja'o 'rā kuaray ijapu'a'ia katy, ha'e rā hovaikue ma kuaray puku-a katy 'rā oo.

**5** Ha'e ramo peē kuery pejava 'rā peovy xevygua yvy'ā ugua rupi, mba'eta Azal peve 'rā oo yvy'ā ugua. Tá, pejava 'rā Judá pygua huvixa Uzias oī jave py yvy ryryi oiko va'e gui ojavapaague rami. Ha'e gui mae ma ou 'rā SENHOR Xeruete, ha'e hupive iky'a e'ŷ va'e kuery ha'e javi voi.

**6** Ha'e va'e ára ma ndoikoi 'rā hexakāa, yro'y atā anho 'rā itui.

**7** Ha'e va'e ára ma peteī'i 'rā, SENHOR anho oikuua va'e regua. Ndoikoi 'rā ára, neī pytū ma voi noī 'rā. Ha'e rami teī ka'aru peve ojekuaa 'rā hexakāa.

**8** Ha'e va'e ára ma Jerusalém tetā guive oxyry 'rā ovy yy imarā e'ŷ va'e. Ha'e gui yy oja'o vy amongue oxyry 'rā ovy kuaray oua katy ye'ē oī va'e katy, ha'e rā amboae ma kuaray oikea katy ye'ē oī va'e katy 'rā oxyry ovy. Oxyry riae 'rā, kuaray puku jave e'ŷ vy yro'y jave teī.

**9** Ha'e gui SENHOR ae 'rā oī huvixave yvy jave rupi opena va'e. Ha'e va'e ára ma peteī'i anho 'rā oiko SENHOR, ha'e peteī'i avi 'rā hery oī.

**10** Ha'e gui ma yvy ha'e javi rupi opyta 'rā yvy joja reia Jerusalém regua kuaray oua katy Geba ha'e Rimom yvýry rami. Ha'e rā Jerusalém tetā ma yvateve 'rā oiny, oīa py ae

\* **13:6** Amongue py profeta ramigua rive gueko rami vy onhekiximba 'rā nguuete ramigua pe ojapukai reve (1 Reis 18.27-28). Mba'emo rague py onhemonde 'rā guive, profeta Elias rami avi (2 Reis 1.7-8). † **13:7** Kova'e ayvu rami ae oiko avi Jesus re (Mateus 26.31 ha'e Marcos 14.27).

'rã ikuiaia guive, Benjamim rokẽ oĩa guive jypygua okẽ peve, ha'e okẽ kora ojerea rupi oĩ va'e peve, ha'e gui Hananel regua torre oĩa guive huvixa pegua uva onhamiaty peve ju.  
**11** Ikuiaia 'rã ha'e py ae. Ndouvei 'rã ayvu vai imbovaipaarã. Oĩ porãmba 'rã Jerusalém tetã.

**12** Ha'e rã yvy regua kuery Jerusalém tetã re opu'ã va'ekue ma po rami 'rã SENHOR omoingo axy. Ho'okue hu'ũmba 'rã, opu'ã teri ho'amy reve tei. Hexa voi hu'ũmba 'rã okua py oĩ reve, ha'e inhapekũ hu'ũmba avi 'rã ijuru py oĩ reve.

**13** Ha'e kuery ikuiaia py SENHOR ombou avi 'rã opa marãguia imondiyipa reiarã. Ha'e rami vy peteĩ-tei oirũ kuery po re ojopy vy oguero'a 'rã, peteĩ-tei opu'ã 'rã oirũ kuery re ae.

**14** Judá kuery voi Jerusalém tetã oepy vy opu'ã 'rã okuapy joe. Ha'e rami vy omboatypa 'rã ha'e'i rupi yvy regua ikuai va'e mba'emo oguereko va'ekue, ouro ha'e prata guigua, ao mbovy e'ŷ ete guive.

**15** Ha'e rami ae omoingo axy avi 'rã hymba kuery kavaju, mburika, camelo, mburika'i, ha'e ikuiaia rupi guymba oguereko va'ekue ha'e javi.

*“Nhanderuete pegua tetã py iky'a e'ŷ va'e anho 'rã oĩ” he'iague*

**16** Ha'e gui ma yvy regua kuery Jerusalém tetã re opu'ã va'ekue rembyrekue ma ma'etõa nhavõ 'rã ojevy jogueruvy omboete aguã huvixave SENHOR ixondaro reta va'e, ha'e ngaru oguy'i pygua ára ikuai aguã guive.

**17** Ha'e gui xapy'a rei amongue regua ndooi 'rã Jerusalém py huvixave SENHOR ixondaro reta va'e omboete aguã. Ha'e rami rã ha'e kuery yvy re nda'okyi 'rã.

**18** Xapy'a rei Egito pygua kuery mba'e ngaru oguy'i pygua py ndooi ramo ha'e kuery yvy re nda'okyi 'rã. Ha'e kuery áry ou 'rã imoingo axyarã, yvy regua ndooi va'ekue áry SENHOR ombou va'e ramigua ae.

**19** Ha'e rami ae 'rã omoingo axy Egito pygua kuery ha'e yvy regua ha'e javi, ngaru oguy'i pygua py ndooi va'ekue.

**20** Ha'e gui ha'e va'e ára ma kavaju xã mbojeguaa oĩ va'e re voi omboparaa 'rã imoiny “SENHOR pegua iky'a e'ŷ va'e” he'ia. SENHOR pegua opy oja oiporua va'e rei iky'a e'ŷ va'e avi 'rã, altar yvýry hy'a guaxu oiporua va'e rami ae.

**21** Tá, Jerusalém tetã rupi ha'e Judá yvy re oja ikuai va'e ma iky'a e'ŷ va'e meme 'rã ikuai SENHOR ixondaro reta va'e pegua. Ha'e ramo mba'emo ome'ẽ va'erã ogueru va'e kuery ha'e javi ma oja oĩ va'e rive ojou vy ha'e va'e py ae 'rã ombojoy SENHOR pegua xo'o. Ha'e va'e ára ma SENHOR ixondaro reta va'e pegua oo py noïvei 'rã mba'emo vendea rupi rive ikuai va'e.

## Malaquias ayvu oĩa Malaquias ayvu oĩa

Israel kuery Jerusalém tetā py ikuai va'e templo omoatyrō ju teĩ Nhanderuete ojapo uka va'ekue rupi e'ŷ teri ikuai. Ha'e kuery pe profeta Malaquias ijayvu ojeko rerova aguã, mba'eta Senhor ára ou oiny ramo. "Senhor ixondaro reta va'e aipoe'i: 'Ou ma oiny ára tatakua rami haku raxa va'erã. Onhembovate rei ha'e teko vai rupi ikuai va'ekue okaipa 'rã mba'emo pirukue rami rive, mba'eta ára ou ramo okaipa 'rã. Ha'e rami vy ndopytai 'rã hapokue neĩ hi'ygue. Ha'e rã peẽ kuery xerery pendu vy xerenonde pejererokyjea rupi pendekuai va'e pe ma kuaray rami 'rã ojekuaa teko porã. Hexakãa rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi. ... Ha'e gui Senhor ára tuvixa ha'e ijavaete va'e ovaẽ ta ramo pendea py ambou ju 'rã profeta Elias. Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'ŷ ramo aju jevy vy yvy amomba 'rã ayvu vai py' ", he'i (4.1-2, 5-6).

Ha'e rami py Antigo Testamento ijapy. Ha'e va'e rire 400 ma'etý rivyvyia py ma Jesus Cristo ou.

### *Jacó oayvua rami SENHOR ijayvuague*

<sup>1</sup> Kova'e ayvu ma Malaquias pe SENHOR omombe'u uka va'ekue Israel kuery rovai.

<sup>2</sup> — Xee ma roayvu va'e — he'i SENHOR.

Ha'e rã peẽ kuery ma peporandu:

— Mba'exa vy tu ndee orerayvu?

SENHOR ombovai:

— Esaú ma Jacó ryke'y e'ŷ teve raka'e? Ha'e rami teĩ Jacó ae ayvu,

<sup>3</sup> ha'e rã Esaú re ma ndaxe'a ei, ha'e rami vy ha'e kuery rekoarã vyty ome'ẽ mbyre ambovaipa vy amboaxa raka'e jagua-tuvy nhe'ẽ tekao e'ŷa rupigua pe rive — he'i.\*

<sup>4</sup> Ha'e gui ma xapy'a rei Edom pygua kuery\* aipoe'i 'rã: "Kore nhanderekao SENHOR ombovaipa teĩ oityague py ae ju 'rã jajapopa", he'i 'rã okuapy.

Ha'e rã SENHOR ixondaro reta va'e ma aipoe'i: "Ha'e kuery ojapopa teĩ xee aitypa ju 'rã. Ha'e rami rire Edom yvy omboerya 'rã: 'Yvy teko vai renda', ha'e 'Ha'e kuery pe SENHOR ipoxy raka'e rã peve' ea 'rã.

<sup>5</sup> Ha'e nunga penderexa py ae 'rã pexa. Ha'e vy 'SENHOR tu ipo'akapa va'e rima ra'e, Israel kuery ikuiaia rupi anho e'ŷ, peje 'rã", he'i.

### *Sacerdote kuery pe SENHOR ijayvu eteague*

<sup>6</sup> SENHOR ixondaro reta va'e aipoe'i:

— Ta'y kuery ikuai va'e omboete 'rã nguu, ha'e tembiguai kuery voi omboete 'rã hereko. Ha'e rami teĩ xee ri Penderu aiko teĩ mamo tu oĩ xemboetea? Xee ri Pendererekao ae avi aiko teĩ mamo tu ha'vy oĩ xemboetea? Mba'eta peẽ sacerdote kuery pendekuai va'eri xerery napemboetei va'e.

— Ha'e rã peẽ kuery ma peporandu 'rã: "Mba'e nunga py tu noromboetei ri nderery?" peje 'rã.

<sup>7</sup> — Ambovai: "Mba'eta mbojape ha'eve'ŷ va'e rive peme'ẽ xevyguá altar áry", ha'e.

— Ha'e gui peporanduve tema: "Mba'e nunga py tu ndee noromboetei?"

— Ambovai: "Mba'eta aipopeje: 'SENHOR pegua mesa ma ojou vaipy' pejea py.

---

\* **1:3** Romanos 9.13 \* **1:4** Edom ma Esaú rery mboae (Gênesis 25.30). Ha'e rami vy Edom pygua kuery ma Esaú ramymino ikuai. Ha'e rã Israel kuery ma Jacó ramymino ikuai.

<sup>8</sup> Mba'eta xevy pe peme'ẽ 'rã mymba oma'ẽ e'ŷ va'e. Ha'e nunga rive peru ramo nda'evei e'ŷ teve? Ha'e rami e'ŷ vy hetyma rovai va'e, e'ŷ vy imba'eaxykue peru ramo nda'evei e'ŷ avi teve? Xapy'a rei penderuvixa pe ha'e ramigua peme'ẽ va'e rire ha'e va'e nda'u pendejou porã vy pendererovy'a 'rãgue? Any", he'i SENHOR ixondaro reta va'e.

<sup>9</sup> — Aŷ ma pejapukai ke Penderuete pe penemboaxy nho aguã. Ha'e rami avi namigua pendepo py peme'ẽ va'erã peru ramo xee rojou porã 'rã teve? — he'i SENHOR ixondaro reta va'e.

<sup>10</sup> — Ha'eveve 'rãgue peẽ kuery va'e regua xerorokẽ pembotypa va'e rire, xevyguia altar áry tata napemoendy rivevei aguã. Mba'eta xee ma ndoroguerovy'ai ruxã'i ma voi. Ha'e rami vy ndajopyi 'rã guive peme'ẽ va'erã pendepo py peru va'e — he'i SENHOR ixondaro reta va'e.

<sup>11</sup> — Ha'e rã yvy regua ikuaria rupi ma xerery omboete 'rã okuapy, kuaray oẽa katy guive oikea katy peve. Opa rupi xevy oapy 'rã heakuã porã va'e, ha'e iky'a e'ŷ va'e anho 'rã ogueru ome'ẽ va'erã. Mba'eta xerery omboetea 'rãe yvy regua kuery ikuaria rupi — he'i SENHOR ixondaro reta va'e.

<sup>12</sup> — Ha'e rã peẽ kuery ma pemongy'apa xerery, mba'eta aipopeje: " SENHOR pegua mesa ma ha'eve'ŷ va'e, ha'e hi'áry tembi'u nhame'ẽ va'e voi ojou vaipy", peje.

<sup>13</sup> Aipopeje avi: "Ai nhanekane'õ rive ma!" peje vy xemboetea rupi e'ŷ pendekuai. Mba'eta oixu'upa pyre peme'ẽ, hetyma rovaikue, ha'e imba'eaxykue guive. Namigua rive peme'ẽ ramo xee ajopy 'rã ri ty'y pendepo gui? Any — he'i SENHOR ixondaro reta va'e.

<sup>14</sup> — Ijayvu vaipy toiko xembotavypaxe va'e, guymba hexaimbã va'e oguereko vy ha'e va'e ae SENHOR pe ome'ẽ aguã re ijayvu teihekvia ivaikue'i rive ome'ẽ va'e. Mba'eta xee ma huvixave yvate ete va'e aiko. Ha'e ramo yvy regua kuery ma xerery oendu vy oikuua pavẽ 'rã ijavaete va'e aikoa — he'i SENHOR ixondaro reta va'e.

## 2

### *Sacerdote kuery ombopaga aguã re ijayvuague*

<sup>1</sup> SENHOR ixondaro reta va'e aipoe'i:

— Aŷ peẽ sacerdote kuery, pendevy pe xeayvu mba'emo ajapo uka vy.

<sup>2</sup> Ha'e gui napendu potai, ha'e pendepy'a re xerery pemboete aguã napemoi ramo pende'áry ambou 'rã ayvu vai. Rogueroayvu porã 'rãgue py xeayvu vai 'rã pendevy. Xeayvu vai ae ma guive, ha'e rami aguã pendepy'a re napemoi rire.

<sup>3</sup> Ne'ixa, peneramymino kuery pe voi xeayvu 'rã, ha'e penderova re amombo 'rã mymba peme'ẽ va'erã Peru va'ekue repoxi, ha'e nunga reve pendereraapaa avi aguã.\*

<sup>4</sup> Ha'e ramo peikuaa 'rã Levi ramymino kuery pe xereve guarã ajapo va'ekue oĩ riae aguã ajapo uka po rami — he'i SENHOR ixondaro reta va'e.

<sup>5</sup> — Mba'eta Levi ramymino kuery pe xereve guarã ajapo va'ekue ma tekove ha'e ikuai porã aguã regua. Ha'e va'e mokoive ame'ẽ xerenonde ojererokyjea rupi ikuai aguã. Ha'e ramo ha'e kuery ma xerenonde ojererokyjea rupi oryryi ete karamboae xerery oendu vy.

<sup>6</sup> Ijuru py oĩ va'ekue anhetẽ ete rupi nhombo'ea, ha'e rã ha'eve e'ŷa rami joguereko aguã ma noĩ va'ekue ijuru py. Xereve peteĩ rami ikuai va'ekue teko porã rupi. Ha'e rami vy heta va'e kuery ombo'e ojejavya gui ojepe'a aguã rami.

<sup>7</sup> Mba'eta sacerdote kuery ma ojuru py 'arandu re ijayvu aguã rami ikuai, ha'e kuery juru gui avakue oendu aguã o'arandurã, mba'eta SENHOR ixondaro reta va'e ayvu reraa ikuai.

\* <sup>2:3</sup> Ha'e kuery iky'apa va'e ikuaria rami ijayvu, mba'eta mymba repoxi ma oapya aguã py 'rã heraa (Levítico 16.27).

<sup>8</sup> Ha'e rã peẽ kuery ma ha'e va'e tape gui pejepo'a vy penhombo'ea rupi heta ma pejapo ojejavý aguã rami. Pejepo'a rive Levi ramymino kuery pe xereve guarã ajapo va'ekue gui – he'i SENHOR ixondaro reta va'e.

<sup>9</sup> – Ha'e nunga rupi ae xee rojapo ojou vaipy ha'e omboetepy e'ý pendekuai aguã rami heta va'e kuery renonde, tape aeja va'ekue rupi napendekuai, ha'e lei rupi e'ý, ha'eve'ýa rami anho pejoguerekó rire – he'i.

### *Nhanderu'xyx kuery pe jajejavý e'ý aguã re ijayvuague*

<sup>10</sup> Nhanderu ma peteñ'i va'e'ý ri ty'y oiko? Nhanderuete e'ý teve nhanemoingo pavẽ raka'e? Mba'e re tu ha'vy anhetẽ rupi e'ý jajoguerekó? Ha'e rami vy nhambovaipa nhaneramoí kuery pe Nhanderuete guexeve guarã ojapo va'ekue.

<sup>11</sup> Mba'eta Judá kuery ma ojeroviapy rupi e'ý ikuai vy ojeguarupy ojapo Israel yvy re, Jerusalém tetã py guive. Mba'eta SENHOR pegua oo iky'a e'ý va'e oguerovy'a ete va'e ma Judá kuery omongy'apa vy omenda tuuete ramigua mboae mboetea kuery re.

<sup>12</sup> Ha'e gui avakue ha'e rami ete ojapo va'e rei SENHOR omokanhymba 'rã Jacó kuery ikuiai gui, SENHOR ixondaro reta va'e pe mba'emo ome'ë va'eri.

<sup>13</sup> Pova'e nunga pejapo avi va'e. Mba'emo peme'ë va'e re ha'e noma'ëvei, pendepo gui ndojopyvei ndoguerovy'avei vy. Ha'e ramo SENHOR pegua altar pejao'i 'rã pendexay py. Pejao'e reve penepoaë rei pekuapy.

<sup>14</sup> Ha'e rami vy peporandu guive vy “Mba'e re tu nanhandererovy'avei?” peje. Mba'eta SENHOR oikuua porã nekunumi vy ndera'xyrã reraa va'ekue reve peteñ rami pejoguerekó aguã pejapoague. Pendera'xyx kuery ma peneirũ oiko, peteñ rami pendekuai aguã pejapoague regua teñ ha'e kuery pe pejajavy.

<sup>15</sup> SENHOR peteñ rami e'ý teve ava ha'e kunha omoingo raka'e, peteñ'i nhe'ë omoí reve? Mba'erã tu peteñ rami omoingo raka'e? Mba'eta oipota ta'y kuery ha'e hamymino kuery ixupe ete ikuai. Ha'e nunga rupi peikuua pota pendejee ae. Avave rei tojajevy eme gua'xyrã kunumi jave ogueraa va'ekue pe.

<sup>16</sup> Mba'eta SENHOR Israel kuery Ruete aipoe'i: “Xee ndajou porã joegui opoi va'e, neñ joguero'aa rupi onhemongy'apa rei va'e”, he'i SENHOR ixondaro reta va'e. Ha'e nunga rupi peikuua pota pendejee ae, joupe pejajavy e'ý aguã.

### *SENHOR ou jevy e'ý mbove ixupeguia Anjo ojekuaa aguã re ijayvuague*

<sup>17</sup> Peẽ kuery pemomboriau SENHOR pendeayvu py. Ha'e ramo aipopeje: “Mba'e nunga py tu romomboriau?” peje. Mba'eta pendejeupe ae aipopeje: “ SENHOR omboeko porã 'rã teko vai apoa kuery, oguerovy'a guive”, peje. Ha'e rami e'ý vy “Mba'exa tu oiko Nhanderuete nhombopaga aguã?” peje rive.

## 3

<sup>1</sup> SENHOR ixondaro reta va'e aipoe'i:

– Xerenonde rupi amondouka 'rã xeayvu reraarã tape oguerekó katu aguã. Ha'e gui ma Senhor pearõ pekuapy va'e ou xapy'a 'rã ojeupeguia templo py. Ha'e va'e ma xeremimbou, xereve guarã ajapo va'ekue kuaa ukaarã ambou va'e, peipota va'e ae. Ne'exa, ou ma oiny.\*

<sup>2</sup> Ha'e rami avi mava'e tu ogueropo'aka 'rã oua ára? Ha'e ojekuaa ramo mava'e tu optya 'rã ho'amy? Mba'eta tata ouro ky'a'oa rami oiko, kavõ ao joia rami guive.

<sup>3</sup> Mba'eta openaaty py oguapy 'rã joky'a'o aguã prata omboyku reve oiky'a'oa rami. Ha'e vy oiky'a'o 'rã Levi ramymino kuery, ouro ha'e prata rami ete 'rã oiky'a'o. Ha'e ramo mae SENHOR pe ha'e kuery ogueru 'rã ha'evea ramigua ome'ë va'erã.

<sup>4</sup> Ha'e ramo SENHOR oguerovy'a 'rã mba'emo Judá ha'e Jerusalém pygua kuery ome'ë va'e, yma guare rami, ára jypy guare rami.

\* <sup>3:1</sup> Mateus 11.10, Marcos 1.2, Lucas 7.27

<sup>5</sup> — Pendere aikuua pota vy 'rã aju pendea py. Ha'e rami vy are'ŷ'i re xeayvu 'rã imba'evyky va'e kuery rovai, itavy rei va'e, oura rive-rive va'e, omba'eapo va'e pe ha'eve'ŷ'a rami opaga va'e kuery, imeve'ŷ va'e ha'e tyre'ŷ moingo axya, amboae yvy guigua rerekoxya, ha'e xerenonde ojererokyje rupi e'ŷ ikuai va'e ha'e javi rovai — he'i SENHOR ixondaro reta va'e.

### *Dízimo ha'e mymba nome'ẽ porāi okuapya py imonda rã ijayvuague*

<sup>6</sup> — Mba'eta xee SENHOR ma ojeko rerova va'e'ŷ aiko. Ha'e nunga rupi peẽ Jacó ramymino kuery, napekanhyi.

<sup>7</sup> Mba'eta peneramoï kuery ikuai guive ma voi pejepe'a xeayvu aeja va'ekue gui, ndapejapoi ete. Pejevy ju ha'vy xea py, ha'e ramo xee voi ajevy ju 'rã peẽa katy — he'i SENHOR ixondaro reta va'e.

— Ha'e rami teĩ peẽ kuery aipopeje: “Mba'exa tu rojevy aguã rami roiko?” peje.

<sup>8</sup> Ha'e rami avi peẽ avakue penemonda 'rã ri ty'y Penderuete gui? Mba'eta peẽ kuery penemonda xegui. Ha'e ramo aipopeje: “Mba'e nunga py tu oremonda ndegui?” peje ramo xee ambovai: “Dízimo ha'e mymba napeme'ẽ porāia py”, ha'e.

<sup>9</sup> Xegui penemonda rire ayvu vaipy peiko, peẽ kuery ha'e javi.

<sup>10</sup> Peru ke ha'vy dízimo ha'e javi mba'emo omoï porāaty py, xevyguia opy oĩ aguã tembi'u. Xera'ã ke ha'e nunga py — he'i SENHOR ixondaro reta va'e. — Ha'e rami rã yva re janela oĩ va'e aipe'a vy peẽ kuery áry anhoë 'rã penemoingo porāarã, oĩmba aguã nda'evei peve.

<sup>11</sup> Peẽ kuery re ama'ẽ vy xeayvu ete 'rã mba'emo aju 'upaa pe, pendeyvy gui mba'emo aju oiko rã omomba e'ŷ aguã, uva penhotŷ va'ekue voi ndai'a ve'ŷi aguã — he'i SENHOR ixondaro reta va'e.

<sup>12</sup> — Ha'e gui pendeyvy iporã ete ramo pendevy ha'e javi regua “Ovy'a ete va'e” he'i 'rã okuapy — he'i SENHOR ixondaro reta va'e.

### *Heko porā va'e ha'e heko vai va'e joo ramigua e'ŷ ikuai re ijayvuague*

<sup>13</sup> SENHOR aipoe'i:

— Pendeayvua ma nda'evei ete xevy. Ha'e rami teĩ peẽ ma aipopeje: “Mba'exa tu oreayvu ndere?” peje.

<sup>14</sup> Mba'eta aipopeje: “Nda'eve ranhei Nhanderuete pe nhandekuaia. Mba'e 'rã tu jajou ijayvua jajapo vy, ha'e SENHOR ixondaro reta va'e renonde rupi jajae'o reve nhandekuaivy?

<sup>15</sup> Mba'eta nhande jaikuua onhemboyvate rei va'e kuery ovy'a reia. Ha'e kuery opa marã rei ikuai teĩ ma ikuai porã. SENHOR re voi opu'ã va'eri oo jepe”, peje rive.

<sup>16</sup> Ha'e rã SENHOR renonde ojererokyjea rupi ikuai va'e ma jomeme ijayvu okuapy. Ha'e ramo SENHOR oendu pota. Ha'e rami vy SENHOR renonde peteĩ kuaxia omboparaa, henonde ojererokyje ha'e hery re ima'endu'aa rupi ikuai va'e rery oĩa, ha'e kuery re avi ima'endu'aa riae aguã.

<sup>17</sup> SENHOR ixondaro reta va'e aipoe'i:

— Aikuua pota aguã ára ovaẽ ramo ha'e kuery ma xevyguia arov'y a ete va'e ikuai 'rã. Ha'e kuery re apena 'rã peteĩ ava gua'y ixupe ae oiko va'e re openaa rami avi.

<sup>18</sup> Ha'e gui teĩgue ju peikuua 'rã heko porã va'e ha'e heko vai va'e joo ramigua e'ŷ ikuai, mba'eta Nhanderuete ma ojeupagua kuery ha'e ojeupagua e'ŷ joo rami e'ŷ 'rã oguerek.

## 4

### *Kuaray rami teko porā ojekuua aguã re ijayvuague*

<sup>1</sup> SENHOR ixondaro reta va'e aipoe'i:

— Ou ma oiny ára tatakua rami haku raxa va'erã. Onhemboyvate rei ha'e teko vai rupi ikuai va'ekue ma okaipa 'rã mba'emo pirukue rami rive, mba'eta ára ou ramo okaipa 'rãe. Ha'e rami vy ndopytai 'rã hapokue neĩ hi'ygue.

<sup>2</sup> Ha'e rã peẽ kuery xerery pendu vy xerenonde pejererokyjea rupi pendekuai va'e pe ma kuaray rami 'rã ojekuaa teko porã. Hexakãa rupi 'rã ou nhomoingo porãarã. Ha'e ramo pepo-pepo reve 'rã peẽmba, vaka ra'y kuery kora gui oẽ va'e rami avi.

<sup>3</sup> Ha'e rami vy pepyrõmba 'rã heko vai va'e re, pendepy guýry tanhimbu rami 'rã ha'e kuery opyta, aikuaa pota aguã ára ovaẽ ramo – he'i SENHOR ixondaro reta va'e.

<sup>4</sup> — Penema'endu'a ke lei xerembiguai Moisés ombopara va'ekue re. Mba'eta Israel kuery ha'e javi pe aeja va'ekue Horebe yvyty áry, xeayvua ha'e aipota va'e reve.

<sup>5</sup> — Ha'e gui xee SENHOR ára tuvixa ha'e ijavaete va'e ovaẽ ta ramo pendea py ambou ju 'rã profeta Elias.\*

<sup>6</sup> Ha'e va'e ma oguerova 'rã tuu kuery py'a re oĩ va'e, gua'y kuery oayvu ju aguã rami, ha'e ta'y kuery py'a oguerova avi 'rã nguu kuery oayvu ju aguã. Ha'e rami e'ŷ ramo aju jevy vy yvy amomba 'rã ayvu vai py.

---

\* **4:5** João Batista ou jave heta va'e kuery onhe'ẽ rendu va'e rire ma ha'e ae oiko 'rãgue Elias ou ju 'rã va'ekue. Ha'e rami teĩ heta va'e kuery nonhe'ẽ rendui ramo Elias ou teri aguã rami oiko (Mateus 11.13-14, 17.10-13; Lucas 1.17).

## **Mateus ayvu porā ombopara va'ekue**

## **Mateus ayvu porā ombopara va'ekue**

Kova'e kuaxia para rupi Jesus remimbo'e Mateus omboaxa nhandevy arandu iporā va'e, Jesus rekoke omombe'u vy. Yma rupi Jesus ramoī kuery ikuai jave, ha'e kuery pe Nhanderuete omombe'u ma voi Jesus ou vy teko vai gui nhandererova aguā. Ha'e rami aguā ma Antigo Testamento py oī. Mateus omombe'u Jesus oikoa rupi Nhanderuete ijayvu ma voiague oiko va'ekue. Yma guive Nhanderuete omombe'u uka ma voi nhandereraa jepearā omoī vy ombou aguā. Ha'e va'e pe hebreu kuery ayvu py "Messias" 'ea, ha'e rā grego ayvu py ma "Cristo" 'ea. Tery Jesus voi "Jogueraa jepea" 'ea. Ha'e nunga rupi Jesus itui'ague Mateus omombe'u vy aipoe'i: "Remboery rā Jesus, mba'eta ojeupeguā kuery ogueraa jepe 'rā heko vaia gui" (1.21b).

Peteī regua anho ogueraa jepe aguā e'ŷ Jesus ou, ha'e rā yvy jave re ha'e javi regua. Ha'e rami vy omombe'u ko yvy re Nhanderuete po'akaa ou aguā. Ha'e vy aipoe'i: "Pejeko rerova ke, mba'eta namombyryvei ma yva pygua po'akaa ojekuaa aguā" (4.17b). Nhanderuete po'akaa ojekuaa raka'e Jesus ojapo porāa ha'e nhombo'ea rupi ae.

Heta Mateus omombe'u Jesus nhombo'eague, ha'e mba'emo re ombojoja vy Nhanderuete po'akaa omombe'u porāveague guive. Porombo'ea ikuai va'e gui nhombo'e porā kuaave. Ha'e anho'i ha'eve jaikoa omoexakā aguā Nhanderuete oipotaa rami, Nhanderuete Ra'y ae vy.

### *Jesus Cristo ramoī kuery rery oīa*

*Lucas 3.23-38*

<sup>1</sup> Kova'e kuaxia re ma oī Jesus Cristo ramoī ypy kuery rery. Jesus ma Davi ramymino oiko, ha'e Davi ma Abraão ramymino raka'e.

<sup>2</sup> Abraão ra'y ma Isaque, Isaque ra'y ma Jacó, Jacó ra'y ma Judá ha'e tyvy kuery.  
<sup>3</sup> Judá Tamar re ta'ya ma Perez ha'e Zerá. Perez ra'y ma Esrom, Esrom ra'y ma Arão,  
<sup>4</sup> Arão ra'y ma Aminadabe, Aminadabe ra'y ma Naassom, Naassom ra'y ma Salmom,  
<sup>5</sup> Salmom ra'y Raabe guigua ma Boaz. Boaz ra'y Rute guigua ma Obede, ha'e Obede ra'y ma Jessé.

<sup>6</sup> Jessé ra'y ma huvixave Davi, ha'e huvixa Davi ra'y ma Salomão, Urias ra'yxykue pi'a va'e.

<sup>7</sup> Salomão ra'y ma Roboão, Roboão ra'y ma Abias, Abias ra'y ma Asa,

<sup>8</sup> Asa ra'y ma Josafá, Josafá ra'y ma Jorão, Jorão ra'y ma Uzias,

<sup>9</sup> Uzias ra'y ma Jotão, Jotão ra'y ma Acaz, Acaz ra'y ma Ezequias,

<sup>10</sup> Ezequias ra'y ma Manassés, Manassés ra'y ma Amom, Amom ra'y ma Josias,

<sup>11</sup> Josias ra'y ma Jeconias ha'e tyvy kuery, Babilônia katy ogueraapaa jave py oiko va'ekue.

<sup>12</sup> Ha'e gui Babilônia katy escravo-rā ogueraapaa ma rire oiko Jeconias ra'y Salatiel, Salatiel ra'y ma Zorobabel,

<sup>13</sup> Zorobabel ra'y ma Abiúde, Abiúde ra'y ma Eliaquim, Eliaquim ra'y ma Azor,

<sup>14</sup> Azor ra'y ma Sadoque, Sadoque ra'y ma Aquim, Aquim ra'y ma Eliúde,

<sup>15</sup> Eliúde ra'y ma Eleazar, Eleazar ra'y ma Matã, Matã ra'y ma Jacó.

<sup>16</sup> Ha'e gui Jacó ra'y ma Maria me José. Maria pi'a ma Jesus, Cristo 'epy va'e.

<sup>17</sup> Ha'e rami vy Abraão oiko guive Davi oiko peve ma catorze-kue hamymino ikuai. Ha'e Davi oiko guive Babilônia katy escravo-rā ogueraapaa peve catorze-kue ju ikuai. Ha'e gui Babilônia katy ogueraapaa guive Cristo oiko peve ma catorze-kue ju ikuai.

*Lucas 2.1-7*

<sup>18</sup> Ha'e gui Jesus itui'ague ma po rami: José re ixyrā Maria omenda va'erā oikovy jave, joupe ojekuaa uka e'ŷ mbove oguerekō'i kyrī va'e Nhe'ẽ Ky'a E'ŷ gui.

<sup>19</sup> Ha'e rā imerā José heko porā va'e vy ndoikuua ukaxe. Ha'e rami vy onhembopy'a oeja aguā avave rei oikuua e'ŷ re.

<sup>20</sup> Ha'e nunga re onhembopy'a oikovy. Ha'e gui oexa ra'u rā ixupe ojexa uka peteĩ anjo Senhor-a guigua. Ha'e vy aipoe'i:

— Davi ramymino José, ekyje eme Maria reraa aguā ndera'yxyrā, mba'eta kyrī va'e oguerekō'i va'e ma Nhe'ẽ Ky'a E'ŷ guigua.

<sup>21</sup> Ha'e ramo oikuavā 'rā peteĩ ava'i. Remboery 'rā Jesus, mba'eta ojeupagua kuery ogueraa jepe 'rā heko vaia gui.

<sup>22</sup> Ha'e nunga ha'e javi ma ojeupity aguā profeta pe Senhor aipoe'i ukaague:

<sup>23</sup> "Peteĩ kunhataĩ ete'i oiko va'e oguerekō'i 'rā kyrī va'e, oikuavā 'rā ava'i. Ha'e va'e pe ma 'Emanuel' 'ea 'rā." (Ha'e va'e tery ma "Nhanderuete nhandereve oiko" 'ea.)\*

<sup>24</sup> Ha'e rami rā José okeague gui ovvy vy oiko Senhor-a guigua anjo aipoe'iague rami. Ha'e vy ogueraa gua'yxyrā.

<sup>25</sup> Ha'e rami avi oguerekō rive ranhe, ava'i oikuavā e'ŷa ja. Ha'e va'e ma omboery Jesus.

## 2

### *Imba'ekuaa va'e kuery oipouague*

<sup>1</sup> Huvixave Herodes oĩ jave, Judéia regua Belém tekoá py Jesus itui'i rire ou amongue imba'ekuaa va'e kuery. Kuaray oua katygui ou Jerusalém tetā py.

<sup>2</sup> Ha'e kuery oporandu jogueruvy:

— Mamo tu itui judeu kuery ruvixaverā oiko ramo'i va'ekue? Mba'eta kuaray oua katy roexa karamboae ikuaa ukaa jaxy-tata. Ha'e rami vy apy roju romboete aguā — he'i.

<sup>3</sup> Ha'e nunga omombe'ua rā huvixa Herodes oendu vy onhemondyi, Jerusalém py ikuai va'e ha'e javive reve.

<sup>4</sup> Ha'e rami vy oenoimba judeu kuery regua sacerdote yvatekueve va'e ha'e kuaxia re nhombo'e va'ety kuery. Ha'e va'e kuery pe oporandu mamo pa Cristo itui'i 'rāa re.

<sup>5</sup> Ha'e kuery ombovai:

— Judéia regua Belém tekoá py 'rā itui'i, mba'eta po rami oĩ profeta ombopara va'ekue:

<sup>6</sup> "Ndee Judá yvy regua Belém tekoá, Judá regua tetā tuvixakueve ikuai va'e gui mba'eve py nane'yvyřvei, mba'eta ndea gui ae 'rā oiko Juguerekōarā, xevygua Israel kuery re opena va'erā", he'i va'ekue.\*

<sup>7</sup> Ha'e nunga Herodes oendu vy imba'ekuaa va'e kuery ju oenoí uka ha'e ae'ia py. Ha'e kuery pe oporandu vy oikuuaa pota raka'e ete pa jaxy-tata ojekuaa ague re.

<sup>8</sup> Ha'e gui Belém katy omondouka vy aipoe'i ha'e kuery pe:

— Tapeo, peikuaa pota porā ava'i reko re. Pejou vy ke pemombe'u uka xevy, xee voi aa aguā amboete vy — he'i.

<sup>9</sup> Ha'e ramo huvixa ayvu ha'e kuery oendupa vy oje'oi. Ha'e gui jaxy-tata kuaray oua katy ikuai teri reve oexa va'ekue ma ha'e kuery renonde ju oaxa ovvy, ava'i ituia áry ovaẽ peve. Ha'e py ma optya.

<sup>10</sup> Ha'e kuery jaxy-tata oexa vy ovvy'a ete.

<sup>11</sup> Oo py oike vy oexa ava'i, ixy Maria reve. Ha'e rami vy guenapy'ā re oĩ vy omboete okuapy, ha'e mba'emo porā oguenoē vy ixupe ome'ẽ ogueru va'ekue: ouro, heakuā porā va'e ha'e mirra.

<sup>12</sup> Ha'e gui oexa ra'u rā Nhanderuete oikuua uka huvixa Herodes-a rupi ve'ŷ ojevy aguā. Ha'e ramo tape mboae rupi ojevy oyvy katy.

### *Egitoyvy katy oguerojava heravyague*

\* <sup>1:23</sup> Isaías 7.14 \* <sup>2:6</sup> Miquéias 5.2

<sup>13</sup> Ha'e kuery oje'oipa rire José oexa ra'u jevy rā ixupe ojexa uka peteĩ anjo Senhor-a guigua. Ha'e vy aipoe'i ixupe:

— Epu'ã ke, eraa ava'i ha'e ixy. Pejava Egito yvy katy. Ha'e py ma peiko xeayvu jevy e'ŷa ja, mba'eta Herodes oeka ta ava'i ojukaxe vy — he'i.

<sup>14</sup> Ha'e ramo opu'ã pyavyve. Ava'i ha'e ixy ogueraa vy Egito katy oje'oi.\*

<sup>15</sup> Ha'e py optyta Herodes omano e'ŷa ja, profeta pe Senhor aipoe'i ukaague ojeupity aguã: “Egito gui aenoĩ Xera'y”, he'iague.\*

### *Avakue'i ojukapaague*

<sup>16</sup> Herodes ma imba'ekuaa va'e kuery ombotavyague oikuaa vy ipoxy vaipa. Ha'e rami vy ojuka ukapa avakue'i Belém teko, ha'e ha'e katy'i rupi ikuai va'e ha'e javi. Mokoĩ ma'etý ete'ŷ-te'ŷ oguereko va'e guive ojuka ukapa, imba'ekuaa va'e kuery gui raka'e pa oikoague omombe'uague rami vy.\*

<sup>17</sup> Ha'e rami oiko raka'e profeta Jeremias pe aipoe'i ukaague ojeupity aguã:

<sup>18</sup> “Ramá teko py onhendu hevovo rei va'e. Hexay [ha'e ojae'o va'e], ipoaẽ rei va'e guive, Raquel opi'a kuery re ojae'o okuapy vy. Imemby kuery jipovei ma ramo nonhembovy'a ukai.”\*

### *Egito gui ojevyague*

<sup>19</sup> Ha'e gui Herodes omano ma rire Egito yvy re José oikoa py ra'u rupi ojexa uka peteĩ anjo Senhor-a guigua. Ha'e vy aipoe'i:

— Epu'ã ke, eraa ava'i ha'e ixy. Tapeo ju Israel yvy re, mba'eta ava'i jukaxeare kuery omanomba ma — he'i.

<sup>21</sup> Ha'e ramo opu'ã. Ava'i ha'e ixy ogueraa vy ojevy ju Israel yvy re.

<sup>22</sup> Ha'e gui Judéia pygua huvixa Herodes rekoria ta'ykue Arquelau ju oĩa oendu vy okyje ha'e katy ju oo aguã. Ha'e gui oexa ra'u rā Nhanderuete oikuaa uka jevyague rami oiko vy Galiléia yvy katy ojepe'a ovy,

<sup>23</sup> peteĩ tetã Nazaré hery va'e py ikuai aguã. Ha'e rami oiko ojeupity aguã profeta kuery pe aipoe'i ukaague: “Ixupe ‘Nazaré pygua’ 'ea 'rā”, he'iague.

## 3

### *Marcos 1.2-6; Lucas 3.1-9*

<sup>1</sup> Ha'e va'e jave py ojekuaa João Batista. Ha'e va'e ma Judéia katy'i teko e'ŷa rupi omombe'u oikovy ayvu.\* Ha'e vy aipoe'i:

— Pejeko rerova ke, mba'eta namombyryvei ma yva pygua po'akaa ojekuaa aguã — he'i.

<sup>3</sup> Ha'e va'e rekorã ma profeta Isaías pe omombe'u ukaa va'ekue: “Tekoa e'ŷa rupi onhendu 'rā ‘Perekó katu Senhor raperã, pembo'yvi ou aguã’, he'i oikovy va'e.”\*

<sup>4</sup> João ao ma camelô rague guigua, ha'e rā iku'axã ma ipire guigua. Ho'u va'e ma tuku ha'e ei ka'aguy regua.

<sup>5</sup> Ha'e ramo ha'e oĩa py oje'oi Jerusalém tetã pygua kuery, Judéia ha'e Jordão yakã yvýry ikuai va'e kuery ha'e javi reve.

<sup>6</sup> Ixupe onhemongarai ukapa Jordão yakã py, ojejavyague omombe'upa vy.

— Nhomongaraia py heta avi ou fariseu ha'e saduceu kuery. Ha'e rā oexa vy aipoe'i ha'e kuery pe:

— Peẽ mboi ramigua, mava'e tu aipoe'i poxya ou va'erã gui peo jepe 'rāa rami?\*

<sup>8</sup> Pendekuai ha'vy yvyra hi'a porã va'e rami, pejeko rerovaague pexa uka aguã.

---

\* <sup>2:14</sup> Apocalipse 12.1-6   \* <sup>2:15</sup> Oséias 11.1   \* <sup>2:16</sup> Apocalipse 12.13-18   \* <sup>2:18</sup> Jeremias 31.15   \* <sup>3:1</sup> João 1.19-23   \* <sup>3:3</sup> Isaías 40.13   \* <sup>3:7</sup> Ha'e kuery pe “Mboi ramigua” he'i mba'eta mboi yma guare rami ha'e kuery voi nhombotavya rupi ikuai, ndojeko rerovaxei guive.

<sup>9</sup> Ha'e jomeme pemboypy eme "Nhande ma Abraão ramymino jaiko" peje aguã. Mba'eta xee aipoa'e pëvy: Kova'e ita ikuai va'e gui voi Nhanderuete omoingo kuaa Abraão ramyminorã.

<sup>10</sup> Ha'e gui haxa py omboguai ta ma yvyra rapo re. Yvyra hi'a porã e'ŷ va'e ha'e javi ojaya vy omombo 'rã tata py.<sup>†</sup>

*Marcos 1.7,8; Lucas 3.15-17; João 1.19-28*

<sup>11</sup> — Xee ma pejeko rerova ramo yy py rive romongarai va'e. Ha'e rã xerakykue ou va'e ma xegui yvateve va'e. Ha'e va'e gui xe'yvyïve ete va'e vy neï ipy regua araa aguã voi nda'evei. Ha'e ma Nhe'ẽ Ky'a E'ŷ reve 'rã penemongarai, tata py guive.

<sup>12</sup> Mba'eta opo py oguerek ma trigo mbovevea, ha'e vy ombovevepa 'rã ha'yï oï va'e. Trigo ra'yï ete omoï porã 'rã omoï porãty py, ha'e rã ipirekue ma oapy 'rã tata ogue e'ŷ va'e py.

*Marcos 1.9-11; Lucas 3.21,22; João 1.32-34*

<sup>13</sup> Ha'e jave py Galiléia yvy gui Jesus oo Jordão yakã katy, João pe onhemongarai uka aguã.

<sup>14</sup> Ha'e rami teĩ João nomongaraixei ranhe vy aipoe'i:

— Xee ma ha'eve ndevy pe anhemongarai uka aguã. Ndee ri ty'y xea py reju?

<sup>15</sup> Ha'e rã Jesus ombovai:

— Tove ha'e rami teĩ, mba'eta ha'e rami vy 'rãteko porã ha'e javi jajapo — he'i. Ha'e ramo omongarai.

<sup>16</sup> Jesus onhemongarai ma vy yy gui oẽ ju ramove yva ojepe'a jekuaa ramo oexa Nhanderuetea guigua Nhe'ẽ oguejy ouvy rã peteĩ apykaxu'i rami. Ha'e va'e ou vy hexe oï.

<sup>17</sup> Ha'e gui onhendu peteĩ ayvu yva gui:

— Peva'e ma Xera'y ayvu ete ha'e arov'y'a va'e — he'i va'e.

## 4

*Marcos 1.12,13; Lucas 4.1-13*

<sup>1</sup> Ha'e rire tekaoa e'ŷa py ju Nhe'ẽ ogueraa Jesus, anha oeko a'ã aguã py.\*

<sup>2</sup> Ha'e ramo quarenta ára, quarenta pytû re oiko okaru e'ŷ re. Ha'e rire okaruxe ma.

<sup>3</sup> Ha'e ramo oïa py poroeko a'ãa onhemboja vy aipoe'i:

— Nhanderuete Ra'y ri reiko vy ndeayvu kova'e ita oï va'e pe tojeapo mbojape.

<sup>4</sup> Ha'e ramo Jesus ombovai:

— Ipara oiny: "Mbojape re anho e'ŷ 'rã avakue oikove, ha'e rã ayvu Nhanderuete juru gui oẽ va'e ha'e javi re" — he'i.\*

<sup>5</sup> Ha'e gui anha ogueraa tetã iky'a e'ŷ va'e py, templo apyte áry omoï.

<sup>6</sup> Ha'e vy aipoe'i:

— Nhanderuete Ra'y ri reiko vy enhemombo apy gui yvy katy, mba'eta ipara oiny: "Ombou 'rã ojeupagua anjo kuery ndere opena aguã." Ha'e rã "Ha'e kuery ndejoko 'rã opo py, ita re renhepyxanga e'ŷ aguã" — he'i.\*

<sup>7</sup> Jesus ombovai:

— Ipara avi oiny: "Eko a'ã eme Senhor Nderuete" — he'i.\*

<sup>8</sup> Ha'e gui yvyty yvateve va'e áry ju anha ogueraa vy ixupe oexa uka ko yvy re tetã ikuai va'e, mba'emo porã oï va'e ha'e javi guive.

<sup>9</sup> Ha'e vy aipoe'i ixupe:

— Peva'e nunga ha'e javi ame'ẽmba 'rã ndevy, xapy'a rei nerenapy'ã re reĩ reve xemboete ramo.

<sup>10</sup> Ha'e ramo Jesus aipoe'i ixupe:

\* 3:10 "Haxa py yvyra ojaya 'rã" he'ia py Nhanderuete pe ndojeko rerovai va'e ombopagapa 'rãa re ijayvu vy. \* 4:1 Hebreus 2.18; 4.15 \* 4:4 Deuteronomio 8.3 \* 4:6 Salmo 91.11-12 \* 4:7 Deuteronomio 6.16

— Satanás, ejep'e a ke apy gui, mba'eta ipara oiny: “Senhor Nderuete anho 'rã remboete ha'e rembojerovia” — he'i.\*

**11** Ha'e rami rã anha oeja ovv, ha'e rã anjo kuery ju ou vy opena hexe.

*Marcos 1.14,15; Lucas 4.14,15*

**12** João nhuã py ombotya ague omombe'ua rã Jesus oendu vy ojepe'a ovv Galiléia katy.

**13** Nazaré tetã oeja vy Cafarnaum py ju oo oiko aguã, ye'ẽ yvýry, Zebulom ha'e Naftali yvy katy'i,

**14** profeta Isaías pe aipoe'i ukaague ojeupity aguã:

**15** “Zebulom ha'e Naftali yvy, ye'ẽ katy tape oo va'e yvýry, Jordão yakã rovaigua re, judeu e'ý va'e kuery ikuai Galiléia rupi,

**16** ha'e pygua kuery ma pytã rupi ikuai va'ekue ri oexa hendy tuvixa va'e. Ha'e rã hendy va'e omoexakã manoa guy pytã reia rupi ikuai va'ekue” he'i ukaague rami.\*

**17** Ha'e va'e guive Jesus omboypy ayvu omombe'u aguã. Ha'e vy aipoe'i:

— Pejeko rerova ke, mba'eta namombyryvei ma yva pygua po'akaa ojekuaa aguã.

*Marcos 1.16-20; Lucas 5.1-11*

**18** Galiléia regua yupa yvýry oikoa rupi oexa mokoõ joegua: Simão Pedro hery va'e ha'e André. Yy py pira mbo'aa omombo okuapy rã oexa, pira mbo'aa rupi ikuai ramo.

**19** Ha'e rami vy aipoe'i ha'e kuery pe:

— Peju ke xerakykue. Xee ma avakue jouarã ju 'rã romoingo — he'i.

**20** Ha'e ramo ha'e kuery ma pira mbo'aa oejapa vyvoi vy oje'oi hupive.

**21** Oovea py mokoõ joegua ju oexa: Zebedeu ra'y kuery Tiago ha'e tyvy João. Ha'e va'e kuery ma nguu reve kanoã py pira mbo'aa omoatyrõ okuapy rã oexa. Ha'e vy oenoõ.

**22** Ha'e ramove ha'e kuery kanoã ha'e nguu oeja vy oje'oi hakykue.

*Lucas 6.17-19*

**23** Galiléia yvy ha'e javi rupi Jesus oiko. Onhembo'eaty ikuai va'e rupi nhombo'e vy omombe'u ayvu porã Nhanderuete po'akaa regua. Heta va'e kuery omonguera guive opa marãguia gui imba'eaxy va'e.

**24** Ha'e ramo mba'emo ojapo oikovya omombe'ua rã oendu pavã Síria yvy ha'e javi rupi. Ha'e ramo oña py oguerua imba'eaxy va'e opa marãguia mba'eaxy oendu va'e gui omonguera aguã: anha onhemondea va'e, he'o'ã va'e ha'e oguata e'ý va'e guive. Ha'e ramo omonguerapa.

**25** Ha'e rire heta ju Galiléia gui ou, ha'e Decápolis, Jerusalém, Judéia ha'e Jordão rovaigua gui. Ou vy oje'oi hakykue.

## 5

*Lucas 6.20-23*

**1** Heta va'e kuery ou rã Jesus oexa vy oẽ yvy'ã re, ha'e oguapy. Ha'e ramo hemimbo'e kuery ma ijyvy'iry ou.

**2** Ha'e ramo ombo'e vy aipoe'i:

**3** — Ovy'a ete 'rã onhe'ẽ py iporiaukue'i va'e, mba'eta ha'e kuery peguarã yva pygua po'akaa oĩ.

**4** — Ovy'a ete 'rã ojae'o va'e, mba'eta omboovy'aa ju 'rã.

**5** — Ovy'a ete 'rã ivai rei e'ý va'e, mba'eta ha'e kuery peguarã yvy itui.

**6** — Ovy'a ete 'rã teko porã re okaruxe ha'e ijy'uvei va'e, mba'eta ojoupa 'rã.

**7** — Ovy'a ete 'rã nhomboaxy va'e, mba'eta ha'e kuery voi omboaxya 'rã.

**8** — Ovy'a ete 'rã ipy'a ky'a e'ý va'e, mba'eta ha'e kuery oexa 'rã Nhanderuete.

**9** — Ovy'a ete 'rã peteñ rami nhomoingo va'e, mba'eta ha'e kuery pe “Nhanderuete ra'y kuery” 'ea 'rã.

\* **4:10** Deuteronomio 6.13

\* **4:16** Isaías 9.1-2

**10** — Ovy'a ete 'rã heko porã ramo rive oguereko axy reia va'e, mba'eta ha'e kuery peguarã yva pygua po'akaa oĩ.

**11** — Pevy'a ete 'rã xekáuxa pendere ijayvu rei ha'e penderereko axya rei ramo, ha'e ijapu vy opa marã pendere ijayvu vai rã guive.

**12** Pevy'a ha'e peporai, mba'eta heta oĩ yva re pendevy guarã. Mba'eta ha'e rami ae oguereko axya raka'e profeta kuery peiko e'ŷ mbove ikuai va'ekue.

*Marcos 9.49,50; Lucas 14.34,35*

**13** — Peẽ kuery ma juky rami peiko yvy regua moe'earã. Ha'e rã xapy'a rei juky nae'evei ramo mba'exa 'rã tu he'ẽ ju? Nдоваревеи 'rã mba'everã. Ha'e ramo oka py rive 'rã nhomombo, avakue opyrõmba aguã py.

### *Guemimbo'e kuery hendy va'e re ombojojaague*

**14** — Peẽ kuery ma hendy va'e peiko yvy regua moexakãarã. Yvyty áry tetã ojapo pyre ma ndojekuua e'ŷi 'rã.

**15** Tataendy voi avave rei omoendy vy nomoĩai 'rã ajaka guýry. Oĩaty py ae 'rã omoĩa, opy ikuai va'e ha'e javi omoexakã aguã.

**16** Ha'e rami ae hendy va'e perekva'e voi taexakã avakue renonde, pendereko porãa ha'e kuery oexa vy oguerovy'a avi aguã Penderu yva pygua.

### *Lei ojeupitypa aguã Jesus oua re ijayvuague*

**17** — Pexa'ã eme lei ha'e profeta kuery ombopara va'ekue ambovaipa aguã ajua re. Ambovaipa aguã e'ŷ aju, ojeupity aguã.

**18** Mba'eta anhetẽ aipoa'e pêvy: Yva ha'e yvy okanhya e'ŷa ja neĩ peteĩ ipara'i, neĩ peteĩ ikarẽ'i va'e nokanhya 'rã lei gui, ha'e javi ojeupity e'ŷa ja.\*

**19** — Ha'e gui ijayvua yvyi've va'e teĩ ha'e va'e rami e'ŷ ikuai ha'e nhombo'e va'e pe ma "Yvyi've i va'e" 'ea 'rã yva pygua po'akaa py. Ha'e rã ha'e rami ete ikuai ha'e nhombo'e va'e pe ma "Yvateve va'e" 'ea 'rã yva pygua po'akaa py.

**20** Mba'eta xee aipoa'e pêvy: Kuaxia re nhombo'e va'ety ha'e fariseu kuery reko gui peẽ kuery napendeko porãvei vy yva pygua po'akaa py ndapeikei 'rãe.

### *Ymagua kuery pe aipo'ea ague Jesus omombe'u porãveague*

#### *Jojukaa re ijayvua*

**21** — Pendu ma ymagua kuery pe aipo'ea ague: "Pejojuka eme." Ha'e rã "Amongue jojuka ramo ombopagaa 'rã", 'ea ague.\*

**22** Ha'e rã xee ma aipoa'e pêvy: Ha'e javive [mba'e re'ŷ] guyvy kuery pe ivai va'e ombopagaa 'rã. Guyvy pe "Mba'e vare'ŷ" he'i va'e ma heraa 'rã nhomongeta va'ety ikuia py. Ha'e rã guyvy pe "Inhakã porã ve'ŷ va'e" he'i va'e ma tata ogue e'ŷ va'e py 'rã opaga.

**23** — Altar oĩa py mba'emo reme'ẽ va'erã reru vy ha'e py xapy'a rei nema'endu'a 'rã nderyvy nderovai mba'emo oguerekao re.

**24** Ha'e rami vy ejá ranhe altar yvy'iry mba'emo reme'ẽ va'erã, tereo ha'e peteĩ rami ju pejogueroayvu nderyvy reve. Ha'e gui mae ma ejevy ju eme'ẽ reme'ẽxe va'ekue.

**25** — Pejogueroayvu porã voi 'rã nderovaigua reve tape rupi peo reve, huvixa po py nderovaigua nemboaxa e'ŷ aguã, ha'e gui jopya pe ju huvixa nemboaxa e'ŷ aguã, ha'e nhuã py nembo'a e'ŷ aguã.

**26** Anhetẽ aipoa'e ndevy: Nereẽi 'rã ha'e gui repagapa katuĩ'i e'ŷa ja.

#### *Tavy reia re ijayvua*

**27** — Pendu aipo'ea ague: "Ndetavy rei eme."\*

\* **5:18** Lucas 16.16,17

\* **5:21** Êxodo 20.13, Deuteronomio 5.17

\* **5:27** Êxodo 20.14, Deuteronomio 5.18

**28** Ha'e rã xee ma aipoa'e pãvy: Kunhague re itavyxea rupi oma'ẽ va'e voi hexeve itavy ae ma opy'a py.

**29** Xapy'a rei nderexa reiporu kuaa regua ri ndereity ramo enoẽ, emombo ndejegui. Mba'eta nderete ha'e javi reve reiko axy aguã py nemomboa 'rãgue py ha'eveve peteĩ nderete regua remokanh.

**30** Xapy'a rei ndepo reiporu kuaa regua ri ndereity ramo ejaya, eipe'a ndejegui. Mba'eta nderete ha'e javi reve reiko axy aguã py reo 'rãgue py ha'eveve peteĩ nderete regua remokanh.

**31** Aipo'ea avi va'ekue: "Gua'yxy gui opoixe va'e tome'ẽ ixupe kuaxia para omendaague ombovaipa aguã", 'ea va'ekue.\*

**32** Ha'e rã xee ma aipoa'e pãvy: Gua'yxy itavy rei ramo e'ŷ opoi va'e ma ojapo 'rã itavy rei va'e oiko aguã rami, ha'e opoi pyre re omenda va'e voi itavy rei avi.

### *Ouraa re ijayvua*

**33** — Pendu avi ymagua kuery pe aipo'ea ague: "Peura rive eme. Senhor pe pejapo ete 'rã peuraague" 'ea ague.

**34** Ha'e rã xee ma aipoa'e pãvy: Nda'evei mba'eve re peura aguã, neĩ yva re, mba'eta Nhanderuete openaaty;

**35** neĩ yvy re, mba'eta opyrõa; neĩ Jerusalém tetã re, mba'eta Huvixa yvateve va'e pegua.

**36** Neĩ peura eme peneakã re, mba'eta peteĩve pende'a napemoxiã kuaai, neĩ napemoũ kuaai guive.\*

**37** Ha'e rami 'rãgue py po rami 'rã pendeayvu: "Tá, tá", e'ŷ vy "Any, any", peje 'rã. Ha'e ramia gui pendeayvuve aguã ma poromboeko vaia guigua.

### *Jepya re ijayvua*

*Lucas 6.27-30*

**38** — Pendu ma aipo'ea ague: "Joexa mombuare rexâ ju 'rã omombua, ha'e nhoaĩ mopẽare raĩ ju 'rã omopẽa" 'ea ague.\*

**39** Ha'e rã xee ma aipoa'e pãvy: Pãvy amongue ojapo vai ta ramo pejoko eme. Ha'e rami 'rãgue py penderova peiporu kuaa regua oipete rã perova hovai re ju oipete aguã.\*

**40** Huvixa kuerya py pendereraa vy pendeparito oipe'aa rã pendecapa avi peipe'a uka.

**41** Xapy'a rei peteĩ quilômetro amongue pendereraa nhea'ã ramo mokoña peve tapeo hupive.

**42** Peme'ẽ 'rã pãvy ojerure va'e pe rei, ha'e pendekupe rei eme mba'emo oiporuxe va'e katy.

### *Mborayvu re ijayvua*

*Lucas 6.32-36*

**43** — Pendu aipo'ea ague: "Peayvu 'rã peneirũ kuery, ha'e rã penderovaigua kuery re ma pendea'e eme" 'ea ague.\*

**44** Ha'e rã xee ma aipoa'e pãvy: Peayvu 'rã pendovaigua kuery voi, ha'e Nhanderuete pe pejerure 'rã pendererekó axy va'e re,

**45** Penderu yva pygua ra'y kuery pendekuai aguã. Mba'eta ha'e ma kuaray ombou vy omoexakã 'rã heko vai va'e ha'e heko porã va'e áry. Oky voi ombou 'rã heko porã va'e ha'e heko vai va'e pe.

**46** Ha'e gui penderayvu va'e kuery anho ri peayvu vy mba'e 'rã tu pejopy ha'e nunga repy? Mba'eta imposto re nhombopaga va'ety kuery voi ha'e rami ikuai.

**47** Penderegua kuery pe anho ri pexarura vy mba'e nunga py tu amboae kuery gui pendekuai porãve? Mba'eta amboae regua kuery voi ha'e rami ikuai.

---

\* **5:31** Deuterônômio 24.1 \* **5:36** Tiago 5.12 \* **5:38** Éxodo 21.24, Levítico 24.20 \* **5:39** Romanos 12.14 \* **5:43** Levítico 19.18

**48** Ha'e rã peẽ ma heko porã va'e 'rã peiko opa mba'e py, Penderu yva pygua opa mba'e py heko porãa rami avi.

## 6

### *Nhanderuete pe mba'emo jajapoa re ijayvua*

**1** — Peiko kuaa pota avakue renonde e'ŷ mba'emo pejapo aguã Nhanderuete pe, ha'e kuery oexa aguã rive. Ha'e rami ri vy Penderu yva pygua gui mba'eve ndapejopyi 'rã hekoria.\*

### *Mba'emo nhame'ẽa re ijayvua*

**2** — Ha'e rami vy iporiaukue'i pe mba'emo peme'ẽ vy penerenonde rupi pemonhe'ẽ uka eme mimby guaxu. Ha'e rami heko porã merami rive va'e ojapo 'rã okuapy onhembo'eaty py ha'e tape rupi, avakue pe onhemboete ukaxe vy rive. Anhetẽ aipoa'e pêvy: Ha'e kuery ojopy ae ma hekoria.

**3** Ha'e rã peẽ ma mba'emo peme'ẽ vy pendeaxua regua pe voi peikuaa uka eme pendeaxu e'ŷa ojapo va'e,

**4** joupe mba'emo peme'ẽ rã avave oikuaa e'ŷ aguã. Ha'e gui peikuaa uka e'ŷ va'e Penderu oexa vy ome'ẽ 'rã hekoria.\*

### *Nhanhembo'e aguã re ijayvua*

**5** — Ha'e gui penhembo'e vy heko porã merami rive va'e rami e'ŷ pendekuai, mba'eta ha'e kuery ma onhembo'eaty py ha'e tetã mbyte rupi onhembo'exe vai 'rã ho'amys avakue oexa aguã rive. Anhetẽ aipoa'e pêvy: Ha'e kuery ojopy ae ma hekoria.

**6** Ha'e rã peẽ ma penhembo'exe vy peike 'rã penderopy, okẽ pemboty 'rã guive. Ha'e gui mae ma 'rã penhembo'e Penderu pexa e'ŷ va'e pe. Ha'e ramo peikuaa uka e'ŷ va'e Penderu oexa vy ome'ẽ 'rã hekoria.\*

**7** — Penhembo'ea py ha'ekue'-ekue'i rupi pendeayvu eme amboae regua kuery rami, mba'eta ha'e kuery oexa'ã tei ijayvu reta rã oendua aguã re.

**8** Ha'e rã peẽ ma peiko eme ha'e kuery rami, mba'eta Penderu oikuaa ma voi peipota va'e, pejerure e'ŷ mbove.

### *Lucas 11.2-4*

**9** — Ha'e vy po rami 'rã penhembo'e: "Oreru yva pygua, tove nderery tomboetea.

**10** Tovaẽ ndepo'akaa ojekuaa aguã. Reipota va'e tojapoa yvy re, yva re ojapoa rami avi.

**11** Ko'ẽ nhavõ ejou uka ro'u va'erã.

**12** Ha'e emboguepa ke ndevy rorevea, ore voi orevy oreve va'e roperdoaa rami avi.

**13** Orereity uka eme poromoangecko pe, orereraa jepe ke mba'emo vai gui. [Mba'eta ndepo'akaa, nembaraetea ha'e nerexakãa oĩ riae 'rã raka'e rã peve guarã. Amém,]” peje 'rã.

**14** — Mba'eta amboae kuery otekoavyague peperdoa ramo Penderu yva pygua voi ombogue 'rã pejeavyague.

**15** Ha'e rã amboae kuery [otekoavyague] ndapeperdoai ri ramo Penderu voi nomboguei 'rã pejeavyague.

### *Nhanderuete pe jakaru e'ŷ re jaikoa re ijayvua*

**16** — Ha'e gui pekaru e'ŷ re peiko vy pexa uka eme pendeporiau reia heko porã merami rive va'e rami, mba'eta ha'e kuery ma iporiaua oexa uka 'rã amboae kuery oikuaa aguã okaru e'ŷ re ikuiaia. Anhetẽ aipoa'e pêvy: Ha'e kuery ojopy ae ma hekoria.

**17** Ha'e rã peẽ ma pekaru e'ŷ re peiko vy pemoatyrõ pende'a, ha'e pejeovai guive,

**18** pekaru e'ŷ re peikoa amboae kuery oikuaa e'ŷ aguã, Penderu pexa e'ŷ va'e anho. Ha'e ramo peikuaa uka e'ŷ va'e Penderu oexa vy ome'ẽ 'rã hekoria.

\* **6:1** Mateus 23.1-5 \* **6:4** Lucas 21.1-4 \* **6:6** Lucas 18.9-14

*Yva re nhandejeupe guarā nhamoī porā aguā re ijayvua*

**19** — Ko yvy re pemoī porā eme mba'emo pendejeupe guarā, mba'eta vixo'i ho'upa ha'e iky'a ombovaipa 'rā, ha'e imonda va'e oipe'a ha'e ogueraapa 'rā.

**20** Yva re ae pemoī porā uka 'rāgue pendejeupe guarā. Ha'e py ma jipoi 'rā vixo'i ho'upa va'erā, iky'a nombovaipai 'rā, neī imonda va'e ndoipe'a heravyi 'rā guive.\*

**21** Mba'eta pendevy guarā pemoī porāa py ma penekuraxō avi 'rā oī.

*Lucas 11.33-36*

**22** — Penderexa ma penderete moexakāarā oī. Xapy'a rei penderexa iporā ramo penderete ha'e javi 'rā hexakāmba.

**23** Ha'e rā penderexa na'iporāi ri ramo penderete pytūmba 'rā. Ha'e penemoexakāarā oī va'e pytū ramo pytū ete 'rā pēvy.

*Mokoī patō re ijayvua*

**24** — Avave rei nomba'eapoi 'rā mokoī patō pe. Mba'eta peteī re nda'ija'eive 'rā amboae oayvuve vy, ha'e'ŷ vy peteī ojou porāve vy amboae ma ndojou porāive 'rā. Nda'evei Nhanderuete pe peiko aguā, mba'emo perekopaa rupi nda'evei reve.\*

*Lucas 12.22-31*

**25** — Ha'e nunga rupi ae xee aipoa'e pēvy: Pendepy'a eta rei eme pendekove re, neī pe'u ha'e pey'u va'erā pejou aguā re guive, penderete re pemoī va'erā re voi. Mba'eta penderekove nda'u tembi'u gui ndovareive teve? Ha'e penderete nda'u ao gui ndovareive teve?

**26** Peikuaa pota guyra kuery oveve va'e reko re. Ha'e kuery ma mba'eve nonhotŷi, nomono'ði, neī omoī porāaty py nomboatyi guive. Ha'e rami teī ha'e kuery pe Penderu yva pygua ojou uka 'rā ho'u va'erā. Peē kuery nda'u guyra'i gui ndapevareive ri?

**27** Mava'e nda'u pendepy'a eta rei vy pembopukuve kuaa 'rā ruxā'i peikove aguā?

**28** Mba'e re tu pendeaorā re ri nda'eveive pendekuai? Peikuaa pota ha'vy yvoty nhuñndy rupi ikuai va'e re. Ha'e va'e ma ombo'eapo va'e'ŷ, neī oipopē va'e'ŷ.

**29** Ha'e rami teī xee aipoa'e pēvy: Huvixa Salomão minha opa marāgua oguerekopa va'eri kova'e yvoty rami nonhemondei raka'e.

**30** Nhanderuete omonhemonde porā 'rā jai rogue aŷ nhuñndy re ikuai va'e, ha'e gui ko'ẽ tata py omomboa va'erā va'eri. Ha'e gui peē ndapejerovia porāi va'e, peē kuery re katuve ma opena porāve 'rā.

**31** Ha'e nunga rupi pendepy'a eta rei eme, ha'e aipopeje eme: "Mba'e tu ja'u 'rā, ha'e jay'u 'rā? Ha'e mba'e py tu nhanhemonde 'rā?" peje eme.

**32** Mba'eta ha'e nunga jouxea rupi amboae regua kuery ikuai, ha'e Penderu yva pygua oikuua ae ha'e nunga peikotevē va'ea.

**33** Ha'e rami 'rāgue py jypy'i peka 'rā ipo'akaa ha'e ixuguigua teko porā. Ha'e ramo 'rāe peikotevē va'e ha'e javi ome'ẽ avi pēvy.

**34** — Ha'e nunga rupi pendepy'a eta rei eme ko'ẽ rā guarā re, peja ko'ẽ ramo guarā ae. Mba'eta ára nhavō oiko 'rāe mba'emo vai ha'e jave guarā.

7

*Lucas 6.37,38,41,42*

**1** — Penhombopagaxe rei eme, penembopagaa e'ŷ aguā.\*

**2** Mba'eta penhombopagaague rami ae 'rā peē ju penembopagaa, ha'e joe pejapoague rami pendere ju ojapoa 'rā.

**3** Mba'e re tu nderyvy rexā py iky'a oī va'e re rexā pota, ha'e rā nderexa py ae yvyra oī va'e re ma ndereikuaa potai?

---

\* **6:20** Lucas 12.33,34; 2 Timóteo 4.8; 1 Pedro 1.3,4   \* **6:24** Lucas 16.13   \* **6:25** Filipenses 4.6; 1 Pedro 5.7   \* **7:1** Romanos 2.1-3; 1 Coríntios 4.5; Tiago 4.11,12

**4** Mba'e re tu aipo're nderyvy pe: "Tove tanoẽ iky'a nderexa gui", 're, nderexa py ae yvyra oĩ teri reve?

**5** Heko porã merami rive va'e, enoẽ ndee ranhe yvyra nderexa gui. Ha'e vy'rãe rexâ porã nderyvy rexâ gui iky'a renoẽ aguã.

### *Jagua pe iporã va'e nhame'ẽ e'ŷ aguã re ijayvua*

**6** — Jagua kuery pe peme'ẽ eme mba'emo iky'a e'ŷ va'e, ha'e poryko ikuiaia katy pemombo eme ovareve va'e, ha'e kuery opyrõmba rive'ŷ aguã, ha'e gui ojere vy penemondoropa avi e'ŷ aguã.\*

### *Lucas 11.9-13*

**7** — Pejerure, ha'e ramo ome'ẽa 'rã. Peka, ha'e vy pejou 'rã. Penhendu uka, ha'e ramo okẽ oipe'aa 'rã pãvy.\*

**8** Mba'eta ha'e javive ojerure va'e ojopy 'rã, oeka va'e ojou 'rã, ha'e onhendu uka va'e pe oipe'aa 'rã.

**9** Mava'e peẽ avakue nda'u pendera'y kuery mbojape re ojerure rã peme'ẽ 'rã ita?

**10** Ha'e rami e'ŷ vy pira re ojerure rã mboi ri nda'u peme'ẽ 'rã?

**11** Ha'e nunga rupi peẽ penderekó vai va'eri pendera'y kuery pe mba'emo porã peme'ẽ kuaa va'e. Ha'e gui Penderu yva pygua katuve nda'u nome'ei 'rã ri mba'emo porã ojerure va'e pe?

**12** — Pãvy avakue ojapo aguã peipotaa rami ae avi peẽ voi pejapo ha'e kuery pe, mba'eta ha'e rami ae oĩ lei ha'e profeta kuery omboparaague re.

### *Lucas 13.24*

**13** — Peike okẽ ipo'i'i va'e rupi. (Mba'eta okẽ ha'e tape okanhy aguã katy oo va'e ma ipy vaipa ramo heta 'rã ikuai ha'e va'e rupi oo va'e.)

**14** Ha'e rã tekove katy okẽ ha'e tape oo va'e ma ipo'i'i ramo mbovy'i ete 'rã ojou.

### *Lucas 13.25-27; 2 Coríntios 13.5*

**15** — Penheangu ke profeta ramigua kuery gui. Ha'e kuery ma vexa'i pirekue py onhemonde va'e, ha'e rã iguýry ma guary nhomondoropa va'e ikuai.\*

**16** Mba'emo rembypy'a re peikuaa pota vy peikuaa 'rã mba'e nunga paa. Tyrã uva nda'u nhamondo 'rã ri juu'y gui? Ha'e rami e'ŷ vy juu rakua endy gui nda'u nhamondo 'rã ri figo?

**17** Ha'e rami avi yvyra porã ma hi'a porã avi 'rã. Ha'e rã yvyra iporã e'ŷ va'e ma ndai'a porã'i 'rã.

**18** Yvyra porã ma ndai'a vaikuei 'rã, ha'e yvyra iporã e'ŷ va'e voi ndai'a porã'i 'rã.

**19** Yvyra hi'a iporã e'ŷ va'e ojayapaa vy omomboa 'rã tata py.

**20** Ha'e nunga rupi ha'e kuery reko re peikuaa pota vy peikuaa 'rã marã ramigua paa.\*

**21** — Pavẽ e'ŷ xevy "Senhor, Senhor" he'i va'e oike 'rã yva pygua po'akaa py, ha'e rã Xeru yva pygua oipotaa ramo ikuai va'e anho.

**22** Ha'e va'e ára heta 'rã aipoe'i xevy: "Senhor, Senhor, nderery rupi e'ŷ ri ty'y ore romombe'u raka'e Nhe'ẽ guigua? Ha'e nderery rupi e'ŷ ri ty'y roipe'a anha, ha'e heta rojapo ndepo'akaa rupigua?" he'i 'rã.

**23** — Ha'e ramo ha'e kuery pe xee ambovai 'rã: "Peẽ kuery ma xee roikuaa va'e'ŷ. Pendeko vai va'e, pejepe'a ke xea gui!" ha'e 'rã.

### *Lucas 6.46-49*

**24** — Ha'e javive ha'e rami xeayvu rã oendu vy ha'ekue ramo ikuai va'e ma ava hi'arandu va'e ngoorã ita áry ojapo va'e ramo ikuai.

**25** Mba'eta oky ou rã yy tyguaxu vy oxyry atã 'rã. Yvytu oipeju atã vy ha'e va'e oo re ojeapi-api tei ndoityi 'rã, ita áry omboyta porã rire.

---

\* **7:6** Lucas 9.5   \* **7:7** João 14.13,14; 1 João 5.14,15   \* **7:15** 2 Pedro 2.1-3   \* **7:20** Lucas 6.43,44; Tiago 3.11,12;  
1 João 3.10; 4.6

<sup>26</sup> — Ha'e rā xeayvua oendu teī ha'ekue rami ndoikoi va'e kuery ma ava hi'arandu e'ŷ va'e ngoorā ita ku'i reia áry rive ojapo va'e rami ikuai.

<sup>27</sup> Ha'e gui oky ou rā yy tyguaxu 'rā. Yvytu oipeju vy ha'e va'e oo re ojeapi vy oity, ombovaipa ete 'rā — he'i.\*

### *Opa vy ma yvyty áry ijayvuague*

<sup>28</sup> Jesus pova'e ayvu omombe'upa rā heta va'e kuery onhemondyipa ombo'ea gui,  
<sup>29</sup> mba'eta ipo'akapa va'e rami ombo'e, kuaxia re nhombo'e va'ety kuery rami e'ŷ.\*

## 8

### *Marcos 1.40-44; Lucas 5.12-14*

<sup>1</sup> Yvy'ã gui Jesus oguejy rā heta ete oje'oi hakykue.

<sup>2</sup> Ha'e gui ma peteī lepra revegua onhemboja hexe. Omboete vy aipoe'i:  
— Senhor, lepra gui xeky'a'oxe vy ke xeky'a'o — he'i.

<sup>3</sup> Ha'e ramo Jesus okuave'ẽ vy opoko hexe. Ha'e vy aipoe'i:

— Xee ma roiky'a'oxe ae, ekuera ke — he'i. Ha'e ramove lepra okanhymba.

<sup>4</sup> Ha'e ramo Jesus aipoe'i ixupe:

— Ma'ẽ, emombe'ueme avave rei pe. Ha'e rami 'rāgue py tereo sacerdote pe anho ejexa uka, ha'e eme'ẽ mymba Moisés omboparaague rami, heta va'e kuery oikuua aguã.

### *Lucas 7.1-10*

<sup>5</sup> Cafarnaum tetā py Jesus ovaẽ ma ramo hexe onhemboja peteī xondaro ruvixa. Ha'e vy ojerure ixupe:

<sup>6</sup> — Senhor, xero py amongakuaa va'ekue itui tupa py. Ndoguatavei, ojexavai guive — he'i.

<sup>7</sup> Jesus ombovai:

— Xee aa 'rā amonguera — he'i.

<sup>8</sup> Ha'e rā xondaro ruvixa aipoe'ive ju:

— Xee ma xe'yvy'í ete xero py revaẽ aguã. Peteī ayvu rive ri eraa uka. Ha'e ramo xerembiguai kunumi va'e okuera 'rā.

<sup>9</sup> Mba'eta xee voi huvinha oipotaa rami aiko va'e. Ikuai avi xondaro kuery xeayvu rami ikuai va'e. Peteī pe "Tereo", ha'e ramo oo 'rā. Ha'e rā amboae pe ma "Eju", ha'e rā ou 'rā. Xerembiguai pe "Ejapo ha'e nunga", ha'e ramo ojapo 'rā — he'i.

<sup>10</sup> Ha'e nunga Jesus oendu vy onhemondyi. Ha'e vy aipoe'i hakykue oje'oi va'e pe:

— Anhetē aipoa'e pêvy: Neĩ Israel kuerya rupi voi ndajoui teri kova'e rami ojerovia ete va'e.

<sup>11</sup> Aipoa'e pêvy: Heta ou 'rā kuaray oua katy ha'e oikea katy gui, yva pygua po'akaa py ikuai 'rā mesa py Abraão, Isaque ha'e Jacó reve.

<sup>12</sup> Ha'e rā Nhanderuete po'akaa pygurarā va'ekue ma oka py 'rā omomboa pytūa py. Ha'e py ojae'opa ha'e opa marā onhendu 'rā okuapy — he'i.

<sup>13</sup> Ha'e gui xondaro ruvixa pe ju Jesus aipoe'i:

— Tereo ju. Ndee rejeroviaa rami toiko — he'i. Ha'e va'e hora-ve hembiguai okuera.

### *Marcos 1.29-31; Lucas 4.38,39*

<sup>14</sup> Ha'e gui ma Pedro ro py ju Jesus ovaẽ. Ha'e vy haixo oexa ipire raku vaipa vy tupa py itui ramo.

<sup>15</sup> Ipo re Jesus ojopy rā ipire raku oaxa. Ha'e ramo opu'ã vy mba'emo ojapo ha'e kuery pe.

### *Marcos 1.32-34; Lucas 4.40,41*

<sup>16</sup> Ka'aru'i jave oña py heta oguerua anha onhemondea va'e. Ha'e ramo ayvu py rive oipe'a nhe'ẽ iky'a va'e, omonguera avi imba'eaxy va'e ha'e javi.

\* <sup>7:27</sup> Tiago 1.22-25; 1 João 2.3-6    \* <sup>7:29</sup> Marcos 1.22; João 7.46

<sup>17</sup> Ha'e nunga oiko profeta Isaías pe aipoe'i ukaague ojeupity aguā: "Ha'e ae oipe'a jaiko axya, ogueraapa nhanemba'eaxyā", he'iague.\*

*Lucas 9.57-62*

<sup>18</sup> Jesus oyvýry heta ikuai va'e oexa vy ijayvu yy rovaigua re oaxa aguā.

<sup>19</sup> Ha'e va'e jave py hexe peteī kuaxia re nhombo'e va'ety onhemboja vy aipoe'i:

— Porombo'e, xee aa ta nderupive reoa katy rei.

<sup>20</sup> Ha'e rā Jesus ombovai:

— Aguara'i oguereko 'rā okua, guyra oveve va'e voi oguereko guaity. Ha'e rā Ava ra'y ojeapo va'ekue ma neī oakā omboguejyaty ndoguerekoi — he'i.

<sup>21</sup> Amboae hemimbo'e ju aipoe'i ixupe:

— Senhor, taa ranhe xeru tanhono porā.

<sup>22</sup> Jesus ombovai:

— Eju xerupive, tove omanogue ae tonhono porā omano va'ekue.

*Marcos 4.35-41; Lucas 8.22-25*

<sup>23</sup> Ha'e gui kanoā py Jesus oī ramo hemimbo'e kuery oje'oi hupive.

<sup>24</sup> Yy rupi oaxa jave ou yvytu vaikue. Yai ojeapi-api kanoā re. Ha'e ramia ja Jesus oke oupy.

<sup>25</sup> Ha'e ramo hemimbo'e kuery ou vy omomyī. Ha'e vy ojapukai reve aipoe'i:

— Senhor, orereraa jepe ke! Nhamanomba ta ma — he'i okuapy.

<sup>26</sup> Ha'e ramo Jesus aipoe'i ha'e kuery pe:

— Pejeroviaa kyrī'i va'e, mba'e re tu pekyje ri? — he'i. Ha'e rami vy opu'ā vy yvytu ha'e ye'ē pe ijayvu atā. Ha'e ramove optyu'upa.

<sup>27</sup> Ha'e ramo ha'e kuery onhemondyipa vy aipoe'i:

— Marā ramigua tu peva'e ava, yvytu ha'e yai voi onhe'ē rendu aguā?

*Marcos 5.1-20; Lucas 8.26-39*

<sup>28</sup> Yupa rovaigua Gadara pygua kuery yvy re ovaē ramo ovaexī jogueruvy mokoī ava anha onhemondea va'e. Yvyra rupa oī va'e gui ou. Ivai vaikue rei rā avave rei ndoguataavei ha'e va'e tape rupi.

<sup>29</sup> Ha'e gui ha'e kuery ou vy ojapukai:

— Nhanderuete Ra'y, mba'e tu xee areko ndereve? Oremoingo axy aguā teve reju oa'angaague ára ovaē e'ŷ mbove? — he'i.

<sup>30</sup> Ha'e katy'i heta ikuai poryko okarua py.

<sup>31</sup> Ha'e ramo anha kuery ojerure Jesus pe:

— Orepe'a vy ta'vy oremondouka poryko kuerya katy.

<sup>32</sup> Ha'e rā — Tapeo ha'vy — he'i Jesus. Ha'e gui ha'e kuery ojepe'a vy poryko re ova. Ha'e rā poryko kuery ma yvy'ā guy katy onhamba. Ho'apa ye'ē py, yy py omanomba.

<sup>33</sup> Ha'e ramo poryko re opena va'e kuery onhamba oje'oivy. Tetā py ovaē vy omombe'u oiko va'ekue ha'e javi, anha onhemondea va'e re oiko va'ekue guive.

<sup>34</sup> Ha'e ramo tetā pygua kuery oupa Jesus oexa aguā. Oexa vy ojerure ijyvy gui oo ju aguā re.

## 9

*Marcos 2.1-12; Lucas 5.17-26*

<sup>1</sup> Kanoā py Jesus oī vy yy rovaigua re oaxa. Ha'e vy guetā katy oo.

<sup>2</sup> Ha'e oīa py oguerua peteī oguata e'ŷ va'e hupa reve. Ha'e kuery ojerovia etea Jesus oexa vy aipoe'i oguata e'ŷ va'e pe:

— Xera'y, ndepy'a guaxu ke. Rejejavyague omboguepaa ma — he'i.

<sup>3</sup> Ha'e ramo kuaxia re nhombo'e va'ety ikuai va'e aipoe'i ojeupe ae:

— Peva'e tu ijayvu vai — he'i okuapy.

<sup>4</sup> Ha'e rā Jesus ma ha'e kuery ojeupe ae ijayvua oikuaa vy aipoe'i:

---

\* <sup>8:17</sup> Isaías 53.4

— Mba'e re tu po rami ri pendeayvu pendepy'a py?

<sup>5</sup> Mba'e ayvu rupi tu ndaxyive xeayvu aguã: “Rejejavyague omboguepaa ma”, tyrã pa “Epu'ã, ha'e eguata” ha'e aguã?

<sup>6</sup> Ha'e rami teĩ peikuaa aguã Ava ra'y ojeapo va'ekue ko yvy re oiko teĩ joeko vaiague ombogue aguã voi ipo'aka va'ea —

Oguata e'ŷ va'e pe ju aipoe'i:

— Epu'ã ha'vy, eupi nderupa, ha'e tereo ndero py – he'i.\*

<sup>7</sup> Ha'e ramo opu'ã vy ngoo katy oo.

<sup>8</sup> Ha'e nunga heta va'e kuery oexa vy okyjepa reve ombojerovia okuapy Nhanderuete, ha'e rami aguã avakue ombopo'aka ramo.

*Marcos 2.13,14; Lucas 5.27,28*

<sup>9</sup> Jesus ha'e gui oo vy oexa peteĩ ava Mateus hery va'e, imposto opagaaty py oguapy oiny ramo. Ha'e va'e pe ijayvu vy

— Eju xerupive – he'i. Ha'e ramo opu'ã vy oo hupive.

*Marcos 2.15-17; Lucas 5.29-32*

<sup>10</sup> Ha'e gui oo py mesa py Jesus oĩ ramo heta ou imposto re nhombopaga va'ety ha'e heko vai va'e. Ha'e va'e kuery ma Jesus ha'e hemimbo'e kuery reve onhemboja avi okuapy.

<sup>11</sup> Ha'e nunga fariseu kuery oexa vy oporandu hemimbo'e kuery pe:

— Mba'e re tu penembo'ea okaru ri imposto re nhombopaga va'ety ha'e ojejavypa va'e kuery reve?

<sup>12</sup> Ha'e ramo Jesus oendu vy ombovai:

— Hexaĩ va'e kuery ma ndoipotai 'rã poropoanoa, imba'eaxy va'e anho 'rã oipota.

<sup>13</sup> Tapeo, peikuaa pota povae ayvu mba'e he'ia paa re: “Xevy pe mymba peme'ẽ 'rãgue py aipota teĩ penhomboaxy.” Mba'eta xee ma heko porã va'e aenoĩ aguã e'ŷ aju, ha'e rã heko vai va'e aenoĩ aguã [ojeko rerova aguã].\*

*Marcos 2.18-22; Lucas 5.33-39*

<sup>14</sup> Ha'e rire João Batista remimbo'e kuery ou. Ha'e vy oporandu ixupe:

— Mba'e re tu ore kuery [mbovykue rei e'ŷ] rokaru e'ŷ re orekuai, fariseu kuery voi, ha'e rã neremimbo'e kuery ma ha'e rami e'ŷ ikuai?

<sup>15</sup> Jesus ombovai:

— Omendaap yha'eve nda'u oenoĩ mbyre kuery iporiau aguã, ha'e kuery reve omenda va'e oĩ teria ja? Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e ára mae ma ha'e kuery ikuai 'rã okaru e'ŷ re.

<sup>16</sup> — Avave rei ao ymague re nombojai 'rã ajukue pyau ra'ykue, mba'eta ombojaague omboi 'rã ao gui. Ha'e ramo oxoroa tuvixave 'rã.

<sup>17</sup> Ha'e avave rei hyru ymague py nomboyru 'rã vinho pyau, mba'eta ombovaipa 'rã hyru. Vinho onheẽmba 'rã, ha'e hyru voi ivaipa avi 'rã. Ha'e rami 'rãgue py vinho pyau 'rã hyru pyau py 'rã omoĩ, mokoĩve oĩ porã aguã.

*Marcos 5.21-24a; Lucas 8.40-42a*

<sup>18</sup> Ha'e nunga re ijayvu teri reve ou peteĩ huvixa. Onhemboja vy omboete. Ha'e vy aipoe'i:

— Xerajy omano ange'i. Ha'e rami teĩ eju, emoĩ ndepo hexe oikove ju aguã – he'i.

*Marcos 5.24b-34; Lucas 8.42b-48*

<sup>19</sup> Ha'e ramo Jesus opu'ã vy oo hexeve, hemimbo'e kuery voi.

<sup>20</sup> Oiko avi peteĩ kunha, doze ma'etŷ re ma gueko re riae oiko va'e. Ha'e va'e ma hakykue gui ou vy opoko ija apy re,

<sup>21</sup> mba'eta ojeupe ae “Ija apy re rive apoko teĩ akuera 'rã” he'i.

<sup>22</sup> Ha'e ramo Jesus ojere vy oexa. Ha'e vy aipoe'i:

\* **9:6** João 10.37,38

\* **9:13** Oséias 6.6

— Xerajy, ndepy'a guaxu ke. Rejeroviaa ndereraa jepe — he'i. Ha'e ramove kunha va'e okuera.

*Marcos 5.35-43; Lucas 8.49-56*

<sup>23</sup> Huvixa ro py Jesus ovaẽ vy oexa mimby monhe'ẽa ha'e heta va'e kuery ojae'o rã. Ha'e vy aipoe'i:

<sup>24</sup> — Pejepe'a ke, mba'eta kunha'i nomanoi, oke rima — he'i. Ha'e ramo ojojai rei okuapy.

<sup>25</sup> Ha'e gui Jesus omoẽmba vy oike. Kunha'i va'e po re ojopy ramo opu'ã.

<sup>26</sup> Ha'e nungakue oendupaa ha'e va'e yvy ha'e javi rupi.

*Mokoĩ ára revegua e'ŷ omongueraague*

<sup>27</sup> Ha'e gui Jesus oo rã hakykue rupi ou mokoĩ ára revegua e'ŷ. Ojapukai jogueruvy:

— Davi ramymino, oremboaxy ke — he'i.

<sup>28</sup> Ha'e gui oo py Jesus oike jave hexe onhemboja jogueruvy ára revegua e'ŷ. Ha'e ramo oporandu ha'e kuery pe:

— Perovia pa pejerurea rami ajapo aguã xepo'aka va'ea?

Ha'e kuery ombovai:

— Tá, Senhor — he'i.

<sup>29</sup> Ha'e ramo ha'e kuery rex a re opoko vy aipoe'i:

— Toiko ha'vy pejeroviaa rami — he'i.

<sup>30</sup> Ha'e ramove hexa ojepe'a.

Ha'e gui Jesus aipoe'ive ju:

— Pejejoko ke avave rei pe pemombe'u e'ŷ aguã — he'i.

<sup>31</sup> Ha'e rami teĩ ha'e kuery oo vy ha'e yvy ha'e javi rupi omombe'upa.

*Peteĩ ava ijayvu e'ŷ va'e omonguera ramo fariseu kuery ijayvu reiague*

<sup>32</sup> Ha'e kuery oje'oi rire oĩa py oguerua peteĩ ava anha onhemonde ramo nda'ijayvui va'e.

<sup>33</sup> Anha oipe'a rã ijayvu e'ŷ va'ekue ijayvu. Ha'e ramo heta va'e kuery onhemondypa vy aipoe'i:

— Peva'e nunga jaexa va'e'ŷ teri Israel kuerya rupi — he'i.

<sup>34</sup> Ha'e rã fariseu kuery ma ijayvu rei okuapy:

— Anha ruvixa po'akaa rupi rima oipe'a anha.\*

*Opa rupi Jesus ojapo porã, ha'e ombo'eapo va'e kuery re ombojojaague*

<sup>35</sup> Ha'e gui Jesus ma tetã ha'e tekoa ikuai va'e rupi oguata oikovy, onhembo'eaty oĩ va'e rupi guive. Nhombo'e vy omombe'u oikovy Nhanderuete po'akaa, nhomonguera guive opa marãguia mba'eaxy gui.

<sup>36</sup> Heta va'e kuery oexa vy omboaxy, mba'eta vexa'i ija e'ŷ va'e rami ojexavai ha'e ikangy okuapy ramo.\*

<sup>37</sup> Ha'e rami vy guemimbo'e kuery pe aipoe'i:

— Anhetẽ heta oĩ omono'õa aguã, ha'e rã ombo'eapo va'e kuery ma mbovy'i.\*

<sup>38</sup> Ha'e nunga rupi pejerure Senhor mba'ety ja va'e pe ombouve aguã imba'ety rupi ombo'eapo va'erã.

## 10

*Marcos 3.13-19; Lucas 6.12-16*

<sup>1</sup> Ha'e gui guemimbo'e kuery doze-ve Jesus oenoĩ vy ombopo'aka nhe'ẽ vai oipe'a, ha'e opa marãguia mba'eaxy gui nhomonguera aguã.

<sup>2</sup> Doze apóstolo kuery rery ma po rami: Jypygua ma Simão Pedro hery va'e, ha'e gui tyvy André, Zebedeu ra'y kuery Tiago ha'e tyvy João,

\* 9:34 Lucas 11.14-18 \* 9:36 Marcos 6.34 \* 9:37 Lucas 10.2

<sup>3</sup> Filipe ha'e Bartolomeu, Tomé ha'e imposto re nhombopaga va'ekue Mateus, Alfeu ra'y Tiago ha'e Tadeu,

<sup>4</sup> Simão Zelote hery va'e ha'e ijopy uka nhemiarã Judas Iscariotes avi.

*Marcos 6.7-11; Lucas 9.1-5*

<sup>5</sup> Ha'e gui doze guemimbo'e kuery Jesus omondouka ta vy po rami ijayvu:

— Tapeo eme judeu e'ŷ va'e ikuia rupi, neĩ Samaria pygua kuery retã py voi pevaẽ eme.

<sup>6</sup> Ha'e rã tapeo vexa'i kuery Israel regua okanhy va'e peka.

<sup>7</sup> Peoa rupi pemombe'u yva pygua po'akaa ojekuaa aguã namombyryvei maa.

<sup>8</sup> Pemonguera imba'eaxy va'e, pemboete ju omano va'ekue, peiky'a'o lepra revegua, ha'e peipe'a anha. Mba'emo pejopy rive rire peme'ẽ rive ju 'rã joupe.

<sup>9</sup> Pendeku'a re peraa eme peráta, ouro, prata neĩ overa va'e guigua,

<sup>10</sup> neĩ voko peraa eme tape rupi, neĩ mokoĩ kamixa, pendepy regua, neĩ pendepopoka guive, mba'eta ombo'epo va'e rei ha'eve ojopy aguã ho'u va'era.

<sup>11</sup> Ha'e tetã py e'ŷ vy tekoa oĩ va'e rupi pevaẽa py peporandu 'rã heko porã va'e oiko va'ea re. Ha'e va'e kuery ro py ae 'rã pepyta, peove aguã ára peve.

<sup>12</sup> Oo py pevaẽ vy pexarura 'rã ha'e pygua kuery pe.

<sup>13</sup> Ha'e ramo oo pygua kuery heko porã ri ramo ha'e kuery re oĩ 'rã peroayvu porãague. Ha'e rã heko vai ramo pendere ae ju tojevy peroayvu porãague.

<sup>14</sup> Ha'e kuery napenemovaõi, neĩ pendeayvu noenduxei ramo ha'e va'e oo e'ŷ vy tetã gui peo ju vy pendepy regua gui peity-ity 'rã yvy ku'i.\*

<sup>15</sup> Anhetẽ aipoa'e pêvy: Nhombopagaa ára py ha'e va'e tetã pygua kuery gui omboaxyave 'rã Sodoma ha'e Gomorra pygua kuery.\*

*Mba'emo gui omonheanguague*

<sup>16</sup> — Ma'ë, xee ma vexa'i rami romondouka aguara mbyte rupi. Ha'e nunga rupi peiko kuua 'rã mboi rami, ha'e rã apykaxu'i rami 'rã pendekuai rive.

<sup>17</sup> Penheangu ke avakue gui, mba'eta penemboaxa 'rã huvixa kuery po py, ha'e penenupã 'rã onhembo'eaty oĩ va'e rupi.

<sup>18</sup> Xekáuxa pendereraa 'rã huvixa kuery ha'e huvixave renonde. Ha'e ramigua oiko 'rã ha'e kuery ha'e judeu e'ŷ va'e kuery pe xeregua ayvu pemombe'u aguã.

<sup>19</sup> Ha'e rami avi penemboaxaa ramo pepõxa rei eme marã rami e'ŷ vy mba'e nunga re pa pendeayvu aguã re, mba'eta ha'e va'e hora-ve pendeayvurã oikuaa ukaa 'rã pêvy.

<sup>20</sup> Mba'eta pendejegui ae e'ŷ 'rã pendeayvu, ha'e rã Penderu Nhe'ë ijayvu 'rã pêgui.\*

<sup>21</sup> Amongue ojopy uka 'rã guyvy ae ojuka uka aguã, ha'e tuu kuery ojopy uka 'rã gua'y kuery ae. Ta'y kuery opu'ã 'rã nguu kuery re ojuka uka avi aguã.

<sup>22</sup> Xerery káuxa pavẽ nda'ija'ei 'rã pendere. Ha'e rami teĩ opa peve ogueropo'aka va'e oo jepe 'rã.

<sup>23</sup> Ha'e gui tetã py pendere opu'ã reia ramo amboae henda katy ju penha, mba'eta anhetẽ aipoa'e pêvy: Ava ra'y ojeapo va'ekue ou peve napevaõmba jepei 'rã Israel regua tetã ikuai va'e rupi.

*Omokyre'ŷa rupi ijayvuague*

<sup>24</sup> — Temimbo'e kuery ma imbo'ea gui yvateve va'e'ŷ, tembiguai kuery voi opatõ gui yvateve va'e'ŷ guive.

<sup>25</sup> Ha'eve temimbo'e kuery ikuai aguã imbo'ea reko rami, ha'e tembiguai kuery ikuai aguã opatõ oikoa rami. Hoo va'e pe "Anha ruvixa Belzebu" 'ea ramo hoo pygua kuery pe katuve 'rã teve.\*

\* **10:14** Atos 13.50,51; 18.6    \* **10:15** Lucas 10.1-12    \* **10:20** Lucas 12.11,12; 1 Pedro 3.13-17; 4.12-19    \* **10:25** Lucas 6.40; João 15.20

<sup>26</sup> Ha'e rami teĩ pekyje eme ha'e kuery gui, mba'eta mba'emo onhom i mbyre oexa ukapaa 'rã, ha'e oikuua e'ŷ pyre voi oikuaapaa 'rã.

<sup>27</sup> Pytūa py xee rombo'eague ma hexakāa py ju 'rã pemombe'u, pendeapyxa'i py xeayvuague ma oo apyte áry gui ju 'rã pemombe'u.

<sup>28</sup> Pekyje eme penderete jukaa kuery gui, mba'eta penenhe'ẽ ma ha'e kuery ndojuka kuaai 'rã. Pejererokyje 'rã nhonhe'ẽ ha'e joete tata ogue e'ŷ va'e py omokanhy aguã ipo'aka va'e renonde anho.

<sup>29</sup> — Mokoĩ guyra'i nda'u peteĩ'i hatã'i va'e repy e'ŷ ri? Ha'e rami teĩ yvy py neĩ peteĩve ndo'ai 'rã Penderu oipota e'ŷ rã.

<sup>30</sup> Peẽ kuery re katuve ma opena, mba'eta pende'a peneakã re oĩ va'e voi oipapapa.

<sup>31</sup> Ha'e nunga rupi pekyje eme, mba'eta heta guyra'i gui peẽ pevareve.

<sup>32</sup> Ha'e nunga rupi avakue renonde xevy pe oikoa omombe'u va'ekue ha'e javi ma xee voi ha'e rami 'rã amombe'u Xeru yva pygua renonde.

<sup>33</sup> Ha'e rã avakue renonde naxemombe'uxei va'ekue ma xee voi namombe'ui 'rã Xeru yva pygua renonde.\*

### *Haxy va'e re ijayvuague*

<sup>34</sup> — Pexa'ã eme ko yvy re aju peteĩ rami nhomoingoarã aru aguã. Peteĩ rami nhomoingoarã aru aguã e'ŷ aju, ha'e rã kyxe.

<sup>35</sup> Mba'eta aju rire avakue joo rami e'ŷ 'rã ikuai nguu reve, ha'e imemby kuery ha'e rami ae 'rã ikuai oxy reve, ha'e ipi'a ra'yxy kuery avi ome xy reve 'rã ikuai.

<sup>36</sup> Ha'e rami vy avakue rovaigua ma hoo pygua kuery ae 'rã ikuai.\*

<sup>37</sup> Amongue xegui nguu, e'ŷ vy oxy ri oayvuve vy nda'evei xerupiveguia oiko aguã. Ha'e rami ae avi gua'y e'ŷ vy guajy ri xegui oayvuve vy nda'evei xerupiveguia oiko aguã.

<sup>38</sup> Ha'e ojeupegua kuruxu ndogueraaxe, ha'e xerupive ndooxei va'e ma nda'evei xeremimbo'erã.

<sup>39</sup> Nomanoxei va'ekue omokanhy 'rã guekove. Ha'e rã xekáuxa omano va'e ma ojou ju 'rã guekove.\*

### *Mba'emo rekovia re ijayvuague*

<sup>40</sup> — Amongue penemovaẽ ramo xee avi ha'e kuery xemovaẽ, ha'e xemovaẽ va'e ma xembouare avi omovaẽ.

<sup>41</sup> Profeta kuery pe "Profeta" he'i vy omovaẽ va'ekue ma hekovia ojopy 'rã profeta pegua rami. Ha'e heko porã va'e kuery pe "Heko porã va'e" he'i vy omovaẽ va'ekue ma hekovia ojopy 'rã heko porã va'e pegua rami.

<sup>42</sup> Ha'e rami ae avi anhetẽ aipoa'e pêvy, amongue kova'e kyrĩ va'e rami ikuai va'e pe "Jesus remimbo'e" he'i vy peteĩ karo yro'yxã ome'ẽ va'ekue voi ndojopy e'ŷi 'rã hekovia.\*

## 11

### *Tetã ikuai va'e rupi Jesus ayvu omombe'uague*

<sup>1</sup> Ha'e rami guemimbo'e kuery doze-ve Jesus ombo'epa ma vy ojepe'a ha'e gui. Nhombo'e ha'e ayvu omombe'u oikovy ha'e katy'i tetã ikuai va'e rupi.

#### *Lucas 7.18-23*

<sup>2</sup> Nhuã py João Batista oĩa py Cristo mba'emo ojapo oikovyia omombe'ua rã oendu vy ixupe ombou guemimbo'e kuery po rami oporandu aguã:

<sup>3</sup> "Ndee ae teve reju 'rã va'ekue, tyrã pa roarõve 'rã amboae?" he'i aguã.

<sup>4</sup> Ha'e rã Jesus ombovai vy aipoe'i ha'e kuery pe:

— Tapeo ju João pe pemombe'u mba'emo pendu ha'e pexa va'ekue,

---

\* **10:33** Lucas 12.29-31    \* **10:36** Miquéias 7.6, Lucas 12.51-53, 14.26,27    \* **10:39** Marcos 8.34,35; Lucas 9.24; Apocalipse 12.11    \* **10:42** Mateus 25.34-40; Marcos 9.41; João 13.20

<sup>5</sup> mba'eta ára reveguia e'ŷ oma'ẽ ju, oguata e'ŷ va'ekue oguata ju, lepra revedua ojeky'a'o ju, ijapyxa e'ŷ va'ekue oendu ju, omano va'ekue onhemboete ju, ha'e iporiaukue'i pe omombe'ua ayvu porã.\*

<sup>6</sup> Ovy'a ete 'rã xere ojeroviaa gui ndojep'e ai va'e.

### *Lucas 7.24-35*

<sup>7</sup> Ha'e kuery oopa ma rire heta va'e kuery pe ju Jesus ijayvu João Batista reko re. Aipoe'i:

— Marã ramigua pexa aguã tu peo raka'e tekoia e'ŷa py? Takua'i yvtyu omomy-momyĩ va'e ramigua rive ri ty'y?

<sup>8</sup> Ha'e rami e'ŷ rã marã ramigua pexa aguã tu peo? Peteĩ ava ao porã py onhemonde va'e ri ty'y? Ha'e rami avi onhemonde porã va'e ma huvinha ro py ikuai va'e anho.

<sup>9</sup> Marã ramigua tu ha'vy peo pexa? Profeta? Tá, xee aipoa'e pêvy: João Batista ma profeta ikuai va'e gui voi yvateve va'e.

<sup>10</sup> Mba'eta hekorã re ae ipara oiny: “Nerenonderã xee amondouka 'rã peteĩ xerembiguai, nderaperã oguerekato aguã.”\*

<sup>11</sup> Anhetẽ aipoa'e pêvy: Kunhague gui oiko va'ekue jipoia João Batista gui yvateve va'e. Ha'e rami avi yva pygua po'akaa py yvýgueve'i va'e ma ixugui yvateve.

<sup>12</sup> Mba'eta João Batista oikoa ára guive aŷ peve ma onhea'ãa 'rã oupity aguã yva pygua po'akaa, onhea'ã va'e kuery anho 'rã oupity.

<sup>13</sup> Mba'eta profeta kuery ha'e lei ma João oikoa ára peve'i omombe'ua.

<sup>14</sup> Ha'e gui peẽ perovia ri ramo ha'e ae Elias ou 'rã va'ekue oiko.

<sup>15</sup> Ijapyxa [oendu aguã] oĩ va'e toendu.

<sup>16</sup> — Mba'e nunga re nda'u ambojoja 'rã aŷguia kuery reko? Ha'e va'e kuery ma ikuai kyrígue tetã mbyte rupi oguapy vy oirũ kuery pe ojapukai va'e rami:

<sup>17</sup> “Mimby romonhe'ẽ ramo peẽ ndapejerokyxei, ha'e rã omanoa pygua ju romonhendu teĩ ndapejae'oxei”, he'i va'e kuery rami.

<sup>18</sup> Mba'eta João Batista ou vy okaru ha'e oy'u e'ŷ re oiko. Ha'e rami rã ixupe “Anha reve rima oiko” 'ea.

<sup>19</sup> Ha'e rã Ava ra'y ojeapo va'ekue ma ou vy okaru ha'e oy'u ramo ixupe “Peva'e ma okaru guaxu, vinho oy'u, ha'e imposto re nhombopaga va'ety ha'e heko vai va'e kuery re irũ va'e”, 'ea. Ha'e rã hi'arandu va'e ma mba'emo ojapoa py oexa uka 'rã o'arandu.

### *Lucas 10.13-15*

<sup>20</sup> Ha'e gui Jesus omboypy tetã ikuai va'e pygua kuery re ijayvu aguã, mba'eta ha'e va'e rupi mba'emo porã heta ojapo teĩ ndojeko rerovai rire. Ha'e vy aipoe'i:

<sup>21</sup> — Peẽ Corazim ha'e Betsaida pygua kuery pe nda'evei ete 'rã. Mba'eta pendea py hexa pyrã ajapo va'e ramigua Tiro ha'e Sidom py ojapoa va'e rire, ha'e pygua kuery ojeko rerova voi 'râgue. Ha'e rami vy ajukue vaikue py onhemonde 'râgue tanhimbu py oguapy reve.

<sup>22</sup> Ha'e nunga rupi aipoa'e pêvy: Nhombopagaa ára py peẽ kuery gui omboaxyave 'rã Tiro ha'e Sidom pygua kuery.

<sup>23</sup> Ha'vy peẽ Cafarnaum pygua kuery, peo 'rã teve yva peve? Any, tata ogue e'ŷ va'e py 'rã pe'a. Mba'eta mba'emo porã pendea py ajapo va'e ramigua Sodoma py ojapoa va'e rire ma kova'e ára peve oĩ 'râgue.

<sup>24</sup> Pêvy aipoa'e: Nhombopagaa ára py pendegui omboaxyave 'rã Sodoma yvy regua kuery.

### *Lucas 10.21,22*

<sup>25</sup> Ha'e jave py Jesus ijayvu atã:

— Xeru yva ha'e yvy re ndepo'aka va'e, xee roguerovy'a, mba'eta ha'e nunga ma hi'arandukue pe e'ŷ reikuaa uka, neĩ ombo'e pyre pe e'ŷ guive. Yvýgueve'i pe anho reikuaa uka.

\* **11:5** Lucas 4.16-21 \* **11:10** Malaquias 3.1

**26** Tá, Xeru, ha'e rami ae reipota.

**27** — Opa mba'e Xeru omboaxapa xevy. Avave rei ndoikuuai Ta'y, Tuu e'ŷ vy. Ha'e avave rei ndoikuuai Tuu, Ta'y e'ŷ vy, ha'e amongue pe Ta'y oikuaa ukaxea va'e ete'i.

*“Peju ke xea py”, he'iague*

**28** — Peju ke xea py penekane'õ ha'e pevysi va'e ha'e javi. Ha'e rã xee romokane'õgua 'rã.\*

**29** Pendejee pemoĩ xeregua canga, peikuua xegui, mba'eta xepy'a re xevai reia noĩ, ha'eve rei'ia anho. Ha'e rami vy pejou 'rã penenhe'ẽ opytu'u aguã.

**30** Mba'eta xeregua canga ma ndaxyi, ha'e xevysi nda'ipoyi guive.\*

## 12

*Marcos 2.23-28; Lucas 6.1-5*

**1** Ha'e jave py sâbado ára Jesus oaxa trigoty rupi. Ha'e gui hemimbo'e kuery okaruxe vy omboypy hi'a oipo'o vy ho'u heravy aguã.

**2** Ha'e nunga fariseu kuery oexa vy aipoe'i ixupe:

— Ma'ẽ, neremimbo'e kuery ojapo sâbado ára py nda'evei va'e — he'i okuapy.

**3** Ha'e ramo Jesus aipoe'i ha'e kuery pe:

— Ndaperoayvui teve Davi okaruxe vy oirũ kuery reve ojapo va'ekue?

**4** Mba'eta Nhanderuete ro py Davi oike vy ho'u raka'e mbojape Senhor renonde pe omoĩ mbyre, ha'e kuery ho'u aguã nda'evei va'eri, neĩ hupive ikuai va'e, sacerdote kuery pe anho ha'eve.

**5** Ha'e ndaperoayvui teve lei re oĩ va'e? Mba'eta sâbado py sacerdote kuery ma iky'a va'e opytu e'ŷ re ojapo 'rã mba'emo templo ropy rupi sâbado py amboae kuery ojapo aguã nda'evei va'e. Ha'e rami avi xee aipoa'e pêvy:

**6** Apy oĩ va'e templo gui yvateve va'e.

**7** Ha'e nunga rupi pova'e ayvu: “Mba'emo peapy reve xevy peme'ẽ 'rãgue py aipotave penhomboaxy”, he'iague peikuua va'e rire ndapejou vai 'rãgue ojejavu e'ŷ va'e.\*

**8** Mba'eta Ava ra'y ojeapo va'ekue ma sâbado ára re voi ipo'aka va'e.

*Marcos 3.1-6; Lucas 6.6-11*

**9** Jesus ha'e gui oo vy oike ha'e kuery onhembo'eaty py.

**10** Ha'e py oĩ peteĩ ava ipo rovai piru va'e. Ha'e ramo Jesus re ha'e kuery ijayvu reixe vy oporandum okuapy Jesus pe:

— Ha'evea rami ri nda'u sâbado ára py nhanhomongueraa? — he'i okuapy.

**11** Ha'e ramo ombovai:

— Mava'e peẽ kuery regua nda'u sâbado py penerymba vexa'i yvykua py ho'a rã napenhea'ãi 'rã ha'e gui penoẽ aguã?

**12** Vexa'i gui nhande va'e ovareve ramo ha'eve sâbado py joupe jajapo porã aguã — he'i.

**13** Ha'e gui ava pe ju Jesus aipoe'i:

— Embo'yvi ndepo — he'i. Ipo ombo'yvi rã iporã ju ipo rovai rami.

**14** Ha'e rã fariseu kuery ma ojepe'a vy jogueroayvu hovai, ojuka uka aguã re.

*Jesus ojepe'aague*

**15** Jesus ha'e nunga oikuaa vy ojepe'a ha'e gui. Heta avi oje'oi hakykue. Ha'e ramo omonguerapa.

**16** Ha'e vy omongoeta avave rei pe ha'e kuery omombe'u e'ŷ aguã,\*

**17** profeta Isaías pe aipoe'i ukaague ojeupity aguã:

**18** “Ma'ẽ, pee ma oĩ xerembiguarã aiporavo va'ekue, xerembiayvu Xenhe'ẽ py arovya va'e. Hexe amoĩ 'rã Xenhe'ẽ. Ha'e ramo amboae regua kuery pe voi omombe'u 'rã ha'evea rami joguerekao.

**19** Nanhomotare'ŷi 'rā, nda'ijayvu atāi 'rā, neĩ tetā mbyte rupi nda'ijayvui 'rā guive.

**20** Nomondoi 'rā takua opē va'e, neĩ nomboguei 'rā tataendy ogue rai'i va'e, ha'evea rami joguerekoa ipo'aka aguā rami ojapo e'ŷa ja.

**21** Ha'e ramo hery rupi amboae regua kuery voi oarō 'rā okuapy."\*

*Marcos 3.20-30; Lucas 11.14-23*

**22** Jesus oña py oguerua peteĩ ava hexe anha onhemonde rā ndoexai neĩ nda'ijayvui va'e. Omonguera ramo ijayvu e'ŷ va'ekue ijayvu ha'e oexa ju.

**23** Ha'e ramo heta va'e kuery oexa vy onhemondyipa. Ha'e vy

— Peva'e e'ŷ nda'u Davi ramymino? — he'i okuapy.

**24** Ha'e rā fariseu kuery ma ha'e nunga oendu vy ijayvu rei okuapy:

— Peva'e tu anha ruvixa Belzebu po'akaa rupi rima oipe'a oikovy anha kuery — he'i.

**25** Ha'e ramo ha'e kuery py'a py ijayvua Jesus oikuua vy aipoe'i:

— Tetā pygua kuery minha jomeme ri opu'ā vy nhomomba 'rā. Tetā, ha'e e'ŷ vy oo pygua jomeme opu'ā vy okanhymba 'rā.

**26** Ha'e rami ae avi Satanás kuery meme ri jope'a va'e rire ojee ae opu'ā 'rāgue. Mba'exa tu ha'vy ipo'akave ta?

**27** Anhetē ri Belzebu po'akaa rupi xee anha aipe'a ramo, mba'exagua po'akaa rupi tu ha'vy pendera'y kuery oipe'a? Ha'e nunga rupi ha'e kuery ae oikuua uka 'rā pendeayvu rivea.

**28** Ha'e rā Nhanderuete guigua Nhe'ẽ po'akaa rupi ae xee anha aipe'a ramo anhetē ete Nhanderuete po'akaa ojekuaa ra'e peẽ kuery pe.

**29** Ha'e rami ae avi mba'exa 'rā tu ojerovia vaipa va'e ro py amongue oike vy ojokua ranhe e'ŷ re imba'e rei-rei re imonda? Mba'eta ojokua vy 'rāe ogueraapa hoo gui.

**30** Xereveguia e'ŷ va'e ma xerovaigua ikuai, ha'e xea py ndajoguerui va'e ma xegui nhomonheguāmba 'rā.

**31** Ha'e nunga rupi aipoa'e pēvy: Avakue ojejavyague ha'e ijayvu vaiague ha'e javi omboguea 'rā. Ha'e rā Nhe'ẽ re ijayvu vaiague ma nombogueai 'rā.

**32** Ava ra'y ojeapo va'ekue re teĩ amongue ijayvu vai ramo ha'e nungakue omboguea 'rā. Ha'e rā Nhe'ẽ Ky'a E'ŷ re ri ijayvu vaia ramo nombogueai 'rā kova'e yvy re, neĩ yvy pyau re voi.

*Lucas 6.43-45*

**33** — Peiko ke yvyra porā ha'e hi'a porā va'e rami, ha'e rami e'ŷ vy yvyra porā e'ŷ ha'e hi'a iporā e'ŷ va'e rami peiko. Mba'eta yvyra ikuai va'e ma hi'a re jaikuua pota vy 'rāe jaikuua.

**34** Mboi rami pendekuai va'e, mba'exa tu pendeko vai va'eri pendeayvu ta mba'emo porā re? Mba'eta nhandejuru py nhandeayvu 'rā mba'emo nhandepy'a re tynyē va'e re.

**35** Heko porā va'e ma mba'emo porā omoī porā va'ekue gui oguenoē 'rā mba'emo porā anho. Ha'e rā heko vai va'e ma mba'emo vai omoī porā va'ekue gui oguenoē 'rā mba'emo vai.

**36** Aipoa'e pēvy: Avakue ijayvuague ndovarei va'e ha'e javi re 'rā opaga nhomboayvua ára py.

**37** Mba'eta pendeayvuague re ae penemboeko porāa, ha'e rami e'ŷ vy pendeayvuague re penembopagaa 'rā.

*Lucas 11.29-32*

**38** Ha'e ramo kuaxia re nhombo'e va'ety ha'e fariseu kuery regua aipoe'i:

— Porombo'ea, ore roexaxe hexa pyrā rejapo rā — he'i.\*

**39** Ha'e ramo ombovai:

— Heko vai ha'e itavy rei va'e kuery ae 'rā ojerure hexa pyrā ajapo aguā. Ha'e rami teĩ ha'e kuery pe peteĩve ndojapoai 'rā, profeta Jonas re oiko va'ekue ramigua e'ŷ vy.

\* **12:21** Isaías 42.1-4 \* **12:38** Marcos 8.11,12

**40** Mba'eta Jonas mboapy ára ha'e mboapy pytū re pira guaxu rye py oñague rami avi Ava ra'y ojeapo va'ekue voi mboapy ára ha'e mboapy pytū re oĩ 'rã yvy guýry.\*

**41** Ha'e nunga rupi nhomboayvua ára py Nínive pygua kuery opu'ã vy ijayvu 'rã okuapy aýgua kuery re, mba'eta Jonas ayvu omombe'u rã ha'e kuery oendu vy ojeko rerovapa rire. Ha'e rã apy oĩ va'e ma Jonas gui yvateve va'e.

**42** Nhomboayvua ára py kuaray puku-a katygua huvixave kunha voi opu'ã vy ijayvu 'rã aýgua kuery re, mba'eta yvy apy gui ou raka'e Salomão arandua oendu aguã. Ha'e rã apy oĩ va'e ma Salomão gui yvateve va'e.

### *Lucas 11.24-26*

— Ha'e rami avi avakue gui nhe'ẽ vai oẽ vy teko a e'ýa rupi ju 'rã oiko, ikane'õguá aguã oeka vy. Ha'e gui ndojoui vy

**43** ojeupe aipoe'i 'rã: "Aa ju ta xero ajepe'aague py", he'i 'rã. Ha'e rami vy ou ju vy ojou 'rã oo avave rei noñai va'e, oipeipa ha'e omoatyrõmba pyre.

**44** Ha'e gui oo ranhe vy sete nhe'ẽ ju ogueru 'rã ixugui nda'eveive va'e, ha'e py oike vy ikuai va'erã. Ha'e rami rire opaa py jypy guare gui nda'eveive 'rã ava va'e pe. Ha'e ramigua ae 'rã oiko kova'e kuery heko vai va'e re.

### *Marcos 3.31-35; Lucas 8.19-21*

**45** Heta va'e kuery pe Jesus ijayvu teri jave ixy ha'e tyvy kuery ovaẽ oka py, hexeve ijayvuxe vy.

**46** Ha'e ramo amongue aipoe'i ixupe:

— Ndexy ha'e nderyvy kuery, pee oka py ikuai. Ndereve ijayvuxe okuapy – he'i.

**47** Ha'e ramo imombe'uare pe ombovai:

— Marã ramigua tu ha'i ha'e xeryvy kuery ikuai? – he'i.

**48** Ha'e gui guemimbo'e kuerya katy okuave'ẽ vy aipoe'i:

— Peva'e ae ma ha'i ha'e xeryvy kuery.

**49** Mba'eta Xeru yva pygua oipotaa rami ojapo va'e ma ha'i, xeryvy ha'e xereindy kuery ikuai.\*

## 13

### *Marcos 4.1-9; Lucas 8.4-8*

**1** Ha'e va'e árave oo gui Jesus oo vy oguapy ye'ẽ yvýry.

**2** Heta ijyvýry ono'õ ramo peteñ kanoã py ju oĩ vy oguapy oiny ha'e py. Ha'e rã heta va'e kuery ma ita ku'i reia rupi opu'ã okuapy.

**3** Ha'e gui ha'e kuery pe opa mba'e re ijayvu mba'emo re ombojoja vy. Ha'e vy aipoe'i:  
— Peteñ ava oo mba'emo ra'yí moaí vy.

**4** Ha'e va'e omoaí ramo amongue ha'yígue ho'a tape yvýry rupi. Ha'e nunga ma guyra'i ou vy ho'upa.

**5** Amboae ma itaty yvy mbovy'i reia rupi ho'a. Ha'e nungakue ma yvy re ndoike pukui rire henhoñ voi'i.

**6** Ha'e rami teñ kuaray oẽ vy omombirupa, ndapoi rã.

**7** Amboae ma juu mbyte rupi ho'a. Ha'e gui juu yvate vy ojukapa.

**8** Ha'e rã amboae ma yvy porãa rupi ho'a. Ha'e nungakue ma hi'a, cem, sessenta, trinta ra'yí oiko peteñ-teñ gui.

**9** Ijapyxa [oendu aguã] oĩ va'e toendu.

### *Marcos 4.10-20; Lucas 8.9-15*

**10** Ha'e gui hemimbo'e kuery onhemboja vy oporandu ixupe:

— Mba'e re tu mba'emo re rembojoja vy anho ndeayvu ha'e kuery pe?

**11** Ha'e ramo ombovai:

— Pendevy pe yva pygua oikuua uka opo'akaa py mba'emo oiko va'e ndoikuua ukai teri va'ekue. Ha'e rã ha'e kuery pe ma ndoikuua ukai.

\* **12:40** Jonas 1.17 \* **12:50** Hebreus 2.11,12

12 Mba'eta mba'emo oguereko va'e pe ome'ẽave 'rã, oguereko retave aguã. Ha'e rã oguereko e'ŷ va'e gui ma oguereko'i va'e voi oipe'aa 'rã.

13 Ha'e nunga rupi ae mba'emo re ambojoja vy xeayvu ha'e kuery pe. Mba'eta ha'e kuery oma'ẽ teĩ ndoexai, ha'e oendu teĩ noendu kuaai, neĩ ndoikuaai guive,

14 Isaías aipoe'iague ojeupity aguã: "Pendeapyxa py pendu teĩ mba'eve napendu kuaai 'rã. Penderexa py pexa teĩ mba'eve ndapexa kuaai 'rã.

15 Mba'eta kova'e kuery ma inhakã ratã va'e. Oapyxa py noenduxei okuapy, ha'e guexa omboty oexa e'ŷ aguã, oapyxa py oendu e'ŷ aguã, ha'e opy'a py mba'eve oikuua e'ŷ aguã, ha'e rami vy ojeko rerova e'ŷ aguã, xevy pe onhemonguera uka e'ŷ aguã", he'iague.\*

16 Ha'e rã peẽ kuery ma pevy'a 'rã, mba'eta penderexa oexa, ha'e pendeapyxa oendu.

17 Mba'eta anhetẽ aipoa'e pãvy: Heta ikuai raka'e profeta kuery ha'e heko porã va'e peẽ kuery pexa va'e oexaxe va'eri ndoexai, ha'e pendu va'e oenduxe va'eri noendui.

18 — Pejapyxaka ke ha'vy mba'emo ra'yã moaãa re ambojojaague amombe'u porãve rã.

19 Amongue Nhanderuete po'akaa regua ayvu oendu teĩ noendu kuaai ramo ha'e kuery ha'e javia py ou 'rã poromboeko vaia, ha'e ipy'a gui oipe'a 'rã ha'yã omoaĩ mbyre. Ha'e va'e ma tape yvýry omoaĩ mbyre rami ikuai.

20 Ha'e gui yvý itaty reia rupi omoaĩ mbyre rami ikuai va'e ma ayvu oendu vy ojopy voi 'rã ový'a reve.

21 Ha'e rami teĩ ndapo pukui va'e rami avi ikuai vy opa voi 'rã. Ayvu káuxa oguereko axya, e'ŷ vy opu'ãa rei ramo ndarei re ojepe'a 'rã.

22 Ha'e gui juu mbyte rupi omoaĩ mbyre rami ikuai va'e ma ayvu oendu teĩ ko yvý re mba'emo ikuai va'e re openavea ha'e ombo'e rei-rei re nda'eveivea ojao'ipa 'rã ayvu, hi'a e'ŷ aguã rami.

23 Ha'e rã yvý porãa rupi omoaĩ mbyre rami ikuai va'e ma ayvu oendu vy oikuua porã va'e. Ha'e va'e ma hi'a 'rã cem, sessenta, trinta peteĩ-teĩ gui.

### *Trigo ramigua re ombojojaague*

24 Amboae ayvu ju ha'e kuery pe omombe'u mba'emo re ombojoja vy. Ha'e vy aipoe'i:

— Yva pygua po'akaa py oiko 'rã peteĩ ava ombo'ety rupi trigo ra'yã iporãve va'e omoaĩ va'e rami.

25 Ha'e gui pavã oke jave hovaigua ou vy trigo mbyte rupi omoaĩ trigo ramigua rive, ha'e vy ojope'a ju.

26 Ha'e gui onhotŷ mbyre yvate ha'e hi'a ramo trigo ramigua avi ojekuaa ra'e.

27 Ha'e ramo ija rembiguai kuery ou vy aipoe'i ixupe: "Senhor, trigo ra'yã iporã va'e e'ŷ ri ty'y remoaĩ nemba'ety py? Magui nda'u oiko trigo ramigua?"

28 Ombovai: "Nhanderovaigua rima ojapo ra'e", he'i.

— Ha'e gui hembiguai kuery oporanduve ju: "Reipota pa roo romondoro trigo ramigua?"

29 Ombovai: "Any, trigo ramigua pemondoro vy trigo avi pemondoro e'ŷ aguã.

30 Tove ranhe, ta'yvate jojavi omono'õa ára peve. Ha'e gui mae ma aipoa'e 'rã imono'õa kuery pe: 'Trigo ramigua ranhe pemono'õ, pejokua oapypaa aguã. Ha'e rã trigo ma pemoi porã xeroguy py.' \*\*

### *Marcos 4.30-32; Lucas 13.18,19*

31 Amboae ayvu ju ha'e kuery pe omombe'u mba'emo re ombojoja vy. Ha'e vy aipoe'i:

— Yva pygua po'akaa py oiko 'rã peteĩ mostarda ra'yã peteĩ ava ojopy vy ombo'ety re onhotŷ va'e rami.

\* 13:15 Isaías 6.9-10 \* 13:30 Mateus 13.36-43

**32** Ha'e nunga ma anhetē ha'yī ikuai va'e gui ruxāve'i va'e. Ha'e rami teī yvate vy mba'emo nhanhotȳ va'e ha'e javi gui tuvixave'rā. Yvyra ete oiko ramo guyra oveve va'e ou vy hakā re ojapo'rā guaityrā.

*Lucas 13,20,21*

**33** Amboae ayvu ju omombe'u ha'e kuery pe mba'emo re ombojoja vy:

— Yva pygua po'akaa py oiko'rā trigo mbovua rami, mba'eta peteī kunha ogueraa vy omoirū'rā trigo re irūmba peve.

*Marcos 4,33,34*

**34** Pova'e nunga ha'e javi Jesus omombe'u heta va'e kuery pe mba'emo re ombojoja vy. Mba'emo re ombojoja e'ŷ re nda'ijayvui ha'e kuery pe,

**35** profeta pe aipo'ea ukaague ojeupity aguā: "Xeayvu'rā mba'emo re ambojoja vy. Aikuaa uka'rā mba'emo [yvy] itui ypy'i guive ndokuaa ukai pyre", he'iague.\*

*Trigo ramigua re ombojoja va'ekue omombe'u porāveague*

**36** Ha'e gui Jesus heta va'e kuery omondoukapa ma vy oo avi oo oñaty katy. Ha'e ramo hemimbo'e kuery hexe onhemboja vy aipoe'i:

— Emombe'u porāve ju trigo ramigua mba'ety rupi onhotȳ mbyre re ndeayvuague.

**37** Ha'e ramo ombovai:

— Mba'emo ra'yī iporāve va'e moaña ma Ava ra'y ojeapo va'ekue ae.

**38** Mba'ety ma kova'e yvy, mba'emo ra'yī iporāve va'e ma Nhanderuete po'akaa pygua kuery, ha'e rā trigo ramigua ma poromboeko vaia ra'y kuery.

**39** Ha'e nunga moaña ma nhanderovaigua anha. Ha'e gui omono'õa aguā ma opaa ára, ha'e rā imono'ðarā ma anjo kuery.

**40** Mba'eta trigo ramigua omono'õ vy tata py omomboa rami avi'rā oiko opaa ára py.

**41** Ava ra'y ojeapo va'ekue omondouka'rā ojeupega anjo kuery, openaa gui oipe'apa aguā nhombojejavya ha'e mba'emo vai apoaa kuery ha'e javi.

**42** Ha'e vy omombopa'rā tata hendy va'e py. Ha'e ramo ojae'opa ha'e opa marā onhendu'rā okuapy ha'e py.\*

**43** Ha'e rā heko porā va'e kuery ma kuaray rami hexakā'rā okuapy Nguuete po'akaa py. Ijapyxa [oendu aguā] oĩ va'e toendu.

*Mba'emo ovareve va'e onhomni mbyre re ijayvua*

**44** — Yva pygua po'akaa py oiko'rā mba'emo ovareve ete va'e peteī mba'ety py onhomni mbyre rami. Ha'e va'e ma peteī ava ojou vy onhomive ju ranhe. Ha'e gui ov'y'a vaipa reve oo vy opa mba'e oguereko va'e ovendepa. Ha'e vy ojeupe ae ojogua ha'e va'e mba'ety.\*

*Pérola re ijayvua*

**45** — Yva pygua po'akaa py oiko'rā peteī ava pérola porāgueve ojoguaxe vy oekaa rupi oiko va'e rami.

**46** Ha'e gui peteī pérola ovareve ete va'e ojou vy opa mba'e oguereko va'e ovendepa'rā ojogua aguā.\*

*Pira mbo'aa re ijayvua*

**47** — Yva pygua po'akaa py oiko'rā pira mbo'aa ye'ẽ py omomboa rami avi. Opa marāguia ombo'a'rā pira.

**48** Ha'e gui tynyē ma ramo pira jopoia kuery omoatā'rā heruvy yvy'ã re, ha'e oguapy vy oiporavo'rā ombo'a va'ekue. Iporāgueve omboyrū'rā ajaka py, ha'e rā iporā e'ŷ va'e ma omombopa ju'rā.

**49** Ha'e rami ae'rā oiko opaa ára py. Anjo kuery ou vy heko vai va'e kuery oipe'apa'rā heko porā va'e kuery mbyte gui,

---

\* **13:35** Salmo 78,2   \* **13:42** Mateus 13,47-50   \* **13:44** Proverbios 2,4,5; Filipenses 3,7,8   \* **13:46** Proverbios 8,11

50 ha'e vy omombo 'rã tata hendy va'e py. Ha'e py ma ojae'opa ha'e opa marã onhendu 'rã okuapy.\*

*Mba'emo pyau ha'e inhymague re ijayvua*

51 Ha'e vy oporandu guemimbo'e kuery pe: — Pendu kuaa pa pov'a'e nunga?

— Tá — he'i okuapy.

52 Ha'e ramo aipoe'i ha'e kuery pe:

— Ha'e rami vy yva pygua po'akaa py mba'emo oiko va'e re ma kuaxia re nhombo'e va'ety ombo'ea porã ramo hoo va'e kuery rami avi 'rã oiko, mba'eta omoĩ porãague gui oguenoẽ 'rã mba'emo pyau ha'e mba'emo ymague.\*

*Marcos 6.1-6; Lucas 4.16-30*

53 Pova'e nunga ayvu Jesus mba'emo re ombojoja vy omombe'upa ma vy ojepe'a ha'e gui.

54 Guekoa py ae ovaẽ vy nhombo'e oikovy onhembo'eaty py. Ha'e ramo ijayvua ha'e kuery oendu vy onhemondyipa. Ha'e vy aipoe'i okuapy:

— Magui nda'u peva'e ava oikuaa o'arandurã ha'e opo'akaa rupi mba'emo ojapo aguã?

55 Peva'e nda'u oo apoa ra'y e'ŷ ri? Maria nda'u ixy e'ŷ ri? Tiago, José, Simão ha'e Judas e'ŷ ri ty'y tyvy kuery ikuai?

56 Heindy kuery nda'u nhanembyte rupi e'ŷ ri ikuai? Magui ha'vy oikuaa ha'e nunga ha'e javi? — he'i okuapy.

57 Ha'e rami vy ndojeroviai okuapy hexe.

Ha'e ramo Jesus ombovai:

— Profeta ikuai va'e ma hekoia pygua ha'e hoo pygua kuery anho nomboetei — he'i.

58 Ha'e rami vy mba'emo porã ndojapo retai ha'e py, ha'e kuery ndojeroviai ramo.\*

## 14

*Marcos 6.14-29; Lucas 9.7-9*

1 Ha'e jave py huvixave Herodes oendu omombe'ua rã Jesus mba'emo ojapo oikovya.

2 Ha'e vy aipoe'i guembiguai kuery pe:

— Ha'e va'e ma João Batista omanoague gui onhemboete ju va'ekue. Ha'e rami vy 'rãe ipo'aka mba'emo porã ojapo aguã — he'i.

3 Mba'eta Herodes ojopy ae va'ekue João, ha'e ojokua vy nhuã py ombo'a tyvy Filipe ra'yxy Herodias káuxa.

4 Mba'eta João “Nda'evei ndera'yxyrã rerekro aguã” he'i ramo.

5 Huvixa ojukaxe teĩ okyje heta va'e kuery gui, profeta oikoa ramo oikuaa okuapy ramo.

6 Ha'e gui Herodes ituiague ára ovaẽ ramo pavẽ ikuai va'e renonde Herodias memby ojeroky ramo huvixa oguerovy'a.

7 Ha'e rami vy oura vy ijayvu ojerure va'e rei tema ome'ẽ aguã re.

8 Ha'e ramo kunhataĩ ma ixy ombo'eague ramo vy aipoe'i:

— Eme'ẽ xevy peteĩ hy'a py João Batista akãgue — he'i.

9 Ha'e ramo huvixa ndovy'avei. Ha'e rami teĩ hexeve mesa py ikuai va'e oendua py oura rire ojapo uka nho.

10 Ha'e vy ijayvu João akã ojayaag Aguã nhuã py.

11 Ha'e gui inhakãgue peteĩ hy'a py oguerua vy kunha'i va'e pe ome'ẽa ramo oxy pe ju ogueraa.

12 Ha'e ramo João remimbo'e kuery ou. Hetekue ogueraa vy onhono porã. Ha'e rire oje'oi, Jesus pe omombe'u.

*Marcos 6.30-44; Lucas 9.10-17; João 6.1-14*

\* 13:50 Mateus 13.24-30,36-43

\* 13:52 Romanos 1.1-4; 2 Coríntios 1.20

\* 13:58 João 1.11

<sup>13</sup> Jesus ha'e nunga oendu vy ojep'e'a ha'e gui. Peteñ kanoñ py oo teko a e'ña py ha'e kuery ae'i oñ aguã katy. Ha'e rami teñ heta va'e kuery oikuua avi vy tetã ikuai va'e gui oupa, hakykue oje'oi yvy rupi.

<sup>14</sup> Ha'e ramo kanoñ gui Jesus oguejy vy oexa heta ikuai va'e. Ha'e vy omboaxy vy omonguera imba'eaxy gui.

<sup>15</sup> Ka'aru'i jave hemimbo'e kuery ou Jesus oña py. Ha'e vy aipoe'i ixupe:

— Apy ma teko a e'ña py nhandekuai, pytû ta ma guive. Ha'e nunga rupi emondoukapa heta va'e kuery, teko rupi oo vy ho'u va'erã ojogua aguã — he'i okuapy.

<sup>16</sup> Ha'e rã Jesus aipoe'i ha'e kuery pe:

— Oje'oi e'ñ teñ ha'eve. Peñ ae peme'ë ho'u va'erã — he'i.

<sup>17</sup> Ha'e rã ha'e kuery ombovai:

— Mba'eve ndoroguerokoi apy peteñ nhiruñ mbojape ha'e mokoñ pira'i e'ñ vy.

<sup>18</sup> Ha'e ramo aipoe'i:

— Peru ha'vy apy — he'i.

<sup>19</sup> Ha'e gui Jesus heta va'e kuery nhuñ áry omboguapypa vy ojopy peteñ nhiruñve mbojape ha'e mokoñve pira. Yva re oma'ë reve oguerovy'a Nhanderuete. Ha'e rire mbojape oipe'ñ-pe'ñ i vy ome'ë guemimbo'e kuery pe, ha'e kuery ju ome'ë-me'ë aguã heta va'e kuery pe.

<sup>20</sup> Ha'e javive okaru vy hevyatãmba. Ha'e gui hembyrekue omono'õ vy doze varai omonyë.

<sup>21</sup> Okaru va'ekue ma cinco mil avakue, kunhague ha'e kyrigue reve e'ñ vy.

*Marcos 6.45-52; João 6.15-21*

<sup>22</sup> Ha'e rire'ive guemimbo'e kuery pe aipoe'i kanoñ py oñmba vy oje'oi aguã henonderã hovaigua re, heta va'e kuery ha'e ae omondoukapaa ja.

<sup>23</sup> Ha'e gui heta va'e kuery omondoukapa ma vy yvyty áry katy oë ov, ha'e ae'ia py onhembo'e aguã. Ka'aru ete peve ha'e py oiko ha'e ae'i.

<sup>24</sup> Ha'e ramia ja kanoñ mombyry ma oo yy rembe gui. Yai ojeapi-api, ha'eve e'ña katy gui yvytu ramo.

<sup>25</sup> Ko'ë rai jave Jesus ou ha'e kuerya katy, ye'ë áry oguata ouvy.

<sup>26</sup> Yy áry oguata rã hemimbo'e kuery oexa vy onhemondyipa. Ha'e vy aipoe'i:

— Águe rima! — he'i. Okyje vy haxëmba okuapy.

<sup>27</sup> Ha'e ramo Jesus ijayvu ha'e kuery pe:

— Pendepy'a guaxu ke. Xee rima, pekyje eme — he'i.

<sup>28</sup> Ha'e gui Pedro ijayvu vy aipoe'i:

— Senhor, ndee ri vy aipo're ndea py xee aa aguã yy áry rupi.

<sup>29</sup> Ha'e ramo

— Eju ha'vy — he'i.

Ha'e rã Pedro kanoñ gui oguejy vy oguata yy áry, Jesus-a katy.

<sup>30</sup> Ha'e gui yvytu atãa re oma'ë vy oendu okyjea. Ha'e oike ov vy ojapukai:

— Senhor, xereraa jepe ke!

<sup>31</sup> Ha'e ramove Jesus okuave'ë vy ojopy. Ha'e vy aipoe'i ixupe:

— Ava rejeroviaa kyrí'i va'e, mba'e re tu nderejeroviai ri? — he'i.

<sup>32</sup> Ha'e gui ma kanoñ py mokoñve oñ ramove yvytu opytu'u.

<sup>33</sup> Ha'e rã kanoñ py opyta va'ekue omboete vy aipoe'i:

— Anhetë ete ra'e ndee Nhanderuete Ra'y!

*Marcos 6.53-56*

<sup>34</sup> Ha'e gui hovaigua re ovaë vy Genesaré yvy re ikuai.

<sup>35</sup> Ha'e va'e yvy regua avakue oexa kuaa vy omombe'u uka ha'e'i rupi ikuai va'e ha'e javi pe. Ha'e ramo oña py ogueru imba'eaxy va'e.

<sup>36</sup> Ixupe ojerure avi ijao apy re ri jepe opoko aguã. Ha'e gui opoko va'e rei okuerapa.

## 15

### *Marcos 7.1-23*

<sup>1</sup> Ha'e gui Jesus-a py onhemboaty fariseu ha'e kuaxia re nhombo'e va'ety kuery Jerusalém gui ou va'ekue. Ha'e vy oporandu:

<sup>2</sup> — Mba'e re tu neremimbo'e kuery nda'ikuai ri ymagua kuery nhombo'eague rami? Mba'eta ojepoei e'ŷ re okaru.

<sup>3</sup> Ha'e ramo ombovai:

— Ha'vy peẽ kuery mba'e re tu ndapejapoi Nhanderuete ojapo uka va'e, ymagua kuery nhombo'eague pejou porâve vy?

<sup>4</sup> Mba'eta Nhanderuete ma ojapo uka “Emboete nderu ha'e ndexy. Ha'e rã amongue nguu re, oxy re ijayvu vai va'e ma topaga ojukaa py” he'iague.\*

<sup>5</sup> Ha'e rã peẽ kuery ma aipopeje: “Nguu e'ŷ vy oxy pe amongue aipoe'i 'rã: ‘Pêvy peguarã areko va'ekue ma Senhor pe ju amboaxa’,

<sup>6</sup> he'i teĩ ha'eve”, peje. Ha'e rami vy tuu ha'e ixu napeipytyvõ ukai. Ha'e rami py pemboyke Nhanderuete ayvu, ymagua kuery penembo'eague pejou porâve vy.

<sup>7</sup> Heko porã merami rive va'e, ha'evea rami peẽ kuery reko re Isaías ijayvu vy aipoe'i:

<sup>8</sup> “Kova'e kuery ma ojuru py rive xemboete, ha'e rã ipy'a ma mombyry xegui.

<sup>9</sup> Avakue ijayvuague rupi rive nhombo'e vy xemboete merami rive okuapy”, he'i va'ekue.\*

<sup>10</sup> Ha'e gui heta va'e kuery ju oenoimba vy aipoe'i ha'e kuery pe:

— Pejapyxaka porã peikuua aguã:

<sup>11</sup> Pendejuru rupi oike va'e'ŷ penemboeko ky'a, pendejuru gui oẽ va'e anho 'rã penemboeko ky'a – he'i.

<sup>12</sup> Ha'e ramo hemimbo'e kuery hexe onhemboja vy aipoe'i:

— Reikuua teve fariseu kuery ndeayvu oendu vy ojou vaia?

<sup>13</sup> Ombovai:

— Mba'emo renhoĩ Xeru onhotŷ va'ekue e'ŷ ma omondoropaa 'rã.

<sup>14</sup> Tove ta'ikuai. Ha'e kuery ma ára revegua e'ŷ va'eri ára revegua e'ŷ rerekoa rupi ikuai. Ha'e gui ára revegua e'ŷ ri oirũ oguereko vy mokoïve 'rã ho'a hugua katy – he'i.

<sup>15</sup> Ha'e ramo Pedro aipoe'i ixupe:

— Emombe'u porâve orevy pov'a ayvu mba'emo re rembojoja vy remombe'u va'ekue

— he'i.

<sup>16</sup> Jesus ombovai:

— Peẽ voi napendu kuaai teri teve?

<sup>17</sup> Napendu kuaai ri ty'y opa mba'e pendejuru rupi oike va'e penderyepy katy rive 'rã oguejy, ha'e penderete gui ju oaxapa 'rã?

<sup>18</sup> Ha'e rã avakue juru gui oẽ va'e ma ipy'a gui ou. Ha'e nunga ae oĩ imboeko ky'aa.

<sup>19</sup> Mba'eta avakue py'a gui ae 'rã ou opa marã rei oikoxea: jojukaxe, itavy reixe, kunhague mboae re opena reixe, imondaxe, joe ijayvu reixe ha'e gui ijayvu vaikue reixe.

<sup>20</sup> Ha'e nunga anho imboeko ky'aarã oĩ. Ha'e rã ojepoei e'ŷ re okarua ma nomboeko ky'ai 'rã.

### *Marcos 7.24-30*

<sup>21</sup> Ha'e gui Jesus ojepe'a ovv Tiro ha'e Sidom katy.

<sup>22</sup> Ha'e rami jave ou peteĩ kunha Canaã pygua ha'e katy'i gui. Ha'e va'e ojapuka-pukai:

— Senhor, Davi ramymino, xemboaxy ke. Xememby re anha onhemonde ramo nda'evei ete itui – he'i.

<sup>23</sup> Ha'e rami teĩ Jesus nombovai ranhe.

Ha'e ramo hemimbo'e kuery onhemboja vy aipoe'i ixupe:

— Emondouka na, mba'eta ojapukai ouvy nhanderakykue.

\* **15:4** Êxodo 20.12, 21.17; Levítico 20.9; Deuteronômio 5.16

\* **15:9** Isaías 29.13

- <sup>24</sup> Ha'e rã Jesus ombovai:  
 – Israel kuery regua vexa'i okanhy va'ekue anho aeka aguã xemboua – he'i.  
<sup>25</sup> Ha'e gui kunha va'e ou vy omboete. Ha'e vy aipoe'i:  
 – Senhor, xepytyvõ ke.  
<sup>26</sup> Jesus ombovai vy aipoe'i:  
 – Nda'evei ta'y kuery po gui mbojape jajogua vy jagua'i ikuai va'e pe nhamombo aguã – he'i.\*  
<sup>27</sup> Ha'e ramo kunha va'e aipoe'i:  
 – Tá, Senhor. Ha'e rami avi jagua'i teñ ho'u 'rã oja mesa gui tembi'u kure ho'a va'ekue.  
<sup>28</sup> Ha'e rami rã Jesus aipoe'i:  
 – Kunha rejerovia ete va'e, toiko reipota va'e – he'i. Ha'e va'e jave py ma imemby okuera ma.

### *Galiléia ye'ẽ rembe katy Jesus ojevy vy heta ju omongueraague*

- <sup>29</sup> Jesus ha'e gui oo vy Galiléia ye'ẽ rembe rupi ranhe oo. Ha'e gui yvyty re oẽ vy oguapy ha'e py.  
<sup>30</sup> Oĩa py heta ou. Heta ogueru hetyma rovai piru va'e, ikarëgue'i, ára revegu e'ŷ, ijayvu e'ŷ va'e ha'e amboae rami imba'eaxy va'e. Jesus py yvýry onhonomba. Ha'e ramo omonguerapa.  
<sup>31</sup> Heta va'e kuery onhemondyipa oexa vy ijayvu e'ŷ va'ekue ijayvu rã, ikarëgue'i va'ekue oiko porã, hetyma pirupa va'ekue oguata, ha'e ára revegu e'ŷ va'ekue voi oexapa ju ramo. Ha'e rami vy omboete okuapy Israel kuery Ruete.

### *Marcos 8.1-10*

- <sup>32</sup> Ha'e gui Jesus guemimbo'e kuery oenoĩ vy aipoe'i:  
 – Amboaxy kova'e kuery, mba'eta mboapy ára ma xerupive ikuai rire mba'eve ndoguerekoi ho'u va'erã. Namondoukaxeui guive okaru e'ŷ re, tape rupi ho'apa e'ŷ aguã – he'i.  
<sup>33</sup> Ha'e rã hemimbo'e kuery aipoe'i:  
 – Mamo nda'u kova'e tekao e'ŷa py oĩ 'rã mbojape heta va'e kuery nhamongarupa aguã?  
<sup>34</sup> Jesus oporandu ha'e kuery pe:  
 – Mbovy ha'vy pereko mbojape?  
 Ombovai:  
 – Sete, ha'e mbovy'i pira'i guive – he'i.  
<sup>35</sup> Ha'e ramo Jesus heta va'e kuery omboguapy ukapa yvy py.  
<sup>36</sup> Ha'e vy ojopy sete-ve mbojape ha'e pira. Nhanderuete oguerovy'a rire oipe'ã-pe'ã'i vy ome'ẽ guemimbo'e kuery pe, ha'e kuery ju heta va'e kuery pe ombojoja aguã.  
<sup>37</sup> Ha'e javive okarupa vy hevyatãmba. Ha'e gui hembyrekue ma sete ajaka renyẽ omboyru.  
<sup>38</sup> Okaru va'e ma quattro mil avakue, kunhague ha'e kyrigue reve e'ŷ vy.  
<sup>39</sup> Ha'e gui Jesus heta va'e kuery omondoukapa ma rire kanoã py oĩ. Ha'e vy Magadã regua katy oo.

## 16

### *Marcos 8.11-13*

- <sup>1</sup> Ha'e gui fariseu ha'e saduceu kuery ju onhemboja hexe. Oeko a'ã vy ojerure hexa pyrã yva guigua ojapo aguã re.  
<sup>2</sup> Ha'e ramo ombovai:  
 – Peẽ kuery ma ka'aru ramo aipopeje 'rã: “Ára porã 'rã, mba'eta yva re pytãmba.”

\* <sup>15:26</sup> Jesus “Ta'y kuery” he'ia ma guetarã kuery pe ijayvu vy, ha'e rã “Jagua'i” he'ia ma amboae regua pe. Kunha va'e ma amboae regua va'eri Jesus re ojerovia ete.

<sup>3</sup> Ha'e rã ko'ẽmba jave ma "Kova'e ára oiko 'rã ára vai, mba'eta yva pytã rei", peje 'rã. Ha'e rami yva re pema'ẽ vy mba'emo peikuaa va'eri ndapexa kuaai va'e ty'y aŷ oiko va'e?

<sup>4</sup> Heko vai ha'e itavy rei va'e kuery anho 'rã ojerure hexa pyrã re. Ha'e rami teĩ ha'e kuery pe neĩ peteĩ hexa pyrã ndojapoai 'rã, Jonas re oiko va'ekue ramigua e'ŷ vy – he'i. Ha'e rami vy ojepe'a ovv ha'e kuerya gui.\*

*Marcos 8.14-21*

<sup>5</sup> Ha'e gui yupu rovaigua katy oo vy hemimbo'e kuery oikuua pota rã hexarai ra'e mbojape ogueraa aguã re.

<sup>6</sup> Ha'e ramo Jesus aipoe'i ha'e kuery pe:

– Ma'ẽ, penheangu ke fariseu ha'e saduceu kuery regua trigo mbovua gui – he'i.

<sup>7</sup> Ha'e ramo ha'e kuery jomeme ijayvu vy aipoe'i:

– Ha'e rami ijayvu mbojape ndajarui rire – he'i okuapy.

<sup>8</sup> Jesus ha'e nunga oikuua vy aipoe'i:

– Avakue pejeroviaa kyrĩ'i va'e, mba'e re tu mbojape ndaperekoia re pendeayvu?

<sup>9</sup> Ndapeikuai teri, neĩ napenema'endu'ai teve cinco mil avakue peguarã peteĩ nhiruĩ mbojape ha'eveague re, neĩ mbovy varai pa hembyrekue pemboyruague re?

<sup>10</sup> Neĩ quattro mil avakue peguarã sete mbojape ha'eveague re napenema'endu'ai teve, neĩ mbovy ajaka pa hembyrekue pemboyruague re guive?

<sup>11</sup> Mba'exa tu napendu kuaai mbojape re ete'ŷ xeayvua, ha'e rã trigo mbovua rami fariseu ha'e saduceu kuery nhombo'ea gui penheangu aguã re – he'i.

<sup>12</sup> Ha'e ramo mae ma ha'e kuery oikuua mbojape mbovua gui ete'ŷ omonheangu-a, ha'e rã fariseu ha'e saduceu kuery nhombo'ea gui.

*Marcos 8.27-30; Lucas 9.18-21*

<sup>13</sup> Cesáreia Filipe pegua tetã katy Jesus ooa rupi oporandu guemimbo'e kuery pe:

– Marã ramigua Ava ra'y ojeapo va'ekue oikoa rami tu heta va'e kuery oikuua?

<sup>14</sup> Ha'e kuery ombovai:

– Amongue ma "João Batista" he'i. Amboae ma "Elias" he'i. Ha'e rã amboae kuery ma "Jeremias" e'ŷ vy "Profeta mboae" he'i.

<sup>15</sup> Oporanduve ju:

– Ha'vy peẽ kuery, marã ramigua aikoa pa peikuaa?

<sup>16</sup> Simão Pedro ombovai vy

– Ndee ma Cristo Nhanderuete oikove va'e Ra'y – he'i.

<sup>17</sup> Ha'e ramo ixupe Jesus aipoe'i:

– Simão, João ra'y, revy'a ete 'rã, mba'eta ho'o ha'e huguy va'e e'ŷ ha'e nunga oikuua uka ndevy, ha'e rã Xeru yva pygua ae.

<sup>18</sup> Aipoa'e avi ndevy: Ndee ma Pedro, ha'e kova'e ita áry ajapo 'rã xevygua igreja. Ha'e gui xevygua igreja re ma manoa rokẽ rupi nhomoingea voi nda'ipo'akai 'rã.

<sup>19</sup> Ndevy pe ma yva pygua po'akaa rokẽ pe'aa ame'ẽ 'rã. Mba'emo yvy re rejokua va'e ma yva re voi ojokua pyre 'rã oiko. Ha'e rã yvy re rejora va'e ma yva re voi ojora pyre 'rã oiko – he'i.

<sup>20</sup> Ha'e gui ma guemimbo'e kuery pe aipoe'i avave rei pe omombe'u e'ŷ aguã Cristo oikoa.

*Marcos 8.31-33; Lucas 9.22*

<sup>21</sup> Ha'e va'e ára guive Jesus Cristo omboypy guemimbo'e kuery pe omombe'u aguã Jerusalém katy oo 'rãa, ha'e nhomongeta va'ety kuery po py oiko axy 'rãa opa mba'e py, sacerdote yvatekueve ha'e kuaxia re nhombo'e va'ety kuery po py guive. Ojukaa 'rã, ha'e gui mboapy araa py onhemboete ju 'rãa voi omombe'u.

<sup>22</sup> Ha'e ramo Pedro oenoĩ ha'e ae'ia py. Ha'e vy ndojou porãia rami ijayvu vy aipoe'i ixupe:

– Senhor, enhemboaxy na ha'e nunga ndere oiko e'ŷ aguã.

\* <sup>16:4</sup> Mateus 12.38-42; Lucas 12.54-56

<sup>23</sup> Ha'e rā Jesus ojere vy ombovai Pedro pe:  
— Satanás, ejepé'a ke xea gui. Ndee ma ita xereityxea reiko, mba'eta Nhanderuete guigua e'ŷ reikuua, ha'e rā avakue guigua rive.

*Marcos 8.34-9.1; Lucas 9.23-27*

<sup>24</sup> Ha'e ramo Jesus aipoe'i guemimbo'e kuery pe:  
— Xerupive oikoxe va'e taexarai ojegui ae, togueraa ojeupegua kuruxu, ha'e tou xerakykue.

<sup>25</sup> Mba'eta nomanoxei ete va'e kuery omokanhy 'rā guekove. Ha'e rā xekáuxa omano va'e ma ojou ju 'rā guekove.\*

<sup>26</sup> Mba'e 'rā tu avakue ojou, mba'emo yvy regua oguerekopa va'eri guekove ae omokanhy vy? Mba'e nunga 'rā tu ome'ẽ onhe'ẽ rekoria?

<sup>27</sup> Mba'eta Ava ra'y ojeapo va'ekue ou 'rā Nguu rexakāa rupi, ojeupegua anjo kuery reve. Ha'e rami vy peteĩ-teĩ pe ombojoja 'rā ojapo va'ekue rekoria.\*

<sup>28</sup> Anhetē aipoa'e pêvy: Apy peĩ va'e regua amongue napemanoi 'rā Ava ra'y ojeapo va'ekue opo'akaa reve ou rā pexa e'ŷa ja.

**17***Marcos 9.2-8; Lucas 9.28-36*

<sup>1</sup> Oito araa py Jesus ngupive ogueraa Pedro, tyvy Tiago ha'e João ha'e kuery ae'i ikuai aguã py peteĩ vytyt yvate va'e áry.

<sup>2</sup> Ha'e py ha'e kuery oexaa py ma guexakā py ojekuaa. Hova hexakā kuaray rami, ha'e rā ijaou ma xiimbā rei hendy va'e rami ojekuaa.\*

<sup>3</sup> Hexeve ojekuaa avi Moisés ha'e Elias. Ha'e va'e kuery ma hexeve ijayvu okuapy.

<sup>4</sup> Ha'e ramo Pedro aipoe'i Jesus pe:  
— Senhor, ha'eve apy nhaíve aguã. Ha'e ramo reipota rā ajapo 'rā mboapy oo'i: peteĩ ma ndevy guarā, amboae ma Moisés pe, ha'e gui amboae ju ma Elias peguarā — he'i.

<sup>5</sup> Pedro ijayvu teria ja peteĩ arai hexakā va'e ou vy ojao'ipa. Arai gui onhendu peteĩ ayvu aipoe'i va'e:  
— Peva'e ma Xera'y ayvu ete ha'e arov'y a va'e. Pejapyxaka ijayvua re ae — he'i.

<sup>6</sup> Ha'e nunga hemimbo'e kuery oendu vy ho'apa okyje vy, yvy re ngova omovaẽ reve.  
<sup>7</sup> Ha'e kuery re Jesus onhemboja vy opoko. Ha'e vy aipoe'i:  
— Pevy ke, pekyje eme — he'i.

<sup>8</sup> Ha'e kuery guexa oipe'a vy avave rei ndoexavei, Jesus e'ŷ vy.

*Marcos 9.9-13*

<sup>9</sup> Yvyty áry gui ha'e kuery oguejy rā Jesus aipoe'i:  
— Avave rei pe ke pemombe'u eme pexa va'ekue, Ava ra'y ojeapo va'ekue omanoague gui onhemboete ju e'ŷa ja — he'i.

<sup>10</sup> Ha'e gui hemimbo'e kuery oporandu:  
— Mba'e re tu ha'y kuaxia re nhombo'e va'ety kuery ijayvu okuapy Elias ranhe ou 'rāa re?

<sup>11</sup> Jesus ombovai:  
— Anhetē ae Elias ou vy opa mba'e omoimba porā ju 'rā.\*  
<sup>12</sup> Ha'e rami avi xee aipoa'e porāve pêvy: Elias ma ou ae ma teĩ heta va'e kuery ndoikuuai okuapy. Ha'e rami vy ha'e kuery oipotaa rami ae ojapo okuapy hexe. Ha'e rami ae avi ha'e kuery po py Ava ra'y ojeapo va'ekue voi oiko axy 'rā — he'i.

<sup>13</sup> Ha'e ramo hemimbo'e kuery oikuua João Batista reko re ijayvua rami.  
*Marcos 9.14-29; Lucas 9.37-43a*

<sup>14</sup> Ha'e gui heta va'e kuery ikuua py ha'e kuery ovaẽ rā peteĩ ava onhemboja hexe. Ha'e va'e guenapy'ã re oĩ vy aipoe'i:

---

\* **16:25** João 12.24-26; Apocalipse 2.10; 12.11    \* **16:27** Provérbios 24.12    \* **17:2** 2 Pedro 1.16-18    \* **17:11** Malaquias 4.5-6

**15** — Senhor, emboaxy xera'y, mba'eta he'o'ã vy oiko axy. Mbovykue rei e'ŷ ho'a tata py ha'e yy py.

**16** Neremimbo'e kuerya py aru kuri teĩ ha'e kuery nomonguera kuaai – he'i.

**17** Jesus aipoe'i:

— Peẽ pejerovia e'ŷ ha'e pendeko vai va'e, raka'e peve 'rã tu aiko pendereve, rogueropo'aka aguã? Eru ha'vy ava'i apy – he'i.

**18** Ha'e gui anha pe Jesus ijayvu atã ramo ojepe'a ava'i gui. Ha'e va'e hora-ve ava'i okuera.

**19** Ha'e ramo hemimbo'e kuery Jesus re onhemboja vy oporandu ha'e ae'ia py:

— Mba'e re tu ore ndoroipe'a kuaai ra'e anha?

**20** Ombovai ha'e kuery pe:

— Mba'eta pejeroviaa kyrĩ'i rã. Anhetẽ aipoa'e pêvy: Peteĩ mostarda ra'yĩ'i rami ri jepe pejeroviaa oĩ va'e rire kova'e yvyty pe “Ejepe'a ke apy gui, ki katy tereo”, peje ramo ojepe'a 'rãgue. Mba'eve rei ndaxyi 'rãgue pêvy.

**21** [Ha'e gui ha'e va'e nunga anha ma nhanhembo'e ha'e jakaru e'ŷ re jaiko vy 'rãe jaipe'a.]

*Marcos 9.30-32; Lucas 9.43b-45*

**22** Ha'e gui Galiléia yvy re hemimbo'e kuery ijatypa ju ma ramo Jesus aipoe'i ha'e kuery pe:

— Ava ra'y ojeapo va'ekue omboaxaa 'rã avakue po py.

**23** Ha'e kuery ojuka 'rã. Ha'e gui mboapy araa py onhemboete ju 'rã – he'i. Ha'e rã hemimbo'e kuery oendu vy iporiaupa.

### *Jesus imposto opaga ukaague*

**24** Cafarnaum py ha'e kuery ovaẽ jave Pedro oĩa py ou imposto re nhombopaga va'ety kuery. Ha'e rami vy oporandu okuapy mokoĩ hatã'i va'e opaga aguã re:

— Penembo'ea ndopagai 'rã teve mokoĩ hatã'i va'e? – he'i okuapy.

**25** — Tá, opaga ri – he'i ombovai vy.

Ha'e gui opy Pedro ovaẽ ramove ixupe Jesus oporandu vy aipoe'i:

— Simão, mba'exa tu reikuaa? Mava'e kuery tu kova'e yvy regua huvixa kuery ombopaga 'rã imposto re: gua'y kuery tyrã pa amboae regua?

**26** Pedro ombovai:

— Amboae regua ri – he'i.

Jesus aipoe'i ixupe:

— Ha'e rami rã ta'y kuery opaga e'ŷ teĩ ha'eve.

**27** Ha'e rami avi ha'e kuery ivai e'ŷ aguã tereo, eity pinda yy py, ha'e enoẽ pira ogueraa ypy va'e. Ha'e va'e juru reipe'a vy rejou 'rã peteĩ peráta hatã'i va'e ovareve'i va'e. Eraa, ha'e kuery pe eme'ẽ xegui ha'e ndeguigua.\*

## 18

*Marcos 9.33-37; Lucas 9.46-48*

**1** Ha'e jave hemimbo'e kuery Jesus re onhemboja vy oporandu:

— Mava'e nda'u yvateve va'e oiko 'rã yva pygua po'akaa py?

**2** Ha'e ramo Jesus peteĩ kyrĩ va'e oenoĩ vy omo'ã ha'e kuery mbyte.

**3** Ha'e vy aipoe'i:

— Anhetẽ aipoa'e pêvy: Ndapejeko rerovai, ha'e kyrĩ va'e rami ndapeikoi ri vy ndapeikei 'rã yva pygua po'akaa py.

**4** Ha'e nunga rupi kova'e kyrĩ va'e rami onhemo'yvyi'i va'e anho 'rã yvateve yva pygua po'akaa py.\*

**5** Ha'e xerery rupi peteĩ kyrĩ va'e kova'e ramigua omovaẽ va'e ma xee avi xemovaẽ.

*Marcos 9.42-48; Lucas 17.1,2*

\* **17:27** Romanos 13.5-7; 1 Coríntios 10.32-11.1

\* **18:4** Filipenses 2.3-7; 1 Pedro 5.5,6

<sup>6</sup> — Ha'e rā kova'e kyrīgue va'e ramigua xere ojeroviaa gui amongue oity 'rāgue py ha'eveve oityxe va'e aju'y re ita guaxu mba'emo mongu'ia ojokua pyre reve ye'ē typyvea py oy'upa va'e rire.

<sup>7</sup> — Nda'evei ete 'rā yvy regua kuery pe heityarā oiko ramo. Mba'eta oiko 'rāe joityarā, teī joityare pe ma nda'evei 'rā.

<sup>8</sup> Ha'e nunga rupi ndepo, e'ŷ vy ndepy ri ndereity ramo ejaya, emombo ndejegui. Mba'eta ndepo e'ŷ vy ndepy jobaive reve tata ogue'ŷ va'e py nemomboa 'rāgue py ha'eveve ndepo, ndepy rovaikue'i reve reikove aguā py reike aguā.

<sup>9</sup> Ha'e peteī nderexa ri ndereity ramo enoē, ha'e emombo ndejegui. Mba'eta mokoīve nderexa reve tata py reiko axy aguā py nemomboa 'rāgue py ha'eveve peteī'i nderexa reve reikove aguā py reike aguā.

### *Lucas 15.3-7*

<sup>10</sup> — Ma'ē, nda'evei kova'e kyrī va'e rami oiko va'e pe rei "Mba'e vare'ŷ" peje aguā. Mba'eta aipoa'e pēvy: Ha'e kuery rarōa anjo kuery ikuai riae Xeru yva pygua renonde.

<sup>11</sup> [Mba'eta Ava ra'y ojeapo va'ekue ou okanhyme ogueraa jepe aguā.]

<sup>12</sup> — Mba'exa tu peē peikuaa? Xapy'a rei peteī ava oguerek 'rā cem vexa'i. Ha'e gui ha'e va'e regua peteī okanhyme ramo noventa e nove ikuai va'e oejapa 'rā yvyty áry, okanhyme va'ekue oeka vy oo aguā.

<sup>13</sup> Ha'e gui anhetē aipoa'e pēvy: Ojou ma vy noventa e nove okanhyme e'ŷ va'e gui oguerovy'ave 'rā.

<sup>14</sup> Ha'e rami ae avi Penderu yva pygua voi ndoipotai neī peteī kova'e kyrīgue va'e regua okanhyme.

### *Irmão otekoavy va'ekue nhamongeta aguā re ijayvua*

<sup>15</sup> — Xapy'a rei nde-irmão [ndevy] otekoavy ramo tereo ha'e ae'ia py ndeayvu ixupe. Ha'e gui ndeayvu re ojapyxaka ramo peteī rami ju 'rā peiko nde-irmão reve.\*

<sup>16</sup> Ha'e rā ndeayvu re ndojapyxakaxeī ramo peteī, mokoī ju eraa nderupive, mokoī e'ŷ vy mboapy pendu rire ayvu oiko va'e oikuua porā aguā.\*

<sup>17</sup> Ha'e gui xapy'a rei noendu potai ae ramo remombe'u 'rā igreja kuery pe. Ha'e rā igreja kuery ayvu re voi ndojapyxakai ramo amboae regua rami 'rā perekō, imposto re nhombopaga va'ety rami.

<sup>18</sup> Anhetē aipoa'e pēvy: Yvy re pejokua va'e rei yva re voi oiko 'rā ojokua pyre. Ha'e rā yvy re pejora va'e rei ma yva re voi oiko 'rā ojora pyre.

<sup>19</sup> Anhetē aipoa'e avi pēvy: Peē kuery va'e regua mokoī teī mba'emo re pejerure vy joo rami peikuaa ramo Xeru yva pygua ojapo 'rā pēvy.

<sup>20</sup> Mba'eta mokoī e'ŷ vy mboapy teī xerery rupi pendeatya py xee voi aī 'rā peē kuery mbyte.

### *Lucas 17.3,4*

<sup>21</sup> Jesus oña py Pedro ou vy oporandu:

— Senhor, xevy pe xe-irmão otekoavy ramo mbovykue peve 'rā tu aperdoa? Sete-kue peve ri nda'u?

<sup>22</sup> Ombovai:

— Sete-kue peve'i nda'eis, ha'e rā setenta vezes sete-kue peve 'rā peperdoa.\*

### *Nhomboreveare nhomboaxy e'ŷ va'e re ijayvua*

<sup>23</sup> — Ha'e nunga rupi yva pygua po'akaa py oiko 'rā peteī huvixave guembiguai kuery orevea ombopaga uka va'e rami.

<sup>24</sup> Jypy'i ha'e oña py peteī oguerua dez mil poyikue prata guigua oreve va'e.

\* **18:15** Gálatas 6.1,2; 2 Tessalonicenses 3.14,15; Tiago 5.19,20 \* **18:16** Deuteronomio 10.15 \* **18:22** Efésios 4.32; Colossenses 3.13

25 Ha'e va'e ma opaga aguã ndoguerekoi ramo ipatõ aipoe'i ovendea aguã escravo-rã, ta'yxy, ta'y kuery ha'e oguerekoo va'e ha'e javi guive, orevea omboekoviapa aguã.

26 Ha'e ramo hembiguai guenapy'ã re oĩ reve ojerure: "Xerarõve'i ranhe, apagapa 'rã", he'i.

27 Ha'e ramo ipatõ omboaxy vy omondouka rive, oreveague ombogueua.

28 — Ha'e gui ha'e va'e tembiguai oo vy peteĩ oirũ ojou cem ára repy ete'i ixupe oreve va'e. Ha'e vy oguero'a vy ojyryvipy. Ha'e vy aipoe'i: "Epagapa ke rerevea."

29 Ha'e ramo irũ ipy yvy'iry oĩ vy aipoe'i ixupe: "Xerarõve'i ranhe, apagapa 'rã", he'i.

30 Ha'e rami teĩ noendu potai. Ha'e rami 'rãgue py oo vy omboty uka nhuã py orevea opagapa peve.

31 — Ha'e rami joguerekoo axy rã irũ kuery oexa vy iporiaupa okuapy. Opatõa py jogueraa vy omombe'u oiko va'ekue ha'e javi.

32 Ha'e ramo ipatõ guembiguai oenoĩ uka ju vy aipoe'i ixupe: "Tembiguai heko vai va'e, ndee rejerurea rami xee ambogueua rereveague ha'e javi.

33 Ha'vy ndee nda'evei ri ty'y xee romboaxyague rami neirũ remboaxy aguã?" he'i.

34 Ha'e vy ipoxy vy omboaxa hereko axyarã kuery pe, orevea opagapa peve.

35 Ha'e rami ae avi Xeru yva pygua pendererekoo 'rã, pendepy'a py peteĩ-teĩ pende-irmão peperdoa e'ŷ ramo.\*

## 19

### *Marcos 10.1*

1 Ha'e rami Jesus ijayvupa ma vy ojepe'a Galiléia gui, Judéia katy'i oo Jordão yakã rovaigua re.

2 Heta ete oje'oi hakykue. Ha'e ramo omonguerapa ha'e py.

### *Marcos 10.2-12; Lucas 16.18*

3 Jesus oña py ou amongue fariseu kuery. Oeko a'ã vy oporandu okuapy:

— Ha'eve nda'u mba'emokue py rive ime kuery opoi aguã gua'yxy gui?

4 Ha'e ramo ombovai:

— Ndaperoayvui teve Penemoingoare jypy'i guive ava ha'e kunha ojapoague?\*

5 Ha'e vy aipoe'i: "Ha'e nunga rupi ava oeja 'rã nguu ha'e oxy, onhemoirũ 'rã gua'yxy re, mokoĩ 'rãgue py peteĩ'i to'o ikuai aguã" he'iague?\*

6 Ha'e rami vy mokoĩ ve'ŷ ma ikuai, peteĩ'i to'o ma. Ha'e nunga rupi Nhanderuete omoirũ rire avave rei tomboja'o eme — he'i.\*

7 Ha'e gui oporanduve ju ixupe:

— Mba'e re ha'vy Moisés ome'ẽ uka raka'e kuaxia para omendaague mbovaipaarrã, omenda va'e opoi aguã?

8 Jesus ombovai:

— Peneakã ratã ramo Moisés penemomboi uka raka'e pendera'yxy gui. Ha'e rami teĩ jypy'i guive e'ŷ oeja ha'e ramigua.

9 Ha'e rã xee ma aipoa'e pêvy: Itavy reiague re'ŷ ri gua'yxy gui ava opoi vy amboae re omenda va'e ma itavy, [ha'e opoi pyre re omenda va'e voi itavy avi] — he'i.

10 Ha'e gui ma hemimbo'e kuery ju aipoe'i ixupe:

— Ha'e rami ri avakue gua'yxy kuery reve joguerekoo ramo ha'eveve omenda e'ŷ re ae ikuai aguã.

11 Jesus ombovai:

— Ha'e ramigua ayvu ma pavẽ pegua e'ŷ, amongue pe ete'i, ha'e rami aguã ome'ẽa va'e pe anho.

\* 18:35 Mateus 6.14,15 \* 19:4 Gênesis 1.27, 5.2 \* 19:5 Gênesis 2.24 \* 19:6 Mateus 5.31,32; 1 Coríntios 7.10-16

<sup>12</sup> Mba'eta ikuai itui'i guive omenda e'ŷ va'erāe. Ikuai avi ha'e rami aguã rami avakue ojapo va'ekue. Ha'e amboae ju ikuai avi yva pygua po'akaa rupi vy omenda e'ŷ va'e. Ha'e va'e ayvu rami oiko aguã ha'eve va'e toiko ha'e rami.

*Marcos 10.13-16; Lucas 18.15-17*

<sup>13</sup> Ha'e gui Jesus oña py oguerua kyrīgue, ha'e kuery re opo omoĩ reve onhembo'e aguã. Ha'e ramo herua kuery pe hemimbo'e kuery ijayvu ete.

<sup>14</sup> Ha'e rami rã Jesus aipoe'i:

— Tove tou kyrīgue'i xea py, pejoko eme, mba'eta kova'e ramigua'i peguarã ae yva pygua po'akaa — he'i.

<sup>15</sup> Ha'e vy kyrīgue re opo omoĩ ma rire ojepe'a ha'e gui.

*Marcos 10.17-22; Lucas 18.18-23*

<sup>16</sup> Ha'e jave Jesus oña py peteĩ ou vy oporandu:

— Porombo'ea, mba'e nda'u ajapo 'rã iporã va'e, tekove marã e'ŷ aupity aguã?

<sup>17</sup> Jesus ombovai:

— Mba'e re tu iporã va'e rejapoa re reporandu ri? Heko porã va'e ma peteĩ'i anho oiko. Ha'e gui tekove reupityxe vy ejapo ha'vy ojapo uka pyre — he'i.

<sup>18</sup> Ha'e ramo oporanduve ju ixupe:

— Marã ramigua ojapo uka pyre ha'vy?

Jesus ombovai:

— Ejojuka eme, ndetavy eme, nemonda eme, ndeapu eme,

<sup>19</sup> emboete nderu ha'e ndexy, ha'e gui eayvu neirũ ndee ae rejeayvua rami — he'i.\*

<sup>20</sup> Kunumi va'e aipoe'i:

— Ha'e nunga ha'e javi ajapopa ae ma. Mba'e tu xevy oata teri?

<sup>21</sup> Jesus ombovai:

— Opa mba'e py nderekko porãxe vy tereo, evendepa rerekko va'e ha'e javi, ha'e gui hepykue ma eme'ẽmba iporiaukue'i pe. Ha'e rami vy 'rã rerekko ovareve va'e yva re. Ha'e gui mae ma eju xerupive — he'i.\*

<sup>22</sup> Ha'e rami ijayvu rã kunumi va'e oendu vy iporiau reve ojepe'a, oguerekopa va'e vy.

*Marcos 10.23-31; Lucas 18.24-30*

<sup>23</sup> Ha'e ramo Jesus aipoe'i guemimbo'e kuery pe:

— Anhetẽ aipoa'e pãvy: Haxy ete oguerekopa va'e kuery yva pygua po'akaa py oike aguã.\*

<sup>24</sup> Aipoa'e avi pãvy: Nhanderuete po'akaa py oguerekopa va'e oikea gui ndaxyive juu nambi kua rupi mymba camelo oaxa aguã — he'i.

<sup>25</sup> Hemimbo'e kuery ha'e nunga oendu vy onhemondyipa. Ha'e vy aipoe'i okuapy:

— Ha'e rami vy mba'e xagua 'rã tu oo jepe?

<sup>26</sup> Ha'e kuery re Jesus oma'ẽ vy ombovai:

— Ha'e nunga ma avakue pe haxy ete, ha'e rã Nhanderuete pe ma mba'eve ndaxyi — he'i.

<sup>27</sup> Ha'e ramo Pedro aipoe'i ixupe:

— Ore kuery ma opa mba'e roejapa va'ekue nderupive orekuai aguã. Mba'e 'rã tu ha'vy ore rojopy?

<sup>28</sup> Jesus ombovai:

— Anhetẽ aipoa'e pãvy: Peẽ kuery xerupive peo va'e, opa mba'e ipyaupaa ára py Ava ra'y ojeapo va'ekue tenda openaaty hexakãmba va'e áry oguapy ramo peẽ voi peguapy 'rã doze tenda áry, Israel kuery doze regua ikuai va'e re pepena vy.

<sup>29</sup> Ha'e gui ha'e javi xerery káuxa ngoo oeja va'e, guyvy, gueindy, nguú, oxy, [gua'yxy], gua'y e'ŷ vy oyvy, ha'e kuery ma ojou retave 'rã, ha'e gui tekove marã e'ŷ avi 'rã ouipy.

\* **19:19** Levítico 19.18

\* **19:21** Romanos 3.19,20; Tiago 2.10

\* **19:23** 1 Timóteo 6.6-10

**30** Ha'e rami teĩ tenonde pyguare ma heta 'rã opyta takykue py, ha'e rã takykue pyguare ma tenonde py 'rã ikuai.

## 20

### *Uvaty py omba'eapo va'e kuery omombe'uague*

**1** — Mba'eta yva pygua po'akaa py oiko 'rã peteĩ hoo va'e oikoa rami. Ha'e va'e ma ko'ẽ rai ramove oo omba'e uvaty rupi omba'eapo va'erã reka vy.

**2** Ha'e gui omba'eapo va'erã kuery reve jogueroayvu peteĩ-teĩ pe peteĩ ára repy ome'ẽ aguã re. Ha'e rami vy omondouka uvaty katy.

**3** Kuaray mbyte e'ŷ mbove oo vy tetã mbyte py ojou ikuai rive va'e.

**4** Ha'e vy aipoe'i: "Tapeo peẽ voi uvaty py. Ha'e rã xee ma ha'evea rami 'rã apaga", he'i. Ha'e ramo ha'e kuery avi oo.

**5** — Kuaray mbyte jave teĩgue ju oo, ha'e gui kuaray ojero'a jave guive oo vy ha'ekue rami ae ju jogueroayvu.

**6** Ha'e gui ka'aru rai'i jave ju oo vy amboae kuery ojou ikuai rive va'e. Ha'e vy oporandu ha'e kuery pe: "Mba'e re tu ára pukukue re peĩ rive apy?"

**7** Ombovai: "Mba'eta avave rei noremomba'eapoai", he'i okuapy. Ha'e ramo aipoe'i: "Peẽ voi ke tapeo ha'vy uvaty py."

**8** — Ha'e gui ka'aru jave uvaty ja aipoe'i kapata pe: "Enoĩmba omba'eapo va'e kuery, ha'e epaga. Takykue py oo va'ekue gui remboypy 'rã oo ypy va'ekue peve", he'i.

**9** Ha'e ramo ka'aru rai'i jave omba'eapo va'ekue ou ramo peteĩ-teĩ pe ome'ẽ peteĩ ára repy.

**10** Ha'e gui tenonde py oo va'ekue ju ovaẽ vy oexa'ã ojopy retave aguã re. Ha'e rami teĩ ha'e kuery pe voi peteĩ ára repy ae ome'ẽ.

**11** Ha'e va'e ojopy rire ija re ijayvu rei okuapy.

**12** Ha'e vy aipoe'i: "Peva'e kuery takykue py ou va'ekue tu peteĩ hora ete'i omba'eapo va'eri ore rami ae repaga, ore ára pukukue re kuaray aku roqueropo'aka va'ekue ri", he'i okuapy.

**13** — Ha'e ramo ha'e kuery va'e regua pe ija ombovai vy aipoe'i: "Xeirũ, xee ma ha'eve e'ŷa rami ndoroguerekoi. Ndereve ndorojogueroayvui ri ty ra'e peteĩ ára repy re?

**14** Ejopy ha'vy ndeperáta, tereo, mba'eta takykue py ou va'ekue pe avi ame'ẽxe pêvy ame'ẽa rami.

**15** Nda'evei ri nda'u xee aipotaa rami mba'emo areko va'e aiporu aguã? Tyrã pa rejou vai teve xeporayvua?" he'i.\*

**16** Ha'e rami vy takykue pyguare ma opyta 'rã tenonde py. Ha'e rã tenonde pyguare ma takykue py 'rã opyta. [Mba'eta heta 'rã oenoĩa, ha'e rã mbovy'i 'rã oiporavoa.]

### *Marcos 10.32-34; Lucas 18.31-33*

**17** Jerusalém tetã katy Jesus oo vy doze guemimbo'e kuery oenoĩ ha'e kuery ae'i. Tape rupi oje'oia rupi aipoe'i ha'e kuery pe:

**18** — Pendu ke. Aŷ ma jaje'oi nhainy Jerusalém katy. Ha'e py ma Ava ra'y ojeapo va'ekue omboaxaa 'rã sacerdote yvatekueve va'e ha'e kuaxia re nhombo'e va'ety kuery pe. Ha'e rã ha'e kuery ma ojuka uka 'rã.

**19** Ha'e gui amboae regua kuery pe ju 'rã omboaxa ojavyky rei, oinupã ha'e kuruxu re omoĩ aguã. Ha'e gui ma mboapy araa py onhemboete ju 'rã.

### *Marcos 10.35-45*

**20** Ha'e gui Jesus oĩa py Zebedeu ra'yxy ou opi'a kuery reve. Omboete vy ojerure oipytyvõ aguã re.

**21** Ha'e ramo Jesus oporandu ixupe:

— Mba'e tu reipota?

Kunha va'e ombovai:

\* **20:15** Romanos 9.14-16

— Ndepo'akaa py ma kova'e moko'i xepi'a toguapy pete'i reiporu kuaa regua re, ha'e amboae ma ndeaxua re — he'i.

<sup>22</sup> Ha'e ramo Jesus ombovai:

— Peẽ ndapeikuaai mba'e nunga re pa pejerurea. Ha'eve 'rã ri ty'y karo xee ay'u aguã va'e gui peẽ voi pey'u aguã?

Ombovai:

— Ha'eve 'rã — he'i okuapy.

<sup>23</sup> Ha'e ramo aipoe'i ha'e kuery pe:

— Pey'u 'rãe xekaro gui. Ha'e rã aiporu kuaa regua re ha'e xeaxua re oguapy va'erã ma xee e'ý 'rã aiporavo. Ha'e rami aguã ma Xeru oiporavo va'ekue pe anho — he'i.

<sup>24</sup> Ha'e rã hemimbo'e kuery mboae dez ikuai va'e ma ha'e nunga oendu vy ivai okuapy moko'i joegua pe.

<sup>25</sup> Ha'e ramo Jesus oenoimbä vy aipoe'i:

— Yvy jave regua huvixa kuery ma joguerekö atã 'rã, ha'e kuery va'e regua yvatekueve ipo'aka 'rãe joe.

<sup>26</sup> Ha'e rã pende kuery ma ha'e rami e'ý 'rã pendekuai. Ha'e rami 'rãgue py peẽ kuery va'e regua joegui yvatevexe va'e toiko pavẽ rembiguai rami.\*

<sup>27</sup> Tenondexe va'e ma nhoembiguai rami toiko,

<sup>28</sup> Ava ra'y ojeapo va'ekue rami avi, mba'eta ha'e ma jojokuai aguã e'ý ou, ha'e rã tembiguai rami ou guekove ome'ã aguã heta rekovia, ogueraa jepe aguã.

*Marcos 10.46-52; Lucas 18.35-43*

<sup>29</sup> Ha'e kuery Jericó tetã gui oo jave heta ete oje'oi hupive.

<sup>30</sup> Ha'e jave tape yvýry moko'i ára revegua e'ý oguapy oiny va'e ma Jesus oaxa ovya oendu vy ojapukai:

— Senhor, Davi ramymino, oremboaxy ke! — he'i.

<sup>31</sup> Ha'e ramo heta va'e kuery ijayvu okyrirí aguã. Ha'e rami te'i ha'e kuery ojapukaive tema:

— Senhor, Davi ramymino, oremboaxy ke!

<sup>32</sup> Ha'e ramo optya ho'amy vy oenoí. Oporandu ha'e kuery pe:

— Mba'e tu peipota ajapo pêvy?

<sup>33</sup> Ombovai:

— Senhor, ore ma roexaxe — he'i.

<sup>34</sup> Ha'e ramo Jesus omboaxy vy opoko ha'e kuery rexä re. Ha'e ramove oexa ju, ha'e vy oje'oi hakykue.

## 21

*Marcos 11.1-11; Lucas 19.28-40; João 12.12-15*

<sup>1</sup> Ha'e gui ma Jerusalém py Jesus ovaë rai'i ma vy Betfagé tekao py ranhe ovaë, Oliveiras yvyty katy'i. Ha'e gui omondouka moko'i guemimbo'e. Ha'e vy aipoe'i:

<sup>2</sup> — Tapeo peẽ ranhe peva'e tekao oï va'e py. Ha'e py pejou 'rã pete'i mburika ixã re hi'aí va'e. Ha'e va'e reve pete'i ta'y'i avi hi'aí. Pejora vy ke peru.

<sup>3</sup> Ha'e gui xapy'a rei amongue pendevy ijayvu ramo ha'e kuery pe "Senhor ma oipota" peje 'rã. Ha'e ramo ogueru ruka 'rã pêvy — he'i.

<sup>4</sup> Ha'e nunga oiko ojeupity aguã profeta pe aipoe'i ukaague:

<sup>5</sup> "Aipo'ere Sião pygua kuery pe: 'Pee ma ou oiny penderuvixaverã. Ha'e ma onhemboy-vate va'e'ý vy mburika áry ou, mburika'i ombovoyipy ra'y áry', 're.'"

<sup>6</sup> Ha'e ramo hemimbo'e kuery oo vy Jesus aipoe'iague rami ojapo.

<sup>7</sup> Ha'e vy ogueru mburika ta'y'i reve. Hi'áry omoï oao. Ha'e ramo Jesus oï hi'áry.

\* <sup>20:26</sup> Romanos 12.3,10,16; Filipenses 2.3-8; 1 Pedro 5.3   \* <sup>21:5</sup> Zacarias 9.9

**8** Ha'e gui heta va'e kuery tape rupi oipyo okuapy oao, ha'e amboae kuery ma yvyra rogue ojaya vy onhono avi tape rupi.

**9** Ha'e gui heta va'e kuery tenonde ha'e hakykue oje'oi va'e ojapukai vy aipoe'i:

— Toguerovy'aa Davi ramymino! Ta'ima'endu'a porãa Senhor rery rupi ou va'e re! Toguerovy'aa yvatevea py! — he'i oje'oivy.\*

**10** Jerusalém tetã py ovaẽ ma ramo tetã pygua kuery mava'e paa ndoikuuai vy oporandu okuapy:

— Mava'e tu peva'e?

**11** Ha'e ramo heta va'e kuery ojapukai:

— Peva'e ma profeta Jesus, Galiléia regua Nazaré pygua.

*Marcos 11.15-17; Lucas 19.45,46*

**12** Templo py Jesus oike vy oipe'apa mba'emo vendea ha'e mba'emo joguaa kuery ha'e py ikuai va'ekue. Oitypa guive peráta mboekoviaa kuery mesa, ha'e apykaxu vendea kuery renda.

**13** Ha'e vy aipoe'i ha'e kuery pe:

— Ipara oiny “Xero ma onhembo'e atyrã oĩ” 'ea va'eri peẽ ma pejapo imonda va'e onhemiaty rami.\*

### *Templo py nhombo'eague*

**14** Templo py Jesus oĩa py ou ára rewegua e'ŷ ha'e oguata e'ŷ va'e kuery. Ha'e ramo omonguerapa.

**15** Ha'e rã sacerdote yvatekueve va'e ha'e kuaxia re nhombo'e va'ety kuery ma Jesus mba'emo porã ojapo rã oexa vy ndojou porãi okuapy, ha'e kyrigue “Toguerovy'aa Davi ramymino” he'i okuapy rã oendu vy guive.\* Ha'e rami vy oporandu okuapy ixupe:

— Rendu ma'ã peva'e kuery aipoe'ia?

Jesus ombovai:

— Xee aendu ma. Ha'vy peẽ ndaperoayvui ri ty'y po ramigua: “Kyrigue'i ha'e okambu'i va'e pe ma mboraei iporã ete va'e py rejelerovy'a uka”, he'iague?\*

**17** Ha'e rami vy tetã gui ojepe'a vy Betânia katy ju. Ha'e py ma oke.

*Marcos 11.12-14,20-24*

**18** Ko'ẽ aje'ive'i reve tetã katy ojevya rupi inhembyayi.

**19** Tape yvýry peteñ figo'y hi'aĩ va'e oexa vy ovaẽ ha'e py, teñ mba'eve ndojoui hogue e'ŷ vy. Ha'e rami vy ha'e va'e pe aipoe'i: “Toikove eme nde'a”, he'i ramove figo'y ipirupa vyvoi.

**20** Hemimbo'e kuery ha'e nunga oexa vy onhemondyipa. Ha'e vy aipoe'i:

— Ipiru vyvoi nda figo'y.

**21** Ha'e gui Jesus aipoe'i ha'e kuery pe:

— Anhetê aipoa'e pêvy: Pixa'ã rei 'rãgue py pejerovia ete ramo figo'y re oiko va'ekue ramigua anho e'ŷ 'rã oiko. Kova'e yvyty pe “Ejepe'a, enhemombo ye'ẽ py”, peje ramo voi oiko 'rã.

**22** Pejeroviaa rupi ri penhembo'e vy pejopy 'rã pejerurea.

*Marcos 11.27-33; Lucas 20.1-8*

**23** Templo py Jesus ovaẽ vy nhombo'e oiny. Ha'e ramo sacerdote yvatekueve va'e ha'e heta va'e mongetaaty kuery ombojere rei vy oporandu okuapy:

— Mava'e po'akaa rupi tu ha'e nunga rejapo reikovy? Mava'e tu nembopo'aka?

**24** Jesus ombovai:

— Xee voi aporandu ta pêvy. Xevy pe pembovai ramo xee voi amombe'u 'rã mava'e po'akaa rupi pa ha'e nunga ajapoa.

**25** Maguigua nda'u João Batista nhomongaraia? Yva guigua tyrã pa avakue guigua raka'e? — he'i.

\* **21:9** Salmo 118.26

\* **21:13** Isaías 56.7, Jeremias 7.11

\* **21:15** Marcos 11.18,19; Lucas 19.47,48

\* **21:16**

Salmo 8.2

Ha'e ramo ha'e kuery joo meme ranhe ijayvu okuapy:

— Xapy'a rei "Yva gui", ja'e ramo ha'e ombovai ju 'rā: "Mba'e re ha'vy ndapejeroviai hexe?" he'i 'rā nhandevy.

<sup>26</sup> Ha'e rā "Ava gui", ja'e aguā nda'evei avi, heta va'e kuery gui jakye vy, mba'eta oikuaa pavē João Batista profeta oikoa – he'i okuapy.

<sup>27</sup> Ha'e rami vy aipoe'i Jesus pe:

— Ore ma ndoroikuuai.

Ha'e rā ha'e ju ombovai:

— Xee voi namombe'ui 'rā pēvy mava'e po'akaa rupi pa ha'e nunga ajapo aikovya.

### *Mokoī ta'y reombojojaague*

<sup>28</sup> — Mba'exa tu peikuaa? Oiko peteī ava mokoī ta'y va'e. Tyke'y oīa py oo vy aipoe'i: "Xera'y, tereo aŷ, emba'eapo xemba'e uvaty py."

<sup>29</sup> Ha'e ramo "Ha'eve senhor", he'i va'eri ndooi.

<sup>30</sup> — Ha'e gui tyvy oīa py ju tuu oo vy ha'ekue rami ae ijayvu. Ha'e rā ha'e va'e ma aipoe'i: "Xee ndaa reguai" he'i rire nda'evei nho vy oo.

<sup>31</sup> Mava'e ete nda'u mokoī va'e gui ojapo nguu oipotaa rami?

Ombovai:

— Tyvy rima – he'i okuapy.

Jesus omombe'u porāve ha'e kuery pe:

— Anhetē aipoa'e pēvy: Peē kuery gui imposto re nhombopaga va'ety kuery ha'e kunhague itavy rei va'ekue ranhe 'rā oike Nhanderuete po'akaa py.

<sup>32</sup> Mba'eta João Batista ou vy peē kuery pe oikuaa uka raka'e tape porā, teī peē ma ijayvua ndapejeroviai. Ha'e rā imposto re nhombopaga va'ety kuery ha'e kunhague itavy rei va'e ma oguerovia. Peē ma ha'e nunga pexa va'eri ndapejeko rerovai ijayvua, neī ndaperoviai.\*

### *Marcos 12.1-12; Lucas 20.9-19*

<sup>33</sup> — Pejapyxaka ke mba'emo re ambojoja vy ayvu mboae amombe'u rā. Oiko peteī ava hoo va'e. Ha'e va'e onhotŷ uva, ha'e rire ijyvýry rupi ojapo kora. Ojapo uva oubirí atyrā ha'e torre. Ha'e rami vy omboaxa opena va'erā kuery po py. Ha'e rire oo guekoa gui.

<sup>34</sup> — Hi'a omono'õa ára ovaẽ ramo opena va'e kuerya py ija ombou guembiguai kuery, ojopy aguā uva'a ixupegua.

<sup>35</sup> Ha'e ramo opena va'e kuery hembiguai kuery ojopy vy amongue oinupāmba, amboae ojuka, ha'e rā amboae ma ojapipa ita py.

<sup>36</sup> Ha'e gui ma ija hetave ju ombou guembiguai. Ha'e rā ha'ekue rami ae ju oguereko.

<sup>37</sup> Opa vyguia ombou gua'y ae. Ha'e vy aipoe'i: "Xera'y ete ramo omboete 'rā ko", he'i.

<sup>38</sup> — Ha'e rami teī ombo'eapo va'e kuery ta'y oexa vy aipoe'i joupe-upé: "Peva'e ma uvaty jarā ete. Jajuka teve, uvaty nhandevy ju opyta aguā", he'i okuapy.

<sup>39</sup> Ha'e gui ojopy vy uvaty gui ogueraa vy ojuka.

<sup>40</sup> — Ha'e gui uvaty ja ou vy mba'e nda'u ojapo 'rā opena va'e kuery re?

<sup>41</sup> Ha'e ramo ombovai okuapy:

— Ojuka ukapa 'rā heko vai va'e kuery, ha'e vy amboae kuery pe ju 'rā omboaxa uvaty, hi'a ára py ixupegua ome'ẽ va'erā pe – he'i okuapy.

<sup>42</sup> Ha'e ramo Jesus oporandu ha'e kuery pe:

— Ha'vy peē ndaperoayvui teve ipara oī va'e: "Oo apoa kuery ita ndoipotai va'ekue opyta omboeteve pyrā, tenonde pyguarā. Ha'e nunga ma Senhor gui ae oiko, ha'e jaexa rā iporā ete va'e", he'iague?\*

<sup>43</sup> Ha'e nunga rupi aipoa'e pēvy: Pendegui Nhanderuete oipe'a 'rā opo'akaa, amboae regua pe ju 'rā omboaxa, ixupegua ome'ẽ va'erā kuery pe.

\* <sup>21:32</sup> Mateus 7.21 \* <sup>21:42</sup> Salmo 118.22-23

<sup>44</sup> Ha'e va'e ita re ho'a va'e opẽmba 'rã. Ha'e rã amongue áry ita ho'a ramo iku'ipa 'rã – he'i.

<sup>45</sup> Pova'e ayvu omombe'u rã sacerdote yvatekueve va'e ha'e fariseu kuery oendu vy oikuaa ha'e kuery re ae ri Jesus ijayvua.

<sup>46</sup> Ha'e vy ojopyxe teĩ okyje heta va'e kuery gui, profeta oikoa rami oikuaa pavẽ ramo.

## 22

### *Omendaa py okaru okuapy va'e re ombojojaague*

<sup>1</sup> Teĩgue ju Jesus mba'emo re ombojoja vy ijayvu. Ha'e vy aipoe'i ha'e kuery pe:

<sup>2</sup> — Yva pygua po'akaa py oiko 'rã peteĩ huvixave ta'y omendaa py ngaru ojapo va'e rami avi.\*

<sup>3</sup> Ha'e gui guembiguai kuery omondouka omombe'u aguã omendaa py ou va'erã va'e pe ou aguã, teĩ ha'e kuery ndouxei.

<sup>4</sup> Amboae guembiguai ju omondouka po rami ijayvu reve: "Aipo're ke aenoĩ va'e kuery pe: 'Areko katupa ma ngaru. Xerymba vaka ha'e vaka ra'y ikyra va'e ajuka, ha'e javi oimba ma. Peju ke ngaru oña py', 're 'rã."

<sup>5</sup> — Ha'e rami teĩ ha'e kuery ndoikuua potai vy oje'oipa. Peteĩ oo omba'ety katy, ha'e rã amboae ma vendeaty katy oo.

<sup>6</sup> Amboae kuery ma tembiguai kuery ojopy vy ojavyky rei, ojuka guive.

<sup>7</sup> Ha'e ramo huvixave ipoxy. Ha'e vy xondaro kuery ju omondouka vy ojuka ukapa jojukaare kuery, ha'e omoendy uka ha'e kuery retã.

<sup>8</sup> — Ha'e rire guembiguai kuery pe ju aipoe'i: "Areko katupa ma ngaru teĩ aenoĩ uka va'ekue ma nda'evei amovaẽ aguã.

<sup>9</sup> Ha'e rami ri rã tapeo tape pia ikuai va'e rupi, peovaexi va'e rei penoĩ omendaa py ou aguã", he'i imondovy.

<sup>10</sup> Ha'e ramo tembiguai kuery tape rupi oje'oi vy omboaty ojou va'e ha'e javi, heko porã ha'e heko vai va'e guive. Ha'e rã opy okaru aguã py tynyẽ oenoĩ va'ekue.

<sup>11</sup> — Ha'e gui huvixave oike vy mesa py ikuai va'e oexapa. Oexa avi peteĩ ava omendaa pygua ao py e'ŷ onhemonde va'e.\*

<sup>12</sup> Ha'e vy oporandu ixupe: "Xeirũ, mba'exa tu apy reike omendaa pygua ao remoĩ e'ŷ re?" he'i ramo ha'e va'e nombovai.

<sup>13</sup> — Ha'e ramo huvixave aipoe'i guembiguai kuery pe: "Pejokua ipo ha'e ipy, ha'e pemombo oka katy pytúa py", he'i. Ha'e py ma ojae'opaa ha'e opa marã onhendua 'rã.

<sup>14</sup> Mba'eta heta 'rã oenoĩa, ha'e rã mbovy'i 'rã oiporavoa.

### *Marcos 12.13-17; Lucas 20.20-26*

<sup>15</sup> Ha'e ramo fariseu kuery ojepe'a vy joo meme oikuaa pota okuapy marã rami vy pa omoĩ vai aguã re ayvu py.

<sup>16</sup> Ha'e rami vy guemimbo'e kuery ombou Herodes-a katyguia kuery reve, Jesus pe aipoe'i aguã:

— Porombo'ea, ore roikuua ndee anhetẽ va'ea, ha'e anhetẽ rupi renhombo'e Nhan-deruete oipota va'e re. Neĩ joegui peteĩve ndereayvuvei, mba'eta nderekuaa potai avakue yvatea re.

<sup>17</sup> Ha'e gui aipo'ere ke orevy: Mba'exa tu ndee reikuaa? Ha'evea rami ri nda'u César pe nhame'ẽ imposto repy, tyrã pa any?

<sup>18</sup> Jesus ha'e kuery ija'e e'ŷa oikuaa vy aipoe'i:

— Pendeko porã merami rive va'e, mba'e re tu xerekó a'âxe ri?

<sup>19</sup> Pexa uka ha'vy xevy peteĩ hatã'i va'e imposto peguarã — he'i. Ha'e ramo ixupe ogueru peteĩ hatã'i va'e.

<sup>20</sup> Ha'e rã oporandu ha'e kuery pe:

\* <sup>22:2</sup> Lucas 14.15-24 \* <sup>22:11</sup> 1 Coríntios 6.9-11; Efésios 5.5,6; Apocalipse 19.7,8

— Kova'e re ma mava'e ra'angaa ha'e mava'e rery tu oĩ?

<sup>21</sup> Ombovai okuapy:

— César mba'e rima.

Ha'e ramo aipoe'i ha'e kuery pe:

— César mba'e ri rã peme'ẽ ha'vy César pe. Ha'e rã Nhanderuete pegua ma Nhan-deruete pe ae 'rã peme'ẽ – he'i.\*

<sup>22</sup> Ha'e nunga ha'e kuery oendu vy onhemondyipa reve oejapa oje'oivy.

*Marcos 12.18-27; Lucas 20.27-40*

<sup>23</sup> Ha'e va'e árave oĩa py ou saduceu kuery va'e regua. Ha'e va'e kuery ma ndogueroviai nhanhemboete ju 'rãa. Ha'e gui oporandu okuapy ixupe:

<sup>24</sup> — Porombo'ea, Moisés aipoe'i: “Amongue ta'y e'ý re omano ramo tyvy ju omenda 'rã imeve'ý va'e re, omano va'e ra'yrã va'ekue oguereko aguã”, he'i raka'e.\*

<sup>25</sup> Ha'e gui ikuai raka'e sete joegua. Tujave va'e ma omenda va'ekue ri ta'y e'ý re omano vy gua'xykue oeja guyvy pe.

<sup>26</sup> Ha'ekue rami ae ju oiko tyvy re, mboapya, ha'e gui sete ikuai va'e ha'e javive re.

<sup>27</sup> Ha'e kuery ha'e javi omanomba rire kunha va'e avi omano.

<sup>28</sup> Ha'e gui onhemboete jevya ára nda'u sete joegua ikuai va'e gui mava'e ete'i 'rã oiko kunha va'e me? Mba'eta kunha va'e re sete-ve omenda rire.

<sup>29</sup> Jesus aipoe'i ha'e kuery pe:

— Pejavy, mba'eta ndapeikuuai ipara re oĩa, neĩ Nhanderuete po'akaa.

<sup>30</sup> Mba'eta onhemboetepa ju va'ekue ma nomendaavei, neĩ nanhomomendaavei ma 'rã guive. Ha'e rami 'rãgue py anjo kuery rami 'rã ikuai yva re.

<sup>31</sup> Ha'e gui omanoague gui onhemboetepa ju 'rãa re ndaperoayvui teve Nhanderuete pendevy aipoe'iague:\*

<sup>32</sup> “Xee ma Abraão, Isaque ha'e Jacó Ruete aiko” he'iague? Ha'e ramo ma omanogue Ruete e'ý oiko, ha'e rã oikove va'e Ruete – he'i.\*

<sup>33</sup> Ha'e rami ombo'e rã heta va'e kuery oendu vy onhemondyipa.

*Marcos 12.28-34*

<sup>34</sup> Ha'e gui Jesus saduceu kuery omokyriríague fariseu kuery oendu vy ha'e kuery ju nhomboaty jogueroayvu aguã.

<sup>35</sup> Ha'e gui peteĩ ha'e kuery regua lei re nhombo'e va'ety ou oeko a'ã vy. Ha'e vy oporandu ixupe:

<sup>36</sup> — Porombo'ea, mba'e nunga lei re ojapo uka pyre tu pavẽ gui yvateve va'e?

<sup>37</sup> Jesus ombovai:

— “Reayvu 'rã Senhor Nderuete ndepy'a ha'e javi py, nderekoo ha'e ne'arandua ha'e javi py guive”, he'i va'e.\*

<sup>38</sup> Ha'e va'e ojapo uka pyre ma iporãve ha'e yvateve va'e oĩ.

<sup>39</sup> Ha'e va'e rire ma po rami ju: “Reayvu 'rã neirũ kuery ndee ae rejeayvua rami”, he'i va'e.\*

<sup>40</sup> Pova'e mokoĩ ojapo uka pyre guigua ma lei ha'e profeta kuery nhombo'eague ha'e javi – he'i.

*Marcos 12.35-37; Lucas 20.41-44*

<sup>41</sup> Fariseu kuery ijatypa rã Jesus oporandu ha'e kuery pe:

<sup>42</sup> — Mba'exa tu peikuua Cristo oikoa? Mava'e ramymino tu oiko?

Ha'e kuery ombovai:

— Davi ramymino rima – he'i okuapy.

<sup>43</sup> Jesus aipoe'i:

— Mba'exa tu ha'vy ixupe Davi “Senhor” he'i Nhe'ẽ gui? Mba'eta aipoe'i:

\* <sup>22:21</sup> Romanos 13.7   \* <sup>22:24</sup> Deuteronomio 25.5   \* <sup>22:31</sup> 1 Coríntios 6.14, 15.12-28; 1 Tessalonicenses 4.13-18

\* <sup>22:32</sup> Êxodo 3.6   \* <sup>22:37</sup> Deuteronomio 6.5   \* <sup>22:39</sup> Salmo 118.26

**44** “Senhor aipoe'i xe-Senhor pe: ‘Eguapy ke aiporu kuaa regua re, ndepy guýry nderovaigua kuery amoï e'ÿja ja’, he'i raka'e.”

**45** Ha'e rami vy Davi voi “Senhor” he'i ixupe. Mba'exa tu ha'vy hamymino avi ri oiko? – he'i.\*

**46** Ha'e rã peteïve nombovai kuaai. Ha'e va'e ára guive neï peteïve nda'ipy'a guaxuvei ixupe oporandu aguã mba'emo re.

## 23

*Marcos 12.38-40; Lucas 11.37-52; 20.45-47*

**1** Ha'e ramo heta va'e kuery pe ju Jesus aipoe'i, guemimbo'e kuery guive:

**2** – Kuaxia re nhombo'e va'ety ha'e fariseu kuery oguapy 'rã okuapy Moisés renda py.

**3** Ha'e nunga rupi pejapo ha'e pemoï porã 'rã ha'e kuery ojapo uka va'e ha'e javi. Ha'e rami teï peiko eme ha'e kuery ikuaria rami, mba'eta ha'e kuery nhombo'e teï ndojapoi 'rã oayvua ae.

**4** Ha'e kuery ma nhombovoyi raxa 'rã [ndogueropo'akai va'erã py], ijaxi'y áry oupi va'e rami. Ha'e rami teï ha'e kuery ma neï okuã py voi nanhopytyvõi 'rã.

**5** Ha'e kuery ikuaria ha'e javi ma amboae kuery oexa aguã rive. Ha'e rami vy lei ryru'i ipyve va'e anho ojee ojokua, ha'e oao apy voi ombopotypa 'rã ipukuve va'e py.\*

**6** Okarua py ha'e onhembo'eaty py oguapy 'rã tenda tenondeve oï va'e py anho.

**7** Tetã mbyte rupi ikuai vy oipota 'rã avakue oxarura vy “Xembo'ea” he'i aguã.

**8** – Ha'e rã peë ma pendejeupe “Xembo'ea” peje uka aguã nda'evei, mba'eta peteï'i anho oiko penembo'ea, ha'e rã peë ma joegua'i meme pendekuai.

**9** Ha'e apy yvy re avave rei pe “Oreru” peje eme, mba'eta Penderu peteï'i oiko yva pygua.

**10** Neï joupe “Xererekoa” peje aguã nda'evei, mba'eta peteï'i oiko pendererekoa. Ha'e va'e ma Cristo.

**11** Ha'e rã peë kuery regua yvatekueve va'e ma pavë rembiguai rami 'rã pendekuai.

**12** Ha'e javive onhembooyvateve va'ekue ma omo'yvy'iave 'rã. Ha'e rã onhemo'yvy'i ve'ekue ma ombooyvateave 'rã.

*Jesus “Nda'evei ete 'rã”, he'iague*

**13** – Peë kuery kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta yva pygua po'akaa rokë pemboty amboae kuery oike e'ÿ aguã. Mba'eta peë ndapeikei 'rã, ha'e oikexe va'e pejokopa.

**14** [– Peë kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta peipe'a rivepa 'rã imeve'ÿ va'e kuery ro gui. Ha'e penhemboeko porã ukaxe vy penhembo'e are 'rã. Ha'e nunga rupi pepaga raxa ete 'rã.]

**15** – Peë kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta ye'ë ha'e yvy jave rupi peo 'rã peteï'i ri jepe pejou aguã penemimbo'erã. Ha'e gui pejou vy tata ogue'ÿ va'e pyguarã pemoingo pendegui heko vaive va'e.

**16** – Peë kuery pe nda'evei ete 'rã, joguerekao ára revegua e'ÿ rami pendekuai ramo. Aipopeje 'rã: “Henda iky'a e'ÿ va'e ropy mba'emo oï va'e re jaura teï ovare va'e'ÿ. Ha'e rã henda iky'a e'ÿ va'e ropy ouro oï va'e re ri jaura rire jajapo 'rãe jauraague”, peje.

**17** Hi'arandu e'ÿ ha'e ára revegua e'ÿ pendekuai va'e, mava'e tu joegui omboetevepy: ouro rive, tyrã pa henda iky'a e'ÿ va'e? Mba'eta henda iky'a e'ÿ va'e ma ojapo ouro avi iky'a e'ÿ va'e opyta aguã.

**18** – Peë kuery aipopeje avi: “Altar re jaura teï ovare va'e'ÿ. Ha'e rã altar áry omoï mbyre re ri jaura rire jajapo 'rãe jauraague”, peje.

\* **22:45** Romanos 1.3,4 \* **23:5** Judeu kuery gueko rami vy ngova ha'e ojyva re ojokua 'rã hyru'i lei regua ayvu oïa.

<sup>19</sup> Ára revegua e'ŷ pendekuai va'e, mba'e tu joegui omboetevepy: mba'emo ome'ẽ mbyre, tyrã pa altar? Mba'eta altar ma ojapo hi'áry oĩ va'e avi iky'a e'ŷ va'e opyta aguã.

<sup>20</sup> Mba'eta altar re amongue oura va'e ma ha'e va'e re anho e'ŷ, altar áry oĩ va'e ha'e javi re avi oura.

<sup>21</sup> Ha'e henda iky'a e'ŷ va'e ropy re amongue oura va'e ma ha'e va'e re oura, ha'e ha'e py oiko va'e re avi.

<sup>22</sup> Ha'e yva re amongue oura va'e ma Nhanderuete renda openaaty re oura, guenda py oguapy oiny va'e re avi.

<sup>23</sup> — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta dízimo peme'ẽ hortelã, endro ha'e cominho regua gui, ha'e rã lei regua ojapo uka pyre yvateve va'e rupi ma ndapeikoxei: ha'e va'e ma pendeko porã aguã, penhomboaxy ha'e pejerovia aguã. Ha'e va'e rupi voi pendekuai 'rãgue, amboae nunga pejapoa rami avi.

<sup>24</sup> Ára revegua e'ŷ joguerekao pendekuai va'e, karo gui nhexõ pemoẽ va'eri pemokõ camelio oĩ va'e.

<sup>25</sup> — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta hi'árykue rupi rive pejoi karo ha'e hy'a. Ha'e rã pendepy'apy py ma oĩ pejokorea ha'e pejejoko e'ŷa anho.<sup>†</sup>

<sup>26</sup> Fariseu kuery ára revegua e'ŷ, karo ryepy rupi oĩ va'e ranhe peiky'a'o. Ha'e ramo ma hi'árykue rupi avi 'rã nda'iky'ai.

<sup>27</sup> — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta omano va'ekue ryru omoxiimba pyre rami pendekuai. Ha'e nunga ma hi'árykue rupi iporã rei, ha'e rã ipy rupi ma omano va'ekue kãgue ha'e opa marãguia ky'akue oĩ.

<sup>28</sup> Ha'e rami ae avi peẽ kuery voi avakue penderexa rã heko porã va'e merami peiko, ha'e rã pendepy'a re ma pendeko porã merami rivea ha'e pendeko vaia anho oĩ.

<sup>29</sup> — Peẽ kuaxia re nhombo'e va'ety ha'e fariseu kuery pe nda'evei ete 'rã. Heko porã merami rive va'e pendekuai, mba'eta profeta kuery rupa áry guarã pejapo oo ra'angaa'i, ha'e pemoatyrõmba 'rã guive heko porã va'e onhono porãague.

<sup>30</sup> Ha'e vy aipopeje: "Nhaneramoĩ kuery ikuai jave ma voi jaiko va'e rire ha'e kuery rami profeta jukaa rupi nhande ndajaikoi 'rãgue", peje.

<sup>31</sup> Ha'e rami vy pendejee ae pendeayvu profeta jukaare ramymino kuery peikoa rami.

<sup>32</sup> Pejapopa ha'vy penamoĩ kuery omboypy va'ekue.

<sup>33</sup> Peẽ mboi joxu'u va'e regua, mba'exa 'rã tu peo jepe tata ogue e'ŷ va'e py pepaga aguã gui?

<sup>34</sup> Ha'e nunga rupi peẽ kuery pe xee ambou 'rã profeta ha'e hi'arandu va'e kuery penembo'earã. Ha'e va'e kuery regua amongue pejuka 'rã kuruxu re pemoĩ vy. Ha'e rã amboae kuery ma peinupã 'rã penhembo'eaty py, ha'e tetã nhavõ gui pemoxẽ 'rã,

<sup>35</sup> peẽ kuery ae pepaga aguã heko porã va'e ruguy omoëague ha'e javi re, heko porã va'e Abel ruguy omoëague guive'i Baraquias ra'y Zacarias ruguy omoëa peve. Ha'e va'e ma pejuka va'ekue henda iky'a e'ŷ va'e ha'e altar mbyte.

<sup>36</sup> Anhetẽ aipoa'e pêvy: Aŷguia kuery re ha'e nunga rekovia ha'e javi 'rã ou.

### *Lucas 13.34,35*

<sup>37</sup> — Jerusalém, Jerusalém, profeta kuery jukaaty, ha'e ndea py ombou pyre kuery ita py rejapipa va'ety. Mbovykue rei e'ŷ xee aikuavãmbaxe teĩ nememby kuery, uru gua'y kue'iry opepo py ojao'ipaa rami. Ha'e rami teĩ peẽ kuery ndapeipotai.

<sup>38</sup> Ha'e rami rire pendero opyta rivepa 'rã.

<sup>†</sup> **23:25** Lei re nhombo'e va'ety ha'e fariseu kuery opa marãguia ojoi va'erã okaru e'ŷ mbove, nonhemongy'a ukaxeiy (Marcos 7.3,4). Ha'e rã apy ma Jesus ijayvu ha'e kuery py'a re iky'a va'e oña re.

**39** Aipoa'e porã pêvy: Peẽ kuery ndaxerexavei ma 'rã, ovaẽ e'ŷa ja “Ta'ima'endu'a porãa Senhor rery rupi reju va'e re” peje aguã ára.\*

## 24

### *Marcos 13.1,2; Lucas 21.5,6*

**1** Templo gui Jesus oẽ ov yave hemimbo'e kuery hexe onhemboja vy ixupe oexa uka templo mba'emo porã gui anho ojapoague.

**2** Ha'e ramo aipoe'i ha'e kuery pe:

— Peexa pa peva'e nunga ha'e javi? Anhetẽ aipoa'e pêvy: Oitypaa ramo peteïve ita ndopytai 'rã amboae ita áry.

### *Marcos 13.3-13; Lucas 21.7-19*

**3** Oliveiras yvyty py Jesus oguapy oiny jave hemimbo'e kuery onhemboja ju hexe. Ha'e vy oporandu okuapy:

— Emombe'u na orevy: Araka'e 'rã tu ha'e nunga oiko? Mba'e nunga tu oiko 'rã roikuua aguã reju jevy taa, ha'e ára opa ta maa?

**4** Ombovai:

— Penheangu ke ha'vy penhembotavy uka e'ŷ aguã avave rei pe.

**5** Mba'eta heta 'rã ou xerery rupi “Xee ae ma Cristo” he'i rive va'e. Ha'e rami vy heta 'rã ombotavy.

**6** Pendu avi 'rã “Joe opu'ã ma”, e'ŷ vy “Joe opu'ã 'rã” 'ea rã. Peikuaa pota ke penhemondyi e'ŷ aguã, mba'eta ha'e nunga ranhe 'rãe oiko teĩ opa aguã e'ŷ teri.

**7** Peteï-teĩ tetã pygua kuery opu'ã 'rã amboae tetã pygua kuery re, ha'e peteï-teĩ regua amboae regua re 'rã opu'ã. Opa rupi oiko 'rã karuai ha'e yvy ryryi.

**8** Pova'e nunga ha'e javi ma ikuai axya ypy'i aguã.

**9** — Ha'e va'e jave penembojexavai ha'e pendejukaa 'rã. Xerery káuxa pavẽ nda'ija'ei 'rã pendere.

**10** Ha'e va'e jave heta 'rã ojeity uka vy jojopy uka ndajoayvuvei vy.

**11** Heta 'rã ikuai profeta ramigua rive, heta 'rã ombotavy.

**12** Ha'e gui heta-etave heko vai ramo pavẽ rai ojepa'e 'rã porayvua gui.\*

**13** Ha'e rã opa peve oĩ atã va'e ma oo jepe 'rã.

**14** Nhanderuete po'akaa regua ayvu porã omombe'ua 'rã yvy jave re, ha'e javi regua oikuua aguã. Ha'e gui mae ma opa ete 'rã.

### *Marcos 13.14-23; Lucas 21.20-24*

**15** — Ha'e gui henda iky'a e'ŷ va'e py pexa 'rã ojeguarupy nhomokanhyarã oĩ rã, profeta Daniel omombe'u ma voi va'ekue. (Tove ogueroayvu va'e toikuua.)\*

**16** Ha'e ramo Judéia pygua kuery tonhamba yvyty re.

**17** Ngoo áry oĩ va'e totegejy eme ngopy gui mba'emo oguenoẽ aguã,

**18** ha'e mba'ety rupi ikuai va'e tojevy eme guive oparito ogueraa aguã.

**19** Ha'e va'e ára nda'evei 'rã imemby ryru'i ha'e imemby kambu va'e pe.

**20** Pejerure ke yro'y py e'ŷ penha aguã, neĩ sábado ára py voi,

**21** mba'eta ha'e va'e ára py ma ojexavaia ete 'rã. Jypy'i guive aŷ peve ndoikoi teri ha'e ramigua ete, neĩ ndoikovei ma 'rã guive ha'e rami.

**22** Ha'e va'e ára Nhanderuete nomomba voi va'e rire avave rei ndoo jepei 'rãgue. Va'eri ojeupe guarã oiporavo va'ekue re oma'ẽ vy omomba voi 'rã.

**23** — Ha'e gui amongue pêvy aipoe'i 'rã: “Ma'ẽ, apy ma Cristo”, e'ŷ vy “Pee py ma hiny”, he'i ramo perovia eme,

---

\* **23:39** Romanos 11.25-27 \* **24:12** Apocalipse 6.1-17; 2 Timóteo 3.1-9 \* **24:15** Daniel 9.27; 11.31; 12.11

<sup>24</sup> mba'eta oiko 'rãe Cristo ramigua ha'e profeta ramigua rive. Ha'e kuery voi ojapo 'rã hexa pyrã ha'e nhomondyipaarã oiporavo pyre kuery voi ombotavy aguã teĩ, ha'e eve va'e rire.

<sup>25</sup> Peiko kuaa pota ke, xee romonheangu ma voi.

<sup>26</sup> Ha'e nunga rupi xapy'a rei pãvy "Tekoa e'þa py Cristo oĩ", 'ea ramo tapeo eme. Xapy'a rei "Pee oopy ma hiny", 'ea ramo perovia eme.

<sup>27</sup> Mba'eta overa va'e minha kuaray oua katy gui oẽ vy oikea peve ojekuaa va'e rami avi ojekuaa 'rã Ava ra'y ojeapo va'ekue ou rã.

<sup>28</sup> Mamo rã te'ðgue ituia py xapirã onhemboaty 'rã okuapy.

*Marcos 13.24-27; Lucas 21.25-28*

<sup>29</sup> — Ha'e va'e ára ojexavaia rire'ive kuaray pytãmba 'rã, jaxy voi naendyvei 'rã. Jaxy-tata ho'apa 'rã yva gui, ha'e yva re ipo'akakueve ikuai va'e voi oitypaa 'rã.\*

<sup>30</sup> Ha'e gui yva re ojekuaa 'rã hexa pyrã Ava ra'y ojeapo va'ekue guigua. Ha'e ramo ha'e javi regua yvy re ikuai va'e ojae'o 'rã okuapy oexa vy Ava ra'y ojeapo va'ekue yva gui ou rã arai rupi, opo'aka ha'e guexakãmba reve.\*

<sup>31</sup> Ha'e vy mimby guaxu onhe'ẽ atã reve omondouka 'rã guembiguai anjo kuery. Ha'e kuery omboatypa 'rã heruvy hembiporavo kuery irundy henda yvvytu oipejua gui, yva guy jobaive gui.

*Marcos 13.28-37; Lucas 21.29-36*

<sup>32</sup> — Peikuua pota ke figo'y re mba'emo ambojoja vy amombe'u rã. Mba'eta hakã ipyaupa ha'e hogue hokypa rã pexa vy peikuua 'rã ára pyau ovaẽ rai'i maa.

<sup>33</sup> Ha'e rami ae avi peẽ kuery voi xeayvuague ha'e javi oiko rã pexa vy peikuua 'rã xe'ára ovaẽ rai'i maa, okẽ py ae.

<sup>34</sup> Anhetẽ aipoa'e pãvy: Aÿguia kuery opa e'þ re ha'e nunga ha'e javi oiko 'rã.

<sup>35</sup> Opa 'rã yva ha'e yvy. Ha'e rã xeayvuague ma ndoaxa rivei 'rã.

<sup>36</sup> — Ha'e rami teĩ ha'e va'e ára ha'e hora raka'e paa avave rei ndoikuuai, neĩ anjo kuery yva pygua, neĩ xee Ta'y voi ndaikuuai. Xeru anho'i oikuua.

<sup>37</sup> Ava ra'y ojeapo va'ekue oua ára ma Noé oiko jave py oikoague rami avi 'rã oiko.

<sup>38</sup> Mba'eta yy ou e'þa ja okarua ha'e oy'ua okuapy, omendaa ha'e nhomomendaa guive, kanoã py Noé oikea ára peve.

<sup>39</sup> Noexa'ãi rei okuapy raka'e, yy ou vy ogueroxyrypa heravya ára peve. Ava ra'y ojeapo va'ekue ou jave voi ha'ekue rami ae 'rã oiko.

<sup>40</sup> Ha'e va'e jave py mokoõ 'rã ikuai mba'ety py. Peteĩ heraa 'rã, ha'e rã amboae ma oejaai 'rã.

<sup>41</sup> Mokoõ kunhague ombo'eapo 'rã omongu'ia py. Peteĩ heraa 'rã, ha'e rã amboae ma oejaai 'rã.

<sup>42</sup> Ha'e nunga rupi peiko kuaa pota, mba'eta ndapeikuuai mba'e ára pa pende-Senhor ou 'rãa.

<sup>43</sup> Peikuua pota ke pova'e nunga re: Hoo va'e ma mba'e hora pa imonda va'e ovaẽ 'rãa oikuua va'e rire oikuua pota 'rãgue ngopy gui ogueraa ukapa e'þ aguã.

<sup>44</sup> Ha'e nunga rupi peẽ voi peiko kuaa pota, mba'eta napexa'ãi rei jave Ava ra'y ojeapo va'ekue ou 'rã.\*

*Lucas 12.42-46*

<sup>45</sup> — Ha'e gui mava'e nda'u peiko tembiguai ojeroviapy ha'e joe opena kuaa va'e? Ha'e ramigua ma ipatõ omoõ 'rã oirã kuery okaru aguã hora py omongaru aguã.

<sup>46</sup> Ovy'a ete 'rã tembiguai ipatõ ou rã ha'e rami ojapo va'e.

<sup>47</sup> Anhetẽ aipoa'e pãvy: Ha'e va'e pe opena uka 'rã opa mba'e oguereko va'e re.

<sup>48</sup> Ha'e rã xapy'a rei ha'e va'e tembiguai heko vai vy ojeupe ae "Xepatõ ndou voi 'rã teve", he'i 'rã.

49 Ha'e rami vy oinupāmba 'rā oirū kuery. Ha'e rā oka'u va'e kuery reve ma okaru ha'e oy'u 'rā.

50 Ha'e rami vy tembiguai noexa'āi reia ára ha'e ndoikuuai reia hora 'rā ipatō ou.

51 Ha'e rami rire ombopaga vy oguereko axy 'rā heko porā merami rive va'e kuery reve. Ha'e ramo ojae'o ha'e opa marā 'rā onhendu.

## 25

### *Dez kunhataīgue re ombojojaague*

1 — Ha'e va'e jave yva pygua po'akaa py oiko 'rā dez kunhataīgue guataendy ogueraa vy omenda va'e ovaexī aguā oje'oi va'e rami avi.

2 Ha'e kuery regua peteī nhiruī hi'arandu e'ŷ va'e, ha'e rā peteī nhiruī ma hi'arandu va'e.

3 Hi'arandu e'ŷ va'e kuery ma guataendy ogueraa, ha'e rā tykue ma ndogueraai.

4 Ha'e rā hi'arandu va'e kuery ma tataendy reve tykue avi ogueraa hyru py.

5 Ha'e gui ma omenda va'erā ndou voi ramo kunhataīgue hopeyipa. Ha'e vy okepa.

6 — Pytū mbyte jave onhendu peteī ojapukai va'e: "Ou ma oiny omenda va'erā. Peē ke peovaexī", he'i va'e.

7 Ha'e ramo kunhataīgue ha'e javive opu'ā vy omoatyrō guataendy.

8 Ha'e ramo hi'arandu e'ŷ va'e kuery aipoe'i oirū kuery hi'arandu va'e pe: "Pemboja'o na orevy penderataendy rykue, mba'eta orerataendy ma ogue ta ma", he'i okuapy.

9 — Ha'e ramo hi'arandu va'e kuery ombovai: "Nda'evei teve, orevy oata e'ŷ aguā, ha'e pēvy voi. Tapeo ivendeaty py pejogua aguā", he'i.

10 Ha'e gui ha'e kuery ojogua aguā oje'oi jave ovaē ma omenda va'erā. Ha'e ramo ngarua py oiko katu valekue oike oje'oivy hupive. Ha'e gui okē ombotya.

11 — Are ma jave kunhataīgue hi'arandu e'ŷ va'e ovaē vy ojapukai: "Senhor, Senhor, eipe'a ke okē orevy", he'i okuapy.

12 — Ha'e ramo ombovai: "Anhetē aipoa'e pēvy: Peē ma xee aikuaa va'e'ŷ", he'i.

13 Ha'e nunga rupi peiko kuaa pota, mba'eta ndapeikuuai ára, neī hora.\*

### *Peráta oiporuka pyre re ombojojaague*

14 — Ha'e nunga oiko 'rā peteī ava oyvy gui oo ta ma vy guembiguai kuery oenoī va'e rami avi. Ha'e va'e ma guembiguai kuery pe oiporuka mba'emo oguereko va'e.

15 Ha'e vy jypygua pe ome'ē peteī nhiruī poyikue prata guigua, amboae pe ma mokoī, ha'e rā opa vygua pe ma peteī'i poyikue ome'ē. Peteī-teī oiporu kuaa-a rami ome'ē. Ha'e gui mae ma oo.

16 — Peteī nhiruī poyikue jopyare oo voi mba'emo ojogua aguā. Ha'e vy teī nhiruī mboae ju onganave.

17 Ha'e rami ae mokoī poyikue jopyare voi mokoī ju ongana.

18 Ha'e rā peteī'i jopyare ma oo vy ojo'o yvy, ha'e ojaty opatō peráta.

19 — Yma ete ma rire tembiguai kuery patō ojevy. Ha'e vy oikuaa pota ha'e kuery ojapoague re.

20 Ha'e ramo teī nhiruī poyikue jopyare ou vy teī nhiruī mboae ju ogueru. Ha'e vy aipoe'i: "Senhor, xevy pe reiporuka va'ekue peteī nhiruī poyikue prata guigua. Koo, aru peteī nhiruī mboae ju angana va'ekue."

21 — Ixupe ipatō aipoe'i: "Ha'evea rami, tembiguai porā ha'e ojeroviapy reiko va'e. Mbovy'i va'e re repena kuaa rire romoī 'rā heta va'e re ju repena aguā. Eike ke xee nepatō reve javy'a aguā py", he'i.

22 — Ha'e gui mokoī poyikue jopyare ou vy aipoe'i: "Senhor, mokoī poyikue xevy reiporuka. Apy mokoī ju aru angana va'ekue."

\* 25:13 1 Tessalonicenses 5.1-3

<sup>23</sup> — Ixupe ipatō aipoe'i: “Ha'evea rami, tembiguai porā ha'e ojeroviapy reiko va'e. Mbovy'i re repena kuaa rire romoī 'rā heta va'e re ju repena aguā. Eike ke xee nepatō reve javy'a aguā py”, he'i.

<sup>24</sup> — Opa vyguā ovaē peteī'i poyikue jopyare. Ha'e vy aipoe'i: “Senhor, xee aikuua rā ndee porayvu va'e'ŷ. Mba'eta renhotŷague gui e'ŷ 'rā remono'ō, ha'e remoañague gui e'ŷ 'rā remoa'yīgue, xee aikuua rā.

<sup>25</sup> Ha'e rami vy akyje vy peráta reiporuka va'ekue anhomí karamboae vvy guy py. Koo, aru ju nemba'e peráta”, he'i.

<sup>26</sup> — Ha'e rami rā ipatō ombovai: “Tembiguai porā e'ŷ ha'e inhate'ŷ va'e, reikuua va'e ri ty'y anhotŷague gui e'ŷ amono'ōa ha'e amoñañague gui e'ŷ amo'a'yīgue?

<sup>27</sup> Ha'e rami vy xeperáta reiporu uka va'e rire peráta porua kuery pe, xee ajevy vy hetave ju ajopy aguā.”

<sup>28</sup> Ha'e gui amboae kuery pe ju aipoe'i: “Peipe'a ixugui prata guigua, ha'e dez oguereko va'e pe ju peme'ē.

<sup>29</sup> Mba'eta mba'emo oguereko va'e pe ome'ēave 'rā, oguereko retave aguā. Ha'e rā oguereko e'ŷ va'e gui ma oguereko'i va'e voi oipe'aa 'rā.

<sup>30</sup> Ha'e gui tembiguai ovare'ŷ va'e ma pemombo oka py, pytūa py. Ha'e py ma ojae'opaa vy opa marā 'rā onhendu okuapy.”

### *Nhomboayvu aguā ára re ijayvua*

<sup>31</sup> — Mba'eta Ava ra'y ojeapo va'ekue ou 'rā guexakā ha'e anjo kuery ha'e javive reve. Ha'e rami vy guexakāa py oguapy 'rā oiny tenda openaaty áry.

<sup>32</sup> Ha'e gui henonde omboatypaa 'rā vvy regua kuery ha'e javi. Ha'e ramo peteī-teī omboja'o 'rā joa gui, vexa'i re opena va'e kavara mbyte gui guymba kuery omboja'oa rami avi.

<sup>33</sup> Mba'eta omoī 'rā vexa'i kuery oaxu e'ŷa re, ha'e rā kavara kuery ma oaxua re 'rā omoī.

<sup>34</sup> Ha'e gui oaxu e'ŷa re ikuai va'e pe huvixave aipoe'i 'rā: “Xeru penembovy'a va'e, peju ke. Peike ke ipo'akaa py yvy itui ypy'i guive pendevy oguereko katu va'ekue pejopy aguā.

<sup>35</sup> Mba'eta akaruxe ramo peme'ē ha'u va'erā. Xey'uvei ramo peme'ē ay'u aguā. Peēa rupigua e'ŷ aiko ramo xemovaē.

<sup>36</sup> Ndaxeaoysi ramo xemonhemonde. Xemba'eaxy rā xepou. Nhuā py xembotya rā peju xerexa aguā”, he'i.

<sup>37</sup> — Ha'e ramo heko porā va'e kuery oporandu 'rā: “Senhor, araka'e tu rekaruxe rā roexa vy rome'ē re'u va'erā, ha'e ndey'uvei rā roexa vy rome'ē rey'u aguā?

<sup>38</sup> Araka'e tu oreia rupigua e'ŷ reiko rā roexa vy romovaē, ha'e nandeaovei rā romonhemonde?

<sup>39</sup> Araka'e tu nemba'eaxy, e'ŷ vy nhuā py reī rā roexa vy roo roipou?” he'i okuapy.

<sup>40</sup> — Ha'e ramo huvixa ombovai vy aipoe'i 'rā ha'e kuery pe: “Anhetē aipoa'e pêvy: Kova'e xe-irmāo kuery yvyīgueve'i va'e pe ha'e nunga pejapo nhavō xevy pe avi pejapo”, he'i.

<sup>41</sup> — Ha'e gui oaxua re ikuai va'e pe ju huvixa ijayvu vy aipoe'i 'rā: “Ayvu vaipy pendekuai va'e, pejope'a ke xea gui. Tapeo tata ogue e'ŷ va'e anha ha'e hembiguai kuery pe oguereko katu pyre katy.

<sup>42</sup> Mba'eta akaruxe teī napeme'ēi ha'u va'erā. Xey'uvei teī napeme'ēi ay'u aguā.

<sup>43</sup> Peēa rupigua e'ŷ aiko ramo naxemovaēi. Ndaxeaoysi teī naxemonhemondei. Xemba'eaxy, ha'e nhuā py aī ramo ndapeoi xerexa aguā”, he'i.

<sup>44</sup> — Ha'e ramo ha'e kuery oporandu 'rā ixupe: “Senhor, araka'e tu rekaruxe rā roexa, e'ŷ vy ndey'uvei rā, oreia rupigua e'ŷ reiko, e'ŷ vy nandeaovei rā, nemba'eaxy, ha'e e'ŷ vy nhuā py reī rā roexa teī noroipytyvōi?”

<sup>45</sup> — Ha'e ramo ombovai 'rā: “Anhetē aipoa'e pêvy: Kova'e kuery yvyīgueve'i ikuai va'e pe ha'e nunga ndapejapo nhavō, xevy pe avi ndapejapo”, he'i.

**46** Ha'e gui ha'e va'e kuery oo 'rā ikuai axy riae aguā katy. Ha'e rā heko porā va'e kuery ma tekove marā e'ŷ katy 'rā oo.\*

## 26

*Marcos 14.1,2; Lucas 22.1,2; João 11.45-53*

**1** Ha'e nunga re Jesus nhombo'epa vy aipoe'i guemimbo'e kuery pe:

**2** — Mokoī araa py oiko 'rā ngaru Páscoa regua, peikuaa. Ha'e gui Ava ra'y ojeapo va'ekue omboaxaa 'rā kuruxu re omoña aguā — he'i.

**3** Ha'e gui ma sacerdote yvatekueve va'e ha'e heta va'e monetaaty kuery nhomboaty okuapy sacerdote yvateve va'e Caifás hery va'e ro py.

**4** Ha'e py jogueroayvu Jesus ojopy nhemi vy ojuka aguā re.

**5** Ha'e vy aipoe'i okuapy:

— Ngaru oiko jave ma nda'evei, heta va'e kuery opu'āmba e'ŷ aguā.

*Marcos 14.3-9; João 12.1-8*

**6** Ha'e gui Betânia tetā py Simão lepra oguereko va'ekue ro py Jesus oī jave

**7** hexe onhemboja peteī kunha. Peteī hyru ogueru ita xiī va'e guigua, heakuā porā va'e hepyve va'e tynyē va'e. Ha'e va'e ma mesa py Jesus oī jave onhoē inhakā re.

**8** Ha'e nunga hemimbo'e kuery oexa vy ndojou porāi. Ha'e vy joupe-upé aipoe'i:

— Mba'erā tu guĩ rami ojavyky rei?

**9** Mba'eta peva'e heakuā porā va'e ma heta peráta re ovende va'e rire, iporiaukue'i pe ome'ẽ aguā — he'i.

**10** Ha'e rami ijayvua Jesus oikuua vy aipoe'i ha'e kuery pe:

— Mba'e re tu pendeayvu rei kova'e kunha va'e re? Mba'eta mba'emo porā ete ojapo xevy.

**11** Ha'e rami avi iporiaukue'i ikuai riae 'rā pendereve. Ha'e rā xee ma ndaxerexa riae 'rā.

**12** Kova'e kunha ma xerete re heakuā porā va'e onhoē xenhono porāa rā guarā.

**13** Anhetē aipoa'e pēvy: Mamo rā yvy jave re kova'e ayvu porā omombe'ua py omombe'ua avi 'rā kunha va'e ojapo va'ekue, hexe ima'endu'aa vy.

*Marcos 14.10,11; Lucas 22.3-6*

**14** Ha'e gui hemimbo'e kuery doze ikuai va'e regua Judas Iscariotes hery va'e oo sacerdote yvatekueve va'e ikuiaia py. Ha'e vy aipoe'i ha'e kuery pe:

**15** — Mba'e tu peme'ẽ ta xevy, pendepo py amboaxa aguā? — he'i ramo ixupe opaga trinta hatā'i va'e prata guigua.

**16** Ha'e va'e ára guive oikuua pota oikovy ha'eve jave ojopy uka aguā re.

*Marcos 14.12-16; Lucas 22.7-13*

**17** Ngaru mbojape imbovua revegua e'ŷ ijypyá ára ma hemimbo'e kuery ou Jesus-a py. Ha'e vy oporandu okuapy:

— Mamo tu reipota roguereko katu Páscoa ára py jakaru aguā?

**18** Ombovai:

— Tapeo ha'vy tetā py peteī ava oĩa py. Ixupe aipopeje: “Orembo'ea aipoe'i uka kuri: ‘Xe'ára ovaẽ rai'i ma. Páscoa ára py rokaru 'rā ndero py xeremimbo'e kuery reve’, he'i uka”, peje.

**19** Ha'e ramo Jesus ijayvuague rami ha'e kuery ojapo vy oguereko katu Páscoa py okaru okuapy aguā.

*Marcos 14.17-21; Lucas 22.21-23; João 13.21-30*

**20** Ka'aru'i ma jave doze guemimbo'e kuery reve ikuai mesa py.

**21** Okaru okuapy jave Jesus aipoe'i:

— Anhetē aipoa'e pēvy: Peẽ kuery regua peteī va'e xejopy uka nhemi 'rā — he'i.

**22** Ha'e ramo ha'e kuery iporiaupa vy omboypy peteī-teī ixupe oporandu aguā:

---

\* **25:46** Apocalipse 20.11-15

— Senhor, xee teve?

<sup>23</sup> Ombovai:

— Xereve hy'a py opo'ẽ va'e ae 'rã xejopy uka nhemi.

<sup>24</sup> Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemiarare pe ma nda'evei ete 'rã. Ixupe ha'eveve 'rãgue ndoikoi ma voi va'e rire — he'i.

<sup>25</sup> Ha'e ramo ijopy uka nhemiarã Judas oporandu:

— Xembo'ea, xee teve?

Jesus ombovai:

— Ndee ae aipo're — he'i.

*Marcos 14.22-26; Lucas 22.14-20; 1 Coríntios 11.22-25*

<sup>26</sup> Okaru okuapy jave Jesus ojopy peteĩ mbojape. Nhanderuete oguerovy'a ma vy oipe'ã-pe'ã'i, ha'e guemimbo'e kuery pe ome'ẽ vy aipoe'i:

— Pejopy, pe'u. Kova'e ma xerete — he'i.

<sup>27</sup> Ha'e rire karo ju ojopy. Oguerovy'a ma vy ombojoja guemimbo'e kuery pe. Ha'e vy aipoe'i:

— Pey'u ha'e javive.

<sup>28</sup> Mba'eta kova'e ma xereve guarã [ipyau va'e] ajapo va'e regua, heta re vy xeruguy amoẽ uka ta va'e rupi ojeavyague omboguepaa aguã.

<sup>29</sup> Aipoa'e pãvy: Aÿ gui ma kova'e regua uva rykue xee nday'uvei ranhe 'rã, peẽ kuery reve Xeru po'akaa py ipyau va'e ju ay'u e'ÿa ja — he'i.

<sup>30</sup> Ha'e gui peteĩ mboraei oporaei rire oje'oi Oliveiras yvyty katy.

*Marcos 14.27-31; Lucas 22.31-34; João 13.36-38*

<sup>31</sup> Ha'e ramo Jesus aipoe'i ha'e kuery pe:

— Kova'e pytã ma peẽ kuery ha'e javive pejeity ukapa 'rã xekáuxa. Mba'eta ipara oiny: "Ajuka uka 'rã vexa'i re opena va'e. Ha'e ramo vexa'i kuery oaõmba 'rã", he'i va'ekue.\*

<sup>32</sup> Ha'e gui anhemboete ju ma rire penerenonde xee aa 'rã Galiléia katy — he'i.

<sup>33</sup> Pedro aipoe'i ixupe:

— Ndekáuxa ha'e javive ojeity ukapa teĩ xee any 'rã.

<sup>34</sup> Jesus ombovai:

— Anhetã aipoa'e ndevy: Kova'e pyavyve uru ojapukai e'ÿ mbove, mboapykue renhemombe'u 'rã xekuaa e'ÿ va'e rami.

<sup>35</sup> Pedro aipoe'i:

— Ndereve xejukaa 'rã teĩ ae ma peteĩve henda py ndaxeayvui 'rã roikuaa e'ÿa rami — he'i. Hemimbo'e kuery ha'e javive ha'e rami meme ijayvu.

*Marcos 14.32-42; Lucas 22.40-46*

<sup>36</sup> Ha'e rire'ive Jesus oo guemimbo'e kuery reve peteĩ henda Getsêmani 'epy va'e py. Ha'e vy aipoe'i ha'e kuery pe:

— Peguapy ke apy, pe'i py xee anhembo'e ainya ja — he'i.

<sup>37</sup> Ngupive ogueraa Pedro ha'e Zebedeu ra'y kuery mokoõve. Ha'e vy iporiaua ha'e nda'eveia oendu.

<sup>38</sup> Ha'e vy aipoe'i ha'e kuery pe:

— Xepy'a re aendu nda'evei etea xejuka ta va'e rami. Pepyta apy, peikuua pota xereve — he'i.

<sup>39</sup> Ojepe'ave'i ovv vy ngova omovaõ yvy re. Onhembo'e vy aipoe'i:

— Xeru, ha'eve rã xegui oaxa 'rãgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

<sup>40</sup> Ha'e gui guemimbo'e kuerya py ojevy vy oexa rã okepa ra'e. Ha'e ramo aipoe'i Pedro pe:

— Neĩ peteĩ hora voi teve nda'evei xereve peikuua pota aguã?

\* **26:31** Zacarias 13.7

**41** Peikuaa pota, ha'e penhembo'e penderekoo a'aa py pejeity ukapa e'ŷ aguã. Penenhe'ẽ ma anhetẽ ikyre'ŷ, ha'e rã pendero'o re ma penekangy – he'i.

**42** Ha'e gui ojepe'a ju. Onhembo'e jevy vy aipoe'i:

– Xeru, kova'e karo gui ay'u e'ŷ re oaxa aguã nda'evei ri ramo toiko ndee reipota va'e – he'i.

**43** Ha'e gui ojevy vy oexa rã okepa ju ra'e, hopeyi vaipa vy.

**44** Ha'e gui oejapa ju vy mboapykuea ma oo onhembo'e. Ha'ekue'i rupi ae ju ijayvu.

**45** Ha'e vy guemimbo'e kuerya py ojevy vy aipoe'i ha'e kuery pe:

– Pekepa teri va'e ty'y pejupy? Ovaẽ ma hora heko vai va'e kuery po py Ava ra'y ojeapo va'ekue omboaxaa aguã.

**46** Pepu'ã, jaje'oi. Pee ma ou oiny xejopy ukaarã.

*Marcos 14.43-50; Lucas 22.47-53; João 18.2-11*

**47** Jesus ijayvu teri jave ovaẽ ma ouvy hemimbo'e kuery doze va'e regua Judas. Hexeve heta ete ou kyxe ha'e yvyra revegua, sacerdote yvatekueve va'e ha'e heta va'e mongetaaty kuerya gui.

**48** Mba'eta ha'e kuery pe ijopy uka nhemia aipoe'i va'ekue: “Hova py ayvu va'e ae 'rã pejopy”, he'i va'ekue.

**49** Ha'e gui ma Jesus re onhemboja ouvy vy aipoe'i:

– Xembo'ea, ha'eve vai pa? – he'i vyve oayvu hova py.

**50** Ha'e ramo Jesus aipoe'i ixupe:

– Xeirũ, mba'e re tu reju? – he'i. Ha'e ramove ha'e kuery oupa vy Jesus re opoko, ojopy okuapy.

**51** Ha'e jave Jesus revegua kuery va'e regua peteĩ oekyi xapy'a kyxe. Omboguai sacerdote yvateve va'e rembiguai nambi rupi, ha'e vy omboi.

**52** Ha'e ramo Jesus aipoe'i ixupe:

– Emboyrú ke ndekyxe, mba'eta kyxe oiporu va'ekue ma kyxe py ae ju 'rã omano.

**53** Ndereikuuaai ri ty'y xepo'akaa Xeru pe ajerure ramo aŷ'i ma voi doze aty anjo kuery ombou aguã?

**54** Ha'e rami avi namigua ajapo va'e rire mba'exa tu ojeupity 'rāgue ipara re xerekorã oĩa? – he'i.

**55** Ha'e gui ma heta va'e kuery pe ju Jesus aipoe'i:

– Peẽ kuery kyxe ha'e yvyra reve ri ty'y peju jojuka rive va'ety rami xejopy aguã? Ko'ẽ nhavõ templo py [peẽ kuery pendekuaia rupi] aiko vy xee anhombo'e teĩ ndaxejopyi va'ekue.

**56** Ha'e rami avi guĩ nunga oiko profeta kuery ombopara va'ekue ha'e javi ojeupitya aguã – he'i.

Ha'e ramo hemimbo'e kuery ha'e javive oeja onhamba vy.

*Marcos 14.53-65; Lucas 22.63-71; João 18.12-14,19-24*

**57** Ha'e gui Jesus jopyare kuery ogueraa sacerdote yvateve va'e Caifás ro py. Ha'e py ma ijaty ma kuaxia re nhombo'e va'ety ha'e nhomboayvu va'ety kuery.

**58** Ha'e rã Pedro ma hakykue mombyry'i rupi oo sacerdote roka peve. Ha'e py ovaẽ vy oguapy oiny tembiguai kuery mbyte, opa peve oexa aguã.

**59** Ha'e gui sacerdote yvatekueve va'e ha'e nhomoneta va'ety kuery Jesus ojuka ukaxe vy ojouxé okuapy hekokue ramigua mombe'uarã.

**60** Ha'e rami teĩ ndojoui, mbovy e'ŷ hekokue ramigua mombe'uarã ikuai va'eri.

Ha'e gui are rire mokoĩ ava ou vy aipoe'i:

**61** – Peva'e ma aipoe'i: “Xepo'aka Nhanderuete pegua templo ambovaipa aguã, ha'e gui mboapy araa py ajapo ju aguã guive”, he'i va'ekue.

**62** Ha'e gui sacerdote yvateve va'e opu'ã vy oporandu Jesus pe:

– Nerembovai va'e ty'y po rami ndere ijayvu va'e?

**63** Ha'e rami teĩ Jesus okyrirí.

Ha'e gui sacerdote yvateve va'e aipoe'i ixupe:

— Xee aipoa'e ndevy Nhanderuete oikove va'e rery rupi: Emombe'u orevy ndee pa Cristo Nhanderuete Ra'y reikoa — he'i.

<sup>64</sup> Jesus ombovai:

— Ndee ae ri tu aipo're. Ha'e gui xee amombe'u porăve ta pĕvy: Aÿ gui ma pexa 'ră Ava ra'y ojeapo va'ekue Ipo'akapa va'e oiporu kuaa regua re oguapy oiny ră, ha'e yva gui arai rupi ou ramo guive — he'i.\*

<sup>65</sup> Ha'e ramo sacerdote yvateve va'e oao omondoro vy aipoe'i:

— Ijayvu vai rima! Mba'eră tu jaipotave hekokue mombe'uară? Pendu ae ma ange'i ijayvu vai ră.

<sup>66</sup> Mba'exa tu peikuaa?

Ha'e kuery ombovai:

— Jajuka aguă rami ijayvu — he'i okuapy.

<sup>67</sup> Ha'e ramo amongue onyvō hova re, oungapa guive. Amboae kuery ma oipete vy aipoe'i:

— Cristo, emombe'u ke orevy, mava'e ete pa nembota ra'e?

*Marcos 14.66-72; Lucas 22.55-62; João 18.15-18,25-27*

<sup>69</sup> Ha'e ramia ja Pedro oguapy oiny oka py. Ha'e gui hexe peteī kunha'i omongakuaapy onhemboja vy aipoe'i ixupe:

— Ndee voi teve Galiléa pygua Jesus reve reiko va'ety.

<sup>70</sup> Ha'e ră Pedro ma ha'e javive oendua py onhenhomu. Ha'e vy aipoe'i:

— Xee ndaikuuai rima mba'e nunga re pa ndeayvua — he'i.

<sup>71</sup> Ha'e gui oka katy oẽ ovy ră amboae kunha'i omongakuaapy ju oexa. Ha'e va'e ma aipoe'i ha'e py ikuai va'e pe:

— Peva'e ma oiko avi kuri Nazaré pygua Jesus reve.

<sup>72</sup> Ha'e ră Pedro oendu vy oura reve onhenhomu ju:

— Xee tu rima ha'e va'e ava — he'i.

<sup>73</sup> Ha'e rireve'i ha'e py ikuai va'e onhemboja vy aipoe'i Pedro pe:

— Anhetē ndee voi ha'e kuery regua reiko, mba'eta ha'e kuery rami ae ndeayvu va'e.

<sup>74</sup> Ha'e ramo ijayvu vaikue ha'e oura reve aipoe'i:

— Xee tu ndaikuuai ha'e va'e ava! — he'i. Ha'e ramove uru ojapukai nhendu.

<sup>75</sup> Ha'e ramo Pedro ima'endu'a Jesus ixupe aipoe'iague re: "Kuri uru ojapukai e'ŷ mbove ndee mboapykue 'ră renhemombe'u xekuaa e'ŷ va'e rami", he'iague re. Ha'e rami vy ojepe'a vy ojae'o vaipa.

## 27

*Marcos 15.1; Lucas 23.1,2; João 18.28-32*

<sup>1</sup> Ko'ëgue aje'ive reve sacerdote yvatekueve va'e ha'e heta va'e mongetaaty kuery ha'e javi jogueroayvu okuapy Jesus ojuka uka aguă re.

<sup>2</sup> Ha'e rami vy oipokua vy ogueraa uka, huvixa Pilatos pe ju omboaxa.

### *Judas ojejukaague*

<sup>3</sup> Ha'e gui ijopy uka nhemiare Judas ma Jesus ojuka ta ma okuapy ră oexa vy onhemboaxy. Ha'e vy trinta hată'i va'e prata guigua ome'ĕ ju sacerdote yvatekueve va'e ha'e nhomongeta va'ety kuery pe. Ha'e vy aipoe'i:

<sup>4</sup> — Ojejavy e'ŷ va'e ruguy amoẽ ukaa py xee ajejavy — he'i.

Ha'e kuery ombovai:

— Mba'e tu ore roguereko guĩ nunga reve? Ndereve ae topyta — he'i okuapy.

<sup>5</sup> Ha'e ramo Judas ma templo ropy katy hată'i va'e omombopa vy ojepe'a. Oo vy ojejyryvipy.\*

**6** Ha'e gui hatã'i va'e ma sacerdote yvatekueve va'e omono'õ vy aipoe'i:

— Nda'evei ome'ẽmby ryru py nhamoĩ aguã, mba'eta tuguy repykue – he'i.

**7** Ha'e gui jogueroayvuve rire ojogua peteĩ yvy nhae'ũ re ombo'epo va'ety gui, amboae regua omano ramo onhono porãa aguã.

**8** Ha'e rami vy ha'e va'e yvy aÿ peve hery Yvy-Tuguy.

**9** Ha'e rami oiko vy ojeupity profeta Jeremias pe aipoe'i ukaague: “Trinta hatã'i va'e prata guigua hepyrã Israel kuery regua oikuua va'ekue ogueraa vy.

**10** Ha'e vy opaga nhae'ũ re ombo'epo va'ety yvy re. Ha'e rami ae Senhor aipoe'i uka xevy”, he'iague.\*

*Marcos 15.2-15; Lucas 23.1-5,13-25; João 18.33-19.16*

**11** Huvixave renonde Jesus hi'aĩ ramo oporandu vy aipoe'i:

— Ndee ma nhi'ã judeu kuery pegua huvixave?

Jesus ombovai:

— Ndee ae ma aipo're – he'i.

**12** Ha'e gui sacerdote yvatekueve va'e ha'e nhomongeta va'ety kuery hexe ijayvu rei ramo mba'eve nde'i.

**13** Ha'e ramo Pilatos oporandu ixupe:

— Nerendui ri ty'y mbovy e'ÿ ndere ijayvua rã?

**14** Ha'e rami teĩ Jesus neĩ peteĩ ayvu py nombovai. Ha'e ramo huvixave onhemondyi vaipa.

**15** Ngaru oikoa ára nhavõ huvixa opoi jepi 'rã peteĩ nhuã py oĩ va'e, heta va'e kuery oipota va'e rei.

**16** Ha'e va'e javé py ma peteĩ oĩ nhuã py pavẽ oikuua va'ety Barrabás hery va'e.

**17** Ha'e gui heta va'e kuery ijatypa rã Pilatos oporandu ha'e kuery pe:

— Mava'e tu peipota apoi pêvy: Barrabás tyrã pa Jesus, Cristo hery va'e? – he'i,

**18** mba'eta oikuua ha'e kuery ija'e e'ÿ vy rive ipo py omboaxaague.

**19** Ha'e gui nhomboayvuaty py huvixa oĩ javé ta'yxy aipoe'i uka ixupe:

— Mba'eve ejapo eme peva'e ava heko porã va'e re, mba'eta ange ajexavai vaipa ra'u ikáuxa – he'i.

**20** Ha'e rami teĩ sacerdote yvatekueve va'e ha'e nhomongeta va'ety kuery ombo'e heta va'e kuery Barrabás re ojerure okuapy aguã, ha'e rã ojuka uka aguã Jesus.

**21** Teigue ju ha'e kuery pe huvixave oporandu:

— Mava'e tu mokoïve gui peipota apoi?

Ha'e kuery ombovai:

— Barrabás – he'i okuapy.

**22** Pilatos oporanduve ju ha'e kuery pe:

— Mba'e 'rã tu ha'vy ajapo Jesus, Cristo hery va'e re?

— Emoĩ kuruxu re! – he'i pavẽ.

**23** — Mba'e nunga py tu ojapo vai raka'e? – he'i Pilatos oporandu vy.

Ha'e rã ojapukaive tema:

— Emoĩ kuruxu re! – he'i okuapy.

**24** Pilatos mba'eve rei ndojapo kuaa reguai vy, ha'e pavẽ nda'eveive oje'oivy rã oexa vy ogueru ruka yy, ha'e vy heta va'e kuery oexaa py ojepoei. Ha'e vy aipoe'i:

— Xee ma mba'eve ndarekoi kova'e [heko porã va'e] ruguy pemoõ ukaxea reve.

Pendereve ae toptyta ha'e nunga!

**25** Ha'e ramo heta va'e kuery aipoe'i:

— Orere ae toõ huguy romoõ ukaague re ropaga aguã, orera'y kuery re guive – he'i.

\* **27:10** Zacarias 11.13

**26** Ha'e rami rā Pilatos ha'e kuery ayvu oendu vy opoi Barrabás. Ha'e rā Jesus ma oinupā ukapa rire omboaxa kuruxu re omoña aguā.

*Marcos 15.16-20; João 19.2,3*

**27** Ha'e rire'ive huvixavea pegua xondaro kuery ma opy Jesus ogueroike vy omboaty xondaro kuery ha'e javi.

**28** Ijao omboipa vy omonhemonde peteī ao pytā va'e py,

**29** ha'e juu gui peteī coroa ramigua ojapo vy omoī inhakā re, ha'e ipo oiporu kuaa regua re peteī takua ojopy uka. Ha'e vy henonde guenapy'ā re oī vy ojojai rei reve aipoe'i:

— Iporā ete judeu kuery pegua huvixave! — he'i okuapy.

**30** Ha'e gui hexe onyvō reve takua ojopy vy oinupā inhakā rupi.

**31** Ha'e gui ojojai reipa rire ao omboi vy ijae ae py ju omonhemonde. Ha'e gui ma ogueraa kuruxu re omoī aguā katy.

*Marcos 15.21; Lucas 23.26*

**32** Ha'e kuery oje'oi vy ovaexī peteī Cirene pygua Simão hery va'e. Ha'e va'e pe ogueraa uka okuapy kuruxu.

*Marcos 15.22-32; Lucas 23.32-43; João 19.17-24*

**33** Ha'e gui ovaē peteī henda Gólgota “Akāgue renda” 'epy va'e py.

**34** Ha'e vy ixupe ome'ẽ vinho iro va'e re omoirū va'ekue. Ha'e rami teī oa'anga vy ndoy'uxei.

**35** Kuruxu re omoī rire oexa okuapy xorte ijae jomeme omboja'o aguā.\*

**36** Ha'e gui oguapypa ha'e py oarō vy.

**37** Inhakā a'iry oupi imoiny ipara va'e hexe ijayvua: “Kova'e ma Jesus, judeu kuery pegua huvixave” he'ia.

**38** Kuruxu mboae re hexeve omoī avi mokoī imonda va'e: ijaxu e'ŷa re peteī omoī, ha'e rā amboae ma ijaxua re.

**39** Ha'e rupi oaxa ovv va'e ijayvu vai oje'oivy hexe. Oakā ombovava reve aipoe'i:

**40** — Ndee ma templo rembovaipa rire mboapy araa pyve ju rejapo 'rā va'ekue, ejereraa jepe ha'vy ndee ae, Nhanderuete Ra'y ri vy. Eguejy kuruxu gui — he'i oje'oivy.

**41** Ha'e rami ae avi sacerdote yvatekueve va'e, kuaxia re nhombo'e va'ety ha'e nhomoneta va'ety kuery ojojai rei vy aipoe'i:

**42** — Amboae kuery ogueraa jepe va'eri ha'e ae ndojereraa jepe kuaai. Israel kuery pegua huvixave ri oiko vy toguejy kuruxu gui. Ha'e ramo jajerovia 'rā hexe.

**43** Nhanderuete re ojerovia rire tou ha'vy togueraa jepe, anhetē ri oayvu vy. Mba'eta “Xee ma Nhanderuete Ra'y” he'i.

**44** Imonda va'e kuery hexeve kuruxu re omoī mbyre voi ojojai rei.

*Marcos 15.33-41; Lucas 23.44-49; João 19.28-30*

**45** Kuaray mbyte jave pytūmba yvy jave re, kuaray ojero'a puku peve.

**46** Ha'e gui kuaray ojero'a jave Jesus ojapukai atā reve aipoe'i:

— Eli, Eli, lamá sabactâni — he'i, “Xeru, Xeru, mba'e re tu xereja?” he'ia.\*

**47** Ha'e py ikuai va'e regua oendu vy aipoe'i:

— Elias rima oenoī — he'i okuapy.

**48** Ha'e ramo ha'e kuery regua peteī va'e onha pojava ovv, peteī esponja ogueru. Vinagre py omoakŷ, ha'e takua apy re omoī vy omovaē oy'u aguā.

**49** Ha'e rā amboae kuery aipoe'i:

— Tove, Elias ou vy ogueraa jepe rā jaexa aguā — he'i.

**50** Ha'e gui ma Jesus teīgue ju ojapukai atā reve omondouka onhe'ẽ.

**51** Ha'e ramove henda iky'a e'ŷ va'e ropy ajukue okē regua oī va'e oxoro mbyte rupi. Yvate gui oxoro yvy peve. Yvy oryryi, ha'e itaova ovopa guive.

\* 27:35 Salmo 22.18 \* 27:46 Salmo 22.1

<sup>52</sup> Ha'e gui yvyra rupa ikuai va'e oipe'aa ramo heta onhemboete ju iky'a e'ŷ va'e oke va'ekue,

<sup>53</sup> ha'e vy onhono porāague gui oẽmba. Jesus onhemboete ju rire ha'e kuery voi tetā iky'a e'ŷ va'e py ovaẽ vy heta pe ojexa uka.

<sup>54</sup> Ha'e gui ma xondaro ruvixa ha'e oirū kuery Jesus rarõa ikuai va'e ma yvy oryryi ha'e opa mba'ẽ oiko rã oexa vy okyjepa okuapy. Ha'e vy aipoe'i:

— Anhetē ae ra'e peva'e ava Nhanderuete Ra'y — he'i.

<sup>55</sup> Ha'e py heta avi ikuai kunhague mombyry'i gui oma'ẽ okuapy va'e. Ha'e va'e kuery ma Galiléia guive Jesus rakykue ou vy oipytyvõ va'ekue.

<sup>56</sup> Ha'e kuery regua ma Maria Madalena, Tiago ha'e José xy Maria, ha'e gui Zebedeu ra'yxy.

### *Marcos 15.42-47; Lucas 23.50-56; João 19.38-42*

<sup>57</sup> Ka'aru'i jave ou peteĩ ava Arimatéia pygua oguerekopa va'e, José hery va'e. Jesus remimbo'e oiko.

<sup>58</sup> Ha'e va'e ma Pilatos-a py oo vy ojerure Jesus retekue re. Ha'e ramo Pilatos ogueraa uka.

<sup>59</sup> Ha'e ramo José ma hetekue ogueraa vy onhovã peteĩ ajukue puku xiñ porã va'e iky'a e'ŷ va'e py.

<sup>60</sup> Ha'e vy onhono porã nguparã itaova re ojo'o uka va'ekue py. Ha'e gui peteĩ ita tuvixa va'e ombojere itakua rokẽ omботy aguã. Ha'e vy oo ju.

<sup>61</sup> Ha'e ramia ja onhono porāague rexei oguapy okuapy Maria Madalena ha'e Maria mboae.

### *Onhono porāague huvixa oarõ ukaague*

<sup>62</sup> Ko'ẽgue mba'emo oguerekko katupaa ára rire ma sacerdote yvatekueve va'e ha'e fariseu kuery nhomboaty. Ha'e gui Pilatos-a py jogueraa vy

<sup>63</sup> aipoe'i okuapy ixupe:

— Oreruvixa, orema'endu'a ha'e va'e ijapu va'e oikove teri reve aipoe'iague re: "Mboapy ára rire anhemboete ju 'rã'", he'iague re.

<sup>64</sup> Ha'e nunga rupi mboapy ára peve rearõ uka 'rãgue onhono porāague, hemimbo'e kuery ou vy hetekue re imonda e'ŷ aguã, ha'e gui heta va'e kuery pe omanoague gui onhemboete jevyague rami omombe'u e'ŷ aguã. Mba'eta ha'e rami ri ijapu rire jypy guare gui nda'eveive 'rã — he'i okuapy.

<sup>65</sup> Pilatos ombovai:

— Apy ma xondaro kuery ikuai. Peraa, pearõ uka onhono porāague peikuua rami — he'i.

<sup>66</sup> Ha'e ramo ha'e kuery oje'oi vy oarõ uka onhono porāague. Omboja ita imbotyarã oĩ va'e, ha'e oeja imbokuapy xondaro kuery ha'e py.

## 28

### *Marcos 16.1-8; Lucas 24.1-12; João 20.1-10*

<sup>1</sup> Sábado oaxa rire semana ijypa ára ko'ẽ rai'i jave ma Maria Madalena ha'e amboae Maria jogueraa itakua re oma'ẽ aguã.

<sup>2</sup> Ha'e gui yvy oryryi atã xapy'a, mba'eta peteĩ anjo Senhor-a guigua yva gui oguejy rã. Oguejy vy ombojere ita, ha'e vy oguapy hi'áry.

<sup>3</sup> Ha'e va'e ma overa va'e rami ojekuaa, yro'y rami onhemondea xiñmba va'e.

<sup>4</sup> Ha'e rã itakua rarõa kuery okyje vy oryryipa okuapy, omanogue rami ikuai.

<sup>5</sup> Ha'e gui kunhague pe anjo aipoe'i:

— Pekyje eme, mba'eta aikuaa peẽ kuery kuruxu re omoĩ mbyre Jesus pecaa.

<sup>6</sup> Ha'e va'e ma apy noívei, onhemboete ju ma aipoe'iague rami vy. Peju pexa onhono porāague.

<sup>7</sup> Ha'e gui tapeo pojava, pemombe'u hemimbo'e kuery pe omanoague gui onhemboete jevy maa, ha'e vy penerenonderā oo 'rāa Galiléia katy. Ha'e py ma pexa ju 'rā. Ha'e va'e anho areko pendevy amombe'u va'erā – he'i.

<sup>8</sup> Ha'e ramo itakua gui ha'e kuery ojepe'a vy oo pojava. Okyje ha'e ovya'reve onha jogueravy hemimbo'e kuery pe omombe'u aguā.

<sup>9</sup> Ha'e gui ma Jesus ae ovaexī ouvy. Ha'e vy aipoe'i:

– Tapeiko porā – he'i.

Ha'e rā ha'e kuery onhemboja vy oikuavā ipy rupi, omboete.

<sup>10</sup> Ha'e ramo Jesus aipoe'i ha'e kuery pe:

– Pekyjeve eme. Tapeo pemombe'u xe-irmāo kuery pe Galiléia katy oje'oi aguā. Ha'e py ma ha'e kuery xererexa 'rā.

### *Xondaro kuery ijapu aguā judeu kuery opagaague*

<sup>11</sup> Ha'e gui kunhague oo ma ramo onhono porāague rarōa kuery regua tetā re oo vy sacerdote yvatekueve va'e pe omombe'u oiko va'ekue ha'e javi.

<sup>12</sup> Ha'e ramo nhomoneta va'ety kuery reve ha'e kuery nhomboaty vy heta ome'ē peráta xondaro kuery pe.

<sup>13</sup> Ha'e vy aipoe'i:

– Aipopeje 'rā: "Pyávy roke jave hemimbo'e kuery ou vy imonda hetekue re", peje 'rā.

<sup>14</sup> Ha'e gui xapy'a rei huvixave ha'e nungakue oendu ramo oreayvu 'rā hexeve, pendere mba'eve oiko e'ŷ aguā – he'i okuapy.\*

<sup>15</sup> Ha'e ramo xondaro kuery peráta ogueraa vy aipoe'i ukaague rami ijapu. Ha'e rami rire ha'e nungakue aŷ peve omombe'ua judeu kuery ikuia rupi.

### *Galiléia yvy re guemimbo'e kuery pe Jesus ojexa ukaague*

<sup>16</sup> Ha'e rā hemimbo'e kuery onze-ve ma Galiléia katy oje'oi, yvyty Jesus oikuua uka va'ekue py.\*

<sup>17</sup> Ha'e py ma oexa vy omboete. Ha'e rā amongue ma ndoguerovia porāi.

### *Marcos 16.15-18; Lucas 24.44-49*

<sup>18</sup> Ha'e kuery re Jesus onhemboja vy aipoe'i:

– Opa mba'e py xembopo'akaa yva ha'e yvy re ikuai va'e ha'e javi re.

<sup>19</sup> Ha'e nunga rupi tapeo, penhomongo xeremimbo'erā ha'e javi regua gui.\* Ha'e vy pemongarai 'rā Tuu, Ta'y ha'e Nhe'ē Ky'a E'ŷ rery rupi.

<sup>20</sup> Pembo'e 'rā pēvy ajapo uka va'ekue ha'e javi rupi ikuai aguā. Ha'e rā xee ma ko'ē nhavō aiko 'rā peē kuery reve, opaa ára peve.

---

\* **28:14** Lucas 16.31   \* **28:16** Mateus 28.7,10; Marcos 14.27,28   \* **28:19** João 20.21; Atos 1.6-8

## Marcos ayvu porã ombopara va'ekue

## Marcos ayvu porã ombopara va'ekue

Jesus rekokue Marcos omombe'u vy ijayvu Mateus ha'e Lucas omombe'ua rupi avi. Jypy guive Marcos omombe'u Jesus nhandereraa jepe aguã ipo'aka va'ea, mba'eta ipo'aka nhe'ẽ vai gui oipe'a aguã (1.21-27), nhomonguera aguã (1.32-34), jajejavyague ombogue aguã (2.1-12), yvytu atã omombytu'u aguã (4.35-41) ha'e omano va'ekue omboete jevy aguã (5.22-42).

Jesus ipo'akapa va'eri ndou raka'e joguerekoy poyi aguã, ha'e rã nhanderekovia guekove ome'ẽ aguã, ha'e ae aipoe'iague rami vy: "Ava ra'y ojeapo va'ekue eteve voi jojokuai aguã e'ŷ ou, ha'e rã tembiguai rami oiko aguã, ha'e guekove ome'ẽ aguã heta rekovia, ogueraa jepe aguã" (10.45). Ojeupe ae "Ava ra'y ojeapo va'ekue" he'i, mba'eta Nguuetea gui ko yvy re ou vy ava ojeapo vy onhembo'yyvõ'i ete raka'e, kuruxu re omano guive. Ha'e rami teī omanoague gui onhemboete ju, ha'e guemimbo'e kuery pe ojexa uka guive. Ha'e kuery pe aipoe'i: "Tapeo opa rupi, yvy javé re ikuai va'e ha'e javive pe pemombe'u ayvu porã" (16.15). Ha'e nunga rupi nhandevy pe voi omombe'ua ayvu porã Jesus nhandereraa jepea regua.

<sup>1</sup> Nhanderuete Ra'y Jesus Cristo reko regua ayvu porã ijypyda.

*Mateus 3.1-6; Lucas 3.1-6*

<sup>2</sup> Profeta Isaías ombopara vy aipoe'iague rami oiko: "Ne'exa, nerendera ambou 'rã xerembiguai. Ha'e va'e oguerekoy katu 'rã nderaperã".\*

<sup>3</sup> Ha'e rami vy tekao e'ŷa py ijayvu atã 'rã: 'Pereko katu Senhor raperã, pembo'yvi ou aguã', he'i 'rã'.\*

<sup>4</sup> Ha'ekue rami ae João Batista ojekuaa raka'e tekao e'ŷa py. Omombe'u oikovy pavẽ ojeko rerova vy onhemongarai uka aguã, ojejavyague omboguepaa aguã.\*

<sup>5</sup> Ha'e va'e oikoa py jogueru Judéia katy'i ikuai va'e ha'e Jerusalém pygua kuery ha'e javi. Ojejavyague omombe'upa ramo omongarai Jordão yakã py.

<sup>6</sup> João ao ma camelو rague guigua, ha'e rã iku'a xã ma ipirekue guigua. Tuku ha'e ei ka'aguy regua ho'u oikovy.

*Mateus 3.11; Lucas 3.15,16; João 1.19-28*

<sup>7</sup> João ayvu omombe'u vy aipoe'i:

— Xerakykue ou 'rã peteĩ xegui yvateve va'e. Ha'e va'e gui xe'yvyõ've va'e vy nda'evei ajero'a vy ipy regua xã ajora aguã voi.

<sup>8</sup> Xee ma romongarai yy py. Ha'e rã ha'e ma Nhe'ẽ Ky'a E'ŷ reve 'rã penemongarai.\*

*Mateus 3.13-17; Lucas 3.21,22; João 1.32-34*

<sup>9</sup> Ha'e va'e javé Galiléia regua Nazaré tetã gui Jesus ou. Ha'e vy João pe onhemongarai uka Jordão yakã py.

<sup>10</sup> Yy gui oẽ vyve oexa yva ojepe'a, ha'e apykaxu'i rami hexe Nhe'ẽ oguejy ouvy rã.

<sup>11</sup> Ha'e ramo onhendu peteĩ ayvu yva gui:

— Ndee ma Xera'y roayvu ete ha'e roquerovy'a va'e — he'i va'e.

*Mateus 4.1-11; Lucas 4.1-13*

<sup>12</sup> Ha'e rire'ive tekao e'ŷa katy Nhe'ẽ ogueraa.

\* **1:2** Malaquias 3.1 \* **1:3** João Batista ma Jesus raperã oguerekoy katua rupi ijayvu raka'e, mba'eta heta va'e kuery pe omombe'u oikovy opa marã rei ikuiai gui ojepe'a vy Jesus re ojerovia aguã (Isaías 40.3). \* **1:4** João 1.6-8,19-23

\* **1:8** Atos 19.4

<sup>13</sup> Ha'e py ma quarenta ára oĩ Satanás oeko a'ã rã. Mymba inharõ va'e mbyte py oĩ teĩ anjo kuery opena.\*

*Mateus 4.12-17; Lucas 4.14,15*

<sup>14</sup> Nhuã py João ombotya ma rire Jesus ojevy ju Galiléia katy, Nhanderuete guigua ayvu porã omombe'u vy.

<sup>15</sup> Ha'e vy aipoe'i:

— Ára ojeupity ma, namombyryvei ma Nhanderuete po'akaa ojekuaa aguã. Pejeko rerova, ha'e perovia ayvu porã.

*Mateus 4.18-22; Lucas 5.1-11*

<sup>16</sup> Galiléia yupa yvýry rupi oiko vy oexa mokoĩ joegua Simão ha'e André. Ha'e kuery ma pira mbo'aa rupi ikuai vy yy py pira mbo'aa omombo okuapy.

<sup>17</sup> Ha'e va'e kuery pe Jesus aipoe'i:

— Peju ke xerakykue. Xee ma avakue jouarã ju 'rã romoingo — he'i.

<sup>18</sup> Ha'e ramove ha'e kuery oejapa vyvoi pira mbo'aa, ha'e oje'oi hupive.

<sup>19</sup> Oove'ia py oexa Zebedeu ra'y Tiago ha'e tyvy João, kanoã py pira mbo'aa omoatyrõ okuapy rã.

<sup>20</sup> Ha'e vyve oenoĩ. Ha'e rã ha'e kuery ma nguu Zebedeu ha'e hembiguai kuery kanoã py oeja vy oo Jesus rakykue.

*Lucas 4.31-37*

<sup>21</sup> Ha'e rire ovaẽ Cafarnaum tetã py. Sábado ára py onhembo'eaty oĩ va'e py oo nhombo'e vy.

<sup>22</sup> Nhombo'e rã pavẽ oendu vy onhemondyi okuapy, mba'eta opo'akaa rupi ijayvu, kuaxia re nhombo'e va'ety kuery rami e'ŷ.

<sup>23</sup> Are'ŷ'i re onhembo'eaty py ou peteĩ ava nhe'ẽ vai onhemondea va'e. Ha'e va'e ma ojapukai atã:

<sup>24</sup> — Jesus Nazaré pygua va'e, mba'e tu ndee rerekorere? Oremokanhy aguã teve rej? Xee ma aikuaa ndee Nhanderuete guigua iky'a e'ŷ va'e reikoa — he'i.

<sup>25</sup> Ha'e ramo ixupe Jesus ijayvu atã vy aipoe'i:

— Ekyrirĩ, ha'e ejep'e a upe va'e ava gui — he'i.

<sup>26</sup> Ha'e ramo nhe'ẽ vai omboryryipa ha'e ojapukai atã reve ojepe'a ixugui.

<sup>27</sup> Ikuai va'e kuery ha'e javi onhemondyi pya oporandu joupe-up:

— Mba'erã 'rã nda'u guĩ ramigua oiko? Mba'emo pyau re nhombo'earã teve? Mba'eta opo'akaa rupi ijayvu rã nhe'ẽ vai voi onhe'ẽ rendu — he'i okuapy.

<sup>28</sup> Ha'e rire Galiléia vyv katy ha'e javi rupi onhendu Jesus mba'emo porã ojapoague.

*Mateus 8.14,15; Lucas 4.38,39*

<sup>29</sup> Onhembo'eaty gui Jesus oẽ vy Tiago ha'e João reve jogueraa Simão ha'e André ro py.

<sup>30</sup> Oo py ma Simão raixo ipire raku oupy. Ha'e ramo Jesus pe omombe'ua imba'eaxy.

<sup>31</sup> Ha'e ramo onhemboja vy ipo re ojopy ramove ipire raku oaxa. Ha'e ramo opu'ã vy mba'emo ojapo ha'e kuery pe.

*Mateus 8.16,17; Lucas 4.40,41*

<sup>32</sup> Ka'aru kuaray oike ta ma jave Jesus-a py oguerua imba'eaxy va'e ha'e anha gui oiko axy va'e ha'e javi.

<sup>33</sup> Tetã pygua kuery ha'e javi onhemboaty avi okẽ py.

<sup>34</sup> Ha'e ramo heta omonguera opa marãgua mba'eaxy gui oiko axy va'e, heta avi anha oipe'a omboayvu e'ŷ re, mba'eta ha'e kuery oikuua mava'e paa.

*Lucas 4.42-44*

<sup>35</sup> Ko'ẽ rai ramove Jesus opu'ã vy oo peteĩ henda tekao e'ŷa oĩ va'e katy. Ha'e py ma onhembo'e oiny Nhanderuete pe.

<sup>36</sup> Ha'e ramo Simão ma ou oeka vy, hupive ikuai va'e reve.

---

\* <sup>1:13</sup> Hebreus 2.18, 4.15

**37** Ojou vy aipoe'i:

— Pavē rei ndereka.

**38** Ha'e ramo Jesus aipoe'i:

— Amboae henda katy jaa kii rai'i tekoa ikuai va'e ha'e javi rupi, ha'e py voi ayvu amombe'u aguā, mba'eta ha'e rami aguā ae aju — he'i.

**39** Ha'e rami vy Galiléia yvy ha'e javi rupi oiko. Ha'e pygua onhembo'eaty ikuai va'e rupi omombe'u ayvu, oipe'a guive anha kuery.

*Mateus 8.1-4; Lucas 5.12-16*

**40** Hexe onhemboja ouvy peteī lepra reveguia. Ha'e vy guenapy'ā re oī reve ojerure:

— Lepra gui xeky'a'oxe vy xeky'a'o 'rāgue — he'i.

**41** Jesus omboaxy vy okuave'ē, ha'e hexe opoko vy aipoe'i:

— Xee ma roiky'a'oxe ae, ekuera ke — he'i.

**42** Ha'e ramove lepra okanhymba ramo okuera.

**43** Ha'e gui ixupe ijayvuve imondovy

**44** vy aipoe'i:

— Emombe'u eme avave rei pe. Va'eri tereo sacerdote pe ejexa uka, ha'e rekueraague re eme'ē mymba Moisés omboparaague rami, heta va'e kuery oikuua aguā — he'i.

**45** Ha'e rami teī ava va'e oo vy opa rupi omombe'u. Ha'e rami rire tetā ikuai va'e rupi nda'eveei Jesus ovaē aguā. Tekoa e'ŷa rupi rive oiko mombyry. Ha'e ramo opa rupi gui jogueru oĩa py.

## 2

*Mateus 9.1-8; Lucas 5.17-26*

**1** Kueve ma rire Jesus ovaē ju Cafarnaum py. Ha'e ramove opa rupi omombe'upaa oo py oĩa.

**2** Heta ete ou ramo okē rexei'i oī aguā voi nda'evei. Ha'e rā ha'e kuery pe ayvu omombe'u.

**3** Oĩa py peteī oguata e'ŷ va'e oguerua. Irundy avakue ogueru teī

**4** heta va'e kuery gui nda'evei hexe onhemboja aguā. Ha'e ramo oĩa áry oo ao'ia oipe'a vy oipe'aague rupi omboguejy imba'eaxy va'e hupa reve.

**5** Ha'e kuery ojeroviaa Jesus oexa vy aipoe'i oguata e'ŷ va'e pe:

— Xera'y, rejejavyague omboguepaa ma — he'i.

**6** Ha'e gui kuaxia re nhombo'e va'ety kuery ha'e py oguapy okuapy va'e opy'a py aipoe'i:

**7** — Mba'e re tu po rami ijayvu? Po ramigua ma ayvu vai. Mava'e tu ombogue kuaa joeko vaiague, peteī'i e'ŷ vy? Ha'e va'e ma Nhanderuete — he'i okuapy.

**8** Ha'e kuery opēxaa Jesus oikuua vy aipoe'i:

— Mba'e re tu po rami ri pendeayvu pendepy'a py?

**9** Mba'ixa nda'u ndaxyive xeayvu aguā oguata e'ŷ va'e pe: “Rejejavyague omboguepaa ma” tyrā pa “Epu'ā, eupi nderupa, ha'e tereo”, ha'e aguā?

**10** Ha'e rami avi peikuaa aguā Ava ra'y ojeapo va'ekue ko yvy re joeko vaiague ombogue aguā voi ipo'aka va'ea —

Oguada e'ŷ va'e pe ju aipoe'i:

**11** — Xee aipoa'e ndevy: Epu'ā, eupi nderupa, ha'e tereo ndero katy — he'i.\*

**12** Ha'e ramove opu'ā vy oupi ngupa ituiaty, ha'e oẽ ovvy pavē oexaa gui.

Ha'e kuery onhemondyipa vy ombojerovia Nhanderuete. Ha'e vy aipoe'i okuapy:

— Guĩ ramigua jaexa va'e'ŷ teri aŷ peve.

*Mateus 9.9; Lucas 5.27,28*

**13** Teīgue ju Jesus oo yupia katy. Heta va'e kuery ha'e javi ou ovaexī aguā. Ha'e ramo ombo'e.

**14** Oovea py oexa Alfeu ra'y Levi imposto opagaaty py oguapy oiny rā. Ha'e vy aipoe'i:

---

\* **2:11** João 10.37,38

— Eju xerupive — he'i. Ha'e ramove opu'ã vy oo hupive.

*Mateus 9.10-13; Lucas 5.29-32*

<sup>15</sup> Ha'e gui Levi ro py Jesus oĩ mesa py. Hexeve ha'e hemimbo'e kuery reve heta ikuai imposto re nhombopaga va'ety ha'e heko vai va'ekue, mba'eta ha'e kuery ma Jesus rupive ikuai va'ety meme.

<sup>16</sup> Ha'e rã fariseu kuery regua kuaxia re nhombo'e va'ety ikuai va'e ma oexa okuapy Jesus okaru rã heko vai va'ekue ha'e imposto re nhombopaga va'ety kuery reve. Ha'e rami vy oporandu hemimbo'e kuery pe:

— Mba'e re tu Jesus okaru [ha'e oy'u] ri imposto re nhombopaga va'ety ha'e ojejavypa va'e kuery reve?

<sup>17</sup> Ha'e nunga Jesus oendu vy ombovai ha'e kuery pe:

— Hexaĩ va'e kuery ma ndoipotai 'rã poropoanoa, imba'eaxy va'e anho 'rã oipota. Ha'e rami vy xee ma heko porã va'e aenoĩ aguã e'ŷ aju, ha'e rã heko vai va'e anho.

*Mateus 9.14-17; Lucas 5.33-39*

<sup>18</sup> João remimbo'e ha'e fariseu kuery okaru e'ŷ re jepi 'rã ikuai. Ha'e ramo amongue ou vy oporandu Jesus pe:

— Mba'e nunga rupi tu João remimbo'e ha'e fariseu remimbo'e kuery okaru e'ŷ re jepi ikuai, ha'e rã neremimbo'e kuery ma ha'e rami nda'ikuai?

<sup>19</sup> Jesus ombovai:

— Omendaa py ha'eve nda'u oenoĩ mbyre kuery okaru e'ŷ re ikuai aguã, ha'e kuery reve omenda va'e oĩ teria ja? Any, omenda va'e oĩ teria ja ha'e kuery nda'ikuai 'rãe okaru e'ŷ re.

<sup>20</sup> Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e jave mae 'rã ha'e kuery okaru e'ŷ re ikuai.

<sup>21</sup> — Avave rei ao ymague re nombojai 'rã ajukue pyau ra'ykue, mba'eta ombojaague omboi 'rã ao ymague gui. Ha'e ramo oxoroa tuvixave 'rã.

<sup>22</sup> Ha'e avave rei hyru ymague py nomboyru 'rã vinho pyau. Ha'e rami e'ŷ rã ombovaipa 'rã hyru. Vinho ha'e hyru ivaipa 'rã. Ha'e rami 'rãgue py vinho pyau rã hyru pyau py 'rã omoĩ.

*Mateus 12.1-8; Lucas 6.1-5*

<sup>23</sup> Peteĩ sábado ára py Jesus guemimbo'e kuery reve oaxa ovu trigoty rupi. Hemimbo'e kuery ma ooa rupi oipo'o heravy hi'a.

<sup>24</sup> Ha'e ramo fariseu kuery ha'e nunga oexa vy aipoe'i ixupe:

— Ma'ë, mba'e re tu neremimbo'e kuery ojapo sábado py nda'evei va'eri?

<sup>25</sup> Ombovai:

— Ndaperoayvui teve Davi ojexavai ha'e okaruxe vy oirũ kuery reve ojapo va'ekue?

<sup>26</sup> Mba'eta Nhanderuete ro py oike raka'e sacerdote yvateve va'e Abiatar oĩ jave py, ha'e vy ho'u mbojape Senhor renonde omoĩ mbyre, ha'e kuery ho'u aguã nda'evei va'eri, sacerdote pe anho ha'eve. Ngupive ikuai va'e pe voi ome'ë avi — he'i.

<sup>27</sup> Ha'e vy aipoe'ive ju:

— Sábado ára ma avakue pe oejaaa raka'e, ha'e rã sábado pe avakue oejaaa nda'ei.

<sup>28</sup> Ha'e nunga rupi Ava ra'y ojeapo va'ekue ma sábado ára re voi ipo'aka va'e.

### 3

*Mateus 12.9-14; Lucas 6.6-11*

<sup>1</sup> Teĩgue ju Jesus ovaẽ onhembo'eaty py. Ha'e py oĩ peteĩ ava ipo rovai piru va'e.

<sup>2</sup> Ha'e py ikuai va'e ma Jesus re oexa pota okuapy, sábado py rã pa nhomonguera ra'ea oexa aguã, ijayvu reixe vy.

<sup>3</sup> Ha'e rã Jesus ma ava ipo piru va'e pe aipoe'i:

— Eju mbyte katy.

<sup>4</sup> Ha'e gui ha'e kuery pe ranhe oporandu:

— Ha'eve ri nda'u sábado ára py jajapo porã tyrã pa jajapo vai? Ha'eve ri nda'u joekove jaraa jepe, tyrã pa tove tomano? — he'i. Ha'e rami tei okyririmbä okuapy.

<sup>5</sup> Ha'e ramo ipoxy ha'e iporiau rei reve oma'ẽ ijyvýry ikuai va'e re, ha'e kuery inhakã ratã ramo. Ha'e vy aipoe'i ava pe:

— Embo'yvi ndepo.

Ha'e ramo opo ombo'yvi vyve okuera.

<sup>6</sup> Ha'e rã fariseu kuery ma ojepe'a vy hovai jogueroayvu Herodes-a katyguia kuery reve. Marã rami pa ojuka uka aguã re ijayvu okuapy.

### *Ye'ẽ rembe re heta omongueraague*

<sup>7</sup> Ha'e gui Jesus guemimbo'e kuery reve oje'oi yupu katy. Heta ete ou Galiléia gui, Judéia,

<sup>8</sup> Jerusalém, Iduméia, Jordão yakã rovaigua, Tiro ha'e Sidom gui avi heta ete ou. Jesus mba'emo ojapoague omombe'ua rã oendu vy jogueru oĩa py.

<sup>9</sup> Ha'e ramo guemimbo'e kuery pe Jesus aipoe'i peteĩ kanoã ogueru aguã ha'e oĩ aguã, heta va'e kuery omboty rei e'ỹ aguã.

<sup>10</sup> Mba'eta heta omonguera ramo imba'eaxy va'e kuery nhomoanha-anha jogueruvy hexe opokoxe vy.\*

<sup>11</sup> Nhe'ẽ vai rewegua voi oexa vy henonde guenapy'ã re oĩ vy ojapukai reve aipoe'i:

— Ndee ma Nhanderuete Ra'y.

<sup>12</sup> Ha'e ramo ha'e kuery pe Jesus ijayvu atã oikuaa uka e'ỹ aguã re.

### *Mateus 10.1-4; Lucas 6.12-16*

<sup>13</sup> Ha'e rire vyty oĩ va'e áry oẽ vy oenoĩ ha'e ae oipota va'e kuery. Ha'e ramo oĩa py ha'e kuery ou.

<sup>14</sup> Ha'e ramo doze oiporavo hexeve ikuai va'erã, ha'e gui ayvu omombe'u aguã katy omondouka aguã,

<sup>15</sup> ha'e ipo'akaa rupi anha kuery oipe'a aguã guive.

<sup>16</sup> Doze oiporavo va'ekue ma pova'e: Simão hery mboaerã Pedro omoĩ va'ekue,

<sup>17</sup> ha'e gui Zebedeu ra'y kuery Tiago ha'e tyvy João. Ha'e va'e kuery reryrã omoĩ Boanerges, "Yapu va'e ra'y kuery" he'ia.

<sup>18</sup> Ha'e gui André, Filipe, Bartolomeu, Mateus, Tomé, Alfeu ra'y Tiago, Tadeu, Simão Zelote,

<sup>19</sup> ha'e ijopy uka nhemiarã Judas Iscariotes avi.

### *Mateus 12.22-32; Lucas 11.14-23*

<sup>20</sup> Ha'e ramo ngoo katy ju oo. Ha'e ramive ma heta ete ju onhemboaty ramo nei okaru aguã ma voi nda'evei.

<sup>21</sup> Jesus retarã kuery ha'e nunga oendu vy ou ogueraa aguã, mba'eta omombe'ua rã oendu na'inhakã porãveia rami.

<sup>22</sup> Ha'e py ikuai avi kuaxia re nhombo'e va'ety kuery Jerusalém gui ou va'ekue. Ha'e va'e kuery aipoe'i:

— Hexe tu anha ruvixa Belzebu rima onhemonde. Anha po'akaa rupi ae rima oipe'a oikovy anha kuery — he'i.\*

<sup>23</sup> Ha'e ramo Jesus oenoimba vy ha'e kuery pe ijayvu mba'emo re ombojoja reve. Ha'e vy aipoe'i:

— Mba'exa 'rã tu anha ha'e ae onhemoxẽ?

<sup>24</sup> Mba'eta joa pygua meme joe opu'ã vy nhomomba 'rã.

<sup>25</sup> Petei oo pygua meme joe opu'ã vy nhomomba avi 'rã.

<sup>26</sup> Ha'e rami ae avi anha kuery jomeme opu'ã vy joo rami e'ỹ ikuai va'e rire nda'ikuaivei 'rãgue, okanhymba 'rã guive.

\* **3:10** Mateus 4.23-25; Lucas 6.17-19 \* **3:22** Lucas 12.10

<sup>27</sup> — Avave rei ma ndoikei 'rã ava ojeroviave va'e ro py imba'e rei-rei re imonda aguã, oipokua ranhe e'ŷ re. Oipokua rire vy 'rãe oipe'apa.

<sup>28</sup> — Anhetẽ aipoa'e pendevy: Avakue ojejavyague ha'e ijayvu vaiague omboguea aguã ma ha'eve meme.

<sup>29</sup> Ha'e rã Nhe'ê Ky'a E'ŷ re ijayvu vaia ague ma nombogueai 'rã, ha'e nunga jejavya ma omboguea va'erã e'ŷ — he'i.

<sup>30</sup> Po rami ijayvu mba'eta “Hexe anha onhemonde” he'i okuapy ramo.

*Mateus 12.46-50; Lucas 8.19-21*

<sup>31</sup> Ha'e rami jave ovaẽ ixy, tyvy ha'e heindy kuery. Oka py ikuiaia py oenoĩ uka.

<sup>32</sup> Ha'e ramo heta ijyvýry oguapy okuapy va'e aipoe'i ixupe:

— Pee oka py ma ndexy, nderyvy ha'e nereindy kuery ikuai. Nderekva vy je ou — he'i.

<sup>33</sup> Ha'e ramo ombovai:

— Marã ramigua tu ha'i ha'e xeryvy kuery?

<sup>34</sup> Ha'e oyvýry oguapy va'e kuery re oma'ẽ vy aipoe'i:

— Peva'e ae ma ha'i ha'e xeryvy kuery.

<sup>35</sup> Mba'eta Nhanderuete oipotaa rami ojapo va'e ma ha'i, xeryvy ha'e xereindy kuery ikuai.\*

## 4

*Mateus 13.1-9; Lucas 8.4-8*

<sup>1</sup> Teigue ju Jesus nhombo'e oiny yupa yvýry. Ha'e py heta ikuai ramo peteĩ kanoã py oĩ. Yy rembe re heta va'e kuery ikuiaia gui mombyry'i oguapy oiny. Ha'e rã heta va'e kuery ye'ẽ rembe re ikuai, ita ku'i reia py.

<sup>2</sup> Ha'e gui opa mba'e re ombo'e mba'emo re ombojoja vy. Ha'e vy aipoe'i:

<sup>3</sup> — Pejapyxaka ke. Peteĩ ava oo mba'emo ra'yĩ moaĩ vy.

<sup>4</sup> Ha'e va'e omoaĩ rã amongue ha'yígue ho'a tape yvýry. Ha'e nunga ma guyra'i ou vy ho'upa.

<sup>5</sup> Amboae ma itaty yvy mbovy'i reia rupi ho'a. Ha'e nungakue ma yvy re ndoike pukui rire henhoĩ voi'i.

<sup>6</sup> Ha'e rami teĩ kuaray oẽ vy omombiru, ndapoi rã.

<sup>7</sup> Amboae ma juu mbyte rupi ho'a rire juu yvate vy ojukapa. Ha'e ramo ndai'ai.

<sup>8</sup> Ha'e rã amboae ma yvy porãa rupi ho'a. Ha'e nungakue ma henhoĩ porã, yvate ha'e hi'a porã guive. Trinta, sessenta, cem ha'yĩ peve oiko peteĩ-teĩ gui — he'i.

<sup>9</sup> Ha'e vy aipoe'ive ju:

— Ijapyxa oendu aguã oĩ va'e toendu.

*Mateus 13.10-23; Lucas 8.9-15*

<sup>10</sup> Jesus-a gui ojepé'apaa ma ramo hupive ikuai va'e hemimbo'e kuery doze va'e reve ou vy oporandu okuapy mba'emo re ombojoja vy ayvu omombe'u va'ekue re.

<sup>11</sup> Ha'e ramo ombovai:

— Pendevy pe Nhanderuete oikuua uka ipo'akaa py mba'emo oiko va'e ndoikuua ukai va'ekue. Ha'e rã amboae kuery ma mba'emo re ambojojaa rupi anho 'rã ambo'e,

<sup>12</sup> ha'e kuery oma'ẽ teĩ ndoexa kuaai aguã, ha'e oendu teĩ noendu kuaai aguã, ojeko rerova e'ŷ aguã ndoperdoaai aguã — he'i.\*

<sup>13</sup> Ha'e gui ma ha'e kuery pe oporandu:

— Napendu kuaai teve mba'e nunga re ambojoja vy pa pova'e ayvu amombe'uague? Mba'exa tu ha'vy pendu kuaa ta ayvu amombe'u va'e ha'e javi?

<sup>14</sup> Ha'e gui mba'emo moaĩ ma omoaĩ ayvu.

<sup>15</sup> Po rami ikuai tape yvýry omoaĩ mbyre rami: Ayvu oendu vy ojapyxaka teĩ Satanás ou vy ayvu oipe'a 'rã ha'e kuery re oĩ va'ekue.

\* <sup>3:35</sup> Hebreus 2.11,12 \* <sup>4:12</sup> Isaías 6.9-10

16 Ha'e gui po rami ma itaty reia rupi omoaĩ mbyre rami ikuai: Ayvu oendu vy ojopy vyvoi 'rã ov'y'a reve.

17 Ha'e rami teĩ ndapo pukui va'e rami avi ikuai. Are'ŷ'i re ovaẽ 'rã imoingo axyarã, ha'e ayvu porã káuxa ijavyky reiarã. Ha'e nunga oiko rã ayvu porã rupi ikuaiague gui ojepe'apa 'rã.

18 Ha'e gui juu mbyte rupi omoaĩ mbyre rami ikuai va'e ma ayvu oendu avi,

19 teĩ ko yvy re mba'emo ikuai va'e re openave vy, peráta, opa marãguia ojou porãve vy noendu potavei 'rã ayvu. Ha'e rami vy ndai'ai.

20 Ha'e rã yvy porãa rupi omoaĩ mbyre rami ikuai va'e ma ayvu oendu vy ojopy 'rã, hi'a porã 'rã guive trinta, sessenta, cem peteĩ-teĩ gui.

### *Lucas 8.16-18*

21 Ha'e gui aipoe'i avi:

— Tataendy nda'u nhamoendy vy jajao'i 'rã ri ajaka py, ha'e e'ŷ vy tupu guýry 'rã ri nhamoĩ? Any, imoiny oĩaty py ae 'rã jaupi imoiny.

22 Mba'eta ndoexa ukai pyre ojekuaapa 'rã, ha'e onhomu mbyre oikuaa ukapaa 'rã.

23 Ijapyxa oendu aguã oĩ va'e toendu — he'i.

24 Ha'e kuery pe aipoe'ive ju:

— Peikuuaa pota porã ayvu pendu va'e re. Mba'eta joupe pejapoague rami ae 'rã ojapoa pendevy, ojapoave 'rã guive.

25 Mba'eta mba'emo oguereko va'e pe ome'ẽave 'rã. Ha'e rã oguereko e'ŷ va'e gui ma oipe'apaa 'rã oguereko rei'i merami va'ekue.\*

### *Mba'emo ra'yĩ re ombojojaague*

26 Aipoe'i avi:

— Nhanderuete po'akaa py oiko 'rã yvy re ava mba'emo ra'yígue onhoty va'e rami.

27 Mba'eta oke 'rã pyávy, ha'e rã ára py ov'y 'rã. Ha'e ramia ja ha'yígue henhoĩ ha'e yvate 'rã marã rami paa oikuaa e'ŷ re.

28 Yvy ae ojapo 'rã hi'a aguã rami. Jypy'i ma henhoĩ, ha'e gui ipoty, ha'e gui ma ha'yí omonyé 'rã hi'a.

29 Hi'a ijajupa ma ramo ojaya 'rã kyxe py, mba'eta ovaẽ ma omono'õ aguã.

### *Mateus 13.31,32, Lucas 13.18,19*

30 Aipoe'ive ju:

— Marã ramigua nda'u Nhanderuete po'akaa py oiko va'e reve joo ramigua? Mba'e nunga re nda'u ha'eve ambojoja aguã?

31 Mostarda ra'yí re ha'eve, mba'eta ha'yígue ikuai va'e gui ruxãve'i va'e 'rã nhanhoty.

32 Ha'e gui nhanhoty ma rire yvate 'rã, mba'emo nhanhoty va'e ha'e javi gui tuvixave 'rã guive. Hakã voi tuvixa ramo guyra'i oveve va'e ou vy kuaray'ã py ojapo 'rã guaityrã.

### *Mateus 13.34,35*

33 Heta ayvu ha'ekue ramigua omombe'u ha'e kuery pe mba'emo re ombojoja vy, ojapyxaka va'e kuery oendu kuua peve.

34 Ha'e rami avi mba'emo re ombojoja e'ŷ re nda'ijayvui ha'e kuery pe. Ha'e rã guemimbo'e kuery pe ma omombe'u porãve kuerei 'rã ha'e kuery ae'ia py.

### *Mateus 8.23-27; Lucas 8.22-25*

35 Ha'e va'e ára ka'aru'i Jesus aipoe'i ha'e kuery pe:

— Jaaxa yupu rovaigua re — he'i.

36 Ha'e ramo heta va'e kuery omondoukapa ma vy ogueraa Jesus kanoã py oĩague reve ae. Ha'e rã amboae kuery ma kanoã mboae py oo hakylkue.

37 Ha'e gui ou yvytu atã ramo kanoã re yai ojeapi-api. Ha'e ramo kanoã py yy tynyé ta ma.

38 Ha'e rã Jesus ma kanoã revi katy oke oupy akãngyta áry. Ha'e ramo omomyí vy aipoe'i:

\* **4:25** Mateus 13.10-15; Lucas 8.18; Tiago 1.22-25

— Orembo'ea, ndee nerepenai va'e ty'y nhamanomba taa re?

<sup>39</sup> Ha'e ramo ovy vy ijayvu atā yvvytu ha'e yai pe. Ha'e vy aipoe'i:

— Epytu'u, ekyrirī ke — he'i. Ha'e ramove yvvytu optytu'u, yai okyrirīmba guive.

<sup>40</sup> Ha'e gui ma aipoe'i:

— Mba'e re tu guī rami pekyjepa? Mba'e re tu noī pejeroviaa? — he'i.

<sup>41</sup> Ha'e ramo ha'e kuery onhemondyipa vy joupe-upe ju aipoe'i:

— Marā ramigua tu peva'e ava, yvvytu ha'e ye'ē voi onhe'ē rendu aguā?

## 5

*Mateus 8.28-33; Lucas 8.26-34*

<sup>1</sup> Ha'e rire yupa rovaigua re ovaē Gerasa pygua kuery yvy re.

<sup>2</sup> Oguejy ramove yvyra rupa oī va'e gui ovaexī ouvy peteī ava nhe'ē vai onhemondea va'e.

<sup>3</sup> Ha'e va'e ma itakua rupi tema oiko. Neī corrente py teī avave rei nomombytaai.

<sup>4</sup> Mba'eta ojopya vy ipy rupi corrente py ojokuaa teī omondo kuerei 'rā, ipy jokoa ferro guigua voi omondopa. Avave rei nda'ipo'akaai hexe.

<sup>5</sup> Pytū nhavō ha'e ára pukukue re ojapukai oikovy itakua rupi, yvyty áry guive. Onheungapa rei oikovy ita re.

<sup>6</sup> Ha'e gui ma mombyry gui oexa Jesus. Ha'e vy onha ouvy vyomboete.

<sup>7</sup> Ojapukai reve aipoe'i:

— Nhanderuete Yvate ete va'e Ra'y Jesus, mba'e tu ndee rerekoxereve? Nhanderuete rery rupi ajerure xemoingo axy e'ŷ aguā — he'i,

<sup>8</sup> mba'eta nhe'ē vai pe Jesus aipoe'i ae ma: "Ejepe'a ke upe va'e ava gui."

<sup>9</sup> Ha'e gui Jesus oporandu:

— Marā rami tu nderery?

Ombovai:

— Xerery ma Heta va'e, mba'eta heta orekuai — he'i.

<sup>10</sup> Ha'e vy ojerure ha'e va'e yvy gui oipe'a e'ŷ aguā.

<sup>11</sup> Ha'e'i py heta ikuai poryko yvyty áry okaruaty py.

<sup>12</sup> Ha'e ramo nhe'ē vai kuery aipoe'i Jesus pe:

— Oremondouka 'rāgue poryko kuery katy ha'e kuery re ju roī aguā — he'i.

<sup>13</sup> Ha'e ramo Jesus omondouka. Ha'e gui nhe'ē vai kuery ojepe'a vy poryko re ju onhemonde. Dois mil poryko rānda'u ikuai. Ha'e gui poryko kuery onhemondyipa vy yvy'ā guy katy onha oje'oivy, ha'e yy py ho'apa vy oy'upa.

<sup>14</sup> Poryko re opena va'e kuery onhamba jogueravy tetā katy, ha'e mba'ety rupi ikuai va'e kuery pe guive omombe'u aguā.

*Mateus 8.34; Lucas 8.35-39*

Ha'e ramo ha'e pygua kuery oupa oexa aguā oiko va'ekue.

<sup>15</sup> Jesus oīa py ha'e kuery ovaē vy oexa ava anha kuery onhemondeague va'e onhemonde ha'e hi'arandua oī porā ju ramo. Ha'e rami vy ndaekorāvei rei okuapy.

<sup>16</sup> Ha'e nunga hexaare kuery omombe'upa ava anha onhemondea va'e re oiko va'ekue, ha'e poryko re guive.

<sup>17</sup> Ha'e rami vy Jesus pe ojerure okuapy ha'e kuery rekaoa gui ojepe'a aguā.

<sup>18</sup> Ha'e ramo kanoā py Jesus oī ramo ava anha onhemondeague va'e ojerure hupive oo aguā.

<sup>19</sup> Ha'e rami teī Jesus ndogueraai. Ha'e vy aipoe'i:

— Tereo ndero katy, ha'e neretarā kuery pe emombe'u Senhor nemboaxyra rupi ojapo va'ekue ha'e javi — he'i.

<sup>20</sup> Ha'e ramo oo vy Decápolis tetā rupi omboypy omombe'u aguā ixupe Jesus ojapo va'ekue ha'e javi. Ha'e ramo onhemondyi pavē.

*Mateus 9.18,19; Lucas 8.40-42*

<sup>21</sup> Yy rovaigua re kanoã py Jesus oo ju ramo heta ete oje'oi avi ye'ẽ rembe re oĩa katy.  
<sup>22</sup> Ovaẽ avi peteĩ ava Jairo hery va'e, onhembo'eaty pygua ruvixa. Ha'e va'e ma oexa Jesus vyve guenapy'ã re oĩ henonde.

<sup>23</sup> Ha'e vy ojerure ete:

— Xerajy'i omano rai'i ma oupy. Eju ke hexe epoko, okuera vy oikove nho aguã — he'i.

<sup>24</sup> Ha'e ramo Jesus oo hexeve.

*Mateus 9.20-22; Lucas 8.43-48*

Heta va'e kuery ombofy rei oje'oivy hupive.

<sup>25</sup> Oiko avi peteĩ kunha doze ma'etõ re ma gueko re riae oiko va'e.

<sup>26</sup> Poropoanoa kuery opa marã oguereko va'ekue, ha'e kuery pe kunha va'e mba'emo oguereko va'ekue ha'e javi ma ome'ẽ teĩ ndokuerai. Ha'e rami'râgue py nda'eveive tema ový.

<sup>27</sup> Jesus mba'emo ojapo oikovya omombe'ua rã kunha va'e oendu vy hakykue gui ou. Heta va'e mbyte gui opoko ijaõ re,

<sup>28</sup> mba'eta aipoe'i vy: "Ijaõ re rive apoko teĩ akuera 'rã" he'i.

<sup>29</sup> Ha'e ramove imba'eaxy optyu'u vyvoi, guete re oendu ombo'eaxy gui okuera ma ra'ea.

<sup>30</sup> Ha'e gui Jesus oikuua vyvoi ixugui ipo'akaa oẽ rã. Ha'e vy heta mbyte pyve ojere vy oporandu:

— Mava'e tu xere opoko?

<sup>31</sup> Ha'e ramo hemimbo'e kuery ombovai:

— Mba'e re tu teta nemboty rei va'eri "Mava'e tu xere opoko?" 're?

<sup>32</sup> Ha'e gui Jesus oyvýry rupi oma'ẽ ho'amy, mava'e pa hexe opoko va'ekue oexa aguã.

<sup>33</sup> Ha'e ramo kunha va'e ma okueraague oikuua vy okyje va'eri oryryipa reve ou. Henonde guenapy'ã re oĩ vy omombe'u oiko va'ekue.

<sup>34</sup> Ha'e ramo aipoe'i:

— Xerajy, rejeroviaa ndereraa jepe. Tereo porã ke, tanemba'eaxyve eme.

*Mateus 9.23-26; Lucas 8.49-56*

<sup>35</sup> Jesus ijayvu teri ho'amy reve amongue ou onhembo'eaty pygua ruvixa ro gui. Ha'e vy tuu pe aipoe'i okuapy:

— Nderajy omano ma. Mba'erã tu remoangeko teri porombo'ea?

<sup>36</sup> Ha'e rã Jesus ma ha'e nunga ayvu re nopenai. Ha'e vy onhembo'eaty pygua ruvixa pe aipoe'i:

— Enhemondyi eme, ejerovia temá — he'i.

<sup>37</sup> Avave rei ndogueraai ngupive, Pedro, Tiago ha'e tyvy João e'ŷ vy.

<sup>38</sup> Onhembo'eaty pygua ruvixa ro py Jesus ovaẽ vy oendu opa marã onhendu va'e, ojae'o ha'e haxẽ-axẽ va'e guive.

<sup>39</sup> Ha'e oike vy aipoe'i:

— Mba'e re tu opa marã penhendu pejae'o vy? Kunha'i nomanoi, oke rima — he'i.

<sup>40</sup> Ha'e ramo ojojai rei okuapy. Ha'e gui omoẽ ukapa ma rire kunha'i va'e ituia py ogueroike tuu, ixy ha'e ngupive ogueraa va'ekue.

<sup>41</sup> Ipo re ojopy vy aipoe'i:

— Talitá cumi — he'i, "Kunha'i, evy ke", he'ia.

<sup>42</sup> Ha'e ramove kunha'i va'e opu'ã vy oguata. Doze ma'etõ ma oguereko. Ha'e ramo onhemondyi pavẽ.

<sup>43</sup> Ha'e rã Jesus aipoe'i avave rei pe omombe'u e'ŷ aguã. Ha'e gui omongaru uka kunha'i va'e.

*Mateus 13.53-58; Lucas 4.16-30*

<sup>1</sup> Ha'e gui Jesus guekoa katy oo guemimbo'e kuery reve.

<sup>2</sup> Sábado ovaẽ ramo nhombo'e onhembo'eaty py.

Nhombo'e rã heta oendu vy onhemondyipa, ha'e vy aipoe'i:

— Magui nda'u ha'e rami oikuua? Mba'exa tu ha'e ramigua 'arandu ixupe ome'ëa? Mba'exa nda'u mba'emo porã ojapo opo py?

<sup>3</sup> Peva'e e'ÿ ri nda'u oo apoa, ha'e Maria memby, Tiago ryke'y, José, Judas ha'e Simão ryke'y? Ha'e apy nhanembyte rupi e'ÿ teve ikuai heindy kuery? — he'i okuapy. Ha'e vy ndojou porã.\*

<sup>4</sup> Ha'e ramo Jesus aipoe'i:

— Neĩ peteĩve profeta nda'ipoi hekoia pygua kuery ae omovaë porã va'erã — he'i.

<sup>5</sup> Ha'e rami rã ha'e py nda'evei mba'evei ojapo aguã opo'akaa rupi. Mbovy'i re opo omoï vy omonguera mba'eaxy gui.

<sup>6</sup> Ha'e kuery ndojeroviaia oexa vy onhemondyi. Ha'e rami vy tekao ha'e katy rai-rai'i oï va'e rupi oo nhombo'e aguã.

*Mateus 10.5-15; Lucas 9.1-6*

<sup>7</sup> Doze guemimbo'e kuery Jesus oenoï vy ombopo'aka nhe'ë vai re. Ha'e vy mokõ-mokoï omondouka.

<sup>8</sup> Ha'e kuery pe aipoe'i:

— Mba'eve peraa eme tape rupi peguataa rupi, peteĩ popoka e'ÿ vy, neĩ mbojape, voko, neĩ peráta nda'evei.

<sup>9</sup> Pendepy regua pemoï aguã ha'eve teĩ peraa eme mokoï kamixa.

<sup>10</sup> Ha'e gui peteĩ oo py pevaëa py ae 'rã pepyta ha'e va'e tekao gui peove peve.

<sup>11</sup> Ha'e rã tekao py napenemovaëai ha'e pendeayvua noendu potaai ramo pejepe'a 'rã ha'e gui. Ha'e pendepy regua gui peity-ity 'rã yvy ku'i, ha'e kuery pe peikuaa uka aguã peja peovya — he'i.\*

<sup>12</sup> Ha'e gui ma hemimbo'e kuery oje'oi vy heta va'e kuery pe omombe'u ojeko rerova aguã.

<sup>13</sup> Oipe'a reta anha kuery, ha'e heta avi imba'eaxy va'e omonguera azeite oikyty reve.

*Mateus 14.1-12; Lucas 9.7-9*

<sup>14</sup> Jesus re opa rupi ima'endu'aa ramo huvixave Herodes avi oendu. Ha'e va'e pe amongue aipoe'i avi:

— João Batista rima omanoague gui onhemboete ju. Ha'e vy 'rãe mba'emo ojapo oikovy opo'akaa rupi.

<sup>15</sup> Amboae ju aipoe'i ixupe:

— Elias rima — he'i.

Ha'e gui amboae ju aipoe'i:

— Peteĩ profeta oiko, yma oiko va'ekue ramigua rima — he'i.

<sup>16</sup> Ha'e rã Herodes ma ha'e nunga oendu vy aipoe'i:

— João akã xee ae ajaya uka va'ekue ri nhi'ã onhemboete ju — he'i.

<sup>17</sup> Mba'eta Herodes ae João ojopy vy nhuã py ojokua uka va'ekue guyvy Filipe ra'yxy Herodias káuxa, hexe omenda rire.

<sup>18</sup> Mba'eta ixupe João “Nda'evei nderyvy ra'yxy rerekoo aguã” he'i ramo.

<sup>19</sup> Ha'e nunga rupi Herodias ndoayvui vy ojukaxe teĩ nda'evei,

<sup>20</sup> mba'eta João pe Herodes “Heko porã ha'e iky'a e'ÿ va'e” he'i vy okyje. Ha'e rami vy opena porã. Ijayvua oendu vy ndoikuaai rei teĩ ojapyxaka porã.

<sup>21</sup> Peteĩ ára ta'yxy oipotaa rami oiko. Herodes ituiague ára py ngaru ojapo guembiguai kuery yvatekueve reve, xondaro ruvixa ha'e Galiléia pygua huvixa kuery pe guive.

<sup>22</sup> Ha'e kuery ikuiaia py Herodias memby oike vy ojeroky ramo Herodes ha'e oenoï uka va'ekue oexa vy ojou porã okuapy. Ha'e ramo kunhataï pe huvixa aipoe'i:

— Ejerure reipota va'e re, xee ame'ë 'rã.

<sup>23</sup> Oura guive:

\* <sup>6:3</sup> João 1.11 \* <sup>6:11</sup> Atos 13.50,51; 18.6

— Mba'emo areko va'e mbyte rupi peve rejerure teĩ ame'ẽ 'rã — he'i.

<sup>24</sup> Ha'e ramo kunhataĩ oo vy oxy pe ranhe oporandu:

— Mba'e nunga re tu tajerure?

Ixy ombovai:

— João Batista akãgue re — he'i.

<sup>25</sup> Ha'e ramove huvixa oĩa py ju ou pojava vy aipoe'i:

— Aipota aÿ'i ma voi xevy reme'ẽ João Batista akãgue peteĩ hy'a py — he'i.

<sup>26</sup> Ha'e ramo huvixa iporiau vaipa, teĩ mesa py hexeve ikuai va'e oendua py oura rire nda'evei ndojapoi aguã.

<sup>27</sup> Ha'e rami vy ijukaarã omondouka vy ijayvu João akãgue ogueru aguã. Ha'e ramo nhuã py oo vy ojaya inhakã,

<sup>28</sup> ha'e peteĩ hy'a py ogueru. Kunhataĩ pe ome'ẽ rã oxy pe ju ogueraa.

<sup>29</sup> João remimbo'e kuery ha'e nunga oendu vy ou. Hetekue ogueraa vy onhono porã huparã ojapo pyre py.

*Mateus 14.13-21; Lucas 9.10-17; João 6.1-14*

<sup>30</sup> Ha'e gui Jesus oĩa py apóstolo kuery ojevypa ju vy ixupe omombe'u ojapo va'ekue ha'e nhombo'league ha'e javi.

<sup>31</sup> Ha'e ramo aipoe'i ha'e kuery pe:

— Jaje'oi nhande kuery ae'i japytu'u ranhe peteĩ henda tekao e'ÿa py — he'i, mba'eta heta oo ha'e ou va'e gui ha'e kuery okaru aguã ma voi nda'evei.

<sup>32</sup> Ha'e rami vy ha'e kuery ae'i kanoã py oje'oi tekao e'ÿa katy.

<sup>33</sup> Ha'e kuery oje'oi rã heta oexa. Oexa kuaa vy tetã ikuai va'e ha'e javi gui onha jogueravy ha'e katy. Yvy rupi oo vy ha'e kuery ranhe ovaëmba.

<sup>34</sup> Ha'e ramo kanoã gui Jesus oguejy vyve heta ikuai va'e oexa. Ha'e vy omboaxy, mba'eta vexa'i ija e'ÿ va'e rami ikuai. Ha'e vy opa mba'e re ombo'e oiny.

<sup>35</sup> Ka'aru'i jave Jesus-a py hemimbo'e kuery ou vy aipoe'i:

— Apy ma tekao e'ÿa py nhandekuai, ka'aru ete ma guive.

<sup>36</sup> Emondoukapa ha'vy imba'ety ha'e kii rai'i tekao ikuai va'e rupi, ho'u va'erã ojogua aguã — he'i okuapay.

<sup>37</sup> Ha'e ramo aipoe'i ha'e kuery pe:

— Peẽ ae peme'ẽ ho'u va'erã.

Ha'e rami rã ha'e kuery ombovai:

— Ore kuery pa toroo duzentos ára repy re torojogua mbojape ha'e kuery ho'u aguã?

— he'i.

<sup>38</sup> Ha'e ramo aipoe'i:

— Mbovy mbojape ha'vy perek? Tapeo pexa.

Ha'e kuery oikuua vy ombovai:

— Peteĩ nhiruĩ mbojape roguereko, mokoï pira'i guive — he'i.

<sup>39</sup> Ha'e ramo nhuã hovy reia oĩ va'e py Jesus omboguapy ukapa peteĩ henda-enda py.

<sup>40</sup> Ha'ekue rami omboja'o peteĩ-teĩ henda py cem, ha'e rã amboae py ma cinqüenta ikuai aguã rami.

<sup>41</sup> Ha'e gui Jesus ma peteĩ nhiruїve mbojape ha'e mokoїve pira ojopy vy yva re oma'ẽ reve oguerovy'a Nhanderuete. Oipe'ã-pe'ã'i vy ome'ẽ guemimbo'e kuery pe ombojoja aguã, mokoїve pira'i guive omboja'o heta va'e kuery pe.

<sup>42</sup> Ha'e javive okaru ma vy hevyatãmba.

<sup>43</sup> Ha'e gui doze varai ju omono'õ mbojape ra'ykue ha'e pira rembyrekue.

<sup>44</sup> Mbojape re avakue okaru va'ekue ma cinco mil.

*Mateus 14.22-33; João 6.16-21*

<sup>45</sup> Ha'e rire'ive Jesus omondouka guemimbo'e kuery kanoã py ha'e kuery ranhe oaxa aguã yupá rovaigua re Betsaida katy, heta va'e kuery ha'e omondoukapa peve.

**46** Omondoukapa ma vy yvyty áry oẽ ov y onhembo'e aguã.

**47** Pytū'i jave yy mbyte rupi kanoã oo oiny jave Jesus ma yvyty áry ha'e ae'i oĩ.

**48** Hemimbo'e kuery renonde katy gui yvytu oipeju ramo ndopykui porãvei rã Jesus oexa. Ha'e gui ko'ẽ rai jave mae ha'e kuerya katy oo. Yy áry rupi oguata ouvy, ha'e kuery renonde oaxa ta merami.

**49** Yy áry rupi oguata ouvy rã ha'e kuery oexa vy “Águe po” he'i vy ojapukai okuapy.

**50** Mba'eta ha'e kuery Jesus oexa vy ndaekorãveipa.

Ha'e ramo ha'e kuery pe ijayvu vy aipoe'i:

— Pendepy'a guaxu ke, xee rima. Pekyje eme – he'i.

**51** Ha'e vy ha'e kuery reve kanoã py oĩ ramove yvytu optytu'u. Ha'e ramo onhemondyipa okuapy,

**52** mba'eta inhakã ratã vy ndoikuaai teri neĩ opo'akaa rupi mbojape omboetaveague.

### *Mateus 14.34-36*

**53** Yy rovaigua re oaxa vy Genesaré yvy re ovaẽ. Ha'e py ma kanoã omboja.

**54** Kanoã gui ha'e kuery oẽmba ramove heta va'e kuery oexa kuaa okuapy Jesus.

**55** Ha'e rami vy teko a ikuai va'e ha'e javi rupi onha-onha vy ogueru imba'eaxy va'e kuery. Hupa reve ogueru Jesus oĩa oendua katy.

**56** Ha'e gui ma teko a py Jesus ovaẽa py rei, tetã e'ỹ vy imba'ety va'e kuerya py, e'ỹ vy tetã mbyte py mba'e ovaẽ rã oguerua 'rã imba'eaxy va'e kuery. Ovaẽ aguã py omoĩ vy ixupe ojerure ijao apy'i re ri jepe opoko aguã. Ha'e ramo opoko va'e ha'e javi okuera.

## 7

### *Mateus 15.1-20*

**1** Jesus-a py onhemboaty fariseu ha'e kuaxia re nhombo'e va'ety kuery Jerusalém gui ou va'ekue.

**2** Ha'e vy oexa rã hemimbo'e kuery regua ojepoei e'ỹ re okaru.

**3** (Ha'e rã fariseu ha'e judeu kuery ha'e javi ma ymagua kuery nhombo'eague rami vy ojepoei ma vy mae 'rã okaru.

**4** Tetã mbyte gui ovaẽ vy voi onhemoakỹ ranhe 'rã okaru aguã. Ha'e rami vy hekorã oeja pyre heta oguereko mba'emo ojoi aguã: karo, yryru, oja overa va'e guigua, [ha'e tupa guive].)

**5** Ha'e nunga rupi fariseu ha'e kuaxia re nhombo'e va'ety kuery oporandu Jesus pe:

— Mba'e re tu neremimbo'e kuery ma ymagua kuery nhombo'eague rami nda'ikuai?

Mba'eta ojepoei e'ỹ re okaru.

**6** Ha'e ramo ombovai:

— Pendeko porã merami rive va'e, peẽ kuery reko re profeta Isaías ha'evea rami ijayvu raka'e. Ha'e vy ombopara imoiny: “Kova'e kuery ma ojuru py rive xemboete, ha'e rã ipy'a ma mombyry xegui.

**7** Avakue ojapo uka va'e re nhombo'e vy xembojerovia merami rive”, he'i va'ekue.\*

**8** Ha'e rami vy peẽ kuery Nhanderuete ojapo uka va'ekue ndapejapoi pekuapy, avakue ojapo uka va'e rive pejapoxeve vy – he'i.

**9** Aipoe'ive ju:

— Peẽ kuery opa marã pemboyke Nhanderuete ojapo uka va'ekue, pende ae reko rami rive pendekuai aguã.

**10** Mba'eta Moisés aipoe'i: “Remboete 'rã nderu ha'e ndexy. Ha'e rã nguu ha'e oxy re ijayvu vai va'e pejuka 'rã”, he'i va'ekue.\*

**11** Ha'e rã peẽ ma aipopeje: “Nguu e'ỹ vy oxy pe amongue aipoe'i 'rã: ‘Mba'emo pẽvy peguarã areko va'ekue ma Nhanderuete pe ju amboaxa’, he'i teĩ ha'eve”, peje.

**12** Ha'e rami vy tuu ha'e ixy naapeipytyvõ ukai.

\* **7:7** Isaías 29.13 \* **7:10** Êxodo 20.12, 21.17; Levítico 20.9; Deuteronômio 5.16

13 Ha'e rami py pemboyke Nhanderuete ayvu, penderekko rami rive penhomoingo vy. Peē kuery ha'e rami anho penhombo'e. Oĩ retave ju ha'e va'e ramigua pejapo va'e – he'i.

14 Teīgue ju heta va'e kuery oenoĩ vy aipoe'i:  
— Pejapyxaka pavē peikuaa aguā.

15 Avakue ryepy py mba'emo oike va'e'ŷ omboeko ky'a. Avakue gui oẽ va'e anho 'rã omboeko ky'a.

16 [Ijapyxa oendu aguā oĩ va'e toendu] – he'i.

17 Ha'e gui heta va'e kuery oeja vy oike opy. Ha'e ramo hemimbo'e kuery ou vy ojerure mba'emo re ombojojaague omombe'u porāve aguā re.

18 Ha'e ramo ombovai:

— Peē voi teve napendu kuaai, ha'e ndapeikuai? Avakue ryepy py oike va'e'ŷ 'rã omboeko ky'a,

19 mba'eta ndoikei 'rã ikuraxõ re. Hye rupi oaxa vy oẽ ju 'rã hete gui – he'i. Ha'e rami vy tembi'u ma guive rã nanhanemboeko ky'ai 'rãa re ijayvu.

20 Aipoe'i avi:

— Mba'emo avakue gui oẽ va'e anho 'rã omboeko ky'a.

21 Avakue py'a gui ae 'rã oẽ imboeko ky'aarã: opa marã rei oikoxea, imondaxeia, jojukaxeia, itavy reixeia,

22 nhomba'e re hakāte'ŷa, ojapo vaixea, nhombotavypaxea, ndojejokoia, joapo vaixea, ijayvu vaixea, onhemboyyate reixeia ha'e na'inhakã porāveia rupi oikoa.

23 Ikuraxõ gui ha'e va'e nunga oẽ va'e anho 'rã imboeko ky'aarã oĩ.

### *Mateus 15.21-28*

24 Jesus opu'ã vy oo ha'e gui Tiro [ha'e Sidom] yvy katy. Peteĩ oo py ovaẽ vy oĩa ndoikuua ukaxei avave rei pe teī nda'evei onhemi aguā.

25 Mba'eta peteĩ kunha ou imemby re nhe'ẽ vai onhemondea va'e. Jesus re ima'endu'aa rã oendu vy ou, ha'e vy guenapy'ã re oĩ ipy yvýry.

26 Ha'e va'e kunha ma Siro-fenícia pygua, ha'e grego ayvu py ijayvu va'eri ojerure oiny imemby gui anha oipe'a aguā.

27 Ha'e ramo Jesus aipoe'i:

— Tove ta'y kuery ranhe tokarupa. Nda'evei mbojape jajopy aguā ta'y kuery po gui, jagua'i ikuai va'e pe nhamombo aguā.\*

28 Kunha va'e ombovai:

— Tá, Senhor. Ha'e rami avi jagua'i teī mesa guýry ho'u 'rã kyrĩ va'e rembi'u kure – he'i.

29 Ha'e ramo Jesus aipoe'i:

— Po rami ri rembovai rire tereo ju. Nememby gui anha ojepe'a ma – he'i.

30 Ha'e ramo ngoo py ovaẽ vy ojou kunha'i va'e tupa rupi itui porā rã, ixugui anha ojepe'a ma ra'e.

### *Noendui ha'e nda'ijayvui va'e omongueraague*

31 Tiro yvy gui ojepe'a vy oaxa ov y Sidom rupi. Galiléia yupi peve oo Decápolis yvy rupi.

32 Ha'e ramo oĩ py peteĩ oguerua noendui ha'e nda'ijayvui va'e. Ha'e vy ojerure hexe opoko aguā.\*

33 Ha'e ramo heta va'e mbyte gui Jesus ogueraa ranhe mombyry'i ha'e ae'ia py. Ha'e vy ijapyxa py opo'ẽ, inhapekũ re opoko guive guendyry reve.

34 Yva re oma'ẽ vy ipytuẽ atã. Ha'e vy aipoe'i:

— Efatá – he'i, “Ejepe'a ke” he'ia.

35 Ha'e ramo oendu xapy'a, na'inhapekũ ratãvei vyvoi guive. Ha'e vy ijayvu porā.

\* 7:27 Judeu e'ŷ va'e kuery pe judeu kuery “Jagua kuery” he'i. Ha'e rami Jesus ijayvu ojerovia ete paa oexaxe vy.

\* 7:32 Mateus 15.29-31

<sup>36</sup> Ha'e gui ha'e kuery pe aipoe'i avave rei pe omombe'u e'ŷ aguã. Ha'e rami teĩ omongetavea ramive ma omombe'uve tema oje'oivy.

<sup>37</sup> Mba'eta onhemondyipa vy aipoe'i okuapy:

— Ha'evea rami meme ojapo. Mba'eta ojapo nda'ijayvui va'ekue ijayvu, ha'e noendui va'ekue oendu ju aguã rami.

## 8

### Mateus 15.32-39

<sup>1</sup> Ha'e jave heta va'e kuery ono'õa py teĩgue ju ndoguerekoi ho'u va'erã. Ha'e ramo Jesus guemimbo'e kuery oenoĩ vy aipoe'i:

<sup>2</sup> — Xee amboaxy kova'e kuery, mba'eta mboapy ára ma xerupive ikuai rire mba'eve ndoguerekovei ho'u va'erã.

<sup>3</sup> Okaru e'ŷ re hoo katy amondouka ramo ho'apa 'rã tape rupi, mombyry gui ou rire — he'i.

<sup>4</sup> Ha'e rã hemimbo'e kuery aipoe'i:

— Apy tekao e'ŷa py magui 'rã tu jajou mbojape kova'e kuery peguarã?

<sup>5</sup> Jesus oporandu:

— Mbovy tu mbojape perekó?

Ha'e kuery ombovai:

— Sete — he'i.

<sup>6</sup> Ha'e gui Jesus aipoe'i heta va'e kuery oguapy aguã yvy py, ha'e vy ojopy sete-ve mbojape. Nhanderuete oguerovy'a vy oipe'ã-pe'ã'i, ha'e guemimbo'e kuery pe ome'ẽ heta va'e kuery pe ju omboja'o-ja'o aguã.

<sup>7</sup> Ogueroko avi amongue pira'i. Ha'e gui oguerovy'a vy aipoe'i ha'e va'e voi ombojoja aguã.

<sup>8</sup> Ha'e kuery okaru ma vy hevyatãmba. Ho'u va'ekue rembyre ma sete ajaka py omboyro.

<sup>9</sup> Quattro mil avakue rãnda'u ikuai. Ha'e gui mae ma Jesus omondoukapa.

<sup>10</sup> Ha'e rire'ive guemimbo'e kuery reve kanoã py oĩ vy Dalmanuta yvy katy ju oje'oi.

### Mateus 16.1-4

<sup>11</sup> Jesus oĩa py fariseu kuery jogueru vy hexeve ijayvu ete okuapy. Ha'e rami vy oeko a'ã vy ojerure yva guigua hexa pyrã ojapo aguã re.

<sup>12</sup> Ha'e ramo Jesus opy'apy guive ipytuẽ atã vy aipoe'i:

— Mba'e re tu peẽ kuery pejerure yva guigua hexa pyrã re? Anhetẽ aipoa'e pãvy: Aŷgua kuery pe ndojapoai 'rã peteïve — he'i.

<sup>13</sup> Ha'e gui ojepe'a vy oĩ ju kanoã py, ha'e yy rovaigua re oo.

### Mateus 16.5-12

<sup>14</sup> Hupive hemimbo'e kuery oo vy hexarai mbojape ogueraa aguã. Peteï'i mbojape anho oguereko kanoã py.

<sup>15</sup> Jesus aipoe'i:

— Ma'ẽ, penheangu ke fariseu kuery ha'e Herodes regua trigo mbovua gui — he'i.

<sup>16</sup> Ha'e ramo ha'e kuery aipoe'i jomeme:

— Po rami ijayvu mbojape ndoroguerui rã — he'i.

<sup>17</sup> Ha'e nunga Jesus oikuaa vy oporandu:

— Mba'e re tu pendeayvu mbojape ndaperekia re? Peneakã ratã vy napendu kuaai, neĩ ndapeikuuai teri teve?

<sup>18</sup> Penderexa oĩ va'eri ndapexai teve, pendeapyxa voi oĩ va'eri napendui teve? Napen-ema'endu'ai teve

<sup>19</sup> cinco mil pe peteï nhiruĩ mbojape aipe'ã-pe'ã'i jave mbovy varai renyẽ tu ha'ykue pemono'õ raka'e?

Ha'e kuery ombovai:

— Doze — he'i okuapy.

**20** — Ha'vy quattro mil pe sete mbojape aipe'ã-pe'ã'i jave mbovy ajaka renyẽ tu ha'ykue pemono'õ?

Ha'e kuery

— Sete — he'i okuapy.

**21** Ha'e ramo Jesus aipoe'i:

— Ndapeikuaai teri teve?

### *Betsaida py ára revegua e'ŷ omongueraague*

**22** Ha'e gui ma Betsaida py ovaẽ. Ha'e ramo ixupe peteĩ ára revegua e'ŷ herua vy ojerurea opoko aguã re.

**23** Ha'e ramo ára revegua e'ŷ po re Jesus ojopy vy oguerojepe'a tekoa gui. Ha'e gui hexa re oikyty guendyry, ha'e hexe opoko vy oporandu:

— Rexa ma pa mba'emo?

**24** Ha'e rã oma'ẽ vy ombovai:

— Aexa avakue va'eri yvyra merami oguata rã — he'i.

**25** Ha'e ramo opoko ju. Ha'e ramo okuera vy opa mba'e oexa porã.

**26** Ha'e vy Jesus aipoe'i imondovy:

— Tereo ke ndero py tekoa py revaẽ e'ŷ re.

### *Mateus 16.13-20; Lucas 9.18-21*

**27** Ha'e rire Jesus guemimbo'e kuery ogueraa Cesaréia de Filipe regua tekoa ikuai va'e katy. Tape rupi ooa rupi oporandu ha'e kuery pe:

— Marã ramigua aikoa rami tu heta va'e kuery oikuaa?

**28** Ha'e kuery ombovai:

— João Batista. Ha'e rã amboae kuery ma “Elias” he'i. Ha'e rã amboae kuery ju ma “Peteĩ profeta” he'i 'rã ndevy — he'i okuapy.

**29** Ha'e ramo oporanduve ju:

— Ha'vy peẽ kuery, marã ramigua aikoa pa peẽ peikuaa?

Pedro ombovai:

— Ndee ma Cristo — he'i.

**30** Ha'e ramo Jesus aipoe'i avave rei pe nomombe'ui ranhe aguã.

### *Mateus 16.21-23; Lucas 9.22*

**31** Ha'e gui omboypy po rami ombo'e aguã:

— Ava ra'y ojeapo va'ekue oiko axy 'rãe opa mba'e py. Hexe opu'ã rei 'rã nhomongeta va'ety, sacerdote yvatekueve va'e ha'e kuaxia re nhombo'e va'ety kuery. Ojukaa 'rã. Ha'e rire mboapy araa py onhemboete ju 'rã.

**32** Ha'e ramí Jesus ijayvu vy onhemombe'u porã. Ha'e ramo Pedro ha'e ae'ia py oenoĩ vy ndojou porãia rami ijayvu.

**33** Ha'e ramo Jesus ojere vy guemimbo'e kuery ikuiaia katy ju oma'ẽ. Ha'e vy Pedro pe ijayvu vy aipoe'i:

— Satanás, ejep'e a ke xea gui, mba'eta ndee ma Nhanderuete guigua ndereikuuai, avakue guigua anho.

### *Mateus 16.24-28; Lucas 9.23-27*

**34** Ha'e gui ma guemimbo'e kuery oenoĩmba, heta va'e kuery guive. Ha'e kuery pe aipoe'i:

— Xerupive oikoxe va'e taexarai ojegui ae, togueraa ojeupegua kuruxu, ha'e gui tou xerakykue.

**35** Mba'eta nomanoxei ete va'e ma omokanhy 'rã guekove. Ha'e rã xekáuxa ha'e ayvu porã káuxa omano va'e ma ogueraa jepe uka 'rã guekove.\*

---

\* **8:35** João 12.24-26; Apocalipse 2.10; 12.11

**36** Mba'e 'rã tu avakue ojou, mba'emo yvy regua ha'e javi oguerekopa va'eri guekove ae omokanhy vy?

**37** Mba'e nunga 'rã tu ome'ẽ onhe'ẽ rekovia?

**38** Mba'eta aŷguua kuery itavy rei ha'e ojejavypa rei va'e mbyte amongue ikuai vy xererox̄ 'rã, ha'e xeayvua guive. Ha'e rami rire ha'e kuery ma Ava ra'y ojeapo va'ekue voi oguerox̄ 'rã Nguu rexakā rupi ou vy, anjo iky'a e'ŷ va'e kuery reve.

## 9

**1** Aipoe'ive ju:

— Anhetẽ aipoa'e pẽvy: Apy peĩ va'e regua amongue napemanoi 'rã Nhanderuete po'akaa ojekuaa ouvy rã pexa e'ŷa ja, opo'akaa oexa uka jave.

*Mateus 17.1-8; Lucas 9.28-36*

**2** Mboapy meme araa py Jesus ngupive ogueraa Pedro, Tiago ha'e João ha'e kuery ae'i. Peteĩ yvyty yvate va'e áry oo. Ha'e py ma guexakā py ojekuaa ha'e kuery renonde.

**3** Ijaoo voi hexakāmba ha'e xiimba rei. Ao joia jipoi ha'e rami ojoi kuaa va'e.

**4** Hexeve ojekuaa avi ho'amy Elias ha'e Moisés. Ha'e vy ijayvu okuapy Jesus reve.

**5** Ha'e ramo Pedro aipoe'i:

— Orembo'ea, ha'eve apy nhaŷve aguã. Ha'e rami vy rojapo 'rã mboapy oo'i: peteĩ ma ndevy guarã, amboae ma Moisés pe, ha'e gui amboae ju ma Elias peguarã — he'i.

**6** Oikuua vy e'ŷ ijayvu, mba'eta ha'e kuery onhemondyipa.

**7** Ha'e ramove peteĩ arai ou vy ojao'ipa. Ha'e va'e mbyte gui peteĩ ayvu onhendu:

— Peva'e ma Xera'y ayvu ete va'e. Pejapyxaka ijayvua re ae — he'i va'e.\*

**8** Ha'e ramo ha'e kuery oyvýry rupi oma'ẽmba teĩ peteĩve ndoexavei hexeve. Oexa va'e Jesus anho.

*Mateus 17.9-13*

**9** Yvyty áry gui ha'e kuery oguejy jogueruvy rã Jesus aipoe'i:

— Avave rei pe pemombe'u eme pexa va'ekue, Ava ra'y ojeapo va'ekue omanoague gui onhemboete ju e'ŷa ja — he'i.

**10** Ha'e rami ijayvuague ha'e kuery omoõ porã. Ha'e rami avi jomeme oporandu okuapy omanoague gui onhemboete ju 'rãa oikuaaxe vy.

**11** Oporandu avi okuapy Jesus pe:

— Mba'e re tu ha'vy kuaxia re nhombo'e va'ety kuery ijayvu okuapy Elias ranhe ou 'rãa re?

**12** Ombovai:

— Anhetẽ ae Elias ha'e ranhe ou vy opa mba'e omoõmba porã ju 'rã. Ha'e rami avi Ava ra'y ojeapo va'ekue rekorã re ipara oinya py, mba'exa tu oĩ oiko axy ha'e ombojaru reia 'rãa rami?

**13** Xee aipoa'e pẽvy: Elias ou ae ma teĩ hekorã re ipara oinya rami vy hexe ha'e kuery ojapo okuapy oipotaa rami ae.\*

*Mateus 17.14-21; Lucas 9.37-43*

**14** Hemimbo'e kuery mboae ikuaria py ovaẽ jogueruvy ramo heta avi ou ha'e py. Ha'e rã kuaxia re nhombo'e va'ety kuery ijayvu okuapy ha'e kuery reve.

**15** Heta va'e kuery Jesus oexa vy onhemondyipa okuapy. Ha'e vy onhamba jogueruvy oxarura aguã.

**16** Ha'e ramo kuaxia re nhombo'e va'ety kuery pe Jesus oporandu:

— Mba'e nunga re tu pendeyayvu ra'e ha'e kuery reve?

**17** Ha'e gui heta va'e mbyte gui peteĩ aipoe'i:

— Porombo'ea, ndea py aru xera'y nhe'ẽ vai nomboayvui rã.

\* **9:7** 2 Pedro 1.16-18 \* **9:13** Elias re ijayvu João Batista re ijayvu vy. Mateus 17.11-13

18 Mba'eta oikoa rupi oity xapy'a jepi 'rā. Ijuru ryjui ha'e haī jekyty, inhangai ma ovv. Ajerure teī neremimbo'e kuery oipe'a aguā, ha'e kuery ndoipe'a kuaai – he'i.

19 Ha'e ramo Jesus aipoe'i:

— Peē pejerovia e'ŷ va'e, raka'e peve 'rā tu aiko pendereve? Raka'e peve 'rā tu rogueropo'aka? Eru ha'vy ava'i apy – he'i.

20 Ha'e ramo ogueru. Ha'e gui ava'i Jesus oexa ramove nhe'ē ombovava ratā vyvoi. Ha'e vy yvy rupi ho'a vy ojere-jere oupy, ijuru ryjuipa guive.

21 Jesus oporandu kyrī va'e ru pe:

— Araka'e ma tu guī nunga oiko hexe?

Tuu ombovai:

— Kyrī'i guive.

22 Mbovykue rei e'ŷ ma tata py ha'e yy py oity ojukaxe vy. Ndevy pe ha'eve ri rā oremboaxy 'rāgue, oreptytvō.

23 Jesus ombovai:

— "Ha'eve ri rā" 're va'e ty'y? Opa mba'e ndaxyi ojerovia va'e pe – he'i.

24 Ha'e ramo kyrī va'e ru [hexay reve] ojapukai:

— Xee ajerovia. Xeptytvō avi ajeroviave aguā – he'i.

25 Heta va'e kuery oupa rā Jesus oexa vy ijayvu atā nhe'ē vai pe:

— Nhe'ē nanhomboayvui ha'e nanhomboapyxai va'e, ejep'e a ke kyrī va'e gui, ejuve eme hexe – he'i.

26 Ha'e ramo nhe'ē vai ojapukai reve ombovava ratā vy ojepe'a, oeja ovv he'ōgue rami. Pavē rei "Omano" he'i okuapy.

27 Ha'e rā Jesus ma ipo re ojopy vy ombovy ramo opu'ā ho'amy.

28 Ha'e gui ma opy oike ma ramo hemimbo'e kuery oporandu ha'e kuery ae'ia py:

— Mba'e re tu ore ndoroipe'a kuaai ra'e anha?

29 Ombovai:

— Ha'e va'e nunga ma nhanhembo'e [ha'e jakaru e'ŷ re nhandekuai] vy 'rāe jaipe'a.

*Mateus 17.22,23; Lucas 9.43b-45*

30 Ha'e kuery oje'oi vy oaxa Galiléia rupi. Jesus ndoipotai avave rei oikuua oīa,

31 mba'eta guemimbo'e kuery ombo'e vy aipoe'ia rami:

— Ava ra'y ojeapo va'ekue omboaxaa 'rā avakue po py, ha'e rā ha'e kuery ojuka 'rā. Ha'e gui mboapy araa py onhemboete ju 'rā omanoague gui – he'i.

32 Ha'e rā ha'e kuery ndoikuuai teī nda'ipy'a guaxui vy noporandui guive ha'e nunga re.

*Mateus 18.1-5; Lucas 9.46-48*

33 Ha'e gui Cafarnaum katy ju ha'e kuery oje'oi. Opy Jesus oike vy oporandu guemimbo'e kuery pe:

— Mba'e nunga re tu pendeayvu ra'e tape rupi?

34 Ha'e ramo ha'e kuery okyrirī okuapy, mba'eta mava'e pa joegui yvateve 'rāa re tape rupi ijayvu rire.

35 Ha'e ramo oguapy oiny vy oenoī doze-ve guemimbo'e kuery. Ha'e vy aipoe'i:

— Ha'e ranhexe va'e ma opyta 'rā takykue pavē rembiguairā – he'i.

36 Ha'e gui peteī kyrī va'e ogueru vy omopu'ā hen'o'amy ha'e kuery mbyte. Oikuavā vy aipoe'i ha'e kuery pe:

37 — Amongue xerery rupi peteī kyrī va'e kova'e ramigua omovaē vy xee avi xemovaē. Ha'e xemovaē va'e ma xee anho e'ŷ xemovaē, xembouare avi omovaē.

*Lucas 9.49,50*

38 Ha'e gui João aipoe'i:

— Orembo'ea, roexa kuri peteī ava nderery rupi anha oipe'a rā, nhanderupive e'ŷ oiko va'e. Ha'e ramo ndoroipe'a ukavei, nhanderupiveguā e'ŷ ramo – he'i.

39 Ha'e ramo Jesus ombovai:

— Nda'evei ndapeipe'a ukai aguã, mba'eta xerery rupi tembiapo porã ojapo va'e nda'ijayvu vai 'rã xere.

<sup>40</sup> Mba'eta nhanderovaigua e'ŷ va'e ma nhanderupivegua ae.

<sup>41</sup> Anhetẽ aipoa'e pẽvy: Cristo pegua peiko ramo xerery rupi amongue peteĩ karo yy ri jepe pendevy ome'ẽ rire ndojopy e'ŷi 'rã ojapoague repy.

*Mateus 18.6-9; Lucas 17.1,2*

<sup>42</sup> — Ha'e rã kova'e kyr̄gue va'e regua ojeroviaa gui amongue oity 'rãgue py ha'eveve oityxe va'e aju'y re ita guaxu mba'emo mongu'ia ojokua pyre reve ye'ẽ mbyte py omomboa va'e rire.

<sup>43</sup> Xapy'a rei rã ndepo ri ndererojejavý ramo ejaya, mba'eta ha'eveve ndepo rovaikue'i reve reikove aguã py reike aguã, ndepo jovaive reve tata ogue e'ŷ va'e py reo 'rãgue py.

<sup>44</sup> [Mba'eta ha'e py ma yxo noomanovei ma 'rã, neĩ tata voi ndoguevei ma 'rã.]

<sup>45</sup> Ha'e rami e'ŷ vy ndepy ri ndererojejavý ramo ejaya. Mba'eta ha'eveve ndepy rovaikue'i reve reikove aguã py reike aguã, ndepy jovaive reve tata ogue e'ŷ va'e py nemomboa 'rãgue py.

<sup>46</sup> [Ha'e py ma noomanovei ma 'rã yxo, neĩ tata voi ndoguevei ma 'rã.]

<sup>47</sup> Xapy'a rei nderexa ri ndererojejavý ramo enoẽ. Mba'eta ha'eveve Nhanderuete po'akaa py peteĩ'i nderexa reve reike aguã, mokoĩve nderexa reve tata ogue e'ŷ va'e py nemomboa 'rãgue py.

<sup>48</sup> Ha'e py ma noomanovei ma 'rã yxo, neĩ tata voi ndoguevei ma 'rã.\*

*Mateus 5.13; Lucas 14.34,35*

<sup>49</sup> — Mba'eta peteĩ-teĩ tata rupi peaxa vy omoe'ẽ mbyre 'rã pendekuai.

<sup>50</sup> Juky ma iporã vaipa. Ha'e rã xapy'a rei nae'ẽvei rire mba'exa 'rã tu he'ẽ ju? Peẽ kuery voi pendejee ae perek'o 'rãgue juky, jomeme pendekuai porã aguã.

## 10

*Mateus 19.1,2*

<sup>1</sup> Jesus opu'ã vy oo ha'e gui Judéia rupi Jordão yakã rovaigua re. Teĩgue ju oĩa py heta va'e kuery ono'õ okuapy. Ha'e ramo ojapoaty rami vy ombo'e ju.

*Mateus 19.3-9; Lucas 16.18*

<sup>2</sup> Ha'e jave py fariseu kuery regua onhemboja jogueruvy vy oeko a'ã. Ha'e vy oporandu okuapy:

— Ha'eve ri nda'u ime kuery opoi aguã gua'yxy gui?

<sup>3</sup> Ha'e ramo ha'e ju oporandu ha'e kuery pe:

— Mba'e tu Moisés ojapo uka pendevy?

<sup>4</sup> Ha'e kuery ombovai:

— Moisés ojapo uka raka'e kuaxia omendaague regua ombovaipa aguã, ha'e gui ma opoi aguã — he'i.

<sup>5</sup> Ha'e ramo Jesus aipoe'i:

— Peneakã ratã ramo ha'e rami oeja ipara va'e pejapo aguã.

<sup>6</sup> Ha'e rã yvy itui ypy'i guive ma Nhanderuete omoingo ava ha'e kunha.\*

<sup>7</sup> Ha'e nunga rupi ava oeja 'rã nguu ha'e oxy, [gua'yxy reve onhemoirũ aguã].\*

<sup>8</sup> Ha'e gui gua'yxy reve mokoĩ 'rãgue py peteĩ'i to'o ma ikuai. Ha'e rami vy mokoĩ ve'ŷ ikuai, peteĩ'i to'o ma.

<sup>9</sup> Ha'e nunga rupi Nhanderuete omoirũ rire avave rei tomboja'o eme — he'i.\*

<sup>10</sup> Opy ikuai jave ixupe hemimbo'e kuery oporandu ju ha'e nunga re.

<sup>11</sup> Ha'e ramo aipoe'i:

— Gua'yxy gui ava opoi vy amboae re omenda va'e ma itavy gua'yxy ae pe.

\* **9:48** Isaías 66.24 \* **10:6** Gênesis 1.27 \* **10:7** Gênesis 2.24 \* **10:9** 1 Coríntios 7.10-16

**12** Ha'e rami ae ome gui kunha va'e opoi vy amboae re omenda va'e voi itavy avi.

*Mateus 19.13-15; Lucas 18.15-17*

**13** Ha'e gui oĩa py oguerua kyrīgue ha'e kuery re opo omoĩ aguã. Ha'e rã hemimbo'e kuery ma herua kuery pe ijayvu ete.

**14** Jesus ha'e nunga oexa vy ndojou porãi. Ha'e vy aipoe'i:

— Tove tou kyrīgue'i xea py, pejoko eme, mba'eta peva'e ramigua'i peguarã ae Nhanderuete po'akaa.

**15** Anhetẽ aipoa'e pãvy: Amongue kyrīgue rami e'ŷ Nhanderuete po'akaa nomovaõxei vy ndoikei 'rãe ha'e py — he'i.

**16** Ha'e gui kyrīgue oikuavã vy ha'e kuery re opo omoĩ ogueroayvu porã reve.

*Mateus 19.16-22; Lucas 18.18-23*

**17** Ha'e gui tape rupi Jesus oo ju ma oiny rã onha ouvy peteĩ ava ovaexi aguã. Guenapy'ã re oĩ vy oporandu:

— Porombo'ea nderekoo porã va'e, mba'e nda'u ajapo 'rã tekove marã e'ŷ aupity aguã?

**18** Jesus ombovai:

— Mba'e re tu "Nderekoo porã va'e", 're xevy? Avave rei ndaeko porãi peteĩ'i e'ŷ vy. Ha'e va'e ma Nhanderuete.

**19** Reikuaa ae ma ojapo uka va'ekue: Ejojuka eme, ndetavy eme, nemonda eme, ndeapu eme, ejokore eme, emboete nderu ha'e ndexy — he'i.

**20** Ha'e ramo ava va'e ombovai:

— Porombo'ea, ha'e nunga ha'e javi ajapopa ae ma, xekyrī guive.

**21** Ha'e rã Jesus hexe oma'ẽ vy oayvu. Ha'e vy aipoe'i:

— Peteĩ mba'e ma oata teri ndevy. Tereo evendepã rereko va'e ha'e javi, ha'e hepykue eme'ëmba iporiaukue'i pe. Ha'e vy 'rãe rereko ovareve va'e yva re. Ha'e gui mae eju xerupive — he'i.\*

**22** Ha'e rami ijayvuague ava va'e ndojou porãi vy iporiau ovvy, oguerekopa va'e vy.

*Mateus 19.23-30; Lucas 18.24-30*

**23** Ha'e gui Jesus oyvýry oma'ẽ vy aipoe'i guemimbo'e kuery pe:

— Haxy ete oguerekopa va'e kuery Nhanderuete po'akaa py oike aguã — he'i.

**24** Ha'e rami ijayvu rã hemimbo'e kuery oendu vy onhemondyipa. Ha'e ramo Jesus aipoe'ive ju:

— Xera'y kuery, haxy ete mba'emo oguerekopa va'e re rive ojerovia va'e oike aguã Nhanderuete po'akaa py.

**25** Nhanderuete po'akaa py oguerekopa va'e oikea gui ndaxyive cameloo oaxa aguã juu nambi kua rupi — he'i.\*

**26** Ha'e ramo ha'e kuery onhemondyipave vy aipoe'i jomeme:

— Marã ramigua 'rã tu ha'vy oo jepe?

**27** Ha'e kuery re Jesus oma'ẽ vy aipoe'i:

— Ha'e nunga ma avakue pe haxy ete, ha'e rã Nhanderuete pe ma any, mba'eta Nhanderuete pe mba'eve ndaxyi — he'i.

**28** Ha'e ramo Pedro aipoe'i:

— Ore kuery ma opa mba'e roejapa va'ekue nderupive orekuai aguã.

**29** Jesus ombovai ju:

— Anhetẽ aipoa'e pãvy: Ha'e javi xekáuxa ha'e ayvu porã káuxa ngoo oeja va'e, guyvy, gueindy, oxy, nguu, gua'y e'ŷ vy omba'ety,

**30** ha'e kuery ma aŷ voi ojou retave 'rã: guyvyrã, gueindyrã, oxyrã, gua'yrã ha'e omba'etyrã ojou 'rã oiko axy reve, ha'e gui yvy pyau re ju oupity 'rã tekove marã e'ŷ.

\* **10:21** Romanos 3.19,20; Tiago 2.10

\* **10:25** 1 Timóteo 6.6-10

**31** Ha'e rami avi tenonde pyguare heta opyta 'rā takykue py, ha'e rā takykue pyguare ma opyta 'rā tenonde py.

*Mateus 20.17-19; Lucas 18.31-33*

**32** Ha'e gui ma Jerusalém katy oguata oje'oviv. Jesus ma guemimbo'e kuery renonde oo oiny. Ha'e rā ha'e kuery ma onhemondyi ha'e okyje rei reve hakykue oje'oi. Ha'e gui ma ha'e kuery ae'i ikuai aguā py Jesus ogueraa doze guemimbo'e kuery. Ha'e vy ha'e kuery pe omombe'u porāve hexe oiko va'erā. Ha'e vy aipoe'i:

— Pendu ke. Aÿ ma jaje'oi nhainy Jerusalém katy. Ha'e py ma Ava ra'y ojeapo va'ekue ojopy ukaa 'rā sacerdote yvatekueve va'e ha'e kuaxia re nhombo'e va'ety kuery pe. Ha'e kuery ojuka uka vy omboaxa 'rā amboae regua kuery pe.

**34** Ha'e kuery ojavyky rei ha'e onyvōmba 'rā hexe, ha'e gui oinupāmba ma rire ojuka 'rā. Ha'e gui mboapy araa py onhemboete ju 'rā.

*Mateus 20.20-28*

**35** Ha'e ramo Jesus re onhemboja Zebedeu ra'y kuery Tiago ha'e João. Ha'e vy aipoe'i:  
— Orembo'ea, ejapo orevy rojerure taa.

**36** Ha'e ramo oporandu ha'e kuery pe:

— Mba'e tu peipota ajapo pēvy?

**37** Ha'e kuery ombovai:

— Nerexakā reve reju vy oremoī 'rāgue peteī ndeauxu e'ÿa re, ha'e rā amboae ma ndeauxua re — he'i.

**38** Jesus ombovai:

— Ndapeikuuaai mba'e nunga re pa pejerurea. Peē nda'u pey'u 'rā ri karo xee ay'u aguā va'e gui? Penhemongarai uka 'rā ri xee anhemongarai ukaa rami?\*

**39** Ha'e kuery aipoe'i:

— Ha'eve.

Jesus aipoe'i ju:

— Pey'u 'rāe karo xee ay'u aguā gui, ha'e penhemongarai uka avi 'rā xee anhemongarai ukaa rami.

**40** Ha'e rā xeauxu e'ÿa re ha'e xeauxa re oguapy va'erā ma xee e'ÿ 'rā aiporavo. Ha'e rami aguā ma oguereko katu pyre pe anho — he'i.\*

**41** Ha'e nunga hemimbo'e kuery mboae dez ikuai va'e ma ha'e nunga oendu vy ijayvu rei okuapy Tiago ha'e João re.

**42** Ha'e ramo Jesus ojea py oenoīmba vy aipoe'i:

— Yvy jave regua huvíxa kuery ma joguereko atā 'rā, ha'e kuery va'e regua yvatekueve ipo'aka 'rā joe, peikuaa rami

**43** Ha'e rā pende kuery ma ha'e rami e'ÿ 'rā pendekuai. Ha'e rami 'rāgue py peē kuery va'e regua joegui yvatevexe va'e ma penerembiguai rami toiko.

**44** Peneranhexe va'e ma peiko 'rā pavē rembiguai.

**45** Mba'eta Ava ra'y ojeapo va'ekue eteve voi jojokuai aguā e'ÿ ou, ha'e rā tembiguai rami oiko aguā, ha'e guekove ome'ë aguā heta rekoria, ogueraa jepe aguā.

*Mateus 20.29-34; Lucas 18.35-43*

**46** Ha'e vy Jericó tetā py ranhe ovaë. Ha'e gui tetā gui guemimbo'e kuery ha'e heta va'e kuery reve oje'oi jave peteī ava ára revegua e'ÿ oguapy oiny tape yvýry. Timeu ra'y Bartimeu hery va'e mba'emo re ojerurea py oï.

**47** Ha'e va'e ma Jesus Nazaré pygua va'e ou oinya oendu vy ojapukai reve aipoe'i:

— Davi ramymino Jesus, xemboaxy ke — he'i.

**48** Ha'e ramo heta ijayvu okyrirí aguā. Ha'e rami teī ojapukaive tema. Ha'e vy aipoe'i:

— Davi ramymino, xemboaxy ke.

**49** Ha'e ramo Jesus opyta vy aipoe'i:

\* **10:38** “Anhemongarai” ha'e “Karo gui ay'u” he'ia ma oiko axy aguā re ijayvu vy. \* **10:40** Lucas 22.24-30; Filipenses 2.3-8; 1 Pedro 5.3

— Penoř.

Ha'e ramo oenoña ára revegua e'ŷ. Ha'e vy aipoe'i:

— Ndepy'a guaxu, epu'ã ke, mba'eta nerenoř.

**50** Ha'e ramo capa omboi vy opo reve opu'ã ovvy Jesus-a katy.

**51** Jesus oporandu:

— Mba'e tu reipota ajapo ndevy?

Ára revegua e'ŷ ombovai:

— Xee ma aexaxe — he'i.

**52** Ha'e ramo Jesus aipoe'i:

— Tereo, rejeroviaa ndereraa jepe ma.

Ha'e ramove ava va'e oexa ju vy Jesus rakykue oo tape rupi.

## 11

*Mateus 21.1-17; Lucas 19.28-40; João 12.12-19*

**1** Jerusalém py ha'e kuery ovaẽ rai'i ma. Ha'e vy Oliveiras yvyty re Betfagé ha'e Betânia teko a rupi oaxa vy Jesus omondouka mokoř guemimbo'e.

**2** Ha'e vy aipoe'i:

— Tapeo tenonde peva'e teko oĩ va'e py. Ha'e py pevaẽ vyve pejou 'rã peteř mburika'i ixã va'e, hi'áry avave rei nořai teri va'e. Pejora vy ke peru.

**3** Xapy'a rei amongue oporandu 'rã mba'e re pa pejoraa re. Ha'e rami rã aipopeje: "Senhor ma oipota, ha'e gui ogueru ruka voi ju 'rã apy", peje 'rã.

**4** Ha'e ramo oje'oi vy tape py ojou mburika'i ixã va'e peteř kora rokě rexei. Ha'e vy ojora.

**5** Ha'e py ikuai va'e regua ijayvu:

— Mba'erã tu pejora mburika'i?

**6** Ha'e rã hemimbo'e kuery ma Jesus aipoe'iague rami ombovai. Ha'e ramo ogueraa uka.

**7** Ha'e gui mburika'i ogueru ma vy hi'áry omoř oao. Ha'e ramo Jesus oĩ hi'áry.

**8** Tape rupi heta oipyo okuapy oao, ha'e rã amboae kuery ma jai rogue mba'ety yvýry gui ojaya va'ekue onhono.

**9** Ha'e gui henonde ha'e hakykue oo va'e kuery ojapukai vy aipoe'i:

— Iporã ete! Ta'ima'endu'a porãa Senhor rery rupi ou va'e re!\*

**10** Ima'endu'a porãmby toiko opo'akaa rupi ovaẽ ouvy va'e, nhanceramoř Davi rami ipo'aka va'e. Toguerovy'aa yvatevea py! — he'i oje'oivy.

**11** Ha'e gui Jerusalém py ovaẽ ma vy templo py oike. Ha'e vy oma'ẽmba ma rire ka'aru ma ramo Betânia katy ju oo doze guemimbo'e kuery reve.

*Mateus 21.18-22*

**12** Ko'ẽ jevy Betânia gui oo vy inhembyayi.

**13** Mombypygui oexa peteř figo'y hogue va'e. Ha'e gui oo oexa aguã mba'emo ojou rivyvyi gui. Ha'e rami teři yvyra hi'ařa py ovaẽ vy mba'eve ndojoui hogue e'ŷ vy, mba'eta figo oikoa ára e'ŷ rã.

**14** Ha'e ramo Jesus aipoe'i:

— Aŷ gui ma to'uave eme nde'a — he'i. Ha'e ramo hemimbo'e kuery oendu.\*

*Mateus 21.12-17; Lucas 19.45-48*

**15** Ha'e gui Jerusalém tetã py ovaẽ. Templo py oike vy omořmba mba'emo vendea ha'e mba'emo joguaa kuery ha'e py ikuai va'ekue. Oity peráta mboekoviaa kuery mesa, ha'e apykaxu vendea kuery renda guive.

**16** Templo rupi avave rei pe ndogueraa ukai mba'emo ryru.

**17** Ha'e vy nhomongeta vy aipoe'i:

\* **11:9** Salmo 118.25-26    \* **11:14** Figo'y pe Jesus ijayvu vai oikuua uka aguã judeu kuery ndojeroviaia re Nhanderuete ombopaga taa (Lucas 13.5-9).

— Ipara oiny “Xero ma onhembo'e atyrā oī” 'ea va'eri peē ma pejapo imonda va'e onhemiaty rami – he'i.\*

<sup>18</sup> Ha'e nunga ma sacerdote yvatekueve va'e ha'e kuaxia re nhombo'e va'ety kuery oendu. Ha'e vy oikuaa pota okuapy marā rami vy pa ojuka aguā. Ha'e rami teī okyje guive, mba'eta ombo'e rā heta va'e kuery ha'e javi ojou porā.

<sup>19</sup> Ha'e gui ka'aru ma ramo Jesus ha'e hemimbo'e kuery oje'oi ju tetā gui.

### *Ojerovia va'e po'akaa re ijayvua*

<sup>20</sup> Ha'e gui ko'ēgue aje'ive'i reve ha'e kuery ojevy jogueruvy vy oexa rā figo'y ipiru ma ra'e hapo ha'e javi.

<sup>21</sup> Ha'e ramo Pedro ima'endu'a vy aipoe'i:

— Orembo'ea, ema'ē. Figo'y ndeayvu vaiague nda ipiru ra'e – he'i.

<sup>22</sup> Ha'e ramo Jesus ombovai:

— Pejerovia tema Nhanderuete re.

<sup>23</sup> Mba'eta anhetē aipoa'e pēvy: Amongue peva'e yvity pe “Epu'ā ke, enhemombo ye'ē py”, he'i vy opy'a py oexa'ā rei 'rāgue py ijayvuague oiko 'rāa oguerovia ete ramo ha'ekue rami ae 'rā oiko ixupe.

<sup>24</sup> Ha'e nunga rupi aipoa'e pēvy: Penhembo'e vy pejerurea pejopy maa re pejerovia ramo ha'ekue rami ae 'rā oiko pēvy.

<sup>25</sup> Ha'e gui penhembo'e vy xapy'a rei amongue reve mba'emo perekoy vy peperdoa ranhe, Penderu yva pygua pejejavyague avi operdoa aguā.

<sup>26</sup> [Ha'e rā ndapejoperdoai ramo Penderu yva pygua voi ndoperdoai 'rā pejejavyague.]\*  
*Mateus 21.23-27; Lucas 20.1-8*

<sup>27</sup> Ha'e gui Jerusalém katy ojevy ju jogueravy. Ha'e vy templo rupi oiko jave oīa py ou sacerdote yvatekueve va'e, kuaxia re nhombo'e va'ety ha'e nhomongetaa kuery.

<sup>28</sup> Ha'e vy oporandu ixupe:

— Mba'e nunga po'akaa rupi tu rejapo ha'e nunga? Mava'e tu nembopo'aka guī rami rejapo aguā?

<sup>29</sup> Jesus ombovai:

— Xee voi aporandu ta pēvy. Pemombe'u ke. Ha'e ramo xee voi amombe'u 'rā pēvy mba'e nunga po'akaa rupi pa ha'e nunga ajapoa.

<sup>30</sup> João nhomongaraia pa yva guigua tyrā avakue guigua raka'e? Pembovai ke – he'i.

<sup>31</sup> Ha'e ramo ha'e kuery jomeme ranhe ijayvu okuapy:

— Xapy'a rei “Yva gui”, ja'e ramo ha'e ombovai ju 'rā: “Mba'e re tu ha'vy ndapejeroviai hexe?” he'i 'rā nhandevy.

<sup>32</sup> Ha'e rā “Avakue gui”, ja'e aguā nda'evei avi – he'i okuapy, mba'eta ha'e kuery okyje heta va'e kuery gui, João anhetē profeta oikoa pavē oikuaa ramo.

<sup>33</sup> Ha'e rami vy aipoe'i Jesus pe:

— Ore ma ndoroikuaai.

Ha'e ramo Jesus ju ombovai:

— Xee voi namombe'ui 'rā pēvy mava'e po'akaa rupi pa ha'e nunga ajapoa aikovya.

## 12

### *Mateus 21.33-46; Lucas 20.9-19*

<sup>1</sup> Ha'e rire ha'e kuery pe Jesus omombe'u peteī ayvu mba'emo re ombojoja vy.

— Peteī ava onhoty uva. Ojapo ikora yvate va'erā, ojapo guive uva oumbiri atyrā ha'e torre, ha'e gui ma opena va'erā kuery po py omboaxa. Ha'e vy oo guekoa gui.

<sup>2</sup> — Omono'ōa ára ovaē ramo opena va'e kuerya py ombou peteī guembiguai, ixupegua uva'a ome'ē okuapy aguā.

\* **11:17** Isaías 56.7, Jeremias 7.11    \* **11:26** Tiago 1.6; Mateus 6.14,15

<sup>3</sup> Ha'e rami teĩ ha'e kuery ojopy vy oinupã ha'e ojavyky rei ma rire omondouka rive ju.

<sup>4</sup> — Amboae guembiguai ju ombou. Ha'e ramo ha'e voi oinupãmba inhakã rupi, ojavyky rei.

<sup>5</sup> — Amboae ju ombou. Ha'e va'e ma ojuka. Amboae kuery heta ombou avi. Ha'e kuery oinupãmba amongue, ha'e rã amboae kuery ma ojuka.

<sup>6</sup> — Petei'i ma oguereko teri, gua'y oayvuve va'e anho. Ha'e va'e ma ija ombou vy "Xera'y ramo omboete 'rã ko", he'i.

<sup>7</sup> — Ha'e ramo ombo'eapo va'e kuery aipoe'i joupe-upe: "Peva'e ma uvaty jarã ete. Jajuka na, uvaty nhandevy ju opyta aguã", he'i okuapy.

<sup>8</sup> Ha'e rami vy ojopy vy ojuka, ha'e gui uvaty gui omombo mombyry'i.

<sup>9</sup> — Mba'e nda'u uvaty ja ojapo 'rã? Ha'e va'e ou vy omomba 'rã opena va'ekue, ha'e rã amboae kuery pe ju 'rã omboaxa uvaty.

<sup>10</sup> Ha'vy peẽ ndaperoayvui teri teve po rami ipara va'e: "Oo apoa kuery ita ndoipotai va'ekue opyta omboeteve pyrã, tenonde pyguarã.

<sup>11</sup> Ha'e nunga ma Senhor gui ae oiko, ha'e jaexa rã iporã ete va'e", he'iague?\*

<sup>12</sup> Ha'e rami rã ha'e kuery ojopyxe teĩ heta va'e kuery gui okyje, mba'eta ha'e kuery re ae ri ijayvua oikuaa. Ha'e rami vy ojepe'apa jogueravy.

*Mateus 22.15-22; Lucas 20.20-26*

<sup>13</sup> Ha'e ramo Jesus oĩa py omboua fariseu regua ha'e Herodes-a katygua kuery, ayvu py ojopy aguã.

<sup>14</sup> Ha'e va'e kuery ovaẽmba vy aipoe'i ixupe:

— Porombo'ea, ore roikuaa ndee anhetẽ va'ea, ha'e ndereikuua potai 'rã mava'e paa re, mba'eta nerema'ẽi avakue yvatea re, ha'e anhetẽ rupi renhombo'e Nhanderuete oipota va'e re. Ha'evea rami ri nda'u César pe nhame'ẽ imposto repy, tyrã pa any? Ha'eve tyrã pa nda'evei nhame'ẽ aguã?

<sup>15</sup> Jesus oikuaa ha'e kuery ijayvu rivea. Ha'e vy ombovai:

— Mba'e re tu xerekro a'axe ri? Peru ha'vy peteĩ hatã'i va'e, taexa — he'i.

<sup>16</sup> Ha'e ramo ha'e kuery ogueru ramo ha'e ju oporandu:

— Mava'e ra'angaa ha'e mava'e rery tu kova'e re oĩ?

Ha'e kuery ombovai:

— César mba'e rima.

<sup>17</sup> Ha'e ramo Jesus aipoe'i:

— César mba'e ri rã peme'ẽ ha'vy César pe. Ha'e rã Nhanderuete pegua ma Nhanderuete pe ae 'rã peme'ẽ — he'i. Ha'e ramo onhemondyipa ijayvua gui.

*Mateus 22.23-33; Lucas 20.27-38*

<sup>18</sup> Jesus oĩa py ou saduceu kuery va'e regua. Ha'e va'e kuery ma ndogueroviai nhanhemboete ju 'rãa. Ha'e gui oporandu okuapy ixupe:

<sup>19</sup> — Porombo'ea, Moisés oeja raka'e po rami ipara va'e: "Ta'y e'ŷ re tyke'y omano ramo tyvy ju 'rã omenda imeve'ŷ va'e re, omano va'ekue ra'yrã va'ekue oguereko aguã", he'i va'ekue.\*

<sup>20</sup> Ha'e gui ikuai raka'e sete joegua. Tujave va'e ma omenda va'ekue ri ta'y e'ŷ re omano.

<sup>21</sup> Ha'e ramo tyvy ju omenda imeve'ŷ va'e re teĩ ha'e va'e voi omano ta'y e'ŷ re. Ha'e gui mboapya ma ha'ekue rami ae ju.

<sup>22</sup> Ha'e rami py sete-ve ndata'y. Ha'e gui mae ma kunha va'e avi omano.

<sup>23</sup> Ha'e gui onhemboetepa jevya ára ha'e kuery onhemboete ju rã mava'e ete'i 'rã oiko kunha va'e me? Mba'eta kunha va'e re sete-ve omenda rire — he'i.

<sup>24</sup> Ha'e ramo Jesus ombovai:

— Pejavy, mba'eta ipara re oĩa neĩ Nhanderuete po'akaa peikuaa e'ŷ vy.

\* <sup>12:11</sup> Salmo 118.22-23

\* <sup>12:19</sup> Deuteronomio 25.5

**25** Mba'eta omanoague gui onhemboete ju va'ekue ma nomendavei 'rã, neĩ nanhomomendavei 'rã. Anjo kuery yva pygua rami 'rã ikuai.

**26** Ha'e gui omano va'ekue onhemboetepa ju 'rãa re ndaperoayvui teri teve Moisés ombopara va'ekue? Mba'eta yvyra yky hendy va'e mbyte gui Nhanderuete aipoe'i ixupe: "Xee ma Abraão, Isaque ha'e Jacó Ruete aiko", he'i raka'e.\*

**27** Ha'e ma omanogue Ruete e'ŷ oiko, ha'e rã oikove va'e Ruete. Ha'e nunga rupi pejavy vaipa.\*

*Mateus 22.34-40; Lucas 10.25-28*

**28** Ou avi peteĩ kuaxia re nhombo'e va'ety. Ha'e va'e ma amboae kuery reve Jesus ijayvu ha'e ombovai porã rã oendu ma vy oporandu:

— Mba'e nunga ojapo uka pyre tu pavẽ gui yvateve va'e?

**29** Jesus ombovai:

— Yvateve va'e ma pova'e: "Israel kuery, pendu ke: Senhor Penderuete ma peteĩ'i.\*

**30** Reayvu 'rã Nderuete ndepy'a ha'e javi py, nderek, ne'arandua ha'e nembaraetea ha'e javi py guive" he'iague.\*

**31** Ha'e va'e rire ma po rami ju oĩ: "Reayvu 'rã neirũ kuery ndee ae rejeyvua rami" he'iague. Amboae ojapo uka pyre pova'e gui yvateve va'e ma jipoi – he'i.\*

**32** Ha'e ramo kuaxia re nhombo'e va'ety aipoe'i:

— Porombo'ea, ha'evea rami ndeayvu anhetẽ rupi meme. Mba'eta Nhanderuete ma peteĩ'i, amboae jipoi ha'e e'ŷ vy.\*

**33** Ha'e gui Nhanderuete jayvu 'rã nhandepy'a, nhane'arandua ha'e nhanembaraetea ha'e javi py. Ha'e nhaneirũ kuery ma nhande ae jajeayvua rami 'rã jayvu. Ha'e nunga jajapo aguã ma ixupe mymba nhame'ëa gui ha'eveve – he'i.

**34** Ha'e rami o'arandua rupi ombovai rã Jesus oendu vy aipoe'i:

— Ndee ma mombyry e'ŷ reiko Nhanderuete po'akaa gui – he'i.

Ha'e va'e rire avave rei nda'ipy'a guaxuavei ixupe oporandu aguã mba'eve re.

*Mateus 22.41-46; Lucas 20.41-44*

**35** Ha'e gui templo py Jesus nhombo'e vy oporandu:

— Mba'exa nda'u kuaxia re nhombo'e va'ety kuery Cristo reko re ijayvu vy aipoe'i Davi ramymino oikoa rami?

**36** Mba'eta Davi eteve voi Nhe'ë Ky'a E'ŷ gui aipoe'i: "Senhor aipoe'i xe-Senhor pe: 'Eguapy ke aiporu kuaa regua re, ndepy guýry nderovaigua kuery amoï e'ŷa ja', he'i va'ekue."\*

**37** Ha'e rami vy Davi voi "Senhor" he'i ixupe. Mba'exa tu ha'vy hamymino avi ri oiko? – he'i.\*

Ha'e rami ijayvu rã heta va'e kuery oenduxe vai.

*Mateus 23.1-7,14; Lucas 20.45-47*

**38** Ha'e gui nhombo'e vy aipoe'i ju:

— Penheangu ke lei re nhombo'e va'ety kuery gui, mba'eta ha'e kuery ma ao puku py 'rã onhemonde, ha'e tetã mbyte rupi ikuai vy oipota 'rã oxarura porãa.

**39** Onhembo'eaty py ha'e ngaru oĩa py ha'e kuery oguapy 'rã tenda tenondeve oĩ va'e py anho.

**40** Ha'e rami avi ha'e kuery ogueraa rivepa 'rã imeve'ŷ va'e kuery ro gui oipota va'e, ha'e onhemboeko porãxe vy onhembo'e are 'rã. Ha'e nunga rupi ha'e kuery opaga raxa ete 'rã.

*Lucas 21.1-4*

\* **12:26** Êxodo 3.6 \* **12:27** 1 Coríntios 6.14; 15.12-28; 1 Tessalonicenses 4.13-18 \* **12:29** Deuteronomio 6.4

\* **12:30** Deuteronomio 6.5 \* **12:31** Levítico 19.18 \* **12:32** Deuteronomio 4.35 \* **12:36** Salmo 110.1 \* **12:37**

Romanos 1.3,4

<sup>41</sup> Ha'e gui templo py Jesus oguapy oiny hyru peráta omoñaty oĩ va'e rexei'i. Ha'e vy oexa heta va'e kuery peráta ome'ẽ vy hyru py omoĩ rã. Oguerekopa va'e kuery ome'ẽ retave.

<sup>42</sup> Peteĩ imeve'ŷ va'e iporiaukue'i oexa avi mokoĩ hatã'i va'e ndovareive'i va'e omoĩ rã.

<sup>43</sup> Ha'e rami vy guemimbo'e kuery oenoĩmba vy aipoe'i:

— Anhetẽ aipoa'e pêvy: Peva'e imeve'ŷ va'e ma iporiaukue'ia ramive ma peráta me'ẽa kuery ha'e javi gui omoĩ retave hyru py.

<sup>44</sup> Mba'eta amboae kuery ma hembyrekue gui rive ome'ẽ. Ha'e rã peva'e ma iporiaukue'ia ramive mba'emo'i ojogua aguã oguerekoko va'ekue ha'e javi'i omoĩ.

## 13

### *Mateus 24.1,2; Lucas 21.5-9*

<sup>1</sup> Templo gui Jesus oẽ ovyy jave peteĩ hemimbo'e aipoe'i:

— Orembo'ea, ne'ema'ẽ ave ita tuvixakue gui anho nda ojapo raka'e!

<sup>2</sup> Jesus ombovai:

— Aŷ pexa pa kova'e oo tuvixa va'e? Oitypaa ramo peteĩve ita ndopytai 'rã amboae ita áry.

### *Mateus 24.3-14; Lucas 21.7-19*

<sup>3</sup> Ha'e gui templo rexei Oliveiras yvyty py Jesus oguapy oiny jave Pedro, Tiago, João ha'e André oporandu ha'e kuery ae'ia py:

<sup>4</sup> — Emombe'u na orevy: Araka'e 'rã tu ha'e nunga oiko? Mba'e nunga tu oiko 'rã roikuua aguã ha'e nunga ha'e javi ojeupity rai'i maa?

<sup>5</sup> Jesus ombovai:

— Penheangu ke ha'vy penhembotavy uka e'ŷ aguã avave rei pe.

<sup>6</sup> Mba'eta heta 'rã ou xerery rupi "Xee ae ma Cristo" he'i rive va'e. Ha'e rami vy heta 'rã ombotavy.

<sup>7</sup> Penhemondyi eme guive "Joe opu'ã", 'ea rã pendu vy, neĩ "Joe opu'ã 'rã", 'ea teĩ. Ha'e nunga ranhe 'rãe oiko teĩ opa aguã e'ŷ teri.

<sup>8</sup> Mba'eta peteĩ-teĩ tetã pygua kuery opu'ã 'rã amboae tetã pygua kuery re, ha'e peteĩ-teĩ regua amboae regua re 'rã opu'ã. Amongue henda py oiko 'rã yvy ryryi ha'e karuai. Ha'e nunga ma jypy'i ojexavaia aguã.

<sup>9</sup> — Peiko kuaa pota ke, mba'eta pendejopy ukaa 'rã, ha'e pendereraa 'rã nhomboayvua kuery ha'e onhembo'eaty pygua ruvixa pe penemboayvu uka aguã. Xekáuxa penenupãa ha'e pendereraa 'rã pejexa uka aguã huvixa ha'e huvixave renonde. Ha'e ramo ha'e kuery pe pemombe'u 'rã ayvu.

<sup>10</sup> Mba'eta jypy'i ha'e javi regua pe ayvu porã omombe'ua 'rãe.

<sup>11</sup> Ha'e nunga rupi pendereraa ha'e pendejopy ukaa teĩ pendepy'a eta rei eme pendeayvurã re. Ha'e va'e hora ayvu py ae pendeayvurã ome'ẽa va'e rupi 'rã pendeayvu. Mba'eta pendejegui ae e'ŷ 'rã pendeayvu, ha'e rã Nhe'ẽ Ky'a E'ŷ gui.

<sup>12</sup> — Tyke'y kuery ojopy uka 'rã guyvy ojukaa aguã, ha'e tuu kuery ojopy uka 'rã gua'y kuery. Ta'y kuery nguu kuery re opu'ã vy ojuka uka avi 'rã.

<sup>13</sup> Xerery káuxa pavẽ nda'iija'evei 'rã pendere. Ha'e rã opa peve oĩ atã va'e ma oo jepe 'rã.

### *Mateus 24.15-28; Lucas 21.20-24*

<sup>14</sup> — Ha'e gui pexa 'rã ojeguarupy nhomokanhyarã ha'eve e'ŷa py oĩ rã. (Tove ogueroayvu va'e toikuaa.) Ha'e ramo Judéia pygua kuery tonhamba yvyty re.\*

<sup>15</sup> Ngoo áry ikuai va'e toteqey eme, toike eme ngopy gui mba'emo oguenoẽ aguã,

<sup>16</sup> ha'e mba'ety rupi ikuai va'e voi tojevy eme oparito re.

<sup>17</sup> Ha'e va'e ára nda'evei 'rã imemby ryru'i ha'e imemby kambu va'e pe.

<sup>18</sup> Pejerure ke ha'e nunga oiko e'ŷ aguã yro'y py.

\* **13:14** Daniel 9.27, 11.31

<sup>19</sup> Mba'eta ha'e va'e ára ojexavaia ete 'rã. Ha'e rami ete ndoikoi teri jypy'i Nhanderuete yvy onhono guive aŷ peve, ha'e gui ha'e va'e rire ndoikovei 'rã ha'ekue rami.

<sup>20</sup> Senhor ha'e va'e ára nomomba voi va'e rire avave rei ndoo jepei 'rãgue. Va'eri ojeupe guarã oiporavo va'ekue re oma'ẽ vy omomba voi 'rã ha'e va'e ára.

<sup>21</sup> — Ha'e gui pêvy amongue aipoe'i 'rã: "Ma'ẽ, apy ma Cristo", ha'e e'ŷ vy "Pe py ma hiny", he'i ramo perovia eme,

<sup>22</sup> mba'eta oiko 'rãe Cristo ramigua ha'e profeta ramigua kuery rive. Ha'e kuery voi ojapo 'rã hexa pyrã ha'e nhomondyipaarã ombotavy aguã Nhanderuete rembiporavo kuery, ha'eve va'e rire.

<sup>23</sup> Peiko kuaa pota ke, opa mba'e gui xee romonheangu ma voi.

*Mateus 24.29-31; Lucas 21.25-28*

<sup>24</sup> — Ha'e va'e ára ojexavaia rire'ive kuaray pytumba 'rã, jaxy voi naendyvei 'rã.

<sup>25</sup> Jaxy-tata ho'apa 'rã yva gui, ha'e yva re ipo'akakueve ikuai va'e voi oitypaa 'rã.\*

<sup>26</sup> Ha'e gui oexa pavẽ 'rã Ava ra'y ojeapo va'ekue arai rupi ou rã opo'aka ha'e guexakãmba reve.\*

<sup>27</sup> Ha'e vy ojeupegua anjo kuery omondouka 'rã irundy henda yvytu oipejua rupi hembiporavo kuery omboaty heruvy aguã, yvy apy guive yva apy peve.

*Mateus 24.32-44; Lucas 21.29-36*

<sup>28</sup> — Peikuua pota ke figo'y re mba'emo ambojoja vy amombe'u rã. Mba'eta hakã ipyaupa ha'e hokypa rã pexa vy peikuua 'rã ára pyau ovaẽ rai'i maa.

<sup>29</sup> Ha'e rami ae avi peẽ kuery voi xeayvuague oiko rã pexa vy peikuua 'rã xe'ára ovaẽ rai'i maa, okẽ py ae.

<sup>30</sup> Anhetẽ aipoa'e pêvy: Aŷguia kuery opa e'ŷ re ha'e nunga ha'e javi oiko 'rã.

<sup>31</sup> Opa 'rã yva ha'e yvy. Ha'e rã xeayvuague ma ndoaxa rivei 'rã.

<sup>32</sup> Ha'e va'e ára ha'e hora raka'e paa avave rei ndoikuuai, neĩ anjo kuery yva pygua, neĩ xee Ta'y voi ndaikuuai. Xeru anho'i oikuua.

<sup>33</sup> — Peiko kuaa pota, peiko katu [ha'e penhembo'e] guive, mba'eta ndapeikuuai raka'e pa ha'e va'e ára ovaẽ 'rãa.

<sup>34</sup> Ha'e nunga oiko 'rã peteĩ ava guekoa gui oo va'e rami. Ngoo oeja vy guembiguai kuery pe opena uka 'rã. Peteĩ-teĩ pe ojapo uka 'rã mba'emo. Ha'e rã okẽ rarõa pe ma oikuua pota uka 'rã.

<sup>35</sup> Peẽ voi peiko kuaa pota 'rãgue, mba'eta ndapeikuuai raka'e pa hoo va'e ou 'rãa. Ka'aru tyrã pa pytã mbyte jave, uru ojapukai jave tyrã pa ko'ẽmba'i jave paa voi ndapeikuuai,

<sup>36</sup> mba'eta ovaẽ xapy'a vy peke reve pendejou ramo nda'evei 'rã.

<sup>37</sup> Pendevy aipoa'ea rami ma aipoa'e pavẽ pe: Peiko kuaa pota ke.

## 14

*Mateus 26.1-5; Lucas 22.1,2*

<sup>1</sup> Mokoĩ ára'i ma oata ovaẽ aguã Páscoa ha'e ngaru mbojape imbovua revegua e'ŷ va'e ára. Ha'e gui sacerdote yvatekueve va'e ha'e lei re nhombo'e va'ety kuery oikuua pota okuapy nhemi rupi ojopy vy ojuka aguã.

<sup>2</sup> Mba'eta aipoe'i okuapy: "Ngaru oiko jave ma nda'evei, heta va'e kuery opu'ãmba e'ŷ aguã."

*Mateus 26.6-13; João 12.1-8*

<sup>3</sup> Betânia tetã py Jesus oĩ mesa py, Simão lepra oguerekva'e ro py. Oĩa py ou peteĩ kunha heakuã porã va'e ryru ita xii va'e guigua ogueru va'e. Heakuã va'e ma hepyve va'e, nardo anho'i tynyẽ. Ha'e gui ma hyru oipe'a vy Jesus akã re onhoẽ heakuã porã va'e.

<sup>4</sup> Amongue ikuai va'e ojou vai vy jomeme aipoe'i:

— Mba'erã tu ojavyky heakuã porã va'e?

\* **13:25** Isaías 13.10, 34.4   \* **13:26** Daniel 7.13-14

<sup>5</sup> Mba'eta ha'e nunga ma trezentos raxa ára repy re ovende va'e rire, iporiaukue'i pe ome'ẽ aguã — he'i. Ha'e vy ijayvu rei okuapy hexe.

<sup>6</sup> Ha'e ramo Jesus aipoe'i:

— Tove ri. Mba'e re tu pendeayyu rei kunha va'e re? Mba'emo porã ete ojapo xevy.

<sup>7</sup> Mba'eta iporiaukue'i ma pendereve riae 'rã ikuai. Peipytyvõxea hora rei ha'eve peipytyvõ aguã. Ha'e rã xee ma ndaiko riae'i 'rã pendereve.

<sup>8</sup> Kunha va'e ma ha'eve va'e ojapo. Amano e'ŷ mbove voi omoeakuã xerete xenhono porãa rã guarã.

<sup>9</sup> Anhetẽ aipoa'e pãvy: Mamo rã yvy jave re ayvu porã omombe'ua py omombe'ua avi 'rã kunha va'e ojapo va'ekue, hexe ima'endu'aa vy.

### Mateus 26.14-16; Lucas 22.3-6

<sup>10</sup> Hemimbo'e kuery doze va'e regua Judas Iscariotes hery va'e ma sacerdote yvatekueve va'ea py oo, Jesus ojopy uka aguã.

<sup>11</sup> Ha'e kuery ha'e nunga oendu vy oguerovy'a rei, ha'e vy ixupe ijayvu peráta ome'ẽ aguã re. Ha'e ramo Judas oikuaa pota ha'eve jave ojopy uka aguã re.

### Mateus 26.17-19; Lucas 22.7-13

<sup>12</sup> Ha'e gui ovaẽ ngaru mbojape imbovua revegua e'ŷ ijypyá ára, Páscoa pyguarã vexa'i ojukaa aguã. Ha'e ramo hemimbo'e kuery oporandu Jesus pe:

— Mamo tu reipota roo roguereko katu Páscoa ára py jakaru aguã?

<sup>13</sup> Ha'e ramo mokoĩ guemimbo'e omondouka vy aipoe'i:

— Tapeo ha'vy tetã re. Ha'e py penerovaexí 'rã peteĩ ava yryru ogueraa va'e.

<sup>14</sup> Tapeo hupive, ha'e mamo rã oikea py hoo va'e pe aipopeje: "Orembo'ea oporandu uka kuri: 'Mamo pa opy ja'o oĩ Páscoa ára xeremimbo'e kuery reve rokaru aguã?' he'i uka", peje.

<sup>15</sup> Ha'e ramo pendevy pe oexa uka 'rã peteĩ opy ja'o tuvixa va'e opa mba'e oĩmba ma voia. Ha'e py 'rãe perekó katu — he'i.

<sup>16</sup> Ha'e ramo hemimbo'e kuery tetã re oo vy Jesus aipoe'iague rami ae ojou. Ha'e rami vy oguereko katu Páscoa py okaru okuapy aguã.

### Mateus 26.20-25

<sup>17</sup> Ka'aru'i ma jave oo doze guemimbo'e kuery reve.

<sup>18</sup> Ha'e gui mesa py okaru okuapy jave Jesus aipoe'i:

— Anhetẽ aipoa'e pãvy: Peẽ kuery xereve pekaru va'e regua peteĩ xejopy uka nhemi 'rã — he'i.

<sup>19</sup> Ha'e ramo ha'e kuery iporiaupa vy jorire-rire aipoe'i:

— Xee teve?

<sup>20</sup> Ha'e ramo ombovai:

— Xeremimbo'e kuery doze pendekuai va'e regua peteĩ, xereve hy'a py opo'ẽ oiny va'e ae.

<sup>21</sup> Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemiare pe ma nda'evei ete 'rã. Ixupe ma ha'eveve 'rãgue ndoikoi ma voi va'e rire.

### Mateus 26.26-30; Lucas 22.16-20,39

<sup>22</sup> Ha'e kuery okaru teri reve Jesus ojopy peteĩ mbojape. Nhanderuete oguerovy'a ma vy oipe'ã-pe'ã vy ome'ẽ ha'e kuery pe. Ha'e vy aipoe'i:

— Pejopy, kova'e ma xerete — he'i.

<sup>23</sup> Ha'e rire karo ju ojopy. Oguerovy'a ma vy ombojoja guemimbo'e kuery pe. Ha'e rã ha'e javive oy'u.

<sup>24</sup> Ha'e gui aipoe'i:

— Kova'e ma xereve guarã [ipyau va'e] ajapo va'e regua, heta re vy xeruguy amoẽ uka ta va'e rupi.

<sup>25</sup> Anhetē aipoa'e pēvy: Uva rykue xee nday'uvei ranhe 'rā, Nhanderuete po'akaa py ipyau va'e ju ay'u e'ŷa ja – he'i.\*

<sup>26</sup> Ha'e gui peteĩ mboraei oporaei rire Oliveiras yvyty katy oje'oi.

*Mateus 26.31-35; Lucas 22.31-34; João 13.36-38*

<sup>27</sup> Ha'e gui Jesus aipoe'i:

– Peẽ kuery ha'e javive xerejapa 'rā, mba'eta ipara oiny: “Ajuka uka 'rā vexa'i re opena va'e. Ha'e ramo vexa'i kuery oaĩmba 'rā”, he'iague.\*

<sup>28</sup> Ha'e gui anhemboete ju ma rire penerenonderā aa 'rā Galiléia katy – he'i.

<sup>29</sup> Pedro aipoe'i:

– Ha'e kuery ha'e javive nderejapa teĩ xee any 'rā.

<sup>30</sup> Jesus ombovai:

– Anhetē aipoa'e ndevy: Kova'e pyavyve uru mokoïgue ojapukai e'ŷ mbove, mboapykue 'rā renhemombe'u xekuaa e'ŷ va'e rami – he'i.

<sup>31</sup> Ha'e rami teĩ Pedro aipoe'i:

– Ndereve xejukaa ta teĩ ae ma peteĩve henda py ndaxeayvui 'rā roikuua e'ŷa rami – he'i. Hemimbo'e kuery ha'e javive ha'e rami meme ijayvu.

*Mateus 26.36-46; Lucas 22.39-46*

<sup>32</sup> Ha'e gui Jesus oo peteĩ henda Getsêmani 'epy va'e py. Ha'e py ovaẽ vy aipoe'i guemimbo'e kuery pe:

– Peguapy apy, xee anhembo'e ainya ja – he'i.

<sup>33</sup> Ngupive ogueraa Pedro, Tiago ha'e João. Ha'e vy oendu nda'eveia ha'e ojexavai etea.

<sup>34</sup> Ha'e vy aipoe'i:

– Xepy'a re aendu nda'evei etea xejuka ta va'e rami. Pepyta apy peikuua pota aguã – he'i.

<sup>35</sup> Ojepe'ave'ia py ngova omovaẽ yvy re. Ha'e vy ojerure ha'eve ramo ha'e va'e hora oaxa aguã.

<sup>36</sup> Ha'e vy aipoe'i:

– Xeru, xeru, opa mba'e ndevy ha'eve. Xegui oaxa 'rāgue kova'e karo. Ha'e rami avi xee aipota va'e ma toiko eme, ndee reipota va'e ae toiko – he'i.

<sup>37</sup> Ha'e gui ojevy vy oexa rā okepa okuapy. Ha'e rā aipoe'i Pedro pe:

– Simão, reke ri ty'y? Neĩ peteĩ hora voi teve nda'evei reikuua pota aguã?

<sup>38</sup> Peikuua pota, ha'e penhembo'e penderekoo a'ãa py pejeity ukapa e'ŷ aguã. Penenhe'ẽ ma anhetē ikyre'ŷ, ha'e rā penderoo re ma penekangy – he'i.

<sup>39</sup> Ha'e gui ojepe'a ju vy onhembo'e. Ha'ekue'i rupi ae ju ijayvu.

<sup>40</sup> Ojevy vy oexa rā okepa ju, hopeyi vaipa vy. Ha'e vy ha'e kuery pe ijayvu rā nombovai kuuai.

<sup>41</sup> Ha'e gui ma mboapykuea ma ou vy aipoe'i:

– Peke teri va'e ty'y pejupy? Ha'eve ma. Ovaẽ ma hora heko vai va'e kuery po py Ava ra'y ojeapo va'ekue omboaxaa aguã.

<sup>42</sup> Pepu'ã ke, jaje'oi. Pee ma ou oiny xejopy ukaarā.

*Mateus 26.47-56; Lucas 22.47-53; João 18.1-11*

<sup>43</sup> Are'ŷ'i re Jesus ijayvu teri reve ovaẽ peteĩ hemimbo'e kuery doze ikuai va'e regua, Judas hery va'e. Hexeve heta avi ou kyxe ha'e yvyra revegua kuery. Sacerdote yvatekueve va'e, lei re nhombo'e va'ety ha'e nhomongetaa kuerya gui ou va'ekue.

<sup>44</sup> Mba'eta ha'e kuery pe ijopy ukaa aipoe'i va'ekue: “Hova py ayvu va'e ae 'rā pejopy, ha'e gui peipokua reve peraa”, he'i va'ekue.

<sup>45</sup> Ha'ekue rami vy ovaẽ vyve Jesus re onhemboja. Ha'e vy

– Xembo'ea – he'i vy oayvu.

<sup>46</sup> Ha'e ramo ojopy vy ojokua okuapy.

\* **14:25** 1 Coríntios 11.23-26 \* **14:27** Zacarias 13.7

**47** Ha'e rami rā ha'e py peteī hi'aī va'e regua okyxe oekyi vy omboguai sacerdote yvateve va'e rembiguai nambi rupi, ha'e vy omboi.

**48** Ha'e gui Jesus aipoe'i ha'e kuery pe:

— Peē kuery kyxe ha'e yvyra reve ri ty'y peju jojuka rive va'ety rami xejopy aguā?

**49** Ko'ē nhavō templo py peē kuery pendekuaia rupi aiko vy anhombo'e teī ndaxejopyi va'ekue. Ha'e rami avi guī nunga oiko ipara oiny va'e ojeupitypa aguā — he'i.

**50** Ha'e rami rā hemimbo'e kuery ha'e javive ojepe'apa ojava vy.

### *Kunumi Jesus rakykue ooague*

**51** Hakykue oo peteī kunumi ajukue puku py onheovā va'e. Ha'e rā ojopya ta ramo

**52** ajukue puku gui ojepe'a vy ojava avi ov yvyre rei reve.

### *Mateus 26.57-68; Lucas 22.63-71*

**53** Ha'e gui ma sacerdote yvateve va'ea py ogueraa Jesus. Ha'e py ijatypa sacerdote yvatekueve va'e, nhomongetaa ha'e kuaxia re nhombo'e va'ety kuery ha'e javive.\*

**54** Ha'e ramia ja hakykue Pedro oo avi mombyry'i rupi, sacerdote yvateve va'e roka peve. Ha'e vy tembiguai kuery reve ojape'e oiny tata yvýry.

**55** Ha'e gui sacerdote yvatekueve va'e ha'e nhomboayvu va'ety kuery Jesus ojuka ukaxe vy ojouxe hekokue mombe'uarā, teī ndojou.

**56** Mba'eta Jesus re heta ijayvu rive va'eri ha'ekue rami e'ŷ-e'ŷ guive.

**57** Ha'e rami vy amongue opu'ā vy hekokue ramigua omombe'u vy aipoe'i:

**58** — Ore roendu aipoe'i rā: “Xee ambovaipa 'rā kova'e templo avakue ojapo va'ekue, ha'e mboapy araa py amboae ju 'rā ajapo avakue rembiapo e'ŷ”, he'i va'ekue.

**59** Ha'e rami teī ijayvuague rami e'ŷ ae tema ijayvu.

**60** Ha'e gui ha'e kuery mbyte py sacerdote yvateve va'e opu'ā vy oporandu Jesus pe:

— Nerembovai va'e ty'y ndere ayvua ramo?

**61** Ha'e rā Jesus okyrirī, mba'eve nde'i.

Ha'e gui sacerdote yvateve va'e oporanduve ju:

— Ndee ma nhi'a Nhanderuete ijayvu porāmby Ra'y Cristo?

**62** Ha'e ramo Jesus ombovai:

— Xee ae ha'e. Ha'e gui pexa 'rā Ipo'akapa va'e oiporu kuaa regua re Ava ra'y ojeapo va'ekue oguapy ha'e yva gui ou ramo arai rupi — he'i.\*

**63** Ha'e ramo sacerdote yvateve va'e omondoro oao reve aipoe'i:

— Mba'erā tu jaipotave hekokue mombe'uarā?

**64** Pendu ae ma ijayvu vai rā. Mba'exa tu peikuaa?

Ha'e javive ombovai:

— Jajuka aguā rami ijayvu — he'i okuapy.

**65** Ha'e gui hexe amongue onyvō, ha'e hova onhovā vy ouna guive. Ha'e vy aipoe'i:

— Emombe'u ke mava'e pa neunga ra'e — he'i. Xondaro kuery voi oipetepa okuapy.

### *Mateus 26.69-75; Lucas 22.55-62; João 18.15-18,25-27*

**66** Ha'e ramia ja oka yvy reia py Pedro oña py ou peteī kunha'i sacerdote yvateve va'e omongakuaa va'ekue.

**67** Pedro ojape'e oiny rā oexa vy oma'ē porā, ha'e vy aipoe'i:

— Ndee voi teve reiko Jesus Nazaré pygua va'e reve.

**68** Ha'e ramo onhenhomí vy aipoe'i:

— Xee ndaikuuai, neī ndeayvua voi naendu kuaai — he'i. Ha'e vy oēve oka katy. [Ha'e jave uru ojapukai nhendu.]

**69** Ha'e gui teīgue ju omongakuaa pyre oexa vy amboae kuery pe

— Peva'e voi ha'e kuery regua — he'i.

**70** Ha'e ramo onhenhomí ju.

\* **14:53** João 18.12-14,19-24

\* **14:62** Daniel 7.13-14

Ha'e rire'ive ha'e py ikuai va'e aipoe'i Pedro pe:

— Anhetē teve ndee ha'e kuery regua, mba'eta ndee voi Galiléia pygua.

**71** Ha'e ramo ijayvu vaikue, oura guive:

— Xee tu ndaikuaai rima ava pendeayvua! — he'i.

**72** Ha'e ramove mokoīguea ma uru ojapukai nhendu.

Ha'e ramo Pedro ima'endu'a Jesus aipoe'ague re: "Kuri mokoīgue uru ojapukai e'ŷ mbove ndee mboapykue 'rā renhemombe'u xekuaa e'ŷa rami", he'iague re. Ha'e rā onhemboaxy vy ojae'o vaipa.

## 15

*Mateus 27.1,2,11-26; Lucas 23.1-7,13-25; João 18.28-19.16*

**1** Ko'ẽ aje'ive'i reve sacerdote yvatekueve va'e jogueroayvu, nhomongetaa kuery, kuaxia re nhombo'e va'ety ha'e nhomboayvua kuery ha'e javi reve. Ha'e vy Jesus ojokua uka vy Pilatos-a py ju ogueraa.

**2** Ha'e gui ma Pilatos oporandu ixupe:

— Ndee ma nhi'ã judeu kuery pegua huvixave?

Jesus ombovai:

— Ndee ae ma aipo're — he'i.

**3** Ha'e ramo sacerdote yvatekueve va'e opa marā ijayvu hexe.

**4** Ha'e gui teīgue ju Pilatos oporandu:

— Nerembovai 'rā ri ty'y? Ne'endu po rami ete ndere ayvu ou.

**5** Ha'e rami teī Jesus nombovai ae. Ha'e ramo Pilatos onhemondyi vaipa.

**6** Ha'e gui ngaru oikoa ára nhavō huvixa opoi jepi 'rā peteī nhuā py oī va'e regua, heta va'e kuery ojerurea va'e rei.

**7** Peteī oī nhuā py Barrabás hery va'e, oirū kuery reve joe opu'ã vy jojukaague py.

**8** Ha'e gui heta va'e kuery ou vy huvixa pe ojerure okuapy jepiaty rami ojapo aguā.

**9** Ha'e ramo Pilatos oporandu:

— Peipota pa apoi judeu kuery pegua huvixave? — he'i,

**10** mba'eta oikuua sacerdote yvatekueve va'e ija'e e'ŷ vy rive ipo py omboaxaague.

**11** Ha'e ramo ha'e kuery ombo'e heta va'e kuery Barrabás re ojerure okuapy aguā.

**12** Ha'e rami rā Pilatos oporandu:

— Mba'e 'rā tu ha'vy ajapo "Judeu kuery pegua huvixave" pejea re?

**13** Ha'e ramo ha'e kuery ojapukai vy

— Emoī kuruxu re! — he'i okuapy.

**14** Ha'e rā Pilatos aipoe'i:

— Mba'e nunga py tu ojapo vai raka'e?

Ha'e rā ha'e kuery ojapukaive rei:

— Emoī kuruxu re! — he'i okuapy.

**15** Ha'e rami rā Pilatos heta va'e kuery ombovy'axe vy opoi Barrabás, ha'e rā Jesus ma oinupā uka rire omboaxa kuruxu re omoīa aguā.

*Mateus 27.27-31*

**16** Ha'e gui ma huvixa ro guaxu py ju xondaro kuery ogueraa. Ha'e py ijatypa xondaro kuery ha'e javi.

**17** Ha'e ramo vy ajukue púrpura guigua py omonhemonde, ha'e juu gui peteī coroa ramigua ojapo vy omoī inhakā re.

**18** Ha'e vy aipoe'i:

— Iporā ete judeu kuery pegua huvixave! — he'i okuapy.

**19** Takua py oinupā inhakā rupi, hexe onyvō, ha'e guenapy'ã re oī vy omboete.\*

\* **15:19** João 19.2,3

20 Ojavyky rei ma rire ajukue púrpura guigua omboi vy ija o py ae ju omonhemonde. Ha'e gui oka katy ogueraa kuruxu re omoī aguā.

*Mateus 27.32; Lucas 23.26*

21 Ha'e va'e jave peteī oaxa ov y mba'ety gui ou va'ekue, Cirene pygua Simão hery va'e, Alexandre ha'e Rufo ru. Ha'e va'e pe ma ogueraa uka okuapy kuruxu.

*Mateus 27.33-44; Lucas 23.33-43; João 19.17-24*

22 Ha'e gui ma Gólgota, "Akāgue renda" 'epy va'e katy ogueraa Jesus.

23 Ixupe ome'ẽ vinho mirra revegua teī ndoy'ui.

24 Ha'e gui omoī kuruxu re, ha'e ija o omboja'o-ja'o jomeme. Oexa okuapy xortea mba'e pa peteī-teī ogueraa 'rāa oikuaaxe vy.

25 Nove hora jave kuruxu re omoīa.

26 Hi'ary oupi imoiny ipara va'e hexe ijayvua: "*Judeu kuery pegua huvixave*", he'ia.

27 Kuruxu mboae re hexeve omoī avi mokoī imonda va'e: ijaxu e'ŷa re peteī omoī, ha'e rā amboae ma ijaxua re.

28 [Ha'e rami ojeupity ipara "Heko vai va'e kuery reve oguerekao" he'iague.]

29 Oaxa oje'oivy va'e ijayvu rei hexe. Oakā ombovava-vava vy aipoe'i:

— Ndee templo rembovaipa rire mboapy araa pyve ju rejapo 'rā va'ekue,

30 ejereraa jepe ha'vy ndee ae kuruxu gui reguejy vy — he'i okuapy.

31 Ha'e rami ae avi kuaxia re nhombo'e va'ety kuery reve sacerdote yvatekueve va'e ojojai rei vy aipoe'i:

— Amboae kuery ogueraa jepe va'eri ha'e ae ndojereraa jepe kuaai.

32 Tove Israel kuery pegua huvixave Cristo toguejy kuruxu gui, jaexa vy jajerovia aguā

— he'i okuapy. Hexeve kuruxu re omoī mbyre kuery voi ojojai rei.

*Mateus 27.45-56; Lucas 23.44-49; João 19.25-30*

33 Kuaray mbyte jave pytūmba yvy jave re, kuaray ojero'a puku peve.

34 Ha'e gui kuaray ojero'a puku jave Jesus ojapukai atā:

— Eloí, Eloí, lamá sabactâni? — he'i, "Xeruete, Xeruete, mba'e re tu xereja?" he'ia.\*

35 Ha'e py ikuai va'e regua ha'e nunga oendu vy aipoe'i:

— Ne'endu, Elias rima oenoī — he'i okuapy.

36 Ha'e rami vy peteī ha'e kuery va'e regua onha vy vinagre py peteī esponja omoaky, ha'e takua apy re omovaē oy'u aguā. Ha'e vy aipoe'i:

— Tove, tajaexa Elias pa ou ra'e omboguejy aguā — he'i.

37 Ha'e gui ma Jesus onhendu atā vy omano.

38 Ha'e ramo henda iky'a e'ŷ va'e ropy ajukue okē regua oī va'e oxoro mbyte rupi, yvate gui yvy peve.

39 Ha'e rami omano ramo kuruxu rexei'i xondaro ruvixa hi'aī va'e oexa vy aipoe'i:

— Anhetē ae ra'e peva'e ava ma Nhanderuete Ra'y — he'i.

40 Ha'e py ikuai avi amongue kunhague mombyry'i gui oma'ẽ okuapy va'e. Ha'e kuery regua ma Maria Madalena, Tiago kyrīve va'e ha'e José xy Maria, ha'e gui Salomé.

41 Ha'e kuery ma Galiléia rupi Jesus oiko jave hupive ikuai va'ekue oipytyvõa rupi. Ha'e kuery reve hetave ju hupive oje'oi va'ekue Jerusalém katy.

*Mateus 27.57-61; Lucas 23.50-55; João 19.38-42*

42 Ha'e va'e ára ma sábado pygurarã mba'emo oguerekoo katupaa aguā ára. Ha'e nunga rupi ka'aru jave

43 ou peteī Arimatéia pygua José hery va'e, nhomongeta va'ety kuery regua omoetevepy, Nhanderuete po'akaa ojekuaa aguā oarõ oikovy va'e. Ha'e va'e ma Pilatos-a py oo vy ojerure Jesus retekue re.

44 Ha'e ramo Pilatos ma Jesus omano ma ra'ea omombe'u rā oendu vy onhemondyi. Ha'e rami vy xondaro ruvixa oenoī vy ixupe oporandu aje'i ma pa omano ra'ea re.

\* 15:34 Salmo 22.1

<sup>45</sup> Xondaro ruvixa omombe'u rã oikuaa porã rire hetekue ogueraa uka José pe.

<sup>46</sup> Ha'e ramo José ma kuruxu gui hetekue omboguejy vy onhovã peteñ ajukue puku xiñ porã va'e ojogua va'ekue py. Ha'e vy onhono porã peteñ tuparã itaova re ojo'o pyre py, ha'e peteñ ita juombojere hokẽ ombojere aguã.

<sup>47</sup> Ha'e ramia ja Maria Madalena ha'e Maria José xy oexa pota ho'amy oikuaa aguã mamo pa onhono porã ra'ea.

## 16

*Mateus 28.1-8; Lucas 24.1-10; João 20.1-10*

<sup>1</sup> Sábado ára oaxa rire Maria Madalena, Tiago xy Maria ha'e Salomé ojogua heakuã porã va'e, oje'oi vy hetekue omoeakuã aguã.

<sup>2</sup> Ha'e gui ko'ëmba'i jave semana ijypyá ára kuaray oë ouvy jave oje'oi hupa katy.

<sup>3</sup> Joupe-upé aipoe'i jogueravy:

— Mava'e nda'u hupa rokẽ gui oipe'a 'rã ita jaike aguã? — he'i.

<sup>4</sup> Ha'e gui ha'e kuery oma'ë vy oexa ita tuvixa va'eri ombojerea ma ra'ea.

<sup>5</sup> Ha'e rami vy ikua py oike vy peteñ kunumi va'e oexa onhemondea xiñmba va'e, oiporu kuua regua re oguapy oiny rã. Ha'e va'e ma ha'e kuery oexa xapy'a vy okyje okuapy.

<sup>6</sup> Ha'e ramo ava va'e aipoe'i:

— Pekyje eme. Peka pekuapy kuruxu re omoñ mbyre Jesus Nazaré pygua va'e. Ha'e va'e ma onhemboete ju ma, noïvei ma apy. Pema'ë ha'vy ituiague py.

<sup>7</sup> Ha'e gui ma tapeo hemimbo'e kuery ha'e Pedro pe aipopeje: "Galiléia katy Jesus oo 'rã penerenonderã. Ha'e py ma pexa 'rã aipoe'iague rami", peje.

<sup>8</sup> Ha'e gui itakua gui oë vy onhamba jogueravy onhemondyipa ha'e okyje reve. Okyje vy avave rei pe nomombe'ui ranhe.

*João 20.11-18*

<sup>9</sup> Semana ijypy'a ára aje'ive Jesus onhemboete ju rire Maria Madalena pe ranhe ojexa uka, ixugui sete anha oipe'aague va'e pe.

<sup>10</sup> Ha'e ramo kunha va'e oo vy Jesus irũ kuery pe omombe'u. Ha'e kuery ma ojae'o ha'e iporiaupa teri vy

<sup>11</sup> ndogueroviai ranhe oikove jevya, kunha pe ojexa ukaague omombe'u rã oendu va'eri.

*Lucas 24.13-35*

<sup>12</sup> Ha'e rire Jesus amboae rami ojexa uka mokoñ ha'e kuery regua tetã rovai katy oo va'e pe.

<sup>13</sup> Ha'e rami rire ha'e kuery ojevy vy amboae kuery pe omombe'u teñ ha'e kuery ndogueroviai.

*Ayvu porã omombe'ua aguã re ijayvua*

<sup>14</sup> Ha'e rire guemimbo'e kuery onze-ve pe ju Jesus ojexa uka, mesa py ikuai jave. Ha'e vy ha'e kuery pe ijayvu ndogueroviaiague ha'e inhakã ratãa re, mba'eta hexaare kuery "Onhemboete ju ma", he'i rã oendu teñ ndogueroviai rire.

<sup>15</sup> Ha'e gui aipoe'i avi:

— Tapeo opa rupi, yvy jave re ikuai va'e ha'e javive pe pemombe'u ayvu porã.\*

<sup>16</sup> Ha'e ramo oguerovia vy onhemongarai uka va'e oo jepe 'rã. Ha'e rã ndogueroviai va'e ma ombopagaa 'rã.

<sup>17</sup> Ojerovia va'e kuery ombopo'akaa 'rã po ramigua hexa pyrã ojapo aguã. Xerery rupi oipe'a 'rã anha, ha'e ayvu mboae py ijayvu 'rã.

<sup>18</sup> Ojopy 'rã mboi, ha'e veneno oy'u teñ mba'eve ndoikoi 'rã. Imba'eaxy va'e kuery re opoko ramo okuera 'rã guive.

*Lucas 24.50,51; Atos 1.6-11*

\* <sup>16:15</sup> Mateus 28.18-20; Lucas 24.44-49; João 20.21; Atos 1.6-8

<sup>19</sup> Ha'e kuery reve Senhor Jesus ijayvupa ma rire heraa yva re. Ha'e gui ma Nhanderuete oiporu kuaa regua re oguapy oiny.

<sup>20</sup> Ha'e ramo hemimbo'e kuery oje'oi vy opa rupi omombe'u ayvu. Senhor voi oipytyvõ hexa pyrã ojapoa py, ha'e kuery ayvu omombe'ua rupi anhetẽ memea oikuaa uka aguã.

## Lucas ayvu porā ombopara va'ekue

## Lucas ayvu porā ombopara va'ekue

Lucas ma poropoanoa ha'e apóstolo Paulo hirū raka'e. Jesus Cristo yva re ju oo rire Lucas mokoī kuaxia ombopara raka'e. Jypygua ma kova'e, Jesus rekokue oīa. Ha'e gui amboae ma apóstolo kuery rembiapokue oīa Atos 'epy va'e ju. Atos omboypyā py Lucas aipoe'i: "Jypygua kuaxia ndevy Teófilo ambopara va'ekue ma amombe'u aguā Jesus ojapo va'ekue ha'e nhombo'eague ha'e javi, yvate heraa ára peve" he'i va'ekue (Atos 1.1-2a).

Lucas ma heta ombopara Jesus mba'emo re ombojoja reve nhombo'eague. "Ava ra'y ojeapo va'ekue ou ojou ha'e ogueraa jepe aguā okanhy va'ekue" (19.10). "Okanhy va'ekue" he'ia py ma nhande kuery re ae ijayvu vy, amboae henda py ipara oinya rami: "Nhande kuery ha'e javi nhakanhymba javy vexa'i rami, peteī-teī jajepe'a va'ekue tape gui. Ha'e ramo hexe ma Senhor omoī nhande kuery ha'e javive reko vaitaty" (Isaiás 53.6). Ha'e nunga rupi nhande kuery re ae Jesus ombojoja vy omombe'u raka'e vexa'i okanhy va'e, perāta hatā'i va'e okanhy va'e ha'e ta'y okanhy va'e (capítulo 15). Nhande kuery rekaa rupi Jesus ou raka'e, nhanderekova opaga aguā. Nhanderuete nhanemboaxy ete vy Gua'y Jesus ombou raka'e nhandereraa jepe aguā, mba'eta Gua'y re nhanderekova opaga aguā.

### *Ijayvuypyague*

- <sup>1</sup> Heta ma ikuai ore kuery mbyte rupi mba'emo oiko va'ekue mboparaare.
- <sup>2</sup> Ha'e kuery ombopara jypy'i guive hexaare ha'e ayvu mombe'ua kuery orevy ijayvuague rami vy.
- <sup>3</sup> Ha'e rami ae avi xeruvixa Teófilo, xee voi jypy'i guive ha'e nunga ha'e javi aikuaa porā rire aŷ ambopara porāve ndevy jorire-rire opyta porā aguā,
- <sup>4</sup> nembo'eague reikuua aguā anhetē etea.\*

### *Zacarias ha'e Isabel re ijayvua*

- <sup>5</sup> Ha'e gui Judéia pygua huvixave Herodes oī jave oiko peteī sacerdote Zacarias hery va'e, Abias ramymino kuery regua. Ta'yxy ma Arão ramymino Isabel hery va'e.
- <sup>6</sup> Ha'e kuery ma Nhanderuete renonde heko porā va'e ikuai, Senhor ijayvua ha'e ojapo uka va'e ha'e javi ojapo vy.
- <sup>7</sup> Ta'y va'e'ŷ guive, mba'eta Isabel imemby va'erā e'ŷ, ha'e mokoīve ikakuaakue meme.

### *João Batista itui'i aguā omombe'u ma voiague*

- <sup>8</sup> Ha'e gui Zacarias ma Nhanderuete renonde rupi ombo'eapo oikovy sacerdote reko rami vy, xortea oexaa rupi oiporavoa rire.
- <sup>9</sup> Ha'e vy sacerdote kuery reko rami vy oike Senhor pegua henda iky'a e'ŷ va'e py heakuā porā va'e oapy aguā.
- <sup>10</sup> Ha'e ramia ja heta va'e kuery ma oka py ikuai onhembo'e okuapya py.
- <sup>11</sup> Ha'e gui ixupe ojexa uka peteī anjo Senhor-a guigua, altar heakuā va'e rapyaty oiporu kuaa regua re.
- <sup>12</sup> Zacarias oexa vy onhemondyi vaipa, okyje guive.
- <sup>13</sup> Ha'e rā anjo aipoe'i ixupe:
  - Zacarias, ekyje eme. Oendua ma rejurerua. Ha'e nunga rupi aŷ ndera'yxy Isabel oikuavā'i 'rā ndera'y, ha'e rā remboery 'rā João.
- <sup>14</sup> Ha'e va'e ma rerovy'a vaipa 'rā, ha'e heta 'rā ov'y'a oiko'iague oendu vy.

---

\* <sup>1:4</sup> Atos 1.1,2

15 Ha'e maomboyvatepy 'rā oiko Senhor renonde, ndoy'ui 'rā vinho, neī iro va'e. Hexe Nhe'ē Ky'a E'ŷ anho 'rā oī, ixy oguereko'ia ára guive.

16 Ha'e ojapo 'rā Israel kuery heta ojeko rerova aguā rami Senhor Nguuete re.

17 Ha'e oo 'rā Senhor renonderā, Elias rami inhe'ē ha'e ipo'aka va'e vy, ojapo aguā tuu kuery opy'a py gua'y kuery oayvu, ha'e onhe'ē rendu e'ŷ va'ekue heko porā va'e ju ikuai aguā rami, ha'e rami vy peteī regua oguereko katu aguā Senhor peguarā – he'i.

18 Ha'e gui Zacarias oporandu anjo pe:

— Mba'exa tu aikuaa ta ha'e nunga? Mba'eta xee ma xetuja'i ma, ha'e xera'yxy voi guaimi'i ma.

19 Anjo ombovai:

— Xee ma Gabriel, Nhanderuete renonde aiko va'e. Ha'e ae xembou ndevy mba'emo porā amombe'u aguā.

20 Ha'e rami teī xeayvua ndereroviai rire nandeayvuēvei 'rā, nda'evevei 'rā ndeayvu aguā ha'e nunga ojeupity e'ŷa ja, mba'eta ojeupity 'rā oa'angaague py ae – he'i.

21 Ha'e ramia ja heta va'e kuery oarō okuapy Zacarias. Ha'e kuery onhemondyipa, henda iky'a e'ŷ va'e py oiko are rā.

22 Ha'e gui ha'e oē vy nda'evevei ijayvu aguā. Ha'e ramo oikuaa okuapy henda iky'a e'ŷ va'e py mba'emo oexa ra'eague. Okuā py rive omombe'u, nda'ijayvuēvei vy.

23 Ha'e gui guembiaporā va'ekue ojapopa ma vy oo ju ngoo katy.

### *Isabel ov'y'a vaipa oikovyague*

24 Ha'e rire ma ta'yxy Isabel oguereko'i ma vy ndojexa ukavei peteī nhiruī jaxy re. Ha'e vy aipoe'i:

25 — Ha'e rami Senhor ojapo xevy, xere oma'ē vy, amboae kuery ndaxejou vaivei aguā.

### *Jesus oiko aguā omombe'u ma voiague*

26 Mboapy meme jaxy py ma Galiléia yvy re Nhanderuete ombou anjo Gabriel Nazaré tetā py.

27 Ha'e py oiko peteī kunhataī omenda va'erā peteī ava Davi ramymino José hery va'e re. Kunhataī rery ma Maria.\*

28 Ha'e va'e oīa py anjo oike vy aipoe'i:

— Temimboaxy ete evy'a ke, ndereve Senhor oī ramo – he'i.

29 Pova'e ayvu Maria oendu vy onhemondyi vy opēxa rei: "Mba'e he'i vy nda'u po rami oxarura xevy?" he'i.

30 Ha'e rā anjo aipoe'i:

— Maria, ekyje eme, mba'eta Nhanderuete nemboaxy.

31 Ha'e rā rerekoi 'rā, reikuavā 'rā peteī ava'i. Remboery 'rā Jesus.

32 Ha'e va'e ma yvate 'rā, ha'e ixupe "Yvate ete va'e Ra'y", 'ea 'rā. Senhor Nhanderuete omoī 'rā huvixarā, tamoi Davi rekopia.

33 Jacó ramymino kuery re opena riae 'rā, ipo'akaa ndopai 'rā guive – he'i.

34 Ha'e ramo Maria aipoe'i anjo pe:

— Mba'exa 'rā tu ha'e nunga oiko? Mba'eta xee peteīgueve ma avakue pe ndajekuaa ukai teri va'eri.

35 Anjo ombovai:

— Ndere oguejy 'rā Nhe'ē Ky'a E'ŷ, ha'e Yvate ete va'e po'akaa ndeao'i 'rā okuaray'ā py. Ha'e nunga rupi iky'a e'ŷ va'e oiko ramo ixupe "Nhanderuete Ra'y" 'ea 'rā.

36 Neretarā Isabel voi oguereko'i ma oikovy, guaimi'i ma teī. Kova'e re mboapy meme jaxy ma oguereko'iague, imemby 'rā e'ŷ va'ekue ri.

37 Mba'eta Nhanderuete pe ma nda'ipoi haxy va'e ijayvuague ha'e javi py – he'i.

38 Ha'e ramo Maria aipoe'i:

\* 1:27 Mateus 1.18-21

— Apy ma aĩ Senhor rembiguai. Tove toiko xevy ndeayvuague — he'i. Ha'e gui anjo ojep'e'a ju oĩa gui.

*Maria oipouague Isabel*

<sup>39</sup> Ha'e va'e javé ma Maria oiko katu vy oo pojava yvy'ã ikuai va'e katy, peteĩ tetã Judá regua py.

<sup>40</sup> Zacarias ro py oike vy oxarura Isabel pe.

<sup>41</sup> Maria oxaruraa ha'e oendu rã kyrí va'e omyí guyru'i py. Ha'e ramo Isabel re Nhe'ẽ Ky'a E'ỹ anho oĩ ramo

<sup>42</sup> ijayvu atã:

— Kunhague ikuai va'e gui ndere ima'endu'a porãave, ha'e rerekoi'i va'e voi ima'endu'a porãmby ete rã.

<sup>43</sup> Marã ramigua nda'u aiko ndee xe-Senhor xy xepou vy reju aguã?

<sup>44</sup> Mba'eta rexaruraa aendu ramove kyrí va'e ov'y'a vy omyí guyru'i py.

<sup>45</sup> Revy'a ete 'rã rerovia rire, mba'eta ojeupity 'rã Senhor ndevy ijayvuague — he'i.

*Maria oporaeiague*

<sup>46</sup> Ha'e ramo Maria aipoe'i:

— Xepy'a py amboete Senhor,

<sup>47</sup> ha'e xenhe'ẽ ov'y'a Nhanderuete xereraa jepeare re.

<sup>48</sup> Mba'eta oma'ẽ xee hembiguai yvy'í'i va'e aikoa re.

Ha'e ramo aÿ guive xevy "Ovy'a ete" he'i pavẽ rã,

<sup>49</sup> mba'eta Ipo'akapa va'e ojapo porã xevy,

Iky'a e'ỹ va'e hery va'e.

<sup>50</sup> Ha'e ma omboaxy 'rã henonde ojererokyjea rupi ikuai va'e,  
raka'eve rã ikuai jevy-jevy va'e kuery voi.

<sup>51</sup> Ipo'akapaa rupi oiko vy omoaĩmba op'y'a py onhemboyvate rei va'e kuery.

<sup>52</sup> Oipe'a ipo'akakueve, ha'e rã yvy'igueve'i ma omboyvateve.

<sup>53</sup> Omoevyatãmba inhemyayi va'ekue,  
ha'e rã iporiau e'ỹ va'e kuery ma omondoukapa rive.

<sup>54</sup> Omboaxya rupi vy oepy guembiguai Israel kuery ijayvuague re ima'endu'a vy,

<sup>55</sup> Abraão ha'e hamymino kuery pe ojapo porã riae aguã re,  
nhaneramoĩ kuery pe ijayvuague rami vy — he'i.

<sup>56</sup> Ha'e gui Maria ma mboapy jaxy re opyta Isabel ro py. Ha'e va'e rire oo ju ngoo katy.

*João Batista itui'iague*

<sup>57</sup> Ha'e gui Isabel oguerekoi'i aguã ára ovaẽ ramo oikuavã ava'i.

<sup>58</sup> Ha'e ramo Senhor omboaxya ha'e katy'i ikuai va'e ha'e heta va'e kuery oikuua vy ov'y'a avi okuapy hexeve.

<sup>59</sup> Oito araa py jogueraapa ava'i pire ombooi uka aguã. Ha'e rami vy omboeryxe okuapy tuu Zacarias rery rupi.

<sup>60</sup> Ha'e ramo ixy aipoe'i:

— Any teve. Ha'e rami 'rãgue py João 'rã hery — he'i.

<sup>61</sup> Ha'e ramo hetarã kuery aipoe'i:

— Ha'e gui ha'e rami peneretarã kuery hery va'e ndoikoi va'eri — he'i okuapy.

<sup>62</sup> Ha'e rami vy tuu pe ju opo py oporandu marã rami pa omboeryxe re.

<sup>63</sup> Ha'e gui tuu ojerure peteĩ yvyra pe'i re, ha'e vy ha'e va'e re ombopara: "Hery ma João" he'ia. Ha'e ramo ha'e javive onhemondyipa okuapy.

<sup>64</sup> Ha'e ramove ijuru oipe'aa rã ijayvuẽ ju. Ha'e vy omboete Nhanderuete.

<sup>65</sup> Ha'e py ikuai va'e ha'e javi onhemondyipa, ha'e Judéia katy'i yvy'ã reia rupi ikuai va'e kuery pe voi omombe'upaa.

<sup>66</sup> Ha'e javive ha'e nunga oendu vy op'y'a re omoĩ okuapy. Ha'e vy aipoe'i:

— Mba'e nungarã nda'u ha'e va'e ava'i oiko? — he'i okuapy. Mba'eta hexe Senhor po oĩ.

### *Zacarias oporaeiague*

<sup>67</sup> Ha'e gui tuu Zacarias re Nhe'ẽ Ky'a E'ŷ anho oĩ ramo omombe'u ayvu. Ha'e vy aipoe'i:

<sup>68</sup> — Ta'ima'endu'a porãa Senhor Israel kuery Ruete re,  
mba'eta oikuaa pota ma guembiporavo ikuai va'e re oepy aguã.

<sup>69</sup> Ha'e vy ombou peteĩ nhandereraa jepearã ipo'akapa va'e guembiguai Davi ramymino.

<sup>70</sup> Ha'e rami ojapo aguã yma guive omombe'u uka  
profeta iky'a e'ŷ va'e kuery ijayvua rupi,

<sup>71</sup> nhanderovaigua kuery gui nhandereraa jepe aguã,  
ha'e nhandere ija'e e'ŷ va'e ha'e javi po gui.

<sup>72</sup> Ha'e rami vy nhaneramoĩ kuery omboaxyague rami ju oiko aguã,  
guexeve guarã iky'a e'ŷ va'e ojapo va'ekue re ima'endu'a vy,

<sup>73</sup> nhaneramoĩ Abraão pe ouraague re guive.

<sup>74</sup> Mba'eta ijayvu raka'e nhanderovaigua kuery po gui nhandereraa jepe aguã re,  
jakyje e'ŷ re nhambojerovia aguã,

<sup>75</sup> ha'e jaikoa pukukue re henonde  
iky'a e'ŷ va'e jaiko aguã teko porã rupi.

<sup>76</sup> — Ha'e gui ma ndee ava'i, ndevy pe “Yvate ete va'e pegua profeta” 'ea 'rã.  
Mba'eta Senhor renonde rupi reiko 'rã haperã rerekatagu aguã.

<sup>77</sup> Ha'e rami vy ixupegua kuery pe reikuua uka 'rã  
ojejavyague gui oo jepe aguã,

<sup>78</sup> Nhanderuete nhanemboaxy etea rupi.  
Mba'eta kuaray oẽ ouvya rami avi ojekuaa uka 'rã yva gui

<sup>79</sup> omoexakã aguã manoaa guy pytû reia rupi ikuai va'e,  
nhandererekaguã tape jaiko porã aguã rupi — he'i.

<sup>80</sup> Ha'e gui ava'i ma tuja pojava ha'e imbaraeteve tema ovvy onhe'ẽ re guive. Tekoa e'ŷa rupi oiko Israel kuery pe ojekuaa uka aguã ára peve.

## 2

### *Mateus 1.18-25*

<sup>1</sup> Ha'e va'e jave py ma César Augusto omombe'u uka pavẽ oje'oi aguã guery ombopara uka vy.

<sup>2</sup> Ha'e va'e ma tery mbopara uka ypy'ia, Síria pygua huvixa Quirino oĩ jave py oiko va'e.

<sup>3</sup> Ha'e rami rã ha'e javive oo guery ombopara uka vy, peteĩ-teĩ guekoa py ae.

<sup>4</sup> Ha'e rami vy José voi oo. Davi ramymino oiko vy oguata Galiléia regua Nazaré tetã gui, Judéia regua tetã Davi rekoague Belém tetã katy oo vy.

<sup>5</sup> Guery ombopara uka vy oo gua'yxy Maria hye guaxu'i va'e reve.

<sup>6</sup> Ha'e gui Belém py ikuai jave py ma ovaẽ oikuavã aguã ára.

<sup>7</sup> Ha'e ramo oikuavã omemby ypy'i, ava'i. Ha'e vy onhovãmba vy onhono inony mymba karua'i py, mba'eta okeaty py jipovei ma ha'e kuery avi oke aguã.

### *Vexa'i re opena va'e kuery pe anjo kuery ojexa ukaague*

<sup>8</sup> Ha'e katy rai ikuai vexa'i re opena va'e kuery. Pyávy nhuñdy re ikuai guymba kuery re openaa rupi.

<sup>9</sup> Ha'e gui ha'e kuery ikuaria py oguejy peteĩ anjo Senhor-a guigua. Ha'e kuery yvýry rupi Senhor omoexakãmba xapy'a. Ha'e ramo onhemondyipa okuapy.

<sup>10</sup> Ha'e kuery pe anjo aipoe'i:

— Penhemondyi eme, mba'eta xee aju pêvy amombe'u aguã mba'emo porã nhombovy'a ete va'erã, heta va'e kuery ha'e javi peguarã.

<sup>11</sup> Mba'eta ange Davi rekoague py itui'i ma pendereraa jepearã Cristo Senhor.

<sup>12</sup> Po rami oiko peẽ kuery peikuaa aguã: Ava'i pejou 'rã mymba karua'i py, ajukue py onhovã ha'e onhonoa inony va'e – he'i.

<sup>13</sup> Ha'e gui anjo reve heta ju ojexa uka xapy'a irũ yva pygua xondaro kuery. Ha'e kuery ma Nhanderuete oguerovy'aa rupi aipoe'i okuapy:

<sup>14</sup> – Yvate etea py toporaeia Nhanderuete pe, ha'e yvy re voi toĩ avakue hemimboaxy ikuai porã aguã – he'i okuapy.

<sup>15</sup> Ha'e gui ma vexa'i re opena va'e kuerya gui anjo kuery yva re ojepe'apa ramove aipoe'i joupe-upe:

– Jaje'oi Belém tetã katy jaexa aguã nhandevy Senhor oikuaa uka va'ekue – he'i okuapy.

<sup>16</sup> Ha'e rami vy ha'e kuery oje'oi pojava, ha'e vy ojou Maria ha'e José, kyrĩ'i va'e guive ojou mymba karua'i py itui'i rã.

<sup>17</sup> Ha'e kuery oexa vy omombe'u ava'i oikoa ha'e kuery pe oikuaa ukaa ague.

<sup>18</sup> Ha'e rami vexa'i re opena va'e kuery omombe'u rã oendu va'e kuery ha'e javi onhemondyipa.

<sup>19</sup> Ha'e rã Maria ma pova'e ayvu ha'e javi opy'a re omoĩ porã ima'endu'a riae aguã.

<sup>20</sup> Ha'e gui vexa'i re opena va'e kuery ojevypa ju. Oporaei jogueravy Nhanderuete oguerovy'aa rupi, omombe'uague rami ae oendu ha'e oexa rire.

### *Jesus pire omboiaague*

<sup>21</sup> Oito araa py ovaẽ ava'i pire omboia aguã. Ha'e gui ma omboerya Jesus, oguereko'i e'ŷ mbove ma voi anjo omboery ukaague rami vy.\*

### *Templo py Jesus oexa ukaague*

<sup>22</sup> Ha'e gui Moisés lei omboparaague rami vy ha'e kuery ojeky'a'o uka aguã ára oaxapa ma ramo ogueraa ju Jerusalém tetã py Senhor pe oexa uka aguã,

<sup>23</sup> Senhor guigua lei re ipara oĩa rami vy: “Ava jypy'i oiko va'e ha'e javi 'rã pemboaxa Senhor peguarã.”\*

<sup>24</sup> Ha'e kuery ogueraa avi “mokoĩ jeruxi, e'ŷ vy mokoĩ apykaxu'i” Nhanderuete pe ojuka uka aguã, ha'e kuery lei re ipara oĩa rami vy.\*

### *Simeão oporaeiague*

<sup>25</sup> Jerusalém tetã py oiko peteĩ ava Simeão hery va'e. Ha'e va'e ma heko porã ha'e ojerovia ete va'e, Israel kuery repyarã oarõ oikovy va'e. Nhe'ẽ Ky'a E'ŷ hexe oĩ.

<sup>26</sup> Ixupe Nhe'ẽ Ky'a E'ŷ oikuaa uka ma voi omano e'ŷ mbove Senhor remimbou Cristo oexa 'rãa.

<sup>27</sup> Ha'e rami vy Nhe'ẽ ogueraa rã templo py oo. Ha'e va'e jave py tuu kuery ogueru ava'i Jesus ha'e kuery lei re oĩa rami ojapo aguã.

<sup>28</sup> Ha'e ramo Simeão ojopy ava'i ojyva áry, ha'e Nhanderuete oguerovy'aa rupi aipoe'i:

<sup>29</sup> – Aŷ ma Senhor, ha'eve xee nerembiguai xemondouka porã aguã ndeayvuague rami vy,

<sup>30</sup> mba'eta aexa ma orereraa jepearã rembou va'ekue.

<sup>31</sup> Ha'e va'e ma ha'e javi regua renonde py rerekon katu va'ekue

<sup>32</sup> imoexakãarã, judeu e'ŷ va'e kuery oikuaapa aguã, ha'e nerembiporavo Israel kuery voi oguerovy'a aguã – he'i.

<sup>33</sup> Ha'e rami ijayvu ma ramo tuu ha'e ava'i xy onhemondyi.

<sup>34</sup> Simeão ma ha'e kuery ogueroayvu porã vy ixy Maria pe ju aipoe'i:

\* <sup>2:21</sup> Mateus 1.21 \* <sup>2:23</sup> Êxodo 13.2,12 \* <sup>2:24</sup> Iporiaukue'i Senhor peguarã vexa'i ndojoui vy ome'ẽ 'rã mokoĩ jeruxi e'ŷ vy mokoĩ apykaxu'i (Levítico 5.11, 12.1-8).

— Kova'e ava'i oiko ramo heta okanhy 'rā, ha'e heta avi oo jepe 'rā Israel kuery va'e regua. Ikuai avi 'rā hexe ijayvu rei va'e,  
 35 heta py'a re oĩ va'e ojekuaa aguã. Ndepy'a re voi rendu 'rā kyxé py oikutu imoiny va'e rami — he'i.

### *Profeta kunha Ana ovaẽ aviague*

36 Oiko avi peteĩ profeta kunha Fanuel rajy, Ana hery va'e, Aser ramymino kuery regua. Kakuaa vaipa ma oiko, omenda rire sete ma'etý ete'i ime oiko,  
 37 ha'e gui oitenta e quatro ma'etý re ma oiko imeve'ŷ va'e. Ha'e va'e ma templo gui ndooi 'rāe. Ara py ha'e pyávy omboetea rupi oiko. Okaru e'ŷ re jepi 'rā oiko onhembo'ea rupi.

38 Ha'e va'e jave ete'i kunha va'e ovaẽ vy oguerovy'a Nhanderuete. Ha'e vy Jerusalém pygua kuery guepyarã oarõ okuapy va'e ha'e javi pe omombe'u oikovy ava'i oikoa.

### *Nazaré tetã py ava'i Jesus oiko jave guare*

39 Senhor guigua lei re oĩa rami ha'e kuery ojapopa ma vy ojevy ju Galiléia regua guekoa Nazaré katy.

40 Ava'i ma tuja ha'e imbaraeteve pojava, hi'aranduve guive ovy, Nhanderuete omboaxy ramo.

### *Porombo'ea kuery mbyte py ava'i Jesus oĩague*

41 Ha'e gui ma'etýa nhavõ tuu kuery jogueraa 'rā Jerusalém py Páscoa ára ngaru oiko aguã py.

42 Doze ma'etý ava'i oguereko jave ha'e kuery gueko rami vy oje'oi ju Jerusalém katy ngaru oiko aguã py.

43 Ngaru opa jave ha'e kuery ojevy ju ngoo katy. Ha'e rā ava'i Jesus ma Jerusalém py teri optyta, tuu kuery oikuua e'ŷ re.

44 Tuu kuery ma oirũ kuery reve ha'e oua rami oexa'ã vy peteĩ ára re ranhe oguata. Ha'e gui mae ma oeka oje'oivy hetarã ha'e hexaaty kuery mbyte rupi.

45 Ndojoui vy Jerusalém tetã katy ju ojevy oeka aguã.

46 Mboapy araa py ojou templo py oguapy oiny rā, porombo'ea kuery reve ijayvua re ojapyxaka ha'e oporandu oinya py.

47 Ijayvu rā oendu va'e kuery ha'e javi onhemondyipa okuapy o'arandua rupi ombovai rā.

48 Ha'e gui tuu kuery oexa vy onhemondyi. Ha'e vy ixy aipoe'i:

— Xepi'a, mba'e re tu evoko rami rejapo orevy? Nderu reve nda'evei vaipa roiko va'ekue roekaa rupi.

49 Ombovai nguu kuery pe:

— Mba'e re tu xereka ri? Ndapeikuaai va'e ty'y Xeru ro py 'rāe aikoa? — he'i.

50 Ha'e rami teĩ ha'e kuery ndoikuuaai mba'e he'ia paa.

51 Ha'e gui ma nguu kuery reve oo ju guekoa Nazaré py. Ojapo oikovy ha'e kuery oipota va'e ha'e javi. Ha'e rā ixy ma ha'e nunga ha'e javi omoĩ porã opty'a re.

52 Ha'e gui Jesus ma tuja pojava vy hi'aranduve ovy. Ha'e ramo Nhanderuete ha'e avakue renonde rupi oguerovy'aa.

## 3

### *Mateus 3:1-10; Marcos 1:2-5*

1 Quinze ma'etý re ma Tibério César huvixave oĩ jave py, ha'e Judéia pygua huvixa Pôncio Pilatos oĩ jave, Galiléia pygua huvixa Herodes, ha'e gui Ituréia ha'e Traconites pygua huvixa tyvy Filipe oĩ jave, Abilene pygua huvixa Lisâncias oĩ,

2 ha'e gui sacerdote yvateve va'e Anás ha'e Caifás ikuai, ha'e va'e jave py ma Nhanderuete ombou oayvu Zacarias ra'y João pe, tekaoa e'ŷa rupi oikoa py.

3 Ha'e ramo João ma Jordão yakã yvýry ha'e javi rupi oiko. Omombe'u oikovy pavẽ ojeko rerova vy onhemongarai uka aguã, ojeavyague omboguepaa aguã.

<sup>4</sup> Mba'eta profeta Isaías kuaxia ombopara vy aipoe'iague rami: “Tekoa e'ŷa py onhendu 'rã aipoe'i va'e: Pereko katu Senhor raperã, pembo'yvi ou aguã.

<sup>5</sup> Yvyugua ha'e javi ijojapa 'rã, yvyty ha'e yvy'ã'i ha'e javi guive. Tape ikarẽ va'ekue hi'yvipa 'rã, ha'e ijoja e'ŷague voi ijojapa 'rã.

<sup>6</sup> Ha'e gui avakue ha'e javi 'rã oexa Nhanderuete guigua jogueraa jepea”, he'iague rami.\*

<sup>7</sup> Ha'e gui heta va'e kuery onhemongarai uka vy ou va'e pe João aipoe'i:

— Peẽ mboi ramigua, mava'e tu aipoe'i poxya ou va'erã gui peo jepe 'rãa rami?

<sup>8</sup> Peiko ha'vy yvyra hi'a porã va'e rami, pejeko rerovaague pexa uka aguã. Ha'e pemboypy eme jomeme “Nhande kuery ma Abraão ramymino jaiko” peje aguã. Mba'eta xee aipoa'e pêvy: Kova'e ita gui voi Nhanderuete omoingo kuaa Abraão ramyminorã.

<sup>9</sup> Ha'e gui haxa py omboguai ta ma yvyra rapo re. Yvyra hi'a porã e'ŷ va'e ma ojayapa 'rã tata py omombo aguã — he'i.

<sup>10</sup> Ha'e ramo heta va'e kuery oporandu ixupe:

— Mba'e 'rã tu ha'vy rojapo?

<sup>11</sup> Ombovai:

— Mokoĩ kamixa oguereko va'e tome'ẽ oguereko e'ŷ va'e pe. Tembi'u oguereko va'e ha'e rami ae tomboja'o — he'i.

<sup>12</sup> Imposto re nhombopagaaty kuery voi jogueru onhemongarai uka aguã. Ha'e vy oporandu:

— Porombo'ea, mba'e tu ore rojapo 'rã?

<sup>13</sup> Ombovai ha'e kuery pe:

— Nda'evei penhombopaga aguã opaga aguã va'ekue áryve — he'i.

<sup>14</sup> Xondaro kuery voi oporandu ixupe:

— Ha'vy ore, mba'e 'rã tu rojapo?

Aipoe'i ha'e kuery pe:

— Pejoavyky rei eme, joekokue ramigua pemombe'uve eme, neĩ peipotave eme pemba'epoague repy áryve — he'i.

*Mateus 3:11,12; Marcos 1:7,8; João 1.19-27*

<sup>15</sup> Ha'e jave ma pavẽ rei oarõ okuapy jogueraa jepearã. Ha'e rami vy João re oexa'ã okuapy opy'a py. Ha'e vy aipoe'i:

— Ha'e'ŷ ri nda'u Cristo oiko?

<sup>16</sup> Ha'e ramo João aipoe'i ha'e javive pe:

— Xee anhetẽ yy py rive romongarai va'e. Ha'e rami teĩ ou 'rã peteĩ xegui yvateve va'e. Ha'e va'e gui ma xe'yvyïve ete va'e vy nda'evei ipy regua xã ajora aguã voi. Ha'e ma penemongarai 'rã Nhe'ẽ Ky'a E'ŷ reve, tata py guive.

<sup>17</sup> Ojopy ae ma trigo mbovevea oiky'a'o ha'e omboyrupa aguã omoĩ porãat py. Ha'e rã ipirekue ma oapy 'rã tata ogue e'ŷ va'e py — he'i.\*

<sup>18</sup> Ha'e rami vy ayvu porã omombe'u oikovy heta va'e kuery pe, opa mba'e ayvu py omongoeta reve.

<sup>19</sup> Huvixa Herodes pe voi ijayvu tyvy ra'yxy Herodias káuxa, ha'e Herodes ae ojapo vaiague re.

<sup>20</sup> Ha'e ramo huvixa ojapo vaive ju, nhuã py João ombo'a vy.

*Mateus 3:13-17; Marcos 1:9-11; João 1.32-34*

<sup>21</sup> Pavẽ onhemongarai uka jave py Jesus voi oo onhemongarai uka vy. Ha'e ramo onhembo'e oiny jave yva ojepo'a ramo

<sup>22</sup> hexe Nhe'ẽ Ky'a E'ŷ oguejy ouvy apykaxu'i rami. Ha'e gui onhendu peteĩ ayvu yva gui:

— Ndee ma Xera'y roayvu ete ha'e roguerov'y a va'e — he'i va'e.

*Mateus 1.1-17*

\* **3:6** Isaías 40:3-5   \* **3:17** Atos 19:4

23 Jesus ma trinta ma'etŷ rivyvvi oguereko reve omboypy nhombo'e aguã. Ixupe ma “José ra'y” 'ea.\* Ha'e rã José ma Heli ra'y,  
 24 Heli ma Matã ra'y, Matã ma Levi ra'y, Levi ma Malqui ra'y, Malqui ma Janai ra'y, Janai ma José ra'y,  
 25 José ma Matatias ra'y, Matatias ma Amós ra'y, Amós ma Naum ra'y, Naum ma Esli ra'y, Esli ma Nagai ra'y,  
 26 Nagai ma Maate ra'y, Maate ma Matatias ra'y, Matatias ma Semei ra'y, Semei ma José ra'y, José ma Jodá ra'y,  
 27 Jodá ma Joanã ra'y, Joanã ma Resa ra'y, Resa ma Zorobabel ra'y, Zorobabel ma Salatiel ra'y, Salatiel ma Neri ra'y,  
 28 Neri ma Melqui ra'y, Melqui ma Adi ra'y, Adi ma Cosã ra'y, Cosã ma Elmadã ra'y, Elmadã ma Er ra'y,  
 29 Er ma Josué ra'y, Josué ma Eliézer ra'y, Eliézer ma Jorim ra'y, Jorim ma Matã ra'y, Matã ma Levi ra'y,  
 30 Levi ma Simeão ra'y, Simeão ma Judá ra'y, Judá ma José ra'y, José ma Jonã ra'y, Jonã ma Eliaquim ra'y,  
 31 Eliaquim ma Meleá ra'y, Meleá ma Mená ra'y, Mená ma Matatá ra'y, Matatá ma Natã ra'y, Natã ma Davi ra'y,  
 32 Davi ma Jessé ra'y, Jessé ma Obede ra'y, Obede ma Boaz ra'y, Boaz ma Salá ra'y, Salá ma Naassom ra'y,  
 33 Naassom ma Aminadabe ra'y, Aminadabe ma Admim ra'y, Admim ma Arni ra'y, Arni ma Esrom ra'y, Esrom ma Peres ra'y, Peres ma Judá ra'y,  
 34 Judá ma Jacó ra'y, Jacó ma Isaque ra'y, Isaque ma Abraão ra'y, Abraão ma Terá ra'y, Terá ma Naor ra'y,  
 35 Naor ma Serugue ra'y, Serugue ma Ragaú ra'y, Ragaú ma Faleque ra'y, Faleque ma Éber ra'y, Éber ma Salá ra'y,  
 36 Salá ma Cainã ra'y, Cainã ma Arfaxade ra'y, Arfaxade ma Sem ra'y, Sem ma Noé ra'y, Noé ma Lameque ra'y,  
 37 Lameque ma Metusalém ra'y, Metusalém ma Enoque ra'y, Enoque ma Jaredé ra'y, Jaredé ma Maalalel ra'y, Maalalel ma Cainã ra'y,  
 38 Cainã ma Enos ra'y, Enos ma Sete ra'y, Sete ma Adão ra'y, ha'e rã Adão ma Nhanderuete ra'y raka'e.

## 4

*Mateus 4.1-11; Marcos 1.12,13*

<sup>1</sup> Jesus re Nhe'ë Ky'a E'ŷ anho oĩ ramo ojevy ju Jordão yakã gui, ha'e teko a e'ŷa py ju Nhe'ë ae ogueraaa.

<sup>2</sup> Quarenta ára re anha oeko a'ã herekovy. Ha'e jave ma mba'eve ndo'ui. Ha'e rire okaruxa ma.

<sup>3</sup> Ha'e ramo ixupe anha aipoe'i:  
 — Nhanderuete Ra'y ri reiko vy ndeayvu kova'e ita oĩ va'e pe tojeapo mbojape.

<sup>4</sup> Jesus ombovai:  
 — Ipara oiny: “Mbojape re anho e'ŷ 'rã avakue oikove” — he'i.\*  
<sup>5</sup> Ha'e gui yvatevea py anha ogueraaa vy ixupe oexa ukapa vyvoi ko yvy re tetã ikuai va'e.  
<sup>6</sup> Ha'e vy aipoe'i ixupe:

---

\* **3:23** Jesus ma José ra'y ete'ŷ raka'e, amboae kuery José ra'y rami rive oikuua. Jesus ma Nhanderuete ra'y ae oiko, Nhe'ë Ky'a E'ŷ po'akaa rupi Maria oguereko'i va'ekue ava reve'ŷ, Mateus 1.18 ha'e Lucas 1.30-35 py oña rami. \* **4:4** Deuteronomio 8.3

— Kova'e tetā ame'ẽmba 'rã ndevy, ha'e mba'emo porã ko yvy regua ha'e javi, mba'eta xevy ome'ẽmbaa rire ame'ẽ 'rã ame'ẽxeva va'e pe.

<sup>7</sup> Xapy'a rei nerenaipy'ã re reĩ reve xemboete ramo ha'e javi 'rã nemba'e.

<sup>8</sup> Ha'e ramo Jesus ombovai:

— Ipara oiny: “Senhor Nderuete anho 'rã remboete ha'e rembojerovia” — he'i.\*

<sup>9</sup> Ha'e gui anha ma Jerusalém py ju ogueraa, templo apyte áry omoõ. Ha'e vy aipoe'i:

— Nhanderuete Ra'y ri reiko vy enhemombo apy gui yvy katy.

<sup>10</sup> Mba'eta ipara oiny: “Ombou 'rã anjo kuery ndere opena aguã.”

<sup>11</sup> Ha'e rã “Ha'e kuery ndejoko 'rã opo py, ita re renhepyxanga e'ŷ aguã” — he'i.\*

<sup>12</sup> Jesus ombovai:

— Aipoe'i avi: “Eko a'ã eme Senhor Nderuete” — he'i.\*

<sup>13</sup> Opa mba'e py anha oeko a'ãmba ma vy ojepe'a ixugui, ha'eve aguã ára ovaẽ peve.\*

*Mateus 4.12-17; Marcos 4.14,15*

<sup>14</sup> Ha'e gui Nhe'ẽ po'akaa rupi Jesus oo ju Galiléia yvy katy. Ha'e ramo ha'e katy rai-rai ikuai va'e oendupa mba'emo ojapo oikovya.

<sup>15</sup> Onhembo'eaty ikuai va'e rupi nhombo'e oikovy ramo omboete pavẽ.

*Mateus 13.54-58; Marcos 6.1-4*

<sup>16</sup> Nazaré tetã py ombokakuaque py oo vy sábado ára py oike onhembo'eaty py gueko rami vy. Ha'e vy opu'ã ho'amy kuaxia ogueroayvu aguã.

<sup>17</sup> Ha'e ramo ixupe ome'ẽa profeta Isaías ombopara va'ekue. Kuaxia oipe'a vy ojou po rami ipara va'e:

<sup>18</sup> “Senhor-a guigua Nhe'ẽ xere oĩ vy xemoõ iporiaukue'i pe amombe'u aguã ayvu porã. Xembou nhuã py ikuai va'e pe amombe'u aguã oẽmba ju aguã, ára revegua e'ŷ'i ikuai va'e pe amombe'u aguã oma'ẽmba ju aguã, ha'e omoingo axy reipy apoi ju aguã,

<sup>19</sup> ha'e gui amombe'u aguã Senhor nhomboaxy aguã ma'etýa” — he'i.\*

<sup>20</sup> Ha'e gui kuaxia omboty vy ome'ẽ ju kuaxia re opena va'ety pe. Ha'e vy oguapy. Ha'e ramo ha'e py ikuai va'e ha'e javive hexe anho oma'ẽ okuapy.

<sup>21</sup> Ha'e ramo Jesus aipoe'i:

— Kova'e ára ojeupity ma kuaxia para re oĩ va'e penduague — he'i.

<sup>22</sup> Ha'e rami rã ha'e javive hexe ima'endu'a porã, mba'eta ayvu porã rupi ijayvu rã oendu vy onhemondyi. Ha'e vy oporandu okuapy:

— Peva'e nda'u José ra'y e'ŷ ri?

<sup>23</sup> Ha'e ramo Jesus aipoe'i ha'e kuery pe:

— Xevy pe aipopeje 'rã: “Poropoanoa, enhemonguera ndee ae. Apy nderekoa py ae ejapo avi roendu rã Cafarnaum py rejapo va'ekue ramigua ha'e javi”, peje 'rã xevy.

<sup>24</sup> Aipoe'ive ju:

— Anhetẽ aipoa'e pendevy: Neĩ peteĩve profeta nda'ipoi hekoa pygua kuery ae omovaẽ porã va'erã.

<sup>25</sup> Anhetẽ aipoa'e pêvy: Elias oiko jave heta ikuai raka'e Israel kuery regua imeve'ŷ va'e. Ha'e va'e jave mboapy ma'etý rire mboapy meme jaxy re nda'okyvei ramo yvy jave re karuai oiko.

<sup>26</sup> Ha'e rami teĩ ha'e pygua kuery neĩ peteĩvea py ma Elias nombouai, peteĩ imeve'ŷ va'e Sidom katy'i Sarepta tetã pyguua py e'ŷ vy.

<sup>27</sup> Ha'e gui profeta Eliseu ju oiko jave ma heta avi ikuai raka'e Israel kuery regua lepra revegua. Ha'e rami avi neĩ peteĩve ma ixupe ndoiky'a'o ukaai, Síria pygua Naamã e'ŷ vy — he'i.\*

<sup>28</sup> Ha'e ramo ha'e javive onhembo'eaty py ikuai va'e povae ayvu oendu vy ipoxypa.\*

\* <sup>4:8</sup> Deuterônômio 6.13    \* <sup>4:11</sup> Salmo 91.11-12    \* <sup>4:12</sup> Deuterônômio 6.16    \* <sup>4:13</sup> Hebreus 2.18; 4.15

\* <sup>4:19</sup> Isaías 61.1-2    \* <sup>4:27</sup> Profeta kuery pe Nhanderuete oipyttyvõ uka raka'e amboae yvy pygua kuery, hekoa py ae nomboeteai ramo.    \* <sup>4:28</sup> João 1.11

<sup>29</sup> Ha'e vyve opu'āmba vy tetā gui oguenoē vy ogueraa peteī itaova áry peve, mba'eta ha'e va'e áry tetā oī ramo, ha'e gui yvy'ā guy katy oity aguā.

<sup>30</sup> Ha'e rami teī ha'e kuery mbyte rupi Jesus oaxa vy ojepe'a ovv.

*Marcos 1.21-28*

<sup>31</sup> Ha'e gui ma Galiléia regua Cafarnaum tetā py ju oo. Sábado ára py nhombo'e oiny.

<sup>32</sup> Ha'e nhombo'e rā oendu va'e onhemondyipa okuapy, opo'akaa rupi ijayvu ramo.

<sup>33</sup> Onhembo'eaty py oī avi peteī ava hexe anha iky'a va'e onhemondea va'e. Ha'e va'e ma ojapukai atā:

<sup>34</sup> — Jesus Nazaré pygua va'e, mba'e tu orereve ndee rerek? Oremomba aguā teve reju? Xee ma aikuaa ndee Nhanderuete guigua iky'a e'ŷ va'e reikoa — he'i.

<sup>35</sup> Ha'e ramo ixupe Jesus ijayvu atā vy aipoe'i:

— Ekyrirī, ha'e ejep'e ava gui — he'i. Ha'e ramo pavē renonde yvy rupi anha oity ma vy ojepe'a ava gui, ojapo vai e'ŷ re.

<sup>36</sup> Ha'e javive onhemondyipa vy aipoe'i joupe-up:

— Mba'e nunga ayvu tu pova'e? Mba'eta opo'akaa rupi ijayvu rā nhe'ẽ vai kuery voi ojepe'a rā — he'i okuapy.

<sup>37</sup> Ha'e ramo ha'e nungakue ha'e katy rai-rai'i rupi ikuai va'e oendupa.

*Mateus 8.14,15; Marcos 1.29-31*

<sup>38</sup> Onhembo'eaty gui Jesus oē vy Simão ro py ju ovaē. Simão raixo ma imba'eaxy oupy, ipire raku vaipa vy. Ha'e ramo Jesus pe ojerure okuapy kunha va'e re.

<sup>39</sup> Ha'e ramo ituia katy ojero'a vy ipire raku pe ijayvu atā ramove oaxapa vyvoi. Ha'e rire'ive opu'ā vy ojapo mba'emo ha'e kuery pe.

*Mateus 8.16,17; Marcos 1.32-34*

<sup>40</sup> Kuaray oike jave ma oīa py ogueru okuapy opa marāgua mba'eaxy gui imba'eaxy va'e. Ha'e ramo peteī-teī re opoko vy omonguerapa.

<sup>41</sup> Heta gui anha kuery ojapukai reve ojepe'a vy aipoe'i:

— Ndee ma Nhanderuete Ra'y — he'i ramo ha'e kuery pe ijayvu atā okyrirī aguā re, Cristo oikoa oikuaa ramo.

*Marcos 1.35-39*

<sup>42</sup> Ko'ēmba'i ramove ojepe'a vy oo tekao e'ŷa katy. Ha'e rā heta va'e kuery oeka vy jogueraa oīa peve. Ha'e vy ixupe ojerure okuapy oeja e'ŷ aguā.

<sup>43</sup> Ha'e ramo aipoe'i ha'e kuery pe:

— Xee ma amboae tetā rupi voi ayvu porā Nhanderuete po'akaa regua amombe'u aguā rami aiko, ha'e rami aguā ae xemboua rire — he'i.

<sup>44</sup> Ha'e rami vy ayvu omombe'u oikovy Judéia regua onhembo'eaty ikuai va'e rupi.

## 5

*Pira ombo'a retaague*

<sup>1</sup> Ha'e gui ma Genesaré yupi yvýry rupi ju oiko. Ha'e jave heta va'e kuery omboty rei okuapy Nhanderuete ayvu oenduxe vy.

<sup>2</sup> Ha'e rā oexa mokoī kanoā yy rembe re oī va'e. Pira mbo'aa kuery ma oēmba ra'e pira mbo'aa ojoi aguā.

<sup>3</sup> Peteī kanoā Simão mba'e py oike vy ojerure yy rembe gui ogueraave'i aguā. Ha'e gui kanoā py oguapy vy ombo'e oiny heta va'e kuery.

<sup>4</sup> Ijayvupa ma vy aipoe'i Simão pe:

— Eraa kanoā typyvea py, ha'e pemombo pira mbo'aa pembo'a aguā.

<sup>5</sup> Simão ombovai:

— Orembo'ea, pytū mbukukue re romba'eapo teī norombo'ai mba'eve. Teī ndeayvua rupi vy amombo ju'rā pira mbo'aa — he'i.

<sup>6</sup> Ha'e rami ojapo vy ombo'a reta pira, pira mbo'aa voi oxopa rai.

**7** Ha'e ramo opo py oenoř oirũ kuery kanoã mboae py ikuai va'e ou aguã oipytyvõ vy. Ha'e vy mokoïve kanoã omonyë pira ramo yy py ogueroike rai-rai'i heravy.

**8** Ha'e nunga Simão Pedro oexa vy guenapy'ã re oĩ Jesus renonde. Aipoe'i:

— Senhor, ejep'e a ke xea gui, mba'eta xee ma ajejavypa va'e — he'i.

**9** Mba'eta heta ete pira ho'a rã oexa vy onhemondyi, irũ kuery ha'e javive reve.

**10** Irũ kuery Zebedeu ra'y Tiago ha'e João voi onhemondyi.

Jesus aipoe'i Simão pe:

— Enhemondyi eme, aÿ gui ma avakue jouarã 'rã reiko — he'i.

**11** Ha'e ramo ha'e kuery yy rembe re kanoã omboja vy oejapa oje'oivy hupive.

*Mateus 8.1-4; Marcos 1.40-45*

**12** Peteĩ tetã py Jesus oiko jave ou peteĩ ava hete ha'e javi rupi lepra oĩ va'e. Ha'e va'e ma oexa Jesus vy guenapy'ã re oĩ henonde, ngova yvy re omovaë. Ha'e vy ojerure ixupe:

— Senhor, lepra gui xeky'a'oxe vy ke xeky'a'o — he'i.

**13** Ha'e ramo okuave'ẽ vy opoko hexe. Ha'e vy aipoe'i:

— Xee ma roiky'a'oxe ae, ekuera ke — he'i. Ha'e ramove lepra okanhymba.

**14** Ixupe Jesus aipoe'ive ju avave rei pe omombe'u e'ÿ aguã.

— Va'eri tereo, sacerdote pe ejexa uka, ha'e rekueraague re eme'ẽ mymba Moisés omboparaague rami vy, heta va'e kuery oikuua avi aguã — he'i.

**15** Jesus aipoe'iague rami e'ÿ ava va'e oo vyve omombe'upa. Ha'e ramo heta-etave ma ou Jesus oña py ijayvua oendu aguã, ombo'eaxy gui okueraxe vy guive.

**16** Ha'e rã Jesus ma ojepe'a jepi 'rã ha'e ae'ia py onhembo'e aguã.

*Mateus 9.1-8; Marcos 2.1-12*

**17** Peteĩ ára Jesus nhombo'e oiny jave fariseu ha'e lei re nhombo'e va'ety kuery oguapy okuapy ha'e py, opa rupi gui ou va'ekue, Galiléia, Judéia ha'e Jerusalém gui. Senhor po'akaa hexe oĩ nhomonguera aguã.

**18** Ha'e gui ou avi amongue avakue peteĩ oguata e'ÿ va'e hupa reve ogueru va'e. Ogueroikexe teĩ Jesus renonde py onhono aguã.

**19** Heta va'e kuery gui nda'evei ogueroike aguã. Ha'e ramo oguerojeupi oo áry, ha'e oipe'aague rupi hupa reve omboguejy ikuai va'e mbyte py, Jesus renonde.

**20** Avakue ojerovia etea Jesus oikuua vy aipoe'i oguata e'ÿ va'e pe:

— Ava, rejavyague omboguepaa ma — he'i.

**21** Ha'e rami rã lei re nhombo'e va'ety ha'e fariseu kuery ndojou porã vy aipoe'i:

— Marã ramigua tu po rami ijayvu vai va'e? Avave rei nombogue kuaai 'rã joeko

vaiague, Nhanderuete e'ÿ vy — he'i okuapy.

**22** Ha'e kuery opěxaa Jesus oikuua vy aipoe'i:

— Mba'e re tu po rami ri pendeayvu pendepy'a py?

**23** Mba'e ayvu rupi tu ndaxyive xeayvu aguã: "Rejavyague omboguepaa ma", tyrã pa "Epu'ã, ha'e eguata" ha'e 'rã?

**24** Va'eri peikuua aguã Ava ra'y ojeapo va'ekue ko yvy re oiko vy joeko vaiague ombogue aguã voi ipo'aka va'ea —

Oguata e'ÿ va'e pe ju aipoe'i:

— Xee aipoa'e ndevy: Epu'ã, eupi nderupa, ha'e tereo ndero katy — he'i.\*

**25** Ha'e ramove opu'ã pavẽ oexaa gui, oupi ngupa ituiaty, ha'e oo ngoo katy. Nhanderuete pe oporaei ov.

**26** Ha'e javive onhemondyipa vy ombojerovia Nhanderuete. Okyjepa reve aipoe'i:

— Ange ma jaexa mba'emo porã — he'i okuapy.

*Mateus 9.9; Marcos 2.13,14*

**27** Ha'e va'e rire Jesus oo jevy vy oexa peteĩ imposto re nhombopaga va'ety Levi hery va'e, imposto opagaaty py oguapy oiny rã. Ha'e vy aipoe'i ixupe:

\* **5:24** João 10.37,38

— Eju ke xerupive – he'i.

<sup>28</sup> Ha'e ramo opu'ã vy oejapa ov y hupive oo aguã.

*Mateus 9.10-13; Marcos 2.15-17*

<sup>29</sup> Ha'e rire Jesus pe Levi ojapo peteĩ ngaru tuvixa va'e ngoo py. Heta avi ikuai ha'e py, imposto re nhombopaga va'ety ha'e amboae kuery hexeve okaru aguã.

<sup>30</sup> Fariseu ha'e irũ kuery lei re nhombo'e va'ety ijayvu okuapy Jesus remimbo'e kuery re. Ha'e vy oporandu:

— Mba'e re tu pekaru ri imposto re nhombopaga va'ety ha'e ojejavypa va'e kuery reve?

<sup>31</sup> Jesus ombovai:

— Hexaĩ va'e kuery ndoipotai 'rã poropoanoa, imba'eaxy va'e kuery anho 'rã oipota.

<sup>32</sup> Ha'e rami vy xee ma heko porã va'e aenoĩ aguã e'ŷ aju, ha'e rã heko vai va'e aenoĩ aguã ojeko rerova aguã – he'i.

*Mateus 9.14-17; Marcos 2.18-22*

<sup>33</sup> Ha'e kuery aipoe'i ixupe:

— João remimbo'e ha'e fariseu remimbo'e kuery ma okaru e'ŷ re ikuai jepi 'rã onhembo'e vy. Ha'e rã neremimbo'e kuery ma any, okaru ha'e oy'u 'rã.

<sup>34</sup> Ha'e ramo Jesus aipoe'i ha'e kuery pe:

— Omendaa py pejapo 'rã ri ty'y oenoĩ mbyre kuery okaru e'ŷ re ikuai aguã rami, ha'e kuery reve omenda va'e oĩ teria ja?

<sup>35</sup> Ha'e rami avi ovaẽ 'rã ha'e kuerya gui omenda va'e oipe'aa aguã ára. Ha'e va'e ára mae 'rã ha'e kuery ikuai okaru e'ŷ re – he'i.

<sup>36</sup> Ha'e kuery pe omombe'u avi peteĩ ayvu mba'emo re ombojoja vy:

— Avave rei ao pyau gui nomboi 'rã ha'ykue ao ymague re omboja aguã. Ha'e rami vy onmondoro 'rã ipyau, ha'e ipyau ra'ykue voi ndoja porãi 'rã inhymague re.

<sup>37</sup> Ha'e avave rei hyru ymague py nomboyrui 'rã vinho pyau, mba'eta vinho pyau ombovaipa 'rã hyru. Vinho onheẽmba 'rã, hyru voi ivaipa 'rã.

<sup>38</sup> Ha'e rami 'rãgue py vinho pyau ma hyru pyau py 'rã omboyru. [Ha'e ramo 'rãe mokoĩve oĩ porã.]

<sup>39</sup> — Ha'e rami avi avave rei vinho ymague oy'u rire ndoy'uxei 'rã ipyau va'e, mba'eta aipoe'i 'rã: "Inhymague ma iporãve."

## 6

*Mateus 12.1-8; Marcos 2.23-28*

<sup>1</sup> Peteĩ sâbado py trigoty rupi Jesus kuery oaxa jogueravy jave hemimbo'e kuery hi'a oipo'o vy ho'u heravy oipokyty va'ekue.

<sup>2</sup> Ha'e ramo amongue fariseu kuery aipoe'i:

— Mba'e re tu evoko ramo pejapo sâbado ára py nda'evei va'erí?

<sup>3</sup> Jesus ombovai:

— Ndaperoayvui teve Davi okaruxe vy oirũ kuery reve ojapo va'ekue?

<sup>4</sup> Ha'e ma Nhanderuete ro py oike vy ojou mbojape Senhor renonde omoĩ mbyre, ha'e ho'u. Ome'ẽ avi ngupive ikuai va'e pe, ha'e kuery ho'u aguã nda'evei va'erí, sacerdote kuery pe anho ha'eve – he'i.\*

<sup>5</sup> Ha'e aipoe'ive ju ha'e kuery pe:

— Ava ra'y ojeapo va'ekue ma sâbado ára re voi ipo'aka va'e.

*Mateus 12.9-14; Marcos 3.1-6*

<sup>6</sup> Sâbado jevy py onhembo'eaty py ju oike vy nhombo'e oiny. Ha'e py oĩ avi peteĩ ava ipo oiporu kuaa regua re ipiru va'e.

<sup>7</sup> Lei re nhombo'e va'ety ha'e fariseu kuery ikuai va'e oexa pota okuapy sâbado ára py pa nhomonguera 'rãa re, hexe ijayvu reixe vy.

---

\* **6:4** 1 Samuel 21.1-6

<sup>8</sup> Ha'e rã ha'e kuery opẽxaa Jesus oikuaa vy aipoe'i ava ipo piru va'e pe:  
 – Epu'ã ejuvy mbyte katy – he'i ramo opu'ã ouvy.  
<sup>9</sup> Ha'e ramo Jesus aipoe'i amboae kuery pe:  
 – Mba'exa tu peikuua? Ha'eve ri nda'u sábado ára py jajapo porã, tyrã pa jajapo vai?  
 Ha'eve ri nda'u joekove jaraa jepe, tyrã pa tove tomano? – he'i.  
<sup>10</sup> Ha'e gui oyvýry ikuai va'e ha'e javive re oma'ẽ reve aipoe'i ava va'e pe:  
 – Embo'yvi ndepo.

Ha'e rami opo ombo'yvi ramo okuera.

<sup>11</sup> Ha'e rami rã amboae kuery ma ipoxypa, ha'e joupe-upe oporandu mba'e pa Jesus re ojapo aguã re.

*Mateus 10.1-4; Marcos 3.13-19*

<sup>12</sup> Ha'e va'e jave py oo yvyty áry onhembo'e aguã. Ha'e vy pytũ mbukukue re onhembo'e oiny Nhanderuete pe.

<sup>13</sup> Ko'ẽmba jave ojea py oenoĩ guemimbo'e kuery ha'e javi, ha'e vy oiporavo doze. Ha'e va'e kuery pe ma "Apóstolo" he'i:\*

<sup>14</sup> Simão hery mboaerã Pedro omoĩ va'ekue ha'e tyvy André, Tiago ha'e João, Filipe ha'e Bartolomeu,

<sup>15</sup> Mateus ha'e Tomé, Alfeu ra'y Tiago ha'e Simão "Zelote" 'ea va'e,

<sup>16</sup> Tiago ra'y Judas ha'e Judas Iscariotes Jesus jopy uka nhemiarã va'e avi.

*Mateus 4.23-25*

<sup>17</sup> Ha'e kuery reve oguejy vy yvy joja reia py ju ovaẽ, hemimbo'e kuery mboae ha'e heta rei va'e ikuiai py. Judéia ha'e javi gui, Jerusalém, Tiro ha'e Sidom ha'e ye'ẽ rembe katy gui ou va'ekue.

<sup>18</sup> Ha'e kuery ma ayvu oenduxe vy ou va'ekue, omba'eaxy gui okueraxe vy guive. Nhe'ẽ vai omoangeko va'e guive ou rã omonguerapa.

<sup>19</sup> Heta va'e kuery ha'e javive opokoxe hexe, mba'eta ixugui ipo'akaa oẽ va'e py nhomonguerapa ramo.

*Mateus 5.1-12*

<sup>20</sup> Ha'e gui guemimbo'e kuery re oma'ẽ vy aipoe'i ha'e kuery pe:

– Iporiaukue'i pendekuai va'e, pevy'a ete 'rã, mba'eta Nhanderuete po'akaa pendevy guarã oĩ.

<sup>21</sup> – Pevy'a ete 'rã aŷ pekaruxe va'e, mba'eta perekopa 'rã.

– Aŷ pejae'o va'e, pevy'a ete 'rã, mba'eta penderory riae 'rã.

<sup>22</sup> – Pevy'a ete 'rã Ava ra'y ojeapo va'ekue káuxa avakue pendere nda'ija'ei vy penemoxẽ, pendere ijayvu rei ha'e penderery vaikue va'e rami oíkuua ramo.

<sup>23</sup> Ha'e nunga oiko rã pevy'a ha'e peporaei, mba'eta heta mba'e yva re oĩ pendevy guarã. Mba'eta yma rupi ha'e rami ae tamõi kuery oguereko axy raka'e profeta kuery.

*Nda'evei ete 'rãa re ijayvuague*

<sup>24</sup> – Ha'e rã aŷ perekopa va'e pe ma nda'evei ete 'rã, mba'eta perekopa ma penembovy'aarã.

<sup>25</sup> – Nda'evei ete 'rã pekaru porã va'e pe, mba'eta pendu 'rã karuai.

– Nda'evei ete 'rã pevy'a rei va'e pe, mba'eta pendepy'a vai ha'e pejae'o 'rã.

<sup>26</sup> – Nda'evei ete 'rã pendejou porã va'e ha'e javi pe, mba'eta ha'e rami ae peneramoĩ kuery ojou porã rei raka'e profeta ramigua kuery.

*Mateus 5.38-42*

<sup>27</sup> – Ha'e rã xeayvua re pejapyxaka va'e pe ma aipoa'e: Peayvu 'rã pendovaigua kuery, pejapo porã 'rã pendere ija'e e'ŷ va'e pe.

<sup>28</sup> Peroayvu porã 'rã pendere inhe'ẽ vai va'e, ha'e pejerure 'rã pendere ijayvu rei va'e re.\*

\* <sup>6:13</sup> "Apóstolo" 'ea ma Cristo rembiporavo guery rupi omondouka va'e ayvu omombe'u ha'e nhomonguera aguã.

\* <sup>6:28</sup> Lucas 23.34; Romanos 12.14

29 Amongue pendova pete rã perova hovai re ju oipete aguã. Amongue pendeparito oipe'a rã penekamixa avi 'rã peraa uka.

30 Peme'ẽ 'rã pãvy ojerure va'e ha'e javi pe. Amongue penemba'e ogueraa ramo nda'evei "Eme'ẽ ju" peje aguã.

31 Pãvy avakue ojapo aguã peipotaa rami ae avi peẽ voi pejapo ha'e kuery pe.

*Mateus 5.43-48*

32 — Xapy'a rei penderayvu va'e anho ri peayvu vy mba'e 'rã tu pejopy ha'e nunga repy? Mba'eta heko vai va'e kuery voi oayvu 'rã guayvua kuery.

33 Pendevy ojapo porã va'e pe anho ri pejapo porã vy mba'e 'rã tu pejopy ha'e nunga repy? Mba'eta heko vai va'e kuery voi ha'e rami ikuai.

34 Pendevy omboekovia va'erã pe anho ri mba'emo peiporuka vy mba'e 'rã tu pejopy ha'e nunga repy? Mba'eta heko vai va'e kuery voi joupe oiporuka 'rã mba'emo ha'ekue rami ju ojopy aguã.

35 — Ha'e rã peẽ ma peayvu 'rã pendovaigua kuery voi, ha'e pejapo porã joupe, mba'emo peiporuka 'rã hekovicia re'ý. Ha'e rami rã 'rãe heta omoõ porãa pendevy guarã, ha'e Yvate ete va'e ra'y pendekuai. Mba'eta ha'e ma ojapo porã 'rã hexe ima'endu'a e'ý va'e ha'e heko vai va'e kuery pe voi.

36 Penhomboaxy kuaa 'rã Penderu nhomboaxya rami.

*Mateus 7.1-5*

37 — Peikuaa pota rei eme joe, pendere oikuaa potaa e'ý aguã. Penhombopaga eme penembopagaa e'ý aguã. Pejoperdoa 'rã pendeperdoaa aguã.\*

38 Joupe mba'emo peme'ẽ ri ramo pendevy ju ome'ëa 'rã mba'emo. Omboyruborã'i, omomy-momyï, ojapete ramo tynyë vaipa vy onheëmba rei va'e 'rã ome'ëa pendevy. Mba'eta joupe pejapoa rami avi pendevy ju ojapoa 'rã.

*Ára reveguia e'ý meme jogueraa va'e re ijayvuague*

39 Ha'e kuery pe omombe'u avi peteõ ayvu mba'emo re ombojoja vy:

— Ha'eve ri nda'u ára reveguia e'ý ogueraa aguã amboae ára reveguia e'ý? Ha'e rami vy nda'u mokoïve ndo'ai 'rã ri hugua katy?

40 Temimbo'e kuery ma imbo'ea gui yvateve va'e'ý. Imbo'e porã mbyre ma imbo'eare rami avi 'rã ikuai.\*

41 — Mba'e re tu nderyvy rexaply iky'a oï va'e re rexapota, ha'e rã yvyra nderexaply oï va'e re ma ndereikuuaa potai?

42 Mba'e re tu nderyvy pe "Xeryvy, tove tanoõ iky'a nderexapui" 're va'eri nderexaply yvyra oï va'e re ma ndereikuuaa potai? Heko porã merami rive va'e, enoõ ndee ranhe yvyra nderexapui. Ha'e vy 'rãe rexapota 'rã nderyvy rexapui iky'a renoõ aguã.

*Mateus 12.33-37*

43 — Jipoi yvyra porã hi'a iporaõ e'ý va'e, neõ yvyra iporaõ e'ý va'e voi jipoi hi'a porã va'e.

44 Mba'eta yvyra ikuai va'e jaikuuaa 'rã hi'a re vy. Figo ma nanhamondoi 'rã juu'ygui, ha'e uva ma nanhamondoi 'rã juu rakuaendygui.

45 Heko porã va'e oexa uka 'rã opy'a re mba'emo porã omoõ va'ekue, ha'e rã heko vai va'e ma mba'emo vai omoõ va'ekue 'rã oexa uka. Mba'eta nhandeypy're oï va'e re ae 'rã nhandeayvu.

*Mateus 7.24-27*

46 — Mba'e re tu xevy "Senhor, Senhor" peje va'eri ndapejapoi ajapo uka va'e?

47 Ha'e javive xea py ou, xeayvu oendu ha'e ha'ekue rami ikuai va'e ma xee amombe'u ta marã rami pa ikuuaia.

48 Ha'e kuery ma ikuai peteõ ava oorã ojapo vy ijyta kuarã yvy ojo'o puku vy ita áry omo'ã va'e rami. Ha'e gui yy tyguaxu vy oo re ojeapi-api teõ ndoityi, omboyta porã rire.

\* 6:37 Romanos 2.1-3; 1 Coríntios 4.5; Tiago 4.11,12

\* 6:40 Mateus 10.24; João 13.16

<sup>49</sup> Ha'e rā xeayvu oendu teĩ ha'ekue rami nda'ikuai va'e ma ava oorā ojapo vy omboyt  
vai-vai va'e rami. Ha'e gui oo re yy ojeapi-api vy oitypa vyvoi, ombovaipa katuĩ'i.\*

## 7

### *Mateus 8.5-13*

- <sup>1</sup> Ha'e va'e ayvu heta va'e kuery pe Jesus omombe'upa ma vy oo Cafarnaum tetā py.
- <sup>2</sup> Ha'e py ma peteĩ xondaro ruvixa rembiguai oayvu ete va'e imba'eaxy vy omano rai'i oupy.
- <sup>3</sup> Jesus re ima'endu'aa ramo huvixa oendu vy oĩ katy omondouka amongue judeu mongetaaty kuery, ha'e kuery ojerure rā ou vy omonguera aguã hembiguai.
- <sup>4</sup> Ha'e kuery ma Jesus-a py ovaẽ vy ojerure ete okuapy. Ha'e vy aipoe'i:  
— Huvixa ma ha'eve reipytyvõ aguã,
- <sup>5</sup> mba'eta nhande kuery irũ oiko vy ojapo karamboae ronhembo'e atyrā — he'i okuapy.
- <sup>6</sup> Ha'e ramo Jesus oo ha'e kuery reve.

Oo py ovaẽ rai'i ma ovjave xondaro ruvixa omondouka ju oirũ kuery regua aipoe'i aguã:

— Senhor, xero py revaẽ e'ŷ teĩ ha'eve, mba'eta xee xe'yvyi'i ete xero py romovaẽ aguã.

<sup>7</sup> Ha'e nunga rupi ndaxepy'a guaxui xee aju aguã ndea py. Peteĩ ayvu ri eruruka

xerembiguai tokuera.

<sup>8</sup> Mba'eta xee voi xeruvixa oĩ va'e oipotaa rami aiko va'e. Ikuai avi xondaro kuery xeayvua rami ikuai va'e. Peteĩ pe "Tereo" ha'e ramo oo 'rā. Ha'e rā amboae pe ma "Eju" ha'e rā ou 'rā. Xerembiguai kuery pe "Ejapo ha'e nunga" ha'e ramo ojapo 'rā — he'i.

<sup>9</sup> Pova'e ayvu Jesus oendu vy onhemondyi. Ha'e rami vy hupive ou va'e kuerya katy ojere vy aipoe'i:

— Xee ma aipoa'e pêvy: Neĩ Israel kuerya rupi voi ndajoui teri ha'e rami ojerovia ete va'e — he'i.

<sup>10</sup> Ha'e gui omondouka pyre oo katy ojevy vy oexa rā tembiguai okuera ma ra'e.

### *Naim tetā py kunha imeve'ŷ va'e pi'a omboete jevyague*

<sup>11</sup> Ha'e va'e rire'i Jesus oo peteĩ tetā Naim hery va'e katy. Hupive hemimbo'e kuery ha'e heta va'e kuery oje'oi.

<sup>12</sup> Tetā kora rokẽ py ovaẽ rai ovjave oẽ jekuaa mba'e guaxu reraa kuery. Ha'e va'e kuery ma peteĩ kunha imeve'ŷ va'e pi'a peteĩ'i va'ekue ogueraa. Ixykue'i reve heta avi oje'oi tetā pygua kuery.

<sup>13</sup> Ha'e nunga Senhor oexa vy omboaxy kunha va'e. Ha'e vy aipoe'i:

— Ejae'o eme.

<sup>14</sup> Ha'e rami vy onhemboja vy opoko omano va'e rupa re. Heraa kuery omombyta vy aipoe'i:

— Kunumi, xee aipoa'e ndevy: Epu'ã ke — he'i.

<sup>15</sup> Ha'e ramo omano va'ekue oguapy oiny vy ijayvu. Ha'e rā ixy pe ju Jesus omboaxa.

<sup>16</sup> Ha'e javive onhemondypa vy Nhanderuete omboetea rupi aipoe'i:

— Profeta ipo'akapa va'e oiko nhande kuery mbyte, Nhanderuete ojekuaa uka ra'e ojeupegua kuery pe — he'i okuapy.

<sup>17</sup> Ha'e va'e omombe'ua rā oendupaa Judéia ha'e javi rupi, ha'e gui ha'e katy'i rupi ikuai va'e ha'e javi.

### *Mateus 11.2-6*

<sup>18</sup> Ha'e nungakue ha'e javi João Batista pe hemimbo'e kuery omombe'u. Ha'e rā ha'e kuery regua mokoĩ João oenoĩ vy

<sup>19</sup> omondouka Senhor-a katy oporandu aguã: "Ndee teve reju 'rā va'ekue, tyrā pa roarõve 'rā amboae?" he'i aguã.

---

\* <sup>6:49</sup> Tiago 1.22-25; 1 João 2.3-6

**20** Jesus oĩa py avakue ovaẽ vy aipoe'i ixupe:

— João Batista orembou apy ndevy roporandu aguã: Ndee ae pa reju 'rã va'ekue, tyra pa roarõve 'rã amboae? — he'i.

**21** Ha'e va'e jave Jesus heta omonguera imba'eaxy va'e oiko axyague gui, anha onhemondea va'e guive. Heta avi omoma'ẽ ára reveguia e'ŷ.

**22** Ha'e gui mae ma Jesus ombovai ha'e kuery pe:

— Tapeo pemombe'u João pe pexa ha'e pendu va'ekue: ára reveguia e'ŷ oma'ẽ ju, oguata e'ŷ va'ekue oguata, lepra reveguia ojeky'a'o, ijapyxa e'ŷ va'ekue oendu, omano va'ekue onhemboete, ha'e iporiaukue'i pe omombe'ua ayvu porã.

**23** Ovy'a ete 'rã xere ojeroviaa gui ndojepo'ai va'e — he'i.

### *Mateus 11.7-19*

**24** Oporandu aguã ombou pyre kuery oje'oi ju rire João reko re Jesus ijayvu heta va'e kuery pe: Ha'e vy aipoe'i:

— Marã ramigua pexa aguã tu peo tekao e'ŷa py? Takua'i yvytu omomy-momyi va'e ramigua ri ty'y?

**25** Marã ramigua pexa aguã tu peo raka'e? Petei ava ao porã py onhemonde va'e? Ha'e rami avi onhemonde porã ha'e oguerekopa va'e ma huvixa ro py ikuai va'e anho.

**26** Marã ramigua tu ha'vy peo pexa? Profeta? Tá, xee aipoa'e pêvy: João Batista ma profeta ikuai va'e gui voi yvateve va'e.

**27** Mba'eta hekorã re ae ipara oiny: “Xee amondouka 'rã petei xerembiguai nerendorã, nderaperã oguerekoko katu aguã”, he'i va'ekue.\*

**28** Xee aipoa'e pêvy: Kunha gui oiko va'ekue jipoi João Batista gui yvateve va'e. Ha'e rã Nhanderuete po'akaa py yvyigueve'i va'e ma ixugui yvateve — he'i.

**29** Ha'e javive oendu va'e ha'e imposto re nhombopaga va'ety kuery voi Nhanderuete guigua teko porã João omombe'u rã oendu vy ixupe onhemongarai uka va'ekue.

**30** Ha'e rã fariseu ha'e lei re nhombo'e va'ety kuery ma Nhanderuete oipotaa rami nda'ikuaxei vy João pe nonhemongarai ukai va'ekue. Ha'e gui aipoe'ive ju:

**31** — Mba'e nunga re nda'u ambojoja 'rã aŷgua kuery reko? Marã rami nda'u ha'e kuery ikuai?

**32** Ha'e kuery ma ikuai kyrigue tetã mbyte rupi oguapy vy joupe-upo ojapukai va'e rami: “Mimby romonhe'ẽ ramo peẽ ndapejerokyi, ha'e gui omanoa pygua romonhendu ramo ma ndapejae'oi”, he'i va'e kuery rami.

**33** Mba'eta João Batista ou vy mbojape ho'u e'ŷ re oiko, vinho ndoy'ui guive. Ha'e rami rã ixupe peẽ kuery “Anha reve rima oiko”, peje.

**34** Ha'e rã Ava ra'y ojeapo va'ekue ma ou vy okaru ha'e oy'u ramo ixupe “Peva'e ma okaru guaxu, vinho oy'u, ha'e imposto re nhombopaga va'ety heko vai va'e kuery re onhemoiru va'e”, peje.

**35** Ha'e rã hi'arandu va'e kuery ha'e javi ma ojou porã 'rã 'arandu rupi ikuai va'e — he'i.

### *Kunha heko vai va'ekue Jesus py re heakuã porã va'e oikytyague*

**36** Petei fariseu oenoi Jesus hexeve oo vy okaru aguã. Ha'e rã fariseu ro py Jesus ovaẽ ma vy mesa py oĩ.

**37** Petei kunha heko vai va'ekue ha'e va'e tetã pygua ae oikuaa fariseu ro py okaru oinya. Ha'e rami vy oĩa py petei heakuã porã va'e ryru ogueru, ita xiĩ va'e guigua.

**38** Hakykue gui onhemboja vy ojae'o reve omoakŷ ipy guexay py, ha'e o'a py ju omombiru. Ipy rupi oayvu reve oikyty heakuã porã va'e.

**39** Ha'e nunga fariseu henoĩare oexa vy aipoe'i ojeupe ae:

— Peva'e ma profeta ete va'e rire oikuua 'rãgue mba'e nunga kunha pa hexe opoko va'ea, mba'eta heko vai va'e — he'i.

**40** Ha'e ramo Jesus aipoe'i fariseu pe:

---

\* **7:27** Malaquias 3.1

— Simão, peteĩ mba'e areko amombe'u va'erã ndevy.

Ombovai:

— Emombe'u ha'vy, porombo'ea — he'i.

**41** Aipoe'i:

— Oiko peteĩ nhomboreve va'ety. Ha'e va'e pe mokoĩ oreve. Peteĩ oreve quinhentos ára repy, ha'e rã amboae ma cinqüenta oreve.

**42** Neĩ peteїve ma ndoguerekoi omboekovia aguã. Ha'e ramo imboreveare omboguepa mokoїve orevea. Mokoїve gui mava'e nda'u oayvuve?

**43** Simão ombovai:

— Xee aikuaa rã oreve retave va'ekue — he'i.

Ha'e ramo aipoe'i ixupe:

— Ha'evea rami rembovai — he'i.

**44** Ha'e gui kunha va'e re ranhe oma'ẽ vy aipoe'ive ju Simão pe:

— Rexa pa kova'e kunha? Ndero py xee avaẽ ramo ndee ndererui yy xepy ajoi aguã. Ha'e rã peva'e kunha ma guexay py ae ojoi xepy, ha'e gui o'a py ju omombiru.\*

**45** Ndee ma xerova rupi ndereayvui. Ha'e rã peva'e ma avaẽ guive xepy rupi oayvupa.

**46** Ndee ma azeite ndereikytyi xeakã re. Ha'e rã peva'e ma xepy re oikyty oiny heakuã porã va'e.

**47** Ha'e nunga rupi aipoa'e ndevy: Peva'e ojejavy eteague omboguepaa ma, mba'eta xerayvu ete. Ha'e rã ojejavyague nombogueaive va'e ma ndaxerayvuive 'rã — he'i.

**48** Ha'e gui ma kunha va'e pe aipoe'i:

— Rejejavyague omboguepaa ma.

**49** Ha'e ramo hexeve okaru va'e kuery joupe-upe aipoe'i:

— Mava'e nda'u peva'e ava jejavya voi ombogue va'e? — he'i okuapy.

**50** Ha'e ramo Jesus aipoe'i kunha va'e pe:

— Rejeroviaa ndereraa jepe ma. Tereo porã ke.

## 8

### *Kunhague Jesus pytyvõa kuery rery oĩa*

**1** Ha'e rire Jesus oguata oikovy tetã ha'e tekoa ikuai va'e rupi. Omombe'u ov y ayvu porã Nhanderuete po'akaa regua. Hupive hemimbo'e kuery doze va'e oje'oi,

**2** ha'e amongue kunhague anha gui ha'e mba'eaxy gui ogueraa jepe va'ekue avi: Maria Madalena hery va'e sete anha gui oepy va'ekue,

**3** huvixa Herodes rembiguai Cuza ra'yxy Joana, ha'e gui Suzana. Heta avi kunhague mboae oje'oi mba'emo py oipytyvõ va'ety kuery.

### *Mateus 13.1-9; Marcos 4.1-9*

**4** Jesus oĩa py heta ou opa rupi tetã ikuai va'e gui. Ha'e ramo omombe'u peteĩ ayvu mba'emo re ombojoja vy:

**5** — Peteĩ ava oo mba'emo ra'yõ moaõ vy. Ha'e va'e omoaõ ramo amongue ha'yigue ho'a tape yvýry. Ha'e nunga re opyrõmbaa, guyra'i ho'upa guive.

**6** Amboae ma itaty reia rupi ho'a. Ha'e nungakue yvate'i vyve ipiru, na'inhakõi ramo.

**7** Amboae ma juu mbyte rupi ho'a. Ha'e nungakue jojaví yvate vy ojukapa.

**8** Ha'e rã amboae ma yvy porãa rupi ho'a. Ha'e nungakue ma yvate ha'e hi'a porã. Cem ra'yõ peteĩ-teĩ gui oiko.

Ha'e rami ijayvupa ma vy aipoe'i:

— Ijapyxa oendu aguã oĩ va'e toendu.

### *Mateus 13.10-23; Marcos 4.10-20*

**9** Hemimbo'e kuery oikuua porãvexe vy oporandu ixupe:

\* **7:44** Ha'e kuery reko rami vy oo py ovaẽ ramo hoo va'e omovaẽ vy ogueru ruka 'rã yy ipoua kuery ojepyei aguã, tape rupi yvy ku'i heta va'e gui (Gênesis 19.2, 24.32, 43.24, Juízes 19.21, João 13.1-14).

— Mba'e nunga re tu pova'e rembojoja?

<sup>10</sup> Jesus ombovai:

— Pendevy ma Nhanderuete oikuua uka opo'akaa py mba'emo oiko va'e ndoikuua ukai va'ekue. Ha'e rā amboae kuery pe ma mba'emo re ambojojaa rupi rive amombe'u ayvu, ha'e kuery oexa teīndoexa kuaai aguā, ha'e oendu teīnoendu kuaai aguā.\*

<sup>11</sup> — Pova'e nunga re ma ambojoja kuri. Ha'yigue'i ma Nhanderuete ayvu.

<sup>12</sup> Tape yvýry ho'a va'ekue rami ikuai va'e ma ayvu oendu teī anha ou vy ipy'a gui oipe'a'rā, oguerovia e'ŷ ha'e oo jepe e'ŷ aguā.

<sup>13</sup> Itaty reia rupi ho'a va'ekue rami ikuai ayvu oendu vy ojou porā ha'e oguerovy'a va'e. Ndapo pukui va'e rami avi ikuai vy xapy'a'i anho 'rā ojerovia. Ha'e gui mba'emo oiko rā ojep'e'a'rā.

<sup>14</sup> Juu mbyte rupi ho'a va'ekue rami ikuai va'e ma ayvu oendu teī mba'emo yvy reguare, omba'e rei-reirā ha'e mba'emo imbovy'aarā re openave vy hexaraipa. Ha'e rami vy ndai'ai.

<sup>15</sup> Ha'e rā yvy porāa rupi ho'a va'ekue rami ikuai va'e ma ayvu oendu vy opy'a re omoi. Ha'e kuery ma ojep'e'a e'ŷ vy hi'a porā.

*Marcos 4.21-25*

<sup>16</sup> — Avave rei tataendy nhamoendy vy ndajajao'i 'rā mba'emo ryru py, neītupa guýry nanhamoī. Ha'e rami 'rāgue py imoiny oīaty py ae 'rā jaupi, oike va'e kuery oexa aguā hendy va'e.

<sup>17</sup> Ndoexa ukai pyre ojekuaapa 'rā, ha'e onhomni mbyre oikuua ukapaa 'rā.

<sup>18</sup> Ha'e nunga rupi peikuaaa pota ke marā rami pa pendua re. Mba'eta mba'emo oguereko va'e pe ome'ēave 'rā. Ha'e rā oguereko e'ŷ va'e gui ma oipe'apaa 'rā oguereko rei'i merami va'ekue — he'i.\*

*Mateus 12.46-50; Marcos 3.31-35*

<sup>19</sup> Jesus oīa py ixy ha'e tyvy kuery ovaēxe teī heta va'e kuery ikuai va'e gui nda'evei ovaēete aguā.

<sup>20</sup> Ha'e ramo omombe'ua ixupe:

— Ndexy ha'e nderyvy kuery, pee oka py ikuai nderexaxe vy — he'i.

<sup>21</sup> Ombovai:

— Ha'i ha'e xeryvy kuery ma Nhanderuete ayvu oendu vy ha'ekue rami ae ikuai va'e.\*

*Mateus 8.23-27; Marcos 4.35-41*

<sup>22</sup> Peteī ára oī kanoā py guemimbo'e kuery reve. Ha'e vy ha'e kuery pe

— Jaaxa yupa rovai re — he'i. Ha'e vy oje'oi.

<sup>23</sup> Yy rupi ooa ja ha'e oke oupy.

Ha'e gui yupa áry rupi ou yvytu atā. Ha'e ramo kanoā oike rai-rai'i yy py.

<sup>24</sup> Ha'e ramo ha'e kuery ovaē Jesus ituia py. Omomyī vy aipoe'i:

— Orembo'ea, orembo'ea, nhamanomba ta rima! — he'i okuapy. Ha'e ramo Jesus omyī vy ijayvu atā yvytu ha'e yai pe. Ha'e ramove optytu'upa, nda'yvytuvei.

<sup>25</sup> Ha'e ramo aipoe'i ha'e kuery pe:

— Mamo tu oī pejeroviaa?

Ha'e ramo ha'e kuery onhemondiyipa, okyje guive. Ha'e vy aipoe'i joupe-up:

— Marā ramigua tu peva'e, yvytu ha'e yai pe ijayvu ramo voi onhe'ē rendu aguā?

*Mateus 8.28-33; Marcos 5.1-14*

<sup>26</sup> Ha'e gui geraseno kuery yvy katy ju oje'oi Galiléia yupa rovaigua re.

<sup>27</sup> Kanoā gui oguejypa ramove ou peteī ava tetā gui. Ha'e va'e re ma anha onhemonde ramo yma rei ma ao nomoīvei, neīngoo rupi ndopytavei va'e. Yvyra rupa rupi rive tema oiko.

<sup>28</sup> Ha'e va'e oexa Jesus vyve guenapy'ā re oīhenonde. Ha'e vy aipoe'i ojapukai atā reve:

\* **8:10** Isaías 6.9-10

\* **8:18** Marcos 4.24, Tiago 1.22-25

\* **8:21** Hebreus 2.11,12

— Jesus Nhanderuete Yvate ete va'e Ra'y, mba'e tu xee areko ndereve? Xee ajerure xemoingo axy e'ŷ aguã — he'i.

<sup>29</sup> Mba'eta anha pe Jesus ijayvu ae ma ava gui oẽmba aguã, mba'eta mbovykue rei e'ŷ ma oguereco axy. Ipy ha'e ipo corrente py ojokuapaa teĩ omondopa kuerei. Ha'e ramo anha kuery ogueraa 'rã tekoa e'ŷa rupi.

<sup>30</sup> Ha'e gui ma Jesus oporandu ixupe:

— Mba'exa tu nderery?

Ombovai vy

— Heta va'e — he'i, hexe heta anha onhemonde ramo.

<sup>31</sup> Ha'e vy ojerure yvykua vaikue py omondouka e'ŷ aguã.

<sup>32</sup> Ha'e katy'i ma heta ikuai poryko okarua py yvyty re. Anha kuery ojerure omondouka aguã poryko re ju onhemonde aguã. Ha'e ramo Jesus omondouka.

<sup>33</sup> Ha'e ramo ava gui anha kuery oẽmba vy poryko re ju onhemonde. Ha'e ramo yvy'ã guy katy onhamba jogueravy. Yy py ho'apa vy oy'upa.

<sup>34</sup> Ha'e gui ma poryko re opena va'e kuery mba'emo oiko va'e oexa vy onhamba jogueravy, omombe'u tetã ha'e tekoa ikuai va'e rupi.

#### *Mateus 8.34; Marcos 5.14-20*

<sup>35</sup> Ha'e pygua kuery ou oiko va'ekue oexaxe vy. Jesus oĩa py ovaẽ vy oexa ava anha kuery oẽmbaague va'e. Ha'e va'e ma onhemonde ha'e hi'arandua oĩ porã ju ma. Jesus yvy'iry oguapy oiny. Ha'e rã ha'e kuery ndaekorãvei rei okuapy.

<sup>36</sup> Ha'e kuery pe hexaare regua omombe'u marã rami vy pa anha gui oepyague.

<sup>37</sup> Geraseno kuery opa rupi gui ou va'ekue okyje vy ixupe ojerure ha'e kuery rekoa gui ojepe'a aguã. Ha'e ramo kanoã py Jesus ojeipi vy oo ju.

<sup>38</sup> Ha'e rã ava anha kuery oẽmbaague va'e ma ojerure hupive oo aguã. Ha'e rami teĩ Jesus omondouka vy aipoe'i:

<sup>39</sup> — Tereo ndero pygua kuery pe emombe'u Nhanderuete ndevy ojapo va'ekue — he'i. Ha'e ramo tetã jave rupi oo vy omombe'u hexe Jesus ojapo va'ekue ha'e javi.

#### *Mateus 9.18,19; Marcos 5.21-24*

<sup>40</sup> Ha'e gui Jesus ojevy ramo heta va'e kuery oarõ okuapy va'e omovaẽ porã ov'y a reve.

<sup>41</sup> Ha'e jave py ma ou peteĩ ava Jairo hery va'e, onhembo'eaty pygua huvixa. Ha'e va'e ma Jesus renonde guenapy'ã re oĩ vy ojerure hoo py ovaẽ aguã,

<sup>42</sup> mba'eta tajy peteĩ'i va'e doze ma'etŷ oguereco va'e omano rai'i oupy ramo.

#### *Mateus 9.20-22; Marcos 5.24-34*

Jesus ooa rupi heta va'e kuery omboty rei oje'oivy.

<sup>43</sup> Oiko avi peteĩ kunha doze ma'etŷ re ma gueko re riae oiko va'e. Avave rei nomongueravei ma, [ha'e oguereco va'ekue ha'e javi ome'ẽ ma poropoanoa kuery pe.]

<sup>44</sup> Ha'e va'e ma Jesus rakykue gui ovaẽ vy opoko ijao apy re. Ha'e ramove optytu'u vyvoi hekoaxy.

<sup>45</sup> Ha'e ramo Jesus aipoe'i:

— Mava'e tu xere opoko?

Ha'e javive nomombe'uxei ramo Pedro [oirũ kuery reve] aipoe'i:

— Orembo'ea, heta nderakykue ou va'e ndejopy rei heravy nemboty rei vy, [va'eri ndee "Mava'e tu xere opoko?" 're.]

<sup>46</sup> Ha'e rami teĩ Jesus aipoe'ive tema:

— Amongue ta'vy xere opoko teve, mba'eta aendu xegui xepo'akaa oẽ rã — he'i.

<sup>47</sup> Ha'e ramo kunha va'e onhenhomu aguã nda'evei ramo ou oryryipa reve, guenapy'ã re oĩ henonde. Ha'e vy pavẽ oendua py onhemombe'u mba'e re pa hexe opokoa, ha'e opoko vyve okueraague.

<sup>48</sup> Ha'e ramo ixupe aipoe'i:

— Xerajy, rejeroviaa ndereraa jepe. Tereo porã ke.

*Mateus 9.23-26; Marcos 5.35-43*

<sup>49</sup> Jesus ijayvu teri ho'amy reve peteĩ ou onhembo'eaty pygua ruvixa ro gui. Ha'e vy aipoe'i ixupe:

— Nderajy omano ma. Nda'evevei ma porombo'ea remoangekove aguã — he'i.

<sup>50</sup> Ha'e nunga Jesus oendu vy aipoe'i tuu pe:

— Enhemondyi eme, ejerovia tema. Ha'e ramo oo jepe 'rã — he'i.

<sup>51</sup> Ha'e gui oo py ovaẽ vy avave rei ndogueroikei, Pedro, João, Tiago, ha'e kunha'i ru ha'e ixy e'ŷ vy.

<sup>52</sup> Ha'e javive ipy'a vai vy ojae'o okuapy rã oexa vy aipoe'i:

— Pejae'o eme. Kunha'i va'e nomanoi, oke rima — he'i.

<sup>53</sup> Ha'e ramo ojojai rei okuapy, omano maa oikuaa vy.

<sup>54</sup> Ha'e rã kunha'i va'e po re Jesus ojopy vy ijayvu atã reve aipoe'i ixupe:

— Kunha'i, evy ke.

<sup>55</sup> Ha'e ramove hexe inhe'ẽ ojevy ramo opu'ã. Ha'e ramo omongaru uka.

<sup>56</sup> Tuu kuery onhemondyipa. Ha'e ramo ha'e kuery pe aipoe'i avave rei pe omombe'u e'ŷ aguã oiko va'ekue.

## 9

*Mateus 10.1,5-15; Marcos 6.7-13*

<sup>1</sup> Doze guemimbo'e kuery Jesus oenoĩ vy ombopo'aka anha kuery ha'e javi re, ha'e nhomonguera aguã re.

<sup>2</sup> Ha'e vy omondouka Nhanderuete po'akaa regua omombe'u ha'e imba'eaxy va'e omonguera aguã.

<sup>3</sup> Ha'e vy aipoe'i ha'e kuery pe:

— Mba'eve rei peraa eme peoa rupi, neĩ popoka, voko, mbojape, peráta ha'e kamixa voi peraa eme mokoĩ.

<sup>4</sup> Oo py pevaẽa py ae pepyta peove peve.

<sup>5</sup> Ha'e gui tetã re napenemovaẽai ramo pendepy regua gui peity-ity 'rã peovy yvy ku'i, ha'e kuery pe peikuua uka aguã peja peovya — he'i.\*

<sup>6</sup> Ha'e ramo hemimbo'e kuery ma tekao ha'e javi rupi oje'oi vy ayvu porã omombe'u ha'e nhomonguera opa rupi.

*Mateus 14.1-12; Marcos 6.14-29*

<sup>7</sup> Ha'e gui huvixa Herodes oendu omombe'u rã Jesus mba'emo ojapo oikovya. Ha'e vy ndoikuuaai rei, mba'eta amongue aipoe'i:

— João omanoague gui onhemboete ju va'ekue.

<sup>8</sup> Amboae ma — Elias rima oiko — he'i.

Ha'e rã amboae ma — Peteĩ profeta yma oiko va'ekue rima oiko — he'i.

<sup>9</sup> Ha'e rã Herodes ma aipoe'i:

— João akã ma xee ae ajaya uka va'ekue. Marã ramigua tu ha'vy oiko ha'e nunga apoa omombe'ua rã aendu? — he'i. Ha'e rami vy onhea'ã oexa aguã.

*Mateus 14.13-21; Marcos 6.30-44; João 6.1-14*

<sup>10</sup> Apóstolo kuery ojevypa ma vy Jesus pe omombe'upa ojapo va'ekue ha'e javi. Ha'e ramo ogueraa Betsaida tetã py ha'e kuery ae'i ikuai aguã.

<sup>11</sup> Ha'e rami teĩ heta va'e kuery oikuaa vy oje'oi hakykue. Ha'e ramo omovaẽmba vy ijayvu Nhanderuete po'akaa re, imba'eaxy va'e voi omonguera.

<sup>12</sup> Ka'aru rai jave hemimbo'e kuery doze va'e ou vy aipoe'i ixupe:

— Emondoukapa ju heta va'e kuery, tetã ha'e tekao kii rai'i ikuai va'e rupi oje'oi vy oke ha'e ho'u va'erã ojou aguã, mba'eta apy ma tekao e'ŷa py nhandekuai — he'i okuapy.

<sup>13</sup> Ha'e rã aipoe'i ha'e kuery pe:

\* <sup>9:5</sup> Atos 13.50,51; 18.6

— Peẽ ae peme'ẽ ho'u va'erã.

Ha'e kuery ombovai:

— Mba'eve ndoroguererekoi, peteĩ nhiruĩ mbojape ha'e mokoĩ pira'i e'ŷ vy. Tyrã pa ore ae toroo tembi'u rojogua aguã ha'e javive peguarã? — he'i.

<sup>14</sup> Ha'e py rãnda'u ikuai cinco mil avakue.

Ha'e gui ma aipoe'i guemimbo'e kuery pe:

— Pemboguapy peteĩ-teĩ henda py cinqüenta ikuai aguã rami — he'i.

<sup>15</sup> Ha'e ramo ha'e kuery ha'e rami ojapo vy omboguapypa.

<sup>16</sup> Ha'e gui Jesus ma peteĩ nhiruĩ mbojape ha'e mokoĩ pira ojopy vy yva re oma'ẽ reve oguerovy'a Nguuete. Ha'e vy oipe'ãmba'i vy ome'ẽ guemimbo'e kuery pe, ha'e kuery ju ome'ẽ-me'ẽ aguã heta va'e kuery pe.

<sup>17</sup> Ha'e javive okaru vy hevyatãmba. Ha'e ramo hembyrekue omono'õ vy doze varai ju omonyẽ.

*Mateus 16.13-21; Marcos 8.27-31*

<sup>18</sup> Ha'e ae'i onhembo'e oinya py hemimbo'e kuery ou ramo oporandu ha'e kuery pe:

— Marã ramigua aikoa rami tu heta va'e kuery oikuua?

<sup>19</sup> Ha'e kuery ombovai:

— João Batista. Amboae kuery ma “Elias” he'i. Ha'e rã amboae kuery ma peteĩ profeta ymave guare renhemboete ju va'ekue reikoa rami oikuua — he'i.

<sup>20</sup> Ha'e gui ma oporanduve ju:

— Ha'vy peẽ kuery, marã ramigua aikoa pa peikuua?

Ha'e ramo Pedro ijayvu vy aipoe'i:

— Ndee ma Cristo Nhanderuete remimbou — he'i.

<sup>21</sup> Ha'e rami rã aipoe'i omombe'u e'ŷ aguã avave rei pe.

<sup>22</sup> Ha'e vy aipoe'i:

— Ava ra'y ojeapo va'ekue ma oiko axy 'rãe. Mba'eta nhomongeta va'ety, sacerdote yvatekueve va'e ha'e lei re nhombo'e va'ety kuery nda'ija'ei 'rã hexe. Ha'e gui ojukaa rire mboapy araa py onhemboete ju 'rã.

*Mateus 16.24-28; Marcos 8.34-9.1*

<sup>23</sup> Ha'e gui ma aipoe'i pavẽ pe:

— Xerupive oikoxe va'e taexarai ojegui ae, ko'ẽ nhavõ togueraa ojeupagua kuruxu, ha'e tou xerakykue.

<sup>24</sup> Mba'eta nomanoxei ete va'e ma omokanhy 'rã guekove. Ha'e rã xekáuxa omano va'e ma ogueraa jepe uka 'rã guekove.\*

<sup>25</sup> Mba'e 'rã tu avakue ojou, mba'emo yvy regua ha'e javi oguerekopa va'eri guekove ae omokanhy vy, e'ŷ vy ha'e ae onhemoingo axy uka rire?

<sup>26</sup> Mba'eta amongue xee ha'e xeayvua ogueroxí rire, ha'e kuery ma Ava ra'y ojeapo va'ekue voi ogueroxí 'rã guexakã rupi ou jevy ma vy, Nguu rexakã ha'e anjo iky'a e'ŷ va'e kuery rexakã rupi.

<sup>27</sup> Anhetẽ aipoa'e pêvy: Apy peĩ va'e regua amongue napemanoi 'rã Nhanderuete po'akaa ojekuaa ouvy rã pexa e'ŷa ja.

*Mateus 17.1-8; Marcos 9.2-8*

<sup>28</sup> Ha'e rami ijayvu rire oito araa py ma ngupive Pedro, João ha'e Tiago ogueraa vy peteĩ yvyty áry oẽ onhembo'e aguã.

<sup>29</sup> Onhembo'e oiny jave hova guexakã py ojekuaa, ha'e ijaõ ma xiõmba rei hexakãmba vy.

<sup>30</sup> Ha'e jave mokoĩ avakue ijayvu jekuaa hexeve, Moisés ha'e Elias.

<sup>31</sup> Ha'e va'e kuery ma hexakã rupi ojekuaa vy hexeve ijayvu okuapy Jerusalém tetã py Jesus oo vy ojexavai ranhe aguã oiko va'erãa re.

\* <sup>9:24</sup> João 12.24-26; Apocalipse 2.10, 12.11

<sup>32</sup> Ha'e rā Pedro ha'e oirū kuery ma hopeyi vaipa okuapya ramive ndoke etei'i vy oexa hexakā ha'e mokoī avakue hexeve hi'aī va'e.

<sup>33</sup> Jesus-a gui ha'e kuery ojepe'a ta ma ramo Pedro aipoe'i ixupe:

— Orembo'ea, ha'eve apy nhaīve aguā. Ha'e ramo rojapo 'rā mboapy oo'i: peteī ma ndevy guarā, amboae ma Moisés pe, ha'e gui amboae ju ma Elias peguarā — he'i. Oikuaa vy e'ŷ ha'e rami ijayvu.

<sup>34</sup> Ha'e rami ijayvu teria ja peteī arai ou vy ojao'ipa. Arai ojao'i rā ha'e kuery okyjepa.

<sup>35</sup> Ha'e va'e mbyte gui ou nhendu peteī ayvu aipoe'i va'e:

— Peva'e ma Xera'y xerembiporavo. Pejapyxaka ijayvua re — he'i.\*

<sup>36</sup> Ha'e va'e nonhenduvei rire Jesus ha'e ae'i ju hi'aī. Ha'e va'e rire ma hemimbo'e kuery okyrirī okuapy, ha'e va'e jave avave rei pe nomombe'ui oexa va'ekue.

*Mateus 17.14-18; Marcos 9.14-27*

<sup>37</sup> Ko'ē jevy yvytgygui oguejy jogueruvy ramo heta ou Jesus ovaexī vy.

<sup>38</sup> Teta mbyte gui peteī ava ojapukai nhendu vy aipoe'i:

— Porombo'ea, ajerure rema'ē aguā xera'y re, peteī'i va'e ramo.

<sup>39</sup> Hexe ma nhe'ē vai onhemonde ramo ojapukai xapy'a vy ho'a 'rā yvy rupi. Anha oguereko axy rei vy ombojuru ryjuipa ha'e omboejukapa ma vy mae ma 'rā oeja.

<sup>40</sup> Ajerure teī neremimbo'e kuery oipe'a aguā, ha'e kuery ndoipe'a kuaai — he'i.

<sup>41</sup> Ha'e ramo Jesus ombovai:

— Peē pejerovia e'ŷ ha'e pendeko vai va'e, raka'e peve 'rā nda'u xee aiko pendereve, rogueropo'aka aguā? Eru ha'vy nderay — he'i.

<sup>42</sup> Oguerovaē heruvy rā anha oity ju yvy rupi. Opa marā rei oguereko ramo Jesus ijayvu atā anha pe. Ha'e rami vy kunumi va'e omonguera vy omboaxa ju tuu pe.

<sup>43</sup> Ha'e ramo pavē rei onhemondyipa Nhanderuete po'akaa oexa uka rā oexa vy.

*Mateus 17.22,23; Marcos 9.30-32*

Jesus ojapo va'e pavē oexa vy onhemondyipa ramo aipoe'i guemimbo'e kuery pe:

<sup>44</sup> — Penema'endu'a riae ke pova'e ayvu re: Ava ra'y ojeapo va'ekue omboaxaa 'rā avakue po py — he'i.

<sup>45</sup> Ha'e rami teī ha'e kuery noendu kuaai, ndoikuaa uka porāvei ramo. Nda'ipy'a guaxui vy noporandui guive ha'e nunga re.

*Mateus 18.1-5; Marcos 9.33-37*

<sup>46</sup> Ha'e kuery joupe-upē ijayvu mavae'ete pa joegui yvateve va'e omoīa 'rāa re.

<sup>47</sup> Ha'e rā Jesus ma ha'e kuery py'a re oī va'e oikuaa vy ojee omonhemboja peteī kyrī va'e, ha'e omoī oyvy'iry.

<sup>48</sup> Ha'e vy aipoe'i guemimbo'e kuery pe:

— Amongue xerery rupi kova'e kyrī va'e omovaē vy xee avi xemovaē. Ha'e xemovaē va'e ma xembouare avi omovaē. Mba'eta peē kuery va'e regua pavē gui yvyīve va'e ma yvateve va'e oiko.

*Marcos 9.38-40*

<sup>49</sup> João aipoe'i:

— Orembo'ea, peteī ava roexa kuri nderery rupi anha oipe'a rā. Ha'e ramo ndoroipe'a ukavei, mba'eta nhanderupivegua e'ŷ ramo — he'i.

<sup>50</sup> Ha'e ramo Jesus ombovai:

— Nda'evei ndapeipe'a ukai aguā, mba'eta penderovaigua e'ŷ va'e ma penderupivegua ae.

*Samaria pygua kuery Jesus nomovaēiague*

<sup>51</sup> Yva re ju heraa aguā ovaē rai'i ma ramo, hova re ojekuaa Jerusalém katy oo aguā opy'a re omoī va'ekue.

<sup>52</sup> Ha'e vy guenonderā omondouka imombe'uarā. Ha'e ramo ha'e kuery oo vy peteī Samaria pygua kuery rekoa py ovaē oguereko katu aguā oke aguā.

\* <sup>9:35</sup> 2 Pedro 1.16-18

<sup>53</sup> Ha'e rā ha'e pygua kuery ma nomovaẽxei, Jerusalém katy ooa oikuua vy.\*

<sup>54</sup> Ha'e nunga hemimbo'e kuery Tiago ha'e João oexa vy oporandu ixupe:

— Senhor, reipota pa rombou uka tata yva gui ha'e kuery omomba aguã?

<sup>55</sup> Ha'e ramo Jesus ojere vy ijayvu atã ha'e kuery pe. [Ha'e vy aipoe'i:

— Peẽ kuery ndapeikuaai mba'e nunga nhe'ẽ gui pa peikoa.

<sup>56</sup> Mba'eta Ava ra'y ojeapo va'ekue ma avakue nhe'ẽ omomba aguã e'ŷ ou, ha'e rā ogueraa jepe aguã — he'i.]

Ha'e gui amboae tekoia katy ju oje'oi.

### *Mateus 8.18-22*

<sup>57</sup> Ha'e kuery oje'oia rupi amongue aipoe'i:

— Xee aa ta nderupive reoa katy rei.

<sup>58</sup> Ha'e rā Jesus ombovai:

— Aguara'i oguerekoo'rā okua, guyra'i oveve va'e voi oguerekoo guaity. Ha'e rā Ava ra'y ojeapo va'ekue ma neĩ oakā omboguejyaty ndoguerekoi — he'i.

<sup>59</sup> Amboae pe Jesus aipoe'i:

— Eju katu xerupive.

Ha'e va'e ombovai:

— Taa ranhe xeru tanhono porã.

<sup>60</sup> Ha'e ramo Jesus aipoe'ive ju:

— Tove omanogue ae tonhono porã omano va'ekue. Ha'e rā ndee ma tereo emombe'u Nhanderuete po'akaa — he'i.

<sup>61</sup> Amboae ju aipoe'i ixupe:

— Senhor, xee aa ta nderupive. Ha'e rami teĩ taa ranhe tamombe'u xero pygua kuery pe.

<sup>62</sup> Ha'e rā Jesus ombovai:

— Avave rei yvy karaĩa re ojopy heravy reve guakykue re oma'ẽ va'e nda'evei Nhanderuete po'akaa pygurarã — he'i.

## 10

### *Setenta guemimbo'e kuery omondoukaague*

<sup>1</sup> Ha'e va'e rire Senhor ma setenta ju oiporavo, ha'e vy guenonderã mokõ-mokoĩ omondouka tetã ha'e tekoia nhavõ ha'e oo aguã rupi.

<sup>2</sup> Ha'e kuery pe aipoe'i imondovy:

— Mba'ety ma tuvixa, ha'e rā ombo'eapo va'e kuery ma mbovy'i. Ha'e nunga rupi pejerure Senhor mba'ety ja pe ombou retave aguã imba'ety rupi ombo'eapo va'erã.

<sup>3</sup> Tapeo. Xee romondouka vexa'i rami aguara mbyte rupi.

<sup>4</sup> Peraa eme voko, popoka, neĩ py regua. Tape rupi pexarura eme guive avave pe.

<sup>5</sup> Joo py pevaẽ vy aipopeje 'rã: "Kova'e oo pygua kuery ta'ikuai porã", peje.

<sup>6</sup> Xapy'a rei ha'e py oiko porãxe va'e oĩ ramo hexe oiko 'rã peroayvu porãague. Ha'e rā jipoí ramo pendere ae 'rã ojeapa peroayvu porãague.

<sup>7</sup> Oo pevaẽague py ae 'rã pepyta. Pe'u ha'e pey'u 'rã ha'e kuery ome'ẽ va'e rei. Mba'eta ombo'eapo va'e kuery ma ha'eve ojopy aguã ombo'eapoague repy. Peva eme oo mboae-ae rupi.

<sup>8</sup> Tetã pevaẽa py penemovaẽ porã ri ramo pe'u 'rã ome'ẽ va'e rei.

<sup>9</sup> Ha'e py pemonguera 'rã imba'eaxy va'e, ha'e aipopeje ha'e kuery pe: "Pendevy namombyryvei ma Nhanderuete po'akaa ojekuaa aguã", peje.

<sup>10</sup> Ha'e rā tetã pevaẽa py napenemonhembojaai ramo tape rupi peo vy aipopeje 'rã:

\* <sup>9:53</sup> Samaria pygua kuery nomovaẽxei, mba'eta judeu kuery reve joe ija'e e'ŷ va'e vy (João 4.9).

11 “Peneretā guigua yvy ku'i orepy re oja va'ekue voi roitypa, penderovai roikuua uka aguā roeja ma rovya. Ha'e rami teĩ peikuaa pota pova'e re: Namombyryvei ma Nhanderuete po'akaa ojekuaa aguā”, peje.\*

12 Aipoa'e peẽ kuery pe: Opaa ára ha'e va'e tetā pygua kuery gui Sodoma pygua kuery nombopagaaive 'rā.

#### *Mateus 11.20-24*

13 — Peẽ Corazim ha'e Betsaida pygua kuery pe nda'evei ete 'rā.\* Mba'eta pendea py hexa pyrā ajapo va'e ramigua Tiro ha'e Sidom tetā py ajapo va'e rire, ha'e kuery ojeko rerova voi 'rāgue. Ha'e rami vy ajukue vaikue py onhemonde vy oguapy 'rāgue tanhimbu py.

14 Ha'e nunga rupi nhombopagaa ára peẽ kuery gui omboaxyave 'rā Tiro ha'e Sidom pygua kuery.

15 Ha'vy peẽ Cafarnaum pygua kuery, peo 'rā teve yva peve? Any, pe'a 'rā tata ogue e'ŷ va'e py.

16 — Pendeayvu oendu va'e ma xeayvu avi oendu, ha'e rā napenenhe'ẽ rendui va'e ma xee avi naxenhe'ẽ rendui. Ha'e rā naxenhe'ẽ rendui va'e ma xembouare avi nonhe'ẽ rendui.

#### *Setenta oo va'ekue ojevypaague*

17 Ha'e gui setenta omondouka va'ekue ov'y'a reve ojevy vy aipoe'i okuapy:

— Senhor, nderery rupi oreayvu ramo anha kuery voi orenhe'ẽ rendu karamboae! — he'i okuapy.

18 Ha'e rā ombovai:

— Xee ma Satanás aexa karamboae overa va'e rami yva gui ho'a rā.

19 Ha'e gui peẽ kuery rombopo'aka mboi ha'e japeuxa re pepyrō aguā, nhanderovaigua po'akaa ha'e javi re guive, pendere mba'eve rei oiko e'ŷ re.

20 Ha'e rami teĩ perovy'a eme anha kuery re pendepo'akaa rive, ha'e rā yva re penderery omboparaa ma imoinyague.\*

#### *Mateus 11.25-27*

21 Ha'e va'e jave ae Jesus ov'y'a Nhe'ẽ Ky'a E'ŷ gui. Ha'e vy aipoe'i:

— Xeru yva ha'e yvy re ndepo'aka va'e, xee roguerovy'a, mba'eta ha'e nunga ma hi'arandukue pe ndereikuua ukai, neĩ ombo'e pyre pe'ŷ guive. Yvyīgueve'i pe anho reikuua uka. Tá, Xeru, ha'e rami ae reipota.

22 — Opa mba'e Xeru ome'ẽmba xevy. Avave rei ndoikuuai Ta'y, Tuu e'ŷ vy. Ha'e avave rei ndoikuuai Tuu, Ta'y e'ŷ vy, ha'e amongue pe Ta'y oikuua ukaxeia va'e ete'i — he'i.

23 Ha'e gui ma guemimbo'e kuery pe ju aipoe'i ha'e kuery ae'ia py:

— Ovy'a ete 'rā mba'emo peẽ kuery pexa va'e rexaa kuery.

24 Mba'eta xee aipoa'e porâve pêvy: Heta ikuai raka'e profeta ha'e huvixave peẽ kuery pexa va'e oexaxe teĩ ndoexai, ha'e pendu va'e oenduxe avi teĩ noendui raka'e.

#### *Samaria pygua porayvu va'e omombe'uague*

25 Peteĩ ava lei re nhombo'e va'ety opu'ã ho'amy Jesus oeko a'ã vy. Ha'e vy aipoe'i:

— Porombo'ea, mba'e nda'u ajapo 'rā tekove marā e'ŷ aupity aguā?

26 Ha'e ramo ixupe ju Jesus oporandum:

— Mba'e tu ipara oiny lei re? Mba'exa tu reikuua?

27 Ava va'e ombovai:

— “Reayvu 'rā Senhor Nderuete ndepy'a ha'e javi py, nderekoo, nembaraetea ha'e ne'arandua ha'e javi py guive.” Ha'e “Reayvu 'rā neirū kuery ndee ae rejeayvua rami” — he'i.\*

28 Ha'e rami rā Jesus aipoe'i:

\* 10:11 Lucas 9.5    \* 10:13 Tiro ha'e Sidom tetā ma yma heko vai ete va'e ikuaiague (Isaías 23.1-18).    \* 10:20 Apocalipse 3.5    \* 10:27 Levítico 19.18, Deuteronômio 6.5

— Ha'evea rami rembovai. Ha'e rami rejapo vy reupity 'rā tekove – he'i.

<sup>29</sup> Ha'e rami teĩ ava va'e onhemboeko porâxe vy oporandu Jesus pe:

— Marã ramigua tu xeirũ kuery?

<sup>30</sup> Ha'e rã Jesus ombovai:

— Peteĩ ava ma Jerusalém tetã gui oguejy ovy Jericó katy oo vy. Ha'e gui ha'e va'e ma jojuka va'ety kuery po py oĩ vai ramo ixugui oipe'apa, oinupãmba guive. Ha'e vy oeja oje'oivy omano rai'i va'e.

<sup>31</sup> — Ha'e jave py tape rupi ou peteĩ sacerdote. Ha'e va'e oexa teĩ ojepekuavo ovy.

<sup>32</sup> — Ha'e rami ae avi peteĩ levita ha'e rupi ou vy oexa teĩ ojepekuavo avi ovy.

<sup>33</sup> — Ha'e gui ma peteĩ Samaria pygua oguata ouvy vy oaxa avi ha'e rupi. Ha'e va'e ma oexa vy omboaxy.

<sup>34</sup> Ha'e vy onhemboja vy ojokuapa ijai, azeite ha'e vinho oikyty reve. Guymba áry ae oupi vy ogueraa peteĩ okea aty py opena aguã.

<sup>35</sup> — Ko'ẽ ju mokoĩ ára repy oguenoẽ vy ome'ẽ hoo va'e pe. Ha'e vy aipoe'i: “Epena porã tema kova'e ava re. Ha'e gui xapy'a rei repenaa rupi regatave ri ramo ajevy vy amboekovia 'rã”, he'i.

<sup>36</sup> — Ha'e va'e mboapy va'e regua, ndee reikuua rã mava'e nda'u jojuka va'ety kuery po py oĩ vai va'ekue irã oiko?

<sup>37</sup> Ha'e rã lei re nhombo'e va'ety ombovai:

— Omboaxy va'ekue rima.

Ha'e ramo Jesus aipoe'i ixupe:

— Tereo ha'vy, ndee voi ha'ekue rami eiko.\*

### *Maria ha'e Marta ro py oĩ jave guare*

<sup>38</sup> Ha'e kuery oovea rupi Jesus ovaẽ peteĩ tetã'i py. Ha'e ramo peteĩ kunha Marta hery va'e omovaẽ ngoo py.

<sup>39</sup> Ha'e py oiko avi ikypy'y Maria hery va'e. Ha'e va'e ma oguapy oiny Senhor yvýry ombo'e rã oendu aguã.

<sup>40</sup> Marta ma ha'e ramia ja opy rupi mba'emo ojapo vy ojapura rei oikovy. Ha'e vy Jesus-a py ou vy aipoe'i:

— Senhor, rexâ rive va'e ty'y xekypy'y xee ae'i mba'emo ajapo aguã oeja rã? Aipo'ere na tou taxeptyvõ.

<sup>41</sup> Ha'e rã Senhor ombovai:

— Marta, Marta, ndereguappyi rei ndepy'a eta reia rupi.

<sup>42</sup> Mbovy'i jajapo teĩ ha'eve va'e, ha'e rami e'ŷ vy peteĩ'i anho. Ha'e rã Maria ma oiporavo iporâve va'e. Ha'e ramo ha'e nunga ndoipe'aai 'rã ixugui.

## 11

### *Mateus 6.9-13*

<sup>1</sup> Peteĩ ára Jesus onhembo'e oiny peteĩ henda py. Ijayvupa ma jave peteĩ hemimbo'e ojerure ixupe:

— Senhor, orembo'e na ronhembo'e kuaa aguã re, João guemimbo'e kuery ombo'eague rami avi.

<sup>2</sup> Ha'e ramo ombo'e. Ha'e vy aipoe'i:

— Penhembo'e vy aipopeje 'rã: “Xeruete, tove nderery tomboetea. Tovaẽ ndepo'akaa ojekuaa aguã.

<sup>3</sup> Ha'e ko'ẽ nhavõ ejou uka ro'u va'erã.

<sup>4</sup> Emboguepa rojejavyague, ore voi orevy oreve va'e roperdoaa rami avi. Orereity uka eme guive poromoangecko pe”, peje 'rã.

### *Iriũ mba'emo re ojerure anho rei va'e omombe'uague*

---

\* <sup>10:37</sup> 1 João 3.17,18

**5** Jesus aipoe'i avi:

— Amongue peē kuery va'e regua pytū mbyte jave peneirū ovaē 'rā pendero py. Ha'e vy aipoe'i 'rā pēvy: "Xeirū, eiporuka xevy mboapy mbojape.

**6** Mba'eta peteī xeirū oguataague gui ovaē teī mba'eve ndarekoi ixupe ame'ē va'erā", he'i 'rā.

**7** Ha'e rā penderopy gui pembovai 'rā: "Xemoangeko eme, mba'eta okē onhemboty ma, ha'e xera'y kuery onhenomba ma xereve. Ndavy reguavei ame'ē aguā ndevy", peje 'rā.

**8** Ha'e rami teī xee aipoa'e pēvy: Peneirū ae teī xapy'a rei napepu'āxei 'rā mba'emo peme'ē aguā. Ha'e ramia gui onhea'āve tema ramo peme'ē nho 'rā oikotevē va'e ha'e javi.\*

### *Mateus 7.7-11*

**9** — Ha'e nunga rupi aipoa'e pēvy: Pejerure, ha'e ramo ome'ēa 'rā. Peka, ha'e vy pejou 'rā. Penhendu uka, ha'e ramo okē oipe'aa 'rā pēvy.

**10** Mba'eta ha'e javive ojerure va'e ojopy 'rā, oeka va'e ojou 'rā, ha'e onhendu uka va'e pe oipe'aa 'rā.

**11** Mava'e peē avakue nda'u pendera'y [mbojape re ojerure rā peme'ē 'rā ita? Xapy'a rei rā] pira re ojerure rā mboi ri nda'u peme'ē 'rā pira rekoria?

**12** Ha'e rami e'ŷ vy uru rupi'a re ojerure rā japeuxa ri nda'u peme'ē 'rā?

**13** Pendu ke, peē kuery penderekoi vai va'eri mba'emo porā peme'ē kuaa va'e pendera'y kuery pe. Ha'e gui Nhanderu yva pygua katuve nda'u nome'ēi 'rā ri Nhe'ē Ky'a E'ŷ ojerure va'e pe?

### *Mateus 12.22-30; Marcos 3.20-27*

**14** Amboae py Jesus oipe'a anha nhomboayvu e'ŷ va'e. Anha ojepe'a rire ijayvu e'ŷ va'ekue ijayvu ju ma. Ha'e ramo heta va'e kuery onhemondyipa.

**15** Ha'e rami teī ha'e kuery va'e regua amongue aipoe'i:

— Peva'e tu anha ruvixa Belzebu po'akaa rupi rima oipe'a oikovy anha kuery — he'i.

**16** Ha'e ramo amboae kuery oeko a'ā vy ixupe ojerure yva guigua hexa pyrā ojapo aguā re.

**17** Ha'e rami rā ha'e kuery py'a re oī va'e ha'e oikuaapa vy aipoe'i:

— Tetā pygua kuery minha jomeme ri opu'ā vy nhomomba 'rā, ha'e peteī-teī oo pygua kuery joguero'a 'rā.

**18** Ha'e rami ae avi Satanás kuery meme ri joe opu'ā va'e rire mba'exa tu ipo'akave ta? Po rami xeayvu mba'eta aipopeje Belzebu po'akaa rupi anha kuery aipe'aa rami.

**19** Anhetē ri xee Belzebu po'akaa rupi anha aipe'a ramo, mba'e xagua po'akaa rupi tu ha'vy pendera'y kuery oipe'a? Ha'e nunga rupi ha'e kuery ae oikuaa uka 'rā pendeayvu rivea.

**20** Ha'e rā Nhanderuete po rupi ae xee anha aipe'a ramo anhetē ete Nhanderuete po'akaa ojekuaa ra'e peē kuery pe.

**21** — Ha'e gui peteī ava ojerovia vaipa va'e ngoo oarō oikovy ramo opa mba'e oguerekova'e oī porā 'rā.

**22** Ha'e gui ma peteī ixugui ojeroviave va'e ou vy oity 'rā. Ha'e vy hembiporu ojerovi-aague oipe'apa vy joupe omboja'opa 'rā oguerekova'e ekue.

**23** — Xereveguia e'ŷ va'e ma xerovaigua ikuai, ha'e xea py ndajoguerui va'e ma xegui nhomonheguāmba 'rā.

### *Mateus 12.43-45*

**24** — Ha'e rami avi peteī ava gui nhe'ē vai ojepe'a vy oo 'rā tekoa e'ŷa rupi oiko, ikane'ōguia aguā oeka vy. Ha'e gui ndojoui vy ojeupe aipoe'i 'rā: "Aa ju ta xero ajepa'aague py", he'i 'rā.

**25** Ha'e rami vy ou ju vy ojou 'rā ngopy oipeipa ha'e omoatyrōmba pyre.

**26** Ha'e gui ma oo vy sete irūrā ju ogueru 'rā nhe'ē ixugui nda'eveive va'e, ha'e py ovaē vy ikuai va'erā. Ha'e rami rire ava va'e pe ma opaa py jypy guare gui nda'eveive 'rā.

\* **11:8** Lucas 18.1; Efésios 6.18

### *Peteĩ kunha ijayvu nhenduague*

<sup>27</sup> Ha'e rami Jesus ijayvupa ma ramo teta mbyte gui peteĩ kunha ijayvu nhendu. Ha'e vy aipoe'i ixupe:

— Ovy'a ete 'rã nekuavãare, nemokambuare.

<sup>28</sup> Ha'e rã ombovai:

— Ha'e rami 'rãgue py ovy'a ete 'rã Nhanderuete ayvu oendu vy ha'ekue rami ikuai va'e — he'i.\*

### *Mateus 12.38-42*

<sup>29</sup> Heta va'e kuery ijatypa ramo Jesus aipoe'i:

— Kova'e kuery ma heko vai va'e vy ojerure mba'emo kuaa ukaarã ajapo aguã. Ha'e rami teĩ ha'e kuery pe peteĩve ndojapoai 'rã, Jonas re oiko va'ekue ramigua e'ŷ vy.

<sup>30</sup> Mba'eta Nínive pygua kuery oikuua aguã Jonas oikoague rami avi Ava ra'y ojeapo va'ekue voi oiko 'rã aŷgua kuery oikuua aguã.

<sup>31</sup> Nhomboayvua ára py huvixave kunha kuaray puku-a katyguia opu'ã ho'amy vy ijayvu 'rã aŷgua kuery re, mba'eta yvy apy gui kunha va'e ou rire Salomão 'arandua oendu aguã. Ha'e rã apy oĩ va'e ma Salomão gui yvateve va'e.

<sup>32</sup> Nhomboayvua ára py Nínive pygua kuery voi opu'ã vy ijayvu 'rã okuapy aŷgua kuery re, mba'eta Jonas ayvu omombe'u rã ha'e kuery oendu vy ojeko rerovapa rire. Ha'e rã apy oĩ va'e ma Jonas gui yvateve va'e.

### *Mateus 6.22,23*

<sup>33</sup> — Avave rei tataendy omoendy vy nomoĩ 'rã hi'ã py, neĩ ajaka guýry guive. Oĩaty py ae 'rã omoĩa, oike va'e kuery hendy va'e oexa porã aguã.

<sup>34</sup> Ha'e rami ae avi nhanderexa ma nhanderete moexakãarã oĩ. Xapy'a rei nderexa iporã vy omoexakã 'rã nderete ha'e javi rupi. Ha'e rã nderexa na'iporãi ramo ma nderete ha'e javi pytûmba 'rã.

<sup>35</sup> Ha'e nunga rupi eikuua pota ke nemoexakãarã oĩ va'e pytû e'ŷ aguã.

<sup>36</sup> Ha'e rã xapy'a rei nderete ha'e javi omoexakãa, neĩ peteĩ henda py pytûa noĩ ri ramo tataendy rami 'rã omoexakã opa rupi.

### *Fariseu kuery pe Jesus ijayvu eteague*

<sup>37</sup> Opa ma Jesus mba'emo re ombojoja vy ijayvupa ramo peteĩ fariseu aipoe'i hupive oo aguã okaru vy. Ha'e ramo hoo py ovaẽ vy oguapy okaru aguã py.

<sup>38</sup> Ha'e gui fariseu ma Jesus ojepoei e'ŷ re okaru ta ramo oexa vy onhemondyi.

<sup>39</sup> Ha'e ramo ixupe Senhor aipoe'i:

— Peẽ fariseu kuery ma karo ha'e hy'a pejoi 'rã hi'árykue rupi rive. Ha'e rã pendepy'apy rupi ma pejokore ha'e pejejoko e'ŷa anho oĩ.\*

<sup>40</sup> Pene'arandu e'ŷ va'e, penderete apoare e'ŷ ri nda'u pendepy'apy apoare avi oiko?

<sup>41</sup> Ha'e rami 'rãgue py iporiaukue'i pe mba'emo perekova'e peme'ẽ vy 'rãe opa marãgua gui ha'eve va'e ju 'rã peiko.

<sup>42</sup> — Peẽ fariseu kuery pe nda'evei ete 'rã, mba'eta dízimo peme'ẽ 'rã hortelã, arruda ha'e mba'emo rogue'i ha'e javi regua gui. Ha'e rã ha'evea rami pejoguereko ha'e Nhanderuete peayvua rupi ma napendekuaixe. Ha'e nunga voi pejapo 'rãgue amboae ramigua pejapoa rami avi.

<sup>43</sup> — Peẽ fariseu kuery pe nda'evei ete 'rã, mba'eta penhembo'eaty py peñxe 'rã tenda tenondeve oĩ va'e py anho. Tetã mbyte rupi voi peipota 'rã pendevy oxaruraa porã'i.

<sup>44</sup> — Nda'evei ete 'rã pêvy. Yvyra rupa ndojekuaavei va'e rami pendekuai, mba'eta ha'e va'e áry rupi avakue oaxa 'rã oikuua e'ŷ vy.\*

### *Lei re nhombo'e va'ety pe nda'evei ete 'rãa re ijayvuague*

\* **11:28** Lucas 8.19-21 \* **11:39** Mateus 23.5-7,23-28; Marcos 7.1-5 \* **11:44** Ha'e kuery reko rami vy yvyra rupa áry rupi oaxa vy onhemongy'a 'rã. Ha'e nunga rupi omoxiï 'rã pavë oexa vy oikuua aguã (Mateus 23.27).

**45** Ha'e ramo peteñ lei re nhombo'e va'ety ombovai vy aipoe'i Jesus pe:

— Porombo'ea, ha'e rami ndeayvu vy ore kuery re voi rima ndeayvu ra'e.

**46** Ha'e ramo ombovai:

— Peẽ kuery lei re penhombo'e va'ety pe voi nda'evei ete 'rã, mba'eta avakue pembovoyi 'rã ndogueropo'akai va'erã py. Ha'e rã peẽ ma neñ penekuã py voi napeipytyvõi 'rã.\*

**47** — Peẽ kuery pe nda'evei ete 'rã, mba'eta pejapo 'rã oo ra'angaa'i penamoĩ kuery profeta kuery jukaare rupa áry guarã.

**48** Ha'e nunga rupi peikuaa uka penamoĩ kuery jojukaague pejou porãa, mba'eta ha'e kuery ma profeta kuery ojuka rire peẽ ju pejapo hupa áry guarã.

**49** Ha'e nunga rupi Nhanderuete o'arandua rupi aipoe'i va'ekue: "Ha'e kuerya py xee ambou 'rã profeta ha'e apóstolo kuery. Ha'e va'e kuery regua amongue ojuka 'rã, ha'e rã amboae kuery ma oguereko axy 'rã", he'i va'ekue.

**50** Ha'e rami aÿgua kuery ikuai yvy itui ypy guive profeta ruguy omoëague re opaga aguã rami,

**51** Abel ruguy omoëague guive'i Zacarias ruguy omoëa peve. Ha'e va'e ma Nhanderuete ropy altar oĩ va'e yvýry ojukaa va'ekue. Ha'e nunga rupi xee aipoa'e porâve pêvy: Aÿgua kuery ae 'rã opaga ha'e nungakue re.

**52** — Peẽ kuery lei re penhombo'e va'ety pe nda'evei ete 'rã, mba'eta peipe'a mba'emo kuua ukaarã oĩ va'e. Peẽ ae voi ndapeikuaa pota etei, ha'e oikuaaxe va'e kuery pe ma ndapeikuaa ukai guive.

### *Jesus ojuka aguã re onhembopy'a okuapyague*

**53** Jesus ojep'e'a ta ma ov yv rã lei re nhombo'e va'ety ha'e fariseu kuery ipoxypa vy ijayvu ete okuapy ixupe. Opa mba'e re oporandu omoõi vaixe vy,

**54** ijayvuague py ae ojopy vaixe vy.

## 12

### *Trigo mbovua re fariseu kuery reko ombojoja reve nhomongetaague*

**1** Heta va'e kuery ono'õmba vy joe ojeapi-api rei okuapy ramo Jesus aipoe'i guemimbo'e kuery pe anho'i:

— Penheangu ke fariseu kuery regua trigo mbovua gui. Ha'e va'e ma heko porã merami rivea.

**2** Mba'eta onhomí mbyre oexa ukapaa 'rã, ha'e oikuaa uka e'ý pyre oikuaapaa 'rã.

**3** Ha'e rami vy opa mba'e pytû py pemombe'u va'ekue hexakãa py ju oendupaa 'rã, ha'e opy joapyxa py pendeayyuague oo apyte áry gui ju omombe'ua 'rã.

**4** — Xeirũ kuery, xee aipoa'e porâve pêvy: Pekyje eme penderete jukaarã kuery gui, mba'eta ha'e va'e rire mba'eve ndojapo kuaavei ma 'rã pendere.

**5** Xee amombe'u ta mava'e renonde pa ha'eve pejererokyje aguã: Pejererokyje 'rã jojuka rire tata ogue e'ý va'e py nhomombo aguã ipo'aka va'e renonde. Tá, aipoa'e pêvy, ha'e va'e renonde ae ha'eve pejererokyje aguã.\*

**6** Peteñ nhiruñ guyra'i nda'u mokoõ hatã'i va'e repy rive e'ý ri? Ha'e rami va'eri neñ peteñ re Nhanderuete ndaexarai.

**7** Pende'a peneakã re oĩ va'e voi oipapapa ma. Ha'e nunga rupi pekyje eme, mba'eta heta guyra'i gui voi peẽ pevareve.

**8** — Aipoa'e avi: Avakue renonde xevy pe oikoa omombe'u porã va'ekue ha'e javi ma Ava ra'y ojeapo va'ekue voi omombe'u 'rã Nhanderuete pegua anjo kuery renonde.

**9** Ha'e rã avakue renonde naxemombe'uxei va'ekue ma xee voi namombe'ui 'rã Nhanderuete pegua anjo kuery renonde.

\* **11:46** Mateus 23.1-4,13,29-36 \* **12:5** Mateus 10.26-33

<sup>10</sup> Mba'eta Ava ra'y ojeapo va'ekue re teĩ amongue ijayvu vai ramo ha'e nungakue omboguepaa 'rã. Ha'e rã Nhe'ẽ Ky'a E'ŷ re ijayvu vaia ague ma nombogueai 'rã.\*

<sup>11</sup> — Onhembo'eaty py pendereraa ramo, ha'e rami e'ŷ vy huvixa ha'e nhomboayvu va'ety kuery renonde teĩ pendep'y a eta rei eme pembovai ha'e pendeayvu aguã re.

<sup>12</sup> Mba'eta ha'e jave py Nhe'ẽ Ky'a E'ŷ oikuaa uka 'rã pendeayvu aguã.

### *Mba'e rakāte'ŷa re ijayvuague*

<sup>13</sup> Ha'e va'e jave peteĩ ava teta mbyte gui aipoe'i ixupe:

— Porombo'ea, aipo're ke'y pe tomboja'o orevy peguare xevy.

<sup>14</sup> Ha'e ramo Jesus aipoe'i ixupe:

— Ava, mava'e tu xemoĩ penderuvixarã, penemba'e amboja'o uka aguã? — he'i.

<sup>15</sup> Ha'e vy aipoe'i ha'e kuery pe:

— Peiko kuaa ke, penheangu opa mba'e re penerakāte'ŷa gui, mba'eta avakue rekove ma mba'emo oguerekopaa re'ŷ.\*

<sup>16</sup> Ha'e gui ma ha'e kuery pe omombe'u peteĩ ayvu mba'emo re ombojoja vy. Ha'e vy aipoe'i:

— Peteĩ ava iporiau e'ŷ va'e onhoty va'ekue oiko porã.

<sup>17</sup> Ha'e rami vy ojeupe ae aipoe'i: "Mba'e nda'u ajapo 'rã, mba'eta ndarekovei amono'õ va'ekue amoĩ porã aguã."

<sup>18</sup> Aipoe'ive ju: "Po rami ajapo ta: Ambovaipa ta mba'emo amoĩ porãaty, ha'e gui tuvixave va'e ju 'rã ajapo, ha'e va'e py amoĩ porã aguã amono'õ va'ekue ha'e areko va'e ha'e javi.

<sup>19</sup> Ha'e gui ma aipoa'e 'rã xejeupe: 'Heta mba'e porã areko heta ma'etŷa reguarã. Aŷ ma apytu'u 'rã, akaru, ay'u ha'e avy'a 'rã aikovy', ha'e 'rã", he'i.

<sup>20</sup> — Ha'e rã ixupe Nhanderuete aipoe'i: "Mba'e 'arandu e'ŷ, kova'e pyavyve oipe'aa 'rã nenhe'ẽ. Ha'vy mba'emo remoĩ porã va'ekue, mava'e pe 'rã tu opyta?" he'i.

<sup>21</sup> — Ha'e rami ae 'rã oiko ojeupe guarã mba'emo omoĩ porã teĩ Nhanderuetea py ma mba'eve ndoguerekoi va'e re.

### *Mateus 6.25-34*

<sup>22</sup> Ha'e gui Jesus aipoe'i guemimbo'e kuery pe:

— Ha'e nunga rupi xee aipoa'e pêvy: Pendep'y a eta rei eme pendekove re, neĩ pe'u va'erã ha'e penderete re pemoĩ va'erã re guive.

<sup>23</sup> Mba'eta penderekove ma tembi'u gui ovareve, ha'e penderete ma ao gui ovareve.

<sup>24</sup> Peikuaa pota na uruvu kuery re. Ha'e kuery ma mba'eve nonhoty, nomono'õi, nomoĩ porãi, neĩ oguy ma voi ndoguerekoi guive. Ha'e rami teĩ Nhanderuete omongaru herekovy. Peẽ kuery ma guyra'i gui voi pevareve.

<sup>25</sup> Mava'e nda'u pendep'y a eta rei vy pembopukuve kuaa 'rã ruxã'i peikove aguã?

<sup>26</sup> Mba'emo ruxã'i va'e ndapejapo kuaai va'eri mba'e re tu mba'emo mboae re rive nda'eveive pendekuai?

<sup>27</sup> — Peikuaa pota na yvoty ikuai va'e re. Ha'e va'e ma mba'emo oipopë va'e'ŷ, omboyvi kuaa va'e'ŷ guive. Ha'e rami teĩ xee aipoa'e pêvy: Salomão minha opa marâgua oguerekopa va'eri kova'e yvoty rami nonhemondei raka'e.

<sup>28</sup> Ha'e gui Nhanderuete ha'e rami omonhemonde 'rã jai rogue aŷ nhuñdy re ikuai, ha'e gui ko'ẽ tata py omomboa va'erã va'eri. Peẽ kuery re katuve opena porãve 'rã, ndaperovia porãi va'eri.

<sup>29</sup> Ha'e nunga rupi pendekuai eme pe'u ha'e pey'u va'erã pejouxea rupi rive, neĩ pejapura rei eme,

<sup>30</sup> mba'eta ha'e nunga jouxea rupi amboae regua kuery ikuai yvy jave re. Penderu ma oikuaa ae ha'e nunga peikotevã va'ea.

\* **12:10** Mateus 12.31,32; Marcos 3.28-30 \* **12:15** 1 Timóteo 6.9,10

**31** Ha'e nunga rupi jypy'i peka 'rā ipo'akaa. Ha'e ramo 'rāe opa mba'e ome'ē avi pendevy.

**32** — Xerymba kuery mbovy'i pendekuai teī pekyje eme, mba'eta Penderu pendererovy'a vy pendevy ome'ē 'rā opo'akaa.

**33** Ha'e nunga rupi pevendepa ke perekva'e, ha'e hekoviakue peme'ē iporiaukue'i pe. Ha'e rami vy 'rā yva re pejou voko ivaipa e'ŷ va'erā ha'e mba'emo imarā e'ŷ va'e, mba'eta ha'e py ma imonda va'e novaēi 'rā, neī vixo'i ma voi ndo'upa rei 'rā guive.\*

**34** Mba'eta penembovy'a va'e oĩa py penekuraxõ py peẽ voi peixə avi 'rā.

### *Tembiguai opatō oarō kuaa va'e omombe'uague*

**35** — Pejeku'a jokua ke, tataendy pembogue uka eme guive.

**36** Pendekuai ke avakue opatō omendaa gui ojevy rā guarā oarō va'e rami, mba'eta okē re ombota xapy'a ramo ha'e kuery oipe'a vyvoi aguā.\*

**37** Ha'e rami vy hembiguai kuery ov'y'a ete 'rā ipatō ou vy oexa rā oarō okuapy va'e. Anhetē aipoa'e pēvy, ha'e ae oiko katu vy omboguapypa 'rā mesa py, ha'e vy ou vy ojara 'rā ha'e kuery pe.

**38** Pytū mbyte e'ŷ vy pytū mbyte raxa'i jave ovaē xapy'a teī oarō okuapy va'e ov'y'a ete 'rā ha'e rami ikuiaia py ojou ramo.

**39** — Ha'e rami avi peikuua pota ke povae're: Peteī hoo va'e oikuua va'e rire mba'e hora pa imonda va'e ovaē 'rāa, [oarō vy] ndogueraa ukapai 'rāgue ngopy gui.

**40** Pendekuai kuaa pota ke peẽ voi, mba'eta ndapeikuua potavei rei jave 'rā Ava ra'y ojeapo va'ekue ou — he'i.

**41** Ha'e ramo Pedro oporandu:

— Senhor, povae ayvu pa ore kuery pe anho, tyrā pa amboae kuery pe avi remombe'u?

**42** Senhor ombovai:

— Ha'vy mava'e nda'u peiko tembiguai ojeroviapy ha'e joe opena kuaa va'e? Ha'e ramigua ma ipatō omoi 'rā oirū kuery okaru aguā hora py omongaru va'erā.

**43** Ovy'a ete 'rā tembiguai kuery ipatō ou ramo ha'e rami ojapo va'e.

**44** Anhetē aipoa'e pēvy: Ha'e va'e pe opena uka 'rā opa mba'e oguereko va'e re.

**45** Ha'e rā xapy'a rei ha'e va'e tembiguai ojeupe "Xepatō ndou voi 'rā teve", he'i vy oinupāmba 'rā avakue ha'e kunhague hexeve ikuai va'e. Okaru ha'e oy'u 'rā oka'u peve.

**46** Ha'e gui ma ha'e va'e tembiguai noarōvei vy ndoikuua potavei rei oikovy jave ipatō ovaē 'rā. Ha'e rami vy ombopaga 'rā heko vai va'e kuery reve.

**47** — Ha'e gui tembiguai ipatō oipota va'e ojapo aguā oikuua va'eri ndoiko katui, neī oipotaa ramo ndojapoi va'ekue ma oinupāa vaipa 'rā.

**48** Ha'e rā opatō oipota va'e ndoikuai vy ri ha'eve e'ŷa rami ojapo oikovy va'ekue ma noinupāa vaipai 'rā. Mba'eta amongue pe ome'ē retaave rire ixugui oipotaave 'rā. Ha'e rami ae avi amongue pe opena uka retaave rire ixupe ojerureave 'rā.

### *Mateus 10.34-36*

**49** — Xee aju tata amboja aguā ko yvy re. Xevy pe ha'eve 'rāgue hendy ma va'e rire.\*

**50** Ha'e rā xevy peguarā oĩ avi peteī nhemongarai ha'e va'e py anhemongarai uka aguā. Ha'e nunga oiko e'ŷa ja xee nda'evei aiko.

**51** Tyrā pa peẽ kuery pexa'ā aju yvy re ikuai va'e peteī rami ikuai aguā? Any, xee ma aipoa'e pēvy: Joo rami e'ŷ-e'ŷ ikuai aguā aju.

**52** Mba'eta aŷ gui ma peteī oo py peteī nhiruī ikuai va'e oja'o 'rā: mboapy ikuai 'rā mokoī rovai, ha'e mokoī ikuai 'rā mboapy rovai.

**53** Tuu opu'ā 'rā gua'y re, ha'e ta'y opu'ā 'rā nguu re. Ixy opu'ā 'rā omemby re, ha'e imemby opu'ā 'rā oxy re. Ime xy opu'ā 'rā opi'a ra'yxy re, ha'e ipi'a ra'yxy opu'ā 'rā ome xy re.\*

\* **12:33** 1 Pedro 1.3-5

\* **12:36** Mateus 24.42-44; Marcos 13.32-37; Lucas 21.34-36

\* **12:49** Mateus 10.34-36

\* **12:53** Miquéias 7.6

### *Mba'emo kuua ukaarā oī va'e re ijayvuague*

<sup>54</sup> Heta va'e kuery pe aipoe'i avi:

— Ka'arua katy arai ojekuaa rā pexa vy aipopeje 'rā: "Oky ta." Ha'e gui ma ha'ekue rami ae 'rā oky.

<sup>55</sup> Ha'e kuaray puku-a katy gui yvytu oipeju ramo "Kuaray haku ta" peje 'rā. Ha'ekue rami ae avi kuaray haku 'rā.

<sup>56</sup> Pendeko porā merami rive va'e, yvy ha'e yva re pema'ẽ vy peikuua 'rā mba'emo. Ha'e rami va'eri ndapexa kuaai aŷ oiko va'e.\*

<sup>57</sup> Mba'e re tu ndapeikuua potai pendejegui ae, ha'evea rami peiko aguã?

<sup>58</sup> Ha'e rami vy pendovaigua reve huvixaa py peo vy tape rupi ma voi peikuua pota ipo gui peo jepe aguã. Ha'e rami e'ŷ ramo penemboaxa 'rā penemboayvuarā pe, ha'e penemboayvua ma jopya pe ju 'rā penemboaxa, ha'e gui jopya ma penembo'a 'rā nhuã py.

<sup>59</sup> Xee aipoa'e pêvy: Napeēi 'rā ha'e gui pepagapa e'ŷa ja.

## 13

### *Galiléia pygua kuery omanoague, ha'e Siloé py torre ho'aague re ijayvuague*

<sup>1</sup> Ha'e va'e jave py amongue ovaẽ vy Jesus pe omombe'u Galiléia pygua kuery mymba ojuka reve ome'ẽ jave py ha'e kuery ruguy avi huvixa Pilatos omoẽ ukaague, mymba ruguy onheëague pyve.\*

<sup>2</sup> Ha'e ramo ha'e aipoe'i:

— Peē kuery pexa'ã teve Galiléia pygua kuery mboae gui ha'e va'e kuery heko vaivea, ha'e rami oiko vai aguã?

<sup>3</sup> Any, xee aipoa'e porâve pêvy: Peē voi ndapejeko rerovai vy pekanhymba avi 'rā ha'e kuery rami.

<sup>4</sup> Ha'e gui Siloé py dezoito ikuai va'ekue áry torre ho'a vy ojukapa raka'e. Ha'e kuery nda'u amboae kuery Jerusalém py ikuai va'e gui ojejavypave ri?

<sup>5</sup> Any, xee aipoa'e porâve pêvy: Peē voi ndapejeko rerovai vy pekanhymba avi 'rā ha'e kuery rami.\*

### *Figo'y hi'a e'ŷ va'e omombe'uague*

<sup>6</sup> Ha'e gui Jesus omombe'u pova'e ayvu mba'emo reombojoja reve:

— Peteĩ ava ogueroko peteĩ figo'y, uvaty mbyte onhotŷ va'ekue. Hi'a re ija ou teĩ ndojoui.

<sup>7</sup> Ha'e vy aipoe'i uvaty re opena va'e pe: "Mboapy ma'etŷ re ma apy hi'a re aju teĩ mba'eve ndajoui. Ejaya na. Mba'erā tu hi'a vy e'ŷ yvy re hi'aï riae?"

<sup>8</sup> Ha'e rā ombovai: "Senhor, tove ranhe kova'e ma'etŷ re. Ajo'o 'rā hembypy rupi, yty ru'ūgue amoĩ 'rā guive.

<sup>9</sup> Ha'e gui hi'a ramo ha'eve ete 'rā. Ha'e rami e'ŷ rā rejaya uka 'rā", he'i.\*

### *Peteĩ kunha oiko axy va'e omongueraague*

<sup>10</sup> Peteĩ sâbado py Jesus nhombo'e oiny onhembo'eaty oī va'e py.

<sup>11</sup> Ha'e py ou peteĩ kunha dezoito ma'etŷ re ma nhe'ẽ vai omoingo axy va'e. Ojero'a rei oikovy, onhembo'yvi aguã nda'evei ramo.

<sup>12</sup> Ha'e gui Jesus oexa vy oenoĩ. Ha'e vy aipoe'i:

— Kunha, rekuera ma nemba'eaxygui — he'i.

<sup>13</sup> Hexe opoko ramove hi'yvi vyvoi. Ha'e vy oguerovy'a Nhanderuete.

\* **12:56** Mateus 16.1-4 \* **13:1** Apy ijayvu templo py huvixa Pilatos jojukaague re. Ha'e va'e jave py Galiléia gui ha'e kuery ou va'ekue Nhanderuete pe mymba ojuka uka vy ome'ẽ aguã. Ha'e rā Pilatos ojuka ha'e py. \* **13:5** Ezequiel 33.11 \* **13:9** Romanos 2.4; 2 Pedro 3.9

**14** Ha'e gui ma onhembo'eaty pygua huvixa ma sábado ára py Jesus nhomonguera rã oexa vy ndojou porãi ete. Ha'e vy aipoe'i heta va'e kuery pe:

— Mboapy meme ára oĩ nhamba'eapo aguã. Ha'e va'e ára py 'rã peju pekuera aguã, sábado py e'ý — he'i.

**15** Ha'e ramo ixupe Senhor aipoe'i:

— Heko porã merami rive va'e kuery, peteĩ-teĩ nda'u sábado ára py teĩ ndapejorai 'rã ri penerymba vaka e'ý vy mburika okaruaty gui pemboy'u vy peraa aguã?

**16** Mba'e re nda'u nda'evei sábado py jaraa jepe aguã kova'e kunha Abraão ramymino va'e dezoito ma'etý re ma Satanás omoingo axy va'ekue? — he'i.

**17** Ha'e ramí ijayvu rã hexe ija'e e'ý va'e kuery oendu vy oximbá. Ha'e rã heta va'e kuery ma ový'a okuapy opa mba'e porã Jesus ojapo rã oexa vy.

*Mateus 13.31,32; Marcos 4.30-32*

**18** Ha'e gui ma aipoe'i avi:

— Mba'e nunga nda'u Nhanderuete po'akaa reve joo ramigua? Mba'e nunga re nda'u ha'eve ambojoja aguã?

**19** Mostarda ra'yí peteĩ ava ngoka py onhotý va'e rami ae. Mba'eta yvate vy yvyra rami 'rã hi'aí, ha'e hakã re ma guyra'i oveve va'e ojapo 'rã guive guaityrã.

*Mateus 13.33*

**20** Aipoe'ive ju:

— Mba'e nunga re nda'u Nhanderuete po'akaa ambojoja 'rã?

**21** Trigo mbovua rami avi ha'eve, mba'eta kunhague ojopy vy mboapy ryru trigo re omoirú 'rã irumbá peve.

*Okẽ ipo'i'i va'e re ijayvuague*

**22** Jesus oaxa ový tetã ha'e tekoa ikuai va'e rupi. Nhombo'e ový Jerusalém katy oo vy.

**23** Ha'e gui ma amongue ou vy oporandu ixupe:

— Senhor, mbovy'i teve ikuai oo jepe va'erã?

**24** Jesus ombovai:

— Penheaã ha'vy okẽ ipo'i'i va'e rupi peike aguã. Mba'eta xee aipoa'e pêvy: Mbovy e'ý oikexe teĩ ndoikei 'rã.\*

**25** Ha'e gui hoo va'e opu'ã vy omboty 'rã ngokẽ. Peẽ kuery ma okẽ re pembota-mbota 'rã oka katy gui. Ha'e vy "Senhor, eipe'a na okẽ orevy" peje 'rã guive.

— Ha'e ramo ombovai vy "Xee ndaikuuai maguigua pa peẽ kuery peikoa", he'i 'rã.

**26** — Ha'e ramo aipopejeve ju 'rã: "Ore ma ndereve rokaru ha'e roy'u va'ekue, orerekao rupi renhombo'e va'ekue guive."

**27** — Ha'e ramo aipoe'i 'rã pêvy: "Xee ndaikuuai maguigua pa peẽ kuery peikoa. Pendeko vai va'e, pejepé'apa ke xea gui", he'i 'rã.

**28** — Ha'e py ma pejae'opa ha'e opa marã 'rã penhendu, pexa vy Nhanderuete po'akaa py Abraão, Isaque, Jacó ha'e profeta kuery ha'e javive ikuai ramo, ha'e rã peẽ kuery ma oka py penemombopaa rire.

**29** Heta 'rã ou kuaray oua katy gui, oikea katy gui, ijapu'a'ia katy gui ha'e ipuku-a katy gui, ha'e vy mesa py oguapypa 'rã okuapy Nhanderuete po'akaa py.

**30** Ha'e ramí teĩ takykue pyguare ma tenonde pyguarã, ha'e tenonde pyguare ma takykue pyguarã ikuai.

*Mateus 23.37-39*

**31** Ha'e va'e jave py fariseu kuery ou vy aipoe'i ixupe:

— Ejepe'a na, tereo apy gui, huvixa Herodes ndejukaxe ramo — he'i okuapy.

**32** Ombovai:

— Tapeo aipopeje ha'e va'e mbyku pe: "Ko'ẽ rã aipe'a 'rã anha, anhomonguera 'rã guive aikovy. Ko'ẽ mboae ramo mae ma ajapopa 'rã", peje.<sup>†</sup>

\* **13:24** Mateus 7.13,14; João 10.7-10    † **13:32** Ha'e kuery "Mbyku" he'i 'rã nhombotavypa rei va'e pe.

<sup>33</sup> Mba'eta xee ma aŷ, ko'ẽ rã ha'e ko'ẽ mboae rã peve aguata aguã rami aiko, mba'eta Jerusalém py e'ŷ ndojukaai 'rã profeta.

<sup>34</sup> — Jerusalém, Jerusalém, profeta kuery jukaaty, ndevy ombou pyre ita py rejapipa va'ety! Mbovykue rei e'ŷ xee aikuavãmbaxe teĩ nememby kuery, opepo py uru gua'y kuery ojao'ipaa rami. Ha'e rami teĩ peẽ kuery ndapeipotai.

<sup>35</sup> Ha'e rami rire pendo opyta rivepa 'rã. Anhetẽ ae aipoa'e pêvý: Peẽ kuery ndaxerexavei 'rã ovaẽ e'ŷa ja aipopeje aguã: "Ta'ima'endu'a porãa Senhor rery rupi reju va'e re."\*

## 14

### *Peteĩ ava ijyke rurupa va'e omongueraague*

<sup>1</sup> Peteĩ sábado ára py Jesus oo peteĩ fariseu ruvixa ro py okaru aguã. Ha'e ramo hexe ha'e kuery oma'ẽ ngatu okuapy.

<sup>2</sup> Oĩ avi peteĩ ava ijyke rurupa va'e.

<sup>3</sup> Ha'e ramo Jesus oporandu lei re nhombo'e va'ety ha'e fariseu kuery ikuai va'e pe:  
— Ha'eve pa sábado ára py nhanhomonguera aguã, tyrã pa any? — he'i.

<sup>4</sup> Ha'e rã ha'e kuery ma mba'eve nde'i. Ha'e ramo ava va'e po re ojopy vy omonguera, ha'e gui omondouka ju.

<sup>5</sup> Ha'e rire oporandu ikuai va'e pe:

— Peẽ kuery nda'u pendera'y e'ŷ vy penerymba vaka yvykua py ho'a ramo napenoẽ potai 'rã ri, sábado ára py teĩ? — he'i.

<sup>6</sup> Ha'e ramo ha'e kuery nombovai kuaai.

### *Tenondeve py ikuai va'e re ijayvuague*

<sup>7</sup> Ha'e gui Jesus oma'ẽ vy oexa oenoĩ mbyre kuery tenda tenondeve oĩ va'e anho oiporavo rã oĩ aguã. Ha'e rami vy ha'e kuery pe omombe'u peteĩ ayvu mba'emo re ombojoja vy:

<sup>8</sup> — Amongue omendaa py penerenoĩ ramo nda'evei tenda tenondeve oĩ va'e py peĩ aguã. Mba'eta xapy'a rei pendegui yvateve va'e oenoĩ mbyre ou ramo

<sup>9</sup> penerenoĩare ou vy "Eme'ẽ peva'e pe tenda py oguapy aguã", he'i 'rã pêvý. Ha'e ramo peximba reve 'rã peva tenda ijapy'i py oĩ va'e py.

<sup>10</sup> Ha'e rami 'rãgue py amongue penerenoĩ ramo ha'eveve tenda ijapy'i py oĩ va'e py peĩ. Ha'e ramo penerenoĩare ou vy "Xeirû, kyvõve ke eguapy", he'i 'rã pêvý. Ha'e ramo oenoĩ mbyre kuery ha'e javi oikuua 'rã penemboetevea.

<sup>11</sup> Mba'eta ha'e javive onhemboyvate va'ekue omo'yvy'iave 'rã. Ha'e rã onhemo'yvy'i va'ekue ma omboyvateave 'rã — he'i.\*

<sup>12</sup> Ha'e gui ma henoĩare pe ju aipoe'i:

— Ngaru rejapo vy nda'evei renoĩ aguã neirû kuery anho, nderyvy kuery, neretarã kuery, neĩ ndea katy'i iporiau e'ŷ va'e kuery, ndevy pe ha'e kuery ju ha'ekue rami ojapo e'ŷ aguã omboekovia vy.

<sup>13</sup> Ha'e rami 'rãgue py ngaru rejapo vy renoĩ 'rã iporiaukue'i, hetyma rovaikue va'e, oguata e'ŷ va'e ha'e ára rewegua e'ŷ ikuai va'e.

<sup>14</sup> Ha'e rami vy nemoingo porãa 'rã, mba'eta ha'e kuery ndojoui 'rã omboekovia aguã. Ha'e nungakue rekovia rejopy 'rã heko porã va'e kuery omboete jevya ára py.\*

### *Ngaru re ombojojaague*

<sup>15</sup> Ha'e rami ijayvu rã mesa py hexeve oguapy oiny va'e regua peteĩ oendu vy aipoe'i:  
— Ovy'a ete 'rã Nhanderuete po'akaa py okaru okuapy va'e.

<sup>16</sup> Ha'e rã ombovai vy aipoe'i:

— Peteĩ ava ojapo ngaru tuvixa va'e, heta oenoĩ uka guive.

\* <sup>13:35</sup> Salmo 118.26, Romanos 11.25-27 \* <sup>14:11</sup> Mateus 23.6,12; Proverbios 25.6,7 \* <sup>14:14</sup> Proverbios 19.17

**17** Okaru aguã ovaẽ ma ramo omondouka guembiguai oenoĩ uka va'ekue pe "Peju, oguerekatupama", he'i aguã.

**18** Ha'e rami teĩ ha'e javive omombe'u oo aguã nda'eveia rami. Peteĩ ma aipoe'i: "Xee ma ajogua xeyvyrã, ha'e py ranhe aa ta ama'ẽ vy. Ha'e rami vy ajerure remombe'u aguã ndaa reguaia", he'i.

**19** Amboae aipoe'i avi: "Xee ma peteĩ nhiruĩ meme vaka ajogua rire aa ta ha'anga. Ha'e rami vy ajerure remombe'u aguã ndaa reguaia", he'i.

**20** Amboae ma "Xee ma amenda ramo vy ndaa reguai", he'i.

**21** — Ha'e gui ma tembiguai ojevy vy omombe'upa opatõ pe. Ha'e ramo hoo va'e ivai reve aipoe'i guembiguai pe: "Tereo pojava tetã rupi tape ikuai va'e rupi. Eru apy iporiaukue'i, oguata e'ỹ va'e, ára reveguia e'ỹ ha'e ijyva rovaikue va'e", he'i.

**22** — Ha'e va'e rire hembiguai ou vy aipoe'i: "Xepatõ, ajapopa ma rejapo uka va'ekue. Ha'e rami teĩ oĩve teri tenda."

**23** — Ha'e ramo ipatõ ombovai: "Tereo ju tape ikuai va'e rupi, ejapo ha'e javive ou vy xeropy omonyẽ aguã.

**24** Xee aipoa'e avi pẽvy: Avakue aenoĩ uka ypy va'ekue ma neĩ peteĩve ndokarui 'rã ngaru ajapoa py."

### *Cristo rupive jaikoxe vy jaejapa aguã re ijayvuague*

**25** Heta ete va'e hupive oje'oi ramo ojere vy aipoe'i ha'e kuery pe:

**26** — Amongue xea py ouxe teĩ nguu, oxy, gua'yxy, gua'y kuery, guyvy kuery, gueindy kuery ha'e guekove ae oayvuve va'e nda'evei xeremimbo'erã.\*

**27** Amongue xerupive oikoxe teĩ ojeupegua kuruxu ndogueraai va'e ma nda'evei avi xeremimbo'erã.

**28** Mba'eta peẽ kuery va'e regua ma torre pejapo ta vy peguapy ranhe 'rã peikuaa pota aguã ha'eve paa pejapopa aguã.

**29** Ha'e rami e'ỹ vy pembopyr rire ndapejapopai rã pavẽ oexa vy pendejojai rei 'rã,

**30** ha'e vy aipoe'i rã: "Peva'e ava omboypy rive, ndojapopai", he'i 'rã okuapy.

**31** — Huvixa oiko va'e amboae huvixa re opu'ã aguã oo ta vy ha'e rami ae avi 'rã oiko, oguapy 'rã ranhe oikuua pota aguã dez mil xondaro reve vy pa vinte mil hovaigua ou va'e re ipo'aka 'rãa re.

**32** Ha'e rami aguã nda'evei ramo amboae kuery mombyry teri ou reve ombou 'rã peteĩ guembiguai amboae kuery reve ikuai porã ju aguã re ojerure aguã.

**33** Ha'e rami avi peẽ kuery voi mba'emo perekova'e pejapa e'ỹ vy nda'evei xeremimbo'e peiko aguã.

### *Mateus 5.13; Marcos 9.50*

**34** — Juky ma iporã vaipa. Ha'e rã xapy'a rei nae'ẽvei rire mba'exa 'rã tu he'ẽ ju?

**35** Nda'evei 'rã yvy, neĩ yty reguarã guive. Nhamombo rive 'rã oka py. Ijapyxa oendu aguã oĩ va'e toendu.

## 15

### *Jesus omovaẽague heko vai va'e kuery*

**1** Ha'e javive imposto re nhombopaga va'ety ha'e heko vai va'e kuery ma Jesus ayvu oenduxe vy onhemboja okuapy hexe.

**2** Ha'e rã fariseu ha'e lei re nhombo'e va'ety kuery ma ha'e nunga oexa vy ijayvu rei vy aipoe'i:

— Peva'e tu omovaẽ rima ojejavypa va'e kuery, ha'e kuery reve okaru guive — he'i okuapy.\*

### *Mateus 18.10-14*

\* **14:26** Mateus 10.37-39; Lucas 9.57-62 \* **15:2** Lucas 5.29-32

<sup>3</sup> Ha'e ramo Jesus omombe'u pova'e ayvu mba'emo re ombojoja vy:

<sup>4</sup> — Mava'e nda'u perek'o 'rā cem veva'i, ha'e gui peteī pemokanhy vy noventa e nove ikuai va'e ndapejai 'rā teve tekao e'ÿa py, ha'e vy pa ndapeoi 'rā teve okanhy va'ekue pejou peve peka aguā?

<sup>5</sup> Pejou ma vy pejaxe'i 'rā heruvy pevy'a vy.

<sup>6</sup> Pendo py pevaē ma vy pemboatypa 'rā peneirū ha'e penetarā kuery. Ha'e vy aipopeje 'rā: "Javy'a ke xereve, mba'eta ajou ju ma xerymba amokanhy va'ekue", peje 'rā.

<sup>7</sup> — Xee aipoa'e pēvy: Ha'ekue rami avi yva re oguerovy'aa ete 'rā peteī heko vaiague gui ojeko rerova ramo, noventa e nove heko porā va'e vy ndojeko rerovai va'e gui oguerovy'ave 'rā.

### *Hatā'i va'e omokanhy mbyre omombe'uague*

<sup>8</sup> — Mava'e kunha dez hatā'i va'e oguerek'o va'e nda'u peteī omokanhy vy nomoendyi 'rā tataendy, ha'e ngoguy rupi ndoipei 'rā ri omokanhy va'ekue ojou peve?

<sup>9</sup> Ojou ma vy omboatypa 'rā oirū ha'e guetarā kuery. Ha'e vy aipoe'i 'rā: "Javy'a ke xereve, mba'eta ajou ju ma peráta amokanhy va'ekue", he'i 'rā.

<sup>10</sup> — Xee aipoa'e pēvy: Ha'e rami ae avi Nhanderuete pegua anjo kuery oguerovy'a 'rā okuapy peteī heko vaiague gui ojeko rerova ramo.

### *Ta'y okanhy ranhe va'ekue omombe'uague*

<sup>11</sup> Aipoe'ive ju:

— Peteī ava oguerek'o mokoī gua'y.

<sup>12</sup> Kunumive va'e aipoe'i nguu pe: "Xeru, eme'ẽ xemba'erā va'ekue rerek'o va'e", he'i. Ha'e ramo omboja'o oguerek'o va'e.

<sup>13</sup> — Kueve'i ma rire ta'y kunumive va'e omono'õmba oguerek'o va'e, ha'e oo mombyry amboae yvy re. Ha'e py omokanhymba oguerek'o va'e, opa marā rei oikoa rupi.

<sup>14</sup> Oguerek'o va'ekue omomba rire ha'e va'e yvy re oiko karuai. Ha'e ramo oiko axy.

<sup>15</sup> Ha'e rami vy oo ombo'eapo peteī ava ha'e va'e yvy regua pe. Ha'e va'e omondouka poryko kuery ikuiaia rupi opena aguā.

<sup>16</sup> Ha'e rami oiko vy alfarroba rope poryko ho'u va'e ha'e voi ho'uxe teī ixupe avave rei nome'ẽi mba'eve.

<sup>17</sup> — Ha'e gui ma onhemboaxy vy ojeupe ae aipoe'i: "Mbovy pa ikuai xerua py ombo'eapo vy okaru porā va'e, ha'e rā xee ma apy amano ta ma karuai gui.

<sup>18</sup> Apu'ã ta, ha'e vy aa 'rā xerua py. Ha'e vy aipoa'e 'rā ixupe: 'Xeru, xee ajejav'yva pygua rovai, nderovai guive.

<sup>19</sup> Nda'eveei ma nderai'aiko aguā. Xererek'o ombo'eapo va'e rami rive'i', ha'e 'rā.'

<sup>20</sup> Ha'e rami vy opu'ã vy oo ju nguua katy.

— Mombyry teri ou jekuaa reve tuu oexa vy omboaxy. Ha'e vy onha ovu, oikuavā reve oayvu.

<sup>21</sup> Ha'e ramo ta'y aipoe'i: "Xeru, xee ajejav'yva pygua rovai, nderovai voi. Nda'eveei nderai'aiko aguā", he'i.

<sup>22</sup> — Ha'e rami teī tuu aipoe'i guembiguai kuery pe: "Peru pojava ao iporāve va'e, pemonhemonde. Ikuā re ma pemoī kuā regua, ha'e gui ipy re ma pemoī py regua.

<sup>23</sup> Peru avi vaka ra'y ikyra va'e, ha'e pejuka. Jakaru ha'e javy'a,

<sup>24</sup> mba'eta kova'e xera'y omano va'ekue ri oikove ju. Okanhy va'ekue ojoua ju", he'i. Ha'e rami vy ovu'ya okuapy.

<sup>25</sup> — Ha'e ramia ja ta'y tujave va'e mba'ety rupi oiko. Ha'e gui ojevy, oo py ovaē rai'i ouvy vy oendu mba'epu ha'e ojeroky va'e.

<sup>26</sup> Ha'e vy peteī tembiguai oenoī vy oporandu mba'e pa oikoa re.

<sup>27</sup> Ombovai: "Nderyvy ou ramo rima nderu ojuka uka kuri vaka ra'y ikyra va'e, hexaī reve ou ramo", he'i.

- 28** — Ha'e ramo tyke'y ipoxy vy ndoikexei. Ha'e ramo tuu oẽ ombopy'a porã aguã.
- 29** Ha'e ramo aipoe'i nguu pe: "Mbovy ma'etõ re ma pa mba'emo ajapo aikovy ndevy? Peteïgueve ma voi noronhe'ẽ apo e'ŷi. Ha'e rami teĩ neĩ peteïgueve ma kavara'i nereme'ẽi xeirũ kuery reve avy'a aguã.
- 30** Ha'e rã nderay kunhague re nemba'e rei-rei omokanhymba va'ekue ou ramo ma je rejuka uka vaka ra'y ikyra va'e", he'i.
- 31** — Ha'e rã tuu ombovai: "Xera'y, ndee ma xea py riae reiko va'e, ha'e mba'emo areko va'e ma nemba'e meme.
- 32** Ha'e rami avi jarovy'a 'rãe, javy'a 'rã, mba'eta nderyvy omano va'ekue ri oikove ju, okanhy va'ekue ojoua ju."\*

## 16

### *Tembiguai ojeroviap y e'ŷi va'e omombe'uague*

- 1** Guemimbo'e kuery pe Jesus aipoe'i avi:
- Oiko peteĩ ava iporiau e'ŷi va'e. Ha'e va'e ma peteĩ ava omopena omba'e rei-rei re. Ha'e va'e re ayvu oiko imba'e rei-rei re nopena porãia rami.
- 2** — Ha'e ramo ija oenoĩ vy aipoe'i ixupe: "Anhetõ pa ndere ayvu oiko va'e? Emombe'u rejapo va'ekue ha'e javi, mba'eta nda'evevi ma xevy pe remba'eapove aguã", he'i.
- 3** — Ha'e ramo mba'e rei-rei re opena va'ety aipoe'i ojeupe: "Mba'e nda'u ajapo 'rã? Mba'eta xepatõ xepe'a ta ma amba'eapoa gui. Mba'ety rupi amba'eapo aguã ma nanhanimai, ha'e rã ajerurea rupi aiko aguã ma axi.
- 4** Aikuua ma mba'e pa ajapo 'rãa, amba'eapoa gui xepe'a ramo ngoo py xemovaẽa aguã", he'i.
- 5** — Ha'e rami vy oenoimba ipatõ pe oreve va'e kuery peteĩ-teĩ. Jypygua pe aipoe'i: "Mbovy tu rereve xepatõ pe?"
- 6** Ombovai: "Cem ryru azeite." Ha'e ramo aipoe'i: "Ejopy ke rereveague oĩa, eguapy, ha'e embopara cinqüenta ryru ete'i", he'i.
- 7** — Amboae pe ju oporandu: "Ha'vy ndee, mbovy tu rereve?" Ha'e ombovai: "Cem ryru trigo." Ixupe aipoe'i: "Ejopy ke rereveague oĩa, ha'e embopara oitenta ete'i", he'i.
- 8** — Ha'e rami rã ipatõ oguerovy'a guembigui ojeroviap y e'ŷi teĩ oiko kuaa ramo, mba'eta hendy va'e ra'y kuery gui ma ko yvy regua kuery ikuai kuaave 'rã joguerekoo py.
- 9** Ha'e nunga rupi xee aipoa'e pêvy: Pereko kuaa pota ke mba'emo ko yvy regua peneirûrã pejouve aguã ramo, ha'e nunga opa ramo ha'e kuery ju penemovaẽ aguã oo imarã e'ŷi va'e py.\*
- 10** Mba'eta mbovy'i oguerekoo kuaa va'e ma heta va'e voi oguerekoo kuaa 'rã. Ha'e rã mbovy'i va'e ndoguerekoo kuaai va'e ma heta va'e voi ndoguerekoo kuaai 'rã.
- 11** Ha'e nunga rupi mba'emo ko yvy regua ndaperekoo kuaai rire mava'e tu pendepo py omboaxa ta mba'emo iporã ete va'e?
- 12** Nhomba'e re napepena porãi rire mava'e tu ome'ẽ ta pendevy guarã va'ekue?
- 13** — Avave rei nomba'eapoi 'rã mokoĩ patõ pe. Mba'eta peteĩ re nda'ija'eive 'rã amboae oayvuve vy. Ha'e rami e'ŷi vy peteĩ ojou porãve vy amboae ma ndojou porãive 'rã. Nda'evei Nhanderuete pe peiko aguã, peráta re nda'evei reve.

### *Fariseu kuery pe Jesus ijayvu eteague*

- 14** Fariseu kuery ha'e nunga oendu vy ojojai rei okuapy, peráta re nda'eveive va'e vy.
- 15** Ha'e ramo Jesus aipoe'i ha'e kuery pe:

\* **15:32** Efésios 2.1-10; Tiago 4.8-10   \* **16:9** 1 Timóteo 6.17-19

— Peẽ kuery ma penhemboeko porã amboae kuery oexaa rupi. Ha'e rã Nhanderuete ma oikuaapa pendepy'a re oĩ va'e. Mba'eta avakue ojou porãve va'e ma Nhanderuete pe ha'eve'ŷ va'e.

**16** — Lei ha'e profeta ombopara va'ekue ma João Batista oikoa ára peve'i guarã va'ekue. Ha'e va'e rire ma ayvu porã Nhanderuete po'akaa regua omombe'ua ramo pavẽ onhea'ã oupity aguã.

**17** Ha'e rami avi yva ha'e yvy okanhymbaa gui haxyve peteĩ ipara'i lei re oĩ va'ekue oaxa rive.\*

*Mateus 19.9; Marcos 10.10-12*

**18** — Gua'yxy gui opoi vy amboae re omenda va'e ma itavy, ha'e kunha oeja pyre re omenda va'e itavy avi.

*Oguerekopa va'e ha'e Lázaro omombe'uague*

**19** — Oiko peteĩ ava iporiau e'ŷ va'e, púrpura ha'e ajukue iporãve va'e py anho onhemonde va'e, ko'ẽ nhavõ ngaru ojapo va'e.

**20** Oiko avi peteĩ ava poriaukue'i Lázaro hery va'e, ijaipa'i va'e. Iporiau e'ŷ va'e rokẽ yvy'iry omoĩa.

**21** Ha'e va'e ma ho'uxe iporiau e'ŷ va'e mesa gui ikure-kure'i ho'a va'ekue. Ijai re ma jagua kuery ou vy oere guive.

**22** — Iporiaukue'i omano ma ramo anjo kuery ogueraa Abraão yvýry optytu'u aguã py. Ha'e rã iporiau e'ŷ va'ekue omano ramo ma onhono porãa.

**23** — Haku vaikuea py iporiau e'ŷ va'ekue oiko axy reve oma'ẽ vy oexa mombyry Abraão ha'e Lázaro ijyvýry oĩ rã.

**24** Ha'e ramo ojapukai vy aipoe'i: “Xeru Abraão, xemboaxy ke, ha'e vy embou Lázaro tomoakŷ okuã yy py xeapekũ omboaku ro'y aguã, mba'eta tataendy raku py aiko axy”, he'i.

**25** — Ha'e rã Abraão aipoe'i: “Xera'y, nema'endu'a ke reiko teri vy opa mba'e porã rerekague re. Ha'e rã Lázaro ma oiko axy rei va'ekue. Aŷ ma apy oiko optytu'ua py, ha'e rã ndee ma reiko axya py rei.”\*

**26** Oĩ avi nhandekuaia mbyte peteĩ yvykua tuvixa va'e. Ha'e va'e gui nda'evei kyvõ katy gui upe katy oaxaa aguã, neĩ upe katy gui kyvõ katy nda'evei avi”, he'i.

**27** — Ha'e gui ma aipoe'ive ju: “Xeru, xee ajerure xeru ro py Lázaro remondouka aguã

**28** xeryvy kuery peteĩ nhiruĩ areko va'e ikuaria py, ha'e kuery omonheangu aguã, ha'e kuery ou e'ŷ aguã oiko axy aguã py.”

**29** — Abraão ombovai: “Ha'e rami avi ha'e kuery oguereko ae ma Moisés ha'e profeta kuery ombopara va'ekue. Toendu ha'e nunga”, he'i.

**30** — Ha'e rã ojerureve: “Any xeru Abraão, amongue omanoague gui onhemboete vy ha'e kuerya py oo ramo 'rãe ojeko rerova.”

**31** — Ha'e rami rã Abraão ombovai: “Moisés ha'e profeta kuery ombopara va'ekue re noendu potai ri vy ndogueroviai 'rã amongue omanoague gui onhemboete ramo voi.”\*

## 17

*Mateus 18.6,7; Marcos 9.42*

**1** Jesus aipoe'i guemimbo'e kuery pe:

— Oiko riae 'rã joityarã. Ha'e rami teĩ nda'evei ete 'rã joityare kuery pe.

**2** Mba'eta kova'e kyrigue va'e regua amongue oity 'rãgue py, ha'eveve oityxe va'e aju'y re ita mba'emo mongu'ia ojokua pyre reve ye'ẽ py omomboa va'e rire.

*Mateus 18.21,22*

\* **16:17** Mateus 11.12,13; 5.17,18

\* **16:25** Lucas 6.20-26

\* **16:31** Mateus 28.11-15

<sup>3</sup> — Peiko kuua pota ke. Ndevy pe nderegua otekoavy ri ramo ndeayvu 'rā ixupe. Ha'e rā ojeko rerova ramo reperdoa 'rā.

<sup>4</sup> Peteī ára pyve sete-kue ndevy otekoavy teī sete-kue ae ndea py ou vy "Nda'eveia aendu", he'i ramo eperdoa ju – he'i.\*

<sup>5</sup> Ha'e ramo apóstolo kuery aipoe'i Senhor pe:

— Emoīve ke rojeroviaa.

<sup>6</sup> Senhor ombovai:

— Pejeroviaa ma peteī mostarda ra'yī'i rami ri jepe oī va'e rire kova'e amora rembypy pe "Ejeapo'o ha'e enhenhoty ye'ē py" peje teī pendeayvua oiko 'rāgue.

<sup>7</sup> — Peē kuery ma perekō 'rā penembiguai mba'ety rupi e'ŷ vy vaka re openaa rupi om̄ba'eapo va'e. Ha'e va'e ma om̄ba'eapoa gui ou ramo "Eju ke ekaru" peje 'rā teve?

<sup>8</sup> Ha'e rami 'rāgue py aipopeje 'rā: "Ejapo ranhe ke xee ha'u va'erā. Enhemboekovia vy ejara xevy akaru ha'e ay'u peve. Ha'e rire ma ndee ju 'rā rekaru ha'e rey'u", peje 'rā.

<sup>9</sup> Penembiguai kuery pendeayvua ojapo teī ha'e kuery pe "Ha'eve ete ko" ndapeje riaeī 'rā.

<sup>10</sup> Peē kuery voi ha'e rami avi, pendevy pe ojapo uka pyre pejapopa ma vy ha'eve aipopeje aguā: "Ore ma tembiguai oguerovy'a pyrā e'ŷ, mba'eta rojapo 'rā va'ekue anho rojapo."

### *Dez lepra reveguia omongueraague*

<sup>11</sup> Jerusalém tetā katy Jesus oo vy oaxa Samaria ha'e Galiléia mbyte rupi.

<sup>12</sup> Peteī tekao py ovaē ramove dez lepra reveguia ovaexī jogueruvy.

<sup>13</sup> Mombyry jogueropytaa py ixupe ojapukai reve aipoe'i:

— Jesus, Porombo'ea, oremboaxy ke.

<sup>14</sup> Jesus oexa vy ombovai:

— Tapeo ha'vy pejexa uka sacerdote kuery pe – he'i. Ha'e ramo ha'e kuery ooa rupive okuerapa.

<sup>15</sup> Ha'e kuery dez va'e regua peteī ma okuerapaa oexa vy ojevy ju oīa py. Ijayvu atā reve Nhanderuete pe oporaei ouvy,

<sup>16</sup> ha'e Jesus renonde guenapy'ā re oī, yvy re ngova omovaē oguerovy'aa rupi. Ha'e va'e ma Samaria pygua.

<sup>17</sup> Ha'e rami rā Jesus oporandu ixupe:

— Dez e'ŷ teve pekuera ra'e? Mamo tu amboae kuery nove ikuai?

<sup>18</sup> Jipoi ri nda'u Nhanderuete pe oporaei vy ojevy va'erā, kova'e amboae regua e'ŷ vy? – he'i.

<sup>19</sup> Ha'e vy aipoe'ive ju:

— Epu'ā katu, tereo. Rejeroviaa ndereraa jepe.

### *Nhanderuete po'akaa ojekuaa 'rāa re ijayvuague*

<sup>20</sup> Fariseu kuery oporandu raka'e pa Nhanderuete po'akaa ojekuaa 'rāa re. Ha'e ramo ha'e kuery pe Jesus ombovai:

— Nhanderuete po'akaa ma jaexa va'erā rami e'ŷ ojekuaa va'e.

<sup>21</sup> Ha'e nunga pe aipo nda'eai 'rā: "Apy rima", neī "Pe py rima oī" nda'eai 'rā, mba'eta Nhanderuete po'akaa ma penembyte ae oī – he'i.

<sup>22</sup> Ha'e gui ma guemimbo'e kuery pe ju aipoe'i:

— Ovaē'rā Ava ra'y ojeapo va'ekue ojekuaa rā pexaxe rei aguā ára, teī ndapexai ranhe 'rā.

<sup>23</sup> Pendevy pe "Apy rima" e'ŷ vy "Pe py rima oī" 'ea teī tapeo eme ha'e kuery rupive.

<sup>24</sup> Mba'eta overa vy yva jave re hexakā ouvya rami avi ojekuaa 'rā Ava ra'y ojeapo va'ekue ára.

<sup>25</sup> Ha'e rami teī ha'e va'e'ŷ mbove hexe aÿgua kuery nda'ijs ei rā oiko axy 'rāe.

\* <sup>17:4</sup> Efésios 4.32; Colossenses 3.13

- <sup>26</sup> — Noé oiko jave py oikoague rami avi oiko 'rã Ava ra'y ojeapo va'ekue ára.
- <sup>27</sup> Mba'eta okaru ha'e oy'u okuapy, omenda ha'e nhomomenda raka'e Noé kanoã py oikea ára peve. Ha'e gui ma yy ou vy omomba ha'e javive.\*
- <sup>28</sup> Ha'ekue rami avi oiko Ló oiko jave py. Okaru, oy'u, mba'emo ojogua, ovende, onhoty ha'e ojapo okuapy.
- <sup>29</sup> Ha'e gui ma Sodoma tetã gui Ló ojepe'a ramove yva gui ho'a raka'e tata enxofre revegua, omomba ha'e javive.
- <sup>30</sup> Ha'ekue rami avi oiko 'rã Ava ra'y ojeapo va'ekue ojekuaa uka aguã ára.
- <sup>31</sup> Ha'e va'e ára ma amongue ngoo áry oĩ va'e totejy eme ngopy oguereko va'e oguenoẽ aguã. Ha'e rami ae omiba'epoa rupi ikuai va'e tojevy eme guakykue.
- <sup>32</sup> Penema'endu'a ke Ló ra'yxy re oiko va'ekue re.\*
- <sup>33</sup> Mba'eta nomanoxei va'ekue omokanhy 'rã guekove. Ha'e rã ojuka uka va'e ma ogueraa jepe uka 'rã guekove.
- <sup>34</sup> Aipoa'e pëvy: Ha'e va'e pytû mokoõ oke 'rã oupy peteõ tupu py. Peteõ heraa 'rã, ha'e rã amboae ma oeja 'rã.
- <sup>35</sup> Mokoõ kunhague ikuai 'rã omiba'exoa py. Peteõ heraa 'rã, ha'e rã amboae oeja 'rã.
- <sup>36</sup> [Mokoõ ikuai 'rã mba'ety py. Peteõ heraa 'rã, ha'e rã amboae oeja 'rã] — he'i.
- <sup>37</sup> Ha'e ramo ixupe oporandu okuapy:  
— Senhor, mamo 'rã tu ha'e nunga oiko?  
Omobovai ha'e kuery pe:  
— Mamo rã te'õgue ituia py xapirẽ voi onhemboaty 'rã okuapy — he'i.

## 18

### *Nhomboayvu va'ety porayvu e'ŷ va'e omombe'uague*

- <sup>1</sup> Ha'e gui Jesus omombe'u peteõ ayvu mba'emo re ombojoja vy, nhandekuerai e'ŷ re nhanhembo'e riae aguã.\*
- <sup>2</sup> — Peteõ tetã py oiko peteõ nhomboayvu va'ety Nhanderuete renonde ojererokyjea rupi e'ŷ oiko va'e, neĩ avakue omboete e'ŷ va'e guive.
- <sup>3</sup> Ha'e va'e tetã py oiko avi peteõ imeve'ŷ va'e. Ha'e va'e ma huvixa oĩ py ou vy aipoe'i: "Eikuua pota na xerovaigua kuery xemoangeko reia re", he'i.
- <sup>4</sup> — Ha'e rã ha'e ma ndoikuua potaxeí ranhe ha'e nunga re. Ha'e rire mae ma aipoe'i ojeupe: "Anhetê ae ndajeroviai Nhanderuete re, ha'e neĩ avakue namboetei.
- <sup>5</sup> Ha'e gui imeve'ŷ va'e ojerure riae ete ma ramo aikuua pota nho 'rã, xemoangeko reia e'ŷ aguã", he'i.
- <sup>6</sup> Ha'e ramo Senhor aipoe'i:  
— Peikuua pota ke huvixa porayvu e'ŷ va'e ijayvuague re.
- <sup>7</sup> Ha'e gui Nhanderuete nda'u ndoikuua pota voi 'rã ri hembiporavo kuery ára pukukue re ha'e pytû mbukukue re ixupe ojapukai va'e re? Oikuua pota aguã are merami tei<sup>8</sup> xee aipoa'e: Oikuua pota voi 'rã pendere. Ha'e rami teõ Ava ra'y ojeapo va'ekue ou ju vy nda'u ojou 'rã ri ojerovia va'e ko yvy re?

### *Fariseu ha'e imposto re nhombopaga va'ety omombe'uague*

- <sup>9</sup> Omombe'u avi pova'e ayvu mba'emo re ombojoja vy, amongue ojee ae ojerovia ha'e onhemboeko porãxe vy jojou vai va'e re ijayvu vy.
- <sup>10</sup> — Mokoõ ava oo templo py onhembo'e aguã. Peteõ ma fariseu, ha'e rã amboae ma imposto re nhombopaga va'ety.

---

\* **17:27** Mateus 24.37-44    \* **17:32** Ló ra'yxy ma Sodoma tetã gui oo jepe vy guakykue re oma'ẽ ramo Nhanderuete ojuka raka'e, ha'e ramo juky rive opyta (Gênesis 19.26).    \* **18:1** Lucas 11.5-10; 1 Tessalonicenses 5.17

11 Fariseu va'e opu'ã ho'amy vy ojeupe ae onhembo'e po rami: “Xeruete, xee roguerovy'a, mba'eta avakue mboae rami rami e'ŷ aiko, imonda va'e, jokorepa rei, itavy rei va'e, peva'e imposto re nhombopaga va'ety rami e'ŷ guive.

12 Semana nhavõ re mokoīgue kuerei 'rã aiko akaru e'ŷ re. Ha'e opa mba'e ajou va'ekue gui ame'ẽ aikovy dízimo”, he'i.

13 — Ha'e rã imposto re nhombopaga va'ety ma mombyry'i hi'aĩ, neĩ yva re oma'ẽ aguã voi nda'ipy'a guaxui. Opexo re oipete-pete reve aipoe'i: “Xeruete, xemboaxy ke, xee ajejavypa va'e aiko”, he'i.

14 — Xee aipoa'e pêvy: Ha'e va'e anho omboeko porã mbyre oo ngoo katy, fariseu ma any. Mba'eta ha'e javive ha'e ae onhemboevate va'e omo'yvyi'ave 'rã. Ha'e rã onhemoyvyi'va'e kuery ma omboevateave 'rã.\*

*Mateus 19.13-15; Marcos 10.13-16*

15 Ha'e oĩa py oguerua kyrīgue ha'e kuery re opo omoĩ aguã. Ha'e rã hemimbo'e kuery oexa vy ijayvu ete okuapy herua kuery pe.

16 Ha'e rã Jesus ma ojea py kyrīgue oenoĩ vy aipoe'i:

— Tove tou kyrīgue, pejoko eme, mba'eta peva'e ramigua'i peguarã ae Nhanderuete po'akaa.

17 Anhetẽ aipoa'e pêvy: Kyrīgue'i rami e'ŷ Nhanderuete po'akaa nomovaẽi va'e ma ndoikei 'rãe ha'e py.

*Mateus 19.16-22; Marcos 10.17-22*

18 Peteĩ ava omboetevepy oĩ va'e oporandu ixupe:

— Porombo'ea nderekoko porã va'e, mba'e nda'u ajapo 'rã tekove marã e'ŷ aupity aguã?

19 Jesus ombovai:

— Mba'e re tu “Nderekoko porã va'e”, 're xevy? Avave rei ndaeko porãi Nhanderuete e'ŷ vy.

20 Reikuua ae ma ojapo uka pyre: “Ndetavy eme, ejojuka eme, nemonda eme, ndeayvu rive eme joe, emboete nderu ha'e ndexy”, he'i.

21 Ava va'e aipoe'ive ju:

— Ha'e nunga ha'e javi ajapopa ae ma, xekyrī guive.\*

22 Jesus oendu vy aipoe'i:

— Peteĩ mba'e ma oata teri ndevy. Evendepa rerekoko va'e ha'e javi, ha'e hepykue eme'ẽmba iporiaukue'i pe. Ha'e vy 'rãe rerekoko ovareve va'e yva re. Ha'e gui mae ma eju xerupive – he'i.

23 Ha'e ramo ha'e va'e ayvu oendu vy ndovy'ai ete, oguerekopa va'e vy.

*Mateus 19.23-30; Marcos 10.23-31*

24 Jesus ma ava va'e ndovy'aveia oexa vy aipoe'i:

— Haxy ete oguerekopa va'e kuery Nhanderuete po'akaa py oike aguã – he'i.\*

25 Nhanderuete po'akaa py oguerekopa va'e oikea gui ndaxyive juu nambi kua rupi cameloo oaxa aguã – he'i.

26 Ha'e ramo oendu va'e kuery aipoe'i:

— Mba'e xagua 'rã tu ha'vy oo jepe?

27 Ombovai:

— Avakue pe haxy va'e ma Nhanderuete pe ndaxyi – he'i.

28 Ha'e ramo Pedro aipoe'i:

— Ore kuery ma orero roejapa va'ekue nderupive orekuai aguã.

29 Ha'e ramo Jesus ombovai ha'e kuery pe:

— Anhetẽ aipoa'e pêvy: Ha'e javi Nhanderuete po'akaa rupi oiko aguã ngoo oeja va'e, gua'yxy, guyvy kuery, nguoo e'ŷ vy gua'y kuery,

\* **18:14** Mateus 6.5-8; João 9.41; 1 Pedro 5.5,6 \* **18:21** Romanos 3.10,19,20; Tiago 2.10 \* **18:24** 1 Timóteo 6.9,10

<sup>30</sup> ha'e kuery ma aŷ voi ojou retave ete 'rã, ha'e gui raka'eve rã oupity 'rã tekove marã e'ŷ.

*Mateus 20.17-19; Marcos 10.32-34*

<sup>31</sup> Ngupive doze guemimbo'e kuery Jesus ogueraa vy aipoe'i ha'e kuery pe:

— Ma'ẽ, aŷ ma jaje'oi nhainy Jerusalém katy. Ha'e py ma ojeupity 'rã Ava ra'y ojeapo va'ekue rekorã profeta kuery omboparaague ha'e javi.

<sup>32</sup> Mba'eta omboaxaa 'rã amboae regua kuery pe, ha'e ramo ojavyky rei, ojojai rei ha'e onyvõomba 'rã okuapy.

<sup>33</sup> Oinupâmba ma rire ojukaa 'rã. Ha'e gui mboapy araa py onhemboete ju 'rã — he'i.

<sup>34</sup> Ha'e rami teĩ ha'e kuery neĩ peteĩ henda py noendu kuaai pov'a'e ayvu, mba'e he'ia paa ndoikuua ukai ramo. Ha'e kuery ndoikuuai ae ijayvua.

*Mateus 20.29-34; Marcos 10.46-52*

<sup>35</sup> Jericó tetã py ovaẽ rai'i ovya py peteĩ ára revegua e'ŷ oguapy oiny tape yvýry mba'emo re ojerurea py.

<sup>36</sup> Ha'e va'e ma heta va'e kuery oaxa nhendua oendu vy oporandu mba'e pa oikoa re.

<sup>37</sup> Ha'e ramo ixupe omombe'ua Nazaré pygua Jesus oaxaa.

<sup>38</sup> Ha'e ramo ojapukai:

— Jesus Davi ramymino, xemboaxy ke — he'i.

<sup>39</sup> Ha'e ramo tenonde oje'oi va'e aipoe'i okyrirĩ aguã. Ha'e rami teĩ ojapukaive tema:

— Jesus Davi ramymino, xemboaxy ke.

<sup>40</sup> Ha'e ramo Jesus opyta vy ogueru ruka. Ha'e ovaẽ ramo oporandu ixupe:

<sup>41</sup> — Mba'e tu reipota ndevy ajapo?

Ombovai:

— Senhor, xee ma aexaxe — he'i.

<sup>42</sup> Ha'e ramo Jesus aipoe'i:

— Exa ha'vy. Rejeroviaa ndereraa jepe ma.

<sup>43</sup> Ha'e ramove oexa, ha'e Nhanderuete pe oporaei ov y hupive. Heta va'e kuery ha'e javive ha'e nunga oexa vy oporaei avi jogueravy Nhanderuete pe.

## 19

*Imposto re nhombopaga va'ety Zaqueu oo jepeague*

<sup>1</sup> Jericó py Jesus oike vy oaxa ov y tetã rupi.

<sup>2</sup> Ha'e py oiko peteĩ ava Zaqueu hery va'e, imposto re nhombopaga va'ety ruvixa oguerekopa va'e.

<sup>3</sup> Ha'e va'e oexaxe mava'e pa Jesus, teĩ nda'evei heta va'e kuery gui, ikarape'i va'e vy.

<sup>4</sup> Ha'e vy onha ov y henonderã, ojeupi peteĩ sicômoro rakã re oexa aguã, ha'e rupi 'rãe oaxa ramo.

<sup>5</sup> Ha'e py Jesus ovaẽ vy yvate oma'ẽ reve aipoe'i ixupe:

— Zaqueu, eguejy pojava ke, kova'e ára ma apyta 'rã ndero py — he'i.

<sup>6</sup> Ha'e ramo oguejy pojava, ov y'a reve oguerovaẽ.

<sup>7</sup> Ha'e javive ha'e nunga oexa va'e ijayvu rei okuapy, heko vai va'e ro py ovaẽ ramo.

<sup>8</sup> Ha'e gui ma Zaqueu opu'ã vy aipoe'i Senhor pe:

— Senhor, xee anhenhandu iporiaukue'i pe mba'emo areko va'e ame'ẽ aguã, mbyte rupi peve. Ha'e xapy'a rei amongue mba'emo py akore rire irundykue ju 'rã ame'ẽ hekovia — he'i.\*

<sup>9</sup> Ha'e ramo Jesus aipoe'i ixupe:

— Kova'e ára ma oĩ kova'e oo py oo jepe va'e, mba'eta kova'e ava voi Abraão ramymino oiko.\*

\* **19:8** Lucas 3.8,12,13    \* **19:9** Gálatas 3.7,29 py oĩa rami, “ojerovia va'e ae Abraão ramymino kuery ikuai”, ha'e “Cristo pegua peiko vy peẽ kuery voi Abraão ramymino kuery pendekuai.”

10 Mba'eta Ava ra'y ojeapo va'ekue ou ojou ha'e ogueraa jepe aguã okanhy va'ekue.

*Dez hatã'i va'e ouro guigua omombe'uague*

11 Ha'e nunga ha'e kuery oendu ramo Jesus peteĩ ayvu ju omombe'u mba'emo re ombojoja vy, mba'eta Jerusalém py ovaẽ rai'i ma ramo oexa'ã teĩ okuapy Nhanderuete po'akaa ojekuaa ta ma aguã re.

12 Ha'e ramo aipoe'i:

— Peteĩ ava yvatekueve regua oo amboae yvy re onhembopo'aka uka, ha'e gui ojevy ju aguã.

13 Ha'e vy dez guembiguai oenoĩ vy ha'e kuery pe oiporuka dez hatã'i va'e ouro guigua ovareve va'e. Ha'e vy aipoe'i: "Kova'e peráta pemboetave ke ajevy peve", he'i.

14 — Ha'e rã hetarã kuery mboae nda'ija'ei vy hakykue omondouka huvixave oĩ va'e pe aipoe'i va'erã: "Ore kuery ma ndoroipotai ha'e va'e oreruvixarã", he'i va'erã.

15 — Ha'e rami teĩ ombopo'aka ma ramo ou ju, ha'e vy oenoĩ uka guembiguai kuery peráta jopyare, marã rami pa peteĩ-teĩ oguerekoague oikuaa aguã.

16 — Tenonde ou va'e aipoe'i: "Xeruvixa, ndeperáta gui ma dez ju ajouve."

17 — Ha'e ramo huvixa ombovai: "Ha'eve ete ma tembiguai porã. Mbovy'i va'e re repena kuaa rire dez tetã re ju ndepo'aka 'rã", he'i.

18 — Amboae ju ou vy aipoe'i: "Xeruvixa, ndeperáta gui ajouve ju peteĩ nhiruĩ."

19 — Ha'e va'e pe ma aipoe'i: "Ndee ma peteĩ nhiruĩ tetã re 'rã ndepo'aka", he'i.

20 — Ha'e gui amboae ju ou vy aipoe'i: "Xeruvixa, apy ma aru ju ndeperáta ajukue py anhovã vy amoĩ porã va'ekue.

21 Mba'eta ndegui xee akyje, ivai rei va'e reiko ramo. Remoĩ porãaty gui e'ý renoẽ, ha'e renhotÿague gui e'ý 'rã remono'õ va'e", he'i.

22 — Ha'e ramo ombovai: "Tembiguai heko vai va'e, ndeayvuague rupi ae 'rã rombopaga. Reikuua ri ty'y xevai rei va'ea, amoĩ porãaty gui e'ý teĩ anoẽ, ha'e anhotÿague gui e'ý amono'õ 'rãa?

23 Ha'e rami vy mba'e re tu xeperáta ma peráta renda py neremoĩ, ajevy vy ajopy retave aguã?" he'i.

24 — Ha'e gui ha'e py ikuai va'e pe ju aipoe'i: "Peipe'a na peráta ixugui, ha'e peme'ẽ dez oguereko va'e pe."

25 — Ha'e rã ha'e kuery aipoe'i: "Xeruvixa, ha'e tu oguereko ae ma dez."

26 — Ombovai: "Xee aipoa'e pãvy: Mba'emo oguereko va'e ha'e javi pe ome'ẽave 'rã. Ha'e rã ndoguerekoi va'e gui ma oguereko'i va'e voi oipe'aa 'rã.

27 Ha'e gui xerovaigua kuery nguvixarã ndaxepotai va'ekue ma peru, pejukapa aexaa py."

*Mateus 21.1-11; Marcos 11.1-11; João 12.12-19*

28 Po ramo ijayvupa rire Jesus oove ju Jerusalém katy.

29 Betfagé ha'e Betânia py ovaẽ rai'i ma ovy vy yyty Oliveiras katy'i, omondouka mokoĩ guemimbo'e.

30 Ha'e kuery pe aipoe'i imondovy:

— Tapeo tenonde peva'e tekao oĩ va'e py. Ha'e py pevaẽ vy pejou 'rã peteĩ mburika'i ixã re hi'ai va'e, hi'ary avave rei noĩai teri va'e. Pejora vy ke Peru.

31 Ha'e gui xapy'a rei pãvy amongue oporandu 'rã mba'e re pa pejoraa re. Ha'e ramo pembovai vy "Senhor ma oipota", peje 'rã.

32 Ha'e ramo omondouka va'ekue oje'oi vy Jesus aipoe'iague rami meme ojou.

33 Mburiaka'i ojora jave ija aipoe'i:

— Mba'e re tu pejora?

34 Ha'e kuery ombovai:

— Senhor ma oipota — he'i.

<sup>35</sup> Ha'e vy mymba ogueru vy hi'áry oipyo oao, ha'e oupi Jesus hi'áry.  
<sup>36</sup> Hi'áry oo oiny ramo tape rupi oipyo okuapy oao.

<sup>37</sup> Ha'e gui vyty Oliveira gui oguejy ovya py ovaẽ rai'i ma jave hemimbo'e kuery ha'e javi oguerovy'a vy Nhanderuete pe oporaei atã oje'oivy mba'emo porã ojapo rã oexa va'ekue ha'e javi re.

<sup>38</sup> – Ta'ima'endu'a porãa Huvixave Senhor rery rupi ou va'e re. Ta'ikuai porãa yva re, toporaeia yvatevea py! – he'i oje'oivy.\*

<sup>39</sup> Ha'e rã amongue fariseu kuery heta va'e kuery mbyte ikuai avi va'e ma aipoe'i ixupe:

– Porombo'ea, ndeayvu na neremimbo'e kuery pe.

<sup>40</sup> Ha'e rã ha'e kuery pe ombovai:

– Xee aipoa'e pãvy: Ha'e kuery okyrirã va'e rire ita eteve voi oporaei 'rãgue – he'i.

### *Jerusalém tetã Jesus oexa vy ojae'oague*

<sup>41</sup> Jesus ovaẽ ovvy vy tetã oexa vy ojae'o.

<sup>42</sup> Ha'e vy aipoe'i:

– Kova'e ára rexaa kuaa va'e rire nemoingo porãarã ou va'e. Tei aý ha'e nunga ndoikuua ukaai ndevy.†

<sup>43</sup> Mba'eta ovaẽ 'rã nderovaigua kuery ndejokopa aguã ára, jovalovai katy gui nemboty heravy aguã.

<sup>44</sup> Nerenda ombovaipa vy ojukapa 'rã nememby kuery. Nei peteĩ ita ma ndoejai 'rã amboae ita áry, ndea py aju tei ndaxerexa kuaai rire.

### *Mateus 21.12,13; Marcos 11.15-17*

<sup>45</sup> Ha'e gui templo py oike vy oipe'apa mba'emo vendea kuery ha'e py ikuai va'ekue.

<sup>46</sup> Ha'e vy aipoe'i ha'e kuery pe:

– Ipara oiny “Xero ma onhembo'e atyrã oí” 'ea va'eri peẽ ma pejapo imonda va'e onhemiaty rami.\*

### *Templo py nhombo'eague*

<sup>47</sup> Ko'ẽ nhavõ Jesus nhombo'e oikovy templo py. Ha'e rã sacerdote yvatekueve va'e, lei re nhombo'e va'ety ha'e heta va'e ruvixa kuery ma ojukaxe okuapy,\*

<sup>48</sup> tei ndojuka uka kuaai teri, heta va'e kuery ha'e javi ojapyxaka vy ojou porã okuapy ramo.

## 20

### *Mateus 21.23-27; Marcos 11.27-33*

<sup>1</sup> Peteĩ ára templo py Jesus ombo'e oiny heta va'e kuery. Ayvu porã omombe'u jave oĩa py jogueru sacerdote yvatekueve va'e, lei re nhombo'e va'ety ha'e nhomongeta va'ety kuery.

<sup>2</sup> Ha'e vy aipoe'i okuapy ixupe:

– Emombe'u orevy mava'e po'akaa rupi pa ha'e nunga rejapo reikovy. Mava'e tu nembopo'aka?

<sup>3</sup> Ha'e ramo ombovai:

– Xee voi aporandu ta pãvy. Pemombe'u ke:

<sup>4</sup> João nhomongaraia pa yva guigua tyrã avakue guigua raka'e? – he'i.

<sup>5</sup> Ha'e ramo ha'e kuery joupe-upa ranhe aipoe'i okuapy:

– “Yva gui”, ja'e ramo “Mba'e re tu ha'vy ndapejeroviai hexe?” he'i 'rã nhandevy.

<sup>6</sup> Ha'e rã “Avakue gui”, ja'e ramo ma heta va'e kuery nhandeapipa 'rã ita py, mba'eta ha'e kuery oikuaa João profeta oikoa – he'i okuapy.

\* <sup>19:38</sup> Salmo 118.26    † <sup>19:42</sup> “Ndee” he'ia py ma peteĩ'i pe rami ijayvu tei tetã pygua kuery ha'e javive pe.

\* <sup>19:46</sup> Isaías 56.7, Jeremias 7.11    \* <sup>19:47</sup> Mateus 21.14-17

**7** Ha'e rami vy ombovai:

— Ore ma ndoroikuuai.

**8** Ha'e rā Jesus ju ombovai:

— Xee voi peē kuery pe namombe'ui 'rā mava'e po'akaa rupi pa ha'e nunga ajapo aikovoya.

*Mateus 21.33-44; Marcos 12.1-11*

**9** Ha'e rire pova'e ayvu ju Jesus omombe'u heta va'e kuery pe, mba'emo re ombojoja vy:

— Peteī ava onhotŷ uva, ha'e vy omboaxa opena va'erā kuery po py. Ha'e gui ma guekoa gui oguata oiko are aguā katy.

**10** Omono'ða ára ovaẽ ramo opena va'e kuerya py ombou peteī guembiguai, ixupe uva'a ome'ẽ okuapy aguā. Ha'e ramo ha'e kuery oinupā ha'e ojavyky rei ma rire ombojevy rive ju.

**11** — Amboae guembiguai ju ombou. Ha'e ramo ha'e va'e voi oinupāmba. Ojavyky rei rire ombojevy rive ju.

**12** — Ha'e gui mboapya ma ombou. Ha'e va'e re voi ojeaipa ma rire omoxē ju avi.

**13** — Ha'e ramo uvaty ja aipoe'i ojeupe: "Mba'e nda'u ajapo 'rā? Amondouka 'rā xera'y ayvu ete va'e. Xapy'a rei rā ko omboetea 'rā", he'i.

**14** — Ha'e rami teī opena va'e kuery ta'y oexa vy aipoe'i joupe-up: "Peva'e ma uvaty jarā ete. Jajuka na, uvaty nhandevy ju opyta aguā", he'i okuapy.

**15** Ha'e vy uvaty gui oguenoẽ vy ojuka.

— Mba'e nda'u uvaty ja ojapo 'rā ha'e kuery re?

**16** Ha'e ou vy omomba 'rā opena va'ekue, ha'e amboae kuery pe ju omboaxa 'rā uvaty — he'i.

Ha'e rā ha'e va'e ayvu oendu va'e kuery aipoe'i:

— Ha'e nunga ete ta'vy toiko eme.

**17** Ha'e rā Jesus ha'e kuery re oma'ẽ vaipa vy aipoe'i:

— Mba'e he'ia tu ha'vy ipara: "Oo apoa kuery ita ndoipotai va'ekue opyta omboeteve pyrā, tenonde pyguarā", he'ia.\*

**18** Ha'e va'e ita re ho'a va'e ha'e javi opēmba 'rā. Ha'e amongue áry ita ho'a ramo iku'ipa 'rā.

*Mateus 22.15-22; Marcos 12.13-17*

**19** Ha'e jave ae lei re nhombo'e va'ety ha'e sacerdote yvatekueve va'e ojopyxe teī, ha'e kuery re ri ty ra'e ijayvua oikuua vy. Ha'e rami teī heta va'e kuery gui okyje guive.

**20** Ha'e rami vy oikuua pota okuapy hexe, amongue pe peráta ome'ẽ guive, heko porā va'e rami onhemingo vy ayvu py omoĩ vai vy huvixa po py omboaxa aguā.

**21** Ha'e vy ixupe oporandu vy aipoe'i:

— Porombo'ea, ore roikuua ndee ndeayvu ha'e renhombo'e porāa. Ndereikuua pota rei avave re, ha'e anhetē rupi renhombo'e Nhanderuete oipota va'e re.

**22** Ha'evea rami ri nda'u César pe nhame'ẽ imposto repy, tyrā pa any?

**23** Ha'e rā Jesus ma ha'e kuery omoĩ vaixeia oikuua vy ombovai:

**24** — Pexa uka ha'vy xevy peteī hatā'i va'e. Mava'e ra'angaa ha'e mava'e rery ha'vy oĩ?

Aipoe'i okuapy:

— César mba'e ri.

Ha'e ramo Jesus aipoe'i ha'e kuery pe:

**25** — César mba'e ri rā peme'ẽ ha'vy César pe. Ha'e rā Nhanderuete pegua ma Nhanderuete pe ae 'rā peme'ẽ — he'i.\*

**26** Ha'e rami rā heta va'e kuery oendua py ha'e kuery ndojopy reguai ayvu py. Ombovai kuaa rā oendu vy okyririmbā guive onhemondyipa vy.

*Mateus 22.23-33; Marcos 12.18-27*

\* **20:17** Salmo 118.22-23 \* **20:25** Romanos 13.7

<sup>27</sup> Ovaẽ avi amongue saduceu kuery. Ha'e kuery ma nhanhemboete ju 'rãa ndogueroviai va'e.

<sup>28</sup> Ha'e vy oporandu okuapy ixupe:

— Porombo'ea, Moisés oeja raka'e po rami ipara va'e: “Amongue ta'y e'ŷ re omano ramo tyvy ju omenda 'rã imeve'ŷ va'e re, omano va'ekue ra'yrã va'ekue oguereko aguã”, he'iague.\*

<sup>29</sup> Ha'e gui ikuai raka'e sete joegua. Tujave va'e ma omenda va'ekue ri omano ta'y e'ŷ re.

<sup>30</sup> Ha'e ramo tyvy mokoĩa va'e, ha'e gui mboapya va'e ju omenda ranhe imeve'ŷ va'e re.

<sup>31</sup> Ha'e rami py sete-ve omano ta'y e'ŷ re meme.

<sup>32</sup> Ha'e gui mae ma kunha va'e avi omano.

<sup>33</sup> Ha'e gui onhemboete jevya ára nda'u mava'e ete'i 'rã oiko kunha va'e me, kunha va'e re sete-ve omenda rire? — he'i.

<sup>34</sup> Ha'e rã Jesus ombovai ha'e kuery pe:

— Ko yvy re ikuai va'e ma omenda ha'e nhomomenda 'rã.

<sup>35</sup> Ha'e rã ára pyau onhemboete aguã ára oupity aguã oiporavo pyre ma nomendavei, neĩ nanhomomendavei ma 'rã.

<sup>36</sup> Nomanovei ma 'rã guive, mba'eta omboete ju rire anjo kuery rami ma 'rã ikuai Nhanderuete ra'y kuery ikuai vy.

<sup>37</sup> Ha'e gui omano va'ekue onhemboete ju aguã regua ma Moisés ae ombopara. Mba'eta yvyra rogue okai va'e omombe'ua py Senhor pe “Abraão, Isaque ha'e Jacó Ruete”, he'i va'ekue.\*

<sup>38</sup> Ha'e nunga rupi Nhanderuete ma omanogue Ruete e'ŷ oiko, ha'e rã oikove va'e Ruete, ixupe pavẽ oikove ramo — he'i.\*

<sup>39</sup> Ha'e ramo lei re nhombo'e va'ety regua aipoe'i:

— Porombo'ea, rembovai porã — he'i.

<sup>40</sup> Ha'e va'e rire avave rei nda'ipy'a guaxuvei ixupe oporandu aguã.

*Mateus 22.41-45; Marcos 12.35-37*

<sup>41</sup> Ha'e gui ma ha'e kuery pe ju Jesus oporandu:

— Mba'exa nda'u Cristo reko re pendeayvu vy aipopeje Davi ramymino oikoa rami?

<sup>42</sup> Mba'eta Davi eteve voi aipoe'i Salmo py: “Senhor aipoe'i xe-Senhor pe: ‘Eguapy ke aiporu kuaa regua re,

<sup>43</sup> ndepy guýry nderovaigua kuery amoĩ e'ŷa ja', he'i va'ekue.”\*

<sup>44</sup> Ha'e rami vy Davi voi “Senhor” he'i ixupe. Mba'exa tu ha'vy hamymino avi ri oiko?\*

*Mateus 23.1-7; Marcos 12.38-40*

<sup>45</sup> Heta va'e kuery ha'e javi oendua py Jesus aipoe'i guemimbo'e kuery pe:

<sup>46</sup> — Penheangu ke lei re nhombo'e va'ety kuery gui, mba'eta ha'e kuery onhemonde 'rã ao puku py, ha'e tetã mbyte rupi oipota 'rã oxaruraa porã. Onhembo'eaty py ha'e ngaru oĩa py oguapy 'rã tenda tenondeve oĩ va'e py anho.

<sup>47</sup> Ha'e rami avi ha'e kuery ogueraa rivepa 'rã imeve'ŷ va'e kuery ro gui oipota va'e, ha'e onhemboeko porãxe vy onhembo'e are 'rã. Ha'e nunga rupi ha'e kuery opaga raxa ete 'rã.

## 21

*Marcos 12.41-44*

<sup>1</sup> Jesus templo py oma'ẽ oiny vy oexa oguerekopa va'e kuery peráta ome'ẽ vy hyru py omoĩ rã.

<sup>2</sup> Oexa avi peteĩ imeve'ŷ va'e omoĩ rã mokoĩ hatã'i va'e ndovareive'i va'e.

<sup>3</sup> Ha'e vy aipoe'i:

---

\* **20:28** Deuteronômio 25.5    \* **20:37** Éxodo 3.6    \* **20:38** 1 Coríntios 6.14    \* **20:43** Salmo 110.1    \* **20:44** Romanos 1.3,4

— Anhetē aipoa'e pēvy: Peva'e imeve'ŷ va'e iporiaukue'ia ramive pavē gui ome'ẽ retave.

<sup>4</sup>Mba'eta amboae kuery ma hembyrekue gui rive ome'ẽ. Ha'e rā peva'e ma iporiaukue'ia ramive mba'emo'i ojogua aguā oguerekō va'ekue ha'e javi'i omoī.

**Mateus 24.1,2; Marcos 13.1,2**

<sup>5</sup> Amongue ijayvu templo ojou porāa rupi, mba'eta ita porā ha'e ome'ẽ mbyre py ombojeguua rire.

<sup>6</sup> Ha'e ramo Jesus ombovai:

— Aŷ pexa pa peva'e nunga? Ovaē 'rā oitypaa ára, neĩ peteĩ ita amboae ita áry ndopytai aguā.

**Mateus 24.3-13; Marcos 13.3-13**

<sup>7</sup> Oporandu okuapy ixupe:

— Orembo'ea, araka'e 'rā tu ha'e nunga oiko? Mba'exa tu roikuaa 'rā ovaē rai'i maa?

<sup>8</sup> Ombovai:

— Penheangu ke ha'vy penhembotavy uka e'ŷ aguā. Mba'eta heta 'rā ou xerery rupi "Xee ae ri", e'ŷ vy "Ovaē ma hora", he'i rive va'e. Tapeo eme hupive.

<sup>9</sup> Penhemondyi eme "Joe opu'ã" 'ea rā pendu vy, neĩ "Huvixa kuery re opu'ã", 'ea teĩ. Ha'e nunga ranhe 'rāe oiko teĩ opa aguā e'ŷ teri — he'i.

<sup>10</sup> Aipoe'i avi ha'e kuery pe:

— Peteĩ-teĩ tetā pygua kuery opu'ã 'rā amboae tetā pygua re, ha'e peteĩ-teĩ regua amboae regua re 'rā opu'ã.

<sup>11</sup> Yvy oryryi 'rā, oiko 'rā mba'eaxy vaikue ha'e karuai. Oiko 'rā nhomondyipaa, yva re hexa pyrā tuvixa va'e voi.

<sup>12</sup> Ha'e nunga oiko e'ŷ mbove pendejopya ha'e penemoingo axya 'rā. Xerery rupi pendekuai ramo pendereraa 'rā onhembo'eaty py, nhuā py ha'e huvixa kuerya py.

<sup>13</sup> Ha'e nunga pendere oiko 'rā ayvu pemombe'u aguā.

<sup>14</sup> Ha'e nunga rupi pendepy'a eta rei eme pembovai aguā re.

<sup>15</sup> Mba'eta xee ae 'rā ame'ẽ pendeayvurā ha'e pene'arandu aguā, pendere ija'e e'ŷ va'e kuery nda'ipo'akai, neĩ nombovai kuaai aguā rami.

<sup>16</sup> Penderu kuery voi penembo'a uka 'rā, penderegua, penetarā ha'e peneirū kuery voi, amongue pendejukaa 'rā guive.

<sup>17</sup> Xerery káuxa pavē nda'ija'evei 'rā pendere.

<sup>18</sup> Ha'e rami teĩ neĩ peteĩ pende'a nokanhysi 'rā peneakā guigua.

<sup>19</sup> Peĩ atāa py perekō riae 'rā penenhe'ẽ.

**Mateus 24.15-22; Marcos 13.14-20**

<sup>20</sup> — Ha'e gui xondaro kuery Jerusalém tetā ojokopa rā pexa vy peikuaa 'rā ombovaipa ta maa.

<sup>21</sup> Ha'e ramo Judéia pygua kuery tonhamba yvyty re. Tetā py ikuai va'e voi toopa, mba'ety rupi ikuai va'e voi toike eme tetā py.

<sup>22</sup> Ha'e va'e ára ma nhombopagapaa ára, ipara oinya ha'e javi ojeupity aguā.

<sup>23</sup> — Ha'e va'e ára ma nda'evei 'rā imemby ryru'i ha'e imemby kambu va'e pe. Mba'eta yvy re oiko 'rā teko axy kova'e kuery mbopagaarā.

<sup>24</sup> Ojukaa 'rā kyxe py, ha'e escravo-rā ogueraapaa 'rā yvy jave rupi. Judeu e'ŷ va'e kuery po'akaa ára opa e'ŷa ja ha'e kuery opyrōmba 'rā Jerusalém tetā re.

**Mateus 24.29-31; Marcos 13.24-27**

<sup>25</sup> — Kuaray, jaxy ha'e jaxy-tata re ojekuaa 'rā hexa pyrā. Ye'ẽ revovo ha'e yai opu'ã-pu'ã va'e gui yvy regua ikuai va'e nda'evei ha'e ndoikuuai rei 'rā okuapy.

<sup>26</sup> Yvy re mba'emo vai oiko ta va'e gui avakue onhemondyi vy ho'apa 'rā. Mba'eta yva re ipo'akakueve ikuai va'e voi oitypaa 'rā.

<sup>27</sup> Ha'e gui ma oexaa 'rã Ava ra'y ojeapo va'ekue arai rupi ou rã opo'aka ha'e guexakãmba reve.\*

<sup>28</sup> Ha'e nunga oiko aguã ijypy ramo pevy'a, pemopu'ã peneakã, mba'eta ovaẽ ta ma pendereraa jepea.

*Mateus 24.32-44; Marcos 13.28-37*

<sup>29</sup> Peteĩ ayvu omombe'u avi mba'emo reombojoja vy. Ha'e vy aipoe'i ha'e kuery pe:  
— Peikuaa pota figo'y ha'e yvyra ikuai va'e re.

<sup>30</sup> Mba'eta hokypa rã pexa vy peikuaa 'rã ára pyau ovaẽ rai'i maa.

<sup>31</sup> Ha'e rami ae xeayvuague oiko rã pexa vy peikuaa 'rã Nhanderuete po'akaa ojekuaa aguã ovaẽ rai'i maa.

<sup>32</sup> Anhetẽ aipoa'e pêvy: Aŷgua kuery opa e'ŷ re ha'e nunga ha'e javi oiko 'rã.

<sup>33</sup> Yva ha'e yvy opa 'rã. Ha'e rã xeayvuague ma ndoaxa rivei 'rã.

<sup>34</sup> — Ha'e nunga rupi peiko kuaa pota pendepy'a pemonyẽ e'ŷ aguã opa marã rei pendekuaia, peka'ua, neĩ mba'emo ko yvy re ikuai va'e re pepenaa guive, pendere ha'e va'e ára ou xapy'a e'ŷ aguã nhuã rami.

<sup>35</sup> Mba'eta ko yvy re ikuai va'e ha'e javi re ou 'rãe.

<sup>36</sup> Peikuaa pota ha'e pejerure riae mba'emo oiko va'erã gui peo jepe aguã, ha'e Ava ra'y ojeapo va'ekue renonde pene'aĩ aguã.\*

*Jesus ijayvu rã heta va'e kuery ojapyxaka okuapyague*

<sup>37</sup> Ko'ẽ nhavõ Jesus nhombo'e oikovy templo py. Ha'e gui pyávy ma oo 'rã Oliveiras yvyty re oke aguã.

<sup>38</sup> Ha'e rã heta va'e kuery ha'e javi ma aje'ive reve 'rã jogueraa templo py ijayvu rã ojapyxaka aguã.

## 22

*Mateus 26.1-5; Marcos 14.1,2*

<sup>1</sup> Ovaẽ rai ma ngaru mbojape imbovua revegua e'ŷ "Páscoa" 'epy va'e ára.

<sup>2</sup> Sacerdote yvatekueve va'e ha'e lei re nhombo'e va'ety kuery oikuaa pota okuapy marã rami vy pa Jesus ojuka aguã, mba'eta heta va'e kuery gui okyje.\*

*Mateus 26.14-16; Marcos 14.10,11*

<sup>3</sup> Ha'e gui ma Satanás ipo'aka peteĩ hemimbo'e kuery doze ikuai va'e regua Judas Iscariotes hery va'e py'a re.

<sup>4</sup> Ha'e ramo oo jogueroayvu aguã sacerdote yvatekueve va'e ha'e jopya ruvixa kuery reve, ha'e kuery pe Jesus ojopy uka aguã re.

<sup>5</sup> Ha'e ramo ha'e kuery oguerovy'a vy ixupe ijayvu peráta ome'ẽ aguã re.

<sup>6</sup> Judas ojou porã vy oikuaa pota ha'e kuery pe ojopy uka aguã pavẽ opu'ã e'ŷ re.

*Mateus 26.17-19; Marcos 14.12-16*

<sup>7</sup> Ovaẽ ma ngaru mbojape imbovua revegua e'ŷ Páscoa ára okaru aguã.

<sup>8</sup> Ha'e ramo Jesus omondouka Pedro ha'e João. Ha'e vy aipoe'i:

— Tapeo, perekó katu Páscoa ára jakaru aguã.

<sup>9</sup> Ha'e rã oporandu ixupe:

— Mamo tu reipota roguereko katu?

<sup>10</sup> Jesus ombovai:

— Tetã py pevaẽ vy peovaexi 'rã peteĩ ava yryru revegua. Tapeo hupive opy oikea peve.

<sup>11</sup> Hoo va'e pe ke aipopeje: "Orembo'ea oporandu uka kuri ndevy: Mamo pa oĩ opy ja'o Páscoa ára xeremimbo'e kuery reve rokaru aguã?" he'i uka.

<sup>12</sup> Ha'e ramo oexa uka 'rã pêvy peteĩ opy ja'o tuvixa va'e opa mba'e oĩa. Ha'e py ae 'rã perekó katu — he'i.

\* 21:27 Daniel 7.13-14 \* 21:36 Lucas 12.35-48 \* 22:2 João 11.47-57

<sup>13</sup> Ha'e rami rã jogueraa vy ojoupa Jesus aipoe'iague rami. Ha'e vy oguereco katu Páscoa ára okaru okuapy aguã.

*Guemimbo'e kuery reve Páscoa ára opa vygua okaru okuapyague*

<sup>14</sup> Ha'e gui hora ovaẽ ramo mesa py Jesus oĩ apóstolo kuery reve.\*

<sup>15</sup> Ha'e vy aipoe'i ha'e kuery pe:

— Xee ma kova'e Páscoa ára akaruxe ete pendereve, aiko axy e'ŷ mbove'i.

<sup>16</sup> Mba'eta aipoa'e pêvy: Nda'uwei ma 'rã kova'e nunga Nhanderuete po'akaa py ojeupity e'ŷa ja — he'i.

<sup>17</sup> Ha'e gui ojopy karo. Oguerovy'a vy aipoe'i:

— Pejopy, pemboja'o jomeme.

<sup>18</sup> Xee aipoa'e pêvy: Aŷ gui ma nday'uwei ma 'rã uva rykue, Nhanderuete po'akaa ovaẽ e'ŷa ja.

*Mateus 26.26-29; Marcos 14.17-26*

<sup>19</sup> Peteĩ mbojape ju ojopy. Ha'e vy oguerovy'a ma vy oipe'â-pe'â'i vy ome'ë. Aipoe'i:

— Kova'e ma xerete peẽ kuery re vy ame'ë va'erã regua. Guĩ nunga pejapo 'rã xere penema'endu'aa rupi — he'i.

<sup>20</sup> Ha'ekue rami ju okarupa ma rire karo ojopy vy aipoe'i:

— Kova'e karo ma xereve guarã ipyau va'e ajapo va'e regua, peẽ kuery re vy xeruguy amoẽ uka ta va'e rupi.

<sup>21</sup> Ha'e rami teĩ xejopy uka nhemiarã oĩ avi xereve mesa py.

<sup>22</sup> Mba'eta Ava ra'y ojeapo va'ekue ma hekorã ipara oĩa rami ae 'rã oo. Ha'e rã ijopy uka nhemire pe ma nda'evei ete 'rã — he'i.

<sup>23</sup> Ha'e ramo joupe-upo oporandu okuapy mava'e ete'i pa ha'e kuery regua ojopy uka 'rãa re.

*Yvatekueve va'e yvyïve va'e rami ikuai aguã re ijayvuague*

<sup>24</sup> Hemimbo'e kuery joo rami e'ŷ-e'ŷ ijayvu okuapy mava'e ete'i pa joegui yvateve va'ea oikuaaxe vy.

<sup>25</sup> Ha'e rami rã Jesus aipoe'i ha'e kuery pe:

— Yvy regua huvixa kuery ipo'aka 'rã ha'e kuery re, ha'e ipo'akakue pe "Ojapo porã va'e", 'ea 'rã.

<sup>26</sup> Ha'e rã pende kuery ma ha'e rami e'ŷ 'rã. Ha'e rami 'rãgue py peẽ kuery va'e regua joegui yvatekueve va'e ma yvyïgueve rami 'rã ikuai. Joguerekoa ma nhoembiguai rami 'rã ikuai.\*

<sup>27</sup> Mba'eta mava'e nda'u joegui yvateve: mesa py oĩ va'e tyrã pa joupe ojara va'e? Mesa py oĩ va'e'ŷ teve? Ha'e rami teĩ xee ma peẽ kuery mbyte aiko joupe ojara va'e rami.

<sup>28</sup> — Peẽ kuery ma xereve pendekuai riae va'ekue xereko a'âa ha'e javi rupi.

<sup>29</sup> Ha'e rami rire xee rombopo'aka Xeru xembopo'akaague rami avi,

<sup>30</sup> xepo'akaa py peẽ kuery avi pekaru ha'e pey'u aguã xe-mesa py, ha'e tenda pepenaaty py peguapy vy Israel kuery doze regua ikuai va'e re pepena aguã.

*Mateus 26.31-35; Marcos 14.27-31; João 13.36-38*

<sup>31</sup> — Simão, Simão, ma'ë, Satanás ojerure pendererekoo aguã trigo ombogua va'e rami.

<sup>32</sup> Ha'e rã xee ma ajerure ndere, rejeroviaa gui rejope'a e'ŷ aguã. Ha'e rire rejeko rerova ju ma vy emombaraete nde-irmão kuery — he'i.

<sup>33</sup> Simão Pedro ombovai:

— Senhor, xevy pe ha'eve ndereve nhuã py aa, ha'e amano aguã voi.

<sup>34</sup> Ha'e rã Jesus aipoe'ive ju ixupe:

— Pedro, xee aipoa'e ndevy: Kuri uru ava ojapukai e'ŷ mbove mboapykue ren-hemombe'u 'rã xekuaa e'ŷ va'e rami.

\* <sup>22:14</sup> Mateus 26.20,27-29

\* <sup>22:26</sup> Mateus 20.20-28; Marcos 10.35-45; 1 Pedro 5.3

### *Kyxre ijayvuague*

<sup>35</sup> Ha'e gui Jesus oporandu ha'e kuery pe:

— Xee romondouka jave peráta ryru reve'ŷ, voko, ha'e pendepy regua reve'ŷ jave pendevy oata teve raka'e mba'emo?

— Any, mba'eve rei — he'i okuapy.

<sup>36</sup> Ha'e ramo aipoe'i:

— Ha'e gui aŷ gui ma peráta ryru perekva'e peraa, voko guive. Ha'e kyxe ndaperekoi va'e ma pendecapa pevende 'rā pejogua aguã.

<sup>37</sup> Mba'eta xerekorã ipara oiny va'e ojeupity 'rāe: "Jojuka rive va'ety rami 'rā oguerekoa", he'iague rami. Xerekorã ipara oiny va'e ojeupity ta ma — he'i.\*

<sup>38</sup> Ha'e rami rā ha'e kuery aipoe'i:

— Senhor, apy ma mokoñ kyxe roguereko.

Ombovai:

— Ha'eve ma!

### *Mateus 26.36-41; Marcos 14.32-38*

<sup>39</sup> Oliveiras yvyty katy ju oo oikoaty rami vy. Hupive hemimbo'e kuery oje'oi avi.

<sup>40</sup> Ooxeague py Jesus ovaẽ ma vy aipoe'i ha'e kuery pe:

— Penhembo'e ke penderekao a'âa py pejeity uka e'ŷ aguã — he'i.

<sup>41</sup> Ha'e rā ha'e ma mombyry'i ojepe'a ovyy, ha'e guenapy'â re oĩ vy onhembo'e.

<sup>42</sup> Ha'e vy aipoe'i:

— Xeru, reipota ramo xegui oaxa 'rāgue kova'e karo. Ha'e rami avi xee aipota va'e ma toiko eme, ndee reipota va'e ae toiko — he'i.

<sup>43</sup> [Ha'e javo ou peteñ anjo yva pygua omombaraete vy.]

<sup>44</sup> Ha'e rā ojexavai vy hatâve tema onhembo'e ramo hy'ai voi huguy rami otyky yvy py.]

<sup>45</sup> Ha'e gui onhembo'ea gui opu'â ju vy guemimbo'e kuery ikuaiia py oo. Ha'e vy oexa rā okepa okuapy ra'e iporiau vy.

<sup>46</sup> Ha'e ramo aipoe'i ha'e kuery pe:

— Mba'e re tu pekepa ri? Pepu'â katu, penhembo'e penderekao a'âa py pejeity uka e'ŷ aguã.

### *Mateus 26.47-56; Marcos 14.43-50; João 18.1-11*

<sup>47</sup> Ha'e gui ijayvu teri ho'amy reve ovaẽ ma jogueruvy heta va'e. Ha'e kuery renonde ou oiny peteñ hembiguai kuery doze ikuai va'e regua Judas hery va'e. Ha'e vy Jesus re onhemboja oova rayvu aguã.

<sup>48</sup> Ha'e rā Jesus aipoe'i ixupe:

— Judas, reayvu vy 'rāe ty'y rejopy uka Ava ra'y ojeapo va'ekue?

<sup>49</sup> Ha'e ramo hexeveguia kuery ma oiko ta va'e oexa vy aipoe'i:

— Senhor, ha'eve pa orekyxe roiporu aguã? — he'i.

<sup>50</sup> Ha'e vy ha'e kuery va'e regua peteñ omboguai sacerdote yvateve va'e rembiguai nambi oiporu kuaa regua rupi, ha'e vy omboi.

<sup>51</sup> Ha'e ramo Jesus aipoe'i:

— Tove, ha'eve ma! — he'i vyve inambi re opoko vy omonguera.

<sup>52</sup> Ha'e gui Jesus ijayvu sacerdote yvatekueve va'e pe, templo rarõa ruvixa ha'e nhomongeta va'ety kuery ijopyarã ou va'e kuery pe guive. Ha'e vy aipoe'i:

— Peñ kuery ma kyxe ha'e yvyra reve ri ty'y peju jojuka rive va'ety rami xejopy aguã?

<sup>53</sup> Mba'eta ko'ë nhavõ templo py peñ kuery pendekuaia rupi aiko teñ ndaxejopyi va'ekue. Ha'e rami avi aŷ ma peñ kuery hora ovaẽ, pytû ipo'aka aguã.

### *Mateus 26.69-75; Marcos 14.66-72; João 18.15-18,25-27*

<sup>54</sup> Ha'e kuery ojopy vy sacerdote yvateve va'e ro py ogueraa. Hakykue Pedro oo avi mombyry'i rupi.

\* <sup>22:37</sup> Isaías 53.12

**55** Oka mbyte py ojape'e okuapy aguã ojatapy ramo Pedro voi oguapy ha'e kuery reve.

**56** Ha'e gui peteñ tembiguai kunhatañ ma Pedro tata yvýry oguapy oiny rã oexa vy oma'ẽ ngatu hexe. Ha'e vy aipoe'i:

— Peva'e voi hexeve oiko va'ety.

**57** Ha'e ramo Pedro onhemboapu vy aipoe'i:

— Kunha, xee tu aexa va'e'ý rima — he'i.

**58** Ha'e va'e rire amboae ju oexa vy aipoe'i:

— Ndee voi ta'vy ha'e kuery regua teve.

Ha'e ramo Pedro ombovai:

— Ava, xee tu ha'e kuery regua e'ý rima — he'i.

**59** Aje'i ma rire amboae ju aipoe'i:

— Peva'e tu anhetẽ rima ha'e kuery regua, mba'eta ha'e voi Galiléia pygua.

**60** Ha'e ramo Pedro aipoe'ive ju:

— Ava, xee tu ndaikuaai rima ndeayvua — he'i. Ha'e ijayvu teri reve uru ava ojapukai nhendu.

**61** Ha'e ramove Senhor ojere vy oma'ẽ Pedro re. Ha'e ramo mae ma Pedro ima'endu'a ma Senhor aipoe'iague re: "Kuri uru ava ojapukai e'ý mbove mboapykue 'rã renhemombe'u xekuaa e'ý va'e rami", he'iague re.

**62** Ha'e rami vy Pedro ojepe'a vy ojae'o vaipa.

### *Jesus rarõa kuery ojavyky rei okuapyague*

**63** Jesus rerekaoa kuery ojavyky rei, oungapa guive.\*

**64** Hexa omo'ã vy aipoe'i okuapy:

— Emombe'u ke mava'e ete pa nembota ra'e — he'i.

**65** Ha'e vy opa marã hexe ijayvuve tema ayvu vai rupi.

### *Mateus 26.57-68; Marcos 14.53-65*

**66** Ko'ẽ aje'ive'i reve nhomongeta va'ety kuery, sacerdote yvatekueve va'e ha'e lei re nhombo'e va'ety kuery onhemboatypa okuapy.\* Ha'e vy ogueru ruka omboayvu aguã. Ha'e vy aipoe'i ixupe:

**67** — Ndee ma Cristo ri vy emombe'u orevy.

Jesus ombovai:

— Xee anhemombe'u ri ramo peẽ kuery ndaperoviai 'rã.

**68** Ha'e gui xee aporandu ramo peẽ kuery voi naxembovai 'rã.

**69** Aý gui ma voi Ava ra'y ojeapo va'ekue oguapy 'rã Nhanderuete Ipo'akapa va'e oiporu kuua regua re — he'i.

**70** Ha'e ramo ha'e javive aipoe'i:

— Ndee ae ma nhi'ã Nhanderuete Ra'y?

Ombovai:

— Peẽ ae ri tu aipopeje ha'e aikoa rami — he'i.

**71** Ha'e ramo ha'e kuery joupe-upe aipoe'i:

— Mba'erã tu jaipotave hekokue mombe'uarã? Mba'eta nhande kuery ae nhaendu ijuru gui.

## 23

### *Mateus 27.1,2,11-14; Marcos 15.1-5; João 18.28-38*

**1** Ha'e gui ijaty okuapy va'ekue opu'ãmba vy ogueraa Jesus huvixa Pilatos-a py.

**2** Ha'e py ju hexe ijayvu vy aipoe'i okuapy:

— Kova'e ava ma rojou heta va'e kuery ombo'e vaikue rei rã, mba'eta aipoe'i huvixa César pegua imposto repy rome'ẽ ve'ý aguã. Aipoe'i avi Cristo huvixave oikoa rami — he'i okuapy.

\* **22:63** Mateus 26.67,68; Marcos 14.65    \* **22:66** João 18.19-24

<sup>3</sup> Ha'e rami rã Pilatos oporandu ixupe:

— Ndee ma nhi'ã judeu kuery pegua huvixave?

Jesus ombovai:

— Ndee ae ma aipo're — he'i.

<sup>4</sup> Pilatos aipoe'i sacerdote yvatekueve va'e ha'e heta va'e kuery ijaty va'e pe:

— Xee ma mba'eve py ndajoui kova'e ava otekoavyague.

<sup>5</sup> Ha'e ramo ha'e kuery aipoe'ive tema:

— Ha'e rami avi ojapo heta va'e kuery opa marã rei ikuai aguã rami, Judéia ha'e javi rupi ombo'e vy, Galiléia py omboypyä gui apy peve — he'i okuapy.

<sup>6</sup> Ha'e rami Pilatos oendu vy oporandu Galiléia pygua paa re.

<sup>7</sup> Ha'e vy huvixa Herodes openaa pygua oikoa oikuua vy ha'e va'e pe ju omboaxa, mba'eta ha'e jave py Jerusalém py oĩ avi ramo.\*

### *Herodes renonde ju Jesus ojexa ukaague*

<sup>8</sup> Herodes ma Jesus oexa vy ov'y'a vaipa, mba'eta yma ma oexaxe, hekokue oendu rire. Oexaxe avi hexa pyrã ojapo rã.

<sup>9</sup> Ha'e rami vy opa marã re oporandu teĩ Jesus mba'eve py nombovai.

<sup>10</sup> Sacerdote yvatekueve va'e ha'e lei re nhombo'e va'ety kuery ha'e py ikuai avi va'e ma hekokue ramigua omombe'u okuapy ijayvu rei vy.

<sup>11</sup> Ha'e rami rã Herodes oguereko vaikue rei oxondaro kuery reve. Ha'e vy peteĩ ao iporãve va'e py omonhemonde vy Pilatos-a katy ju omondouka.

<sup>12</sup> Ha'e va'e ára guive Herodes ha'e Pilatos joayvu, joe nda'i ja'e ete va'ekue ri.

*Mateus 27.15-26; Marcos 15.6-15; João 18.39-19.16*

<sup>13</sup> Ha'e gui ma Pilatos omboatypa sacerdote yvatekueve va'e ha'e huvixa kuery heta va'e kuery reve.

<sup>14</sup> Ha'e vy aipoe'i:

— Kova'e ava ma peẽ kuery Peru kuri penetarã kuery opa marã rei ombo'ea rami peikuua vy. Ha'e gui ma pendua py xee amboayvu teĩ mba'eve rei ndaikuaai pen-deayuague ramigua.

<sup>15</sup> Neĩ huvixa Herodes voi ndoikuaai kuri. Ha'e rami vy ae xea py ju ombou. Ha'e nunga rupi xee aikuua rã mba'eve ndojapo vai omano aguã.

<sup>16</sup> Ha'e rami vy ainupã uka ta, ha'e gui ma apoi uka ju 'rã — he'i.

<sup>17</sup> [Mba'eta ngaru oikoa ára nhavõ opoi jepi 'rã peteĩ nhuã py oĩ va'e.]

<sup>18</sup> Ha'e rami rã heta va'e kuery ha'e javi ojapukai vy

— Eraa upa va'e, ha'e vy epoi Barrabás orevy — he'i okuapy.

<sup>19</sup> Barrabás ma nhuã py oĩ, tetã rupi nhomopu'ãmba rei ha'e jojukaague re.\*

<sup>20</sup> Ha'e gui ma Pilatos ma teĩgue ju aipoe'i Jesus opoixeia rami.

<sup>21</sup> Ha'e rami teĩ ha'e kuery ma hatâve tema ojapukai okuapy:

— Emoĩ kuruxu re, emoĩ kuruxu re! — he'i okuapy.

<sup>22</sup> Ha'e ramo mboapykuea ma Pilatos oporandu ha'e kuery pe:

— Mba'e nunga py tu ojapo vai raka'e? Xee ma hexe mba'eve ndaikuaai ajuka uka aguã. Ha'e nunga rupi ainupã ukapa rire apoi ju 'rã — he'i.

<sup>23</sup> Ha'e rami rã katuve ma hatâve tema ojapukai okuapy kuruxu re omoĩ aguã re. Ha'e kuery ojapukaia ipo'aka.

<sup>24</sup> Ha'e ramo Pilatos ojapo nho ha'e kuery ojerurea.

<sup>25</sup> Ha'e rami vy opoi nhomopu'ãmba rei va'ety jojukaague py nhuã py oĩ va'e. Ha'e rã Jesus ma omboaxa ha'e kuery oipotaa rami oguereko aguã.

*Mateus 27.32; Marcos 15.21*

\* <sup>23:7</sup> Huvixa Herodes ma Galiléia yvy re opena va'e (Lucas 9.7-9). Ha'e nunga rupi ixupe ju Pilatos omboaxa Jesus.

\* <sup>23:19</sup> Atos 3.13,14

<sup>26</sup> Ha'e gui ma Jesus reraa kuery ovaexī peteī ava Cirene pygua Simão hery va'e, mba'ety gui ou va'ekue. Ha'e vy ha'e va'e axi'y áry ju omoī kuruxu, Jesus rakykue ogueraa aguā.

### *Jesus ojuka aguā katy ogueraa ague*

<sup>27</sup> Hakykue heta oje'oi, amongue kunhague voi ipy'a vai vy opexo re oipete-pete oje'ivvy.

<sup>28</sup> Ha'e rami rā Jesus ojere vy aipoe'i ha'e kuery pe:

— Jerusalém memby kuery, pejae'o eme xere, ha'e rā pendejee ha'e penememby kuery re 'rā pejae'o.

<sup>29</sup> Mba'eta ovaē 'rā aipopeje aguā ára: “Ovy'a ete 'rā imemby e'ŷ va'e, noikuavāi, neī nomokambui va'e”, peje aguā.

<sup>30</sup> Ha'e va'e ára aipopeje 'rā yvyty pe: “Pe'a ke ore'áry”, ha'e yvy'â'i pe “Oreao'i ke” peje 'rā.\*

<sup>31</sup> Mba'eta yvyra pyau re ha'e rami ojapoa rire, mba'e tu ojapoa 'rā ipirukue re? — he'i.<sup>†</sup>

<sup>32</sup> Mokoī avi ogueraa joapo vai va'ety hexeve ojuka aguā katy.

*Mateus 27.33-44; Marcos 15.22-32; João 19.17-27*

<sup>33</sup> Ha'e gui ma peteī henda py ovaē Calvário 'epy va'e py. Ha'e py omoī kuruxu re, joapo vai va'ety kuery guive: peteī ijaxu e'ŷa re, ha'e rā amboae ma ijaxua re.

<sup>34</sup> Ha'e ramo Jesus aipoe'i:

— Xeru, erperdoa ke, mba'eta ha'e kuery ndoikuaai mba'e pa ojapoa — he'i.

Ha'e gui ma ijao omboja'o-ja'o xortea oexa vy.

<sup>35</sup> Heta va'e kuery ha'e py ikuai va'e oexa okuapy oiko va'e. Huvixa kuery voi oojai rei vy aipoe'i:

— Âmboae kuery ogueraa jepe rire ha'e ae ju tojereraa jepe, anhetē ri Cristo Nhan-deruete rembiporavo oiko vy — he'i okuapy.

<sup>36</sup> Xondaro kuery voi ha'e rami ojojai rei reve onhemboja vy vinagre ogueru oy'u aguā. Ha'e vy aipoe'i:

<sup>37</sup> — Judeu kuery pegua huvixave ri reiko vy ejereraa jepe ha'vy ndee ae — he'i.

<sup>38</sup> Inhakā áry omoīa avi ipara [grego, romano ha'e hebraico ayvu py]: “*Kova'e majudeu kuery pegua huvixave*” he'ia.

### *Mokoījoapo vai va'ety ijayvuague*

<sup>39</sup> Peteī joapo vai va'ety kuruxu re oī va'e ojojai rei vy aipoe'i ixupe:

— Ndee Cristo e'ŷ ri ty'y? Ejereraa jepe na ndee ae, ore avi.

<sup>40</sup> Ha'e rā amboae ma oirū ombovai vy ijayvu ete ixupe. Ha'e vy aipoe'i:

— Nhandeuete renonde teī ndee neremoī va'e ty'y rejererokyje aguā? Mba'eta peva'e rami nhanembopagaa.

<sup>41</sup> Ha'e gui nhande ma ha'evea rami jajexavai, jajapoague py japaga aguā. Ha'e rā peva'e ma mba'eve ndojapo vai — he'i.

<sup>42</sup> Ha'e vy aipoe'ive ju:

— Jesus, nema'endu'a ke xere ndepo'akaa rupi reju jevy ma vy.

<sup>43</sup> Jesus ombovai:

— Anhetē aipoa'e ndevy: Kova'e árave reī 'rā xereve 'amba marā e'ŷ py — he'i.

*Mateus 27.45-56; Marcos 15.33-41; João 19.28-30*

<sup>44</sup> Kuaray mbyte rai'i jave kuaray naexakāvei. Yvy jave re pytūmba kuaray ojero'a puku peve.

<sup>45</sup> Ha'e gui henda iky'a e'ŷ va'e ropy ajukue okē regua oī va'e oxoro mbyte rupi.

<sup>46</sup> Ha'e gui ma Jesus ojapukai atā:

\* <sup>23:30</sup> Oséias 10.8, Lucas 21.20-24; Apocalipse 6.15-17   † <sup>23:31</sup> “Yvyra pyau oapya aguā rami e'ŷ opyta va'e” he'ia ma heko porā va'e re ijayvu vy, ha'e rā “Ipirukue” he'ia ma opaga aguā rami ikuai va'e re ijayvu vy (Ezequiel 20.47, 21.3).

— Xeru, ndepo py amboaxa xenhe'ẽ — he'i. Po rami ijayvu vyve omano.\*

<sup>47</sup> Ha'e nunga xondaro ruvixa oexa vy omboete Nhanderuete. Ha'e vy aipoe'i:

— Anhetẽ ae ra'e kova'e ava heko porã va'ekue — he'i.

<sup>48</sup> Heta va'e kuery ha'e py mba'emo oiko va'e oexa aguã ijatypa va'ekue ojepe'apa ju, ipy'a vai vy opexo re oipete-pete reve.

<sup>49</sup> Ha'e rã Jesus rexaaty kuery ha'e kunhague Galiléia guive hupive oje'oi va'ekue ma mombyry'i opytapa okuapy oma'ẽ aguã.

*Mateus 27.57-61; Marcos 15.42-47; João 19.38-42*

<sup>50</sup> Peteĩ ava oiko avi José hery va'e, nhomongeta va'ety kuery regua heko porã va'e.

<sup>51</sup> Ha'e va'e ma ndojou porãi oirũ kuery ojapoague. Ha'e ma judeu kuery rekoa Arimatéia pygua, Nhanderuete po'akaa oarõ oikovy va'e.

<sup>52</sup> Ha'e va'e ma Pilatos-a py oo vy ojerure Jesus retekue re.

<sup>53</sup> Ha'e rami vy yvyra gui omboguejy vy onhovã ajukue xii porã va'e py, ha'e peteĩ itaova re ojo'o pyre py onhono porã, avave rei nonhono porãai teria py.

<sup>54</sup> Ha'e va'e ára ma mba'emo oguereko katupaa ára, ha'e sábado ovaẽ rai'i ma.

<sup>55</sup> Galiléia gui kunhague Jesus rupive ou va'ekue oje'oi avi oexa aguã itakua hetekue onhono porãague.

<sup>56</sup> Ha'e vy ojevy ju heakuã porã va'e oguereko katu aguã imoeakuãarã.

Ha'e gui sábado ára ma opytu'u ranhe okuapy ojapo uka pyre rami vy.

## 24

*Mateus 28.1-8; Marcos 16.1-8; João 20.1-13*

<sup>1</sup> Semana ijypyá ára aje'ive reve kunhague ma hupa katy ju oje'oi, heakuã porã va'e oguereko katu va'ekue ogueraa vy.

<sup>2</sup> Ha'e kuery oexa rã ita ombojerea ma ra'e itakua rokẽ gui.

<sup>3</sup> Ha'e kuery oike teĩ Senhor Jesus retekue ma ndojou.

<sup>4</sup> Ha'e gui ma ha'e kuery ndoikuuai rei okuapy jave mokoõ avakue ojexa uka ijaõ hexakãmba va'e.

<sup>5</sup> Ha'e ramo kunhague okyje vy yvy re anho oma'ẽ joguerokuapy. Ha'e ramo ha'e kuery pe avakue aipoe'i:

— Mba'e re tu peka oikove va'e omanogue rupa rupi?

<sup>6</sup> Ha'e va'e ma apy noïvei ma, onhemboete ju ma. Penema'endu'a ke Galiléia py teri oiko vy ijayvuague re:

<sup>7</sup> “Ava ra'y ojeapo va'ekue ma omboaxaa 'rã heko vai va'e kuery po py. Kuruxu re omoõ rire mboapy araa py onhemboete ju 'rã”, he'iague re.

<sup>8</sup> Ha'e ramo mae kunhague ima'endu'a ijayvuague re.

<sup>9</sup> Ha'e rami vy hupa gui ojevy vy omombe'upa hemimbo'e kuery onze-ve va'e ha'e hexeveguá kuery ha'e javi pe.

<sup>10</sup> Apóstolo kuery pe omombe'u va'e ma Maria Madalena, Joana ha'e Maria Tiago xy va'e. Ha'e kuery reve oo va'ekue voi omombe'u.

<sup>11</sup> Ha'e rami teĩ apóstolo kuery pe rã ha'e va'e ayvu omombe'u rive merami. Ha'e vy ndogueroviai.

<sup>12</sup> Ha'e rã Pedro ma opu'ã vy onha ovu hupa katy. Ha'e gui ojeyvy reve oma'ẽ vy mba'eve ndoexai, ajukue inhovãague e'ŷ vy. Ha'e vy ngoo katy ju oo, mba'emo oiko va'ekue gui onhemondyi reve.

*Marcos 16.12,13*

<sup>13</sup> Ha'e va'e árave ha'e kuery va'e regua mokoõ jogueraa peteĩ tekoa Emaús 'epy va'e katy, Jerusalém tetã gui dez quilômetro rivyyvia katy.

<sup>14</sup> Ha'e va'e kuery ma mba'emo oiko va'ekue ha'e javi re ijayvu jogueravy.

\* **23:46** Salmo 31.5

**15** Ijayvu tema jogueravy jave Jesus oupity vy oo avi ha'e kuery reve.

**16** Ha'e rami teĩ ha'e kuery ndoexa kuaai ranhe, hexa mo'ãa va'e rami.

**17** Ha'e ramo Jesus oporandu:

— Mba'e nunga re tu pendeayvu peovy peguataa rupi?

Ha'e ramo ha'e kuery opyta iporiau reve.

**18** Ha'e kuery regua peteĩ ombovai, Cleopas hery va'e. Ha'e vy aipoe'i:

— Jerusalém tetã py reiko avi va'eri ndereikuuai teve kuee rupi mba'emo oiko va'ekue?  
Ndee anho rima ndereikuuai teri ra'e — he'i.

**19** Ha'e ramo oporandu:

— Mba'e nunga tu?

Ombovai:

— Jesus Nazaré pygua va'e re oiko va'ekue. Ha'e va'e ma Nhanderuete renonde profeta ipo'akapa va'e oiko va'ekue ayvu py ha'e mba'emo ojapoa py, heta va'e kuery ha'e javi oexaa rupi guive.

**20** Sacerdote yvatekueve va'e ha'e nhanderuvixa kuery omboaxa imbopagaarã po py, kuruxu re ojuka uka aguã.

**21** Ore kuery ma roexa'ã teĩ Israel kuery reraa jepearã oikoa re. Ha'e rami avi kova'e ára reve vy mboapy ára ma ojapo ha'e nunga oikoague.

**22** Anhetẽ avi amongue ore kuery revegua kunhague ange oremondyipave ju, mba'eta ko'ẽ e'ý re onhono porãague py oje'oi

**23** teĩ ndojouvei Jesus retekue. Ha'e vy ojevy vy aipoe'i anjo oexaague rami oikove jevy maa omombe'u va'e.

**24** Oreirũ kuery regua mboae ma onhono porãague py oo avi oikuaaxe vy kunhague omombe'ua anhetẽ paa. Ha'e rami teĩ ndoexai ae — he'i.

**25** Ha'e rami rã Jesus aipoe'i ha'e kuery pe:

— Napene'arandui ha'e peneakã ratã va'e perovia aguã profeta kuery omombe'u va'ekue.

**26** Cristo nda'u ndoiko vai 'rã ri guexakãa py oike aguã? — he'i.

**27** Ha'e rami vy Moisés ayvukue gui omboypy vy profeta kuery ha'e javi ayvukue re ijayvu, guekorã re ipara oĩ va'e omombe'u porãve vy.

**28** Ha'e gui ma ha'e kuery tekao ovaõxeague py ovaõ ramo Jesus oove aguã re ijayvu.

**29** Ha'e rã ha'e kuery ma oguerovaõxe vy aipoe'i:

— Evaõ na orea py, mba'eta ka'aru ma, pytã ma — he'i. Ha'e ramo ha'e kuery reve ovaõ opyta aguã.

**30** Ha'e gui mesa py ovaõmba ma ramo Jesus ma mbojape ojopy vy oguerovy'a. Ha'e vy oipe'ã vy ome'ẽ ha'e kuery pe.

**31** Ha'e ramove ha'e kuery rexo ojepe'a rã oexa kuaa ju. Ha'e rã okanhy xapy'a ha'e kuerya gui.

**32** Ha'e rami rã joupe aipoe'i:

— Anhetẽ ae rãke tape rupi jaguataa rupi nhandepy'a re nhaendu kuri javy'aa nhandevy kuaxia para omombe'u porãve rã — he'i.

**33** Ha'e vyve opu'ã vy Jerusalém katy ju ojevy jogueravy onze hemimbo'e kuery ijatypa okuapya py amboae kuery reve.

**34** Ha'e ramo ha'e va'e kuery ranhe aipoe'i:

— Senhor onhemboete ju vy ojexa uka ma kuri Simão pe — he'i okuapy.

**35** Ha'e gui mokoõve ju omombe'u tape rupi oiko va'ekue, ha'e mbojape oipe'ã rã oexa kuaa ague.

**36** Ha'e nungakue re ha'e kuery ijayvu teri reve Jesus ae ojekuaa ho'amy ha'e kuery mbyte.\* Ha'e vy aipoe'i:

— Toĩ peẽ kuery re mby'a porã.

**37** Ha'e kuery onhemondyipa vy “Ãgue po ojexa uka” he'i.

**38** Ha'e ramo aipoe'ive ju:

— Mba'e re tu penhemondyipa, ha'e pendep'y'a re oĩ ri ndaperoviai aguã?

**39** Pema'ẽ ha'vy xepo ha'e xepy re, xee ae aikoa peikuaa aguã. Pepoko na xere perovia aguã, mba'eta ãgue ma ndao'oi, neĩ na'ikãguei xee rami e'ŷ — he'i.

**40** Po rami ijayvu vy oexa uka opo ha'e opy.

**41** Ha'e kuery ovy'a ha'e onhemondyi vy ndogueroviai teri rã Jesus aipoe'i:

— Mba'eve ndaperekoi pa ha'u va'erã?

**42** Ha'e ramo ixupe ome'ẽ peteĩ pira mbixy pãgue'i [ha'e ei hetãgue'i reve].

**43** Ha'e ramo ha'e kuery oexaa py ho'u.

### *Kuaxia para Jesus omombe'u porãveague*

**44** Ha'e gui ma Jesus aipoe'i ha'e kuery pe:

— Pendereve aiko teri vy aipoa'e va'ekue: “Ojeupity 'rãe xerekorã Moisés lei oeja va'ekue, profeta kuery ayvukue ha'e Salmo re oĩa rami”, he'iague.

**45** Ha'e rami vy ha'e kuery pe omombe'u porãve ipara oiny va'e.

**46** Ha'e vy aipoe'i:

— Po rami ipara oiny: Cristo omano, ha'e gui mboapy araa py onhemboete ju 'rã va'ekue ae.

**47** Ha'e gui hery rupi yvy jave re ikuai va'e pe omombe'ua 'rã ojeko rerova aguã, ojeavyague omboguepaa aguã. Jerusalém tetã gui ijypy 'rã.

**48** Ha'e gui peẽ kuery ae ha'e nunga mombe'uarã pendekuai.\*

**49** Ha'e ramo pendevy ambou 'rã Xeru ome'ẽ 'rã va'ekue. Ha'e nunga rupi pepyta ranhe tetã py, yvate gui penembopo'akaarã pendere onhemonde e'ŷa ja.\*

### *Marcos 16.19,20*

**50** Ha'e gui ma Betânia tekoá peve guemimbo'e kuery ogueraa vy opo oupi reve ogueroayvu porã.

**51** Ogueroayvu teri reve ojepe'a ovy ha'e kuerya gui, yva re oupia heravy ramo.\*

**52** Ha'e ramo ha'e kuery omboete vy Jerusalém katy ojevypa jogueravy ovy'a reve.

**53** Ha'e vy templo py tema ikuai Nhandruete omboetea py.

---

\* **24:36** Mateus 28.16-17; Marcos 16.14   \* **24:48** Mateus 28.18-20; Marcos 16.15-18   \* **24:49** Atos 1.6-8   \* **24:51** Atos 1.9-14

## João ayvu porā ombopara va'ekue João ayvu porā ombopara va'ekue

Kova'e kuaxia Jesus rekoke oña ma hemimbo'e João ombopara va'ekue. Jypy'i João Jesus pe "Nhanderuete Ayvu" he'i ombojoja vy, mba'eta nhandeayvu ma nhandepy'a re oī va'e kuaa ukaa. Ha'e rā Jesus ou raka'e oexa uka aguā Nhanderuete nhanderayvu etea. "Mba'eta Nhanderuete yvy re ikuai va'e oayvu vy ome'ē Gua'y peteī'i va'e, hexe ojerovia va'e okanhy e'ŷ aguā, ha'e rā tekove marā e'ŷ oupity aguā. Mba'eta ko yvy re Nhanderuete Gua'y ombou yvy regua kuery ombopaga aguā e'ŷ, ha'e rā hexeve vy yvy re ikuai va'e oo jepe aguā" (3.16-17). "Avave rei ndoexai Nhanderuete, teī Nhanderuete Ra'y peteī'i va'e Nguu revegua ae oikuua uka" (1.18).

Mba'exa 'rā tu "Nhanderuete Ra'y peteī'i va'e" he'ia py jaikuua? Mba'eta Jesus ae "Xee ha'e Xeru reve ma peteī'i ae roiko", he'i (10.30). Nguu reve peteī'i inhe'ē va'e oiko Nguu oipotaa rami anho, ha'e Nguu ipy'aa oexa uka guive raka'e. Nguu rami ae avi ojejavy e'ŷ va'e oiko.

Kova'e kuaxia para py Jesus onhemombe'u porā: "Xee ma mbojape tekove me'ēa. Xere ou va'e kuery noenduvei'rā okaruxea, xere ojerovia va'e ma noenduvei'rā yuvei" (6.35); "Xee ma hendy va'e yvy regua kuery moexakāarā. Xerupive ikuai va'e ma pytū rupi ve'ŷ 'rā oiko, mba'eta ha'e kuery re oī 'rā hendy va'e nhomoingovea" (8.12); "Xee ma okē aī. Xea rupi oike va'e kuery oo jepe 'rā" (10.9); "Xee ma vexa'i re opena porā va'ety rami aiko. Mba'eta opena porā va'ety ma guymba kuery re ome'ē 'rā guekove ae" (10.11-12); "Xee ae ma anhomboete ha'e anhomingoive va'e. Xere ojerovia va'e omano teī oikove jevy 'rā. Ha'e rami avi ha'e javive xere oiko ha'e ojerovia va'e ma nomanoi 'rā raka'eve rā peve guarā" (11.25-26); "Xee ae ma tape, anhetē va'e ha'e tekove. Avave rei ndooi 'rā Xerua py xereve'ŷ vy" (14.6).

Kova'e kuaxia João ombopara vy oito henda py omombe'u hexa pyrā Jesus ojapoague Nguuete reko oikuua uka vy. Aipoe'i: "Jesus hexa pyrā heta ojapo raka'e guemimbo'e kuery oexaa rupi. Ha'e nungakue ha'e javi e'ŷ ipara oiny kova'e kuaxia re. Ha'e rā kova'e re ipara oinya ma peē kuery perovia aguā Jesus ae Cristo Nhanderuete Ra'y oikoa, pejerovia vy tekove peupity aguā hery rupi" (20.30-31).

### *Jypy'i guive Ayvu oiko va'ekue ava ju ojeapoague re ijayvua*

<sup>1</sup> Jypy'i guive Ayvu oiko. Ayvu ma Nhanderuete reve oiko raka'e, ha'e Ayvu ma Nhanderuete ae.\*

<sup>2</sup> Ha'e ma jypy'i guive oiko raka'e Nhanderuete reve.

<sup>3</sup> Ha'e va'e rupi ae opa mba'e ojapoa raka'e. Neī peteī've ma ndoikoi ha'e ojapo va'ekue'ŷ.\*

<sup>4</sup> Hexe oī tekove, ha'e hekove ma avakue moexakāarā oī.

<sup>5</sup> Hendy va'e ma pytū rupi hexakā, pytū ma hexe nda'ipo'akai.

<sup>6</sup> Oiko raka'e peteī ava Nhanderuete ombou va'ekue João hery va'e.\*

<sup>7</sup> Ha'e va'e ma imombe'uarā ou, hendy va'e rekorā kuaa ukaarā, hendy va'e ou rā hexe pavē ojerovia aguā.

<sup>8</sup> João ma hendy va'e ete e'ŷ, hendy va'e mombe'uarā rive ou.

<sup>9</sup> Hendy va'e ete ma yvy re ou vy omoexakā 'rā avakue ha'e javi.

<sup>10</sup> Ha'e gui Ayvu ma yvy ixupe ojapo ukaa va'ekue re ae ou teī yvy regua kuery ndoexa kuaai.

<sup>11</sup> Guetarā kuerya py ae ou teī hetarā kuery nomovaēi.

---

\* **1:1** Ayvu py ma jaikuua uka 'rā nhandepy'a re oī va'e. Ha'e gui Jesus Cristo ma Nhanderuete py'a re oī va'e kuaa ukaarā ou (versículo 18; Colossenses 1.15). \* **1:3** Colossenses 1.16,17; Hebreus 1.1-4; 1 João 1.1-4 \* **1:6** João 1.15-37; Marcos 1.2-8; Atos 19.4

<sup>12</sup> Ha'e rā ojee omovaẽ va'e ha'e javi pe ma ome'ẽ Nhanderuete ra'y kuery ikuai aguã, hery rupi ojerovia va'e kuery pe ae.

<sup>13</sup> Ha'e va'e kuery ma avakue gui rive'ŷ oiko, to'o oipotaa rami e'ŷ, neĩ nguu kuery gui rive'ŷ guive. Ha'e kuery ma Nhanderuete gui ae oiko va'e.

<sup>14</sup> Ha'e gui Ayvu ma ava ojeapo vy oiko va'ekue ore kuery mbyte rupi. Hexe oĩ va'e ma nhomboaxya ha'e anhetẽ va'e anho. Hexakãmbaa avi roexa karamboae, Nhanderuete Ra'y peteĩ'i va'e ramo.

*João Batista Jesus rekorã omombe'u porãveague*

<sup>15</sup> Hekorã ma João omombe'u ma voi. Ha'e vy aipoe'i:

— Hekorã re ae xeayvu va'ekue. Aipoa'e: "Xee aju rire ojekuaa 'rā peteĩ xegui yvateve ete va'e, mba'eta xee aiko e'ŷ mbove ha'e oiko ae ma", ha'e va'ekue — he'i.

<sup>16</sup> Mba'eta ojee mba'emo porã oĩ va'e ome'ẽ nhande kuery ha'e javi pe, nhanemboaxya oexa uka jepi.

<sup>17</sup> Mba'eta lei ma Moisés pe oikuaa ukaa raka'e. Ha'e rā nhomboaxya ha'e anhetẽ va'e ma Jesus Cristo rupi ae ojekuaa.

<sup>18</sup> Avave rei ndoexai Nhanderuete, teĩ Nhanderuete Ra'y peteĩ'i va'e Nguu revegua ae oikuaa uka.

*Mateus 3.1-12; Marcos 1.2-8; Lucas 3.1-18*

<sup>19</sup> Po rami ae João omombe'u hekorã. Mba'eta Jerusalém tetã gui judeu ruvixa kuery omondouka oirũ sacerdote ha'e levita kuery ixupe oporandu aguã. Ha'e ramo aipoe'i:

— Marã ramigua tu ndee reiko? — he'i okuapy.

<sup>20</sup> Ha'e ramo João onhemombe'u porã, nda'ijapui. Ha'e vy aipoe'i:

— Xee ma Cristo e'ŷ — he'i.

<sup>21</sup> Ha'e ramo ha'e kuery oporanduve ju:

— Marã ramigua ha'vy ndee? Tyrã pa profeta Elias?

Ombovai:

— Xee ma ha'e'ŷ — he'i.

Ha'e kuery oporandu ju:

— Tyrã pa ndee profeta ou va'erã va'e reiko?

— Any — he'i ombovai vy.<sup>†</sup>

<sup>22</sup> Ha'e ramo ha'e kuery aipoe'i:

— Emombe'u porã orevy marã ramigua pa reikoa, oremboquare kuery pe ju romombe'u aguã.

<sup>23</sup> Ombovai:

— Xee ma tekaoa e'ŷa rupi ajapukai aikovy vy "Pembo'yvi ke tape Senhor ou aguã", ha'e va'e, profeta Isaías ijayvuague rami vy — he'i.\*

<sup>24</sup> João-a py omondouka pyre kuery ma fariseu regua meme.

<sup>25</sup> Ha'e gui ha'e kuery aipoe'i:

— Mba'e re tu ha'vy renhomongarai reikovy, Cristo e'ŷ, Elias e'ŷ neĩ profeta e'ŷ va'eri?

<sup>26</sup> Ha'e ramo João ombovai:

— Xee ma yy py rive anhomongarai va'e. Ha'e rā peẽ kuery mbyte rupi peteĩ oiko ndapeikuuai va'e,

<sup>27</sup> xerakykue ou va'e. Ixugui ma xe'yvyf'live ete vy nda'evei ipy regua amboi aguã voi — he'i.

<sup>28</sup> Ha'e rami João ijayvu Jordão yakã rovai re, Betânia katy'i nhomongarai oikovya py.

*João Batista peteigue ju Jesus rekorã omombe'u porãveague*

<sup>29</sup> Ko'ẽ jevy João oexa Jesus ha'e katy ou oiny rā. Ha'e vy aipoe'i:

\* <sup>1:21</sup> Judeu kuery oikuaa rā Cristo ou e'ŷ mbove Nhanderuete ombou jevy 'rā profeta Elias imombe'uarã (Malaquias 4.5-6). Ha'e rā "Profeta ou va'erã va'e" he'ia ma Deuterônômio 18.15-18 py oña gui oikuaa. \* <sup>1:23</sup> Isaías 40.3

— Pee ma ou oiny Nhanderuetea guigua vexa'i, yvy re ikuai va'e reko vaiaty pe'aarã.<sup>‡</sup>  
 30 Hekorã re ae xeayvu vy "Raka'eve rã ou 'rã peteĩ ava xegui yvateve ete va'e, mba'eta xee aiko e'ŷ mbove ha'e oiko ae ma", ha'e va'ekue.

31 Xee eteve voi ndaikuuaai va'ekue mava'e pa ha'e oikoa. Ha'e rami avi Israel kuery oikuua aguã xemboua karamboae yy py anhomongarai aguã — he'i.

*Mateus 3.13-17; Marcos 1.9-11; Lucas 3.21,22*

32 João aipoe'i:

— Xee ma aexa karamboae Nhe'ẽ apykaxu'i rami yva gui oguejy ouvy vy hexe oĩ rã.  
 33 Xee voi ndaikuuaai teri va'ekue ha'e oikoa. Ha'e ramo yy py anhomongarai aguã xembou va'ekue aipoe'i: "Rexa 'rã Nhe'ẽ oguejy ouvy vy peteĩ ava re oĩ rã. Ha'e va'e ae ma Nhe'ẽ Ky'a E'ŷ reve nhomongarai va'erã", he'i va'ekue xevy.

34 Ha'e gui ha'e va'ekue ma xee aexa ete karamboae. Ha'e rami vy ae pěvy aikuua uka Nhanderuete Ra'y oikoa.

*Jesus rupive João Batista remimbo'e kuery mokoĩ oje'oiague*

35 Ko'ẽ jevy João oiko mokoĩ guemimbo'e reve.

36 Oexa Jesus oaxa rã. Ha'e vy aipoe'i:

— Peva'e ma Nhanderuetea guigua vexa'i — he'i.

37 Po rami ijayvu rã hemimbo'e mokoĩve oendu vy oje'oi Jesus rupive.

38 Ha'e gui Jesus guakykue re oma'ẽ vy oexa ha'e kuery ou rã. Ha'e vy aipoe'i:

— Mba'e re tu peju?

Ha'e kuery aipoe'i:

— Rabi, mamo tu ndee rekeaty? — he'i. "Rabi" ma "Porombo'ea" 'ea.

39 Ha'e ramo aipoe'i ha'e kuery pe:

— Peju ha'vy pexa peikuaa aguã — he'i. Ha'e ramo ha'e kuery oje'oi vy oexa okeaty, ha'e ka'aru ma ramo opyta hexeve.

40 Ha'e gui João ijayvu rã hemimbo'e kuery oendu vy Jesus rupive oje'oi va'ekue regua peteĩ ma Simão Pedro ryvy André.

41 Ha'e va'e ma guyke'y Simão-a py ranhe oo. Ha'e vy aipoe'i guyke'y pe:

— Ore rojou ma Messias — he'i. "Messias" ma "Cristo" 'ea.<sup>§</sup>

42 Ha'e rami vy guyke'y ogueraa Jesus-a py.

Ha'e gui ha'e va'e re Jesus oma'ẽ vy aipoe'i:

— Ndee ma Simão, João ra'y reiko. Aŷ gui ma nderery 'rã Cefas — he'i. "Cefas" ma "Pedro" 'ea.

*Jesus guemimbo'erã Filipe ha'e Natanael oenoīague*

43 Ko'ẽ jevy Jesus onhembopy'a Galiléia katy oo aguã. Ha'e ramia ja oexa Filipe. Ha'e vy aipoe'i ixupe:

— Jaa ke xerupive — he'i.

44 Filipe ma Betsaida tetã pygua, André ha'e Pedro reve ha'e py hekoa va'e.

45 Ha'e gui Filipe ma oo oeka Natanael. Ojou vy aipoe'i:

— Roexa ma Moisés lei re omboparaague, ha'e profeta kuery voi omombe'u va'ekue. Ha'e va'e ma José ra'y Jesus Nazaré pygua va'e — he'i.

46 Ha'e ramo Natanael oporandu:

— Nazaré gui nda'u oiko 'rã ri mba'emo porã?

Filipe ombovai:

— Jaa ha'vy exa — he'i.

47 Ha'e gui Natanael ovaẽ ouvy rã Jesus oexa vy aipoe'i:

<sup>‡</sup> 1:29 Jesus pe "Nhanderuete guigua vexa'i" he'i, mba'eta omanoa py opaga raka'e nhanderekoo vaiaty re (Êxodo 12.3-13, Isaías 53.7-11, 1 Pedro 1.18,19, Apocalipse 5.6). <sup>§</sup> 1:41 Tery Messias ma hebraico ayvu pygua, ha'e rã tery Cristo ma grego pygua. Mokoĩve joo rami he'ia va'e, "Nhandereraa jepearã Nhanderuete ombou va'e" he'ia.

- Pee ma ou peteĩ Israel regua anhetẽ rupi ete oiko va'e — he'i.
- <sup>48</sup> Ha'e ramo Natanael oporandu:
- Mamo ha'vy ndee xerexa ra'e?
- Jesus ombovai:
  - Ndevy pe Filipe xemombe'u e'ŷ mbove ma voi xee roexa kuri figo'y yvypy py reĩ rã — he'i.
  - <sup>49</sup> Ha'e rami rã Natanael aipoe'i:
  - Porombo'ea, ndee ma Nhanderuete Ra'y, Israel kuery pegua huvixave ae — he'i.
  - <sup>50</sup> Ha'e gui Jesus aipoe'i:
    - Ndee ma ha'e rami aikoa rerovia mba'eta “Figo'y yvypy py reĩ rã roexa”, ha'e ramo rive. Ha'e gui raka'eve rã mba'emo ndevy aikuua uka 'rã pova'e gui iporâve va'e.
  - <sup>51</sup> Mba'eta anhetẽ aipoa'e pêvy: Raka'eve rã pexa 'rã yva ojepe'a rã, ha'e Nhanderuetea guigua anjo kuery ojeupi ha'e oguejy ramo Ava ra'y ojeapo va'ekue re.

## 2

### *Omendaa py Jesus avi ooague*

- <sup>1</sup> Ha'e gui mboapy araa py omendaa ta Caná tetã Galiléia regua py. Ha'e py ma Jesus xy oo.
- <sup>2</sup> Jesus voi hemimbo'e kuery reve oenoĩa avi omendaa aguã py oo aguã.
- <sup>3</sup> Ha'e gui vinho opa ramo ixy omombe'u Jesus pe. Ha'e vy aipoe'i:
  - Ha'e kuery ndoguerekovei ma vinho.
- <sup>4</sup> Jesus ombovai:
  - Kunha, mba'e tu ndee rerekos xereve? Mba'eta xe'ára novaõi teri — he'i.
  - <sup>5</sup> Ha'e ramo tembiguai ikuai va'e pe ju ixy ijayvu:
    - Pejapo tema ha'e ojapo uka va'e rei — he'i.
  - <sup>6</sup> Ha'e py ma mboapy meme yryru tuvixakue ikuai, ita ku'i gui ojapo pyre, oitenta, cem litro ogueraa va'e meme. Ha'e va'e yryru py yy oï va'e ma judeu kuery gueko ramí vy oiporu 'rã mba'emo oiky'a'o aguã.\*
  - <sup>7</sup> Ha'e gui Jesus aipoe'i tembiguai kuery pe:
    - Pemonyëmba yryru ikuai va'e — he'i. Ha'e ramo ha'e kuery omonyëmba.
  - <sup>8</sup> Ha'e gui ma Jesus aipoe'ive ju:
    - Aÿ ma penoõeve ju, ha'e peraa ngaru re opena va'e toa'anga — he'i. Ha'e ramo ha'e kuery ojapo.
  - <sup>9</sup> Ha'e gui ngaru re opena va'e oa'anga vy ojou porã, mba'eta yy gui vinho ojeapo rire. Ha'e rami avi ndoikuuai magui pa vinho oguerua ra'e. Tembiguai kuery yy haraare anho ikuua.
  - Ha'e gui ngaru re opena va'e ndoikuuai rei teri reve oenoĩ omenda va'e.
- <sup>10</sup> Ha'e vy aipoe'i ixupe:
  - Ngaru py ikuai va'e pe ma vinho iporâve va'e ranhe 'rã ome'ëa. Oy'uxea rami oy'u pa ma rire iporã e'ŷve va'e ju 'rã ome'ëa. Ha'e rã ndee ma ha'e rami e'ŷ rejapo, vinho iporâve va'e remoõ porã ra'e aÿ guarã — he'i ndoikuuai vy.

<sup>11</sup> Ha'e nunga Jesus ojapo va'e ma jypy'i hexa pyrã ojapo, Caná tetã Galiléia regua py. Opo'akaa oexa uka ramo hemimbo'e kuery ojerovia hexe.

<sup>12</sup> Ha'e va'e rire ma Cafarnaum katy oo oxy, guyvy kuery ha'e guemimbo'e kuery reve. Ha'e py ma nda'ikuai arei'i.

### *Templo gui Jesus oipe'apaague*

<sup>13</sup> Ovaõi rai ma judeu kuery ngaru Páscoa ojapo aguã ára. Ha'e rami rã Jesus oo avi Jerusalém katy.

\* <sup>2:6</sup> Marcos 7,3,4

<sup>14</sup> Templo py ovaẽ vy oexa vaka, vexa'i ha'e apykaxu vendea kuery ikuai rã, peráta mboekoviaa kuery guive.

<sup>15</sup> Ha'e rami vy mba'emo ryvikue ojopy vy oipoka. Ha'e va'e py ma omondyipa templo ropy gui. Vexa'i ha'e vaka omondyipa, ha'e mesa ikuai va'e oity vy peráta onhoẽmba.\*

<sup>16</sup> Apykaxu vendea kuery pe ma aipoe'i:

— Peipe'apa apy gui kova'e nunga. Pejapo eme Xeru pegua oo mba'emo vendeaty — he'i.

<sup>17</sup> Ha'e rami ojapo rã hemimbo'e kuery oexa vy ima'endu'a ipara oĩ va'e re: “Ndevyguia oo ayvu etea xemombaa 'rã" he'iague re.\*

<sup>18</sup> Templo gui Jesus oipe'apa rã judeu ruvixa kuery oexa vy oporandu ixupe:

— Mba'e nunga 'rã tu rejapo ha'e nunga rejapo aguã re ndepo'akaa kuaa ukaarã?

<sup>19</sup> Ha'e ramo Jesus ombovai:

— Pembovaipa ha'vy kova'e templo, ha'e gui mboapy araa py ajapopa ju 'rã — he'i.

<sup>20</sup> Ha'e ramo judeu ruvixa kuery aipoe'i:

— Kova'e templo ma quarenta e seis ma'etÿa re ojapopa. Mba'exa tu ha'vy ndee mboapy araa pyve ri rejapopa ju ta? — he'i okuapy.

<sup>21</sup> Ha'e rami avi Jesus “Templo” he'ia ma guete re ae ijayvu vy.

<sup>22</sup> O manoague gui onhemboete ju ma rire mae ma hemimbo'e kuery ima'endu'a aipoe'iague re. Ha'e rami vy oguerovia ipara oĩ va'e ha'e Jesus ijayvuague.

### *Jesus re heta ojerovia merami teĩ okuapyague*

<sup>23</sup> Páscoa ára Jerusalém py Jesus oiko jave heta oexa okuapy hexa pyrã ojapo oikovy rã. Ha'e rami vy ojerovia hexe.

<sup>24</sup> Ha'e rã Jesus ma ha'e kuery re ndojeroviai, ha'e javive py'a oikuaapa vy.

<sup>25</sup> Avakue reko ixupe nomombe'uai teĩ ha'e ae oikuaa ha'e kuery py'a re oĩ va'e.

## 3

### *Nicodemos reve Jesus ijayvuague*

<sup>1</sup> Oiko peteĩ ava fariseu regua Nicodemos hery va'e, judeu kuery ruvixa.

<sup>2</sup> Peteĩ pytû ha'e va'e oo Jesus oĩa py. Ha'e vy aipoe'i ixupe:

— Porombo'ea, ore kuery roikuuaa ndee Nhanderuetea gui ae rejuvene nhombo'earã, mba'eta hexa pyrã ndee rejapo reikovy va'e nunga avave rei ndojapo kuaai 'rã, hexeve Nhanderuete oiko e'ÿ re — he'i.

<sup>3</sup> Jesus ombovai:

— Anhetê ete aipoa'e ndevy: Avave rei ndoexai 'rã Nhanderuete po'akaa, oiko jevy e'ÿ vy — he'i.\*

<sup>4</sup> Ha'e ramo Nicodemos oporandu:

— Mba'exa 'rã tu jaiko jevy nhandeduja ma va'eri? Nhanderuete py ju jajevy 'rã ri nda'u jaiko jevy aguã?

<sup>5</sup> Jesus ombovai:

— Anhetê aipoa'e: Yy ha'e Nhe'ẽ gui ndapeikoi vy ma ndapeikei 'rãe Nhanderuete po'akaa py.\*

<sup>6</sup> To'o gui oiko va'ekue ma to'o, ha'e rã Nhe'ẽ gui oiko va'ekue ma nhe'ẽ.

<sup>7</sup> Penhemondyi eme peiko jevy aguã re xeayvu rã pendu vy.

<sup>8</sup> Vvytu minha oipejua rupi rei 'rã oipeju. Pendu teĩ ndapeikuaai magui pa oua, neĩ marã katy pa ooa. Nhe'ẽ gui oiko va'ekue voi ha'e rami ae avi ikuai — he'i.

<sup>9</sup> Ha'e ramo Nicodemos oporandu ju:

— Mba'exa 'rã tu ha'eve ha'e rami aguã?

\* <sup>2:15</sup> Mateus 21.12,13; Marcos 11.15-19; Lucas 19.45,46 \* <sup>2:17</sup> Salmo 69.9 \* <sup>3:3</sup> João 1.12,13; 1 Pedro 1.23

\* <sup>3:5</sup> Ezequiel 36.25-28

Jesus ombovai:

- <sup>10</sup> — Ndee ma Israel kuery mbo'ea reiko va'eri mba'exa tu ndereikuaai xeayvua?
- <sup>11</sup> Anhetē aipoa'e: Ore kuery ma mba'emo roikuua ha'e roexa va'ekue anho romombe'u. Ha'e rami teī peē kuery ma ndaperoviai.
- <sup>12</sup> Kova'e yvy re mba'emo oiko va'e re xeayvu rā ndaperoviai pekuapy. Mba'exa 'rā tu ha'vy yva re ikuai va'e re xeayvu rā perovia?
- <sup>13</sup> Mba'eta avave rei ndooi yva re, Ava ra'y ojeapo va'ekue [ha'e pygua ae] e'ŷ vy.
- <sup>14</sup> Tekoa e'ŷa py Moisés oupi imoiny raka'e mboi ra'angaa.\* Ha'ekue rami avi Ava ra'y ojeapo va'ekue voi oupia 'rā imoiny,
- <sup>15</sup> hexe ojerovia va'e ha'e javi oupity aguā tekove marā e'ŷ.

### *Ojerovia va'e ha'e ojerovia e'ŷ va'e kuery re ijayvuague*

- <sup>16</sup> Mba'eta Nhanderuete yvy re ikuai va'e oayvu vy ome'ẽ Gua'y peteī'i va'e, hexe ojerovia va'e okanhy e'ŷ aguā, ha'e rā tekove marā e'ŷ oupity aguā.\*
- <sup>17</sup> Mba'eta ko yvy re Nhanderuete Gua'y ombou yvy regua kuery ombopaga aguā e'ŷ, ha'e rā hexeve vy yvy re ikuai va'e oo jepe aguā.
- <sup>18</sup> Ha'e ramo hexe ojerovia va'e kuery ndopagai 'rā. Ha'e rā ndojeroviai va'e ma opaga aguā rami ae ikuai, Nhanderuete Ra'y peteī'i va'e rery rupi ndojeroviai vy.
- <sup>19</sup> Ha'e kuery opaga 'rā mba'eta yvy re hendy va'e ou teī ha'e kuery teko vai rupi ikuai va'e vy pytū rive ojou porāve.
- <sup>20</sup> Mba'eta teko vai rupi ikuai va'e ndojou porāi hexakāa, hendy va'e re nonhembojaxei ae, heko vaiaty ojekuaa e'ŷ aguā.
- <sup>21</sup> Ha'e rā anhetē va'e rupi ikuai va'e ma onhemboja 'rā hendy va'e re heko ojekuaa porā aguā rami, mba'eta Nhanderuete re ae ikuai.\*

### *Jesus reko re teīgue ju João Batista ijayvuague*

- <sup>22</sup> Ha'e va'e rire guemimbo'e kuery reve oje'oi Judéia katy. Ha'e py ikuai ranhe ha'e kuery reve nhomongarai vy.
- <sup>23</sup> João avi nhomongarai oikovy Enom re Salim katy'i, ha'e va'e rupi yy ikuai rei ramo. Ha'e oĩa py heta oje'oi onhemongarai uka vy.
- <sup>24</sup> Ha'e va'e jave ma João nombo'aai teri.
- <sup>25</sup> Ha'e gui João remimbo'e kuery ijayvu okuapy peteī judeu reve, marā rami vy pa ojeky'a'o aguā re oikuaaxe vy.
- <sup>26</sup> Ha'e ramo hemimbo'e kuery oje'oi João pe omombe'u. Ha'e vy aipoe'i okuapy:  
— Orembo'ea, kueve Jordāo rovai re ndea py ava ou va'ekue, hekorā remombe'ua va'ekue ma nhomongarai avi oikovy. Ha'e ramo pavē rei 'rā oje'oi oĩa py — he'i okuapy.
- <sup>27</sup> Ha'e ramo João aipoe'i:  
— Nhanderuete mba'emo ome'ẽ ramo 'rāe jareko.
- <sup>28</sup> Peē kuery voi peikuaa porā aipoa'egue: "Xee ma Cristo e'ŷ aiko, ha'e rā henonderā xemboua va'ekue", ha'e va'ekue.
- <sup>29</sup> Ha'e rā Jesus ma omenda va'e rami oiko, ha'e omenda va'e anho 'rā ogueraa kunha. Ha'e rā omenda va'e irū ma ovy'a 'rā omenda va'e ayvu oendu vy. Ha'e nunga rupi xee voi avy'a aikovy.
- <sup>30</sup> Tove hetá-etave too hexe, ha'e rā xere ma mbovyve'i tou — he'i.

### *Jesus pavē guiyvatevea re ijayvua*

- <sup>31</sup> Yva gui ou va'ekue ma pavē gui yvateve. Ha'e rā yvy re ikuai va'e ma yvy regua meme ikuai, ha'e rami vy mba'emo yvy re oiko va'e re 'rā ijayvu. Ha'e rā yva gui ou va'ekue ma yvateve pavē gui.

\* **3:14** Moisés mboi ra'angaa oupi raka'e peteī yvyra apy re, ha'e va'e re mboi oixu'u va'ekue oma'ẽ vy okuera aguā (Números 21.9, João 12.32). \* **3:16** Romanos 5.8,9; 1 João 5.11,12 \* **3:21** Efésios 5.8-14

32 Ha'e va'e ma mba'emo oendu ha'e oexa va'ekue re ijayvu teĩ avave rei ndogueroviaai ijayvua.

33 Ha'e rã oguerovia va'e ma Nhanderuete pe voi "Anhetẽ va'e" he'i.

34 Mba'eta Nhanderuete remimbou ma ijayvua anho 'rã omombe'u, hexe Onhe'ẽ omoĩ ramo amongue'i py e'ŷ.

35 Tuu ma Gua'y oayvu ete vy opa mba'e omboaxa ipo py.

36 Ha'e nunga rupi Ta'y re ojerovia va'e kuery re oĩ tekove marã e'ŷ. Ha'e rã Ta'y nonhe'ẽ rendui va'e re ma tekove noĩ. Ha'e kuery re oĩ va'e ma Nhanderuete poxya anho.\*

## 4

### *Samaria pygua kunha reve Jesus ijayvuague*

<sup>1</sup> Ha'e gui fariseu kuery oendu aipo'ea rã João gui Jesus omongarai retavea guemimbo'erã. Senhor Jesus voi oikuua ha'e kuery oendua.

<sup>2</sup> Ha'e rami avi nhomongarai va'e ma Jesus e'ŷ, hemimbo'e kuery rima nhomongarai.

<sup>3</sup> Ha'e ramo Judéia yvy gui ha'e kuery oje'oi ju Galiléia katy.

<sup>4</sup> Ha'e rami vy Samaria yvy rupi'rãe oaxa.

<sup>5</sup> Ha'e gui ha'e kuery ovaẽ peteĩ tetã Samaria kuery rekoá py. Ha'e va'e tetã ma Sicar hery va'e, Jacó gua'y José pe yvy ome'ẽ va'ekue katy'i.

<sup>6</sup> Ha'e py ma oĩ Jacó yguakue. Kuaray mbyte jave Jesus oguapy ygua rexei'i ikane'õgua aguã.

<sup>7</sup> Ha'e jave py peteĩ kunha Samaria pygua ou yy re. Ha'e ramo kunha va'e pe Jesus aipoe'i:

— Eru na tay'u — he'i.

<sup>8</sup> Mba'eta hemimbo'e kuery oopa ra'e tetã py tembi'u jogua vy.

<sup>9</sup> Ha'e ramo kunha Samaria pygua aipoe'i:

— Mba'e re tu ndee judeu va'eri xee Samaria pygua pe rejerure yy re? — he'i, mba'eta Samaria pygua kuery reve judeu kuery ndajoayvui.\*

<sup>10</sup> Jesus ombovai:

— Mba'emo Nhanderuete ndevy ome'ẽ va'e, ha'e mava'e pa ndevy yy re ojerure va'e reikuua va'e rire ndee ma xevy pe rejerure 'rãgue, ha'e ramo ndevy pe xee ame'ẽ 'rãgue yy imarã e'ŷ va'e — he'i.

<sup>11</sup> Ha'e gui kunha va'e aipoe'i:

— Ndee ndererekoi yy rejara aguã, ha'e kova'e ygua ikua puku. Magui 'rã tu yy imarã e'ŷ va'e rejou?

<sup>12</sup> Ndee nda'u nhaneramoĩ Jacó gui ndepo'akave ri? Mba'eta Jacó ma nhandevy oeja raka'e kova'e ygua ha'e ae oy'uaty, ta'y kuery ha'e hymba kuery guive.

<sup>13</sup> Jesus ombovai:

— Kova'e yy gui oy'u va'e ma ijy'uvei kuerei 'rã.

<sup>14</sup> Ha'e rã xee yy ame'ẽ va'e oy'u va'e ma nda'ijy'uvei riaevei ma 'rã, mba'eta xee yy ame'ẽ va'e ma yvu rami 'rã oĩ ipy'a re imoingo riaearã — he'i.\*

<sup>15</sup> Ha'e ramo kunha va'e aipoe'i:

— Xevy pe ha'vy eme'ẽ ha'e va'e regua yy xey'uvei riae e'ŷ, ha'e yy re aju riae e'ŷ aguã.

<sup>16</sup> Jesus ombovai:

— Tereo ha'vy enoĩ neme, ha'e gui peju ju apy.

<sup>17</sup> Kunha va'e ju

— Xee ma xeme va'e'ŷ — he'i.

Jesus ombovai:

\* **3:36** 1 João 5.11,12    \* **4:9** Samaria pygua kuery ma judeu e'ŷ, amboae regua ikuai.    \* **4:14** João 7.37-39; Apocalipse 22.17

— Anhetē ae “Xeme va'e'ŷ” 'rea,  
 18 mba'eta peteñ nhiruñ avakue ma rerekō raka'e. Ha'e gui aŷ ndereve oiko va'e ma neme e'ŷ ae. Anhetē ae ri aipo'rea — he'i.

*Nhanderuete nhamboete aguā anhetē va'e re Jesus ijayvuague*

19 Ha'e gui kunha va'e aipoe'i:  
 — Senhor, xee aikuaa rā ndee profeta reiko.  
 20 Oreramoñ kuery ma yma Nhanderuete omboete raka'e peva'e yvyty áry. Ha'e rā peẽ kuery ma aipopeje Nhanderuete nhamboete aguā Jerusalém py anho oĩa rami.

21 Jesus ombovai:  
 — Ha'e gui kunha, erovia xeayvu, mba'eta ovaẽ 'rā kova'e yvyty áry avave rei Nhanderuete nomboeteavei aguā ára, neñ Jerusalém py voi.

22 Ha'e gui peẽ kuery ma ndapeikuuaai marā ramigua pa pemboetea.\* Ha'e rā ore judeu kuery ma roikuaa, mba'eta jogueraa jepearā judeu regua ae oiko.

23 Ovaẽ 'rā ára, ha'e ovaẽ ae ma guive Xeru omboete ete va'e kuery nhe'ẽ re ha'e anhetēa rupi omboete aguā. Mba'eta ha'e ramigua imboetearā ae Xeru oeka.

24 Nhanderuete ma nhe'ẽ. Ha'e nunga rupi imboetea kuery voi nhe'ẽ re 'rā omboete, ha'e anhetēa rupi — he'i.\*

25 Ha'e ramo kunha va'e aipoe'i:  
 — Xee aikuaa ramo raka'eve rā ou 'rā Messias Cristo 'epy va'e. Ha'e ou vy ma nhandevy omombe'u porāve 'rā ha'e ramigua.

26 Jesus ombovai:  
 — Xee ndereve xeayvu va'e ae ha'e — he'i.  
 27 Ha'e rami jave hemimbo'e kuery ovaẽmba ju. Ha'e kuery kunha reve Jesus jogueroayvu rā oexa vy onhemondyipa, teñ peteñve ma noporandui mba'e nunga re pa jogueroayvua, neñ mba'e re pa kunha reve ijayvua re.

28 Ha'e ramove kunha va'e oeja ovvy ryryru tetā katy oo vy. Ha'e rami vy aipoe'i tetā pyguia kuery pe:

29 — Peju ke jaje'oi pexa aguā peteñ ava xerekokue ha'e javi mombe'uare. Ha'e nda'u Cristo e'ŷ ri? — he'i.

30 Ha'e ramo ha'e kuery tetā gui jogueru Jesus oĩa katy.

*Mba'emo mono'õa kuery re ijayvuague*

31 Ha'e rami jave hemimbo'e kuery aipoe'i:  
 — Orembo'ea, ekaru ma'vy.  
 32 Jesus ombovai:  
 — Xee ma tembi'u areko peẽ kuery peikuaa e'ŷ va'e — he'i.  
 33 Ha'e ramo hemimbo'e kuery joupe-upa aipoe'i:  
 — Amongue ta'vy ogueru ma teve ra'e ho'u va'erā?

34 Jesus ombovai:  
 — Xee tembi'u areko va'e ma Xembouare oipotaa rami ajapo aguā ae, ajapopa peve.

35 Peẽ kuery aipopeje: “Irundy jaxy teri oata ovaẽ aguā onhotŷ mbyre nhamono'õ aguā”, peje. Ha'e rā xee ma aipoa'e: Pema'ẽ pexa aguā onhotŷ mbyre ijajupa ma oupya.

36 Ha'e nunga mono'õa rupi ikuai va'e ma aŷ guive 'rā ojopy ombo'eapoague repy, tekove marā e'ŷ reguarā omono'õ va'e vy. Ha'e rami vy mba'emo nhotŷare ha'e imono'õare kuery jovaive re 'rā ovvy'a okuapy.

37 Anhetē ete “Peteñ onhotŷ 'rā, ha'e amboae ju 'rā omono'õ”, 'ea.

38 Mba'eta xee romondouka penhotŷ e'ŷague gui pemono'õ aguā. Amboae kuery ranhe ma omboopy, ha'e gui peẽ kuery ju 'rā pemono'õ ha'e kuery ombo'eapoague rupi.\*

### *Jesus re Samaria pygua kuery heta ete ojeroviaague*

<sup>39</sup> Ha'e va'e tetã Samaria pygua kuery heta ete ojerovia Jesus re, kunha va'e "Opa mba'e ajapo va'ekue ha'e omombe'upa" he'i rire.

<sup>40</sup> Ha'e rami vy Samaria pygua kuery Jesus oĩa py ou vy "Epytave apy ore kuery reve", he'i ramo Jesus mokoĩ ára re opyta ha'e py.

<sup>41</sup> Ha'e ramo amboae kuery voi heta ete ojerovia Jesus re, ijayvua ae oendu vy.

<sup>42</sup> Ha'e rami vy ha'e kuery aipoe'i kunha va'e pe:

— Aŷ ma ore kuery rojerovia mba'eta ore ae roendu ijayvua, ndee remombe'u ramo e'ŷ. Aŷ ore kuery roikuaa ma Jesus anhetẽ yvy re ikuai va'e reraa jepea oikoa — he'i okuapay.

### *Galiléia yvy katy Jesus peteĩgue ju ooague*

<sup>43</sup> Mokoĩ ára rire Galiléia yvy katy ju ojevy.

<sup>44</sup> Mba'eta Jesus ae aipoe'i:

— Profeta ikuai va'e ma nomboeteai 'rã hekoa py ae — he'i.\*

<sup>45</sup> Ha'e gui Galiléia re ovaẽ ramo ha'e pygua kuery oguerovy'a okuapy, ngaru Jerusalém py oiko jave mba'emo porã ojapo rã oexa rire.

### *Huvixave reveguia ra'y Jesus omongueraague*

<sup>46</sup> Ha'e gui ojevy ju Caná tetã Galiléia regua py yy gui vinho ojapoague py. Ha'e py oiko peteĩ huvixave rembiguai yvateve va'e. Ha'e va'e ra'y ma Cafarnaum tetã py imba'eaxy oupy.

<sup>47</sup> Ha'e va'e oendu "Judéia gui Jesus ou ju ma Galiléia re" 'ea rã. Ha'e rami vy Jesus oĩa py oo ojerure gua'y omonguera aguã, mba'eta ta'y omano rai'i oupy.

<sup>48</sup> Tuu va'e pe Jesus aipoe'i:

— Peẽ kuery ma hexa pyrã ajapo rã pexa vy 'rãe pejerovia — he'i.

<sup>49</sup> Ha'e ramo ava va'e ojerure:

— Senhor, jaa ete ma xera'y omano e'ŷ mbove.

<sup>50</sup> Jesus ombovai:

— Tereo katu, nderay oikove ju ma — he'i. Ha'e ramo ijayvua tuu oguerovia vy oo ju.

<sup>51</sup> Tuu ooa rupi ovaexí guembiguai kuery. Ha'e ramo ha'e kuery aipoe'i:

— Nderay okuera ju ma — he'i okuapy.

<sup>52</sup> Ha'e ramo tuu oporandu:

— Mba'e hora py xera'y okuera ra'e?

Hembiguai kuery ju

— Kuee kuaray mbyte rire'i ipire raku-a oaxa — he'i okuapy.

<sup>53</sup> Ha'e ramo ma tuu ima'endu'a ha'e va'e hora py ae Jesus "Nderay oikove ju ma" he'iague re. Ha'e rami vy ojerovia hexe, hoo py ikuai va'e ha'e javive guive.

<sup>54</sup> Ha'e va'e reve mokoĩguea ma Jesus hexa pyrã ojapo, Judéia gui Galiléia re ou rire.

## 5

### *Peteĩ ava oguata ve'ŷ va'e Jesus omongueraague*

<sup>1</sup> Ha'e va'e rire oiko ngaru judeu kuery pegua. Ha'e ramo Jesus oo Jerusalém katy.

<sup>2</sup> Ha'e py vexa'i rokẽ 'epy va'e rexel'i oĩ peteĩ yy omboty pyre, hebraico ayvu py Betesda hery va'e. Ha'e va'e yvýry oĩ peteĩ nhiruĩ oguy.

<sup>3</sup> Ha'e va'e oguy py ma imba'eaxy va'e anho ikuai: ára reveguia e'ŷ, oguata e'ŷ va'e ha'e ipirupa va'e.

<sup>4</sup> [Ha'e kuery ma oarõ okuapy yy omyĩ rã guarã, mba'eta ou jepi 'rã anjo yy omomyĩ aguã. Ha'e gui peteĩ imba'eaxy va'e ha'e ranhe yy py oguejy vy okuera 'rã imba'eaxy gua.]

<sup>5</sup> Ha'e py oĩ peteĩ ava trinta e oito ma'etõ re ma imba'eaxy oupy va'e.

\* **4:44** Mateus 13.57

**6** Ha'e va'e onheno oupy rā Jesus oexa vy oikuua yma ma imba'eaxy oupya. Ha'e vy oporandu:

— Ndee pa rekueraxe?

**7** Imba'eaxy va'e ombovai:

— Senhor, nda'ipoai avave rei yy omyī rā xemboguejy va'erā. Yy omyī nhavō amboae ranhe kuerei 'rā oguejy xegui — he'i.

**8** Ha'e ramo Jesus aipoe'i ixupe:

— Epu'ā ha'vy, ejopy nderupa, ha'e tereo — he'i.

**9** Ha'e ramove ava okuera vy ngupa ojopy ha'e oguata ovv. Ha'e va'e ára ma sábado.

**10** Ha'e nunga rupi judeu ruvixa kuery ijayvu okuapy okuera va'ekue pe:

— Kova'e ára sábado ramo nda'evei nderupa re revoyi aguā — he'i ixupe.\*

**11** Ombovai:

— Ha'e rami avi ava xemonguerare ma “Ejopy nderupa ha'e tereo” he'i xevy.

**12** Ha'e ramo ha'e kuery oporanduve ju:

— Mava'e ava tu ndevy “Ejopy nderupa ha'e tereo?” 'eare?

**13** Ha'e ramo ma okuera va'ekue ndoikuaai mava'e ete pa imongueraare, mba'eta Jesus ha'e gui ojepe'a vyvoi rire, heta vaipa ikuai rā.

**14** Ha'e gui ka'aruve ma Jesus oexa ju templo rupi oikoa py. Ha'e vy aipoe'i:

— Aÿ ma rekuera ma. Ejejavyve eme nda'eveive va'e oiko e'ÿ aguā ndevy — he'i.

**15** Ha'e gui ava ojepe'a vy oo judeu ruvixa kuery pe omombe'u Jesus ae omonguer-aague.

**16** Ha'e ramo ha'e kuery onhea'ā okuapy Jesus omoī vai aguā sábado ára py voi nhomongueraaty re.

**17** Ha'e ramo Jesus aipoe'i ha'e kuery pe:

— Xeru ma aÿ voi ombo'eapo. Ha'e rami ae avi xee voi amba'eapo tema aikovy — he'i.

**18** Ha'e nunga rupi judeu ruvixa kuery ojukaxe sábado ára py voi nhomongueraaty re, ha'e Nhanderuete Tuu oikoa rami omombe'u vy Nhanderuete rami avi onhemingo ramo guive.\*

### *Jesus gueko omombe'u porãveague*

**19** Ha'e gui Jesus ombovai vy aipoe'i:

— Anhetē aipoa'e pëvy: Ta'y ma mba'eve ndojapoi 'rā ojegui ae, Tuu mba'emo ojapo rā oexa e'ÿ vy. Mba'eta Tuu ojapo va'e ramigua ae avi 'rā Ta'y ojapo oikovy.\*

**20** Tuu ma Gua'y oayvu vy ixupe oikuua ukapa mba'emo ojapo oikovya. Raka'eve rā ixupe ojapo uka 'rā mba'emo tuvixave ete va'e, peẽ kuery penhemondyipa aguā.

**21** Mba'eta Tuu ma omano va'ekue omboete ha'e omoingove jevya rami avi Ta'y voi 'rā omoingove omoingovexe va'e.

**22** Tuu ma nanhombopagai 'rā. Gua'y rima omoī pavē oikoague repy me'ëarā,

**23** Ta'y omboete pavē aguā Tuu omboetea rami. Ha'e rā Ta'y nomboetei va'e ma Tuu imbuare voi nomboetei.

**24** — Anhetē aipoa'e: Amongue xeayvu oendu vy Xembouare re ojerovia va'e, ha'e va'e kuery re oĩ tekove marā e'ÿ. Ha'e kuery ndopagavei 'rā, mba'eta manoa gui oaxa ma tekove oupity aguā re.

**25** Anhetē aipoa'e pëvy: Ovaë 'rā hora, ha'e ovaë ae ma guive omano va'ekue oendu aguā Nhanderuete Ra'y ijayvua. Ha'e gui hendua kuery oikove ju 'rā.

**26** Mba'eta Tuu re tekove ome'ë aguā oĩ rami avi Gua'y voi ombopo'aka tekove ome'ë aguā,

**27** ha'e pavē oikoague repy ome'ë aguā voi ombopo'aka, Ava ra'y ojeapo va'ekue ramo.

28 Penhemondyi eme ha'e rami xeayvu rā pendu vy, mba'eta ovaẽ ma ouvy hora yvyla rupa py ikuai va'e Ta'y ijayvua oendu vy opu'ãmba aguã.

29 Heko porã va'ekue opu'ãmba 'rā oikove riae aguã. Ha'e rā teko vai rupi ikuai va'ekue ma opu'ã 'rā opaga aguã.

30 Xee ma mba'eve ndajapoi xejegui ae. Mba'emo ajapo va'e ma aenduague rami meme ajapo. Ha'e pavẽ oikoague repy ame'ẽ vy voi ha'evea rami 'rā ajapo, mba'eta xee ae aipota va'e'ý ajapoxe, ha'e rā Xembouare oipota va'e anho.

31 — Ha'e gui xee anho rive xerekó amombe'u va'e rire ndovarei 'rāgue xeayvua.

32 Ha'e oiko avi amboae xerekó kuaa ukaarã. Ha'e va'e xekuaa ukaa ma anhetẽ va'e meme, xee aikuaa.

33 João Batista pe peẽ kuery peporandu uka ramo anhetẽ va'e meme xemombe'u raka'e.

34 Ha'e rami teĩ xee naikotevẽi xekuaa ukaa ko yvy regua. Ha'e rami avi João rekokue re xeayvu pendu vy peo jepe aguã.

35 Mba'eta ijayvuaque ma tataendy opa rupi omoexakãa rami. Ha'e ramo peẽ kuery pendu vy pevy'a ranhe raka'e penemoexakãa rupi.

36 Oiko avi peteĩ xerekó kuaa ukaa João gui yvateve va'e, mba'eta xerembiaporã Xeru ome'ẽ va'ekue ae 'rā oikuaa uka Xeru xembouague.

37 — Ha'e gui Xeru Xembouare voi ijayvu raka'e xerekorã re. Teĩ peẽ kuery ma neĩ peteĩgue napendui ijayvua, ndapexai guive,

38 neĩ pendejee napemoĩ ijayvu, mba'eta ndapejeroviai pekuapy hemimbou re.

39 Peikuaa pota 'rā kuaxia para re tekove marã e'ý peupity aguã. Ha'e va'e re ma xerekorã mombe'ua oĩ,

40 ha'e rami teĩ xere ma ndapejuxei tekove peupity aguã.

41 — Xee ma avakue pe rive nanhemboyvate ukai.

42 Ha'e rā peẽ kuery reko ma xee aikuaa porã, mba'eta pendere noĩ Nhanderuete peayvua.

43 Xeru rery rupi aju teĩ peẽ kuery naxemovaẽi. Ha'e rā amongue guery rupi rive ou ramo ma pemovaẽ 'rā.

44 Mba'exa tu pejerovia ta xere? Mba'eta joupe rive penhemboeko porã uka, ha'e rā Nhanderuete peteĩ'i va'e pe ma napenhemboeko porã uka potai.

45 — Pexa'ã eme Nhanderuete renonde xee pendere xeayvu aguã re. Moisés pemboete va'e ae 'rā ijayvu pendere.

46 Ha'e rami avi anhetẽ ri Moisés ombopara va'ekue perovia va'e rire xere voi pejerovia 'rāgue, xerekorã re ae ombopara rire.

47 Ha'e gui Moisés ombopara va'ekue ndaperoviai vy ma mba'exa tu perovia ta xeayvu?

## 6

*Mateus 14.13-21; Marcos 6.30-44; Lucas 9.10-17*

1 Ha'e va'e rire Jesus oaxa ovu Galiléia yupa Tiberíades 'epy va'e rupi.

2 Heta avi oo hupive, mba'eta oexa rire hexa pyrã ojapo rā imba'eaxy va'e omongueraa py.

3 Ha'e gui peteĩ yvyty re Jesus oẽ vy guemimbo'e kuery reve oguapypa.

4 Ha'e jave ovaẽ rai'i ma judeu kuery pegua ngaru Páscoa oikoa ára.

5 Ha'e gui Jesus oma'ẽ vy heta ou rā oexa vy aipoe'i guemimbo'e Filipe pe:

— Magui nda'u jajogua 'rā mbojape apy ikuai va'e kuery peguarã? — he'i.

6 Jesus po rami ijayvu ombovai rā oenduxe vy, mba'eta oikuaa ae ma ojapo va'erã.

7 Ha'e ramo Filipe aipoe'i:

— Peteĩ-teĩ mbojape ho'u aguã ma neĩ duzentos ára repy re mbojape jajogua ramo voi 'rā nda'evei — he'i.

8 Ha'e gui hemimbo'e mboae Simão Pedro ryvy André aipoe'i Jesus pe:

<sup>9</sup> — Ha'e rami avi pe py ma oĩ peteĩ kunumi peteĩ nhiruĩ mbojape cevada guigua ha'e mokoĩ pira'i oguerekva'e. Ha'e rami teĩ nda'evei 'rã ko heta ete ikuai va'e peguarã — he'i.

<sup>10</sup> Jesus ombovai:

— Aipopeje ha'e javive oguapypa aguã — he'i. Ha'e py ma nhuũndy porã ramo ha'e javi oguapypa. Ha'e py rã nda'u cinco mil avakue ikuai.

<sup>11</sup> Ha'e gui peteĩ nhiruĩve mbojape Jesus ojopy vy oguerovy'a Nhanderuete. Ha'e gui mae ma ombojoja uka pavẽ pe. Pira'i voi ha'ekue rami ju ombojoja uka.

<sup>12</sup> Ha'e gui ha'e javive hevyatãmba ma ramo Jesus aipoe'i guemimbo'e kuery pe:

— Pemono'õmba ju hembyrekue ojeavyky rei e'ŷ aguã — he'i.

<sup>13</sup> Ha'ekue rami ha'e kuery ojapo vy ha'e javi vy doze varai omonyẽ peteĩ nhiruĩ mbojape gui hembyre va'ekue.

<sup>14</sup> Ha'e gui ha'e py ikuai va'e ma hexa pyrã Jesus ojapo rã oexa vy aipoe'i joupe-up:

— Anhetẽ ae peva'e oiko ra'e profeta ko yvy re ou 'rã va'ekue — he'i okuapy.

<sup>15</sup> Ha'e rami vy ogueraaxe okuapy nguvixaverã. Ha'e rami teĩ Jesus oikuaa vy ojepe'a vy oẽve ovyytvy re.

#### *Mateus 14.22-33; Marcos 6.45-51*

<sup>16</sup> Pytû'i jave hemimbo'e kuery oguejy oje'oivy yupa peve.

<sup>17</sup> Ha'e py ma ojou peteĩ kanoã hovaigua re oaxa aguã Cafarnaum tetã katy. Pytû are ma va'eri Jesus ndoui teri ha'e kuerya py.

<sup>18</sup> Ha'e gui ha'e kuery oo jave yai opu'ã-pu'ã, yvvytu oipeju atã ramo.

<sup>19</sup> Yy rembe gui cinco, seis quilômetro rãnda'u ha'e kuery oo ma jave kanoãa katy Jesus ou jekuaa yy áry rupi oguata vy. Ha'e nunga hemimbo'e kuery oexa vy onhemondiyipa.

<sup>20</sup> Ha'e ramo Jesus aipoe'i:

— Penhemondyi eme, xee rima — he'i.

<sup>21</sup> Ha'e ramo hemimbo'e kuery ovyy'a vaipa reve oupi kanoã py. Ha'e rire'ive ovaẽmba ma ooxeague py.

#### *Jesus ae mbojape nhomoingo riaearã oikoa re ijayvuague*

<sup>22</sup> Ha'e gui ko'ẽ jevy heta va'e kuery yupa rembe re opyta va'ekue ima'endu'a peteĩ kanoã kyrĩ'i va'e anho ha'e py ituiague re, ha'e va'e py guemimbo'e kuery reve Jesus ndooiague re, mba'eta hemimbo'e kuery ha'e kuery ae'i oje'oi rire.

<sup>23</sup> Ha'e rami jave ma amboae kanoã ju Tiberíades tetã gui ou vy Senhor mbojape oguerovy'a rire ho'u okuapyague katy'i ombojaa.

<sup>24</sup> Jesus guemimbo'e kuery reve ha'e py ndoikovei maa heta va'e kuery oikuaa vy ojopy kanoã, ha'e oje'oi Cafarnaum katy oeka vy.

<sup>25</sup> Ha'e gui yupa rovaigua re oexa vy oporandu:

— Orembo'ea, araka'e ma tu revaẽ apy?

<sup>26</sup> Jesus ombovai:

— Anhetẽ aipoa'e pêvy: Peẽ kuery ma mbojape pe'u ha'e penevyatãmba rire rive xereka, hexa pyrã ajapo rã pexa kuaa porã vy e'ŷ.

<sup>27</sup> Penhea'ã eme tembi'u opa va'erã re rive, ha'e rã imarã e'ŷ va'e nhomoingo riaearã re. Ha'e va'e regua ma Ava ra'y ojeapo va'ekue anho 'rã ome'ẽ, mba'eta Tuu oikuaa uka hemimbou oikoa — he'i.

<sup>28</sup> Ha'e kuery oporandu ixupe:

— Mba'e nunga nda'u rojapo 'rã Nhanderuete oipota va'e rojapo aguã?

<sup>29</sup> Jesus ombovai:

— Nhanderuete oipota va'e ma hemimbou re pejeroviaa — he'i.

<sup>30</sup> Ha'e ramo ha'e kuery aipoe'ive ju:

— Mba'e nunga hexa pyrã tu rejapo 'rã ha'vy roexa vy ndere rojerovia aguã? Mba'e nunga tu ndee rejapo kuaa?

31 Mba'eta nhaneramoĩ kuery ma tekao e'ŷa rupi ikuai vy ho'u raka'e maná, ipara oĩa "Yva gui mbojape ombou ha'e kuery ho'u aguã", he'ia rami vy.\*

32 Ha'e ramo Jesus ombovai:

— Anhetẽ aipoa'e pãvy: Mbojape yva guigua Moisés e'ŷ ombou, Xeru ae pãvy ombou mbojape anhetẽ va'e yva gui.

33 Mba'eta mbojape Nhanderuetea guigua ma yva gui ou vy yvy re ikuai va'e pe ome'ẽ tekove — he'i.

34 Ha'e ramo ha'e kuery aipoe'i:

— Senhor, eme'ẽ riae orevy ha'e va'e regua mbojape.

35 Jesus ombovai:

— Xee ae ma mbojape tekove me'ẽa. Xere ou va'e kuery noenduvei 'rã okaruxea, xere ojerovia va'e ma noenduvei 'rã yuvei.\*

36 Xee aipoa'eague rami ae peẽ kuery xerexa teĩ ndapejeroviai.

37 Xevy guarã Xeru ome'ẽ va'ekue-'ekue ma oupa 'rã xere. Ha'e xere ou va'ekue ma ndaipe'avei 'rã xejegui.

38 Mba'eta xee ma yva gui aju Xembouare oipota va'e ajapo aguã, xee aipota va'e'ŷ.

39 Ha'e gui Xembouare oipota va'e ma povae, xevy guarã ome'ẽ va'ekue peteĩve namokanhyi aguã, ha'e rã opaa ára amboetepa ju aguã.

40 Mba'eta Xeru oipota ha'e javive Ta'y oexa kuaa vy hexe ojerovia va'e kuery oupity tekove marã e'ŷ. Ha'e ramo ma xee amboetepa ju 'rã opaa ára.

### *Yva guigua mbojape omombe'u porãveague*

41 Ha'e gui Jesus "Yva guigua mbojape aiko" he'i rã judeu kuery oendu vy ijayvu rei okuapy hexe.

42 Ha'e rami vy aipoe'i joupe-upe:

— Peva'e Jesus nda'u José ra'y e'ŷ ri? Tuu ha'e ixu ndajaikuaai ri ty'y? Mba'exa tu ha'vy "Yva gui aju va'ekue" he'i kuri?

43 Ha'e ramo ma Jesus ombovai:

— Ha'e rami ete jomeme pendeayvu aguã ma nda'evei.

44 Mba'eta avave rei ndoui 'rã xere, Xeru Xembouare ndoguerui rã. Ha'e gui opaa ára amboetepa ju 'rã.

45 Mba'eta profeta kuery regua ombopara vy "Nhanderuete oeko mbo'e 'rã ha'e kuery ha'e javi", he'iague rami vy Xeru ayvu oendu ha'e oikuua va'e kuery ma ou 'rã xere.\*

46 Ha'e rami avi avave rei ndoexai Xeru. Peteĩ'i anho oiko hexaare, oĩa gui aju va'ekue ae.

47 Anhetẽ aipoa'e pãvy: Xere ojerovia va'e re ma tekove marã e'ŷ oĩ.

48 — Xee ae mbojape nhomoingove riae aiko.

49 Peneramoĩ kuery ma tekao e'ŷa rupi ikuai vy maná ho'u teĩ ha'e javive omanomba raka'e.

50 Ha'e rã kova'e mbojape yva gui ou va'ekue ho'u va'e ma nomanoi 'rã.

51 Xee ae mbojape oikove va'e yva gui ou va'ekue. Ha'e va'e regua ho'u va'e ma oiko riae 'rã. Mbojape ko yvy re ikuai va'e moingovearã xee ame'ẽ va'erã ma xerete ae — he'i.

52 Ha'e ramo judeu kuery joo rami e'ŷ-e'ŷ ijayvu. Ha'e vy aipoe'i:

— Mba'exa 'rã tu peva'e ngo'o ome'ẽ ja'u aguã?

53 Jesus ombovai:

— Anhetẽ aipoa'e: Ava ra'y ojeapo va'ekue ro'o gui ndape'ui, ha'e huguy gui ndapey'ui ri ramo pendere noĩ 'rã tekove.

54 Mba'eta xero'o gui ho'u, ha'e xeruguy gui oy'u va'e re ma oĩ tekove marã e'ŷ, ha'e amboetepa ju 'rã opaa ára.

\* 6:31 Êxodo 16.4, Neemias 9.15, Salmo 78.24-25

\* 6:35 João 4.13,14

\* 6:45 Isaías 54.13

- <sup>55</sup> Mba'eta xero'o ma tembi'u anhetē va'e, ha'e xeruguy ma oy'u pyrā anhetē va'e.  
<sup>56</sup> Xero'o gui ho'u ha'e xeruguy gui oy'u va'e ma ikuai 'rā xere, ha'e xee aī 'rā ha'e kuery re.  
<sup>57</sup> Xeru xembouare oikove, ha'e hexe xee aikovea rami avi xere okaru va'e oikove 'rā xere.  
<sup>58</sup> Kova'e mbojape yva gui ou va'ekue ma penamoī kuery ho'u va'ekue ramigua e'ŷ, mba'eta ha'e kuery omanomba raka'e. Ha'e rā kova'e mbojape ho'u va'e ma oikove riae 'rā – he'i.  
<sup>59</sup> Ha'e rami Jesus ijayvu Cafarnaum tetā py judeu kuery onhembo'eaty py nhombo'ea py.

### *Jesus oayvua omombe'u porāveague*

- <sup>60</sup> Po rami ijayvu rā hemimbo'e kuery oendu vy heta aipoe'i okuapy:  
 – Haxy ete rima ijayvua. Mava'e tu oikuaa ta?\*
- <sup>61</sup> Ha'e gui Jesus ma ha'e kuery ndojou porāia oikuaa ae vy aipoe'i:  
 – Peē kuery napendu kuuaii va'e ty'y nami xeayvu rā?
- <sup>62</sup> Ha'e rami avi mba'exa 'rā tu peikuua Ava ra'y ojeapo va'ekue ouague katy ju ojeupi ovv rā pexa vy?
- <sup>63</sup> Mba'eta Nhe'ẽ ae rima nhomoingovearā oī, ha'e rā nhandero'o ma ha'e rami aguā ndovarei. Nami xeayvu vy Nhe'ẽ ha'e tekove re rima xeayvu kuri.
- <sup>64</sup> Ha'e rami avi peē kuery regua amongue ndapejeroviai – he'i. Po rami Jesus ijayvu mba'eta oikuaa ae mava'e kuery pa hexe ndojeroviai, ha'e mava'e pa ijopy uka nhemiarā oikoa.
- <sup>65</sup> Ha'e rami vy aipoe'ive ju:  
 – Ha'e nunga rupi xee aipoa'e kuri pēvy: “Avave rei ndoui 'rā xere, ha'e rami aguā Xeru ome'ẽ e'ŷ ramo.”

### *Jesus-a gui heta ojepe'aague*

- <sup>66</sup> Ha'e rami rā hemimbo'e kuery heta ojepe'a, hexeve nda'ikuaxevei vy.
- <sup>67</sup> Ha'e ramo guemimbo'e kuery doze ikuai va'e pe ju Jesus oporandu:  
 – Ha'vy peē kuery voi teve pejope'axe avi xegui?
- <sup>68</sup> Simão Pedro ombovai:  
 – Senhor, mava'e rupive 'rā tu roo? Mba'eta ndee ndeayvua anho tekove marā e'ŷ me'ẽa.\*
- <sup>69</sup> Ha'e gui ore kuery roguerovia, roikuua porā ete ndee Nhanderuete remimbou Iky'a e'ŷ va'e reikoa – he'i.
- <sup>70</sup> Ha'e ramo Jesus ombovai:  
 – Ha'e rami avi peē kuery doze aiporavo va'ekue regua peteī re ma anha oī – he'i.
- <sup>71</sup> Po rami ijayvu Simão Iscariotes ra'y Judas reko re, mba'eta ha'e va'e ma doze ikuai va'e regua va'eri ijopy uka nhemiarā oiko.

## 7

### *Jesus re tyvy kuery ndojeroviai okuapyague*

- <sup>1</sup> Ha'e va'e rire ma Jesus oiko Galiléia yvy rupi. Judéia yvy katy ranhe ndooovei, judeu ruvixa kuery ojukaxe rā.
- <sup>2</sup> Ha'e gui ovaẽ rai'i ma judeu kuery pegua ngaru oguy'i py ikuai aguā regua ára.
- <sup>3</sup> Ha'e ramo oīa py tyvy kuery ou vy aipoe'i ixupe:  
 – Tereo ju kova'e tekaoa gui judéia katy, neremimbo'e kuery ha'e pygua voi mba'emo rejapo va'e oexa aguā.
- <sup>4</sup> Mba'eta avave rei ojekuaa ukaxe vy nhemi rupi ndojapoi 'rā mba'eve. Tove yvy jave rupi toikuaa mba'emo rejapo reikovy va'e – he'i okuap.

\* **6:60** Mateus 13.10-17 \* **6:68** Atos 4.12

<sup>5</sup> Ha'e rami tyvy kuery ijayvu mba'eta ha'e kuery ae ndojeroviai hexe.\*

<sup>6</sup> Ha'e ramo Jesus aipoe'i ha'e kuery pe:

— Nda'evei, xe'ára novaëi teri. Ha'e rã peẽ kuery pe ma ára nhavõ ha'evepa rei.

<sup>7</sup> Peẽ kuery re yvy regua kuery nda'ija'e e'ýi 'rã. Ha'e rã xere ma nda'ija'ei okuapy, teko vai rupi ikuiaia amombe'u ramo.

<sup>8</sup> Tapeo peẽ ae ngarua py. Xee ma ndaa reguai ranhe, mba'eta novaëi teri xe'ára — he'i.

<sup>9</sup> Ha'e rami Jesus ijayvu vy optytave ranhe Galiléia py.

### *Ngarua py Jesus ooague*

<sup>10</sup> Tyvy kuery ngarua py oje'oipa ma rire mae Jesus voi oo. Ha'e rami teĩ avave rei pe ndojekuua ukai guive.

<sup>11</sup> Ngarua py ma judeu ruvixa kuery oeka okuapy, oporandu guive mamo pa oña re.

<sup>12</sup> Heta va'e kuery joo rami e'ý-e'ý ijayvu okuapy heko re, mba'eta amongue ma aipoe'i:

— Ha'e tu porayvu va'e rima.

Ha'e rã amboae kuery ma

— Xevy pe rã nhombotavypa rei oikovy — he'i.

<sup>13</sup> Avave rei nomombe'u porâai guive marã rami pa oikoa, mba'eta judeu ruvixa kuery gui okyje vy.

### *Jesus guetarã kuery ojerovia e'ý va'e reve jogueroayvu okuapyague*

<sup>14</sup> Ha'e gui ngaru oikoa mbyte py mae ma Jesus oo templo py nhombo'e vy.

<sup>15</sup> Ha'e ramo judeu ruvixa kuery ma nhombo'e rã oendu vy onhemondyipa. Ha'e vy aipoe'i:

— Mba'exa tu kuaxia para re oĩ va'e oikuaapa, nonhembo'e'i va'ekue ri?

<sup>16</sup> Jesus ombovai:

— Xee ma xejegui ae e'ý anhombo'e, ha'e rã Xembouare gui aikuua.

<sup>17</sup> Ha'e gui Nhanderuete oipotaa rami ikuaixe va'e ma oikuua 'rã Nhanderuete gui pa anhombo'e kuaa, tyrã pa xejegui ae.

<sup>18</sup> Mba'eta ojegui ae nhombo'e va'e ma onhemboyvate ucaa rupi rive 'rã oiko. Ha'e rã imbonare yvatea oikuua ucaa rupi nhombo'e va'e ma anhetê va'e, ha'e hexe noĩ 'rã teko vai.

<sup>19</sup> Moisés e'ý teve peẽ kuery pegua lei ombopara raka'e? Ha'e ramive ma peẽ kuery neĩ peteĩve ndapejapoi. Mba'e re tu xejukaxe ri?

<sup>20</sup> Ha'e ramo heta va'e kuery aipoe'i:

— Anha teve rima ndere onhemonde. Mava'e tu ndejukaxe?\*

<sup>21</sup> Jesus ombovai:

— Xee ma peteĩ mba'e ajapo ramo rive peẽ kuery penhemondyipa.

<sup>22</sup> Moisés ma oeja raka'e jopire pemboi aguã. Ha'e rami aguã ma Moisés guigua ete e'ý guive, ha'e rã nhaneramoí kuery gui ijypy raka'e. Ha'e rami rire sábado ára py teĩ pemboi 'rã avakue'i pire.

<sup>23</sup> Moisés lei ombopara va'ekue rami vy sábado ára py voi avakue'i pire pemboi va'eri mba'e re tu xejou vai ri pekuapy sábado ára py anhomongueraague re?

<sup>24</sup> Nda'evei joe peikuaa pota aguã mba'emo pexaa rupi rive, ha'e rã anhetê va'e ha'e teko porã rupi anho 'rã ha'eve.

### *Judeu ruvixa kuery joo rami e'ý-e'ý ijayvuague*

<sup>25</sup> Amongue Jerusalém pygua kuery aipoe'i:

— Peva'e e'ý nda'u huvinha kuery ojukaxe va'e?

<sup>26</sup> Mba'exa tu ha'vy pavẽ oendua py nhombo'e teĩ avave rei nomokyrirí? Tyrã pa huvinha kuery voi teve oikuua Cristo oikoa rami?

\* **7:5** Mateus 10.36; Mateus 10.36    \* **7:20** Mateus 13.53-58; Marcos 3.22

<sup>27</sup> Nhande kuery ma jaikuaa magui pa ha'e oua. Ha'e gui Cristo ou ramo ma avave rei ndoikuuai 'rā magui pa oua – he'i okuapy.

<sup>28</sup> Ha'e gui Jesus ma templo py nhombo'e vy aipoe'i:

– Peẽ kuery nda'u xekuaa, ha'e magui pa ajua peikuaa avi ri ty'y? Ha'e gui xee ma xee ae aipotaa rami rive'ŷ aju. Peẽ kuery ma ndapeikuaai ae Xembouare ma anhetē va'eri.

<sup>29</sup> Ha'e rā xee ma aikuaa, mba'eta ixugui aju, ha'e ae xembou ramo – he'i.

<sup>30</sup> Ha'e ramo ha'e kuery ojopyxe teĩ avave rei opo nomoī hexe, hi'ára novaëi teri ramo.

<sup>31</sup> Ha'e pygua kuery regua heta ojerovia hexe. Ha'e vy aipoe'i:

– Cristo ou vy nda'u ojapo 'rā ri hexa pyrā peva'e ava ojapo va'e gui iporâve va'e? – he'i okuapy.

<sup>32</sup> Ha'e gui fariseu kuery ma heta va'e kuery Jesus ojou porā okuapya oikuua vy sacerdote yvatekueve va'e reve omondouka xondaro kuery ojopy aguã.

<sup>33</sup> Ha'e ramo Jesus aipoe'i ha'e kuery pe:

– Aŷ'i tema aiko teri peẽ kuery reve. Ha'e gui aa ju ta ma Xembouarea py.

<sup>34</sup> Ha'e va'e rire peẽ kuery xereka teĩ ndaxejoui 'rā, mba'eta xee aa ague py peẽ kuery peo aguã nda'evei – he'i.

<sup>35</sup> Ha'e ramo judeu ruvixa kuery joupe-upe ju aipoe'i:

– Marā katy nda'u ha'e oo 'rā ndajajoui aguã? Tyrā pa grego kuery retā nhande kuery ikuiaia rupi teve oo ta ombo'e vy?

<sup>36</sup> Mba'e he'i vy nda'u po rami ijayvu: “Xereka teĩ ndaxejoui 'rā”, ha'e “Xee aa ague py peo aguã nda'evei”, he'i kuri?

### *Yy imarā e'ŷ va'e re Jesus ijayvuague*

<sup>37</sup> Ngaru opaa ára ma omboeteave ára. Ha'e va'e ára Jesus opu'ã vy aipoe'i:

– Pendey'uvei va'e peju xea py pey'u.

<sup>38</sup> Mba'eta xere ojerovia va'e kuery re oiko 'rā kuaxia para re oĩ va'e: “Ipy'a gui oxyry 'rā yy imarā e'ŷ va'e” he'ia rami.\*

<sup>39</sup> Ha'e rami ijayvu Nhe'ẽ re, mba'eta Jesus re ojerovia va'e kuery re Nhe'ẽ oĩ 'rā. Ha'e rā ha'e va'e jave ma Nhe'ẽ nombouai teri, mba'eta Jesus nomboyvateai teri.

<sup>40</sup> Ha'e gui po rami Jesus ijayvu rā heta va'e kuery oendu vy aipoe'i:

– Ha'e tu anhetē ae profeta oiko – he'i okuapy.

<sup>41</sup> Amongue aipoe'i:

– Ha'e tu Cristo ete rima oiko.

Ha'e rā amboae kuery ma oporandu:

– Cristo nda'u Galiléia gui 'rā ri ou?

<sup>42</sup> Mba'eta kuaxia re ipara oiny: “Cristo ma Davi ramymino 'rā oiko, ha'e Belém tetā Davi rekoague py ae 'rā itui'i”, he'iague.

<sup>43</sup> Ha'e rami vy joo rami e'ŷ-e'ŷ oikuuaa Jesus reko re ijayvu vy.

<sup>44</sup> Amongue ma ojopyxe teĩ avave rei opo nomoī hexe.

### *Xondaro kuery ojevypa riveague*

<sup>45</sup> Ha'e gui xondaro kuery ojevypa rive ju sacerdote yvatekueve va'e ha'e fariseu kuerya py. Ha'e ramo xondaro kuery ha'e kuery oporandu:

– Mba'e re tu ndaperui?

<sup>46</sup> Xondaro kuery ombovai:

– Mba'eta ha'e va'e ava ijayvua rami avave rei nda'ijayvui teri – he'i okuapy.\*

<sup>47</sup> Ha'e ramo fariseu kuery aipoe'i:

– Peẽ kuery voi teve penembotavy ra'e?

<sup>48</sup> Ha'e gui nhanderuvixa kuery e'ŷ vy fariseu kuery regua voi teve ojerovia hexe?

\* <sup>7:38</sup> João 4.13,14; Apocalipse 22.1,17    \* <sup>7:46</sup> Mateus 7.28,29

**49** Ha'e rā heta va'e kuery ma nhandevyguia lei oikuua va'e'ŷ, ayvu vaipy meme ikuai – he'i okuapy.

**50** Peteī ha'e kuery va'e regua ma Nicodemos, Jesus reve jogueroayvu vy oo va'ekue. Ha'e va'e ma oirū kuery pe oporandu:

**51** — Nhande kuery pegua lei rami vy nda'u ha'eve 'rā ri amongue nhamboayvu porā e'ŷ re nhanhombopaga aguā, e'ŷ vy mba'emo ojapo oikovya re jaikuua pota porā e'ŷ re?

**52** Irū kuery ombovai:

— Ndee voi teve Galiléia pygua reiko? Eikuua porā pota reikuua aguā Galiléia gui neī peteī profeta ndoui 'rāa – he'i okuapy.

**53** [Ha'e gui ma peteī-teī oje'oi ngoo katy.

## 8

### *Kunha itavy rei va'e ogueru okuapyague*

**1** Ha'e rā Jesus ma Oliveira yvyty katy oo.

**2** Ko'ẽ rai ramove ma templo katy ju ou. Oĩa py heta va'e kuery voi joguerupa. Ha'e ramo oguapy vy ombo'epa oiny.

**3** Ha'e gui Jesus oĩa py lei re nhombo'e va'ety ha'e fariseu kuery ogueru peteī kunha itavy reia py ojou pyre. Ha'e rami vy omopu'ã imo'amy teta mbyte py.

**4** Ha'e vy aipoe'i Jesus pe:

— Porombo'ea, kova'e kunha ma itavya py ojoua ra'e.

**5** Ha'e gui Moisés nhandevyguia lei ombopara vy aipoe'i raka'e kunha itavy rei va'e ita py jajapipa aguā. Ha'vy ndee, mba'e 're? – he'i okuapy

**6** oecko a'ã vy hexe ijayvu rei aguā.

Ha'e ramo Jesus yvy re oma'ẽ reve okuā py ombopara oiny yvy re.

**7** Ha'e kuery oporandu riae ma okuapy ramo mae ma Jesus oma'ẽ. Ha'e vy aipoe'i:

— Pejejavy va'e'ŷ ete peiko va'e ranhe pejapi ita py – he'i.

**8** Ha'e gui yvy re ju oma'ẽ reve omboparave ju oiny.

**9** Ha'e rami ijayvu rā ha'e kuery oendu vy opy'apy py oikuua ha'e kuery ae ojejavy va'ea. Ha'e rami vy peteī-teī ojepe'a oje'oivy. Tujakueve ranhe oo, ha'e rami py oje'oipa. Opyta va'e ma Jesus anho, ha'e kunha va'e guive, ha'e kuery mbyte py hi'añague py ae.

**10** Ha'e gui Jesus oma'ẽ vy avave rei ndoexavei. Kunha va'e anho ho'ame rā oexa vy aipoe'i ixupe:

— Kunha, mamo tu oopa ra'e ndere ijayvu va'ekue? Mava'eve rei teve nanembopagai?

**11** Kunha va'e ombovai vy

— Mava'eve rei, Senhor – he'i.

Ha'e ramo Jesus aipoe'i:

— Xee voi norombopagai 'rā. Tereo ju, ejejavyve eme.]

### *Jesus gueko omombe'u porāveague*

**12** Teīgue ju Jesus aipoe'i:

— Xee ma hendy va'e yvy regua kuery moexakāarā. Xerupive ikuai va'e ma pytū rupi ve'ŷ 'rā oiko, mba'eta ha'e kuery re oĩ 'rā hendy va'e nhomoingovea – he'i.\*

**13** Ha'e gui fariseu kuery aipoe'i:

— Ndee tu nderekō re ae rima ndeayvu ra'e. Ha'e nunga rupi ndeayvua ndovarei.

**14** Jesus ombovai vy aipoe'i ha'e kuery pe:

— Xee ae xerekō re xeayvu teī xeayvua anhetē meme. Mba'eta xee aikuua magui pa ajuague, ha'e marā katy pa aa 'rāa. Ha'e rā peē kuery ma ndapeikuaai magui pa aju, neī marā katy pa aa 'rāa voi.

\* **8:12** João 1.4; Salmo 36.9

<sup>15</sup> Peẽ kuery ma peikuua rami rive penhombopagaxe, ha'e rã xee ma avave rei nambopagai.

<sup>16</sup> Ha'e anhombopaga vy voi anhetẽ rupi meme 'rã anhombopaga, mba'eta xee ma xee ae'ý aiko. Xee ha'e Xembouare roiko.

<sup>17</sup> Pendevyguia lei re ma ipara oiny: "Mokoĩ joo rami meme ijayvu ramo 'rãe jaikuua anhetẽa", he'iague.

<sup>18</sup> Xee aikuua uka porã aikovy xerek, ha'e Xeru Xembouare voi xekuua uka – he'i.

<sup>19</sup> Ha'e ramo oporandu okuapy:

– Mamo ha'vy oĩ Nderu?

Jesus ombovai:

– Peẽ ndaxekuaaia rami avi neĩ Xeru voi ndapeikuuaai. Xee xekuua va'e rire ma peikuua avi 'rãgue Xeru – he'i.

<sup>20</sup> Ha'e rami ijayvu templo py, peráta ryru oĩ va'e yvýry oĩa py. Ha'e rami teĩ avave rei ndojopyai, hi'ára novaõi teri ramo.

### *Heta va'e kuery pe Jesus onhemombe'u teĩ ndogueroviai okuapyague*

<sup>21</sup> Peteĩgue ju aipoe'i:

– Xee ma ajep'e'a 'rã apy gui. Ha'e ramo peẽ kuery xereka teĩ ndapeoi 'rã xee aa ague py. Ha'e rami 'rãgue py pekanhymba 'rã pejejavyague re – he'i.

<sup>22</sup> Ha'e ramo judeu ruvixa kuery aipoe'i:

– Peva'e teve ojejukaxe? Ha'e vy ae ma "Ndapeoi 'rã aa ague py", he'i ri kuri.

<sup>23</sup> Jesus aipoe'ive ju:

– Peẽ kuery ma ko yvy rupigua, ha'e rã xee ma pe yvategua. Peẽ ma kova'e yvy regua, ha'e rã xee ma yvy regua e'ý.

<sup>24</sup> Ha'e nunga rupi ae xee aipoa'e kuri pekanhymba 'rã pejejavyague re. Mba'eta xee ae aikoa ndaperoviai vy pejejavyague re pekanhymba 'rãe – he'i.

<sup>25</sup> Ha'e ramo oporandu okuapy:

– Marã ramigua tu ndee?

Jesus ombovai:

– Mba'e tu jypy'i guive pendevy amombe'u raka'e?

<sup>26</sup> Heta mba'e areko peẽ kuery reko re xeayvu aguã peikoague repy ame'ẽ vy guarã. Ha'e rami teĩ aÿ ma ko yvy re ikuai va'e pe amombe'u aikovy Xembouare anhetẽ va'e gui aendu va'e anho – he'i.

<sup>27</sup> Ha'e rami ijayvu teĩ ha'e kuery ndoikuuai Nguu re ae ijayvua.

<sup>28</sup> Ha'e gui Jesus aipoe'ive ju:

– Ava ra'y ojeapo va'ekue peupi ma pekuapy vy peikuua 'rã marã ramigua pa aikoa, ha'e xejegui ae mba'eve ndajapoia, mba'eta Xeru xembo'ea rami anho xeayvu aikovy.

<sup>29</sup> Xembouare ma oiko riae xereve. Ndaxerejai 'rã xee ae'i, ha'e oipotaa rami anho ajapo ramo – he'i.

<sup>30</sup> Ha'e rami ijayvu ramo heta ojerovia hexe.

<sup>31</sup> Ha'e gui judeu kuery hexe ojerovia va'e pe Jesus aipoe'i:

– Xeayvua rupi riae ri peiko vy anhetẽ ete 'rã xeremimbo'e peiko.

<sup>32</sup> Ha'e rami vy peikuua 'rã anhetẽ va'e, ha'e anhetẽ va'e pendejora 'rã escravo pendekuaia gui – he'i.

<sup>33</sup> Ha'e ramo ha'e kuery aipoe'i:

– Ore ma Abraão ramymino orekuai vy neĩ peteĩgueve ma escravo orekuai va'e'ý.

Mba'e re tu escravo ve'ý orekuai aguã re ri ndeayvu?

<sup>34</sup> Jesus ombovai:

– Anhetẽ aipoa'e: Teko vai rupi ikuai va'e ma teko vai pegua escravo meme ikuai.

<sup>35</sup> Ha'e escravo ikuai va'e ma ndoiko riae 'rã herekoia ro py, ha'e rã ta'y anho.

<sup>36</sup> Ha'e rami avi Ta'y pendejora ramo ojora pyre ete 'rã pendekuaia.

**37** Ha'e gui xee ma aikuua ae peẽ kuery Abraão ramymino pendekuaia. Ha'e rami teĩ pendere xeayvu noĩ ramo xejukaxe pekuapy.

**38** Xee ma xeayvu mba'emo Xerua py aexa va'ekue re anho. Ha'e rã peẽ kuery ma penderu mba'emo ojapo rã pexa va'ekue ae pejapo – he'i.

**39** Ha'e ramo ha'e kuery

– Oreru ma Abraão ae – he'i okuapy.

Jesus ombovai:

– Anhetẽ ete ri Abraão ra'y kuery pendekuai va'e rire pejapo 'rãgue Abraão ojapoague rami.

**40** Ha'e rami 'rãgue py peẽ kuery xejukaxe pekuapy, anhetẽ va'e Nhanderuete gui aendu va'e amombe'u ramo rive. Ha'e rã Abraão ma ha'e ramigua e'ŷ ojapo raka'e.

**41** Peẽ kuery ma penderu ojapo va'e ramigua ae pejapo va'e – he'i.

Ha'e kuery aipoe'i:

– Ore kuery ma tuu heta rei va'e'ŷ orekuai. Peteĩ'i oreru oiko. Ha'e va'e ma Nhanderuete ae.

**42** Jesus ombovai:

– Anhetẽ ri Nhanderuete re penderu va'e rire ma xerayvu 'rãgue pekuapy, mba'eta xee ma Xeruetea gui aju vy apy ju aiko. Xee ae aipotaa ramí e'ŷ aju va'ekue, ha'e rã Xeru xembou ramo ma aju.

**43** Mba'e re tu peẽ kuery ndapeikuaai ri xeayvua? Ndapeikuaai mba'eta xeayvu pendu kuaa va'erã e'ŷ ae.

**44** Peẽ kuery ma anha guigua pendekuai, hexe ae penderu va'e vy. Ha'e rami vy ae anha oipotaa rami pendekuai. Mba'eta anha ma jypy'i guive jojukaa rupi tema oiko, anhetẽ va'e rupi ndoikoi, hexe anhetẽ va'e noĩ ae ramo. Ha'e vy ijapu 'rã oïkovy gueko rami vy, mba'eta ijapu va'e ae, ha'e ijapu va'e ru oiko.\*

**45** Ha'e nunga rupi ae anhetẽ va'e re xeayvu ramo peẽ kuery ndaperoviai.

**46** Mava'e nda'u peẽ kuery regua peikuaa ajejavvyague? Anhetẽ meme aipoa'e teĩ mba'e re tu ndaperoviai?

**47** Nhanderuete guigua kuery anho 'rã onhe'ẽ rendu. Ha'e nunga rupi ae peẽ kuery naxenhe'ẽ rendui, mba'eta Nhanderuete guigua e'ŷ pendekuai – he'i.

**48** Judeu kuery aipoe'i:

– Anhetẽ'ŷ ri nda'u aiporo'ea Samaria pygua ha'e anha reveguia reikoa?

**49** Jesus ombovai:

– Xee ma anha reveguia e'ŷ aiko, ha'e rã Xeru amboete va'e. Ha'e rã peẽ kuery ma naxemboetei.

**50** Ha'e rami avi xee ma avave rei pe nanhemboyvate ukai. Peteĩ oiko xemboyvatearã, ha'evea rami joe oikuua pota va'e ae.

**51** Anhetẽ aipoa'e: Xeayvua rupi ikuai va'e ma nomanoi 'rã raka'eve rã peve guarã – he'i.

**52** Ha'e ramo judeu kuery aipoe'i:

– Aŷ ma anhetẽ ete roikuua ma anha reveguia reikoa. Mba'eta Abraão ha'e profeta kuery ha'e javive omano raka'e. Ha'e rã ndee ma “Xeayvua rupi ikuai va'e nomanoi 'rã raka'e rã peve guarã” 're.

**53** Ndee nda'u nhaneramoĩ Abraão omano va'ekue gui ndeyvateve ri? Profeta kuery voi omanomba raka'e. Marã ramigua tu ndee renhemoingo?

**54** Jesus ombovai:

– Xee ae anhemboyvate uka va'e rire ma xeyvatea mba'everã ndovarei 'rãgue. Ha'e rã xemboyvatearã ma Xeru ae oiko. Ixupe ma peẽ kuery “Nhanderuete” peje

**55** va'eri peikuaa va'e'ŷ. Ha'e rã xee ma aikuua. Xee “Ndaikuuaai” ha'e va'e rire peẽ kuery rami avi 'rãgue xeapu. Xee ma aikuua, ha'e ijayvua ajapo aikovy guive.

\* **8:44** 1 João 3.7-10

<sup>56</sup> Ha'e gui peneramoõ Abraão ma ov'y'a raka'e xerekorã ixupe oikuaa ukaa rã oikuaa vy. Ha'e ma oikuaa vy xererovy'a ma voi raka'e – he'i.

<sup>57</sup> Judeu kuery aipoe'i:

– Ndee tu neĩ cinqüenta ma'etÿ teri ndererekoi va'eri rexa ma va'e ty'y Abraão?

<sup>58</sup> Jesus ombovai:

– Anhetë aipoa'e: Abraão oiko e'ÿ mbove voi xee aiko ae ma – he'i.

<sup>59</sup> Ha'e ramo ha'e kuery ojopy ita ojapi aguã, teĩ Jesus ojepe'a ov'y templo gui.

## 9

### *Peteĩ ava ára revegua e'ÿ va'e Jesus omoma'ẽ jevyague*

<sup>1</sup> Ha'e gui Jesus oo vy oexa peteĩ ava ára revegua e'ÿ ma voi oiko va'ekue.

<sup>2</sup> Ha'e ramo hemimbo'e kuery oporandu:

– Orembo'ea, mava'e nda'u ojejavy raka'e peva'e ára revegua e'ÿ ma voi itui'i aguã: ha'e ae, tyrã pa tuu kuery ojejavy?

<sup>3</sup> Jesus ombovai:

– Ha'e va'e ojejavyague gui e'ÿ oiko, neĩ tuu kuery gui e'ÿ guive. Hexe Nhanderuete rembiapo ojekuaa aguã rima oiko.

<sup>4</sup> Ha'e gui nhande kuery ma ára oĩ teri reve 'rã jajapo Xembouare ojapo uka va'e, mba'eta pytû ou ma oiny, avave rei nomba'epoavei aguã.

<sup>5</sup> Kova'e yvy re aiko teria ja yvy regua moexakãa aiko – he'i.

<sup>6</sup> Ha'e rami ijayvu ma vy onyvõ yvy re. Ha'e rami vy guendyry py yvy omoakÿ va'ekue oikyty ára revegua e'ÿ rexa re.

<sup>7</sup> Ha'e vy aipoe'i:

– Tereo ejeovai yy omboty pyre Siloé hery va'e py – he'i. Ha'e va'e tery ma "Omondouka pyre" 'ea. Ha'e gui ava oo vy ojeovai, ha'e gui oma'ẽ porã ju ma ouvy.

<sup>8</sup> Ha'e gui oo katy'i ikuai va'e ha'e mba'emo ojerure oiny rã oexa va'ety kuery oexa okuapy. Oexa vy oporandu joupe-up:

– Peva'e e'ÿ teve mba'emo re ojerureaty py oĩ va'ekue?

<sup>9</sup> Amongue ma

– Ha'e rima – he'i.

Ha'e rã amboae kuery ma

– Any teve, ha'e ae merami rive ta'vy – he'i.

Ha'e ramo ha'e ae aipoe'i:

– Xee ae ri – he'i.

<sup>10</sup> Ha'e ramo oporandu okuapy:

– Mba'exa tu aÿ rexa ri reikovy?

<sup>11</sup> Ava va'e ombovai:

– Peteĩ ava Jesus hery va'e ma yvy omoakÿ vy oikyty kuri xerexa re. Ha'e vy aipoe'i xevy: "Tereo ejeovai Siloé yy omboty pyre py", he'i. Ha'e ramo aa ajeovai, ha'e gui aÿ reve aexa porã ju – he'i.

<sup>12</sup> Oporandu ju okuapy:

– Mamo tu ha'e oĩ?

Ombovai:

– Xee ndaikuuai – he'i.

### *Fariseu kuery omboayvuague ára revegua e'ÿ va'ekue*

<sup>13</sup> Ha'e gui fariseu kuerya py ju ha'e kuery ogueraa ára revegua e'ÿ ma voi itui'i va'ekue,

<sup>14</sup> mba'eta Jesus yvy omoakÿ vy omoma'ëa ára ma sábado.

<sup>15</sup> Ha'e gui fariseu kuery ju oporandu marã rami vy pa oma'ëa re.

Ha'e ramo ava va'e ombovai:

– Xerexa re yapo oikyty ha'e ajeovaipa rire ma ama'ẽ kuri – he'i.

<sup>16</sup> Ha'e ramo fariseu kuery va'e regua amongue aipoe'i:

— Ha'e nunga apoare ta'vy Nhanderuete guigua e'ŷ teve, mba'eta sábado ára pyguitarã oeja pyre rami e'ŷ oiko.

Ha'e rã amboae kuery ma aipoe'i:

— Mba'exa 'rã tu heko vai va'e ojapo kuaa guĩ ramigua hexa pyrã? — he'i okuapy. Ha'e rami vy joo rami e'ŷ-e'ŷ ijayvu okuapy.

<sup>17</sup> Tēgue ju ha'e kuery oporandu ára rewegua e'ŷ va'ekue pe:

— Nemoma'ẽare tu marã ramigua oikoa ndee reikuua?

— Profeta — he'i.

<sup>18</sup> Judeu ruvixa kuery ndogueroviai okuapy ára rewegua e'ŷ ae itui'i raka'eague. Ha'e rami vy oenoĩ uka tuu kuery.

<sup>19</sup> Tuu kuery pe oporandu okuapy:

— Peva'e ma nhi'ã pendera'y “Ára rewegua e'ŷ ma voi itui'i” pejeague? Marã rami vy tu aŷ oma'ẽ?

<sup>20</sup> Ha'e ramo tuu kuery ombovai:

— Ore ma roikuua orera'y oikoa, ha'e ára rewegua e'ŷ ma voi itui'iague.

<sup>21</sup> Ha'e rã marã rami vy pa oma'ẽ jevya ma ore kuery ndoroikuuaai, neĩ mava'e pa imoma'ẽare voi ndoroikuua. Orera'y ma tuja ma ramo ixupe ae 'rã peporandu. Ha'e ae vy 'rãe ma onhemombe'u kuaa — he'i okuapy.

<sup>22</sup> Tuu kuery ma judeu ruvixa kuery gui okyje vy ha'e rami ijayvu, mba'eta huvixa kuery ijayvu ma voi onhembo'eaty gui omoxẽ aguã amongue Jesus ae Cristo oikoa rami omombe'u va'e.

<sup>23</sup> Ha'e nunga rupi ae tuu kuery “Ha'e ma tuja ma, ixupe ae peporandu” he'i.

<sup>24</sup> Ha'e gui tēgue ju huvixa kuery oenoĩ ava ára rewegua e'ŷ va'ekue. Ha'e vy aipoe'i:

— Nhanderuete rembojerovia va'e rupi emombe'u porã, mba'eta ore ma roikuua ha'e va'e ava heko vai va'ea — he'i.

<sup>25</sup> Ha'e ramo ombovai:

— Xee ma ndaikuua heko vai va'ea. Peteĩ mba'e tema aikuua, mba'eta ára rewegua e'ŷ aiko va'ekue ri aŷ ma ama'ẽ — he'i.

<sup>26</sup> Ha'e kuery oporanduve ju:

— Mba'e tu ojapo ndevy? Marã rami vy tu nemoma'ẽ?

<sup>27</sup> Ombovai:

— Xee ma amombe'u ae ma kuri tē peẽ kuery ndaperoviai. Mba'e re tu peẽ kuery penduxe vai ri ha'ekue'-ekue'i amombe'u rã? Tyrã pa peẽ kuery voi hemimbo'e pendekuaixe? — he'i.

<sup>28</sup> Ha'e rami rã ijayvu rei okuapy hexe. Ha'e vy aipoe'i:

— Ndee rima hemimbo'e, ha'e rã ore kuery ma Moisés remimbo'e orekuai.

<sup>29</sup> Mba'eta Moisés reve Nhanderuete ijayvu raka'e, roikuua porã. Ha'e rã ha'e va'e ava ma neĩ maguigua pa oikoa voi ndoroikuuaai — he'i okuapy.

<sup>30</sup> Ava va'e ombovai:

— Peẽ kuery tu “Maguigua pa oikoa ndoroikuuaai” peje, xemoma'ẽ va'eri.

<sup>31</sup> Mba'eta jaikuua ae ma Nhanderuete noendui 'rãa heko vai va'e ojerurea. Ha'e rã Nhanderuete renonde ojererokyjea rupi ha'e oipotaa rami oiko va'e ojerurea ma oendu 'rã.

<sup>32</sup> Yvy itui ypy'i guive nanhaendui teri ára rewegua e'ŷ ma voi itui'i va'ekue moma'ẽa omombe'ua rã.

<sup>33</sup> Ha'e nunga rupi ha'e va'e ava ma Nhanderuete guigua e'ŷ va'e rire mba'eve rei ndojapo kuaai 'rãgue — he'i.

<sup>34</sup> Ha'e rã ha'e kuery ombovai:

— Ndee tu ndetui'i guive rejeyavypa ma voi va'ekue ri aŷ ma orembo'e ta? — he'i okuapy. Ha'e rami vy omoxẽ.

*Ára rewegua e'ŷ va'ekue pe Jesus ojekuaa ukaague*

<sup>35</sup> Jesus oendu ára revegua e'ŷ va'ekue omoxẽ okuapyague. Ha'e rami vy ovaexĩ vy oporandu:

— Ndee tu rejerovia ri Ava ra'y ojeapo va'ekue re?

<sup>36</sup> Ava va'e ombovai:

— Senhor, mava'e tu oiko, hexe ajerovia aguã?

<sup>37</sup> Jesus aipoe'i:

— Ndee ma rexma re'amy, xee ndereve xeayvu va'e ae ha'e — he'i.

<sup>38</sup> Ombovai:

— Senhor, xee ajerovia — he'i vyve omboete.

<sup>39</sup> Ha'e gui Jesus aipoe'i:

— Xee ma kova'e yvy re aju peteĩ-teĩ oikoague repy ojopy aguã, ha'e rami vy ára revegua e'ŷ ikuai va'ekue oma'ẽmba ju, ha'e oma'ẽ porã va'ekue ndoexavei aguã — he'i.

<sup>40</sup> Ha'e ramo fariseu kuery regua ijyvýry ikuai va'e oporandu ixupe:

— Ha'e rami vy ore kuery voi teve ára revegua e'ŷ orekuai?

<sup>41</sup> Jesus ombovai:

— Ára revegua e'ŷ ete pendekuai va'e rire penderekvaia noĩ 'rãgue. Ha'e rã “Ore roma'ẽ porã” peje vy ma penderekvaia oĩ tema.\*

## 10

### *Vex'a'i re opena porã va'e oikoa re Jesus ijayvuague*

<sup>1</sup> — Anhetẽ aipoa'e pêvy: Amongue vexa'i kora rokẽ rupi e'ŷ, amboae rupi oike va'e ma imonda ha'e jojuka rive-rive va'e anho.

<sup>2</sup> Ha'e rã okẽ rupi oike va'e ma vexa'i kuery re opena va'e ete.

<sup>3</sup> Ha'e va'e pe ma okẽ rarõa oipe'a 'rã, ha'e vexa'i kuery voi oendu kuaa 'rã okuapy ijayvua. Ha'e ramo guymba kuery hery rupi meme oenoĩ reve oguenoẽmba 'rã heravy oka py.

<sup>4</sup> Guymba kuery oguenoẽmba ma vy henonde 'rã oo, ha'e rã hymba kuery ma ijayvua oendu kuaa vy oo 'rã hakykue.

<sup>5</sup> Ha'e rã opena va'ety e'ŷ ou ramo ma vexa'i kuery ndooi 'rã hakykue, onhamba 'rã ixugui, ijayvua noendu kuaai vy — he'i.

<sup>6</sup> Ha'e rami Jesus ijayvu mba'emo re ombojoja vy. Ha'e rami teĩ hendua kuery noendu kuaai.

<sup>7</sup> Ha'e ramo Jesus omombe'u porãve ju:

— Anhetẽ aipoa'e pêvy: Xee ae vexa'i kora rokẽ aĩ.

<sup>8</sup> Xee aiko e'ŷ mbove ma imonda ha'e jojuka rive va'e kuery anho ou raka'e. Ha'e va'e kuery ayvu ma vexa'i kuery noendui.

<sup>9</sup> Ha'e rã xee ma okẽ aĩ. Xea rupi oike va'e kuery oo jepe 'rã. Oike 'rã, ha'e gui oẽ ju vy ojou 'rã ho'u va'erã.

<sup>10</sup> Imonda va'e ou 'rã mymba kuery oipe'a, ojuka ha'e omomba aguã rive. Ha'e rã xee ma aju ha'e kuery oupity aguã tekove, ha'e opa mba'e py ikuai porã aguã.

<sup>11</sup> — Xee ma vexa'i re opena porã va'ety rami aiko. Mba'eta opena porã va'ety ma guymba kuery re ome'ẽ 'rã guekove ae.

<sup>12</sup> Ha'e rã peráta re rive ombo'eapo va'e ma vexa'i re opena ete va'ety e'ŷ, neĩ vexa'i ja e'ŷ guive. Ha'e rami vy aguara'i guaxu ou rã ha'e oexa vy onha rive 'rã vexa'i kuery oejapa vy. Ha'e ramo aguara'i guaxu mymba kuery oguero'a vy omondyipa 'rã imondovy opa rupi.

<sup>13</sup> Peráta re rive ombo'eapo va'e ma onha 'rã vexa'i kuery re'ŷ ae openave vy.

<sup>14</sup> Ha'e rã xee ma vexa'i re opena porã va'ety aiko. Aikuua xerymba kuery, ha'e rã ha'e kuery voi xekuaa,

\* <sup>9:41</sup> Lucas 18.9-14; Apocalipse 3.17

<sup>15</sup> Xeru xekuaa, ha'e xee Xeru aikuaa rami ae avi. Ha'e rami vy xerymba kuery re ame'ẽ 'rã xerekove.

<sup>16</sup> — Ha'e gui xerymba kuery areko avi kora mboae py, kova'e py e'ŷ. Ha'e va'e kuery avi 'rã aru, xeayvu oendu avi ramo. Ha'e rami vy peteĩ kora py 'rã ha'e javive ikuai, ha'e peteĩ'i avi 'rã oiko opena va'ety.

<sup>17</sup> — Ha'e nunga rupi ae Xeru xerayvu, mba'eta ame'ẽ 'rã xerekove, ha'e gui ajopy jevy aguã.

<sup>18</sup> Xegui avave rei ndoipe'aai 'rã xerekove. Xee ame'ẽxe'a'i py ae 'rã ame'ẽ. Mba'eta xepo'aka xerekove ame'ẽ, ha'e gui ajopy ju aguã, ha'e rami Xeru ojapo uka rire.

### *Joo rami e'ŷ-e'ŷ judeu kuery ijayvu okuapyague*

<sup>19</sup> Ha'e rami Jesus ijayvu rã judeu kuery oendu vy joo rami e'ŷ-e'ŷ ijayvu okuapy.

<sup>20</sup> Ha'e kuery va'e regua hetu aipoe'i:

— Evoko va'e re tu anha rima onhemonde ra'e na'inhakã porâvei aguã rami. Mba'e re tu pejapyxaka ri ijayvua re?

<sup>21</sup> Ha'e rã amongue ma aipoe'i:

— Ha'e rami avi anha reveguia ma nda'ijayvui 'rã ha'e rami. Tyrã pa anha omoma'ẽ kuaa ri ty'y oma'ẽ e'ŷ va'ekue?

### *Jesus pe oporandu ju okuapyague*

<sup>22</sup> Yro'y py oiko ngaru Jerusalém py, templo ojapopaague re ima'endu'aa aguã regua.

<sup>23</sup> Ha'e gui Jesus oiko templo roka rupi oguy puku Salomão 'epy va'e py.

<sup>24</sup> Ha'e jave judeu kuery ijyvýry oupa vy oporandu ixupe:

— Raka'e peve tu ropêxa rei aguã rami oremonoinga ta? Cristo ete ri reiko vy enhemombe'u porã.

<sup>25</sup> Jesus ombovai:

— Xee ma anhemombe'u porã teĩ peẽ kuery ndaperoviai. Mba'emo porã Xeru rery rupi ajapo aikovy va'e voi oikuua uka marã ramigua pa aikoa.

<sup>26</sup> Peẽ kuery ndapejeroviai mba'eta xerymba vexa'i regua e'ŷ pendekuai vy.

<sup>27</sup> Mba'eta xerymba vexa'i kuery ma oendu 'rã xeayvu, ha'e rã xee ma peteĩ-teĩ aexa kuaa. Ha'e kuery oo 'rã xerakykue.

<sup>28</sup> Ha'e kuery pe ame'ẽ tekove marã e'ŷ. Ha'e ramo ha'e kuery nomanovei ma 'rã, ha'e avave rei ndoipe'aai 'rã xepo gui.

<sup>29</sup> Xevy pe Xeru omboaxa va'ekue ma pavẽ gui ipo'akave. Ha'e Xeru po gui ma avave rei ndoipe'aai 'rã.

<sup>30</sup> Xee ha'e Xeru reve ma peteĩ'i ae roiko — he'i.

<sup>31</sup> Ha'e gui teĩgue ju judeu kuery ojopy ita ojapi aguã.

<sup>32</sup> Ha'e ramo Jesus aipoe'i:

— Pexaa rupi mba'emo porã ajapo reta ma, Xeru ojapo uka va'e meme. Ha'e nungakue regua mava'e re tu xeapipaxe ita py?

<sup>33</sup> Judeu kuery ombovai:

— Mba'emo porã rejapo va'ekue re'ŷ ri rojapipaxe ita py, ha'e rã Nhanderuete re ndeayvu vaiague re, mba'eta ndee ava rive reiko va'eri Nhanderuete rami renhemoingo ramo — he'i okuapy.

<sup>34</sup> Ha'e ramo Jesus aipoe'i:

— Pêvygua lei re aipo nde'i ri ty'y: “Xee aipoa'e tuuete regua pendekuaia rami”?\*

<sup>35</sup> Nhanderuete ombopara uka va'ekue ndoaxa rivei 'rã. Ha'e nunga rupi ha'e va'e kuery pe ijayvu vy “Tuuete” he'i rire

\* <sup>10:34</sup> “Tuuete” he'ia ma joe oikuua pota va'e kuery re ijayvu vy (Salmo 82.6).

<sup>36</sup> mba'e re tu ha'vy "Ndeayvu vai" peje xevy Nhanderuete Ra'y aikoa rami anhemombe'u ramo? Mba'eta xee ma Xeru guemimbourā xemoī va'ekue, ko yvy re xembou aguā.

<sup>37</sup> Ha'e gui mba'emo Xeru ojapo uka va'e xee ndajapoi va'e rire ha'evea rami 'rāgue xere ndapejeroviaia.

<sup>38</sup> Ha'e rami avi ha'e nunga ajapo ramo ha'e nunga oikoa ri jepe perovia 'rāgue, xere ae ndapejeroviai tei. Ha'e rami vy peikuaa aguā xere Xeru oña, ha'e Xeru re xee aña — he'i.

<sup>39</sup> Ha'e rami ijayvu ramo ha'e kuery ojopyxe tei oo jepe ju ha'e kuery po gui.

<sup>40</sup> Peteīgue ju Jordão yakā rovaigua re Jesus oo João nhomongarai ypy'i oikovyague py. Ha'e py ranhe oiko.

<sup>41</sup> Ha'e ramo heta ju oje'oi oña py. Ha'e rami vy joupe-upe aipoe'i okuapy:

— João ma neī peteīgueve hexa pyrā ndojapoi va'ekue. Ha'e rā kova'e rekorā re ijayvuague ma anhetē meme raka'e — he'i okuapy.

<sup>42</sup> Ha'e rami vy ha'e py heta ete ojerovia hexe.

## 11

### *Jesus omboete jevyague Lázaro*

<sup>1</sup> Ha'e gui Maria ha'e tyke Marta rekoa Betânia py ma ikyvy Lázaro imba'eaxy oupy.

<sup>2</sup> Maria ma Senhor py re heakuā porā va'e oikyty vy o'a py ae omombiru va'erā.

<sup>3</sup> Ha'e gui Lázaro reindy kuery aipoe'i uka Jesus pe:

— Senhor, orekyvy reayvu ete va'e imba'eaxy oupy — he'i uka.

<sup>4</sup> Ha'e nunga Jesus oendu vy aipoe'i:

— Ha'e va'e teko axy ma ijukaarā e'ŷ oiko, ha'e rā Nhanderuete yvatea ha'e Ta'y yvatea avi ojekuaa aguā — he'i.

<sup>5</sup> Jesus oayvu ete Marta, ikypy'y ha'e ikyvy Lázaro.

<sup>6</sup> Ha'e rami vy Lázaro imba'eaxy oupya oikuaa tei mokoī ára ranhe opytave oña py.

<sup>7</sup> Ha'e gui mae ma

— Jaje'oi ju Judéia yvy katy — he'i guemimbo'e kuery pe.

<sup>8</sup> Ha'e ramo hemimbo'e kuery oporandu:

— Orembo'ea, kuee'i judeu kuery ita py ndeapipaxe va'ekue ri ha'ekue katy ju va'e ty'y rejeyta?

<sup>9</sup> Jesus ombovai:

— Doze hora e'ŷ ri ty'y petei ára oĩ? Ha'e ara py teri amongue oguata vy nonhepyxangai 'rā, hexakāa ko yvy regua oexa vy.

<sup>10</sup> Ha'e rā pyávy ma oguata vy onhepyxanga 'rāe, mba'eta hexe noī hexakāa — he'i.

<sup>11</sup> Ha'e rami ijayvu ma vy aipoe'ive ju:

— Nhaneirū Lázaro ma oke oupy. Ha'e ramo xee aa ta amomyi — he'i.

<sup>12</sup> Ha'e ramo hemimbo'e kuery aipoe'i:

— Senhor, oke vy 'rā okuera — he'i okuapy.

<sup>13</sup> Ha'e rami Jesus ijayvu va'eri Lázaro omano maa re ijayvu vy. Ha'e rā hemimbo'e kuery ma okea re rive ijayvua rami oikuaa.

<sup>14</sup> Ha'e ramo ma Jesus omombe'u porāve:

— Lázaro omano ma.

<sup>15</sup> Ha'e pendere ama'ẽ vy avy'a ha'e py ndaikoiague re, mba'eta ha'e rami rā 'rāe pejerovia. Jaje'oi ma'vy ituia py — he'i.

<sup>16</sup> Tomé Dídimu hery va'e aipoe'i oirū kuery pe:

— Jaje'oi ha'vy nhande kuery voi hexeve nhamano aguā — he'i.

<sup>17</sup> Ha'e gui Jesus ovaē rā irundy ára ma ojapo Lázaro onhono porāa ague.

<sup>18</sup> Betânia tekaoa ma Jerusalém gui três quilômetro rānda'u opyta.

<sup>19</sup> Marta ha'e Maria okyvy re ipy'a vai ramo heta ou judeu kuery ombopy'a guaxu aguā.

<sup>20</sup> Marta ma Jesus ou oinya oikuaa vy oo ovaexī aguā. Ha'e rā ikypy'y Maria ma ngoo py ranhe opyta.

<sup>21</sup> Ha'e gui Marta aipoe'i Jesus pe:

— Senhor, apy reiko va'e rire xekyvy nomano jepei 'rāgue.

<sup>22</sup> Ha'e rami avi xee aikuuaa opa mba'e re Nhanderuete pe rejerure ramo ha'e ojapo 'rāa ndevy — he'i.

<sup>23</sup> Jesus aipoe'i:

— Ndekyvy ma onhemboete ju 'rā.

<sup>24</sup> Ha'e ramo Marta ma

— Tá, xee aikuuaa ma opaa ára onhemboete ju 'rāa, omboetepaa jevy jave — he'i.

<sup>25</sup> Ha'e gui Jesus aipoe'i:

— Xee ae ma anhomboete ha'e anhomoingove va'e. Xere ojerovia va'e omano teĩ oikove jevy 'rā.

<sup>26</sup> Ha'e rami avi ha'e javive xere oiko ha'e ojerovia va'e ma nomanoi 'rā raka'eve rā peve guarā. Rerovia pa xeayvua?\*

<sup>27</sup> Kunha va'e ombovai:

— Tá Senhor, xee arovia ndee Nhanderuete Ra'y Cristo ko yvy re rejua 'rā va'ekue reikoa — he'i.

<sup>28</sup> Ha'e rami ijayvupa vy ojepe'a ranhe, ha'e oenoī okypy'y Maria. Ha'e vy ixupe anho'i aipoe'i:

— Nhanembo'ea ovaē ma, ha'e nerenoī — he'i.

<sup>29</sup> Ikypy'y oendu vyve opu'ā ha'e oo oña katy.

<sup>30</sup> Mba'eta Jesus ma tekaoa py ete'i novaē teri, Marta oexaague py teri oī.

<sup>31</sup> Ha'e gui judeu kuery Maria mbopy'a guaxuarā hoo py ou va'ekue oexa okuapy Maria ojapura reve opu'ā ov y rā. Ha'e rami vy ha'e kuery voi oje'oi hupive, "Ikyvy ituia katy po oo ojae'o aguā" he'i vy.

<sup>32</sup> Ha'e gui Jesus oña py Maria ovaē vy oexa vyve guenapy'ā re oī henonde. Ha'e vy aipoe'i:

— Senhor, apy reiko va'e rire xekyvy nomano jepei 'rāgue — he'i.

<sup>33</sup> Ha'e ojae'o rā, ha'e judeu kuery hupive ou va'ekue ha'e javi ojae'o avi ramo Jesus oexa vy oendu opy'a re omboaxya, ndovy'ai guive.

<sup>34</sup> Ha'e rami vy oporandu:

— Mamo tu penhono porā raka'e?

Ha'e kuery ombovai:

— Senhor, eju ha'vy exa — he'i.

<sup>35</sup> Jesus voi ojae'o.

<sup>36</sup> Ha'e ramo judeu kuery oexa vy

— Ha'e oayvu ete va'e ty'y — he'i okuapy.

<sup>37</sup> Ha'e rā amongue ma aipoe'i:

— Ha'e ma ára rewegua e'ŷ omoma'ē va'ekue nda'evei ri ty'y kova'e voi omano aguā guogueraa jepe aguā? — he'i.

<sup>38</sup> Jesus teīgue ju opy'a re oendu omboaxya. Ha'e vy oo onhono porāa ague peve. Peteĩ itakua py onhono porāa, ha'e imbotyarā omoña ita tuvixa va'e.

<sup>39</sup> Ha'e ramo Jesus aipoe'i:

— Peipe'a ita — he'i.

Ha'e ramo omano va'ekue reindy Marta aipoe'i:

— Senhor, heakuā ma rima, irundy ára ma rire.

<sup>40</sup> Jesus ombovai:

— Xee aipo nda'eit ri ty'rā'e, rejerovia vy Nhanderuete po'akaa rexā 'rāa? — he'i.

\* **11:26** João 5.21-29, 6.40

- 41** Ha'e rami rā oipe'aa ita. Jesus yva re oma'ẽ vy aipoe'i:  
 — Xeru, xee roguerovy'a, mba'eta rendu xeayvua.
- 42** Xee ma aikuaa ae xeayvua rendu riaeae. Ha'e rami avi nami xeayvu heta va'e kuery oikuuaa aguā ndee ae xembouague — he'i.
- 43** Ha'e rami ijayvu ma rire ojapukai reve aipoe'i:  
 — Lázaro, eẽ ke oka py — he'i.
- 44** Ha'e ramove omano va'ekue oẽ ouvy ipy ha'e ipo ojokuaague reve, ha'e hova panhero py onhovāa va'ekue reve.  
 Ha'e ramo Jesus aipoe'i:  
 — Pejora, tove too — he'i.
- 45** Ha'e gui judeu kuery Maria-a py ou va'ekue ma ha'e rami Jesus ojapo rā oexa vy heta ojerovia hexe.
- 46** Ha'e rā amboae kuery ma oje'oi vy fariseu kuery pe omombe'upa Jesus ojapo va'ekue.
- Huvixa kuery Jesus ojuka aguā re jogueroayvuague*
- 47** Ha'e nunga sacerdote yvatekueve va'e ha'e fariseu kuery oendu vy nhomboatypa nhomboayvu va'ety kuery reve. Ha'e vy aipoe'i:  
 — Mba'e tu nhande kuery jajapo jakuapy? Mba'eta ha'e va'e ava ma hexa pyrā anho ojapo oikovy.
- 48** Xapy'a rei nanhapenai ramo ma ojerovia pavē 'rā hexe. Ha'e ramo Roma pygua kuery ha'e nunga oendu vy ou vy omomba 'rā nhambojeroviaaty ha'e nhande kuery voi — he'i okuapy.
- 49** Ha'e kuery regua peteī ma Caifás hery va'e, ha'e va'e ma'et̄y re sacerdote yvateve va'e oī. Ha'e va'e aipoe'i:  
 — Peē kuery ma mba'eve ndapeikuaai,
- 50** neī ndapeikuaa potai guive, mba'eta nhande kuery nhamanombaa 'rāgue py ha'eveve peteī ava omano aguā heta va'e kuery rekovia — he'i.
- 51** Ojee ae gui e'ŷ ha'e rami ijayvu. Ha'e rā ha'e va'e ma'et̄y re sacerdote yvateve va'e oī vy Nhanderuete gui ae ijayvu Jesus heta va'e kuery rekovia omano aguā re.
- 52** Ha'e guetarā kuery rekovia anho e'ŷ guive omano, ha'e rā Nhanderuete ra'y kuery yvy jave re ikuai va'e ha'e javi omoingo aguā peteī'i tete rami.
- 53** Ha'e gui ha'e va'e ára guive ha'e kuery onhembopy'a okuapy ojuka aguā.\*
- 54** Ha'e nunga Jesus oikuuaa vy judeu kuery ikuai rupi ve'ŷ oiko, ha'e rā teko a e'ŷa katy'i peteī tetā Efraim hery va'e oī va'e py oo. Ha'e py ranhe opyta guemimbo'e kuery reve.
- 55** Ha'e gui judeu kuery pegua ngaru Páscoa ára ovaẽ rai'i ma ramo Jerusalém katy heta oje'oi teko ikuai va'e gui, Páscoa oiko rā guarā ojeky'a'o aguā.
- 56** Ha'e py ma oeka okuapy Jesus. Ha'e rami vy templo py ikuai vy aipoe'i joupe-up:  
 — Mba'exa ndee reikuaa? Jesus nda'u ndoui 'rā ngarua py? — he'i.
- 57** Sacerdote yvatekueve va'e ha'e fariseu kuery aipoe'i amongue mamo pa Jesus oikoa oikuuaa vy omombe'u aguā, ha'e kuery ojopy aguā.

## 12

*Mateus 26.6-12; Marcos 14.6-8*

- 1** Mboapy meme ára teri oata Páscoa ára ovaẽ aguā jave ma Betânia katy ju Jesus oo, Lázaro omanoague gui omboete ju va'ekue rekoia py.
- 2** Ha'e rā Jesus pe ojapo okuapy peteī ngaru. Marta ojara oikovy tembi'u. Ha'e rā Lázaro voi ha'e kuery reve oī okarua py.
- 3** Ha'e gui Maria ogueru meio quilo heakuā porā va'e nardo gui anho ojapo pyre, hepyve ete va'e. Ha'e rami vy Jesus py re oikyty heakuā porā va'e, ha'e o'a py ju omombiru. Opy ha'e javi rupi omoeakuāmba.

\* **11:53** Mateus 26.1-5; Marcos 14.1,2; Lucas 22.1,2

<sup>4</sup> Ha'e rami rā hemimbo'e kuery regua Judas Iscariotes ijopy uka nhemiarā va'e aipoe'i:

<sup>5</sup> — Mba'e re tu heakuā porā va'e novendei ra'e trezentos ára repy re, iporiaukue'i pe hepykue ome'ē aguā? — he'i.

<sup>6</sup> Ha'e rami ijayvu iporiaukue'i oipytyvōxe vy e'ŷ, mba'eta imonda va'e oiko, ha'e oirū kuery peráta ryrū re opena va'e vy ojeupe guarā oipe'a kuerei 'rā peráta omoī mbyre.

<sup>7</sup> Ha'e ramo ixupe Jesus aipoe'i:

— Tove ri, mba'eta guī rami xerete omoeakuā ma voi xenhono porāa rā guarā.

<sup>8</sup> Iporiaukue'i ma ikuai riae 'rā peē kuery reve. Ha'e rā xee ma pendereve ndaiko riaei 'rā.

### *Lázaro avi ojukaxe okuapyague*

<sup>9</sup> Heta judeu kuery ma Jesus ha'e py oĩa oikuaa vy jogueru ha'e katy. Jesus oexaxe vy anho e'ŷ oo, oexaxe avi Lázaro omanoague gui omboete ju va'ekue.

<sup>10</sup> Ha'e rā sacerdote yvatekueve va'e ma Lázaro voi ojukaxe okuapy,

<sup>11</sup> mba'eta judeu kuery Lázaro oexa vy oje'oi va'ekue heta ma ojevy Jesus re ojerovia reve.\*

*Mateus 21.1-9; Marcos 11.1-10; Lucas 19.28-38*

<sup>12</sup> Ko'ē jevy ngaru oĩa py ou va'ekue heta oendu okuapy Jerusalém katy Jesus ou oinya.

<sup>13</sup> Ha'e rami vy pindo rogue ojaya reta jogueravy ovaexī aguā oje'oi vy. Ojapukai reve aipoe'i:

— Iporā ete! Ima'endu'a porāmby Israel kuery ruvixaverā Senhor rery rupi ou va'e — he'i oje'oivy.\*

<sup>14</sup> Ha'e gui Jesus ma mburika'i ojou uka va'ekue áry ou, kuaxia para re oĩa rami vy:

<sup>15</sup> “Sião pygua kuery, pekyje eme, mba'eta mburika ra'y áry ou ma oiny penderuvixaverā”, he'iague rami.\*

<sup>16</sup> Hemimbo'e kuery ha'e nunga oexa teĩ ndoikuai ranhe. Jesus omboyvatea ju rire mae ma oikuaa, mba'eta ima'endu'a okuapy kuaxia para re hekorā re ijayvuague re, omovaẽ porā okuapy rā oexa rire.

<sup>17</sup> Mba'eta heta ikuai va'ekue Lázaro omanoague gui Jesus omopu'ā ju ha'e onhono porāague gui oenoīague py. Ha'e kuery ha'e nungakue omombe'u ramo ae

<sup>18</sup> heta va'e kuery oje'oi ovaexī aguā, ha'e nunga hexa pyrā ojapoague oendu rire.

<sup>19</sup> Ha'e ramo fariseu kuery ma aipoe'i okuapy joupe-up:

— Opa mba'e jajapo va'e mba'everā ndovarei, mba'eta hakykue oje'oi pavē.

### *Amongue grego kuery Jesus oexaxe okuapyague*

<sup>20</sup> Amongue grego kuery ngarua py ombojerovia aguā jogueru avi va'ekue.

<sup>21</sup> Ha'e gui ha'e va'e kuery oje'oi hemimbo'e Filipe oĩa py, Galiléia regua Betsaida pygua ramo. Ha'e vy aipoe'i okuapy ixupe:

— Oreruvixa, ore kuery voi roexaxe Jesus — he'i.

<sup>22</sup> Ha'e ramo Filipe oo vy André pe ranhe omombe'u. Ha'e rami vy André reve Jesus pe ju omombe'u.

<sup>23</sup> Ha'e ramo Jesus ombovai:

— Aŷ ovaẽ ma Ava ra'y ojeapo va'ekue omboyvatea ju aguā ára.

<sup>24</sup> Anhetē aipoa'e pêvy, trigo ra'yī yvy py ndo'ai ha'e nomanoi vy peteĩ ha'yī'i ae 'rā opyta. Ha'e rā omano vy ma hi'a retave 'rā.

<sup>25</sup> Guekove oayvu va'e kuery ma omokanhy 'rā. Ha'e rā ko yvy re ikuai reve guekove ndoayvui va'ekue ma ojou 'rā tekove marā e'ŷ.\*

\* **12:11** Lucas 16.27-31   \* **12:13** Salmo 118.26   \* **12:15** Zacarias 9.9-10 py oĩa rami vy pindo rogue heta va'e kuery ogueru vy oexa uka nguvixa po'akaa oguerovy'aa, ha'e rā kavaju áry 'rāgue py mburika'i áry huvixa ou vy oexa uka onhemoyvy'i ha'e ha'evepa rei'ia.   \* **12:25** Mateus 16.24-28; Apocalipse 2.10, 12.11

<sup>26</sup> Xerembiguai ikuaixe va'e toje'oi xerakykue, mamo rã xee aikoa py xerembiguai avi ikuai aguã. Ha'e gui xerembiguai rami ikuai va'e ma Xeru omboyvate 'rã.

<sup>27</sup> — Aÿ ma xepy'a py aendu ndavy'aia. Ha'e rami vy mba'e ha'e nda'u xee? “Xeru, xereraa jepe ke kova'e hora gui” ha'e 'rã nda'u? Any, mba'eta kova'e hora pyguarã ae xee aju rire.

<sup>28</sup> Ha'e rami 'rãgue py “Xeru, eikuua uka ke nderery yvatea” ha'e – he'i.

Ha'e ramo onhendu peteñ ayvu yva gui:

— Xee aikuua uka ae ma xerery yvatea, ha'e aikuua ukave ju 'rã guive – he'i va'e.

<sup>29</sup> Ha'e va'e ayvu ma heta va'e kuery ikuai va'e oendu vy aipoe'i:

— Yapu.

Ha'e rã amboae kuery ma

— Anjo rima ijayvu ra'e – he'i.

<sup>30</sup> Ha'e gui Jesus ma aipoe'i:

— Pova'e ayvu ma xee anho aendu aguã e'ÿ onhendu, ha'e rã peñ kuery peguarã.

<sup>31</sup> Aÿ ovaë ma ko yvy regua kuery opaga aguã oikuua ucaa ára, ha'e ko yvy regua kuery rerekhoa avi 'rã oitya.

<sup>32</sup> Mba'eta ko yvy gui xereupia ramo ha'e javi regua 'rã aru xejee – he'i.

<sup>33</sup> Ha'e rami ijayvu, marã rami pa omano 'rãa re ijayvu vy.

<sup>34</sup> Ha'e ramo heta va'e kuery oporandu:

— Ore kuery ma roikuua lei re oña rami vy Cristo ou vy oiko riae 'rãa. Mba'exa tu ha'vy ndee aipo're Ava ra'y ojeapo va'ekue yvy gui oupia 'rãa rami? Mava'e tu “Ava ra'y ojeapo va'ekue” 'rea? – he'i okuapy.

<sup>35</sup> Jesus aipoe'i:

— Aÿ'i ma hendy va'e oiko teri pendereve. Peiko kuua ke pendereve hendy va'e oña ja, pytû penderupity e'ÿ aguã, mba'eta pytû rupi ikuai va'e ma ndoikuuaai marã katy pa ooa.

<sup>36</sup> Hendy va'e pendereve oiko teri reve pejerovia hexe, hendy va'e ra'y kuery peiko aguã – he'i. Ha'e rami Jesus ijayvupa ma vy ojepe'a ovv, ha'e ndojexa ukavei ha'e kuery pe.

### *Jesus re judeu kuery ndojeroviai okuapya re ijayvua*

<sup>37</sup> Ha'e kuery oexaa rupi hexa pyrã ojapo reta teñ ndojeroviai okuapya hexe,\*

<sup>38</sup> profeta Isaías aipoe'iague ojeupity aguã: “Senhor, mava'e tu oguerovia 'rã oreayvua?

Mava'e kuery pe tu reikuua ucaa 'rã ndepo'akaa?” he'iague rami.\*

<sup>39</sup> Mba'eta ha'e kuery ndojeroviai ae, Isaías aipoe'ia rami vy:

<sup>40</sup> “Ha'e kuery rexamboguepa, amoakã ratã guive, ha'e kuery guexa py mba'eve oexa e'ÿ aguã, ha'e opy'a py mba'eve oendu e'ÿ aguã, ojeko rerova rã araa jepe aguã.”\*

<sup>41</sup> Ha'e rami Isaías ijayvu Jesus ipo'aka aguã oikuua ma voi vy. Ha'e vy ae hekorã re ijayvu.

<sup>42</sup> Ha'e rami avi huvixa kuery heta ojerovia hexe teñ okyje vy onhenhomí guive, onhembo'eaty gui fariseu kuery omoxë gui.

<sup>43</sup> Ha'e kuery ma avakue pe rive ojejou porã uka, Nhanderuete pe 'rãgue py.

### *Gueko re peteñgue ju Jesus ijayvuague*

<sup>44</sup> Ha'e gui Jesus ijayvu atã reve aipoe'i:

— Xere ojerovia va'e ma xere anho e'ÿ ojerovia, ha'e rã Xembouare re avi.

<sup>45</sup> Xerexa va'e kuery ma Xembouare avi oexa.

<sup>46</sup> Mba'eta xee ma ko yvy regua moexakãarã aju, xere ojerovia va'e pytû rupi ve'ÿ ikuai aguã.

<sup>47</sup> Ha'e gui amongue xeayvu oendu teñ ndojapoi va'e ma xee nambopagai 'rã. Mba'eta xee aju ko yvy re ikuai va'e araa jepe aguã, ambopaga aguã e'ÿ.

\* **12:37** João 1.10,11   \* **12:38** Isaías 53.1   \* **12:40** Isaías 6.10

48 Ha'e rami avi oiko ae ma xere ndojeroviai ha'e xeayvua ndojapoi va'e mbopagaarã. Xeayvu amombe'u va'ekue ae 'rã ojapo opaa ára opaga aguã rami.

49 Mba'eta xee ma xejegui e'ŷ xeayvu. Xeru Xembouare ae oikuaa uka xeayvu aguã, ha'e amombe'u va'erã.

50 Ha'e ijayvua ma tekove marã e'ŷ me'ëa, xee aikuaa. Ha'e rami ae xee xeayvua voi, mba'eta Xeru xembo'ea rami anho xeayvu.

## 13

### *Guemimbo'e kuery py Jesus ojoiague*

1 Páscoa ára py ngaru oiko e'ŷ mbove Jesus oikuaa ovaẽ ta maa ko yvy gui nguua katy ju oo aguã ára. Ojeupagua kuery yvy re teri opytave va'erã oayvu etea rupi oexa uka oayvua opa peve.

2 Ha'e kuery okaru teri okuapy reve, Simão Iscariotes ra'y Judas py'a re anha omoï Jesus ojopy uka nhemi aguã.

3 Ha'e rã Jesus ma oikuaa Tuu opa mba'e ipo py omboaxapaa. Oikuaa avi Nhanderuetea gui ou rire ha'ea py ju oo 'rãa.

4 Ha'e rami vy okaru oinya gui opu'ã vy omboi okamixa puku, ha'e peteĩ ajukue ojopy vy ojokua oku'a rupi.

5 Ha'e rami vy hy'a py yy omoï vy ojoi oiny guemimbo'e kuery py, ha'e gui omombiru ju ajukue oku'a rupi ojokua va'ekue py.\*

6 Ha'e gui Simão Pedro oña py ovaẽ ramo aipoe'i:

— Senhor, ndee rejoi ta va'e ty'y xepy?

7 Jesus ombovai:

— Mba'emo aŷ ajapo va'e ndereikuuai rire teĩ raka'eve rã reikuua 'rã — he'i.

8 Ha'e ramo Pedro aipoe'i:

— Ndee nderejoi 'rã xepy.

Jesus ombovai:

— Xee ndepy ndajoi ri ramo mba'eve ndererekoi 'rã xereve — he'i.

9 Ha'e ramo Pedro aipoe'i:

— Senhor, xepy anho'i e'ŷ ejoi, ha'e rã xepo ha'e xeakã ha'e javi rupi guive.

10 Jesus aipoe'i ixupe:

— Ha'e rami avi amongue ojaupa ma va'ekue opy anho ojoi uka teĩ ha'eve, nda'iky'avei vy. Peẽ kuery voi napendepy'a ky'avei ma aŷ, va'eri ha'e javive e'ŷ ta'vy — he'i.

11 Mba'eta ha'e oikuaa ae mava'e pa ijopy uka nhemiarã oikoa. Ha'e vy ae “Ha'e javi e'ŷ napendepy'a ky'ai” he'i.

### *Mba'e re pa guemimbo'e kuery py ojoiague Jesus omombe'u porâveague*

12 Ha'e kuery py ojoipa ma rire omoï ju okamixa, ha'e mesa py ju oĩ. Ha'e vy oporandu:

— Peikuua pa guĩ rami ajapoague?

13 Mba'eta peẽ kuery ma xevy “Orembo'ea” ha'e “Senhor” peje. Anhetẽ ae aipopeje, mba'eta ha'e ae aiko.

14 Ha'e gui xee penembo'ea ha'e Senhor aiko va'eri pendepy ajoí rire ma peẽ voi 'rã pejoi peteĩ-teĩ py.\*

15 Mba'eta guĩ rami ajapo rombo'e aguã ha'ekue rami avi peẽ kuery voi peteĩ-teĩ pe pejapo aguã re.

16 Anhetẽ aipoa'e pêvy: Tembiguai kuery ma opatõ gui yvateve va'e'ŷ, ha'e imbou pyre voi imbauare gui yvateve va'e'ŷ.

17 Ha'e nunga peikuua vy ha'e rami ri pendekuai vy pevy'a ete 'rã.

\* 13:5 Ha'e kuery reko rami vy oo py ipoua kuery ovaẽ ramo hoo va'e omovaẽ vy ogueru ruka 'rã yy ojepyei aguã, tape rupi yvy ku'i rupi ou rire. Amongue py peteĩ tembiguai ojoi 'rã ipy (Gênesis 18.4, 19.2, 24.32, 43.24, Juízes 19.21, Lucas 7.44). \* 13:14 Lucas 22.24-27; Filipenses 2.5-8

<sup>18</sup> — Peẽ kuery ha'e javive reko re'ŷ guive xeayvu, mba'eta aikuua xerembiporavo peteĩ-teĩ reko. Ha'e rami avi ojeupity 'rãe kuaxia re oĩ va'e: “Xereve okaru oiny va'ekue regua peteĩ opu'ã xerovai”, he'iague.\*

<sup>19</sup> Ha'e nunga oiko e'ŷ mbove xee amombe'u ma voi pẽvy, ojeupity ramo xee ae aikoa perovia aguã.

<sup>20</sup> Anhetẽ aipoa'e pẽvy: Xeremimbou kuery amongue omovaẽ vy ma xee avi xemovaẽ. Ha'e xemovaẽa ma Xembouare avi omovaẽ.

### *Peteĩgue ju ijopy uka nhemiarã Jesus omombe'uague*

<sup>21</sup> Pova'e nunga re Jesus ijayvu vy oendu nda'evei etea. Ha'e vy omombe'u porãve:

— Anhetẽ aipoa'e pẽvy: Peẽ kuery va'e regua peteĩ xejopy uka nhemi 'rã — he'i.\*

<sup>22</sup> Ha'e ramo hemimbo'e kuery joe-joe rive oma'ẽ, mava'e re pa ijayvua oikuua e'ŷ vy.

<sup>23</sup> Jesus yvýry oĩ hemimbo'e kuery regua oayvuve va'e.

<sup>24</sup> Ha'e va'e pe ma Simão Pedro okuã py ojapo “Eporandu mava'e ete pa” he'ia rami.

<sup>25</sup> Ha'e ramo ha'e va'e hemimbo'e ma Jesus pexo re ojekove'i reve oporandu:

— Senhor, mava'e tu?

<sup>26</sup> Jesus ombovai:

— Mbojape ra'ykue hy'a py amoakŷ va'ekue ame'ẽa va'e ae 'rã — he'i. Ha'e rire'ive mbojape ra'ykue ojopy vy omoakŷ, ha'e ome'ẽ Simão Iscariotes ra'y Judas pe.

<sup>27</sup> Ha'e va'e ma mbojape ho'u ramove ipy'a re onhemonde Satanás.

Ha'e ramo ixupe Jesus aipoe'i:

— Mba'emo rejapoxe va'e ke emboare eme — he'i.

<sup>28</sup> Ha'e rami ijayvu rã okarua py amboae kuery ikuai va'e oendu va'eri ndoikuuai okuapy mba'erã pa ijayvua.

<sup>29</sup> Judas ma ha'e kuery peráta re opena va'e ramo amboae kuery “Ngaru pyguarã ojogua aguã re po ijayvu” he'i, ha'e e'ŷ vy “Iporiaukue'i pe mba'emo ome'ẽ aguã po omondouka” he'i teĩ.

<sup>30</sup> Ha'e ramo Judas mbojape ho'upa vyve opu'ã ov. Ha'e jave ma pytũ ma.

### *Jajoayvu aguã re ijayvuague*

<sup>31</sup> Judas ojepe'a ramove Jesus aipoe'i:

— Aŷ ma ovaẽ ma Ava ra'y ojeapo va'ekue omboyvatea aguã, ha'e xere vy Nhanderuete yvatea ojekuaa avi aguã.

<sup>32</sup> Ha'e gui xere vy Nhanderuete yvatea ojekuaa ramo ma xee voi xemboyvate 'rã ojea py ae, xemboyvate voi 'rã guive.

<sup>33</sup> — Xera'y kue'iry, aŷ'i ma aiko teri pendereve. Araka'eve'i rã peẽ kuery xereka 'rã pekuapy. Aŷ pẽvy aipoa'e avi judeu ruvixa kuery pe aipoa'egue rami: “Peẽ kuery voi ndapeoi 'rã aa ague py” ha'e.

<sup>34</sup> Ha'e gui mba'emo pyau ajapo uka pẽvy: Pejoayvu peteĩ-teĩ, xee roayvua ramo ae avi peẽ kuery voi pejoayvu aguã.

<sup>35</sup> Pejoayvua pavẽ oexa vy 'rãe oikuua xeremimbo'e kuery pendekuaia.\*

*Mateus 26.31-35; Marcos 14.27-31; Lucas 22.31-34*

<sup>36</sup> Ha'e ramo Simão Pedro oporandu:

— Senhor, mamo tu reo ta?

Jesus ombovai:

— Xee aa ague py ma ndee ndereoi ranhe 'rã. Raka'eve ramo mae 'rã reo xerakykue — he'i.

<sup>37</sup> Ha'e ramo Pedro oporanduve ju:

— Mba'e re tu nda'evei aŷ've aa aguã nderupive? Xevy pe ha'evepa rei nderekovia ajejuka uka aguã voi.

\* **13:18** Salmo 41.9   \* **13:21** Mateus 26.20-25; Marcos 14.17-21; Lucas 22.21-23   \* **13:35** 1 João 3.11-18

**38** Jesus ombovai:

— Anhetē ri nda'u rejuka uka 'rā xerekovia? Anhetē aipoa'e ndevy, mboapykue uru ava ojapukai e'ŷ mbove renhemombe'u 'rā xekuaa e'ŷa rami — he'i.

## 14

### *Hebreus 10.19,20*

**1** — Pendepy'a re toĩ eme nda'eveia. Pejerovia tema Nhanderuete re, xere avi tema pejerovia.

**2** Mba'eta xeru ro py ma heta oĩ tekoarā, ha'e aa ta areko katu pendekuai aguā. Ha'e rami e'ŷ va'e rire xee amombe'u ma voi 'rāgue pēvy.

**3** Ha'e gui aa vy pendekoarā areko katupa rire aju ju 'rā rogueraa aguā xea py, xee aikoa py peẽ voi pendekuai aguā.\*

**4** Ha'e peẽ kuery peikuaa ae ma aa aguā katy tape oo va'e — he'i.

**5** Ha'e ramo Tomé aipoe'i:

— Senhor, ore ma ndoroikuaai mamo pa reo taa. Marā rami vy 'rā tu roikuaa tape?

**6** Jesus ombovai:

— Xee ae ma tape, anhetē va'e ha'e tekove. Avave rei ndooi 'rā Xerua py xereve'ŷ vy.

**7** Peẽ kuery anhetē ri xekuaa vy Xeru voi 'rā peikuaa. Ha'e rami avi aŷ gui voi peikuaa, ha'e pexa ma guive — he'i.

**8** Ha'e ramo Filipe aipoe'i:

— Senhor, exa uka na Nderu. Ha'e rami rā ha'eve ma 'rā orevy.

**9** Jesus ombovai:

— Filipe, yma ma ri tu ojapo peẽ kuery reve aikoague va'eri ndaxekuaai teri va'e ty'y? Xerexa va'e ma Xeru avi oexa.\* Mba'e re tu aipo're ri ndee: "Exa uka na Nderu orevy" 're?

**10** Ndereroviai va'e ty'y Xeru re xee aĩa, ha'e Xeru xere oĩa? Ha'e ayvu amombe'u va'e voi ma xejeguigua e'ŷ, ha'e rā Xeru xere oĩ va'e ae ojapo oikovy mba'emo.

**11** Perovia na Xeru re aĩa, ha'e Xeru xere oĩa. Ha'e rami e'ŷ vy mba'emo ajapo va'e ri jepe perovia.

**12** — Anhetē aipoa'e pēvy: Xere ojerovia va'e kuery ma mba'emo ajapo va'ekue ramigua ju 'rā ojapo. Iporâve va'e voi 'rā ojapo, Xerua py xee aa ma rire.

**13** Ha'e xerery rupi mba'emo re pejerure ramo ajapopa 'rā, Ta'y re vy Tuu yvatea ojekuaa aguā.

**14** Xerery rupi mba'emo re pejerure ramo xee ajapo 'rā.

**15** Peẽ xerayvu vy pejapo 'rā ajapo uka va'ekue.

### *Nhanembopy'a guaxuarā ombou aguā re ijayvuague*

**16** — Ha'e xee ajerure 'rā Xeru pe ombou aguā Penembojoyvyarā mboae, peẽ kuery reve oiko riae va'erā.

**17** Ha'e va'e ma Nhe'ẽ anhetē va'e kuaa ukaa.\* Ha'e va'e ma ko yvy regua kuery ojee nomoĩ kuaai 'rā, mba'eta ndoexai neĩ ndoikuaai guive. Ha'e rā peẽ kuery ma peikuaa ma, mba'eta pendereve oiko, ha'e pendereve oĩ 'rā guive.

**18** Xee ma ndoroeja rivei 'rā, aju ju 'rā pendereve aiko aguā.

**19** Yvy regua kuery ma ndaxerexavei ranhe 'rā. Ha'e rā peẽ kuery ma xerexa 'rā. Xee aikove ramo peẽ kuery voi peikove 'rā.

**20** — Ha'e va'e ára peikuaa ete 'rā Xeru re aĩa, ha'e peẽ kuery xere peĩa, ha'e gui xee peẽ kuery re aĩa guive.

---

\* **14:3** 1 Tessalonicenses 4.16,17; Hebreus 11.16   \* **14:9** João 10.30; Colossenses 2.9   \* **14:17** João 7.37-39, 16.7-14; Atos 2.1-4; 1 João 2.27

<sup>21</sup> Ajapo uka va'ekue ojee omoõ ha'e ojapo ete va'e kuery ma xerayvu. Ha'e xerayvua kuery ma Xeru rembiayvu ikuai, ha'e xee voi ayvu vy ajekuaa uka 'rã ha'e kuery pe – he'i.

<sup>22</sup> Ha'e ramo Judas mboae Iscariotes e'ŷ va'e aipoe'i:

— Senhor, mba'exa tu orevy anho rejekuaa uka ta, yvy regua kuery pe any va'eri?

<sup>23</sup> Jesus ombovai:

— Xerayvua kuery ma ikuai 'rã xeayvua rupi. Ha'e ramo ma Xeru oayvu 'rã, ha'e roju 'rã ha'e kuery re roĩ aguã.

<sup>24</sup> Ha'e rã ndaxerayvui va'e ma xeayvua rupi e'ŷ 'rã ikuai. Ha'e rami avi xeayvu pendu va'e ma xee ae guigua e'ŷ guive, ha'e rã Xeru Xembouare ayvu.

<sup>25</sup> — Po ramigua re xeayvu pendereve teri aiko reve.

<sup>26</sup> Ha'e rã Nhe'ẽ Ky'a E'ŷ Penembojoyvyarã xerery rupi Xeru ombou va'erã ma opa mba'e re 'rã penembo'e, ha'e penemoma'endu'a 'rã xeayvuague ha'e javi re.

<sup>27</sup> Pendevy pe aeja ta mby'a porã, xeguigua mby'a porã ae 'rã amboaxa pendevy. Ha'e nunga mby'a porã ma yvy re ikuai va'e nome'ẽ kuaai. Ha'e nunga rupi pendepy'a re toĩ eme nda'eveia, pekyje eme guive.

<sup>28</sup> — Pendu ma pêvy “Aa ta, ha'e gui aju ju 'rã pendea py” ha'e ramo. Ha'e gui peẽ kuery anhetẽ xerayvu va'e rire pevy'a 'rãgue “Xerua py xee aa ta” ha'e rã pendu vy, mba'eta Xeru ma xegui yvateve.

<sup>29</sup> Ha'e nunga ma xee amombe'u ma voi oiko e'ŷ mbove, ojeupity rã pejerovia aguã.

<sup>30</sup> — Nda'evevei ranhe xeayvuve aguã pêvy, mba'eta ou ma ko yvy regua kuery rerekaoa. Ha'e ma mba'eve ndoguerekoi xereve,

<sup>31</sup> teĩ ha'e rami aiko 'rã ko yvy re ikuai va'e oikuua aguã Xeru ayvua, ha'e ajapo aikovya ha'e ojapo uka va'e. Pepu'ã ma ha'vy, jaje'oi apy gui.

## 15

### *Uva'y ha'e hakã re ombojojaague*

<sup>1</sup> — Xee ma uva'y anhetẽ va'e, ha'e rã Xeru ma ity re opena va'e.

<sup>2</sup> Ha'e gui hakã xere oĩ va'eri ndai'ai va'e ma ha'e ojayapa 'rã. Ha'e rã hi'a va'e ma ojaya pa'ũ-pa'ũ 'rã hi'a retave aguã.

<sup>3</sup> Peẽ kuery ma hakã omoatyrõ mbyre rami ma pendekuai, ayvu pêvy amombe'ua py ha'eve va'e romoingo rire.

<sup>4</sup> Peĩ atã xere, ha'e rã xee ma aĩ 'rã pendere. Mba'eta hakãgue rive ndai'ai 'rã ojegui ae, hi'y re oĩ e'ŷ vy. Ha'e rami ae avi peẽ kuery voi xere e'ŷ vy hakã hi'a e'ŷ va'e rami 'rã pendekuai.

<sup>5</sup> Mba'eta xee ma uva'y, ha'e rã peẽ kuery ma hakã. Amongue xere oĩ, ha'e ha'e kuery re xee aĩ ramo hi'a porã 'rã, ha'e rã xere'ŷ vy ma mba'eve ndapejapoi 'rã.\*

<sup>6</sup> Xere noĩ va'e kuery ma hakãgue rami 'rã omomboa ipirupa aguã. Ha'e rire amongue ojopy vy tata py ju 'rã omombo okaipa aguã.

<sup>7</sup> Xapy'a rei xere peĩ atã, ha'e pendere xeayvuague oĩ ramo ma peipota va'e re pejerure ramo ojapoa 'rã.

<sup>8</sup> Hakã hi'a reta va'e rami pendekuai ramo 'rãe ojekuaa Xeru yvatea, ha'e xeremimbo'e ete pendekuai.

<sup>9</sup> — Xeru xerayvua rami avi xee voi roayvu peẽ kuery. Xee roayvua rupi tema pendekuai.

<sup>10</sup> Xeayvua rupi pendekuai vy roayvua rupi avi 'rã pendekuai, Xeru ijayvua rupi xee aiko vy xerayvua rupi aikoa rami avi.

<sup>11</sup> Ha'e rami xeayvu xeguigua vy'a peẽ kuery re oĩ aguã, opa mba'e py pevy'a aguã.

<sup>12</sup> — Pova'e ae xee aeja pendevy: Peteĩ-teĩ pejoayvu 'rã xee roayvua rami.

\* <sup>15:5</sup> 1 João 2.28; Gálatas 2.20; Filipenses 4.13

13 Mba'eta guembiaiyvu kuery rekoria ojejuka uka va'e gui ma avave rei ndajoayvuavei.

14 Peẽ kuery ae xerembiayvu pendekuai, ajapo uka va'e pejapo vy.

15 Xee ma “Escravo” nda'eí pãvy, mba'eta escravo kuery ndoikuaai mba'e pa hereko ojapo oikovya. Ha'e rami 'rãgue py “Xerembiayvu” ha'e pãvy, mba'eta pendevy pe aikuua uka Xeru gui aendu va'e ha'e javi.

16 — Mba'eta peẽ ranhe'ý xeporavo va'ekue. Xee ae peẽ kuery roiporavo, ha'e romoõ guive peoa rupi heta pemoingo aguã hi'a opa e'ý va'erã. Ha'e ramo 'rãe pãvy Xeru ojapo xerery rupi pejerurea ha'e javi.

17 Pova'e ae ajapo uka pãvy, peteĩ-teĩ pejoayvu aguã.

18 — Ha'e gui yvy regua kuery napenderayvui ramo peikuaa pota tema pova'e re: Peẽ kuery gui xee ranhe ndaxerayvui okuapy.

19 Ha'e rã yvy regua peẽ pendekuai va'e rire ma yvy regua kuery penderayvu 'rãgue, ha'e kuery regua ae pendekuai rã. Ha'e rami avi yvy regua e'ý peẽ kuery pendekuai, ha'e kuery mbyte gui xee roiporavo rire. Ha'e nunga rupi ae yvy regua napendayvui.

20 Penema'endu'a ke “Tembiguai kuery opatõ gui yvateve va'e'ý” ha'eague re. Ha'e nunga rupi xere opu'ã rei okuapyague rami avi peẽ kuery re voi opu'ã rei 'rã. Ha'e rã xeayvua oendua ramo ma pendeayvua voi oendua 'rã.

21 Ha'e nunga ha'e javi 'rã pendere ha'e kuery ojapo xerery rupi pendekuai ramo, mba'eta Xembouare voi ndoikuaai vy.

22 — Ha'e gui xee ndajui ha'e ha'e kuery pe ndaxeayvui va'e rire ma ha'e kuery reko vaia noĩ 'rãgue. Va'eri aÿ gui ma nda'evei ha'e kuery “Aikuua vy e'ý ajejavy” he'i aguã.

23 Ndaxerayvui va'e kuery ma ndoayvui avi Xeru.

24 Ha'e kuerya rupi xee ndajapoi va'e rire mba'emo avave rei ojapo kuaa e'ý va'e regua, ha'e kuery reko vaia noĩ 'rãgue. Ha'e rami avi aÿ ma ha'e kuery xerexa teĩ ndaxerayvui, ha'e Xeru voi ndoayvui okuapy.

25 Ha'e nunga oiko ojeupity aguã ha'e kuery pegua lei re “Mba'e py e'ý ndaxerayvui okuapy” he'iague.\*

26 — Ha'e gui Xerua gui ambou 'rã Penembojoyvyarã, anhetẽ va'e kuaa ukaarã. Ha'e va'e ou ma vy oikuaa uka 'rã xereko.

27 Peẽ kuery avi 'rã pemombe'u, jypy'i guive xerupive pendekuai rire.

## 16

### *Nhanembojoyvyarã ou va'erã re ijayvuague*

1 — Ha'e nunga xee amombe'u ma voi, pejeroviaa gui pejep'e a e'ý aguã.

2 Mba'eta ha'e kuery penemoxẽ 'rã onhembo'eaty ikuai va'e gui. Ovaẽ 'rã pendejukaa kuery “Nhanderuete pe vy ajojuka” he'ia ára.

3 Ha'e nunga ha'e kuery ojapo 'rã mba'eta neĩ Xeru, neĩ xee voi xekuaa e'ý vy.

4 Pova'e nunga xee amombe'u pendevy ha'e nunga ojeupity rã pexa vy xeayvuague re penema'endu'a aguã. Po rami ma jypy'i guive e'ý amombe'u pãvy, mba'eta peẽ kuery reve teri 'rã aiko.

5 — Ha'e gui aÿ ma aa ta ma Xembouarea py. Ha'e rami teĩ peteĩve voi “Mamo tu reo ta?” ndapejevei xevy.

6 Ha'e nunga amombe'u rire ndapevy'aia anho pendu pendepy'a re.

7 Anhetẽ aipoa'e pãvy: Xee aa 'rãe, mba'eta xee ndaai ramo ndoui 'rã Penembojoyvyarã. Ha'e rami avi xee aa vy ambou 'rã pãvy.\*

8 — Ha'e va'e ou vy yvy re ikuai va'e pe oikuaa uka 'rã heko vaia, teko porã ha'e opagapa aguã.

9 Heko vaia oikuaa uka 'rã mba'eta xere ha'e kuery ndojeroviai rire.

\* 15:25 Salmo 35.19, 69.4 \* 16:7 João 14.16-19; Romanos 5.5

<sup>10</sup> Teko porã oikuua uka 'rã, mba'eta Xerua py aa ramo ndaxerexavei 'rã.

<sup>11</sup> Ha'e kuery opaga aguã avi 'rã oikuua uka, mba'eta ko yvy regua kuery rerekaoa voi opaga aguã rami oiko.

<sup>12</sup> — Heta teri areko pêvy amombe'u va'erã, teĩ aÿ ma napendu kuaapai 'rã.

<sup>13</sup> Ha'e gui Nhe'ẽ anhetẽ va'e kuaa ukaarã ou ma vy penembo'e 'rã anhetẽ va'e ha'e javi re. Ojegui ae e'ÿ 'rã ijayvu, mba'eta oikuua uka 'rã oendu va'ekue anho, mba'emo oiko va'erã-'erã voi.

<sup>14</sup> Ha'e ma xemboyvate 'rã, xeguigua pendevy oikuua uka vy.

<sup>15</sup> Opa mba'e Xeru oguerekva'e xemba'e meme. Ha'e nunga rupi aipoa'e: "Ojopy 'rã mba'emo xegui, ha'e oikuua uka 'rã pendevy" ha'e va'ekue.

<sup>16</sup> Peẽ kuery ndaxerexavei rai'i ma. Ha'e gui areve'i rã xerexa ju 'rã — he'i.

<sup>17</sup> Ha'e ramo hemimbo'e kuery regua joupe-upa aipoe'i:

— Mba'e he'i vy nda'u po rami ijayvu, "Ndaxerexavei rai'i ma, ha'e gui areve'i rã xerexa ju 'rã", ha'e "Aa ta Xerua py" he'iague?

<sup>18</sup> Mba'e he'i a nda'u "Areve'i rã" he'i? Mba'e he'i vy paa ndajaikuaai — he'i.

<sup>19</sup> Ha'e kuery oporanduxea Jesus oikuua vy aipoe'i:

— Mba'e re tu joupe-upa ri peporandu "Ndaxerexavei rai'i ma. Ha'e gui areve'i rã xerexa ju 'rã" ha'eague re?

<sup>20</sup> Anhetẽ aipoa'e pêvy: Peẽ kuery pejae'opa ha'e ndapevy'avei 'rã. Ha'e rã yvy regua kuery ma ov'y'a rei 'rã okuapy. Ha'e rire ma pevy'apa ju 'rã ndapevy'aiague gui.

<sup>21</sup> Kunhague imemby raxy va'e iporiau 'rã, ojexavai aguã hora ovaẽ ma ramo. Ha'e gui imemby ma rire na'ima'endu'avei 'rã ojexavaiague re, kyrĩ va'e itui'i ma ramo ov'y'a vy.

<sup>22</sup> Ha'e rami ae avi peẽ kuery aÿ pendu ndapevy'aveia. Ha'e gui jajoexa jevy ramo ma pendep'y'a py pendu 'rã pevy'aa avave rei ndoipe'a kuaai va'e.

<sup>23</sup> — Ha'e va'e ára ma mba'eve re napenoranduvei 'rã xevy. Anhetẽ aipoa'e pêvy: Peipota va'e re rei Xeru pe pejerure ramo ome'ẽ 'rã xerery rupi.

<sup>24</sup> Aÿ peve xerery rupi ndapejerurei teri mba'eve re. Pejerure, ha'e pejopy 'rã pevy'a ete aguã.

### Oo rai'i ma vy ijayvuague

<sup>25</sup> — Aÿ peve mba'emo re ambojojaa rupi xeayvu. Ha'e gui raka'eve rã mba'emo re ambojojaa rupi ve'ÿ 'rã xeayvu, ha'e amombe'u porã 'rã Xeru reko.

<sup>26</sup> Ha'e va'e ára ixupe pejerure 'rã xerery rupi. Aipo nda'e Xeru pe xee ajerure aguã pendere,

<sup>27</sup> mba'eta Xeru ae penderayvu, peẽ kuery xerayvu ha'e Xerua gui ajuague perovia rire.

<sup>28</sup> Mba'eta Xerua gui aju karamboae yvy re. Aÿ ma yvy gui aa ju ta Xerua py — he'i.

<sup>29</sup> Ha'e ramo hemimbo'e kuery aipoe'i:

— Aÿ ma roikuaa aguã rami ma ndeayvu, ayvu haxy va'e py ve'ÿ ma.

<sup>30</sup> Aÿ roikuaa ndee opa mba'e reikuaapa va'e reikoa, ndevy roporandu e'ÿ teĩ reikuaa roporanduxea. Ha'e nunga rupi roquerovia Nhanderuete remimbou reikoa — he'i okuapy.

<sup>31</sup> Jesus ombovai:

— Perovia ete pa aÿ?

<sup>32</sup> Mba'eta ou oiny hora, ha'e ovaẽ ae ma, peẽ kuery joa katy e'ÿ-e'ÿ peo aguã peteĩ-teĩ ro katy. Peo vy xerejapa 'rã xee ae'i.\* Ha'e rami teĩ xee ae'i ete e'ÿ 'rã guive, mba'eta Xeru oiko 'rãe xereve.

<sup>33</sup> Ha'e nunga ha'e javi re xeayvu, xere vy pendep'y'a guaxu aguã. Ko yvy re ma peiko axy 'rã. Ha'e rami teĩ pendep'y'a guaxu ke, mba'eta xee xepo'aka ma yvy re.

\* 16:32 Marcos 14.27,50

## 17

### *Ojeupegua kuery re Jesus ojerure oinyague*

<sup>1</sup> Jesus ijayvupa ma vy yva re ju oma'ẽ. Ha'e vy aipoe'i:

— Xeru, aŷ ovaẽ ma hora. Embovate ke Nder'a'y, Nder'a'y ju ndeyvatea oikuua uka aguã,

<sup>2</sup> avakue ha'e javi re ndee xembopo'akaague rami, xee ju tekove marã e'ŷ ame'ẽ aguã xevy guarã reme'ẽ va'ekue ha'e javi pe.

<sup>3</sup> Tekove marã e'ŷ ma po rami 'rã oupity: Ndee Tuuete peteĩ'i ha'e anhetẽ va'e ndekuaa vy, ha'e xee neremimbou Jesus Cristo xekuaa avi vy 'rã oupity.

<sup>4</sup> — Xee ma yvy re aiko jave aikuua uka ma ndeyvatea, rejapo uka va'ekue ajapopa vy.

<sup>5</sup> Ha'e gui Xeru, aŷ ma ndea py ju xembovate, yvy itui e'ŷ mbove voi ndereve aĩ jave xeyvateague py ae.

<sup>6</sup> — Mba'eta yvy regua kuery mbyte gui amongue reiporavo vy xevy guarã ju reme'ẽ va'ekue pe ma xee aikuua uka ma nderery po'akaa. Ndepo py ae ikuai va'ekue ri xevy guarã ju remboaxa. Ha'e ramo ha'e kuery ma ndeayvua rupi meme ikuai.

<sup>7</sup> Ha'e rami vy aŷ ma ha'e kuery oikuua mba'emo xevy reme'ẽ va'ekue ndeguigua memea.

<sup>8</sup> Ha'e kuery pe xee amombe'u ma ayvu remombe'u uka va'ekue. Ha'e ramo ha'e kuery oguerovia, oikuua guive anhetẽ ete ndea gui ajuague, ndee xembou rã.

<sup>9</sup> — Ha'e kuery re ma xee ajerure, yvy regua kuery re'ŷ, ha'e rã xevy guarã reme'ẽ va'ekue re anho, mba'eta ndevygua meme ikuai.

<sup>10</sup> Xevygua kuery ha'e javi ma ndevygua avi, ha'e ndevygua ikuai va'e ma xevygua avi, ha'e ha'e kuery ikuia rupi xeyvatea ojekuaa 'rã.

<sup>11</sup> — Xee ma ndaikovei ma 'rã yvy re. Ha'e rã ha'e kuery ma yvy re ikuai teri. Xee ma ndea py ta aa. Xeru ndeky'a e'ŷ va'e, epena ke ha'e kuery re nderery po'akaa xere ju remoĩ va'ekue rupi, ha'e kuery voi peteĩ rami ikuai aguã nhande rami avi.

<sup>12</sup> Ha'e gui xee ma ha'e kuery reve aiko teri jave xee ae ranhe apena aikovy nderery po'akaa xere remoĩ va'ekue rupi. Xee aepy ramo neĩ peteĩve nokanhyi, okanhy 'rã va'ekue e'ŷ vy, kuaxia para re oĩa ojeupity aguã.

<sup>13</sup> Aŷ ma xee aa ta ma ndea py. Ha'e ramo xeayvu ko yvy re aiko teri reve, ha'e kuery re xeguigua vy'a oĩ aguã opa mba'e py.

<sup>14</sup> — Ha'e kuery pe ndeayvu aikuua uka ramo yvy regua kuery ndoayvui, mba'eta yvy regua e'ŷ ikuai, xee rami avi.

<sup>15</sup> Ha'e kuery ko yvy gui reipe'a aguã re'ŷ ajerure, ha'e rã teko vai gui repena aguã.

<sup>16</sup> Mba'eta xee rami avi ha'e kuery voi yvy regua ve'ŷ ma ikuai.

<sup>17</sup> Eiky'a'o ke ha'e kuery anhetẽ va'e rupi. Ndeayvu ae ma anhetẽ va'e.

<sup>18</sup> — Ndee yvy re xembouague rami avi xee voi amondouka yvy jave rupi.

<sup>19</sup> Ha'e kuery re ama'ẽ vy xee ae anhemboaxa ndevy, ha'e kuery voi ndevygua iky'a e'ŷ va'e ikuai aguã, anhetẽ va'e rupi.

<sup>20</sup> — Ha'e kuery re anho e'ŷ ajerure, ha'e rã amboae kuery ha'e kuery ijayvua oendu vy xere ojerovia va'erã re guive,\*

<sup>21</sup> ha'e javive peteĩ rami meme ikuai aguã. Xeru, xee ndere aĩ, ha'e ndee xere reĩ rami avi ha'e kuery voi nhandere toĩ. Ha'e ramo 'rãe ko yvy re ikuai va'e oguerovia ndee xembouague.

<sup>22</sup> Ndeyvatea xevy reme'ẽ va'ekue ma ha'e kuery pe ju ame'ẽ, peteĩ rami meme ikuai aguã nhande rami avi.

<sup>23</sup> Xee ha'e kuery re aĩ, ha'e ndee xere reĩ ramo ha'e kuery voi peteĩ rami ete ikuai aguã, ko yvy re ikuai va'e oikuua aguã ndee xembouague ha'e ha'e kuery reayvua, xerayvua rami avi.

---

\* **17:20** Romanos 8.34; Hebreus 7.25

<sup>24</sup> — Xeru, xee aipota mamo rā aĩa py xevy guarã reme'ẽ va'ekue avi xereve ikuai, ha'e kuery oexa aguã xeyvatearã reme'ẽ va'ekue, mba'eta ko yvy renhono e'ŷ mbove ma voi xerayvu.

<sup>25</sup> — Xeru nderekó porã va'e, ko yvy regua kuery ma nandekuaai. Ha'e rā xee ma roikuaa, ha'e kova'e kuery kuery voi oikuaa ndee xembouague.

<sup>26</sup> Ha'e kuery pe aikuua uka ma nderery po'akaa, ha'e aikuua ukave ju 'rā guive, ha'e kuery re oĩ aguã reayvua ndee xerayvua ramigua ae, ha'e gui ha'e kuery re xee voi aĩ aguã.

## 18

*Mateus 26.47-54; Marcos 14.43-47; Lucas 22.47-51*

<sup>1</sup> Ha'e rami Jesus ijayvupa ma vy guemimbo'e kuery reve oje'oi Cedrom yakã'i rovaigua re, ha'e peteñ yvotyty oĩ va'e py oike ha'e kuery reve.

<sup>2</sup> Jesus jopy uka nhemiarã Judas hery va'e voi oikuaa ha'e va'e yvotyty, mba'eta mbovykue rei e'ŷ ha'e py Jesus guemimbo'e kuery reve ikuai jepi rire.

<sup>3</sup> Ha'e rami vy ha'e katy Judas ogueraa xondaro kuery, sacerdote yvatekueve va'e ha'e fariseu kuery pegua jopya kuery. Ha'e kuery yvyra reve-reve, ha'e takua ryxa rendy reve ovaẽ ha'e py.

<sup>4</sup> Ha'e gui Jesus mba'emo hexe oiko va'erã oikuaa vy ovaexi. Ha'e vy oporandu ha'e kuery pe:

— Mava'e tu peka?

<sup>5</sup> Ombovai vy

— Nazaré pygua Jesus — he'i okuapy.

Ha'e ramo Jesus aipoe'i:

— Xee ae ha'e — he'i. Ijopy uka nhemia Judas voi oiko ha'e kuery reve.

<sup>6</sup> Ha'e gui Jesus “Xee ae ha'e” he'i ramove ha'e kuery oguevipa vy ho'apa yvy rupi.

<sup>7</sup> Teñgue ju Jesus oporandu:

— Mava'e tu peka?

— Nazaré pygua Jesus — he'i okuapy.

<sup>8</sup> Ha'e ramo Jesus ombovai:

— “Xee ae” ha'e ma kuri. Xee ri xereka ramo tove kova'e kuery toje'oipa — he'i,

<sup>9</sup> ipara re oĩ va'e ojeupity aguã: “Xevy guarã reme'ẽ va'ekue regua neñ peteñve ma xee namokanhyi.”

<sup>10</sup> Ha'e ramo Simão Pedro kyxe ogueru va'ekue oekyi vy omboguai sacerdote yvateve va'e rembiguai nambi oiporu kuaa regua re. Ha'e va'e ma Malco hery va'e.

<sup>11</sup> Ha'e ramo Jesus aipoe'i Pedro pe:

— Emoñ ju kyxe hyru py. Nda'evei ri ty'y karo Xeru ome'ẽ va'e gui ay'u aguã?

*Anás ro py ogueraa ague*

<sup>12</sup> Ha'e gui xondaro kuery, huvixa ha'e judeu regua jopya kuery ojopy okuapy Jesus, ha'e ojokuapa.

<sup>13</sup> Ha'e rami vy Anás ro py ranhe ogueraa. Ha'e va'e ma ha'e va'e ma'etŷ re sacerdote yvateve va'e Caifás oĩ va'e ratyua.\*

<sup>14</sup> Caifás ae judeu ruvixa kuery pe “Ha'eveve peteñ ava omano heta va'e kuery rekovia” he'i va'ekue.

*Mateus 26.69-75; Marcos 14.66-72; Lucas 22.55-62*

<sup>15</sup> Simão Pedro ha'e amboae hemimbo'e reve jogueraa Jesus rakykue. Ha'e va'e hemimbo'e ma sacerdote yvateve va'e rexaaty ae vy hoka py oike avi Jesus ogueroikea javé.

\* **18:13** Marcos 14.53,54

**16** Ha'e rã Pedro ma oka py ranhe opyta okẽ oĩ va'e rexei'i. Ha'e gui hemimbo'e mboae sacerdote yvateve va'e rexaaty va'e ou vy ijayvu kunhataĩ okẽ rarõa reve. Ha'e vy mae ma ogueroike avi Pedro.

**17** Ha'e gui kunhataĩ okẽ rarõa oporandu Pedro pe:

— Ndee voi peva'e ava remimbo'e e'ŷ teve?

— Any — he'i.

**18** Tembiguai ha'e jopya kuery ma tata omoendyague py ikuai ojape'ea py, yro'y ramo. Pedro voi ojape'e ho'amy ha'e kuery mbyte.

### *Sacerdote yvateve va'e Jesus omboayvuague*

**19** Ha'e ramia ja sacerdote yvateve va'e oporandu Jesus pe hemimbo'e kuery ikuia ha'e nhombo'ea re.

**20** Jesus omombe'u vy aipoe'i:

— Xee ma yvy re ikuai va'e pe amombe'u porã ma. Anhombo'e riae judeu kuery ono'õa rupi, templo py ha'e py onhembo'eaty ikuai va'e rupi. Mba'eve namombe'ui nhemi rupi.

**21** Mba'e re tu xevy pe reporandu? Eporandu xeayvu renduare kuery pe. Ha'e kuery ma oikuaa xeayvuague — he'i.

**22** Ha'e rami Jesus ijayvu ramo peteĩ jopya ha'e py hi'aĩ va'e oipete. Ha'e vy aipoe'i:

— Po rami va'e ty'y ndeayvu sacerdote yvateve va'e pe?

**23** Jesus ombovai:

— Xeayvu vai ri ra'e ramo emombe'u xeayvu vaiague. Ha'e rami avi xeayvu porã va'eri mba'e re tu xepete? — he'i.

**24** Ha'e gui Anás ojokua uka reve omondouka sacerdote yvateve va'e Caifás-a py.\*

### *Pedro peteĩgue ju onhenhomiaque*

**25** Simão Pedro ha'e py teri ojape'e ho'amy. Ixupe oporandu okuapy:

— Ha'e rami vy ndee voi hemimbo'e kuery regua teve?

Pedro onhenhomí vy

— Xee any — he'i.

**26** Ha'e py oĩ avi sacerdote yvateve va'e rembiguai regua peteĩ, Pedro inambi omboiague va'e retarã. Ha'e va'e ju aipoe'i:

— Xee ndoroexai ri ty ra'e hexeve yvotyty py?

**27** Teĩgue ju Pedro onhenhomí. Ha'e ramove uru ojapukai.

### *Mateus 27.1,2; Marcos 15.1; Lucas 23.1*

**28** Ha'e rire aje'ive'i reve ma Caifás ro gui Jesus ogueraa okuapy huvixa ro katy. Ha'e rã judeu kuery ma nhomboayvuaty py ndoikexei, ojeko mongy'a e'ŷ aguã Páscoa ára py okaru aguã.

**29** Ha'e ramo ha'e kuery ikuia py huvixa Pilatos oẽ ijayvu aguã. Ha'e vy aipoe'i:

— Mba'ekue py tu Peru kova'e ava?

**30** Ombovai vy

— Kova'e ava ma mba'eve rei py ndotekoavyi va'e rire ndoroguerui 'rãgue ndea py — he'i okuapy.

**31** Ha'e gui Pilatos aipoe'i ha'e kuery pe:

— Peẽ ae peraa, pendevyguá lei rami ae perekó.

Judeu ruvixa kuery ombovai:

— Ha'e rami avi orevy pe nda'evei rojojuka aguã — he'i okuapy.

**32** Ha'e rami oiko ojeupity aguã Jesus marã rami pa omano aguã re ijayvuague.

### *Mateus 27.11-26; Marcos 15.1-15; Lucas 23.1-5,13-25*

**33** Opy ju Pilatos oike vy oenoĩ Jesus. Ha'e vy aipoe'i ixupe:

— Ndee ma nhi'ã judeu kuery pegua huvixave?

\* **18:24** Mateus 26.59-66; Marcos 14.55-64; Lucas 22.66-71

<sup>34</sup> Jesus ombovai:

— Ndee ae pa po rami reporandu tyrā amongue ndevy omombe'u xerekō?

<sup>35</sup> Ha'e ramo Pilatos aipoe'i:

— Xee ma nhi'ā judeu aiko? Neretarā kuery ha'e sacerdote yvatekueve va'e ae ndereru kuri xea py. Mba'e py tu rejapo vai?

<sup>36</sup> Jesus ombovai:

— Xee apenaa ma ko yvy regua e'ŷ. Ko yvy regua va'e rire xerembiguai kuery opu'āmba 'rāgue judeu ruvixa kuery re, xejopy uka e'ŷ aguā. Aŷ ma apenaa ko yvy regua e'ŷ — he'i.

<sup>37</sup> Ha'e ramo Pilatos oporandu:

— Ndee ma huvixave ri ty'y?

Jesus ombovai:

— Ndee ae aipo're huvixave aikoa rami. Xee ma ha'e nungarā ae aiko, ha'e rami aguā aju ko yvy re, anhetē va'e amombe'u aguā. Ha'e ramo anhetē va'e rupi ikuai va'e ma oendu 'rā xeayvua — he'i.

<sup>38</sup> Ha'e ramo Pilatos aipoe'i:

— Mba'e nunga tu "Anhetē va'e" 'rea? — he'i.

Po rami ijayvu rire oē ju judeu kuery ono'ōa py. Ha'e vy aipoe'i ha'e kuery pe:

— Xee ma ndaikuuai mba'eve rei ojapo vaiague.

<sup>39</sup> Pendereko rami vy ma Páscoa ára nhavō pepoi uka 'rā amongue. Peē kuery nda'u peipota ri apoi judeu kuery pegua huvixave?

<sup>40</sup> Ha'e javive ojapukai reve ombovai:

— Peva'e'ŷ, epoi Barrabás — he'i okuapy. Barrabás ma jojuka rive va'ety.

## 19

<sup>1</sup> Ha'e rami rā Pilatos ogueraa uka ju Jesus, ha'e oinupā uka.

<sup>2</sup> Xondaro kuery ojapo peteī ngora juu gui, ha'e omoī inhakā re. Omonhemonde peteī ao puku púrpura guigua py.

<sup>3</sup> Jesus re onhemboja vy

— Iporā ete judeu kuery pegua huvixave — he'i reve oipete-pete.

<sup>4</sup> Teīgue ju Pilatos oē vy aipoe'i judeu kuery pe:

— Peva'e ava ambou ju ta apy peē ae peikuua pota aguā ojapo vaiague re, mba'eta xee ma ndaikuuai — he'i.

<sup>5</sup> Ha'e gui Jesus oguenoēa heruvy ngora juu gui ojapo pyre ha'e ao púrpura guigua py onhemonde reve. Ha'e ramo Pilatos aipoe'i:

— Apy ma ava hi'aī.

<sup>6</sup> Ha'e ramo sacerdote yvatekueve va'e ha'e jopya kuery oexa vy ojapukai:

— Emoī kuruxu re, emoī kuruxu re.

Ha'e ramo Pilatos aipoe'i:

— Peē kuery ae peraa kuruxu re pemoī, mba'eta xee ndaikuuai ojapo vaiague — he'i.

<sup>7</sup> Judeu kuery ombovai:

— Ore kuery lei roguereko va'e rami vy ojukaa aguā rami oiko, Nhanderuete Ra'y rami onhemoingo ramo — he'i okuapy.

<sup>8</sup> Ha'e rami ijayvu rā Pilatos oendu vy okyjeve.

<sup>9</sup> Ha'e rami vy ngopy ju ogueroike vy oporandu Jesus pe:

— Maguigua tu ndee? — he'i teī Jesus nombovai.

<sup>10</sup> Ha'e ramo Pilatos aipoe'i:

— Naxembovai va'e ty'y? Ndereikuuai ri ty'y xepo'akaa ropoi e'ŷ vy kuruxu re romoī aguā?

<sup>11</sup> Jesus ombovai:

— Ndee ma mba'eve rei py xere nandepo'akai 'rāgue yvate gui nanembopo'akaa ukai va'e rire. Ha'e nunga rupi ndea py xereruare kuery heko vaive — he'i.

**12** Ha'e rami rã Pilatos teīgue ju onhea'ã teī opoi aguã. Ha'e rã judeu kuery ma aipoe'i:  
 — Peva'e ndee repoi ri vy huvixave César irũ e'ŷ reiko. Mba'eta huvixave onhemoingo va'e ma César rovaigua meme – he'i okuapy.

**13** Ha'e rami ijayvu rã Pilatos oendu vy oka py ju oguenoẽ uka Jesus, ha'e tenda nhomboayvuaty py oguapy oiny ita ombojopeague py. Ha'e va'e henda ma hebraico ayvu py Gabatá hery va'e.

**14** Kuaray mbyte rai'i ma, ha'e sexta-feira Páscoa ára ovaẽ rai'i ma guive.

Ha'e gui Pilatos aipoe'i ha'e kuery pe:

— Apy ma peẽ kuery ruvixave hi'aĩ.

**15** Ha'e rã ha'e kuery ma ojapukaive:

— Eraa, eraa, eupi kuruxu re – he'i okuapy.

Ha'e ramo Pilatos aipoe'i:

— Peipota va'e ty'y peẽ kuery ruvixave kuruxu re upi uka?

Sacerdote yvatekueve va'e ombovai:

— Ore kuery ma oreruvixave ndoroguerereko, César e'ŷ vy – he'i okuapy.

**16** Ha'e rami rã Pilatos ogueraa uka kuruxu re omoña aguã.

*Mateus 27.33-38; Marcos 15.22-28; Lucas 23.33-38*

**17** Ha'e ramo ha'e kuery ogueraa Jesus. Ha'e ae kuruxu ogueraa reve oo peteĩ henda Calvário 'epy va'e katy. Ha'e rã hebraico ayvu py ma ha'e va'e henda Gólgota hery va'e.

**18** Ha'e py ma oupia imoiny kuruxu re, ha'e mokoĩ ju oupi avi ijyvy jobaive, ha'e Jesus mbyte py.

**19** Pilatos ombopara uka avi peteĩ ayvu, ha'e kuruxu re omoĩ uka. Po rami ipara oiny: “Nazaré pygua Jesus judeu kuery pegua huvixave.”

**20** Ha'e va'e ipara heta judeu kuery ogueroayvu, mba'eta Jesus kuruxu re oupi imoinya ma tetã katy'i. Hebraico, latim ha'e grego ayvu py ipara oiny.

**21** Ha'e ramo sacerdote yvatekueve va'e aipoe'i Pilatos pe:

— Embopara uka eme “Judeu kuery pegua huvixave.” Ha'e rã embopara uka “Ha'e onhemombe'u judeu kuery pegua huvixave oikoa rami.”

**22** Ha'e ramo Pilatos ombovai:

— Xee ambopara uka va'ekue ma ipara ae ma oiny – he'i.

### *Jesus ao omboja'o okuapyague*

**23** Xondaro kuery Jesus kuruxu re oupi ma rire ojopy ijaoo, ha'e omboja'o irundy henda rupi, peteĩ-teĩ xondaro ojeupe guarã ojopy aguã. Ikamixa puku avi ojopy. Ha'e rã ikamixa puku ma omboovyvy pyre'ŷ, yvate katy gui ipy katy peve ojapo pyre.

**24** Ha'e ramo joupe-upue aipoe'i:

— Nhamondoro eme teve kamixa puku. Ha'eve jaexa nhandexortea, mava'e ete'i pe pa kova'e optyaa jaikuua aguã – he'i okuapy. Ha'e rami oiko kuaxia para re oĩ va'e ojeupity aguã: “Omboja'o-ja'o xeao, ha'e rã xekamixa re ma oexa okuapy oxortea” he'iague. Xondaro kuery ha'ekue rami ae ikuai.\*

**25** Kuruxu yvy'iry hi'aĩ Jesus xy, ikypy'y, ha'e gui Cleopas ra'yxy Maria ha'e Maria Madalena.

**26** Oxy, ha'e ijyvýry guemimbo'e oayvuve va'e hi'aĩ rã Jesus oexa vy aipoe'i:

— Kunha, pee ma ndepi'arã hi'aĩ – he'i.

**27** Ha'e gui guemimbo'e pe ju aipoe'i:

— Pee ma ndexyrã hi'aĩ – he'i. Ha'e rire hemimbo'e ogueraa ngoo py.

*Mateus 27.45-56; Marcos 15.33-37; Lucas 23.44-46*

**28** Ha'e rire Jesus oikuua mba'emo oiko 'rã va'ekue ojeupitypa maa. Ha'e rami vy kuaxia re ipara oiny va'e ojeupity aguã aipoe'i avi:

— Xey'uvei – he'i.

\* **19:24** Salmo 22.18, Mateus 27.35,36,55,56; Marcos 15.24

<sup>29</sup> Ha'e py oĩ peteĩ hy'a vinagre tynyẽ va'e. Ha'e va'e py peteĩ esponja omoakŷa vy peteĩ takua apy re omoĩ, ha'e omovaẽ Jesus juru re.

<sup>30</sup> Jesus vinagre oy'u ma rire aipoe'i:

— Aŷ ma ojeupitypa ma oiko 'rã va'ekue — he'i. Ha'e gui ma oity oakã, ha'e omondouka onhe'ẽ.

### 1 João 5.6-8

<sup>31</sup> Ha'e va'e ára ma judeu kuery mba'emo oguereko katua ára, mba'eta ha'e va'e sábado ma ára omboeteveypy. Ha'e rami vy sábado peve kuruxu re hetekue oĩ e'ŷ aguã Pilatos pe judeu ruvixa kuery ojerure hetyma omopẽ uka vy omboguejy uka aguã.

<sup>32</sup> Ha'e ramo xondaro kuery oje'oi vy omopẽ jypy oĩ va'e retyma, ha'e amboae hexeve kuruxu re oĩ va'e retyma ju.

<sup>33</sup> Ha'e rã Jesus oĩa re ma ovaẽ vy oma'ẽ rã omano ma ra'e. Ha'e ramo ma nomopẽi hetyma.

<sup>34</sup> Ha'e rami avi inharukã py peteĩ xondaro oipyxo nho hu'y guaxu py. Ha'e rã onheẽ huguy ha'e yy.

<sup>35</sup> Ha'e nunga rexaare omombe'upa, anhetẽ guare meme omombe'u. Ha'e oikuaa guive anhetẽ meme omombe'ua, peẽ kuery voi perovia aguã.

<sup>36</sup> Ha'e rami oiko va'e kuaxia re ipara oinya ojeupity aguã: “Neĩ peteĩve ikãgue nomopẽai 'rã” he'iague.\*

<sup>37</sup> Oĩ avi kuaxia para re “Ha'e kuery oexa ju 'rã oipyxo va'ekue” he'iague.\*

### Mateus 27.57-60; Marcos 15.42-46; Lucas 23.50-54

<sup>38</sup> Ha'e va'e rire peteĩ ava Arimatéia pygua José hery va'e ma Pilatos-a py oo vy ojerure Jesus retekue omboguejy aguã. Ha'e ramo omboguejy uka rã José omboguejy Jesus retekue. Ha'e va'e ma judeu ruvixa kuery gui okyje vy nhemi rupi Jesus remimbo'e oiko va'e.

<sup>39</sup> Nicodemos pyávy Jesus reve ijayvu aguã oo va'ekue voi trinta quilo heakuã porã va'e ogueraa mirra ha'e aloé guigua.

<sup>40</sup> Ha'e kuery Jesus retekue ojopy vy ajukue py onhovã heakuã porã va'e reve. Judeu kuery reko rami vy ojapo ha'e rami, onhono porã aguã.

<sup>41</sup> Jesus kuruxu re oupi imoinyague katy'i ma peteĩ yvotyty oĩ. Ha'e py ma oĩ peteĩ tuparã oguereko katu ramo'i va'ekue. Ha'e va'e py avave rei nonhono porãai teri.

<sup>42</sup> Judeu kuery mba'emo oguereko katua ára ovaẽ ma, ha'e tuparã oguereko katu pyre ha'e katy rai'i oĩ ramo ma ha'e py ae onhono porã Jesus retekue.

## 20

### Mateus 28.1-8; Marcos 16.1-8; Lucas 24.1-12

<sup>1</sup> Semana ijypya ára ko'ẽ rai, pytû-pytû'i teri reve Maria Madalena oo Jesus onhono porãague katy. Ha'e vy oexa rã ita imbotyarã omoĩ mbyre ombojerea ma ra'e.

<sup>2</sup> Ha'e gui onha ovu Simão Pedro ha'e hemimbo'e mboae Jesus oayvuve va'e oĩa katy. Ha'e vy aipoe'i ha'e kuery pe:

— Senhor retekue tu oguenoëa rima ra'e hupa gui, ha'e ndoroikuuai marã katy pa oguerovaague — he'i.

<sup>3</sup> Ha'e gui Pedro ha'e hemimbo'e mboae jogueraa onhono porãague katy.

<sup>4</sup> Mokoïve onha reve oje'oi. Amboae hemimbo'e ma Pedro gui onha ratâve vy ha'e ranhe ovaẽ hupa py.

<sup>5</sup> Ha'e rami vy ojeyvy vy oexa ajukue xiñ va'e anho. Ha'e rami teĩ ndoikei.

<sup>6</sup> Ha'e gui Simão Pedro ma takykueve'i ovaẽ vy oike. Ha'e rami vy oexa avi ajukue

<sup>7</sup> ha'e panhero Jesus akã re omoĩ mbyre. Ha'e va'e ma ajukue mboae reve'ŷ itui, amboae henda py ombojo'a porã'i ra'e.

\* <sup>19:36</sup> Éxodo 12.46, Salmo 34.20    \* <sup>19:37</sup> Zacarias 12.10

<sup>8</sup> Ha'e gui amboae hemimbo'e ha'e ranhe ovaẽ va'ekue avi oike, ha'e oexa vy oguerovia.

<sup>9</sup> Ha'e kuery ndoikuaai teri kuaxia para re oĩa rami vy omanoague gui onhemboete jevy aguã.

<sup>10</sup> Ha'e gui hemimbo'e kuery mokoĩve ojevy ju jogueravy ngoo katy.

*Marcos 16.9-11*

<sup>11</sup> Ha'e ramia ja Maria ma hupa rokẽ yvýry ojae'o ho'amy. Ojae'oa ramive ojeyvy ikua katy oma'ẽ aguã.

<sup>12</sup> Ha'e rami vy oexa mokoĩ anjo onhemondea xiĩ va'e Jesus retekue ituiague py oguapy rã. Peteĩ ma inhakã katy, ha'e rã amboae ma ipy katy oĩ.

<sup>13</sup> Ha'e ramo ha'e kuery aipoe'i:

— Kunha, mba'e re tu rejae'o?

Kunha va'e ombovai:

— Mba'eta ogueraa ra'e xe-Senhor, ha'e ndaikuaai marã katy pa oguerovaague — he'i.

<sup>14</sup> Ha'e rami ijayvu rire ojere vy oexa Jesus hi'aĩ rã, teĩ ndoikuaai teri Jesus ae hi'aĩa.

<sup>15</sup> Ha'e ramo Jesus oporandu:

— Kunha, mba'e re tu rejae'o? Mava'e tu reka?

Maria ma “Yvotyty re opena va'e po” he'i vy ombovai:

— Senhor, ndee ri apy gui hetekue rerova rire ke emombe'u marã katy pa rerovaague, xee aa araa aguã — he'i.

<sup>16</sup> Ha'e ramo Jesus aipoe'i:

— Maria.

Ha'e rã ha'e va'e ojere vy aipoe'i hebraico ayvu py:

— Raboni — he'i, “Xembo'ea” he'ia.

<sup>17</sup> Ha'e ramo Jesus aipoe'i:

— Xejoko eme, mba'eta ndaai teri Xerua py. Ha'e rami 'rãgue py tereo xeryvy kuery pe emombe'u aa taa Xeru ha'e Penderua py, Xeruete ha'e Penderuetea py — he'i.

<sup>18</sup> Ha'e rami rã Maria Madalena oo hemimbo'e kuery pe omombe'u:

— Aexa ma kuri Senhor — he'i. Omombe'u avi Jesus ijayvuague ha'e javi.

*Lucas 24.36-40*

<sup>19</sup> Ha'e va'e semana ijypyá ára ka'aru hemimbo'e kuery ono'õmba peteĩ oo py, ha'e okẽ ojokopa judeu ruvixa kuery gui okyje vy. Ha'e jave Jesus ojexa uka xapy'a ha'e kuery mbyte. Ha'e vy aipoe'i:

— Toĩ pendere mby'a porã — he'i.

<sup>20</sup> Ha'e vyve oexa uka opo ha'e oarukã. Ha'e ramo hemimbo'e kuery Senhor oexa vy ov'y'a okuapy.

<sup>21</sup> Ha'e gui Jesus aipoe'ive ju:

— Toĩ pendere mby'a porã. Xeru xembouague rami avi xee voi romondouka 'rã — he'i.

<sup>22</sup> Ha'e rami ijayvupa vyve ipytue. Ha'e vy aipoe'i:

— Pemovaẽ Nhe'ẽ Ky'a E'ŷ pendejee.

<sup>23</sup> Ha'e gui amongue ojejavyague peperdoa ramo ombogue pyre 'rã oiko. Ha'e rã ndapeperdoi ramo ma ombogue pyre'ŷ 'rã oiko — he'i.

*Tomé ndogueroviai ranheague*

<sup>24</sup> Peteĩ hemimbo'e doze va'e regua Tomé Dídimو hery va'e ma Jesus ojekuaa jave noĩ va'ekue oirũ kuery reve.

<sup>25</sup> Ha'e gui ixupe hemimbo'e kuery mboae

— Roexa ma kuri Senhor — he'i okuapy.

Ha'e ramo ombovai:

— Xee ma ipo re karavo kuare ndaexai, ha'e xekuã py ae ndapokoi vy, ha'e gui inharukã re voi apoko e'ŷ re xee ndaroviai 'rã — he'i.\*

\* **20:25** Mateus 28.17

### *Guemimbo'e kuery pe teīgue ju Jesus ojexa ukaague*

<sup>26</sup> Oito ára rire hemimbo'e kuery ha'ekue py ju onhemboatypa, ha'e Tomé avi oĩ ha'e kuery reve. Ha'e vy ojokopa okẽ. Ha'e gui Jesus ou vy ha'e kuery mbyte hi'aĩ xapy'a. Ha'e vy aipoe'i:

— Toĩ pendere mby'a porã.

<sup>27</sup> Ha'e vyve aipoe'i Tomé pe:

— Emoĩ apy nekuā, ha'e exa xepo. Epoko avi xearukā re. Ejerovia e'ŷve eme, aŷ ma erovia ma — he'i.

<sup>28</sup> Tomé ombovai:

— Xe-Senhor ha'e Xeruete! — he'i.

<sup>29</sup> Ha'e ramo Jesus aipoe'i:

— Ndee xerexa vy rive teve rerovia? Ha'e rã ový'a ete 'rã xerexa e'ŷ teī ojerovia va'e kuery — he'i.\*

### *Jajerovia aguã re ijayvuague*

<sup>30</sup> Jesus hexa pyrã heta ojapo raka'e guemimbo'e kuery oexaa rupi. Ha'e nungakue ha'e javi e'ŷ ipara oinya kova'e kuaxia re.

<sup>31</sup> Ha'e rã kova'e re ipara oinya ma peẽ kuery perovia aguã Jesus ae Cristo Nhanderuete Ra'y oikoa, pejerovia vy tekove peupity aguã hery rupi.

## 21

### *Sete guemimbo'e kuery pe ju Jesus ojexa ukaague*

<sup>1</sup> Ha'e va'e rire, teīgue ju Jesus ojexa uka guemimbo'e kuery pe, Tiberíades yupa py. Ha'e rami py ojexa uka tema.

<sup>2</sup> Ha'e py ma oĩ Simão Pedro, Tomé Dídimu hery va'e, Galiléia regua Caná pygua Natanael, ha'e Zebedeu ra'y mokoïve. Oïve avi mokoï hemimbo'e mboae.

<sup>3</sup> Ha'e gui Simão Pedro aipoe'i:

— Xee aa ta pira mbo'a vy.

Ha'e ramo amboae kuery ombovai:

— Ore voi roo ta nderupive — he'i okuapy. Ha'e rami vy oje'oipa, kanoã py ikuai pira mbo'aa rupi. Pytū mbukukue re teī neĩ peteī'i nombo'ai.

<sup>4</sup> Ko'ẽ aje'ive'i reve yy rembe re Jesus ojekuaa ho'amy ita ku'i reia py. Ha'e rami teī hemimbo'e kuery ndoexa kuaai ha'e ri hi'aña.

<sup>5</sup> Ha'e gui Jesus oporandu:

— Xera'y kuery, perekpa upa py ja'u va'erã?

— Any — he'i okuapy.

<sup>6</sup> Ha'e kuery pe aipoe'ive ju:

— Pemombo ha'vy pira mbo'aa kanoã yke peiporu kuaa regua re. Ha'e rami vy 'rãe pembo'a — he'i. Ha'e rami ha'e kuery ojapo vy haxy py omoatã pira mbo'aa, heta ho'a ramo.

<sup>7</sup> Ha'e rami rã hemimbo'e Jesus oayvuve va'e aipoe'i Pedro pe:

— Senhor rima ra'e — he'i.

Ha'e ramo Simão Pedro ma Senhor-a oendu vy onhemonde pojava onhemboipa rire. Ha'e rami vy oguejy yy py.

<sup>8</sup> Ha'e rã hemimbo'e kuery mboae ma kanoã py ae ou, pira mbo'aa omoatã heruvy, mba'eta yy rembe gui namombyryi ikuai, cem metros rivyvyia py.

<sup>9</sup> Yvy'ã re ha'e kuery oẽ vy oexa tapyi, ha'e hi'áry piky oexy inony va'e, mbojape guive.

<sup>10</sup> Ha'e gui Jesus ha'e kuery pe

— Peru avi pira peẽ pembo'a va'ekue — he'i.

\* <sup>20:29</sup> 2 Coríntios 5.7; 1 Pedro 1.8,9

**11** Ha'e ramo Simão Pedro kanoã py oike vy omoatã pira mbo'aa yvy'ã re. Cento e cinqüenta e três pira tuvixakueve anho tynyẽ. Ha'e rami teĩ pira mbo'aa neĩ peteĩ henda py ma ndoxoi.

**12** Ha'e gui Jesus

— Peju jakaru — he'i. Ha'e neĩ peteĩve hemimbo'e kuery noporandui mava'e pa oikoa re, mba'eta Senhor ae oikoa oikuua vy.

**13** Ha'e gui Jesus onhemboja vy ojopy mbojape, ha'e omboja'o. Pira voi ha'ekue rami omboja'o.

**14** Kova'e re mboapykuea ma Jesus guemimbo'e kuery pe ojexa uka raka'e, omanoague gui onhemboete rire.

### *Pedro pe mboapykue oporanduague*

**15** Ha'e kuery okarupa ma rire Jesus oporandu Simão Pedro pe. Ha'e vy aipoe'i:

— Simão João ra'y, ndee nda'u xerayvuve ri amboae kuery gui?

Pedro ombovai:

— Tá Senhor, xee roayvu. Ndee ma reikuua roayvua — he'i.

Ha'e ramo aipoe'i:

— Emongaru ha'vy xerymba vexa'i kuery — he'i.\*

**16** Teĩgue ju Jesus oporandu:

— Simão João ra'y, ndee pa xerayvu?

Ombovai:

— Tá Senhor, xee roayvu. Ndee reikuua roayvua — he'i.

Ha'e ramo Jesus aipoe'i:

— Epena ha'vy xerymba vexa'i kuery re — he'i.

**17** Ha'e gui mboapykuea ma Jesus oporandu:

— Simão João ra'y, ndee pa xerayvu?

Ha'e ramo Pedro iporiau, mboapykue ma “Ndee pa xerayvu?” he'i ramo. Ha'e vy ombovai:

— Tá Senhor, ndee ma opa mba'e reikuua, ha'e reikuua avi xee roayvua — he'i.

Ha'e ramo Jesus aipoe'i:

— Emongaru ha'vy xerymba vexa'i kuery.

**18** Anhetẽ aipoa'e ndevy: Nekunumive jave py ma ndee ae renhemonde ha'e reo va'ekue reoxea katy rei. Ha'e rã ndetuja'i ma rire reupi 'rã ndejyva jovaive, ha'e amboae kuery nemoxã vy ndereraa 'rã ndee reoxeague katy e'ÿ — he'i.

**19** Ha'e rami ijayvu vy oikuua uka marã rami pa Pedro omano aguã Nhanderuete mboetea rupi.\* Ha'e rami ijayvupa rire aipoe'ive ju:

— Eju ke xerakykue — he'i.

**20** Ha'e gui Pedro ojere vy oexa hakykue'i hemimbo'e Jesus oayvuve va'e ou oiny ramo. Ha'e va'e ma okaru okuapy jave Jesus yvy'iry oguapy oiny, ha'e ijopy uka nhemiarã mava'e pa oikoa re oporandu va'ekue.

**21** Ha'e gui Pedro ha'e va'e oexa vy oporandu Jesus pe:

— Ha'vy peva'e?

**22** Jesus ombovai:

— Xapy'a rei xee aipota ramo peva'e oikove 'rã aju jevy peve. Mba'e re tu ndee ha'e nunga reikuaxe? Ndee tema eju xerakykue — he'i.

**23** Ha'e va'e rire irmão kuery oikuua “Ha'e va'e hemimbo'e nomanoi 'rã” he'iague rami. Ha'e rami teĩ Jesus ma “Nomanoi 'rã” nde'i. Ha'e rã “Xapy'a rei xee aipota ramo ha'e oikove 'rã aju jevy peve. Mba'e re tu reikuaxe ha'e nunga?” he'i raka'e.

### *João omombe'u va'ekue re ijayvuague*

\* **21:15** 1 Pedro 5.1-4 \* **21:19** 2 Pedro 1.13,14

<sup>24</sup> Ha'e va'e hemimbo'e ae ha'e nunga omombe'u ha'e imboparaare. Ha'e ore kuery roikuaa ha'e omombe'u va'ekue anhetē memea.

<sup>25</sup> Heta teri oī Jesus ojapo va'ekue. Ha'e nunga ha'e javi omboparapaa va'e rire xee aikuua rā neī yvy jave re voi noīmbai 'rāgue kuaxia ombopara pyre.

## Apóstolo kuery rembiapokue atos 'epy va'e oĩa Apóstolo kuery ojapo va'ekue atos 'epy va'e oĩa

Jesus Cristo omanoague gui onhemboete ju, ha'e yva re oo ta ma jave ijayvu Nhe'ẽ Ky'a E'ŷ hemimbo'e kuery re oguejy vy omombaraete aguã. Aipoe'i: "Ha'e ramo xeregua ayvu pemombe'ua rupi 'rã pendekuai. Jerusalém py 'rã pemombe'u, Judéia ha'e Samaria rupi, ha'e gui yvy apy ha'e javi rupi peve", he'i (1.8b). Quarenta araa py ha'e kuery re Nhe'ẽ ou. "Ha'e ramo hemimbo'e kuery oje'oi vy opa rupi omombe'u ayvu. Senhor voi oipytyvõ hexa pyrã ojapoa py, ha'e kuery ayvu omombe'ua rupi anhetẽ memea oikuua uka aguã" (Marcos 16.20). Kova'e kuaxia py ha'e nunga oĩ. Lucas ombopara va'ekue.

Jesus po'akaa rupi ha'e Nhe'ẽ Ky'a E'ŷ rupi hemimbo'e kuery omombe'u Jesus Cristo re jajerovia aguã regua ha'e hexa pyrã ojapo. Jerusalém tetã guiomboypy, Judéia ha'e Samaria ha'e javi rupi ju oje'oi, ha'e gui judeu e'ŷ va'e ikuaria rupi. Apóstolo Pedro onhea'ave raka'e judeu kuery pe ayvu omombe'u aguã, ha'e rã apóstolo Paulo ma judeu e'ŷ va'e kuery pe omombe'u. Ha'e ramia py opa rupi oikuua uka ayvu Jesus nhandereraa jeprea regua. Aŷ peve ha'e va'e ayvu omombe'ua teri peteĩ-teĩ regua ikuaria rupi, Jesus aipoe'iague rami vy. Ko yvy re Jesus ojevy e'ŷa ja ha'e rami 'rã omombe'ua, pavẽ oendu aguã.

### *Ijayvu ypyague*

<sup>1</sup> Jypyguia kuaxia ndevy Teófilo ambopara va'ekue ma amombe'u aguã Jesus ojapo va'ekue ha'e nhombo'eague ha'e javi,\*

<sup>2</sup> yvate heraa ára peve. Ha'e va'e e'ŷ mbove ma apóstolo kueryrã oiporavo va'ekue pe ojapo uka mba'emo Nhe'ẽ Ky'a E'ŷ rupi.

<sup>3</sup> Mba'eta omano rire ha'e va'e kuery pe ojexa uka ju oikove va'e. Mbovykue rei e'ŷ oikuua uka anhetẽ ete oikovea. Quarenta ára re ha'e kuery pe ojexa uka vy ombo'e oikovy mba'emo Nhanderuete po'akaa rupi oiko va'erã re.

<sup>4</sup> Ha'e kuery reve okaru vy aipoe'i avi:

— Jerusalém gui pejep'e a e'ŷ re pearõ ranhe Xeru Onhe'ẽ ombou aguã re ijayvuague. Ha'e va'e xee amombe'u rã pendu ae ma va'ekue.\*

<sup>5</sup> Mba'eta João ma anhetẽ yy py nhomongarai va'ekue. Ha'e rã peẽ ma Nhe'ẽ Ky'a E'ŷ reve 'rã penemongaraia, are vaipa e'ŷ re — he'i.

### *Yva re Jesus ooague*

<sup>6</sup> Ha'e rami rã ijaty va'e kuery oporandu:

— Senhor, aŷ ma nhi'ã rejapo ta Israel kuery ipo'aka ju aguã rami?

<sup>7</sup> Ha'e ramo ombovai ha'e kuery pe:

— Mba'emo oiko aguã ára araka'e paa ma Xeru opo'akaa rupi ae oa'anga va'ekue. Ha'e rã peẽ kuery ma nda'evei peikuua aguã.

<sup>8</sup> Ha'e rami avi pendere Nhe'ẽ Ky'a E'ŷ oguejy rã penembopo'akaa ae 'rã. Ha'e ramo xeregua ayvu pemombe'ua rupi 'rã pendekuai. Jerusalém py 'rã pemombe'u, Judéia ha'e Samaria rupi, ha'e gui yvy apy ha'e javi rupi peve — he'i.

<sup>9</sup> Ha'e rami Jesus ijayvupa ma rire yvate heraa ha'e kuery oexaa gui. Ha'e gui peteĩ arai ou vy ojao'i ramo ndoexavei.\*

<sup>10</sup> Yva re Jesus oo ma ramo ha'e kuery oma'ẽ teri okuapy jave ha'e kuery yvýry mokoĩ ava hi'aĩ xapy'a ijao xiĩmba rei va'e.

\* **1:1** Lucas "Jypyguia kuaxia" he'ia ma Jesus Cristo reko ombopara va'ekue re ijayvu vy (Lucas 1.1-4), mba'eta ha'e va'e ombopara rire apóstolo kuery ojapo va'ekue ju ombopara, kova'e ae. \* **1:4** Lucas 24.36-49 \* **1:9** Mateus 28.16-20; Marcos 16.15,19; Lucas 24.50,51

**11** Ha'e va'e kuery oporandu:

— Avakue Galiléia pygua, mba'e re tu pema'ẽ teri yvate? Mba'eta penembyte gui Jesus yva re oo va'ekue ma ha'ekue rami ae ju 'rã ou, oo rã pexaague rami ae.

### *Jerusalém tetā py temimbo'e kuery ikuaiague*

**12** Ha'e ramo Olival vytyt 'epy va'e gui ma Jerusalém tetā katy ju ojevypa, sábado ára py oguata aguã ha'evea peve.<sup>†</sup>

**13** Tetā re ovaẽ ma vy ojeupi jogueravy yvate opy oĩ va'e py. Ha'e py ma nhomboaty: Pedro, João, Tiago, André, Filipe, Tomé, Bartolomeu, Mateus, Alfeu ra'y Tiago, Simão Zelote ha'e Tiago ra'y Judas.

**14** Ha'e va'e kuery ha'e javi ma peteĩ rami meme ikuai onhembo'ea py. Kunhague avi ikuai. Ha'e kuery reve oĩ avi Jesus xy Maria, tyvy kuery guive.

### *Apóstolo-rã Matias oiporavoa ague*

**15** Ha'e va'e jave py ma irmão kuery cento e vinte ikuai va'e mbyte py Pedro opu'ã ho'amy. Ha'e vy aipoe'i:

— Irmão kuery, ojeupity 'rãe raka'e Davi juru rupi Nhe'ẽ Ky'a E'ŷ omombe'u va'ekue Judas rekorã. Ha'e va'e ma ogueraa raka'e Jesus jopyarã kuery.

**17** Mba'eta ha'e va'e ma ore kuery regua vy kova'e tembiapo ojapo aguã rami oiko avi va'ekue.

**18** (Ha'e gui ha'e va'e ava ma ojejavvyague repy re ojoguaa peteĩ yvy. Ha'e py oo ma vy ho'a vy oxoropa, hyekue onheẽmba raka'e.)

**19** Ha'e nunga ha'e javi Jerusalém py ikuai va'e oikuaapa. Ha'e rami vy oayvu py ae omboery Aceldama, “Yvy tuguy” he'ia.)\*

**20** Mba'eta kuaxia Salmo oĩa re ipara oiny: “Hogue topyta tekua oĩ e'ŷa. Toĩ eme avave rei ha'e va'e py”, ha'e “Tove amboae tojopy hembiaporã va'ekue” he'iague.\*

**21** Ha'ekue rami vy jajou 'rã peteĩ ava Senhor Jesus oikoa pukukue re nhandereve ikuai va'ekue regua,

**22** João nhomongaraia ára guive, ore mbyte gui yvate Jesus heraa-a ára peve. Ha'e va'e regua peteĩ toiko nhandereve onhemboete jevyague mombe'uarã – he'i.\*

**23** Ha'e ramo mokoĩ ranhe ojou okuapy: José Barsabás Justo 'epy va'e, ha'e Matias guive.

**24** Ha'e rami vy onhembo'e vy aipoe'i okuapy:

— Ndee Senhor ha'e javive py'a re oĩa reikuaa va'e vy eikuua uka orevy mava'e pa kova'e mokoĩ gui reiporavo ra'e,

**25** apóstolo rembiapo ojapo oikovy aguã. Mba'eta Judas ma ha'e rami aguã gui ojepe'a raka'e, ha'e ae oĩ aguã katy oo vy – he'i okuapy.

**26** Ha'e gui ma xortea oexa vy oikuua okuapy Matias ri ty ra'ea. Ha'e rami vy omoĩ onze apóstolo ikuai va'e irûrã.

## 2

### *Nhe'ẽ Ky'a E'ŷ oguejyague*

**1** Pentecostes ára ojeupity jave ha'ekue py ae ono'õmba okuapy.

**2** Ha'e gui yva gui ou nhendu xapy'a vytytu atã ramigua. Opy jave re oguapy okuapya rupi onhendu.

**3** Ha'e kuerya rupi tata rendy vuku ramigua ojekuaa avi, apekũ ramigua merami. Ha'e vy peteĩ-teĩ áry oĩ.

<sup>†</sup> **1:12** Judeu kuery gueko rami vy sábado ára oguata aguã ha'evea ma namombyryi'i, peteĩ quilômetro rai'i peve anho (Lucas 24.52,53.)    \* **1:19** Mateus 27.3-10    \* **1:20** Salmo 69.25, 109.8    \* **1:22** João 15.27

<sup>4</sup> Ha'e javive re Nhe'ẽ Ky'a E'ŷ anho oĩ ramo ijayvu okuapy ayvu mboae py, Nhe'ẽ ombo'ea rami meme.

### *Amboae ayvu py omboayvuague*

<sup>5</sup> Jerusalém py ikuai avi judeu regua avakue Nhanderuete pegua, yva guýry ha'e javi gui ou va'ekue.

<sup>6</sup> Ha'e kuery ma hemimbo'e kuery ha'e rami ijayvu rã oendu vy heta ijatypa. Ndoikuaai rei okuapy, mba'eta ijayvu rã oendu okuapy peteĩ-teĩ oayvu ae py.

<sup>7</sup> Onhemondyipa ha'e ndoikuaai rei vy aipoe'i okuapy:

— Ne'endu, Galiléia pygua meme e'ŷ ri nda'u peva'e kuery ijayvu okuapy va'e?

<sup>8</sup> Mba'exa vy tu ijayvu rã peteĩ-teĩ nhandeayvu ae py nhaendu?

<sup>9</sup> Mba'eta Pártia guigua nhandekuai, Média guigua, Elão, Mesopotâmia, Judéia ha'e Capadócia guigua, Ponto ha'e Ásia guigua,

<sup>10</sup> Frígia, Panfília, Egito, Líbia, Cirene katy'i ha'e Roma guigua guive apy nhandekuai,

<sup>11</sup> judeu ha'e judeu reko rami nhandekuai va'e, Creta ha'e Arábia guigua kuery. Ha'e rami teĩ mba'exa vy tu nhandeayvu ae py nhaendu ha'e kuery ijayvu rã Nhanderuete mba'emo porã ojapoa re? — he'i okuapy.

<sup>12</sup> Ha'e javive ndoikuaai rei ha'e onhemondyipa vy oporandu okuapy joupe-up:

— Mba'erã nda'u po rami ijayvu? — he'i okuapy.

<sup>13</sup> Ha'e rã amboae kuery ma oojai rei vy

— Oka'upa rima ra'e — he'i okuapy.

### *Pedro ijayvuague*

<sup>14</sup> Ha'e ramo Pedro opu'ã ho'amy apóstolo kuery mboae onze va'e reve. Ijayvu atã vy aipoe'i:

— Avakue judeu regua ha'e Jerusalém py pendekuai va'e ha'e javive, pejapyxaka xeayvua re peikuua porã aguã.

<sup>15</sup> Kova'e avakue ma ndoka'ui pexa'ãa rami e'ŷ, mba'eta kuaray yvatepa ramo'i.

<sup>16</sup> Ha'e rami 'rãgue py oiko va'e ma profeta Joel pe aipoe'i ukaague rami:

<sup>17</sup> "Senhor aipoe'i: 'Opaa ára py po rami 'rã oiko. Avakue ha'e javi re ambou 'rã Xenhe'ẽ. Ha'e ramo pendera'y ha'e penderajy kuery ijayvu 'rã xegui. Ipyaukueve oexa 'rã hexa pyrã, kakuaakueve voi oexa ra'u 'rã.

<sup>18</sup> Ha'e va'e ára Xenhe'ẽ ambou 'rã xerembiguai avakue ha'e kunhague re. Ha'e ramo ha'e kuery mba'emo omombe'u 'rã Nhe'ẽ rupi.

<sup>19</sup> Yva re aexa uka 'rã nhomondyipaarã, yvy re voi hexa pyrã aexa uka 'rã tuguy, tata ha'e hataxi.

<sup>20</sup> Ha'e ramo kuaray pytumba 'rã, jaxy voi tuguy rami 'rã optya, Senhor ára yvate ete ha'e hexakãmba va'e ovaẽ e'ŷ mbove.

<sup>21</sup> Ha'e po rami 'rã oiko: Ha'e javive Senhor rery rupi ojapukai va'e oo jepe 'rã', he'ague."\*

<sup>22</sup> — Avakue Israel regua, pejapyxaka xeayvua re. Penerenonde rupi Nhanderuete oikuua uka va'ekue Nazaré pygua Jesus po'akaa. Ha'e ramo opo'akaa rupi ojapo oikovy penemondyiärã ha'e hexa pyrã. Ipo rupi Nhanderuete ojapo raka'e penembyte rupi. Peẽ kuery voi peikuua.

<sup>23</sup> Ha'e gui Jesus ma Nhanderuete ha'e ae oipotaa rami vy ojopy uka, onhembopy'a voiaque rami vy ae. Ha'e ramo peẽ kuery pejuka. Ha'e vy kuruxu re pemoĩ uka heko vai va'e kuery pe.

<sup>24</sup> Ha'e gui Nhanderuete ma manoa po'akaa ombovaipa vy omboete ju, mba'eta hexe ma manoa nda'ipo'akai 'rãe.

---

\* <sup>2:21</sup> Joel 2.28-32

<sup>25</sup> Mba'eta hekorā re ae Davi ijayvu raka'e: “Xerenonde aexa riae Senhor aiporu kuaa regua re oĩ rā, xereity uka e'ŷ aguã.

<sup>26</sup> Ha'e rami rā xepy'a py avy'a vaipa, xeayvu py roguerovy'a guive. Xero'o eteve voi ojeroviaa rupi 'rā opytu'u.

<sup>27</sup> Mba'eta nderejai 'rā xenhe'ẽ omano aguã py, xerete voi nerembovaipa ukai 'rā, neremimbo'e iky'a e'ŷ va'e aiko rā.

<sup>28</sup> Ha'e rami 'rāgue py xevy pe reikuaa uka tape tekove katy oo va'e, nerенонде xembovy'a 'rā guive opa mba'e py", he'i va'ekue.\*

<sup>29</sup> — Ke'y ha'e xeryvy kuery, tamombe'u porāve nhaneramoĩ Davi rekokue. Ha'e va'e ma omano raka'e, onhono porāa guive. Onhono porāague ma aŷ peve oĩ nhanembyte.

<sup>30</sup> Ha'e rami avi profeta oiko, oikuua guive Nhanderuete oura voiague, hekovia peteĩ hamymino huvixaverā oĩ aguã re.

<sup>31</sup> Ha'e nunga oikuua vy ae ijayvu raka'e Cristo onhemboete jevy 'rāa re, omanoa py ndoejai, neĩ hetekue ombovaipa uka e'ŷ aguã re.

<sup>32</sup> Ha'e rami vy Nhanderuete omboete ju Jesus. Ha'e nungakue mombe'ua ma ore kuery ha'e javive orekuai.

<sup>33</sup> Ha'e gui Nhanderuete oiporu kuaa regua re omboyvateve ma ramo Nguu gui ojopy Nhe'ẽ Ky'a E'ŷ ombou 'rā va'ekue. Ha'e va'e ae ombou kuri pexa ha'e pendu va'e.

<sup>34</sup> Mba'eta Davi ma yva re ndooi va'eri ha'e ae aipoe'i: “Senhor ma aipoe'i xe-Senhor pe: 'Eguapy aiporu kuaa regua re,

<sup>35</sup> nderovaigua kuery ndepy guýry guarā amoĩ e'ŷa ja', he'i va'ekue.”\*

<sup>36</sup> Ha'e nunga rupi peẽ Israel kuery ha'e javi, peikuaa porā pota pova'e re: Jesus kuruxu re pemoĩ va'ekue ae ma Nhanderuete oikuua uka Senhor ha'e Cristo oikoa — he'i.

### *Três mil onhemongarai ukaague*

<sup>37</sup> Ha'e nunga ha'e kuery oendu vy opy'a re oendu okuapy ojeayvua. Ha'e vy oporandu Pedro ha'e apóstolo kuery mboae pe:

— Ke'y kuery, mba'e tu rojapo ta?

<sup>38</sup> Pedro ombovai:

— Pejeko rerova, ha'e peteĩ-teĩ penhemongarai uka Jesus Cristo rerry rupi, pejejavique omboguepa aguã. Ha'e rami vy pendevy voi ome'ẽa 'rā Nhe'ẽ Ky'a E'ŷ.

<sup>39</sup> Mba'eta peẽ kuery pe voi ijayvu ombou aguã re, penda'y ha'e pendajy kuery pe, ha'e mombyry teri ikuai va'e Senhor Nhanderuete oenoĩ va'erā ha'e javive pe guive — he'i.

<sup>40</sup> Opa marãgua ayvu py omongetave ju. Ha'e vy aipoe'i:

— Pejereraa jepe uka kova'e kuery heko vai va'e mbyte gui — he'i.

<sup>41</sup> Ha'e gui onhe'ẽ rendu va'e kuery onhemongarai uka. Ha'e rami vy ha'e va'e ára hetave três mil rai'i.

### *Ojeko me'ẽ va'ekue ikuaria re ijayvuague*

<sup>42</sup> Ha'e kuery ikuai tema apóstolo kuery ombo'ea rami peteĩ'i rami meme, mbojape oipe'ã-pe'ã'ia rupi, ha'e onhembo'ea py.

<sup>43</sup> Peteĩ-teĩ oendu ojererokyjea. Ha'e rā apóstolo kuery ma opo py heta ojapo nhomondiyipaarā ha'e hexa pyrā.

<sup>44</sup> Ha'e javive oguerovia va'e joupive ikuai, ha'e opa mba'e oguerekova'e joupe guarā meme.\*

<sup>45</sup> Ha'e rami vy oyvy ha'e mba'emo oguerekova'e ekue ovende vy hepykue omboja'o-ja'o amongue oikotevẽa rami.

<sup>46</sup> Ko'ẽ nhavõ peteĩ rami ikuai templo py, ha'e ngoo rupi mbojape ho'u okuapy. Ovy'a reve okaru peteĩ rami ipy'a reve.

<sup>47</sup> Nhanderuete pe oporaeia rupi tema ikuai. Ha'e rami rã heta va'e kuery ha'e javi ojou porã, ha'e ko'ẽ nhavõ Senhor omboetave heravy oo jepe va'e.

### 3

#### *Peteĩ oguata e'ŷ va'ekue omopu'ã jevyague*

- <sup>1</sup> Kuaray ojero'a jave Pedro ha'e João templo katy oo onhembo'e vy.
- <sup>2</sup> Ha'e jave py ma heraa avi peteĩ ava itui'i guive ndoguatai va'e. Ha'e va'e ma ko'ẽ nhavõ omoĩa 'rã templo rokẽ Iporã 'epy va'e py, oike va'e kuery pe mba'emo re ojerure aguã.
- <sup>3</sup> Pedro ha'e João templo py oike jogueravy rã ava va'e oexa vy ha'e kuery pe voi ojerure mba'emo ome'ẽ aguã.
- <sup>4</sup> Ha'e gui hexe Pedro ha'e João oma'ẽ porã ranhe. Ha'e vy  
— Ema'ẽ orere — he'i.
- <sup>5</sup> Ha'e ramo ha'e kuery re oma'ẽ oiny mba'emo ojopy aguã oarõ vy.
- <sup>6</sup> Ha'e gui Pedro aipoe'i:  
— Xee ma prata neĩ ouro ndarekoi. Ha'e rã areko va'e ma ame'ẽ 'rã. Ha'e rami vy Jesus Cristo Nazaré pygua va'e rery rupi aipoa'e: Eguata — he'i.\*
- <sup>7</sup> Ha'e rami vy ipo oiporu kuaa regua re ojopy vy omopu'ã. Ha'e ramove ipy ha'e ipy nhu'ã imbaraetepa.
- <sup>8</sup> Opo reve opu'ã vy templo py oike ha'e kuery reve. Opo-opo oikovy Nhanderuete pe oporaei reve.
- <sup>9</sup> Ava va'e oguata ha'e Nhanderuete pe oporaei rã pavẽ rei oexa okuapy vy
- <sup>10</sup> oikuapa ha'e ae ri ty ra'e mba'emo re ojerurea rupi templo rokẽ Iporã 'epy va'e py oguapy va'ety. Ha'e rami vy onhemondyipa, okyje guive ha'e nunga ri ty ra'e oiko rã.

#### *Templo ropy Pedro ijayvuague*

- <sup>11</sup> Pedro ha'e João reve tema ava va'e onhemoirũ rã heta va'e kuery ha'e javi oexa vy onhemondyipa reve onhamba jogueruvy ha'e kuerya katy, Salomão roguy puku 'epy va'e py.\*
- <sup>12</sup> Heta va'e kuery ou rã Pedro oexa vy aipoe'i ha'e kuery pe:  
— Israel kuery, mba'e re tu penhemondyipa ri kova'e nunga gui? Mba'e re tu orere anho ri pema'ẽ? Pexa'ã teve ore ae po'akaa py, e'ŷ vy orerekoo porãa py romboguata jevyague?
- <sup>13</sup> Mba'eta Abraão, Isaque ha'e Jacó Ruete, nhaneramoĩ kuery Ruete ae ojapo, guembiguai Jesus po'akaa oíkuua uka aguã. Ha'e va'e ma pejopy uka nhemi, ha'e huvixa Pilatos opoi ta ramo henonde pendeayvu va'ekue ndapeipotaia rupi.
- <sup>14</sup> Iky'a e'ŷ va'e, Heko porã ete va'e peẽ kuery ndapeipotai vy hekovia pejerure jojuka rive va'ety opoi aguã.
- <sup>15</sup> Ha'e rami py pejuka uka Tekove me'ëa. Ha'e rã Nhanderuete ma omboete ju omanoague gui. Ore kuery ma ha'e nungakue mombe'ua orekuai.
- <sup>16</sup> Jesus rery re ore rojerovia ramo guery rupi ae omombaraete kova'e ava, aŷ pexa vy peikuua va'e. Tá, Jesus re rojerovia ramo ae omonguera porã ju peẽ kuery ha'e javive renonde.
- <sup>17</sup> — Ha'e gui aŷ ke'y ha'e xeryvy kuery, xee aikuua peikuua e'ŷ vy pejuka ukaague, penduvixa kuery reve.
- <sup>18</sup> Ha'e rami avi Nhanderuete ae ojapo Cristo oiko axy aguã rami, profeta kuery pe omombe'u uka va'ekue ha'e javi ojeupity aguã.
- <sup>19</sup> Ha'e nunga rupi penhemboaxy ha'e pejeko rerova ke pejejavyague omboguepa aguã,\*
- <sup>20</sup> Senhor gui ou aguã javy'a aguã ára, ha'e pendereraa jepearã omoĩ va'ekue Cristo ombou jevy aguã. Ha'e va'e ma Jesus ae.

\* **3:6** João 14.13,14

\* **3:11** Salomão roguy puku 'epy va'e ma templo roka py oĩ.

\* **3:19** Lucas 24.46,47

<sup>21</sup> Mba'eta yva re opyta ranhe 'rã mba'emo ombopyaupa aguã ára ovaẽ e'ŷa ja. Ha'e va'e ára ma yma ma voi Nhanderuete omombe'u uka profeta kuery iky'a e'ŷ va'e pe.

<sup>22</sup> Mba'eta anhetẽ ae Moisés aipoe'i: "Senhor Nhanderuete ma pendyvy kuery regua va'e ae omoingo 'rã peteĩ profeta xee rami guarã. Ha'e va'e ayvu re anho pejapyxaka 'rã opa mba'e omombe'u rã.

<sup>23</sup> Ha'e rã ha'e va'e profeta ayvu re ndojapyxakai va'e ma oipe'apaa 'rã heta va'e kuery mbyte gui", he'i va'ekue.\*

<sup>24</sup> Ha'e gui Samuel oiko guive profeta ikuai va'e ha'e javi omombe'u ma voi kova'e ára guarã.

<sup>25</sup> Peẽ ma profeta ramymino kuery pendekuai, ha'e nhaneramoĩ kuery pe Nhanderuete guexeve guarã ojapo va'ekue ma pendevy pegua voi, mba'eta Abraão pe "Neramymino kuery re vy yvy regua ha'e javi ikuai porã 'rã", he'iague rami.\*

<sup>26</sup> Ha'e nunga rupi Nhanderuete Guembiguai omboete ju vy pendevy pe ranhe ombou, peteĩ-teĩ pendeko vaia gui pendepe'a vy penemoingo porã aguã.

## 4

### *Pedro ha'e João nhuã py ombotya ague*

<sup>1</sup> Heta va'e kuery pe apóstolo kuery ijayvu teri reve ou sacerdote kuery, templo rarõa ruvixa ha'e saduceu kuery.

<sup>2</sup> Ha'e va'e kuery ma ndojou porã heta va'e kuery ombo'ea, mba'eta omombe'u Jesus re vy omano va'ekue onhemboete jevy 'rãa.

<sup>3</sup> Ha'e rami vy ka'aru ma ramo ojopy vy nhuã py ombotya ko'ẽ jevy oikuaa pota aguã.

<sup>4</sup> Ha'e rã ijayvua oendu va'e kuery ma heta oguerovia. Avakue oguerovia va'e ma cinco mil rai'i ikuai.

### *Pedro ha'e João omboayvu okuapyague*

<sup>5</sup> Ko'ẽ jevy Jerusalém tetã py huvixa kuery nhomboaty okuapy nhomongeta va'ety kuery reve, lei re nhombo'e va'ety kuery,

<sup>6</sup> sacerdote yvateve va'e Anás, Caifás, João, Alexandre ha'e gui sacerdote yvateve va'e ro pygua kuery ha'e javi reve.

<sup>7</sup> Ha'e gui ojea py apóstolo kuery ogueru ruka vy oporandu ha'e kuery pe:

— Mba'e nunga po'akaa rupi tu, ha'e mava'e rery rupi pejapo guĩ nunga?

<sup>8</sup> Ha'e ramo Pedro re Nhe'ẽ Ky'a E'ŷ anho oĩ ramo aipoe'i:\*

— Oreruvixa ha'e nhomongeta va'ety kuery,

<sup>9</sup> aŷ ma oremboayvu peteĩ ava imba'eaxy va'e pe mba'emo porã oiko va'ekue re, ha'e marã rami vy pa okueraague re.

<sup>10</sup> Peikuaa pota ha'vy pova'e re, peẽ ha'e Israel kuery ha'e javi reve: Nazaré pygua Jesus Cristo kuruxu re pemoĩ uka va'ekue, ha'e omanoague gui Nhanderuete omboete ju va'ekue rery rupi ae kova'e ava okuera reve hi'aĩ penerenonde.

<sup>11</sup> Jesus ae ita peẽ oo apoa kuery ndapeipotai va'ekue ri ita omboeteve pyrã rami opyta.\*

<sup>12</sup> Mba'eta jipoi nhandereraa jepearã mboae, mba'eta yva guýry nda'ipoi amboae tery nhandevy pe ome'ẽ mbyte, ha'e va'e rupi jaa jepe aguã — he'i.

<sup>13</sup> Ha'e rami rã Pedro ha'e João ipy'a guaxua oexa vy onhemondyipa okuapy, mba'eta kuaxia para oexa kuaa va'e e'ŷ, imbo'e pyre'ŷ ikuiaia oikuaa vy. Ha'e rami vy oikuaa Jesus reve ikuai va'ekuea.

<sup>14</sup> Ha'e kuery mbyte py ava omonguera pyre oĩ avi rã oexa vy nda'ijayvu kuaavei ha'e kuery rovai.

<sup>15</sup> Ha'e gui ma omboayvuague gui omoẽmba vy jomeme ju ijayvu vy

<sup>16</sup> aipoe'i:

\* <sup>3:23</sup> Deuteronômio 18.15,18-19 \* <sup>3:25</sup> Gênesis 22.18, 26.4 \* <sup>4:8</sup> Lucas 21.12-15 \* <sup>4:11</sup> Salmo 118.22

— Mba'e tu jajapo 'rā peva'e avakue re? Mba'eta anhetē ae Jerusalém pygua kuery oikuaapa ha'e kuery mba'emo porā ete ojapoague. Ha'e nunga rupi "Any" ja'e aguā nda'evei.

<sup>17</sup> Ha'e rami avi heta va'e kuery pe ha'e kuery omombe'u ve'ŷ aguā nhamongyje 'rā. "Ha'e va'e rery rupi pendeayvuve eme avave rei pe", ja'e 'rā — he'i okuapy.

<sup>18</sup> Ha'e rami vy oenoī jevy vy ijayvu ha'e kuery pe Jesus rery rupi nda'ijayvuvei neī nanhombo'evei aguā.

<sup>19</sup> Ha'e ramo Pedro ha'e João ombovai:

— Peikuua pota ke Nhanderuete renonde: Ha'eve ri nda'u peē kuery, tyrā pa Nhanderuete ronhe'ẽ rendu aguā?

<sup>20</sup> Mba'eta ore ma ndorojepe'ai 'rā mba'emo roexa ha'e roendu va'ekue re oreayvua gui — he'i.

<sup>21</sup> Ha'e rami rā omongyjeve rire opoipa, mba'e nunga re pa ombopaga aguā oikuaa e'ŷ vy, heta va'e kuery gui okyje guive. Mba'eta pavē rei ma mba'emo porā oikoague re ima'endu'a vy oguerovy'a okuapy Nhanderuete,

<sup>22</sup> mba'eta Nhanderuete opo'akaa py omonguera va'ekue ma quarenta ma'etŷ raxa oguereko.

### *Igreja kuery onhembo'e okuapyague*

<sup>23</sup> Pedro ha'e João opoia ma ramo ojou irmão kuery. Ha'e vy ha'e kuery pe omombe'u sacerdote yvatekueve va'e ha'e nhomongoeta va'ety kuery ijayvuague ha'e javi.

<sup>24</sup> Omombe'u rā ha'e kuery oendu vy ha'e javive ojapukai okuapy Nhanderuete pe. Ha'e vy aipoe'i:

— Ndee Senhor Ndepo'akapa va'e ma yva, yvy, ye'ẽ ha'e opa mba'e hexe ikuai va'e apoare reiko.\*

<sup>25</sup> Nhe'ẽ Ky'a E'ŷ rupi aipo'ere uka va'ekue nerembiguai oreramoī Davi pe: "Mba'e re nda'u judeu e'ŷ va'e kuery ipoxypa, ha'e heta va'e kuery voi mba'emo ovare'ŷ va'e ojapo aguā onhembopy'a okuapy?

<sup>26</sup> Mba'eta yvy regua huvixave kuery opu'ã, huvixa kuery peteī rami nhomboaty okuapy Senhor ha'e huvixaverā omoī va'ekue rovai", 're uka va'ekue.\*

<sup>27</sup> Mba'eta anhetē ae kova'e tetā py nhomboaty okuapy Nerembiguai iky'a e'ŷ va'e Jesus nhandereraa jepearā remoī va'ekue rovai. Herodes ha'e Pôncio Pilatos, judeu e'ŷ va'e ha'e oreretarā Israel kuery reve nhomboaty raka'e

<sup>28</sup> ojapo aguā ndepo'akaa rupi ndee ae renhembopy'a ma voiague ha'e javi.

<sup>29</sup> Aŷ ma Senhor, eikuua pota oremongyje okuapy re, ha'e ore nerembiguai kuery orembopy'a guaxu ndeayvu romombe'u aguā.

<sup>30</sup> Ha'e ramia ja ndepo'akaa rupi enhomonguera. Nerembiguai iky'a e'ŷ va'e Jesus rery rupi ejapo hexa pyrā ha'e nhomondyipaarā — he'i okuapy.

<sup>31</sup> Ha'e kuery onhembo'epa ramove oo ono'õ okuapya oryryipa. Ha'e javive re Nhe'ẽ Ky'a E'ŷ anho oī. Ha'e ramo okyjea py e'ŷ omombe'u Nhanderuete ayvu.\*

### *Igreja kuery reko re ijayvuague*

<sup>32</sup> Ojerovia va'e kuery ma peteī rami meme ipy'a ha'e inhe'ẽ. Avave rei "Xevy anho" nde'i neī peteīve oguereko va'e regua pe ma voi. Mba'emo oguereko va'e ma joupe-upé omboja'o va'erā meme oguereko.

<sup>33</sup> Apóstolo kuery ma ipo'akapa reve omombe'u Senhor Jesus onhemboete jevyague, ha'e pavē re oī omboaxya.

<sup>34</sup> Mba'eta ha'e kuery mbyte neī peteīve iporiau'i va'e ndoikoi, mba'eta yvy, e'ŷ vy oo oguereko va'e ovendepa vy ogueru 'rā hepykue,

\* <sup>4:24</sup> Êxodo 20.11

\* <sup>4:26</sup> Salmo 2.1-2

\* <sup>4:31</sup> Mateus 18.19,20

<sup>35</sup> ha'e apóstolo kuery py yvýry omoñ. Ha'e ramo peteñ-teñ pe omboja'o-ja'o 'rã mba'emo oikotevëa rami.\*

### *Barnabé mba'emo ome'ëague*

<sup>36</sup> Peteñ levita Chipre guigua José hery va'e avi ojapo, apóstolo kuery omboery va'ekue Barnabé, "Nhombopy'a guaxua" 'ea.

<sup>37</sup> Ha'e va'e ma oyvy oguerekva'ekue ovende, ha'e hepykue ogueru vy omoñ apóstolo kuery py yvýry.

## 5

### *Ananias ha'e Safira reko re ijayvuague*

<sup>1</sup> Oiko avi peteñ ava Ananias hery va'e. Gua'yxy Safira reve ovende avi oyvy,  
<sup>2</sup> va'eri gua'yxy reve jogueroayvua rami vy ojeupe guarã ae omboja'o hepykue. Hembyrekue rive ogueraa vy omoñ apóstolo kuery py yvýry.

<sup>3</sup> Ha'e ramo Pedro aipoe'i:

— Ananias, mba'e re tu ndepy'a remonhemonde uka Satanás pe, Nhe'ẽ Ky'a E'ŷ pe ndeapu aguã, ndeyvy repykue regua ndejeupe guarã ae remoñ porã vy?

<sup>4</sup> Ndeyvy revende e'ŷ mbove nemba'e'ŷ ri ty'y itui? Ha'e revende rire voi hepykue ndepo py e'ŷ ri ty'y oĩ? Mba'e re tu guĩ rami rejapo aguã ri oĩ ndepy'a re? Avakue pe'ŷ ndeapu, ha'e rã Nhanderuete pe — he'i.\*

<sup>5</sup> Ha'e rami ijayvu rã Ananias oendu vyve ho'a, omano. Ha'e ramo pavẽ oendu vy onhemondyipa.

<sup>6</sup> Ha'e gui kunumigue ikuai va'e ovaẽ vy onhovãmba hetekue, ha'e onhono porã aguã py ogueraa.

<sup>7</sup> Ha'e gui três hora ma oaxa rire Ananias ra'yxy ju ovaẽ mba'e pa oikoague ndoikuai vy.

<sup>8</sup> Ha'e ramo ixupe ju Pedro oporandu:

— Emombe'u xevy: Kova'e'i re ae ma nhi'ã pevende ra'e pendeyvy?

Kunha va'e ombovai:

— Tá, evoko va'e'i re ae ri — he'i.

<sup>9</sup> Pedro aipoe'i:

— Mba'e re tu penhembopy'a ri Senhor Nhe'ẽ peko a'ã aguã? Aipo, okẽ py onhendu neme nhono porãare kuery pyambu. Ha'e ndee voi ndereraa avi 'rã — he'i.

<sup>10</sup> Ha'e ramove kunha va'e ho'a Pedro py rupi, ha'e vy omano. Kunumigue oike vy omano ma oupy rã ojou. Ha'e rami vy ogueraa vy ime yvýry onhono porã.

<sup>11</sup> Ha'e rami rã igreja ikuai va'e oendu okyjea, oiko va'ekue renduare kuery ha'e javive guive.

### *Apóstolo kuery opa mba'e porã ojapoague*

<sup>12</sup> Apóstolo kuery po py hexa pyrã ha'e nhomondyipaarã heta ojapo ukaa heta va'e kuery mbyte rupi.\* Ijatypa jepi 'rã Salomão roguy puku 'epy va'e py.

<sup>13</sup> Ha'e rã amboae kuery ma peteñve na'irũxei ha'e kuery re. Ha'e rami avi heta va'e kuery ojou porã.

<sup>14</sup> Ha'e rami vy avakue ha'e kunhague ma heta-etave tema oje'oivy Senhor re ojerovia va'e.

<sup>15</sup> Ha'e ramo tape rupi imba'eaxy va'e heraa vy onhonoa inony hupa reve ha'e ajukue áry, Pedro oaxa ramo hi'ã ri jepe ojao'i aguã.

<sup>16</sup> Jerusalém katy'i tetã ikuai va'e gui heta ou avi. Imba'eaxy ha'e nhe'ẽ vai gui oiko axy va'e herua ramo omonguerapaa.

### *Apóstolo kuery nhuã py ombo'aa ague*

\* **4:35** Atos 2.42-47 \* **5:4** Gálatas 6.7 \* **5:12** Marcos 16.17-20

<sup>17</sup> Ha'e gui ma sacerdote yvateve va'e ha'e irũ kuery saduceu regua ha'e javive nda'ija'e vy opu'ã okuapy.

<sup>18</sup> Ha'e rami vy apóstolo kuery ojopy vy omboty nhuã py.

<sup>19</sup> Ha'e rami teĩ pyávy peteĩ anjo Senhor-a guigua oipe'a nhuã rokẽ. Ha'e vy oka katy ogueraa vy aipoe'i:

— Tapeo, templo py ju pene'aĩ, ha'e heta va'e kuery pe pemombe'u tekove regua ayvu ha'e javi — he'i.

<sup>21</sup> Ha'e nunga ha'e kuery oendu vy ko'ẽmba'i ramove templo py oike vy nhombo'e.

Ha'e gui sacerdote yvateve va'e ha'e irũ kuery ma nhomboayvuaty py oupa vy omboatypa avi Israel ruvixa kuery ha'e javi. Ha'e vy omondouka nhuã gui apóstolo kuery ogueru aguã.

<sup>22</sup> Ha'e rã xondaro kuery nhuã py oo vy ndojoui. Ha'e rami vy ojevy ju vy omombe'u.

<sup>23</sup> Ha'e vy aipoe'i:

— Roexa rã nhuã onhemboty porã oiny, ha'e okẽ py ma nhuã rarõa kuery ikuai. Ha'e rami teĩ roipe'a vy peteĩve ndorojoui opy — he'i okuapy.

<sup>24</sup> Ha'e rami ijayvu rã templo rarõa ruvixa ha'e sacerdote yvatekueve va'e oendu vy ndoikuaai rei okuapy mba'e pa apóstolo kuery re oikoague, neĩ mba'e pa oiko 'rãa voi ndoikuaai.

<sup>25</sup> Ha'e rami jave ete'i amongue ovaẽ vy omombe'u ha'e kuery pe:

— Nhuã py avakue pemboty va'ekue tu templo py rima ombo'e okuapy heta va'e kuery — he'i.

<sup>26</sup> Ha'e ramo templo rarõa kuery ruvixa ixondaro kuery reve oo vy ogueru porã'i, mba'eta okyje heta va'e kuery ita py ojapipa gui.

<sup>27</sup> Omboayvu aguã ogueru ma ramo sacerdote yvateve va'e oporandu ha'e kuery pe.

<sup>28</sup> Ha'e vy aipoe'i:

— Ha'e gui aiporo'e va'ekue napenhombo'evei aguã ha'e va'e rery rupi. Ha'e ramive ma pejapo Jerusalém ha'e javi rupi penhombo'ea oikuaapaa aguã rami. Orere pemoixe avi ha'e va'e ava ruguy omoëague re ropaga aguã — he'i.

<sup>29</sup> Ha'e ramo Pedro ha'e apóstolo kuery mboae ombovai:

— Avakue ronhe'ẽ rendu 'rãgue py ha'eveve Nhanderuete ronhe'ẽ rendu.

<sup>30</sup> Mba'eta nhaneramoĩ kuery Ruete omboete ju Jesus, peẽ kuery yvyra re pemoi uka vy pejuka va'ekue.

<sup>31</sup> Ha'e rã Nhanderuete ma opo'akaa oexa uka vy omboyvate Huvixave ha'e Jugueraa jepearã, Israel kuery onhemboaxya oendu nho ramo ojejavyague omboguepa aguã.

<sup>32</sup> Ha'e gui ore kuery ma ha'e nungakue kuaa ukaarã orekuai, Nhe'ẽ Ky'a E'ŷ voi, mba'eta Nhanderuete ombou onhe'ẽ rendu va'e kuery pe.

### Gamaliel ijayvuague

<sup>33</sup> Ha'e rami apóstolo kuery ijayvu rã ha'e kuery oendu vy ipoxypave okuapy, ojukaxe guive.

<sup>34</sup> Ha'e rami teĩ nhomongeta va'ety kuery mbyte peteĩ fariseu opu'ã Gamaliel hery va'e, lei re nhombo'e va'ety, ha'e heta va'e kuery ha'e javi omboeteve va'e.\* Ha'e va'e ma opu'ã vy apóstolo kuery omoë uka ranhe xapy'a'i.

<sup>35</sup> Ha'e vy oirũ kuery pe aipoe'i:

— Israel kuery regua, peikuaa pota ranhe, peva'e avakue pembopaga rive e'ŷ aguã.

<sup>36</sup> Mba'eta ymave opu'ã raka'e Teudas. Ha'e va'e ma onhemboyvate rei ramo hexeve quattrocentos avakue rãnda'u onhemoirû. Ha'e gui ma ojukaa rire hexe ojapyxaka va'ekue-ekue oaĩmba, mba'eve rei ojapo e'ŷ re.

<sup>37</sup> Ha'e va'e rire tery ombopara ukaa jave py Galiléia pygua Judas ju opu'ã vy heta ete ogueraa ngupive. Ha'e va'e voi omano, ha'e rã onhe'ẽ rendu va'ekue oaĩmba rive.

\* 5:34 Atos 22.3

<sup>38</sup> Aŷ ma aipoa'e kova'e avakue re pejapo vai ve'ŷ aguã, tove ta'ikuai. Mba'eta ha'e kuery ayvu ha'e hembiapo ma avakue guigua ri vy opa rive 'rã.

<sup>39</sup> Ha'e rã Nhanderuete guigua ri ramo napembovaipa kuaai 'rã, Nhanderuete rovaigua pendekuai e'ŷ aguã – he'i. Ha'e rami ijayvua rã pavẽ rei ojou porã.

<sup>40</sup> Ha'e gui ma apóstolo kuery oenoĩ ju vy oinupãmba. Ha'e vy ha'e kuery pe ijayvu ijayvu ve'ŷ aguã Jesus rery rupi. Ha'e gui opoipa ju.

<sup>41</sup> Ha'e rã ha'e kuery omboayvuague gui ojepe'a vy ovy'a jogueravy, Jesus rery káuxa ikuai axy aguã oiporavo rire.

<sup>42</sup> Ha'e gui ko'ẽ nhavõ templo py, ha'e oo ha'e javi rupi ndojepe'ai Jesus ae Cristo oikoa re nhombo'ea gui.\*

## 6

### *Nhopypyvõarã kuery omoĩa ague*

<sup>1</sup> Ha'e va'e jave temimbo'e kuery heta-etave oje'oivy ramo grego kuery regua ijayvu rei okuapy hebreu regua re, mba'eta ko'ẽ nhavõ tembi'u omboja'oa py grego kuery regua imeve'ŷ va'e kuery re hexarai ra'e.

<sup>2</sup> Ha'e ramo apóstolo kuery doze va'e omboatypa temimbo'e kuery ha'e javi. Ha'e vy aipoe'i:

— Nda'evei Nhanderuete ayvu romombe'ua gui ore kuery rojepe'a aguã tembi'u romboja'oa rupi roiko aguã.

<sup>3</sup> Ha'e nunga rupi irmão kuery, peiporavo peẽ kuery regua sete avakue heko porã va'e, Nhe'ẽ Ky'a E'ŷ anho oĩa, ha'e hi'arandu va'e. Ha'e va'e kuery ma romoĩ 'rã ha'e nunga rupi omba'eapo va'erã.\*

<sup>4</sup> Ha'e rã ore kuery ma ronhembo'ea ha'e ayvu romombe'ua rupi anho 'rã orekuai – he'i okuapy.

<sup>5</sup> Ha'e rami ijayvu rã pavẽ oendu vy ojou porã. Ha'e rami vy jypy ojou Estêvão, peteĩ ava ojerovia ete ha'e Nhe'ẽ Ky'a E'ŷ anho oĩa va'e, ha'e gui ma Filipe, Prócoro, Nicanor, Timão, Pármenas ha'e Nicolau. Ha'e va'e ma Antioquia guigua judeu kuery reko rami oiko va'e.

<sup>6</sup> Ha'e va'e kuery ma apóstolo kuery renonde ogueru ramo onhembo'e reve ha'e kuery áry omoĩ okuapy opo.

<sup>7</sup> Ha'e gui ma Nhanderuete ayvu oendupaave. Jerusalém tetã py temimbo'e kuery heta-etave ma oje'oivy. Sacerdote kuery voi heta ikuai ojeroviaa rupi.

### *Estêvão omboayvua ague*

<sup>8</sup> Ha'e gui Estêvão ma Nhanderuete omboaxyha ha'e ipo'akaa rupi oiko vy heta va'e kuery mbyte rupi ojapo oikovy nhomondyipaarã ha'e hexa pyrã.

<sup>9</sup> Ha'e ramo hexe opu'ã okuapy judeu kuery va'e regua escravo ve'ŷ onhembo'eatty pygua, Cirene, Alexandria, Cilícia ha'e Ásia guigua. Ha'e va'e kuery ma Estêvão reve ijayvu ete okuapy.

<sup>10</sup> Va'eri hexe nda'ipo'akai, Nhe'ẽ guigua 'arandua rupi ijayvu ramo.\*

<sup>11</sup> Ha'e rami vy opaga amongue avakue aipoe'i aguã: "Roendu peva'e ava ijayvu vaikue rã Moisés ha'e Nhanderuete rovai", he'i aguã.

<sup>12</sup> Ha'e rami py omopu'ãmba rei heta va'e kuery, nhomongeta va'ety ha'e lei re nhombo'e va'ety kuery guive. Ha'e rami vy oje'oi vy ojopy, nhomongeta va'ety kuerya py ogueraaa.

<sup>13</sup> Ha'e py ma ogueru avi hekokue ramigua mombe'uarã. Ha'e va'e kuery aipoe'i:

— Peva'e ava ma ijayvu vai riae oikovy templo iky'a e'ŷ va'e ha'e lei re.

\* **5:42** Mateus 5.10-12; 1 Pedro 4.16,19 \* **6:3** 1 Timóteo 3.8-10 \* **6:10** Lucas 21.14,15

<sup>14</sup> Mba'eta roendu aipoe'i rā Nazaré pygua Jesus templo omomba 'rāa rami, ha'e nhanderekorā Moisés oeja va'ekue oguerova 'rāa rami guive – he'i.

<sup>15</sup> Ha'e javive omboayvua py oguapy va'e ma Estêvão re anho oma'ẽ okuapy. Oma'ẽ okuapy rā anjo rami hova.

## 7

*Estêvão ijayvuague*

<sup>1</sup> Ha'e ramo sacerdote yvateve va'e oporandu vy aipoe'i:

— Ha'e rami ae teve?

<sup>2</sup> Estêvão ombovai:

— Ke'y kuery ha'e xeru kuery, pendu ke. Nhaneramoī Abraão ma Mesopotâmia yvy re teri oiko jave, Harā py oiko e'ŷ mbove ixupe Nhanderuete hexakāmba va'e ojexa uka raka'e.

<sup>3</sup> Ha'e vy aipoe'i ixupe: “Ejepe'a ndeyvy neretarā kuerya gui, ha'e tereo yvy aexa uka aguã katy”, he'i va'ekue.\*

<sup>4</sup> Ha'e ramo caldeu kuery yvy gui oo Harā py ju oiko aguã. Tuu omano ma rire apy ju Nhanderuete ombou yvy aŷ peẽ pendekuaia py.

<sup>5</sup> Ha'e rami avi apy voi ixupe guarā nome'ei neĩ peteīgue'i opy oguerova aguã voi, teĩ ijayvu yvy ome'ẽ aguã, ha'e hamymino kuery pe voi. Ha'e jave ma ndata'yi teri.

<sup>6</sup> Ha'e gui Nhanderuete ijayvu hamymino kuery oyvy re'ŷ, yvy mboae re ikuai 'rāa re. Ha'e py ma escravo kuery 'rā ikuai, quatrocentos ma'etŷ re 'rā ikuai axy.

<sup>7</sup> Ha'e gui Nhanderuete aipoe'ive ju: “Xee ma ambopaga 'rā escravo penemoingoare kuery. Ha'e va'e rire ha'e gui pexē 'rā kova'e yvy re ju xerembiguai pendekuaia aguã”, he'i va'ekue.\*

<sup>8</sup> — Ha'e gui ma ipire omboi uka vy hexeve ojapo guexeve guarā. Ha'e rami vy Isaque itui rire oito araa py Abraão omboi ipire. Isaque gui oiko Jacó, ha'e gui ha'e va'e gui nhaneramoī kuery doze ikuai va'ekue oiko.

<sup>9</sup> Ha'e gui José re nhaneramoī kuery nda'ijs' ei vy ovende raka'e Egito yvy katy heraarā pe. Ha'e rami teĩ Nhanderuete ma hexeve oiko vy

<sup>10</sup> ogueraa jepe opa mba'e vai oiko va'e gui. Omboaxya rupi omo'arandu Egito pygua huvixave Faraó renonde. Ha'e ramo Faraó omoī ha'e pygua kuery re opena aguã, ha'e hoo pygua ha'e javi re guive.

<sup>11</sup> Ha'e gui ma karuai oiko Egito yvy ha'e javi rupi. Canaã yvy re voi ikuai axy ramo nhaneramoī kuery ndojouvei tembi'u.

<sup>12</sup> Ha'e rā Egito yvy re ma trigo oguerekoa omombe'ua rā Jacó oendu vy jypy omondouka raka'e nhaneramoī kuery.

<sup>13</sup> Ha'e kuery teīgue ju ovaẽ ramo José ojekuaa uka guyke'y kuery pe, ha'e Faraó voi oexa José regua kuery.

<sup>14</sup> Ha'e vy José oenoī uka nguu Jacó ha'e guetarā kuery ha'e javive setenta e cinco ikuai ya'e.

<sup>15</sup> Ha'e rami py Egito yvy re Jacó oo raka'e. Ha'e py ma omano, nhaneramoī kuery ha'e javive voi.

<sup>16</sup> Hetekue ma Siquém katy heraa vy onhono porãa Hamor ra'y kuery gui Abraão tuparã peráta re ojogua va'ekue py.

<sup>17</sup> — Ha'e gui ovaẽ rai'i ma Abraão pe Nhanderuete ouraague ojeupity aguã ára. Ha'e jave ma nhaneramoī kuery hetave oje'oivy Egito yvy re,

<sup>18</sup> amboae huvixave José oikuua va'e'ŷ oiko peve.\*

<sup>19</sup> Ha'e va'e huvixa ma nhaneramoī kuery ombotavypa vy ojavyky rei, ojapo guive gua'y kuery re ae nopenavei rā omanomba aguã rami.

\* **7:3** Gênesis 12.1

\* **7:7** Gênesis 15.13-14

\* **7:18** Éxodo 1.8

<sup>20</sup> Ha'e va'e jave py oiko Moisés. Ha'e va'e ma Nhanderuete renonde voi ojou porãa ramo mboapy jaxy re ranhe onhomí tuu ro py.

<sup>21</sup> Ha'e gui oejaa ramo Faraó rajy ju ogueraa vy omemby ae'i rami omongakuaa.

<sup>22</sup> Moisés ma Egito pygua 'arandua ha'e javi re ombo'ea ramo ipo'aka ayvu py ha'e mba'emo ojapoa py.

<sup>23</sup> — Quarenta ma'etý ma oguerekaoa py oendu guyke'y kuery Israel regua oexaxeа.

<sup>24</sup> Ha'e rami vy peteĩ ava ojavykya rei rã oexa vy oipe'a, ha'e oepy vy ojuka Egito pygua.

<sup>25</sup> Mba'eta Moisés oexa'ã hetarã kuery "Ixupe Nhanderuete nhandereraa jepe uka 'rã" he'i aguã, teĩ ha'e kuery ha'e rami ndoikuuai.

<sup>26</sup> — Ha'e gui ko'ëgue onhemboja ju guetarã kuery joguero'a va'e re. Ha'e kuery ikuai porã aguã omboja'oxe vy aipoe'i: "Avakue, peẽ kuery tu joegua'i rima pendekuai. Mba'e re tu pejoguero'a rei?" he'i.

<sup>27</sup> Ha'e ramo oirũ re ojeaive va'e omoanha vy aipoe'i: "Mava'e tu nemoõ oreruvixarã, orere repena aguã?

<sup>28</sup> Xee voi teve xejukaxe avi kuee Egito pygua rejukaague rami?" he'i.\*

<sup>29</sup> Ha'e rami ijayvu rã Moisés oendu vy okanhy ovv, ha'e Midiã yvy re ju oiko guekoia py e'ý. Ha'e py ma oiko mokoõ ta'y.

<sup>30</sup> — Quarenta ma'etý rire tekaoa e'ýa py Sinai yvyty re ixupe ojexa uka peteĩ anjo. Yvyra rogue hendy va'e mbyte gui ojexa uka.

<sup>31</sup> Moisés ha'e nunga oexa vy onhemondyi va'eri onhembojave ovv oexa porãve aguã. Ha'e vy oendu Senhor aipoe'i rã:

<sup>32</sup> "Xee ma neramoõ kuery Abraão, Isaque ha'e Jacó Ruete aiko", he'i. Ha'e rami rã Moisés okyje vy oryryipa, oma'ëve aguã nda'ipy'a guaxui guive.

<sup>33</sup> — Ha'e ramo Senhor aipoe'ive ju: "Emboi ndepy regua, mba'eta repyrða ma yvy ky'a e'ý.

<sup>34</sup> Xee aexa ma Egito yvy re xevygua kuery ikuai axya, ha'e kuery ipoaõ rã aendu guive. Ha'e rami vy aguejy araa jepe aguã. Ejuve ke aÿ, xee romondouka 'rã Egito katy", he'i.\*

<sup>35</sup> — Ha'e rami teĩ ha'e kuery nonhe'ẽ rendui Moisés. Ha'e vy aipoe'i: "Mava'e tu nemoõ huvixa orere repena va'erã?" he'i okuapy, huvixarã ha'e heraa jepearã Nhanderuete ombou va'ekue ri, anjo yvyra rogue hendy va'e mbyte gui ojexa uka va'ekue ipytyvõarã oiko guive.

<sup>36</sup> Ha'e gui Egito yvy re nhomondyipaarã ha'e hexa pyrã Moisés ae ojapo vy oguenoõ nhaneramoõ kuery. Ye'ẽ Pytã re voi ojapo, ha'e quarenta ma'etýa pukukue re tekaoa e'ýa rupi ikuai jave guive.

<sup>37</sup> Moisés ae Israel kuery pe aipoe'i: "Peẽ kuery regua Nhanderuete omoingo 'rã peteĩ profeta xee rami guarã", he'i va'ekue.\*

<sup>38</sup> Ha'e Moisés ae oï va'ekue tekaoa e'ýa py ono'õmba va'e kuery reve, Sinai yvyty re ixupe anjo ijayvu va'ekue ha'e nhaneramoõ kuery reve. Ojopy avi ayvu imarã e'ý va'e nhandevy ju oikuaai uka aguã.

<sup>39</sup> — Ha'e rami teĩ nhaneramoõ kuery ma nonhe'ẽ rendui raka'e. Ha'e kuery ndoiptai vy opy'a re omoõ okuapy Egito katy ju ojevyxeia.

<sup>40</sup> Ha'e vy aipoe'i Arão pe: "Ejapo orevy nhanderueterã nhanerenonde re oo va'erã. Mba'eta Egito yvy gui nhanerenoõare Moisés re ma ndajaikuaai mba'e pa oikoa", he'i okuapy.\*

<sup>41</sup> Ha'e va'e jave ojapo vaka ra'y ra'angaa, ha'e ha'angaa pe mymba kuery ojuka guive. Oguerovy'a rei okuapy opo py ojapo va'ekue rive.

<sup>42</sup> — Ha'e ramo ha'e kuery gui Nhanderuete ojepe'a vy omboaxa yva re ikuai va'e rive ombojerovia aguã, profeta kuaxia ombopara vy aipoe'iague rami: "Israel kuery,

\* <sup>7:28</sup> Êxodo 2.14 \* <sup>7:34</sup> Êxodo 3.5-8,10 \* <sup>7:37</sup> Deuteronômio 18.15 \* <sup>7:40</sup> Êxodo 32.1,23

teko a e'ŷa rupi quarenta ma'etŷ re pendekuai vy xevy pe teve mymba pejuka vy peme'ẽ raka'e?

<sup>43</sup> Tuuete ramigua Moloque pe e'ŷ ri ty'y pejapo pembojerovia atyrã? Ha'e tuuete ramigua Renfã jaxy-tata ra'angaa pejapo va'ekue pembojerovia aguã. Ha'e nungakue re ma xee rogueraa ukapa 'rã Babilônia rovai katy", he'iague.\*

<sup>44</sup> — Ha'e gui ombojeroviaaty Nhanderuete ayvu oĩa va'e ma nhaneramoĩ kuery oguereko raka'e teko a e'ŷa re, Moisés pe ojapo ukaague rami ae ojapo va'ekue.

<sup>45</sup> Ha'e nunga ma nhaneramoĩ kuery Josué oiko javegua ju ojopy vy amboae katy ogueraa, mba'eta ha'e kuery renonde gui Nhanderuete yvy regua kuery omoxẽ ramo ha'e py ju ikuai. Davi oikoa ára peve oguereko va'ekue.

<sup>46</sup> Ha'e gui Davi ma Nhanderuete ojou porã ramo ojerure peteĩ oo Jacó Ruete peguarã ojapo aguã.

<sup>47</sup> Ha'e rã ixupe guarã oo apoare ete ma Salomão raka'e.

<sup>48</sup> Ha'e rami teĩ Yvate ete va'e ma avakue opo py oo ojapo va'ekue py noĩ, profeta aipoe'iague rami:

<sup>49</sup> "Yva ma xerenda, ha'e rã yvy ma xepy renderã itui. Mba'e nunga oo 'rã tu pejapo xevy? Mamo 'rã tu xee apytu'u atyrã oĩ aguã ha'eve?"

<sup>50</sup> Mba'eta xepo py e'ŷ ri ty'y ha'e nunga ha'e javi ajapo va'ekue?" he'i Senhor.\*

<sup>51</sup> — Avakue peneakã ratã va'e, pendepy'a ratã ha'e pendeapyxa e'ŷ va'e, Nhe'ẽ Ky'a E'ŷ ijayvu teĩ ndapejapyxakaxeí kuerei. Peneramoĩ kuery ikuaiague rami ae ju peẽ voi pendekuai.\*

<sup>52</sup> Mba'eta mava'e profeta re nda'u peneramoĩ kuery nopu'ã rei raka'e? Mba'eta ojuka okuapy raka'e Heko porã ete va'e ou 'rãa mombe'ua kuery. Ha'e va'e gui aŷ ma peẽ ju ijopy nhemiare ha'e ijuka riveare pendekuai.

<sup>53</sup> Pende kuery ma anjo po gui lei pejopy va'eri ndapejapoi – he'i.

### *Estêvão omanoague*

<sup>54</sup> Ha'e rami ijayvu rã ha'e kuery oendu vy ipoxy okuapy opy'a py, ha'e hexe opu'ã vy haï jekyty guive okuapy.

<sup>55</sup> Ha'e rã Estêvão re ma Nhe'ẽ Ky'a E'ŷ anho oĩ ramo yva re oma'ẽ vy oexa Nhanderuete rexakãa, ha'e oiporu kuaa regua re Jesus hi'aĩ rã.

<sup>56</sup> Ha'e rami vy aipoe'i:

— Aipo aŷ, xee aexa yva ojepe'a rã, ha'e Nhanderuete oiporu kuaa regua re Ava ra'y ojeapo va'ekue hi'aĩ rã – he'i.

<sup>57</sup> Ha'e ramo ha'e kuery ojapukai atã vy omboty oapyxa, joo rami meme oguero'a okuapy.

<sup>58</sup> Tetã gui mombyry'i ogueraa py ojapipa okuapy ita py. Hekokue ramigua mombe'uare kuery ma oao puku omboi vy oeja imoiny peteĩ kunumi Saulo hery va'e hi'aĩa py.\*

<sup>59</sup> Ha'e rami vy ita py Estêvão ojapipaa ramo ojapukai vy aipoe'i:

— Senhor Jesus, eraa ke xenhe'ẽ – he'i.

<sup>60</sup> Ha'e gui guenapy'ã re oĩ vy ijayvu atã:

— Senhor, embopaga eme kova'e kuery ojejavyague re – he'i. Po rami ijayvu reve oke.\*

## 8

<sup>1</sup> Ha'e kuery ojuka okuapya ma Saulo ojou porã.

### *Atos 26.9-11*

Ha'e va'e árave Jerusalém pygua igreja kuery omoingo axya vaipa. Ha'e ramo ha'e kuery ha'e javive apóstolo e'ŷ vy oaĩmba Judéia ha'e Samaria yvy rupi.

---

\* <sup>7:43</sup> Amós 5.25-27    \* <sup>7:50</sup> Isaías 66.1-2, Atos 17.24    \* <sup>7:51</sup> Mateus 23.30-32    \* <sup>7:58</sup> Saulo ma Jesus pe ojeko me'ẽ va'erã va'e (Atos 2.20). Guery oguerova rire ixupe "Apóstolo Paulo" 'ea (Atos 9.1-9, 13.9).    \* <sup>7:60</sup> Lucas 21.16-19, 23.46,34

<sup>2</sup> Estêvão retekue ma Nhanderuete pegua avakue onhono porã, hexe ojae'o vaipa guive.  
<sup>3</sup> Ha'e rã Saulo ma omombaxe ete heravy igreja kuery. Oo rupi oike vy ogueraa avakue ha'e kunhague nhuã py omboty aguã.

### *Samaria tetã py Filipe oo vy ayvu omombe'uague*

<sup>4</sup> Ha'e gui opa rupi oaĩmba jogueravya rupi ayvu omombe'u.  
<sup>5</sup> Filipe ma Samaria tetã py oo vy ha'e kuery pe omombe'u Cristo.\*  
<sup>6</sup> Filipe ijayvu rã heta va'e kuery peteĩ rami meme ojapyxaka okuapy. Oendu, oexa guive hexa pyrã ojapo rã.  
<sup>7</sup> Mba'eta heta gui nhe'ẽ vai ojapukai reve-reve ojepe'a, ha'e heta oguata e'ŷ ha'e hetyma pirupa va'e voi okuerapa.  
<sup>8</sup> Ha'e ramo ov'y'a ete okuapy ha'e va'e tetã py.

### *Onhembo'e vaikue va'e Simão re ijayvuague*

<sup>9</sup> Ha'e py ma oiko peteĩ ava Simão hery va'e, onhembo'e vaikuea rupi oiko. Samaria pygua kuery ombotavypa oikovy, ipo'akapa va'e rami rive onhemoingo vy.  
<sup>10</sup> Hexe ojapyxaka pavẽ, yvyigüeve ha'e yvatekueve guive. Ha'e vy aipoe'i:  
 — Kova'e ava re ma Nhanderuete po'akaa oĩ. Ha'e ramo Ipo'akapa va'e hery – he'i okuapy.  
<sup>11</sup> Hexe anho ojapyxaka, mba'eta are ma omba'evykyia py ombotavypa ramo.  
<sup>12</sup> Ha'e gui ha'e pygua kuery pe Filipe omombe'u oikovy ayvu porã Nhanderuete po'akaa ha'e Jesus Cristo regua. Ha'e ramo avakue ha'e kunhague oguerovia ramo omongaraipa.  
<sup>13</sup> Simão eteve voi ojerovia avi, ha'e omongarai ma rire Filipe re onhemoirũ oikovy, mba'eta hexa pyrã ha'e mba'emo porã ojapo rã oexa vy onhemondyipa.

### *Samaria py Pedro ha'e João ikuai jave guare*

<sup>14</sup> Samaria pygua kuery Nhanderuete ayvu ogueroviaa omombe'ua rã Jerusalém py apóstolo kuery ikuai va'e oendu okuapy. Ha'e rami vy ha'e katy omondouka Pedro ha'e João.  
<sup>15</sup> Ha'e py ha'e kuery ovaẽ vy ha'e pygua kuery re onhembo'e Nhe'ẽ Ky'a E'ŷ oĩ aguã,  
<sup>16</sup> mba'eta neĩ peteĩve re Nhe'ẽ Ky'a E'ŷ ndoguejyi teri, Senhor Jesus rery rupi omongaia rive.  
<sup>17</sup> Ha'e gui ha'e kuery áry apóstolo kuery opo omoĩ ramo ha'e kuery re Nhe'ẽ Ky'a E'ŷ ou.  
<sup>18</sup> Apóstolo kuery joe opo omoĩ rã Nhe'ẽ [Ky'a E'ŷ] oua Simão oexa vy apóstolo kuery pe ijayvu peráta ome'ẽ aguã re.

<sup>19</sup> Ha'e vy aipoe'i:  
 — Xee voi ke xembopo'aka joe xepo amoĩ rã Nhe'ẽ Ky'a E'ŷ ou aguã – he'i.  
<sup>20</sup> Ha'e rã Pedro ombovai:  
 — Ndeperáta too ndereve rekanhy aguã py, mba'eta rexâ'a peráta re ndejeupe rejogua aguã Nhanderuete ome'ẽ rive va'e.  
<sup>21</sup> Ndee ma mba'eve ndererekoi ore rami reiko aguã, neĩ rojapo va'e rejapo aguã voi, mba'eta ndepy'a py ha'eve e'ŷa rami reiko Nhanderuete renonde.  
<sup>22</sup> Ha'e nunga rupi ejeko rerova nderekoo vaia gui, ha'e ejapukai Senhor pe. Xapy'a rei ombogue 'rã ndepy'a re remoĩ va'ekue.  
<sup>23</sup> Mba'eta xee aexa rã opa marã rei teri reiko, nhuã py rami teko vai nembo'a ramo – he'i.  
<sup>24</sup> Ha'e ramo Simão ombovai vy aipoe'i:  
 — Pejerure ha'vy Senhor pe pendeayvuague oiko e'ŷ aguã – he'i.  
<sup>25</sup> Ha'e kuery Senhor ayvu omombe'u ha'e nhombo'epa ma vy Jerusalém tetã katy ju ojevy. Samaria pygua kuery rekooa ikuai va'e rupi omombe'u oje'oivy ayvu porã.

\* <sup>8:5</sup> Atos 1.8; João 12.24

*Eunuco reve Filipe onhemoirūague*

<sup>26</sup> Ha'e gui Filipe pe peteī anjo Senhor-a guigua ijayvu. Ha'e vy aipoe'i:

— Epu'ā ke, tereo kuaray puku-a yke katy. Jerusalém gui Gaza katy tape oo va'e rupi tereo, tekao e'ŷa rupi — he'i. Ha'e ramo opu'ā vy oo.

<sup>27</sup> Oo vy peteī ava oexa Etiópia pygua eunuco, huvixa kunha Candace mba'e peráta ha'e javi re opena va'ety. Ha'e va'e ma Jerusalém py ombojerovia aguã ooague gui

<sup>28</sup> ojevya rupi oguapy oiny karóxa py. Ogueroayvu heravy profeta Isaías ombopara va'ekue.

<sup>29</sup> Ha'e ramo Nhe'ē aipoe'i Filipe pe:

— Enhemboja peva'e karóxa re, tereo ijyvy'iry — he'i.

<sup>30</sup> Ha'e ramo Filipe onha ovvy vy oendu ogueroayvu rā profeta Isaías ombopara va'ekue. Ha'e vy aipoe'i:

— Reikuua ma'ā reroayvu heravy va'e?

<sup>31</sup> Ombovai:

— Mba'exa vy tu aikuua ta avave rei omombe'u porāve e'ŷ rā? — he'i. Ha'e rami vy oenoī Filipe karóxa py ojeupi vy hexeve oī aguã.

<sup>32</sup> Ipara ogueroayvu oiny va'e po rami: “Vexa'i rami heraa ojukaa aguã py. Ijukaarā renonde vexa'i okyrirĩa rami avi ha'e voi ndoipe'ai ojuru.

<sup>33</sup> Omo'yvy'i vy ha'eve e'ŷa rami oguerekao. Mava'e nda'u omombe'u 'rā hamymino kuery? Mba'eta yvy gui hekove oipe'aa rire”, he'iague.\*

<sup>34</sup> Ha'e ramo eunuco oporandu Filipe pe:

— Ajerure remombe'u aguã mava'e reko re pa profeta ijayvu, ojee ae tyrā pa amboae reko re? — he'i.

<sup>35</sup> Ha'e ramo Filipe omombe'u porāve. Po rami ipara oī va'e guive omboypy vy ixupe omombe'u oiny Jesus.

<sup>36</sup> Ha'e kuery oo tema tape rupi. Yy oīa py ovaē vy eunuco aipoe'i:

— Apy ma yy oī. Nda'evei 'rā ri nda'u anhemongarai uka aguã?

<sup>37</sup> [Filipe ombovai:

— Ndepy'a ha'e javi py rejerovia ramo ha'eve 'rā — he'i.

Ha'e ramo ombovai vy aipoe'i:

— Xee arovia Jesus Cristo Nhanderuete Ra'y oikoa — he'i.]

<sup>38</sup> Ha'e rami vy omombyta uka karóxa. Mokoīve oguejy ovyy py, ha'e Filipe omongarai.

<sup>39</sup> Yy gui oē jogueravy jave Senhor Nhe'ē oipe'a heravy Filipe. Ha'e ramo eunuco ndoexavei va'eri ovyy'a reve oo oiny tape rupi.

<sup>40</sup> Ha'e va'e rire'ive Filipe ma Azoto tekao py ra'e oikoa oikuua vy oove ha'e gui. Ayvu porā omombe'u heravy tetā ha'e javi rupi, Cesaréia py ovaē peve.

## 9

*Atos 22.4-11; 26.9-18*

<sup>1</sup> Ha'e ramia ja Saulo ma Senhor remimbo'e kuery ojukapa aguã re ijayvu. Ha'e rami vy sacerdote yvateve va'ea py oo vy

<sup>2</sup> ojerure kuaxia para re Damasco tetā py oo aguã judeu kuery onhembo'eaty ikuai va'e rupi, Senhor reko rami avakue ha'e kunhague ikuai va'e ojou vy oipokua ha'e Jerusalém katy oguerupa aguã.

<sup>3</sup> Ha'e rami vy oo tape rupi. Damasco py ovaē rai'i ovya py yva gui hendy va'e hexakāmba xapy'a ijyvýry.

<sup>4</sup> Ha'e rā yvy rupi ho'a vy peteī ayvu oendu:

— Saulo, Saulo, mba'e re tu xererekao axyxre ri? — he'i va'e.

<sup>5</sup> Ha'e ramo oporandu:

— Mava'e tu ndee, Senhor?

---

\* **8:33** Isaías 53,7,8

Ombovai:

— Xee ma Jesus rereko axy rei va'e.

<sup>6</sup> Epu'ã ke, eike tetã py. Ha'e py ma omombe'ua 'rã rejapo va'erã — he'i.

<sup>7</sup> Ha'e gui irũ kuery hupive oo va'e ma okyrirĩ reve optytapa. Ijayvu va'e oendu teĩ avave rei ndoexai okuapy.

<sup>8</sup> Ha'e rã Saulo ma yvy gui opu'ã vy guexa oipe'a teĩ mba'eve rei ndoexavei. Ha'e gui ijyva re ogueraa Damasco katy.

<sup>9</sup> Mboapy ára re oĩ oexa e'ŷ re. Ha'e ramia pukukue re ndokarui neĩ ndoy'ui.

### *Atos 22.12-16*

<sup>10</sup> Damasco tetã py oiko peteĩ temimbo'e Ananias hery va'e. Ha'e va'e pe Senhor ojexa uka vy aipoe'i:

— Ananias.

Ombovai:

— Senhor, apy ma aĩ — he'i.

<sup>11</sup> Senhor aipoe'i:

— Epu'ã ke, tereo tape hi'yvi va'e 'epy va'e rupi. Judas ro py revaẽ vy ke eka Tarso guigua Saulo. Mba'eta ha'e va'e ma onhembo'e oiny jave

<sup>12</sup> oexa kuri peteĩ ava Ananias hery va'e ovaẽ ouvy rã, hi'áry opo omoĩ oexa ju aguã — he'i.

<sup>13</sup> Ananias ombovai:

— Ha'e rami avi Senhor, heta gui ma aendu ha'e va'e ava reko. Mbovykue rei ve'ŷ ma ojapo vai va'ekue Jerusalém py ikuai va'e re,

<sup>14</sup> ha'e apy guarã ju kuaxia para ogueru sacerdote yvatekueve va'ea gui, nderery rupi ojapukai va'e kuery ojopypa heravy aguã — he'i.

<sup>15</sup> Ha'e ramo Senhor aipoe'i:

— Tereo nho, mba'eta ha'e va'e ma xerembiguarã aiporavo va'ekue judeu e'ŷ va'e kuery pe xerery ogueraa aguã, huvixa kuery ha'e Israel kuery renonde guive.

<sup>16</sup> Ixupe xee ae aikuaa uka 'rã xerery rupi oiko ramo omoingo axya 'rãa — he'i.

<sup>17</sup> Ha'e ramo Ananias oo vy ovaẽ oo oĩa py. Hi'áry opo omoĩ reve aipoe'i:

— Irmão Saulo, Senhor Jesus tape rupi rejua rupi ojekuaa uka va'ekue xembou kuri rexia ju aguã, ha'e ndere Nhe'ẽ Ky'a E'ŷ anho oĩ aguã — he'i.

<sup>18</sup> Ha'e ramove hexa gui pira pekue ramigua ho'a ramo oexa ju. Ha'e gui opu'ã vy onhemongarai uka.

<sup>19</sup> Okarupa ma vy oendu imbaraetea. Ha'e vy Damasco py are'i optyta Jesus remimbo'e kuery reve.

### *Damasco py ayvu Saulo omombe'u oikovyague*

<sup>20</sup> Ha'e rire'ive judeu kuery onhembo'eaty ikuai va'e rupi Saulo omombe'u oikovy Jesus ae Nhanderuete Ra'y oikoa.

<sup>21</sup> Ha'e javive oendu va'e onhemondyipa. Ha'e vy aipoe'i okuapy:

— Peva'e e'ŷ ri ty'y Jerusalém py Jesus rery rupi ojapukai va'e ojukapaxe va'ety? Ha'e gui apy ju ou oipokuapa heravy aguã sacerdote yvatekueve va'ea katy — he'i okuapy.

<sup>22</sup> Ha'e rã Saulo ma imbaraeteve oikovy. Ha'e vy Jesus ae Cristo oikoa omombe'u vy omokyrirĩmba judeu kuery Damasco py ikuai va'e.

<sup>23</sup> Kueve ma rire judeu kuery jogueroayvu ojuka aguã.

<sup>24</sup> Ha'e rami teĩ ha'e kuery ojapoxe va'e Saulo oikuaa. Ha'e kuery ojuka vy ara py ha'e pyávy tetã kora rokẽ py oarõ okuapy.

<sup>25</sup> Ha'e rã temimbo'e kuery ma pyávy ogueraa vy peteĩ ajaka py omoĩ vy omboguejy tetã kora rovai.

### *Jerusalém ha'e Tarso py Saulo ovaẽague*

<sup>26</sup> Jerusalém py ovaẽ vy onhemoirũxe temimbo'e kuery mboae reve, teĩ ha'e kuery ha'e javive Jesus remimbo'e oikoa ndogueroviai vy okyje okuap.

<sup>27</sup> Ha'e rã Barnabé ma apóstolo kuerya py ogueraa vy omombe'u porãmba tape rupi Senhor ojekuaa uka vy hexeve ijayvuague, ha'e ramo Damasco tetã py okyjea py e'ŷ Jesus rery rupi ijayvuague.

<sup>28</sup> Ha'e rami rire Jerusalém py oiko ha'e kuery reve. Okyje reve'ŷ ijayvu oikovy Senhor rery rupi.

<sup>29</sup> Grego ayvu py ijayvu va'e kuery pe ayvu omombe'u ha'e ijayvu ete oikovy ramo ha'e kuery ojukaxe ete.

<sup>30</sup> Ha'e nunga irmão kuery oikuaa vy Cesaréia peve ogueraa, ha'e gui Tarso katy ju omondouka.\*

### *Igreja pygua heta-etave ovyüague*

<sup>31</sup> Ha'e rami rire Judéia ha'e javi rupi igreja kuery ikuai porã, Galiléia ha'e Samaria rupi guive. Imbaraeteve oje'oivy Senhor renonde ojererokyjea rupi. Nhe'ê Ky'a E'ŷ ombopy'a guaxu ramo heta-etave ov.

### *Enéias omongueraa ague*

<sup>32</sup> Ha'e gui Pedro ma opa rupi oaxa ovvy vy Lida tetã py ovaẽ iky'a e'ŷ va'e kuerya py.

<sup>33</sup> Ha'e py ma peteĩ ava oexa Enéias hery va'e. Ha'e va'e ma oguata va'e'ŷ vy oito ma'etŷ re ma tupu py itui.

<sup>34</sup> Ixupe Pedro aipoe'i:

— Enéias, Jesus Cristo nemonguera. Epu'ã ke ha'vy, emoī porã ju nderupa — he'i ramove opu'ã.

<sup>35</sup> Ha'e ramo Lida ha'e Sarona pygua kuery ha'e javi oexa vy ojeko rerova Senhor re.

### *Dorcas omboeteajevyüague*

<sup>36</sup> Jope tetã py ma oiko peteĩ temimbo'e kunha Tabita hery va'e, Dorcas he'ia. Ha'e va'e ma pavẽ oikuaa mba'emo porã anho ojapo ha'e mba'emo ome'ë va'ety oikoa.

<sup>37</sup> Ha'e va'e jave imba'eaxy vy omano. Ha'e gui hetekue ombojaupa ma rire ombouve ju inony opy ja'o'i yvate oï va'e py.

<sup>38</sup> Jope gui ma Lida py Pedro oña namombyryi'i. Ha'e ramo ha'e py oña temimbo'e kuery oendu vy mokoĩ avakue omondouka "Jaa vyvoi ke orereve" he'i aguã.

<sup>39</sup> Ha'e nunga Pedro oendu vy oo ha'e kuery reve. Oo py ovaẽ ramo opy ja'o'i yvate oï va'e py ogueraa. Imeve'ŷ va'e kuery ha'e javi ombojere rei, ojae'o reve oexa uka ao puku ha'e tupyja Dorcas oikove teri reve ojapo va'ekue.

<sup>40</sup> Ha'e gui ma Pedro omoẽmba vy guenapy'ã re oï, ha'e vy onhembo'e. Ha'e gui ojere vy hetekue ituia katy ju oma'ë. Ha'e vy aipoe'i:

— Tabita, epu'ã ke — he'i. Ha'e ramo guexa oipe'a vy oexa Pedro, ha'e vy ovvy oiny.

<sup>41</sup> Ha'e ramo ipo re ojopy vy omopu'ã. Ha'e gui iky'a e'ŷ va'e ha'e imeve'ŷ va'e kuery oenoimba vy oexa uka oikove va'e.

<sup>42</sup> Ha'e nunga Jope pygua kuery ha'e javi oikuaa vy heta ojerovia Senhor re.

<sup>43</sup> Jope py ma Pedro opyta are, ipirekue re ombo'eapo va'e Simão hery va'e ro py.

## 10

### *Xondaro ruvixa Cornélio reko re ijayvuague*

<sup>1</sup> Cesaréia tetã py peteĩ ava oiko Cornélio hery va'e, xondaro kuery Itália pygua ruvixa.

<sup>2</sup> Ha'e va'e ma Nhanderuete pe oiko ojererokyjea rupi, ngoo pygua kuery ha'e javi reve. Mba'emo ome'ë jepi ha'e py judeu kuery ikuai va'e pe, Nhanderuete pe onhembo'e riae guive.

---

\* **9:30** Gálatas 1.15-24

<sup>3</sup> Ha'e gui ma kuaray ojero'a'i jave peteĩ anjo Nhanderuetea guigua ojexa uka ixupe. Hexe onhemboja vy aipoe'i:

<sup>4</sup> — Cornélio.

Ha'e ramo onhemondyi reve anjo re oma'ẽ vy oporandu:

— Mba'e tu, Senhor?

Anjo ombovai:

— Nhanderuete renonde ima'endu'aa renhembo'ea ha'e mba'emo reme'ẽ reikovya re.

<sup>5</sup> Aŷ ma emondouka Jope tetã katy Simão Pedro hery va'e renoiarã.

<sup>6</sup> Ha'e va'e ma ye'ẽ yvýry oiko, ipirekue re ombo'eapo va'e Simão ro py – he'i.

<sup>7</sup> Hexeve anjo ijayvu va'ekue ojepe'a ramove oenoĩ mokoĩ guembiguai ha'e peteĩ xondaro Nhanderuete pe oiko va'e ixupe ombo'eapo va'e regua.

<sup>8</sup> Ha'e va'e kuery pe ha'e nungakue omombe'upa vy Jope tetã katy omondouka.

### *Pedro pe mba'emo ojexá ukaague*

<sup>9</sup> Ko'ẽ jevy tape rupi ha'e kuery oo vy tetã py ovaẽ rai'i ma oje'oivy jave, Pedro ma kuaray mbyte rire'i oo áry ojeupi onhembo'e aguã.

<sup>10</sup> Inhembyayi vy okaruxea oendu. Ha'e gui tembi'u ojapoa rã oarõ jave ixupe ojexa uka peteĩ.

<sup>11</sup> Ha'e vy oexa yva ojepe'a rã, ha'e oguejy ouvy peteĩ ajukue ramigua tuvixa va'e, yvy rami omboguejya ijapy irundyve re.

<sup>12</sup> Ha'e va'e áry ma opa marâguia mymba ikuai irundy ipy va'e, yvy rupi otyryry ha'e guyra oveve va'e.

<sup>13</sup> Ha'e gui ixupe peteĩ ijayvu va'e aipoe'i:

— Pedro, epu'ã ke, ejuka ha'e he'u.

<sup>14</sup> Pedro ombovai:

— Any teve Senhor, mba'eta ha'u va'e'ŷ teri ha'eve'ŷ va'e nhomongy'aarã – he'i.

<sup>15</sup> Mokoĩguea ma ijayvu va'e aipoe'i:

— Nhanderuete oiky'a'o va'ekue pe “Ha'eve'ŷ va'e” 're eme – he'i.

<sup>16</sup> Ha'e nunga mboapykue oiko rire ajukue ogueraa ju yva re.

### *Cornélio remimbou kuery Jope py ovaẽague*

<sup>17</sup> Pedro mba'emo ojexa uka va'ekue mba'erã paa ndokuaai rei oiny jave avakue ovaẽ ma Cornélio ombou va'ekue. Simão ro re oporandu jogueruvy rire okẽ py optya.

<sup>18</sup> Onhenduka vy oporandu:

— Simão Pedro hery va'e pa oĩ? – he'i.

<sup>19</sup> Ha'e rã Pedro ma mba'emo oexa va'ekue re teri oikuua pota oiny reve Nhe'ẽ aipoe'i ixupe:

— Pe'i py mokoĩ ava ndereka va'e ikuai.

<sup>20</sup> Epu'ã ha'vy, eguejy ha'e tereo ha'e kuery reve. Erovia e'ŷ eme, mba'eta xee ae ambou uka – he'i.

<sup>21</sup> Ha'e gui avakue ikuiaia py Pedro oguejy ma vy aipoe'i:

— Xee apy aĩ va'e ae pa xereka? Mba'e re tu peju?

<sup>22</sup> Ha'e kuery ombovai:

— Xondaro ruvixa Cornélio ma ava heko porã ha'e Nhanderuete renonde ojererokyjea rupi oiko va'e, judeu kuery ha'e javi ima'endu'a porãa va'e guive. Ha'e va'e ae nerenoĩ uka, ngoo py revaẽ rã ndeayvu oendu aguã, anjo iky'a e'ŷ va'e aipoe'iague rami vy – he'i okuapy.

### *Pedro ijayvuague*

<sup>23</sup> Ha'e rami rã Pedro ma ha'e kuery omovaẽ ranhe, omoinge opy. Ko'ẽ jevy opu'ã vy oo ha'e kuery reve. Jope pygua irmão kuery regua oo avi hupive.

<sup>24</sup> Ko'ẽ jevy Cesaréia py ovaẽmba. Cornélio oarõ vy omboatypa ma ra'e guetarã ha'e oirũ kuery oayvuve va'e.

25 Pedro ovaẽ ouvy rã Cornélio oẽ ovaexĩ aguã. Guenapy'ã re oĩ vyombojerovia.

26 Ha'e ramo Pedro omopu'ã vy aipoe'i:

— Epu'ã katu, xee voi ma ava avi aiko — he'i.

27 Hexeve ijayvu reve oike vy heta oexa ono'õ okuapy va'e.

28 Ha'e vy ha'e kuery pe aipoe'i:

— Peẽ ma peikuaa porã rã ore judeu kuery amboae regua re ronhemoirũ aguã nda'evei, neĩ ronhemboja aguã voi. Ha'e rami teĩ xevy pe Nhanderuete oikuua uka avave pe "Nda'evei va'e" neĩ "Ha'eve'õ va'e" ro'e aguã nda'eveia.

29 Ha'e nunga rupi xerenoõ uka ramo aju "Nda'evei" ha'e e'õ re. Aÿ ma aporandu: Mba'erã pa xerenoõ uka?

30 Cornélio ombovai:

— Kova'e ára reve vy irundy ára ma ojapo guĩ rami jave xero py anhembo'e ainyague, kuaray ojero'a jave. Ha'e gui xerenonde ojexa uka peteĩ ava ijao rexakâmba va'e.

31 Ha'e va'e ma aipoe'i: "Cornélio, Nhanderuete renonde ma oendua renhembo'ea, ha'e mba'emo reme'ẽ reikovsky re ima'endu'aa guive.

32 Emondouka ke Jope katy Simão Pedro hery va'e renoñarã. Ha'e va'e ma ye'ẽ yvýry oiko, ipirekue re ombo'eapo va'e Simão ro py", he'i va'ekue.

33 Ha'e ramo roenoõ uka voi. Ha'eve vaipa rejuvenue. Aÿ ma apy roñmba Nhanderuete renonde, ndevy Senhor omombe'u uka va'e ha'e javi roendu aguã — he'i.

34 Ha'e ramo Pedro ijayvu vy aipoe'i:

— Aÿ ma aikuua ma anhetẽ ae ra'e Nhanderuete peteĩ regua rive joegui oayvuve va'e e'õya.

35 Ha'e rami 'rãgue py ha'e javive regua omonhemboja 'rã henonde ojererokyjea rupi ha'e ha'evea rami ikuai va'e.\*

36 Pova'e ayvu Nhanderuete ombou raka'e Israel kuery pe, Jesus Cristo re vy peteĩ rami nhanemoingo porã aguã. Mba'eta ha'e javi regua Senhor oiko.

37 Peẽ avi peikuaa ayvu Judéia ha'e javi rupi oendua va'ekue, Galiléia gui ijypy va'ekue, nhomongaraia regua João omombe'u ma rire.

38 Oendua Nhanderuete Jesus Nazaré pygua va'e ombopo'aka vy hexe Nhe'ẽ Ky'a E'õomoïague. Ha'e ramo hexeve Nhanderuete oiko ramo opa rupi oiko vy mba'emo porã ojapo, nhomonguera guive anha kuery omoingo axya gui.

39 Judeu yvy re ha'e Jerusalém tetã py mba'emo porã ojapo va'ekue ha'e javi ma ore roexapa. Ha'e gui ma yvyra re omoõ vy ojukaa.

40 Ha'e gui mboapy araa py Nhanderuete omboete ju, ha'e joupe oexa uka guive.

41 Heta va'e kuery ha'e javive pe'õ oexa uka, ha'e rã imombe'uarã Nhanderuete oiporavo va'ekue pe anho, ore kuery omanoague gui onhemboete ju ma rire hexeve rokaru ha'e roy'u va'ekue pe ae.

42 Orevy pe ma ayvu omombe'u uka heta va'e kuery pe, roikuaa uka aguã Nhanderuete omoïague oikove va'e ha'e omano va'ekue re oikuua pota va'erã.

43 Hekorã re ae profeta kuery ha'e javi ijayvu raka'e. Ha'e vy omombe'u hery rupi omboguepaa 'rãa hexe ojerovia va'e ha'e javi ojejavyague.

### *Judeu e'õ va'e kuery re Nhe'ẽ Ky'a E'õ oguejyague*

44 Ha'e nunga re Pedro ijayvu teri oiny jave ayvu re ojapyxaka okuapy va'e ha'e javive re Nhe'ẽ Ky'a E'õ oguejy.

45 Judeu e'õ va'e kuery pe voi Nhe'ẽ Ky'a E'õ ome'ẽa ramo judeu regua ojerovia va'e Pedro rupive ou va'ekue onhemondyipa,

46 mba'eta oendu okuapy ayvu mboae py ijayvu rã Nhanderuete omboetea rupi.

Ha'e ramo Pedro aporandu:

---

\* **10:35** Romanos 2.11; 1 Timóteo 2.4-6

<sup>47</sup> — Amongue nda'uojoko 'rã yy py kova'e kuery romongarai aguã? Mba'eta nhande rami avi kova'e kuery voi ojopy ra'e Nhe'ë Ky'a E'ÿ — he'i.

<sup>48</sup> Ha'e rami vy Jesus Cristo rery rupi omongarai uka. Ha'e ramo ojerure ha'e kuery reve opytave ranhe aguã.

## 11

### *Pedro guekokue re ijayvuague*

<sup>1</sup> Ha'e gui Judéia py apóstolo ha'e irmão kuery ikuai va'e oendu okuapy judeu e'ÿ va'e kuery voi Nhanderuete ayvu ogueroviaague.

<sup>2</sup> Ha'e gui Jerusalém py Pedro ovaẽ ramo jopire omboi ukaxe va'e regua ndojou porã vy aipoe'i:

<sup>3</sup> — Kore revaẽ va'e ty'y avakue opire omboi uka e'ÿ va'e ro py, ha'e kuery reve rekaru guive — he'i okuapy.

<sup>4</sup> Ha'e ramo Pedro omombe'upa jypy'i guive jorire-rire oiko va'ekue. Ha'e vy aipoe'i:

<sup>5</sup> — Xee ma Jope tetã py anhembo'e ainy jave, xeakanhy vy aexa peteĩ ajukue tuvixa va'e ramigua oguejy ouvy rã. Ijapy irundyve re omboguejya yva gui. Ha'e vy xea'i py peve ou.

<sup>6</sup> Ipy katy ama'ë vy aexa ipy irundy va'e yvy re ikuai va'e, mymba inharõ va'e, yvy rupi otyryry ha'e guyra oveve va'e.

<sup>7</sup> Aendu avi peteĩ ayvu “Pedro, epu'ã ke, ejuka ha'e he'u”, he'i va'e xevy.

<sup>8</sup> Ha'e ramo xee aipoa'e: “Any teve Senhor, mba'eta xejuru py oike va'e'ÿ teri ha'eve'ÿ va'e nhomongy'aarã”, ha'e.

<sup>9</sup> Teïgue ju yva gui onhendu: “Nhanderuete oiky'a'o va'ekue pe ‘Ha'eve'ÿ va'e' 're eme”, he'i va'e.

<sup>10</sup> Ha'e nunga ma mboapykue oiko, ha'e gui ha'e nunga ha'e javi ma yva re ju heraa.

<sup>11</sup> — Ha'e va'e jave ete'i oo roña py ovaẽ mboapy avakue. Ha'e va'e kuery ma Cesaréia gui omondouka pyre xerenojarã.

<sup>12</sup> Ha'e ramo xevy pe Nhe'ë ijayvu ha'e kuery reve aa aguã akyje e'ÿ re. Xerupive oo avi kova'e irmão kuery mboapy meme ikuai va'e. Ha'e gui ma ha'e va'e ava ro py rovaẽ.

<sup>13</sup> Ha'e ramo orevy pe omombe'u ngoo py anjo hi'aï rã oexaague, ha'e ixupe aipoe'iague: “Emondouka amongue Jope katy, ha'e enoï uka Simão Pedro hery va'e.

<sup>14</sup> Ha'e va'e ma ndevy omombe'u 'rã reo jepe aguã regua ayvu, ndee ha'e ndero pygua kuery ha'e javive reve”, he'iague.

<sup>15</sup> Ha'e gui ma xeayvu ypy'i ramove Nhe'ë Ky'a E'ÿ oguejy ha'e kuery re, jypy nhandere oguejyague rami ae.

<sup>16</sup> Ha'e ramo xema'endu'a Senhor aipoe'iague re: “João ma anhetë yy py nhomongarai. Ha'e rã peẽ ma penemongaraia 'rã Nhe'ë Ky'a E'ÿ reve”, he'iague re.

<sup>17</sup> Ha'e rami py ha'e kuery pe avi Nhanderuete ombou Senhor Jesus re jajerovia ramo nhandevy ombouague rami. Ha'e rami rire mavae tu xee aiko Nhanderuete pe “Nda'evel” ha'e aguã? — he'i.

<sup>18</sup> Ha'e rami ijayvu rã ha'e kuery oendu vy nda'ivaivei. Ha'e vy Nhanderuete oguerovy'a vy aipoe'i:

— Ha'e rami vy ta'vy judeu e'ÿ va'e kuery pe voi teve Nhanderuete ome'ë ojeko rerova vy tekove ojopy aguã — he'i okuapy.

### *Antioquia py temimbo'e kuery pe “Cristo pegua” 'eaague*

<sup>19</sup> Estêvão ojukaa rire oaïmba va'ekue ma opa rupi oje'oi, Fenícia, Chipre ha'e Antioquia peve. Judeu kuery regua pe anho ranhe omombe'u ayvu.

<sup>20</sup> Ha'e gui ha'e kuery regua Chipre ha'e Cirene guigua ma Antioquia tetã py ovaẽ vy grego kuery pe voi omombe'u ayvu porã Senhor Jesus regua.

<sup>21</sup> Ha'e kuery re Senhor po'akaa oï ramo heta ojerovia vy ojeko rerova Senhor re.

<sup>22</sup> Ha'e nunga ma Jerusalém py igreja kuery ikuai va'e pe omombe'ua. Ha'e rami rã Antioquia katy omondouka Barnabé.

<sup>23</sup> Ha'e va'e ma ha'e py ovaẽ vy Nhanderuete omboaxyo rupi ikuia oexa vy ovy'a, ha'e kuery ha'e javi omongoeta guive ipy'a mbaraete reve Senhor re ikuai aguã.

<sup>24</sup> Mba'eta hexe Nhe'ẽ Ky'a E'ŷ ha'e ojerovia etea anho oĩ ramo ava porayvu va'e oiko.\* Ha'e ramo heta onhemboja Senhor re.

<sup>25</sup> Ha'e gui Tarso katy ju Barnabé oo Saulo reka vy.

<sup>26</sup> Ojou vy Antioquia py ogueru. Peteĩ ma'etŷ pukukue re ha'e pygua igreja kuery reve ikuai vy heta ombo'e. Antioquia py temimbo'e kuery ikuai va'e jypy'i oenoña Cristo pegua.

### *Karuai oiko va'erãa re Ágabo ijayvuague*

<sup>27</sup> Ha'e va'e jave py Antioquia py profeta kuery regua ou Jerusalém gui.

<sup>28</sup> Peteĩ ha'e kuery regua Ágabo hery va'e opu'ã vy Nhe'ẽ gui omombe'u yvvy jave re karuai oiko 'rãa. Ha'e nunga oiko ae ma huvixave Cláudio oĩ jave py.

<sup>29</sup> Ha'e ramo temimbo'e kuery jogueroayvu okuapy mba'emo omondouka aguã Judéia py irmão kuery ikuai va'e pe. Peteĩ-teĩ ojoua'i rami 'rã omondouka oipytyvõ vy.

<sup>30</sup> Ha'ekue rami ae ha'e kuery ojapo. Ha'e vy Barnabé ha'e Saulo po py ogueraa uka igreja re opena va'e kuery pe.

## 12

### *Huvixa Herodes apóstolo Tiago ha'e Pedro oguereko axyague*

<sup>1</sup> Ha'e va'e jave py huvixave Herodes ojopy uka igreja kuery ikuai va'e regua oguereko axy aguã.

<sup>2</sup> Ha'e rami vy kyxo py ojuka uka João ryke'y Tiago.

<sup>3</sup> Ha'e nunga judeu kuery ojou porã rei okuapy oikuua vy oguereko axyve ju. Ha'e vy Pedro voi ojopy uka, ngaru mbojape imbovua revegua e'ŷ va'eá ára.

<sup>4</sup> Ojopy uka vy ombo'a uka nhuã py. Xondaro kuery po py omboaxa opena aguã. Irundy aty ikuai xondaro kuery, peteĩ-teĩ aty irundy xondaro oguereko harðarã, Páscoa ára rire heta va'e kuery oendua py omboayvua aguã.

<sup>5</sup> Ha'e rami py Pedro nhuã py oĩ, teĩ hexe igreja kuery ikuai va'e onhembo'e tema Nhanderuete pe.\*

<sup>6</sup> Pyávy huvixa Herodes omboayvu e'ŷ mbove'i, Pedro oke oupy mokoĩ xondaro mbyte, mokoĩ corrente py ojokuaague reve. Xondaro kuery mboae ma okẽ py ikuai nhuã oarða py.

<sup>7</sup> Ha'e gui peteĩ anjo Senhor-a guigua ou xapy'a ramo peteĩ hendy va'e omoexakãmba nhuã ropy rupi. Pedro re opoko vy omomyi. Ha'e vy aipoe'i:

— Epu'ã pojava — he'i ramove ojokuaague ho'apa ipo gui.

<sup>8</sup> Anjo aipoe'i:

— Ejeku'a jokua ke, ha'e emoĩ ndepy regua. — Ha'ekue rami ojapo ramo aipoe'ive ju:  
— Emoĩ ndeao puku, ha'e eju xerakykue — he'i.

### *Nhuã gui Pedro oguenoëa ague*

<sup>9</sup> Ha'e gui Pedro oẽ vy hakykue oo. Ndoikuuai ov y anhetẽ paa anjo opo py ojapo va'e, "Aexa ra'u rive po" he'i vy.

<sup>10</sup> Xondaro ikuai va'e jypy ha'e mokoĩa ma oaxa vy ovaẽ jogueravy okẽ ferro guigua tetã katy oĩ va'e py. Ha'e va'e ma ha'e ae ojepe'a. Ha'e gui oẽ vy peteĩ tape rupi jogueraa. Oove'ia py anjo ojepe'a ixugui.

<sup>11</sup> Ha'e ramo mae ma Pedro oikuua xapy'a vy aipoe'i:

\* **11:24** Atos 4.36,37 \* **12:5** Mateus 18.19,20

— Aŷ ma aikuaa anhetē Senhor ombou ra'e ojea pygua anjo, Herodes po gui xereraa jepe aguã, ha'e judeu kuery ojapoxe va'e ha'e javi gui guive — he'i.

<sup>12</sup> Hexe oiko va'e re oikuaa pota vy onhembopy'a oo aguã João Marcos hery va'e xy Maria ro py. Ha'e py ma heta ikuai onhembo'e vy.

<sup>13</sup> Kora rokē re ombota ramo ou peteĩ tembiguai kunha'i Rode hery va'e, mava'e paa oexa aguã.

<sup>14</sup> Pedro ayvu oendu kuaa vy ov'y'a vaipa vy hexarai omoinge aguã. Onha reve opy ojevy Pedro oké py hi'aĩa omombe'u aguã.

<sup>15</sup> Ha'e ramo ha'e kuery aipoe'i ixupe:

— Naneakã porâvei teve — he'i okuapy. Ha'e rami teĩ omombe'uve ha'e etea.

Ha'e ramo aipoe'i ju:

— Inhe'ẽ rive ri nhi'ã — he'i okuapy.

<sup>16</sup> Ha'e ramia ja Pedro ombotave tema ho'amy. Ha'e ramo mae ma ha'e kuery oipe'a vy ha'e ri ty ra'e oexa vy ndoikuuai rei okuapy.

<sup>17</sup> Ha'e ramo opo py "Pekyrirî" he'ia rami ojapo vy omombe'u marã rami pa nhuã gui Senhor oguenoẽ ukaague. Ha'e vy aipoe'i:

— Pemombe'u ke Tiago pe, irmão kuery pe guive — he'i. Ha'e gui oẽ ju vy amboae katy oo.

<sup>18</sup> Ko'ẽmba rã xondaro kuery nda'evei rei ikuai, mba'e pa Pedro re oikoague ndoikuuai vy.

<sup>19</sup> Herodes oeka uka teĩ ndojoui. Ha'e rami vy nhuã rarõa kuery omboayvu ma vy ojuka ukapa. Ha'e vy Judéia gui ma Cesaréia katy ju oo. Ha'e py oiko are.

### *Herodes omanoague*

<sup>20</sup> Ha'e va'e jave Herodes joo rami e'ŷ ijayvu Tiro ha'e Sidom pygua kuery reve. Ha'e ramo oĩa py ha'e kuery oupa peteĩ rami ojexa uka aguã. Ha'e rami vy huvixa rembiguai Blasto pe onhepytyvõ uka rire ojerure okuapy peteĩ rami ju ikuai aguã re, mba'eta huvixa yvy rupi ho'u va'erã ojou vy.

<sup>21</sup> Ha'e gui oa'angaague ára py Herodes omoĩ ao iporâve va'e. Tenda openaaty áry oguapy vy ijayvu ha'e kuery pe.

<sup>22</sup> Ha'e ramo ha'e kuery ojapukai:

— Nhanderuete ae teve ijayvu, ava e'ŷ — he'i okuapy.

<sup>23</sup> Ha'e ramove anjo Senhor-a guigua omomba'eaxy huvixa, Nhanderuete nomboetei ramo. Haxo ho'upa rã omano.

<sup>24</sup> Ha'e gui Nhanderuete ayvu oenduave tema opa rupi, ha'e ojerovia va'e kuery hetave ov'y.\*

<sup>25</sup> Barnabé ha'e Saulo ma ojapo 'rã va'ekue ojapopa ma vy ojevy ju Jerusalém gui. Ngupive ogueraa avi João Marcos hery va'e.

## 13

### *Jypy'i Barnabé ha'e Saulo ayvu mombe'ua rupi oguataague*

<sup>1</sup> Antioquia pygua igreja kuery regua ikuai profeta ha'e nhombo'ea kuery: Barnabé, Simeão Níger hery va'e, Cirene pygua Lúcio, huvixave Herodes ryvy ranga Manaém ha'e Saulo.

<sup>2</sup> Ha'e kuery ma Senhor pe okaru e'ŷ re ikuai ramo Nhe'ẽ Ky'a E'ŷ aipoe'i:

— Peiporavo xevy Barnabé ha'e Saulo, xee aenoñague rami ha'e kuery omiba'eapo aguã — he'i.\*

<sup>3</sup> Ha'e ramo okaru e'ŷ re onhembo'e okuapy ranhe. Ha'e gui ha'e kuery áry opo omoĩ reve omondouka.

\* **12:24** 1 Pedro 1.24,25 \* **13:2** Atos 9.15,16; Romanos 1.1

### *Onhembo'e vaikue va'e Elimas reko re ijayvua*

<sup>4</sup> Nhe'ẽ Ky'a E'ŷ omondouka ramo Selêucia peve ranhe oo. Ha'e gui yy rupi oje'oi Chipre katy.

<sup>5</sup> Salamina py ovaẽ vy Nhanderuete ayvu omombe'u judeu kuery onhembo'eaty ikuai va'e rupi. Ipytyvõarã ogueraa avi João.\*

<sup>6</sup> Ypa'ũ oaxapa vy Pafos tetã peve oo. Ha'e py oexa peteĩ judeu onhembo'e vaikue va'e profeta ramigua, Barjesus hery va'e.

<sup>7</sup> Ha'e va'e ma huvixa Sérgio Paulo irũ oiko. Ha'e rã huvixa ma ava hi'arandu va'e. Ha'e rami vy Barnabé ha'e Saulo oenoĩ vy oendu porã pota Nhanderuete ayvu omombe'u rã.

<sup>8</sup> Ha'e rami teĩ onhembo'e vaikue va'e Elimas hery va'e ojokoxe huvixa ojerovia e'ŷ aguã.

<sup>9</sup> Ha'e gui Saulo Paulo avi hery va'e re ma Nhe'ẽ Ky'a E'ŷ anho oĩ ramo oma'ẽ porã ranhe Elimas re. Ha'e vy aipoe'i:

<sup>10</sup> — Anha ra'y, ndere ma renhombotavypa ha'e opa marã rei reiko aguã anho oĩ. Heko porã va'e re repu'ã rei. Nderepytu'ui ta ri ty'y Senhor reko amboae rami rei reikuua ucaa gui?

<sup>11</sup> Aŷ ma ndere Senhor omoĩ 'rã opo nderexavei aguã. Ha'e ramo mbovy ára rei ve'ŷ nderexavei 'rã kuaray – he'i. Ha'e ramove hexe ho'a yvyxí ramigua pytû va'e. Ha'e ramo ojere-jere oikovy, oipota ijyva re imboguataarã.

<sup>12</sup> Mba'emo oiko va'e huvixa oexa vy oguerovia ayvu, Senhor re ombo'e rã oguerovy'a guive.

### *Jerusalém katy ju João Marcos ojevyague*

<sup>13</sup> Pafos gui ma Paulo yy rupi oo. Oirũ kuery reve oje'oi Panfília regua Perge tetã re. Ha'e rã João ma ha'e kuery gui oja'o vy Jerusalém katy ju ojevy.

<sup>14</sup> Ha'e rã ha'e kuery ma Perge gui oove Pisídia regua Antioquia tetã peve, ha'e sábado ára py judeu kuery onhembo'eaty py oo vy oguapy.

<sup>15</sup> Lei ha'e profeta ombopara va'ekue ogueroayvupaa ma rire onhembo'eaty pygua ruvixa aipoe'i uka ha'e kuery pe:

— Xeryvy kuery, heta va'e kuery pemombaraete aguã regua ayvu perekri vy ke pemombe'u.

### *Antioquia py Paulo ayvu omombe'uague*

<sup>16</sup> Ha'e ramo Paulo opu'ã vy opo py ojapo “Pekyrirí” he'ia rami. Ha'e vy aipoe'i:

— Avakue Israel regua ha'e Nhanderuete renonde pejererokyjea rupi pendekuai avi va'e, pejapyxaka ke.

<sup>17</sup> Nhande Israel kuery Ruete ma oiporavo raka'e nhaneramoĩ kuery, ha'e gui oyvy re'ŷ ikuia pukukue re omboetave, Egito yvy re. Ha'e gui opo'akaa rupi oguenoẽmba vy

<sup>18</sup> quarenta ma'etŷ re tekao e'ŷa py ikuai jave ogueropo'aka ha'e kuery reko vai.

<sup>19</sup> Ha'e gui sete regua Canaã yvy re ikuai va'ekue omomba vy ijyvykue ome'ẽ ha'e kuery yvyrã,

<sup>20</sup> quatrocentos e cinqüenta ma'etŷ rai'i rire. Ha'e va'e rire omoĩ herekoarã kuery, profeta Samuel oikoa ára peve.

<sup>21</sup> Ha'e gui nguvixaverã re ha'e kuery ojerure okuapy ramo Nhanderuete omoĩ uka Benjamim regua Quis ra'y Saul. Ha'e va'e ma quarenta ma'etŷ re oĩ.

<sup>22</sup> Ha'e gui ma oipe'a vy hekovia Davi ju oiporavo huvixaverã. Ha'e va'e reko re ijayvu vy aipoe'i: “Jessé ra'y Davi ma ava xee ae rami ipy'a va'e ajou, xee aipota va'e ojapopa va'erã”, he'i va'ekue.

<sup>23</sup> Ha'e va'e ramymino kuery regua Nhanderuete ijayvuague rami vy omoingo Israel kuery reraa jepearã. Ha'e va'e ma Jesus.

\* <sup>13:5</sup> Apy João hery va'e ma Apóstolo João e'ŷ, ha'e rã João Marcos, Jesus rekokue ombopara va'erã va'e (versículos 13-15).

<sup>24</sup> Ha'e va'e ojekuaa uka e'ŷ mbove João ranhe Israel kuery ha'e javive pe omombe'u oikovy jajeko rerova vy nhanhemongarai uka aguã regua.

<sup>25</sup> Ha'e gui João ojapo 'rã va'ekue ojapopa ma vy aipoe'i: "Xee ma pexa'ãa ramigua e'ŷ. Ha'e rã xerakykue rima ou oiny peteĩ. Ha'e va'e gui ma xe'yvyi'i ete vy neĩ ipy regua amboi aguã voi nda'evei", he'i va'ekue.

<sup>26</sup> — Ke'y kuery Abraão ramymino kuery ha'e Nhanderuete renonde pejererokyjea rupi pendekuai va'e, nhandevy pe ae oikuua uka ayvu jaa jepe aguã regua.

<sup>27</sup> Mba'eta Jerusalém pygua kuery nguvixa kuery reve ndoikuuai okuapy Jesus, neĩ profeta kuery nhombo'ea noendu kuaai guive, sábado ára nhavõ ogueroayvu teĩ, mba'eta ojuka uka raka'e Jesus, profeta kuery ijayvuague ojeupity aguã rami.

<sup>28</sup> Neĩ peteĩ henda py ojapo vaiague ha'e kuery ndoikuuai va'eri huvixa Pilatos pe ojerure okuapy ojuka aguã re.

<sup>29</sup> Hekorã ipara oiny va'e ojeupity aguã rami oguereko rire omboguejya yvyla gui, ha'e vy tuparã ojapo pyre py onhono porãa.

<sup>30</sup> Ha'e rami teĩ omanoague gui Nhanderuete omboete ju.

<sup>31</sup> Ha'e ramo mbovy ára re rei e'ŷ ojexa uka oikovy, Galiléia guive Jerusalém katy hexeve oje'oi va'ekue pe. Ha'e va'e kuery ma imombe'uarã ikuai heta va'e kuery pe.

<sup>32</sup> Ha'e gui ore ju pêvy romombe'u ayvu porã Nhanderuete nhaneramoĩ kuery omoingo porã aguã re ijayvuague regua.

<sup>33</sup> Ha'e kuery ramymino nhandekuai va'e pe Nhanderuete ojapo ha'e nungakue ha'e javi ojeupity aguã rami, Jesus omboete jevya py, mba'eta mokoĩ Salmo re ipara oĩa rami vy: "Ndee ma Xera'y, ange xee romoingo", he'iague.\*

<sup>34</sup> Ha'e rami vy ae omanoague gui Nhanderuete omboete ju ivaipa e'ŷ aguã, aipoe'iague rami: "Pendevy pe ajapo 'rã Davi pe xeayvuague iky'a e'ŷ ha'e oguerovia pyrã ojeupity aguã rami."\*

<sup>35</sup> Ha'e rami vy amboae Salmo py aipoe'i avi: "Nderejai 'rã neremimbo'e retekue Iky'a e'ŷ va'e ivaipa aguã", he'i va'ekue.\*

<sup>36</sup> Mba'eta anhetẽ Nhanderuete oipotaa rami vy heta va'e kuery re Davi opena ma rire oke vy oo nguu kuery ooague py, ha'e ramo hetekue ivaipa.

<sup>37</sup> Ha'e rã Nhanderuete omboete ju va'e retekue ma nda'ivaipai.

<sup>38</sup> — Ha'e nunga rupi ke'y kuery, peikuaa pota, mba'eta pêvy pe romombe'u hexe vy jejavya omboguepaa aguã regua.

<sup>39</sup> Hexe vy ma ha'e javive ojerovia va'e omboeko porãa 'rã opa mba'e vai gui. Ha'e rã Moisés lei oeja va'ekue rupi ma nanhanemboeko porãai 'rã.

<sup>40</sup> Peikuaa pota ha'vy profeta kuery aipoe'iague pendere oiko e'ŷ aguã:

<sup>41</sup> "Ma'ě ke, peẽ pejojojai rei va'e. Penhemondyi ha'e pekanhy, mba'eta pende'ára py xee ajapo 'rã mba'emo ndaperoviai va'erã, pêvy omombe'ua teĩ", he'iague.\*

### *Sábado jevya py ayvu omombe'u aguã re ojerure okuapyague*

<sup>42</sup> Paulo ha'e Barnabé oẽ rã ojerure okuapy sábado jevya py ha'ekue rami ae ju ijayvu aguã.

<sup>43</sup> Onhembo'eaty gui ono'õ va'ekue oopa rã judeu kuery ha'e judeu reko rami Nhanderuete pe ikuai va'e heta oje'oi Paulo ha'e Barnabé rakykue. Ha'e ramo omongeta Nhanderuete porayvua re riae ikuai aguã.

### *Judeu e'ŷ va'e kuery pe ju Paulo ha'e Barnabé ayvu omombe'uague*

<sup>44</sup> Sábado jevya py tetã pygua ha'e javi rai ou Nhanderuete ayvu oendu aguã.

<sup>45</sup> Ha'e rã judeu kuery ma heta ijaty va'e oexa vy ndojou porãi. Ha'e rami vy ijayvu vaikue, Paulo ayvu re ijayvu rei guive.

**46** Ha'e ramo Paulo ha'e Barnabé okyjea py e'ŷ ijayvu vy aipoe'i:

— Peẽ kuery pe ranhe ma romombe'u Nhanderuete ayvu. Ha'e rã napenduxei vy pexa uka tekove marã e'ŷ pejopy aguã nda'eveia. Ha'e rami rã judeu e'ŷ va'e kuery ikuaiia py ju'rã roo.

**47** Mba'eta ha'e rami aguã rami ae Senhor oremoĩ. Ha'e vy aipoe'i: “Xee romoĩ judeu e'ŷ va'e kuery moexakãarã, yvy jave re ikuai va'e oo jepe aguã”, he'i va'ekue.\*

**48** Ha'e rami ijayvu rã judeu e'ŷ va'e kuery oendu vy ov'y'a okuapy, Senhor ayvu oguerovy'a guive. Tekove marã e'ŷ jopyarã oiporavo pyre ha'e javive oguerovia.

**49** Ha'e rami rã ha'e va'e yvy ha'e javi rupi oendupaa Senhor ayvu.

**50** Ha'e rami teĩ judeu kuery ombopoxy kunhague judeu reko rami ikuai va'e yvatekueve, tetã pygua ruvixa kuery guive. Ha'e rami vy omoingo axy Paulo ha'e Barnabé vy omoxẽ oyvy gui.

**51** Ha'e ramo ha'e kuery opy regua gui yvy ku'i oity-ity oikuua uka aguã ha'e kuery oeja ma ovya. Ha'e gui Icônio katy ju oje'oi.\*

**52** Ha'e rã temimbo'e kuery ikuai va'e ma opa mba'e py ov'y'a tema okuapy Nhe'ẽ Ky'a E'ŷ reve vy.

## 14

### *Icônio py Paulo ha'e Barnabé ovaẽague*

**1** Icônio tetã py ma Paulo ha'e Barnabé ma judeu kuery onhembo'eaty py ovaẽ vy nhombo'e. Ha'e ramo heta ikuai va'e oguerovia, judeu ha'e grego kuery guive.

**2** Ha'e rã judeu kuery oguerovia e'ŷ va'e ma omopu'ã rei judeu e'ŷ va'e kuery, ombopoxypa irmão kuery pe.

**3** Ha'e ramive ma ikuai are ha'e py, okyjea py e'ŷ ijayvu Senhor gui. Ha'e rã Senhor ma ha'e kuery po py hexa pyrã ha'e nhomondyipaarã ojapo vy oikuua uka ayvu nhomboaxya regua anhetãa.

**4** Ha'e rami rire tetã pygua kuery oja'opa. Peteĩ regua oo judeu kuery re, ha'e rã amboae kuery ma apóstolo kuery re oje'oi.

**5** Ha'e rami vy judeu e'ŷ va'e ha'e judeu kuery nguvixa kuery reve opu'ãmba rei okuapy oojai reixe ha'e ita py ojapipa aguã.

**6** Ha'e nunga ha'e kuery oikuua vy ojava Licaônia regua Listra ha'e Derbe tetã katy, ha'e katy rai-rai'i ikuai va'e rupi voi.

**7** Ha'e py ju omombe'u ayvu porã.

### *Listra py peteĩ oguata e'ŷ va'e omongueraague*

**8** Listra py oguapy oiny peteĩ ava ipy pirupa va'e, itui'i guive ndoguatai va'e, neĩ peteĩgue ma oguata va'e e'ŷ.

**9** Ha'e va'e ava ma Paulo ayvu re ojapyxaka oiny ramo hexe oma'ẽ vy oexa okuera aguã ojerovia etea.

**10** Ha'e rami vy ijayvu atã reve aipoe'i ixupe:

— Epu'ã ke ndepy re — he'i ramove opo reve opu'ã vy oguata.

**11** Heta va'e kuery Paulo ojapo va'e oexa vy ojapukai Licaônia ayvu py, aipoe'i:

— Nhanderuete kuery teve avakue rami ojeapo vy oguejy ra'e nhanda peve — he'i okuapy.

**12** Ha'e rami vy Barnabé pe “Júpiter”, ha'e rã Paulo pe ma “Mercúrio” he'i okuapy, mba'eta ijayvuve ramo.\*

\* **13:47** Isaías 49,6    \* **13:51** Lucas 10,10,11    \* **14:12** Júpiter ma ha'e kuery ruete ramigua yvateve va'e, ha'e rã Mercúrio ma tuuete ramigua ijayvu kuaave va'e.

<sup>13</sup> Ha'e Júpiter pegua sacerdote oĩ va'e ma ixupegua templo tetã kyvõ katy oĩ va'e gui ou vy tetã rokẽ katy ogueru vaka ha'e ngora yvoty guigua. Heta va'e kuery reve mymba ojukaxe ha'e kuery pe.

<sup>14</sup> Ha'e nunga apóstolo kuery Barnabé ha'e Paulo oendu vy oao omondoro reve opo heta va'e kuery mbyte py. Ha'e vy ojapukai:

<sup>15</sup> — Avakue, mba'e re tu guĩ ramigua pejapo ta? Ore voi ma ava peẽ ramigua. Pendua rami ae avi roendu. Ha'e rami vy pẽvy romombe'u ayvu porã guĩ ramigua ovare'ŷ va'e pejapoa gui pejeko rerova aguã Nhanderuete oikove va'e re. Ha'e va'e ae yva, yvy, ye'ẽ ha'e opa mba'e ikuai va'e apoare oiko.\*

<sup>16</sup> Ymagua kuery pe oeja raka'e peteĩ-teĩ regua ha'e kuery ae reko rami ikuai aguã.

<sup>17</sup> Ha'e rami teĩ ikuua ukaarã ndoeja e'ŷi guive, mba'eta pendevy pe ojapo porã vy yva gui ombou oky ha'e mba'emo hi'a aguã ára. Pekaru ha'e pendepy'a py pевy'a aguã nomboatai — he'i.

<sup>18</sup> Po rami ijayvu teĩ haxy ete py ojoko heta va'e kuery ha'e kuery pe mymba ojuka taa.

### *Paulo ita py ojapipaague*

<sup>19</sup> Ha'e rami jave Antioquia ha'e Icônio gui judeu kuery ou vy ombopoxypa heta va'e kuery. Ha'e rami vy Paulo ojapipa okuapy ita py. Ombotyryry heravy tetã gui mombyry'i, "Omano ma po" he'i vy.

<sup>20</sup> Ha'e gui temimbo'e kuery ombojere rei ramo opu'ã, ojevy ju tetã py.

Ko'ẽ jevy Barnabé reve Derbe katy oo.

<sup>21</sup> Ha'e va'e tetã py ayvu porã omombe'u vy heta ojou temimbo'erã. Ha'e gui ma Listra, Icônio ha'e Antioquia katy ju ojevy.

<sup>22</sup> Temimbo'e ikuai va'e ombopy'a guaxu ovvy vy omongoeta ojeroviaa rupi riae ikuai aguã.

— Jaiko axy vy 'rãe jaike Nhanderuete pegua po'akaa py — he'i.\*

<sup>23</sup> Peteĩ-teĩ igreja rupi okaru e'ŷ re onhembo'e rire oiporavo igreja re opena va'erã. Ha'e Senhor re ojerovia va'e kuery ma omboaxa ovvy ipo py.

<sup>24</sup> Pisídia yvy oaxa vy Panfília katy ju jogueraa.

<sup>25</sup> Perge py ayvu porã omombe'u rire oguejy jogueravy Atália katy.

<sup>26</sup> Ha'e gui yy rupi oo Antioquia katy, mba'eta ha'e py Nhanderuete po py jypy'i omboaxaa va'ekue mba'emo ojapo 'rã va'ekue ojapo aguã.†

<sup>27</sup> Ha'e py ovaẽ vy omboatypa igreja kuery, ha'e omombe'u oguataa rupi Nhanderuete ojapo va'ekue ha'e javi, ha'e okẽ judeu e'ŷ va'e kuery ojerovia aguã regua oipe'aague guive.

<sup>28</sup> Mbovy ára rei e'ŷ ikuai ha'e py temimbo'e kuery reve.

## 15

### *Judeu e'ŷ va'e kuery joo rami e'ŷ-e'ŷ ijayvu okuapyague*

<sup>1</sup> Ha'e gui ma Judéia gui amongue ou vy ombo'e po rami irmão kuery:

— Orerekorã Moisés oejaague rami vy pendepire napemboi ukai ri vy ndapeo jepei 'rã — he'i okuapy.

<sup>2</sup> Ha'e rami rã ha'e kuery reve Paulo ha'e Barnabé joo rami e'ŷ-e'ŷ ijayvu ramo jogueroayvu Jerusalém katy ha'e va'e mokoĩ oo aguã amboae kuery ha'e pygua reve, apóstolo ha'e igreja re opena va'e kuery pe oikuua pota uka aguã ha'e nunga re.\*

\* <sup>14:15</sup> Éxodo 20.11, Salmo 146.6   \* <sup>14:22</sup> 2 Timóteo 3.10-12; 1 Pedro 4.12-14   † <sup>14:26</sup> Mokoĩ henda py oĩ raka'e tetã Antioquia hery va'e. Apy omombe'u va'e ma Síria regua, igreja kuery ikuiaia. Ha'e rã capítulo 13, ha'e 14.21 py ijayvua ma Pisídia regua.   \* <sup>15:2</sup> Gálatas 2.1-5; 5.1-6

<sup>3</sup> Ha'e rami vy igreja kuery omondouka vy mombyry'i peve omoirū heravy. Ha'e ramo Fenícia ha'e Samaria rupi oaxa vy judeu e'ŷ va'e ojeko rerovaague omombe'u oje'oivy. Ha'e rami rā irmão kuery ha'e javive oendu vy ov'y'a vaipa.

<sup>4</sup> Jerusalém py ovaẽ ramo igreja kuery omovaẽ porã'i, apóstolo ha'e opena va'e kuery reve. Ha'e ramo omombe'upa oguataa rupi Nhanderuete ojapo va'ekue.

<sup>5</sup> Ha'e rā amongue fariseu regua Jesus re ojerovia va'e ma opu'ã vy aipoe'i:

— Ojerovia va'e kuery ma opire omboi uka ramo 'rāe ha'eve, ha'e nhambo'e avi 'rā lei Moisés oeja va'ekue rami ikuai aguã — he'i okuapy.

### *Jerusalém py opena va'e kuery nhomboatyague*

<sup>6</sup> Ha'e ramo apóstolo ha'e igreja re opena va'e kuery nhomboaty okuapy ha'e nunga re oikuaa pota aguã.

<sup>7</sup> Joo rami e'ŷ-e'ŷ ijayvu ramo Pedro opu'ã vy aipoe'i:

— Irmão kuery, peẽ peikuaa yma Nhanderuete xeporavoague penembyte gui, judeu e'ŷ va'e kuery pe ayvu porã amombe'u rā oendu vy ojerovia aguã.\*

<sup>8</sup> Ha'e gui Nhanderuete nhande kuery pavẽ py'a re oĩa oikuapa va'e vy ha'e kuery pe voi oikuaa uka ojou porãa, mba'eta ha'e kuery pe Nhe'ẽ Ky'a E'ŷ ombou, nhandevy ombouague rami avi.

<sup>9</sup> Nhande, neĩ ha'e kuery regua nanhanderayvuvei joegui, mba'eta ha'e kuery ojerovia rā oiky'a'opa avi ipy'a.

<sup>10</sup> Ha'vy aŷ, mba'e re tu Nhanderuete pe "Nda'evei" peje ri? Mba'eta temimbo'e kuery pembovoyixe pekuapy nhaneramoĩ kuery ndogueropo'akai va'ekue py, neĩ nhande voi ndajaropo'aka kuaai.\*

<sup>11</sup> Ha'e rami 'rāgue py jarovia nhande voi Senhor Jesus nhanemboaxy ramo ae jaa jepea, ha'e kuery rami avi — he'i.

### *Tiago ijayvuague*

<sup>12</sup> Ha'e gui ma heta va'e kuery ha'e javive okyrirĩ okuapy ojapyxaka aguã Barnabé ha'e Paulo omombe'u rā hexa pyrã ha'e nhomondyipaarã ipo py Nhanderuete ojapo va'ekue, judeu e'ŷ va'e kuery tekoa rupi oguataa rupi.\*

<sup>13</sup> Ha'e kuery ijayvupa ma rire Tiago ju ijayvu. Ha'e vy aipoe'i:

— Irmão kuery, pejapyxaka xeayvu re.

<sup>14</sup> Simão ranhe omombe'u kuri judeu e'ŷ va'e pe jypy'i Nhanderuete ojekuaa ukaague, ha'e kuery regua gui oiporavo aguã hery rupi ikuai va'erã.

<sup>15</sup> Ha'e rami ae avi profeta kuery ayvu ipara oinya. Mba'eta aipoe'i:

<sup>16</sup> "Ha'e nunga oiko ma rire ajevy vy ajapo ju 'rā Davi ro ho'apa va'ekue. Ho'aague gui ajapo jevy vy amoatyrõmba 'rā,†

<sup>17</sup> amboae kuery voi oeka aguã Senhor, judeu e'ŷ va'e kuery xerery rupi aenoĩ va'e ha'e javi voi",

<sup>18</sup> he'i Senhor yma voi ha'e nunga kuua ukaare.\*

<sup>19</sup> Ha'e nunga rupi xee aikuua ramo nda'evei nhamoangeko rei aguã judeu e'ŷ va'e kuery Nhanderuete re ojeko rerova va'ekue.

<sup>20</sup> Ha'e kuery pe nhambopara 'rā onhemongy'a e'ŷ aguã mba'emo ra'angaa py, neĩ itavy reia py, ha'e ho'u e'ŷ aguã xo'o ojyrvipy vy ojuka pyre ro'okue neĩ huguykue.

<sup>21</sup> Mba'eta yma guive Moisés ombopara va'ekue rupi ijayvu va'e ikuai ae tetã nhavõ rupi. Judeu kuery onhembo'eaty py voi sábado ára nhavõ ogueroayvua 'rā.\*

\* **15:7** Atos 10.1-48   \* **15:10** Ha'e kuery ombovoyixe temimbo'e kuery amboae regua, mba'eta oipota ha'e kuery voi ikuai judeu kuery rekorã oeja pyre rami.   \* **15:12** Gálatas 1.18,19   † **15:16** "Ajapo ju 'rā Davi ro ho'apa va'ekue", he'ia ma Davi ramymino Jesus nhandereraa jepearã ombou aguã re ijayvu vy.   \* **15:18** Amós 9.11-12   \* **15:21** 1 Coríntios 9.19-22, 10.31-33

### *Antioquia katy ayvu ogueraa ukaa ague*

<sup>22</sup> Ha'e ramo apóstolo ha'e opena va'e kuery igreja ha'e javi reve ojou porã ha'e kuery regua avakue oiporavo ha'e omondouka aguã Antioquia tetã katy, Paulo ha'e Barnabé reve. Ha'e rami vy oiporavo Judas Barsabás 'epy va'e ha'e Silas, irmão kuery omboeteve va'e meme.

<sup>23</sup> Ha'e va'e kuery po py ogueraa uka po rami ombopara va'ekue: "Irmão kuery apóstolo ha'e igreja re opena va'e orekuai va'e, kova'e kuaxia rombopara irmão kuery judeu e'ŷ va'e regua, Antioquia, Síria ha'e Cilícia py pendekuai va'e pe. Pendevy roxarura.

<sup>24</sup> Roikuua karamboae amongue romondouka ramo e'ŷ orembyte gui [oje'oi va'ekue] penemoingo eta reiague, ayvu py penemoangeko rei vy.

<sup>25</sup> Ha'e nunga rupi peteĩ rami roikuua porã ma vy rojou porã amongue avakue roiporavo vy peẽ kuerya py rombou aguã orerembiayvu Barnabé ha'e Paulo reve.

<sup>26</sup> Ha'e va'e avakue ma nhande-Senhor Jesus Cristo rery káuxa ndojeayvuvei va'e.

<sup>27</sup> Ha'e rami vy Judas ha'e Silas rombou, peẽ kuery pe ha'e kuery ae omombe'u aguã ha'e nunga.

<sup>28</sup> Mba'eta Nhe'ẽ Ky'a E'ŷ reve rojou porã amboae ramigua pêvy ndorojapo ukai aguã, pov'a nunga anho:

<sup>29</sup> Penhemongy'a eme mba'emo ra'angaa pe ome'ẽ mbyre pe'ua py, neĩ huguykue, ha'e mymba ojyryvipy vy ojuka pyre ro'okue, ha'e pendetavy rei eme guive. Ha'e nunga gui pejejoko vy peiko porã 'rã. Tove tapendekuai porã."

### *Kuaxia para ogueroayvu okuapyague*

<sup>30</sup> Are'ŷ re omondouka pyre kuery ma Antioquia tetã py ovaẽ ma vy ha'e py ikuai va'e omboatypa vy ha'e kuery pe omboaxa kuaxia para.

<sup>31</sup> Ha'e pygua kuery ogueroayvu vy ov'y'a vaipa ombopy'a guaxu rã.

<sup>32</sup> Judas ha'e Silas profeta ikuai va'e voi irmão kuery ombopy'a guaxu vy heta ayvu py omombaraete.

<sup>33</sup> Ha'e py ikuai are rire irmão kuery ombojevy uka porã'i ju imondoukaare kuerya katy.

<sup>34</sup> [Ha'e rã Silas ma ojou porã ha'e py ae opytave aguã.]

<sup>35</sup> Paulo ha'e Barnabé ma Antioquia py ikuai are vy nhombo'e ha'e omombe'u Senhor ayvu, heta ikuai va'e reve.

### *Barnabé gui Paulo oja'o rire mokoïguea ma ayvu omombe'ua rupi oguataague*

<sup>36</sup> Are'i ma rire Paulo aipoe'i Barnabé pe:

— Aŷ ma jajevy ke jaexa ju irmão kuery tetã ha'e javi rupi Senhor ayvu nhomombe'uague rupi, jaikuua aguã marã rami pa ikuaria — he'i.

<sup>37</sup> Ha'e vy Barnabé ogueraaxe João Marcos hery va'e.

<sup>38</sup> Ha'e rã Paulo ma ndojou porãi ogueraa aguã, Panfília py oĩa gui ojepe'a vy omba'eapoa rupi noipytyvõvei rire.\*

<sup>39</sup> Ha'e rami py joo rami e'ŷ ijayvu vy oja'o joegui. Barnabé ma Marcos ogueraa vy yy rupi oo Chipre katy.

<sup>40</sup> Ha'e rã Paulo ma oirûrã Silas oiporavo vy oo avi, Senhor po py irmão kuery omboaxa rire.

<sup>41</sup> Ha'e vy Síria ha'e Cilícia rupi oaxa, omombaraete ov'y igreja ikuai va'e ha'e javi.

## 16

### *Paulo Timóteo ngupive ogueraa ague*

<sup>1</sup> Ha'e gui Derbe py ovaẽ avi, ha'e gui Listra py ju. Ha'e py ma peteĩ temimbo'e oiko Timóteo hery va'e, judeu regua oguerovia va'e pi'a. Ha'e rã tuu ma grego.

\* 15:38 Atos 13.13

<sup>2</sup> Ha'e va'e re ma Listra ha'e Icônio pygua irmão kuery ima'endu'a porã.

<sup>3</sup> Paulo oipota oo hupive. Ha'e vy ipire omboi ha'e katy'i rupi judeu kuery ikuai va'e re vy, mba'eta pavẽ oikuua tuu grego oikoa.

<sup>4</sup> Ha'e gui tetã ikuai va'e rupi oaxa vy irmão kuery pe omombe'u hekorã apóstolo ha'e opena va'e kuery Jerusalém py ikuai va'e ijayvuague.

<sup>5</sup> Ha'e rami vy igreja kuery ikuai va'e imbaraeteve oje'oivy ojeroviaa py. Hetave ovv ko'ẽ nhavõ.

### *Trôade py peteĩ ava oexa ukaa ague*

<sup>6</sup> Ha'e gui ma Ásia py ma Nhe'ẽ Ky'a E'ŷ ayvu nomombe'u ukai ramo Frígia-Galácia yvy rupi oje'oi.

<sup>7</sup> Mísia py ovaẽ rai'i vy onhea'ã Bitínia katy oo aguã. Ha'e rami teĩ Jesus Nhe'ẽ nomondoukai.

<sup>8</sup> Ha'e ramo Mísia rupi oaxa vy Trôade tetã py oguejy.

<sup>9</sup> Pyávy Paulo pe peteĩ oexa ukaa, Macedônia pygua ava opu'ã ho'amy va'e. Ha'e va'e ma ojerure vy

— Tereo ke Macedônia katy oreptyvõ aguã — he'i.

<sup>10</sup> Ha'e rami oexa ukaa rire roje'oi voi pota ha'e katy, mba'eta roikuua ha'e kuery pe ayvu porã romombe'u aguã orerenoñare Nhanderuete ae oikoa.\*

### *Filipos py Paulo oiko jave Lídia ojeko me'ẽague*

<sup>11</sup> Trôade gui yy rupi roo yvi Samotrácia katy. Ko'ẽ jevy ma Neápolis katy,

<sup>12</sup> ha'e gui ma Filipos katy ju roo.\* Ha'e va'e tetã ma Macedônia regua pavẽ gui omboetevepy, ha'e Roma tetã gui ae openaa va'e. Ha'e py ma roiko are.

<sup>13</sup> Sábado ára py tetã gui mombyry'i roo vy yakã rembe peve roguejy, ha'e py onhembo'eaty oña roikuua vy. Ha'e vy roguapypa vy oreayvu roiny kunhague ijaty va'e reve.

<sup>14</sup> Peteĩ kunha Lídia hery va'e ma ojapyxaka porã oiny oreayvua re. Ha'e va'e ma Tiatira guigua, ajukue púrpura guigua vendea, ha'e Nhanderuete renonde ojererokyjea rupi oiko va'e. Ha'e va'e py'a re Senhor ae omoõ Paulo ijayvua re ojapyxaka pota aguã.

<sup>15</sup> Ha'e rami vy onhemongarai uka ngoo pygua kuery ha'e javi reve. Ha'e rami vy orevy pe ojerure vy aipoe'i:

— Senhor re ajeroviaa perovia vy ke pevaẽ ke xero py, ha'e py ae pepyta — he'i. Ha'e rami ijayvua ha'eve orevy.

### *Peteĩ kunha'i imba'ekuua va'e gui nhe'ẽ vai oipe'aague*

<sup>16</sup> Onhembo'eaty katy roo jave peteĩ kunha'i ou orerovaexi nhe'ẽ vai gui imba'ekuua va'e. Ha'e va'e ma ombo'ekuua rupi ongana vaipa oikovy opatõ kuery pe.

<sup>17</sup> Ha'e va'e ma Paulo ha'e ore kuery rakykue oo vy ojapukai reve aipoe'i 'rã:

— Peva'e avakue ma Nhanderuete Yvate ete va'e rembiuai, ha'e pêvy omombe'u tape peo jepe aguã — he'i.

<sup>18</sup> Ha'e ramigua mbovy ára rei e'ŷ oiko. Ha'e ramo Paulo noenduxevei vy ojere, ha'e aipoe'i nhe'ẽ vai pe:

— Jesus Cristo rery rupi aipoa'e: Ejepe'a ixugui — he'i ramove ojepe'a.

### *Paulo ha'e Silas oinupãmbaa rire nhuã py ombo'aa ague*

<sup>19</sup> Kunha'i patõ kuery ma nonganaveia oexa vy ojopy Paulo ha'e Silas, ha'e vy tetã mbyte py ogueraa huvixa kuery renonde.

<sup>20</sup> Huvixa kuerya py ogueraa vy aipoe'i:

— Peva'e avakue ma judeu ikuai vy opa marã omoingo nhaneretã pygua kuery.

\* <sup>16:10</sup> “Oje'oi” he'i 'rãgue py “Roje'oi” he'i, mba'eta ha'e kuery rupive kova'e kuaxia mboparaa Lucas voi oo raka'e.

\* <sup>16:12</sup> Filipenses 1.1

<sup>21</sup> Mba'eta teko mboae re nhombo'e 'rã. Ha'e va'e rupi ma nhandekuai aguã nda'evei, mba'eta nhande ma Roma pygua regua – he'i.

<sup>22</sup> Ha'e gui heta va'e kuery peteĩ rami opu'ãmba ha'e kuery re. Huvixa kuery voi ijao omendoropa vy oinupã uka yvyra po'i'i py.

<sup>23</sup> Ha'e gui oinupãmba rire omboty nhuã py, ha'e nhuã rarõa pe opena uka oẽ e'ŷ aguã.

<sup>24</sup> Ha'e va'e ma ha'e rami ijayvu rã oendu vy nhuã ropy apy py ogueraa, ha'e ipy voi omboty yvyra py.

<sup>25</sup> Pytû mbyte jave ma Paulo ha'e Silas onhembo'e ha'e oporaei oiny Nhanderuete pe omboete vy.\* Ha'e rã amboae kuery nhuã py ikuai avi va'e ma ojapyxaka okuapy.

<sup>26</sup> Ha'e rami jave yvy oryryi xapy'a vy omongu'epa nhuã yta. Ha'e ramo okẽ ikuai va'e ojepe'apa, ha'e javive gui oipa ojokuaague.

### *Nhuã rarõa ojeko me'ëague*

<sup>27</sup> Nhuã rarõa omyí vy nhuã rokẽ ojepe'a rã oexa vy oekyi kyxé ojejuka aguã, “Nhuã py ikuai va'ekue oẽmba ra'e ma po” he'i vy.

<sup>28</sup> Ha'e ramo Paulo ojapukai vy aipoe'i:

– Mba'eve ejapo eme ndejee, apy roï pavẽ – he'i.

<sup>29</sup> Ha'e ramo nhuã rarõa tataendy re ojerure vy oike pojava ovy. Oryryipa reve Paulo ha'e Silas renonde oĩ guenapy'ã re.

<sup>30</sup> Ha'e gui oka py ogueru vy aipoe'i:

– Avakue, mba'e tu ajapo 'rã aa jepe aguã?

<sup>31</sup> Ombovai:

– Ejerovia Senhor Jesus re. Ha'e vy 'rã reo jepe, ndee ha'e ndero pygua kuery – he'i.

<sup>32</sup> Ixupe omombe'u Nhanderuete ayvu, hoo pygua kuery ha'e javive pe guive.

<sup>33</sup> Ha'e va'e hora-ve pyávy ha'e kuery re opena porã vy ojoi oinupãague. Ha'e rire'ive onhemongarai uka, ha'e hoo pygua kuery ha'e javive reve.

<sup>34</sup> Ha'e gui ma ngoo py ae ogueraa vy omongaru. Ngoo pygua kuery ha'e javi reve ov'y'a ete okuapy Nhanderuete re ojerovia vy.

### *Nhuã gui Paulo ha'e Silas opoia ague*

<sup>35</sup> Ko'ẽmba jave huvixa kuery ombou guembiguai “Pepoi peva'e avakue” he'i aguã.

<sup>36</sup> Ha'e ramo nhuã rarõa omboaxa pova'e ayvu Paulo pe:

– Huvixa kuery pendepoi uka kuri. Ha'e rã peẽmba aŷ, tapeo porã – he'i.

<sup>37</sup> Ha'e ramo Paulo aipoe'i ha'e kuery pe:

– Ha'e rami avi mba'eve rojapo vaiague re'ŷ orenupãmba pavẽ oexaa py, nhuã py orembo'a uka guive, Roma pygua regua roiko va'eri. Aŷ ma nhemi rupi ju orepoi uka ta? Ha'e rami nda'evei. Ha'e rami 'rãgue py tou ha'e kuery ae torepoi – he'i.

<sup>38</sup> Ha'e nunga tembiguai kuery oendu vy oo omombe'u huvixa kuery pe. Ha'e va'e kuery ma Roma pygua regua oikoa oikuaa vy okyjepa.\*

<sup>39</sup> Ha'e rami vy Paulo kuerya py jogueru vy ijayvu porã'i. Nhuã gui oguenoẽ vy ojerure tetã gui ojepe'a aguã.

<sup>40</sup> Ha'e ramo nhuã gui oẽ ma vy Lídia ro py ranhe ovaẽ. Irmão kuery oexa vy omombaraetepa. Ha'e gui ma oje'oi.

## 17

### *Tessalônica py Paulo ha'e Silas ovaëague*

<sup>1</sup> Anfípolis ha'e Apolônia rupi oaxa vy ovaẽ Tessalônica tetã py.\* Ha'e py ma oĩ judeu kuery onhembo'eaty.

\* **16:25** 1 Tessalonicenses 5.16-18; Tiago 1.2-4    \* **16:38** Atos 22.25-29    \* **17:1** 1 Tessalonicenses 1.1; 2.13,14

<sup>2</sup> Paulo gueko rami vy oo ha'e kuery nhomboatya py. Mboapy sábado re ha'e kuery reve ijayvu oikovy ipara re oña re.

<sup>3</sup> Nhombo'e vy omombe'u porā. Ha'e vy aipoe'i:

— Cristo omanoague gui onhemboete jevy aguã rami oiko va'ekue. Jesus pêvy amombe'u va'e ae ma Cristo — he'i.

<sup>4</sup> Ha'e va'e kuery regua amongue oguerovia vy onhemoirū Paulo ha'e Silas re. Grego kuery heta avi Nhanderuete pe ikuai, kunhague omboetevepy voi.

<sup>5</sup> Ha'e rā judeu kuery ma nda'ijs'e vy ojou avakue heko vai va'e. Ha'e vy omono'õ reta vy opa marã rei nhomoingo tetã rupi. Jasom ropy oikepa, teta mbyte katy Paulo kuery ogueraaxe vy.

<sup>6</sup> Ha'e rami teñ ndojoui vy huvixa kuerya py ogueraa Jasom ae, amongue irmão kuery reve. Ha'e vy aipoe'i:

— Kova'e kuery ma yvy jave re ikuai va'e moingo eta reia, ha'e gui apy ju rima ovaẽ ra'e.

<sup>7</sup> Ha'e gui Jasom ma ngoo py omovaẽ. Ha'e va'e kuery ha'e javive César ayvu rami e'ŷ ikuai, Jesus pe anho "Huvixave" he'i okuapy.

<sup>8</sup> Ha'e nunga ayvu heta va'e ha'e huvixa kuery oendu vy ipoxypa.

<sup>9</sup> Ha'e rami teñ Jasom ha'e amboae kuery gui peráta ojopy rire opoi ju.

### *Beréia py Paulo ha'e Silas ovaãgue*

<sup>10</sup> Ha'e rire'i pyavyve irmão kuery ma Beréia tetã katy ju omondouka Paulo ha'e Silas. Ha'e py ovaẽ ma vy judeu kuery onhembo'eaty oĩ va'e katy jogueraa.

<sup>11</sup> Ha'e gui Beréia pygua kuery ma Tessalônica pygua gui hi'aranduve va'e vy ojapyxaka porā ayvu re oenduxe vy. Ko'ẽ nhavõ ipara oña re oikuaa pota guive, oikuaa aguã oendu va'ekue anhetẽ paa.

<sup>12</sup> Ha'e rami vy heta ojerovia, grego regua kunhague omboetevepy, ha'e avakue mbovy e'ŷ avi.

<sup>13</sup> Ha'e rami rā judeu Tessalônica pygua ma Beréia py avi ri ty ra'e Nhanderuete ayvu Paulo omombe'ua oikuaa vy ha'e py ju oje'oi nhombopoxy ha'e nhomopu'ãmba rei aguã.

<sup>14</sup> Ha'e ramo irmão kuery ojou porā Paulo omondouka voi aguã ye'ẽ rembe peve. Ha'e rā Silas ha'e Timóteo ma opytave ranhe ha'e py.

<sup>15</sup> Paulo re opena va'e kuery ma Atenas peve ogueraa. Ha'e kuery ojevy vy Paulo ijayvuague ogueraa Silas ha'e Timóteo pe, oña py ha'e kuery ou voi aguã.

### *Atenas tetã py Paulo ijayvuague*

<sup>16</sup> Atenas tetã py Paulo oirū kuery oarõ jave tetã rupi mba'emo ra'angaa anho oĩ rā oexa vy ndojou porāi vaipa.

<sup>17</sup> Ha'e nunga rupi ijayvu oikovy judeu kuery onhembo'eaty py, judeu ha'e judeu e'ŷ va'e Nhanderuete mboetea rupi ikuai va'e kuery reve. Ha'e rami avi ko'ẽ nhavõ tetã mbyte rupi ijayvu ha'e py ikuai va'e reve.

<sup>18</sup> Ha'e gui amongue onhemo'arandu va'e epicureu ha'e estóico regua ijayvu hexeve. Joupe-upe oporandu:

— Mba'e he'i vy tu po rami ijayvu katu rei va'e? Tuuete mboae re teve ijayvu — he'i okuapy, mba'eta Jesus reko omombe'u, onhemboete jevyague guive.

<sup>19</sup> Ha'e rami vy ngupive ogueraa peteñ henda Areópago hery va'e py. Ha'e vy aipoe'i:

— Aŷ ma roikuaaxe mba'e nunga pyau re pa renhombo'ea.

<sup>20</sup> Mba'eta remombe'u va'e ma ore kuery ndoroikuaai teri. Roikuaaxe mba'e 'rea pa ha'e nunga — he'i okuapy.

<sup>21</sup> Mba'eta Atenas pygua kuery ha'e amboae regua ha'e py ikuai va'e voi amboae ramigua re ndoikuaa potai, mba'emo ipyauve va'e re rive ijayvu ha'e ojapyxaka okuapy.

<sup>22</sup> Ha'e ramo Areópago mbyte py Paulo opu'ã vy aipoe'i:

— Atenas pygua avakue, xee aexa rã peẽ kuery pembojerovia etea rupi anho pendekuai.

<sup>23</sup> Mba'eta tetã rupi aaxa avy vy aexa mba'emo pembojerovia va'ety ikuai va'e. Peteĩ aexa avi pembojeroviaaty re ipara oiny "Kova'e ma Nhanderuete jaikuua e'ŷ va'e pegua" he'ia va'e. Ha'e gui peikuaa vy e'ŷ pembojerovia va'e ae xee amombe'u porãve pêvy.

<sup>24</sup> — Mba'eta Nhanderuete yvy ha'e yvy re opa mba'e ikuai va'e moingoare ma yva ha'e yvy re ipo'aka va'e vy oo avakue opo py ojapo va'ekue py noĩ,

<sup>25</sup> neĩ nhande kuery po py nanhaipytyvõi 'rã mba'eve py. Nhandegui mba'eve oipota va'e'ŷ, mba'eta nhande kuery ha'e javive pe ha'e ae ome'ẽ nhanderekoverã, nhanepy-tuẽrã ha'e opa mba'e jareko va'e.

<sup>26</sup> Peteĩ'i gui nhanemoingo raka'e opa marãguia yvy re nhandekuai va'erã. Yma voi oa'anga raka'e pa, ha'e mamo ete pa peteĩ-teĩ regua ikuai aguã,

<sup>27</sup> Nhanderuete jaeka aguã, ha'e jaeka ete vy jajou aguã. Ha'e rami avi nhandegui mombyry e'ŷ oiko,

<sup>28</sup> mba'eta hexe vy jaiko, nhamyĩ ha'e nhandekuai, peẽ kuery regua ijayvu kuaa va'e "Mba'eta ixuguigua meme jaiko", he'ia rami.

<sup>29</sup> Ha'e gui Nhanderuete gui meme jaikoague jaikuua vy jaikuua avi mba'emo ouro guigua rami e'ŷ oikoa, neĩ prata ha'e ita gui avakue o'arandua rupi ha'e oikuua rami ojapo va'ekue rami e'ŷ guive.

<sup>30</sup> — Ha'e gui ymave rupi jaikuua vy e'ŷ mba'emo vai jajapoague re Nhanderuete nanhanembopagai. Ha'e rami teĩ aŷ ma oikuua uka avakue opa rupi ikuai va'e ojeko rerova aguã.

<sup>31</sup> Mba'eta oa'anga ma yvy re ikuai va'e ombopagapa aguã ára. Ha'evea rami 'rã ombopaga uka peteĩ ava omoĩ va'ekue pe. Ha'e va'e ma jaikuua pavẽ aguã omanoague gui omboete ju – he'i.

### *Amongue ojojai rei, ha'e rã amboae kuery ma ogueroviaague*

<sup>32</sup> Omanoague gui Jesus onhemboeteague re Paulo ijayvu rã ha'e kuery oendu vy amongue ojojai rei. Ha'e rã amboae kuery ma

— Amboae ára ma emombe'uve ju pov'a'e nunga roenduve aguã – he'i okuapy.

<sup>33</sup> Ha'e ramo Paulo ojepe'a ha'e kuery mbyte gui.

<sup>34</sup> Ikuai avi amongue avakue oguerovia vy hexe onhemoirũ va'e. Ha'e kuery regua ma Areópago pygua Dionísio, ha'e peteĩ kunha Dâmaris hery va'e. Ha'e va'e kuery reve ikuaiive amboae kuery.

## 18

### *Corinto tetã py Paulo ovaẽague*

<sup>1</sup> Ha'e va'e rire Atenas tetã gui Paulo oẽ vy Corinto katy ju oo.

<sup>2</sup> Ha'e py ma peteĩ judeu Ponto guigua oexa Áqüila hery va'e. Roma tetã gui huvixa Cláudio judeu kuery omoxẽmba ramo Itália gui oẽ vy Corinto py ovaẽ ramo'i va'ekue gua'xy Priscila reve. Ha'e va'e kuery re Paulo onhemboja.\*

<sup>3</sup> Oo'i ipirekue guigua apoa rupi ikuai va'e meme ramo ha'e kuery reve Paulo opyta ombo'eapoa py.

<sup>4</sup> Ha'e gui sábado nhavõ ijayvu oikovy judeu kuery onhembo'eaty py. Judeu ha'e grego kuery pe omombe'u oikovy ayvu.

### *Jesus reko Paulo omombe'uague*

---

\* **18:2** 1 Coríntios 1.1-3; Romanos 16.3,4

<sup>5</sup> Macedônia gui Silas ha'e Timóteo ovaẽ ma ramo Paulo nomba'epovei, ayvu mombe'ua rupi anho oiko. Ha'e rami vy judeu kuery pe omombe'u oikovy Jesus ae Cristo oikoa.\*

<sup>6</sup> Ha'e rami teĩ ha'e kuery ijayvu vaikue reve opu'ãmba ramo Paulo oaoombojaity vy aipoe'i:

— Peneakã re ae toĩ penderuguy pemoẽ ukaague re pepaga aguã.\* Xee ma ha'e nunga py ndaxepo ky'ai. Aÿ gui ma amboae regua kuery pe ju 'rã aa amombe'u – he'i.

<sup>7</sup> Ha'e gui ojepe'a vy peteĩ ava Tício Justo hery va'e ro py ovaẽ, judeu kuery onhembo'eaty yvy'iry oĩ va'ea py. Ha'e va'e ava ma Nhanderuete renonde ojererokyjea rupi oiko.

<sup>8</sup> Ha'e gui onhembo'eaty pygua ruvixa Crispo hery va'e ma Senhor re ojerovia okuapy ngoo pygua kuery ha'e javi reve. Corinto pygua kuery voi ayvu oendu vy heta oguerovia vy onhemongarai uka.

<sup>9</sup> Ha'e gui pyávy Senhor ojexa uka Paulo pe. Ha'e vy aipoe'i:

— Ekyje eme. Ha'e rami 'rãgue py ndeayvuve tema rekyrirĩ e'ÿ re,

<sup>10</sup> mba'eta xee aiko ndereve. Avave rei ndere nopus'ãi 'rã mba'emo vai ojapo aguã, mba'eta kova'e tetã py heta areko xejeupe guarã – he'i.

<sup>11</sup> Ha'e ramo ha'e py ma peteĩ ma'etý ha'e mboapy meme jaxy re oiko. Nhombo'ea rupi oiko Nhanderuete ayvu re.

### *Huvixa Gálio renonde Paulo ojexa ukaague*

<sup>12</sup> Acaia pygua huvixa Gálio oĩ jave py ma judeu kuery peteĩ rami opu'ã okuapy Paulo re. Nhomboayvuaty py ogueraa vy

<sup>13</sup> aipoe'i:

— Kova'e ava ma nhombo'e oikovy lei re oĩa rami e'ÿ Nhanderuete omboetea aguã re – he'i okuapy.

<sup>14</sup> Ha'e ramo Paulo ombovai ta jave huvixa Gálio aipoe'i judeu kuery pe:

— Judeu kuery, mba'emo vai ete, e'ÿ vy jojukaague, mba'emo nda'evei ete va'e re pendeayvu va'e rire ha'eve 'rãgue xee aikuua pota aguã.

<sup>15</sup> Ha'e rã ayvukue, tery ha'e pêvygua lei re ri pendeayvu ta vy peikuua pota peẽ ae ha'e nunga re. Xee ma ha'e nunga re ndaikuua potai 'rã – he'i.

<sup>16</sup> Ha'e rami vy nhomboayvuaty gui omoẽmba ju.

<sup>17</sup> Ha'e ramo ha'e kuery ha'e javi ma judeu kuery onhembo'eaty pygua ruvixa Sóstenes ojopy vy oinupãmba nhomboayvua kuery renonde. Ha'e rami teĩ Gálio ma ha'e nunga re voi ndoikuua potai.

### *Mokoiguea ayvu mombe'u vy ooague gui Paulo ojevyague*

<sup>18</sup> Ha'e py ma Paulo optyave ranhe heta ára. Ha'e va'e rire irmão kuerya gui oo vy Síria katy ju oguata. Ngupive ogueraa Priscila ha'e Áquila. Ha'e rami e'ÿ mbove Cencréia py onhopi uka oakã, mba'emo ojapo aguã re onhemboayvuague ojapopa ma rire.

<sup>19</sup> Ha'e gui ma Éfeso tetã py ovaẽ oirũ kuery oeja aguã py. Ha'e rã ha'e ma judeu kuery onhembo'eaty py oike vy ha'e kuery pe omombe'u ayvu.

<sup>20</sup> Ha'e kuery ojerure optyave aguã ha'e py, teĩ nda'evei.

<sup>21</sup> Ha'e rã ha'e kuerya gui oo ta vy aipoe'i:

— Nhanderuete oipota ramo ajevy ju 'rã peẽ kuerya py – he'i. Ha'e gui kanoã py ojeupi vy oove Éfeso gui.

<sup>22</sup> Cesaréia py ovaẽ vy oguejy vy Jerusalém tetã re oo. Ha'e pygua igreja pe oxarurapa ma vy Antioquia katy ju oguejy ov.

---

\* **18:5** 2 Coríntios 11:9    \* **18:6** ‘Peneakã re ae toĩ penderuguy pemoẽ ukaague re pepaga aguã’ he'ia ma ha'e kuery ae ndojereraa jepe ukaxeí rire opaga aguã re ijayvu vy.

<sup>23</sup> Ha'e py ma oiko are rire oo ju. Galácia ha'e Frígia yvy rupi oaxa vy omombaraeteve ovy temimbo'e kuery ha'e javive.

### *Mboapykuea ayvu mombe'ua rupi Paulo oguata, ha'e Éfeso py Apolo ovaēague*

<sup>24</sup> Ha'e va'e jave py Éfeso py ma peteī judeu ovaē, Alexandria tetā guigua Apolo hery va'e. Ha'e va'e ma ijayvu kuaa, ha'e ipara oikuaapa va'e,

<sup>25</sup> Senhor reko re ombo'e pyre. Ikyre'ŷ vy ijayvu Jesus reko re, ha'evea rami nhombo'e oikovy guive, João nhomongarai jave guare anho oikuaa va'eri.

<sup>26</sup> Ha'e rami ranhe okyjea py e'ŷ ijayvu judeu kuery onhembo'eaty py. Ha'e ijayvu rā Priscila ha'e Áqüila oendu vy ogueraa, ha'e vy ixupe omombe'u porāve Nhanderuete reko.\*

<sup>27</sup> Acaia katy Apolo ooxe ramo irmāo kuery omonhanima, temimbo'e kuery pe ombopara guive omovaē aguā. Ha'e py ovaē ma vy opa mba'e py oipytyvō Nhanderuete omboaxy rā ojerovia va'e kuery,

<sup>28</sup> mba'eta ijayvu kuaa ete vy pavē oendua py ipo'aka judeu kuery re, mba'eta ipara oī va'e gui omombe'u vy oikuaa uka Jesus ae Cristo oikoa.

## 19

### *Éfeso py Paulo ovaēague*

<sup>1</sup> Corinto tetā py Apolo oiko jave Paulo ma yvy rupi oguata vy Éfeso tetā py ovaē. Ha'e py ma amongue temimbo'e kuery ojou vy

<sup>2</sup> oporandu ha'e kuery pe:

— Peē kuery pa pejerovia ramo pendere ou Nhe'ẽ Ky'a E'ŷ?

Ha'e kuery ombovai:

— Any, ore kuery ma noroendui ae Nhe'ẽ Ky'a E'ŷ oiko va'ea — he'i okuapy.

<sup>3</sup> Ha'e ramo Paulo oporandu ju:

— Marā rami ha'vy penhemongarai uka?

Ha'e kuery ombovai:

— João Batista nhomongaraia rami rima — he'i okuapy.

<sup>4</sup> Paulo aipoe'i ha'e kuery pe:

— João ma ojeko rerova va'ekue omongarai vy heta va'e kuery pe ijayvu va'ekue araka'eve rā ou va'erā re ju ojerovia okuapy aguā. Ha'e va'e ma Jesus — he'i.\*

<sup>5</sup> Ha'e nunga ha'e kuery oendu vy onhemongarai ukapa Senhor Jesus rery rupi.

<sup>6</sup> Ha'e kuery áry Paulo opo omoī ramo ha'e kuery re ou Nhe'ẽ Ky'a E'ŷ. Ha'e ramo ayvu mboae py ijayvu, Nhe'ẽ guigua omombe'u guive.

<sup>7</sup> Ha'e javi vy doze avakue ikuai.

### *Tirano nhombo'eaty py Paulo nhombo'eague*

<sup>8</sup> Ha'e gui ma judeu kuery onhembo'eaty py Paulo oo vy nhombo'e. Mboapy jaxy re okyjea py e'ŷ nhombo'e vy omombe'u oikovy Nhanderuete po'akaa.

<sup>9</sup> Ha'e rā amongue ma ndogueroviai ha'e noenduxei vy heta va'e kuery oendua py ijayvu vai okuapy Senhor reko re. Ha'e ramo ha'e kuerya gui Paulo oguerojepe'a temimbo'e kuery. Ha'e gui ma Tirano hery va'e nhombo'eaty py ju ombo'e oikovy ko'ẽ nhavō.

<sup>10</sup> Mokoī ma'etŷ re nhombo'ea rami oiko ramo Ásia pygua kuery ha'e javi oendu Senhor ayvu, judeu ha'e grego kuery voi.

<sup>11</sup> Paulo po py Nhanderuete mba'emo porā ete ojapo oikovy opo'akaa rupi.

<sup>12</sup> Panhero ha'e avental Paulo oiporu va'ety ma imba'eaxy va'e ikuia rupi heraa ramo okuerapa 'rā imba'eaxygui, nhe'ẽ vai ikuai va'ekue voi ojepe'apa 'rā.

\* **18:26** Efésios 1.1,2; 1 Coríntios 3.6-9   \* **19:4** Lucas 3.15,16

<sup>13</sup> Ha'e gui amongue judeu kuery nhe'ẽ vai pe'aa rupi ikuai va'e ma onhea'anga Senhor Jesus rery rupi nhe'ẽ vai oipe'a aguã. Ha'e vy aipoe'i:

— Xee aipoa'e pejepe'a aguã Jesus rery Paulo omombe'u va'e rupi — he'i.

<sup>14</sup> Ha'e rami ojapo va'e ma peteĩ judeu sacerdote yvateve va'e Ceva hery va'e ra'y kuery, ha'e javi vy sete ikuai.

<sup>15</sup> Ha'e rami rã ha'e kuery pe nhe'ẽ vai ombovai:

— Jesus ma xee aikuua, Paulo guive. Ha'vy peẽ, mava'e tu peẽ? — he'i.

<sup>16</sup> Ha'e rami vy ha'e kuery re nhe'ẽ vai onhemondea va'e opo vy ipo'aka ha'e kuery ha'e javive re. Opa marã oguereko axy ramo ipire rei ha'e ijipa rei reve onhamba oo oĩa gui.

<sup>17</sup> Ha'e nungakue Éfeso py ikuai va'e oendupa, judeu ha'e grego kuery. Ha'e rami vy ha'e javive ojererokyje vy omboete okuapy Senhor Jesus rery.

<sup>18</sup> Oguerovia va'e kuery heta ou vy onhemombe'u. Mba'emo vai ojapoague omombe'upa.

<sup>19</sup> Heta avi onhembo'e vaikue va'ekue okuaxia oguerupa vy oapypa pavẽ renonde. Kuaxia para repykue re oikuua pota vy cinqüenta mil ára repy oikuua.

<sup>20</sup> Ha'e rami vy Senhor ayvu oenduave ha'e ipo'akave ov.

### *Macedônia katy Paulo oirũ kuery omondoukaague*

<sup>21</sup> Ha'e nunga ha'e javi oiko rire Paulo onhembopy'a Macedônia ha'e Acaia rupi oaxa ma vy Jerusalém katy oo aguã. Mba'eta aipoe'i:

— Ha'e py aiko rire aexaxe avi Roma tetã pygua kuery — he'i.\*

<sup>22</sup> Mokoĩ opytyvõaty Timóteo ha'e Erasto omondouka Macedônia katy. Ha'e rã ha'e ma Ásia py ranhe opytave.

### *Demétrio nhomopu'ãmba reiague*

<sup>23</sup> Ha'e va'e jave py heta opu'ã okuapy Senhor reko rami ikuai va'e re.

<sup>24</sup> Mba'eta peteĩ ava oiko ouro re ombo'eapo va'ety Demétrio hery va'e, prata gui xyete ramigua Diana ra'angaa ojapo va'e. Ha'e nunga repykue gui hexeve ombo'eapo va'e kuery oguerekopa.

<sup>25</sup> Ha'e gui guexeve ombo'eapo va'e kuery omboatypa vy aipoe'i ha'e kuery pe:

— Avakue, peikuua kova'e nunga gui jajoupaa.

<sup>26</sup> Pendu ha'e pexaa rami Éfeso tetã py ha'e Ásia yvy ha'e javi rupi rai'i Paulo nhombo'e vy heta ojapo mba'emo ra'angaa nomboetevei aguã rami, mba'eta ijayvu avakue opo py ta'angaa ojapo va'ekue tuuete e'ŷ oikoa rami.

<sup>27</sup> Ha'e nunga rupi nhanerembiapo re ndojeroviaavei. Ha'e rami anho e'ŷ, nhandexyete Diana ipo'akapa va'e pegua templo eteve voi nomboetevei. Ha'e rami vy ombovaipa 'rã Ásia ha'e yvy jave re ikuai va'e omboete va'e yvatea — he'i.

<sup>28</sup> Ha'e nunga ha'e kuery oendu vy ipoxypa, ha'e vy ojapuka-pukai:

— Éfeso pygua xyete Diana ma yvate ete — he'i okuapy.

<sup>29</sup> Tetã ha'e javi rupi opa marã ojapura okuapy vy ono'õaty oĩ va'e katy oje'oi pavẽ. Ngupive ogueraa Paulo irũ kuery Gaio ha'e Aristarco, Macedônia gui ou va'ekue.

<sup>30</sup> Paulo voi heta va'e kuery pe ojexa ukaxe teĩ temimbo'e kuery nomondoukai.

<sup>31</sup> Ásia pygua huvixa kuery Paulo irũ ikuai vy ixupe ojerure uka avi ono'õaty py oo e'ŷ aguã.

<sup>32</sup> Ono'õ va'e regua amongue ojapukai peteĩ rami, ha'e rã amboae kuery ma amboae rami ojapukai. Joo rami e'ŷ-e'ŷ ijaty va'e ikuai. Heta va'e kuery neĩ mba'erã pa ono'õmba okuanya ma ndoikuuai.

<sup>33</sup> Ha'e ramo teta mbyte gui judeu kuery ogueru Alexandre, ha'e vy pavẽ renonde katy omoanha. Ha'e va'e ma ojapo opo py heta va'e kuery pe ijayvuxea rami.

\* <sup>19:21</sup> Romanos 1.13-15; 15.22-29

<sup>34</sup> Ha'e rami teñ judeu oiko ra'ea ha'e kuery oikuaa vy peteñ rami ojapukai okuapy mokoñ hora re rãnda'u:

— Éfeso pygua xyete Diana ma yvate ete — he'i okuapy.

<sup>35</sup> Ha'e va'e tetã py oiko kuaxia mboparaaty. Ha'e va'e ma opu'ã vy omokyrirñ heta va'e kuery. Ha'e vy aipoe'i:

— Avakue Éfeso pygua, pavẽ oikuaa ae ma Diana ipo'akapa va'e ra'angaa pegua templo re nhande Éfeso tetã pygua kuery nhapena va'ea, ha'e Júpiter-a gui ta'angaa ho'a va'ekue re guive.

<sup>36</sup> Ha'e nunga avave rei amboae rami ndoikuuai 'rã. Ha'e nunga rupi pekyrirñ 'rãgue, mba'eve pejapo eme peikuua pota porã e'ý re.

<sup>37</sup> Mba'eta peva'e avakue apy peru va'ekue ma templo mbovaipaa rupi e'ý ikuai, neñ nhandexyete re voi nda'ijayvu vai guive.

<sup>38</sup> Xapy'a rei Demétrio ha'e hexeve omiba'eapo va'e kuery ri amongue re ijayvu aguã oguereko ramo oa'angaa ae ma huvixa nhomboayvua kuery oikuaa pota aguã ára, joe pendeayvu aguã.

<sup>39</sup> Ha'e rã amboae ramigua re ri peikuua potaxe ramo ma nhanhomboaty aguã ára oa'anga pyre py 'rã jaikuua pota.

<sup>40</sup> Mba'eta nhandevy pe voi nda'evei ange oiko va'ekue re ijayvua gui, nhapu'ãmba reiague rami omombe'ua rã. Mba'eta ha'e rami rã peteñ henda py ma voi nanhamombe'u porã kuaai 'rã mba'erã pa nhanhomboatyague — he'i. Ha'e rami ijayvu ma vy ijaty va'ekue omondoukapa ju.

## 20

### *Teñgue ju Macedônia ha'e Grécia rupi Paulo oguataague*

<sup>1</sup> Ha'e kuery opa marã ikuiaia gui optyu'upa ma ramo Paulo oenoñ uka temimbo'e kuery. Omombaraetea rupi ijayvu ma vy oipopyypa, ha'e gui oo Macedônia katy.

<sup>2</sup> Tekoa ikuai va'e rupi oaxa vy nhomongeta ha'e nhomombaraete ovu. Ha'e gui Grécia katy ju oo.

<sup>3</sup> Ha'e py ma mboapy jaxy re oiko. Síria katy oo ta oikovy vy oendu judeu kuery hexe opu'ãmbaxeia. Ha'e rami vy Macedônia rupi ju ojevy.

<sup>4</sup> [Ásia pevel] omoirñ va'e kuery ma povae: Beréia pygua Pirro ra'y Sópatro, Aristarco, Tessalônica pygua Secundo, Derbe pygua Gaio, ha'e gui Timóteo, Tíquico ha'e Ásia pygua Trófimo.

<sup>5</sup> Ha'e va'e kuery ma orerenonde oje'oi, Trôade tetã py orerarõ aguã.

<sup>6</sup> Ha'e gui ngaru mbojape imbovua reveguia e'ýa ára oaxa ma rire Filipos gui roo yy rupi. Ha'e gui peteñ nhiruñ araa py ma Trôade py rovaë ha'e kuery ikuiaia py. Ha'e py ma peteñ semana ropyta.

### *Trôade py Paulo nhombo'eague*

<sup>7</sup> Semana ijypyá ára py mbojape roipe'ã-pe'ã'i aguã ronhomboaty rã Paulo nhomongeta. Ko'ë jevy oove ta vy pytû mbyte peve ijayvu.

<sup>8</sup> Opy ronhomboatya py heta oñ tataendy.

<sup>9</sup> Ha'e py peteñ kunumi oñ Êutico hery va'e janela py oguapy oinya py. Ha'e va'e ma Paulo nda'ijayvupai ete ramo oke. Oke ete vy janela yvateve va'e gui ho'a yvy py. Ha'e gui he'ögue ojopya.

<sup>10</sup> Ha'e ramo Paulo oguejy vy ojero'a hi'áry. Oikuavã vy aipoe'i:

— Penhemondyi eme, hekove oime teri — he'i.

<sup>11</sup> Ojeupi ju vy oipe'ã mbojape, ha'e ho'u. Nhomongetave ju ko'ëmba peve. Ha'e gui mae ma oo.

<sup>12</sup> Ha'e rã kunumi va'e okuera jevy rã pavẽ oexa vy oguerovy'a ete okuapy. Ha'e vy ogueraa ju okuapy oikove va'e.

### *Assôs gui Paulo oo vy Mileto py ovaẽague*

<sup>13</sup> Ore roove vy kanoã py roõ, ha'e Assôs katy roo. Ha'e py roarõ Paulo yvy rupi ooa ja, ha'e rami aguã orevy ijayvu rire.

<sup>14</sup> Assôs py orea py ju ovaẽ ma ramo orereve oĩ avi kanoã py, ha'e vy Mitilene katy ju roo.

<sup>15</sup> Ha'e gui roove vy ko'ẽ jevy roaxa Quios ypa'ũ katy'i rupi. Are'ŷ'i re rovaẽ Samos py, ha'e ko'ẽ jevy Mileto py ju rovaẽ.

<sup>16</sup> Mba'eta Paulo ijayvu ma voi Ásia yvy re ndopyta arexei vy Éfeso tetã py ovaẽ e'ŷ aguã re, mba'eta ojapura Pentecostes ára Jerusalém py oiko aguã, ha'eve ramo.

### *Mileto py Éfeso pygua igreja re opena va'e kuery omongoetaague*

<sup>17</sup> Mileto tetã gui Paulo oenoĩ uka Éfeso pygua igreja re opena va'e kuery.

<sup>18</sup> Oĩa py ovaẽmba ma ramo aipoe'i ha'e kuery pe:

— Peẽ peikuua porã marã rami pa peẽ kuery reve aikoague Ásia py avaẽ ypya ára guive.

<sup>19</sup> Mba'eta anhemboyvatevea rupi e'ŷ Senhor pe ete aiko xerexay ha'e aiko axya py, mba'eta judeu kuery xerekoo a'ã vy xemoingo axy ramo.

<sup>20</sup> Ha'e rami teĩ xee ndajep'e ai romombaraetea rupi xeayvua gui. Ha'e nunga re rombo'e aikovy pavẽ oendua rupi, ha'e peteĩ-teĩ ro rupi guive.

<sup>21</sup> Judeu ha'e grego kuery pe amombe'u aikovy Nhanderuete re ojeko rerova vy nhande-Senhor Jesus [Cristo] re ojerovia aguã.

<sup>22</sup> — Aŷ ma xepy'a re aendu Jerusalém katy aaxeaa, ha'e py xere oiko va'erã ndaikuuai teĩ.

<sup>23</sup> Mba'eta tetã nhavõ rupi xee aa rupi Nhe'ẽ Ky'a E'ŷ oikuua uka nhuã py xembotya ha'e xemoingo axya 'rãa.

<sup>24</sup> Ha'e rami teĩ mba'eve py xee naendui ajeayvua, ajapo 'rã va'ekue ajapopaxea anho. Ha'e va'e ma xerembiaporã Senhor Jesus gui ae ajopy va'ekue, Nhanderuete nhanemboaxya regua ayvu porã amombe'u aguã.

<sup>25</sup> — Peẽ kuery mbyte Nhanderuete po'akaa re rombo'e aikovy rire teĩ aŷ ma aikuua xerova ndapexavei ma 'rãa.

<sup>26</sup> Ha'e nunga rupi kova'e ára xee anhemombe'u porã pêvy: Xee ndaxepo ky'ai peẽ mava'eve ruguy py,

<sup>27</sup> mba'eta peteĩgueve ndajepe'ai Nhanderuete oipota va'e ha'e javi amombe'ua gui.

<sup>28</sup> Pepena pendejee ae ha'e vexa'i kuery ha'e javi re, ha'e va'e kuery re opena va'erã Nhe'ẽ Ky'a E'ŷ penemoĩ rire. Ha'e va'e ma Nhanderuete pegua igreja kuery nguguy py ae ojogua va'ekue.\*

<sup>29</sup> Xee aikuua rã aa ma rire penembyte oiko 'rã guary kuery nhomondoropaarã, vexa'i kuery omboaxya rupi e'ŷ.

<sup>30</sup> Peẽ kuery regua voi opu'ã 'rã avakue ha'eve e'ŷa rami nhombo'e va'e, ojee ae temimbo'e kuery oguerova aguã.

<sup>31</sup> Ha'e nunga rupi peikuua pota. Penema'endu'a mboapy ma'etŷ re xeayvu aikovyague re. Ara py ha'e pyávy ndapytu'ui xerexay reve peteĩ-teĩ romongetaa gui.

<sup>32</sup> — Ha'e gui aŷ ma Senhor po py romboaxa, ayvu nhanemboaxya regua rupi vy penembaraete aguã, mba'eta ijayvu ma ipo'aka penemombaraete vy pendevy guarã ome'ẽ aguã iky'a e'ŷ va'e kuery ha'e javi reve.

<sup>33</sup> Xee ma napenai va'ekue avave mba'e prata, ouro, neĩ ao re.

<sup>34</sup> Peẽ voi peikuua xepo py ae ajouague xee ha'e xereveguia kuery roipota va'e.

---

\* **20:28** João 21.15-17; 1 Pedro 5.1-4

<sup>35</sup> Opa mba'e py pëvy aexa uka nhamba'apo vy iporiaukue'i nhaipytyvõ aguã. Penema'endu'a Senhor Jesus ae aipoe'iague re: "Joupe mba'emo nhamer'ẽ vy javy'ave 'rã jajopya gui", he'iague re.

### *Ha'e kuery reve Paulo onhembo'eague*

<sup>36</sup> Ha'e rami Paulo ijayvupa ma vy guenapy'ã re oĩ, ha'e onhembo'e oiny ha'e kuery ha'e javi reve.

<sup>37</sup> Ha'e ramo ojae'o pavẽ. Oikuavã vy oayvupa.

<sup>38</sup> Ndovy'avei okuapy, "Xerova ndapexavei 'rã", he'i rire. Ha'e vy omoirũ heravy kanoã ituia py peve.

## 21

### *Tiro tetã py Paulo ova ague*

<sup>1</sup> Ha'e kuerya gui rojepe'a rire kanoã ajukue regua py roo. Roje'oi yvi vy C s py rova . Ko' e jevy Rodes py, ha'e gui ma P tara py ju rova .

<sup>2</sup> Pete i kano  Fen cia katy oo va'e rojou vy ha'e va'e py ju ro . Ha'e vy roove.

<sup>3</sup> Chipre ypa'  oreaxua regua ojekuaa maa gui roeja vy S ria yvy katy ju roo. Ha'e gui ma Tiro tet  py rova , mba'eta ha'e py mba'emo omboguejya 'rã kano  gui.

<sup>4</sup> Ha'e py temimbo'e kuery rojou vy sete  ra ropyta ha'e py. Ha'e va'e kuery ma Nhe' e gui oikuua vy Paulo pe ijayvu Jerusal m katy oo e' y agu .

<sup>5</sup> Ha'e rami te i are' i re rojepe'a vy roove ju. Ha'e kuery ha'e javive oremoir  imondovy gua'yxy ha'e gua'y kuery reve. Tet  rovai roo vy ita ku'i reia py orerenapy'  re ro  vy ronhembo'e rokuapy ha'e py.

<sup>6</sup> Ha'e gui pete i-te i rojopopyy ma vy ro  ju kano  py. Ha'e r  ha'e kuery ma ngoo katy ju ojevypa.

### *Cesar ia py Paulo ova ague*

<sup>7</sup> Ha'e gui Tiro tet  gui roove vy Ptolemaida py rova . Ha'e py ma roxarura irm o kuery ikuai va'e pe. Pete i  ra orekuai ha'e kuery reve.

<sup>8</sup> Ko' e jevy rojepe'a vy Cesar ia katy roo. Ha'e py ma Filipe ro py rova  vy ropyta hexeve. Ha'e va'e ma ayvu por  mombe'uar  sete omo  mbyre regua.

<sup>9</sup> Ha'e ma irundy guajy omenda e' y va'e oguereko, profeta meme ikuai.

<sup>10</sup> Ha'e py orekuai are ma rire Jud ia gui ou pete i profeta  gabo hery va'e.

<sup>11</sup> Ha'e va'e ma orea py ova  vy ojora Paulo ku'akuaa. Ha'e va'e py ma opy ha'e opo ojokua reve aipoe'i:

— Po rami Nhe' e Ky'a E' y oikuua uka: Nami judeu kuery Jerusal m pygua ojapo 'r  kova'e ku'akuaa ja re, mba'eta omboaxa 'r  judeu e' y va'e kuery po py — he'i.

<sup>12</sup> Ha'e va'e ayvu roendu vy ha'e py ikuai va'e ha'e javi reve Paulo pe rojerure rokuapy Jerusal m katy oo ve' y agu .

<sup>13</sup> Ha'e ramo ombovai:

— Mba'e tu pejapo pejae'o ha'e xemokangy vy? Mba'eta xevy pe ma ha'evepa rei Senhor Jesus rery k uxa Jerusal m tet  py nhu  py aa ha'e amano agu  voi — he'i.

<sup>14</sup> Ha'e rami r  ndorojokoi vy ropytu'u, ha'e vy

— Tove toiko Senhor oipota va'e — ro'e.

<sup>15</sup> Ha'e va'e rire roiko katupa ma vy Jerusal m katy roje'oi.

<sup>16</sup> Temimbo'e kuery Cesar ia gui ou va'ekue regua oo avi orerupive. Ha'e va'e kuery ma pete i temimbo'e yma ogueraa avi Chipre py itui'i va'ekue Mnasom hery va'e, mba'eta ha'e va'e ma ngoo py oremova  va'er .

### *Jerusal m py Paulo ova ague*

<sup>17</sup> Jerusal m py rova  ma ramo irm o kuery ov'y a reve oremova .

18 Ko'ẽ jevy orereve Tiago-a py Paulo oo oexa aguã. Igreja re opena va'e kuery ha'e javi ijaty ra'e.

19 Ha'e ramo Paulo oxarurapa ma vy omombe'u judeu e'ŷ va'e ikuai rupi omba'eapo rã mba'emo Nhanderuete ojapoague ha'e javi.

20 Ha'e nunga ha'e kuery oendu vy oguerovy'a okuapy Nhanderuete. Ha'e gui ma Paulo pe aipoe'i:

— Ha'e rami avi irmão, apy rexâa nhi'ã heta ikuai judeu kuery regua ojerovia va'e. Ha'e va'e kuery ha'e javi ma lei re oĩa rami anho ikuai.

21 Ha'e kuery pe ma omombe'ua ma nderekô ramigua. Ha'e vy aipo'ea: "Amboae regua ikuai rupi Paulo ombo'e judeu kuery Moisés ojapo uka va'ekue gui ojepe'a aguã re, gua'y kuery pire omboi e'ŷ, neĩ lei re oĩa rami ve'ŷ ikuai aguã", 'ea nderekô ramigua rive omombe'u vy.

22 Ha'e rami rã mba'exâa 'rã tu jajapo? Mba'eta ndee revaẽague oikuaa pavẽ 'rã.

23 Ha'e nunga rupi ejapo oreayvu taa. Apy ore kuery regua ikuai irundy avakue onhemboayvuague ojapo aguã rami ikuai va'e.

24 Ha'e va'e kuery reve tereo, ha'e ndee voi ejeky'a'o uka ha'e kuery reve, ha'e eme'ẽ ha'e kuery oakã onhopi uka aguã regua. Ha'e ramo 'rãe oikuaa pavẽ nderekô re ijayvuague anhetê e'ŷa, ha'e ndee voi lei re oĩa rami reiko avia.

25 Ha'e rã judeu e'ŷ va'e regua ojerovia va'e pe ma oreayvu romondouka ae ma, ha'e kuery ho'u e'ŷ aguã mba'emo ra'angaa pe ojuka pyre, huguykue, neĩ mymba ojyryvipy pyre ro'okue, ha'e gui itavy rei e'ŷ aguã — he'i.

26 Ha'e ramo Paulo ma ko'ẽ jevy avakue ogueraa vy ha'e kuery reve ejeky'a'o uka. Ha'e vy templo py oike vy omombe'u ejeky'a'oa ára raka'e pa opa 'rãa, ha'e peteĩ-teĩ rekoria mymba ome'ẽ aguã.\*

### *Paulo ojopy okuapyague*

27 Sete araa opa ta ma jave judeu kuery Ásia gui ou va'ekue regua ma Paulo templo py oĩ rã oexa vy ombopoxy heta va'e kuery ha'e javi. Ha'e rami vy ojopy vy

28 ojapukai:

— Avakue Israel regua, oreptyvõ ke! Kova'e ava ma opa rupi nhombo'e oikovy nhande kuery rovai guarã, lei ha'e kova'e oo rovai guive. Aŷ katuve ma grego kuery ogueroike kuri templo py. Ha'e rami py omongy'apa kova'e oo iky'a e'ŷ va'ekue — he'i okuapy.

29 Ha'e rami ijayvu mba'eta oexa va'ekue Éfeso pygua Trófimo hexeve tetã py oĩ rã. Ha'e rami vy oexa'ã teĩ Paulo templo py ogueroikea re.

30 Ha'e ramo tetã ha'e javi rupi heta va'e kuery opu'ãmba vy onhamba jogueruvy. Ha'e vy Paulo ojopy vy ombotyryry heravy templo ropy gui. Ha'e ramove ombotypa vyvoi okê.

31 Ha'e kuery ojukaxe ete ramo xondaro ruvixa pe omombe'ua Jerusalém pygua kuery opu'ãmba okuapya.

32 Ha'e ramo ha'e va'e ogueru vyvoi xondaro kuery, huvixa yvyïve va'e reve. Onhamba jogueruvy heta va'e kuery mbyte katy. Ha'e ramo huvixa ha'e xondaro kuery ovaẽ rã heta va'e kuery oexa vy optyu'upa Paulo oinupãa gui.

33 Xondaro ruvixa ovaẽ vy ojopy Paulo, ha'e mokoĩ corrente py ojokua uka. Ha'e vy oporandu mava'e paa, ha'e mba'e pa ojapoague re.

34 Heta va'e kuery regua amongue ojapukai peteĩ rami, ha'e rã amboae kuery ma amboae rami ojapukai. Joo rami e'ŷ-e'ŷ ojapukai rã anhetêa huvixa ndokuuai vy xondaro kuery okeaty katy ju ogueraa uka Paulo.

35 Tape pyrõ-pyrõ'a'i py ovaẽ vy xondaro kuery oupi heravy, heta va'e kuery jo'a rei ramo.

\* **21:26** Ha'e rami Paulo ojapo judeu kuery reko rami vy, pavẽ oikuaa aguã hekokue ramigua omombe'ua va'e anhetê e'ŷa (versículo 24), amongue ayvu porã oguerovia vy oo jepe aguã (1 Coríntios 9.19-22, 10.32,33).

<sup>36</sup> Mba'eta heta va'e kuery hakyue katy gui ou vy ojapukai:

— Pejuka — he'i okuapy.

<sup>37</sup> Ha'e gui Paulo ogueroike ta ma jave aipoe'i huvixa pe:

— Ha'eve pa ndereve xeayvu aguã mba'emo re?

Ombovai:

— Ndee ri ty'y grego ayvu py ndeayvu kuaa va'e?

<sup>38</sup> Ndee e'ÿ teve Egito pygua yma renhomopu'ãmba va'ekue, ha'e tekoa e'ÿa katy quattro mil porojukaa reraa va'ekue? — he'i.

<sup>39</sup> Ha'e ramo Paulo ombovai:

— Xee ma judeu regua, Tarso tetã omboetevepy va'e pygua aiko Cilícia yvy re. Ha'e gui ndevy pe ajerure heta va'e kuery pe xeayvu aguã — he'i.

<sup>40</sup> — Ha'eve — he'i ma ramo Paulo opu'ã ho'amy tape pyrõ-pyrõ'a'i py. Opo py ojapo heta va'e kuery pe okyrirĩ aguã. Ha'e kuery okyrirĩmba rã hebraico ayvu py ijayvu vy aipoe'i:

## 22

### *Paulo guekokue omombe'uague*

<sup>1</sup> — Ke'y kuery ha'e xeryvy kuery, pendu ke aÿ xerekokue amombe'u rã — he'i.

<sup>2</sup> Ha'e ramo hebraico ayvu py ijayvu rã ha'e kuery oendu vy okyrirĩ ete okuapy. Ha'e rã ijayvuve tema:

<sup>3</sup> — Xee ma judeu, Cilícia regua Tarso tetã py xetui'i va'ekue. Ha'e gui kova'e tetã py ju xetuja. Apy Gamaliel remimbo'e aiko vy lei nhaneramoï kuery reko oña rami ete anhembo'e va'ekue. Nhanderuete pe aiko aguã re anho anhea'ã aikovy, aÿ peẽ kuery pendekuaia rami avi.

<sup>4</sup> Amoingo axy va'ekue Senhor reko rupi ikuai va'e, ajuka guive. Ajopy vy nhuã py amboty va'ekue, avakue ha'e kunhague.\*

<sup>5</sup> Ha'e nungakue sacerdote yvateve va'e ha'e nhomongeta va'ety ha'e javi oikuua anhetẽa, mba'eta ha'e kuery gui ae kuaxia para araa karamboae nhanderyke'y kuery peguarã. Ha'e rami vy Damasco tetã katy ju aa, ha'e py ikuai va'e voi aipokuapa reve Jerusalém py aru aguã omoingo axya aguã.\*

<sup>6</sup> — Ha'e gui ma tape rupi aa ainy jave, Damasco py avaẽ rai'i avya py, kuaray mbyte rai'i jave, peteĩ hendy hatã va'e yva gui hexakã xapy'a xeyvýry rupi.

<sup>7</sup> Ha'e ramo ha'a yvy rupi. Ha'e gui peteĩ ayvu aendu xevy aipoe'i va'e: “Saulo, Saulo, mba'e re tu xerereko axyxé ri?”

<sup>8</sup> — Xee aporandu: “Mava'e tu ndee, Senhor?”

“Xee ma Jesus Nazaré pygua, ndee rerekoo axy rei va'e”, he'i xevy.

<sup>9</sup> Xerevegua kuery ma hendy va'e oexa teĩ noendu kuaai xevy ijayvu va'e ayvu.

<sup>10</sup> — Ha'e ramo xee aporandu: “Mba'e 'rã tu ajapo, Senhor?”

Ombovai: “Epu'ã ke, evaẽ Damasco py, mba'eta ha'e py ma omombe'ua 'rã ndevy ajapo uka va'e ha'e javi”, he'i.

<sup>11</sup> Ha'e va'e hendy va'e rexakã gui ndaexavei rã xerupive ikuai va'e xejyva re xereraa ramo avaẽ Damasco py.

<sup>12</sup> — Ha'e py oiko peteĩ ava Ananias hery va'e. Nhanderuete pe oiko lei re oña rami, ha'e ha'e pygua judeu kuery ha'e javi ima'endu'a porãa va'e.

<sup>13</sup> Ha'e va'e ma ou xereka. Xeyvýry ovaẽ ma vy aipoe'i: “Irmão Saulo, exa ju ke”, he'i. Ha'e ramove aexa jevy vy ama'ẽ hexe.

<sup>14</sup> — Ha'e ramo aipoe'ive ju: “Nhaneramoï kuery Ruete yma voi ndeporavo ha'e oipota va'e reikuua aguã, Heko porã ete va'e rexo aguã, ha'e ayvu ijuru guigua ae rendu aguã.

<sup>15</sup> Mba'eta ixupe reiko vy ha'e javi regua renonde remombe'u 'rã rexo ha'e rendu va'ekue.

\* <sup>22:4</sup> Atos 8.3 \* <sup>22:5</sup> Atos 9.1-19

**16** Ha'e vy aŷ mba'e re tu remboare ta? Epu'ã ke, enhemongarai uka, ha'e ejeky'a'o uka rejeyavyague gui, hery rupi rejapukai vy", he'i.

**17** — Ha'e gui ma Jerusalém katy ajevy ma rire templo py anhembo'e ainy jave aexa xapy'a karamboae peteĩ ojexa uka va'e.

**18** Ha'e rami vy aexa xereve aipoe'i va'e: "Ndepojava ke, tereo voi Jerusalém gui, mba'eta ha'e kuery noenduxei 'rã xerekó re ndeayvua", he'i.

**19** — Xee aipoa'e: "Ha'e rami teĩ Senhor, judeu kuery oikuua porã xee nhuã py amboty va'ekuea ndere ojerovia va'e kuery, ha'e ha'e kuery onhembo'eaty ikuai va'e rupi voi ainupãmbaague.

**20** Ha'e gui xee voi aĩ karamboae ndeayvu mombe'ua Estêvão ruguy moẽa kuery reve. Ha'e nunga ajou porã vy ijukaa kuery ao aarõ va'ekue", ha'e.

**21** — Ha'e rami teĩ aipoe'i xevy: "Tereo, mba'eta xee romondouka 'rã mombyry, judeu e'ŷ va'e ikuiaia rupi", he'i.

### *Roma pygua regua Paulo oiko ramo noinupãaiague*

**22** Pova'e ayvu omombe'u peve'i ha'e kuery ojapyxaka. Ha'e gui ma ojapukai vy aipoe'i okuapay:

— Peipe'a peva'e ava ko yvy gui, nda'evei oikove aguã — he'i okuapy.

**23** Ha'e kuery ojapukai reve ojegui capa omboipa, ha'e yvy ku'i omombo-mombo yvate katy.

**24** Ha'e ramo xondaro ruvixa aipoe'i Paulo ogueroikea aguã xondaro kuery okeaty py, ha'e oinupã reve omboayvu aguã, mba'e re pa hexe ijayvu okuapy oikuua aguã.

**25** Ha'e gui ma ipire ra'ykue py ojokuaa rã Paulo aipoe'i huvixa yvyive va'e pe:

— Ha'evea rami ri ty'y peinupã Roma pygua regua peikuaa pota porã e'ŷ re? — he'i.

**26** Ha'e nunga huvixa oendu vy xondaro ruvixa yvateve va'ea py ju oo. Ha'e vy aipoe'i ixupe:

— Mba'e tu rejapo ta? Mba'eta peva'e ava ma je Roma pygua regua — he'i.

**27** Ha'e rami rã xondaro ruvixa ou vy oporandu Paulo pe:

— Emombe'u xevy, ndee ma nhi'ã Roma pygua regua?

Ombovai:

— Xee ha'e aiko — he'i.

**28** Huvixa aipoe'i ixupe:

— Xee ma heta peráta apaga karamboae Roma pygua regua anhemoingo uka aguã.

Paulo ombovai:

— Ha'e rã xee ma ha'e pygua regua ae aiko — he'i.

**29** Ha'e ramove inupãarã ikuai va'ekue ojepe'apa. Huvixa eteve voi okyje Roma pygua regua ojokua uka rire.\*

**30** Ko'ẽ jevy mba'e re pa judeu kuery hexe ijayvu rei okuapyague huvixa oikuua porãvexe vy ojora uka. Ha'e gui omboaty ukapa sacerdote yvatekueve va'e ha'e nhomongeta va'ety kuery. Paulo ogueru ruka vy oexa uka ha'e kuery renonde.

## 23

### *Nhomongeta va'ety kuery renonde Paulo ojexa ukaague*

**1** Ha'e gui nhomongeta va'ety kuery re Paulo oma'ẽ vy aipoe'i:

— Ke'y kuery, xee ma Nhanderuete renonde xepy'a ky'a e'ŷa rupi aiko opa mba'e py, aŷ peve — he'i.

**2** Ha'e ramo sacerdote yvateve va'e Ananias ma ijyvýry ikuai va'e pe oipete uka ijuru rupi.

**3** Ha'e ramo Paulo aipoe'i ixupe:

— Nhanderuete nenupã avi 'rã, oo mbotya omoxiñ mbyre rami rive reiko va'e.\* Ndee

\* **22:29** Atos 16.35-39 \* **23:3** Mateus 23.27,28

ma upé py reguapy reiny lei re oĩ rami xemboayvu aguã, teĩ lei re oĩ rami e'ŷ ri ty'y xepete uka?

<sup>4</sup> Ha'e ramo ijyvýry ikuai va'e aipoe'i:

— Ndeayvu vai ri ty'y sacerdote yvateve va'e Nhanderuete omoĩ va'ekue re?

<sup>5</sup> Paulo ombovai:

— Ke'y kuery, xee ndaikuaai kuri sacerdote yvateve va'e oikoa. Mba'eta ipara oiny: "Pendeayvu vai eme heta va'e kuery ruvixa re" — he'i.\*

<sup>6</sup> Ha'e gui ma Paulo oikuaa nhomongeta va'ety kuery regua amongue saduceu, ha'e rã amboae ma fariseu regua ikuia. Ha'e rami vy ojapukai:

— Ke'y kuery, xee ma fariseu regua, ha'e fariseu ra'y aiko. Omano va'ekue omboetepa jevy rã guarã aarõ aikovy ramo ae xemboayvua — he'i.

<sup>7</sup> Ha'e rami ijayvu ramo fariseu ha'e saduceu kuery joo rami e'ŷ-e'ŷ ijayvu. Mba'eta ijaty va'e kuery ma joo rami e'ŷ-e'ŷ oikuaa.

<sup>8</sup> Mba'eta saduceu kuery ma oikuaa nonhemboete jevyavei 'rãa rami. Neĩ anjo, neĩ nhe'ẽ oikoa ha'e kuery ndogueroviai.\* Ha'e rã fariseu kuery ma ha'e nunga ha'e javi oikoa oguerovia.

<sup>9</sup> Ha'e rami py joo rami e'ŷ-e'ŷ ijayvu. Ha'e gui lei re nhombo'e va'ety fariseu regua opu'ã vy ijayvu atã:

— Ore ma mba'eve ndoroikuaai kova'e ava ojapo vaiague. Xapy'a rei nhe'ẽ e'ŷ vy anjo ri ty'y ixupe oikuaa uka ha'e nunga — he'i okuapy.

<sup>10</sup> Ha'e kuery joguero'apa ramo huvixa okyje Paulo omopẽmba gui. Ha'e vy aipoe'i uka xondaro kuery ou vy oipe'a ha'e gui, okeaty py ju ogueraa aguã.

### *Paulo pe Senhor ojexá ukaague*

<sup>11</sup> Pytũ jevy Paulo yvýry Senhor ojekuaa ho'amy. Ha'e vy aipoe'i:

— Ndepy'a guaxu ke, mba'eta Jerusalém py xerekó remombe'uague rami avi Roma tetã py ju 'rã remombe'u.

### *Paulo ojuka aguã re judeu kuery jogueroayvuague*

<sup>12</sup> Ko'ẽmba rã judeu kuery nhomboaty vy oura okuapy Paulo ojuka e'ŷa ja ndokarui neĩ ndoy'ui aguã re, ayvu vaipy ikuai e'ŷ aguã.

<sup>13</sup> Ha'e rami aguã re jogueroayvu va'e ma quarenta raxa'i ikuai.

<sup>14</sup> Jogueroayvu va'e kuery ma sacerdote yvatekueve va'e ha'e nhomongeta va'ety kuerya py oo vy aipoe'i:

— Roura kuri Paulo rojuka e'ŷa ja ndorokarui ha'e ndoroy'ui aguã re, ayvu vaipy orekuai e'ŷ aguã.

<sup>15</sup> Aŷ ma nhomongeta va'ety kuery po py pendeayvu pemondouka xondaro ruvixa pe, penerenonde oexa uka ju aguã. Hekokue re peikuaa pota porãvexea rami pemombe'u. Ha'e rã ore ma roarõ 'rã ovaẽ e'ŷ re rojuka aguã — he'i okuapy.

<sup>16</sup> Ha'e rami ijayvu okuapy rã Paulo ri'y oendu. Ha'e rami vy ha'e va'e ma oo vy xondaro kuery okeaty py oike, ha'e vy Paulo pe omombe'u.

<sup>17</sup> Ha'e rami rã Paulo xondaro ruvixa oenoĩ vy aipoe'i:

— Eraa kova'e kunumi va'e nderuvixaa py, mba'eta oguereko ixupe omombe'u va'erã — he'i.

<sup>18</sup> Ha'e ramo nguvixaa py ogueraa vy aipoe'i:

— Nhuã py omboty pyre Paulo xerenoĩ vy ojerure kuri ndea py aru aguã kova'e kunumi va'e, mba'eta oguereko ndevy omombe'u va'erã — he'i.

<sup>19</sup> Ha'e ramo huvixa ipo re ojopy vy mombyry'i oguerojep'e heravy. Ha'e vy oporandu ixupe:

— Mba'e tu rerekó xevy remombe'u va'erã?

\* **23:5** Êxodo 22.28 \* **23:8** Lucas 20.27

**20** Ombovai:

— Judeu kuery ijayvu kuri ndevy pe ojerure aguã ko'ẽ rã Paulo rexa uka aguã re nhomongeta va'ety kuerya py, hekokue re oikuua pota porãvexea rami.

**21** Ha'e rã ndee enhembotavy uka eme, mba'eta ha'e kuery regua quarenta raxa oura okuapy Paulo ojuka e'ŷa ja ndokarui neĩ ndoy'ui aguã re, ayvu vaipy ikuai e'ŷ aguã. Aŷ ma oiko katupa ma okuapy ndeayvua oarõ vy — he'i.

**22** Ha'e rami rã huvixa ma kunumi va'e omondouka ju vy ijayvu avave rei pe omombe'u e'ŷ aguã ixupe oikuua ukaague.

**23** Ha'e gui mokoĩ xondaro ruvixa ju oenoĩ vy aipoe'i:

— Pytũ are jave guarã pemboaty duzentos xondaro kuery, setenta kavaju árygua, ha'e duzentos hu'y guaxu revegua Cesaréia peve peo aguã.

**24** Pejou avi kavaju Paulo oĩ aguã, mba'eve oiko e'ŷ re ovaẽ aguã huvixave Félix-a py — he'i.

**25** Ha'e gui kuaxia huvixave peguarã ombopara uka po rami ijayvua:

### *Félix pe huvixa Cláudio kuaxia ombopara uka va'ekue oĩa*

**26** “Xee Cláudio Lísias ma kova'e ambopara uka ndee huvixave omboetevepy Félix pe. Tereiko porã.

**27** Kova'e ava ma judeu kuery ojopy vy ojuka rai ramo xee xondaro kuery reve aju vy araa jepe, Roma pygua regua oikoa aikuaa vy.\*

**28** Ha'e gui hexe ijayvu okuapy aikuaa porãvexe vy araa uka ha'e kuery regua mongetaaty ikuaria py.

**29** Ha'e rami vy aikuaa ha'e kuery rekora lei oeja pyre re oĩa re rive ijayvu okuapya. Mba'eve rei ndojapo vai jajuka aguã, neĩ nhuã py nhamboty aguã voi.

**30** Ha'e rami vy ava va'e ojuka ta okuapy a xevy omombe'ua rã aendu vy amondouka voi ndea katy. Hexe ijayvu rei va'e kuery pe voi xeayvu, ha'e kuery avi ou vy nerondenre omombe'u aguã hexeve oguerekva'e. [Tereiko porã.]”

### *Huvixave Félix-a py Paulo ovaẽague*

**31** Ha'e gui xondaro kuery ma huvixa ijayvuague rami ikuai. Ha'e rami vy pyavyve Paulo ogueraa vy Antipátride peve oguerovaẽ.

**32** Ko'ẽ jevy ha'e kuery ojevypa ju okeaty katy, ha'e rã kavaju árygua kuery pe ma ogueraa ukave Paulo.

**33** Ha'e va'e kuery ma Cesaréia py ovaẽ vy huvixave pe omboaxa kuaxia para, ha'e Paulo voi oexa uka.

**34** Ha'e ramo huvixave ma kuaxia para ogueroayvupa ma vy oporandu maguigua pa oikoa re. Cilícia pygua oikoa oikuua vy

**35** aipoe'i:

— Nderekokue mombe'ua kuery ovaẽmba ma ramo xee romboayvu 'rã — he'i. Ha'e rami vy omboty uka ranhe Herodes oo guaxu ojapo va'ekue py.

## 24

### *Félix renonde Paulo rekokue ramigua omombe'ua ague*

**1** Peteĩ nhiruĩ ára rire ovaẽ sacerdote yvateve va'e Ananias, nhomongeta va'ety kuery ha'e peteĩ ava ijayvu va'erã Tértulo hery va'e. Ha'e va'e kuery ma huvixa renonde ojexa uka okuapy Paulo rekokue re ijayvu aguã.

**2** Ha'e gui Tértulo ma oenoĩa rã omombe'u hekokue ramigua. Ha'e vy aipoe'i:

— Oreruvixa omboetevepy Félix, ndegui vy orekuai porã riae opa mba'e py. Ndee repena porã ramo mba'emo porã anho oiko ore judeu kuery pe.

**3** Ha'e nunga roikuua vy opa mba'e py roguerovy'a riae.

---

\* **23:27** Atos 21.27-39; 22.24-30

<sup>4</sup> Ha'e rami avi xeayvu are e'ŷ aguã ajerure rejapyxaka porã aguã xapy'a'i.

<sup>5</sup> Mba'eta ore roikuua pota rã peva'e ava ma mba'eaxy vaikue rami. Judeu kuery yvy jave re ikuai va'e omopu'ãmba rei oikovy, ha'e amboae rami nhombo'e Nazaré pygua peguarã rive.

<sup>6</sup> Ha'e gui templo omongy'a ta ramo ore rojopy karamboae [rombopaga aguã ore kuery lei re oĩa rami vy.]

<sup>7</sup> Ha'e rami tei xondaro ruvixa Lísias ou vy ivai vaipa reve orepo gui oipe'a heravy,

<sup>8</sup> ha'e aipoe'i hexe oreayvu va'e apy ju roju aguã nerondenon.] Ha'e gui ndee voi hekokue re reikuaa pota vy reikuaa avi 'rã oreayvua anhetẽ memea – he'i.

<sup>9</sup> Ha'e rami ijayvu rã judeu kuery ikuai va'e ojou porãmba. Ha'e vy

– Anhetẽ va'e meme – he'i okuapy.

### *Paulo guekokue omombe'uague*

<sup>10</sup> Ha'e gui Paulo pe ju huvixave opo py “Emombe'u ke” he'ia rami ojapo. Ha'e ramo aipoe'i:

– Heta ma'etŷ re ma ore kuery ruvixa reĩa aikuua vy xee voi ta xeayvu.

<sup>11</sup> Mba'eta ndee voi reikuaa doze ára ete'i ojapoa Jerusalém katy amboete aguã aa ague.

<sup>12</sup> Ha'e gui templo py ha'e kuery xejou okuapy jave avave reve ndaxeayvu vai, neĩ nanhomopu'ã ha'e kuery onhembo'eaty rupi, neĩ tetã rupi voi.

<sup>13</sup> Ha'e kuery nomombe'u porã kuaai guive xere ijayvu rei okuapyague.

<sup>14</sup> Ha'e rã peteĩ amombe'u ta ndevy: Xee ma Senhor reko rupi aiko, ha'e kuery “Amboae rami onhembo'e va'e”, he'ia rupi. Ha'e rami vy xee voi aiko oreramoĩ kuery Ruete pe. Lei re ipara oinya ha'e profeta kuery ombopara va'ekue rami vy mba'emo oiko va'e ha'e javi arovia.

<sup>15</sup> Ha'e rami vy Nhanderuete gui aarõ aikovy ha'e kuery voi oarõ okuapy va'e, heko porã ha'e heko porã e'ŷ va'ekue omboetepaa ju aguã.

<sup>16</sup> Ha'e nunga rupi anhea'ã aikovy Nhanderuete ha'e avakue renonde xepy'a ky'a e'ŷa rupi aiko aguã.

<sup>17</sup> – Ha'e gui mbovy ma'etŷ rei e'ŷ aikoa gui aa karamboae ore kuery pe ome'ẽ mbyre araa vy, ha'e Nhanderuete pe mba'emo ame'ẽ aguã guive.

<sup>18</sup> Ha'e nunga ajapo aikovya rupi ae judeu kuery Ásia pygua xejou templo py. Ajeky'a'o ukapa ma rire xejou xeirũ heta reve'ŷ, ha'e anhombopoxy reia py e'ŷ guive.

<sup>19</sup> Ha'e va'e kuery ae ou 'rãgue nerondenon xere ijayvu aguã, oguerekoo va'e rire.

<sup>20</sup> Ha'e rami e'ŷ vy apy ikuai va'e ae oikuua ri vy tomombe'u nhomongeta va'ety kuery renonde ha'ã jave ajapo vaiague ojou va'ekue.

<sup>21</sup> Mba'eta po rami anho ha'e kuery mbyte ha'ã vy xeayvu atã: “Kova'e ára xemboayvu omano va'ekue omboetepaa ju 'rãa arovia ramo”, ha'e va'ekue.

### *Félix ha'e Drusila renonde Paulo ojexa ukaague*

<sup>22</sup> Ha'e ramo Félix ma Senhor reko oikuua ae vy nopena voixei. Aipoe'i:

– Xondaro ruvixa Lísias ou jave mae ma aikuua pota porã 'rã pendeayvua re – he'i.

<sup>23</sup> Ha'e rami vy xondaro ruvixa yvyïve va'e pe aipoe'i Paulo oarõ vy hexe opena porã'i aguã, ha'e irũ kuery oipytyvõxe rã ojoko e'ŷ aguã guive.

<sup>24</sup> Kueve'i ma rire Félix ou ju gua'yxy judeu va'e Drusila reve. Ha'e vy Paulo oenoĩ uka vy ojapyxaka oiny Cristo Jesus re jajerovia aguã re ijayvu rã.

<sup>25</sup> Teko porã, jejokoa ha'e nhomboayvupaa aguã re ijayvu ramo Félix oendu vy okyje. Ha'e vy aipoe'i:

– Ha'e rami vy aŷ tereo ju. Ha'eve jave roenoĩ uka ju 'rã – he'i.

<sup>26</sup> Ha'e rami avi oipota tei Paulo ome'ẽ peráta ixupe. Ha'e rami vy mbovykue rei e'ŷ oenoĩ uka vy ijayvu hexeve.

<sup>27</sup> Mokoĩ ma'et̄y rire huvixa Félix rekoria oĩ Pórcio Festo. Ha'e jave Félix ma judeu kuery pe ojejou porã ukaxe vy oeja ový Paulo nhuã py.

## 25

### *Festo renonde Paulo oĩ vy César renonde ju ijayvu aguã re ojerureague*

<sup>1</sup> Festo ha'e pygua kuery ruvixarã oĩ vy mboapy ára rire Cesaréia tetã gui oo Jerusalém katy.

<sup>2</sup> Are'ŷ re ixupe sacerdote yvatekueve va'e ha'e judeu ruvixa kuery omombe'u Paulo rekoku ramigua. Ha'e rami vy peteĩ re ojerure

<sup>3</sup> oipytyvõ aguã. Paulo re nda'ija'ei vy ojerure Jerusalém katy ju ogueru ruka aguã, ha'e kuery tape py oarõ vy ojuka aguã.

<sup>4</sup> Ha'e rã Festo ombovai:

— Paulo ma Cesaréia py ae oĩ nhuã py, ha'e gui xee voi are'ŷ'i re aa 'rã ha'e katy.

<sup>5</sup> Peẽ kuery regua hi'arandukueve tapeo avi xerupive, ava va'e ojapo vaiague peikuaa vy pemombe'u aguã — he'i.

<sup>6</sup> Ha'e kuery ikuiaia py ndoiko arei. Oito, dez araa py oguejy ju Cesaréia katy. Ha'e gui ko'ẽ jevy nhomboayvuaty py oguapy vy ogueru ruka Paulo.

<sup>7</sup> Paulo ovaẽ ramo judeu kuery Jerusalém gui ou va'ekue ombojere rei okuapy. Opa marã rei hekokue ramigua omombe'u. Ha'e rami teĩ ha'e kuery nomombe'u porã kuaai guive.

<sup>8</sup> Ha'e rã Paulo ma guekokue omombe'u vy aipoe'i:

— Peteĩve henda py ma xee ndajejavyi judeu kuery pegua lei rovai, templo, neĩ César rovai — he'i.

<sup>9</sup> Ha'e rã Festo ma judeu kuery pe ojejou porã ukaxe vy aipoe'i Paulo pe:

— Ndevy pe ha'eve pa Jerusalém katy reo aguã, ha'e py ju xee romboayvu aguã ha'e nungakue re?

<sup>10</sup> Paulo ombovai:

— Xee ma César nhomboayvu atyrã omoĩ va'ekue py aĩ ae ma. Apy ae ha'eve xemboayvu aguã. Neĩ mba'eve ndajapo vai judeu kuery pe. Ndee reikuua porã.

<sup>11</sup> Mba'emo ajapo vai, e'ŷ vy ajojuka va'e rire amano teĩ ha'evepa rei 'rãgue. Ha'e rami 'rãgue py xerekokue ramigua omombe'u okuapya anhetẽ e'ŷ ramo nda'evei ha'e kuery po py avave rei xemboaxa rive aguã. Xee ma ajerure César renonde ju xeayvu aguã — he'i.

<sup>12</sup> Ha'e gui Festo ma imongetaa kuery reve jogueroayvu ma rire aipoe'i ixupe:

— César renonde ndeayvu aguã re rejerure rire ma ha'e katy 'rã reo.

### *Agripa pe Festo omombe'uague Paulo reko*

<sup>13</sup> Kueve ma rire Cesaréia py huvixave Agripa gua'yxy Berenice reve ovaẽ huvixa Festo pe oxarura aguã.

<sup>14</sup> Ha'e py ikuai are ramo huvixave pe Festo omombe'u Paulo reko. Ha'e vy aipoe'i:

— Apy Félix oeja ový peteĩ ava nhuã py.

<sup>15</sup> Ha'e va'e reko re ma Jerusalém py aĩ jave sacerdote yvatekueve va'e ha'e judeu mongetaaty kuery ijayvu. Ajuka uka aguã re ojerure okuapy.

<sup>16</sup> Ha'e kuery pe aipoa'e Roma pygua kuery reko rami vy nda'evei peteĩ va'e rei ajuka uka aguã hexe ijayvu va'e kuery joa py ikuai e'ŷ re, ayvu oiko va'e ombovai aguã.

<sup>17</sup> Ha'e gui ma apy ju ha'e kuery ovaẽmba ma ramo xee namboarei. Ko'ẽ jevy nhomboayvuaty py aguapy vy aru ruka ava.

<sup>18</sup> Ha'e rã hexe ijayvu va'e kuery opu'ã vy peteĩve nda'ijayvui ojapo vaiague re xee aexa'ãague rami.

<sup>19</sup> Ha'e rami 'rãgue py hexe ijayvu okuapy guekorã oeja pyre re rive, ha'e peteĩ ava omano va'ekue Jesus hery va'e re guive. Ha'e va'e pe ma Paulo "Oikove" he'i.

<sup>20</sup> Ha'e nunga re xee ndaikuua pota kuaai vy aporandu Jerusalém katy oo aguã ha'eve paa re, ha'e py ju amboayvu aguã ha'e nungakue re.

<sup>21</sup> Ha'e rami tei Paulo ojerure nhuã py optya aguã re César renonde ju ijayvu aguã. Ha'e ramo xeayvu apy ae optytave aguã, César-a katy amondouka peve – he'i.

<sup>22</sup> Ha'e ramo Agripa aipoe'i Festo pe:

– Ha'e va'e ava ayvu ma xee voi aenduxe.

Ombovai:

– Ko'ẽ ramo rendu 'rã – he'i.

### *Teigue ju Agripa reve Festo ijayvuague*

<sup>23</sup> Ko'ẽ jevy Agripa ha'e Berenice opa marã omboetea reve ou vy nhomboayvu aguã py ovaẽ, huvixa kuery ha'e tetã pygua yvatekueve reve. Ha'e gui Festo ogueru ruka Paulo.

<sup>24</sup> Ha'e rami vy aipoe'i:

– Huvixave Agripa, ha'e apy pendekuai va'e ha'e javi, kova'e ava pexa va'e káuxa ae judeu kuery ha'e javi ijayvu karamboae xerenonde. Jerusalém tetã py, ha'e apy voi ojapukai okuapy ndoikove riaevei aguã ramo.

<sup>25</sup> Ha'e rã xee ma ndaikuuai ojapo vaiague omano aguã. Ha'e rami vy nhanderuvixa guaxuve renonde ijayvu aguã re ojerure ramo xeayvu ha'e katy ju amondouka aguã.

<sup>26</sup> Ha'e rami avi hekokue mba'eve ndaikuuai anhetẽ va'e nhanderuvixa pe ambopara aguã. Ha'e nunga rupi penerenonde ju aru ruka. Huvixave Agripa, nerenonde ae aru ruka aikuaaxe vy, ndee remboayvu ramo aikua aguã ambopara va'erã.

<sup>27</sup> Mba'eta xevy pe nda'evei nhuã py omboty pyre amondouka aguã hexe ayvu oiko va'e amombe'u porã e'ŷ re.

## 26

### *Huvixave Agripa renonde Paulo ijayvuague*

<sup>1</sup> Ha'e rire huvixave Agripa aipoe'i Paulo pe:

– Ha'eve ndeayvu nderekoo re.

Ha'e ramo Paulo opo oupi vy omombe'u gueko. Aipoe'i:

<sup>2</sup> – Huvixave Agripa, kova'e ára avy'a nerenonde xereko re xeayvu vy, judeu kuery xere ijayvuague ha'e javi ambovai aguã.

<sup>3</sup> Mba'eta ndee ma judeu kuery reko ha'e ayvu oiko va'e ha'e javi reikuua porãve va'e. Ha'e nunga rupi ajerure rejapyxaka porã aguã re.

<sup>4</sup> Ha'e gui judeu regua huvixa kuery oikuaapa xekyrĩ guive aikoague, ha'e jypy guive ore kuery ikuia rupi ha'e Jerusalém tetã py aikoague guive.

<sup>5</sup> Anhetẽ ae ha'e kuery jypy'i guive xekuaa, ha'e rami omombe'uxe rã. Mba'eta orereko rupi onhea'ave va'e fariseu kuery regua xee voi aiko va'ekue.

<sup>6</sup> Oreramoí kuery pe Nhanderuete ijayvuague ojeupity aguã re ajerovia ramo rive xemboayvua aŷ.

<sup>7</sup> Ha'e nunga ae ore kuery doze regua orekuai va'e roupity aguã ronhea'ã rokuapy ara py ha'e pyávy, Nhanderuete pe orekuai vy. Xeruvixa, ha'e nunga re ajerovia ramo ae judeu kuery xemboayvu.

<sup>8</sup> Mba'e re tu peẽ kuery ndaperoviai Nhanderuete omano va'ekue omboete ju 'rãa?

<sup>9</sup> – Anhetẽ xevy rã voi ha'eve rei va'ekue opa marãguia ajapo aguã Nazaré pygua Jesus rery amboetea rupi e'ŷ.\*

<sup>10</sup> Ha'e rami ae aiko va'ekue Jerusalém py. Kuaxia para sacerdote yvatekueve va'e gui araa vy iky'a e'ŷ va'e kuery heta amboty va'ekue nhuã py. Ojukaa ta ramo xee voi ojuka aguã re xeayvu va'ekue.

\* <sup>26:9</sup> Atos 8.3, 9.1-19

**11** Mbovykue rei e'ŷ ainupã va'ekue judeu kuery onhembo'eaty ikuai va'e rupi, ijayvu vai aguã rami guive ajapo. Ha'e kuery pe xevai vy yvy mboae re tetã ikuai va'e rupi voi amoingo axy va'ekue.

**12** — Ha'e rami aguã ae aa karamboae Damasco tetã katy. Sacerdote yvatekueve va'ea gui kuaxia para araa, ha'e kuery xemōague kuaa ukaarã.

**13** Xeruvixa, kuaray mbyte jave tape rupi aa vy petēi hendy va'e aexa yva re, kuaray gui hendy ratâve va'e. Ha'e va'e ma xeyvýry rupi omoexakãmba, ha'e xerupive oo va'e kuery yvýry guive.

**14** Ha'e ramo yvy rupi ro'a pavẽ. Ha'e gui petēi ayvu aendu hebraico ayvu py aipoe'i va'e: "Saulo, Saulo, mba'e re tu xerereko axyxre ri? Ndee ae renhemingo axy, ferro rakua re opyvoi va'e rami reiko vy", he'i.

**15** — Ha'e ramo xee aporandu: "Mava'e tu ndee, Senhor?" Ombovai: "Xee ma Jesus rerekoy axy va'e.

**16** Ha'e gui epu'ã he'amy ndepy re, mba'eta po rami aguã ajexa uka ndevy, xerembiguairã romōi reikuua uka aguã mba'emo rexâva'ekue, ha'e raka'e rã aexa uka va'erã guive.

**17** Neretarã kuery ha'e judeu e'ŷ va'e kuery ikuiaia rupi xee romondouka vy rogueraa jepe rã ha'e kuery po gui.

**18** Hexa reipe'a 'rã ojeko rerova aguã pytãa rupi ikuiaia gui hendy va'e peguarã, ha'e Satanás po'akaa rupi ikuiaia gui Nhanderuete peguarã. Ha'e rami vy 'rã ombogue ukapa ojejavyague, oupity aguã xere ojerovia vy ojeky'a'o uka va'ekue pegua", he'i.

**19** — Ha'e rami rã huvixa Agripa, xee nanhe'ẽ rendu e'ŷi yva guigua aexa va'ekue.

**20** Ha'e rami vy Damasco tetã py ranhe ayvu amombe'u, ha'e gui Jerusalém py ju, Judéia regua ha'e javi rupi, ha'e judeu e'ŷ va'e kuerya rupi amombe'u aikovy ikuaiaty gui ojep'e a vy Nhanderuete re ojeko rerova aguã, ha'e iporã va'e ojapoa py oexa uka aguã ojeko rerovaague.

**21** Ha'e rami aikoa re rima amongue judeu kuery xejukaxe vy xejopy karamboae templo py aiko jave.

**22** Ha'e rami tēi Nhanderuete xepytyvõ ramo kova'e ára peve aiko. Yvȳgueve ha'e yvatekueve pe amombe'u ayvu. Xee amombe'u aikovy va'e ma profeta kuery ha'e Moisés ijayvuague rami vy oiko va'erã anho.

**23** Ha'e nunga ma Cristo oiko axy aguã, ha'e gui ha'e ranhe omanoague gui onhemboete ju vy judeu ha'e judeu e'ŷ va'e kuery pe oikuua uka aguã hendy va'e.

### *Paulo ijayvupa e'ŷ re Festo ijayvuague*

**24** Paulo gueko omombe'upa e'ŷ re Festo ojapukai reve aipoe'i:

— Paulo, naneakã porâvei ma teve. Ipara re renhembo'e vai ete vy nane'aranduvei — he'i.

**25** Paulo ombovai:

— Xeruvixa Festo, xee naxeakã porã e'ŷi ri. Ha'e rami 'rãgue py xe'arandua rupi xeayvu anhetê va'e re anho.

**26** Mba'eta ha'e nunga ha'e javi huvixave oikuua. Ixupe ae amombe'u akyjea py e'ŷ. Xee aikuua rã ha'e nungakue ha'e javi oikuapaa, mba'eta nēi petēive ndoikoi nhemi rupi.

**27** Ha'vy ndee huvixave Agripa, rerovia pa profeta kuery ayvu? Xee aikuua porã rerviaa — he'i.

**28** Ha'e ramo Agripa aipoe'i Paulo pe:

— Rexa'ã rã ndaxyi Cristo pegua xeapo aguã?

**29** Paulo ombovai:

— Xeruvixa, tove ndaxyi e'ŷ vy haxy py tēi Nhanderuete tojapo ndee anho e'ŷ, kova'e ára xeayvu re ojapyxaka va'e kuery ha'e javive tojapo xee rami, va'eri aŷ'i xejokuaa rami e'ŷ ta'vy.

*"Ha'eve 'rãgue tēi Paulo japoí aguã", he'iague*

<sup>30</sup> Ha'e rami rā huvixave opu'ã ju, ha'e gui huvixa mboae kuery, Berenice, ha'e ha'e kuery reve oguapy okuapy va'ekue ha'e javi voi.

<sup>31</sup> Ha'e kuery ojepe'apa vy peteī-teī joupe ijayvu vy aipoe'i:

— Peva'e ava mba'eve rei ndojapoi ra'e ojukaa aguā, neī nhuā py ombotya aguā — he'i.

<sup>32</sup> Ha'e ramo Agripa aipoe'i Festo pe:

— Peva'e ava ma ha'eve 'rāgue japoai aguā, César renonde ijayvu aguā re ndojerurei va'e rire.

## 27

### *Itália katy Paulo omondoukaague*

<sup>1</sup> Ha'e gui huvixa kuery ijayvu Itália katy oremondouka aguā. Ha'e rami vy Paulo ha'e nhuā py ikuai va'e regua omboaxa peteī xondaro ruvixa heraarā po py. Ha'e va'e ma César oĩa pygua, Júlio hery va'e.

<sup>2</sup> Ha'e ramo roīmba peteī kanoā guaxu Adramítio guigua py. Ha'e va'e ma Ásia yke rupi oo va'erā. Ha'e rami vy yy rupi roje'oi. Orerupive oo avi Macedônia regua Tessalônica pygua Aristarco.

<sup>3</sup> Ko'ẽ jevy rovaẽ Sidom py. Paulo re Júlio opena porā ivai reia py e'ŷ. Ha'e rami vy omondouka oirū kuery oexa aguā, ha'e mba'emo oipota va'e ojou aguā.

<sup>4</sup> Ha'e gui ma roje'oi ju yy rupi. Ha'eve e'ŷa katy gui yvytu oipeju ramo Chipre ypa'ũ katy'i rupi roo ijyke yvytu e'ŷa rupi.\*

<sup>5</sup> Cilícia ha'e Panfília yke rupi ye'ẽ roaxa ma vy Lícia regua Mirra tetā py rovaẽ.

<sup>6</sup> Ha'e py ma xondaro ruvixa peteī kanoā Alexandria guigua ojou Itália katy oo ta va'e. Ha'e va'e py ju oremoĩ.

<sup>7</sup> Ha'e gui ma roove mbeguei'i. Mbovy ára rei e'ŷ haxy py Cnido tetā katy'i rovaẽ. Yvytu ha'eve e'ŷa katy gui oipeju rā nda'evei rooxea katy roove aguā. Ha'e ramo Creta ypa'ũ yke rupi roo yvytu e'ŷa rupi, Salmodia gui mombyry'i rupi.

<sup>8</sup> Ijyke rupi anho roo vy haxy py rovaẽ peteī henda Porto Porā 'epy va'e py. Ha'e katy rai oĩ Laséia tetā.

### *Ára vai rupi oguataague*

<sup>9</sup> Are ma rire ha'e kuery oove aguā ijavaete, mba'eta okaru e'ŷ re ikuaia ára oaxa ma rire. Ha'e ramo Paulo ha'e kuery omongoeta vy

<sup>10</sup> aipoe'i:

— Avakue, xee aikuua rā jaguataa rupi jaiko axy vaipa 'rā. Mba'emo jajavyky rei 'rā, ha'e nhamokanhymba 'rā kanoā ha'e ivoyi guive, nhanderekove voi — he'i.

<sup>11</sup> Ha'e rā xondaro ruvixa ma Paulo ayvu gui ogueroviave kanoā mboguataa ha'e ija ayvu.

<sup>12</sup> Ha'e py yro'y jave kanoā omboja aguā nda'evei ramo ha'e kuery oovexe ha'e gui, Fenice py ovaẽ jepe rivyvyi gui, ha'e py mae ma oaxa aguā yro'y. Mba'eta ha'e py kanoā mbojaaty Creta ypa'ũ re oĩ va'e ma kuaray oua katy ijapy jovaive opyta.

<sup>13</sup> Ha'e gui kuaray ijapu'a'ia katy gui mbeguei'i yvytu oiny ramo ha'e kuery oexa'ã teī ooxeague py ovaẽ jepe aguā re. Ha'e rami vy kanoā mombytaa oupi ju rā Creta ypa'ũ yke rupi roo.

<sup>14</sup> Ha'e rami teī are'ŷ'i re ypa'ũ katy gui ou yvytu atā, Euroaquilão 'epy va'e.

<sup>15</sup> Yvytu kanoā ogueraa rami rei ogueraa. Roguerova nhea'ã teī yvytu re ndorepo'akai vy ropoipa. Ha'e vy noropenavei ogueraa tema aguā.

<sup>16</sup> Peteī ypa'ũ'i Cauda 'epy va'e yke yvytu e'ŷa rupi roaxa jave haxy py roupi imoiny kanoā'i.

\* <sup>27:4</sup> Yvytu po'akaa re ha'e kuery oo kanoā guaxu re ajukue oipyoa va'e py.

<sup>17</sup> Ha'e va'e oupi ma vy opa mba'e oiporu kanoã ojokua aguã, ita ku'i reia re ojeapi gui okyje vy. Ajukue oupi pyre omboguejy ju vy nopenavei ogueraa aguã.

<sup>18</sup> Yvytu atã gui rojexavai vy ko'ẽ jevy ombovevuia kanoã mba'emo oĩ va'e omomboa vy.

<sup>19</sup> Ha'e gui mboapy araa py ore ae po py romombo mba'emo kanoã regua ye'ẽ py.

<sup>20</sup> Ha'e gui ára vai orere ou va'ekue gui mbovy ára rei e'ỹ kuaray neĩ jaxy-tata ndojekuaavei ramo noroexa'ãvei ma roo jepe aguã.

<sup>21</sup> Are ma ore kuery ha'e javive ndorokaruvei ramo Paulo opu'ã ho'amy ore kuery mbyte. Ha'e vy aipoe'i:

— Avakue, anhetẽ pejapyxaka va'e rire xeayvu re, ha'e Creta gui ndajajui va'e rire, guĩ rami ete jajexavai ha'e nhamokanhymba e'ỹ aguã.

<sup>22</sup> Ha'e rami teĩ aÿ ma po rami xee romongeta: Pendepy'a guaxu ke, mba'eta peẽ kuery regua peteïve nomokanhysi 'rã guekove, kanoã anho 'rã okanhy.

<sup>23</sup> Mba'eta angegua pyávy xea py peteĩ anjo ojekuaa Nhanderuete ixupe aiko ha'e amba'eapoa va'ea guigua.

<sup>24</sup> Ha'e va'e ma xevy pe aipoe'i: "Paulo, ekyje eme. César renonde rejexa uka 'rãe. Ha'e gui Nhanderuete nhomboaxya rupi ndere oma'ẽ vy ogueraa jepe 'rã ndereve oguata va'e kuery ha'e javi", he'i va'ekue xevy.<sup>†</sup>

<sup>25</sup> Ha'e nunga rupi avakue, pendepy'a guaxu ke, mba'eta xee ajerovia Nhanderuete re, xevy ijayvuague oiko aguã.

<sup>26</sup> Ha'e rami teĩ nhandereraa 'rãe peteĩ ypa'ũ re — he'i.

### Kanoã ivaipaague

<sup>27</sup> Mokoõ semana re ha'ekue'ỹ-kue'ỹ katy yvytu orereraa ye'ẽ Adriático rupi. Ha'e gui ma pyávy pytũ mbyte jave kanoã mboguataa kuery oendu yvy re ovaẽ rai'i maa.

<sup>28</sup> Ha'e rami vy ixã ipoyi va'e oity vy oikuua vinte braça typa. Oove'ia py ixã oity ju vy quinze braça ete'i oikuua.

<sup>29</sup> Ha'e vy ita re ojeapi gui okyje vy kanoã revi gui irundy henda py omboguejy kanoã mombytaarã. Ha'e rami vy onhembo'e okuapy ko'ẽ voi aguã.

<sup>30</sup> Kanoã mboguataa kuery oẽxe vy kanoã xĩ gui kanoã'i omboguejy nhemi yy py, kanoã mombytaarã mboae omboguejy aguã merami.

<sup>31</sup> Ha'e ramo Paulo aipoe'i xondaro ruvixa ha'e xondaro kuery pe:

— Peva'e kuery kanoã py ndopytai ramo peẽ voi ndapeo jepei 'rã — he'i.

<sup>32</sup> Ha'e ramo xondaro kuery kanoã'i xã ojaya vy opoi ogueroxry heravy aguã.

<sup>33</sup> Ko'ẽ rai'i jave pavẽ pe Paulo ijayvu okaru aguã. Ha'e vy aipoe'i:

— Kova'e ára reve vy mokoõ semana ma ojapo pekaru e'ỹ re pendekuai, mba'eve ndape'u.

<sup>34</sup> Ha'e ramo xee xeayvu pekaru aguã. Ha'e rami vy 'rãe penembaraete peo jepe aguã. Mba'eta napemokanhysi 'rã neĩ peteĩ pende'a ma voi — he'i.

<sup>35</sup> Po rami ijayvu ma vy peteĩ mbojape oupi, ha'e pavẽ oexaa py oguerovy'a Nhanderuete. Ha'e gui oipe'ã vy omboypy ho'u aguã.

<sup>36</sup> Pavẽ oexa vy oendu ipy'a guaxua, ha'e vy ha'e kuery voi okaru avi.

<sup>37</sup> Kanoã py ikuai duzentos e setenta e seis ha'e javi vy.

<sup>38</sup> Okaru porãmba ma vy ombovevuive ju kanoã, trigo ryru ye'ẽ py omombopa vy.

<sup>39</sup> Ko'ẽmba rã yvy oexa teĩ ndoexa kuaai. Ha'e gui ma peteĩ yy oikea oexa. Ha'e va'e rembe re ma ita ku'i reia oĩ. Ha'e ramo nhomongeta okuapy ha'e va'e re kanoã omboja aguã.

<sup>40</sup> Ha'e rami vy kanoã mombytaa xã ojaya vy opoi yy py. Ojora avi imbojeapaa ojokuaague. Kanoã xĩ katy oupi imoiny ajukue, yy rembe katy yvytu ogueraa aguã.

<sup>†</sup> 27:24 Atos 23.11

<sup>41</sup> Ha'e gui ma mokoï henda katy gui oxyrya py kanoã ovaẽ vy ipija. Ixĩ ipija vy noẽvei. Ha'e rã hevi ma yai ojeapi-api vaipa ramo opẽmba.

<sup>42</sup> Ha'e ramo xondaro kuery ijayvu nhuã py omboty pyre kuery ojukapa aguã, peteĩve ho'ytã vy oo jepe e'ŷ aguã.

<sup>43</sup> Ha'e rã xondaro ruvixa ma Paulo ogueraa jepexe vy ndojuka ukai omboty pyre kuery. Ha'e vy aipoe'i ho'ytã kuaa va'e ranhe yy py opo aguã, yy rembe re ovaẽ aguã.

<sup>44</sup> Ha'e gui amboae kuery pe ma aipoe'i yvyrapse ha'e kanoã pẽgue áry oo jepe aguã. Ha'e rami py ha'e javive oo jepe, yvy'ã re oẽmba.

## 28

### *Malta ypa'ũ py ikuaiague*

<sup>1</sup> Yvy'ã re orekuai vy roikuua ha'e va'e ypa'ũ Malta herya.

<sup>2</sup> Ha'e pygua kuery opena porã'i orere. Tata ojapo vy oremovaẽmba oky ha'e yro'y gui.

<sup>3</sup> Paulo ma yxakã ra'ykue omono'õ vy tata py onhono ramo haku gui peteĩ mboi oẽ vy oixu'u oiny ipo re.

<sup>4</sup> Ipo re mboi ovava oiny rã ha'e pygua kuery oexa vy joupe-upé aipoe'i:

— Peva'e ava ta'vy jojuka rive va'ety teve, mba'eta ye'ẽ gui oo jepe va'ekue ri Nhandererekoa ndoejai oikove aguã — he'i.

<sup>5</sup> Ha'e rã Paulo ma tata py mboi omombo ramo mba'eve rei ndoikoi.\*

<sup>6</sup> Ha'e ramo ha'e kuery oexa pota iruru rivyvyi, e'ŷ vy ho'a vy omano vyvoi gui. Ha'e rami teĩ aje'i ma oarõ rire mba'eve rei ndoikoi rã oexa vy amboae rami ju oexa'ã okuapy. Ha'e vy

— Peva'e ta'vy tuuete kuery regua teve — he'i okuapy.

### *Huvixa Públia ngoo py Paulo omovaẽague*

<sup>7</sup> Ha'e katy rai oĩ ypa'ũ pygua ruvixa pegua yvy, Públia hery va'e. Ha'e va'e ma ngoo py oremovaẽ porã mboapy ára peve.

<sup>8</sup> Públia ru ma imba'eaxy oupy tye raxy gui, ipire raku vaipa guive. Ha'e ramo Paulo oo oipou vy, ha'e onhembo'e reve hexe omoĩ opo. Ha'e rami vy omonguera.

<sup>9</sup> Ha'e nunga ypa'ũ pygua kuery oikuua vy imba'eaxy va'e kuery mboae ou vy okuerapa.

<sup>10</sup> Ha'e pygua kuery opa mba'e ome'ẽ orevy. Roo ju ta ma ramo voi kanoã py omboyrú opa marãguia roikotevã va'e.

### *Oguatave jevyague*

<sup>11</sup> Mboapy jaxy oaxa rire roĩ peteĩ kanoã Alexandria guigua py, yro'y jave ypa'ũ re onhemboja oupy va'ekue, Dióscuros ra'angaa oĩa va'e py.

<sup>12</sup> Siracusa tetã py rovaẽ vy mboapy ára re ropyta ha'e py.

<sup>13</sup> Ha'e gui roove vy Régio py rovaẽ. Ko'ẽ jevy kuaray puku-a katy gui yvytu oipeju ramo mokoï araa py rovaẽ Putéoli py.

<sup>14</sup> Ha'e py rojou amongue irmão kuery. Ha'e va'e kuery ojerure ha'e kuery reve ropyta aguã sete ára peve. Ha'e rami py roje'oi Roma katy.

<sup>15</sup> Roju roinya omombe'ua rã oendu vy Roma pygua irmão kuery ju ou orerovaexi aguã. Praça de Ápio ha'e Mboapy Vendeaty 'epy va'e peve ou. Ha'e va'e kuery ou rã Paulo oexa vy oguerovy'a Nhanderuete, ipy'a guaxuve guive.\*

### *Roma py Paulo ovaẽague*

<sup>16</sup> Roma tetã py rovaẽ ma ramo Paulo ha'e ae oĩxeia py omoĩa. Hexeve oiko avi peteĩ xondaro harðarã.

\* 28:5 Marcos 16.17,18 \* 28:15 Romanos 1.10-12

**17** Mboapy araa py oenoĩ uka judeu ruvixa kuery. Ha'e ramo ha'e kuery jogueru vy ono'õmba ramo aipoe'i:

— Ke'y kuery, xee ma mba'eve rei ndajapoi nhande kuery rovai, neĩ nhanderekorã nhaneramoĩ kuery pe oeja pyre rovai guive. Ha'e rami teĩ Jerusalém tetã guive xejokuaa reve aju, Roma pygua regua po py xemboaxaa rire.

**18** Ha'e va'e kuery ma xemboayvu vy ndoikuuai mba'eve rei ajapo vaiague xejuka aguã. Ha'e rami vy xepoixe teĩ

**19** judeu kuery ma xere opu'ã rei rã ajerure César renonde ju xeayvu aguã re. Ha'e rami avi mba'eve ndarekoi nhande kuery va'e regua re xeayvu aguã.

**20** Ha'e nunga rupi peẽ kuery roenoĩ uka roexa ha'e peẽ kuery reve xeayvu aguã, mba'eta Israel kuery ojerovia okuapya re xee voi ajerovia ramo rima xejokuaa imoiny kova'e corrente py – he'i.

**21** Ha'e ramo ha'e kuery aipoe'i ixupe:

— Ore ma Judéia guigua kuaxia para noroexai nderekko re ijayvu va'e, neĩ peteĩve nhanderyke'y kuery regua ndouai guive nderekko omombe'u, e'ŷ vy ndere ijayvu aguã.

**22** Ha'e rami avi roenduxe reikuaa va'e, mba'eta anhetẽ amboae rami penhembo'ea re opa rupi ijayvu reia rã roendu.

### *Roma py Paulo ayvu omombe'uague*

**23** Ha'e kuery oa'angaague ára py heta ete ou Paulo oĩa py, okeaty py ae. Ha'e rã ko'ẽmba guive ka'aru peve ha'e kuery pe ayvu omombe'u porãve Nhanderuete po'akaa regua. Moisés lei ombopara va'ekue ha'e profeta kuery ombopara va'ekue rupi ijayvu vy onhea'ã Jesus re ha'e kuery ojerovia aguã.

**24** Ha'e ramo amongue ete'i oguerovia ijayvua. Ha'e rã amboae kuery ma ndogueroviai ae tema.

**25** Ha'e kuery joo rami e'ŷ-e'ŷ oikuua vy oje'oipa ta ma ramo Paulo aipoe'i:

— Ha'evea rami Nhe'ẽ Ky'a E'ŷ ijayvu raka'e penamoĩ kuery pe, mba'eta profeta Isaías pe aipoe'i uka:

**26** “Tereo heta va'e kuerya py, ha'e aipo'ere ha'e kuery pe: ‘Pendeapyxa py pendu teĩ napendu kuaai 'rã. Pexa pota teĩ ndapexa kuaai 'rã’, 're.

**27** Mba'eta ha'e kuery ma inhakã ratãmba. Oapyxa py oendu vai, guexa guive omboty, ndoexai aguã guexa py, neĩ noendui aguã oapyxa py, opy'a py oikuua e'ŷ aguã, mba'eta ndojeko rerovaxeい ae, xevy pe nonhemoingo porã ukaxeい guive”, he'i va'ekue.\*

**28** — Ha'e nunga rupi peikuua pota, mba'eta judeu e'ŷ va'e kuery pe voi Nhanderuete oikuua uka nhandereraa jepe aguã regua. Ha'e rã ha'e kuery ma oendu 'rã — he'i.\*

**29** [Pova'e ayvu rupi ijayvu rã judeu kuery oendu vy nhomotare'ŷmba reve oje'oipa.]

### *Mokoĩ ma'etý re Paulo omboty imoinyague*

**30** Mokoĩ ma'etý re Paulo oĩ oke atyrã oiporuka va'e py. Ha'e py ma omovaẽ oexaxe vy ou va'e ha'e javi.

**31** Omombe'u oikovy Nhanderuete po'akaa, ha'e nhombo'e oiny Senhor Jesus Cristo re. Okyjea py e'ŷ ijayvu, avave rei omokyrirí e'ŷ re.

## Roma pygua kuery pe Paulo ombopara va'ekue

## Roma pygua kuery pe Paulo ombopara va'ekue

Kova'e kuaxia ma Roma tetā py Jesus remimbo'e kuery ikuai va'e peguarā apóstolo Paulo ombopara va'ekue. Paulo ma opa rupi oo raka'e ayvu porā omombe'u vy. Ha'e rā Roma tetā py ma ndooi ranhe. Ha'e py ma amboae kuery omboypy raka'e igreja. Ha'e py Paulo ovaẽxe avi vy ha'e pygua kuery pe ombopara kova'e kuaxia. Aipoe'i: "Mba'eta roexaxe ete, peẽ kuery pe voi aikuaa uka aguā Nhe'ẽ guigua penembaraeteve aguā. Ha'e rami avi peẽ kuery reve joo meme nhanhomombaraaete aguā jajeroviaa rupi, peẽ ha'e xee. ... Mba'eta xee naxī ayvu porā amombe'u aguā, mba'eta ha'e va'e rupi Nhanderuete oexa uka opo'akaa ogueraa jepe vy hexe ojerovia va'e ha'e javive, jypy'i judeu regua, ha'e gui grego regua guive. Mba'eta ayvu porā rupi Nhanderuete oikuua uka ojeguigua teko porā. Ha'e va'e ma jajerovia rā ome'ẽ 'rā", he'i (1.11-12,16-17a).

Mba'exa 'rā tu nhande kuery nhanderekai vai va'e meme teĩ Nhanderuete nhanemboeko porā? Mba'eta Paulo aipoe'ia rami: "Mba'eta nhande ha'e javive jajejavvy vy ndajaupity kuaai Nhanderuete rexakāa. Ha'e rami teĩ Nhanderuete nhanemboaxy rupi rive nhanemboeko porā 'rā Cristo Jesus nhandejogua rire. Mba'eta Jesus ma Nhanderuete ombou vy oikuua uka raka'e jejavya pe'aarā, jajerovia rā huguy py ombogue aguā jajejavvyague" (3.23-25a).

"Ha'e gui ma jajeroviaa re Nhanderuete nhanemboeko porā rire hexeve peteĩ rami ju jaiko, nhande-Senor Jesus Cristo re vy" (5.1). Ha'e nunga rupi nhande ae nhanhe'aãa rupi e'ỹ Nhanderuete nhanemboeko porā, ha'e rā Jesus re jajerovia ramo nhanemboaxy vy rive ombogue 'rā nhanderekai vaiaty, ha'e nhandevy ome'ẽ 'rā ojeguigua teko porā.

### *Oxarura reve ijayvu vy omboypyague*

<sup>1</sup> Xee Paulo ma Jesus Cristo rembiguai aiko. Apóstolo-rā xerenoĩ ha'e Nhanderuete guigua ayvu porā amombe'u va'erā xeporavo.

<sup>2</sup> Ha'e va'e ayvu ma yma ma voi Nhanderuete oikuua uka aguā re ijayvu ojeupagua profeta kuery omboparaa rupi,

<sup>3</sup> Gua'y rekorā re ijayvu vy. Ha'e va'e ma ngo'o re oiko Davi ramymino,

<sup>4</sup> ha'e rā Nhe'ẽ Ky'a E'ỹ re ma omanoague gui onhemboete jevy vy ojekuaa uka Nhanderuete Ra'y ipo'akapa va'ea. Ha'e va'e ma Jesus Cristo nhande-Senor.

<sup>5</sup> Hexe vy oremboaxy vy oremoĩ apóstolo-rā guery omboete ukaa rupi vy, judeu e'ỹ va'e ha'e javi regua hexe ojerovia vy onhe'ẽ rendu aguā.

<sup>6</sup> Ha'e kuery regua ma peẽ voi pendekuai, Jesus Cristo peguarā penerenoĩ rire.

<sup>7</sup> Peẽ kuery Roma tetā pygua Nhanderuete rembiayvu ha'e iky'a e'ỹ va'erā penerenoĩ va'ekue ha'e javive pe ambopara. Tove peẽ kuery tapendu penemboaxy ha'e mby'a porā Nhanderuete ha'e Senhor Jesus Cristo guigua.

### *Cristo pegua kuery Roma py ikuai va'e Paulo oexaxe re ijayvuague*

<sup>8</sup> Jypy ma peẽ kuery ha'e javi re arovya Xeruete Jesus Cristo rery rupi, mba'eta yvy jave re pejerovia etea oendupaa.

<sup>9</sup> Mba'eta Nhanderuete oikuua peẽ kuery re xema'endu'a riae. Ixupe ae xenhe'ẽ py guive amba'eapo aikovy Ta'y regua ayvu porā amombe'ua rupi.

<sup>10</sup> Ixupe anhembo'e nhavõ ajerure ha'evea ára, Nhanderuete oipotaa rami peẽ kuery roipou aguā re.

<sup>11</sup> Mba'eta roexaxe ete, peẽ kuery pe voi aikuaa uka aguā Nhe'ẽ guigua penembaraeteve aguā.

<sup>12</sup> Ha'e rami avi peẽ kuery reve joo meme nhanhomombaraete aguã jajeroviaa rupi, peẽ ha'e xee.\*

<sup>13</sup> Mba'eta irmão kuery, aipota peikuaa peẽ kuerya py mbovykue rei e'ŷ aaxea teĩ, peẽ kuery mbyte rupi voi ajou aguã Jesus peguarã, judeu e'ŷ va'e mboae ikuia rupi ajapoa rami avi. Ha'e rami teĩ aŷ peve nda'evei.

<sup>14</sup> Mba'eta grego kuery ha'e amboae regua pe voi xee areve teri ayvu porã amombe'u aguã, ombo'epa pyre ha'e kuaxia ndoexa kuaai teri va'e pe guive.

<sup>15</sup> Ha'e nunga rupi Roma tetã py pendekuai va'e pe voi ayvu porã amombe'u aguã rami aiko.

### *Jesus Cristo re jajerovia ramo teko porã ome'ẽ aguã re ijayvua*

<sup>16</sup> Mba'eta xee naxí ayvu porã amombe'u aguã, mba'eta ha'e va'e rupi Nhanderuete oexa uka opo'akaa ogueraa jepe vy hexe ojerovia va'e ha'e javive, jypy'i judeu regua, ha'e gui grego regua guive.\*

<sup>17</sup> Mba'eta ayvu porã rupi Nhanderuete oikuua uka ojeguigua teko porã. Ha'e va'e ma jajerovia rã ome'ẽ 'rã, mba'eta ojerovia va'e pegua ae, ipara re oĩa rami: "Heko porã va'e ma ojeroviaa rupi 'rã ikuai", he'ague rami.\*

### *Avakue mba'emo rive ombojeroviaha'e opa marã rei ikuia re ijayvua*

<sup>18</sup> Mba'eta Nhanderuete ma opoxya avi oikuua uka yva gui, ojejavvy ha'e heko vai va'e ha'e javive rovai, mba'eta ha'e kuery gueko vaia rupi vy ndoikuaaxe anhetẽ va'e.

<sup>19</sup> Mba'eta ha'e kuery oikuua ae Nhanderuete reko oikuua pyrã oĩ va'e, ha'e kuery pe ha'e ae oikuua uka ramo.

<sup>20</sup> Mba'eta Nhanderuete reko ma ndajaexai va'eri yvy itui ypy'i guive jaikuua porã 'rã guive hembiapokue re jaikuua pota vy. Ha'e nunga rupi jaikuua porã 'rã ipo'akaa opa va'erã e'ŷ ha'e imarã e'ŷa. Ha'e rami vy heko vai va'e kuery "Aikuua vy e'ŷ rima ajejavvy" he'i aguã nda'evei.

<sup>21</sup> Mba'eta ha'e kuery Nhanderuete reko oikuua teĩ nomboetexe vy ixupe "Xeruete" nde'i, ndoguerovy'ai guive. Ha'e rami 'rãgue py opẽxaa py ovare e'ŷ va'e optya, ha'e optya py mba'eve noenduvei ramo pytûmba.

<sup>22</sup> Ojeupe ae "Hi'arandu va'e" he'i va'eri inhakã porã ve'ŷ va'e optya.

<sup>23</sup> Ha'e rami vy Nhanderuete imarã e'ŷ ha'e hexakãmba va'e ombojerovia 'rãgue py avakue imarã va'e ra'angaa rive ombojerovia, ha'e gui guyra, mymba ha'e yvy rupi otyryry va'e ra'angaa guive.

<sup>24</sup> Ha'e nunga rupi Nhanderuete omboaxa ha'e kuery ae onhemboeko ky'a aguã, optya re opa marã rei ikuaxea oĩa rami rive ikuai aguã, guete voi joo meme omongy'a aguã.

<sup>25</sup> Mba'eta Nhanderuete guigua anhetẽ va'e 'rãgue py apu rive ha'e kuery oguerovia. Ha'e rami vy imoingoare 'rãgue py ombojerovia hemimoingo kuery rive. Ha'e rã Nhanderuete anho ha'eve nhambojerovia aguã, raka'e rã peve. Amém.

<sup>26</sup> Ha'e nunga rupi ae Nhanderuete omboaxa itavy reixe rupi rive ikuai aguã. Kunhague voi guekorã va'ekue omboekovia vy ha'eve'ŷa rami ikuai.

<sup>27</sup> Avakue voi ha'e rami ae avi ojepe'a gua'yxy reve joguerekaoa gui. Ha'e vy jomeme itavy reixe vy avakue meme joavyky rei. Ha'e rami rire ojee ae oendu ojejavvyague re ha'evea rami opagaa.

### *Amboae regua kuery opa marã rei ikuai aguã Nhanderuete omboaxaa re ijayvua*

<sup>28</sup> Nhanderuete reko ha'e kuery oikuua va'eri oikuua ete aguã ndojou porãi ramo omboaxa opẽxaa py ojou vaipy ikuai, ha'e ha'eve'ŷ va'e anho ojapo aguã.

\* **1:12** Romanos 15.22-29; Atos 28.15 \* **1:16** 2 Timóteo 1.6-12; Romanos 3.21-24 \* **1:17** Habacuque 2.4

<sup>29</sup> Ha'e kuery re ma teko vai anho oĩ, tavy reia, hakăte'ŷa ha'e porayvu e'ŷa. Joe ija'e e'ŷa rupi anho ikuai, jojukaa ha'e joguero'aa rupi guive. Nhombotavypa rei ha'e porayvu e'ŷ rei va'e ikuai. Joe ijayvu rei,

<sup>30</sup> ijayvux, neĩ Nhanderuete re voi nda'ija'ei, ojee anho ojerovia ha'e ima'endu'a va'e, mba'emo vai re anho onhembopy'a, nguu kuery nonhe'ẽ rendui,

<sup>31</sup> iporã va'e noenduvei, oayvuague ndojapoi, porayvu e'ŷ ae va'e, ha'e nanhomboaxy kuaavei va'e guive.

<sup>32</sup> Ha'e kuery oikuaa ae Nhanderuete ha'evea rami omokanhymba 'rãa ha'e rami ikuai va'e. Ha'e ramive ma ojapove tema okuapy, ha'e amboae kuery ha'e rami ikuai rã oexa vy ojou porã guive.

## 2

### *Judeu ha'e judeu e'ŷ regua ombopaga pyrã ikuia re ijayvua*

<sup>1</sup> Ha'e nunga rupi ndee renhombopagaxe vai va'e, ndee voi nda'evei "Aikuua vy e'ŷ rima ajejavý" 're aguã, mba'eta amboae kuery rembopagaxea py ndee ae renhem-bopaga uka, mba'eta rejou vai va'e ramigua ndee voi rejapo.\*

<sup>2</sup> Ha'e rã Nhanderuete ma ha'evea rami 'rã ombopaga ha'e rami ikuai va'e, jaikuua pavẽ.

<sup>3</sup> Ha'e rami teĩ ndee renhombopaga ukaxe va'eri ha'e rami ae reiko va'e, rex'a'ã ri ty'y reo jepe aguã re Nhanderuete nembopaga aguã gui?

<sup>4</sup> Ndereikuuai ri ty'y rejeko rerova aguã ae Nhanderuete oexa ukaa nderayvua? Tyrã pa nerembovarei ri ty'y oexa uka rã opa mba'e py nderayvua, nanembopaga voi ha'e nerarõ area?

<sup>5</sup> Ha'e rami py neakã ratã ha'e ndepy'a py nderejeko rerovaxei vy ndejee ae remoĩ ukave Nhanderuete poxya. Ha'e va'e ma ha'evea rami nhombopagaa ára py oexa uka 'rã.

<sup>6</sup> Mba'eta peteĩ-teĩ peombojoja 'rã oikoague repy.\*

<sup>7</sup> Ha'e rami vy tekove marã e'ŷ ome'ẽ 'rã iporã va'e rupi anho ikuai vy hexakãmbaa, omboetea aguã ha'e imarã e'ŷ aguã re onhea'ã va'e kuery pe.

<sup>8</sup> Ha'e rã joapo vaia rupi ikuai va'e pe ma oexa uka 'rã ivaia ha'e opoxya, anhetẽ va'e rupi e'ŷ, teko vaia rupi anho ikuai va'e pe.

<sup>9</sup> Mba'eta heko vai va'e kuery áry ou 'rã ojexavai ha'e ikuai axy aguã, judeu kuery pe ranhe, ha'e gui grego kuery pe avi.

<sup>10</sup> Ha'e rã iporã va'e rupi ikuai va'e pe ma ome'ẽ 'rã guexakã, imboetea ha'e imoingo porãarã, judeu kuery pe ranhe, ha'e gui grego kuery pe avi,

<sup>11</sup> mba'eta Nhanderuete ma peteĩ regua rive joegui oayvuve va'e'ŷ.

<sup>12</sup> Ha'e nunga rupi lei revegua e'ŷ ojejavý va'e ha'e javi ma lei re'ŷ avi 'rã okanhy. Ha'e rã lei revegua ojejavý va'e ma lei re oĩa rami ae 'rã ombopagaa.

<sup>13</sup> Mba'eta Nhanderuete renonde ma lei oendu rive va'e'ŷ 'rã heko porã, lei re oĩa rami ikuai va'e anho 'rã omboeko porã.

<sup>14</sup> Ha'e nunga rupi xapy'a rei amboae regua kuery, lei revegua e'ŷ teĩ lei re oĩa rami ikuai 'rã oikuua rami ae. Ha'e va'e kuery ma lei ndojopyi teĩ ha'e kuery ae oikuua 'rã lei regua.

<sup>15</sup> Ha'e rami vy ha'e kuery oexa uka 'rã opy'a re lei regua oĩa, o'arandua gui ae oikuua guekorã. Ha'e rami vy amongue py oikuua 'rã ojejavý, ha'e rã amongue py ma oikuua 'rã ha'evea rami ikuiaia.

<sup>16</sup> Ha'e nunga ha'e javi ojekuaa porã 'rã avakue nhemi rupi ikuaiague re Nhanderuete oikuua potaa ára. Ayvu porã amombe'u aikovya rami vy Cristo Jesus pe ae 'rã oikuua pota uka.

### *Judeu kuery "Aikuua vy e'ŷ rima ajejavý" he'i aguã nda'eveia re ijayvua*

\* **2:1** Mateus 7.1,2 \* **2:6** Salmo 62.12, Proverbios 24.12

<sup>17</sup> Ha'e gui ndee ma "Judeu" 'epy va'e reiko. Rejerovia reikovy lei re oña rami reikoa re, ha'e "Nhanderuete rembiayvu aiko" 're vy revy'a.

<sup>18</sup> Lei re oña rami nembo'ea rā reikuua ae Nhanderuete oipota va'e ha'e rejapo kuaa iporā va'e.

<sup>19</sup> Ndee rexa'ā rā ndee ae reiko ára revegua e'ŷ mboguataa, pytūa rupi ikuai va'e moexakāa,

<sup>20</sup> hi'arandu e'ŷ va'e rerekoa ha'e kyrīgue mbo'ea, mba'eta lei rupi vy 'arandua ha'e anhetēguia reikuuaapa merami.

<sup>21</sup> Ha'e rami avi nhombo'ea reiko va'eri mba'e re tu nerenhembo'ei ndee ae? Imonda e'ŷ aguā renhomongeta va'eri ndee ae ri ty'y nemonda va'ety?

<sup>22</sup> Joupe "Pendetavy eme", 're va'eri ndee ae ri ty'y ndetavy? Mba'emo ra'angaa rejou vai va'eri ta'angaa pegua templo gui nemonda va'e ty'y?

<sup>23</sup> Lei rejou porā va'eri lei rovai reikoa py Nhanderuete neremboete ukai.\*

<sup>24</sup> Mba'eta ipara re oña rami: "Peẽ kuery káuxa amboae regua kuery ijayvu vai 'rā Nhanderuete rery re", he'ia rami ae pendekuai.\*

### *Judeu regua anhetē ete va'e re ijayvua*

<sup>25</sup> Mba'eta ndepire remboi ukaague ma lei re oña rami ete ri reiko ramo ovare. Ha'e rā lei re oña rami e'ŷ ri reiko ramo opire omboi uka e'ŷ va'e rami repyta.

<sup>26</sup> Ha'e rami avi amongue opire omboi uka e'ŷ va'eri lei re oña rami ikuai ramo ha'e kuery pe "Opire omboi uka va'ekue rami ikuai", he'i pavē 'rā.

<sup>27</sup> Ha'e rami vy opire omboi uka e'ŷ va'eri lei re oña rami ikuai va'e kuery ijayvu 'rā okuapy ndere, mba'eta ipara re oī va'e reikuua vy ndepire remboi uka va'eri lei re oña rami e'ŷ reiko.

<sup>28</sup> Mba'eta judeu ete ma guete re rive'ŷ oexa uka judeu oikoa, mba'eta opire omboi uka aguā oeja pyre ma ngo'o re rive'ŷ 'rā ojapo aguā.

<sup>29</sup> Ha'e rami 'rāgue py judeu ete ma opy'a py 'rā ha'e rami ikuai, ha'e opire omboi uka aguā oeja pyre ma ipy'a reguarā, nhe'ē re ae, ipara regua rive'ŷ. Ha'e rami ikuai va'e ma avakue rive'ŷ 'rā oguerovy'a, Nhanderuete ae 'rā oguerovy'a.\*

## 3

### *Paulo mbovaia ayvu oña*

<sup>1</sup> Ha'e gui mba'e nunga py tu amboae regua reko gui judeu kuery reko ha'eveve? Mba'erā nda'u ovare ha'e kuery opire omboi ukaa?

<sup>2</sup> Mba'eta heta oguereko iporā va'e, opa mba'e py. Jypy'i ma judeu kuery pe Nhanderuete ombou raka'e oayvu.\*

<sup>3</sup> Ha'e gui? Judeu regua amongue ndogueroviai rire nda'u Nhanderuete ndoikovei 'rā ri ojeroviapy?

<sup>4</sup> Any teve. Avakue ijapu va'e meme teī Nhanderuete ma anhetē va'e ae, ipara oña rami vy: "Oikuaa pavē 'rā ndeayvua anhetē memea. Ha'e ramo ndereko re oikuaa potaa rā ndepo'aka 'rā", he'ia rami.\*

<sup>5</sup> Ha'e gui amongue aipoe'i 'rā: "Nhandereko vaia ojapo 'rā Nhanderuete reko porāa ojekuaa porāve aguā rami", he'i 'rā. Mba'exa 'rā tu nhambovai? Nda'evei ri nda'u Nhanderuete nhandereko vaia re nhanembopaga aguā? (Nami avakue rami rive xeayvu.)

<sup>6</sup> Any. Ha'e rami va'e rire mba'exa 'rā tu ha'eve Nhanderuete yvy re ikuai va'e re oikuaa pota aguā?

---

\* <sup>2:23</sup> Romanos 3:19,20 \* <sup>2:24</sup> Isaías 52:5; Ezequiel 36:22 \* <sup>2:29</sup> Tery "Judeu" ma "Oguerovy'apy" he'ia. \* <sup>3:2</sup> Romanos 9:4,5 \* <sup>3:4</sup> Salmo 51:4, Romanos 9:6-8; 11:1-5, 25-27

<sup>7</sup> Ha'e gui aipo'ea avi: "Xeapua ojapo 'rā Nhanderuete anhetē va'ea ojekuaa porāve aguā rami, ha'e omboeteave 'rā guive. Ha'e rami rā mba'e re tu xevy pe 'Ojejavvy va'e' he'i vy xembopaga 'rā?" 'ea.

<sup>8</sup> Any, ha'e rami va'e rire ha'eve avi teī 'rāgue "Teko vai rupi tema nhandekuai mba'emo porā oiko aguā" ja'e aguā. Amongue ijapu vy omombe'u 'rā ha'e rami ae oreayvua rami. Ha'e kuery ma ha'evea rami 'rā ombopagaa.

### *Jajejavvy va'e memea re ijayvua*

<sup>9</sup> Ha'e gui mba'exa tu jaikuaa? Ore judeu kuery teve amboae regua gui orerekko porāve va'e? Any, neī peteī henda py. Mba'eta amombe'u ae ma judeu ha'e grego kuery jejavya guy py ikuai va'e memea,

<sup>10</sup> ipara oīa rami: "Jipoi heko porā va'e, neī peteīve.\*

<sup>11</sup> Jipoi oikuua ete va'e, jipoi Nhanderuete oeka va'e.

<sup>12</sup> Mba'eta ojep'e'a pavē, joo rami meme ovare'ŷ va'e ikuai. Jipoi iporā va'e ojapo va'e, neī peteīve."

<sup>13</sup> "Ha'e kuery jyryvi ma omanogue rupa ojep'e'a va'e rami. Oapekū py nhombotavypa." "Ha'e kuery juru re ma mboi guigua veneno ramigua oī."

<sup>14</sup> "Ijuru tynyē oiny ayvu vai ha'e py'a vaikue reia anho."

<sup>15</sup> "Ha'e kuery py ma tuguy omoē aguā katy oo vy inhakuā.

<sup>16</sup> Ikuia rupi ma nhomokanhyarā ha'e nhomomboriauarā oī.

<sup>17</sup> Ha'e rā tape ikuai porā aguā ma ndoikuaai."

<sup>18</sup> "Ha'e kuery re noī ae Nhanderuete renonde ojererokyje aguā."\*

### *Judeu kuery amboae regua rami avi ojejavvy va'e re ijayvua*

<sup>19</sup> Ha'e gui lei re oī va'e ha'e javi ma lei rupi ikuai va'e pegua ae, jaikuaa. Ha'e ramo Nhanderuete renonde yvy jave re ikuai va'e okyririmbā ha'e opaga aguā rami ikuai aguā.

<sup>20</sup> Mba'eta lei re onhea'āa rupi ma avave rei nomboeko porāai 'rā henonde, mba'eta lei gui ma jaikuaa 'rā jajejavvy va'e memea.\*

### *Jesus Cristo re jajerovia ramo nhanemboeko porāa aguā re ijayvua*

<sup>21</sup> Ha'e gui aŷ ma lei rupi e'ŷ Nhanderuete oikuua uka ojeguigua teko porā, lei ha'e profeta kuery omombe'u ma voi va'ekue.

<sup>22</sup> Mba'eta Nhanderuete guigua teko porā ma Jesus Cristo re jajerovia ramo ome'ē. Ojerovia va'e ha'e javive pegua oī, [ha'e javi regua peguarā ombou,] mba'eta joo ramigua meme nhandekuai,

<sup>23</sup> mba'eta nhande ha'e javive jajejavvy vy ndajaupity kuaai Nhanderuete rexakāa.\*

<sup>24</sup> Ha'e rami teī Nhanderuete nhanemboaxya rupi rive nhanemboeko porā 'rā Cristo Jesus nhandereraa jepe rire.

<sup>25</sup> Mba'eta Jesus ma Nhanderuete ombou vy oikuua uka raka'e jejavvy pe'aarā, jajerovia rā huguy py omboguepa aguā jajejavvyague. Ha'e rami py Nhanderuete oexa uka ha'evea rami joguereco va'ea, mba'eta oarō are kuaa va'e vy ymagua kuery ojejavvyague re nombopaga potai ranhe raka'e.\*

<sup>26</sup> Ha'e gui aŷ ma oexa uka ha'evea rami joguereco va'ea, mba'eta heko porā va'e oiko, ha'e Jesus re ojerovia va'e kuery mboeko porāa guive.

<sup>27</sup> Ha'e rami rire nda'u ha'eve nhanhemboyvate aguā? Peteīve henda py nda'evei. Mba'e re tu nda'evei? Mba'eta nhande ae nhanhea'ā rupi e'ŷ jaa jepe, hexe jajerovia vy rive.

---

\* **3:10** Gálatas 3.11,22    \* **3:18** Salmo 5.9, 10.7, 14.1-3, 36.1, 53.1-3, 140.3; Eclesiastes 7.20; Isaías 59.7-8    \* **3:20**  
Romanos 7.7,8; Gálatas 2.16    \* **3:23** Romanos 1.17; 2 Coríntios 5.21; Gálatas 2.15-21; Filipenses 3.9    \* **3:25** Atos  
17.30,31

28 Ha'e nunga rupi jaikuuaa jajerovia ramo 'rāe nhanemboeko porā, lei rupi nhanhea'āa rupi e'ŷ.

29 Tyrā pa Nhanderuete nda'u ore judeu kuery Ruete anho ri oiko? Amboae kuery Ruete guive e'ŷ ri ty'y? Tá, amboae kuery Ruete guive oiko,

30 mba'eta Nhanderuete ma petei'i. Ha'e rami vy judeu kuery ojerovia rā omboeko porā 'rā, ha'e amboae kuery voi ojerovia rā omboeko porā avi 'rā.

31 Ha'e gui jajeroviaa rupi jaa jepea py nda'u jajapo ri lei mba'erā ovare ve'ŷa rami? Any, petei've henda py. Ha'e rami 'rāgue py lei re oī va'e jaikuuaa uka anhetē memea.

## 4

### *Abraão ojerovia ramo omboeko porāgue re ijayvua*

1 Ha'e gui mba'e tu Abraão oupity raka'e? Mba'eta ha'e va'e ma ngo'o re oiko ore judeu kuery ramoī ppy.\*

2 Ha'e gui Abraão ha'e ae onhea'āa rupi onhemboeko porā va'e rire oguereko 'rāgue onhemboyvate aguā. Ha'e rami avi Nhanderuete renonde ndoguerekoi,

3 mba'eta mba'e he'i tu ipara? "Abraão ojerovia Nhanderuete re. Ha'e ramo ojeroviaa re ome'ē teko porā", he'iague.\*

4 Ha'e gui ombo'eapo va'e pe ombo'eapoague repy ma ome'ēa va'e rive e'ŷ, ixupe guarā ae oī.

5 Ha'e rā amongue ha'e ae onhea'ā 'rāgue py heko vai va'e mboeko porāa re ojerovia ramo ma ixupe ome'ē 'rā teko porā, ojeroviaa re rive.

6 Ha'e rami ae Davi voi ijayvu raka'e, mba'eta omombe'u amongue onhea'ā e'ŷ re ixupe Nhanderuete teko porā ome'ē ramo ovy'a ete 'rāa. Ha'e vy aipoe'i:

7 "Ovy'a ete 'rā heko vaiague omboguepaa va'e, ojejavyague ojao'ipaa ramo.

8 Ovy'a ete 'rā avakue ha'e kuery pe Senhor 'Heko vai va'e' nde'i ramo", he'i raka'e.\*

9 Ha'e gui opire omboi uka va'ekue pegua anho 'rā nda'u ovy'a ete aguā oī, tyrā pa opire omboi uka e'ŷ va'e pegua avi? Mba'eta "Abraão ojeroviaa re rive ixupe ome'ē teko porā", ha'eague rami.

10 Mba'e tu ojapo ramo teko porā ome'ē raka'e? Opire omboi uka rire ri nda'u ome'ē, tyrā pa opire omboi uka e'ŷ re? Opire omboi uka rire'ŷ, omboi uka e'ŷ mbove ma voi teko porā ome'ē raka'e Abraão pe.

11 Mba'eta opire omboi uka aguā ma hekorā Nhanderuete oeja raka'e oikuaa uka aguā ojeroviaa re teko porā ixupe ome'ēague, opire omboi uka e'ŷ teri reve. Ha'e rami rire ojerovia va'e ha'e javi ru opyta, opire omboi uka e'ŷ va'e kuery pe guive, mba'eta ha'e kuery voi ojerovia ramo ome'ē 'rā teko porā.

12 Ha'e gui ore orepire romboi uka va'e ru avi oiko. Mba'eta ore ma orepire romboi uka va'e rive e'ŷ orekuai, nhanderu Abraão opire omboi uka e'ŷ re ojeroviaague rami rojerovia va'e avi.

13 Ha'e rami ae avi lei rupi e'ŷ Abraão ha'e hamymino kuery pe Nhanderuete ijayvu raka'e ko yvy ome'ē aguā re, ha'e rā ojeroviaa re teko porā ojopy rire.

14 Ha'e rā lei re ikuai va'e pe yvy ome'ē aguā re ijayvu va'e rire Abraão ojeroviaa ndovarei 'rāgue, ha'e ixupe ijayvuague voi oaxa rive 'rāgue.

15 Mba'eta lei gui ou Nhanderuete ipoxy aguā, ha'e rā lei ndoikuaaia py ma jipoí avi lei rovai ojejavy va'e.

16 Ha'e nunga rupi ae jajeroviaa re Nhanderuete ome'ē teko porā, nhanemboaxy ramo rive jaupity aguā. Ha'e ramo Abraão ramymino kuery ha'e javive pe ijayvuague oī atā 'rā, lei rupi ikuai va'e pe anho e'ŷ, Abraão rami ojerovia va'e kuery ha'e javive pe, (mba'eta nhande kuery pavē ru oiko,

<sup>17</sup> ipara re “Heta regua rurā romoī” he’iague rami vy), mba’eta Nhanderuete renonde hexe ojerovia. Mba’eta Nhanderuete ma omano va’ekue moingovea, ha’e ndoikoi teri va'e pe “Oiko ae” he'i va'e guive.\*

<sup>18</sup> Abraão oarō aguā noī merami teī oarō nho vy ojerovia rire heta regua ru opyta, ixupe “Heta 'rā neramymino kuery ikuai” he’iague rami vy.\*

<sup>19</sup> Ikangy e'ŷ re ojerovia nho vy oikuua pota guete omanogue rami oĩa re, mba’eta cem ma’etŷ ma oguereko, ha'e Sara voi guaimi'i ete ma.

<sup>20</sup> Ha'e rami teī ndoguerovia e'ŷi Nhanderuete ijayvuague, oexa'ã reia noī. Ha'e rami 'rāgue py ojeroviaa py imbaraeteve ovy, oguerovy'a guive Nhanderuete,

<sup>21</sup> mba’eta oikuua porā oayvuague ojapo aguā ipo'aka va'ea.

<sup>22</sup> Ha'e nunga rupi ae “Ojeroviaa re ome'ẽ teko porā” he'i.\*

<sup>23</sup> Ixupe anho e'ŷ guive ipara oiny ome'ãa rami,

<sup>24</sup> nhande kuery pe guive, mba’eta nhandevy pe avi ome'ẽ 'rā teko porā, nhande-Senhor Jesus omanoague gui omboete ju va'ekue re jajerovia ramo.

<sup>25</sup> Ha'e va'e ma omboaxaa raka'e nhanderekro vaia re omano aguā, ha'e gui onhemboete ju nhanemboeko porā aguā.

## 5

### *Jajeroviaa re Nhanderuete nhanemboeko porā rire hexeve jaiko porā aguā re ijayvua*

<sup>1</sup> Ha'e gui ma jajeroviaa re Nhanderuete nhanemboeko porā rire hexeve peteī rami ju jaiko, nhande-Senhor Jesus Cristo re vy.

<sup>2</sup> Hexe jajerovia vy Nhanderuete nhanemboaxya rupi nhandekuai, ha'e Nhanderuete rexakāa ojekuua aguā nharō vy javy'a jaikovy guive.

<sup>3</sup> Ha'e rami anho e'ŷ, jajexavaia py voi javy'a, mba’eta jaikuua jajexavaia ojapo jaropo'akave aguā rami.

<sup>4</sup> Ha'e gui mba’emo jaropo'aka vy jaikuua Nhanderuete nhandererovy'aa. Ha'e nhandererovy'a ramo jareko iporā va'e nharō aguā.\*

<sup>5</sup> Nharōa py ndajajekorei guive, mba’eta nhandepy'a re Nhanderuete oendu uka ae nhanderayvua. Nhe'ẽ Ky'a E'ŷ nhandere ombou va'ekue gui nhaendu.

<sup>6</sup> Mba’eta nhanekangy teri reve Cristo omano raka'e nhanderekro vai va'e re, oa'angaague ára py ete.

<sup>7</sup> Heko porā va'e re vy haxy amongue omano aguā, ha'e rā porayvu va'e re ma amongue nhi'ã omano 'rā.

<sup>8</sup> Ha'e rā Nhanderuete ma po rami oexa uka nhanderayvua: jajejavya rupi teri jaiko reve Cristo omano raka'e nhandere.

<sup>9</sup> Ha'e rami rire, aŷ katuve ma huguy rupi nhanemboeko porā rire nhandereraa jepe 'rā nhombopaga aguā gui.

<sup>10</sup> Mba’eta Nhanderuete rovaigua teri jaiko reve Ta'y omano vy hexeve peteī rami ju nhanemoingo rire aŷ katuve ma hexeve peteī rami nhanemoingo vy nhandereraa jepe 'rā, oikove ju rire.

<sup>11</sup> Ha'e nunga anho e'ŷ, Nhanderuete re ae javy'a, nhande-Senhor Jesus Cristo re vy. Mba’eta hexe vy aŷ peteī rami nhandekuai Nhanderuete reve.

### *Adão re Cristo ombojojaague*

<sup>12</sup> Mba’eta peteī'i ava gui jejavya oiko ypy raka'e yvy jave re, ha'e jejavya gui oiko avi nhamano aguā. Ha'e rami py nhande pavē nhamano aguā rami nhandekuai, pavē jajejavvy rire.

<sup>13</sup> Mba’eta lei oejaa e'ŷ mbove ma voi jejavya oĩ ae ma raka'e yvy re, lei ndoikuua ukaai teri jave avave pe “Lei rovai ojejavy” nda'eai teī.

\* **4:17** Gênesis 17.5 \* **4:18** Gênesis 15.5 \* **4:22** Gênesis 15.6 \* **5:4** Tiago 1.2-4

**14** Ha'e rami avi Adão guive Moisés oiko peve manoia ipo'aka raka'e, ayvu rovai Adão ojejavyague rami ete ndojejavyi va'e kuery re voi. Adão ma nhaneramoï ypy raka'e, ou va'erã va'e kuaa ukaarã.

**15** Ha'e rami avi Adão ojejavy jave guare rami e'ŷ oiko tekove me'ẽ rivea ou rã, mba'eta peteĩ'i ojejavy rire heta omano. Ha'e gui ma heta pe avi Nhanderuete oexa uka omboaxya, amboae ava Jesus Cristo ombou vy.

**16** Ha'e rami avi tekove ome'ẽmby ma peteĩ anho ojejavy jave guare rami e'ŷ guive, mba'eta peteĩ'i ojejavyague gui oiko raka'e nhombopagapa aguã. Ha'e gui heta jaje-javyague gui Nhanderuete nhanemboaxya oexa uka vy nhanemboeko porã.

**17** Peteĩ'i ojejavyague gui ae manoia ipo'aka rire teĩ Nhanderuete nhanemboaxya ha'e teko porã ome'ẽ rã jaupity va'e katuve ma nhandepo'aka 'rã peteĩ'i re vy. Ha'e va'e ma Jesus Cristo.\*

**18** Mba'eta peteĩgue'i ojejavya ague gui nhande kuery pavẽ re oiko raka'e japaga aguã. Ha'e rã peteĩgue'i joapo porãague gui nhande kuery pavẽ pe oiko avi nhanemboeko porã rã tekove jaupity aguã.

**19** Mba'eta peteĩ'i ava nonhe'ẽ renduiague gui heta ikuai raka'e ojejavy va'e. Ha'e gui ma peteĩ'i onhe'ẽ renduague gui ju heta ikuai 'rã heko porã va'e.

**20** Ha'e gui ma lei oejaa avi raka'e jejavya ojekuaa porãve aguã, va'eri jejavya hetave ramo nhanemboaxya voi hetave avi oexa uka raka'e.

**21** Ha'e rami avi jejavya ipo'aka raka'e pavẽ nhamano aguã rami. Ha'e gui nhanemboaxya ju nhanemboeko porã vy ipo'aka tekove marã e'ŷ jaupity aguã, nhande-Senhor Jesus Cristo re vy.

## 6

### *Nhanderuete nhanemboaxy ramo jejavya po'akaa gui jaa jepea re ijayvua*

**1** Ha'e rami rã mba'e ja'e 'rã tu? Jajejavva rupi riae 'rã teve jaiko Nhanderuete nhanemboaxyve aguã?

**2** Any. Mba'exa tu jajejavva riaeve ta, ha'e nunga pe nhamano rire?

**3** Tyrã pa ndapeikuuai teri teve Cristo Jesus peguarã nhanhemongarai vy ha'e omanoague py avi nhanhemongaraiague?

**4** Mba'eta nhanhemongarai vy hexeve nhande voi jajeaty uka avi nhamanoa py, Nguu po'akaa rupi Cristo omanoague gui onhemboete jevyague rami avi nhande voi nhandereko pyau reve nhandekuai aguã.\*

**5** Mba'eta Cristo omanoague rami nhande voi hexeve nhamano rire ha'e onhemboete jevyague rami avi 'rã jaiko.

**6** Mba'eta jaikuua nhanderekoy mague kuruxu re hexeve omano aviague, to'o nhanembojejavva ve'ŷ aguã, jejavya rembiguai rami ve'ŷ jaiko aguã.

**7** Mba'eta omano va'ekue ha'e javi oiko porã ju 'rã ojejavyague gui.

**8** Ha'e gui nhande voi Cristo reve nhamano rire jarovia hexeve avi jaiko aguã.

**9** Mba'eta jaikuua Cristo omanoague gui onhemboete ju rire nomanovei ma 'rãa. Hexe ma manoia nda'ipo'akavei.

**10** Peteĩgue'i omano raka'e jejavya pe. Ha'e gui oikove vy Nhanderuete pe ju oiko.

**11** Ha'e rami ae avi po rami peẽ voi peikuua: peẽ voi jejavya pe pemano ma avi, ha'e gui Cristo Jesus re vy Nhanderuete pe ju peiko.

**12** Ha'e nunga rupi jejavya ta'ipo'akave eme penderete imarã va'e re, to'o oipota va'e rupi ve'ŷ pendekuai aguã.

\* **5:17** 1 Coríntios 15.20-22,45-49      \* **6:4** 2 Coríntios 5.17; Gálatas 2.19,20; 5.24; 6.14; Efésios 4.22-24; Colossenses 3.1-11; 1 Pedro 4.1-3

<sup>13</sup> Penderete regua voi pemboaxave eme jejavya pe, nhomboeko vaia rembiguairā. Ha'e rami 'rāgue py omanoague gui oikove ju va'ekue rami pejeko me'ē Nhanderuete pe. Ixupe anho pemboaxa penderete regua, teko porā rembiguairā.

<sup>14</sup> Mba'eta jejavya nda'ipo'akavei 'rā pendere, mba'eta lei guy py ve'ŷ pendekuai, ha'e rā Nhanderuete penemboaxya rupi anho.

### *Lei, tembiguai ha'e nhanemboaxya re ijayvua*

<sup>15</sup> Ha'e gui? Lei guy py ve'ŷ, Nhanderuete nhanemboaxya rupi anho nhandekuai vy nda'u jajejavva riaeve ta? Any.

<sup>16</sup> Ndapeikuai ri ty'y nhoembiguairā pejeko me'ē rire pendererekao anho 'rā penhe'ē rendu? Jejavva rembiguai ma omano aguā rami ikuai, ha'e rā Nhanderuete nhanhe'ē rendu va'e ma teko porā rupi nhandekuai.\*

<sup>17</sup> Xee arov'a Nhanderuete, mba'eta yma rupi jejavya rembiguai pendekuaiague gui pejepe'a vy pendepy'a ha'e javi py penhe'ē rendu penembo'eague rami.

<sup>18</sup> Ha'e gui jejavya gui peo jepe vy teko porā rembiguai ju pendekuai.

<sup>19</sup> Avakue reko re ambojoja, mba'eta pendero'o reve teri peiko vy ndapeikuua porāi ramo. Yma rupi penderete regua pemboaxa va'ekue imongy'aarā pe hembiguairā, penderekoyk'ave ha'e penderekovai reive peovy aguā rami. Ha'e gui aŷ ma teko porā rembiguairā ju pemboaxa penderete regua, iky'a e'ŷ va'e pendekuai aguā.

<sup>20</sup> Mba'eta jejavya rembiguai teri pendekuai jave teko porā rupi e'ŷ pendekuai va'ekue.

<sup>21</sup> Ha'e va'e jave mba'e tu pejou raka'e ha'e nunga repy? Mba'emo aŷ penemoximba va'e anho, ha'e opaa py ma ha'e nunga nhandejuka 'rā.

<sup>22</sup> Ha'e gui aŷ ma jejavya rembiguai pendekuaiague gui Nhanderuete pendereraa jepe vy guembiguai ae ju penemoingo rire pejou iky'a e'ŷ va'e penemoingoarā, ha'e opaa py ma tekove marā e'ŷ.

<sup>23</sup> Mba'eta jejavyague repy ma mano. Ha'e rā Nhanderuete ome'ē rive va'e ma tekove marā e'ŷ, nhande-Senor Cristo Jesus re oĩ va'e.

## 7

### *Omenda va'e reko re ombojojaague*

<sup>1</sup> Irmão kuery, lei peikuua va'e pe ju ta xeayvu aŷ. Ndapeikuai ri ty'y jaikovea pukukue re anho lei ovare 'rā?

<sup>2</sup> Mba'eta lei re oĩ rami vy kunha omenda va'e minha ime oikovea ja anho oiko 'rā ixupe. Ha'e gui ime omano ma ramo lei re oĩ rami vy ndoikovei ma 'rā ixupe.

<sup>3</sup> Xapy'a rei ime oikove teri reve amboae ava re onhemoirū ramo jaikuua 'rā itavy reia. Ha'e rā ime omano ma ramo ha'e va'e lei rami ve'ŷ ma 'rā oiko. Omenda jevy tei itavy rei va'e'ŷ 'rā oiko.

<sup>4</sup> Ha'e rami ae avi xe-irmão kuery, peẽ voi lei pe pemano va'ekue Cristo rete reve vy, amboae pe ju peiko aguā, omanoague gui onhemboete ju va'ekue pe ae, ha'e rami vy Nhanderuete oipotaa rami pendekuai aguā.\*

<sup>5</sup> Mba'eta to'o oipotaa rami teri nhandekuai jave lei ojapo raka'e jajejavypa reixeia anho nhaendu aguā rami, ha'e ramo opa marā oguerekoo nhanderete regua nhandejuka ete aguā.

<sup>6</sup> Ha'e gui aŷ ma lei gui nhandereraa jepe rire nhandere ipo'aka va'ekue pe nhamano ma, Nhe'ē guigua teko pyau rupi ju nhandekuai aguā rami, teko ymague ipara re oĩ rupi ve'ŷ.

### *Lei ha'e jejavya re ijayvua*

\* **6:16** João 8.34 \* **7:4** Romanos 10.4

<sup>7</sup> Mba'e ja'e 'rã tu ha'vy? Lei teve nhanembojejavyarã oĩ? Any. Ha'e rami avi lei gui e'ŷ va'e rire xee ndaikuuai 'rãgue jejavya. Mba'eta lei aipo nde'i va'e rire: "Emoaruã eme", xee naendui 'rãgue amoaruãa.\*

<sup>8</sup> Ha'e gui ojapo uka pyre rupi vy jejavya ojapo opa marãgua amoaruãa aendu aguã rami, mba'eta lei ndoikuua py ma omano va'ekue rami avi jejavya nda'ipo'akai.

<sup>9</sup> Ymave rupi lei aikuua e'ŷ mbove, aiko porã merami. Ha'e gui ma ojapo uka pyre aikuua ramo jejavya oikove ju, ha'e rã xee ma omano va'ekue rami apyta.

<sup>10</sup> Ha'e rami vy ojapo uka pyre nhomoingovearã oĩ va'ekue ri xemoingo karamboae omano va'ekue rami.\*

<sup>11</sup> Mba'eta ojapo uka pyre rupi jejavya ipo'akave vy xembotavy ojapo uka pyre aikuua py ae, ha'e vy omano va'ekue rami xemoingo.

<sup>12</sup> Ha'e gui lei ha'e ojapo uka pyre ma iky'a e'ŷ va'e meme, teko porã kuaa ukaarã ha'e iporã va'e.

<sup>13</sup> Ha'e gui iporã va'e ae teve xemoingo omano va'ekue rami? Any, jejavya ae ha'e rami xemoingo iporã va'e rupi. Mba'eta ojapo uka pyre rupi jejavya ojekuaa porãve, jejavya etea jaikuua aguã rami. Ha'e rami vy ae omano va'ekue rami xemoingo.

<sup>14</sup> Mba'eta jaikuua lei re oĩ va'e ma Nhe'ẽ guigua memea. Ha'e rã xee ma to'o re aiko, jejavya rembiguairã omboaxa pyre rami.

<sup>15</sup> Mba'eta xee ae voi ndaikuuai aikoa, mba'eta xee aikoxea rupi ndaikoi, aikoxe e'ŷa rupi rive aiko.

<sup>16</sup> Ha'e gui aikoxe e'ŷa rupi aiko vy lei pe "Iporã va'e" ha'e.

<sup>17</sup> Ha'e rami xemoingoa ma xee ae e'ŷ, ha'e rã jejavya xere oĩ va'e.

<sup>18</sup> Mba'eta aikuua xere, xerete re ma iporã va'e noĩa. Ha'evea rami aikoxea ma xere oĩ anhetẽ. Ha'e rã ha'e rami aiko kuaa etea ma noĩ.

<sup>19</sup> Mba'eta ha'evea rami aikoxea rupi ndaikoi. Ha'e rami 'rãgue py mba'emo vai ajapoxe e'ŷ va'e anho ajapo.

<sup>20</sup> Ha'e nunga rupi ajapoxe e'ŷ va'e ajapo ramo ha'e rami xemoingoa ma xee ae e'ŷ, ha'e rã jejavya xere oĩ va'e.

<sup>21</sup> Mba'eta ha'evea rami aikoxe teĩ xere aendu avi mba'emo vai rupi xemoingoarã.

<sup>22</sup> Mba'eta xepy'a re ma Nhanderuete guigua lei arov'y'a,

<sup>23</sup> ha'e rã xero'o re ma amboae rami xemoingoarã aendu. Ha'e va'e ma xepy'a re lei oĩ va'e re opu'ã 'rã xemoingo aguã xerete re jejavya oĩ va'e rembiguairã.

<sup>24</sup> Ava ov'y'a e'ŷ ete va'e xee aiko! Mava'e tu xereraa jepe 'rã kova'e tete xejukaxe va'e gui?

<sup>25</sup> Arov'y'a Nhanderuete, Jesus Cristo nhande-Senhor rupi. Mba'eta xejegui ae xepy'a re oĩa rami vy aiko Nhanderuete guigua lei rembiguai, ha'e rã to'o oipotaa rami aiko vy ma lei jejavya rembiguai aiko.

## 8

### *Nhe'ẽ re nhandekuai va'e ndajapagavei aguã re ijayvua*

<sup>1</sup> Ha'e gui aŷ Cristo Jesus re jaiko va'e ma japaga aguã rami ve'ŷ jaiko,

<sup>2</sup> mba'eta Nhe'ẽ guigua tekove me'ẽa Cristo Jesus re oĩ va'e ma nhandereraa jepe ma jejavya nhandejukaa gui.\*

<sup>3</sup> Mba'eta lei rupi nhanhea'ã teri jave nda'evei va'ekue jajapopa aguã, nhandro'o re nhanekangy vy. Ha'e ramo Nhanderuete ae ojapo nhandevy, mba'eta Gua'y ombou raka'e nhandro'o re jajejavvy va'e regua rami teĩ, jajejavvy oipe'a aguã. Ha'e rami py Nhanderuete oipe'a raka'e to'o re jejavya oĩ va'e po'aka,

\* 7:7 Êxodo 20.17, Deuteronômio 5.21 \* 7:10 Romanos 3.20; Gálatas 3.23,24 \* 8:2 Gálatas 5.16-26

<sup>4</sup> lei re ojapo uka pyre oĩ va'e jajapo nho aguã, to'o re ve'ŷ jaiko vy guive, ha'e rã Nhe'ẽ re anho.

<sup>5</sup> Mba'eta to'o re ikuai va'e ma to'o guigua re anho 'rã ipy'a, ha'e rã Nhe'ẽ re ikuai va'e ma Nhe'ẽ guigua re 'rã ipy'a.

<sup>6</sup> Mba'eta to'o re ikuai va'e omano aguã rami ikuai. Ha'e rã Nhe'ẽ re ikuai va'e ma tekove ha'e mby'a porã 'rã oupity.

<sup>7</sup> Mba'eta to'o re ikuai va'e ma Nhanderuete rovaigua meme ikuai. Ha'e kuery nonhe'ẽ rendui 'rã Nhanderuete guigua lei rupi, mba'eta nda'evei ae ha'e va'e rupi ikuai aguã.

<sup>8</sup> Ha'e nunga rupi to'o re ikuai va'e nombovy'ai 'rã Nhanderuete.

<sup>9</sup> Ha'e rã peẽ ma to'o re'ŷ pendekuai, ha'e rã Nhe'ẽ re, anhetẽ ri pendere Nhanderuete Nhe'ẽ oĩ ramo. Ha'e rã amongue re Cristo Nhe'ẽ noĩ ramo ixupegua e'ŷ oiko.

<sup>10</sup> Ha'e rã pendere Cristo oĩ ramo penderete anhetẽ omano aguã rami oĩ jejavya káuxa, teĩ pendere teko porã oĩ avi rã Nhe'ẽ ome'ẽ tekove.

<sup>11</sup> Mba'eta Cristo Jesus omanoague gui omboete va'ekue Nhe'ẽ pendere oĩ vy penderete imarã va'e voi omoingove avi 'rã, Onhe'ẽ pendere oĩ va'e py ae.

### *Ta'y kuery ha'e mba'emo jopyarã jaikoa re ijayvua*

<sup>12</sup> Ha'e nunga rupi irmão kuery, Nhanderuete pe jaiko aguã rami nhandekuai, to'o pe'ŷ, to'o oipotaa rami nhandekuai ve'ŷ aguã.

<sup>13</sup> Mba'eta to'o oipotaa rami ri pendekuai vy pemano aguã rami peiko. Ha'e rã Nhe'ẽ re vy to'o oipota va'e pemomba rí vy anhetẽ peikove 'rã.

<sup>14</sup> Mba'eta Nhanderuete Nhe'ẽ pe ojererekoo uka va'e ma Nhanderuete ra'y kuery meme ikuai.\*

<sup>15</sup> Mba'eta Nhe'ẽ pendere oĩ va'e ma escravo penemoingoarã e'ŷ oĩ, pekyjea rupi peiko ve'ŷ aguã. Pendere Nhe'ẽ oĩ va'e ma Nhanderuete ra'y kuery peikoa kuaa ukaarã oĩ. Ha'e va'e rupi vy "Xeru, Xeru" ja'e 'rã jajapukai vy,

<sup>16</sup> mba'eta nhanenhe'ẽ reve Inhe'ẽ avi oikuua uka Nhanderuete ra'y kuery jaikoa.

<sup>17</sup> Ha'e ta'y kuery jaiko vy raka'eve rã jajopy 'rã nhandevy guarã omoĩ porã mbyre. Cristo reve vy jajopy 'rã Nhanderuete gui, mba'eta hexeve jaiko axy rire hexeve avi 'rã nhanemoingo imarã ve'ŷ va'e.

### *Aŷ jaiko axy rire raka'eve rã iporã ete va'e jaupity aguã re ijayvua*

<sup>18</sup> Mba'eta po rami xee aikuua porã: raka'eve rã imarã ve'ŷ va'e nhanemoingo ma ramo aŷ jaiko axyague pe "Mba'e'ŷ va'ekue" ja'e 'rã. \*

<sup>19</sup> Mba'eta mba'emo omoingo pyre ha'e javi oarõ avi Nhanderuete ra'y kuery ojekuaa ára pyguarã.

<sup>20</sup> Mba'eta opa mba'e omoingo pyre omombytaa raka'e ha'eve'ŷa rami ranhe, ha'e ae oipotaa rami e'ŷ, imoingoare oipotaa rami.

<sup>21</sup> Ha'e rami rire mba'emo omoingo pyre voi oarõ imarã aguã gui oo jepe aguã, Nhanderuete ra'y kuery oo jepea rami avi ha'e nunga voi imarã ve'ŷ va'e opyta aguã.

<sup>22</sup> Mba'eta jaikuua mba'emo omoingo pyre ha'e javi aŷ peve ikuai axy vy ipoaẽ oinya.

<sup>23</sup> Ha'e nunga anho e'ŷ, nhande kuery jypy Nhanderuete Onhe'ẽ ome'ẽ rã jajopy va'ekue voi nhanepoaẽ avi nhandepy'a py, gua'y kuery eterã nhandererova aguã nharõ vy, nhanderete voi ogueraa jepe avi javé.

<sup>24</sup> Mba'eta ha'e rami aguã nharõ reve ae jaa jepe raka'e. Ha'e gui nharõ va'e ojekuaa ma va'e rire nharõa noïvei 'rãgue, mba'eta mba'emo ojekuaa ma va'ekue nanharõvei 'rã.

<sup>25</sup> Ha'e rami avi ndojekuaai teri va'e nharõ vy nhandekuerai e'ŷ re 'rã nharõ.

### *Nhandere Nhe'ẽ ojerurea re ijayvua*

\* **8:14** Gálatas 4.1-7    \* **8:18** 2 Coríntios 4.16-18; 1 Pedro 1.3-5

<sup>26</sup> Ha'e rami ae avi nhanekangya py Nhe'ẽ nhanepytyvõ 'rã, mba'eta nhande ndajaikuai neĩ nhanhembo'e aguã. Ha'e rã Nhe'ẽ ma nhandere ojerure 'rã opoaẽa nanhaendu kuaai va'e rupi.

<sup>27</sup> Nhe'ẽ py'a re oĩ va'e ma pavẽ py'a re oikuaa pota va'e oikuaapa 'rã, mba'eta Nhanderuete oipotaa rami ae ojerure oikovy iky'a e'ŷ va'e kuery re.

<sup>28</sup> Jaikuua mba'emo oiko va'e ha'e javi ojapo porã 'rãa Nhanderuete jayvu va'e kuery pe, ha'e ae oipotaa rami vy nhanerenoĩ rire.

<sup>29</sup> Mba'eta yma ma voi nhandekuaa vy nhandeporavo avi Gua'y reko rami nhanemoingo aguã, guyvy kuery oguerekoo reta aguã.

<sup>30</sup> Ha'e gui nhandeporavo rire nhanerenoĩ avi, ha'e gui nhanerenoĩ rire nhanemboeko porã avi. Ha'e gui nhanemboeko porã rire imarã ve'ŷ va'e avi nhanemoingo.\*

### *Nhanderuete nhanderayvua jaikuua porã aguã re ijayvua*

<sup>31</sup> Ha'e rami rire mba'e ja'e 'rã tu? Nhandereve Nhanderuete oiko ramo mava'e 'rã tu nhanderovaigua oiko?

<sup>32</sup> Mba'eta nhande kuery ha'e javi re Gua'y nome'ẽ e'ŷi rire hexeve opa mba'e ome'ẽ avi 'rã nhandevy.

<sup>33</sup> Mava'e tu ijayvu kuaa Nhanderuete rembiporavo kuery rovai? Mba'eta nhanemboeko porãa ma Nhanderuete ae.\*

<sup>34</sup> Mava'e tu nhanembopaga 'rã? Mba'eta Cristo Jesus omano ha'e onhemboete ju va'ekue ae nhandere ojerure oiny Nhanderuete oiporu kuaa regua re.

<sup>35</sup> Mava'e 'rã tu ha'vy nhandepe'a Cristo nhanderayvua gui? Jajexavaia teve 'rã nhandepe'a, tyrã pa haxy va'e, nhandere opu'ã rei va'e, karuai, nhandeao e'ŷa, ijavaete va'e, tyrã kyxe revegua teve?

<sup>36</sup> Mba'eta ipara oĩa rami: "Ndevyguia orekuai ramo ko'ẽ nhavõ oremboaxaa orejukaarã pe. Vexa'i ojukaa aguã katy heraa va'e rami orekuai", he'iague rami.\*

<sup>37</sup> Ha'e nunga ha'e javi nhandere oiko teĩ opa mba'e py Nhanderayvua nhanembopo'aka.

<sup>38</sup> Mba'eta xee aikuua porã Nhanderuete nhanderayvua gui nhandepe'aarã ndoikoia: neĩ mano, tekove, anjo kuery, huvixa kuery, mba'emo aŷ oiko va'e, araka'eve rã guarã, ipo'akakueve,

<sup>39</sup> yvategua, yvy guyrygua, neĩ amboae nunga voi nanhandepe'ai 'rã Nhanderuete nhanderayvua nhande-Senhor Cristo Jesus re oĩ va'e gui.

## 9

### *Judeu kuery ogueraa jepexea re Paulo ijayvuague*

<sup>1</sup> Cristo rery rupi anhetẽ va'e amombe'u po rami, ndaxeapui. Nhe'ẽ Ky'a E'ŷ re vy xepy'apy py aikuua anhetẽa.

<sup>2</sup> Mba'eta xeporiau ete, xekuraxõ raxy ndoaxai ae,

<sup>3</sup> mba'eta xeryvy kuery, xeretarã kuery ngo'o re ikuai va'e araa jepe aguã ha'eve va'e rire ayvu vaipy ha'e Cristo gui okanhigue 'rãgue xee aiko.

<sup>4</sup> Ha'e kuery ma Israel regua ikuai. Ha'e kuery peguarã va'ekue ma Nhanderuete ra'y kuery ikuai aguã, hexakã, guexeve guarã ojapo va'ekue, lei, Nhanderuete ombojerovia aguã, ha'e mba'emo ome'ẽ aguã re ijayvuague.

<sup>5</sup> Ha'e kuery regua ma oreramoĩ kuery ikuai raka'e, ha'e Cristo voi ngo'o re ha'e kuery regua avi oiko. Ha'e va'e ma pavẽ gui yvateve va'e oiko raka'e rã peve, Nhanderuete ima'endu'a porãmby. Amém.\*

### *Israel kuery pavẽ e'ŷ Nhanderuete oiporavo ramo ijayvuague ndoaxa riveia re ijayvua*

---

\* **8:30** Efésios 1.3-5   \* **8:33** Romanos 5.1   \* **8:36** Salmo 44.22   \* **9:5** Romanos 3.1,2

<sup>6</sup> Ha'e rami avi jaikuua Nhanderuete ijayvuague ndoaxa riveia, mba'eta Israel ramymino kuery pavē e'ŷ ikuai Israel regua ete.\*

<sup>7</sup> Ha'e Abraão ramymino kuery ha'e javi e'ŷ guive ikuai ta'y kuery rami. Mba'eta "Isaque ramymino kuery pe anho 'rā 'Neramymino kuery' 'ea 'rā", he'i va'ekue.\*

<sup>8</sup> Ha'e nunga rupi ho'o gui rive oiko va'ekue'ŷ 'rā Nhanderuete ra'y kuery ikuai. Ijayvuague rami oiko va'ekue anho 'rā ta'y kuery jaikuua.

<sup>9</sup> Mba'eta Abraão pe aipoe'i raka'e: "Kova'e ára ojeupity jevy jave aju ramo Sara oguereko'i ma 'rā ava'i", he'i va'ekue.\*

<sup>10</sup> Ha'e va'e anho e'ŷ, Rebeca pi'a kuery voi peteĩ'i nguu oguereko raka'e, oreramoĩ Isaque ae,

<sup>11</sup> ha'e rami teĩ mokoĩve itui e'ŷ re ma voi peteĩ'i Nhanderuete oiporavo raka'e, mba'emo porā neĩ mba'emo vai ha'e kuery ojapo e'ŷ re. (Mba'eta Nhanderuete ha'e ae oipotaa rami vy nhandeporavo, nhande ae nhanhea'ãa rupi e'ŷ, ha'e rā Nhanerenoĩa oipotaa rami vy anho.)

<sup>12</sup> Ha'e nunga rupi ixy pe aipoe'i raka'e: "Tyke'y oiko 'rā guyvy rembiguai", he'i,\*

<sup>13</sup> ipara oĩa rami: "Xee ayvu va'ekue Jacó, ha'e rā Esaú ma ayvu va'ekue'ŷ ae."\*

*Israel kuery amongue Nhanderuete ndoiporavoi teĩ ha'evea rami nhandererekova'ea re ijayvua*

<sup>14</sup> Ha'e rami rā mba'e ja'e 'rā tu? Nhanderuete ha'eve e'ŷa rami teve nhandererek? Any teve.\*

<sup>15</sup> Mba'eta Moisés pe aipoe'i: "Xee amboaxy 'rā amboaxyxe va'e, xemboaxy rami areko 'rā amboaxy va'e ete'i", he'i va'ekue.\*

<sup>16</sup> Ha'e nunga rupi nhande ae jaipotaa rami e'ŷ 'rā nhandeporavo, nhande nhanhea'ãa re'ŷ guive, ha'e rā Nhanderuete ha'e ae nhanemboaxy rupi.

<sup>17</sup> Mba'eta ipara oĩa py aipoe'i Faraó pe: "Po rami aguã ae romoĩ, ndee reikoa rupi xepo'akaa aexa uka aguã, yvy jave re xerery oikuaapaa aguã", he'i raka'e.\*

<sup>18</sup> Ha'e rami vy Nhanderuete omboaxy 'rā omboaxyxe va'e, ha'e rā amboae kuery ma omoakã ratā 'rā, ha'e ae oipotaa rami oiko vy.

*Nhanderuete opa mba'e re ipo'aka va'ea re ijayvua*

<sup>19</sup> Ha'e gui xapy'a rei ndee aipo're 'rā xevy: "Mba'e re tu ha'vy Nhanderuete jojou vai? Mava'e tu oiko 'rā ha'e oipotaa rami e'ŷ?" 're 'rā.

<sup>20</sup> Ha'e rami teĩ ndee ava, marā ramigua tu reiko Nhanderuete rembovai ete aguã? Mba'emo ryrurā ojapo pyre nda'u ijapoare pe: "Mba'e re tu guĩ rami ri xeapo?" he'i 'rā ri?\*

<sup>21</sup> Mba'eta nhae'ũ gui mba'emo apoa ipo'aka 'rā yapo re, peteĩ apu'a gui mokoĩ ryru ojapo aguã: iporā va'e ryrurā, ha'e gui mba'emo rive ryrurā avi.

<sup>22</sup> Mba'e ja'e 'rā tu ha'vy? Mba'eta xapy'a rei Nhanderuete opoxya ha'e opo'akaa oexa ukaxe vy ogueropo'aka are 'rā mba'emo ryru ojou vai pyrā, okanhy aguã rive oguereko pyre,

<sup>23</sup> ha'e rā mba'emo ryru hemimboaxy ikuai va'e re ma oexa uka 'rā guexakãa, yma ma voi guexakãa pyguarā oguereko katu rire.

<sup>24</sup> Ha'e va'e kuery ma nhande ae, mba'eta judeu regua anho e'ŷ, amboae regua voi nhancerenoĩ raka'e.

<sup>25</sup> Mba'eta Oséias ombopara va'ekue re aipoe'ia rami: "Xevyguia e'ŷ va'ekue pe 'Xevyguia ae' ha'e 'rā, ha'e xerembiayvu e'ŷ va'ekue pe 'Xerembiayvu ae' ha'e 'rā.

---

\* **9:6** Romanos 2.25-29   \* **9:7** Gênesis 21.12   \* **9:9** Gênesis 18.10,14   \* **9:12** Gênesis 25.23   \* **9:13** Malaquias 1.2-3   \* **9:14** Romanos 3.5-8; Mateus 20.1-16   \* **9:15** Éxodo 33.19   \* **9:17** Éxodo 9.16   \* **9:20** Isaías 29.16, 45.9

**26** Ha'e gui pendevy pe 'Xevyguia e'ŷ' 'ea 'rāgue py 'Nhanderuete oikove va'e ra'y kuery 'ea 'rā", he'i raka'e.\*

**27** Ha'e rā Israel kuery re ma Isaías ijayvu vy aipoe'i: "Israel kuery ma ye'ẽ rembe re ita ku'i ikuai va'e rami heta teĩ mbovy'i ete 'rā oo jepe.

**28** Mba'eta Senhor ojapopa vyvoi 'rā oayvuague yvy re",

**29** Isaías aipoe'i ma voiague rami: "Senhor Ixondaro reta va'e nhaneramymenorã nomoingovei va'e rire Sodoma ha'e Gomorra pygua kuery rami avi 'rāgue nhakan-hymba."\*

### *Israel kuery ndojeroviaia re ijayvua*

**30** Mba'e ja'e 'rā tu ha'vy? Amboae regua kuery nonhemboeko porã uka potai va'ekue ri ojeroviaa rupi oupity nho teko porã.

**31** Ha'e rā Israel kuery ma lei rupi teko porã re onhea'ã va'ekue ri ndoupityi.

**32** Mba'e re nda'u ha'e kuery ndoupityi? Mba'eta ojeroviaa rupi e'ŷ oupityxe, ha'e kuery ae onhea'ãa rupi rive. Ha'e rami vy onhepyxanga okuapy ita nhomonhepyxangaarã oĩ va'e re,

**33** ipara oĩa rami: "Pendu ke, Sião py amoĩ 'rā peteĩ ita nhomonhepyxangaarã, joityaraã. Ha'e rā hexe ojerovia va'e ma nda'eve e'ŷi nho 'rā."\*

## 10

### *Nhanderuete guigua teko porã judeu kuery ojee nomoĩxeia re ijayvua*

**1** Irmão kuery, xepy'a py aipota va'e, ha'e Nhanderuete pe judeu kuery re ajerure aikovya ma ha'e kuery oo jepe aguã.

**2** Mba'eta xee aikuaa rā ha'e kuery anhetẽ ete onhea'ã okuapy Nhanderuete pe ojererovy'a ukaxe vy, teĩ oikuaa rupi e'ŷ onhea'ã.

**3** Mba'eta ndoikuuai okuapy Nhanderuete guigua teko porã, ha'e rami vy ha'e kuery ae reko porãa rive oexa ukaxe vy nonhemo'yvyixei Nhanderuete guigua ojee omoĩ aguã.

**4** Mba'eta Cristo ma lei opaa, mba'eta hexe ojerovia va'e ma teko porã oguereko va'e meme.\*

**5** Ha'e gui Moisés ombopara raka'e: "Lei re teko porã oĩ va'e rupi amongue oiko ri vy oikove 'rā ha'e va'e re", he'i.\*

**6** Ha'e rā ojeroviaa re teko porã oupity va'e re ma aipoe'i: "Eporandu eme ndepy'a py: 'Mava'e tu oo 'rā yva re?' 're eme.' (Pova'e ma "Yva gui Cristo ogueru aguã", he'ia.)

**7** "Neĩ 'Mava'e tu oguejy 'rā yvykua vaikue py?' 're eme guive.' (Pova'e ma "Cristo omanoague gui ogueru ju aguã", he'ia.)

**8** Ha'e rami 'rāgue py mba'e he'i tu? "Ndeyvy'iry ae ayvu oĩ, ndejuru py ha'e ndepy'a re", he'i.\* Ha'e va'e ayvu ma jajerovia aguã regua romombe'u va'e, po rami:

**9** Ndejuru py Jesus Senhor oikoa rami ri remombe'u, ha'e ndepy'a py omanoague gui Nhanderueteomboete jevyague rerovia vy reo jepe 'rā.

**10** Mba'eta nhandepy'a py jajerovia 'rā teko porã jaupity aguã, ha'e nhandejuru py ma nhanhemombe'u 'rā jaa jepe aguã.

**11** Ha'e nunga rupi ae ipara oiny: "Ha'e javive hexe ojerovia va'e nda'eve e'ŷi nho 'rā."\*

**12** Mba'eta judeu ha'e grego kuery joo rami ikuai, mba'eta peteĩ'i oiko pavẽ regua Senhor, ha'e opa mba'e py omboaxy 'rā ixupe ojapukai va'e ma guive rā,

**13** "Ha'e javive Senhor rery rupi ojapukai va'e oo jepe 'rā" he'iague rami.\*

---

\* **9:26** Oséias 1.10, 2.23 \* **9:29** Isaías 1.9, 10.22-23 \* **9:33** Isaías 8.14, 28.16 \* **10:4** Gálatas 3.24-27 \* **10:5** Levítico 18.5 \* **10:8** Deuteronomio 30.12-14 \* **10:11** Isaías 28.16 \* **10:13** Joel 2.32, Romanos 1.16,17; Marcos 16.15,16

<sup>14</sup> Ha'e rami avi mba'exá 'rã tu ixupe amongue ojapukai, hexe ojerovia e'ý re? Ha'e mba'exá 'rã tu hexe ojerovia, ayvu oendu e'ý re? Ha'e mba'exá 'rã tu oendu, imombe'uarã ndoikoi rã?

<sup>15</sup> Ha'e mba'exá 'rã tu amongue omombe'u, omondoukaa e'ý ramo? Mba'eta ipara oĩa rami: "Iporã ete ayvu porã mombe'ua kuery ou rã."\*

### *Israel kuery "Noroendui rima", he'i aguã nda'eveia re ijayvua*

<sup>16</sup> Ha'e rami teĩ Israel kuery pavẽ e'ý onhe'ẽ rendu ayvu porã. Mba'eta Isaías aipoe'i: "Senhor, mava'e tu oguerovia oreayvu?" he'i va'ekue.\*

<sup>17</sup> Ha'e nunga rupi ayvu omombe'ua ramo mae 'rã jajerovia, ha'e ayvu omombe'u pyrã ma Cristo regua ae.

<sup>18</sup> Ha'e rami teĩ aporandu ta: Israel kuery nda'u noendui ri? Ha'e kuery oendu ae, mba'eta anhetẽ "Yvy jave rupi ojapo ayvu oendupaa aguã rami. Ijayvua ma yvy apy rupi peve oenduka", he'iague rami.\*

<sup>19</sup> Aporanduve ju ta: Israel kuery pe ri nda'u ndoikuua ukai teri ayvu? Jypy'i Moisés pe aipoe'i uka raka'e: "Penderegua e'ý va'e kuery amboaxy vy ajapo 'rã penerakâte'ý aguã rami. Hi'arandu e'ý va'ekue araa jepe vy peẽ kuery rojapo 'rã penerakâte'ýa pendu aguã rami", he'i.\*

<sup>20</sup> Ha'e gui Isaías ju okyje e'ýa py aipoe'i: "Ajejou uka xereka e'ý va'ekue pe, xere oporandu e'ý va'ekue pe ajekuua uka", he'i.

<sup>21</sup> Ha'e rã Israel kuery pe ma aipoe'i: "Ára pukukue re akuave'ẽ teĩ xenhe'ẽ rendu e'ý ha'e xerovai ikuai va'e kuery aenoí vy."\*

## 11

### *Israel kuery reko re ijayvua*

<sup>1</sup> Ha'e gui aporandu jevy ta: Nhanderuete nda'u oejapa ri guembiporavo kuery? Any, mba'eta xee voi Israel regua aiko, Abraão ramymino ha'e Benjamim kuery regua.

<sup>2</sup> Nhanderuete ma ndoeja rivei guembiporavo kuery yma ma voi oikuua va'ekue. Tyrã ndapeikuuaai teve ipara Elias ayvu oĩa? Ha'e va'e ma Nhanderuete renonde Israel kuery re ijayvu vy aipoe'i:

<sup>3</sup> "Senhor, ha'e kuery ojuka ndevygua profeta kuery, ombovaipa guive ndevygua altar ikuai va'ekue. Xee ae'i aikove, ha'e xerekove avi oipe'axe okuapy", he'i raka'e.

<sup>4</sup> Ha'e gui mba'e he'i tu ombovai vy? "Ha'e rami avi xejeupergua areko teri sete mil avakue Baal renonde guenapyã re oĩ e'ý va'e", he'i.\*

<sup>5</sup> Ha'ekue rami avi aý voi ikuai amongue ete'i omboaxya rupi oiporavo va'ekue.

<sup>6</sup> Ha'e gui omboaxya rupi oiporavo vy ma ha'e kuery onhea'ãa rupi e'ý Nhanderuete oiporavo. Ha'e rami e'ý va'e rire omboaxya rupi e'ý oiporavo 'rãgue.

<sup>7</sup> Ha'e gui mba'e ja'e 'rã tu ha'vy? Israel kuery onhea'ãa rupi teko porã oupityxe teĩ ndouptyi, oiporavo va'ekue anho oupity. Ha'e rã amboae kuery ma inhakã ratãmba,\*

<sup>8</sup> ipara oĩa rami: "Ha'e kuery py'a re Nhanderuete omoĩ ndoikuua potavei, hexa ma ojapo oexa e'ý aguã rami, ha'e ijapyxa ojapo oendu e'ý aguã rami aý peve", he'i.\*

<sup>9</sup> Davi aipoe'i avi: "Tove mesa py ha'e kuery ikuaria pyve toiko monde pi ha'e nhuã rami, ha'e kuery onhepyxanga ha'e opaga aguã.

<sup>10</sup> Ha'e kuery rexá tapytãmba oexa ve'ý aguã, ha'e ta'ikupe karẽ riae", he'i va'ekue.\*

*Atos 13.46, 28.23-28; Efésios 2.11-22; Hebreus 3.14*

\* **10:15** Isaías 52.7   \* **10:16** Isaías 53.1   \* **10:18** Salmo 19.4, Romanos 1.19,20   \* **10:19** Deuteronomio 32.21

\* **10:21** Isaías 65.1-2   \* **11:4** 1 Reis 19.10,14,18   \* **11:7** Mateus 13.10-17   \* **11:8** Deuteronomio 29.4, Isaías 29.10

\* **11:10** Salmo 69.22-23

<sup>11</sup> Ha'e gui aporandu ta: Israel kuery ho'a aguã ri nda'u onhepyxanga? Any. Ha'e rami avi ha'e kuery heko vai ramo amboae regua kuery oo jepe, Israel kuery ju hakâte'ŷa oendu aguã.

<sup>12</sup> Mba'eta Israel kuery heko vai ramo yvy regua kuery oupity okuapy iporã va'e, Israel kuery re iporã va'e noĩ ramo amboae regua opa mba'e porã oupity. Ha'e gui ma Israel kuery oo jepe ramo katuve ma ikuai porã 'rã.

<sup>13</sup> Aŷ peẽ amboae regua kuery pe ju xeayvu ta. Xee amboae regua kuery pegua apóstolo aiko vy arovy'a xerembiaporã va'e,

<sup>14</sup> mba'eta ajapoxe xeretarã kuery voi ikuai avi aguã pendekuaia rami, ha'e kuery regua avi araa jepe uka aguã.

<sup>15</sup> Mba'eta ha'e kuery ma Nhanderuete rembiayvu e'ŷ ikuai ramo yvy regua kuery peteĩ rami ju ikuai hexeve. Ha'e rami rire mba'e tu oiko 'rã guembiaiyvurã ju ogueru ramo? O manoague gui oikove ju va'e 'rã ikuai.

<sup>16</sup> Mba'eta jypy'i mbojape oexy pyre iky'a e'ŷ va'e oĩ rire ma mbojape ha'e javi 'rã iky'a e'ŷ va'e avi opyta. Yvyra rapo iky'a e'ŷ va'e oĩ rire hakâgue voi ha'e rami 'rã opyta.\*

<sup>17</sup> Ha'e gui hakâgue ojaya raka'e, ha'e pende kuery ju oliveira iro va'e rami teĩ ha'e kuery mbyte penemboja, hapo ha'e oliveira rykue re peiko aguã.

<sup>18</sup> Ha'e rami teĩ nda'evei hakâgue ae gui pejejou porã ve aguã. Pejejou porã ve ri vy peikuua pota pova'e re: peẽ e'ŷ hapo moingo porãa peiko, ha'e rã hapo rima penemoingo porãa oĩ.

<sup>19</sup> Xapy'a rei aipopeje 'rã: "Hakã ae ojaya raka'e ha'ekue py ore roĩ aguã", peje.

<sup>20</sup> Ha'e rami teĩ ha'e kuery ndojeroviaia re ojaya, ha'e peẽ ma pejerovia ramo penemboja. Pejejou porã eme, ha'e rami 'rãgue py pemoĩ pejererokyje aguã,

<sup>21</sup> mba'eta hakâgue ae Nhanderuete ombopaga rire peẽ voi napenembopaga e'ŷi 'rã.

<sup>22</sup> Peikuua pota ke Nhanderuete porayvu ha'e nhombopaga va'ea re. Ho'a va'e kuery ma Nhanderuete ombopaga 'rã. Ha'e rã pendevy pe ma oexa uka 'rã oporayvua, hexe peĩ riae ramo. Ha'e rami e'ŷ ramo peẽ voi pendepe'a 'rã.

<sup>23</sup> Ha'e gui Israel kuery voi ojerovia e'ŷa gui ojeko rerova ramo omboja nho 'rã, mba'eta Nhanderuete ipo'aka omoĩ ju aguã.

<sup>24</sup> Mba'eta oliveira iro va'e gui pendeaya vy pendereko ae rovai oliveira iporã va'e re penemboja rire hakâgue ae katuve ju 'rã omboja hi'y re.

### *Opaa py Nhanderuete nhomboaxypa aguã re ijayvua*

<sup>25</sup> Mba'eta irmão kuery, aipota peikuua pova'e oikuua pyre e'ŷ teri, peẽ ae rive penhem'o'arandu e'ŷ aguã. Mba'eta Israel kuery re ma amongue henda py oiko imoakã ratãarã, peẽ amboae regua kuery pejerovia va'erã va'e ha'e javi pejeroviapa peve.\*

<sup>26</sup> Ha'e va'e rire ma Israel kuery ha'e javive 'rã oo jepe, ipara oĩa rami: "Sião gui ou 'rã Jacó regua reraa jepearã, ha'e kuery reko vaia oipe'apa 'rã.

<sup>27</sup> Po rami 'rã ha'e kuery pe ajapo xereve guarã, ojejavvyague aipe'a vy", he'i.\*

<sup>28</sup> Ayvu porã ha'e kuery ndogueroviai vy Nhanderuete rovaigua ranhe ikuai, peẽ kuery peo jepe aguã. Ha'e rami avi Nhanderuete oiporavoague rami vy hembiayvu guive ikuai, oreramoĩ kuery pe ijayvuague rami vy.

<sup>29</sup> Mba'eta Nhanderuete joupe mba'emo ome'ea ha'e oenoñague ma oaxa rive va'erã e'ŷ.

<sup>30</sup> Mba'eta peẽ kuery minha ymave Nhanderuete napenhe'ẽ rendui va'ekue ri aŷ ma ha'e kuery nonhe'ẽ rendui ramo peupity Nhanderuete penemboaxy.

<sup>31</sup> Ha'e gui aŷ ma ha'e kuery ju nonhe'ẽ rendui, ha'e kuery voi Nhanderuete penemboaxy oexa vy omboaxyo oupity avi aguã.

---

\* **11:16** "Jypy'i mbojape oexy pyre" ha'e "Yvyra rapo" he'ia ma judeu ypy kuery re ijayvu vy. \* **11:25** Lucas 21.24; João 10.16; Mateus 23.37-39 \* **11:27** Isaías 27.9

<sup>32</sup> Mba'eta Nhanderuete nhanembotypa ranhe nhanhe'ẽ rendu e'ŷa py, ha'e gui nhanemboaxypa ju aguã.

### *Nhanderuete 'arandua re ijayvua*

<sup>33</sup> Opa mba'e py Nhanderuete 'arandua ha'e oikuaapaa ma opa va'erã e'ŷ. Mba'eta ipy'aa ma ndajaikuuaai ae, heko re voi ndajaikuua pota kuaai.\*

<sup>34</sup> Mba'eta mava'e tu oikuua Senhor ipy'aa? Mava'e tu imongetaarã oiko?\*

<sup>35</sup> Mava'e ranhe tu mba'emo ome'ẽ ixupe, hekovia ojopy aguã?\*

<sup>36</sup> Mba'eta ixugui ae opa mba'e oiko raka'e, ipo guigua ha'e ixupe guarã meme ikuai. Tove ha'e anho toguerovy'aa raka'e rã peve opa e'ŷ re. Amém.

## 12

### *Teko pyau re ijayvua*

<sup>1</sup> Ha'e nunga rupi irmão kuery, Nhanderuete nhanemboaxy ramo aipoa'e: Mymba pejuka 'rãgue py penderete ae peme'ẽ ixupe, ome'ẽmbry oikove ha'e iky'a e'ŷ va'e Nhanderuete ojou porã va'erã. Ha'e rami vy 'rã pendepy'a py pembojerovia.

<sup>2</sup> Ha'e rami vy penhemingo ukave eme yvy regua kuery reko rami. Ha'e rami 'rãgue py pejeko rerova pendepy'aa pembopyau uka vy, Nhanderuete oipota va'e pejapo kuaa aguã. Ha'e va'e ma iporã ha'e ha'evea ramigua meme. Ha'e rami pendekuai ramo pendejou porã 'rã.\*

### *Nhe'ẽ guigua ome'ẽmbry rupi jaikoa re ijayvua*

<sup>3</sup> Mba'eta Nhanderuete xemboaxyague rupi aipoa'e peẽ kuery peteĩ-teĩ pe: Pejejou porã rei eme, ha'evea rami meme peikuua pota penderekoo re, mba'eta jajeroviaa rupi joo rami e'ŷ-e'ŷ nhamba'epo aguã Nhanderuete ome'ẽ peteĩ-teĩ pe.

<sup>4</sup> Mba'eta peteĩ'i tete re minha mbovy rei e'ŷ hexegua ikuai, ha'e joo ramigua e'ŷ-e'ŷ oguereko guembiaporã.

<sup>5</sup> Ha'e rami ae avi nhande kuery voi, mbovy e'ŷ nhandekuai va'eri Cristo re vy peteĩ'i tete jaiko, ha'e peteĩ-teĩ joupegua nhandekuai.

<sup>6</sup> Ha'e rami avi nhanerembiaporã joo ramigua e'ŷ-e'ŷ jareko nhanemboaxy rupi ome'ẽ va'ekue.\* Xapy'a rei Nhe'ẽ guigua nhamombe'u aguã ri jajopy vy jajeroviaa rupi 'rã nhamombe'u.

<sup>7</sup> Ha'e rami e'ŷ vy nhanhopytyvõ aguã ri jajopy vy nhanhopytyvõa rupi nhanhea'ã ete 'rã. Nhombo'e va'e ma tonhea'ã ha'e rami aguã.

<sup>8</sup> Nhombopy'a guaxu va'e ma tonhea'ã nhombopy'a guaxua rupi. Joupe mba'emo ome'ẽ va'e ma hakâte'ŷ rei ve'ŷ re tome'ẽ. Joe opena va'e ma oikuua pota porã reve topena. Nhomboaxy rupi nhropytyvõa ma ov'y'a reve tojapo.

### *Ha'evea ramigua anho jajapo aguã re ijayvua*

<sup>9</sup> Pejoayvu merami rive eme. Pejepe'a ha'eve'ŷ va'e gui, ha'evea ramigua anho pejapo.\*

<sup>10</sup> Pejoayvu ete ke peteĩ-teĩ, joegua meme'i joayvua rami. Peteĩ-teĩ penhomboetea rupi pendekuai.

<sup>11</sup> Peneate'ŷ eme pemba'epoa py. Senhor pe pendekuaia py penekyre'ŷ penenhe'ẽ ha'e javi py.

<sup>12</sup> Pevy'a ke pearõa py. Pendekuerai eme peiko axya py. Pejepe'a eme pejerurea gui.

<sup>13</sup> Pemboja'o ke mba'emo iky'a e'ŷ va'e iporiaukue'i pe. Penhomovaẽ kuaa ke.

\* **11:33** 1 Coríntios 2.9,16    \* **11:34** Isaías 40.13    \* **11:35** Jó 41.11    \* **12:2** 1 Coríntios 6.20; Filipenses 4.8,9

\* **12:6** 1 Coríntios 12.1-11; Efésios 4.11-16; 1 Pedro 4.10,11    \* **12:9** Efésios 4.25-5.2; 1 Pedro 3.8-12

<sup>14</sup> Peroayvu porã pendere opu'ã rei va'e kuery. Pendeayvu vai eme, peroayvu porã anho.

<sup>15</sup> Pevy'a ke ovy'a va'e kuery reve, ha'e rã ojae'o va'e reve ma pejae'o.

<sup>16</sup> Peteĩ rami meme pendekuai. Penhemboyvate rei 'rãgue py penhemoirũ yvyigueve'i re. Pendejeupe ae "Xe'arandu" peje eme.

<sup>17</sup> Pendevy ojapo vaia rã peẽ pejapo vai eme. Penhea'ã pavẽ oexaa py ha'evea ramigua anho pejapo aguã re.

<sup>18</sup> Ha'evea ja pendekuai porã'i 'rã ha'e javive reve.

<sup>19</sup> Xerembiayvu kuery, pejepy eme. Ha'e rami 'rãgue py pemboaxa nhombopagaarã pe. Mba'eta ipara oiny: "Xee anhombopaga 'rã, xee amboekovia 'rã", he'i Senhor.\*

<sup>20</sup> Ha'e rami 'rãgue py pendere ija'e e'ý va'e okaruxe ramo peme'ë ho'u va'erã. Ijy'uvei ramo peme'ë oy'u aguã. Mba'eta ha'e rami vy 'rã rejapo inhakã áry tapyi hexakã va'e ramigua oendu aguã rami.

<sup>21</sup> Pejeity uka eme teko vai pe. Ha'e rami 'rãgue py peẽ ma teko vai re pendepo'aka 'rã iporã va'e pejapo vy.\*

## 13

### *Huvixa kuery nhanhe'ẽ rendu aguã re ijayvua*

<sup>1</sup> Ha'e javive penhe'ẽ rendu huvixa kuery, mba'eta joe opena va'e kuery ma Nhanderuete ombopo'aka ramo opena. Huvixa ikuai va'e ma Nhanderuete omoi uka va'ekue meme.\*

<sup>2</sup> Ha'e rami vy huvixa kuery re opu'ã rei va'e ma Nhanderuete omoi va'ekue re ae opu'ã. Ha'e nunga rupi joe opu'ã rei va'e ma ha'e kuery ae opaga aguã rami ojapo.

<sup>3</sup> Mba'eta huvixa kuery ma heko porã va'e okyje aguã e'ý oí, ha'e rã heko vai va'e okyje aguã. Pendekuaixe pa huvixa kuery gui pekyje reia rupi e'ý? Penderekó porã ha'vy. Ha'e rami rã pendejou porã 'rã.

<sup>4</sup> Mba'eta huvixa kuery ma Nhanderuete guembiguairã omoi va'ekue nhandere opena porã aguã. Xapy'a rei pejapo vai vy pekyje 'rãe, mba'eta huvixa kuery rive'ý oguerekó kyxé. Nhanderuete rembiguai ikuai joepyarã, ha'e ojapo vai va'e mbopagaarã.

<sup>5</sup> Ha'e rami vy penhe'ẽ rendu 'rãe, penembopaga aguã gui pekyje vy anho e'ý, ha'evea rami pendekuai aguã guive.

<sup>6</sup> Ha'e nunga rupi ae imposto re pepaga, mba'eta huvixa kuery Nhanderuete rembiguai ikuai ha'e nunga re opena va'ety.

<sup>7</sup> Pavẽ pe pemboekovia perevea: huvixa pe ri pepaga aguã oí ramo pepaga, imposto re ri pereve vy peme'ë, pemboete va'erã ma pemboete 'rã, ha'e pembojerovia va'erã ma pembojerovia 'rã.

### *Porayvu va'e lei ojapopaa re ijayvua*

<sup>8</sup> Avave rei pe pereve riae eme mba'emo re, pejoayvu aguã re anho. Mba'eta joayvu va'e ma lei re oña ha'e javi ojapopa.\*

<sup>9</sup> Mba'eta po rami oí: "Ndetavy rei eme, ejojuka eme, nemonda eme, emoaruã eme." Ha'e nunga ha'e javi, ojapo uka pyre mboae ikuai va'e avi ma pova'e ayvu re oí: "Reayvu 'rã neirã ndee ae rejeayvua rami."\*

<sup>10</sup> Porayvu va'e ma ndojapo vai 'rã oirã pe. Ha'e nunga rupi porayvu va'e ojapopa 'rã lei re oí va'e ae.

### *"Ára ovaẽ rai'i ma", he'iague*

---

\* **12:19** Deuteronomio 32.35   \* **12:21** Provérbios 25.21-22   \* **13:1** Mateus 22.21; Tito 3.1; 1 Pedro 2.13-17   \* **13:8** Mateus 22.39,40; Gálatas 5.13-15; 1 João 3.11-18   \* **13:9** Éxodo 20.13-17, Levítico 19.18, Deuteronomio 5.17-21

<sup>11</sup> Aŷ peẽ kuery mba'emo oiko va'e re peikuaa pota kuaa va'e pe xeayvu: Ovaẽ ma pekeague gui pemyĩ aguã, mba'eta aŷ ma jaa jepe aguã ára ovaẽ rai'ive ma jajerovia ypyague gui.

<sup>12</sup> Pytū oaxapa rai'i ma, ovaẽ ma ouvy ára.\* Ha'e nunga rupi jajepe'a 'rã pytū rupi jaikoague gui, ha'e jaraa hendy va'e rembiporu.

<sup>13</sup> Ha'evea rami pota 'rã nhandekuai ara py rami. Nda'evei opa marã rei ikuai ha'e oka'u va'e rami nhandekuai aguã, itavy rei ha'e ha'eve e'ŷa rami, neĩ joguero'a rei ha'e omoaruã reia rupi nda'evei.

<sup>14</sup> Ha'e rami 'rãgue py penhemonde Senhor Jesus Cristo py, ha'e peteĩve henda py pemoĩ eme to'o oipota va'e.

## 14

### *Ojeroviaa py ikangy va'e jaropo'aka aguã re ijayvua*

<sup>1</sup> Pemovaẽ ojeroviaa py teri ikangy va'e, ha'e kuery oikuaa va'e re pejoguero'a e'ŷ re.  
<sup>2</sup> Mba'eta amongue oikuaa rã opa mba'e nunga ja'u aguã ha'eve. Ha'e rã ikangy va'e ma mba'emo aju anho 'rã ho'u.

<sup>3</sup> Ho'upa rei va'e ma tojou vai eme ho'upa rei e'ŷ va'e, ha'e ho'upa rei e'ŷ va'e avi tojou vai eme ho'upa rei va'e, mba'eta Nhanderuete omovaẽ ma mokoĩve.\*

<sup>4</sup> Tyrã marã ramigua tu ndee reiko nhoembiguai re reikuua pota rei aguã? Mba'eta guerekoa pe ae oiko, ojou porã, e'ŷ vy ndojou porãia rupi. Ha'e rami avi Senhor ojou porã 'rã, mba'eta ipo'aka omombaraete aguã.

<sup>5</sup> Amongue omboeteve 'rã amongue ára amboae gui, ha'e rã amboae ma joo ramigua memea oikuaa ára nhavõ. Peteĩ-teĩ toikuaa porã ha'e kuery ae o'arandua rupi.

<sup>6</sup> Amongue ára omboeteve va'e ma Senhor pe ae omboete, ha'e ho'upa rei va'e voi Senhor pe ae ho'u, mba'eta Nhanderuete oguerovy'a reve okaru. Ha'e ho'upa rei e'ŷ va'e voi Senhor pe avi ndo'upa rei, mba'eta ha'e voi oguerovy'a 'rã Nhanderuete.

<sup>7</sup> Mba'eta peteĩve nhandejeupe ae e'ŷ jaiko, ha'e nhandejeupe ae e'ŷ guive nhamano.

<sup>8</sup> Mba'eta jaikove vy ma Senhor pe jaiko, ha'e nhamano vy Senhor pe ae ju 'rã nhamano. Jaikove e'ŷ vy nhamano teĩ Senhor pegua meme nhandekuai.

<sup>9</sup> Ha'e rami aguã ae Cristo omano ha'e onhemboete ju raka'e, omano va'ekue ha'e okuave va'e ha'e javi Senhor oiko aguã.

<sup>10</sup> Ha'e nunga rupi ndee, mba'e re tu reikuua pota rei ri nde-irmão re? Ha'vy ndee, mba'e re tu rejou vai nde-irmão? Mba'eta Nhanderuete nhomboayvu aguã py ha'e javive 'rã jajexa uka henonde,

<sup>11</sup> ipara oĩ rami: "Senhor aipoe'i: 'Xee ae rekove rupi aura vy aipoa'e: Xerenonde pavẽ 'rã oĩ guenapy'ã re, pavẽ 'rã ojuru py omboete Nhanderuete', he'i."\*

<sup>12</sup> Ha'e rami vy peteĩ-teĩ nhanhemombe'u 'rã Nhanderuete pe.

### *Peteĩ-teĩ jaikuua rami jaiko teĩ jajoayvu aguã re ijayvua*

<sup>13</sup> Ha'e nunga rupi jajojou vai reive eme. Ha'e rami 'rãgue py penhea'ã pende-irmão kuery pemonhepyxanga ha'e peity e'ŷ aguã.\*

<sup>14</sup> Xee ma Senhor Jesus gui aikuua porã: Mba'eve jipoi ha'e nunga ae nhanemboeko ky'a va'erã. Ha'e rami avi mba'emo pe amongue "Xemboeko ky'aarã" he'i ramo ha'e kuery pe ma imboeko ky'aarã ae oĩ.

<sup>15</sup> Ha'e nunga rupi mba'emo re'u va'e káuxa nde-irmão kuery remomboriau vy mborayvu rupi e'ŷ reiko. Ha'e kuery re Cristo omano rire nda'evei tembi'u káuxa rive rejoapo aguã okanhy aguã rami.

---

\* **13:12** Efésios 5.14-18    \* **14:3** Mateus 7.1-5; 1 Coríntios 10.23-33    \* **14:11** Isaías 45.23    \* **14:13** 1 Coríntios 8.9-13

**16** Ha'e rami avi ndejeupe ae rā ha'evea rami reiko teĩ nda'evei amboae kuery ndejou vai aguã rami reiko aguã.

**17** Mba'eta Nhanderuete po'akaa py ma ja'u ha'e jay'u va'e re rive'ŷ nhanhea'ã, ha'e rā Nhe'ẽ Ky'a E'ŷ guigua tekō porã, mby'a porã ha'e javy'aa re.

**18** Mba'eta ha'e va'e rupi Cristo pe ikuai va'e ma ombovy'a 'rā Nhanderuete, ha'e avakue voi ojou porã 'rā.

**19** Ha'e nunga rupi peteĩ rami pota 'rā nhandekuai nhanhombaraaetea rupi.

**20** Tembi'u káuxa rive pembovaipa eme Nhanderuete rembiapo. Opa marãguia tembi'u anhetẽ nanhanemboeko ky'ai va'erã meme. Ha'e rami teĩ tembi'u pe "Xemboeko ky'aarã" he'i reve ho'u va'e pe ma nda'evei.

**21** Ha'eveve xo'o ja'u e'ŷ, vinho jay'u e'ŷ, ha'e mba'eve rei jajapo e'ŷ aguã nhande-irmão kuery reityarã regua, [e'ŷ vy imomboriauarã, e'ŷ vy imokangyarã regua.]

**22** Ha'e nunga ha'evea rami reroviaa ma ndepy'a py ae ereko Nhanderuete renonde. Ovy'a ete 'rā gueko ae ojou vai e'ŷ va'e.

**23** Ha'e rā amongue ojeroviaa rupi e'ŷ mba'emo ho'u va'e ma ojou vai pyrã ikuai, ojeroviaa rupi e'ŷ ikuai vy. Mba'eta jajeroviaa rupi e'ŷ ri nhandekuai vy jajejav.

## 15

### *Cristo rami mborayvu rupi jaiko aguã re ijayvua*

**1** Ha'e gui nhande nhanembaraetekueve va'e ma jaropo'aka 'rā ikangy teri va'e ikuiaia, nhande ae jaipota va'e rive jajapo 'rãgue py.

**2** Peteĩ-teĩ nhandekuai amboae kuery oipota va'e rupi, iporã va'e anho jajapo nhomombaraetearã.\*

**3** Mba'eta Cristo voi ha'e ae oipota va'e rupi e'ŷ oiko raka'e. Ha'e rami 'rãgue py hexe oiko ipara oña rami: "Ndere ijayvu rei okuapya ma xere ae ou", he'iague rami.\*

**4** Mba'eta yma ombopara pyre ma Nhanderuete nhanembo'e aguã meme ombopara uka, ipara oña re nhañ atã ha'e nhandepy'a guaxu vy jajeroviaa rupi nharõ jaikovy aguã.

**5** Ha'e gui Nhanderuete nhanemoi atãa ha'e nhanembopy'a guaxua va'e ma peẽ voi tapendeapo peteĩ rami meme peikuaa aguã rami, Cristo Jesus rami ete,

**6** ha'e rami vy peteĩ rami pendepy'a, ha'e peteĩ'i rami ae peporaei aguã Nhanderuete, nhande-Senor Jesus Cristo Ru va'e pe.

**7** Ha'e nunga rupi nhanhomovaẽ peteĩ-teĩ, Cristo nhanemovaẽmbaague rami ae, Nhanderuete oguerovy'aa aguã rami.

**8** Mba'eta aipoa'e pendevy: Nhanderuete omoi Cristo judeu kuery pe oikuua uka aguã anhetẽ rupi meme oikoa, ojapo aguã oreramoi kuery pe ijayvuague ojeupitypa aguã rami,

**9** ha'e gui amboae regua kuery voi Nhanderuete oguerovy'a okuapy aguã omboaxyia re, ipara oña rami: "Ha'e nunga rupi amboae regua kuery mbyte xee roguerovy'a vy aporaei 'rā nderery amboetea rupi."\*

**10** Aipoe'i avi: "Peẽ amboae regua kuery, pevy'a avi ke ixupeguia kuery reve."\*

**11** Aipoe'ive ju: "Peẽ amboae regua kuery ha'e javi, pemboete ke Senhor. Ha'e javi regua tomboete okuapy."\*

**12** Isaías aipoe'i avi: "Peteĩ henhoi'i 'rā Jessé rapokue gui, amboae regua kuery re opena va'erã. Ha'e va'e re vy ha'e kuery oguerekó 'rā oarõ aguã."\*

**13** Nharõ jaikovy aguã Nhanderuete ome'ẽ va'e vy tove pendere tomoi pevy'aa ha'e mby'a porã anho, Nhe'ẽ Ky'a E'ŷ po'akaa rupi pearõ peikovy aguã opa mba'e py.

\* **15:2** 1 Coríntios 10.24; Filipenses 2.3-5

\* **15:3** Salmo 69.9

\* **15:9** 2 Samuel 22.50, Salmo 18.49

\* **15:10**

Deuteronomio 32.43 \* **15:11** Salmo 117.1 \* **15:12** "Jessé rapo guigua" he'ia ma Jesus Cristo re ijayvu vy (Isaías 11.10).

### *Paulo gueko omombe'u porāveague*

<sup>14</sup> Ha'e gui irmão kuery, xee aikuaa ae peẽ kuery re mborayvu ha'e 'arandua ha'e javi oña, joo meme penhomongeta kuaa aguã rami.

<sup>15</sup> Ha'e rami avi mba'emo amombe'u porāa rupi kova'e kuaxia ambopara pendevy, peteīgue ju ha'e nunga re romoma'endu'a aguã, Nhanderuete xemboaxy vy xemoīague rami vy.

<sup>16</sup> Mba'eta xemoī karamboae amboae regua kuery ikuiaia rupi Cristo Jesus pe amba'eapo aguã, mba'eta sacerdote rami amba'eapo Nhanderuete guigua ayvu porā amombe'ua rupi. Ha'e rami rã Nhe'ẽ Ky'a E'ŷ ha'e kuery oiky'a'o rire Nhanderuete pe ome'ẽmbry rami amboaxa aguã, oguerovy'a va'erã.\*

<sup>17</sup> Ha'e nunga rupi xee voi Nhanderuete pe amba'eapo aikovya rupi areko Cristo Jesus re vy arov'y'a aguã.

<sup>18</sup> Ha'e rami avi mba'eve ndarov'yai 'rã xepo rupi Cristo ae ojapo va'ekue e'ŷ vy. Mba'eta xeayvu ha'e mba'emo ajapoa py Cristo ojapo amboae regua kuery onhe'ẽ rendu aguã rami,

<sup>19</sup> Nhe'ẽ Ky'a E'ŷ po'akaa rupi hexa pyrã ha'e nhomondyipaarã ajapoa py. Ha'e rami vy Jerusalém katy'i rupi guive Ilírico vyv peve amombe'u ma Cristo regua ayvu porā.

<sup>20</sup> Ha'e rami avi xee anhea'ã aikovya Cristo regua ayvu ndokuuai teria rupi ju amombe'u aguã, amboae kuery omboypy ma voiague rupi e'ŷ amba'eapo aguã.

<sup>21</sup> Mba'eta ipara oña rami: "Ha'e kuery pe omombe'u pyre e'ŷ 'rã oexa okuapy, ha'e oendu va'ekue'ŷ 'rã oikuaapa guive", he'ia rami aiko.\*

### *Paulo oguata aguã re ijayvuague*

<sup>22</sup> Ha'e nunga rupi ae mbovykue rei e'ŷ xee roipouxe teĩ nda'evei teri.

<sup>23</sup> Ha'e rã aŷ ma ha'ekue rupi amba'eapo aguã jipovei ramo, ha'e peẽ kuery roexaxe ete vy

<sup>24</sup> xepy'a Espanha katy aguata vy roipou aguã re. Ha'e rami vy aguata avya rupi avaẽ 'rã peẽ kuerya py, pendekuaia gui peẽ kuery ju xemondoukave aguã aaxeia katy, peẽ kuery reve xapy'a'i ri jepe aiko ranhe rire.

<sup>25</sup> Ha'e gui aŷ ma Jerusalém katy aa iky'a e'ŷ va'e kuery aipytyvõ aguã.

<sup>26</sup> Mba'eta Macedônia ha'e Acaia pygua kuery ma omboaxya rupi peráta omono'õ Jerusalém pygua kuery iky'a e'ŷ va'e iporiaukue'i oipytyvõ aguã.\*

<sup>27</sup> Ha'e rami ha'e kuery ojapoxe ete okuapy, "Judeu kuery pe jareve" he'i vy. Mba'eta judeu kuery gui amboae regua kuery Nhe'ẽ guigua ojopy rire ha'evea rami oipytyvõ mba'emo py.

<sup>28</sup> Ha'e gui ha'e kuery pe ha'e nungakue araapa ma rire peẽ kuerya py ju 'rã avaẽ Espanha katy aguata avy vy.

<sup>29</sup> Xee aikuaa porā peẽ kuerya py aru 'rãa Cristo guigua opa mba'e py penemoingo porāarã.

### *Ha'e kuery onhembo'e aguã re Paulo ojerureague*

<sup>30</sup> Ha'e gui irmão kuery, po rami ajerure nhande-Senhor rery rupi, Nhe'ẽ guigua mborayvu rupi guive: Penhea'ã xereve Nhanderuete xepytyvõ aguã re pejerure vy,

<sup>31</sup> aa jepe aguã Judéia pygua kuery onhe'ẽ rendu e'ŷ va'ea gui, ha'e Jerusalém pygua iky'a e'ŷ va'e kuery pegua araa rã ha'e kuery ojou porā aguã,

<sup>32</sup> ha'e gui Nhanderuete oipotaa rami roipou vy avy'a reve avaẽ aguã peẽ kuerya py, jojavi japytu'u vy javy'a aguã.\*

<sup>33</sup> Nhanderuete peteĩ rami nhanemoingo va'e toiko peẽ kuery ha'e javi reve. Amém.

## 16

### *Paulo Febe omovaẽ ukaague*

<sup>1</sup> Tamombe'u nhanereindy Febe, mba'eta Cencréia pygua igreja kuery oipytyvõ va'ety oiko.

<sup>2</sup> Ha'e nunga rupi pemovaẽ porã Senhor rery rupi, iky'a e'ŷ va'e kuery nhamovaẽ rami ae. Peipytyvõ ke oipota va'e ha'e javi py, mba'eta heta re ma opena porã'i va'ekue, xere voi.

### *Oirũ kuery pe oxaruraague*

<sup>3</sup> Pemombe'u ke xema'endu'aa Priscila ha'e Áqüila pe, mba'eta Cristo Jesus pe amba'eapoa rupi xepytyvõ va'ety ikuai.

<sup>4</sup> Ha'e va'e kuery ma ndojeayvuveikue py ikuai karamboae xere. Ha'e nungakue re arov'y'a, ha'e xee anho e'ŷ guive, amboae regua igreja kuery ha'e javi avi.\*

<sup>5</sup> Pemombe'u avi xema'endu'aa ha'e kuery ro py igreja kuery onhemboaty va'e pe. Pemombe'u avi xerembiayvu Epêneto pe. Ha'e va'e ma jypy'i Ásia pygua ojeko me'ẽ raka'e Cristo pe.

<sup>6</sup> Pemombe'u avi Maria peẽ kuery re vy omba'eapo vaipa va'ety pe.

<sup>7</sup> Pemombe'u avi xeretarã kuery Andrônico ha'e Júnias nhuã py aĩ rã xemoirũ va'ekue pe. Ha'e va'e kuery ma apóstolo regua ima'endu'a porãmby ikuai. Xegui ha'e kuery ranhe Cristo pe ikuai raka'e.

<sup>8</sup> Pemombe'u Ampliato pe voi, Senhor re vy ayvu va'e rã.

<sup>9</sup> Pemombe'u xereve Cristo pe omba'eapo oikovy va'e Urbano pe, ha'e xerembiayvu Estáquis pe guive.

<sup>10</sup> Pemombe'u Cristo pegua ojou porãmby Apeles pe. Pemombe'u avi Aristóbulo ro pygua kuery pe.

<sup>11</sup> Pemombe'u xeretarã Herodião pe. Pemombe'u avi Narciso ro pygua kuery Senhor re ikuai va'e pe.

<sup>12</sup> Pemombe'u Trifena ha'e Trifosa pe. Ha'e va'e kuery ma Senhor pe omba'eapo va'ety. Pemombe'u xerembiayvu Pérsida Senhor pe omba'eapo vaipa avi va'ety pe.

<sup>13</sup> Pemombe'u Senhor ojeupe guarã oiporavo va'ekue Rufo pe, ixy pe guive, mba'eta ha'i rami ae xere voi opena karamboae.

<sup>14</sup> Pemombe'u Asíncrito, Flegonte, Hermes, Pátrobas ha'e Hermas pe, ha'e gui irmão kuery ha'e kuerya py onhemboaty va'e pe.

<sup>15</sup> Pemombe'u Filólogo ha'e Júlia pe, Nereu ha'e heindy pe, Olimpas, ha'e iky'a e'ŷ va'e kuery ha'e kuerya py onhemboaty va'e ha'e javi pe.

<sup>16</sup> Pexarura joupe-upé iky'a e'ŷ va'e kuery joavyua rami. Cristo pegua igreja ikuai va'e ha'e javi pygua omombe'u uka okuapy pendevy oxaruraa.

### *Nhomongetaague*

<sup>17</sup> Ha'e gui irmão kuery, ajerure peikuua pota porã aguã amongue penembo'eague rami e'ŷ, peteĩ rami e'ŷ penemoingoxe vy pendereityxe va'e kuery re. Pejepa ha'e kuerya gui,

<sup>18</sup> mba'eta nhande-Senhor Cristo pe'ŷ omba'eapo va'e, ojeupe guarã re anho onhea'ã. Ha'e rami vy ijayvu porã'i ha'e joguerory merami rive vy ombotavy 'rã onheangu e'ŷ va'e kuery kuraxõ.\*

<sup>19</sup> Ha'e rã peẽ kuery penhe'ẽ rendua ma pavẽ oikuua. Xee voi roguerovy'a avi ha'e rami pendekuaia re. Ha'e rami avi aipota pene'arandu iporã va'e peikuua aguã, ha'e rã mba'emo vai re ma peikuua pota eme.

\* **16:4** Atos 18.1-3,18,26    \* **16:18** Mateus 7.15-20; 1 João 3.10, 4.1-6; Efésios 5.6,7

<sup>20</sup> Ha'e ramo Nhanderuete mby'a porã me'ẽa va'e ma are'ŷ re 'rã omoõ Satanás pendepy guýry. Pendere toĩ riae nhande-Senhor Jesus nhanemboaxyा.

*Irũ kuery oxarura ukaague*

<sup>21</sup> Xepytyvõa Timóteo oxarura uka pendevy, ha'e gui xeretarã kuery Lúcio, Jasom ha'e Sosípatro guive.

<sup>22</sup> Xee Tércio kova'e kuaxia ambopara va'e voi pendevy axarura avi Senhor rery rupi.

<sup>23</sup> Xemovaẽ porã va'ety Gaio oxarura uka avi pendevy. Ha'e va'e ma igreja kuery ha'e javi omovaẽ va'ety. Tetã pygua peráta re opena va'ety Erasto ha'e irmão Quarto oxarura uka avi pendevy.

<sup>24</sup> [Peẽ kuery ha'e javive re toĩ riae nhande-Senhor Jesus Cristo nhanemboaxyा. Amém.]

*Opaa py ijayvuague*

<sup>25</sup> Nhanderuete opo'akaa rupi penemombaraete 'rã Jesus Cristo regua ayvu porã amombe'u aikovy va'e rami vy. Ha'e va'e ayvu ma oikuaa e'ŷ pyre, yma voi ndoikuua ukai va'ekue.

<sup>26</sup> Ha'e gui aŷ ma oikuaa uka vy profeta kuery pe ombopara uka, Nhanderuete imarã e'ŷ va'e ojapo ukaague rami vy, ha'e javi regua ojerovia vy onhe'ẽ rendu aguã.

<sup>27</sup> Nhanderuete peteñ'i oiko ha'e hi'arandupa va'e tomboetepaa Jesus Cristo rupi, raka'e rã peve ete. Amém.

## Jypy'i Corinto pygua kuery pe Paulo ombopara va'ekue

## Jypy'i Corinto pygua kuery pe Paulo ombopara va'ekue

Corinto ma tetā guaxu, aŷ Grécia yvy re oĩ va'e. Ha'e py Jesus Cristo pegua igreja oĩ va'e ma apóstolo Paulo ae omboypy va'ekue. Ha'e va'e rire ndovy'ai ha'e kuery joo rami e'ŷ-e'ŷ ikuaia omombe'ua rã oendu vy. Ha'e rami vy ombopara vy aipoe'i: "Irmão kuery, nhande-Senhor Jesus Cristo rery rupi ajerure joo rami pendeayvu aguã. Joo rami e'ŷ-e'ŷ pendekuai eme. Joo'i rami meme pendekuai, joo rami peikuaa ha'e joo rami meme pene'arandu" (1.10).

Ha'e kuery mbyte py oiko avi itavy rei va'e. Ha'e va'e reko apóstolo Paulo ndojou porã vy nomovaẽ ukavei ranhe. Omongoeta avi omenda va'e kuery reko re. Ombo'e Nhe'ẽ po'akaa rupi peteĩ-teĩ nhanhopytyvõa re, ha'e Jesus omanoague gui onhemboete ju rire nhande voi jaikove jevy aguã re. "Ha'e nunga rupi xerembiayvu irmão kuery, peĩ atã tema, pejeity uka eme, Senhor pe pemba'eapoa rupi penekyre'ŷ riae guive, mba'eta jaikuua Senhor re vy nhamba'eapoa ndoaxa rivei 'rãa" (15.58).

### *Oxarura reve ijayvu vy omboypyague*

<sup>1</sup> Xee Paulo ma Jesus Cristo pegua apóstolo-rã Nhanderuete oipotaa rami vy xerenoĩ va'ekue. Irmão Sóstenes reve

<sup>2</sup> roxarura Nhanderuete pegua igreja kuery Corinto tetā py pendekuai va'e pe.\* Peẽ kuery voi Cristo Jesus re vy pendeky'a'oa ha'e iky'a e'ŷ va'erã penerenoĩ, nhande-Senhor Jesus Cristo rery rupi opa rupi ojapukai va'e ha'e javi reve. Mba'eta ha'e kuery pegua Senhor avi oiko, nhande-Senhor oikoa rami.

<sup>3</sup> Tove pendere toĩ penemboaxyha'e mby'a porã Nhanderuete ha'e Senhor Jesus Cristo guigua.

### *Oguerovy'aague*

<sup>4</sup> Peẽ kuery re arovya'riae [Xe]ruete, mba'eta Cristo Jesus re penemoĩ vy penemboaxy ramo.

<sup>5</sup> Mba'eta ha'e va'e re vy mba'emo porã opa marãguo ome'ẽ pêvy, pendeayvurã ha'e pene'arandurã ha'e javi guive,

<sup>6</sup> mba'eta pendekuaia re Cristo regua ayvu ojekuaa anhetẽ va'e.

<sup>7</sup> Mba'eta nhande-Senhor Jesus Cristo ojekuaa aguã pearõ rã pendevy pe opa marãguo Nhe'ẽ guigua ome'ẽ rã ndoatai peteĩve henda py.

<sup>8</sup> Opa peve penemombaraete'rã guive, nhande-Senhor Jesus Cristo ára py opa mba'e py heko porã va'e pejexa uka aguã.

<sup>9</sup> Nhanderuete penerenoĩ gua'y Jesus Cristo nhande-Senhor reve peteĩ rami pendekuai aguã. Ha'e rire ojeroviapy'rã oiko.

### *Peteĩ rami ikuai aguã re ijayvua*

<sup>10</sup> Irmão kuery, nhande-Senhor Jesus Cristo rery rupi ajerure joo rami pendeayvu aguã. Joo rami e'ŷ-e'ŷ pendekuai eme. Joo'i rami meme pendekuai, joo rami peikuaa ha'e joo rami meme pene'arandu.\*

<sup>11</sup> Mba'eta irmão kuery, Cloe ro pygua kuery omombe'u rã aendu karamboae joo rami e'ŷ-e'ŷ peikuaa.

\* **1:2** Atos 18.1-17 \* **1:10** Romanos 15.5,6; Efésios 4.1-6; Filipenses 2.1-4

<sup>12</sup> Mba'eta peteĩ-teĩ aipopeje: “Xee ma Paulo pegua” e'ŷ vy “Xee ma Apolo pegua”, “Xee ma Cefas pegua” e'ŷ vy “Xee ma Cristo pegua”, peje.

<sup>13</sup> Cristo nda'u onhemboja'opa ri? Xee Paulo nda'u penderekovia kuruxu re xemoĩa va'ekue? Tyrã pa xerery rupi penhemongarai? Any.

<sup>14</sup> Arov'y'a [Nhanderuete] mba'eta peẽ kuery regua peteĩve xee namongarai, Crispo ha'e Gaio e'ŷ vy,

<sup>15</sup> avave rei xerery rupi penhemongaraiague rami penhemombe'u e'ŷ aguã.

<sup>16</sup> Amongarai avi Estéfanas ro pygua kuery. Ha'e va'e kuery e'ŷ vy amboae kuery amongaraiague re naxema'endu'ai.

<sup>17</sup> Mba'eta anhomongarai aguã e'ŷ Cristo xembou, ha'e rã ayvu porã amombe'u aikovy aguã. Xee ae 'arandua rupi e'ŷ guive ayvu amombe'u, kuruxu re Cristo omanoague regua ayvu amboyke rive e'ŷ aguã.

### *Ayvu kuruxu regua re ijayvua*

<sup>18</sup> Anhetẽ kuruxu ayvu regua ma okanhy aguã rami ikuai va'e pe ovare'ŷ va'e merami. Ha'e rã nhande jaa jepe va'e pe ma Nhanderuete po'akaa oĩa.

<sup>19</sup> Mba'eta ipara oiny: “Ambovaipa 'rã hi'arandu va'e kuery 'arandua, amomba 'rã oikuapa va'e kuery oikuua va'e”, he'i.\*

<sup>20</sup> Mamo tu opyta hi'arandu va'e ha'e lei re nhombo'e va'ety kuery? Mamo tu opyta ko yvy regua ijayvu kuaa va'e? Mba'eta kova'e yvy regua 'arandua ma Nhanderuete oikuua uka mba'everã ndovareia.

<sup>21</sup> Mba'eta Nhanderuete 'arandua rami vy yvy regua kuery ojee ae 'arandua rupi ikuai vy ndoikuuai okuapy. Ha'e ramo Nhanderuete oiporavo ayvu “Ovare'ŷ va'e” 'ea va'e omombe'u uka vy ogueraa jepe aguã hexe ojerovia va'e.\*

<sup>22</sup> Mba'eta judeu kuery ojerure 'rã hexa pyrã re, ha'e rã grego kuery ma o'arandurã oeka okuapy.

<sup>23</sup> Ha'e rã ore ma kuruxu re Cristo omoĩa ague regua romombe'u. Ha'e va'e ma judeu kuery pe rã ojou vaipy, ha'e amboae regua kuery pe ovare'ŷ va'e.

<sup>24</sup> Ha'e rã oenoĩ mbyre judeu ha'e grego ikuai va'e pe ma romombe'u Cristo Nhanderuete po'aka ha'e hi'arandu kuaa ukaa.

<sup>25</sup> Mba'eta Nhanderuete ayvu “Ovare'ŷ va'e” 'ea teĩ avakue gui hi'aranduve, ha'e ixuguiuga “Ikangya” 'ea teĩ avakue gui imbaraeteve.

### *Iky'a e'ŷ va'erã oenoĩ mbyre re ijayvua*

<sup>26</sup> Irmão kuery, peikuuaa pota ke penerenoĩ mbyre marã ramigua pa pendekuaia re. Mba'eta heta e'ŷ pendekuai avakue oikuua rã hi'arandupa va'e, ipo'akapa va'e, neĩ omboetevepy.

<sup>27</sup> Ha'e rami 'rãgue py ko yvy regua “Ovare'ŷ va'e” he'ia ma Nhanderuete oiporavo omoximba aguã hi'arandu va'e kuery, kova'e yvy regua “Ikangy” he'ia ma oiporavo omoximba aguã ipo'aka va'e kuery.\*

<sup>28</sup> Ko yvy regua “Yvyigueve'i”, “Ojou vaipy” ha'e “Mba'e'ŷ” he'ia ma Nhanderuete oiporavo omo'yvy'i aguã onhemboiyvate rei va'e,

<sup>29</sup> Nhanderuete renonde avave rei onhemboiyvate e'ŷ aguã.

### *Cristo ovare etea re ijayvua*

<sup>30</sup> Ha'e rã peẽ ma Nhanderuete ae penemoĩ Cristo Jesus re. Ha'e va'e ma nhandevy pe ojeapo Nhanderuete guigua 'aranduarã, teko porã, nhandeky'a'oarã ha'e nhandejoguaarã,

<sup>31</sup> ipara oĩa rami: “Mba'emo oguerovy'a va'e ma Senhor ae toguerovy'a” he'ia rami jaiko aguã.\*

\* **1:19** Isaías 29.14 \* **1:21** Mateus 11.25,26 \* **1:27** 2 Coríntios 12.7-10 \* **1:31** Jeremias 9.24, Gálatas 6.14; 2 Coríntios 5.21

## 2

### *Nhe'ẽ guigua po'akaa rupi Paulo ayvu omombe'uague re ijayvuague*

- <sup>1</sup> Irmão kuery, xee ma peẽ kuerya py Nhanderuete ayvu amombe'u vy aju jave ijayvu kuaa va'e rami e'ŷ xeayvu karamboae, hi'arandu va'e rami e'ŷ guive.
- <sup>2</sup> Mba'eta peẽ kuerya py aiko jave xejee amoĩ mba'eve rei aikuua e'ŷ aguã Jesus Cristo regua e'ŷ vy, ha'e kuruxu re omanoague guive.
- <sup>3</sup> Xekangy, ajererokyje ha'e aryryipa reve aiko va'ekue peẽ kuery mbyte.
- <sup>4</sup> Xeayvua ma xee ae 'arandua rupi e'ŷ, xeayvu kuaa rupi e'ŷ guive amombe'u. Ha'e rami 'râgue py Nhe'ẽ guigua po'akaa aexa uka,
- <sup>5</sup> avakue 'arandu re rive'ŷ pejerovia aguã, ha'e rã Nhanderuete po'akaa re anho.

### *'Arandua anhetẽ va'e re Nhe'ẽ Ky'a E'ŷ nhanembo'ea re ijayvua*

- <sup>6</sup> Ha'e rã hi'arandu va'e kuerya rupi ma 'arandua re guive oreayvu, va'eri yvy regua 'arandu re'ŷ, neĩ yvy regua ipo'akakueve va'e 'arandu re e'ŷ guive, mba'eta ha'e va'e kuery ma okanhy va'erã meme.
- <sup>7</sup> Nhanderuete 'arandu ndoikuua ukai va'ekue re ae oreayvu. Ymave rupi Nhanderuete ndoikuua ukai teĩ jypy'i guive oguereko katu nhanemoexakãmba aguã.
- <sup>8</sup> Ha'e va'e 'arandu ma yvy regua ipo'akakueve va'e peteĩve ndoikuuai, mba'eta ha'e kuery oikuua va'e rire kuruxu re ndojukai 'râgue Senhor hexakãmba va'e.
- <sup>9</sup> Ha'e rami teĩ ipara oĩ rami: "Avakue oexa py ndoexai, oapyxa py noendui, neĩ opy'a py voi noexa'ãi Nhanderuete guembiyvu kuery peguarã oguereko katu va'ekue re."\*
- <sup>10</sup> Ha'e rã nhandevy pe ma Nhanderuete oikuua uka Nhe'ẽ rupi. Mba'eta Nhe'ẽ ma opa mba'e oikuua uka, Nhanderuete py'apy re oĩ va'e voi.
- <sup>11</sup> Mba'eta mava'e nda'u jaikuua ta jopy'a re oĩ va'e? Inhe'ẽ hexe oĩ va'e anho oikuua 'rã. Ha'e rami ae avi Nhanderuete py'a re oĩ va'e voi avave rei ndoikuuai 'rã, Nhanderuete Nhe'ẽ anho oikuua.
- <sup>12</sup> Ha'e gui nhandere ma ko yvy regua nhe'ẽ e'ŷ omoĩ va'ekue, ha'e rã Nhanderuete Nhe'ẽ, nhandevy Nhanderuete ome'ẽ va'e jaikuua aguã.\*
- <sup>13</sup> Ha'e nunga re ae oreayvu, avakue o'arandua rupi orembo'ea rami e'ŷ, ha'e rã Nhe'ẽ orembo'ea rami, Nhe'ẽ guigua ayvu py Nhe'ẽ guigua romombe'u vy.
- <sup>14</sup> Ha'e rã avakue Nhe'ẽ reveguia e'ŷ ma ojee nomoĩxei Nhanderuete Nhe'ẽ guigua. Ha'e kuery pe rã ovare'ŷ va'e merami, noendu kuaai 'rãe, mba'eta Nhe'ẽ gui anho 'rã jaikuua.
- <sup>15</sup> Ha'e rã Nhe'ẽ reveguia ma opa mba'e re oikuua pota teĩ ha'e kuery re avave rei ndoikuua pota kuaai 'rã.
- <sup>16</sup> Mba'eta ipara oĩ rami "Mava'e tu oikuua 'rã Senhor 'arandu ombo'e aguã?" Ha'e rã nhandere ma Cristo guigua 'arandu oĩ.\*

## 3

### *Nhe'ẽ re'ŷ vy ha'e kuery joguero'a reia re ijayvuague*

- <sup>1</sup> Ha'e gui irmão kuery, xee ma nda'evei karamboae peẽ kuery rombo'e aguã Nhe'ẽ reveguia ambo'ea rami. To'o re ikuai va'e ambo'ea rami rive rombo'e va'ekue, mba'eta Cristo pegua kyrigue rami teri pendekuai ramo.
- <sup>2</sup> Ha'e rami vy kamby py anho romongaru va'ekue, tembi'u ete name'ei, mba'eta napendu kuaai teri va'ekue. Neĩ aŷ voi napendu kuaai teri, to'o re rive pendekuai vy.
- <sup>3</sup> Mba'eta penembyte ikuai hakâte'ŷ ha'e joo rami e'ŷ-e'ŷ oikuua va'e. Ha'e rami vy nda'u to'o re e'ŷ ri pendekuai, yvy regua ikuia rami?\*
- <sup>4</sup> Mba'eta peẽ kuery regua amongue aipopeje 'rã: "Xee ma Paulo pegua", e'ŷ vy "Xee ma Apolo pegua", peje. Ha'e rami vy nda'u yvy regua rami e'ŷ ri pendekuai?

---

\* **2:9** Isaías 64.4   \* **2:12** João 14.26; 16.13-15   \* **2:16** Isaías 40.13   \* **3:3** Gálatas 5.16-21, Tiago 4.1-3

<sup>5</sup> Mba'e ta marã ramigua tu Apolo oiko? Ha'e marã ramigua tu xee Paulo? Tembiguai rive orekuai, ha'e ayvu romombe'u rã pejerovia raka'e. Peteĩ-teĩ roiko Senhor orerembiaporã ome'ẽague rupi.

<sup>6</sup> Xee ma anhotȳ ha'yigue, ha'e gui Apolo ju omoakŷ. Ha'e rã imbo'yvatea ma Nhanderuete ae.

<sup>7</sup> Ha'e rami vy inhotȳ ma mba'eŷ, imoakŷ voi mba'eŷ avi, ha'e rã Nhanderuete imbo'yvatea va'e anho.

<sup>8</sup> Ha'e gui ha'yigue nhotȳ ha'e imoakŷ roiko va'e ma joo rami romba'eapo, ha'e peteĩ-teĩ rojopy 'rã romba'eapoague repy.

<sup>9</sup> Mba'eta ore ma Nhanderuete pe ombo'eapo va'e meme, ha'e rã peẽ kuery ma Nhanderuete mba'ety, ha'e ixupeguia oo guive.

### *Nhombo'ea kuery ombo'eapoague re oikuua potaa 'rãa re ijayvua*

<sup>10</sup> Nhanderuete xemboaxy vy xerembiaporã ome'ẽague rami vy oo apoa hi'arandu va'e rami avi hoo ytarã amoõ karamboae. Ha'e gui amboytaague áry ma amboae ju ojapove heravy. Peteĩ-teĩ toikuaa pota porã ha'e ae ombo'eapoaa re.

<sup>11</sup> Mba'eta oo ytarã amboae ramigua ju nda'evei nhamoõ aguã, omoña ae ma va'ekue e'ŷ vy. Ha'e va'e ma Jesus Cristo.\*

<sup>12</sup> Ha'e gui xapy'a rei ha'e va'e áry amongue ojapove 'rã ouro guigua, prata, ita iporãgueve va'e py, ha'e rami e'ŷ vy yvyra, mba'emo rogue pirukue ha'e mba'emo 'ygue rive py.

<sup>13</sup> Peteĩ-teĩ ombo'eapoague ojekuaa porãmba 'rã. Hi'ára py 'rã ojekuaa tata rupi, mba'eta peteĩ-teĩ ombo'eapoague tata py ae 'rã oa'angaa.

<sup>14</sup> Ha'e gui oo yta áry amongue ojapoveague ndokai ramo ojopy 'rã hekivia.

<sup>15</sup> Ha'e rã amongue ombo'eapoague okai ramo ma omokanhymba 'rã. Ha'e ae oo jepe 'rã tata rupi oaxa va'e rami rive.

<sup>16</sup> Ndapeikuiaai ri ty'y Nhanderuete mbojerovia atyrã pendekuaia, ha'e pendere Nhanderuete Nhe'ẽ oña?

<sup>17</sup> Xapy'a rei Nhanderuete mbojeroviaaty amongue ombovaipa ramo Nhanderuete ju ombovaipa 'rã. Mba'eta Nhanderuete mbojeroviaaty ma iky'a e'ŷ va'e. Ha'e va'e ma pendekuaia.

### *Avakue 'arandu ovare e'ŷa re ijayvua*

<sup>18</sup> Avave rei tapejekore eme: Xapy'a rei peẽ kuery regua amongue ikuai yvy regua kuery "Hi'arandu va'e" he'ia va'e. Ha'e va'e ma "Hi'arandu e'ŷ va'e" he'ia va'e ju tojeapo, hi'arandu ete aguã.

<sup>19</sup> Mba'eta kova'e yvy regua 'arandu ma Nhanderuete pe rã ovare'ŷ va'e.\* Ha'e nunga rupi ipara oiny: "Nhanderuete oitypa 'rã hi'arandu va'e ha'e kuery ae 'arandua py."

<sup>20</sup> Oĩ avi: "Senhor oikuua hi'arandu va'e kuery py'a re oĩ va'e ovare'ŷ va'e memea."\*

<sup>21</sup> Ha'e nunga rupi perovy'a rei eme avakue pegua peikoa, mba'eta opa marãgua ikuai va'e pendevygua meme:

<sup>22</sup> Paulo, Apolo, Cefas, kova'e yvy, tekove ha'e manoia, mba'emo aŷ oiko va'e ha'e araka'e rã guarã, ha'e nunga ha'e javi ma pendevygua meme.

<sup>23</sup> Ha'e rã peẽ ma Cristo pegua, ha'e gui Cristo ma Nhanderuete pegua.

## 4

### *Ayvu mombe'ua kuery Nhanderuete rembiguai ikuiaia re ijayvua*

<sup>1</sup> Toikuaa pavẽ Cristo rembiguai orekuiaia, Nhanderuete ayvu ndoikuua ukai va'ekue romombe'u porãve aguã.

<sup>2</sup> Ha'e rami avi tembiguai ikuai va'e re herekoia oikuua pota 'rã ixupe anho pa ikuiaia re.

\* **3:11** Efésios 2.19-22   \* **3:19** 1 Coríntios 1.10-25; Jó 5.13   \* **3:20** Salmo 94.11

<sup>3</sup> Ha'e rã peẽ e'ŷ vy amboae kuery xere oikuaa pota ramo xee napenai. Neĩ xee ae voi xejee ndaikuua potai.

<sup>4</sup> Peteĩve henda py noĩ xepy'a ky'aa teĩ ha'e nunga py ma xee ae nanhemboeko porāi. Xere oikuaa pota va'e ma Senhor ae oiko.

<sup>5</sup> Ha'e nunga rupi peikuaa pota rei eme avave re, Senhor oua ára ovaẽ e'ŷ mbove. Ha'e gui ma Senhor omoexakãmba 'rã avakue hi'ã py ikuaiague, ha'e oikuaa ukapa 'rã ipy'a re oĩ va'e ha'e javi. Ha'e ramo Nhanderuete gui ae 'rã peteĩ-teĩ oendu oguerovy'aa.

### Ijayvu eteague

<sup>6</sup> Irmão kuery, ha'e rami ma xee ae reko re, ha'e Apolo reko re guive xeayvu peẽ kuery re ama'ẽ vy, oreroko re vy pene'arandu aguã. Ha'e rami vy peikuaave eme ipara oĩ va'e gui, amongue joegui pejou porâve vy penhemboyvate rei e'ŷ aguã.

<sup>7</sup> Mba'eta mava'e tu joegui penemboyvateve? Mba'emo perekoyva rei e'ŷ aguã. Mba'eta mava'e tu joegui pejopy rire mba'e re tu penhemboyvate ri, joegui mba'emo ndojopyi va'ekue rami?

<sup>8</sup> Peẽ kuery aŷ voi perekopa merami, napendeporiauvei ma. Peẽ ranhe oregui peĩ huvixa rami. Ha'e rami avi huvixa peĩ ete ma 'rãgue, ore voi peẽ kuery reve huvixa roĩ avi aguã.\*

<sup>9</sup> Xee aikuaa rã ore apóstolo kuery ma pavẽ rakykue py Nhanderuete oremoĩ, ojuka pyrã rami. Mba'eta ore ma ko yvy regua kuery rembiexarã rami orekuai, anjo kuery ha'e avakue oexaa rupi.

<sup>10</sup> Cristo káuxa orevy pe "Inhakã porã e'ŷ va'e" 'ea, ha'e rã peẽ ma Cristo re vy pene'arandu. Ore ma orekangy merami, ha'e rã peẽ ma penembaraete. Peẽ ma omboetevepy, ha'e rã ore ma ojou vaipy orekuai.

<sup>11</sup> Mba'eta aŷ peve karuai ha'e yuvei gui rojexavai, neĩ oreaorã ndoroguerekoi guive. Orenupãmbaa, neĩ orero roke atyrã ndoroguerekoi,

<sup>12</sup> ronhea'ã roikovy orepo py ae romba'eapoa py. Orere ijayvu vaia rã rogueroayvu porã'i, oremoingo axya rei rã rogueroayvu porã'i,

<sup>13</sup> orere ijayvu vaikuea ramo rombovai porã'i. Aŷ peve orevy pe "Yvy regua yty" ha'e "Opa mba'e ky'akue" 'ea.\*

### Tuu rami Paulo omongetaague

<sup>14</sup> Romoximba aguã e'ŷ ha'e rami ambopara, ha'e rã xera'y kuery rami roayvu vy romongeta porã'i aguã.

<sup>15</sup> Mba'eta Cristo re penderekombo'ea kuery ma mbovy e'ŷ ikuai teĩ heta e'ŷ guive penderu ikuai. Ha'e gui xee ma ayvu porã amombe'ua rupi penderu rami aiko karamboae Cristo Jesus re.

<sup>16</sup> Ha'e nunga rupi aipota xee rami pendekuai.

<sup>17</sup> Ha'e rami aguã ae pendea katy ambou xera'y ayvu va'e Timóteo, Senhor re vy ojeroviapy oiko va'e. Ha'e va'e ma penemoma'endu'a 'rã Cristo Jesus pe aikoa re, opa rupi peteĩ-teĩ igreja ikuaiia rupi anhombo'ea rami vy.

<sup>18</sup> Ha'e rã peẽ kuery regua amongue ma je onhemboyvate rei, pendea py navaẽvei aguã re oexa'ã vy.

<sup>19</sup> Ha'e rami avi Senhor oipota rã xee aju voi 'rã peẽ kuery roexa vy. Ha'e rami vy aikuaa 'rã onhemboyvate rei va'e kuery anhetẽ pa ipo'aka va'ea, tyrã ijayvu anho rei rive va'ea.

<sup>20</sup> Mba'eta Nhanderuete po'akaa py ma ayvu anho e'ŷ oĩ, ha'e rã ipo'akaa.

<sup>21</sup> Mba'eda tu peipotave? Peẽ kuerya py yvyra rovi'i reve teve taju, tyrã pa mborayvu ha'e xevai reve'ŷ?

\* **4:8** Araka'eve rã Jesus ou jevy vy guexeve nhanemoĩ avi 'rã huvixa rami mba'emo re nhapena va'erã (1 Coríntios 6.2-3; 2 Timóteo 2.12; Apocalipse 5.10). \* **4:13** 2 Coríntios 4.8-11

## 5

*Itavy rei va'e re ijayvuague*

<sup>1</sup> Opa rupi omombe'ua rā oendua peẽ kuerya rupi itavy rei va'e oikoa, nguu ra'yxy reve joguerekva'e. Amboae regua kuery ikuiaia rupi voi ha'e rami ete itavy rei va'e ndoikoi.

<sup>2</sup> Ha'e rami teĩ peẽ kuery ma pendeporiau 'rāgue py pejejou porā rei tema. Penembyte gui ha'e rami ete ojapo vai va'e pemoxē va'e rire!

<sup>3</sup> Xee ma anhetē peẽa py naĩ teĩ nhe'ẽ re pendereve aiko vy peẽ kuerya py oĩ va'e rami xeayvu ha'e nunga apoare pembopaga aguã.

<sup>4</sup> Ha'e rami aguã penhemboaty ke Senhor Jesus rery rupi, xenhe'ẽ ha'e nhande-Senhor Jesus po'akaa reve.

<sup>5</sup> Ha'e rami vy Satanás po py pemboaxa ho'o ombovaipa aguã, ha'e rā inhe'ẽ oo jepe nho aguã Senhor [Jesus] ára py.\*

<sup>6</sup> Mba'eta pejejou porā reia ma na'iporāi. Ndapeikuai ri ty'y trigo mbovua ruxã'i oĩ teĩ mesa ha'e javi rupi omoeakuãmba 'rāa?

<sup>7</sup> Ha'e nunga rupi penembyte gui pemombo ke trigo mbovua ymague oĩ va'e, mbojape iky'a e'ŷ va'e ju pendekuai aguã, mba'eta trigo mbovua revegua e'ŷ anhetē peiko. Mba'eta nhandere vy ojukaa ma ngaru Páscoa pyguarã vexa'i. Ha'e va'e ma Cristo.

<sup>8</sup> Ha'e nunga rupi ngaru jajapo 'rā trigo mbovua yma guare nhanemboeko vai ha'e nhandeapo vaiarā reve'ŷ, ha'e rā mbojape irū e'ŷ va'e reve. Ha'e va'e ma anhetē ha'e teko porā rupi ete jaikoa.

<sup>9</sup> Kuaxia mboae ambopara va'ekue py xeayvu karamboae heko vai va'e re penhemoirū ve'ŷ aguã.

<sup>10</sup> Ha'e rami avi ko yvy regua heko vai va'e ha'e javi gui pejepe'a aguã re'ŷ xeayvu, peráta re nda'eveive va'e gui, neĩ imonda va'e ha'e mba'emo ra'angaa ombojerovia va'e gui. Mba'eta kova'e yvy gui jaa vy mae ma 'rā ha'e kuery gui jajepe'a.

<sup>11</sup> Ha'e rami 'rāgue py aŷ ma amongue ojeupe "Irmão" he'i rive va'e re ambopara. Ha'e kuery reve penhemoirū ve'ŷ aguã re xeayvu, neĩ heko vai va'e, peráta re nda'eveive va'e, mba'emo ra'angaa ombojerovia va'e, ijayvu vaikue rei va'e, oka'u va'ety, ha'e imonda va'e. Ha'e nunga reve nda'evei pekaru aguã voi.

<sup>12</sup> Mba'exa tu jaikuua pota igreja pygua e'ŷ re? Peikuua pota 'rāgue igreja pygua kuery re ae.

<sup>13</sup> Mba'eta igreja pygua e'ŷ re ma Nhanderuete ae 'rā oikuua pota. Ha'e rā peẽ ma penembyte gui pemoxē 'rā mba'emo vai apoa oiko va'e.\*

## 6

*Irmão kuery jomeme oikuua pota uka e'ŷ aguã re Paulo ijayvuague*

<sup>1</sup> Ha'e gui peẽ kuery jomeme pendeayvu aguã perekoy mba'exa tu heko vai va'e kuery renonde py pejogueraa peikuua pota uka aguã, iky'a e'ŷ va'e kuery renonde 'rāgue py?

<sup>2</sup> Ndapeikuai teve raka'eve rā iky'a e'ŷ va'e kuery ko yvy regua re oikuua pota 'rāa? Ha'e gui ko yvy regua re peikuua pota aguã rami pendekuai vy aŷ mba'e'ŷ'i re peikuua pota 'rāgue.

<sup>3</sup> Ndapeikuai ri ty'y anjo kuery re eteve voi jaikuua pota 'rāa? Ha'e gui aŷgua kuery re katuve ma 'rā jaikuua pota.

<sup>4</sup> Ha'e rā peẽ ma mba'emo ko yvy regua re peikuua pota uka aguã perekoy igreja kuery ndojou porāi va'e renonde py ri peikuua pota uka!

<sup>5</sup> Ha'e rami ma xeayvu peximba aguã. Penembyte ndoikoi ri ty'y peteĩ ri jepe hi'arandu va'e irmão kuery re oikuua pota kuaa va'erā?

\* 5:5 2 Coríntios 2.5-11 \* 5:13 Deuteronomio 17.7

<sup>6</sup> Ha'e rami 'rāgue py ojerovia e'ŷ va'e kuery renonde ri irmão kuery meme jogueraa 'rā oikuua pota uka aguā!

<sup>7</sup> Peē kuery regua jomeme peikuua pota ukaa py pejeity uka ma. Mba'e re tu ha'e rami 'rāgue py ndapejekore ukai ri? Mba'e re tu mba'emo perekva'e ndapeipe'a ukapai?\*

<sup>8</sup> Ha'e rā peē ae pejoapo vai vy nhomba'e rei-rei peipe'a uka. Pende-irmão kuery re ae pejapo ha'e rami.

<sup>9</sup> Ndapeikuaai ri ty'y heko vai va'e kuery e'ŷ Nhanderuete po'akaa pyguarā ikuai? Pejekore eme, mba'eta heko ky'apa rei va'e ma nda'ikuai 'rā Nhanderuete po'akaa py, neī mba'emo ra'angaa ombojerovia va'e, itavy rei va'e, kunha rami rei oiko va'e, avakue meme joguereko va'e,

<sup>10</sup> imonda va'e, peráta re nda'evei rei va'e, oka'u va'ety, ijayvu vaikue va'e, neī jokorepa va'e voi Nhanderuete po'akaa py nda'ikuai 'rā.

<sup>11</sup> Ha'e rami ae peē kuery regua pendekuai va'ekue ri pejejoi uka, pejeky'a'o uka ha'e penhemboeko porā uka ma Senhor Jesus Cristo rery rupi, ha'e Nhanderuete Nhe'ẽ re vy.

### *Nhandetavy rei e'ŷ aguā re ijayvua*

<sup>12</sup> "Opa mba'e ha'eve jajapo aguā", 'ea teī opa mba'e e'ŷ 'rā nhanemoingo porā. "Opa mba'e ha'eve jajapo aguā", 'ea teī xere ma mba'eve ipo'aka aguā nda'evei.

<sup>13</sup> "Tembiu ma nhanderyepy pyguarā oī, ha'e nhanderyepy ma tembi'u oī aguā", 'ea teī Nhanderuete omomba 'rā mokoīve. Ha'e rami avi nhanderete ma itavy rei aguā e'ŷ oī, Senhor peguarā anho.\* Ha'e Senhor ma nhanderete peguarā ojou uka,

<sup>14</sup> mba'eta Nhanderuete omboete ju rire nhande voi nhanemboete ju avi 'rā opo'akaa py.

<sup>15</sup> Ndapeikuaai ri ty'y penderete Cristo rete regua oikoa? Ha'e gui Cristo rete regua nda'u araa 'rā ri kunha itavy rei va'e re amboja aguā? Any teve.

<sup>16</sup> Ndapeikuaai ri ty'y kunha itavy rei va'e reve ava joguereko vy hexeve peteī'i tete opytas? Mba'eta 'Mokoī'rāgue py peteī'i to'o ikuai 'rā", he'iague rami.\*

<sup>17</sup> Ha'e rā Senhor re onhemboja va'e ma hexeve peteī'i nhe'ẽ oguereko.

<sup>18</sup> Penhemombyry ha'vy tavy reia gui. Jejavya mboae py ma nhande ae rete rovai e'ŷ jajejavy. Ha'e rā itavy rei va'e ma guete rovai ae ojejavy.

<sup>19</sup> Ndapeikuaai ri ty'y penderete Nhe'ẽ Ky'a E'ŷ mbojerovia atyrā oīa? Mba'eta Nhe'ẽ pendere oī va'e ma Nhanderuete gui pejopy rire pendejeupeguva ve'ŷ peiko.

<sup>20</sup> Mba'eta hepy re pendejogua. Ha'e rami rire aŷ pemboete 'rā Nhanderuete penderete py.

## 7

### *Omenda va'e reko re ijayvua*

<sup>1</sup> Ha'e gui xevy pe pemboparaague re ju ta xeayvu. Ha'eve ava kunha reve joguereko e'ŷ ramo.

<sup>2</sup> Ha'e rami teī tavy rei gui peteī-teī toguereko gua'yxy ae, ha'e peteī-teī kunha toguereko ome ae.

<sup>3</sup> Ava ma gua'yxy pe tojapo ojapo 'rā va'ekue, ha'e ta'yxy voi ha'e rami ae tojapo ome pe.

<sup>4</sup> Mba'eta kunha ma guete re ae nda'ipo'akai va'e, ha'e rā ime. Ha'e rami ae ime ma guete re ae nda'ipo'akai avi, ha'e rā ta'yxy.

<sup>5</sup> Peteī-teī joupe peikoxe e'ŷ eme, xapy'a'i pejoguereko rive ranhe aguā e'ŷ vy, pejerurea rupi anho pendekuai aguā. Ha'e va'e rire ma pejoguereko ju, pejejoko e'ŷa py Satanás penemoangecko e'ŷ aguā.

<sup>6</sup> Ha'e rami xeayvu vy "Pejapo rā ha'eve" ha'e, "Pejapo 'rāe" nda'eit.

---

\* **6:7** Mateus 5.38-40 \* **6:13** Romanos 12.1,2; 1 Tessalonicenses 4.1-8 \* **6:16** Gênesis 2.24

<sup>7</sup> Mba'eta aipota teĩ pavẽ xee aikoa rami ikuai. Ha'e rami teĩ peteĩ-teĩ guekorã ojopy Nhanderuete gui. Amongue ma anhetẽ peteĩ rami 'rã ikuai, ha'e rã amboae ma amboae rami ikuai aguã ojopy.\*

<sup>8</sup> Ha'e rã omenda e'ŷ ha'e imeve'ŷ va'e kuery pe ma aipoa'e: Xee aikoa rami ikuai rã ha'eve 'rãgue.

<sup>9</sup> Ha'e rami teĩ amongue ndojejoko kuaai vy tomenda, mba'eta omendaxeа oendu riae 'rãgue py ha'eveve omenda aguã.

### *Omenda va'e joegui opoi rive e'ŷ aguã re ijayvua*

<sup>10</sup> Ha'e gui omenda va'e kuery pe ju xeayvu ta. Xee anho e'ŷ guive xeayvu, Senhor ae ijayvu raka'e ome gui kunhague opoi e'ŷ aguã re.

<sup>11</sup> (Ha'e gui opoi ri vy tomendave eme. Ha'e rami e'ŷ vy ome reve ae ju toiko.) Ha'e ime kuery voi topoi eme gua'yxy gui.\*

<sup>12</sup> Ha'e rã amboae kuery pe ma xee ae aipoa'e, Senhor e'ŷ: Xapy'a rei amongue irmão gua'yxy ojerovia e'ŷ va'e oguerekõ rã hexeve oikoxe ramo ma topoi eme gua'yxy gui.

<sup>13</sup> Ha'e rami ae avi amongue kunha ome ojerovia e'ŷ va'e oguerekõ rã hexeve oikoxe ramo topoi eme ome gui.

<sup>14</sup> Mba'eta ime ojerovia e'ŷ va'e teĩ gua'yxy reve vy iky'a e'ŷ va'e rami 'rã oiko, ha'e ta'yxy ojerovia e'ŷ va'e voi iky'a e'ŷ va'e rami 'rã oiko ome ojerovia va'e reve vy. Ha'e rami e'ŷ va'e rire penda'y kuery heko ky'a va'e 'rãgue ikuai, va'eri aŷ ma iky'a e'ŷ va'e ikuai.

<sup>15</sup> Ha'e rã ojerovia e'ŷ va'e ma opoixe ri vy topoi. Ha'e rami rã irmão ojegui opoi uka teĩ ha'eve, ha'e irmã ha'e rami ae avi. Mba'eta Nhanderuete penerenoĩ peteĩ rami pendekuai aguã.

<sup>16</sup> Mba'eta ndee ta'yxy, mba'exa tu reikuua ndereve vy neme oo jepe 'rãa rami? Ha'e ndee ime, mba'exa tu reikuua ndereve vy ndera'yxy oo jepe 'rãa?

<sup>17</sup> Peteĩ-teĩ tapeiko penderekõrã Senhor oejaague rami, Nhanderuete penerenoĩague rami ae. Ha'e rami ae ajapo uka aikovy igreja ikuai va'e ha'e javi rupi.

<sup>18</sup> Amongue Nhanderuete oenoĩ jave opire omboi uka va'ekue teve oiko? Tombovaipa eme ha'vy opire omboi ukaague. Amongue oenoĩ jave opire omboi uka e'ŷ va'e teve oiko? Tomboi uka eme ha'vy opire.

<sup>19</sup> Mba'eta opire omboi ukaague ma mba'e'ŷ, ha'e opire omboi uka e'ŷa voi mba'e'ŷ avi. Ovare va'e ma Nhanderuete ojapo uka va'e rupi nhandekuaia anho.

<sup>20</sup> Ha'e nunga rupi peteĩ-teĩ toiko oenoĩ jave oikoague rupi ae.

<sup>21</sup> Escravo teve reiko nerenoĩ jave? Ndepy'a eta rei eme ha'e nunga re. Ha'e rami avi escravo reikoa gui repoi aguã ha'eve ramo epoi ha'vy.

<sup>22</sup> Mba'eta escravo Senhor oenoĩ va'ekue ma Senhor pegua escravo-ve'ŷ ikuai. Ha'e escravo e'ŷ oenoĩ va'ekue ma Cristo pegua escravo ikuai.

<sup>23</sup> Hepy re pendejogua rire pendekuaive eme avakue pegua escravo rami.

<sup>24</sup> Irmão kuery, peteĩ-teĩ Nhanderuete renonde peiko tema penerenoĩ jave peikoague rupi ae.

### *Ikuai axya ára pyguarã omenda ha'e omenda e'ŷ va'e re ijayvua*

<sup>25</sup> Ha'e gui kunhataigue omenda e'ŷ teri va'e peguarã ma xee ndaikuuaai Senhor ojapo uka va'ekue. Ha'e nunga rupi xee ae aikuua va'e amombe'u ta, mba'eta Senhor xemboaxy vy ojeroviapõ xemoingo.

<sup>26</sup> Xee aikuua rã aŷ teko axy oiko ramo ha'eve 'rãgue peikoa rami ae tema peiko aguã.

<sup>27</sup> Remenda ri vy epoi eme, ha'e rã kunha reve'ŷ reiko vy emenda eme.

<sup>28</sup> Remenda ri vy nderejejavyi 'rã. Kunhatai voi omenda vy ndojejavyi avi 'rã. Ha'e rami teĩ guete reve oikoa ja ikuai axy 'rã, ha'e ramo xee ajapoxe ha'e nunga pendu e'ŷ aguã rami.

\* 7:7 Mateus 19.10-12 \* 7:11 Mateus 19.3-9

<sup>29</sup> Ha'e gui irmão kuery, tamombe'u porãe: Ára ovaẽ rai'i ma. Aŷ guive omenda va'e ta'ikuai omenda e'ŷ va'e rami,

<sup>30</sup> ojae'o va'e ta'ikuai ojae'o e'ŷ va'e rami, ovy'a va'e ta'ikuai ovy'a e'ŷ va'e rami, mba'emo ojogua va'e ta'ikuai mba'eve oguereko e'ŷ va'e rami,

<sup>31</sup> ha'e mba'emo ko yvy regua oiporu va'e ta'ikuai oiporu e'ŷ va'e rami, mba'eta kova'e yvy jaexa va'e okanhy ma ovy.

<sup>32</sup> Xee opa mba'e py aipota va'e ma pendereketa reia gui peo jepea. Mba'eta omenda e'ŷ va'e kuery ma Senhor pe oiko aguã re anho 'rã opena, Senhor ombovy'a aguã.

<sup>33</sup> Ha'e rã omenda va'e ma mba'emo ko yvy regua re openaa rupi avi 'rã ikuai, gua'yxy ombovy'axe vy.

<sup>34</sup> Ha'e rami vy pete'i'i re'ŷ 'rã opena. Kunhague ma ha'e rami ae avi. Imeve'ŷ va'e ha'e omenda e'ŷ teri va'e ma Senhor pe oiko aguã re anho 'rã opena, guete py ha'e onhe'ẽ re iky'a e'ŷa rupi oiko aguã. Ha'e rã omenda vy ma mba'emo ko yvy regua re voi 'rã opena, ome ombovy'a aguã.

<sup>35</sup> Ha'e rami xeayvu peẽ kuery pevy'a aguã, romoingo eta reixe vy e'ŷ. Ha'e rami 'rãgue py aipota ha'evea rami pendekuai, ajapoxe Senhor pe ete iky'a e'ŷ va'e pendekuai aguã.

<sup>36</sup> Ha'e gui xapy'a rei pete'i tuu ojeupe ae "Xee ndareko kuaavei ma xerajy" he'i 'rã. Xapy'a rei tajy iporãa oaxa ta, ha'e omenda aguã ha'eveve ramo kunha va'e oipotaa rami ae tuu toguereko. Omomenda ri vy ndojejavyi 'rã.

<sup>37</sup> Ha'e rã tuu mboae ma opy'a py omoĩ porã 'rã ngoo py ae guajy oguereko tema aguã, xapy'a rei amboae rami imoingoarã jipo, ha'e ipo'aka ha'e ae oipotaa rami oguereko aguã. Ha'e gui ipy'a re ha'e rami aguã oĩ atã ramo guajy omomenda e'ŷa py ha'evea rami ojapo.

<sup>38</sup> Mba'eta guajy omomenda va'e ma ha'evea rami ojapo, ha'e rã omomenda e'ŷ va'e ma ha'eveve va'e ojapo.

<sup>39</sup> Ha'e gui ta'yxy kuery ma ime oikovea ja hexeve anho 'rã ikuai. Ha'e gui ime omano ma ramo ha'eve omendaxeja va'e re omenda ju aguã, va'eri Senhor pegua re anho.

<sup>40</sup> Ha'e rami avi imeve'ŷ va'e ma xee aikuua rã ha'ekue rami ae oiko vy ovy'ave 'rã. Aikuua avi xere voi Nhanderuete Nhe'ẽ oĩa.

## 8

### *Mba'emo ra'angaa pe tembi'u ome'ẽ mbyre re ijayvua*

<sup>1</sup> Aŷ ma xeayvu ta mba'emo ra'angaa pe tembi'u ome'ẽ mbyre re. Nhande kuery ha'e javive ha'e nunga jaikuua. Ha'e gui mba'emo oikuua va'e ma ha'e kuery ae onhembovate rei 'rã, ha'e rã mborayvu re ikuai va'e ma nhomombaraete 'rã.

<sup>2</sup> Mba'eta "Mba'emo aikuapa" he'i va'e ma ndoikuuai teri mba'emo oikuua ete aguã.

<sup>3</sup> Ha'e rã Nhanderuete oayvua rupi ikuai va'e ma Nhanderuete rembikuua ikuai.

<sup>4</sup> Ha'e nunga rupi mba'emo ra'angaa pe tembi'u ome'ẽ mbyre ma po rami jaikuua: Kova'e yvy re mba'emo ra'angaa ikuai va'e ha'e javi ma mba'e'ŷ, mba'eta Nhanderuete ndoikoi, pete'i'i e'ŷ vy.

<sup>5</sup> Ha'e ikuai avi "Nhanderuete" he'i va'e yva re e'ŷ vy yvy re mba'emo oĩ va'e pe. Heta ikuai "Nhanderuete" 'ea, ha'e heta avi "Senhor" 'ea va'e.

<sup>6</sup> Ha'e rami te'i nhandevy pe ma pete'i'i oiko Nhanderuete. Ixugui ma opa mba'e oiko raka'e, ha'e ixupe meme jaiko. Ha'e rami ae avi pete'i'i oiko Senhor. Ha'e va'e ma Jesus Cristo. Mba'eta ipo gui ma opa mba'e ikuai raka'e, nhande kuery voi ixugui jaiko.

<sup>7</sup> Ha'e rami te'i pavẽ e'ŷ ha'e rami oikuua. Mba'eta mba'emo ra'angaa mboetea rupi ikuai va'ekue amongue ma aŷ peve ta'angaa pe ome'ẽ mbyre ho'u vy "Xemboeko ky'aara ha'u" he'i 'rã, o'arandua py ikangy teri vy.

<sup>8</sup> Ha'e rami avi tembi'u e'ŷ 'rã nhanemboeko porã Nhanderuete renonde, mba'eta mba'emo ndaja'ui vy mba'eve ndoatai 'rã nhandevy, ha'e mba'emo ja'u teĩ mba'eve ndajarekovei 'rã.

<sup>9</sup> Ha'e rami teĩ peikuaa pota pova'e re: Mba'emo pe'ua py peity e'ŷ aguã irmão kuery ikangykuve.\*

<sup>10</sup> Mba'eta xapy'a rei ndee "Aikuaapa" 're reve reo 'rã mba'emo ra'angaa pegua templo py rekaru aguã. Ha'e gui ha'e py ikangy teri va'e nderexa vy ha'e kuery voi oendu 'rã tembi'u mba'emo ra'angaa pe ome'ẽ mbyre ho'uxe avia.

<sup>11</sup> Ha'e rami vy ndee reikuaa va'e káuxa nde-irmão ikangyve va'e okanhy 'rã, hexe Cristo omano rire teĩ.

<sup>12</sup> Ha'e ramia py rejjavvy irmão kuery pe, mba'eta ha'e kuery 'arandua ikangy teri va'e rembovaipa vy Cristo pe voi rejjavvy.

<sup>13</sup> Ha'e nunga rupi xee ma tembi'u ha'ua py xe-irmão kuery aity 'rãgue py nda'uvei 'rã xo'o, aity rive'ŷ aguã.

## 9

### *Apóstolo Paulo gueko re ijayvuague*

<sup>1</sup> Ha'e rami avi nda'evei ri ty'y xee aikuua rami aiko aguã? Xee apóstolo e'ŷ ri ty'y? Ndaexai ri ty'y Jesus nhande-Senhor? Peẽ kuery e'ŷ teve Senhor pe amba'eapoague rupi pejerovia va'ekue?

<sup>2</sup> Xapy'a rei amboae kuery oikuua rã xee apóstolo e'ŷ, ha'e rã pendevy pe ma anhetẽ apóstolo aiko, mba'eta Senhor pegua apóstolo aikoa kuaa ukaa ma peẽ ae peiko.

<sup>3</sup> Xere oikuua pota rei va'e kuery pe ma po rami ambovai:

<sup>4</sup> Ore kuery ma nda'evei ri ty'y ronhemongaru uka aguã?

<sup>5</sup> Nda'evei ri ty'y orerupive irmã orera'yxy rogueraa aguã, amboae apóstolo kuery, Senhor ryvy kuery ha'e Cefas rami avi?

<sup>6</sup> Tyrã pa xee ha'e Barnabé anho vi nda'evei romba'eapoa rupi e'ŷ roiko aguã?

<sup>7</sup> Mava'e xondaro tu ha'e ae operáta re oo 'rã joe opu'ã aguã? Mava'e uva nhotÿare tu hi'a ho'u va'erã e'ŷ? Ha'e mava'e mymba re opena va'e tu guymba kamby gui oy'u va'erã e'ŷ?\*

<sup>8</sup> Ha'e rami xeayvu vy avakue oikuua rami rive teve xeayvu, tyrã pa lei re oĩ va'e voi aipo nde'i?

<sup>9</sup> Mba'eta lei Moisés ombopara va'ekue re ma ipara oiny: "Pejokua eme vaka mba'emo ojyky va'e juru rupi", he'ia py vaka re anho teve Nhanderuete ijayvu?\*

<sup>10</sup> Nhande kuery re avi e'ŷ ri ty'y ijayvu? Nhanderoko re ae ipara oiny anhetẽ, mba'eta yvy karaña rupi ombo'eapo va'e ma mba'emo oarõ reve 'rã oyvy karañ. Ha'e mba'emo ojyky va'e voi ojeupagua oarõ reve 'rãe ombo'eapo.

<sup>11</sup> Xapy'a rei peẽ kuerya py Nhe'ẽ guigua ronhotÿ rire ipoyi vaipa teve mba'emo perekva'e gui rojopy'i aguã?

<sup>12</sup> Amboae kuery mba'emo perekva'e ojopy aguã ha'eve ramo orevy pe katuve ma nda'evei ri ty'y rojopy aguã?

Ha'e rami teĩ ore kuery ma ha'e nunga ndorojopyxei. Ha'e rami 'rãgue py opa marãgua roqueropo'aka neĩ peteĩ henda py rojou vai uka e'ŷ aguã Cristo regua ayvu porã.\*

<sup>13</sup> Tyrã pa ndapeikuaai teve templo re opena va'e kuery voi templo py ogueru pyre gui okaru 'rãa? Altar rupi ombo'eapo va'e kuery voi altar áry ome'ẽ mbyre gui ae 'rã ho'u.

\* <sup>8:9</sup> 1 Coríntios 10.14-22; Romanos 14.13-23 \* <sup>9:7</sup> Paulo ma apóstolo oiko vy nhombo'ea rupi oikoa py ha'eve 'rãgue guemimbo'e kuery pe onhemongaru uka va'e rire, teĩ ha'e rami ndoiptai (versículo 18). \* <sup>9:9</sup> Deuteronômio 25.4

\* <sup>9:12</sup> Atos 20.33-35; 2 Coríntios 11.7-9

**14** Ha'e rami ae avi Senhor ijayvu raka'e ayvu porã mombe'ua kuery onhemongaru uka aguã ayvu porã omombe'ua re.

**15** Ha'e rã xee ma peteigueve nanhemongaru ukai joupe, neĩ xemongarua aguã re e'ŷ guive pendevy pe ambopara aŷ. Mba'eta joupe anhemongaru uka aikovy 'rãgue py ha'eveve amano aguã. Avave rei ndoipe'ai 'rã xegui ha'e rami aiko vy avy'aa.

**16** Mba'eta ayvu porã amombe'u teĩ ha'e rami aikoa rive e'ŷ arov'y'a, mba'eta amombe'u aguã rami aikoa aendu riae. Xevy pe ndavy'ai ete 'rãgue ayvu porã amombe'u e'ŷ va'e rire.

**17** Xee ae amombe'uxea rupi rive amombe'u vy ajopy 'rã hekobia. Ha'e rã ayvu mombe'uarã xemoña rire amombe'ua aguã rami ae aiko.

**18** Mba'exa tu ha'vy oĩ 'rã amba'epoague repyrã? Po ramigua ae oĩ: Ayvu porã amombe'ua rupi nanhemongaru ukai, ha'e rami ajapo va'e rire ha'eve 'rãgue teĩ.

**19** Mba'eta avave pegua escravo e'ŷ aiko teĩ pavẽ escravo rami ajeapo, heta araa jepe aguã, ha'evea peve.

**20** Ha'e rami vy judeu kuerya rupi judeu rami aiko, judeu kuery regua araa jepe aguã. Lei re oĩa rami ikuai va'ea rupi xee voi ha'e kuery rami aiko, lei guy py ikuai va'e araa jepe aguã, lei guy py ete'ŷ xee aiko teĩ.

**21** Ha'e rã lei oikuua e'ŷ va'ea rupi xee voi ha'e kuery rami aiko, araa jepe aguã lei oikuua e'ŷ va'e regua. Ha'e rami avi Nhanderuete pe vy lei rupi ndaiko e'ŷi, Cristo guigua lei rupi aiko ae.

**22** Ikangykueve ikuiaia rupi ikangy va'e rami aiko, ikangy va'e regua araa jepe aguã. Peteĩ-teĩ regua ikuiaia rupi opa marãguia rami aiko, marã rami vy pa araa jepe aguã amongue.

**23** Ha'e nunga ha'e javi ajapo ayvu porã oendua aguã, xee voi ixuguigua ajopy avi aguã.

**24** Ndapeikuuaai teve ougaa py onha va'e ha'e javive anhetẽ onha teĩ peteĩ'i anho ojopy 'rãa ome'ẽ mbyrã? Peẽ voi ke penhea'ã ome'ẽ mbyrã pejopy aguã re.

**25** Mba'eta ouga va'e kuery ha'e javi ojejoko 'rã opa mba'e py. Ha'e va'e kuery ma akã regua imarã va'e ojopy aguã ojejoko, ha'e rã nhande kuery ma imarã e'ŷ va'e jajopy aguã.

**26** Xee voi aiko ha'e rami, aa aguã katy ama'ẽ reve tema anha. Ha'e rami anhea'ã, ngovaigua oinupã ta vy ojavypa rive va'e rami e'ŷ.

**27** Areko axy xerete, xevygua escravo rami areko, amboae kuery pe ayvu amombe'u rire teĩ xee ae ougaa gui omoxẽ mbyre rami apyta e'ŷ aguã.

## 10

### *Israel regua ikuaiague re ijayvua*

**1** Mba'eta irmão kuery, ndaipotai penderexarai nhaneramoĩ kuery ikuai jave guare re. Mba'eta ha'e kuery ma arai guy rupi oguata vy ye'ẽ mbyte rupi oaxa pavẽ raka'e.\*

**2** Moisés peguarã onhemongaraia rami ha'e javive arai guy rupi oguata, ha'e ye'ẽ rupi oaxapa raka'e.

**3** Ha'e javive peteĩ'i regua tembi'u ho'u raka'e, Nhe'ẽ guigua,

**4** ha'e oy'u avi Nhe'ẽ guigua yvu gui, mba'eta peteĩ ita Nhe'ẽ guigua ha'e kuery oguataa rupi ojou kuerei va'e gui oy'u. Ha'e va'e ita ma Cristo.

**5** Ha'e rami teĩ ha'e kuery regua hetave ma Nhanderuete ndoguerovy'ai vy tekao e'ŷa pyve oitypa.

**6** Ma'ẽ, ha'e nunga oiko raka'e nhande voi nhanheangu aguã, ha'e kuery ikuaiague rami ovare'ŷ va'e nhamoaruã avi e'ŷ aguã.\*

\* **10:1** Apy ma Egito yvy gui Moisés Israel kuery ogueraapaague re ijayvu. \* **10:6** Hebreus 3.7-4.11

<sup>7</sup> Ha'e nunga rupi pembojerovia eme mba'emo ra'angaa ha'e kuery regua ojapoague rami, ipara oña rami: "Ha'e kuery oguapy okuapy okaru ha'e oy'u aguã. Ha'e gui ma opu'ã ju ov'y'a aguã", he'iague rami.\*

<sup>8</sup> Ha'e nhandetavy rei eme guive ha'e kuery regua ojapoague rami, ha'e ramo peteĩ ára pyve vinte e três mil oitya.

<sup>9</sup> Nda'evei Senhor jaeko a'ã aguã ha'e kuery regua ojapoague rami, ha'e gui mboi oixu'u rã omanomba.

<sup>10</sup> Pendeayvu rei eme Senhor re ha'e kuery regua ijayvuague rami, ha'e ramo poromokanhy omomba.

<sup>11</sup> Ha'e nunga ma ha'e kuery re oiko raka'e jaikuua aguã, omboparaa guive nhanheangu aguã, mba'eta nhande ma ára opaa pygua nhandekuai.

<sup>12</sup> Ha'e nunga rupi "Xe'aĩ atã" he'i va'e ma tonheangu ho'a e'ŷ aguã.

<sup>13</sup> Mba'eta penemoangeko pendu va'e ma nhande ha'e javi nhaendu va'e ramigua. Ha'e Nhanderuete ojeroviapy vy napenemoangeko ukai 'rã penembaraetea áryve. Ha'e rami 'rãgue py penemoangekoarã ou ramo oikuua uka kuerei 'rã peo jepe aguã, ha'e va'e rupi vy peropo'aka aguã.

### *Mba'emo ra'angaa nhambojerovia e'ŷ aguã re ijayvua*

<sup>14</sup> Ha'e nunga rupi xerembiajvu kuery, penhemombyry ke mba'emo ra'angaa pembojerovia aguã gui.

<sup>15</sup> Pene'arandu va'e pe xeayvu, peẽ ae peikuua porã pota xeayvua re.

<sup>16</sup> Mba'eta karo nhanemoingo porãarã gui jarovy'a reve jay'u ramo Cristo ruguy rupi e'ŷ ri ty'y hexe nhanemonhembojapa? Ha'e mbojape nhaipe'ã reve ja'u ramo Cristo rete rupi e'ŷ ri ty'y hexe nhanemonhembojapa?

<sup>17</sup> Mba'eta heta nhandekuai teĩ peteĩ'i mbojape, peteĩ tete anho jaiko, mba'eta peteĩ'i mbojape gui ja'u pavẽ.

<sup>18</sup> Peikuua pota ke Israel kuery ngo'o re ikuai va'e reko re, mba'eta altar áry tembi'u ome'ẽ mbyre gui ha'e javi ho'u.

<sup>19</sup> Ha'e gui mba'e ha'e 'rã tu? Mba'emo ra'angaa pe tembi'u ome'ẽ mbyre, e'ŷ vy mba'emo ra'angaa ae ojapo 'rã teve mba'emo?

<sup>20</sup> Any, teĩ aipoa'e: Ta'angaa pe mba'emo ha'e kuery ome'ẽ va'e ma anha pe ae ome'ẽ, Nhanderuete pe'ŷ. Ha'e rami rã xee ndaipotai anha kuery re penhemboja.\*

<sup>21</sup> Nda'evei Senhor karo gui ha'e anha karo gui avi pey'u aguã. Nda'evei Senhor pegua mesa py ha'e gui anha pegua mesa py avi pei aguã.

<sup>22</sup> Tyrã pa pejapoxe ri Senhor nda'evei etea oendu aguã rami? Peẽ nda'u ixugui pendepo'akave ri?

### *Cristo re vy jajoitya rupi e'ŷ nhandekuai aguã re ijayvua*

<sup>23</sup> "Opa mba'e ha'eve jajapo aguã" 'ea teĩ opa mba'e e'ŷ 'rã nhanemoingo porã. "Opa mba'e ha'eve jajapo aguã" 'ea teĩ opa mba'e e'ŷ 'rã nhanemombaraete.

<sup>24</sup> Avave rei ojeupe anho rive tojapo porã eme, ha'e rã amboae kuery pe.\*

<sup>25</sup> Ha'eve pe'u aguã mba'emo vendea py ovende va'e rei, maguigua paa re peporandu e'ŷ re peikuua potaxe vy.

<sup>26</sup> Mba'eta Senhor pegua ae itui yvy ha'e opa mba'e hexe ikuai va'e.\*

<sup>27</sup> Ha'e rami vy ojerovia e'ŷ va'e regua ngoo py pekaru aguã penerenoĩ ramo peoxe vy tapeo, ha'e pe'u tema penerononde omoĩ va'e rei, mba'eve re peporandu e'ŷ re peikuua potaxe vy.

<sup>28</sup> Ha'e rami avi pendevy amongue aipoe'i: "Kova'e tembi'u ma mba'emo ra'angaa pe ome'ẽ mbyre", he'i ramo pe'u eme imombe'uare opy'a ky'aa oendu e'ŷ aguã.

---

\* **10:7** Éxodo 32.6 \* **10:20** 1 Coríntios 8.1-13 \* **10:24** Romanos 14.1-15.7; Filipenses 2.1-4 \* **10:26** Salmo 24.1

<sup>29</sup> “Peẽ ae pendepy'a ky'aa gui pe'ueme” nda'e, “Amboae kuery opy'a ky'aa oendu e'ŷ aguã” ha'e.

Ha'e rami avi mba'ex tu amboae kuery opy'a ky'aa oendu e'ŷ aguã nda'evei xee aikuua rami aiko aguã?

<sup>30</sup> Nhanderuete arov'y'a reve mba'emo ha'u ramo mba'ex tu xere ayvua 'rã mba'emo arov'y'a va'e káuxa?

<sup>31</sup> Ha'e nunga rupi pekaru ha'e pey'u, e'ŷ vy opa mba'e pejapo va'e rei Nhanderuete omboetea aguã rami pejapo.

<sup>32</sup> Peity eme judeu kuery, neñ amboae regua, ha'e neñ Nhanderuete pegua igreja kuery,

<sup>33</sup> xee voi opa mba'e py pavẽ pe ajapo porãxe rami avi. Mba'eta xejeupe ae e'ŷ ajapo porãxe, ha'e rã pavẽ pe, ha'e kuery voi oo jepe aguã.

## 11

<sup>1</sup> Xee rami avi ke pendekuai, xee voi Cristo rami aikoa rami.

### *Igreja py kunhague akã ao'ia oiporu aguã re ijayvuague*

<sup>2</sup> Anhetê xee roguerovy'a peẽ kuery, mba'eta opa mba'e py xerekore penema'endu'a, ha'e pendekorã amombe'u va'ekue guive pemoī porã.

<sup>3</sup> Ha'e rami avi aipota peikua Cristo avakue ha'e javi akã oikoa, ha'e avakue ma kunhague akã, ha'e gui Cristo akã ma Nhanderuete ae oiko.

<sup>4</sup> Ha'e nunga rupi avakue onheakã ao'i reve ri Nhanderuete pe onhembo'e, e'ŷ vy Nhe'ẽ guigua omombe'u vy oakã mboetea rupi e'ŷ oiko.

<sup>5</sup> Ha'e rã kunhague ma onheakã ao'i e'ŷ re ri ojerure, e'ŷ vy Nhe'ẽ guigua omombe'u vy oakã nomboetei, inhakã onhopī mbyre revegua rami ikuai.

<sup>6</sup> Ha'e nunga rupi kunhague akã ao'ia ndoiporu ri vy tojayapa o'a. Ha'e rã o'a ndojayaxei, e'ŷ vy oakã onhopī aguã oxĩ ri vy toiporu akã ao'ia.

<sup>7</sup> Mba'eta anhetê avakue onheakã ao'i aguã nda'evei, Nhanderuete ojee rami omoingo rire ipo'akaa oexa uka aguã. Ha'e rã kunhague ma ava po'akaa oexa uka aguã ikuai.

<sup>8</sup> Mba'eta ava va'e ma kunha gui e'ŷ omoingo raka'e, ha'e rã kunha va'e ma ava gui omoingo.

<sup>9</sup> Ha'e kunha pytyvõarã e'ŷ ava oiko raka'e, ha'e rã ava pytyvõarã kunha oiko.

<sup>10</sup> Ha'e nunga rupi kunhague omoī 'rã akã ao'ia, anjo kuery pe voi ipo'akaa oexa uka aguã.

<sup>11</sup> Ha'e rami teī Senhor re vy kunhague ndoikoi 'rã avakue e'ŷ re, ha'e avakue voi ndoikoi 'rã kunhague e'ŷ re.

<sup>12</sup> Mba'eta ava va'e gui kunha omoingoa raka'e teī kunhague gui avakue itui'i guive, ha'e opa mba'e oiko Nhanderuete gui.

<sup>13</sup> Peẽ kuery ae peikua pota: Ha'evea rami ri nda'u kunhague akã ao'ia omoī e'ŷ re onhembo'e aguã Nhanderuete pe?

<sup>14</sup> Nhanderekorã oeja pyre gui ndapeikuaai ri ty'y avakue hi'a vuku aguã nda'eveia?

<sup>15</sup> Ha'e rã kunhague ma hi'a vuku ramo jajou porã, mba'eta hi'a ma inhakã ao'iarã ome'ëa.

<sup>16</sup> Ha'e amboae rami amongue oikua vy toikua pota povae re: Ore ma amboae rami ndorekuai, neñ Nhanderuete pegua igreja kuery mboae voi.

### *Senhor pegua ngaru marã rami pa jajapo aguã re ijayvua*

<sup>17</sup> Ha'e gui po ramigua ma roguerovy'aa rupi e'ŷ ambopara, mba'eta pendekuai porãve aguã rami e'ŷ ri penhemboaty, ha'e rã napendekuai porãive aguã rami.

<sup>18</sup> Mba'eta jypy'igua omombe'ua rã aendu joo rami e'ŷ-e'ŷ pendekuaia igreja penhemboatya py. Xee ma amongue henda py arovia guive.

<sup>19</sup> Mba'eta peẽ kuery joo rami e'ŷ-e'ŷ 'rãe pendekuai, penembyte py ha'evea rami ikuai va'e ojekua porã aguã.

<sup>20</sup> Ha'e gui ngaru oiko aguã py penhemboaty vy Senhor pegua ngaru e'ŷ pe'u.  
<sup>21</sup> Mba'eta pekarua py peteĩ-teĩ ha'e ranhe 'rã ojopy ho'u va'erã. Oĩ 'rã inhembyayi va'e, oĩ avi 'rã oka'u va'e.  
<sup>22</sup> Pendero ndaperekoi ri ty'y pekaru ha'e pey'u aguã? Tyrã pa Nhanderuete pegua igreja napembovarei mba'eve oguereko e'ŷ va'e kuery pemoximbaa py? Mba'e ha'e 'rã tu pêvy? "Roguerovy'a" ha'e 'rã teve? Ha'e rami pendekuaia anhetẽ xee ndarovy'ai.

<sup>23</sup> Mba'eta xee Senhor gui aikuaa va'ekue pendevy pe ju amombe'u: Senhor Jesus ojopy uka nhemia pytû ma ojopy raka'e mbojape,

<sup>24</sup> ha'e oguerovy'a rire oipe'ã. Ha'e vy aipoe'i: "Kova'e ma xerete pendere ame'ẽ va'e. Guĩ nunga pejapo 'rã xere penema'endu'a vy", he'i.

<sup>25</sup> Ha'ekue rami ae ju okarupa rire ojopy karo. Ha'e vy aipoe'i: "Kova'e karo ma xereve guarã ipyau va'e xeruguy rupi ajapo va'e. Guĩ nunga pey'u nhavõ xere penema'endu'a aguã pejapo", he'i raka'e.

<sup>26</sup> Mba'eta ha'e va'e regua mbojape pe'u, ha'e karo gui pey'u nhavõ Senhor ou jevy peve peikuua uka 'rã omanoague.\*

<sup>27</sup> Ha'e nunga rupi amongue ha'eve'ŷa rami oiko reve mbojape ho'u, ha'e Senhor karo gui oy'u va'e ma Senhor rete ha'e huguy py onhemboeko ky'a.

<sup>28</sup> Ha'e nunga rupi peteĩ-teĩ toikuua pota gueko re ae. Ha'e rire mae ma to'u mbojape, ha'e toy'u karo gui.

<sup>29</sup> Mba'eta amongue Senhor rete mboetea rupi e'ŷ ho'u ha'e oy'u vy ha'e ae onhembopaga uka ho'u ha'e oy'uague re.

<sup>30</sup> Ha'e nunga rupi ae peẽ kuery va'e regua heta ikuai ikangy ha'e imba'eaxy va'e, ha'e mbovy e'ŷ ma guive oke.\*

<sup>31</sup> Ha'e rã nhandere ae jaikuua pota ramo nanhanembopagaai 'rã.

<sup>32</sup> Ha'e rami avi Senhor nhanembopaga vy nhanemo'arandu, yvy regua reve japaga ve'ŷ aguã.

<sup>33</sup> Ha'e nunga rupi xe-irmão kuery, pekaru aguã py penhemboaty vy penhoarõ ke jomeme.

<sup>34</sup> Xapy'a rei amongue okaruxea rive oendu vy ngoo py ae tokaru, penhemboatya py penhembopaga uka e'ŷ aguã. Ha'e gui amboae nunga re peẽ kuerya py avaẽ ma rire mae ma xeayvu 'rã.

## 12

### Nhe'ẽ ojapo kuaa ukaa re ijayvua

<sup>1</sup> Irmão kuery, xee aipota peikuua porã Nhe'ẽ guigua ome'ẽmby ikuai va'e.  
<sup>2</sup> Mba'eta ymave rupi ndapejeroviai teri jave opa marã rei pejererekoi uka va'ekue mba'emo ra'angaa ijayvu e'ŷ va'e pe rive pendekuai aguã, peikuua rami.  
<sup>3</sup> Ha'e nunga rupi po rami xeayvu pendevy: Nhanderuete Nhe'ẽ gui amongue ijayvu vy "Jesus ayvu vaipy toiko" nde'i 'rã. Ha'e rami ae avi Nhe'ẽ Ky'a E'ŷ gui anho 'rã "Jesus ma Senhor" 'ea. \*

<sup>4</sup> Ha'e gui nhanerembiaporã Nhanderuete ome'ẽ va'e ma joo ramigua e'ŷ-e'ŷ, ha'e rã Inhe'ẽ ma peteĩ'i.\*

<sup>5</sup> Joo ramigua e'ŷ-e'ŷ 'rã nhanerembiaporã oĩ, ha'e rã Senhor ma peteĩ'i.

<sup>6</sup> Joo rami e'ŷ-e'ŷ nhamba'eapo, va'eri ha'e nunga ha'e javi ma Nhanderuete ojapo kuaa uka pavẽ pe.

<sup>7</sup> Mba'eta peteĩ-teĩ pe oikuua uka 'rã Nhe'ẽ guigua pavẽ pe ojapo porã aguã.

\* **11:26** Mateus 26.26-30; Marcos 14.22-26; Lucas 22.14-20 \* **11:30** "Oke" he'ia ma Cristo pegua omano va'ekue re ijayvu vy (15.20). \* **12:3** 1 João 4.1-3 \* **12:4** Romanos 12.6-8; 1 Coríntios 14.29; 1 Pedro 4.10,11

<sup>8</sup> Mba'eta amongue pe Nhe'ẽ guigua ome'ẽ 'rã o'arandua rupi ijayvu aguã. Amboae pe ma Nhe'ẽ guigua ome'ẽ 'rã ayvu mba'emo kuaa ukaarã.

<sup>9</sup> Amboae pe ma Nhe'ẽ guigua ome'ẽ 'rã ojerovia ete aguã. Ha'e rã amboae pe ma Nhe'ẽ guigua ome'ẽ 'rã nhomonguera aguã.

<sup>10</sup> Amboae pe ma ome'ẽ 'rã hexa pyrã ojapo aguã. Amboae pe ju ome'ẽ 'rã Nhe'ẽ guigua ayvu omombe'u aguã. Amboae pe ma ome'ẽ 'rã nhe'ẽ ikuai va'e re oikuua pota aguã. Amongue pe ma ome'ẽ 'rã opa marãgua ayvu py ijayvu aguã. Ha'e rã amboae pe ma ome'ẽ 'rã ha'e rami ijayvua rã mba'e he'i paa omombe'u porãve aguã.

<sup>11</sup> Ha'e rami avi peteĩ'i ae Nhe'ẽ ojapo kuaa uka 'rã ha'e nunga ha'e javi. Peteĩ-teĩ pe ombojoja 'rã ha'e ae oipotaa rami.

### *Nhanderete re igreja ombojojaague*

<sup>12</sup> Mba'eta nhanderete minha peteĩ'i oĩ va'eri heta oĩ hexegua, ha'e hexegua ikuai va'e ma heta teĩ ha'e javi vy peteĩ tete ojapo. Ha'e rami ae Cristo pegua nhandekuai.\*

<sup>13</sup> Mba'eta peteĩ'i Nhe'ẽ reve nhande kuery ha'e javive nhanemongarai raka'e peteĩ teterã, judeu, grego, escravo, escravo e'ŷ regua voi. Mba'eta nhande kuery ha'e javive pe ome'ẽ peteĩ'i Nhe'ẽ gui jay'u aguã.

<sup>14</sup> Mba'eta nhanderete re minha peteĩ'i regua e'ŷ oĩ, heta.

<sup>15</sup> Xapy'a rei nhandepy aipoe'i 'rã: "Xee ma ipo e'ŷ vy tete regua e'ŷ aiko", he'i teĩ ha'e nunga rupi voi ndoiko e'ŷi 'rã nhanderete regua.

<sup>16</sup> Xapy'a rei nhandeapyxa aipoe'i rã: "Xee texa e'ŷ vy tete regua e'ŷ aiko", he'i teĩ ha'e nunga rupi voi ndoiko e'ŷi 'rã tete regua.

<sup>17</sup> Mba'eta nhanderete re texa anho oĩ va'e rire mba'exa 'rãgue tu jajapyxaka? Apyxha anho oĩ va'e rire mba'exa 'rãgue tu nhaetã?

<sup>18</sup> Ha'e rami 'rãgue py nhanderete re ma Nhanderuete ae tete regua ha'e javi omoĩ, ha'e ae omoĩxeia rami.

<sup>19</sup> Mba'eta ha'e javive joo ramigua anho oĩ va'e rire mba'e nunga tete 'rãgue tu oiko?

<sup>20</sup> Ha'evea rami tete regua heta oĩ, peteĩ'i tete ojapo aguã.

<sup>21</sup> Nda'evei nhandepo pe nhanderexa "Ndee noroikotevẽi" he'i aguã. Neĩ nhaneakã voi nda'evei nhandepy pe "Peẽ noroikotevẽi" he'i aguã.

<sup>22</sup> Ha'e rami 'rãgue py nhanderete regua ikangykueve va'e teĩ nhaikotevẽ ete 'rã.

<sup>23</sup> Nhanderete regua ovare e'ŷve va'e teĩ nhamboeteve 'rã. Na'iporãive va'e re nhapena porãve 'rã.

<sup>24</sup> Ha'e rã nhanderete regua jaexa ukave va'e ma nhamboete e'ŷ teĩ ha'eve 'rã. Mba'eta Nhanderuete tete regua omoĩ vy ombovare ukave ovare e'ŷve va'e,

<sup>25</sup> nhanderete regua joe opu'ã okuapy e'ŷ aguã, tete regua peteĩ rami meme oĩ aguã jomeme opena porãa rupi.

<sup>26</sup> Mba'eta peteĩ tete regua ojexavai ramo ha'e javive 'rã ojexavai hexeve. Peteĩ omboetea rã ha'e javive avi 'rã ovy'a hexeve.

<sup>27</sup> Ha'e rami ae peẽ kuery ma Cristo rete pendekuai, peteĩ-teĩ hete regua peĩ.

<sup>28</sup> Ha'e gui igreja mbyte py Nhanderuete omoĩ va'e jypy rã apóstolo-rã, mokoĩa ma profeta-rã, mboapya ma porombo'earã, ha'e va'e rire ma hexa pyrã apoarã, ome'ẽ avi nhomonguera aguã, nhopytyvõ aguã, joe opena aguã, ha'e opa marãgua ayvu py ijayvu aguã.

<sup>29</sup> Ha'e javive teve apóstolo ikuai? Tyrã pa ha'e javive 'rã profeta? Ha'e javive teve porombo'ea ikuai, tyrã pa hexa pyrã apoarã?

<sup>30</sup> Ha'e javive pe teve ome'ẽ nhomonguera aguã? Ha'e javive teve ijayvu kuaa 'rã amboae ayvu py? Ha'e javive teve omombe'u porãve kuaa 'rã amboae regua ayvu?

<sup>31</sup> Any teĩ penhea'ã tema ome'ẽmby iporãgueve pejopy aguã.

\* **12:12** Romanos 12.3-5; Efésios 1.22,23; 4.11-16

*Mborayvu iporāve va'ea re ijayvua*

Ha'e gui peteĩ tape pavẽ gui iporāve va'e ju amombe'u ta pendevy.

**13**

<sup>1</sup> Avakue ha'e anjo kuery ayvu py xeayvu kuaa va'e rire xeporayvu e'ŷ ri vy itapu onhendu va'e rami rive 'rāgue aiko, e'ŷ vy hy'a pu rami rive.

<sup>2</sup> Ha'e rami e'ŷ vy Nhe'ẽ guigua amombe'u kuaa va'e rire, mba'emo ndoikuua ukai pyre ha'e 'arandua ha'e javi aikuaapa, ha'e yvyty voi arova kuaa aguã rami ajeroviaa oĩ teĩ xeporayvu e'ŷ ri vy mba'everã ndavarei 'rāgue.

<sup>3</sup> Iporiaukue'i pe xemba'e rei-rei ame'ẽmba va'e rire, ha'e xerete rapyarã pe amboaxa teĩ xeporayvu e'ŷ ri vy ha'e nungakue gui ndajou'i 'rāgue mba'eve.

<sup>4</sup> Ha'e rami 'rāgue py nhandedporayvua rupi nhandedkuai vy ma nanhanhogueroangeko rei 'rā, jajapo porã 'rā joupe. Nhandedporayvua rupi vy joe nanhanerakâte'yi 'rā, nanhanhemboyvatei 'rā, neĩ ndajajejou porã rei 'rā guive.

<sup>5</sup> Ha'eve'ŷa rami rei ndajaikoi 'rā, nhande ae jaipota va'e anho ndajajapoi 'rā, nanhan-devai rei 'rā, nhandedevy otekoavya rã nanhanhenhandu vaikue rei 'rā,

<sup>6</sup> ndajarovy'ai 'rā teko vai, ha'e anhetê va'e anho 'rā jarovy'a.

<sup>7</sup> Opa mba'e py nanhandekuerai 'rā, opa mba'e jarovia 'rā, opa mba'e nharõ kuaa 'rā, opa mba'e jaropo'aka 'rā guive.

<sup>8</sup> Mborayvu ma opa va'erã e'ŷ. Ha'e rã Nhe'ẽ guigua nhamombe'ua ma opa 'rā, amboae ayvu py nhandedayvua opa 'rā, mba'emo jaikuaa aguã voi opa avi 'rā.

<sup>9</sup> Mba'eta amongue henda py ete'i jaikuaa mba'emo, ha'e amongue henda py ete'i guive nhamombe'u kuaa 'rā Nhe'ẽ guigua.

<sup>10</sup> Ha'e gui ma opa mba'e py iporã va'e ou jave ma amongue henda py ete'i jajapo kuaa ague omombaa 'rā.

<sup>11</sup> Xee minha xekyrĩ jave py kyrĩ va'e rami xeayvu, mba'emo aendu, ha'e xepy'a va'ekue. Ha'e gui xetuja ma vy xekyrĩ jave aikoague rami ve'ŷ ma aiko.

<sup>12</sup> Mba'eta aŷ ma mba'emo jaexa epéko oje'opa va'e re ojexa vai-vai va'e rami. Ha'e rã ha'e va'e jave py ma hova re nhama'ẽ reve 'rā jaexa. Aŷ ma amongue henda py ete'i aikuaa mba'emo. Ha'e rã ha'e va'e jave py ma aikuaa porãmba 'rā Nhanderuete xekuaa-a rami avi.

<sup>13</sup> Ha'e gui aŷ mboapy oiko: jajeroviaa, nharõa ha'e mborayvu. Ha'e va'e gui yvateve va'e ma mborayvu.\*

**14***Amboae ayvu py nhandedayvua gui Nhe'ẽ guigua nhamombe'ua yvatevea re ijayvua*

<sup>1</sup> Peiko ke mborayvu re, ha'e penhea'ã Nhe'ẽ guigua ome'ẽmbry pejopy avi aguã. Penhea'ãve Nhe'ẽ guigua ayvu pemombe'u aguã.

<sup>2</sup> Mba'eta amboae ayvu py ijayvu va'e ma amboae kuery oendu aguã e'ŷ ijayvu, Nhanderuete anho, mba'eta avave rei noendu kuaai 'rā, mba'eta jaikuaa e'ŷ va'e re ijayvu onhe'ẽ py ae.\*

<sup>3</sup> Ha'e rã Nhe'ẽ guigua ayvu mombe'ua ma nhaendu kuaa aguã ijayvu, nhanemombaraete, nhanemongeta ha'e nhanembopy'a porã aguã guive.

<sup>4</sup> Amboae ayvu py ijayvu va'e ma ha'e ae onhemombaraete. Ha'e rã Nhe'ẽ guigua mombe'ua ma omombaraete 'rā igreja kuery ha'e javi.

<sup>5</sup> Xee aipota teĩ peẽ kuery ha'e javive pendeayvuu amboae ayvu py. Ha'e rami avi aipotave va'e ma Nhe'ẽ guigua ayvu pemombe'u, mba'eta Nhe'ẽ guigua mombe'ua ma

\* **13:13** João 13.31-35; Gálatas 5.13,14; Colossenses 3.12-14    \* **14:2** 1 Coríntios 12.7-11,27-31

amboae ayvu py ijayvu va'e gui yvateve, oayvua ae omombe'u porâve e'ŷ re igreja kuery omombaraeteve aguã.

<sup>6</sup> Aŷ ma irmão kuery, amboae ayvu py xeayvu reve peẽ kuerya py avaẽ va'e rire mba'exa tu roipytyvõ 'râgue? Peteĩve henda py noroipytyvõi 'râgue. Ha'e rã Nhanderuete oikuaa uka va'ekue amombe'u ramo ha'eve, e'ŷ vy mba'emo aikuaa va'e, Nhe'ẽ guigua, e'ŷ vy rombo'ea rupi xeayvu ramo ha'eve avi.

<sup>7</sup> Mba'eta mba'epu omyĩ e'ŷ va'e voi, mimby, mbaraka mba'e nhaendu porã aguã rami e'ŷ ri ombopua ramo mba'exa tu nhaendu kuaa ta mba'epu ombopua rã?

<sup>8</sup> Ha'e rami avi mimby guaxu nonhendu porãi ri ramo mava'e tu oiko katu ta joe opu'a aguã?

<sup>9</sup> Ha'e rami ae avi peẽ voi amboae ayvu py amboae kuery oikuaa aguã rami e'ŷ ri pendeayvu ramo mba'exa tu oendu kuaa ta aipopejea? Mba'eta yvate rupi rive ijayvu va'e rami 'râgue pendeayvu.

<sup>10</sup> Anhetẽ opa marãgua ayvu ikuai ko yvy re, ha'e rã ayvu oendu kuaa aguã ramigua e'ŷ ma jipoi.

<sup>11</sup> Ha'e rami teĩ amongue ijayvu rã mba'e he'ia pa xee aikuaa e'ŷ va'e rire ixupe amboae regua rami xee aiko 'râgue, ha'e va'e voi amboae regua 'râgue olko xevy.

<sup>12</sup> Ha'e rami ae avi peẽ voi Nhe'ẽ guigua ome'ẽmby pejopyxe vy penhea'ãve igreja kuery mombaraetearã pejopy aguã.

<sup>13</sup> Ha'e nunga rupi amboae ayvu py ijayvu va'e tojerure oayvua omombe'u porâve kuaa avi aguã re.

<sup>14</sup> Mba'eta amboae ayvu py ri Nhanderuete pe anhembo'e ramo xenhe'ẽ anhetẽ on-hembo'e 'rã, ha'e rã xe'arandua ma oĩ rive 'rã.

<sup>15</sup> Mba'exa tu aiko 'rã ha'vy? Xenhe'ẽ py anhembo'e 'rã, ha'e xe'arandua py guive. Xenhe'ẽ py aporaei 'rã, ha'e xe'arandua py guive.

<sup>16</sup> Mba'eta penenhe'ẽ py anho ri Nhanderuete perovy'a ramo mba'exa tu oikuaa e'ŷ va'e "Amém" he'i ta perovy'apa ma ramo? Mba'eta ndoikuaai 'rã mba'e pejea paa.

<sup>17</sup> Peẽ anhetẽ Nhanderuete perovy'a porã'i, ha'e rã pendeayvua oendu va'e ma nape-mombaraetei 'rã.

<sup>18</sup> Xee arov'y'a Nhanderuete mba'eta peẽ kuery ha'e javive gui xeayvuve amboae ayvu py.

<sup>19</sup> Ha'e rami teĩ amboae ayvu py dez mil-kue xeayvu 'râgue py igreja kuery ikuiaia py ajou porâve xe'arandua reve peteĩ nhiruĩ ayvu py ete'i xeayvu aguã, anhombo'e porã aguã.

### *Igreja kuerya py ipoua kuery ikuai jave ome'ẽmby jaiporu kuaa aguã re ijayvua*

<sup>20</sup> Irmão kuery, kyr̄gue rami peiko eme pene'arandua py. Teko vai py ma kyr̄gue rami peiko teĩ ha'eve. Ha'e rã pene'arandua py ma kakuaakue oiko kuaa va'e rami peiko.

<sup>21</sup> Lei re ipara oiny: "Kova'e kuery pe xeayvu 'rã amboae ayvu py, amboae regua ayvu rupi 'rã xeayvu teĩ naxenhe'ẽ rendui 'rã", he'i Senhor.\*

<sup>22</sup> Ha'e nunga rupi ayvu mboae py ijayvua ma mba'emo kuaa ukaarã oiko, teĩ ojerovia va'e kuery pe'ŷ, ojerovia e'ŷ va'e kuery pe anho. Ha'e rã Nhe'ẽ guigua ayvu omombe'ua ma ojerovia e'ŷ va'e kuery pegua e'ŷ, ojerovia va'e kuery pegua.

<sup>23</sup> Ha'e gui igreja kuery ha'e javi joa py onhemboaty vy amboae ayvu py ha'e javive ijayvu ramo amongue oikuaa e'ŷ rei va'e, ojerovia e'ŷ va'e oike vy oendu vy "Na'inhakã porâveipa", nde'i 'rã ri ty'y?

<sup>24</sup> Ha'e rã Nhe'ẽ guigua ayvu ri ha'e javive omombe'u rã amongue ojerovia e'ŷ va'e, oikuaa e'ŷ va'e oike vy oendu vy onhemboaxy 'rã, mba'eta ha'e javi ijayvu rã oendu 'rã gueko regua meme, ojeupe guarã ae.

---

\* **14:21** Isaías 28.11-12

<sup>25</sup> Ha'e va'e opy'apy py mba'emo onhomí va'ekue teĩ oikuaapaa 'rã. Ha'e ramo guenapy'ã re oĩ vy ngova yvy re omovaẽ reve omboete 'rã Nhanderuete. Ha'e vy "Nhanderuete anhetẽ ete ri penembyte oĩ", he'i 'rã.

### *Nhanhemboatya py ha'evea rami meme nhandekuai aguã re ijayvua*

<sup>26</sup> Ha'e gui irmão kuery, mba'exa tu ha'vy pendekuai 'rã? Mba'eta penhemboatya py amongue ogueru 'rã jogueroporaei aguã, ha'e rã amboae ma nhombo'e aguã 'rã ogueru, amongue ma ogueru 'rã mba'emo oikuaa uka aguã, ha'e rã amboae ma ayvu mboae py ijayvu aguã rami 'rã oiko, ha'e amboae ju omombe'u porãve 'rã ijayvuague. Ha'e nunga ha'e javi ma nhomombaraete aguã rami meme tojeapo.

<sup>27</sup> Ha'e gui amboae ayvu py ri amongue ijayvu vy mokoĩ e'ŷ vy mboapy anho ta'ijayvu jorire. Toĩ avi ijayvuague omombe'u porãve va'erã.

<sup>28</sup> Ha'e rami avi imombe'u porãvearã noĩ ramo pekyrirĩ 'rã peiny igreja kuerya py. Pendejeupe ae, ha'e Nhanderuete reve anho 'rã pendeayvu.

<sup>29</sup> Profeta kuery voi mokoĩ e'ŷ vy mboapy ta'ijayvu, ha'e rã amboae kuery ma toikuaa pota ijayvua re.

<sup>30</sup> Ha'e gui xapy'a rei peteĩ oguapy oiny va'e pe Nhe'ẽ mba'emo oikuaa uka ramo jypy'igua tokyrirĩ ranhe.

<sup>31</sup> Ha'e rami vy Nhe'ẽ guigua ayvu jorire peteĩ-teĩ omombe'u teĩ ha'eve 'rã, pavẽ oikuaa vy ipy'a guaxuve aguã.

<sup>32</sup> Mba'eta profeta kuery ikuai va'e ma ojoko kuaa 'rã onhe'ẽ ae.

<sup>33</sup> Mba'eta Nhanderuete ma nanhanemboeko eta rei, peteĩ rami 'rã nhanemoingo.

Ha'e javi igreja ikuai va'e rupi iky'a e'ŷ va'e kuery ikuiaia py

<sup>34</sup> kunhague okyrirĩ 'rã okuapy pavẽ onhemboatya py, nda'evei ijayvu aguã. Ha'e rami 'rãgue py ome kuery po'akaa re ta'ikuai, lei re oĩa rami vy.

<sup>35</sup> Xapy'a rei kunhague mba'emo oikuaa porãvexe vy ome pe toporandu ngoo py ae. Mba'eta pavẽ onhemboatya py ri kunhague ijayvu vy oximba rei aguã rami ikuai.

<sup>36</sup> Tyrã pa peẽ kuerya gui ranhe ri ty'y Nhanderuete ayvu ou raka'e? Ha'e rami e'ŷ vy pendevy pe anho ri ty'y oikuaa uka raka'e?

<sup>37</sup> Amongue ojeupe ae "Profeta" e'ŷ vy "Nhe'ẽ revegua" he'i va'e toikuaa pota pova'e re: Pendevy pe xee amboparaa ma Senhor ae ojapo uka va'e meme.

<sup>38</sup> Pova'e nunga re amongue ndojapyxakaxei ramo ijayvua re ju tojapyxakaa eme.

<sup>39</sup> Ha'e gui xe-irmão kuery, penhea'ãve tema Nhe'ẽ guigua ayvu pemombe'u kuaa aguã. Pejoko eme guive amboae ayvu py amongue ijayvu rã.

<sup>40</sup> Ha'e nunga ha'e javi ma ha'evea rami meme tojeapo jorire-rire.

## 15

### *Cristo onhemboete ju rire nhanhemboete ju avi aguã re ijayvua*

<sup>1</sup> Irmão kuery, aŷ romoma'endu'a ta ayvu porã amombe'u aikovy va'e re. Ha'e va'e ma perovia rire hexe peĩ atã teri.

<sup>2</sup> Ha'e va'e rupi peo jepe guive, xapy'a rei pendevy ayvu amombe'u va'ekue pendejee pemoi riae vy. Ha'e rami e'ŷ ri vy peroviaague mba'everã ndovarei 'rã.

<sup>3</sup> Mba'eta xevy pe ranhe ayvu oikuaa uka pyre pendevy ju amombe'u va'ekue: Jaje-javyague re Cristo omano raka'e ipara oĩa rami vy.

<sup>4</sup> Ha'e gui onhono porãa, ha'e mboapy araa py onhemboete ju, ipara oĩa rami vy ae ju.\*

<sup>5</sup> Ha'e gui jypy'i ojexa uka Cefas pe, ha'e va'e rire ma doze-ve pe.

<sup>6</sup> Ha'e va'e rire ma peteigüe pyve ojexa uka quinhentos raxa irmão kuery pe. Ha'e va'e kuery regua heta okuave aŷ peve, ha'e rã amongue ma oke ma.

<sup>7</sup> Ha'e va'e rire ma Tiago pe ju ojexa uka, ha'e gui apóstolo kuery ha'e javive pe.

\* **15:4** Atos 2.24-36; 1 Coríntios 6.14

<sup>8</sup> Ha'e gui opaa py xevy pe avi ojexa uka, are rire itui'i va'ekue pe rami.

<sup>9</sup> Mba'eta xee ma apóstolo kuery mboae gui xe'yvyīve va'e aiko, ha'e Nhanderuete pegua igreja kuery re apu'ã rei rire nda'evei va'ekue apóstolo-rā xerenoña aguā.

<sup>10</sup> Ha'e rami teñ Nhanderuete xemboaxy ramo apóstolo xee aiko. Xemboaxyia ndoaxa rivei guive, mba'eta apóstolo kuery ha'e javive gui amba'eapove va'e. Xee ae e'ÿ guive, Nhanderuete xemboaxyia xere oĩ va'e ojapo.

<sup>11</sup> Ha'e rami teñ xee, e'ÿ vy ha'e kuery teñ ha'e rami ae romombe'u va'e, ha'e gui ha'e rami ae ju perovia raka'e.

<sup>12</sup> Ha'e gui Cristo omanoague gui onhemboete jevyague romombe'u ramo mba'exa tu peẽ kuery regua amongue ijayvu ri omano va'ekue nonhemboete jevyi 'rāa rami?

<sup>13</sup> Mba'eta anhetē ri omanoague gui nonhemboete jevyai va'e rire Cristo voi nonhemboete jevyi 'rāgue raka'e.

<sup>14</sup> Ha'e Cristo nonhemboete jevyi va'e rire mba'everā ndovarei 'rāgue ayvu romombe'ua ha'e pejeroviaa.

<sup>15</sup> Ha'e Nhanderuete ayvu romombe'u merami rive 'rāgue, Nhanderuete rovai oreapu va'e rami roiko 'rāgue, mba'eta Cristo omboete jevyague romombe'u. Mba'eta Cristo nomboete jevyi va'e rire omano va'ekue nonhemboete jevyi ae 'rāgue.

<sup>16</sup> Mba'eta omano va'ekue nonhemboete jevyi ri ramo Cristo voi nonhemboete jevyi 'rāgue raka'e.

<sup>17</sup> Ha'e Cristo nonhemboete jevyi va'e rire pejeroviaa mba'everā ndovarei 'rāgue, ha'e pejejavya rupi teri peiko 'rāgue.

<sup>18</sup> Ha'e rami anho e'ÿ, Cristo pegua oke va'ekue voi okanhymba ae 'rāgue.

<sup>19</sup> Xapy'a rei aÿ jaikovea peve'i Cristo guigua nharõa ovare va'e rire pavē gui ov'y'a e'ÿve va'e jaiko 'rāgue.

### *Oke va'e kuery gui Cristo ranhe oikove jevyague re ijayvua*

<sup>20</sup> Ha'e rami avi anhetē ete omano va'ekue mbyte gui Cristo onhemboete ju raka'e, oke va'e kuery gui ha'e ranhe oikove ju aguā.

<sup>21</sup> Mba'eta peteñ'i ava gui nhamano aguā ouague rami peteñ ava gui avi ou nhamanoague gui nhanhemboete ju aguā.

<sup>22</sup> Mba'eta Adão re vy nhamano aguā rami japyta pavē. Ha'ekue rami avi Cristo re vy pavē jaikove ju 'rā.

<sup>23</sup> Ha'e rami avi peteñ-teñ hi'ára py porā 'rā oikove ju. Cristo ma jypygua ete raka'e. Ha'e va'e rire Cristo ou jave ma ixupeguia kuery ju 'rā okuave.

<sup>24</sup> Ha'e va'e rire mae ovaë 'rā opaa ára. Ha'e jave py yvatekueve ha'e ipo'akakueve ha'e javi Cristo omokanhymba ma rire Nguuete pe ju 'rā omboaxa opo'akaa.

<sup>25</sup> Mba'eta ipo'aka 'rā ngovaigua kuery ha'e javive opy guýry omo'yvýimba peve.

<sup>26</sup> Hovaigua opa vygua omomba va'erā ma manoia,

<sup>27</sup> "Opa mba'e omo'í 'rā ipy guýry", he'iague rami. Ha'e rami avi "Opa mba'e ipo'aka guy py omo'í", he'ia py ma ipo'aka guy py opa mba'e moñare re ae e'ÿ guive ijayvu.\*

<sup>28</sup> Ha'e gui ipo'aka guy py Tuu opa mba'e omo'í ma rire mae ma Ta'y voi ha'e ae onhemoo'í 'rā opa mba'e moñare po'aka guy py, Nhanderuete opa mba'e re ipo'aka aguā.

### *Nhanhemboete ju va'erā vy marā rami pa jaiko aguā re ijayvua*

<sup>29</sup> Ha'e rami e'ÿ ramo mba'exa 'rā tu ikuai omano va'ekue re vy onhemongarai va'e? Anhetē ri omano va'ekue nonhemboete jevyi va'e rire mba'e re tu ha'e kuery onhemongarai 'rā omano va'ekue re?

<sup>30</sup> Ha'e mba'e re tu ore voi ndorojeayvuveikue py orekuai ára nhavõ?

<sup>31</sup> Mba'eta ko'ë nhavõ xee ajejuka uka. Irmão kuery, ha'e rami xeayvu mba'eta Cristo Jesus nhande-Senhor re vy peẽ kuery roguerovy'a vy.

\* **15:27** Salmo 8.6

<sup>32</sup> Xapy'a rei avakue oikuaa rami rive ri Éfeso tetã py mymba inharõ va'e reve anhea'ã va'e rire mba'e 'rāgue tu ajopy ha'e nunga rekoria? Mba'eta omano va'ekue nonhemboete jevyvei ri ramo "Jakaru ha'e jay'u tema, mba'eta ko'ẽ rā nhamanomba 'rā", ja'e 'rāgue.\*

<sup>33</sup> Pejekore eme, mba'eta heko vai va'e re penhemoirū ramo ombovaipa 'rā pendereko porāa.

<sup>34</sup> Pendekuai porā pota nho ke, pejejavy ve'ŷ aguā. Mba'eta peẽ kuery regua amongue ikuai Nhanderuete ndoikuuai teri va'e. Ha'e rami xeayvu peximba aguā.

### *Onhemboete jevy vy guete oguerekō va'erā re ijayvua*

<sup>35</sup> Ha'e gui amongue aipopeje 'rā: "Marā rami 'rā tu ha'vy omano va'ekue onhemboete ju? Marā ramigua tete 'rā tu ha'e kuery oguerekō?" peje 'rā.

<sup>36</sup> Pene'arandu e'ŷ va'e, mba'emo ra'yīgue omoaī mbyre rami 'rā ikuai, mba'eta ha'yīgue ma omano e'ŷ re naenhoī 'rā.

<sup>37</sup> Mba'emo ra'yī nhamoāi va'e minha heterā reve'ŷ 'rā nhamoāi, ha'yīgue anho, trigo e'ŷ vy amboae ra'yī rei.

<sup>38</sup> Nhanderuete ae heterā ome'ẽ 'rā ome'ẽxea rami, peteī-teī ha'yīgue pe heterā ae ome'ẽ.

<sup>39</sup> Ha'e javi ho'o va'e voi joo ramigua e'ŷ-e'ŷ: Peteī ma avakue ro'o, amboae ma mymba ro'o, amboae ma guyra, ha'e amboae ma pira ro'o.

<sup>40</sup> Ikuai avi yva regua ha'e yvy regua. Anhetē yva regua jaexa rā yvy regua reve joo rami e'ŷ-e'ŷ iporā va'e.

<sup>41</sup> Kuaray rexakā ma ha'e rami 'rā iporā, jaxy rexakā ma amboae rami 'rā, ha'e jaxy-tata rendy ma amboae rami ju 'rā iporā. Jaxy-tata ikuai va'e voi joo rami e'ŷ-e'ŷ 'rā hendy.

<sup>42</sup> Ha'e rami ae avi 'rā omano va'ekue onhemboete ju jave. Nhanderetekue ivaipa aguā rami onhono porāa va'ekue ri onhemboete ju 'rā ivaipa ve'ŷ aguā rami. Nda'evei va'ekue onhono porāa va'ekue ri onhemboete ju 'rā imarā ve'ŷ aguā.\*

<sup>43</sup> Ikangy va'e onhono porāa va'ekue ri onhemboete ju 'rā ipo'aka reve.

<sup>44</sup> Nhande regua tete onhono porāa va'ekue ri onhemboete jevy vy Nhe'ẽ guigua ju 'rā oiko. Mba'eta oiko nhande regua tete, ha'e Nhe'ẽ guigua tete avi oiko.

<sup>45</sup> Mba'eta ipara oiny: "Ava jypygua Adão ma omoingo raka'e oikove va'erā, ha'e rā opa vyguia Adão ma nhe'ẽ nhomoingovearā oiko."\*

<sup>46</sup> Ha'e rami avi nhande regua ranhe oiko raka'e, Nhe'ẽ guigua e'ŷ. Ha'e rire mae ma Nhe'ẽ guigua oiko.

<sup>47</sup> Jypygua ava yvy gui ojapo rire yvy regua ae oiko. Ha'e rā mokoña ava ma yva guigua.\*

<sup>48</sup> Jypygua ava yvy regua oiko rire avakue mboae yvy regua meme ikuai. Ha'e gui yva guigua ava oikoague rami avi yva guigua 'rā ikuai.

<sup>49</sup> Yvy regua rami jaiko rire yva guigua rami ju 'rā jaiko.

### *Okuave va'e voi ombopyaupaa aguā re ijayvua*

<sup>50</sup> Irmão kuery, po rami amombe'u porā: Ho'o ha'e huguy va'e ma nda'evei Nhanderuete po'akaa pyguarā, mba'eta imarā va'e nda'evei imarā e'ŷa py ikuai aguā.

<sup>51</sup> Ma'ẽ, pendevy amombe'u ta ndoikuua ukai pyre: Pavē e'ŷ 'rā jake, teī pavē 'rā nhanembopyaupa,

<sup>52</sup> nhaxapymi xapy'a'ia rami 'rā, opa vyguia mimby guaxu onhendu jave. Mba'eta mimby guaxu onhendu rā omano va'ekue onhemboete jevypa 'rā imarā ve'ŷ aguā, ha'e nhande nhanembopyaupa 'rā.\*

<sup>53</sup> Mba'eta nhanderete imarā va'e onhemonde 'rā imarā e'ŷ aguā py. Nhanderete omano va'erā va'e onhemonde 'rā omano ve'ŷ aguā py.

---

\* **15:32** Isaías 22.13   \* **15:42** Filipenses 3.20,21; 1 João 3.2   \* **15:45** Gênesis 2.7   \* **15:47** "Opa vyguia Adão" ha'e "Mokoña ava" he'ia ma Cristo re ae ijayvu vy.   \* **15:52** 1 Tessalonicenses 4.13-18

54 Ha'e gui nhanderete imarã va'e imarã e'ŷ aguã py ju onhemonde jave, omano va'erã va'e omano ve'ŷ aguã py onhemonde ma jave py mae ma ojeupity 'rã ayvu ipara oinya: "Ipo'akapave va'e ombovaipa ma mano."\*

55 Ha'e nunga rupi mano, mamo tu opyta ndepo'akaague? Mamo tu opyta orepiarã reiporu va'ekue?\*

56 Mba'eta manoia popia ma jejavya, ha'e jejavya po'akaa ma lei re oĩ.

57 Ha'e rami teĩ jarovy'a Nhanderuete, mba'eta nhande-Senhor Jesus Cristo re vy nhanembopo'aka.

58 Ha'e nunga rupi xerembiayvu irmão kuery, peĩ atã tema, pejeity uka eme, Senhor pe pemba'eapoa rupi penekyre'ŷ riae guive, mba'eta jaikuua Senhor re vy nhamba'eapoa ndoaxa rivei 'rãa.

## 16

### *Judéia pygua kuery iporiaukue'i peguarã mba'emo omono'õ aguã re ijayvuague*

1 Ha'e gui iky'a e'ŷ va'e kuery pe peme'ẽ va'erã pemono'õ aguã re xeayvu po rami: Peẽ voi ke pejapo Galácia pygua igreja kuery pe ajapo ukaague rami avi.

2 Ha'e rami vy semana ijypyä ára nhavõ peteĩ-teĩ pendero rupi pemoõ porã 'rã pejoua rami. Pemono'õ-no'õve tema, xee avaẽ rã pemono'õ ve'ŷ teĩ ha'eve aguã.

3 Ha'e gui avaẽ ma rire peẽ peiporavo va'e rei amondouka 'rã Jerusalém katy kuaxia para reve. Ha'e rami rã ha'e kuery ogueraa 'rã peme'ẽ va'ekue.

4 Xee voi aa avi aguã ha'eve ramo ha'e kuery oo 'rã xerupive.\*

### *Paulo oguataxea re ijayvuague*

5 Macedônia yvy rupi aaxa rire peẽ kuerya py ju 'rã avaẽ, mba'eta ha'e rupi aaxa aguã rami ranhe aiko.\*

6 Xapy'a rei peẽ kuery reve aiko are vy aaxa 'rã yro'y jave, ha'e peẽ kuery xepytyvõ 'rã aaxea katy aguatave aguã.

7 Mba'eta aaxa avy vy rive roexa aguã nda'evei, Senhor oipota rã peẽ kuery reve aiko arexe.

8 Ha'e rami avi Pentecostes ára peve apyta 'rã Éfeso tetã py,

9 mba'eta ha'e py peteĩ okẽ tuvixa va'e ojepe'a xevy amba'eapo aguã, xejokoxe va'e heta ikuai teĩ.

### *Timóteo ha'e Apolo rekora re ijayvuague*

10 Peẽ kuerya py Timóteo ovaẽ ramo ke pepena porã okyje reia oendu e'ŷ aguã rami, mba'eta xee rami avi Senhor pe omba'eapo va'e.

11 Ha'e nunga rupi pemboete e'ŷ eme. Ha'e rami 'rãgue py pemondouka porã'i ju xea katy, mba'eta irmão kuery reve roarõ 'rã rokuapy.

12 Ha'e gui irmão Apolo pe ma mbovykue rei e'ŷ ajerure pendea katy irmão kuery reve oo aguã, teĩ aŷ peve noendui ooxea. Ha'e rami avi ha'eve jave ma ou 'rã.

### *Opaa py omongetaague*

13 Peiko kuaa pota ke, peĩ atã pejeroviaa re, pendepy'a guaxu avakue rami, penembaraete tema guive.\*

14 Mba'emo pejapo va'e mborayvu rupi meme pejapo.

### *Estéfanas, Fortunato ha'e Acaico reko re ijayvua*

15 Ha'e gui aŷ irmão kuery, po rami ajerure pendevy. (Mba'eta peikuua ae ma Estéfanas ro pygua kuery jypyguia Acaia py ojeroviaague, ha'e iky'a e'ŷ va'e kuery pytyvõarã ojeko me'ëague.)

\* 15:54 Isaías 25.8   \* 15:55 Oséias 13.14   \* 16:4 Atos 11.27-30; Romanos 15.25-27; 2 Coríntios 8.1-24   \* 16:5 Atos 19.21,22   \* 16:13 Efésios 6.10-12; 1 Pedro 5.8-9

<sup>16</sup> Ha'e gui aipota peẽ voi ha'e kuery regua oipotaa rami pendekuai, ha'e hexeve omba'epo va'e ha'e javi oipotaa rami guive.

<sup>17</sup> Ha'e gui xea py Estéfanas, Fortunato ha'e Acaico ovaẽ ramo avy'a karamboae, mba'eta xevy pe ha'e kuery ojapopa peẽ ndapejapopa reguai va'ekue.

<sup>18</sup> Ha'e rami vy xembopy'a guaxu, penembopy'a guaxua rami avi. Ha'e nunga rupi pemboete ha'e kuery ramigua.

### *Oxarura ha'e ogueroayvu porãague*

<sup>19</sup> Ásia pygua igreja kuery oxarura ukapa pendevy. Senhor re ikuai va'e pendevy oxarura uka ete okuapy, Áqüila, Priscila ha'e hoo py igreja onhemboaty va'e voi.

<sup>20</sup> Irmão kuery ha'e javive oxarura uka pendevy. Pexarura joupe-upé iky'a e'ŷ va'e joayvua rami.

<sup>21</sup> Xee Paulo xepo py ae ambopara axarura avia.

<sup>22</sup> Ha'e rã Senhor oayvua rupi e'ŷ ikuai va'e ma ayvu vaipy topyta. Ore-Senhor, eju voi ke.

<sup>23</sup> Tove peẽ kuery tapendu Senhor Jesus penemboaxy.

<sup>24</sup> Cristo Jesus re vy xee roayvua toiko avi peẽ kuery ha'e javi reve.

## Mokoīguea Corinto pygua kuery pe Paulo ombopara va'ekue

### Mokoīguea Corinto pygua kuery pe Paulo ombopara va'ekue

Kova'e kuaxia ma Corinto tetā pygua kuery pe apóstolo Paulo ombopara hexe opu'ā rei va'e ikuai omombe'ua rā oendu vy. Ha'e va'e kuery ma ojeupe "Apóstolo" he'i teĩ ha'eve'ŷa rami nhombo'e, apóstolo Paulo re ijayvu rei, ha'e opa marā rei ikuai aguā rami ojapo guive. Ha'e nunga apóstolo Paulo oendu vy gueko omombe'u porāve ha'e kuery oikuaa porāmba aguā rami. "Mba'eta ore ma Nhanderuete ayvu romombe'ua rupi ndorojokorei. Ha'e rami 'rāgue py Cristo re vy Nhanderuete guigua anhetēa rupi oreayvu roikovy, Nhanderuete renonde rupi ae" (2.17). Amongue henda py Paulo ndovy'ai vy ijayvu poyi ha'e kuery pe.

Paulo gueko re ijayvu vy ima'endu'a haxy va'e oendu oikovy va'e re. "Ha'e nunga rupi mboapykue Senhor pe ajerure xegui oipe'a aguā re. Ha'e rami teĩ ha'e aipoe'i xevy: 'Xee romboaxyha'eve ma ndevy, mba'eta ikangy va'e re xepo'akaa ojekuaa porāve 'rā', he'i va'ekue. Ha'e nunga rupi avy'a reve 'rā xeayvu xekangya re, xere Cristo po'akaa oĩ aguā", he'i (12.8-9). Ha'e nunga ma ha'eve nhande kuery pavē pe.

Opaa py Paulo ijayvu ha'e kuery mba'emo ome'ẽ aguā Jerusalém tetā py Jesus remimbo'e kuery ikuai va'e pe, karuai oiko va'e gui ojexavai okuapy rā.

#### *Oxarura reve ijayvu vy omboypyague*

<sup>1</sup> Xee Paulo ma Cristo Jesus pegua apóstolo-rā Nhanderuete oipotaa rami xemoĩ va'ekue. Irmão Timóteo reve roxarura Nhanderuete pegua igreja kuery Corinto py pendekuai va'e pe, ha'e iky'a e'ŷ va'e kuery Acaia yvy re pendekuai va'e ha'e javi pe guive.

<sup>2</sup> Tove peẽ kuery tapendu penemboaxyha'e mby'a porā Nhanderuete ha'e Senhor Jesus Cristo guigua.

#### *Nhanderuete ombopy'a guaxua re Paulo oguerovy'aague*

<sup>3</sup> Ta'ima'endu'a porāa Nhanderuete nhande-Senhor Jesus Cristo Ru va'e re. Mba'eta Nhanderu ma nhanemboaxyha'e opa mba'e py nhanembopy'a guaxu va'e.

<sup>4</sup> Ha'e rami vy ore voi opa mba'e py rojexavai rā orembopy'a guaxu 'rā, ore ju rombopy'a guaxu aguā opa mba'e gui ojexavai va'e, Nhanderuete orembopy'a guaxua py ae.

<sup>5</sup> Mba'eta Cristo káuxa opa mba'e py rojexavaia rami avi Cristo orembopy'a guaxua voi roendu avi opa mba'e py.

<sup>6</sup> Ha'e nunga rupi rojexavaia oiko va'e ma peẽ kuery pendepy'a guaxu ha'e peo jepe aguā oiko. Orembopy'a guaxua voi pendepy'a guaxu aguā oĩ, mba'eta peẽ voi pendekuerai e'ŷ re peropo'aka pekuapy ore roiko axya ramigua.

<sup>7</sup> Peẽ kuery re rojerovia, mba'eta roikuaa ore rami pendekuai axya rami orereve avi 'rā penembopy'a guaxua.

<sup>8</sup> Mba'eta irmão kuery, aipota peikuaa Ásia yvy re roiko jave rojexavaiague. Mba'eta ha'e nunga ndorogueropo'aka kuaavei peve ipoyi ramo noroexa'avei ma va'ekue roikove aguā re.\*

<sup>9</sup> Ha'e rami vy orepy'a re romano taa roendu karamboae orejee ae rojerovia e'ŷ aguā, ha'e rā Nhanderuete omano va'ekue omboete jevy va'e re anho.

---

\* **1:8** Atos 19.23-40

<sup>10</sup> Mba'eta ha'e ae orereraa jepe karamboae ha'e rami ete romano aguā va'ekue gui. Hexe vy roarō orereraa jepe riaeve aguā,

<sup>11</sup> peē kuery voi oreptyvō ramo pejerurea py. Ha'e rami rā heta 'rā Nhanderuete oguerovy'a orere, heta ojerurea rupi orereraa jepe rire.

*Paulo anhetēa rupi oikoa re ijayvuague*

<sup>12</sup> Mba'eta pova'e nunga re ae roguerovy'a: Peteīve henda py orepy'a ky'aa noroendui, mba'eta Nhanderuete guigua iky'a e'ŷa ha'e anhetēa rupi orekuai kova'e yvy re, peē kuerya py guive. Avakue 'arandua rupi e'ŷ roiko, ha'e rā Nhanderuete oremboaxya rupi.

<sup>13</sup> Mba'eta pendevy romboparaague re ma peroayvu vy pendu kuaa va'erā anho oī. Ha'e ajerovia pendu kuaa porāmba aguā,

<sup>14</sup> amongue henda py orepy'a re oī va'e peikuua maa rami, nhande-Senhor Jesus oua ára py peē kuery orererovy'a aguā, ore roguerovy'aa rami avi.

*Paulo mba'e re pa Corinto py ndooi teria omombe'u porāveague*

<sup>15</sup> Ha'e rami peē kuery orekuua aguā re ajerovia vy anhembopy'a teī peē kuerya py ranhe avaē vy jajoexa aguā, peteīgue ju pejopy aguā penemoingo porāarā,

<sup>16</sup> ha'e gui peē kuery xepytyvō ramo aave aguā Macedônia yvy katy, ha'e Macedônia gui ajevy vy peē kuerya py ju avaē aguā, Judéia yvy katy ju aa rā xepytyvō aguā.

<sup>17</sup> Ha'e rami aguā re xeayvu vy nda'u rombotavypa reia rupi ri aiko raka'e? To'o revegua rami ri ty'y xeayvu? Xee teve "Ha'eve" ha'e vyve "Nda'evei" ha'e avi va'e?

<sup>18</sup> Ha'e rami 'rāgue py Nhanderuete ojeroviapy oikoa rami avi ore voi peē kuery pe "Ha'eve" ha'e "Nda'evei" ndoro'eit va'e,

<sup>19</sup> Nhanderuete Ra'y Cristo Jesus peē kuery mbyte rupi ore kuery – xee, Silvano ha'e Timóteo – romombe'u va'ekue rami avi, mba'eta Jesus ma "Ha'eve" ha'e "Nda'evei" he'i avi va'e'ŷ. Hexe ma ha'eve va'e anho oī.

<sup>20</sup> Mba'eta Cristo re vy Nhanderuete ijayvuague ojeupity aguā ha'eve va'e meme. Ha'e rami ae hexe vy Nhanderuete nhamboete vy "Amém" ja'e avi 'rā.

<sup>21</sup> Mba'eta Nhanderuete ae peē kuery reve nhanemoi atā Cristo re, ha'e ojeupe guarā nhanemoi.

<sup>22</sup> Nhandere ha'e nunga kuaa ukaarā omoi vy Onhe'ẽ ae omoi nhanekuraxõ re.

<sup>23</sup> Ha'e gui xerekove rupi ae aipoa'e, Nhanderuete voi oikuua xeayvu anhetēa: Peē kuery romomboriau e'ŷ aguā rima ndajuvei teri apy Corinto py.

<sup>24</sup> "Pejeroviaaa re orepo'aka va'e" nda'eit. Ha'e rami avi peē kuery pevy'ave aguā re ronhea'ã. Mba'eta pejeroviaaa rupi ae 'rā penembaraeteve.

## 2

<sup>1</sup> Ha'e rami vy xejeupe ae xeayvu karamboae peē kuery romomboriaua rupi aju ve'ŷ aguā re.

<sup>2</sup> Mba'eta xee romomboriau va'e rire mava'e 'rāgue tu oiko xembovy'a ju aguā, peē romomboriau va'ekue e'ŷ vy?

<sup>3</sup> Ha'e nunga rupi ae ambopara va'ekue, peē kuerya py avaē vy peē xembovy'aarā pendekuai va'e re xeporiau e'ŷ aguā. Mba'eta peē kuery ha'e javi re ajerovia mba'emo xembovy'a va'e peē voi penembovy'a avi aguā.

<sup>4</sup> Mba'eta xepy'a py aiko axya ha'e ajexavaia aendu reve ae ambopara va'ekue pēvy, xerexay ete reve guive. Pendeporiau rei aguā e'ŷ guive ambopara, ha'e rā roayvu etea peikuua aguā.

*Ojejavy va'ekue ojeko rerova rā igreja kuery omovaẽ ju aguā re ijayvua*

<sup>5</sup> Ha'e gui penembyte py nhomomboriaua oiko va'ekue ma xee anho e'ŷ xemomboriau, peẽ kuery ha'e javi penemomboriau amongue henda py. Ha'e rami xeayvu ajou vai etea rupi e'ŷ.\*

<sup>6</sup> Ha'eve ma aŷ peẽ kuery regua hetave va'e pembopagaague.

<sup>7</sup> Ha'e gui aŷ ma ha'eve peperdoa ha'e pembopy'a guaxu ju aguã, mboriau gui okanhy ete e'ŷ aguã.

<sup>8</sup> Ha'e rami vy pêvy ajerure ixupe pexa uka ju aguã peayvua.

<sup>9</sup> Ha'e nunga rupi ae ambopara va'ekue pêvy, peẽ kuery anhetê opa mba'e py pa xenhe'ẽ rendu va'ea aexaxe vy.

<sup>10</sup> Mba'eta mba'emokue re pejoperdoa ri ramo xee voi aperdoa. Anhetê peẽ kuery re ama'ẽ vy aperdoa ae ma Cristo renonde,

<sup>11</sup> nhandere Satanás ipo'aka e'ŷ aguã, mba'eta jaikuaa porã ae nhanembotavyxea.

### *Tito ndojoui vy Paulo ndovy'aia re ijayvuague*

<sup>12</sup> Ha'e gui Trôade tetã py Cristo regua ayvu porã amombe'u aguã avaẽ jave py peteĩ okẽ ojepe'a xevy Senhor pe amba'eapo aguã.

<sup>13</sup> Ha'e rami teĩ xe-irmão Tito ndajoui vy xepy'a py ma avy'aa naendui. Ha'e nunga rupi ha'e kuerya gui ajepe'a vy Macedônia katy ju aa.

### *Apóstolo kuery ombo'eapoa rupi Cristo po'akaa ojekuaa 'rãa re ijayvua*

<sup>14</sup> Ha'e rami avi arov'y'a Nhanderuete, mba'eta Cristo re vy opo'akaa rupi riae orereraa, ha'e ore kuery orekuia re opa rupi oikuaa uka Cristo regua heakuã porã va'e ramigua.

<sup>15</sup> Mba'eta ore kuery ma Cristo guigua heakuã va'e rami orekuai Nhanderuete pegua, oo jepe va'e ha'e okanhy va'e kuerya rupi.

<sup>16</sup> Okanhy oje'oivy va'e pe ma manoa reakuã rami orekuai, mba'eta ha'e kuery oikuaa omano aguã regua romombe'ua. Ha'e rã oo jepe va'e kuery pe ma tekove reakuã rami orekuai, mba'eta oikuaa tekove regua romombe'ua. Ha'e ramo mava'e tu ha'eve 'rã ha'e rami aguã?

<sup>17</sup> Mba'eta ore ma Nhanderuete ayvu romombe'ua rupi ndorojokorei, amboae kuery rami e'ŷ. Ha'e rami 'rãgue py Cristo re vy Nhanderuete guigua anhetêa rupi oreayvu roikovy, Nhanderuete renonde rupi ae.

## 3

### *Guexeve guarã ojapo pyau pyre inhymague gui iporãvea re ijayvua*

<sup>1</sup> Po rami vy ri nda'u oreayvu rojejou porã uka reivea rupi? Amboae kuery rami avi ore voi ri ty'y roipota kuaxia oremombe'uarã pendevy pe rogueraa aguã, ha'e'ŷ vy pende guigua kuaxia romba'eapoa kuaa ukaarã amboae rupi rogueraa aguã?

<sup>2</sup> Any, mba'eta kuaxia para rami oremombe'uarã ma peẽ kuery ae pendekuai. Ha'e nunga ma orepy'a re ipara oiny ramo ogueroayvu pavẽ, oikuaapa 'rã.

<sup>3</sup> Mba'eta peẽ ae pexa uka Cristo guigua kuaxia para pendekuaia, ore kuery romba'eapoa kuaa ukaarã. Ha'e rami avi tinta py e'ŷ ipara, ha'e rã Nhanderuete oikove va'e Nhe'ẽ py. Itape re'ŷ guive ipara, avakue ro'o re, orekuraxõ re ae.\*

<sup>4</sup> Cristo re vy ha'e rami ae rojerovia Nhanderuete re.

<sup>5</sup> Orejegui ae e'ŷ guive mba'emo rojapo kuaa, oregui e'ŷ mba'emo oiko. Mba'eta rojapo kuaa aguã ma Nhanderuete gui ae ou.

\* <sup>2:5</sup> Ha'e kuery va'e regua otekoavy va'ekue re ijayvu, xapy'a rei itavy rei va'e 1 Coríntios 5 py omombe'u va'ekue re.

Apy ma Paulo ijayvu operdoa ju aguã re (Lucas 17.3,4; Gálatas 6.1,2). \* <sup>3:3</sup> "Itape re ipara va'e" he'ia ma lei Moisés ombopara va'ekue re ijayvu vy, teko yma guare kuaa ukaarã.

**6** Ha'e ae oremo'arandu guexeve guarã ipyau va'e ojapo va'ekue roikuua uka aguã. Ha'e va'e ma ipara regua e'ŷ, ha'e rã Nhe'ẽ guigua. Mba'eta ipara regua nhandejuka 'rã. Ha'e rã Nhe'ẽ ma nhanemoingove 'rã.

**7** Ipara nhandejukaarã ma itape re omboparaa vy omoexakã reve oeja raka'e. Ha'e nunga gui Moisés rova hexakã raxy ramo hova katy Israel kuery nomã'ẽ kuaai raka'e, ogue ovy teĩ.

**8** Ha'e va'ekue gui nda'u Nhe'ẽ guigua naexakã ratãive 'rã?

**9** Mba'eta nhanembopagaarã omoexakã reve oeja rire tekó porã me'ẽa katuve ma hexakã ratãve 'rã.

**10** Ha'e nunga rupi aŷ hexakã ratãve va'e ou ma rire ymagua omoexakã mbyre rexakãa ndojekuaavei ma.

**11** Mba'eta ogue ovy va'e omoexakã reve oeja pyre gui ogue va'erã e'ŷ katuve ma hexakã ratãve.

### *“Senhor Nhe'ẽ oĩa py jaiko porã 'rã”, he'ia*

**12** Ha'e nunga roarõ roikovy vy orepy'a guaxua rupi ete oreayvu.

**13** Ore ma Moisés ngova omo'ãague rami e'ŷ orekuai. Mba'eta ha'e va'e ma ngova omo'ã raka'e Israel kuery oexa e'ŷ aguã ogue ovy va'e opa rã.\*

**14** Ha'e rami teĩ ha'e kuery 'arandua omopytãmbaa. Mba'eta aŷ peve yma guare guexeve guarã ojapo pyre ogueroayvu rã hova mo'ãa oime teri. Imo'ãa ma ndoipe'aai teri, mba'eta Cristo re vy mae ma oipe'aa 'rã.

**15** Aŷ peve Moisés ombopara va'ekue ogueroayvu rã imo'ãa oime teri ha'e kuery py'a re.\*

**16** Ha'e rã amongue Senhor pe ojeko me'ẽ ramo oipe'aa 'rã imo'ãa.

**17** Ha'e gui “Senhor” he'ia ma Nhe'ẽ, ha'e mamo rã Senhor Nhe'ẽ oĩa py jaiko porã 'rã opa mba'e gui.

**18** Mba'eta nhande kuery ha'e javive nhanderova mo'ãa oipe'aa rire Senhor rexakã re nhama'ẽ porã jaikovy epéko re rami. Ha'e ramo nhanembopyau 'rã nhanerexakãve javy aguã rami, Senhor rami ete nhandekuai aguã. Ha'e rami aguã ma Senhor, Nhe'ẽ gui ae ou.

## 4

### *Paulo ojapo 'rã va'ekue ojapo porãa re ijayvuague*

**1** Ha'e nunga rupi Nhanderuete oremboaxy vy ha'e ramigua orerembiaporã ome'ẽ rire norekangyi,

**2** neĩ nhemi rupi ndorekuai mba'emo nharoxi va'erãa rupi. Ronhombotavya rupi e'ŷ orekuai, neĩ Nhanderuete ayvu ramigua rive noromombe'ui. Ha'e rami 'rãgue py Nhanderuete renonde orekuai anhetẽ va'e roikuua ukaa rupi, ha'evea rami orekuuaia oikuua pavẽ aguã.

**3** Ha'e gui xapy'a rei ayvu porã romombe'u va'e ndojekuaai teri vy ma okanhy aguã rami ikuai va'e pe anho ndoikuua ukaai.

**4** Mba'eta ha'e kuery ndoyeroviai ramo kova'e yvy regua ruete omopytãmba hi'arandua, ha'e kuery pe Cristo rexakãa regua ayvu porã ojekuaa e'ŷ aguã. Ha'e va'e ma Nhanderuete rami ete heko va'e.

**5** Mba'eta ore ma ore ae e'ŷ rojekuaa uka, ha'e rã Cristo Jesus Senhor oikoa. Ha'e rã ore ma Jesus re vy peẽ kuery rembiguai rami roiko.

**6** Mba'eta Nhanderuete “Pytãua gui taexakã hendy va'e”, he'i va'ekue ae oremoexakã avi orepy'a rupi, Cristo rova re hexakã ojekuaa va'e roexa uka aguã.\*

### *Nhanderuete gui imbaraetea re Paulo ijayvuague*

\* **3:13** Êxodo 34.33,35 \* **3:15** Romanos 11.7-10 \* **4:6** Gênesis 1.3

<sup>7</sup> Ha'e nunga ma iporã ete va'eri hyru yapo gui ojapo pyre ramigua py rive roguereko, pavẽ oikuaa aguã ipo'aka etea Nhanderuete gui ae oua, oregui e'ŷ.\*

<sup>8</sup> Mba'eta ore ma opa mba'e py oremoingo axya teĩ ndorejokoa etei. Ndoroikuaai rei teĩ ndorekueraai.

<sup>9</sup> Orere opu'aa rei teĩ oeja pyre'ŷ orekuai. Orenupãa teĩ noremombai.

<sup>10</sup> Orerete re Cristo ojukaa ague ramigua roendu riae, orerete re hekove voi ojekuaa avi aguã.

<sup>11</sup> Mba'eta Jesus káuxa nhande jaikove va'e jajejuka uka riae, Jesus rekove ojekuaa avi aguã nhanderete imarã va'e re.

<sup>12</sup> Ha'e rami vy orere oĩ orejukaa aguã, peẽ kuery re ma tekove oĩ aguã.

<sup>13</sup> Ha'e rami teĩ rojeroviaa oĩ avi, ipara oĩ rami: "Xee arovia, ha'e rami vy xeayvu."\* Ore voi roguerovia vy oreayvu,

<sup>14</sup> mba'eta roikuaa Senhor Jesus mboete jevyare ma Jesus re vy ore voi oremboete ju avi 'rã, ha'e peẽ kuery reve nhandererupa 'rã guive.

<sup>15</sup> Mba'eta orere oiko va'e ha'e javi ma peẽ kuery penemoingo porãarã oiko. Ha'e rami vy Nhanderuete penemboaxya heta-etave oikuaa vy oguerovy'a ha'e omboete 'rã okuapy.

### *Mba'erã pa jaiko axya re ijayvua*

<sup>16</sup> Ha'e nunga rupi nanhandekuerai 'rã. Ha'e rami 'rãgue py nhanderete ivaipave ovy teĩ nhandepy'a rupi nhanembopyaua 'rã ko'ẽ nhavõ.

<sup>17</sup> Mba'eta xapy'a'i jajexavaia ipoyi e'ŷ va'e ojapo 'rã mba'emo porã opa e'ŷ va'e, opa mba'e gui ovareve va'e jajopy aguã rami.\*

<sup>18</sup> Ha'e nunga rupi mba'emo jaexa va'e re'ŷ jaikuua pota, ha'e rã mba'emo jaexa e'ŷ va'e re. Mba'eta jaexa va'e ma opa 'rã, ha'e rã jaexa e'ŷ va'e ma opa va'erã e'ŷ.

## 5

### *Nhanderete jaeja vy Senhor oĩa py jaiko 'rãa re ijayvua*

<sup>1</sup> Mba'eta jaikuua nhandro yvy regua ivaipa ramo yva re jajopy 'rã nhanderorã Nhanderuete guigua, avakue opo py ojapo va'ekue e'ŷ, opa va'erã e'ŷ.\*

<sup>2</sup> Ha'e gui kova'e oo py nhaĩ teria ja nhanepoaã jaikovy, nhanderorã yva regua nharõ vy ha'e va'e py ju nhaĩ aguã.

<sup>3</sup> Mba'eta ha'e va'e py ma nhaĩ vy hete e'ŷ va'e rami ve'ŷ 'rã jaiko.

<sup>4</sup> Mba'eta anhetẽ kova'e oo py nhaĩ teri vy nhanepoaã jaikovy jajexavai vy. Ha'e rami avi hete e'ŷ va'e ndajaikoxei guive, ha'e rã hete pyau va'e, imarã va'e 'rãgue py tekove jareko vy.

<sup>5</sup> Ha'e rami aguã rami Nhanderuete ae nhanemoingo, ha'e nhandevy Onhe'ẽ guive ome'ẽ ikuaa ukaarã.

<sup>6</sup> Ha'e nunga rupi nhandepy'a guaxu riae. Nhanderete re jaikoa ja jaikuua Senhor oĩa py ndajaikoi teria,

<sup>7</sup> mba'eta jajeroviaa re jaiko, mba'emo jaexa va'e re'ŷ.

<sup>8</sup> Ha'e gui nhandepy'a guaxu vy nhanderete jaejaxe, Senhor oĩa py ju jaiko aguã.

<sup>9</sup> Ha'e nunga rupi Senhor oĩa py, e'ŷ vy apy jaiko teĩ nhanhea'ã jaikovy nhambovy'a aguã.

<sup>10</sup> Mba'eta Cristo oikuaa potaaty renonde jajexa uka pavẽ 'rã, peteĩ-teĩ jajopy aguã nhanderete re teri jaikoa ja ha'eve rami, e'ŷ vy ha'eve'ŷa rami jaikoague rekovia.

### *Gueko re apóstolo Paulo ijayvuague*

<sup>11</sup> Senhor renonde rojererokyjea ore roendu vy amboae kuery pe voi oreayvu ojeko rerova aguã. Nhanderuete orekuua porã, ha'e ajerovia peẽ voi pene'arandua py orekuua porã avi aguã.

\* **4:7** 1 Coríntios 2.4,5; 2 Coríntios 12.9    \* **4:13** Salmo 116.10    \* **4:17** Romanos 8.18-25; 1 Pedro 1.3-5    \* **5:1**

"Nhandro yvy regua" he'ia ma nhanderete re ijayvu vy (4.16; 2 Pedro 1.13,14).

<sup>12</sup> Ha'e rami peteīgue ju oreayvua rojejou porā ucaa rupi e'ŷ. Ha'e rami 'rāgue py pendevy roikuua uka orekuaia, amongue orere ijayvu rā peē kuery orejou porāa rupi pembovai aguā. Ha'e kuery ma oexa va'e rive oguerovy'ave, opy'a re oī va'e'ŷ.

<sup>13</sup> Ha'e rami na'inhabā porāvei va'e rami oreayvua ma Nhanderuete peguarā anho. Ha'e rā 'arandua rupi oreayvua ma pendevy guarā.

<sup>14</sup> Mba'eta Cristo orerayvu rire ixupe anho roiko. Mba'eta pavē re peteī omano rire jaikuua ha'e javive omanoague.

<sup>15</sup> Anhetē ete Cristo omano raka'e pavē re, jaikove va'e nhandejeupe ae jaiko ve'ŷ aguā, ha'e rā nhandere omano ha'e onhemboete ju va'ekue pe anho.

<sup>16</sup> Ha'e ramo aŷ gui ma ndajaikuua potavei avave rei ngo'o re oikoa re. Yma rupi Cristo ngo'o re oikoa re jaikuua pota va'ekue ri aŷ ma ha'ekue rami ve'ŷ ma jaikuua.

<sup>17</sup> Mba'eta Cristo re ikuai va'e ma hemimoingo pyau ma. Heko ymague oaxapa ma, ipyau va'e ju oī.\*

### *Nhanderuete reve peteī rami ju nhandekuai aguā re ijayvua*

<sup>18</sup> Ma'ē, ha'e nunga ha'e javi Nhanderuete guigua meme. Mba'eta Cristo re vy ngupive nhanemoingo peteī rami, ha'e nhanemoī guive hexeve peteī rami ju nhandekuai aguā regua mombe'uarā,

<sup>19</sup> po rami: Cristo re vy Nhanderuete ma ko yvy regua kuery reko vaiague re oikuua pota 'rāgue py ojapo raka'e hexeve peteī rami ikuai aguā. Ha'e nhandevy omombe'u uka guive hexeve peteī rami nhandekuai aguā regua ayvu.

<sup>20</sup> Ha'e rā ore kuery ma Cristo rery rupi oreayvu va'e, ore oreayvua rupi Nhanderuete voi ijayvu avi. Ha'e rami vy Cristo rery rupi rojerure: Nhanderuete reve peteī rami penhemoingo uka.\*

<sup>21</sup> Mba'eta Cristo ojejavy e'ŷ va'eri nhandere vy hexe omoña raka'e jajejavya, hexe vy nhandere Nhanderuete omoī aguā ojeguigua teko porā.

## 6

<sup>1</sup> Ha'e rami rire ore hexeve romba'eapo va'e ma peē kuery pe oreayvu avi Nhanderuete penemboaxyo pejopy rive'ŷ aguā re.

<sup>2</sup> (Mba'eta aipoe'i: "Ha'evea ára aendu pendeayvua, ha'e rami vy rogueraa jepe aguā ára roepy", he'i va'ekue.\* Ma'ē, aŷ ma ha'evea ára, aŷ ae peo jepe aguā ára.)

<sup>3</sup> Ore ma mba'eve py rojotya rupi e'ŷ orekuai, romba'eapoa ndojou vaiai aguā.

### *Paulo onhemoingo axy ucaa re ijayvuaque*

<sup>4</sup> Ha'e rami 'rāgue py opa mba'e py roexa uka Nhanderuete rembiguai roikoa: orekuerau e'ŷa py, orekuai axya py, rojexavaia py, rojererekao axy ucaa py,

<sup>5</sup> ronhenupā ucaa py, nhuā py roĩa py, orere opu'āmbaa reia py, romba'eapoa py, roke e'ŷa py, rokaru e'ŷ re roikoa py,

<sup>6</sup> orerekao ky'a e'ŷa py, mba'emo roikuua-a py, orevai rive-rive'ŷa py, ha'eve vai'i orekuua py, Nhe'ē Ky'a E'ŷ po'akaa py, oreporayvu merami rive e'ŷa py,

<sup>7</sup> anhetē ete rupi oreayvua py, Nhanderuete po'akaa rupi orekuua py, orepo jovalive py heko porā va'e rembiporu roiporua py;

<sup>8</sup> oremboetea rupi, ha'e oremboete e'ŷa rupi orererekao rā; orere ijayvu rei, ha'e ijayvua porā rā; mba'eta nhombotavypa va'e rami orererekao, anhetē va'e roiko tei;

<sup>9</sup> oexapy e'ŷ rami orererekao, oexa riaepy roiko tei; omano ta va'e rami orekuua tei oikove va'e roiko; ombopagapy rami orererekao tei ndorejukaai;

<sup>10</sup> orepy'a vai va'eri rovy'a riae; oreporiaukue'i va'eri heta rojapo iporiau e'ŷ aguā rami; mba'eve ndoroguerekoi merami tei opa mba'e roguerekoo.

---

\* **5:17** Romanos 6.4-6; Efésios 4.22-24; Colossenses 3.9,10    \* **5:20** Romanos 5.1,10; Colossenses 1.19,20    \* **6:2**  
Isaías 49.8

*Paulo oayvua rami ha'e kuery voi oayvu aguã re ijayvuague*

- <sup>11</sup> Peẽ Corinto pygua kuery pe ronhemombe'u porã, noronhomni orepy'a re oĩ va'e.  
<sup>12</sup> Peẽ kuery pe ore noronhemoakâte'ŷi, peẽ kuery ae rima penhemoakâte'ŷ orevy.  
<sup>13</sup> Ore rami avi ke pendekuai. (Xera'y kuery pe rami xeayvu pendevy.) Peẽ voi ke pendepy'a peipe'a avi orevy.

*Ojerovia e'ŷ va'e kuery ikuiaia rami nhandekuai e'ŷ aguã re ijayvua*

- <sup>14</sup> Canga py peĩ eme amboae kuery ojerovia e'ŷ va'e reve. Mba'eta mba'exa tu heko porã va'e nhomoirũ ta heko vai va'e reve? Mba'exa tu hendy va'e nhomoirũ ta pytû reve?  
<sup>15</sup> Mba'exa tu Cristo oguereko ta Poromboeko vaia reve? Mba'e tu ojerovia va'e oguereko ta ojerovia e'ŷ va'e reve?\*
- <sup>16</sup> Mba'e 'rã tu Nhanderuete pegua templo oguereko mba'emo ra'angaa reve? Mba'eta nhande ae Nhanderuete oikove va'e pegua templo jaiko, aipoe'ague rami: "Aĩ 'rã, aiko 'rã ha'e kuery mbyte. Aiko 'rã ha'e kuery Ruete, ha'e rã ha'e kuery ma xevygua 'rã ikuai."\*
- <sup>17</sup> "Ha'e nunga rupi pejepa ha'e kuery mbyte gui, penhemoirûve eme", he'i Senhor. "Pepokove eme iky'a va'e re. Ha'e ramo xee romovaẽ 'rã,  
<sup>18</sup> aiko 'rã Penderu, ha'e rã peẽ ma xera'y ha'e xerajy kuery 'rã pendekuai", he'i Senhor Ipo'akapa va'e.\*

**7**

- <sup>1</sup> Ha'e nunga rupi xerembiayvu kuery, ha'e rami nhandereroayvu porã rire jajeky'a'o ukapa 'rã nhanemboeko ky'aarã, nhandro'o ha'e nhanenhe'ẽ mongy'aarã va'ekue ha'e javi gui. Iky'a e'ŷ ete va'e nhandekuai, Nhanderuete renonde jajererokyjea rupi.

*Corinto pygua kuery oayvua rupi Paulo ijayvuague*

- <sup>2</sup> Oremovaẽ ke penekuraxõ py. Avave rei ndoroguerekoi ha'eve e'ŷa rami, noronhomboeko vai ha'e ndorojokorei guive.  
<sup>3</sup> Ha'e rami avi rojou vaia rupi e'ŷ xeayvu, mba'eta aipoa'e ae ma peẽ kuery orekuraxõ re roguerekoa, joupive nhamano e'ŷ vy jaikove aguã.  
<sup>4</sup> Opa mba'e py anhemombe'u porã pêvy, opa mba'e py roguerovy'a guive. Ha'e nunga rupi aendu xepy'a guaxuvea ha'e avy'a etea, opa mba'e py rojexavai tei.

*Tito ovaäge re ijayvuague*

- <sup>5</sup> Mba'eta Macedônia yvy re rovaẽ vy peteïve henda py noroendui karamboae mby'a porã. Ha'e rami 'rãgue py opa mba'e py rojexavai. Amboae kuery opu'ã okuapy orere, ha'e orepy'a py roendu rokyjea.  
<sup>6</sup> Ha'e rami tei Tito ovaẽ ramo Nhanderuete ikuerai va'e mbopy'a guaxua va'e vy orembopy'a guaxu ju.  
<sup>7</sup> Ha'e va'e ovaẽ ramo anho e'ŷ, peẽ kuery pembopy'a guaxuague omombe'u rã roendu vy voi orepy'a guaxu. Mba'eta orevy pe omombe'u peẽ kuery xerexaxe, penhemboaxya ha'e xenhe'ẽ rendu pekuapya. Ha'e rami vy xembovy'ave.  
<sup>8</sup> Mba'eta peẽ kuery pe kuaxia ambopara va'ekue pexa vy pendeporiau rei tei xee ma nda'evei nho ndaikoi, ymave nda'evei nho aiko va'ekue tei (mba'eta aikuua ha'e va'e kuaxia para xapy'a'i penemomboriaua).  
<sup>9</sup> Ha'e gui aŷ ma avy'a ju, pendeporiaupa reiague re rive'ŷ, ha'e rã pejeko rerova aguã rami pendeporiauage re, mba'eta Nhanderuete gui ae pendu pendeporiaua, ha'e rã oregui ma peteïve henda py pendeporiau e'ŷ aguã.  
<sup>10</sup> Mba'eta Nhanderuete gui ma nhandeporiau vy jajeko rerova 'rã jaa jepe aguã. Ha'e rami aguã gui ju avave rei ndojeko rerovavei 'rã. Ha'e rã yvy guigua mboriau reia ma nhamano aguã rami 'rã ojapo.

\* **6:15** 1 Coríntios 10.20-22; 15.33; Tiago 4.4,5

\* **6:16** Levítico 26.11-12, Ezequiel 37.27, Jeremias 32.38

\* **6:18**

Ezequiel 20.41, Isaías 52.11, 2 Samuel 7.14

<sup>11</sup> Mba'eta Nhanderuete guigua mboriau ma opa mba'e py penemoingo porã: penhemboeko porã uka, teko vai pejou vai ete, pejererokyje, xerexaxe ete ju, xenhe'ẽ rendu, ha'e penhombopagaxe guive. Opa mba'e py pexa uka pejejavya rupi ve'ŷ pendekuaia ha'e nungakue py.

<sup>12</sup> Ha'e nunga rupi pêvy ambopara va'ekue teĩ otekoavy va'ekue re vy e'ŷ ambopara, neĩ omomboriau va'ekue re vy e'ŷ guive, ha'e rã Nhanderuete renonde peẽ kuery pexa uka ju aguã orenhe'ẽ rendua.

<sup>13</sup> Ha'e nunga rupi ae roendu ju karamboae orepy'a guaxua. Ha'e orepy'a guaxua gui rovy'ave ete, mba'eta roendu avi Tito pembopy'a porã ramo ov'y'aa.

<sup>14</sup> Mba'eta ixupe xeayvu va'ekue peẽ kuery roguerovy'aa rami, ha'e gui nda'evei nho ndaikoi. Mba'eta opa mba'e py pendereve oreayvua anhetẽ memea rami avi Tito oendua py roguerovy'aague voi anhetẽ ojeupitypa.

<sup>15</sup> Tito voi penderayvua oenduve mba'eta penhe'ẽ renduague ha'e javi re ima'endu'a vy, ha'e gui pejeayvu ha'e peryryipa reve pemovaẽague re guive.

<sup>16</sup> Xee avy'a mba'eta opa mba'e py peẽ kuery re ajeroviaa ojeupitypa.

## 8

*Judéia py iporiaukue'i ikuai va'e pe Macedônia py igreja ikuai va'e peráta ome'ẽague re ijayvuague*

<sup>1</sup> Ha'e rami avi irmão kuery, peẽ kuery pe romombe'u va'ekue Macedônia yvy re igreja kuery ikuai va'e Nhanderuete omboaxy vy marã rami pa omoingoague,

<sup>2</sup> mba'eta ha'e kuery ma opa marã omoingo axya teĩ oexa uka tema ov'y'a etea, mba'eta iporiaupa va'eri heta ojou irmão kuery pe ome'ẽ va'erã.\*

<sup>3</sup> Mba'eta xee aipoa'e: Ha'e kuery oexa uka mba'emo oguerekva'ekue áryve ome'ẽxeia.

<sup>4</sup> Ha'e rami vy orevy pe ju ojerure jepi iky'a e'ŷ va'e kuery oipytyvõ aguã re, amboae kuery rami avi.

<sup>5</sup> Ha'e gui ore roexa'ãague rami anho e'ŷ ikuai, mba'eta Senhor pe ranhe ojeko me'ẽ okuapy, ha'e rire Nhanderuete oipotaa rami orevy pe ju ikuai.

<sup>6</sup> Ha'e nunga rupi ae Tito pe rojerure penepytyvõ aguã peráta peme'ẽ 'rã va'ekue pemono'õmba aguã, ha'e rami aguã omboypy rire.

<sup>7</sup> Ha'e nunga rupi pejapopa ke, opa mba'e py pendekuai porã etea pexa ukaa rami avi: pejeroviaa py, ayvu py, mba'emo peikuaa-a py, opa mba'e py penekyre'ŷa py, ha'e roayvua py guive.

<sup>8</sup> Pêvy ajapo uka nhea'ãa rupi e'ŷ guive xeayvu. Ha'e rami avi amboae kuery nhopytyvõxeia pêvy amombe'u vy aexaxe anhetẽ pa peẽ kuery voi pendoporayvua.

<sup>9</sup> Mba'eta peikuaa ma Senhor Jesus Cristo nhanemboaxy, mba'eta iporiau e'ŷ va'eri penderayvu vy iporiau va'e ojeapo raka'e, iporiau va'e oiko ramo peẽ kuery iporiau e'ŷ va'e peiko aguã.

<sup>10</sup> Amombe'u porãve ta aikuua va'e: Peẽ kuery ma ma'etŷa oaxa va'e py peẽ ranhe pemboypy va'ekue mba'emo pemono'õ aguã, mba'eta peẽ ranhe pendepy'a re ha'e rami aguã pemoi va'ekue. Ha'e rami vy po rami 'rã ha'eve:

<sup>11</sup> Aŷ pejapopa ke pemboypy va'ekue. Peme'ẽxeia peikuaa ukaague rami pemono'õmba ke peme'ẽ va'erã, pejoua'i rami.

<sup>12</sup> Mba'eta nhame'ẽxeia oĩ ramo jajoua rami nhame'ẽ rã ojou porã pavẽ 'rã, ruxã'i anho jajou vy nanhame'ẽive teĩ.

<sup>13</sup> Mba'eta "Amboae kuery nome'ẽive, ha'e rã peẽ peme'ẽve aguã" nda'eit. Ha'e rami 'rãgue py aipota joo rami meme perekoi mba'emo.

\* <sup>8:2</sup> Atos 11.27-30; Romanos 15.25-27; 1 Coríntios 16.1-4

<sup>14</sup> Ha'e rami vy perekopa va'e gui pemboja'o ramo ha'e kuery pe ndoatavei 'rā, araka'eve rā ha'e kuery ju oguerekopa va'e gui omboja'o rā pendevy pe ju ndoatavei aguā. Ha'e rami vy joo rami meme 'rā perekoko,

<sup>15</sup> ipara oĩa rami: "Omono'õ reta va'ekue pe naembyrei. Ha'e rā mbovy'i omono'õ va'ekue pe ma ndoatai."\*

### *Tito peojapo uka pyau jevyague re ijayvua*

<sup>16</sup> Ha'e gui arov'y'a Nhanderuete mba'eta Tito py'a re omoĩ xee rami penepytyvõxeia.

<sup>17</sup> Ha'e ramo ojapyxaka karamboae rojerurea re. Ha'e rami vy ikyre'ŷve ete vy ha'e ae penepytyvõxeia rupi oguata peẽ kuerya katy.

<sup>18</sup> Hupive romondouka avi irmão mboae. Ha'e va'e ma ayvu porã omombe'ua rupi oiko va'e, opa rupi igreja kuery oikuaa.

<sup>19</sup> Ha'e rami anho e'ŷ, igreja kuery oiporavo va'ekue oreirũrā, peráta mono'õa rupi orepytyvõ aguā. Ha'e nunga rojapo Senhor omboetea aguā, ha'e ronhopytyvõxe etea roexa uka aguā.

<sup>20</sup> Mba'eta ronhea'ã avave rei orere ijayvu rei e'ŷ aguā peráta ome'ẽa reta pyre rogueraa rā.

<sup>21</sup> Mba'eta ronhea'ã ha'evea rami orekuai aguā Senhor renonde, ha'e avakue oexaa py guive.

<sup>22</sup> Ha'e va'e irmão kuery reve romondouka avi nhande-irmão mboae. Ha'e va'e ma opa mba'e py nhopytyvõxeia roexa jepi va'e, mbovykue rei e'ŷ. Ha'e gui aŷ ma peẽ kuery re ojeroviaa rupi vy oexa ukave ju nhopytyvõvexea.

<sup>23</sup> Ha'e gui xeirũ Tito ma peẽ kuerya rupi xepytyvõ va'ety. Ha'e gui irmão kuery mboae ma igreja kuery remimondouka meme, ha'e Cristo mboetea guive.

<sup>24</sup> Ha'e ramo igreja kuery pavẽ renonde peẽ voi ke pexa uka pendoporayvua, ha'e va'e avakue oendua py ore roguerovy'a rire.

## 9

### *Ha'e kuery ome'ẽmba voi aguā re Paulo ijayvuague*

<sup>1</sup> Ha'e gui iky'a e'ŷ va'e kuery pe mba'emo pemboja'o aguā re ambopara ve'ŷ teĩ ha'eve, <sup>2</sup> mba'eta aikuua porã peipytyvõxeia. Ha'e nunga py roguerovy'a Macedônia pygua kuery ikuia rupi. Mba'eta ha'e kuery pe aipoa'e pendereko re: "Acaia pygua kuery ma ma'etŷa oaxa va'e guive mba'emo omboja'o aguā rami ikuai", ha'e va'ekue. Ha'e rami vy peẽ ranhe peme'ẽxe rire heta ju ma ikuai ome'ẽxe avi va'e.

<sup>3</sup> Ha'e rami avi pẽa py ambou irmão kuery, peẽ kuery roguerovy'aa oaxa rive'ŷ aguā, ha'e rami 'rāgue py pemono'õmba aguā, xee aipoa'eague rami.

<sup>4</sup> Ha'e rami vy Macedônia pygua kuery xerupive ou va'e oexa e'ŷ aguā ndapejapo porãi ra'ea, roximba e'ŷ aguā. (Ha'e rami avi "Peẽ peximba 'rā" nda'e), mba'eta peẽ kuery re ajerovia ae ha'e nunga py.

<sup>5</sup> Ha'e rami avi ajou porã xegui irmão kuery ranhe peẽ kuerya py ambou aguā, oguerekokatu ma voi aguā mba'emo peme'ẽ aguā va'ekue. Ha'e rami vy pemono'õmba 'rā penhopytyvõxeia rupi ete, penerakâte'ŷ reia rupi e'ŷ.

### *Mba'emo moaĩa ha'e imono'õa re ombojojaague*

<sup>6</sup> Aipoa'e: Mbovy'i ri amongue omoaĩ rire mbovy'i avi 'rā omono'õ. Ha'e rā omoaĩ reta va'ekue ma omono'õ reta avi 'rā.

<sup>7</sup> Peteĩ-teĩ tapeme'ẽ pendepy'a re pemoñaague rami, penerakâte'ŷa rupi e'ŷ, neĩ ame'ẽ uka nhea'ã ramo e'ŷ guive, mba'eta Nhanderuete oayvu ov'y'a reve ome'ẽ va'e.

<sup>8</sup> Ha'e ramo Nhanderuete penemboaxy vy opa mba'e 'rā ojou uka pêvy. Ha'e rami vy opa mba'e pejou riae 'rā, opa mba'e py penhopytyvõ aguā,

\* 8:15 Êxodo 16.18

<sup>9</sup> ipara oĩa rami: “Mba'emo omboja'o vy iporiaukue'i pe ome'ẽ ramo heko porãa ojekuaa riae 'rã", he'iague rami.\*

<sup>10</sup> Mba'eta Nhanderuete ae ome'ẽ mba'emo ra'yigue inhotyará pe, mbojape guive ome'ẽ ho'u va'erã pe. Ha'e pendevy pe voi ome'ẽ porãmba 'rã pemoaĩ va'erã, omboetave avi 'rã pendereko porãa.

<sup>11</sup> Opa mba'e ome'ẽmba 'rã pendevy, opa mba'e py joupe pemboja'o aguã. Ha'e gui ha'e joupe rogueraa ramo heta 'rã oguerovy'a Nhanderuete.

<sup>12</sup> Mba'eta ha'e rami penhopytyvõ ramo iky'a e'ŷ va'e kuery oguerekopa 'rã. Ha'e rami anho e'ŷ, heta oguerovy'a 'rã Nhanderuete guive.

<sup>13</sup> Mba'eta Nhanderuete omboete 'rã okuapy, peipytyvõa py Cristo regua ayvu porã peroviaa rupi penhe'ẽ rendua pexa uka ramo, mba'eta peme'ẽxea py ha'e kuery pe pemboja'o, pavẽ rei pe guive.

<sup>14</sup> Ha'e ramo ha'e kuery ma pendererovy'aa rupi ojerure 'rã pendere, opa mba'e py Nhanderuete penemboaxya oikuaa vy.

<sup>15</sup> Nhandevy Nhanderuete ome'ẽ opa mba'e gui iporãve va'e. Ha'e ramo jarovy'a.

## 10

### *Apóstolo po'akaa rupi Paulo ijayvuague*

<sup>1</sup> Cristo ivai rei e'ŷ ha'e porayvu va'e rery rupi xee Paulo ae pãvy ajerure. Xee ma anhetẽ peẽ kuerya py aiko jave xe'yvy'i' va'eri pendekuaia rupi e'ŷ aiko jave “Ijayvu ete va'e”' ea xevy.

<sup>2</sup> Tá, xee ajerure pãvy peẽ kuerya py avaẽ ju jave ijayvu ete va'e rami e'ŷ xeapo aguã, mba'eta anhetẽ xeayvu ete 'rã amongue to'o re roikoa rami ijayvu va'e ikuai rã.

<sup>3</sup> Mba'eta orero'o re roiko teĩ to'o oikuaa rami e'ŷ guive ropu'ã roikovy orerovaigua kuery re.

<sup>4</sup> Mba'eta ore ronhea'ãa rupi tembiporu roiporu va'e ma to'o guigua e'ŷ, ha'e rã Nhanderuete guigua ipo'aka va'e, oo imbaraete ete va'e mbovaipaarrã.\* Ha'e rami vy rombovaipa 'rã nhombotavypa reia rupi ayvua,

<sup>5</sup> ha'e opa marâguia onhemboyvatevexea guive, Nhanderuete oikuaaxe va'e rovai opu'ã va'e. Ha'e rami vy roity avakue 'arandu ha'e javi, ha'e kuery voi Cristo onhe'ẽ rendu aguã rami.

<sup>6</sup> Ha'e gui opa mba'e py penhe'ẽ rendu ma ri ramo rombopaga 'rã inhe'ẽ rendu e'ŷ va'e ha'e javi.

<sup>7</sup> Peikuaa pota ke mba'emo ojekuaa porãa va'e re. Amongue ojejou porãa rupi ojeupe “Cristo pegua” he'i vy peteigüe ju toikuaa pota ojee. Mba'eta Cristo pegua ha'e kuery oikoa rami avi ore voi Cristo pegua roiko.

<sup>8</sup> Orepo'akaa re peteigüe ju xeayvu teĩ naxi, mba'eta peẽ kuery romombaraeeteve aguã Senhor orembopo'aka, penembaraeetea rombovaipa aguã e'ŷ.

<sup>9</sup> Ha'e rami xeayvu, kuaxia ambopara vy romongyjexea rami pexa'ã e'ŷ aguã.

<sup>10</sup> Mba'eta amongue ndaxejou porãi vy aipoe'i: “Paulo kuaxia ombopara va'ekue ma ipoyi, ha'e ipo'akaa kuaa ukaa guive, va'eri nhandea py oĩ vy ikangy, ha'e ijayvu ndovarei”, he'i.

<sup>11</sup> Ha'e rami ijayvu va'e toikuaa pota povae nunga re: Ha'e kuerya py e'ŷ roĩ jave kuaxia para romboparaa rami ae ju 'rã oreayvu ha'e kuerya py rovaẽ vy.

<sup>12</sup> Mba'eta ore ma noronhemboyvatexei va'ekue, ojejou porãa rei va'e kuery rami e'ŷ. Ha'e kuery ma ojee ae rive ový'a, ha'e ojegui ae mba'emo ombojoja vy oexa uka o'arandu e'ŷa.

### *Mamo pa Paulo ombo'eapo aguã oikuaa ukaague re ijayvua*

\* **9:9** Salmo 112.9    \* **10:4** Efésios 6.10-18; 1 Tessalonicenses 5.8

<sup>13</sup> Ha'e rā ore ma orejee ae ndoreayvui 'rā ha'evea ramigua áryve, Nhanderuete orerembiaporā ome'ē va'ekue re anho oreayvu. Mba'eta peē kuerya rupi voi romba'eapo aguā ome'ē.

<sup>14</sup> Mba'eta peē kuerya rupi noremomba'eapoi va'e rire pendekuaia re oreayvu aguā nda'evei 'rāgue. Ha'e rami avi Cristo regua ayvu porā romombe'u vy peē kuerya rupi romba'eapo ae ma.

<sup>15</sup> Ha'e rami avi ha'evea ramigua áryve e'ŷ 'rā oreayvu, amboae kuery om̄ba'eapoa re oreayvu e'ŷ aguā. Ha'e peē kuery re rojerovia, pejeroviaa oīve ramo peē kuerya rupi romba'eapove aguā, orerembiaporā ome'ē mbyre rami vy,

<sup>16</sup> ha'e pendekuaia rovai rupi voi ayvu porā romombe'u aguā, mba'eta ore ndoreayvui 'rā amboae kuery om̄ba'eapoague rupi ore ju romba'eapoa roguerovy'aa rupi.\*

<sup>17</sup> Ha'e rami 'rāgue py "Mba'emo oguerovy'a va'e ma Senhor ae toguerovy'a" he'ia rami orekuai.\*

<sup>18</sup> Mba'eta amongue ha'e ae rive ojererovy'a va'e'ŷ 'rā ojou porā mbyrā oiko, ha'e rā Senhor oguerovy'a va'e anho.

## 11

### *Paulo gueko re ijayvuve jevyague*

<sup>1</sup> Inhakā porā e'ŷ va'e rami xeayvuve ju ta ramo aipota xereropo'akave. Ha'e rami vy xereropo'akave'i ju ke.

<sup>2</sup> Mba'eta peē kuery re xee nda'evei etea ma Nhanderuete guigua ae. Mba'eta omerā peteī'i va'e pe kunhataī ete'i ojexa uka va'e rami avi xee ma roguereko katu peteī pe roexa uka aguā. Ha'e va'e ma Cristo.

<sup>3</sup> Ha'e rami teī xee akyje, mboi ijapua rupi Eva ombotavyague rami avi pene'arandua voi ombovaipa avi gui, peteī rami anho pendepy'aa ha'e Cristo pe pendeko ky'a e'ŷa rupi pendekuaia gui pejepe'a gui.

<sup>4</sup> Mba'eta anhetē pēa py amongue ovaē vy Jesus regua ore romombe'u va'ekue ramigua e'ŷ 'rā omombe'u, ha'e rami e'ŷ vy Nhe'ē e'ŷ vy ayvu porā pejopy va'ekue ramigua e'ŷ 'rā omombe'u. Ha'e ramo ha'e va'e regua pe teī penhembo'e uka 'rā, pēvy'a reve.

<sup>5</sup> Ha'e kuery ojeupe ae "Apóstolo" he'ia va'e gui xee ma neī peteī henda py naxe'yvyī've.

<sup>6</sup> Ayvu py xe'yvyī'i teī mba'emo aikuaa-a py any. Ha'e nunga ha'e javi roikuaa uka ae ma pēvy, opa mba'e py.

### *Joupe nonhemongaru ukaiague re Paulo ijayvuague*

<sup>7</sup> Tyrā pa peē kuery romboyvateve vy xee ae anhemo'yvyī've vy ajejavvy va'ekue ri ty'y? Mba'eta peē kuerya rupi aiko jave hepy e'ŷ re amombe'u va'ekue Nhanderuete guigua ayvu porā.

<sup>8</sup> Mba'eta igreja kuery mboae gui mba'emo aipe'a heruvy peē kuery roipytyvō rive aguā, ha'e amba'eapoague repy ajopy guive.

<sup>9</sup> Peē kuerya py aiko jave mba'emo py xeporiau teī peē kuery peteīve pe nanhemongaru ukai. Mba'eta Macedônia gui irmāo kuery ovaē vy ome'ēmba aikotevē va'ekue. Opa mba'e py anhea'ā va'ekue peē kuery pe anhemongaru uka e'ŷ aguā, ha'e anhea'ā riaeve 'rā guive ha'e rami.\*

<sup>10</sup> Cristo regua ayvu anhetē ete va'e xere oī va'e rupi aipoa'e: Xegui ndoipe'aai 'rā apy Acaia yvy re ha'e rami aiko vy avy'aa.

<sup>11</sup> Mba'e re nda'u nanhemongaru ukai va'ekue pendevy? Peē kuery roayvu e'ŷ vy teve ha'e rami aiko? Nhanderuete ma oikuaa roayvua.

---

\* **10:16** Romanos 15.18-21 \* **10:17** Jeremias 9.24 \* **11:9** 1 Coríntios 9.1-27

<sup>12</sup> Ha'e rami 'rāgue py "Paulo kuery rami orekuai" he'i rive va'e kuery amokyrirī aguā nanhemongaru ukai va'ekue pendevy, ha'e kuery ojejou porā ve'ŷ aguā. Ha'ekue rami aiko riaeve 'rā guive,

<sup>13</sup> mba'eta ha'e kuery ma apóstolo ramigua rive, anhetē rupi e'ŷ omiba'eapo, Cristo pegua apóstolo ramigua rive onhemoingo va'e.

<sup>14</sup> Ha'e ramigua jaexa teĩ nanhanhemondyi, mba'eta Satanás ae voi anjo hexakāmba va'e rami onhemoingo.

<sup>15</sup> Ha'e nunga rupi hembiguai kuery voi heko porā va'e merami rive onhemoingo rā jaexa vy nanhemondyi 'rā. Ha'e gui opaa py ha'e kuery ha'evea rami 'rā opaga ojapo vaiague re.

### *Ayvu porā káuxa ojexavaia re Paulo ijayvuague*

<sup>16</sup> Teĩgue ju xeayvu: Avave rei xevy pe "Inhakā porā e'ŷ va'e" ta'ea eme. Ha'e rami teĩ ha'e rami xekuaa va'e ikuai vy taxereropo'akave'i ju, inhakā porā e'ŷ va'e rami xejee xeayvuve rā.

<sup>17</sup> Mba'eta xeayvu ta Senhor gui e'ŷ ijayvu va'e rami, 'arandu rupi e'ŷ, ojejou porā rei va'e rami rive.

<sup>18</sup> Heta ikuai to'o re vy ojererovy'aa rupi rive ijayvu va'e. Ha'e gui xee voi xeayvu ta ranhe ajererovy'aa rupi.

<sup>19</sup> Mba'eta peẽ kuery pendejeupe "Hi'arandu va'e" peje teĩ pevy'a reve penhembo'e uka hi'arandu e'ŷ va'e pe.

<sup>20</sup> Ha'e kuery pe pejejokuai uka escravo rami, penhemomba uka, pejekore ukapa, mba'eta pendegui onhemboyyateve vy penderova petepa.

<sup>21</sup> Xee axĩ reve xema'endu'a ha'e kuery rami orekuai aguā ndorepy'a guaxuiague re. Ha'e rami avi amongue ipy'a guaxua rupi ijayvu ramo xee voi xepy'a guaxu 'rā. Inhakā porā e'ŷ va'e rami teri xeayvu.

<sup>22</sup> Ha'e kuery hebreu regua teve? Xee voi hebreu aiko. Ha'e kuery Israel regua teve? Xee voi. Ha'e kuery Abraão ramymino teve ikuai? Xee voi.

<sup>23</sup> Cristo rembiguai teve ikuai? (Inhakā porā e'ŷ va'e rami teri xeayvu.) Xee katuve ma ha'e aiko. Mba'eta pavẽ gui amba'eapove, nhuã py hetakueve aĩ, mbovykue rei e'ŷ anhenupā uka, mbovykue rei e'ŷ amano aguā rupi aiko va'ekue.

<sup>24</sup> Peteĩ nhiruĩgue ma judeu kuery xenupā trinta e nove-kue,

<sup>25</sup> mboapykue xenupāa vyryra rovi py, peteĩgue ita py xeapipaa, mboapykue kanoã aĩa va'e oike, peteĩ pytū ha'e peteĩ ára ye'ẽ mbyte py aĩ va'ekue.

<sup>26</sup> Aguataa rupi aiko vy mbovykue rei e'ŷ ajexavai. Yy oxyry atã va'e rupi aaxa, jojuka rive-rive va'e ikuia rupi, xeretarā kuery ha'e amboae regua xejukaxe ramo, tetã ha'e tekoa e'ŷa rupi aikoa py, ye'ẽ rupi aa vy, ha'e irmão ramigua rive xejukaxe ramo.

<sup>27</sup> Amba'eapoa py aiko vy xekane'õ va'ekue, mbovykue rei e'ŷ ake e'ŷ re aiko. Xenhembyayi ha'e xey'uwei va'ekue. Mbovykue rei e'ŷ akaru e'ŷ re aiko va'ekue, ha'e xeao e'ŷ vy yro'y aendu guive.

<sup>28</sup> Ha'e nunga xerete re oiko va'e ramigua anho e'ŷ aendu, ko'ẽ nhavõ xere oĩ ipoyive va'e, igreja kuery ha'e javi re nda'evei aikoa.

<sup>29</sup> Ha'e kuery va'e regua ikangy rā xee voi xekangya aendu. Ho'a ramo xee voi xepy'a vai 'rā.

<sup>30</sup> Ha'e rami avi mba'emo arov'yaa rupi xeayvu vy xeayvu ta avi xekangya rupi aikoa re.

<sup>31</sup> Nhanderuete, Senhor Jesus Ru va'e raka'e rā peve ima'endu'a porãmby oiko va'e ma oikuua ndaxeapuia.

<sup>32</sup> Damasco tetã py aiko jave tetã re opena va'erā huvixave Aretas omoĩ va'ekue omboaty jopya kuery xejopy aguā.

33 Ha'e rami teĩ tetã kora re janela oĩ va'e gui xemboguejya yvy katy peteĩ ajaka tuvixa va'e py. Ha'e rami vy aa jepe karamboae ha'e kuery po gui.\*

## 12

### *Senhor mba'emo oexa uka ha'e oikuaa ukaague re ijayvuague*

<sup>1</sup> Ajererovy'aa rupi xeayvuve aguã nda'evei teĩ amombe'u ta Senhor mba'emo oexa ha'e oikuaa ukaague.

<sup>2</sup> Peteĩ ava aikuua Cristo pegua. Ha'e va'e ma catorze ma'etõ ma ojapo yva mboapya peve oupiague. Hete reve pa tyrã hete reve'ŷ oupia xee ndaikuuai, Nhanderuete ma oikuua. \*

<sup>3</sup> Ha'e gui ha'e va'e ava hete reve pa tyrã hete reve'ŷa ndaikuuai, Nhanderuete ma oikuua teĩ xee aikuua

<sup>4</sup> yvy marã e'ŷ re oupia. Ha'e ramo ayvu oendu avave rei omombe'ua aguã nda'evei va'e.

<sup>5</sup> Ha'e ramigua oikoague re xee xeayvu 'rã, ha'e rã xerekro re ae ndaxeayvui 'rã, xekangya re e'ŷ vy.

<sup>6</sup> Ha'e rami ajererovy'aa rupi xeayvu va'e rire inhakã porã e'ŷ va'e ndaikoi 'rãgue, mba'eta anhetẽ va'e meme. Ha'e rami teĩ ha'e rami ndaxeayvuxei, avave rei xejou porã rei e'ŷ aguã. Ha'e rã xere mba'emo oĩ rã oexa, e'ŷ vy xegui ayvu oendu va'ekue anho ha'eve.

### *Ho'o re juu oĩ va'e re Paulo ijayvuague*

<sup>7</sup> Ha'e ramigua iporã ete va'e xevy oikuua ukaague re ajejou porã rei e'ŷ aguã, peteĩ juu omoña xero'o re. Ha'e va'e ma Satanás ombou va'ekue xererekro axy aguã, anhemboyvate rei e'ŷ aguã.

<sup>8</sup> Ha'e nunga rupi mboapykue Senhor pe ajerure xegui oipe'a aguã re.

<sup>9</sup> Ha'e rami teĩ aipoe'i xevy: "Xee romboaxya ha'eve ma ndevy, mba'eta ikangy va'e re xepo'akaa ojekuaa porãve 'rã", he'i va'ekue. Ha'e nunga rupi avy'a reve 'rã xeayvu xekangya re, xere Cristo po'akaa oĩ aguã.\*

<sup>10</sup> Ha'e rami vy arovya 'rã xekangya, xere ayvua reia, ajexavaia, xere opu'ãa reia, ha'e nda'evei aikoa Cristo káuxa aendu va'e. Mba'eta xekangya py xembaraeteve 'rã.

### *Apóstolo oikoa kuua ukaa re Paulo ijayvuague*

<sup>11</sup> Inhakã porã e'ŷ va'e rami xeayvu va'ekue, ha'e rami aguã rami peẽ ae xemoingo ramo. Peẽ ae pendeayvu 'rãgue xererovy'aa rupi, mba'eta xee ma mba'eve py ojeupe "Apóstolo" he'i rive va'e kuery gui naxe'yvy'i've, mba'e'ŷ aiko va'eri.

<sup>12</sup> Mba'eta peẽ kuery mbyte rupi aexa uka ae ma apóstolo aikoa kuua ukaarã, opa mba'e aropo'akaa py, ha'e gui hexa pyrã, nhomondyipaarã ha'e po'akaa kuua ukaarã ajapoa py guive.

<sup>13</sup> Mba'e nunga py tu igreja kuery mboae gui peẽ kuery pe ajapo vaive, xee anho pêvy nanhepytyvõ ukaia py e'ŷ vy? Xeperdoa ke ha'e nunga py ri ajapo vai rã.

### *Oipouxea rupi Paulo ijayvuague*

<sup>14</sup> Mboapykuea ma peẽ kuerya py aa aguã rami aiko, ha'e teĩgue ju nanhepytyvõ ukai 'rã guive pêvy. Mba'eta xee ndaiptai mba'emo perekro va'e, peẽ kuery ae roipota. Mba'eta ta'y kuery minha mba'eve nomoĩ porãi 'rã nguu kuery peguarã, ha'e rã tuu kuery ma gua'y kuery peguarã omoĩ porã 'rã mba'emo.

<sup>15</sup> Ha'e nunga rupi xee avy'a reve mba'emo ame'ẽ, ha'e penenhe'ẽ re vy xee ae anhemomba uka 'rã guive. Pavẽ gui xee roayvuve rã peẽ kuery ndaxerayvuive teve?

<sup>16</sup> Mba'eve py pêvy nanhepytyvõ ukai ramo xapy'a rei peẽ kuery va'e regua "Paulo ijapu vy nhandekorea rupi oiko" he'i 'rã.

<sup>17</sup> Ha'e rami avi pêa py amongue ambou va'ekue pe teve rokore uka?

\* 11:33 Atos 9.23-25

\* 12:2 Apy "Peteĩ ava" he'ia ma ojee ae ijayvu vy (versículo 7).

\* 12:9 1 Coríntios 1.26-29

<sup>18</sup> Mba'eta Tito ou aguã re ajerure, ha'e hexeve ambou avi karamboae irmão mboae. Tito teve pendekore raka'e? Hexeve peteĩ nhe'ẽ rupi ae e'ŷ ri ty'y roiko? Peteĩ tape rupi e'ŷ ri ty'y roo?

### *Ha'e kuery oipou aguã okyjea rupi Paulo ijayvuague*

<sup>19</sup> Are ma guive rã peẽ kuery pexa'ã teĩ ore rojejou porã ukaxe vy rive oreayvua rami. Ha'e rami 'rãgue py xerembiayvu kuery, Cristo re vy Nhanderuete renonde romombaraeeteve aguã oreayvu ha'e nunga ha'e javi re.\*

<sup>20</sup> Ha'e rami teĩ akyje, peẽ kuerya py avaẽ vy aipotaa rami e'ŷ pendekuai rã roexa gui, ha'e peẽ voi pexa'ãague rami e'ŷ xerexa gui. Akyje peẽ kuery mbyte aexa gui joguero'a rei va'e, joe ija'e'ŷ, ivai rei, ha'e ranhexe va'e, ijayvu vaikue, ijayvux, onhemboyvate ha'e nhombopoxypa rei va'e.

<sup>21</sup> Akyje peteĩgue ju avaẽ ramo peẽ kuery mbyte Xeruete xemo'yvyi rivyvyi gui, ha'e yma rupi pejejavyague gui ndapejeko rerovai rã xee ajae'o rivyvyi gui, heko ky'a rei va'e, itavy rei ha'e opa marã ikuai va'e aexa vy.

## 13

### *Oikuua pota ha'e ijayvu ete aguã re Paulo ijayvuague*

<sup>1</sup> Kova'e re mboapykuea ma 'rã avaẽ peẽ kuerya py. "Mokoõ e'ŷ vy mboapy mba'emo omombe'u rã jaikuua porãve 'rã", 'ea ague rami.\*

<sup>2</sup> Mba'eta mokoõgue pêa py aĩ jave aipoa'eague rami ae ju 'rã xeayvu. Aŷ peẽ kuerya py naĩ vy aipoa'e ymave rupi ojejavvy va'ekue pe, ha'e amboae kuery ha'e javive pe guive: Peteĩgue ju avaẽ vy xee noromboaxyvei ma 'rã.

<sup>3</sup> Mba'eta peikuaaxe anhetẽ pa Cristo gui ae xeayvua. Ha'e va'e rima na'ikangyi 'rã peẽ kuery mbyte, ha'e rã pendevy pe oexa uka 'rã opo'akaa.

<sup>4</sup> Mba'eta anhetẽ ikangy va'e rami kuruxu re onhemoõ uka va'ekue ri oikove ju raka'e Nhanderuete po'akaa rupi. Ha'e rami ae hexe vy ore voi orekangy va'eri peẽ kuery mbyte Nhanderuete po'akaa rupi avi 'rã orekuai hexeve.

<sup>5</sup> Peikuaa pota ke pendejee ae, pexa aguã anhetẽ pa pejeroviaa oĩa. Penhea'anga ke pendejee ae. Ndapeikuaai ri ty'y Jesus Cristo pendere oĩa? Ha'e rami e'ŷ ri ramo ojou vaipy peiko.\*

<sup>6</sup> Ha'e rami teĩ xee ajerovia peikuaa aguã ore kuery ojou vaipy e'ŷ roikoa.

<sup>7</sup> Nhanderuete pe rojerure mba'eve py pejejavy e'ŷ aguã, pavẽ orejou porã aguã e'ŷ guive. Roipota va'e ma teko porã rupi peẽ pendekuai, ojou vaipy ore roikoa rami amongue oikuua teĩ.

<sup>8</sup> Mba'eta peteĩve henda py ndorepo'akai 'rã anhetẽ va'e rojoko aguã, ha'e rã anhetẽ va'e ojekuaa porãve aguã anho.

<sup>9</sup> Ha'e rami vy rovy'a 'rã peẽ penembaraete ramo, ore orekangy teĩ. Ha'e rami vy rojerure peẽ kuery opa mba'e py pendekuai porã aguã.

<sup>10</sup> Ha'e nunga rupi pêa py e'ŷ teri aiko vy ambopara ha'e rami, peẽ kuerya py aiko jave Senhor xembopo'akaague rami vy rombopaga e'ŷ aguã, mba'eta anhomomba aguã e'ŷ xembopo'aka, ha'e rã anhomombaraeeteve aguã.

### *Oxaruraa rupi ijayvuague*

<sup>11</sup> Aŷ ma irmão kuery, pevy'a ke. Opa mba'e py pendekuai porã pota, joo meme penhombopy'a guaxu, peteĩ rami peikuaa, ha'e peteĩ rami pendekuai guive. Ha'e ramo Nhanderuete mborayvu me'ëa ha'e peteĩ rami nhánemoingoa va'e oiko 'rã pendereve.

<sup>12</sup> Pexarura joupe-upa iky'a e'ŷ va'e joayvua rami. Iky'a e'ŷ va'e kuery ha'e javi oxarura uka pêvy.

\* **12:19** 2 Coríntios 3.1-3 \* **13:1** Deuteronômio 19.5 \* **13:5** 1 Coríntios 11.31

*Ogueroayvu por̄ague*

<sup>13</sup> Tove peẽ kuery ha'e javive tapendu Senhor Jesus Cristo nhanemboaxy, Nhan-deruete nhanderayvua ha'e Nhe'ẽ Ky'a E'ỹ peteĩ rami nhanemoingoa.

## **Galácia pygua kuery pe Paulo ombopara va'ekue**

## **Galácia pygua kuery pe Paulo ombopara va'ekue**

Kova'e kuaxia ma Galácia yvy re Jesus remimbo'e kuery ikuai va'e pe apóstolo Paulo ombopara va'ekue. Ha'e ae omboypy va'ekue igreja ha'e py. Ha'e gui Galácia yvy gui Paulo oo ma rire ha'e py ovaẽ amboae rami rei nhombo'e va'e, judeu regua. Ha'e va'e kuery ma nhombo'e vy aipoe'i: "Moisés lei oeja va'ekue rupi nhandekuai ramo 'rāe Nhanderuete nhanemboeko porã, nhandepire nhamboi uka aguã regua rupi guive", he'i nhombo'e vy.

Ha'e rã Paulo ma ha'e rami e'ŷ nhombo'e, avakue oikuua rami rive'ŷ. Aipoe'i: "Ayvu porã pendevy xee amombe'u va'ekue ma avakue guigua e'ŷ. Mba'eta xee ma avakue gui naendui neĩ ndaikuaai karamboae. Jesus Cristo ae oikuua uka xevy" (1.11b-12). "Nhanderuete renonde avave rei lei re onhea'ãa rupi nomboeko porãai 'rã, mba'eta 'Heko porã va'e ma ojeroviaa rupi 'rã ikuai', he'i" (3.11). "Mba'eta peẽ kuery voi Cristo Jesus re pejerovia vy Nhanderuete ra'y kuery pendekuai", he'i (3.26).

Ha'e gui ára nhavõ Nhanderuete renonde jaiko aguã ma ha'e rami ae avi, mba'eta nhande ae nhanhea'ãa rupi rive'ŷ 'rã jaupity teko porã, ha'e rã Jesus re jajeroviaa re, ha'e Nhe'ẽ po'akaa rupi anho. "Ha'e nunga rupi aipoa'e: Pendekuai Nhe'ẽ re. Ha'e vy 'rãe ndapejapoi to'o oipota va'e", he'i (5.16).

### *Oxarura reve ijayvu vy omboypyague*

<sup>1</sup> Xee Paulo ma apóstolo aiko. Avakue e'ŷ xemoĩ, neĩ avakue pe e'ŷ guive xemoĩ ucaa. Ha'e rã Jesus Cristo ae xemoĩ va'ekue, ha'e omanoague gui Nhanderuete imboete jevyare va'e voi.

<sup>2</sup> Irmão kuery xeirũ ikuai va'e ha'e javi reve roxarura Galácia py igreja kuery pendekuai va'e pe.\*

<sup>3</sup> Tove peẽ kuery tapendu Nhanderuete ha'e [nhande] Senhor Jesus Cristo penemboaxyha'e mby'a porã.

<sup>4</sup> Mba'eta ha'e ae ojejuka uka raka'e jajejavvyague re, Nhanderuete oipotaa rami vy ko yvy vai regua reko gui nhandereraa jepe aguã.

<sup>5</sup> Tove ha'e anho tomboetea aŷ, ha'e raka'eve rã peve. Amém.

### *Galácia pygua kuery ojeroviaa gui ojepe'aa re ijayvuague*

<sup>6</sup> Ha'e rami avi anhemondyi mba'eta omombe'ua rã aendu Cristo rupi Nhanderuete penemboaxy vy penerenoĩ va'ekue ri ixugui pejepetapa vyvoia, ayvu porã ramigua re rive pevapaxe vy.

<sup>7</sup> Ha'e va'e ma amboae ayvu porã e'ŷ guive. Ha'e rami avi amongue rãnda'u Cristo regua ayvu porã oguerovaxe vy penemboeko eta rei.\*

<sup>8</sup> Ha'e gui ayvu porã romombe'u va'ekue rami e'ŷ ri omombe'u va'e rei tove tokanhy, ore e'ŷ vy anjo yva pygua omombe'u teĩ.

<sup>9</sup> Aipoa'e ae ma va'ekue ri teĩgue ju aipoa'e: Ayvu porã oregui pendu va'ekue rami e'ŷ ri omombe'u vy tokanhy.

### *Ayvu porã oendu ha'e omombe'ua re Paulo ijayvuague*

<sup>10</sup> Ha'e rami xeayvu vy nda'u aŷ avakue pe ri ajejou porã uka, tyrã pa Nhanderuete pe? Avakue rive ri nda'u ambovy'axe? Mba'eta avakue ambovy'aa rupi rive aiko va'e rire ndaikoi 'rãgue Cristo rembiguai.

\* <sup>1:2</sup> Atos 16.6, 18.23   \* <sup>1:7</sup> Romanos 16.17; 2 Coríntios 11.3,4; Colossenses 2.8; 2 Pedro 2.1-3

**11** Irmão kuery, po ramigua aipota peikuaa porã: Ayvu porã pendevy xee amombe'u va'ekue ma avakue guigua e'ŷ.

**12** Mba'eta xee ma avakue gui naendui neĩ ndaikuuai karamboae. Jesus Cristo ae oikuaa uka xevy.

**13** Mba'eta pendu ae ma judeu kuery reko rami aikoague. Mba'eta Nhanderuete pegua igreja kuery amoingo axy rei va'ekue, amombaxe ete vy.

**14** Ha'e rami aikoa rupi xeretarã judeu kuery xejavegua gui voi anhea'âve va'ekue, oreramoĩ kuery orembo'eague rami ete aikoxe vy.\*

**15** Ha'e gui ma xetui'i e'ŷ mbove ma voi Nhanderuete xemboaxya rupi xeporavo rire xerenoĩ, ha'e oipotaa rami vy

**16** xevy pe oikuaa uka Gua'y regua, judeu e'ŷ va'e kuery ikuiaia rupi amombe'u aguã. Ha'e ramo amboae kuery pe xee naporandui karamboae aiko aguã re,

**17** neĩ Jerusalém tetã katy ma voi ndaai ha'e kuery ranhe xegui apóstolo ikuai va'ea py. Ha'e rã Arábia yvy katy ranhe aa, ha'e gui Damasco tetã py ju ajevy.

### *Jerusalém py, Síria ha'e Cilícia katy Paulo ooague*

**18** Ha'e gui mboapy ma'etŷa py mae ma Jerusalém katy aa Cefas aexa aguã. Quinze ára re aiko hexeve.

**19** Ha'e rã apóstolo kuery mboae ma ndaexai karamboae, Senhor ryvy Tiago e'ŷ vy.\*

**20** Nhanderuete renonde aipoa'e: Po rami pêvy ambopara vy ndaxeapui.

**21** Ha'e gui ma Síria ha'e Cilícia yvy katy ju aa.

**22** Ha'e rã Judéia yvy re Cristo pegua igreja kuery ikuai va'e ma ndaxerexai teri.

**23** Xereko omombe'ua ramo rive ha'e kuery oendu, "Nhanemoingo axy reiare aŷ ma omombe'u oikovy jajerovia aguã regua yma rupi ombovaipaxe va'ekue", 'ea rã.

**24** Ha'e rami xereko oendu vy oguerovy'a okuapy Nhanderuete.

## 2

### *Judeu ha'e judeu e'ŷ va'e ikuiaia rupi apóstolo kuery ombo'eapoa re ijayvuague*

**1** Ha'e gui catorze ma'etŷ rire ma Jerusalém katy ju aa karamboae Barnabé reve. Tito avi araa.

**2** Aa aguã Nhanderuete oikuaa ukaague rami vy aa. Ha'e py ma opena va'e kuery pe amombe'u ayvu porã judeu e'ŷ va'e kuerya rupi amombe'u aikovy va'e. Pavẽ pe'ŷ guive amombe'u, irmão kuery yvatekueve va'e pe anho, ha'e kuery ombovaipa e'ŷ aguã anhombo'ea ha'e anhombo'eague.\*

**3** Ha'e rami teĩ neĩ Tito xerupive oo va'ekue pe voi ha'e kuery nda'ijayvui opire omboi uka aguã, grego va'eri.

**4** Omboi uka aguã ijayvu va'e ma irmão ramigua kuery rive, irmão kuery reve onhemoirũ va'ekue. Ha'e kuery ma oikuaa pota reixe raka'e opa mba'e gui Cristo Jesus nhandereraa jepe ramo nhandekuaia re, escravo rami ju nhanemoingoxe vy.\*

**5** Ha'e rami teĩ ha'e kuery oipota va'e ma neĩ peteĩ henda py ma voi ndorojapoi, ayvu porã anhetẽ va'e peẽ kuery peguarã optya aguã.

**6** Ha'e guiomboetevepy kuery re ma xee napenai, mba'eta Nhanderuete voi amongue rive joegui oayvuve va'e'ŷ. Ha'e kuery yvatekueve ikuai va'e voi neĩ peteĩ henda py naxembo'eï mba'emo pyau re.

**7** Ha'e rami 'rãgue py xejou porã, mba'eta oikuaa amboae regua kuery pe ayvu porã amombe'u aguã Nhanderuete xemoïague, judeu kuery pe Pedro omombe'u aguã omoïague rami avi.

\* **1:14** Atos 26.9-20 \* **1:19** Atos 9.26-30 \* **2:2** Atos 15.1-11 \* **2:4** Irmão ramigua kuery ma nhomoingoxe judeu kuery pegua lei rupi anho, escravo rami ae.

<sup>8</sup> Mba'eta apóstolo Pedro judeu kuery pe ayvu omombe'ua rupi Nhanderuete oipytyvõa rami avi xee voi xepytyvõ amboae regua ikuiaia rupi amba'eapoa rupi.

<sup>9</sup> Ha'e gui ha'e rami amba'eapo aguã Nhanderuete xemboaxy vy xemoiague ombotevepy kuery Tiago, Cefas ha'e João oikuua vy orererovy'a, orepopyy guive, xee ha'e Barnabé reve. Mba'eta ojou porã amboae regua kuery mbo'ea rupi ore orekuaia, ha'e kuery judeu kuery mbo'ea rupi ikuiaia rami avi.

<sup>10</sup> Peteñ'i re anho tema ha'e kuery ojerure, iporiaukue'i roipytyvõ aguã re orema'endu'a aguã. Ha'e gui xee ma ha'e nunga re anhea'ã ae ma aikovy.

*Pedro pe Paulo ijayvuague, ha'e Cristo Jesus re jajerovia ramo nhanemboeko porãa re ijayvua*

<sup>11</sup> Ha'e gui ma Antioquia tetã py Cefas ovaẽ ma vy ha'eve e'ŷa rami oiko ramo xeayvu ete ixupe.

<sup>12</sup> Mba'eta Tiago remimbou avakue novaẽi teria ja Cefas okaru oikovy va'ekue judeu e'ŷ va'e kuery reve. Ha'e rami teñ avakue ovaẽ ma ramo optyu'u, judeu kuery gui okyje vy ojepe'a.

<sup>13</sup> Hexeve judeu kuery mboae heta avi onhenhom. Barnabé eteve voi ha'e kuery onhenhomia rami onhemoingo uka.

<sup>14</sup> Ha'e gui ma ha'e kuery ha'eve e'ŷa rami, ayvu porã anhetẽ va'e rami e'ŷ ikuiaia xee aexa vy pavẽ oendua py aipoa'e Cefas pe: "Ndee ma judeu va'eri amboae regua reko rami reiko va'ekue, judeu reko rami e'ŷ. Ha'e gui aŷ ma mba'e re tu amboae regua kuery ri remoingoxe judeu reko rami?" ha'e va'ekue.

<sup>15</sup> Mba'eta ore ma judeu ae ma voi orekuai, "Amboae regua ojejavypa rei va'e" 'ea va'e e'ŷ.

<sup>16</sup> Jaikuua guive lei re nhanhea'ãa rupi e'ŷ nhanemboeko porãa, ha'e rã Cristo Jesus re jajeroviaa re. Ha'e rami vy ore voi Cristo Jesus re rojerovia, ha'e rami vy rojeroviaa re oremboeko porãa aguã, lei re ronhea'ãa rupi e'ŷ. Mba'eta lei re onhea'ãa rupi ma avave rei nomboeko porãai 'rã.<sup>†</sup>

<sup>17</sup> Ha'e rami avi xapy'a rei Cristo re vy nhanhemboeko porã uka teñ amongue ojou 'rã jajejavya. Ha'e rami vy nda'u Cristo ae ri nhandeapo jajejavvy aguã rami? Any teve.

<sup>18</sup> Mba'eta mba'emo nhambovaipa va'ekue jajapo ju va'e rire mae japyta 'rãgue ojejavypa riae va'e.

<sup>19</sup> Ha'e rami 'rãgue py lei re oĩa aikuua porã rire xee amano ae ma lei pe, Nhanderuete pe ju aiko aguã. Xee voi kuruxu re xemoiã avi Cristo reve.\*

<sup>20</sup> Ha'e rami rire xee ve'ŷ ma aiko, Cristo oiko xere. Aŷ xero'o re aiko teri reve Nhanderuete Ra'y re ajeroviaa rupi aiko, xerayvu vy xere ojejuka uka rire.

<sup>21</sup> Xee ma Nhanderuete xemboaxy nambovare e'ŷi. Mba'eta lei re nhanhea'ãa rupi nhanemboeko porãa va'e rire Cristo omanoague ndovarei 'rãgue.

### 3

*Galácia pygua kuery pe Paulo oporanduague*

<sup>1</sup> Peñ Galácia pygua kuery pene'arandu e'ŷ va'e, mava'e tu penembotavy ra'e? Mba'eta pendua py amombe'u porã va'ekue Jesus Cristo kuruxu re ojejuka ukaague.

<sup>2</sup> Po rami anho aikuaxe pëgui: Lei re penhea'ã rupi ri nda'u Nhe'ẽ pejopy, tyrã pa ayvu porã pendu vy pejeroviaa py?

<sup>3</sup> Pene'arandu e'ŷ va'e, Nhe'ẽ reve pemboypy va'ekue ri aŷ to'o re rive ju ta ri ty'y opa mba'e py pendekuai porã?\*

<sup>4</sup> Pendekuai axy reiague ndovarei ri ty'y mba'everã? Ha'e nungakue ndovare e'ŷi 'rãgue.

<sup>†</sup> **2:16** "Ore" he'ia ma judeu kuery re ijayvu vy. Galácia pygua kuery ma judeu e'ŷ ikuai. Ha'e gui ha'e javi regua ma Jesus Cristo re ojerovia vy 'rãe oo jepe (Romanos 3.21-30). \* **2:19** Romanos 6.1-4 \* **3:3** Gálatas 5.16-23; Efésios 2.8-10

<sup>5</sup> Ha'e gui Nhe'ẽ mbouare nda'u lei re penhea'ã ramo ri mba'emo porã ojapo penembyte, tyrã pa ayvu porã pendu va'e re pejerovia ramo?

### *Abraão rekokue re ijayvua*

<sup>6</sup> Ha'e ramigua ae Abraão ojou raka'e, mba'eta "Nhanderuete re ojerovia ramo ojeroviaa re ome'ẽ teko porã", he'iague rami.\*

<sup>7</sup> Ha'e nunga rupi jaikuaa ojerovia va'e ae Abraão ramymino kuery ikuai.\*

<sup>8</sup> Mba'eta Abraão pe ranhe omombe'u ayvu porã vy "Ndegui vy amoingo porã 'rã yvy regua ha'e javi", he'i va'ekue. Ha'e ramia py ipara re Nhanderuete oikuua uka ma voi amboae regua kuery ojerovia ramo omboeko porã 'rãa.\*

<sup>9</sup> Ha'ekue rami vy Abraão ojerovia ete va'e reve omoingo porã avi 'rã ojerovia va'e kuery ha'e javi.

<sup>10</sup> Ha'e rã lei re onhea'ã va'e ma ayvu vaipy meme, mba'eta ipara oiny: "Lei re ikuai va'e ndojapopai ri vy ayvu vaipy opyta."\*

<sup>11</sup> Ha'e nunga rupi Nhanderuete renonde avave rei lei re onhea'ãa rupi nomboeko porãai 'rã, mba'eta "Heko porã va'e ma ojeroviaa rupi 'rã ikuai", he'i.\*

<sup>12</sup> Ha'e gui lei re nhanhea'ã vy ma jajeroviaa rupi e'ŷ nhandekuai. Ha'e rami 'rãgue py "Lei re oĩa amongue ojapopa ri vy oikove 'rã hexe vy", he'iague rami.\*

<sup>13</sup> Ha'e gui ma Cristo nhandejogua raka'e lei re ayvu vai oĩa gui, nhanderekovia ayvu vaipy ojeapo vy. Mba'eta ipara oiny: "Yvyra re oupia imoiny va'ekue ma ayvu vaipy meme" he'ia rami.\*

<sup>14</sup> Ha'e rami vy Jesus Cristo ojapo Abraão pe Nhanderuete "Ndegui vy anhomoingo porã 'rã" he'iague amboae regua kuery voi oupity aguã. Ha'e rami rã jajerovia vy jajopy 'rã Nhe'ẽ ombou va'erã va'ekue.

### *Nhanderuete ayvu mbovaipaarã e'ŷ lei oejaague re ijayvua*

<sup>15</sup> Irmão kuery, nhande ae reko re ambojoja ta aŷ. Mba'eta mba'emo jajapo aguã re jajogueroayvu rire nda'evei avave rei ombovaipa, neĩ omoĩave aguã ha'e va'ekue áry.

<sup>16</sup> Ha'e gui Abraão ha'e hamymino pe Nhanderuete ijayvu raka'e omoingo porã aguã re. Ha'e ramia py "Hamymino kuery pe" nde'i, mba'eta heta pe rami e'ŷ ijayvu, peteĩ'i pe anho, "Neramymino" he'ia py. Ha'e va'e ma Cristo.\*

<sup>17</sup> Ha'e gui aipoa'eve ju: Nhanderuete yma ma voi guexeve guarã ojapo ma rire quattrocentos e trinta ma'etŷa py lei oeja avi vy nomboaxa rivei, neĩ nombovaipai ijayvu ma voiague.\*

<sup>18</sup> Mba'eta lei re nhanhea'ãa rupi ri Nhanderuete gui mba'emo jajopy va'e rire ijayvuague rupi ve'ŷ jajopy 'rãgue. Ha'e rami teĩ ijayvuague rupi rive Nhanderuete mba'emo ome'ẽ raka'e Abraão pe.

<sup>19</sup> Ha'e gui ma mba'erã nda'u oeja avi lei? Lei ma jejavya kuaa ukaarã oeja raka'e, ovare aguã hamymino ijayvu ma voiague va'e oiko peve'i.\* Anjo kuery po rupi lei ome'ẽ uka raka'e, ha'e gui amboae po rupi ju.

<sup>20</sup> "Amboae po rupi ome'ẽ uka" he'ia py ma peteĩ'i re e'ŷ ijayvu vy, mokoĩ re. Ha'e rã Nhanderuete ma peteĩ'i.

<sup>21</sup> Ha'e gui Nhanderuete nda'u ijayvu ma voiague rovai guarã ri lei oeja raka'e? Any teve. Mba'eta tekove me'earã ri lei oeja va'e rire anhetê lei re nhanhea'ãa rupi 'rãgue teko porã jaupity.

<sup>22</sup> Ha'e gui ipara oinya oikuua uka jejavya guy py meme nhandekuaia, Jesus Cristo re jajerovia vy ome'ẽ 'rã va'ekue jajopy aguã.

---

\* **3:6** Gênesis 15.6   \* **3:7** Romanos 4.1-25   \* **3:8** Gênesis 12.3, 18.18   \* **3:10** Deuterônômio 27.26   \* **3:11** Habacuque 2.4   \* **3:12** Levítico 18.5   \* **3:13** Deuterônômio 21.23   \* **3:16** Gênesis 13.15, 24.7   \* **3:17** Hebreus 6.13-18   \* **3:19** Romanos 5.20,21

### *Cristo-a py lei nhancererova ague rami ijayvua*

<sup>23</sup> Ha'e gui hexe jajerovia agu   regua oikuaa uka e'   mbove ma lei rupi ranhe nhanemoingo vy omboty pyre rami nhandererek raka'e, jajerovia agu   regua oikuaa uka peve.

<sup>24</sup> Ha'e rami vy lei ma nhandere opena va'e rami ranhe nhandererek raka'e, Cristo-a py nhancererova   agu  , hexe jajerovia ramo nhanemboeko por   agu  .\*

<sup>25</sup> Ha'e gui jajerovia agu   regua oikuaa uka ma rire nhandererek ore rupi ve'   nhandekuai.

<sup>26</sup> Mba'eta pe   kuery voi Cristo Jesus re pejerovia vy Nhanderuete ra'y kuery pendekuai.

<sup>27</sup> Mba'eta Cristo re penhemongarai uka va'ekue ha'e javi ma Cristo py avi penhemonde.

<sup>28</sup> Ha'e nunga rupi jipovei 'r   judeu ha'e grego, escravo ha'e escravo e'  , avakue ha'e kunhague, mba'eta Jesus Cristo re vy ha'e javive pete   regua anho nhandekuai.

<sup>29</sup> Ha'e rami vy Cristo pegua peiko vy pe   kuery voi Abra  o ramymino kuery pendekuai, ha'e ijayvuague peupity avi agu   rami guive pendekuai.

## 4

### *Cristo re vy Nhanderuete ra'y kuery jaikoa re ijayvua*

<sup>1</sup> Aipoa'e: nguu gui ta'y kuery mba'emo ojopy agu   rami ikuai va'e ma kyr  gue teri ikuia ja escravo rami ete 'r   ikuai, opa mba'e ha'e kuery pe guar   o   te  .

<sup>2</sup> Ha'e rami vy imbo'ea ha'e hexe opena va'e kuery oipotaa rami 'r   ikuai, tuu oa'angaague   ra nova  i teria ja.

<sup>3</sup> Nhande kuery voi ha'e rami avi nhandekuai va'ekue. Kyr  gue rami teri nhandekuai jave escravo rami nhanemoingoa va'ekue ko yvy regua oikuaa rami rive.

<sup>4</sup> Ha'e gui oa'angaague   ra ova   ramo Nhanderuete ombou Gua'y ae kunha gui oiko agu  , lei rupi guar  ,

<sup>5</sup> lei rupi nhandekuaiague gui nhandereraa jepe vy ta'y kuery ete nhanemoingo agu  .

<sup>6</sup> Ha'e gui ta'y kuery jaiko ramo nhandepy'a re Nhanderuete ombou Gua'y Nhe'  , ojapukai vy "Xeru, Xeru" he'i va'er  .

<sup>7</sup> Ha'e nunga rupi escravo ve'  , ta'y kuery ma peiko. Gua'y kuery Nhanderuete penemoingo rire ixugui mba'emo por   pejopy agu   rami pendekuai.\*

### *Gueko ymague ae rupi ju ojevyxea re ijayvuague*

<sup>8</sup> Ymave rupi Nhanderuete peikuua e'   mbove escravo rami pendekuai teri va'ekue Nhanderuete ramigua kuery pe rive.

<sup>9</sup> A   ma peikuua ma Nhanderuete, ha'e ranhe pendekuaa rire. Mba'e re tu ha'vy pejevyxe ju mba'emo ipo'aka e'   ha'e ovare'   va'e re, ha'e nunga pegua escravo ju pendekuaixe vy?

<sup>10</sup> Mba'eta amongue   ra pemboeteve 'r   joegui, amongue jaxy, mba'emo oiko agu     ra ha'e amongue ma'et   guive.

<sup>11</sup> Ha'e ramo xee akyje pe   kuerya rupi amba'apoague ndovarevei gui.\*

### *Paulo ndoikuuai reia re ijayvuague*

<sup>12</sup> Xee rami avi pendekuai 'r  gue, mba'eta xee voi pe   rami aiko.\* Irm  o kuery, po rami anho ajerure, mba'eta xevy pe mba'eve py ndapejapo vai.

<sup>13</sup> Jypy'i p  vy ayvu por   amombe'u jave xemba'eaxy ete va'ekue, pe   peikuua por  .

<sup>14</sup> Xee aiko axya pe   kuery pe voi haxy ete va'ekue peropo'aka agu  . Ha'e ramive ma pe   kuery ndaxerexaxe e'  i, ndaxerayvu e'  i guive. Ha'e rami 'r  gue py xemova   por   va'ekue Nhanderuetea guigua anjo rami, Jesus Cristo rami ete.

\* **3:24** Romanos 10.4 \* **4:7** Romanos 8.14-17 \* **4:11** Colossenses 2.16,17 \* **4:12** Paulo ma judeu va'eri judeu e'   va'e reko rami oiko ombo'ea rupi (1 Corintios 9.21,22).

15 Ha'e gui aŷ ma mba'exa tu nōvei ri pendekuai porāague? Xee aipoa'e porā: Ha'eve va'e rire penderexa ae penō 'rāgue raka'e xevy peme'ẽ aguã.

16 Ha'e gui aŷ ma anhetē va'e rupi xee romongeta vy nda'u penderovaigua ju ri aiko?

17 Ha'e rā amboae kuery ma pendererory merami rive xegui pendererovapaxē vy, ha'e kuery re ju peo aguã.

18 Ha'eve avi iporā va'e re peo aguã, pendereve xee aiko jave anho e'ŷ.

19 Xera'y kuery, peẽ kuery re nda'evei aiko imemby raxy va'e rami, pendere Cristo reko ojekuaai porā e'ŷa ja.

20 Ha'eve va'e rire aŷ voi xee avaẽ 'rāgue peẽ kuerya py amboae rami ju xeayvu aguã, mba'eta ndaikuuai rei peẽ kuery reko.

### *Sara ha'e Agar rekokue re ombojojaague*

21 Lei rupi rive pendekuaixe va'e, pemombe'u xevy: Ndapeikuaai ri ty'y lei re oĩ va'e?

22 Mba'eta ipara oiny: "Abraão oguerekō mokoõ gua'y. Peteĩ ma kunha escrava pi'a, ha'e rā amboae ma escrava e'ŷ pi'a raka'e."†

23 Escrava pi'a ma to'o gui rive itui'i. Ha'e rā escrava e'ŷ pi'a ma Nhanderuete ijayvuague rami vy itui'i.

24 Ha'e nunga oiko raka'e jaikuuai pota aguã, mba'eta ha'e va'e kunhague ma mokoõ ayvu nhanderekorā oeja pyre rami. Peteĩ ayvu ma Sinai yvyty re oeja, escravo rami nhanemoingo va'e. Ha'e va'e ma Agar.‡

25 Mba'eta Agar ma Arábia regua Sinai yvyty rami, ha'e Jerusalém tetā aŷguā rami guive oiko, mba'eta ha'e pygua kuery escravo rami meme teri ikuai.

26 Ha'e rā Jerusalém yvategua pygua kuery ma escravo e'ŷ ikuai. Ha'e va'e ae ma nhandexy.

27 Mba'eta ipara oiny: "Nememby e'ŷ va'e, kyrī va'e reikuavā e'ŷ teri va'e, evy'a ke. Kyrī va'e raxy rendu e'ŷ teri va'e, enhendu atā ke revy'a vy, mba'eta ome reve oiko va'e memby kuery gui hetave 'rā ikuai kunha oeja pyre memby kuery."\*

28 Ha'e gui irmão kuery, peẽ ma Isaque itui'iague rami avi Nhanderuete ijayvuague rami vy peiko.

29 Yma guare rami to'o gui itui'i va'ekue ma opu'ã rei raka'e Nhe'ẽ gui itui'i va'ekue re. Ha'ekue ramigua ae aŷ voi oiko.

30 Ha'e rami teĩ ipara re oĩ: "Eipe'a ke escrava ipi'a reve, mba'eta nda'evei escrava e'ŷ pi'a rami avi escrava pi'a ojopy aguã mba'emo."\*

31 Ha'e rami vy irmão kuery, nhande ma escrava memby kuery e'ŷ, ha'e rā escrava e'ŷ memby kuery nhandekuai.

## 5

### *Lei rupi nhandekuai 'rāgue py Cristo re anho jajerovia aguã re ijayvua*

1 Escravo ve'ŷ nhandekuai aguã ae Cristo nhandereraa jepe. Peĩ atā ke ha'vy escravo penhemingo uka jevy e'ŷ aguã.\*

2 Mba'eta xee Paulo aipoa'e pêvy: Pendepire pemboi uka ramo Cristo pendereraa japeague ndovarei 'rā.

3 Teigue ju aipoa'e pavē pe: Opire omboi uka va'ekue ma lei re oĩ va'e ha'e javi ojapo aguã rami ikuai.

4 Peẽ kuery lei re penhea'ãa rupi penhemboeko porā ukaxe va'e, pejep'e a ma Cristo gui, ha'e penemboaxyague peja guive.

† 4:22 Abraão ma mokoõ kunha re omenda raka'e, gua'yxy ae'i Sara re, ha'e gui escrava Agar re guive, Nhanderuete oipotaa rami e'ŷ teĩ. Sara pi'a ma Isaque, ha'e rā Agar pi'a ma Ismael (Gênesis 16 ha'e 21). ‡ 4:24 Sinai yvyty re ma lei judeu kuery rekoraõ oeja raka'e. Ha'e va'e rupi onhea'ãa va'e ma escravo rami meme ikuai (Êxodo 20; Hebreus 12.18-29). \* 4:27 Isaías 54.1 \* 4:30 Gênesis 21.10 \* 5:1 João 8.32,36

<sup>5</sup> Mba'eta ore ma Nhe'ẽ rupi vy rojerovia reve roarõ roikovy teko porã ome'ẽ mbyrã.  
<sup>6</sup> Mba'eta Cristo Jesus re nhandekuai ramo mba'everã ndovarei nhandepire nhamboi ukaague, neĩ nhamboi uka e'ŷa voi. Ovare va'e ma jajeroviaa nhandeporayvua rupi jaexa uka va'e anho.

<sup>7</sup> Peẽ kuery pendekuai porã va'ekue. Mava'e tu pendejoko ra'e anhetẽ va'e rupi pendekuai ve'ŷ aguã?

<sup>8</sup> Mba'eta ha'e rami aguã ma penerenoĩare gui e'ŷ ou.

<sup>9</sup> Trigo mbovua minha ruxã'i teĩ mesa ha'e javi 'rã omoeakuãmba.

<sup>10</sup> Ha'e rami teĩ xee ma Senhor rupi vy ajerovia amboae rami rei peikuaa e'ŷ aguã. Ha'e rã penemoangeko reia mava'e rã rei opaga 'rã.

<sup>11</sup> Ha'e gui irmão kuery, xee ma nhandepire nhamboi uka aguã re teri anhombo'e va'e rire mba'exa 'rãgue tu ha'vy xembojexavai reia? Ha'e rami anhombo'e va'e rire ha'e kuery ndojou vaivei 'rãgue kuruxu re Cristo ojuka ukaague amombe'u rã.

<sup>12</sup> Ha'eveve 'rãgue penemoangeko reia kuery ha'e kuery ae onhekxyximba va'e rire.

### *Escravo ve'ŷ ma jaiko vy nhandeporayvu aguã re ijayvua*

<sup>13</sup> Mba'eta peẽ irmão kuery, escravo ve'ŷ pendekuai aguã Nhanderuete penerenoĩ. Ha'e rami avi escravo ve'ŷ pendekuaia rupi nda'evei to'o oipotaa rami pendekuai aguã, ha'e rã pejoayvua rupi 'rã pendekuai peteĩ-teĩ rembiguai rami.\*

<sup>14</sup> Mba'eta lei re oĩ va'e ha'e javi 'rã jajapo peteĩ'i ayvu rupi nhandekuai vy: "Peayvu peneirũ peẽ ae pejeayvua rami" he'iague.\*

<sup>15</sup> Ha'e rami teĩ jomeme pejoxu'u ha'e penhomboi-mboi ri vy penheangu ke peẽ ae penhomomba e'ŷ aguã.

### *To'o rembiapo ha'e Nhe'ẽ guigua re ijayvua*

<sup>16</sup> Ha'e nunga rupi aipoa'e: Pendekuai Nhe'ẽ re. Ha'e vy 'rãe ndapejapo to'o oipota va'e.

<sup>17</sup> Mba'eta to'o oipota va'e ma Nhe'ẽ ndoiptai, ha'e Nhe'ẽ oipota va'e ma to'o ndoiptai, joo ramigua e'ŷ vy. Ha'e nunga rupi ae ndapejapo kuaai peipota va'e.

<sup>18</sup> Ha'e rã Nhe'ẽ ri pendererekro ramo lei guy py ve'ŷ pendekuai.\*

<sup>19</sup> Ha'e gui to'o guigua ma jaikuua pavẽ: tavy reia, teko ky'a, jajejoko e'ŷa,

<sup>20</sup> mba'emo ra'angaa re jajeroviaa, mba'evyky, joe nanhandea'eia, joe nhapu'ã reia, takâte'ŷ, joupe nhandevai reia, nhandeyvate reixea, joegui jaja'oa, joo rami e'ŷ-e'ŷ nhandekuaia,

<sup>21</sup> jajojou vai reia, jaka'u reia, jakaru guaxua rupi nhandekuaia, ha'e ramigua anho. Ha'e nunga re pêvy xeayvu ae ma va'ekue, ha'e aŷ ma amombe'u porãve ju: Ha'e rami ikuai va'e ma Nhanderuete po'akaa pyguarã e'ŷ.

<sup>22</sup> Ha'e rã Nhe'ẽ guigua ma povae: mborayvu, vy'a, mby'a porã, jajogueropo'akaa, joupe jajapo porãa, nhanhopytyvõa, ojeroviapy jaikoa,

<sup>23</sup> nhandevai rive e'ŷa ha'e jajejokoa. Ha'e ramigua jokoarã lei jipoi.

<sup>24</sup> Ha'e Jesus Cristo pegua ikuai va'e ma kuruxu re ojuka avi ma to'o opa marã rei oipota va'e.

<sup>25</sup> Nhe'ẽ re vy jaikove rire Nhe'ẽ reve ae tema nhandekuai.

<sup>26</sup> Nda'evei jajejou porã rei aguã, nhanhombopoxy ha'e jajojou vaia rupi.

## 6

### *Nhanhopytyvõ ha'e nhandejee ae jaikuuaa pota aguã re ijayvua*

\* <sup>5:13</sup> Romanos 6.18,19; 1 Pedro 2.16,17    \* <sup>5:14</sup> Levítico 19.18    \* <sup>5:18</sup> Romanos 8.1-9

<sup>1</sup> Irmão kuery, amongue ha'eve e'ŷa rami oiko rã oexaa ramo peẽ Nhe'ẽ reve pendekuai va'e pemongeta 'rã, pendevai e'ŷ re. Penheangu ke guive peẽ voi penhembotavy uka e'ŷ aguã.

<sup>2</sup> Peraa ke peteĩ-teĩ voyi. Ha'e rami vy 'rãe Cristo guigua lei rupi pendekuai.\*

<sup>3</sup> Ha'e rã amongue heko porãve e'ŷ teĩ ojeupe "Xereko porã" he'i vy ha'e kuery ae ojekore.

<sup>4</sup> Peteĩ-teĩ peikuaa pota peẽ ae penderekoo re. Ha'e rami vy 'rãe pejererovy'a aguã ha'eve, amboae kuery reko re peikuaa pota rei nda'eit.

<sup>5</sup> Mba'eta peteĩ-teĩ ogueraa 'rã ovoyi ae.

### *Mba'emo nhanhotŷague gui nhamono'õ ju 'rãa re ijayvua*

<sup>6</sup> Ayvu porã re penembo'ea rã opa mba'e porã pemboja'o 'rã penembo'ea kuery pe.

<sup>7</sup> Pejekore eme pova'e nunga re, mba'eta Nhanderuete ndojejojai ukai 'rã, mba'eta nhanhotŷague gui ae ju 'rã nhamono'õ.

<sup>8</sup> To'o guigua onhotŷ rire to'o gui ju 'rã omono'õ imombaarã. Ha'e rã Nhe'ẽ guigua ri onhotŷ rire ma Nhe'ẽ gui ae ju 'rã omono'õ tekove marã e'ŷ.

<sup>9</sup> Japytu'u rive eme joupe jajapo porãa gui, mba'eta oa'angaague ára nhamono'õ 'rã hekobia, ndajajepe'ai rire.

<sup>10</sup> Ha'e nunga rupi ha'eve jave jajapo porã 'rã pavẽ pe, nhandereveguia ojerovia va'e kuery pe katuve ma.\*

### *Cristo kuruxu regua anho Paulo oguerovy'aa re ijayvuague*

<sup>11</sup> Pexa ke ipara tuvixa rei va'e xepo py ae ambopara va'ekue.

<sup>12</sup> Ha'e gui to'o re onhemboyvatevexe va'e kuery onhea'ã 'rã pendepire pemboi uka aguã re. Ha'e ramigua oipota onhembojexavai uka e'ŷ aguã, mba'eta Cristo kuruxu regua omombe'u va'e rire ombojexavaia ae 'rãgue.

<sup>13</sup> Ha'e rami avi opire omboi uka va'ekue voi ndojapopai 'rã lei re oña, ha'e rami teĩ ha'e kuery onhea'ã pendepire pemboi uka aguã re, ha'e nunga re ojererovy'a rei aguã.

<sup>14</sup> Ha'e rã xee ma mba'eve rei ndarovy'ai kuruxu re nhande-Senhor Jesus Cristo omanoague e'ŷ vy.\* Mba'eta kuruxu re ma yvy regua reko omano ae ma xevy, ha'e xee voi amano avi yvy regua reko pe.

<sup>15</sup> Mba'eta nhandepire nhamboi ucaa, ha'e nhamboi uka e'ŷa voi mba'e'ŷ, hemimoingo pyau jaikoa anho ovare.

<sup>16</sup> Tove ha'e rami ikuai va'e ha'e javi toendu mby'a porã ha'e omboaxya, Nhanderuete pegua kuery Israel regua voi.

<sup>17</sup> Ha'e rami avi ndaiptavei ma avave rei xemoangeko, mba'eta xerete rupi iperepa ma Jesus káuxa.

### *Ogueroayvu porãague*

<sup>18</sup> Irmão kuery, tove penenhe'ẽ py tapendu nhande-Senhor Jesus Cristo penemboaxya. Amém.

\* **6:2** Mateus 18.15; Lucas 17.3,4; Tiago 5.19,20

\* **6:10** 2 Coríntios 9.6-15

\* **6:14** 1 Coríntios 1.22-24; 2.1,2

## Éfeso pygua kuery pe Paulo ombopara va'ekue

### Éfeso pygua kuery pe Paulo ombopara va'ekue

Kova'e kuaxia ma Jesus remimbo'e kuery Éfeso tetā pygua pe apóstolo Paulo ombopara va'ekue. Ha'e kuery pe omombe'u porāve nhandevy peguarā Nhanderuete oguerekva'e, araka'eve rā guarā guive, Ta'y Jesus re nhaī rā. Aipoe'i: "Tove Nhanderuete nhande-Senor Jesus Cristo Ru va'e re ta'ima'endu'a porāa, mba'eta Cristo re nhanemoī vy yva re opa mba'e porā Nhe'ē guigua ome'ē nhandevy. Mba'eta yvy onhono e'ŷ mbove ma voi Cristo re nhanemoī vy ojeupe guarā nhandeporavo raka'e, henonde rupi iky'a e'ŷ ha'e otekoavy e'ŷ va'e nhandekuai aguā" (1.3-4). Jesus re jajerovia va'e ma iky'a e'ŷ va'erā ojogua pyre nhandekuai, Nhanderuete pegua templo rami, ha'e Jesus rete rami guive.

Paulo ijayvu avi Nhanderuete nhanderayvu etea re. Aipoe'i: "Mba'eta jajerovia rā nhanemboaxy py ae nhandereraa jepe. Ha'e nunga ma nhandegui ae e'ŷ ou, Nhanderuete ome'ē rive. Nhande ae nhanhea'āa rupi e'ŷ guive ou, avave rei ojejou porā rei e'ŷ aguā" (2.8-9). Ha'e rami rire amboae kuery reve peteī rami nhandekuai aguā, Nhe'ē po'akaa rupi peteī-teī nhanhomombaraetea rupi ae.

Opaaa py Paulo aipoe'i: "Penembaraete tema Senhor re, ipo'akaa rupi ae. Pendejee pemoi Nhanderuete guigua tembiporu ha'e javi, pendere anha opu'ā rā peī atā aguā" (6.10-11).

#### *Oxarura reve ijayvu vy omboypyague*

<sup>1</sup> Xee Paulo ma Nhanderuete oipotaa rami vy Cristo Jesus pegua apóstolo aiko. Kova'e kuaxia ambou Éfeso tetā py iky'a e'ŷ va'e ha'e Cristo Jesus pegua ojeroviapy pendekuai va'e pe:<sup>\*</sup>

<sup>2</sup> Tove peē kuery tapendu Nhanderuete ha'e Senhor Jesus Cristo guigua penemboaxyha'e mby'a porā.

#### *Cristo nhandereraa jepe rā Nhanderuete nhanemoingo porāague re ijayvua*

<sup>3</sup> Tove Nhanderuete nhande-Senor Jesus Cristo Ruete va'e re ta'ima'endu'a porāa, mba'eta Cristo re nhanemoī vy yva re opa mba'e porā Nhe'ē guigua ome'ē nhandevy.

<sup>4</sup> Mba'eta yvy onhono e'ŷ mbove ma voi Cristo re nhanemoī vy ojeupe guarā nhandeporavo raka'e, henonde rupi iky'a e'ŷ ha'e otekoavy e'ŷ va'e nhandekuai aguā. Nhanderayvu vy

<sup>5</sup> nhandeporavo ma voi va'ekue gua'y kuery ae nhanemoingo aguā. Ha'e ae oipotaa rami vy nhanemboaxy Jesus Cristo rupi,\*

<sup>6</sup> nhanemboaxy ramo pavē oguerovy'a aguā. Ha'e rami nhandekuai aguā ome'ē rive, gua'y oayvu va'e re nhanemoī vy.

<sup>7</sup> Hexe nhanemoī vy nhandejogua raka'e jajejavyague gui, mba'eta nhanemboaxy ete vy huguy py omboguepa.

<sup>8</sup> Ha'e nunga Nhanderuete ombou nhandere opa marāgua 'arandu reve, jaiko kuaa aguā.

<sup>9</sup> Nhandevy oikuua uka avi ha'e ae oipotaa rami mba'emo ojapo aguā ndoikuua ukai va'ekue. Ha'e va'e ma nhanemboaxy rupi ojapo uka 'rā Cristo pe,

<sup>10</sup> oa'angaague ára ovaē rā ojapo aguā opa mba'e re Cristo ipo'aka aguā rami, yva ha'e yvy re ikuai va'e ha'e javi re.

<sup>11</sup> Cristo re nhanemoī vy nhandeporavo raka'e ojeupe guarā. Ha'e ae oipotaa rami vy opa mba'e omoingoague rami avi ha'e rami nhandeapo onhembopy'a ma voiague rami,

\* <sup>1:1</sup> Atos 19.1-40, 20.17-35 \* <sup>1:5</sup> Romanos 8.28-30; 1 Pedro 1.2

<sup>12</sup> ha'e rami nhandekuaia pavē oikuaa vy oguerovy'a aguā hexakāmbaa, yma guive ore kuery Cristo roarōa rupi orekuia re guive.\*

<sup>13</sup> Ha'e gui peē kuery voi penemoī avi Cristo re. Mba'eta pendereraa jepea regua ayvu porā anhetē va'e pendu vy hexe pejerovia ramo pendere omoī ikuaa ukaarā, Nhe'ē Ky'a E'ŷ ombou 'rā va'ekue ae.\*

<sup>14</sup> Mba'eta nhandere Onhe'ē omoī rire jaikuua nhandevy guarā oguerekoo va'e ha'e javi jajopy 'rāa. Ojeupagua eterā nhandereraa jepea ára ome'ē 'rā nhandevy, hexakāmbaa oguerovy'aa pavē aguā.

### *Ojerovia va'e kuery re Paulo ojerureague*

<sup>15</sup> Ha'e nunga rupi xee voi arov'y'a, omombe'ua rā aendu vy Senhor Jesus re pejeroviaa ha'e iky'a e'ŷ va'e kuery ha'e javi peayvua.

<sup>16</sup> Ha'e rami vy anhembo'e nhavō pendere xema'endu'a vy arov'y'a Nhanderuete.

<sup>17</sup> Ha'e rami vy ixupe ajerure pendere omoīve aguā pene'arandurā peikuua ete aguā Nhanderuete nhande-Senhor Jesus Cristo Ru hexakāmba va'e.

<sup>18</sup> Tove pendepy'a py tapenemoexakā peikuua aguā mba'e pearō aguā pa penerenoīague, iky'a e'ŷ va'e kuery mboae reve opa mba'e porā pejopy avi va'erā,

<sup>19</sup> ha'e opa mba'e re ipo'akaa, hexe jajerovia va'e pe oexa uka rā peikuua avi aguā.

<sup>20</sup> Mba'eta opo'akaa oexa uka raka'e Cristo omanoague guiomboete jevy vy. Ha'e gui yva re ju omboguapy imoiny oiporu kuaa regua re,

<sup>21</sup> huvixa ikuai va'e áryve oī aguā, joguerekooa kuery, mba'emo re ombopo'aka ha'e opena uka pyre kuery áryve, aŷgua ha'e raka'eve rā ikuai va'e áryve guive.\*

<sup>22</sup> Mba'eta ipy guýry opa mba'e omoī, ha'e opa mba'e akārā omoī vy igreja kuery pe ome'ē.\*

<sup>23</sup> Mba'eta igreja kuery ma hete.\* Igreja kuery reve anho 'rā Cristo regua oīmba, hexeve anho opa mba'e oīmbaa rami avi.

## 2

### *Nhanemboaxy vy nhandereraa jepeague re ijayvua*

<sup>1</sup> Pendevy pe voi ome'ē tekove, pendeko vai ha'e pejejavya rupi vy omanogue rami pendekuai va'ekue ri.

<sup>2</sup> Mba'eta ha'e rami anho pendekuai va'ekue yvy regua reko rami, arai guy rupi nhe'ē vai ipo'aka va'e, Nhanderuete onhe'ē rendu e'ŷ va'e kuery rerekooa va'e oipotaa rami rive.

<sup>3</sup> Ha'e rami nhande kuery pavē nhandekuai va'ekue to'o oipotaa rami. Mba'eta to'o oipota rami ha'e nhande ae nhandepy'aa rupi rive nhandekuai va'ekue. Amboae kuery rami avi japaga aguā rami nhandekuai va'ekue, ha'e rami ete nhanderoko va'e vy.

<sup>4</sup> Ha'e rā Nhanderuete opa ma mba'e py nhanemboaxy ha'e nhanderayvu ete vy

<sup>5</sup> omanogue rami nhanderoko vaiague py teri nhandekuai va'ekue ri nhande avi nhanemoingove ju Cristo reve, mba'eta nhanemboaxy ramo ae jaa jepe.

<sup>6</sup> Cristo Jesus reve nhanemoingove ju vy hexe vy nhanemboguapy avi yva re,

<sup>7</sup> raka'eve rā oexa uka aguā Cristo Jesus re vy nhanemboaxy etea ha'e nhanderayvua.

<sup>8</sup> Mba'eta jajerovia rā nhanemboaxy py ae nhandereraa jepe. Ha'e nunga ma nhandegui ae e'ŷ ou, Nhanderuete ome'ē rive.

<sup>9</sup> Nhande ae nhanhea'āa rupi e'ŷ guive ou, avave rei ojejou porā rei e'ŷ aguā.\*

<sup>10</sup> Mba'eta nhande ma Nhanderuete rembiapo jaiko. Cristo Jesus re nhanemoingove ju iporā va'e jajapo jaikovy aguā, ha'e rupi nhandekuai aguā yma ma voi omoī rire.

---

\* **1:12** Apy ma "Ore" he'ia ma judeu kuery re ijayvu vy. \* **1:13** 2 Coríntios 1.21,22 \* **1:21** Filipenses 2.9-11; Colossenses 2.9,10 \* **1:22** Salmo 8.6 \* **1:23** Efésios 4.11-16; Romanos 12.4,5; 1 Coríntios 12.12-27 \* **2:9** Romanos 3.19-24; 5.6-8; Tito 2.11-3.7

*Cristo kuruxu gui judeu kuery ha'e amboae regua joegua meme ikuiaia re ijayvua*

<sup>11</sup> Ha'e nunga rupi peẽ judeu e'ŷ va'e ke penema'endu'a yma rupi pendero'o re pendekuaiague re. Pendevy pe judeu kuery "Opire omboi uka e'ŷ va'e" he'i, ha'e kuery ojeupe ma "Opire omboi uka va'e" he'i okuapy teĩ avakue po py rive omboi uka.

<sup>12</sup> Ha'e va'e jave ma Cristo reve'ŷ pendekuai va'ekue, Israel regua e'ŷ guive. Neĩ ndapeikuaai va'ekue Nhanderuete mba'emo porã ome'ẽ aguã re ijayvu vy guexeve guarã ojapoague. Mba'eve ndaperekoi va'ekue pearõ aguã, mba'eta Nhanderuete revegua e'ŷ pendekuai va'ekue yvy re.\*

<sup>13</sup> Yma Nhanderuetea gui mombyry pendekuai va'ekue ri aŷ ma Cristo Jesus re vy penemonhemboja ma, Cristo ruguy rupi ae.

<sup>14</sup> Mba'eta ha'e va'e ae ma peteĩ rami nhanemoingo, mba'eta mokoĩ regua gui peteĩ'i nhanemoingo.\* Ha'e vy oity nhanembyte kora nhanemboja'oarã hi'aĩ va'ekue. Ha'e va'e ma joe nanhandea'eague.

<sup>15</sup> Ngo'o reve vy ombovaipa raka'e lei re ojapo uka pyre ha'e ndojapo ukai pyre oĩa. Mokoĩ regua gui peteĩ regua pyau omoingo, ojee ae nhanemoingo vy. Ha'e rami vy peteĩ rami nhanemoingo.

<sup>16</sup> Mokoĩve regua nhandereru ju Nhanderuete re, peteĩ'i tete nhandekuai aguã. Kuruxu re omano vy oipe'apa raka'e ndajajoayvui reiague.

<sup>17</sup> Ha'e gui ou vy oikuua uka peteĩ rami ju nhanemoingopa aguã, peẽ ixugui mombyry pendekuai va'ekue, ha'e'i rupi orekuai va'ekue guive.

<sup>18</sup> Mba'eta hexe vy mokoĩve regua ha'eve Nhanderuete re nhanhemboja aguã, peteĩ'i Nhe'ẽ rupi.

<sup>19</sup> Ha'e nunga rupi amboae regua ve'ŷ, amboae guigua ve'ŷ ma pendekuai. Ha'e rami 'rãgue py iky'a e'ŷ va'e kuery reve joegua, Nhanderuete ro pygua kuery ae pendekuai.

<sup>20</sup> Ha'e va'e oo ytara ma apóstolo ha'e profeta kuery ranhe omoĩ raka'e, ha'e gui peẽ kuery ju penemoĩ vy ojapove heravy. Cristo Jesus ae ita omboeteve pyrã oĩ.

<sup>21</sup> Hexe vy oo ha'e javi joo'i rami oĩ vy yvateve ovy, templo Senhor peguarã.\*

<sup>22</sup> Cristo re vy peẽ kuery voi joo'i rami penemoĩ ramo Nhanderuete Onhe'ẽ rupi oĩ atyrã pepyta.

### 3

*Amboae regua kuery oo jepea re ijayvua*

<sup>1</sup> Ha'e nunga rupi aŷ xee Paulo ma Cristo Jesus káuxa aĩ nhuã py, peẽ judeu e'ŷ va'e kuery ayvu vy.

<sup>2</sup> Mba'eta peẽ kuery pendu ma nhi'ã Nhanderuete xemboaxy vy xemoĩague pendevy pe ayvu amombe'u aguã.\*

<sup>3</sup> Mba'eta xevy pe oikuua uka karamboae ndoikuua ukai va'ekue. Ha'e va'e ma mboapy ayvu'i py pêvy amboparaague.

<sup>4</sup> Ha'e gui ambopara va'ekue peroayvu vy peikuua avi 'rã Cristo regua oikuua uka e'ŷ pyre xevy pe ranhe oikuua uka va'ekue.

<sup>5</sup> Ymagua kuery pe ma ha'e nunga ndoikuua ukai va'ekue. Ha'e gui aŷ ma Onhe'ẽ rupi ae oikuua uka iky'a e'ŷ va'e apóstolo ha'e profeta kuery pe.

<sup>6</sup> Ha'e va'e ma povae: peẽ kuery judeu regua e'ŷ voi ore judeu kuery reve nhandevy pavẽ pe Nhanderuete ome'ẽ 'rã mba'emo porã, ha'e gui peteĩ'i tete nhanemoingo pavẽ, ha'e ijayvuague jajopy pavẽ aguã rami nhanemoingo guive, Cristo Jesus regua ayvu porã oĩa rami vy.

\* <sup>2:12</sup> Colossenses 1.21,22 \* <sup>2:14</sup> "Mokoĩ regua" he'ia py ma judeu kuery ha'e amboae regua re ijayvu vy, mba'eta Jesus pegua joegua e'ŷ-e'ŷ nhandekuai teĩ peteĩ'i regua nhanemoingo (Gálatas 3.26-28). \* <sup>2:21</sup> 1 Coríntios 3.16,17;

1 Pedro 2.4,5 \* <sup>3:2</sup> Romanos 15.15,16; Colossenses 1.25-27

<sup>7</sup> Ha'e va'e mombe'uarã ae Nhanderuete xemoõ. Xemboaxy rupi xemoõ opo'akaa oexa uka vy.

<sup>8</sup> Xee ma iky'a e'ŷ va'e kuery pavẽ gui xe'yvyīve va'eri Nhanderuete xemboaxy vy xemoõ karamboae amboae regua kuery pe ayvu porã amombe'u aguã. Ha'e va'e oĩ rami vy opa mba'e porã jaikuaa e'ŷ va'e regua Cristo re anho oĩ.

<sup>9</sup> Xemoõ karamboae amombe'u aguã mba'emo oiko va'erã, Nhanderuete opa mba'e apoare va'e yma rupi onhembopy'aague ndokuaa ukai teri va'ekue ojeupity rã.

<sup>10</sup> Mba'eta aŷ gui ma igreja kuery ikuiaia rupi Nhanderuete ha'ekue-'ekue'i rami e'ŷ oexa uka 'rã o'arandua. Yva pygua huvixa kuery ha'e ipo'akakueve ikuai va'e pe voi oikuaa uka 'rã,

<sup>11</sup> mba'eta jypy guive oipotaa rami ae onhembopy'a ojapo aguã Cristo Jesus nhande-Senor rupi.

<sup>12</sup> Ha'e rami rire hexe vy nhandepy'a guaxu Nhanderuete re nhanhemboja aguã, mba'eta aŷ jaikuaa ete hexe jajerovia ramo nhanemboaxy.

<sup>13</sup> Ha'e nunga rupi pendere vy aiko axya omombe'ua rã pendu teĩ ndaipotai pendekuerai, mba'eta pevy'ave aguã ae aiko axy.

### *Peteĩgue ju Paulo onhembo'eague*

<sup>14</sup> Ha'e nunga rupi Nhanderuete renonde xerenapy'ã re aĩ.

<sup>15</sup> Hery rupi ae yva ha'e yvy re ha'e javi regua ikuai va'e omboerya.

<sup>16</sup> Opa mba'e porã oguerekva'e vy ixupe ajerure pendepy'a re Inhe'ẽ oĩ va'e rupi penemombarae aguã,

<sup>17</sup> ha'e rami py pejerovia rã pendepy'a re Cristo oiko aguã. Ha'e gui mborayvu re penembarae ha'e peĩ atã vy

<sup>18</sup> iky'a e'ŷ va'e kuery ha'e javi reve peikuaa aguã Cristo nhanderayvua tuvixa etea, mba'eta ipy ete, ipuku, yvate ha'e yvy katy oo.

<sup>19</sup> Ha'e rami vy peikuaa aguã nhanderayvua, ndajaikuaapai va'e teĩ, Nhanderuete re oĩ va'e ha'e javi pendere voi oĩ aguã.

<sup>20</sup> Nhanderuete ma opa mba'e py ipo'akapa va'e vy ojapo jajerurea ha'e nhaexa'ãa áryve voi, nhandere opo'akaa oĩ va'e rupi ae.

<sup>21</sup> Tove igreja kuery ikuiaia rupi ixupe toporaeia, ha'e Cristo Jesus re vy guive, aŷ ha'e araka'e rã peve. Amém.

## 4

### *Peteĩramijajeroviaaguãreijayvua*

<sup>1</sup> Senhor káuxa nhuã py aĩa py po rami xee romongeta: Nhanderuete ojeupe guarã penerenoĩ rire ha'ekue rami ae ke pendekuai.

<sup>2</sup> Pendekuai rive'i, ha'eve vai'i. Pendevai rei eme. Mborayvu re pejogueropo'aka peteĩ-teĩ.

<sup>3</sup> Penhea'ã pembovaipa e'ŷ aguã peteĩ rami Nhe'ẽ penemoingoa, jomeme pendekuai porã vy.\*

<sup>4</sup> Mba'eta peteĩ'i tete nhandekuai, peteĩ Nhe'ẽ oiko ha'e peteĩ'i guive pearõ pekuapy va'e, ha'e rami aguã penerenoĩ rire.\*

<sup>5</sup> Oiko peteĩ'i Senhor, peteĩ'i rami jajerovia aguã, peteĩ'i nhanhemongarai aguã,

<sup>6</sup> peteĩ'i Nhanderuete nhande kuery ha'e javi Ru va'e. Ha'e ma ha'e javi re ipo'aka, ha'e javi rupi ombo'eapo, ha'e javi re oĩ.

### *Iky'a e'ŷ va'e kuery mba'emo ojapo aguã re ijayvua*

\* **4:3** Filipenses 2.1-4; Colossenses 3.12-15 \* **4:4** Romanos 12.4,5; 1 Coríntios 12.12,13

- <sup>7</sup> Ha'e rami avi nhanemboaxya rupi peteĩ-teĩ pe ome'ẽ nhanerembiaporã. Cristo ae ome'ẽxea rami ome'ẽ.\*  
<sup>8</sup> Ha'e nunga rupi ipara re oĩa py "Yvate ojeupi vy heta ogueraa guembiguairã ojopy va'ekue, ha'e avakue pe ome'ẽ hembiaporã", he'i va'ekue.\*  
<sup>9</sup> Ha'e gui "Ojeupi" he'ia py jaikuua yvy guýry peve oguejy ranheague,  
<sup>10</sup> mba'eta oguejy va'ekue ae ma ojeupi ju yva ha'e javi áry, opa mba'e re oĩ aguã.  
<sup>11</sup> Ha'e gui amongue pe ome'ẽ apóstolo ikuai aguã, amboae pe ma profeta ikuai aguã, amboae kuery pe ma ayvu porã mombe'ua rupi ikuai aguã, amboae kuery pe ma igreja re opena, e'ŷ vy nhombo'ea rupi ikuai aguã.  
<sup>12</sup> Ha'e rami vy ombo'e uka porãmba iky'a e'ŷ va'e kuery peteĩ-teĩ guembiapo ojapo kuaa aguã rami. Ha'e rami vy Cristo rete omombaraeeteve aguã,  
<sup>13</sup> peteĩ rami meme jajerovia ha'e Nhanderuete Ra'y jaikuua ete peve. Ha'e rami vy 'rãe kakuaakue rami nhandekuai, Cristo rami ete nhandekuai peve opa mba'e py,  
<sup>14</sup> kyrigue rami ve'ŷ nhandekuai aguã, opa marã rei nhanembo'e va'e yvytu rami nhandereraa rã ha'ekue'ŷ-kue'ŷ katy rive jaa e'ŷ aguã. Mba'eta ha'e kuery ma avakue 'arandua rami rive 'rã nhanembo'e, ijayvu kuaa vy nhanembotavypa 'rã guive.  
<sup>15</sup> Ha'e rami 'rãgue py anhetẽ va'e rupi ha'e mborayvu re nhandekuai vy opa mba'e py nhandeyvateve 'rã javy Cristo rami ete nhandekuaia jaupity peve, mba'eta ha'e anho nhaneakã oiko.  
<sup>16</sup> Hexe vy tete ha'e javi oĩmba porã 'rã, joo rami ikuiai py. Peteĩ-teĩ regua joo rami meme ha'e mborayvu re nhomombaraete vy ha'e javi 'rã yvateve ov.

### *Jajeko rerova aguã re ijayvua*

- <sup>17</sup> Ha'e nunga rupi aipoa'e Senhor rery rupi: Pendekuaive eme amboae regua kuery reko rami, mba'eta ha'e kuery ma ipy'aa ovare e'ŷ va'e rupi rive ikuai.  
<sup>18</sup> Ha'e kuery 'arandua ma pytumba. Mombyry ikuai Nhanderuete reko gui, inhakã ratãa rupi ae.  
<sup>19</sup> Ha'e kuery oxia noendu kuaavei vy opa marã rei ikuiai rupi ndojejokovei ma, ha'e rami anho ikuaixe vy.  
<sup>20</sup> Ha'e rã peẽ kuery ma ha'e rami e'ŷ peikuaa raka'e Cristo reko.  
<sup>21</sup> Mba'eta anhetẽ ae Jesus regua anhetẽ va'e pendu, ha'e ha'e rupi ete penembo'ea.  
<sup>22</sup> Penembo'ea pendereko ymague peja aguã re, mba'eta nhandereko ymague rupi vy nhandereko ky'ave javy nhanhemoaruãa py jajekorepa vy.  
<sup>23</sup> Ha'e gui penembo'ea penhembopyau uka aguã pendepy'a ha'e peikuaa-a py,  
<sup>24</sup> ha'e pendeko pyau py ju penhemonde aguã. Ha'e va'e ma Nhanderuete omoingo ha'e rami ete pendekuai aguã, anhetẽ guigua teko porã ha'e pendeky'a e'ŷa rupi.\*

### *Nhanderuete pe ete nhandekuai aguã re ijayvua*

- <sup>25</sup> Ha'e nunga rupi pendeapuague peja vy peteĩ-teĩ anhetẽ rupi anho pendeayvu jomeme, mba'eta peteĩ'i tete nhandekuai.\*  
<sup>26</sup> Pendevaia py teĩ pejejavu eme. Pendevaia gui pejepe'a kuerei 'rã kuaray oike e'ŷ re,\*  
<sup>27</sup> peteĩve henda py anha pe penhembotavy uka e'ŷ aguã.  
<sup>28</sup> Imonda va'ekue ta'imondave eme. Ha'e rami 'rãgue py tomba'eapo, opo py tojapo iporã va'e, iporiaukue'i oipytvõ aguã ojou aguã.  
<sup>29</sup> Pendejuru gui toẽ eme ayvu vai, ha'e rã ayvu porã anho, peteĩ-teĩ oikotevãa rami penhomombaraete aguã. Ha'e rami vy 'rã hendua kuery pe pendeayvua ojapo porã.  
<sup>30</sup> Pemomboriau eme Nhanderuete Nhe'ẽ, mba'eta opa mba'e gui pendereraa jepe aguã ára peve guarã pendere omoi, ojeupegua kuery peikoa kuaa ukaarã.\*

---

\* **4:7** Romanos 12.4-8; 1 Coríntios 12.4-11; 1 Pedro 4.10,11    \* **4:8** Salmo 68.18    \* **4:24** Colossenses 3.5-10    \* **4:25** Zacarias 8.16    \* **4:26** Salmo 4.4    \* **4:30** Gênesis 6.5,6; Salmo 78.40,41; Isaías 63.9,10

31 Pejepe'a ke pendevai reiaty gui, ha'e gui penhenhandu vaikue reia, pendepoxy reia, penhomotare'ŷa, pendeayvu vaikue reia ha'e opa mba'e vai gui.

32 Ha'e rami 'rāgue py joo rami meme pendekuai pejoayvu ha'e penhomboaxya rupi. Pejoperdoa ke, Cristo re vy Nhanderuete penderedoague rami avi.

## 5

<sup>1</sup> Ha'e nunga rupi Nhanderuete rami ete ke pendekuai, ta'y kuery hembiayvu va'e vy.

<sup>2</sup> Mborayvu re pendekuai Cristo penderayvua rami, mba'eta nhandere ojejuka uka raka'e, Nhanderuete pe guekove ae ome'ẽ heakuā porā va'e ome'ẽmby rami.

### *Hendy va'e ha'e pytū rupi ikuai va'e re ijayvua*

<sup>3</sup> Iky'a e'ŷ va'e pendekuai vy nda'evei neĩ pendeayvu aguā mba'emo vai re: tavy reia, nhemboeko ky'aa, nhomba'e re pena reia, ha'e nunga re.

<sup>4</sup> Nda'evei pendeayvu vaikue aguā, pene'arandua rupi e'ŷ pendeayvu aguā, neĩ penderoryai rei aguā. Ha'e ramigua ma nda'evei va'e meme. Ha'e rami 'rāgue py perovy'a tema Nhanderuete.

<sup>5</sup> Peikuua pota ke pova'e nunga re: Cristo ha'e Nhanderuete po'akaa ojekuaa jave peteĩve ndojejokoi rei va'e mba'eve ndojopyi 'rā, neĩ onhemboeko ky'a rei va'e, nhomba'e re opena rei va'e, mba'eta ha'e ramigua ma ta'angaa ombojerovia va'e rami meme.

<sup>6</sup> Avave rei pe penhembotavy uka eme ayvu ovare'ŷ va'e py, mba'eta Nhanderuete ombopaga 'rā nonhe'ẽ rendui va'e kuery ha'e rami ikuaiague re.

<sup>7</sup> Ha'e nunga rupi mba'eve perekō eme ha'e kuery reve.\*

<sup>8</sup> Mba'eta yma rupi, pytū rupi pendekuai va'ekue ri aŷ ma Senhor re vy hexakā va'e peiko. Pendekuai ha'vy hendy va'e ra'y kuery rami ete,

<sup>9</sup> mba'eta hendy va'e guigua ma mborayvu, teko porā ha'e anhetē va'e rupi nhandekuaia.\*

<sup>10</sup> Peikuua pota ha'vy Senhor pembovy'aa rupi pendekuai aguā.

<sup>11</sup> Mba'eve perekō eme pytū rupigua mba'emo vai apoa kuery reve, mba'eta ovare'ŷ va'e meme. Ha'e rami 'rāgue py peikuua uka nda'evei va'ea.

<sup>12</sup> Mba'eta ha'e kuery nhemi rupi ojapo va'e re nhandeayvu vy voi nhaximba 'rā.

<sup>13</sup> Mba'eta hendya py mba'emo jaikuua uka ramo ojekuaapa 'rā marā ramigua ete paa. Hendya py ojekuaa va'e ma hexakā va'e meme opyta,

<sup>14</sup> aipoe'ia rami vy: "Reke va'e, emyŷ ke, epu'ã omano va'ekue mbyte gui, ha'e gui Cristo nemoexakā 'rā."

<sup>15</sup> Ha'e nunga rupi peiko kuaa pota. Pendekuaive eme hi'arandu e'ŷ va'e rami, ha'e rā hi'arandu va'e rami anho.

<sup>16</sup> Peiporu kuaa ke ára nhavõ, mba'eta ara vai meme.

<sup>17</sup> Ha'e nunga rupi pepyta eme hi'arandu e'ŷ va'e, va'eri peikuua pota Senhor oipota va'e re.

<sup>18</sup> Peka'u eme guive vinho py, mba'eta opa marā rei nhanemoingo. Ha'e rami 'rāgue py pendere Nhe'ẽ anho tōi.\*

<sup>19</sup> Ha'e rami vy jomeme pendeayvu salmos peporaei vy. Pendep'y'a py Senhor pemboetea rupi peporaei hinos ha'e Nhe'ẽ guigua mboraei.

<sup>20</sup> Opa mba'e re Nhanderuete perovy'a riae, Senhor Jesus Cristo rery rupi.\*

<sup>21</sup> Peteĩ-teĩ oipotaa rami peiko Cristo pemboetea rupi.

### *Omenda va'e kuery reko re ijayvua*

<sup>22</sup> Ha'e rami vy kunhague ma ome oipotaa rami ta'ikuai, Senhor pe rami ete.

<sup>23</sup> Mba'eta ime kuery ma gua'yxy akā ikuai, igreja kuery akā Cristo oikoa rami avi, heraa jepea guive oiko. Ha'e va'e ma hete.

**24** Ha'e gui igreja kuery Cristo oipotaa rami ikuiaia rami avi kunhague voi opa mba'e py ta'ikuai ome kuery oipotaa rami.

**25** Peẽ ime kuery voi peayvu ke penda'yxy, Cristo igreja kuery oayvua rami avi, mba'eta igreja kuery re vy guekove ae ome'ẽ raka'e,

**26** iky'a e'ẽ va'erã omoingo aguã yy py ojoi vy, ayvu omombe'ua reve,

**27** guenonde ae igreja kuery oexa uka aguã hexakãmba va'e, ipere ha'e ixorõmba rei e'ẽ va'e, ha'e kuery re ivaikue reia, neĩ ha'e va'e regua oĩ e'ẽ aguã, ha'e rã iky'a e'ẽ anho.

**28** Ha'e rami avi ime kuery ma guete ae'i rami toayvu gua'yxy. Gua'yxy oayvua va'e ma ha'e ae ojeayvu.

**29** Mba'eta guete ae ndoayvui va'e jipoi. Ha'e rami 'rãgue py nhamongaru ha'e nhapena 'rã nhanderete re. Ha'e rami ae avi Cristo opena igreja re,

**30** hete regua nhandekuai ramo.

**31** "Ha'e nunga rupi avakue oeja 'rã nguu ha'e oxy, gua'yxy reve joguerekao aguã, mokoõ 'rãgue py pete'i to'o ikuai aguã", he'iague rami.\*

**32** Pova'e ma ndoikuua ukai pyre iporã ete va'e, mba'eta Cristo ha'e igreja re xeayvu.

**33** Ha'e rami avi peẽ kuery voi peteĩ-teĩ peayvu 'rã penda'yxy peẽ ae pejeayvua rami, ha'e kunhague voi tomboete ome.\*

## 6

### *Tuu ha'e ta'y kuery reko re ijayvua*

**1** Peẽ ta'y ha'e tajy kuery voi Senhor re vy penhe'ẽ rendu 'rã penderu ha'e pendexy, mba'eta ha'e rami vy 'rã ha'evea rami pendekuai,

**2** "Pemboete 'rã penderu ha'e pendexy", he'iague rami. Ha'e va'e ojapo uka pyre ma jypy'igua nhanemoingo porã aguã regua ayvu reve ou, po rami:

**3** "Kova'e yvy re peiko porã ha'e peikove puku aguã", he'i va'ekue.\*

**4** Ha'e gui peẽ tuu kuery ma pembopoxy rei eme penda'y ha'e penderajy kuery. Ha'e rami 'rãgue py Senhor guigua 'arandu rupi 'rã pemo'arandu ha'e pemongeta.\*

### *Escravo ha'e joguerekao kuery reko re ijayvua*

**5** Ha'e gui peẽ escravo kuery ma penhe'ẽ rendu ke pendererekao ngo'o re ikuai va'e. Pemboetea rupi pejererokyje pendepy'a ha'e javi py, Cristo pemboetea rami avi.

**6** Nda'evei pendererekao oexaa py rive pemba'eapo porã aguã, avakue rive pendererovy'a e'ẽ aguã. Ha'e rami 'rãgue py Cristo rembiguai peiko vy pendepy'a py guive pejapo Nhanderuete oipota va'e.

**7** Penekyre'ẽa py pemba'eapo, Senhor pe rami, avakue pe rive'ẽ.

**8** Mba'eta jaikuua iporã va'e rupi nhandekuai rire peteĩ-teĩ rekovia jajopy 'rãa Senhor po gui, escravo ha'e escravo e'ẽ teĩ.

**9** Ha'e gui peẽ joguerekao kuery voi, ha'e rami ae perekoo porã penembiguai kuery. Pemongyje rei eme, mba'eta peikuaa ha'e kuery Senhor ha'e pende-Senor yva re oikoa. Ha'e va'e ma peteĩ regua rive joegui oayvuve va'e'ẽ.\*

### *Nhanderuete guigua tembiporu re ijayvua*

**10** Ha'e gui ma penembaraete tema Senhor re, ipo'akaa rupi ae.

**11** Pendejee pemoõ Nhanderuete guigua tembiporu ha'e javi, pendere anha opu'ã rã peĩ atã aguã.\*

**12** Mba'eta nhande kuery re avakue e'ẽ opu'ã, ha'e rã yva regua huvixa kuery, ipo'akakueve, ko yvy pytã guy rupigua rerekao kuery, ha'e nhe'ẽ vai arai guy rupigua.

---

\* **5:31** Gênesis 2.24   \* **5:33** Colossenses 3.18,19; 1 Pedro 3.1-7   \* **6:3** Êxodo 20.12, Deuterônômio 5.16   \* **6:4** Colossenses 3.20,21   \* **6:9** Colossenses 3.22-4.1; 1 Timóteo 6.1,2; Tito 2.9,10; 1 Pedro 2.18-21   \* **6:11** 2 Coríntios 10.3,4; 1 Tessalonicenses 5.8,9; 1 Pedro 5.8-10

**13** Ha'e nunga rupi peraa ke Nhanderuete guigua tembiporu ha'e javi, ara vai ovaẽ rã peĩ atã aguã, ha'e gui opa pendepo'akapa ma rire pejeity uka e'ŷ re pene'aĩ aguã.

**14** Ha'e gui peĩ atã aguã ma ku'akuua rami pemoĩ'rã anhetẽ va'e, ha'e teko porã voi pemoĩ pexo regua rami.

**15** Pendepy regua rami pemoĩ penekyre'ŷa, peiko katu aguã ayvu porã Nhanderuete reve peteĩ rami nhanemoingoa regua pemombe'u aguã.

**16** Hu'y jokoarã pereko riae ke pejeroviaa, poromboeko vaia hu'y hendy va'e omombo rã pemboguepa aguã.

**17** Ngora ratãrã ma peraa peo jepea, ha'e Nhe'ẽ guigua kyxe guive. Ha'e va'e ma Nhanderuete ayvu.

**18** Nhanderuete pe penhembo'e pavẽ re, Nhe'ẽ re vy pejerure riae. Ha'e rami aguã peiko kuua pota tema, peĩ atã guive iky'a e'ŷ va'e kuery ha'e javi re pejerurea py.

**19** Xere voi ke pejerure, xeayvu ta rã xeayvurã ome'ea aguã, akyjea py e'ŷ amombe'u aguã ayvu porã ndoikuua ukai pyre.

**20** Mba'eta ha'e rami aguã ae aĩ nhuã py, Jesus rery rupi ayvu mombe'uarã. Tove Cristo re vy akyjea py e'ŷ tamombe'u, amombe'u aguã rami ae rire.

### *Tíquico omondouka aguã re ijayvuague*

**21** Ha'e gui aikoa ha'e mba'emo ajapo aikovya peikuua aguã ma xerembiayvu irmão Tíquico omombe'upa 'rã pendevy. Ha'e va'e ma Senhor pe ombo'eapoa rupi ojeroviapy oiko.\*

**22** Ha'e rami aguã ae xee ambou aŷ, marã rami pa roikoa peikuua aguã, peẽ voi pendepy'a guaxu aguã.

### *Ogueroayvu porãague*

**23** Irmão kuery, tapendu mby'a porã, mborayvu ha'e pejeroviavea guive, Nhanderuete ha'e Senhor Jesus Cristo guigua meme.

**24** Tove nhande-Senhor Jesus Cristo oayvu ete va'e kuery ha'e javi toendu nhanemboaxya.

---

\* **6:21** Colossenses 4.7,8

## Filipos pygua kuery pe Paulo ombopara va'ekue

### Filipos pygua kuery pe Paulo ombopara va'ekue

Filipos tetā re ma Roma pygua huixave opena raka'e, Macedônia yvy re oĩ, aŷ Grécia re. Ha'e pygua igreja ma Europa pygua jypy'i apóstolo Paulo omboypy va'ekue (Atos 16.12-40).

Filipos tetā gui Paulo oo ma rire ombotya nhuã py. Ha'e gui Filipos pygua kuery nhuã py Paulo oĩa omombe'ua rã oendu vy ixupe guarã ogueru ruka jepi oipytyvõ vy. Ha'e ramo apóstolo Paulo nhuã py oĩ reve ae kova'e kuaxia ombopara raka'e ha'e kuery pe oguerovy'a vy.

Mba'eta nhuã py Paulo oĩ va'eri nda'ikueraí, ov'y'a tema oikovy, ha'e ijayvu ha'e kuery voi ov'y'a avi aguã re. Aipoe'i: "Peẽ kuery re xema'endu'a nhavõ arov'y'a Xeruete. Anhembo'e nhavõ peẽ kuery ha'e javive re ajerure riae avy'a reve" (1.3-4). "Ha'e gui xapy'a rei xeruguy omoëa 'rã Nhanderuete pe mymba ome'ëmby rami, pejerovia peme'ë va'e irûrã. Ha'e rami teñ ae ma xee avy'a 'rã, ha'e peẽ kuery ha'e javi reve 'rã arov'y'a. Ha'e rami rã peẽ voi ke pevy'a, ha'e xererovy'a guive" (2.17-18). "Pevy'a riae ke Senhor re. Peteïgue ju aipoa'e: Pevy'a riae ke", he'i (4.4).

Paulo ijayvu avi ha'e kuery peteñ rami ikuai aguã. "Peẽ voi ke pendejee pemoñ Cristo Jesus py'a re oĩ va'e ramigua, mba'eta ha'e va'e ma Nhanderuete rami ete oiko va'eri nonhea'ãi raka'e Nhanderuete rami riae yvate aguã. Ha'e rami 'râgue py ojegui ha'e ae yvatea oipe'a vy tembiguai rami ju oiko, ava ojeapo vy. Ha'e rami vy ava rami ojekuaa vy onhemo'yyvõ'ive ete. Ha'e vy onhe'ẽ rendu kuruxu re eteve voi ojejuka uka peve. Ha'e rami rire Nhanderuete ombovate ju pavõ aryve, ha'e heryrã ome'ë tery ikuai va'e gui yvateve va'e, Jesus rery pavõ omboete vyi guenapy'ã re oĩ aguã, yva re, yvy re ha'e yvy guýry ikuai va'e guive, ha'e gui ha'e javive 'Jesus Cristo ae Senhor oiko' he'i okuapy aguã, Nhanderuete omboetea rupi," he'i (2.5-11).

#### *Oxarura reve ijayvu vy omboypyague*

<sup>1</sup> Paulo ha'e Timóteo, Cristo Jesus rembiguai roiko va'e roxarura Filipos tetā py Cristo Jesus re vy iky'a e'ŷ va'e pendekuai va'e ha'e javive pe, joe opena va'e ha'e nhopytyvõa kuery pe guive.\*

<sup>2</sup> Tove peẽ kuery tapendu penemboaxya ha'e mby'a porã Nhanderuete, Senhor Jesus Cristo Ru va'e guigua.

#### *Filipos pygua kuery re oguerovy'a ha'e ojerureague*

<sup>3</sup> Peẽ kuery re xema'endu'a nhavõ arov'y'a Xeruete.

<sup>4</sup> Anhembo'e nhavõ peẽ kuery ha'e javive re ajerure riae avy'a reve.

<sup>5</sup> Xema'endu'a jypy'i guive aŷ peve ayvu porã mombe'ua rupi xereve penhea'ã pekuapya re.

<sup>6</sup> Mba'eta xee aikuua porã Cristo Jesus oua ára peve peẽ kuery re mba'emo porã moĩypyare omoimba 'rãa.

<sup>7</sup> Ha'eve peẽ kuery re xema'endu'a riae aguã, mba'eta xepy'a re aendu roayvua. Mba'eta Nhanderuete xemboaxy vy ixupe amba'eapo aguã xemoñ rire peẽ kuery xepytyvõ pekuapya nhuã py aĩ rã, ha'e ayvu porã anhetê va'e amombe'ua rupi guive.

<sup>8</sup> Nhanderuete oikuua peẽ kuery ha'e javive roexaxea. Ha'e rami aguã ma Cristo Jesus gui ae aendu.

<sup>9</sup> Po rami ajerure ixupe: Pendere tomoïve heravy mborayvu, mba'emo peikuua porãve ha'e opa mba'e py pene'arandua reve,

\* <sup>1:1</sup> Atos 16.12-40

10 iporā va'e anho pendejee guarā peiporavo aguā, iky'a e'ŷ va'e ha'e ojou vaipy e'ŷ pendekuai aguā Cristo ára pyguarā,

11 Jesus Cristo guigua teko porā anho pexa uka rā Nhanderuete oguerovy'aa ha'e omboetea aguā.

*Apóstolo Paulo re mba'emo oiko ramo hetave ayvu porā oendua re ijayvuague*

12 Ha'e gui irmão kuery, aipota peikuua mba'emo xere oiko rire ayvu porā oenduave ague.

13 Mba'eta huvixave pegua jopya kuery oikuaapa Cristo káuxa nhuā py aña, ha'e amboae kuery ha'e javi voi.\*

14 Ha'e ramo irmão kuery voi Senhor káuxa nhuā py aña heta oikuaa vy ipy'a guaxu vy ndokyjevei okuapy Nhanderuete ayvu omombe'u aguā.

15 Ikuai avi amongue ete'i xere ija'e e'ŷa rupi Cristo regua ayvu omombe'u va'e, xegui onhemboyvatevexe vy rive. Ha'e rā amboae kuery ma anhetē rupi omombe'u.

16 Ha'e va'e kuery ma porayvua rupi ayvu omombe'u, mba'eta oikuaa ayvu porā mombe'uarā xemōague.

17 Ha'e rā amboae kuery ma onhemboyvate reixe vy rive omombe'u Cristo regua, anhetē rupi e'ŷ, mba'eta ha'e kuery ojapoxe nhuā py aña py ajexavaive aguā rami.

18 Ha'e rami teī xee ma ndaikuaa potai. Mba'eta anhetē rupi, ha'e'ŷ vy anhetē rupi e'ŷ teī Cristo omombe'ua ramo avy'a, ha'e avy'a tema 'rā guive.

19 Mba'eta po rami aikuaa porā: Xere pejerure ramo Jesus Cristo Nhe'ẽ xepytyvō 'rā opa mba'e gui aa jepe aguā.

20 Xee aipota ete va'e, ha'e ajeroviaa ma mba'eve py axīmba e'ŷ aguā. Ha'e rami 'rāgue py xepy'a guaxu aguā, aiko jepiaty rami aŷ voi xee aikoa rupi Cristo omboetea aguā, aikove e'ŷ vy amano teī.

21 Mba'eta xevy pe ma aikovea Cristo pe aiko aguā, ha'e rā amano aguā ma ajoupave aguā.

22 Ha'e rami teī, xero'o re aikove teri reve amba'eapoa rupi iporā va'e oiko ramo xee ndaiporavo kuaai,

23 mba'eta mokoī rami aendu. Mba'eta aaxe Cristo reve aiko aguā. Ha'e va'e ma opa mba'e gui ha'eveva va'e.

24 Ha'e rami avi xero'o re ranhe aikove vy 'rāe peē kuery roipytyvōve.

25 Ha'e nunga rupi aikuaa porā peē kuery ha'e javi reve apytave ranhe 'rāa, pevy'a ha'e pejeroviave aguā,

26 mba'eta peē kuerya py ju avaē rā xerexa vy perovy'ave 'rā Cristo Jesus.

*Cristo reve vy peteī rami nhanhea'ā aguā re ijayvua*

27 Opa mba'e gui ha'eveva va'e ma Cristo regua ayvu porā omboetea aguā rami pendekuai aguā. Ha'e rami rā peē kuery roexa vy aa, ha'e'ŷ vy ndaai teī pendekuaia omombe'ua rā aendu vy aikuaa 'rā peteī Nhe'ẽ re peī atāa, ha'e peteī'i rami penhea'ā pekuapya ayvu porā rupi jajeroviaa re,

28 mba'eve py nhanderovaigua kuery gui pekyje e'ŷ re. Ha'e kuery ma ha'e rami pendekuaia oexa vy oikuaa okanhy aguā rami ikuiaia, ha'e rā peē kuery ma peikuua Nhanderuete re vy peo jepe 'rāa.

29 Mba'eta pendevy pe ome'ẽ Cristo káuxa pendekuai axy aguā, hexe pejerovia aguā anho e'ŷ,

30 mba'eta peē voi penhea'ā pekuapya ymave rupi pexa rā xee anhea'āague rami, ha'e aŷ pendu rā anhea'āa rami avi.\*

\* 1:13 Atos 28.16,30,31; Efésios 6.19,20    \* 1:30 Atos 5.41; 1 Pedro 4.12,13

## 2

*Jajoayvu ha'e joegui nhanhemo'yvyi'ive aguã re ijayvua*

<sup>1</sup> Ha'e nunga rupi Cristo re vy penembaraeeta pendu vy, penderayvua py pendepy'a guaxu, Nhe'ẽ reve peteĩ rami pendekuai, ha'e pendeporayvua rupi penhomboaxya pendu vy,

<sup>2</sup> ha'e rami vy xembovy'a ke opa mba'e py, peteĩ rami peikuaa vy, jomeme pejoayvu, peteĩ rami anho pendepy'a, ha'e pendepy'a py peteĩ'i ramigua anho pendu vy.\*

<sup>3</sup> Mba'eve pejapo eme penhemboyvatea rupi, neĩ pejejou porã reia rupi guive. Ha'e rami 'rãgue py penhemo'yvyi'ive peteĩ-teĩ penhomboyvateve 'rã pendejegui.

<sup>4</sup> Pemoĩ peteĩ-teĩ peẽ ae peipotaa rami rive'ỹ pendekuai aguã, ha'e rã amboae kuery oipotaa rami.

*Cristo onhemo'yvyi'ague rami avi nhande voi nhandekuai aguã re ijayvua*

<sup>5</sup> Peẽ voi pendejee pemoĩ Cristo Jesus py'a re oĩ va'e ramigua,

<sup>6</sup> mba'eta ha'e va'e ma Nhanderuete rami ete oiko va'eri nonhea'ãi raka'e Nhanderuete rami riae yvate aguã.

<sup>7</sup> Ha'e rami 'rãgue py ojegui ha'e ae yvatea oipe'a vy tembiguai rami ju oiko, ava ojeapo vy.\* Ha'e rami vy ava rami ojekuaa vy

<sup>8</sup> onhemo'yvyi'ive ete. Ha'e vy onhe'ẽ rendu kuruxu re eteve voi ojejuka uka peve.

<sup>9</sup> Ha'e rami rire Nhanderuete omboyvate ju pavẽ áryve, ha'e heryrã ome'ẽ tery ikuai va'e gui yvateve va'e,

<sup>10</sup> Jesus rery pavẽ omboete vy guenapy'ã re oĩ aguã, yva re, yvy re ha'e yvy guýry ikuai va'e guive,

<sup>11</sup> ha'e gui ha'e javive "Jesus Cristo ae Senhor oiko" he'i okuapy aguã, Nhanderuete omboetea rupi.\*

*Jaa jepea jaexa uka aguã re ijayvua*

<sup>12</sup> Ha'e ramo xerembiayvu kuery, peẽ kuery xenhe'ẽ rendu riae pekuapy xerexaa rupi anho e'ỹ, aÿ peẽ kuerya py naĩ jave katuve ma. Ha'e rami vy peo jepea pexa uka-ukave tema pejererokyje ha'e peryryipaa rupi,

<sup>13</sup> mba'eta Nhanderuete ae pendere ojapo 'rã ha'e oipotaa rami pendekuaixe ha'e pendekuai ete aguã rami.

<sup>14</sup> Opa mba'e pejapoa py pendeayvu rei eme, ha'e pejoguero'a rei eme guive,

<sup>15</sup> ojou vaipy e'ỹ ha'e anhetẽ rupigua pendekuai aguã. Ha'e rami vy heko vai ha'e opa marã rei ikuai va'e mbyte pendekuaia rupi pexa uka 'rã Nhanderuete ra'y kuery iky'a e'ỹ va'e peikoa. Mba'eta ha'e kuery mbyte rupi tataendy rami penerexakã peikovy kova'e yvy re,\*

<sup>16</sup> tekove regua ayvu re peĩ atã vy. Ha'e rami rire Cristo oua ára py xee roguerovy'a 'rã nanhea'ã rivei neĩ namba'eapo rivei rire.

<sup>17</sup> Ha'e gui xapy'a rei xeruguy omoõa 'rã Nhanderuete pe mymba ome'ẽmby rami, pejeroviaa peme'ẽ va'e irûrã. Ha'e rami teĩ ae ma xee avy'a 'rã, ha'e peẽ kuery ha'e javi reve 'rã arov'y'a.

<sup>18</sup> Ha'e rami rã peẽ voi ke pevy'a, ha'e xererovy'a guive.

*Paulo oirũ kuery Timóteo ha'e Epafradito omombe'uague*

<sup>19</sup> Ha'e gui Senhor Jesus re ajerovia peẽ kuerya py ambou voi aguã Timóteo, pendekuaia aikuaa vy xee voi avy'a aguã.

<sup>20</sup> Mba'eta xeirũ mboae ndarekoi xee rami oendu va'erã anhetẽ rupi peẽ kuery re opena aguã.

\* <sup>2:2</sup> Romanos 15.5,6; Efésios 4.1-3    \* <sup>2:7</sup> João 13.12-17; 2 Coríntios 8.9    \* <sup>2:11</sup> Efésios 1.20-23; Apocalipse 5.1-14

\* <sup>2:15</sup> Mateus 5.14-16

21 Mba'eta amboae kuery ma ha'e kuery ae oipotaa rami ikuaixe, Cristo oipotaa rami e'ŷ.

22 Ha'e rã Timóteo ma peẽ voi peikuaa ae heko porã va'e oikoa, mba'eta ayvu porã mombe'ua rupi xerupive ombo'eapo nguu pe rami.

23 Amondouka voi aguã rami aiko, xere mba'emo oiko va'e aikuua vyve.

24 Senhor re ajerovia aikovy hare'ŷ re xee voi aju aguã.

25 Ha'e rami teĩ ajou porã peẽ kuerya py ambou ranhe aguã Epafrodit. Ha'e va'e ma xe-irmão, xereve ombo'eapo ha'e onhea'ã va'ety. Ha'e va'e ma peẽ kuery pemondouka avi raka'e, aiko axy rã xepytyvõ aguã.

26 Ha'e ramo peẽ kuery ha'e javive penderexaxe ete oikovy, ha'e ipy'a eta rei guive, mba'eta imba'eaxy penduague ixupe omombe'ua rã oendu rire.

27 Anhetẽ imba'eaxy vy omano rai'i va'ekue, teĩ Nhanderuete omboaxy. Ha'e anho e'ŷ, xee voi xemboaxy avi, xeporiauve ju e'ŷ aguã.

28 Ha'e nunga rupi ajapurave tema ambou aguã, pexa ju vy perovy'a aguã, ha'e xee voi ndaxeporiau vaipavei aguã.

29 Ha'e ramo Senhor re vy pemovaẽ ke perovy'a ete reve, ha'e pemboete tema ha'e ramigua avakue ha'e javi.

30 Mba'eta Cristo pe ombo'eapoa rupi omano rai'i va'ekue ndojeayvuveikue py, peẽ kuery naxepytyvõ reguavei rã xepytyvõ aguã.

### 3

#### *Cristo re javy'a aguã re ijayvua*

1 Ha'e gui xe-irmão kuery, pevy'a tema Senhor re. Ambopara ma voiague ramigua peteĩgue ju ambopara. Ha'e rami teĩ ndajou porã e'ŷi, mba'eta penemombaraeteve 'rã.\*

#### *Anhetẽ rupi e'ŷ nhombo'e va'e kuery gui nhanheangu aguã re ijayvua*

2 Penheangu ke jagua rami heko vai va'e kuery gui, mba'eta ha'eve'ŷa rami ombo'eapo, ha'e anhetẽ rupi e'ŷ jopire omboi uka va'e.\*

3 Ha'e rã nhande kuery ma opire omboi uka va'e ete nhandekuai, mba'eta Nhe'ẽ rupi nhamboete Nhanderuete, jarovy'a Cristo Jesus, ha'e rã to'o re ma ndajajeroviai va'e.

4 Ha'eve 'rãgue teĩ xee to'o re ajerovia aguã. Amongue va'e to'o re ojerovia aguã ha'eve va'e rire xee katuve 'rãgue,

5 mba'eta oito ára arekoa py xepire omboia va'ekue, Israel ramymino aiko, Benjamim kuery regua, hebreu kuery gui xetui'i va'ekue hebreu eterã. Fariseu regua aiko vy lei rupi anhea'ã va'ekue.

6 Anhea'âve ete vy igreja kuery re apu'ã rei va'ekue. Lei guigua tekó porã rupi aiko ramo xejou porã pavẽ karamboae.

7 Ha'e rami teĩ mba'emo xembovarearã areko va'ekue pe ma aŷ Cristo re vy "Ovare'ŷ va'e" ha'e.

8 Anhetẽ opa mba'e pe "Ovare'ŷ va'e" ha'e aŷ, mba'eta Cristo Jesus xe-Senhor aikuua aguã ma pavẽ gui iporãve va'e. Hexe vy amokanhy ha'e nungakue ha'e javi, ha'e "Omombo pyrã" ha'e guive, hekivia Cristo aupity aguã,

9 ha'e hexe aĩ aguã. Ha'e rami vy tekó porã aupity aguã, xee ae reko porã e'ŷ, neĩ lei guigua e'ŷ guive, ha'e rã Cristo re jajerovia vy jaupity va'erã. Ha'e nunga tekó porã ma jajerovia ramo Nhanderuete ome'ẽ 'rã nhandevy.\*

10 Ha'e rami vy Cristo aikuua ete aguã, ha'e omanoague gui imboete jevyare po'akaa guive. Hexeve aiko axyxe avi, omanoague py guive aikoxe ha'e rami,

11 marã rami vy pa aupity avi aguã amanoague gui anhemboete ju aguã.

\* 3:1 Filipenses 2.18, 4.4    \* 3:2 "Jagua rami heko vai va'e" he'ia kuery ma nhombo'ea rupi "Judeu reko rami pendekuai ramo anho 'rã Nhanderuete pendereraa jepe" he'i rive va'e.    \* 3:9 Romanos 3.21-26; Efésios 2.8,9

### *Yvate katy nhanerenoña re ijayvua*

<sup>12</sup> Xee ma “Aupitypa ma” nda'ei, neñ “Opa mba'e py xerekoporā” nda'ei guive. Ha'e rami teñ anhea'äve tema aupity aguã Cristo Jesus ojeupe guarã xejogua vy xerenonderã omoñ va'ekue.

<sup>13</sup> Irmão kuery, xee ma “Aupitypa ma” nda'ei, teñ peteñ'i rupi ma anhea'ä aikovy: Mba'emo xerakykue opyta va'e gui xerexarai vy anhea'ä tema xerenonderã oñ va'e re anho.\*

<sup>14</sup> Anhea'ä tema xerenonderã oñ va'e re, aupity aguã iporã va'e Nhanderuete ome'ë va'erã. Ha'e va'e ajopy aguã ae Cristo Jesus re vy yvate katy xerenoñ.

<sup>15</sup> Jajeroviaa rupi nhanembaraete va'e ma ha'e rami ae 'rã jaikuua. Ha'e gui amboae rami ri peikuua ramo ha'e nunga avi Nhanderuete oikuua uka 'rã pêvy.

<sup>16</sup> Ha'e rami vy peteñ-teñ jaupity maague rupi tema nhandekuai.

### *Cristo kuruxu regua ayvu rovaigua kuery re ijayvua*

<sup>17</sup> Irmão kuery, peñ avi ke xee aikoa rami tema pendekuai, ha'e ore rami ikuai va'e reko re guive peikuua porã pota.

<sup>18</sup> Mba'eta nhanembyte rupi heta ikuai Cristo kuruxu rovaigua kuery. Ha'e va'e kuery reko gui mbovykue rei e'ý xee romonheangu, ha'e aý xerexay reve ju xeayvu ha'e rami.

<sup>19</sup> Ha'e kuery ma okanhy aguã rami ikuai, ombojerovia guyepy ae rive, ha'e oguerovy'a ogueroxiñ 'rã va'ekue, mba'emo kova'e yvy regua re anho nda'eveive vy.

<sup>20</sup> Ha'e rã nhande kuery retã ma yva re oñ, ha'e nharõ jaikovy nhandereraa jepea Senhor Jesus Cristo ha'e gui ou rã guarã.

<sup>21</sup> Mba'eta ou vy ombopyaupa 'rã nhanderete ikangy va'e, guete hexakãmba va'e rami avi nhanemboete jevy vy. Opo'akaa rupi 'rã ha'e rami nhanemoingo, opa mba'e re ipo'aka va'e vy.

## 4

<sup>1</sup> Ha'e nunga rupi irmão kuery xerembiyvu va'e, ha'e rami ae tema penembaraete Senhor re. Pendere xema'endu'a riae, mba'eta arov'y'a va'e ha'e xembovy'aarã peiko.

### *Evódia ha'e Síntique pe ojerure, ha'e gui javy'a ha'e nhanhembo'e aguã re ijayvua*

<sup>2</sup> Evódia ha'e Síntique pe ajerure Senhor re vy peteñ rami ju oikuua aguã.

<sup>3</sup> Ha'e gui ndee xeirñ anhetë va'e pe ma ajerure avi ha'e va'e kunhague reipytyvõ aguã, mba'eta xereve mokoïve onhea'ä va'ekue ayvu porã mombe'ua rupi, Clemente ha'e xepytyvõa kuery mboae reve guive. Ha'e kuery rery oñ ma kuaxia tekove oguerekova'e kuery rery oña re.

<sup>4</sup> Pevy'a riae ke Senhor re. Peteñgue ju aipoa'e: Pevy'a riae ke.

<sup>5</sup> Pavẽ pe pexa uka ha'eve vai'i peikoa. Senhor mombyry e'ý oñ.

<sup>6</sup> Pendep'y'a eta rei eme mba'eve re. Ha'e rami 'rãgue py, opa mba'e py Nhanderuete pe pejerure peikotevõ va'e re. Penhembo'e ha'e pejerure tema perovy'a reve.

<sup>7</sup> Ha'e ramo mby'a porã opa mba'e jaikuua va'e gui iporâve va'e rupi Nhanderuete opena 'rã penekuraxõ ha'e pendep'y'a re, Cristo Jesus re vy.

### *Nhandep'y'a re mba'emo nhamoñ aguã re ijayvua*

<sup>8</sup> Ha'e nunga rupi irmão kuery, pendep'y'a re pemoñ anhetë va'e ha'e javi, iporã va'e, ha'evea ramigua, iky'a e'ý va'e regua, nhombovy'a va'e ha'e ojou porãmby ha'e javi. Ha'e gui ojou porãmby, e'ý vy oguerovy'apy mboae oiko rã ha'e nunga re anho peikuua pota.\*

<sup>9</sup> Ha'e gui pejapo mba'emo xegui peikuua, pejopy, pendu ha'e pexa va'ekue ramigua. Ha'e ramo Nhanderuete mby'a porã me'ëa oiko 'rã pendereve.

### *Filipos pygua kuery re Paulo oguerovy'aague*

\* **3:13** Hebreus 12.1-3    \* **4:8** Romanos 12.1,2

<sup>10</sup> Arov'y'a ete Senhor, mba'eta peteīgue ju pexa uka xepytyvõxe. Ha'e rami aguã pendu ae ma va'ekue, teī pexa uka aguã novaēi teri va'ekue.

<sup>11</sup> Xevy pe mba'emo oata ramo e'ŷ ha'e rami xeayvu, mba'eta oiko va'e py rei aikuua avy'a aguã.

<sup>12</sup> Aikuua omo'yvyī'imby ha'e omboetevepy aiko aguã. Opa mba'e py, opa marāgua oiko va'e py avy'a kuaa, arekopaa py ha'e anhembyayia py, ajoupaa py ha'e xeporiaua py.

<sup>13</sup> Opa mba'e aropo'aka 'rã xemombaraetea re vy.

<sup>14</sup> Ha'e rami avi aiko axy rã peē kuery ha'evea rami xemoirū uka.

<sup>15</sup> Filipos pygua kuery, jypy'i ayvu porã pendu jave pendeyvy Macedônia gui aa ramo jipoi raka'e igreja mboae mba'emo ome'ěa py xepytyvõ va'e, peē kuery anho'i e'ŷ vy. Ha'e rami peikuua porã.

<sup>16</sup> Mba'eta Tessalônica tetã py aĩa peve peteīgue'i e'ŷ, mokoīgue peraa uka raka'e aipota va'e oata e'ŷ aguã.

<sup>17</sup> Ha'e rami vy "Peme'ẽve ke xevy" nda'ei, mba'eta xee aipota va'e ma peē ae pendejeupe guarã pejoupave aguã.

<sup>18</sup> Mba'eta xee ajopypa ma, arekopa ramo mba'eve ndoatavei, mba'emo peē kuerya gui Epafroditu ogueru va'ekue xepo py omboaxapa rire. Ha'e nunga ma heakuã porã va'e rami oĩ Nhanderuete pe ome'ẽmbu ojou porã va'erã, imbovy'aarã.

<sup>19</sup> Ha'e nunga rupi Cristo Jesus re vy Xeruete ojou ukapa 'rã peikotevẽ va'e, guexakãa py oguerekopa ete va'e vy.

<sup>20</sup> Nhanderuete tomboetea araka'eve rã peve. Amém.

### *Oxarura reve opaa py ijayvuague*

<sup>21</sup> Pemombe'u ke axaruraa iky'a e'ŷ va'e kuery Cristo Jesus re ikuai va'e ha'e javi pe. Irmão kuery xereveguia oxarura uka pêvy.

<sup>22</sup> Iky'a e'ŷ va'e kuery ha'e javi avi oxarura uka pêvy, César ro pygua kuery voi.

<sup>23</sup> Tove penenhe'ẽ py tapendu Senhor Jesus Cristo penemboaxyia.

## **Colosso pygua kuery pe Paulo ombopara va'ekue**

## **Colosso pygua kuery pe Paulo ombopara va'ekue**

Colosso tetā ma Ásia yvy 'epy va'e re, aŷ Turquia py oĩ. Ha'e pygua igreja re opena va'ety ma Epafras hery va'e. Ha'e gui Paulo ma nhuã py oĩ reve omombe'ua rã oendu ha'e py ha'eve'ŷa rami nhombo'ea kuery ovaëague. Ha'e rami vy kova'e kuaxia ombopara ha'e pygua kuery omombaraete ha'e ombo'e porâve aguã.

Jypy ma ijayvu Jesus Cristo pavẽ gui yvatevea re. Aipoe'i: "Ha'e ma Nhanderuete jaexa e'ŷ va'e rami ete oiko, temimoingo ha'e javi renondegua guive. Mba'eta hexe vy omoingo raka'e yva ha'e yvy re ikuai va'e ha'e javi, jaexa va'e ha'e jaexa e'ŷ va'e guive, ha'e gui huixixa kuery, yvatekueve, imbaraetekueve ha'e ipo'akakueve va'e tei. Opa mba'e Jesus rupi ae omoingo raka'e, ha'e ixupe guarã meme ikuai. Opa mba'e oiko e'ŷ mbove oiko ae ma guive, ha'e hexe vy opa mba'e oimb'a porã. Igreja nhandekuai va'e ma hete, ha'e rã ha'e ma nhaneakã. Jypy'igua oiko, omanoague gui ha'e ranhe onhemboete ju va'ekue, pavẽ gui yvateve va'e oiko aguã opa mba'e py" (1.15-18). "Mba'eta hexe ae oĩ 'arandu ha'e oikuaa pyrã ndoikuua ukai va'ekue ha'e javi. Ha'e rami xeayvu avave rei pe penhembotavy uka e'ŷ aguã, ijayvu porã merami rive va'e kuery pe" (2.3-4).

Paulo ijayvu avi jajojou vai e'ŷ aguã, ha'e rami 'râgue py aipoe'i: "Pendejee pemoī penhomboaxy aguã, pendeporayvu, penhemo'yvyi'i, ivai rei e'ŷ va'e ha'e ivai rive-rive'ŷ va'e pendekuai aguã. Pejogueropo'aka peteĩ-tei, ha'e pendeapo vaia rã pejoperdoa guive. Senhor penderperdoaague rami avi peẽ voi pejoperdoa 'rã" (3.12b-13).

### *Oxarura reve ijayvu vy omboypyague*

<sup>1</sup> Xee Paulo ma Nhanderuete oipotaa rami vy Jesus Cristo pegua apóstolo aiko. Irmão Timóteo reve

<sup>2</sup> roxarura peẽ irmão kuery Colosso py pendekuai va'e pe. Iky'a e'ŷ va'e peiko, ha'e Cristo re pejerovia ete va'e. Tove peẽ kuery tapendu Nhanderuete penemboaxyha ha'e mby'a porã.

### *Oguerovy'aague*

<sup>3</sup> Peẽ kuery re ronhembo'e vy roguerovy'a riae Nhanderuete nhande-Senhor Jesus Cristo Ru va'e,

<sup>4</sup> mba'eta omombe'ua rã roendu Cristo Jesus re pejerovia, ha'e iky'a e'ŷ va'e kuery ha'e javi peayvu pekuapya.

<sup>5</sup> Ha'e rami pendekuai pearõ vy yva re pendevy guarã omoī porã mbyre. Ha'e nunga ma yma voi pendu va'ekue ayvu porã anhetê va'e

<sup>6</sup> peẽ kuerya rupi omombe'ua rã. Yvy jave re heta-etave ayvu porã oguerovia vy ojeko rerovaa. Peẽ kuery voi ayvu anhetê va'e Nhanderuete nhanemboaxyha regua pendu vy peikuua ára guive ha'e rami ae avi pendekuai,

<sup>7</sup> Epafras penembo'e ramo. Ha'e va'e ma orerembiayvu, ore reve Cristo rembiguai avi oiko, ha'e peẽ kuery pytyvõa rupi Cristo pe ombo'eapo va'e ojeroviapy.

<sup>8</sup> Ha'e va'e ma orevy ju omombe'u Nhe'ẽ reve vy mborayvu re pendekuuaia.

### *Colosso pygua kuery re Paulo ojerureague*

<sup>9</sup> Ha'e rami pendekuuaia roendu guive ndoropytu'ui peẽ kuery re ronhembo'ea gui. Rojerure Nhanderuete oipota va'e peikuua porã ete aguã, opa mba'e py Nhe'ẽ gui pene'arandu ha'e peikuapa aguã guive.

<sup>10</sup> Ha'e rami vy Senhor pegua ete pendekuai aguã, opa mba'e py pembovy'a, joupe pejapo porã, ha'e Nhanderuete peikuua porâve peovy aguã.

11 Ajerure avi opa mba'e py penemombaraete aguã opo'akaa hexakãmba va'e py, opa mba'e py peĩ atã ha'e peropo'akapa aguã rami, ha'e gui pevy'a reve

12 Penderu perovy'a aguã opa mba'e py, mba'eta ha'e ae penemoingo hexakãa py iky'a e'ŷ va'e kuery peguarã peupity avi aguã rami.

### *Cristo reko ha'e mba'emo ojapo va'e iporã etea re ijayvua*

13 Mba'eta nhandereraa jepe raka'e pytû po'akaa gui, ha'e Gua'y oayvu va'e po'akaa py ju nhandereru.

14 Mba'eta hexe vy ae jaupity jaa jepe aguã, jajejavyague omboguepa ramo.

15 Ha'e ma Nhanderuete jaexa e'ŷ va'e rami ete oiko, temimoingo ha'e javi renondegua guive.

16 Mba'eta hexe vy omoingo raka'e yva ha'e yvy re ikuai va'e ha'e javi, jaexa va'e ha'e jaexa e'ŷ va'e guive, ha'e gui huvixa kuery, yvatekueve, imbaraetekueve ha'e ipo'akakueve va'e teĩ. Opa mba'e Jesus rupi ae omoingo raka'e, ha'e ixupe guarã meme ikuai.

17 Opa mba'e oiko e'ŷ mbove oiko ae ma guive, ha'e hexe vy opa mba'e oĩmba porã.\*

18 Igreja nhandekuai va'e ma hete, ha'e rã ha'e ma nhaneakã. Jypy'igua oiko, omanoague gui ha'e ranhe onhemboete ju va'ekue, pavẽ gui yvateve va'e oiko aguã opa mba'e py.

19 Mba'eta Nhanderuete oipotaa rami vy ojapo guexegua ha'e javi Cristo re avi oĩmba aguã.

20 Ha'e gui kuruxu re huguy omoẽ uka vy peteĩ rami ju guexeve nhanemoingo, Cristo rupi opa mba'e ogueru ju aguã ojee, yvy ha'e yva re ikuai va'e ha'e javi.

21 Peẽ kuery voi ojee pendereru, ymave rupi teko vai rupi anho pendekuai vy pendepy'a py hexeveguia e'ŷ, hovaigua pendekuai va'ekue ri.\*

22 Ha'e gui aŷ ma pendereru ju ojee, Cristo guete ha'e ngo'o reve omanoa py, guenonde penderexa uka aguã iky'a e'ŷ va'e, jejavya oĩa e'ŷ va'e, ha'e ojou vaipy e'ŷ.

23 Pejeroviaa re peĩ atã ri ha'e rami 'rã pendekuai, pendepy'apy guive penembaraete reve, ha'e ayvu porã regua pearõa gui ndapejepe'ai vy. Ha'e va'e ayvu pendu va'ekue ma yva guýry ikuai va'e ha'e javi pe omombe'ua. Xee Paulo voi imombe'uarã xemoĩa.

### *Ayvu porã oikuua uka pyre re Paulo ijayvuague*

24 Aŷ peẽ kuery re vy aiko axya rupi avy'a, mba'eta xero'o re aiko axyve Cristo oiko axyague rami. Hete re vy aiko axy. Ha'e va'e ma igreja.

25 Mba'eta Nhanderuete xemoĩ karamboae igreja kuery rembiguairã, peẽ kuerya rupi voi Nhanderuete ayvu amombe'upa aguã.

26 Ha'e va'e ayvu ma ndoikuua ukai va'ekue ymave rupi ikuai va'e pe. Ha'e rã aŷ ma iky'a e'ŷ va'e kuery pe oikuua uka.

27 Mba'eta nhande kuery pe Nhanderuete oipotaa rami vy po rami oikuua uka: peẽ judeu e'ŷ va'e kuery peguarã voi oguereko iporã ete va'e ndoikuua ukai va'ekue, peẽ kuery re voi Cristo oĩ aguã.\* Ha'e rami rã peẽ voi pearõ pekuapy hexakã ojekuaa rã guarã.

28 Cristo regua ae romombe'u. Romongeta pavẽ, ha'e 'arandua ha'e javi rupi rombo'e guive, henonde ha'e javive roexa uka aguã Cristo re vy opa mba'e py ojerovia porã va'e.

29 Ha'e rami aguã ae xee amba'eapo, anhea'ã ete aikovy, ipo'akaa xere oĩ va'e xemombaraete rã.

## 2

### *Colossos pygua kuery oipytyvõxeia re Paulo ijayvuague*

\* **1:17** João 1.1-5, 10-14; Hebreus 1.1-14 \* **1:21** Efésios 2.11-22 \* **1:27** Efésios 3.1-6

<sup>1</sup> Mba'eta aipota peikuaa peẽ kuery re vy anhea'ã ete aikovya, Laodicéia re ikuai va'e ha'e xerexa e'ŷ teri va'e ha'e javi re vy guive.

<sup>2</sup> Ha'e rami rã pendepy'a py penembaraete ha'e mborayvu re peteĩ rami pendekuai aguã, peikuaa porãmba aguã Nhanderuete guigua ndoikuua ukai va'ekue. Ha'e va'e ma Cristo.

<sup>3</sup> Mba'eta hexe ae oĩ 'arandu ha'e oikuua pyrã ndoikuua ukai va'ekue ha'e javi.

<sup>4</sup> Ha'e rami xeayvu avave rei pe penhembotavy uka e'ŷ aguã, ijayvu porã merami rive va'e kuery pe.

<sup>5</sup> Mba'eta aŷ peẽ kuerya py xerete re ndaikoi teĩ xenhe'ẽ re aiko ae peẽ kuery reve. Ha'e rami vy roguerovy'a pendekuai porãha'e Cristo re pejerovia etea omombe'ua rã aendu vy.

### *Ha'e kuery ojeroviaa re imbaraete aguã re Paulo ijayvuague*

<sup>6</sup> Ha'e gui Senhor Jesus Cristo pemovaëague rami avi hexe tema pendekuai.

<sup>7</sup> Hexe vy peĩ atã yvyra hapo porã va'e, ha'e oo omboyta porã mbyre rami avi. Pejeroviaa re penembaraete penembo'eague rami, ha'e perovy'a riaeve tema Nhanderuete.

### *Ha'eve'ŷa rami nhombo'ea, ha'e Cristo reko re ijayvua*

<sup>8</sup> Penheangu ke avave rei pe penhembotavy uka e'ŷ aguã ijayvu kuaa ha'e ijayvu porã meramia py. Ha'e rami ijayvu va'e ma mba'emo ko yvy regua re rive penembo'e, avakue oikuua rami rive, Cristo gui e'ŷ.

<sup>9</sup> Mba'eta hexe anho oĩ Nhanderuete py'a re oĩ va'e ha'e javi, hete re ae.

<sup>10</sup> Ha'e hexe vy pendere voi Nhanderuete omoĩ ha'e nunga ha'e javi, mba'eta Cristo ma yvatekueve ha'e ipo'akakueve ha'e javi áryvegua oiko.

<sup>11</sup> Hexe vy opire omboi uka va'ekue ramigua avi peiko, teĩ avakue opo py ojapoa rami e'ŷ. Pendegui omboi pyre ma to'o oipotaa. Ha'e nunga ae Cristo omboi nhandegui.

<sup>12</sup> Mba'eta penhemongaraia py penenhono porãa avi raka'e hexeve. Penhemongaraia rupi penemboete ju avi, mba'eta Cristo omanoague gui Nhanderuete omboete ju va'ekue po'akaa re peẽ voi pejerovia.

<sup>13</sup> Mba'eta peẽ kuery voi omanogue pendekuai va'ekue pejejavya rupi, to'o guigua napemboi uka kuaai vy. Ha'e rami teĩ pendevy pe voi tekove ome'ẽ avi Cristo reve.\* Mba'eta jajapo vaiague omboguepa raka'e

<sup>14</sup> ipara japaga aguã oïague ombovaipa vy. Ha'e nunga ma nhanembopagaarã oĩ va'ekue, ojapo uka pyre nhanderovai oĩ va'ekue. Ha'e nunga ma oipe'apa raka'e, kuruxu re ombokaravo avi vy.

<sup>15</sup> Ha'e gui oipe'a avi yvatekueve ha'e ipo'aka va'e kuery po'akaa, ha'e pavẽ pe oikuua uka mba'everã ndovareia. Kuruxu re oĩ vy ipo'aka raka'e ha'e kuery ha'e javi re.

### *Mba'emo nhambetea Cristo 'ã rami rive oikoa re ijayvua*

<sup>16</sup> Ha'e rami rire avave rei toikuaa pota rei eme mba'emo pe'u ha'e pey'ua re, neĩngaru oikoa ára, jaxy pyau, e'ŷ vy sábado ára napemboeteia re,

<sup>17</sup> mba'eta ha'e nunga ha'e javi ma ou oiny va'e 'ã ramigua rive. Ha'e rã ou va'e ete ma Cristo.\*

<sup>18</sup> Avave rei pe pejekore uka eme pendevy guarã omoĩ porã mbyre re, mba'eta onhemoyvy'i merami rive va'e ikuai, ha'e anjo kuery ombojeroviaa rupi guive. Ha'e kuery ma mba'emo oexa ra'uague gui rive oikuua, ha'e ojee rive ojerovia reve to'o oipotaa rami anho ipy'a va'e.

<sup>19</sup> Ha'e kuery ojepe'a ma igreja kuery Akã gui. Mba'eta hexe vy tete nhandekuai va'e ha'e javi oiko porã ha'e oïmba porã, mba'eta Nhanderuete ae ojapo iku'ea ha'e hexegua ikuai va'e yvateve ovy aguã rami.

### *Avakue reko rupi rive nhandekuai vy jajejavya gui ndajajejokoi 'rãa re ijayvua*

\* **2:13** Efésios 2.1-7 \* **2:17** Gálatas 4.8-11

<sup>20</sup> Cristo reve ko yvy regua 'arandua pe pemano ma avi rire, mba'e re tu ha'vy ko yvy regua rami teri pendekuai ha'e kuery oipotaa rami?

<sup>21</sup> Mba'eta po rami ijayvu: "Pejopy eme ha'e nunga", "Pe'u eme ha'e nunga", ha'e "Pepoko eme ha'e nunga re" he'i.

<sup>22</sup> Ha'e ramigua ma avakue ojapo uka va'e ha'e nhombo'ea rive. Ha'e ramigua rupi nhandekuaia ma opa va'erā meme.\*

<sup>23</sup> Ha'e ramigua ojapo uka pyre re ma 'arandua oī merami teī, mba'eta nhandejegui ae nhambojerovia kuaa aguā, nhanhemo'yvyī'i merami rive, ha'e nhanderete jareko axy aguā re ijayvu. Ha'e rami teī peteīve henda py ndovarei to'o oipotaa jajoko aguā.

### 3

#### *Cristo reve hexakāa py jajekuaa avi 'rāa re ijayvua*

<sup>1</sup> Ha'e nunga rupi Cristo reve penhemboete ju avi rire penhea'ā yvate, Nhanderuete oiporu kuaa regua re Cristo oguapy oinya py mba'emo oī va'e re.

<sup>2</sup> Pendepy'a re pemoī yvate guigua, apy yvy regua rive e'ŷ.

<sup>3</sup> Mba'eta pemano ma, ha'e ramo penderekove pyau ma Nhanderuetea py oī, Cristo reve ndojekuaai teri va'e.\*

<sup>4</sup> Ha'e gui Cristo nhanderekove reruarā ojekuaa ramo peē voi peī avi 'rā hexeve, hexakāa py.

#### *Cristo reve nhandekuai vy teko vai jaipe'apa aguā re ijayvua*

<sup>5</sup> Ha'e nunga rupi pemomba ke penderekko ko yvy regua oī teri va'e: tavy reia, nhemongy'apa reia, opa marā pendekuaixea, moaruā reia ha'e peipotapa reia. Ha'e nunga ma ta'angaa pembojeroviaa rami.

<sup>6</sup> Ha'e rami ae [onhe'ē rendu e'ŷ va'e kuery ikuai ramo ha'e kuery áry] ou 'rā Nhanderuete poxya.

<sup>7</sup> Peē kuery voi ha'e rami pendekuai va'ekue ymave rupi, ha'e kuery reko rupi ae.

<sup>8</sup> Ha'e rā aŷ ma pendejegui pemboi ke ha'ekue ramigua ha'e javi: pendevaia, pendepoxy reia, pejoapo vai reia, joe pendeayvu reia ha'e ha'eve'ŷ rei va'e rupi pendeayvua.

<sup>9</sup> Pendeapuve eme joupe, mba'eta penderekko yma guare pemboipa ma,

<sup>10</sup> ha'e teko pyau ju pendejee pemoī rire. Mba'eta teko pyau moingoare ma penembopy- auve avi 'rā heravy opa mba'e oikuaa ukaa py, ojee rami ete penemoingo aguā.

<sup>11</sup> Ha'e ramia py jipovei grego neī judeu regua, opire omboi uka va'ekue neī opire omboi uka e'ŷ va'e, amboae ramigua neī nhanderegua e'ŷ va'e, escravo neī escravo e'ŷ va'e. Ha'e rā Cristo anho jaikuaa, nhande ha'e javive re oī guive.\*

#### *Teko porā rupi nhandekuai aguā re ijayvua*

<sup>12</sup> Ha'e nunga rupi iky'a e'ŷ va'e ha'e guembiaiyvurā Nhanderuete pendoporavo rire ke pendejee pemoī penhomboaxy aguā, pendoporayvu, penhemo'yvyī'i, ivai rei e'ŷ va'e ha'e ivai rive-rive'ŷ va'e pendekuai aguā.

<sup>13</sup> Pejogueropo'aka peteī-teī, ha'e pendeapo vaia rā pejoperdoa guive. Senhor pendepordaague rami avi peē voi pejoperdoa 'rā.

<sup>14</sup> Ha'e nunga ha'e javi áryve pemoī mborayvu, opa mba'e py nhanemoingo porāarā.

<sup>15</sup> Tove Cristo peteī rami nhanemoingoa tapendererekoo pendepy'a py, mba'eta ha'e rami aguā ae penerenoī, peteī'i tete pendekuai aguā. Ha'e Nhanderuete perovy'aa rupi guive pendekuai.

<sup>16</sup> Tove Cristo ayvu peē kuery re toī opa mba'e py penemoingo porāarā. Penhombo'e ha'e penhomongeta 'arandua ha'e javi rupi. Nhanderuete pe peporaei salmos, hinos ha'e Nhe'ē guigua mboraei, pendepy'a py perovy'a reve.

\* **2:22** Gálatas 3.1-5 \* **3:3** Romanos 6.1-11 \* **3:11** Efésios 4.17-5.2

<sup>17</sup> Ha'e gui pendeayvua py, e'ŷ vy mba'emo pejapoa py, Senhor Jesus rery rupi meme pejapo, hery rupi Nhanderuete perovy'a reve.\*

### *Oo pygua kuery reko re ijayvua*

<sup>18</sup> Ta'yxy kuery, pendekuai peneme oipotaa rupi, mba'eta Senhor re vy ha'e rami aguã ha'eve.

<sup>19</sup> Ime kuery, peayvu pendera'yxy, ha'e perekko eme pendevai rei reve.

<sup>20</sup> Ta'y kuery, penhe'ẽ rendu penderu ha'e pendexy opa mba'e py, mba'eta ha'e rami rã Senhor voi pendererovy'a 'rã.

<sup>21</sup> Tuu kuery, pembopoxy rei eme pendera'y ha'e penderajy kuery, ha'e kuery ikueraí rei e'ŷ aguã.\*

<sup>22</sup> Tembiguai kuery, opa mba'e py penhe'ẽ rendu pendererekao ko yvy regua. Ha'e kuery oexaa py anho e'ŷ pemba'eapo porã, avakue pe ojejou porã ukaxe va'e rami rive. Ha'e rami 'rãgue py Senhor renonde pejererokyjea rupi peteĩ rupi anho pendekuai pendepy'a py.

<sup>23</sup> Opa mba'e pejapoa py pendepy'a ha'e javi py pejapo Senhor pe ae, avakue pe'ŷ,

<sup>24</sup> mba'eta peikuaa Senhor gui pejopy 'rãa hekoria omoĩ porã va'ekue. Senhor Jesus Cristo pe ae pemba'eapo.

<sup>25</sup> Ha'e rã heko vai va'e ma mba'emo vai anho 'rã ojopy, mba'eta Nhanderuete oikuua potaa py peteĩ regua rive ndoayvuvei joegui.

## 4

<sup>1</sup> Joguerekao kuery, pepena porã ke penerembiguai kuery re. Ha'evea rami perekko, mba'eta peikuaa pendererekao Senhor avi oikoa yva re.

### *"Pejerure orere, ha'e 'arandu rupi pendekuai", he'iague*

<sup>2</sup> Peĩ atã tema pejerurea py, peiko kuaa pota ha'e perovy'a reve.

<sup>3</sup> Ha'e rami nhavõ orere guive pejerure, peteĩ okẽ Nhanderuete oipe'a aguã, Cristo regua ayvu ndoikuaa ukaai teria rupi romombe'u aguã. Ha'e rami aikoa re ae aĩ nhuã py.

<sup>4</sup> Pejerure amombe'u porãve aguã re, xevy ojapo ukaague rami ae.

<sup>5</sup> 'Arandu rupi pendekuai nhande reveguia e'ŷ va'e kuerya rupi. Peiporu kuaa ke ára nhavõ.\*

<sup>6</sup> Pendeayvu porã kuaa riae ke, juky py anho he'ẽ porã va'e rami, peteĩ-teĩ pe pembovai kuaa aguã.

### *Tíquico ha'e Onésimo ombou aguã re ijayvuague*

<sup>7</sup> Ha'e gui xere mba'emo oiko va'ekue ma irmão Tíquico omombe'upa 'rã pãvy. Ha'e va'e ma xerembiayvu ha'e ojeroviapy, xereve Senhor pe omba'eapo va'ety.\*

<sup>8</sup> Pãa py ambou, orere oiko va'ekue omombe'u ramo pendepy'a guaxu aguã.

<sup>9</sup> Hupive amondouka avi 'rã irmão Onésimo, ojeroviapy ha'e nhancerembiayvu, peẽ kuerya pygua ae. Ha'e va'e kuery ma omombe'upa 'rã orea py oiko va'ekue.

### *Opaa py oxaruraague*

<sup>10</sup> Peẽ kuery pe oxarura uka va'e ma nhuã py xereve oĩ va'e Aristarco, ha'e Barnabé ryvy Marcos guive. (Ha'e va'e reko ma pãvy omombe'ua ae ma. Peẽ kuerya py ha'e ovaẽ rã ke pemovaẽ.)

<sup>11</sup> Jesus Justo 'epy va'e voi oxarura uka pãvy. Ha'e va'e kuery anho ikuai judeu regua xereve Nhanderuete po'akaa amombe'ua rupi omba'eapo va'e, xembopy'a guaxu va'e meme.

\* <sup>3:17</sup> Efésios 4.1-16; 5.15-20 \* <sup>3:21</sup> Efésios 5.22-6.9 \* <sup>4:5</sup> Efésios 5.15,16; 1 Pedro 3.13-17 \* <sup>4:7</sup> Efésios 6.21,22

<sup>12</sup> Ha'e gui peẽ kuery regua, Cristo Jesus rembiguai Epafras voi oxarura uka avi pãvy. Ha'e va'e ma onhea'ã ete oikovy peẽ kuery re ojerurea py, opa mba'e py pendekuai porã ha'e Nhanderuete oipota va'e peikuaapa porã aguã.

<sup>13</sup> Ha'e va'e ma peẽ kuery re nda'evei oiko, Laodicéia ha'e Hierápolis pygua kuery re guive.

<sup>14</sup> Peẽ kuery pe oxarura uka avi xerembiaayvu poropoanoa Lucas, ha'e gui Demas.

<sup>15</sup> Pexarura ke irmão kuery Laodicéia py ikuai va'e pe, Nifia ha'e hoo py igreja kuery onhemboaty va'e pe guive.

<sup>16</sup> Kova'e kuaxia para ma peẽ kuerya py peroayvu ma rire Laodicéia katy ju pemon-douka, ha'e pygua igreja kuery voi ogueroayvu aguã. Ha'e gui kuaxia para Laodicéia pegua voi peẽ kuerya py ju Peru peroayvu aguã.\*

<sup>17</sup> Arquipo pe aipopeje: “Enhea'ã tema nerembiaporã Senhor ome'ẽ va'ekue rupi, rejapopa peve.”

### *Oxarura reve ogueroayvu porãague*

<sup>18</sup> Xee Paulo xepo py ae ambopara pãvy axaruraa. Penema'endu'a ke nhuã py aĩ rã xere pejerure aguã.

Tove peẽ kuery tapendu Nhanderuete penemboaxya.

---

\* **4:16** Colossenses 2.1

## Tessalônica pygua kuery pe jypy'i Paulo ombopara va'ekue

### Tessalônica pygua kuery pe jypy'i Paulo ombopara va'ekue

Tessalônica tetā ma aŷ Grécia yvy re oĩ. Ha'e va'e pygua igreja apóstolo Paulo ombopy va'ekue (Atos 17.1-10). Ha'e pygua kuery Jesus remimbo'e ikuai va'e re amboae kuery opu'ã rei teĩ ojeroviae tema Jesus re.

Ha'e nunga omombe'ua rã Paulo oendu vy kova'e kuaxia ombopara Tessalônica pygua kuery ombopy'a guaxu aguã. Oguerovy'a reve ijayvu ha'e kuery ojeroviae py oĩ atã riae aguã re, mba'emo oiko teĩ. Aipoe'i: "Pevy'a riae ke. Pejerure riae tema pejep'e a e'ŷ re. Opa mba'e py perovy'a Nhanderuete. Ha'e rami ae oipota pendekuai Cristo Jesus re vy" (5.16-18). Omombe'u porâve guive Jesus remimbo'e kuery omano teĩ onhemboete jevy aguã, Jesus ou jevy jave.

#### *Oxarura reve ijayvu vy omboypyague*

<sup>1</sup> Xee Paulo ma Silvano ha'e Timóteo reve roxarura peẽ kuery Tessalônica tetā py Nhanderuete ha'e Senhor Jesus Cristo pegua igreja pendekuai va'e pe. Tove peẽ kuery tapendu penemboaxyha'e mby'a porâ.

#### *Tessalônica pygua igreja kuery re oguerovy'aague*

<sup>2</sup> Peẽ kuery ha'e javive re roguerovy'a riae Nhanderuete, ronhembo'e nhavõ orema'endu'a pendere. Nhanderuete renonde orema'endu'a riae avi

<sup>3</sup> pejeroviae rupi pemba'eapoa re, pejoayvua rupi penhea'ãa, ha'e nhande-Senhor Jesus Cristo ou jevy rã guarã pearõ pekuapya py peĩ atãa re.

<sup>4</sup> Ha'e rami vy irmão kuery Nhanderuete rembiayvu pendekuai va'e, roikuua pendeporavoague.

<sup>5</sup> Mba'eta pendea py ayvu porã romombe'u ramo ayvu anho e'ŷ ombou raka'e, ombou avi op'oakaa, Nhe'ê Ky'a E'ŷ ha'e anhetê va'e peikuaa porã aguã. Mba'eta peikuaa ma penembyte rupi orekuaiague, roayvua rupi.

<sup>6</sup> Ha'e rami vy ore orekuai rami avi peẽ voi pendekuai raka'e, Senhor rami ete. Ha'e rami vy ayvu pendu vy pevy'a pekuapya Nhe'ê Ky'a E'ŷ gui, opa mba'e py pejexavai teĩ.

<sup>7</sup> Ha'e rami py ojeroviae va'e kuery Macedônia ha'e Acaia pygua ikuai va'e ha'e javi pe pexa uka pekuapya teko porã.

<sup>8</sup> Ha'e rami rã peẽ kuerya gui Senhor ayvu onhendu opa rupi. Macedônia ha'e Acaia rupi anho e'ŷ, opa rupi oendua Nhanderuete re pejeroviae pekuapya. Ha'e rami rire ore romombe'u porâve e'ŷ teĩ ha'eve.

<sup>9</sup> Mba'eta ha'e kuery ae omombe'u peẽ kuerya py orekuai jave guare. Mba'eta Nhanderuete re pejeko rerova vy mba'emo ra'angaa pembojeroviae gui pejep'eapa raka'e, Nhanderuete oikove ha'e anhetê va'e pe anho pendekuai aguã,

<sup>10</sup> ha'e pearõ pekuapya aguã ta'y Jesus omanogue mbyte gui omboete va'ekue yva gui ou jevy rã guarã. Ha'e va'e ma nhandereraa jepe 'rã poxya ou oiny va'e gui.

## 2

#### *Tessalônica py Paulo kuery ayvu porã omombe'ua rupi ikuai jave guare re ijayvuague*

<sup>1</sup> Mba'eta irmão kuery, peikuaa porã peẽ kuerya py orekuaiague ndovare e'ŷia.

<sup>2</sup> Jypy Filipos tetā py ranhe oremoingo axy ha'e orejojai rei teĩ Nhanderuete re rojeroviae vy peẽ kuery pe ju romombe'u ayvu porã, orere opu'ã reia teĩ. Ha'e nungakue peẽ kuery peikuaapa.

<sup>3</sup> Mba'eta ore ma ronhombotavya rupi e'ŷ ronhomongeta, orereko ky'aa rupi e'ŷ, neĩ rojokore reia rupi e'ŷ guive oreayvu.

<sup>4</sup> Mba'eta Nhanderuete anhetẽ rupi orekuaia oikuaa vy oremoĩ ayvu porã mombe'uarã. Ha'e ramo ha'e rami ae oreayvu, avakue rive orejou porã aguã e'ŷ, ha'e rã Nhanderuete nhandepy'a re oĩ va'e re oikuaa pota va'e anho.\*

<sup>5</sup> Mba'eta anhetẽ neĩ peteĩgueve ndoreayvui rojejou porã ukaa rupi rive, neĩ mba'emo rojopyxeia rupi e'ŷ guive, peẽ voi peikuaa, Nhanderuete oikuaa avi.

<sup>6</sup> Ndorekuai guive avakue orererovy'aa rupi, peẽ kuery, neĩ amboae kuery.

<sup>7</sup> Cristo remimbou roiko vy ha'eve 'rãgue teĩ pêvy ronhemongaru uka aguã. Ha'e rami 'rãgue py penembyte rupi mborayvu rupi orekuai, kunha omemby kuery oayvua rami.

<sup>8</sup> Roayvu ete vy Nhanderuete guigua ayvu porã anho e'ŷ ha'eve pendevy romboaxa aguã, ore ae rekove voi, orerembiajyu ete peiko ramo.

<sup>9</sup> Mba'eta irmão kuery, penema'endu'a romba'eapoa rupi rojexavaiague re. Nhanderuete guigua ayvu porã romombe'ua rupi orekuai jave ara py ha'e pyávy ronhea'ã va'ekue peẽ kuery pe ronhemongaru uka e'ŷ aguã.

<sup>10</sup> Mba'eta peẽ pejerovia va'e kuerya rupi iky'a e'ŷ va'e orekuai, heko porã va'e ha'e ojou vaipy e'ŷ guive. Peẽ kuery peikuaa, ha'e Nhanderuete voi.

<sup>11</sup> Peikuaa avi tuu gua'y kuery omongoeta porã'ia rami avi peẽ kuery peteĩ-teĩ

<sup>12</sup> romongetaague, rombopy'a guaxu ha'e romokyre'ŷague guive, Nhanderuete oipotaa rami pendekuai aguã, opo'akaa ha'e guexakãa pyguarã penerenoĩ rire.

### *Tessalônica pygua kuery ojexavai teĩ ojeroviave temaa re ijayvuague*

<sup>13</sup> Amboae nunga re avi roguerovy'a riae Nhanderuete, mba'eta ixuguigua ayvu romombe'u rã pendu vy pejopy raka'e avakue ayvu rami rive'ŷ, ha'e rã Nhanderuete ayvu anhetẽ va'e rami ae. Ha'e va'e rupi oexa uka opo'akaa pejerovia va'e pendekuaia rupi.\*

<sup>14</sup> Ha'e rami vy irmão kuery, Cristo Jesus re vy peẽ voi pendekuai Judéia pygua igreja kuery Nhanderuete pe ikuiaia rami. Mba'eta judeu kuery po py ha'e kuery ikuai axyague rami avi peẽ voi pendekuai axy raka'e peneretã pygua kuery po py.

<sup>15</sup> Judeu kuery ma Senhor Jesus ha'e profeta kuery ojuka rire ore kuery ju orembojex-avai rei. Nhanderuete oguerovy'aa rupi e'ŷ ikuai, ha'e avakue pavẽ re opu'ã rei okuapy guive.

<sup>16</sup> Mba'eta amboae regua kuery pe ayvu romombe'u ta ramo ha'e kuery orejoko karamboae, amboae regua oo jepe e'ŷ aguã. Ha'e rami ojejavypave ovv rire ha'e kuery áry poxya ou ae ma.

### *Tessalônica pygua kuery Paulo oexaxea re ijayvuague*

<sup>17</sup> Irmão kuery, ore ma xapy'a rai'i orepe'aa karamboae peẽ kuerya gui mombyry, ha'e rã orekuraxõ py ma peẽa gui mombyry e'ŷ orekuai. Ha'e rami vy ronhea'ã ete roexa ju vy roo aguã.\*

<sup>18</sup> Ha'e nunga rupi peẽ kuerya py rojuxe jepi teĩ. Xee Paulo ri jepe, peteĩgue'i anho e'ŷ, mokoïgue ma aaxe. Ha'e rami teĩ Satanás orejoko.

<sup>19</sup> Mba'eta mava'e tu roarõ ha'e orembov'y'a va'e ikuai? Nhande-Senhor Jesus ou rã mava'e kuery tu coroa roguerovy'a va'e 'rã ikuai henonde, peẽ e'ŷ vy?

<sup>20</sup> Tá, peẽ kuery ae rojou porã ha'e roguerovy'a va'e pendekuai.

## 3

### *Ha'e kuerya py oirũ Timóteo ombou jave guare re Paulo ijayvuague*

\* **2:4** 2 Coríntios 1.12; 4.1,2    \* **2:13** Atos 17.1-9    \* **2:17** Atos 17.10-13

<sup>1</sup> Ha'e nunga rupi peẽ kuery re nda'eveia ndorogueropo'akavei vy ronhembopy'a karamboae Atenas py ore ae'i ropyta,

<sup>2</sup> ha'e vy pendea katy romondouka aguã irmão Timóteo.\* Ha'e va'e ma Nhanderuete rembiguai ha'e Cristo regua ayvu porã mombe'ua oiko. Penemombaraete ha'e penembopy'a guaxu aguã rombou karamboae pejeroviave aguã,

<sup>3</sup> pendekuai axy teĩ mava'eve rei pejep'e a e'ŷ aguã. Mba'eta peẽ voi peikuaa jajexavai aguã rami nhandekuaia.

<sup>4</sup> Mba'eta peẽ kuerya py teri orekuai reve aiporo'e ae ma nhandekuaai axy'rãa. Ha'e ramo ha'ekue rami ae oiko, peẽ peikuaa rami.

<sup>5</sup> Ha'e nunga rupi xee nda'eveei vy ambou Timóteo pejerovia teri paa aikuaa aguã, mba'eta akyje poromoangecko penemoangeko ramo peẽa py romba'eapoague mba'everã ndovarei va'e opyta gui.

<sup>6</sup> Ha'e gui aŷ ma peẽ kuerya gui Timóteo ou ju vy omombe'u pejerovia riae, pendeporayvu ha'e orere penema'endu'a riae guive. Omombe'u avi orerexaxe pekuapya, ore roexaxe rami avi.

<sup>7</sup> Anhetê irmão kuery, peẽ kuery pejerovia riae roikuaa vy orepy'a porã ju, opa mba'e py orekuai axy ha'e rojexavai teĩ.

<sup>8</sup> Aŷ ma Senhor re vy penembaraeve riae roendu vy orepy'a porã ju.

<sup>9</sup> Mba'ixa nda'u ha'eve Nhanderuete roguerovy'a aguã pendere? Mba'eta opa mba'e py peẽ kuery re rovy'a Nhanderuete renonde.

<sup>10</sup> Ara py ha'e pyávy rojerure orepy'a ha'e javi py roexa ju aguã, pejeroviave aguã re norombo'epai teri va'ekue re rombo'eve ju aguã.

### *Tessalônica pygua kuery re Paulo ojerureague*

<sup>11</sup> Ha'e nunga rupi tove Nhanderuete ha'e nhande-Senhor Jesus torembou peẽ kuerya py.

<sup>12</sup> Senhor tojapo avi penembaraeve ha'e pejoayvuve aguã rami jomeme ha'e pavẽ reve, peẽ kuery roayvua rami avi.

<sup>13</sup> Ha'e rami vy pendep'y'a py penembaraeve aguã, Nhanderuete renonde iky'a e'ŷ va'e ha'e ojou vaipy e'ŷ pendekuai aguã, nhande-Senhor Jesus ojeupagua iky'a e'ŷ va'e kuery reve ou rã guarã.

## 4

### *Iky'a e'ŷ va'e nhandekuaai aguã re ijayvua*

<sup>1</sup> Aŷ ma irmão kuery, Senhor Jesus re vy rojerure ha'e romongeta oreayvua pendu va'ekue rupi pendekuaive tema aguã, Nhanderuete pendererovy'a aguã rami. Pendekuaia rami ae tema pejapove peovy.

<sup>2</sup> Mba'eta peikuaa porã ae ma Senhor Jesus ayvu re rombo'eague.

<sup>3</sup> Po rami ae Nhanderuete oipota: iky'a e'ŷ va'e pendekuai, pendetavy rei eme,

<sup>4</sup> ha'e peteĩ-teĩ perekoo kuaa penderete regua, iky'a e'ŷ va'e ha'e omboetepy pendekuai aguã,

<sup>5</sup> amboae regua kuery Nhanderuete ndoikuaai va'e itavy reixeia rupi ikuiaia rami e'ŷ.

<sup>6</sup> Ha'e nunga py avave rei petekoavy eme, neĩ pekore eme pende-irmão, mba'eta Senhor nhombopaga 'rã ha'e nunga ha'e javi re. Ha'e nunga re oreayvu ha'e romombe'u porã ae ma.

<sup>7</sup> Mba'eta Nhanderuete ma nhanhemongy'apa rei aguã e'ŷ nhanerenoĩ, ha'e rã iky'a e'ŷ va'e nhandekuaai aguã.\*

<sup>8</sup> Ha'e nunga rupi ha'e va'e ayvu noenduxei va'e ma avakue ayvu rive'ŷ noenduxei, ha'e rã Nhanderuete pendevy Nhe'ẽ Ky'a E'ŷ ome'ẽ va'ekue ayvu ae.

\* **3:2** Atos 17.14,15, 18.5   \* **4:7** Romanos 13.11-14; Efésios 5.3-14

### *Irmão kuery jayvu aguã re ijayvua*

- <sup>9</sup> Irmão kuery peayvu aguã re ambopara e'ŷ teĩ ha'eve, mba'eta Nhanderuete ae penembo'e peteĩ-teĩ pejoayvu aguã re.
- <sup>10</sup> Anhetẽ peayvu ae ma Macedônia py irmão kuery ikuai va'e ha'e javi. Ha'e rami teĩ irmão kuery, ajerure mborayvu re pendekuaive tema aguã.
- <sup>11</sup> Penheáã ke pendekuai porãa rupi, peikuua pota penderekro re ae, ha'e pemba'eapo pendepo py, aiporo'eague rami ae.
- <sup>12</sup> Ha'e rami vy 'rã nhandereveguia e'ŷ kuery voi penemboete, ha'e mba'eve ndoatai pêvy.\*

### *Senhor oua ára ixupegua kuery omano va'ekue onhemboete ju aguã re ijayvua*

- <sup>13</sup> Irmão kuery, roipota peikuua avi Cristo pegua oke va'ekue reko, ha'e kuery re pendeporiau riae e'ŷ aguã, amboae kuery mba'eve noarõi va'e rami e'ŷ.
- <sup>14</sup> Mba'eta jarovia Jesus omanoague gui onhemboete jevyague. Ha'ekue rami avi ixupegua kuery oke ma va'ekue voi Nhanderuete ogueru rukapa ju 'rã Jesus pe.
- <sup>15</sup> Mba'eta Senhor ayvu rupi romombe'u porâve ju: Senhor ou peve nhande jaikove teri va'e ma nhande ranhe e'ŷ 'rã hexeve nhaĩ oke va'e kuery gui.
- <sup>16</sup> Mba'eta Senhor ijayvu atã reve oguejy 'rã yva gui, anjo yvateve va'e ayvu ha'e Nhanderuete mimby guaxu onhendu reve. Ha'e gui Cristo pegua omano va'ekue ranhe 'rã onhemboete.
- <sup>17</sup> Ha'e gui ma nhande jaikove teri va'e ju ha'e kuery reve nhandereraapaa avi 'rã arai rupi, Senhor nhaovaexí aguã yvate. Ha'e rami vy Senhor reve riae 'rã nhandekuai.
- <sup>18</sup> Ha'e va'e ayvu py penhombopy'a guaxu ke peteĩ-teĩ.\*

## 5

### *Senhor ou xapy'a 'rãa re ijayvua*

- <sup>1</sup> Irmão kuery, ha'e va'e ára ha'e araka'e paa amombe'u porã ve'ŷ teĩ ha'eve,
- <sup>2</sup> mba'eta peikuua ae Senhor ára ou xapy'a 'rãa, imonda va'e pyávy oua rami.
- <sup>3</sup> Amboae kuery "Javy'a tema, mba'eve rei ndoikoi 'rã" he'i okuapy jave ou xapy'a 'rã imombaarã, imemby ta va'e haxy oendua rami. Ha'e rami vy ndoo jepei 'rã.\*

### *Nhama'ena aguã re ijayvua*

- <sup>4</sup> Ha'e rã irmão kuery, peẽ ma pytũ rupi e'ŷ pendekuai, ha'e va'e ára penemondyiara e'ŷ ovaẽ aguã imonda va'e rami.
- <sup>5</sup> Nhande ma ára pygua hendy va'e ra'y meme. Pyavygua e'ŷ, pytũ guy rupigua e'ŷ nhandekuai.
- <sup>6</sup> Ha'e rami vy nda'evei amboae kuery rami jake aguã. Ha'e rami 'rãgue py nhama'ena tema 'rã jaiko kuaa pota reve.\*
- <sup>7</sup> Mba'eta oke va'e kuery ma pyávy 'rã oke, oka'u va'e voi oka'u 'rã okuapy pyávy.
- <sup>8</sup> Ha'e rã nhande ma ara pygua vy jaiko kuaa pota 'rã. Nhandejee pexo reguarã nhamoï 'rã jajerovia aguã ha'e mborayvu. Ngora ratãrã ma nhamoï 'rã nhandereraa jepea nharõ jaikovya.
- <sup>9</sup> Mba'eta Nhanderuete ipoxy rã guarã e'ŷ nhanemoingo, ha'e rã jaupity aguã nhande-Senor Jesus Cristo nhandereraa jepe aguã.
- <sup>10</sup> Mba'eta nhandere omano raka'e, nharõ jaikovy e'ŷ vy jake ma teĩ hexeve nhandekuai aguã.
- <sup>11</sup> Ha'e nunga rupi penhombopy'a guaxu ha'e penhomombaraete peteĩ-teĩ, pejapoa rami ae.

### *Mba'exa pa nhandekuai aguã re ijayvua*

---

\* **4:12** 2 Tessalonicenses 3.6-13    \* **4:18** Mateus 24.29-31; 1 Coríntios 15.51-58    \* **5:3** Mateus 24.36-25.13; 2 Pedro 3.10-13    \* **5:6** Lucas 12.35-48

<sup>12</sup> Aŷ ma irmão kuery, rojerure pemboete aguã penembyte rupi ombo'eapo va'e kuery, Senhor re vy penderereko ha'e penemoneta rã.

<sup>13</sup> Senhor pe ombo'eapo ramo peayvu ha'e pemboyvate guive.\* Pendekuai porã ke jomeme.

<sup>14</sup> Ha'e gui irmão kuery, oreayvu avi po rami: pemoneta ke nhonhe'ẽ rendu e'ŷ va'e, na'ikyre'ŷi va'e ma pembopy'a porã, ha'e rã ikangy va'e ma pemombaraete. Pavẽ reve pendekuai peteĩ rami.

<sup>15</sup> Peja eme avave rei ojepy-jepy aguã. Ha'e rami 'rãgue py iporã va'e rupi meme pendekuai jomeme ha'e pavẽ reve.

<sup>16</sup> Pevy'a riae ke.

<sup>17</sup> Pejerure riae tema pejepe'a e'ŷ re.

<sup>18</sup> Opa mba'e py perovy'a Nhanderuete. Ha'e rami ae oipota pendekuai Cristo Jesus re vy.

<sup>19</sup> Pejoko eme Nhe'ẽ.

<sup>20</sup> Pembovare e'ŷ eme profeta kuery ijayvu rã.

<sup>21</sup> Peikuua pota opa mba'e re. Pendejee pemoĩ ha'eve va'e,

<sup>22</sup> ha'e rã ha'eve'ŷa ramigua ha'e javi gui ma pejepe'a.

### *Apóstolo ojerureague*

<sup>23</sup> Tove Nhanderuete nhanemoingo porãa va'e tapendeky'a'o opa mba'e py. Tove topena penenhe'ẽ, peikovea ha'e penderete re, peteĩ'i rupi iky'a e'ŷ va'e pendekuai aguã nhande-Senor Jesus Cristo ou jevy rã guarã.

<sup>24</sup> Penerenoĩare ma ojeroviapy vy ojapo 'rãe ha'e rami.

### *Oxarura reve opaa py ogueroayvu porãague*

<sup>25</sup> Irmão kuery, pejerure ke orere.

<sup>26</sup> Pexarura irmão kuery ha'e javi pe iky'a e'ŷ va'e kuery joayvua rami.

<sup>27</sup> Senhor rery rupi ajerure kova'e kuaxia irmão kuery ha'e javi pe ogueroayvua aguã.

<sup>28</sup> Tove peẽ kuery tapendu nhande-Senor Jesus Cristo penemboaxya.

---

\* <sup>5:13</sup> 1 Timóteo 5:17-19

## **Tessalônica pygua kuery pe mokoīguea Paulo ombopara va'ekue**

## **Tessalônica pygua kuery pe mokoīguea Paulo ombopara va'ekue**

Kova'e kuaxia mokoīguea ma Tessalônica tetā pygua Jesus remimbo'e kuery pe apóstolo Paulo ombopara va'ekue. Kuaxia jypy ombopara va'ekue ha'e kuery oexa teĩ ndoikuuai rei teri okuapy Senhor Jesus ou jevy aguã ára. Ha'e kuery va'e regua amongue "Ha'e va'e ára ovaẽ ma", he'i, ha'e rã amboae kuery ma "Any va'eri ha'e va'e ára ovaẽ rai'i ma ramo aÿ gui ma nanhamba'eaxovei 'rã" he'i okuapy, ndoikuuai rei vy.

Ha'e nunga rupi kova'e kuaxia ju apóstolo Paulo ombopara omombe'u porãve aguã Senhor ou jevy rã guarã. Aipoe'i: "Avave rei pe penhembotavy uka eme, mba'eta heta ojepe'a ma ramo mae ma 'rã hi'ára ovaẽ, ha'e ava heko vai ete va'e nhomokanhya ra'y ojekuaa ma ramo" (2.3). Paulo omombaraetea rupi guive ijayvu Jesus re ojeroviave aguã.

### *Oxarura reve ijayvu vy omboypyague*

<sup>1</sup> Xee Paulo ma Silvano ha'e Timóteo reve roxarura Tessalônica py Nhanderuete ha'e Senhor Jesus Cristo pegua igreja kuery pendekuai va'e pe.

<sup>2</sup> Tove peẽ kuery tapendu penemboaxyha'e mby'a porã Nhanderuete ha'e Senhor Jesus Cristo guigua.

### *Tessalônica pygua kuery re oguerovy'aague*

<sup>3</sup> Irmão kuery, peẽ kuery re roguerovy'a riae Nhanderuete. Ha'evea rami guive roguerovy'a, mba'eta opa mba'e py pejeroviave, ha'e peteĩ-teĩ pejoayvuve peovy.

<sup>4</sup> Ha'e rami rã Nhanderuete pegua igreja kuery ikuia rupi orema'endu'a porã peẽ kuery re, mba'eta roikuaa pejeroviaa py peĩ atãa, opa mba'e py pendekuai axy ha'e pejexavai teĩ.

<sup>5</sup> Ha'e rami pendekuai ramo pavẽ oikuua Nhanderuete ha'evea rami joguerekao. Ha'e gui pendevy pe Nhanderuete "Xepo'akaa pyguarã roiporavo" he'i 'rã, ikáuxa ae pendekuai axy ramo.

<sup>6</sup> Mba'eta anhetẽ ha'evea rami Nhanderuete omoingo axy 'rã penemoingo axyare kuery,

<sup>7</sup> ha'e rã aÿ pendekuai axy va'e ma penemombytu'u avi 'rã orereve, yva gui Senhor Jesus opo'akaa oexa uka vy ojekuaa jave, ojeupegua anjo kuery reve.

<sup>8</sup> Ha'e rami vy tata py ombopagapa 'rã Nhanderuete ndoikuaaxeい ha'e Senhor Jesus regua ayvu porã rupi nda'ikuaxiei va'ekue.

<sup>9</sup> Ha'e kuery ikuai axy riae 'rã Senhor renonde ha'e ipo'akaa rexakãa gui mombyry oipe'aague py.

<sup>10</sup> Ha'e va'e ára Jesus ou rã iky'a e'ÿ va'e kuery omboete 'rã, hexe ojerovia va'e ha'e javi 'rã oguerovy'a okuapy, peẽ kuery voi, mba'eta ayvu porã romombe'u rã perovia avi rire.

<sup>11</sup> Ha'e nunga rupi ropytu'u e'ÿ re rojerure pendere, Nhanderuete ojeupe guarã ete penemoingo aguã, penerenoÿague rami ae. Tove opo'akaa rupi tomoingo joupe pejapo porãxeia, ha'e pejeroviaa rupi mba'emo pejapoxea ha'e javi guive.

<sup>12</sup> Ha'e rami rã peẽ kuery pendekuaia re Senhor Jesus Cristo rery omboetea aguã, ha'e hexe penemboetea avi aguã, Nhanderuete ha'e Senhor Jesus Cristo penemboaxyha'e oexa uka rire.

## 2

### *Senhor ou ju aguã, ha'e ava heko vai ete va'e re ijayvua*

- <sup>1</sup> Ha'e gui irmão kuery, xeayvu ta nhande-Senhor Jesus Cristo ou jevy ramo oña py nhano'õmba aguã re. Ha'e rami rã guarã romoneta.
- <sup>2</sup> Xapy'a rei amongue ijayvu vy "Senhor ára ovaẽ ma" he'i rã pendu teĩ penhemondyi eme, neĩ pepẽxa rei eme guive, "Nhe'ẽ guigua ayvu aendu" 'ea teĩ, ha'e'ŷ vy "Paulo kuery kuaxia para ombopara vy omombe'u" 'ea rã pendu teĩ ae ma.
- <sup>3</sup> Avave rei pe penhembotavy uka eme, mba'eta heta ojepe'a ma ramo mae 'rã hi'ára ovaẽ, ha'e ava heko vai ete va'e nhomokanhyra'y ojekuaa ma ramo.
- <sup>4</sup> Ha'e va'e ma ivai ete reve opu'ã 'rã "Nhanderuete" 'epy va'e ha'e javi rovai, mba'emo ombojeroviapu ikuai va'e re. Ha'e rami vy Nhanderuete ramigua rive onhemoingo vy ixupeguia henda iky'a e'ŷ va'e ropy ae 'rã oguapy.\*
- <sup>5</sup> Napanema'endu'ai teve pendea py teri aiko vy amombe'u jepiague re?
- <sup>6</sup> Ha'e gui aŷ peikuaa avi mba'e pa ijokoarã oña, hi'ára py mae ma ojekuaa aguã.

### *Ava heko vai ete va'e rekorã re ijayvua*

- <sup>7</sup> Ha'e rami avi aŷ guive voi heko vaia nhemi rupi ojapo oiny mba'emo. Ha'e rami teĩ ndojekuaa porãi teri, ijokoarã oĩ va'e oipe'aa e'ŷa ja.
- <sup>8</sup> Ha'e gui mae ma 'rã heko vai ete va'e ojekuaa. Ha'e va'e ma Senhor Jesus ou vy ojuka 'rã ojuru py oipeju vy rive. Opo'akaa oexa ukaa py omokanhy vyvoi 'rã.
- <sup>9</sup> Heko vai ete va'e ma Satanás po'akaa rupi ojekuaa vy ojapo 'rã opa marãgua hexa pyrã ha'e nhomondiyipaarã, nhombotavyxe vy.
- <sup>10</sup> Opa marãgua teko vai py ombotavy 'rã okanhy ovu va'e kuery, ha'e kuery ojee nomoĩ rire anhetã va'e oendu pota aguã oo jepe aguã.\*
- <sup>11</sup> Ha'e ramo Nhanderuete ombou 'rã imbotavyarã, apu rive oguerovia aguã.
- <sup>12</sup> Ha'e kuery ha'e javi 'rã ombopaga, anhetã va'e oguerovia 'rãgue py teko vai anho oguerovy'a rire.

### *Jarovy'a reve nhanembaraete aguã re ijayvua*

- <sup>13</sup> Ha'e nunga rupi irmão kuery Senhor rembiayvu pendekuai va'e, ha'evea rami peẽ kuery re roquerovy'a riae Nhanderuete, mba'eta jypy'i guive pendeporavo raka'e Nhe'ẽ pendeky'a'o, ha'e ayvu anhetã va'e re pejerovia ramo peo jepe aguã.
- <sup>14</sup> Ha'e rami aguã ae ayvu porã romombe'u rã penerenoĩ raka'e, nhande-Senhor Jesus Cristo rexakãa peupity aguã.\*
- <sup>15</sup> Ha'e nunga rupi irmão kuery, peĩ atã ha'e pemoĩ porã oreayvu py ha'e kuaxia romboparaague py rombo'eague.
- <sup>16</sup> Ha'e nunga rupi peẽ kuery re roquerure nhande-Senhor Jesus Cristo ha'e Nhanderuete pe, mba'eta nhanderayvu vy nhanemboaxya rupi ome'ẽ mby'a guaxu marã e'ŷ ha'e iporã ete va'e nharõ aguã.
- <sup>17</sup> Tove tapenembopy'a guaxuve ha'e tapenemombaraeteve, iporã va'e pejapo ha'e iporã va'e re pendeayvua ha'e javi py.

## 3

### *Tessalônica pygua kuery Paulo re ojerure aguã re ijayvuague*

- <sup>1</sup> Ha'e gui irmão kuery, pejerure avi orere, Senhor ayvu romombe'u rã oenduave ha'e oguerovy'aave tema aguã, peẽ kuerya rupi oikoa rami avi.
- <sup>2</sup> Pejerure roo jepe aguã avakue heko vai ha'e porayvu e'ŷ va'e gui, mba'eta pavẽ e'ŷ ojerovia.

---

\* **2:4** 1 João 2.18,19   \* **2:10** Mateus 24.23-25; Apocalipse 13.1-10   \* **2:14** Romanos 8.28-30

<sup>3</sup> Ha'e rami teĩ Senhor ma ojeroviapy. Ha'e vy penemombarae ha'e pendere opena 'rã poromboeko vaia gui.

<sup>4</sup> Ha'e rami avi Senhor re vy ore rojerovia peẽ kuery re, mba'eta roikuua rojapo uka va'ekue pejapopa pekuapya, ha'e pejapo riaeve 'rã guive.

<sup>5</sup> Tove Senhor pendepy'a re topena ixuguigua mborayvu ha'e Cristo re peĩ atãa rupi pendekuai aguã rami.

### *Ha'evea ramigua jajapo aguã re ijayvua*

<sup>6</sup> Irmão kuery, Senhor Jesus Cristo rery rupi aiporo'e: Penhemoirũve eme irmão ha'eve e'ŷa rami rei, rombo'eague rami e'ŷ ikuai va'e re.

<sup>7</sup> Mba'eta peẽ ae voi peikuua orekuuaiague rami pendekuai aguã, mba'eta neĩ peteĩ henda py ndoroiko vaikue rei va'ekue peẽ kuerya rupi,

<sup>8</sup> ndorokaru rivei guive. Ha'e rami 'rãgue py romba'eapoa rupi ronhea'ã ete va'ekue. Ara py ha'e pyávy romba'eapo va'ekue avave rei pe ronhemongaru uka rive e'ŷ aguã.

<sup>9</sup> Ha'e rami avi ronhemongaru uka aguã nda'eve e'ŷi teĩ ha'e rami ndoroikoi va'ekue ore rami avi pendekuai aguã.

<sup>10</sup> Mba'eta pendereve teri roiko vy aiporo'eague rami: "Nomba'eapoxei va'e tokaru eme."

<sup>11</sup> Mba'eta omombe'ua rã roendu peẽ kuerya rupi amongue omба'eapo e'ŷ vy ha'eve e'ŷa rami rei ikuia. Joeko re rive tema oikuua pota.

<sup>12</sup> Ha'e rami ikuai va'e pe oreayvu, ha'e Senhor Jesus Cristo rery rupi romongeta ikuai porã'ia rupi omба'eapo vy okaru aguã ha'e kuery ae po py ojou va'ekue re.\*

<sup>13</sup> Ha'e rã peẽ irmão kuery, pejepe'a eme iporã va'e pejapoa gui.

<sup>14</sup> Xapy'a rei kova'e kuaxia re oreayvu oĩ va'e amongue noendu potai 'rã. Ha'e ramo peikuua pota porã ke ha'e kuery re. Penhemoirũve eme oximba aguã.

<sup>15</sup> Ha'e rami teĩ ha'e kuery pe "Xerovaigua" peje eme, ha'e rã irmão pe rami 'rã pendeayvu.\*

<sup>16</sup> Tove Senhor nhanemoingo porãa va'e ae tapenemoingo porã opa mba'e py. Senhor toiko peẽ kuery ha'e javi reve.

### *Oxarura reve opaa py ogueroayvu porãague*

<sup>17</sup> Axaruraa ma xee Paulo po py ae ambopara. Guĩ rami ae xekuaa 'rã ambopara va'e nhavõ re. Guĩ rami ae xee ambopara xerery.

<sup>18</sup> Tove peẽ kuery ha'e javi tapendu nhande-Senor Jesus Cristo penemboaxy.

\* **3:12** Efésios 4.28; 1 Tessalonicenses 4.9-12

\* **3:15** Mateus 18.15-20

## **Timóteo pe jypy'i Paulo ombopara va'ekue**

## **Timóteo pe jypy'i Paulo ombopara va'ekue**

Timóteo ma apóstolo Paulo irū kunumi va'e raka'e. Paulo oirūrā ogueraa vy jypy ombo'e, ha'e gui Éfeso tetā katy omondouka, igreja ikuai va'e re opena aguā.

Kova'e kuaxia ma Timóteo pe Paulo ombopara mba'eta oendu vy omombe'ua rā Cristo remimbo'e kuery mbyte ha'eve'ÿa rami nhombo'e va'e ikuia. Ha'e rami rā apóstolo Paulo ombopara ha'evea rami ju ombo'e vy. Aipoe'i: "Mba'eta peteñ'i oiko Nhanderuete. Ha'e rami ae avi peteñ'i oiko Nhanderuete reve peteñ rami nhanemoingoa. Ha'e va'e ma Cristo Jesus ava ojeapo va'ekue. Pavē reraa jepearā ojejuka uka raka'e" (2.5-6a).

Paulo omongoeta igreja re opena va'e kuery. Timóteo pe guive aipoe'i: "Iporā va'e re anho enheaã rejeroviaa rupi. Eupity ete tekove marā e'ÿ" (6.12a).

### *Oxarura reve ijayvu vy omboypyague*

<sup>1</sup> Xee Paulo ma Cristo Jesus pegua apóstolo aiko, Nhanderuete nhandereraa jepea ha'e Cristo Jesus nharō jaikovy va'e ojapo ukaague rami vy.

<sup>2</sup> Ndee Timóteo pe axarura. Rejeroviaa py xera'y ete rami reiko. Tove terendu Nhan-deruete ha'e nhande-Senhor Jesus Cristo guigua mborayvu, nemboaxyha'e mby'a porā.\*

### *Éfeso tetā py Timóteo nhombo'e ha'e nhomongetaa rupi oiko aguā re ijayvuague*

<sup>3</sup> Macedônia yvy katy aa vy aipoa'e va'ekue ndee Éfeso tetā py ranhe repyta aguā, ha'e rami vy amongue remongoeta aguā, amboae rami rei nhombo'e ve'ÿ aguā,

<sup>4</sup> ha'e ayvu rive ha'e ymagua kuery rery oña ndopa kuaai va'e re oikuua pota ve'ÿ aguā, mba'eta ha'e nunga ojapo 'rā joo rami e'ÿ-e'ÿ oikuua aguā rami, ojeroviaa rupi Nhanderuete pe ikuai 'rāgue py.

<sup>5</sup> Ha'e rami xeayvu ha'e kuery porayvu re ikuai aguā ipy'a ky'a e'ÿa ha'e hi'arandua rupi anho, ojerovia merami rivea rupi e'ÿ.

<sup>6</sup> Mba'eta ha'e rami ikuiai gui amongue ojepe'a vy okanhymba ma ovare e'ÿ va'e re rive ijayvua rupi.

<sup>7</sup> Ha'e kuery ma lei re nhombo'e va'ety ramigua onhemoingo va'eri ha'e kuery ae oayvua oikuua vy e'ÿ, neñ mba'e nunga re pa nhombo'ea voi, oikuapa merami teñ.

### *Lei mba'erā pa oejaague re ijayvua*

<sup>8</sup> Ha'e rami avi lei ma ha'evea rami amongue oiporu ramo ha'evea, jaikuua pavē.

<sup>9</sup> Mba'eta heko porā va'e peguarā e'ÿ lei oejaai raka'e, ha'e rā heko vai ha'e nhonhe'ẽ rendu e'ÿ va'e kuery pe, Nhanderuete nomboetei ha'e ojejavypa rei va'e pe, ndojeroviai ha'e iky'a e'ÿ va'ea rupi e'ÿ ikuai va'e pe, nguū ha'e oxy ae ojuka, ha'e amboae kuery voi ojuka va'e pe,

<sup>10</sup> heko ky'a ha'e avakue meme joe opena va'e pe, jogueraa rive va'e pe, ijapu ha'e ijayvuxa va'e pe, ha'e nhombo'e porāa rupi e'ÿ ikuai va'e mboae pe lei oejaai raka'e.

<sup>11</sup> Mba'eta ayvu porā Nhanderuete hexakāmba ha'e ima'endu'a porāmby va'e xevy pe omombe'u uka va'ekue re anho oñ nhanhombo'e porā aguā.\*

### *Nhanderuete omboaxyague re apóstolo Paulo ijayvuague*

<sup>12</sup> Arovya'a ete nhande-Senhor Cristo Jesus xemombaraetea va'e, mba'eta ojeroviap aikoa oikuua vy xemoñ ixupe amba'eapo aguā.

\* **1:2** Atos 16.1-5; 1 Coríntios 4.17, 16.10,11

\* **1:11** Gálatas 3.19-25

13 Xee ma yma hexe xeayvu vai ha'e ajoavyky rei va'ekue xevai vy. Ha'e rami ete teĩ xemboaxy, mba'eta aikuaa e'ŷ vy, ajerovia e'ŷ vy ha'e ramigua ajapo.\*

14 Ha'e gui nhande-Senhor xemboaxy etea oexa uka vy omoĩ ajerovia aguã, mborayvu Cristo Jesus re oĩ va'e reve.

15 Pova'e ayvu ma ogueroviaa ha'e peteĩ-teĩ ojee omoĩmbaa aguã ha'eve va'e: Cristo Jesus ou yvy re ojejavy va'e kuery ogueraa jepe aguã. Ha'e gui xee ma pavẽ gui ajejavyve va'ekue,

16 va'eri xemboaxy karamboae po rami aguã, xee ajejavyve va'ekue aikoa rupi Jesus Cristo oexa uka aguã nhomboaxy etea, amboae kuery xerekoo oendu vy xee rami avi hexe ojerovia vy tekove marã e'ŷ oupity aguã.

17 Ha'e nunga rupi Huvixave imarã e'ŷ, omano e'ŷ ha'e jaexa e'ŷ va'e, Nhanderuete peteĩ'i oiko va'e ae tomboetea ha'e toguerovy'aa aŷ ha'e araka'e rã peve. Amém.

### *Iporã va'e re Timóteo onhea'ã aguã re ijayvuague*

18 Xera'y Timóteo, pova'e ae aeja rejapo aguã, Nhe'ẽ gui nderekorã omombe'ua ague rami vy. Ha'e nunga re nembaraete vy enhea'ãve tema iporã va'e re.

19 Ejep'e a eme rejeroviaa gui, neĩ ndepy'a ky'a e'ŷa rupi reikoa gui, mba'eta amongue ma ipy'a ky'a e'ŷa rupi ikuiaa gui ojepe'a vy ha'e kuery ae ojeroviaa ombovaipa uka.

20 Ha'e va'e kuery regua ma Himeneu ha'e Alexandre. Ha'e ramo Satanás po py ranhe xee amboaxa uka oguereko axy aguã, ha'e kuery ijayvu vai ve'ŷ aguã.\*

## 2

### *Pavẽ re jajerure aguã, ha'e Nhanderuete reve peteĩ rami nhanemoingoa re ijayvua*

1 Opa mba'e gui aipotave va'e ma peẽ kuery pejerure aguã Nhanderuete pe. Penhembo'e, pejerure, perovy'a guive pavẽ re penema'endu'a vy,

2 huvixave ha'e joe opena aguã ombopo'aka pyre ha'e javi re guive, ha'eve vai'i reve nhandekuai porã aguã, opa mba'e py Nhanderuete pe nhandekuai ha'e nhanhomboetea rupi.

3 Ha'e rami pejerurea ma Nhanderuete nhandereraa jepea renonde iporã, oguerovy'a 'rã guive.

4 Mba'eta oipota anhetẽ ete va'e pavẽ oikuua vy oo jepe.

5 Mba'eta peteĩ'i oiko Nhanderuete. Ha'e rami ae avi peteĩ'i oiko Nhanderuete reve peteĩ rami nhanemoingoa. Ha'e va'e ma Cristo Jesus ava ojeapo va'ekue.\*

6 Pavẽ reraa jepearã ojejuka uka va'ekue. Ha'e va'e ayvu ma ha'evea ára oikuua uka.

7 Ha'e rami aguã ae xemoĩ karamboae ayvu mombe'uarã, apóstolo ha'e amboae regua mbo'earã, anhetẽ va'e re ha'e kuery ojerovia aguã. Ha'e rami xeayvua ma anhetẽ, xeapua e'ŷ.

### *Nhandeatya py marã rami pa nhandekuai aguã re ijayvua*

8 Ha'e nunga rupi aipota avakue opa rupi ikuai va'e onhembo'e opo iky'a e'ŷ va'e oupi reve. Ivai e'ŷ re, ha'e nda'ija'e rei e'ŷ re tonhembo'e.

9 Kunhague voi ha'e rami ae avi tonhemonde ha'eve va'e py anho. Oikoaty'i rami ae toiko onhemoatyrõa py. Nda'evei opa marã oje'a popẽ aguã, o'a re ouro ha'e ita hepyve va'e omoĩ aguã, neĩ ao hepyve va'e py onhemonde aguã.

10 Ha'e rami 'rãgue py ojee tomoĩ joupe ojapo porã aguã, kunhague Nhanderuete pegua reko rami vy.

11 Kunhague ombo'ea rã tokyrirĩ, opa mba'e py nhomboetea oexa uka aguã.

12 Kunhague pe xee nanhombo'e ukai, neĩ ime re nambopo'aka ukai guive. Ha'e rami 'rãgue py tokyrirĩ toiny.

\* 1:13 Atos 26.9-18 \* 1:20 1 Coríntios 5.4,5 \* 2:5 João 3.36; 14.6; Atos 4.12; 1 João 5.11,12

<sup>13</sup> Mba'eta Adão ranhe Nhanderuete omoingo rire mae ma Eva ju omoingo raka'e.

<sup>14</sup> Ha'e gui Adão e'ŷ guive onhembotavy uka, ta'yxy ranhe onhembotavy uka vy ojejavy raka'e.

<sup>15</sup> Ha'e rami teĩ kunhague omemby oikuavāa py ogueraa jepea nho 'rã, o'arandua rupi ojeroviaa, porayvua ha'e iky'a e'ŷ va'e ikuaiia gui ndojep'e ai vy.

## 3

### *Igreja re openaa ha'e nhopytyvõa rupi ikuai va'e reko re ijayvua*

<sup>1</sup> Pova'e ayvu ma ogueroviaa aguã ha'eve va'e: Igreja kuery re openaa rupi oikoxe va'e ma tembiapo iporã ete va'e ojapoxe.

<sup>2</sup> Ha'e nunga rupi igreja re opena va'e ma pavẽ ojou porã aguã rami ta'ikuai, peteĩ'i kunha re omenda va'e, hi'arandu ha'e ojejoko kuaa va'e, omboetepy, nhomovaẽ ha'e nhombo'e kuaa va'e,

<sup>3</sup> vinho oy'ua rupi e'ŷ oiko va'e, ojerovia rei e'ŷ va'e, ha'e rã ha'eve vai'i, joguero'a rei e'ŷ va'e ha'e peráta re nda'evei rei e'ŷ va'e,

<sup>4</sup> ha'e ngoo pygua kuery re opena porã va'e, gua'y ha'e guajy kuery onhe'ẽ rendu ha'e omboete porã aguã rami oguereko va'e.

<sup>5</sup> Mba'eta ngoo pygua kuery re ae nopena kuaai vy mba'exa 'rã tu opena Nhanderuete pegua igreja kuery re?

<sup>6</sup> Joe opena va'erã ma ojeko me'ẽ ramo va'e'ŷ 'rã, ojee rive ojerovia ramo anha opagaa py ombopagaa e'ŷ aguã.

<sup>7</sup> Ha'e rami 'rãgue py nhande revegua e'ŷ kuery voi omboete aguã rami oiko va'e, ojou vaia e'ŷ ha'e anha pe onhembo'a uka e'ŷ aguã.\*

<sup>8</sup> Ha'e rami ae avi nhopytyvõa kuery ma omboetea aguã rami 'rã ikuai, peteĩ'i rupi ijayvu va'e, vinho oy'ua rupi rei e'ŷ oiko va'e, peráta re nda'evei rei e'ŷ va'e,

<sup>9</sup> ha'e ipy'a ky'a e'ŷa rupi jajerovia aguã regua oikuua uka pyre re opena va'e.

<sup>10</sup> Nhopytyvõarã reko re jaikuua pota ranhe 'rã. Ha'e kuery re nda'ijayvu vaiai ramo ma ha'eve 'rã nhopytyvõa ikuai aguã.

<sup>11</sup> Ha'e rami ae avi kunhague voi omboetea aguã rami ta'ikuai. Ijayvu vaikue rei e'ŷ, oiko kuaa va'e, ha'e opa mba'e py ojeroviapy ta'ikuai.

<sup>12</sup> Nhopytyvõa oiko va'erã ma peteĩ'i kunha re omenda va'e, ha'e gui gua'y ha'e guajy kuery, ngoo pygua kuery ha'e javi re opena kuaa va'e.

<sup>13</sup> Mba'eta nhopytyvõ porã va'e ma ha'evea rami nhamboete, ha'e okyjea py e'ŷ 'rã omombe'u Cristo Jesus re jajerovia aguã.

### *Nhanderuete pegua igreja reko omombe'u porãveague*

<sup>14</sup> Po rami ambopara ndevy, roexa aguã aa voi aguã rami aiko va'eri.

<sup>15</sup> Ha'e rami avi ndaa voi ramo kova'e kuaxia gui reikuua 'rã Nhanderuete ro pygua kuery marã rami pa ikuai aguã. Ha'e va'e oo ma Nhanderuete oikove va'e pegua igreja, anhetẽ va'e yta ha'e hendarã oĩ va'e.\*

<sup>16</sup> Mba'eta anhetẽ Nhanderuete pe nhandekuai aguã kuaa ukaa ma yvate ete:

Ngo'o re ojekuaa va'ekue ma

Nhe'ẽ ju oikuua uka heko ky'a e'ŷa.

Anjo kuery oexa pota,

hexegua ma amboae regua ikuaiia rupi voi omombe'ua.

Ha'e ramo hexe ojeroviaa yvy re.

Ha'e gui hexakãa py ju heraa.

## 4

*Opaa ára py heta ojepe'a 'rāa re ijayvua*

<sup>1</sup> Nhe'ẽ oikuaa uka porā avi opaa ára py nhe'ẽ nhombotavya ha'e anha nhombo'e rā amongue ojapyxaka vy ojepe'a 'rāa ojeroviaa gui.\*

<sup>2</sup> Nhombo'e vaikue va'e kuery ma heko porā merami rive ha'e ijapu rei va'e, ipy'a ky'aa noenduvei aguã rami ha'e kuery ae ojeapo rire.

<sup>3</sup> Ha'e kuery nanhomomenda ukai 'rā, ha'e ndo'u ukai 'rā guive amongue regua tembi'u, jajerovia ha'e anhetē va'e jaikuaa va'e jarovy'a reve ja'u aguã Nhanderuete omoingo va'eri.

<sup>4</sup> Mba'eta Nhanderuete omoingo va'ekue ma ha'eve va'e meme. Jarovy'a reve jajopy vy ndaja'u e'ŷi 'rā,

<sup>5</sup> Nhanderuete ayvu ha'e jarovy'aa py nda'iky'avei ramo.

*Heko porā ha'e nhombo'e porāa rupi Timóteo onhea'ã aguã re ijayvuague*

<sup>6</sup> Ha'e nunga re irmão kuery rembo'e vy reiko 'rā Cristo Jesus rembiguai porā, jajerovia aguã regua ayvu re nembaraete ha'e nembo'e porāague rupi reiko vy.

<sup>7</sup> Ha'e rā ayvu reko rei guaimigue'i hi'arandu e'ŷi va'e omombe'u va'e nunga ma endu rive. Enhea'ã tema Nhanderuete pe ete reiko aguã re.

<sup>8</sup> Mba'eta jauga kuaa aguã re nhanhembo'ea ma xapy'a'i guarã rive ovare. Ha'e rā Nhanderuete pe jaikoa ma opa mba'e py ovare, mba'eta tekove ome'ẽ aŷ ha'e araka'e rā peve guarã.

<sup>9</sup> Pova'e ayvu ma pavẽ ojerovia ha'e ojee omoĩ aguã ha'eve va'e.

<sup>10</sup> Ha'e va'e rupi nhanhea'ã 'rā guive opa mba'e py, Nhanderuete oikove va'e pavẽ reraa jepea va'e re jajerovia rire. Jajerovia va'e katuve ma nhandereraa jepe.

<sup>11</sup> Ejapo uka ha'e enhombo'e ke ha'e nunga re.

<sup>12</sup> Nekunumi teri va'eri eiko eme avave rei nembojaru rei aguã rami. Ha'e rami 'rāgue py ndee rami ojerovia va'e kuery ikuai aguã rami eiko, ndeayvu py, nderekō porāa, ndeporayvua, rejерoviaa ha'e nderekō ky'a e'ŷa py guive.\*

<sup>13</sup> Xee aju e'ŷa ja eiko kuaxia reroayvua rupi pavẽ pe, renhomongetaa ha'e renhombo'ea rupi.

<sup>14</sup> Ejapo e'ŷ eme nerembiaporā ome'ẽ mbyre. Ha'e rami aguã ae Nhe'ẽ oikuaa uka raka'e, igreja re opena va'e kuery ndeapte re opo omoĩ jave.

<sup>15</sup> Eikuua pota ke ha'e nunga re, ejapo porā pota guive, pavẽ oikuaa aguã rejapo porāve reovya.

<sup>16</sup> Eikuua pota ke ndee ae reko re, renhombo'ea re guive. Enhea'ã tema ha'e nunga re, mba'eta ha'e rami vy 'rā rejapo ndee ae reo jepe aguã rami, ha'e ndeayvu re ojapyxaka va'e kuery guive.

## 5

*Petei-tei regua omongoeta kuaa aguã re ijayvua*

<sup>1</sup> Ndeayvu vaipa eme tujakueve pe. Ha'e rami 'rāgue py nderu rami emongeta. Kunumigue pe ma nderyvy pe rami 'rā ndeayvu,

<sup>2</sup> guaimigue pe ma ndexy pe rami, ha'e kunhataigue pe nereindy pe rami 'rā ndeayvu, nderekō ky'a e'ŷa rupi.

*Imeve'ŷ va'e kuery oipytyvõ aguã re ijayvua*

<sup>3</sup> Eipytyvõ uka imeve'ŷ va'e kuery, imeve'ŷ va'e ete ri ikuai ramo.\*

\* **4:1** Mateus 24.10-13; 2 Timóteo 3.1-5; 2 Pedro 2.1-3; Judas 3-21    \* **4:12** 2 Timóteo 1.6-8; Tito 2.1-8    \* **5:3** Tiago 1.27

<sup>4</sup> Ha'e rã omemby, e'ŷ vy guemiarirõ kuery oguereko ramo topena pota ngoo pygua re, oxy e'ŷ vy ojaryi openaague rekoria. Mba'eta ha'e rami ikuai ramo Nhanderuete oguerovy'a 'rã.

<sup>5</sup> Ha'e rã imeve'ŷ ete va'e, ipytyvõarã ndoguerekoi va'e kuery ma Nhanderuete gui anho 'rã oarõ oikovy mba'emo. Ara py ha'e pyávy ojerure ha'e onhembo'ea rupi 'rã ikuai.

<sup>6</sup> Ha'e rã ndojejoko kuaai va'e ma oikove merami teĩ omanogue ikuai.

<sup>7</sup> Ha'e rami ae emongeta ha'e kuery, ojou vaipy ikuai e'ŷ aguã.

<sup>8</sup> Ha'e rã guetarã ha'e ngoo pygua kuery re nopenai va'e ma ojeroviaa rupi ve'ŷ ikuai, ojerovia e'ŷ va'e kuery gui nda'eveive.

<sup>9</sup> Imeve'ŷ va'e kuery sessenta ma'etŷ ma oguereko ramo mae ma 'rã remoĩ uka hery. Peteĩ'i re omenda va'ekue rery anho 'rã remoĩ uka,

<sup>10</sup> ojapo porãague oikuua pavẽ va'e, omemby kuery omongakuaapa ma va'ekue, nhomovaẽ porã va'ety, ha'e iky'a e'ŷ va'e kuery py ojoi va'ety, iporiaukue'i oipytyvõ va'ety, ha'e ojapo porãa rupi onhea'ã va'ekue.

<sup>11</sup> Ha'e rã imeve'ŷ va'e ipyaukueve rery ma emoĩ uka eme. Mba'eta ha'e kuery ma Cristo pe anho ndoikoxevei vy oendu 'rã omenda jevyxea.

<sup>12</sup> Ha'e rami jypy ouraague omboaxa rive vy opaga aguã rami 'rã ikuai.

<sup>13</sup> Omboopy'rã guive inhate'ŷ aguã, peteĩ-teĩ oo rupi ikuai vy. Inhate'ŷ vy anho e'ŷ, ijayvu katu vai ete 'rã, ha'e joeko re oikuua pota rei 'rã ha'eve'ŷ va'e re ijayvu vy.

<sup>14</sup> Ha'e nunga rupi aipota ipyaukueve omenda, omemby oguereko, ha'e ngoo re opena porã aguã. Ha'e ramo 'rãe nhanderovaigua ndojoui nhandere ijayvu rei aguã.

<sup>15</sup> Mba'eta amongue ma Satanás re ova vy anhetẽ ojepe'a ma ojeroviaa gui.

<sup>16</sup> Ha'e gui ojerovia va'e kuery guetarã imeve'ŷ va'e oguerekoi ri vy toipytyvõ. Nda'evei igreja pygua kuery pe oipytyvõ uka aguã, igreja kuery ma imeve'ŷ ete va'e anho oipytyvõ aguã.

### *Igreja re opena va'e kuery mba'emo ojapo aguã re ijayvua*

<sup>17</sup> Igreja re opena porã va'e kuery ma mba'emo organave teĩ ha'eve, mba'eta ayvu mombe'ua rupi ha'e nhombo'ea rupi onhea'ã va'e vy.

<sup>18</sup> Mba'eta ipara re oĩa rami: "Vaka mba'emo ra'yĩ ojykya rupi ombo'eapo ramo nda'evei ijuru pejokua aguã." Oĩ avi: "Ombo'eapo va'e ha'eve ojopy aguã ombo'eapoague repy", he'iague rami.\*

<sup>19</sup> Ha'e gui igreja re opena va'e re ayvua ramo ejapyxaka eme, mokoĩ e'ŷ vy mboapy gui rendu e'ŷ vy.

<sup>20</sup> Xapy'a rei ojejavvy ramo pavẽ oendua py 'rã remongeta, amboae kuery voi ojererokyje aguã.

<sup>21</sup> Nhanderuete, Cristo Jesus ha'e anjo kuery oiporavo va'ekue renonde aipoa'e ndevy: Ha'e va'e ayvu rami eiko rejepa'e e'ŷ re. Mba'eve ejapo eme joe gui peteĩ reayvuvea rupi.

<sup>22</sup> Avave apyte re ndepo emoĩ eme heko re reikuaa pota porã e'ŷ re, amboae kuery ojejavvy py renhemongy'a e'ŷ aguã. Eiko kuaa pota ke ndee ae nderekoye ky'a e'ŷ aguã.

<sup>23</sup> Nda'evei yy anho riae rey'u aguã, ey'u avi kyrĩ'i vinho ndepy'a raxya ha'e nemba'eaxy rendu jepi vy.

<sup>24</sup> Amongue ojejavya oikuapaa voi 'rã, ombopagaa aguã py ovaẽ e'ŷ mbove ma voi. Ha'e rã amboae kuery ojejavvyague ma raka'eve ramo mae 'rã ojekuaa.

<sup>25</sup> Ha'e rami ae avi ha'evea rami nhandekuaia voi ojekuaa voi 'rã. Ha'e rami e'ŷ va'ekue voi ndojekuaa e'ŷ riae'i 'rã.

<sup>1</sup> Ha'e gui escravo kuery jopo'aka guýry ikuai va'e ma opa mba'e py tomboete guerekoa, Nhanderuete rery ha'e nhanembo'ea re ijayvu vaia e'ý aguã.\*

<sup>2</sup> Ha'e gui hereko ma irmão ojerovia avi va'e ramo tomboete e'ý eme. Ha'e rami 'rãgue py tomba'eapo porãve tema ixupe, mba'eta ojerovia va'e vy hembiayvu oiko, ha'e ixupe ombo'eapo porã ramo mba'emo ojouve 'rã. Embo'e, ha'e ejapo uka ha'e nunga.

### *Amboae rami rei nhombo'e ha'e peráta re nda'evei va'e re ijayvua*

<sup>3</sup> Ha'e gui amongue amboae rami rei 'rã nhombo'e, nhande-Senhor Jesus Cristo regua ayvu porã rami e'ý, Nhanderuete pe jaiko aguã regua rami e'ý.

<sup>4</sup> Ha'e va'e kuery ma ojee ae rive ojerovia vy ndoikuaai mba'eve. Ha'e rami vy joo rami e'ý-e'ý 'rã ijayvux rei, ha'e ayvu py rive joguero'a rei 'rã. Ha'e nunga gui oiko 'rã joe ija'e'ý va'e, nhomoangeko rei va'e, joe ijayvu rei va'e, oexa'ã vaikue rei va'e,

<sup>5</sup> ha'e joo rami e'ý-e'ý ijayvua ndopa kuaai va'e guive. Hi'arandu ve'ý ramo ha'e kuery re noívei anhetẽ va'e, oíí va'e ma Nhanderuete pe merami rive oikoa rupi mba'emo ojoupave aguã.

<sup>6</sup> Ha'e rami avi anhetẽ Nhanderuete pe jaiko vy opa mba'e porã 'rã jajou, javy'a 'rã guive.

<sup>7</sup> Mba'eta mba'eve ndajarui ko yvy re, ha'e apy gui jaa vy mba'eve ndajaraai 'rã guive.

<sup>8</sup> Ja'u va'erã ha'e nhanhemonde aguã jareko vy ma tajavy'a.

<sup>9</sup> Ha'e rã opa mba'e ojoux va'e ma anha omoangeko rã onhembo'a uka 'rã nhuã py. Hi'arandu ve'ý vy opa marã oipotaa rupi rive 'rã ikuai, ojexavai 'rã guive. Ha'e rami vy ikuai axy 'rã okanhy peve.

<sup>10</sup> Mba'eta peráta re nda'eveivea gui ma opa marãguia teko vai oiko. Ha'e nunga re anho amongue nda'evei vy ojepe'a ma 'rã ojeroviaa gui, ha'e kuery ae onhemoingo axy uka 'rã guive opa mba'e py.

### *Timóteo omongoetaague*

<sup>11</sup> Ha'e rã ndee Nhanderuete remimbo'e, eiko eme ha'e rami, enhea'ã teko porã reupity aguã anho, ha'e gui Nhanderuete pe ete reikoa, rejerovia, ndeporayvua, opa mba'e reropo'akaa ha'e ndevai e'ýa guive.

<sup>12</sup> Iporã va'e re anho enhea'ã rejeroviaa rupi. Eupity ete tekove marã e'ý, ha'e rami aguã nerenoña, ha'e heta oendua py renhemombe'u porã rire.

<sup>13</sup> Xee romongeta Nhanderuete opa mba'e moingoare va'e renonde, ha'e Pôncio Pilatos renonde re Cristo Jesus onhemombe'u porã va'ekue renonde guive:

<sup>14</sup> Senhor Jesus Cristo ojekuaa rã guarã enhea'ã ojapo uka pyre iky'a e'ý va'e ha'e ojou vaipy e'ý oikuua pavẽ aguã.\*

<sup>15</sup> Ha'e va'e ma Nhanderuete Ima'endu'a porãmbi pete'i oiko ha'e Ipo'akapa va'e oexa uka 'rã oa'angaague ára py ae. Ha'e ma huvinxave ikuai va'e Ruvinxave, ha'e senhor ikuai va'e Senhor oiko.

<sup>16</sup> Ha'e anho ma hekove marã e'ý va'e oiko. Hexakãa ma avave rei ndoupity kuaai. Oexaa e'ý va'e, ha'e oexa pyrã e'ý oiko. Tomboetea ha'e ta'ipo'aka riae. Amém.

### *Oguerekopa rei va'e kuery re ijayvua*

<sup>17</sup> Emongeta oguerekopa rei va'e kuery ojee e'ý ojerovia aguã, neí mba'emo imarã va'erã re rive'ý guive, ha'e rã Nhanderuete re anho, mba'eta ome'ẽ oikovy nhanembovy'aarã ha'e javi.

<sup>18</sup> Ha'e kuery ma joupe ojapo porãa rupi ta'ikuai, tanhopytyvõ opa mba'e py. Ome'ẽxeia'i py tome'ẽ reta, hakâte'ýa rupi e'ý tomboja'o.

<sup>19</sup> Ha'e rami vy 'rãe mba'emo porã ojeupe guarã omoõ porã uka araka'e rã peve imarã e'ý va'erã, ha'e rami vy oupity aguã tekove anhetẽ ete va'e.\*

*Omonogeta reve opaa py ogueroayvu porāague*

<sup>20</sup> Ha'e gui ndee Timóteo, epena ke ndepo py opena uka pyre re. Ejapyxaka eme ayvu rive iporã e'ŷ va'e re, neĩ "Aikuaapa" he'i rive vy joo rami e'ŷ-e'ŷ ijayvua re guive.  
<sup>21</sup> Mba'eta ha'e nunga re amongue ojapyxaka vy ojepe'a ma ojeroviaa gui.  
Tove peẽ kuery tapendu penemboaxya.

## **Timóteo pe mokoīguea Paulo ombopara va'ekue**

## **Timóteo pe mokoīguea Paulo ombopara va'ekue**

Kova'e kuaxia mokoīguea ma Timóteo peguarā apóstolo Paulo ogueraa uka va'ekue. Ixupe Paulo aipoe'i Jesus regua omombe'ua rupi okyje e'ŷ aguā, ojepe'a e'ŷ aguā guive.

Paulo guekorā re ae oexa'ā ojukaa voi aguā Jesus re ojeroviaa py. Ha'e rami teī ipy'a guaxu reve ojerovia tema. Ha'e vy aipoe'i: "Ovaē ma ouvy aa aguā ára. Iporā va'e re xee anhea'ā va'ekue, ajapopa ma xerembiaporā va'ekue, ha'e amombe'u porā jajerovia aguā regua. Aŷ ma heko porā va'e pegua coroa oĩ xevy pe oguerekō katu pyre. Ha'e va'e ma Senhor ha'evea rami oikuua pota va'e opaa ára ome'ẽ 'rā xevy. Xevy pe anho e'ŷ guive, oua ára peve oarō ha'e oayvu okuapy va'e ha'e javi pe 'rā ome'ẽ", he'i (4.6b-8).

Timóteo pe ijayvu omokyre'ŷa rupi, oiko axy teī nhombo'ea rupi tema oiko aguā gueko porāa oexa uka reve.

### *Oxarura reve ijayvu vy omboypyague*

<sup>1</sup> Xee Paulo ma Nhanderuete oipotaa rami vy apóstolo-rā Cristo Jesus xemoī va'ekue. Cristo Jesus re tekove oĩ va'e oikuua uka aguā re ijayvuague rami xemoī.

<sup>2</sup> Timóteo xera'y roayvu ete va'e, taxarura ndevy. Tove terendu Nhanderuete ha'e nhande-Senhor Jesus Cristo guigua mborayvu, nemboaxya ha'e mby'a porā guive.

### *Timóteo ojeroviaa re Paulo oguerovy'aague*

<sup>3</sup> Xeramoī kuery rami avi xee voi ambojerovia Nhanderuete xepy'a ky'a e'ŷa rupi, arov'y'a guive, mba'eta ara py ha'e pyávy anhembo'e vy xema'endu'a riae ndere.

<sup>4</sup> Nderexaya re xema'endu'a vy roexaxe ete ju, opa mba'e py avy'a aguā.

<sup>5</sup> Xema'endu'a avi rejerovia etea re, mba'eta ndejaryi Lóide ranhe ha'e ramigua oĩ, ha'e gui ndexy Eunice ju. Ha'ekue rami avi xee aikuua ndere voi oĩ.\*

### *Nhanhea'ā, nhanembaraete ha'e jajerovia ete aguā re ijayvua*

<sup>6</sup> Ha'e nunga rupi romongeta nerembiaporā ome'ẽ mbyre rupi renhea'āve ju aguā re. Ha'e va'e ma ndeapte re xepo amoī jave Nhanderuete ome'ẽ va'ekue.

<sup>7</sup> Mba'eta nhanemongygearā e'ŷ nhandere Nhanderuete omoī Onhe'ẽ, ha'e rā nhanembaraete, nhandeporayvu ha'e jajejokoa rupi nhandekuai aguā.\*

<sup>8</sup> Ha'e nunga rupi exī eme Senhor regua remombe'u aguā, ikáuxa nhuā py xee aī teī. Ha'e rami 'rāgue py Nhanderuete po'akaa rupi enhemoingo axy uka avi xereve ayvu porā remombe'ua py.

<sup>9</sup> Mba'eta nhandereraa jepe vy iky'a e'ŷ va'e ojeupe guarā nhanerenoī raka'e. Nhande ae nhanhea'āa re e'ŷ guive. Ha'e rami 'rāgue py ha'e ae oipotaa rami vy nhanemboaxy raka'e ára ijypy e'ŷ mbove voi, ha'e onhembopy'aague rami vy nhanemoī Cristo Jesus re.

<sup>10</sup> Ha'e gui aŷ mae ma oikuua uka nhanemboaxya, Cristo Jesus Nhandereraa jepearā ojekuaa py. Mba'eta ha'e va'e ma manoa ombovaipa vy tekove marā e'ŷ oikuua uka ayvu porā rupi.

<sup>11</sup> Ha'e va'e amombe'u aikovy aguā xemoī apóstolo ha'e nhombo'earā.

<sup>12</sup> Ha'e nunga rupi ae nami aiko axy. Ha'e rami teī xee naxī, mba'eta aikuua mava'e re pa ajeroviaa, aikuua porā guive ipo'akapa va'e vy ipo py xerekove amboaxa va'ekue re opena 'rāa, opaa ára peve guarā.

<sup>13</sup> Enhombo'e tema ayvu amombe'u rā rendu va'ekue rupi, exa uka guive rejeroviaa ha'e mborayvu Cristo Jesus re oĩ va'e.

\* <sup>1:5</sup> Atos 16.1,2   \* <sup>1:7</sup> 1 Timóteo 4.12-16

**14** Nhe'ẽ Ky'a E'ỹ nhandere oĩ va'e po'akaa rupi epena tema iporã va'e ndepo py opena uka pyre re.

*Apóstolo Paulo nhuā py oĩa, ha'e irū kuery ikuiaia re ijayvuague*

**15** Xeirũ kuery Ásia pygua ojepe'apa xegui, ndee reikuua ma. Ha'e va'e kuery regua ma Fígelo ha'e Hermógenes.\*

**16** Ha'e rã Onesíforo ha'e hoo pygua kuery ma Senhor tomboaxy, mba'eta mboapykue rei e'ỹ xembopy'a guaxu, ha'e nhuā py aĩa oendu teĩ peteīgueve ma nixereroxí.

**17** Ha'e rami 'rãgue py Roma tetã py ovaẽ vy xereka raka'e xejou peve.

**18** Ha'e ramo tove opaa ára py Senhor tomboaxy. Xegui ndee reikuua porâve ha'e kuery xepytyvõ jepiague Éfeso tetã py.

## 2

*Cristo re jajeroviaa rupi vy nhanhemoingo axy uka aguã re ijayvua*

**1** Ha'e gui ndee xera'y, nembaraeteve tema Nhanderuete nemboaxya Cristo Jesus re oĩ va'e re.

**2** Heta oendua py xee anhombo'e rã renduague rami avi ndee ju embo'e ojeroviapy kuery, amboae kuery mbo'earã.

**3** Cristo Jesus pegua xondaro ojeroviapy va'e reiko vy enhemoingo axy uka avi ke xereve.

**4** Ha'e gui peteīve xondaro ndoikoi 'rã amboae nunga re openaa rupi, nguvixa hery moĩare ombovy'a aguã.

**5** Ha'e rami ae avi ouga va'e kuery voi ha'evea rami ouga e'ỹ rã peteīve ndoguerovy'aai 'rã.

**6** Oma'etõa rupi onhea'ã va'ekue voi ha'eve ha'e ranhe ijaju va'e ho'u aguã.

**7** Eikuua pota ke xeayvua re, mba'eta Senhor oikuua uka porãmba 'rã ndevy.

**8** Nema'endu'a tema Jesus Cristo rekukue re, mba'eta Davi ramymino oiko, ha'e omanoague gui onhemboete ju raka'e, ayvu porã amombe'u aikovya rami vy.

**9** Ha'e va'e káuxa ae xemoingo axya nhuā py heko vai va'e rami. Ha'e rã Nhanderuete ayvu ma ndojoko kuaai.

**10** Ha'e nunga rupi opa marãguia aropo'aka oiporavo pyre kuery re vy, ha'e kuery voi oupity aguã Cristo Jesus nhandlereraa jepea ha'e hexakãa imarã e'ỹ va'e.

**11** Pova'e ayvu ma jarovia ete va'erã:

Hexeve nhamano rire hexeve avi 'rã jaikove ju.

**12** Mba'emo jaropo'akapa rire

hexeve avi 'rã nhaĩ huvixarã.

Ha'e rã ixupegua rami e'ỹ ri nhanhemombe'u rire

ha'e ju 'rã nanhanemombe'ui.\*

**13** Ojeroviapy e'ỹ jaiko ramo

ha'e ma ojeroviapy ae 'rã oiko,

mba'eta ndaexarai 'rã ojegui ae.

*Amboae rami rei nhombo'e ha'e ojerovia merami rive va'e omongeta aguã re ijayvuague*

**14** Enhomoma'endu'a ke ha'e nunga re. Nhanderuete renonde ke ndeayvu pavẽ pe, ha'e kuery joguero'a rei e'ỹ aguã ayvu mba'everã ovare'ỹ va'e py, mba'eta ha'e nunga ma opa marã 'rã omoingo hendua kuery.

**15** Enhea'ã tema reximba rei e'ỹ re Nhanderuete pe rejexa uka aguã ombo'eapo va'e ojou porã va'erã, ayvu anhetẽ ete va'e ha'evea rami remombe'u rire.

**16** Ha'e rã ayvuxe iporã e'ỹ va'e ma endu rive, mba'eta ha'e rami ijayvu va'e heko vaive 'rã oje'oivy.

\* **1:15** 2 Timóteo 4.16-18    \* **2:12** Mateus 10.32,33

**17** Ha'e kuery ijayvua ma nhomokanhy tema 'rã heravy, mba'eaxy vaikue nhandro'o omou'ũ va'e rami avi. Ha'e va'e kuery regua ma Himeneu ha'e Fileto.

**18** Ha'e va'e kuery ojepe'a ma anhetẽ va'e gui, mba'eta nhombo'e teĩ nanhanhemboete jevyvei 'rãa rami. Ha'e rami vy joapo ndojeroviavei aguã rami.

**19** Ha'e rami teĩ oo ytarã Nhanderuete omoĩ va'ekue ma oĩ atã. Ha'e va'e re ma po rami oĩ ikuaa ukaarã: "Senhor oikuua ae ojeupeguia kuery" he'ia va'e. Ha'e gui amboae ju "Senhor rery rupi ikuai va'e tojepe'a teko vai gui", he'i avi.

**20** Ha'e rami avi oo tuvixakueve ikuai va'e py oĩ 'rã mba'emo ryru ouro ha'e prata guigua anho e'ŷ, oĩ avi 'rã yvyra ha'e yapo guigua. Iporãgueve ma mba'emo porã ryrurã oĩ, ha'e rã amboae ma oiporu rive pyrã oĩ.

**21** Ha'e rami ae avi nhande voi opa marã rei nhandekuaiague gui jajeky'a'o vy mba'emo porã ryrurã rami 'rã jaiko, iky'a e'ŷ va'erã omboaxa pyre ija oiporu va'erã rami, iporã va'e ha'e javi jajapo aguã rami nhandeapo rire.

**22** Ha'e nunga rupi eiko eme kunumigue opa marã ikuaxea rami. Teko porã rupi enhea'ã, rejeroviaa, ndeporayvu, ha'e peteĩ rami pendekuia rupi, ipy'a ky'a e'ŷ re Senhor pe ojapukai va'e kuery reve.

**23** Endu rive amongue ijayvuxe rã ovare'ŷ va'e re hi'arandu e'ŷa rupi, mba'eta ha'e nunga gui joguero'apa rei 'rã, reikuaa ma avi.

**24** Mba'eta Senhor rembiguai kuery ma nda'evei joguero'a rei aguã. Ha'e rami 'rãgue py ijayvu porã'i 'rã pavẽ reve, ha'e ivai rei e'ŷ re nhombo'e kuaa 'rã guive.

**25** Ha'e kuery re amongue opu'ã rei ramo omongeta porã'i 'rã, mba'eta xapy'a rei ha'e kuery pe voi Nhanderuete ome'ẽ 'rã ojeko rerova vy anhetẽ va'e oikuuaa nho aguã,

**26** ha'e rami vy hi'arandu ju vy anha pe onhembo'a ukaague gui oo jepe aguã, ixupe ojerereko uka rire teĩ oipotaa rami ikuai aguã.\*

### 3

#### *Opaa ára opa marã rei ikuai 'rãa re ijayvua*

**1** Eikuua pota ke pova'e re: Opaa ára py ou 'rã ikuai axya ete aguã.\*

**2** Mba'eta avakue ikuai va'e ojejou porã rei 'rã, peráta re anho 'rã nda'eveive, ojee rive 'rã ojerovia, onhemboyvate rei 'rã, ijayvu vaikue-ikue 'rã, ngu'u kuery nonhe'ẽ renduvei 'rã, ndajoguerovy'axevei 'rã, Nhanderuete nomboetevei 'rã,

**3** nda'iporayvuvei 'rã, nanhomboaxy kuaavei 'rã, joe ijayvu rei 'rã, ndojejoko kuaavei 'rã, ojerovia rei 'rã, iporã va'e rovai 'rã ikuai,

**4** nhombo'a uka rive 'rã, o'arandua rupi e'ŷ 'rã ikuai, onhembotuvixa rei 'rã, ha'e kuery ae oipotaa rami 'rã ikuaxe, Nhanderuete pe ikuai 'rãgue py,

**5** Nhanderuete pe merami ikuai va'eri ixupe "Ipo'aka va'e'ŷ" he'i rive 'rã. Ejep'e a ke ha'e kuery gui voi.

**6** Ha'e kuery va'e regua ma joo rupi ovaẽ vy ombotavy 'rã kunhague ikangykueve ojejavypa va'e, opa marã rei oikoxea rami rive ikuai va'e.

**7** Ha'e kuery ma mba'emo re onhembo'e uka riae teĩ ndoupityi 'rã anhetẽ va'e oikuuaa ete aguã.

**8** Moisés re Janes ha'e Jambres opu'ã reiaque rami avi ha'e kuery voi anhetẽ va'e re opu'ã rei teĩ. Ha'e kuery opa marã rei nai'arandui, ha'e ndojeroviavei vy ojou vai pyrã ikuai.

**9** Ha'e rami teĩ ha'e kuery nda'ikuai riae 'rã ha'e rami, mba'eta pavẽ oikuuaa 'rã hi'arandu e'ŷa, Moisés rovaigua kuery re oikoague rami avi.

#### *Timóteo anhetẽ va'e re oĩ atã aguã re Paulo ijayvuaque*

**10** Ha'e rã ndee ma reikuaa ae ma anhombo'e aikovya, xerekoo, anhembopy'aa, ajeroviaa, mba'emo aropo'akapaa, xeporayvua, aĩ atãa,

\* **2:26** 1 Pedro 3.14-16 \* **3:1** Mateus 24.9-13; 1 Timóteo 4.1-5; 2 Pedro 2.1-3; Judas 3-21

<sup>11</sup> xemoingo axya ha'e ajexavaia guive, mba'eta ha'e ramigua ma Antioquia, Icônio ha'e Listra tetâ py oiko xere. Opa marâguia teko axy arop'o'aka va'ekue. Ha'e rami teĩ ha'e nunga ha'e javi gui Senhor xereraa jepe.\*

<sup>12</sup> Ha'e gui Cristo Jesus pe oikoxe va'e ha'e javi 'rã omoingo axya rei.

<sup>13</sup> Ha'e rã heko vai ha'e heko porã merami rive va'e ma heko vaive 'rã oje'oivy, nhombotavy ha'e onhembotavy ukaa rupi anho.

### *Nhanderuete ayvu anhetê ete ha'e ha'evea re ijayvua*

<sup>14</sup> Ha'e rã ndee ma eĩ atã tema mba'emo reikuua ha'e rerovia va'e re. Nema'endu'a ke ha'e nunga re mava'e pa nembo'eague re.

<sup>15</sup> Mba'eta nekyrĩ reve reikuua ae ma ipara iky'a e'ŷ va'e. Ha'e va'e rupi vy reupity ne'arandurã Cristo Jesus re rejerovia vy reo jepe aguã.

<sup>16</sup> Ha'e va'e ipara va'e ma Nhanderuete guigua meme, ha'e rami vy ha'eve nhanhombo'e aguã, nhanhomongeta, nhanhomo'arandu, ha'e teko porã rupi nhanhomongo aguã,

<sup>17</sup> Nhanderuete remimbo'e kuery opa mba'e py hi'arandu vy iporã va'e ha'e javi ojapo kuaa aguã.\*

## 4

### *Ayvu porã nhamombe'ua rupi nhanhea'ã aguã re ijayvua*

<sup>1</sup> Nhanderuete ha'e Cristo Jesus renonde xee romongeta. Ha'e va'e ma ojekuaa ju vy oikuuaa pota 'rã oikove va'e ha'e omamo va'ekue ikuaiague re.

<sup>2</sup> Emombe'u tema ayvu porã. Ha'e va'e rupi enhea'ã katu ha'eve jave, e'ŷ vy haxy teĩ. Joupe ndeayvu, enhomo'arandu ha'e enhomongeta ndevai rei e'ŷ re renhombo'ea ha'e javi py.\*

<sup>3</sup> Mba'eta ovaẽ 'rã ha'evea rami nhanhombo'e teĩ ndojapyxakaavei aguã ára. Ha'e rami 'rãgue py ojou 'rã ha'e kuery ae oipotaa rami ombo'e va'erã, oapyxa remo rive oikaraĩ va'e rami.

<sup>4</sup> Ha'e rami vy noenduxevei 'rã anhetê va'e, ayvu rive re anho ojapyxakave vy.

<sup>5</sup> Ha'e rã ndee ma eiko kuaa pota opa mba'e py. Nemoingo axya rã eropo'aka, ayvu porã remombe'ua rupi tema eiko, ejapopa ete nerembiaporã va'e.

### *Apóstolo Paulo omamo taa re ijayvuague*

<sup>6</sup> Ha'e gui xee ma xeruguy omoëta ma mymba ome'ẽmby rami. Ovaẽ ma ouvy aa aguã ára.

<sup>7</sup> Iporã va'e re xee anhea'ã va'ekue, ajapopa ma xerembiaporã va'ekue, ha'e amombe'u porã jajerovia aguã regua.\*

<sup>8</sup> Aŷ ma heko porã va'e pegua coroa oĩ xevy pe oguerekoo katu pyre. Ha'e va'e ma Senhor ha'evea rami oikuuaa pota va'e opaa ára ome'ẽ 'rã xevy. Xevy pe anho e'ŷ guive, oua ára peve oarõ ha'e oayvu okuapy va'e ha'e javi pe 'rã ome'ẽ.\*

### *Avakue apóstolo oejapaague, ha'e rã Nhanderuete ndoejaia re ijayvuague*

<sup>9</sup> Eju voi pota ke xea py.

<sup>10</sup> Mba'eta Demas ma aŷ mba'emo oĩ va'e re nda'eveive vy xereja. Tessalônica tetâ katy ojepo'a ovy. Crescente ma Galácia katy, ha'e rã Tito ma Dalmácia katy oo.

<sup>11</sup> Lucas anho oiko teri xereve. Ejou ke Marcos, ha'e vy eru, mba'eta ha'e ma xepytyvõ 'rã amba'eapoa rupi.

<sup>12</sup> Ha'e gui Tíquico ma Éfeso tetâ katy amondouka va'ekue.

<sup>13</sup> Reju vy ke eru avi Trôade py capa aeja va'ekue, Carpo ro py. Eru avi kuaxia para, aiapotave va'e ma ipire guigua.

\* <sup>3:11</sup> Atos 13.14-14.22 \* <sup>3:17</sup> Romanos 15.4; 2 Pedro 1.20,21 \* <sup>4:2</sup> Colossenses 4.5,6 \* <sup>4:7</sup> Atos 20.17-24

\* <sup>4:8</sup> 1 Coríntios 9.25; Tiago 1.12; 1 Pedro 5.4; Apocalipse 2.10

**14** Ferro re omba'eapo va'ety Alexandre ma ojapo vai ete xevy. Ha'e ramo Senhor ombopaga 'rã ojapoague re.

**15** Ndee voi enheangu avi ixugui, mba'eta oreayvu rã orere opu'ã rei va'ekue.

**16** Jypy'i xemboayvua jave avave rei naxepytyvõai. Ha'e rami 'rãgue py pavẽ rei xereja karamboae. Ha'e ramiague re tombopagaa eme.

**17** Ha'e rã Senhor ma xereve oiko vy xemombaraete, ayvu amombe'uve ju rã amboae regua kuery oendupa aguã. Ha'e rami aguã xereraa jepe karamboae guary juru gui.

**18** Ha'e rami ae avi Senhor xereraa jepe 'rã xevy ojapo vaixe va'e ha'e javi gui, ha'e opo'akaa py xereraa jepe 'rã yva re. Ixupe toporaeia aÿ ha'e araka'e rã peve. Amém.

*Oxarura reve opaa py ogueroayvu porãague*

**19** Emombe'u ke xema'endu'aa Prisca ha'e Áqüila pe, Onesíforo ro pygua kuery pe guive.

**20** Erasto ma Corinto tetã py opyta. Ha'e rã Trófimo ma Mileto py aeja karamboae imba'eaxy rã.

**21** Eju voi ke yro'y ovaẽ e'ŷ mbove. Ndevy oxarura uka va'e ma Êubulo, Lino, Cláudia ha'e irmão kuery ha'e javive.

**22** Tove Senhor toiko nenhe'ẽ reve. Tove peẽ kuery tapendu penemboaxya.

## Tito pe Paulo ombopara va'ekue

## Tito pe Paulo ombopara va'ekue

Tito ma Timóteo rami avi apóstolo Paulo irũ oiko raka'e igreja kuery re openaa rupi. Ha'e va'e ma Creta yy pa'ũ py Paulo oeja raka'e Jesus remimbo'e kuery ha'e py ikuai va'e ombo'e porâve aguã, ha'eve'ya rami nhombo'e va'e kuery ikuai avi rã.

Ha'e rami vy omombe'u porâve Jesus Cristo regua, ijayvu guive hemimbo'e kuery marã rami pa ikuai aguã re. "Mba'eta pavê pe Nhanderuete oikuaa uka omboaxya ogueraa jepe aguã. Ha'e rami vy nhanemo'arandu nhanderekovaiaty ha'e yvy regua reko gui jajep'e a aguã, ha'e aÿ gui voi jaiko kuaa pota ha'e teko porâ rupi nhandekua aguã Nhanderuete pe ete" (2.11-12).

### *Oxarura reve ijayvu vy omboypyague*

<sup>1</sup> Xee Paulo ma Nhanderuete rembiguai ha'e apóstolo-rã Jesus Cristo xemoï va'ekue, Nhanderuete rembiporavo kuery ambo'e rã ojerovia, ha'e ixupe ikuai vy oikuaa porãmba aguã anhetê ete va'e,

<sup>2</sup> ha'e tekove marã e'ÿ oarõ okuapy aguã guive. Ha'e va'e ma Nhanderuete ijapu e'ÿ va'e ome'ë aguã re ijayvu raka'e, ára ijypy e'ÿ mbove ma voi.

<sup>3</sup> Ha'e gui aÿ oa'angaague ára py ma Nhanderuete Nhandereraa jepeva'e oayvu oikuaa uka vy oipotaa rami vy xemoï karamboae imombe'uarã.

<sup>4</sup> Ndee Tito rejeroviaa py xera'y ete reiko va'e pe axarura. Tove terendu Nhanderuete ha'e Nhandereraa jepeva'e Cristo Jesus guigua nemboaxya ha'e mby'a porã.\*

### *Igreja re opena va'e kuery reko re ijayvua*

<sup>5</sup> Ha'e nunga rupi ae roeja karamboae Creta ypa'ũ py py, mba'emo ndajapopai va'ekue rejapopa aguã, ha'e rami vy peteñ-teñ tetã py remoï aguã igreja re opena va'erã, ndevy ajapo ukaague rami vy.

<sup>6</sup> Ha'eve remoï aguã ojou vaia rei aguã rami e'ÿ ikuai va'e, ha'e peteñ'i ta'xy va'e. Ta'y kuery ojerovia va'e, ha'e kuery opa marã rei e'ÿ, inhe'ë rendua rupi anho ikuia oikuaa pavê va'e.

<sup>7</sup> Mba'eta igreja re opena va'e ma nda'evei ojou vaia rei aguã rami ikuai aguã, ha'e kuery pe Nhanderuete ae opena uka rire. Ha'e kuery ojee ae rive'ÿ ojerovia va'e, ivai ja e'ÿ, ha'e vinho oy'ua rupi e'ÿ ikuai va'e, ojerovia rei e'ÿ va'e, neñ peráta re nda'evei rei e'ÿ va'e ha'eve.

<sup>8</sup> Ha'e rami 'râgue py nhomovaë kuaa va'e, iporâ va'e anho oguerovy'a va'e, oiko kuaa pota ha'e ha'evea rami joguerekova'e, iky'a e'ÿa rupi oiko ha'e ojejoko kuaa va'e,

<sup>9</sup> ha'e ayvu anhetê ete va'e ojee omoï ete va'e ombo'egue rami ae. Ha'e rami vy 'râe nhombo'e porâ ha'e nhombopy'a guaxu kuaa, ha'e ombovai kuaa 'rã guive hexe opu'ã reia rã.

### *Nhombo'e porâ merami rive va'e kuery re ijayvua*

<sup>10</sup> Mba'eta heta ikuai nhonhe'ë rendu e'ÿ va'e, ijayvuxa ha'e nhombotavypa rei va'e. Judeu regua ma hetave ikuai ha'e rami.

<sup>11</sup> Ha'e va'e kuery nhamokyirî'râe, mba'eta oo pygua ha'e javi-javi 'rã ombotavy ombo'e vaikuea rupi, peráta re rive nda'eveive vy.

<sup>12</sup> Ha'e kuery reguae profeta rami aipoe'i va'ekue: "Creta pygua kuery ma ijapu va'e ae, mymba inharõ va'e rami okaru guaxu ha'e inhate'ÿ va'e", he'iague rami.

<sup>13</sup> Ha'e rami ijayvua ma anhetê. Ha'e nunga rupi ha'e kuery pe ndeayvu ete 'rã ojeroviaa rupi imbaraete aguã,

\* <sup>1:4</sup> 2 Coríntios 8.23; Gálatas 2.1-3

<sup>14</sup> ha'e ojapyxaka ve'ŷ aguã judeu kuery ijayvu rivea re, neĩ anhetẽ va'e gui ojepe'a va'ekue ayvu re.

<sup>15</sup> Mba'eta heko ky'a e'ŷ va'e kuery pe mba'eve rei nomongy'ai 'rã. Ha'e rã heko ky'a ha'e ojerovia e'ŷ va'e kuery ma opa mba'e py 'rã onhemongy'a, mba'eta o'arandua ha'e opy'aa rupi iky'apa rã.

<sup>16</sup> Ha'e kuery ma "Xee aikuaa Nhanderuete" he'i teĩ gueko vaia py oexa uka anhetẽ e'ŷa. Ojeguarupy ha'e nanhonhe'ẽ rendui va'e vy iporã va'e ojapo aguã nda'evei.

## 2

### *Ojerovia va'e kuery reko re ijayvua*

<sup>1</sup> Ha'e rã ndee ma ndeayvu ke ha'evea rami renhombo'ea rupi.

<sup>2</sup> Tujakueve embo'e ojejoko aguã re, omboetea aguã. Toiko kuaa pota, ha'e ojeroviaa py ta'imbaraete, iporayvua ha'e oĩ atãa py guive.

<sup>3</sup> Ha'e rami ae avi guaimigueve ma nhomboetea rupi ta'ikuai. Ta'ijayvuxre rei eme, ha'e vinho oy'ua rupi ta'ikuai eme. Tanhombo'e iporã va'e re,

<sup>4</sup> ombo'e aguã kunhague ipyauve va'e ome ha'e omemby kuery oayvu ete aguã re,

<sup>5</sup> oiko porã pota ha'e heko ky'a e'ŷ aguã, ngoo rupi opena porã aguã, ha'eve vai'i ha'e ome oipotaa rami oiko aguã, ha'e rami rã Nhanderuete ayvu re ijayvu vaia e'ŷ aguã.

<sup>6</sup> Kunumigue ha'e rami ae avi emongeta opa mba'e py oiko kuaa pota aguã.

<sup>7</sup> Ndee ae voi iporã va'e rupi eiko, amboae kuery ndee rami ikuai aguã. Renhombo'ea rupi exa uka anhetẽ rupi anho reikoa ha'e renhomboetea.

<sup>8</sup> Iporã va'e re anho ndeayvu ndejou vaia aguã rami e'ŷ, nhanderovaigua kuery oximba aguã, mba'eve py nhandere nda'ijayvu vai kuaai vy.

<sup>9</sup> Escravo kuery ma guerekaoa kuery nhe'ẽ rendua rupi ta'ikuai opa mba'e py, ha'e ramo oguerovy'a aguã. Ta'inhe'ëngi rei eme,

<sup>10</sup> ha'e ta'imonda eme guive. Ha'e rami 'rãgue py toexa uka opa mba'e py ojeroviap oikoa. Ha'e rami vy opa mba'e py ojapo 'rã Nhanderuete Nhandereraa jepeva'e regua ayvu ojou porã aguã rami.

### *Cristo nhandereraa jepe vy nhanemoingo porãague re ijayvua*

<sup>11</sup> Mba'eta pavẽ pe Nhanderuete oikuaa uka omboaxya ogueraa jepe aguã.

<sup>12</sup> Ha'e rami vy nhanemo'arandu nhanderekovaia yvy regua reko gui jajepe'a aguã, ha'e aŷ gui voi jaiko kuaa pota ha'e teko porã rupi nhandekuai aguã Nhanderuete pẽ ete,

<sup>13</sup> ima'endu'a porãmbou aguã nharõ jaikovya ja. Ha'e va'e ma Nhanderuete Ipo'akapa va'e ha'e Nhandereraa jepeva'e Cristo Jesus rexakãa ojekuaa rã guarã.

<sup>14</sup> Mba'eta nhandere ojejuka uka raka'e, opa mba'e vai gui nhandejogua vy ojeupe guarã ae nhandeky'a'o aguã, iporã va'e re anho nhanhea'ãa rupi nhandekuai aguã.\*

<sup>15</sup> Ha'e nunga re tema ndeayvu. Enhomombaraete ha'e enhomongeta ipo'akaa ha'e javi rupi, avave rei nembojaru rei e'ŷ aguã.

## 3

### *Huvixa kuery nhanhe'ẽ rendu, ha'e iporã va'e rupi nhandekuai aguã re ijayvua*

<sup>1</sup> Enhomoma'endu'a ke joe opena va'e ha'e huvixa kuery oipotaa rami ikuai aguã. Tonhe'ẽ rendu, ha'e ta'ikyre'ŷ opa mba'e porã ojapo aguã.

<sup>2</sup> Avave rei re ta'ijayvu rei eme, neĩ ta'ijayvu rive eme joupe. Ha'e rami 'rãgue py ha'eve vai'i ta'ikuai, pavẽ reve ta'ijayvu porã'i opa mba'e py.\*

<sup>3</sup> Mba'eta nhande voi yma rupi hi'arandu e'ŷ va'e nhandekuai va'ekue, nhanhe'ẽ rendu e'ŷ va'e ha'e okanhhygue rami, to'o pegua escravo rami nhandekuai va'ekue

\* **2:14** Efésios 2.8-10; Filipenses 3.20,21 \* **3:2** Romanos 13.1-6

nhamoaruā rei ha'e opa marā nhandekuaixea rupi. Jaiko vaikue rei, nanhandea'ei rei joe, nanhandeporayvui, ha'e ndajajoayvui rei va'ekue.

<sup>4</sup> Ha'e gui Nhanderuete Nhandereraa jepea va'e oexa uka nhanderayvua, nhanemboaxypaa guive.

<sup>5</sup> Ha'e rami vy nhanemboaxy vy rive nhandereraa jepe, teko porā re nhanhea'āa rupi e'ŷ. Nhe'ē Ky'a E'ŷ nhandeky'a'o vy nhanemoingove ju, ha'e nhanembopyau.

<sup>6</sup> Ha'e va'e ma Nhandereraa jepea Jesus Cristo rupi nhandere Nhanderuete ombou vy opa mba'e py nhanemoingo porā.

<sup>7</sup> Ha'e ramo nhanemboaxy vy nhanemboeko porā ma rire tekove marā e'ŷ nharōa rupi mba'emo porā jopyarā ju jaiko.

<sup>8</sup> Ha'e va'e ayvu ma jarovia va'erā, aipota remombe'u porāve guive, Nhanderuete re ojerovia va'e kuery iporā va'e ojapoa rupi onhea'ā aguā. Ha'e nunga ma iporā, ha'e omoingo porā pavē 'rā.\*

<sup>9</sup> Ha'e rā ayvu ovare'ŷ va'e ma endu rive, ymagua kuery rery oīa re ijayvua rā, ha'e lei re joo rami e'ŷ-e'ŷ ijayvu vy joguero'a rei ramo, mba'eta ha'e nunga ma nhomoingo porāarā e'ŷ, mba'everā ndovarei.

<sup>10</sup> Joo rami e'ŷ-e'ŷ nhomoingoa kuery pe mokoīgue ma ndeayvu rire ejep'e a ke ha'e kuery gui.

<sup>11</sup> Mba'eta reikuua ma heko vai ha'e ojejavypa va'e ae ikuaia. Ha'e kuery ae onhembopaga uka.

### *Oxarura reve opaa py ogueroayvu porāague*

<sup>12</sup> Ndea py ambou 'rā Ártemas, e'ŷ vy Tíquico. Ha'e va'e ovaē ma ramo eju pojava Nicópolis tetā py xerovaexī aguā. Anhembopy'a ha'e py ae yro'y aaxa aguā.

<sup>13</sup> Eipytyvō porā pota lei re nhombo'e va'ety Zenas oguatave ta ramo, Apolo guive, ha'e kuery pe mba'eve oata e'ŷ aguā.

<sup>14</sup> Ha'e gui nhanderevegua kuery tonhea'ā iporiaukue'i pytyvōa rupi, yvyra hi'a e'ŷ va'e rami ikuai e'ŷ aguā.

<sup>15</sup> Ha'e gui xereve ikuai va'e ha'e javi oxarura uka ndevy. Emombe'u ke orema'endu'aa ojeroviaa py orerayvu va'e kuery ha'e javive pe.

Tove peē kuery ha'e javi tapendu penemboaxya.

---

\* **3:8** Efésios 2.1-10

## Filemom pe Paulo ombopara va'ekue

### Filemom pe Paulo ombopara va'ekue

Nhuã py apóstolo Paulo oĩ javé peteĩ ava oexa escravo oikoague gui ojava va'ekue, hery va'e Onésimo. Paulo oexa vy Jesus regua omombe'u ramo ojerovia, ojeko me'ẽ guive Jesus pe. Ha'e rami vy Paulo pytyvõa rupi oiko.

Onésimo rerekaoa Filemom hery va'e ma amboae tetã Colossos pygua oiko Paulo oexa va'ety, igreja re opena va'e, ha'e Jesus regua Paulo omombe'u rã ojeko me'ẽ avi va'ekue. Ha'e nunga rupi Paulo onhembopy'a ija Filemom pe ju Onésimo omondouka aguã.

Kova'e kuaxia ogueraa uka Onésimo po py, Filemom pe omombe'u porãve ha'e ojerure aguã operdoa vy omovaẽ porã ju aguã guembiguai onha va'ekue. Mborayvu rupi ojerure porã'i vy aipoe'i: "Ha'e rami vy ajerure xera'y Onésimo removaẽ porã ju aguã, ... ndevygua escravo-rã ju e'ŷ guive removaẽ aguã, ha'e rã nde-irmão reayvu ete va'e rami, nde-escravo rami rive'ŷ. Mba'eta Onésimo ma xe-irmão oiko rire nde-irmão katuve ma oiko, ngo'o re escravo rami rive'ŷ, ha'e rã Senhor re vy irmão oiko" (versículos 10a, 16).

#### *Oxarura reve ijayvu vy omboypyague*

<sup>1</sup> Xee Paulo ma Cristo Jesus pegua aikoa re nhuã py aĩ. Xe-irmão Timóteo reve roxarura ndevy, xerembiayvu Filemom. Ore rami avi remba'epo va'e reiko.

<sup>2</sup> Irmã Áfia pe voi axarura, ore rami onhea'ã va'ety Arquipo, ha'e igreja kuery ndero py onhemboaty va'e pe guive.

<sup>3</sup> Tove peẽ kuery tapendu penemboaxyha'e mby'a porã Nhanderuete ha'e Senhor Jesus Cristo guigua.

#### *Filemom nhopytyvõa re oguerovy'aague*

<sup>4</sup> Ndere xema'endu'a riae vy Xeruete pe anhembo'e nhavõ arov'y'a,  
<sup>5</sup> mba'eta aendu omombe'ua rã iky'a e'ŷ va'e kuery ha'e javi reayvua, ha'e Senhor Jesus re rejeroviaa rupi reikoa guive.

<sup>6</sup> Ajerure ore rami rejerovia reve Cristo re vy mba'emo porã jareko va'e reikuaapa avi aguã.

<sup>7</sup> Mba'eta irmão, ndeporayvua omombe'ua rã aendu vy avy'a ete ha'e xepy'a guaxuve, iky'a e'ŷ va'e kuery rembovy'a ramo ipy'a py.

#### *Onésimo re apóstolo Paulo ojerureague*

<sup>8</sup> Ha'e gui Cristo re vy aendu ndevy pe mba'emo ajapo uka va'e rire ha'eve 'rãguea,  
<sup>9</sup> ha'e rami teĩ roayvua rupi ajerure porã'i ha'e nunga re. Xee Paulo xetuja'i ma, ha'e aŷ Jesus káuxa nhuã py aĩ.

<sup>10</sup> Ha'e rami vy ajerure xera'y Onésimo removaẽ porã ju aguã, mba'eta xejokuaa imoinya py xera'y rami amoingo va'ekue.\*

<sup>11</sup> Ha'e va'e ma anhetẽ yma ndovarei va'ekue ndevy, teĩ aŷ ma ovare ete ndevy, xevy pe voi.

<sup>12</sup> Ha'e rami vy ndea py ambou ju xekuraxõ ae reve.

<sup>13</sup> Xee ma nderekovia amombytavexe teĩ xea py, ayvu porã káuxa xejokuaa imoinya py xepytyvõ aguã.

<sup>14</sup> Ha'e rami avi mba'eve rei ndajapoxei ndevy pe ranhe aporandu e'ŷ re. Ha'e ramo 'rãe xepytyvõxe'a'i py xepytyvõ uka, xee ajapo uka ramo rive'ŷ.

<sup>15</sup> Mba'eta xee aikuaa rã xapy'a'i rive ojepe'a raka'e ndea gui, raka'e rã peve guarã removaẽ ju aguã,

---

\* <sup>1:10</sup> Romanos 15.7; Efésios 4.32

<sup>16</sup> ndevyguia escravo-rã ju e'ŷ guive removaẽ aguã, ha'e rã nde-irmão reayvu ete va'e rami, nde-escravo rami rive'ŷ. Mba'eta Onésimo ma xe-irmão oiko rire nde-irmão katuve ma oiko, ngo'o re escravo rami rive'ŷ, ha'e rã Senhor re vy irmão oiko.

<sup>17</sup> Ha'e nunga rupi xevy pe "Xereveguia" 're vy xee xemovaẽ rami ae ha'e voi emovaẽ.

<sup>18</sup> Ha'e gui xapy'a rei nemba'e rei-rei omokanhy rire ndevy pe orevea oĩ ramo ejá ranhe xee ae amboekoviapa aguã.

<sup>19</sup> Xee Paulo xepo py ae ambopara amboekovia aguã re. Ha'e "Nderekove re ae xevy pe rereve" ha'e e'ŷ teī reikuaa.

<sup>20</sup> Ha'e nunga rupi irmão, Senhor re vy ejapo ha'e nunga xevy. Xembovy'a ke Cristo re.

*Oxarura reve opaa py ogueroayvu porāague*

<sup>21</sup> Ha'e rami ambopara ri teī aikuua xenhe'ẽ rendu 'rãa, ha'e ajerurea gui rejapove 'rã guive.

<sup>22</sup> Ajerure avi rerekataguia aguã ake aguã, mba'eta xee aikuua rã xere pejerurea rupi pẽa py xemboua ju 'rã.

<sup>23</sup> Epafras ma Cristo re vy xereve oĩ avi nhuã py. Ha'e va'e ma oxarura avi ndevy,

<sup>24</sup> ha'e gui Marcos, Aristarco, Demas ha'e Lucas xepytyvõ va'ety kuery voi.

<sup>25</sup> Tove penenhe'ẽ py tapendu Senhor Jesus Cristo penemboaxya.

## **Hebreu kuery pe ombopara pyre Hebreu kuery pe ombopara pyre**

Kova'e kuaxia para ma hebreu kuery Jesus re ojerovia va'e pe omboparaa. Imboparaare rery ma noī.

Jesus re ha'e kuery ojerovia ramo hetarā kuery opu'ā rei ha'e kuery re, nhandere oikoa rami ae avi. Ha'e rami rā ha'e kuery va'e regua amongue ojeroviaa gui ojepe'axe gueko ymague rami ju ikuai aguā. Ha'e nunga rupi kova'e kuaxia omboparaa ha'e kuery pe ipy'a guaxu reve onhea'āve aguā, mba'eta Jesus regua ha'e kuery ojeroviaa ma pavē gui ha'eveva va'e, yma guare teko gui voi. Mymba kuery Nhanderuete pe ome'ēa 'rāgue py Jesus ojejuka ukaague anho ovare nhandereraa jepe aguā. Jesus ma nhandereraa jepea peteī'i va'e Nhanderuete ombou va'ekue.

Aipoe'i: "Ha'e rami rire mba'exa 'rā tu nhande jaa jepe, nhandereraa jepe aguā regua iporāve va'e nhaendu rive vy? Mba'eta jypy'i Senhor ae omombe'u, ha'e gui henduare kuery ju omboaxa, anhetē etea jaikuua porāve aguā rami" (2.3). Ha'e nunga rupi "nhanekangy e'ŷ re nhaī atā tema nharō va'e nhamombe'u jaikovy va'e re" (10.23), "nhama'ē porā tema Jesus re anho, mba'eta ixugui ae ou jypy guive opa peve jajerovia aguā" (12.2). Mba'eta "Jesus voi tetā rokē gui mombyry'i oiko axy raka'e, nguguy py ae ojeupegua kuery oiky'a'o aguā. Ha'e nunga rupi oĩ py jaje'oi nhande voi, amboae kuery ikuiai gui mombyrya py teī, Jesus káuxa nhanembojaru reia rā jaropo'aka vy. Mba'eta anhetē apy ndajarekoi tetā oĩ riae va'erā, raka'eve rā ojekuaa va'erā va'e re nhanheāā" (13.12-14).

### *Nhanderuete ojekuaa ukaague re ijayvua*

<sup>1</sup> Ymave rupi Nhanderuete mbovykue rei e'ŷ, ha'e ha'ekue-'ekue'i rami e'ŷ ijayvu raka'e nhaneramoī kuery pe profeta kuery rupi.

<sup>2</sup> Ha'e gui aŷ opa vyguá ára ma Gua'y rupi ae ijayvu nhandevy. Ha'e va'e ma opa mba'e ikuai va'e jopyarā omoī, ipo rupi opa mba'e ojapo rire.\*

<sup>3</sup> Nhanderuete rexakāa rexā ūkaa oiko, Nguu rami ete heko va'e vy. Mba'emo ikuai va'e oguerekō porāmba oayvu ipo'akapa va'e py rive. Ha'e gui jajejavvyague gui nhandecky'a'opa ma vy oguapy oiny yvate. Ipo'akapa va'e oiporu kuaa regua re oĩ

<sup>4</sup> anjo kuery gui omboyvateve rire, mba'eta hery oenoīa va'e ma anjo kuery oenoīa gui iporāve.

### *Cristo Ta'y oikoa, ha'e rā anjo kuery ma tembiguai ikuiaia re ijayvua*

<sup>5</sup> Mba'eta anjo kuery pe ma aipo nde'i: "Ndee ma Xera'y, ange ma romoingo", nde'i. Ha'e gui teīgue ju aipoe'i: "Xee aiko 'rā Tuu, ha'e rā ha'e ma Xera'y 'rā oiko."\*

<sup>6</sup> Ha'e gui kova'e vy re Gua'y Jypygua ombou vy teīgue ju aipoe'i: "Nhanderuete pegua anjo kuery tomboete pavē", he'i.\*

<sup>7</sup> Ha'e rā anjo kuery pe ma aipo'ea: "Ojeupegua anjo kuery ojapo yvytu rami, guembiguai kuery ojapo tata rami", 'ea.\*

<sup>8</sup> Ha'e rā Ta'y pe ma aipo'ea: "Oreruete, ndepo'akaa ma raka'e rā peve guarā. Ha'e ndepo'akaa py rejoguerekō 'rā ha'evea rami."\*

<sup>9</sup> Rerovy'a teko porā, ha'e rā teko vai ma nderejou porāi. Ha'e nunga rupi Nderu Nhanderuete ndererovy'aa rupi nemoī neirū kuery áry guarā, ndere azeite omoī uka vy", 'ea.

\* **1:2** João 1.1-5; Colossenses 1.15-18    \* **1:5** Salmo 2.7; 2 Samuel 7.14, 1 Crônicas 17.13    \* **1:6** Deuterônomo 32.43

\* **1:7** Salmo 104.4    \* **1:8** Salmo 45.6-7

<sup>10</sup> Ixupe aipo'ea avi: "Senhor, jypy'i renhono va'ekue yvy. Yva regua voi ndepo py rejapo va'ekue meme.

<sup>11</sup> Ha'e nunga ma opa va'erā. Ha'e rā ndee ma reiko riae 'rā. Ha'e nunga ha'e javi 'rā inhyma ovy ao rami,

<sup>12</sup> ha'e ramo ao pukukue rami 'rā rembojo'a imoiny, ao rami ae avi 'rā remboekovia. Ha'e rā ndee ma ha'ekue ae reiko. Nderekove opa va'erā e'ŷ", 'ea.\*

<sup>13</sup> Ha'e gui peteīve anjo pe aipo nde'i: "Eguapy ke aiporu kuaa regua re, nderovaigua kuery ndepy guýry amoī peve", nde'i.\*

<sup>14</sup> Mba'eta anjo kuery ma nhe'ẽ hembiguai ikuai, oo jepe aguã rami ikuai va'e pytyvõarã ombou va'e.

## 2

### *Ayvu porã nhaendu rive'ŷ aguã re ijayvua*

<sup>1</sup> Ha'e nunga rupi anhetē ete va'e nhaendu vy nhamoī porã pota 'rā nhandejee, ha'e va'e rupi nhandekuaia gui jajepe'a e'ŷ aguã.\*

<sup>2</sup> Mba'eta ymave rupi Nhanderuete ayvu anjo kuery omombe'u va'ekue ndoaxa rivei raka'e, mba'eta ha'e va'e rupi heko vai ha'e nonhe'ẽ rendui va'e kuery ombopagapa.

<sup>3</sup> Ha'e rami rire mba'exa 'rā tu nhande jaa jepe, nhandereraa jepe aguã regua iporâve va'e nhaendu rive vy? Mba'eta jypy'i Senhor ae omombe'u, ha'e gui henduare kuery ju omboaxa, anhetē etea jaikuaa porâve aguã rami.

<sup>4</sup> Ha'e kuery ijayvua rupi Nhanderuete oikuua uka anhetē etea, hexa pyrã, nhomondiyipaarã ha'e opa marâguo opo'akaa rupi ojapo vy. Ha'e gui peteī-teī rupi oexa uka avi Nhe'ẽ Ky'a E'ŷ guigua, ha'e ae oipotaa rami vy.

### *Sacerdote yvateve va'e ojeroviap y ha'e nhomboaxy kuaa va'e Jesus oikoa re ijayvua*

<sup>5</sup> Mba'eta anjo kuery pe'ŷ Nhanderuete opena uka raka'e yvy pyau oreayvua va'e re.

<sup>6</sup> Ha'e rami 'râgue py amongue henda py omombe'u porã vy aipoe'i: "Marã ramigua tu avakue, ha'e kuery re nema'endu'a aguã? Marã ramigua tu avakue ra'y kuery, ha'e kuery re reikuuaa pota aguã?

<sup>7</sup> Ha'e rami teī hare'i anjo kuery gui remo'yvyi've rire remboyvate, remboete uka [ha'e rembopo'aka ndepo py rejapo va'ekue ha'e javi re].

<sup>8</sup> Opa mba'e re rembopo'aka, ipy guýry remoī vy", he'i va'ekue. Opa mba'e re nhanem-bopo'aka rire ma mba'eve jipoī nhandepo'aka e'ŷa. Ha'e rami teī aŷ peve ndajaexai teri opa mba'e re nhandepo'akaa.\*

<sup>9</sup> Ha'e rā Jesus ma jaexa omano rire Nhanderuete ombopo'aka ha'e omboete ukaague. Mba'eta Nhanderuete nhanemboaxy vy anjo kuery gui xapy'a'i omo'yvyi've raka'e Jesus, nhande kuery ha'e javi re omano aguã.\*

<sup>10</sup> Mba'eta Nhanderuete peguarã opa mba'e oiko, ha'e ae omoingopa rire. Ha'e rami vy guexakãa katy gua'y kueryrã nhandereru aguã ma opa mba'e py oguerekó katu raka'e Nhandereraa jepearã, oiko axya py guive.

<sup>11</sup> Mba'eta Nhandeky'a'oarã ou va'ekue ha'e nhande kuery oiky'a'o va'ekue voi peteī'i gui ae jaiko. Ha'e nunga rupi noxī nhandevy "Xeryvy kuery" he'i aguã,

<sup>12</sup> mba'eta aipoe'i: "Xeryvy kuery pe aikuua uka 'rā nderery, ha'e onhemboaty okuapya py aporaei 'rā ndevy."\*

<sup>13</sup> Aipoe'ive ju: "Xee ajerovia 'rā hexe." Teīgue ju aipoe'i: "Apy ma xee aĩ, ha'e xera'y kuery Nhanderuete ome'ẽ va'ekue reve", he'i.\*

<sup>14</sup> Ha'e gui ta'y kuery he'ia ho'o ha'e huguy va'e ikuia rami avi ha'e voi oiko ha'e rami, omanoa py ombovaipa aguã porojukaa po'akaa. Ha'e va'e ma anha.

\* **1:12** Salmo 102.25-27   \* **1:13** Salmo 110.1   \* **2:1** Marcos 4.14-25   \* **2:8** Salmo 8.4-6   \* **2:9** Filipenses 2.6-11   \* **2:12** Salmo 22.2   \* **2:13** Isaías 8.17-18

15 Ha'e gui nhandereraa jepe aguã, mba'eta jaikoa pukukue re nhamano aguã gui jakyje vy manoa pegua escravo rami nhandekuai va'ekue.

16 Mba'eta anhetẽ anjo kuery reraa jepearã e'ŷ ou, ha'e rã Abraão ramymino kuery reraa jepearã anho.

17 Ha'e nunga rupi opa mba'e py guyvy kuery rami 'rãe ojeapo, nhanemboaxy kuaa ha'e ojeroviapy oikoa oexa uka aguã, ha'e Nhanderuete pegua sacerdote yvateve va'e oiko aguã guive, ojeupegua kuery ojejavyague re opaga aguã.

18 Mba'eta anha omoangecko py oiko axy rire aŷ ipo'aka nhanderepy aguã nhande voi nhanemoangeko rã.

### 3

#### *Moisés gui Cristo yvateve ramo jajeroviaa gui jajepe'a e'ŷ aguã re ijayvua*

1 Ha'e nunga rupi irmão kuery iky'a e'ŷ va'erã Yva pygua penerenoĩ avi va'ekue, peikuua pota porã Jesus re, mba'eta Nhanderuete ombou raka'e Sacerdote Yvateve va'erã, nhamombe'ua rami ae.\*

2 Ha'e va'e pe ma Nhanderuete ngoo pygua kuery re opena uka ramo henonde rupi ojeroviapy oiko, Moisés oikoague rami avi.

3 Ha'e rami avi Moisés gui ma Jesus omboetevepy, oo gui ijapoare omboeteavea rami avi.\*

4 Mba'eta oo ikuai va'e ma ojapo pyre meme, ha'e rã opa mba'e apoare ma Nhanderuete anho.

5 Ha'e gui Moisés ma Nhanderuete rembiguai rami oiko raka'e hoo pygua ha'e javi re openaa rupi. Ha'e ramia py ojeroviapy oiko, omombe'u ma voi guive raka'eve rã Nhanderuete omombe'u porãve va'erã regua.

6 Ha'e rã Cristo ma hoo pygua kuery re opena vy Ta'y ae oiko. Ha'e gui "Hoo pygua kuery" he'ia ma nhande ae jaiko, opa peve ete ri nhaĩ atã vy nhandepy'a guaxu ha'e jarovy'a reve nharõ jaikovya re.

7 Mba'eta Nhe'ẽ Ky'a E'ŷ aipoe'iague rami: "Kova'e ára ijayvua pendu vy

8 peneakã ratã eme, tekao e'ŷa rupi ymagua kuery ikuai jave oeko a'ã rei ha'e nonhe'ẽ renduiague rami e'ŷ.

9 Mba'eta ha'e py ma peneramoĩ kuery xerekoo a'ã vy xemoangeko rei va'ekue, quarenta ma'etõ re mba'emo porã ajapo rã oexa okuapy tei.\*

10 Ha'e nunga rupi ha'e javeguia kuery pe xevai vy aipoa'e: 'Ha'e kuery ojejavy riae opy'a py, ndoikuaaxeit guive xerekoo', ha'e va'ekue.

11 Ha'e rami vy xepoxy reve aura va'ekue ha'e kuery oupity e'ŷ aguã opytu'u aguã areko katu va'ekue", he'i.\*

12 Ha'e nunga rupi irmão kuery, penheangu ke peẽ kuery regua neĩ peteĩve py'a re oĩ e'ŷ aguã pejerovia e'ŷa, Nhanderuete oikove va'e penhe'ẽ rendua gui pendepe'aarã.

13 Ha'e rami 'rãgue py ko'ẽ nhavõ penhomombaraeete peteĩ-tei, "Kova'e ára" he'iague oĩ teria ja, jejavya peteĩve penembotavy e'ŷ aguã peneakã ratã aguã rami.

14 Mba'eta Cristo reveguia ete jaiko, anhetẽ ri jypy guive jajeroviaa re opa peve nhaĩ atã vy.

15 Mba'eta "Kova'e ára ijayvua pendu vy peneakã ratã eme, oeko a'ã rei va'e kuery rami e'ŷ", he'iague rami.

16 Ha'e gui mava'e kuery tu ijayvua oendu tei nonhe'ẽ rendui raka'e? Moisés reve Egito gui oẽmba va'ekue ha'e javi.

17 Ha'e mava'e kuery pe tu quarenta ma'etõ re ipoxy raka'e? Ojejavy va'ekue pe ae, mba'eta ha'e va'e kuery ma tekao e'ŷa pyve ho'apa rã hetekue opyta raka'e.

\* 3:1 Números 12.17 \* 3:3 João 1.17,18 \* 3:9 "Peneramoĩ kuery" he'ia ma Moisés reve Egito yvy gui oẽ va'ekue re ijayvu vy. \* 3:11 Salmo 95.7-11

**18** Ha'e gui mava'e rovai tu oura raka'e optyu'u aguã oguereko katu va'ekue oupity e'ŷ aguã? Nonhe'ẽ rendui va'ekue rovai ae.

**19** Ha'e rami vy po rami jaikuua: Ha'e kuery ndojeroviaiague re ae nda'evei raka'e oupity aguã.

## 4

### *Japytu'u aguã py Nhanderuete re jajeroviaa rupi jaike aguã re ijayvua*

**1** Ha'e nunga rupi nhanheangu, japytu'u aguã Nhanderuete oguereko katu va'ekue jaupity aguã re ijayvu rire teĩ peẽ kuery regua amongue ndapeupityi gui.

**2** Mba'eta nhandevy pe voi ayvu porã omombe'ua, ymagua kuery pe rami avi. Mba'eta ha'e kuery ayvu oendu teĩ ndojeroviai ramo ha'e kuery pe mba'everã ndovarei.

**3** Ha'e rã nhande jajerovia va'e ma jaupity 'rã japytu'u aguã, Nhanderuete aipoe'iague rami vy: "Xepoxy reve aura va'ekue ha'e kuery oupity e'ŷ aguã optyu'u aguã areko katu va'ekue" he'i, ko yvy onhono ypy jave mba'emo ojapopa rire teĩ.

**4** Mba'eta amongue henda py sete araa re ijayvu vy aipoe'i: "Sete araa py Nhanderuete optyu'u raka'e mba'emo ojapoa gui", he'i.\*

**5** Ha'e pyve ju aipoe'i: "Ha'e kuery ma ndoupityi 'rã optyu'u aguã areko katu va'ekue", he'i.

**6** Ha'e nunga rupi oĩ teri optyu'u aguã amongue oupity aguã, ha'e rã ymagua kuery pe ma ayvu porã omombe'ua rã nonhe'ẽ rendui vy ndoupityi raka'e.

**7** Ha'e gui yma ete rire peteĩgue ju Nhanderuete oa'angaa ára, mba'eta "Kova'e ára" he'i uka Davi pe, "Kova'e ára ijayvua pendu vy peneakã ratã eme", he'iague romombe'u ma voiague rami.

**8** Mba'eta ha'e kuery optyu'u aguã ete py Josué ogueraa va'e rire ma yma rire noa'anga jevyi'rãgue ára mboae.

**9** Ha'e nunga rupi oĩ teri Nhanderuete pegua kuery optyu'u aguã.

**10** Mba'eta japytu'u aguã Nhanderuete oguereko katu va'ekue jaupity vy japytu'u 'rã mba'emo re nhanhea'ã jaikovya gui, Nhanderuete oikoague rami avi.

**11** Ha'e nunga rupi nhanhea'ã ke japytu'u aguã oguereko katu va'ekue jaupity aguã, avave rei ho'a e'ŷ aguã inhe'ẽ rendu e'ŷ rei va'e kuery ho'apaague rami.

**12** Mba'eta Nhanderuete ayvu ma oikove ha'e ipo'akapa va'e. Kyxe haĩmbe jovai va'e gui haĩmbeve va'e, mba'eta oike 'rã jaikovea ha'e nhanenhe'ẽ omboja'o aguã peve, jaku'ea ha'e nhanderajy ojaya rami avi. Ha'e rami vy oikuua uka 'rã nhapẽxaa ha'e nhandepy'aa ha'e javi.

**13** Ha'e ramo hemimoingo jipoi henonde onhenhomí kuaa va'erã. Ha'e rami 'rãgue py oikuua pota va'e renonde jajexa uka rã opa mba'e ojekuaa porãmba 'rã.\*

### *Sacerdote yvateve va'e Jesus nhanemboaxya oikoa re ijayvua*

**14** Ha'e nunga rupi Nhanderuete Ra'y Jesus, Sacerdote yvateve va'e rami nhanderepy vy yva re oo rire nhaĩ atã tema jajeroviaa re.

**15** Mba'eta nhande-Sacerdote ma nhanekangy rã nanhanemboaxy e'ŷi 'rã. Ha'e rami 'rãgue py nhande rami avi onhemoangeko uka raka'e opa mba'e py, teĩ ojejavý e'ŷ re.

**16** Ha'e nunga rupi jakyjea py e'ŷ 'rã nhanhemboja Nhanemboaxya guenda openaaty py oguapy oinya re, nhanekangya ára jaupity aguã nhanemboaxy vy nhanepytyvõa.\*

## 5

### *Sacerdote ymagua kuery gui Cristo yvatevea re ijayvua*

\* **4:4** Gênesis 2.2   \* **4:13** Efésios 6.17; Apocalipse 1.16   \* **4:16** Hebreus 10.19-25; 1 João 2.1,2

<sup>1</sup> Mba'eta sacerdote yvatekueve ikuai va'e ma avakue mbyte gui oiporavoa ha'e omoña rire Nhanderuete pe ombo'epo 'rã avakue rekovia, mymba ojuka ha'e mba'emo ome'ẽ aguã ojejavyague re.

<sup>2</sup> Ha'e omboaxy kuaa 'rã oikuaa e'ỹ vy ojejavy va'e kuery, mba'eta ha'e kuery rami avi ikangy va'e vy.

<sup>3</sup> Ha'e nunga rupi ae mba'emo ome'ẽ 'rã ha'e ae ojejavyague re, heta va'e kuery ojejavyague re anho e'ỹ.

<sup>4</sup> Ha'e gui avave rei ha'e ae nonhemboyvatei 'rã ha'e rami oiko aguã. Nhanderuete oenoĩ ramo mae ha'eve, Arão oenoĩague rami.

<sup>5</sup> Ha'e rami ae avi Cristo voi ha'e ae e'ỹ onhemboyvate sacerdote yvateve va'e oĩ aguã. Ha'e rã ixupe "Ndee ma Xera'y, kova'e ára romoingo" he'i va'e ae\*

<sup>6</sup> amboae henda py "Ndee ma sacerdote reĩ riae 'rã, Melquisedeque reko rami ndereko va'e vy" he'i.\*

<sup>7</sup> Ha'e gui Jesus ma ngo'o re oiko jave ojapukai atã ha'e hexay reve onhembo'e vy ojerure raka'e omanoa gui ogueraa jepe aguã ipo'aka va'e pe. Ha'e ramo oendu ete, mba'eta Nguu pe ete oiko ramo.

<sup>8</sup> Ta'y ae oiko va'eri oiko axya py voi oikuaa raka'e onhe'ẽ rendua.

<sup>9</sup> Ha'e gui ha'e nunga ha'e javi oaxapa ma rire ogueraa jepe inhe'ẽ rendua kuery ha'e javi, raka'e rã peve guarã,

<sup>10</sup> Melquisedeque rami sacerdote yvateve va'erã Nhanderuete omoĩ rire.\*

### *Ha'e kueryndoikuaa porãi teria re ijayvua*

<sup>11</sup> Ha'e va'e rekokue re ma heta roguerek oreayvu aguã, teĩ aÿ ma napendu kuaa porãi ramo haxy 'rã romombe'u porãve aguã.\*

<sup>12</sup> Mba'eta yma ma pejerovia teĩ penhombo'e kuaa 'rãgue py peikotevõ teri Nhanderuete ayvu jypy guare, haxy e'ÿve va'e re penembo'e va'erã. Ha'e rami vy kyrígue'i okambu va'e rami teri pendekuai, tembi'u tykue'ÿ va'e ho'u va'e rami e'ÿ.

<sup>13</sup> Mba'eta okambu va'e rami ikuai va'e ma noendu kuaai 'rã teko porã regua, kyrí'i va'e rami teri ikuai vy.

<sup>14</sup> Ha'e rã tembi'u tykue'ÿ va'e ma kakuaakueve peguarã, mba'eta o'arandua re onhea'ãa rupi vy oikuaa 'rã ha'eve va'e ha'e ha'eve'ÿ va'e.\*

## 6

### *Jajeroviaa regua jaikuuaa porãve pota aguã re ijayvua*

<sup>1</sup> Ha'e nunga rupi jaikuuaa porãve pota ke jypy'i Cristo regua re nhanembo'eague, ha'e opa mba'e py nhanemoingo porãarã re ju jaikuuaa pota. Nda'evei jypy'i nhaendu va'ekue re rive rombo'eve ju aguã. Ha'e va'e ma nhamano aguã rami nhandekuaiague gui jajeko rerova aguã, Nhanderuete re jajerovia aguã,

<sup>2</sup> nhanhemongarai aguã, nhandeapte re opo omoĩa aguã, nhamanoague gui nhanhemboete ju aguã, ha'e raka'e rã peve guarã nhanemboayvua aguã.

<sup>3</sup> Ha'e rami 'rãgue py amboae nunga re ju 'rã jaikuuaa pota, Nhanderuete oipota rã.

### *Ojeroviaa gui ojepe'a va'ekue re ijayvua*

<sup>4</sup> Ha'e rã anhetõ va'e oikuaa va'ekue gui amongue ojepe'a ramo ma nda'evei nhamboeko rerova ju aguã. Ha'e va'e kuery ojopy ae ma yva guigua, Nhe'ẽ Ky'a E'ÿ

<sup>5</sup> ha'e Nhanderuete guigua ayvu porã, ha'e oendu ma guive Nhanderuete po'akaa raka'eve rã peve guarã,

---

\* **5:5** Salmo 2.7   \* **5:6** Salmo 110.4   \* **5:10** Mateus 26.36-46   \* **5:11** Melquisedeque rekoke ma capítulo 7 py omombe'u porãve.   \* **5:14** 1 Coríntios 3.1,2, 14.20; Efésios 4.11-16

**6** ha'e rami teĩ ha'e kuery ho'a ramo nda'evei nhamo'arandu ju aguã ojeko rerova aguã rami, mba'eta ha'e kuery ae ojapo Nhanderuete Ra'y pavẽ ojojai rei aguã rami, teĩgue ju kuruxu re omoña rami.

**7** Mba'eta yvy minha oky jepi rã inhaký vy hi'a porã 'rã oma'etý va'e kuery peguarã. Ha'e va'e yvy ma Nhanderuete ogueroayvu porã 'rã.

**8** Ha'e rã juu ha'e juu rakua endy rive moingoa yvy ma ndojou porãi 'rã, ayvu vai pyrã rive oiko. Ha'e va'e ma opaa py oapypaa 'rã.\*

### *Jaa jepea kuua ukaarã re ijayvua*

**9** Ha'e rã peẽ orerembiayvu kuery, ha'e rami oreayvu teĩ roikuaa rã pendere oĩ iporãve va'e nunga, peo jepea kuua ukaarã.\*

**10** Mba'eta Nhanderuete ndaexarai 'rã pemba'eapoague ha'e hery rupi pejoayvua pexa ukaague re, mba'eta iky'a e'ý va'e kuery peipytyvõ va'ekue, ha'e peipytyvõve teri guive.

**11** Ha'e rami avi roipota opa peve peteĩ-teĩ pexa uka ha'ekue rami penhea'ãa, peupity aguã pearõ peikovy va'e.

**12** Pendekuai eme inhate'ý va'e rami, ha'e rã ojeroviaa ha'e oĩ atãa rupi Nhanderuete ijayvuague oupity va'erã kuery rami anho.

### *Nhanderuete ijayvuague ndoaxa rivei 'rãa re ijayvua*

**13** Mba'eta Abraão pe Nhanderuete mba'emo ome'ẽ aguã re ijayvu vy guery rupi ae oura raka'e, mba'eta ixugui yvateve va'e jipoí hery rupi oura aguã.

**14** Ha'e vy aipoe'i: "Anhetẽ romoingo porã 'rã, neramymino kuery amoingo reta 'rã guive", he'i.\*

**15** Ha'e ramo Abraão oĩ atãa rupi oarõ rire oupity raka'e ijayvuague.

**16** Ha'e gui avakue minha ha'e kuery gui yvateve va'e rery rupi 'rã oura. Ha'e rami rire jomeme joguero'a teĩ ouraague ojapo 'rã peteĩ rami ju oikuua aguã rami.

**17** Ha'e nunga rupi Nhanderuete voi oura reve ijayvu raka'e, ijayvuague oupity va'erã kuery pe oikuua uka aguã ndoaxa rivei 'rãa.

**18** Ha'e rami vy mokoõ mba'e oaxa rive e'ý va'erã py Nhanderuete oikuua uka raka'e nda'ijapuia.\*

Ha'e rami rire jajereraa jepe uka rire nhandepy'a guaxu ete 'rã, ha'e rami vy nharõ jaikovya nhanerenonderã omoõ mbyre jaupity aguã.

**19** Nharõ va'e ma kanoã mombytaa rami oĩ nhanenhe'ẽ moõ atãarã. Mba'eta mba'eve py nanhanemokanhy ukai 'rã, nhanemoõ atã 'rã, templo mbotya ajukue guigua rovai oike rire.†

**20** Mba'eta ha'e py ma Jesus nhandegui ha'e ranhe oike raka'e. Nhandere vy oike, Melquisedeque rami sacerdote yvateve va'e omoña rire raka'eve rã peve guarã.

## 7

### *Cristo rami Melquisedeque oikoague re ijayvua*

**1** Mba'eta Melquisedeque ma Salém tetã pygua huvixave oiko raka'e, ha'e sacerdote Nhanderuete Yvate ete va'e pegua guive. Ha'e va'e ma Abraão ovaexi vy oo raka'e. Abraão ma huvixa kuery juka vy ooague gui ojevy jave Melquisedeque ovaexi vy ogueroayvu porã.

---

\* **6:8** Hebreus 10.26-31 \* **6:9** 1 Tessalonicenses 1.2-4; 2 Pedro 1.5-10 \* **6:14** Gênesis 22.17 \* **6:18** "Mokoõ mba'e oaxa rive e'ý va'erã" he'i, mba'eta Nhanderuete guery rupi ae ijayvu, ha'e oura guive. † **6:19** "Templo mbotya ajukue guigua" he'ia ma ombojeroviaaty ropy oĩ va'e re ijayvu vy, Henda iky'a e'ý ete va'e jaikea. Ha'e nunga omombe'u porãve capítulo 9 py. Ha'e rami avi apy ma ombojeroviaaty yva re oĩ va'e re ijayvu, 8.12 ha'e 9.11-12 py oĩ rami.

<sup>2</sup> Ha'e ramo ixupe Abraão ome'ẽ raka'e mba'emo ojou va'ekue ha'e javi guigua dízimo. (Jypy Melquisedeque rery ma “Huvixave heko porã va'e” he'ia, ha'e rire ma Salém pygua huvixa avi oiko vy “Huvixave nhomoingo porãa” he'ia.

<sup>3</sup> Tuu e'ŷ va'e, ixy e'ŷ va'e, tamoĩ e'ŷ va'e, hekove ijypy va'ekue'ŷ, neĩ opa e'ŷ va'e guive oiko raka'e, Nhanderuete Ra'y rami omoingo pyre.) Ha'e ma sacerdote raka'e rã peve guarã oiko.\*

### *Levi ramymino kuery sacerdote ikuai va'e gui Melquisedeque yvatevea re ijayvua*

<sup>4</sup> Peikuaa pota ke ha'vy Melquisedeque yvatea re, mba'eta ixupe nhandeypy Abraão ome'ẽ raka'e dízimo huvixa kuery mba'e rei-reikue iporãve va'e guigua.

<sup>5</sup> Ha'e gui Levi ramymino kuery regua sacerdote ikuai va'e ma lei re oĩa rami vy heta va'e kuery gui ojopy 'rã dízimo, guyvy kuery gui ae, Abraão ramymino ikuai avi va'eri.

<sup>6</sup> Ha'e rã Melquisedeque ma ha'e kuery regua e'ŷ vy Abraão gui eteve voi ojopy raka'e dízimo, ha'e ogueroayvu porã guive Nhanderuete ijayvuaque renduare.

<sup>7</sup> Ha'e rami avi joegui yvateve va'e ogueroayvu porã 'rã yvyïve va'e, jaikuua pavẽ.

<sup>8</sup> Ko yvy re Levi ramymino kuery regua dízimo jopya ikuai va'e ma avakue omano va'erã meme. Ha'e rã Melquisedeque pe ma “Oikove va'e” 'ea.

<sup>9</sup> Ha'e gui jaikuua rã Levi voi dízimo ome'ẽ avi raka'e Abraão ome'ëa py, aŷ hamymino kuery dízimo jopya ikuai va'eri,

<sup>10</sup> mba'eta tamoĩ Abraão ma Melquisedeque rovaexí vy oo jave hete re Levi voi oĩ ae ma raka'e.

### *Levi ramymino kuery sacerdote ikuai aguã opa va'erã, ha'e rã Cristo ma opa va'erã e'ŷa re ijayvua*

<sup>11</sup> Levi ramymino kuery sacerdote ikuai aguã ma heta va'e kuery lei ojopy va'ekue re oĩ. Ha'e rami avi Levi ramymino kuery opa mba'e gui nhandeky'a'opa va'e rire amboae regua sacerdote oĩ e'ŷ teĩ ha'eve 'rãgue. Ha'e va'e ma Arão ramymino e'ŷ, ha'e rã Melquisedeque reko rami heko va'e.

<sup>12</sup> Lei omboekoviaa ramo mae ma ha'eve amboae regua sacerdote oĩ aguã.

<sup>13</sup> Mba'eta sacerdote ro'ea va'e ma amboae regua. Ha'e va'e regua ma avave rei altar rupi ombo'eapo va'e'ŷ.

<sup>14</sup> Mba'eta jaikuua nhande-Senhor ma Judá ramymino oikoague. Ha'e va'e regua pe ma Moisés “Sacerdote oĩ va'erã” nde'i.

<sup>15</sup> Ha'e rami teĩ jaikuua porãve 'rã, mba'eta amboae regua Melquisedeque reko rami heko va'e sacerdote oĩ aguã ma ha'eve.

<sup>16</sup> Ha'e va'e ma avakue pegua lei re oĩa rami e'ŷ omoña raka'e, ha'e rã hekove imarã e'ŷ va'e vy ipo'akapa va'e ramo.

<sup>17</sup> Mba'eta Jesus pe “Ndee ma Melquisedeque reko rami sacerdote reĩ raka'e rã peve guarã”, he'i.\*

<sup>18</sup> Ha'e ramia py omboyke yma ojapo uka pyre, mba'eta ha'e va'e ma ipo'aka e'ŷ ha'e mba'everã ovare'ŷ ramo.

<sup>19</sup> (Mba'eta lei ma peteïve henda py nhandeky'a'o va'e'ŷ.) Ha'e gui oikuua uka iporãve va'e nharõ aguã, ha'e va'e rupi Nhanderuete re nhanhemboja ete aguã.

### *Cristo anho'i sacerdote heko porã ete va'e oikoa re ijayvua*

<sup>20</sup> Ha'e gui Nhanderuete ma sacerdote-rã Jesus omoĩ vy ndoura e'ŷi guive. (Amboae regua sacerdote kuery ma oura re'ŷ 'rã omoĩa.

<sup>21</sup> Ha'e rã Jesus ma oura reve omoĩ, mba'eta ixupe “Senhor ouraague ndoaxa rivei 'rã, ‘Ndee ma sacerdote raka'e rã peve guarã’, he'ia py.”)

\* <sup>7:3</sup> Apy Melquisedeque pe “Cristo rami oiko va'ekue” he'i, mba'eta Antigo Testamento py nomombe'uai tuu, ixy, tamoĩ kuery, ituiague neĩ omanoague (Gênesis 14.17-20). \* <sup>7:17</sup> Salmo 110.4

<sup>22</sup> Ha'e nunga rupi Jesus ma Nhanderuete reve guarā iporāve va'e oikuua uka.

<sup>23</sup> Ymave rupigua sacerdote kuery ma heta ikuai raka'e, mba'eta peteñ-teñ omano vy noñvei 'rā.

<sup>24</sup> Ha'e rā Jesus ma raka'e rā peve guarā vy sacerdote opa e'ŷ re oĩ.

<sup>25</sup> Ha'e nunga rupi hexeve vy Nhanderuete re nhanhemboja va'e nhandereraa jepe 'rā opa mba'e gui, mba'eta oikove riae nhandere ojerure aguā.

<sup>26</sup> Anhetē ha'e va'e regua sacerdote yvateve va'e anho ha'eve nhandevy, iky'a e'ŷ va'e, heko vaia oĩ e'ŷ va'e, heko ky'a e'ŷ va'e, ojejavvy va'e kuerya gui oipe'a pyre, ha'e yva áryve ombovatea va'e.

<sup>27</sup> Sacerdote yvateve va'e mboae ikuai va'e rami e'ŷ Jesus noikotevēi ára nhavō ha'e ae ojejavvyague re ranhe mymba ome'ẽ aguā, ha'e gui mae ma amboae kuery ojejavvyague re ju. Mba'eta peteñgue'i ha'e ae ojejuka uka vy ombogue raka'e jejavya.

<sup>28</sup> Mba'eta lei re oĩa rami vy sacerdote kuery yvatekueve va'e ma ikangy va'e meme. Ha'e gui Nhanderuete lei oeja ma rire Gua'y ae omoĩ, oura reve ijayvuague rami vy. Ha'e rā Ta'y ma opa mba'e py heko porā va'e, raka'e rā peve guarā.

## 8

### *Jypygua guexeve guarā ojapo pyre gui Cristo rupi ou va'ekue iporāvea re ijayvua*

<sup>1</sup> Ha'e gui aiporo'eague ma po rami: Nhandevyguia sacerdote yvateve va'e ma yva re oguapy raka'e Ipo'akapa va'e renda oiporu kuaa regua re.

<sup>2</sup> Ha'e py ma ojeupagua kuery re ojerure oinyombojeroviaaty iky'a e'ŷ ha'e anhetē ete va'e py, Senhor ae ojapo va'ekue py, avakue ojapo va'ekue py e'ŷ.

<sup>3</sup> Mba'eta sacerdote yvateve va'e kuery ma mba'emo ome'ẽ aguā omoña, mymba ojuka aguā guive. Ha'e nunga rupi nhandevyguia sacerdote yvateve va'e voi oguerekavi ome'ẽ va'erā.\*

<sup>4</sup> Ha'e rami avi ko yvy re oiko teri va'e rire neñ sacerdote voi ndoikoi 'rāgue, mba'eta ikuai 'rāe lei re oĩa rami vy mba'emo me'ẽarā.

<sup>5</sup> Ha'e va'e kuery ombo'eapo aguā ma yva re mba'emo oĩ va'e 'ã rami rive, Moisés ombojerovia atyrā ojapo aguā re Nhanderuete ijayvu vy aipoe'iague rami vy: "Ma'ẽ, ejapopa ke yvyty áry ndevy ha'angaa aexa uka va'ekue rami", he'iague rami.\*

<sup>6</sup> Ha'e nungakue gui aŷ Jesus mba'emo ojapo va'e ma ha'eveve, Nhanderuete reve guarā ogueru va'ekue voi ha'eveve, ayvu iporāve va'e rupi ogueru guive.\*

<sup>7</sup> Mba'eta hexeveguia jypy guare opa mba'e py ha'eve ete va'e rire ma amboae ju ogueru e'ŷ teñ ha'eve 'rāgue.

<sup>8</sup> Ha'e rami avi Senhor ndoguerovy'ai raka'e ymagua kuery. Ha'e vy aipoe'i: "Ma'ẽ, ou ma oiny ára xereve guarā ipyau va'e ju ajapo aguā Israel ha'e Judá kuery pe.

<sup>9</sup> Peneramoĩ kuery pe ajapo va'ekue ramigua e'ŷ 'rā ajapo, ha'e kuery po re ajopy vy Egito yvy gui anoẽmba jave guare rami e'ŷ, mba'eta ha'e kuery ojepe'apa ma xereve guarā ajapo va'ekue gui. Ha'e rire ha'e kuery re xee napenavei ma 'rā", he'i Senhor.

<sup>10</sup> "Ha'e gui raka'eve rā po rami 'rā ajapo xereve guarā pyau Israel kuery pe. Xee aipota va'e amoĩ 'rā ha'e kuery 'arandua re, ipy'a re ae 'rā ambopara. Xee aiko 'rā Tuuete, ha'e rā ha'e kuery ma xevygua kuery 'rā ikuai", he'i Senhor.

<sup>11</sup> "Ha'e rami rire mava'eve nombo'evei 'rā oirū neñ guyvy kuery Senhor oikuua aguā re, mba'eta pavē 'rā xekuaa, yvyigueve'i ha'e yvatekueve voi.

<sup>12</sup> Mba'eta amboaxy vy amboguepa 'rā heko vaiague, naxema'endu'avei ma 'rā ojejavvyague re", he'i.\*

<sup>13</sup> "Ipyau va'e" he'ia py oikuua uka jypy guare inhyma maa. Ha'e gui yma guare inhymamba va'e vy oaxa ta ma ov.

\* <sup>8:3</sup> Jesus ome'ẽ va'ekue ma nguguy ae (Hebreus 9.12). \* <sup>8:5</sup> Éxodo 25.40 \* <sup>8:6</sup> Lucas 22.20; 2 Coríntios 3.6-11

\* <sup>8:12</sup> Jeremias 31.31-34

## 9

*Ymave rupi mba'emo ome'ẽmbi mba'everã ndovareiague re ijayvua*

- <sup>1</sup> Ha'e gui Nhanderuete jypy guexeve guarã ojapo va'ekue re oĩ heta va'e kuery ombojerovia aguã, ha'e ko yvy regua oo iky'a e'ŷ va'erã ojapo aguã guive.\*
- <sup>2</sup> Ha'e rami rã ojapopa raka'e ombojerovia atyrã. Ha'e gui opy jaikea py ma oĩ va'ekue tataendy 'y, mesa ha'e Senhor renonde mbojape omoĩ mbyre. Ha'e va'e henda pe ma "Henda iky'a e'ŷ va'e" 'eaague.
- <sup>3</sup> Ha'e gui ma peteĩ okẽ re ajukue mokoĩa oĩ va'e rovai ma ombojeroviaaty ropy ete oĩ, "Henda iky'a e'ŷ ete va'e" 'eaague.
- <sup>4</sup> Ha'e va'e pegua oĩ va'ekue ma peteĩ altar ouro guigua heakuã porã va'e rapyaty. Oĩ avi guexeve guarã Senhor ojapo va'ekue ryru, ouro py onhovãmba pyre. Ha'e va'e ryepy py oĩ va'ekue maná ryru ouro guigua, Arão popoka ipoty va'ekue, ha'e itape ayvu oeja va'ekue oĩa guive.
- <sup>5</sup> Hi'áry ma omopu'ã anjo ipopo va'e ra'angaa hexakãmba va'e. Ha'e kuery omo'ã hyru mbotya teko vai mbogue atyrã oĩ va'e. Ha'e nungakue ma aŷ nda'evei romombe'u porãve aguã.
- <sup>6</sup> Ha'e nunga ha'e javi oguereko katupa ma rire sacerdote kuery ma opy ja'o oike ypya'i pyve oĩ va'e py oike jepi 'rã Nhanderuete pe mba'emo ome'ẽ aguã.\*
- <sup>7</sup> Ha'e rã opyve ma sacerdote yvateve va'e ha'e ae'i 'rã oike, peteĩgue-ígue'i ma'etýa nhavõ. Mba'emo ruguy reve 'rã oike ha'e ae ojejavyague re ome'ẽ va'erã, ha'e gui heta va'e kuery oikuua vy e'ŷ ojejavyague re ju.
- <sup>8</sup> Ha'e nunga py Nhe'ẽ Ky'a E'ŷ po rami oikuua uka: Ombojeroviaaty jypy guare ho'ame teria ja Henda iky'a e'ŷ va'e py jaike aguã nda'evei, mba'eta nhanhemboja aguã ndoikuua ukaai teri.
- <sup>9</sup> Ha'e nunga oejaa raka'e nhande aŷguia kuery jaikuua aguã, mba'eta ymagua kuery ombojerovia vy mymba ojuka ha'e mba'emo ome'ẽ teĩ ha'e nunga ma ipy'apy rupi ndoiky'a'oi raka'e opa mba'e vai gui.
- <sup>10</sup> Ha'e ramigua ojapo uka pyre ma ha'e kuery ro'o reguarã rive. Okaru, oy'u ha'e ojepoei aguã rive oeja, opa mba'e ombopyau aguã ára peve guarã.

*Tuguy omoõa re ijayvua*

- <sup>11</sup> Ha'e gui ma Cristo ou vy sacerdote yvateve va'e rami ogueru mba'emo porã aŷ ojekuaa va'e. Ha'e rami vy ombojeroviaaty tuvixave ha'e iporãve va'e py oike, avakue opo py ojapo va'ekue py e'ŷ, mba'eta ko yvy regua e'ŷ ae.
- <sup>12</sup> Kavara ha'e vaka ra'y ruguy e'ŷ guive ogueroike raka'e Henda iky'a e'ŷ ete va'e py, ha'e rã nguguy ae. Peteĩgue'i oike raka'e, araka'e rã peve guarã nhandereraa jepe ma rire.\*
- <sup>13</sup> Mba'eta ymave rupi kavara ha'e vaka ruguy, ha'e gui vaka ra'y oapy pyre rugue ma onhemongy'a va'ekue áry omboayvi vy oiky'a'oa 'rã hi'árykue rupi rive.
- <sup>14</sup> Ha'e gui Cristo ruguy katuve ma nhandeky'a'o 'rã, mba'eta Nhe'ẽ imarã e'ŷ va'e po'akaa rupi iky'a e'ŷ va'e vy ha'e ae ojejuka uka raka'e Nhanderuete pe ome'ẽ mbyrã. Ha'e rami vy nhandepy'apy rupi peve 'rã nhandeky'a'o, jajapo ve'ŷ aguã manoia katy nhandereraa arã nunga, Nhanderuete oikove va'e pe anho nhandekuai aguã.
- <sup>15</sup> Ha'e rami py Nhanderuete reve guarã ipyau va'e ogueru. Omano vy omboguepa raka'e jypy guare ayvu rupigua kuery ojejavyague, Nhanderuete remienoĩ kuery ha'e javi oupity aguã mba'emo imarã e'ŷ va'e ijayvuague.
- <sup>16</sup> Mba'eta amongue omano ta vy joupe mba'emo oeja aguã re ijayvuague ma ijayvu va'ekue omano ramo anho 'rã ovare,
- <sup>17</sup> omano ma ramo mae ma ijayvuague oiko 'rã. Ijayvu va'ekue oikove teria ja peteĩve henda py ndoikoi 'rã.

\* **9:1** Êxodo 25.8-40\* **9:6** Êxodo 30.10; Levítico 16.34\* **9:12** 1 Timóteo 2.5,6

**18** Ha'e nunga rupi Nhanderuete jypy guare guexeve guarā ojapo vy omoē uka raka'e mba'emo ruguy.

**19** Ha'e ramo Moisés ma heta va'e kuery pe lei regua ojapo uka pyre omombe'upa ma vy ogueru raka'e vaka ra'y ha'e kavara ruguy yy reve. Ha'e rami vy hissopo rogue ha'e vexa'i rague omopytā mbyre omoakŷ vy omboayvi raka'e kuaxia para oī va'e ha'e heta va'e kuery ha'e javi re.

**20** Ha'e vy aipoe'i: "Kova'e tuguy py Nhanderuete ojapo guexeve guarā, ha'e va'e rupi pendekuai aguā", he'i raka'e.

**21** Ha'ekue rami ae huguy py omboayvi avi ombojeroviaaty ha'e tembiporu opy rupi oiporu va'erā ha'e javi re.

**22** Mba'eta lei re oīa rami vy opa mba'e rai oiky'a'oa 'rā tuguy py, mba'eta tuguy omoēa e'ŷ re nda'evei jejavya omboguea aguā.

### *Cristo omanoague araka'e rā peve guarā ovarea re ijayvua*

**23** Ha'e va'e nunga ma yva re mba'emo oī va'e kuaa ukaarā rive ome'ēa, ha'e rami vy mymba ojukaa py 'rā oiky'a'oa. Ha'e rā yva re ete mba'emo oī va'e ma yvateve va'e ojukaa py 'rā oiky'a'oa.

**24** Mba'eta Cristo ma henda iky'a e'ŷ va'erā avakue opo py ojapo va'ekue py e'ŷ oike raka'e, mba'eta ha'e nunga ma anhetē va'e kuaa ukaarā rive ome'ēa. Ha'e rami 'rāgue py yva re ete oike raka'e, aŷ peve Nhanderuete renonde ojexa uka vy nhandere ojerure aguā.

**25** Ojejuka uka jepi e'ŷ teĩ ha'eve guive, sacerdote yvatekueve va'e ma'etŷa nhavō henda iky'a e'ŷ ete va'e py mba'emo ruguy reve oike va'e rami e'ŷ.

**26** Mba'eta ha'e rami va'e rire yvy itui ypy'i guive mbovykue rei e'ŷ Cristo omano 'rāgue. Ha'e rami 'rāgue py aŷ ára ojeupity ramo peteŷgue'i ojekuaa, ha'e ae ojejuka uka vy jejavya ha'e javi oipe'apa vyvoi aguā.

**27** Mba'eta avakue renonderā omoña peteŷgue'i omano aguā, ha'e va'e rire imboayvuarā pe ojexa uka aguā.

**28** Ha'e rami ae avi Cristo voi peteŷgue'i ojejuka uka raka'e heta ojeavyague oipe'a aguā, ha'e va'e rire jejavya reve'ŷ ju 'rā ojekuaa, oo jepe aguā oarō va'e kuery pe.

## 10

### *Mymba ojukaa ague rami e'ŷ Cristo omanoague re ijayvua*

**1** Lei regua ma henonde re mba'emo porā ou oiny va'e 'ā rami rive, ou va'e ete e'ŷ.\* Ha'e nunga rupi nda'evei 'rā opa mba'e gui oiky'a'o aguā mba'emo me'ēa kuery, ma'etŷa nhavō mymba ome'ē jepi teĩ.

**2** Ha'e rami e'ŷ va'e rire ombojerovia va'e kuery nome'ēvei 'rāgue, mba'eta peteŷgue'i oiky'a'opaa va'e rire ipy'a ky'aa noenduvei ma 'rāgue.

**3** Ha'e rami avi ma'etŷa nhavō mymba ome'ē aguā ma ojeavya re ima'endu'a jepi aguā rive,

**4** mba'eta vaka ha'e kavara ruguy omoē mbyre ma ndoipe'ai 'rāe jajeavya.

**5** Ha'e nunga rupi kova'e yvy re Cristo ou vy aipoe'i: "Mymba ojukaa pyre ha'e mba'emo ome'ēmby ma ndereipotai. Ha'e rami 'rāgue py xereterā rerekō katu.

**6** Jejavya regua oapy reve ome'ēa rā ndererovy'ai.

**7** Ha'e nunga rupi aipoa'e: 'Ma'ē Xeruete, apy ma aī ndee reipota va'e ajapo aguā, (mba'eta kuaxia onhemama va'e re oī xerekorā)', ha'e", he'i.

**8** Jypy aipoe'i: "Mymba ojuka pyre ha'e mba'emo ome'ēmby ndereipotai, mba'eta jejavya regua oapy reve ome'ēa rā ndererovy'ai", he'i raka'e, lei re oīa rami vy ome'ēa va'e meme teĩ. Ha'e va'e rire

---

\* **10:1** Colossenses 2.16,17

<sup>9</sup> aipoe'ive ju: "Ma'ẽ Xeruete, apy ma aĩ ndee reipota va'e ajapo aguã", he'i. Ha'e rami vy jypy guare omomba raka'e, hekvia amboae ju omoĩ aguã.

<sup>10</sup> Ha'e rami vy "Nhanderuete oipota va'e" he'ia rami vy nhandeky'a'o, Jesus Cristo guete reve peteĩgue'i ojejuka uka rire.

<sup>11</sup> Ha'e gui sacerdote kuery ikuai va'e ma ko'ẽ nhavõ ojexa uka 'rã Nhanderuete pe omiba'epo aguã, ha'ekue'i rami ae mymba ojukaa py, ha'e nunga neĩ peteĩgueve jejavya ndoipe'ai teī.

<sup>12</sup> Ha'e rã Jesus ma raka'e rã peve guarã peteĩgue'i ojejuka uka jejavya re, ha'e rire Nhanderuete oiporu kuaa regua re oguapy oiny.

<sup>13</sup> Ha'e va'e rire oarõ oiny hovaigua kuery ipy guýry omoõmba peve guarã.

<sup>14</sup> Mba'eta peteĩgue'i ojejuka uka vy opa mba'e gui oiky'a'o raka'e ojeky'a'o uka va'e ha'e javi, raka'e rã peve guarã.

<sup>15</sup> Ha'e ramigua Nhe'ẽ Ky'a E'ŷ voi oikuua uka, mba'eta jypy'i Senhor aipoe'i:

<sup>16</sup> "Ha'e va'e ára rire ha'e kuery pe ajapo 'rã xereve guarã, po rami: Ha'e kuery py'a re amoĩ 'rã aipota va'e, hi'arandua re ae 'rã ambopara", he'i rire

<sup>17</sup> aipoe'ive ju: "Ha'e kuery ojejavyague ha'e heko vaiague re peteĩve henda py naxema'endu'avei ma 'rã raka'e rã peve", he'i.

<sup>18</sup> Ha'e nungakue omboguepa ma rire mba'eve nanhame'ẽvei ma 'rã jajejavyague re.

### *Nhanderuete re nhanhemboja, nhaĩ atã ha'e nhanhopytyvõ aguã re ijayvua*

<sup>19</sup> Ha'e nunga rupi irmão kuery, Jesus ruguy gui vy nhandepy'a guaxu Henda iky'a e'ŷ ete va'e py jaike aguã,

<sup>20</sup> mba'eta nhandevy pe ojapo tape pyau imarã e'ŷ va'e, ajukue okẽ regua rovai katy oo va'e. Ha'e va'e ma hete ae.

<sup>21</sup> Nhandedevy pegua sacerdote yvateve ete va'e oiko Nhanderuete pegua oo re opena va'e.

<sup>22</sup> Ha'e ramo nhanhemboja tema peteĩ rupi nhandepy'a ha'e jajerovia ete reve, nhandepy'a oiky'a'opaa rire iky'aa oĩ va'ekue gui, ha'e nhanderete voi yy iky'a e'ŷ va'e py ojoi porãmbaa rire.\*

<sup>23</sup> Nhanekangy e'ŷ re nhaĩ atã tema nharõ va'e nhamombe'u jaikovy va'e re, mba'eta nhanhemboaxy aguã re ijayvu va'ekue ma ojeroviap.

<sup>24</sup> Peteĩ-teĩ nhanhopytyvõ pota guive nhandeporayvu ha'e jajapo porãa rupi nhandekuai aguã.

<sup>25</sup> Japytu'u eme nhanhemboatya gui, amboae kuery ikuiaia rami e'ŷ. Ha'e rami 'rãgue py nhanhombopy'a guaxu, hi'ára ovaẽ rai'ive ma ouvy rã jaexa vy katuve ma jajapove tema.

### *Ojejavy potae rei va'ekue ombopagaa 'rãa re ijayvua*

<sup>26</sup> Mba'eta anhetẽ va'e jaikuua porã rire teī jajejavy potae reia rupi ri nhandekuai ramo jipovei ma 'rã jajajevyague re ome'ẽ mbyrã.

<sup>27</sup> Ha'e rami 'rãgue py jakyje reve 'rã nharõ nhanhemboayvuarã ha'e tata nhombopagaarã, hovaigua kuery mokanhayarã.\*

<sup>28</sup> Mba'eta Moisés lei ombopara va'ekue amongue noenduxei ramo omboaxy e'ŷ re ojukaa 'rã raka'e, mokoĩ e'ŷ vy mboapy hekokue omombe'u rire.\*

<sup>29</sup> Ha'e gui mba'exa tu peikuaa? Ha'e nungakue gui nombopaga vaipaaive 'rã teve amongue Nhanderuete Ra'y re opyrõmba rei va'ekue? Mba'eta nombovarei Cristo ruguy, ha'e va'e py Nhanderuete guexeve guarã ojapoague rami vy oiky'a'o rire teī, ha'e ombojaru rei guive Nhe'ẽ nhanhemboaxy ka ukaa.

<sup>30</sup> Mba'eta jaikuua ae "Xee ae ajoepy ha'e anhombopaga 'rã" he'i va'ekue. Teĩgue ju aipo'ea: "Senhor omboayvu 'rã ojeupagua kuery."\*

\* **10:22** Romanos 5.1,2; Efésios 3.12; Hebreus 4.14-16 \* **10:27** Hebreus 6.4-8 \* **10:28** Deuteronomio 17.6

\* **10:30** Deuteronomio 32.35-36, Salmo 135.14

**31** Nhanderuete oikove va'e po py amongue ho'a rā nda'evei ete 'rā.

### *Yma guare re nhanema'endu'a, ha'e jaikoague repy jaupity aguā re ijayvua*

**32** Ha'e rami avi penema'endu'a ke yma guare re, mba'eta ayvu porā peikuua rire pendere opu'āa rei rā pejexavai teī peī atā pekuapy raka'e.

**33** Amongue py pavē rembiexarā penemoia penembojaru rei ha'e pendererekko axy rei vy. Ha'e amongue py amboae kuery oguerekko axya rā ojexavai va'e kuery re penhemoirū va'ekue,

**34** nhuā py ikuai rā pemboaxy vy. Ha'e nunga anho e'ŷ, peē ae penemba'e rei-rei peipe'a ukapa va'ekue pevy'a reve, mba'eta mba'emo iporāve ha'e opa e'ŷ va'e perekoa peikuua.

**35** Ha'e nunga rupi pejepe'a eme pejeroviaa rupi pendekuaia gui, mba'eta ha'e nungakue repy iporā va'e oī.\*

**36** Peī atā tema, Nhanderuete oipota va'e pejapopa ma rire peupity aguā ijayvuague.

**37** "Mba'eta are'ŷ'i re ou va'erā va'e ovaē 'rā, ndarei 'rā ou aguā.

**38** Ha'e rami avi xevygu heko porā va'e ma ojeroviaa rupi 'rā ikuai. Ha'e rā ha'ekue py ojevy ramo xee ndarov'y'avei 'rā", he'i va'ekue.\*

**39** Ha'e rā nhande kuery ma okanhy aguā katy ojevy va'e regua e'ŷ. Ojeroviaa rupi ikuai va'e regua nhandekuai, onhe'ē omokanhy va'e'ŷ.

## 11

### *Jajeroviaa re ijayvua*

**1** Ha'e gui jajeroviaa rupi vy jaikuua porā 'rā mba'emo nharō va'e anhetē ete oikoa, mba'emo jaexa e'ŷ va'e oikoa jaikuua.

**2** Mba'eta ymagua kuery voi ojeroviaa rupi vy oexa uka raka'e heko porā va'ea.

**3** Jajeroviaa rupi vy jaikuua Nhanderuete oayvu py rive opa mba'e omoingo raka'eague. Ha'e rami vy mba'emo jaexa va'e ma jaexa e'ŷ va'e gui oiko va'ekue meme.\*

### *Jypy ombopara pyre re jaikuua pota aguā re ijayvua*

#### *Abel, Enoque ha'e Noé rekokue oīa*

**4** Abel ma ojeroviaa rupi oiko vy ome'ē raka'e guyke'y Caim ome'ē va'e gui iporāve va'e. Mba'emo ome'ē va'e Nhanderuete ojou porā ramo jaikuua heko porā va'ea. Ha'e nunga rupi omano ma rire teī aŷ voi ijayvu teri.\*

**5** Enoque ma ojeroviaa rupi oiko ramo heraa raka'e omano e'ŷ aguā rami. Nhanderuete ogueraa rire ndojouavei, mba'eta ogueraa e'ŷ mbove voi oexa uka Nhanderuete ombovy'a va'ea.

**6** Ha'e rā jajerovia e'ŷ re ma nda'evei Nhanderuete nhambovy'a aguā, mba'eta Nhanderuete oikoa jarovia vy 'rāe nhanhemboja hexe, ha'e oeka va'e kuery pe mba'emo porā ome'ē 'rāa jarovia vy guive.\*

**7** Noé voi ojeroviaa rupi vy Nhanderuete gui oikuua raka'e mba'emo ojekuaa e'ŷ teri va'e oiko 'rāa. Nhanderuete renonde ojererokyjea rupi vy ojapo raka'e peteī kanoā guaxu ngoo pygua kuery ogueraa jepe aguā. Ha'e rami vy oikuua uka ko yvy regua kuery ombopagaa 'rāa, ha'e ojeroviaa rupi teko porā oupity aguā rami oiko.\*

#### *Abraão, Sara, Isaque, Jacó ha'e José rekokue oīa*

**8** Ha'e gui Abraão ma ojeroviaa rupi oiko vy Nhanderuete oenoī rā onhe'ē rendu, ha'e rami vy oo peteī henda oyvyrā ojopy aguā katy. Marā katy pa ooa oikuua vy e'ŷ oo.

**9** Ojeroviaa rupi oiko yvy ome'ē va'erā va'e rupi, oyvy re'ŷ rami. Oo'i py oiko raka'e Isaque ha'e Jacó reve. Ha'e va'e kuery voi hexeve ojopy avi 'rā oyvyrā ijayvuague.

\* **10:35** Tiago 1.2-4, 12 \* **10:38** Habacuque 2.3-4 \* **11:3** Gênesis 1.1; 2 Pedro 3.5 \* **11:4** Gênesis 4.1-8 \* **11:6** Gênesis 5.21-24 \* **11:7** Gênesis 6.8-22

10 Mba'eta oarō oikovy tetā ijyta porā va'e ojekuaa aguā. Ha'e va'e re onhembopy'a va'ekue ha'e ijapoare ma Nhanderuete ae.\*

11 Ta'yxy Sara voi ojeroviaa rupi oiko vy imemby nho raka'e, guaimi'i ete ma va'eri. Mba'eta oikuua imemby aguā re ijayvu va'ekue ojeroviapy oikoa.\*

12 Ha'e nunga rupi peteī ava omanogue rami oiko va'e gui heta ikuai raka'e, yva re jaxy-tata ikuai va'e ha'e ye'ē yvýry ita ku'i ikuai va'e rami avi mbovy rei e'ŷ ikuai.

13 Ha'e va'e kuery ha'e javive ojeroviaa rupi ikuai reve omano raka'e, ome'ē va'erā va'ekue ojopy e'ŷ re. Ha'e nunga ma mombyry gui mba'emo oexaa rami rive oguerovy'a. Ha'e rami vy yvy mboae regua ikuia rami onhemombe'u, ha'e rā ko yvy rupi ma oguata rei va'e ikuia.

14 Ha'e rami ijayvu va'e kuery ma guekoarā oeka teria oikuua uka.

15 Tekoa oxēague re ima'endu'a riae va'e rire anhetē ojevy 'rāgue ha'e katy.

16 Ha'e rami 'rāgue py oeka oikovy guekoia iporāve va'erā, yva regua. Ha'e nunga rupi Nhanderuete noxī "Ha'e kuery Ruete" he'i aguā ojeupe, ha'e rami vy oguereko katu ha'e kuery retārā.

17 Abraão ma Nhanderuete oeko a'ã ramo ojeroviaa rupi oiko vy ome'ē gua'y Isaque. Nhanderuete omoingo aguā re ijayvu rā oendu vy oguerovy'a va'ekue ri gua'y peteī'i va'e ojuka aguā rami oiko.

18 Mba'eta ixupe Nhanderuete "Isaque ra'y kuery pe 'Neramymino kuery' 'ea 'rā", he'i va'ekue.\*

19 Ha'e rami Abraão oiko mba'eta oikuua ta'y omanoague gui Nhanderuete omboete ju aguā voi ipo'aka va'ea. Ha'e rire omanoague gui oikove ju va'e rami ete avi ogueraa gua'y.\*

20 Ha'ekue rami ju Isaque voi ojeroviaa rupi oiko vy ogueroayvu porā gua'y kuery Jacó ha'e Esaú, ha'e rami vy omombe'u mba'emo oiko va'erā.\*

21 Jacó ma ojeroviaa rupi vy omano ta ma vy ogueroayvu porā José ra'y kuery peteī-teī. Ha'e rami vy opopoka apy re onhemomburu reve opu'ā vy omboete Nhanderuete.\*

22 José ma ojeroviaa rupi vy omano rai'i ma vy omombe'u Israel kuery oopa ju 'rāa, ha'e okāgue guive ogueraa uka.\*

23 Ha'e gui Moisés itui'i ramove tuu kuery ojeroviaa rupi ikuai vy mboapy jaxy re onhomí raka'e, mba'eta oexa rā kyrī va'e iporā. Ha'e rami vy ndokyjei huvixave ayvu rovai rupi ikuai aguā.\*

### *Moisés rekokue oña*

24 Moisés tuja ma rire ojeroviaa rupi vy ndoikoxevei Faraó rajy pi'a rami.

25 Mba'eta ojejavý reia py xapy'a'i ový'a 'rāgue py ojou porāve Nhanderuete pegua kuery reve ojererekoo axy uka aguā.

26 Mba'eta Cristo káuxa onhemoingo axy uka vy Egito pygua kuery oguerekopaa gui oguerekopave 'rāa oikuua, mba'eta oarō oikovy hekoviarrā.

27 Ojeroviaa rupi vy oeja ový Egito yvy, neñ huvixa ipoxy ramo voi ndokyjei guive. Ha'e rami 'rāgue py oí atā, jaexa e'ŷ va'e oexa va'e rami.

28 Ojeroviaa rupi vy ojapo raka'e ngaru Páscoa ára pygua, ha'e rami vy vexa'i ruguy omoë uka porojukaa oupity e'ŷ aguā Israel regua ra'y kuery tujakueve.\*

29 Ha'e kuery ojeroviaa rupi ikuai vy oaxa raka'e Ye'ē Pytā rupi, yvy pirua rupi ooa rami. Ha'e rā Egito pygua kuery ma oaxa aguā onhea'anga vy oy'upa.

### *Canaã yvy re Israel kuery ikuai jave guare re ijayvua*

---

\* 11:10 Gênesis 12.1-4 \* 11:11 Gênesis 17.15-22 \* 11:18 Gênesis 21.12 \* 11:19 Gênesis 22.1-18 \* 11:20 Gênesis 27.1-40 \* 11:21 Gênesis 48.10-16 \* 11:22 Gênesis 50.22-26 \* 11:23 Éxodo 2.1-15 \* 11:28 Éxodo 12.1-28; 14.15-31

<sup>30</sup> Ha'e kuery ojeroviaa rupi ikuai ramo Jericó tetā kora ho'apa raka'e, sete ára re ombojere rire.

<sup>31</sup> Ha'e gui Raabe voi kunha itavy rei va'ekue ri ojeroviaa rupi oiko vy omovaē porā raka'e avakue oikuua pota vy oje'oi va'ekue. Ha'e rami vy nokanhyi nhonhe'ẽ rendu e'ŷ va'e kuery reve.\*

<sup>32</sup> Ha'e gui nda'evei amombe'upave aguã. Mba'eta oata 'râgue amombe'u aguã Gideão rekoke, Baraque, Sansão, Jefté, Davi, Samuel ha'e profeta kuery rekoke ha'e javi.

<sup>33</sup> Ha'e va'e kuery ma ojeroviaa rupi ikuai vy ipo'aka raka'e tetā ikuai va'e re, teko porā rupi joguerek, oupity mba'emo ome'ẽ 'rã va'ekue, omboty uka guary juru,

<sup>34</sup> ombogue uka tata guaxu, kyxe gui oo jepé, ikangya gui imbaraete ju, joe opu'ãa py ipo'aka, ha'e amboae guigua xondaro kuery omonhamba.

<sup>35</sup> Kunhague ma hoo pygua omano va'ekue omboetea jevy ramo ogueraa ju oikove va'e. Ha'e rã amboae kuery ma nonhemoẽ ukaxeí vy onhemongo axy uka raka'e, onhemboete ju aguã iporâve va'e oupity aguã.

<sup>36</sup> Ha'e gui amboae kuery ju ombojarua rei rã ikuai axy rei, oinupãa, oipokuaa, ha'e nhuã py ombotya ramo.

<sup>37</sup> Ita py ojapipaa, omboayvua, yvyra kyxiá py mbyte rupi ojaya, kyxe py ojukaa guive. Hoo e'ŷ va'e ikuai, vexa'i ha'e kavara pire py onhemonde, iporiau rei, ojexavai rei ha'e ojavykyia rei.

<sup>38</sup> (Ha'e va'e kuery rekoarã kova'e yvy nda'evei.) Tekoa e'ŷa rupi ikuai, yvyty, itakua ha'e yvykua oĩ va'e rupi.

<sup>39</sup> Ha'e va'e kuery ha'e javive ma ojeroviaa rupi ikuai vy oexa uka raka'e heko porā va'ea. Ha'e rami teī ndoupityi guive ome'ẽ 'rã va'ekue,

<sup>40</sup> mba'eta nhande kuery peguarã Nhanderuete oguerek, katu mba'emo iporâve va'e, nhande kuery reve vy anho ha'e kuery oupitya aguã ijayvuague.

## 12

### *Cristo rami avi nhande voi nhaĩ atā aguã re ijayvua*

<sup>1</sup> Ymagua kuery heta ojeroviaa oexa uka va'ekue ma arai tuvixa va'e rami nhanembojere okuapy. Ha'e ramo nhande voi ke nhandejegui nhambipa ipoyikue oĩ va'e ha'e javi, nhandere jejavya oja ratã va'e guive. Ha'e rami vy nhaĩ atā reve nhanha tema nhanerenonderã omoõ mbyre katy.\*

<sup>2</sup> Nhamo'ẽ porā tema Jesus re anho, mba'eta ixugui ae ou jypy guive opa peve jajerovia aguã. Mba'eta ha'e ma henonderã imbovy'aarã omoõ mbyre ojopy voi 'râgue py oxí e'ŷ re ogueropo'aka raka'e kuruxu re oiko axya. Ha'e rire oguapy oiny Nhanderuete renda openaaty oiporu kuaa regua re.

<sup>3</sup> Peikuuaa pota porā ke ha'e rami ete heko vai va'ety kuery hexe opu'ã rei rã ogueropo'akaagüe re, penekangy e'ŷ aguã, neī pendepy'a py pendekuerai e'ŷ aguã.

### *Nhanemo'arandua py Nhanderuete nhanderayvua oexa ukaa re ijayvua*

<sup>4</sup> Mba'eta peẽ ma teko vai rovai penhea'ãa rupi penderuguy nomoẽai teri.

<sup>5</sup> Ha'e penderexarai guive gua'y pe rami penemogetaa re: "Xera'y kuery, pembovare'ŷ eme Senhor penemo'arandu rã, pendekuerai eme guive pêvy ijayvu ramo.

<sup>6</sup> Mba'eta Senhor omongoeta 'rã guembiyvu kuery, ha'e oinupã 'rã gua'yrã ogueru va'e ha'e javive", he'iague re.\*

<sup>7</sup> Ha'e nunga rupi penemoingo axya ma Nhanderuete penemo'arandu aguã oiko, gua'y kuery rami ae pendererekoy. Mba'eta jipoitay kuery tuu omo'arandu e'ŷ va'e.

---

\* **11:31** Josué 6.1-25 \* **12:1** Apy ma corrida re ombojoja Senhor pe nhandekuaia (Filipenses 3.12-14). \* **12:6** Jó 5.17; Proverbios 3.11-12

<sup>8</sup> Napanemo'arandui ri ramo penderu peikuaa e'ŷ va'e peiko, ta'y e'ŷ, mba'eta Nhan-deruete omo'arandu 'rã gua'y kuery ha'e javi.

<sup>9</sup> Nhanderu kuery ngo'o re ikuai va'e ma nhanemo'arandu rã nhanhe'ẽ rendu 'rã. Nhanenhe'ẽ Ruete katuve ma nhanhe'ẽ rendu 'rãgue, jaikove aguã.

<sup>10</sup> Mba'eta nhanderu kuery nhanemo'arandu 'rã xapy'a'i guarã, ha'e kuery oikuua rami. Ha'e rã Nhanderuete ma nhanemoingo porã aguã nhanemo'arandu, iky'a e'ŷa rami nhande voi nhandekuai aguã.

<sup>11</sup> Nhanemo'arandua nhavõ ha'e ramove'i nanhanembovy'ai 'rã merami, nhanemom-boriau ranhe. Ha'e rami teĩ nhanemo'arandupaa ma rire ojapo 'rã nhandekuai porã ha'e nhanderekko porã aguã rami.\*

<sup>12</sup> Ha'e nunga rupi pemombaraete ju ipo ho'a va'ekue ha'e henapy'ã kangi va'e kuery.

<sup>13</sup> Pembo'yvi porã tape oguata aguã, okarau va'ekue okanhy 'rãgue py okuera aguã.\*

### *Peteĩ rami nhandekuai, ha'e nhanderekko ky'a e'ŷ aguã re ijayvua*

<sup>14</sup> Peteĩ rami pendekuai pavẽ reve, ha'e penhea'ã pendeko ky'a e'ŷa rupi, mba'eta ha'e rami e'ŷ vy avave rei ndoexai 'rã Senhor.

<sup>15</sup> Peikuaa pota porã ke Nhanderuete omboaxya avave rei oupity e'ŷ re ojepe'a e'ŷ aguã. Toĩ eme guive iro va'e rapo rami ikuai va'e, mba'eta ha'e va'e henhoĩ vy penemoingo eta rei ha'e heta 'rã penemboeko ky'a.\*

<sup>16</sup> Penembyte rupi ta'ikuai eme heko ky'a va'e, neĩ ha'eve'ŷa rami ikuai va'e Esaú ramigua. Mba'eta ha'e va'e ma peteĩgue'i okaru aguã re rive ovende raka'e ta'y jypygua oikoa peguarã va'ekue.

<sup>17</sup> Ha'e va'e rire ma nguu pe ojereroayvu porã ukaxe teĩ nda'evei ae. Hexay reve onhea'ã teĩ ndojouvei ha'ekue py ojevy aguã.

### *Yvyty Sinai ha'e Sião re ijayvua*

<sup>18</sup> Ha'e gui peẽ ma yvyty tata haku raxy hendya py e'ŷ pevaẽ.† Pyávy rami pytũa py e'ŷ pevaẽ, neĩ ara vai oikoa py,

<sup>19</sup> mimby guaxu onhendu ratã va'e oĩa py, neĩ ayvu atãa py e'ŷ pevaẽ. Ha'e va'e gui hendua kuery ojerure raka'e onhendu ve'ŷ aguã re,

<sup>20</sup> mba'eta ha'e kuery ndogueropo'akavei ma ijayvuague: "Mymba teĩ ae ma yvyty re onhemboja ramo tojapipaa ita py", he'iague.\*

<sup>21</sup> Anhetẽ ha'e nunga nhomondyipa ete ramo Moisés eteve voi "Akyje ha'e aryryipa reia aendu!" he'i raka'e.\*

<sup>22</sup> Ha'e rami 'rãgue py peẽ ma Sião yvyty re pevaẽ, Nhanderuete oikove va'e pegua tetã, yva re Jerusalém oĩ va'e py. Pevaẽ anjo kuery mbovy e'ŷ ikuia py, ha'e nhemboaty iky'a e'ŷ va'ea py,

<sup>23</sup> igreja kuery jypygua ta'y ha'e tajy kuery yva re hery ipara va'e ijatya py. Pevaẽ Nhanderuete pavẽ re oikuua pota va'erã oĩa py, ha'e penhemoirũ ma guive heko porã va'e kuery imoingo porãarã oupitypa ma va'ekue nhe'ẽ reve.

<sup>24</sup> Pevaẽ avi Nhanderuete reve guarã ipyau va'e Reruare Jesus oĩa py, ha'e huguy nhandeky'a'oarã omboayvi pyre oĩa py guive. Ha'e va'e ma Abel ruguy gui mba'emo iporãve va'e oikuua uka va'e.

<sup>25</sup> Ha'e nunga rupi pejapyxaka porã pota, ijayvua pendu rive'ŷ aguã. Mba'eta yvy re Nhanderuete ijayvu rã noenduxei va'ekue ndoo jepei rire nhande kuery katuve ma ndajaa jepei 'rã, yva gui nhandevy ijayvua gui jajepe'a ri vy.

\* **12:11** João 15.1,2; Tiago 1.2-4; 1 Pedro 4.1,2 \* **12:13** Provérbios 4.26 \* **12:15** Deuteronômio 29.18 † **12:18** Apy ma ijayvu judeu kuery yma guare Sinai yvyty katy'i ikuia py lei ojopy jave okyje rei okuapyague re. Ha'e va'e jave py Nhanderuete ma nhomondyipa rei va'e rami ojekuaa (Êxodo 19.9-25; 20.18-21; Deuteronômio 4.9-12). \* **12:20** Êxodo 19.12-13 \* **12:21** Deuteronômio 9.19

<sup>26</sup> Ha'ekue py Nhanderuete ijayvu vy omomyĩ raka'e ko yvy. Ha'e gui aŷ ma ijayvu jevy vy aipoe'i: "Peteĩgue ju, teĩgue'i pyve amomyĩ 'rã yvy anho e'ŷ, yva guive", he'i.\*

<sup>27</sup> Ha'e gui "Peteĩgue ju, teĩgue'i pyve" he'ia py jaikuua Nhanderuete oipe'apa 'rãa guembiapo omomyĩ mbyrã oĩ va'e, omomyĩ mbyrã e'ŷ anho optya aguã.

<sup>28</sup> Ha'e nunga rupi nhande ma nhaneretã omomyĩ mbyrã e'ŷ jareko vy nhaĩ atã tema nhanemboaxya re, mba'eta nhanemboaxya rupi Nhanderuete pe nhandekuai ramo nhandererovy'a 'rã. Henonde nhamboete ha'e jajererokyjea iky'a e'ŷ va'e rupi tema nhandekuai,

<sup>29</sup> mba'eta Nhanderuete ma tata nhomombaarã oiko.\*

## 13

### *Jomeme nhandekuai porã aguã re ijayvua*

<sup>1</sup> Pendekuai riae tema mborayvu re, joegua meme'i joayvua rami ae.

<sup>2</sup> Penhomovaẽ e'ŷ eme, mba'eta amongue ma oikuua vy e'ŷ anjo kuery ete omovaẽ raka'e.

<sup>3</sup> Penema'endu'a tema nhuã py omboty pyre re, ha'e kuery reve peẽ voi peĩ avia rami. Penema'endu'a avi oguerekoxya va'e re, peẽ voi ojavyky reipy peikoa rami.

<sup>4</sup> Tomboete pavẽ omenda va'e kuery, ha'e iky'a e'ŷa rupi tajoguerekoxya. Mba'eta Nhanderuete ombopaga 'rã heko ky'a ha'e itavy rei va'e ha'e javi.

<sup>5</sup> Pendekuai eme peráta re nda'eveivea rupi. Mba'emo perekoi vy pevy'a, mba'eta Nhanderuete aipoe'i: "Peteĩve henda py xee ndoroejai 'rã, neĩ peteĩgueve ndoroayvu e'ŷi 'rã", he'i.\*

<sup>6</sup> Ha'e rami rire jakyjea py e'ŷ 'rã aipoja'e: "Senhor xepytyvõarã oiko ramo xee ndakyjei 'rã. Mba'e tu avakue ojapo 'rã xere?"\*

### *Nhanderuete pe jaiko aguã re ijayvua*

<sup>7</sup> Penema'endu'a tema pendererekoare kuery Nhanderuete ayvu mombe'uare rekukue re. Peikuua pota porã ha'e kuery omano peve ikuaiague re. Ha'e kuery ojeroviaague rami ke peẽ voi pendekuai.\*

<sup>8</sup> Jesus Cristo ma jypy guive aŷ peve ha'ekue ae oiko, ha'e raka'e rã peve guarã.

<sup>9</sup> Opa marã ha'e amboae rami rei penembo'ea rã pendu rive. Mba'eta pavẽ gui ovareve va'e ma Nhanderuete nhanemboaxya re nhanhemombaraete aguã nhandepy'a py, tembi'u re rive'ŷ, mba'eta ha'e nunga re nda'eveive va'e kuery peteĩve henda py ndoupiyi 'rã imoingo porãarã.

<sup>10</sup> Ha'e rã nhande kuery ma amboae regua altar jareko. Ha'e va'e gui ma ombojeroviaaty pygua kuery ho'u aguã nda'evei.

<sup>11</sup> Ha'e gui Henda iky'a e'ŷ ete va'e py sacerdote kuery yvatekueve va'e ogueroike 'rã mymba ruguy jejavya re, ha'e rã ho'okue ma tekua gui mombyry'i 'rã oapy.

<sup>12</sup> Ha'e rami ae Jesus voi tetã rokẽ gui mombyry'i oiko axy raka'e, nguguy py ae ojeupagua kuery oiky'a'o aguã.

<sup>13</sup> Ha'e nunga rupi oĩ py jaje'oi nhande voi, amboae kuery ikuiaia gui mombyrya py teĩ, Jesus káuxa nhanembojaru reia rã jaropo'aka vy.

<sup>14</sup> Mba'eta anhetẽ apy ndajarekoi tetã oĩ riae va'erã, raka'eve rã ojekuaa va'erã va'e re nhanhea'ã.

<sup>15</sup> Ha'e rami vy Jesus rery rupi Nhanderuete pe nhame'ẽ riae 'rã jarovy'aa, nhandejuru py jaroporai hery.

<sup>16</sup> Ha'e rami ae avi pejepa'e eme joupe pejapo porãa ha'e peteĩ-teĩ penhopytyvõa gui, mba'eta ha'e nunga ome'ẽmby ma Nhanderuete oguerovy'a.

---

\* **12:26** Ageu 2.6   \* **12:29** Deuteronomio 4.24   \* **13:5** Deuteronomio 31.6   \* **13:6** Salmo 118.6-7   \* **13:7** 1 Tessalonicense 5.12,13

**17** Penhe'ẽ rendu pendererekoa kuery, pendekuai ha'e kuery oipotaa rami, mba'eta penenhe'ẽ re opena, ha'e raka'eve rã oikuua potaa 'rã openaague re. Ha'e rami rã ha'e kuery ov'y'aa rupi 'rã opena pendere, iporiaua rupi e'ŷ, mba'eta iporiaua ma mba'everã ndovarei 'rãgue pêvy.

*Opaa py mba'emo re ojerureague*

**18** Pejerure tema orere, mba'eta ore roikuaa rã orepy'a ky'a e'ŷa rupi orekuiaia, opa mba'e py ha'evea rami roikoxe vy.

**19** Aipota pejerure ete pêa py xee aju voive aguã re.

**20** Ha'e gui Nhanderuete peteĩ rami nhanemoingo aguã nhande-Senor Jesus omanoague gui omboete ju raka'e, ha'e huguy rupi ojapo guexeve guarã opa va'erã e'ŷ, ha'e omoĩ guive vexa'i kuery re opena va'erã yvateve va'e.

**21** Tove tapenemoingo porã opa mba'e py, ha'e oipota va'e pejapo aguã rami. Tove peẽ kuery re tomoĩ imbovy'aarã pejapo aguã, Jesus Cristo rupi ae. Jesus toguerovy'aa raka'e rã peve. Amém.

**22** Irmão kuery, ajerure pendu porã aguã kova'e ayvu ipuku e'ŷ'i va'e romongetaa rupi ambopara va'ekue.

**23** Pêvy amombe'u irmão Timóteo nhuã gui opoia jevy maa. Xapy'a rei ha'e va'e xea py ovaẽ voi ramo hexeve roo 'rã roexa vy.

**24** Pemombe'u ke pendererekoa kuery ha'e javive pe roxaruraa, iky'a e'ŷ va'e kuery ha'e javi pe guive. Itália pygua kuery oxarura uka avi pendevy.

**25** Tove peẽ kuery ha'e javive tapendu penemboaxya.

## Tiago ombopara va'ekue Tiago ombopara va'ekue

Kova'e kuaxia rupi Jesus ryvy Tiago omongeta hemimbo'e kuery. Ha'e rami vy ijayvu Jesus re jajeroviaaa jaexa uka aguã mba'emo jajapoa py.

Mba'eta "Irmão kuery, nhande-Senhor Jesus Cristo hexakãmba va'e re pejerovia vy peteĩ regua rive joegui peayyuve eme" (2.1), "nda'evei pejejou porã rei aguã, neĩ anhetẽ va'e rovai pendeapu aguã guive" (3.14). Ha'e rami 'rãgue py Nhanderuetea gui arandu ou va'e re 'rã nhandekuai. Mba'eta "yvate guigua 'arandua ma jypy'i nhandeapo 'rã nhanderekko ky'a e'ŷ aguã rami, ha'e gui nanhandevai rive-rivei 'rã, mborayvu re nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayyuvei 'rã, nanhanderekko porã merami rivei 'rã guive" (3.17). Ha'e rami vy 'rãe jaexa uka Jesus re jajeroviaaa.

### *Oxarura reve ijayvu aguã omboypyague*

<sup>1</sup> Xee Tiago ma Nhanderuete ha'e Senhor Jesus Cristo rembiguai aiko.\* Axarura doze regua opa rupi pendekuai va'e pe.

### *Nhanderekko a'ãa rire iporã va'e oiko va'erã re ijayvua*

<sup>2</sup> Irmão kuery, opa marã penderekko a'ãa rã pevy'a ete ke,

<sup>3</sup> mba'eta peikuaa pejeroviaaa a'ãaarã oiko va'e peaxapa ma rire peĩ atãve 'rãa.

<sup>4</sup> Ha'e gui peĩ atãa tojapopa ojapo 'rã va'ekue, peẽ kuery opa mba'e py penderekko porã aguã, peteĩve henda py iporã va'e oata e'ŷ re.\*

### *Nhane'arandurã re jajerure aguã re ijayvua*

<sup>5</sup> Ha'e gui amongue 'arandurã oata ramo tojerure Nhanderuete pe. Ha'e ramo ome'ẽ 'rã, mba'eta ivai e'ŷ re 'rã mba'emo ome'ẽ pavẽ pe.

<sup>6</sup> Ha'e rami avi ojeroviaaa rupi tojerure, peteĩve henda py toĩ eme oexa'ã reia.\* Mba'eta ndojerovia porãi va'e ma yai yvvytu ogueraa rupi rei omomy-momyĩ va'e rami ikuai.

<sup>7</sup> Ha'e ramigua avakue toexa'ã eme Senhor gui mba'emo ojopy aguã re,

<sup>8</sup> mba'eta mokoĩ rami rei oikuaa va'e vy mamo rã oikoa rupi nai'arandui rei 'rã.

### *Mba'emo ko yvy regua okanhymba 'rãa re ijayvua*

<sup>9</sup> Irmão kuery yvy'ĩigueve va'e ma toguerovy'a Nhanderuete ombovatea re.

<sup>10</sup> Ha'e rã oguerekopa va'e ma omo'yvy'ĩia re toguerovy'a, mba'eta jai poty rami rive 'rã okanhý.\*

<sup>11</sup> Mba'eta kuaray ojope ratã reve ou ramo jai ipiru rã ipoty okuipa 'rã. Jaexa rã iporãague ndojekuaavei 'rã. Ha'e rami ae oguerekopa va'e voi okanhý 'rã mba'emo re opena rupive.

### *Jejavya re ijayvua*

<sup>12</sup> Ovy'a ete 'rã avakue oeko a'ãa rã oĩ atã reve ogueropo'aka va'e, mba'eta oaxapa rire coroa-rã oupity 'rã tekove. Ha'e va'e ma guembiajyu kuery pe Senhor ome'ẽ aguã re ijayvu.

<sup>13</sup> Ha'e rami teĩ avave rei omoangecko rã "Nhanderuete xemoangeko" te'i eme. Mba'eta Nhanderuete ma mba'emo vai pe onhemoangecko uka va'e'ŷ, neĩ nanhanemoangekoi 'rã mava'eve rei.

<sup>14</sup> Ha'e rami 'rãgue py peteĩ-teĩ nhande ae jaipotapa reia py nhanhemoangeko uka. Ha'e nunga py ae nhanhembotavy uka ha'e jajeity uka.

---

\* **1:1** Atos 15.13; Gálatas 1.19, 2.9,12    \* **1:4** Romanos 5.3,4; 1 Pedro 4.12-14    \* **1:6** Mateus 21.22    \* **1:10** 1 Pedro 1.24,25

**15** Mba'eta jaipotapa reia ma nhandejee nhamoī rire nhanemoingo 'rā jajejavvy aguā rami. Ha'e gui jajejavya ma opaa py ojapo 'rā nhamano aguā rami.

### *Iporā va'e me'ēa re ijayvua*

**16** Irmão kuery xerembiayvu, pejekore eme.

**17** Mba'eta yvate gui meme ou mba'emo porā iky'a e'ŷ va'e, Nhanderuete hendy va'e moingoare va'e ae ombou.\* Ixupe ma jipoj amboae rami rei imoingoarā, neī kuarayā rami rive herovaarā.

**18** Mba'eta ha'e ae oipotaa rami vy gua'y kueryrā nhanemoingo raka'e ayvu anhetē va'e rupi, hemimoingo kuery ha'e javi gui nhande ranhe ixupeguia nhandekuai aguā.

### *Nhanderuete ayvu rupi nhandekuai ete aguā re ijayvua*

**19** Irmão kuery xerembiayvu, ha'e nunga peikuaapa ae ma. Ha'e rami avi peteī-tenhea'ā penembo'ea rā pejapyxaka porā aguā. Ha'e rā pendeayvu voi eme, neī pendevai voi eme guive.

**20** Mba'eta avakue ivaia py ndoexa ukai 'rā Nhanderuete guigua teko porā.\*

**21** Ha'e nunga rupi pendejegui pemboi nda'evei va'e ha'e teko vai pendere oī va'e ha'e javi. Ha'e penhemō'yvy'i reve pendu ete ayvu porā pendere omoī mbyre, mba'eta pendereraa jepe aguā ipo'aka va'e.

**22** Ha'e rami vy ayvu ojapo ete va'e peiko, oendu rive va'e'ŷ, peē ae pejekore e'ŷ aguā.\*

**23** Mba'eta ayvu oendu rive vy ha'e rupi ndoikoi va'e ma epéko re peteī ava ojexa rive va'e rami,

**24** mba'eta ojexa ma vy ojepe'a vyve marā rami pa ojekuaa ague re hexaraipa vyvoi 'rā.

**25** Ha'e rā lei opa mba'e gui nhanemoingo porā va'e re amongue oikuua pota ete ha'e ojapoa rupi oī atā va'e ma omoingo porāa ete 'rā mba'emo ojapoa rupi rei, mba'eta oendu rive va'e'ŷ, ojapo ete va'e oiko rā.

**26** Ha'e rā amongue ojeupe "Nhanderuete pegua" he'i teī oayvu py ndojejokoi va'e ma opy'a py ae ojekore, ha'e Nhanderuete pe merami rive oiko.

**27** Ha'e gui Nhanderuete renonde nhanderekoy ky'a e'ŷa ha'e anhetē rupi nhandekuai vy jaipou 'rā tyre'ŷ ha'e imeve'ŷ va'e kuery ojexavai rā, ha'e jajejoko 'rā yvy regua reko rupi nhanderekoy ky'a gui.

## 2

### *Peteī regua rive joegui jayvu ve'ŷ aguā re ijayvua*

**1** Irmão kuery, nhande-Senor Jesus Cristo hexakāmba va'e re pejerovia vy peteī regua rive joegui peayvuve eme.\*

**2** Xapy'a rei penhembo'eaty py peteī ava oike 'rā kuā regua ouro guigua ha'e onhemonde porā reve. Ha'e gui amboae ju oike avi 'rā iporiaukue'i, ao ymague py rive onhemonde va'e.

**3** Xapy'a rei onhemonde porā va'e peroryxe vy "Apy ke eguapy tenda iporāve va'e py" peje 'rā. Ha'e rā iporiaukue'i pe ma "Ndee, epu'ā he'amy upe py, ha'e'ŷ vy eguapy apy xepy renda yvýry" peje 'rā.

**4** Ha'e ramia py peteī regua rive'ŷ ri ty'y joegui peayvuve? Ha'eve'ŷa rami e'ŷ ri ty'y joeko re peikuaa pota?

**5** Irmão kuery xerembiayvu, pendu ke. Ko yvy regua kuery "Iporiaukue'i" he'ia va'e regua e'ŷ teve Nhanderuete oiporavo ojerovia ete aguā? Ha'e kuery va'e regua pe e'ŷ teve oupity uka opo'akaa? Mba'eta guembiaayvu kuery ha'e javi peguarā oguerekoy.

---

\* **1:17** 2 Pedro 1.3,4    \* **1:20** Romanos 12.17-21; Efésios 4.26-32    \* **1:22** Mateus 7.24-27; 1 João 2.3-6    \* **2:1** 1 Timóteo 5.21

<sup>6</sup> Ha'e rā peẽ kuery ma napemboetei pekuapy iporiaukue'i. Ha'e rami avi oguerekopa rei va'e kuery e'ŷ ri ty'y penemoingo axy rei? Ha'e kuery e'ŷ ri ty'y penemboayvua aguã katy pendereraa va'e?

<sup>7</sup> Ha'e kuery e'ŷ ri ty'y tery porã pendere omoĩ mbyre re ijayvu rei va'e?

<sup>8</sup> Lei re ipara oĩ va'e "Reayvu 'rā neirũ ndee ae rejeayvua rami" he'ia pejapopa ri vy ha'evea rami pendekuai.\*

<sup>9</sup> Ha'e rā peteĩ regua rive joegui peayvuve ri vy pejejavy. Lei rupi e'ŷ pendekuai vy heko vai va'e pepyta.

<sup>10</sup> Mba'eta lei re oĩ va'e ha'e javi amongue ojapopa teĩ peteĩ henda'i py mba'e ho'a vy ha'e javi py onhemboeko ky'a.

<sup>11</sup> Mba'eta "Ndetavy eme" he'i va'ekue ae "Ejojuka eme" he'i avi. Ha'e ramo nandetavy rei va'eri rejojuka vy lei rovai rupi reiko.\*

<sup>12</sup> Ha'e nunga rupi pendeayvu ha'e pendekuai ke jaa jepe aguã regua lei rupi, mba'eta ha'e va'e rupi ae 'rā nhandere oikuua potaa.

<sup>13</sup> Mba'eta nanhanhomboaxyi rire nhanemboaxy re'ŷ ju 'rā nhanembopaga. Ha'e rā nhomboaxy va'ekue ma nhombopagaa aguã ára py ipo'aka 'rā.

### *Jajerovia jaexa uka aguã re ijayvua*

<sup>14</sup> Irmão kuery, mba'erã tu ovare amongue "Xee ajerovia" he'i teĩ ojeroviaa mba'eve py ndoexa ukai ramo? Ha'e rami ojeroviaa rupi nda'u oo jepe 'rā?

<sup>15</sup> Xapy'a rei peteĩ irmão e'ŷ vy irmã nda'ijaoi ha'e tembi'u ndoguerekoi rā

<sup>16</sup> peẽ kuery regua pexa vy onheovã aguã napeme'ëi e'ŷ re "Peiko porã ke, penhemonde ha'e pekaru", peje 'rā. Mba'erã tu ovare 'rā ha'e rami pendeayvua?

<sup>17</sup> Ha'e rami ae avi jajeroviaa voi mba'eve py ndajaexa ukai ri ramo omanogue rami rive opyta, hexa ukaarã noĩ avi rā.\*

<sup>18</sup> Xapy'a rei amongue aipoe'i 'rā: "Peteĩ ojerovia 'rā, ha'e rā amboae ma onhea'ã 'rā mba'emo ojapoa rupi", he'i 'rā. Exa uka ha'vy rejeroviaa mba'emo rejapo e'ŷ re. Ha'e rā xee ma aexa uka 'rā ajeroviaa mba'emo ajapoa py.

<sup>19</sup> Ndee rerovia teve Nhanderuete peteĩ'i oikoa? Ha'evea rami reikuua teĩ anha kuery voi ha'e rami oguerovia oryryipa reve.

<sup>20</sup> Ha'e gui ava hi'arandu e'ŷ va'e, reikuua porãxe teve jajeroviaa ndajaexa ukai ramo mba'everã ndovareia?

<sup>21</sup> Nhaneramoĩ Abraão nda'u ojerovia etea oexa uka e'ŷ re ri omboeko porãa raka'e? Mba'eta altar áry gua'y Isaque ome'ë aguã rami oiko.

<sup>22</sup> Ma'ë, ojerovia ete ha'e oexa uka guive, mba'eta mba'emo ojapoa py oexa uka ojerovia etea.

<sup>23</sup> Ha'e rami vy ae ojeupity ipara re oĩ va'e: "Abraão ojerovia Nhanderuete re. Ha'e ramo ojeroviaa re omoĩ teko porã" he'iague. Ipara avi oiny: "Ixupe 'Nhanderuete irũ' 'ea."\*

<sup>24</sup> Ha'e rami rire jajerovia jaexa uka ramo mae 'rā nhanemboeko porãa, jajeroviaa re rive'ŷ.

<sup>25</sup> Raabe itavy rei va'ekue voi ojeroviaa oexa uka ramo omboeko porãa raka'e. Mba'eta ha'e va'e ma oikuua pota aguã ombou pyre kuery omovaë raka'e, ha'e gui amboae tape rupi ju omondouka guive.

<sup>26</sup> Mba'eta nhanenhe'ë reve'ŷ vy nhanderete omanogue itui. Ha'e rami ae avi jajeroviaa voi xapy'a rei mba'eve py jaexa uka e'ŷ ramo omanogue ae avi opyta.

## 3

### *Nhaneapekũ nhanemboeko vaia re ijayvua*

---

\* **2:8** Levítico 19.18    \* **2:11** Êxodo 20.13-14, Deuteronômio 5.17-18    \* **2:17** Lucas 3.8-14; Atos 26.20    \* **2:23** Gênesis 15.6

- <sup>1</sup> Irmão kuery, nda'evei peẽ kuery heta peiko aguã porombo'ea, mba'eta jaikuua porombo'ea kuery rekukue re oikuaa potaa povive 'rãa.
- <sup>2</sup> Mba'eta nhande kuery ha'e javive 'rã jajeity uka opa mba'e py. Oayvu py ndojejavyi va'e ma opa mba'e py 'rã heko porã, ha'e guete regua ha'e javi guive ojoko kuaa.
- <sup>3</sup> Kavaju re minha ijuru xã nhamoõ 'rã jaipotaa rami jareko aguã. Ha'e rami vy hete ha'e javi 'rã jaaxeal rupi jaraa.
- <sup>4</sup> Peikuuaa pota avi kanoã guaxu ikuai va'e re. Ha'e nunga ma tuvixa ete, ha'e hexe yvvyt oipeju atã teĩ imbojeapaa kyrĩ'i va'e py imboguataa kuery ogueraaxea katy rei 'rã ogueraa.
- <sup>5</sup> Ha'e rami ae avi nhaneapekũ, mba'eta nhanderete regua kyrĩ'i va'eri onhemboyvate reia rupi 'rã ijayvu, peteĩ tata ravijukue'i ka'aguy tuvixa va'e omoendypaa rami avi.
- <sup>6</sup> Mba'eta nhaneapekũ voi tata ramigua, ha'e nhanderete regua ikuai va'e mbyte py oĩ opa marãguia teko vai rexia ukaarã. Nhanemboeko ky'apa 'rã. Tata ogue'ý va'e omoendy rire oapy avi 'rã jaikoa ha'e javi.
- <sup>7</sup> Mba'eta mymba ikuai va'e minha nhamomãxo kuaa 'rã: guyra, yvy rupi otyryry va'e ha'e yy rupigua ha'e javive regua ma nhamomãxo va'e meme.
- <sup>8</sup> Ha'e rã nhaneapekũ ma avave rei ndojoko kuaai 'rã. Teko vai moingoa ojoko pyrã e'ý oĩ, ha'e veneno rami jojuka 'rã guive.
- <sup>9</sup> Nhaneapekũ py jaroayvu porã 'rã Senhor Nhanderuete. Ha'e va'e py ae ju 'rã nhandeayyu vai avakue Nhanderuete ojee rami omoingo va'ekue re.
- <sup>10</sup> Nhandedjuru peteĩ'i va'eri ayvu porã ha'e ayvu vai rupi ijayvu. Irmão kuery, ha'e nunga ma nda'evei.\*
- <sup>11</sup> Yvu peteĩ'i oĩ va'e gui nda'u oẽ 'rã yy porã ha'e iro va'e avi?
- <sup>12</sup> Irmão kuery, figo rembypy gui nda'u oiko 'rã azeitona? Ha'e rami e'ý vy uva'y gui nda'u oiko 'rã figo? Ha'e rami ae avi peteĩ yvu gui noẽi 'rã yy he'ẽ ro ha'e iporã va'e.

### 'Arandua yvate guigua re ijayvua

- <sup>13</sup> Peẽ kuery va'e regua mava'e nda'u hi'arandu ha'e oikuaapa va'e pendekuai? Pene'arandua pexa uka ha'vy pendevai reia rupi e'ý, ha'evea rami anho pendekuia py.
- <sup>14</sup> Ha'e rã xapy'a rei pendepy'a re joe napendea'ei reia ha'e peẽ ranhexea oĩ ramo nda'evei pejejou porã rei aguã, neĩ anhetẽ va'e rovai pendeapu aguã guive.
- <sup>15</sup> Ha'e ramigua pexa uka va'e ma yvate guigua 'arandua e'ý. Ha'e ramigua ma yvy regua, mymba kuery oendu va'e ramigua rive, anha guigua ae.
- <sup>16</sup> Mba'eta joe nda'iija'eí ha'e ha'e ranhexe va'e ikuiaia py oĩ avi 'rã joo rami e'ý-e'ý ikuai va'e ha'e opa marãguia teko vai.
- <sup>17</sup> Ha'e rã yvate guigua 'arandua ma jypy'i nhandeapo 'rã nhanderekko ky'a e'ý aguã rami, ha'e gui nanhandevai rive-rivei 'rã, mborayvu re 'rã nhandekuai, ha'eve vai'i va'e 'rã jaiko, ha'e opa mba'e py nhomboaxy ha'e nhopytyvõ va'e, peteĩ regua joegui ndajayvuvei 'rã, nanhanderekko porã merami rivei 'rã guive.\*
- <sup>18</sup> Mba'eta peteĩ rami nhomoingoa kuery ma oma'etý va'e rami avi peteĩ rami nhomoin-gogue rupi ojou 'rã heko porã va'e.

## 4

### Joguero'a reia re ijayvua

- <sup>1</sup> Magui tu ou joe pepu'ã ha'e pejoguero'a reixeia? Pendepy'apy py mba'emo re nda'eveivea pendu va'e gui e'ý teve ou?\*
- <sup>2</sup> Mba'eta mba'emo peipota teĩ ndapejoui vy pejojukaxe. Mba'emo re nda'eveive peiko teĩ ndapejoui vy pejoguero'a rei ha'e joe pepu'ãa rupi pendekuai. Mba'eve ndapejoui mba'eta ndapejerurei.

\* **3:10** Efésios 4.29 \* **3:17** Gálatas 5.19-26 \* **4:1** Tiago 3.14-16

<sup>3</sup> Pejerure vy voi ndapejopyi, mba'eta ha'eve'ŷa ramigua re pejerure, peẽ ae peipotaa rami pendekuaixe vy.

<sup>4</sup> Nhanderuete pe merami rive pendekuai va'e, ndapeikuaai ri ty'y ko yvy regua re peo vy Nhanderuete rovaigua pepytaa? Mba'eta ko yvy regua re ooxe va'e rei Nhanderuete rovaigua oiko.

<sup>5</sup> Tyrā pa pexa'ã ipara re oĩa oaxa rive 'rāa re? Mba'eta "Nhandere Nhanderuete Onhe'ẽ omoĩ va'ekue oipota hexe anho jaa", he'i va'ekue.

<sup>6</sup> Ha'e rami teĩ nhanemboaxyve ju 'rā, mba'eta aipoe'i avi: "Nhanderuete opu'ã 'rā onhembovate rei va'e re, ha'e rā onhemo'yvyi'i va'e ma omboaxy 'rā."\*

<sup>7</sup> Ha'e nunga rupi penhemo'yvyi'i ke Nhanderuete oipotaa rami. Ha'e rā anha pe ma pejeity ukaeme. Ha'e ramo ojava 'rā pendegui.

<sup>8</sup> Penhemboja ke Nhanderuete re. Ha'e ramo ha'e ju onhemboja 'rā peẽ kuery re. Pejejavypa va'e, peiky'a'o uka ke pendepo. Mokoĩ rupi rei pendepy'a va'e, peiky'a'o uka pendepy'a.

<sup>9</sup> Pendu ke penhemboaxy, ha'e rami vy peneraxē ha'e pejae'o. Penderory rei 'rāgue py pendepy'a vai, pevy'a rei 'rāgue py pendeporiau.

<sup>10</sup> Penhemo'yvyi'i ke Senhor renonde. Ha'e ramo penemboyvate ju 'rā.

### *Joe nhandeayvu rei e'ŷ aguã re ijayvua*

<sup>11</sup> Irmão kuery, pendeayvu rei eme joe. Mba'eta irmão kuery re ijayvu rei, e'ŷ vy oikuua pota rei va'e ma lei re voi ijayvu ha'e oikuua pota rei. Ha'e gui lei re peikuua pota rei vy lei rupi ve'ŷ pendekuai, ha'e rā lei re peikuua pota reia rupi rive.

<sup>12</sup> Mba'eta peteĩ'i oiko lei mbouare ha'e joe oikuua pota va'erā. Ha'e va'e ma jogueraa jepe ha'e nhomokanhy aguã ipo'aka va'e. Ha'e rā ndee, marā ramigua tu reiko, neirū kuery re reikuua pota rei aguã?\*

### *Tenonde oiko va'erā ndajaikuaaia re ijayvua*

<sup>13</sup> Peẽ kuery va'e regua "Kova'e ára, e'ŷ vy ko'ẽ rā roo 'rā tetā re. Peteĩ ma'etŷ re 'rā roiko ha'e py. Mba'emo romboekoviaa rupi rojoupa 'rā", peje. Ha'e ramo pejapyxaka porã pota ke aŷ.

<sup>14</sup> Mba'eta peẽ ndapeikuaai neĩ ko'ẽ rā mba'e pa oiko 'rāa voi.\* Marā ramigua tu peikovea? Mba'eta yvyxi xapy'a'i ojekuaa, ha'e gui are'ŷ'i re okanhy va'e rami peiko.

<sup>15</sup> Ha'e rami 'rāgue py "Senhor oipota ramo roikove, ha'e rojapo 'rā ha'e nunga", peje aguã ha'eveve.

<sup>16</sup> Ha'e rami teĩ aŷ ma mba'emo tuvixa va'e pejapo aguã re pendeayvua rupi penhemboyvate rei. Ha'e rami nhanhemboyvatea ha'e javi ma teko vai.

<sup>17</sup> Ha'e nunga rupi iporã va'e ojapo aguã oikuua teĩ ndojapoi va'e ma ojejavy.

## 5

### *Ojeupe guarā rive ojou pyre Nhanderuete omomba aguã re ijayvua*

<sup>1</sup> Perekopa rei va'e kuery, pejapyxaka ke aŷ. Pejae'o ha'e pendepy'a vai ke, mba'eta penembojexavaiarā ou.\*

<sup>2</sup> Mba'emo perekova'e ma hu'ũmba 'rā, vixo ho'upa 'rā pendeao,

<sup>3</sup> ha'e ouro, prata perekova'e voi opa 'rā iky'apa vy. Iky'akue pavē oexa vy oikuua 'rā napene'aranduia. Ha'e nunga ma tata rami 'rā ombovaipa pendero'o. Opaa ára py teĩ penemba'e rei-reirā rive pemono'õ.

<sup>4</sup> Ma'ê, omaba'eapo va'e kuery pe napeme'ëi penhotŷ va'ekue omono'õague repy, pekorepa rei rire ojapukai okuapy. Ha'e kuery ojapukaia ma Senhor Ixonitaro reta va'e oendua peve onhendu.

\* **4:6** Proverbios 3.34    \* **4:12** Mateus 7.1-5; Lucas 6.37; Romanos 2.1-3; 1 Coríntios 4.5    \* **4:14** Lucas 12.15-21

\* **5:1** 1 Timóteo 6.9,10

<sup>5</sup> Perekopa va'ekue ko yvy re, pevy'aa rupi rive pendekuai. Penemombaa ára py teĩ penekuraxõ py voi penhemongyra rive.

<sup>6</sup> Heko porã va'e kuery ma pendere ha'e kuery nopus'ãi teĩ pembopaga uka, ha'e pejuka uka guive.

### *Jajapura rei e'ŷ aguã re ijayvua*

<sup>7</sup> Ha'e nunga rupi irmão kuery, Senhor ndoui teria ja pejapura rei eme. Omba'eapo va'e voi ojapura e'ŷ re oarõ 'rã okuapy oky jypy'igua ha'e opa vygua ho'a ramo onhotõ' va'ekue hi'a porã aguã.

<sup>8</sup> Peẽ voi pejapura rei eme. Penembaraete ke penekuraxõ py, mba'eta namombyryvei ma Senhor ou aguã.

<sup>9</sup> Irmão kuery, pendeayvu eme joe, penembopagaa e'ŷ aguã. Ma'ë, nhandere oikuaa pota va'erã ovaë ma okë py.

<sup>10</sup> Irmão kuery, peiko axy teĩ pejapura eme, profeta kuery Senhor rery rupi ijayvu va'ekue ikuaiague rami avi.

<sup>11</sup> Amongue ojapura e'ŷ re mba'emo ogueropo'aka ramo jaikuua ov'y'a 'rãa. Mba'eta pendu ma Jó teko axy ogueropo'akaague, peikuua avi opaa py Senhor omoingo porãague, opa mba'e py nhanemboaxy ha'e nhanderayvu va'e vy.\*

### *Jaura e'ŷ aguã, ha'e jajerure aguã re ijayvua*

<sup>12</sup> Ha'e gui irmão kuery, opa mba'e gui yvateve va'e ma po rami: Peura eme yva re, yvy re, neĩ amboae nunga re rei. Ha'e rami 'rãgue py "Tá" peje aguã py "Tá" peje, ha'e "Any" peje aguã py "Any" peje, penembopagaa e'ŷ aguã.\*

<sup>13</sup> Peẽ kuery mbyte ikuai teve ojexavai va'e? Tojerure ha'vy Nhanderuete pe. Ikuai teve ov'y'a va'e? Toporaei ha'vy.\*

<sup>14</sup> Penembyte ikuai teve imba'eaxy va'e? Toenoĩ ha'vy igreja re opena va'e kuery, ha'e va'e kuery Senhor rery rupi azeteite oikyty reve ojerure aguã.

<sup>15</sup> Ha'e gui ojeroviaa rupi ojerure ramo imba'eaxy va'e okuera 'rã, Senhor ae omopu'ã ju 'rã. Ojejavyague oĩ ramo ombogue 'rã guive.

<sup>16</sup> Ha'e nunga rupi peteĩ-teĩ pe pemombe'u pejejavyague, ha'e jomeme pejerure pekuera aguã. Heko porã va'e ojerurea ma ipo'aka vaipa 'rã.

<sup>17</sup> Elias ma nhande ramigua ae oiko raka'e, nhande rami guive onhenhandu va'e. Ha'e va'e ma onhea'ãa rupi ojerure raka'e yvy áry oky e'ŷ aguã. Ha'e ramo mboapy ma'etõ' raxa peve nda'okyi.

<sup>18</sup> Ha'e gui ojerure ju ramo oky ou yva gui, ha'e ramo yvy gui oiko mba'emo aju.

<sup>19</sup> Irmão kuery, xapy'a rei peẽ kuery regua anhetõ' va'e gui ojepe'a rã amongue ogueru jevy ramo

<sup>20</sup> peikuua pota pov'a re: Ojejavy va'e teko vai rupi oikoague gui amongue ogueru ju vy inhe'ẽ ogueraa jepe omano aguã gui, ojejavyague heta teĩ ombogue uka vy.\*

## Jypy'i kuaxia Pedro ombopara va'ekue Jypy'i kuaxia Pedro ombopara va'ekue

Kova'e kuaxia para apóstolo Pedro ogueraa uka Jesus Cristo remimbo'e kuery peguarã. Ha'e va'e kuery ma Jesus re ojerovia rã ha'e kuery re opu'âa rei. Ha'e nunga rupi Pedro ijayvu omokyre'ý ha'e omombaraetea rupi, nhandereraa jepea re ima'endu'a riae aguã: "Yva re pendevy guarã omoï porã mbyre ma ivaipa e'ý va'e, iky'a e'ý ha'e imarã e'ý va'e. Peẽ kuery re Nhanderuete opena opo'akaa rupi, pejerovia vy opaa ára py peo jepe aguã. Ha'e va'e ojekuaa aguã ma namombyryvei ma guive. Ha'e rami aguã pearõ vy pevy'a, aý pendekuai axy aguã rami pendekuai vy are'ý'i re pendeporiau pekuapy ranhe teĩ, mba'eta ha'e nunga peaxapa ma ramo pejeroviaa ojekuaa aguã ovare ete va'e. Ouro tata py oiky'a'o pyre gui ovareve va'e, mba'eta ha'e nunga ivaipa va'erã. Ha'e rã peẽ ma Jesus Cristo ojekuaa jave pendererovy'aa 'rã, penemboyvate ha'e penemboetea 'rã guive", he'i (1.4-7).

### *Oxarura reve ijayvu vy omboypyague*

<sup>1</sup> Xee Pedro ma Jesus Cristo pegua apóstolo aiko.\* Axarura Nhanderuete rembiporavo opa rupi pendevy re'ý pendekuai va'e pe. Ponto re, Galácia, Capadócia, Ásia ha'e Bitínia re pendekuai.

<sup>2</sup> Nhanderuete onhembopy'a ma voiague rami vy pendeporavo. Ha'e rami vy ixupe guarã Inhe'ë penemoingo rire penhe'ë rendu Jesus Cristo, huguy py pejeky'a'o uka vy.\* Tove peẽ kuery tapendu penemboaxyha'e mby'a porã opa mba'e py.

### *Nhandereraa jepea re jarovy'a aguã re ijayvua*

<sup>3</sup> Ta'ima'endu'a porãa Nhanderuete nhande-Senhor Jesus Cristo Ru va'e re, mba'eta nhanemboaxy ete vy nhanemoingove ju raka'e. Ha'e ramo nharõ jakuapy oikove va'e ou aguã, Jesus Cristo omanoague gui omboete ju rire.

<sup>4</sup> Ha'e gui yva re pendevy guarã omoï porã mbyre ma ivaipa e'ý va'e, iky'a e'ý ha'e imarã e'ý va'e.

<sup>5</sup> Peẽ kuery re Nhanderuete opena opo'akaa rupi, pejerovia vy opaa ára py peo jepe aguã. Ha'e va'e ojekuaa aguã ma namombyryvei ma guive.

<sup>6</sup> Ha'e rami aguã pearõ vy pevy'a, aý pendekuai axy aguã rami pendekuai vy are'ý'i re pendeporiau pekuapy ranhe teĩ,

<sup>7</sup> mba'eta ha'e nunga peaxapa ma ramo pejeroviaa ojekuaa aguã ovare ete va'e. Ouro tata py oiky'a'o pyre gui ovareve va'e, mba'eta ha'e nunga ivaipa va'erã. Ha'e rã peẽ ma Jesus Cristo ojekuaa jave pendererovy'aa 'rã, penemboyvatea ha'e penemboetea 'rã guive.

<sup>8</sup> Cristo ma peẽ ndapexai teri va'eri peavyu. Aý pexa e'ý re hexe pejerovia vy perovy'a ete. Pendere vy'aa oï va'e ma iporã ete va'e nhamombe'u kuaa va'e'ý,

<sup>9</sup> mba'eta pejopy ma pejeroviaa rekovia. Ha'e va'e ma penenhe'ë oo jepea.

<sup>10</sup> Ha'e rami jaa jepe aguã re ma profeta kuery yma guare oporandu ha'e oikuua pota raka'e, nhanemboaxyha'e ombou pyrã omombe'u ma voi va'ekue ri.

<sup>11</sup> Mba'eta ha'e kuery re Cristo Nhe'ë oï vy yma ma voi oikuua uka Cristo omano 'rãa, ha'e va'e rire mba'emo iporã ete va'e oiko 'rãa guive. Ha'e kuery oikuaxe teĩ araka'e ete ha'e marã rami pa ha'e nunga ojeupity 'rãa.

<sup>12</sup> Ha'e ramo ha'e kuery pe oikuua uka ojeupe guarã e'ý ayvu omombe'ua, ha'e rã peẽ kuery peguarã, mba'eta omombe'u ma voi raka'e mba'emo aý peẽ kuery pe oikuua ukaa

\* **1:1** João 1.40-42 \* **1:2** Romanos 8.29,30; Efésios 1.4,5

va'e. Mba'eta pendevy pe ae ayvu porã mombe'ua kuery omombe'u, yva gui Nhe'ẽ Ky'a E'ŷ ombou pyre rupi. Ha'e ramigua ma anjo kuery eteve voi oikuaa porãvexe teĩ okuapy.

### *Iky'a e'ŷ va'e jaiko aguã re ijayvua*

<sup>13</sup> Ha'e nunga rupi pendejee pemoĩ pene'arandurã, peiko kuaa pota ha'e pearõ aguã, mba'eta Jesus Cristo ojekuaa ára oexa uka 'rã penemboaxy etea.

<sup>14</sup> Ta'y kuery inhe'ẽ rendu va'e peiko vy pendekuaive eme yma ndapeikuaai teri jave peipotaague rupi rive.

<sup>15</sup> Ha'e rami 'rãgue py penerenoĩare iky'a e'ŷ va'e oikoa rami avi peẽ voi ke iky'a e'ŷ va'e pendekuai, peikoa ha'e javi rupi,

<sup>16</sup> mba'eta ipara oĩ va'e "Iky'a e'ŷ va'e ke pendekuai, mba'eta xee ma iky'a e'ŷ va'e" he'ia rami.\*

<sup>17</sup> Nhanderuete ma peteĩ regua joegui oayvuve e'ŷ re oikuaa pota 'rã peteĩ-teĩ jaikoague re. Ha'e nunga rupi kova'e yvy re peikoa pukukue re pejererokyjea rupi tema pendekuai.

<sup>18</sup> Mba'eta po rami peikuaa ae: Pendejoguaa raka'e pendereko yma guare ovare'ŷ va'e rupi pendekuaiague gui, mba'eta peneramoĩ kuery gui ha'e ramigua rive peikuaa va'ekue. Prata, ouro, mba'emo opa va'erã re rive'ŷ guive pendejoguaa,

<sup>19</sup> ha'e rã Cristo ruguy ovarepave va'e re. Ha'e va'e ma vexa'i ivaikue rei e'ŷ, iky'a e'ŷ va'e rami ojukaa raka'e.

<sup>20</sup> Hekorã ma kova'e yvy itui e'ŷ mbove ma voi Nhanderuete omoĩ raka'e. Ha'e gui aŷ opaa ára py mae ma oikuaa uka penderayvu vy.

<sup>21</sup> Cristo gui vy ae pejerovia Nhanderuete omanoague gui omboete ha'e omboyvate ju va'ekue re. Ha'e rami py Nhanderuete re pejerovia ha'e pearõ pekuapy.

### *Mborayvu re nhandekuai aguã re ijayvua*

<sup>22</sup> Anhetẽ va'e rupi penhe'ẽ rendu vy peiky'a'o uka ma pendepy'a. Aŷ ma joegua meme'i joayvua rami pejoayvu, merami rive'ŷ. Ha'e rami vy pendepy'a ha'e javi py pejoayvu peteĩ-teĩ.\*

<sup>23</sup> Mba'eta mba'emo ra'yĩ ivaipa va'erã gui e'ŷ penemoingove ju, ha'e rã imarã e'ŷ va'e gui, Nhanderuete ayvu oikove ha'e ndopai va'erã gui ae.

<sup>24</sup> Mba'eta "Avakue ma jai rami meme 'rã opa. Iporãa ha'e javi ma jai poty ramigua rive oĩ. Mba'eta jai ipiru rã ipoty okuipa 'rã.

<sup>25</sup> Ha'e rã Senhor ayvu ma oĩ riae 'rã", he'i.\* Ha'e va'e ayvu porã ma pêvy omombe'u pyre ae.

## 2

### *Cristo re jajerovia va'e Nhe'ẽ rorã nhanemoingoague re ijayvua*

<sup>1</sup> Ha'e nunga rupi pendejegui pemboi opa mba'e vai, pendeapua, pendeko porã merami rivea, mba'emo peipota reia ha'e joe pendeayvu reia ha'e javi.

<sup>2</sup> Ha'e rami 'rãgue py kyrĩ'i va'e itui ramo'i va'e rami avi penhea'ã ke kamby Nhe'ẽ guigua iky'a e'ŷ va'e re, ha'e va'e re pende'yvate vy oo jepe ete va'e peiko aguã,

<sup>3</sup> Senhor penderayvua pendu ma rire.

<sup>4</sup> Cristo ma ita oikove va'e avakue omombo va'ekue rami oiko, teĩ Nhanderuete pe ovare ete va'e rã oiporavo. Ha'e nunga rupi hexe penhemboja ramo

<sup>5</sup> peẽ voi ita oikove va'e rami Nhanderuete penemoĩ Nhe'ẽ rorã.\* Ha'e pygua sacerdote iky'a e'ŷ va'erã avi penemoĩ, ixupe peme'ẽ aguã Nhe'ẽ guigua. Jesus Cristo rupi peme'ẽ ramo oguerovy'a 'rã.

\* **1:16** Levítico 11.44-45 \* **1:22** 1 João 5.1 \* **1:25** Isaías 40.6-9 \* **2:5** 1 Coríntios 3.16; Efésios 2.19-22

<sup>6</sup> Mba'eta ipara re oĩ: “Sião py amoĩ'rã peteĩ ita oo ytarã aiporavo va'ekue, ovare ete va'e. Ha'e va'e re ojerovia va'e kuery ma peteĩve henda py nda'eve e'ŷi nho 'rã”, he'i.\*

<sup>7</sup> Peẽ kuery hexe pejerovia va'e pe ma anhetẽ ovare ete va'e oiko. Ha'e rã ojerovia e'ŷ va'e kuery pe ma “Oo apoa kuery ita omombo va'ekue ma omboeteve pyrã optya, tenondeve pygurarã”,\*

<sup>8</sup> ha'e “Nhomonhepyxangaarã, joityarã optya”, he'ia rami. Mba'eta ha'e kuery ojeity uka 'rã ayvu porã oendu teĩ nonhe'ẽ renduia py, ha'e rami ae hekorã omoña rire.\*

<sup>9</sup> Ha'e rã peẽ kuery ma peteĩ regua oiporavo pyre, huvixave pegua sacerdote, iky'a e'ŷ va'e, Nhanderuete ojeupe guarã ae ojogua va'ekue, peikuaa uka aguã pytãa gui guexakãa pygurarã penerenoĩ va'ekue po'akaa.\*

<sup>10</sup> Mba'eta yma rupi peteĩ regua e'ŷ pendekuai va'ekue. Ha'e rã aŷ ma Nhanderuete pegua pendekuai. Yma ndapeupityi penemboaxya, ha'e rã aŷ ma peupity ma.\*

### *Ojerovia e'ŷ va'e ha'e huvixa kuery pe Cristo pegua kuery iporã va'e anho oexa uka aguã re ijayvua*

<sup>11</sup> Xerembiaiyvu kuery, oyvy re'ŷ ikuai va'e pendekuai ramo ajerure pejejoko aguã to'o oipota va'e gui, mba'eta penenhe'ẽ re opu'ã rei va'e.

<sup>12</sup> Amboae regua mbyte pendekuaia rupi pexa uka tema penderekoi porãa. Ha'e ramo heko vai va'e re rami pendere amongue ijayvu rei teĩ, pendekuai porãa oexa vy ha'e kuery voi ombojerovia aguã Nhanderuete, ojekuaa ára.

<sup>13</sup> Senhor re vy penhe'ẽ rendu ke joe opena va'e kuery ha'e javi: huvixave yvateve ikuai va'e

<sup>14</sup> ha'e hembiguai kuery huvixa yvyigueve va'e, mba'eta ha'e kuery omoña heko vai va'e ombopaga aguã, ha'e rã heko porã va'e ma oguerory aguã.

<sup>15</sup> Mba'eta Nhanderuete oipota pendekuai porãa py pejapo hi'arandu e'ŷ va'e kuery oikuua vy e'ŷ ijayvua gui okyrirã aguã rami.

<sup>16</sup> Opa mba'e gui peo jepe teĩ nda'evei “Jaa jepe” peje vy ha'eve'ŷ va'e pejapo aguã. Ha'e rami 'rãgue py Nhanderuete rembiguai rami pendekuai.

<sup>17</sup> Pemboete pavẽ ke. Peayvu irmão kuery. Nhanderuete renonde pendekuai pejerokyjea rupi. Pemboete avi huvixave.\*

### *Tembiguai kuery ombo'eapo porã aguã re ijayvua*

<sup>18</sup> Tembiguai kuery, penhe'ẽ rendu tema pendererekao, opa mba'e py pemboete reve. Pendererekao porayvu ha'e hi'arandu va'e anho e'ŷ 'rã penhe'ẽ rendu, ha'e rã heko vai va'e voi.\*

<sup>19</sup> Mba'eta xapy'a rei Nhanderuete renonde pendep'y a ky'a e'ŷa rupi pendekuaia teĩ mba'e re'ŷ penemoingo axya 'rã. Ha'e ramigua pendeporiau reia peropo'aka porã vy ojou porãmby 'rã peiko.

<sup>20</sup> Ha'e gui xapy'a rei pejejavyague re ri penembopagaa ramo mba'exa 'rã tu pendererovy'a? Ha'e rami avi xapy'a rei ha'evea rami pendekuai teĩ penemoingo axya rã pendevai e'ŷ re peropo'aka ramo Nhanderuete pendejou porã 'rã.

<sup>21</sup> Mba'eta ha'e rami aguã ae penerenoĩ, mba'eta Cristo voi pendere oiko axy raka'e, oikoague rami avi peẽ voi pendekuai aguã.

<sup>22</sup> Ha'e ma ndojejavyi, peteĩve henda py nda'ijayvui nhombotavy reia rupi.

<sup>23</sup> Ixupe ijayvu vaikuea rã nombovai ayvu vai py. Oguereko axya rei ramo nanhomongyjei. Ha'e rami 'rãgue py onhemboaxa ha'evea rami joe oikuua pota va'e po py.\*

\* **2:6** Isaías 28.16 \* **2:7** Salmo 118.22-23 \* **2:8** Isaías 8.14 \* **2:9** Isaías 43.21 \* **2:10** Oséias 1.6,9, 2.23 \* **2:17**

Mateus 22.21; Romanos 13.1-7 \* **2:18** Efésios 6.5-8; Colossenses 3.22-25 \* **2:23** Isaías 53.9, Mateus 27.11-14, 39-44; Lucas 23.39-41

**24** Yvyra re ojukaa py guete re ae ogueraa raka'e jajeavyague, nhande voi jejavya pe nhamano avi, ha'e teko porã re ju jaiko aguã. Ijai gui vy jakuera.\*

**25** Mba'eta vexa'i okanhigue rami pendekuai va'ekue ri aõ ma penenhe'ẽ re Opena ha'e Onhangareko va'e oõa py ju pendereru.\*

### 3

#### *Omenda va'e kuery joguereko kuaa aguã re ijayvua*

**1** Kunhague, peẽ voi peneme oipotaa rami avi peiko. Ha'e rami avi ayvu porã rupi ha'e kuery nda'ikuai teri teĩ peẽ ta'yxy kuery pendekuai porãa oexa vy rive ha'e kuery voi ojerovia 'rã pendeayvu re'ŷ.

**2** Mba'eta opa mba'e py pejererokyjea rupi peiko ramo oexa 'rã pendekuai porãa.

**3** Peẽ ta'yxy kuery, penhemoatyrõ eme hi'árykue rive, peje'a vykypa reia py, ouro guigua py pejeguaa py, neõ ao hepyve va'e py penhemonde vy.

**4** Ha'e rami 'rãgue py pendepy'a re oĩ va'e ae toexa uka peneporãa, ha'eve vai'ia ha'e pejapura e'ŷa. Ha'e ramigua ma Nhanderuete pe ovareve ete va'e.

**5** Mba'eta ymave rupi kunhague iky'a e'ŷa rupi Nhanderuete re ojerovia va'e ma ha'e ramigua py ae onhemonde raka'e, ome oipotaa rami ikuia py.

**6** Abraão ra'yxy Sara voi ha'e rami oiko raka'e, mba'eta ome onhe'ẽ rendua rupi ixupe "Senhor" he'i. Peẽ voi iporã va'e pejapo ha'e mba'eve rei gui vy ndapekyjei vy imemby kuery 'rã peiko.

**7** Ha'e peẽ ime kuery voi ha'e rami. Pene'arandua rupi pejoguereko pendera'yxy reve. Ha'e kuery ikangyve ramo pemboetea rupi perek, mba'eta peẽ reve ha'e kuery peguarã voi tekove oĩ. Ha'e rami vy 'rãe mba'eve napendejokoi pejerurea gui.\*

#### *Irmão kuery joayvu aguã re ijayvua*

**8** Opaa py aipota jojo'i rami peikuaa. Penhomboaxy, joegua meme rami pejoayvu, joegui penhemo'yvyi've guive.

**9** Pendevy otekoavya rã pejepy-jepy eme ha'ekue rami, ha'e pendere ijayvu vaia rã pembovai eme ayvu vai rupi. Ha'e rami 'rãgue py pejogueroayvu porã, mba'eta ha'e rami aguã ae Nhanderuete penerenoõ, pendereroayvu porãa peupity aguã.\*

**10** Mba'eta "Oiko pukuvexe ha'e ov'y'aa aguã va'e ára oupityxe va'e ma tojoko oapekũ mba'emo vai rupi ijayvu e'ŷ aguã, tojoko ojuru ijapu rei e'ŷ aguã.

**11** Tojep'e a mba'emo vai gui, iporã va'e anho tojapo. Tonhea'ã pavẽ reve ikuai porã aguã. Tonhea'ã ete, oupity peve.

**12** Mba'eta heko porã va'e re Senhor oma'ẽ oikovy, ojapyxaka oiny guive ha'e kuery ojerurea re. Ha'e rã mba'emo vai apoa kuery pe ma Senhor oexa uka 'rã opoxya", he'i.\*

#### *Iporã va'e jajapoa rupi nhaõ atã aguã re ijayvua*

**13** Ha'e gui iporã va'e pejapoa rupi penhea'ã ramo mava'e tu penemoingo axy ta?

**14** Ha'e rami avi penderekoi porãa rupi pejexavai teĩ ov'y'a ete va'e 'rã peiko. Penemongy-jea rupi ijayvua teĩ pekyje eme, pejapura eme guive.

**15** Ha'e rami 'rãgue py pendepy'a py Cristo pemboetea rupi "Xe-Senhor iky'a e'ŷ va'e" peje vy peiko katu riae oporandu va'e-va'e pe pemombe'u porãve aguã pearõ peikovya.

**16** Ha'e rami avi pendevai reia rupi pendeayvu eme, ha'e rã pejererokyjea ha'e pendepy'a ky'a e'ŷa rupi anho. Ha'e ramo penderovai ijayvu va'e oximba 'rã Cristo re vy penderekoi porãa re ijayvu vaiague re.\*

**17** Mba'eta pendekuai axy Nhanderuete oipota ri ramo ha'eveve pendeko porãa re pendekuai axy, pendeko vaia re 'rãgue py.

\* **2:24** Isaías 53.4   \* **2:25** Isaías 53.6   \* **3:7** Efésios 5.22-25; 1 Timóteo 2.9-11   \* **3:9** Lucas 6.27,28; Romanos 12.9-21   \* **3:12** Salmo 34.12-16   \* **3:16** Isaías 8.12-13, Mateus 10.16-20; 2 Timóteo 2.24-26

<sup>18</sup> Mba'eta Cristo voi omano raka'e jajejavyague re, peteñgue'i. Heko porã ete va'e ojejuka uka nhandereko vai va'e re, nhandereru aguã Nhanderuete pe. Ngo'o re omano teñ Nhe'ẽ omoingove ju raka'e.

<sup>19</sup> Ha'e gui onhe'ẽ rupi oo vy ayvu omombe'u nhe'ẽ nhuã py omboty pyre kuery pe.

<sup>20</sup> Ha'e va'e kuery ma yma rupi Noé oiko jave Nhanderuete nonhe'ẽ rendui okuapy teñ Nhanderuete oarõ are ranhe kanoã guaxu ojapoa ja. Ha'e rami teñ mbovy'i oo jepe raka'e yy rupi, oito ete'i.

<sup>21</sup> Ha'ekue rami ae ju aÿ ma peë voi penhemongaraia rupi peo jepe. Pendero'o peiky'a'o vy rive peo jepe nda'ei, ha'e rã Nhanderuete pe pejapukaia rupi, pendepy'a peiky'a'o uka vy. Jesus Cristo onhemboete ju rire pendeky'a'o.

<sup>22</sup> Ha'e gui yva re oo ma vy Nhanderuete oiporu kuaa regua re oĩ. Ha'e ramo ha'e oipotaa rami ikuai anjo kuery, yvatekueve ha'e mba'emo re ombopo'aka pyre ha'e javi.

## 4

### *Jejavya pe nhamano ha'e iky'a e'ÿ va'e jaiko aguã re ijayvua*

<sup>1</sup> Ha'e gui Cristo ngo'o re oiko axy rire peë voi pendepy'a re pemoï ha'ekue rami penhemoingo axy uka avi aguã, mba'eta ngo'o re oiko axy va'ekue ma mba'eve ndoguerokovei ma jejavya reve.\*

<sup>2</sup> Ha'e rami rire pendero'o re peikove teria ja avakue oipotaa rami ve'ÿ pendekuai aguã, ha'e rã Nhanderuete oipotaa rami anho.

<sup>3</sup> Mba'eta ha'eve ma amboae regua oipotaa rami pendekuaiague. Opa marã rei pendekuai va'ekue to'o oipota va'e rupi, peka'ua rupi, opa marã vy'aa rupi, iro va'e pey'ua rupi, ha'e mba'emo ra'angaa ojeguarupy pembojeroviaa rupi guive.

<sup>4</sup> Ha'e gui amboae kuery opa marã ikuaria rupi peë kuery napenhemoirûvei ramo onhemondyipa rei okuapy, ha'e peë kuery re ijayvu vai guive.

<sup>5</sup> Ha'e rami teñ ha'e kuery onhemombe'upa 'rã oikove va'e ha'e omano va'ekue re oikuua pota va'e renonde.

<sup>6</sup> Mba'eta ha'e rami aguã ae omano va'ekue pe voi ayvu porã omombe'ua raka'e, avakue rami ha'e kuery ngo'o re opaga teñ nhe'ẽ re oikove ju aguã Nhanderuete rami.

### *Peteñ-teñ nhanhopytyvõ aguã re ijayvua*

<sup>7</sup> Namombyryvei ma opa mba'e opa aguã ára. Ha'e nunga rupi pejejoko ha'e peiko kuaa pota ke penhembo'e kuaa aguã.\*

<sup>8</sup> Opa mba'e gui yvateve va'e ma peteñ-teñ pejoayvu ete aguã, mba'eta porayvu va'e ombogue uka reta 'rã amboae kuery ojejavague.\*

<sup>9</sup> Penhomovaë peteñ-teñ pendeayvu rei e'ÿ re.

<sup>10</sup> Peteñ-teñ penerembiaporã pejopyague rami vy penhopytyvõ, mba'eta peteñ-teñ pe Nhanderuete ome'ẽ joo rami e'ÿ-e'ÿ nhopytyvõ aguã. Ha'e rami rã pejapo ete.

<sup>11</sup> Ayvu omombe'u aguã ojopy va'ekue ma tomombe'u porã, Nhanderuete ayvu ramo. Nhopytyvõ aguã ojopy va'ekue ma Nhanderuete omombaraetea rupi tojapo, opa mba'e py Nhanderueteomboetea aguã Jesus Cristo rery rupi. Ha'e va'e ma hexakãmba ha'e ipo'akapa araka'e rã peve guarã. Amém.

### *Cristo káuxa nhanhopytyvõ aguã re ijayvua*

<sup>12</sup> Xerembiajyu kuery, penembyte tata hendy va'e rami pendeko a'ãarã ou teñ penhemondyi eme, mba'eta penemondyipaarã e'ÿ ou.

<sup>13</sup> Ha'e rami vy Cristo oiko axyague rami peë voi pendekuai axy vy pevy'a, hexakãa ojekuaa jave pevy'ave ete aguã.\*

\* **4:1** Romanos 6.1-4; Colossenses 3.1-10 \* **4:7** Mateus 24.42-44; Apocalipse 16.15 \* **4:8** Proverbios 10.12 \* **4:13** João 16.1-4; Tiago 1.2-4

<sup>14</sup> Cristo rery káuxa pendere ijayvua rei ramo ov'y'a ete va'e peiko, mba'eta pendere oĩ 'rã Nhanderuete Nhe'ẽ hexakãmba va'e.

<sup>15</sup> Ha'e gui peẽ kuery va'e regua nda'evei mava'eve rei pejojukaague py peiko axy aguã, e'ŷ vy penemondaague re, pejapo vai reiague re, neĩ joe pepena reiague re guive.

<sup>16</sup> Ha'e rã Cristo pegua peikoa re ri penemoingo axya rã pexĩ eme. Ha'e rami 'rãgue py perovy'a Nhanderuete, pendere Cristo rery oĩa re.

<sup>17</sup> Mba'eta ovaẽ ma ára Nhanderuete joe oikuua pota aguã. Ojeupeguia kuery re ranhe 'rã oikuua pota. Ha'e ramo nhande kuery re ranhe oikuua pota rire mba'exa 'rã tu ikuai Nhanderuete guigua ayvu porã rupi nonhe'ẽ rendui va'ekue?

<sup>18</sup> Mba'eta "Heko porã va'e ojexavaia py anho 'rã oo jepe, rire mba'exa 'rã tu ikuai Nhanderuete re ima'endu'a e'ŷ ha'e heko vai va'e kuery?" he'iague rami.\*

<sup>19</sup> Ha'e nunga rupi Nhanderuete oipotaa rami vy ikuai axy va'e guekove re topena uka imoingoare ojeroviapy va'e pe, ha'e iporã va'e rupi tema ta'ikuai guive.

## 5

### *Igreja re opena va'e kuery omongoetaague*

<sup>1</sup> Ha'e gui peẽ kuery regua igreja re pepena va'e kuery ju xee romoneta, mba'eta xee voi peẽ kuery rami avi aiko igreja kuery re apena va'e, ha'e Cristo oiko axyague amombe'u va'e, ha'e gui peẽ kuery reve aĩ avi 'rã hexakãa ojekuua javé.

<sup>2</sup> Pepena porã ke Nhanderuete rymba kuery pãvy opena uka va'ekue re.\* Ojapo uka ramo rive'ŷ pejapo, ha'e rã pejapoxea'ipy, Nhanderuete oipotaa rami ae. Peráta re rive'ŷ guive pejapo, ha'e rã penekyre'ŷa rupi.

<sup>3</sup> Pejokuai poyi eme pãvy opena uka va'ekue. Ha'e rami 'rãgue py peiko ha'e kuery voi peẽ rami ikuai aguã.

<sup>4</sup> Ha'e ramo Opena va'ety Yvateve ete va'e ojekuua ramo pejopy 'rã coroa hexakãmba va'e opa va'erã e'ŷ.

### *Omonogeta ha'e oxarura reve opaa py ogueroayvu porãague*

<sup>5</sup> Ha'e rami ae avi peẽ kunumigueve, pendekuai 'rã tujakueve oipotaa rami. Ha'e peẽ kuery ha'e javi, pendekuaia rupi pendejee pemoõ joegui penhemo'yvy'i've aguã. Mba'eta Nhanderuete opu'ã 'rã onhembovate rei va'e re, ha'e rã onhemo'yvy'i've pe ma oexa uka 'rã omboaxya.\*

<sup>6</sup> Ha'e nunga rupi penhemo'yvy'i Nhanderuete po'akaa guy py, ha'evea ára py penembovate ju aguã.

<sup>7</sup> Ipo py meme ke pemboaxa pendevoyi perekó va'e, mba'eta penemboaxya rupi 'rã opena pendere.

<sup>8</sup> Peiko kuaa pota ke, penheangu guive. Mba'eta penderovaigua anha ma pendeyvýry rupi oiko guary guembiarã oeka vy okororõ oikovy va'e rami avi.

<sup>9</sup> Pejeity uka eme ixupe, pejeroviaa re peĩ atã vy. Mba'eta peikuaa pende-irmão kuery yvy jave re ikuai va'e voi oendu avi okuapya peẽ pendekuai axya ramigua.

<sup>10</sup> Ha'e gui xapy'a'i pendekuai axy ma rire Nhanderuete penemoingo porã ju 'rã, penemoõ atã, penemombaraete ha'e penemombyta porã ju 'rã, mba'eta opa mba'e py nhanemboaxy va'e, ha'e Cristo re vy guexakãa imarã e'ŷ va'e pyguarã nhanerenoĩ va'ekue.

<sup>11</sup> Ha'e ae ta'ipo'akapa araka'e rã peve guarã. Amém.

<sup>12</sup> Irmão Silvano pe ma kova'e kuaxia ambopara uka pãvy. Ha'e va'e ma xee aikuua rami ojeroviapy oiko, peẽ kuery pe avi. Ayvu mbovy'i py ambopara uka. Romonetaa rupi teĩgue ju aipoa'e: Ha'e rami ae Nhanderuete nhanemboaxyanahetê va'e. Ha'e va'e re anho tema peĩ atã.

\* **4:18** Proverbios 11.31   \* **5:2** João 10.11-13, 21.15; Atos 20.28   \* **5:5** Proverbios 3.34, Lucas 18.9-14

<sup>13</sup> Babilônia py oiporavo pyre ikuai va'e avi oxarura uka peẽ kuery pe, xera'y Marcos voi.\*

<sup>14</sup> Pexarura peteĩ-teĩ pe pejoayvua rupi.

Tove Cristo re pendekuai va'e ha'e javive tapendu mby'a porã.

---

\* <sup>5:13</sup> Amongue py Roma tetã pe “Babilônia” 'ea 'rã.

## **Mokoīguea kuaxia Pedro ombopara va'ekue**

## **Mokoīguea kuaxia Pedro ombopara va'ekue**

Kova'e kuaxia py apóstolo Pedro ojapo Jesus Cristo remimbo'e kuery onheangu aguā. Mba'eta Jesus Cristo pegua igreja mbyte py ikuai nhombotavya rupi nhombo'e va'e. Mba'eta yma heta va'e kuery mbyte rupi profeta ramigua rive ikuaiague rami avi "peē kuery mbyte voi ikuai 'rā porombo'ea anhetē rupigua e'ŷ. Ha'e va'e kuery ma nhemi rupi 'rā omombe'u apu nhomombaarā. Senhor Ijoguaare Ipo'akapa va'e rovai eteve voi 'rā ijayvu. Ha'e ramia py o'áry ae ombou uka imomba vyvoiarā" (2.1b).

Ijayvu avi Jesus Cristo re jajeroviaa rupi nhaï atāve aguā, ha'e Jesus ou ju jave guarā nharō jaikovy aguā. Mba'eta "Senhor ára ma imonda va'e rami 'rā ou xapy'a. Ha'e va'e jave py yapu ratā reve yva okanhymba 'rā, ha'e mba'emo jaexa va'e okai vy ivaipa 'rā. Ko yvy ha'e mba'emo ojapo pyre ha'e javi 'rā okaipa. Ha'e nunga ha'e javi ha'e rami ete okanhymba aguā rami opyta ramo peē kuery pendeky'a e'ŷa rupi pota ke pendekuai Nhanderuete pe ete" (3.10-11).

### *Oxarura reve ijayvu vy omboypyague*

<sup>1</sup> Xee Simão Pedro ma Jesus Cristo rembiguai ha'e apóstolo-rā xemoī va'ekue. Axarura pēvy, mba'eta peē kuery voi peupity pejerovia aguā, Nhanderuete ha'e Nhandereraa jepea Jesus Cristo guigua teko porā rupi ome'ē va'ekue. Ha'e va'e ma ovare ete va'e.

<sup>2</sup> Tove opa mba'e py tapendu penemboaxyha'e mby'a porā, Nhanderuete ha'e nhande-Senhor Jesus Cristo peikuua porāvea rupi.

### *Cristo guigua jaexa uka aguā re ijayvua*

<sup>3</sup> Mba'eta Nhanderuete ma guevakāa ha'e gueko porāa jaupity aguā nhanerenoī ma vy opo'akaa rupi ome'ē avi nhanemoingo porāarā ha'e ixupe nhanemoingoarā regua ha'e javi. Nhanerenoīare jaikuua porāvea rupi jajopypa 'rā.

<sup>4</sup> Ha'e rami vy mba'emo ovare ha'e iporā ete va'e nhandevy ome'ē aguā re ijayvu, kova'e yvy re to'o oipota va'e nhanemongy'aarā oī va'e gui jaa jepe aguā, nhandere voi Nhanderuete py'a re oī va'e oī avi aguā.

<sup>5</sup> Ha'e nunga rupi ae penhea'ā pejeroviaa re pemoirū aguā pendereko porā aguā, ha'e pendereko porāa re pemoirū pene'arandua rupi pendekuai aguā,

<sup>6</sup> ha'e pene'arandua re pemoirū pejejoko aguā, ha'e pejejokoa re pemoirū peī atā aguā, ha'e peī atāa re pemoirū Nhanderuete pe ete peiko aguā,

<sup>7</sup> ha'e ixupe peikoa re pemoirū irmāo kuery pexaxe aguā, ha'e irmāo kuery pexaxe re pemoirū mborayvu re pendekuai aguā.

<sup>8</sup> Mba'eta pendere ha'e nunga oī, ha'e oīve ovu ri ramo nhande-Senhor Jesus Cristo peikuua porāvea rupi pexa uka 'rā penekyre'ŷ ha'e iporā va'e anho.\*

<sup>9</sup> Ha'e rā amongue re ha'e nunga noī ri ramo ára revegua e'ŷ, ha'e'i py oī va'e anho'i oexa va'e rami teri oiko, mba'eta hexarai ma ojejavyague gui oiky'a'oague re.

<sup>10</sup> Ha'e nunga rupi irmāo kuery, penhea'āve tema penerenoīague ha'e pendeporavoague pexa ukaa rupi. Ha'e rami vy 'rā neī peteīve henda py voi ndapejeity ukai.

<sup>11</sup> Ha'e rami rā nhande-Senhor Nhandereraa jepea Jesus Cristo po'akaa imarā e'ŷ va'e peupity rā penemovaē porā 'rā.

### *Apóstolo Pedro nhanemoma'endu'aa rupi ijayvuague*

<sup>12</sup> Ha'e nunga rupi pendere anhetē va'e oī va'e peikuua porā, ha'e nunga re peī atā guive teī ha'e nunga re romoma'endu'a aguā rami riae aiko.

---

\* <sup>1:8</sup> Filipenses 2.12,13

<sup>13</sup> Mba'eta kova'e oo'i re aikove teria ja ha'e nunga re romoma'endu'aa rupi xeayvu vy romokyre'ŷvexe.<sup>†</sup>

<sup>14</sup> Mba'eta xee aikuua rā kova'e oo'i areko va'e are'ŷ'i re aeja 'rā, nhande-Senor Jesus Cristo oikuua ukaague rami vy.

<sup>15</sup> Ha'e nunga rupi xee anhea'âve 'rā aa ma rire ha'e nunga ha'e javi re penema'endu'a aguã rami.

### *Nhanderuete ayvu anhetē etea re ijayvua*

<sup>16</sup> Mba'eta ore ma avakue akā gui rive'ŷ pêvy romombe'u va'ekue nhande-Senor Jesus Cristo po'akaa, ha'e ou jevy aguã regua guive. Ha'e rami 'rāgue py ipo'akaa ma ore ae rexa py roexa va'ekue.

<sup>17</sup> Mba'eta Nguuete gui ae ou raka'e omboetepaa aguã ha'e hexakāa. Mba'eta ixupe Hexakāmba va'e oayvu ombou vy "Kova'e ma Xera'y ayvu va'e, arov'y'a va'e", he'i va'ekue.

<sup>18</sup> Ha'e va'e ayvu yva gui onhendu rā ore voi roendu karamboae yvyty iky'a e'ŷ va'e áry hexeve orekuuaia py.\*

<sup>19</sup> Ha'e rami rire jaikuua porâve profeta kuery ayvu anhetē va'e memea, ha'e nhande-jee nhamoï atâve 'rā guive, mba'eta pytūa py tataendy rami nhanemoexakā 'rā ko'ẽmba peve, nhandep'y a re jaxy-tata ko'ẽ mbija ojekuaia peve.

<sup>20</sup> Po ramigua jypy'i jaikuua: Ipara iky'a e'ŷ va'e re ayvu ikuai va'e ma avakue akā gui rive'ŷ ou,

<sup>21</sup> mba'eta peteñve ayvu ndojekuaai raka'e profeta kuery ae oipotaa gui. Ha'e rami 'rāgue py Nhanderuete gui ae avakue [iky'a e'ŷ va'e] ijayvu raka'e, Nhe'ẽ Ky'a E'ŷ omo'arandu heravy rā.\*

## 2

### *Porombo'ea kuery anhetē rupigua e'ŷ opaga 'rāa re ijayvua*

<sup>1</sup> Heta va'e kuery mbyte rupi ikuai avi raka'e profeta ramigua rive. Peẽ kuery mbyte voi ikuai 'rā porombo'ea anhetē rupigua e'ŷ. Ha'e va'e kuery ma nhemi rupi 'rā omombe'u apu nhomombaarrā. Senhor Íjoguaare Ipo'akapa va'e rovai eteve voi 'rā ijayvu. Ha'e ramia py o'áry ae ombou uka imomba vyvoiarā.\*

<sup>2</sup> Heta 'rā ikuai avi ha'e kuery opa marā rei ikuia rupi. Ha'e ramo ha'e kuery káuxa ijayvu vaia 'rā tape anhetē va'e re.

<sup>3</sup> Ha'e kuery ma peráta re nda'eveive vy pendekore 'rā ijapua py. Ha'e rami teñha'e kuery mbopagaarrā yma guive omoï mbyre ndarei 'rā. Imombaarrā ma ndokei ae.

<sup>4</sup> Mba'eta anjo kuery eteve voi ojejavý ramo Nhanderuete nomboaxyi raka'e. Ha'e rami 'rāgue py yvy guy py nhuã oĩ va'e py omombo, yvykua pytū reia py omboty ombopaga aguã ára pygurarā.

<sup>5</sup> Ymagua kuery voi nomboaxyi vy Noé teko porā mombe'ua va'e anho ogueraa jepe raka'e, ha'e hexeve sete ju. Ha'e rā ko yvy regua heko vai va'e kuery áry ma yy ombou.

<sup>6</sup> Ha'e gui Sodoma ha'e Gomorra tetā ma tanhimbu rive omombyta. Ombovaipa ete raka'e, raka'eve rā heko vai va'e ikuai va'erā oikuua vy onheangu aguã.

<sup>7</sup> Ló anho ogueraa jepe. Ha'e va'e heko porā va'e ma nhonhe'ẽ rendu e'ŷ va'e kuery opa marā rei ikuia oexa vy nda'evei etea oendu raka'e.

<sup>8</sup> (Mba'eta ha'e kuery opa marā rei ikuia mbyte heko porā va'e oiko vy ko'ẽ nhavõ oexa ha'e oendu vy opy'a heko porā va'e py ojexavai.)

<sup>9</sup> Ha'e nunga rupi Senhor ogueraa jepe kuaa heko porā va'e ikuai axya gui, ha'e rā heko vai va'e kuery ma ikuai axy aguã py omboty 'rā oikuua pota aguã ára pygurarā.

\* **1:13** "Oo'i" he'ia ma guete'i re ae ijayvu vy (2 Coríntios 5.1-4). \* **1:18** Marcos 9.1-8 \* **1:21** 2 Timóteo 3.16,17

\* **2:1** 1 Timóteo 4.1,2; Judas 3-23

10 Ombopagave 'rã to'o oipotaa rami opa marã rei ikuai va'ekue, huvixa kuery onhe'ẽ rendua rupi e'ŷ guive. Ha'e kuery ma nhombojaru ha'e onhemboyvate rei va'e vy neĩ ipo'akakueve re ijayvu aguã voi ndokyjei.

11 Ha'e rã anjo kuery ma imbaraeteve ha'e ipo'akave va'eri huvixa kuery re nda'ijayvu vai 'rã Senhor renonde.

12 Ha'e rã nhombojaru rei va'e kuery ma mymba inharõ va'e ombo'a ha'e ojuka pyrã rami rive ikuai, mba'eta ijayvu vai 'rã oikuua e'ŷ va'e re voi. Ha'e ramo mymba opaa rami avi ha'e kuery voi omombaa 'rã.

13 Ha'e kuery ojexavai 'rã nhombojexavaiague py ae. Ha'e kuery ma ara py teĩ opa marã rei 'rã ovy'a okuapy to'o oipotaa rupi. Mba'emo iky'apa ha'e ivaikue rei va'e rami ikuai. Ha'e kuery ae 'rã onhemongy'a ojekorea py, peẽ kuery reve okaru okuapya pyve.

14 Joe oma'ẽ 'rã itavy reixea rupi anho, ndopytu'ui 'rã guive ojejavya gui. Ombotavy 'rã ikangy va'e, peráta re nda'eveive ha'e ayvu vaipy ra'y ikuai vy.

15 Tape hi'yvi porã va'e gui ojepe'a vy Beor ra'y Balaão oikoague rupi oo vy okanhymba, mba'eta ha'e va'e ma teko vai rupi mba'emo ojoupa va'erã re anho nda'eveive raka'e.

16 (Ha'e rami avi opaga raka'e ojejavague re. Profeta oiko va'eri hymba ovoyi va'ety avakue ayvu py ijayvu ixupe, o'arandua rupi e'ŷ oiko ta ramo ojokoxe vy.)

17 Ha'e kuery ma ygua ipirupa va'e rami ikuai, yvyxĩ yvytu ogueraapa rive va'e rami guive. Pytãa rupi guarã rive ikuai.

18 Mba'eta onhemboyvate reia rupi ijayvu, ha'e to'o oipotaa rami ikuai vy ombotavy 'rã gueko vaiaty gui oo jepexe va'e.

19 "Escravo ve'ŷ ma peiko", he'i teĩ ha'e kuery ae imongy'apaa pegua escravo ikuai. Mba'eta jajeity uka vy nhandereityare pegua escravo japyta.

20 Mba'eta amongue ma Senhor Nhandereraa jepea Jesus Cristo oikuua, ha'e ko yvy regua nhomongy'apa reia gui oo jepe teĩ ha'e nunga pyve ju 'rã ojekore ha'e ojeity uka. Ha'e rami rire jypy guare gui nda'eveive 'rã opaa py.

21 Ha'e kuery pe ha'eveve 'rãgue teko porã katyguia tape ndoikuuai ma voi va'e rire. Mba'eta oikuua teĩ ojapo uka pyre iky'a e'ŷ va'e gui ojepe'a vy ha'ekue py ju ojevy.

22 Ha'e kuery re oiko ayvu "Jagua ojevy 'rã ha'e ae ombojevyague py, ha'e poryko ojoia porã teĩ ojevy ju 'rã yapo py onhemou'ũ aguã rive", he'i va'e.\*

### 3

#### *Senhor ou jevy aguã ára re ijayvua*

1 Xerembiayvu kuery, kova'e kuaxia ma mokoïguea ma pãvy ambopara. Mokoïve ma mba'emo re romoma'endu'a aguã rupi ambopara, pene'arandu ae teĩ.

2 Ha'e rami rã penema'endu'a aguã profeta iky'a e'ŷ va'e kuery yma ijayvuague re, ha'e Senhor Nhandereraa jepea ojapo uka va'ekue re guive, peẽ kuerya rupi apóstolo kuery penembo'egue rami ae.

3 Jypy'i peikuuaa pota pova'e nunga re: Opaa ára py ikuai 'rã porojajai rei va'e. Nhandedojajai reia rupi 'rã ikuai, ha'e kuery ae oipotaa rami rive.

4 Ha'e rami vy aipoe'i 'rã: "Mba'eda tu oiko Cristo ou jevy aguã re ijayvuague? Mba'eta nhaneramoï kuery omano guive ha'ekue rami ae tema opa mba'e ikuai, ko yvy onhonoa guive", he'i 'rã.

5 Ha'e rami teĩ ha'e kuery hexarai potae pova'e nunga gui, mba'eta yma Nhanderuete oayvu gui rive omoingo raka'e yva ha'e yvy. Yvy ma ojapo raka'e yy gui ojekuua aguã rami, yy mbyte rupi gui ae.

6 Ha'e va'e rupi ae ju ha'e va'e javegua yvy omomba, yy ombou vy.

\* 2:22 Provérbios 26.11

**7** Ha'e gui aŷ yva ha'e yvy itui va'e ma Nhanderuete oayvu rupi ae ju omombyta tata py okaipa aguã. Joe oikuaa pota ha'e heko vai va'e kuery ombopaga aguã ára pyguarã omombyta.

**8** Ha'e rami avi xerembiayvu kuery, peteĩ mba'e oĩ penderexarai e'ŷ aguã: Senhor pe rã peteĩ ára mil ma'etŷa rami, ha'e rã mil ma'etŷa ma peteĩ ára rami rive oaxa.

**9** Ha'e nunga rupi Senhor ndarei ijayvuague ojapo aguã, amongue "Are ete ma" he'i teĩ. Ha'e rami 'rãgue py nhanerarõ are oikovy. Ndoipotai peteĩve nhakanhy, ha'e rã nhande ha'e javive jahekero rerova.\*

**10** Ha'e gui Senhor ára ma imonda va'e rami 'rã ou xapy'a. Ha'e va'e jave py yapu ratã reve yva okanhymba 'rã, ha'e mba'emo jaexa va'e okai vy ivaipa 'rã. Ko yvy ha'e mba'emo ojapo pyre ha'e javi 'rã okaipa.\*

**11** Ha'e nunga ha'e javi ha'e rami ete okanhymba aguã rami opyta ramo peẽ kuery pendeky'a e'ŷa rupi pota ke pendekuai Nhanderuete pe ete.

**12** Nhanderuete ára pearõa rupi pejapo ovaẽ voive aguã rami. Ha'e va'e jave py yva voi hendy vy ivaipa 'rã, ha'e mba'emo jaexa va'e okai vy hykupa 'rã.

**13** Ha'e rã nhande kuery ma ijayvuague rami vy yva pyau ha'e yvy pyau nharõ jakuapy, teko porã renderã.\*

### *Senhor nharõ vy ipara re nhanhembo'e aguã re ijayvua*

**14** Ha'e nunga rupi xerembiayvu kuery, ha'e nunga pearõ vy penhea'ã tema pejexa uka aguã peteĩ rami ikuai va'e, iky'a e'ŷ va'e ha'e ojou vai pyrã e'ŷ.\*

**15** Penema'endu'a nhande-Senhor jogueraa jepexe vy nhoarõ area re. Ha'e nunga re nhanerembiayvu irmão Paulo voi omo'aranduague rami vy ombopara pêvy.

**16** Ha'e va'e ijayvu ha'e kuaxia ombopara va'e ha'e javi re ma ha'e ramigua oĩ. Ha'e rami avi amongue henda py oĩ jaikuua aguã haxyve va'e. Ha'e ramo oikuua e'ŷ rei ha'e ikangy va'e kuery ma ha'e nunga oexa vy ha'eve'ŷa rami 'rã oikuua, ipara iky'a e'ŷ va'e mboae re oĩ va'e voi ha'e kuery ndoikuuai reia rami avi. Ha'e ramia py ha'e kuery okanhy aguã katy oo.

**17** Ha'e rã peẽ xerembiayvu kuery, ha'e nunga peikuua ma voi vy penheangu. Penhembotavy uka eme Senhor nhe'ẽ rendu e'ŷa kuery pe, penembaraetea rupi pendekuaia gui pejeity uka e'ŷ aguã.

**18** Ha'e rami 'rãgue py penembaraeteve tema peovy nhande-Senhor Nhandereraa jepea Jesus Cristo penemboaxyu rupi, ha'e peikuua porãvea py. Ha'e ae toguerovy'aa aŷ ha'e araka'e rã peve.

---

\* **3:9** Lucas 13.6-8   \* **3:10** Mateus 24.29-31; Apocalipse 21.1-8   \* **3:13** Isaías 65.17   \* **3:14** 1 João 3.2,3

## Jypy'i kuaxia Joāo ombopara va'ekue Jypy'i kuaxia Joāo ombopara va'ekue

Apóstolo Joāo aipoe'i: “Pova'e ayvu peē kuery pe ambopara peikuua aguā pendere tekove marā e'ŷ oĩa, Nhanderuete Ra'y rery rupi pejerovia va'e re ae” (5.14).

Marā rami vy 'rā nda'u jaikuua nhandere tekove marā e'ŷ oĩa? Jaikuua 'rā jajejavya nhamombe'u ha'e jaejapa vy (1.8-9), Jesus ojapo uka va'ekue rupi nhandekuai vy (2.3), Jesus oikoague rami nhande voi nhandekuai vy (2.6), irmão kuery jayvu vy (2.9-11), Jesus reveguia jaikoa rami nhanhemombe'u porā vy (2.23), ha'e teko porā rupi jaiko vy (2.29). Jesus Cristo re jajerovia vy 'rāe jaupity tekove marā e'ŷ: “Nhandevy Nhanderuete ome'ẽ tekove marā e'ŷ, ha'e tekove ma Ta'y re oĩ. Ha'e nunga rupi amongue Nhanderuete Ra'y reve ikuai ramo ha'e kuery re oĩ tekove. Ha'e rā Ta'y reve e'ŷ ikuai ramo ma ha'e kuery re tekove noĩ” (5.11-12).

*Ayvu Tekove me'ẽa ha'e Nhanderuete reve peteĩ rami nhandekuaia re ijayvua*

<sup>1</sup> Jypy'i guive roendu va'ekue, orerexa py ae roexa ha'e hexe ropoko guive va'ekue ma Ayvu Tekove me'ẽa.\*

<sup>2</sup> Mba'eta Tekove me'ẽa ojekuua rā ore roexa rire imombe'uarā roiko. Ha'e rami vy pendevy pe ju romombe'u. Ha'e va'e ma Tekove marā e'ŷ me'ẽa, Nguu reve oiko va'ekue ri orevy ju ojekuua karamboae.

<sup>3</sup> Roexa ha'e roendu va'ekue ma pendevy pe ju romombe'u, peē kuery voi orereve peteĩ rami nhandekuai aguā. Mba'eta ore ma Tuu ha'e Ta'y Jesus Cristo reve ae orekuai.

<sup>4</sup> Ha'e va'e rombopara pēvy opa mba'e py javy'a aguā.

*Nhanderuete rexakāa rupi nhandekuai aguā jajejavya nhamombe'upa aguā re ijayvua*

<sup>5</sup> Ha'e gui ayvu ixugui roendu va'ekue, ha'e pēvy ju romombe'u va'e ma pova'e: Nhanderuete ma hexakāa va'e, hexe ma neĩ peteĩ henda py noĩ pytūa.

<sup>6</sup> Xapy'a rei “Xee ma Nhanderuete reve aiko” ja'e teĩ pytūa rupi jaiko vy ma nhan-deapu, anhetē va'e rupi e'ŷ jaiko.

<sup>7</sup> Ha'e rami teĩ guexakāa rupi ha'e oikoa rami avi nhande voi hexakāa rupi jaiko ri vy peteĩ rami 'rā nhandekuai jomeme, ha'e Ta'y Jesus ruguy nhandeky'a'o 'rā jajejavya ha'e javi gui.

<sup>8</sup> Ha'e rā “Xere ma neĩ peteĩ henda py jejavya noĩ” ja'e ri vy nhande ae jajekore, ha'e nhandere anhetē va'e noĩ.

<sup>9</sup> Ha'e gui jajejavya nhamombe'upa ramo ma Nhanderuete heko porā ha'e ojeroviapy va'e vy ombogue 'rā jajejavvyague, ha'e nhandeky'a'o 'rā teko vai ha'e javi gui.

<sup>10</sup> Xapy'a rei “Xee ma ajejavvy va'e'ŷ” ja'e vy ixupe “Ijapu va'e” ja'e, ha'e nhandere ijayvu noĩ.

## 2

<sup>1</sup> Xera'y kue'iry, ha'e rami ambopara pejejavy e'ŷ aguā. Ha'e rami avi xapy'a rei amongue ojejavvy ramo ma Nhanderuetea py peteĩ oiko nhanepytyvõarā. Ha'e va'e ma Jesus Cristo, heko porā va'e.

<sup>2</sup> Ha'e ma jajejavvyague re opaga va'ekue. Nhande jajejavvyague re anho e'ŷ opaga raka'e, ha'e rā yvy jave regua ojejavvyague re.

<sup>3</sup> Ha'e ojapo uka va'e rupi jaiko vy jaikuua 'rā jaikuua va'e jaikoa.

<sup>4</sup> Ha'e nunga rupi amongue “Xee aikuua” he'i teĩ ha'e ojapo uka va'e rupi ndoikoi va'e ma ijapu, ha'e hexe noĩ anhetē va'e.

---

\* **1:1** João 1.1-3, 14

<sup>5</sup> Ha'e rã ijayvua rupi jaiko vy 'rãe anhetẽ Nhanderuete jayvu aguã va'e rami ete jayvu. Ha'e rami vy ae 'rã jaikuaa hexe nhaña.

<sup>6</sup> "Xee ma hexe aĩ" he'i va'e ma ha'e oikoague rami ae toiko.

### *Ayvu yma guare ha'e ipyau va'e re ijayvua*

<sup>7</sup> Xerembiayvu kuery, ayvu ipyau va'e'ý ambopara pãvy, ha'e rã yma ojapo uka pyre jypy'i guive pendu va'ekue, mba'eta yma guive ojapo uka pyre ma ayvu pendu va'ekue ae.\*

<sup>8</sup> Ha'e rami avi ojapo uka pyre ambopara va'e ma ipyau guive, mba'eta Jesus Cristo ranhe anhetẽ va'e rupi oiko rire peẽ kuery ju ha'e va'e rupi peiko. Mba'eta pytã oaxa ma ovv, ha'e hendy va'e anhetẽ va'e ju hexakã ouvy.

<sup>9</sup> Amongue "Xee hexakãa rupi aiko" he'i teñ o-irmão ndoayvui va'e ma pytã rupi teri oiko.

<sup>10</sup> Ha'e rã o-irmão kuery oayvu va'e ma hexakãa rupi oiko, ha'e hexe noĩ joityarã.

<sup>11</sup> Ha'e rã o-irmão ndoayvui va'e ma pytã reia rupi oiko, marã katy pa ooa voi ndoikuaai, pytã oexa mbogue rã.

### *Kyr̄gue'i, tujakue ha'e ipyaukue pe ijayvua*

<sup>12</sup> Xera'y kue'iry, pãvy ambopara mba'eta pejejavvyague omboguepaa ma hery rupi.

<sup>13</sup> Ha'vy peẽ tujakue, pãvy ambopara mba'eta peikuua ma jypy'i guive oiko va'e. Ha'e ipyaukue, pãvy ambopara mba'eta pendepo'aka ma poromboeko vaia re.

<sup>14</sup> Xera'y kue'iry, pãvy ambopara mba'eta peikuua ma Nhanderuete. Ha'e tujakue, pãvy ambopara mba'eta peikuua jypy'i guive oiko va'e. Ipyaukue, pãvy ambopara mba'eta penembaraete ha'e pendere Nhanderuete ayvu oĩ ramo pendepo'aka ma poromboeko vaia re.

### *Kova'e yvy regua reko re ijayvua*

<sup>15</sup> Peayvu eme ko yvy regua reko, neĩ mba'emo yvy re ikuai va'e. Mba'eta yvy regua reko rayvua kuery re ma Nhanderuete rayvua noĩ.

<sup>16</sup> Mba'eta mba'emo yvy re ikuai va'e ma yvy regua meme: to'o oipota va'e, mba'emo jaexa vy jaipotapa reia, ha'e nhandejee ae rive jajeroviaa. Ha'e nunga ma yvy guigua meme, Nhanderuete guigua e'ý.

<sup>17</sup> Ko yvy ma opa'rã, to'o oipota va'e ha'e javi reve. Ha'e rã Nhanderuete oipota va'e ojapo va'e ma oikove riae'rã.

### *Cristo ramigua rive ikuai va'e re ijayvua*

<sup>18</sup> Xera'y kue'iry, ovaẽ ma opa aguã ára, Cristo ramigua rive ojekuaa aguã. Pendu ma omombe'ua rã ha'e va'e ou 'rãa. Aý voi heta ma ikuai Cristo ramigua rive. Ha'e nunga rupi ae jaikuaa opa aguã ára ovaẽ maa.

<sup>19</sup> Ha'e kuery ma nhande kuery mbyte gui ojepe'a va'ekue, nhande regua e'ý vy. Mba'eta nhande regua ikuai va'e rire opyta'rãgue nhande kuery reve. Ha'e gui ha'e kuery ojepe'a ramo jaikuaa nhande regua e'ý ikuai.

<sup>20</sup> Ha'e rã pendere ma oĩ penemo'aranduarã Iky'a e'ý va'e omoĩ va'ekue. Ha'e rami rire peẽ kuery peikuuaapa.

<sup>21</sup> Kova'e kuaxia pãvy ambopara "Anhetẽ va'e ndapeikuaai" ha'e vy e'ý. Mba'eta peikuua ae, ha'e peikuua avi apu ikuai va'e anhetẽ va'e guigua e'ýa.

<sup>22</sup> Ha'e gui ijapu va'e ma "Jesus ae Cristo oiko" nde'i va'e. Ha'e nunga ma Cristo ramigua rive, mba'eta Tuu neĩ Ta'y re ndojeroviai va'e.

<sup>23</sup> Ha'e nunga rupi Nhanderuete Ra'y pe "Xee ma hexeveguia e'ý" he'i va'e re ma Tuu noĩ. Ha'e rã "Nhanderuete Ra'y reveguia ae xee" he'i va'e re ma Tuu avi oĩ.

<sup>24</sup> Pendere toĩ riae jypy'i guive pendu va'ekue. Mba'eta jypy'i guive pendu va'ekue pendere oĩ ramo ma peẽ voi'rã peĩ Nhanderuete ha'e Ta'y re.

\* 2:7 João 13.34

25 Mba'eta ijayvu tekove marã e'ŷ ome'ẽ aguã re nhandevy.

26 Ha'e nunga ambopara penembotavyxea kuery gui penheangu aguã.

### *Nhe'ẽ Ky'a E'ŷ nhanembo'ea re ijayvua*

27 Ha'e gui pendere ojeguigua omoõ va'ekue oĩ riae ramo penembo'earã mboae oĩ e'ŷ teĩ ha'eve, mba'eta pendere omoõ mbyre ae 'rã penembo'e opa mba'e re. Ha'e va'e ma anhetẽ rupigua ae, anhetẽ rupigua merami rive'ŷ. Peĩ riae ke hexe, penembo'eague rami vy ae.

28 Ha'e gui aŷ xera'y kue'iry, peĩ atã tema hexe. Ha'e rami vy ha'e ojekuaa jevy ramo nhandepy'a guaxu, ha'e ixugui nhaximba reve nhanhemi e'ŷ aguã ou jevya py.

29 Cristo heko porã va'ea jaikuua vy jaikuua avi teko porã rupi ikuai va'e ixugui oiko va'ekue memea.

## 3

### *Cristo iky'a e'ŷa rami nhande voi nhandekuai aguã re ijayvua*

1 Peikuuaa pota Nhanderuete nhanderayvu etea re, nhandevy "Xera'y kuery" he'ia py. Anhetẽ ae Nhanderuete ra'y kuery nhandekuai.\* Ha'e nunga rupi ae yvy regua kuery nanhandekuaai, mba'eta Cristo voi ndoikuuai okuapy rire.

2 Xerembiayvu kuery, aŷ voi Nhanderuete ra'y kuery nhandekuai. Ha'e rami teĩ ndajaikuuai teri raka'eve rã marã ramigua ete pa jaiko 'rãa. Ha'e rã peteĩ mba'e ma jaikuua porã: Cristo ojekuaa ramo nhande voi 'rã heko rami jaiko, mba'eta jaexa 'rã marã rami ete pa ha'e oikoa.

3 Ha'e rami aguã oarõ okuapy va'e ha'e javi ojeky'a'o uka 'rã ha'e iky'a e'ŷa rami avi ikuai aguã.

4 Ha'e rã jejavya rupi ikuai va'e ma lei rovai rupi avi ikuai, mba'eta jejavya ma lei rovai ae.

5 Peikuuaa avi Cristo ou raka'e jajejavva oipe'apa aguã. Hexe ma jejavy noĩ.\*

6 Hexe ikuai va'e ma ndojejavy riaevei ma 'rã. Ha'e rã jejavya rupi ikuai va'e ma ndoexai, neĩ ndoikuuai okuapy.

### *Nhanderuete guigua ha'e anha guigua re ijayvua*

7 Xera'y kue'iry, penhembotavy uka eme avave rei pe. Teko porã rupi ikuai va'e ma heko porã va'e ae, Cristo heko porã va'ea rami avi.

8 Ha'e rã jejavya rupi ikuai va'e ma anha guigua, mba'eta anha jypy'i guive ojejavva raka'e. Ha'e rami aguã ae Nhanderuete Ra'y ou, anha rembiapo ombovaipa aguã.

9 Ha'e javi Nhanderuete gui oiko va'ekue ma ndojejavy riaevei ma 'rã, mba'eta ha'e kuery re oĩ Nhanderuete guigua. Ha'e kuery ndojejavy riaevei 'rãa, Nhanderuete gui oiko rire.

10 Po rami 'rã jaikuua mava'e pa Nhanderuete ra'y kuery ha'e anha ra'y kuery ikuia. Teko porã rupi nda'ikuai va'e ma Nhanderuete guigua e'ŷ, ha'e o-irmão kuery ndoayvui va'e guive.

### *Irmão kuery jayvu ete aguã re ijayvua*

11 Ha'e gui ayvu jypy'i guive pendu va'ekue ma pova'e: Peteĩ-teĩ jajoayvu aguã.

12 Caim oikoague rami e'ŷ 'rã nhandekuai, mba'eta ha'e va'e ma poromboeko viaia guigua oiko rire ojuka raka'e guyvy. Mba'e re nda'u ojuka? Mba'eta heko vai va'e oiko, ha'e rã tyvy ma heko porã va'e.\*

13 Irmão kuery, penhemondyi eme yvy regua kuery pendere nda'ija'ei rã.

14 Irmão kuery jayvu vy ae 'rã jaikuua manoia gui tekove jaupity aguã re jaaxa maa.\* Ha'e rã ndoayvui va'e ma manoia py teri ikuai.

<sup>15</sup> Irmão kuery re nda'ija'ei va'e ma jojuka va'ety meme ikuai. Ha'e peikuaa jojuka va'ety re tekove marā e'ŷ noña.

<sup>16</sup> Po rami ae jaikuaa mborayvu, Cristo nhanderayvu vy nhandere guekove ome'ẽ rire. Ha'e ramo nhande kuery avi 'rā nhanderekove nhamer'ē irmão kuery re.

<sup>17</sup> Ha'e gui xapy'a rei amongue mba'emo kova'e yvy rupigua oguerekopa rei va'e o-irmão ojexavai rei rā oexa teĩ ipy'a mbaraete 'rā oipytyvō e'ŷ aguā. Ha'e nunga re mba'exa tu oĩ Nhanderuete guigua porayvua?

<sup>18</sup> Xera'y kue'iry, nda'evei jajoayvu merami aguā, nhandeayvu py rive. Jaexa uka ete ke jajoayvua, nhanhopytyvōa py ae.

<sup>19</sup> Po rami 'rā jaikuaa anhetē va'e guigua jaiko va'ea, henonde nhandepy'a guaxu aguā ndajaikuai reia gui.

<sup>20</sup> Ha'e rami avi nhandepy'a py nhanembopagaarā nhaendu teĩ nhandepy'a gui Nhanderuete hi'aranduve va'e vy opa mba'e oikuaa.

<sup>21</sup> Xerembiayvu kuery, nhandepy'a py nhanembopagaarā nanhaendui ri vy nhandepy'a guaxu 'rā Nhanderuete renonde.

<sup>22</sup> Ha'e rami vy mba'emo re jajerurea voi jajopy 'rā ixugui, mba'eta henonde ojapo uka va'e rupi jaiko vy nhambovy'a.

<sup>23</sup> Po rami ae ha'e ojapo uka va'ekue: Ta'y Jesus Cristo rery rupi jajerovia aguā, ha'e peteĩ-teĩ jajojayvu aguā ijayvuague rami vy.

<sup>24</sup> Nhanderuete ojapo uka va'e rupi ikuai va'e ma hexe anho tema ikuai, ha'e gui ha'e kuery re ma Nhanderuete voi oĩ. Po rami 'rā jaikuaa nhandere oĩ, Inhe'ẽ nhandere omoĩ va'ekue gui ae.

## 4

### 1 João 2.18-26; 2 João 7-11

<sup>1</sup> Xerembiayvu kuery, nda'evei perovia aguā nhe'ẽ guigua ayvu va'e ma guive rā. Peikuaa pota ranhe nhe'ẽ kuery anhetē Nhanderuete guigua tyrā pa anya re, mba'eta heta ma ikuai profeta ramigua rive yvy re.

<sup>2</sup> Po rami jaikuaa 'rā Nhanderuete Nhe'ẽ, mba'eta "Jesus Cristo ngo'o reve ou va'ekue re ajerovia" he'i va'e ma Nhanderuete guigua meme.

<sup>3</sup> Ha'e rā "Jesus reveguia aiko" nde'i va'e ma Nhanderuete guigua e'ŷ, ha'e rā Cristo ramigua nhe'ẽ rive. Pendu ma ha'e nunga oiko 'rāa, ha'e gui aŷ voi oiko ae ma yvy re.

<sup>4</sup> Xera'y kue'iry, peẽ kuery ma Nhanderuete guigua pendekuai vy pendepo'aka ma profeta ramigua kuery re, mba'eta pendere oĩ va'e ma yvy regua kuery re oĩ va'e gui ipo'akave.

<sup>5</sup> Ha'e kuery ma yvy regua ikuai va'e vy yvy gui rive 'rā ijayvu, ha'e ramo yvy regua kuery ojapyxaka 'rā ijayvua re.

<sup>6</sup> Ha'e rā nhande kuery ma Nhanderuete guigua nhandekuai ramo Nhanderuete oikuaa va'e kuery ojapyxaka 'rā nhandeayvua re. Ha'e rā Nhanderuete guigua e'ŷ ma ndojapyx-akai 'rā okuapy. Ha'e rami rā jaikuaa 'rā nhe'ẽ anhetē rupi, tyrā pa nhombotavya rupi ijayvu va'ea.

### Jajoayvu aguā re ijayvua

<sup>7</sup> Xerembiayvu kuery, jajoayvu peteĩ-teĩ, mba'eta mborayvu ma Nhanderuete guigua ae. Porayvu va'e ma Nhanderuete guigua meme ikuai, ha'e oikuaa guive Nhanderuete.

<sup>8</sup> Ha'e rā joayvu e'ŷ va'e ma ndoikuai Nhanderuete, mba'eta Nhanderuete ma mborayvu rupigua ae.

<sup>9</sup> Po rami Nhanderuete oexa uka raka'e nhanderayvua, Gua'y peteĩ'i va'e ombou vy, hexe vy jaikove riae aguā.

<sup>10</sup> Pova'e py ma mborayvu ojekuaa: Nhanderuete jayvua py e'ŷ, ha'e rā ha'e ranhe nhanderayvua py, mba'eta Gua'y ombou jajeavyague re opaga aguā.

<sup>11</sup> Xerembiayvu kuery, ha'e rami Nhanderuete nhanderayvu rire nhande kuery avi 'rā jajoayvu peteĩ-teĩ.

<sup>12</sup> Avave rei ndoexaai teri Nhanderuete. Ha'e rami avi jomeme jajoayvu ramo ma Nhanderuete oĩ 'rā nhandere, ha'e iporayvua ojekuaa 'rā va'ekue ojekuaapa 'rā.\*

<sup>13</sup> Po rami jaikuua 'rā hexe nhaĩa, ha'e ha'e voi nhandere oĩa, mba'eta nhandereve guarã ombou Onhe'ẽ.

<sup>14</sup> Ha'e ore kuery roexa ha'e romombe'u guive Nhanderuete Gua'y ombouague yvy re ikuai va'e reraa jepearã.

<sup>15</sup> "Jesus ma Nhanderuete Ra'y" he'i va'e re ma Nhanderuete oĩ. Ha'e kuery voi ikuai Nhanderuete re.

<sup>16</sup> Nhande kuery jaikuua ha'e jarovia guive Nhanderuete nhanderayvua. Nhanderuete porayvua rupi oiko va'e ramo porayvu rupigua ikuai va'e ma hexe meme ikuai, ha'e ha'e kuery re Nhanderuete avi oĩ.

<sup>17</sup> Ha'e ramo nhanderayvua jaikuua porã vy nhandep'y a guaxu 'rā pavẽ re oikuua potaa ára py voi, mba'eta kova'e yvy re jaiko reve ma voi nhandekuai ha'e oikoa rami.

<sup>18</sup> Hembiajyvu jaiko vy ndajakyje rei 'rā, mba'eta opa mba'e py nhanderayvua oipe'a 'rā jakyjea. Mba'eta jakyjea ma japaga aguã rami jaikoa py anho 'rā nhaendu. Ha'e nunga rupi okyje va'e ma ndoikuua porãi teri nhanderayvua.

<sup>19</sup> Nhande kuery jajoayvu mba'eta ha'e ranhe nhanderayvu rire.

<sup>20</sup> Amongue "Xee ayvu Nhanderuete", he'i va'eri irmão kuery ndoayvui va'e ijapu. Mba'eta o-irmão oexa va'e ndoayvui vy Nhanderuete oexa e'ŷ va'e katuve ma ndoayvui 'rā.

<sup>21</sup> Pova'e ayvu nhaendu ixugui: Nhanderuete oayvu va'e ma toayvu avi o-irmão kuery.

## 5

### *Yvy rupigua re nhandepo'aka aguã re ijayvua*

<sup>1</sup> Jesus ae Cristo oikoa oguerovia va'e ma Nhanderuete gui oiko va'ekue meme. Ha'e Nhanderuete oayvu va'e kuery oayvu avi 'rā ixugui oiko va'ekue mboae.

<sup>2</sup> Po rami jaikuua Nhanderuete ra'y kuery jayvua, mba'eta Nhanderuete jayvu vy ojapo uka va'e rupi nhandekuai.

<sup>3</sup> Mba'eta Nhanderuete ojapo uka va'e rupi nhandekuaia py ae 'rā jaexa uka jayvua.\* Ha'e ojapo uka va'e ma nda'ipoyi guive,

<sup>4</sup> mba'eta ha'e javi Nhanderuete gui jaiko va'ekue ma nhandepo'aka 'rā yvy rupigua re. Po rami 'rā nhandepo'aka yvy rupigua re, jajeroviaa rupi ae.

<sup>5</sup> Mava'e kuery nda'u ipo'aka 'rā yvy rupigua re? Jesus Nhanderuete Ra'y oikoa oguerovia va'e kuery anho.

### *Jesus reko regua kuaa ukaa re ijayvua*

<sup>6</sup> Jesus Cristo ou vy yy ha'e nguguy py ojekuaa uka raka'e. Yy py anho e'ŷ ojekuaa uka, ha'e rā yy ha'e nguguy py. Ha'e gui Nhe'ẽ avi oiko ikuua ukaarã, mba'eta Nhe'ẽ ma anhetẽ va'e kuaa ukaa ae.

<sup>7</sup> Mba'eta ikuua ukaa mboapy ikuai [yva re: Nhanderuete, Jesus ha'e Nhe'ẽ Ky'a E'ŷ. Ha'e mboapyve ma peteĩ'i.

<sup>8</sup> Ha'e gui ikuua ukaa mboapy avi ikuai yvy re:] Nhe'ẽ, yy ha'e huguy. Mboapyve ma peteĩ rami meme oikuua uka.

<sup>9</sup> Ha'e gui avakue ayvu jarovia vy Nhanderuete ayvu katuve ma jarovia. Po rami Nhanderuete oikuua uka Gua'y reko regua.

<sup>10</sup> Nhanderuete Ra'y re ojerovia va'e kuery re ae 'rā ikuua ukaa oĩ. Ha'e rā Nhanderuete ayvu ndogueroviai va'e ma ixupe "Ijapu va'e" he'i, mba'eta Gua'y reko regua Nhanderuete oikuua uka rā ndogueroviai.

\* 4:12 João 1.18 \* 5:3 João 14.15

<sup>11</sup> Mba'eta oikuaa uka va'ekue ma pova'e ae: Nhandevy Nhanderuete ome'ẽ tekove marã e'ŷ, ha'e tekove ma Ta'y re oĩ.

<sup>12</sup> Ha'e nunga rupi amongue Nhanderuete Ra'y reve ikuai ramo ha'e kuery re oĩ tekove. Ha'e rã Ta'y reve e'ŷ ikuai ramo ma ha'e kuery re tekove noĩ.\*

### *Mba'emo re jajerure aguã re ijayvua*

<sup>13</sup> Pova'e ayvu peẽ kuery pe ambopara peikuaa aguã pendere tekove marã e'ŷ oĩa, Nhanderuete Ra'y rery rupi pejerovia va'e re ae.

<sup>14</sup> Nhanderuete re jajerovia vy jaikuua avi ixupe mba'emo re jajerure ramo oendu 'rãa, ha'e oipotaa rami ri jajerure ramo.

<sup>15</sup> Jajerurea oendua jaikuua vy jaikuua avi jajerureague ome'ẽ ma 'rãa.

<sup>16</sup> Ha'e gui xapy'a rei amongue oexa 'rã o-irmão omano aguã rami e'ŷ ojejavy rã. Ha'e rami vy ha'e va'e re ojerure 'rã, ha'e ramo Nhanderuete omoingove ju 'rã, omano aguã rami e'ŷ ojejavy ramo. Mba'eta oiko avi teko vai nhamano aguã rami nhanemoingo va'erã. "Ha'e nunga re pejerure" nda'ei.

<sup>17</sup> Teko vai ma guive rã jejavya meme. Teĩ oiko avi teko vai nhamano aguã rami nhanemoingo va'erã e'ŷ.

<sup>18</sup> Jaikuua ha'e javi Nhanderuete gui oiko va'ekue ndojejavy riaevei ma 'rãa. Mba'eta ha'e kuery re Nhanderuete gui jypy'i oiko va'ekue opena 'rã poromboeko vaia oity e'ŷ aguã.

<sup>19</sup> Jaikuua nhande kuery Nhanderuete guigua nhandekuaia, ha'e rã yvy regua kuery ma poromboeko vaia re ikuaria.

### *Omongeta reve opaa py ijayvuague*

<sup>20</sup> Jaikuua avi Nhanderuete Ra'y ou vy nhanemo'arandu anhetẽ va'e jaikuua aguã rami. Ha'e rami rire ma anhetẽ va'e re nhaĩ, Ta'y Jesus Cristo re ae. Ha'e va'e ma Nhanderuete anhetẽ va'e ha'e tekove marã e'ŷ me'ëa.

<sup>21</sup> Xera'y kue'iry, penheangu ke Nhanderuete ramigua rive pembojerovia e'ŷ aguã.

## **Mokoīguea kuaxia João ombopara va'ekue Mokoīguea kuaxia João ombopara va'ekue**

Kova'e kuaxia apóstolo João ombopara va'ekue peteī kunha pe, imemby kuery pe guive. Ijayvu anhetē va'e rupi ikuai aguā, mborayvu re guive. Anhetē va'e ma Jesus Cristo regua ae, mba'eta “Cristo regua rami e'ŷ nhombo'ea, ha'e ayvu porā gui ojepe'a va'ekue re ma Nhanderuete noī. Ha'e rā ha'e va'e ayvu nhanembo'egue rupi riae ikuai va'e re ma Nhanderuete ha'e Ta'y oī” (versículo 9).

### *Oxarura reve ijayvu vy omboypyague*

<sup>1</sup> Xee igreja re apena va'e ma axarura ndevy, xereindy Nhanderuete ojeupe guarā ndeporavo va'ekue pe, ha'e nememby kuery xerembiayvu ikuai avi va'e pe. Xee anho e'ŷ roayvu, anhetē va'e oikuua va'e kuery ha'e javi guive,

<sup>2</sup> mba'eta nhande kuery pavē re anhetē va'e oī, ha'e nhandereve riae 'rā oiko.

<sup>3</sup> Nhandereve oī 'rā nhanemboaxyha'e mby'a porā Nhanderuete ha'e Ta'y Jesus Cristo guigua, anhetē va'e ha'e mborayvu guive.

### *Jajoayvu aguā re ijayvua*

<sup>4</sup> Xee avy'a ete nememby kuery regua anhetē va'e rupi ikuai rā aikuua vy, Nhanderu ojapo ukaague rami vy ae.

<sup>5</sup> Aŷ ma xereindy, xee ajerure peteī-teī jajoayvu aguā. Ha'e ramia py ma ayvu ipyau va'e'ŷ ambopara, ha'e rā jypy'i guive oeja va'ekue.\*

<sup>6</sup> Po rami 'rā jajoayvu: ha'e ojapo uka va'e rupi nhandekuaia py. Kova'e ma jypy'i guive ojapo uka va'e regua pendu va'ekue, mborayvu re nhandekuaí aguā.

### *Nhombotavya rupi nhombo'ea kuery reko re ijayvua*

<sup>7</sup> Mba'eta heta avi ikuai nhombotavy va'e yvy jave rupi. Ha'e va'e kuery ma “Jesus Cristo ngo'o reve ou va'ekue re ajerovia” nde'i. Ha'e rami ikuai nhombotavypa rei va'e kuery, Cristo rovaigua ae.\*

<sup>8</sup> Ha'e nunga rupi peiko kuaa pota, pemokanhy e'ŷ aguā penhea'āague repyrā oī va'e, ha'e rā pejopypa aguā.

<sup>9</sup> Ha'e gui Cristo regua rami e'ŷ nhombo'ea, ha'e ayvu porā gui ojepe'a va'ekue re ma Nhanderuete noī. Ha'e rā ha'e va'e ayvu nhanembo'egue rupi riae ikuai va'e re ma Nhanderuete ha'e Ta'y oī.

<sup>10</sup> Amongue penda py ou vy ha'e va'e ayvu rupi e'ŷ penembo'e ramo pemovaē eme pendero py, pexarura eme guive.

<sup>11</sup> Mba'eta ha'e kuery pe amongue oxarura vy ma teko vai apoa kuery reve onhemoirū va'e.

### *Oxarura reve opaa py ijayvuague*

<sup>12</sup> Heta teri areko ambopara va'erā pēvy. Ha'e rami teī aŷ namombe'uxei tinta py kuaxia re, mba'eta peē kuerya py aju voixe. Ha'e ramo ma nhandeayvu porā 'rā, javy'a ete aguā.

<sup>13</sup> Ndekypy'y oiporavo pyre memby kuery ha'e javive oxarura uka ndevy.

\* **1:5** João 13.34,35; 1 João 2.7,8

\* **1:7** Romanos 16.17,18; 1 João 2.18-26

## Mboapykuea kuaxia João ombopara va'ekue Mboapykuea kuaxia João ombopara va'ekue

Kova'e kuaxia ma apóstolo João ombopara va'ekue peteĩ igreja re opena va'e Gaio hery va'e pe. Oguerovy'aa rupi ijayvu, "mba'eta xera'y kuery anhetẽ va'e rupi ikuai aendu rã xembovy'ave pavẽ gui", he'i vy (versículo 4).

### *Guyvy Gaio pe oxarura reve ijayvu vy omboopyague*

- 1 Xee igreja re apena va'e axarura ndee Gaio roayvu ete va'e pe.
- 2 Xerembiayvu, opa mba'e py ajerure reiko porã ha'e nerexaĩ aguã re, nenhe'ẽ oiko porãa rami avi.
- 3 Xee avy'a ete irmão kuery ovaẽ vy omombe'u rã anhetẽ rupigua reikoa, mba'eta anhetẽ va'e rupi ae reiko va'e.
- 4 Mba'eta xera'y kuery anhetẽ va'e rupi ikuai aendu rã xembovy'ave pavẽ gui.

### *Ayvu porã mombe'ua kuery nhaipytyvõ aguã re ijayvua*

- 5 Xerembiayvu, irmão kuery reipytyvõ reikovya py ma ha'evea rami rejapo. Yvy mboae guigua kuery ou ramo voi reipytyvõ jepi.
- 6 Mba'eta igreja kuery pe ha'e kuery omombe'u porã ndeporayvua. Ha'evea rami reipytyvõ oguatave aguã, ha'e ramia py Nhanderuete rami ete rejapo.
- 7 Mba'eta ha'e kuery ma Hery rupi oje'oi vy peteĩve henda py nonhepytyvõ ukai nhande kuery regua e'ŷ pe.
- 8 Ha'e nunga rupi ha'evea rami nhaipytyvõ ha'e va'e irmão kuery, anhetẽ va'e oenduave aguã rami jajapo.

### *Heko vai ha'e heko porã va'e reko re ijayvua*

- 9 Xee ma igreja kuery pe mba'emo re ambopara teĩ Diótrefes onhembovatevexe rei vy ndojapyxaka potai oreayvu re.\*
- 10 Ha'e nunga rupi araka'e'i rã apy pendekoa py aju vy ixupe xeayvu 'rã ha'eve'ŷa rami ojapoague re, mba'eta opa marã rei ijayvu orere. Ha'e ramia gui ojapo vaivexe vy irmão kuery ha'e py ovaẽ ramo nomovaẽi, ha'e amongue omovaẽ ta ramo nomovaẽ ukai, ha'e rã igreja gui omoxẽ ete raka'e.

11 Xerembiayvu, ndee ma eiko eme teko vai rupi, ha'e rã teko porã rupi anho, mba'eta teko porã rupi ikuai va'e ma Nhanderuete guigua meme. Ha'e rã teko vai rupi ikuai va'e ma neĩ peteĩgue voi ndoexai Nhanderuete.

12 Ha'e rã Demétrio re ma ima'endu'a porã pavẽ, anhetẽ va'e eteve voi. Ore kuery voi roikuaa heko porãa, ha'e ndee reikuaa avi oreayvu anhetẽ ete memea.

### *Oxarura reve opaa py ijayvuague*

- 13 Heta mba'e teri arekô ndevy ambopara aguã. Ha'e rami teĩ namombe'uxei tinta ha'e caneta py rive.
- 14 Mba'eta xee aa voixe roexa vy. Ha'e ramo ma nhandeayvu porã 'rã.
- 15 Tove terendu mby'a porã. Nhaneirũ kuery ha'e javi oxarura uka ndevy. Ha'e nhaneirũ kuery ndea py ikuai va'e peteĩ-teĩ pe emombe'u orema'endu'aa.

---

\* 1:9 Mateus 20.25-28; 23.1-12

## Judas ombopara va'ekue

### Judas ombopara va'ekue

Kova'e kuaxia mboparaare ma Judas Iscariotes e'ŷ, Judas mboae, Tiago ha'e Jesus ryvy (versículo 1). Jypy onhembopy'a jaa jepea omombe'u porâve aguã, ha'e gui amboae rami onhembopy'a, jajeroviaa regua jaepya rupi nhanhea'ã aguã re ijayvu aguã. "Mba'eta amongue avakue Nhanderuete pegua e'ŷ nhanembotavyxe vy nhemi rupi oike ra'e nhanembyte py. Ha'e va'e kuery ma opa marã rei ikuai vy ha'eve'ŷa rami nhombo'e" (versículo 4a).

"Ha'e rã peẽ xerembiayvu kuery, tapenembaraeteve peovy pejeroviaa iky'a e'ŷ va'e rupi, ha'e Nhe'ê Ky'a E'ŷ gui peikuua vy pejerurea py guive. Nhanderuete penderayvua rupi anho tapendekuai. Pearõ tema nhande-Senor Jesus Cristo penemboaxya rupi tekove marã e'ŷ ogueru rã guarã" (versículos 20-21).

#### *Oxarura reve ijayvu vy omboypyague*

<sup>1</sup> Xee Judas ma Jesus Cristo rembiguai ha'e Tiago ryvy aiko.\* Axarura peẽ kuery Nhanderuete remienoĩ, hembiayvu, ha'e Jesus Cristo rery rupi openamby pendekuai va'e pe.

<sup>2</sup> Tove peẽ kuery tapenduve tema penemboaxya, mby'a porã ha'e mborayvu.

#### *Cristo re jajeroviaa regua re nhanhea'ã aguã re ijayvua*

<sup>3</sup> Xerembiayvu kuery, jypy anhembopy'a teĩ nhande kuery jaa jepea re pêvy ambopara aguã. Ha'e gui ma aendu ete amboae re xeayvu aguã pêvy ambopara vy, jajeroviaa regua anhetê va'e rupi penhea'ã aguã, iky'a e'ŷ va'e kuery pe peteĩgue'i omboaxaa rire.

<sup>4</sup> Mba'eta amongue avakue Nhanderuete pegua e'ŷ nhanembotavyxe vy nhemi rupi oike ra'e nhanembyte py. Ha'e va'e kuery ma opa marã rei ikuai vy ha'eve'ŷa rami nhombo'e Nhanderuete nhanemboaxya re, ha'e Senhor Jesus Cristo Huvixave peteĩ'i va'e re ndojeroviaia rami ijayvu guive. Ha'e kuery opaga aguã yma ma voi omoĩa.\*

#### *Ymagua kuery heko vai va'e ombopagaa ague re ijayvua*

<sup>5</sup> Ha'e nunga ha'e javi peikuua ae ma teĩ romoma'endu'axe ju Egito yvy gui Senhor heta va'e kuery oguenoẽ vy ogueraa jepepa rire teĩ ojerovia e'ŷ va'e kuery omokanhyague re.\*

<sup>6</sup> Anjo kuery voi guekorã va'ekue gui ojepe'a vy guekoa ae oejapa rire Senhor ombotypa pytãa py, corrente opa e'ŷ va'e py ojokua, ombopaga aguã ára tuvixa va'e pyguarã.

<sup>7</sup> Ha'e gui Sodoma, Gomorra ha'e ha'e katy'i rupi tetã ikuai va'e re ha'ekue rami ae ju oiko raka'e. Ha'e pygua kuery ma anjo ojejavvy va'ekue rami ae itavy reia rupi ikuai, ha'e amboae rami rei to'o oipotaa rupi guive. Ha'e kuery ombopagaague ma tata ogue'ŷ va'e gui nhande voi jakyje aguã opyta.\*

<sup>8</sup> Ha'e gui aŷ voi nhombotavy reia kuery ma ha'ekue rami ae ju ikuai. Oexa ra'ua rupi rive vy ngo'o ae omongy'a, nonhe'ê rendui huvixa kuery, ha'e ijayvu rei 'rã ipo'akakueve re.

<sup>9</sup> Ha'e rã anjo yvateve va'e Miguel ma anha reve Moisés retekue re joaka ete ijayvua py voi nonhemboyvatei raka'e anha pe ijayvu vai aguã. Ha'e rami 'rãgue py "Senhor ae ta'ijayvu ndevy", he'i.\*

---

\* **1:1** Mateus 13.55   \* **1:4** 2 Timóteo 3.1-9   \* **1:5** 2 Pedro 2.1-22   \* **1:7** Egito yvy gui oo jepe va'ekue ri ojerovia e'ŷ va'e omokanhyague omombe'u Números 14.26-30 py, ha'e gui tetã Sodoma ha'e Gomorra omboipaague ma Gênesis 19 py omombe'u.   \* **1:9** Zacarias 3.2

<sup>10</sup> Ha'e rā nhombo'e vaia kuery ma ijayvu vai 'rā oikuua e'ŷ va'e ha'e javi re. Mymba kuery hi'arandu e'ŷ va'e rami avi onhemongy'apa rei 'rā mba'emo oakā gui ae oikuua va'e rupi rive.

<sup>11</sup> Ha'e kuery pe nda'evei ete 'rā! Mba'eta Caim oikoague rupi ae ju ha'e kuery ikuai, ha'e mba'emo ojoupaxea rupi rive oje'oi pojava Balaão ojekoreague ramigua rupi, ha'e rire Coré kuery rami avi okanhymba 'rā nhonhe'ẽ raxaveague re.<sup>†</sup>

<sup>12</sup> Ha'e kuery ma yy guy py ita itui va'e rami onhenhomni va'e, mba'eta ha'e javi joa-joapy, pekarua py ha'e kuery voi 'rā ikuai, peteĩve henda py oxĩa oendu e'ŷ re.<sup>‡</sup> Mymba kuery re opena va'ety ha'e ae rive onhemongaru va'e rami avi ikuai. Oky aguã e'ŷ arai yvytu ogueraapa rive va'e rami, ha'e yvyra hi'a ára py teĩ hi'a e'ŷ va'e rami avi ikuai. Ha'e va'e nunga ma mokoõgue omano va'e, mba'eta ipirupa va'ekue ha'e oapo'opa pyre rami.

<sup>13</sup> Ha'e kuery ma yai opu'ã-pu'ã vy hyjui ombovu va'e rami avi ikuai, ha'e jaxy-tata ova va'e rami, pytū reia py araka'e rā peve guarã omoingo pyre.

<sup>14</sup> Ha'e va'e kuery rekorã ma Enoque omombe'u raka'e. Ha'e va'e ma Adão ramymino kuery jevy regua sete-a va'ekue. Aipoe'i: "Senhor ou 'rā ojeupagua kuery iky'a e'ŷ va'e mbovy rei e'ŷ reve.

<sup>15</sup> Joe oikuua pota vy ou, mba'eta heko vai va'ekue ha'e javi 'rā ombopaga, ixupe ndoikoxei vy teko vai ojapo, ha'e hexe ijayvu vaiague re", he'i va'ekue.

<sup>16</sup> Ha'e kuery ma joe ijayvu rei riae va'e, ndovy'aia rupi rei ijayvu va'ety, ha'e kuery ae oipotaa rami ikuai va'e. Onhembovate reia rupi anho ijayvu. Joguerorya rupi 'rā ijayvu mba'emo ojoupaxe vy rive.

### *Apóstolo kuery ijayvu ma voiague rupi nhanemongetaague*

<sup>17</sup> Ha'e rā peẽ xerembiayvu kuery, penema'endu'a riae ke yma guive nhande-Senhor Jesus Cristo pegua apóstolo kuery ijayvuague re.

<sup>18</sup> Mba'eta aipoe'i pêvy: "Opaa ára ikuai 'rā porojojai reia kuery, teko vai ojapoxea rupi rive ikuai va'e", he'i va'ekue.\*

<sup>19</sup> Ha'e va'e kuery ojapo 'rā joo rami e'ŷ-e'ŷ ikuai aguã rami. Yvy regua reko rami rive ikuai, Nhe'ẽ reveguia e'ŷ.

<sup>20</sup> Ha'e rā peẽ xerembiayvu kuery, tapenembaraeteve peovy pejeroviaa iky'a e'ŷ va'e rupi, ha'e Nhe'ẽ Ky'a E'ŷ gui peikuaa vy pejerurea py guive.

<sup>21</sup> Nhanderuete penderayvua rupi anho tapendekuai. Pearõ tema nhande-Senhor Jesus Cristo penemboaxya rupi tekove marã e'ŷ ogueru rā guarã.

<sup>22</sup> Pemboaxy ke ndojerovia porãi teri va'e.

<sup>23</sup> Ha'e rami vy peraa jepe, tata gui perojepe'a vy. Ha'e rā amboae kuery ma pemboaxy avi teĩ pejererokyjea rupi guive, mba'eta to'o oipotaa rupi vy oao voi omongy'apa rei vy ojeguarupy opyta.\*

### *Opaa py ogueroayvu porãague*

<sup>24</sup> Ha'e gui Nhanderuete ma ipo'aka opena aguã ja'a e'ŷ aguã, ha'e guexakãa py nhandereroy'a reve iky'a e'ŷ va'e nhanderexa uka aguã.

<sup>25</sup> Tove Nhandereraa jepea Nhanderuete peteĩ'i va'e toguerovy'aa nhande-Senhor Jesus Cristo rery rupi. Ha'e anho ha'eve yvate ete aguã, pavẽ re opena ha'e ipo'aka aguã, yma guive, aŷ ha'e araka'eve rā peve. Amém.

<sup>†</sup> **1:11** Caim rekukue ma Gênesis 4.1-8 py omombe'u, Balaão rekukue ma Números 22 py, ha'e rā Coré kuery rekukue ma Números 16.1-9 py omombe'u. <sup>‡</sup> **1:12** Yy guy py ita itui va'e ma ijavaete 'rā, mba'eta ha'e nunga kanoã mboguataa kuery ndoexai vy onhembota rive 'rā. \* **1:18** 2 Pedro 3.3 \* **1:23** Gálatas 6.1,2; Tiago 5.19,20

## **João pe oexa uka pyre Apocalipse 'epy va'e oĩa João pe oexa uka pyre apocalipse 'epy va'e oĩa**

“Kova'e ma Jesus Cristo araka'eve guarã oikuaa uka va'ekue. Ixupe Nhanderuete omboaxa va'ekue, guembiguai kuery pe ju oikuaa uka aguã mba'emo are'ŷ'i re oiko va'erã, tenonderã omoĩ ma voiague rami vy. Ha'e rami vy ojeupegua anjo ombou, guembiguai João pe oikuaa uka aguã” (1.1).

Apóstolo João pe Jesus ojexaa uka vy aipoe'i: “Ekyje eme. Xee ma jypy'igua ha'e opa vygua, oikove va'e guive aiko. Mba'eta amano va'ekue, teĩ aŷ ma aikove ju araka'e rã peve guarã. Areko avi omanogue retã rokẽ pe'aa. Ha'e nunga rupi embopara ke mba'emo rexaa va'ekue, mba'emo aŷ oiko, ha'e araka'eve rã oiko va'erã guive”, he'i (1.17b-19). Ha'e gui ma omombe'u igreja kuery sete henda rupi ikuai va'e pegua João ombopara va'erã (capítulos 2-3). Ha'e gui ma ixupe oikuaa uka raka'eve rã oiko va'erã. Mba'eta oiko 'rã Jesus remimbo'e kuery re opu'ã rei va'e ha'e ko yvy re mba'emo tuvixa va'e Nhanderuete omoingo rã. Ha'e gui opaa py Jesus Cristo ou jevy 'rã yva gui, yva pyau ha'e yvy pyau reve. Hexe huvixa kuery opu'ã rei teĩ ojekuaa xapy'a 'rã pavẽ pe, mba'eta ha'e ma “Huvixave ikuai va'e Ruvixave, ha'e senhor ikuai va'e Senhor” (19.16).

Ha'e nunga rupi nhandepy'a guaxu ha'e nhaĩ atã 'rã Jesus re jajeroviaa py. Mba'emo oiko rã jaropo'aka 'rã, mba'eta Jesus ipo'aka ae ma mba'emo vai re, ha'e opaa ára py opo'akaa oexaa uka 'rã pavẽ pe.

### *Jesus Cristo raka'eve guarã oikuaa uka va'ekue re ijayvua*

<sup>1</sup> Kova'e ma Jesus Cristo araka'eve guarã oikuaa uka va'ekue. Ixupe Nhanderuete omboaxa va'ekue, guembiguai kuery pe ju oikuaa uka aguã mba'emo are'ŷ'i re oiko va'erã, tenonderã omoĩ ma voiague rami vy. Ha'e rami vy ojeupegua anjo ombou, guembiguai João pe oikuaa uka aguã.

<sup>2</sup> Ha'e va'e ju omombe'u Nhanderuete ayvu Jesus Cristo oikuaa uka va'ekue. Oexaa va'ekue ha'e javi omombe'u.

<sup>3</sup> Ovy'a ete 'rã okuapy kova'e ayvu ogueroayvu, e'ŷ vy oendu rire ipara oĩa rupi ikuai va'e, mba'eta ára namombyryvei ma.\*

### *Ásia yvy re sete igreja ikuai va'e pe João oxaruraague*

<sup>4</sup> Xee João axarura Ásia yvy re sete igreja ikuai va'e pygua kuery pe: Tove peẽ kuery tapendu penemboaxyha'e mby'a porã, aŷ oiko va'e, yma guive oiko va'ekue, ha'e araka'eve rã ou va'erã va'e guigua, henda openaaty renonde sete Nhe'ẽ ikuai va'e guigua,

<sup>5</sup> ha'e Cristo guigua guive. Ha'e va'e ma anhetẽ va'e mombe'ua ojeroviapy va'e oiko, omanogue mbyte gui ha'e ranhe ju onhemboete va'ekue, ha'e yvy re huvixave kuery ikuai va'e áryve Ipo'akapa va'e. Nhanderayvu vy nguguy py ae nhandejogua raka'e jajejavyague gui,

<sup>6</sup> ha'e gui nhanemoingo opo'akaa pyguarã ha'e Nguuete pegua sacerdote-rã. Ha'e ma taexakãmba ha'e ta'ipo'akapa araka'e rã peve. Amém.

<sup>7</sup> Ma'ẽ, arai rupi 'rã ou. Ha'e ramo oexaa pavẽ 'rã, ipyxoare kuery voi. Yvy re ikuai va'e ha'e javi regua oexaa vy ojae'opa 'rã okuapy. Anhetẽ ete va'e. Amém.\*

<sup>8</sup> Senhor Nhanderuete aipoe'i: “Xee ma jypy'igua ha'e opa vygua. Aŷ aiko, yma guive aiko va'ekue, ha'e raka'eve rã aju va'erã va'e, Ipo'akapa va'e aiko”, he'i.

### *Jesus guexakã reve ojexaa ukaague*

\* **1:3** Apocalipse 22.6,7    \* **1:7** Zacarias 12.10

<sup>9</sup> Xee João ma pende-irmão aiko, ha'e gui jaiko axya py, Nhanderuete po'akaa py ha'e Jesus re nhaï atāa py peẽ kuery irū aiko. Peteĩ ypa'ũ Patmos 'epy va'e re aĩ va'ekue, Nhanderuete ayvu Jesus regua amombe'uague re.

<sup>10</sup> Ha'e gui ma Senhor ára py Nhe'ẽ re aiko vy xerakykue katy gui peteĩ aendu ijayvu atā va'e, mimby guaxu rami onhendu va'e.

<sup>11</sup> Ha'e va'e ma aipoe'i xevy:

— Rexa va'e ke embopara kuaxia re, ha'e emondouka sete igreja ikuai va'e pe: Éfeso, Esmirna, Pérgamo, Tiatira, Sardes, Filadélfia ha'e Laodicéia pygua pe — he'i.

<sup>12</sup> Ha'e ramo ajere aexa aguã xereve ijayvu va'e. Ajere vy sete tataendy renda aexa ouro guigua meme.

<sup>13</sup> Tataendy renda ikuai va'e mbyte peteĩ aexa avi ava ra'y rami ojekuaa va'e. Ha'e va'e ma ao puku py onhemonde, ha'e ipexo rupi oĩ ajukue ra'ykue ouro guigua.

<sup>14</sup> Inhakã re hi'a oĩ va'e ma vexa'i rague rami xií, yro'y apĩ rami avi. Hexa ma tata rami hendy.

<sup>15</sup> Ipy ma overa va'e rami hendy, tata py omoexakã mbyre rami ojekuaa. Ijayvua ma yy tuvixa va'e revovo rami onhendu.\*

<sup>16</sup> Opo oiporu kuaa regua py ma sete jaxy-tata oguerek. Ijuru gui ma peteĩ kyxe guaxu oẽ haĩme jovai va'e. Hova ma kuaray ojope ratāa rami hexakã.

<sup>17</sup> Ha'e gui aexa vy ipy yvýry ha'a ajupy omanogue rami. Ha'e ramo opo oiporu kuaa regua xere omoĩ vy aipoe'i:

— Ekyje eme. Xee ma jypy'igua ha'e opa vygua,

<sup>18</sup> oikove va'e guive aiko. Mba'eta amano va'ekue, teĩ aÿ ma aikove ju araka'e rã peve guarã. Areko avi omanogue retã rokẽ pe'a.

<sup>19</sup> Ha'e nunga rupi embopara ke mba'emo rexia va'ekue, mba'emo aÿ oiko, ha'e araka'eve rã oiko va'erã guive.

<sup>20</sup> Ha'e gui sete jaxy-tata xepo aiporu kuaa regua py areko va'e, ha'e sete tataendy renda ouro guigua rexia va'e ma ndoikuua ukaai teri. Sete jaxy-tata ma anjo kuery sete igreja ikuai va'e pegua, ha'e rã sete tataendy renda ma sete igreja ae — he'i.

## 2

### *Éfeso pygua igreja kuery pe ombopara ukaague*

<sup>1</sup> — Embopara Éfeso tetã py igreja kuery ikuai va'e pegua anjo pe: “Po rami ijayvu opo oiporu kuaa regua re sete jaxy-tata oguerek. Ha'e sete tataendy renda ouro guigua mbyte rupi avi oiko va'e:

<sup>2</sup> “Xee aikuua peẽ kuery reko. Xevy pe pemba'eapoa ha'e peĩ atāa voi aikuapa, ha'e heko vai va'e kuery ayvu re ndapejapyxakaia guive. Pea'anga apóstolo onhemoingo rive va'e, ha'e vy ijapu va'e memea peikuua.”\*

<sup>3</sup> Peĩ atā, ha'e xerery rupi pendekuai ramo penderek. a'ãa rã pendekuerai e'ý re peropo'akapa guive.

<sup>4</sup> Ha'e rami avi penderek. regua peteĩ ma naxembovy'ai, mba'eta pejepe'a ma jypy'i mborayvu rupi pendekuaiague gui.\*

<sup>5</sup> Penema'endu'a ke magui pa pe'aague re. Pejeko rerova ke, pendekuai ju jypy' peikoague rami. Ha'e rami e'ý rã pẽa py aju vy aipe'a 'rã pendevygua tataendy renda oñaty gui, pejeko rerova e'ý ramo.

<sup>6</sup> Ha'e rami avi penderek. regua peteĩ oĩ xembovy'a va'e: Nicolaíta kuery reko ndapejou porãia. Ha'e va'e kuery reko ma xee voi ndajou porãi.

<sup>7</sup> Ijapyxa oĩ va'e ke toendu igreja kuery pe Nhe'ẽ ijayvu rã. Mba'eta ogueropo'akapa va'ekue pe ame'ẽ 'rã Nhanderuete 'amba re yvyra tekove me'ëa hi'aĩ va'e'a ho'u aguã.”

\* <sup>1:15</sup> Daniel 7.13, 10.5-6, Ezequiel 43.2 \* <sup>2:2</sup> 2 Coríntios 11.13-15 \* <sup>2:4</sup> Mateus 24.12,13

### *Esmirna pygua igreja kuery pe ombopara ukaague*

**8** — Ha'e gui Esmirna tetā py igreja kuery ikuai va'e pegua anjo pe ju embopara: “Po rami ijayvu jypy'igua ha'e opa vygua, omano va'ekue ri oikove ju va'e:

**9** “Xee aikuua pendekuai axy ha'e pendeporiaukue'i va'ea. Ha'e rami avi perekopa va'e guive. Aikuua avi judeu rami rive onhemoingo va'e kuery pendere ijayvu rei okuapya. Ha'e va'e kuery ma Satanás peguarā rive onhemboaty va'e.

**10** Pekyje eme pendekuai axy aguā gui. Ma'ẽ, amongue peē kuery regua ma anha omboty uka'rā nhuā py penderekko a'ā aguā. Dez ára peve 'rā pendekuai axy. Pejerovia tema pemano peve. Ha'e ramo coroa-rā pēvy ame'ẽ 'rā tekove.\*

**11** Ijapyxa oĩ va'e ke toendu igreja kuery pe Nhe'ẽ ijayvu rā. Mba'eta ogueropo'akapa va'ekue ma mokoīguea manoa py nda'ikuai axyi'rā, peteīve henda py.”

### *Pérgamo pygua igreja kuery pe ombopara ukaague*

**12** — Embopara ke Pérgamo tetā py igreja kuery ikuai va'e pegua anjo pe: “Po rami ijayvu kyxe guaxu haímbe jovai va'e oguerekva'e:

**13** “Xee aikuua tetā pendekuaia py Satanás renda ae.\* Ha'e rami teī xerery rupi pendekuaia re peī atā, ndapejepo'ai guive xere pejeroviaa gui, Antipas ojukaa ára voi. Ha'e va'e ma xevygua omombe'u porā ramo ojukaa va'ekue penderekko Satanás renda oña py.

**14** Ha'e rami teī oiko avi penderekko regua naxembovy'ai va'e, mba'eta peē kuery mbyte perekko Balaão nhombo'egue rupi ikuai va'e. Ha'e va'e ma Balaque ombo'e raka'e Israel kuery renonde nhuā omoī aguā, mba'emo ra'angaa pe ome'ẽ mbyre gui ha'e kuery ho'u ha'e itavy rei okuapya aguā rami.

**15** Penembyte perekko avi Nicolaíta kuery nhombo'ea rupi ikuai va'e.

**16** Ha'e nunga rupi pejeko rerova. Ha'e rami e'ŷ ramo aju voi 'rā pēa py, ha'e xejuru gui kyxe guaxu oẽ va'e py apu'ā 'rā ha'e kuery rovai.

**17** Ijapyxa oĩ va'e ke toendu igreja kuery pe Nhe'ẽ ijayvu rā. Mba'eta ogueropo'akapa va'ekue pe ame'ẽ 'rā maná onhomí mbyre ha'e ita'i xiñ va'e guive. Ha'e va'e ita re ma tery pyau oĩ 'rā avave rei ndoikuaai va'e, ojopy va'e e'ŷ vy.”

### *Tiatira pygua igreja kuery pe ombopara ukaague*

**18** — Embopara ke Tiatira tetā py igreja kuery ikuai va'e pegua anjo pe: “Po rami ijayvu Nhanderuete Ra'y tata rami hexa ha'e overa va'e rami ipy va'e:

**19** “Xee aikuua penderekko, pendeporayvua, pejeroviaa, xevy pe pemb'a'eapoaa ha'e peī atāa. Aikuua avi jypy'i pemb'a'eapoague gui aŷ pemb'a'eapovea.

**20** Ha'e rami teī peteī oĩ penderekko regua naxembovy'ai va'e, mba'eta kunha Jezabel ayvu re pejapyxaka. Ha'e va'e ma profeta ramigua rive onhemoingo vy xerembiguai kuery ombo'ea rupi ombotavy, itavy rei ha'e mba'emo ra'angaa pe ome'ẽ mbyre gui ha'e kuery ho'u okuapya aguā.

**21** Ha'e va'e ma xee arō are ma ojeko rerova aguā, teī itavy reia gui ndojeko rerovaxei.

**22** Ma'ẽ, ajapo 'rā tupa py ojexavai ete oupy aguā rami, ha'e hexeve itavy rei va'ekue guive, kunha va'e ombo'ea rupi ikuiai gui ndojeko rerovai ramo.

**23** Ajuka ete 'rā imemby ha'e ipi'a kuery. Ha'e ramo igreja kuery ha'e javi 'rā oikuua xee jopy'a ha'e nhokuraxõ re aikuua pota va'e. Ha'e rami vy peteī-teī pe ame'ẽ 'rā peikoague rekovia.

**24** “Ha'e rā peē Tiatira pygua kuery mboae, ha'e kuery rami e'ŷ penhembo'e va'e, ‘Satanás py'apy regua’ he'ia re pepena e'ŷ va'e, peē kuery pe ma aipoa'e: Pendevy pe ndajapo ukai 'rā ipoyi va'e,

**25** pov'a'e anho: Xee aju peve peī atā tema mba'emo peupity ma va'e re.

\* **2:10** Mateus 10.28; 1 Pedro 1.6,7 \* **2:13** Filipenses 2.15

<sup>26</sup> Mba'eta ogueropo'akapa, ha'e opa peve ajapo uka va'e rupi ikuai va'ekue pe ma ame'ẽ 'rã yvy regua kuery re ipo'aka aguã.

<sup>27</sup> Ha'e ramo omo'arandu 'rã po pygua ferro guigua py, omboa'ypa 'rã mba'emo ryru nhae'ũ guigua rami rive.\*

<sup>28</sup> Ha'e kuery pe voi ame'ẽ 'rã jaxy-tata ko'ẽ mbija, xevy pe xeru ome'ẽague rami avi.

<sup>29</sup> Ijapyxa oĩ va'e ke toendu igreja kuery pe Nhe'ẽ ijayvu rã."

### 3

#### *Sardes pygua igreja kuery pe ombopara ukaague*

<sup>1</sup> — Sardes tetã py igreja kuery ikuai va'e pegua anjo pe embopara: "Po rami ijayvu sete nhe'ẽ Nhanderuete guigua ha'e sete jaxy-tata oguereko va'e:

"Xee aikuaa pendereko. Pendevy pe 'Oikove va'e' 'ea teĩ omanogue peiko.

<sup>2</sup> Peiko kuaa pota ke, ha'e pemombaraete okuave'i teri teĩ omano aguã rami ikuai va'e, mba'eta xee aikuaa Xeruete renonde opa mba'e py e'ŷ pendereko porãa.

<sup>3</sup> Ha'e nunga rupi penema'endu'a ke ayvu pendu vy pendejee pemoĩ va'ekue re. Pemoĩ porã ju, ha'e pejeko rerova. Mba'eta ndapeiko kuaa potai ri ramo aju xapy'a 'rã imonda va'e rami, ndapeikuai 'rã guive penderovai aju aguã hora.\*

<sup>4</sup> Ha'e rami avi Sardes tetã py peẽ kuery regua mbovy'i avi ikuai oao nomongy'ai va'e. Ha'e va'e kuery heko porã va'e vy xerupive 'rã ikuai xiĩ va'e py onhemonde reve.

<sup>5</sup> Ogueropo'akapa va'ekue ma ha'e kuery rami avi 'rã onhemonde xiĩ va'e py. Peteїve henda py hery namboguei 'rã kuaxia tekove oguereko va'e kuery rery oĩa gui. Ha'e rami 'rãgue py hery amombe'u porã 'rã Xeru ha'e ixupegua anjo kuery renonde.

<sup>6</sup> Ijapyxa oĩ va'e ke toendu igreja kuery pe Nhe'ẽ ijayvu rã."

#### *Filadélfia pygua igreja kuery pe ombopara ukaague*

<sup>7</sup> — Embopara ke Filadélfia tetã py igreja kuery ikuai va'e pegua anjo pe: "Po rami ijayvu iky'a e'ŷ ha'e anhetẽ va'e. Ha'e va'e ma oguereko okẽ pe'aa Huvixave Davi rami ipo'aka aguã. Ha'e ramo oipe'aague avave rei nombotyai 'rã, ha'e ombotyague avave rei ndoipe'aai 'rã guive. Ha'e vy aipoe'i:

<sup>8</sup> "Xee aikuaa pendereko. Ma'ẽ, penerenonde amoĩ 'rã peteĩ okẽ ojepe'a va'e, avave rei nomboty kuaai va'erã, mba'eta amongue py ete'i penembaraete va'eri xeayvu pemoĩ porã, napemombe'u e'ŷi guive xerery rupi peikoa.

<sup>9</sup> Ha'e gui Satanás peguarã onhemboaty va'e kuery, judeu rami rive onhemoingo teĩ ha'e'ŷ ikuai va'e ma ajapo 'rã oupa vy pendepy yvýry guenapy'ã re ikuai aguã rami. Ha'e ramo ha'e kuery oikuaa 'rã xerembiajvu peikoa.

<sup>10</sup> Xeayvuague rami vy peĩ atã rire xee voi pendere apena porã 'rã jexavaia ára yvy jave re joeko a'ãarã ou va'e gui.

<sup>11</sup> Aju 'rã are'ŷ'i re. Pendejee pemoĩ atã ke mba'emo peupity ma va'e, pendevyguia coroa avave rei oipe'aa e'ŷ aguã.

<sup>12</sup> Mba'eta ogueropo'akapa va'ekue ajapo 'rã Xeruete ro iky'a e'ŷ va'e yta rami oĩ aguã. Ha'e va'e rire ndoipe'aavei 'rã ha'e gui. Ha'e kuery re amoĩ 'rã Xeruete rery, ha'e Xeruete pegua tetã rery guive. Ha'e va'e ma Jerusalém pyau, yva Xeruetea gui oguejy va'erã. Ha'e kuery re amoĩ avi 'rã xerery pyau.

<sup>13</sup> Ijapyxa oĩ va'e ke toendu igreja kuery pe Nhe'ẽ ijayvu rã."

#### *Laodicéia pygua igreja kuery pe ombopara ukaague*

<sup>14</sup> — Embopara ke Laodicéia tetã py igreja kuery ikuai va'e pegua anjo pe: "Po rami ijayvu Anhetẽ ete va'e hery va'e, mba'eta ha'e va'e ma anhetẽ va'e mombe'ua ojeroviapy va'e, ha'e Nhanderuete omoingo va'ekue ha'e javi ypy. Ha'e vy aipoe'i:

\* <sup>2:27</sup> Salmo 2.9    \* <sup>3:3</sup> Lucas 12.35-40

<sup>15</sup> “Xee aikuua pendereko. Ha'e gui peẽ ma yro'yxã va'e'ŷ, neĩ haku va'e'ŷ. Penero'yxã e'ŷ vy penderaku va'e rire ha'eveve 'râgue.

<sup>16</sup> Ha'e rami 'râgue py haku vevui va'e rive peiko, neĩ napenderakui, neĩ napenero'yxãi. Ha'e rami rã xejuru gui rombojevy aguã rami aiko.\*

<sup>17</sup> Mba'eta peẽ kuery ‘Arekopa, aiko porã, xevy pe mba'eve ndoatai’ peje.\* Ha'e rami teĩ ndapeikuaai ov'y'a e'ŷ ete va'e peikoa. Omboetepy e'ŷ, iporiaukue, ára reveguia e'ŷ ha'e ipire rei va'e peiko.

<sup>18</sup> Ha'e ramo xee romongeta xegui pejogua aguã ouro tata py oiky'a'o pyre oguerekopa va'e ete peiko aguã, ha'e ao xiĩ va'e py penhemonde aguã, pendepire reia pexa ucaa py peximba e'ŷ aguã. Xegui pejogua avi texa raxy poã penderexa py pemoi vy pexa porã ju aguã.

<sup>19</sup> Xerembiaiyvu kuery ha'e javive pe xeayvu amo'arandua rupi. Ha'e nunga rupi penekyre'ŷ ha'e pejeko rerova.

<sup>20</sup> Ma'ẽ, okẽ py xe'aĩ anhenduka vy. Amongue xeayvu oendu vy okẽ oipe'a ramo aike 'rã hoo py. Hexeve akaru 'rã, ha'e voi okaru 'rã xereve.

<sup>21</sup> Mba'eta ogueropo'akapa va'ekue pe amboguapy 'rã xereve xerenda apenaaty yvýry, xee voi aropo'akapa rire Xeru reve henda yvýry aguapya rami avi.

<sup>22</sup> Ijapyxa oĩ va'e ke toendu igreja kuery pe Nhe'ẽ ijayvu rã.”

## 4

### *Nhanderuete renda oexaague*

<sup>1</sup> Ha'e va'e rire ama'ẽ vy peteĩ okẽ aexa yva re ojepe'a va'e, ha'e teĩgue ju aendu jypy'i ayvu aendu va'ekue. Mimby guaxu pu rami onhendu vy aipoe'i:

— Enhemboja ke ejuvy. Ha'e ramo aikuua uka 'rã kova'e nunga rire mae ma mba'emo oiko va'erã, tenonderã omoi ma voiague rami vy — he'i.

<sup>2</sup> Ha'e ramove nhe'ẽ re aiko vy peteĩ tenda aexa yva re huvixa openaaty oĩ va'e, ha'e tenda py peteĩ oguapy oiny va'e guive.

<sup>3</sup> Oguapy oiny va'e rova ma ita jaspe ha'e sardônio rami hexakã. Henda yvýry rupi ojekuaa peteĩ karugua esmeralda rami hexakã va'e.

<sup>4</sup> Tenda yvýry rupi ikuai avi vinte e quatro tenda mboae. Ha'e va'e áry ma vinte e quattro tujakueve joe opena va'ety oguapy okuapy onhemondea xiĩ va'e. Ha'e va'e kuery akã re oĩ coroa ouro guigua.

<sup>5</sup> Mbytegua tenda oĩ va'e gui oẽ overa va'e, ayvu ha'e yapu. Tenda renonde ma sete tataendy oĩ. Ha'e va'e ma sete nhe'ẽ Nhanderuete guigua.

<sup>6</sup> Tenda renonde oĩ avi peteĩ henda yupá vidro guigua rami ojekuaa va'e, itaendy rami hexakã va'e. Ha'e gui mbyte py, tenda ijyvýry rupi ikuai irundy temimoingo kuery. Ha'e va'e kuery joavaive re ma hexa oĩmba va'e, henonde katy ha'e hakykue katy guive.

<sup>7</sup> Temimoingo jypygua ma guary rami ojekuaa, mokoña ma vaka ra'y rami, mboapya ma ava rami hova va'e, ha'e rã irundaya ma taguato tuvixa va'e oveve oikovy va'e rami.

<sup>8</sup> Irundy temimoingo ikuai va'e peteĩ-teĩ ma mboapya meme ipopo va'e. Opa rupi hexa oĩ va'e, hi'áry ha'e hyepy rupi. Ara py ha'e pyávy opytu'u e'ŷ re aipoe'i:

— Iky'a e'ŷ, iky'a e'ŷ, iky'a e'ŷ va'e ma Senhor Nhanderuete Ipo'akapa va'e. Yma guive oiko va'ekue ae, aŷ oiko, ha'e raka'eve rã ou va'erã va'e — he'i okuapy.\*

<sup>9</sup> Ha'e gui tenda py oguapy oiny va'e araka'e rã peve guarã oiko va'e pe temimoingo kuery oporaei okuapy. Omboete ha'e oguerovy'a ramo

\* <sup>3:16</sup> “Haku va'e” he'ia ma Nhanderuete pe ete ikuai va'e, ha'e rã “Yro'yxã va'e” he'ia ma ixupe oikoxea neĩ oendu va'e'ŷ. Ha'e rã “Haku vevui va'e” he'ia ma ixupeguia merami rive va'e. \* <sup>3:17</sup> Lucas 12.15-21 \* <sup>4:8</sup> Ezequiel 1.4-10, Isaías 6.3

<sup>10</sup> vinte e quatro tujakueve joe opena va'ety voi guenapy'ã re ikuai, tenda py oguapy oiny va'e araka'e rã peve guarã oiko va'e renonde. Omboete vy tenda renonde omombo ojeupegua coroa. Ha'e vy aipoe'i:

<sup>11</sup> — Senhor Oreruete, ndee ma ha'eve rombojerovia, romboete ha'e ndepo'akaa roguerovy'a aguã, mba'eta opa mba'e moingoare reiko. Ndee ae reipotaa rami vy ha'e nunga ha'e javi remoingo ramo oiko raka'e — he'i okuapy.

## 5

### *Vexa'i ra'y kuaxia para oipe'a rã oexaague*

<sup>1</sup> Ha'e gui aexa rã tenda py oguapy oiny va'e opo oiporu kuaa regua py oguereko peteĩ kuaxia para onhemama va'e. Ha'e va'e py rupi ha'e hi'áry rupi ipara va'e oĩ. Sete henda py ombojaague ikuai.

<sup>2</sup> Ha'e gui peteĩ aexa avi anjo imbaraete va'e. Ha'e va'e ijayvu atã vy aipoe'i:

— Mava'e tu ha'eve kuaxia para mbojaague ikuai va'e omboi vy oipe'a aguã? — he'i.

<sup>3</sup> Ha'e rami teĩ yva re, yvy re ha'e yvy guýry avave rei jipoi kuaxia para oipe'a aguã ha'eve va'e, neĩ kuaxia re oma'ẽ aguã voi nda'evei.

<sup>4</sup> Ha'e ramo xee ajae'o vaipa, mba'eta avave rei ndojouai kuaxia para oipe'a aguã ha'eve va'e, neĩ oma'ẽ aguã.

<sup>5</sup> Ha'e rami teĩ tujakueve joe opena va'ety regua peteĩ aipoe'i xevy:

— Ejae'o eme. Ma'ẽ, Judá regua guary ipo'aka ma, Davi rapokue renhoĩ 'epy va'e. Ha'e rami rire ha'e ae ha'eve kuaxia mbojaa sete ikuai va'e omboi vy oipe'a aguã — he'i.

<sup>6</sup> Ha'e ramo peteĩ aexa tenda ha'e irundy temimoingo kuery ha'e tujakueve ikuai va'e mbyte hi'aĩ va'e, Vexa'i ra'y ojuka pyre rami ojekuua. Ha'e va'e re ma sete hakua oĩ, ha'e sete hexa avi. Hexa ma sete nhe'ẽ Nhanderuete guigua yvy jave rupi omondouka va'e.\*

<sup>7</sup> Ha'e gui Vexa'i ra'y ou vy ojopy kuaxia para tenda py oguapy oiny va'e oiporu kuaa regua gui.

<sup>8</sup> Kuaxia para Vexa'i ra'y ojopy ramo henonde irundy temimoingo kuery guenapy'ã re ikuai, ha'e vinte e quatro tujakueve voi. Peteĩ-teĩ opo py oguereko mba'epu ixã reta va'e ha'e hy'a'i ouro guigua, heakuã porã va'e oapy va'erã tynyẽ va'e. Ha'e va'e ma iky'a e'ŷ va'e kuery onhembo'ea.

<sup>9</sup> Ha'e kuery ma mboraei pyau omonhendu vy aipoe'i:

— Ndee ma ha'eve kuaxia para rejopy vy imbojaa reipe'a aguã. Mba'eta ndejukaa va'ekue, ha'e nderuguy py Nhanderuete peguarã rejogua joegua e'ŷ-e'ŷ, amboae rami ijayvu va'e, amboae yvy regua, ha'e amboae regua kuery ha'e javi gui.

<sup>10</sup> Nhanderuete po'akaa pygurarã remoingo, ixupegua sacerdote-rã guive. Ha'e ramo ha'e kuery huvixa rami 'rã joguerekoo yvy re — he'i okuapy.

<sup>11</sup> Ha'e gui teĩgue ju ama'ẽ vy peteĩ ayvu aendu tenda yvýry anjo kuery mbovy e'ŷ ikuai va'e oporaei rã. Ha'e va'e kuery ma temimoingo kuery ha'e tujakueve yvýry mbovy rei e'ŷ ikuai, jaipapapa kuaa aguã rami rei e'ŷ.

<sup>12</sup> Oporaei atã vy aipoe'i okuapy:

— Vexa'i ra'y ojuka pyre pe ma ha'eve “Ipo'akapa va'e, oguerekopa, hi'arandu ha'e imbaraete va'e” 'ea aguã. Ha'eve omboetea aguã, oguerovy'a ha'e ombojerovia pavẽ aguã guive — he'i okuapy.

<sup>13</sup> Ha'e gui aendu rã yva re, yvy, yvy guýry ha'e ye'ẽ áry temimoingo ikuai va'e ha'e javi aipoe'i:

— Tove tenda py oguapy va'e ha'e Vexa'i ra'y tombojeroviaa, tomboetea, toguerovy'aa, ha'e ta'ipo'akapa araka'e rã peve — he'i okuapy.

<sup>14</sup> Ha'e ramo irundy temimoingo kuery ombovai vy

\* <sup>5:6</sup> Vexa'i ra'y ojuka pyre rami ojekuua va'e ma Jesus Cristo ae (Isaías 53.6-12; João 1.29; Filipenses 2.5-11). Ha'e rã hexa ma Zacarias 4.10 py omombe'u porãve.

— Anhetē ete — he'i. Tujakueve voi guenapy'ā re ikuai vy omboete okuapy.

## 6

### *Jypygua kuaxia para mbojaague Vexā'i ra'y omboi rā oexaaque*

<sup>1</sup> Ha'e gui aexa rā Vexā'i ra'y omboi kuaxia para mbojaague sete oī va'e regua jypygua. Ha'e gui aendu irundy temimoingo kuery va'e regua yapu ratā va'e rami ijayvu rā. Ha'e vy

— Enhemboja ke ejuvy — he'i.

<sup>2</sup> Ha'e ramo aexa rā ou peteī kavaju xiī va'e. Ha'e va'e árygua ma guyrapa oguereko, ha'e ixupe ome'ēa coroa. Ha'e ramo joe ipo'aka ovy, ipo'akave aguā.\*

### *Kuaxia para mbojaague mokoña va'e omboi rā oexaaque*

<sup>3</sup> Ha'e gui kuaxia para mbojaague mokoña va'e omboi jave mokoña temimoingo aendu  
— Enhemboja ke ejuvy — he'i rā.

<sup>4</sup> Ha'e gui aexa rā oē kavaju mboae, pytā va'e. Ha'e va'e árygua pe ma ome'ēa yvy regua kuery ojapo aguā peteī rami ve'ŷ ikuai aguā rami, peteī-teī jojuka aguā. Ixupe ome'ēa avi peteī kyxe guaxu.

### *Kuaxia para mbojaague mboapya va'e omboi rā oexaaque*

<sup>5</sup> Kuaxia para mbojaague mboapya va'e omboi jave aendu mboapya temimoingo  
— Enhemboja ke ejuvy — he'i rā.

Ha'e gui aexa rā ou peteī kavaju huū va'e. Ha'e va'e árygua ma opo py oguereko mba'emo opejaa.

<sup>6</sup> Peteī ayvu aendu avi irundy temimoingo kuery mbyte gui rami onhendu va'e. Ha'e vy aipoe'i:

— Peteī ryru'i trigo ma peteī ára repy re 'rā ovendea. Mboapy ryru cevada voi 'rā peteī ára repy re ovendea. Ha'e rami teī embovaipa eme azeite ha'e vinho — he'i.

### *Kuaxia mbojaague irundaya va'e omboi rā oexaaque*

<sup>7</sup> Ha'e gui Vexā'i ra'y kuaxia para mbojaague irundaya va'e omboi jave aendu irundaya temimoingo  
— Enhemboja ke ejuvy — he'i rā.

<sup>8</sup> Ha'e ramo ama'ē vy aexa peteī kavaju iju va'e. Ha'e va'e árygua rery ma Manoa Ja. Hakykue ou avi omanogue retā. Ha'e kuery pe ma ome'ēa yvy regua kuery ojuka aguā, irundy-rundy ikuai va'e gui peteī-teī ojuka aguā kyxe guaxu py, karuai, nhomoingo axya ha'e yvy rupigua vixo inharō va'e py.\*

### *Kuaxia para mbojaague teī nhiruīa va'e omboi rā oexaaque*

<sup>9</sup> Kuaxia para mbojaague teī nhiruīa va'e omboi jave ma aexa rā altar oī va'e yvýry ikuai Nhanderuete ayvu omombe'uague ha'e onhemombe'u porāague re ojuka pyre kuery nhe'ē.

<sup>10</sup> Ha'e va'e kuery ojapukai atā vy

— Senhor ndepo'akapa va'e, iky'a e'ŷ ha'e anhetē va'e, raka'e peve 'rā tu ndereikuaa potai, neī nerembopagai yvy regua kuery oreruguy omoēague re? — he'i okuapy.

<sup>11</sup> Ha'e ramo ha'e kuery peteī-teī pe ome'ēa ao xiī va'e, ha'e aipo'ea opytu'uve ranhe aguā xapy'a'i, ha'e kuery ojukaa ague rami avi irmāo kuery Nhanderuete rembiguai ojuka pyrā ikuai va'e ojukapaa peve.

### *Kuaxia para mbojaague mboapya memea va'e omboi rā oexaaque*

<sup>12</sup> Ha'e gui aexa rā Vexā'i ra'y kuaxia para mbojaague mboapya memea va'e omboi jave yvy oryryi atā. Kuaray pytūmba ajukue huū rei va'e rami, jaxy voi tuguy rami pytāmba.

\* **6:2** Mateus 24.4-14 \* **6:8** Zacarias 6.1-6, Ezequiel 14.21

<sup>13</sup> Yva re jaxy-tata ikuai va'e ho'apa yvy py, yvytu oipeju atā rā figo'a ky'i okuipaa rami avi.

<sup>14</sup> Ha'e gui ma yva okanhy xapy'a mba'emo pire onhemama ovv va'e rami. Yvyty ha'e ypa'ū ikuai va'e ha'e javi ovapa oñague gui.

<sup>15</sup> Ha'e ramo yvy regua huvixave kuery, yvatekueve, xondaro ruvixa, oguerekopa va'e kuery, ipo'akakueve, escravo ha'e escravo e'ŷ va'e ha'e javi ma yvykua rupi onhemimba okuapy, ha'e yvy'ā re ita pa'ū ikuai va'e rupi guive.

<sup>16</sup> Ha'e va'e kuery ma yvyty ha'e ita ikuai va'e pe aipoe'i:

— Pe'a ke ore'ary, orenhomni tenda py oguapy oiny va'e orerexa e'ŷ aguā, ha'e Vexai' ra'y orembopaga e'ŷ aguā.

<sup>17</sup> Mba'eta ovaē ma ipoxya ára. Mava'e tu ogueropo'aka ta?

## 7

### *Cento e quarenta e quatro mil Israel kuery regua oexaague*

<sup>1</sup> Ha'e va'e rire irundy anjo aexa yvy apy irundy oī va'e py hi'aī rā. Ha'e va'e kuery ma yvytu jokoarā ikuai, yvytu oipeju e'ŷ aguā yvy re, ye'ē re, neī peteīve yvyra hi'aī va'e re guive.

<sup>2</sup> Ha'e gui peteī anjo mboae ju aexa kuaray oua katy gui oē ouvy va'e, Nhanderuete oikove va'e guigua kuaa ukaarā ogueru. Ha'e va'e ma ojapukai atā irundy anjo yvy ha'e ye'ē mbovaipaarā omoī mbyre pe.

<sup>3</sup> Ha'e vy aipoe'i:

— Pembovaipa eme ranhe yvy, ye'ē, neī yvyra ikuai va'e, Nhanderuete rembiguai kuery rova re ikuua ukaarā romoī e'ŷa ja — he'i.\*

<sup>4</sup> Ha'e gui ikuua ukaarā omoīmbaa va'ekue oipapaa rā aendu mbovy paa. Ha'e va'e kuery ha'e javi vy ma cento e quarenta e quattro mil ikuai, Israel kuery ha'e javi regua gui.\*

<sup>5</sup> Judá regua kuery gui doze mil, Rúben regua gui doze mil ju, Gade regua gui doze mil,

<sup>6</sup> Aser regua gui doze mil, Naftali regua gui doze mil, Manassés regua gui doze mil,

<sup>7</sup> Simeão regua gui doze mil, Levi regua gui doze mil, Issacar regua gui doze mil,

<sup>8</sup> Zebulom regua gui doze mil, José regua gui doze mil, ha'e Benjamim regua gui doze mil re avi ikuua ukaarā omoīa.

### *Ombopyau pyre opu'ā okuapy va'e oexaague*

<sup>9</sup> Ha'e va'e rire aexa rā heta ete ikuai avave rei oipapa kuaa aguā rami e'ŷ, ha'e javi regua kuery, joegua e'ŷ-e'ŷ, amboae yvy regua ha'e amboae rami ijayvu va'e gui. Ha'e va'e kuery opu'āmba okuapy tenda ha'e Vexai' ra'y renonde. Xiī va'e py peteī-teī onhemonde va'e, opo py pindo rogue oguerekopu guive.

<sup>10</sup> Ha'e rami vy ijayvu atā vy aipoe'i:

— Tenda py Nhanderuete oguapy oiny va'e ha'e Vexai' ra'y gui ae ou jaa jepe aguā — he'i okuapy.

<sup>11</sup> Anjo kuery ma tujakueve ha'e irundy temimoingo kuery yvýry rupi ikuai, tenda jovaise re opu'ā okuapy. Ha'e javive guenapy'ā re ikuai tenda renonde, yvy re ngova omovaē okuapy Nhanderuete omboete vy.

<sup>12</sup> Ha'e vy aipoe'i:

— Anhetē ete. Tove Nhanderuete pe toporaeia, tombojeroviaa, tai'arandu, toguerovy'aa, tomboetea, ta'ipo'aka ha'e ta'imbaraete araka'e rā peve. Amém — he'i okuapy.

<sup>13</sup> Ha'e gui tujakueve regua peteī ijayvu vy oporandu xevy:

— Peva'e kuery xiī va'e py onhemonde va'e, marā ramigua tu? Magui ou va'ekue tu?

\* <sup>7:3</sup> Ezequiel 9.4    \* <sup>7:4</sup> Apocalipse 9.3,4; 14.1-5

<sup>14</sup> Xee ambovai vy

— Xeruvixa, ndee ma reikuua 'rā — ha'e.

Ha'e ramo aipoe'i xevy:

— Ha'e kuery ma ikuai axy eteague gui ou va'ekue. Vexa'i ra'y ruguy py oao ojoi uka vy oiky'a'o uka va'ekue.

<sup>15</sup> Ha'e nunga rupi Nhanderuete renda renonde rupi riae ikuai. Ara py ha'e pyávy ombojerovia okuapy ixupegua oo iky'a e'ý va'e py. Ha'e ramo ha'e kuery áry rupi tenda py oguapy oiny va'e ojao'i 'rā ho'ã py.

<sup>16</sup> Ha'e ramo ha'e kuery noenduvei ma 'rā karuai neí yuvei. Ha'e kuery áry kuaray ndojope raxyvei 'rā, neí haku noenduvei 'rā guive,

<sup>17</sup> mba'eta ha'e kuery re Vexa'i ra'y tenda py oĩ va'e opena 'rā, ha'e ogueraa 'rā guive ygua tekove me'ea oña katy. Ha'e kuery rexay Nhanderuete omombirupa 'rā.\*

## 8

### *Kuaxia para mbojaague sete-a va'e omboi rā sete anjo mimby guaxu oguereko va'e oexaague*

<sup>1</sup> Ha'e gui kuaxia para mbojaague sete-a va'e Vexa'i ra'y omboi jave yva re okyririmbá katuí'i meia-hora rānda'u.

<sup>2</sup> Ha'e gui aexa sete anjo Nhanderuete renonde opu'ã okuapy rā. Ha'e va'e kuery pe ma sete mimby guaxu ome'ëa.

<sup>3</sup> Ha'e gui ou avi anjo mboae. Ha'e va'e ma altar yvy'iry hi'aï. Opo py oguereko hy'a'i heakuã porã va'e oappyaty ouro guigua. Ixupe ma ome'ëa vaipa heakuã porã va'e, iky'a e'ý va'e kuery ojerurea irûrã oapy aguã altar ouro guigua tenda renonde oĩ va'e áry.

<sup>4</sup> Ha'e gui anjo po py hy'a'i heakuã porã va'e rapyaty oĩ va'e gui hataxí ojeupi ov y Nhanderuete oña peve, iky'a e'ý va'e kuery ojerurea irûrã.

<sup>5</sup> Ha'e gui hy'a'i heakuã porã va'e oappyaty ma peteïgue ju anjo omonyë tata altar áry gui ojopy va'ekue. Ha'e vy omombo yvy re. Ha'e rā oiko yapu, ayvu, overa ha'e yvy ryryi.

<sup>6</sup> Ha'e gui mae ma anjo kuery sete mimby guaxu revegua oguereko katu omonhe'ë aguã.

### *Jypygua mimby guaxu omonhe'ë jave oexaague*

<sup>7</sup> Ha'e gui jypygua anjo omonhe'ë mimby guaxu. Ha'e ramo ho'a amandau ha'e tata tuguy re irû va'e. Ha'e nunga ma ko yvy re omomboa. Ha'e ramo oapy yvy, yvyra ikuai va'e ha'e jai rogue pyau ha'e javi. Mboapy-apy henda ikuai va'e gui peteï-teï okai.

### *Mokoïa mimby guaxu omonhe'ë jave oexaague*

<sup>8</sup> Ha'e gui anjo mokoïa ju omonhe'ë mimby guaxu. Ha'e ramo peteï omomboa ye'ë py, yvyty tuvixa va'e ramigua, hendi va'e. Ha'e ramo ye'ë mboapy-apy oĩ va'e gui peteï-teï henda py optya tuguy.

<sup>9</sup> Temimoingo kuery ye'ë rupi mboapy-apy ikuai va'e peteï-teï omano. Kanoã voi mboapy-apy ikuai va'e gui peteï-teï omboavaipa.

### *Mboapya mimby guaxu omonhe'ë jave oexaague*

<sup>10</sup> Ha'e gui anjo mboapya ju omonhe'ë mimby guaxu. Ha'e ramo yva gui ho'a peteï jaxy-tata tuvixa va'e, takua ryxa rami hendi va'e. Yakã mboapy-apy oĩ va'e gui peteï-teï áry ho'a, ha'e yvu ikuai va'e áry guive.

<sup>11</sup> Jaxy-tata rery ma Iro ete va'e. Ha'e rami vy yy mboapy-apy oĩ va'e gui peteï-teï iro. Ha'e ramo avakue hetu omano yy gui, iro vaipa ramo.

### *Irundaya mimby guaxu omonhe'ë jave oexaague*

---

\* <sup>7:17</sup> Isaías 49.10; 25.8

<sup>12</sup> Ha'e gui anjo irundaya ju omonhe'ẽ mimby guaxu. Ha'e ramo kuaray, jaxy ha'e jaxy-tata mboapy-apy ikuai va'e gui peteĩ-teĩ pytū. Ara py ha'e pyávy teĩ naexakãvei.

<sup>13</sup> Ha'e ramo ama'ẽ vy aendu peteĩ taguato tuvixa va'e yva mbyte rupi oveve vy ijayvu rã. Ijayvu atã reve aipoe'i:

— Nda'evei ete, nda'evei ete, nda'evei ete 'rã yvy regua kuery pe, mboapy anjo mimby guaxu omonhe'ẽ va'erã oime teri ramo.

## 9

### *Teĩ nhiruña mimby guaxu omonhe'ẽ jave oexaague*

<sup>1</sup> Ha'e gui teĩ nhiruña anjo omonhe'ẽ mimby guaxu. Ha'e rã aexa peteĩ jaxy-tata yva gui ho'a rã yvy re. Ha'e va'e pe ma ome'ẽa yvykua pytūa rokẽ pe'aa.

<sup>2</sup> Ha'e gui yvykua pytūa rokẽ oipe'a ramo yvykua gui ojeupi hataxí, tatakua tuvixa va'e gui hataxí opu'ãa rami. Yvykua gui hataxí oẽ va'e omo'ãmba kuaray ha'e yvate rupi.

<sup>3</sup> Hataxí mbyte gui oẽ tuku, ha'e yvy re oje'oi. Ha'e va'e kuery pe ome'ẽa japeuxa yvy rupigua rami jopi aguã.

<sup>4</sup> Ha'e kuery pe aipo'ea ojavyky e'ŷ aguã yvy re nhuũ ha'e hogue va'e, neĩ yvyra ikuai va'e, ha'e rã avakue rova re Nhanderuete guigua kuaa ukaarã nomoĩaia va'ekue anho.

<sup>5</sup> Tuku kuery jojuka aguã 'rãgue py ha'e kuery pe ome'ẽa teĩ nhiruĩ jaxy re nhomoingo axy aguã rive. Ha'e ramo japeuxa jopi vy nhomoingo axya rami 'rã nhomoingo axy.

<sup>6</sup> Ha'e va'e jave py avakue onhea'ã 'rã omano aguã teĩ nda'evei 'rã. Omanoxea oendu teĩ nda'evei 'rã omano aguã.

<sup>7</sup> Tuku ma kavaju joe opu'ã aguã katy guarã oguereko katu pyre rami ojekuaa. Inhakã re oĩ coroa ouro guigua rami ojekuaa va'e. Hova ma ava rami ojekuaa.

<sup>8</sup> Hi'a ma kunhague'a rami, haĩ ma guary rai rami.

<sup>9</sup> Opexo re ma oguereko pexo regua ferro gui ojapo pyre ramigua. Ipepo revovo ma joe opu'ã aguã katy karóxa heta kavaju omoatã heravy va'e revovo rami.

<sup>10</sup> Huguai ma japeuxa rami ipopia. Huguai re ae oĩ teĩ nhiruĩ jaxy re nhomoingo axy va'erã.

<sup>11</sup> Ha'e kuery rerekaoa huvinaxe rami oguereko va'e ma anjo yvykua pytūa pygua. Ha'e va'e rery ma hebraico py Abadom, ha'e rã grego py ma Apoliom.

<sup>12</sup> Ha'e rami py ojeupity ma jypygua "Nda'evei ete" he'iague. Ha'e va'e rire mokoĩ ju 'rã oiko.

### *Mboapy memea mimby guaxu omonhe'ẽ jave oexaague*

<sup>13</sup> Ha'e gui anjo mboapy memea ju omonhe'ẽ mimby guaxu. Ha'e gui aendu peteĩ ayvu. Ha'e va'e ma ouro guigua altar Nhanderuete renonde oĩ va'e apy irundy oĩ va'e gui onhendu.

<sup>14</sup> Ha'e vy aipoe'i anjo mboapy memea va'e mimby guaxu oguereko va'e pe:

— Ejora ke irundy anjo Eufrates yakã guaxu yvýry ojokua pyre — he'i.

<sup>15</sup> Ha'e ramo ojora irundy anjo. Ha'e va'e kuery ma ha'e va'e ma'etŷ, ha'e va'e jaxy, ha'e va'e ára, ha'e va'e hora jave ae avakue mboapy-apy ikuai va'e gui peteĩ-teĩ jukaarã oguereko katu pyre.

<sup>16</sup> Kavaju árygua xondaro kuery mbovy paa aendu rã duzentos milhões ikuai.

<sup>17</sup> Ha'e rami vy aexa rã kavaju ha'e hi'árygua kuery opexo regua oguereko tata rami pytã va'e, jacinto rami hovy va'e ha'e enxofre rami iju va'e. Kavaju akã ma guary akã rami. Ijuru gui ma oẽ oiny tata, hataxí ha'e enxofre.

<sup>18</sup> Ha'e va'e mboapy nhomoingo axyarã ijuru gui oẽ va'e py ae jojuka 'rã, tata, hataxí ha'e enxofre py. Avakue mboapy-apy ikuai va'e gui peteĩ-teĩ ojuka 'rã.

<sup>19</sup> Mba'eta kavaju kuery mbaraetea ma ijuru ha'e huguai re oĩ. Huguai ma mboi rami inhakã va'e. Ha'e va'e py ae 'rã nhomoingo axy.

<sup>20</sup> Ha'e rā amboae kuery, imoingo axyarā oiko va'e gui nomanoi va'ekue ma ndojeko rerovai opo py mba'emo vai ojapoaty gui. Ndojepe'ai ae anha ha'e mba'emo ra'angaa ouro guigua omboetea gui, neī prata guigua, overa va'e, ita ha'e yvyra guigua gui, ha'e nunga oexa va'erā e'ŷ, oendu va'erā e'ŷ, neī oguata va'erā e'ŷ teī.

<sup>21</sup> Ha'e kuery ndojeko rerovai ae jojukaaty gui, imba'evykyta, itavy reia, neī imondaa gui.\*

## 10

### *João pe kuaxia para'i ho'u ukaa ague*

<sup>1</sup> Ha'e gui amboae anjo imbaratee va'e aexa yva gui oguejy ouvy rā. Ha'e va'e ma arai py onhemonde ouvy. Inhakā áry rupi ma karugua ojekuaa. Hova ma kuaray rami hexakā, ha'e hetyma ma tata rami.

<sup>2</sup> Opo py ma peteī kuaxia para'i ojepe'a va'e oguereko. Opy oiporu kuaa regua re opyrō ye'ē áry, ha'e rā opy oiporu kuaa e'ŷa re ma yvy re opyrō.

<sup>3</sup> Ha'e gui ojapukai atā guary okororōa rami. Ojapukai ramo sete yapu oī va'e ombovai.

<sup>4</sup> Sete yapu ijayvu rā aendu vy ambopara ta ramove peteī ayvu aendu yva gui,

— Emombe'u eme sete yapu ijayvuague, embopara eme — he'i va'e.\*

<sup>5</sup> Ha'e gui ye'ē ha'e yvy re anjo opyrō rā aexa va'e ma opo oiporu kuaa regua oupi yvate katy.

<sup>6</sup> Ha'e rami vy oura araka'e rā peve oiko va'erā rery rupi, yva, yvy, ye'ē ha'e opa mba'e ikuai va'e apoare re. Ha'e vy aipoe'i:

— Ndarevei ma 'rā.

<sup>7</sup> Mba'eta sete-a anjo ijayvua ára py mimby guaxu omonhe'ē ta jave ojeupitypa ma 'rā Nhanderuete oikuua uka e'ŷ teri va'ekue, guembiguai profeta kuery pe omombe'uague rami vy — he'i.

<sup>8</sup> Yva gui ijayvu va'ekue ma teīgue ju ijayvu vy aipoe'i xevy:

— Tereo, ejopy kuaxia para ojepe'a va'e ye'ē ha'e yvy re anjo opyrō va'e po py oī va'e — he'i.

<sup>9</sup> Ha'e ramo anjo hi'aña py aa vy ajerure kuaxia para'i xevy ome'ē aguā re. Ha'e ramo aipoe'i:

— Ejopy ha'vy, ha'e he'upa. Anhetē iro 'rā nderyepy py, ha'e rā ndejuru py oī teria ja ei rami he'ē 'rā — he'i.

<sup>10</sup> Anjo po gui kuaxia para'i ajopy vy ha'u ramo xejuru py he'ē ei rami. Ha'e rami teī amokō rire xerye py ma iro.\*

<sup>11</sup> Ha'e gui aipoe'ive xevy:

— Teīgue ju 'rā remombe'u heta regua kuery rekorā, amboae regua, amboae rami ijayvu va'e ha'e huvixave ikuai va'e rekorā.

## 11

### *Nhanderuete pegua oo iky'a e'ŷ va'e oa'ā aguā re ijayvuague*

<sup>1</sup> Ha'e gui xevy pe ome'ēa peteī takua popoka rami ipuku va'e. Ha'e aipo'ea xevy:

— Epu'ā ke, tereo, ha'e ea'ā Nhanderuete pegua oo iky'a e'ŷ va'e. Ea'ā avi altar oī va'e, ha'e pygua ombojerovia va'e kuery voi.\*

<sup>2</sup> Ha'e rā oo iky'a e'ŷ va'e roka ma tove, ea'ā eme, mba'eta amboae regua kuery pe ranhe omboaxaa va'ekue. Ha'e va'e kuery ma quarenta e dois jaxy re 'rā opyrō tetā iky'a e'ŷ va'e re.

### *Mokoī profeta ojukaa rā oexaague*

\* **9:21** Jeremias 5.3 \* **10:4** Daniel 12.4 \* **10:10** Ezequiel 3.1-3 \* **11:1** Ezequiel 40.3

<sup>3</sup> — Ha'e gui mokoõ profeta xeayvu mombe'uarã ambou vy mil duzentos e sessenta ára re 'rã amoingo, ajukue vaikue py onhemonde reve — he'i.

<sup>4</sup> Ha'e va'e kuery ma mokoõ oliveira, ha'e mokoõ tataendy renda Senhor yvy re ipo'aka va'e renonde hi'aõ va'e.\*

<sup>5</sup> Ha'e kuery pe amongue ojapo vai ta ramo ijuru gui oẽ 'rã tata hovaigua kuery mombaarã. Ha'e rami 'rãe imoingo axynea kuery omano.

<sup>6</sup> Ha'e kuery ipo'aka 'rã yva ojoko aguã, ayvu omombe'u oikovya ja oky e'ý aguã. Yy re voi ipo'aka 'rã tuguy rami ojeapo aguã. Ipo'aka avi 'rã opa marãguia nhomoingo axya py yvy ombovaipa aguã, mbovykue rei e'ý ojapoxea rami.

<sup>7</sup> Ha'e va'e rire ha'e kuery omombe'u 'rã va'ekue omombe'upa ma ramo ha'e kuery re peteõ opu'ã 'rã, vixo vaikue yvykua gui oẽ va'e. Ha'e va'e ma ha'e kuery re ipo'aka vy ojuka ete ranhe 'rã.

<sup>8</sup> Ha'e kuery retekue omomboa inony 'rã tetã guaxu mbyte rupi tape oaxa va'e py. Ha'e va'e tetã pe ma "Sodoma" ha'e "Egito" 'ea Nhe'ẽ gui, mba'eta ha'e py ae ha'e kuery Senhor ojukaa aviague, kuruxu re.

<sup>9</sup> Ha'e ramo mokoõ profeta retekue re heta 'rã oma'ẽ: amboae yvy regua kuery, joegua e'ý-e'ý, amboae rami ijayvu va'e ha'e amboae regua kuery. Irundy araa kuaray mbyte peve 'rã hetekue re oma'ẽ okuapy, ojaty uka vy e'ý.

<sup>10</sup> Mba'eta yvy regua kuery oguerovy'a rei 'rã mokoõve omanoague. Ha'e rami vy ojapo 'rã ngaru, ha'e joupe-upe ome'ẽ 'rã mba'emo, "Ha'e va'e mokoõ profeta ma yvy regua kuery omoingo axy rei va'ekue" he'i vy.

<sup>11</sup> Ha'e gui irundy araa kuaray mbyte rire ma Nhanderuetea gui nhe'ẽ imoingove jevyarã ou vy ha'e kuery re 'rã oĩ. Ha'e ramo opu'ã 'rã nhogueno'amy, ha'e hexaa kuery ndaekorãvei 'rã okuapy.

<sup>12</sup> Ha'e gui mokoõ profeta yva gui oendu 'rã peteõ ayvu atã "Penhemboja ke pejuvy" he'i nhendu va'e. Ha'e ramo yva re ojeupi 'rã arai rupi, hovaigua kuery oexaa py.

<sup>13</sup> Ha'e ramove oiko 'rã yvy oryryi atã va'e, tetã mbovaipaarã. Dez henda oĩ va'e-va'e gui peteõ-teõ henda py 'rã ombovaipa. Yvy ryryi gui omano 'rã sete mil. Ha'e rã amboae kuery ma ndaekorãvei reve ombojerovia 'rã okuapy Nhanderuete yva pygua.

<sup>14</sup> Ha'e rami py ojeupity mokoõguea "Nda'evei ete" he'iague. Ma'ẽ, are'ý'i re mboapya ju 'rã ou.

### *Sete-a mimby guaxu ju omonhe'ẽ jave oexaague*

<sup>15</sup> Ha'e gui sete-a anjo ju omonhe'ẽ mimby guaxu. Ha'e ramo yva re onhendu peteõ ayvu atã:

— Yvy regua po'akaa ma nhande-Senhor ha'e hemimbou Cristo pegua omboaxaa. Ha'e ramo ha'e va'e ju 'rã joguerek araka'e rã peve — he'i va'e.\*

<sup>16</sup> Ha'e gui vinte e quatro tujakueve joe opena va'ety kuery Nhanderuete renonde, guenda py oguapy okuapy va'e ma guenapy'ã re ikuai, ha'e yvy re ngova omovaõ Nhanderuete omboetea rupi.

<sup>17</sup> Ha'e vy aipoe'i okuapy:

— Senhor Oreruete Ndepo'akapa va'e, aý reiko ha'e yma guive reiko va'ekue va'e, ore kuery roguerovy'a, mba'eta ndepo'aka etea rexu uka vy huvixave ma rei.

<sup>18</sup> Anhetõ, yvy regua kuery ipoxypa va'ekue ri ovaõ ma ndee ae ndepoxy aguã, omano va'ekue remboayvu aguã ára rea'angaague. Ha'e rami vy nerembiguai kuery pe reme'ẽ 'rã hekovia, profeta kuery, iky'a e'ý va'e ha'e nderery oendu vy ojererokyjea rupi ikuai va'e ha'e javi, yvyigüeve ha'e yvatekueve. Ovaõ avi yvy mombaare kuery remomba aguã — he'i.

\* **11:4** Zacarias 4.1-2 \* **11:15** Daniel 7.27

<sup>19</sup> Ha'e gui yva re ojepe'a jekuaa Nhanderuete pegua oo iky'a e'ŷ va'e rokẽ, ha'e ramo iky'a e'ŷ va'e ropy aexa guexeve guarã ojapo va'ekue ryru oĩ va'e. Ha'e gui oiko overa, ayvu, yapu ha'e yvy ryryi. Amandau avi ho'a vaipa.

## 12

### *Kunha ha'e teju-jagua oexaque*

<sup>1</sup> Yva re peteĩ ojekuaa avi hexa pyrã tuvixa va'e. Oiko peteĩ kunha kuaray py onhemonde va'e, jaxy áry ipy oĩ va'e. Ha'e va'e akã re ma oĩ peteĩ coroa doze jaxy-tata oĩa.

<sup>2</sup> Hye guaxu'i va'e vy haxy rã haxẽ, ojexavai oiny kyrĩ'i va'e oikuavã aguã haxy ramo.

<sup>3</sup> Amboae ojekuaa avi hexa pyrã yva re, peteĩ teju-jagua pytã hi'aĩ tuvixa va'e. Ha'e va'e ma sete inhakã ha'e dez hakua va'e. Sete inhakã re ma sete coroa oĩ.

<sup>4</sup> Nguguai py oity yva gui jaxy-tata ikuai va'ekue. Mboapy-apy oĩ va'e gui peteĩ-teĩ oity vy omombo yvy katy. Kunha kyrĩ va'e oikuavã ta va'e renonde teju-jagua hi'aĩ, itui'i ramove ho'u aguã.

<sup>5</sup> Ha'e gui itui'i ma peteĩ ava'i. Ha'e va'e ma ha'e javi regua mo'aranduarã oiko po pygua ferro guigua py. Ha'e gui kunha va'e pi'a ma Nhanderuetea py heraa, henda peve.

<sup>6</sup> Ha'e gui kunha va'e ma teko a e'ŷa katy ojava ovv. Ha'e py hekoarã oĩ Nhanderuete oguereko katu va'ekue. Ha'e py omongaru uka 'rã mil duzentos e sessenta araa peve.

### *Yva gui teju-jagua oitya rã oexaque*

<sup>7</sup> Ha'e gui yva re oiko joe opu'ã va'e. Ha'e rami vy anjo Miguel ma guexeveguia kuery reve opu'ã okuapy teju-jagua re. Ha'e ramo teju-jagua ojeupagua anjo kuery reve opu'ã avi,

<sup>8</sup> teĩ ha'e va'e kuery nda'ipo'akai. Ha'e ramo ha'e kuery pe noïvei yva re ikuai aguã.

<sup>9</sup> Ha'e ramo yva gui oitya teju-jagua tuvixa va'e, mboi yma guive oiko va'ekue, anha Satanás hery va'e, yvy regua kuery ha'e javi mbotavya. Yvy katy omomboa, ixupeguia anjo kuery reve.

<sup>10</sup> Ha'e gui yva gui aendu peteĩ ijayvu atã va'e:

— Aŷ ma ojekuaa ma jaa jepe aguã, Nhanderuete ombaraetea ha'e opo'akaa oexa uka aguã guive. Ojekuaa avi hemimbou Cristo po'akaa, mba'eta oity ma nhandirmão kuery rekoke ramigua mombe'ua. Ha'e va'e ma ara py ha'e pyávy Nhanderuete renonde hi'aĩ ha'e kuery rekoke omombe'ua py.

<sup>11</sup> Ha'e rami teĩ hexe ma Vexa'i ra'y ruguy rupi ha'e kuery ipo'aka, ha'e hexegua ayvu omombe'ua py guive. Ha'e kuery omano aguã rami ikuai teĩ noendui okuapy ojeayvua.

<sup>12</sup> Ha'e nunga rupi yva re pendekuai va'e ha'e javi, pevy'a ke. Ha'e rã yvy ha'e ye'ẽ pe ma nda'evei ete 'rã, mba'eta pendea py oguejy ma anha. Ipoxy vaipa reve oguejy, mba'eta oikuua hi'ára opa rai'i maa.

### *Teju-jagua kunha va'e oakykue monha rã oexaque*

<sup>13</sup> Ha'e gui yvy py teju-jagua omomboa ma ramo oakykue monha kunha opi'a'i oikuavã va'ekue.

<sup>14</sup> Ha'e ramo kunha va'e pe ome'ẽa taguato tuvixa va'e pepo joavaive reveguia, teko a e'ŷa katy oveve aguã, hekoarã oguereko katu pyre py. Ha'e py ma omongarua 'rã mboapy ma'etý rire irundaya mbyte peve, mboi oexa e'ŷa py.\*

<sup>15</sup> Ha'e ramo kunha va'e rakykue mboi ou vy ojuru gui yy omoẽ yakã rami, kunha va'e ogueroxry heravy aguã.

<sup>16</sup> Ha'e rami teĩ yvy ae oipptyvõ kunha va'e. Ha'e rami vy ojepe'a vy omokõmba teju-jagua ojuru gui yy omoẽ va'ekue.

\* **12:14** Daniel 7.25, 12.7

<sup>17</sup> Ha'e ramo kunha va'e pe teju-jagua ipoxyve ete vy oo imemby mboae kuery ikuai va'e re opu'ã aguã. Ha'e va'e kuery ma Nhanderuete ojapo uka va'e omoõ porã, ha'e Jesus regua omombe'ua rupi ikuai va'e.

<sup>18</sup> Ha'e gui teju-jagua ma ye'ẽ rembe re ju hi'aĩ ita ku'i reia py.

## 13

### *Ye'ẽ gui vixo vaikue oẽ rã oexaague*

<sup>1</sup> Ha'e gui peteĩ vixo vaikue aexa ye'ẽ gui oẽ ouvy rã. Ha'e va'e ma dez hakua ha'e sete inhakã va'e. Hakua re ma dez coroa oĩ. Ìnhakã re ma hery oĩ ayvu vai regua.

<sup>2</sup> Vixo aexa va'e ma reõ rami hete. Ipy ma ursa rami, ha'e rã ijuru ma guary rami. Ixupe teju-jagua omboaxa opo'akaa, henda openaaty py oĩ aguã, ha'e mba'emo tuvixa va'e ojapo aguã guive.\*

<sup>3</sup> Ha'e gui aexa rã inhakã sete ikuai va'e regua peteĩ re ijukhaarã omboguaiague oĩ, teĩ ijai ijukhaarã oĩ va'ekue gui okuera. Ha'e ramo yvy regua kuery ha'e javi onhemondyipa vy vixo re anho oje'oi.

<sup>4</sup> Teju-jagua voi ombojerovia okuapy, vixo ombopo'aka rire. Vixo vaikue avi ombojerovia. Ha'e vy aipoe'i okuapy:

— Mava'e nda'u vixo rami ipo'aka va'e? Mava'e nda'u opu'ã kuaa 'rã hexe? — he'i.

<sup>5</sup> Ixupe ome'ea avi ojuru py ijayvupa rei ha'e ijayvu vai aguã. Quarenta e dois jaxy peve ombopo'akaa.

<sup>6</sup> Ha'e ramo ojuru oipe'a Nhanderuete re ijayvu vai aguã. Ha'e rami vy hery ha'e ombojeroviaaty re ijayvu rei, ha'e yva pygua kuery re guive.\*

<sup>7</sup> Ixupe ome'ea avi iky'a e'ŷ va'e kuery re opu'ã ha'e ipo'aka ete aguã. Ombopo'akaa avi yvy re ikuai va'e re: peteĩ-teĩ regua re, joegua e'ŷ-e'ŷ, amboae rami ijayvu va'e ha'e amboae regua kuery re.\*

<sup>8</sup> Ha'e ramo yvy regua kuery ha'e javi 'rã ombojerovia. Ha'e va'e kuery rery ma kuaxia tekove oguereko va'e kuery rery oĩa re noĩ. Ha'e va'e kuaxia ma Vexa'i ra'y pegua, mba'eta yvy itui ypy'i guive ojejuka uka va'ekue.

<sup>9</sup> Ijapyxa oĩ va'e ke toendu.

<sup>10</sup> Nhuã py heraa pyrã ma nhuã py ae 'rã oo. Kyxe guaxu py ojuka pyrã ma kyxe py ae 'rã ojukaa. Ha'e rami oiko rã iky'a e'ŷ va'e kuery toexa uka ogueropo'aka ha'e ojerovia etea.

### *Yvy guy gui vixo mboae oẽ ouvy rã oexaague*

<sup>11</sup> Ha'e gui vixo vaikue mboae ju aexa yvy guy gui oẽ ouvy rã. Ha'e va'e ma Vexa'i ra'y rami hakua mokoõ va'eri teju-jagua rami ijayvu va'e.

<sup>12</sup> Jypygua vixo po'akaa rupi oiko henonde. Ha'e rami vy ojapo 'rã yvy regua kuery vixo jypygua omboete aguã rami, ijai ijukhaarã oĩ va'ekue gui okuera rire.

<sup>13</sup> Ojapo avi 'rã hexa pyrã tuvixa va'e. Ha'e rami vy yva gui omboguejy 'rã tata yvy katy, avakue oexaa py.

<sup>14</sup> Vixo renonde hexa pyrã ojapo aguã ombopo'akaague rupi ombotavy 'rã yvy regua kuery. Ha'e rami vy ha'e kuery pe ojapo uka 'rã vixo ra'angaarã, kyxe guaxu py omboguaiague gui oikove ju va'ekue pegua ae.

<sup>15</sup> Ombopo'aka avi vixo ra'angaa omopytuẽ aguã. Ha'e ramo ha'angaa ijayvu, ha'e ojuka uka guive ha'angaa ombojerovia e'ŷ va'e kuery.

<sup>16</sup> Pavẽ re omoõ uka ikuua ukaarã, ipo oiporu kuaa regua re, e'ŷ vy hova re. Yvyigueve ha'e yvatekueve, oguerekopa va'e ha'e iporiaukue'i, escravo ha'e escravo e'ŷ ha'e javi re omoõ,

17 mba'eve rei ovende e'ŷ neĩ ojogua e'ŷ aguã, ikuaa ukaa oguereko va'e e'ŷ vy. Ha'e va'e kuery re oĩ jypygua vixo rery, e'ŷ vy hery regua númera.

18 Ha'e nunga ma 'arandua oexa ukaa aguã oiko. Hi'arandu va'e kuery toikuaa pota vixo númera mbovy paa re, mba'eta ava regua númera ae, seiscentos e sessenta e seis.

## 14

### *Vexa'i ra'y ha'e ixupeguia kuery Sião yvyty áry ikuai rã oexaague*

<sup>1</sup> Ha'e gui ama'ẽ vy aexa Vexa'i ra'y Sião yvyty áry hi'aĩ rã. Hexeve ikuai avi cento e quarenta e quatro mil. Ha'e va'e kuery rova re ma hery ha'e Tuu rery omboparaa va'ekue.\*

<sup>2</sup> Ha'e gui peteĩ ayvu aendu yva gui onhendu va'e, yy heta ha'e yapu atã va'e revovo rami, ha'e mba'epu ixã reta va'e ombopua rã onhendua rami guive.

<sup>3</sup> Tenda oĩ va'e renonde rupi oporaeia okuapy mboraei pyau, irundy temimoingo kuery ha'e tujakueve joe opena va'ety renonde. Ha'e va'e mboraei ma avave rei ndoporaei kuaai, cento e quarenta e quattro mil yvy regua kuery gui ogueraa jepe pyre'ŷ vy.

<sup>4</sup> Ha'e va'e kuery ma kunhague reve onhemongy'a e'ŷ va'e, joguereko e'ŷ va'e vy. Vexa'i ra'y ooa rupi rei hupive oje'oi va'e. Avakue mbyte gui ojoguaa Nhanderuete ha'e Vexa'i ra'y peguarã jypy'igua ikuai aguã.

<sup>5</sup> Ha'e kuery juru py apu oĩ e'ŷ va'e, mba'eta iky'a e'ŷ va'e meme.

### *Jypygua ayvu oenduague*

<sup>6</sup> Ha'e gui anjo mboae ju aexa yva mbyte rupi oveve-veve rã. Ha'e va'e ma ayvu porã araka'e rã peve guarã oguereko yvy regua kuery pe omombe'u va'erã, peteĩ-teĩ regua pe, joegua e'ŷ-e'ŷ, amboae rami ijayvu va'e, ha'e amboae yvy regua kuery ha'e javi pe.

<sup>7</sup> Ha'e vy ijayvu atã reve aipoe'i:

— Pejererokyje ke Nhanderuete renonde, pemboete guive, mba'eta ovaẽ ma nhombopaga aguã hora. Pembojerovia yva, yvy, ye'ẽ ha'e yvu ikuai va'e apoare — he'i.

### *Mokoĩa ayvu oenduague*

<sup>8</sup> Ha'e va'e rire ou anjo mboae, mokoĩa va'e. Ha'e va'e ju aipoe'i:

— Ho'a, ho'apa ma Babilônia tetã guaxu. Mba'eta ha'e va'e tetã ma vinho ome'ẽ va'ekue yvy regua kuery ha'e javi oy'u aguã. Ha'e va'e ma poxya, Babilônia pygua kuery itavy reiague re ou va'e.

### *Mboapya ayvu oenduague*

<sup>9</sup> Ha'e va'e rire ou anjo mboae ju, mboapya va'e. Ha'e va'e ma ijayvu atã reve aipoe'i:

— Vixo vaikue ha'e ha'angaa mbojeroviaa kuery rova re, e'ŷ vy ipo re ikuua ukaarã omoimbaa va'ekue ma

<sup>10</sup> oy'u'rã vinho Nhanderuete poxya regua. Ha'e nunga ma omoirũ e'ŷ re oguereko katu va'ekue. Karo ipoxya oĩa gui ae 'rã ha'e kuery oy'u. Ha'e rami vy tata enxofre reveguia py ikuai axy'rã anjo iky'a e'ŷ va'e kuery ha'e Vexa'i ra'y renonde.

<sup>11</sup> Ha'e kuery ikuai axya gui hataxí ojeupi 'rã araka'e rã peve guarã. Vixo vaikue ha'e ha'angaa mbojeroviaa kuery re hery omoĩa va'ekue ma ara py ha'e pyávy optyu'u e'ŷ re ikuai axy riae'rã — he'i.

<sup>12</sup> Ha'e rami oiko rã iky'a e'ŷ va'e kuery toexa uka oĩ atãa. Ha'e kuery ma Nhanderuete ayvu ha'e Jesus re ojeroviaa rupi ikuai va'e.

### *Irundaya ayvu oenduague*

<sup>13</sup> Ha'e ramo yva gui aendu peteĩ ayvu:

— Embopara ke: Ovy'a ete 'rã okuapy aŷ guive Senhor re omano va'e kuery — he'i va'e. Ha'e ramo Nhe'ẽ ombovai:

\* **14:1** Apocalipse 7.1-4

— Anhetē, mba'eta ha'e kuery opytu'u 'rã ombo'epoague gui. Heko porāague repy ojekuaa avi 'rã ha'e kuery reve — he'i.

### *Mba'emo aju omono'õa rã oexaague*

<sup>14</sup> Ha'e gui ama'ẽ vy aexa peteĩ arai xiñ va'e. Ha'e va'e áry ma peteĩ oguapy oiny, ava ra'y ojeapo va'ekue rami ojekuaa va'e. Ha'e va'e akã re ma coroa ouro guigua oĩ, ha'e opo py ma foice'i haimbe va'e oguerek.\*

<sup>15</sup> Ha'e gui ma Nhanderuete ro iky'a e'ŷ va'e gui oẽ ouvy anjo mboae. Ha'e va'e ma ojapukai reve aipoe'i arai áry oguapy oiny va'e pe:

— Mba'ety yvy regua ijajupa ma. Eraa ke nde-foice'i ha'e emono'õ, mba'eta remono'õ aguã hora ovaẽ ma. — he'i.

<sup>16</sup> Ha'e ramo arai áry oguapy oiny va'e yvy áry rupi foice'i py ijaju va'e ojaya vy omono'õmba yvy gui.\*

### *Uva omono'õa rã oexaague*

<sup>17</sup> Ha'e gui yva re Nhanderuete ro iky'a e'ŷ va'e oĩ va'e gui oẽ ouvy anjo mboae. Ha'e va'e voi foice'i haimbe va'e oguerek opo py.

<sup>18</sup> Ha'e gui altar yvýry gui peteĩ oẽ anjo mboae ju, tata re opena va'ety. Ha'e va'e ma foice'i haimbe va'e reveguia pe ijayvu atã vy aipoe'i:

— Eraa ke nde-foice'i haimbe va'e, ha'e emono'õ uva yvy regua hembypy gui, mba'eta uva ijajupa ma — he'i.

<sup>19</sup> Ha'e ramo yvy áry rupi anjo foice'i omboaxa vy yvy re uva rembypy ikuai va'e gui ojaya hi'a. Ha'e rami vy uva'a ma peteĩ onhami atyrã tuvixa va'e oĩ va'e py omombopa, Nhanderuete opoxya rupi nhombopaga aguã.\*

<sup>20</sup> Ha'e ramo uva onhamia tetã gui mombyry'i. Ha'e ramo onhamiaty gui onheẽ tuguy. Kavaju juruxã peve tyguaxu, ha'e trezentos quilometro-a rupi peve oxyry.

## 15

### *Sete nhomoingo axyarã omboua ta ramo oexaague*

<sup>1</sup> Ha'e gui aexa rã yva re ojekuaa hexa pyrã tuvixa va'e mboae, nhomondyipaarã. Mba'eta sete anjo ikuai, sete nhomoingo axyarã rerua. Ha'e va'e nhomoingo axya ma opa vygua, mba'eta ha'e nunga py opa 'rã Nhanderuete opoxya rupi joguerekaoa.

### *Moisés ha'e Vexa'i ra'y poraei oporaeia okuapy rã oenduague*

<sup>2</sup> Ha'e gui peteĩ yupa aexa vidro guigua rami ojekuaa va'e, tata re irũ va'e. Ha'e va'e áry ma mba'emo vai re ipo'aka va'ekue ikuai: vixo vaikue re, ha'angaa, ha'e hery regua número omoña 'rã va'ekue re. Ha'e va'e kuery ma Nhanderuete pegua mba'epu ixã reta va'e oupi reve

<sup>3</sup> oporaei okuapy Nhanderuete rembiguai Moisés ha'e Vexa'i ra'y poraei. Ha'e rami vy aipoe'i:

— Senhor Oreruete Ndepo'akapa va'e, mba'emo rejapo va'e ma tuvixa ha'e iporã va'e meme. Reikoa ha'e javi rupi nderekō porãa anhetē rupigua meme rexu uka. Yvy regua kuery Ruvixave reiko!

<sup>4</sup> Senhor, mava'e tu nderery oendu vy nanemboetei 'rã ojererokyjea rupi? Mba'eta ndee anho iky'a e'ŷ va'e reiko. Ha'e nunga rupi yvy regua kuery ha'e javi 'rã neretonde ou nemboete aguã, nderekō porãa ojekuaa ma rire — he'i okuapy.

### *Nhanderuete nhomoingo axyarã ombou rã oexaague*

<sup>5</sup> Ha'e va'e rire ama'ẽ jevy rã yva re ombojeroviaaty iky'a e'ŷ va'e ojepe'a, ha'e Nhanderuete ayvu ryru opy oĩa gui ojekuaa.

<sup>6</sup> Ha'e gui iky'a e'ŷ va'e ropy gui sete anjo kuery oẽ ouvy sete nhomoingo axyarā rerua. Ha'e va'e kuery ma ajukue porāve xiĩ rei hexakā va'e py onhemonde, ajukue ra'ykue ouro guigua opexo rupi ojokua reve.

<sup>7</sup> Ha'e ramo sete anjo ikuai va'e po py irundy temimoingo kuery va'e regua peteĩ omboaxa sete hy'a'i ouro guigua. Ha'e va'e ma tynyē Nhanderuete raka'e rā peve oiko va'erā poxya.

<sup>8</sup> Ha'e gui iky'a e'ŷ va'e ropy rupi tynyē Nhanderuete rexakā ha'e ipo'akaa guigua hataxī. Ha'e ramo avave rei nda'evei ranhe oike aguā, sete nhomoingo axyarā sete anjo oguerekva'e oiko e'ŷa ja.

## 16

### *Jypygua nhomoingo axyarā ombou rā oexaague*

<sup>1</sup> Ha'e gui peteĩ ayvu aendu oo iky'a e'ŷ va'e gui onhendu atā va'e. Ha'e rami vy sete anjo ikuai va'e pe aipoe'i:

— Tapeo, sete hy'a'i pereko va'e gui penhoẽ yvy re Nhanderuete poxya rexu ukaarā — he'i.

<sup>2</sup> Ha'e ramo anjo jypygua oẽ ovv vy hy'a'i py oĩ va'e onhoẽ yvy re. Ha'e va'e gui ma oiko ai vaikue. Ha'e ramo vixo vaikue guigua kuaa ukaarā avakue omoña ha'e ha'angaa ombojerovia va'ekue re oiko imoingo axyarā.

### *Mokoña nhomoingo axyarā ombou rā oexaague*

<sup>3</sup> Ha'e gui anjo mokoña va'e ma ye'ẽ áry ju onhoẽ hy'a'i gui. Ha'e va'e gui ma omano va'ekue ruguy rami yy oiko. Ha'e ramo ye'ẽ rupi temimoingo ikuai va'e omanomba.

### *Mboapya nhomoingo axyarā ombou rā oexaague*

<sup>4</sup> Ha'e gui anjo mboapya va'e ma yakā ha'e yvvu ikuai va'e áry ju onhoẽ hy'a'i gui. Ha'e va'e gui ma tuguy ojeapo.

<sup>5</sup> Ha'e ramo aendu yy re anjo opena va'e aipoe'i rā:

— Ndee ma heko porā va'e, aŷ reiko ha'e yma guive reiko va'ekue, Ndeky'a e'ŷ ete va'e, mba'eta ha'e nunga py ma ha'evea rami renhombopaga.

<sup>6</sup> Ha'e kuery ma iky'a e'ŷ va'e ha'e profeta kuery ruguy omoẽ uka rire ha'e kuery pe ju reme'ẽ tuguy oy'u aguā. Ha'e nunga py ha'evea rami rembopaga — he'i.

<sup>7</sup> Ha'e gui aendu avi altar gui ombovai va'e:

— Anhetē, Senhor Oreruete Ndepo'akapa va'e. Anhetē va'e ha'e ha'evea rami meme renhombopaga — he'i.

### *Irundaya nhomoingo axyarā ombou rā oexaague*

<sup>8</sup> Ha'e gui irundaya anjo ma kuaray re ju onhoẽ hy'a'i gui. Ha'e va'e gui ma kuaray oapy avakue tata py.

<sup>9</sup> Ha'e ramo kuaray aku gui okaipa vy ijayvu vaikue okuapy Nhanderuete rery re, imoingo axyarā ombou aguā re ipo'aka va'e ramo. Ha'e rami teĩ ndojeko rerovai guive omboete aguā.

### *Peteĩ nhiruña nhomoingo axyarā ombou rā oexaague*

<sup>10</sup> Ha'e gui anjo peteĩ nhiruña va'e ma vixo vaikue renda openaaty re ju onhoẽ hy'a'i gui. Ha'e va'e gui ma vixo openaa ha'e javi rupi pytūmba. Ha'e rā avakue haxy va'e oendu vy oixu'upa oapekū,

<sup>11</sup> ai vaikue gui ojexavai vy ijayvu vai okuapy Nhanderuete yva pygua re. Ha'e rami teĩ opa marā rei ikuiai gui ma ndojeko rerovai guive.

### *Mboapy memea nhomoingo axyarā ombou rā oexaague*

<sup>12</sup> Ha'e gui anjo mboapy memea va'e ma Eufrates yakā guaxu áry ju onhoē hy'a'i gui. Ha'e va'e gui ma yy ipirupa peteī tape oī aguā, kuaray oua katy gui huvixave kuery ou aguā.

<sup>13</sup> Ha'e ramo ama'ẽ rā teju-jagua, vixo vaikue ha'e profeta ramigua juru gui ma mboapy nhe'ẽ vai oẽ ju'i rami ojekuaa va'e.

<sup>14</sup> Ha'e va'e nhe'ẽ ma anha kuery meme, hexa pyrā apoarā ikuai. Ha'e kuery oje'oi 'rā yvy jave re huvixa kuery ikuai va'ea rupi omono'ōmba heruvy aguā, Nhanderuete Ipo'akapa va'e re opu'ã rei okuapy aguā, mba'eta hi'ára tuvixave va'e ovaẽ rā.

<sup>15</sup> (— Ma'ẽ, xee ma imonda va'e rami 'rā aju xapy'a. Ovy'a ete 'rā xerarō vy oao py onhemonde riae va'e, ipire reia rupi oiko e'ŷ aguā, oexa pavē rā oxīmba e'ŷ aguā — he'i.)

<sup>16</sup> Ha'e gui anha kuery nhe'ẽ ma peteī henda py omono'ōmba huvixa kuery, hebraico ayvu py Armagedom 'epy va'ea py.

### *Sete-a nhomoingo axyarā ju ombou rā oexaague*

<sup>17</sup> Ha'e gui anjo sete-a va'e ma yvate rupi onhoē hy'a'i gui. Ha'e va'e jave py ayvu atā onhendu oo iky'a e'ŷ va'e py, tenda openaaty oī va'e yvy'iry gui. Ha'e vy  
— Ojeupitypa ma — he'i.

<sup>18</sup> Ha'e gui oiko overa, ayvu ha'e yapu. Oiko avi yvy ryryi atā tuvixa va'e. Ha'e va'e ramigua yvy ryryi ma yvy re ikuiaia ypy'i guive ndoikoi teri va'ekue.

<sup>19</sup> Ha'e va'e gui ma tetā guaxu mboapy henda rupi oja'o. Ho'apa avi kova'e yvy re tetā ikuai va'e. Mba'eta Babilônia tetā guaxu re Nhanderuete oikuaa pota vy omboy'u vinho ipoxya oĩa karo gui.

<sup>20</sup> Ha'e ramo ypa'ũ ha'e javi okanhymba, yvyty ikuai va'e voi ndojouavei.

<sup>21</sup> Ha'e gui avakue áry ho'a yva gui amandau tuvixa va'e, trinta quilo raxa va'e meme. Ha'e ramo amandau gui ojexavai vy ijayvu vai okuapy Nhanderuete re, imoingo axyarā ombou va'ekue tuvixa ramo.

## 17

### *Kunha itavy rei ete va'e oexaague*

<sup>1</sup> Ha'e gui anjo kuery sete hy'a'i oguereko va'e regua peteī ou. Ha'e va'e ma ijayvu vy aipoe'i xevy:

— Enhemboja ke ejuvy, aexa uka ta kunha itavy rei ete va'e ombopagaa rā. Ha'e va'e ma yy heta va'e áry oguapy oiny va'e.

<sup>2</sup> Hexeve huvixave yvy re ikuai va'e itavy rei va'ekue. Kunha va'e itavy reia vinho ma yvy regua kuery oy'u vy oka'upa va'ekue — he'i.

<sup>3</sup> Ha'e gui nhe'ẽ re aiko reve anjo xereraa peteī henda tekua e'ŷa py. Ha'e py ma kunha va'e aexa peteī vixo pytā va'e kupe áry oguapy oiny rā. Ha'e va'e vixo re ma tery nda'evei ete va'e oīmba. Sete inhakā ha'e dez hakua va'e hi'aĩ.

<sup>4</sup> Kunha va'e ma púrpura ha'e pytā va'e py onhemonde va'e. Ouro guigua py ojegua, ita hepyve va'e ha'e pérola guigua py. Opo py oguereko peteī karo ouro guigua. Ha'e va'e ma ojeguarupy anho tynyē, itavy reia rupi onhemongy'apaague.

<sup>5</sup> Kunha va'e rova re ma peteī tery oī oikuaa pyrā e'ŷ: "Babilônia tetā guaxu, itavy rei va'e kuery xy, ha'e yvy re ojeguarupy omoingo va'ety" he'ia.

<sup>6</sup> Aexa rā kunha va'e ma Jesus regua mombe'ua kuery iky'a e'ŷ va'e ruguy oy'u vy oka'u va'ekue. Ha'e nunga aexa vy anhemondyi vaipa.

<sup>7</sup> Ha'e ramo anjo aipoe'i xevy:

— Mba'e re tu renhemondyi ri? Amombe'u porāve ta kunha va'e reko reikuaa e'ŷ va'ekue, ha'e vixo sete inhakā ha'e dez hakua va'e kunha reraa reko guive.

<sup>8</sup> Vixo rexu va'e ma yma oiko va'ekue ri aŷ noīvei, ha'e gui yvykua gui oẽ aguā rami ju oiko, ha'e okanhyp aguā rami guive. Ha'e rā yvy regua kuery yvy itui ypy'i guive kuaxia tekove oguereko va'e kuery rery oĩa re hery nomboparaaia va'e, ha'e kuery oexa 'rā vixo

oiko va'ekue ri noīvei va'e ojekuaa ju rã. Ha'e gui vixo oiko va'ekue ri noīvei va'e ojekuaa ju rã rã yvy regua kuery oexa 'rã okuapy, yvy itui ypy'i guive kuaxia tekove oguereko va'e kuery rery oña re hery nomboparaaia va'e kuery ae. Ha'e kuery oexa vy onhemondyipa 'rã okuapy.

<sup>9</sup> — Ha'e nunga ma hi'arandu va'e kuery oikuaa aguã: Vixo akã sete ikuai va'e ma sete yvyty. Ha'e va'e yvyty áry ae kunha va'e oguapy oiny. Sete huvixave guive ikuai.

<sup>10</sup> Ha'e kuery va'e regua peteĩ nhiruĩ ma noīvei ma. Peteĩ ju aÿ oikove, ha'e rã amboae ma ndoikoi teri. Ha'e va'e ma ojekuaa vy are'ÿ'i re 'rã oiko, henonderã omoõ ma voiague rami vy.

<sup>11</sup> Ha'e gui vixo yma oiko va'ekue ri aÿ noīvei va'e ae 'rã oiko huvixave oito-a va'erã. Sete ikuai va'e gui 'rã oiko. Ha'e rami avi okanhy aguã rami oiko.

<sup>12</sup> Ha'e gui dez hakua rexâa va'e ma dez huvixave ikuai. Ha'e va'e kuery ma nombopo'akaai teri. Vixo reve vy mae ma 'rã ipo'aka huvixa ikuai aguã. Peteĩ hora ete'i 'rã oĩ.\*

<sup>13</sup> Ha'e va'e kuery ma peteĩ rami meme 'rã onhembopy'a. Ha'e rami vy vixo pe omboaxa 'rã opo'aka joguereko aguã.

<sup>14</sup> Ha'e kuery opu'ã 'rã okuapy Vexâ'i ra'y re. Ha'e rami teĩ ha'e kuery re Vexâ'i ra'y ipo'aka 'rã, mba'eta senhor ikuai va'e Senhor, ha'e huvixave ikuai va'e Ruvixave. Hexeveguia kuery ipo'aka avi 'rã, hexe anho ojerovia va'e, oiporavo ha'e oenoõ va'ekue ikuai vy – he'i.

<sup>15</sup> Ha'e gui aipoe'ive ju xevy:

— Kunha itavy rei va'e oguapy oinya yy ma joegua e'ÿ-e'ÿ va'e, heta va'e kuery, amboae yvy regua, ha'e amboae rami ijayvu va'e kuery.

<sup>16</sup> Ha'e gui vixo ha'e dez hakua rexâa va'ekue ma nda'ija'ei 'rã okuapy kunha itavy rei va'e re. Ha'e rami vy oipe'apa 'rã heravy mba'emo oguereko va'ekue. Ho'upa 'rã ho'okue, ha'e gui oapypa 'rã guive tata py.

<sup>17</sup> Mba'eta ha'e kuery py'a re Nhanderuete ae 'rã omoõ ha'e oipota va'e ojapo aguã. Ha'e ramo peteĩ rami meme 'rã vixo pe omboaxa ipo'aka aguã, Nhanderuete ijayvuague ojeupitypa peve.

<sup>18</sup> Kunha rexâa va'ekue ma tetã guaxu yvy regua huvixave kuery re ipo'aka va'e.

## 18

### *"Babilônia tetã oitya ma" 'ea rã oenduague*

<sup>1</sup> Ha'e va'e rire ma ama'ẽ rã yva gui oguejy amboae anjo ipo'aka ete va'e. Ha'e va'e rexakãa ma yvy jave re oexape.

<sup>2</sup> Ha'e gui ojapukai vy aipoe'i:

— Oitya, oitypaa ma Babilônia tetã guaxu. Anha kuery ikuai atyrã rive opyta, opa marãguia nhe'ẽ vai kuarã, ha'e guyra ojeguarupy ha'eve'ÿ va'e onhemi atyrã.

<sup>3</sup> Mba'eta Babilônia pygua kuery itavy reia re imbopagaarã vinho ma yvy regua kuery ha'e javi oy'u. Hexeve yvy regua huvixave kuery itavy rei avi va'ekue. Yvy regua mba'emo vendea kuery voi ojoupa va'ekue Babilônia pygua kuery itavy reia gui.

<sup>4</sup> Ha'e gui amboae ayvu ju aendu yva gui aipoe'i va'e:

— Xevyguia kuery, pejepê'a ke ha'e kuery mbyte gui, ha'e kuery ojejavya rupi pendekuai e'ÿ aguã, ha'e kuery moingo axyarã pendere voi oiko e'ÿ aguã – he'i.

<sup>5</sup> Mba'eta ha'e kuery ojejavya ma yva re peve ojekuaa. Ha'e ramo Nhanderuete oikuaa pota ae ma teko vai rupi ikuiaia re.

<sup>6</sup> Tomoingo axya ete ha'e kuery nhomoingo axyague rekobia, tombopaga raxaave guive ojapoague re. Karo py ha'e kuery nhomonga'u aguã omoirûague py ae ju tomoirûave ete ha'e kuery oy'u aguã.

\* **17:12** Daniel 7.24

<sup>7</sup> Ha'e kuery ojejou porã ha'e itavy reiague re tomboekoviaa ojexavai ha'e ojae'o aguã rami, mba'eta ojeupe ae "Xee ma huvixa kunha rami aguapy ainy. Imeve'ŷ va'e xee ndaikoi. Neĩ peteĩ henda py naendui 'rã xembojae'oarã" he'i rire.

<sup>8</sup> Ha'e nunga rupi peteĩ ára pyve 'rã ou imoingo axyarã. Oiko 'rã ijukaarã, imbojae'oarã ha'e karuai. Ha'e gui okaipa 'rã tata py, mba'eta Senhor Nhanderuete imbopagaarã oiko va'e ma ipo'aka.

### *Babilônia tetã oguerovy'a va'ekue ipy'a vai rã oexaague*

<sup>9</sup> Ha'e gui yvy regua huvixave kuery oexa 'rã okuapy Babilônia tetã okai rã hataxí ojeupi va'e. Ha'e rami vy ojae'o ha'e ipy'a vai 'rã, ha'e kuery reve itavy rei ha'e opa marã ov'y'a rire.

<sup>10</sup> Ha'e va'e kuery ma imbojexavaia gui okyje vy tetã gui mombyry ikuaria gui 'rã oma'ẽ okuapy. Ha'e vy aipoe'i 'rã:

— Nda'evei, nda'evei ete teĩ. Ndee tetã guaxu Babilônia, tetã ipo'akapa reiko va'ekue ri peteĩ hora pyve oiko nembopagaarã — he'i 'rã okuapy.

<sup>11</sup> Yvy regua mba'emo vendea kuery voi ha'e nunga oexa vy ojae'o ha'e ipy'a vai 'rã okuapy, mba'eta avave rei ndojoguaavei ma 'rã ovende va'erã oguerekva'ekue.

<sup>12</sup> Ovende va'erã oguerekva'ekue ma povae: ouro guigua, prata, ita hepyve va'e, pérola, ha'e ajukue iporãve va'e guigua, púrpura, seda ha'e pytã va'e guigua, opa mba'e marfim gui ojapo pyre, opa marâguia tenda, mesa, ha'e nunga ha'e javi yvyra hepyve va'e gui ojapo pyre, overa va'e, ferro ha'e mármore guigua,

<sup>13</sup> canela heakuã porã va'e, mba'emo irûrã, heakuã porã va'e oapy pyrã, moã jaikyty va'e nunga, bálsamo, vinho, azeite, trigo, trigo ra'yigue, vaka, vexa'i, kavaju, karóxa ha'e escravo kuery, avakue oikove va'e ae.

<sup>14</sup> Yvyra'a ijaju nhavõ ho'uxe vai va'ekue ma jipovei ma 'rã ndea py. Ndevy pe jipovei ma 'rã mba'emo hepyve va'e, ojou porãmby ikuai va'e, ha'e nunga ndojouavei ma 'rã ndea py.

<sup>15</sup> Ha'e nunga vendea kuery omboekoviaa rupi ojoupa va'ekue ma mombyry gui 'rã oma'ẽ okuapy, nembojexavaia gui okyje vy. Ojae'o reve ipy'a vai vy

<sup>16</sup> aipoe'i 'rã okuapy:

— Nda'evei, nda'evei ete teĩ tetã guaxu pe. Mba'eta ajukue iporãve va'e py anho ha'e kuery onhemonde va'ekue, púrpura ha'e pytã va'e py. Ijegua va'ekue ouro, ita hepyve va'e ha'e pérola guigua py.

<sup>17</sup> Ha'e rami teĩ peteĩ hora pyve oguerekopa va'ekue okanhymba — he'i 'rã okuapy.

Ha'e gui kanoã ja kuery yy rupi oguata va'e, kanoã mboguataa kuery, ha'e ye'ẽ rupi ombo'eapo va'e kuery ha'e javi ma mombyry gui avi 'rã oma'ẽ okuapy.

<sup>18</sup> Ha'e rami vy tetã okai rã hataxí ojeupi va'e oexa vy ojapukai 'rã:

— Mba'e nunga tetã tu peva'e tetã guaxu iporãague rami iporã va'e? — he'i 'rã okuapy.

<sup>19</sup> Ha'e kuery oakã re yvy ku'i omombo-mombo reve ojae'o ha'e ipy'a vai 'rã. Ha'e vy ojapukai 'rã:

— Nda'evei, nda'evei ete teĩ tetã guaxu pe. Ha'e py ma ye'ẽ rupigua kanoã ja kuery ha'e javi ojoupa va'ekue oguerekopaa gui. Ha'e rami teĩ peteĩ hora pyve ivaipa — he'i 'rã okuapy.\*

<sup>20</sup> Ha'e nunga rupi yva pygua kuery, pevy'a ke. Ha'e peẽ kuery iky'a e'ŷ va'e, apóstolo ha'e profeta kuery voi ke pevy'a, mba'eta Nhanderuete ombopaga ma penemoingo axyare.

### *"Babilônia ivaipa ae ma" 'ea rã oenduague*

<sup>21</sup> Ha'e gui peteĩ anjo imbaraeteve va'e oupi peteĩ ita mba'emo mongu'ia rami tuvixa va'e. Ha'e rami vy ye'ẽ mbyte py omombo. Ha'e vy aipoe'i:

\* **18:19** Ezequiel 27.27-32

- Guĩ rami 'rã oitya Babilônia tetã guaxu. Avave rei ndojouavei 'rã.
- <sup>22</sup> Ndea py noenduavei 'rã mba'epu ixã reta va'e mbopua, imba'epu va'e, neĩ mimby ha'e mimby guaxu monhe'ëa. Ndojekuaavei 'rã mba'emo py ombo'eapo va'e rembiapo. Ndea py noenduavei 'rã mba'emo ra'yigue mongu'ia revovo.
- <sup>23</sup> Ndea py naexakävei ma 'rã tataendy, omenda ta va'e kuery ayvu voi noenduavei 'rã. Ndevy mba'emo ovende va'e ma yvateve ikuai va'ekue yvy re, mba'eta yvy regua kuery ha'e javi rembotavypa va'ekue nemba'evykyapu.
- <sup>24</sup> Ha'e va'e tetã py ae omoëa profeta kuery ruguy, iky'a e'ÿ va'e kuery ha'e yvy re ojukaa va'ekue ha'e javi ruguy.

## 19

### *Yva re ovy'a okuapy va'e oexaague*

<sup>1</sup> Ha'e nunga oiko rire ma yva re peteĩ ayvu atã aendu heta va'e kuery ijayvua rami. Ha'e vy aipoe'i:

— Aleluia! Jaa jepe aguã, hexakãa ha'e po'akaa ma Nhanderuete guigua meme.

<sup>2</sup> Anhetẽ rupi, ha'evea rami meme nhombopaga, mba'eta ombopaga ma kunha itavy rei ete va'ekue. Ha'e va'e ma itavy reia py omongy'apa va'ekue yvy regua kuery, ha'e opo py ae Nhanderuete rembiguai kuery ruguy omoë va'ekue tei ombopaga ma ha'e nungakue re — he'i.

<sup>3</sup> Aipoe'ive ju:

— Aleluia! Kunha okaia gui hataxí opu'ã 'rã araka'e rã peve — he'i.

<sup>4</sup> Ha'e ramo vinte e quatro tujakueve joe opena va'ety ha'e irundy temimoingo kuery ma guenapy'ã re ikuai vy omboete avi okuapy Nhanderuete tenda py oguapy oiny va'e. Ha'e vy

— Anhetẽ ete. Aleluia! — he'i okuapy.

<sup>5</sup> Ha'e gui peteĩ ayvu onhendu tenda oia gui:

— Nhanderuete rembiguai pendekuai va'e, pembojerovia ke, henonde pejererokyjea rupi pendekuai va'e ha'e javi, yvyigueve ha'e yvatekueve — he'i.

<sup>6</sup> Peteĩ ayvu aendu avi heta va'e kuery ijayvua rami, yy tuvixa va'e ha'e yapu atã va'e revovo rami. Ha'e vy aipoe'i:

— Aleluia! Mba'eta Senhor Nhanderuete Ipo'akapa va'e ae oï Joguerekoarã.

<sup>7</sup> Javy'a ke, japoraei ha'e ixupe "Hexakãmba va'e" ja'e, mba'eta ovaë ma Vexa'i ra'y omenda aguã ára. Ta'yxyrã onhemotatyrm̄ba ma guive,

<sup>8</sup> mba'eta ha'e va'e onhemonde aguã ma ajukue iporãve, hexakã ha'e iky'a e'ÿ va'e ome'ëa — he'i okuapy. Mba'eta ajukue iporãve va'e ma iky'a e'ÿ va'e kuery teko porã rupi ikuai.

<sup>9</sup> Ha'e ramo anjo aipoe'i xevy:

— Embopara ke po rami: "Ovy'a ete 'rã okuapy Vexa'i ra'y omenda aguã ngaru py oenoï mbyre kuery."\*

Aipoe'ive ju:

— Pova'e nunga ma Nhanderuete ayvu anhetẽ va'e — he'i.

<sup>10</sup> Ha'e ramo ipy yvy'iry xerenapy'ã re aï amboete aguã. Ha'e rami tei aipoe'i xevy:

— Ma'ë, ejapo eme evoko rami. Xee voi ndee rami tembiguai aiko, nde-irmão kuery Jesus regua omombe'ua rupi ikuai va'e rami. Nhanderuete anho tema emboete. Mba'eta profeta kuery pe Nhe'ë oikuua uka va'e ma Jesus regua ae.

### *Vixo vaikue ha'e profeta ramigua re Cristo ipo'aka rã oexaague*

<sup>11</sup> Ha'e gui ama'ë rã yva ojepe'a, ha'e oë ouvy peteĩ kavaju xiñ. Hi'árygua pe ma "Ojeroviapy ha'e Anhetẽ va'e" 'ea. Ha'e va'e ma ha'evea rami joguerek, ha'e teko porã rupi opu'ã 'rã joe.

\* **19:9** Mateus 22.1-14

<sup>12</sup> Hexa ma tata rami hendy. Inhakā re ma coroa heta oĩ. Hexe ipara oiny peteĩ tery avave rei ndoikuuai va'e, ha'e anho e'ŷ vy.

<sup>13</sup> Ijao ma tuguy py omopytā mbyre. Hery oenoĩa ma Nhanderuete ayvu.

<sup>14</sup> Hakykue jogueru yva pygua xondaro kuery. Ha'e va'e kuery voi kavaju xiĩ va'e áry ikuai, ha'e ajukue xiĩ rei iky'a e'ŷ va'e py onhemonde va'e.

<sup>15</sup> Herekoá juru gui ma peteĩ kyxé guaxu haimbe va'e oẽ, ha'e va'e py yvy regua kuery omoingo axy aguã. Ha'e rami vy omo'arandu 'rã po pygua ferro guigua py, ha'e onhami 'rã uva Nhanderuete Ipo'akapa va'e poxya rupi.\*

<sup>16</sup> Ijao puku re, ha'e hetyma re ma peteĩ tery ipara oiny: "Huvixave ikuai va'e Ruvixave, ha'e senhor ikuai va'e Senhor" he'ia va'e.\*

<sup>17</sup> Ha'e gui peteĩ anjo aexa kuaray áry opu'ã ho'amy va'e. Ha'e va'e ma ojapukai atã reve ijayvu yva mbyte rupi guyra oveve va'e ha'e javi pe. Ha'e vy aipoe'i:

— Peju ke, pendeaty Nhanderuete ngaru tuvixa va'e ojapoa py,

<sup>18</sup> pe'u aguã huvixave ro'okue, xondaro ruvixa, ipo'akakueve, kavaju ha'e hi'árygua kuery ro'okue, opa marãgua ro'okue, escravo ha'e escravo e'ŷ, yvȳgueve ha'e yvatekueve ro'okue guive — he'i.

<sup>19</sup> Ha'e gui ma aexa rã vixo vaikue ha'e yvy regua huvixave kuery ono'õ okuapy, ha'e kuery pegua xondaro kuery reve. Ha'e va'e kuery ma kavaju áry oĩ va'e rovai opu'ã aguã ono'õ okuapy, ixupeguia kuery rovai guive.

<sup>20</sup> Ha'e rami teĩ vixo ombotya nhuã py, profeta ramigua guive. Ha'e va'e ma vixo renonde hexa pyrã ojapo vy ombotavy va'ekue vixo ra'angaa mbojeroviaa kuery ixuguigua kuaa ukaarã omoĩa va'ekue. Ha'e kuery mokoïve ma oikove reve omomboa yupa tata guigua, enxofre okaia py.

<sup>21</sup> Ha'e rã amboae kuery ma kavaju árygua ojukapa ijuru gui kyxé guaxu oẽ va'e py. Ha'e ramo ho'okue re ma guyra kuery oveve va'e hevyatãmba.\*

## 20

### *Mil ma'etý re anha ombotya, ha'e onhemboete ju va'e kuery oexaague*

<sup>1</sup> Ha'e gui peteĩ anjo aexa yva gui oguejy ouvy va'e. Opo py ogueru yvykua rokẽ pe'aa, ha'e peteĩ corrente tuvixa va'e guive.

<sup>2</sup> Ha'e gui ojopy teju-jagua, mboi yma guive oiko va'ekue. Ha'e va'e ma anha Satanás. Ha'e rami vy mil ma'etý peve ojokua.

<sup>3</sup> Yvykua py omombo vy omboty imoiny. Okẽ re omoĩ imbojaarã, mil ma'etý ojeupity e'ŷa ja ombotavy ve'ŷ aguã yvy regua kuery. Ha'e va'e rire ma henonderã omoĩ ma voiague rami vy opoia 'rã xapy'a'i.

<sup>4</sup> Aexa avi huvixa kuery pegua tenda ikuai va'e. Ha'e va'e py ma ombopo'aka pyre kuery oguapy okuapy joguereko aguã. Aexa avi Nhanderuete ayvu Jesus regua omombe'uague re ojyryvi kyxí mbyre kuery nhe'ẽ. Ha'e va'e kuery ma vixo vaikue ha'e ha'angaa nombojeroviai va'ekue, neĩ ixuguigua kuaa ukaarã nomoĩ ukai va'ekue ngova re, neĩ opo re. Ha'e kuery oikove ju, ha'e Cristo reve ipo'aka okuapy mil ma'etý re.

<sup>5</sup> Ha'e va'e ma nhemboete jevya jypygua. Ha'e rã omano va'ekue mboae ma ndoikove jevyi 'rã mil ma'etý ojeupity e'ŷa ja.

<sup>6</sup> Ovy'a ete, ha'e iky'a e'ŷ va'e 'rã ikuai jypygua nhemboete jevya py onhemboete ju va'e kuery. Ha'e va'e kuery re ma omano jevy aguã nda'ipo'akai 'rã. Ha'e rami 'rãgue py Nhanderuete ha'e Cristo pegua sacerdote 'rã ikuai. Hexeve huvixa rami 'rã opena okuapy mil ma'etý re.\*

### *Anha opoia ma rire ombopagaa rã oexaague*

---

\* **19:15** Salmo 2.9    \* **19:16** Mateus 24.30; 2 Tessalonicenses 1.6-10    \* **19:21** Ezequiel 39.17-20    \* **20:6** 1  
Coríntios 15.20-25; 2 Timóteo 2.12; Apocalipse 5.9,10

- <sup>7</sup> Ha'e gui mil ma'etý ojeupity ma ramo Satanás opoia 'rã nhuã py ombotyague gui.  
<sup>8</sup> Ha'e ramo oẽ vy ombotavypa 'rã yvy regua kuery yvy apy irundyve ikuai rupi, Gogue ha'e Magogue 'epy va'e. Ha'e kuery ha'e javi 'rã omboatypa joe opu'ã aguã. Ye'ẽ rembe re ita ku'i ikuai va'e rami 'rã heta.  
<sup>9</sup> Ha'e ramo ha'e kuery ma yvy jave rupi gui oguata jogueruvy vy ojokopa 'rã iky'a e'ŷ va'e kuery reko, tetã Nhanderuete oayvu ete va'e. Ha'e rami teĩ yva gui tata oguejy vy omokanhymba 'rã.\*  
<sup>10</sup> Ha'e gui anha imbotavyare omomboa 'rã yupa tata guigua enxofre okaia py. Ha'e py ma oĩ avi vixo vaikue ha'e profeta ramigua rive. Ha'e kuery ma ara py ha'e pyávy ojexavai 'rã araka'e rã peve.

### *Senhor oikuua pota rã oexaague*

- <sup>11</sup> Ha'e gui ma aexa peteĩ tenda guaxu openaaty xiĩ rei va'e, ha'e hi'áry oguapy oiny va'e guive. Ha'e va'e renonde gui ma yvy ha'e yva regua okanhymba, ndojouavei oĩ aguã.  
<sup>12</sup> Aexa avi omano va'ekue, yvatekueve ha'e yvyigueve guive. Ha'e kuery ma tenda renonde ojexa uka vy opu'ãmba okuapy. Ha'e ramo oipe'aa kuaxia para ikuai va'e, ha'e amboae kuaxia avi oipe'aa, tekove oguerekova'e kuery rery oĩa. Ha'e rami vy omano va'ekue re oikuua potaa 'rã mba'emo ojapoague re, kuaxia ikuai va'e re ipara oĩa rami vy.\*  
<sup>13</sup> Ye'ẽ gui ou 'rã omano va'ekue ha'e py ikuai va'ekue. Omanogue retã gui avi 'rã ou. Ha'e ramo peteĩ-teĩ re oikuua potaa 'rã mba'emo ojapoague re.  
<sup>14</sup> Ha'e ramo omanogue retã py ikuai va'ekue omombopaa 'rã yupa tata guigua py. Ha'e va'e yupa tata guigua ma omano jevy aguã ae oĩ.  
<sup>15</sup> Kuaxia para tekove oguerekova'e kuery rery oĩa re amongue rery ndojouai ramo omomboa 'rã yupa tata guigua py.

## 21

### *Yva pyau ha'e yvy pyau oexaague*

- <sup>1</sup> Ha'e gui aexa yva pyau ha'e yvy pyau, mba'eta yva ha'e yvy jypy guare ma okanhymba, ye'ẽ voi jipovei ma.\*  
<sup>2</sup> Aexa avi tetã iky'a e'ŷ va'e, Jerusalém pyau yva gui oguejy rã, Nhanderuetea guigua. Ha'e va'e ma iporã ete, kunhataĩ omenda ta vy omerã pe onhemootyrõ va'e rami avi.  
<sup>3</sup> Ha'e gui peteĩ ayvu atã aendu tenda oĩa gui onhendu va'e:  
  — Ma'ẽ, aŷ gui ma Nhanderuete opyta 'rã avakue mbyte. Ha'e kuery reve ae 'rã oĩ. Ha'e kuery ikuai 'rã ixupegu, ha'e rã Nhanderuete ma oiko 'rã ha'e kuery reve.\*  
<sup>4</sup> Ha'e rami vy omombirupa 'rã ha'e kuery rexay. Omano va'e jipovei ma 'rã, neĩ ipy'a vai va'e voi, haxê va'e, neĩ haxy va'e voi jipovei 'rã, mba'eta jypy guare oaxapa ma — he'i.\*  
<sup>5</sup> Ha'e gui tenda py oguapy oiny va'e aipoe'i:  
  — Ma'ẽ, opa mba'e ambopyaupa ma — he'i.  
Aipoe'ive ju:  
  — Embopara ke pova'e ayvu, mba'eta anhetẽ meme vy ogueroviaa aguã ha'eve va'e.  
<sup>6</sup> Aipoe'ive ju xevy:  
  — Opa mba'e ojeupitypa ma. Xee ma jypy'igua ha'e opa vygua, mba'emo mboypyare ha'e ijapopaarã. Ijy'upei va'e pe ma xee ame'ẽ rive 'rã yvu tekove me'ẽa gui oy'u aguã.  
<sup>7</sup> Ha'e nunga ma mba'emo ogueropo'aka va'e kuery peguarã. Xee aiko 'rã ha'e kuery Ruete. Ha'e rã ha'e kuery ma xera'y ha'e xerajy kuery 'rã ikuai.\*  
<sup>8</sup> Ha'e rã okyje rei va'e kuery, ojerovia e'ŷ va'e, ojou vai pyrã, jojuka va'ety, onhemongy'apa rei va'e, imba'evyky va'e, mba'emo ra'angaa ombojerovia va'e, ha'e ijapu

\* <sup>20:9</sup> Ezequiel 18.1-39; 16    \* <sup>20:12</sup> Daniel 7.10, João 5.25-29    \* <sup>21:1</sup> 2 Pedro 3.13    \* <sup>21:3</sup> Ezequiel 37.27  
\* <sup>21:4</sup> Isaías 25.8    \* <sup>21:7</sup> 1 Crônicas 17.13

va'e kuery ha'e javi, ha'e kuery rekoarā ma yupa tata guigua enxofre okaia va'e. Ha'e kuery omano jevy aguā oī.

*Jerusalém pyau regua omombe'u porāveague*

<sup>9</sup> Ha'e gui sete anjo kuery hy'a'i sete nhomoingo axyarā tynyē va'e oguereko va'ekue regua peteī ou. Ha'e va'e ma aipoe'i xevy:

— Enhemboja ke ejuvy, taixa uka kunhataī omenda va'erā, Vexā'i ra'y ra'yxyrā — he'i.

<sup>10</sup> Ha'e rami vy nhe'ē re aiko reve xereraa peteī yvyty tuvixa ha'e yvateve va'e áry. Ha'e

vy xevy pe oexa uka Jerusalém tetā iky'a e'ŷ va'e, yva Nhanderuetea gui oguejy ouvy rā.\*

<sup>11</sup> Ha'e va'e re ma oī Nhanderuete rexakā. Ita hepyve va'e rami hexakā, ita jaspe hendy va'e rami.

<sup>12</sup> Ikora ma tuvixa ha'e yvate ete va'e. Doze okē oī. Okē rarōarā ma doze anjo ikuai. Okē re ma ipara oiny Israel kuery doze regua ikuai va'e rery.

<sup>13</sup> Kuaray oua katy mboapy okē oī, kuaray ijapu'a'ia katy ma mboapy ju, kuaray puku-a katy ma mboapy ju, ha'e gui kuaray oikea katy ma mboapy ju oī.\*

<sup>14</sup> Tetā kora re ma doze ita oī ijytarā. Ha'e va'e re ma ipara oiny Vexā'i ra'y pegua apóstolo kuery doze ikuai va'e rery.

<sup>15</sup> Xereve ijayvu va'e ma peteī yvyra po'i'i ouro guigua oguereko mba'emo oa'āarā, tetā, kora ha'e okē oī va'e oa'ā aguā.

<sup>16</sup> Tetā ma ipuku-a oī va'e'ŷ, ipuku-a ha'e ipya joo rami. Yvyra po'i'i py anjo tetā oa'ā rā dois mil e duzentos quilômetros ipuku-a. Ipuku-a, ipya ha'e yvatea ma joo rami meme.

<sup>17</sup> Ha'e gui ikora ju oa'ā rā sessenta e cinco metros. Avakue oa'ā jepiaty rami ae avi anjo oa'ā.

<sup>18</sup> Kora ma ita jaspe gui ojapo pyre. Ha'e rā tetā ma ouro iky'a e'ŷ va'e guigua, vidro iky'a e'ŷ va'e rami hexakā.

<sup>19</sup> Tetā kora ytarā ita ikuai va'e ma ita hepyve va'e opa marāgua py ijegua. Ijyta jypygua ma jaspe guigua. Mokoña ma safira guigua. Mboapy ma calcedônia guigua. Irundaya ma esmeralda guigua.

<sup>20</sup> Teī nhiruña ma sardônio guigua. Mboapy memea ma sárdio guigua. Sete-a ma crisólito guigua. Oito-a ma berilo guigua. Nove-a ma topázio guigua. Dez-a ma crisópraso guigua. Onze-a ma jacinto guigua. Ha'e gui doze-a ma ametista guigua.

<sup>21</sup> Doze okē oī va'e ma doze pérola. Peteī-teī okērā ma peteī pérola oī. Tetā mbyte rupi tape guaxu oaxa va'e ma ouro iky'a e'ŷ va'e guigua, vidro rami hexakā.

<sup>22</sup> Tetā py xee ndaexai templo, mba'eta templo 'rāgue py Senhor Nhanderuete Ipo'akapa va'e ha'e Vexā'i ra'y oī.

<sup>23</sup> Tetā rupi kuaray neī jaxy nomoexakāi teī ha'eve, mba'eta Nhanderuete rexakā ae oexape, ha'e Vexā'i ra'y ma tataendy rami omoexakā.

<sup>24</sup> Tetā rexakāa rupi ma amboae regua kuery 'rā ikuai. Ha'e py 'rā yvy regua huvixave kuery ogueru mba'emo porāgueve oguereko va'e.

<sup>25</sup> Okē ikuai va'e ma nonhembotyi 'rā ara py, ha'e rā pytū ma ndoikoi ha'e py.

<sup>26</sup> Ha'e py amboae regua kuery mba'emo porāgueve anho 'rā ogueru imboetearā.

<sup>27</sup> Ha'eve'ŷ va'e ma ndoikei 'rā ha'e py, neī ojeguarupy, e'ŷ vy apua rupi ikuai va'e. Ha'e pygua kuery ma tekove oguereko va'e vy Vexā'i ra'y pegua kuaxia re hery oīa va'e kuery anho.

## 22

<sup>1</sup> Xevy pe anjo oexa uka avi yakā tekove me'ēa. Ha'e va'e ma itaendy rami hexakā, Nhanderuete ha'e Vexā'i ra'y renda openaaty oīa gui oxyry ový va'e.

<sup>2</sup> Tape guaxu oĩ va'e mbyte rupi hi'aĩ yvyra tekove me'ẽa, yakã rembe rovaive re guive. Ha'e va'e ma doze hi'a va'e, jaxy nhavõ hi'a mboae va'e. Yvyra rogue ma heta va'e kuery joegua e'ŷ-e'ŷ mongueraarã oĩ.\*

<sup>3</sup> Jipovei ma 'rã ayvu vaipy. Tetã re 'rã oĩ Nhanderuete ha'e Vexa'i ra'y renda openaaty. Ixupeguia kuery omboete 'rã okuapy,

<sup>4</sup> ha'e hova oexa 'rã guive. Ha'e rã ha'e kuery rova re ma oĩ 'rã hery.

<sup>5</sup> Ha'e py pytû jipovei ma ramo ha'e pygua kuery ikuiaia rupi tataendy nomoexakãi, neĩ kuaray ndojopei teĩ ha'eve, mba'eta Senhor Nhanderuete ae 'rã omoexakã. Ha'e ramo ha'e kuery huixia rami 'rã opena araka'e rã peve.

### *Kova'e kuaxia re ayvu oĩ va'e anhetẽ ete memea re ijayvua*

<sup>6</sup> Ha'e gui aipoe'ive ju xevy:

— Pova'e ayvu ma oguerovia pyrã ha'e anhetẽ va'e meme. Senhor profeta kuery nhe'ẽ Ruete va'e ma guembiguai kuery ikuiaia py ombou ojeupagua anjo are'ŷ'i re mba'emo oiko va'erã oikuua uka aguã, tenonderã omoĩ ma voiague rami vy.

<sup>7</sup> Ma'ẽ, are'ŷ re 'rã aju. Ovy'a ete 'rã okuapy kova'e kuaxia para re ayvu oĩ va'e rupi ikuai va'e.

### *Nhanemongeta ha'e nhandereroayvu porãague*

<sup>8</sup> Ha'e nunga xee João ae aendu ha'e aexa. Ha'e nunga aendu ha'e aexa vy ikuua ukaa anjo py yvy'iry aĩ xerenapy'ã re amboete aguã.

<sup>9</sup> Ha'e ramo aipoe'i xevy:

— Ma'ẽ, ejapo eme evoko rami. Xee ma ndee rami avi tembiguai aiko, nde-irmão kuery profeta ha'e kova'e kuaxia re ayvu oĩ va'e rupi ikuai va'e ha'e javi ramigua. Nhanderuete ae 'rã remboete – he'i.

<sup>10</sup> Aipoe'ive ju:

— Eikuua uka e'ŷ eme kuaxia re ayvu oĩ va'e, mba'eta hi'ára namombyryvei ma.

<sup>11</sup> Tove heko vai va'e kuery taeko vaive tema. Tove heko ky'a va'e kuery taeko ky'ave tema. Ha'e rã heko porã va'e ma teko porã rupi anho ta'ikuai, ha'e heko ky'a e'ŷ va'e ta'ikuative tema teko ky'a e'ŷa rupi.

<sup>12</sup> Ma'ẽ, xee aju 'rã are'ŷ re, aru 'rã guive peteĩ-teĩ oikoague repy ame'ẽ va'erã.

<sup>13</sup> Xee ma jypy'igua ha'e opa vygua, mba'emo mboypyare ha'e ijapopaarã.

<sup>14</sup> Ovy'a ete 'rã okuapy [Vexa'i ra'y ruguy py] oao ojoi va'e, ha'e rami vy yvyra 'a tekove me'ẽa va'e ho'u, ha'e tetã rokẽ rupi oike aguã.

<sup>15</sup> Ha'e rã tetã rovai rupi ma jagua rami ikuai va'e 'rã opyta, imba'evyky va'e, on-hemongy'apa va'e, jojuka va'ety, mba'emo ra'angaa ombojerovia va'e, ha'e ijapuxe vai va'e apu rupi rive ikuai va'e ha'e javi.

<sup>16</sup> Xee Jesus ma xejeupagua anjo ambou peẽ igreja pygua kuery pe ha'e nunga aikuua uka aguã. Xee ma “Davi rapokue renhoĩ” 'epy va'e, hamymino aiko, ha'e jaxy-tata ko'ẽ mbija hexakãmba va'e guive – he'i.

<sup>17</sup> Nhe'ẽ ha'e ta'yxyrã ma

— Eju – he'i ixupe.

Tove oendu va'e voi

— Eju – te'i.

Tove ijy'uvei va'e voi tonhemboja touvy, yy tekove me'ẽa oy'uxe va'e rei tojopy rive.\*

### *Kuaxia para opaa py ijayvuagie*

<sup>18</sup> — Po rami kova'e kuaxia para re ayvu oĩ va'e rendua kuery ha'e javive pe xeayvu. Ayvu oĩ va'e áryve amongue omoïve ri ramo hexe ju 'rã Nhanderuete omoĩ nhomoingo axyarã kova'e kuaxia re ipara oiny va'e.

\* **22:2** Ezequiel 47.1,12

\* **22:17** Isaías 55.1,2; João 4.13,14; 7.37-39

**19** Ha'e kova'e kuaxia re ayvu oĩ va'e gui amongue mba'emo'i teĩ oipe'a ramo ixugui Nhanderuete oipe'a 'rã yvyra'a ho'u aguã, tetã iky'a e'ŷ va'e py oike aguã, ha'e kova'e kuaxia re mba'emo porã oĩ va'e ojopy aguã.

**20** Ha'e nunga kuaa ukaa aipoe'i:

— Anhetẽ are'ŷ re 'rã aju — he'i.

Amém. Eju, Senhor Jesus.

*Ogueroayvu porãague*

**21** Tove peẽ kuery ha'e javive tapendu Senhor Jesus penemboaxy.